


परमप्रभु यावे आ  
लोव



Bible in Sunwar (NP:suz:Sunwar)

# परमप्रभु यावे आ लोत्र

## Bible in Sunwar (NP:suz:Sunwar)

copyright © 2011 Wycliffe Bible Translators, Inc.

Language: Sunwar

Translation by: Wycliffe Bible Translators, Inc.

### Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

Printed book ISBN 9789937101646

#### **The Bible without Deuterocanon**

in Sunwar

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

---

PDF generated using Haiola and XeLaTeX on 18 Apr 2025 from source files dated 29 Jan 2022  
27cd6a1c-0244-5add-a4e8-b4f0e5104473

## Contents

उत्पत्ती . . . . .	1
प्रस्थान . . . . .	75
लेवी . . . . .	140
गन्ती . . . . .	185
ब्यवस्था . . . . .	248
यहोसु . . . . .	301
न्यायाधीस . . . . .	337
रूथ . . . . .	374
१ सामुएल . . . . .	379
२ सामुएल . . . . .	427
१ राजा . . . . .	466
२ राजा . . . . .	513
१ इतिहास . . . . .	559
२ इतिहास . . . . .	606
एज़्रा . . . . .	659
नेहेम्याह . . . . .	675
एस्तर . . . . .	698
अय्युब . . . . .	710
भजन संग्रह . . . . .	752
हितोपदेस . . . . .	860
उपदेसक . . . . .	896
ठेयब कुम्सो . . . . .	907
यसैया . . . . .	914
येरमीया . . . . .	988
बिलाप . . . . .	1070
इजीकीएल . . . . .	1078
दानीएल . . . . .	1152
होसे . . . . .	1175
योएल . . . . .	1188
आमोस . . . . .	1193
ओबदिया . . . . .	1203
योना . . . . .	1205
मीका . . . . .	1208
नहुम . . . . .	1215
हबकुक . . . . .	1218
सेफन्याह . . . . .	1222
हागै . . . . .	1226

जकरिया . . . . .	1229
मलाकी . . . . .	1243
मत्ती . . . . .	1248
मर्कुस . . . . .	1302
लूका . . . . .	1336
यूहन्ना . . . . .	1395
प्रेरित . . . . .	1439
रोमी . . . . .	1497
१ कोरिन्थी . . . . .	1521
२ कोरिन्थी . . . . .	1545
गलाती . . . . .	1560
एफिसी . . . . .	1569
फिलिप्पी . . . . .	1578
कलस्सी . . . . .	1584
१ थिस्सलोनिकी . . . . .	1590
२ थिस्सलोनिकी . . . . .	1595
१ तिमोथी . . . . .	1598
२ तिमोथी . . . . .	1605
तीतस . . . . .	1610
फिलेमोन . . . . .	1614
हिब्रू . . . . .	1616
याकूब . . . . .	1634
१ पत्रुस . . . . .	1641
२ पत्रुस . . . . .	1648
१ यूहन्ना . . . . .	1652
२ यूहन्ना . . . . .	1659
३ यूहन्ना . . . . .	1660
यहूदा . . . . .	1662
प्रकाश . . . . .	1664



## उत्पत्ती

**ब्रेक्ब मुर:** यहूदी आन ब्रेक्ब मुर नु थमा सुइक्ब आन गुम्तीकेमी मेको किताब ब्रेक्ब मोसा बाक्ब, देनीम। येसु ख्रीस्तमी यो मोसा आ ब्रेक्शो आ पर्वम लोव्र पशो बाक्त। यूहन्ना ५:४६; लूका २४:२७

**गेना दुम्शो:** एको किताब परमप्रभु यावेम नेल्ल सेला रे योसेफ आ बेक्ची ना सम्म डा लोव्र बाक्ब।

**मार ब्रेक्शो:** उत्पत्ती किताब आ शेंशो

१. परमप्रभु यावे रागी सेल्ब बाक्ब उत्पत्ती १:१-२:३

परमप्रभु यावे मुर कली सेल्ब बाक्ब उत्पत्ती २:४-१५

२. डोंइती सेल्शो मुर आस पशो ब्रेक्शो बाक्ब उत्पत्ती ३:-११:-

मुरुम परमप्रभु यावे आ देंशो मटितीके उत्पत्ती ३:-

काइन नु हाबील उत्पत्ती ४:१-२४

हाबील रे नोआह सम्म उत्पत्ती ४:२५-५:३२

रागी नेल्ल कली ब्वाक्कुम सुम्शो उत्पत्ती १०:-

बेबीलोन सहरम लाइशो खि सेल्शो उत्पत्ती ११:१-९

किकी पिपी आन नें उत्पत्ती ११:१०-३२

३. यहूदा आ किकी पिपी उत्पत्ती १२:-५०:-

अब्राहाम उत्पत्ती १२:-२३:-

इसहाक उत्पत्ती २४:-२६:-

याकूब उत्पत्ती २७:-३६:-

योसेफ उत्पत्ती ३७:-५०:-

डोंइती डा लोव्र

उत्पत्ती २:४-२५; भजन संग्रह १०४

१ नेल्ल क्येडा डोंइती परमप्रभुमी सरीड नु रागी दुम्पदा बाक्त।

२ मिनु खप, फश, ब्वाक्कु नेल्ल खालसीशा, मारेड मवाशो बाक्माक्त। मिनु मेको तारी छिडछिड बाक्माक्त। परमप्रभु आ सोक्त ब्वाक्कु तारी फिल फिल पा हिम्सीशा बाक्बाक्माक्त।

परमप्रभुमी मारेड मारेड सेल्शो

उत्पत्ती ४-२५; भजन संग्रह १०४

३ मिनु परमप्रभुमी “छेडछेड दुमो” देंमेनु, छेडछेड दुम्माक्त। भजन संग्रह ३३:९; हिब्रू ११:३; यसैया ४५:७

४ मेको तशा “रिम्शो दुम्त” देंमाक्त। मिनु छेडछेड नु छिडछिड फ्रादीम्सी बाक्त।

५ मिनु परमप्रभुमी छेडछेड कली नाक्ती नु छिडछिड कली नाक्दो, दे नें वोदा बाक्त। मिनु नां रिक्शा, नां सोव्रशा, मेको डोंइती डा नाक्ती दुम्माक्त।

६ मिनु परमप्रभुमी “ब्वाक्कु आ दातेमी फ्रातीक दुमो। ब्वाक्कु ब्राशा बाक्मल” देंमाक्त।

७ मोपा परमप्रभुमी सरीड आगा डा ब्वाक्कु नु सरीड तारी डा ब्वाक्कु फ्रादीम्सी बाक्त। मिनु ब्वाक्कु बुक्शा बाक्मा बाक्त। भजन संग्रह १९:२; भजन संग्रह १३६:६; भजन संग्रह १४८:४

८ परमप्रभुमी मेको फ्रातीके कली सरीड, दे नें वोदा बाक्त। मिनु नां रिक्शा, नां सोव्रशा, मेको निक्शी नाक्त दुम्माक्त।

९ मिनु परमप्रभुमी “सरीड आगा डा ब्वाक्कु काथा दुमीन। सोव्रशो रू गूडो” देंमाक्त। मेको यो दुम्माक्त। अय्युब ३८:८-११; भजन संग्रह २४:२; २पत्रुस ३:५

१० मिनु परमप्रभुमी सोव्रशो रू कली रागी नु ब्वाक्कु देम्शा लीशो कली समुन्द्र, दे नें वोदा बाक्त। मिनु मेको आ सेल्शो तशा “रिम्शो दुम्त” देंमाक्त।

11 मिनु परमप्रभुमी रागी डा खप कली “घांस, फू नु रवापुकी दुम्मल। घांस नु फूपुकीम वांचेर बाक्मल। फल फुल सिप्ब रवापुकी वाशा, आंम आंम फल सिम्मल। मेको आन वांचेर चहिं आन फलपुकीम बाक्मल” देंमाक्त। मिनु मोदेशो दुम्माक्त।

12 रागीम घांस नु फूपुकी वाशा, आन वांचेर यो वामा बाक्त। फल फुल रवापुकी वाशा, आन वांचेर यो वामा बाक्त। मिनु परमप्रभुमी आ सेल्शो तशा “रिम्शो दुम्त” देंमाक्त।

13 मिनु नां रिक्शा, नां सोत्रशा, मेको सां नाक्ती दुम्माक्त।

14 मिनु परमप्रभुमी “नाक्ती नु नाकदो फ्राचा कली सरीडमी छेडछेड पा ब्राइबपुकी दुमीन। मेको ब्राइबपुकीम हिंउद नु बर्खा, नाक्ती नु बर्स कली फ्रातीक गेय पामेक्ल। ब्यवस्था ४:१९; भजन संग्रह ७४:१६; यसैया ४७:१३

15 मिनु मेको सरीड डा ब्राइबपुकीम रागी कली छेडछेड गेचा मालनीम” देंमाक्त। मिनु मेको दुम्माक्त।

16 मोपा परमप्रभुमी ठेयब बत्ती निक्शी सेला बाक्त। शुश छेडछेड पा ब्राइब नाक्त कली नु इच्का छेडछेड पा ब्राइब बत्ती नाकदो कली वोदा बाक्त। सोरुल यो सेल्मी बाक्त। भजन संग्रह १३६:७-९

17 परमप्रभुमी रागी छेडछेड बाक्ल, दे मेको नेल्ल आन कली सरीडमी वोइक्मी बाक्त।

18 नाक्त नु नाकदो कली फ्राचा नु छेडछेड छिडछिड रे फ्राचा कली सरीडम वोदा बाक्त। परमप्रभुमी मेको तशा “रिम्शो दुम्त” देंमाक्त।

19 मिनु नां रिक्शा, नां सोत्रशा, मेको ४ नाक्ती दुम्माक्त।

20 मिनु परमप्रभुमी “ब्वाक्कुमी मारेइ मारेइ ब्रोंइशा बाक्बपुकीम ब्रीमल। रागी तारी मारेइ मारेइ चिक्ब सरीडम बेरमल” देंमाक्त।

21 मोपा परमप्रभुमी ब्वाक्कुम बाक्ब ठेयब हिंचा डा जन्तु नु मारेइ मारेइ ब्रोंइशा बाक्ब सेल्मी बाक्त। मेको शुश दुम्शा, समुन्द्र ब्रीशा बाक्मा बाक्त। चिक्ब यो शुश दुम्मा बाक्त। मिनु परमप्रभुमी मेको तशा “रिम्शो दुम्त” देंमाक्त। भजन संग्रह ७४:१३-१४; १४८:७

22 परमप्रभुमी मेको नेल्ल आन कली आसीक गेशा “सोशा बोशा, शुश दुमीन, समुन्द्र डा ब्वाक्कु ब्रीडीने” देंमाक्त। चिक्ब आन कली यो “सोशा बोशा, रागीमी शुश दुमीन” देंमाक्त।

23 मिनु नां रिक्शा, नां सोत्रशा, मेको ५ नाक्ती दुम्माक्त।

24 मिनु परमप्रभुमी “रागीम मारेइ मारेइ ब्रोंइशा बाक्ब गूचा मालनीम। मार गूचा मालनीम देंशा हना बी ब्यफ, खपीम गेशा गाक्ब आइक्च जन्तु नु मार मार ब्वाकी डा जन्तु दुमीन” देंमाक्त। मिनु मेको दुम्माक्त।

25 मोपा परमप्रभुमी मारेइ मारेइ ब्वाकी डा जन्तु, मारेइ मारेइ बी ब्यफ, खपीम गेशा गाक्ब नु मारेइ मारेइ आइक्च जन्तु सेल्मी बाक्त। मिनु परमप्रभुमी आ सेल्शो तशा “रिम्शो दुम्त” देंमाक्त।

26 मिनु नोले परमप्रभुमी “इं खोदेशो पा मुर का सेल्य। मिनु समुन्द्र डा डांड, सरीडम बेरब चिक्ब, बी ब्यफ, ब्वाकी डा जन्तु नु खपीम गेशा गाक्ब आइक्च जन्तु नेल्ल आन कली हुकुम पाइब दुम्ल” देंमाक्त। भजन संग्रह ८:६-९; एफिसी ४:२४; कलस्सी १:१५; याकूब ३:९

27 मिनु परमप्रभुमी आ खोदेशो तांडसीशो का सेला बाक्त। मेकोमी वोंइशा मुर का नु मीश मुर का सेला बाक्त। उत्पत्ती ९:६; मत्ती १९:४

28 मिनु परमप्रभुमी मुर आस कली आसीक गेशा “सोशा बोशा, तमी तौ थिशा, रागी प्रिंशा, रिम्शो पा हुकुम पस। समुन्द्र डा डांड, सरीडम बेरब चिक्ब, रागीम बाक्ब जन्तु नेल्ल नु खपीम गेशा गाक्ब आइक्च जन्तु नेल्ल आन कली रिम्शो पा हुकुम पसे” देंमाक्त।

29 मिनु परमप्रभुमी “नेनीस, गो इस कली वांचेर सिप्ब, गिग खाइ, फल सिप्ब नु वांचेर सेल्ब रवा गेतन्सी। मेको इस कली जचा ब्वचा दुम्ब। मत्ती ६:२५-३४

30 मिनु गो रागीम बाक्ब जन्तु, बी ब्यफ, रागी डा चिक्ब, खपीम गेशा गाक्ब आइक्च जन्तु नु मारेइ मारेइ ब्रोंइशा बाक्ब आन कली घांस, सुवा ब्वचा गेतामी” देंमाक्त। मिनु मोदेशो दुम्माक्त। भजन संग्रह १४५:१६

31 मिनु परमप्रभुमी आ सेल्शो नेल्ल तशा “शुश रिम्शो दुम्त” देमाक्त। मिनु नां रिक्शा, नां सोवत्रशा, मेको ६ नाक्त दुम्माक्त। मत्ती १९:१७; १तिमोथी ४:४

## 2

### डोंइती डा नाइक्तीक नाक्त

- 1 मिनु मोपा परमप्रभुमी सरीड, रागी नु मार मार बाक्मा, मेको नेल्ल सेल्ने थुमा बाक्त।
- 2 मिनु ६ नाक्तीम आ गेय नेल्ल थुम्शा डा मिन ७ नाक्तीम नांइसे बाक्त। हिब्रू ४:४
- 3 मिनु परमप्रभुमी नाइक्तीक नाक्त कली आसीक गेवा बाक्त। मिनु मेको नाक्त आंम कली नाइक्चा, दे वोदा बाक्त। मारदे हना मेको नेल्ल सेल्तीक गेय थुम्शा नांइसे बाक्त। प्रस्थान २०:११; भजन संग्रह ९५:११; इजीकीएल २०:१२; हिब्रू ४:९-१९

### परमप्रभुमी मुर सेल्शो

- 4 एको परमप्रभुमी सरीड नु रागी सेल्ची ना डा लोत्र बाक्ब। परमप्रभु यावेमी रागी नु सरीड सेलानु,
- 5 मारेड मारेड घांस खपीम मवाशो बाक्मा बाक्त। कोत्रकेली यो मदाप्शो बाक्मा बाक्त। मारदे हना परमप्रभु यावेमी रागीम रेउ मयिपाइशो बाक्माक्त। मिनु रूम गेय पाइब मुर यो मबाक्मा बाक्त।
- 6 मेना रागी रे खोला गूशा, रागी नेल्ल डा खप जिप्पाइक्बाक्माक्त।
- 7 मिनु नोले परमप्रभु यावेमी रू डा खप के मुर का सेला बाक्त। मिनु मुर आ नेमी ब्रोंइतीक सोक्त मुइक्ता बाक्त। मिनु मुर सोक्त पाइशो दुम्माक्त। उत्पत्ती ३:१९; अय्युब १०:९; अय्युब ३३:४; भजन संग्रह १०४:२९-३०; १कोरिन्थी १५:४५,४७

### परमप्रभुमी आ रू सेल्शो

- 8 मिनु नोले परमप्रभु यावेमी पूर्वम एदेन माइशो रू का सेला बाक्त। मेकेर आ सेल्शो मुर कली वोदा बाक्त।
- 9 मिनु परमप्रभु यावेमी मेकेर मार मार दारशो तांडसीब रवा नु जचा ब्वचा फल सिब्व रवा वापदा बाक्त। ब्रोंइपाइक्ब का नु रिम्शो नु मरिम्शो तुइक्पाइक्ब रवा का यो रू आ दातेमी वापदा बाक्त। उत्पत्ती ३:२२; प्रकाश २:७; प्रकाश २२:२
- 10 मिनु रू कली जिप्पाइक्चा, दे एदेन रे खोला का गूमाक्त। मेको खोला नोले ब्राशा, ४ ओटा खोला दुम्शो बाक्मा बाक्त। इजीकीएल ४७:१-१२
- 11 डोंइती डा खोला आ नें पीशोन बाक्ब। मेको खोला हवीलाह रागी आ एर ओंथ रे लशो बाक्ब। मेको रागीमी सुन बाक्बाक्माक्त।
- 12 मेको रागी डा सुन रिम्शो बाक्बाक्माक्त। मेकेर गोकुल धूप नु ओनीक्स माइशो हीरा यो बाक्बाक्माक्त।
- 13 मेको आ नोले डा खोला आ नें गिहोन बाक्ब। मेको कूश माइशो रागी आ एर ओंथ हिरशो बाक्ब।
- 14 मिनु मेको आ नोले डा खोला आ नें टाइग्रीस बाक्ब। मेको खोला अस्सुर रागी आ पूर्व गे लशो बाक्ब। मिनु नेल्ल क्येडा नोले डा खोला आ नें युफ्रेटीस बाक्ब।
- 15 मिनु परमप्रभु यावेमी मुर कली लाइशशा, एदेन रू दोचा नु कोत्रचा कली वोदा बाक्त।
- 16 मिनु परमप्रभु यावेमी मेको मुर कली “नेल्ल रवा डा फल जने ब्वने चाप्नेवे।
- 17 तन्न रिम्शो नु मरिम्शो तुइक्पाइक्ब रवा रे ब्वचा मदुम्ब। तेको नाक्त ब्वाइनेवे, मेको नाक्तीन बेक्नेवे” दे अरेवा बाक्त। रोमी ६:२३

### मुर आ गेय

- 18 मिनु परमप्रभु यावेमी “मुर का ला बाक्चा मरिम्शो दुम्ब। गो मेको नु बाक्चा कली वारच पाइब का सेल्लुड” देमाक्त। उपदेसक ४:३०

19 मिनु परमप्रभु यावेमी आ खप के सेल्शो मार मार जन्तु नु सरीडम बेरब चिक्ब आन कली मुरुम मार मार नें वोडकबाकमे, दे मुर आ बाक्तीके चाक्मी बाक्त। मिनु मुरुमी ब्रोंडशा बाक्ब नेल्ल आन कली नें वोदा बाक्त। मार नें वोदा, मेको नें लीमा बाक्त।

20 मुरुमी बी ब्यफ, सरीडम बेरब चिक्ब नु ब्वाकी डा जन्तु नेल्ल आन कली नें वोदा बाक्त। तन्न मुर कली मेको नु बाक्चा कली वारच पाइब मबाक्शो बाक्माक्त।

### परमप्रभुमी मुर आ वारच सेल्शो

21 मिनु परमप्रभु यावेमी आदम कली मारेइ मतुइक्चा डा पा निन्द्रा पपदा बाक्त। मिनु मेको के जेरी का शोला बाक्त। मिनु मेको पोव्रला कली श्येमी सुवा बाक्त।

22 मिनु परमप्रभु यावेमी मेको शोल्शो जेरी के मीश मुर का सेल्शा, मुर आ बाक्तीकेमी चाक्गा बाक्त।

23 मिनु आदममी “ओहो, एको रुश, आं रं डा रुश बाक्त। एको श्ये आं रं डा श्ये बाक्त” दे तुइक्ता बाक्त। मिनु मेकोमी “मेको आ नें मीश मुर वोडक्चा माल्ब। मारदे हना वोंडश मुर आं रं रे शोल्शो बाक्ब” देमाक्त।

24 मोपतीके वोंडश मुरुमी आ आंम आफ आस कली प्रोंडशा, आ मीश नु काथा बाक्ब। मेको निक्शी रं का दुम्नीस। मत्ती १९:५-६; १कोरिन्थी ६:१६; एफिसी ५:३१

25 मेना आदम नु आ मीश निम्फा शिन्ना बाक्सा बाक्त। मुने चहिं मतुइक्बाक्सा बाक्त।

## 3

### मुरुम परमप्रभु आ देशो मटिशो

1 मिनु परमप्रभु यावे आ सेल्शो जन्तु आन दातेमी नेल्ल क्येडा निप्स पाइशशो बुस्स दुम्माक्त। मिनु बुस्सुमी मीश मुर कली “परमप्रभुमी इस कली ‘एको रू डा रवा आन फल मारेइ मब्वसे’ देमे?” दे हिल्लो पवा बाक्त। प्रकाश १२:९; प्रकाश २०:२

2 मिनु मीश मुरुमी बुस्स कली “गो एको रू डा रवा आन फल ब्वचा दुम्नस्कु। उत्पत्ती २:१६

3 तन्न रू आ दातेमी बाक्शो रवा आ फल आ पर्वम परमप्रभुमी ‘मब्वचा, मथिचा यो। ब्वाइतीसी हना, गे बेक्नीसी’ देंत” देमाक्त। उत्पत्ती २:१७

4 तन्न बुस्सुमी “गे बेक्सीन मबेक्नीसी। यूहन्ना ८:४४

5 ब्वाइतीसी हना, इस कली रिम्शो नु मरिम्शो मार बाक्बा तुइक्पाइक्ब। मिनु गे परमप्रभु खोदेशो दुम्नीसी। मेकोन परमप्रभुमी तुइक्ताक्ब” देमाक्त।

6 मिनु मीश मुरुम मेको रवा तशा ब्वशोनु, ब्रोंडचा डा कोव्रशोनु, दारशो, रुप्तीक थुं गेचा डा तवा बाक्त। मोपतीके फल सेक्शा, ब्ववा बाक्त। मेको आ नेक्शा बाक्ब आ वोंडश कली यो गेवा बाक्त। मेकोमी यो ब्ववा बाक्त। याकूब १:१४-१५; १तिमोथी २:१४

7 मिनु नोले निम्फा शिन्ना बाक्शो तुइक्तसे बाक्त। मिनु फोव्रशी रवा आ सफा सेक्शा फेक्तीक सेल्से बाक्त। उत्पत्ती २:२५

8 मिनु नाक्नाक्दो मेको निक्शीमी परमप्रभु यावे रूमी हिरशो नेन्से बाक्त। मिनु “परमप्रभु यावेम मतचा डा पा खुइक्चा” दे रवा आन दातेमी लशा, खुइक्ससा बाक्त। भजन संग्रह १३९:७-१०; येरमीया २३:२४

9 मिनु परमप्रभु यावेमी आदम कली “ते बाक्डे?” दे ब्रेत्ता बाक्त।

10 मेकोमी “गो इन गाक्शो नेंता। मिनु गो शिन्ना बाक्तीके, हिंशा खुइक्साक्यी” देमाक्त।

11 मिनु “गे शिन्ना बाक्नेवे, दे दोपा तुइक्नेवे? मब्वचा देशो रवा आ फल ब्ववी?” दे हिल्लो पवा बाक्त।

12 मिनु मुरुमी “इन गेशो मीश मुरुमी आं कली मेको रवा आ फल गेती। मिनु गो ब्वाता” देमाक्त। २कोरिन्थी ११:३

13 मिनु परमप्रभु यावेमी मेको मीश मुर कली “मार पवी?” दे हिल्लो पवा बाक्त। मीश मुरुमी “बुस्सुमी आं कली जोल पा ब्वपाइक्ती। मिनु गो ब्वाता” देमाक्त। २कोरिन्थी ११:३

14 मिनू परमप्रभु यावेमी बुस्स कली “बी ब्यफ नु ब्वाकी डा जन्तु नेल्ल आन दातेम गे सराप राइनेवे। मारदे हना मोदेशो मरिम्शो पाप्तीवी। इ रांमी ग्रेशा गाक्चा माल्नेवे। इ ब्रोंइतीक नाक्त सम्म खप जशा, बाक्चा माल्नेवे।

15 गे नु मेको मीश मुर जिशा, बाक्चा मलीसे। मेको आ युइ नु इ युइ जिशा बाक्नीमी। मीश मुर आ युइ कामी इ पिया दिम्शा प्रोल्ब। गे चहिं मेको आ गेंग्रेम कोक्नेवे” दे सराप पदा बाक्त। प्रकाश १२:४-५, १५-१७

16 मिनू मेकोमी मेको मीश मुर कली “कोव्रज कुरशा, आल थिवेनु, इ कली ठेयब श्येत गेनुड। आल थिचा रोइ पाइनेवे। मो हना यो इ वोंइश कली माल्नेवे। मिनू मेकोमी इ कली हुकुम पाइब” देंमाक्त। एफिसी ५:२२-२३; १तिमोथी २:१२

17 मिनू आदम कली “मारदे हना गे इ मीश आ लोत्र नेशा, मब्वचा देशो रवा आ फल ब्वाप्तीवी, इ पतीके आ पर्बम इ रू नेल्लेमी सराप ताइनीम। इ जचा थोत्रक श्येत पा खुम्चा माल्नेवे। उत्पत्ती ८:२१-२२; अय्युब ३१:३८-३९

18 इ रूमी चू नु चोंक वानीम। मिनू गे गिगी खाइ ब्वचा माल्नेवे।

19 इ कुप्फी रे गाल यिपाइशशा शोब्ले जचा माल्नेवे। गे खप मदुमे सम्म मोदेशो पचा माल्नेवे। मारदे हना गो इ कली खप रे सेल्शो नड” दे परमप्रभु यावेमी आदम कली देंमाक्त। उत्पत्ती २:७; भजन संग्रह ९०:१०; भजन संग्रह १०४:२९; उपदेसक १२:७; २थिस्सलोनिकी ३:१०

20 मिनू आदममी आ मीश कली हव्वा नें वोदा बाक्त। मारदे हना मेको ब्रोंइब मुर नेल्ल आन ममा दुम्माक्त।

21 मिनू परमप्रभु यावेमी आदम नु आ मीश आस कली कुशुल के फेक्तीक सेल्शा, फेक्तीम्सी बाक्त।

22 मिनू परमप्रभु यावेमी “मुर इं खोदेशो दुम्त। रिम्शो नु मरिम्शो तुइक्ब दुम्त। मेको ब्रोंइपाइक्ब रवा आ फल यो सेक्शा, ब्वाप्तु हना, गेना हना यो ब्रोंइब, गेनायो मबेक्ब दुम्ब” देंमाक्त।

23 मोपतीके परमप्रभु यावेमी खप रे सेल्शो मुर कली एदेन माइशशो रू रे गुंइशा, अरु रूम गेय पथ सोइक्ता बाक्त। उत्पत्ती २:१५

24 परमप्रभुमी मेको आस कली खेरसी बाक्त। मेको आस कली खेरशा, एदेन रू डा पूर्वमी आ स्वर्ग डा करूब माइशशो गेय पाइब वोदा बाक्त। मेकेर मी ब्रशो एर ओंथ हिरब तरवार का यो वोदा बाक्त। मेको ब्रोंइपाइक्ब रवा आ फल ब्वचा मताम्सेक्ल, दे कोत्रब वोदा बाक्त।

## 4

### परमप्रभु रे डोन बाक्शो

1 मिनू नोले आदम आ मीश हव्वा नु इम्माक्त। मिनू हव्वाम कोत्रज कुरशा, तौ का थिमाक्त। हव्वामी “परमप्रभु यावेमी आं कली वारच पा आल का गेती” देंमाक्त। मिनू आ नें काइन वोदा बाक्त।

2 मिनू मेको आ नोले लेंशा अर्को तौ का यो थिमाक्त। मेको कली हाबील नें वोदा बाक्त। हाबील काइन आ लोकब बाक्माक्त। मेको आल निक्शी कोल्शा, हाबील भेडा गोठला दुम्माक्त। काइन चहिं रू डा गेय पाइब दुम्माक्त।

3 काबु काइनमी आ रू डा सिशशो मारेइ मारेइ थोत्रक परमप्रभु यावे कली चढेवा बाक्त। प्रस्थान २३:१९

4 हाबीलमी आ डोंइती गिक्शो पाठा आ श्ये नु बोंसो परमप्रभु यावे कली चढेवा बाक्त। मिनू परमप्रभु यावेमी हाबील आ चढेशो ब्रवा बाक्त। प्रस्थान ३४:१९; लेवी ३:१६

5 तन्न काइन आ चढेशो मब्रवा बाक्त। मिनू काइन आ कुल राव किक्पा चुरमाक्त। प्रस्थान ३३:१९; हिब्रू ११:४

6 मिनू परमप्रभु यावेमी काइन कली “मारदे चुरे? मारदे राव किक्डे?

7 गे रिम्शो पाप्तीवी हना, गो इ कली मब्राइनुडा डा? ब्राइनुड। गे मरिम्शो पाप्तीवी हना, मुर साइक्ब जन्तु खोदेशो पा, पाप इ लाप्चोमी बाक्ब। मिनू इ कली माल्ब। गे इ मरिम्शो थुं कली ग्राडो” देंमाक्त। गलाती ५:१७; रोमी ६:१२

8 मिनू काइनमी आ लोकब हाबील कली “रूमी लस” देंमाक्त। मिनू रूमी बाक्सानु, काइनमी हाबील कली सदा बाक्त। १यूहन्ना ३:१२, १५

9 मिनू परमप्रभु यावेमी काइन कली “इ लोकब ते बाक्म?” दे हिल्लो पवा बाक्त। मिनू काइनमी “डाद, गो आं लोकब आ गोठला नडा डा?” देंमाक्त। उत्पत्ती ३:९

10 मिनू मेकोमी “नेनो, मार पवी? इ लोकब आ हुशेमी आं कली खप रे ब्रेशो नेंता। भजन संग्रह ९:१३; मत्ती २३:३५; हिब्रू १२:२४

11 मुल गे सराप रशा, इ रू रे खेरचा पुंडसीनेवे। मारदे हना इ लोकब आ हुश मेकेर जारशो बाक्ब। गन्ती ३५:३३

12 मुल रे गे रू डा गेय पवीनु, मारेइ मग्रेलब। रागी प्रोइशा, गाक्ब मुर दुमचा माल्लेवे” दे परमप्रभु यावेमी देंमाक्त।

13 मिनू काइनम परमप्रभु यावे कली “इन गेशो सजाइ ठेयब बाक्ब। मोमो श्येत गेतीनी हना, फाल्ने मचापुण्ड।

14 मुलाक्ती आं कली आं रू रे गुंडताक्वीनी। मिनू इन नेक्था बाक्चा मताइनुड। गो मुल रागी प्रोइशा, गाक्ब मुर दुमुनुड। आं कली सुम थित्तेक्म हना यो, साइक्नीम” देंमाक्त। अय्युब १५:२०-२४

15 मिनू परमप्रभु यावेमी “ममाइ, सुइमी इ कली साइक्तेमी हना, इ तशो सराप मेको कली ७ खेयप रचा माल्ल” देंमाक्त। मिनू परमप्रभु यावेमी “काइन कली सुइमी मसदमेक्ल” दे आ रांम चिनु वोदा बाक्त। इजीकीएल ९:६; प्रकाश ७:३-४

16 मिनू नोले काइन परमप्रभु यावे आ डोंइती रे लमाक्त। मिनू एदेन आ पूर्व गे, नोद माइशो रागीम जाक्दीशशा बाक्माक्त।

### मुर आन ठेयब लेशो

17 मिनू काइन आ मीश नु इम्माक्त। मिनू मेकोमी कोव्रज कुरशा, हनोक थिमाक्त। मिनू काइनम सहर का सेला बाक्त। मेको सहर कली आ तौ हनोक आ नें खोदेंशो पा हनोक नें वोदा बाक्त।

18 हनोकमी इराद थिमाक्त। इरादमी मेहुयाएल थिमाक्त। मेहुयाएल मथुशाएल आ आफ दुम्माक्त। मेथुशाएल लमेक आ आफ दुम्माक्त।

### लमेकमी यो मुर साइशो

19 मिनू लमेकमी मीश निक्शी चाक्गा बाक्त। का आ नें आदाह नु अर्को आ नें चिल्लाह बाक्माक्त।

20 मिनू आदाहमी याबाल थिमाक्त। मेको ताम्बुम बाक्ब नु गोठम बाक्ब बस्तु योव्रब आन किकी पिपी बाक्माक्त।

21 मेको आ लोकब आ नें यूबाल बाक्माक्त। मेको बीना नु मुइक्तीके ताप्ब आन किकी पिपी बाक्माक्त।

22 मिनू चिल्लाहमी तूबल-काइन थिमाक्त। मेकोमी कांसा नु फलाम के मार मार सेल्लिक गेय पवा बाक्त। तूबल-काइन आ समी नामा बाक्माक्त।

23 मिनू लमेकमी आ मीश निक्शी आस कली “आदाह नु चिल्लाह, आं लोव्र नेनीस, गे लमेक आ मीश निक्शी, आं सेंदा नेंशा, होस पसे। गो मुर का साइक्ता। मारदे हना मेको ठिटामी आं कली तुप्ती।

24 काइन साइक्ब ७ खेयप क्येक्क लेत्चा पुंडसीब हना, लमेक साइक्ब ७७ खेयप क्येक्क लेत्चा पुंडसीब” देंमाक्त। उत्पत्ती ४:१५; लेवी १९:१८; ब्यवस्था ३२:३५; मत्ती १८:२२

### आदम नु हव्वा आस अर्को तौ

25 मिनू आदम लेशा आ मीश नु इप्शा, तौ का थिमाक्त। मेको कली सेथ नें वोदा बाक्त। हव्वामी “परमप्रभुमी हाबील आ पा डा अर्को तौ का गेती। मारदे हना काइनमी हाबील कली साइक्तु” देंमाक्त।

26 मिनू सेथमी यो तौ का थिमाक्त। मिनू मेको कली एनोश नें वोदा बाक्त। मिनू मेना रे मुरपुकीमी परमप्रभु यावे कली पुंड्या नु ठेयब सेल्चा गोव्रमे बाक्त। उत्पत्ती १२:८

## 5

आदम आ चच युड

१इतिहास १:१-४

1 एको आदम आ चच, युड बाक्नीम। परमप्रभुमी मुर सेलानु, आ खोदेशो पा सेला बाक्त। लूका ३:३७-३८; उत्पत्ती १:२७

2 वोंडश मुर का नु मीश मुर का सेला बाक्त। मिनु मेको आस कली आसीक गेशा, आस नें मुर वोंडसी बाक्त।

3 मिनु आदम सहे का ३० बर्स दुम्मेनु, आ खोदेशो तौ का थिमाक्त। मिनु मेको कली सेथ नें वोदा बाक्त। भजन संग्रह ५१:७; १कोरिन्थी १५:४५

4 सेथ थिशा नोले आदम ८ सहे बर्स ब्रोंडमाक्त। अरु तमी तौ यो थिमाक्त।

5 मिनु आदम नेल्ल पा ९ सहे ३० बर्स ब्रोंडशा बेक्माक्त।

6 मिनु सेथ सहे का ५ बर्स दुम्मेनु, तौ का थिमाक्त। मेको कली एनोश नें वोदा बाक्त।

7 एनोश थिशा नोले ८ सहे ७ बर्स ब्रोंडमाक्त। अरु तमी तौ यो थिमाक्त।

8 मिनु सेथ नेल्ल पा ९ सहे १२ बर्स ब्रोंडशा बेक्माक्त।

9 मिनु एनोश ९० बर्स दुम्मेनु, तौ का थिमाक्त। मेको कली केनान नें वोदा बाक्त।

10 केनान थिशा नोले ८ सहे १५ बर्स ब्रोंडमाक्त। अरु तमी तौ यो थिमाक्त।

11 मिनु एनोश नेल्ल पा ९ सहे ५ बर्स ब्रोंडशा बेक्माक्त।

12 मिनु केनान ७० बर्स दुम्मेनु, तौ का थिमाक्त। मेको कली मा-हालालेल नें वोदा बाक्त।

13 केनान मा-हालालेल थिशा नोले ८ सहे ४० बर्स ब्रोंडमाक्त। अरु तमी तौ यो थिमाक्त।

14 मिनु केनान नेल्ल पा ९ सहे १० बर्स ब्रोंडशा बेक्माक्त।

15 मिनु मा-हालालेल ६५ बर्स दुम्मेनु, तौ का थिमाक्त। मेको कली यरेद नें वोदा बाक्त।

16 यरेद थिशा नोले ८ सहे ३० बर्स ब्रोंडमाक्त। अरु तमी तौ यो थिमाक्त।

17 मिनु मा-हालालेल नेल्ल पा ८ सहे ९५ बर्स ब्रोंडशा बेक्माक्त।

18 मिनु यरेद सहे का ६२ बर्स दुम्मेनु, तौ का थिमाक्त। मेको कली हनोक नें वोदा बाक्त।

19 यरेद हनोक थिशा नोले ८ सहे बर्स ब्रोंडमाक्त। अरु तमी तौ यो थिमाक्त।

20 मिनु यरेद नेल्ल पा ९ सहे ६२ बर्स ब्रोंडशा बेक्माक्त।

21 मिनु हनोक ६५ बर्स दुम्मेनु, तौ का थिमाक्त। मेको कली मेथुसेलाह नें वोदा बाक्त। हनोक कली हिबू लोत्रमी एनोक देनीम।

22 हनोक आ थुमी परमप्रभु आ नेक्था बाक्शो बाक्माक्त। हनोक मेथुसेलाह थिशा नोले सहे सां बर्स ब्रोंडमाक्त। अरु तमी तौ यो थिमाक्त। उत्पत्ती ६:९

23 मिनु हनोक नेल्ल पा सहे सां ६५ बर्स दुम्माक्त।

24 हनोक परमप्रभु नु गाक्बाक्माक्त। मिनु परमप्रभुमी हनोक कली आ बाक्तीक लदा बाक्त। मुरपुकीम हनोक कली माल्शा, मथिदमे बाक्त। २राजा २:११; हिबू ११:५

25 मिनु मेथुसेलाह सहे का ८७ बर्स दुम्मेनु, तौ का थिमाक्त। मेको कली लमेक नें वोदा बाक्त।

26 मेथुसेलाह लमेक थिशा नोले ७ सहे ८२ बर्स ब्रोंडमाक्त। अरु तमी तौ यो थिमाक्त।

27 मिनु मेथुसेलाह नेल्ल पा ९ सहे ६९ बर्स ब्रोंडशा बेक्माक्त।

28 मिनु लमेक सहे का ८२ बर्स दुम्मेनु, तौ का थिमाक्त।

29 मेको कली नोआह नें वोदा बाक्त। मेको नें आ अर्थ थु बारपाइक्तीक बाक्ब। मिनु लमेकमी “परमप्रभु यावेमी खप कली सराप पाप्तु। आं तौ रूम गेय पपाइक्तीके श्येत रे प्रोंडब बाक्ब” देंमाक्त।

उत्पत्ती ३:१७-१९

30 लमेक नोआह थिशा नोले ५ सहे ९५ बर्स ब्रोंडमाक्त। अरु तमी तौ यो थिमाक्त।

31 मिनु लमेक नेल्ल पा ७ सहे ७७ बर्स ब्रोंडशा बेक्माक्त।

32 मिनु नोआह ५ सहे बर्स दुम्मेनु, शेम हाम नु यफेथ थीमी बाक्त।

## 6

## रागी ब्वाक्कुम सुम्शो

- 1 मिनु नोले रागीमी मुर शुश दुम्मा बाक्त। मेकोपुकीमी शुश तमी थीमा बाक्त।
- 2 मिनु परमप्रभु आ तौपुकीमी मुर आन तमी आन कली तशा “दारशो बाक्नीम” दे मिम्तमे बाक्त। मिनु मेको आन दाते रे योव्रशा चाक्मे बाक्त। अय्युब १:६; २पत्रुस २:४; यहूदा ६
- 3 मिनु परमप्रभु यावेमी “आं सोक्त मुर आन कली शुश बर्स बाक्चा मगेनुड। मुर बेक्चा माल्नीम। आन ब्रोंडतीक सहे का २० बर्स ला दुम्ब” देंमाक्त।

## परमप्रभु आ थुं मनुशो

- 4 मेना रागीमी नेफीलीम माइशो थम लाइशो मुरपुकी बाक्शो बाक्मा बाक्त। मिनु नोले परमप्रभु आ तौपुकीमी रागी डा तमी आन कली चाक्शा, आल थीमे बाक्त। मेको बोल्यो नु टेयब लडाइ पाइब मुर दुम्मा बाक्त। इजीकीएल ३२:२७
- 5 मिनु परमप्रभु यावेमी “रागीम बाक्शो मुर आं अरेशो मटीब नु मरिम्शो पाइब ला बाक्नीम। मार मिम्ताकम हना यो, मरिम्शो बाक्त” दे मिम्ता बाक्त। उत्पत्ती ८:२१
- 6 मिनु परमप्रभु यावेमी आंम सेल्शो मुर आन कली तशा, शुश आ थुं मनुथु बाक्शो बाक्माक्त। १सामुएल १५:११-३५; येरमीया १८:७-१०
- 7 मिनु परमप्रभु यावेमी “आं सेल्शो मुर आन कली रागी रे क्याम्नुड। मुर नु जन्तु नेल्ल क्याम्नुड। खपीम ग्रेशा गाक्ब आइक्च जन्तु नु सरीडम बेरब चिक्ब यो क्याम्नुड। मारदे हना गो मेको आन कली सेल्शा यो, आं थुं मनुड” दे मिम्ता बाक्त। गन्ती २३:१९; रोमी ३:३-४; २तिमोथी २:१३
- 8 मिनु परमप्रभु यावेमी नोआह तवानु, मेको कली दाक्ता बाक्त। हिब्रू ११:७

## नोआह नु आ तौ

- 9 नोआह आ तौ सां बाक्मा बाक्त। नोआह शुश रिम्शो मुर बाक्माक्त। मुर नेल्लेमी “ठीक पाइब दोस मताइब मुर बाक्ब” दे तुइक्तमे बाक्त। नोआह परमप्रभु नु गाक्बाक्माक्त। उत्पत्ती ५:२२
- 10 मिनु नोआह आ तौ सां आन नें शेम, हाम नु यफेथ बाक्मा बाक्त।
- 11 परमप्रभुमी मुर आन कली कोव्रडानु, नेल्ल मरिम्शो बाक्मा बाक्त। रागी नेल्ल हुश खाक्श पोक्तीकेमी ब्रीमाक्त। अर्को मरिम्शो पाइब यो बाक्मा बाक्त।
- 12 मिनु परमप्रभुमी रागीम बाक्ब मुर आन कली कोव्रडानु, शुश मरिम्शो बाक्मा बाक्त। मुर नेल्लेमी आन दला दाक्स पामे बाक्त। भजन संप्रह १४:२-३
- 13 मिनु परमप्रभुमी नोआह कली “गो मुर नेल्ल आन कली क्याम्नुडमी। मारदे हना मेको आन पर्वम रागी हुश खाक्श पोक्तीकेमी ब्रीत। मुर नु रागी नेल्ल आन कली क्याम्नुड। आमोस ८:२
- 14 गे चहिं खिं खोदेशो पा शी के टेयब डोंगा का सेलो। मिनु आगामी कोठापुकी सेलो। ब्वाक्कु मओव्रचा डा पा आगा नु लाडगा अल्कत्राम सिल्दो” दे नोआह कली देंमाक्त।

## नोआहमी परमप्रभु कली टिशो

- 15 मिनु परमप्रभुमी “डोंगा दोपा सेल्चा माल्नेवे देशा हना, मेको आ लाइशो सहे सां कुबीत दुम्चा माल्ब। आ ब्रेम्शो ५० कुबीत दुम्चा माल्ब। आ ग्येत्थ लाइशो ३० कुबीत दुम्चा माल्ब। कुबीत का ०.५ मिटर खोदेशो बाक्ब।
- 16 मिनु छानां रे हात का प्रोंइशा, फश यूतीक बोखा का सेल्चा माल्नेवे। मिनु का पटटीम लाप्यो का वोइक्चा माल्नेवे। आगामी खप तला का, दाते तला का नु तला तारी बाक्तीक का सेल्चा माल्नेवे।
- 17 आं देशो रिम्शो पावो। मारदे हना गो मारेइ मारेइ साइक्चा कली रागी ब्वाक्कुम प्रिनुड। रागीम मार मार सेस बाक्मा, मेको नेल्ल बेक्चा माल्नीम।



18 तन्न गो इन कली कोव्रनुड, गे नु आं कबल पाइनुड। मिनु गे, इ तौपुकी, इ मीश, नु इ चाइमीपुकी मेको डोंगामी ओव्रचा माल्नीनी। मेको नेल्ल गे नु ब्रोंइचा माल्नीम। मेको पोथी भाले, बी ब्यफ नेल्ल निक्निक्शी बाक्चा माल्नीम। उत्पत्ती ९:९

19 गेपुकी नु मारेइ मारेइ सेस जन्तु निक्निक्शी ओव्रचा माल्नीम।

20 मारेइ मारेइ चिक्ब, मारेइ मारेइ जन्तु नु मारेइ मारेइ खपीम ग्रेशा गाक्ब आइक्च जन्तु निक्निक्शी ब्रोंइचा, दे गे नु डोंगामी ओव्रशा, बाक्चा माल्नीम।

21 मिनु इन कली, मार मार जचा ब्वचा ओइशा, उप्शा वोतो। मेको इन कली नु मेको आन कली जचा थोव्रक दुम्ब” दे परमप्रभुमी नोआह कली अरेवा बाक्त।

22 मिनु परमप्रभुमी मार मार मदा, नोआहमी नेल्ल टिशा, पवा बाक्त। हिब्रू ११:७

## 7

नोआह टेयब डोंगाम ओव्रशो

1 मिनु परमप्रभु यावेमी नोआह कली “गे नु इ खिं डा मुर नेल्ल शी के टेयब डोंगामी ओव्रडीन। मारदे हना एको पाला डा मुर आन दातेमी गे का ला ठीक पाइब बाक्नेवे। उत्पत्ती ६:८

2 गे चढेचा दुम्ब बी ब्यफ, क्यारश बोका, भेडा सांड रे ७ जोड लतो। उत्पत्ती ८:२०; लेवी ११:-

3 मिनु चढेचा दुम्ब सरीडम बेरब चिक्ब यो ७ जोड लतो। भाले नु पोथी लतो। मारदे हना मेकोपुकी रागीमी ब्रोंइचा माल्नीम।

4 गो ७ नाक्त नोले ४० नाक्त नु ४० नाकदो सम्म रेउ यिपाइक्नुड। मिनु आं सेल्लशो रागीम मार मार ब्रोंइशा बाक्मा, मेको नेल्ल आन कली साइक्नुडमी” देमाक्त।

5 मिनु परमप्रभु यावेमी मार मार अरेवा, नोआहमी नेल्ल टिशा पवा बाक्त।

6 रागीमी रेउ यिचा गोवानु, नोआह ६ सहे बर्स दुम्शो बाक्माक्त।

7 मिनु नोआहम मार पवा बाक्त देश हना, डोंइती आ तौपुकी, आ मीश, आ चाइमीपुकी ब्वाक्कु रे प्रोंइचा कली टेयब डोंगामी ओव्रपाइक्मी बाक्त। १ पत्रुस ३:२०

8 मिनु चढेचा दुम्ब बस्तु, चढेचा मदुम्ब बस्तु नु चिक्ब नु मारेइ मारेइ खपीम ग्रेशा गाक्ब आइक्च जन्तु,

9 निक्निक्शी बी ब्यफ, जोड जोड भाले पोथी नोआह नु टेयब डोंगामी ओव्रमा बाक्त। परमप्रभुमी दोपा नोआह कली अरेवा, मोपा पवा बाक्त। उत्पत्ती ६:१९-२०

10 मिनु ७ नाक्त नोले रागीम ब्वाक्कु ब्रीचा गोवा बाक्त।

11 मिनु रेउ यिमेनु, उइ रे यो ब्वाक्कु बारशा कुचा गोवा बाक्त। मेना नोआह ६ सहे बर्स, महिना निक्शी १७ नाक्त दुम नाक्त मोदेशो दुम्माक्त। प्रकाश ९:१

12 मिनु ४० नाक्त नु ४० नाकदो शुश रेउ यिमाक्त।

13 मेको रेउ यिचा आ डोंइती नाक्ती नोआह नु आ तौ शेम, हाम, नु यफेथ सांफा, नोआह आ मीश नु आ चाइमी सांफा मेको डोंगामी ओव्रमा बाक्त।

14 मिनु मारेइ मारेइ जन्तु, मारेइ मारेइ बी ब्यफ, क्यारश भेडा, मारेइ मारेइ खपीम ग्रेशा गाक्ब आइक्च जन्तु नु मारेइ मारेइ फ्रां पाइशो, ब्रोंइशा बाक्ब जन्तु

15 जोड जोड पा नोआह नु टेयब डोंगामी ओव्रमा बाक्त।

16 मिनु ब्रोंइशा बाक्ब नेल्ल जोड जोड पा, भाले पोथी नेल्ल ओव्रमा बाक्त। परमप्रभुमी नोआह कली दोपा अरेवा, मोपा नेल्ल टिशा पवा बाक्त। मेको नेल्ल ओव्रमा नोले परमप्रभु यावेमी लाप्चो चोक्गा बाक्त। उत्पत्ती ६:१९

17 मिनु ब्वाक्कु ४० नाक्त सम्म रागीम ब्रीना ब्रीन बाक्माक्त। ब्वाक्कु शुश बारशा, ब्वाक्कुमी टेयब डोंगा कली कुरा बाक्त। ब्वाक्कु रागीम शुश बारमाक्त।

18 मिनु रेउ यिना यिन, ब्वाक्कु बारना बारन लमेनु, मेको डोंगा ब्वाक्कु तारी गाक्चा गोवा बाक्त।

19 रागी नेल्लेम ब्वाक्कु शुश दुम्शा, टेयब डांटा यो सुमा बाक्त।

- 20 डांडा क्येडा यो १५ कुबीत सम्म ग्येत्थ सुमा बाक्त। कुबीत का ०.५ मिटर खोदेशो बाक्ब।
- 21 मिनु रागीम मार मार ब्रोंइशो बाक्मा, बी ब्यफ, क्यारश भेडा, ब्वाकी डा जन्तु, रागीम फोंइब, खपीम ग्रेशा गाक्ब आइक्च जन्तु नु मुर नेल्ल बेक्मा बाक्त। २पत्रुस ३:५-६
- 22 रागीम ब्रोंइशा बाक्ब नेल्ल बेक्मा बाक्त।
- 23 मोपा मेकोमी रागीम ब्रोंइशा बाक्ब मार मार बाक्मा, मुर, जन्तु खपीम ग्रेशा गाक्ब आइक्च जन्तु नु सरीडम बेरब चिक्ब नेल्ल क्याम्दा बाक्त। नोआह नु आ खिं डा मुर ला प्रोंइमी बाक्त।
- 24 मिनु मेको ब्वाक्कु सहे का ५० नाक्त सम्म रागीम बारना बारन बाक्माक्त।

## 8

### परमप्रभुम ब्वाक्कु सोत्रपाइशो

- 1 मिनु परमप्रभुमी नोआह नु टेयब डोंगामी बाक्ब नेल्ल ब्वाकी डा जन्तु नु बी ब्यफ क्यारश भेडा आन कली मप्रेंदीमी बाक्त। मिनु परमप्रभुमी रागीम फश पपदा बाक्त। मिनु ब्वाक्कु सोत्रमाक्त।
- 2 मिनु ब्वाक्कु बुक्तीके नेल्ल सोत्रना सोत्रन लमा बाक्त। रेउ यो देक्माक्त।
- 3 मिनु मेको ब्वाक्कु सोत्रना सोत्रन लशा, सहे का ५० नाक्त नोले शुश सोत्रमाक्त।
- 4 मिनु मेको बर्स डा ७ महिना डा १७ नाक्त मेको टेयब डोंगा आरारात माइशो डांडामी जाक्दीशो दिक्माक्त। उत्पत्ती ७:११
- 5 मिनु मेको बर्स डा १० महिना सम्म ब्वाक्कु सोत्रना सोत्रन लमाक्त। १० महिना डा डोंइती नाक्ती अर्को पहाड डा डांडा तांइसमा बाक्त।
- 6 मिनु ४० नाक्त नोले नोआहम आ सेल्शो डोंगा डा झेल रोक्या बाक्त। उत्पत्ती ७:१२, १७
- 7 मिनु मेकेरे रे खद का सोइक्ता बाक्त। मेको रागी डा ब्वाक्कु मसोत्रम सम्म एर ओंथ बेरशा बाक्माक्त।
- 8 मिनु नोआहमी “ब्वाक्कु नेल्ल सोत्रमा कों” दे तुइक्चा कली ढुकुर का यो सोइक्ता बाक्त।
- 9 मेको ढुकुर चहिं जुक्तीक मथित्थु लेशशा, नोआह आ बाक्तीके जाक्माक्त। मारदे हना आ लतीकेमी ब्वाक्कुम सुम्शो बाक्माक्त। मिनु नोआहम गुइ दिंशा ताक्शा, मेको कली ओंइदा बाक्त।
- 10 मिनु अर्को ७ नाक्ती रिम्शा, मेको ढुकुर कली लेंशा डोंगा रे सोइक्ता बाक्त।
- 11 मिनु नाक्नाक्दो ढुकुरमी आ तुंडमी नक वाशो तेल रवा आ सफा का कुरशा जाक्माक्त। मिनु नोआहमी “ब्वाक्कु नेल्ल सोत्रमाक्त” दे तुइक्ता बाक्त।
- 12 मिनु नोले यो ७ नाक्त रिम्शा, ढुकुर कली सोइक्ता बाक्त। मिनु मेको ढुकुर मलेम्माक्त।

### ब्वाक्कु सोत्रशो

- 13 मेको नोआह ६ सहे बर्स का दुम्मे आ डोंइती डा महिना डा डोंइती डा नाक्तीम रागीमी ब्वाक्कु सोत्रमाक्त। नोआहमी टेयब डोंगा आ छाना थूशा, कोत्रशा “लो, ब्वाक्कु नेल्ल सोत्रमाक्त” देंमाक्त। उत्पत्ती ७:११
- 14 मिनु महिना का नु २७ नाक्त नोले खप नेल्ल सोत्रमाक्त।
- 15 मिनु परमप्रभुमी नोआह कली
- 16 “गे, इ मीश, इ तौपुकी नु इ चाइमीपुकी डोंगा रे यूडीन” देंमाक्त।
- 17 मिनु “मारैइ मारेइ ब्रोंइशा बाक्ब, चिक्ब, जन्तु नु खपीम ग्रेशा गाक्ब आइक्च जन्तु नेल्ल आन कली यो युंइदो। मेकोपुकी सोशा बोशा रागीम शुश दुम्चा माल्नीम” देंमाक्त।
- 18 मिनु नोआह, आ तौपुकी, आ मीश नु आ चाइमीपुकी गूमा बाक्त। २ पत्रुस २:५
- 19 मिनु जन्तु नेल्ल, खपीम ग्रेशा गाक्ब आइक्च जन्तु नेल्ल, चिक्ब नेल्ल नु रागीम ब्रोंइशा बाक्ब मार मार नेल्ल डोंगा रे गूमा बाक्त।

### परमप्रभु यावेमी गेशो लोत्र

20 मिनू नोले नोआहम परमप्रभु यावे कली चढेतीक का सेला बाक्त। मिनू चढेचा दुम्ब बस्तु नु चढेचा दुम्ब चिक्ब नेल्ल लाइशा चोशा चढेतीक चढेवा बाक्त। उत्पत्ती ७:२

21 मिनू परमप्रभु यावेमी मेको ब्रोव्रशो रिना नाम्शा, ग्येरसे बाक्त। आ थुंमी “मुरुम मरिम्शो पतीकेम खप कली मुल सराप गेनायो मपाइनुड। मुर आ थुं मरिम्शो बाक्त हना यो, गेनायो सराप मपाइनुड। गो ब्रोइशा बाक्ब नेल्ल आन कली साइशा क्याम्ताकड। मोदेशो गेनायो लेंशा मपाइनुड। उत्पत्ती ६:५; अय्युब १४:४; भजन संग्रह १४:३; मत्ती १५:१९; रोमी ३:२३

22 रागी बाक्म सम्म शोकचा, खुम्चा नु रिक्चा तांडसीब। ग्यू पाइब, हुप्ब, हिंउद नु बर्खा दुम्ब। नाकदो नाक्त दुम्ब” दे लोत्र पवा बाक्त। येरमीया ३३:२०, २५

## 9

### परमप्रभुमी आसीक गेशो

1 मिनू परमप्रभुमी नोआह नु आ तौ आन कली आसीक गेमी बाक्त। मेकोमी “तमी तौ थिशा, सोशा बोशा शुश दुमीन। रागी प्रिदीने। उत्पत्ती १:२८

2 रागी डा जन्तु नेल्ल, सरीडम बेरब चिक्ब, खपीम ग्रेशा गाक्ब साइक्च जन्तु नु समुन्द्र डा डांड नेल्ल, इन कली तशा, हिंचा माल्नीम। मेको आन कली इन गुडमी गेता।

3 डोंइती इन कली गिगी खाइ ब्वचा गेता। मुल गो ब्रोइशा बाक्ब जन्तु नेल्ल इन कली ब्वचा गेतन्नी। उत्पत्ती १:२९; कलस्सी २:१६

4 क्योरशा हुश मचुइक्थु चहिं मब्वने। मारदे हना हुशेमी ब्रोइतीक सोक्त बाक्ब।

5 मुरुमी मुर कली साइक्तु हना, जन्तुमी मुर कली साइक्तु हना, मेको यो साइक्चा पुंडसीब। मुरुमी आ लोकब साइक्तु हना, मेको यो साइक्चा पुंडसीब। लेवी ३:१७; लेवी १७:१०-१४; ब्यवस्था १२:२३

6 सु सुमी मुर साइशा हुश जारबा, मेको यो मोपान साइशा, हुश जारचा पुंडसीब। मारदे हना गो मुर कली आं खोदेशो पा सेल्ला। प्रस्थान २१:१२; लेवी २४:१७; गन्ती ३५:३३; मत्ती २६:५२; रोमी १३:४; प्रकाश १३:१०

7 गे रागीम सोशा बोशा शुश दुमीने” दे परमप्रभुमी नोआह कली देंमाक्त।

### परमप्रभुमी कबल पशो

8 मिनू नोले परमप्रभुमी नोआह नु आ तौ आन कली

9 “नेनीन, गे नु इन नोले डा चच युइ नु आं कबल पाइनुड। उत्पत्ती ६:१८

10 डोंगामी ब्रोइशा बाक्ब चिक्ब, बी ब्यफ, रागी डा जन्तु गे नु डोंगा रे यूशो नेल्ल नु आं कबल पाइनुड। होसे २:२०

11 गो मार कबल पाइनुड देशा हना, ब्रोइशा बाक्ब नेल्ल आन कली ब्वाक्कुम मसाइक्नुड। रागी बिग्रेचा कली गेनायो ब्वाक्कु मबारपाइक्नुड” देंमाक्त।

12 मिनू परमप्रभुमी “गे नु गे नु ब्रोइशा बाक्ब नेल्ल इन कली आं कबल पतीके चिनु का गेनुड। मेको इन नोले डा पाला नेल्ल आन कली यो बाक्ब।

13 गो गोस्सुमी आं वाक्श वोइक्नुड। मेको गो रागी नु कबल पशो आ चिनु बाक्ब।

14 मिनू गो रागी तारी गोस्स सोइक्तुनु, मेको गोस्सुमी आं वाक्श तांडसीब।

15 मिनू गो गे नु मारेइ मारेइ ब्रोइशा बाक्ब नु कबल पाता, दे मिम्नुड। गो गेनायो ब्रोइशा बाक्ब नेल्ल आन कली ब्वाक्कुमी मसाइक्नुडमी। यसैया ५४:७-१०

16 मेको वाक्श गोस्सुम बाक्मेनु, गो मेको कली ताइनुड। मिनू गो रागीम बाक्ब मुर नु ब्रोइशा बाक्ब नेल्ल नु गेना हना यो लीब कबल पाता, दे मिम्नुड” देंमाक्त।

17 मिनू परमप्रभुमी नोआह कली “मेको वाक्श कबल आ चिनु बाक्ब। गो गे नु रागीम ब्रोइशा बाक्ब नेल्ल नु कबल पाता” देंमाक्त।

18 डोंगा रे गूशो नोआह आ तौपुकी शेम, हाम नु यफेथ बाक्मा बाक्त। हाम चहिं कनान आ आफ बाक्माक्त। उत्पत्ती ५:३२

19 मेको सांफा नोआह आ तौ बाक्मा बाक्त। मेको रे रागी नेल्ल ब्रीमा बाक्त।

नोआहम अडगुर रू सेल्शो

20 मिनु नोआह रूमी गेय पाइब दुग्शा, अडगुर रू सेला बाक्त। मेको नेल्ल क्येडा डोंइती अडगुर खुम्ब मुर दुग्माक्त।

21 मिनु अडगुर शांबु तूशा दुक्शा, आ ताम्बुमी शिन्ना इग्माक्त।

22 मिनु कनान आ आफ हाममी आ आफ शिन्ना तशा, लाडगामी बाक्शो आ लोकब आस कली देमाक्त। प्रस्थान २०:१२; हितोपदेस ३०:१७

23 मेको नेंशा, शेम नु यफेथम वा का सुर सुरम ग्याइश्शा लाप्शा, नोले रे ग्रेना ग्रेन लशा, आस आफ आ ताम्बु ओव्रसा बाक्त। मिनु आस आफ आ भेत्रे रां सुम्से बाक्त। नोले रे ग्रेशा, आस आफ आ शिन्ना रां मताम्से बाक्त।

24 मिनु नोले नोआह आ दुक्शो रे सेंसे बाक्त। आ चचमी आ कली मार पवा, नेल्ल तुडक्ता बाक्त।

25 मिनु नोआहमी “कनान सराप रल। आ लोकब आस नेल्ल क्येडा आइक्च वाइल दुग्ल” दे सराप पवा बाक्त।

26 मिनु मेकोमी लेंशा “परमप्रभु, शेम आ परमप्रभु यावे ठेयब बाक्ब। कनान मेको आ नेल्ल क्येडा आइक्च वाइल दुग्ल” दे शेम कली आसीक गेवा बाक्त।

27 मिनु लेंशा “परमप्रभुमी यफेथ कली ‘सोशा बोशा शुश दुग्पदल। मेको शेम आ ताम्बुम बाक्चा तवल। कनान चहिं मेको आ वाइल दुग्ल’ ” दे लोत्र पवा बाक्त।

28 मिनु ठेयब ब्वाक्कु बारशा नोले, नोआह सहे सां ५० बर्स ब्रोंइमाक्त।

29 मिनु नोआह नेल्ल पा ९ सहे ५० बर्स ब्रोंइशा बेक्माक्त।

## 10

रागी नेल्ल डा मुर

१इतिहास १:५-२३

1 ब्वाक्कु बारम नोले नोआह आ तौपुकी शेम, हाम नु यफेथमी तौपुकी थीमा बाक्त। नोआह आ तौ आन चच युइ सु सु बाक्मा बाक्त देंशा हना,

यफेथ आ चच युइ

2 यफेथ आ तौ गोमेर, मागोग, मादै, यावान, तूबल, मेशेक नु तिरास बाक्मा बाक्त। इजीकीएल २७:१३-२२; इजीकीएल ३८:२; इजीकीएल ३९:१,६

3 गोमेर आ तौपुकी अश्केनज, रीफत नु तोगारमाह बाक्मा बाक्त।

4 यावान आ तौपुकी एलीशाह, किक्तीम, टारशीश नु दोदानीम बाक्मा बाक्त।

5 मेको मुरपुकी रे समुन्द्र आ नेक्था बाक्ब जरमेशो बाक्मा बाक्त। मेकोपुकी यफेथ आ चच युइ बाक्मा बाक्त। मेकोपुकी आंम रागीम बाक्शो बाक्मा बाक्त। मिनु आंम रागी रागीमी, आंम खिं खिं डा मुरुमी आंम लोत्र ब्वाक्मा बाक्त।

हाम आ चच युइ

6 हाम आ तौपुकी कूश, इजीप्त, पूत नु कनान बाक्मा बाक्त।

7 कूश आ तौपुकी शेबा, हवीलाह, साब्ताह, रामाह नु साब्तेका बाक्मा बाक्त। रामाह आ तौ निक्शी शेबा नु देदान बाक्सा बाक्त।

निम्नोद सक्ति पाइश्शो दुग्शो

8 मिनु कूशमी निम्नोद यो थिमाक्त। मेको बोल्यो नु सक्ति पाइश्शो मुर दुग्माक्त।

9 मेको परमप्रभु यावे आ डोंइती सक्ति पाइश्शो सिखारी बाक्माक्त। मोपतीके मुरुमी बोल्यो मुर का तशा “परमप्रभु यावे आ डोंइती निम्रोद खोदेशो सक्ति पाइश्शो सिखारी बाक्बाक्त” दे देंतीके देंमा बाक्त। मत्ती ५:५

10 मिनु आ डोंइती डा राज्य बेबीलोन बाक्माक्त। अरु एरेक नु अक्कद सहर बाक्मा बाक्त। मेको नेल्ल शिनार रागीम बाक्बाक्मा बाक्त।

11 निम्रोद मेको रागी रे अस्सुर जाक्शा, निनवे, रेहोबोथ-इर नु कालाह सहर सेला बाक्त।

12 निनवे नु कालाह सहर आस दातेमी रेसेन सहर सेला बाक्त। मेको ठेयब सहर बाक्माक्त।

13 इजीप्त, लूदीम, अनामीम, लेहाबीम, नफ्तुहीम,

14 पथुसीम, कस्लुहीम नु काफतोरीम आन आफ दुम्माक्त। मेकोपुकी रे पलिस्ती यूमा बाक्त।

15 मिनु कनानमी आ डोंइती डा तौ सीदोन नु नोले हेथ थिमाक्त।

16 मिनु नोले यबुसी, एमोरी, गिरगाशी,

17 हिब्बी, अरकी, सिनी,

18 अरवादी, सेमारी नु हमार्थी थिमाक्त। नोले कनान रागी डा मुर शुश दुम्मा बाक्त।

19 कनान डा मुर आन रागी सीदोन रे गेरार गे नु गाजा सम्म दुम्माक्त। सोदोम नु गोमोरार गे अदमाह, सेबोयीम नु लाशा सहर सम्म दुम्माक्त।

20 मिनु हाम आ चच युड आन खिं खिं डा मुर आन लोव, आन रू नु आन रागी बाक्मा बाक्त।

शेम आ चच युड

21 शेम यफेथ आ लोकबमी यो तौपुकी थिमाक्त। शेम एबेर आ आल आन किकी पिपी बाक्माक्त।

उत्पत्ती ११:१०

22 शेम आ तौ चच युड सु बाक्मा बाक्त देशा हना, एलाम, अरशुर, अरपक्शाद, लूद नु अराम बाक्मा बाक्त।

23 अराम आ तौपुकी ऊज, हुल, गेथेर नु माश बाक्मा बाक्त। उत्पत्ती २२:२१

24 मिनु अरपक्शाद शेलाह आ आफ दुम्माक्त। शेलाह एबेर आ आफ दुम्माक्त।

25 एबेरमी तौ निक्शी थिमाक्त। का आ नें पेलेग बाक्माक्त। मारदे हना मेना रागी योक्शो बाक्माक्त। पेलेग नें आ अर्थ भाग का बाक्माक्त। अर्को आ नें योक्तन बाक्माक्त। उत्पत्ती ११:८-९; ब्यवस्था ३२:८

26 मिनु योक्तनमी अल्मोदाद, शेलेफ, हासार-मावेथ येराह

27 हदोराम, उजाल, दिकलाह,

28 ओबाल, अबीमा-एल, शेबा,

29 ओफीर, हवीलाह नु योबाब आन आफ दुम्माक्त। मेको नेल्ल योक्तन आ तौ बाक्मा बाक्त।

30 मिनु आन बाक्तीक मेशा रे पूर्व डा सेफार माइश्शो पहाड सम्म दुम्माक्त।

31 मिनु शेम आ चच युड आन खिं खिं डा मुर आन लोव, आन रू नु आन रागी बाक्मा बाक्त।

32 मिनु मेको नोआह आ तौ नेल्ल आन खिं खिं डा मुर, आन चच युड, आन आन रागी बाक्मा बाक्त। ब्वाक्कु बारशा नोले मेकोपुकी रे रागी नेल्ल ब्रीमा बाक्त।

## 11

बाबेल सहर डा लाइश्शो खिं

1 डोंइती रागी नेल्ल डा मुर लोव का ब्वाक्बाक्मा बाक्त।

2 मुरपुकी पूर्व गे लना लन बाक्मानु, शिनार नें पाइश्शो रागीम ठेयब दिंम का थित्मे बाक्त। मिनु मेकेर खिं सेल्शा बाक्मा बाक्त।

3 मिनु मुरपुकीमी “लो, इंटा सेल्य। मिनु मीमी रिम्शो पा चोय” देंमा बाक्त। मिनु फुल्लु आ पा डा इंटा नु हिलो आ पा डा अल्कत्रा गुंडदमे बाक्त।

4 मिनु नोले मेकोपुकीमी “गोपुकी इ कली सहर का सेल्सीय, ठेयब लाइश्शो सरीड थिचा डा खिं का सेल्य। इ नें ठेयब सेल्सीशा, इ मुरपुकी रागी नेल्लेमी मब्राथु बाक्य” देंमुमा बाक्त।

5 मिनु परमप्रभु यावे मेको मुरपुकीमी सेल्शो सहर नु सरीड थिचशो ठेयब लाइशशो खिं कोवथ यिमाक्त। उत्पत्ती १८:२१; भजन संग्रह १४:२

6 मिनु परमप्रभु यावेमी “लो, मेको नेल्ल थुं का डा मुर नमी। मेको नेल्ल लोत्र का ब्वाक्नीम। मेको आन नक गोशो गेय ला बाक्ब। मार मार मिम्मे, मेको नेल्ल पने चाप्नीम। प्रेरित २:१-११

7 मुल उड लय। मेको आन पशो लोत्र खालशा पपाइय्य। मिनु कामी अर्को आ लोत्र मरुबल” देंमाक्त।

8 मोपा परमप्रभु यावेमी मुर आन कली नेल्ल रागीम फ्रादीमी बाक्त। मिनु मेकोपुकीमी सहर सेल्चा प्रोन्मे बाक्त। ब्यवस्था ३२:८; लूका १:५१

9 मोपतीके मेको सहर आ नें बाबेल वोदमे बाक्त। मारदे हना मेकेर रे परमप्रभु यावेमी रागी नेल्ल डा मुर आन लोत्र खाल्दा बाक्त। मिनु परमप्रभु यावेमी मोपा मुर नेल्ल आन कली फ्रादीमी बाक्त।

### शेम आ चच युड

10 शेम आ आ चच युड सु सु बाक्मा बाक्त देंशा हना, शेम सहे का बर्स दुम्मेनु, अरपक्शाद आ आफ दुम्माक्त। मेना ब्वाक्कु बारशा सोव्रशो बर्स निक्शी दुम्शो बाक्माक्त। ?इतिहास १:२४-२७; लूका ३:३४-३६; उत्पत्ती १०:२१-२२

11 मिनु शेम अरपक्शाद थिशा नोले ५ सहे बर्स ब्रोंडमाक्त। अरु तमी तौ यो थिमाक्त।

12 मिनु अरपक्शाद ३५ बर्स दुम्मेनु, शेलाह आ आफ दुम्माक्त।।

13 मिनु शेलाह थिशा नोले ४ सहे बर्स सां ब्रोंडमाक्त। अरु तमी तौ यो थिमाक्त।

14 मिनु शेलाह ३० बर्स दुम्मेनु, एबेर थिमाक्त।

15 मिनु शेलाह एबेर थिशा नोले ४ सहे बर्स सां ब्रोंडमाक्त। अरु तमी तौ यो थिमाक्त।

16 मिनु एबेर ३४ बर्स दुम्मेनु, पेलेग आ आफ दुम्माक्त।

17 मिनु एबेर पेलेग थिशा नोले ४ सहे ३० बर्स ब्रोंडमाक्त। अरु तमी तौ यो थिमाक्त।

18 मिनु पेलेग ३० बर्स दुम्मेनु, रेऊ आ आफ दुम्माक्त।

19 मिनु पेलेग रेऊ थिशा नोले सहे निक्शी ९ बर्स ब्रोंडमाक्त। अरु तमी तौ यो थिमाक्त।

20 मिनु रेऊ ३२ बर्स दुम्मेनु, सेरूग आ आफ दुम्माक्त।

21 मिनु रेऊ सेरूग थिशा नोले, सहे निक्शी ७ बर्स ब्रोंडमाक्त। अरु तमी तौ यो थिमाक्त।

22 मिनु सेरूग ३० बर्स दुम्मेनु, नाहोर आ आफ दुम्माक्त।

23 मिनु सेरूग नाहोर थिशा नोले सहे निक्शी बर्स ब्रोंडमाक्त। अरु तमी तौ यो थिमाक्त।

24 मिनु नाहोर २९ बर्स दुम्मेनु, तेराह आ आफ दुम्माक्त।

25 मिनु नाहोर तेराह थिशा नोले सहे का १९ बर्स ब्रोंडमाक्त। अरु तमी तौ यो थिमाक्त।

26 मिनु तेराह ७० बर्स दुम्मेनु, अब्राम, नाहोर नु हारान आन आफ दुम्माक्त।

### तेराह आ चच युड

27 तेराह आ चच युड सु सु बाक्मा बाक्त देंशा हना, तेराह अब्राम, नाहोर नु हारान आन आफ दुम्माक्त। हारानमी लोत थिमाक्त।

28 हारान चहिं आ आफ तेराह क्येडा डोंडती आ जरमेशो कल्दी डा ऊर सहरमी बेक्माक्त।

29 मिनु अब्राम नु नाहोर निम्फामी ग्युबे पाम्से बाक्त। अब्राम आ मीश आ नें साराइ बाक्माक्त। नाहोर आ मीश आ नें मिल्का बाक्माक्त। मिल्का हारान आ तमी बाक्माक्त। हारान मिल्का नु यिस्का आस आफ बाक्माक्त। उत्पत्ती २२:२०

30 साराइ आल मथीब बाक्माक्त।

31 मिनु तेराहमी आ तौ अब्राम, आ चच लोत, हारान आ तौ, नु आ चाइमी, अब्राम आ मीश साराइ आन कली लाइशशा, कल्दी रागी डा ऊर रे कनान रागी लचा गोव्रमे बाक्त। मिनु हारान माइशशो सहर जाक्दीशशा बाक्मा बाक्त। यहोसु २४:२; नेहेम्याह ९:७

32 तेराह सहे निक्शी ५ बर्स दुम्शा, हारान सहरम बेक्माक्त।

## 12

परमप्रभुमी अब्राम नु लोत्र पशो

1 मिनु परमप्रभु यावेमी अब्राम कली “इ रागी, इ खिं खिं डा मुर नु इ आफ आ खिं रे लावो। तेको रागी लचा माल्नेवे, गो इ कली कौंइनन। गन्ती २३:९; प्रेरित ७:३; हिब्रू ११:८

2 गो इ रे पा ठेयब जात डा मुर सेल्लुडमी। गो इ कली आसीक गेनन। इ नें ठेयब सेल्लुड। गे अर्को आन कली आसीक दुम्नेवे। उत्पत्ती २४:१, ३५; भजन संग्रह ७२:१७

3 सुमी इ कली आसीक गेवा, गो मेको कली आसीक गेनुड। सुम इ कली सराप पाइबा, गो मेको कली सराप पाइनुड। इ पर्वम रागी डा मुर नेल्ल आसीक ताइनीम” दैमाक्त। उत्पत्ती १८:१८; उत्पत्ती २२:१८; उत्पत्ती २६:४; उत्पत्ती २८:१४; प्रस्थान २३:२२; प्रेरित ३:२५; गलाती ३:८

अब्राममी परमप्रभु कली टिशो

4 मिनु अब्राम परमप्रभु यावे आ लोत्र नेंशा, हारान सहर रे गाक्माक्त। लोत यो अब्राम नु गाक्माक्त। हारान सहर रे गाक्मेनु, अब्राम ७५ बर्स, दुम्शो बाक्माक्त।

5 अब्राममी आ मीश साराइ, आ लोक्ब आ तौ, लोत, आन मारेइ मारेइ, हारान सहरमी ग्याप्शो वाइलीम वाइल आन कली यो लदा बाक्त। मिनु मेको नेल्ल कनान रागी लचा गोत्रमे बाक्त। मिनु लशा कनान रागी जाक्दीम्मा बाक्त।

परमप्रभुमी अब्राम कली रागी कौंइशो

6 मिनु अब्राम कनान रागी जाक्दीश्शा, शेकेम सहर आ नेक्था मोरेह माइश्शो मुर आ रवा आ नेक्था जाक्दीम्माक्त। मेना कनान डा मुरपुकी रागीम बाक्शो बाक्मा बाक्त। उत्पत्ती ३५:४; यहोसु २४:२५-२६

7 मेकेर जाक्दीम्मेनु, परमप्रभु यावे अब्राम आ डौंइती गूशा, मेको कली “एको रागी इ चच युइ आन कली गेनुड” दे लोत्र गेवा बाक्त। मिनु अब्राममी “गो परमप्रभु यावे कली ताता” दे चढ्ढेतीक का सेला बाक्त। उत्पत्ती १३:१५; उत्पत्ती १५:१८; उत्पत्ती १७:८; उत्पत्ती ३५:१२; प्रस्थान ६:४,८; प्रस्थान ३२:१३; यहोसु २१:४३; प्रेरित ७:५

8 मेकेर रे लशा, बेथेल सहर आ पूर्व गे डा डांडामी आ ताम्बु याक्शा कीडा बाक्त। बेथेल सहर पच्छिम गे नु ऐ सहर पूर्व गे बाक्शा, मेकेर यो परमप्रभु यावे कली चढ्ढेतीक का सेल्शा, परमप्रभु यावे कली लोत्र पा ठेयब सेला बाक्त। उत्पत्ती ४:२६

अब्राम इजीप्त रागीम लशो

उत्पत्ती २०:१-१८; उत्पत्ती २६:७-११

9 मेकेर रे लशा, नेगोब माइश्शो रागी आ दक्खिन गे लमाक्त।

10 मिनु मेको रागीम अन्काल बाक्माक्त। मोपतीके मेकेर रे लशा, इजीप्त रागीम बाक्थ, लमाक्त। मारदे हना ठेयब अन्काल बाक्माक्त।

11 मिनु इजीप्त ओवचा क्येडा डौंइती अब्राममी आ मीश साराइ कली “नेनो, गे दारशो मीश मुर बाक्नेवे।

12 मिनु इजीप्त डा मुरुम इ कली तशा ‘मेको आ मीश बाक्ब’ दे आं कली साइक्नीम। इ कली चहिं ब्रौंइचा गेनीम।

13 मोपतीके ‘आ समी नड’ देनो। मिनु इ मो देशो आ पर्वम गो साइक्चा मपुंडसीनुड, ब्रौंइचा ताइनुड” दे आ मीश कली मदा बाक्त।

साराइ कली लाइश्शो

14 मिनु अब्राम इजीप्त रागीम जाक्दीम्मेनु, इजीप्त डा मुरपुकीमी साराइ आ पर्वम “मेरे मीश मुर थम दारशो बाक्ब” दैमुमा बाक्त।

15 मिनु फाराओ माइश्शो पिप आ मुरपुकीमी साराइ कली तशा “थम दारशो मीश मुर का ताइतक” दे मदमे बाक्त। मिनु साराइ कली फाराओ आ खिं लदमे बाक्त।

16 मिनू साराइ आ पर्वम अब्राम भेडा, ब्यफ, गधा, वाइलीम वाइल नु दलओठ मारेइ मारेइ गेचा पुंडसे बाक्त।

17 तन्न परमप्रभु यावेमी फाराओ नु आ खिं डा मुर आन कली अब्राम आ मीश साराइ आ पर्वम ठेयब श्येत गेवा बाक्त।

18 मिनू फाराओमी अब्राम कली ब्रेशशा “गे आं कली मार पवी? मारदे ‘इ मीश बाक्ब’ मदेने?

19 मारदे ‘आं समी बाक्ब’ देने? गो हेरा आं मीश सेल्ला। मुल इ मीश लतो। एकेर रे लावो” दे मदा बाक्त।

20 फाराओमी मेको लोत्र आ मुर आन कली माइशशा, अब्राम, आ मीश नु आ नु बाक्ब नेल्ल आन कली मेकेर रे सोइक्तमे बाक्त।

## 13

### अब्राम नु लोत ब्राशो

1 मिनू अब्राम, आ मीश, आ मारेइ मारेइ नेल्ल नु लोत यो लाइशशा इजीप्त रे नेगेब रागी लमाक्त।

2 अब्राम शुश बी ब्यफ क्यारश भेडा नु सुन चांदी पाइशशो मुर बाक्माक्त।

3 मिनू दक्खिन डा नेगेब रे लशा, बेथेल सहर जाकदीम्माक्त। मेकेर बेथेल सहर नु ऐ सहर आस दातेमी डोंइती आ ताम्बु कीतीकेम जाकदीम्माक्त।

4 मिनू इजीप्त लचा क्येडा डोंइती मेकेर सेल्लो चढ़ेतीकेमी लेशशा जाकदीशशा, परमप्रभु यावे कली लोत्र पा, ठेयब सेला बाक्त। उत्पत्ती १२:८

5 मिनू लोत के यो क्यारश भेडा, बी ब्यफ नु ताम्बु शुश बाक्माक्त।

6 मिनू अब्राम नु लोत आस मारेइ मारेइ शुश दुम्तीके मेको निक्शी काथा बाक्ने मचाप्से बाक्त।

7 मिनू अब्राम आ गोठलापुकी लोत आ गोठलापुकी नु जीमे बाक्त। मेना मेको रागीम कनानी नु परिज्जीपुकी बाक्मा बाक्त।

8 मिनू अब्राममी लोत कली “गो पोबु नस। जिचा मदुम्ब। इ गोठलापुकी नु आं गोठलापुकी यो जिचा मदुम।

9 गे नु गो ब्राचा रिम्शो दुम्ब। एको रागी नेल्ल इ डोंइती बाक्ब। गे पेरा गे लते हना, गो ग्युरा गे लाइनुड। गे ग्युरा गे लते हना, गो पेरा गे लाइनुड” देमाक्त।

10 मिनू लोतमी यर्दन खोला आ नेक्था ब्वाक्कु बाक्शो रिम्शो दिंम तवा बाक्त। मेको परमप्रभु यावे आ रू नु इजीप्त रागी खोदेशो दारशो तांडसे बाक्त। सोआर सहर सम्म मोदेशो दारशो तांडसे बाक्त। परमप्रभु यावेम सोदोम नु गोमोररा सहर मीम जेप्पाइक्चा क्येडा डोंइती मेकेर थाम्पा दारशो बाक्माक्त। उत्पत्ती २:८-१०

11 मिनू लोत यर्दन खोला डा दिंम योत्रशा, पूर्व गे लमाक्त। मोपा लोत नु अब्राम ब्रासा बाक्त।

12 मिनू अब्राम कनान रागीम बाक्शो बाक्माक्त। लोत चहिं यर्दन खोला डा दिंमम बाक्शो सहर आन नेक्था बाक्शा, आ ताम्बु याक्ना याक्न सोदोम सहर सम्म जाकदीम्माक्त।

13 सोदोम सहर डा मुरपुकी थम मरिम्शो बाक्मा बाक्त। मेकोपुकीमी परमप्रभु यावे आ डोंइती शुश मरिम्शो पामे बाक्त। उत्पत्ती १८:२०; उत्पत्ती १९:४-९

### परमप्रभुम अब्राम कली लोत्र गेशो

14 लोत नु अब्राम ब्रासा नोले परमप्रभु यावेमी अब्राम कली “इ बाक्तीके रे पूर्व, पच्छिम, उत्तर, दक्खिन गे कोत्रडो।

15 गे तेको तेको रागी ताइनेवे, मेकोन इ कली नु इ चच युइ आन कली गेना हना यो कली गेनुड। उत्पत्ती १२:७

16 गो इ चच युइ खप डा फुरक खोदेशो पा शुश सेल्लुड। मुरुम फुरक हिकने चाप्तेक्म हना ला, इ चच युइ आन कली यो हिकने चाप्नीम। तन्न मचाप्नीम। उत्पत्ती २८:१४; गन्ती २३:१०; १राजा ४:२०



17 बोकको, रागी नेल्ल हिरशा लावो। मेको नेल्ल इ कली गेनन” दे परमप्रभु यावेमी लोत्र गेवा बाक्त।

18 मिनू अब्राममी आ ताम्बु याक्शा, हेब्रोन रागी डा माम्रे माइश्शो ब्वाकीम कीडा बाक्त। मिनू मेकेर परमप्रभु यावे कली चढ़ेतीक का सेला बाक्त। उत्पत्ती १४:१३-२४

## 14

अब्राममी लोत कली प्रोइशो

1 मिनू शिनार डा पिप अम्राफेल, एल्लासार डा पिप अरयोक, एलाम डा पिप केदोर-लाओमेर नु गोयीम रागी डा पिप तिदालम सासन पामे ना, यहोसु १२:२३

2 सोदोम डा पिप बेरा, गोमोररा डा पिप बिरशा, अदमाह डा पिप शिनाब नु सेबोयीम डा पिप शेमेबेर, बेला सहर डा पिप नु लडाइ पामे बाक्त। बेला सहर कली सोआर यो देनीम। उत्पत्ती १९:२४

3 मेको नेल्ल सिददीम दिममी लडाइ पथ खुम्सीशो बाक्मा बाक्त।

4 मारदे हना मेकोपुकीमी लडाइ का बुशा नोले, १२ बर्स सम्म श्येत जशा, पिप केदोर-लाओमेर कली मार मार गेचा माल्मा बाक्त। मोपतीके मेकोपुकीम १३ बर्समी “मगेय, लडाइ पय” दे सल्ला पामे बाक्त।

5 मिनू १४ बर्समी पिप केदोर-लाओमेर नु मेको आ वारच पिपपुकी अशतारोथ-कारनाइमम बाक्ब रेफाइमपुकी, हामम बाक्ब जूजीमपुकी, शावेह-किरयथ-थाइम बाक्ब एमीमपुकी, उत्पत्ती ३६:२०-३०

6 सेडर पहाडम बाक्ब होरी आ मुर नेल्ल आन कली एल-पारान मुर बाक्तीक आ नेक्था सम्म फ्रूमे बाक्त।

7 मेको ग्राब पिप आन लां लेशशा, एन-मिशपात जाक्शा, हासासोन-तामारम बाक्ब अमालेकी नु एमोरी आन कली फ्रूमे बाक्त। एन-मिशपात कली कादेश यो देनीम।

8 मेना सोदोम डा पिप, गोमोररा डा पिप, अदमाह डा पिप, सेबोयीम डा पिप नु बेला डा पिप सल्ला पशा, बेला सहर कली सोआर यो देनीम

9 सिददीम दिममी एलाम डा पिप केदोर-लाओमेर गोयीम रागी डा पिप तिदाल, शिनार डा पिप अम्राफेल नु एल्लासार डा पिप अरयोक नु लडाइ पथ जाक्मा बाक्त। ४ जना पिपपुकीम ५ जना पिप नु लडाइ पशो बाक्मा बाक्त।

10 मिनू सिददीम डा दिममी अल्कत्रा खाल्टा शुश बाक्मा बाक्त। मिनू सोदोम नु गोमोररा डा पिप प्रोक्शा, खाल्टा आगा दोक्सा बाक्त। लीशो मुरपुकी चहिं पहाड गे प्रोक्मा बाक्त।

11 मिनू केदोर-लाओमेर नु आ हुलमी सोदोम नु गोमोररा सहर डा मुर नु आन मार मार नेल्ल रोइश्शा लदमे बाक्त।

12 मिनू मेकोपुकीमी सोदोम सहरम बाक्शो अब्राम आ लोकब आ तौ लोत नु आ मारेइ मारेइ नेल्ल यो लाइश्शा लमा बाक्त। उत्पत्ती १३:१०-१२

13 मिनू पहाडम प्रोक्शो मुर कामी हिब्रू अब्राम कली मेको लोत्र शेंदा बाक्त। अब्राम चहिं एमोरी माम्रे आ ब्वाकीम बाक्शो बाक्माक्त। माम्रे एश्कोल नु आनेर वोबु बाक्सा बाक्त। मेको अब्राम कली वारच पाइब बाक्मा बाक्त।

14 मिनू अब्राममी आ लोकब आ तौ ग्याइश्शो नेशा, आ खिंमी जरमेशो सहे सां १८ जना लडाइ पचा कली शेंसीशो मुर कली या गेशा, ठीक पवा बाक्त। मिनू मेकोपुकीमी रोइक्ब आन कली दान सहर सम्म खेदा पामे बाक्त। यहोसु १९:४७; न्यायाधीस १८:२९

15 नाक्दोमी अब्राममी आ मुर आन कली हुल निकशी पशा, रोइक्बपुकी नु लडाइ पशा ग्राशा, होबाह सम्म खेदा पामे बाक्त। होबाह दमस्कस सहर आ उत्तर गे बाक्ब।

16 मोदेंशो पा अब्राममी सोदोम नु गोमोररा रे रोइश्शा मारेइ मारेइ नु आ लोकब आ तौ लोत आ मारेइ मारेइ नेल्ल, मीश मुर नेल्ल नु मेको निकशी सहर डा मुर नेल्ल लेप्पदा बाक्त।

मेल्कीसेदेक नु अब्राम

17 मोपा अब्राम केदोर-लाओमेर नु आ वारच पिपपुकी नु लडाइ पशा ग्राशा, लेशशा नोले सोदोम डा पिप शावेह माइशशो दिंम जाक्शा, अब्राम कली युमथ जाक्माक्त। शावेह माइशशो दिंम कली पिप आन दिंम यो देंनीम। हिब्रू ७:१-४

18 मिनु सालेम डा पिप मेल्लीसेदेकम अब्राम नु आ मुर आन कली शोब्ले नु अडगुर शांबु चाक्गा बाक्त। मेको नेल्ल क्येडा ठेयब परमप्रभु कली चढ़ेब बाक्माक्त। भजन संग्रह ११०:४; भजन संग्रह ७६:३

19 मिनु मेकोमी अब्राम कली आसीक गेशा “सरीड नु रागी सेल्ब नेल्ल क्येडा ठेयब परमप्रभु आ आसीक इ कली रल।

20 मिनु नेल्ल क्येडा ठेयब परमप्रभु मान ताइब बाक्ब। मारदे हना इ जोरी सत्रु इ गुडमी गेशा, इ कली ग्रापाइक्तु” दे ठेयब सेला बाक्त। मिनु अब्राममी नेल्ल थोव्रक १० भाग डा भाग का मेल्लीसेदेक कली गेवा बाक्त। उत्पत्ती २८:२२; लेवी २७:३०-३२

21 मिनु सोदोम डा पिपमी अब्राम कली “मुर ला गेयी। अरु मार मार इन कली दुम्ल” देंमाक्त।

22 मिनु अब्राममी सोदोम डा पिप कली “गो आं गुड परमप्रभु यावे, नेल्ल क्येडा ठेयब सरीड नु रागी सेल्ब परमप्रभु गे पोक्शा कसम जाता।

23 गो इन के मारेइ मलाइक्नुड। श्येले का, जुत्ता आ डोरी का यो मलाइक्नुड। मिनु गेमी ‘गो अब्राम कली शुश शोंप पाइशशो सेल्ला’ दे गेनायो देंने मचाप्नीनी।

24 आं गेय पाइब आन जशो चहिं लाइक्नुड। गो नु गाक्ब आनेर, एश्कोल नु माप्रे आन भाग चहिं लाइक्चा गेन” देंमाक्त।

## 15

अब्राम आ आल  
उत्पत्ती १७:-

1 मिनु नोले परमप्रभु यावेमी अब्राम कली डोमु खोदेशो पा कोंडतीक कोंडदा बाक्त। मिनु मेकोमी अब्राम आ नें थिशा “अब्राम महिनो। गो इ कली कोव्रनन। शुश आसीक गेनन” देंमाक्त। गन्ती २४:४,१६; भजन संग्रह ३:४

2 तन्न अब्राममी “आं कली मार गेनीनी डा? आं के आल मबाक्नीम। आ अडस ताइब दमस्कस डा एलीएजर दुम्ब।

3 गे आं कली तमी तौ मगेयीनी। मुल आं खिम जरमेशो वाइलम आं अडस ताइब दुम्त” देंमाक्त।

4 मिनु परमप्रभु यावेमी लेशा “मेको मुरुम इ अडस मताइब। इ आंम रां डा इ तौमी इ अडस ताइब” देंमाक्त।

5 मिनु मेकोमी अब्राम कली ताम्बु रे गुंडशा “सरीड गे कोव्रडो, सोरुल आन कली हिक्को। मेको हिक्के चाप्नेवे? गिश बाक्मा, इ चच युइ यो मिश दुम्नीम” देंमाक्त। उत्पत्ती २२:१७; प्रस्थान ३२:१३; ब्यवस्था १:१०; हिब्रू ११:१२

6 मिनु अब्राममी परमप्रभु यावे आ लोव्र थमा सुदा बाक्त। मिनु परमप्रभु यावेमी अब्राममी थमा सुइशशो तशा “ठीक पाइब मुर का बाक्त” दे तुइक्ता बाक्त। रोमी ४:३-५; याकूब २:२३

7 मिनु लेशा अब्राम कली “गो परमप्रभु यावे नड। गो एको रागी इ कली गेचा कली कल्दी डा ऊर सहर रे गुंडताक्न” देंमाक्त। उत्पत्ती ११:३१; प्रस्थान ३:१४; यसेया ४५:५; यूहन्ना ८:२४-२९

8 मिनु अब्राममी “परमप्रभु, परमप्रभु यावे, आं के रागी दुम्ब, दे दोपा तुइक्नुडा डा?” दे हिल्लो पवा बाक्त।

9 मिनु मेकोमी “आं कली बर्स सां डा बी का, बर्स सां डा क्यारश का, बर्स सां डा सांड का, हुकुर का परवा आ चाइक्ब का चाक्ती” देंमाक्त।

10 मिनु अब्राममी मेको नेल्ल चाक्शा क्योरशा, फेके पा रिक्शा, फेके का एर गे, फेके का ओंथ गे पा चोदा बाक्त। हुकुर नु परवा चहिं फेके मसेला बाक्त, येरमीया ३४:१८-१९

11 मिनु ठेयब चिक्बपुकी मेको श्ये तशा, जुक्तमे बाक्त। तन्न अब्राममी “हाइ हाइ” दे ग्रीशा खेरमी बाक्त।

### परमप्रभुमी कबल पशो

12 मिनु नां रिक्चावानु, अब्राम मारेइ मतुइक्चा डा पा निन्द्रा पवा बाक्त। मिनु शुश हिंचा माल्शो आ एर ओंथ नेल्ल छिडछिड दुम्माक्त। उत्पत्ती २:२१; १सामुएल २६:१२; यसैया २९:१०

13 मिनु मेकोमी अब्राम कली “इ तौ चच युइ अर्को रागीमी अर्को रागी डा मुर दुम्नीम। मेकेर बाक्मानु, वाइलीम वाइल यो दुम्नीम। मेकेर ४ सहे बर्स सम्म श्येत जाइनीम। प्रस्थान १:१३; प्रस्थान १२:४०; प्रेरित ७:६

14 गो चहिं मेको आन बाक्शो रागी डा मुर आन कली निसाफ पा सजाइ गेनुड। मारदे हना इ मुर आन कली वाइलीम वाइल सेल्नीम। मिनु नोले इ मुरपुकीम मेको आन मारेइ मारेइ लाइश्शा, मेको रागी रे गूशा लाइनीम। प्रस्थान ३:२१-२२; प्रेरित ७:७

15 गे चहिं थुं नाइश्शा इ किकी पिपी आन बाक्तीक लाइनेवे। शुश बर्स दुम्शा बेक्नेवे। उत्पत्ती २५:७-८

16 इ मुरपुकी ४ पाला नोले ला एकेर लेशशा जाक्नीम। मारदे हना एमोरी आन मरिम्शो पशो मनुष्शो बाक्त” दे परमप्रभु यावेमी देंमाक्त। प्रेरित ७:७

17 मिनु नां रिक्शा, छिडछिड दुम्शा नोले मी ब्रशो चुप्लु का गूमाक्त। मिनु ब्रशो तोव्रशी का मेको श्ये आ एर ओंथ गाक्माक्त। प्रस्थान १९:१८

18 मेको नाक्ती परमप्रभु यावेमी अब्राम नु कबल पशा “मेको रागी इ चच युइ आन कली गेनुड। मेको इजीप्त डा ठेयब खोला रे युफ्रेटीस सम्म बाक्ब। उत्पत्ती १२:७; १राजा ८:६५; १राजा ५:१

19 मेकेर बाक्बपुकी केनी, केनीज्जी, कादमोनी,

20 हिंत्ती, परिज्जी, फाइम,

21 एमोरी, कनानी, गिरगाशी नु यबुसी आन रागी नेल्ल इ कली गेनुड” दे अब्राम कली लोव्र गेशा, कबल पवा बाक्त।

## 16

### हागार नु इश्माल

#### उत्पत्ती २१:९-२१

1 अब्राम आ मीश साराइ आल मथीब बाक्माक्त। मिनु साराइ नु इजीप्त डा वाइलीम का बाक्माक्त। मेको आ नें हागार बाक्माक्त।

2 मिनु साराइमी अब्राम कली “नेनीन, परमप्रभु यावेमी आं कली आल मगेयी। मोपतीके आं वाइलीम नु बाक्कीन। मोपा गो आल ताइनुडा, कौ?” देंमाक्त। मिनु अब्राममी आ मीशेमी मार देंमे, मेको पवा बाक्त। उत्पत्ती ३०:३,९

3 मिनु अब्राम कनान रागीम १० बर्स बाक्म नोले, आ मीश साराइमी आ इजीप्त डा वाइलीम हागार लाइश्शा, आ वोंइश कली गेवा बाक्त।

4 मिनु अब्राम हागार नु इम्माक्त। मिनु हागार कोव्रज कुरशो दुम्माक्त। मेको तुइश्शा, ठेयब लेशशो दुम्शा, आ होव्रपोक्म कली मटिवा बाक्त।

5 मिनु साराइमी अब्राम कली “आं कली मरिम्शो दुम्तीके इन कली दुम्ल। गो आं वाइलीम इन कली गेता। मुल आम कली कोव्रज कुरशो तशा, आं कली आइक्च सेल्ती। परमप्रभु यावेमी गे नु गो, इस दातेम निसाफ पवल” देंमाक्त।

6 मिनु अब्राममी “नेनो, इ वाइलीम इ गुइमी बाक्ब। मेको कली इ दाक्शो पावो” दे साराइ कली देंमाक्त। मिनु साराइमी हागार कली हुइक्तानु, मेको प्रोक्माक्त।

### हागार प्रोक्शो

7 मिनु परमप्रभु यावे आ स्वर्ग डा गेय पाइबमी हागार कली गोरशो रागी शुर लतीक लां डा ब्वाक्कु बुक्तीके आ नेक्था थिदा बाक्त। प्रस्थान १४:१९; प्रस्थान २३:२०; गन्ती २२:२२; १राजा १९:७; १राजा १९:७; २राजा १९:३५

8 मिनु मेकोमी “हागार, साराइ आ वाइलीम, ते लशा पिनी?” दे हिल्लो पवा बाक्त। मिनु हागारमी “आं होवपोक्म साराइ आ डोंइती रे प्रोक्ती” दे लोत्र लेत्ता बाक्त।

9 मिनु परमप्रभु यावे आ स्वर्ग डा गेय पाइबमी मेको कली “इ होवपोक्म आ खिं लेतो। मिनु मेको आ अरेशो टिशा बाक्को” देंमाक्त।

10 मिनु परमप्रभु यावे आ स्वर्ग डा गेय पाइबमी लेंशा “इ चच युइ आन कली शुश दुम्पाइक्नुड। इ मुरपुकी सुइमी हिकने मचाप्चा डा पा शुश दुम्नीम” देंमाक्त। उत्पत्ती १७:२०

11 मिनु परमप्रभु यावे आ स्वर्ग डा गेय पाइबमी लेंशा “नेनो, गे कोत्रज कुरशो बाक्नेवे। तौ का थीनेवे। मेको कली इश्माएल नें वोइक्चा माल्नेवे। मारदे हना परमप्रभु यावेमी इ श्येत ताप्तु। प्रस्थान २:२३; अय्युब ३४:२८; भजन संग्रह ९:१३; यसैया ४१:१७; याकूब ५:४

12 इ तौ जीब दुम्ब। मुर नेल्ल नु जीब। मुरपुकी यो मेको नु जीनीम। मेको आ लोकबपुकी नु यो जीब दुम्ब” देंमाक्त। उत्पत्ती २५:१८

13 मिनु हागारमी आ नु लोत्र पाइब परमप्रभु यावे कली “गे आं कली ताइब परमप्रभु ननी। गो थमा पा आं कली ताइब कली ताता” देंमाक्त। उत्पत्ती २२:१४; प्रस्थान ३:७; २राजा १३:४

14 मोपतीके मेको ब्वाक्कु बुक्तीक आ नें बेयर-लहाइ-रोइ वोदमे बाक्त। मेको कादेश नु बेरेद आस दातेम बाक्ब। उत्पत्ती २४:६२; उत्पत्ती २५:११

15 मिनु हागारम अब्राम के तौ का थिमाक्त। अब्रामम मेको कली इश्माएल नें वोदा बाक्त।

16 हागारम इश्माएल थिमेनु, अब्राम ८६ बर्स दुम्शो बाक्माक्त।

## 17

### परमप्रभुमी अब्राम नु कबल पशो

1 मिनु अब्राम ९९ बर्स दुम्मेनु, परमप्रभु यावे अब्राम आ डोंइती यूशा, मेको कली “गो नेल्ल क्येडा सक्ति पाइशो परमप्रभु नड। गे, गो नु बाक्शा, ठीक पाइब दुमो। उत्पत्ती ३५:११; प्रस्थान ६:३; ब्यवस्था १०:१२

2 मिनु गो गे नु आं कबल पाइनुड। गो इ मुर हिकने मचाप्चा डा पा शुश सेल्लुडमी” देंमाक्त।

3 मिनु अब्राम खुम्की पा बाम्माक्त। परमप्रभुमी मेको कली

4 “नेनो, मेको गो, गे नु आं कबल पतीके बाक्ब। गे शुश रागी डा मुर आन किकी पिपी दुम्नेवे।

5 मुल रे इ नें अब्राम देंचा मदुम्ब। इ नें अब्राहाम दुम्चा माल्ब। मारदे हना गो इ कली शुश रागी डा मुर आन किकी पिपी सेल्लन। रोमी ४:११,१७

6 गो इ रे शुश मुर सेल्लुडमी, रागी रागी डा मुर सेल्लुड। इ रे पिपपुकी यो दुम्नीम।

7 मिनु गो गे नु लोत्र पा आं कबल पाइनुड। गो इ चच युइ नु यो आं कबल पाइनुड। मेको गेना हना यो लीब कबल बाक्ब। गो इ परमप्रभु नु इ चच युइ आन परमप्रभु नड।

8 मुल गे इ बाक्तीक रागीमी अर्को रागी डा मुर बाक्नेवे। नोले गो एको कनान रागी गेना हना यो इन कली नु इ चच युइ आन कली गेनन्नी। गो चहिं मेको आन परमप्रभु दुम्नुड” दे अब्राहाम कली देंमाक्त। उत्पत्ती ३५:२७; हिब्रू ११:९-१०; प्रेरित ७:५

9 मिनु परमप्रभुमी अब्राहाम कली “आं कबल पशो डा लोत्र नेल्ल टिवो। मिनु इ नोले इ चच युइपुकीमी नेल्ल पालामी यो आं कली मिम्शा, टिचा माल्नीम।

10 गे नु इ नोले डा तौ चच युइ आन पचा माल्शो कबल मार बाक्त देशा हना, इ चारतीक डा कुशुल कुल पा खोइक्चा माल्नेवे। गे नु इ चच युइ, वोइश मुर नेल्ल कली कुशुल खोइक्तीक चिनु खोइक्चा माल्नीम। लेवी १२:३; यूहन्ना ७:२२

11 मेको गे नु गो इस कबल पशो आ चिनु बाक्ब। इजीकीएल २०:१२; ब्यवस्था ३०:६; रोमी ४:११

12 मुल रे इ पाला डा मुरुम आन तौ कली ८ नाक्ती दुम्मानु, खोइक्तीक चिनु खोइक्चा माल्नीम। इ खिम जरमेशो वोइश आल, तेको तेको रागी रे ग्याप्शो इ वाइल नु आन तौ नेल्ल आन कली यो खोइक्तीक चिनु खोइक्चा माल्नीम।

13 इ खिंम जरमेशो, इ चांदीम ग्याप्शो मुरपुकी कली यो खोइक्तीक चिनु खोइक्चा माल्नीम। मिनु आं कबल पशो डा चिनु इ रांम बाक्चा माल्ब। मेको गेना हना यो लीब कबल बाक्ब।

14 खोइक्तीक चिनु मखोइश्शो वोंइश मुर नु वोंइश आल आन मुर आन दाते रे तिल्ला पुंडसीनीम। मारदे हना मेकोपुकीमी आं कबल पशो प्रोंइशो बाक्नीम” देंमाक्त।

15 मिनु परमप्रभुमी अब्राहाम कली “गे इ मीश कली ‘साराइ’ मदेंचा, मुल रे मेको कली ‘सारा’ नें वोइक्चा माल्नेवे।

16 गो मेको कली आसीक गेनुड। गो इ कली मेको रे तौ का गेनुड। मिनु सारा रागी रागी डा मुर नु जात जात डा मुर आन पिप आन ममा दुम्ब” दे परमप्रभुमी देंमाक्त। उत्पत्ती १२:२-३

17 मिनु अब्राहाममी खुम्की पा बाप्शा, रिश्शा “सहे का बर्स डा मुरुम आल थीबा? सारा १० बर्स दुम्शा, आल थिने चाप्बा?” दे आम कली देंमाक्त। उत्पत्ती १८:१२; उत्पत्ती २१:६; लूका १:१८; रोमी ४:१९-२१

18 मिनु अब्राहाममी परमप्रभु कली “इश्माएल इन डोंइती बाक्ल” देंमाक्त।

19 मिनु परमप्रभुमी “ममाइ, इ मीश सारामी थमा पा तौ का थीब। मेको आ नें इसहाक वोइक्चा माल्नेवे। मेको नु आं कबल पतीक गेना हना यो दुम्ब। मेको आ नोले डा आ तौ चच युइ नु यो लीब।

20 इश्माएल आ पर्बम मार देने, गो मेको नेल्ल नेंता। नेनो, गो मेको कली आसीक गेनुड। मेको सोशा बोशा, शुश दुम्ब। गो मेको कली १२ जना पिप आन आफ सेल्लुड। गो मेको कली ठेयब जात दुम्पाइक्नुड। उत्पत्ती १६:१०; उत्पत्ती २१:१३,१८; उत्पत्ती २५:१६

21 तन्न आं कबल इसहाक नु पाइनुड। सारामी बर्स का नोले इसहाक थीब” देंमाक्त।

22 मिनु परमप्रभु अब्राहाम नु लोत्र पने थुम्शा लमाक्त।

### खोइक्तीक चिनु आ पर्बम शेंशो

23 मिनु परमप्रभुमी लोत्र पवा नाक्ती अब्राहाममी आ तौ इश्माएल, आ खिंमी जरमेशो नु ग्याप्शो वाइल नु आ खिं डा वोंइश मुर नेल्ल आन कली खोइक्तीक चिनु खोइक्पाइक्मी बाक्त।

24 अब्राहाममी खोइक्तीक चिनु खोदा नाक्ती ९९ बर्स दुम्शो बाक्माक्त।

25 आ तौ इश्माएल खोइक्तीक चिनु खोइक्तीक नाक्ती १३ बर्स दुम्शो बाक्माक्त।

26 मिनु अब्राहाम नु इश्माएल नाक्त कामी खोइक्तीक चिनु ताम्से बाक्त।

27 आ खिं डा वोंइश मुर नेल्ल, आ खिंम जरमेशो नु रागी रे ग्याप्शो वाइल नेल्लेम यो मेको नाक्ती खोइक्तीक चिनु तामे बाक्त।

## 18

### परमप्रभु माप्रे आ ब्वाकीमी गृशो

1 मिनु काबु नाक्ती अब्राहाम माप्रे आ ब्वाकीमी बाक्माक्त। आ ताम्बु आ लाप्चोमी निस्से बाक्त। मारदे हना शुश हुप्ता बाक्त। मेना परमप्रभु यावे मेको कली गुम्थ जाक्माक्त।

2 मिनु मुर सां गृशा, आ डोंइती राप्शो तवा बाक्त। मेको आन कली तशा, छुल बोक्शा बाप्शा, सेउ पवा बाक्त। हिब्रू १३:२

3 मिनु अब्राहाममी “आं परमप्रभु, आं कली दाक्ताक्नी हना, इन गेय पाइब रे मो मलने।

4 इन खोइल चिक्चा कली ब्वाक्कु गेनन्नी। मिनु चिक्शा, रवा आगाम नांडसीन।

5 गो इन कली इक्का शोब्ले ब्रथ लाइनुड। लाम्ज जचा माल्नीनी। मारदे हना गेपुकी इन गेय पाइब कली गुम्थ जाक्शो बाक्नीनी” देंमाक्त। मिनु मेकोपुकीमी “इ देंशो खोदेँशो पावो” देंमा बाक्त।

6 मिनु अब्राहाम दोरशा, ताम्बुम लशा, सारा कली “गे रीब पा सेआह सां रिम्शो फस के शोब्ले चोवो” देंमाक्त। सेआह का ७ लिटर पुक्तीके बाक्ब।

7 अब्राहाम चहिं गोठमी दोरशा लशा, दोम्शो रिम्शो बाछा का चाक्शा क्योरपाइश्शा, गेय पाइब कली क्येपदा बाक्त।

8 मिनू दहि, दूध नु श्ये चाकशा, मेको आन कली खेत्तीमी बाक्त। मिनू मेकोपुकीमी जामेनु, अब्राहाम मेको आन नेक्था रवा आ पुंम राप्शा बाक्माक्त।

9 मिनू मेकोपुकीमी “इ मीश सारा ते बाक्मे?” दे हिल्लो पामे बाक्त। मिनू अब्राहाममी “ताम्बुम बाक्ब” देंमाक्त।

10 मिनू कामी “गो एकेर लेशा माइक्थ जाक्नुड। मेना इ मीशेमी तौ का थिशो बाक्ब” देंमाक्त। मिनू सारा ताम्बु आ लाप्चोम मेको लोत्र पाइब आ नोले खुइश्शा बाक्शा, मेको लोत्र नेना बाक्त। उत्पत्ती १७:१९; रोमी ९:९

11 अब्राहाम नु सारा खाल्पा खाल्पी दुम्शो बाक्सा बाक्त। सारा आ रां ब्रोल्चा यो नुप्शो बाक्माक्त।

12 मोपतीके सारामी मेको लोत्र नेशा “गो खाल्पी दुम्ती। आं वोंइश यो खाल्पा दुम्त। मिनू आल थीनुडा डा?” दे रिस्से बाक्त। उत्पत्ती १७:१७; १पत्रुस ३:६

13 मिनू परमप्रभु यावेमी अब्राहाम कली “सारा मारदे ‘गो खाल्पी दुम्शा, आल थीनुडा डा?’ दे रिस्से?

14 गो परमप्रभु यावे नड। गो नेल्ल पने चाप्नुड। गो माइक्थ लेशा जाक्डानु, सारामी तौ थिशो बाक्ब” देंमाक्त। मत्ती १९:२६; लूका १:३७

15 सारामी चहिं “गो मरिस्सीड” दे जोल पवा बाक्त। मारदे हना हिंमाक्त। तन्न मेकोमी “गे थमा पा रिस्साक्वे” देंमाक्त।

16 मिनू मेको मुर सां बोक्शा, सोदोम सहर गे लमा बाक्त। अब्राहाममी मेको आन कली आइक्ची सम्म चोत्रथ लमाक्त।

17 मिनू परमप्रभु यावेमी “गो मार पचा चिक्तु, मेको मखुइक्थु अब्राहाम कली शेंनुड। आमोस ३:७

18 अब्राहाम ठेयब नु बोल्यो रागी डा मुर आन आफ दुम्ब। मिनू रागी नेल्ल डा मुरपुकीमी मेको आ पबंम आसीक ताइनीम। उत्पत्ती १२:३

19 गो अब्राहाम कली तुइक्नुड, आ आल नु आ चच युइ आन कली परमप्रभु यावे आ लां गाक्पाइक्चा कली अरेब। मिनू मेकोपुकी परमप्रभु यावे आ लां खोइक्ब दुम्शा, ठीक नु रिम्शो पचा शेंसीशा पाइनीम। परमप्रभु यावेमी अब्राहाम कली मार लोत्र देंमे, मेको नेल्ल दुम्ल” देंमाक्त। ब्यवस्था ६:७; ब्यवस्था ३२:४६

### अब्राहाममी परमप्रभु नु लोत्र पशो

20 मिनू परमप्रभु यावेमी “गो सोदोम नु गोमोररा सहर निक्शी आस पबंम शुश मरिम्शो लोत्र नेता। मारदे हना मेकेर डा मुर आन मरिम्शो पशो शुश हिंचा डा बाक्त। उत्पत्ती १९:१३

21 मुल गो कोत्रथ थीनुड। एको नेशो लोत्र थमा बाक्म कों, जोल बाक्म, गो तुइक्नुड” देंमाक्त।

22 मिनू परमप्रभु यावे आ स्वर्ग डा गेय पाइब निक्शी सोदोम गे लसा बाक्त। अब्राहाम परमप्रभु यावे आ डोंइती राप्शा बाक्माक्त।

23 मिनू अब्राहाम मेको आ नेक्था लशा “गे ठीक पाइब आन कली नु मरिम्शो पाइब आन कली खाल का डा पा क्याम्नीनी? गन्ती १६:२२

24 मेको सहरमी ५० जना ठीक पाइब मुर बाक्तेक्म हना, सहर कली क्याम्नीनी? मेको ५० जना ठीक पाइब मुर आन पबंम मेको सहर मप्रोंइनीनी?

25 ममाइ, गे मोदेशो पा मक्याम्नीनी। गे ठीक पाइब नु मरिम्शो पाइब आन कली खाल का डा पा मसाइक्नीनी। थमान, ठीक पाइब नु मरिम्शो मुर आन कली खाल का डा मपाइनीनी। गे रागी रागी डा निसाफ पाइब बाक्शा, ठीक निसाफ पाइनीनी” देंमाक्त। भजन संग्रह ८२:१; भजन संग्रह ९४:२

26 मिनू परमप्रभु यावेमी “सोदोम सहरम ५० जना ठीक पाइब मुर बाक्तेक्म हना, गो मेको आन पबंम सहर मक्याम्नुड” देंमाक्त। यसैया ६५:८; मत्ती २४:२२

27 मिनू अब्राहाममी “गो फुरक नु पुलु रे दुम्शो मुरुमी परमप्रभु नु लोत्र पाता।

28 मेको सहरम ४५ जना मुर ला ठीक पाइब बाक्तेक्म हना, गे मेको ४५ जना मुर, ५ जना मजाक्दीतीके सहर क्याम्नीनी?” दे हिल्लो पवा बाक्त। मिनू मेकोमी “गो मेकेर ४५ जना ठीक पाइब मुर थित्तामी हना, गो सहर मक्याम्नुड” देंमाक्त।

29 मिनु अब्राहाममी लेंशा “४० जना ठीक पाइब बाक्तेकम हना?” देमेनु, मेकोमी “गो मेको ४० जना आन परबम यो सहर मक्याम्नुड” देमाक्त।

30 मिनु अब्राहाममी “परमप्रभु, मगाइक्तीने, गो चिनु लोत्र पाइनुड। ३० जना ठीक पाइब मुर बाक्तेकम हना?” देमाक्त। मिनु परमप्रभुमी “३० जना बाक्तेकम हना, मेको आन परबम यो मक्याम्नुड” देमाक्त।

31 मिनु अब्राहाममी लेंशा “गो परमप्रभु इन कली लेंशा लोत्र पाइनुड, सहरमी २० जना ला ठीक पाइब मुर बाक्तेकम हना?” देमाक्त। मिनु मेकोमी “२० जना ठीक पाइब मुर बाक्तेकम हना यो, मेको आन परबमी सहर मक्याम्नुड” देमाक्त।

32 मिनु अब्राहाममी “परमप्रभु, मगाइक्तीने। गो चिनु लोत्र हिल्लो पाइनुड। १० जना ला ठीक पाइब मुर बाक्तेकम हना?” देमाक्त। मिनु मेकोमी “गो मेको १० जना ठीक पाइब आन परबम यो सहर मक्याम्नुड” देमाक्त। न्यायाधीस ६:३९

33 मिनु अब्राहाम नु लोत्र पने थुम्शा, परमप्रभु यावे आ लां लमाक्त। अब्राहाम आ बाक्तीके लेम्माक्त।

## 19

### सोदोम नु गोमोररा क्याम्शो

1 मेको परमप्रभु यावे आ स्वर्ग डा गेय पाइब निकशी सोदोम सहरम नाकनाकदो जाकदीस्सा बाक्त। मेना लोत सहर आ गारो डा ठेयब लाप्चो आ नेक्था निश्शा बाक्मेनु, गुम्से बाक्त। मिनु लोतमी मेको आस कली तशा बोक्शा, खुम्की पा बाम्माक्त। उत्पत्ती १८:२२

2 मिनु लोतमी “आं प्रभु निकशी, नेनीसे, मुलाकदो आं खिम बाक्कीसे। इस खोइल चिकसीसे। सुनी बोक्शा, इस लां लने चान्नीसी” देमाक्त। मेको निकशीमी “ममाइ, गो मेरे लाडगाम इप्नस्कु” देसा बाक्त।

3 मिनु लोतमी शुश लोत्र पचा नोले आ खिमि बास बाक्सा बाक्त। लोतमी मेको आस कली ब्रोत्रब्रोत्रशो क्येशा, बोरब ओखती मसुप्शो शोब्ले सेला बाक्त। मिनु जाम्से बाक्त।

4 मिनु इप्चा क्येडा डोंइती सोदोम सहर डा वोंइश मुरपुकी खिं आ एर ओंथ खुम्सीशा बाक्सा बाक्त। खाल्पा, ठिटा सहर डा वोंइश मुर नेल्ल खुम्सीशा बाक्सा बाक्त।

5 मेकोपुकीमी लोत कली “नाकनाकदो इ खिम जाक्शो वोंइश मुर ते बाक्सा। आंइ दाक्शो पचा कली लाडगाम सोइक्तो” देमा बाक्त। लेवी १८:२२-२५; न्यायाधीस १९:२२-२४; रोमी १:२७

6 मिनु लोत लाप्चो रे लाडगा गूशा, आ नोले लाप्चो चोक्शा वोदा बाक्त।

7 मिनु मेकोमी “आं लोकबपुकी, मोपा मरिम्शो मपने।

8 नेनीन, आं के कन्ने तमी निकशी बाक्नीसी। मेको इन कली लाडगा सोइक्नुड। मार मार पचा दाक्नीनी, मेको निकशी नु पने। आं खिमि जाक्शो वोंइश मुर आस कली मारेइ मपने। मारदे हना बास बाक्चा कली आं खिम जाक्ताक्से” देमाक्त।

9 मेकोपुकीमी चहिं “गे लावो। गे ला एको सहरमी अर्को रागी डा मुर बाक्नेवे, आंइ कली हुकुम पचा माल्नेवे? लो, मेको निकशी आस क्येडा इ कली श्येत गेनीकी” देमा बाक्त। लोत कली शुश लोत्र पशा, लाप्चो रोक्चा माल्मे बाक्त। २ पत्रुस २:७-८

10 तन्न आगा डा वोंइश मुर निकशीमी आस गुइ लाडगा गुंइशा, लोत कली ग्याइश्शा आगा कीशा, लाप्चो चोक्सासे बाक्त।

11 मिनु मेको निकशीमी लाडगाम बाक्शो मुर आन कली मिक्च मताइब सेल्से बाक्त। मिनु मेकोपुकीमी लाप्चो मथित्थु, माल्चा प्रोन्मे बाक्त। २राजा ६:१८

12 मिनु मेको निकशीमी लोत कली “गे इ के सु सु बाक्नीमी? चांइवा, तमी तौ नु सहरम इ मुर सु सु बाक्नीमी? एको सहर रे गुंइदो।

13 मारदे हना गो एको सहर कली क्याम्नस्कु। परमप्रभु यावे आ डोंइती एको आन ग्रॉग्रा दिचा डा गेय आ पबर्म शुश रेयके बाक्ब। परमप्रभु यावेमी आंस कली एको सहर क्याम्चा, दे सोइशशो बाक्ब” देंसा बाक्त। उत्पत्ती १८:२०

14 मिनु लोतमी आ तमी आस कली ग्युबे पचशो वोंइश आल आस कली गुम्शा “बोक्कीस, सहर रे लसे। मारदे हना परमप्रभु यावेमी सहर क्याम्ब” दे माइक्सी बाक्त। मेको निक्शीमी चहि “रित्चा डा लोत्र बाक्त” दे मिम्तसे बाक्त। गन्ती १६:२१

15 मिनु भाले ग्रीमेनु, परमप्रभु यावे आ स्वर्ग डा गेय पाइब निक्शीमी लोत कली “बोक्को, इ मीश नु इ तमी निक्शी आस कली लाइशशा, एको सहर रे प्रोक्कीन। मप्रोक्तीनी हना, एको सहर डा मुर खोदेशो पा क्याम्चा पुंइसीनीनी” देंसा बाक्त।

16 मिनु लोत कली ओंखां बोक्शो तशा, मेको कली आ तमी निक्शी नु आ मीशे आन कली गुड रे कीशा, सहर रे गुंडदसे बाक्त। मोपा परमप्रभु यावेमी लोत नु आ खिं डा मुर आन कली दाक्शा प्रॉइमी बाक्त।

17 सहर रे गुंडशा, परमप्रभु यावे आ स्वर्ग डा गेय पाइब कामी “ब्रॉइचा दाक्नीनी हना, नोले मकोव्रथु प्रोक्कीन। दिमम मबाक्कीन। पहाड गे प्रोक्कीन। मो मपाइतीनी हना, गे सहर डा मुर नु क्याम्चा पुंइसीनीनी” देंसा बाक्त। मती २४:१६

18 मिनु लोतमी “आं प्रभु, गो मचबु।

19 नेनीन, गो इन शिशी ताता। गो आंइ कली दाक्शा, बेक्चा रे प्रॉइतीनी। गो पहाड प्रोक्ने मचबु। पहाडमी अर्को श्येतमी आं कली साइक्बा, कों।

20 नेनीन, ह्यु उड डा सहर प्रोक्चा कली आं नेक्था बाक्ब। आइक्च यो बाक्ब। मेकेर प्रोक्चा गेयीनी। मेको सहर आइक्च बाक्ब। मेकेर ब्रॉइने चाप्नुड” देंसा बाक्त।

21 मिनु मेकोमी “लो, गो इ पुंइशो गेनुड। इ देशो सहर मक्याम्नुड।

22 रीब पा प्रोक्कीन। गे मजाक्दीन्नी सम्म मारेइ पने मचाप्नुड” देंसा बाक्त। मेको सहर कली सोआर नें वोदा बाक्त। आइक्च कली सोआर देंसीब।

23 मिनु लोत सोआर सहर ओव्रची ना रागीमी नां दाप्ने थुम्शो बाक्माक्त।

24 मिनु नोले परमप्रभु यावेमी सोदोम नु गोमोररा सहर आस तारी सरीड रे गन्धक नु मी रेउ यिशो खोदेशो पा यिपदा बाक्त। ब्यवस्था २९:२२; भजन संग्रह ११:६; यसैया १:९-१०; यसैया १३:१९; आमोस ४:११; लूका १७:२९; २पत्रुस २:६; प्रकाश १४:१०

25 मिनु परमप्रभु यावेमी मेको सहर निक्शी, दिंम नेल्ल, सहर डा मुर नेल्ल नु रूम मार मार वाशो बाक्मे, मेको नेल्ल क्याम्दा बाक्त।

26 लोत नु आ मुर प्रोक्मानु, लोत आ मीशेमी नोले बिर लेशशा कोव्रडा बाक्त। मिनु मेको हिक्सी के थाम दुम्माक्त।

27 मिनु अब्राहाम नाक्त का डोंइती परमप्रभु यावे आ डोंइती राष्ठा बाक्तीकेम लमाक्त।

28 मिनु सोदोम नु गोमोररा सहर डा दिंम डा रू नेल्ल कोव्रडा बाक्त। मिनु मेको सहर निक्शी नु रू नेल्ल रे ठेयब चुप्नु डा मी खोदेशो पा कुन यूशो तवा बाक्त।

29 मोपा परमप्रभुमी मेको दिंम, सहर निक्शी क्याम्दा बाक्त। मेना परमप्रभुमी अब्राहाम आ पुंइशो लोत्र मिम्शा, लोत कली मेको सहर रे गुंडशा प्रोना बाक्त। नोले मेकोमी मेको सहर नेल्ल खतम पोक्गा बाक्त।

**लोत आ तमी निक्शी**

30 मिनु लोत नु आ तमी निक्शी सोआर रे लशा, पहाड मेर लमा बाक्त। मारदे हना सोआर सहरम बाक्चा हिंमा बाक्त। मेको नु आ तमी निक्शी पहाड डा पुक्खीम बाक्शो बाक्मा बाक्त।

31 मिनु लोत आ डोंइती जरमेशो तमीमी “इस आफ खाल्पा दुम्त। नेल्ल रागीमी इस कली वोंइश मुर मबाक्मं।

32 लो, इस आफ कली अडगुर शांबुमी दुक्पाइशशा, इस आफ नु बाक्स। मोपा इस आफ कली चच युड दुम्नीम” दे आ लोकब कली देंसा बाक्त। लेवी १८:७



33 मेको नाकदो आस आफ कली अडगुर शांबुम दुक्पदसे बाक्त। मिनु आ ठेयब तमी आ आफ नु इम्माक्त। लोतमी आ तमी आं नु इप्शो, बोक्शो मारेड मतुइक्ता बाक्त।

34 मिनु आ दीसा ठेयब तमीमी आ लोक्ब कली “नेनो, गो सिनाकदो आफ नु बाक्ती। गो लेंशा आफ कली अडगुर शांबुमी दुक्पाइक्स। मुलाकदो गे इपो। मोपा इस आफ रे चच युइ दुम्नीम” देंमाक्त।

35 मिनु मेको निक्शीमी आस आफ कली मेको नाकदो यो दुक्पदसे बाक्त। मिनु कान्छी आ आफ नु इप्थ लमाक्त। मिनु लोतमी आ तमी आं नु इप्शो, बोक्शो मारेड मतुइक्ता बाक्त।

36 मिनु लोत आ तमी निक्शीमी आस आफ के कोव्रज कुरसे बाक्त।

37 मिनु ठेयब तमीम तौ का थिमाक्त। मेको आ नें मोआब वोदा बाक्त। मेको मोआबी आन किकी पिपी बाक्माक्त। ब्यवस्था २:९

38 कान्छीमी यो तौ का थिमाक्त। मेको आ नें बेन-अम्मी वोदा बाक्त। मेको अम्मीनी आन किकी पिपी बाक्माक्त। ब्यवस्था २:१९; ब्यवस्था २३:४

## 20

### अब्राहाम नु अबीमेलोक

उत्पत्ती १२:१०-२०; उत्पत्ती २६:१-११

1 मेकेर रे अब्राहाम दक्खिनन बाक्ब नेगेब गे लमाक्त। मिनु कादेश नु शुर आस दाते गेरार सहरमी अर्को रागी डा मुर दुम्शा बाक्माक्त। उत्पत्ती १२:९; उत्पत्ती २६:१

2 मेकोमी मुर आन कली आ मीश, सारा आ पबर्म “आं समी बाक्ब” देंमाक्त। मिनु गेरार डा पिप अबीमेलोकमी मेको कली ब्रथ सोइक्ता बाक्त।

3 मिनु अबीमेलोकम आ डोमुमी परमप्रभु आ डोंइती गूशो तवा बाक्त। मिनु “गे मीश चाक्शो आ पबर्म बेक्चा माल्लेवे। मारदे हना मेको ग्युंबे पशो मीश मुर बाक्ब” देंमाक्त।

4 मिनु अबीमेलोकम मेको नु मइप्तीके “परमप्रभु, गे दोस मताइब मुर आन कली यो साइक्नीनी?

5 मेकोमी आं कली ‘आं समी बाक्ब’ मदेम डा? आ मीशेमी यो ‘आं लोक्ब बाक्ब’ देंत। गो रिम्शो थुं नु थमा पा मतुइक्तीकेमी चाक्ता” देंमाक्त।

6 मिनु परमप्रभुमी मेको आ डोमुमी “गे रिम्शो थुंमी पाप्तीवी। गो तुइक्नुड। मोपतीके गो इ कली मेको कली थिचा मगेथु, आं डोंइती मरिम्शो पचा मगेड।

7 मुल मेको मुर आ मीश लेत्तो। मारदे हना मेको आं लोव्र पाइब का बाक्ब। मेकोमी इ पबर्म पुंडुब। मिनु गे ब्रोंइनेवे। गे आ मीश कली मलेत्ताक्वी हना, गे थमा पा बेक्चा माल्लेवे। इ मुर नेल्ल यो बेक्चा माल्नीमी, दे तुइक्तो” देंमाक्त। १राजा १३:६

8 मोपतीके अबीमेलोक सुनी कना बोक्शा, आ गेय पाइब नेल्ल आन कली ब्रेरशा, आ डोमु नेल्ल शोव्रडा बाक्त। मिनु मुर नेल्ल शुश हिंमा बाक्त।

9 मिनु अबीमेलोकम अब्राहाम कली यो ब्रेत्ता बाक्त। मिनु मेको कली “मारदे आंइ कली ओदेशो पवी? गो नु आं रागी कली ओदेशो मरिम्शो पपाइक्चा कली गो इ कली मार मरिम्शो पाइक्ना? गे मपचा डा गेय पाप्तीवी।

10 गे मारदे ओदेशो पचा मिम्ती?” देंमाक्त।

11 मिनु अब्राहाममी “थमा पा, एको रागी डा मुरपुकी परमप्रभु कली मान पा महिंनीमी। मिनु आं मीश आ पबर्म आं कली साइक्नीम, दे मिम्ताक्ड।

12 मेको थमा आं समी यो बाक्ब। आं आफ आ तमी बाक्ब। तन्न आं ममा आ तमी ममाइ। गो मेको कली चाक्ता। लेवी १८:९

13 मिनु परमप्रभुमी आं कली आं आफ आ खिं रे गाक्पाइय्यीनु, गो आं मीश कली ‘आं कली दाक्नेवे हना, गो ते ते जाक्दीस्सा, मेक मेक एको आं लोक्ब बाक्ब, देनो’ दे माइक्ता” देंमाक्त।

14 मिनु अबीमेलोकमी भेडापुकी, बी ब्यफ नु वाइलीम वाइल आन कली लाइशशा, अब्राहाम कली गेवा बाक्त। आ मीश सारा यो लेत्ता बाक्त।

15 मिनु “नेनीन, आं रागीमी ते ते बाक्चा दाक्नेवे, मेक मेक बाक्ने चाप्नेवे” देंमाक्त।

16 मिनु सारा कली “नेनो, इ लोकब कली हजार का चांदी टुक्रा गेता। मेको इन कली इ मुर आन डोंडती इ कली रिम्शो पचा कली गेता। मोपा नेल्ल आन डोंडती इ कली ठीक पाता” देंमाक्त।

17 मिनु अब्राहामम अबीमेलेक आ पर्वम परमप्रभु कली पुना बाक्त। मिनु परमप्रभुमी अबीमेलेक, आ मीश नु आ गेय पाइब नेल्ल आन पर्वम आल मथितीक रोइ रे सापदा बाक्त।

18 मारदे हना परमप्रभु यावेमी अब्राहाम आ मीश सारा आ पर्वम अबीमेलेक आ खिं डा मुर नेल्ल आन कली आल मथीब सेल्शो बाक्माक्त।

## 21

### इसहाक जरमेशो

- 1 मिनु परमप्रभु यावेमी सारा कली मार देंमे, मेकोन दुम्पदा बाक्त। उत्पत्ती १८:१०
- 2 मिनु सारामी खाल्पी दुम्शा, अब्राहाम के कोव्रज कुरशा, तौ का थिमाक्त। परमप्रभुमी गेना थीब देंमे, मेना थिमाक्त। हिब्रू ११:११
- 3 मिनु अब्राहाममी सारा आ थिशो तौ कली इसहाक नें वोदा बाक्त। उत्पत्ती १७:१९
- 4 मिनु अब्राहाममी आ तौ इसहाक कली ८ नाक्ती दुम्मेनु, खोइक्तीक चिनु खोदा बाक्त। परमप्रभुमी डोंडती दोपा अरेवा, मोपा पवा बाक्त। उत्पत्ती १७:११-१२; प्रेरित ७:८
- 5 अब्राहाम आ तौ इसहाक थिमेनु, सहे का बर्स दुम्शो बाक्माक्त। उत्पत्ती १७:१७
- 6 मिनु सारामी “परमप्रभुमी आं कली रिप्पाइक्ती। सु सुम एको नेंनीमी, मेको यो गो नु रिन्नीम। उत्पत्ती १८:१२
- 7 सु सुमी अब्राहाम कली ‘इ मीशेमी आल कली दूध तुंडब’ देंनीमी? गो खाल्पा दुम्शो अब्राहाम के तौ का थिती” देंमाक्त।

### हागार नु आ तौ खेरशो

- 8 मिनु आल कोल्शा, दूध तूचा प्रोना बाक्त। मिनु दूध तूचा प्रोना नाक्ती अब्राहाममी ठेयब भोज सेल्शा, मुर आन कली थुल्मी बाक्त।
- 9 मिनु सारामी इजीप्त डा हागार नु अब्राहाम आस थिशो तौ इश्माएलमी इसहाक कली शुक्शी पशो तवा बाक्त।
- 10 मिनु मेकोमी अब्राहाम कली “वाइलीम नु आ तौ आस कली खेरो। मेको वाइलीम आ तौ कली, आं तौ इसहाक नु अडस योक्शा गेचा मदुम्ब” देंमाक्त। गलाती ४:३०
- 11 अब्राहामम आ लोव नेंशा, थुं मनुमाक्त। मारदे हना इश्माएल यो आ तौ बाक्माक्त।
- 12 तन्न परमप्रभुमी अब्राहाम कली “वोंइश आल नु इ वाइलीम आ पर्वम सुर्ता मपावो। सारामी मार मार देंमे, मेको नेल्ल पावो। मारदे हना इसहाक आ चच युइ इ जात दुम्नीम। उत्पत्ती १७:२१; रोमी ९:७-८; हिब्रू ११:१८
- 13 मिनु इ वाइलीम आ तौ इश्माएल आ चच युइ रे यो ठेयब जात का सेल्लुड। मारदे हना मेको यो इ तौ बाक्ब” देंमाक्त। उत्पत्ती १७:२०
- 14 मिनु अब्राहाम सुनी कना बोक्शा, हागार कली शोब्ले नु ब्वाक्कु कुरपाइश्शा, आ तौ नु सोइक्ता बाक्त। मिनु हागार नु आ तौ लसा बाक्त। मिनु लशा, लां जाम्शा, बेयर-शेबा माइश्शो गोरशो रागीम हिरससा बाक्त।
- 15 मिनु ब्वाक्कु नुप्शा, आ आल कली बुटा आगाम वोदा बाक्त।
- 16 मिनु हागार चहिं आइदी लशा, निस्से बाक्त। मारदे हना मेकोमी “आं आल बेक्शो मतडल” दे मिन्ता बाक्त। मिनु ठेयब सेंदा पा डाक्माक्त। यसैया ४९:१५
- 17 मिनु परमप्रभुमी आल आ डाक्शो सेंदा नेना बाक्त। मिनु परमप्रभु आ स्वर्ग डा गेय पाइबमी सरीड रे “हागार, मार दुमे? महिनो। मारदे हना परमप्रभुमी उइ बाक्शो इ तौ आ ब्रेश्शो नेतु।
- 18 बोक्को, इ तौ लाइश्शा गाक्को। गो मेको रे ठेयब जात का सेल्लुड” देंमाक्त।

19 मिनु परमप्रभुमी हागार आ मिक्च तपदानु, ब्वाक्कु बुक्तीके का तवा बाक्त। मिनु आ ब्वाक्कु कुरतीके प्रिंशा, आ तौ कली तूपदा बाक्त। २राजा ६:१७,२०

20 मिनु परमप्रभु मेको वोंइश आल नु बाक्मेनु, मेको कोल्शा, गोरशो रागीमी बाक्शा, लिब्रा आप्स शुश जोक्ब दुम्माक्त।

21 मेको गोरशो रागी आ नें पारान बाक्माक्त। मिनु आ ममामी आ तौ कली इजीप्त रागी डा तमी चाक्शा गेवा बाक्त। उत्पत्ती १६:३

अबीमेलेक नु अब्राहाम सल्ला पशो

उत्पत्ती २६:१५-३३

22 मिनु काबु अबीमेलेक नु आ फौज डा ठेयब कप्तान फीकोल अब्राहाम आ बाक्तीक जाक्शा, अब्राहाम कली “गे मार मार पाइनीनी, परमप्रभु गे नु बाक्ब।

23 मोपतीके गो इन कली मार पुंडनुड देशा हना, आं कली, आं तमी तौ नु आं चच युइ आंइ कली श्येत मगेकी। गो इन कली रिम्शो पशो खोदेशो पा, आं कली यो रिम्शो पने। इन बाक्शो रागी कली यो रिम्शो पने। ‘रिम्शो पाइनुड’ दे परमप्रभु आ नें थिशा, कसम जने” दे पुना बाक्त। उत्पत्ती २०:१५

24 मिनु अब्राहाममी “गो कसम जाइनुड” देंमाक्त।

25 मिनु अब्राहाममी अबीमेलेक कली हुइक्ता बाक्त। मारदे हना अबीमेलेक आ गेय पाइबपुकीमी अब्राहाम आ इनार आ पर्बम जिशा, रोइक्तमे बाक्त।

26 मिनु अबीमेलेकमी “गो मेको मतुइक्तु, सुम पवा? गे यो मशेंदीनी। मुलाक्त ला नेंता” देंमाक्त।

27 मिनु अब्राहाममी भेडापुकी नु ब्यफपुकी अबीमेलेक कली गेवा बाक्त। मोपा मेको निक्शी सल्ला पाप्से बाक्त।

28 अब्राहामम ७ ओटा पाठी चहिं बगाल रे गुंडशा, वोदा बाक्त।

29 मिनु अबीमेलेकम “मेको ७ ओटा पाठी मारदे वोइक्नी?” दे हिल्लो पवा बाक्त।

30 मिनु “मेको ७ ओटा पाठी आं गुइ रे लाइक्चा मालनीनी। गो आं दोशो इनार आ सांकछी दुम्नीनी” देंमाक्त।

31 मिनु मेको बाक्तीके कली बेयर-शेबा, दे नें वोदसे बाक्त। मारदे हना मेको निक्शी मेकेर कसम जाप्से बाक्त।

32 मिनु बेयर-शेबामी मेको सल्ला पने थुम्शा, अबीमेलेक नु फीकोल आ ठेयब कप्तान पलिस्ती आन रागी लेस्सा बाक्त।

33 अब्राहाममी चहिं बेयर-शेबाम रवा का खुमा बाक्त। मिनु मेकेर परमप्रभु यावे, गेना हना यो बाक्ब परमप्रभु आ नें थिशा, मेको नु लोत्र पवा बाक्त। उत्पत्ती १२:८; रोमी १६:२६

34 मिनु पलिस्ती आन रागीमी अब्राहाम अर्को रागी डा मुर दुम्शा, शुश नाक्त बाक्माक्त।

## 22

परमप्रभुमी अब्राहाम आ थुं नाक्शो

1 मिनु नोले परमप्रभुमी “अब्राहामम आं कली टीबाक्म कों, मटीबाक्म” दे मिष्शा “अब्राहाम” दे ब्रेत्ता बाक्त। अब्राहाममी “गो एक बाक्ती” दे परमप्रभु कली मदा बाक्त। प्रस्थान १५:२५; प्रस्थान १६:४; प्रस्थान २०:२०; ब्यवस्था ८:२; ब्यवस्था १३:४; न्यायाधीस २:२२; हिब्रू ११:१७; याकूब १:१३

2 मिनु मेकोमी “इ तौ लतो। का ला बाक्शो दाक्शो इ तौ इसहाक लतो। मिनु मोरीयाह रागी लावो। मेकेर लशा, इ तौ कली चोशा चढ़ेयी। तेको डांडाम चढ़ेचा मालनेवे, गो इ कली कौडनन” देंमाक्त।

3 मिनु अब्राहाम सुनी कना बोक्शा, चढ़ेतीकेम चोचा कली शी चेरशा, आ गधा ठीक पवा बाक्त। मिनु ठिटा निक्शी नु आ तौ इसहाक कली लाइश्शा, परमप्रभुमी देशो पहाड लमा बाक्त।

4 लमा लमा नाक्त सां नोले परमप्रभु आ देशो बाक्तीके डोन रे तवा बाक्त।

5 मिनू अब्राहाममी आ गेय पाइब निक्शी आस कली “एकेर गधा नु बाक्कीसे। गो आं तौ नु मिरि आइक्था लशा, चढ़ेशा, इस बाक्तीक लेल्नस्कु” देंमाक्त।

6 मिनू अब्राहाममी चोशा चढ़ेतीक शी इसहाक कली कुरपदा बाक्त। मिनू मी नु चुक्ब आंमा कुरा बाक्त। मोपा निम्फा लसा बाक्त।

7 मिनू इसहाकम आ आफ कली “आं आफ” देंमाक्त। मिनू अब्राहाममी “गो नेता” देंमाक्त। मिनू इसहाकमी “गो मी नु शी ला कुरशा गाक्तस, चोशा चढ़ेतीक पाठा चहिं ते बाक्म?” दे हिल्लो पवा बाक्त।

8 मिनू अब्राहाममी “चोशा चढ़ेतीक पाठा परमप्रभुमी गेब” देंमाक्त। मोपा निम्फा लसा बाक्त।

9 मिनू परमप्रभुमी देशो रागी जाक्दीस्सानु, अब्राहाममी फुल्लु चाक्शा, चढ़ेतीक सेला बाक्त। मिनू चढ़ेतीक तारी शी प्रोवडा बाक्त। मिनू आ तौ इसहाक कली गुड सोइल फ्रेशा, शी तारी वोदा बाक्त।

10 मिनू अब्राहाममी आ तौ क्योरचा कली चुक्ब शोइशशा तरेवा बाक्त। मती २६:३९; याकूब २:२१

11 मिनू परमप्रभु यावे आ स्वर्ग डा गेय पाइबमी सरीड रे “अब्राहाम, अब्राहाम” दे ब्रेत्ता बाक्त। मिनू अब्राहाममी “गो नेता” देंमाक्त।

12 मेकोमी “इ तौ कली मक्योरो। मेको कली मारेड मपतो। मारदे हना गे परमप्रभु कली मान पा हिंबाक्ते। गो मुल तुइक्ताक्ड। गे इ का ला बाक्शो तौ आं कली गेचा ठीक पाप्तीवी। इ का ला तौ यो आं कली गेचा टीबाक्ते” देंमाक्त। रोमी ८:३२; हिब्रू ११:१७

13 मिनू अब्राहाममी एर गे कोव्रडानु, सांड का आ ग्रीव्र चू लहाराम रेशशा, बाक्शो तवा बाक्त। मिनू लशा सांड चाक्शा, आ तौ आ पा डा मेको सांड क्योरशा, चोशा चढ़ेतीक चढ़ेवा बाक्त।

14 मिनू अब्राहाममी मेको डांडा कली परमप्रभु यावे यीरेह, दे नें वोदा बाक्त। मोपतीके मुल सम्म मुरपुकीम “परमप्रभु यावे आ डांडाम परमप्रभु यावेमी माल्लो गेब” देंनीम। “परमप्रभु यावे यीरेह” आ अर्थ “परमप्रभु यावेमी आं माल्लो गेब” देशो बाक्ब। उत्पत्ती १६:१३

15 मिनू परमप्रभु यावे आ स्वर्ग डा गेय पाइबमी लेंशा सरीड रे अब्राहाम कली

16 “परमप्रभु यावेमी ‘गो आं नेंमी कसम जाता। मारदे हना गे इ तौ आं कली गेचा ठीक पाप्तीवी। प्रस्थान ३२:१३; यसैया ४५:२३; आमोस ६:८; मीका ७:२०; लूका १:७३; हिब्रू ६:१३

17 मार कसम जाता देशा हना, गो इ कली आसीक गेनुड। इ चच युड आन कली सोरुल नु समुन्द्र आ नेक्था डा बाल्वा खोदेशो पा शुश सेल्लुडमी। मिनू मेकोपुकीमी आन जोरी सत्रु आन सहर आंम के सेल्लनीम। उत्पत्ती १३:१६; हिब्रू ११:१२

18 इ चच युड आन पबंम रागी रागी डा मुर नेल्ल आसीक राइनीम। मारदे हना गे आं देशो टीब बाक्ते’ दे परमप्रभु यावेमी देंत” दे आ स्वर्ग डा गेय पाइबम अब्राहाम कली लोत्र पवा बाक्त। उत्पत्ती १२:३; गलाती ३:१६

19 मिनू अब्राहाम मेकेरे र लशा, आ गेय पाइब निक्शी आस रिम्तीके लेस्सा बाक्त। मिनू गुम्शा, बेयर-शेबा माइक्तीकेम लमा बाक्त। मिनू अब्राहाम मेक उड बाक्माक्त।

### नाहोर आ चच युड

20 मिनू मेको नोले मुरुमी अब्राहाम कली “मिल्कामी यो इन लोकब नाहोर रे पा आल थिप्तु। उत्पत्ती ११:२९

21 आ डोंइती जरमेशो तौ ऊज, आ लोकब बूज, अराम आ आफ केमुएल,

22 केसेद, हाजो, पिल्लाश, यिदलाफ नु आ कान्छा बेथुएल बाक्नीम।

23 बेथुएल चहिं रेबेका आ आफ बाक्त। मिल्कामी अब्राहाम आ लोकब नाहोर के ८ जना तौ थिप्तु। उत्पत्ती २४:१५

24 नाहोर आ कान्छी मीश आ नें रूमा बाक्माक्त। मेकोमी तेबाह, गाहाम, ताहाश नु माकाह थिमाक्त” देंमाक्त।

## 23

सारा बेक्शो

- 1 मिनू सारा सहे का २७ बर्स दुम्शो बाक्माक्त। आ ब्रोंडतीक नाक्त नेल्ल मोशोन बाक्माक्त।
- 2 सारा कनान रागी डा किरयथ-अरबाम बेक्माक्त। मेको कली हेब्रोन यो देंनीम। मिनू अब्राहाम सारा आ पर्वम हिंशेक पा डाक्थ लमाक्त।
- 3 अब्राहाम सारा आ बेक्शो रां बाक्तीके रे लशा, हिती आ मुर आन कली
- 4 “गो इन दातेमी अर्को रागी डा मुर बाक्नुड। गो थिम्तीक का ग्याप्चा दाक्नुड। मारदे हना आं बेक्शो मुर कली थिम्चा माल्नुड” देमाक्त। उत्पत्ती १७:८
- 5 मिनू हिती आ मुरपुकीमी अब्राहाम कली
- 6 “प्रभु, आंइ लोव्र नेनीन, गे आंइ दातेमी परमप्रभुमी सेल्शो ठेयब मुर बाक्नीनी। आंइ के बेक्शो मुर आन कली वोइक्तीक पुक्खी शुश बाक्नीम। तेको दाक्नीनी, मेकोमी इन बेक्शो मुर थिमीन। इन बेक्शो मुर थिम्चा सुडमी मतेक्ब” देमा बाक्त।
- 7 मिनू अब्राहाम बाक्शा, हिती आ मुर आन डोंडती सेउ पवा बाक्त।
- 8 मेको आन कली “आं बेक्शो मुर थिम्चा गेतीनी हना, आं पर्वम सोहार आ तौ एफ्रोन नु लोव्र पने।
- 9 मेको आ रू आ नोले बाक्ब माक-पेला पुक्खी आं कली लेयड, दे पुंइदीन। गिश थाप्चा माल्नुडा, थाप्नुड। इन दातेमी आं बेक्शो मुर थिम्तीके दुम्ल” देमाक्त।
- 10 मेना एफ्रोन हिती आन दातेमी निश्शो बाक्माक्त। मेको आन सहर डा गारो डा ठेयब लाप्चो आ नेक्था बाक्शा, अब्राहाम आ लोव्र नेन्मेनु, मेको हिती एफ्रोनमी अब्राहाम कली
- 11 “प्रभु, ममाइ, आं लोव्र नेनीन, गो इन कली मेको रू नु पुक्खी गेनुड। आं मुरपुकी सांक्छी बाक्नीम। गो इन कली गेनुड। इन बेक्शो मुर थिमीन” देमाक्त।
- 12 मिनू अब्राहाममी मेको मुर आन डोंडती सेउ पवा बाक्त।
- 13 मिनू मुर नेल्ल आन डोंडती अब्राहाममी एफ्रोन कली “आं लोव्र नेनीन। गो मेको रू डा क्येउ थाप्नुड। मेको ताक्कीन। गो आं मीश मेक थिम्नुड” देमाक्त।
- 14 मिनू एफ्रोनमी अब्राहाम कली
- 15 “प्रभु, आं लोव्र नेनीन, मेको रू ४ सहे शेकेल चांदी डा बाक्ब। मेको इस दातेमी मारेइ ममाइ। मोपतीके थिमीन” देमाक्त। शेकेल का ११.५ ग्राम बाक्ब।
- 16 मिनू अब्राहाममी एफ्रोन आ लोव्र बिस्से बाक्त। मेकोमी एफ्रोनमी हिती आ मुर आन डोंडती देशो खोदेशो पा ४ सहे शेकेल चांदी नाक्शा, गेमी बाक्त। मेको ४ सहे शेकेल चहिं ग्याप्ब लेयब आन दातेमी मोदेशो रू कली ठीक बाक्माक्त। शेकेल का ११.५ ग्राम चांदी बाक्त।
- 17 माक-पेलामी बाक्शो एफ्रोन आ रू माप्रे आ पूर्व गे बाक्शो बाक्माक्त। मोपा रू नु पुक्खी, रूमी बाक्शो रवा नेल्ल नु एर ओथ सुरम खुम्शो रवा यो
- 18 हिती नेल्ल नु ठेयब लाप्चोम बाक्ब आन डोंडती अब्राहाम के दुम्माक्त।
- 19 मिनू नोले अब्राहामम आ मीश सारा कली माप्रे आ नेक्था माक-पेलामी बाक्शो पुक्खीमी थिमा बाक्त। माप्रे चहिं कनान रागी डा हेब्रोन सहर बाक्माक्त।
- 20 मिनू मेको रू नु मेक बाक्शो पुक्खी हिती आ मुरपुकी रे अब्राहाम आ मुर थिम्तीक रू दुम्माक्त। उत्पत्ती २५:९-१०; उत्पत्ती ४७:३०; उत्पत्ती ४९:२९-३२; उत्पत्ती ५०:१३

## 24

रेबेका इसहाक आ मीश दुम्शो

- 1 मिनू अब्राहाम शुश बर्स दुम्शा, खुशो दुम्माक्त। परमप्रभु यावेमी अब्राहाम कली आ पतीक नेल्लेमी आसीक गेवा बाक्त। उत्पत्ती १२:२
- 2 मिनू अब्राहाममी आ रू खिं नेल्ल कोव्रब नु वाइल आन कली अरेब ठेयब वाइल कली “इ गुड आं फिला तारी वोतो।

3 गो इ कली परमप्रभु यावे, सरीड नु रागी डा परमप्रभु आ नेमी कसम जपाइक्नुड। मार कसम जपाइक्नुड देशा हना, आं तौ कली आं बाक्शो कनान रागी डा मीश आल मचाक्को। उत्पत्ती २८:१; प्रस्थान ३४:१६

4 आं रागी नु आं जात डा मीश आल का चाक्को” दे अब्राहाममी वाइल कली मदा बाक्त।

5 मिनु वाइलमी “मेको मीश आल एको रागी जाक्चा मबिस्साक्व हना, इन तौ इन जरमेशो रागीम लाइक्चा माल्नुडा?” दे हिल्लो पवा बाक्त।

6 मिनु अब्राहाममी “मोदेशो गेनायो मपावो। आं तौ कली मेक मलतो।

7 डोंइती परमप्रभु यावे, सरीड नु रागी डा परमप्रभुम आं कली आं आफ आ खिं नु आं जात डा रागी रे गुंडशा, एक सोइक्ताक्यी। मेकोमी कसम जशा, आं कली लोत्र पाप्तु ‘कनान रागी इ चच युइ आन कली गेनुडमी’ दे माइक्ती। मेकोमी आ स्वर्ग डा गेय पाइब इ डोंइती सोइक्ब। आं तौ कली आं जात रे मीश आल का चाक्को। २इतिहास ३६:२३; नेहेम्याह २:२०

8 मेको मीश आल गे नु जाक्चा मबिस्साक्व हना, गे कसम मजशो खोदेशो दुम्नेवे। आं तौ कली चहिं मलतो” दे अब्राहाममी आ वाइल कली अरेवा बाक्त।

9 मिनु मेको वाइलमी आ होत्रप अब्राहाम आ फिला तारी गुइ वोइश्शा, आ देशो आ पर्बम कसम जवा बाक्त।

10 मिनु नोले मेको वाइलम आ होत्रप आ दलओंठ १० ओटा लाइश्शा, आ होत्रप के मारेइ मारेइ रिम्शो कोसेली कुरशा लमाक्त। मेकेर रे लशा, मेसोपोटामीया रागीमी नाहोर आ बाक्तीक सहर, अराम-नहराडम मेर जाक्दीम्माक्त। उत्पत्ती ११:२२-३१

11 मिनु मेकेर जाक्दीश्शा, नाक्नाक्दो मीश मुरपुकी ब्वाक्कु दिथ जाक्ची ना, सहर मओत्रथु, दलओंठपुकी इनार आ नेक्था नाइक्पदा बाक्त।

12 मिनु मेकोमी “परमप्रभु यावे, आं होत्रप अब्राहाम आ परमप्रभु, मुलाक्ती आं कली वारच पने। आं होत्रप कली इन गेना हना यो दाक्तीके कोंइदीने। मेकोन पुंइनुड।

13 गो इनार आ नेक्था बाक्नुड। मिनु सहर डा मुर आन तमी ब्वाक्कु दिथ जाक्नीम।

14 गो मीश आल कली ‘इ गाग्री डा ब्वाक्कु इच्चा तूचा गेयी’ देनुड। मेको मीश आलमी ‘तूडो। गो इ दलओंठ आन कली यो ब्वाक्कु तुंइनुड’ देत हना, मेको मीश आल इन गेय पाइब इसहाक कली योत्रशो बाक्ल। मोदेशो दुम्त हना, गे आं होत्रप कली इन गेना हना यो दाक्तीके कोंइताक्नी, दे गो तुइक्नुड” दे परमप्रभु कली लोत्र पवा बाक्त।

15 मोपा लोत्र पन पना, रेबेका माइश्शो मीश आल का गाग्री कुरशा जाक्माक्त। मेको रेबेका बेथुएल आ तमी बाक्माक्त। बेथुएल चहिं अब्राहाम आ लोकब नाहोर नु आ मीश मिल्ला आस तौ बाक्माक्त। उत्पत्ती २२:२३

16 रेबेका थम दारशो मीश आल बाक्माक्त। मिनु ग्युंवे मपथु, कन्ने बाक्शो बाक्माक्त। मिनु इनारम तोइश्शा, आ गाग्री प्रिंशा बेप मुष्शा डोंइसे बाक्त।

17 मिनु मेको वाइल रेबेका कली गुमथ दोरमाक्त। मिनु “इ गाग्री डा ब्वाक्कु इच्चा तूचा गेयी” दे पुना बाक्त।

18 मिनु रेबेकामी आ गाग्री रीब पा नाइश्शा, तूचा गेवा बाक्त।

19 मिनु तूचा गेने थुम्शा “गो इन दलओंठ आन कली यो ब्वाक्कु चाक्शा, मरूमा सम्म तुंइनुड” देमाक्त।

20 मिनु आ गाग्री डा ब्वाक्कु मेकेर बाक्शो शुंगुमी मोइश्शा, दोरशा ब्वाक्कु ब्रथ लमाक्त। दलओंठ नेल्ल आन कली मरूमा सम्म ब्वाक्कु तुंइदा बाक्त।

21 मिनु मेको वाइल छक लाक्शा, मेको कली कोत्रशा, परमप्रभु यावे आ योत्रशो मीश आल बाक्म कौं मबाक्म, दे ब्वालेइ पा बाक्माक्त।

22 मिनु दलओंठ रूथ्री ब्वाक्कु तूडे नोले वाइलम आधी शेकेल सुन के मुन्ट्री नु १० शेकेल सुन के चुरा निक्शी शोल्शा, रेबेका कली गेवा बाक्त। शेकेल का ११.५ ग्राम बाक्ब।

23 मिनू वाइलमी “गे सु का आ तमी नवे? आं कली देनो। इ आफ आ खिंम आंइ कली बास बाक्चा गेनीमी कौ?” दे हिल्लो पवा बाक्त।

24 मिनू रेबेकामी “गो बेथुएल आ तमी नड। बेथुएल चहिं नाहोर नु मिल्ला आस तौ बाक्ब।

25 आंइ खिंम नल नु जचा थोव्रक शुश बाक्ब। बास बाक्तीक यो बाक्ब” दे मदा बाक्त।

26 मिनू वाइलमी खुम्की पा बाप्शा, परमप्रभु यावे आ डोंइती गु बाप्शा बाक्माक्त।

27 मिनू मेकोमी “परमप्रभु यावे, आं होव्रप अब्राहाम आ परमप्रभु, गे ठेयब बाक्नीनी। गे इन शिशी नु इन रिम्शो पशो मप्रोंइथु, आं होव्रप कली कोंइताक्नी। गे आं कली आं होव्रप आ लोक्ब आ खिं कोंइताक्यीनी” दे परमप्रभु यावे कली ठेयब सेला बाक्त।

28 मिनू रेबेका दोरशा खिं लेशशा, आ ममा आ खिं डा मुर आन कली मार मार दुम्मे, मेको नेल्ल देमाक्त।

29 मिनू लाबान माइश्शो, रेबेका आ लोक्ब का बाक्माक्त। मेको दोरशा, इनारम मेको मुर कली गुम्थ लमाक्त।

30 मारदे हना मेकोमी आ समी आ मुन्द्री नु चुरा तशा “मेको मुरुम आं कली मोदेशो लोव्र पाप्तु” देशो नेशा, लाबान मेको मुर कली गुम्थ लमाक्त। मेको मुर आ दलओठ नु इनारम बाक्शो बाक्माक्त।

31 मिनू लाबानम मेको कली “परमप्रभु यावे आ आसीक राइब, गे मारदे मेकेर बाक्नीनी? आंइ खिं पिने। गे नु इन दलओठ आन कली मारेइ मारेइ ठीक पाता” देमाक्त।

32 मिनू वाइल खिं ओव्रमाक्त। लाबानमी दलओठ तार वोइश्शो नेल्ल शोल्ला, थुल्चा कली नल लाप्ता बाक्त। मिनू मेको मुर नु आ गेय पाइब आन कली खोइल चिक्चा कली ब्वाक्कु यो गेवा बाक्त।

33 नोले मेको आ डोंइती जचा थोव्रक खेत्मे बाक्त। मेकोमी चहिं “गो मारदे पिडा, इन कली मदेडा सम्म मजाइनुड, मबवाइनुड” देमाक्त। मिनू लाबानमी “इन के मार लोव्र बाक्मे? लो देनीन” देमाक्त।

34 मिनू वाइलमी “गो अब्राहाम आ वाइल नड।

35 मिनू परमप्रभु यावेमी आं होव्रप कली शुश आसीक गेप्तु। मिनू शुश शोंप पाइश्शो दुम्त। मेकोमी मेको कली क्यारश भेडा, सुन चांदी, वाइलीम वाइल, दलओठ नु गधा शुश गेप्तु।

36 मिनू आं होव्रप आ मीश सारामी खाल्पी दुम्शा, अब्राहाम के तौ का थिप्तु। मिनू अब्राहामम आ तौ कली आ मारेइ मारेइ नेल्ल गेप्तु।

37 मिनू आं होव्रपमी आं कली ‘आं तौ कली आं बाक्शो कनान रागी डा मुर आन तमी मचाक्को।

38 गे आं आफ आं खिं नु आं मुर आन खिं रे मीश आल का चाक्को’ दे कसम जपाइक्ती।

39 मिनू गो आं होव्रप कली ‘मीश आल एको रागी जाक्ने मबिप्बा, कोर में’ देती।

40 मेकोमी चहिं ‘गो परमप्रभु यावे आ डोंइती गाक्नुड। मेकोमी आ स्वर्ग डा गेय पाइब गे नु सोइक्ब। मेकोमी इ कली वारच पाइब। मिनू आं तौ कली आं मुर आन खिं नु आं आफ आं खिं रे मीश आल का चाक्को।

41 आं खिं डा मुर आन बाक्तीके जाक्दीरशा, मीश आल का मगेतेमी हना, गे कसम मजशो खोदेशो दुम्नेवे’ दे आं होव्रपमी आं कली माइक्ती।

42 मिनू मुलाक्ती इनारम जाक्शा, गो ‘परमप्रभु यावे, आं होव्रप, अब्राहाम आ परमप्रभु, गे आं कली वारच पने।

43 गो इनार आ नेक्था बाक्नुड। मिनू मीश आल ब्वाक्कु दिथ जाक्मानु, मीश आल कली इ गाग्री डा ब्वाक्कु इच्का तूचा गेयी, देनुड।

44 मिनू मेको मीश आलमी तूडीन, गो इन दलओठ आन कली यो ब्वाक्कु तुंइनुड, देत हना, मेको मीश आल आं होव्रप आ तौ कली परमप्रभु यावेमी योव्रशो बाक्ल’ देती।

45 मिनू गो आं थुंमी लोव्र पने मथुथु, रेबेका आ गाग्री मुष्णा पित। मिनू इनारम ब्वाक्कु कीथ तोइसाक्व। मिनू गो ‘आं कली इच्का तूचा गेयी’ दे माइक्ता।

46 मिनू मेकोमी आ गाग्री रीब पा नाइश्शा ‘तूडो। गो इन दलओठ आन कली यो तुंइनुड’ देत। मिनू गो तूता। मेकोमी आं दलओठ आन कली ब्वाक्कु तुंइताक्व।

47 मिनु गो 'गे सु का आ तमी नवे?' दे हिल्लो पडानु 'गो बेथुएल आ तमी नड। बेथुएल नाहोर नु मिल्ला आस तौ बाक्ब' दे माइक्ती। मिनु गो आ नेमी मुन्द्री पाइक्ताक्ड, आ गुइमी चुरा लिक्ताक्ड।

48 मिनु गो परमप्रभु यावे आ डोंइती गु बाप्शा 'परमप्रभु यावे, आं होत्रप अब्राहाम आ परमप्रभु, गेरिम्शो पाइब बाक्नीनी' दे ठेयब सेल्ला। मारदे हना आं होत्रप आ लोकब आ खिं डा मुर रे आ तौ कली तमी चाक्चा कली रिम्शो लां कोंइताक्यी।

49 मिनु 'गे आं होत्रप कली शिशी नु रिम्शो पचा मप्रोंइतीनी हना, आं कली देनीन। मेको पचा मदाक्नीनी हना यो देनीन। मारदे हना गो ग्युरा पेरा गे लचा माल्नुड' " दे लोत्र पवा बाक्त।

50 मिनु लाबान नु बेथुएलमी "मेको नेल्ल परमप्रभु यावे आ पशो बाक्ब। मार पाइनस्कु मार देंनस्कु ड।

51 लो, रेबेका कली लतो। मिनु लावो। इन होत्रप आ तौ आ मीश दुम्ल। दोपा परमप्रभु यावेमी लोत्र पवा, मोपा दुम्ल" देंसा बाक्त।

52 मिनु अब्राहाम आ वाइलम मेको लोत्र नेंशा, परमप्रभु यावे आ डोंइती खुम्की पा बाप्शा, मेको कली ठेयब सेला बाक्त।

53 मिनु आ गेय पाइबमी सुन नु चांदी के गहना नु दारशो वासी रेबेका कली गेमे बाक्त। आ लोकब नु आ ममा आस कली यो मार मार गेमे बाक्त।

54 मिनु जशा तूशा, आ गेय पाइबपुकी नु नाक्दो बाक्मा बाक्त। मिनु सुनी कना बोक्मानु, वाइलमी "आं होत्रप आ बाक्तीक लेत्चा गेयीनी" देंमाक्त।

55 मिनु रेबेका आ लोकब नु आ ममामी "रेबेका १० नाक्त सम्म बाक्ल, कोर में। मिनु नोले लन" देंसा बाक्त।

56 मिनु वाइलमी "परमप्रभु यावेमी आं कली आसीक गेशा, रिम्शो पा वारच पाइक्ती। मोपतीके आं कली मक्योल्यीनी। आं होत्रप आ बाक्तीक लेत्चा गेयीनी" देंमाक्त।

57 मिनु मेको निक्शीम "रेबेकामी मार देंबा, मेको नेंय" देंसा बाक्त।

58 मिनु रेबेका कली ब्रेशशा "एको मुर नु लाइनेवे?" दे हिल्लो पाम्सेनु "गो लाइनुड" देंमाक्त।

59 मिनु नोले आ समी रेबेका नु आ कली वारच पाइब, अब्राहाम आ वाइल नु आ गेय पाइब आन कली सोइक्तमे बाक्त।

60 लचा डोंइती रेबेका कली आसीक गेशा "गे आं समी बाक्नेवे। सोशा बोशा, शुश दुमीने। इ चच युइ आन कली आन जोरी सनु आन कली ग्राडीन" दे आसीक गेमे बाक्त। उत्पत्ती २२:१७

61 मिनु नोले रेबेका नु आ वारच पाइब बोक्शा, दलओंठ डोइशशा, मेको मुर नु लसा बाक्त। मोपा वाइलमी रेबेका कली लाइशशा, आ होत्रप आ खिं लेम्माक्त।

62 मिनु इसहाक बेयर-लहाइ-रोइ माइशशो ब्वाक्कु बुक्तीके रे पिमाक्त। मारदे हना दक्खिन रागी नेगेबम बाक्शो बाक्माक्त। उत्पत्ती १६:१४; उत्पत्ती २५:११

63 मिनु नाक्नाक्दो रूमी हिरथ लमाक्त। मिनु कोत्रडानु, डोन रे दलओंठपुकी पिशो तवा बाक्त।

64 मिनु रेबेकामी इसहाक कली तशा, दलओंठ रे फ्रु तोंइसे बाक्त।

65 मिनु अब्राहाम आ वाइल कली "मेरे इं कली गुमथ पीब मुर सु में?" दे हिल्लो पवा बाक्त। मिनु वाइलमी "आं होत्रप बाक्ब" देंमाक्त। मेको नेंशा, रेबेकामी आ कुप्नीम कुल सुम्से बाक्त।

66 मिनु वाइलमी इसहाक कली मार मार दुम्मे, मार मार पवा, नेल्ल शेंदा बाक्त।

67 मिनु इसहाकम रेबेका कली आ ममा सारा आ ताम्बुम ओइंदा बाक्त। मिनु नोले ग्युंवे पाम्से बाक्त। मिनु इसहाकम आ मीश कली दाक्ता बाक्त। मोपा इसहाक आ ममा बेक्शो प्रेंदा बाक्त। उत्पत्ती २३:१-२

## 25

### अब्राहाम आ चच युइ

1 मिनु अब्राहामम अर्को मीश चाक्गा बाक्त। मेको आ नें केतुराह बाक्माक्त।

2 मिनु मेकोमी अब्राहाम रे जिम्नान, योकशान, मेदान, मिदयान, इशबाक नु शुआह थिमाक्त।



3 मिनु योकशानमी शेबा नु देदान थिम्सी बाक्त। देदान आ तौपुकी अशशुरीम, लेतुशीम नु ले-उम्मीम बाक्मा बाक्त।

4 मिनु मिदयान आ तौ एफाह, एफेर, हनोक, अबीदान नु एल्दाह बाक्मा बाक्त। मेको नेल्ल केतुराह आ चच युइ बाक्मा बाक्त।

5 मिनु अब्राहामम आ मार मार नेल्ल इसहाक कली गोवा बाक्त।

6 अब्राहाममी आ मबेक्थुन अर्को मीश आन तौ आन कली मार मार कोसेली गेमी बाक्त। मिनु आ तौ इसहाक रे फ्राशा, पूर्व डा रागीम बाक्मल, दे पूर्व गे सोइक्तीमी बाक्त।

### अब्राहाम बेक्शो

7 मिनु अब्राहाम नेल्ल पा सहे का ७५ बर्स ब्रोंइमाक्त। उत्पत्ती १२:४

8 मिनु नोले शुश बर्स डा खाल्पा दुम्शा बेक्शा, आ किकी पिपी नु लमाक्त। उत्पत्ती १५:१५

9 मिनु इसहाक नु इश्माएल आ तौ निकशीमी आ बेक्शो रां माक-पेला माइश्शो रू डा पुक्खीमी लाइश्शा, वोदसे बाक्त। डोंइती मेको रू सोहार आ तौ एफोन आ रू बाक्माक्त। एफोन हिती का बाक्माक्त। मेको रू माप्पे आ पूर्व गे बाक्माक्त। उत्पत्ती २३:१३-२०

10 अब्राहाममी मेको रू हिती आ मुर रे ग्याप्शो बाक्माक्त। मेकेर डोंइती आ मीश सारा कली नोले अब्राहाम कली वोदमे बाक्त।

11 मिनु अब्राहाम बेक्म नोले परमप्रभुमी इसहाक कली आसीक गोवा बाक्त। मेना इसहाक बेयर-लहाइ-रोइ माइश्शोमी बाक्शो बाक्माक्त। उत्पत्ती १७:१९; उत्पत्ती २४:६२

### इश्माएल आ चच युइ

12 सारा आ वाइलीम इजीप्त डा हागार रे जरमेशो अब्राहाम आ तौ इश्माएल बाक्माक्त। उत्पत्ती २१:१३

13 इश्माएल आ तौ सु सु बाक्मा बाक्त देशा हना, आ डोंइती जरमेशो तौ नेबायोथ बाक्माक्त। मिनु नोले थिशो आन नें केदार, अदबेल, मिब्सा,म,

14 मिश्मा, दुमा, मस्सा,

15 हादाद, तेमा, येतुर, नाफीश नु केदमा बाक्मा बाक्त।

16 एको इश्माएल आ तौ आन नें, आन बाक्तीके आन नें बाक्मा बाक्त। मेको नेल्ल आन थर डा टेयब मुर बाक्शो बाक्मा बाक्त। उत्पत्ती १७:२०; गन्ती १:४४

17 इश्माएल नेल्ल पा सहे का ३७ बर्स ब्रोंइमाक्त। मिनु बेक्शा, आ किकी पिपी नु लमाक्त।

18 आ तौपुकी हवीलाह रे इजीप्त लतीक लां शुर सम्म बाक्शो बाक्मा बाक्त। शुर रागी इजीप्त आ डोंइती अस्सुर गे बाक्ब। इश्माएल चहिं आ लोक्ब नेल्ल आन दातेमी बाक्माक्त। उत्पत्ती १६:१२

### इसहाक आ तौ निकशी

19 इसहाक अब्राहाम आ तौ बाक्माक्त।

20 इसहाक ४० बर्स दुम्मेनु, रेबेका चाक्मा बाक्त। रेबेका चहिं अरामी पदान-अराममी बाक्ब बेथुएल आ तमी, लाबान आ समी बाक्माक्त।

21 मिनु इसहाकमी परमप्रभु यावे कली आ मीश आ परबम पुना बाक्त। मारदे हना आल मथीब बाक्माक्त। परमप्रभु यावेमी आ पुंइशो गोवा बाक्त। मिनु रेबेकामी कोव्रज कुरा बाक्त।

22 मिनु आल निकशी आ कोव्रजम राम्शी पाम्से बाक्त। मिनु रेबेकामी “मुल ओदेशो दुम्ती हना, मार दुम डा? दोपा ब्रोंइनुडा डा?” दे मिम्ता बाक्त। मिनु परमप्रभु यावे कली “मार दुम्नुडा?” दे हिल्लो पंवा बाक्त।

23 मिनु परमप्रभु यावेमी मेको कली “इ कोव्रजम जात निकशी डा मुर बाक्नीसी। मेको जात निकशी फ्राचा पुंइसीनीस। का अर्को क्येडा बोल्यो बाक्ब। डोंइती जरमेशो चहिं कान्छा आ गेय पाइब दुम्ब” दे शेंदा बाक्त। उत्पत्ती २७:२९; मलाकी १:२; रोमी ९:१०-१२

24 मिनु रेबेकामी आल थिमेनु, जौले बाक्सा बाक्त।

25 मिनु डोंइती डा आ रांम वा फेकशो खोदेशो पा लल चां पाइशो वोंइश आल का थिमाक्त। मिनु मेको कली एसाव नें वोदा बाक्त।

26 मिनु नोले आ लोकबमी आ लोकब आ गेंग्रे ग्याइशशा गूमाक्त। मोपतीके आ नें याकूब वोदा बाक्त। रेबेका आल थिची ना इसहाक ६० बर्स दुम्शो बाक्माक्त। होसे १२:४

27 मिनु मेको तौ निक्शी कोल्सानु, एसाव जोकब सिखारी दुम्माक्त। नेल्ल नाक्त ब्वाकीम बाक्चा दाक्ता बाक्त। याकूब चहिं ताम्बुम बाक्ब नु रू डा गेय पा, सिक्सी पा बाक्ब दुम्माक्त।

28 इसहाकम एसाव कली दाक्ता बाक्त। मारदे हना आ चाक्शो सिखार ब्ववा बाक्त। रेबेकामी चहिं याकूब कली दाक्ता बाक्त।

### डोंइती जरमेशो तौ आ अधिकार

29 मिनु काबु याकूबमी खोले क्येवानु, एसाव ब्वाकी रे शोत्रलु बेक्शा जाक्माक्त।

30 मिनु एसावमी याकूब कली “इ क्येशो लल दाल खोले इच्का गेयी। गो शोत्रलु बेक्ती” देंमाक्त। मोपतीके एसाव कली एदोम माइशो याइनी नें वोइशो बाक्माक्त।

31 मिनु याकूबमी “मुलाक्ती डोंइती जरमेशो तौ इ आसीक आं कली गेयी” देंमाक्त।

32 मिनु एसावमी “मुल गो बेक्चता डोंइती जरमेशो तौ आ तचा डा आसीकम मार दुम्बा डा?” देंमाक्त।

33 मिनु याकूबमी “गो मुलाक्ती गेतन, दे कसम जावो” दे मदा बाक्त। मिनु एसावमी याकूब कली “डोंइती जरमेशो तौ आं आसीक इ केन दुम्ल” दे कसम जवा बाक्त। उत्पत्ती २७:३६; हिब्रू १२:१६

34 मिनु नोले याकूबमी एसाव कली शोब्ले नु दाल खोले खेत्ता बाक्त। मिनु मेको जशा तूशा बोक्शा लमाक्त। मोपा एसावमी “डोंइती जरमेशो तौ आ ततीक आसीक ममाल्नुड” दे प्रोना बाक्त।

## 26

### इसहाक गेरार सहर लशो

1 मिनु नोले रागीमी अन्काल दुम्माक्त। डोंइती अब्राहाम बाक्मेनु यो, अन्काल दुम्शो बाक्माक्त। मिनु इसहाक पलिस्ती आन पिप अबीमेलेक आ रागी डा गेरार सहर लमाक्त।

2 मिनु परमप्रभु यावेमी इसहाक आ डोंइती गूमाक्त। मिनु इसहाक कली “इजीप्त रागी मलावो। आं देशो रागीम बाक्थ लावो।

3 मेको रागीमी अर्को रागी डा मुर दुम्शा बाक्को। गो गे नु बाक्शा, इ कली आसीक गेनुड। गो इ कली नु इ चच युइ आन कली एको रागी नेल्ल गेनुड। गो इ आफ अब्राहाम नु कबल पा, कसम जाता। मुल आं कबल खाप्नुड। उत्पत्ती १७:१९; उत्पत्ती २२:१६-१७

4 इ चच युइ आन कली सरीड डा सोरुल खोदेशो पा शुश सेल्नुड। मेको आन कली एको रागी नेल्ल गेनुड। मिनु इ चच युइ आन पर्वम रागी रागी डा मुर नेल्ल आसीक ताइनीम।

5 मारदे हना अब्राहामम आं देशो टिशा, आ पचा माल्शो पाप्तु। आं शेंशो, आं फुल्लुम मुशा ब्रेक्शो लोत्र नु आं अरेशो नेल्ल पाप्तु” दे मदा बाक्त। उत्पत्ती १५:५

6 मिनु इसहाक गेरार सहर उइ बाक्माक्त।

7 मिनु अबीमेलेक आ मुरपुकीमी इसहाक कली आ मीश आ पर्वम लोत्र पामे बाक्त। मेकोमी चहिं “आं समी बाक्ब” दे लोत्र लेत्ता बाक्त। मारदे हना रेबेका शुश दारशो मीश मुर दुम्तीके “आं मीश बाक्ब” देंचा हिंमाक्त। मारदे हना “मेको कली तशा, लाइक्चा कली आ कली साइक्नीम” दे हिंशो बाक्माक्त।

8 मिनु इसहाक मेको रागीमी शुश बाक्शा, काबु पलिस्ती आन पिप अबीमेलेकमी झेल रे इसहाक नु आ मीश रेबेका चाल्शो तवा बाक्त।

9 मोपतीके अबीमेलेकमी इसहाक कली ब्रेशशा “नेनो, एको थमा पा इ मीश बाक्ब। दोपा ‘आं समी बाक्ब’ देंने?” दे हुइक्ता बाक्त। मिनु इसहाकमी “एको आ पर्वम आं कली साइक्नीमी, को, दे हिंती” देंमाक्त।

10 मिनु अबीमेलेकमी “आंड कली मार पवी? आं मुर का मेको नु इप्शो हना, गे आंड कली शुश मरिम्शो मपपदी वा?” दे मदा बाक्त।

11 मिनु अबीमेलेकमी आ मुर नेल्ल आन कली “सुम मेको नु आ मीश आस कली मरिम्शो पाइबा, मेको थमा पा साइक्चा पुंडसीब” दे माइक्मी बाक्त।

12 मिनु इसहाकमी मेको रागीमी मार मार शोक्शा, मेको बर्सम गेडा का के सहे का गेडा सम्म सिप्पाइश्शा खेला बाक्त। मारदे हना परमप्रभु यावेमी इसहाक कली आसीक गेवा बाक्त। हितोपदेस १०:२२

13 मिनु शुश शोप पाइश्शो दुम्शा, दारना दारन शुश क्येट थीब दुम्माक्त।

14 मेको आ क्यारश भेडा नु बी ब्यफ शुश दुम्मा बाक्त। मिनु वाइलीम वाइलपुकी यो शुश दुम्मा बाक्त। मोपतीके पलिस्तीपुकीमी गेहे पामे बाक्त।

15 मिनु पलिस्तीपुकीमी अब्राहाम आ गेय पाइब आन दोशो इनार खपीम प्रिंशा, ब्वाक्कु तेकामे बाक्त। उत्पत्ती २१:२२-३४

16 मिनु अबीमेलेकम इसहाक कली “आंड क्येडा गे बोल्यो बाक्नीनी, मोपतीके एकेर रे लने” दे मदा बाक्त।

17 मिनु इसहाक नु आ मुरपुकी मेकेर रे लशा, गेरार डा दिममी जाक्दीश्शा, आन ताम्बु कीशा बाक्मा बाक्त।

18 मिनु इसहाकमी डोंडती अब्राहाम आ दोशो इनारपुकी, लेंशा दोपाइश्शा, ब्वाक्कु गूपदा बाक्त। मारदे हना अब्राहाम बेक्म नोले पलिस्तीपुकीमी मेको इनार आन कली खपीम प्रिंशा बाक्मा बाक्त। मिनु मेको इनार आन कली आ आफ आ वोइश्शो नें लेंशा वोदा बाक्त।

19 मिनु इसहाक आ गेय पाइबपुकीमी मेको दिममी दोशा, ब्वाक्कु बुक्तीके थित्मे बाक्त।

20 मिनु गेरार डा गोठलापुकीमी इसहाक आ गोठला आन कली “एको ब्वाक्कु आंड के बाक्ब” दे जीमे बाक्त। मोपतीके इसहाकम मेको इनार कली एसेक नें वोदा बाक्त। मारदे हना मेकोपुकी आ मुर नु जीमे बाक्त।

21 मिनु लेंशा अर्को इनार का दोव्रमे बाक्त। मेको आ पर्बम यो जीमे बाक्त। मेको कली सित्ना नें वोदा बाक्त।

22 नोले मेकेर रे लशा, अर्को इनार का दोव्रमे बाक्त। मेको आ पर्बम सुइमी जिचा मपोक्गमे बाक्त। मिनु मेको आ नें रेहोबोथ वोदा बाक्त। मिनु “मुल परमप्रभु यावेमी आंड कली बाक्तीक गेवा बाक्त। गोपुकी एको रागीमी शुश दुम्कल” देंमाक्त।

23 मिनु मेकेर रे लशा, बेयर-शेबा जाक्दीम्मा बाक्त।

24 मिनु मेको नाक्दो परमप्रभु यावे गूशा “गो इ आफ अब्राहाम आ परमप्रभु नड। महिनो। गो गे नु बाक्नुड, इ कली आसीक गेनन। आं गेय पाइब अब्राहाम आ पर्बम गो इ चच युइ आन कली शुश सेल्लुड” दे लोव्र पवा बाक्त।

25 मिनु इसहाकम मेकेर चढेतीक सेल्शा, परमप्रभु यावे आ नें थिशा ब्रेश्शा, मेको नु लोव्र पवा बाक्त। मिनु आ ताम्बु मेक उइ कीडा बाक्त। आ गेय पाइबपुकीमी मेकेर इनार का दोव्रमे बाक्त। उत्पत्ती १२:८

### इसहाक नु अबीमेलेक सल्ला पशो

26 काबु अबीमेलेक, आ अर्ती गेब अहुज्जाथ नु आ फौज डा ठेयब कप्तान फीकोल नु गेरार सहर रे जाक्शा, इसहाक कली गुम्मे बाक्त।

27 मिनु इसहाकमी “गेपुकी आं कली मदाक्थु, इन बाक्तीके रे सोइक्ताक्थीनी। मुल मारदे आं कली गुम्थ जाक्नी?” दे हिल्लो पवा बाक्त।

28 मिनु मेकोपुकीमी “परमप्रभु यावे गे नु बाक्ब, गो तुइक्नीकी। मोपतीके गोपुकीमी ‘गे नु कसम जशा, कबल पचा’ रिम्शो दुम्ब। ब्यवस्था २९:३; मत्ती १३:१३

29 गे आंड कली श्येत मगेने। गोपुकीमी यो इन कली श्येत मगेथु, रिम्शो पा लडाइ मपथु सोइक्ताक्क। गे परमप्रभु यावे आ आसीक राइब बाक्नीनी” दे इसहाक कली देंमा बाक्त।

30 मिनु इसहाकम मेको आन कली भोज सेला बाक्त। मिनु मेकोपुकीम जामे, तूडमे बाक्त।

31 मिनु मेकोपुकी आ दीसा सुनी कना बोक्शा, कसम जामे बाक्त। मिनु नोले इसहाकमी मेको आन कली लचा गेवा बाक्त। मिनु आन थुं नाइश्शा लमा बाक्त।

32 मेको नाक्ती इसहाक आ गेय पाइबपुकी जाक्शा, इसहाक कली “आंड दोतीकेमी ब्वाक्कु यूत” दे शेंदमे बाक्त।

33 मिनु मेको इनार कली शिबा नें वोदा बाक्त। मोपतीके मेको सहर आ नें मुल सम्म बेयर-शेबा बाक्ब।

### एसाव आ मीश निक्शी

34 एसाव ४० बर्स दुम्मेनु, हिती आ मुर बेयरी आ तमी युदीथ नु हिती आ मुर एलोन आ तमी बासेमाथ चाक्सी बाक्त। उत्पत्ती ३६:२-३

35 मिनु मेको निक्शी आस पर्वम इसहाक नु रेबेका थुं मनुथु, शुश सुर्ता पाम्से बाक्त।

## 27

### इसहाकमी आसीक गेशो

1 मिनु इसहाक खाल्पा दुम्शा, ब्राब्रा पा मिक्च मताइब दुम्माक्त। मिनु मेकोमी आ डोंइती जरमेशो तौ एसाव कली “आं तौ” दे ब्रेत्ता बाक्त। मिनु एसावमी “मार देंनी?” दे लोत्र लेत्ता बाक्त।

2 मिनु इसहाकमी “नेनो, गो खाल्पा दुम्ती, आं बेक्ची ना मतुइक्नुड।

3 इ लिब्रा लाइश्शा, सिखार ग्यारथ लावो। मिनु आं कली सिखार चाक्को।

4 मिनु नोले आं दाक्शो ब्रोत्रब्रोत्रशो क्येशा, गेयी। गो आं बेक्चा क्येडा डोंइती जशा ब्वशा, इ कली आसीक गेनुड” देंमाक्त।

5 मिनु रेबेकामी इसहाक नु एसाव लोत्र पशो नेंशो बाक्माक्त। मिनु एसाव ब्वाकी सिखार ग्यारथ लमेनु,

6 रेबेकामी आ तौ याकूब कली “आं तौ नेनो, गो इ आफोमी एसाव कली लोत्र पशो नेंता।

7 मेकोमी एसाव कली ‘आं कली सिखार चाक्को। ब्रोत्रशो क्येवो। गो जशा ब्वशा नोले परमप्रभु यावे आ डोंइती आं बेक्चा क्येडा डोंइती इ कली आसीक गेनुड” देंत।

8 मोपतीके आं तौ, आं देंशो टिवो। दोपा अरेना, मोपा पावो।

9 मुल गोठ लावो। क्यारश आन दाते रे रिम्शो पाठा निक्शी चाक्को। मिनु गो इ आफ कली आ दाक्शो ब्रोत्रशो क्येनुड।

10 मिनु गे चहिं लाइश्शा, इ आफ कली ख्रेत्तो। मेकोमी जशा ब्वशा, आ बेक्चा क्येडा डोंइती इ कली आसीक गेवल” देंमाक्त।

11 मिनु याकूबम आ ममा कली “नेनीन, आं लोकब एसाव शुश चां पाइश्शो बाक्ब। गो मोदेंशो मनड। उत्पत्ती २५:२५

12 मिनु आं आफोम आं कली थिशा, तुइक्ब। मिनु गो जोल पाइब दुम्शा, आसीक मतथु, सराप राइनुड” देंमाक्त।

13 मिनु आ ममामी “इ कली पशो सराप गो रडल, आं तौ। गे आं देंशो पावो। पाठा निक्शी ब्रथ लावो” देंमाक्त।

14 मिनु याकूबम गोठ लशा, पाठा निक्शी चाक्शा, आ ममा कली गेवा बाक्त। मिनु आ ममामी आ आफ कली आ दाक्शो ब्रोत्रशो श्ये क्येवा बाक्त।

15 मिनु रेबेकामी आ खिमी वोइश्शो आ डोंइती जरमेशो तौ एसाव आ नक वा लाइश्शा, आ कान्छा याकूब कली फेक्पदा बाक्त।

16 मिनु मेको पाठा आस कुशुल याकूब आ गुइ तारी नु आ शुर तारी क्येप्ता बाक्त।

17 मिनु आ क्येशो ब्रोत्रशो श्ये नु शोब्ले याकूब कली गेवा बाक्त।

18 मिनु याकूबम आ आफ बाक्तीके लशा, मेको कली “आं आफ” देमाक्त। मिनु “गो बाक्ती। आं तौ, गे सु नवे” दे हिल्लो पवा बाक्त।

19 याकूबम आ आफ कली “गो इन डोंइती जरमेशो तौ, एसाव, नड। इन पुंइशो गो पाता। बोक्शा निश्शा, आं सिखार ब्वने। मिनु आं कली आसीक गेयीनी” देमाक्त। लेवी १९:१४

20 मिनु इसहाकमी “गिश रीब पा पवी, आं तौ?” दे हिल्लो पवा बाक्त। मिनु “परमप्रभु यावे, इन परमप्रभुमी सिखार आं नेक्था चाक्तु” देमाक्त।

21 मिनु इसहाकम याकूब कली “आं नेक्था पिवो। इ कली थीनन, आं तौ। गे थमा पा, आं तौ एसाव नवे कों, मनवे” दे मदा बाक्त।

22 मिनु याकूब आ आफ आ नेक्था लमाक्त। इसहाकम मेको कली सुल्शा “आ सेंदा याकूब के बाक्त, आ गुड चहिं एसाव के बाक्त” देमाक्त।

23 मिनु मेको कली मनुइक्ता बाक्त। मारदे हना आ गुड एसाव खोदेशो पा चां पाइश्शो बाक्माक्त। मोपतीके आसीक गेवा बाक्त।

24 मिनु “गे थमा पा आं तौ एसाव नवे?” दे हिल्लो पवानु “गो नड” देमाक्त।

25 मिनु इसहाकम “लो, इ सेल्शो जचा ब्वचा थोव्रक चाक्को। इ कली आसीक गेनन” देमाक्त। मिनु याकूबमी चाक्का बाक्त। मिनु आ आफोम ब्ववा बाक्त। मिनु याकूबमी अडगुर शांबु यो चाक्शा, गेवा बाक्त। मिनु मेको यो तूडा बाक्त।

26 मिनु आ आफ इसहाकम “आं नेक्था पिवो, आं कली पुक्पु पावो, आं तौ” देमाक्त।

27 मिनु आ नेक्था लशा, पुक्पु पवा बाक्त। इसहाकमी आ वा आ रिना नाम्शा, आसीक गेवा बाक्त। मिनु मेकोमी “आं तौ आ रिना परमप्रभु यावेमी आसीक गेशो रू आ रिना खोदेशो बाक्ब।

28 परमप्रभुमी इ कली सरीड डा सीत रे नु रिम्शो खप रे शुश चेरब नु अडगुर शांबु गेवल।

29 मुरपुकीम इ कली गेय पामेकल। रागी रागी डा मुरपुकी इ डोंइती खुम्की पा बाम्मल। इ लोकब आन दातेमी गे ठेयब दुमो। इ ममा आ तौपुकी इ डोंइती बाम्मल। सु सुम इ कली सराप पामे, मेको आंमान रमल। सु सुम इ कली आसीक गेमे, मेको आसीक रमल” दे आसीक गेवा बाक्त। उत्पत्ती २३:२५; उत्पत्ती १२:३

30 मिनु इसहाकमी आसीक गेवा नोले, याकूब आ आफ आ बाक्तीक रे लमेनु, आ लोकब एसाव आ सिखार ग्यारतीक रे जाक्माक्त।

31 मेकोमी ब्रोव्रशो श्ये क्येशा, आ आफ आ बाक्तीके जाक्शा, आ आफ कली “आं आफ बोक्कीन। आं सिखार ब्वशा, आं कली आसीक गेयीनी” देमाक्त।

32 मिनु आ आफ, इसहाकमी मेको कली “गे सु नवे?” दे हिल्लो पवानु “गो इन डोंइती जरमेशो तौ, एसाव नड” देमाक्त।

33 मिनु इसहाक शुश खिंखि पा “सुमी आं कली सिखार चाक्का? इ जाक्चा क्येडा डोंइती गो जाता। मिनु आसीक गेता। आं आसीक लीब” देमाक्त।

34 मिनु एसाव आ आफ आ लोव्र नेंशा, ठेयब सेंदा पा डाक्माक्त। मिनु आ आफ कली “आं आफ, आं कली यो आसीक गेयीनी” देमाक्त। हिबू १२:१७

35 मिनु “इ लोकब जाक्शा, जोल पशा, इ आसीक रोइक्ताक्व” देमाक्त।

36 मिनु एसावमी “आ नें याकूब दुम्शो, ठीक बाक्ब। मुल आं कली निक्शी खेयप ठगेती। आं डोंइती जरमेशो तौ आ अधिकार रोइक्ताक्यी। मुल आं आसीक यो लाइक्तु। गे आं कली आसीक महेंदीनी?” दे डाक्शा, देमाक्त। उत्पत्ती २५:२६; उत्पत्ती २५:३३

37 मिनु इसहाकम एसाव कली “नेनो, गो मेको कली इ प्रभु सेल्ता। आ लोकब नेल्ल आन कली मेको आ गेय पाइब सेल्ता। चेरब नु अडगुर शांबु शुश ग्रेल्लम, दे लोव्र पाता। मिनु इ कली मार गेनना डा, आं तौ?” दे लोव्र पवा बाक्त।

38 मिनु एसावमी आ आफ कली “इन के आसीक का ला बाक्बा डा, आं आफ? आं कली यो आसीक गेयीनी” दे शुश डाक्माक्त।

39 मिनु आ आफ इसहाकम “नेनो, मलिलो खप नु सरीड डा सीत इ बाक्तीक रे डोन बाक्ब।

40 इ तरवारम इ गेय पाइनेवे। इ लोकब कली गेय पाइनेवे। २राजा ८:२०,२२ गे बोल्यो दुम्ते हना, आ जुवा इ शुर रे ताइक्नेवे” दे एसाव कली यो आसीक गेवा बाक्त।

41 मिनु एसावमी आ आफोम याकूब कली गेशो आसीक लोत्र आ पर्वम, याकूब कली काइ मदाक्ता बाक्त। आ थुंमी “आं आफ बेक्शा रोंका पने थुम्शो नोले, आं लोकब याकूब कली साइक्नुड” दे मिम्ता बाक्त।

42 मिनु रेबेकामी आ तौ आ लोत्र नेना बाक्त। मिनु मेकोमी याकूब कली ब्रेशशा “नेनो, इ लोकबमी इ कली साइक्चा कली मिम्ब।

43 मोपतीके आं तौ, गे आं देशो पावो। बोक्को, आं लोकब लाबान आ बाक्तीके, हारान सहर प्रोक्को। उत्पत्ती २४:२९

44 इ लोकब आ गाइशो मनांडसे सम्म मेक उइ बाक्को।

45 मिनु इ लोकबमी इ पशो प्रेशा, मचुरत हना, गो इ कली ब्रथ सोइक्नुड। गो दोपा नाक्त कामी आं मुर निक्शी जाम्शो तने चान्नुड डा?” दे आ तौ कली देमाक्त।

46 मिनु रेबेकामी इसहाक कली “गो हित्ती आ तमी आस पर्वम बेक्चा डा दुम्ती। याकूबमी यो एको खोदेशो पा एको रागी डा हित्ती आ तमी का चाक्तु हना, गो ब्रोइचा मदाक्नुड” दे मदा बाक्त। उत्पत्ती २६:३४-३५

## 28

### याकूब कली सोइशो

1 मिनु नोले इसहाकमी याकूब कली अरेशा “गे कनान रागी डा मीश आल मचाक्को। उत्पत्ती २४:३

2 साशा, पदान-अराम इम्मा आ आफ बेथुएल आ खिं लावो। मिनु इम्मा आ लोकब लाबान आ तमी का चाक्को। उत्पत्ती २२:२३; उत्पत्ती २४:२९

3 मिनु नेल्ल क्येडा सक्ति पाइशो परमप्रभुमी इ कली आसीक गेवल। मिनु इ कली सोशा बोशा, शुश सेलल। हिक्ने मचाप्चा डा पा शुश दुम्पदल।

4 अब्राहाम कली गेशो आसीक मुल इ कली नु इ चच युइ आन कली गेवल। इ मुल बाक्शो रागीम अर्को रागी डा मुर बाक्ते, तन्न परमप्रभुमी अब्राहाम कली गेप्टु। मेको इ कली दुम्ल” दे आसीक गेवा बाक्त।

5 मोदेशो पा इसहाकमी याकूब कली पदान-अराम डा मुर बेथुएल आ तौ आ खिं सोइक्ता बाक्त। मेको याकूब नु एसाव आस ममा आ लोकब लाबान बाक्माक्त।

6 मिनु एसावमी, इसहाकम याकूब कली आसीक गेशा, मीश चाक्चा कली पदान-अराम गे सोइशो तुइशशा, आ आफ आ अरेशो “कनान रागी डा तमी मचाक्को” दे माइशो तुइक्ता बाक्त।

7 याकूबमी आम आफ आस कली टिशा, पदान-अराम गे लशो तवा बाक्त।

8 मिनु एसावम कनान रागी डा तमीपुकी आ आफ इसहाकम मदाक्शो तुइशशा,

9 इश्माएल आ बाक्तीके लमाक्त। मिनु मीश निक्शी बाक्शा यो, अब्राहाम आ तौ इश्माएल आ तमी नेबायोथ आ समी महलाथ चाक्गा बाक्त। उत्पत्ती १६:१६; उत्पत्ती २६:३४; उत्पत्ती २५:१३

### याकूबमी डोमु तशो

10 मिनु याकूब बेयर-शेबा रे गाक्शा, हारान सहर गे लमाक्त।

11 मिनु बाक्तीके का जाक्दीशशा, नाक्दो मेकेर बाक्माक्त। मारदे हना नां रिक्माक्त। मिनु फुल्लु तार आ पिया वोइशशा इम्माक्त।

12 मिनु इम्मेनु, डोमुम खप रे सरीड थिशो क्रेसी का तवा बाक्त। मेको क्रेसीमी परमप्रभु आ स्वर्ग डा गेय पाइबपुकी तोइशशा, डोइशशा तवा बाक्त। यूहन्ना १:५१

13 मिनु क्रेसी आ डरम परमप्रभु यावे राप्शा, याकूब कली “गो परमप्रभु यावे, इ बाजे अब्राहाम नु इ आफ इसहाक आस परमप्रभु नड। मुल इ इप्शा बाक्तीक रागी इ कली नु इ चच युइ आन कली गेनन्नी।

14 इ चच युड खप डा फुरक खोदेशो पा शुश दुम्नीम। सोशा बोशा, शुश दुम्शा, पूर्व, पच्छिम, उत्तर, दक्खिनम ब्रशा बाक्नीमी। गे नु इ चच युड आन परबम रागी नेल्ल डा मुर आसीक ताइनीम। उत्पत्ती १३:१४-१५

15 गो गे नु बाक्शा, ते लाइनेवे, गो इ कली कोत्रनन। गो इ कली एको रागी लेप्पाइक्कनन। मारदे हना गो इ कली मप्रॉइनन। इ कली मार मार देंडा, गो मेको नेल्ल पाइनुडु” देमाक्त।

16 मिनु याकूब आ निन्द्रा रे सेंसीशा “परमप्रभु यावे थमा पा एकेर बाक्ब। गो मतुडक्कु” देमाक्त।

17 मिनु हिंशा “एको हिंशा डा बाक्तीके बाक्ब। परमप्रभु आ बाक्तीक खिं बाक्शा, सरीड डा लाप्चो बाक्ब” देमाक्त। प्रस्थान ३:५

18 मिनु याकूब सुनी कना बोक्शा, आ पिया आगा डा वोइश्शो फुल्लु राप्पाइश्शा तेल लुक्ता बाक्त। उत्पत्ती ३५:१४-१५

19 मिनु मेको बाक्तीके कली बेथेल नें वोदा बाक्त। डोंइती मेको सहर आ नें लूज बाक्माक्त।

20 मिनु याकूबमी “परमप्रभु गो नु बाक्त हना, लां कोंइशा कोत्रती हना, जचा नु फेक्चा यो गेती हना,

21 थुं नाइश्शा, आं आफ आ खिं लेत्चा गेती हना, परमप्रभु यावे आं परमप्रभु बाक्ब” दे कसम जवा बाक्त।

22 मिनु परमप्रभु कली “आं राप्पाइश्शा वोइश्शो फुल्लु परमप्रभु आ खिं दुम्ल। आं कली मार मार गेनी, मेको के १० भागमी भाग का थमा पा इन कली गेनन्नी” देमाक्त। उत्पत्ती ३५:१

## 29

याकूब लाबान आ खिं जाक्दीश्शो

1 मिनु याकूब लमे लमे, पूर्व डा मुर आन रागी जाक्दीम्माक्त।

2 मिनु कोत्रडानु, दिंम कामी इनार का तवा बाक्त। हुल सां भेडा मेकेर बाक्शो बाक्मा बाक्त। मारदे हना मेको आन कली मेको इनार डा ब्वाक्कु तुंडबाक्मा बाक्त। मेको इनार चहिं ठेयब फुल्लुमी सुम्शो बाक्माक्त।

3 मिनु भेडा आन हुल नेल्ल मेकेर खुम्सीशा, गोठलापुकीमी मेको इनार डा फुल्लु क्युक्शा, भेडा आन कली ब्वाक्कु तुंडशा, नोले लेंशा इनार सुम्शा वोइक्बाक्मा बाक्त।

4 मिनु याकूबमी मेको भेडा गोठला आन कली “आं लोकबपुकी गे ते डा बाक्नीनी?” दे हिल्लो पवा बाक्त। मिनु मेकोपुकीमी “हारान डा बाक्नीकी” देमा बाक्त।

5 मिनु याकूबमी “गे नाहोर आ तौ लाबान तुडक्नीनी?” दे हिल्लो पवा बाक्त। मिनु “गो तुडक्नीकी” दे लोत्र लेत्मे बाक्त। उत्पत्ती २४:१०, २४

6 याकूबमी “रिम्शो बाक्मे?” दे हिल्लो पवानु, मेकोपुकीमी “रिम्शो बाक्ब। हयु आ तमी राहेल आ भेडा नु जाक्त” देमा बाक्त।

7 मिनु याकूबमी “चोकची मजाक्शो, भेडा आन कली ब्वाक्कु तुंडशा, जोपाइक्थ लतीन” देमाक्त।

8 मिनु मेकोपुकीमी “हुल नेल्ल मखुम्सीथु, इनार डा फुल्लु मयाक्थु, भेडा आन कली ब्वाक्कु तुंडने मचाप्नीकी” दे लोत्र लेत्मे बाक्त।

9 मिनु याकूब मेकोपुकी नु लोत्र पवा सम्म, राहेल आ आफ आ भेडा नु जाक्माक्त। मेको गोठाल्नी बाक्माक्त।

10 मिनु याकूबमी आ मामा, लाबान आ तमी राहेल तवा बाक्त। मिनु मेको कली गुम्थ लशा, इनार डा फुल्लु याक्ता बाक्त। मिनु आ मामा आ भेडा आन कली ब्वाक्कु तुंडदा बाक्त।

11 मिनु राहेल कली चुप पाइश्शा डाक्माक्त।

12 राहेल कली “गो इ आफ आ बहिनी रेबेका आ तौ नड” देमाक्त। मिनु राहेल दोरशा लशा, आ आफ कली मेको लोत्र शेंदा बाक्त।

13 मिनु लाबानमी आ भानीच याकूब जाक्शो लोत्र नेंशा, दोरशा मेको कली गुम्थ जाक्माक्त। मिनु मुष्शा, पुक्पु पा, आ खिं लदा बाक्त। मिनु याकूबमी लाबान कली शुश लोत्र शोत्रडा बाक्त।

14 मिनु लाबानमी “गे थमा पा आं खिं डा मुर बाक्नेवे” देमाक्त। मिनु याकूब महिना का खोदेशो मेकेर बाक्माक्त।

15 मिनु लाबानमी याकूब कली “गे आं खिं डा मुर बाक्ते हना यो, आं कली मो गेय पचा ममाल्लेवे। मार पुंडनेवे, देनो” दे हिल्लो पवा बाक्त।

16 लाबान आ तमी निकशी बाक्सा बाक्त। आ डोंडती जरमेशो आ नें लेआ नु कान्छी आ नें राहेल बाक्माक्त।

17 लेआ मदारशो बाक्माक्त। राहेल चहिं शुश दारशो बाक्माक्त।

18 याकूबम राहेल कली दाक्ता बाक्त। मिनु लाबान कली “इन कान्छी तमी राहेल आ पर्वम गो इन कली ७ बर्स गेय पाइनुड” देमाक्त।

19 मिनु लाबानमी “अर्को मुर कली गेचा क्येडा इ कली गेचा रिम्शो बाक्ब। गो नु गेय पा बाक्को” देमाक्त।

20 मिनु याकूबम राहेल आ पर्वम ७ बर्स गेय पवा बाक्त। मेको ७ बर्स याकूब कली नाक्त का निकशी खोंदेंशो पा लमाक्त। मारदे हना राहेल कली शुश दाक्ता बाक्त।

21 मिनु याकूबमी लाबान कली “आं मीश गेयीनी। ७ बर्स दुम्माक्त। मेको नु ग्युंबे पाइनुड” दे मदा बाक्त।

22 मिनु लाबानमी सहर डा मुर नेल्ल ब्रेशशा, भोज गेमी बाक्त।

23 मिनु नाक्नाक्दो लाबानमी आ तमी लेआ लाइशशा, याकूब कली गेवा बाक्त। मिनु याकूब मेको नु इम्माक्त।

24 लाबानमी आ तमी लेआ कली आ गेय पाइब वाइलीम जिल्ला गेवा बाक्त।

25 मिनु याकूब सुनी कना बोक्शा, आ मीश कोव्रडानु, लेआ बाक्माक्त। मिनु गाइशशा लाबान कली “गे आं कली मार पनी? गो इन कली राहेल आ पर्वम गेय मपडा डा? मारदे आं कली ठगेनी?” दे मदा बाक्त।

26 मिनु लाबानमी “आंइ रागीमी जेठी क्येडा डोंडती कान्छी मगेनीकी।

27 हप्ता का मेको नु बाक्को। नोले गो इ कली अर्को यो गेनन। गे अर्को ७ बर्स गेय पचा माल्लेवे” दे मदा बाक्त।

28 मिनु याकूब मेको बिशशा, लेआ नु हप्ता का बाक्माक्त। मिनु नोले लाबानमी राहेल कली यो गेवा बाक्त।

29 लाबानमी आ तमी राहेल कली आ गेय पाइब वाइलीम बिल्हाह गेवा बाक्त।

30 मिनु याकूबम राहेल कली यो चाक्गा बाक्त। मिनु लेआ क्येडा राहेल कली शुश दाक्ता बाक्त। मिनु लाबान कली अर्को ७ बर्स गेय पवा बाक्त। लेवी १८:१८

### परमप्रभुमी लेआ आ श्येत तशो

31 मिनु परमप्रभु यावेमी याकूबमी लेआ कली मदाक्शो तशा “आल थीब दुम्ल” दे आसीक गेवा बाक्त। तन्न राहेल आल मथीब बाक्माक्त।

32 मिनु लेआ कोव्रज कुरशा, तौ का थिमाक्त। मेको आ नें रूबेन वोदा बाक्त। मारदे हना “परमप्रभु यावेमी आं श्येत ताप्तु। मुल रे आं वोंडशेम आं कली दाक्ब” देमाक्त।

33 मिनु लेंशा कोव्रज कुरशा, तौ का नु थिमाक्त। मिनु “परमप्रभु यावेमी आं कली मदाक्शो तशा, अर्को तौ का यो गेती” देश, मेको आ नें सिमियोन वोदा बाक्त।

34 मिनु लेंशा कोव्रज कुरशा, अर्को तौ का थिमाक्त। मिनु “मुल रे आं वोंडश गो नु बाक्ब। मारदे हना गो तौ सां थीतामी” देमाक्त। मोपतीके आ नें लेवी वोदा बाक्त।

35 मिनु लेंशा कोव्रज कुरशा, तौ का नु थिमाक्त। मिनु “गो परमप्रभु यावे कली ठेयब सेल्लुड” दे मेको कली यहूदा नें वोदा बाक्त। मिनु आल थिचा नांइसे बाक्त।

## 30

### याकूब आ अर्को आल

1 मिनु राहेलमी “आल मथीब बाक्डा बाक्त” दे तुइशशा, आ लोकब कली गेहे पवा बाक्त। मिनु याकूब कली “गे आं कली आल मगेतीनी हना, गो बेक्नुड” देमाक्त।



- 2 मिनू याकूबमी राहेल आ लोव्र आ पर्बम गाइशशा “परमप्रभुमी इ कली आल मथीब सेल्लु। गो मेको क्येडा ठेयब नडा डा?” देमाक्त। भजन संग्रह १२७:३
- 3 मिनू राहेलमी “गो इन कली आं गेय पाइब बिल्हाह गेनुड। मेकोमी आं कली आल थिचा माल्ब। मिनू आं के आल दुम्मल” देमाक्त। उत्पत्ती १६:२
- 4 मिनू मेकोमी याकूब कली आ गेय पाइब बिल्हाह गेवा बाक्त। मिनू याकूब मेको नु इम्माक्त।
- 5 मिनू बिल्हाह कोव्रज कुरशा, तौ का थिमाक्त।
- 6 मिनू राहेलमी “परमप्रभुमी आं कली नाक्शा, आं पुंडशो नेंतु। मिनू आं कली तौ का गेती” देमाक्त। मोपतीके आ नें दान वोदा बाक्त।
- 7 मिनू राहेल आ गेय पाइब बिल्हाहमी लेंशा कोव्रज कुरशा, अर्को तौ का थिमाक्त।
- 8 मिनू राहेलमी “गो आं लोकब नु परमप्रभु खोदेशो पा जिशा ग्राती” देमाक्त। मोपतीके मेको आ नें नापताली वोदा बाक्त।
- 9 मिनू लेआमी “लेंशा आल मथीनुड” दे मिम्शा, याकूब कली आ गेय पाइब जिल्पा गेवा बाक्त।
- 10 मिनू लेआ आ गेय पाइब जिल्पामी तौ का थिमाक्त।
- 11 मिनू लेआमी “रिम्शो दुम्त” दे आ नें गाद वोदा बाक्त।
- 12 मिनू लेआ आ गेय पाइब जिल्पामी अर्को तौ का नु थिमाक्त।
- 13 मिनू लेआमी “गो ग्येरसाक्यी। मारदे हना मीश मुरपुकीमी आं पर्बम ‘आसीक राइब बाक्ब’ देंनीम” देमाक्त। मिनू आ तौ कली आशेर नें वोदा बाक्त।
- 14 मिनू काबु रूबेनमी चेरब रिक्की ना आल थिपाइक्ब फल थिदा बाक्त। मिनू आ ममा लेआ कली गेवा बाक्त। मिनू राहेलमी लेआ कली “इ तौ आ चाक्शो फल आं कली का निक्की गेयी” देमाक्त।
- 15 मिनू मेकोमी “गे आं वोंडश आ थुं रोइक्चा ला ममाइ, आं तौमी चाक्शो फल यो रोइक्चेवे?” देमाक्त। मिनू राहेलमी “इ तौ आ फल आ पर्बम मुलाकदो याकूब इ खिंम बाक्ल” देमाक्त।
- 16 मिनू नाक्नाकदो याकूब रू रे जाक्मेनु, लेआम ग्रुम्थ लशा “गे आं खिंम बाक्चा माल्नीनी। गो आं तौ आ चाक्शो फल इन पर्बम थाप्ताक्ड” देमाक्त। मिनू मेको नाकदो याकूब लेआ नु इम्माक्त।
- 17 मिनू परमप्रभुमी लेआ आ पुंडशो गेवा बाक्त। मिनू याकूब के ४ जना तौ थिशा नोले अर्को तौ का नु थिमाक्त।
- 18 मिनू लेआमी “परमप्रभुमी आं कली रिम्शो पाप्तु। मारदे हना गो आं गेय पाइब आं वोंडश कली गेता” देमाक्त। मिनू आ नें इस्साकार वोदा बाक्त।
- 19 मिनू लेंशा कोव्रज कुरा बाक्त। मिनू ५ जना तौ थिशा यो, अर्को तौ का नु थिमाक्त।
- 20 मिनू “परमप्रभुमी आं कली रिम्शो पाप्तु। मुल आं वोंडश गो नु बाक्ब। मारदे हना गो ६ जना तौ थीतामी” देमाक्त। मिनू मेको कली जबूलून नें वोदा बाक्त।
- 21 मिनू नोले तमी का यो थिमाक्त। मेको कली दीना नें वोदा बाक्त।
- 22 नोले परमप्रभुमी राहेल कली मिम्ता बाक्त। मिनू आ पुंडशो गेशा, आल थीब दुम्माक्त। १ सामुएल १:१९
- 23 मिनू कोव्रज कुरशा, तौ का थिमाक्त। मिनू “परमप्रभुमी श्येते रे प्रोंडती” देमाक्त। यसैया ४:१; लूका १:२५
- 24 मोपतीके आ नें योसेफ वोदा बाक्त। मिनू “परमप्रभु यावेमी आं कली अर्को तौ का नु गेयील” दे पुना बाक्त। उत्पत्ती ३५:१७-१९

### याकूब शोंप पाइशशा दुम्शो

25 मिनू राहेलमी योसेफ थिशा नोले याकूबमी लाबान कली “आं कली लचा गेयीनी। गो आं रागी, आं खिं लचा दाक्नुड।

26 आं मीशपुकी, आं आलपुकी नु आं कली लचा गेकी। गो एको तचा कली इन गेय पाता। गो इन कली दोदेशो रिम्शो गेय पडा, मेको गे तुइक्नीनी” देमाक्त। उत्पत्ती २९:२०,३०; उत्पत्ती ३१:४३

- 27 मिनू लाबानमी “गे आं कली दाक्नेवे हना, इच्का नु बाक्को। मारदे हना गे एक बाक्शा, परमप्रभु यावेमी इ गेय पतीके आं कली आसीक गेती, दे तुइक्नुड। उत्पत्ती ३९:५
- 28 गे मार माल्नेवे, मेको इ कली गेनुड” दे मदा बाक्त।
- 29 मिनू याकूबमी “गो दोदेशो गेय पडा, इन बी ब्यफ गिश दुम्मा, गे तुइक्नीनी।
- 30 आं जाक्ची ना का निक्शी बाक्तेक्मे, मुल शुश दुम्तेक्म। मिनू गो जाक्डा रे परमप्रभु यावेमी इन कली आसीक गेप्टु। मिनू आं खिं गेना कोव्रनुडा?” दे मदा बाक्त।
- 31 मिनू लाबानमी “गो मार गेचा माल्नुडा?” देमेनु, याकूबमी “आं कली मारेइ गेचा ममाल्नीनी। आं देशो पाइतीनी हना, गो लेंशा इन गोठला दुम्नुड।
- 32 गो मुलाक्ती इन क्यारश भेडा नेल्ल कोव्रथ लाइनुड। मिनू पुल्ले पाडग्रे नेल्ल गुंडनुड। क्यारश भेडा रे यो क्येर नु पुल्ले पाडग्रे गुंडनुड। मेको आं गाल्च दुम्नीम।
- 33 मोदेशो दुम्मेनु, आं ठीक पतीके तुइक्नीनी। तेको क्यारश आन दातेमी पुल्ले पाडग्रे मपाइशो नु पाठा आन दातेमी क्येर मबाक्मा, मेको आं खुइ पशो, दे तुइक्नीनी” दे मदा बाक्त।
- 34 मिनू लाबानमी “इ देशो खोदेशो दुम्ल” देमाक्त।
- 35 मिनू मेको नाक्ती लाबानमी गोठ नेल्ल रे टाटे पाडग्रे क्यारश बोका नेल्ल नु पुल्ले पाडग्रे भेडा सांड गुंडदा बाक्त। तेक तेको इच्का बुश नु क्येर बाक्मा, मेको योव्रशा, आ तौ आन गुडमी गेवा बाक्त।
- 36 मिनू आ तौ आन गोठ नु याकूब आ गोठ नाक्त सां गाक्तीक लां डोन वोदा बाक्त। याकूबम चहिं लाबान आ अरु क्यारश भेडा कोव्रडा बाक्त।
- 37 मिनू याकूबमी ब्वाकीम पिपल, कटुस नु अर्को रवा आन क्येख राशी जिक्शा, बुश रेखा गुंडशा खेवा बाक्त।
- 38 मिनू मेको कोक्केपुकी क्यारश नु भेडा आन ब्वाक्कु तूतीकेमी वोदा बाक्त। मिनू ब्वाक्कु तूशा डा मिन ब्वांडसीमानु,
- 39 मेको आ टाटे पाडग्रे कोक्के तशा, टाटे पाडग्रे पाठापुकी जरमेसीमा बाक्त।
- 40 याकूबमी मेको पाठा आन कली गुंडशा फ्राशा आंम बगाल डा गोठ सेला बाक्त। आंम क्यारश भेडा लाबान आ गोठम मवोदा बाक्त।
- 41 मिनू गेना बोल्यो नु रिम्शो बोकापुकी माल्ची ना बाक्मा नु ब्वाक्कु तूथ जाक्मा, मेना मेको कोक्केपुकी तूतीकेमी आन डोंइती वोदा बाक्त। मिनू “कोक्के आन डोंइती ब्वांडसीमल” देमाक्त।
- 42 बगाल डा मरिम्शो क्यारश भेडा जाक्तेक्म हना, कोक्के मवोदा बाक्त। मोदेशो पा मरिम्शो क्यारश भेडा लाबान कली, रिम्शो बोल्यो चहिं याकूब के दुम्मा बाक्त।
- 43 मिनू याकूब शुश शोंप पाइशो दुम्शा, क्यारश भेडा, वाइलीम वाइल, दलओंठपुकी नु गधा शुश पाइशो दुम्माक्त।

## 31

### याकूबम लाबान कली प्रोंइशो

- 1 मिनू लाबान आ तौपुकीमी “याकूबमी आंड आफ आ मारेइ मारेइ नेल्ल रोइक्ताक्व। आंड आफ आ शोंप रे शोंप पाइशो दुम्त” देशो, याकूबमी नेना बाक्त। उत्पत्ती ३०:३५
- 2 मिनू याकूबमी “लाबानम आं कली मदाक्ब दुम्त” दे तुइक्ता बाक्त।
- 3 मिनू परमप्रभु यावेमी याकूब कली “इ आफ आ रागी इ मुर आन बाक्तीक लेशशा लावो। गो गे नु बाक्नुड” देमाक्त। उत्पत्ती २८:१५
- 4 मिनू याकूबमी राहेल नु लेआ आस कली गोठीम ब्रेत्तीम्सी बाक्त।
- 5 मिनू मेको आस कली “इस आफोम डोंइती आं कली दाक्शो खोदेशो पा मुल मदाक्ब, दे तुइक्ताक्ड। आं आफ आ परमप्रभु गो नु बाक्शो बाक्त।
- 6 गो इस आफ कली दोदेशो पा आं बोल नेल्लेमी गेय पडा, मेको गे निक्शीम तुइक्नीसी।

७ इस आफोमी आं कली ठगेप्टु। आं गेय डा तचा माल्शो थोव्वक १० खेयप फाइक्तु। तन्न परमप्रभुमी मेको कली आं कली श्येत गेचा, मगेवा बाक्त।

८ इस आफोमी 'पुल्ले पाडग्रे नेल्ल इ के दुम्ल' देंमेनु, क्यारश भेडा नेल्लेमी पुल्ले पाडग्रे गिक्तेकम। मेकोमी 'रेखा पाइशो नेल्ल इ के दुम्ल' देंमेनु, नेल्ल रेखा पाइशो गिक्तेकम।

९ मोदेशो पा परमप्रभुमी इस आफ आ क्यारश भेडा बी ब्यफ रोइशशा, आं कली गेती।

१० क्यारश भेडा आन ब्वाइसीची ना गो डोमुमी बोका नेल्ल पुल्ले पाडग्रे, रेखा पाइशो नु खाल्शो रड्ड डा तातामी।

११ मिनु परमप्रभु आ स्वर्ग डा गेय पाइबमी आं कली डोमुमी 'याकूब' दे ब्रेत्ताकयी। 'मिनु गो बाक्ती' दे लोव्व लेत्ताक्ड।

१२ मिनु मेकोमी आं कली 'कोव्वडो, ब्वाइसीब बोका नेल्ल पुल्ले पाडग्रे, रेखा पाइशो नु खाल्शो रड्ड डा बाक्नीम। मारदे हना लाबानमी इ कली मार पशो बाक्बा, गो नेल्ल ताता।

१३ गो परमप्रभु नड्ड। गो इ कली बेथेलम गुम्ता। गे मेकेर फुल्लु का कली तेल लुक्ताकवी। मिनु आं कली कसम जाप्तीवी। मुल बोक्को, मेको रागी रे यूडो। इ जरमेशो रागी लेतो' दे माइक्ती' दे आ मीश निक्शी आस कली देंमाक्त। उत्पत्ती २८:१८-२२

१४ मिनु राहेल नु लेआमी "आंस आफ आ खिमी आस थेरशो रू नु शोप बाक्मा डा?"

१५ आंस कली अर्को रागी डा मुर खोदेशो सेल्शा, लेयशा ताक्शो नेल्ल जाप्तु। उत्पत्ती २९:१८,२७

१६ परमप्रभुमी आंस आफ रे लाइशो शोप, आंस कली नु आंस आल के दुम्त। परमप्रभुमी इन कली मार देंबा, मेकोन पने" देंसा बाक्त।

१७ मिनु याकूब सुनी कना बोक्शा, आ आलपुकी नु आ मीशपुकी दलओठ तारी डोइक्पदा बाक्त।

१८ मिनु मारेइ मारेइ पदान-अराम रे आ गेय पा सेल्शो बस्तु भाव नेल्ल खुल्शा, आ शोप लाइशशा, आ आफ इसहाक आ खिं कनान रागी लचा गोवा बाक्त।

१९ लाबान आ भेडा आन ऊन खोइक्थ लशो बाक्माक्त। मेना राहेलमी आ आफ आ खिं डा मूर्तिपुकी खुइ पा कुरा बाक्त। न्यायाधीस १७:५; न्यायाधीस १८:१७; १सामुएल १९:१३; २राजा २३:२४; जकरिया १०:२

२० याकूबमी अरामी लाबान कली "गो लशो" दे मदेंथु, गाक्मा बाक्त।

२१ मोदेशो पा याकूब आ मारेइ मारेइ कुरशा, प्रोक्माक्त। मिनु सुनी बोक्शा, युफ्रेटीस खोला शोक्समा बाक्त। मिनु गिलाद डांडा गे लमा बाक्त।

२२ मिनु लमा आ नाक्त सां नोले मुरुमी "याकूब प्रोक्त" दे लाबान कली शेंदमे बाक्त।

२३ मिनु लाबानमी आ लोक्ब आन कली ब्रेशशा, मेकोपुकी नु ७ नाक्ती सम्म याकूब कली माल्शा, गिलाद डांडाम गुमा बाक्त। उत्पत्ती ३१:४७

२४ मिनु परमप्रभुमी अरामी लाबान कली डोमुमी "गे होस पावो। याकूब कली मारेइ मपावो" देंमाक्त।

२५ मिनु लाबानमी याकूब कली गुमानु, आ ताम्बु गिलाद डा पहाडम कीडा बाक्त। याकूबम चहिं आ ताम्बु आइक्था डा डांडाम कीशा, वोदा बाक्त।

२६ मिनु लाबानमी याकूब कली "गे मार पवी? मारदे आं मतुइक्थु प्रोक्नी? आं तमीपुकी लडाइमी ग्याइशो खोदेशो पा लाइक्तीवी।

२७ गे मारदे खुइशशा गाक्नी? मारदे आं कली मारेइ मदेंनी? गो इन कली ग्येरशा, कुम्सो पशा, खैजडी नु बीना ताप्शा, लां सम्म चोव्वदीशा सोइक्तन्नी वा।

२८ गे आं कली आं चचपुकी नु आं तमीपुकी नु पुक्पु पाइक्मुचा मगेवी। मरिम्शो पाइब बाक्ते।

२९ इ कली श्येत गेचा आं गुइमी बाक्ब। तन्न सिनाक्दो इ आफ आ परमप्रभुमी आं कली 'गे होस पावो। याकूब कली मारेइ मरिम्शो मपावो' दे लोव्व पाप्तु।

३० मिनु गे इ आफ गुम्चा शुश दाक्ताकवी हना यो, मारदे आं खिं डा मूर्ति खुइ पा लदी?" दे हिल्लो पवा बाक्त।

३१ मिनु याकूबमी लाबान कली "गे इन तमी निक्शी आं गुइ रे रोइक्नीनी, दे हिंती। उत्पत्ती ३१:१९

32 इन मूर्तिपुकी चहिं सुका आ ताम्बुम थिन्नीनी, मेको मब्रोंडल। इन लोकब आन डोंडती आं बाक्तीकेम इन के मार बाक्मे, कोव्रशा लतीन” देंमाक्त। मारदे हना याकूबमी राहेलम मेको मूर्तिपुकी खुड पशो, दे मतुडक्ता बाक्त।

33 मिनु लाबानमी याकूब आ ताम्बु, लेआ आ ताम्बु, गेय पाडब निक्शी आस ताम्बु ओव्रशा, माल्शा मथिदा बाक्त। लेआ आ ताम्बु रे गूशा, राहेल आ ताम्बु ओव्रमाक्त।

34 मिनु राहेलम मेको खिं डा मूर्ति आन कली दलओंठ आ तारी डा नित्तीकेमी खुडशशा, मेको आ तारी निस्से बाक्त। मिनु लाबानमी ताम्बु नेल्लेमी माल्शा मथिदा बाक्त।

35 मिनु राहेलमी “आं प्रभु, मगाइक्तीने, गो इन डोंडती बोक्ने मचाप्नुड, मारदे हना गो मथिचा दुम्ती” देंमाक्त। मोपतीके माल्शा मथिदा बाक्त। लेवी १५:१९-२०

36 मिनु याकूब चुरशा, लाबान कली “मार दूली पडा। आं कली मार मरिम्शो पशो आ पबंम खेदा पनी?

37 आं मारेड मारेडम माल्तीनी, इन थोव्रकी मार थिन्नी? इन लोकब नु आं लोकब आन डोंडती देनीन। एकोपुकीमी इस दातेमी निसाफ पामेक्ल।

38 गो गे नु २० बर्स बाक्ती। इन क्यारश भेडाम पाठा मशाम्देम। इन बगाल डा बोका का यो मब्वड।

39 जन्तुमी साडशशो यो इन कली मचाक्गु। गो आंमा थाप्ताक्ड। नाक्दो, नाक्ती जन्तुमी साडक्तेक्म हना यो, गे आं कली थाप्पाइक्तीनी। प्रस्थान २२:११-१२

40 नाक्ती हुप्शोम बाक्ती, नाक्दो ग्यू बेक्शा, यो मड्पथु, नां सोंडताक्ड।

41 मोदेशो पा गो इन खिंमी २० बर्स गेय पाता। इन तमी निक्शी आस पबंम गो १४ बर्स गेय पाता। ६ बर्स इन क्यारश भेडा आन पबंम गेय पाता। गे आं गेय डा तचा माल्शो थोव्रक १० खेयप फाइक्तीनी। उत्पत्ती २९:२०,३०; उत्पत्ती ३०:३१-३६

42 आं आफ आ परमप्रभु, अब्राहाम आ परमप्रभु नु इसहाक आ मान पा हिंशो परमप्रभु गो नु मबाक्शो हना, गे आं कली मुल श्येथ सोइक्तीनी वा। परमप्रभुमी आं श्येत नु आं गेय तशा, सिनाक्दो इन कली हुडक्ताक्व” देंमाक्त। उत्पत्ती ३१:२४,५१

43 मिनु लाबानमी याकूब कली “एको तमी निक्शी आं तमी बाक्नीस। एको आल आं आल बाक्नीम। एको क्यारश भेडा आं के बाक्नीम। इ तशो नेल्ल आं के बाक्ब। आं तमी आस कली मुलाक्ती गो मार पने चाप्नुडा डा? एको आस तौ आन कली गो मार पने चाप्नुडा डा?

44 मोपतीके गे नु गो कबल पस, इस डोंडती सांकछी बाक्मल” दे मदा बाक्त।

45 मिनु याकूबम फुल्लु का चाक्शा राप्पाइशशा,

46 आ मुर आन कली यो “फुल्लु खुप्तीन” देंमाक्त। मिनु मेकोपुकीमी यो फुल्लु खुप्तमे बाक्त। मिनु मेकेर जामे बाक्त।

47 मिनु लाबानमी मेको कली येगार-सहादुता, दे नें वोदा बाक्त। याकूबम चहिं मेको कली गलेद, दे नें वोदा बाक्त। उत्पत्ती ३१:२३

48 मिनु लाबानमी “एको फुल्लु खुप्तीके मुलाक्ती इस पशो कबल आ सांकछी बाक्ब” देंमाक्त। मोपतीके मेको कली गलेद देंनीम। गलेद आ अर्थ सांकछी डा फुल्लु खुप्तीके बाक्ब। यहोसु २४:२७

49 मिनु मेको राप्पाइशशो फुल्लु कली मिस्या नें वोदा बाक्त। मारदे हना लाबानमी “परमप्रभु यावे गे नु गो इस ब्राची ना इस कली कोव्रब बाक्ल। न्यायाधीस ११:११

50 गे आं तमी आस कली श्येत गेप्तीवी हना, अर्को मीश चाक्तीवी हना, गो इस दातेमी मुर सांकछी मबाक्तेक्म हना यो, परमप्रभु इस सांकछी बाक्ब” देंमाक्त।

51 मिनु लाबानमी लेंशा, याकूब कली “कोव्रडो, एको खुप्शो फुल्लु नु मेको लाइशशो राप्पाइशशो फुल्लु गो इस दातेमी बाक्ब।

52 एको खुप्शो फुल्लु गो रे इ बाक्तीके, गे रे आं बाक्तीके श्येत गेथ मलमल।

53 अब्राहाम आ परमप्रभु, नाहोर आ परमप्रभु नु आन किकी पिपी आन परमप्रभुम इस दातेमी निसाफ पवल” देंमाक्त। मिनु याकूबमी इसहाक आ मान पा हिंशो परमप्रभु आ नें थिशा, कसम जवा बाक्त।

54 मिनु मेको डांडामी याकूबमी चढेतीके चढेवा बाक्त। मिनु आ खिं डा मुर आन कली “शोब्ले जने” दे गेवा बाक्त। मिनु जशा, मेको नाकदो मेक उइ बाक्मा बाक्त। उत्पत्ती ३१:४२

55 मिनु लाबान सुनी कना बोक्शा, आ तमी नु आ चच आन कली पुक्पु पाइश्शा, आसीक गेशा, आ खिं लेम्माक्त।

## 32

याकूबम एसाव कली गुम्चा चिक्शो

1 मिनु याकूब लांमी लना लन बाक्मेनु, परमप्रभु आ स्वर्ग डा गेय पाइबपुकी याकूब कली गुम्थ जाक्मा बाक्त।

2 मिनु याकूबमी मेको आन कली तशा “एकेर परमप्रभु आ लडाइ पाइब आन बाक्तीके बाक्ब” देमाक्त। मोपतीके मेको गुम्तीक रागी आ नें महा-नाइम वोदा बाक्त। महा-नाइम आ अर्थ चहिं “बाक्तीक निक्शी” बाक्ब।

3 मिनु याकूबमी आ लोक्ब एसाव गुम्चा कली आ डोंइती मुरपुकी एदोम डा सेइर रागी सोइक्ता बाक्त। उत्पत्ती ३६:८

4 मेको आन कली “गे आं प्रभु एसाव कली ‘इन गेय पाइब याकूबमी इन कली लोत्र सोइक्ताक्व। गो मुल सम्म लाबान नु आ रागीमी अर्को रागी डा मुर दुम्शा बाक्ती।

5 गो नु शुश ब्यफ, गधा, क्यारश भेडा, वाइलीम वाइल बाक्नीम। गो आं प्रभु, इन डोंइती शिशी तडल, दे मुर आन कली सोइक्ताक्ड’ देंत, देंचा माल्नीनी” दे अरेशा सोइक्तीमी बाक्त।

6 मिनु आ सोइश्शो मुरपुकी लेशशा जाक्शा, याकूब कली “गोपुकी इन लोक्ब एसाव आ बाक्तीक जाक्दीत्तक। मेकोमी ४ सहे मुर नु कुशा, इन कली गुम्थ जाक्ब” दे शेंदेम बाक्त।

7 मिनु याकूब शुश हिंशा, सुर्ता पवा बाक्त। मेको नु बाक्ब मुर क्यारश भेडा, बी ब्यफ नु दलओंठ आन कली हुल निक्शी पा योक्गा बाक्त।

8 मेकोमी “एसावमी डोंइती डा हुल साइक्तु हना, अर्को प्रोक्ने चाप्नीम” दे मिम्ता बाक्त।

9 मिनु याकूबम “आं बाजे अब्राहाम आ परमप्रभु, आं आफ इसहाक आ परमप्रभु, आं कली लोत्र पाइब परमप्रभु यावे, गे आं कली ‘इ खिं डा मुर आन बाक्तीक, इ रागी लेतो। गो इ कली रिम्शो पाइनुड’ दे लोत्र पाइतीनी। उत्पत्ती ३१:३, १३

10 गो, इन गेय पाइब आं कली पशो गेना हना यो दाक्तीक नु इन रिम्शो पचा मप्रोंइतीके मशिरनुड। गो कोक्के का ला कुरशा, यर्दन खोला शोक्शा लशो नड। मुल आं के हुल निक्शी दुम्शो बाक्नीम। २सामुएल ७:१८

11 गो आं कली आं लोक्ब एसाव आ गुइ रे प्रोनीने। मारदे हना आं कली, आं मीश आन कली नु आल नेल्ल आन कली साइक्ब, दे हिंती।

12 गे आं कली ‘गो इ कली थमा पा रिम्शो पाइनुड। इ चच युइ आन कली समुन्द्र डा बाल्वा खोदेशो पा, हिक्ने मचाप्चा डा सेल्नुड’ देंतीनी” दे याकूबमी परमप्रभु कली लोत्र पवा बाक्त। उत्पत्ती २८:१३-१४

13 मिनु मेको नाकदो मेकेर बाक्शा, आ मारेइ मारेइ रे एसाव कली कोसेली योव्रडा बाक्त।

14 मेकोमी सहे निक्शी ओटा क्यारश, २० ओटा बोका, सहे निक्शी ओटा भेडा नु २० ओटा सांड,

15 मिनु ३० ओटा दूध तूब चाइक्ब पाइश्शो दलओंठ, ४० ओटा बी नु १० ओटा ब्यफ, २० ओटा गधैनी नु १० ओटा गधा एसाव कली योव्रशा, ठीक पवा बाक्त।

16 मिनु आ गेय पाइब आन कली का का पा हुल हुल पा गेवा बाक्त। आ गेय पाइब आन कली “गे आं डोंइती हुल हुल पना पन गाक्कीन। हुल नेल्ल कालेमी मखुलीन। का अर्को क्येडा डोन खुल्चा माल्नीनी” दे माइक्मी बाक्त।

17 मिनु नेल्ल क्येडा ठेयब अरेतीके लोत्र “आं लोक्ब एसाव इन कली गुम्थ जाक्त हना, मेकोमी इन कली ‘गे सुका आ मुर ननी? ते लाइनीनी? इन डोंइती गाक्ब बगाल सु के नमी?’ दे हिल्लो पाप्तु हना,

18 गेमी 'एको इन गेय पाइब याकूब के नम। आ प्रभु एसाव कली कोसेली बाकब। आं यो खोइशशा पिना पिन बाकब' देंचा माल्नीनी" दे गेय पाइब आन कली माइकमी बाकत।

19 मोदेशो पा डोंइती गाकब, नोले गाकब नु नेल्ल क्येडा नोले गाकब नेल्ल आन कली अरेमी बाकत। मिनु "मोदेशो पा एसाव नु गुम्ची ना लोव्र पचा माल्नीनी।

20 मिनु "इन गेय पाइब आंइ नोले पिना पिन बाकब' देंचा मप्रेदीन" दे माइकमी बाकत। मारदे हना याकूबमी "गो आं डोंइती सोइशशो कोसेलीमी गो मेको कली लेमुंड। मिनु नोले मेको कली गुमुंड, आं कली ब्राइबा को" दे मिम्ता बाकत।

21 मिनु आ कोसेली आ डोंइती लदमे बाकत। आं चहिं मेको नाकदो आ मुर बाकतीकेमी बाकमाकत।

**याकूब यब्बोक खोलाम बाकशो**

22 मिनु मेको नाकदो बोक्शा, आ मीश निकशी, आ गेय पाइब मीश निकशी नु आ ११ जना तौ आन कली लाइशशा, यब्बोक खोला शोकपाइकमी बाकत।

23 मिनु मेको आन कली शोकपाइशशा, आ मारेइ मारेइ यो सोइक्ता बाकत।

24 मिनु आइक्ची हांबुम याकूब का ला बाकमाकत। मिनु नां रिक्शा, नां मसोव्रम सम्म मुर का नु राम्शी पवा बाकत। होसे १२:४-५

25 मेको मुरुम याकूब नु राम्शी पा आं बुचशो तशा, याकूब आ फिला डा बोंइसे थिवा बाकत। मिनु आ फिला डा बोंइसे याक्ता बाकत।

26 मिनु मेको मुरुमी "नां दाप्चावानु, मुल लचा गेयी" देंमाकत। मिनु याकूबमी "आं कली आसीक मगेवी सम्म मप्रोंइनन" दे मदा बाकत मत्ती १५:२२-२८

27 मिनु मेकोम "इ नें मार में?" दे हिल्लो पवानु, याकूबमी "याकूब" देंमाकत।

28 मिनु मेकोमी "मुल डा मेरे इ नें याकूब ममाइ, इ नें इसाएल देंचा माल्नीम। मारदे हना गे परमप्रभु नु राम्शी पा ग्राते, मुर नु राम्शी पा यो ग्राते" देंमाकत। उत्पत्ती ३५:१०; येरमीया २०:७

29 मिनु याकूबम "इन नें मार में?" दे हिल्लो पवा बाकत। मिनु मेकोमी "आं नें मारदे माल्दे?" देंशा, मेको कली आसीक गेवा बाकत। न्यायाधीस १३:१७-१८

30 मिनु याकूबमी "गो परमप्रभु आ कुल तशा यो मबेकड" दे मेको बाकतीके आ नें पेनीएल वोदा बाकत। प्रेस्थान ३३:२०

31 मिनु नां दाप्मेनु, याकूब पेनुएल रे खोड चेड पा गाकमाकत।

32 मोपतीके इसाएलीपुकीमी मुल सम्म मेको बोंइसे ग्याइक्ब नारी नु मेकेर डा श्ये मब्वाइनीमी। मारदे हना मेकोमी याकूब आ फिला डा बोंइसे याक्ता बाकत।

## 33

**याकूब नु एसाव गुम्शो**

1 मिनु याकूबम लां गे कोव्रडानु, एसाव नु ४ सहे मुर पिन पिन पशो तवा बाकत। मिनु आ आलपुकी लेआ, राहेल नु आस गेय पाइब मीश निकशी नु गाकपाइकमी बाकत। उत्पत्ती ३२:७

2 मेको गेय पाइब मीश नु आस आल आन कली नेल्ल क्येडा डोंइती गाकपदा बाकत। मिनु मेको आन नोले लेआ नु आ आलपुकी, नेल्ल क्येडा नोले राहेल नु योसेफ गाकपदा बाकत।

3 मिनु मेको नेल्ल आन डोंइती आंमा गाकमाकत। मिनु मेको आ लोकब गुम्चा क्येडा डोंइती ७ खेयप खुम्की पा बाम्माकत।

4 मिनु एसावमी मेको कली तशा, दोरशा गुम्थ जाक्माकत। मिनु आ लोकब कली मुप्शा पुक्पु पदा बाकत। मिनु निम्फा डाक्सा बाकत।

5 मिनु एसावमी कोव्रशा, आलपुकी नु मीश मुर आन कली तशा "गे नु बाकब सु नमी?" दे हिल्लो पवा बाकत। मिनु याकूबमी "परमप्रभुमी इन गेय पाइब कली शिशो पशा, गेशो आलपुकी नम" दे मदा बाकत। भजन संग्रह १२७:३

6 मिनु नोले मेको गेय पाइब मीश निकशी नु आस आलपुकी जाक्शा, एसाव आ डोंइती खुम्की पा बाम्मा बाकत।

7 मिनू लेआ नु आ आलपुकी जाकशा, खुम्की पा बाम्मा बाक्त। मिनू नोले योसेफ नु राहेल जाकशा, खुम्की पा बाप्सा बाक्त।

8 मिनू एसावमी “इ डोंइती गाकशो मार मार मारदे सोइक्ती?” दे हिल्लो पवा बाक्त। मिनू “आं प्रभु, इन डोंइती शिशी तडल, दे सोइक्ताकड” दे लोव्र लेत्ता बाक्त। उत्पत्ती ३२:१४-२१

9 मिनू एसावमी “आं लोकब, आं कली मारेइ मारेइ गाप्शो बाकब। इ कली वोंइसो” देंमाक्त।

10 मिनू याकूबमी “मदुम्ब। गो इन डोंइती शिशी ताता हना, आं कोसेली ताक्कीन। मारदे हना गो इन कुल तशा, परमप्रभु आ कुल तशो खोदेशो पा ग्येरसाक्यी। गे आं कली दाक्शा ब्राइतीनी। उत्पत्ती ३२:३१

11 इन कली गेशो आसीक लतीन। मारदे हना परमप्रभुमी आं कली शुश शिशी पाप्तु। आं के मारेइ मारेइ यो गाप्शो बाकब” दे एसाव कली मदा बाक्त। मिनू याकूबमी शुश लोव्र पा एसावमी मेको नेल्ल ताक्गा बाक्त।

12 मिनू एसावमी “लो, पिन। गो गे नु लाइनुड” देंमाक्त।

13 मिनू याकूबमी “आं प्रभु, आं आलपुकी आइक्च बाक्नीम। क्यारश भेडा, बी ब्यफ आन चाइक्च बाक्नीम। मेको आन कली नाक्ती का ला शुश गाक्पाइश्शा, श्येत गेता हना, नेल्ल बेक्नीम।

14 आं प्रभु, गे इन गेय पाइब क्येडा डोंइती गाक्कीन। गो बी ब्यफ नु आलपुकी चाप्चा डा पा गाक्नीकी। नोले आं प्रभु आ बाक्तीक सेइर सहर जाक्नीक” देंमाक्त।

15 मिनू एसावमी “आं मुर का निक्शी गे नु गाक्मल” दे मदा बाक्त। मिनू याकूबम “ममाल्नुड। मारदे आं प्रभुम आं कली मोदेशो रिम्शो पचा मिम्बा?” देंमाक्त।

16 मिनू मेको नाक्ती एसाव सेइर गे लेम्माक्त।

17 याकूब चहिं सुक्कोथ गे लमाक्त। मेकेर खिं का सेल्शा, आ बी ब्यफ आन कली गोठपुकी सेला बाक्त। मोपतीके आ बाक्तीके आं नें सुक्कोथ वोदा बाक्त।

18 मोपा याकूब पदान-अराम रागी रे मारेइ मदुम्शु रिम्शो पा लेश्शा, कनान रागी डा शेकेम सहर जाक्दीम्माक्त। सहर आ नेक्था आ बाक्तीक सेला बाक्त।

19 मिनू आ ताम्बु कीतीके रू हमोर आ तौ आन दाते शेकेम आ आफ रे सहे का केसीता थाप्शा, ग्यबा बाक्त। केसीता मेकेर डा क्येट बाक्त। सुन के बाक्बा कों, चांदी के बाक्बा कों, गिश हेल्लशो बाक्ब मतुंडसीब। यहेसु २४:३२

20 मिनू मेकेर चढ़ेतीक का सेला बाक्त। मेको आ नें “एल-एलोहे-इस्त्राएल” दे वोदा बाक्त। मेको आ अर्थ परमप्रभु, इस्त्राएल आ परमप्रभु बाक्ब। उत्पत्ती १२:७-८

## 34

दीना शेकेम सहर कोव्रथ लशो

1 मिनू लेआ आ तमी, दीना मेको रागी डा मीश आल आन कली गुम्थ लमाक्त।

2 हिंवी डा हमोर आ तौ शेकेम, मेको रागी डा पिप आ तौमी दीना कली तशा, ग्याइश्शा मेको नु इप्शा, बिथोलो पवा बाक्त। न्यायाधीस ९:२८

3 मिनू याकूब आ तमी दीना कली शुश दाक्शा, रिम्शो लोव्र पवा बाक्त।

4 मिनू शेकेममी आ आफ कली “मेको मीश आल आं कली चाक्कीन” दे मदा बाक्त।

5 मिनू याकूबमी “शेकेममी इन तमी दीना कली बिथोलो पाप्तु” देशो नेना बाक्त। आ तौपुकी चहिं रू डा गोटीम बाक्मा बाक्त। याकूब आ तौपुकी मजाक्मा सम्म सिक्सी पा बाक्माक्त।

6 मिनू शेकेम आ आफ हमोर याकूब नु लोव्र पचा कली जाक्माक्त।

7 मिनू मेको नेशा, याकूब आ तौपुकी यो रू रे जाक्मा बाक्त। आन थुं मनुथु, शुश चुरमा बाक्त। मारदे हना शेकेमम इस्त्राएल आ तमी नु इप्शा, बिथोलो पशो बाक्माक्त। मो पचा मदुम्शो बाक्माक्त।

8 मिनू हमोरमी इस्त्राएल कली “आं तौ शेकेममी इन तमी कली शुश दाक्ब, चाक्चा गेने।

9 मिनू आंइ तमीपुकी इन तौपुकीमी चाक्मेक्ल। इन तमीपुकी आंइ कली चाक्चा गेने।

- 10 गे गोपुकी नु बाक्कीन। आंइ रागी इन कली ग्याप्चा लेयचा, बाक्चा कली गेनीकी” देंमाक्त।
- 11 मिनु शेकेममी मीश आल आ आफ याकूब नु आ लोकब आन कली “इन डोंइती शिशी तडल। गे मार देंनीनी इन कली गेनुड।
- 12 मेको मीश आल चाक्चा गेतीनी हना, गो इन माल्लशो मारेइ मारेइ गेनुड” देंमाक्त। प्रस्थान २२:१५
- 13 याकूब आ तौपुकीमी आन समी कली बिथोलो पाइब, शेकेम नु आ आफ हमोर आस कली जोल पा
- 14 “गो आंइ समी खोइक्तीक चिनु मखोइश्शो मुर आन कली गेने मचाप्नीकी। मेको आंइ कली मशिरब।
- 15 गे आंइ खोदेशो पा वोंइश आल वोंइश मुर नेल्लेमी खोइक्तीक चिनु खोइक्तीनी हना, उत्पत्ती १७:१०-१४
- 16 आंइ तमीपुकी इन कली लाइक्चा गेनीकी। मिनु इन तमीपुकी गो चाक्नीकी। मिनु गो गोपुकी नु बाक्शा, मुर का खोदेशो दुम्नीकी।
- 17 गेपुकी आंइ देंशो मबिस्साक्नी हना, आंइ तमी लाइश्शा, गाक्नीकी” दे लोव्र पामे बाक्त।
- 18 मिनु हमोर नु आ तौ शेकेम मेको आस देंशो नेंशा, ग्येरससा बाक्त।
- 19 मिनु मेको ठिटा मेको पचा बिस्से बाक्त। मारदे हना याकूब आ तमी कली शुश दाक्ता बाक्त। मेको आ आफ आ खिं डा नेल्ल क्येडा मान ताइब बाक्माक्त।

### लेआ आ तौ निक्शी गाइश्शो

- 20 मिनु हमोर नु आ तौ शेकेम आस सहर डा लाप्चो ओव्रशा, मेको निक्शीमी मुर आन कली
- 21 “एको मुरपुकी गो नु दुशा बाक्चा दाक्नीम। मोपतीके एक बाक्चा गेने। मारदे हना इं रागी ठेयब बाक्ब। मेको आन कली यो गारब। गोपुकी मेको आन तमी चाक्च। इं तमी मेको आन कली गेय।
- 22 गो वोंइश मुर नेल्ल खोइक्तीक चिनु खोइक्साक्च हना ला, मेकोपुकी गो नु बाक्ने बिल्लीम।
- 23 मार, मेको आन बी ब्यफ, क्यारश भेडा नु आन शोंप नेल्ल इं के मदुम्बा डा? गो मेको आन लोव्र बिश्शा हना, इं दातेमी बाक्नीम” देंसा बाक्त।
- 24 मिनु सहर डा मुर नेल्ल हमोर नु शेकेम आस लोव्र टिशा, खोइक्तीक चिनु खोइक्चा गेमे बाक्त। सहर नेल्ल डा वोंइश मुरुम मोदेशो पामे बाक्त।
- 25 मिनु नाक्त सां नोले आन खोइक्तीके नेल्ल क्येडा खाइक्मानु, याकूब आ तौ निक्शी, दीना आ लोकब, सिमियोन नु लेवी, आस तरवार लाइश्शा, सुइ आन मतुइक्थु, सहर ओव्रशा, सहर डा वोंइश मुर नेल्ल सदसे बाक्त। उत्पत्ती ४९:५-७
- 26 मिनु मेको निक्शीमी हमोर नु शेकेम आस कली यो साइश्शा, दीना शेकेम आ खिं रे ग्रुंइशा, लदसे बाक्त।
- 27 मिनु याकूब आ अर्को तौपुकी यो सहर ओव्रमा बाक्त। मेकोपुकीमी सहर डा मारेइ मारेइ लदमे बाक्त। मारदे हना शेकेममी आन समी कली बिथोलो पवा बाक्त।
- 28 मिनु आन क्यारश भेडा, बी ब्यफ, गंधा नु मार मार सहर नु आन रूमी बाक्मा, मेको नेल्ल लदमे बाक्त।
- 29 आन शोंप नेल्ल, आन आलपुकी, आन मीश नु आन खिं डा मारेइ मारेइ नेल्ल लदमे बाक्त।
- 30 मिनु याकूबमी सिमियोन नु लेवी आस कली “गे आं कली श्येत गेतीसी। मुल एको रागी डा मुरुमी आं कली मदाक्नीम। कनानी नु परिज्जी आन दातेम आं कली मरिम्शो रिना पाइश्शो खोदेशो सेलतीसी। गोपुकी नु शुश मुर मबाक्नीम। इं कली लडाइ तोशा, इं खिं डा मुर नेल्ल साइक्नीम” दे मेको आस कली हुइक्तीम्सी बाक्त।
- 31 मिनु मेको निक्शीमी “मार, मेकोमी आंस समी कली तेल्लेम खोदेशो सेल्चा दुम्बा?” देंसा बाक्त।



1 मिनू परमप्रभुमी याकूब कली “बोकशा सासो। बेथेल सहर लावो। मिनू मेकेर बाक्को। इ लोकब एसाव रे प्रोक्डेनु, इ डोइती गूशो परमप्रभु, आं कली, चढ़ेतीक का सेलो” दे मदा बाक्त। उत्पत्ती २८:११-२२; उत्पत्ती ३१:१३

2 मिनू याकूब आ खिं डा मुर नु आ बाक्शो मुर नेल्ल आन कली “इन गुइमी बाक्शो मूर्ति ताइक्तीन। इन फेक्शो वा पुइश्शा, चिक्शा, अर्को फेक्सीन। उत्पत्ती ३१:१९; ब्यवस्था २७:१५; यहोसु २४:२३

3 मिनू बोक्य, बेथेल लय। गो मेकेर जाक्दीश्शा, परमप्रभु कली चढ़ेतीक का सेलनुड। गो श्येत जडानु, आं पुंइशो गेप्टु। गो ते गाक्ती हना यो, मेको गो नु बाक्त” दे माइक्मी बाक्त।

4 मिनू मेकोपुकीमी याकूब कली आन मूर्ति नु आन पांइशो मारवाडी नेल्ल गेमे बाक्त। याकूबमी मेको नेल्ल शेकेम आ नेक्था बाक्शो रवा आगाम थिमा बाक्त। यहोसु २४:२६; न्यायाधीस ९:६

5 मिनू मेकोपुकी लचा गोत्रमे बाक्त। परमप्रभुमी एर ओंथ डा सहर डा मुर आन कली हिंब सेलमी बाक्त। मोपतीके मेकोपुकीमी मेको आन कली खेदा मपामे बाक्त। प्रस्थान २३:२७; यहोसु १०:१०

6 मिनू लशा, याकूब नु मेको नु बाक्ब मुर नेल्ल कनान रागी डा लूज सहर जाक्दीम्मा बाक्त। लूज सहर कली बेथेल नें वोइश्शो बाक्माक्त।

7 याकूबम मेकेर चढ़ेतीक का सेला बाक्त। मेको आ नें एल-बेथेल वोदा बाक्त। मारदे हना आ लोकब एसाव रे प्रोक्मेनु, मेकेर परमप्रभुम तपांइसीशो बाक्माक्त।

8 मेना रेबेका कली कोत्रब देबोरा बेक्माक्त। मिनू मेको कली बेथेल आ नेक्था, रवा आगामी थिम्मे बाक्त। मेको कली याकूबम अल्लोन-बकुथ नें वोदा बाक्त। मेको आ अर्थ डाक्चा डा रवा बाक्ब। उत्पत्ती २४:५९

### परमप्रभुमी याकूब कली गुम्शो

9 पदान-अराम रे लेम्मेनु, परमप्रभुमी याकूब कली लेशा गुम्शा, मेको कली आसीक गेशा

10 “इ नें याकूब बाक्ब। तन्न मुल रे याकूब मदेचा, इ नें इस्राएल दुम्चा माल्ब” देमाक्त। मोपतीके इस्राएल नें वोइश्शो बाक्माक्त। उत्पत्ती ३२:२९

11 मिनू परमप्रभुमी मेको कली “गो नेल्ल क्येडा सक्ति पाइश्शो परमप्रभु नड। गे सोशा बोशा, शुश दुमीने। गे रे रागी का डा शुश मुर नु रागी रागी डा मुर यो दुम्नीम। गे रे पिपुकी दुम्नीमी। उत्पत्ती १७:१; उत्पत्ती २८:३-४; उत्पत्ती १७:६

12 अब्राहाम नु इसहाक कली गेशो रागी गो इ कली नु इ चच युइ आन कली गेनुड” देमाक्त।

13 मिनू परमप्रभुमी लोत्र पने थुम्शा, मेको आ बाक्तीक रे लमाक्त।

14 मिनू याकूबमी परमप्रभु नु लोत्र पशो मिम्चा कली मेकेर फुल्लु का राप्पदा बाक्त। मिनू मेको आ तारी तूचा थोत्रक चढ़ेतीक नु तेल लुक्ता बाक्त। उत्पत्ती २८:१८-१९

15 याकूबमी परमप्रभु नु लोत्र पतीक सहर कली बेथेल नें वोदा बाक्त।

### बेन्यामीन जरमेसेनु राहेल बेक्शो

16 मिनू बेथेल रे एफ्राथ जाक्दीत्वा कली गाक्शो बाक्मा बाक्त। मेना राहेल आल थिचा चिक्शो बाक्माक्त।

17 सुत्केरी रोइम शुश श्येत जवानु, आ वारच पाइब मीश मुरुमी “महिनो, गे अर्को तौ का नु थीनेवे” दे लोत्र पवा बाक्त। उत्पत्ती ३०:२४

18 मिनू मेको मबेक्थ, आ सोक्त लची ना आ तौ आ नें बेन-ओनी वोदा बाक्त। आ आफोम चहिं आ नें बेन्यामीन वोदा बाक्त। मेको आ अर्थ आं श्येत डा तौ बाक्ब।

19 मिनू राहेल बेक्माक्त। मिनू एफ्राथ लतीक लामी थिम्मे बाक्त। एफ्राथ बेथलेहेम सहरम बाक्ब। उत्पत्ती ४८:७; १सामुएल १०:२; येरमीया ३१:१५; मत्ती २:१८

20 मिनू याकूबमी आ थिम्तीक तारी फुल्लु के थाम का राप्पदा बाक्त। मुल सम्म राहेल आ थिम्तीके तारी मेको ठेयब फुल्लु के थाम बाक्ब।

### इस्राएल आ तौपुकी

21 मिनु इस्राएल लना लन, आ ताम्बु एदेर माइशो लाइशो खिं आ नेक्था कीडा बाक्त।

22 मिनु इस्राएल मेको रागीमी बाक्मेनु, आ तौ रूबेन आ आफ आ मीश बिल्हाह नु इम्माक्त। मिनु इस्राएलमी मेको नेना बाक्त। उत्पत्ती ४९:४

याकूब आ १२ जना तौ

१इतिहास २:१-२

23 लेआ आ तौ रूबेन, याकूब आ डोंइती जरमेशो तौ बाक्माक्त। सिमियोन, लेवी, यहूदा, इस्साकार नु जबूलन नेल्ल लेआ आ तौ बाक्मा बाक्त।

24 राहेल आ तौ योसेफ नु बेन्यामीन बाक्सा बाक्त।

25 राहेल आ गेय पाइब बिल्हाह आ तौ दान नु नाप्ताली बाक्सा बाक्त।

26 लेआ आ गेय पाइब जिल्पा आ तौ गाद नु आशेर बाक्सा बाक्त। मेको नेल्ल पदान-अराममी जरमेशो याकूब आ तौ बाक्मा बाक्त।

इसहाक बेक्शो

27 मिनु याकूब, आ आफ इसहाक आ खिं माग्ने जाक्दीम्माक्त। मेको कली किरयथ-अरबा सहर नु हेब्रोन यो देंनीम। मेको अब्राहाम नु इसहाक आस बाक्तीक रागी बाक्माक्त।

28 मिनु इसहाक सहे का ८० बर्स दुम्माक्त।

29 मिनु इसहाक शुश बर्स डा खाल्पा दुम्शा बेक्माक्त। आ क्येडा डोंइती बेक्शो किकी पिपी आन बाक्तीक लमाक्त। मिनु आ तौ एसाव नु याकूबम मेको कली थिम्से बाक्त।

## 36

एसाव आ तौ चच युड

१इतिहास १:३५-५४

1 एको एसाव आ चच युड बाक्नीम। एसाव कली एदोम यो देंनीम। उत्पत्ती २५:३०; ब्यवस्था २३:८

2 एसावमी कनान रागी डा मीश निक्शी चाक्गा बाक्त। का हिती डा एलोन आ तमी आदाह, अर्को होर डा हिच्वी सिबोन आ तौ अनाह आ तमी ओहोली-बामा बाक्माक्त। उत्पत्ती २६:३४

3 मिनु इश्माएल आ तमी बासेमाथ, नेबायोथ आ समी यो चाक्गा बाक्त। उत्पत्ती २८:९

4 मिनु आदाहमी एसाव के एलीफाज थिमाक्त। बासेमाथमी रूएल थिमाक्त।

5 ओहोली-बामामी येऊश, यालाम नु कोराह थिमाक्त। मेकोपुकी कनान रागीम जरमेशो एसाव आ तौ बाक्मा बाक्त।

6 मिनु एसावमी आ मीशपुकी, आ तौपुकी, आ तमीपुकी, आ खिं डा मुर नेल्ल, आ बी ब्यफ नु बस्तु भाव नेल्ल कनान रागीम चेम्शो शोंप नेल्ल लाइशशा, याकूब रे डोन अर्को रागी लमाक्त।

7 मारदे हना शुश शोंप दुम्तीके, बस्तु भाव शुश दुम्तीके, काथा बाक्ने मचाप्से बाक्त। मिनु आस बाक्शो रागीम शुश बस्तु भाव दुम्तीके थुल्ने मचाप्मे बाक्त। उत्पत्ती १३:६

8 मिनु मेको एदोम माइशो एसाव सेइर डा पहाड लशा बाक्माक्त।

9 एसाव आ चच युड सेइर पहाड डा एदोमी माइशो सु सु बाक्मा बाक्त देशा हना,

10 एसाव आ मीश आदाह आ तौ एलीफाज, आ मीश बासेमाथ आ तौ रूएल बाक्माक्त।

11 मिनु एलीफाज आ तौपुकी तेमान, ओमार, सेफो, गाताम नु केनाज बाक्मा बाक्त।

12 एसाव आ तौ एलीफाज आ कान्छी मीश तिम्ना बाक्माक्त। मेकोमी अमालेक थिमाक्त। मेकोपुकी एसाव आ मीश आदाह आ तौपुकी बाक्मा बाक्त।

13 मिनु रूएल आ तौपुकी नाहाथ, जेराह, शम्माह नु मिज्जा बाक्मा बाक्त। मेको एसाव आ मीश बासेमाथ आ तौपुकी बाक्मा बाक्त।

14 मिनु सिबोन आ तौ अनाह आ तमी, एसाव आ मीश ओहोली-बामा आ तौपुकी येऊश, यालाम नु कोराह बाक्मा बाक्त।

### हुकुम पाइब एसाव आ तौपुकी

- 15 मिनु एसाव आ तौ आन दाते डा ठेयब मुर सु सु बाकमा बाक्त देशा हना, आ डोंइती जरमेशो तौ एलीफाज आ तौ तेमान, ओमार, सेफो नु केनाज,
- 16 कोराह, गाताम नु अमालेक, एलीफाजमी एदोम रागीमी थिशो आदाह आ तौ बाकमा बाक्त।
- 17 मिनु एसाव आ तौ रूएल आ तौ आन दाते डा ठेयब मुर नाहाथ, जेराह, शम्माह नु मिज्जा बाकमा बाक्त। मेकोपुकी रूएलमी एदोम रागीमी थिशो, एसाव आ मीश बासेमाथ आ तौ बाकमा बाक्त।
- 18 मिनु एसाव आ मीश ओहोली-बामा आ तौ आन दाते डा ठेयब मुर येऊश, यालाम नु कोराह बाकमा बाक्त। मेकोपुकी अनाह आ तमी, एसाव आ मीश ओहोली-बामाम, जरमेशो बाकमा बाक्त।
- 19 मेकोपुकी एदोम माइशो एसाव आ तौ आन दाते डा ठेयब मुर बाकमा बाक्त।

### सेइर आ चच युइ

- 20 मिनु डोंइती मेको रागीम बाकब सेइर आ तौ होरीपुकी सु सु बाकमा बाक्त देशा हना, लोतान, शोबाल, सिबोन, अनाह उत्पत्ती १४:६; ब्यवस्था २:१२, २२
- 21 दीशोन, एजेर नु दीशान बाकमा बाक्त। मेकोपुकी एदोम रागी डा सेइर आ तौ होरी आन दाते डा ठेयब मुर बाकमा बाक्त।
- 22 लोतान आ तौ होरी नु हेमान बाकसा बाक्त। लोतान आ समी तिम्ना बाकमा बाक्त।
- 23 शोबाल आ तौपुकी अल्वान, मानाहाथ, एबाल, शेफो नु ओनाम बाकमा बाक्त।
- 24 सिबोन आ तौ आइयाह नु अनाह बाकसा बाक्त। मिनु अनाहमी आ आफ सिबोन आ गधा योव्रदीमेनु, गोरशो रागीमी होश ब्वाककु बुक्तीके थिदा बाक्त।
- 25 अनह आ आल दीशोन नु आ तमी ओहोली-बामा बाकसा बाक्त।
- 26 मिनु दीशोन आ तौपुकी हेम्दान, एशबान, इश्रान नु केरान बाकमा बाक्त।
- 27 एजेर आ तौपुकी बिल्हान, जावान नु अकान बाकमा बाक्त।
- 28 दीशान आ तौ ऊज नु अरान बाकसा बाक्त।
- 29 होरी आन दाते डा ठेयब मुरपुकी लोतान, शोबाल, सिबोन, अनाह,
- 30 दीशोन, एजेर नु दीशान बाकमा बाक्त। मेको सेइर रागी डा होरी आन ठेयब मुर बाकमा बाक्त।

### एदोम रागी डा पिपपुकी

- 31 डोंइती इस्राएल डा मुर आन पिप मबाकशो बाकमा बाक्त। एदोम रागीमी चहिं सासन पाइब पिपपुकी बाकमा बाक्त।
- 32 मिनु बेओर आ तौ बेलामी एदोम रागीमी सासन पवा बाक्त। मिनु मेको आ सहर आ नें दिनहाबा बाकमा बाक्त।
- 33 मिनु बेला बेकशा नोले बोञ्जा डा जेराह आ तौ योबाब मेकेर डा पिप दुम्माक्त।
- 34 मिनु योबाब बेकशा नोले तेमान आ मुर आन रागी डा हुशाम पिप दुम्माक्त।
- 35 मिनु हुशाम बेकम नोले बेदाद आ तौ हादाद पिप दुम्माक्त। मेकोमी मोआब रागीमी मिदयानी नु लडाइ पशा ग्रामाक्त। आ सहर आ नें अवीथ बाकमा बाक्त।
- 36 मिनु हादाद बेकम नोले मासैकाह डा सम्ला पिप दुम्माक्त।
- 37 मिनु सम्ला बेकम नोले युफ्रेटीस खोला आ नेक्था बाकशो रेहोबोथ डा शावल पिप दुम्माक्त।
- 38 मिनु शावल बेकम नोले आकबोर आ तौ बाल-हनान पिप दुम्माक्त।
- 39 मिनु आकबोर आ तौ बाल-हनान बेकम नोले हादार पिप दुम्माक्त। आ सहर आ नें पाहु बाकमा बाक्त। आ मीश मेहेताबेल बाकमा बाक्त। मेको मात्रेद आ तमी बाकमा बाक्त। मात्रेद चहिं मे-जाहाब आ तमी बाकमा बाक्त।

### एसाव रे पिशो थर

- 40 एसाव रे पिशो थर आन सिं नु आन बाक्तीके तेको बाकमा बाक्त देशा हना, तिम्ना, अलवाह, येथेथ,

- 41 ओहोली-बामा, एलाह, पिनोन,  
 42 केनाज, तेमान, मिब्सार,  
 43 मग्दीएल नु यिराम बाक्मा बाक्त। मेको एदोम आ थर आन बाक्तीक बाक्मा बाक्त। एसाव एदोमी आन किकी पिपी बाक्माक्त।

## 37

### याकूब आ तौ योसेफ आ कथा

- 1 याकूब आ आफ अर्को रागीम बाक्शो खोदेशो पा याकूब यो कनान रागीम बाक्शो बाक्माक्त।  
 2 एको याकूब आ खिं डा मुर आन कथा बाक्ब। योसेफ १७ बर्स दुम्शा आ लोकब आन क्यारश भेडा गोठ डा गोठला बाक्माक्त। आ आफ आ मीश बिल्हाह नु जिल्पा आस तौ कली वारच पाइब बाक्माक्त। मिनु योसेफमी मेको आन मरिम्शो पशो आ आफ कली शोत्रबाक्माक्त।  
 3 इस्राएलमी नेल्ल क्येडा योसेफ कली दाक्शो बाक्माक्त। मारदे हना मेकोमी खाल्पा दुम्शा थिमाक्त। मिनु योसेफ कली दारशो फेक्तीके का फेरपदा बाक्त।  
 4 मिनु आ लोकबपुकीमी “आफोम नेल्ल क्येडा योसेफ कली दाक्ताक्व” दे तुइश्शा, योसेफ कली मदाक्तमे बाक्त। मिनु योसेफ नु रिम्शो लोत्र यो मपामे बाक्त।

### योसेफ आ डोंइती डा डोमु

- 5 काबु नाक्दो योसेफमी डोमु का तवा बाक्त। मिनु योसेफमी आ लोकब आन कली शेंदीमी बाक्त। मिनु मेकोपुकीमी डोंइती क्येडा मदाक्तमे बाक्त।  
 6 योसेफमी मेको आन कली “गो सिनाक्दो डोमु का ताता।  
 7 गो नेल्ल रूमी चेरब मुठा फ्रेंशा बाक्तय। मिनु आं मुठा बोक्शा राप्त। मिनु इन मुठापुकी एर ओंथ बाक्शा, आं मुठा कली सेउ पाम्तेक्मे” देंमाक्त।  
 8 आ लोकबपुकीम “गे आंइ कली अरेब दुम्नेवे? आंइ कली हुकुम पाइब दुम्नेवे?” दे गाइश्शा देंमा बाक्त। मिनु योसेफ कली आ डोमु नु आ देंशो आ पर्बम डोंइती क्येडा मदाक्तमे बाक्त।

### योसेफ आ नोले डा डोमु

- 9 मिनु नोले योसेफम लेंशा अर्को डोमु तवा बाक्त। मिनु आ लोकब आन कली “नेनीन, गो अर्को डोमु का यो ताता। नां, तास्ला नु ११ ओटा सोरुलपुकीम आं कली सेउ पाइक्तीमी” देंमाक्त।  
 10 मेको डोमु आ आफ नु आ लोकब आन कली शेंदीमीनु, आ आफोमी “मार डोमु तवी? गो, इ ममा नु इ लोकबपुकी इ डोंइती थमा पा खुम्की पा बाप्चा माल्नीकी?” दे हुइक्ता बाक्त।  
 11 मिनु आ लोकबपुकीमी योसेफ कली मदाक्तमे बाक्त। आ आफोम चहिं योसेफ आ देंशो मिम्शा आ थुंमी वोदा बाक्माक्त।

### योसेफ कली लेयशो

- 12 मिनु योसेफ आ लोकबपुकी क्यारश भेडा योत्रचा कली शेकेम माइश्शो रागीमी बाक्शो बाक्मा बाक्त। उत्पत्ती ३३:१८-१९  
 13 इस्राएलमी योसेफ कली “इ लोकबपुकी शेकेम नेक्थान क्यारश भेडा योत्रनीम। गो इ कली शेकेम सोइक्नन” देंमाक्त। मिनु योसेफम “लो, गो लाइनुडु” देंमाक्त।  
 14 मिनु “लावो, इ लोकब नु क्यारश भेडा नेल्ल रिम्शो बाक्मा कों, दोदेशो पा बाक्मा, कोत्रथ लावो। मिनु कोत्रशा, शेंदी” देंमाक्त। मिनु योसेफ कली हेब्रोन बेसी रे सोइक्तानु, शेकेम गे लमाक्त। उत्पत्ती ३५:२७  
 15 मिनु योसेफमी लेखमी मुर का गुमाक्त। मिनु मेकोमी “गे मार मली?” दे हिल्लो पवा बाक्त।  
 16 मिनु योसेफमी “आं लोकब आन कली माल्थ गाक्ती। क्यारश भेडा ते योत्रशो बाक्मा, तुइक्ती?” दे हिल्लो पवा बाक्त।

17 मिनु मेको मुरुमी “मेकोपुकी एकेर रे लाम्तेक्मे। ‘दोथान लचा’ देशो नेंता” देंमाक्त। मिनु योसेफम आ लोकब आन कली दोथानम थिम्मी बाक्त।

18 मिनु आ लोकबपुकीम योसेफ कली डोन रे पिशो तशा, आन नेक्था जाक्चा क्येडा डोंइती “मेको कली साइक्चा” दे सल्ला पामे बाक्त।

19 मिनु मेकोपुकीमी “कोव्रडीन, डोमु ताइब जाक्त।

20 मुल मेको कली साइय्य। मिनु ढोडोडगा कामी पिक्य। मिनु ‘जन्तुम साइशशा ब्वाप्टु’ देंय। आ डोमु तशो गाप्बाक्म कों, मगाप्बाक्म तुइक्नय” देंमुमा बाक्त।

21 मिनु रूबेनमी मेको आन लोव्र नेंशा, मेको कली “मसाइय्य” देंमाक्त। मेकोमी “आ लोकबपुकी रे प्रोंइनुड” दे मिम्ता बाक्त। उत्पत्ती ४२:२२

22 रूबेनमी मेको आन कली “मसतीने। लेख डा ढोडोडगा कामी ताइक्चा” दे माइक्मी बाक्त। मार दे हना योसेफ कली आन गुइ रे प्रोंइशा, आफ आ खिं सोइक्नुड, दे मिम्ता बाक्त।

23 मिनु योसेफ आ लोकब आन बाक्तीके जाक्मेनु, मेकोपुकीमी आ नक फेरशो रिम्शो फेक्तीक वा पुइक्तमे बाक्त।

24 मिनु लेख डा ढोडोडगा कामी पिक्यमे बाक्त। मेको ढोडोडगाम ब्वाक्कु मबाक्शो बाक्माक्त।

25 मिनु शोब्ले जथ निस्सीमा बाक्त। मिनु कोव्रडमेनु, गिलाद सहर रे इश्माएल जात डा ग्याप्ब लेयब मुर नु आन दलओठपुकी पिशो तामे बाक्त। मेको आन दलओठपुकीमी मस्लापुकी, खेक्तीकपुकी नु धूप इजीप्तमी लेयचा कली लाइक्बाक्मा बाक्त।

26 मिनु यहूदामी आ लोकब आन कली “इ लोकब साइशशा, जोल पचा, मार रिम्शो दुम्बा डा?

27 नेनीन, इश्माएल आ मुर आन कली लेयशा सोइक्तय, मसाइय्य। मार दे हना इ लोकब, इ आंम मुर बाक्ब” देंमाक्त। मिनु आ लोकबपुकी बिस्समा बाक्त।

28 मिदयान डा इश्माएली ग्याप्ब लेयब मुर पिना पिन बाक्मा बाक्त। मिनु योसेफ कली ढोडोडगा रे फेरशा, इश्माएली आन कली चांदी के २० शेकेलम लेयडमे बाक्त। मिनु मेकोपुकीमी योसेफ कली इजीप्त लदमे बाक्त। शेकेल का ११.५ ग्राम, तोला खोदेशो बाक्ब। उत्पत्ती २५:२; लेवी २७:१-८

29 मिनु रूबेनमी योसेफ प्रोंइचा कली मेको ढोडोडगा लशा कोव्रडानु, योसेफ कली मथित्थु, सुर्ता पा, आ वां खाक्गा बाक्त।

30 मिनु आ लोकब आन कली “मेको आल मबा। दोपा आ आफ आ डोंइती जाक्दीत्नुडा?” दे लोव्र पवा बाक्त।

31 मिनु मेकोपुकीमी योसेफ आ फेक्शो वा लाइशशा, पाठा का क्योरशा, आ फेक्शो वा हुशेम खुम्मे बाक्त।

32 मिनु मेको फेरशो फेक्शो वा आन आफ कली लाइशशा गेमे बाक्त। मेकोपुकीमी आन आफ कली “कोव्रडीन, एको वा थित्तक। इन तौ आ फेक्शो वा कों?” दे हिल्लो पामे बाक्त।

33 मिनु मेको वा तशा “आं तौ आ फेक्शो वा बाक्त, दे तुइक्ता बाक्त। मिनु ब्वाकी डा जन्तुमी मेको कली साइशशा, नेक्मे बाक्त” दे डाक्माक्त। उत्पत्ती ३७:२०

34 मिनु याकूबम आ फेक्शो वा खाक्शा, अरन्डी फेक्शा, शुश नाक्ती रोंका पवा बाक्त।

35 आ तमी तौ आन आफ कली लेम्थ जाक्मा बाक्त। मिनु याकूबमी “गो आं बेक्ची ना सम्म आं तौ कली रोंका पाइनुड” दे लेम्था मगेमी बाक्त। मोपा आ आफ योसेफ आ पर्वम डाक्माक्त।

36 मिनु मेको मिदयान डा मुरपुकीमी योसेफ कली इजीप्त रागी डा फाराओ आ नेल्ल क्येडा ठेयब गेय पाइब पोतीफर कली लेयडमे बाक्त।

## 38

### यहूदा नु तामार

1 मिनु नोले यहूदा आ लोकबपुकी रे लशा, अदुल्लाम सहर डा हीरा माइशशो मुर आ बाक्तीक लमाक्त।

2 मेकेर बाक्शा, यहूदामी कनानी शुआ नें पाइशशो मुर आ तमी तवा बाक्त। मिनु मेको चाक्शा, मेको नु बाक्माक्त।

3 मिनू मेकोमी कोव्रज कुरशा, तौ का थिमाक्त। मेको आ नें एर वोदा बाक्त।

4 मिनू लेंशा कोव्रज कुरशा, अर्को तौ का नु थिमाक्त। मेको आ नें ओनान वोदा बाक्त।

5 मेकोमी लेंशा कोव्रज कुरशा, अर्को तौ का नु थिमाक्त। मेको आ नें शेलाह वोदा बाक्त। मेको आल थिची ना यहूदा केसीब माइक्तीकेमी बाक्शो बाक्माक्त।

6 मिनू यहूदामी आ डोंइती जरमेशो तौ एर कली मीश आल का चाक्गा बाक्त। मेको आ नें तामार बाक्माक्त।

7 यहूदा आ डोंइती जरमेशो तौ एरमी परमप्रभु यावे आ डोंइती मरिम्शो पना पन बाक्माक्त। मिनू परमप्रभु यावेमी मेको कली सदा बाक्त।

8 मिनू यहूदामी ओनान कली “रिउम पतीक गेय पा इ लोकब आ मीश नु बाक्को। इ लोकब कली आल सेलो” दे मदा बाक्त। ब्यवस्था २५:५-१०

9 मिनू ओनानमी आ आल मदुम्ब, दे तुइशशा, आ लोकब आ मीश नु बाक्की ना आ लोकब आ आल मसेल्चा, दे आ वांचेर खपीम ताइक्वाक्माक्त।

10 मिनू मेको कली मो पशो तशा, परमप्रभु यावेमी मेको कली मदाक्शो बाक्माक्त। मोपतीके मेको कली यो सदा बाक्त।

11 मिनू यहूदामी आ चाइमी तामार कली “इ आफ आ खिंम बाक्शा, शेलाह मकोल्म सम्म रिम्दो” दे लेम्दा बाक्त। मारदे हना यहूदामी “मेको नु बाक्शा, आ लोकब निक्शी खोदेशो पा, अर्को यो बेक्बा कों” दे मिम्ता बाक्त। मिनू तामार आ आफ आ खिं लमाक्त।

12 मिनू नोले शुआ आ तमी, यहूदा आ मीश बेक्माक्त। मिनू आ रोंका पतीक नुम नोले यहूदा आ भेडा आन कली ऊन खोइक्वपुकी गुम्चा कली आ वारच अदुल्लाम सहर डा मुर हीरा नु तिम्नाह लमाक्त।

13 मिनू मुर कामी तामार कली “इ शिउ आ भेडा ऊन खोइक्व तिम्नाह कुइब” दे मदा बाक्त। यहोसु १५:५७

14 मिनू आ वोंइश बेक्शो वा पुइशशा, आ कुल तेल्लेम खोदेशो पा सुम्से बाक्त। मिनू मोदेशो पा तिम्नाह एनाइम लतीक लॉमी निशशा बाक्माक्त। मारदे हना शेलाह कोल्शा यो, यहूदामी मेको नु ग्युंबे मपाइक्ता बाक्त।

15 मिनू यहूदाम मेको कली लॉम तशा “तेल्लेम का बाक्ब” दे मिम्ता बाक्त। मारदे हना आ कुल सुमा बाक्त।

16 मिनू मेको कली “आं कली ओव्रचा गेयी” देंमाक्त। मारदे हना आ चाइमी बाक्ब, दे मतुइक्ता बाक्त। मिनू तामारमी “गे गो नु बाक्शो डा आं कली मार गेनीनी?” दे हिल्लो पवा बाक्त। लेवी १८:१५

17 मिनू “गो आं गोठ डा पाठा का सोइक्वन” देंमाक्त। मिनू तामारमी “मेको मसोइक्तीनी सम्म मार गेनीनी?” दे हिल्लो पवा बाक्त।

18 मिनू यहूदामी “मार पुइनेवे?” दे हिल्लो पवा बाक्त। मिनू मेकोमी “इन छाप, इन डोरी नु इन गुइ डा कोक्के गेचा नड” दे मदा बाक्त। मिनू मेको नेल्ल गेशा नोले मेको नु बाक्माक्त। मिनू कोव्रज कुरा बाक्त।

19 मिनू तामार बोक्शा लशा, आ वोंइश बेक्शो डा वा लेंशा फेक्से बाक्त।

20 मिनू यहूदामी मेको पाठा गेचा नु आ छाप, डोरी नु कोक्के लेत्चा कली आ अदुल्लाम डा आ वारच कली सोइक्ता बाक्त। मेकोमी मेको मीश मुर कली मथिदा बाक्त।

21 मिनू मेकोमी मेकेर डा मुर आन कली “एकेर एनाइम डा लॉम बाक्ब तेल्लेम ते लमे?” दे हिल्लो पामी बाक्त। मिनू मेकोपुकीमी “एकेर तेल्लेम मबाक्ब” देंमा बाक्त।

22 मिनू मेको यहूदा आ बाक्तीक लेशशा “मेको कली थिन्ने मचबु। मेकेर डा मुरपुकीमी ‘एकेर तेल्लेम मबाक्ब’ देंतेक्म” दे यहूदा कली शेंदा बाक्त।

23 मिनू यहूदामी “मेकोन बाक्ल। गो मुने मदोक्डल। गो पाठा का सोइक्ताक्ड। गे मेको कली मथिदी, मार पचा डा?” देंमाक्त।

24 मिनू महिना सां नोले मुर कामी यहूदा कली “इ चाइमी तामारम तेल्लेम पाप्तु। तेल्लेम पा कोव्रज कुरशा बाक्त” देंमाक्त। मिनू यहूदामी “मेको चोचा कली चाक्कीन” दे लोव्र लेत्ता बाक्त।

25 मिनू तामार कली चाकामेनु, मेकोमी आ शिउ कली “एको छाप, डोरी नु कोक्के सु के बाकमे मेको रे पा कोव्रज कुरशो नड। एको छाप, डोरी नु कोक्के सु के बाकमे, कोव्रडीन” दे लोव्र कुरब सोइक्ता बाक्त।

26 मिनू यहूदा मेको छाप, डोरी नु कोक्के तुइश्शा, मेकोमी “आं क्येडा मेको ठीक पाइब बाक्त। मारदे हना गो मेको कली आं तौ शेलाह मगेड” देमाक्त। तन्न तामार कली मचाक्या बाक्त।

27 मिनू आल थिचा रोइ पची ना, आ कोव्रजम जौले आल बाकसा बाक्त।

28 मिनू आल थिचावानु, आल कामी आ गुइ गुंइदा बाक्त। मिनू आ वारच पाइब मीश मुरुमी लल श्येले पाइश्शा “एको डोंइती डा बाकब” देमाक्त।

29 मिनू मेको आ गुइ ओंइशा, आ लोकब जरमेसे बाक्त। मिनू मेको वारच पाइबमी “इ यूची ना गिश ठेयब गार सेली” दे मदा बाक्त। मोपतीके आ नें परेस वोदा बाक्त। परेस आ अर्थ खाकशो गार बाकब। रूथ ४:१८; मत्ती १:३

30 मिनू नोले लल श्येले पाइश्शो आल जरमेसे बाक्त। मिनू मेको आ नें जेराह वोदा बाक्त।

## 39

### योसेफ पोतीफर आ खिम बाकशो

1 मेको इश्माएल जात डा ग्याप्ब लेयबपुकीमी योसेफ कली इजीप्त रागी चाकदीत्मे बाक्त। मिनू इजीप्त रागी डा पिप आ नेल्ल क्येडा ठेयब गेय पाइब पोतीफरमी योसेफ कली ग्यबा बाक्त। उत्पत्ती ३७:२८, ३६

2 मिनू परमप्रभु यावे योसेफ नु बाकशो बाकमाक्त। योसेफ इजीप्त डा होव्रप आ खिम बाकमेनु, मार मार पवा, मेको नेल्ल रिम्शो दुम्शा लमाक्त। उत्पत्ती २६:२४

3 मिनू आ होव्रपमी “परमप्रभु यावे योसेफ नु बाकमाक्त। मिनू योसेफमी मार मार पवा, मेको नेल्ल परमप्रभु यावेमी रिम्शो दुम्पदा बाक्त।” दे तुइक्ता बाक्त।

4 मिनू योसेफ पोतीफर आ डोंइती शिशी तवा बाक्त। मिनू आ खिम गेय पवानु, आ ठेयब गेय पाइब सेला बाक्त। मिनू अर्को गेय पाइबपुकी कली अरेब यो सेला बाक्त। आ मारेइ मारेइ योसेफ कली कोव्रपदा बाक्त।

5 मिनू पोतीफरमी योसेफ कली आ खिम डा नेल्ल कोव्रब मुर सेलानु, परमप्रभु यावेमी योसेफ आ पर्बम मेको कली शुश आसीक गेवा बाक्त। पोतीफर आ खिम मार मार बाकमा, आ रूम मार मार ब्वारा, मेको नेल्ल कली परमप्रभु यावेमी आसीक गेवा बाक्त। उत्पत्ती ३०:२७

6 मोपा पोतीफरमी आ मार मार नेल्ल योसेफ आ गुइमी जिम्मा गेवा बाक्त। आ जचा ब्वचा ला आंमा कोव्रडा बाक्त। योसेफ आ रं नु कुल थम दारशो बाकमाक्त। उत्पत्ती ४३:३२

7 मिनू पोतीफर आ खिम बाकमेनु, आ होव्रपोकममी योसेफ कली दाकशा, मेको नु बाकचा मला बाक्त। मेको मीश मुरुम योसेफ कली “पिवो, गो नु बाकको” दे मदा बाक्त।

8 योसेफमी “गो गे नु मबाकनुड। आं होव्रपमी आ मार मार नेल्ल आं कली ‘कोव्रडो’ दे जिम्मा गेती।

9 आं कली आ खिम डा नेल्ल क्येडा ठेयब सेलती। मार मार बाकमा, नेल्ल जिम्मा गेती। इन कली चहिं आं कली मगेयी। मारदे हना गो आ मीश ननी। गो दोपा परमप्रभु आ डोंइती मोदेशो मरिम्शो पाप पने चाप्नुडा? गो मपाइनुड?” दे मदा बाक्त। प्रस्थान २०:१४; लेवी १८:२०

10 मिनू मेको मीश मुरुमी नाक्त किंत किंत योसेफ कली लोव्र पशा “पिवो, गो नु बाकको” दे मदा बाक्त। योसेफम चहिं मेको आ लोव्र मटिवा बाक्त।

11 मिनू काबु योसेफ आ गेय पचा कली पोतीफर आ खिम बाकमाक्त। खिम गेय पाइब मुर सुइ मबाकमा बाक्त।

12 मिनू मेको मीश मुरुमी योसेफ आ फेकशो वा ग्याइश्शा कीशा “गो नु बाकको” देमाक्त। मिनू योसेफ आ फेकशो वा प्रोंइशा, खिम रे दोरशा लाडगा यूमाक्त।

13 पोतीफर आ मीशेमी योसेफ आ फेकशो वा आंम गुइमी प्रोंइशा वोइश्शा, खिम रे प्रोकशो तशा,

- 14 खिं डा मुर आन कली ब्रेशशा “कोव्रडीन, पोतीफरमी एको हिबू मरिम्शो पपाइक्या कली चाक्तु। एकोमी आं कली ग्याइकताकयी ‘गो नु बाक्को’ दे माइक्ती। गो चहिं ठेयब सेंदामी वाइ ब्रेत्ती।
- 15 मिनु आं कली वाइ ब्रेशशो तशा, आ वा प्रोंइशा प्रोक्त” दे माइक्ती बाक्त।
- 16 मिनु मेकोमी योसेफ आ फेक्शो वा आ नेक्था वोइशशा, आ वोंइश मजाक्म सम्म रिम्दा बाक्त।
- 17 पोतीफर जाक्मेनु, आ मीशेमी “एको इन चाक्शो गेय पाइब हिबूमी आं कोठा ओव्रशा ‘गो नु बाक्को’ देंत।
- 18 गो चहिं वाइ ब्रेत्ती। मिनु आ फेक्शो वा प्रोंइशा, खिं रे यूशा प्रोक्त” दे मदा बाक्त।
- 19 मिनु आ होव्रपमी आ मीश आ लोव्र नेंशा, चुरमाक्त।
- 20 योसेफ कली लाइशशा, जेल्खानम चोक्पदा बाक्त। मेकेर पिप आ चोक्शो मुरपुकी यो बाक्मा बाक्त। मिनु योसेफ मेकोपुकी नु बाक्माक्त।
- 21 मिनु परमप्रभु यावेमी योसेफ कली वारच पशा, जेल्खान डा कोव्रब कली “योसेफ रिम्शो मुर बाक्ब” दे तुइक्पदा बाक्त।
- 22 मिनु मेको कोव्रब मुरुमी योसेफ कली जेल्खानम चोक्शो मुर आन कली कोव्रब सेला बाक्त। मिनु मेकेर बाक्शो गेय नेल्ल योसेफमी पवा बाक्त।
- 23 मेको जेल्खान डा कोव्रब मुरुमी योसेफ आ पशो यो मकोव्रडा बाक्त। मारदे हना परमप्रभु यावे मेको नु बाक्शो तुइक्ता बाक्त। मेको नेल्ल रिम्शो पाइब, दे थमा सुदा बाक्त। मिनु परमप्रभु यावे मेको नु बाक्मेनु, आ गेय नेल्ल रिम्शो दुम्माक्त।

## 40

### योसेफमी डोमु आ अर्थ शेंशो

- 1 मिनु नोले मार दुम्माक्त देंशा हना, इजीप्त डा पिप फाराओ आ खिंमी पिप कली तूचा गेब आन ठेयब मुर नु पिप कली शोब्ले चोइब आन ठेयब मुरुमी आस प्रभु इजीप्त डा पिप कली मरिम्शो पाम्से बाक्त।
- 2 मिनु फाराओमी मेको तूचा गेब आन ठेयब मुर नु शोब्ले चोइब आन ठेयब मुर आस पबर्म गाइक्ता बाक्त।
- 3 मिनु मेको निम्फा आस कली नेल्ल क्येडा ठेयब गेय पाइब आ जेल्खानमी चोक्सी बाक्त। मेकेर योसेफ यो बाक्शो बाक्माक्त।
- 4 मिनु जेल्खान डा कोव्रब मुरुम योसेफ कली “मेको निम्फा आस कली वारच पावो” दे अरेवा बाक्त। मिनु वारच पवा बाक्त।
- 5 मिनु इजीप्त डा पिप आ गेय पाइब ठेयब मुर निक्शी जेल्खानमी बाक्सानु, काबु नाकदो निम्फामी डोमु ताम्से बाक्त। मेको आस डोमु आस अर्थ निक्शी बाक्माक्त।
- 6 मिनु सुनी कना योसेफ मेको निक्शी आस कली वारच पथ, आस कोठा ओव्रमेनु, निम्फा सुर्ता पा बाक्शो ताम्सी बाक्त।
- 7 मिनु योसेफमी जेल्खानम बाक्शो फाराओ आ गेय पाइब आ ठेयब मुर निक्शी आस कली “मारदे सुर्ता पनी?” दे हिल्लो पाम्सी बाक्त।
- 8 मिनु मेको निक्शीमी “गो डोमु ताइतस्कु। मिनु मेको डोमु आ अर्थ मरुप्स्कु। शेंब मुर मबा” देंसा बाक्त। मिनु योसेफमी “परमप्रभुमी मेको डोमु मार बाक्बा दे शेंबा ममाइ डा? लो, आं कली देनीन” दे माइक्सी बाक्त। उत्पत्ती ४१:१५-१६; दानीएल २:२७-२८
- 9 मिनु फाराओ कली तूचा गेब आन ठेयब मुरुमी “गो आं डोमुमी आं डोंइती अडगुर बोट का ताता।
- 10 मिनु मेको अडगुर बोटमी राशी सां बाक्तेक्म। मिनु मेको कोच्वा दाप्शा, फू यो बोइक्तेक्मे। बोइशशा डा मिन अडगुर गेडा सिशशा मीतेक्म।
- 11 मिनु आं गुइमी फाराओ आ कचौरा बाक्त। मिनु गो अडगुर आ गेडा आ रस फाराओ आ कचौरामी चिम्ता। मिनु कचौरा पिप कली गेता” दे लोव्र पवा बाक्त।
- 12 मिनु योसेफमी “इन तशो डोमु आ अर्थ मार बाक्ब देंशा हना, मेको राशी सां नाक्ती सां बाक्नीम।



13 मिनू सांबु नाक्ती फाराओम इन कली जेल्खान रे प्रोंडशा डा मिन इन डोंडती पशो गेय लेंशा गेब । मिनू गे डोंडती डा खोदेशो पा फाराओ कली तूचा गेनीनी । लेंशा फाराओ कली कचौरा गेनीनी । इन तशो डोमु आ अर्थ एको बाक्ब ।

14 इन कली रिम्शो दुम्मेनु, आं कली यो मप्रेंदीन । आं कली शिशी पने । फाराओ कली आं कली मेको जेल्खान रे गुंडचा, दे लोत्र पने ।

15 डोंडती आं कली हिबू रागी रे खुड पा चाक्तीमी । मुल जेल्खानम चोक्तीमी । गो मारेड मरिम्शो मपड” देंमाक्त । उत्पत्ती ३७:२८

16 मिनू फाराओ कली शोब्ले चोडब आन ठेयब मुरुम मेको डोमु आ अर्थ रिम्शो बाक्त, देंशा, योसेफ कली “गो यो डोमु का ताता । मेको डोमुम पिरीडगा सां बुश शोब्ले पियाम कुरशो बाक्ती ।

17 नेल्ल क्येडा आ तार डा पिरीडगामी फाराओ कली शुश खाल डा चोशो शोब्ले बाक्तेक्मे । मेको पिरीडगा डा शोब्ले चिक्बीम खुड पा जाम्तेक्म” दे मदा बाक्त ।

18 मिनू योसेफमी “इन तशो डोमु आ अर्थ मार बाक्ब देंशा हना, मेको पिरीडगा सां, नाक्त सां बाक्नीम ।

19 सांबु नाक्ती फाराओमी इन कली जेल्खान रे गुंडपाडशशा, रवाम क्याडक्पाडक्ब । मिनू चिक्बीम इन श्ये व्वाडनीम । इन तशो डोमु आ अर्थ एको बाक्ब” दे शेंदा बाक्त ।

20 मिनू आ सांबु नाक्ती फाराओ आ जरमेशो नाक्त बाक्माक्त । मिनू फाराओमी आ गेय पाडब नेल्ल आन कली भोज सेला बाक्त । मिनू आ कली तूचा गेब आन ठेयब मुर नु शोब्ले चोडब आन ठेयब मुर आस कली जेल्खान रे गुंडदीम्सी बाक्त ।

21 मिनू आ कली तूचा गेब आन ठेयब मुर कली लेंशा डोंडती डा गेय पचा गेवा बाक्त । मिनू मेकोमी लेंशा फाराओ कली तूचा गेब दुम्माक्त ।

22 शोब्ले चोडब आन ठेयब मुर कली चहिं क्याडशशा साडक्पदा बाक्त । योसेफमी दोदेशो देंमे, मोदेशो दुम्माक्त ।

23 तन्न फाराओ कली तूचा गेब आन ठेयब मुरुमी योसेफ कली यु प्रेंदा बाक्त ।

## 41

### फाराओ आ डोमु आ अर्थ

1 मिनू बर्स निकशी नोले फाराओमी डोमु निकशी तवा बाक्त । मिनू डोमुमी मार तवा बाक्त देंशा हना, आंम कली नील खोला आ नेक्थान राप्शा बाक्शो तवा बाक्त ।

2 मिनू नील खोला रे ७ ओटा दारशो दोम्शो बी गूशो तवा बाक्त । मेको बीपुकीमी बुदी मीलु घांस व्वामे बाक्त ।

3 मिनू नोले नील खोला रे ७ ओटा अर्को काड मदारशो ग्येशो बी गूशो तवा बाक्त । मिनू मेकोपुकी अर्को बी नु नील खोला आ नेक्था राप्शा बाक्मा बाक्त ।

4 मिनू काड मदारशो ग्येशो बीपुकीमी दारशो दोम्शो बी आन कली व्वामे बाक्त । नोले फाराओ सेंसे बाक्त ।

5 मिनू फाराओ लेंशा निन्द्रा पवानु, लेंशा अर्को डोमु तवा बाक्त । मार तवा बाक्त देंशा हना, चेरब बोट कामी शुश आख पाडशो ७ ओटा ग्रेल्लो बाला सिशो तवा बाक्त ।

6 मिनू नोले पूर्व डा फशेम बुश सेल्लो ७ ओटा सोप्पीक्च आडक्च बाला तवा बाक्त ।

7 मिनू मेको आडक्च बालामी मेको शुश आख पाडशो ७ ओटा बाला आन कली दाक्मे बाक्त । नोले फाराओ सेंशा, आ डोमु तशो तुडक्ता बाक्त ।

8 मिनू आ थुं मनुथु सुनी कना इजीप्त डा जादू पाडब नु जोक्ब तुडक्ब नेल्ल आन कली ब्रेथ्स सोडक्तीमी बाक्त । मेको जाक्मानु, आ डोमु मेको आन कली शेंदीमी बाक्त । तन्न सुडमी फाराओ कली मेको डोमु आस अर्थ देंने मचाप्मे बाक्त । दानीएल २:३

9 मिनू फाराओ कली तूचा गेब आन ठेयब मुरुमी आ पिप कली “मुलाक्ती आं मरिम्शो पशो मिम्ताक्ड।

10 फाराओमी आ गेय पाइब आस पबंम चुरमेनु, गो नु शोब्ले चोइब आन ठेयब मुर नेल्ल क्येडा ठेयब गेय पाइब आ जेल्खानम चोकसीशा बाक्स्कुनु,

11 गो निक्शीम काबु नाकदो डोमु ताइतस्कु। मेको डोमु निक्शी के अर्थ निक्शी बाक्सा बाक्त।

12 मेना हिबू रागी डा ठिटा का यो जेल्खानम बाक्त। मेको इन नेल्ल क्येडा ठेयब गेय पाइब आ गेय पाइब बाक्त। गो निक्शीमी तशो डोमु मेको कली माइक्स्कुनु, योसेफमी डोमु आ अर्थ नेल्ल आंस कली शेंताक्स्की। आं तशो डोमु आ अर्थ शेंताक्यी। मिनू अर्को मुर आ तशो डोमु आ अर्थ यो शेंताक्व।

13 दोदेशो पा शेंदा, मोदेशोन दुम्त। आं गेय आं कली लेंशा गेतीनी। अर्को कली चहिं कयाइश्शा साइक्तेक्म” देंमाक्त।

14 मिनू फाराओमी योसेफ कली ब्रथ सोइक्ता बाक्त। मेकोपुकीमी योसेफ कली रीब पा जेल्खान रे गुंडपदमे बाक्त। योसेफ कली चां प्रेक्शा, नक वा फेक्पा, फाराओ आ बाक्तीके चाक्मे बाक्त।

15 मिनू फाराओमी योसेफ कली “गो डोमु निक्शी ताता। सुडमी मेको आस अर्थ शेंने मचबेम। मिनू गो इ पबंम लोत्र नेंता। गे मुर आन तशो डोमु आ अर्थ शेंने चाप्नेवे ने” देंमाक्त।

16 मिनू योसेफमी फाराओ कली “गो डोमु डा लोत्र मतुइक्नुड। परमप्रभुमी फाराओ कली थमा पा थुं नाइक्चा डा लोत्र तुइक्पाइक्ब” देंमाक्त। उत्पत्ती ४०:८

17 मिनू फाराओमी “गो आं डोमुमी नील खोला आ नेक्था बाक्ती।

18 मिनू नील खोला रे ७ ओटा दारशो दोम्शो बी गूतेक्म। मिनू बुदी मीलु घांस ब्वाम्तेक्म।

19 मिनू नोले ७ ओटा मदारशो ग्येंशो बी गूतेक्म। गो इजीप्त रागी नेल्लेमी मोदेशो मदारशो बी गेनायो मतडमी।

20 मिनू मदारशो गेयशो बीपुकीमी डोंइती गूशो दोम्शो बी आन कली ब्वाम्तेक्म।

21 मिनू मेको आन कली ब्वशा यो, गेयशो बी मदोम्म। डोंइती डा खोदेशो पा गेयस डा गेयस बाक्तेक्म। बी ब्वाम्तेक्म, दे सुडमी थमा मसुदेम। मिनू नोले गो सेंसाक्यी।

22 मिनू लेंशा इप्ती। मिनू डोमु तडानु, चेरब बोट का रे ७ ओटा ठेयब रिम्शो बाला पाइश्शो तातामी।

23 मिनू नोले अर्को बोट रे ७ ओटा पूर्व डा फशेम सोव्रशो इम्चीली सोप्पीक्च बाला ताता।

24 मिनू इम्चीली सोप्पीक्च बालापुकीमी मेको ७ ओटा रिम्शो बाला आन कली दाक्तेक्म। गो एको आं डोमु जादू पाइब आन कली माइक्तामी। मेकोपुकीम एको डोमुमी मार दुम्बा, दे देंने मचबेम” दे योसेफ कली देंमाक्त।

25 मिनू योसेफमी फाराओ कली “इन डोमु निम्फा कांइचीक खोदेशो बाक्ब। परमप्रभुमी मार पचशो बाक्मे, मेको इन कली डोमुमी कोंइताक्व।

26 मेको ७ ओटा रिम्शो बी ७ ओटा बर्स बाक्नीम। मिनू मेको ७ ओटा रिम्शो बाला यो ७ बर्स बाक्नीम। डोमु निक्शी कांइचीक खोदेशो बाक्नीस।

27 मिनू मेको आ नोले गूशो ७ ओटा ग्येंशो बीपुकी ७ ओटा बर्स बाक्नीम। मिनू मेको ७ ओटा गेडा मसिश्शो, पूर्व डा फशेम सोव्रशो सोप्पीक्च बाला यो ७ ओटा बर्स बाक्नीम। मेको ७ बर्स डा अन्काल बाक्नीम।

28 आं देशो मार बाक्ब देशा हना, परमप्रभुमी मार पचा चिक्शो बाक्मे, मेको इन कली कोंइताक्व। मोदेशो बाक्ब।

29 नेनीन, इजीप्त रागी नेल्लेमी ७ बर्स सम्म शुश बाली नाली ग्रेल्शा, रिम्शो बर्स दुम्चा चिक्शो बाक्नीम।

30 मिनू आ नोले ७ बर्स सम्म अन्काल दुम्ब। मिनू मेको मरिम्शो ७ बर्सम इजीप्त रागीमी अन्न ग्रेल्शो नेल्ल प्रेनीम। मिनू मेको अन्कालमी रागी कली थुम्पाइक्ब।

31 मिनू मेको ठेयब अन्काल दुम्शा, डोंइती अन्न ग्रेल्शो बर्स नेल्लेमी प्रेनीम। मारदे हना मेको अन्काल शुश श्येत डा बाक्ब।

32 मिनु इन डोमु निक्शी खेयप ताइतीनी, मेको आ अर्थ मार बाक्ब देशा हना, परमप्रभुमी मेको थमा पा पाइब नु पचा चिकशो बाक्ब।

33 मोपतीके फाराओमी निप्स पाइश्शो मुर का इजीप्त रागी डा ठेयब मुर सेलीन।

34 मिनु आं देशो पशा, कोवब मुरपुकी यो वोइक्चा माल्नीनी। मेकोपुकीमी फाराओ आ सासनमी रिम्शो ७ बर्सम इन रागी नेल्ल रे अन्न ५ भाग तिरो पोक्चा माल्नीम।

35 मेको रिम्शो बर्स डा अन्न खुप्शा, अन्काल डा बर्सम सहर डा मुर आन कली थुल्चा कली उप्शा वोइक्चा माल्नीम।

36 मेको उप्शा वोइश्शो अन्न इजीप्त रागीमी अन्काल मदुम सम्म उप्चा माल्ब। मोपा वोइश्शोनु, अन्कालमी मबेक्नीम” दे योसेफमी फाराओ कली मदा बाक्त।

### योसेफ ठेयब मुर दुम्शो

37 मिनु फाराओ नु आ गेय पाइब नेल्लेमी “योसेफ आ देशो लोव्व रिम्शो बाक्ब” दे मिम्तमे बाक्त। हितोपदेस १४:३५

38 मिनु फाराओम आ गेय पाइब आन कली “गो योसेफ खोदेशो मुर अर्को सु थिन्ने चाप्नया डा? परमप्रभु आ सोक्तीम ब्रीशो मुर का थिन्ने चाप्नया डा?” दे हिल्लो पामी बाक्त। प्रस्थान ३१:३; हितोपदेस २:६

39 मिनु फाराओमी योसेफ कली “परमप्रभुमी मेको नेल्ल इ कली तुइक्पाइक्तु। इ खोदेशो जोक्ब तुइक्ब मुर सुइ मथिसीब।

40 इ कली आं रागी डा मुर आन कली हुकुम पाइब सेल्लन। इ देशो लोव्व मुर नेल्लेमी टिचा माल्नीम। गे आं सरकार डा गेय पाइब नेल्ल आन क्येडा ठेयब मुर दुम्नीनी। गो सिरपेचम पतीके ला इ क्येडा ठेयब बाक्नुड। भजन संग्रह ११३:७

41 नेनीन, गो इ कली इजीप्त रागी नेल्ल डा ठेयब मुर सेल्लनी” देमाक्त। प्रेरित ७:१०

42 मिनु फाराओम आ छाप क्येप्तीक औंठी आ ब्रेप्चो रे पुइश्शा, योसेफ आ ब्रेप्चोम लिक्ता बाक्त। मिनु योसेफ कली दारशो बुश वा फेक्पाइश्शा, सुन के माला रेल्ला बाक्त। एस्तर ३:३०; दानीएल ५:२९

43 मिनु फाराओमी योसेफ कली आ नोले डा बग्गीमी डोइक्पदा बाक्त। मिनु योसेफ आ डोंइती बाक्बपुकीमी “योसेफ आ डोंइती पोक्च थेक्शा, सेउ पने” दे ब्रेम्मा बाक्त। मोपा इजीप्त रागी डा हुकुम पाइब सेला बाक्त। एस्तर १०:३

44 मिनु फाराओमी “गो फाराओ नड। इजीप्त रागीमी गे मार पचा देंनी, मेको ला पचा माल्नीम” दे योसेफ कली देंमाक्त।

45 मिनु फाराओमी योसेफ कली साफेनाथ-पानेआह, दे नक नें वोदा बाक्त। मिनु योसेफ कली पोतीफेरा माइश्शो ओन सहर डा नाक्सो आ तमी आसेनाथ नु ग्युबे पाइक्ता बाक्त। मिनु योसेफ इजीप्त रागी नेल्ल कोव्वथ हिरचा गोवा बाक्त।

46 योसेफ फाराओ पिप आ डोंइती लोव्व पवानु, ३० बर्स दुम्शो बाक्माक्त। मिनु फाराओ आ डोंइती रे लशा, इजीप्त रागी नेल्ल हिरथ लमाक्त। उत्पत्ती ३७:२

### योसेफम इजीप्त कली गेय पशो

47 मिनु मेको रिम्शो बाली ग्रेल्लतीक ७ बर्समी इजीप्त नेल्ल डा रूमी थाम्पा अन्न ग्रेल्लमाक्त।

48 मिनु योसेफमी मेको बाली ग्रेल्लो ७ बर्स डा अन्न सहर सहरम उप्शा, वोदा बाक्त। मेको सहरम एर ओंथ सु सु आन रू बाक्मे, मेकेर डा अन्न मेको सहरम उप्शा वोदा बाक्त।

49 मिनु योसेफमी समुन्द्र डा बाल्वा खोदेशो पा अन्न उप्शा, शुश दुम्तीके पुक्चा यो प्रोना बाक्त। मारदे हना पुक्ने मचाप्चा डा पा शुश बाक्माक्त।

### योसेफ आ तौ निक्शी

50 मिनु अन्काल दुम्चा डोंइती योसेफ आ मीश ओन सहर डा नाक्सो पोतीफेरा आ तमी आसेनाथमी तौ निक्शी थिमाक्त।

51 मिनू योसेफमी “डोंइती श्येत जडानु, परमप्रभुमी आं आफ आ खिं डा मुर आन कली प्रेंपाइक्ती” दे मिम्शा, आ डोंइती जरमेशो तौ कली मनस्से नें वोदा बाक्त।

52 अर्को कली एफाइम नें वोदा बाक्त। मारदे हना “परमप्रभुमी आं कली रागीमी श्येत जडानु, शुश दुम्पाइक्ती” दे मिम्ता बाक्त।

53 मिनू इजीप्त रागीमी मेको रिम्शो अन्न ग्रेल्शो ७ बर्स नुम्माक्त।

54 मिनू योसेफ आ देशो ७ बर्स डा अन्काल दुम्चा गोवा बाक्त। मेको अन्काल रागी रागी नेल्लेमी दुम्माक्त। इजीप्त रागीमी चहिं अन्न थिंसे बाक्त।

55 मिनू इजीप्त रागीमी ठेयब अन्काल दुम्शा, मुरपुकीमी फाराओ कली “अन्न गेकी” दे पुन्मे बाक्त। मिनू फाराओम इजीप्त डा मुर आन कली “योसेफ नु पुंइथ लने। मेकोमी मार देंबा, मेको पने” दे माइक्मी बाक्त।

56 मिनू मेको अन्काल रागी रागी नेल्लेमी दुम्माक्त। मेना योसेफमी अन्न वोइक्तीक नेल्ल रोकचा गोवा बाक्त। इजीप्त डा मुर आन कली अन्न लेयपदा बाक्त। रागी नेल्लेमी ठेयब अन्काल दुम्माक्त।

57 मिनू अर्को रागी डा मुरपुकी यो इजीप्त रागीमी अन्न ग्याप्य, योसेफ आ डोंइती जाक्मा बाक्त। मारदे हना मेको अन्कालम रागी नेल्ल ग्रोइक्माक्त।

## 42

### याकूब आ तौपुकी इजीप्त लशो

1 मिनू याकूबमी इजीप्त रागीमी अन्न बाक्ब दे तुइश्शा, आ तौ आन कली “गे मारदे कोव्रमुशा बाक्नीनी? मारैड मपाइनीनी?

2 नेनीन, इजीप्त रागीमी अन्न बाक्ब। मिनू गोपुकी अन्कालमी मबेक्क्य, ब्रोंइय अन्न ग्याप्य लने” देमाक्त।

3 मिनू योसेफ आ १० जना लोकबपुकी इजीप्त अन्न ग्याप्य लमा बाक्त।

4 याकूबमी योसेफ आ लोकब बेन्यामीन कली चहिं श्येत दुम्बा कों, दे हिंशा, आ लोकबपुकी नु मसोइक्ता बाक्त।

5 मोपा याकूब आ तौपुकी अर्को मुर नु इजीप्त अन्न ग्याप्य जाक्दीम्मा बाक्त। मारदे हना कनान रागीमी यो अन्काल दुम्माक्त।

6 मिनू योसेफ सरकार डा ठेयब मुर दुम्शा, रागी नेल्ल डा मुर आन कली अन्न लेयपदा बाक्त। योसेफ आ लोकबपुकी जाक्शा, योसेफ आ डोंइती खुम्की पा बाप्शा, सेउ पामे बाक्त।

7 मिनू योसेफमी आ लोकब आन कली तशा, तुइक्ता बाक्त। तन्न मतुइश्शो खोदेशो पा ठेयब सेंदामी “ते रे जाक्नी?” दे हिल्लो पामी बाक्त। मिनू मेकोपुकीमी “गो कनान रागी रे अन्न ग्याप्य जाक्तक” देमा बाक्त।

8 योसेफम आ लोकब आन कली तुइक्ता बाक्त। मेकोपुकीमी चहिं योसेफ कली मतुइक्त्मे बाक्त।

9 मिनू योसेफम आ लोकब आन परबम आ डोमु मिम्ता बाक्त। मिनू मेको आन कली “गे क्यारी पाइब बाक्नीनी। एको रागीम ते रे ओव्रचा, दे कोव्रथ जाक्तीनी” दे आ लोकब आन कली माइक्मी बाक्त। उत्पत्ती ३७:५-९

10 मिनू मेकोपुकीमी “ममाइ प्रभु, इन गेय पाइब अन्न ग्याप्य जाक्तक।

11 गो नेल्ल मुर का आ तौ नकी। गोपुकी ठीक पाइब बाक्नीकी। इन गेय पाइब, गो क्यारी पाइब मनकी” देमा बाक्त।

12 मिनू योसेफमी “ममाइ, गे एको रागी ‘दोपा ओव्रचा’ दे कोव्रथ जाक्तीनी” देमाक्त।

13 मिनू मेकोपुकीमी “गो इन गेय पाइब १२ जना लोकब बाक्नीकी। कनान रागी डा मुर का आ तौ नकी। नेनीन, कान्छा मुल आ आफ नु बाक्ब। का चहिं मबाक्ब” दे योसेफ कली मदमे बाक्त।

14 मिनू योसेफमी “आं देशो खोदेशो पा, गे क्यारी पाइब बाक्नीनी।

15 गो इन कली कोव्रनुड, फाराओ आ नेमी इन लोकब कान्छा मजाक्म सम्म गे एकेर रे लचा मताइनीनी।

16 इन दाते डा का कली इन लोकब कान्छा ब्रथ सोइक्तीन। मेना सम्म गे एक जेल्खानम बाक्नीनी। इन लोव्र थमा बाक्म कों, जोल बाक्म कों, नोले तुंडसीब। गे इन लोकब कान्छा मचाक्तीनी हना, फाराओ आ नेमी गे क्यारी पाइब बाक्नीनी” देंमाक्त।

17 मेको नेल्ल आन कली नाक्त सां सम्म जेल्खानम चोक्मी बाक्त। उत्पत्ती ३७:२४

18 मिनु नाक्त सां नोले योसेफमी “गो परमप्रभु कली मान पा हिंनुड। मोपतीके गेपुकी ब्रोंइचा कली आं देशो पने।

19 गे ठीक पाइब मुर बाक्तीनी हना, इन दाते डा का चहिं जेल्खानम बाक्कीने। अर्को अन्न कुरशा, इन खिं लने।

20 इन लोकब कान्छा कली एक चाक्कीन। मिनु इन लोव्र थमा बाक्ब, दे तुंडसीब। मिनु गे बेक्चा ममाल्नीनी” दे आ लोकब आन कली माइक्मी बाक्त। मिनु आ देशो पामे बाक्त।

21 मेकोपुकीमी “गो थमा पा इं लोकब आ पर्वम ठेयब पाप पाइतय। मेकोमी इं कली तशा, शुश हिंशा, पुनानु यो, मेको आ लोव्र मनैय। मोपतीके इं कली एको श्येत दुम्त” देंमुमा बाक्त। भजन संग्रह ५०:२१

22 मिनु रूबेनमी “मेको आल कली मारेइ पाप मपने, दे गो इन कली मदेडा डा? तन्न गे आं लोव्र मनैनी। मेको कली श्येत गेशो हुश आ क्येक्क लेत्चा पुंडसाक्य” दे आ लोकब आन कली देंमाक्त। उत्पत्ती ३७:२१-२२

23 मिनु योसेफमी मेको आन लोव्र नेल्ल रुप्तु, दे मतुइक्तमे बाक्त। मारदे हना योसेफमी मेकोपुकी नु लोव्र पवानु, आन लोव्र रूपब नु आ कली आ अर्थ देंब मुर का वोदा बाक्त।

24 मिनु योसेफ आ लोकबपुकी रे लशा डाक्माक्त। मिनु लेशशा जाक्शा, मेकोपुकी नु लोव्र पशा, मेको आन डोंइती सिमियोन कली पाइक्ता बाक्त।

25 मिनु नोले योसेफमी आन धोक्रोम अन्न प्रिपाइशशा, आन गेशो क्येट यो लेंशा, आन धोक्रोम कुर पपाइशशा, लां कली जचा थोव्रक यो गेपाइक्मी बाक्त। आ लोकब आन कली मोदेशो पाइक्मी बाक्त।

26 मिनु मेकोपुकी अन्न आन गधा तारी वोइशशा लमा बाक्त।

27 मिनु लांमी बास बाक्मानु, आन दाते डा कामी आ गधा कली थुल्चा, दे आ धोक्रो रोकगा बाक्त। मिनु आ धोक्रो आ शोव्रमी आ थाप्शो क्येट थिदा बाक्त।

28 मिनु मेकोमी आ लोकब आन कली “आं क्येट लेत्मे देय मार में? आं धोक्रो आ शोव्रम बाक्त, शां” दे लोव्र पवा बाक्त। मिनु नेल्लेमी सुरता पशा “परमप्रभुमी इं कली मार पवा” दे हिंमा बाक्त।

29 मेकोपुकीमी आन आफ याकूब आ खिं कनान रागी जाक्दीशशा, मार मार दुम्मे, नेल्ल शोव्रडमे बाक्त।

30 मेकोपुकीमी “मेको रागी डा ठेयब मुरुम आंइ कली ठेयब सेंदामी लोव्र पशा, आंइ कली आन रागी क्यारी पाइब सुइक्तु।

31 गोपुकीमी ‘गो ठीक पाइब बाक्नीकी, गो क्यारी पाइब मनकी।

32 गो १२ लोकब, आफ का आ तौ नकी। का मुल मबाक्ब, कान्छा कनान रागीम आफ नु बाक्ब’ दे माइक्तक।

33 मिनु मेको रागी डा ठेयब मुरुम आंइ कली ‘गो दोपा तुइक्नुडा, गे ठीक मुर बाक्नीनी, दे इन लोकब का गो नु बाक्चा माल्ब। अरु चहिं अन्कालम जचा कली अन्न कुरशा, खिं लेशशा लने। उत्पत्ती ४२:२४

34 मिनु इन लोकब कान्छा कली एक चाक्कीन। मेको नोले ला गेपुकी क्यारी पाइब मननी, दे तुइक्नुड। मेना इन लोकब कली प्रोंइशा, लचा गेनुड’ दे माइक्तीकी” दे आन आफ कली देंमा बाक्त।

35 मिनु नोले आन धोक्रो रोकशा, नेल्लेमी आन थाप्शो क्येट आन धोक्रोमी थित्मे बाक्त। मिनु मेकोपुकी नु आन आफ मेको क्येट तशा, हिंमा बाक्त।

36 मिनु आन आफ याकूबमी “गे आं आल कली रोइक्ब बाक्नीनी। योसेफ लत। सिमियोन लत। मुल बेन्यामीन लाइक्चा माल्नीनी। एको नेल्ल आं कली श्येत गेचा कली बाक्ब” दे आ तौ आन कली देंमाक्त।

37 मिनु रूबेनमी “गो बेन्यामीन ठीक पा मलेत्ताकड हना, आं तौ निक्शी आस कली सतीन” दे आ आफ कली मदा बाक्त।

38 मेकोमी “आं तौ गे नु लचा मगेनुड। आ लोकब बेक्त, आ का ला बाकब। मेको कली लामी मार मार दुम्ने चापब। बेक्त हना, गेपुकीमी चां बोइश्शो आं कली ठेयब श्येत जपाइश्शा तुरसुम वोइक्चा माल्नीनी” दे याकूबम आ तौ आन कली माइक्मी बाक्त।

## 43

याकूब आ तौपुकी लेंशा इजीप्त लशो

1 मिनु मेको रागीमी अन्काल बारना बारन लमाक्त।

2 मिनु आन इजीप्त रे चाक्शो अन्न नेल्ल नुप्शा, आन आफोमी मेको आन कली “लेंशा इच्का जचा थोवक ग्यापथ लने” दे माइक्मी बाक्त।

3 मिनु यहूदामी “मेको ठेयब मुरुमी ‘गे इन लोकब कान्छा मचाक्तीनी हना, आं कली ग्रुथ मजाक्कीन’ दे आंइ कली हुइक्ताक्व। उत्पत्ती ४२:१५-३४

4 गे आंइ लोकब कान्छा कली गोपुकी नु सोइक्ताक्नी हना, ला लाइनीकी।

5 गे मेको कली गो नु मसोइक्ताक्नी हना, मलाइनीकी। मारदे हना मेको ठेयब मुरुमी ‘गे इन लोकब कान्छा मचाक्तीनी हना, आं कली ग्रुथ मजाक्कीन’ दे आंइ कली हुइक्ताक्व” दे आ आफ कली देंमाक्त।

6 मिनु इस्राएलमी “मारदे मेको मुर कली ‘आंइ लोकब कान्छा बाक्ब’ दे शेंदीनी? मिनु आं कली ओदेशो मरिश्शो पाइय्यीनी” दे माइक्मी बाक्त।

7 मिनु मेकोपुकीमी “मेको ठेयब मुरुमी ‘इन आफ मुल सम्म ब्रोंइशो बाक्बा? अर्को लोकब यो बाक्बा?’ दे आंइ कली खिं डा मुर आन पर्बम शुश हिल्लो पाप्तु। मिनु गोपुकीमी मेकोन देंतक। ‘इन लोकब कान्छा चाक्कीन’ देंब, दे गो दोपा तुइक्नीकी?” दे आन आफ कली देंमा बाक्त। उत्पत्ती ४२:७-१३

8 मिनु यहूदामी “कान्छा गो नु सोइक्तीन। गे गो नु इं आइक्च आल यो मबेक्मल, दे गो लाइनीकी।

9 गो एको आ जमानी दुम्नुड। गो लेशशा जाकडानु, गो एको कली चाक्शा, इन डोंइती मवोइक्ता हना, गेना हना यो आं पाप लील।

10 गो एको कली रिश्शा मबाक्शो नकी हना, गो खेयप निक्शी लने पिने थुक्च वा” दे आ आफ कली देंमाक्त।

11 मिनु आन आफ इस्राएलमी “मुल मो दुम्चा माल्शो बाक्त हना, गे मेको ठेयब मुर कली इं रागी डा नेल्ल क्येडा रिश्शो फल, इच्का खेक्तीक तेल, इच्का खुदो, मस्लापुकी, ब्रोंवशो रिना पाइब थोवक, फोरो नु देसी बदाम कोसेली लतीन। हितोपदेस १८:१६

12 मिनु इन क्येट नु डोंइती डा इन धोक्रोम बाक्शो क्येट यो लतीन। प्रेशा मो दुम, कों? मार दुम्मे? उत्पत्ती ४२:२७, ३५

13 इन लोकब कान्छा लाइश्शा, मेको ठेयब मुर कली लेंशा ग्रुथ लने।

14 नेल्ल क्येडा सक्ति पाइश्शो परमप्रभुमी मेको मुर आ डोंइती इन कली शिशी गेवल। मिनु इन अर्को लोकब नु बेन्यामीन यो सोइक्तल। गो श्येत जचान माल्शो बाक्ती हना यो, श्येत जडल” दे आ तौ आन कली माइक्मी बाक्त।

15 मिनु आ तौपुकीमी मेको कोसेली, डोंइती डा क्येट, अर्को क्येट नु बेन्यामीन लाइश्शा, इजीप्त रागी लशा, योसेफ आ डोंइती जाक्दीम्मा बाक्त।

16 मिनु योसेफमी मेकोपुकी नु बेन्यामीन कली तशा, आ खिं डा ठेयब गेय पाइब मुर कली “मेको मुर आन कली आं खिं लाइक्मी। बस्तु का क्योरशा, भोज ठीक पावो। मारदे हना मुलाक्ती मेकोपुकी गो नु जाइनीम” देंमाक्त।

17 मिनु मेको मुरुम योसेफ आ देशो पशा, नेल्ल आन कली योसेफ आ खिं ओइदीमी बाक्त।

18 मेकोपुकी चहिं हिंमा बाक्त, मारदे हना योसेफ आ खिं आगा ओइदीमी बाक्त। मिनु मेकोपुकीमी “मारदे हना इं डोंइती डा क्येट इं धोक्रोम थित्तय। मिनु इं कली वाइल सेल्चा नु इं गधा रोइक्चा कली इं कली एके ओइताकमे” देंमुमा बाक्त। उत्पत्ती ४२:२८

19 मिनु योसेफ आ खिं डा ठेयब गेय पाइब आ नेक्था लशा, लाप्चो रे मेको नु लोत्र पामे बाक्त।

20 मिनु “हजुर, गोपुकी डोंइती खेयप का जचा थोत्रक ग्याप्थ जाक्तक।

21 मिनु गोपुकी बास बाक्तीके जाकदीशशा, आंइ धोक्रो रोक्शा, कोत्रकानु, आंइ क्येट नेल्ल आंइ धोक्रो धोक्रोम थित्तक।

22 मुल गो लेंशा चाक्तक। अर्को जचा थोत्रक ग्याप्चा कली यो क्येट चाक्तक। सुम आंइ क्येट आंइ धोक्रोम कुर पवा, गो मतुइक्नीकी” दे ठेयब गेय पाइब कली देंमा बाक्त।

23 मिनु मेकोमी “इन थुं नाइक्तीने, महिनीने। इन परमप्रभु, इन आफ आ परमप्रभुमी इन क्येट इन धोक्रोम कुर पवा माइ। गो इन क्येट ताक्ता” देंमाक्त। मिनु मेकोमी सिमियोन कली चाक्गा बाक्त। उत्पत्ती ४२:२४

24 मिनु मेको मुरुम मेको आन कली योसेफ आ खिं ओइशा, खोइल चिक्चा कली ब्वाक्कु गेवा बाक्त। आन गधा आन कली थुला बाक्त।

25 मिनु नाक्ती दुम्या चिक्तानु, मेको नु काथा जचा माल्ब देंशो नेंशा, आन कोसेली गेचा कली ठीक पामे बाक्त।

26 मिनु योसेफ जाक्मेनु, मेकोपुकीमी आन कोसेली लाडगा रे ओइशा, मेको आ डोंइती वोइशशा, खुम्की पा बाप्शा खेत्मे बाक्त।

27 मिनु योसेफमी मेको आन कली “दोपा बाक्नी? इन आफ, इन देंशो खाल्पा, रिम्शो बाक्मे? मुल सम्म ब्रोंइमे?” दे हिल्लो पामी बाक्त।

28 मिनु मेकोपुकीमी “इन गेय पाइब आंइ आफ मुल सम्म ब्रोंइशो नु रिम्शो बाक्ब” देंशा, आन पिया खुक्शा, सेउ पामे बाक्त। उत्पत्ती ३७:७,९

29 मिनु योसेफमी आ लोक्ब बेन्यामीन, आ ममा आ तौ तशा “इन देंशो इन लोक्ब कान्छा एकोन बाक्बा?” देंशा, बेन्यामीन कली “परमप्रभुमी इ कली शिशी पवल, आं तौ” देंमाक्त।

30 मिनु योसेफमी आ लोक्ब तशा, ग्येरसीशा डाक्चा कली ते लड, दे आ कोठा लशा डाक्माक्त।

31 मिनु आ कुल चिक्शा, लेम्माक्त। मिनु गेय पाइब आन कली “शोब्ले खेत्तीन” देंमाक्त।

32 मिनु योसेफ, आ लोक्ब नु मेको नु जाइब इजीप्त डा मुर नेल्ल आन कली आन पेवा पेवा जचा थोत्रक खेत्मे बाक्त। मारदे हना इजीप्त डा मुर हिबू नु जचा मदुम्बाक्माक्त। इजीप्त डा मुरपुकी ग्रांग्रा दीबाक्मा बाक्त। उत्पत्ती ३९:६; उत्पत्ती ४६:३४; प्रस्थान ८:२२

33 मिनु योसेफमी आ लोक्ब आन कली डोंइती जरमेशो, माइला, साइला पा कान्छा सम्म गार पा निप्पदा बाक्त। मिनु मेकोपुकी छक लाक्मा बाक्त।

34 मिनु योसेफ आ डोंइती रे जचा ब्वचा थोत्रक लाइशशा, मेको आन कली खेप्पदा बाक्त। बेन्यामीन आ भाग अरु आन क्येडा ५ भाग खोइ शुश बाक्माक्त। मिनु मेकोपुकी योसेफ नु जशा तूशा, ग्येरशा बाक्मा बाक्त।

## 44

### योसेफ नु आ लोक्बपुकी

1 मिनु योसेफमी आ खिं डा ठेयब गेय पाइब कली “मेको मुर आन धोक्रो प्रिपतो। गिश कुरने चाप्नीमी, मिश प्रिपतो। मिनु आन क्येट अन्न आ शोत्रम वोतो।

2 मिनु आं चांदी के कचौरा, आ क्येट नु मेको नेल्ल क्येडा ठिटा आ धोक्रो आ शोत्रम वोतो” दे मदा बाक्त। मिनु मेकोमी योसेफ आ देंशो खोदेंशो पा पवा बाक्त।

3 मिनु सुनी कना रिम्शो पा नां मसोत्रथु, मेको मुर नु आन गधा आन कली लचा गेमे बाक्त।

4 मिनु सहर रे लमानु, योसेफम आ ठेयब गेय पाइब कली “बोक्को, मेको आन नोले खोतो। मिनु मेको आन कली थिश्शा ‘मारदे गे रिम्शो पाइब कली मरिम्शो पनी?

5 मारदे आं प्रभु आ मार मार तूतीक नु लिंग्यु कोव्रतीक चांदी के कचौरा खुइ पनी? गे मरिम्शो पाइतीनी' दे माइक्मी" दे मदा बाक्त।

6 मिनु मेको आन कली थिरशा, मोदेशो लोव्र पवा बाक्त।

7 मिनु मेकोपुकीमी "आइ प्रभुम मारदे मोदेशो लोव्र पाइबा? गो मो मपक।

8 नेनीन, आंइ धोक्रोमी थिरशो क्येट कनान रागी रे लेंशा चाक्तक। गो दोपा इन प्रभु आ खिं रे सुन चांदी खुइ पाइनीकी? उत्पत्ती ४३:२१

9 गो इन गेय पाइब सु नु मेको कचौरा बाक्मे, मेको बेक्ल। मिनु गोपुकी यो इन वाइल दुम्कल" दे मदमे बाक्त।

10 मिनु मेकोमी "इन देशो खोदेशो दुम्ल। सु आ धोक्रोम थिसीबा, मेको आं वाइल दुम्ब। अरु मो लाइनीनी" देमाक्त।

11 मिनु नोले मेकोपुकीमी रीब रीब पा आन धोक्रो गधा रे शोलशा, रोक्शा कोव्रडमे बाक्त।

12 मिनु मेकोमी डोंइती जरमेशो आ धोक्रोमी, नोले नेल्ल आन धोक्रोमी का का पा मालशा, कान्छा ला लीमाक्त। मिनु कचौरा बेन्यामीन आ धोक्रोमी थिदा बाक्त।

13 मिनु मेकोपुकीमी आन वा खाक्शा, आन अन्न लेंशा गधा तार वोइरशा, सहर लेम्मा बाक्त।

14 मिनु यहूदा नु आ लोकबपुकी योसेफ आ खिं जाक्मानु, योसेफ मेक उइ बाक्माक्त। मेको आ डोंइती खुम्की पा बाम्मा बाक्त।

15 योसेफम मेको आन कली "गे मार पनी? आं खोदेशो मुरुम नेल्ल तुइक्ब, दे मतुइक्तीनी?" दे मेको आन कली हुइक्ता बाक्त।

16 मिनु यहूदामी "आंइ प्रभु कली मार देंनीकी? मार लोव्र पाइनीकी? गोपुकी 'ठीक मुर बाक्नीकी' दे दोपा देंने चाप्नीकी? परमप्रभुमी इन गेय पाइब आन मरिम्शो कोंइताक्व। नेनीन, गोपुकी नु कचौरा धोक्रोम बाक्ब, गो नेल्ल आंइ प्रभु इन वाइल दुम्तक" देमाक्त। उत्पत्ती ४२:२१-२२

17 मिनु योसेफमी "ममाइ, मेको मपाइनुइ। तन्न सु मुर नु आं कचौरा बाक्मे, मेको ला आं वाइल दुम्चा माल्ब। गोपुकी चहिं थुं नाइरशा, इन आफ आ बाक्तीक लने" देमाक्त।

18 मिनु यहूदा मेको आ नेक्था लशा "आं प्रभु, लोव्र का पचा गेयीनी। इन गेय पाइब आ पर्वम मगाइक्तीने। गे फाराओ खोदेशो बाक्नीनी।

19 आं प्रभुमी डोंइती आ गेय पाइब आन कली 'इन के आफ बाक्बा? अर्को लोकब यो बाक्बा?' दे हिल्लो पाइतीनी। उत्पत्ती ४२:७,१३; उत्पत्ती ४३:७

20 मिनु गोपुकीमी आंइ प्रभु कली 'आंइ के आफ खाल्पा दुम्शो बाक्ब। मिनु खाल्पाम थिशो तौ का यो बाक्ब। मेको आ लोकब चहिं बेक्त। मेको लीशो आ ममा आ का ला तौ बाक्ब। मिनु आ आफोमी मेको कली शुश दाक्ब' दे इन कली देंतक।

21 मिनु गेमी 'आं कली कोंइचा कली मेको एक चाक्कीन' देंतीनी।

22 गोपुकीमी आंइ प्रभु कली 'मेको वोइश आलमी आ आफ कली प्रोंइने मचाप्ब। प्रोंइतु हना, आ आफ बेक्ब' देंतक।

23 मिनु गेमी इन गेय पाइब आन कली 'इन लोकब कान्छा मचाक्तीनी हना, गे आं कली गुम्थ मपिने' देंतीनी। उत्पत्ती ४२:१५; उत्पत्ती ४३:३-५

24 गोपुकी आंइ आफ इन गेय पाइब आ बाक्तीके जाक्दीरशा, इन लोव्र नेल्ल माइक्तक।

25 आंइ आफोमी 'लेंशा जचा थोव्रक ग्याप्थ लने' देंत।

26 मिनु गोपुकीमी 'आंइ लोकब कान्छा मलाइक्तक हना, गो लने मचाप्नीकी। मारदे हना आंइ कान्छा भाइ गोपुकी नु मलत हना, गुम्चा मदुम्ब' देंतक।

27 मिनु इन गेय पाइब आंइ आफोम आंइ कली 'आं मीशेम तौ निक्शी थिप्नु, गे तुइक्तीनी।

28 का आं बाक्तीक रे लत। जन्तुमी मेको कली ब्वाम्तेक्मे। गो मेको कली लेंशा मतड। उत्पत्ती ३७:३२-३३



29 मिनू गे एको कली यो लाइक्तीनी हना, लांम बेक्वा कों, बेक्त हना, गे आं बोइश्शो चां श्येतम प्रिंशा, तुरसुम वोइक्चा माल्नीनी' दे लोत्र पाप्नु। उत्पत्ती ४२:३८

30 मिनू गो इन गेय पाइब आंइ आफ आ बाक्तीक जाक्दीकानु, एको वोंइश आल, आ आफ आ थुं नेल्लेमी दाक्ब। मोपतीके गोपुकी नु मबाक्त हना,

31 मेको तशा, आ आफ बेक्ब। मिनू गोपुकीमी आंइ आफ, चां बोइश्शो इन गेय पाइब कली सुर्ता पपाइश्शा, श्येत जपाइश्शा तुरसुम वोइक्चा माल्नीकी।

32 गो मेको आ जमानी बाक्शो बाक्नुड। गो आफ कली 'मेको आल मचाक्ता हना, आं मरिम्शो पशो गेना हना यो आं तारी लील' देंती। उत्पत्ती ४३:९

33 मोपतीके एको वोंइश आल ममाइ, आं प्रभु, आं कली इन वाइल वोतीन। एको वोंइश आल आ लोकबपुकी नु लचा गेने।

34 गो आं आफ आ डोंइती एको वोंइश आल मलाइक्थु, दोपा लने चाप्नुडा? आं आफ आ श्येत तशा, गो यो फाल्ने मचाप्नुड" दे यहूदामी योसेफ कली देंमाक्त।

## 45

### योसेफमी तुइक्पांइसीशो

1 मिनू नोले योसेफमी आ मुर नेल्ल आन डोंइती फाल्ने मचबा बाक्त। मिनू "आं गेय पाइब नेल्ल एकेर रे लने" दे सोइक्पदा बाक्त। मिनू योसेफमी आंम कली आ लोकब आन कली तुइक्पदानु, कोठामी सुइ मबाक्शो बाक्मा बाक्त।

2 मिनू ठेयब सेंदामी डाक्मेनु, फाराओ आ खिंम बाक्ब इजीप्त डा मुर नेल्लेम नेन्मे बाक्त।

3 मिनू योसेफमी आ लोकब आन कली "गो योसेफ नड। आं आफ मुल सम्म ब्रोंइमे?" देंमाक्त। आ लोकबपुकीमी लोत्र लेन्ने मचाप्मे बाक्त। मारदे हना शुश हिंमा बाक्त।

4 मिनू योसेफमी आ लोकब आन कली "आं नेक्था पिने" देंमाक्त। मिनू मेकोपुकी आ नेक्था जाक्मा बाक्त। मिनू योसेफमी "गो इन इजीप्त रागीम लेयशो लोकब योसेफ नड।

5 गे आं कली लेयशो आ परबम सुर्ता मपने। आंम कली दोस मगेने। मारदे हना परमप्रभुमी आं कली नेल्ल ब्रोंइमल, दे इन डोंइती सोइश्शो बाक्त। उत्पत्ती ५०:२०

6 एको अन्काल मुल बर्स निकशी दुम्त। मिनू मुल ५ बर्स सम्म तेइ वाक्शो नु रिक्शो मतांइसीब।

7 परमप्रभुमी आं कली गोपुकी ब्रोंइनील। रागीम जात का लीनील। इन परबम शुश ब्रोंइमल, दे इन क्येडा डोंइती एक सोइक्ताकयी। एको ठेयब श्येत रे प्रोंइतीके बाक्ब।

8 मोपतीके गोपुकीमी आं कली एक सोइश्शो ममाइ, परमप्रभुमी सोइश्शो बाक्त। मेकोमी आं कली फाराओ आ आफ खोंदेशो सेल्शा, आ खिं डा होत्रप नु इजीप्त रागी नेल्ल डा हुकुम पाइब सेल्टी।

9 गोपुकी मुल रीब पा इं आफ आ बाक्तीके लने। मिनू मेको कली 'परमप्रभुमी इन तौ योसेफ कली इजीप्त रागी नेल्ल डा ठेयब मुर सेला बाक्त। एक यिचा मरिम्दीन।

10 आं नेक्था बाक्चा कली गे, इन आल, इन चच, इन क्यारश भेडा, बी ब्यफ नु मारेइ मारेइ नेल्ल चाक्शा, गेशेन माइक्तीकेमी जाक्चा माल्नीनी।

11 आं नेक्था बाक्कीन। गो इन कली थुक्नुड। मारदे हना अन्काल मुल ५ बर्स सम्म दुम्ब। गे मयीतीनी हना, गे, इन खिं डा मुर नु गोपुकी नु बाक्ब नेल्ल शुश पुड्या दुम्नीनी' देंत, दे इं आफ कली माइक्चा माल्नीनी।

12 मिनू गोपुकी नु आं लोकब बेन्यामीनम तशो 'गो योसेफ नड। गो इन कली लोत्र पाता' दे तुइक्नीनी।

13 गो इजीप्त रागीमी गिश रिम्शो बाक्डा, इन तशो नेल्ल, गोपुकीमी इं आफ कली देंचा माल्नीनी। रीब पा इं आफ कली एक चाक्कीन" दे आ लोकब आन कली माइक्मी बाक्त।

14 मिनू आ लोकब बेन्यामीन कली मुप्शा डाक्माक्त। मिनू बेन्यामीन यो डाक्माक्त।

15 मिनू नोले आ लोकब नेल्ल आन कली मुप्शा, पुक्पु पाइश्शा डाक्माक्त। मिनू नोले आ लोकबपुकीमी लोत्र पचा गोत्रमे बाक्त।

16 मिनु “योसेफ आ लोकबपुकी जाक्तेकम” देशो लोत्र फाराओ आ खिंम यो जाक्दीम्माक्त। मिनु फाराओ नु आ गेय पाइब नेल्ल ग्येरसमा बाक्त।

17 मिनु फाराओमी योसेफ कली “गेमी इन लोकब आन कली ‘इन गधापुकीमी अन्न कुरपाइशशा, कनान रागी लने।

18 मिनु इन आफ नु इन खिं डा मुर नेल्ल आं नेक्था जाक्कीन। गो इजीप्त रागी डा नेल्ल क्येडा रिम्शो रू इन कली गेनुड। मिनु गे रागी डा नेल्ल क्येडा ब्रोव्रशो जचा ताइनीनी’ दे माइक्चा मालनीनी।

19 इन कली अरेशो एकोन बाक्ब। इन आइक्च आल नु इन मीश आन कली डोइक्चा कली इजीप्त रागी रे बग्गीपुकी लतीन। इन आफ चाक्कीन।

20 ‘इन मारेड मारेड ममिम्तीन। मारदे हना इजीप्त डा रिम्शो नेल्ल इन के बाक्ब’ दे माइक्मी” दे योसेफ कली मदा बाक्त।

21 मिनु इस्राएल आ तौपुकीमी योसेफ आ देशो पामे बाक्त। मिनु फाराओम मार देंमे मेको पा, योसेफमी मेको आन कली बग्गी नु लां कली लाम्जी गेवा बाक्त।

22 मेको आन कली जोड का का फेक्तीक नक वा गेवा बाक्त। बेन्यामीन कली चहिं सहे सां चांदी के शेकेल नु ५ जोड फेक्तीक वा गेवा बाक्त।

23 मिनु आ आफ कली १० ओटा गधैनीमी इजीप्त रागी डा नेल्ल क्येडा ब्रोव्रशो जचा थोत्रक नु लांम जचा कली १० ओटा गधाम अन्न, शोब्ले नु श्ये कुर पा सोइक्ता बाक्त।

24 मिनु लचा डोंइती मेको आन कली “लांमी मजिने” दे अरेवा बाक्त। उत्पत्ती ४२:२२

25 मिनु मेकोपुकी इजीप्त रागी रे पा कनान रागी आन आफ याकूब आ बाक्तीके जाक्दीम्मा बाक्त।

26 मिनु आन आफ कली “योसेफ मुल यो ब्रोंइशो बाक्त। इजीप्त रागीम हुकुम पाइब मेको बाक्माक्त” दे लोत्र पामे बाक्त। याकूबम चहिं आन देशो थमा मसुदा बाक्त।

27 मिनु मेकोपुकीमी योसेफ आ लोत्र नेल्ल शोत्रडमे बाक्त। मिनु याकूबम आ कली डोइक्चा, दे योसेफमी सोइशो बग्गी तशा, आ थुं लेत्ता बाक्त।

28 मिनु इस्राएलमी “आं तौ योसेफ ब्रोंइशो थमा बाक्ब। आं बेक्चा क्येडा डोंइती मेको आ कुल कोत्रनुड” देमाक्त। उत्पत्ती ४६:३०

## 46

### याकूब इजीप्त लशो

1 मिनु इस्राएल नु आ खिं डा मुर नेल्ल इजीप्त गे लमा बाक्त। मिनु बेयर-शेबा जाक्दीशशा, आ आफ इसहाक आ परमप्रभु कली चढेवा बाक्त। उत्पत्ती २६:२३-२५

2 मिनु मेको नाकदो परमप्रभुमी इस्राएल कली “याकूब, याकूब” देमाक्त। मिनु इस्राएलमी “गो नेता” दे लोत्र लेत्ता बाक्त।

3 मिनु परमप्रभुमी “गो परमप्रभु, इ आफ आ परमप्रभु नड। इजीप्त लचा महिनो। मारदे हना गे उड बाक्डेनु, इ रे पा ठेयब जात सेल्लनुड। उत्पत्ती ४७:२७; प्रस्थान १:७

4 गो गे नु इजीप्त रागी लाइनुड। मिनु इ कली थमा पा लेप्पाइक्नुड। बेक्शा नोले योसेफमी इ मिक्च खेप्ब” दे परमप्रभुमी देमाक्त।

5 मिनु याकूब बेयर-शेबा रे लमाक्त। मिनु इस्राएल आ तौपुकीमी आन आफ, आन आइक्च आल नु आन मीश फाराओमी सोइशो बग्गीम डोइक्पदमे बाक्त।

6 मिनु आन बस्तु भाव, कनान रागीम आन चाक्शो मारेड मारेड नु याकूब नु आ मुर नेल्ल इजीप्त रागी जाक्दीम्मा बाक्त।

7 याकूबमी आ तौपुकी नु मेको आन तौपुकी, आ तमीपुकी नु आ तौ आन तमीपुकी नु चच युड नेल्ल इजीप्त रागी चाक्दीम्मी बाक्त।

याकूब आ तौ नु चच युड

8 मिनु इजीप्त रागीम जाकदीशो इस्राएल आ आल आन नें एको बाक्नीमी। आ डोंइती जरमेशो तौ रूबेन बाक्माक्त। प्रस्थान ६:१४-१६

9 रूबेन आ तौपुकी हनोक, फल्लु, हेस्रोन नु कारमी बाक्मा बाक्त।

10 सिमियोन आ तौपुकी येमुएल, यामीन, ओहद, याकीन नु सोहार, कनान डा मीश रे जरमेशो शावल, नेल्ल सिमियोन आ तौ बाक्मा बाक्त।

11 लेवी आ तौपुकी गेरशोन, कोहाथ नु मेरारी बाक्मा बाक्त।

12 यहूदा आ तौपुकी एर, ओनान, शेलाह, पेरस नु जेराह बाक्मा बाक्त। एर नु ओनान चहिं कनान रागीम बेक्सा बाक्त। पेरस आ तौ हेस्रोन नु हामुल बाक्सा बाक्त। उत्पत्ती ३८:३,४,२९,३०

13 इम्साकार आ तौपुकी तोला, पुवा याशुब नु शिमोन बाक्मा बाक्त।

14 जबूलुन आ तौपुकी सेरेद, एलोन नु याहलेल बाक्मा बाक्त।

15 मेको नेल्ल लेआमी याकूब के पदान-अराममी थिशो तौ बाक्मा बाक्त। आ तमी दीना यो बाक्माक्त। याकूब नु आ तमी तौ नेल्ल पा ३३ जना बाक्मा बाक्त।

16 मिनु गाद आ तौपुकी सिफयोन, हाग्गी, शुनी, एस्बोन, एरी, अरोदी नु अरेली बाक्मा बाक्त।

17 आशेर आ तौपुकी इम्नाह, इश्वाह, इश्वी, बेरीआ नु आ तमी सेराह बाक्मा बाक्त। मिनु बेरीआ आ तौ निकशी हेबेर नु माल्कीएल बाक्सा बाक्त।

18 मिनु लाबान आ तमी लेआ कली गेशो गेय पाइब जिल्लपाम याकूब के थिशो तौपुकी बाक्मा बाक्त। मेको १६ जना बाक्मा बाक्त। उत्पत्ती २९:२४

19 मिनु याकूब आ मीश राहेल आ तौ योसेफ नु बेन्यामीन बाक्सा बाक्त।

20 योसेफमी इजीप्त रागीमी मनस्से नु एफ्राइम थिमाक्त। आ मीश ओन सहर डा नाक्सो पोतीफेरा आ तमी आसेनाथ बाक्माक्त।

21 बेन्यामीन आ तौपुकी बेला, बेकेर, अशबेल, गेरा, नामान, एही, रोश, मुप्पीम, हुप्पीम नु आरद बाक्मा बाक्त।

22 मेको नेल्ल राहेल आ थिशो तौ बाक्मा बाक्त। मेको नेल्ल पा १४ जना बाक्मा बाक्त।

23 दान आ तौ हुशीम बाक्माक्त।

24 नाप्ताली आ तौपुकी याहसेल, गुनी, येसेर नु शिल्लेम बाक्मा बाक्त।

25 मेको लाबानमी आ तमी राहेल कली गेशो गेय पाइब बिल्हाहम याकूब के थिशो तौ बाक्मा बाक्त। मेको नेल्ल ७ जना बाक्मा बाक्त। उत्पत्ती २९:२९

26 मिनु याकूब आ चाइमीपुकी महिक्थु, याकूब नु इजीप्त रागी जाकशो मुर नेल्ल पा ६६ जना बाक्मा बाक्त।

27 इजीप्त रागीमी योसेफमी तौ निकशी थिमाक्त। मोपा इजीप्त रागीमी जाकशो याकूब आ खिं डा मुर ७० जना बाक्मा बाक्त। याकूब नु योसेफ नु आ तौ निकशी यो हिक्शो बाक्मा बाक्त।

### याकूब नु योसेफ गुम्शो

28 मिनु याकूबमी यहूदा कली गोशेन लां शेंसीचा नु योसेफ गुम्चा, दे आन डोंइती गुम्थ सोइक्ता बाक्त। मिनु मेकोपुकी गोशेन माइक्तीके जाकदीम्मानु, उत्पत्ती ४५:१०

29 योसेफ आंम बग्गी ठीक पा आ आफ इस्राएल कली गोशेनम गुम्थ जाक्माक्त। मिनु मेको कली गुम्शा, मुप्शा शुश डाक्सा बाक्त।

30 मिनु इस्राएलमी योसेफ कली “मुल गो बेक्ने चाप्नुड। मारदे हना गे ब्रोंइशो बाक्ते, गो इ कुल कोत्रचा ताता” दे आ तौ कली देंमाक्त। उत्पत्ती ४५:२८

31 मिनु योसेफम आ लोकब नु आ आफ आ खिं डा मुर आन कली “गो फाराओ आ बाक्तीके लाइनुड। मिनु मेको कली ‘कनान रागीम बाक्शो आं आफ, आं लोकबपुकी नु आं आफ आ खिं डा मुर नेल्ल जाक्तेक्म।

32 मेकोपुकी भेडा गोठला नु बस्तु भाव थुल्ब बाक्नीम। मेको आन क्यारश भेडा, बी ब्यफ नु आन मारेड मारेड चाक्शो बाक्तेक्मे’ देनुड।

33 मिनु फाराओम इन कली ब्रेताक्व हना, मिनु इन कली इन गेय आ पर्वम हिल्लो पाप्तु हना,

34 गेपुकीमी 'इन गेय पाइब आन आल रेन मुल सम्म बस्तु भाव थुल्ब बाक्नीम। आंइ किकी पिपी यो मोदेशो गेय पशो बाक्मा बाक्त' देंचा माल्नीनी। नोले मेकोमी इन कली गोशेनमी बाक्तीके गेब। मारदे हना इजीप्त डा मुर गोठला आन कली तशा ग्रॉग्रा दीनीम" दे योसेफमी आ लोकब आन कली देमाक्त। उत्पत्ती ४३:३२

## 47

### याकूब फाराओ आ डोंइती

1 मिनु नोले योसेफमी फाराओ कली "आं आफ, आं लोकबपुकी, आन क्यारश भेडा, बी ब्यफ, आन मारेइ मारेइ नेल्ल कनान रागी रे चाक्शा, गोशेनमी जाक्शो बाक्नीमी" दे शेंदा बाक्त।

2 मिनु आ लोकब आन दाते रे ५ जना योत्रशा, फाराओ आ डोंइती राप्पदा बाक्त।

3 मिनु फाराओमी मेको आन कली "इन गेय मार बाक्बा?" दे हिल्लो पवा बाक्त। मिनु मेकोपुकीमी "गो, इन गेय पाइबपुकी, भेडा गोठला बाक्नीकी। गो आंइ किकी पिपी रे गोठला बाक्तक" दे फाराओ कली देमा बाक्त। उत्पत्ती ४६:३३-३४

4 मिनु लेंशा "कनान रागीमी ठेयब अन्काल दुम्तीके, गो अर्को रागी डा मुर दुम्शा, एक बाक्थ जाक्तक। मारदे हना आंइ क्यारश भेडा आन कली जोतीके मबा। मोपतीके आंइ कली गोशेन माइक्तीकेमी बाक्चा गेने, दे पुंइनीकी" दे पुंइदमे बाक्त।

5 मिनु फाराओम योसेफ कली "इ आफ नु इ लोकबपुकी इ बाक्तीक रागी जाक्तेक्मे।

6 इजीप्त रागी इ रागी खोदेशो मिम्तो। नेल्ल क्येडा रिम्शो जोतीके गोशेनमी मेको आन कली बाक्पतो। मिनु मेको इ मुर आन दातेमी रिम्शो गेय पाइब बाक्तेक्म हना, आं बस्तु भाव आन कली यो कोत्रपतो" दे मदा बाक्त।

7 मिनु नोले योसेफमी आ आफ कली फाराओ आ डोंइती राप्पदा बाक्त। मिनु याकूबमी फाराओ कली आसीक गेवा बाक्त।

8 मिनु फाराओमी "गिश बर्स दुम्नी?" दे हिल्लो पवा बाक्त।

9 मिनु याकूबमी "गो मुल सम्म रागीम बाक्शो, सहे का ३० बर्स दुम्ती। आं किकी पिपी खोदेशो पा शुश बर्स मदुम्ड। गो मरिम्शो नाक्त यो ताता" देमाक्त। हिब्रू ११:१३

10 मिनु आसीक गेशा, फाराओ रे लमाक्त।

11 मिनु योसेफमी फाराओ आ देशो खोदेशो पा आ आफ नु आ लोकब आन कली इजीप्त रागीमी रू गेवा बाक्त। रागी डा नेल्ल क्येडा रिम्शो बाक्तीके रामेसेस आ रागी गोशेनमी बाक्पाइक्मी बाक्त।

12 मिनु योसेफम आ आफ, आ लोकब नु आ आफ आ खिं डा मुर नेल्ल आन कली आन खिं खिं कली गाप्चा डा पा जचा थोत्रक गेशा थुल्मी बाक्त। उत्पत्ती ४५:११

### इजीप्त डा मुरपुकी पुडग दुम्शो

13 रागी नेल्लेमी जचा थोत्रक मथिदमे बाक्त। मारदे हना मेको अन्काल बारना बारन लमाक्त। मिनु इजीप्त नु कनान रागी डा मुर शुश श्येत जामे बाक्त।

14 मिनु योसेफमी इजीप्त नु कनान रागी डा अन्न ग्याप्थ जाक्ब आन गुइ रे क्येट ताक्शा, फाराओ आ खिंमी वोदा बाक्त।

15 मिनु इजीप्त नु कनान डा मुर आन क्येट नुप्शा, योसेफ आ बाक्तीकेमी जाक्शा, मेकोपुकीमी "जचा थोत्रक गेकी। आंइ के क्येट नुप्त। गे जचा थोत्रक मगेतीनी हना, गो इन डोंइती बेक्चा माल्नीकी" दे मदमे बाक्त।

16 मिनु योसेफमी "इन के क्येट मबाक्त हना, इन बस्तु भाव चाक्कीन। मेको रे पा जचा थोत्रक ताइनीनी" देमाक्त।

17 मिनु आन बस्तु भाव योसेफ आ बाक्तीके चाक्मे बाक्त। मिनु योसेफमी शारापुकी, क्यारश भेडा, बी ब्यफ, गथा ताक्शा, जचा थोत्रक गेमी बाक्त। मेको बर्समी मेको आन कली आन बस्तु भाव आन पा डा अन्न गेवा बाक्त।

18 मिनु मेको बर्स नुष्शा डा मिन, अर्को बर्स लेंशा जाक्शा योसेफ कली मेकोपुकीमी “गो आंड प्रभु आ डोंइती आंड क्येट नुप्त, आंड क्यारश भेडा, बी ब्यफ नेल्ल आंड प्रभु केन दुम्तेकम। मुल आंड के रूपुकी नु आंम रां ला लीब।

19 मारदे गो इन डोंइती बेकनीकी? आंड कली नु आंड रू कली यो अन्न गेशा ग्यापीन। गोपुकी फाराओ आ वाइलीम वाइल दुम्नीकी। गोपुकी ब्रोंइचा नु आंड रागीम मुरपुकी लीचा कली वांचेर गेने” देंमा बाक्त।

20 मिनु योसेफमी इजीप्त रागी नेल्ल फाराओ कली ग्यबा बाक्त। मारदे हना ठेयब अन्काल आ पर्वम इजीप्त डा मुरपुकीमी आन रू नेल्ल लेयडमे बाक्त। मिनु रू नेल्ल फाराओ के दुम्माक्त।

21 मुर नेल्ल आन कली वाइलीम वाइल सेल्शा, आन बाक्तीक रे याक्शा वोदा बाक्त।

22 नाक्सो आ रू चहिं मग्यबा बाक्त। मारदे हना आन जचा फाराओ आ गुड रे तामे बाक्त। मोपतीके आन रू यो लेयचा ममाल्मा बाक्त। गन्ती १८:२०; यहोसु १३:१४; इजीकीएल ४४:२८; इजीकीएल ४५:१-५

23 मिनु योसेफम मुर आन कली “नेनीन, मुलाक्ती रे गोपुकी नु इन रू नेल्ल फाराओ के दुम्त। गो ग्याप्ता। एको वांचेर लाइशशा, शोक्कीन।

24 मिनु रिक्ची ना ५ भाग डा भाग १ फाराओ कली गेचा माल्नीनी। अर्को ४ भाग वांचेर कली नु इन कली, इन खिं डा मुर नु आइकच आल नेल्ल आन कली थुल्चा कली लीब” दे माइकमी बाक्त। एफाह का २२ लिटर खोदेशो बाक्ब।

25 मिनु मेकोपुकीमी “गे आंड कली बेक्चा रे प्रोंइतीनी। गे आंड कली थम रिम्शो पाइतीनी। गो फाराओ आ वाइल बाक्नीकी” देंमा बाक्त।

26 मिनु योसेफमी इजीप्त रागी डा ऐन कानुनमी “फाराओ कली ५ भाग डा भाग का गेचा माल्नीम। नाक्सोपुकीमी चहिं गेचा ममाल्नीम। मारदे हना आन रू फाराओ के मदुम” दे ब्रेक्पदा बाक्त। मेको मुल सम्म मोदेशो बाक्ब।

27 मिनु इस्राएल इजीप्त रागी डा गोशेनमी बाक्मेनु, आन मारेइ मारेइ नु मुरपुकी सोशा बोशा, शुश दुम्मा बाक्त। उत्पत्ती ४६:३; प्रस्थान १:७,१२

28 याकूब इजीप्त रागीमी १७ बर्स ब्रोंइमाक्त। मेको आ ब्रोंइतीक नेल्ल पा सहे का ४७ बर्स बाक्माक्त।

29 मिनु आ बेक्ची जाक्माक्त। मिनु आ तौ योसेफ कली ब्रेशशा “गे आं कली शिशी पाप्तीवी हना, इ गुड आं फिला तार वोइशशा, जोल मपथु, आं कली रिम्शो पावो। आं कली इजीप्त रागीम मथिम्यी, दे पुंडनुड। उत्पत्ती ५०:५

30 गो बेक्शा, आं कली इजीप्त रगी रे कुरशा, आं कली आं किकी पिपी आन तुरसुम थिम्यी” दे पुंडदा बाक्त। मिनु योसेफमी “इन देशो पाइनुड” देंमाक्त। उत्पत्ती २३:२०

31 मिनु मेकोमी “कसम जावो” दे मदा बाक्त। मिनु योसेफमी कसम जवा बाक्त। मिनु इस्राएल ब्राख्येम बाक्शा, खुम्की पांडसे बाक्त। हिब्रू ११:२१

## 48

### याकूब, एफ्राइम नु मनस्से

1 मिनु नोले मुर कामी योसेफ कली “इन आफ रोइ पाप्तु” दे शेंदा बाक्त। मिनु योसेफमी मनस्से नु एफ्राइम आ तौ निकशी लाइशशा, गुम्थ लमाक्त।

2 मिनु मुर कामी याकूब कली “नेनीन, इन तौ योसेफ इन कली गुम्थ जाक्त” दे नेंपदा बाक्त। मिनु इस्राएल बोल पा बोक्शा, आ ब्राख्येम निस्से बाक्त।

3 मिनु याकूबमी योसेफ कली “नेल्ल सक्ति पाइशशो परमप्रभुमी कनान रागी डा लूज सहरम यूशा, आं कली आसीक गेती। उत्पत्ती २८:१७-१९

4 मेकोमी आं कली 'नेनीन, गो इन कली सोशा बोशा, शुश सेल्लुड। गो इ रे शुश थर डा मुर सेल्लुड। इ कली नु इ चच युड आन कली मेको रागी गेना हना यो इन केन बाक्ब, दे गेनुड' देंत। उत्पत्ती ३५:११-१२

5 आं जाक्चा डोंइती, इजीप्ट रागीम जरमेशो एफ्राइम नु मनस्से, इ तौ निकशी आं मुर दुम्चा माल्नीस। रूबेन नु सिमियोन खोदेशो पा आं केन दुम्चा माल्नीस। उत्पत्ती ४१:५०-५२

6 इ नोले थिशो आल चहिं इ के दुम्मल। मिनु आन लोकब आन जात डा नें वोइश्शो, इजीप्ट रागीम अडस ताइब दुम्मल।

7 गो पदान रे गाक्डानु, कनान रागी डा एफ्राथ आ डोंइती राहेल बेक्त। मिनु गो मेको कली एफ्राथ माइश्शो बेथलेहेम सहर लतीक लांमी थिम्ता" देंमाक्त। उत्पत्ती ३५:१९

8 मिनु इस्राएलमी योसेफ आ तौ निकशी आस कली तशा "मेको निकशी सु नसी?" दे हिल्लो पवा बाक्त।

9 मिनु योसेफमी आ आफ कली "परमप्रभुमी आं कली गेशो तौ बाक्नीसी" देंमाक्त। मिनु याकूबमी "मेको आस कली एक चाक्सी। मिनु गो मेको आस कली आसीक गेनुड" दे मदा बाक्त।

10 इस्राएल खाल्पा दुम्शा, आ मिक्च रिम्शो मताइब दुम्शो बाक्माक्त। मोपतीके मेको आस कली मतुडक्ता बाक्त। मिनु योसेफमी मेको आस नेक्था चाक्दीस्सी बाक्त। मिनु इस्राएलमी मेको आस कली पुक्पु पाइश्शा, मुबा बाक्त।

11 मिनु योसेफ कली "गो इ कुल ताइनुड दे ममिम्शो नड। तन्न परमप्रभुमी आं कली इ आल आन कली यो कोंइताक्यी" देंमाक्त। उत्पत्ती ३७:३३-३५; उत्पत्ती ४५:२६; भजन संग्रह १२८:६

12 मिनु योसेफम मेको आस कली आ आफ आ थुकु रे याक्शा, खुम्की पा सेउ पवा बाक्त।

13 मिनु योसेफमी आ तौ निम्फा आस कली लाइश्शा, एफ्राइम आ ग्युरा गुड नु मनस्से आ पेरा गुड ग्याइश्शा लाइश्शा आ आफ आ डोंइती वोदा बाक्त। मोपा मनस्से याकूब आ ग्युरा गुड नु एफ्राइम याकूब आ पेरा गुड आ नेक्था वोदा बाक्त। उत्पत्ती ४१:५१-५२

14 तन्न इस्राएलमी आ गुड ख्राक्शा आ ग्युरा गुड एफ्राइम आ पिया तारी नु आ पेरा गुड मनस्से आ पिया तारी वोदा बाक्त। मनस्से चहिं योसेफ आ डोंइती जरमेशो तौ बाक्माक्त।

15 मिनु याकूबमी योसेफ कली आसीक गेशा "आं किकी पिपी अब्राहाम नु इसहाक परमप्रभु आ डोंइती गाक्शो बाक्ताक्से। मेको परमप्रभुमी आं कली आं ब्रोंइतीक नाक्त नेल्ल मुल सम्म कोव्रती। उत्पत्ती ३२:१०; भजन संग्रह २३:१

16 आं कली श्येत रे प्रोंइब परमप्रभु यावे आ स्वर्ग डा गेय पाइबम एको वोंइश आल आस कली आसीक गेवल। मिनु एको आस पतीके आं नें नु आं किकी पिपी अब्राहाम नु इसहाक आस नें मंप्रेसेक्ल। एको निकशी रे पा रागीमी शुश दुम्मल" दे आसीक गेम्सी बाक्त। उत्पत्ती ३२:२५-३०; यसेया ४१:१४

17 मिनु योसेफमी आ आफ आ ग्युरा गुड एफ्राइम आ पिया तारी वोइश्शो तशा, आ थुं मनुमाक्त। मिनु आ आफ आ गुड एफ्राइम आ पिया रे शौल्शा, मनस्से आ पियाम वोइक्नुड, दे मिम्ता बाक्त।

18 मिनु योसेफम आ आफ कली "ममाइ आं आफ, मेको आं डोंइती जरमेशो बाक्ब। इन ग्युरा गुड एको आ पिया तारी वोतीन" देंमाक्त।

19 तन्न आ आफ मबित्थु "गो तुइक्नुड, आं तौ, गो तुइक्नुड। एको यो थर का दुम्ब, एको यो ठेयब दुम्ब। तन्न एको क्येडा आ लोकब एफ्राइम ठेयब दुम्ब। मिनु आ चच युड शुश ठेयब जात दुम्नीम" दे आसीक गेम्सी बाक्त। गन्ती १:३३, ३५; ब्यवस्था ३३:१७

20 मिनु मेको नाक्ती मेको आस कली आसीक गेशा "इस नें थिशा इस्राएलीमी आसीक गेनीम। मेकोपुकीमी 'परमप्रभुमी इ कली एफ्राइम नु मनस्से खोदेशो सेलल' दे आसीक गेनीम" देंमाक्त। मोपा याकूबमी मनस्से क्येडा एफ्राइम डोंइती वोदा बाक्त। हिब्रू ११:२१

21 मिनु इस्राएलमी योसेफ कली "नेनो, गो बेक्नुड। मिनु परमप्रभु गे नु बाक्शा, इ कली लेंशा इ किकी पिपी आ रागी लाइक्ब।

22 गो इ कली इ लोकब आन क्येडा निकशी अडस गेतन। आं तरवार नु लिब्रामी एमोरी आन गुड रे रोइश्शो रू इ कली गेतन" दे याकूबमी योसेफ कली मदा बाक्त। यूहन्ना ४:५

## 49

याकूब आ तौ आन आसीक  
ब्यवस्था ३३:-

1 मिनु याकूबमी आ तौ आन कली ब्रेशशा मेको आन कली “नोले इन कली मार मार दुम्बा, नेंचा कली एकेर बुक्कीन।

2 याकूब आ तौपुकी बुक्शा, इन आफ इस्राएल, आं लोत्र नेनीन।

रूबेन

3 रूबेन, गे आं डोंइती जरमेशो तौ नवे। डोंइती डा आं बोल नु सक्ति बाक्नेवे। नेल्ल क्येडा शिरशो नु सक्ति पाइशशो डोंइती डा बाक्ते। उत्पत्ती २९:३२; ब्यवस्था २१:१७

4 समुन्द्र डा छाल खोदेशो पा गे हिम्सीशो थुं पाइशशो मुर दुम्नेवे। मारदे हना गे इ आफ आ खाट डोइशशा, बिथोलो पाप्तीवी। आं इप्तीकेम बाक्ते। गे मान मताइब दुम्नेवे। उत्पत्ती ३५:२२

सिमियोन नु लेवी

5 सिमियोन नु लेवी वोबु बाक्नीसी। गे हुश खाक्श पोक्ब बाक्नीसी। उत्पत्ती ३४:२५

6 आं थुं इस खुइशशा अरेशोम गेनायो मबिस्सेक्ल, आं नें इस गुम्तीकेमी गेनायो मदेंमल। थुं का मदुमीसे। मारदे हना इस चुरतीकेमी मुर साइक्तीसी। महिंब दुम्शा, ब्यफ कली गाक्ने मचाप्ब सेलतीसी।

7 इस गाइशशोम सराप राइब। मारदे हना मेको ठेयब बाक्ब। इस चुरचाम सराप राइब। मारदे हना मेको शिशी मपाइशशो मरिम्शो बाक्ब। थुं का मदुमीस। इस्राएल रागीमी ब्राशा बाक्कीस। यहोसु १९:१-९; २१:१-४२

यहूदा

8 यहूदा, इ लोकबपुकीमी इ कली ठेयब सेल्मेक्ल। इ गुइमी इ जोरी सत्रु आन क्रोकक्रो निन्नेवे। इ आफ आ आल इ डोंइती खुम्की पा बाप्नीम। गन्ती १०:१४; न्यायाधीस १:१-२

9 यहूदा गुप्स आ चाइक्ब खोदेशो बाक्ब। सिस्वार ब्वशा ठेयब दुम्ते। ठेयब गुप्स खोदेशो पा खुम बाप्ब। गुप्सनी खोदेशो पा इप्ब। सुम मेको कली बोक्पाइक्ने चाप्बा? गन्ती २३:२४; इजीकीएल १९:२; प्रकाश ५:५

10 ठेयब श्येत रे प्रोंइब मजाक्म सम्म आ राज दन्ड आ सासन पतीके आ गुइमी लीब। जात जात डा मुर मेको आ नोले खोइक्नीम। गन्ती २४:१७; १इतिहास ५:२; हिब्रू ७:१४; इजीकीएल २१:३२

11 मेकोमी आ गधा अङ्गुर आ बोटम पाइक्ब, आ गधा आ चाइक्ब नेल्ल क्येडा रिम्शो अङ्गुर बोटम पाइक्ब। आ फेक्तीक वा अङ्गुर शांबुम मुरब। आ वा अङ्गुर आ रसम खुम्ब। योएल ४:१८

12 आ मिक्च अङ्गुर क्येडा रिम्शो रड डा बाक्ब। आ खुइ दूध क्येडा बुश बाक्नीम।

जबूलून

13 जबूलून समुन्द्र नु डोंगा वोइक्तीकेमी बाक्ल। सीदोन सहर सम्म आ बाक्तीके दुम्ल। यहोसु १९:१०-१६

इस्साकार

14 इस्साकार बोल्यो गधा दुम्शा, भारी आस दातेमी इप्ब।

15 मेकोमी नाइक्तीके रिम्शो नु रागी दारशो बाक्ब, दे ताप्तु। मेकेर कुरब दुम्शा, अर्को आन गेय पाइब दुम्त।

दान

16 दान इस्राएल आ जात डा ठेयब मुर दुम्शा, अरु आन कली निसाफ पाइब दुम्ल। न्यायाधीस १३:२, २४, २५

17 दान लांमी बाक्शो बुस्स खोदेशो दुम्शा, मेको बीस पाइशशो बुस्स खोदेशो दुम्शा, आइक्च लांम बाक्ब। शारा डोइक्ब मुर तोक्चा कली शारा आ गेंग्रेम कोक्ब। मिनु शारा डोइक्ब मुर नोले गे दोक्ब।

18 परमप्रभु यावे, गे आं मरिम्शो पशो रे प्रोंइनीनी, दे रिम्शा बाक्ती। भजन संग्रह ११९:१६६; हबकुक् २:३

**गाद**

19 रोइक्ब मुरपुकी गाद कली रोइक्चा कली जाक्नीम। गादमी मेको आन कली खेदा पा मेको आन के रोइक्ब।

**आशेर**

20 आशेर आ जचा थोत्रक शुश ब्रोत्रशो बाक्ब। पिपम खोदेशो पा ब्रोत्रशो जचा गेब। यहोसु १९:२४-३१

**नाप्ताली**

21 नाप्ताली प्रोइशो रोकोश बाक्ब। मेकोमी दारदारशो चाइक्ब पाइब। न्यायाधीस ४:६-१०

**योसेफ**

22 योसेफ फल सिप्ब रवा का बाक्ब। आ राशी गारो तारी बाक्शा, ब्वाक्कु बुक्तीकेमी खुम्शो रवा का बाक्ब।

23 ब्रा आप्बपुकीमी मेको कली ब्रा आप्तेक्म। मेको कली आप्शा, खेदा पशा, काड मदाक्तेम।

24 तन्न आ लिब्रा बोल्यो बाक्ब, आ गुइ बोल्यो बाक्नीम। सक्ति पाइशो याक्ब आ परमप्रभु, इस्राएल आ गोठला नु सेरथे फुल्लुम, मेको कली वारच पाप्तु। ब्यवस्था ३२:१८

25 इ आफ आ परमप्रभुमी इ कली वारच पाइब। नेल्ल क्येडा सक्ति पाइशो परमप्रभुमी इ कली सरीड रे नु खप रे आसीक गेब। शुश आल थिचा डा आसीक यो गेवल। ब्यवस्था २८:३-६; ब्यवस्था ३३:१३

26 गेना हना यो बाक्ब डांडा डा आसीक क्येडा इ आफ आ गेशो आसीक ठेयब बाक्ब। योसेफ आ लोक्ब खोदेशो मदुम्थु, एको आसीक आ पिया तारी दुम्ल।

**बेन्यामीन**

27 बेन्यामीन बुष्ठा ग्याइक्ब फर खोदेशो बाक्ब। मिनु सुनी आ सिखार ब्वाइब, नाक्दो आ रोइशो योक्ब” दे याक्बम आ तौ नेल्ल आन कली आसीक गेमी बाक्त। न्यायाधीस २०:२५; १सामुएल १:१-२

**इस्राएल बेक्शो**

28 एको इस्राएल आ १२ थर बाक्नीम। आन आफोम मेको आन कली आसीक गेशा पशो लोत्र एकोन बाक्ब। मेकोमी मेको आन कली का का पा आसीक गेवा बाक्त।

29 मिनु मेको आन कली “गो आं किकी पिपी आन बाक्तीके लाइनुड। हिती डा एफ्रोन आ रूमी बाक्शो पुक्खी, आं किकी पिपी आन कली थिम्तीकेमी आं कली वोतीन। उत्पत्ती २३:१३-२०

30 मेको पुक्खी कनान रागीमी माप्त्रे आ पूब डा माक-पेलामी बाक्ब। अब्राहाममी मेको थिम्तीक हिती डा एफ्रोन रे ग्यबा बाक्त।

31 अब्राहाम नु आ मीश सारा मेक थिम्शो बाक्नीस। इसहाक नु आ मीश रेबेका यो मेक थिम्शो बाक्नीस। मेकेर लेआ यो थिम्ता। उत्पत्ती २५:९; उत्पत्ती ३५:२९

32 मिनु मेको रू नु पुक्खी हिती मुर रे ग्याप्शो बाक्त” देंमाक्त।

33 याक्बमी आ तौ आन कली मोदें लोत्र पशा नोले, खाटमी आ खोइल दिंशा, बेक्माक्त। मिनु आ किकी पिपी आन बाक्तीक लमाक्त।

**50**

**याक्ब कली थिम्शो**

1 मिनु योसेफ आ आफ आ कुल तार गुर ब्वेशा, पुक्पु पाइशशा, डाक्माक्त।

2 मिनु आ गेय पाइब नु डाक्टर आन कली “आं आफ आ रां कली खेक्तीन” दे माइक्मी बाक्त। मिनु मेकोपुकीमी बेक्शो मुर आ रां खेक्तमे बाक्त।

3 मिनु ४० नाक्त खेक्तमे बाक्त। मारदे हना खेक्चा कली ४० नाक्ती माल्बाक्माक्त। इजीप्त डा मुरपुकी यो ७० नाक्ती रोंका पामे बाक्त।



4 मिनू रोंका पतीक नाक्ती नुम्मेनु, योसेफमी फाराओ आ खिं डा मुर आन कली “गो इन डोंइती शिशी ताइनुड हना, गे फाराओ कली आं पबंम लोव्र पने।

5 आं आफोम आं कली ‘गो बेक्डानु, कनान रागीम आं कली थिम्तीके ठीक पाता, मेकेर थिम्चा माल्नेवे’ दे कसम जपाइक्ती। मोपतीके आं आफ थिम्चा कली मेकेर लचा गेयीनी। मिनू गो थिम्शा लेत्नुड। एको लोव्र फाराओ कली देनीन” दे मेको आन कली मदा बाक्त। उत्पत्ती ४७:२९-३०

6 मिनू फाराओमी “इ कसम जशो खोदेशो पा इ आफ कली थिमो” दे योसेफ कली देंमाक्त।

7 मिनू योसेफ, फाराओ आ गेय पाइबपुकी, मेको आन ठेयब मुरपुकी, इजीप्त रागी डा ठेयब मुरपुकी,

8 योसेफ आ खिं डा मुर नेल्ल, आ लोकबपुकी नु आ आफ आ खिं डा मुर नेल्ल आ आफ थिम्चा लमा बाक्त। आन आइक्च आलपुकी नु आन क्यारश भेडा, बी ब्यफ ला गोशेनमी बाक्मा बाक्त।

9 मिनू योसेफ नु बगी नु शारा डोइक्बपुकी लमा बाक्त। मिनू शुश मुर दुम्मा बाक्त।

10 मिनू मेकोपुकी आताद आ चेरब तुप्तीके यर्दन खोला आइक्ची हांबु जाक्दीशशा, ठेयब रोंका पामे बाक्त। मिनू योसेफमी आ आफ कली ७ नाक्त सम्म रोंका पवा बाक्त।

11 मिनू मेकेर बाक्ब कनान रागी डा मुरपुकीम आताद आ चेरब तुप्तीक खलाम मेको रोंका पाइब आन कली तशा “एको इजीप्त डा मुर आन ठेयब रोंका का बाक्ब” देंमा बाक्त। मोपतीके मेको यर्दन आइक्ची हांब डा बाक्तीके कली आबेल-मिसैम नें वोदमे बाक्त। आबेल-मिसैम आ अर्थ “ठेयब रोंका पतीके” बाक्ब।

12 मोपा याकूब आ तौपुकीमी आन आफ आ अरेशो खोदेशो पामे बाक्त। उत्पत्ती ४९:२९

13 मिनू आ तौपुकीम आन आफ आ रां कनान रागी चाक्दीशशा, अब्राहाममी मुर थिम्चा कली हित्ती डा एफ्रोन रे ग्याप्शो माप्रे आ नेक्था माक-पेला डा रूमी थिम्मे बाक्त। उत्पत्ती २३:१३-२०

14 मिनू आ आफ थिम्शा नोले, योसेफ नु आ नु गाक्ब नेल्ल इजीप्त रागी लेम्मा बाक्त।

15 मिनू आन आफ बेक्म नोले योसेफ आ लोकबपुकीम “मुल योसेफमी इं कली क्येक्क लेप्बा कों। मारदे हना गोपुकीमी मेको कली मरिम्शो पाइतय” दे लोव्र पमुमा बाक्त। उत्पत्ती २७:४१

16 मिनू आ लोकबपुकीमी लोव्र पचा कली मुर का योसेफ आ बाक्तीके सोइक्तमे बाक्त। मेकोमी “इन आफ आ बेक्चा क्येडा डोंइती मार अरेवा बाक्त देशा हना,

17 गे योसेफ कली ‘इन लोकब आन मरिम्शो पशो आ पबंम माफ गेने। मारदे हना इन कली मरिम्शो पाम्तेक्मे। मिनू इन आफ आ परमप्रभु आ गेय पाइब आन कली आन पाप माफ गेने’ दे माइक्चा” दे सोइशशो मुरुमी योसेफ कली देंमाक्त। मिनू योसेफमी मेको आ लोव्र नेशा डाक्माक्त।

18 मिनू आ लोकबपुकी यो जाक्मा बाक्त। मिनू आ डोंइती खुम्की पा बाप्शा “इन वाइल नकी” दे सेउ पामे बाक्त।

19 मिनू योसेफमी “महिनीन, गो परमप्रभु मनड।

20 गेपुकीमी आं कली मरिम्शो पाइतीनी। परमप्रभुमी चहिं रिम्शो सेल्टी। मो दुम्शा परमप्रभुमी शुश मुर आन कली ब्रोंइचा गेत्तु। उत्पत्ती ४५:५,७

21 मोपतीके महिनीन, गो इन कली नु इन आल आन कली कोव्रनुड” दे आ लोकब आन कली लेम्शा, रिम्शो लोव्र पवा बाक्त।

22 योसेफ नु आ खिं डा मुर नेल्ल इजीप्त रागीमी बाक्मा बाक्त। मिनू योसेफ सहे का १० बर्स ब्रोंइमाक्त।

23 मिनू आ तौ एफ्राइम आ चच युइ यो तवा बाक्त। आ डोंइती जरमेशो, मनस्से आ तौ माकीर आ तौ आ थुकुम वोदा बाक्त।

24 मिनू योसेफमी आ लोकब आन कली “गो बेक्नुड। परमप्रभुमी इन कली कोव्रब। परमप्रभुमी अब्राहाम, इसहाक नु याकूब कली ‘इन कली कनान रागी लेप्पाइक्नुड’ दे कसम जशा, लोव्र पशो बाक्ब” देंमाक्त।

25 मिनू योसेफमी आ लोकब आन कली “परमप्रभुमी इन कली थमा पा एकेर रे लेप्पाइक्ब। मेना आं रुश यो लतीने” दे कसम जपाइक्मी बाक्त। प्रस्थान १३:१९; यहोसु २४:३२

26 मिनू योसेफ सहे का १० बर्स दुग्शा बेक्माक्त। मिनू आ रां कली मराक्चा डा पा ओख्ती खेक्शा, इजीप्त रागीमी बाकसम कुर पा वोदमे बाक्त।

## प्रस्थान

**ब्रेक्ब मुर:** एको किताब ब्रेक्ब मोसा बाक्ब, दे सां खेयप ब्रेक्बो बाक्ब। प्रस्थान १७:१४; प्रस्थान २४:४; प्रस्थान ३४:२७-२८

**गेना ब्रेक्बो:** एको किताब योसेफ बेक्म नोले रे परमप्रभु यावे आ ताम्बु सेल्ची ना सम्म इस्राएलीपुकीम इजीप्त रागीम श्येत जशो आ पर्वम बाक्ब। इस्राएलीपुकी ४३० बर्स सम्म इजीप्तम बाक्बो बाक्तेक्म। परमप्रभुम मेको आन श्येत जशो तशा, आ ठेयब सक्ति इजीप्त डा मुर आन कली कौडशा, आ मुर इस्राएली आन कली श्येत रे प्रोना बाक्त। एको लोत्र गेना दुम्बो बाक्बा मेको मतुडसीब। एको किताब मोसामी आ गेय पची ना ब्रेक्बो बाक्त।

### मार ब्रेक्बो:

1. इस्राएलीपुकी इजीप्त रागीम बाक्बो श्येत जशो प्रस्थान १:-१२:३६
२. इजीप्त रे गुंडशा, आन श्येत रे प्रौडशो प्रस्थान १२:३७-१८:२७
३. परमप्रभु यावेमी मेकोपुकी नु कबल पशो

### इस्राएलीपुकीमी श्येत जशो

1 आन खिं खिं डा मुर लाइशशा, याकूब नु इजीप्त लाइब इस्राएल आ तौ सु बाक्मा बाक्त देशा हना, उत्पत्ती ४६:८-२७

2 रूबेन, सिमियोन, लेवी, यहूदा,

3 इस्साकार, जबूलून, बेन्यामीन,

4 दान, नाप्ताली, गाद नु आशेर बाक्मा बाक्त।

5 मिनु याकूब आ तौ आन खिं खिं डा मुर नेल्ल पा ७० जना बाक्मा बाक्त। योसेफ चहिं इजीप्त रागीमी बाक्बो बाक्माक्त।

6 मिनु नोले योसेफ नु मेको आ लोकब आन पाला डा मुर नेल्ल बेक्मा बाक्त। उत्पत्ती ५०:२६

7 मिनु इस्राएल आ चच युड सोशा बोशा शुश दुम्मा बाक्त। शुश दुम्मा डा मिन, बोल्यो दुम्मा बाक्त। मिनु इस्राएल आ मुरपुकीमी रागी नेल्ल ब्रीमा बाक्त। प्रेरित ७:१७-१९

8 मिनु नोले योसेफ कली मतुडक्ब पिप काम इजीप्त रागी कली सासन पवा बाक्त।

9 मेकोमी आ मुर आन कली “नेनीन, इं रागीमी बाक्बो इस्राएल डा मुरपुकी इं क्येडा शुश नु बोल्यो दुम्तेक्म।

10 मेको आन पर्वमी शुश मिम्शा, सल्ला पय। मो मपाइतय हना, मेको शुश दुम्शा, नोले लडाइ दुम्मेनु, इं जोरी सत्रु आन कली वारच पाइशशा, एक रे प्रोक्नीमी, कोर मे” दे आ मुर आन कली माइक्मी बाक्त।

11 मोपतीके मेकोपुकीमी इस्राएली आन कली श्येत गेशा, गेय पपाइक्चा कली कोत्रब ठेयब मुरपुकी वोदमे बाक्त। मिनु इस्राएलीपुकीमी फाराओ माइशशो पिप आ मार मार वोइक्चा कली पिथोम नु रामेसेस सहर निकशी सेल्ले बाक्त। उत्पत्ती १५:१३; उत्पत्ती ४७:११

12 तन्न इस्राएली गिश श्येत जामे, मिश बारना बारन शुश दुम्शा, इजीप्त रागी ब्रीमा बाक्त। मिनु मेको आन कली तशा, इजीप्त डा मुर शुश हिंमा बाक्त।

13 मोपतीके इस्राएली आन कली डौडती क्येडा यो शुश गेय पपदमे बाक्त। उत्पत्ती १५:१३

14 शुश श्येत गेशा, शुश गेय पपदमे बाक्त। मार गेय पपदमे बाक्त देशा हना, हिलो निपदमे बाक्त, इंटा सेल्पदमे बाक्त, रू डा गेय यो पपदमे बाक्त। तेको गेय गेमे, मेको शुश श्येत डा गेय बाक्माक्त।

### परमप्रभु कली मान पाइब मीश मुर

15 मिनु इजीप्त डा पिपमी हिबू मीश मुर आन आल थिची ना वारच पाइब आन ठेयब मीश मुर आस कली लोत्र पवा बाक्त। मेको आन दाते डा का आ नें शिप्रा नु अर्को आ नें पुआ बाक्माक्त।

16 मिनु फाराओमी “गे निकशी हिब्रू मीश मुर आन कली आल थिची ना वारच पाइनीसी। तौ थिम्तेकम हना, सतीसे। तमी बाक्त हना, मसतीसे” दे माइक्सी बाक्त।

17 तन्न मेको मीश मुर आन कली वारच पाइब नेल्लेमी परमप्रभु कली मान पा हिंशा, इजीप्त डा पिपमी देंशो मपथु, वोंइश आल आन कली यो मसदमे बाक्त।

18 मिनु इजीप्त डा पिपम मेको वारच पाइब मीश मुर आस कली ब्रेशशा “गे मारदे वोंइश आल आन कली यो ब्रोंइचा गेसी? मारदे मोदेंशो पसी?” दे लोत्र पवा बाक्त।

19 मिनु मेको मीश मुरुमी “हिब्रू मीश मुरपुकी इजीप्त डा मीश मुर आन क्येडा बोल्यो बाक्नीम। मोपतीके गो जाक्दीत्वा क्येडा डोंइती आल थिने थुम्शो बाक्नीमी” देंसा बाक्त।

20 मोपतीके परमप्रभुमी मेको आल थिचा वारच पाइब मीश मुर आन कली आसीक गेवा बाक्त। मिनु इस्राएली शुश दुम्शा, बोल्यो दुम्मा बाक्त।

21 वारच पाइब मीश मुरपुकी परमप्रभु कली मान पा हिंतीके परमप्रभुमी मेको आन खिं कली यो आसीक गेवा बाक्त।

22 मिनु पिप फाराओमी आ मुर आन कली “हिब्रूपुकीमी दोशो तौ थीमे, मेको नेल्ल नील खोलाम लाइशशा ताइक्तीन। आन तमी आन कली चहिं ब्रोंइचा गेने” दे हुकुम पवा बाक्त।

## 2

### मोसा जरमेशो

1 लेवी आ थर डा मुर का बाक्माक्त। मिनु मेकोमी लेवी आ थर डा मीश आल का ग्युबे पवा बाक्त। प्रस्थान ६:२०

2 मिनु मेको मीश मुरुमी तमी का नु तौ का थिमाक्त। नोले लेंशा आल कुरशा, तौ का थिमाक्त। आ थिशो तौ कली तशा “शुश दारशो आल बाक्ब” दे महिना सां सम्म खुइशशा वोदा बाक्त। प्रेरित ७:२०; हिब्रू ११:२३

3 मिनु नोले आल आ ममामी महिना सां डा आल कली खुइक्ने मचबा बाक्त। मिनु आल कली सुम्तीके पाइशशो ग्युर सेल्शा, ब्वाक्कु मओत्रचा डा पा अल्कत्राम सिल्दा बाक्त। मिनु मेको आ तौ कली ग्युरुम कुर पा खोला आ नेक्था डा बुदी मीलु घांस आगा, ब्वाक्कुम वोदा बाक्त।

4 मिनु मेको आल आ दिदी “आं लोक्ब कली मार दुम्मे” दे डोन रे कोव्रदीम्माक्त। गन्ती २६:५९

5 मेना पिप आ तमी खोलाम चिक्चा कली जाक्दीम्माक्त। आ गेय पाइबपुकी यो खोला आ नेक्था लमा बाक्त। मिनु पिप आ तमीमी बुदी मीलु घांस आगा, ब्वाक्कुमी मेको ग्युर तशा, आ गेय पाइब का कली “मेको ग्युर ब्रथ लावो” दे सोइक्ता बाक्त।

6 मिनु पिप आ तमीमी मेको सुम्तीक पाइशशो ग्युर रोकशा कोव्रडानु “ए, आल का बाक्त” देंमाक्त। मिनु आल डाक्माक्त। मेको आल तशा, शिशी पवा बाक्त। मिनु पिप आ तमीमी “एको हिब्रू डा मुर आ तौ का बाक्ब” देंमाक्त।

7 मिनु आल आ दिदीमी “गो इन कली हिब्रू दूध तुंडब मीश मुर का चाक्गु? आल कली दूध तुंडबा को” दे हिल्लो पवा बाक्त।

8 मिनु फाराओ आ तमीमी “लो, चाक्को” दे मीश आल कली देंमाक्त। मिनु मेको मीश आलम आ ममा ब्रथ लमाक्त।

9 मिनु फाराओ आ तमीमी मेको मीश मुर कली “एको आल आं कली थुलो। एको आल थुल्शो डा, इ कली क्येट गेनुड” दे लोत्र पवा बाक्त। मिनु मीश मुरुमी आल लाइशशा, थुला बाक्त।

10 मेको नोले आल कोल्माक्त। मिनु काबु मेकोमी मेको आल फाराओ आ तमी कली लाइशशा, गेवा बाक्त। मिनु आ तौ खोदेंशो दुम्माक्त। मिनु पिप आ तमीमी मेको आ नें मोसा वोदा बाक्त। मारदे हना “गो मेको कली ब्वाक्कु रे गुंडताकड” देंमाक्त। मोसा आ अर्थ हिब्रू लोत्रमी “ब्वाक्कु रे गुंडशो” देंशो बाक्ब।

### मोसामी इजीप्त डा मुर साइशशो

11 मिनु नोले मोसा ठेयब दुम्शा, आ लोकब आन कली गुम्थ लशा, आन श्येत जशो ताप्तु। मेकोमी इजीप्त रागी डा मुरुमी आ हिब्रू लोकब का कली तुप्शो ताप्तु। प्रेरित ७:२३-२९; हिब्रू ११:२४-२७

12 मिनु मोसामी एर ओंथ कोत्रशा, सुड मबाकशो तशा, इजीप्त डा तुप्ब मुर कली साइक्तु। मिनु बाल्वामी थिम्तु।

13 आ दीसा मोसा लेंशा हिरथ लमेनु, हिब्रू निक्शी जिशा तुम्मुशो ताप्तु। मिनु मोसामी मरिम्शो पाइब कली “मारदे आंम लोकब कली तुबी?” दे हिल्लो पाप्तु।

14 मिनु मेकोमी “सुमी इ कली आंस होत्रप नु निसाफ पाइब सेला? इजीप्त डा मुर कली साइशो खोदेशो पा आं कली यो सदु, देने?” दैत। मिनु मोसामी “मुल एको लोत्र, मुर नेल्लेमी तुडक्नीमी” दे मिम्शा हित। प्रेरित ७:३५

15 मिनु फाराओमी “मोसाम इजीप्त डा मुर का साइक्तु” देशो नेंशा, मोसा कली साइक्चा माल्तु। मोसा चहिं फाराओ आ बाक्तीकरे प्रोक्शा, मिदयान रागी जाक्दीशशा, इनार तारी निरशा बाक्त।

### मोसा मिदयान रागी प्रोक्शो

16 मिनु मिदयान रागीमी ७ जना तमी बाक्शो नाक्सो का बाक्माक्त। मेको मीश आलपुकीमी आन आफ आ क्यारश भेडा आन कली ब्वाक्कु तुंडचा, दे शुंगु ब्वाक्कुम पिंचा कली, ब्वाक्कु कीतेक्म। प्रस्थान ३:१

17 तन्न अरु गोठलापुकी जाक्शा, मेको आन कली श्येत गेम्तेक्म। मोसामी चहिं मेको मीश आल आन कली वारच पा, आन भेडा आन कली ब्वाक्कु तुंडताक्व।

18 मिनु मेको आन आफ रूएल आ खिं जाक्दीम्मानु, मेकोमी आ तमी आन कली “मुलाक्ती गे दोपा रीब पा जाक्नी?” दे हिल्लो पवा बाक्त।

19 मिनु मेको आ तमीपुकीमी “इजीप्त रागी डा वोंडश मुर कामी आंइ कली गोठला आन गुड रे प्रोंडतु। मिनु शुश ब्वाक्कु कुर पा आंइ क्यारश भेडा आन कली तुंडताक्व” दे आन आफ कली मदमे बाक्त।

20 मेकोमी आ तमी आन कली “मेको मुर ते बाक्मे? एक मारदे मचाक्नी? मुल गो नु जथ ब्रेत्तीने” दे माइक्मी बाक्त।

21 मिनु मोसा मेकोपुकी नु बाक्चा बिस्साक्व। रूएलमी मोसा कली आ तमी सिप्पोरा ग्युंवे पा गेप्तु। गन्ती १२:१

22 मिनु नोले तौ का थिप्तु। मिनु मोसामी मेको आल आ नें गेरशोम वोडक्तु। मारदे हना “गो मतुडशशो रागीमी अर्को रागी डा मुर दुम्ती” दैत। प्रस्थान १८:४

### परमप्रभुमी इस्राएली आन लोत्र नेंशो

23 मिनु शुश बर्स नोले इजीप्त रागी डा पिप बेक्माक्त। इस्राएल जात डा मुर इजीप्त रागीम वाइलीम वाइल खोदेशो दुम्शा, शुश श्येत जशा, परमप्रभु कली “वारच पाइय्कीकी” दे पुंडशा डाक्मा बाक्त। मिनु परमप्रभुमी मेको आन डाक्शो नेना बाक्त।

24 मिनु परमप्रभुमी अब्राहाम, इसहाक नु याकूब नु कबल पशो मिम्ता बाक्त। उत्पत्ती १५:१८; उत्पत्ती २६:३; उत्पत्ती २८:१३-१४

25 मिनु परमप्रभुमी आन श्येत जशो तशा शिशी पवा बाक्त।

## 3

### परमप्रभुमी लोत्र पशो

1 मेना मोसा आ शिउ आ क्यारश भेडा योत्रथ लत। आ शिउ रूएल आ नें यित्रो यो बाक्माक्त। यित्रो चहिं मिदयान रागी डा नाक्सो का बाक्माक्त। मोसामी क्यारश भेडा आन कली गोरशो रागी डा नां पेरतीके गे योत्रतु। मोपा योत्रना योत्रन, होरेब माइशशो परमप्रभु आ डांडा आ नेक्था जाक्दीत्त। प्रेरित ७:३०-३४

2 मेकेर परमप्रभु यावे आ स्वर्ग डा गेय पाइब मी ब्रशो बुटा रे गूत। डोंइती दोदेशो बाक्त देशा हना, मोसामी डोन रे कोत्रडानु, ब्रशो बुटा का कली मीम काइ मनेक्शो ताप्तु। ब्यवस्था ३३:१६

3 मिनू मोसामी “गो मेकेर लशा कोवचा माल्नुड। छक लाक्चा डा बाक्त। मारदे मीम मेरे बुटा कली मनेक्गा?” दे आंमा लोव पाप्तु।

4 मिनू परमप्रभु यावेमी मोसा कली ब्रशो बुटा कोवथ पिशो तशा, परमप्रभुमी बुटा रे “मोसा, मोसा” दे ब्रेत्ताक्व। मिनू मोसामी “गो एक बाक्ती” दे लोव लेत्ताक्व।

5 मिनू लेंशा “एक मपिवो। इ जुत्ता पुतो। मारदे हना इ राप्शा बाक्तीके आं बाक्तीके बाक्व। उत्पत्ती २८:१७; यहोसु ५:१५

6 गो इ आफ आ परमप्रभु इ किकी पिपी अब्राहाम, इसहाक नु याकूब आन परमप्रभु नड” दे मोसा कली लोव पाप्तु। मिनू मोसामी परमप्रभु कली तशा हिंशा, आ कुल सुम्साक्व। उत्पत्ती १७:१; उत्पत्ती २८:१-४; उत्पत्ती ३५:९-११; मत्ती २२:३२

7 मिनू परमप्रभु यावेमी “गो इजीप्त रागीमी बाक्शो आं मुर आन श्येत ताता। मेको आन कली गेय पपाइक्व आन पबंम डाक्नीमी। गो आन डाक्शो नेंता, ताता। गो आन श्येत जशो तुइक्ताक्व। प्रस्थान २:२३

8 मिनू मेको आन कली इजीप्त रागी डा मुरपुकीम गेशो श्येत रे प्रॉइनुडमी। गो आं मुर आन कली रिम्शो नु ठेयब रागी लाइक्नुडमी। मेको रागीम दूध नु खुदो शुश बाक्व। मारेइ मारेइ यो शुश ग्रेल्ब। मेको रागी कनानी, हिती, एमोरी, परिज्जी, हिठ्वी नु यबुसी आन बाक्तीक रागी बाक्व।

9 नेनो, गो इस्राएल जात डा मुर आन डाक्शो नेंता। इजीप्त रागी डा मुरुमी मेको आन कली दिप्शा श्येत गेन्तेक्म। गो मेको यो ताता।

10 गो इ कली फाराओ आ बाक्तीके सोइक्नुड। गे इस्राएल जात डा मुर आन कली इजीप्त रागी रे गुंडो” दे परमप्रभुमी मोसा कली माइक्तु। प्रस्थान ७:१६; न्यायाधीस ६:१४

11 मिनू मोसामी परमप्रभु यावे कली “गो दोपा मो पने चाप्नुडा? फाराओ आ बाक्तीकेमी लशा, इस्राएल जात डा मुर आन कली इजीप्त रागी रे दोपा गुंडने चाप्नुडा?” दे परमप्रभु कली देंत। प्रस्थान ४:१०; उत्पत्ती ३२:११; २सामुएल ७:१८; यसैया ६:५,८; येरमीया १:६

12 मिनू परमप्रभुमी “गो थमा पा, गे नु बाक्नुड। इ कली सोइक्व गो नड, दे चिन्ड का कोंडनन। मेको चिन्ड मार बाक्त देंशा हना, गे इस्राएल जात डा मुर आन कली इजीप्त रागी रे गुंडशा नोले एको परमप्रभु आ डांडामी आं कली ठेयब सेल्नीनी” दे माइक्तु। येरमीया १:८

### परमप्रभुमी आ नें तुइक्पाइशो

13 मिनू मोसामी परमप्रभु कली “गो इस्राएल जात डा मुर आन बाक्तीके जाक्दीशशा, मेको आन कली ‘इन किकी पिपी आन परमप्रभुमी आं कली इन बाक्तीके सोइक्ताक्यी’ देंडानु, मेकोपुकीमी चहिं ‘मेको आ नें मार में?’ दे हिल्लो पाइनीम। मेना गो मार देंनुडा?” दे हिल्लो पाप्तु।

14 मिनू परमप्रभुमी मोसा कली “आं नें ‘गो नड’ बाक्व। इस्राएल जात डा मुर आन कली ‘गो नड’ देंबमी आं कली इन बाक्तीकेमी सोइक्ताक्यी, देंचा माल्नेवे” देंत। प्रस्थान ६:२; मलाकी ३:६; प्रकाश १:४,८

15 मिनू लेंशा परमप्रभुमी मोसा कली “इस्राएल डा मुर आन कली मार देंचा माल्नेवे देंशा हना ‘परमप्रभु यावे, इन किकी पिपी अब्राहाम, इसहाक नु याकूब आन परमप्रभुमी इन कली गुम्थ सोइक्ताक्यी। आं नें गेना हना यो लीब। नेल्ल पाला डा मुरुम आं नें आन थुंमी मिम्शा वोइक्चा माल्नीम’ देंचा माल्नेवे। प्रस्थान ६:२-३; यसैया ४२:८

16 गे इस्राएल जात डा मुर आन खाल्पा आन कली खुप्थ लावो। मिनू मेको आन कली ‘परमप्रभु यावे इन किकी पिपी आन परमप्रभु आं डोंइती वूत। अब्राहाम, इसहाक नु याकूब आन परमप्रभुमी आं कली गुम्शा, लोव पाप्तु’। मेकोमी आं कली ‘गो थमा पा इन कली गुम्थ यिती, इजीप्त रागीम इन कली गिश श्येत गेमे, मेको ताता।

17 गो इन कली इजीप्त रागी डा मुर आन गेशो श्येत रे प्रॉइनुड। गो इन कली कनानी, हिती, एमोरी, परिज्जी, हिठ्वी नु यबुसी आन बाक्शो रागी गेनुड। मेको रागीम दूध नु खुदो शुश बाक्व, अनन यो शुश ग्रेल्ब। गो आं देंशो लोव खाप्नुड’ देंत, देंचा माल्नेवे।

18 इ देशो लोत्र नेंशा, टिन्तेक्म हना, गे नु इस्राएल डा मुर आन खाल्पापुकी इजीप्त रागी डा पिप आ बाक्तीक लशा, मेको कली लोत्र पचा माल्नीनी। गेमी इजीप्त रागी डा पिप कली 'परमप्रभु यावे हिब्रू आन परमप्रभुमी आंइ कली गुम्तीकी। आंइ कली नाक्त सां गोरशो रागीम लचा गेकी। मेकेर परमप्रभु यावे आंइ परमप्रभु कली चढ्थेथ लाइनीकी' दे पिप कली देनीन। प्रस्थान ५:१,३

19 मेको पिपमी चहिं इन कली लचा मगेब, गो तुइक्नुड। गो थम ठेयब सक्तिमी इन कली वारच पाता हना ला, लचा गेब।

20 मिनु गोमी इजीप्त रागी डा मुर आन दातेमी थम छक लाक्चा डा गेय कोंइशा, मेको आन कली श्येत गेनुड। मिनु नोले मेकोमी इन कली लचा गेब।

21 इजीप्त रागी डा मुरपुकीमी इन कली दाक्ब सेल्लुडमी। इजीप्त रे गूनीनु, श्येत्थ यूचा ममाल्नीनी। प्रस्थान ११:२-३; प्रस्थान १२:३५-३६

22 मीश मुर नेल्लेमी आन नेक्था डा इजीप्त रागी डा वारच रे सुन, चांदी नु वासी पुंडचा माल्नीम। आन तमी तौ आन कली पांइपाइक्चा माल्नीम। मोदेशो पा इजीप्त डा मुर आन शोंप रोइक्चा माल्नीनी" दे परमप्रभु यावेमी मोसा कली देंत।

## 4

परमप्रभुमी मोसा कली चिन्ड कोंइशो

1 मिनु मोसामी परमप्रभु कली "मेकोपुकीमी आं देशो थमा मसुइक्थु, मटीनीमी को? 'परमप्रभु यावेमी इ कली मयुम' देंनीमी को" देंत।

2 मिनु परमप्रभु यावेमी "इ गुइमी मार कुरी?" दे हिल्लो पाप्तु। मिनु मोसामी "कोक्के कुरता" देंत।

3 मिनु "खपीम ब्वारदो" देंत। मिनु मोसामी आ कोक्के ब्वारदानु, बुस्स दुम्त। मिनु मोसा मेको तशा प्रोक्त। प्रस्थान ७:१०

4 मिनु परमप्रभु यावेमी "आ मीलुम ग्याइक्तो" देंत। मिनु मोसामी आ गुइ दिंशा, बुस्स कली ग्याइक्दीमेनु, आ गुइमी लेंशा कोक्के दुम्त।

5 मिनु मेको तशा, मेकोपुकीमी "परमप्रभु यावे, आन किकी पिपी अब्राहाम, इसहाक नु याकूब आन परमप्रभुमी इ डोंइती यूशा, इ कली गुम्तु, दे थमा सुइक्नीम" देंत।

6 मिनु परमप्रभु यावेमी लेंशा "इ गुइ इ फेक्शो वा आगाम वोतो" देंत। मिनु मोसामी मो पाप्तु। मिनु नोले आ गुइ गुंइशा कोत्रडानु, कोत्रर मुशा बुश दुम्शो ताप्तु।

7 मिनु मेकोमी "लेंशा, इ गुइ इ फेक्शो वा आगाम वोतो" देंत। मिनु वोइश्शा गुंइदानु, आ गुइ डोंइती डा खोदेशो पा सेस दुम्शो ताप्तु।

8 "इ डोंइती डा चिन्ड तशा, इ लोत्र थमा मसुइक्थु, मटिन्तेक्म हना, नोले डा चिन्ड तशा, थमा सुइक्नीमी को?"

9 तन्न मेकोपुकीमी चिन्ड निक्शी तशा यो, थमा मसुइक्थु, इ कली मटिन्तेक्म हना, गे नील खोला डा ब्वाक्कु लाइश्शा, सोत्रशो खप तारी मोतो। खोला रे लाइश्शो ब्वाक्कु सोत्रशो खप तारी मोदीनु, मेको हुश दुम्ब" दे परमप्रभु यावेमी देंत। प्रस्थान ७:१७-२१

10 मिनु मोसामी परमप्रभु यावे कली "आं परमप्रभु, गो लोत्र पस मजोक्नुड। गे, मुल इन गेय पाइब नु लोत्र पनीनु यो, आं कली लोत्र पचा मपी। गो थांइशो लें पाइश्शो मुर बाक्नुड" देंत। प्रस्थान ३:११; प्रस्थान ६:१२-३०

11 मिनु परमप्रभु यावेमी "सुमी मुर आ शोत्र सेला? सुम लोत्र पपाइक्ब, नोफा नेंब नु मनेंब, मिक्च ताइब नु मताइब सेला? गो, परमप्रभु यावे मनडा डा? भजन संग्रह ९४:९

12 मुल लावो। गो इ कली लोत्र पपाइक्नुड, मार देंचा माल्बा, मेको इ कली शेनुड" देंत। ब्यवस्था १८:१८; मत्ती १०:१९

13 मोसाम चहिं "आं परमप्रभु, आं पा डा अरु कली सोइक्ने चाप्नीनी को? तन्न आं कली मसोइक्तीनी" देंत।

14 मिनु परमप्रभु यावे मोसा आ पबर्म गाइश्शा “लेवी थर डा इ लोकब हारून रिम्शो लोत्र पस जोक्ब बाक्ब, गो मतुइक्नुडा डा? मिनु मुल इ कली गुम्थ जाक्ब। इ कली तशा शुश ग्येर।

15 गो इ पचा माल्शो लोत्र नेल्ल शेंनुड। मिनु गे मेको हारून कली देंचा माल्नेवे। मिनु मेकोमी इ पा डा मुर आन कली लोत्र पचा माल्ब। मेको इ शोत्र खोदेशो दुम्ब। गो इ कली लोत्र पाइब परमप्रभु खोदेशो पा, गे हारून कली लोत्र पाइब बाक्नीनी।

16 दोपा गो, परमप्रभुम इ कली लोत्र पाइनुडा, मोपा गे हारून कली लोत्र पचा माल्नेवे। मिनु मेकोमी मुर आन कली लोत्र पचा माल्ब। प्रस्थान ७:१-२

17 मेको कोक्के लाइश्शा, आं देशो चिन्ड कोइदो” दे परमप्रभु यावेमी मोसा कली माइक्तु।

### मोसा इजीप्त रागी लेशशो

18 मिनु मोसा आ शिउ, यित्रो आ खिं लशा, मेको कली “इजीप्त रागीम बाक्शो आं लोकब आन कली गुम्थ लचा गेयीनी। बेक्मा कों, ब्रोइमा, गो तुइक्चा दाक्ती” दे पुंडतु। मिनु यित्रोमी “इ थु नाइश्शा, लावो” देंत। प्रस्थान ३:१

19 मिनु मोसा मियान रागीम बाक्मेनु, परमप्रभु यावेमी “लेशा इजीप्त रागी लावो। मारदे हना इ कली साइक्चा माल्बपुकी बेक्तेक्मे” दे लोत्र पाप्तु।

20 मिनु मोसा आ मीश नु आ तौ निक्शी नु गधा डोइश्शा, इजीप्त रागी लेत्त। परमप्रभु आ गेशो कोक्के यो कुरतु। प्रस्थान १८:३-४

21 मिनु परमप्रभु यावेमी मोसा कली “इ नोफा दाइश्शा नेनो। गे इजीप्त रागी जाक्दीश्शा, गो इ कली पपाइश्शो छक लाक्चा डा गेय नेल्ल फाराओ आ डोइती पावो। गो चहिं मुर आन कली लचा मगेचा डा पा फाराओ कली काइ मटीब सेल्लुड। प्रस्थान ७:३,१३; ब्यवस्था २९:३; यसेया ६:१०; रोमी ९:१८

22 मिनु गे मेको कली ‘परमप्रभु यावेमी इन कली मार लोत्र पाप्तु देशा हना, इस्राएल आं डोइती जरमेशो तौ बाक्ब। ब्यवस्था ३२:६

23 आं तौ कली आं कली चढेतीक चढेथ लचा गेवो। गे मटिप्तीवी हना, गो इ डोइती जरमेशो तौ कली साइक्नुड’ देंत, देनो” दे परमप्रभु यावेमी मोसा कली माइक्तु। प्रस्थान ११:५; प्रस्थान १२:२९

### मोसा आ तौ कली चिनु खोइश्शा

24 मिनु लाम बास बाक्मानु, परमप्रभु यावेमी मोसा आ नेक्था जाक्शा, मेको कली साइक्चा माल्तु। उत्पत्ती १७:१४; उत्पत्ती ३२:२५

25 मिनु सिप्पोरामी चहिं हेश्शो फुल्लु का गुप्शा, आ तौ कली खोइक्तीक चिन्ड खोदा बाक्त। मोपा मेकोमी आ तौ आ चारतीक डा कुशुल खोइश्शा, आ तौ आ कुशुलम मोसा आ रां थिशा “गे हुश के ग्युम्ले नवे” देंमाक्त। यहोसु ५:२

26 मोदेशो पतीके, परमप्रभुमी मोसा कली मसाइक्थु, प्रोना बाक्त। सिप्पोरामी मारदे “हुश के ग्युम्ले” देंत देशा हना, खोइक्तीक चिन्ड रे हुश यिमाक्त।

### मोसा नु हारून

27 डोइती परमप्रभु यावेमी हारून कली “मोसा गोरशो रागीम जाक्चा चिक्शो बाक्ब। मेको कली गुम्थ लावो” दे माइक्तु। मिनु लशा, परमप्रभु आ डांडाम मोसा कली गुम्शा, पुक्पु पाइक्तु।

28 मोसामी आ कली सोइक्ब परमप्रभु यावे आ लोत्र नेल्ल नु आ पचा माल्शो चिन्ड यो हारून कली शेंताक्व।

29 मिनु मेको निक्शीमी इस्राएली आन खाल्पा नेल्ल आन कली खुप्ताक्से।

30 हारूनमी परमप्रभु यावेमी मोसानु पशो लोत्र नेल्ल मेको आन कली शेंताक्व। मोसा कली कोइशो चिन्ड, हारूनमी मुर आन डोइती कोइताक्व।

31 मिनु मुरपुकीमी थमा सुइक्तेक्म। मिनु परमप्रभु यावेमी इस्राएली आन कली गुम्शा, आन श्येत तशा, वारच पचा चिक्शो तुइश्शा, मेकोपुकी बाप्शा, परमप्रभु कली ठेयब सेल्लेक्म। प्रस्थान ३:१६



## 5

## मोसा नु हारून आस लोव

1 मिनु नोले मोसा नु आ लोक्ब हारून फाराओ गुम्थ लाम्ताक्स। मिनु मेको कली “परमप्रभु यावे, इस्राएली आन परमप्रभुमी आंस कली लोव पाप्तु। मेकोमी ‘आं मुर आन कली गोरशो रागीमी आं पर्वम चाड मानेचा कली लचा गेवो’ दे परमप्रभु यावेमी इन कली देशो बाक्ब” देताक्स। प्रस्थान ३:१८; प्रस्थान ७:१६,२६; प्रस्थान ९:१,१३

2 मिनु फाराओमी “परमप्रभु यावे सु बाक्म, गो मतुइक्नुड। मार, आ देशो लोव टिचा माल्नुडा? गो इस्राएली आन कली मारदे लचा गेनुडा? गो परमप्रभु यावे कली मतुइक्नुड। मोपतीके इस्राएल डा मुर, इन कली लचा मगेनन्नी” देत।

3 मिनु मेको निक्शीमी “हिबू मुर आन परमप्रभुमी आंस कली गुम्तु। आंइ कली लचा गेने, दे पुंडनस्कु। गोपुकी रोइमी, लडाइमी मबेक्कल, दे परमप्रभु यावे, आंइ परमप्रभु कली चढेथ नाक्त सां सम्म गोरशो रागीम लचा गेने” दे माइक्ताक्स।

4 मिनु इजीप्त डा पिपम मेको आस कली “मोसा नु हारून, गे मारदे मुर आन कली आन गेय क्योल्चा माल्नीसी? इस गेय पथ लस” देत।

## इस्राएली आन कली श्येत गेशो

5 मिनु फाराओमी लेंशा “नेनीस, इस जात डा मुर शुश दुम्तेक्म। गे मेको आन कली आन गेय रे नाइक्चा गेचा माल्सी?” दे मोसा नु हारून आस कली हुइक्ताक्व। प्रस्थान १:७,१२

6 मोपतीके मेको नाक्ती रे फाराओमी गेय पपाइक्ब ठेयब मुर नु कोवब मुर आन कली

7 “मुल रे इस्राएली आन कली इंटा सेल्चा कली पराल मगेचा, आंमा गुम्थ लचा माल्नीम।

8 तन्न इंटा चहिं डोंइती दोशो सेल्मे, मुल यो मोशोन सेल्चा माल्नीमी। मिनु आन गेय डोंइती पशो खोदेशो पा पचा माल्नीम। मारदे हना आन गेय मबाक्मेनु, मेकोपुकीमी ‘गोपुकी गोरशो रागीम आंइ परमप्रभु कली चढेचा दाक्नीकी’ दे लोव पशा ग्रीनीम।

9 मेको मुर आन कली शुश गेय पपाइश्शा श्येत गेचा माल्नीनी। मेकोपुकीमी गेय पा बाक्मानु, दूली लोव मननीम” दे आ मुर आन कली देंमाक्त।

10 मिनु इस्राएली आन कली गेय पपाइक्बपुकी नु कोवबपुकीमी मुर आन कली “फाराओमी ‘इन कली पराल मगेनुड’ देशो बाक्ब।

11 मोपतीके ते खुप्ने चाप्नीनी, मेक डा खुप्तीन। इंटा चहिं डोंइती दोशो सेल्नी, मुल यो मोशोन सेल्चा माल्नीनी” दे मदमे बाक्त।

12 मोपा मेकोपुकी इजीप्त रागीमी पराल मथित्तीके पराल के टुटा गुम्थ ब्रशा गाक्मा बाक्त।

13 गेय पपाइक्बपुकीमी “पराल गेशो नाक्त दोशो इंटा सेल्नी, मुल यो मोशोन सेल्चा माल्नीनी” दे शुश गेय पपदमे बाक्त।

14 फाराओ आ गेय पपाइक्ब इस्राएली कोवबपुकी यो वोइश्शो बाक्मा बाक्त। मेको आन कली तुप्शा “डोंइती डा खोदेशो पा सिनाक्ती मुलाक्ती इंटा मारदे मसेल्नी?” दे इस्राएली कोवब आन कली हुइक्तमे बाक्त।

15 मिनु इस्राएली कोवबपुकीमी फाराओ कली “मारदे इन वाइल आन कली ओदेशो मरिम्शो पाइनीनी?

16 इन वाइल आन कली पराल मगेथु ‘इंटा सेलीने’ दे हुइक्नीनी। मेको ला ममाइ, इन मुरपुकीमी आंइ कली तुप्नीम। गे इन रागी डा मुर आन कली मरिम्शो पपाइक्नीनी” देंमा बाक्त।

17 मिनु फाराओमी “गे अल्सेपुकी, थम अल्से दुम्तीनी। मोपतीके गे ‘आंइ कली परमप्रभु यावे कली चढेथ लचा गेने’ देंतीनी।

18 मुल गेय पथ लने। पराल मगेसीब, इंटा चहिं डोंइती दोशो सेल्नी, मोशोन सेल्चा माल्नीनी” देंमाक्त।

19 मिनु इस्राएली कोव्रबपुकीमी “इं कली मरिम्शो पशा, शुश श्येत गेनीम” दे तुइक्तमे बाक्त। मारदे हना “डोंइती नाक्त किंत किंत दोशो इंटा सेल्नी, मुल यो मोशोन सेल्चा माल्नीनी” देंशो बाक्मा बाक्त।

20 मिनु फाराओ आ बाक्तीके रे लमानु, मेकोपुकीमी लांमी रिम्शा बाक्शो मोसा नु हारून आस कली गुम्तेक्म।

21 मिनु मेको कोव्रबपुकीमी “परमप्रभु यावेमी इस कली सजाइ गेवल। मारदे हना गे निक्शीमी फाराओ नु आ मुर आन डोंइती आंइ कली मरिम्शो सेल्तीसी। आंइ कली साइक्चा, दे तरवार आन गुइमी गेतीसी” दे गाइश्शा हुइक्ताक्म।

22 मिनु मोसा परमप्रभु यावे आ नेक्था लशा “परमप्रभु, मारदे गे इन मुर आन कली मरिम्शो पाइनीनी? आं कली मारदे एक सोइक्तीनी?

23 गो इन नेमी फाराओ नु लोव्र पडा नोले, मेकोमी इन मुर आन कली डोंइती क्येडा शुश श्येत गेप्टु। गे चहिं इन मुर आन कली मप्रोंइनी” देंत।

## 6

### परमप्रभुमी मोसा नु लोव्र पशो

1 मिनु नोले परमप्रभु यावेमी मोसा कली “गो फाराओ कली मार पाइनुडा, गे मुल ताइनेवे। फाराओम मेको आन कली लचा गेचा ला ममाइ, ठेयब सक्तिमी फाराओ कली आं मुर आन कली आ रागी रे खेरपाइक्नुड” देंत। प्रस्थान ११:१; प्रस्थान १२:३३

2 मिनु लेंशा परमप्रभुमी मोसा कली “गो यावे नड। प्रस्थान ३:१४-१५; उत्पत्ती १७:१

3 गो अब्राहाम, इसहाक नु याकूब आन डोंइती यूशो ‘नेल्ल क्येडा सक्ति पाइश्शो परमप्रभु नड’ दे मेको आन कली तुइक्पाइक्ताक्मी। तन्न ‘आं नें यावे बाक्ब’ दे मतुइक्पदुमी।

4 गो मेको आन कली ‘गे मुल अर्को रागी डा मुर दुम्शा, हिरना हिरन बाक्शो कनानी आन रागी इन कली गेनुड’ दे अब्राहाम, इसहाक नु याकूब नु कबल पने थुम्शो नड। उत्पत्ती १७:८

5 मिनु गो इजीप्त डा मुरपुकीमी इन कली गेय पाइब सेल्मेनु, श्येत जशो इस्राएली आन डाक्शो ताता। मिनु गो आं कबल पशो मिम्ताक्ड।

6 मोपतीके गो इस्राएली आन कली ‘गो परमप्रभु यावे नड। गो इजीप्त डा मुर आन गेशो श्येत नु इन वाइल दुम्शो गेय रे प्रोंइननी। गो इजीप्त डा मुर आन कली ठेयब सजाइ गेशा, आं ठेयब सक्तिमी इन कली गुंइनुड।

7 मिनु गो इन कली आं मुर सेल्नुड। गो इन परमप्रभु दुम्नुड। मिनु गो इन कली इजीप्त डा मुर आन गेशो श्येत रे गुंइब, परमप्रभु यावे, इन परमप्रभु नड, दे तुइक्चा माल्नीनी।

8 मिनु गो अब्राहाम, इसहाक नु याकूब आन कली गेनुड, दे कसम जशो रागीम इन कली चाक्दीत्नुड। मिनु मेको रागी इन के दुम्ब। गो परमप्रभु यावे नड’ दे गे इस्राएली आन कली देंचा माल्नेवे” देंत। उत्पत्ती २२:१६

9 मिनु मोसामी मेको लोव्र इस्राएली आन कली नेंपदानु, वाइल दुम्तीके नु आन थुं लुकच लतीके मोसा आ लोव्र मनेनेम।

10 मिनु परमप्रभु यावेमी मोसा कली

11 “गे इजीप्त डा पिप फाराओ कली ‘इस्राएली आन कली इन रागी रे लचा गेने’ दे मतो” देंत।

12 मिनु मोसामी परमप्रभु यावे कली “इस्राएलीपुकीमी ला यो आं लोव्र मनेनेम हना, गो ब्वाक्स मजोक्ब मुर आं लोव्र फाराओम दोपा नेंबा?” दे लोव्र लेत्ताक्व। प्रस्थान ६:३०; प्रस्थान ४:१०

13 मोपा परमप्रभु यावेमी मोसा नु हारून आस कली इस्राएली आन पर्वम लोव्र पाप्टु। मिनु “गेमी इजीप्त डा पिप फाराओ कली ‘इस्राएली आन कली इन रागी रे लचा गेचा माल्नीनी’ दे रुप्पतीस” देंत।

मोसा नु हारून आस किकी पिपी

14 इस्राएली आन किकी पिपी आन दातेमी ठेयब दुम्शो, सु सु बाक्मा बाक्त देंशा हना, इस्राएल आ डोंडती जरमेशो तौ रूबेन मेको आ तौपुकी हनोक, पल्लु, हेसोन नु कारमी बाक्मा बाक्त। मेको रूबेन आ खिं खिं डा मुर बाक्मा बाक्त। उत्पत्ती ४६:१-११

15 सिमियोन आ तौपुकी येमुएल, यामीन, ओहद, याकीन नु सोहार बाक्मा बाक्त। मिनु का कनानी मीश रे जरमेशो शावल बाक्माक्त। मेको सिमियोन आ खिं डा मुर बाक्मा बाक्त।

16 मिनु लेवी आ तौ आन खिं खिं डा मुर सु सु बाक्मा बाक्त देंशा हना, गेरशोन, कोहाथ नु मेरारी बाक्मा बाक्त। मिनु लेवी सहे का ३७ बर्स ब्रोंडमाक्त। १इतिहास ५:२७-३०; १इतिहास ६:१-४

17 गेरशोन आ तौ लिब्नी नु शिमेड बाक्सा बाक्त।

18 कोहाथ आ तौपुकी अग्राम, इच्हार, हेब्रोन नु उज्जीएल बाक्मा बाक्त। मिनु कोहाथ सहे का ३३ बर्स ब्रोंडमाक्त।

19 मिनु मेरारी आ तौ माहली नु मुशी बाक्सा बाक्त। मेको लेवी आ खिं खिं डा मुर बाक्मा बाक्त।

20 मिनु अग्राममी आ आफ आ समी चाक्गा बाक्त। मेको आ नें योकेबेद बाक्माक्त। मेकोमी हारून नु मोसा थिमाक्त। अग्राम सहे का ३७ बर्स ब्रोंडमाक्त। प्रस्थान २:१; लेवी १८:१२

21 इच्हार आ तौपुकी कोराह, नेफेग नु जिक्की बाक्मा बाक्त। गन्ती १६:१

22 उज्जीएल आ तौपुकी मीशाएल, एल-साफान नु सिथ्री बाक्मा बाक्त। लेवी १०:४

23 मिनु हारूनम नहशोन आ समी अम्मीनादाब आ तमी एली-शेबा चाक्गा बाक्त। मेकोमी नादाब, अबीहु, एलाजर नु इथामार थिमाक्त। प्रस्थान २८:१

24 कोराह आ तौपुकी अस्सीर, एल्काना नु अबी-आसाफ बाक्मा बाक्त। मेको कोराह आ खिं डा मुर बाक्मा बाक्त।

25 मिनु हारून आ तौ एलाजरम पुतीएल आ तमी चाक्गा बाक्त। मेकोमी फिनेहास थिमाक्त। मेकोपुकी लेवी आ खिं डा ठेयब मुर बाक्मा बाक्त। गन्ती २५:७

26 मिनु परमप्रभु यावेमी हारून नु मोसा कली “गे इस्राएल डा मुरपुकी हुल हुल पा इजीप्त रागी रे गुंडदीस” देंत। प्रस्थान ६:१३

27 मिनु मेको निक्शीमी इजीप्त डा पिप फाराओ कली “इस्राएल डा मुर आन कली लचा गेने” दे लोत्र पाम्ताक्से।

28 मिनु परमप्रभु यावेमी इजीप्त रागीमी मोसा कली

29 “गो परमप्रभु यावे नड। गो इजीप्त डा पिप फाराओ कली आं देंशो लोत्र नेल्ल माइक्चा माल्नेवे” देंत।

30 मिनु मोसामी परमप्रभु यावे कली “गो ब्वाक्स मजोक्ब मुर नड। दोपा फाराओमी आं लोत्र नेंबा डा?” देंत। प्रस्थान ६:१२

## 7

### मोसामी चिन्ड कोंडशो

1 परमप्रभु यावेमी मोसा कली “नेनो, गो इ कली फाराओ आ डोंडती परमप्रभु खोदेंशो पा चिन्ड कोंडने चाप्ब सेल्लन। इ लोक्ब हारून चहिं इ लोत्र पाइब दुम्ब। प्रस्थान ४:१६

2 गो इ कली मार मार माइक्ना, गे मेको देंचा माल्नेवे। मिनु इ लोक्ब हारूनमी ‘इस्राएली आन कली इन रागी रे लचा गेन’ दे फाराओ कली देंचा माल्ब।

3 तन्न गो फाराओ कली काइ मटीब सेल्लुड। मिनु गो इजीप्त रागीमी शुश चिन्ड नु छक लाक्चा डा गेय कोंडनुड। प्रस्थान ४:२१

4 मिनु फाराओमी इस कली मटीब। मिनु गो इजीप्त डा मुर आन कली थाम्पान सजाइ गेशा, आं शुश मुर आन कली इजीप्त रागी रे गुंडनुड।

5 गो इजीप्त डा मुर आन कली थाम्पान सजाइ गेशा, इस्राएली आन कली आन दाते रे गुंडदुनु 'गो परमप्रभु यावे नड' दे इजीप्त डा मुर आन कली तुइक्पाइकुनुड" देंत। प्रस्थान ७:१७; प्रस्थान ८:१८; प्रस्थान ९:२९; १सामुएल १७:४६; १राजा २०:२८; २राजा १९:१९; इजीकीएल २९:६

6 मिनु मोसा नु हारूनमी परमप्रभु यावे आ देशो पाम्ताक्से।

7 मोपा फाराओ नु लोव पची ना, मोसा ८० बर्स दुम्शो बाक्त। हारून ८३ बर्स दुम्शो बाक्त।

### कोक्के ब्वारशा बुस्स दुम्पाइशो

8 मिनु परमप्रभु यावेमी मोसा नु हारून आस कली

9 "फाराओमी इस कली 'छक लाक्चा डा चिन्ड कोइदीसे' देंमेनु, गेमी हारून कली 'इ कोक्के बुस्स दुम्पाइक्चा कली फाराओ आ डोंइती ब्वारदो' देंचा माल्नेवे। मिनु मेको कोक्के बुस्स दुम्ब" देंत। प्रस्थान ४:३

10 मोपा मोसा नु हारूनमी परमप्रभु यावे आ देशो पशा, फाराओ आ बाक्तीकेमी लाम्ताक्स। मिनु हारूनमी आ कोक्के फाराओ नु आ गेय पाइब मुर आन डोंइती ब्वारताक्व। मिनु मेको कोक्के बुस्स दुम्त।

11 मिनु फाराओमी इजीप्त रागी डा जादू नु टुना मुना पाइब आन कली ब्रेत्ताक्मी। मेकोपुकीमी यो आन टुना मुनामी हारून खोदेशो पा आन कोक्के ब्वारशा, बुस्सपुकी सेल्लेक्म। प्रस्थान ७:२२; प्रस्थान ८:३; उत्पत्ती ४१:८; २तिमोथी ३:८

12 तन्न हारून आ कोक्के रे दुम्शो बुस्सुमी मेको आन कोक्के रे दुम्शो बुस्स नेल्ल आन कली दाक्तीमी।

13 मिनु परमप्रभु यावेमी देशो खोदेशो पा फाराओ काइ मटीब दुम्शा, मोसा नु हारून आस देशो लोव मबिस्से। प्रस्थान ४:२१

### ब्वाक्कु नेल्ल हुश सेल्शो

14 मिनु परमप्रभु यावेमी मोसा कली "फाराओ काइ मटीब दुम्त। आं मुर आन कली लचा मगेब।

15 गे दीसा सुनी फाराओ गुम्थ लचा माल्नीसी। फाराओ ब्वाक्कु आ नेक्था लमेनु, गे मेको आ क्येडा डोंइती खोला आ नेक्था जाक्दीशशा, रिम्शा बाक्चा माल्नीसी। बुस्स दुम्ब कोक्के यो लाइक्चा माल्नीसी।

16 मिनु गे मेको कली "परमप्रभु यावे, हिबू मुर आन परमप्रभुमी इन कली, आं मुर आन कली आं कली चढेतीक चढेथ गोरशो रागी लचा गेवो, देंती। तन्न गे मुल सम्म आं लोव मटिवी" देंत" देनीस। प्रस्थान ५:१

17 मोपतीके परमप्रभु यावेमी "गो परमप्रभु यावे नड। गे आं पतीकेमी तुइक्नेवे। गो आं कोक्केमी नील खोला डा ब्वाक्कु तुप्नुड। मिनु मेको हुश दुम्ब। प्रस्थान ४:९

18 मिनु खोला डा डांड नेल्ल बेक्नीम। खोला शुश राक्शो रिना पाइब। मिनु इजीप्त डा मुरपुकी मेको ब्वाक्कु तूचा ग्रान्ना दीनीम" दे मोसा कली देंत।

19 मिनु परमप्रभु यावेमी मोसा कली "गेमी हारून कली 'इ कोक्के इजीप्त रागी डा ब्वाक्कु हुश दुम्पाइक्चा कली ब्वाक्कु तारी दिंदो। नादी, खोला, कुवा नु इनार आन तारी दिंदो। मुर आन चाक्शो ठेका नु गरम बाक्शो ब्वाक्कु यो हुश दुम्ब' दे हारून कली देनो" देंत। प्रकाश ११:६

20 मिनु परमप्रभु यावेमी मोसा नु हारून कली दोदेशो देंमे, मोदेशो पाम्ताक्स। मोसामी फाराओ नु आ गेय पाइब आन डोंइती आ कोक्के खोला डा ब्वाक्कु तार दिशा तुबानु, हुश दुम्त।

21 मोपा नील खोला डा डांड नेल्ल बेक्तेक्म। मिनु ब्वाक्कु राक्शो रिना पाइशो दुम्त। इजीप्त रागी डा मुर नेल्लेमी नील खोला डा ब्वाक्कु तूने मचबेम। इजीप्त रागी नेल्ल हुशेइ हुश दुम्त।

22 इजीप्त रागी डा टेयब टुना मुना पाइबपुकीमी यो आन मन्तरमी आस पशो खोदेशो पाम्तेक्म। फाराओ आ थुं चहिं डोंइती डा खोदेशो पा काइ मटीब दुम्माक्त। मिनु मोसा नु हारून आस देशो मटिवो। परमप्रभु यावेमी डोंइती दोदेशो देंमे, मोदेशो दुम्त। प्रस्थान ७:११

- 23 मिनु फाराओ आ खिं लेम्माक्त। मार दुम्मे, मारेड ममिम्ता बाक्त।  
 24 इजीप्त रागी डा मुरपुकीमी नील खोला आ नेक्था शुश कुवा दोम्तेक्म। मारदे हना नील खोला डा ब्वाक्कु काइ तूचा मँदुमँ।  
 25 मोपा परमप्रभु यावेमी नील खोला डा ब्वाक्कु तुप्शा, हुश दुम्शो ७ नाक्ती दुम्त।

## 8

### कुक्कु यूपाइश्शो

- 1 मिनु नोले परमप्रभु यावेमी मोसा कली “गे फाराओ आ बाक्तीक लावो। परमप्रभु यावेमी आ मुर आन कली लचा गेमी। प्रस्थान ५:१  
 2 गे लचा मगेतीनी हना, कुक्कुपुकीमी इ रागी डा मुर नेल्ल आन कली श्येत गेपाइक्नुडमी।  
 3 नील खोलाम शुश कुक्कु यूपाइक्नुड। मेकोपुकी इन खिंम बाक्थ जाक्नीम। इन इप्तीक कोठामी यो ओव्रनीम। इन खाट तार डोइक्नीम। मिनु इन दरवार डा गेय पाइब आन खिंमी यो ओव्रनीम। मुर आन तार नु आन चुप्लुमी यो बाक्नीमी। आन फस नित्तीके बोस आगाम ओव्रनीम।  
 4 मेको कुक्कुपुकी इन तारी, इन मुर आन तारी नु इन दरवार डा गेय पाइब आन तारी जाक्नीम, दे परमप्रभु यावे आ देशो लोत्र बाक्ब, दे मतो” दे मोसा कली देंत।  
 5 मिनु नोले परमप्रभु यावेमी मोसा कली “गेमी हारून कली ‘इ कोक्के खोला नेल्ल आन तार दिंदो। मोपा गे इजीप्त रागीम कुक्कु यूपाइक्नेवे’ दे हारून कली देनो” देंत।  
 6 मिनु हारूनमी आ गुड इजीप्त डा ब्वाक्कु तारी दिताक्व। मिनु कुक्कुपुकी यूशा, इजीप्त रागी नेल्ल ब्रीतेक्म।  
 7 इजीप्त रागी डा जादू टुना मुना पाइबपुकीमी यो आन मन्तरमी हारून खोदेशो पा कुक्कु यूपाइक्तेक्म। प्रस्थान ७:११  
 8 मिनु फाराओमी मोसा नु हारून आस कली ब्रेप्पाइश्शा “आं पर्वम नु आं मुर आन पर्वम परमप्रभु यावे कली पुनीस। कुक्कु लमल, दे पुनीस। गोमी इस्राएल जात डा मुर आन कली परमप्रभु यावे कली च्देथ लचा गेनुड” दे मोसा नु हारून आस कली देंत। प्रस्थान ८:२४; प्रस्थान ९:२८; प्रस्थान १०:१७  
 9 मिनु मोसामी फाराओ कली “हजुर, इन कली नु इन गेय पाइब आन कली, इन मुर आन खिं नु इन खिं रे कुक्कु लमल, नील खोलाम ला बाक्मल, दे गेना पुंडचा माल्नस्कु?” दे हिल्लो पापुतु।  
 10 मिनु “दीसा कली पुनीस” दे लोत्र लेत्ताक्व। मोसामी “परमप्रभु यावे आंइ परमप्रभु खोदेशो सुड मबा, दे तुडक्पाइक्चा कली इन देशो दीसा दुम्ब। प्रस्थान ९:१४; प्रस्थान १५:११; ब्यवस्था ३३:२६; २सामुएल ७:२२; येरमीया १०:६  
 11 दीसा कुक्कुपुकी इन बाक्तीक, इन गेय पाइब नु इन मुर इन खिं नेल्ल रे गाक्नीमी। नील खोलाम ला बाक्नीम” देंत।  
 12 मोपा मोसा नु हारून फाराओ आ खिं रे लाम्ताक्स। मिनु मोसामी मेको परमप्रभु यावे आ सोइश्शो कुक्कु आ पर्वम पुंडतु।  
 13 मिनु परमप्रभु यावेमी मोसामी पुंडशो नेंशा पापुतु। खिंम, लाडगाम नु रूम बाक्शो कुक्कु नेल्ल वेक्तेक्म।  
 14 मुरुमी बेक्शो कुक्कु नेल्ल खुप्ताक्म। मिनु रागी नेल्ल थाम्पा रिना पाइक्तु।  
 15 इजीप्त रागी डा फाराओ चहिं मेको कुक्कु रे ब्रोंइशो तशा, आ थुं डोंइती डा खोदेशो पा काइ मटीब दुम्माक्त। मिनु मोसा नु हारूनम देशो लोत्र मपव। डोंइती परमप्रभु यावेमी मो देशो बाक्माक्त। प्रस्थान ४:२१

### भुस्ना यूपाइश्शो

- 16 मिनु नोले परमप्रभु यावेमी मोसा कली “गेमी हारून कली ‘इ कोक्के दिंशा, फुरक तुपो’ दे मतो। मिनु मो पवानु, इजीप्त रागीमी फुरक नेल्ल भुस्ना दुम्शा फोंइनीम” दे मोसा कली माइक्तु। प्रस्थान  
 17 मिनु हारूनमी फुरक तुबानु, इजीप्त रागी नेल्लेमी मुर नु बस्तु भाव आन तारी भुस्ना शुश फोंइतेक्म।

18 इजीप्त रागी डा जादू टुना मुना पाइबपुकीमी यो हारून खोदेशो पा भुस्ना ग्रूपाइक्चा माल्तेक्म। तन्न मचबेम। मुर नु बस्तु भाव आन तारी भुस्ना शुश जुक्ताक्म। प्रस्थान ७:११

19 मिनु जादू टुना मुना पाइबपुकीमी फाराओ कली “एको परमप्रभुमी पाप्तु” देमा बाक्त। फाराओ चहिं काइ मटीब दुम्माक्त। मिनु मोसा नु हारून आस देशो लोत्र मटिव। परमप्रभु यावेम डोंइती देशो खोदेशो दुम्त। भजन संग्रह ६४:१०; भजन संग्रह ७२:१८; लूका ११:२०

### डांस ग्रूपाइश्शो

20 मिनु परमप्रभु यावेमी मोसा कली “सुनी कना बोक्को। फाराओ खोला लमेनु, मेको कली गुम्थ लावो। मिनु फाराओ कली ‘परमप्रभु यावेमी, आं मुर आन कली आं कली चढेथ लचा गेवो। प्रस्थान ५:१

21 नेनो, गे आं मुर आन कली लचा मगेप्तीवी हना, गो इ कली, इ गेय पाइब आन कली नु इ मुर नेल्ल आन कली श्येत जपाइक्चा कली इ खिंमी, इ रागी डा मुर आन खिंमी डांसम ब्रीपाइक्नुड। रू नेल्ल डांसम ब्रीपाइक्नुड।

22 मेको मो दुम नाक्ती आं मुर आन बाक्तीके गोशेनमी चहिं डांस मगूपाइक्नुड। अरु इजीप्त रागीमी ग्रूपाइक्नुड। आं पर्वम तुइक्पाइक्चा कली मो पाइनुड। मिनु गे आं पर्वम परमप्रभु यावे मेको रागीम बाक्ब, दे तुइक्चा माल्नेवे। प्रस्थान ७:५

23 मोदेशो पा गो आं मुर आन बाक्तीकेमी डांस मगूपाइक्नुड। इ मुर आन बाक्तीकेमी ला डांस ग्रूपाइक्नुड। दीसा गे तुइक्नेवे, देनो’ देत” दे परमप्रभु यावेमी मोसा कली देत।

24 मिनु परमप्रभु यावेमी आ देशो पाप्तु। डांस शुश फोंइशा फाराओ आ खिं, आ दरवारम गेय पाइब आन खिं, इजीप्त रागी नेल्लेमी शुश डांस फोंइशा ब्रीतेक्म। मिनु डांसमी मेको रागी नेल्ल खतम सेल्लेक्म।

25 मिनु नोले फाराओमी मोसा नु हारून आस कली ब्रेप्पाइश्शा “लने, इन परमप्रभु कली आं रागी उइ चढेने” देत।

26 मोसामी चहिं “मो पचा मदुम्ब। मारदे हना परमप्रभु यावे, आंइ परमप्रभु कली चढेशो तशा, इजीप्त डा मुर ग्रांग्रा दीनीम। मोपा इजीप्त डा मुर आन डोंइती आन मदाक्शो गेय पकानु, मेकोपुकीमी आंइ कली फुल्लु आप्शा, साइक्नीम। उत्पती ४३:३२; उत्पती ४६:३४

27 गोपुकी नाक्त सां डा लां गाक्शा, गोरशो रागीम लशा, परमप्रभु यावेम देशो खोदेशो पा चढेचा माल्नीकी” देत। प्रस्थान ३:१८

28 मिनु फाराओमी “गो इन कली गोरशो रागीम परमप्रभु यावे, इन परमप्रभु कली चढेथ लचा गेनुड। शुश डोन चहिं मलने। आं पर्वम यो पुनीस” देत।

29 मिनु मोसामी “मुल गो एकेर रे लशा, परमप्रभु यावे कली पुंडनुड। मार पुंडनुड देशा हना ‘दीसा फाराओ, आ गेय पाइब नु रागी डा मुर नेल्ल आन बाक्तीके रे डांस प्रोक्पतीने’ दे पुंडनुड। तन्न लोत्र का पाइनुड। गे आंइ कली परमप्रभु यावे कली चढेचा दुम्ब, दे नोले ‘लचा मगेनुड’ देशा, जोल मपने” दे मोसामी फाराओ कली देत।

30 मो देशा मोसा फाराओ आ खिं रे लशा, परमप्रभु यावे कली पुंडतु। प्रस्थान ८:८

31 मिनु परमप्रभु यावेमी मोसा आ पुंडशो लोत्र नेंशा पाप्तु। मिनु डांस फाराओ आ खिं, आ गेय पाइब नु मुर नेल्ल रे तिल्लु। काइ मलीम।

32 तन्न फाराओ लेंशा काइ मटीब दुम्शा, इस्राएली आन कली लचा मगेव। प्रस्थान ४:२१

## 9

### बस्तु भाव बेक्पाइश्शो

1 मिनु परमप्रभु यावेमी मोसा कली “फाराओ आ बाक्तीके लावो। मिनु गे परमप्रभु यावे, हिबू मुर आन परमप्रभुमी इन कली ‘आं मुर आं कली चढेथ लचा गेवो। प्रस्थान ५:१

2 नेनो, गे मेको आन कली लचा मगेथु, तेक्तीवी हना, यसैया १:२०

3 परमप्रभु यावेमी इन गोठम बाकशो बस्तु भाव आन कली ठेयब रोइ पपाइक्व। इन शारा, गधा, दलओठ, बी ब्यफ नु क्यारश भेडा नेल्ल आन कली बेक्तीक रोइ पपाइक्व। प्रस्थान ३:२०

4 तन्न इस्राएली आन बस्तु भाव आन कली रोइ मपपाइक्व। इजीप्त डा मुर आन बस्तु भाव आन कली चहिं रोइ पपाइक्व। इस्राएली आन बस्तु भाव मबेक्नीम' दे फाराओ कली माइक्वा माल्नेवे” दे परमप्रभु यावेमी मोसा कली देंत। प्रस्थान ८:१८

5 मिनु परमप्रभु यावेमी “गो दीसा इजीप्त रागीम मो पाइनुड” देंत।

6 मिनु आ दीसा परमप्रभु यावेमी आ देंशो पाप्तु। इजीप्त रागी डा मुर आन बस्तु भाव बेक्मा बाक्त। तन्न इस्राएली आन बस्तु भाव चहिं मबेक्म।

7 मिनु फाराओमी इस्राएल डा मुर आन बस्तु भाव यो बेक्मा कों, दे कोव्रथ मुर सोइक्ताक्व। तन्न का यो मबेक्शो बाक्तेक्म, दे तुइक्पाइक्तेक्म। मोपा यो फाराओ काइ मटीब दुम्शा, इस्राएली आन कली लचा मगेव। प्रस्थान ४:२१

### परमप्रभुमी गार मुपाइशो

8 मिनु नोले परमप्रभु यावेमी मोसा नु हारून आस कली “गे चुप्लु डा पुलु हुइशशा कुरशा लस। मिनु मोसामी फाराओ आ डोंइती मेको पुलु सरीड गे फ्रचा माल्ब।

9 मेको पुलु फुरक दुम्शा, मुर नु बस्तु भाव आन कली मरिम्शो गार मुपाइक्व। इजीप्त रागी नेल्लेमी मोदेशो दुम्ब” देंत। ब्यवस्था २८:२७

10 मिनु मोसा नु हारूनमी चुप्लु डा पुलु हुइशशा कुरशा, फाराओ आ डोंइती राप्ताक्स। मिनु मोसामी मेको पुलु सरीड गे फ्रान्तु। मिनु मुर नु बस्तु भाव नेल्ल शुश गार मुतेक्म। प्रकाश १६:२

11 मिनु इजीप्त रागी डा जादू पाइबपुकी यो शुश गार मुशा, रोइ पशा, मोसा आ नेक्था बाक्ने मचबेम।

12 परमप्रभु यावेमी फाराओ कली काइ मटीब दुम्पदा बाक्त। मिनु मोसा नु हारून आस लोव्र मटिव। परमप्रभु यावेमी मोसा कली डोंइती दोदेशो देमे मोदेशो दुम्त। प्रस्थान ४:२१

### ठेयब मुप्स यिपाइशो

13 मिनु परमप्रभु यावेमी मोसा कली “सुनी कना बोक्शा, फाराओ कली गुम्थ लशा, परमप्रभु यावे, हिबू मुर आन परमप्रभुमी इन कली ‘आं मुर आन कली आं कली चढ़ेथ लचा गेवो। प्रस्थान ५:१

14 मारदे हना मुल रे गेचशो श्येतम इ कली, इ गेय पाइब आन कली नु इ मुर नेल्ल आन कली सोइक्नुड। रागी रागीमी आं खोदेशो सुइ मबाक्व, दे इ कली तुइक्पाइक्नुड। प्रस्थान ८:६

15 मुल गो इ कली नु इ मुर आन कली बेक्तीक रोइ पपदु वा।

16 तन्न गो आं सक्ति रागी नेल्लेम तुइक्पाइक्वा कली इ कली मुल सम्म ब्रोंइचा गेता। आ नें रागी नेल्ल डा मुर आन कली तुइक्पाइक्वा, दे इ कली ब्रोंइचा गेता। प्रस्थान १४:४; रोमी ९:१७

17 गे आं मुर आन कली लचा मगेतीके, इ ठेयब लेशो तुइक्ताक्व।

18 नेनो, दीसा गो शुश मरिम्शो मुप्स यिपाइक्नुड। मुल सम्म इजीप्त रागीमी मुर बाक्वा गोव्रमे रे मोदेशो ठेयब मुप्स गेनायो मयिशा बाक्व।

19 मोपतीके इ बस्तु भाव आन कली खिं आगा ओंइदो। मारदे हना मुर नु बस्तु भाव, सु सु लाडगाम बाक्नीमी, मेको मुप्सीम तुप्शा बेक्नीम' देनो देंत” दे परमप्रभु यावेमी मोसा कली देंपाइक्तु।

20 फाराओ आ गेय पाइब आन दातेमी सु सु परमप्रभु यावे क्येडा हिंमा, मेकोपुकीमी आन गेय पाइब नु आन बी ब्यफ, क्यारश भेडा आन कली खिं आगा ओंइताक्व।

21 सु सु परमप्रभु यावे आ देंशो लोव्र क्येडा महिंमा, मेकोपुकीमी चहिं आन गेय पाइब नु आन बस्तु भाव आन कली खिं आगा मओंइदेम।

22 मिनू नोले परमप्रभु यावेमी मोसा कली “इ गुड सरीड गे दिंदो। मो पवीनु, इजीप्त रागी नेल्लेमी मुप्स यीब। मुप्स यिशा, मुर बी ब्यफ, क्यारश भेडा नु रू आन तारी देल्ब” दे परमप्रभु यावेमी मोसा कली देंत।

23 मिनू मोसामी आ कोक्के सरीड गे दिंदानु, बुंबु चिला पा, मुप्स यित। मोपा परमप्रभु यावेमी इजीप्त रागीमी मुप्स यिपाइव्तु। मिनू परमप्रभु यावेमी चिला दाप्पाइश्शा, मुप्स यिपाइव्तु। प्रकाश १६:२१

24 चिला पना पन मुप्स यित। मेको मुप्स थम कोल्कोल्शो बाक्तेकम। इजीप्त रागीम मुर बाक्चा गोव्रमे रे मोमो कोल्शो मुप्स गेनायो मतशो बाक्तेकम।

25 मिनू इजीप्त रागी डा रूम वाशो मारेइ मारेइ मुप्सीमी श्येतथ पोक्तु। मुर नु बी ब्यफ, क्यारश भेडा आन कली साइव्तु। रूम मार मार खुम्शो बाक्मे, मेको नेल्ल साइश्शा, रवा आन कली यो जिक्तु।

26 इस्राएली आन बाक्तीके गोशेनमी ला मुप्स मयी। प्रस्थान ९:४; प्रस्थान ८:१८

27 मिनू फाराओमी मोसा नु हारून आस कली ब्रेताकमसी। मिनू मेको आस कली “मुल गो पाप पाता। परमप्रभु यावे ठीक पाइब बाक्ब। गो नु आं मुरपुकीम मरिम्शो पाइतक।

28 आंइ पबंम परमप्रभु यावे कली पुनीस। एको बुंबु नु मुप्स मयिपदल। गो इन कली लचा गेनुड। मुल गे एकेर बाक्चा ममाल्नीनी” देंत। प्रस्थान ८:४

29 मिनू मोसामी “गो सहर रे लशा, इन पबंम आं गुड पोक्शा, परमप्रभु यावे कली पुंइनुड। नोले बुंबु पचा नु मुप्स यिचा नाइक्ब। मिनू गे रागी नेल्ल परमप्रभु यावे केन बाक्ब, दे तुइक्नीनी। प्रस्थान ७:५

30 तन्न गे नु इन दरवार डा गेय पाइबपुकी मुल सम्म परमप्रभु, परमप्रभु यावे कली महिंशो बाक्नीनी, दे तुइक्ताकड” दे फाराओ कली देंत।

31 मेको मुप्सीमी मार पाप्तु देशा हना, सनपाट नु क्योव्रज नेल्ल खतम सेल्लु। मारदे हना क्योव्रज बाला दुम्ने थुम्शो नु सनपाट बोइक्ने थुम्शो बाक्त।

32 तन्न चेरब नु अर्को अन्न चहिं नोले ला मीबाक्तेकम। मोपतीके मसद।

33 मोदेशो दुम्शा मोसामी फाराओ आ बाक्तीके रे लशा, आ गुड परमप्रभु यावे गे पोक्शा, फाराओ आ पबंम पुंइतु। मिनू बुंबु पा, मुप्स नु रेउ यिचा नाइक्ताक्व।

34 मिनू फाराओ नु आ गेय पाइबपुकीमी रेउ, मुप्स यिचा नु बुंबु पचा नाइश्शो तशा, लेंशा पाप पाक्तेकम। मोपा मटीम।

35 फाराओ काइ मटीब दुम्शा, इस्राएली आन कली लचा मगेव। परमप्रभु यावेमी मोसा कली देशो खोदेशो दुम्त। प्रस्थान ४:२१

## 10

### सल्हा माले यूपाइश्शो

1 मिनू परमप्रभु यावेमी मोसा कली “गे फाराओ कली आं चिन्डपुकी कोइचा कली गुम्थ लसे। मारदे हना गो मेको नु आ गेय पाइब आन कली काइ मटीब दुम्पाइक्ता।

2 मिनू गे इ चच युइ आन कली ‘गो इजीप्त डा मुर आन कली मार मार पडा’ मेको शेंदो। गो मोदेशो चिन्ड कोइब बाक्नुड। ‘गो परमप्रभु यावे नड’ दे नेल्लेमी तुइक्तमेक्ल” देंत। प्रस्थान ६:२-८

3 मिनू मोसा नु हारून फाराओ आ बाक्तीके जाक्दीश्शा, मेको कली “हिबू आंइ परमप्रभु यावे, हिबू मुर आन परमप्रभुमी इन कली ‘गेना सम्म गे आं डोंइती ठेयब लेश्शा बाक्नेवे? आं मुर आन कली आं कली चढेथ लचा गेवो। प्रस्थान ५:३

4 नेनो, गे आं मुर आन कली लचा मगेनेवे हना, दीसा इ रागीम शुश सल्हा माले जाक्पाइक्नुड।

5 मेकोपुकीमी रागी मतचा डा पा सुम्नीम। मिनू मुप्स रे पा गिग खाइ मार मार लीशो बाक्मा, मेको नेल्ल नेक्नीम। रवा आन सफा यो नेल्ल नेक्नीम।

6 मिनू मेकोपुकी इ खिं, इ दरवार डा गेय पाइब आन खिं नु नेल्ल इजीप्त डा मुर आन खिं खिंम ओव्रशा ब्रीनीम। इ किकी पिपीम मोदेशो गेनायो मतामे’ दे परमप्रभुमी इन कली देंत” दे मोसामी देंत। मिनू मोसा फो यूशा गाक्त।



7 मिनु फाराओ आ दरवार डा गेय पाइबपुकीमी फाराओ कली “मेको मुरुम आंड कली गेना सम्म श्येत गेबा? मेको मुर आन कली परमप्रभु यावे, आन परमप्रभु कली चढेचा गेने। इजीप्त रागी मुल थुम्साक्व, दे मतुइक्नीनी?” देमा बाक्त।

8 मिनु मेकोपुकीमी मोसा नु हारून आस कली फाराओ आ बाक्तीके लेशशा चाक्तेक्म। मिनु फाराओमी मेको आस कली “गे लने। परमप्रभु यावे, इन परमप्रभु कली गेय पने। सु सु लाइक्नीनी?” दे हिल्लो पाप्तु।

9 मिनु मोसामी “परमप्रभु यावे आ चाड मानेचा कली गो तमी तौ, खाल्पी खाल्पा, बी ब्यफ नु क्यारश भेडा नेल्ल लाइशशा, लचा माल्नीकी” देंत। प्रस्थान ५:१

10 मिनु फाराओमी मेको आस कली “इन परमप्रभु यावे गे नु बाक्शो खोदेशो पा गो इन कली नु इन आल नु लचा मगेनुड। गे मरिम्शो पचा माल्नीनी, दे आंमा तुइक्नीसी।

11 मोदेशो मदुम्ब। वोंइश मुरपुकी ला परमप्रभु यावे कली चढेथ लने। मारदे हना एकोन इन माल्शो बाक्ब” दे हुइक्ताक्व। मिनु फाराओ आ डोंइती रे खेरतु।

12 मिनु परमप्रभु यावेमी मोसा कली “सल्हा माले थ्रूपाइक्चा कली इ गुइ इजीप्त रागी तार दिंदो। मेकोपुकीम रागीमी मार मार गिग खाइपुकी मुप्सीम हेंशो बाक्मा, मेको ब्वाइनीमी” देंत। प्रस्थान ९:३२

13 मिनु मोसामी आ कोक्के इजीप्त रागी तार दिताक्व। मेको नाक्तर रे आ दीसा सुनी सम्म परमप्रभु यावेमी पूर्व रे फश पपाइक्तु। मिनु सुनी नां सोवमेनु, पूर्व रे पिशो फशेमी सल्हापुकी चाक्तु। योएल १:२-१२; योएल २:१-११

14 मिनु सल्हा मालेमी इजीप्त रागी नेल्ल सुम्तेक्म। डोंइती रे मोदेशो शुश सल्हा माले गेनायो मबाक्शो बाक्मा बाक्त। मिनु नोले यो मोदेशो गेनायो मदुम्माक्त।

15 मेको शुश सल्हा माले बेरमानु, नाक्ती यो नाक्दो खोदेशो पा छिडछिड दुम्त। मेको सल्हा मालेमी मुप्स रे लीशो रू डा वाशो नु रवा डा फल नेल्ल नेक्तेक्म। मार मार गिग बाक्मा, मारेइ महेंदेम। इजीप्त रागी डा रवा नु गिग खाइ नेल्ल नेक्तेक्म।

16 मिनु फाराओमी रीब पा मोसा नु हारून आस कली ब्रेप्पाइक्तु। मिनु मेकोमी “गो परमप्रभु यावे, इन परमप्रभु आ डोंइती पाप पाता। मिनु इस कली यो मरिम्शो पाता। प्रस्थान ९:२७

17 मुल खेयप का ला आं कली माफ गेयीसी, दे पुंडनुड। मिनु आं पर्वम परमप्रभु यावे, इन परमप्रभु कली पुनीस। सल्हा माले खेरशा, अन्काल रे मबेक्पाइक्चा नम, दे पुनीस” दे मोसा नु हारून आस कली माइक्तीम्सी। प्रस्थान ८:४

18 मो देंम नोले मोसा फाराओ आ डोंइती रे लशा, परमप्रभु यावे कली पुंडतु।

19 मिनु परमप्रभु यावेमी नां पेरतीक रागी रे ठेयब फश गिवार सोइक्ताक्व। मेको फश गिवारमी सल्हा माले आन कली हुरशा, लल समुन्द्रम ताइक्ताक्व। मिनु मोपा इजीप्त रागीम सल्हा माले काइ मलीम।

20 तन्न परमप्रभु यावेमी फाराओ कली मबिप्पाइक्चा कली काइ मटीब दुम्पाइक्तु। मोपतीके मेकोमी इस्राएली आन कली लचा मगेव। प्रस्थान ४:२१

### छिडछिड दुम्पाइशो

21 मिनु परमप्रभु यावेमी मोसा कली “इ गुइ सरीड गे पोक्को। मो पवीनु, इजीप्त रागीम हिंचा डा पा छिडछिड दुम्ब” दे माइक्तु।

22 मिनु मोसामी आ गुइ सरीड गे पोक्तु। मिनु इजीप्त रागीमी नाक्त सां सम्म शुश छिडछिड दुम्त। मारेइ मतांइस।

23 मिनु मेकोपुकी मतमुथु, आन बाक्तीक रे बोक्ने मचबेम। तन्न इस्राएली आन बाक्तीकेमी चहिं छेडछेड बाक्त।

24 मिनु फाराओमी मोसा कली ब्रेशशा “लने, परमप्रभु यावे कली गेय पने। इन आल नु मीश आन कली यो लाइक्ने चाप्नीनी। इन बी ब्यफ नु क्यारश भेडा चहिं मेकेरेन बाक्मल” देंत। प्रस्थान १०:१०

25 मोसामी चहिं “आंइ चढेतीक नु चोशा चढेतीक बस्तु भाव नेल्ल लाइक्चा माल्नीकी। मेको ला परमप्रभु यावे, आंइ परमप्रभु कली चढेने चाप्नीकी।

26 गोपुकी आंइ बी ब्यफ, क्यारश भेडा नेल्ल लाइशशा, लचा माल्नीकी। का यो मप्रोंइथु लाइक्चा माल्नीकी। परमप्रभु यावे, आंइ परमप्रभु कली मार चढेचा माल्नीकी मुल मजाकदीशशो सम्म मतुइक्नीकी” दे फाराओ कली माइक्तु।

27 परमप्रभु यावेमी चहिं फाराओ कली काइ मटीब दुम्पाइक्तु। मोपतीके फाराओमी इस्राएली आन कली लचा मगेव। प्रस्थान ४:२१

28 मिनु फाराओमी मोसा कली “मुल एकेर रे लावो। आं कली गुम्थ मपिवो। गे लेंशा आं कली गुम्थ पिते हना, गो इ कली साइक्नन” दैत।

29 मिनु मोसामी “दुम्ब, गो इन कली लेंशा गुम्थ मपीनुड” दैत।

## 11

डोंइती जरमेशो तौ नेल्ल बेक्शो

1 मिनु परमप्रभु यावेमी मोसा कली “फाराओ नु इजीप्त रागी डा मुर आन कली नेल्ल क्येडा नोले डा बेक्चा डा श्येत का गेनुड। मिनु इन कली लचा गेब। लचा गेवानु, नेल्ल इन कली ब्रा बु खेरब।

2 गे मुल इ मुर आन कली ‘वोंइश मुर नु मीश मुरपुकीमी आन नेक्था बाक्ब इजीप्ती आन के सुन नु चांदी के पांइतीक शोंप पुंडचा माल्नीम’ दे शेंचा माल्नेवे” दैत। प्रस्थान ३:२१-२२

3 मिनु परमप्रभु यावेमी इजीप्त डा मुर आन कली इस्राएली आन कली दाक्ब सेल्लु। मिनु मोसा फाराओ आ गेय पाइब नु इजीप्त डा मुर नेल्ल आन डोंइती शुश ठेयब मुर दुम्त।

4 मिनु मोसामी फाराओ नु आ मुर आन कली “परमप्रभु यावे आ देशो लोत्र मार बाक्त देशा हना नाकदो उइक्थ दुम्मेनु, इजीप्ती आन दातेम लाइनुड।

5 इजीप्त रागीमी सु सु डोंइती जरमेशो बाक्मा, मेको बेक्चा माल्नीम। फाराओ आ नोले सासन पाइब डोंइती जरमेशो तौ रे नेल्ल क्येडा आइक्च यात हिल्ल मीश मुर आन डोंइती जरमेशो तौ सम्म नेल्ल बेक्चा माल्नीम। बस्तु भाव आन के यो डोंइती जरमेशो बेक्चा माल्नीम। प्रस्थान ४:२३

6 मिनु इजीप्त रागी नेल्लेमी ठेयब रोंका पा डाक्नीम। डोंइती मोदेशो गेनायो मदुम्शो बाक्त। मिनु नोले यो लेंशा मदुम्ब।

7 इस्राएली आन दातेमी चहिं मुर नु बस्तु भाव आन चां का यो महेम्ब। परमप्रभु यावेमी इजीप्त डा मुर आन कली नु इस्राएल डा मुर आन कली खाल का डा मपाइब, दे तुइक्तमेक्ल। प्रस्थान ९:४

8 मिनु नोले इन गेय पाइब नेल्लेमी आं डोंइती खुम्की पा बाप्शा, आं कली ‘गे नु इन नोले खोइक्ब मुरपुकी एक रे लने’ देंनीम। मिनु गो लाइनुड” दे मोसामी फाराओ कली दैत। मिनु मोसा फाराओ आ बाक्तीके रे शुश गाइशशा चुरशा गाक्त।

9 मिनु परमप्रभु यावेमी मोसा कली “इजीप्त रागीम आं छक लाक्चा डा शुश चिन्ड दुम्ल, दे फाराओम इ कली मटिपदु” दैत।

10 मोसा नु हारूनमी फाराओ आ डोंइती मेको छक लाक्चा डा चिन्ड मार मार नेल्ल पाम्ताक्स। इस्राएल डा मुर आन कली लचा मगेवल, दे परमप्रभु यावेमी फाराओ कली काइ मटीब दुम्पाइक्तु। प्रस्थान ४:२१

## 12

डोंइती डा पास्सा चाड

गन्ती ९:१-१४; ब्यवस्था १६:१-८

1 मिनु मोसा नु हारून इजीप्त रागीम बाक्सानु, परमप्रभु यावेमी मेको आस कली

2 “मुल जाक्शो महिना बर्स डा डोंइती डा महिना दुम्चा माल्ब। प्रस्थान १३:४

3 मिनू गे इस्राएली नेल्ल आन कली 'मेको महिना डा १० नाक्ती खिं का डा ठेयब मुरुमी पाठा का चाक्चा माल्नीम।

4 खिं का कली पाठा का आ श्ये शुश दुम्त हना, आ नेक्था बाक्शो मुर आन कली हिक्शा, दोशो ब्वाइनीमी योक्शा, ब्वचा कली ब्रेत्चा माल्नीम।

5 मेको पाठा मारेइ मदुम्शो थम रिम्शो नु बर्स का डा बोका बाक्चा माल्ब। भेडा के हना यो, क्यारश के हना यो दुम्ब। लेवी २२:२०

6 मिनू मेको महिना डा १४ नाक्ती सम्म मेको बोका कली ठीक पा वोइक्चा माल्नीनी। मिनू नां रिक्चावानु, इस्राएली नेल्लेमी मेको बोका क्योरचा माल्नीनी।

7 तेको खिंमी ब्वाइनीनी, मेको खिं डा मुरुमी बोका आ हुश इच्का लाइशशा, आ खिं डा थाम निक्शी नु लापचो आ पियाम खेक्चा माल्नीनी। प्रस्थान १३:२२

8 मेको नाक्दो मेको बोका आ श्ये ब्वचा माल्नीनी। दोपा ब्वचा माल्नीनी देशा हना, मीम चोशा, बोरब ओस्ती मसुप्शो शोब्ले, कशो खाइ नु ब्वचा माल्नीनी।

9 मेको श्ये क्येख ब्वचा मदुम्ब, लोप्शा ब्वचा यो मदुम्ब। आ पिया, खोइली क्यी नेल्ल मी तारी चोचा माल्नीनी। ब्यवस्था १६:७

10 सुनी सम्म मारेइ हेंत हना, मीम चोशा थुम्चा माल्नीनी।

11 मेको श्ये किप्शुर किप्शा, जुता लिक्शा, गुइमी कोक्के ग्याइशशा, रीब पा ब्वचा माल्नीनी। मारदे हना मेको परमप्रभु यावे आ पास्सा चाड बाक्ब। ब्यवस्था १६:३; यसेया ५२:१२

12 मेको नाक्दो गोमी इजीप्त रागी हिरशा, इजीप्त डा मुर आन डोंइती जरमेशो तौ नेल्ल साइक्नुडमी। बस्तु भाव आन के यो डोंइती जरमेशो नेल्ल साइक्नुडमी। इजीप्त डा देवी देवता नेल्ल आन कली सजाइ गेनुडमी। गो, परमप्रभु यावे मेकोन पाइनुड। गन्ती ३३:४

13 मेको खेक्शो हुश इन खिं डा चिन्ड दुम्ब। तेको खिं हुश खेक्शो तडा, मेको खिं कली हेरशा लाक्नुड। गो इजीप्त रागी डा मुर आन कली बेक्चा डा श्येत गेनुडमी। इन कली चहिं मेको श्येत मगेनुड। हिब्रू ११:२८; प्रस्थान ३०:१२

14 मेको नाक्ती इन कली मिम्तीक नाक्ती दुम्चा माल्ब। मोपतीके आं नेम भोज जचा माल्नीनी। गे बर्स बर्सम मेको चाड परमप्रभु यावे कली मानेचा माल्नीनी। इन पाला नेल्ल आन कली गेना हना यो अरेशो लोत्र बाक्ब।

### बोरब ओस्ती मसुप्शो शोब्ले

15 गे ७ नाक्त सम्म बोरब ओस्ती मसुप्शो शोब्ले जचा माल्नीनी। ७ नाक्त डा डोंइती नाक्ती गे इन खिंम बाक्शो बोरब ओस्ती ताइक्चा माल्नीनी। सुम मेको ७ नाक्तीम बोरब ओस्ती सुप्शो शोब्ले जाइबा, मेको इस्राएली आन दाते रे तिल्चा पुंडसीब। प्रस्थान १३:७; प्रस्थान २३:१५

16 मिनू ७ नाक्त डा डोंइती नाक्ती नु नोले डा नाक्ती परमप्रभु आ नेमी ग्रुम्चा माल्नीनी। मिनू जचा थोत्रक सेल्चा क्येडा लाक्शा, अरु गेय काइ मपने।

17 बोरब ओस्ती मसुप्शो शोब्ले डा चाड मानेचा माल्नीनी। मारदे हना मेको नाक्ती गो इन हुल आन कली इजीप्त रागी रे गुंडताकड। मोपतीके इन पाला मुर नेल्ल आन कली गेना हना यो अरेशो लोत्र बाक्ब।

18 डोंइती डा महिना डा १४ नाक्ती डा नाक्दो रे २१ नाक्त डा नाक्दो सम्म गे बोरब ओस्ती मसुप्शो शोब्ले ला जचा माल्नीनी।

19 मेको ७ नाक्ती इन खिंमी बोरब ओस्ती काइ मवोइक्चा। सुमी बोरब ओस्ती सुप्शो शोब्ले जाइबा, मेको अर्को रागी डा मुर बाक्त हना यो, इस्राएली बाक्त हना यो इस्राएली आन दाते रे तिल्चा पुंडसीब।

20 इन बाक्तीक नेल्लेमी बोरब ओस्ती मसुप्शो शोब्ले ला जने, बोरब ओस्ती सुप्शो शोब्ले मजने' दे माइक्मी" दे परमप्रभुमी देंत।

पास्सा डा पाठा आ हुश

21 मिनू नोले मोसामी इस्राएल डा खाल्पा नेल्ल आन कली ब्रेशशा “इन खिं डा ठेयब मुर आन कली पाठा का का चाक्कीन। मिनू मेको पाठा पास्सा चाड मानेचा कली क्योरीन।

22 मिनू गे हिस्सोप के ब्राक्स लाइशशा, हुश दाइक्तीक बोसुम खुम्शा, लाप्चो आ पिया नु थाम निक्शी कली खेक्तीन। मेको नाकदो सुनी सम्म सुइ लाडगा मगूडीने। प्रस्थान १२:१३

23 परमप्रभु यावे इजीप्त डा मुर साइक्चा कली हिरब। परमप्रभु यावेमी लाप्चो आ पिया नु थाममी हुश खेक्शो तशा, इं खिं हेरशा लाक्ब। मिनू साइक्ब कली इं खिंम ओत्रचा मगेब।

24 मुल रे इन तौ, चच युइ नेल्लेमी एको पास्सा चाड बर्सम बर्सम मानेचा माल्नीम। मेको गेना हना यो लीशो अरेशो लोत्र बाल्ब।

25 मिनू गे परमप्रभु यावेमी देशो खोदेशो पा इन कली गेशो रागी जाक्दीशशा, यो एको चाड मानेचा माल्नीनी।

26 इन आलपुकीम इन कली ‘एको चाड आ अर्थ मार बाक्मे?’ दे हिल्लो पाम्तेक्म हना,

27 गे मेको आन कली ‘इस्राएल डा मुरपुकी इजीप्त रागीम बाक्मानु, परमप्रभु यावेमी इजीप्त डा मुर आन कली साइक्ची ना इस्राएली आन खिं चहिं हेरशा लत। एको हेरतीक आ पर्बम चढेशो बाक्ब’ दैचा माल्नीनी” दे मोसामी दैत। मिनू मुरपुकीमी खुम्की पा बाप्शा, परमप्रभु यावे कली ठेयब सेल्लेक्म।

28 मिनू इस्राएलीपुकीमी लशा, परमप्रभु यावेमी मोसा नु हारून आस कली दोदेशो दैमे, मोदेशो पाम्तेक्म।

### डोंइती डा जरमेशो नेल्ल बेक्शो

29 मिनू नाकदो उइक्थ दुम्मेनु, परमप्रभु यावेमी इजीप्त रागी डा मुर आन डोंइती जरमेशो तौ आन कली साइक्तीमी। फाराओ आ नोले सासन पाइब तौ रे जेल्खानम बाक्ब मुर आन डोंइती जरमेशो तौ नेल्ल आन कली साइक्तीमी। बस्तु भाव आन डोंइती जरमेशो यो साइक्तु। प्रस्थान ४:२३

30 मिनू मेको नाकदो फाराओ, आ गेय पाइबपुकी नु इजीप्त रागी डा मुर नेल्ल बोक्तेक्म। इजीप्त रागीमी ठेयब रोंका पा डाक्तेक्म। मारदे हना खिं खिं नेल्लेमी मुर बेक्तेक्म। प्रस्थान ११:६-७

### इस्राएलीपुकी इजीप्त रे गृशो

31 मिनू मेको नाकदो फाराओमी मोसा नु हारून आस कली ब्रेशशा “छुल छाल बोक्कीस। गे नु इस्राएल डा मुर नेल्ल आं रागी डा मुर आन दाते रे गूडीन। इस दैशो खोदेशो पा परमप्रभु यावे कली चढेथ लने।

32 इन बी ब्यफ नु क्यारश भेडा आन कली लाइशशा, फो फु गूडीने। आं कली आसीक गेयीसी” दैत। प्रस्थान १०:२६; एज्रा ६:१०

33 मिनू इजीप्त डा मुरपुकीमी मेको आन कली आन रागी रे ब्रा बु खेरशा सोइक्ताक्म। मारदे हना “गो नेल्ल बेक्नय” दे हितेक्म। प्रस्थान ६:१

34 मिनू मुरपुकीमी बोरब ओरुती मसुप्शो, निशो फस आन बोस वाम गिल्शा, बलाम लाप्शा कुरतेक्म।

35 मिनू इस्राएलीपुकीम मोसा आ देशो खोदेशो पा इजीप्ती आन सुन चांदी नु वासी पुंइतेक्म। प्रस्थान ११:२

36 मिनू परमप्रभु यावेमी इजीप्त डा मुर आन कली इस्राएली आन कली दाक्पाइक्तीके, आन पुंइशो नेल्ल गेम्तेक्म। मोपा इजीप्त डा मुर आन शोंप लाइशशा गाक्तेक्म। प्रस्थान ३:२१

37 मिनू इस्राएल डा मुरपुकी रामेसेस सहर रे गाक्शा, सुक्कोथ सहर जाक्दीत्तेक्म। मेको आन मीश नु तमी तौ नेल्ल महिक्थु, वोंइश मुर ला ६ लाख बाक्तेक्म।

38 मिनू हिक्ने मचाप्चा डा पा इस्राएली खोदेशो पा परमप्रभु यावे कली टीबपुकी यो, आन बी ब्यफ, क्यारश भेडा, शुश बस्तु भाव खुल्शा गाक्तेक्म।

39 मिनू इजीप्त रे कुरशो बोरब ओरुती मसुप्शो निशो फस रे शोब्ले चोम्तेक्म। मारदे हना इजीप्त रागी रे खेरचा पुंइसीतीके मेकेर लाम्जी सेल्ले मचाप्शो बाक्तेक्म।

40 इस्राएलीपुकी ४ सहे ३० बर्स इजीप्त रागीमी बाकशो बाकमा बाक्त। उत्पत्ती १५:१३

41 मिनु ४ सहे ३० बर्स गाम नाक्ती, परमप्रभु यावे आ योत्रशो इस्राएली नेल्ल इजीप्त रागी रे गाकमा बाक्त।

42 मेको नाकदो इस्राएलीपुकीमी परमप्रभु यावे आ डोंइती शुश मिम्तीक नाकदो दुम्माक्त। मारदे हना मेको आन कली इजीप्त रागी रे गुंडदा बाक्त। मेको परमप्रभु यावे आ नाकदो बाक्ब। इस्राएल डा मुर आन पाला नेल्लेमी मेको मिम्तीक नाकदो बाक्ब। यसैया ३०:२९

पास्सा चाड दोपा मानेचा

43 मिनु परमप्रभु यावेमी मोसा नु हारून आस कली “पास्सा दोपा पचा आं अरेशो लोत्र मार बाक्त देंशा हना, अर्को रागी डा मुरुम मेको जचा ब्वचा मदुम्ब।

44 खोइक्तीक चिनु खोइश्शो इन वाइलपुकीम चहिं जचा ब्वचा दुम्नीम। उत्पत्ती १७:१२-१३

45 तन्न अर्को रागी डा मुर इन दातेमी बाक्त हना यो, गेय पाइब हना यो जचा ब्वचा मदुम्ब।

46 मेको पास्सा डा पाठा आन खिंमी ब्वचा माल्नीम। आ श्ये लाडगा गुंडचा मदुम्ब। आ रुश का यो जिकचा मदुम्ब। यूहन्ना १९:३६

47 इस्राएली नेल्लेमी मोदेशो पचा माल्नीम। प्रस्थान

48 इन दातेमी अर्को रागी डा मुर काम परमप्रभु यावे कली पास्सा चाड मानेचा दाक्ताक्व हना, आ खिं डा गेय पाइब वोंइश मुर नु आ तौ आन कली खोइक्तीक चिनु खोइश्शा ला, इस्राएली आन नेक्था जाक्शा, पास्सा चाड मानेने चापब। मोपा ला इन खोदेशो दुम्ब। मारदे हना खोइक्तीक चिनु मुखोइश्शो मुरुम जने ब्वने मचाप्नीम।

49 मेको इन कली नु इन दातेम बाक्ब अर्को रागी डा मुर आन कली अरेशो लोत्र का बाक्ब” दे परमप्रभुमी दैत। लेवी १९:३४; लेवी २४:२२

50 मिनु परमप्रभु यावेमी मोसा नु हारून आस कली दोदेशो देंमे, मोदेशो इस्राएली नेल्लेमी पाम्तेक्म।

51 मिनु मेको नाक्ती परमप्रभु यावेमी इस्राएली थर आन कली हुल हुल पा इजीप्त रागी रे गुंडताक्व।

## 13

डोंइती डा तौ परमप्रभु के बाक्ब

1 मिनु परमप्रभु यावेमी मोसा कली

2 “इस्राएलीपुकी, इन डोंइती जरमेशो तौ नु इन बी ब्यफ, क्यारश भेडा आन डोंइती जरमेशो बोहोर बोका योत्रशा गयीनी। मारदे हना मेको आं के बाक्नीम, दे मुर आन कली देंचा माल्ब” दैत। प्रस्थान १३:१२,१३; प्रस्थान २२:२८

3 मिनु मोसामी मुर आन कली “गेपुकी इजीप्त रागीम वाइलीम वाइल दुम्शा, ब्रोंइशा, एक जाक्शो नाक्त मप्रेंदीन। परमप्रभु यावेमी इन कली आ सक्तिमी गुंडताक्व। मोपतीके मेको नाक्त गे बोरब ओरुत्ती मसुप्शो शोब्ले ला जचा माल्नीनी। प्रस्थान १२:३३-३४

4 गे मुलाक्ती आबीब महिनामी यूतीनी। प्रस्थान १२:२

5 मिनु परमप्रभु यावेमी इन किकी पिपी आन कली ‘कनानी, हित्ती, एमोरी, हिळ्वी नु यबुसी आन रागी इन कली गेनुड’ दे कसम जशो बाक्माक्त। मेको रागीमी जाक्दीश्शा, आबीब महिनामी पास्सा चाड मानेचा माल्नीनी। मेको रागीम दूध नु खुदो शुश बाक्ब, मारेड मारेड यो शुश ग्रेल्ब। उत्पत्ती १५:१८

6 ७ नाक्त सम्म बोरब ओरुत्ती मसुप्शो शोब्ले जचा माल्नीनी। मेको आ नोले डा नाक्ती परमप्रभु यावे आ नेमी चाड का मानेचा माल्नीनी। प्रस्थान १२:१५-१६

7 मिनु बोरब ओरुत्ती मसुप्शो शोब्ले ७ नाक्त सम्म जचा माल्नीनी। इन बाक्तीके नेल्लेमी बोरब ओरुत्ती सुप्शो शोब्ले काइ वोइक्चा मदुम्ब। मिनु बोरब ओरुत्ती यो वोइक्चा मदुम्ब। १कोरिन्थी ५:८

8 मेको नाक्ती इन आल आन कली ‘परमप्रभु यावेमी इ कली इजीप्त रागी रे गुंडशो कोंइचा, दे ओदेशो पाइनय’ दे शेंचा माल्नीनी।

9 मेको पास्सा चाड इन गुडमी नु इन कुप्फीम मिम्तीके चिन्ड खोदेशो पा बाक्या माल्ब। मोपा परमप्रभु यावे आ अरेशो लोत्र गे नु बाकब। मारदे हना परमप्रभु यावेमी आ ठेयब सक्तिमी इन कली इजीप्त रागी रे गुंडताकव। ब्यवस्था ६:८; ब्यवस्था ११:१८

10 मोपा गेपुकी बर्स बर्समी मेको चाड ठीक नाक्तीम मानेशा आ अरेशो लोत्र पचा माल्नीनी।

11 मिनु परमप्रभु यावेमी इन कली नु इन किकी पिपी आन कली 'गे मेको रागी इन कली गेनुड' दे कसम जशो, कनानी आन रागीम चोत्रदीब।

12 गे इन डोंइती जरमेशो तौ नु इन बी ब्यफ, क्यारश भेडा आन डोंइती जरमेशो परमप्रभु यावे कली गेचा माल्नीनी। डोंइती जरमेशो बोहोर बोका परमप्रभु यावे केन नम।

13 तन्न इन गधैनी आ डोंइती जरमेशो बोहोर प्रोंइचा कली मेको आ पा डा पाठा का गेचा माल्नीनी। पाठा गेचा मदाक्ताकनी हना, आ शुर जिक्चा माल्नीनी। इन डोंइती जरमेशो तौ आ पा डा क्येट गेचा माल्नीनी।

14 मिनु काबु इन आलपुकीमी 'गे मारदे ओदेशो पाइनीनी?' दे हिल्लो पाइनीम। मेना गेपुकीमी 'परमप्रभु यावेमी इ कली आ ठेयब सक्तिमी इजीप्त रागी रे गुंडताकव। वाइलीम वाइल दुम्शो रे यो प्रोंइतु' दे इन आल आन कली शेंचा माल्नीनी। प्रस्थान १२:२६, २९

15 'फाराओम इ कली काइ लचा मगेतीके, परमप्रभु यावेमी इजीप्त रागी डा मुर आन डोंइती जरमेशो तौ नु बस्तु भाव आन दाते डा डोंइती जरमेशो नेल्ल साइकतु। मोपतीके डोंइती जरमेशो बोहोर बोका परमप्रभु यावे कली चढ़ेनीकी। तन्न डोंइती जरमेशो तौ आ पा डा क्येट गेशा प्रोंइतीकी।

16 एको पतीके इन गुडमी नु इन कुप्फीम मिम्तीके चिन्ड खोदेशो पा बाक्या माल्ब। मारदे हना परमप्रभु यावेमी इ कली आ ठेयब सक्तिमी इजीप्त रागी रे गुंडताकव' दे इन आल आन कली शेंचा माल्नीनी" देत।

### गोस्स के थाम नु मी के थाम

17 मिनु फाराओमी इस्राएली आन कली लचा गेवानु, परमप्रभुमी इस्राएली आन कली आन नेकथा डा लां पलिस्ती आन रागी डा लां मकोइद। मारदे हना मुरपुकीमी "लडाइ पचा माल्तेकम हना, हिंशा इजीप्त रागी लेत्नीमी, कों" दे लाइशो लां कोंइताकव।

18 मोपा परमप्रभुमी इस्राएली आन कली गोरशो रागी रे लल समुन्द्र गे डा लां कोंइताकव। मिनु इस्राएली इजीप्त रागी रे गाकमानु, लडाइ पचा कली यो ठीक दुम्शो बाक्तेकम।

19 मोसामी योसेफ आ रुश यो कुरतु। मारदे हना योसेफमी इस्राएली आन कली "परमप्रभुम इन कली थमा पा एको रागी रे गुंडशा लाइब। मेना आं रुश यो लाइक्चा माल्नीनी" दे कसम जपाइशो बाक्माकत। उत्पत्ती ५०:२५; यहोसु २४:३२

20 मेकोपुकी सुक्कोथ सहर रे लशा, एथाम सहर डा गोरशो रागी आ नेकथामी बास बाक्तेकम।

21 मिनु परमप्रभु यावेमी मेकोपुकी नाकदो नाक्ती गाकने चाप्मेकल, दे मेको आन कली लां कोंइचा कली नाक्ती गोस्स के थाम नु नाकदो मी के थाम दुम्शा, मेको आन डोंइडोंइती गाकत। प्रस्थान ४०:३६-३८; गन्ती ९:१५-२३; भजन संग्रह ७८:१४; १कोरिन्थी १०:१

22 नाक्ती गोस्स के थाम नु नाकदो मी के थाम आन डोंइडोंइती गाक्या मप्रोन।

## 14

### लल समुन्द्र शोक्शो

1 मिनु परमप्रभु यावेमी मोसा कली

2 "इस्राएली आन कली 'गेपुकी इक्का लेत्चा माल्नीनी। मिगदोल नु लल समुन्द्र आस दातेम बाक्शो पी-हहीरोथ, बाल-सेफोन आ डोंइती इन बास बाक्तीके सेल्चा माल्नीनी। मेको लल समुन्द्र आ नेकथा बाक्ब' देंचा माल्नेवे।

3 मिनु फाराओमी 'गोरशो रागीमी आन लां जाम्शा, हेंथे गाक्नीम' देब।

4 मिनु गो फाराओ आ थुं काइ मटीब दुम्पाइक्नुड। मिनु फाराओमी इन कली खेदा पाइब। गो फाराओ नु आ फौज आन कली आं सक्ति कौंइनुड। मिनु इजीप्त रागी डा मुर नेल्लेमी 'परमप्रभु यावे बाक्ब' दे तुइक्नीम" देंत। मिनु मोदेशो पांमतेक्म। प्रस्थान ४:२१; इजीकीएल २८:२२

5 मिनु इजीप्त रागी डा मुरपुकीम आन पिप कली "इसाएली प्रोक्ने थुंमतेक्म। गो मार पया? मारदे गो इसाएली आन कली गेय प्रौइपाइशशा, लचा गया?" दे थुं फाइशशा, लोत्र पमुमा बाक्त।

6 मिनु पिपमी आ बग्गी ठीक पशा, आ लडाइ पाइबपुकी ठीक पवा बाक्त।

7 मिनु ६ सहे रिम्यो पा लडाइ पने चापब बग्गी नु इजीप्त रागी डा अरु बग्गी नु चलेब आन ठेयब मुर आन कली लाइशशा, लमाक्त।

8 मिनु परमप्रभु यावेमी इजीप्त रागी डा फाराओ कली काइ मटीब दुम्पाइक्तीके इसाएली आन कली खेदा पांमे बाक्त। इसाएली चहिं ठेयब सक्तिमी गूशा गाक्तेक्म। प्रस्थान ३:१९-२०

9 इजीप्त डा फाराओ आ शारापुकी, शारा डोइक्बपुकी, बग्गी नु लडाइ पाइब नेल्ल लल समुन्द्र आ नेक्था इसाएली आन बास बाक्तीक पी-हहीरोथ सहर आ नेक्था बाल-सेफोन आ डौंइती जाक्तेक्म।

10 मिनु इसाएलीपुकी फाराओ नु आ लडाइ पाइबम आंम कली खेदा पशो तशा, हिंशा खिखि पांमतेक्म। मिनु परमप्रभु यावे कली "वारच पाइय्यीकी" दे पुंडतेक्म।

11 मिनु मेकोपुकीम मोसा कली "गे आंइ कली मारदे इजीप्त रे गुंडदीकी? इजीप्त रागीम मुर थिम्तीके मबाक्बा डा? मारदे गोरशो रागीम साइक्थ चाक्की?"

12 गोपुकी इजीप्त रागीम बाक्कानु, इन कली 'आंइ कली श्येत मगेकी। इजीप्त डा मुर आन गेय पचा गेकी, मदंका डा? गोरशो रागीम बेक्चा क्येडा इजीप्त रागी डा मुर आन गेय पक वा' " दे मोसा कली ग्रीतेक्म।

13 मिनु मोसामी मुर आन कली "महिनीन। मुलाक्ती परमप्रभु यावेमी दोपा इन कली इजीप्त डा मुर रे प्रौइबा, कोत्रशा बाक्कीन। मुलाक्ती तशो इजीप्त डा मुर आन कली गे लेंशा गेनायो मताइनीनी।

14 इन पचा डा लडाइ परमप्रभु यावेमी पाइब। गे थुं नाइशशा बाक्कीन" दे माइक्तीमी। ब्यवस्था १:३०; २इतिहास २०:१५,२९; यसेया ५१:९

15 परमप्रभु यावेमी मोसा कली "मारदे आं कली ठेयब सेंदा पा पुंडनेवे? इसाएली आन कली 'गाक्कीन' दे मतो।

16 इ कोक्के लल समुन्द्र तार दिंदो। मो पवीनु, समुन्द्र ब्राशा, गाक्तीक लां दुम्ब। इसाएलीपुकी हिलो मबाक्शो लांम गाक्ने चाप्नीम।

17 मिनु गोमी इजीप्त डा मुर आन कली काइ मटीब दुम्पाइक्नुड। मो दुम्मेनु, इसाएली आन नोले खोइशशा, लल समुन्द्र ओत्रशा, खेदा पाइनीम। मिनु गो फाराओ आ मुरपुकी, आ बग्गी नु आ शारा डोइक्ब नु लडाइ पा आं सक्ति कौंइशा ग्रानुड।

18 गो फाराओ, आ बग्गी नु आ शारा डोइक्ब आन कली आं सक्ति कौंइनुड। मिनु इजीप्त डा मुरपुकीमी 'परमप्रभु यावेमी पापु' दे तुइक्नीम" देंत।

19 मिनु इसाएली आन डौंइती गाक्शो परमप्रभु आ स्वर्ग डा गेय पाइब नोले गे लेशशा लशा, इसाएली आन नोले खोइक्तु। मेको आन डौंइती गाक्शो गोस्स के थाम यो लेशशा, आन नोले गाक्त। उत्पत्ती १६:७; प्रस्थान १३:२१

20 मेको गोस्स इजीप्त डा फौज आन कली छिडछिड दुम्माक्त। इसाएली आन लडाइ पाइब आन कली चहिं छेडछेड दुम्त। मोपा मेको नाक्दो इजीप्त डा फौज इसाएली आन नेक्था जाक्ने मचबेम। भजन संग्रह १०५:३९

21 मिनु मोसामी आ गुड लल समुन्द्र तारी दिंदानु, परमप्रभु यावेमी नाक्दो नां दाप्तीके रे फश गिवार पपाइशशा, समुन्द्र फ्राशा सोत्रशो गाक्तीक लां सेल्लु।

22 मिनु इसाएलीपुकी समुन्द्र डा सोत्रशो लां लांमतेक्म। समुन्द्र डा ब्वाक्कु चहिं आन ग्युरा नु पेरा गे गारो खोदेशो पा बाक्त। यहोसु ४:२३; २राजा २:८; यसेया ११:१५-१६; १कोरिन्थी १०:१; हिब्रू ११:२९

23 मिनू इजीप्त रागी डा लडाइ पाइब इस्राएली आन कली खेदा पा, मेको आन नोले लल समुन्द्र ओव्रतेकम। पिप आ शारापुकी, आ बग्गीपुकी नु आ शारा डोइक्ब नेल्ल ओव्रतेकम।

24 मिनू सुनी कना परमप्रभु यावे गोस्स के थाम नु मी के थामम बाक्शा, इजीप्त डा लडाइ पाइब आन कली कोव्रशा हिंपाइक्तु।

25 आन बग्गी डा गुगील पुइश्शा गेतीके, गाक्ने मचबेम। मिनू इजीप्त डा मुरपुकीमी “इस्राएली रे प्रोक्य, परमप्रभु यावेमी मेको आन कली वारच पशा, इजीप्त डा मुरपुकी नु लडाइ पाइब” देमा बाक्त।

26 मिनू परमप्रभु यावेमी मोसा कली “इजीप्त रागी डा मुर, आन बग्गी नु आन शारा डोइक्ब आन कली ब्वाक्कुम सुम्पाइक्चा कली इ गुइ लेंशा समुन्द्र तार दिंदो” देत।

27 मिनू मोसामी आ गुइ समुन्द्र तार दिंदानु, नां सोव्रची ना समुन्द्र डोंइती डा खोदेशो दुम्त। मिनू इजीप्त डा लडाइ पाइब लेशशा प्रोक्ने मचबेम। मोपा परमप्रभु यावेमी इजीप्त डा लडाइ पाइब आन कली समुन्द्रमी खुम्तु।

28 मिनू ब्वाक्कु लेंशा डोंइती डा खोदेशो दुम्मेनु, इजीप्त डा बग्गी, शारा डोइक्बपुकी नु फाराओ आ लडाइ पाइब आन कली सुम्शा, समुन्द्रमी योल्ताक्व। सुइ यो मब्रोंइम।

29 तन्न इस्राएली चहिं सोव्रशो लां लशा, समुन्द्र शोक्साक्म। ब्वाक्कु गारो खोदेशो पा, आन ग्युरा नु पेरा गे बाक्त।

30 मोपा परमप्रभु यावेमी मेको नाक्ती इस्राएली आन कली इजीप्त रागी डा लडाइ पाइब रे प्रोंइतीमी। मिनू इस्राएलीपुकीमी इजीप्त डा मुर आन कली दिल दिल थिश्शा, समुन्द्र आ नेक्था बेक्शो ताम्तेकम।

31 मिनू मुरपुकीमी “परमप्रभु यावेमी इजीप्त डा मुर आन कली साइक्तीमी” दे तुइश्शा, परमप्रभु यावे क्येडा हिंतेकम। मिनू “परमप्रभु यावेमी नेल्ल पने चाप्ब। मोसा आ गेय पाइब बाक्ब” दे थमा सुइक्तेकम। प्रस्थान १९:९; २इतिहास २०:२०

## 15

### मोसा आ कुम्सो

1 मिनू नोले मोसा नु इस्राएलीपुकीमी परमप्रभु यावे कली कुम्सो पाम्तेकम। “गो परमप्रभु यावे कली कुम्सो पाइनुड। मारदे हना मेकोमी आ ठेयब सक्ति कोंइशा, ग्रात। शारा नु शारा डोइक्ब आन कली समुन्द्रमी ताइक्ताक्व। प्रकाश १५:३

2 यावे आं सक्ति बाक्ब। आं कली कुम्सो पपाइक्ब। मारदे हना आं कली आ जोरी सत्रु रे प्रोंइती। मेको आं परमप्रभु बाक्ब। मिनू गो मेको कली ठेयब सेल्लुड। परमप्रभु आं आफ आ परमप्रभु बाक्ब। मिनू गो मेको कली मान पाइनुड। भजन संग्रह ११८:१४; यसैया १२:२

3 परमप्रभु यावे लडाइ पाइब बाक्ब। मेको आ नें परमप्रभु यावे बाक्ब। प्रस्थान १४:१४; भजन संग्रह ४६:१०; प्रस्थान ३:१५

4 मेकोमी इजीप्त डा फाराओ आ बग्गीपुकी नु आ लडाइ पाइब आन कली लल समुन्द्रमी योल्पाइक्तु। ठेयब कप्तान नेल्ल आन कली ब्वाक्कुम गुम्पाइक्तु।

5 समुन्द्र डा ब्वाक्कुमी मेको आन कली सुम्तु। मेकोपुकी फुल्लु खोदेशो पा आगा गुम्तेकम।

6 परमप्रभु यावे, इन सक्ति ठेयब बाक्ब। इन सक्तिमी इन जोरी सत्रु आन कली थुम्पाइक्तीनी।

7 इन जोरी सत्रुमी गे नु लडाइ पामेनु, गे इन ठेयब दुम्तीकेमी मेको आन कली ग्रातीनी। मिनू गाइश्शा मेको आन कली मीम भूस चोशो खोदेशो पा थुम्पाइक्तीनी।

8 इन नेमी मुइश्शा, समुन्द्र डा ब्वाक्कु कली ग्येत्य गे पोक्तीनी। समुन्द्र गारो बुदी सोजो पा ग्येत्य गे बोक्शा, आ पुं चहिं सोव्रशो लां दुम्त। यसैया ५१:१०

9 आंइ जोरी सत्रुमी ‘मेको आन कली खेदा पा, ब्रो बु थित्थनय। गो ग्येरशा, इं ग्राशो थोव्रक योक्मुइनय। इं तरवार शोइश्शा, नेल्ल आन कली साइक्नय’ दैतेकम।



10 गे चहिं फश पपाइक्तीनी। मिनु समुन्द्रमी मेको आन कली सुम्तीमी। मेकोपुकी फलाम खोदेशो पा ठेयब समुन्द्रम गुम्तेकम।

11 परमप्रभु यावे, देवी देवता आन दातेमी इन खोदेशो ठेयब सुइ मबाक्नीम। इन खोदेशो सक्ति पाइशशो, ठेयब मान ताइब सुइ मबाक्नीम। इन ठेयब गेय हिंचा डा बाक्ब। गे छक लाक्वा डा गेय पाइब बाक्नीनी। प्रस्थान ८:६; प्रस्थान १८:११; भजन संग्रह ८६:८

12 इन ग्युरा गुइ दिंनीनु, रागीम मेको आन कली दाक्तु।

13 गे इन गुंडशो मुर आन कली गेना हना यो शिशी पा, लां कोइताक्नी। मेको आन कली इन सक्तिमी इन आंम बाक्तीकेम खुल्लीनी।

14 जात जात डा मुरपुकी इन लोत्र नेंशा शुश हितेकम। पलिस्ती रागी डा मुरपुकी हिंशा, खिंखि पाम्तेकम। यहोसु २:९-११

15 मुल एदोम रागी डा ठेयब मुरपुकी हितेकम। मोआब रागी डा ठेयब मुरपुकी हिंशा खिंखि पाम्तेकम। कनान रागीम बाक्बपुकीम आन सक्ति साम्तेकम।

16 परमप्रभु यावे, इजीप्त रागी रे इन गुंडशो मुरपुकी मजाक्दीम्मा सम्म मेको आन जोरी सत्रु इन सक्ति डा गेय तथा, हिंशा फुल्लु खोदेशो पा सिक्सी पा बाक्तेकम। मोपा हिंशा मेको आन थुं लुकच लत।

17 गे इन मुर आन कली आन रागी ओइनीनी। मिनु इन आंम बाक्तीक डांडाम बाक्पाइक्नीनी। परमप्रभु यावे, मेको इन बाक्तीके आंमा सेलतीनी। इन आंम बाक्तीक खिं गे आंमा सेलतीनी। भजन संग्रह ७८:५४

18 परमप्रभु यावे गेना हना यो पिप बाक्ब” दे कुम्सो पाम्तेकम। भजन संग्रह ९३:१

19 फाराओ आ बग्गी नु शारा डोइक्बपुकी समुन्द्र डा लां लाम्तेकम। परमप्रभु यावेमी समुन्द्र डा ब्वाक्कु लेंशा लेप्पाइशशा, मेको नेल्ल आन कली योल्पाइक्तु। इस्राएली चहिं समुन्द्र डा सोवशो लां रे पा गाक्तेकम। प्रस्थान १४:२२-२९

### मिरयामम यो कुम्सो पशो

20 हारून आ समी मिरयाम परमप्रभु आ लोत्र पाइब यो बाक्त। मेकोमी खैजडी ताप्शा, कुम्सो पथ लमेनु, अरु मीश मुरपुकी यो खैजडी ताप्शा, सिल पना पन मेको आ नोले खोइक्तेकम। भजन संग्रह ६८:२६

21 मिरयामम मेको आन कली कुम्सो पा लोत्र लेशशा “परमप्रभु यावे कली कुम्सो पने। मारदे हना मेकोम ठेयब लडाइ पा ग्रात। शारा नु शारा डोइक्ब आन कली समुन्द्रम ताइक्ताक्ब” दे कुम्सो पाप्तु।

### मारा डा कशो ब्वाक्कु

22 मिनु मोसामी इस्राएली आन कली लल समुन्द्र रे शुर माइशशो गोरशो रागी कोइताक्ब। मिनु मेको गोरशो रागीमी नाक्त सां सम्म गाक्मानु, ब्वाक्कु मथिदेम। उत्पत्ती २०:१

23 माराह माइशशोमी जाक्दीशशा, मेक डा ब्वाक्कु तूने मचबेम। मारदे हना मेको ब्वाक्कु कशो बाक्त। मोपतीके मेको कली माराह नें वोइक्तेकम। हिब्रू लोत्रमी मारा देशो कशो रुम्सीब।

24 मिनु मुरपुकीमी मोसा कली “मुल मार तूचा?” दे गन गन पाम्तेकम। प्रस्थान १६:२

25 मोसामी चहिं परमप्रभु यावे कली पुंडस डा पुंडस बाक्त। मिनु परमप्रभु यावेमी मोसा कली रवा आ शी का कोइताक्ब। मिनु मोसामी मेको शी ब्वाक्कुम ब्वारताक्ब। मिनु मेको ब्वाक्कु मकशो ब्रोवशो दुम्त। मेकेर इस्राएली आन कली आ फुल्लुम मुशा ब्रेक्शो नु आन पतीक लोत्र गेशो बाक्त। मोपा मेको आन कली नाक्ताक्ब। उत्पत्ती २२:१

26 मिनु मेकोमी “गे परमप्रभु यावे, इन परमप्रभु आं लोत्र नेंशा, आं डोंइती ठीक पाइतीनी हना, आं शेंशो लोत्र नेंशा, टिशा, आं अरेशो लोत्र टीतीनी हना, गो इजीप्त रागी डा मुर आन कली पपाइशशो रोइ इन कली मपपाइक्नुड। मारदे हना गो इन कली सापाइक्ब परमप्रभु यावे नड” देत। ब्यवस्था ७:१५; उत्पत्ती २०:१७; ब्यवस्था ३२:३९; भजन संग्रह ३०:३; यसैया ५७:१८

### एलीम रागीमी जाक्दीशशो

27 मिनू इस्राएली मेकेर रे लशा, एलीममी जाकदीत्तेकम। मेकेर १२ ओटा धारा नु ७० ओटा रवा बाक्तेकम। मेकोपुकी मेको ब्वाक्कु आ नेक्था बाक्तेकम।

## 16

### इस्राएलीपुकीम गन गन पशो

1 मिनू इस्राएली नेल्ल एलीम रे लशा, सीन माइशो गोरशो रागी जाकदीत्तेकम। सीन माइशो गोरशो रागी एलीम नु सीनै डांडा आस दातेमी बाक्ब। इजीप्त रागी रे गाक्शा नोले मेकेर आबीब आ नोले डा महिना डा १५ नाक्तीम जाकदीत्तेकम।

2 मिनू इस्राएली नेल्ल मोसा नु हारून आस कली तशा गाइशशा, प्रस्थान १७:२-३

3 “इजीप्त रागी उइ परमप्रभु यावेमी आंड कली सद हना, रिम्शो दुम वा। मेकेर श्ये नु शोब्ले शुश बाक्त। गे आंड कली जचा मगेथु, साइक्चा कली एको गोरशो रागीमी चाक्तीसी” दे गन गन पाम्तेकम। प्रस्थान १४:११

4 मिनू परमप्रभु यावेमी मोसा कली “नेनो, गो इन कली रेउ यिशो खोदेशो पा सरीड रे शोब्ले यिपाइक्नुड। मिनू मुरपुकीम नाक्त किंत किंत गुप्चा माल्नीम। खेयप का गुप्मेनु, नाक्त का कली ला गुप्चा माल्नीमी। आं अरेशो लोव्र पाइबाक्मा कौ, मपाइबाक्मा, गो मेको आन कली नाक्नुड। प्रस्थान १६:१५; उत्पत्ती २२:१

5 मुरुमी सुक्रुबार आन गुप्शो शोब्ले नाक्त का कली ठीक पाम्तेकम हना, नाक्त का कली गुप्शो यो, नाक्त निक्शी कली ठीक दुम्ब” देत।

6 मिनू मोसा नु हारूनम इस्राएली आन कली “परमप्रभु यावेमी इन कली इजीप्त रागी रे प्रोइता, दे आपो नाक्दो लेशा मिप्पाइक्ब।

7 सुनी कना गे परमप्रभु यावे आ छेडछेड गूशो ताइनीनी। मारदे हना मेकोमी इन परमप्रभु यावे कली गन गन पशो तुइक्ताक्व। गो निक्शी सु नस्कु डा? गे आंस पबर्म गाइक्नीनी?” देताक्स।

8 मिनू मोसामी इस्राएली आन कली “परमप्रभु यावेमी आपो नाक्दो इन कली श्ये गेब, सुनी कना रूथ्री शोब्ले गेब, इन गन गन पशो लोव्र नेंतु, दे तुइक्तीन। गो निक्शी सु नस्कु डा? इन गन गन पशो आंस कली ममाइ, परमप्रभु यावे नु कका गाइक्ताक्नी दे तुइक्तीन” देत।

9 मिनू मोसामी हारून कली “गे मुर नेल्ल आन कली ‘परमप्रभु यावे आ डोंइती जाक्कीन। मारदे हना मेकोमी इन गन गन पशो नेंतु’ देंचा माल्नेवे” देत।

10 मिनू हारूनमी इस्राएली नेल्ल आन कली लोव्र पवानु, मेकोपुकी गोरशो रागी गे कोव्रतेकम। मिनू मेकेर गोस्सुमी परमप्रभु यावे आ छेडछेड गूशो ताम्तेकम। गन्ती १२:५; गन्ती १४:१०; गन्ती १६:१९

11 मिनू परमप्रभु यावेमी मोसा कली

12 “गो इस्राएली आन गन गन पा पशो लोव्र नेंता। गे मेको आन कली ‘आपो नाक्दो श्ये ब्वाइनीनी। मिनू सुनी कना रूथ्री शोब्ले जाइनीनी। गो परमप्रभु यावे, इन परमप्रभु नड, दे गे तुइक्नीनी’ दे माइक्मी” देत।

### बट्टाइ चिक्ब नु मन्ना शोब्ले गेशो

13 मिनू नाक्दो बट्टाइ गूम बाक्त। मिनू इस्राएली आन बाक्तीक नेल्ल सुम्मे बाक्त। मिनू सुनी कना आन बाक्तीकेमी शुश सीत यिशो बाक्माक्त। गन्ती ११:३१

14 मिनू सुनी कना सीत मजाम्म सम्म गोरशो रागी डा खपीम फुरश खोदेशो पा आइक्च गेडा बाक्त।

15 इस्राएलीपुकीमी मेको तशा “मार में?” देंमुत्तेकम। मारदे हना मार बाक्मे, मतुइक्तम। मिनू मोसामी मेको आन कली “परमप्रभु यावेमी इन कली गेशो मन्ना शोब्ले एकोन बाक्ब। प्रस्थान १६:४; ब्यवस्था ८:३; यूहन्ना ६:३१; १कोरिन्थी १०:३

16 परमप्रभु यावे आ अरेशो लोव्र मार बाक्ब देशा हना, इन मुर नेल्लेमी गिश जने चान्पीमी, मिश गुपीन। इन ताम्बुमी गिश जना मुर बाक्नीमी, मिश गोमेर गुप्चा माल्नीनी” दे इस्राएली आन कली देत। गोमेर का २ लिटर कि ४ माना खोदेशो बाक्ब।

17 मोसामी इस्राएली आन कली दोदेशो देंमे, मोदेशो पाम्तेक्म। का निक्शीमी शुश, का निक्शीमी इच्चका ला गुप्तेक्म।

18 तन्न पुक्गमेनु, मेको शुश गुप्ब नु इच्चका ला गुप्ब नेल्ल आन के उडक्थ उडक्थ दुम्माक्त। नेल्लेमी गिश जचा दाक्तमे, मिश गुप्तेक्म। २कोरिन्थी ८:१५

19 मिनु मोसामी मेको आन कली “दीसा सुनी सम्म सुइमी मारेइ हेंचा मडुम्ब” दे माइक्तीमी। प्रस्थान १६:४; मती ६:३४; लुका ११:३

20 तन्न मेकोपुकीमी मोसा आ देशो मटीम। मिनु का निक्शीमी मेको मन्ना सुनी सम्म हेंदमे बाक्त। मिनु लुस्पु जोल्शा, शुश रिना पाइक्तु। मिनु मोसा शुश गाइक्ताक्व।

21 मिनु गिश माल्दमे, सुनी सुनी गुप्तेक्म। नां चोक्तानु, मेको यत।

### नाइक्तीक नाक्त कली मन्ना गुप्शो

22 मिनु सुक्रबार नाक्ती मुरपुकीम मुर का कली गोमेर निक्निक्शी मन्ना गुप्तेक्म। इस्राएली आन कली कोव्रब मुरपुकीमी मो पाम्तेक्म दे मोसा कली देंतेक्म। गोमेर का २ लिटर कि ४ माना खोदेशो बाक्ब।

23 मिनु मेकोमी “परमप्रभु यावेमी इन कली गे मार पचा माल्नीनी, मेको शेंशो बाक्ब। मारदे हना दीसा परमप्रभु यावे कली मिम्शा नाइक्तीक नाक्ती बाक्ब। मोपतीके मुलाक्त माल्शो जचा थोव्रक क्येने चोने। लीशो चहिं दीसा सुनी सम्म हेंचा दुम्ब” देंत। उत्पती २:२-३

24 मिनु मोसा आ देशो खोदेशो पा आ दीसा सम्म हेंताक्म। मिनु मेको रिना मपाइक्थु, लुस्पु यो मजोल।

25 मिनु मोसामी “गे मुलाक्ती जने। मारदे हना परमप्रभु यावे आ नाइक्तीक नाक्ती बाक्ब। मुलाक्ती लाडगाम मारेइ मथिंसीब।

26 गे ६ नाक्त गुप्चा माल्नीनी। ६ नाक्त आ दीसा डा नाक्त मारेइ मथिंसीब। मारदे हना नाइक्तीक नाक्त बाक्ब” देंत।

27 मिनु सन्चरबार नाइक्तीक नाक्त का निक्शी मुर मन्ना गुप्थ लाडगा गूमानु, मारेइ मथिदेम।

28 मिनु परमप्रभु यावेमी मोसा कली “गेपुकी आं शेंशो नु आं अरेशो गेना सम्म मटीनीनी?

29 नोफा दाइश्शा नेनीन ‘परमप्रभु यावेमी इन कली सन्चरबार नाइक्तीक नाक्ती गेपु। मोपतीके सुक्रबार इन कली नाक्त निक्शी कली जचा थोव्रक गेब। मिनु नाइक्तीक नाक्ती इन बाक्तीक बाक्तीकेमी बाक्कीन। इन खिं रे लाडगा मलने’ दे मुर आन कली देंनो” देंत।

30 मिनु मुरपुकी सन्चरबार नाक्ती नांइसाक्म।

31 मिनु इस्राएलीपुकीम मेको गेडा कली मन्ना दे नें वोइक्तेक्म। मेको बुश धन्या वांचेर खोदेशो बाक्त। मेको खुदोमी सेल्शो शोब्ले खोदेशो पा ब्रोव्रमाक्त।

### मन्ना हेंशो

32 मिनु मोसामी “परमप्रभु यावे आ अरेशो लोव्र मार बाक्त देशा हना, मेकोमी ‘मेको जचा थोव्रक गोमेर का हेंचा माल्नीनी। इन कली इजीप्त रागी रे प्रोंइशा, चाक्गानु, गोरशो रागीमी गेशो जचा थोव्रक मेको बाक्ब दे शुश पाला डा मुर आन कली कोंइचा कली हेंदो। गो इन कली इजीप्त रे गोरशो रागीमी चाक्शा, दोपा थुलु, मेको नेल्लेमी तामेक्ल’ देंत” देंत। गोमेर का इस्राएली आन अन्न पुक्तीके का बाक्त। मेको २ लिटर रिक्ब बाक्त। मिनु ओमेर का ४ माना खोदेशो बाक्ब।

33 मिनु मोसामी हारून कली “बोस का लतो। मिनु ओमेर का मन्ना मेकेर कुर पावो। मेको नेल्ल पाला डा मुरपुकीम तचा डा पा परमप्रभु यावे आ डोंइती वोतो” देंत। हिब्रू ९:४

34 परमप्रभु यावेमी मोसा कली दोपा देंमे, मोपा हारूनमी कबल पशो सन्दोस आ डोंइती वोइक्तु।

35 मिनु इस्राएलीपुकीमी ४० बर्स सम्म मन्ना जाम्तेक्म। मुर बाक्तीक कनान रागी डा सांद मजाक्मा सम्म मेको जाम्तेक्म। यहोसु ५:१२

36 गोमेर का एफाह डा १० भाग बाक्ब। एफाह का ठेयब पुक्तीके बाक्ब।

## 17

## इस्राएली मस्साह नु मेरीबा जाक्शो

- 1 मिनु इस्राएली नेल्ल सीन माइशशो गोरशो रागी रे गाक्शा, परमप्रभु यावे आ देशो बिश्शा, रेफीदीम माइशशोमी बाक्तेकम। मेकेर चहिं तूचा ब्वाक्कु मथिदम। गन्ती ३३:१२-१४
- 2 मोपतीके “मोसामी आंइ कली मरिम्शो लां कोंइब” दे गाइशशा, मोसा कली “आंइ कली तूचा ब्वाक्कु गेकी” दे जिचा पोक्तेकम। मिनु मोसामी मेको आन कली “गे आं कली मारदे जिचा तोइनीनी? मारदे परमप्रभु यावे सक्ति पाइशशो बाक्ब, दे थमा मसुइक्नीनी?” देंत। ब्यवस्था ६:१६
- 3 मिनु मुरपुकी ब्वाक्कु तूत दाक्शा, गाइक्ताकम। मेकोपुकीमी मोसा कली “गे मारदे आंइ कली इजीप्त रागी प्रोंइपाइय्यीकी? आंइ कली, आंइ आल आन कली, आंइ बस्तु भाव आन कली तूचा ब्वाक्कु मबा, आंइ कली बेक्पाइक्चा कली इजीप्त प्रोंइपाइय्यीकी?” देंतेकम। प्रस्थान १५:२४; प्रस्थान १६:२; गन्ती १४:५; गन्ती १७:६-२८
- 4 मो देंमानु, मोसामी परमप्रभु यावे कली “गो एको मुर आन कली मार पाइनुडा? आं कली फुल्लु आप्शा, साइक्चा चिक्तायीमी। मुल मार पड?” देंत। गन्ती १४:१०
- 5 मिनु परमप्रभु यावेमी मोसा कली “इस्राएल डा खाल्पा आन कली लाइशशा, इस्राएली आन डोंइती गाक्को। नील खोला तुप्शो कोंक्के यो लाइशशा लावो। प्रस्थान ७:२०
- 6 गो होरेब माइशशो डांडा आ नेक्था सेरथे फुल्लु तार इ डोंइती बाक्नुड। मिनु गे मेको सेरथे फुल्लु तुप्चा मालेवे। मिनु, सेरथे फुल्लु रे ब्वाक्कु यीब। मिनु मुरपुकीम तूने चाप्नीम” देंत। मिनु इस्राएली आन खाल्पा आन डोंइती मोसाम मो पाप्तु। गन्ती २०:११; १कोरिन्थी १०:४
- 7 मिनु मोसामी मेको सेरथे फुल्लु बाक्तीक कली मास्साह नु मेरीबा नें वोइक्तु। मारदे हना इस्राएलीपुकीमी परमप्रभु यावे कली नाक्शा गाइशशा “परमप्रभु यावे आंइ दातेमी बाक्ब” दे थमा मसुदम। भजन संग्रह ९५:८-९; मीका ३:११

## अमालेकी नु लडाइ पा ग्राशो

- 8 मिनु अमालेकी रेफीदीमम जाक्शा, इस्राएली नु लडाइ पाक्तेकम। उत्पत्ती ३६:१२-१६
- 9 मिनु मोसामी यहोसु कली “इं मुरपुकी रे योव्रशा, अमालेकी नु लडाइ पथ लावो। गो परमप्रभु आ कोंक्के शेशा, दीसा मेको डांडा तार राप्शा बाक्नुड” देंत। गन्ती १३:८, १६
- 10 मिनु यहोसुमी मोसाम देशो खोदेशो पा अमालेकी नु लडाइ पाप्तु। मोसा, हारून नु हुर चहिं मेको डांडा डोंइसाक्म। प्रस्थान २४:१४
- 11 मोसामी आ गुइ पोक्गानु, इस्राएलीपुकी ग्रातेकम। आ गुइ तोक्गानु, अमालेकीपुकी ग्रातेकम।
- 12 मिनु मोसा आ गुइ योक्तीके हारून नु हुरमी फुल्लु का थांइशा, मेको तारी निप्पाइक्ताक्स। मिनु मोसा आ गुइ तिक्शा, वोइक्ताक्स। मोदेशो पा का ग्युरा गे, का पेरा गे बाक्शा, नां मपेरदा सम्म गुइ पोक्स डा पोक्स बाक्ताक्स।
- 13 मिनु यहोसु नु आ मुरुमी अमालेक नु आ मुर आन कली ग्राशा, तरवारम साइक्तेकम।
- 14 मिनु परमप्रभु यावेमी मोसा कली “एको लडाइ गेना हना यो मिम्चा कली किताबम ब्रेक्तो। गो अमालेकी आन कली रागी रागी रे क्याम्नुडमी, दे यहोसु कली मिम्पते” देंत। ब्यवस्था २५:१७-१९; १सामुएल १५:२-३
- 15 मिनु मोसामी चढेतीक का सेल्शा “परमप्रभु यावे आं छेदर बाक्ब” दे नें वोइक्तु।
- 16 मिनु मेकोमी “यावे आ नित्तीक गे इन गुइ पोक्कीन! मारदे हना परमप्रभु यावेमी ‘अमालेकी नेल्ल आन पालामी मेकोपुकी नु लडाइ पाइनुड’ दे डोंइती देशो बाक्ब” देंत। येरमीया ३:१७

## 18

## यित्रो मोसा कली गुम्थ जाक्शो

1 मिनु मिदयान रागी डा नाक्सो मोसा आ शिउ यित्रोमी परमप्रभुमी मोसा नु इस्राएली आन पर्बम मार मार पवा नु परमप्रभु यावेमी मेको आन कली इजीप्त रागी रे दोपा गुंडदा, मेको नेल्ल नेना बाक्त। प्रस्थान ३:१

2 डोंडती मोसामी आ मीश नु आ तौ निक्शी आस कली आ माइत सोइश्शो बाक्माक्त। मुल यित्रोम मेको आन कली मोसा आ बाक्तीक चाक्तीमी। प्रस्थान ४:२०

3 मोसामी आ तौ का आ नें गेरशोम वोइश्शो बाक्त। मारदे हना मेकोमी “गो मतुइश्शो रागी डा मुर आन दातेमी अर्को रागी डा मुर दुम्ती” देंत। प्रस्थान २:२२

4 मिनु अर्को कली एलीएजर नें वोइक्तु। मारदे हना मेकोमी “आं आफ आ परमप्रभुमी आं कली फाराओ आ तरवार रे प्रोंइशा, वारच पाइक्ती” देंशो बाक्त। १इतिहास २३:१५-१७

5 मिनु मोसा आ शिउ यित्रो, मोसा आ मीश नु आ तौ निक्शी गोरशो रागीमी मोसा कली गुम्थ जाक्तेक्म। मेना मोसामी आ ताम्बु परमप्रभु आ डांडा आ पुंमी कीतु।

6 मिनु यित्रोमी मोसा कली “इ शिउ यित्रो, इ मीश नु इ तौ निक्शी इ कली गुम्थ जाक्तेक” दे लोत्र सोइक्ताक्व।

7 मिनु मोसा आ शिउ गुम्थ जाक्शा, सेउ पशा, पुक्पु पशा “दोपा बाक्नी” दे ताम्बुम ओइताक्व।

8 मिनु मोसामी परमप्रभु यावेमी इजीप्त डा फाराओ कली नु आ मुर आन कली मार मार पवा, लाम्नी मार मार श्येत जामे, दोपा परमप्रभु यावेमी मेको नेल्ल रे प्रोना, मेको नेल्ल आ शिउ कली शेंताक्व।

### यित्रो थमा सुइक्व दुम्शो

9 मिनु यित्रोमी परमप्रभु यावेमी इस्राएली आन कली गिश रिम्शो पवा नु इजीप्त डा मुर आन गुइ रे दोपा प्रोना मेको नेल्ल नेशा, शुश ग्येरसाक्व।

10 मिनु मेकोमी “इन कली इजीप्त डा मुरपुकी नु फाराओ आ गुइ रे प्रोंइब परमप्रभु यावे कली ठेयब सेल्य।

11 देवी देवता आन क्येडा परमप्रभु यावे ला ठेयब बाक्व, दे गो मुल तुइक्ताक्व। आ मुर आन कली इजीप्त डा मुर आन गुइ रे प्रोंइतु। मारदे हना इजीप्तीपुकीमी मेको आन कली ठेयब लेशशा दिप्शो बाक्तेक्म” देंत। नेहेम्याह ९:१०; येरमीया ५०:२९

12 मिनु मोसा आ शिउमी परमप्रभु कली चोशा चढ़ेतीक नु अरु चढ़ेतीक यो चढ़ेप्टु। मिनु हारून नु इस्राएल डा मुर आन खाल्पा नेल्ल मोसा आ शिउ नु परमप्रभु कली मान पा ठेयब सेल्शा जाम्तेक्म। उत्पत्ती ३१:५४

### यित्रोम मोसा कली अर्ती गेशो

13 मिनु मोसा सुनी कना बोक्शा, मुर आन कली निसाफ पचा कली निस्साक्व। मुरपुकी सुनी रे जाक्शा, नाक्दो सम्म मोसा आ डोंडती बाक्तेक्म।

14 मिनु मोसा आ शिउ मी मोसा कली मोदेंशो पा मुर आन कली निसाफ पशो तशा “गे मुर आन कली मार पाइनेवे? गे मारदे इ का ला गेय पना पन बाक्नेवे? मुरपुकी सुनी रे नाक्दो सम्म जाक्शा, बाक्शो बाक्नीमी” देंत।

15 मिनु मोसामी आ शिउ कली “मुरपुकीमी परमप्रभु आ देंशो तुइक्चा दाक्नीम, मोपतीके जाक्नीम।

16 मेको आन दातेमी मार मार निसाफ पाचा माल्शो बाक्मे, मेको गो गारपाइक्नुड। मोपा गो निसाफ पचा माल्नुड। मिनु मेको आन कली परमप्रभु आ फुल्लुम मुशा ब्रेक्शो लोत्र नु आ अरेशो लोत्र तुइक्पाइक्नुड” देंत।

17 मिनु आ शिउमी “इ पशो मरिम्शो बाक्व।

18 गे शेम्सीनेवे। गे नु बाक्व मुरपुकी यो शेम्सीनीम। एको गेय इ मचाप्चा डा बाक्व। गे ला पने मचाप्नेवे। गन्ती ११:१४; ब्यवस्था १:९

19 आं लोत्र नेनो, गो इ कली अर्ती गेनुड। परमप्रभु गे नु बाक्व। गे मुर आन पर्बम परमप्रभु कली पुंडदो।

20 परमप्रभु आ फुल्लुम मुशा ब्रेक्शो लोत्र नु आ अरेशो लोत्र मेको आन कली तुडक्पतो। मोपा गे मेको आन गाक्तीक लां नु आन पचा माल्शो गेय मेको आन कली शेंदो।

21 गे मुर नेल्ल आन दाते रे रिम्शो गेय पने चाप्ब परमप्रभु कली मान पा हिंब, थमा सुइक्चा पुंडसीब नु खुइश्शा मार मार ताक्शा मजाइब मुरपुकी योत्रचा माल्नेवे। नोले मेको मुर आन कली कोत्रब ठेयब मुर वोतो। मेको आन कली १० जना मुर आन कली कोत्रब, ३० जना मुर आन कली कोत्रब, सहे सहे जना मुर आन कली कोत्रब नु हजार हजार जना मुर आन कली कोत्रब ठेयब मुर आन कली योत्रडो।

22 मेको कोत्रब मुरपुकीमी नाक्त किंत किंत डा निसाफ पामेक्ल। ठेयब मुददा चहिं इ डोंइती चाक्गामेक्ल। आइक्च मुददा आंमा गारपदमेक्ल। मो पाप्तीवी हना, इ कली रिम्शो दुम्ब। मिनु मेको कोत्रबपुकीमी इ गेय नु श्येत योक्शा पाइनीम।

23 गे आं देशो पाप्तीवी हना, परमप्रभुमी यो इ कली मोदेशो पचा गेब। गे मेको गेय फाल्ने चाप्नेवे। मिनु इ मुर नेल्ल दुशा गारशा, आंम आन बाक्तीके लाइनीम” दे यित्रोमी मोसा कली अर्ती गेप्टु।

24 मिनु मोसामी आ शिउ आ अर्ती नेंशा, आ देशो नेल्ल पाप्टु।

25 मिनु इस्राएली आन दाते रे रिम्शो गेय पाइब आन कली योत्रशा, मुर आन कली कोत्रब वोइक्तु। १०, १०, ३०, ३०, सहे सहे नु हजार हजार जना मुर आन कली कोत्रब वोतो।

26 मेको मुरपुकीमी मुर आन कली निसाफ पची ना, निसाफ पाइनीम। मिनु ठेयब मुददा बाक्त हना, मोसा कली ब्रेत्ताक्म। आइक्च मुददा चहिं आंमा निसाफ पाप्तेक्म।

27 मिनु मोसामी आ शिउ कली लचा गेप्टु। मिनु मेको आ रागी लेत्त।

## 19

### सीनै डांडा जाक्दीश्शो

1 मिनु इस्राएलीपुकी इजीप्ट रागी रे यूशा महिना सां नोले सीनै माइश्शो गोरशो रागीमी जाक्तेक्म।

2 डोंइती रेफीदीम माइश्शो रे लशा, सीनै माइश्शो डांडा आ डोंइती आन ताम्बु कीतेक्म। मेको डांडा आ डोंइती बाक्शो बाक्तेक्म।

3 मिनु मोसा परमप्रभु नु लोत्र पचा कली डांडा डोंइसाक्व। मिनु डांडा रे परमप्रभु यावेमी मोसा कली “इ किकी पिपी याकूब आ खिं डा मुर, इस्राएली आन कली

4 “गो इजीप्ट डा मुर आन कली मार मार पडा, मेको ताइतीनी। ककाकुली आ फ्रां तार कुरशो खोदेशो पा इन कली आं नेक्था वोइक्तन्नी। ब्यवस्था ३२:११

5 गे आं देशो लोत्र पाइतीनी नु आं कबल पशो टीतीनी हना, गे नेल्ल जात जात डा मुर आन दातेमी आं योत्रशो मुर दुम्नीनी। मारदे हना रागी नेल्ल आं केन बाक्ब। ब्यवस्था ५:२; ब्यवस्था ७:६

6 गे आं कली चढेब आन राज्य नु आं योत्रशो जात डा मुर दुम्चा माल्नीनी” दे मेको लोत्र इस्राएली आन कली देंचा माल्नेवे” दे माइक्तु। यसैया ६१:६; १ पत्रुस २:९; प्रकाश १:६; लेवी १९:२

7 मिनु मोसामी इस्राएल आ थर डा मुर आन खाल्पा आन कली ब्रेश्शा, परमप्रभु यावेमी देशो लोत्र मेको आन कली माइक्तीमी।

8 मिनु मुर नेल्ल का दुम्शा “परमप्रभु यावे आ देशो नेल्ल पाइनीकी” देंतेक्म। मिनु मोसामी मेको मुर आन देशो लोत्र परमप्रभु यावे कली देंत। प्रस्थान २४:३-८

9 परमप्रभु यावेमी मोसा कली “लो, गो मारेइ मतांडसीचा डा गोस्सुमी इ कली गुम्थ जाक्नुड। मोपा गो मुर आन कली, गे नु लोत्र पशा नेंपाइक्नुडमी। मिनु इ कली गेना हना यो थमा सुइक्नीम” देंत। मोसामी मुर नेल्ल आन देशो यो परमप्रभु यावे कली देंत। प्रस्थान १६:१०; प्रस्थान ३४:५; भजन संग्रह १८:१२; प्रस्थान १४:३१

10 मिनु परमप्रभु यावेमी मोसा कली “मुलाक्ती नु दीसा इस्राएली आन कली गो नु गुम्पाइक्चा ठीक पावो। आन फेक्शो वा मुरपतो। लेवी ११:४४; यहोसु ३:५; अय्युब १:५

11 नित्थ नाक्त आं कली गुम्चा कली ठीक दुम्चा माल्नीमी। मारदे हना नित्थ नाक्ती गो सीनै डांडाम मुर नेल्ल आन डोंइती जाक्नुड।

12 मिनू गे डांडा आ एर ओंथ थरपु हिरचा माल्लेवे। गेमी मुर आन कली 'डांडा मडोइक्चा, मथिचा डा पा थरपु हिरचा माल्लेवे। होस पा बाक्कीन! सुम डांडा आ पुं थीबा, मेको थमा पा साइक्चा पुंडसीब। प्रस्थान ३४:३

13 मुर आन गुडमी थरपु थिचा मदुम्ब। मेको थरपु थीबा बस्तु भाव बाक्तेक्म हना यो, मुर बाक्तेक्म हना यो, मेको कली फुल्लु आप्शा हना यो ब्रा आप्शा हना यो साइक्चा माल्लीनी' दे इस्राएली आन कली शेंचा माल्लेवे। तुराही आ ठेयब सेंदा नेंशा नोले ला, मेकोपुकी डांडा डोइक्चा माल्लीमी" दंत। हिब्रू १२:१८-२०

14 मिनू मोसा डांडा रे मुर आन बाक्तीके तोइश्शा, मेको आन कली परमप्रभु नु गुम्पाइक्चा कली ठीक पाप्तु। मिनू मेकोपुकीमी आन फेक्शो वा मुरतेक्म।

15 मिनू मोसामी वोंइश मुर आन कली "नित्थ नाक्त ठीक दुम्शा बाक्कीने। मीश मुर नु मबाक्कीन" दंत। १सामुएल २१:४-५; १कोरिन्थी ७:५

### परमप्रभु यावे गूशो

16 मिनू मेको आ नित्थ नाक्ती डांडा तार बुंबु पा, चिला पा, ठेयब गोस्स का यूत। मिनू तुराही का थम ठेयब सेंदा पा ग्रीत। मेको नेंशा, इस्राएलीपुकी हिंशा, डोन लशा, बाक्तेक्म।

17 मिनू मोसामी इस्राएली आन कली परमप्रभु कली गुम्थ जाक्कीन, दे आन बाक्तीक रे गुंडताक्व। मेकोपुकी डांडा आ पुंमी राप्शा बाक्शो बाक्तेक्म।

18 मिनू सीनै डांडा कुनै कुन दुम्त। मारदे हना परमप्रभु यावे मेकेर मीम तोंइसाक्व। मेको मार मार चोशो खोदेशो पा ठेयब कुन यूत। मिनू डांडामी ठेयब खिनु कुत। उत्पत्ती १५:१७

19 तुराही आ सेंदा शुश ठेयब दुम्मेनु, मोसामी परमप्रभु नु लोत्र पाप्तु। मिनू परमप्रभु बुंबु पशो खोदेशो पा मोसा कली लोत्र लेत्ताक्व। प्रस्थान ३३:११; प्रेरित ७:३८

20 मिनू परमप्रभु यावे सीनै डांडा तारी जाक्त। मिनू परमप्रभु यावेमी मोसा कली "डांडा तार डोंइसो" दे ब्रेत्त। मिनू मोसा डोंइसाक्व।

21 मिनू परमप्रभु यावेमी मोसा कली "तोंइसो। मुर आन कली 'होस पा मेकेर बाक्कीने। परमप्रभु यावे गे मलने' दे अरेवो। आं कली कोत्रथ कुम्तेक्म हना, शुश मुर बेक्नीम।

22 आं कली गुम्थ कुडब चढेबपुकी यो आंम कली चिक्शा ठीक दुम्चा माल्लीम। मो मपाप्तेक्म हना, गो मेको आन कली यो साइक्नुडमी" दंत।

23 मिनू मोसामी परमप्रभु यावे कली "मुरपुकी सीनै डांडा डोइक्ने मचाप्नीम, मारदे हना गे आं कली 'एर ओंथ थरपु हिरशा, इन के सेल्चा' दे अरेतीनी" दंत।

24 मिनू परमप्रभु यावेमी मोसा कली "लावो, हारून कली डोइक्पतो। तन्न चढेबपुकी नु मुर आन कली चहिं मचाक्को। परमप्रभु यावे आ बाक्तीके कुम्तेक्म हना, गो मेको आन कली साइक्नुडमी" दंत। प्रस्थान २४:९-११

25 मिनू मोसा मुर आन बाक्तीके तोइश्शा, मेको लोत्र नेल्ल मुर आन कली माइक्तीमी।

## 20

### परमप्रभु आ अरेशो १० ओटा लोत्र ब्यवस्था ५:६-१८

1 मिनू परमप्रभुमी मार लोत्र पाप्तु देंशा हना मत्ती ५:१७-२८

2 "गो परमप्रभु यावे, इन परमप्रभु नड। गो इन कली वाइलीम वाइल दुम्शो इजीप्त रागी रे गुंडताक्नी। न्यायाधीस ६:८; येरमीया ३४:१३

3 गे आं कली ला बाप्शा सेउ पने, देवी देवता आन कली बाप्शा सेउ मपने। ब्यवस्था ६:४-५; यसेया ४५:५-६; १कोरिन्थी ८:५-६

4 मूर्ति मसेलीन। सरीडम बाक्ब, रागीम बाक्ब नु ब्वाक्कु गाम बाक्ब तेकोड जन्तु आन मूर्ति मसेलीने। ब्यवस्था ४:१५-१९; ब्यवस्था २७:१५; यसैया ४०:१८-२६; रोमी १:२३

5 मेको आन कली बाप्शा सेउ मपने। मेको आन कली ठेयब मसेलीने। मारदे हना गो परमप्रभु यावे, इन परमप्रभु नड। गो रुश पाइब परमप्रभु नड। आं कली काइ मदाक्ब नु आ अरेशो मटीब मुर आन आल, चच, युड नु युड आन युड आन पाला सम्म यो सजाइ गेब परमप्रभु नड। प्रस्थान ३४:१४; ब्यवस्था ४:२४; ब्यवस्था ५:९; ब्यवस्था ६:१५; अय्युब २१:१९; येरमीया ३१:२९-३१; इजीकीएल १८:२५

6 तन्न सु सुमी आं कली दाकनीमी, आं शेंशो लोत्र टीनीमी, मेको आन आल, चच युड नु युड आन युड आन पाला सम्म कली ला ममाइ, हजार हजार पाला सम्म गेना हना यो शिशी पाइक्नुडमी। प्रस्थान ३४:७; ब्यवस्था ७:९

7 गे परमप्रभु यावे, इन परमप्रभु आं नें, मो मथिने। मारदे हना सुम परमप्रभु यावे आं नें मो थीबा, मेको कली सजाइ मगेथु, मप्रोंडब। लेवी १९:१२; लेवी २४:१६

8 सन्चरबार नाइक्तीक नाक्ती आं नाक्त बाक्ब। मानेचा माल्नीनी। प्रस्थान १६:२५-२९

9 गे ६ नाक्त इन गेय नेल्ल पचा माल्नीनी।

10 तन्न मेको आ नोले डा नाक्त परमप्रभु यावे, इन परमप्रभु आ नाइक्तीक नाक्त बाक्ब। मेको नाक्ती गेपुकी काइ गेय मपने। इन तमी तौ, इन वाइलीम वाइल, इन बस्तु भाव, इन रागीम बाक्शो अर्को रागी डा मुर आन कली यो काइ गेय मपपतीन। प्रस्थान ३१:१३-१७; इजीकीएल २०:१२; मर्कूस २:२७-२८; कलस्सी २:१६-१७

11 मारदे हना परमप्रभु यावेमी ६ नाक्तीमी सरीड नु रागी, ठेयब समुन्द्र नु ठेयब समुन्द्रमी बाक्शो नेल्ल आन कली सेल्लु। मिनु नोले डा नाक्त नांडसाक्ब। मोपतीके परमप्रभु यावेमी 'मेको आं नाक्त बाक्ब' दे मेको नाक्त कली आसीक गेशो बाक्ब। उत्पत्ती २:२-३

12 इन आम आफ आन कली मान पने। मो पाइतीनी हना, परमप्रभु यावेमी, इन परमप्रभु इन कली गेशो रागीम शुश ब्रोंडचा गेब। प्रस्थान २१:१७; ब्यवस्था २७:१६; मती १५:४-६; एफिसी ६:२-३

13 मुर मसतीन। प्रस्थान २१:१२; उत्पत्ती ९:५-६; याकूब २:१०-११

14 मुर आन मीश वोंडश नु मडपीन। लेवी २०:१०; मती १५:१९

15 खुड मपने। प्रस्थान २१:१६; लेवी १९:११; एफिसी ४:२८

16 जोल पा सांकछी मबाक्कीन। प्रस्थान २३:१; ब्यवस्था १९:१८-१९; एफिसी ४:२५

17 इन नेक्था बाक्ब मुर आ खिं, आ मीश आ वाइलीम वाइल, आ बी ब्यफ नु आ गधा, मेको के मार बाक्त हना यो, मेको तशा मबाल्दीन। एको परमप्रभु यावे आ अरेशो लोत्र बाक्ब" दे मोसामी इस्राएली आन कली देंत। रोमी ७:७; रोमी १३:९

### परमप्रभु कली मान पा हिंशो

18 मिनु मुरपुकी डोन बाक्मानु, बुंबु पशो नेंशा नु चिला पशो तशा, तुराही ताप्शो नेंशा, डांडा रे कुशो कुन तशा, डोन लशा हिंशा खिंखि पा, कोत्रशा बाक्तेक्म।

19 मिनु मेकोपुकीमी मोसा कली "गे आंड कली लोत्र पाइतीनी हना, गो नेंनीकी। तन्न परमप्रभुमी आंड कली लोत्र पाप्तु हना, बेक्नीकी" देंतेक्म।

20 मिनु मोसामी "महिनीन। परमप्रभु इन कली नाक्थ जाक्त। गे परमप्रभु कली मान पा हिंचा डा बाक्ब, दे मिन्ताक्नी हना, पाप मपाइनीनी" देंत। उत्पत्ती २२:१

21 मुरपुकी डोन बाक्शो बाक्तेक्म। मोसा चहिं परमप्रभु आ नेक्था क्येर गोस्सुम लत। १राजा ८:१२

22 मिनु परमप्रभु यावेमी मोसा कली "गे इस्राएली आन कली 'आं कली सरीड रे लोत्र पशो नेंतीनी।

23 गे गो नु देवी देवता मसेलीन। गे आंम कली सुन नु चांदी के देवी देवता मसेलीने।

24 गे आं कली खप के चढेतीके सेल्चा माल्नीनी। मेको तारी चोशा चढेतीक चढेचा माल्नीनी। इन दुशा बाक्चा आ पबंम चढेतीक चढेन। भेडा, ब्यफ चढेचा माल्नीनी। गो ते ते इन कली आं नें मिम्पाइक्नुडा, मेक मेक इन कली आसीक गेनुड। प्रस्थान १७:१५; प्रस्थान २७:१-८; ब्यवस्था १२:५



25 गे आं कली फुल्लु के चढेतीके सेल्चा दाक्ताकनी हना, मप्रोल्लो फुल्लु के सेल्चा माल्नीनी। मेको फुल्लु फलामम प्रोल्लतीनी हना, मेको आं कली मदुम्ब। ब्यवस्था २७:५; यहोसु ८:३१

26 आं कली चढेतीकेम थेंका मडोंइसीने। इन मुने दोक्तीक मतांइसेक्ल' दे माइक्मी" देंमाक्त।

## 21

### हिब्रू वाइलीम वाइल

1 मिनु परमप्रभुमी लेंशा "मेको निसाफ पतीक लोव्र मुर आन कली शेंचा माल्नेवे।

2 'गेपुकीमी हिब्रू वाइल ग्याप्तीनी हना, ६ बर्स इन गेय पपाइश्शा, नोले डा बर्स मो लचा गेचा माल्नीनी। लेवी २५:३९-४१; ब्यवस्था १५:१२-१७; येरमीया ३४:१४

3 मेको वाइल आ का जाक्त हना, आ का लचा माल्ब। ग्युबे पा जाक्त हना, आ मीश लाइश्शा लचा माल्ब।

4 आ होव्रपम आ वाइल कली ग्युबे पपाइक्तु हना, मेकोमी तमी तौ थित हना, मेको मीश मुर नु आलपुकी मेको होव्रप केन दुम्नीम। मेको वाइल आ का ला लचा माल्ब।

5 तन्न मेको वाइलम "आं होव्रप, मीश नु आं आल आन कली दाक्नुड, गो प्रोंइशा मलाइनुड" देंत हना,

6 आ होव्रपम आ वाइली कली परमप्रभु आ डोंइती लाइक्चा माल्ब। मिनु लाप्चो डा शीम आ नोफा ख्रित्चा कली राप्पाइक्चा माल्ब। मिनु आ होव्रपम लूजेमी आ वाइली आ नोफा ख्रित्चा माल्ब। मिनु मेको गेना हना यो वाइल दुम्शा बाक्ब। ब्यवस्था १:१७; भजन संग्रह ८२:१

7 सुइमी आ तमी कली वाइलीमी सेल्शा, लेयतु हना, मेको प्रोंइचा मपुंडसीब।

8 मेको होव्रपमी आंम कली चाक्गा नोले मेको कली मदाक्ताक्व हना, मेको कली क्येट ताक्शा प्रोंइचा माल्ब। आ होव्रपमी मेको वाइलीम कली अर्को रागी डा मुर आन कली लेयने मचाप्ब। मारदे हना मेको मीश मुर मरिम्शो पचा पुंडसीशो बाक्ब।

9 मिनु मेको होव्रपमी मेको ग्याप्शो मीश आल आ तौ कली गेप्टु हना, आ तमी खोदेशो पचा माल्ब।

10 मेकोमी अर्को मीश यो चाक्तु हना, डोंइती डा कली जचा, फेक्चा नु ग्युबे पशो मीश मुर आन माल्लो नेल्ल गेचा माल्ब।

11 तन्न मेको आ माल्लो नेल्ल मगेप्टु हना, मो लचा गेचा माल्ब' देनो" देंत।

### साइक्चा नु तुम्मुचा आ पर्वम लोव्र

12 मिनु "सुमी मुर कली मबेक्म सम्म तुप्बा, मेको मुर थमा पा साइक्चा पुंडसीब। प्रस्थान २०:१३; उत्पत्ती ९:६; मत्ती ५:२१-२२

13 मुरुमी अरु कली खेदा मपथु, साइक्चा ममाल्लो बाक्त, तन्न परमप्रभुमी मेको मोदेशो दुम्पाइक्तु, गो इन कली मोदेशो मुर कली प्रोक्शा बाक्तीक का कोंइनुड। गन्ती ३५:६-२९; ब्यवस्था १९:४-१३

14 तन्न मुर कामी अरु कली 'गो साइक्नुड' दे मेको कली साइक्तु हना, मेको मुर कली आं चढेतीक रे लाइश्शा, साइक्चा माल्ब। १राजा २:२९-३०

15 सुम आ आम आफ आस कली तुप्बा, मेको थमा पा साइक्चा पुंडसीब।

16 सुमी मुर कली लेयचा कली खुइ पाइबा, मिनु मेको आ खुइ पशो मुर कली आ खिम थित्तेक्म हना, मेको मुर थमा पा साइक्चा पुंडसीब। ब्यवस्था २४:७; १तिमोथी १:१०

17 सुमी आ आम आफ आस कली सराप पाइबा, मेको थमा पा साइक्चा पुंडसीब।

18 मिनु मुरपुकी जिशा कामी अर्को कली फुल्लु आप्तु हना, आ गुइमी तुप्टु हना, तन्न मेको मुर मबेक्थु, आ बाक्तीकेम इप्शा,

19 बोक्मेनु, कोक्के तिकशा, गाक्ने चाप्ब दुन्त हना, मेको तुप्बमी मेको तुप्चा पुंडसीब नु गारचा माल्ब। तुप्चा पुंडसीब आ गेय मपशो डा ला थाप्चा ममाइ, मेको कली ठीक पा मसाम सम्म थाप्चा माल्ब।

20 मिनु सुइमी आ वाइलीम वाइल कली कोक्केमी तुप्टु हना, तुबानु बेक्त हना, मेको मुर थमा पा सजाइ ताइब।

21 तन्न मेको तुप्चा पुंडसीशो मुर का निकशी नाक्त सम्म ब्रोंडत हना, मेको तुप्ब मुर सजाइ गेचा मपुंडसीब। मारदे हना आंम आ क्येटीम ग्याप्शो बाक्ब।

22 मिनु वोंडश मुर जिशा, राम्शी पा आन नेक्था बाक्शो कोव्रज कुरशो मीश मुर कली चुशा चिप्शा, मेको मीश मुरुम आ कोव्रज डा आल शांताक्व हना, तन्न आ चहिं मारेइ मरिम्शो मदुम्त हना, आ वोंडशेमी देशो खोदेशो पा मेको डी डा चुशा चिप्ब मुरुम सजाइ ताइब। निसाफ पाइबमी गिश थाप्चा माल्ब देंबा, मिश थाप्चा माल्ब।

23 तन्न मेको मीश मुर नोले बेक्त हना, चुशा चिप्ब मुर साइक्चा पुंडसीब। लेवी २४:१९-२०; ब्यवस्था १९:२१; मत्ती ५:३८

24 सुइमी अरु आ मिक्ची का पुक्ताक्व हना, मेको यो आ मिक्च पुक्चा पुंडसीब। सुइमी अरु आ खुइ का जिकताक्व हना, मेको यो आ खुइ जिकचा पुंडसीब। सुइमी अरु आ गुइ जिकताक्व हना, मेको यो आ गुइ जिकचा पुंडसीब। सुइमी अरु आ खोइली का जिकताक्व हना, मेको यो आ खोइली जिकचा पुंडसीब।

25 सुइमी अरु कली मीम चोशा, गार सेल्लु हना, मेको कली यो मीम चोशा गार सेल्चा माल्ब। सुइमी अरु कली तुप्तु हना, मेको तुप्ब यो तुप्चा पुंडसीब। सुइमी अरु कली क्योरशा गार सेल्लु हना, मेको यो क्योरशा गार सेल्चा पुंडसीब।

26 मिनु होव्रप कामी आ वाइलीम वाइल आन मिक्चीम तुप्तु हना, मेको मिक्च बुक्त हना, मेको होव्रपमी मेको मिक्च आ पर्बम मेको कली मोशा प्रोंडचा माल्ब।

27 आ वाइलीम वाइल कली तुप्शा, आ खुइ जिकताक्व हना, मेको होव्रपमी मेको खुइ आ पर्बम मोशा प्रोंडचा माल्ब।

28 मिनु ब्यफ कामी वोंडश मुर, मीश मुर, सुइ कली खुशा साइक्तु हना, मेको ब्यफ कली थमा पा फुल्लु आप्शा साइक्चा माल्नीनी। आ श्ये ब्वचा मदुम्ब। मेको ब्यफ आ होव्रप चहिं सजाइ मताइब। उत्पत्ती ९:५; गन्ती ३५:३३

29 तन्न मेको ब्यफ डोंइती रे खुइब बाक्त हना, मिनु आ होव्रपमी तुइश्शा यो, आ ब्यफ कली रिम्शो पा मवोइक्तु हना, मेको ब्यफोमी वोंडश मुर, मीश मुर, सुइ कली साइक्तु हना, मेको ब्यफ कली फुल्लु आप्शा, साइक्चा माल्ब। मिनु आ होव्रप कली यो साइक्चा माल्ब।

30 मसाइक्चा, दे क्येट पुंडतेक्म हना, दोशो पुन्मे मोशो गेचा माल्ब।

31 ब्यफोमी तमी तौ खुप्तु हना, मेको मोदेशोन पचा माल्ब।

32 ब्यफोम सुइ आन वाइलीम वाइल आन कली खुप्तु हना, मेको ब्यफ आ होव्रपमी वाइलीम वाइल आन होव्रप कली ३० शेकेल चांदी गेचा माल्ब। मिनु ब्यफ कली चहिं फुल्लु आप्शा साइक्चा माल्ब” देनो। शेकेल का ११.५ ग्राम, तोला खोदेशो बाक्ब। ३० शेकेल चांदी ३४५ ग्राम बाक्ब।

### बस्तु भाव आन पर्बम अरेशो

33 मिनु “सुइमी लाइश्शो इनार रोक्तु हना, इनार दोप्तु हना, मिनु मेको मसुप्थु लत हना, नु ब्यफ हना यो गंधा हना यो बिक्त हना, लेवी ७:२४; लेवी १७:१५

34 मेको इनार आ होव्रपमी मेको गारपाइक्चा माल्ब। मेकोमी बस्तु भाव आ होव्रप कली क्येट गेचा माल्ब। मेको बेक्शो बस्तु चहिं इनार आ होव्रप के दुम्ब।

35 मिनु मुर का आ ब्यफोमी अरु मुर आन ब्यफ कली खुशा साइक्तु हना, मेको सेस ब्यफ कली लेयचा माल्ब। मेको ताक्शो क्येट मेको आस दातेमी योक्शा, बेक्शो ब्यफ यो आस दातेमी योक्चा माल्नीस।

36 तन्न मेको ब्यफ डोंइती रे खुइब बाक्ब, दे तुइश्शा यो, आ होव्रपमी मेको ब्यफ कली रिम्शो पा मवोइक्तु हना, मेको बेक्शो ब्यफ कली थमा पा थाप्चा माल्ब। मिनु बेक्शो ब्यफ मेको के दुम्ब” देनो।

1 सुइमी ब्यफ, भेडा खुइ पशा, क्योरशा ब्वाप्तु हना यो, लेयतु हना यो, मेको मुरुमी ब्यफ का के ५ ओटा ब्यफ थाप्चा माल्ब। भेडा का के ४ ओटा भेडा थाप्चा माल्ब। २सामुएल १२:६; हितोपदेस ६:३१; लूका १९:८

2 मिनु खुइ कली खुइ पना पन थित्तेकम हना, मेको कली तुप्शा साइक्तेकम हना, साइक्ब साइक्चा डा सजाइ गेचा मपुंडसीनीम।

3 तन्न नां दाप्शा नोले सम्म तुप्शा साइक्तु हना, मेको साइक्ब साइक्चा डा सजाइ टाइब। खुइ पाइब आ खुइ पशो नेल्ल लेत्चा माल्ब। थाप्ने मचाप्तु हना, वाइल सेल्चा पुंडसीब।

4 मेको खुइ आ खुइ पशो ब्यफ, गधा, भेडा आ बाक्तीकेम सेल थित्तेकम हना, मार बाक्त हना यो का के निक्शी थाप्पाइक्चा माल्ब।

### रू आ पर्वम अरेशो

5 मिनु “सुइमी आ बी ब्यफ, क्यारश भेडामी अरु मुर आन शोकशो रू नेकपाइक्तु हना, अडगुर रू डा अडगुर नेकपाइक्तु हना, मेकोमी आ आंम रू डा नेल्ल क्येडा रिम्शो फल थाप्चा माल्ब।

6 सुइमी मी मुइक्तानु, मेको मीम चू नु रूमी बाक्शो मारेइ नेक्तु हना, मेको मी मुइक्बमी मीम नेक्शो नेल्ल थाप्चा माल्ब” देनो।

### वोइक्चा गेशो आ पर्वम अरेशो

7 मिनु “सुइमी आ नेक्था डा मुर कली आ क्येट, अरु मारेइ वोइक्चा कली गेप्तु हना, वोइक्ब मुर आ खिं रे खुइ दुम्त हना, नु खुइ कली थित्तेकम हना, मेको खुइमी का के निक्शी थाप्चा माल्ब।

8 खुइ मथित्तेकम हना, मेको खिं डा ठेयब मुरुमी आंम नेक्था डा मुर आ मार मार खुइ पवा कों, दे परमप्रभु आ डोंइती राप्पाइक्चा माल्ब।

9 मिनु बी ब्यफ, गधा, भेडा नु वासी मार मार वोइक्बमी नु वोइक्चा गेब, निम्फामी ‘आं के बाक्ब’ देताक्स हना, मेको निक्शी परमप्रभु आ डोंइती जाक्चा माल्नीस। परमप्रभुमी सुम खुइ सुइक्बा, मेकोमी का डा निक्शी थाप्चा माल्ब।

10 मिनु सुइमी आ नेक्था डा मुर कली गधा, ब्यफ, भेडा नु अरु बस्तु भाव वोइक्चा कली गेप्तु हना, मेको बस्तु भाव बेक्तेकम हना, तुप्शा बिग्रेम्तेकम हना, सुइम मतचा डा पा मुरुम खुइ पा लाइशो बाक्तेकम हना, १राजा ८:३१-३२

11 मेको वोइक्बम आ नेक्था डा मुर आ बस्तु भाव ‘खुइ मपड’ दे परमप्रभु यावे आ डोंइती कसम जचा माल्ब। मिनु बस्तु भाव आ होव्रपम मेको थमा सुदानु, वोइक्ब मुरुमी मारेइ थाप्चा ममाल्ब।

12 तन्न आ खिं रे खुइ पशो बाक्त हना, मेको वोइक्बमी मेको थाप्चा माल्ब।

13 ब्वाकी डा जन्तुम मेको बस्तु कली ग्याइशो साइशो बाक्त हना, मेको वोइक्बम मेको साइशो बस्तु दसी चाक्चा माल्ब। मेको ब्वाकी डा जन्तुमी साइशो कली थाप्चा ममाल्ब। उत्पत्ती ३१:३९

14 मिनु सुइमी आ नेक्था डा मुर रे ब्यफ का परमा पचा कली पुंडतु हना, बस्तु आ होव्रप मबाक्थु, मेको ब्यफ खजा दुम्त हना, बेक्त हना, मेको थमा पा थाप्चा माल्ब।

15 तन्न आ होव्रप यो बाक्त हना, मेको मारेइ थाप्चा ममाल्ब। मारेदे हना गेय पचा कली क्येट गेशो बाक्ब” देनो।

### मीश आल आ पर्वम अरेशो

16 मिनु “वोंइश मुर कामी कन्ने मीश आल नु मिलो शिलो पा, मेको नु इप्त हना, मेको कली थमा पा ग्युंवे पा आ आफ कली मार मार थाप्चा माल्ब। ब्यवस्था २२:२८-२९

17 तन्न मीश आल आ आफोमी आ तमी मगेप्तु हना, मेको वोंइश मुरुम कन्ने ग्युंवे पशो खोदेशो पा, क्येट थाप्चा माल्ब।

### थमा पा साइक्चा पुंडसीब मुर

18 टुना मुना पाइब कली ब्रोंइचा मगेचा। लेवी २०:६,२७; लेवी १९:३१; ब्यवस्था १८:१०; १सामुएल २९:९; मलाकी ३:५

19 सु बस्तु नु इप्बा, मेको कली थमा पा साइक्चा माल्नीनी। लेवी १८:२३; ब्यवस्था २७:२१

20 सुमी देवी देवता कली पूजा पाइबा, मेको मुर थमा पा साइक्या पुंडसीब। परमप्रभु यावे कली ला चढेचा माल्ब। प्रस्थान २०:३-५; ब्यवस्था १३:७-१९; ब्यवस्था १७:२-७

### महिकसीशो मुर आन पर्वम अरेशो

21 अर्को रागी डा मुर आन कली श्येत मगेचा, मदिप्या। मारदे हना गे यो इजीप्ट रागीमी अर्को रागी डा मुर दुश्चा बाक्तीनी। लेवी १९:३३-३४; ब्यवस्था १०:१८,१९

22 आ वोंइश बेकशो मीश मुर नु रोम रोइकच आन कली श्येत मगेचा। ब्यवस्था २७:१९; यसैया १:१७; जकरिया ७:१०

23 गेपुकीमी श्येत गेतीनी हना, मेकोपुकीमी आं कली लोत्र पाम्तेकम हना, गो थमा पा आन पुंडशो गेनुड।

24 मिनु गो गाइशशा, इन कली तरवारमी साइकनन्नी। मिनु इन मीश वोंइश बेकशो मीश दुम्ब। इन आलपुकी आफ बेकशो आल दुम्नीम।

25 गेपुकीमी आं मुर आन दाते डा पुडग आन कली क्येट जेर गेतीनी हना, गे क्येट चेम्चा कली चाइकब ताकब मुर खोदेशो मटुमीन। लेवी २५:३६; ब्यवस्था २३:२०; हितोपदेस २८:८

26 मिनु गेपुकीमी मेको आन सुम्तीक वासी क्येट आ पा डा लाइक्तीनी हना, नां पेरची ना मेको लेत्चा माल्नीनी। ब्यवस्था २४:१०-१३

27 मारदे हना मेको आन रां डा सुम्तीक का ला बाकब। इप्ची ना दोपा सुम्सीनीमी? आं कली ब्रेत्तेकम हना, गो आन पुंडशो गेनुड। मारदे हना गो शिशी पाइब नड।

### परमप्रभु कली मान पा हिंचा

28 परमप्रभु आ पर्वम मरिम्शो लोत्र मपचा। इन कली सासन पाइब कली सराप मपचा। लेवी २४:१४-१६; प्रेरित २३:५

29 गे इन रू डा डोंइती मीशो मारेड मारेड नु अडगुर रस चढेचा मरिम्दीन। मिनु इन डोंइती जरमेशो तौपुकी आं कली गेचा माल्नीनी। प्रस्थान २३:१९; ब्यवस्था १८:४; हितोपदेस ३:९-१०; प्रेरित १३:२,१३

30 इन बी ब्यफ नु इन भेडा रे यो मोदेशो पचा माल्नीनी। ७ नाक्त आन ममा नु बाक्चा माल्नीमी। मेको नोले डा नाक्ती आं कली गेचा माल्नीनी।

31 गेपुकी आं मुर ला दुम्चा माल्नीनी। गे ब्वाकी डा जन्तुपुकीम साइशो मब्वने। मेको कुचुम कली ब्वचा गेन” देनो। लेवी १९:२; १पत्रुस १:१५; लेवी ७:२४; ब्यवस्था १४:२१; इजीकीएल ४:१४; इजीकीएल ४४:३१

## 23

### ठीक पतीके आ पर्वम अरेशो

1 “गेपुकी जोल लोत्र मब्रपतीने। मरिम्शो पाइब कली वारच मपने। जोल पा सांकछी मबाक्कीन। प्रस्थान २०:१६; लेवी १९:१६; भजन संग्रह १५:३; हितोपदेस १९:९

2 मिनु टेयब हुल का मरिम्शो पाइब बाक्तेकम हना, मेको आन नोले मखोतीन। निसाफ पाइब आ डोंइती ‘टेयब हुल डा मुर ठीक बाक्नीम’ मदेनीन। मोपा आं ठीक पतीके रे डोन मलने।

3 दूली पाइब मुर पुडग बाक्त हना यो मेको कली वारच मपतीन। लेवी १९:१५

4 मिनु गे इन जोरी सत्रु आन ब्यफ, गधा लां जाम्शा, हिरशो ताइतीनी हना, मेको कली वारच पा, लेशशा आ खिं चोब्रदीत्चा माल्नीनी। अय्युब ३१:२९; हितोपदेस २५:२१-२२; लूका ६:२७

5 गे नु मदुइब मुर आ गधा आ भारीम चिप्शो थित्तीनी हना, गे मेको पोक्ने मचाप्शो मुर ताइतीनी हना, मेको कली महेरदीन। मेको कली वारच पा मेको कली पोक्कीन।

6 मिनु पुडग मुर का पित हना, मेको कली पुडग बाक्त हना यो, ठीक निसाफ पने। ब्यवस्था २५:१९; भजन संग्रह ८२:२-४; उपदेसक ५:७; यसैया १:१७

7 जोल पा सांकछी माल्ब आन क्येडा डोन बाक्कीन। दोस मताइब नु ठीक पाइब कली मसतीन। मारदे हना गो मरिम्शो पाइब आ पबर्म ठीक पाइब बाक्ब मदेनुड।

8 गेपुकी खुइशशा मारेइ मताक्कीन। मारदे हना मेकोमी मिक्च सिल्ल। मिनु खुइशशा ताक्शोमी ठीक पाइब आ मुददा लोकब। ब्यवस्था २७:२५; १सामुएल ८:३; हितोपदेस १७:२३

9 मिनु अर्को रागी डा मुर आन कली मदिपीन। मारदे हना गेपुकी यो इजीप्त रागीम अर्को रागी डा मुर दुम्शा, अर्को रागी डा मुर आन थुं तुइक्कीनी। प्रस्थान २२:२०

### नाइक्तीक नाक्त नु बर्स

10 मिनु ६ बर्स सम्म इन रूमि खुम्शा, सेक्शा खुप्तीन। लेवी २५:१-१७, १८-२४

11 मिनु मेको आ नोले डा बर्स चहिं मारेइ मशोक्थु, मो वोतीन। इन रागी डा प्रुडगपुकीमी मेको आंमा वाशो जामेक्ल। लीत हना, जन्तुपुकीम जामेक्ल। इन अडगुर रू नु इन तेल रवापुकी यो मेको खोदेशोन पने।

12 गेपुकी ६ नाक्त गेय पचा माल्नीनी। मेको आ नोले डा नाक्ती चहिं नाइसीन। मोपा इन ब्यफ नु गधा यो नाइक्ने चाप्नीम। मिनु इन वाइलीम आ तौ नु इन खिम बाक्शो अर्को रागी डा मुर यो नाइक्चा ताइनीम। प्रस्थान २०:८-११

13 आं अरेशो नेल्ल पने। देवी देवता आन कली मारेइ मपुंइचा आन नें यो मथिचा। यहोसु २३:७; जकरिया १३:२

### बर्स डा चाड सां

14 बर्सम आं पबर्म खेयप सां चाड मानेचा माल्नीनी। प्रस्थान ३४:१८-२६; लेवी २३:४-४४; ब्यवस्था १६:१-१७

15 गो इन कली देशो खोदेशो पा, बोरब ओख्ती मसुप्शो शोब्ले डा चाड मानेचा माल्नीनी। गेपुकी ७ नाक्त सम्म बोरब ओख्ती मसुप्शो शोब्ले जचा माल्नीनी। मेको आबीब महिनामी पचा माल्नीनी। मारदे हना गेपुकी आबीब महिनामी इजीप्त रागी रे ग्रीतीनी। आं डोंइती श्येत्थ गुइ मजाक्कीन। प्रस्थान १२:१५-२०

16 मिनु इन रूम खुम्शो डोंइती डा मीशो मारेइ मारेइ डा चाड मानेचा माल्नीनी। बर्स नुप्ची ना नेल्ल रिक्शा, खुप्शा, ओंइने थुम्शो डा चाड मानेचा माल्नीनी। प्रस्थान ३४:२२

17 वोंइश मुर नेल्ल परमप्रभु, परमप्रभु यावे आ डोंइती बर्समी खेयप सां जाक्चा माल्नीनी।

18 गेपुकीमी चढ़ेनीनु, चढ़ेशो आ हुश नु बोरब ओख्ती सुप्शो मारेइ मारेइ कालेमी मचढ़ेन। मेको चढ़ेशो श्ये आ बोंसो सुनी सम्म महेंचा। प्रस्थान १२:७-१०; प्रस्थान ३४:२५

19 मिनु इन रू डा डोंइती मीशो नेल्ल क्येडा रिम्शो फल फुल नु अन्न परमप्रभु यावे, इन परमप्रभु आ बाक्तीकेम चाक्चा माल्नीनी। गेपुकीमी पाठा कली आ ममा आ दूधम लोप्शा मक्येने, देनो” दे परमप्रभु मोसा कली दैत। उत्पत्ती ४:४; ब्यवस्था २६:१-११; नेहेन्याह १०:३६; ब्यवस्था १४:२१

### परमप्रभु आ अरेशो नु गेशो लोत्र

20 मिनु परमप्रभुमी “नेनीन, गो इन डोंइती आं स्वर्ग डा गेय पाइब का सोइक्नुड। मेकोमी लांमी इन कली कोत्रशा नु आं देशो बाक्तीकेम चोत्रदीब। प्रस्थान १४:१९

21 गेपुकी होस पा बाक्शा, आं देशो टिने। गेपुकी मेको कली मगाइक्पतीन। मारदे हना आं नें मेको नु बाक्ब। मिनु मेकोमी इन हेंथे पतीक मक्याम्ब। यसेया ६३:१०

22 गेपुकी आ देशो नेनीन। आं देशो नेल्ल पाइतीनी हना, गो इन जोरी सत्रु आन जोरी सत्रु दुम्नुड। इन कली खेदा पाइब आन कली खेदा पाइब दुम्नुड।

23 आं स्वर्ग डा गेय पाइब थमा पा इन डोंइती लाइब। मिनु इन कली एमोरी, हिती परिज्जी, नानी, हिव्वी नु यबुसी कनानी आन रागी चोत्रदीब। मिनु गो मेको नेल्ल आन कली क्याम्नुड।

24 गेपुकी मेको आन खोदेशो मपने। मेको आन देवी देवता आन डोंइती बाप्शा सेउ मपने। मेको आन कली गेय मपने। तन्न मेको आन मूर्ति जिक्शा प्रोल्शा ताइक्तीन। प्रस्थान २०:५; ब्यवस्था १२:३०; लेवी १८:३

25 गे परमप्रभु यावे, इन परमप्रभु कली गेय पाइतीनी हना, गो इन जचा तूचा थोत्रक कली आसीक गेनुड। मिनु इन कली रोइ नेल्ल रे प्रोंइनुड। प्रस्थान १५:२६

26 इन रागीमी मीश मुरपुकी आल शाम्ब नु आल मथीब मदुम्नीम। मिनु गेपुकी खाल्पी खाल्पा दुम्चा सम्म ब्रोंइनीनी।

27 गो इन डोंइडोंइती हिंच कोंइनुडमी। मिनु गे ते ते जाक्दीत्नीनी, गो मेक डा जात जात डा मुर आन थुं लुकच लपाइक्नुड। मिनु इन जोरी सत्रु इन कली तशा प्रोक्नीम। उत्पत्ती ३५:५; यहोसु २:९-११; १सामुएल १४:१५

28 गो इन डोंइडोंइती हिकवा सोइश्शो खोदेशो पा हिंतीक सोइक्नुड। मिनु हिच्वी, कनानी नु हिती इन डोंइती रे प्रोक्पाइक्नुड। ब्यवस्था ७:२०; यहोसु २४:१२

29 तन्न बर्स कामी मेको आन कली मप्रोक्पाइक्नुडमी। मोपा प्रोक्पाइक्तामी हना, गोरशो रागी दुम्शा, इन क्येडा ब्वाकी डा जन्तु शुश दुम्नीम।

30 गे शुश दुम्शा, मेको रागी मब्रीनी सम्म, गो मेको आन कली इन डोंइती रे का का पा थुंइनुडमी। ब्यवस्था ७:२२

31 गो इन रागी लल समुन्द्र रे पलिस्ती आन ठेयब समुन्द्र सम्म नु गोरशो रागी रे युफ्रेटीस खोला सम्म दुम्पाइक्नुड। मिनु गो मेको रागी डा मुर इन कली जिम्मा गेनुड। मिनु गे मेको आन कली खेरनीनी। उत्पत्ती १५:१८

32 गे मेकोपुकी नु मेको आन देवी देवता नु कबल मपमुने। प्रस्थान ३४:१२

33 मेकोपुकीम इन कली पाप पपाइक्नीम। मोपतीके मेको आन कली इन रागीमी बाक्चा मोने। गे मेको आन देवी देवता आन कली गेय पाइतीनी हना, आन ग्याइलीम रेत्चा पुंइसीनीनी” दे परमप्रभु यावेमी इस्राएली आन कली अरेवा बाक्त।

## 24

### सीनै डांडाम कबल पशो

1 मिनु परमप्रभु यावेमी मोसा कली “गे, हारून, नादाब, अबीहु नु इस्राएली आन खाल्पा रे ७० जना मुर कुने। मिनु डोन रे आं कली सेउ पचा माल्नीनी। प्रस्थान २८:१; लेवी १०:१; गन्ती ११:१६

2 गे ला आं नेक्था जाक्ने चाप्नेवे। अरु चहिं नेक्था मजाक्थ, बाक्चा माल्नीमी। मिनु मुरपुकी गे नु डांडा डोइक्चा मदुम्नीम” दे परमप्रभु यावेमी देंत।

3 मिनु मोसा डांडा रे तोइश्शा, मुर आन कली परमप्रभु यावेमी देशो नु अरेशो लोत्र नेल्ल नेंपाइक्तीमी। मिनु मुर नेल्लेमी मुर का खोदेशो पा “परमप्रभु यावेमी देशो लोत्र नेल्ल गो पाइनीकी” देंतेक्म। प्रस्थान १९:८

4 मिनु मोसामी परमप्रभु यावे आ देशो लोत्र नेल्ल ब्रेक्ताक्व। मिनु सुनी कना बोक्शा, डांडा आ पुंमी चढेतीक का नु इस्राएल आ १२ थर मिम्चा कली १२ ओटा फुल्लु खुक्तु। प्रस्थान ३४:२७; यहोसु ४:२०

5 मिनु मोसामी इस्राएली ठिटा आन कली बोहोर क्योरशा, चोशा चढेतीक नु परमप्रभु यावे नु दुशा बाक्चा आ पबर्म चढेतीक चढेपपाइक्तु। न्यायाधीस १७:७

6 मिनु चढेशो बस्तु आन हुश आधा लाइश्शा, बोसपुकीम कुर पाप्तु। मिनु लीशो हुश चढेतीकेम बुइक्ताक्व।

7 नोले कबल डा लोत्र ब्रेक्शो किताब मुर आन कली नेंपाइक्चा कली पढेप्तु। मिनु मेकोपुकीमी “परमप्रभु यावे आ देशो नेल्ल पाइनीकी। आ लोत्र टीनीकी” देंतेक्म।

8 मिनु मोसामी बोस डा हुश लाइशशा, मुर आन कली बुइशशा “नेनीन, परमप्रभु यावेमी गेपुकी नु कबल पाप्तु। मेको हुश परमप्रभु यावे आ कबल डा देशो लोत्र आ छाप बाक्ब” देंत। हिब्रू ९:१९-२७; मर्कूस १४:२४

9 मिनु मोसा, हारून, नादाब, अबीहु नु इस्राएली आन खाल्पा रे ७० जना मुर डांडा डोंइसाक्व।

10 मिनु मेकोपुकीमी इस्राएली आन परमप्रभु कली ताम्तेक्म। आ बाक्तीक बास साफीर माइशशो हीरा खोदेशो दिंम का बाक्शो बाक्त। मेको हाक्शो सरीड खोदेशो नीलो बाक्त। इजीकीएल १:२६

11 मिनु परमप्रभुमी इस्राएली आन खाल्पा आन कली मारेड मपव। मिनु मेकोपुकीमी परमप्रभु कली तशा, जशा तूशा बाक्तेक्म। प्रस्थान १९:२१-२२; प्रस्थान ३३:२०-२३

### मोसामी परमप्रभु आ अरेशो टिशो

12 मिनु परमप्रभु यावेमी मोसा कली “गे डांडा डोइशशा, आं नेक्था जाक्शा रिम्शा बाक्को। गो आं अरेशो लोत्र नु आं शेंशो लोत्र इस्राएली आन कली शेंचा कली फुल्लु निक्शीम मुशा ब्रेक्ताक्व। गो मेको फुल्लु इ कली गेनन्” देंत। प्रस्थान ३१:१८; २कोरिन्थी ३:६

13 मिनु मोसा आ गेय पाइब यहोसु लाइशशा, परमप्रभु आ डांडा डोंइसाक्व। प्रस्थान ३३:११

14 तन्न डोंइती मोसामी इस्राएली आन खाल्पा आन कली “गो मलेस्कु सम्म, एकेर रिम्दीन। नेनीन, हारून नु हुर गेपुकी नु बाक्नीस। मार निसाफ पचा माल्नीनी, मेको निक्शीमी गारपाइक्नीस” देंत। प्रस्थान १७:१२

15 मिनु मोसा डांडा डोंइसाक्व। मिनु गोस्सुम मेको डांडा सुम्तु।

16 मिनु परमप्रभु यावे आ छेडछेड सीनै डांडाम बाक्शो बाक्त। मेको गोस्सुम डांडा कली ६ नाक्त सम्म सुम्तु। मिनु नाक्त का नोले गोस्स आ दाते रे परमप्रभु यावेमी मोसा कली ब्रेत्ताक्व। प्रस्थान १६:१०

17 मिनु परमप्रभु यावे आ छेडछेड इस्राएली आन कली डांडा तारी थम ठेयब ब्रशो मी खोदेशो पा तांइसाक्व। ब्यवस्था ४:२४; ब्यवस्था ९:३; हिब्रू १२:२९

18 मिनु मोसा गोस्स आगा ओव्रशा, डांडा डोइशशा, ४० नाक्दो नु ४० नाक्ती बाक्त। प्रस्थान ३४:२८

## 25

### ताम्बु सेल्चा कली शुश गेशो

1 मिनु परमप्रभु यावेमी मोसा कली

2 “इस्राएली आन कली ‘आं कली मार मार गेचा मिम्नीनी, मेको गेने’ दे मतो। आन थुंमी गेचा दाक्शो, नेल्ल आन चाक्शो गे नु इ कली वारच पाइबपुकीमी ताक्कीन। प्रस्थान ३५:४-७; १इतिहास २९:५; एज़ा २:६८, ६९

3 आं कली मार मार ताक्चा माल्नीनी देंशा हना, सुन चांदी नु कांसा,

4 नीलो, प्याजी नु लल रड डा श्येले, रिम्शो पा किरशो सुती श्येले के प्रोव्रशो वा, क्यारश आ चां,

5 लल रड नुप्शो सांड आ कुशुल, नेल्ल क्येडा रिम्शो सेल्शो कुशुल, बोल्यो शी,

6 बत्ती दातीक तेल, लुक्तीक तेल नु धूप कली ब्रोव्रशो रिना पपाइक्व थोव्रक,

7 निसाफ पतीके ऊरीम नु थुम्मीम वोइक्तीक झोला नु कुचु तार वोइक्तीक सेल्चा कली ओनीक्स माइशशो हीरा नु अरु हीरा ताक्चा माल्नीनी।

8 मिनु गो मेको आन दातेमी बाक्चा कली आं बाक्तीक सेल्पतो। इजीकीएल ३७:२६-२८

9 गो इ कली कोंइशो खोदेशो पा ताम्बु सेल्पाइक्चा माल्नेवे। आगाम मार मार वोइक्चा माल्नेवे, मेको आं कोंइशो खोदेशो पा सेल्पतो। प्रस्थान २५:४०; प्रस्थान २६:३०; प्रस्थान २७:८

कबल पशो सन्दोस

प्रस्थान ३७:१-९

10 मेकोपुकीमी बोल्यो शी के सन्दोस का सेल्चा माल्नीम। मेको आ पित्थ लाइशशो कुबीत निक्शी नु आधा, आ ब्रेमशो कुबीत का नु आधा नु आ ग्येत्थ लाइशशो कुबीत का नु आधा डा सेल्चा माल्नीम। कुबीत का ०.५ मिटर खोदेशो बाक्ब।

11 मिनु गे मेको सन्दोस आ खिंडगा नु आ लाडगा नेल्ल क्येख सुनमी गिल्पाइक्चा माल्नेवे। मिनु एर ओंथ सुन के सुर सेल्पाइक्चा माल्नेवे।

12 मिनु सुन के ४ ओटा मुन्द्रा सेल्पाइक्चा माल्नेवे। का पटटी निक्शी नु अर्को पटटी निक्शी पा सन्दोस आ ४ सुरमी क्येप्चा माल्नीम।

13 मिनु बोल्यो शी के कुरतीक कोक्के निक्शी सेल्पाइशशा, सुनमी गिल्पाइक्चा माल्नेवे। १राजा ८:८

14 मिनु मेको कुरतीक कोक्के निक्शी मेको मुन्द्राम शुइक्चा माल्नेवे। मो पा मेको सन्दोस कली कुरने चाप्नीम।

15 मेको कोक्के निक्शी सन्दोसम बाक्शो मुन्द्राम शुइक्चा माल्नीस। मेको आस कली मशोल्चा।

16 मिनु गो इ कली गेचा चिक्शो कबल पा अरेशो लोत्र मेको सन्दोसमी कुर पा वोइक्चा माल्नेवे।

### सन्दोस सुम्तीके

17 मिनु सन्दोस सुम्तीके क्येख सुन के चेम्शा सेल्चा माल्नेवे। मेकेर परमप्रभु आ शिशी बाक्ब। आ पित्थ लाइशशो कुबीत निक्शी नु आधा नु आ ब्रेमशो कुबीत का नु आधा बाक्चा माल्ब। कुबीत का ०.५ मिटर, कुबीत का खोदेशो बाक्ब। लेवी १६:१२-१५; हिब्रू ४:१६; हिब्रू ९:५

18 मिनु गे आं स्वर्ग डा गेय पाइब खोदेशो सुन के करूब निक्शी चेम्शा सेल्पाइक्चा माल्नेवे। मेको सुम्तीकेम आ निम्फा पटटी का का करूब चेम्शा सेल्चा माल्नेवे।

19 का पटटी करूब का, अर्को पटटी करूब का चेम्शा सेल्चा माल्नेवे। मेको सुम्तीके नु करूब निम्फा मखोंडसीशो सुन का केन चेम्शा सेल्चा माल्नेवे।

20 मेको करूबम आस फ्रां हाम्शा, सुम्तीके फारचा माल्नीस। आस कुल कोत्रमुशा, सन्दोस सुम्तीके गे कोत्रचा माल्नीसी।

21 मेको सुम्तीके मेको कबल पशो सन्दोस तार वोइक्चा माल्नेवे। मिनु गो इ कली गेचा चिक्शो कबल पा अरेशो लोत्र मेको कबल पशो सन्दोसम कुर पा वोइक्चा माल्नेवे। प्रस्थान ३४:२९; १राजा ८:९

22 मिनु गो मेको सन्दोस सुम्तीके शिशी बाक्तीकेम गे नु गुम्शा, लोत्र पाइनुड। मेको सुम्तीके आ तारी मेको करूब निक्शी आस दाते रे गो इस्त्राएली आन कली मार मार अरंचा माल्नुडा, मेको गो इ कली देंनुड। गन्ती ७:८९; २सामुएल ६:२

### शोब्ले वोइक्तीके टेबल

प्रस्थान ३७:१०-१६

23 गे बोल्यो शी के टेबल का सेल्पाइक्चा माल्नेवे। मेको आ पित्थ लाइशशो कुबीत निक्शी नु आ ब्रेमशो कुबीत का नु आ ग्येत्थ लाइशशो कुबीत का नु आधा दुम्चा माल्ब। कुबीत का ०.५ मिटर, खोदेशो बाक्ब।

24 मिनु मेको कली क्येख सुनमी गिल्पाइक्चा माल्नेवे। सिरपेच खोदेशो पा एर ओंथ नेल्ल सुन के सुर सेल्पाइक्चा माल्नेवे।

25 मेको एर ओंथ डा सुर नेल्ल ४ आंइची ब्रेमशो दुम्चा माल्ब। मेको कली सिरपेच खोदेशो पा बुटा आप्पाइक्चा माल्नेवे।

26 मिनु ४ ओटा सुन के मुन्द्रा चेम्शा, मेको आ ४ ओटा खोइलीम टेबल आगाम क्येप्पाइक्चा माल्नेवे।

27 टेबल कुरचा कली मुन्द्रापुकी टेबल आ सुर आ नेक्था क्येप्पाइक्चा माल्नेवे।

28 मिनु बोल्यो शी के कोक्के निक्शी सेल्शा, सुनमी गिल्पाइक्चा माल्नेवे। मेको टेबलम बाक्शो मुन्द्राम शुइशशा कुरने चाप्नीम।



29 मिनु टेबलम वोइक्चा माल्शो थाल, लोटा नु बोस नेल्ल नु तूचा थोव्रक चढेतीक लुक्चा कली लोटा नेल्ल क्येख सुन के सेल्पाइक्चा माल्नेवे।

30 मिनु मेकेर गेना हना यो आं डोंइती कोंइतीक शोब्ले वोइक्चा माल्नेवे। लेवी २४:५-६

सुन के बत्ती दातीक  
प्रस्थान ३७:१७-२४

31 गे क्येख सुन के बत्ती दातीक का चेम्शा सेल्पाइक्चा माल्नेवे। आ थाम, आ राशी, आ दियारी, आ डल्ला नु फूपुकी ठेयब सुन का केन दुम्चा माल्नीम।

32 मिनु मेको बत्ती दातीक आ थाम रे ६ ओटा राशी गूचा माल्नीम। का पटटी रे सां नु अर्को पटटी रे सां गूचा माल्नीम।

33 मिनु मेको राशी कामी देसी बदाम आ फू खोदेशो बुटा पाइश्शो फू सां गूचा माल्नीम। अर्को राशीपुकी यो नेल्ल मोदेशोन दुम्चा माल्नीम।

34 मेको बत्ती दातीक आ थामम चहिं ४ ओटा देसी बदाम आ फू खोदेशो बुटा पाइश्शो गूचा माल्नीम।

35 थाम आ डोंइती डा डल्ला, आ दाते डा डल्ला नु नोले डा डल्ला रे निम्फा पटटी गे राशी निक्निक्शी गूचा माल्नीम।

36 मेको आ राशी नु डल्ला नेल्ल ठेयब क्येख सुन का केन चेम्शो दुम्चा माल्नीम।

37 गे क्येख सुन के ७ ओटा दियारी सेल्पाइक्चा माल्नेवे। मिनु सल्दो वोइश्शा, नेल्ल तांइसीचा डा पा दाचा माल्नेवे। मेको ब्रशा, छेडछेड दुम्ल।

38 मिनु आ कांइची नु आइक्च बोस क्येख सुन के दुम्चा माल्नीम।

39 गे मेको नेल्ल टलेन्ट का क्येख सुन के सेल्पाइक्चा माल्नेवे।

40 गे मेको नेल्ल गो इ कली डांडाम कांइशो खोदेशो पा सेल्पाइक्चा माल्नेवे। प्रस्थान २५:९; प्रस्थान २६:३०; प्रेरित ७:४४; हिब्रू ८:५

## 26

ताम्बु कली साप्तीके  
प्रस्थान ३६:८-३८

1 आं बाक्तीके सेल्चा कली रिम्शो पा किरशो सुती श्येले के १० ओटा ताम्बु साप्तीके प्रोव्रपाइक्चा माल्नेवे। मेको सुती श्येले नीलो, प्याजी नु लल रडम नुप्शो बाक्चा माल्ब। मिनु मेको वामी करूब बुटा आप्शा, थाम्पा रिम्शो प्रोव्रस जोक्ब मुर आन कली प्रोव्रपाइक्चा माल्नेवे।

2 वा का आ लाइश्शो २८ कुबीत नु आ ब्रेम्शो ४ कुबीत दुम्चा माल्ब। मेको १० ओटा वा नेल्ल मोदेशोन दुम्चा माल्नीम। कुबीत का ०.५ मिटर, खोदेशो बाक्ब।

3 मिनु ५ ओटा वा बोइश्शा, का सेल्पाइक्चा माल्नेवे। मिनु अर्को ५ ओटा वा यो बोइश्शा, का सेल्पाइक्चा माल्नेवे।

4 मिनु वा आ सुर कली नीलो रड डा श्येले के बोइक्तीके यो सेल्पाइक्चा माल्नेवे। मोपा वा निक्शी बोइश्शा का सेल्पाइक्चा माल्ब।

5 मिनु गे का का पा ताम्बु साप्तीके ५० ओटा सेल्पाइक्चा माल्नेवे। मेकोपुकी गारपाइक्चा कली सेल्पाइक्चा माल्नेवे।

6 मिनु ५० ओटा सुन के ग्याइक्पाइक्तीके सेल्पतो। मोपा मेको वापुकी बोइश्शा, आं बाक्तीक ताम्बु आगा साप्तीक कान दुम्ब।

7 मिनु आं बाक्तीक ताम्बु साप्चा कली क्यारश आ चां के ११ ओटा टुक्रा सेल्पाइक्चा माल्नेवे।

8 का आ लाइश्शो ३० कुबीत नु आ ब्रेम्शो ४ कुबीत दुम्चा माल्ब। मिनु मेको ११ ओटा टुक्रा नेल्ल खाल का डा दुम्चा माल्नीम। कुबीत का ०.५ मिटर खोदेशो बाक्ब।

9 गे ५ ओटा टुक्रा बोइश्शा का नु ६ ओटा बोइश्शा, अर्को का सेल्पाइक्चा माल्नेवे। ६ ओटा बोइश्शा टुक्रा ताम्बु आ डोंइती आ सुर तोक्तीके फेके का मुक्शा तोक्चा माल्ब।

10 मेको टुक्रा का आ सुरमी ५० ओटा बोइक्तीक सेल्पाइक्चा माल्नेवे। मिनु अर्को टुक्रा आ सुरमी यो ५० ओटा बोइक्तीक सेल्पाइक्चा माल्नेवे।

11 मिनु गे कांसा के ५० ओटा ग्याइक्पाइक्तीके सेल्पतो। मेको ग्याइक्पाइक्तीक बोइक्तीकेमी वोइश्शा, टुक्रा निक्शी के का दुम्चा माल्ब। मोपा टुक्रापुकी बोइश्शा, ताम्बु साप्तीक का दुम्ब।

12 ताम्बु आ साप्तीके आ दी गे आइदी सम्म तोक्चा डा पा साप्पाइक्चा माल्नेवे।

13 निम्फा पटटी साप्पाइक्चा कली कुबीत का का आइदी सम्म तोक्चा डा पा साप्पाइक्चा माल्नेवे। कुबीत का ०.५ मिटर खोदेशो बाक्ब।

14 ताम्बु आ साप्तीके निक्शी आस तारी लल रडम नुप्शो बोका आ कुशुल के सेल्पाइक्चा माल्नेवे। मिनु मेको आ तार अर्को साप्तीके नेल्ल क्येडा रिम्शो कुशुल के सेल्पाइक्चा माल्नेवे।

### ताम्बु कली फलेक सेल्शो

15 गे आं बाक्तीक ताम्बु आ एर ओंथ थारचा कली फलेक सेल्पाइक्चा माल्नेवे। मेको फलेकपुकी बोल्यो शी के सेल्पाइक्चा माल्नेवे।

16 फलेक नेल्ल १० कुबीत ग्येत्थ लाइश्शो नु कुबीत का नु आधा ब्रेम्शो दुम्चा माल्नीम। कुबीत का ०.५ मिटर खोदेशो बाक्ब।

17 फलेक नेल्लेमी युक्तीक निक्निक्शी आ पुं गे एर ओंथ पा सेल्पतो। आं बाक्तीक डा फलेक नेल्ल मोदेशो पा सेल्पाइक्चा माल्नेवे।

18 आं बाक्तीक कली मोदेशो फलेक सेल्पाइक्चा माल्नेवे। २० ओटा फलेक दक्खिन गे थारचा कली सेल्पाइक्चा माल्नेवे।

19 मिनु गे २० ओटा फलेक आन कली ४० ओटा चांदी के राप्पाइक्तीके सेल्पाइक्चा माल्नेवे। फलेक का कली युक्तीक निक्शी गारचा डा पा ग्याइक्पाइक्तीक निक्शी माल्ब। अर्को फलेक आन कली यो गारचा डा पा युक्तीक नु राप्पाइक्तीके निक्निक्शी सेल्पाइक्चा माल्नेवे।

20 मोदेशो पा उत्तर गे यो २० ओटा फलेक बाक्चा माल्नीम।

21 मिनु ४० ओटा राप्पाइक्तीक सेल्शा, फलेक कामी राप्पाइक्तीक निक्शी युक्पाइक्चा माल्नेवे। फलेक नेल्ल मोदेशो पा सेल्चा माल्नेवे।

22 मिनु आं बाक्तीक ताम्बु आ नोले पटटी, पच्छिम गे ६ ओटा फलेक सेल्पाइक्चा माल्नेवे।

23 नोले पटटी डा सुर निक्शी कली फलेक निक्शी सेल्पाइक्चा माल्नेवे।

24 मेको सुर डा फलेक आइक्था नु उइ अर्को फलेक नु गारचा डा दुम्चा माल्नीस।

25 नोले पटटी डा फलेक नु सुर डा फलेक नेल्ल पा ८ ओटा दुम्नीम। मेको फलेक नेल्ल आन कली १६ ओटा चांदी के राप्पाइक्तीके सेल्पाइक्चा माल्नेवे। फलेक का कली निक्शी माल्ब। फलेक नेल्ल मोदेशो पा सेल्चा माल्नेवे।

26 मिनु का पटटी डा फलेक आन कली बोल्यो शी के ५ ओटा लाइश्शो कोक्के,

27 अर्को पटटी कली यो ५ ओटा लाइश्शो कोक्के सेल्पाइक्चा माल्नेवे। मिनु पच्छिम गे नोले पटटी कली ५ ओटा लाइश्शो कोक्के सेल्पाइक्चा माल्नेवे।

28 मिनु फलेक ग्येत्थ आ दातेमी सुर का रे अर्को सुर सम्म लाइश्शो कोक्के बाक्चा माल्नीम।

29 मिनु गे मेको फलेकपुकी सुनम गिल्पाइक्चा माल्नेवे। मेको कोक्के शुइक्तीक मुन्द्रा सुन के सेल्पाइक्चा माल्नेवे। मेको लाइश्शो कोक्केपुकी यो सुनमी गिल्पाइक्चा माल्नेवे।

30 गो इ कली डांडामी कौइशो खोदेशो पा आं बाक्तीक ताम्बु सेल्पाइक्चा माल्नेवे। प्रस्थान २५:९

### ताम्बु कली फारतीक

31 मिनु गे फारतीक सेल्चा कली नीलो प्याजी नु लल रड डा श्येले नु रिम्शो पा किरशो सुती श्येले के वा प्रोत्रपाइक्चा माल्नेवे। मेको वा करूब बुटा आप्शा थाम्पा रिम्शो प्रोत्रस जोक्ब मुर आन कली प्रोत्रपाइक्चा माल्नेवे। २इतिहास ३:१४

32 मेको फारतीके बोल्यो शी के सेल्शो सुनम गिल्शो सुन के हेक्तीक पाइश्शो नु चांदी के राप्पाइक्तीक पाइश्शो ४ ओटा थामम क्युक्पाइक्चा माल्नेवे।

33 मिनू मेको फारतीके हेक्तीकेम हेक्पाइक्चा माल्नेवे। मिनू गे मेको आं अरेशो लोत्र आगाम वोइश्शो सन्दोस मेको फारतीके आगा गे वोइक्पाइक्चा माल्नेवे। मोपा मेको फारतीके चोत्रखो नु नेल्ल क्येडा चोत्रखो बाक्तीक कली फारब दुम्ब। मत्ती २७:५१; हिब्रू ९:३; प्रस्थान २६:६, ११

34 मिनू गे मेको सुम्तीक अरेशो लोत्र आगाम वोइश्शो सन्दोस तारी वोइश्शा, मेको फारतीक आ आगा गे नेल्ल क्येडा चोत्रखो बाक्तीकेमी वोइक्पाइक्चा माल्नेवे। प्रस्थान २५:२१

35 कौइतीक शोब्ले वोइक्तीक टेबल चोत्रखो बाक्तीके उत्तर गे वोइक्पाइक्चा माल्नेवे। बत्ती दातीक चहिं दक्खिन गे वोइक्पाइक्चा माल्नेवे। प्रस्थान २५:२३-३०; प्रस्थान ४०:४२

36 मिनू ताम्बु ओव्रतीक कली नीलो प्याजी नु लल रड डा श्येले नु रिम्शो पा किरशो सुती श्येले के प्रोत्रशो वा, बुटा आप्शा ठेयब फारतीक सेल्पाइक्चा माल्नेवे।

37 मेको फारतीके हेक्चा कली ५ ओटा बोल्यो शी के थाम सेल्पाइक्चा माल्नेवे। मेको थाम सुनम गिल्पाइक्चा माल्नेवे। मेको थामम सुन के हेक्तीके यो सेल्पाइक्चा माल्नेवे। मेको थाम राप्पाइक्तीके ५ ओटा कांसा के सेल्पाइक्चा माल्नेवे।

## 27

### चढ़ेतीक सेल्शो

प्रस्थान ३८:१-७

1 मिनू बोल्यो शी के चढ़ेतीक का सेल्चा माल्नेवे। मेको ५ कुबीत लाइश्शो नु ५ कुबीत ब्रेम्शो दुम्चा माल्ब। ४ पाटे नु कुबीत सां ग्येत्थ लाइश्शो दुम्चा माल्ब। कुबीत का ०.५ मिटर देशो बाक्ब।

2 आ ४ सुरमी ४ ओटा ग्रोत्र गूपाइक्चा माल्नेवे। ग्रोत्र नु चढ़ेतीक सेल्चा कली फलेक का केन दुम्चा माल्ब। मेको नेल्ल कांसांम गिल्पाइक्चा माल्नेवे। लेवी १६:१८; १ राजा १:५; भजन संग्रह ११८:२७

3 चढ़ेतीके कली माल्शो मारेइ मारेइ कांसा के सेल्पाइक्चा माल्नेवे। पुलु वोइक्तीक बोसपुकी, पुलु ताप्तीकपुकी, ब्रुइक्तीक बोसपुकी, श्ये गुंडतीक कांटापुकी नु मी कोइला कुर पतीकपुकी सेल्पाइक्चा माल्नेवे।

4 मिनू गे मी तिकतीक कांसा के जाली सेल्पाइक्चा माल्नेवे। मिनू जाली आ ४ सुरमी ४ ओटा मुन्द्रा सेल्पाइक्चा माल्नेवे।

5 मेको जाली चढ़ेतीक उइ गे नु इर गे आ दातेम वोइक्पाइक्चा माल्नेवे।

6 मिनू चढ़ेतीक कली यो बोल्यो शी के कांसांम गिल्शो कुरतीक कोक्के निकशी सेल्पाइक्चा माल्नेवे।

7 मेको चढ़ेतीक आ निम्फा पटटी डा मुन्द्रामी कोक्के शुइश्शा, कुरने चाप्नीम।

8 मेको चढ़ेतीक फलेक के सेल्पाइक्चा माल्नेवे। पुं नु सुम्तीके मपाइश्शो सन्दोस खोदेशो पा सेल्पाइक्चा माल्नेवे। डांडामी इ कली कौइशो खोदेशो पा सेल्पाइक्चा माल्नेवे। प्रस्थान २६:३०;

### ताम्बु आ लाडगा

प्रस्थान ३८:९-२०

9 मिनू ताम्बु आ लाडगा थरपु हिरचा कली रिम्शो पा किरशो सुती श्येले के फारतीके प्रोत्रपाइक्चा माल्नेवे। मेको फारतीके दक्खिन गे सहे का कुबीत लाइश्शो दुम्चा माल्ब। कुबीत का ०.५ मिटर खोदेशो बाक्ब।

10 मेको फारतीक ग्याइक्पाइक्चा कली खाल का डा थाम, खाल का डा कांसा के राप्पाइक्तीके, मुन्द्रापुकी नु कोक्केपुकी चहिं चांदी के सेल्पाइक्चा माल्नेवे।

11 मिनू मोदेशो पा उत्तर गे यो सहे का कुबीत लाइश्शो फारतीक प्रोत्रपाइक्चा माल्नेवे। मेको कली २० ओटा थाम, २० ओटा कांसा के राप्पाइक्तीके, मेको मुन्द्रापुकी नु कोक्केपुकी चहिं चांदी के सेल्पाइक्चा माल्नेवे।

12 लाडगा डा पच्छिम गे ब्रेम्शो कली ५० कुबीत लाइश्शो फारतीक माल्ब। आ थाम नु आ राप्पाइक्तीक १०, १० ओटा दुम्चा माल्नीम। कुबीत का ०.५ मिटर खोदेशो बाक्ब।

13 लाडगा आ पूर्व, नां दाप्तीके गे फारचा कली यो ५० कुबीत ब्रेम्शो दुम्चा माल्ब।

14 मिनु ओव्रतीक डा पटटी का कली १५ कुबीत डा फारतीक दुम्या माल्ब। थाम नु आ राप्पाइक्तीके सां सां दुम्या माल्नीम।

15 मिनु अर्को पटटी यो मोदेशो पा १५ कुबीत डा फारतीक, थाम नु राप्पाइक्तीके सां सां दुम्या माल्नीम।

16 मिनु लाडगा ओव्रतीके कली २० कुबीत डा नीलो, प्याजी, श्येले नु रिम्शो पा किरशो सुती श्येले के प्रोव्रशो फारतीक माल्ब। मेको फारतीक कली लूजेम बुटा आप्पाइक्चा माल्नेवे। ओव्रतीके कली थाम नु राप्पाइक्तीके ४, ४ ओटा दुम्या माल्नीम।

17 लाडगा एर ओथ डा थाम नेल्ल चांदीमी गिल्शो कोक्केमी ग्याइक्पाइश्शो दुम्या माल्नीम। मुन्द्रा चांदी के नु आन राप्पाइक्तीक कांसा के दुम्या माल्नीम।

18 मेको लाडगा आ पित्थ लाइश्शो सहे का कुबीत, आ ब्रेम्शो ५० कुबीत नु आ फारतीके ग्येत्थ ५ कुबीत दुम्या माल्ब। मिनु फारतीक वा नेल्ल रिम्शो पा किरशो सुती श्येले के प्रोव्रशो वा के दुम्या माल्ब। थाम आन राप्पाइक्तीके कांसा के दुम्या माल्नीम।

19 मिनु ताम्बु डा नाक्त् किंत किंत गेय पचा कली माल्शो मारेइ मारेइ कांसा के दुम्या माल्नीम। किलापुकी नु लाडगा डा किला नेल्ल यो कांसा के दुम्या माल्नीम।

### बत्ती कली तेल

20 मिनु गे इस्राएली आन कली 'गे नेल्ल क्येडा रिम्शो तेल रवा आ फल के ख्राक्शो तेल चाक्कीन। मेको बत्ती गेना हना यो ब्रशा बाक्ल' दे माइक्मी। लेवी २४:२-४

21 मिनु युम्तीक ताम्बु आगामी, कबल डा सन्दोस बाक्शो नेल्ल क्येडा चोव्रखो कोटा फारतीक आ डोंइती हारून नु आ तौपुकीमी नाक्दो रे सुनी सम्म मेको बत्ती दातीक परमप्रभु यावे आ डोंइती ब्रशा बाक्ल, दे टीक सेल्चा माल्नीम। मेको इस्राएली आन चच युइ आन कली गेना हना यो पतीके लीचा माल्ब। मेको गेना हना यो पचा माल्नीम।

## 28

### चढेब आन वासी

प्रस्थान ३९:१-३१

1 मिनु इस्राएली आन दाते रे योव्रशा, इ लोकब हारून नु आ तौपुकी इ डोंइती राप्पाइक्चा माल्नेवे। मारदे हना हारून नु आ तो नादाब, अबीहु, एलाजर नु इथामार आं कली चढेब दुम्या माल्नीमी। १इतिहास २३:१३; प्रस्थान ६:२३

2 मिनु गे इ लोकब हारून कली आं गेय पची ना ला फेक्चा कली फेक्तीक वा फेरपाइक्चा माल्नेवे। मेको हारून कली ग्योम्शा दारपाइक्चा कली बाक्ब।

3 मिनु सु सुमी फेरस जोक्नीमी, मेको नु लोव्र पावो। मारदे हना गो मेको आन कली जोक्ब नु तुइक्ब सोक्तीम प्रिंताक्डमी। मेकोपुकीमी हारूनमी आं कली चढेतीक गेय पचा कली वासी फेरचा माल्नीम। प्रस्थान ३१:५

4 मेकोपुकीमी मार वासी फेरचा माल्नीम देशा हना, कुचु तार वोइक्तीके, निसाफ पतीके ऊरीम नु थुम्मीम वोइक्तीक झोला, आ तार फेक्तीके नु आगा फेक्तीक वा फेरचा माल्नीम। पियाम गुप्तीक नु किप्शुर यो सेल्चा माल्नीम। मेको आं कली गेय पची ना फेक्तीक बाक्ब। इ लोकब हारून नु आ तौपुकीमी आं कली गेय पांमेनु, मेको वा फेक्चा माल्नीम।

5 फेरबपुकीमी सुन, नीलो, प्याजी नु लल रड डा श्येले नु रिम्शो पा किरशो सुती श्येले के प्रोव्रशो वा के सेल्चा माल्नीमी। प्रस्थान २६:१

### चढेब आ कुचु तार वोइक्तीके

6 कुचु तार वोइक्तीके सुन के, नीलो, प्याजी नु लल रड डा श्येले नु रिम्शो पा किरशो सुती श्येले के प्रोव्रशो नु बुटा आप्शो वा के सेल्पाइक्चा माल्नेवे।

7 मेको आ बला सुम्तीके निक्शी निम्फा पटटी बोइश्शो दुम्या माल्ब।

8 मिनू आ पाइक्तीके मेको कुचु तार वोइक्तीके का रेन दुम्या माल्ब। मिनू खाल का डा रिमशो गेयम सेल्शो दुम्या माल्ब। मेको पाइक्तीके सुन, नीलो, प्याजी नु लल रड डा श्येले नु रिमशो पा किरशो सुती श्येले के प्रोत्रशो वा दुम्या माल्ब।

9 मिनू गे ओनीक्स हीरा निक्शी चाक्शा, इस्राएल आ १२ जना तौ आन नें मेको आस तारी मुशा ब्रेक्पाइक्चा माल्नेवे। प्रस्थान २५:७

10 गे आन जरमेशो खोदेशो पा हीरा का तारी ६ जना आन नें नु अर्को हीरा तारी ६ जना आन नें मुशा ब्रेक्पाइक्चा माल्नेवे।

11 छाप सेल्बपुकीमी दोदेशो पा मुशा छाप सेल्नीमी, मोदेशो पा मुशा इस्राएल आ तौ आन नें ब्रेक्पाइक्चा माल्नेवे। मिनू मेको हीरा निक्शी सुनमी क्येप्पाइक्चा माल्नेवे।

12 मेको कुचु तार वोइक्तीक आ बला डा टुक्रा तारी क्येप्शा फेरपाइक्चा माल्नेवे। मिनू मेको हीरा कोत्रशा इस्राएली इन कली मिन्नुड, दे कोंइतीक बाक्ब। हारूनम आं डोंइती मेको आन नें बलाम कुरानु, गो मेको आन कली मिन्नुड।

13 मिनू हीरा वोइक्चा कली गे सुन के क्येप्तीक सेल्पाइक्चा माल्नेवे।

14 मिनू गे क्येख सुन के डोरी खोदेशो पा सिक्री निक्शी चेम्पाइश्शा, हीरा क्येप्पाइश्शोमी वोइक्पाइक्चा माल्नेवे।

### निसाफ पतीक झोला

15 गे निसाफ पतीक झोला सेल्पाइक्चा माल्नेवे। मेको कुचु तार वोइक्तीके खोदेशो पा, सेल्पाइक्चा माल्नेवे। सुन, नीलो, प्याजी, लल श्येले नु रिमशो पा किरशो सुती श्येले के प्रोत्रपाइक्चा माल्नेवे।

16 मेको खेयप का मुक्शोनु, स्पान का लाइश्शो नु स्पान का ब्रेमशो ४ पाटे दुम्या माल्ब। स्पान का २३ सेन्ती मिटर खोदेशो बाक्ब। बिल्ला खोदेशो बाक्ब कों?

17 मिनू ४ लस्कर हीरा सुनम का का पा क्येप्पाइक्चा माल्नेवे। डोंइती डा लस्कर लल मानीक माइश्शो हीरा, हाव पुशपराज माइश्शो हीरा नु गिगी बेरूज माइश्शो हीरा वोइक्पाइक्चा माल्नेवे।

18 मेको आ नोले डा लस्कर लल फिरोजा माइश्शो हीरा, बुश नीर माइश्शो हीरा नु बुश नु नीलो पन्ना माइश्शो हीरा वोइक्पाइक्चा माल्नेवे।

19 मेको आ नोले डा लस्कर गिगी नु नीलो रड ब्वाइश्शो रिमशो टल्केशो नीलमनी माइश्शो हीरा, गिगी हाकीक माइश्शो हीरा नु प्याजी रड डा कटेला माइश्शो हीरा वोइक्पाइक्चा माल्नेवे।

20 मिनू नेल्ल क्येडा नोले डा लस्कर पीतमनी माइश्शो हीरा, लल रड डा ओनीक्स नु नीलो बिलौरा माइश्शो हीरा वोइक्पाइक्चा माल्नेवे। मोपा हीरा नेल्ल आन कली सुनम क्येप्पाइक्चा माल्नेवे।

21 मेको हीरा १२ ओटा दुम्या माल्नीम। मिनू इस्राएल आ तौ आन नें का का पा मेको आन तार छाप थोक्शो खोदेशो पा मुशा ब्रेक्पाइक्चा माल्नेवे। हीरा का आ तारी थर का आ नें दुम्या माल्ब।

22 गे मेको निसाफ पतीक झोला कली क्येख सुन के डोरी किरशो खोदेशो पा सिक्री निक्शी चेम्पाइक्चा माल्नेवे।

23 मिनू गे मेको निसाफ पतीक झोला कली सुन के मुन्द्रा निक्शी चेम्पाइक्चा माल्नेवे। मिनू मेको मुन्द्रा निसाफ पतीक झोला आ सुर निक्शीमी वोइक्पाइक्चा माल्नेवे।

24 मेको सुन के सिक्री निक्शी निसाफ पतीक झोला आ सुरम वोइश्शो मुन्द्रा निक्शीमी लिक्पाइक्चा माल्नेवे।

25 मेको सिक्री चढेब आ कुचु तार वोइश्शो वा आ बला डा हीरा क्येप्शो सुनम हेक्पाइक्चा माल्नेवे।

26 मिनू गे लेशा सुन के मुन्द्रा निक्शी सेल्पाइक्चा माल्नेवे। मेको निक्शी निसाफ पतीक ऊरीम नु थुम्मीम वोइक्तीक झोला आ उइ आगा गे पाइक्चा माल्नेवे। मोपा कुचु तार वोइक्तीक वा आ तार बाक्ब।

27 मिनू गे लेशा सुन के मुन्द्रा निक्शी सेल्पाइक्चा माल्नेवे। मेको कुचु तार वोइक्तीक आ बाला सुम्तीके उइ डा सुरम वोइक्चा माल्नेवे। मिनू दारपाइश्शो पाइक्तीके आ तारी क्येप्पाइक्चा माल्नेवे।

28 मिनु मेको निसाफ पतीक ऊरीम नु थुम्मीम वोइक्तीक झोला आ मुन्द्रामी नीलो डोरीम लिक्शा, कुचु तार वोइक्तीक वामी पाइक्पाइक्चा माल्नेवे। मोपा मेको निसाफ पतीक झोला दारपाइश्शो पाइक्तीक तार बाक्शा कुचु वोइक्तीक वा रे एर ओंथ मयाक्सीब।

29 मिनु मोदेशो पा हारून परमप्रभु यावे आ बाक्तीक ओत्रमेनु, इस्राएल आ तौ आन नें ब्रेक्शो निसाफ पतीक झोला आ कुचु तारी कुरचा माल्ब। मेको परमप्रभु यावेमी गेना हना यो मिन्चा कली बाक्ब।

30 मेको निसाफ पतीके झोलामी मेको ऊरीम नु थुम्मीम निक्शी कुर पचा माल्नेवे। हारून परमप्रभु यावे आ डोंइती लमेनु, इस्राएली आन निसाफ पतीके गेना हना यो आ कुचु तारी बाक्चा माल्ब। लेवी ८:८; गन्ती २७:२१; ब्यवस्था ३३:८

### आगा डा फेक्तीक वा

31 मिनु मेको कुचु तार वोइक्तीके आगा फेक्तीके नेल्ल नीलो प्याजी रड डा वा के फेरपाइक्चा माल्नेवे।

32 मिनु पिया खीतीक पोत्रला वोइक्पाइक्चा माल्नेवे। मेको एर ओंथ मगाक्चा डा पा आ सुर थम बोल्यो पा प्रोत्रपाइक्चा माल्नेवे।

33 मेको फेक्तीके आ उइ डा सुर एर ओंथ गे नीलो, लल नु प्याजी रड डा श्येले के सेल्शो दारीम सेल्पाइक्चा माल्नेवे। मेको आन दातेम सुन के आइक्च आइक्च किडगो क्युक्पाइक्चा माल्नेवे।

34 किडगो का, दारीम का, किडगो का दारीम का पा मेको फेक्तीक नेल्ल आ एर ओंथ क्युक्चा माल्नीम।

35 मिनु हारूनमी मेको वा गेय पची ना फेक्चा माल्ब। मोपा परमप्रभु यावे आ नेल्ल क्येडा चोत्रखो बाक्तीके ओत्रमेनु, किडगो आ रेयके नेंपाइक्चा माल्ब। हारून मबेक्ल, दे मोदेशो दुम्चा माल्ब। प्रस्थान ३०:२१; लेवी १६:२, १३

### कुप्फीम पांडतीके नु फेक्तीके वा

36 गे कुप्फीम पांडतीके क्येख सुन के फू खोदेशो पा चेम्पाइक्चा माल्नेवे। मेकेर छाप थोक्शो खोदेशो पा 'परमप्रभु यावे कली ला' दे मुशा ब्रेक्पाइक्चा माल्नेवे। जकरिया १४:२०; प्रस्थान ३९:३०

37 पियाम गुक्तीकेम आ डोंइती गे वोइक्चा कली नीलो प्याजी डोरीम फ्रेंपाइक्चा माल्नेवे।

38 मोपा मेको हारून आ कुप्फीम बाक्चा माल्ब। आ कुप्फीम पाइश्शा, इस्राएली आन मरिम्शो पशो कुरब। मिनु परमप्रभु कली चढ़ेशो रिम्शो दुम्नीम। परमप्रभु यावेमी आन चढ़ेशो ब्रवल, दे गेना हना यो आ कुप्फीम बाक्चा माल्ब।

39 नेल्ल क्येडा आगा फेक्तीके रिम्शो पा किरशो सुती श्येले के बुटा आप्शा प्रोत्रशो वा के सेल्पाइक्चा माल्नेवे। पियाम गुक्तीके रिम्शो पा किरशो सुती श्येले के प्रोत्रशो वा के सेल्पाइक्चा माल्नेवे। किप्तीके रड रड डा सेल्पाइक्चा माल्नेवे।

### हारून आ तौ आन फेक्तीके

40 गे हारून आ तौ आन कली फेक्तीके किप्तीक नु आइक्च गुक्तीके सेल्पाइक्चा माल्नेवे। मेको हारून आ तौ आन कली ग्योम्शा दारपाइक्चा कली बाक्नीम। प्रस्थान २८:२

41 गे मेको इ लोकब हारून नु आ तौ आन कली फेक्तीमी। मिनु तेल लुक्शा, आं कली ला गेय पचा कली योत्रशा वोइक्मी। मोपा आं कली चढ़ेब दुम्नीम। प्रस्थान २९:९, २९-३६; प्रस्थान २९:२४; लेवी ८:१२, २२-३१

42 गे मेको आन शिन्ना रां सुम्पाइक्चा कली सुती वा के कटटु फेरपाइक्चा माल्नेवे। मेको कम्बर रे पोक्च सम्म दुम्चा माल्ब।

43 मिनु हारून नु आ तौपुकी युम्तीक ताम्बु ओत्रशा, चढ़ेतीक आ नेक्था लमानु, मेको वा फेक्सीशो बाक्चा माल्नीम। मफेक्साक्म हना, दोस तशा बेक्नीम। हारून नु आ चच युइ आन पाला नेल्लेमी गेना हना यो मोदेशो पचा माल्नीम।

## 29

### चढेब आन डोंडती डा पतीके लेवी ८:-

1 गे हारून नु आ तौपुकी आं कली चढेब सेल्चा कली मार पचा माल्नेवे दँशा हना, बोहोर का, मारेड मदुम्शो थम रिम्शो सांड निक्शी चाक्को।

2 मिनु रिम्शो चेरब फस के बोरब ओरुती मसुप्शो शोब्ले, तेल व्वाइशशो जिज शोब्ले नु तेल खेक्शो बोरब ओरुती मसुप्शो शोब्ले सेल्पाइक्चा माल्नेवे।

3 मेको शोब्ले नेल्ल तोव्रलो कामी कुर पा, बोहोर नु सांड चाक्चा माल्नेवे।

4 मिनु हारून नु आ तौ आन कली गुम्तीक ताम्बु आ ओव्रतीकेमी चाक्चा नम। मिनु गे मेको आन कली चिक्चा माल्नेवे।

5 वासी चाक्शा, हारून कली आगा फेक्तीक वा, मेको आ तार डा फेक्तीके वा फेक्पाइशशा, कुचु तार वोइक्तीक फेक्शा निसाफ पतीके ऊरीम नु थुम्मीम बाक्शो झोला रेल्ला माल्नेवे। मिनु मेको तारी बुटा आप्शो किप्तीके किप्पाइक्चा माल्नेवे।

6 आ पिया तारी गुक्तीके गुप्शा, मेको तारी 'परमप्रभु यावे कली ला' दे ब्रेक्शो कुप्फीम पांडतीके पांडपाइक्चा माल्नेवे। प्रस्थान २८:३६; प्रस्थान ३९:३०

7 मिनु लुक्तीक तेल लाइशशा आ पियामी तेल लुक्तो। प्रस्थान ३०:२५

8 मिनु हारून आ तौ आन कली यो चाक्शा, वा फेक्चा माल्नेवे।

9 मिनु आ तौ आन कली किप्तीके किप्चा माल्नेवे। मिनु आन पियाम गुक्तीके गुप्चा माल्नेवे। मिनु मेकोपुकी गेना हना यो आं कली चढेब गेय पाइब दुम्नीम। मोपा हारून नु आ तौ आन कली आं कली चढेब सेल्मी। प्रस्थान २८:४१

10 मिनु मेको बोहोर गुम्तीक ताम्बु आ डोंडती चाक्शा, हारून नु आ तौ आन कली आन गुड मेको बोहोर आ पिया तारी वोइक्पाइक्चा माल्नेवे।

11 मिनु मेको बोहोर कली परमप्रभु यावे आ डोंडती, गुम्तीक ताम्बु आ ओव्रतीकेम राप्पाइशशा क्योरचा माल्नेवे। लेवी १:४

12 मिनु बोहोर आ हुश इक्का खोड लाइशशा इ ब्रेप्चोमी चढेतीक आ ओव्रपुकीमी खेक्चा माल्नेवे। मिनु लीशो हुश नेल्ल चढेतीके आ पुंमी मोइक्चा माल्नेवे।

13 मिनु गे क्यी गिल्शो बोंसो नेल्ल, आइदी तारी डा जाला, आ चिच निम्फा नु आ तार डा बोंसो नेल्ल चढेतीकेम चोचा माल्नेवे। लेवी ३:१६-१७

14 आ श्ये, आ कुशुल नु आ गोबर चहिँ ताम्बु आ लाडगा रे गुंडशा, चोचा माल्नेवे। मेको पाप पशो आ पर्वम चढेशो बाक्ब। लेवी ४:११-१२

15 मिनु मेको सांड का चाक्शा, हारून नु आ तौ आन गुड मेको आ पिया तार वोइक्पाइक्चा माल्नेवे।

16 मेको कली क्योरशा, मेको आ हुश चढेतीक नेल्ल बुइक्चा माल्नेवे।

17 मिनु मेको सांड आ श्ये कली टुक्रा टुक्रा पा चेक्शा, पिया नु वोइक्चा माल्नेवे। मिनु मेको आ क्यी नु आ खोइली नेल्ल मुरशा, मेको श्ये नु पियामी वोइक्चा माल्नेवे।

18 मोदेंशो पा सांड नेल्ल चढेतीक तारी चोचा माल्नेवे। मेको परमप्रभु यावे कली चोशा चढेतीक बाक्ब। परमप्रभु यावे कली ब्रोव्रशो रिना पाइशशो मीम चोशा चढेतीके बाक्ब। १सामुएल २:२८

19 मिनु मेको लीशो सांड चाक्चा माल्नेवे। मिनु हारून नु आ तौ आन गुड मेको सांड आ पिया तार वोइक्पाइक्चा माल्नेवे।

20 मिनु मेको सांड क्योरशा, आ हुशेम हारून आ ग्युरा नोफा डा लोव्रतीम नु आ तौ आन ग्युरा नोफा डा लोव्रतीम खेक्चा माल्नेवे। मिनु मेको आन ग्युरा गुड डा टेयब ब्रेप्चोम नु आन ग्युरा खोइली डा टेयब ब्रेप्चोम खेक्चा माल्नेवे। मिनु लीशो हुश चढेतीक तार नु आ एर ऑथ बुइक्चा माल्नेवे।

21 मिनू चढेतीकेम बाकशो हुश नु लुक्तीक तेल लाइशशा, हारून नु आ वा नु आ तौ आन वा तारी ब्रुइक्चा माल्नेवे। मोपा हारून नु आ वा, आ तौ नु मेको आन वा नेल्ल परमप्रभु यावे कली ला गेय पचा कली दुम्नीम।

22 मिनू सांड आ बोंसो, आ बोंसो पाइशशो मीलु, आ कयी गिल्लशो बोंसो, आइदी तार डा जाला, आ चिच निम्फा, मेको तार डा बोंसो नु आ ग्युरा फिला लाइक्चा माल्नेवे। मारदे हना मेको चढेब सेल्टीके सांड बाक्ब। लेवी ३:३-४

23 मिनू परमप्रभु यावे आ डोंइती वोइशशो बोरब ओरूती मसुप्शो शोब्ले, तोव्रलो डा शोब्ले का, तेलम ब्वाइशशो जिज शोब्ले का नु तेल खेक्शो शोब्ले का लाइशशा,

24 मेको नेल्ल हारून नु आ तौ आन दाइशशो गुइ गुइमी गेचा माल्नेवे। मेको परमप्रभु यावे आ डोंइती ग्येत्थ लुक्च पा हिम्शा चढेतीक चढेचा माल्नीम।

25 मिनू गे मेको आन गुइ रे ताक्शा, परमप्रभु यावे आ डोंइती ब्रोव्रशो रिना पाइब चढेतीके तारी चोशा चढेचा माल्नेवे। मेको परमप्रभु यावे कली मीम चोशा चढेतीक बाक्ब।

26 मिनू हारून कली चढेब सेल्टीके सांड आ कुथ्रु चाक्शा, परमप्रभु यावे आ डोंइती ग्येत्थ लुक्च पा हिम्शा चढेचा माल्नेवे। मेको चहिं इ के दुम्ब।

27 मिनू मेको हारून नु आ तौ आन कली चढेब सेल्लशो सांड आ ग्येत्थ लुक्च पा हिम्शा चढेशो कुथ्रु नु क्युकशा चढेशो फिला मेको आन कली गेचा माल्नीम। गन्ती १८:१८

28 मारदे हना इस्राएलीपुकीमी मेको हारून नु आ तौ आन कली गेना हना यो गेचा माल्लशो भाग बाक्ब। मेको गेचा माल्लशो चढेतीके बाक्ब। इस्राएलीपुकीमी आन परमप्रभु यावे नु दुशा बाक्चा आ पबर्म चढेतीके रे गेचा माल्लशो मेकोन बाक्ब।

29 हारून आ चढेची ना फेक्तीक मेको आ नोले चढेब दुम्ब आ तौ के दुम्ब। मेको वा फेक्शा, तेल लुकशा, चढेब दुम्ब। प्रस्थान २८:४०-४१

30 हारून आ पा डा चढेब दुम्ब आ तौ गुम्तीक ताम्बु आगा परमप्रभु यावे आ बाक्तीकेम गेय पथ ओव्रमेनु, ७ नाक्त सम्म मेको वा फेक्चा माल्ब।

31 मिनू मेको चढेब सेल्टीके सांड आ श्ये गुम्तीक ताम्बु आ लाडगाम क्येचा माल्नेवे।

32 मिनू नोले हारून नु आ तौपुकीमी मेको सांड आ श्ये नु तोव्रलो डा शोब्ले गुम्तीक ताम्बु आ ओव्रतीकेमी बाक्शा जचा माल्नीम।

33 मेको डोंइती आन पाप क्याम्चा कली चढेशो थोव्रक आंम कली परमप्रभु यावे कली ला गेय पाइब दुम्चा, दे जचा माल्नीम। तन्न अरुमी मेको जचा मदुम्नीम। मारदे हना मेको परमप्रभु यावे के बाक्ब। लेवी १०:१७

34 चढेब सेल्टी ना डा श्ये नु शोब्ले सुनी सम्म हेंत हना, मेको हेंशो नेल्ल चोचा माल्नेवे। मेको मजचा मब्बचा। मारदे हना मेको चढेब सेल्टी ना डा बाक्ब।

35 गोम इ कली अरेशो खोदेशो पा हारून नु आ तौ आन कली पाइक्मी। मेको आन कली ७ नाक्त सम्म मोदेशो चढेब सेल्टीक गेय पचा माल्नेवे।

36 मिनू गे नाक्त कित कित बोहोर का पाप पशो आ पबर्म चढेचा माल्नेवे। मेको पाप क्याम्तीक गेय पचा कली चढेशो बाक्ब। मिनू चढेतीक परमप्रभु के दुम्त, दे हुश ब्रुइशशा, तेल लुकचा माल्नेवे।

37 गे ७ नाक्त सम्म चढेतीकेमी मो पशा पाप क्याम्तीक गेय पचा माल्नेवे। मिनू मेको चढेतीके परमप्रभु कली ला दुम्ब। मेको चढेतीक कली मार मारम थीनीमी, मेको यो परमप्रभु केन दुम्नीम। प्रस्थान ३०:२९

नाक्त कित कित डा चढेतीक

गन्ती २८:३-८

38 मिनू गे चढेतीकेमी मार चढेचा माल्नेवे देशा हना, नाक्त कित कित बर्स का दुम्शो सांड निकशी चढेचा माल्नेवे।

39 मेको का सुनी का चहिं नाक्दो चढेचा माल्नेवे। २राजा १६:१५; भजन संग्रह १४१:२



40 डोंडती डा सांड नु रिम्शो चेरब फस १० भाग डा भाग का, ४ भाग डा हिन भाग का रिम्शो तेल मेको नु बुल्शा, ४ भाग डा हिन अङ्गुर शांबु भाग का तूचा थोत्रक चढ़ेचा माल्नेवे। चेरब फस एफाह का २२ लिटर खोदेशो बाक्ब। मेको के १० भाग का २ लिटर खोदेशो बाक्ब। हिन का ४ लिटर, ४ भाग डा भाग का लिटर का बाक्ब। प्रस्थान २७:२०

41 मिनु अर्को सांड नाकदो चढ़ेचा माल्नेवे। मिनु मेको नु अन्न चढ़ेतीक नु आ तूचा थोत्रक चढ़ेतीक सुनी डा खोदेशो पा नाकदो यो चढ़ेचा माल्नेवे। परमप्रभु यावे कली ब्रोत्रशो रिना पाइब मीम चोशा चढ़ेतीके मेकोन बाक्ब।

42 गे इ चच युड आन पाला नेल्लेमी गेना हना यो परमप्रभु यावे आ डोंडती गुम्तीक ताम्बु आ ओव्रतीक आ नेक्था चोशा चढ़ेतीक चढ़ेचा माल्नीम। मेकेर गो गे नु लोत्र पचा कली गुम्नन। प्रस्थान ३३:७; प्रस्थान २५:२

43 मिनु गो इस्राएली आन कली मेकेर गुम्नुड। मिनु मेको ताम्बु आं छेडछेडम ब्रीशा आं के दुम्ब। प्रस्थान ३३:१०; प्रस्थान ४०:३४

44 गो गुम्तीक ताम्बु नु चढ़ेतीक आं के सेल्लुड। हारून नु आ तौ आन कली यो आं कली चढ़ेब दुम्शा, आं गेय पपाइक्चा कली आं के सेल्लुडमी।

45 गो इस्राएली आन दातेमी बाक्नुड। मिनु मेको आन परमप्रभु दुम्ती। प्रस्थान २५:८; जकरिया २:१४; लेवी २६:१२

46 गो मेको आन दातेमी बाक्चा कली मेको आन कली इजीप्त रे गुंडब मेको परमप्रभु यावे, आन परमप्रभु नड। गो मेको आन परमप्रभु यावे नड, दे मेकोपुकीम तुइक्चा माल्नीम। प्रस्थान २०:२

## 30

धूप चोशा चढ़ेतीके  
प्रस्थान ३७:२५-२८

1 मिनु गे धूप चोचा कली बोल्यो शी के चढ़ेतीक का सेल्चा माल्नेवे।

2 मेको आ पित्थ लाइश्शो कुबीत का नु आ ब्रेम्शो कुबीत का डा ४ पाटे दुम्चा माल्ब। मिनु आ गेय्थ लाइश्शो कुबीत निकशी दुम्चा माल्ब। मेको ग्रोत्र पाइश्शो दुम्चा माल्ब। ग्रोत्र नेल्ल मखोंडसीशो शी का केन दुम्चा माल्नीम। कुबीत का ०.५ मिटर बाक्ब।

3 मेको नेल्ल क्येख सुनमी गिल्चा माल्ब। मिनु मेको कली सिरपेच के खोदेशो पा सुन के सुर सेल्पाइक्चा माल्नेवे।

4 मिनु सुन के मुन्द्रा निकनिकशी सेल्पाइक्चा माल्नेवे। मेको मुन्द्रा धूप चोतीके आ सिरपेच खोदेशो सुर आ दी निम्फा पटटी गे क्येप्पाइक्चा माल्नेवे। मेको कुरतीक कोक्के आन कली शुइक्तीक दुम्ब।

5 मिनु मेको कुरचा कली बोल्यो शी के कोक्के निकशी सेल्शा, सुनमी गिल्पाइक्चा माल्नेवे।

6 मिनु मेको परमप्रभु यावे आ अरेशो लोत्र वोइश्शो कबल पशो सन्दोस नु सुम्तीके फारतीक वा आ डोंडती वोइक्चा माल्नेवे। गो मेकेर इ कली गुम्नुड। प्रस्थान २५:२१-२२

7 मिनु हारूनमी सुनी कुस कुस बत्ती दाचा कली सादानु, ब्रोत्रशो रिना पाइब धूप चोचा माल्ब। भजन संग्रह १४१:२

8 नाकदो हारूनमी बत्ती दाडानु यो धूप चोचा माल्ब। मेको परमप्रभु यावे आ डोंडती धूप चोतीक मेको आन चच युड आन पालामी गेना हना यो पचा माल्नीम।

9 मेको धूप चोतीकेमी अरु धूप चोचा मदुम्ब। चोशा चढ़ेतीके नु जचा थोत्रक चढ़ेतीके मेकेर चढ़ेचा मदुम्ब। तूचा थोत्रक चढ़ेतीके यो मेकेर मोइक्चा मदुम्ब। लेवी १०:१-२

10 बर्सम खेयप का हारूनमी चढ़ेतीक आ ग्रोत्रम हुश खेक्शा पाप क्याम्तीक गेय पचा माल्ब। मेको हुश पाप आ पर्वम चढ़ेशो बस्तु आ हुश बाक्चा माल्ब। मेको गेना हना यो बर्समी खेयप का इन चच युड आन पाला सम्म मेको पाप क्याम्तीक गेय चढ़ेतीके आ हुशेमी पचा माल्ब। मेको परमप्रभु यावे आ डोंडती नेल्ल क्येडा चोत्रखो सेल्ल्तीके बाक्ब” दे परमप्रभु यावेमी मोसा कली देंत। लेवी १६:१८

### क्येट पोक्चा शेंशो

11 परमप्रभु यावेमी मोसा कली

12 “गे इस्राएली वोंइश मुर आन कली हिक्गीनु, मेको आन कली मुर बेक्तीक रोइ मपामेक्ल, दे ब्रोंइचा कली नेल्लेमी परमप्रभु यावे कली क्येट गेचा माल्नीम। मिनु मेको आन कली हिक्शोनु, मारेइ मरिश्शो मदुम्ब। गन्ती १:३; २सामुएल २४:२-३

13 गिश जना वोंइश मुर हिक्सीनीमी, मिश जना ताम्बु डा नाक्तीके डा आधा शेकेल गेचा माल्नीमी। शेकेल का २० गेराह चांदी बाक्नीम। मोपा परमप्रभु यावे कली गेशो क्येट आधा शेकेल गेचा माल्शो बाक्ब। शेकेल का ११.५ ग्राम खोदेशो बाक्ब। गेरा का ०.६ ग्राम बाक्ब। मती १७:२७

14 वोंइश मुर गिश जना २० बर्स गाप्शो नु मेको क्येडा लाक्शो बाक्मा, मिश जनाम परमप्रभु यावे कली गेचा माल्शो चढेचा माल्नीम।

15 इन पाप क्याम्तीक गेय पचा कली थीबमी आधा शेकेल, मथीबमी यो आधा शेकेल परमप्रभु यावे कली गेचा माल्नीनी।

16 इस्राएली वोंइश मुरुमी आन गेशो प्रोंइतीक क्येट ताक्शा, गुम्तीक ताम्बु डा गेय पचा कली गेचा माल्नेवे। मिनु मेको क्येट परमप्रभु यावे आ डोंइती इस्राएली आन कली प्रोंइशो मिम्तीक चिन्ड दुम्ब” दैत।

### चिक्तीक ठेयब बोस

17 मिनु लेंशा परमप्रभु यावेमी मोसा कली

18 “गे चिक्चा कली कांसा के ठेयब बोस का सेलपतो। मेको आ निप्पाइक्तीके यो कांसा केन दुम्चा माल्ब। मेको गुम्तीक ताम्बु नु चढेतीक आस दातेमी वोंइश्शा, ब्वाक्कु कुर पपाइक्चा माल्नेवे। प्रस्थान ३८:८

19 मेको ब्वाक्कुमी हारून नु आ तौपुकीमी आन गुड खोइली चिक्सीचा माल्नीम।

20 मेकोपुकी मबेक्कल, दे गुम्तीक ताम्बुम ओव्रचा क्येडा डोंइती चिक्सीचा माल्नीम। मिनु चढेतीकेमी गेय पचा, दे परमप्रभु यावे आ डोंइती मीम चोशा चढेतीक चढेचा कली लमानु, मेको ब्वाक्कुम चिक्सीचा माल्नीम। ब्वाक्कुम चिक्सीमानु, मेको मबेक्नीम।

21 मेकोपुकी नु आन चच युइ आन पाला नेल्लेमी गेना हना यो पतीके लोव्र बाक्ब” दैत।

### ताम्बु डा लुक्तीक तेल

22 मिनु लेंशा परमप्रभु यावेमी मोसा कली

23 “गेमी शुश क्येट लाइब ब्रोंव्रशो रिना पाइब थोव्रक चाक्चा माल्नेवे। मार चाक्चा माल्नेवे देंशा हना, मूरे आ रस ५ सहे शेकेल, दाल चिनी सहे निक्शी ५० शेकेल नु ब्रोंव्रशो रिना पाइब बोच सहे निक्शी ५० शेकेल चाक्चा माल्नेवे। शेकेल का ११.५ ग्राम चांदी के क्येट बाक्ब। ताम्बु डा शेकेल चहिं १२ ग्राम बाक्ब।

24 नु कस्सीया माइश्शो ब्रोंव्रशो रिना पाइब फू ५ सहे शेकेल, ताम्बु डा नाक्तीकेमी नाक्शा, चाक्चा माल्नेवे। रिश्शो तेल हिन का यो चाक्चा माल्नेवे। हिन का ४ लिटर खोदेशो बाक्ब।

25 मेको नेल्ल ब्वाइश्शा थम रिश्शो लुक्तीक तेल सेल्पाइक्चा माल्नेवे। मेको परमप्रभु यावे कली ला बाक्ब। मेको ब्रोंव्रशो रिना पाइब सेल्स जोक्ब मुर कली सेल्पाइक्चा माल्नेवे। मेको थम रिश्शो लुक्तीक तेल ताम्बु कली ला सेल्चा माल्ब। प्रस्थान ३७:२९

26 मिनु गे गुम्तीक ताम्बु नु कबल पशो सन्दोस,

27 टेबल नु मेकेर डा मार मार नेल्ल, बती दातीके नु मेको आ मार मार नेल्ल नु धूप चोशा चढेतीके,

28 चोशा चढेतीके नु मेको आ मार मार नेल्ल नु चिक्तीके ठेयब बोस नु आ निप्पाइक्तीके नेल्ल खेक्पाइक्चा माल्नेवे। प्रस्थान ३०:१०

29 मोपा मेको मारेइ मारेइ नेल्ल खेक्तीनु, मेको ताम्बु डा गेय कली ला दुम्नीम। मेको कली मार मारम थीनीमी, मेको यो परमप्रभु कली दुम्नीम।

30 आं कली चढेब दुम्ब हारून नु आ तौ आन कली यो तेल खेक्शा, आं गेय पाइब सेल्चा माल्नेवे। प्रस्थान २९:७

31 इस्राएली आन कली 'मेको गेना हना यो इन चच युड आन पाला सम्म लुक्तीक तेल दुम्चा माल्ब। मेको तेल परमप्रभु यावे के ला बाक्ब।

32 मेको अरु मुर आन कली खेक्चा मदुम्ब। मेको खोदेशो पा ब्वाइश्शा तेल सेल्चा मदुम्ब। मेको परमप्रभु आ तेल ला बाक्ब' दे मिम्चा माल्नीनी।

33 सुमी मेको खोदेशो पा ब्वाइश्शा तेल सेल्बा नु अरु मुर आन कली खेक्बा, मेको मुर आ थर रे तिल्चा पुंडसीब" दे परमप्रभु यावेमी मोसा कली देंत।

### धूप सेल्चा शेंशो

34 मिनु परमप्रभु यावेमी मोसा कली "ब्रोव्रशो रिना पाइब थोव्रक मार ब्वाइक्पाइक्चा माल्नेवे देशा हना, चोव्रक, कुन्दापुरी, ब्रोव्रशो रिना पाइब रवा आ दूध नु मारेइ म्बवाइश्शो मूर, उइक्थ उइक्थ पा नाक्शा ब्वाइक्पाइक्चा माल्नेवे।

35 जोक्ब मुरुम मेको नेल्ल ब्वाइश्शा, ब्रोव्रशो रिना पाइब धूप, हिकसी सुप्शा, अरु म्बवाइश्शो परमप्रभु कली ला चढेतीक धूप सेल्पाइक्चा माल्नेवे।

36 मेको रे इच्का खोइ तुप्शा, फस सेलो। मिनु मेको फस युम्तीक ताम्बु डा नेल्ल क्येडा चोव्रखो कोठा कबल पशो सन्दोस आ डोंइती वोइश्शा, मेको फस चोचा माल्नेवे। मेको इन कली नेल्ल क्येडा चोव्रखो दुम्ब। मेकेर गो इ कली युम्नुड। प्रस्थान ३०:६

37 इन कली धूप सेल्नीनु, आं धूप खोदेशो पा मसेलीन। 'मेको धूप परमप्रभु यावे आं धूप ला बाक्ब' दे मिम्चा माल्नीनी।

38 सुइमी मेको नाम्चा कली सेल्लेक्म हना, मेको आन थर रे तिल्चा पुंडसीनीम" दे परमप्रभु यावेमी मोसा कली माइक्तु।

## 31

### रिम्शो पाइब आन कली योव्रशो

प्रस्थान ३५:३०-३५

1 मिनु परमप्रभु यावेमी मोसा कली प्रस्थान ३५:३०-३५

2 "नेनो, गो यहूदा आ थर डा हर आ चच ऊरी आ तौ बेचालेल आ नें थिशा आं गेय पचा कली योव्रता।

3 गो मेको कली आं सोक्तीमी प्रिंशा, मार मार सेल्चा कली जोक्ब तुइक्ब सेल्लत। मिनु पने चाप्तीक सक्ति यो गेता।

4 मेकोमी नेल्ल मिम्शा, सुन, चांदी नु कांसा के मारेइ मारेइ चेम्ने चाप्ब।

5 हीरा खोइक्तीक नु सुनम क्येप्तीके, शी मुतीके नु मारेइ मारेइ सेल्स जोक्ब दुम्पाइक्ता।

6 गो दान आ थर डा अहीसामाक आ तौ ओहोली-आब कली बेचालेल नु गेय पचा कली योव्रता। गो इस्राएल डा जोक्ब रिम्शो गेय पाइब मेको आस कली वारच पाइब यो योव्रतामी। गो इ कली मार मार देंडा, मेको नेल्ल आन कली सेल्ले चाप्तीक सक्ति गेतामी।

7 गुम्तीक ताम्बु, कबल पशो सन्दोस, मेको आ तार डा सुम्तीके नु ताम्बु आ गा डा माल्शो मारेइ मारेइ, प्रस्थान ३५:११-१९

8 टेबल नु मेको आ मारेइ मारेइ, बत्ती दातीके नु आ मारेइ मारेइ, धूप चोशा चढेतीके,

9 चोशा चढेतीके नु आ मारेइ मारेइ, टेयब चिक्तीक बोस नु आ राप्पाइक्तीके,

10 आं कली चढेब दुम्तीके रिम्शो प्रोव्रशो वा नेल्ल, चढेब हारून आ चढेची ना फेक्तीक वा नु आ तौ आन फेक्तीक वा,

11 लुक्तीक तेल नु ब्रोव्रशो रिना पाइब धूप गोम इ कली देशो खोदेशो पा मेकोपुकीमी आं बाक्तीक कली सेल्चा माल्नीम" देंत।

### नाइक्तीक नाक्त आ पर्बम अरेशो

प्रस्थान ३५:१-३

12 मिनु परमप्रभु यावेमी मोसा कली

13 “गे इस्राएली आन कली मार माइक्चा माल्नेवे देशा हना ‘गेपुकीमी थमा पा आं नाइक्तीक नाक्ती मानेचा माल्नीनी। मारदे हना मेको गेपुकी नु इन चच युइ सम्म कली चिन्ड लीब। गो, परमप्रभु यावेमी, इन कली आं मुर सेल्ता, दे गो तुइक्नीनी। प्रस्थान २०:८; इजीकीएल २०:१२

14 मोपतीके गेपुकीमी नाइक्तीक नाक्त मानेचा माल्नीनी। मारदे हना मेको परमप्रभु आ नाक्त बाक्ब। सु सुमी मेको नाक्ती ममानेशु, गेय पाइनीमी, मेको मुर आ जात डा मुर रे तिल्शा, साइक्चा पुंइसीनीम। गन्ती १५:३२-३५; येरमीया १७:२१-२३

15 मोपा ६ नाक्त सम्म गेय पामेक्ल, तन्न ७ नाक्त चहिं नाइक्तीक नाक्ती बाक्ब। मेको परमप्रभु यावे आ नाक्त बाक्ब। सु सुम मेको नाक्ती गेय पाइनीमी मेको थमा पा साइक्चा पुंइसीनीम।

16 मोपतीके इस्राएलीपुकीमी नाइक्तीक नाक्ती मानेचा माल्नीम। मेको नाक्ती गेना हना यो आन चच युइ सम्म कबल पतीके बाक्ब। मर्कूस २:२७-२८

17 गो नु इस्राएली इन दातेमी मेको गेना हना यो लीब चिन्ड बाक्ब। परमप्रभु यावेमी ६ नाक्तीमी सरीड नु रागी सेल्ने थुम्तु। ७ नाक्ती चहिं नाइसीशा, आ दशो सात’ दे इस्राएली आन कली माइक्चा माल्नेवे” दैत। प्रस्थान १६:२३, २५; उत्पत्ती २:२

18 मिनु परमप्रभुमी मोसा नु सौने डांडाम लोत्र पने थुम्शा, आ देशो फुल्लु निक्शीमी मुशा आंम ब्रेक्शो लोत्र मोसा कली गेपुतु। प्रस्थान २४:१२; प्रस्थान ३२:१५-१६; प्रस्थान ३४:२८; ब्यवस्था ४:१३; ब्यवस्था ५:२२; ब्यवस्था ९:१०; ब्यवस्था १०:१-५

## 32

### इस्राएलीमी सुन के मूर्ति सेल्शो

1 मिनु इस्राएल डा मुरपुकीमी मोसा कली डांडा रे मयिशो तशा, हारून आ बाक्तीक जाक्शा, मेको कली “लो, इं डोंडोंइती गाक्शा लां कोंइब देवता सेलो। आंइ कली इजीप्त रागी रे गुंइशा, एक चाक्ब मोसा मार दुम्मे? मतुइक्तक” दे हारून कली दैमा बाक्त। ब्यवस्था ९:८-२१

2 मिनु हारूनमी मेको आन कली “इन मीश, इन तमी तौ आन पांइशो सुन पुइश्शा, आं बाक्तीके चाक्कीन” दैमाक्त।

3 मिनु मुर नेल्लेमी आन नोफामी पांइशो सुन पुइश्शा, हारून आ बाक्तीके चाक्गमे बाक्त।

4 मिनु हारूनमी मेको सुन आन गुइ रे ताक्शा, यपाइश्शा, बाछा का सेला बाक्त। मिनु इस्राएलीपुकीमी “इस्राएल डा मुरपुकी, एकोन इं देवता बाक्ब। एकोमी इं कली इजीप्त रागी रे गुंइताक्व” दे मुमा बाक्त। १राजा १२:२८; भजन संग्रह १०६:१९-२०; प्रेरित ७:४१

5 मिनु हारूनमी मेको आन कली तशा, बाछा आ डोंइती चढेतीक का सेला बाक्त। मिनु ठेयब सेंदा पा “दीसा परमप्रभु यावे कली चाड का मानेचा माल्ब” दैमाक्त।

6 मिनु आ दीसा मेकोपुकी सुनी कना बोक्शा चोशा चढेतीक नु दुशा बाक्चा आ पर्वम चढेतीक चढेमे बाक्त। मिनु मुरपुकी जचा तूचा कली निस्समा बाक्त। मिनु नोले जशा तूशा बोक्शा, आन दला दाक्स पामे बाक्त। १कोरिन्थी १०:७

7 मिनु परमप्रभु यावेमी मोसा कली “डांडा रे तोंइसो। इजीप्त रे गुंइशा चाक्शो इ मुरपुकीमी आन दला दाक्स पा पाप पाम्तेक्म।

8 मेकोपुकीमी आं शेंशो लोत्र थु था प्रोंइतेक्म। आंम कली सुन के बाछा का सेल्शा, मेको कली पूजा पशा “इस्राएल डा मुरपुकी, एकोन इं कली इजीप्त रागी रे गुंइब परमप्रभु बाक्ब” दैतेक्म” दे परमप्रभु यावेमी मोसा कली दैत। प्रस्थान २०:४, २३

9 मिनु लेंशा परमप्रभु यावेमी मोसा कली “गो मेको मुर आन कली ताता। काइ मटीब बाक्नीम, दे तुइक्ताक्ड। ब्यवस्था ९:६; यसैया ४८:४; प्रेरित ७:५१

10 मोपतीके आं कली मतेक्यी। मेको आन कली तशा गाइक्ताक्यी। गो मेको आन कली साइक्नुडमी। मिनु गो इ लां पा ठेयब जात का सेल्लुडमी” दैत। गन्ती १४:११-२०

11 मिनु मोसामी परमप्रभु यावे कली “परमप्रभु यावे, आं परमप्रभु, इन मुर आन पर्वम मारदे गाइक्तीनी? गेमी इन ठेयब सक्तिमी मेको आन कली इजीप्त रागी रे गुंडताक्नी।

12 मो पाइतीनी हना इजीप्त रागी डा मुरपुकीमी ‘परमप्रभुमी मेको आन कली पहाडमी साइशशा, रागी रे क्याम्चा कली एक रे गुंडताक्व’ देंनीम। मोपतीके इन ठेयब गाइक्तीक प्रोनीन। इन मुर आन कली मसतीन। ब्यवस्था ९:२८; यहोसु ७:९

13 इन गेय पाइब अब्राहाम, इसहाक नु याकूब मिम्तीने। मेको आन पर्वम इन नेंमी ‘गो इन कली सरीड डा सोरुल खोदेशो पा शुश सेलनुड। आं देशो रागी इन चच युड आन कली गेनुडमी। मिनु एको रागी गेना हना यो मेको आन के दुम्ब’ दे कसम जाइतीनी” देंत। उत्पत्ती १५:५; उत्पत्ती २२:१६-१७; उत्पत्ती २६:४

14 मिनु परमप्रभु यावेमी आ थुं लेशशा, आ मुर आन कली मसाइक्मी। भजन संग्रह ८५:-

### परमप्रभु आ ब्रेक्शो फुल्लु प्रोल्लो

15 मिनु मोसा परमप्रभु यावे आ देशो लोत्र ब्रेक्शो फुल्लु निकशी कुरशा, डांडा रे ब्रुप्त। मेको फुल्लु निकशी निम्फा पटटीम मुशा ब्रेक्शो बाक्त।

16 परमप्रभुमी मेको फुल्लु आंमा चेशशा सेल्लो बाक्माक्त। मिनु मुशा ब्रेक्शो बाक्त। प्रस्थान ३१:१८

17 मिनु यहोसुमी मुर आन कली रेयके पशो नेंशा, मोसा कली “इसाएल डा मुर आन बाक्तीकेमी लडाइ पशो रेयके खोदेशो नेंसाक्व” देंत।

18 तन्न मोसामी “एको रेयके लडाइ ग्राब आन रेयके ममाइ, बुडब आन रेयके यो ममाइ। गो कुम्सो पशो नेंता” देंत।

19 मिनु मोसा इस्राएली आन बाक्तीके आ नेक्था जाक्मेनु, बाछा नु बाछा आ एर ओथं मुरपुकी सिल पशो तशा, शुश गाइशशा, फुल्लु निम्फा ताइशशा, डांडा आ पुंम प्रोल्लु।

20 मिनु मोसामी इस्राएली आन सेल्लो बाछा लाइशशा, मीम हुम्शा, तुप्शा फस सेल्लो, ब्वाक्कुम फुइशशा, इस्राएली आन कली तूपाइक्तीमी।

21 मिनु नोले मोसामी हारून कली “एको मुरपुकीमी इ कली मार पामे डा? मारदे मेको आन कली ओदेशो ठेयब पाप पपाइक्मी?” दे हिल्लो पाप्तु।

22 मिनु हारूनमी “आं पर्वम मगाइक्तीन। गे एको मुर आन कली तुडक्नीनी। एकोपुकी दूली पाइब ला बाक्नीम।

23 आं कली ‘आंइ डोंडोंइती गाक्शा लां कोइब देवता सेलो। मारदे हना आंइ कली इजीप्त रे गुंडशा, एक चाक्ब मोसा कली मार दुम्मे, मनुइक्तक’ देंतेक्म।

24 मिनु गो मेको आन कली ‘सु सु इन के सुन बाक्मे, मेको पुइशशा, एक चाक्कीन’ दे माइक्तामी। मिनु मेकोपुकीमी चाक्तेक्म। मिनु गो मेको सुन मीम हुम्ताक्ड। मिनु एको बाछा दुम्त” देंत।

### इसाएली आन कली सजाइ

25 मोसामी मुर आन कली आन दला दाक्स पशो ताप्तु। मारदे हना हारूनमी आन दला दाक्स पचा गेवा बाक्त। मिनु आन जोरी सत्रु नेल्ल ग्येरसमा बाक्त।

26 मिनु मोसामी इस्राएली आन बाक्तीक ओवतीकेम राप्शा “सु सु परमप्रभु यावे गे बाक्नी, मेकोपुकी आं गे पिने” देंत। मिनु लेवी आ थर डा मुर नेल्ल मोसा गे लशा, आ एर ओथं राप्तेक्म।

27 मिनु मोसामी मेको आन कली “परमप्रभु यावे, इस्राएली आन परमप्रभुमी ‘गे नेल्लेमी इन तरवार पिप्शा, मुर आन बाक्तीके लशा, इन लोकब, इन खिं डा मुर, इन वारच नु सु बाक्तेक्म हना यो, सतीन’ देंत” देंत।

28 मिनु लेवी आ थर डा मुरपुकीमी मोसा आ देशो खोदेशो पा पाम्तेक्म। मेको नाक्ती हजार सां मुर साइक्चा पुंडसाक्म।

29 मिनु मोसामी लेवी आ थर डा मुर आन कली “गेपुकीमी मुलाक्ती परमप्रभु यावे आ गेय पा, आंम आंम इन तौ नु आंम आंम इन लोकब आन कली मप्रोंडथु साइक्तीनी। मिनु मुलाक्ती गे आसीक राइनीनी” देंत। प्रस्थान २६:४१; गन्ती ३:६-१०; ब्यवस्था ३३:८-११

### मोसामी परमप्रभु नु लोव्र पशो

30 आ दीसा मोसामी मुर आन कली “गेपुकीमी ठेयब पाप पाइतीनी। मिनु गो परमप्रभु यावे आ बाक्तीक डोइशशा, लाइनुड। गो इन पशो पाप क्याम्तीक गेय पने चाप्नुडा, कौ?” दैत।

31 मिनु मोसा परमप्रभु यावे आ बाक्तीक लशा मेको कली “मुरपुकीमी थमा पा ठेयब पाप पाम्तेक्म। आंम कली सुन के देवता सेल्तेक्म।

32 मो हना यो गे मेको आन पाप क्याम्दीन, दे पुंइनुड। मक्याम्ताकनी हना, इन ब्रेक्शो किताब रे आं नें क्याम्दीने” दैत। भजन संग्रह ६९:२९; लूका १०:२०; रोमी ९:३

33 मिनु परमप्रभु यावेमी मोसा कली “सुमी आं देशो मटिथु पाप पाइबा, मेको आ नें आं ब्रेक्शो किताब रे क्याम्नुड।

34 तन्न मुल लावो। मेको मुर आन कली आं देशो रागी लाइक्मी। नेनो, आं स्वर्ग डा गेय पाइब इ डोंडोंडोंइती सोइक्नुड। तन्न काबु मेको आन कली पाप पशो आ पबंम सजाइ गेनुड” दैत। प्रस्थान ३३:२, १४; गन्ती १४:२७-३०

35 मिनु परमप्रभु यावेमी इस्राएल डा मुर आन कली बेक्तीक रोड पपाइक्तु। मारदे हना मेकोपुकीमी हारून कली मेको सुन के बाछा सेल्पाइशो बाक्तेक्म।

## 33

### परमप्रभु आ शिशी पुंइशो

1 मिनु परमप्रभु यावेमी मोसा कली “इजीप्ट रे गुंइशा, एक चाक्शो मुरपुकी नु आं देशो रागी लावो। मेको रागी आ पबंम गो ‘इ चच युइ आन कली गेनुड’ दे अब्राहाम, इसहाक नु याकूब नु कसम जाता। उत्पती १२:७

2 आं स्वर्ग डा गेय पाइब इन डोंडोंडोंइती सोइक्नुड। मिनु गो कनानी, एमोरी, हिती, परिज्जी, हिक्वी नु यबुसी आन कली खेरनुडमी। प्रस्थान २३:२०

3 मेको रागीम दूध नु खुदो शुश बाक्ब। मारेइ मारेइ यो शुश ग्रेल्ब। गेपुकी काइ मटीब मुर बाक्नीनी। मोपतीके गो गेपुकी नु मगाक्नुड। गो गाक्ती हना, इन कली लांमीन साइक्नन्नी” दैत। प्रस्थान ३२:९-१०

4 मिनु मुरपुकीमी मेको मरिम्शो लोव्र नेशा, सुर्ता पाम्तेक्म। सुइमी आन सुन चांदी मारेइ मपांडसम।

5 मारदे हना परमप्रभु यावेमी मोसा कली “इस्राएली आन कली ‘गेपुकी काइ मटीब मुर बाक्नीनी। गो याम का गे नु गाक्ती हना, नेल्ल इन कली साइक्नन्नी। मुल इन सुन चांदी नेल्ल प्रुतीन। मिनु इन कली मार पचा माल्नुडा, दे मिम्नुड” देशो बाक्त। योएल २:३३

6 मोपतीके होरेब डांडाम बाक्मा रे इस्राएलीपुकीमी सुन चांदी मपांडसम। योना ३:६

### परमप्रभु नु लोव्र पतीक ताम्बु

7 मिनु मोसामी अरु आन बाक्तीक क्येडा डोन ताम्बु का कीशा वोइक्तु। मेको ताम्बु कली परमप्रभु नु लोव्र पतीक ताम्बु दैत। सु सु परमप्रभु यावे कली गुम्चा दाक्तमे, मेको मुर आन बाक्तीक रे गूशा, मेको परमप्रभु नु लोव्र पतीक ताम्बु लाइबाक्तेक्म। प्रस्थान २९:४२

8 मिनु मोसा मेको परमप्रभु नु लोव्र पतीक ताम्बु लामेनु, मुर नेल्ल बोक्शा, आन ताम्बु आ ओव्रतीकेम राप्शा, मोसा मेको ताम्बु मओव्रम सम्म, कोव्रशा बाक्तेक्म।

9 मिनु मोसा मेको ताम्बु आगा ओव्रमेनु, गोस्स के थाम यिशा, ताम्बु आ ओव्रतीकेम राप्शो ताम्तेक्म। मिनु परमप्रभु यावेमी मोसा नु लोव्र पाप्तु। गन्ती ११:२५; ब्यवस्था ३१:१५

10 मुर नेल्लेमी मेको गोस्स के थाम, ताम्बु आ ओव्रतीकेम राप्शो ताम्तेक्म। मिनु मुर नेल्ल बोक्शा आंम आंम ताम्बु आ ओव्रतीकेमी बाप्शा, परमप्रभु कली मान पा ठेयब सेल्तेक्म।

11 मिनु परमप्रभु यावे नु मोसा कोव्रमुशा, लोत्र पाम्ताक्स। दोदेशो पा मुर आन वारच नु बाक्शा, लोत्र पाइनीमी, मोदेशो पा लोत्र पाम्ताक्स। मिनु मोसा लेशशा, आ ताम्बुम लत। आ गेय पाइब ठिटा, नून आ तौ यहोसु चहिं ताम्बु उड बाक्त। प्रस्थान ३३:२०; गन्ती १२:८; ब्यवस्था ३४:१०

### मोसाम परमप्रभु कली पुंडशो

12 मिनु मोसामी परमप्रभु यावे कली “कोव्रडीन, गे आं कली ‘एको मुर आन कली लतो’ देतीनी, तन्न गो नु सु सु सोइक्नीनी, गे आं कली मतुइक्पाइय्यीनी। मो हना यो, गे आं कली ‘इ नें कली तुइक्नुड। मिनु इ कली दाक्नुड’ देतीनी। प्रस्थान ३३:२, ३, १७

13 मोपतीके गे आं कली दाक्ताक्नी हना, आं कली इन लां कोइदीने। गो इन कली तुइक्ने चबुल। गो इन डोंइती शिशी तडल। एको जात डा मुरपुकी इन मुर नम, दे मिन्तीने” देत। भजन संग्रह १०३:७

14 मिनु परमप्रभुमी “गो गे नु लाइनुड। मिनु इ थुं नाइक्चा गेनुड” देत। यसैया ६३:९; यहोसु २१:४४; हिब्रू ४:९

15 मिनु मोसामी “गे गो नु मलाइतीनी हना, आंइ कली एक रे मसोइक्तीन।

16 गो नु इन मुरपुकीमी इन डोंइती शिशी तशो बाक्नीकी, दे गो दोपा तुइक्नीकी? गे गो नु लाइतीनी हना ला, तुइक्नीकी। मोपा ला गो नु इन मुरपुकी रागी डा मुरपुकी नु खाल का डा मदुम्नीकी” देत। ब्यवस्था ४:६-८

17 मिनु परमप्रभु यावेमी मोसा कली “गो इ देशो पाइनुड। मारदे हना गो इ कली दाक्नुड। मिनु इ नें यो तुइक्नुड” देत। प्रस्थान ३३:१२; यसैया ४३:१; रतिमोथी २:१९

### मोसामी परमप्रभु कली तचा दाक्शो

18 मिनु मोसामी “गे आं कली इन छेडछेड तपाइय्यीनी” दे पुंडतु। यूहन्ना १:१४; २कोरिन्थी ३:१८

19 मिनु मेकोमी “गो इ डोंइती रे लाइनुड, आं गेना हना यो दाक्तीक कोइनन। इ डोंइती आं नें ‘यावे, देना दें गाक्नुड’ सु सु आन कली शिशी पचा दाक्डा, मेको आन कली शिशी पाइनुड। सु सु आन कली दाक्चा दाक्डा, मेको आन कली दाक्नुड” देत। रोमी ९:१५

20 मिनु मोसा कली “गे आं कुल कोवने मचाप्नेवे। मारदे हना आं कुल तामेनु, मुर बेक्नीमी” देत। प्रस्थान २४:११; उत्पत्ती ३२:३१; न्यायाधीस ६:२२-२३; न्यायाधीस १३:२२-२३; यसैया ६:५; यसैया ३३:१४; १तिमोथी ६:१६

21 मिनु लेशा परमप्रभु यावेमी मोसा कली “कोव्रडो, आं बाक्तीकेम सेरथे फुल्लु का बाक्ब, गे मेको तार रपो। १राजा १९:८-१३

22 आं छेडछेड मेकेर रे लमेनु, गो इ कली मेको सेरथे फुल्लु आ काक्पेमी खुइश्शा वोइक्नन। गो मलाक्गु सम्म इ कली आं गुडमी सुम्शा वोइक्नन। प्रस्थान ३४:५-६; प्रस्थान २४:११;

23 नोले आं गुड क्युकुनुड। मिनु गे आं ची ताइनेवे। आं कुल चहिं मताइनेवे” देत।

## 34

### परमप्रभु आ अरेशो लेशा ब्रेक्शो

1 मिनु परमप्रभु यावेमी मोसा कली “डोंइती डा खोदेशो पा फुल्लु निक्शी खोतो। गो मेको फुल्लुमी इ डोंइती प्रोल्शो फुल्लु डा लोत्र ब्रेक्नुड। प्रस्थान ३२:१९

2 सुनी कना बोक्शा, सीने डांडा डोइश्शा, आं डोंइती जाक्को।

3 गे नु सुइ डांडा डोइक्चा मदुम्नीम। बी ब्यफ, क्यारश भेडा यो डांडा गे जोचा मदुम्नीम” दे माइक्तु। प्रस्थान १९:१२-१३

4 मिनु मोसामी परमप्रभु यावेमी देशो खोदेशो पा डोंइती डा खोदेशो फुल्लु निक्शी खोइक्तु। मिनु सुनी कना बोक्शा, फुल्लु कुरशा सीने डांडा डोंइसाक्व।

5 मिनु परमप्रभु यावे गोस्स आगाम बाक्शा, तोंइसाक्व। मिनु मोसा नु राप्शा आ नें देना दें गाक्त।

6 मिनु परमप्रभु यावे मोसा आ नेक्था गाक्ना गाक्न “यावे, यावे, शिशी पाइब नु दाक्ब परमप्रभु बाक्ब। रीब पा मगाइक्ब। गेना हना यो शिशी पाइब नु आ दाक्चा मप्रॉइब बाक्ब। प्रस्थान ३३:१८-२६; गन्ती १४:१८; भजन संग्रह १०३:८; नहुम १:३; १यूहन्ना ४:१६

7 मिनु हजार हजार आन पाला सम्म गेना हना यो दाक्ब। मुर आन ठीक मपशो, आन हेंथे पशो नु पाप पशो क्याम्ब। तन्न सजाइ मगेथु मप्रॉइब। आम आफ आन मरिम्शो पशो आन तमी तौ, चच, युड नु युड आन युड सम्म सजाइ ताइनीम” देंत। प्रस्थान २०:५-६; ब्यवस्था ३२:९; भजन संग्रह २८:९

8 मिनु मोसामी गु बाप्शा सेउ पा ठेयब सेल्लु।

9 मिनु “आं परमप्रभु, इन डोंइती शिशी तशो बाक्ती हना, गे परमप्रभु, गो नु गाक्कीन, दे पुंडनुड। एको काइ मटीब मुर बाक्तेक्म हना यो, आंइ ठीक मपशो नु पाप क्याम्दीन। आंइ कली आंम इन मुर सेल्शा ब्रकी” देंत।

10 मिनु मेकोमी “नेनो, गो कबल का पाइनुड। इ मुर नेल्ल आन डोंइती छक लाक्चा डा गेय पाइनुड। गो मोदेशो गेय रागी रागी आन दातेमी गेनायो मपड। मिनु गे नु बाक्ब मुर नेल्लेमी परमप्रभु यावे आ गेय बाक्ब, दे तुडक्नीम। आं पचशो गेय हिंचा डा नु छक लाक्चा डा बाक्ब। प्रस्थान १९:५

11 गो मुलाक्ती मार देनुडा, मेको लोत्र टिचा माल्नेवे। नेनो, गो इ डोंइती रे एमोरी, कनानी, हिती, परिज्जी, हिंवी नु यबुसी आन कली खेरनुडमी।

12 गो इन कली गेनुड देशो रागी जाक्दीत्नीनु, मेको रागी डा मुरपुकी नु काइ कबल मपावो। होस पा बाक्को। कबल पाप्तीवी हना, मेकोपुकीमी इन कली दूली पाइब सेल्लेमी। प्रस्थान २३:३२-३३

13 मेको आन चढेतीकपुकी प्रेशा, आन पूजा पचा कली खुक्शो फुल्लु प्रोल्शा, मूर्ति पाइशो थाम कली क्योरशा, तिम्चा माल्नीनी। प्रस्थान २३:२४

14 गे मेको आन देवी देवता आन डोंइती बाप्शा सेउ मपने। मारदे हना आं नें रुश पाइब बाक्ब। मिनु गो रुश पाइब परमप्रभु बाक्नुड।

15 मेको रागी डा मुर नु काइ कबल मपने। मारदे हना मेको रागी डा मुरुमी आन देवी देवता आन कली पूजा पा क्योरशा चढेनीमी। मिनु इन कली ब्रेम्मानु, गे मेको आन देवी देवता आन कली चढेशो जाइनीनी।

16 मिनु गे आन तमी इन तौ आन कली चाक्नीनी। मिनु मेको आन तमीम आन देवी देवता आन कली पूजा पा चढेनीम। इन तौ आन कली यो आन देवी देवता आन कली पूजा पा चढेपपाइक्नीम। ब्यवस्था ७:३; न्यायाधीस ३:६; १राजा ११:२

17 गेपुकीमी आंम कली मूर्ति मचेम्सीन। प्रस्थान २०:४

18 बोरब ओख्ती मसुप्शो शोब्ले डा चाड मानेचा माल्नीनी। आं देशो खोदेशो पा आबीब महिनाम ७ नाक्त सम्म बोरब ओख्ती मसुप्शो शोब्ले जचा माल्नीनी। मारदे हना गे आबीब महिनाम इजीप्त रे गूशो ननी। प्रस्थान २३:१४-१९

19 इन बस्तु भाव आन डोंइती जरमेशो बाछा, पाठा, नेल्ल आं के नम। उत्पत्ती ४:४

20 डोंइती जरमेशो गधा आ बोहोर आ पा डा पाठा का गेशा प्रॉइचा माल्नीनी। मो मपाइनीनी हना, आ शूर जिक्शा, साइक्चा माल्नीनी। इन डोंइती जरमेशो तौ आ पा डा क्येट गेशा प्रॉइचा माल्नीनी। आं डोंइती सुइ श्येत्थ गुइ मजाक्कीन। प्रस्थान १३:१२-१६

21 मिनु ६ नाक्त इन गेय नेल्ल पचा माल्नीनी। ७ नाक्त चहिं नाइक्चा माल्नीनी। ब्यफ वाक्ची नु बाली नाली रुप्ची ना यो नाइक्चा माल्नीनी।

22 गेपुकीमी हप्ता डा चाड मानेचा माल्नीनी। मेको डोंइती मीशो चेरब आ चाड बाक्ब। बाली नाली रुप्शा ओइतीक डा चाड यो मानेचा माल्नीनी। मेको बर्स नुप्ची ना डा चाड बाक्ब। लेवी २३:१५-१६; ब्यवस्था १६:९-१०

23 इसाएल डा वोंइश मुर नु वोंइश आल नेल्ल बर्सम खेयप सां परमप्रभु आ डोंइती, परमप्रभु यावे, इसाएली आन परमप्रभु आ डोंइती जाक्चा माल्नीम।



24 गो रागी रागी डा मुर आन कली इन डोंइती रे खेरशा, इन बाक्तीक रागी बारपाइक्नुड। बर्सम खेयप सां परमप्रभु यावे इन परमप्रभु आ डोंइती जाक्कीन। मिनु सुइम इन रागी तशा मवाल्नीम।

25 आं कली चढेतीक हुश बोरब ओख्ती सुप्शो शोब्ले नु मचढेन। पास्सा चाड डा चढेशो श्ये सुनी सम्म मारेइ महेंचा।

26 इन रू डा डोंइती मीशो नेल्ल क्येडा रिम्शो थोव्रक परमप्रभु यावे, इन परमप्रभु आ खिंम चाक्चा माल्नीनी। क्यारश आ पाठा आ ममा आ दूधमी लोप्शा क्येचा मदुम्ब” दे मोसा कली देंत। प्रस्थान २३:१९

27 मिनु परमप्रभु यावेमी मोसा कली “गो, गे नु इस्राएली नेल्ल नु एको अरेशो लोव्र पा कबल पाता, मोपतीके ब्रेक्तो” देंत। प्रस्थान २४:४

28 मिनु मोसा परमप्रभु यावे नु ४० नाकदो नाक्ती बाक्त। मारेइ मजवो। ब्वाक्कु यो मतूड। मिनु कबल डा १० ओटा अरेशो लोव्र फुल्लुम ब्रेक्ताक्व। प्रस्थान २४:१८; मती ४:२; प्रस्थान ३१:१८

### मोसा आ कुल छेडछेड दुम्शो

29 मिनु नोले मोसा मेको परमप्रभु यावे आ कबल डा लोव्र ब्रेक्शो फुल्लु निक्शी कुरशा, सीनै डांडा रे तोंइसाक्व। मोसा परमप्रभु यावे नु लोव्र पतीके आ कुल परमप्रभु आ छेडछेडम छेडछेड दुम्शो बाक्व, दे मतुइक्वत।

30 मिनु हारून नु इस्राएली नेल्लेमी मोसा कली तामेनु, आ कुल छेडछेड दुम्शो ताम्तेक्म। मिनु आ नेक्था लचा हितेक्म। २कोरिन्थी ३:७-१८

31 मिनु मोसामी मेको आन कली ब्रेत्तीमीनु, हारून नु ठेयब मुर नेल्ल आ नेक्था जाक्तेक्म। मिनु मेकोपुकी नु लोव्र पाप्तु।

32 मिनु नोले इस्राएलीपुकी यो मोसा आ नेक्था जाक्तेक्म। सीनै डांडाम परमप्रभु यावेमी आ कली मार मार मदा, मेको नेल्ल आन कली अरेम्तीमी।

33 मोसामी मेकोपुकी नु लोव्र पने थुम्शा, आ कुल वामी सुम्साक्व।

34 मोसा परमप्रभु यावे नु लोव्र पथ आ डोंइती लमेनु, लाडगा मग्रूम सम्म आ कुल हुक्साक्व। मिनु नोले गूशा, आ कुल सुम्सीशा मेको लोव्र इस्राएली आन कली नेंपाइक्तीमी। प्रस्थान ३३:८-९

35 इस्राएलीमी मोसा आ कुल छेडछेड दुम्शो ततीके, मोसामी परमप्रभु यावे नु लोव्र पथ, आगा मओव्रम सम्म आ कुल सुम्साक्व।

## 35

### नाइक्तीक नाक्त आ पर्बम अरेशो

प्रस्थान ३१:१२-१७

1 मोसामी इस्राएली नेल्ल आन कली ब्रेशशा “परमप्रभु यावेमी शेंशो इन पचा माल्शो गेय, मार मार बाक्व देंशा हना,

2 गे ६ नाक्त सम्म गेय पने। ७ नाक्ती चहिं परमप्रभु यावे आ नाक्त दुम्तीके, मेको नाक्ती नाइक्तीक नाक्त बाक्व। सु सुमी मेको नाक्ती गेय पाइनीमी, मेको साइक्चा पुंइसीनीम। प्रस्थान २०:८-११; प्रस्थान ३४:२१

3 नाइक्तीक नाक्ती इन खिं नेल्लेमी मी मुइक्चा यो मदुम्ब” दे माइक्तीमी।

### ताम्बु सेल्चा कली मार मार पोकशो

प्रस्थान २५:३-९; प्रस्थान ३१:७-११

4 मिनु नोले मोसामी इस्राएली आन कली “परमप्रभु यावे आ शेंशो लोव्र मार बाक्व, देंशा हना

5 “परमप्रभु यावे कली ग्रुम्तीक ताम्बु सेल्चा कली चढेतीक मार मार पोकचा माल्नीनी। सु सुम ग्येरशा गेनीनी, मेकोमी परमप्रभु यावे कली मार चाक्चा माल्नीनी देंशा हना, सुन, चांदी, कांसा, प्रस्थान २५:२

6 नीलो, प्याजी नु लल श्येले नु रिम्शो पा किरशो सुती श्येले के प्रोव्रशो वा नु क्यारश आ चां,

7 लल रड नुप्शो बोका आ कुशुल, नेल्ल क्येडा रिम्शो कुशुल नु बोल्यो शी,

- 8 बत्ती दाचा कली तेल, लुकतीक तेल कली ब्वाइक्तीक नु धूप कली ब्वाइक्तीक,  
 9 निसाफ पतीके ऊरीम नु थुम्मीम वोइक्तीक झोला नु कुचु तार वोइक्तीक सेल्चा कली ओनीक्स माइशो हीरा नु अरु हीरा चाक्चा माल्नीनी' ” देंत।  
 10 मिनु मोसामी “इन दातेम सु सु जोक्ब बाक्नी, मेको नेल्ल जाक्शा, परमप्रभु यावे आ देशो थोव्रक नेल्ल सेल्चा माल्नीनी।  
 11 गुम्तीक ताम्बु नु ताम्बु कली सुम्तीक, ग्याइक्पाइक्तीकपुकी, फलेक नु लाइशो कोक्केपुकी, थामपुकी नु राप्पाइक्तीकपुकी,  
 12 कबल पशो सन्दोस नु आ कुरतीक कोक्के निक्शी, सन्दोस आ सुम्तीके, फारतीके,  
 13 टेबल नु आ कुरतीक कोक्के, ग्योब नेल्ल नु कोंइतीक शोब्ले,  
 14 बत्ती दातीक नु मेको आ दियारीपुकी, बत्ती कली ठीक सेल्तीक थोव्रक नु बत्ती कली तेल,  
 15 धूप चोशा चढेतीके नु मेको आ कुरतीक कोक्के, लुक्या कली तेल नु ब्रोव्रशो रिना पाइशो धूप, ताम्बु ओव्रतीक डा फारतीक वा,  
 16 चोशा चढेतीके नु आ एर ओथ डा कांसा के थरपु, कुरतीक कोक्के नु आ मार मार, चिक्तीक टेयब बोस नु मेको आ निप्पाइक्तीके,  
 17 ताम्बु आ लाडगा डा फारतीक वा, आ थामपुकी नु मेको आन राप्पाइक्तीकपुकी, ओव्रतीक डा फारतीक वा,  
 18 ताम्बु आ किला नु लाडगा थरपु डा किलापुकी नु डोरीपुकी,  
 19 नु हारून नु आ तौ परमप्रभु कली चढेब दुम्चा कली फेक्तीक वासी सेल्चा माल्नीनी” दे मुर आन कली माइक्तीमी।

### ताम्बु कली मार मार चाक्शो

- 20 मिनु नोले इस्त्राएली नेल्ल मोसा आ डोंइती रे लाम्तेक्म।  
 21 सु सु आन थुंमी “गो चाक्नुड” देंमा, मेकोपुकीमी गुम्तीक ताम्बु सेल्चा कली नु मेकेर डा गेय पचा कली मार मार थोव्रक नु फेक्तीक वा कली मार मार माल्दा, मेको परमप्रभु यावे कली गेचा, दे चाक्तेक्म। १इतिहास २९:५-९; २कोरिन्थी ९:७  
 22 मीश मुर, वोंइश मुर नेल्लेमी मार मार चाक्तेक्म देशा हना, मुन्द्री, मारवाडी, औंठी, सुन के चुरा नु अरु सुन के थोव्रकपुकी परमप्रभु यावे कली चाक्तेक्म।  
 23 सु सु नु नीलो, प्याजी नु लल श्येले नु रिम्शो पा किरशो सुती श्येले के प्रोव्रशो वा, क्यारश आ चां, लल रड नुप्शो सांड आन कुशुल, नेल्ल क्येडा रिम्शो सेल्शो कुशुल बाक्मे, मेको चाक्तेक्म।  
 24 सु सु आन के चांदी नु कांसा बाक्मे, मेकोमी परमप्रभु यावे कली चाक्तेक्म। सु सु नु गेय पचा कली ठीक पशो बोल्यो शी बाक्मे, मेको चाक्तेक्म।  
 25 मिनु मीश मुर आन दातेमी सु सु जोक्ब बाक्मा, मेकोपुकीमी आन पांइशो नीलो, प्याजी, लल श्येले नु रिम्शो पा किरशो सुती श्येले के प्रोव्रशो वा चाक्तेक्म।  
 26 सु सु जोक्ब बाक्मा, मेकोपुकीमी क्यारश आ चां पांइतेक्म।  
 27 मिनु टेयब मुरपुकीमी ओनीक्स माइशो नु अरु हीरा कुचु तार वोइक्तीक नु निसाफ पतीक ऊरीम नु थुम्मीम वोइक्चा कली झोलाम क्येप्पाइक्चा कली चाक्तेक्म।  
 28 बत्ती कली तेल, लुक्या कली तेल नु धूप कली ब्रोव्रशो रिना पाइब ब्वाइक्तीक थोव्रक चाक्तेक्म।  
 29 मोपा इस्त्राएली नेल्लेमी व्येरशा, परमप्रभु यावे कली गेचा कली मारेड मारेड चाक्तेक्म। मीश मुर नु वोंइश मुरुमी मार मार माल्बा मेको नेल्ल चाक्तेक्म। परमप्रभु यावेमी मोसा कली अरेशो खोदेशो पा ताम्बु सेल्तीक गेय पचा कली मार मार चाक्तेक्म।

30 मिनु मोसामी इस्राएली आन कली “नेनीन, परमप्रभु यावेमी यहूदा आ थर डा हरु आ चच, ऊरी आ तौ बेचालेल कली आ नें थिशा, आ गेय पचा कली योव्रतु।

31 मेकोमी मेको कली परमप्रभुमी आ सोक्तीम प्रिंशा, मार मार सेल्चा कली जोक्ब तुइक्ब सेल्लु। मिनु पने चाप्तीक सक्ति यो गेप्तु।

32 मेकोमी नेल्ल मिम्शा, सुन, चांदी नु कांसा के मारेइ मारेइ चेम्ने चाप्ब।

33 हीरा खोइक्तीक नु सुनम क्येप्तीके, शी मुतीके नु मारेइ मारेइ सेल्चा जोक्ब दुम्पाइक्तु।

34 परमप्रभुमी बेचालेल नु दान आ थर डा अहीसामाक आ तौ ओहोली-आब आस कली अरु आन कली शेंतीक सक्ति गेशो बाक्ब।

35 मिनु मेको आस कली जोक्ब तुइक्ब थुं गेशा, गेय पतीक सक्ति नेल्ल गेशो बाक्ब। मार गेय पचा कली जोक्ब तुइक्ब सेल्लो बाक्ब देंशा हना, दारशो मार मार गेय पाइब, मिम्शा ब्रेक्स ब्रेक्शा, नीलो प्याजी नु लल श्येले बुटा प्रोव्रचा नु रिम्शो पा किरशो सुती श्येले के प्रोव्रशो वामी बुटा आप्चा कली जोक्ब तुइक्ब सेल्लो बाक्ब।

## 36

### परमप्रभु आ बाक्तीक सेल्चशो

#### प्रस्थान २६:-

1 मिनु परमप्रभु यावेमी बेचालेल, ओहोली-आब नु अरु आन कली आ बाक्तीक सेल्चा, दे जोक्ब तुइक्ब नु रुप्तीक थुं गेशो मुर नेल्लेमी, परमप्रभु यावेमी देंशो खोदेंशो पा गेय पचा माल्नीम” दे मोसामी इस्राएली आन कली देंत।

2 मिनु मोसामी, बेचालेल, ओहोली-आब नु परमप्रभुमी जोक्ब तुइक्ब सेल्लो मुर नेल्ल आन कली ब्रेत्ताक्नमी। सु सु आन थुंमी “गो यो मेको गेय पाइनुड” दे मिम्शो बाक्मा, मेको आन कली यो ब्रेत्ताक्नमी।

3 इस्राएलीपुकीमी परमप्रभु यावे आ बाक्तीक सेल्चा कली मार मार चाक्शो बाक्मा, आन थुंमी ग्येरशा गेशो नेल्ल मोसा आ गुड रे ताक्तेक्म। मेना सम्म मुरपुकीमी सुनी कुस कुस मार मार चाक्स डा चाक्स बाक्तेक्म।

4 मिनु परमप्रभु यावे आ बाक्तीक सेल्ब जोक्ब तुइक्बपुकीमी आन गेय प्रॉइशा, मोसा आ बाक्तीक जाक्तेक्म।

5 मिनु मेकोपुकीमी मोसा कली “परमप्रभु यावेमी अरेशो सेल्चा कली माल्लो क्येडा यो शुश चाक्ना चाक्न बाक्नीम” देंतेक्म।

6 मिनु मोसामी “मुल रे परमप्रभु यावे आ बाक्तीक डा गेय कली सुडम मारेइ मचाक्कीन” दे मुर आन बाक्तीक बाक्तीकेमी नेंपाइक्थ मुर सोइक्ताक्मी। मोपा मारेइ मचाक्कीन, दे आन चाक्चा नाइक्पाइक्तेक्म।

7 मारदे हना आन चाक्शो मारेइ मारेइ गाप्शा, शुश दुम्शो बाक्त।

### ताम्बु सेल्लतीक गेय

8 मिनु जोक्ब गेय पाइब नेल्लेमी परमप्रभु यावे आ बाक्तीक कली १० ओटा सुम्तीक वा सेल्लेक्म। रिम्शो पा किरशो सुती श्येले के प्रोव्रशो वा के नु नीलो, प्याजी नु लल रड डा श्येलेमी शुश रिम्शो करूबपुकी बुटा आप्शा सेल्लेक्म।

9 मेको सुम्तीक वा का का पा २८ कुबीत दुइश्शो नु ४ कुबीत ब्रेम्शो, खाल का डा पा सेल्लेक्म। कुबीत का ०.५ मिटर खोदेंशो बाक्ब।

10 मेकोपुकीमी ५ ओटा सुम्तीक वा बोइश्शा, का सेल्लेक्म। मिनु अर्को ५ ओटा बोइश्शा, अर्को का सेल्लेक्म।

11 सुम्तीक वा का आ एर सुर गे नीलो रड डा ५० ओटा बोइक्तीके सेल्लेक्म। अर्को सुम्तीक वा के यो ओंथ सुर गे ५० ओटा नीलो बोइक्तीक सेल्लेक्म।

- 12 सुमतीक वा कामी ५० ओटा बोइक्तीके नु अर्को सुमतीक वा कली यो ५० ओटा बोइक्तीके सेल्शा, निक्शी कली का सेल्चा कली ठीक पा वोइक्तेकम।
- 13 मिनु मेकोपुकीमी ५० ओटा सुन के ग्याइक्पाइक्तीके सेल्शा, डोंइती डा नु नोले डा सुमतीक वा आस कली बोइश्शा, का सेल्तेकम।
- 14 परमप्रभु यावे आ बाक्तीक साप्चा कली यो क्यारश आ चां के ११ ओटा सुमतीके सेल्तेकम।
- 15 मेको सुमतीके का का पा ३० कुबीत लाइश्शो नु ४ कुबीत ब्रेम्शो खाल का डा पा सेल्तेकम। कुबीत का ०.५ मिटर खोदेशो बाक्ब।
- 16 मेकोपुकीमी का सेल्चा कली ५ ओटा सुमतीके बोइश्शा का नु ६ ओटा सुमतीके बोइश्शा अर्को का सेल्तेकम।
- 17 डोंइती डा सुमतीके आ एर सुर गे ५० ओटा बोइक्तीक सेल्तेकम। मिनु अर्को सुमतीके आ ओंथ सुर गे यो ५० ओटा बोइक्तीक सेल्तेकम।
- 18 मिनु ताम्बु सुमतीके का सेल्चा कली कांसा के ५० ओटा ग्याइक्पाइक्तीक सेल्तेकम।
- 19 मेकोपुकीमी ताम्बु सुमचा कली लल रड नुप्शो सांड आ कुशुल के सुमतीक का सेल्तेकम। मेको आ तारी नेल्ल क्येडा रिम्शो सेल्शो कुशुल के अर्को सुमतीक का सेल्तेकम।
- 20 मिनु नोले मेकोपुकीमी परमप्रभु यावे आ बाक्तीक सेल्चा कली बोल्यो शी के फलेक सेल्शा, थारतेकम।
- 21 फलेक का का पा १० कुबीत लाइश्शो नु कुबीत का आधा ब्रेम्शो सेल्तेकम। कुबीत का ०.५ मिटर, हात का खोदेशो बाक्ब।
- 22 फलेक का कामी, राप्पाइक्चा कली किला निक्शी गारपाइश्शा, सेल्तेकम। परमप्रभु यावे आ बाक्तीक सेल्चा कली फलेक नेल्ल मोदेशो पा सेल्तेकम।
- 23 मिनु बाक्तीके आ दक्खिन गे कली २० ओटा फलेक सेल्तेकम।
- 24 मिनु मेको २० ओटा फलेक आन पुं गे, ४० ओटा चांदी के राप्पाइक्तीके, फलेक का कली राप्पाइक्तीके निक्शी सेल्तेकम।
- 25 उत्तर गे कली २० ओटा फलेक सेल्तेकम।
- 26 मेको आन कली ४० ओटा चांदी के राप्पाइक्तीके, फलेक का कली राप्पाइक्तीके निक्शी सेल्तेकम।
- 27 बाक्तीके आ पच्छिम गे कली ६ ओटा फलेक सेल्तेकम।
- 28 पच्छिम डा सुर निक्शी कली, फलेक निक्शी सेल्तेकम।
- 29 मेकोपुकीमी उइ रे ममाइ, इर गे मुन्द्रामी ग्याइक्पाइक्तेकम।
- 30 मोपा मेको नेल्ल ८ ओटा फलेक दुम्तेकम। मिनु १६ ओटा चांदी के राप्पाइक्तीके, फलेक का कली राप्पाइक्तीक निक्शी दुम्त। प्रस्थान २६:-
- 31 बोल्यो शी के लाइश्शो कोक्के सेल्तेकम। परमप्रभु यावे आ बाक्तीक का पटटी कली फलेक ग्याइक्पाइक्चा कली ५ ओटा लाइश्शो कोक्के सेल्तेकम।
- 32 अर्को पटटी कली यो फलेक ग्याइक्पाइक्चा कली ५ ओटा लाइश्शो कोक्के सेल्तेकम। आ नोले पच्छिम गे कली ५ ओटा लाइश्शो कोक्के सेल्तेकम।
- 33 मिनु फलेक ग्येत्थ आ दातेमी सुर का रे अर्को सुर सम्म कली लाइश्शो कोक्के सेल्तेकम।
- 34 मिनु फलेक नु लाइश्शो कोक्के आन कली सुनम गिल्लतेकम। मिनु लाइश्शो कोक्के शुइक्चा कली सुन के मुन्द्रापुकी सेल्तेकम।
- 35 मिनु नीलो, प्याजी नु लल श्येले नु रिम्शो पा किरशो सुती श्येले के प्रोव्रशो वा के नेल्ल क्येडा चोव्रखो कोटा फारतीक का सेल्शा, रिम्शो पा करूब बुटा आप्तेकम।
- 36 मेकोमी मेको फारतीक कली बोल्यो शी के ४ ओटा थाम सेल्शा, सुनम गिल्लतेकम। मेको आन ग्याइक्तीके सुन के सेल्तेकम। मेको आन कली ४ ओटा चांदी के राप्पाइक्तीके सेल्तेकम।
- 37 मिनु नीलो, प्याजी नु लल श्येले नु रिम्शो पा किरशो सुती श्येले के प्रोव्रशो वा दारशो बुटा आप्शो ताम्बु आ ओव्रतीके कली फारतीक का सेल्तेकम।

38 मेको फारतीक ब्वेक्चा कली ५ ओटा थाम सेल्लेक्म। मेको आन पिया, ब्वेक्तीक नु हाम्तीक कोक्के सुनम गिल्लेक्म। मेको ५ ओटा थाम आन राप्पाइक्तीके चहिं कांसा के सेल्लेक्म।

## 37

कबल पशो सन्दोस सेल्शो

प्रस्थान २५:१०-२२

1 मिनु बेचालेलमी बोल्यो शी के सन्दोस का सेल्लु। मेको आ लाइशो कुबीत निक्शी नु आधा, आ ब्रेमशो कुबीत का नु आधा नु आ ग्येत्थ लाइशो कुबीत का नु आधा डा पा सेल्लु। कुबीत का ०.५ मिटर, हात का खोदेंशो बाक्ब।

2 मिनु मेको आ खिंडगा नु आ लाडगा नेल्ल क्येख सुनमी गिल्लु। मिनु एर ओंथ नेल्ल सुन के सुर सेल्लु।

3 मिनु सुन के ४ ओटा मुन्द्रा सेल्लु। का पटटी निक्शी नु अर्को पटटी निक्शी पा सन्दोस आ ४ सुरमी क्येप्ताक्व।

4 मिनु बोल्यो शी के कुरतीक कोक्के निक्शी सेल्शा, सुनमी गिल्लु।

5 मिनु मेको कुरतीक कोक्के निक्शी मुन्द्रामी शुइशशा, सन्दोस कुरने चाप्तेक्म।

सन्दोस सुम्तीक सेल्शो

6 मिनु मेकोमी क्येख सुन के चेम्शा, सन्दोस सुम्तीके सेल्लु। मेको आ पित्थ लाइशो कुबीत निक्शी नु आधा नु आ ब्रेमशो कुबीत का नु आधा सेल्लु। कुबीत का ०.५ मिटर, हात का खोदेंशो बाक्ब।

7 मिनु परमप्रभु यावे आ स्वर्ग डा गेय पाइब खोदेंशो सुन के करूब निक्शी चेम्शा सेल्लु। मेको सुम्तीके आ निम्फा पटटी डा का का चेम्शा सेल्लु।

8 का पटटी करूब का, अर्को पटटी करूब का चेम्शा सेला बाक्त। मेको सुम्तीके नु करूब निम्फा मखोंइसीशो सुन का रेन चेम्शा सेल्लु।

9 करूब आस फ्रां हाम्शा, सुम्तीके फारपाइशशा, खाल का डा पा सन्दोस सुम्तीके गे कोव्रपाइशशा चेम्शा सेल्लु।

शोब्ले वोइक्तीक टेबल सेल्शो

प्रस्थान २५:२३-३०

10 बोल्यो शी के टेबल का सेल्लु। मेको आ पित्थ लाइशो कुबीत निक्शी नु आ ब्रेमशो कुबीत का नु आ ग्येत्थ लाइशो कुबीत का नु आधा डा पा सेल्लु। कुबीत का ०.५ मिटर खोदेंशो बाक्ब।

11 मिनु मेको कली क्येख सुनमी गिल्लशा, आ एर ओंथ नेल्ल सिरपेच खोदेंशो पा सुन के सुर सेल्लु।

12 मेको आ एर ओंथ डा सुर नेल्ल ४ गुइ ब्रेमशो सेल्शा, सिरपेच खोदेंशो पा बुटा आप्शा सेल्लु। गुइ का ८ सेन्ती मिटर कि ३ आइची खोदेंशो बाक्ब।

13 मिनु ४ ओटा सुन के मुन्द्रा चेम्शा, मेको आ ४ ओटा खोइलीम टेबल आगाम क्येप्ताक्व।

14 टेबल कुरचा कली मुन्द्रापुकी टेबल आ सुर आ नेक्था क्येप्ताक्व।

15 मिनु टेबल कुरचा कली बोल्यो शी के कुरतीक कोक्के सेल्शा, सुनमी गिल्लु।

16 मिनु टेबलम वोइक्चा माल्लो थाल, लोटा नु बोस नेल्ल नु तूचा थोव्रक चढ़ेतीक लुक्चा कली लोटा नेल्ल क्येख सुन के सेल्लु।

सुन के बत्ती दातीक सेल्शो

प्रस्थान २५:३१-४०

17 मेकोमी क्येख सुन के बत्ती दातीक का चेम्शा सेल्लु। आ थाम, आ राशी, आ दियारी, आ डल्ला नु फूपुकी ठेयब सुन का केन सेल्लु।

18 मिनु मेको बत्ती दातीक आ थाम रे ६ ओटा राशी गुंइशा, का पटटी रे सां नु अर्को पटटी रे सां राशी चेम्शा सेल्लु।

19 मिनू मेको राशी कामी देसी बदाम आ फू खोदेशो फू सां नु डल्ला सां रे गुंडशो सेल्लु। अर्को राशीपुकी यो नेल्ल मोदेशो पा सेल्लु।

20 मेको बत्ती दातीक आ थामम चहिं ४ ओटा देसी बदाम आ फू खोदेशो आन डल्ला रे गूशो सेल्लु।

21 थाम आ डोंइती डा डल्ला रे, आ दाते डा डल्ला रे नु नोलें डा डल्ला रे निम्फा पटटी गे राशी निक्निक्शी गूशो सेल्लु।

22 मेको आ राशी नु डल्ला नेल्ल ठेयब क्येख सुन का केन चेम्शा सेल्लु।

23 बत्ती दातीक ७ ओटा दियारी, आ कांडची नु आइक्च बोस नेल्ल क्येख सुन के चेम्शा सेल्लु।

24 मेको नेल्ल टलेन्ट का क्येख सुन के चेम्शा सेल्लु।

धूप चोशा चढ़ेतीक सेल्लो

प्रस्थान ३०:१-५, २२-३८

25 धूप चोशा चढ़ेतीके बोल्यो शी के कुबीत का लाइशो नु कुबीत का ब्रेम्शो ४ पाटे पा सेल्लु। आ ग्येत्थ लाइशो कुबीत निक्शी डा सेल्लु। मेको नु मेको आ ग्रोत्र नेल्ल मख्रोंइसीशो शी का केन सेल्लु। कुबीत का ०.५ मिटर, हात का खोदेशो बाक्ब।

26 मिनू मेको नेल्ल क्येख सुनमी गिल्ला, सिरपेच के खोदेशो पा सुन के सुर सेल्लु।

27 मेको आ सुर आगा निम्फा पटटी कली सुन के मुन्द्रा निक्निक्शी सेल्ला, आ सिरपेच खोदेशो सुर आ दी निम्फा पटटी गे क्येप्ताक्व। मिनू मेको कुरतीक कोक्के शुइक्तीक दुम्त

28 मिनू मेको कुरचा कली बोल्यो शी के कुरतीक कोक्के निक्शी सेल्ला, सुनम गिल्लु।

29 मिनू मेकोमी ताम्बु डा लुक्तीक तेल नु ब्रोत्रशो रिना पाइब धूप जोक्ब मुरुम सेल्लो खोदेशो पा सेल्लु।

## 38

चोशा चढ़ेतीके सेल्लो

प्रस्थान २७:१-८; प्रस्थान ३०:१८-२१

1 मिनू बेचालेलमी बोल्यो शी के चोशा चढ़ेतीके सेल्लु। मेको ५ कुबीत लाइशो नु ५ कुबीत ब्रेम्शो, ४ पाटे नु कुबीत सां ग्येत्थ लाइशो पा सेल्लु।

2 आ ४ सुरमी ग्रोत्र सेल्लु। मेको ग्रोत्रपुकी मेको चढ़ेतीक फलेक का केन सेल्ला, कांसामी गिल्लु।

3 चढ़ेतीके कली माल्लो मारेइ मारेइ कांसा के सेल्लु। पुलु वोइक्तीक बोसपुकी, पुलु ताप्तीकपुकी, बुइक्तीक बोसपुकी, श्ये गुंडतीक कांटापुकी नु मी कोइला कुर पतीकपुकी सेल्लु।

4 चोशा चढ़ेतीक कली कुबीत का नु आधा डा पा ग्येत्थ पा मी तिक्तीक कांसा के जाली सेल्लु। कुबीत का ०.५ मिटर, हात का खोदेशो बाक्ब।

5 कुरतीक कोक्के शुइक्चा कली, ४ ओटा मुन्द्रा सेल्ला, आ ४ सुरमी क्येप्ताक्व।

6 बोल्यो शी के कुरतीक कोक्के निक्शी सेल्ला, कांसामी गिल्लु।

7 चढ़ेतीक कुरचा कली मेको कोक्के मुन्द्राम शुइक्ताक्व। फलेक के सेल्लो चोशा चढ़ेतीके आगाम श्येत्थ बाक्शो बाक्त।

चिक्तीके ठेयब बोस सेल्लो

8 बेचालेलमी कांसा के चिक्तीक ठेयब बोस नु आ निप्पाइक्तीके सेल्लु। मेको युम्तीक ताम्बु ओव्रतीकेम गेय पाइब मीश मुर आन कांसा के ऐना के सेल्लु।

ताम्बु आ लाडगा

प्रस्थान २७:९-१९

9 मिनू बेचालेलमी ताम्बु आ लाडगा थरपु हिरचा कली रिम्शो पा किरशो सुती श्येले के वा प्रोत्रपाइक्तु। मेको फारतीक दक्खिन गे सहे का कुबीत लाइशो पा सेल्लु। कुबीत का ०.५ मिटर खोदेशो बाक्ब।

10 मेको फारतीक ग्याइक्पाइक्चा कली खाल का डा थाम नु खाल का डा कांसा के राप्पाइक्तीके के सेल्लु। मुन्द्रापुकी नु कोक्केपुकी चहिं चांदी के सेल्लु।

11 मिनु मोदेशो पा उत्तर गे यो सहे का कुबीत लाइशो फारतीक प्रोवपाइक्कु। मेको कली २० ओटा थाम, २० ओटा कांसा के राप्पाइक्तीके सेल्लु। मुन्द्रापुकी नु कोक्केपुकी चहिं चांदी के सेल्लु। सहे का कुबीत ५० मिटर बाक्ब।

12 पच्छिम गे ५० कुबीत डा फारतीक सेल्लु। मेको कली १० ओटा थाम नु १० ओटा राप्पाइक्तीके सेल्लु। आन मुन्द्रा नु कोक्केपुकी चहिं चांदी के सेल्लु।

13 मिनु लाडगा आ डोंइती पूर्व गे कली ५० कुबीत डा फारतीक वा सेल्लु।

14 ओव्रतीके पटटी का कली १५ कुबीत डा फारतीक वा सेल्लु। थाम नु राप्पाइक्तीके सां सां सेल्लु।

15 मिनु ओव्रतीके डा अर्को पटटी कली यो १५ कुबीत डा फारतीक वा सेल्लु। थाम नु राप्पाइक्तीके सां सां सेल्लु।

16 लाडगा डा एर ओंथ नेल्ल डा फारतीक रिम्शो पा किरशो सुती श्येले के प्रोवशो वा के सेल्लु।

17 मेको थाम आन राप्पाइक्तीक कांसा के बाक्तेक्म। थाम आन मुन्द्रा नु कोक्केपुकी चहिं चांदी के बाक्तेक्म। थाम आन पिया चांदीम गिल्लो बाक्तेक्म। थाम आन फ्रेंतीके नेल्ल चांदी के बाक्तेक्म।

18 मेको लाडगा डा ओव्रतीके डा फारतीक नीलो, प्याजी नु लल श्येले नु रिम्शो पा किरशो सुती श्येले के प्रोवशो वाम दारशो बुटा आप्शा सेल्लु। मेको आ लाइशो २० कुबीत नु आ ग्येत्थ ५ कुबीत डा पा अर्को फारतीक नु उइक्थ उइक्थ पा सेल्लु। कुबीत का ०.५ मिटर, हात का खोदेशो बाक्ब।

19 मिनु ओव्रतीक डा ४ ओटा थाम नु आन ४ ओटा राप्पाइक्तीके कांसा के बाक्तेक्म। मेको फारतीक कली ब्वेक्तीक, थाम आन पिया नु फ्रेंतीके चांदी के बाक्तेक्म।

20 मिनु परमप्रभु यावे आ बाक्तीके नु लाडगा डा किला नेल्ल कांसा के बाक्तेक्म।

### सुन चांदी नु कांसा नाक्शो

21 परमप्रभु यावे आ बाक्तीक सेल्चा कली मार मार माल्दा, मेको ब्रेक्शो बाक्त। मेको बाक्तीके कबल पशो सन्दोस वोइक्तीके बाक्त। मोसामी “मेको नेल्ल ब्रेक्चा माल्ब” दे अरेशो बाक्त। चढ़ेब हारून आ तौ इथामार लेवी आन कली गेय पपाइक्ब बाक्त। गन्ती ४:२८

22 परमप्रभु यावेमी मोसा कली शेंशो खोदेशो पा, यहूदा आ थर डा हुर आ चच, ऊरी आ तौ बेचालेलमी मारेइ मारेइ सेल्लु। प्रस्थान ३१:१-११

23 मेको नु दान आ थर डा अहीसामाक आ तौ ओहोली-आब यो बाक्त। मेको मार मार मुशा सेल्लीक गेय जोक्ब, ब्रेक्स ब्रेक्शा सेल्चा जोक्ब नु नीलो, प्याजी नु लल रड डा रिम्शो पा किरशो सुती श्येलेम दारशो बुटा आप्तीक गेय यो जोक्ब बाक्त।

24 परमप्रभु यावे आ बाक्तीक नु मेकेर माल्लो मारेइ मारेइ सेल्चा कली मुर आन गेशो सुन गिश दुम्माक्त देशा हना, २९ टलेन्ट नु ७ सहे ३० शेकेल दुम्त। नेल्ल नाक्शा, हजार का किलो खोदेशो दुम्त। टलेन्ट का ३४ किलो बाक्ब। शेकेल का ११.५ ग्राम, तोला का खोदेशो बाक्ब।

25 डोंइती हिक्शो वोंइश मुर आन रे पोक्शो चांदी सहे का टलेन्ट नु हजार का ७ सहे ७५ शेकेल दुम्त।

26 मिनु २० बर्स गाप्शो नु मेको क्येडा लाक्शो वोंइश मुर ६ लाख हजार सां ५ सहे ५० जना बाक्तेक्म। मेको आन के का का आधा आधा शेकेल पोक्तेक्म। प्रस्थान ३०:१२-१६; गन्ती १:४६

27 ताम्बु आन फलेक राप्पाइक्तीक नु नेल्ल क्येडा चोव्रखो कोटा कली फारतीक डा थाम आन राप्पाइक्तीक कली सहे का टलेन्ट माल्ताक्व। सहे का राप्पाइक्तीके कली सहे का टलेन्ट माल्ताक्व। का कली टलेन्ट का माल्ताक्व।

28 मेको हजार का ७ सहे ७५ शेकेल चांदीमी ब्वेक्तीक सेल्शा, थाम आन पिया गिल्लीक नु आन फ्रेंतीकपुकी सेल्लेक्म।

29 मुर आन चाक्शो कांसा ७० टलेन्ट नु हजार निक्शी ४ सहे शेकेल दुम्शो बाक्त।

30 मेको के युम्तीक ताम्बु डा ओव्रतीके डा थाम आन राप्पाइक्तीके, कांसा के चोशा चढेतीके, आ मी तिव्तीक जाली नु चढेतीक आ मारेइ मारेइ सेल्पाइक्तु।

31 मिनु लाडगा डा थाम आन राप्पाइक्तीकपुकी, टेयब ओव्रतीके डा थाम आन राप्पाइक्तीकपुकी, ताम्बु नु लाडगा डा किला नेल्ल सेल्पाइक्तु।

## 39

चढेब आन वा सेल्शो  
प्रस्थान २८:-

1 परमप्रभु यावेमी मोसा कली दोपा अरेवा, मोपा बेचालेल नु आ मुरपुकीमी हारून कली परमप्रभु यावे आ बाक्तीकेमी गेय पचा कली नीलो प्याजी नु लल रड डा श्येले के प्रोव्रशो फेक्तीक वा सेल्तेकम।

चढेब आ कुचु तार वोइक्तीके

2 मेकोमी कुचु तार वोइक्तीके सुन के, नीलो, प्याजी नु लल रड डा श्येले नु रिम्शो पा किरशो सुती श्येले के प्रोव्रशो वा के सेल्तेकम।

3 मिनु सुन तुप्शा, पाल्लो सेल्शा, आइक्च पा खोइश्शा, श्येले खोदेंशो सेल्तेकम। मिनु नीलो, प्याजी नु लल श्येलेमी रिम्शो पा किरशो सुती श्येले के प्रोव्रशो वा दारशो बुटा आप्शा सेल्तेकम।

4 मेको कुचु तार वोइक्तीकेमी बलाम सुम्तीके निक्शी सेल्शा, निम्फा पटटी बोइक्ताकम।

5 मिनु आ पाइक्तीके मेको कुचु तार वोइक्तीके का रेन सेल्तेकम। मेको खाल का डा पा रिम्शो पा सेल्तेकम। मेको पाइक्तीके सुन, नीलो, प्याजी नु लल रड डा श्येले नु रिम्शो पा किरशो सुती श्येले के प्रोव्रशो वा के सेल्तेकम। परमप्रभु यावेमी मोसा कली दोपा अरेवा, मोपा सेल्तेकम।

6 मिनु मेकोमी ओनीक्स हीरा निक्शी चाक्शा, इस्राएल आ तौ आन नें छाप खोदेंशो पा हीराम मुशा ब्रेक्शा सुनम क्येप्ताकम।

7 मेको हीरा निक्शी कुचु तार वोइक्तीक आ बला डा टुक्रा तारी फेरतेकम। मिनु मेको हीरा इस्राएल आ तौ आन कली मिन्चा कली बाक्ब। परमप्रभु यावेमी मोसा कली दोपा अरेवा, मोपा सेल्तेकम। प्रस्थान २८:१२

निसाफ पतीक झोला

8 मेकोमी निसाफ पतीके ऊरीम नु थुम्मीम वोइक्तीक झोला सेल्पाइक्तु। कुचु तार वोइक्तीके खोदेंशो पा सुन, नीलो, प्याजी नु लल श्येले नु रिम्शो पा किरशो सुती के प्रोव्रशो वा के दारशो पा सेल्तेकम।

9 मेको खेयप का मुक्शोनु, बित्ता का लाइश्शो नु बित्ता का ब्रेम्शो ४ पाटे पा सेल्तेकम।

10 मिनु ४ लस्कर हीरा सुनम का का पा क्येप्ताकम। डोंइती डा लस्कर लल मानीक माइश्शो हीरा, हाव पुश्पराज माइश्शो हीरा नु गिगी बेरूज माइश्शो हीरा क्येप्ताकम।

11 मेको आ नोले डा लस्कर लल फिरोजा माइश्शो हीरा, बुश नीर माइश्शो हीरा नु बुश नु नीलो पन्ना माइश्शो हीरा क्येप्ताकम।

12 मेको आ नोले डा लस्कर गिगी नु नीलो रड ब्वाइश्शो रिम्शो टल्केशो नीलमनी माइश्शो हीरा, गिगी हाकीक माइश्शो हीरा नु प्याजी रड डा कटेला माइश्शो हीरा क्येप्ताकम।

13 मिनु नेल्ल क्येडा नोले डा लस्कर पीतमनी माइश्शो हीरा, लल रड डा ओनीक्स नु नीलो बिलौरा माइश्शो हीरा क्येप्ताकम। मोपा हीरा नेल्ल कली सुनम क्येप्ताकम।

14 मेको हीरा १२ ओटा बाक्तेकम। मिनु इस्राएल आ तौ आन नें का का पा मेको आन तार छाप थोक्शो खोदेंशो पा मुशा ब्रेक्शो बाक्तेकम। हीरा का आ तारी थर का आ नें ब्रेक्शो बाक्त।

15 मेको निसाफ पतीक झोला कली क्येख सुन के डोरी किरशो खोदेंशो पा सिक्की सेल्तेकम।

16 मेकोपुकीमी निसाफ पतीक झोला कली सुन के ग्याइक्तीक निक्शी नु मुन्द्रा निक्शी चेम्तेकम। मिनु मेको मुन्द्रा निसाफ पतीक झोला आ सुर निक्शीमी वोइक्तेकम।



17 मेकोपुकीम सुन के सिक्री निक्शी निसाफ पतीक झोला आ सुरम वोइश्शो मुन्द्रा निक्शीमी लिक्ताकम्।

18 मेको सिक्री निक्शी चढेब आ कुचु तार वोइश्शो वा आ बला डा हीरा क्येप्लो सुनम हेक्ताकम्।

19 मेकोपुकीमी सुन के मुन्द्रा निक्शी सेल्लेकम्। मेको निक्शी निसाफ पतीके ऊरीम नु थुम्मीम वोइक्तीक झोला आ उइ आगा गे पाइक्ताकम्। मोपा मेको झोला कुचु तार वोइक्तीके वा आ तार बाक्त।

20 मेकोपुकीमी लेशा सुन के मुन्द्रा निक्शी सेल्लेकम्। कुचु तार वोइक्तीके आ बला सुम्तीके उइ डा सुरम वोइक्तेकम्। दारपाइश्शो पाइक्तीके आ तारी क्येप्ताकम्।

21 मिनु मेको निसाफ पतीके ऊरीम नु थुम्मीम वोइक्तीक झोला आ मुन्द्रामी नीलो डोरीम लिक्शा, कुचु तार वोइक्तीक वामी पाइक्ताकम्। मोपा मेको निसाफ पतीके झोला दारपाइश्शो पाइक्तीक तार बाक्शो कुचुम वोइक्तीक वा रे एर ओंथ मयाक्सेक्ल, दे पाइक्ताकम्। परमप्रभु यावेमी मोसा कली दोपा अरेवा, मोपा सेल्लेकम्।

### कुचु तार वोइक्तीके आगा डा वा

22 मिनु मेको कुचु तार वोइक्तीके आगा फेक्तीक नेल्ल नीलो प्याजी रड डा वा के फेरतेकम्।

23 मिनु पिया स्त्रीतीक पोव्रला सेल्लेकम्। मेको पोव्रला आ एर ओंथ मगाक्चा डा पा आ सुर थम बोल्यो पा प्रोव्रतेकम्।

24 मेको फेक्तीके आ उइ डा सुर एर ओंथ गे नीलो, लल नु प्याजी रड नु रिम्शो किरशो सुती श्येले के प्रोव्रशो वा के सेल्लो दारीम क्युकशा सेल्लेकम्।

25 मिनु मेकोपुकीम क्येख सुन के आइक्च किङगो सेल्लेकम्। फेक्तीक उइ गे किङगो का दारीम का खाक्शा क्युकतेकम्।

26 किङगो का दारीम का नु किङगो का दारीम का पा खाक्शा, बिर हिरशा क्युकतेकम्। मेको परमप्रभु यावे आ डोंइती गेय पची ना फेक्तीक वा दुम्त। परमप्रभु यावेम मोसा कली दोपा अरेवा मोपा सेल्लेकम्।

### आगा डा फेक्तीके सेल्लो

27 हारून नु आ तौ आन कली रिम्शो पा किरशो सुती श्येले के प्रोव्रशो वा के फेक्तीक यो सेल्लेकम्।

28 रिम्शो पा किरशो सुती श्येले के प्रोव्रशो वा के पियाम रुक्तीक नु गुक्तीक ताकी नु सुरुवाल सेल्लेकम्।

29 रिम्शो पा किरशो सुती श्येले के प्रोव्रशो वा के नीलो, प्याजी नु लल रड डा श्येलेमी दारशो बुटा आप्लो किप्तीकपुकी सेल्लेकम्। परमप्रभु यावेमी मोसा कली दोपा अरेवा, मोपा सेल्लेकम्।

### कुप्फीम पांडतीके सेल्लो

30 मेकोपुकीमी क्येख सुन के फू खोदेशो पा कुप्फीम पांडतीके चेम्तेकम्। मेकेर छाप मुशो खोदेशो पा “परमप्रभु यावे कली ला” दे मुशा ब्रेक्ताकम्। प्रस्थान २९:६; प्रस्थान २७:३६; लेवी ८:९; जकरिया १४:२०;

31 कुप्फीम पांडतीके कली पियाम गुक्तीकेमी नीलो श्येलेमी फ्रेंताकम्। परमप्रभु यावेमी मोसा कली दोपा अरेवा, मोपा सेल्लेकम्।

### मोसामी ताम्बु डा गेय कोव्रशो

32 मिनु परमप्रभु यावे आ बाक्तीक गुम्तीक ताम्बु डा गेय नेल्ल नुम्त। परमप्रभु यावेमी मोसा कली दोपा अरेवा, मोपा इस्राएल डा मुरपुकीमी नेल्ल सेल्लेकम्।

33 मिनु मेकोपुकीमी परमप्रभु यावे आ बाक्तीक नु आ मारेइ मारेइ मोसा आ बाक्तीकेमी चाक्तेकम्। मार मार चाक्गमे बाक्त देशा हना, ताम्बु नु आ ग्योब नेल्ल, ब्वेक्तीक, फलेक, लाइश्शो कोक्के, थाम नु राप्पाइक्तीकपुकी,

34 लल रडम नुप्शो सांड आ कुशुल के सुम्तीके, नेल्ल क्येडा रिम्शो कुशुल के सुम्तीके, फारतीके,

35 कबल पशो सन्दोस, मेको आ कुरतीक कोक्के नु सुम्तीके,

- 36 टेबलम वोइक्चा माल्शो मारेइ मारेइ नु कोंइतीक शोब्ले,  
 37 क्येख सुन के बत्ती दातीके नु आ दियारी आन कली ठीक सेल्ल्तीके थोव्रक नु बत्ती कली तेल,  
 38 सुन के चढेतीक, लुक्चा कली तेल, ब्रोव्रशो रिना पाइब धूप, ताम्बु ओव्रतीके डा फारतीक वा,  
 39 कांसा के चढेतीक, मेको आ कांसा के मी तिव्तीक जाली, कुरतीक कोक्के नु चढेतीक आ मारेइ मारेइ, चिक्तीक ठेयब बोस नु मेको निप्पाइक्तीके,  
 40 ताम्बु आ लाडगा डा फारतीक नु थामपुकी, आन राप्पाइक्तीकपुकी, लाडगा ओव्रतीक डा फारतीक वा, आ फ्रेंतीकपुकी नु किलापुकी, मिनु परमप्रभु यावे आ बाक्तीक गुम्तीक ताम्बु डा गेय पचा कली मारेइ मारेइ नेल्ले,  
 41 परमप्रभु यावे आ बाक्तीक डा गेय पचा कली हारून कली फेक्तीक वा नु आ तौ आन कली परमप्रभु यावे कली चढेब दुम्चा कली आन फेक्शा गेय पतीके वा नेल्ल चाक्तेक्म।  
 42 परमप्रभु यावेमी मोसा कली दोपा अरेवा, मोपा इस्माएल डा मुरपुकीमी सेल्लेक्म।  
 43 मिनु मोसामी मेको नेल्ल कोव्रतु। मिनु परमप्रभु यावेमी दोपा अरेवा, मोपा ठीक सेल्लो तशा, मोसामी मेको नेल्ल आन कली आसीक गेप्तु।

## 40

### गुम्तीक ताम्बु कीचा शेंशो

- 1 मिनु परमप्रभु यावेमी मोसा कली  
 2 “डोंइती डा महिना डा डोंइती नाक्ती, आं बाक्तीके गुम्तीक ताम्बु कीडो। प्रस्थान ४०:१७; प्रस्थान १२:२; प्रस्थान १९:१  
 3 गे कबल पशो सन्दोस आगाम वोइश्शा, फारतीक वाम फारदो।  
 4 टेबल ओइशा, मेको तारी मार मार वोइक्चा माल्बा, ठीक पा वोतो। मिनु बत्ती दातीके ओइशा आ दियारी दाडो।  
 5 सुन के धूप चोशा चढेतीके कबल पशो सन्दोस आ डोंइती वोतो। आं बाक्तीक आ ओव्रतीक डा फारतीक वा क्युक्को।  
 6 गुम्तीक ताम्बु आ ओव्रतीक आ डोंइती चोशा चढेतीके वोतो।  
 7 गुम्तीक ताम्बु नु चढेतीक आस दातेम चिक्तीक ठेयब बोस वोइश्शा, ब्वाक्कुम प्रिदो।  
 8 लाडगा डा थाम वोइश्शा, एर ओंथ हिरशा फारतीक वा नु ओव्रतीक डा फारतीक वा क्युक्को।  
 9 मिनु गे लुक्चा कली तेल चाक्शा, आं बाक्तीक नु मेकेर डा मारेइ मारेइ आन कली ‘परमप्रभु यावे केन बाक्ब’ दे तेल लुक्तो। मोपा मेको नेल्ल आं के दुम्नीम।  
 10 चोशा चढेतीक नु मेको आ मारेइ मारेइ आन कली यो ‘परमप्रभु यावे केन बाक्ब’ दे तेल लुक्तो। मोपा मेको नेल्ल यो आं के दुम्नीम।  
 11 चिक्तीक ठेयब बोस नु मेको आ निप्पाइक्तीके कली यो तेल लुक्तो। मिनु मोपा मेको आं के दुम्ब।  
 12 मिनु हारून नु आ तौ आन कली, गुम्तीक ताम्बु डा ओव्रतीकेम चाक्शा चिक्तो।  
 13 आं कली चढेब दुम्पाइक्चा कली हारून कली चढेतीक वा फेक्पा, तेल लुक्शा आं कली जिम्मा गेयी।  
 14 आ तौ आन कली यो चाक्शा, वा फेक्तो।  
 15 आन आफ कली खोदेशो पा मेको आन कली यो तेल लुक्तो। मेकोपुकी यो चढेब दुम्शा, आं गेय पचा माल्नीम। मेको तेल लुक्तीके आन चच युइ आन पाला नेल्लेमी गेना हना यो आं कली चढेब दुम्नीम” देंत।  
 16 मिनु परमप्रभु यावेमी मोसा कली दोपा अरेवा, मोपा पाप्तु।

### गुम्तीक ताम्बु कीशो

17 इजीप्त रे गाक्मा आ नोले जाक्शो बर्स आ डोंइती डा महिना, डोंइती डा नाक्ती परमप्रभु यावे आ बाक्तीक ताम्बु कीतेक्म।

18 मोसामी परमप्रभु यावे आ बाक्तीक ताम्बु कीशा, राप्पाइक्तीकपुकी वोइक्तु। मिनु फलेक थारशा, लाइशो कोक्के शुइशशा, थाम राप्पाइक्तु।

19 परमप्रभु यावे आ बाक्तीक तारी सुम्तीके यो कोप्ताक्व। परमप्रभु यावेमी मोसा कली दोपा अरेवा, मोपा पाप्तु।

20 मिनु मोसामी परमप्रभु यावे आ अरेशो लोव्र मुशा ब्रेक्शो फुल्लु कबल पशो सन्दोसम कुर पाप्तु। मिनु कबल पशो सन्दोसम कुरतीक कोक्के शुइक्ताक्व। मिनु मेको आ तार सुम्तीकेम सुम्तु।

21 मेको कबल पशो सन्दोस परमप्रभु यावे आ बाक्तीके ओइशा, फारतीक वामी फारताक्व। परमप्रभु यावेमी मोसा कली दोपा अरेवा, मोपा पाप्तु।

22 मोसामी टेबल कली गुम्तीक ताम्बुम ओइशा, फारतीक वा आ डोंइती उत्तर गे वोइक्तु।

23 टेबल तारी परमप्रभु यावे आ डोंइती कोंइतीक शोब्ले वोइक्तु। परमप्रभु यावेमी मोसा कली दोपा अरेवा, मोपा पाप्तु।

24 टेबल नु एर ओथ पा दक्खिन गे बत्ती दातीक कली गुम्तीक ताम्बुम वोइक्तु।

25 परमप्रभु यावे आ डोंइती दियारी दातु। मिनु परमप्रभु यावेमी मोसा कली दोपा अरेवा, मोपा पाप्तु।

26 मिनु मोसामी सुन के सेल्शो धूप चोशा चढ़ेतीके कली गुम्तीक ताम्बु डा फारतीक वा आ डोंइती वोइक्तु।

27 मिनु मेकेर ब्रोव्रशो रिना पाइब धूप चोप्तु। परमप्रभु यावेमी मोसा कली दोपा अरेवा, मोपा पाप्तु।

28 नोले ताम्बु डा ओव्रतीकेम फारतीक वा क्युक्तु।

29 मिनु चोशा चढ़ेतीके परमप्रभु यावे आ बाक्तीके गुम्तीक ताम्बु आ ओव्रतीकेमी वोइक्तु। मिनु मेकेर चोशा चढ़ेतीक नु अन्न चढ़ेतीके चढ़ेप्तु। परमप्रभु यावेमी मोसा कली दोपा अरेवा, मोपा पाप्तु।

30 मोसामी गुम्तीक ताम्बु नु चढ़ेतीक आस दातेमी चिकतीक ठेयब बोस वोइशशा, चिकचा कली ब्वाक्कुम प्रिताक्व।

31 मिनु मोसा, हारून नु हारून आ तौपुकीमी आन गुइ खोइली चिकसाक्म।

32 गुम्तीक ताम्बुमी ओव्रशा चढ़ेतीकेम लमानु, आन गुइ खोइली चिकचा माल्तेक्म। परमप्रभु यावेमी मोसा कली दोपा अरेवा, मोपा पाप्तु।

33 मोसामी गुम्तीक ताम्बु नु चढ़ेतीक आ लाडगा एर ओथ नेल्ल थरपु हिरशा, आ ओव्रतीके डा फारतीक वा क्युक्तु। मोपा मोसामी गुम्तीक ताम्बु डा गेय नेल्ल थुम्तु।

**परमप्रभु आ बाक्तीकेम जाक्शो**

34 मिनु गोस्सुमी गुम्तीक ताम्बु सुम्तु। परमप्रभु यावे आ सक्ति नु छेडछेडमी मेको आ बाक्तीक ब्रीत। इजीकीएल ४३:१-९

35 मिनु मोसा गुम्तीक ताम्बुमी ओव्रने मचब। मारदे हना मेको गोस्स मेको तारी बाक्शा, परमप्रभु यावे आ सक्ति नु छेडछेडमी आ बाक्तीक ब्रीत। गन्ती ७:८९

36 मेको गोस्स परमप्रभु यावे आ बाक्तीक तारी रे ग्येत्थ बोक्मेनु, इस्राएलीपुकी गाक्चा गोम्तेक्म। प्रस्थान १३:२१; गन्ती ९:१५-२३; गन्ती १०:३४-३६; १राजा ८:१०-११; यसैया ४:५

37 मेको गोस्स ग्येत्थ मबोक्म सम्म इस्राएली मेक उइ बाक्तेक्म।

38 नाक्ती परमप्रभु यावे आ गोस्स आ बाक्तीक तारी बाक्त। नाक्दो चहिं मेको गोस्स आगाम मी दुम्त। इस्राएली गोरशो रागीम गाक्मा सम्म मोदेशो दुम्स डा दुम्स पा नेल्लेमी ताम्तेक्म।

## लेवी

**ब्रेक्ब मुर:** साइ परमप्रभु यावे आ मुर नु ख्रीस्त सेंसे नोले डा थमा सुइक्बपुकीमी एको किताब मोसामी ब्रेक्शो बाक्ब, देंनीम। मोसामी परमप्रभु यावे आ देशो नेल्ल ब्रेक्शो बाक्ब।

**गेना ब्रेक्शो:** एको किताब ५० नाक्त गोरशो रागीम गाक्तीक डा लोत्र ला बाक्ब। इस्राएली इजीप्ट रे गूशो बर्स निक्शी नोले, सीनै डांडा आ नेक्था बाक्तेक्म। मोसामी डांडाम बाक्शा, परमप्रभु यावे आ अरेशो नेल्ल ब्रेक्शो बाक्ब। प्रस्थान ४०:१-१७; गन्ती १०:११

**मार ब्रेक्शो:** मुर दोपा परमप्रभु यावे नु गारचा डा दुम्नीम एको किताबमी ब्रेक्शो बाक्ब।

१. दोपा नु मार चढ़ेचा, लेवी १:- ५:-
२. चढ़ेब आन गेय, लेवी ६:- १०:-
३. ग्रांग्रा दिचा नु ग्रांग्रा मदिचा आ पर्वम शेंशो, लेवी ११:- लेवी १६:-
४. परमप्रभु यावे का बाक्ब। मेको आ नोले ला खोइक्चा, दे ब्रेक्शो बाक्ब। लेवी १७:- लेवी २७:-

### चोशा चढ़ेतीक

लेवी २६:१-६

१ मिनु परमप्रभु यावेमी युम्तीक ताम्बु रे ब्रेशशा मोसा कली

२ गे “इस्राएली आन कली ‘इन दाते डा सुइम परमप्रभु यावे कली इन बी ब्यफ, क्यारश भेडा चढ़ेनीनु, आंम इन बगाल रे चढ़ेने।

३ मेको चढ़ेशो बी ब्यफ चोशा चढ़ेतीक बाक्ब हना, मेकोमी मारेइ मदुम्शो थमा रिम्शो बाछा चढ़ेचा माल्ब। मेकोमी मेको युम्तीक ताम्बु आ ओव्रतीकेम चाक्चा माल्ब। मिनु मेको इन पर्वम परमप्रभु आ डोंइती ब्रतीके दुम्ब। लेवी १७:४

४ मेकोमी आ गुइ चोशा चढ़ेतीक बस्तु आ पिया तारी वोइक्चा माल्ब। मिनु मेको परमप्रभु यावे आ डोंइती ब्रशा मेको मुर आ पर्वम पाप क्याम्तीक गेय बाक्ब।

५ मेकोमी मेको बाछा कली परमप्रभु यावे आ डोंइती क्योरशा साइक्चा माल्ब। मिनु चढ़ेब हारून आ तौपुकीमी मेको हुश चढ़ेतीक आ एर ओंथ बुइक्चा माल्नीम। मेको चढ़ेतीक युम्तीक ताम्बु आ ओव्रतीकेम बाक्ब।

६ मिनु मेको नोले मेकोमी मेको चोशा चढ़ेतीक आ कुशुल उक्शा टुक्रा टुक्रा पा चेक्चा माल्ब। लेवी ७:८

७ चढ़ेब हारून आ तौपुकीमी चढ़ेतीक तार मी सुइशशा मेको तार शी गारपाइशशा वोइक्चा माल्नीम।

८ मिनु चढ़ेब हारून आ तौपुकीमी चढ़ेतीके तारी वोइशशा शी आ तार मेको चेक्शो श्ये पिया नु बोंसो गार पा वोइक्चा माल्नीम।

९ मेकोमी मेको आ गा क्यी नु खोइली चहिं ब्वाक्कुम मुरचा माल्नीम। मिनु चढ़ेबपुकीमी मेको नेल्ल कली चढ़ेतीकेमी चोचा माल्नीम। मेको परमप्रभु यावे कली आ दाक्शो ब्रोव्रशो रिना पाइशशा मीम चोशा चढ़ेतीके बाक्ब। उत्पत्ती ८:२१; प्रस्थान २९:१८

१० मेको आ चोशा चढ़ेतीक आ बगाल डा क्यारश भेडा बाक्तेक्म हना, मेकोमी मारेइ मदुम्शो थम रिम्शो बोका, सांड चढ़ेचा माल्नीम।

११ मेकोमी परमप्रभु यावे आ डोंइती चढ़ेतीक आ उत्तर गे मेको क्योरशा साइक्चा माल्ब। मिनु चढ़ेब हारून आ तौपुकीमी मेको आ हुश चढ़ेतीक आ एर ओंथ बुइक्चा माल्नीम।

१२ मेको चढ़ेबमी मेको चढ़ेशो कली टुक्रा टुक्रा पचा माल्नीम। आ पिया बोंसो सुन्दा चेक्चा, श्ये नु काथा शी तारी गारपाइशशा, चढ़ेतीक डा मी तारी वोइक्चा माल्ब।

13 मेकोमी मेको आ गा कयी नु खोइली चहिं ब्वाक्कुम मुरचा माल्नीम। मिनु चढेबपुकीमी मेको नेल्ल कली चढेतीकेमी चोचा माल्नीम। मेको परमप्रभु यावे कली आ दाक्शो ब्रोव्रशो रिना पाइश्शो मीम चोशा चढेतीके बाक्ब।

14 मिनु परमप्रभु यावे कली चोशा चढेतीके चिक्ब बाक्तेक्म हना, दुक्कुर कि परवा चढेचा माल्नीम।

15 चढेबमी मेको चढेतीक आ नेक्था मेको आ पिया प्रोइश्शा साइक्चा माल्ब। मिनु मेको कली चढेतीकेमी चोचा माल्ब। मिनु आ हुश चहिं चढेतीक आ नेक्था चिरचा माल्ब।

16 मेकोमी मेको आ सोके फेशशा चढेतीक आ पूर्व गे डा पुलु ताइक्तीकेम ताइक्चा माल्नीम।

17 मेकोमी मेको कली मचेक्थु, फ्रां आस दाते रे चेत्या माल्ब। मिनु चढेबमी चढेतीक डा मी तार डा शीम मेको चोचा माल्ब। मेको परमप्रभु यावे कली आ दाक्शो ब्रोव्रशो रिना पाइश्शो मीम चोशा चढेतीके बाक्ब।

## 2

### अन्न चढेतीक

लेवी ६:७-११

1 मिनु सुइ मुरुमी परमप्रभु यावे कली अन्न चढेचा थुं पाप्तु हना, मेको अन्न चढेतीक थम रिम्शो फस बाक्चा माल्ब। मिनु मेकोमी मेकेर तेल लुक्शा, धूप सुप्चा माल्नीम। लेवी ७:१०; गन्ती १५:४

2 मिनु मेकोमी मेको चढेब हारून आ तौ आन बाक्तीके चाक्चा माल्ब। मिनु चढेबमी मेको तेल नु धूप ब्वाइश्शो रिम्शो फस मुठी का हुइश्शा, मीम चोचा माल्ब। मिनु मेको परमप्रभु यावे कली आ दाक्शो ब्रोव्रशो रिना पाइश्शो मीम चोशा चढेतीके बाक्ब।

3 मेको अन्न चढेशो रे लीशो चहिं हारून नु आ तौ आन के दुम्ब। मेको परमप्रभु यावे कली मीम चोशा चढेतीक डा नेल्ल क्येडा चोव्रखो चोशा चढेतीक बाक्ब। लेवी ६:२२

4 अन्न चढेतीक चाक्चा थुं पाम्तेक्म हना, चोशो शोब्ले चाक्चा माल्नीम। मेको शोब्ले रिम्शो फस के, तेलमी निशा बोरब ओरुखी मसुप्थु चोचा माल्नीम। बटुक तेलमी निशा बोरब ओरुखी मसुप्थो दुम्चा माल्नीम। तेलम मनिशो बाक्त हना, शोब्ले कली तेल खेक्शो बाक्चा माल्ब। लेवी ७:९

5 मिनु इन चढेतीक अन्न बाक्त हना, तेल ब्वाइश्शो बोरब ओरुखी मसुप्थो रिम्शो फस बाक्चा माल्ब।

6 मेको आइक्च आइक्च सेल्शा, तेल लुक्चा माल्ब। मेको अन्न चढेतीक बाक्ब।

7 इन चढेतीक दिउरेम क्येशो अन्न चढेतीक बाक्त हना, मेको तेलम क्येशो रिम्शो फस के दुम्चा माल्ब।

8 मोपा चोशो क्येशो अन्न चढेतीक परमप्रभु यावे आ बाक्तीक लाइक्चा माल्नीम। मिनु मेको चढेब आन बाक्तीक चाक्मे नोले चढेबमी मेको चढेतीक आ नेक्था चाक्चा माल्ब।

9 मिनु चढेबमी मेको अन्न चढेतीक रे मुठी का हुइश्शा, मेको चढेतीक डा मीम चोचा माल्ब। मेको परमप्रभु यावे कली आ दाक्शो ब्रोव्रशो रिना पाइश्शो मीम चोशा चढेतीके बाक्ब।

10 मेको अन्न चढेतीके आ लीशो चहिं हारून नु आ तौ आन के दुम्ब। मेको परमप्रभु यावे कली मीम चोशा चढेतीक डा नेल्ल क्येडा चोव्रखो चोशा चढेतीक बाक्ब।

11 गेपुकीमी परमप्रभु यावे कली अन्न चढेतीकेमी गेनायो बोरब ओरुखी सुप्चा मदुम्ब। परमप्रभु यावे कली मीम चोशा चढेतीकेमी बोरब ओरुखी नु खुदो गेनायो चोचा मदुम्ब।

12 खुदो नु बोरब ओरुखी सुप्थो चढेतीक लाइश्शा परमप्रभु यावे कली चढेने चाप्नीनी। तन्न मेको कली चढेतीक मीम हुम्चा मदुम्ब। गन्ती १८:१२-१३; २इतिहास ३१:५

13 गेपुकीमी इन अन्न चढेतीक नेल्ल हिक्सी सुप्शा, हिक्सी डाम्शो सेलीन। इन परमप्रभु आ कबल डा अन्न चढेतीकेमी हिक्सी मडाम्शो मदुम्ब। इन चढेतीक नेल्लेमी हिक्सी सुप्थो चढेचा माल्नीनी। गन्ती १८:१९; २इतिहास १३:५

14 परमप्रभु यावे कली डोइती मीशो अन्न चढेचा थुं पाइतीनी हना, इन डोइती मीशो नक बाला आन अन्न मीम क्रोइश्शा चढेन। ब्यवस्था २६:२-११

15 मेको तारी तेल लुक्शा, धूप वोइक्चा माल्ब। मेको अन्न चढेतीक बाक्ब।

16 मिनु चढेबमी मेको तेल लुक्शा, धूप वोइश्शो रे मुठी का हुइश्शा, मीम चोचा माल्ब। मेको परमप्रभु यावे कली मीम चोशा चढेतीक बाक्ब।

### 3

दुशा बाक्चा आ परबम चढेतीक

लेवी ७:११-२१, २८-३४

1 सुइ आन चढेतीके दुशा बाक्चा आ परबम बाक्त हना, मेकोमी बी ब्यफ रे का चढेब हना, परमप्रभु यावे आ डोंइती मारेइ मदुश्शो थम रिश्शो बी कि ब्यफ चढेचा माल्ब।

2 मेकोमी आ गुइ आ चढेतीक बस्तु आ पिया तार वोइक्चा माल्ब। मिनु युम्तीक ताम्बु आ ओत्रतीक आ डोंइती मेको कली क्योरशा साइक्चा माल्ब। मिनु चढेब हारून आ तौपुकीमी मेको आ हुश लाइश्शा चढेतीक आ एर ओंथ बुइक्चा माल्नीम।

3 मेकोमी दुशा बाक्चा आ परबम परमप्रभु यावे कली मीम चोशा चढेतीक चढेचा माल्ब। गा कयी आ तार डा नु मेको कली गिल्शो बोंसो नेल्ल चढेचा माल्ब।

4 आ चिच निम्फा नु मेको आ तार नु आ क्रातोम बाक्शो बोंसो, नु आइदीम क्येप्शो बोंसो नेल्ल गुंइचा माल्नीम।

5 मिनु हारून आ तौपुकीमी मेको नेल्ल कली चढेतीके डा मी तार डा शीम वोइश्शा, चोचा माल्नीम। मेको परमप्रभु यावे कली आ दाक्शो ब्रोव्रशो रिना पाइश्शो मीम चोशा चढेतीक बाक्ब।

6 मेकोमी आ दुशा बाक्चा आ परबम परमप्रभु यावे कली चढेतीके क्यारश भेडा रे का चढेब हना, मेकोमी मारेइ मदुश्शो थम रिश्शो क्यारश भेडा बाक्त हना यो, बोका सांड बाक्त हना यो, चढेचा माल्ब।

7 मेको आ चढेतीक भेडा का बाक्त हना, मेको परमप्रभु यावे आ डोंइती चाक्चा माल्ब।

8 मेकोमी आ गुइ आ चढेतीक भेडा आ पिया तार वोइक्चा माल्ब। मिनु युम्तीक ताम्बु आ ओत्रतीक आ डोंइती मेको कली क्योरशा साइक्चा माल्ब। मिनु चढेब हारून आ तौपुकीमी मेको आ हुश लाइश्शा चढेतीक आ एर ओंथ बुइक्चा माल्नीम।

9 मेकोमी दुशा बाक्तीक आ परबम चढेतीक भेडा आ बोंसो परमप्रभु यावे कली मीम चोशा चढेचा माल्ब। मेको बोंसो पाइश्शो मीलु नु क्रातो आ नेक्था रे नेल्ल गुंइचा माल्नीम। गा कयी आ तार डा नु मेको कली गिल्शो बोंसो नेल्ल चढेचा माल्नीम।

10 आ चिच निम्फा, मेको आ तार डा क्रातो डा बोंसो नेल्ल नु आ आइदीम क्येप्शो बोंसो नेल्ल गुंइचा माल्नीम।

11 मिनु चढेबमी मेको परमप्रभु यावे कली मीम चोशा जचा थोत्रक चढेतीक चढेचा माल्नीम।

12 मिनु दुशा बाक्चा आ परबम परमप्रभु यावे कली चढेतीक क्यारश का बाक्त हना, मेकोमी मेको परमप्रभु यावे आ डोंइती चाक्चा माल्ब।

13 मेकोमी आ गुइ मेको क्यारश आ पिया तारी वोइक्चा माल्ब। मिनु मेको कली युम्तीक ताम्बु आ डोंइती क्योरशा साइक्चा माल्ब। मिनु हारून आ तौपुकीमी मेको आ हुश चढेतीक आ एर ओंथ बुइक्चा माल्नीम।

14 मिनु मेकोमी मेको आ चढेतीके परमप्रभु यावे कली मीम चोशा चढेचा माल्ब। गा कयी सुश्शो नु गिल्शो बोंसो नेल्ले,

15 आ चिच निम्फा, मेको आ तार डा क्रातो डा बोंसो नेल्ले नु आ आइदीम क्येप्शो बोंसो नेल्ल गुंइचा माल्नीम।

16 मिनु चढेबमी ब्रोव्रशो रिना पाइश्शो जचा थोत्रक मेको मीम चोशा चढेतीकेमी चढेचा माल्ब। बोंसो नेल्ले परमप्रभु यावे के बाक्ब।

17 मिनु गेपुकीमी बोंसो नु हुश मब्वने। इन नोले डा पाला नेल्ल आन कली गेपुकी ते बाक्तीनी हना यो, गेना हना यो लीब अरेतीक बाक्ब' दे इस्राएली आन कली देनो" दे परमप्रभु यावेमी मोसा कली देंत। लेवी ७:२३, २७; लेवी १७:१०-१४; उत्पत्ती ९:४; ब्यवस्था १२:१६, २३; प्रेरित १५:२०-२९

## 4

### पाप पशो आ पर्वम चढेतीक

1 मिनु परमप्रभु यावेमी मोसा कली

2 "गे इस्राएली आन कली 'परमप्रभु यावेमी मपचा, दे शेंशो सुइ मुरुमी मतुइक्थु पाप पाप्तु हना,

3 मिनु तेल लुकशो चढेबमी पाप पा, मुर आन कली दोस ताइब सेल्लु हना, मेकोमी आ पशो पाप आ पर्वम मारेइ मदुमशो थम रिमशो ब्यफ का परमप्रभु यावे आ डोंइती पाप पशो आ पर्वम चढेचा माल्ब।

4 मेकोमी मेको ब्यफ कली गुम्टीक ताम्बु आ ओव्रतीक आ नेक्था परमप्रभु यावे आ डोंइती चाक्चा माल्ब। मेकोमी आ गुइ मेको ब्यफ आ पिया तारी वोइक्चा माल्ब। मिनु मेको ब्यफ कली परमप्रभु यावे आ डोंइती साइक्चा माल्ब।

5 मिनु मेको तेल लुकशो चढेबमी ब्यफ आ हुश इक्का हुइशशा गुम्टीक ताम्बुमी चाक्चा माल्नीम।

6 मिनु चढेबमी आ ब्रेचो हुशेम खुमशा, मेको हुश परमप्रभु यावे आ ताम्बु आ आगा डा चोव्रखो कोठा आ बारेशो वाम आ नेक्था परमप्रभु यावे आ डोंइती ७ खेयप बुइक्चा माल्ब। लेवी ९:९

7 मिनु नोले चढेबमी मेको हुश गुम्टीक ताम्बु आ आगामी बाक्शो धूप चढेतीके आ घोव्रपुकीमी खेक्चा माल्ब। मेको ब्रोवशो रिना पाइशो धूप परमप्रभु यावे आ डोंइती चढेतीके बाक्ब। मिनु लीशो हुश नेल्ले गुम्टीक ताम्बु आ ओव्रतीक डा चोशा चढेतीक आ पुंम मोइक्चा माल्ब। प्रस्थान ३०:१, ६; प्रस्थान ४०:६

8 मेकोमी पाप आ पर्वम चढेशो ब्यफ आ बोंसो नेल्ल शोल्चा माल्ब। गा कयी आ तार डा नु मेको कली गिल्लो बोंसो,

9 आ चिच निम्फा, मेको आ क्रातो तार डा बोंसो नेल्ले नु आ आइदीम क्येपशो बोंसो नेल्ल गुंडचा माल्नीम।

10 दुशा बाक्चा आ पर्वम चढेशो ब्यफ आ बोंसो गुंडशो खोदेशो पा शोल्चा माल्ब। मिनु चढेबमी मेको मीम चोशा चढेतीकेमी चढेचा माल्ब। लेवी ८:१७

11 तन्न ब्यफ आ कुशुल, मेको आ श्ये नेल्ल, मेको आ पिया, खोइली नु मेको आ गा कयी गोबर सुन्दा,

12 ब्यफ आ लीशो नेल्ले मुर बाक्तीके रे डोन चोव्रखो पुलु ताइक्तीकेमी लाइशशा, शी तार वोइशशा चोचा माल्नीम। लेवी ६:४

13 इस्राएल डा मुर नेल्लेमी मतुइक्थु पाप पशो बाक्तेकम हना, परमप्रभु यावेमी मपचा दे शेंशो मारेइ पशो बाक्तेकम हना, मेको पाप मेको मुर आन दातेमी खुइशशो बाक्त हना यो, मेकोपुकी दोस ताइब दुम्नीम। गन्ती १५:२२-२६

14 मिनु मेको आन पशो पाप यूमेनु, मेको इस्राएली नेल्लेमी पाप आ पर्वम चढेतीके ब्यफ चाक्चा गुम्टीक ताम्बु आ डोंइती जाक्चा माल्नीम।

15 मिनु इस्राएल डा खाल्पा नेल्लेमी परमप्रभु यावे आ डोंइती मेको आन गुइ ब्यफ आ पिया तारी वोइक्चा माल्नीम। मिनु मेको ब्यफ परमप्रभु यावे आ डोंइती साइक्चा माल्नीम।

16 मिनु नोले तेल लुकशो चढेबमी मेको ब्यफ आ हुश इक्का गुम्टीक ताम्बु आगा चाक्चा माल्नीम।

17 मिनु चढेबमी मेको आ ब्रेचो हुशेमी खुमशा, परमप्रभु यावे आ डोंइती बारेशो वा आ पुंमी ७ खेयप बुइक्चा माल्ब।

18 मिनु नोले मेकोमी गुम्टीक ताम्बु आगाम बाक्शो धूप चढेतीक आ घोव्रपुकीम परमप्रभु यावे आ डोंइती खेक्चा माल्ब। मिनु लीशो हुश नेल्ल गुम्टीक ताम्बु आ ओव्रतीके आ डोंइती बाक्शो चोशा चढेतीक आ पुंम मोइक्चा माल्ब।

19 मेकोमी मेको आ बोंसो नेल्ल शोल्चा, चढेतीकेम चोचा माल्ब।

20 मेकोमी पाप आ पर्वम चढेशो ब्यफ कली दोदेशो पामे, मेको ब्यफ कली यो मोदेशोन पचा माल्ब। मोपा चढेबमी मेको आन पर्वम पाप क्याम्तीक गेय पाडब। मिनु मेकोपुकीम माफ ताडनीम।

21 मेकोमी मेको ब्यफ कली मुर बाक्तीके रे डोन गुंडशा लाडक्चा माल्ब। डोंइती डा ब्यफ चोशो खोदेशो पा चोचा माल्ब। मेको इस्राएली आन पाप आ पर्वम चढेशो बाक्ब। लेवी ४:११-१२

22 मिनु सासन पाडब कामी मतुडक्थु, परमप्रभु यावेमी मपचा, दे शेंशो पाप पाप्तु हना, मेको दोस ताडब दुम्ब।

23 मिनु मेको आ पशो पाप तुडक्तमे नोले, मेकोमी मारेड मदुम्शो थम रिम्शो बोका का चाक्चा माल्ब।

24 मिनु मेकोमी आ गुड मेको बोका आ पिया तार वोडक्चा माल्ब। मिनु तेकेर परमप्रभु यावे आ डोंइती चोशा चढेतीक साडक्नीमी, मेकेर रेन मेको साडक्चा माल्ब। मेको पाप आ पर्वम चढेतीके बाक्ब।

25 मिनु चढेबमी आ ब्रेपचो हुशेमी खुम्शा, चोशा चढेतीक आ ग्रोवपुकीम खेक्चा माल्ब। मेको लीशो हुश चोशा चढेतीक आ पुंम मोडक्चा माल्ब।

26 मेको आ बोंसो नेल्ले चढेतीक आ तार चोचा माल्ब। मेको दुशा बाक्तीक आ पर्वम चढेशो बोंसो खोदेशो पा चढेतीकेमी चोचा माल्ब। मोपा चढेबमी मेको आ पाप आ पर्वम पाप क्याम्तीक गेय पाडब। मिनु मेको माफ ताडब।

27 मिनु मुर आन दाते डा कामी मतुडक्थु पाप पाप्तु हना, परमप्रभु यावेमी मपचा, दे शेंशो पाप्तु हना, मेको दोस ताडब दुम्ब।

28 मिनु मेको आ पशो पाप तुडक्तमे नोले, मेकोमी आ पशो पाप आ पर्वम चढेचा कली मारेड मदुम्शो थम रिम्शो क्यारश का चढेचा कली चाक्चा माल्ब। गन्ती १५:२७-२८

29 मिनु मेकोमी आ गुड मेको पाप आ पर्वम चढेतीक तार वोडक्चा माल्ब। मिनु मेको पाप आ पर्वम चढेतीके कली मेको चोशा चढेतीक आ नेक्था साडक्चा माल्ब।

30 मिनु चढेबमी आ ब्रेपचो हुशेमी खुम्शा, चोशा चढेतीक आ ग्रोवपुकीम खेक्चा माल्ब। मेको लीशो हुश चोशा चढेतीक आ पुंम मोडक्चा माल्ब।

31 मेकोमी आ बोंसो नेल्ल दुशा बाक्चा आ पर्वम चढेशो आ बोंसो खोदेशो पा शोल्चा माल्ब। मिनु चढेबमी मेको चढेतीकेमी चोशा परमप्रभु यावे आ दाक्शो ब्रोव्रशो रिना पाडक्चा कली चोचा माल्ब। मोपा चढेबमी मेको आ पाप आ पर्वम पाप क्याम्तीक गेय पाडब। मिनु मेको माफ ताडब। लेवी ३:१४-१५

32 मेकोमी आ पाप आ पर्वम चढेचा कली भेडा चाक्तु हना, मारेड मदुम्शो थम रिम्शो भेडा चाक्चा माल्नीम।

33 मिनु मेकोमी आ गुड मेको पाप आ पर्वम चढेतीक तार वोडक्चा माल्ब। मिनु तेकेर चोशा चढेतीक साडक्नीमी, मेकेर मेको पाप आ पर्वम चढेतीके साडक्चा माल्ब।

34 मिनु चढेबमी आ ब्रेपचो हुशेमी खुम्शा, चोशा चढेतीक आ ग्रोवपुकीम खेक्चा माल्ब। मेको लीशो हुश चोशा चढेतीक आ पुंम मोडक्चा माल्ब।

35 मेकोमी आ बोंसो नेल्ल दुशा बाक्चा आ पर्वम चढेशो आ बोंसो खोदेशो पा शोल्चा माल्ब। मिनु चढेबमी मेको चढेतीकेमी अरु चोशा चढेतीक नु परमप्रभु यावे कली चोचा माल्ब। मोपा चढेबमी मेको आ पशो पाप आ पर्वम पाप क्याम्तीक गेय पाडब। मिनु मेको माफ ताडब।

## 5

### पाप आ पर्वम चढेतीक

1 मिनु मुर कामी मार मार तशा तुडश्शा यो, सांकळी दुम्चा कली ब्रेत्मेनु, सांकळी दुम्चा कली मजाक्बा, मेकोमी आ तशो तुडश्शो मदेंत हना, मेको आ पर्वम दोस ताडब दुम्ब। न्यायाधीस १७:२; हितोपदेस २९:२४



2 मिनू सुइमी ग्रांग्रा दिशो थोवक, बेकशो ब्वाकी डा जन्तु, बेकशो बस्तु भाव, बेकशो ग्रांग्रा दिशो आइक्च ग्रेकशा गाकब जन्तु थिप्टु हना, मेकोमी मतुइक्ताक्व हना यो, मेको ग्रांग्रा दिशो दुम्शो बाकब। मिनू दोस ताइब दुम्शो बाकब।

3 मिनू मेकोमी मुर आन ग्रांग्रा दिशो थोवक थिप्टु हना, तेकोइ मुर आन ग्रांग्रा दिशो सेल्शो थोवक थिप्टु हना, मेकोम मेको मतुइक्ताक्व हना यो, मेको दोस ताइब दुम्ब। गन्ती १९:१३,२०

4 मिनू सुमी मारेइ रिम्शो मरिम्शो ममिम्थु कसम जाप्टु हना, मारेइ मतुइक्थु कसम जाप्टु हना, मिनू मेको रे मेको लोत्र खुइइशो बाकत हना यो, मेकोमी तुइक्ता नोले मेको दोस ताइब दुम्ब।

5 मिनू मेको मुर आ पशो पाप तुइक्ता नोले, मेकोमी आ पशो पाप शोवचा मालब। लेवी १६:२१; गन्ती ५:७; यहोसु ७:२०

6 मेकोमी परमप्रभु यावे आ डोंइती आ पशो पाप आ परबम चढ़ेचा कली आ बगाल रे भेडा बाकत हना यो, क्यारश बाकत हना यो, का चाक्चा मालब। मिनू चढ़ेबमी मेको आ पशो पाप आ परबम पाप क्याम्तीक गेय पचा मालब।

7 तन्न मेकोमी भेडा चाक्ने मचाप्टु हना, मेको आ पशो पाप क्याम्तीक गेय पचा कली ढुकुर निक्शी कि परवा निक्शी परमप्रभु यावे आ डोंइती चाक्चा मालब। मेको का पाप आ परबम चढ़ेचा कली नु का चोशा चढ़ेचा कली चाक्चा मालब।

8 मेकोमी मेको चढ़ेब आन बाक्तीक चाक्चा मालनीम। मिनू चढ़ेबमी का कली पाप आ परबम डोंइती चढ़ेचा मालब। मिनू मेको कली आ शुर रोप्या मालब। तन्न मेको कली प्रोइक्चा मटुम्ब।

9 मिनू मेको चढ़ेबमी चढ़ेशो परवा आ हुश चढ़ेतीक आ एर ओंथ बुइक्चा मालब। मिनू लीशो हुश चढ़ेतीक आ पुंम चिरचा मालब।

10 मिनू चढ़ेबमी अर्को परवा चहिं परमप्रभु यावेमी डोंइती देशो खोदेशो पा चोशा चढ़ेतीक चढ़ेचा मालब। मोपा मेको चढ़ेबमी मेको आ पाप आ परबम पाप क्याम्तीक गेय पचा मालब। मिनू मेकोम माफ ताइब।

11 तन्न ढुकुर निक्शी नु परवा निक्शी यो चाक्ने मचाप्टु हना, मेकोमी मार पाप पशो बाक्ने, मेको पाप आ परबम एफाह का डा १० भाग थम रिम्शो फस चाक्चा मालब। मेकोमी मेको फस तार तेल लुक्चा नु धूप वोइक्चा मटुम्ब। मारदे हना मेको पाप आ परबम चढ़ेतीके बाक्ब। एफाह पुक्तीके का बाक्ब। एफाह का २२ लिटर रिक्ब। मेको डा १० भाग २ लिटर नु इक्का खोइ खोदेशो बाक्ब।

12 मेकोमी मेको चढ़ेब आन बाक्तीक चाक्चा मालब। मिनू चढ़ेबमी मेको मिम्चा कली मुठी का हइइशा, परमप्रभु यावे कली मीम चोशा चढ़ेतीकेम अरु नु चोचा मालब। मेको पाप आ परबम चढ़ेतीक बाक्ब।

13 मोपा मेको चढ़ेबमी मेको आ पाप आ परबम पाप क्याम्तीक गेय पाइब। मिनू मेकोमी माफ ताइब। मेको रे लीशो चहिं अन्न चढ़ेशो खोदेशो पा चढ़ेब आन के दुम्ब' दे इस्राएली आन कली देनो" दे परमप्रभु यावेमी दैत। लेवी २:३

### गारचा आ परबम चढ़ेतीक

लेवी ७:१-१०

14 मिनू लेशा परमप्रभु यावेमी मोसा कली

15 "सुइ मुरुमी प्रेशा, परमप्रभु यावे आ देशो मटिथु, पाप पाप्टु हना, मेको आ बगाल रे मारेइ मटुम्शो थम रिम्शो ताम्बु डा चांदी के शेकेलम फाइक्चा कली सांड का मेको पाप आ परबम चढ़ेचा कली परमप्रभु यावे आ डोंइती चाक्चा मालब। मेको गारचा आ परबम चढ़ेतीक बाक्ब। शेकेल का ११.५ ग्राम बाक्ब। चांदी नु सुन के क्येट बाकत।

16 मेकोमी गारचा कली प्रेशो बाकत हना, परमप्रभु यावे कली गेतीकेम ५ भाग तेम्चा मालब। मिनू मेको चढ़ेब कली गेचा मालब। मिनू चढ़ेबम मेको पाप गारचा आ परबम चढ़ेशो सांड लाइइशा पाप क्याम्तीक गेय पचा मालब। मिनू मेको माफ ताइब दुम्ब। लेवी ५:२३-२४; लेवी २२:१४; लेवी २७:१३;

17 सुइ मुरुमी परमप्रभु यावेमी मपचा, दे शेंशो पाप्तु हना, मेकोमी मेको मतुइक्ताक्व हना यो, मेको दोस ताइब दुम्शो बाक्व। मिनु मेको सजाइ ताइब दुम्ब।

18 मेकोमी चढेब आन बाक्तीकेम मारेइ मदुम्शो थम रिम्शो ठीक क्येट लाइब सांड का आ बगाल रे गारचा आ परबम चढेतीक चढेचा कली चाक्चा माल्ब। मिनु चढेबमी मेको आ मतुइक्थु पशो पाप आ परबम पाप क्याम्तीक गेय पचा माल्ब। मिनु मेकोम माफ ताइब।

19 मेको गारतीक आ परबम चढेतीक बाक्व। मेको परमप्रभु यावे आ डोंइती थमा पा दोस ताइब दुम्शो बाक्व” दे मोसामी मुर आन कली देंत।

## 6

### चढेब आन पचा माल्शो

1 मिनु लेंशा परमप्रभु यावेमी मोसा कली

2 “सुइ मुरुमी परमप्रभु यावे कली मटिथु, मेको आ डोंइती आ नेक्था डा मुर नु जाकटी वोइश्शो थोव्रक आ परबम जोल पाप्तु हना, सुइम गेनुड, दे कबल पा यो मगेण्टु हना, कि मेको थोव्रक रोइक्ताक्व हना, कि जोल पा आ नेक्था डा मुर आ मारेइ थोव्रक आंम के सेल्लु हना, गन्ती ५:६-८

3 आ नेक्था डा मुर आन मार मार रोइक्ताक्व हना, जाम्शो थोव्रक थिश्शा यो, मथिदु, दे जोल पाप्तु हना, जोल पा कसम जाण्टु हना, मेकोमी पाप पशो बाक्व।

4 मेको मोपा पाप पा दोस ताइब दुम्ब। मिनु मेकोमी आ रोइश्शो, आ खुइ पशो, आ ताक्शो थोव्रक मलेत्ताक्व हना, आ थिश्शो आ परबम जोल पाप्तु हना, इजीकीएल ३३:१५

5 तेको थोव्रक आ परबम जोल पा कसम जशो बाक्मे, मेकोमी मेको थोव्रक नेल्लेमी ५ भाग तेम्शा, आ होव्रप कली लेशशा गेचा माल्ब। मेकोमी दोस आ परबम चढेतीक नाक्ती मेको सु के बाक्मे मेको आ नेक्था डा मुर कली लेशशा गेचा माल्ब।

6 मिनु मेकोमी परमप्रभु यावे आ डोंइती ठीक पा हिक्शो क्येट कि आ बगाल रे मारेइ मदुम्शो थम रिम्शो सांड का आ मरिम्शो पशो आ परबम चढेब आ नेक्था परमप्रभु यावे आ बाक्तीकेमी चढेचा कली चाक्चा माल्ब।

7 मिनु मेको चढेबमी मेको आ परबम परमप्रभु यावे आ डोंइती पाप क्याम्तीक गेय पचा माल्ब। मिनु मेकोमी मार आ परबम दोस तशो बाक्मे, मेकोम माफ ताइब” देंत।

### चोशा चढेतीक आ परबम अरेशो

8 मिनु परमप्रभु यावेमी मोसा कली

9 “गे हारून नु आ तौ आन कली चोशा चढेचा आ परबम अरेमी। मेको चोशा चढेतीक नाक्दो रे सुनी सम्म चढेतीके शी तार बाक्चा माल्ब। मिनु चढेतीक डा मी यो ब्रस डा ब्रस बाक्चा माल्ब।

10 मिनु चढेबमी आ सुती के आगा फेक्तीक वा नु सुती के फेक्तीके फेक्चा माल्ब। मिनु मेकोमी मीम दाक्शो चोशा चढेशो आ पुलु हुइश्शा चढेतीक आ नेक्था वोइक्चा माल्ब। प्रस्थान २८:४२

11 मिनु नोले मेकोमी आ फेक्शो वा पुइश्शा, अर्को वा फेक्शा, मेको पुलु ताम्बु रे गुंइशा चोव्रखो पुलु ताइक्तीकेमी लाइश्शा ताइक्चा माल्ब।

12 चढेतीक डा मी चहिं ब्रस डा ब्रस बाक्चा माल्ब। मेको काप्या मदुम्ब। मिनु सुनी कुस कुस चढेबमी मेकेर शी तेम्चा माल्ब। मिनु चोशा चढेतीके मीम दुशा बाक्तीक आ परबम चढेशो आ बोंसो चोचा माल्ब।

13 चढेतीक डा मी ब्रस डा ब्रस बाक्चा माल्ब। मेको गेनायो काप्या मदुम्ब।

### अन्न चढेशो आ परबम अरेशो

14 एको अन्न चढेतीक आ परबम अरेशो लोव्र बाक्व। हारून आ तौपुकीमी परमप्रभु यावे आ डोंइती चढेतीक आ नेक्था चाक्चा माल्नीम।

15 मिनू मेकोपुकीम अन्न चढेतीके, तेल नु धूप आ तार वोइश्शो रिम्शो फस रे मुठी का लाइश्शा, मिम्चा कली परमप्रभु यावे कली आ दाक्शो ब्रोव्रशो रिना पाइश्शो चढेतीकेमी चोचा माल्नीम।

16 मिनू लीशो हारून नु आ तौपुकीम जचा माल्नीम। तन्न मेको चोव्रखो बाक्तीकेमी बोरब ओख्ती मसुप्थु, चोशा जचा माल्नीम। मेकोपुकीमी गुम्तीक ताम्बु आ लाङगाम बाक्शा, जचा माल्नीम।

17 मेकेर बोरब ओख्ती सुप्शा शोब्ले चोचा मदुम्ब। आं कली मीम चोशा चढेशो रे मेको आन कली आं गेशो भाग बाक्ब। मेको पाप आ पर्वम चढेतीके नु गारपाइक्चा आ पर्वम चढेतीके खोदेशो मेको थम चोव्रखो बाक्ब।

18 हारून आ खिं डा वोंइश मुर नेल्लेमी गेना हना यो परमप्रभु यावे कली मीम चोशा चढेशो रे जचा माल्नीम। परमप्रभु यावे कली मीम चोशा चढेशो रे मेको आ खिं डा मुर नेल्ल आन कली गेशो आन भाग बाक्ब। मेको थीब नेल्ल चोव्रखो दुम्नीम” दैत।

19 मिनू परमप्रभु यावेमी लेंशा मोसा कली

20 “हारून नु आ तौपुकीम तेल लुक्चा पुंडसे नाक्ती परमप्रभु यावे कली मार नु दोपा चढेचा माल्नीम देशा हना, एफाह का डा १० भाग थम रिम्शो फस नाक्दो आधा नु सुनी आधा गेना हना यो चढेचा माल्नीम। एफाह पुक्तीके का बाक्ब। एफाह का २२ लिटर रिक्ब। मेको डा १० भाग २ लिटर नु इक्का खोइ ४ माना खोदेशो बाक्ब।लेवी ७:३७; प्रस्थान २९:-

21 मेको शोब्ले तेलम चोचा माल्ब। गे मेको कली शुश तेलम चोशा, अन्न चढेतीके टुक्रा टुक्रा पा परमप्रभु यावे कली आ दाक्शो ब्रोव्रशो रिना पाइश्शो चढेतीके चढेचा माल्नीम।

22 मोपा हारून आ नोले आ तेल लुक्शो तौमी मोदेशो पचा माल्ब। मेको गेना हना यो परमप्रभु यावे केन बाक्ब। मिनू मेको नेल्ल चोचा माल्ब।

23 मिनू चढेब आन अन्न चढेतीक नेल्ल चोचा माल्नीम। मेको जचा मदुम्ब” दैत।

पाप क्याम्चा कली चढेतीके

24 मिनू परमप्रभु यावेमी मोसा कली

25 “गे हारून नु आ तौ आन कली मार देंचा माल्नेवे देंशा हना ‘पाप क्याम्चा कली चढेतीक आ पर्वम अरेशो बाक्ब। पाप क्याम्चा कली चढेतीक परमप्रभु यावे आ डोंइती चोशा चढेतीक कली साइक्तीकेमी साइक्चा माल्ब। मेको थम चोव्रखो बाक्ब। लेवी ४:-

26 मेको पाप क्याम्चा कली चढेशो चढेबमी मेको रे ब्वचा माल्ब। मेकोपुकीमी गुम्तीक ताम्बु डा लाङगाम बाक्शा, ब्वचा माल्नीम।

27 मेको श्ये मारम थीबा, मेको यो चोव्रखो दुम्ब। मेको आ हुश वाम प्रेक्ताक्व हना, गेपुकीम मेको वा चोव्रखो बाक्तीकेमी मुरचा माल्नीनी।

28 मेको श्ये तेको खप के ग्योबुम लोप्नीमी, मेको ग्योब प्रोल्ला ताइक्चा माल्नीम। मेको कांसा के ग्योबुम लोप्शो बाक्त हना, मेको सिक्स ब्वाक्कुम शेक्चा माल्नीम।

29 मेको चढेब आन दाते डा वोंइश मुर नेल्लेमी मेको ब्वचा माल्नीम। मेको थम चोव्रखो बाक्ब।

30 तन्न तेको पाप क्याम्चा कली चढेतीके आ हुश पाप क्याम्तीक गेय पचा कली गुम्तीक ताम्बु आ आगाम चाक्नीमी, मेको ब्वचा मदुम्ब। मेको चोचा माल्नीम।

## 7

गारचा आ पर्वम चढेशो

1 गारचा आ पर्वम चढेतीक थम चोव्रखो बाक्ब। एको दोपा पचा माल्ब देंशा हना, लेवी ५:१४-२६

2 चोशा चढेतीक तेकेर साइक्नीमी, मेकेरेन गारचा आ पर्वम चढेतीक साइक्चा माल्ब। मेको आ हुश, चढेतीक आ एर ओंथ बुइक्चा माल्ब।

3 मेको आ बोंसो नेल्ले, बोंसो पाइश्शो मीलु, गा क्यी सुम्शो बोंसो, लेवी ३:९-१०

4 चिच निम्फा, मेको आ तार डा नु क्रातो डा बोंसो, चिच सुन्दा आइदीम क्येप्शो बोंसो नेल्ल शोल्शा, चढेचा माल्ब।

5 चढेबमी परमप्रभु यावे कली मीम चोशा चढेचा माल्ब। मेको गारचा आ परबम चढेतीके बाक्ब।

6 मेको चढेब आन खिं डा वोंडश मुर नेल्लेमी मेको ब्वचा माल्नीम। मेको चोत्रखो बाक्तीके ब्वचा माल्नीम। मेको थम चोत्रखो बाक्ब।

7 गारचा आ परबम चढेतीके पाप आ परबम चढेतीक खोदेशो बाक्ब। पतीक गेय यो कान बाक्ब। मिनु तेको चढेबम मेको पाप क्याम्तीक गेय पवा, मेको मेको केन दुम्ब।

8 मिनु तेको चढेबमी मुर आन चाक्शो चोशा चढेतीक चढेबा, मेको चोशा चढेशो आ कुशुल यो मेको केन दुम्ब। लेवी १:६

9 मिनु चुप्लुम चोशो, दिउरमी क्येशो नु तांवाम चोशो चढेशो नेल्ले मेको चढेब केन दुम्ब। लेवी २:४,५,७

10 तन्न अरु अन्न चढेतीके तेलम ब्वाइश्शो नु मब्वाइश्शो नेल्ल हारून नु आ तौ आन कली योक्चा कली बाक्ब। लेवी २:१-३

### दुशा बाक्चा आ परबम चढेशो

11 मिनु परमप्रभु यावे कली दुशा बाक्चा आ परबम चढेतीके दोपा चढेचा माल्ब, दे अरेशो बाक्ब देशा हना, लेवी ३:-

12 सुइमी परमप्रभु यावे कली “गे रिम्शो पाइब बाक्नीनी” दे ठेयब सेल्शा चढेपुतु हना, मेकोमी तेलम निशो बोरब ओस्ती मसुप्शो बटक, बोरब ओस्ती मसुप्शो तेल खेक्शो शोब्ले नु थम रिम्शो फस के सेल्शो तेल वोइश्शो शोब्ले चढेचा माल्नीम। लेवी १९:५-८; लेवी २२:२९-३०

13 मेकोमी “गे रिम्शो पाइब बाक्नीनी” दे ठेयब सेल्शा नु दुशा बाक्चा आ परबम चढेशो नु बोरब ओस्ती सुप्शो शोब्ले यो चढेचा माल्ब।

14 मेकोमी चढेशो शोब्ले नेल्ल रे का का पा परमप्रभु यावे कली क्युकशा चढेचा माल्ब। दुशा बाक्चा आ परबम चढेतीके आ हुश तेको चढेबम बुइक्बा, मेको केन दुम्ब।

15 “गे रिम्शो पाइब बाक्नीनी” दे ठेयब सेल्शा नु दुशा बाक्चा आ परबम चढेशो श्ये मेको चढेशो नाक्तीन नेक्चा माल्नीम। सुनी सम्म मारेइ हेंचा मदुम्ब।

16 मेको चढेशो कसम जशो आ परबम नु ग्येरशा चढेशो बाक्त हना, मेको चढेशो नाक्ती ब्वचा माल्नीम। आ लीशो आ दीसा ब्वचा दुम्ब।

17 आ नित्थ नाक्त सम्म लीशो चढेशो श्ये चहिं मीम चोचा माल्ब।

18 मेको दुशा बाक्तीक आ परबम चढेशो आ श्ये आ नित्थ नाक्त सम्म सुइम ब्वापुतु हना, मेको काइ मदुम्ब। मेको मुरुमी यो मचढेशो खोदेशो दुम्ब। मेको श्ये ब्वचा ग्रांघ्रा दित्चा डा बाक्ब। मेको ब्वाइब मुर दोस ताइब।

19 मारेइ ग्रांघ्रा दिशो थोत्रकम थिशो श्ये ब्वचा मदुम्ब। मेको चोचा माल्ब। तन्न सुइ चोत्रखो दुम्शो बाक्तेक्म हना, अरु श्ये ब्वने चाप्नीम।

20 तन्न सुइ ग्रांघ्रा दिशो दुम्शा, परमप्रभु यावे कली दुशा बाक्चा आ परबम चढेशो श्ये ब्वापुतु हना, मेको आ खिं डा मुर रे तिल्ला पुंइसीब।

21 मिनु इन दातेमी सुमी मारेइ मारेइ ग्रांघ्रा दिशो थोत्रक थिशा, मुर आन ग्रांघ्रा दिशो, ग्रांघ्रा दिशो जन्तु कि मारेइ ग्रांघ्रा दिशो थिपुतु हना, नोले परमप्रभु यावे कली दुशा बाक्चा आ परबम चढेशो श्ये ब्वापुतु हना, मेको आ खिं डा मुर रे तिल्ला पुंइसीब’ दे माइक्मी” दे परमप्रभु यावेमी मोसा कली देंत।

### बोंसो नु हुश ब्वचा मदुम्ब

22 मिनु लेंशा परमप्रभु यावेमी मोसा कली

23 “गे इस्त्राएली आन कली ‘गेपुकीम ब्यफ, भेडा नु क्यारश आन बोंसो काइ मब्वने। लेवी ३:१७

24 आंमा बेक्शो, मारेइमी साइशो बस्तु भाव आन बोंसो अर्को मारेइ गेयम चलने चाप्नीनी। तन्न गेपुकीमी मेको ब्वचा मडुम्ब। प्रस्थान २२:३०

25 मिनु इन दातेमी सुमी परमप्रभु यावे कली मीम चोशा चढ़ेतीके आ बोंसो ब्वाइबा, मेको आ खिं डा मुर रे तिल्ला पुंडसीब।

26 गेपुकी ते बाक्तीनी हना यो, तेकोइ चिक्ब नु बी ब्यफ, क्यारश भेडा आन हुश ब्वचा मडुम्ब।

27 मिनु सुमी हुश ब्वाइबा, मेको आ खिं डा मुर रे तिल्ला पुंडसीब' माइकमी" देत।

### चढ़ेब आन भाग

28 मिनु परमप्रभु यावेमी मोसा कली

29 "गे इस्राएली आन कली 'सुमी परमप्रभु यावे कली गे रिम्शो पाइब बाक्नीनी, दे ठेयब सेल्शा चढ़ेतीक चाड सेल्बा, मेकोमी आ चढ़ेशो रे परमप्रभु यावे आ बाक्तीकेम आंमान चाक्चा माल्ब।

30 मेकोमी परमप्रभु यावे कली मीम चोशा चढ़ेचा कली बोंसो नु कुथु चाक्चा माल्ब। मिनु मेको कुथु परमप्रभु यावे कली क्युक्शा चढ़ेतीक चढ़ेचा माल्ब। प्रस्थान २९:२४

31 मिनु चढ़ेबमी मेको बोंसो कली मीम चोचा माल्ब। तन्न मेको कुथु हारून नु आ तौ आन के दुम्ब।

32 मिनु इन दुशा बाक्चा आ पर्वम चढ़ेतीके रे आ ग्युरा फिला चढ़ेब कली क्युक्शा चढ़ेचा कली गेचा माल्नीनी। लेवी ९:२१

33 हारून आ तौ तेकोम दुशा बाक्चा आ पर्वम चढ़ेतीक चढ़ेबा नु हुश बुइक्बा, ग्युरा फिला मेको के दुम्ब।

34 मारदे हना गो इस्राएली आन "गे रिम्शो पाइब बाक्नीनी" दे ठेयब सेल्शा चढ़ेशो कुथु नु ग्युरा फिला गेपुकी रे ताक्शा चढ़ेब हारून नु मेको आ तौ आन कली गेना हना यो कली गेतामी" दे माइकमी।

35 हारून नु आ तौपुकी तेको नाक्त रे परमप्रभु यावे कली चढ़ेब दुम्मा, मेको नाक्ती रेन परमप्रभु यावे कली मीम चोशा चढ़ेशो चढ़ेतीक रे मेको आन भाग गेतामी।

36 तेको नाक्ती रे मेकोमी मेको आन कली तेल लुक्ता, मेको नाक्त रेन मेको आन कली इस्राएलीपुकी रे ततीक भाग परमप्रभु यावेमी 'मेको आन के बाक्ब' देशो बाक्ब। मेको आन कली गेना हना यो नेल्ल आन पाला सम्म आन भाग बाक्ब, देनो" देत।

37 "मेको चोशा चढ़ेतीके, अन्न चढ़ेतीके, पाप आ पर्वम चढ़ेतीके, गारचा आ पर्वम चढ़ेतीके, नक गेय पचा आ पर्वम चढ़ेतीके नु परमप्रभु यावे कली 'गे रिम्शो पाइब बाक्नीनी' दे ठेयब सेल्शा चढ़ेतीक आ पर्वम पतीके बाक्ब।

38 मिनु परमप्रभु यावेमी मेको लोत्र मोसा कली सीनै डांडाम अरेशो बाक्त। मेको नाक्ती परमप्रभु यावेमी सीनै डा गोरशो रागीम इस्राएली आन कली आन चढ़ेतीक आ बाक्तीक चाक्कीन" दे अरेशो बाक्ब।

## 8

### हारून नु आ तौ चढ़ेब दुम्शो

प्रस्थान २९:-

1 मिनु परमप्रभु यावेमी मोसा कली

2 "गे हारून नु आ तौ आन कली, चढ़ेब आन फेक्तीक वा, आन कली लुक्चा कली तेल, पाप आ पर्वम चढ़ेतीक ब्यफ, सांड निक्शी नु बोरब ओस्ती मसुप्शो शोब्ले चाक्को। प्रस्थान २८:३९-४३

3 मुर नेल्ल आन कली गुम्तीक ताम्बु आ ओवतीकेम पुक्की" देत।

4 मिनु मोसामी परमप्रभु यावेमी दोदेशो पा अरेवा, मोदेशो पा पाप्तु। मिनु मुरपुकी गुम्तीक ताम्बु आ ओवतीकेम बुक्तेकम।

5 मिनु मोसाम बुक्शो मुर आन कली "परमप्रभु यावेमी 'पावो' दे अरेशो लोत्र एकोन बाक्ब" देत।

6 मिनु मोसामी हारून नु आ तौ आन कली चाक्शा चिक्ताक्की।

7 मिनु मेकोमी हारून कली आगा वा फेक्ताक्व। मिनु किप्शुर किप्ताक्व। मिनु मेकोमी आ तार डा फेक्तीक फेक्ताक्व। मेकोमी क्रातो आ डोंइती क्युक्तीक वा क्युक्ताक्व। मिनु रिम्शो पा प्रोव्रशो बुटा आप्शो किप्शुर नु क्रातो डोंइती क्युक्तीक झोला मेको आ तार किप्ताक्व।

8 मिनु नोले मेकोमी हारून कली कुचुम रेलतीक झोला रेलताक्व, मिनु मेको आगा “ऊरीम नु थुम्मीम” कुर पाप्तु। ऊरीम नु थुम्मीम कली छेडछेड नु निसाफ पतीके देंसीब। परमप्रभु यावे आ देशो कोंडब बाक्ब। प्रस्थान २८:३०

9 मिनु मेको आ पियाम गुप्तीके गुप्ताक्व। मिनु सुन के मुशो कुप्फीम पांडतीके “परमप्रभु यावे कली ला” दे मेको आ डोंइती गे पांडताक्व। परमप्रभु यावेमी मोसा कली दोदेशो पा अरेवा, मोदेशो पा पाप्तु। प्रस्थान २८:३६-३८; लेवी ३९:३०

10 मेको नोले मोसामी लुक्तीक तेल चाक्शा परमप्रभु यावे आ बाक्तीके नु मेकेर बाक्शो मारेड मारेड आन कली बुइश्शा, “परमप्रभु यावे केन बाक्ब” दे चोव्रखो सेल्लु।

11 मिनु मेकोमी तेल इच्का चढ़ेतीकेम ७ खेयप बुइक्ताक्व। मोपा चढ़ेतीके, मेकेर बाक्शो चढ़ेचा कली माल्तीक नेल्ले नु चिक्तीक टेयब ग्योब नु आ नाइक्तीके, नेल्ल आन कली परमप्रभु यावे के सेल्चा कली तेल बुइक्ताक्मी।

12 मिनु मेकोमी हारून आ पियाम लुक्तीक तेल लुक्शा, मेको कली परमप्रभु यावे कली ला गेय पाइब सेल्लु।

13 मिनु मोसामी हारून आ तौ आन कली चाक्पाइश्शा, आगा वा फेक्ताक्मी। मिनु किप्शुर किप्शा पियाम गुप्तीके गुप्ताक्मी। परमप्रभु यावेमी मोसा कली दोदेशो पा अरेवा, मोदेशो पा पाप्तु।

14 मिनु नोले मोसामी पाप आ पर्बम चढ़ेतीक ब्यफ चाक्तु। मिनु हारून नु आ तौपुकीम मेको पाप आ पर्बम चढ़ेतीक ब्यफ आ पिया तारी आन गुइ वोइक्तेक्म। लेवी ४:१-१२

15 मिनु मोसामी मेको ब्यफ कली साइक्तु। मिनु मेकोमी मेको इच्का हुश लाइश्शा आ ब्रेप्चोमी चढ़ेतीक एर ओंथ डा गोत्रम खेक्शा, चढ़ेतीक कली परमप्रभु यावे कली ला, चोव्रखो सेल्लु। मिनु लीशो हुश चहिं चढ़ेतीक आ पुंम मोइक्तु। मोपा मेको चढ़ेतीक कली पाप क्याम्तीक गेय पचा, दे चोव्रखो सेल्लु।

16 मिनु मोसामी गा क्यी गिल्लो बोंसो नेल्ल, आइदी क्येप्शो बोंसो नु चिच निम्फा नु आ बोंसो चढ़ेतीकेम चोप्तु।

17 मिनु ब्यफ, मेको आ कुशुल, आ श्ये नु गोबर मुर आ बाक्तीक क्येडा डोन मीम चोप्तु। परमप्रभु यावेमी मोसा कली दोदेशो पा अरेवा, मोदेशो पा पाप्तु।

18 मिनु नोले मोसामी चोशा चढ़ेतीक सांड चाक्तु। मिनु हारून नु आ तौपुकीमी आन गुइ मेको सांड आ पिया तार वोइक्तेक्म। लेवी १:१०-१३

19 मिनु मोसामी मेको सांड कली क्योरतु। मिनु मेकोमी आ हुश चढ़ेतीक एर ओंथ बुइक्ताक्व।

20 मिनु मोसामी मेको सांड कली टुक्रा टुक्रा पा चेक्तु। मेको आ पिया, चेक्शो श्ये नु बोंसो नेल्ल चोप्तु।

21 मेकोमी गा क्यी नु फिला मुरतु। मोपा मोसामी मेको सांड नेल्ल चढ़ेतीकेमी चोप्तु। मेको परमप्रभु यावे कली ब्रोव्रशो रिना पाइश्शा मीम चोशा चढ़ेशो बाक्त। मिनु परमप्रभु यावेमी मोसा कली दोदेशो पा अरेवा, मोदेशो पा पाप्तु।

22 मिनु नोले मोसामी अर्को चढ़ेतीक सांड चाक्तु। मेको गेय गोचा कली चढ़ेतीक डा सांड बाक्त। मिनु हारून नु आ तौपुकीम आन गुइ मेको सांड आ पिया तार वोइक्तेक्म।

23 मिनु मोसामी मेको सांड कली क्योरतु। मिनु मेकोमी मेको आ हुश हारून आ ग्युरा नोफा आ फेनेम, आ ग्युरा गुइ डा बोंग्ये नु आ ग्युरा खोइल डा बोंग्येमी खेक्ताक्व।

24 मिनु मोसामी हारून आ तौ आन कली चाक्पाइवक्तु। मिनु मेकोमी मेको आन ग्युरा नोफा आन फेनेम, आन ग्युरा गुड डा बोंगेये नु आन ग्युरा खोडल डा बोंगेयेमी खेक्ताक्व। मिनु मोसामी मेको हुश कली चढेतीके आ एर ओंथ बुडक्ताक्व। लेवी १७:११

25 मिनु मेकोमी मेको सांड आ बोंसो, मेको बोंसो पाइशशो मीलु, गा कयीम गिल्लशो बोंसो, आइदीम क्येप्लो बोंसो, चिच निम्फा नु मेक डा बोंसो नु ग्युरा फिला लाइवक्तु।

26 मिनु परमप्रभु यावे आ डोंइती बाक्शो बोरब ओरुली मसुप्लो मार मार आ डालो रे बोरब ओरुली मसुप्लो हिरशो शोब्ले का, तेलम खुम्लो शोब्ले का नु बाबर का गुंडशा, मेको बोंसो नु ग्युरा फिला तार वोइवक्तु।

27 मिनु मेको नेल्ल लाइशशा हारून नु आ तौ आन गुडमी वोइवक्तु। मिनु परमप्रभु यावे आ डोंइती हिम्शा चढेतीके चढेप्लु।

28 मिनु मोसामी मेको आन गुड रे लाइशशा, चोशा चढेशो आ तारी चोप्लु। मेको गेय गोचा कली चढेतीके परमप्रभु यावे कली ब्रोव्रशो रिना पाइशशो मीम चोशा चढेतीक बाक्त।

29 मिनु मोसामी मेको सांड आ कुथु लाइशशा, परमप्रभु यावे आ डोंइती हिम्शा चढेतीके चढेप्लु। मेको गेय गोचा कली चढेशो सांड आ श्ये मोसा आ भाग दुम्त। परमप्रभु यावेमी मोसा कली दोदेशो पा अरेवा, मोदेशो पा पाप्लु।

30 मिनु मोसामी लुक्तीक तेल नु चढेतीकेम वोइशशो हुश लाइशशा, हारून नु आ तौ आन फेक्शो वाम बुडक्ताक्व। मोपा मोसामी हारून नु मेको आ फेक्शो वा, आ तौपुकी नु मेको आन फेक्शो वा नेल्ल परमप्रभु यावे कली ला गेय पाइब, दे चोव्रखो सेल्लु।

31 मिनु मोसाम हारून नु आ तौ आन कली “गे मेको श्ये कली गुम्तीक ताम्बु आ ओव्रतीकेम लोपीन। मिनु गेय गोचा कली चढेशो डालो डा शोब्ले नु मेक उड जने ब्वने। आं देशो खोदेशो पा जचा ब्वचा माल्नीनी।

32 हेशो श्ये नु शोब्ले गे मीम चोचा माल्नीनी।

33 मिनु नोले गे ७ नाक्त सम्म, इन कली गेय गोचा कली चढेशो ७ नाक्त मगाम सम्म गुम्तीक ताम्बु आ ओव्रतीक रे लाडगा मलने। मारदे हना ७ नाक्त मजाक्दीम सम्म इन गेय गोचा कली चढेतीक गेय ला थुम्सीब।

34 मुलाक्त मार पडा, मेको परमप्रभु यावेमी अरेशो इन कली पाप क्याम्तीक गेय बाक्त।

35 गेपुकी ७ नाक्त सम्म नाक्दो नाक्ती गुम्तीक ताम्बु आ ओव्रतीकेमी बाक्चा माल्नीनी। गे परमप्रभु यावेमी अरेशो पने। मो मपाइतीनी हना, गे बेक्नीनी। मारदे हना आं कली मोदें अरेशो बाक्ब” दे माइक्तीमी।

36 मिनु परमप्रभु यावेमी मोसा रे पा अरेशो नेल्ल हारून नु आ तौपुकीम पाप्तेक्म।

## 9

हारून नु आ तौ आन गेय

1 मिनु ८ नाक्ती मोसामी हारून, आ तौ नु इस्राएल डा खाल्पा आन कली ब्रेत्ताक्मी। लेवी ८:३३

2 मिनु मेकोमी हारून कली “गे पाप आ पर्वम चढेचा कली मारेड मदुम्लो थम रिम्लो बाछा का नु चोशा चढेचा कली मारेड मदुम्लो थम रिम्लो सांड का चाक्शा परमप्रभु यावे आ डोंइती चढेवो।

3 मिनु इस्राएली आन कली ‘गेपुकीमी पाप आ पर्वम चढेचा कली बोका का नु चोशा चढेचा कली बर्स का दुम्लो, मारेड मदुम्लो थम रिम्लो बाछा का नु मारेड मदुम्लो थम रिम्लो पाठा का चाक्कीन।

4 मिनु परमप्रभु यावे आ डोंइती दुशा बाक्चा आ पर्वम चढेचा कली ब्यफ का, सांड का नु तेलम निशो अन्न चढेतीक यो चाक्कीन। मारदे हना मुलाक्ती परमप्रभु यावेमी इन कली तपांडसीब’ माइक्मी” देंत।

हारूनम आम आ पर्वम चढेशो

5 मिनू मोसामी अरेशो खोदेशो पा मेकोपुकीमी मारेड मारेड गुम्टीक ताम्बु आ डोंइती चाक्तेक्म। मिनू मुर नेल्ले परमप्रभु यावे आ डोंइती जाक्शा राप्तेक्म।

6 मिनू मोसामी “गेपुकीमी परमप्रभु यावेमी अरेशो पचा माल्लो गेय एकोन बाक्ब। मिनू परमप्रभु यावे आ छेडछेड इन कली तपांडसीब” दैत।

7 मिनू मोसाम हारून कली “चढेतीक आ नेक्था जाक्शा, इ पाप आ परबम चढेतीक नु इ चोशा चढेतीक चढेवो। मिनू आम इ परबम नु मुर आन परबम पाप क्याम्टीक गेय पावो। परमप्रभु यावेमी अरेशो खोदेशो पा मुर आन चाक्शो चढेतीक चढेशा, मुर आन परबम पाप क्याम्टीक गेय पावो” दैत। लेवी १६:६, ११, १५; हिब्रू ५:३; हिब्रू ७:२७

8 मिनू हारून चढेतीक आ नेक्था जाक्शा, आ पाप आ परबम चढेतीक बाछा क्योरतु।

9 मिनू हारून आ तौपुकीमी मेको आ हुश चाक्तेक्म। मिनू मेकोमी आ ब्रेचो हुशेम खुम्शा चढेतीक आ ग्रोत्रपुकीम खेक्ताक्व। मिनू लीशो हुश कली चढेतीक आ पुंम मोडक्तु।

10 मिनू मेकोमी पाप आ परबम चढेशो आ बोंसो, चिच नु आइदीम क्येप्शो बोंसो चढेतीकेम चोप्तु। परमप्रभु यावेमी मोसा कली दोदेशो पा अरेवा, मोदेशो पा हारूनमी पाप्तु। लेवी ४:८-१२; लेवी ८:१४-१७

11 तन्न श्ये नु कुशुल चहिं मुर आन बाक्तीके क्येडा डोन चोप्तु।

12 मिनू नोले हारूनमी चोशा चढेतीक क्योरतु। मिनू मेको आ तौपुकीमी मेको आ हुश चाक्शा गेम्तेक्म। मिनू मेकोमी मेको चढेतीक आ एर ओंथ बुडक्ताक्व। लेवी १:१०-१३

13 मिनू मेकोपुकीमी मेको चोशा चढेतीके टुक्रा टुक्रा पा चेक्शा, पिया सुन्दा चाक्शा, मेको कली गेम्तेक्म। मिनू हारूनमी मेको चढेतीकेमी चोप्तु।

14 मिनू मेकोमी गा क्यी नु खोइल मुरशा, चोशा चढेतीके नु चोप्तु।

### हारूनम अरु आन परबम चढेशो

15 मिनू नोले हारूनमी मुर आन परबम चढेतीक चाक्शा, मेको आन पाप आ परबम चढेशो बोका क्योरतु। मिनू डोंइती डा खोदेशो पा पाप आ परबम चढेतीके चढेप्तु।

16 मेको नोले चोशा चढेतीक चाक्शा, अरेशो खोदेशो पा चढेप्तु।

17 मिनू अन्न चढेतीक चाक्शा, मुठी का हुइशशा, सुनी डा चोशा चढेतीक नु चढेप्तु।

18 मिनू हारूनमी मुर आन कली दुशा बाक्चा आ परबम चढेतीके ब्यफ नु सांड क्योरतु। मिनू हारून आ तौपुकीम हुश चाक्शा, मेको कली गेम्तेक्म। मिनू मेकोमी चढेतीक आ एर ओंथ बुडक्ताक्व।

19 मिनू ब्यफ नु सांड आस बोंसो, बोंसो पाइशो मीलु, गा क्यी गिल्लो बोंसो, चिच निम्फा नु आइदीम क्येप्शो बोंसो लाइक्तेक्म।

20 मिनू डोंइती कुथु तार वोइक्तेक्म। नोले बोंसो चढेतीकेम चोम्तेक्म।

21 मिनू मोसाम अरेशो खोदेशो पा हारूनमी कुथु नु ग्युरा फिला चहिं परमप्रभु यावे आ डोंइती क्युक्शा हिम्शा चढेतीके चढेप्तु। लेवी ७:३०-३४;

22 मिनू हारूनमी आ गुड मुर आन गे पोक्शा, आसीक गेम्तीमी। मोपा पाप आ परबम चढेतीके, चोशा चढेतीके नु दुशा बाक्चा आ परबम चढेतीके चढेशा, मेको उड तोंइसाक्व।

23 मिनू मोसा नु हारून गुम्टीक ताम्बु आगा ओन्नताक्स। मिनू गूशा मुर आन कली आसीक गेम्ताक्स। मिनू परमप्रभु यावे आ छेडछेड मुर नेल्लेमी ताम्तेक्म। प्रस्थान १६:१०; प्रस्थान ४०:३४

24 मिनू परमप्रभु यावे आ डोंइती रे मी गूशा, चढेतीकेम बाक्शो चोशा चढेतीक नु मेक बाक्शो बोंसो नेक्तु। मिनू मुरपुकीमी मेको तशा, ठेयब सेंदा पा ग्येरसीशा, खुम्की पा बाप्तेक्म। न्यायाधीस ६:२१; १राजा १८:३८; १इतिहास २१:२६; २इतिहास ७:१



1 मिनू हारून आ तौ नादाब नु अबीहुम आस थनौरौ लाइशशा, मी कुर पाम्ताक्स। मिनू मी आ तारी धूप वोइक्ताक्स। मोपा मेको निक्शी परमप्रभु यावेमी “अरू मी मलाइक्चा” दे अरेशो लोत्र मट्मिस, मेको परमप्रभु यावे आ डोंइती चढेम्ताक्स। प्रस्थान ६:२३; प्रस्थान २८:१; प्रस्थान ३०:९

2 मिनू परमप्रभु यावे आ डोंइती रे मी यूशा, मेको आस कली यु दाक्तु। मोपा मेको निक्शी परमप्रभु यावे आ डोंइती बेक्ताक्स।

3 मिनू मोसामी हारून कली “परमप्रभु यावेमी देशो ‘आं नेक्था बाक्ब आन कली गो नेल्ल क्येडा ठेयब बाक्नुड’ दे कोइनुड। मिनू नेल्ल मुर आन डोंइती गो ठेयब सेल्चा पुंइसीनुड” दैत। मिनू हारून सिक्सी पा बाक्त।

4 मोसामी हारून आ बकान्छा उज्जीएल आ तौ एल-साफान नु मीशाएल आस कली ब्रेशशा “इस लोकब आस कली ताम्बु रे कुरशा गुंइदीस” दैत। प्रस्थान ६:२२

5 मिनू मेको निक्शी जाक्शा, आस फेक्शो वा रे क्युकशा मोसा आ देशो खोदेशो पा कुरशा गुंइताक्स।

6 मिनू मोसाम हारून नु आ तौ एलाजर नु इथामार आन कली “रोंका पा इन पिया डा चां मप्रेक्कीन। इन वा मखाक्कीन। मो पाइतीनी हना, गेपुकी बेक्नीनी। मिनू परमप्रभु यावे आ गाइक्तीक नेल्ल मुर आन तारी जुक्ब। तन्न परमप्रभु यावे आ सोइशशो मीम दुष्शा बेक्ब आस पर्बम इन खिं डा मुर नु इसाएली डा मुर नेल्ल रोंका पचा दुम्ब। लेवी २१:१०

7 गेपुकी चहिं युम्तीक ताम्बु रे लाडगा मलने। मो पाइतीनी हना, बेक्नीनी। मारदे हना परमप्रभु यावे आ लुक्शो तेल गे इन तार बाक्ब” दैत। मिनू मेकोपुकीमी मोसा आ देशो खोदेशो पाम्तेकम।

चढेब आन कली लेंशा अरेशो

8 मिनू नोले परमप्रभु यावेमी हारून कली

9 “गे नु इ तौपुकी युम्तीक ताम्बुम ओवनीनु, अडगुर शांबु नु अरू दुक्तीक थोवक मतूडीन। तूतीनी हना, गेपुकी बेक्नीनी। मेको गेना हना यो इन पतीक दुम्ब। इजीकीएल ४४:२१; होसे ४:११; आमोस २:८

10 आं थोवक नु मुर आ थोवक तिल्चा माल्नीनी। ग्रान्रा दिशो थोवक नु चोवखो थोवक यो तिल्चा माल्नीनी। इजीकीएल २२:२६; इजीकीएल ४४:२३

11 मिनू गो मोसा कली अरेशो नेल्ल, गे इसाएली आन कली शेंचा माल्नीनी” दैत।

12 मिनू मोसामी हारून नु आ लीशो तौ एलाजर नु इथामार आन कली “परमप्रभु यावे कली मीम चोशा अन्न चढेशो रे लीशो बोरब ओरुत्ती मसुप्यु चढेतीके आ नेक्था बाक्शा जने। मारदे हना मेको थम चोवखो बाक्ब। लेवी ९:१७,१८

13 गेपुकीम मेको कली चोवखो बाक्तीकेमी जने। मारदे हना परमप्रभु यावे कली मीम चोशा चढेशो चढेतीक रे मेको गे नु इ तौ इन भाग बाक्ब। आं कली मोदें अरेशो बाक्ब। लेवी २:३

14 तन्न क्युकशा चढेशो कुथु नु हिम्शा चढेशो फिला चहिं गे इन तौ नु इन तमीम चोवखो बाक्तीकेमी बाक्शा ब्वने। मारदे हना मेको इसाएली आन दुशा बाक्चा आ पर्बम चढेशो रे गे नु इ तमी तौ इन भाग बाक्ब। लेवी ७:३४

15 मिनू हिम्शो फिला, क्युकशो कुथु नु मीम चोशा चढेशो मार मार आन बोंसो परमप्रभु यावे आ डोंइती हिम्शा चढेचा कली चाक्चा माल्नीनी। मिनू परमप्रभु यावेमी अरेशो खोदेशो पा गेना हना यो, गे नु इ तमी तौ इन भाग दुम्ब” दैत। लेवी ९:२०-२१

16 मिनू मोसामी पाप आ पर्बम चढेशो बोका माल्तु। तन्न मेको चोने थुम्शो बाक्माक्त। मिनू मेकोमी हारून आ लीशो तौ एलाजर नु इथामार आस कली गाइशशा, लेवी ९:१५

17 “गेपुकीमी मारदे पाप आ पर्बम चढेशो कली चोवखो बाक्तीकेम मब्वनी? मारदे हना मेको थम चोवखो बाक्ब। मिनू परमप्रभु यावेमी मुर आन पर्बम पाप क्याम्तीक गेय पचा, दे मेको इन कली गेशो बाक्ब।

18 मेको आ हुश ताम्बु आ आगामी मलाइशशो बाक्त। गेपुकीम थमा पा आं देशो खोदेशो पा चोवखो बाक्तीकेम मेको श्ये ब्वचा माल्शो ननी” दैत। लेवी ६:१९,२२

19 मिनू हारूनमी मोसा कली “नेनीन, मुलाक्ती मेकोपुकीमी आन पाप आ पब्रम चढ्हेतीक नु आन चोशा चढ्हेतीक परमप्रभु यावे आ डोंइती चढ्हेम्तेकम। मिनू मुलाक्त गो गिश श्येत जशो बाक्नुड। गो मुलाक्ती मेको पाप आ पब्रम चढ्देशो ब्वशो नड हना, मार, मेको परमप्रभु यावे आ डोंइती रिम्शो दुम वा डा?” देंत।

20 मिनू मेको लोव्र नेंशा मोसा सिक्सी पाप्तु।

## 11

ग्रांरा दिशो नु मदिशो

ब्यवस्था १४:३-२०

1 मिनू परमप्रभु यावेमी मोसा नु हारून आस कली

2 “गे इस्राएली आन कली ‘रागीम बाक्शो जन्तु, बस्तु भाव, चिक्ब तेक तेको ब्वचा दुम्बा, तेक तेको ब्वचा मदुम्बा, मेको शेंदीस। मिनू जन्तु नु बस्तु भाव तेको ब्वने चाप्नीनी देंशा हना, प्रेरित १०:१२-१५; कलस्सी २:१६; १तिमोथी ४:३-४

3 गेपुकीमी आन गेंच जेशो नु शोंया हेक्बपुकी ब्वने चाप्नीनी।

4 मो हना यो गेंच जेशो ला कि शोंया हेक्ब दुम्शो ला ब्वचा मदुम्ब। दलओठ मेको शोंया हेक्ब, तन्न आ गेंच मजेशो बाक्ब। मेको इन कली ग्रांरा बाक्ब।

5 मिनू शापन मब्वने। मारदे हना मेकोमी शोंया हेक्ब, तन्न आ गेंच मजेशो बाक्ब। मेको इन कली ग्रांरा बाक्ब।

6 मिनू खरायो मब्वने। मारदे हना मेकोमी शोंया हेक्ब, तन्न आ गेंच मजेशो बाक्ब। मेको इन कली ग्रांरा बाक्ब।

7 मिनू पोत्र मब्वने। मारदे हना मेको आ गेंच जेशो बाक्ब, तन्न शोंया महेक्ब। मेको इन कली ग्रांरा बाक्ब। यसैया ६५:४; यसैया ६६:१७

8 गेपुकीमी मेको आन श्ये मब्वने। आन सिनु यो मथिने। मेको इन कली ग्रांरा बाक्ब।

9 ब्वाक्कु, खोला नु समुन्द्र बाक्बपुकीमी फ्रां नु कत्ला पाइशो ब्वने चाप्नीनी।

10 तन्न समुन्द्र नु खोलाम बाक्ब फ्रां नु कत्ला मपाइशो ब्वचा मदुम्ब। मेको आइक्च ब्वाक्कुम बाक्ब जन्तु नु अरु नेल्ल सेल जन्तु इन कली ग्रांरा बाक्नीम।

11 मेको इन कली ग्रांरा बाक्तीके, मेको आन श्ये मब्वने। मिनू मेको आन सिनु इन कली ग्रांरा बाक्नीम।

12 मिनू ब्वाक्कुम बाक्ब नेल्ले फ्रां नु कत्ला मपाइशो जन्तु, इन कली ग्रांरा बाक्नीम।

13 मिनू चिक्ब आन दातेमी इन कली तेको तेको ग्रांरा दिशो नु ब्वचा मदुम्शो बाक्नीम देंशा हना, ककाकुली, गिद, क्येर गिद,

14 लल ब्वारदे नु नेल्ल खाल डा क्येर ब्वारदे, लेवी ५:२

15 खद नेल्ले,

16 टेयब हुहुचील, ग्रीब बुक्स, ब्वाक्कुम बाक्ब चिक्ब, मिनू बाज नेल्ले,

17 आइक्च हुहुचील, ब्वाक्कु डा खदी, भुल्का,

18 बुश हुहुचील, गोरशो रागी डा हुहुचीलपुकी, डाइ ब्वाइब ब्वारदे,

19 सारस, बोकुला नेल्ल, फाप्रि चिक्ब नु पकातिकती मब्वने। यसैया ६६:१७

20 फ्रां पाइशो, ४ ओटा खोइलीम गेशा गाक्ब जन्तु नेल्ल इन कली ग्रांरा बाक्नीम।

21 मिनू ४ ओटा खोइलीम गेशा गाक्ब, फ्रां पाइशो खपीम प्रेक्चा कली खोइल बोइशो नेल्ल मालेपुकी ब्वने चाप्नीनी।

22 गे सल्हा माले, खुइले माले, किथ्रो माले नु फटेडग्रापुकी ब्वने चाप्नीनी।

23 ४ ओटा खोइल पाइशो नु फ्रां पाइशो नेल्ल इन कली ग्रांरा बाक्नीम।

24 मेकोपुकी रे गेपुकी ग्रांरा दिशो दुम्नीनी। सुमी मेको आन सिनु थीबा, मेको नां मरिक्म सम्म ग्रांरा दिशो दुम्ब।

25 मिनु सुमी मेको सिनु रे इच्छा कुरबा, मेकोमी आ वा मुरचा माल्ब। मिनु नां मरिक्म सम्म ग्रांघा दिशो दुम्ब।

26 मिनु तेको जन्तु आन गेंच जेशो बाक्बा, तन्न मन्नाक्शो बाक्बा, मेको शोंया महेक्बा, मेको इन कली ग्रांघा बाक्ब। मेको थीब नेल्ल ग्रांघा दिशो दुम्नीम।

27 मिनु ब्रेप्चोम थेक्शा ४ ओटा खोइलीम गाक्ब जन्तु नेल्ल इन कली ग्रांघा बाक्नीम। मेको आन सिनु थीब नेल्ल नां मरिक्म सम्म ग्रांघा दिशो दुम्नीम।

28 मेको सुमी आन सिनु कुरब मेकोमी आ वा मुरचा माल्ब। मिनु मेको नां मरिक्म सम्म ग्रांघा दिशो दुम्ब। मेको इन कली ग्रांघा दिशो बाक्नीम।

29 मिनु खपीम ग्रेशा गाक्ब आइक्च जन्तु तेको ग्रांघा दिशो बाक्नीम देंशा हना, कोचोम्बो, यिच, टेयब नु आइक्च खोते नेल्ले,

30 माउसुली, घोरी, भाले मुडग्रो, बाल्वाम बाक्ब खोते नु रड फाइक्ब खोतेपुकी,

31 मेको ग्रेशा गाक्ब नेल्ल इन कली ग्रांघा बाक्नीम। सुमी मेको आन सिनु थीबा, मेको नां मरिक्म सम्म ग्रांघा दिशो दुम्ब।

32 मोदेंशो जन्तु बेक्शा, मार तारी दोक्बा, मेको थोव्रक ग्रांघा दिशो दुम्ब। शी के सेल्शो, वा, कुशुल, भाडग्रा नु मारेड के बाक्ल, मेको थोव्रक ब्वाक्कुम नुप्चा माल्ब। मिनु मेको नां मरिक्म सम्म ग्रांघा दिशो दुम्ब। मिनु नोले ठीक दुम्ब।

33 मिनु मेको मार मार खप के बोसुम दोक्त हना, मेको बोस नेल्ल ग्रांघा दिशो दुम्ब। गेपुकीमी मेको बोस प्रोल्चा माल्नीनी।

34 मेको आगाम ब्वाक्कु बाक्त हना, मिनु मेको ब्वाक्कुम थिशो मारेड मारेड जचा थोव्रक ग्रांघा दिशो दुम्ब। मिनु मेको बोसुम बाक्शो तूचा थोव्रक नेल्ल ग्रांघा दिशो दुम्नीम।

35 मेको आन सिनु मारेड थोव्रकम दोक्त हना, चुप्लुम बाक्त हना यो, मेको प्रेशा ताइक्चा माल्ब। मेको ग्रांघा दिशो बाक्ब। मेको गेना हना यो इन कली ग्रांघा बाक्ब।

36 मो हना यो ब्वाक्कु बुक्तीके, कुवा नु ब्वाक्कु वोइक्तीके चोव्रखो बाक्नीम। तन्न मेको आन सिनु थीब चहिं ग्रांघा दिशो बाक्ब।

37 मेको आन श्ये शोक्तीक वांचेरम दोक्त हना, मेको चहिं चोव्रखो लीब।

38 तन्न मेको आ सिनु शोक्चा कली ब्वाक्कुम वोइश्शो वांचेर तारी दोक्त हना, मेको इन कली ग्रांघा दिशो दुम्ब।

39 इन बस्तु भाव बेक्त हना, सुमी मेको कली थीब, मेको नां मरिक्म सम्म ग्रांघा दिशो दुम्ब।

40 मेको सुम ब्वाइबा, मेकोमी आ वा मुरचा माल्ब नु नां मरिक्म सम्म ग्रांघा दिशो दुम्ब। मेको सिनु कुरबमी यो आ वा मुरचा माल्ब। मिनु मेको नां मरिक्म सम्म ग्रांघा दिशो दुम्ब। प्रस्थान २२:३०

41 खपीम ग्रेशा गाक्ब जन्तु नेल्ल ग्रांघा दिशो बाक्नीम। मेको ब्वचा मदुम्ब।

42 कोव्रजीम ग्रेशा गाक्ब, ४ ओटा खोइलीम गाक्ब नु शुश खोइल पाइश्शो खपीम गाक्ब जन्तुपुकी ब्वचा मदुम्ब। मारदे हना मेकोपुकी ग्रांघा दिशो बाक्नीम।

43 मिनु गेपुकी तेकोड ग्रेशा गाक्ब जन्तु रे ग्रांघा दिशो मदुमीन। मेकोपुकी रे इन कली ग्रांघा दिशो मसेलीन।

44 मिनु गो परमप्रभु यावे, इन परमप्रभु नड। मोपतीके गेपुकी ग्रांघा दिशो मदुम्थु मेको रे डोन बाक्कीन। मारदे हना गो ग्रांघा दिशो रे डोन बाक्नुड। गेपुकी खपीम ग्रेशा गाक्ब जन्तु रे ग्रांघा दिशो मदुमीन। लेवी १९:२

45 गो परमप्रभु यावे, इन कली इजीप्त रागी रे गुंइशा एक चाक्ब, इन परमप्रभु नड। मोपतीके गेपुकी ग्रांघा दिशो रे डोन बाक्कीन। मारदे हना गो ग्रांघा दिशो रे डोन बाक्नुड 'देनो' दैत।

46 एको रागी डा जन्तु, चिक्ब नु ब्वाक्कुम गाक्ब नु खपीम ग्रेशा गाक्ब जन्तु आन पर्बम अरेतीक बाक्ब।

47 मिनु ग्रांघा दिशो नु ग्रांघा मदिशो, ब्वचा दुम्ब नु मदुम्ब जन्तु आन पर्बम तिलीन।

## 12

सुत्केरी दोपा चोव्रखेचा, दे अरेशो

1 मिनु परमप्रभु यावेमी मोसा कली

2 “इसाएली आन कली ‘कोव्रज कुरशा तौ थीब मीश मुर ७ नाक्त सम्म ग्रांग्रा दिशो बाक्ब। मेको आ रां ब्रोल्म नाक्त डा खोदेशो पा ग्रांग्रा बाक्ब। लेवी १५:१९

3 मिनु ८ नाक्ती मेको आ तौ कली खोडक्तीक चिनु खोडक्चा माल्ब। उत्पत्ती १७:१०-१२; लूका २:२१; यूहन्ना ७:२२

4 मिनु मेको मीश मुर आ हुश चोव्रखेचा कली ३३ नाक्त सम्म दुम्या माल्ब। मिनु मेकोमी चोव्रखो दुम्टीक नाक्ती मगाम सम्म मारेड चोव्रखो थोव्रक थिचा मदुम्ब। मिनु गुम्टीक ताम्बु यो ओव्रचा मदुम्ब।

5 तन्न मेकोमी तमी थिप्टु हना, आ रां ब्रोल्म नाक्त डा खोदेशो पा १४ नाक्त सम्म ग्रांग्रा दिशो बाक्ब। मिनु आ हुश चोव्रखेचा कली ६६ नाक्त दुम्या माल्ब।

6 मिनु मेको आ चोव्रखेतीक गाम नाक्ती, तौ आ पर्वम बाक्त हना यो, तमी आ पर्वम बाक्त हना यो, मेकोमी चोशा चढेचा कली बर्स का गाप्शो भेडा का नु पाप आ पर्वम चढेचा कली ढुकुर का कि परवा का गुम्टीक ताम्बु आ ओव्रतीकेम बाक्शो चढेब कली चाक्चा माल्ब।

7 मिनु चढेबमी परमप्रभु यावे आ डोंडती मेको चढेशा, मेको आ पर्वम पाप क्याम्टीक गेय पचा माल्ब। मिनु मेको आ हुश यिशो रे चोव्रखो दुम्ब। मेको मीश मुरुमी तौ कि तमी थिवा नोले, एको पचा माल्शो अरेतीक लोव्र बाक्ब।

8 मिनु मेकोमी भेडा चाक्ने मचाप्बाक्त हना, ढुकुर निकशी कि परवा निकशी चाक्चा माल्ब। मेको का चोशा चढेतीक नु का पाप आ पर्वम चढेतीक बाक्ब। मिनु चढेबमी मेको चढेशा मेको आ पर्वम पाप क्याम्टीक गेय पचा माल्ब। मिनु मेको ग्रांग्रा मदिशो दुम्ब’ माडक्मी” देंत। लेवी ५:७; लूका २:२४

## 13

कोव्र पाडब आन कली पचा माल्शो

1 परमप्रभु यावेमी मोसा नु हारून आस कली गन्ती १२:१०-१२; ब्यवस्था २४:८-९; अय्युब १८:१३

2 “सुड मुर आन रां डा कुशुल बोरत हना, गार दुम्ट हना, बुश दुम्ट हना, मेको कोव्र खोदेशो दुम्ट हना, मेको कली चढेब हारून कि आ तौ का आ बाक्तीके चाक्चा माल्ब।

3 मिनु मेको चढेबमी आ रांम दुम्टो गार कोव्रचा माल्ब। मिनु मेको आ गारम बाक्शो चां बुश बाक्त नु मेको आ गार इक्का लुकच लशो बाक्त हना, मेको याक्सीब रोड बाक्ब। मिनु चढेबमी मेको कली कोव्रडा नोले ‘एको ग्रांग्रा बाक्ब’ देंचा माल्ब।

4 तन्न मेको कुशुल डा बुश गार कुशुल लुकच मलशो बाक्त हना, मिनु मेकेर वाशो चां यो बुश मदुम्टो बाक्त हना, चढेबमी मेको रोड पाडब मुर कली ७ नाक्त सम्म तिल्ला वोडक्चा माल्ब।

5 मिनु चढेबमी ७ नाक्त नोले मेको गार लेंशा कोव्रचा माल्ब। मिनु मेको कुशुल डा गार एर ओंथ मबारशो बाक्त हना, चढेबम मेको कली अर्को ७ नाक्त सम्म तिल्ला वोडक्चा माल्ब।

6 मिनु लेंशा ७ नाक्त नोले चढेबमी कोव्रडानु, आ गार बारचा नांइसाक्व हना, आ कुशुलम मब्रशो बाक्त हना, चढेबम मेको कली ग्रांग्रा मदिशो बाक्ब, मेको गार ला बाक्ब, देंचा माल्ब। मेको मुर आ वा मुरचा माल्ब। मिनु मेको चोव्रखो दुम्ब।

7 तन्न चढेबमी ‘चोव्रखो दुम्ट’ देंम नोले यो गार बारत हना, मेको लेंशा चढेब आ बाक्तीक जाक्शा, आ गार कोड्चा माल्ब।

8 मिनु चढेबमी लेंशा कोव्रचा माल्ब। आ गार कुशुलम बारशा लशो बाक्त हना, चढेबमी ‘मेको कली ग्रांग्रा दिशो बाक्ब’ देंचा माल्ब। मेको कोव्र खोदेशो याक्सीब रोड बाक्ब।

9 मिनु सुड मुर कली कोव्र खोदेशो याक्सीब रोड दुम्टो बाक्त हना, चढेब आन बाक्तीकेम चाक्चा माल्ब।

10 मिनु चढेबमी मेको कली कोव्रचा माल्ब। मिनु आ कुशुल बुश दुम्टा बोरशो बाक्त हना, नु मेको आ गार डा चां बुश दुम्टा, बोरशो कुशुल डा गारम श्ये तांइसाक्व हना,

11 मेको शुश नाक्ती सम्म बाक्ब कुशुल डा रोड कोव्र बाक्ब। मिनु चढेबमी मेको कली 'ग्रांग्रा दिशो बाक्ब' देंचा माल्ब। मेकोमी मेको कली तिल्शा वोडक्चा ममाल्ब। मारदे हना मेको ग्रांग्रा दिशो बाक्ब।

12 मिनु मेको आ रोड कुशुलम बारना बारन लशा, चढेबमी कोव्रडानु, आ गार पिया रे खोइल सम्म बाक्त हना,

13 चढेबमी मेको कली रिम्शो पा कोव्रचा माल्ब। मिनु मेको कुशुल डा रोडम आ रां नेल्ल कली सुम्शो बाक्त हना, चढेबमी मेको कली 'ग्रांग्रा मदिशो बाक्ब' देंचा माल्ब। मारदे हना मेको आ रां नेल्ल बुश दुम्तीके, मेको मुर ग्रांग्रा मदिशो बाक्ब।

14 तन्न मेको मुर आ रांम श्ये तांडसाक्व हना, मेको ग्रांग्रा दिशो बाक्ब।

15 मिनु चढेबमी मेको तांडसीशो श्ये कोव्रशा, मेको कली 'ग्रांग्रा दिशो बाक्ब' देंचा माल्ब। मेको तांडसीशो श्ये ग्रांग्रा बाक्ब। मारदे हना मेको कोव्र बाक्ब।

16 तन्न मेको तांडसीशो श्ये लेंशा बुश दुम्त हना, मेको मुर लेंशा चढेब आ बाक्तीक लचा माल्ब।

17 मिनु मेको गार बुश दुम्शो बाक्त हना, मेको चढेबमी ग्रांग्रा मदिशो बाक्ब देंचा माल्ब। मिनु मेको मुर चोव्रखो बाक्ब।

18 सुइ मुर आ रांमी कान यूशा, सात हना,

19 मिनु मेको कान यूशा साशो गारम बुश दुम्शा, बोरत हना, कि लल दुम्शा बुश पा बोरत हना, मेको मुरुमी मेको आ गार चढेब कली कोइचा माल्ब।

20 मिनु चढेबमी रिम्शो पा कोव्रडानु, मेको गार लुकच लशो बाक्त नु चां यो बुश दुम्शो बाक्त हना, मेको कली 'ग्रांग्रा दिशो बाक्ब' देंचा माल्ब। मेको कोव्र खोदेशो रोड कान रे यूशो बाक्ब।

21 तन्न चढेबमी रिम्शो पा कोव्रडानु, मेकेर बुश चां मयूशो बाक्त नु मेको कुशुल क्येडा लुकच मलशो बाक्त हना, तन्न सोव्रना सोव्रन, जाम्ना जाम्न लशो बाक्त हना, चढेबमी मेको कली ७ नाक्त सम्म तिल्शा वोडक्चा माल्ब।

22 मेको गार कुशुलम बारना बारन लत हना, चढेबमी मेको कली 'ग्रांग्रा दिशो बाक्ब' देंचा माल्ब। मारदे हना मेको याक्सीब रोड बाक्ब।

23 तन्न मेको गार एर ओंथ मबारथु, मेक उइ ला बाक्त हना, मेको कान आ खत बाक्ब। चढेबमी मेको कली 'ग्रांग्रा मदिशो बाक्ब' देंचा माल्ब।

24 सुइ मुर आन रांमी दुप्शा गार दुम्त नु मेको दुप्शो गारम नक श्ये यूशा, लल दुम्त हना यो, बुश दुम्त हना यो,

25 चढेबमी मेको गार रिम्शो पा कोव्रचा माल्ब। मिनु मेको गार डा चां बुश दुम्शा, कुशुल क्येडा लुकच लशो बाक्त हना, मेको याक्सीब रोड बाक्ब। मेको दुप्शो गार रे यूशो बाक्ब। मिनु चढेबमी मेको कली 'ग्रांग्रा दिशो बाक्ब' देंचा माल्ब। मेको कुशुल डा याक्सीब रोड बाक्ब।

26 तन्न चढेबमी रिम्शो पा कोव्रडानु, मेको गार डा चां बुश मबाक्थु नु कुशुल क्येडा लुकच मलथु, सोव्रना सोव्रन बाक्त हना, चढेबमी मेको मुर कली ७ नाक्त सम्म तिल्शा वोडक्चा माल्ब।

27 मिनु चढेबमी मेको कली ७ नाक्त नोले रिम्शो पा कोव्रचा माल्ब। मिनु मेको कुशुलम एर ओंथ बारशो बाक्त हना, चढेबमी मेको कली 'ग्रांग्रा दिशो बाक्ब' देंचा माल्ब। मेको याक्सीब कुशुल डा रोड बाक्ब।

28 तन्न मेको गार एर ओंथ मबारथु, सोव्रना सोव्रन लशो बाक्त हना, मेको दुप्शो रे होम्शो ला बाक्ब। मिनु चढेबमी मेको कली 'ग्रांग्रा मदिशो बाक्ब' देंचा माल्ब। मारदे हना, मेको दुप्शो गार आ खत ला बाक्ब।

29 सुइ मीश मुर, वोंइश मुर आन पियाम, गाल शोक्रेम मारेइ गार का बाक्त हना,

30 चढेबमी मेको गार रिम्शो पा कोव्रचा माल्ब। मिनु मेको कुशुल क्येडा लुकच लशो बाक्त हना, नु मेको गार डा चां हाव जिशो नु आइक्च बाक्त हना, चढेबमी मेको कली 'ग्रांग्रा दिशो बाक्ब' देंचा माल्ब। मेको रक सुइब आ पिया डा नु गाल शोक्रे डा याक्सीब रोड बाक्ब।

31 मिनू चढेबमी मेको रक सुइब रोइ रिम्शो पा कोव्रडानु, मेको कुशुल क्येडा लुकच मलशो नु मेकेर क्येर चां यो मबाक्तेकम हना, चढेबम मेको कली ७ नाक्त सम्म तिल्शा वोइक्चा माल्ब।

32 मिनू ७ नाक्त नोले चढेबमी मेको कली रिम्शो पा कोव्रचा माल्ब। मिनू मेको रक सुइब रोइ मबारशो बाक्त हना, मेक डा चां हाव मजिशो बाक्त नु गार यो कुशुल क्येडा लुकच मलशो बाक्त हना,

33 मेकोमी गार प्रॉइशा आ चां प्रेक्चा माल्ब। मिनू चढेबम मेको रोइ पाइब कली अर्को ७ नाक्त सम्म तिल्शा वोइक्चा माल्ब।

34 मिनू ७ नाक्त नोले चढेबमी मेको रक सुइब गार रिम्शो पा कोव्रचा माल्ब। मिनू मेको मबारथु, कुशुल क्येडा लुकच मलशो बाक्त हना, चढेबमी मेको कली 'ग्रांग्रा मदिशो बाक्ब' देंचा माल्ब। मिनू मेको मुर आ वा मुरशा, चोव्रखो दुम्ल।

35 तन्न मेको चोव्रखो दुम नोले यो मेको रक सुइब रोइ बारशा लत हना,

36 चढेबमी मेको गार रिम्शो पा कोव्रचा माल्ब। मेको कुशुलम बारशा लशो बाक्त हना, चढेबमी मेकेर डा चां हाव बाक्म को मबाक्म, दे कोव्रचा ममाल्ब। मेको मुर ग्रांग्रा दिशो बाक्ब।

37 तन्न चढेबमी मेको रक सुइब रोइ रिम्शो पा कोव्रडानु मेकेर क्येर चां वाशो बाक्त हना, मेको साशो बाक्ब। मेको ग्रांग्रा मदिशो बाक्ब। मिनू चढेबम मेको कली 'ग्रांग्रा मदिशो बाक्ब' देंचा माल्ब।

38 सुइ मीश मुर, वॉइश मुर आन रांम बुश गारपुकी बाक्तेकम हना,

39 चढेबमी मेको रिम्शो पा कोव्रचा माल्ब। मिनू मेको आन रां डा गारपुकी बुश बाक्तेकम हना, मेको कुशुल डा रोइ ला बाक्ब। मेको कुशुल रे ला ग्रूशो बाक्ब। मेको मुर ग्रांग्रा मदिशो बाक्ब।

40 सुइ मुर आन पिया डा चां दुल्शो बाक्त हना, मेको ग्रांग्रा मदिशो बाक्नीम।

41 मेको आ चां कुप्फी रे दुल्शो बाक्त हना, मेको ग्रांग्रा मदिशो बाक्ब।

42 तन्न मेको आन कुप्फीमी लल बुश गार ग्रूत हना, मेको कुप्फीम ग्रूशो याक्सीब रोइ बाक्ब

43 मिनू चढेबमी मेको कली रिम्शो पा कोव्रडानु, आ कुप्फीम होम्शो गार लल बुश नु कोव्रर खोदेंशो तांडसाक्व हना,

44 मेको मुर कोव्रर पशो नु ग्रांग्रा दिशो बाक्ब। मिनू चढेबमी मेको कली 'ग्रांग्रा दिशो बाक्ब' देंचा माल्ब। मेको रोइ आ पियाम बाक्ब।

**कोव्रर पाइबमी मार पचा माल्शो**

45 कोव्रर पशो मुरुम गाक्शो वा फेक्शा, आ पियाम मारेइ गुप्चा मदुम्ब। मेकोमी आ गाल शोक्रे कली सुम्शा 'ग्रांग्रा दिशो, ग्रांग्रा दिशो' दे ग्रीचा माल्ब।

46 मेको आ रोइ गेना सम्म लीबा, मेना सम्म मेको ग्रांग्रा दिशो दुम्ब। मेको आ कांडचीक बाक्चा माल्ब। मिनू मेको मुर आन बाक्तीक क्येडा डोन बाक्चा माल्ब। गन्ती ५:२-३; २राजा १५:५

**बुंखी डाइशो थोव्रक**

47 मिनू वाम बुंखी डाइक्ताक्व हना, ऊन के वासी बाक्त हना यो, सुती के वासी बाक्त हना यो,

48 फेक्तीक नेल्ल, कुशुल के सेल्शो मारेइ मारेइमी

49 बुंखी डाइशो गिगी लल लुम्सीशो बाक्त हना, वासी नेल्ल नु मारेइ मारेइ चढेब कली कोइंचा माल्ब।

50 मिनू चढेबमी मेको रिम्शो पा कोव्रचा माल्ब। मिनू मेको बुंखी डाइशो थोव्रक आन कली ७ नाक्त सम्म तिल्शा वोइक्चा माल्ब।

51 मिनू चढेबमी ७ नाक्त नोले लेंशा रिम्शो पा कोव्रचा माल्ब। मिनू मेको वासी, कुशुल के सेल्शो मारेइ थोव्रकीम बुंखी बारशा लशो बाक्त हना, मेको बिग्रेब बुंखी डाइशो बाक्ब। मेको थोव्रक ग्रांग्रा दिशो बाक्ब।

52 मिनू मेकोमी बुंखी डाइशो वासी कि कुशुल के सेल्शो मारेइ थोव्रक चोचा माल्ब। मारदे हना मेको राक्ब बुंखी बाक्ब। मेको मीम चोचा माल्ब।

53 तन्न चढेबमी रिम्शो पा कोव्रडानु, मेको वासी, कि कुशुल के सेल्शो मारेइ थोव्रकम मेको बुंखी मबारशो बाक्त हना,

54 मिनू चढेबमी मेको मुर कली 'मेको बुंखी डाइशो थोव्रक मुरचा माल्ब' दे अरेचा माल्ब। मिनू मेकोमी चिनु ७ नाक्त सम्म मेको वासी कली तिल्शा वोइक्चा माल्ब।

55 मेको मुरशो नोले चढेबम मेको कली रिम्शो पा कोव्रचा माल्ब। मिनू मेको बुंखी आ लुम्सीशो रड मफांडसीशो बाक्त हना यो, मेको ग्रांरा दिशो बाक्ब। मेको बुंखी आ तार गे बाक्त हना यो, आगा गे बाक्त हना यो, मेको कली मीम चोचा माल्ब।

56 तन्न चढेबमी मेको मुरशो नोले कोव्रडानु, बुंखी जाम्ना जाम्न लशो बाक्त हना, मेको वासी कि मारेड मारेड कुशुल के सेल्शो मेको लुम्सीशो ला खाक्शा ताइक्चा माल्ब।

57 तन्न मेको बुंखी, वासी, कुशुल के सेल्शो मारेड मारेडमी लेंशा तांडसाक्व हना, मेको बारना बारन लशो बाक्ब। मेको बुंखी डाइशो थोव्रक मीम चोचा माल्ब।

58 मिनू मेको वासी, कुशुल के सेल्शो मारेड मारेड थोव्रक मुरशोनू, मेको रे बुंखी लत हना, मेको लेंशा मुरचा माल्ब। मेको ग्रांरा मदिशो बाक्ब।

59 ऊन के सेल्शो वासीम, सुती के वासी नु कुशुल के सेल्शो मारेड थोव्रकम बुंखी डाइशो आ पर्बम ग्रांरा दिशो नु मदिशो आन पर्बम पचा माल्शो गेय एकोन बाक्नीम, दे शेंचा" दे मोसा नु हारून आस कली देंत।

## 14

कोव्रर साम नोले पचा माल्शो

1 मिनू परमप्रभु यावेमी मोसा कली

2 "कोव्रर खोदेंशो पा रोड पशो मुर कली आ रोड साम नोले मार पचा माल्ब देशा हना, मुरुमी मेको कली चढेब आन बाक्तीक चाक्चा माल्नीम। मती ८:४

3 मिनू चढेबमी मुर आन बाक्तीके रे लाडगा यूशा, मेको मुर कली रिम्शो पा कोव्रचा माल्ब। मिनू मेको कुशुल डा याक्सीब रोड साशो बाक्त हना,

4 मेको चढेबमी मेको चोव्रखो सेल्चा पुंडसीशो मुर आ पर्बम 'सेस नु चोव्रखो चिक्ब निकशी, लेबानोन डा लाइशो रवा आ शी, लल रडम नुष्शो ऊन नु हिस्सोप चाक्को' दे अरेचा माल्ब। लेवी ११:३-२०; गन्ती १९:६

5 मिनू चढेबमी 'मेको चिक्ब निकशीमी का खप के सिक्स ब्वाक्कुम ब्रीशो बोस तारी सतो' दे अरेचा माल्ब।

6 मिनू चढेबमी मेको सेस चिक्ब, मेको लेबानोन डा लाइशो रवा आ शी, मेको लल रडम नुष्शो ऊन नु हिस्सोप मेको सिक्स ब्वाक्कु तारी साइशो चिक्ब आ हुशेमी खुम्शा गुंडचा माल्ब।

7 मिनू मेकोमी रोड रे साशो चोव्रखो सेल्चा पुंडसीब मुर कली ७ खेयप बुइशशा 'चोव्रखो बाक्ब' देंचा माल्ब। मिनू मेकोमी मेको सेस चिक्ब कली प्रोइशा बेरपाइक्चा माल्ब। लेवी १६:२२

8 मिनू मेको चोव्रखो सेल्चा पुंडसीशो मुरुम आ वा मुरचा माल्ब। आ चां नेल्ल प्रेक्शा, चिक्चा माल्ब। मिनू मेको ग्रांरा मदिशो चोव्रखो दुम्ब। मिनू नोले मुर आन बाक्तीके लचा दुम्ब। तन्न ७ नाक्त सम्म आ ताम्बु आ लाडगाम बाक्चा माल्ब। गन्ती ८:७

9 मिनू ७ नाक्त नोले मेकोमी आ चां, गाल शोक्के, मुकुक्स नेल्ल प्रेक्चा माल्ब। मिनू नोले आ वा मुरशा, चिक्चा माल्ब। मिनू मेको मुर चोव्रखो दुम्ब।

10 मिनू ८ नाक्त नोले मेकोमी मारेड मदुम्शो थम रिम्शो सांड निकशी नु बर्स का दुम्शो मारेड मदुम्शो थम रिम्शो पाठी का, अन्न चढेचा कली तेलम निशो थम रिम्शो फस एफाह का के ३० भाग नु लोग का तेल चाक्चा माल्ब। एफाह पुक्तीके का बाक्ब। एफाह का २२ लिटर रिक्ब। मेको डा ३० भाग ६.५ लिटर खोदेंशो बाक्ब। नेल्ल १२ माना खोदेंशो बाक्ब। लोग का पुक्तीके का बाक्ब। मेको ०.३ लिटर रिक्ब।

11 मिनू चढेबमी मेको चोव्रखो सेल्चा पुंडसीशो मुर नु मेको आ चाक्को नेल्ल परमप्रभु यावे आ डोइती गुम्तीक ताम्बु आ ओव्रतीकेम वोइक्चा माल्ब।

12 मिनु चढेबमी सांड का नु मेको लोग का तेल गारचा आ पबर्म चढेचा मालब। मिनु क्युकशा हिम्शा चढेतीक परमप्रभु यावे आ डोंडती चढेचा मालब। लोग आइक्च पुक्तीके बाक्ब। मेको ०.३ लिटर रिक्ब।

13 मिनु मेकोमी पाप आ पबर्म चढेतीक नु चोशा चढेतीक साइक्तीके मेको चोत्रखो बाक्तीकेम साइक्चा मालब। मारदे हना गारचा आ पबर्म चढेशो नु पाप आ पबर्म चढेशो चढेब के दुम्ब। मेको थम चोत्रखो बाक्ब। लेवी ७:७

14 मिनु चढेबमी मेको गारचा आ पबर्म चढेशो आ हुश लाइशशा, मेको चोत्रखो सेल्चा पुंडसीशो मुर आ ग्युरा नोफा आ फेनेम, आ ग्युरा गुइ डा बोंग्ये नु आ ग्युरा खोइल डा बोंग्येमी खेक्चा मालब। लेवी ८:२३; प्रस्थान २९:२०

15 मिनु चढेबमी मेको तेल रे इक्का लाइशशा, आ पेरा गुइ डा ताप्लाम लुकचा मालब।

16 मिनु चढेबमी आ ग्युरा गुइ डा ब्रेप्चोम आ पेरा गुइम बाक्शो तेलम खुम्शा, परमप्रभु यावे आ डोंडती ७ खेयप बुइक्चा मालब। लेवी ४:६, १७

17 मिनु चढेबमी आ गुइम लीशो तेल चोत्रखो सेल्चा पुंडसीशो मुर आ ग्युरा नोफा डा फेनेम, मेको आ ग्युरा गुइ डा बोंग्येमी नु आ ग्युरा खोइल डा बोंग्येम नु गारचा आ पबर्म चढेशो आ हुश तारी खेक्चा मालब।

18 मिनु चढेबमी आ गुइम लीशो तेल मेको चोत्रखो सेल्चा पुंडसीशो मुर आ पियाम खेक्चा मालब। मिनु चढेबमी परमप्रभु यावे आ डोंडती मेको मुर आ पबर्म पाप क्याम्तीक गेय पचा मालब।

19 मिनु चढेबमी मेको आ पाप आ पबर्म चढेचा मालब। मोपा मेको चोत्रखो सेल्चा पुंडसीशो मुरुम पाप क्याम्तीक गेय पशो बाक्ब। मिनु नोले मेकोमी चोशा चढेतीक क्योरचा मालब।

20 मिनु चढेबमी मेको चोशा चढेतीक नु अन्न चढेतीक चढेतीकेम चढेचा मालब। मोपा मेको चढेबमी मेको आ पबर्म पाप क्याम्तीक गेय पचा मालब। मिनु मेको मुर ग्रंथा मदिशो चोत्रखो दुम्ब।

21 मिनु मेको मुर पुडग बाक्त हना, मोशो यो चाकने मचापबाक्त हना, मेकोमी आ पाप क्याम्तीक गेय आ पबर्म क्युकशा हिम्शा चढेचा कली सांड का नु अन्न चढेचा कली तेलम निशो एफाह का के १० भाग थम रिम्शो फस नु लोग का तेल चाक्चा मालब। एफाह पुक्तीके का बाक्ब। एफाह का २२ लिटर रिक्ब। मेको के १० भाग २ लिटर नु इक्का खोइ बाक्ब। लोग आइक्च पुक्तीके का बाक्ब। मेको ०.३ लिटर रिक्ब।

22 मिनु आ चाप्शो खोदेशो पा परवा निक्शी कि ढुकुर निक्शी, का पाप आ पबर्म चढेचा कली नु का चोशा चढेचा कली चाक्चा मालब। लेवी ५:७

23 मिनु मेकोमी ८ नाक्ती आम कली चोत्रखो सेल्पाइक्चा कली मेको निक्शी ग्रुम्तीक ताम्बु आ ओत्रतीक परमप्रभु यावे आ डोंडती चढेब आ बाक्तीकेमी चाक्चा मालब।

24 मिनु चढेबमी गारचा आ पबर्म चढेचा कली मेको सांड नु लोग का तेल चाक्शा, क्युकशा, हिम्शा, चढेतीके परमप्रभु यावे आ डोंडती क्युकशा हिम्शा चढेचा मालब। लोग का इप्साली आन आइक्च पुक्तीक का बाक्ब। मेको ०.३ लिटर रिक्ब। मेको माना का नु इक्का खोइ खोदेशो बाक्ब।

25 मिनु चढेबमी मेको गारचा आ पबर्म चढेतीक सांड क्योरशा, मेको आ हुश इक्का लाइशशा, चोत्रखो सेल्चा पुंडसीब मुर आ ग्युरा नोफा डा फेनेम, आ ग्युरा गुइ डा बोंग्ये नु आ ग्युरा खोइल डा बोंग्येमी खेक्चा मालब।

26 मिनु चढेबमी मेको तेल इक्का आ पेरा गुइ डा ताप्लाम लुकचा मालब।

27 मिनु आ ग्युरा गुइ डा ब्रेप्चोम पेरा गुइम बाक्शो तेल परमप्रभु यावे आ डोंडती ७ खेयप बुइक्चा मालब।

28 मिनु चढेबमी आ गुइम बाक्शो तेल मेको चोत्रखो सेल्चा पुंडसीब मुर आ ग्युरा नोफा आ फेनेम, आ ग्युरा गुइ डा बोंग्ये नु आ ग्युरा खोइल डा बोंग्येम गारचा आ पबर्म चढेशो आ हुश खेक्शो तार खेक्चा मालब।

29 मिनु चढेबमी आ गुइम लीशो तेल मेको चोत्रखो सेल्चा पुंडसीब मुर आ पियाम खेक्चा मालब। मोपा मेकोमी चोत्रखो सेल्चा पुंडसीब मुर कली परमप्रभु यावे आ डोंडती पाप क्याम्तीक गेय पाइब।



30 मिनु मेकोमी हुकुर कि परवा आ चाप्शो खोदेशो पा चढेचा मालब।

31 मिनु का पाप आ पर्बम, का चोशा चढेचा कली अन्न चढेतीक नु चढेचा मालब। मोपा चढेबमी चोत्रखो सेल्चा पुंडसीब मुर आ पर्बम परमप्रभु यावे आ डोंइती पाप क्याम्तीक गेय पचा मालब।

32 कुशुल डा याकसीब रोइ पशा, चोत्रखो दुम्तीक आ पर्बम पुडग आन पचा माल्शो गेय एको बाक्ब” देत। लेवी १३:४७-५९

### बुंखी डाइश्शो खिं

33 परमप्रभु यावेमी मोसा नु हारून आस कली

34 “मुल गो इन कली गेशो कनान रागीम जाकदीश्शा बाकनीनु, इन आंम के सेल्नी नोले, गो मेको रागी डा तेकोइ खिंम बुंखी डाइक्पाइक्ता हना,

35 मेको खिं डा मुर जाकशा चढेब कली ‘आं खिंम बुंखी डाइश्शो खोदेशो तांडसाक्व’ देंचा मालब। लेवी १३:२

36 मिनु चढेबमी ‘आं जाकशा रिम्शो पा कोत्रचा क्येडा डोंइती इ खिं कली श्येत्य पावो। मो मपाइतीनी हना खिंम बाक्शो मारेइ मारेइ ग्रांरा दिशो दुम्ब’ दे अरेचा मालब। मिनु नोले मेको चढेब मेको खिं कोत्रथ लचा मालब।

37 मिनु मेकोमी मेको बुंखी डाइश्शो रिम्शो पा कोत्रचा मालब। मेको खिं डा गारो गिगी, लल दुम्शा, गारो क्येडा लुकच लशो बाक्त हना, लेवी १३:३

38 चढेब खिं रे लाडगा गूशा, ७ नाक्त सम्म लाप्यो चोक्शा वोइक्चा मालब।

39 मिनु मेको चढेब ७ नाक्त नोले जाकशा, मेको बुंखी गारोम बारशो बाक्म कों मबाक्म रिम्शो पा कोत्रचा मालब। मिनु मेको गारोम बारशो बाक्त हना,

40 चढेबमी मेको बुंखी डाइश्शो फुल्लु गुंडपाइश्शा, सहर क्येडा डोन ग्रांरा दिशो ताइक्तीकेमी ताइक्पाइक्चा मालब।

41 मेको खिं आगा तेइ तेइ खोतेर पपाइक्चा मालब। मिनु खोतेर पाइश्शो खप सहर क्येडा डोन ग्रांरा दिशो ताइक्तीकेमी ताइक्पाइक्चा मालब।

42 मिनु नोले मेकोपुकीमी ताइश्शो फुल्लु आ पा डा अर्को फुल्लु चाक्शा, मेको फुल्लु बाक्तीकेम प्रोत्रचा मालनीम। मिनु नक खप चाक्शा, खिं सिल्चा मालनीम।

43 मिनु फुल्लु गुंडशा, अर्को फुल्लु प्रोत्रशा, खप खोतेर पा गुंडशा, अर्को खप सिल्शा यो, मेको बुंखी लेंशा गूत हना,

44 चढेबमी लेंशा जाकशा, रिम्शो पा कोत्रचा मालब। मिनु मेको बुंखी खिंम बारना बारन लशो बाक्त हना, मेको बारतीक बुंखी डाइश्शो बाक्ब। मेको खिं ग्रांरा बाक्ब।

45 मिनु मेको खिं कली प्रेत्वा मालब। मेको आ फुल्लु, शी नु सिल्शो खप सहर क्येडा डोन ग्रांरा दिशो ताइक्तीकेमी ताइक्चा मालब।

46 मिनु सुइ मेको खिं चोक्शो नोले ओव्रत हना, मेको नां मरिक्म सम्म ग्रांरा दिशो दुम्ब। लेवी ११:२४

47 मिनु सुइ मेको खिंमी इप्त हना यो, जापु हना यो, मेकोमी आ वा मुरचा मालब।

48 तन्न चढेबमी मेको खिं रिम्शो पा कोत्रडानु, सिल्शा फिक्शा नोले मेको बुंखी डाइश्शो मबारत हना, चढेबमी मेको खिं कली ‘ग्रांरा मदिशो चोत्रखो बाक्ब’ देंचा मालब। मारदे हना मेको बुंखी जाम्शा लत।

49 मिनु मेको खिं डा मुरुमी खिं कली चोत्रखो सेल्चा कली चिक्ब निक्शी, लेबानोन डा लाइश्शो रवा आ शी, हिस्सोप नु लल श्येले चाक्चा मालब।

50 मिनु चढेबमी ‘मेको चिक्ब निक्शीमी का खप के सिक्स ब्वाक्कुम ब्रीशो बोस तारी सतो’ दे अरेचा मालब। लेवी १४:४-७

51 मिनु चढेबमी मेको लेबानोन डा लाइश्शो रवा आ शी, हिस्सोप नु लल रडम नुप्शो श्येले नु मेको सेस चिक्ब लाइश्शा, मेको नेल्ल कली मेको सिक्स ब्वाक्कु तारी साइश्शो चिक्ब आ हुशेमी खुम्शा गुंडचा मालब। मिनु मेकोमी मेको खिं कली ७ खेयप बुइक्चा मालब।

52 मोपा मेकोम चिक्ब आ हुश, सिक्स ब्वाक्कु, सेस चिक्ब, लेबानोन डा लाइशो रवा आ शी, हिस्सोप नु लल रडम नुप्शो श्येलेमी मेको खिं ग्रांघा मदिशो चोव्रखो सेल्चा माल्ब।

53 मिनु मेकोमी मेको सेस चिक्ब कली सहर रे लाडगा प्रोंडशा बेरपाइक्चा माल्ब। मोपा मेकोमी मेको खिं डा बुंखी क्यामतीक गेय पचा माल्ब। मिनु मेको खिं ग्रांघा मदिशो चोव्रखो दुम्ब।

54 मिनु कुशुल डा याक्सीब रोड नेल्ल, रक सुडब रोड,

55 वासी नु खिं डा बुंखी डाइक्तीके,

56 होम्शो नु आइक्च गार नु बुश लुम्सीशो गारपुकी चोव्रखो सेल्टीक गेय एकोन बाक्नीम।

57 ग्रांघा दिशो नु मदिशो तुइक्तीक एको बाक्ब। मेको कोव्रर नु कोव्रर खोदेशो रोड नु बुंखी डाइशो आन पर्वम पतीक गेय एकोन बाक्नीम” दे परमप्रभु यावेमी मोसा नु हारून आस कली माइक्तीम्सी।

## 15

### वोंडश मुर आ रां डा ग्रांघा दिशो

1 परमप्रभु यावेमी मोसा नु हारून आस कली

2 “इस्त्राएली आन कली ‘सुड वोंडश मुर आन के मार मार यित हना यो, मेको यितीके मेको मुर ग्रांघा दिशो बाक्ब। गन्ती ५:२

3 मेको आ रां रे यितीके मार बाक्ब देशा हना, रां रे यित हना यो, देक्त हना यो, मेको मुर ग्रांघा दिशो बाक्ब।

4 मेको मुर इप्शो ब्राख्ये नेल्ल नु आ निशो नित्तीके नेल्ल ग्रांघा दिशो बाक्नीम।

5 सुमी मेको आ ब्राख्ये थीबा, मेकोमी आ वा मुरशा, चिक्सीचा माल्ब। मिनु मेको नां मरिक्म सम्म ग्रांघा दिशो दुम्ब।

6 मिनु सु मेको आ नित्तीकेमी निप्बा, मेकोमी आ वा मुरशा, चिक्सीचा माल्ब। मिनु मेको नां मरिक्म सम्म ग्रांघा दिशो दुम्ब।

7 सुमी मेको मुर कली थीबा, मेकोमी आ वा मुरशा, चिक्सीचा माल्ब। मिनु मेको नां मरिक्म सम्म ग्रांघा दिशो दुम्ब।

8 मेको मुरुमी चोव्रखो मुर कली तोक्ताक्व हना, मेको चोव्रखो मुर चिक्सीचा माल्ब। मेकोमी आ वा मुरशा माल्ब। मिनु मेको नां मरिक्म सम्म ग्रांघा दिशो दुम्ब।

9 मेको मुर तेको शारा तार ब्रतीके थेंकाम निप्बा, मेको ग्रांघा दिशो दुम्ब।

10 सुमी मेको आ नित्तीके थीबा, मेको नां मरिक्म सम्म ग्रांघा दुम्ब। सुमी मेको थोव्रक कुरबा, मेकोमी आ वा मुरशा, चिक्सीचा माल्ब। मेको नां मरिक्म सम्म ग्रांघा दुम्ब।

11 मेको मुरुमी आ गुड मचिक्थु, सुड कली थिप्तु हना, मेको थिचा पुंइसीब मुरुम आ वा मुरशा, चिक्सीचा माल्ब। मिनु मेको नां मरिक्म सम्म ग्रांघा दुम्ब।

12 मेको मुरुम तेकोइ खप के बोस थिप्तु हना, मेको प्रोल्चा माल्ब। तन्न शी के बाक्त हना, ब्वाक्कुम शेक्चा माल्ब। लेवी ११:३३

13 मेको मुरुमी आ ग्रांघा दिशो देक्म नोले, चोव्रखो दुम्चा कली ७ नाक्त रिम्चा माल्ब। मिनु आ वा मुरशा, आ रां नेल्ल ब्वाक्कुम चिक्सीचा माल्ब। मिनु मेको चोव्रखो दुम्ब।

14 मिनु मेकोमी ८ नाक्ती परवा निक्शी कि हुकुर निक्शी कुरशा, परमप्रभु यावे आ डोंडती गुम्तीक ताम्बु आ ओव्रतीक जाक्शा, मेको चढेब कली गेचा माल्ब। लेवी ५:७

15 मिनु चढेबमी मेको का पाप आ पर्वम नु का चोशा चढेतीक चढेचा माल्ब। मोपा चढेबमी मेको ग्रांघा दिशो यिशो मुर आ पर्वम परमप्रभु यावे आ डोंडती पाप क्यामतीक गेय पचा माल्ब।

16 मिनु सुड वोंडश मुर आ बिउ मोशा यित हना, मेकोमी आ रां नेल्ल ब्वाक्कुम चिक्सीचा माल्ब। मिनु मेको नां मरिक्म सम्म ग्रांघा दुम्ब। लेवी २२:४

17 मिनु आ बिउ तेको वा नु कुशुल के सेल्लो मारेइमी दोक्त हना, मेको मुरचा माल्ब। मिनु मेको नां मरिक्म सम्म ग्रांघा दुम्ब।

18 सुइ वोंइश मुर मीश मुर नु इम्मेनु, बिउ दोक्त हना, मेको निम्फा चिकसीचा माल्नीस। मिनु नां मरिक्म सम्म ग्रांघ्रा दुम्नीस।

मीश मुर आ रां डा ग्रांघ्रा दिशो

19 सुइ मीश मुर मथिचा दुम्त हना, मेको आ रां डा दुम्तीक बाक्ब। मेको ७ नाक्त सम्म ग्रांघ्रा दिशो दुम्ब। सुम मेको कली थीबा, मेको नां मरिक्म सम्म ग्रांघ्रा दिशो बाक्ब। लेवी १८:१९

20 मेको मीश मुर ग्रांघ्रा दिशो दुम्मेनु, आ इप्तीके नु नित्तीके नेल्ल ग्रांघ्रा दिशो दुम्नीम।

21 सुम मेको आ ब्राख्ये थीबा, मेकोमी आ वा मुरशा, चिकसीचा माल्ब। मिनु मेको नां मरिक्म सम्म ग्रांघ्रा दिशो दुम्ब।

22 सुम मेको आ निश्शो थोत्रक थीबा, मेकोमी आ वा मुरचा माल्ब। मिनु चिकसीचा माल्ब। मिनु मेको नां मरिक्म सम्म ग्रांघ्रा दिशो दुम्ब।

23 सुइ मुरुमी आ ब्राख्ये कि आ निश्शो पीरा थिप्टु हना, मेको नां मरिक्म सम्म ग्रांघ्रा दिशो दुम्ब।

24 मिनु वोंइश मुर मेको नु इप्ट नु मेको आ ग्रांघ्रा दिशो लुम्साक्व हना, मेको ७ नाक्त सम्म ग्रांघ्रा दिशो दुम्ब। मिनु मेको आ इप्शो ब्राख्ये यो ग्रांघ्रा दिशो दुम्ब।

25 मिनु सुइ मीश मुर आ रां ब्रोल्शो प्रोंइशा मेको क्येडा शुश नाक्त सम्म हुश यिस डा यिस बाक्त हना, आ मथिचा दुम्शो नडा खोदेशो पा ग्रांघ्रा दिशो दुम्ब। मेको आ मथिचा नाक्त खोदेशो पा मेको ग्रांघ्रा दिशो दुम्ब।

26 मेको आ हुश यिशो नाक्त, आ इप्शो ब्राख्ये आ मथिचा दुम्शो नडा खोदेशो पा ग्रांघ्रा दिशो दुम्ब। आ निश्शो पीरा आ मथिची नडा खोदेशो पा ग्रांघ्रा दिशो दुम्ब।

27 मेको थोत्रक थीब ग्रांघ्रा दिशो दुम्ब। मेकोमी आ वा मुरशा, चिकसीचा माल्ब। मिनु मेको नां मरिक्म सम्म ग्रांघ्रा दिशो दुम्ब।

28 मेकोमी आ हुश यिचा देक्म नोले ७ नाक्ती रिम्चा माल्ब। मिनु मेको नोले मेको ग्रांघ्रा मदिशो दुम्ब।

29 मिनु ८ नाक्ती मेकोमी ढुकुर निक्शी कि परवा निक्शी चाक्शा, ग्रुम्तीक ताम्बु आ ओव्रतीक चढेब आ डोंइती जाक्चा माल्ब।

30 मिनु चढेबमी का पाप आ पर्बम नु का चोशा चढेतीके चढेचा माल्ब। मोपा चढेबमी मेको आ हुश यिशो आ पर्बम परमप्रभु यावे आ डोंइती मेको आ पर्बम चोव्रखो दुम्तीक गेय पचा माल्ब।

31 मोपा गे निक्शीमी इस्नाएल डा मुर आन कली ग्रांघ्रा दितीक रे डोन वोतीस। मो मपाइतीसी हना, मेकोपुकीम आं बाक्तीक ताम्बु ग्रांघ्रा दिशो सेल्नीम। मिनु मेको आन ग्रांघ्रा आ पर्बम बेक्नीम।

32 एको ग्रांघ्रा दिशो यितीक कि बिउ दोक्शो ग्रांघ्रा दिशो दुम्शो वोंइश मुर आ पर्बम चोव्रखो सेल्तीके गेय बाक्ब।

33 मिनु मथिचा दुम्शो, ग्रांघ्रा यिशो वोंइश मुर कि मीश मुर नु ग्रांघ्रा दिशो दुम्शो मीश मुर नु इप्ब वोंइश मुर आन कली ग्रांघ्रा मदिशो सेल्तीक गेय एकोन बाक्नीम' देंचा माल्नीसी' देंत।

## 16

पाप क्याम्तीक नाक्त

लेवी २३:२६-३२; गन्ती २९:७-११; हिब्रू ९:७-१४

1 हारून आ तौ निक्शी परमप्रभु यावे आ डोंइती बेक्सा नोले परमप्रभु यावेमी मोसा नु लोत्र पाप्टु। लेवी १०:१-२;

2 मिनु परमप्रभु यावेमी मोसा कली “इ लोक्ब हारून कली ‘इ दाक्खो खोदेशो पा, गेना हना यो फारशो वा आ आगा बाक्शो चोव्रखो कोठामी कबल पशो सन्दोस तार बाक्शो शिशी पतीके आ डोंइती मजाक्को। मटीतीनी हना, गे बेक्नेवे। मारदे हना गो शिशी बाक्तीकेम गोस्स आगाम बाक्शा जाक्नुड। प्रस्थान २६:३३-३४

3 हारून दोपा ओवने चापब देशा हना, पाप आ पर्वम चढेचा कली ब्यफ का नु चोशा चढेचा कली सांड का चाकशा ला ओवने चापब। लेवी ४:३; लेवी १:१०

4 सुती के आं गेय पचा कली ला आगा फेक्तीक वा फेक्शा, सुती के आ तार फेक्तीक फेक्शा, सुती के क्प्युर क्प्युरा नु सुती वा के पियाम गुप्तीक गुक्शा ओव्रचा मालब। मेको वा आ गेय पचा कली ला बाक्त। मेकोमी चिक्सीशा ला मेको वा फेक्सीचा मालब। प्रस्थान २८:३९, ४२; प्रस्थान २९:४; प्रस्थान ३०:१९-२०

5 मेकोमी इस्राएल डा मुर आन गुड रे पाप आ पर्वम चढेचा कली बोका निक्शी नु चोशा चढेचा कली सांड का ताक्चा मालब। लेवी ३:९, १५, १६

6 मिनु हारूनमी आंम पाप आ पर्वम चढेतीक ब्यफ चढेचा मालब। मिनु आ नु आ खिं डा मुर आन पर्वम पाप क्याम्तीक गेय पचा मालब। लेवी ९:२, ८-११; हिब्रू ७:२७

7 मिनु मेकोमी मेको बोका निक्शी लाइशशा, गुप्तीक ताम्बु आ ओव्रतीक परमप्रभु यावे आ डोंइती वोइक्चा मालब।

8 मिनु हारूनमी मेको बोका निक्शी आ पर्वम फेन्टे आप्चा मालब। मेकोमी परमप्रभु यावे कली का नु मो प्रोंइचा कली का फेन्टे आप्चा मालब।

9 मिनु हारूनमी परमप्रभु यावे कली दुम्शो बोका कली आ नेक्था चाकशा पाप आ पर्वम चढेचा मालब।

10 फेन्टे आप्शा मो प्रोंइतीक बोका कली सेसीन परमप्रभु यावे आ डोंइती चाक्चा मालब। मिनु मेको आ तारी पाप क्याम्तीक गेय पा, मेको बोका कली गोरशो रागीम प्रोंइशा सोइक्चा मालब।

11 मिनु हारूनमी आ आंम पाप आ पर्वम चढेतीके ब्यफ चाक्चा मालब। मिनु आ आंम कली नु आ खिं डा मुर आन पर्वम पाप क्याम्तीक गेय पचा मालब। मिनु मेकोमी आ पाप आ पर्वम चढेतीक ब्यफ क्योरचा मालब। रोमी ३:२५

12 मिनु मेकोमी परमप्रभु यावे आ डोंइती चढेतीके रे ब्रशो कोइला धूप चोतीकेम कुर पा मुठी निक्शी चुशो ब्रोव्रशो रिना पाइशशो धूप कुरशा फारतीक वा चोव्रखो कोठा ओव्रचा मालब।

13 मिनु मेकोमी परमप्रभु यावे आ डोंइती बाक्शा, धूप चोचा मालब। मिनु धूप आ कुनम कबल पशो सन्दोस आ तार बाक्शो शिशी बाक्तीक कली सुम्चा मालब। मोदेशो मपाप्टु हना, मेको बेक्ब। प्रस्थान २५:१७-२२

14 मेको नोले मेकोम ब्यफ आ हुश इक्चा ब्रेक्शा पिशशा, परमप्रभु यावे आ बाक्तीक तारी पूर्व गे बुइक्चा मालब। मेकेर मेकोमी आ ब्रेप्चोमी मेको हुश कली ७ खेयप बुइक्चा मालब।

15 मिनु मेकोमी मुर आन पाप आ पर्वम चढेतीक बोका क्योरचा मालब। मिनु मेको आ हुश फारशो वा आ आगा डा कोठा चाकशा, ब्यफ आ हुश खोदेशो पा, शिशी बाक्तीक तार नु आ डोंइती बुइक्चा मालब। हिब्रू ४:१६; हिब्रू ९:५

16 मोपा मेकोमी मेको कोठा चोव्रखो दुम्ब। मिनु इस्राएल डा मुर आन ग्रांघ्रा दिशो नु मरिम्शो पशो नु मेको आन पाप आन पर्वम पाप क्याम्तीक गेय बाक्ब। मिनु मेकोमी गुप्तीक ताम्बु कली यो पचा मालब।

17 मिनु हारूनमी चोव्रखो कोठामी पाप क्याम्तीक गेय पवानु, सुइ मुर गुप्तीक ताम्बु ओव्रचा मदुम्ब। मेकोमी आंम आ पर्वम, आ खिं डा मुर आन पर्वम नु इस्राएल डा मुर नेल्ल आन पर्वम पाप क्याम्तीक गेय मथुमा सम्म, सुइमी गुप्तीक ताम्बु ओव्रचा मदुम्ब।

18 मिनु नोले मेको लाडगा यूशा, परमप्रभु यावे आ डोंइती बाक्शो चढेतीकेम लशा, मेको आ पर्वम पाप क्याम्तीक गेय पचा मालब। मिनु मेकोमी ब्यफ आ हुश नु बोका आ हुश इक्चा लाइशशा, चढेतीक आ एर ओंथ डा ग्रोव्र नेल्लेम खेक्चा मालब। प्रस्थान ३०:१०

19 मिनु इक्चा हुश लाइशशा, आ ब्रेप्चोम ७ खेयप मेको चढेतीक तार बुइक्चा मालब। मोपा मेको चढेतीके इस्राएली आन ग्रांघ्रा दिशो रे चोव्रखो सेल्चा मालब।

20 मिनु हारूनमी चोव्रखो कोठा, गुप्तीक ताम्बु नु चढेतीके आ पर्वम पाप क्याम्तीक गेय पवा नोले, मेको सेस बोका चाक्चा मालब।

21 मिनू नोले हारूनम आ गुड निम्फा मेको सेस बोका आ पिया तार वोडक्या माल्ब। मिनू इस्राएली आन मरिम्शो पशो नेल्ल नु आन पशो पाप नेल्ल शोत्रशा, मोपा नेल्ल पाप बोका आ पियाम वोडक्या माल्ब। मिनू नोले मुर काम मेको बोका कली गोरशो रागीम चोक्या माल्ब।

22 मोपा मेको बोकाम मेको आन मरिम्शो पशो कुरशा, सुड मबाकशो गोरशो रागीम लाडक्या माल्ब। मेको मुरुम मेको बोका कली गोरशो रागीम प्रौंइचा माल्ब।

23 मेको नोले हारून गुम्तीक ताम्बुम ओव्रशा, मेको आ डोंइती चोव्रखो कोठा ओव्रशा, फेक्शो सुती वा पुड्रशा, मेक उड वोडक्या माल्ब।

24 मिनू मेकोमी चोव्रखो बाक्तीके लशा, चिक्सीचा माल्ब। मिनू आ वा फेक्शा लेत्चा माल्ब। मिनू आंम आ पर्वम नु मुर आन पर्वम चोशा चढेतीक चढेशा, आंम कली नु मुर आन कली पाप क्याम्तीक गेय पचा माल्ब।

25 मिनू मेकोमी पाप आ पर्वम चढेशो आ बोंसो चढेतीकेमी चोचा माल्ब।

26 मिनू प्रौंइचा पुंडसीब बोका कली चोव्रथ लाडब मुर आ वा मुरशा, चिक्सीचा माल्ब। मिनू मेको नोले मुर आन बाक्तीक जाक्ने चाप्ब।

27 मिनू पाप आ पर्वम चढेशो ब्यफ नु बोका आस हुशेमी मेको चोव्रखो कोठा कली पाप क्याम्तीक गेय पशा नोले मेको मुर आन बाक्तीक रे गुंडशा, मेको आस कुशुल, श्ये नु गोबर नेल्ल चोचा माल्ब। लेवी ४:१२; लेवी ६:२३; हिब्रू १३:११

28 मिनू मेको चोडबमी आ वा मुरशा, चिक्सीचा माल्ब। मिनू मेको नोले मुर आन बाक्तीके लेन्ने चाप्ब।

29 एको नेल्ले इन कली गेना हना यो पतीके बाक्ब। ७ महिना डा १० नाक्ती परमप्रभु यावे आ नेक्था जाक्चा माल्नीनी। मेको नाक्ती गे, इस्राएली नु अर्को रागी डा मुर नेल्लेमी काड गेय मपने। लेवी २३:२७-३२; गन्ती २९:७

30 मारदे हना मेको नाक्ती इन पर्वम पाप क्याम्तीक गेय पाइनीम। मिनू परमप्रभु यावे आ डोंइती इन पाप क्याम्शो बाक्ब।

31 एको इन टेयब नाडक्तीक नाक्ती बाक्ब। मोपतीके काड गेय मपने। एको गेना हना यो कली पतीक बाक्ब।

32 तेल लुकशो नु आ आफ आ पा डा चढेब दुम्चा कली सु योव्रसीशो बाक्मे, मेकोमी पाप क्याम्तीक गेय पचा माल्ब। मिनू मेकोमी मेको गेय कली ला वोड्रशो सुती के फेक्तीके फेक्चा माल्ब। प्रस्थान २८:४१-४२

33 मेकोमी चोव्रखो कोठा कली, गुम्तीक ताम्बु नु चढेतीक कली पाप क्याम्तीक गेय पचा माल्ब। मिनू मेकोमी चढेबपुकी नु मुर नेल्ल आन पर्वम पाप क्याम्तीक गेय पचा माल्ब।

34 मिनू बर्सम खेयप का इस्राएली नेल्ल आन कली पाप क्याम्तीक गेय पचा माल्ब। मेको इन कली गेना हना यो पतीक बाक्त। बर्सम खेयप का इस्राएली नेल्ल आन पाप आ पर्वम माफ पुंडचा माल्ब' दे हारून कली देनो" देंत। मिनू परमप्रभु यावेमी मोसा कली दोदेशो पा अरेवा, मोदेशो पा पाप्तु। प्रस्थान ३०:१०; हिब्रू १०:३

## 17

### क्योरशा चढेतीके

1 मिनू परमप्रभु यावेमी मोसा कली

2 "गे हारून, मेको आ तौपुकी नु इस्राएली नेल्ल आन कली 'परमप्रभु यावेमी अरेशो मार बाक्ब देशा हना,

3 सुमी इस्राएली आन बाक्तीकेमी ब्यफ, भेडा नु क्यारश क्योरबा,

4 मिनू परमप्रभु यावे आ डोंइती चढेचा कली गुम्तीक ताम्बु आ ओव्रतीकेम मचाक्बा, मेको मुर साड्रशो आ पर्वम दोस ताडब। मेकोमी साडक्तीके आ मुर रे तिल्ला पुंडसीब। उत्पत्ती ९:६

5 मोपतीके इस्राएलीपुकीमी आन क्योरशा चढेतीके आन बाक्तीके रे गुंडशा, परमप्रभु यावे आ डोंइती चाक्चा माल्नीम। मेकोपुकीमी आन क्योरतीक बस्तु भाव चढेब आ बाक्तीकेम, युम्तीक ताम्बु आ ओव्रतीके आ डोंइती चाक्शा, दुशा बाक्तीक आ पर्वम चढेचा माल्नीम।

6 मिनु चढेबमी मेको आ हुश युम्तीक ताम्बु आ ओव्रतीके आ डोंइती बाक्शो परमप्रभु यावे कली चढेतीकेम बुडक्चा माल्ब। मिनु बांसो परमप्रभु यावे कली आ दाक्शो ब्रोव्रशो रिना पपाइश्शो सेल्चा कली चोचा माल्ब।

7 मेकोपुकीमी मोपा वोल कली चढेशा, आंम कली तेल्लेम खोदेशो सेल्ने मचाप्नीम। एकोम परमप्रभु यावे आ अरेशो लोव्र नेल्ल आन पाला सम्म गेना हना यो कली अरेंतीके बाक्ब' देनो" देंत। ब्यवस्था १७:१७

8 मिनु परमप्रभुमी "मेको आन कली 'इस्राएली नु मेको नु बाक्ब अर्को रागी डा मुर चोशा चढेतीके चढेचा दाक्ताकम हना, ब्यवस्था १२:१४

9 मिनु मेको युम्तीक ताम्बु आ ओव्रतीके मचाक्थु, परमप्रभु यावे कली मचढेप्टु हना, मेको मुर कली आ मुर आन दाते रे तिल्ला माल्नीम' दे माइक्मी।

### हुश मब्वचा, दे अरेशो

10 इस्राएली नु मेको आन दातेम बाक्ब अर्को रागी डा मुर सुइमी हुश ब्वाम्तेकम हना, गो मेको हुश ब्वाइब कली मरिम्शो पाइनुड। मिनु मेको मुर कली आ मुर आन दाते रे क्याम्नुड। लेवी ३:१७

11 मारदे हना मेको बस्तु भाव आन हुशेम ब्रोंइतीक सोक्त बाक्ब। मिनु गो मेको हुश इन कली चढेतीकेमी इन पाप क्याम्तीक गेय पचा कली गेता। मारदे हना हुशेम पाप क्याम्तीके बाक्ब। हिबू ९:२२

12 मोपतीके गेपुकी नु गेपुकी नु बाक्ब अर्को रागी डा मुर सुइमी हुश ब्वचा मदुम्ब, दे गो इस्राएली आन कली देंशो बाक्नुड।

13 मिनु सुइ इस्राएलीपुकी नु गेपुकी नु बाक्ब अर्को रागी डा मुर सिखार ग्यारशा, ग्याइश्शा मारेइ साइक्तीनी हना, मेको आ हुश नेल्ल जारशा, खपीम सुम्चा माल्ब।

14 मारदे हना मारेइ मारेइ के ब्रोंइतीक सोक्त हुशेमी बाक्ब। मोपतीके गो इस्राएली नेल्ल आन कली 'गे तेकोइ जन्तु, बस्तु भाव आन हुश ब्वचा मदुम्ब। मारदे हना नेल्ल जन्तु आन ब्रोंइतीके हुशेम बाक्ब। मेको सुमी ब्वाइबा, मेको क्याम्चा पुंडसीब। उत्पत्ती ९:४

15 मिनु इस्राएली नु अर्को रागी डा मुर नेल्लेमी, सुम आंमा बेक्शो मारेइ मारेइ नु ब्वाकी डा जन्तुम साइश्शो मार मार ब्वाम्तेकम हना, मेको आन वा मुरशा, चिक्सीचा माल्नीम। मिनु नां मरिक्म सम्म ग्रॉंघा बाक्चा माल्नीम। मिनु नोले मेको ग्रॉंघा मदिशो दुम्नीम। लेवी ११:४०; लेवी २२:८; प्रस्थान २१:३३-३६; प्रस्थान २२:३०; प्रेरित १५:२०

16 तन्न मेकोपुकीमी आन वा ममुरथु, मचिक्साकम हना, मेको आन पशो आ पर्वम मेको दोस ताइब दुम्नीम' दे हारून नु आ तो आन कली देनो" दे परमप्रभु यावेमी देंत।

## 18

### ग्रॉंघा दितीक गेय मपने

1 मिनु परमप्रभु यावेमी मोसा कली

2 "गे इस्राएली आन कली 'गो परमप्रभु यावे, इन परमप्रभु नड।

3 गेपुकी इजीप्त रागीम पशो खोदेशो मपने। मिनु गो इन कली कनान रागी लाइक्नन्नी। गेपुकीमी मेक डा मुर आन पशो खोदेशो मपने। प्रस्थान २३:२४

4 गेपुकीमी आं पावो, दे अरेशो लोव्र नु आं फुल्लुम मुशा ब्रेक्शो लोव्र पचा माल्नीनी। मारदे हना गो परमप्रभु यावे, इन परमप्रभु नड।

5 सुमी आं फुल्लुम मुशा ब्रेकशो लोव्र नु आं पावो, दे अरेशो लोव्र पाइबा, मेको ब्रोंडचा ताइब। मारदे हना गो परमप्रभु यावे नड। नेहेम्याह ९:२९; इजीकीएल २०:११; रोमी ७:१०; रोमी १०:५; गलाती ३:१२

6 गेपुकी सुइ आंम नेकथा डा नाता नु मइपीन। मारदे हना गो परमप्रभु यावे नड।

7 इन ममा नु इप्शा इन आफ कली मुने मतोककीन। इन ममा नु इप्चा मदुम्ब।

8 गे इ आफ आ अरु मीश नु मइपो। मो पाइतीनी हना, गेपुकीमी इन आफ कली मुने तोक्नीनी। उत्पत्ती ३५:२२; ब्यवस्था २७:२०; २सामुएल १६:२२; १कोरिन्थी ५:१

9 गे इ दिदी, बहिनी नु मइपो। इ आफ आ तमी बाक्त हना यो, इ ममा आ तमी बाक्त हना यो नु आंम खिंम जरमेशो बाक्त हना यो अर्को रागीम जरमेशो बाक्त हना यो, मेको नु इप्चा मदुम्ब।

10 मिनु तौ आ तमी बाक्त हना यो, इ तमी आ तमी बाक्त हना यो, इ चच बाक्त हना यो मेको नु मइपो। मो पाप्तीवी हना, गे आंमा मुने दोक्नेवे।

11 गे इ आफ आ अरु मीश आ तमी नु मइपो। मेको इन समी बाक्ब।

12 गे इन फुपु नु मइपो। मेको इन आफ आ समी बाक्ब। प्रस्थान ६:२०

13 गे इ ममा आ लोक्ब नु मइपो। मेको इन ममा आ नाता बाक्नीम।

14 इन बोडमा नु आमा कान्छी नु मइपो। मेको इन बोडमा नु आमा कान्छी बाक्नीम।

15 गे इ चाइमी नु मइपो। मेको इ तौ आ मीश बाक्ब। गे मेको नु इप्चा मदुम्ब।

16 गे इ भोग्यु, बोहारी नु मइपो। मोपा इ लोक्ब कली मुने मतोकको। लेवी २०:२१; मर्कूस ६:१८

17 गे मीश मुर का नु आ तमी निम्फा नु मइपो। मिनु मेको आ तौ आ तमी नु आ तमी आ तमी, चच नु मइपो। मेकोपुकी नेकथा डा नाता बाक्नीम। मो पचा मरिम्शो बाक्ब।

18 गे इ मीश बाक्ना बाक्न, मेको आ लोक्ब मचाक्को। मेको नु मइपो।

19 गे रां ब्रोल्ला ग्रांरा दिशो दुम्शो मीश मुर नु मइपो।

20 गे अर्को मुर आ मीश नु इप्शा आंम कली ग्रांरा मसेलो। २सामुएल ११:४

21 गे मोलेक कली आंम तमी तौपुकी चढेशा, आंम परमप्रभु यावे, इन परमप्रभु आ नें ग्रांरा मसेलीन। गो परमप्रभु यावे नड।

22 मीश मुर नु इप्शो खोदेशो पा वोंइश मुर नु मइपो। मेको थम ग्रांरा बाक्ब।

23 गे बस्तु भाव नु इप्शा, आंम कली ग्रांरा मसेलो। मीश मुर यो बस्तु भाव नु इप्चा मदुम्ब। मेको थम मरिम्शो दूली गेय बाक्ब। प्रस्थान २२:१८; लेवी २०:१६

24 गेपुकीमी मोदेशो पाप पा आंम कली ग्रांरा मसेलीन। मारदे हना गो मोदेशो पाप आ पबंम जात जात डा मुर इन डोंइती रे ग्रुंडनुडमी। मेको नेल्लेम मोदेशो पाप पा ग्रांरा दिशो दुम्शो बाक्तेकम।

25 मोपान मेको रागी ग्रांरा दिशो दुम्त। मिनु गो मेको आन पाप आ पबंम सजाइ गेता। मिनु रागीम मेक डा मुर आन कली उक्बे पा ताइक्ताक्व।

26 तन्न गे आं फुल्लुम मुशा ब्रेकशो लोव्र नु आं पावो, दे अरेशो लोव्र टिने। मिनु गे इस्राएली नु इन दातेमी बाक्ब अर्को रागी डा मुर मोदेशो ग्रांरा दिशो गेय मपने।

27 मारदे हना इन डोंइती मेकेर बाक्ब मुरपुकीमी मोदेशो ग्रांरा नेल्ल पाप्तेकम। मिनु रागी ग्रांरा दिशो दुम्त।

28 मिनु आं अरेशो मपथु, मेको रागी ग्रांरा दिशो सेलतीनी हना, मेको डोंइती बाक्ब मुर आन कली खोदेशो पा मेको रागीमी इन कली यो उक्बे पा ताइक्ब।

29 सुइमी मेको मरिम्शो का ला पाप्तु हना, मेको मुर आ मुर रे तिल्चा पुंडसीब।

30 मोपतीके गे डोंइती डा मुरपुकीमी पशो खोदेशो पा मेको दूली ग्रांरा दिशो पाप मपने। मिनु आंम कली ग्रांरा दिशो मसेलीन। मारदे हना गो परमप्रभु यावे, इन परमप्रभु नड देनो” दैत।

## 19

## अरु पतीक गेय

1 मिनु परमप्रभु यावेमी मोसा कली

2 “इसाएली आन गुम्टीक डा मुर नेल्ल आन कली ‘गेपुकी आं कली ला ठेयब सेलीन। मारदे हना गो परमप्रभु यावे, इन परमप्रभु का ला नड। लेवी ११:४४-४५; मत्ती ५:४८; १ पत्रुस १:१५-१६

3 गे नेल्लेमी इन आंम आफ आस कली मान पने। मिनु आं नाइक्तीक नाक्ती नाइसीन। गो परमप्रभु यावे, इन परमप्रभु नड। प्रस्थान २०:१२; प्रस्थान २०:८

4 गे मूर्ति कली पूजा मपने। मिनु गे आंम कली मूर्ति मसेलीन। गो परमप्रभु यावे, इन परमप्रभु नड। प्रस्थान २०:३; प्रस्थान ३४:१७

5 गे दुशा बाक्चा आ पबर्म परमप्रभु यावे आ डोंइती चढ़ेनीनु, परमप्रभु यावेमी ब्रचा डा पा चढ़ेने। लेवी ७:१२-१८;

6 गे चढ़ेनीनु, मेको चढ़ेशो नाक्त नु आ दीसा सम्म नेल्ल ब्वशा नेंचा मालनीनी आ नित्थ नाक्त सम्म मारोइ लीत हना, मेको चोचा मालनीनी।

7 आ नित्थ नाक्त मेको ब्वाइताक्नी हना, थम ग्रॉग्रा दुम्ब। मिनु मेको चढ़ेशो मब्राइब।

8 मेको ब्वाइब नेल्लेमी सजाइ ताइनीम। मारदे हना मेकोमी परमप्रभु यावे कली चढ़ेशो ग्रॉग्रा दिशो सेल्शा, मेको कली मटीम। मिनु मोदेंशो मुर आन मुर रे तिल्चा पुंडसीनीम।

9 मिनु गे इन बाली नाली रिक्नीनु, रू आ सुर सुर सम्म मरिक्कीन। सिला बाला मगुपीन। लेवी २३:२२; ब्यवस्था २४:१९; रूथ २:२, १५, १६

10 गेपुकीमी इन अडगुर रू डा फल काइ मलीपाइक्थु, मसेक्कीन। मिनु रूम दोक्शो अडगुर यो मगुपीन। मेको पुडग नु अर्को रागी डा मुर आन कली बाक्ल। गो परमप्रभु यावे, इन परमप्रभु नड।

11 गे खुइ मपने। मठगेने। गे जोल मपमुने। प्रस्थान २०:१५-१६; १ थिस्सलोनिकी ४:६

12 गेपुकीमी आं नें थिशा, जोल पा कसम मजने। मो पाइतीनी हना, गे इन परमप्रभु आ नें आइक्च सेलीनी। गो परमप्रभु यावे नड। प्रस्थान २०:७; मत्ती ५:३३

13 गे आंम नेक्था डा मुर आन कली श्येत गेशा, मदिपीन। मिनु मेको आन मार मार मरोइक्तीन। गाल्च ताक्शा गेय पाइब आन क्येट काब नाक्दो यो इन खिंम वोइक्चा मदुम्ब। ब्यवस्था २४:१४-१५; येरमीया २२:१३; याकूब ५:४

14 नोफा मनेंब मुर कली मरिम्शो लोत्र मपने। मिक्च मताइब आ डोंइती दाइल पाइक्तीक थोत्रक मवोतीन। इन परमप्रभु क्येडा हिनीन। गो परमप्रभु यावे नड। उत्पत्ती २७:१९; ब्यवस्था २७:१८

15 गे जोल पाइब सांक्छी मदुमीन। ठेयब मुर बाक्त हना यो, आइक्च मुर बाक्त हना यो, मुर आन कुल मकोव्रथु, ठीक निसाफ पने। प्रस्थान २३:३, ६; ब्यवस्था १६:१९, २०

16 गेपुकी मुर आन पबर्म जोल पा लोत्र मपमुने। गे इन नेक्था डा मुर कली साइक्चा ममालीन। गो परमप्रभु यावे नड। प्रस्थान २३:७

17 गे इन लोकब कली काइ मदाक्ब मदुमीन। इन नेक्था डा मुर कली रिम्शो पा मोदेंशो दूली गेय मपने दे लोत्र पने। मो मपाइतीनी हना, गे पाप राइनीनी। भजन संग्रह १४१:५; मत्ती १८:१५

18 गे इन मुर आन कली क्येक्क मलेत्तीन। ईख मकुरीन। तन्न इन नेक्था डा मुर कली आंम कली खोदेंशो पा दाक्तीन। गो परमप्रभु यावे नड। २राजा ६:२२; २इतिहास २९:९-१५; मत्ती ५:४३-४८; मत्ती २२:३९; लूका १०:२५-३७; यूहन्ना १३:३४; रोमी १३:९; गलाती ५:१४; याकूब २:८

19 गे आं फुल्लु मुशा ब्रेक्शो लोत्र पने। निक्शी खाल डा जन्तु, बस्तु भाव आन कली मब्वाइक्तीन। इन रूमि निक्शी खाल डा वांचेर मशोक्कीन। गेपुकीमी निक्शी खाल डा श्येले ब्वाइश्शा प्रोव्रशो वा मफेक्सीन। ब्यवस्था २२:९-११

20 मिनु वोंइश मुर कामी वाइलीम दुम्शो मीश आल नु इप्त हना, मेको मीश आल चहिं अरु वोंइश मुर कली गेचा चिक्शो बाक्त हना, तन्न मग्याप्थु, मप्रोंइथु बाक्त हना, मेको वोंइश मुर कली खोदील



निदील पचा माल्नीम। मेको आस कली साइक्चा मदुम्ब। मारदे हना मेको मीश आल मप्रोंइशो बाक्त। प्रस्थान २१:७-११

21 तन्न मेको वोंइश मुरुमी परमप्रभु यावे आ डोंइती गुम्तीक ताम्बु आ ओव्रतीकेम आ दोस आ पर्वम सांड का चढेचा माल्ब।

22 मिनु चढेबमी मेको आ दोस आ पर्वम सांड चढेशा परमप्रभु यावे आ डोंइती पाप क्याम्तीक गेय पचा माल्ब। मोपा मेको आ पाप क्याम्तीसा माफ ताइब दुम्ब। लेवी ५:१७-१८

23 मिनु गेपुकी मेको रागी जाकदीशशा, तेकोइ जचा दुम्ब फल फुल रवा खुम्नीनु, बर्स सां सम्म मेको आन फल मजने।

24 मिनु ४ बर्सम चहिं फल फुल नेल्ले परमप्रभु यावे कली ग्येरशो गेचा माल्नीनी। परमप्रभु यावे कली ठेयब मान पचा कली बाक्ब।

25 तन्न ५ बर्सम गेपुकीम मेको फल फुल जने चाप्नीनी। मिनु मेको रवा इन कली शुश सिम्ब दुम्नीम। गो परमप्रभु यावे, इन परमप्रभु नड।

26 गेपुकीमी तेकोइ चिकब, जन्तु, बी बयफ, क्यारश भडा आन श्ये हुश सुन्दा मब्वने। मिनु गेपुकी लिंक्यु मकोवडीन। मिनु गे टुना मुना काइ मपने। लेवी ३:१७; ब्यवस्था १८:१०

27 गेपुकीमी इन चां एर ओंथ मखोतीन। मिनु इन गाल शोके आ सुर मखोतीन। लेवी २१:५; ब्यवस्था १४:१

28 गेपुकी बेक्शो मुर आन पर्वम आंम रां क्योरशा गार मसेलीन। मिनु इन रांमी चिनु मखोपेन। गो परमप्रभु यावे नड।

29 गेपुकीमी इन तमी आन कली तेल्लेम सेल्शा, ग्रान्ना दिशो मसेलीन। मो पाइतीनी हना, रागी तेल्लेम बाक्तीक खोदेशो दुम्शा, ग्रान्ना दिशोमी ब्रीब। ब्यवस्था २३:१८; २राजा २३:७

30 गे आं नाइक्तीक नाक्तीम नांडसीन। मिनु आं बाक्तीक ताम्बु कली मान पने। गो परमप्रभु यावे नड। लेवी २६:२

31 गेपुकी बेक्शो मुर रे लोव्र पाइब नु लिंक्यु कोव्रब कली 'वारच पाइक्की' दे आन बाक्तीके मलने। मेकोपुकी नु सल्ला पा, गे आंम कली ग्रान्ना दिशो मसेलीन। गो परमप्रभु यावे, इन परमप्रभु नड। लेवी २०:६; ब्यवस्था १८:१०-११; १सामुएल २८:७

32 गे खूशो आ डोंइती बोक्कीन। खाल्पी खाल्पा आन कली मान पने। मिनु इन परमप्रभु कली मान पा हिनीन। गो परमप्रभु यावे नड।

33 गेपुकी नु बाक्ब अर्को रागी डा मुर आन कली मदिपीन। प्रस्थान २२:२०

34 गे मेको आन कली इन रागीम जरमेशो मुर खोदेशो मिम्तीन। मेको आन कली आंम कली खोदेशो पा दाक्तीन। मारदे हना गेपुकी यो इजीप्तमी अर्को रागी डा मुर दुम्शा बाक्शो बाक्तीनी। गो परमप्रभु यावे, इन परमप्रभु नड।

35 गेपुकीमी पुक्नीनु, नाक्तीनीनु नु थाप्तीनीनु जोल मपने।

36 इन नाक्तीकेम तुला ठीक दुम्चा माल्ब। इन ढक ठीक दुम्चा माल्नीमी। मिनु इन पुक्तीके ठीक दुम्चा माल्नीमी। गो इन कली इजीप्त रे गुंडब परमप्रभु यावे, इन परमप्रभु नड। ब्यवस्था २५:१३-१६; हितोपदेस ११:१

37 गे आं फुल्लुम मुशा ब्रेक्शो लोव्र नु आं पावो, दे अरेशो लोव्र नेल्ल थुंम वोइशशा, पचा माल्नीनी। मारदे हना गो परमप्रभु यावे नड” दे परमप्रभु यावेमी मोसा कली देंत।

## 20

काइ मरिम्शो पशो कली सजाइ

1 मिनु परमप्रभु यावेमी मोसा कली

2 “गे लेंशा इस्राएली आन कली ‘इस्राएलीपुकी, मेको नु बाक्ब अर्को रागी डा मुरपुकी सुम आन आल मोलेक कली चढेनीमी, मेको आन कली साइक्चा माल्नीम। गुम्तीक डा मुरपुकीम मेको कली फुल्लु आप्शा साइक्चा माल्नीम।

3 मेकोपुकीमी आन आल मोलेक कली चढेमेनु, आं बाक्तीक ताम्बु नु आं टेयब नें ग्रांघा दिशो सेल्लेक्म। मोपतीके गो आंमा मेको आन कली ब्रोंडचा मगेथु, आ मुर आन दाते रे क्याम्नुडमी।

4 मिनु मेको रागी डा मुरपुकीम आ आल मोलेक कली चढेब मुर कली तुइश्शा यो मसाइक्तेक्म हना,

5 गो आंमा मेको नु आ खिं डा मुर आन कली ब्रोंडचा मगेथु, मेको आन मुर आन दाते रे क्याम्नुडमी। मेको नु मेको आन नोले खोइक्ब मोलेक कली चढेब नेल्ल आन कली क्याम्नुडमी।

6 सु मुर बेक्शो मुर रे लोत्र पाइब नु लिंक्यु कोत्रब आन कली “वारच पयी” दे आन बाक्तीके लाइबा, गो मेको कली ब्रोंडचा मगेथु, आ मुर आन दाते रे क्याम्नुड। लेवी १९:३१

7 मोपतीके आं कली जिम्मा गेंसीशा आं के दुमीन। मारदे हना गो परमप्रभु यावे, इन परमप्रभु नड। लेवी १९:२

8 आं फुल्लुम मुशा ब्रेक्शो लोत्र इन थुंम वोइश्शा टिने। गो परमप्रभु यावे नड। गो इन कली आं खोदेशो सेल्लुड।

9 सुमी आ आंम आफ आस कली सराप पाइक्बा, मेको मुर कली साइक्चा माल्ब। आ आंम आफ आस कली सराप पाइक्तीके साइक्चा पुंइसीब। प्रस्थान २१:१७

10 सुइ मुर अरु आन मीश नु इप्त हना, मेको पाइब निम्फा आस कली साइक्चा माल्ब। प्रस्थान २०:१४; २सामुएल ११:४; यूहन्ना ८:५

11 सु आ आफ आ मीश नु इप्बा, मेकोम आ आफ कली मुने तोक्ब। मेको निम्फा आस कली साइक्चा माल्ब। मेको साइक्चा पुंइसीनीस। लेवी १८:६-२३

12 सु आ चाइमी नु इप्बा, मेको निम्फा आस कली साइक्चा माल्ब। मेको दूली पा मेको थम मरिम्शो बाक्ब। मेको साइक्चा पुंइसीनीस।

13 सुइ मुर मीश मुर नु इप्शो खोदेशो पा वोंइश मुर नु इप्त हना, मेको थम ग्रांघा दितीक बाक्ब। मेको आस कली साइक्चा माल्ब। मेको थमा पा साइक्चा पुंइसीनीस।

14 सु मुर ममा नु आ तमी निम्फा नु इप्बा, मेको काइ मरिम्शो बाक्ब। मेको सां आन कली चोचा माल्ब। इन दातेमी मोदेशो मरिम्शो मदुल्ल।

15 सुइ वोंइश मुर बस्तु भाव नु इप्त हना, मेको कली साइक्चा माल्ब। मिनु मेको बस्तु कली यो साइक्चा माल्ब।

16 सुइ मीश मुर बस्तु भाव नु इप्त हना, मेको मीश मुर नु बस्तु निम्फा आस कली साइक्चा माल्ब। मेको साइक्चा पुंइसीनीस।

17 सु मुर आ दिदी बहिनी, आ आंम आ तमी कि आ आफ आ तमी नु इप्त हना, मेको थम मुने बाक्ब। मेको निम्फा आस कली आस मुर आन दाते रे नेल्लेम तचा डा पा साइश्शा क्याम्चा माल्ब। मेकोमी आंम आ समी नु इप्तीके सजाइ गेचा पुंइसीब।

18 सुइ मुर रां ब्रोल्लो मीश मुर नु इप्त हना, मेको निम्फा आस कली आस मुर आन दाते रे साइश्शा क्याम्चा माल्ब। मारदे हना मेको वोंइश मुरुमी मीश मुर आ हुश यितीक ताप्तु। मिनु मीश मुरुमी चहिं आ हुश यितीके कोइताक्ब। लेवी १५:२४

19 इन ममा आ लोक्ब नु इन आफ आ समी नु मइपीन। मारदे हना मो पाइतीनी हना, आंम खिं डा मुर कली मुने तोक्नीनी। मेको सजाइ ताइनीस।

20 सुइ मुरुमी आ बोडो, बकान्छा कि मामा आ मीश नु इप्त हना, मेकोमी आ बोडो, बकान्छा कि मामा कली मुने तोक्ब। मेको सजाइ जचा पुंइसीनीस। मिनु आल मथिथु बेक्नीस।

21 सुमी मुरुमी आ भोग्यु कि बोहारी चाक्बा, मेको ग्रांघा दिशो बाक्ब। मेकोमी आंम लोक्ब कली मुने तोक्ब। मिनु आल मथिथु बेक्नीस।

22 गेपुकीमी आं फुल्लुम मुशा ब्रेक्शो लोत्र नु आं पाबो, दे अरेशो लोत्र नेल्ल तुइश्शा पचा माल्नीनी। मो मपाइतीनी हना, गो इन कली चाक्शो रागीमी इन कली उक्बे पा ताइक्ब।

23 गे इन डोंइती खेरशो रागी रागी डा मुर आन पशो मपने। मेकोपुकीमी मोदेशो नेल्ल पाम्तेक्म। मोपतीके गो मेको आन कली तशा थम ग्रांग्रा दीती।

24 तन्न गो इन कली मेको आन रागी इन के दुम्ब। गो इन कली गेनुड, देती। मिनु मेको रागीम दूध नु खुदो शुश बाक्ब। गो परमप्रभु यावे, इन परमप्रभु नड। मिनु गो इन कली रागी रागी डा मुर रे तिल्शा योव्रतन्नी। प्रस्थान १९:५-६

25 मोपतीके गेपुकीमी ग्रांग्रा मदिशो नु ग्रांग्रा दिशो जन्तु नु ग्रांग्रा मदिशो नु ग्रांग्रा दिशो चिक्ब तुइश्शा तिल्शा माल्नीनी। गेपुकीमी ग्रांग्रा दिशो जन्तु, चिक्ब नु खपीम प्रेशा गाक्ब जन्तु रे आंम कली ग्रांग्रा दिशो मसेल्सीन। मारदे हना मेको ग्रांग्रा दिशो बाक्नीम, दे शेंताक्ड। लेवी ११:-

26 गेपुकी ग्रांग्रा दिशो क्येडा डोन बाक्शो दुमीन। मारदे हना गो ग्रांग्रा दिशो क्येडा डोन बाक्शो परमप्रभु यावे नड। मिनु गो इन कली आं मुर दुम्चा कली अरु मुर रे तिल्शा योव्रतन्नी।

27 सु इन दातेमी वोंइश मुर कि मीश मुर बेक्शो मुर रे लोत्र पाइबा कि लिंक्यु कोव्रनीम, मेको आन कली साइक्चा माल्ब। मेको आन कली फुल्लु आप्शा साइक्चा माल्ब। मेको साइक्चा पुंडसीनीम' दे इस्राएली आन कली शेंदो" दे परमप्रभु यावेमी मोसा कली देंत। प्रस्थान २२:१७

## 21

### चढेब आन कली अरेशो लोत्र

1 मिनु परमप्रभु यावेमी मोसा कली "हारून आ तौ, चढेब आन कली 'इन मुर बेक्तेक्म हना, गेपुकी मेको बेक्शो मुर कली थिशा आंम कली ग्रांग्रा दिशो मसेलीन। इजीकीएल ४४:२५-२७

2 तन्न इन आम आफ, तमी तौ नु लोक्ब,

3 कन्ने दिदी बहिनी आन पबंम ला आंम इन कली ग्रांग्रा दिशो सेल्ने चाप्नीनी।

4 मिनु गेपुकीमी ग्युंवे पा नक नाता डा मुर आन पबंम आंम कली ग्रांग्रा दिशो सेल्चा मदुम्ब।

5 गे चढेबपुकीमी रेंका पा, इन चां प्रेक्चा, इन गाल शोक्रे आ सुर खोइक्चा नु इन रां क्योरशा गार सेल्चा मदुम्नीनी। लेवी १९:२७-२८

6 इन परमप्रभु कली ला गेय पाइब दुमीन। इन परमप्रभु आ नें ग्रांग्रा दिशो सेल्ब मदुम्नीम। मारदे हना गेपुकीमी परमप्रभु यावे कली मीम चोशा चढेतीके चढेनीनी। मोपतीके गेपुकी परमप्रभु कली ला गेय पाइब बाक्नीनी।

7 गे चढेबपुकीमी तेल्लेम मीश मुर, ग्रांग्रा दिशो मीश मुर नु आ वोंइशेमी प्रोंइशो मीश मुर चाक्चा मदुम्ब। मारदे हना गेपुकी परमप्रभु आ मुर बाक्नीनी।

8 मिनु गे इस्राएलीपुकीमी चढेब आन कली परमप्रभु आ गेय पाइब मिम्तीन। मारदे हना मेकोपुकी इन परमप्रभु आ जचा चढेनीम। मेकोपुकी इन पबंम परमप्रभु आ गेय पाइब दुम्शो बाक्नीम, दे मिम्तीन। मारदे हना इन कली ग्रांग्रा रे डोन बाक्ब सेल्ब, गो ग्रांग्रा रे डोन बाक्ब परमप्रभु यावेमी इन कली आं खोंदेशो सेल्नुड।

9 मिनु चढेब आ तमीमी तेल्लेम पा आंम कली ग्रांग्रा दिशो सेल्लु हना, मेकोमी आ आफ कली ग्रांग्रा दिशो सेल्ब। मेको कली मीम चोशा साइक्चा माल्ब।

10 मिनु सु आंम लोक्ब आन दातेम ठेयब चढेब दुम्शो बाक्मे, मिनु आ पियाम तेल लुक्शो बाक्मे नु ठेयब चढेब आ वा फेक्चा कली तिल्शो बाक्मे, मेकोमी रेंका पशा, आ पिया डा चां प्रेक्चा मदुम्ब नु आ वा खाक्चा मदुम्ब। लेवी ८:१२; प्रस्थान २८:४१; प्रस्थान २९:७; लेवी १०:६; लेवी २१:२

11 मेकोमी बेक्शो मुर बाक्तीके लशा, आंम कली ग्रांग्रा दिशो सेल्चा मदुम्ब। मेको आ आम आफ आ बेक्शो रां यो कोव्रथ लचा मदुम्ब।

12 मेको परमप्रभु यावे आ बाक्तीके ताम्बु रे गूचा मदुम्ब। मोदेशो पाप्तु हना, मेकोमी आंम परमप्रभु आ बाक्तीके ग्रांग्रा दिशो सेल्ब। मारदे हना मेको परमप्रभु आ तेल लुक्शो मुर बाक्ब। गो परमप्रभु यावे नड।

13 मेकोमी कन्ने मीश आल कली ला ग्युंवे पने चाप्ब।

14 आ वोंइश बेक्शो मीश मुर, आ वोंइश प्रोंइशो मीश मुर, ग्रॉग्रा दिशो कि तेल्लेम मीश मुर चाक्ने मचाप्ब। मिनु मेकोमी आ जात डा कन्ने मीश आल ग्युंबे पचा माल्ब।

15 मगारचा डा मीश मुर नु ग्युंबे पा, आंम जात नु आंम तमी तौ आन कली ग्रॉग्रा दिशो सेल्चा मदुम्ब। मारदे हना गो परमप्रभु यावे नड। गो मेको कली आंम मुर सेल्ता' दे शेंदो" दे परमप्रभु यावेमी मोसा कली देंत।

16 मिनु परमप्रभु यावेमी मोसा कली

17 "गे हारून कली 'इ तमी तौ, चच युइ आन दातेमी गुइ खोइल कुंजे नु दूली मुर आंम परमप्रभु कली चढेब दुम्ने मचाप्ब।

18 मारदे हना सुइ दूली मुर, मिक्च मताइब, खोइल मदुक्ब, आ कुल कि रां बिगेशो कि खोइल का लाइशो मुर परमप्रभु आ डोंइती जाक्चा मदुम्ब।

19 गुइ जिक्शो, खोइल जिक्शो,

20 कुप्रे, बामन्ने, मिक्च रोइ पशो, रक सुतीक रोइ पशो, लुतो पशो कि आ गेडा ठीक मदुम्शो मुर आं परमप्रभु आ डोंइती जाक्ने मचाप्ब।

21 चढेब हारून आ तमी तौ चच युइ सु दूली दुम्शो बाक्मे, मेको परमप्रभु यावे कली चोशो चढेतीक चढेने मचाप्ब। मारदे हना मेको दूली बाक्ब। मेकोम आंम परमप्रभु कली जचा थोत्रक चढेचा मदुम्ब।

22 मेकोमी आंम परमप्रभु कली चढेशो नु चोत्रखो नु थम चोत्रखो जचा थोत्रक चहिं जने ब्वने चाप्ब।

23 तन्न मेको फारशो वा नु चढेतीक आ नेक्था जाक्चा मदुम्ब। मारदे हना मेको दूली मुर जाक्शा, आं बाक्तीक ताम्बु ग्रॉग्रा दिशो मसेलल। गो परमप्रभु यावे नड। गो मेको आन कली मेको आं के सेलनुड' दे शेंदो" दे परमप्रभु यावेमी मोसा कली देंत।

24 मिनु मोसामी हारून, मेको आ तौपुकी नु इस्राएली नेल्ल आन कली एको लोत्र नेंपाइक्तीमी।

## 22

सुमी चढेतीक रे जने ब्वने चाप्ब

1 परमप्रभु यावेमी मोसा कली

2 "गे हारून नु आ तौ आन कली मार शेंचा माल्नेवे देशा हना, 'इस्राएलीपुकीमी आं कली चढेशो थोत्रक आन पर्वम होस पा बाक्कीन। मिनु आं नें कली ग्रॉग्रा दिशो मसेलीन। गो परमप्रभु यावे नड' दे शेंचा माल्नेवे" दे परमप्रभु यावेम मोसा कली देंत।

3 मिनु मोसा कली "गो परमप्रभु यावे नड। गे मेको आन कली 'इन तौ, चच युइ आन पाला डा तेकोइ मुर ग्रॉग्रा दिशो दुम्शा, इस्राएलीपुकीमी परमप्रभु यावे कली चढेशो थोत्रक आन नेक्था जाक्तेक्म हना, मेको मुर आं डोंइती रे तिल्ला पुंइसीब। गो परमप्रभु यावे नड।

4 मिनु हारून आ तौ, चच युइ आन दातेमी सुइ कुशुल डा रोइ नु ग्रॉग्रा यितीक पशो बाक्तेक्म हना, मेको ग्रॉग्रा मदिशो सम्म आं कली चढेशो मारेइ थोत्रक जचा ब्वचा मदुम्ब। सुइमी बेक्शो मुर के कि बिउ यिशो मुर रे ग्रॉग्रा दिशो दुम्शो मुर कली थीबा, लेवी १३:-१५:-

5 कि खपीम गेशा गाक्ब जन्तु कली थिशो ग्रॉग्रा दिशो दुम्शो मुर थीबा, कि मार मार आ पर्वम ग्रॉग्रा दिशो बाक्त हना,

6 मेको मुर नां मरिक्म सम्म ग्रॉग्रा दिशो बाक्ब। मेकोमी मचिक्से सम्म ला आं कली चढेशो जचा ब्वचा मदुम्ब। लेवी ११:-

7 मोदेशो मुर नां रिक्म नोले ला ग्रॉग्रा मदिशो दुम्ब। मिनु नोले मेकोमी आं कली चढेशो थोत्रक जने ब्वने चाप्ब। मारदे हना मेको आं कली चढेशो आ जचा ब्वचा थोत्रक बाक्ब।

8 मिनु बेक्शो, ब्वाकी डा जन्तुपुकीम क्राइशशा साइशो जन्तु, बस्तु भाव कली ब्वचा मदुम्ब। मोदेशो पाप्तु हना, मेको मुर ग्रॉग्रा दिशो सेल्सीब। गो परमप्रभु यावे नड। लेवी ७:२४

9 चढेबपुकीमी आं देशो टिचा माल्नीम। मो मपाम्तेकम हना, मेकोपुकीमी आं देशो मटितेकम हना, मेकोपुकी दोस तथा आं बाक्तीक ताम्बुमी बेक्नीम। मिनु गो मेको आन कली आं मुर सेल्ब परमप्रभु यावे नड।

10 मिनु अर्को रागी डा मुर नु चढेब आ खिंम पौना बाक्शो कि गाल्च ताइब मुर आं कली चढेशो थोत्रक जचा ब्वचा मदुम्ब।

11 तन्न चढेबमी क्येट थाप्शा ग्याप्शो मुर नु मेको आ खिंम जरमेशो मुर चढेब आ भाग रे जचा ब्वचा दुम्ब।

12 मिनु चढेब आ तमी अर्को खिं डा मुर नु ग्युंवे पशो बाक्त हना, परमप्रभु कली चढेशो जचा ब्वचा मदुम्ब।

13 तन्न चढेब आ तमी आ वोइश बेक्शो कि प्रोइचा पुंइसीशो बाक्त हना, आ तमी तौ मदुम्बु, आ आफ आ खिं लेत्त हना, आ आल ना डा खोदेशो पा आन आफ आ भाग डा चढेशो रे जने ब्वने चाप्व। तन्न अर्को खिं डा मुर मेको जचा ब्वचा मदुम्ब।

14 मिनु मरुम मतुइक्थु परमप्रभु कली चढेशो रे जाप्तु हना, मेकोमी चढेब कली मेको आ जशो क्येडा ५ भाग तेम्शा, परमप्रभु कली चढेशो खोदेशो पा चढेब कली लेत्चा माल्ब। लेवी ५:१६

15 मोपा सुइमी इस्त्राएली आन परमप्रभु यावे कली चढेशो थोत्रक ग्रॉगा सेल्चा मदुम्ब।

16 मोदेशो परमप्रभु कली चढेशो जशो मुर दोस ताइनीम। मिनु मेकोमी गारशा आ पर्वम चढेतीक चाक्चा माल्ब। मारदे हना मेकोमी परमप्रभु यावे कली चढेशो जाप्तु ब्वाप्तु। गो परमप्रभु यावे नड। मिनु गो मेको कली आं मुर सेल्ता' दे शेंदो" देंत।

17 मिनु परमप्रभु यावेमी मोसा कली

18 "गे हारून, आ तौपुकी नु इस्त्राएली नेल्ल आन कली 'इस्त्राएली आन दातेमी मुर का कि इस्त्राएलम बाक्ब अर्को रागी डा मुरुमी ग्येरशा परमप्रभु यावे कली चढेतीके चोशा चढेशो खोदेशो परमप्रभु यावे कली चढेचा दाक्ताक्व हना,

19 मिनु परमप्रभु आ डोंइती ब्रचा डा पा मेकोमी मारेइ मदुम्बो थम रिम्शो ब्यफ, सांड कि बोका चढेचा माल्ब।

20 गार पाइश्शो बस्तु चढेचा मदुम्ब। मारदे हना मेको मब्रचा डा बाक्नीम। ब्यवस्था १५:२१; ब्यवस्था १७:१; मलाकी १:८

21 मिनु मुर कामी दुशा बाक्चा आ पर्वम चढेतीके परमप्रभु यावे कली चढेशा, आ पशो कसम खबानु, ग्येरशा परमप्रभु यावे कली चढेतीके, खोदेशो पा, मेको ब्रचा डा दुम्पाइक्चा कली आ हुल रे मारेइ मदुम्बो थम रिम्शो बस्तु चढेचा माल्ब।

22 मिनु गेपुकीम परमप्रभु यावे कली मिक्च मताइब, गार दुम्बो, आन रां बिग्रेशो, ग्रॉगा यितीके पाइब, कुशुल रोइ पाइब कि लुतो पाइब बस्तु भाव चढेचा मदुम्ब। मोदेशो मीम चोशा चढेचा कली परमप्रभु यावे कली चढेतीकेमी वोइक्चा मदुम्ब।

23 मिनु गेपुकीमी लाइश्शा खोइल पाइश्शो ब्यफ कि भेडा चहिं ग्येरशा चढेतीके चढेतीनी हना दुम्ब। तन्न कसम जशोनु, इन चढेतीके मब्राइब दुम्ब।

24 तेको ब्यफ, क्यारश भेडा खसी पशो गार सेल्शो नु चेशो बाक्बा, मेको परमप्रभु यावे कली चढेचा मदुम्ब। इन रागीम मो पचा मदुम्ब।

25 गेपुकीमी मोदेशो बस्तु भाव अर्को रागी डा मुर रे ग्याप्शा ताक्शा इन परमप्रभु कली जचा थोत्रक चढेचा मदुम्ब। मेको आन रां बिग्रेशो नु गारम पतीके इन पर्वम मब्रतीक दुम्ब' दे शेंदो" दे परमप्रभु यावेमी मोसा कली देंत।

26 मिनु परमप्रभु यावेमी मोसा कली

27 "बाळा, भेडा पाठा कि क्यारश पाठा जरमेशा, मेको ७ नाक्त सम्म आ ममा नु बाक्चा माल्ब। मिनु मेको कली ८ नाक्त रे चोशा चढेशोनु, परमप्रभु यावेमी ब्राइब। प्रस्थान २७:२९

- 28 तन्न गेपुकी बी नु आ चाइक्ब कि भेडा नु आ पाटा काबुमी क्योरचा मटुम्ब। ब्यवस्था २२:६-७
- 29 गेपुकीमी परमप्रभु यावे कली 'गे रिम्शो पाइब बाक्नीनी' दे चढेशो चढेनीनु, मेको इन पर्वम ब्रचा डा पा चढेने। लेवी ७:१५
- 30 मेको चढेशो नाक्ती मेको कली ब्वने। आ दीसा सुनी सम्म मारेड महेंचा। गो परमप्रभु यावे नड।
- 31 मिनु गेपुकीमी आं शेंतीके तुइशशा टिने। गो परमप्रभु यावे नड।
- 32 गे आं ग्रांरा रे डोन बाक्शो नें ग्रांरा दिशो मसेलीन। मोपतीके गो इस्राएली आन दातेमी का ला टेयब दुम्ती। गो परमप्रभु यावे नड। मिनु गो इन कली आंम आं मुर सेल्ला। लेवी २२:९,१६
- 33 मिनु इन परमप्रभु दुम्चा कली गो इन कली इजीप्त रागी रे गुंडताक्ड। गो परमप्रभु यावे नड, दे शेंदो" देंत।

## 23

### सन्चरबार नाइक्तीक नाक्ती

- 1 मिनु परमप्रभु यावेमी मोसा कली
- 2 "गे इस्राएली आन कली 'परमप्रभु यावे आ देशो पचा माल्शो चाड परमप्रभु यावे के बाक्नीम। मिनु गे मेको पचा माल्नीनी।
- 3 गे ६ नाक्ती सम्म गेय पचा माल्नीनी। तन्न ७ नाक्त चहिं थमा पा नाइक्तीक नाक्ती बाक्शा, परमप्रभु यावे केन बाक्ब। गे मारेड गेय मपने। इन बाक्तीक नेल्लेमी परमप्रभु यावे आ नाइक्तीक नाक्ती बाक्ब" देंत। प्रस्थान २०:८-११

### पास्सा चाड आ पर्वम अरेशो

- 4 मिनु परमप्रभु यावेमी लेंशा, मुर आन कली शेंचा, दे मोसा कली "परमप्रभु यावे आ देशो पचा माल्शो चाड आ चाड बाक्नीम। आ देशो नाक्ती मानेचा माल्नीनी। परमप्रभु यावे आ चाडपुकी मार बाक्नीम देशा हना, प्रस्थान २३:१४-१९
- 5 डोंइती डा महिना डा १४ नाक्ती नाक्नाक्दो पास्सा चाड डा परमप्रभु यावे कली चढेतीक गेय पचा माल्नीम। प्रस्थान १२:-
- 6 मेको महिना डा १५ नाक्ती परमप्रभु यावे कली बोरब ओरुखती मसुप्शो शोब्ले जतीक चाड बाक्ब। गेपुकीमी ७ नाक्त सम्म बोरब ओरुखती मसुप्शो शोब्ले जचा माल्नीनी।
- 7 डोंइती डा नाक्ती आं पर्वम गुम्तीक नाक्ती दुम्चा माल्ब। मेको नाक्ती मारेड गेय मपने।
- 8 मिनु ७ नाक्त सम्म गेपुकीमी परमप्रभु यावे कली मी चोशो चढेतीके चढेचा माल्नीनी। मेको आ ७ नाक्ती लेंशा परमप्रभु यावे आ पर्वम गुम्तीक दुम्चा माल्ब। मेको नाक्ती गेपुकीमी मारेड गेय मपने" देंत। प्रस्थान १३:६

### डोंइती मीशो बाली नाली

- 9 मिनु परमप्रभु यावेमी मोसा कली
- 10 "गे इस्राएली आन कली 'इन कली गेशो रागीम जाक्दीशशा, मेकेर डा बाली नाली खुप्तीनीनु, गेपुकीमी डोंइती डा रिक्शो बाली मुठा का चढेब आन कली चाक्कीन।
- 11 मेकोमी अन्न मुठा परमप्रभु यावे आ डोंइती क्युक्शा हिम्चा माल्ब। मो पाइतीनी हना परमप्रभु यावेमी इन कली ब्राइब। नाइक्तीक नाक्ती आ दीसा चढेबमी मेको क्युक्शा हिम्चा माल्ब।
- 12 मेको क्युक्शा हिम्शो नाक्ती गेपुकीमी परमप्रभु यावे कली बर्स का दुम्शो मारेड मटुम्शो थम रिम्शो सांड चोशा चढेचा माल्नीनी।
- 13 मेको नु अन्न चढेतीक चढेचा माल्नीनी। मेको अन्न चढेतीक चहिं तेलम निशो एफाह के २० भाग थम रिम्शो फस दुम्चा माल्ब। मेको परमप्रभु यावे कली आ दाक्शो ब्रोव्रशो रिना पाइशो मीम चोशा चढेतीके बाक्ब। मेको नु तूचा थोत्रक चढेतीके हिन का डा ४ भाग सेल्लो रे भाग का अडगुर शांबु चढेचा माल्नीनी। एफाह पुक्तीके का बाक्ब। एफाह का २२ लिटर रिक्ब। मेको के २० भाग

४.४ लिटर बाकब। लोग आइकच पुक्तीके का बाकब। मेको ०.३ लिटर रिक्ब। हिन अर्को पुक्तीके का बाकब। हिन का ४ लिटर खोदेशो रिक्ब। हिन का ४ भाग सेल्शो रे भाग का लिटर का खोदेशो बाकब।  
 14 मेको नेल्ल परमप्रभु कली चढ़ेशो नोले ला शोब्ले, कारशो अन्न नु गिगी बाला मारेइ जने चाप्नीनी। मेको गेपुकी ते बाक्तीनी हना यो, एको गेना हना यो नेल्ल पाला सम्म पतीक बाकब।

### ७ हप्ता नोले डा चाड

15 मिनु नाइक्तीक नाक्ती आ दीसा, गे अन्न आ मुठा क्युकशा हिम्शा चढ़ेतीक नाक्त रे गेपुकीमी ७ हप्ता हिक्चा माल्नीनी। गन्ती २८:२६-३१; ब्यवस्था १६:९-१२

16 मिनु गेपुकीमी ७ हप्ता आ दीसा, ५० नाक्त सम्म हिक्चा माल्नीनी। मेको नाक्ती गेपुकीम परमप्रभु यावे कली नक अन्न चढ़ेचा माल्नीनी।

17 गेपुकीमी आंम इन खिं रे शोब्ले निक्शी क्युकशा हिम्शा चढ़ेचा कली माल्नीनी। मेको शोब्ले का एफाह का के २० भाग थम रिम्शो फस रे बोरब ओरुती सुप्थु चोशा सेल्शो दुम्चा माल्ब। मेको डोंइती मीशो अन्न के परमप्रभु यावे कली चढ़ेतीक बाकब। एफाह पुक्तीके का बाकब। एफाह का २२ लिटर रिक्ब। मेको के २० भाग ४.४ लिटर खोदेशो बाकब।

18 मेको शोब्ले नु बर्स का गाप्शो ७ ओटा मारेइ मदुम्शो थम रिम्शो पाठा नु ब्यफ का नु सांड निक्शी चढ़ेचा माल्नीनी। मेको अन्न चढ़ेतीक नु तूचा थोक्क चढ़ेतीके परमप्रभु यावे कली आ दाक्शो ब्रोवशो रिना पाइशशो मीम चोशो चढ़ेतीक बाकब।

19 मिनु गेपुकीमी पाप आ पर्वम चढ़ेचा कली बोका का नु दुशा बाक्चा आ पर्वम चढ़ेचा कली बर्स का गाप्शो सांड निक्शी यो चढ़ेचा माल्नीनी।

20 मिनु चढ़ेबमी परमप्रभु यावे कली डोंइती नक मीशो अन्न के शोब्ले नु सांड निक्शी क्युकशा हिम्शा चढ़ेचा माल्ब। मेको चढ़ेब आ भाग दुम्चा कली परमप्रभु यावे कली गेशो बाक्नीम।

21 मेको नाक्त इन कली ठेयब युम्तीक नाक्त बाकब, दे गेपुकीमी नेल्ल आन कली नेंपाइक्चा माल्नीनी। गेपुकीमी मारेइ गेय मपने। मेको गेपुकी ते बाक्तीनी हना यो, एको गेना हना यो नेल्ल पाला सम्म पतीक बाकब।

22 मिनु गेपुकीमी इन बाली नाली रिक्नीनु, रू आ कुना कुना सम्म मरिक्कीन। गेपुकीमी इन रू डा सिला बाला यो मगुपीन। गेपुकीमी इन दाते डा प्रुडग नु अर्को रागी डा मुर आन पर्वम प्रोनीन। गो परमप्रभु यावे, इन परमप्रभु नड' दे शेंचा माल्नेवे" देंत। लेवी १९:९-१०

### नाइक्तीक डा चाड

23 मिनु परमप्रभु यावेमी मोसा कली

24 "इसाएली आन कली '७ महिना डा डोंइती डा नाक्ती गे नाइक्चा माल्नीनी। गे परमप्रभु यावे आ पर्वम युम्शा, मेको नाक्त मिम्चा कली तुराही ताप्चा माल्नीनी। गन्ती २९:१-६; गन्ती १०:१०

25 गेपुकीमी मेको नाक्त मारेइ गेय मपने। मिनु परमप्रभु यावे कली मीम चोशो चढ़ेतीके चढ़ेन' दे शेंचा माल्नेवे" देंत।

### पाप क्याम्तीक नाक्ती डा चाड

26 मिनु परमप्रभु यावेमी मोसा कली

27 "मेको ७ महिना डा १० नाक्त पाप क्याम्तीक नाक्त बाकब। मेको नाक्ती गेपुकीमी परमप्रभु यावे आ पर्वम युम्चा माल्नीनी। गेपुकी मेको नाक्त माइजा बाक्चा माल्नीनी। मिनु गेपुकीमी परमप्रभु यावे कली मीम चोशा चढ़ेतीक चढ़ेचा माल्नीनी। लेवी १६:-

28 मेको नाक्त मारेइ गेय मपने। मारेदे हना मेको पाप क्याम्तीक नाक्त बाकब। मेको नाक्ती परमप्रभु यावे, इन परमप्रभु आ डोंइती इन पर्वम पाप क्याम्तीक गेय पतीक नाक्ती बाकब।

29 मिनु सु मेको नेल्ल नाक्ती माइजा मबाक्बा, मेको आ मुर आन दाते रे साइक्चा पुंडसीब।

30 मिनु सुइमी मेको नाक्त मारेइ गेय पाम्तेक्म हना, गो मेको आन कली साइक्नुड।

31 गेपुकीमी मेको नाक्त मारेइ गेय मपने। गेपुकी ते बाक्तीनी हना यो, मेको गेना हना यो इन पतीक बाकब।

32 मेको नाक्त इन कली थमा पा नाइक्तीक नाक्त बाक्ब। मिनु मेको नाक्त गेपुकी माइजा बाक्चा माल्नीनी। मेको महिना डा ९ नाक्त डा नां रिक्म रे आ दीसा नां रिक्म सम्म गेपुकी माइजा बाक्शा नाइक्चा माल्नीनी, दे शेंचा माल्नेवे” दैत।

### गोठ सेल्शा बाक्तीक चाड

33 मिनु परमप्रभु यावेमी मोसा कली

34 “गे इस्राएली आन कली ‘७ महिना डा १५ नाक्त रे ७ नाक्त सम्म परमप्रभु यावे आ डोंइती गोठ सेल्शा बाक्तीक चाड मानेचा माल्नीनी।

35 मेको आ डोंइती डा नाक्ती परमप्रभु यावे आ परबंम गुम्चा माल्नीनी। गेपुकी मेको नाक्त इन गेय मपने।

36 मिनु गेपुकीमी ७ नाक्त सम्म परमप्रभु यावे कली मीम चोशा चढेतीक चढेन। मिनु गेपुकीमी आ दीसा परमप्रभु यावे आ परबंम गुम्तीक नाक्ती मानेन। मिनु परमप्रभु यावे कली मीम चोशा चढेन। मेको ठेयब गुम्तीक नाक्ती बाक्ब। मिनु गेपुकीमी मेको नाक्त इन गेय काड मपने। यूहन्ना ७:३७

37 मिनु परमप्रभु यावे आ देशो ठेयब गुम्तीक डा मानेचा माल्शो चाड तेको बाक्नीम देशा हना, मेको नाक्ती गेपुकीमी परमप्रभु यावे कली मीम चोशा चढेतीके, अन्न चढेतीके, क्योरशा चढेतीके नु तूचा थोव्रक चढेतीके ठीक नाक्ती चढेचा माल्नीनी।

38 मेको क्येडा परमप्रभु यावे आ नाइक्तीक नाक्ती डा, इन दाक्शा गेतीक थोव्रक, इन कबल पशो गेतीक थोव्रक नु इन ग्येरशा गेशो थोव्रक परमप्रभु यावे कली चढेचा माल्नीनी।

39 मिनु ७ महिना डा १५ नाक्ती आंम रू डा अन्न खुप्शो नोले गेपुकीमी ७ नाक्त सम्म परमप्रभु यावे आ चाड मानेचा माल्नीनी। डोंइती डा नाक्त नु ८ नाक्ती थमा पा नाइक्चा माल्नीनी।

40 डोंइती डा नाक्ती गेपुकीमी रवा आन रिम्शो फल फुल, खजूर रवा आन राशी, शुश सफा पाइश्शो रवा आन राशी नु अरु खोलामी बाक्शो रवा आन राशी चाक्शा, गे परमप्रभु यावे, इन परमप्रभु आ डोंइती ७ नाक्त सम्म ग्येरसीन। नेहेम्याह ८:१४-१६

41 गेपुकीमी बर्सम ७ नाक्त सम्म एको चाड मानेशा, परमप्रभु यावे कली ठेयब सेल्चा माल्नीनी। गेपुकी ७ महिनामी एको चाड मानेचा माल्नीनी। एको इन कली गेना हना यो पतीक बाक्ब।

42 गे ७ नाक्त सम्म गोठीमी बाक्कीन। इस्राएल डा मुर नेल्ल गोठीम बाक्चा माल्नीम।

43 गो इन कली इजीप्त रे गुंइशा चाक्नीनु, गोठीम बाक्पाइश्शो नड, दे इन चच युडपुकीम तुइक्चा माल्नीम। गो परमप्रभु यावे, इन परमप्रभु नड’ दे शेंदो” दैत।

44 मिनु मोसामी परमप्रभु यावे कली मानेचा माल्शो चाड मुर नेल्ल आन कली नेंपाइक्तीमी।

## 24

### बत्ती नु शोब्ले

1 मिनु परमप्रभु यावेमी मोसा कली

2 “गे इस्राएली आन कली ‘बत्ती गेना हना यो ब्रपाइश्शा वोइक्चा कली गेपुकीमी तेल रवा आ फल रे तुप्शा सेल्शो तेल चाक्कीन। प्रस्थान २७:२

3 मिनु हारूनमी बत्ती कली गुम्तीक ताम्बु आगा, फारशो वा आ डोंइती वोइक्चा माल्ब। मेको परमप्रभु यावे आ डोंइती नाक्दो रे सुनी सम्म गेना हना यो ब्रचा माल्ब। मेको इन कली गेना हना यो पतीके बाक्ब।

4 मेकोमी परमप्रभु यावे आ डोंइती क्येख सुन के सेल्शो बत्ती दातीक तारी गेना हना यो वोइक्चा माल्ब।

5 गे रिम्शो फस चाक्शा, बार ओटा शोब्ले चोवो। शोब्ले का एफाह का के २० भाग थम रिम्शो फस के दुम्चा माल्ब। एफाह पुक्तीके का बाक्ब। एफाह का २२ लिटर रिक्ब। मेको के २० भाग ४.४ लिटर खोदेशो बाक्ब। प्रस्थान २५:३०

6 मेको शोब्ले परमप्रभु यावे आ डोंइती क्येख सुन के टेबल आ तार ६, ६ ओटा खोप्शा वोइक्चा माल्ब।



7 मेको निकशी खोप्टीकेमी का का पा रिम्शो धूप वोडक्चा माल्ब। मिनु मेको शोब्ले आ पा डा मेको धूप मीम चोशा परमप्रभु यावे कली चढेचा माल्ब।

8 मोपा हारूनमी नेल्ल नाइक्तीक नाक्ती मेको शोब्ले कली परमप्रभु यावे आ डोंडती वोडक्चा माल्ब। मेको इस्राएली आन कली मेको गेना हना यो पतीक नु लीब कबल बाक्ब।

9 मेको शोब्ले हारून नु आ तौ चच आन कली बाक्नीम। मेकोपुकीमी मेको शोब्ले चोवखो बाक्तीकेमी बाक्शा जचा माल्नीम। मारदे हना मेको शोब्ले परमप्रभु यावे कली मीम चोशा चढेशो रे नेल्ल क्येडा चोवखो हारून नु आ तौ चच आन भाग बाक्ब' दे अरेवो" देंत।

### परमप्रभु कली शुक्शी पाइब

10 मिनु इजीप्ती आफ नु इस्राएली ममा पाइशशो मुर का बाक्माक्त। मेको मुर इस्राएली आन दातेमी जाक्शा, इस्राएली का नु तुम्मुसा बाक्त।

11 मिनु मेको इस्राएली ममा आ तौमी परमप्रभु यावे आ नें थिशा, सराप पवा बाक्त। मिनु मुरपुकीमी मेको कली मोसा आ बाक्तीकेम चाकगमे बाक्त। मेको आ ममा आ नें शेलोमीथ बाक्माक्त। मिनु मेको दान आ थर डा दिब्री आ तमी बाक्माक्त।

12 मिनु मेको मुर कली चाक्शा, परमप्रभु यावे आ मिम्शो मतुइक्तेमे सम्म चोक्शा वोदमे बाक्त। गन्ती १५:३४

13 मिनु नोले परमप्रभु यावेमी मोसा कली

14 "मेको सराप पाइब कली मुर आन बाक्तीक रे लाडगा गुंडदीन। मिनु मेको आ नेक्था बाक्ब मुर नेल्लेमी मेको आन गुंड आ पिया तारी वोडक्चा माल्नीम। मिनु मेको नोले नेल्लेमी मेको कली फुल्लु आप्शा साइक्चा माल्नीम। गन्ती १५:३६; ब्यवस्था १५:५; प्रेरित ७:५६

15 मिनु गे इस्राएली आन कली 'सुम आ परमप्रभु कली सराप पाइबा, मेको आ पाप राइब।

16 परमप्रभु यावे आ नें आ पर्वम मरिम्शो लोत्र पाइब साइक्चा पुंडसीब। इस्राएल डा मुर बाक्त हना यो, अर्को रागी डा मुर बाक्त हना यो, सुम परमप्रभु यावे आ नें आ पर्वम मरिम्शो लोत्र पाइबा, मेको साइक्चा पुंडसीब। प्रस्थान २०:१७; मत्ती २६:६५-६६

17 सुमी मुर का कली साइक्बा, मेको साइक्चा पुंडसीब। प्रस्थान २१:१२

18 सुडमी बस्तु भाव कली तुप्शा साइक्तु हना, मेको आ पा डा अरु गेचा माल्ब। ब्रोंडशो बस्तु आ पा डा ब्रोंडशो बस्तु गेचा माल्ब। प्रस्थान २१:३३-३७

19 सुडमी आ नेक्था डा मुर कली आ खोइल जिक्ताक्ब हना, मेको यो आ खोइल जिक्चा पुंडसीब।

20 जिक्तीके आ पा डा जिक्तीके, मिक्च आ पा डा मिक्च, खुइ आ पा डा खुइ, सुमी सु कली मार पाइबा, मेको यो मो पाइक्चा पुंडसीब। मेको कली यो मो पाइक्चा माल्ब। प्रस्थान २१:२३-२५

21 सुडमी बी ब्यफ, क्यारश भेडा आन कली तुप्शा साइक्तु हना, मेको आ पा डा अर्को गेचा माल्ब। तन्न मुर साइक्ब कली चहिं, साइक्चान माल्ब।

22 आंम रागी डा मुर नु अर्को रागी डा मुर आन पर्वम खाल का डा ऐन कानुन दुम्चा माल्ब। मारदे हना गो परमप्रभु यावे, इन परमप्रभु नड' दे शेंचा माल्नेवे" देंत। लेवी १९:३४; प्रस्थान १२:४९

23 मिनु मोसामी इस्राएली आन कली मेको लोत्र शेंदीमी नोले मेकोपुकीमी मेको सराप पाइब कली मुर आन बाक्तीक रे गुंडशा, फुल्लु आप्शा साइक्तेक्म। मिनु परमप्रभु यावेमी मोसा कली अरेशो खोदेशो पा इस्राएली नेल्लेमी पाप्तेक्म।

## 25

### नाइक्तीक बर्स

1 मिनु परमप्रभु यावेमी सीने डांडामी मोसा कली

2 "गे इस्राएली आन कली 'गेपुकी गो इन कली गेशो रागीमी जाक्दीन्नी नोले मेको रागी यो परमप्रभु यावे आ नेमी नाइसीचा माल्ब।

3 गे ६ बर्स सम्म आंम रूम मार मार शोक्या खुम्या माल्नीनी। ६ बर्स सम्म इन अडगुर रू डा बोट आन मसिश्शो राशी खोइश्शा ताइक्का माल्नीनी। मिनु मेको आ अडगुर खुप्या माल्नीनी। प्रस्थान २३:१०-११

4 तन्न ७ बर्सम रू नेल्ले परमप्रभु यावे आ बर्सम नाइक्का माल्ब। गेपुकीमी ७ बर्सम इन रूम मारेइ मशोक्या मखुम्या। मिनु अडगुर बोट आ फल मसिप्ब राशी यो मखोतीनि।

5 इन रूमी आंमा वाशो मारेइ मारेइ खुप्या मदुम्ब। मखोइश्शो अडगुर बोट आ फल खुप्या मदुम्ब। मेको रू कली थम नांडसीतीक बर्स दुम्या माल्ब।

6 मेको रू नांडसे ना आंमा सिश्शो मारेइ मारेइ जने चाप्नीनी। मिनु इन वाइलीम वाइल नु गे नु बाक्ब इन थाप्शो गेय पाइबपुकीमी जने चाप्नीमी।

7 मेको रूमी वाशो, इन बस्तु भाव नु ब्वाकी डा जन्तु आन कली ब्वतीक दुम्ब।

### डोंइती डा खोदेशो सेल्लतीक बर्स

8 मिनु गेपुकीमी ७ नाइक्तीक बर्स मानेनी नोले, मिनु ४९ बर्स दुम्बा,

9 मिनु ७ महिना डा १० नाक्ती पाप क्याम्तीक नाक्त बाक्ब। मेको नाक्ती इन रागी नेल्लेमी तुराही ताप्पाइक्का माल्नीनी। लेवी २३:२७

10 मिनु ५० डा बर्स परमप्रभु यावे आ बर्स बाक्ब। मिनु गे रागी डा मुर नेल्ल आन कली आन डोंइती डा अधिकार लेशा ताइनीम, दे नैपाइक्का माल्नीनी। मेको इन कली प्रोंइतीक बर्स बाक्ब। मिनु मुर नेल्ल आन आन खिं नु आन आन बाक्तीक लेन्ने चाप्नीम। यसैया ६१:२; लूका ४:१९

11 मेको ५० बर्स इन कली डोंइती डा खोदेशो पा लेशा सेल्लतीक बर्स बाक्ब। मेको बर्स गेपुकीमी मारेइ मशोक्कीन, मखुमीन। आंमा वाशो बाली नाली मरुप्या। अडगुर बोट आन ममुंइशो राशीम सिश्शो अडगुर मखुप्या।

12 मारदे हना मेको प्रोंइतीक बर्स बाक्ब। मेको परमप्रभु यावे आ बर्स दुम्ब। गेपुकीमी रूम आंमा वाशो, आंमा सिश्शो ला जने।

13 मेको प्रोंइतीक बर्समी मुर नेल्ल आन आन रू नु खिं लेत्या माल्नीम।

14 मिनु आंम नेक्था डा मुर नु ग्याप्तीक लेयतीक गेय पनीनु, मठगेपामुने। १ थिस्सलोनिकी ४:६

15 गे इन नेक्था डा मुर रे रू का ग्याप्तीवी हना, मेको प्रोंइतीक बर्स जाक्का गिश बर्स लीनीम, दे हिक्शा ला ग्यापीन।

16 गिश बर्स लीनीमी मेको कोव्रशा गेपुकीमी आ क्येट बारपाइक्का माल्नीनी। मिनु इक्का बर्स ला लीतेक्म हना, क्येट तोक्का माल्नीनी। मारदे हना अन्न खुप्तीक बर्स कोव्रशा, मेको रू लेयशो बाक्ब।

17 गेपुकी आंम आंमा मठगेपामुने। तन्न परमप्रभु क्येडा हिनीन। मारदे हना गो परमप्रभु यावे, इन परमप्रभु नड।

18 गेपुकीमी आं फुल्लुम मुशा ब्रेक्शो लोव्र तुइश्शा पचा माल्नीनी। आ पावो, दे अरेशो लोव्र टिने। मोपा ला गे मेको रागीमी रिम्शो पा बाक्ने चाप्नीनी। लेवी २६:५; १राजा ५:५

19 मिनु रागीमी अन्न ग्रेल्ब। गेपुकी जचा तूचाम श्येत मजाइनीनी। मिनु मेको रागीमी महिंथु थुं नाइश्शा बाक्का ताइनीनी।

20 गेपुकीमी अन्न मशोक्थु मखुप्यु ७ बर्सम चहिं गो मार जाइनीकी, दे देंतीनी हना,

21 गो ६ बर्सम इन कली आं आसीक गेनन्नी। मिनु रागीम बर्स सां सम्म शुश अन्न ग्रेल्पाइक्कुड। ब्यवस्था २८:८

22 गेपुकीमी ८ बर्सम खुम्नीनु, गे माइत अन्न रे जाइनीनी। ९ बर्सम नक बाली नाली ममीम सम्म गे माइतन जाइनीनी।

### रागी रू नेल्ल परमप्रभु के बाक्ब

23 मिनु इन गे रू गेना हना यो कली लेयने मचाप्नीनी। मारदे हना मेको रागी आं के बाक्ब। गेपुकी गे आं के वाइल नु बुम्या पाइब खोदेशो बाक्नीनी। भजन संग्रह ३९:१३

24 इन ग्याप्शो अधिकारम पिशो रू लेशा लेत्या माल्नीनी।

25 सुइ इन मुर पुडग दुम्तीके आन रू लेयचा माल्तेकम हना, मेको आ नेक्था डा मुर जाक्शा, मेको लेशशा ग्याप्पाइक्चा माल्ब। रूथ ४:३-४

26 तन्न मो पाइब सुइ मबाक्तेकम हना, नोले मेको आंमान क्येट थीब दुम्शा, लेशशा आंमा ग्याप्चा माल्ब।

27 मेकोमी मेको लेयशो गिश बर्स दुम्मे, मेको हिक्चा माल्ब। मिनु सु कली लेयशो बाक्मे, मेको लीशो बर्स डा खुप्तीक अन्न डा क्येट गेचा माल्ब। मिनु मेको मुर आ रू लेंशा मेको केन दुम्ब।

28 तन्न आंमा लेन्ने मचाप्टु हना, मेको रू ग्याप्ब मुर नु बाक्ब। मिनु रू ग्याप्बमी प्रॉइतीक बर्सम लेत्चा माल्ब।

29 मिनु सुइमी गारो हिरशो सहर आगा डा खिं लेयतु हना, लेयशो बर्स का सम्म मेकोमी मेको आ खिं लेन्ने चाप्ब। मेको कली मेको अधिकार बर्स का सम्म बाक्ब।

30 तन्न बर्स काम यो मेको लेन्ने मचाप्टु हना, ग्याप्ब नु आ खिं डा मुर आन कली मेको खिं आन शोंप दुम्ब। प्रॉइतीक बर्सम यो मेको लेशशा गेचा ममाल्ब।

31 तन्न गारो महिरशो बाक्तीके डा खिंपुकी चहिं रूपुकी खोदेशो पा पचा माल्ब। मेको लेन्ने चाप्नीम। मिनु प्रॉइतीक बर्सम लेशशा गेचा माल्नीम।

32 मिनु लेवी आन सहरमी बाक्शो खिं चहिं मेकोपुकीमी आंम खिं गेना हना यो लेन्ने चाप्नीम। गन्ती ३५:२-५

33 लेवी आन सहरम बाक्शो लेयशो खिं अरु लेवीम लेन्ने मचाप्तेकम हना, प्रॉइतीक बर्समी मेको खिं लेशशा, मेको कली गेचा माल्ब। मारदे हना लेवी आन सहरम बाक्शो खिं इस्राएली आन दातेमी लेवी आन शोंप बाक्नीम।

34 मेको आन सहर क्येडा लाडगाम बाक्शो रूपुकी लेयचा मताइनीम। मारदे हना मेको आन गेना हना यो लीब शोंप बाक्नीम।

### क्येट आ चाइक्ब मताक्को

35 मिनु इन इस्राएली लोकब का शुश पुडग दुम्शा, पने जने मचाप्टु हना, गेपुकीमी मेको कली अर्को रागी डा मुर खोदेशो पा वारच पचा माल्नीनी। मिनु मेको गेपुकी नु बाक्ने चबल।

36 मिनु गे मेको कली जेर गेनीनु, आ चाइक्ब मताक्कीन। गे इन परमप्रभु क्येडा हिनीन। मिनु इन लोकब कली गे नु बाक्चा गेन। प्रस्थान २२:२४; ब्यवस्था २३:२०

37 गेपुकीमी मेको कली क्येट गेतीकेमी चाइक्ब मताक्कीन। मिनु मेको कली जचा थोत्रक गेशा, मेको आ क्येडा शुश मलेप्पाइक्तीन।

38 गो इन परमप्रभु दुम्चा नु इन कली कनान रागी गेचा, दे इन कली इजीप्त रागी रे गुंडशा, एक चाक्ब, गो परमप्रभु यावे, इन परमप्रभु नड।

39 मिनु गे इन इस्राएली लोकब शुश पुडग दुम्शा, आंमा इन कली लेयसाकम हना, मेको आन कली वाइल खोदेशो पा गेय मपपतीन। प्रस्थान २१:२

40 मिनु गेपुकीमी मेको कली थाप्शो गेय पाइब कि अर्को रागी डा गेय पाइब खोदेशो पा बाक्चा गेने। मिनु मेको प्रॉइतीक बर्स सम्म गेपुकी नु बाक्शा इन गेय पाइब दुम्ब।

41 मिनु नोले मेकोपुकी नु आन तमी तौ गे इन बाक्तीक रे लशा, आन खिं डा मुर नु आन बाक्तीक लेम्मल।

42 मारदे हना मेकोपुकी गो इजीप्त रे गुंडशा चाक्शो आं गेय पाइबपुकी बाक्नीम। मेको आन कली वाइलीम वाइल खोदेशो पा लेयचा मदुम्ब।

43 मिनु गेपुकीमी मेको आन कली शुश अरेशा श्येत मगेन। इन परमप्रभु कली तशा हिनीन। प्रस्थान २१:२०-२१

44 मिनु गेपुकीमी इन वाइलीम वाइल चहिं एर ओंथ डा अर्को रागी डा मुर रे ग्याप्चा माल्नीनी।

45 गेपुकी नु बाक्ब अर्को रागी डा मुरपुकी नु इन रागीम जरमेशो मेको आन खिं डा मुर रे ग्याप्चा, इन के सेल्ने चाप्नीनी।

46 गे मेको आन कली आंम तौ चच आंम वाइलीम वाइल दुम्या कली ग्याप्शा वोइक्ने चाप्नीनी। गे मेको आन कली वाइलीम वाइल खोदेशो पा दिप्शा गेय पपाइक्ने चाप्नीनी। तन्न आंम लोकब इस्राएली आन कली मोपा श्येत गेशा दिप्ने मचाप्नीनी।

47 मिनु इन दातेमी बाक्ब अर्को रागी डा मुर क्येट थीब दुम्त हना नु सुइ इन लोकब श्येत जशा, पुडग दुम्या, मेको आंम कली कि आ खिं डा मुर कली लेयसाक्व हना,

48 मेको लेयसे नोले आ लोकबपुकीमी मेको कली लेन्ने चाप्नीम। मेको आ लोकब कामी मेको कली लेन्ने चाप्ब।

49 मेको आ आफ आ लोकब, आं लोकब नु सुइ आ नेक्था डा मुरुमी मेको कली लेन्ने चाप्ब। मेको नोले शुश क्येट थीब दुम्त हना, आंमा थाप्शा गूने चाप्ब।

50 मेको मुरुमी आ अर्को रागी डा ठेयब मुर कली लेयसीशो बर्स रे प्रोइतीक बर्स सम्म हिकशा, आ गेय पतीक लीशो बर्स कली जेला तशो खोदेशो पा हिक्या माल्ब। मिनु लीशो बर्सम ततीके जेला डा क्येट हिकशा थाप्चा माल्ब।

51 मिनु शुश बर्स लीमेनु, आंमा लेयसीशो मुरुमी मेको गेय मपशो नेल्ल बर्स हिकशा, मेको कली गारचा डा पा थाप्चा माल्ब।

52 मिनु मेको प्रोइतीक बर्स सम्म का निक्शी बर्स ला लीतेक्म हना, मेकोमी जेला तशो खोदेशो पा का निक्शी बर्स डा गारचा डा पा प्रोइतीक बर्स सम्म क्येट थाप्चा माल्ब।

53 मिनु मेको अर्को रागी डा ठेयब मुरुमी आंमा लेयसीशो इस्राएली कली बर्स का कली जेला ताक्शा गेय पाइब खोदेशो पा रिमशो पचा माल्ब। मेको कली वाइलीम वाइल कली खोदेशो पचा मदुम्ब। लेवी २५:४३

54 मोपा यो मेको मुर प्रोइचा मपुंडसाक्व हना, रिमशा। मेको नु आ खिं डा मुर प्रोइतीक बर्सम ला लचा ताइनीम।

55 मारदे हना इस्राएलीपुकी आं गेय पाइब बाक्नीम। गो मेको आन कली इजीप्त रागी रे गुंडशा चाक्ताक्मी। गो परमप्रभु यावे, इन परमप्रभु नड' दे शेंदो" दे परमप्रभु यावेमी देंत।

## 26

लोत्र टीब आन कली आसीक

प्रस्थान २३:२०-३३; ब्यवस्था २८:-

1 मिनु लेंशा परमप्रभु यावेमी मोसा कली "गेपुकीमी इन कली मूर्तिपुकी मसेलीन। मिनु आंम कली मुशा मूर्ति नु पूजा पचा कली थाम मवोतीन। मिनु इन रागीमी मुशो फुल्लु मवोतीन। मेको कली पूजा पा आन डोइती मबपीन। मारदे हना गो परमप्रभु यावे, इन परमप्रभु नड। प्रस्थान २०:४-५

2 गेपुकीमी आं नाइक्तीक नाक्ती मानेन। मिनु आं बाक्तीक कली मान पने। गो परमप्रभु यावे नड। लेवी १९:३०

3 गेपुकीमी आं फुल्लुम मुशा ब्रेक्शो लोत्र टिशा पाइतीनी हना,

4 गो रेड यिची ना रेड यिपाइक्नुड। मिनु इन रूम शुश अन्न ग्रेल्नीम। मिनु रवाम शुश फल फुल सिस्लीम।

5 मिनु अडगुर सेक्ची ना सम्म इन अन्न तुप्नीनी। मिनु अडगुर सेक्ने मथुमथु शोक्ची ना दुम्ब। मोपा गेपुकी नु शुश जचा तूचा बाक्ब। मिनु इन रागीम थुं नाइश्शा बाक्चा ताइनीनी। आमोस ९:१३

6 मिनु गो रागी डा मुर आन कली थुं नाइश्शा बाक्चा गेनुड। मिनु गेपुकी गोल्शा निन्द्रा पाइनीनी। सुइमी इन कली हिंच मकोइब। गो इन रागी रे हिंचा डा जन्तु आन कली खेरनुडमी। इन रागीमी लडाइ मदुम्ब। इजीकीएल ३४:२५

7 मिनु गेपुकीमी इन जोरी सत्रु आन कली खेदा पा तरवारम साइक्नीनी।

8 इन मुर ५ जनामी सहे का मुर आन कली नु सहे का मुरुमी १० हजार मुर आन कली खेदा पाइनीम। इन जोरी सत्रु इन तरवारम शोल्मो पा बेक्नीम। ब्यवस्था ३२:३०; यहोसु २३:१०

9 मिनु गो इन कली शिशी पा कोन्नन्नी। मिनु गो इन कली सोशा बोशा शुश दुम्पाइक्नुड। मिनु आं पशो कबल गेपुकी नु गेना हना यो लीपाइक्नुड। इजीकीएल ३६:११

10 गेपुकीम इन खेक्शा वोइश्शो माइत अन्न जना जन, नक अन्न वोइक्चा कली माइत अन्न तिल्चा माल्नीनी।

11 गो इन कली ग्रांग्रा मदित्थु, इन दातेमीन आ बाक्तीकेम बाक्नुड। येरमीया ७:२३; २कोरिन्थी ६:१६

12 मिनु गो इन दातेमी बाक्शा, गो परमप्रभु दुमुनुड। मिनु गेपुकी आं मुर बाक्नीनी। गो परमप्रभु यावे, इन परमप्रभु बाक्नुड।

13 गो परमप्रभु यावे, इन परमप्रभु नड। गेपुकी इन कली इजीप्ती आन वाइलीम वाइल मदुम्पाइक्थु, एक चाक्तन्नी। गो इन शुर डा जवा जिक्शा, इन पिया पोक्शा गाक्ब सेल्लन्नी। इजीकीएल ३४:२७-२८

लोत्र मटीब आन कली सजाइ

14 तन्न गेपुकीमी आं लोत्र मटीतीनी नु आं अरेशो मपाइतीनी,

15 नु आं फुल्लुम मुशा ब्रेक्शो लोत्र मकोत्रतीनी, आं अरेशो मपाइतीनी नु आं कबल प्रोंडतीनी हना,

16 गो इन कली मार पाइनुड देशा हना, गो इन दातेमी शुश हींतीके सेल्लुड। मिनु इन रां सोव्रना सोव्रन बाक्नीम। मिनु जरो पा इन मिक्च ततीके जाम्ना जाम्न लाइब। मिनु गे ओंखां पा बेक्नीनी। इन शोक्शो अन्न मोशा दुम्नीम। मारदे हना इन जोरी सत्रुम नेक्नीम।

17 गो इन कली मरिम्शो पाइक्नुड। गे इन जोरी सत्रु रे बुइनीनी। इन जोरी सत्रु इन कली हुकुम पाइब दुम्नीम। मिनु सुइमी इन कली खेदा मपाम्तेक्म हना यो, गेपुकी प्रोक्नीनी।

18 मेको नेल्ल तुइश्शा यो, आं कली मटीतीनी हना, गो इन पाप ७ खेयप तेम्शा सजाइ गेनन्नी।

19 गो इन ठेयब लेशो खतम सेल्लुड। मिनु गो इन सरीड फलाम खोदेशो नु इन रू तांबा खोदेशो सेल्लुड। ब्यवस्था ११:११-१७

20 मिनु इन सक्ति मोशा दुम्शा मारेइ पने मचाप्नीनी। इन रूम मारेइ मवाब। मिनु इन रागी डा रवापुकीम फल मसिल्लीम।

21 गेपुकी दूली लांम गाक्स डा गाक्स पा, आं कली मटीतीनी हना, गो इन पाप ७ खेयप तेम्शा इन कली श्येत गेनन्नी

22 गो इन दातेमी ब्वाकी डा जन्तुपुकी सोइक्नुडमी। मेकोमी इन आल आन कली ब्वाइनीम। मिनु इन बस्तु भाव साइक्नीम। मिनु गे का निक्शी ला दुम्तीके इन लां नेल्ल श्येत्थ दुम्नीम। इजीकीएल ५:१७

23 मोपा सजाइ तशा यो, गेपुकी आं गे मलेत्तीनी हना, नु दूली लां गाक्स डा गाक्स पाइतीनी हना, रसामुएल २२:२७

24 गो इन कली यो मरिम्शो पस डा पस पाइनुड। मिनु गो इन पाप ७ खेयप तेम्शा, इन कली श्येत गेनुड।

25 गो इन कली लडाइ तोपाइक्नुड। मिनु आं कबल प्रोंडिशो आ पबंम क्येक्क लेत्नुड। गेपुकी आंम आंमा सहरम बुक्तीनी हना, गो मेकेर यो इन दातेम बेक्पाइक्ब रोइ सोइक्नुड। मिनु इन जोरी सत्रु आन गुडम दुम्नीनी। यसैया १:२०, २४

26 मिनु गो इन अन्न थमा पा साम्पाइक्नुड। १० ओटा खिं डा मीश मुरुमी चुप्लु कामी क्येनीम। क्येशा पुक्शा तेम्मेनु, सुइ मरूनीम। यसैया ३:१; इजीकीएल ४:१६

27 मिनु मेको मो दुम्शा यो, गे आं कली मटिथु, दूली लां गाक्स डा गाक्स पाइतीनी हना,

28 गो इन कली मरिम्शो पस डा पस गुम्नुड। मिनु इन पाप ७ खेयप तेम्शा, सजाइ गेनन्नी। ब्यवस्था २८:५३; येरमीया १९:९

29 गेपुकीमी इन तमी तौ आन श्ये ब्वचा माल्नीनी।

30 गो इन डांडा डा पूजा पतीक थामपुकी प्रेतनुड। इन धूप चोतीक नेल्ल प्रेतनुड। मिनु इन बेक्शो रां मेको ब्रोल्शो मूर्ति आन तार ताइक्नुड। मिनु गो इन कली तशा ग्रांग्रा दिशा तिल्लुड। इजीकीएल ६:४, ६

31 गो इन सहर गोरशो रागी खोदेशो सेल्लुड। मिनु इन पूजा पतीके थान श्येत्थ सेल्लुड। गो इन ब्रोव्रशो धूप आन रिना मनाम्नुड।

32 मिनु गो रागी कली खतम पोक्नुड। मिनु मेकेर जाक्शा बाक्ब इन जोरी सत्रुमी मेको तशा छक लाक्नीम।

33 गो इन कली रागी रागी डा मुर आन दातेमी ब्रपाइक्नुड। मिनु लडाइ तोपाइश्शा, इन कली खेदा पपाइक्नुड। मिनु इन रागी श्येत्थ नु इन सहरपुकी गोरशो सेल्लुड।

34 मिनु रागी श्येत्थ दुम्मेनु, मेको आ नाइक्तीक बर्स ग्येरशा मानेब। मिनु गेपुकी इन जोरी सत्रु आन रागीम बाक्नीनु, इन रागी चहिं ग्येरशा नांडसीब। लेवी २५:२; २इतिहास २६:२१

35 मेको रागी गिश नाक्त सम्म श्येत्थ लीबा, मिश नाक्त नाइक्चा ताइब। गेपुकी मेक बाक्नीनु, नाइक्तीक बर्स नाइक्चा मतशो, नाइक्तीक बर्स मानेशो बाक्ब।

36 मिनु गो इन जोरी सत्रु आन रागीम बाक्शो लीशो मुर आन थुं लुकच लपाइक्नुड। मिनु सफा दोक्शो रेयके नेशा यो, आन जोरी सत्रुम खेदा पशो खोदेशो पा प्रोक्नीम। मिनु मोशा दाइल पा थित्नीम।

37 सुडमी खेदा मपथु यो, मेकोपुकी तरवार तशा प्रोक्शो खोदेशो पा, प्रोक्नीम। मिनु थोक्मुशा गोलनीम। मोपतीके आन जोरी सत्रु आन डोंइती राप्ने मचाप्नीम।

38 गेपुकी अर्को रागी डा मुर आन दातेमी जाम्शा लाइनीनी। मिनु इन जोरी सत्रु आन रागीमी इन कली दाक्ब।

39 मिनु लीशोपुकी चहिं जोरी सत्रु आन रागीमी आन पाप नु आन किकी पिपी आन पाप पतीके बेक्ना बेक्न लाइनीम। इजीकीएल २४:२३; इजीकीएल ३३:१०

40 तन्न मेकोपुकीमी आंम पाप नु आन किकी पिपी आन पाप आ पर्वम 'मरिम्शो पाइतक नु दूली लां गाक्स डा गाक्स पाइतक' देतेक्म हना, ब्यवस्था ४:३०

41 मिनु गो मेको आन कली मरिम्शो पस डा पस बाक्शा, आन जोरी सत्रु आन रागीम सोइक्ताक्डमी। मिनु मेको आन खकटा थुं ब्रेम्शो दुम्शा, आन पाप आ पर्वम पाप क्याम्तीक गेय पाप्तेक्म हना, ब्यवस्था १०:१६; येरमीया ९:२५

42 गो याकूब, इसहाक नु अब्राहाम नु पशो आं कबल नु मेको रागी कली मिम्नुड। प्रस्थान २:२४; २राजा १३:२३

43 मारदे हना मेको रागी श्येत्थ दुम्शा, आ नाइक्तीक बर्सपुकी मुर मबाक्तीके मानेना मानेन बाक्ब। मिनु मेकोपुकीमी आन मरिम्शो पशो आ पर्वम सजाइ ताइनीम। मारदे हना मेकोपुकीमी आं पावो, दे अरेतीक लोव्र नु आं फुल्लुम मुशा ब्रेक्शो लोव्र काइ मपाम।

44 मिनु मोदेशो पाप्तेक्म हना यो, गो मेको आन कली आन जोरी सत्रु आन रागीमी कोव्रशा, ग्रांघ्रा दिशा खतम मसेल्लुडमी। मिनु मेकोपुकी नु पशो आं कबल मप्रोंइनुड। मारदे हना गो परमप्रभु यावे, मेको आन परमप्रभु नड। होसे ११:९

45 तन्न गो मेको आन कली मिम्शा, आन किकी पिपी नु पशो आं कबल मिम्नुड। गो नेल्ल रागी डा मुरपुकीम तचा डा पा मेको आन परमप्रभु दुम्तीके, मेको आन कली इजीप्त रागी रे गुंइशा चाक्ताक्मी। गो परमप्रभु यावे नड" दे परमप्रभु यावेमी देंत। उत्पत्ती १२:७

46 एको परमप्रभु यावेमी सौने डांडाम मोसा कली गेशो आं नु इस्राएली आन दातेमी फुल्लुम मुशा ब्रेक्शो लोव्र नु "पावो" दे अरेशो लोव्र बाक्नीम।

## 27

मुर आ पर्वम कसम जशो

1 मिनु परमप्रभु यावेमी मोसा कली

2 "गे इस्राएली आन कली 'सुडमी परमप्रभु यावे कली मुर आ पा डा क्येट गेनुड' दे कसम जाप्तु हना,

3 मेकोमी २० बर्स रे ६० बर्स सम्म डा वोंइश मुर आन पर्वम आं ताम्बु डा चांदी के ५० शेकेल परमप्रभु यावे कली गेचा माल्नीम। शेकेल इस्राएली आन क्येट बाक्ब। शेकेल का ११.५ ग्राम चांदी बाक्ब। ताम्बु डा शेकेल चहिं १२ ग्राम बाक्त। न्यायाधीस ११:३१; १सामुएल १:११

4 मीश मुर आ पर्वम बाक्त हना, मेकोम ३० शेकेल गेचा माल्ब। ३० शेकेल ३६० ग्राम चांदी बाक्ब।

5 मिनू ५ बर्स रे २० बर्स सम्म डा वोंडश आल आन पर्वम २० शेकेल गेचा माल्ब। मीश आल बाक्त हना, १० शेकेल गेचा माल्ब।

6 मिनू महिना कारे ५ बर्स सम्म डा वोंडश आल आन पर्वम चांदी के ५ शेकेल नु मीश आल आन पर्वम चांदी के शेकेल सां गेचा माल्नीम।

7 मिनू ६० बर्स क्येडा ग्येत्थ डा वोंडश मुर आ पर्वम १५ शेकेल नु मीश मुर आ पर्वम १० शेकेल गेचा माल्ब। ताम्बु डा शेकेल का १२ ग्राम बाक्ब।

8 मिनू मेको मुर पुडग दुम्शा, गेने मचाप्व बाक्त हना, मेको कली चढेब आ डोंइती चाक्चा माल्नीम। मिनू चढेबमी मेको कसम जाइब आ चाप्लो खोंदेशो पा मेको आ क्येट देंचा माल्ब।

9 मिनू परमप्रभु यावे कली चढेचा डा बी ब्यफ, क्यारश भेडा बाक्तेकम हना, मेको मारेइ मदुम्शो थम रिम्शो नु ग्रंग्रा मदिशो बाक्चा माल्नीम।

10 मेको आ पा डा अरु फाइक्चा मदुम्ब। रिम्शो बस्तु आ पा डा मरिम्शो नु मरिम्शो आ पा डा रिम्शो फाइक्चा मदुम्ब। चढेचा डा बस्तु फाइक्तेकम हना, मेको बस्तु निम्फा मारेइ मदुम्शो थम रिम्शो ग्रंग्रा मदिशो बाक्चा माल्नीस।

11 मिनू परमप्रभु यावे आ डोंइती चढेचा मदुम्शो ग्रंग्रा दिशो बस्तु भाव बाक्तेकम हना, मेको आन कली चढेब कली कोंइचा माल्नीम।

12 मिनू चढेबमी मेको बस्तु रिम्शो बाक्त हना यो, मरिम्शो बाक्त हना यो, मेको गिश क्येट लाइक्बा, दे चढेबमी देंचा माल्ब। मिनू चढेबमी दोशो देंबा मेको ठीक दुम्ब।

13 मेको मुरुम क्येट थाप्ला, मेको बस्तु कली प्रोंइचा दाक्ब हना, चढेब आ देंशो क्येडा यो ५ भाग डा भाग का क्येट तेम्शा गेचा माल्ब। लेवी ५:१६

14 मिनू सुइ मुरुमी परमप्रभु यावे कली खिं का चढेप्टु हना, चढेबमी मेको खिं कोव्रशा रिम्शो बाक्म कों मरिम्शो बाक्मे 'ओशो क्येट लाइक्ब' देंचा माल्ब। मिनू चढेबमी दोशो देंबा मेको ठीक दुम्ब।

15 मिनू मेको मुरुमी क्येट थाप्ला लेत्या थुं पाप्टु हना, चढेबमी देंशो क्येडा यो ५ भाग डा भाग का क्येट तेम्शा गेचा माल्ब। मिनू मेको खिं मेको केन दुम्ब।

16 मिनू सुइ मुरुमी तेकोइ आंम रू परमप्रभु यावे कली चढेप्टु हना, चढेबमी मेको रूम दोशो वांचेर लाइबा कोव्रशा, मेको आ क्येट देंचा माल्ब। होमेर का क्योव्रज वांचेर लाइब रू कली ५० चांदी के शेकेल दुम्चा माल्ब। होमेर का २२० लिटर रिक्ब पुक्तीक का बाक्ब। ताम्बु डा शेकेल का १२ ग्राम चांदी बाक्ब।२सामुएल २४:२४

17 मेको मुरुमी आ रू कली लेंशा प्रोंइतीक बर्स आ नोले डा बर्स रे चढेप्टु हना, मेको आ क्येट चढेबमी देंशो खोंदेशो दुम्ब। लेवी २५:८-५५

18 तन्न मेकोमी आ रू लेंशा प्रोंइतीक बर्स इक्का बर्स नोले चढेप्टु हना, लेंशा प्रोंइतीक बर्स जाक्चा दोशो लीशो बाक्मे, चढेबमी मेको हिक्चा माल्ब। मिनू आ देंशो क्येट रे तोक्चा माल्ब।

19 मेको मुरुमी मेको रू लेंशा फेट्या दाक्ब हना, चढेबमी देंशो क्येट क्येडा ५ भाग डा भाग का क्येट तेम्शा गेचा माल्ब। मिनू मेको रू मेको केन दुम्ब।

20 तन्न मेकोमी मेको रू मलेप्व हना, मेकोमी मेको रू अर्को मुर कली लेयशो बाक्त हना, मेकोमी मेको रू गेनायो लेत्या मताइब।

21 मेको रू लेंशा प्रोंइतीक बर्सम प्रोंइशो बाक्त हना, मेको परमप्रभु यावे कली जिम्मा गेशो रू दुम्शा, चढेबमी मेको रूम शोक्ब।

22 मिनू सुइ मुरुमी आंम के ममाइ, तन्न आ ग्याप्लो रू परमप्रभु यावे कली चढेप्टु हना,

23 चढेबमी लेंशा प्रोंइतीक बर्स सम्म हिक्शा, मेको आ क्येट दोशो बाक्मे, मोशो गेचा माल्ब। मेको नाक्तीन परमप्रभु यावे कली गेचा माल्ब।

24 मिनू लेंशा प्रोंइतीक बर्सम मेको रू सु रे ग्याप्लो बाक्मे, मेको लेंशा ताइब।

25 मिनु गिश क्येट लाइबा, मेको नेल्ल परमप्रभु यावे आ ताम्बु डा चांदी के शेकेलम थाप्चा माल्ब। शेकेल काम २० गेरा बाक्नीम। गेरा का ०.६ ग्राम् बाक्ब।

26 मिनु बी ब्यफ, क्यारश भेडा आन डोंडती जरमेशो ब्यफ बाक्त हना यो, सांड बाक्त हना यो, बोका बाक्त हना यो, मेको डोंडती रे परमप्रभु यावे केन बाक्ब। सुइमी परमप्रभु यावे कली गेने मचाप्नीमी। प्रस्थान १३:२, १२, १३; गन्ती १८:१५

27 मेको ग्राग्रा दिशो बस्तु भाव बाक्त हना, आ देशो क्येट क्येडा ५ भाग डा भाग का तेम्शा, लेत्चा माल्ब। तन्न मलेत्ताकम हना, आ देशो क्येटीम लेयचा माल्ब।

28 मिनु परमप्रभु यावे कली साइक्चा कली जिम्मा गेशो मारेइ मारेइ मुर बाक्त हना यो, बस्तु भाव बाक्त हना यो, आंम रू बाक्त हना यो, मेको लेयने नु लेन्ने मचाप्नीम। मेको साइक्चा कली जिम्मा गेशो मारेइ मारेइ थमा पा परमप्रभु यावे केन बाक्नीम। गन्ती १८:१४; गन्ती २१:२; यहोसु ६:१८, २६; इजीकीएल ४४:२९

29 मिनु सु मुर साइक्चा कली जिम्मा गेचा पुंडसीशो बाक्बा, मेको कली क्येट थाप्शा मलेत्थु, साइक्चा माल्ब। यहोसु ६:१७-१८; १सामुएल १५:३-९

30 मिनु रू नेल्ल डा, अन्न कि रवा आ फल फुल १० भाग परमप्रभु यावे केन बाक्ब। मेको परमप्रभु यावे केन बाक्ब। गन्ती १८:२१; ब्यवस्था १४:२२-२९; नेहेम्याह १३:१२

31 मुरुमी आंमा आ गेशो १० भाग लेत्चा दाक्ताक्व हना, ५ भाग तेम्शा, लेन्ने चाप्ब।

32 नेल्ल गोठ डा बी ब्यफ, क्यारश भेडा, मारेइ मारेइ गोठलाम हिक्तु हना यो, १० ओटा डा का परमप्रभु यावे केन बाक्ब। २इतिहास ३१:६

33 मेकोमी रिम्शो नु मरिम्शो तिल्शा फाइक्चा मदुम्ब। मुरुमी मेको बस्तु फाइक्चा थुं पाप्तु हना, निम्फा परमप्रभु यावे कली गेचा माल्ब। मिनु क्येट थाप्शा, लेत्चा मदुम्ब, दे अरेवो” दे परमप्रभु यावेमी मोसा कली देंत।

34 मिनु सीने डांडामी परमप्रभु यावेमी इस्राएली आन कली मोसा रे पा शेंशो लोत्र एको बाक्नीम। लेवी ७:३८; लेवी २५:१; २६:४६



## गन्ती

**ब्रेक्ब मुर:** एको किताब ब्रेक्ब यो मेको गोरशो रागी हिरब आन दातेमी बाक्शो बाक्त। मारदे हना दोपा मेकोमी मुर आन कली हिकतीके नु अरु मार मार आइक्च गेय पशो नेल्ल ब्रेक्बे चाप्वा डा? मोपतीके मोसामी एको किताब ब्रेक्शो बाक्ब, दे मिन्मीम। गन्ती ३३:२

**गेना ब्रेक्शो:** प्रस्थान ब्रेक्शो नोले, एको किताब सीने डांडाम मार मार दुम्शो बाक्मे, मेको आ पर्वम ब्रेक्शो बाक्त। एको किताब मोसा आ ब्रोंइची ना ब्रेक्शो बाक्ब।

### मारदे ब्रेक्शो:

१. सीने डांडा रे गाक्चा साशो गन्ती १:-१०:१०
२. सीने डांडा रे कादेश सम्म जाक्शो गन्ती १०:११
३. मोआब रागी यर्दन खोला आ पूर्व सम्म जाक्शो गन्ती २२:- ३६:-

### सीने डांडाम मुर हिकशो

गन्ती २६:२-५१

१ इस्राएलीपुकी इजीप्त रे जाक्मा आ बर्स निक्शी, महिना निक्शी डा डोंइती डा नाक्त परमप्रभु यावेमी सीने डा रागीमी बाक्शो गुन्तीक ताम्बुमी मोसा कली लोत्र पाप्नु। प्रस्थान ४०:१७

२ मिनु मेकोमी “गे इस्राएली वोंइश मुर आन थर थर नु आन खिं खिं पा नेल्ल आन नें ब्रेक्चा माल्नेवे। उत्पत्ती ३५:२३-३६; प्रस्थान ३०:१२

३ इस्राएलमी २० बर्स गाप्शो नु मेको क्येडा लाक्शो लडाइम लने चाप्ब मुर नेल्ल आन कली गे नु हारूनमी लडाइ पचा कली खुप्शा वोइक्चा माल्नीसी।

४ मेको नेल्ल आन थर रे मुर का कामी इस कली वारच पचा माल्नीम। मेको मुर आन खिं डा ठेयब मुर बाक्चा माल्नीम।

५ मिनु सु सुम इन कली वारच पचा माल्नीम देशा हना, रूबेन आ थर रे शेदेउर आ तौ एली-सुर,

६ सिमियोन आ थर रे सुरी-शदै आ तौ शेलुमीएल,

७ यहूदा आ थर रे अम्मीनादाब आ तौ नहशोन, प्रस्थान ६:२३

८ इस्साकार आ थर रे सुआर आ तौ नेथनेल,

९ जबूलून आ थर रे हेलोन आ तौ एलीआब,

१० योसेफ आ तौ एफ्राइम आ थर रे अम्मीहुद आ तौ एली-शामा, योसेफ आ तौ मनस्से आ थर रे पेदा-सुर आ तौ गमलीएल, १इतिहास ७:२६; उत्पत्ती ४८:५

११ बेन्यामीन आ थर रे गिदेओनी आ तौ आबी-दान,

१२ दान आ थर रे अम्मी-शदै आ तौ अही-एजेर,

१३ आशेर थर रे ओक्रान आ तौ पगीएल,

१४ गाद आ थर रे दूएल आ तौ एली-आसाफ,

१५ नाप्ताली आ थर रे एनान आ तौ अहीरा बाक्नीम” दे परमप्रभु यावेमी मोसा कली देंत।

१६ एकोपुकी इस्राएली आन दाते रे योव्रशो आन थर डा ठेयब मुर बाक्नीम।

१७ मोसा नु हारूनमी योव्रशो मुर आन कली ब्रेत्ताक्स।

१८ मिनु मेको निक्शीमी महिना निक्शी डा डोंइती डा नाक्ती इस्राएली नेल्ल आन कली पुक्ताक्स। मिनु मुर नेल्लेमी आन थर नु आन खिं देंशा, ब्रेक्पाइक्तेक्म। मिनु २० बर्स गाप्शो नु मेको क्येडा लाक्शो आन नें नेल्ल ब्रेक्पाइक्तेक्म।

१९ मिनु परमप्रभु यावेमी अरेशो खोदेंशो पा, मोसामी सीने डा गोरशो रागीमी मेको आन कली खुप्शा वोइक्तीमी।

20 इस्राएल आ डोइती जरमेशो तौ रूबेन आ थर डा आन खिं खिं डा २० बर्स गाप्शो नु मेको क्येडा लाकशो लडाइम लने चाप्ब वोंइश मुर नेल्ल आन नें ब्रेक्ताकम।

21 मिनु मेको लडाइ पचा कली खुप्शो रूबेन आ थर डा मुर ४६ हजार ५ सहे बाक्तेकम।

22 सिमियोन आ थर डा आन खिं खिं डा २० बर्स गाप्शो नु मेको क्येडा लाकशो लडाइम लने चाप्ब वोंइश मुर नेल्ल आन नें ब्रेक्ताकम।

23 मिनु मेको लडाइ पचा कली खुप्शो सिमियोन आ थर डा मुर ५९ हजार सहे सां बाक्तेकम।

24 गाद आ थर डा आन खिं खिं डा २० बर्स गाप्शो नु मेको क्येडा लाकशो लडाइम लने चाप्ब वोंइश मुर नेल्ल आन नें ब्रेक्ताकम।

25 मिनु मेको लडाइ पचा कली खुप्शो गाद आ थर डा मुर ४५ हजार ६ सहे ५० बाक्तेकम।

26 यहूदा आ थर डा आन खिं खिं डा २० बर्स गाप्शो नु मेको क्येडा लाकशो लडाइम लने चाप्ब वोंइश मुर नेल्ल आन नें ब्रेक्ताकम।

27 मिनु मेको लडाइ पचा कली खुप्शो यहूदा आ थर डा मुर ७४ हजार ६ सहे बाक्तेकम।

28 इस्साकार आ थर डा आन खिं खिं डा २० बर्स गाप्शो नु मेको क्येडा लाकशो लडाइम लने चाप्ब वोंइश मुर नेल्ल आन नें ब्रेक्ताकम।

29 मिनु मेको लडाइ पचा कली खुप्शो इस्साकार आ थर डा मुर ५४ हजार ४ सहे बाक्तेकम।

30 जबूलून आ थर डा आन खिं खिं डा २० बर्स गाप्शो नु मेको क्येडा लाकशो लडाइम लने चाप्ब वोंइश मुर नेल्ल आन नें ब्रेक्ताकम।

31 मिनु मेको लडाइ पचा कली खुप्शो जबूलून आ थर डा मुर ५७ हजार ४ सहे बाक्तेकम।

32 योसेफ आ तौ एफ्राइम आ थर डा आन खिं खिं डा २० बर्स गाप्शो नु मेको क्येडा लाकशो लडाइम लने चाप्ब वोंइश मुर नेल्ल आन नें ब्रेक्ताकम।

33 मिनु मेको लडाइ पचा कली खुप्शो योसेफ आ तौ एफ्राइम आ थर डा मुर ४० हजार ५ सहे बाक्तेकम।

34 योसेफ आ तौ मनस्से आ थर डा आन खिं खिं डा २० बर्स गाप्शो नु मेको क्येडा लाकशो लडाइम लने चाप्ब वोंइश मुर नेल्ल आन नें ब्रेक्ताकम।

35 मिनु मेको लडाइ पचा कली खुप्शो योसेफ आ तौ मनस्से आ थर डा मुर ३२ हजार सहे निकशी बाक्तेकम।

36 बेन्यामीन आ थर डा आन खिं खिं डा २० बर्स गाप्शो नु मेको क्येडा लाकशो लडाइम लने चाप्ब वोंइश मुर नेल्ल आन नें ब्रेक्ताकम।

37 मिनु मेको लडाइ पचा कली खुप्शो बेन्यामीन आ थर डा मुर ३५ हजार ४ सहे बाक्तेकम।

38 दान आ थर डा आन खिं खिं डा २० बर्स गाप्शो नु मेको क्येडा लाकशो लडाइम लने चाप्ब वोंइश मुर नेल्ल आन नें ब्रेक्ताकम।

39 मिनु मेको लडाइ पचा कली खुप्शो दान आ थर डा मुर ६२ हजार ७ सहे बाक्तेकम।

40 आशेर आ थर डा आन खिं खिं डा २० बर्स गाप्शो नु मेको क्येडा लाकशो लडाइम लने चाप्ब वोंइश मुर नेल्ल आन नें ब्रेक्ताकम।

41 मिनु मेको लडाइ पचा कली खुप्शो आशेर आ थर डा मुर ४१ हजार ५ सहे बाक्तेकम।

42 नाप्ताली आ थर डा आन खिं खिं डा २० बर्स गाप्शो नु मेको क्येडा लाकशो लडाइम लने चाप्ब वोंइश मुर नेल्ल आन नें ब्रेक्ताकम।

43 मिनु मेको लडाइ पचा कली खुप्शो नाप्ताली आ थर डा मुर ५३ हजार ४ सहे बाक्तेकम।

44 मिनु मेको मुर नेल्ले लडाइ पचा कली खुप्ताकम। मोसा, हारून नु मेको आस कली चारच पाइब इस्राएल आ १२ थर डा ठेयब मुरपुकीमी मेको आन कली लडाइ पचा कली खुप्ताकम। उत्पत्ती १७:२०; उत्पत्ती २५:१६

- 45 मिनु गिश मुर २० बर्स गाप्शो नु मेको क्येडा लाकशो लडाइम लने चाप्ब वोंडश मुर बाकशो बाक्तेकम देंशा हना, गन्ती २:३२; प्रस्थान १२:३७  
 46 मेको नेल्ल पा ६ लाख ३ हजार ५ सहे ५० जना बाक्तेकम।  
 47 लेवी आ खिं डा मुरपुकी चहिं अरु आन खोदेशो पा महिक्सम।

### लेवी आ थर डा मुर मखुप्शो

- 48 मिनु डोंइती परमप्रभु यावेमी मोसा कली  
 49 “लेवी आ थर डा मुर आन कली चहिं लडाइ पचा कली मखुप्तीमी। मिनु इस्राएली आन कली खोदेशो पा महिक्मी। गन्ती २:२३; गन्ती ३:१५-३९  
 50 तन्न गे लेवी आन कली आं कबल पशो सन्दोस वोइशशो ताम्बु नु आ मारेड मारेड थोत्रक कोत्रचा कली वोइक्मी। मेकोपुकीमी गुम्तीक ताम्बु नु आ मारेड मारेड थोत्रक कुरचा मालनीम। मेकोपुकीमी मेको कोत्रचा मालनीम। मिनु आन ताम्बु गुम्तीक ताम्बु आ एर ओंथ कीचा मालनीम।  
 51 मिनु गुम्तीक ताम्बु याक्तेमेनु, लेवीपुकीमी मेको प्राक्चा मालनीम। मिनु गुम्तीक ताम्बु कीडमेनु, मेकोपुकीमी सेल्चा मालनीम। आन नेक्था जाक्ब अरु मुर साइक्चा पुंडसीनीम। गन्ती ३:१०, ३८; गन्ती १७:५  
 52 अरु इस्राएली आन आन हुल आन दातेमी नु आन छेदर आ खुक्तीके डा बाक्तीकेम बाक्चा मालनीम।  
 53 लेवी आ मुर चहिं परमप्रभु यावे आ कबल पशो सन्दोस वोइशशो ताम्बु आ एर ओंथ आन ताम्बु कीचा मालनीम। इस्राएलीपुकी गुम्तीके ताम्बु आ नेक्था लचा मदुम्नीम। मिनु मेको आन पबंम परमप्रभु यावे मगाइक्ब। मिनु लेवीपुकीमी परमप्रभु यावे आ कबल पशो सन्दोस वोइशशो ताम्बु खाल पचा मालनीम” दे परमप्रभु यावेमी देंत। गन्ती १७:११; गन्ती १८:५; २सामुएल २४:१; २इतिहास १९:२; यसेया ५७:१७; यसेया ६४:४-६  
 54 मिनु इस्राएलीपुकीमी परमप्रभु यावेमी मोसा कली अरेशो खोदेशो पा नेल्ल पाम्तेकम।

## 2

### मुर आन बाक्तीक ताम्बु

- 1 मिनु परमप्रभु यावेमी मोसा नु हारून आस कली  
 2 “इस्राएलीपुकीम आन थर डा छेदर बाक्तीकेम आन ताम्बु कीचा मालनीम। मेकोपुकी गुम्तीक ताम्बु क्येडा डोन एर ओंथ बाक्चा मालनीम।  
 3 पूब, नां दाप्तीक गे यहूदा आ हुल आन बाक्तीके बाक्ब। मेको आन छेदर आ नेक्था आन ताम्बु कीचा मालनीम। यहूदा आ थर डा मुर आन ठेयब मुर अम्मीनादाब आ तौ नहशोन बाक्त।  
 4 मेको आन कली खुप्शा हिक्शोनु ७४ हजार ६ सहे लडाइ पाइब वोंडश मुर बाक्नीम।  
 5 मेको आन नेक्था इस्साकार आ हुल आन बाक्तीके बाक्ब। इस्साकार आ थर डा मुर आन ठेयब मुर सुआर आ तौ नेथनेल बाक्ब।  
 6 मेको आन कली खुप्शा हिक्शोनु ५४ हजार लडाइ पाइब वोंडश मुर बाक्नीम।  
 7 मिनु नोले जबूलून आ थर डा मुर आन बाक्तीके बाक्ब। जबूलून आ थर डा मुर आन ठेयब मुर हेलोन आ तौ एलीआब बाक्ब।  
 8 मेको आन कली खुप्शा हिक्शोनु ५७ हजार ४ सहे लडाइ पाइब वोंडश मुर बाक्नीम।  
 9 यहूदा आ नेक्था खुप्शा हिक्शो मुर आन हुल नेल्ल पा लाख का ८६ हजार ४ सहे लडाइ पाइब वोंडश मुर बाक्नीम। मेको नेल्ल मुर आन डोंइती गाक्चा मालनीम।  
 10 मिनु दक्खिन गे रूबेन आ हुल आन बाक्तीके बाक्ब। मेको आन छेदर आ नेक्था आन ताम्बु कीचा मालनीम। रूबेन आ थर डा मुर आन ठेयब मुर शेदेउर आ तौ एली-सुर बाक्ब।  
 11 मेको आन कली खुप्शा हिक्शोनु ४६ हजार ५ सहे लडाइ पाइब वोंडश मुर बाक्नीम।

12 मेको आन नेक्था सिमियोन आ हुल आन बाक्तीके बाक्ब। सिमियोन आ थर डा मुर आन ठेयब मुर सुरी-शदै आ तौ शेलुमीएल बाक्ब।

13 मेको आन कली खुप्शा हिकशोनु ५९ हजार सहे सां लडाइ पाइब वोंइश मुर बाक्नीम।

14 मिनु नोले गाद आ थर डा मुर आन बाक्तीके बाक्ब। गाद आ थर डा मुर आन ठेयब मुर रूएल आ तौ एली-आसाफ बाक्ब।

15 मेको आन कली खुप्शा हिकशोनु ४५ हजार ६ सहे ५० जना लडाइ पाइब वोंइश मुर बाक्नीम।

16 रूबेन आ नेक्था खुप्शा हिकशो मुर आन हुल नेल्ल पा लाख का ५२ हजार ४ सहे ५० जना लडाइ पाइब वोंइश मुर बाक्नीम। मेकोपुकी यहूदा आ हुल आन नोले गाक्चा माल्नीम।

17 मिनु युम्तीक ताम्बु नु लेवी आन बाक्तीक ताम्बु कुरशा गाक्चा माल्नीम। दोदेशो पा आन ताम्बु कीशो बाक्म, मोदेशो पा आन छेदर आ नेक्था गाक्चा माल्नीम। गन्ती १०:१७,२१

18 पच्छिम गे एफ्राइम आ हुल आन बाक्तीके बाक्ब। मेको आन छेदर आ नेक्था आन ताम्बु कीचा माल्नीम। एफ्राइम आ थर डा मुर आन ठेयब मुर अम्मीहुद आ तौ एली-शामा बाक्ब।

19 मेको आन कली खुप्शा हिकशोनु ४० हजार ५ सहे लडाइ पाइब वोंइश मुर बाक्नीम।

20 मेको आन नेक्था मनस्से आ हुल आन बाक्तीके बाक्ब। मनस्से आ थर डा मुर आन ठेयब मुर पेदा-सुर आ तौ गमालीएल बाक्ब।

21 मेको आन कली खुप्शा हिकशोनु ३२ हजार सहे निकशी लडाइ पाइब वोंइश मुर बाक्नीम।

22 मिनु नोले बेन्यामीन आ थर डा मुर आन बाक्तीके बाक्ब। बेन्यामीन आ थर डा मुर आन ठेयब मुर गिदेओनी आ तौ आबी-दान बाक्ब।

23 मिनु मेको आन कली खुप्शा हिकशोनु ३५ हजार ४ सहे लडाइ पाइब वोंइश मुर बाक्नीम।

24 एफ्राइम आ नेक्था खुप्शा हिकशो मुर आन हुल नेल्ल पा लाख का ८ हजार सहे का लडाइ पाइब वोंइश मुर बाक्नीम। मेकोपुकी लेवी आन नोले गाक्चा माल्नीम।

25 उत्तर गे दान आ हुल आन बाक्तीके बाक्ब। मेको आन छेदर आ नेक्था आन ताम्बु कीचा माल्नीम। दान आ थर डा मुर आन ठेयब मुर अम्मी-शदै आ तौ अही-एजेर बाक्ब।

26 मेको आन कली खुप्शा हिकशोनु ६३ हजार ७ सहे लडाइ पाइब वोंइश मुर बाक्नीम।

27 मेको आन नेक्था आशेर आ हुल आन बाक्तीके बाक्ब। आशेर आ थर डा मुर आन ठेयब मुर ओक्रान आ तौ पगीएल बाक्ब।

28 मेको आन कली खुप्शा हिकशोनु ४१ हजार ५ सहे लडाइ पाइब वोंइश मुर बाक्नीम।

29 मिनु नोले नाप्ताली आ थर डा मुर आन बाक्तीके बाक्ब। नाप्ताली आ थर डा मुर आन ठेयब मुर एनान आ तौ अहीरा बाक्ब।

30 मेको आन कली खुप्शा हिकशोनु ५३ हजार ४ सहे लडाइ पाइब वोंइश मुर बाक्नीम।

31 दान आ नेक्था खुप्शा हिकशो मुर आन हुल नेल्ल पा लाख का ५७ हजार ६ सहे लडाइ पाइब वोंइश मुर बाक्नीम। मेकोपुकी मुर नेल्ल आन क्येडा नोले गाक्चा माल्नीम।

32 एको इस्राएली आन थर थर डा लडाइ पने चापब खुप्शा हिकशो मुर बाक्नीम। आन हुल हुल डा मुर नेल्ल पा ६ लाख हजार सां ५ सहे ५० जना लडाइ पाइब वोंइश मुर बाक्नीम” दंत गन्ती १:४६

33 मिनु परमप्रभु यावेमी मोसा कली अरेशो खोदेशो पा लेवी आ थर डा मुर अरु इस्राएलीपुकी खोदेशो पा मखुप्शा महिकशो बाक्तेकम। गन्ती १:४८-४९

34 इस्राएलीपुकीमी परमप्रभु यावेमी मोसा कली अरेशो खोदेशो पा पाम्तेकम। आन थर डा बाक्तीकेमी आन छेदर आ नेक्था बाक्शा, आन थर थर पा गाक्तेकम।

### 3

1 परमप्रभु यावेमी मोसा नु सीनै डांडाम लोत्र पची ना मोसा नु हारून आस खिं डा मुर सु सु बाक्तेकम देशा हना, प्रस्थान ६:२३

2 हारून आ तौ आन नें, आ डोंइती जरमेशो तौ नादाब नु अबीहु, एलाजर नु इथामार बाक्तेकम।

3 मेको नेल्ल तेल लुकशो चढेब बाक्तेकम। हारूनमी मेको आन कली चढेतीक गेय पचा, दे तेल लुकताकव। प्रस्थान ४०:१५

4 नादाब नु अबीहु सीनै डा गोरशो रागीम बेक्ताकस। मारदे हना, मेको निकशीमी परमप्रभु यावेमी मदुम्ब देशो अर्को मी धूप चोतीकेम कुर पा, परमप्रभु यावे आ डोंइती चढेम्ताकस। मिनु परमप्रभु यावे आ डोंइती बेक्ताकस। मिनु मेको आस के आल मबाकम। मोपतीके आ तौ एलाजर नु इथामार निकशीमी ला आस आफ आ डोंइती चढेतीक गेय पाम्ताकस। लेवी १०:१-२

### लेवीपुकी आन गेय

5 परमप्रभु यावेमी मोसा कली

6 “लेवी आ थर डा मुर आन कली ब्रेशशा, मेको आन कली चढेब हारून आ डोंइती राप्पाइकमी। मिनु मेकोपुकीमी मेको कली वारच पचा मालनीम। प्रस्थान ३२:२९

7 मिनु मेकोपुकीमी हारून कली वारच पा इस्राएली नेल्ल आन परबम गुम्तीक ताम्बु आ डोंइती गेय पचा मालनीम। गन्ती १८:३; गन्ती १६:९

8 मेकोपुकीमी गुम्तीक ताम्बु डा मारेड कोत्रका मालनीम। मिनु मेकोपुकीमी गुम्तीक ताम्बु डा इस्राएली आन पचा मालशो गेय पचा मालनीम। गन्ती ४:-

9 गे मेको लेवी आ मुर आन कली हारून नु आ तौ आन कली गेचा मालनेवे। मेको इस्राएली आन दाते रे योत्रशा हारून कली गेशो बाक्नीम।

10 मिनु गे हारून नु आ तौ आस कली चढेबम पचा मालशो गेय पपाइकमी। मेकोपुकी डा लाकशा अर्को सुइ मुरुम मो पाम्तेकम हना, मेको आन कली साइकचा मालनीम” दंत। गन्ती १:१५

11 मिनु लेंशा परमप्रभु यावेमी मोसा कली

12 “गो इस्राएली आन डोंइती जरमेशो तौ आन पा डा लेवी आ थर डा मुर आन कली इस्राएली आन दाते रे योत्रतामी। मोपतीके लेवी आ मुर आं केन बाक्नीम। गन्ती ८:१६; प्रस्थान १३:२

13 डोंइती जरमेशो नेल्ल आं के बाक्नीम। इजीप्तमी डोंइती जरमेशो नेल्ल सदुमी नाक्ती, गो इस्राएली आन डोंइती जरमेशो आं कली वोंइसाक्यी। मिनु गो मुर नु बी ब्यफ, क्यारश भेडा नेल्ल आं कली वोंइसाक्यी। मेको आं के बाक्नीम। गो परमप्रभु यावे नड” दंत।

14 मिनु परमप्रभु यावेमी सीनै डा गोरशो रागीमी मोसा कली

15 “गे लेवी आ थर डा मुर आन कली आन खिं खिं पा हिकमी। महिना का गाप्शो नु मेको क्येडा लाकशो वोंइश मुर नेल्ल आन कली हिकमी” दंत।

16 मिनु मोसामी परमप्रभु यावेमी अरेशो खोदेशो पा मेको आन कली हिकतीमी।

17 मिनु लेवी आ तौ सु सु बाक्तेकम देशा हना, गेरशोन, कोहाथ नु मेरारी बाक्तेकम। प्रस्थान ६:१६-१९; गन्ती २६:५७-६४

18 गेरशोन आ तौ लिब्नी नु आ खिं डा मुर नु शिमेइ नु आ खिं डा मुर बाक्तेकम।

19 कोहाथ आ तौ अम्रांम नु आ खिं डा मुर नु इचहार नु आ खिं डा मुर, हेब्रोन नु आ खिं डा मुर नु उज्जीएल नु आ खिं डा मुर बाक्तेकम।

20 मेरारी आ तौ माहली नु आ खिं डा मुर नु मुशी नु आ खिं डा मुर बाक्तेकम। एको लेवी आ थर डा मुर आन खिं खिं डा मुर बाक्तेकम।

21 गेरशोन रे पा लिब्नी नु शिमेइ आस खिं खिं डा मुर दुम्तेकम। मेकोन गेरशोन आ खिं खिं डा मुर बाक्नीम।

22 मेकोपुकी महिना का गाप्शो नु मेको क्येडा लाकशो वोंइश मुर हिकशो नु ७ हजार ५ सहे बाक्तेकम।

23 गेरशोन आ खिं डा मुर आन बाक्तीके गुम्तीक ताम्बु आ नोले, पच्छिम गे दुम्चा मालब।

24 गेरशोनी आन खिं डा ठेयब मुर, लाएल आ तौ एली-आसाफ बाक्त।

25 गेरशोन आ मुरपुकीमी युम्तीक ताम्बु कली सुम्तीके, युम्तीक ताम्बु आ आगा ओव्रतीक डा फारशो वा,

26 लाडगा डा फारशो वा, ताम्बु नु चढेतीक आ एर ओंथ डा लाडगा आ आगा ओव्रतीक डा फारशो वा नु ताम्बु डा डोरीपुकी कोव्रचा माल्बाक्तेकम।

27 कोहाथ रे पा अग्राम आ खिं डा मुर, इच्छार आ खिं डा मुर, हेब्रोन आ खिं डा मुर नु उज्जीएल आ खिं डा मुरपुकी दुम्तेकम। मेको कोहाथ आ खिं खिं डा मुर बाक्तीम।

28 मेकोपुकी महिना का गाप्शो नु मेको क्येडा लाकशो वोंइश मुर हिकशोनु ८ हजार ६ सहे बाक्तेकम। मिनु मेकोपुकी युम्तीक ताम्बु डा गेय पाइब आन कली वारच पाइब बाक्तेकम।

29 कोहाथ आ खिं डा मुर आन बाक्तीके युम्तीक ताम्बु आ दक्खिन गे दुम्चा माल्ब।

30 कोहाथी आन खिं डा ठेयब मुर उज्जीएल आ तौ, एली-जाफान बाक्ब। लेवी १०:४

31 कोहाथीपुकीमी कबल पशो सन्दोस, शोब्ले वोंइक्तीक टेबल, बत्ती दातीके, चढेतीक निकशी नु चढेब आन माल्शो मारेइ मारेइ नु नेल्ल क्येडा चोव्रखो कोठा डा फारशो वा कोव्रचा माल्बाक्तेकम। गन्ती ७:९

32 मिनु चढेब हारून आ तौ एलाजर चहिं लेवी आन थर डा ठेयब मुर आन नेल्ल क्येडा ठेयब मुर बाक्त। मिनु मेको युम्तीक ताम्बु डा गेय पाइब नेल्ल आन कली कोव्रब मुर बाक्त।

33 मेरारी रे पा माहली आ खिं डा मुर नु मुशी आ खिं डा मुर बाक्तेकम। एको मेरारी आ खिं खिं डा मुर बाक्तीम।

34 मेकोपुकी महिना का गाप्शो नु मेको क्येडा लाकशो वोंइश मुर नेल्ल हिकशोनु ६ हजार सहे निकशी बाक्तेकम।

35 मेरारी आ खिं डा ठेयब मुर अबीहेल आ तौ सुरीएल बाक्ब। मेरारी आ खिं डा मुर आन बाक्तीके युम्तीक ताम्बु आ उत्तर गे दुम्चा माल्ब।

36 मेरारी आ तौपुकीमी युम्तीक ताम्बु डा फलेकपुकी, थामपुकी नु आन राप्पाइक्तीकपुकी नु आन मारेइ मारेइ कोव्रचा माल्नीम।

37 मेकोपुकीमी लाडगा एर ओंथ डा थामपुकी नु आन राप्पाइक्तीकपुकी, किलापुकी नु डोरीपुकी कोव्रचा माल्नीम।

38 मोसा, हारून नु आस तौ आन बाक्तीके युम्तीक ताम्बु आ डोंइती पूर्व गे, नां दाप्तीके गे दुम्चा माल्बाक्त। मेकोपुकीमी युम्तीक ताम्बुम इस्राएली आन पर्वम मार मार पचा माल्शो बाक्मे, मेको पचा माल्बाक्तेकम। मेकोपुकी डा लाकशा अर्को सुइ मुरुम मो पाम्तेकम हना, मेको आन कली साइक्चा माल्नीम।

39 मोसा नु हारूनमी परमप्रभु यावे आ देशो खोंदेशो पा हिकशो लेवी आ थर डा खिं खिं डा मुर महिना का गाप्शो नु मेको क्येडा लाकशो नेल्ल २२ हजार जना बाक्तेकम।

40 मिनु परमप्रभु यावेमी मोसा कली “महिना का गाप्शो नु मेको क्येडा लाकशो इस्राएली आन डोंइती जरमेशो तौ नेल्ल आन कली हिकशा आन नें ब्रेक्तो।

41 मिनु गे इस्राएली आन डोंइती जरमेशो तौ आन पा डा लेवी आ मुर आन कली आं के सेल्मी। मोपा इस्राएली आन डोंइती जरमेशो बी ब्यफ क्यारश भेडा आन पा डा लेवी आन बी ब्यफ क्यारश भेडा आं के सेल्मी। गो परमप्रभु यावे नड” दैत। गन्ती १८:१५

42 मिनु मोसामी परमप्रभु यावेमी अरेशो खोंदेशो पा इस्राएली आन डोंइती जरमेशो तौ आन कली हिकतीमी।

43 मिनु मेकोपुकी महिना का गाप्शो नु मेको क्येडा लाकशो डोंइती जरमेशो आन नें ब्रेक्शा, हिकशोनु नेल्ल २२ हजार सहे निकशी ७३ जना बाक्तेकम।

44 मिनु लेशा परमप्रभु यावेमी मोसा कली

45 “इस्राएली आन डोंइती जरमेशो तौ आन पा डा लेवी आ मुर आं के सेल्मी। मिनु मेको आन बी ब्यफ, क्यारश भेडा आन पा डा लेवी आ मुर आन बी ब्यफ, क्यारश भेडा आं के सेल्मी। लेवी आ मुर आं के बाक्नीम। गो परमप्रभु यावे नड।

46 मिनु लेवी आन क्येडा शुश दुम्शो इस्राएली आन डोंइती जरमेशो तौ सहे निक्शी ७३ जना बाक्तेक्म। मेको आन कली प्रोंइचा माल्बाक्त।

47 मेको आन कली प्रोंइचा कली का के ५ शेकेल ताक्को। गुम्तीक ताम्बु डा शेकेल का २० गेराह डा बाक्ब। गेराह का ०.६ ग्राम बाक्ब। गुम्तीके ताम्बु डा शेकेल १२ ग्राम बाक्ब।

48 मिनु गे इस्राएली आन कली प्रोंइचा कली गेशो शेकेल हारून नु आ तौ आन कली गेचा माल्नेवे” देंत। शेकेल इस्राएली आन क्येट बाक्ब। बजार डा शेकेल ११.५ ग्राम बाक्ब। ताम्बु कली गेतीक शेकेल चहिं १२ ग्राम बाक्ब। मेको सुन के नु चांदी के शेकेल बाक्नीम।

49 मिनु मोसामी लेवी आन क्येडा शुश दुम्शो, प्रोंइचा माल्शो मुर रे प्रोंइतीक क्येट ताक्तु।

50 मिनु मेकोमी इस्राएली आन डोंइती जरमेशो तौ रे प्रोंइतीक क्येट ताक्शा, मेको हजार का सहे सां ६५ ताम्बु डा शेकेल बाक्तेक्म।

51 मिनु मोसामी परमप्रभु यावेमी अरेशो खोदेशो पा, मेको प्रोंइतीक क्येट हारून नु आ तौ आन कली गेम्तीमी।

## 4

कोहाथ आ मुर आन कली हिक्शो

1 परमप्रभु यावेमी मोसा नु हारून आस कली

2 “लेवी आ मुर आन दाते डा कोहाथी आन कली आन खिं खिं डा मुर पा हिक्कीस।

3 गे ३० बर्स रे ५० बर्स सम्म डा वोंइश मुर आन कली हिक्कीस। मेकोपुकी ला गुम्तीक ताम्बु डा गेय पने चान्नीम। गन्ती ८:२४-२५; १इतिहास २३:२४

4 मेको कोहाथी आन पचा माल्शो गेय गुम्तीक ताम्बु डा नेल्ल क्येडा चोव्रखो थोव्रक नु बाक्ब।

5 मिनु गुम्तीक ताम्बु याक्तमेनु, हारून नु आ तौ गुम्तीक ताम्बु ओव्रशा, फारशो वा शोल्शा, मेको वामी कबल पशो सन्दोस सुम्चा माल्नीम।

6 मिनु नोले मेकोपुकीमी मेको आ तार रिम्शो कोक्तेमी सुम्चा माल्नीम। मेको आ तारी नीलो रड डा वामी सुम्चा माल्नीम। मिनु मेको आ कुरतीक कोक्के शुइक्चा माल्नीम।

7 मिनु मेकोपुकीमी कोंइतीक शोब्ले वोइक्तीक टेबल तार नीलो वा का ब्रशा, मेको आ तारी थालपुकी, थनौरोपुकी, बोसपुकी नु तूचा थोव्रक चढ़ेचा कली कचौरा वोइक्चा माल्नीम। मिनु नाक्त किंत किंत डा कोंइतीक शोब्ले यो मेको तार बाक्चा माल्ब।

8 मिनु नोले मेको आ तार लल रड डा वा ब्रशा, मेको आ तार रिम्शो कोक्तेम सुम्चा माल्नीम। मिनु मेको आ कुरतीक कोक्के शुइक्चा माल्नीम।

9 मेकोपुकीमी बती दातीके नीलो वाम सुम्चा माल्नीम। मेको आ बत्ती, आ थनारो, आ थाल नु तेल वोइक्तीके नेल्ल सुम्चा माल्नीम। प्रस्थान २५:३१

10 मिनु मेको नेल्ल कली रिम्शो कोक्तेमी वोइश्शा, कुरतीक तारी वोइक्चा माल्नीम।

11 मेकोपुकीमी सुन के चढ़ेतीक तारी नीलो वा ब्रशा, रिम्शो कोक्तेम सुम्चा माल्नीम। मिनु मेको आ कुरतीक कोक्के शुइक्चा माल्नीम। प्रस्थान ४०:२६-२७

12 मिनु गुम्तीक ताम्बुम माल्शो मारेइ मारेइ खुप्शा, नीलो वाम कुम्लो पचा माल्नीम। मिनु मेको कली रिम्शो कोक्तेम सुम्चा माल्नीम। मिनु कुरतीक तारी वोइक्चा माल्नीम।

13 मेकोपुकीमी चढ़ेतीक रे पुलु शोल्शा, मेको आ तार प्याजी रड डा वा ब्रचा माल्नीम।

14 मिनु मेकोपुकीमी चढ़ेतीकेम माल्शो मारेइ मारेइ थोव्रकी मेको आ तारी वोइक्चा माल्नीम। मी वोइक्तीके, श्ये गुंइतीके, बेल्चापुकी, ब्वाक्कु वोइक्तीक ग्योंबपुकी नु चढ़ेतीक डा मारेइ मारेइ वोइश्शा, मेको तार रिम्शो कोक्तेम सुम्चा माल्नीम। मेको आ कुरतीक कोक्के शुइक्चा माल्नीम।

15 मिनु हारून नु आ तौपुकीमी मेको गुम्तीक ताम्बु डा मारेड मारेड सुम्ने थुम्मे नोले कोहाथीपुकी मेको कुरथ जाक्चा माल्नीम। तन्न मेकोपुकीमी परमप्रभु यावे आ मार मार थोव्रक थिचा मडुम्नीम। मेकोपुकीमी थिम्तेक्म हना, बेक्नीम। कोहाथीपुकीमी गुम्तीक ताम्बु डा कुरचा माल्शो थोव्रक मेकोन बाक्नीम। गन्ती ७:९; २सामुएल ६:६-७

16 चढेब हारून आ तौ एलाजर बत्ती दाशो तेल, ब्रोव्रशो रिना पाइक्ब धूप, नाक्त किंत किंत डा चढेतीक अन्न नु लुक्तीक तेल कली कोव्रब बाक्ब। मेको गुम्तीक ताम्बु नु मेकेर डा मारेड मारेड कोव्रब बाक्ब” दैत।

17 मिनु नोले परमप्रभु यावेमी मोसा नु हारून आस कली

18 “गे लेवी आन दाते डा कोहाथी आन खिं खिं डा मुर आन कली खतम दुम्चा मगेस।

19 गे, कोहाथी मबेक्थु, ब्रॉइमल दे नेल्ल क्येडा चोव्रखो थोव्रक आ नेक्था जाक्मानु, मार पचा माल्नीनी देशा हना, हारून नु आ तौपुकी आगा ओव्रशा, मेको आन कली आन आन गेय नु मार मार कुरचा माल्नीनी, मेको योक्शा गेचा माल्नीमी।

20 तन्न कोहाथीपुकीमी मेको नेल्ल क्येडा चोव्रखो थोव्रक आन कली कोव्रचा मडुम्ब। कोव्रतेक्म हना, बेक्नीम” दैत। १सामुएल ६:१९

गेरशोन आ मुर आन कली हिक्शो

21 मिनु परमप्रभु यावेमी मोसा कली

22 “गेरशोनी आन कली यो आन खिं खिं पा हिक्मी।

23 गे ३० बर्स रे ५० बर्स सम्म डा वॉइश मुर आन कली हिक्को। मेकोपुकी ला गुम्तीक ताम्बु डा गेय पने चाप्नीम।

24 मिनु गेरशोन आ मुर आन पतीके मार बाक्त देशा हना, गेय पचा नु मार मार कुरचा माल्नीम।

25 गुम्तीक ताम्बु डा फारशो वा, गुम्तीक ताम्बु आ सुम्तीके नु मेको तार बाक्शो रिम्शो कोक्ते नु गुम्तीक ताम्बु आ ओव्रतीक डा फारशो वा कुरचा माल्नीम।

26 मिनु लाडगा डा एर ओंथ फारशो वा, ओव्रतीक डा फारशो वा, गुम्तीक ताम्बु नु चढेतीक आ एर ओंथ डा वा नु आ डोरी नु मेको आ गेय कली माल्शो नेल्ल पचा माल्नीम।

27 गेरशोन आ मुरपुकीमी हारून नु आ तौपुकीमी अरेशो खोदेंशो पा ला आन कुरतीक नु अरु गेय पने चाप्नीम। हारून नु आ तौपुकीमी मेको आन कुरचा माल्शो नु पतीक गेय नेल्ल अरेचा माल्नीम। प्रस्थान ३८:२१

28 मिनु गेरशोनीमी गुम्तीक ताम्बुम पचा माल्शो गेय एकोन बाक्ब। मिनु हारून आ तौ इथामार मेको आन कली अरेब बाक्ब।

मेरारी आ मुर आन कली हिक्शो

29 गे मेरारी आ मुर आन कली आन खिं खिं डा मुर पा हिक्शा, ब्रेक्तो।

30 गे ३० बर्स रे ५० बर्स सम्म डा वॉइश मुर आन कली हिक्को। मेकोपुकी ला गुम्तीक ताम्बु डा गेय पने चाप्नीम।

31 मिनु मेकोपुकीमी गुम्तीक ताम्बु डा मार कुरचा माल्नीम देशा हना, गुम्तीक ताम्बु डा फलेकपुकी, मेको आन ग्याइक्तीक कोक्केपुकी, थामपुकी नु राप्पाइक्तीकपुकी कुरचा माल्नीम।

32 मिनु लाडगा डा थाम नेल्ले, आन राप्पाइक्तीकपुकी, किलापुकी, डोरीपुकी नु मार मार अरु बाक्मा मेको कोव्रचा नु कुरचा माल्नीम।

33 मेको मेरारी आ मुरपुकीमी आन गुम्तीक ताम्बु कली पचा माल्शो गेय बाक्ब। मिनु चढेब हारून आ तौ इथामार मेको आन कली अरेब बाक्ब” दैत।

लेवी आ मुर आन कली हिक्शो

34 मोसा, हारून नु थर थर डा मुर आन टेयब मुरपुकीमी कोहाथी आन खिं खिं डा मुर आन कली हिक्शा ब्रेक्ताक्म।

35 मिनु ३० बर्स रे ५० बर्स सम्म डा मुर ला गुम्तीक ताम्बुमी गेय पने चाप्बाक्तेक्म।



- 36 मिनू मेको आन खिं खिं डा मुर हिक्शोनू, हजार निकशी ७ सहे ५० जना बाक्तेकम।
- 37 मेको गुम्तीक ताम्बु डा गेय पाइब कोहाथीपुकी बाक्नीम। मिनू मोसा नु हारूनमी परमप्रभु यावेमी अरेशो खोदेशो पा मेको आन कली हिक्शा ब्रेक्शो बाक्ताक्स।
- 38 मिनू गेरशोनी आन खिं खिं डा मुर आन कली हिक्शा ब्रेक्ताकम।
- 39 मिनू ३० बर्स रे ५० बर्स सम्म डा मुर ला गुम्तीक ताम्बुमी गेय पने चाप्बाक्तेकम।
- 40 मिनू मेको आन खिं खिं डा मुर हिक्शोनू, हजार निकशी ६ सहे ३० जना बाक्तेकम।
- 41 मेको गुम्तीक ताम्बु डा गेय पाइब गेरशोनी बाक्नीम। मिनू मोसा नु हारूनमी परमप्रभु यावेमी अरेशो खोदेशो पा मेको आन कली हिक्शा ब्रेक्ताक्स।
- 42 मिनू मेरारी आ मुर आन खिं खिं डा मुर आन कली हिक्तेकम।
- 43 मेको ३० बर्स रे ५० बर्स सम्म डा मुर ला गुम्तीक ताम्बुमी गेय पने चाप्बाक्तेकम।
- 44 मिनू मेको आन खिं खिं डा मुर हिक्शोनू, हजार सां सहे निकशी बाक्तेकम।
- 45 मेको गुम्तीक ताम्बु डा गेय पाइब मेरारी आ मुर बाक्नीम। मिनू मोसा नु हारूनमी परमप्रभु यावेमी अरेशो खोदेशो पा मेको आन कली हिक्शा ब्रेक्ताक्स।
- 46 मिनू मोसा, हारून नु इस्राएल आ थर डा मुर आन ठेयब मुरपुकीमी लेवी आ मुर नेल्ल आन खिं खिं डा मुर हिक्शा ब्रेक्ताकम।
- 47 मिनू ३० बर्स रे ५० बर्स सम्म डा मुर ला गुम्तीक ताम्बुमी गेय पने नु मार मार कुरने चाप्बाक्तेकम।
- 48 मिनू मेको आन खिं खिं डा मुर हिक्शोनू ८ हजार ५ सहे ८० जना बाक्तेकम।
- 49 मिनू परमप्रभु यावेमी अरेशो खोदेशो पा मोसामी मेको आन कली हिक्शा, मार गेय पचा माल्नीमी, मार कुरचा माल्नीमी, मेको अरेम्तीमी। मिनू परमप्रभु यावेमी मोसा कली अरेशो खोदेशो पा मेको आन कली हिक्शो बाक्त।

## 5

### मुर बाक्तीक ग्रांघ्रा मसेल्चा

- 1 परमप्रभु यावेमी मोसा कली
- 2 “गे इस्राएली आन कली गेपुकीमी कोवर खोदेशो रोइ पाइब, आन रां रे ग्रांघ्रा दिशो यिशो नु बेक्शो मुर थिशा ग्रांघ्रा दुम्शो मुर आन कली इन बाक्तीक क्येडा डोन वोइक्चा माल्नीनी। लेवी १३:४६; लेवी १५:२; गन्ती ९:६-७
- 3 मोदेशो वोंइश मुर नु मीश मुर नेल्ल आन कली मुर आन बाक्तीके क्येडा डोन वोइक्चा माल्नीनी। मेकोपुकीमी मुर आन बाक्तीके ग्रांघ्रा दिशो सेल्चा मदुम्नीम। मारदे हना गो इन दातेमी बाक्शो बाक्नुड” देंत। गन्ती १२:१४-१५; प्रस्थान २५:८
- 4 मिनू इस्राएलीपुकीमी मो पाम्तेकम। मोदेशो मुर आन कली मुर आन बाक्तीके क्येडा डोन वोइक्तेकम। परमप्रभु यावेमी मोसा कली अरेशो खोदेशो पा इस्राएलीपुकीमी पाम्तेकम।

### खुइ पशो आ पबंम शेंशो

- 5 मिनू लेंशा परमप्रभु यावेमी मोसा कली
- 6 “गे इस्राएली आन कली ‘मीश मुर, वोंइश मुर सु बाक्त हना यो, परमप्रभु यावे आ डोंइती पाप पा अरु मुर आन कली मारेइ मरिम्शो पाप्नु हना, मेको मुर दोस ताइब दुम्ब। लेवी ५:२१-२६
- 7 मिनू मेकोमी आ मरिम्शो पशो शोत्रचा माल्ब। मिनू मेको मुरुमी आ खुइ पशो नेल्ल लेशा गेशा, मेको क्येडा यो ५ भाग तेम्शा गेचा माल्ब।
- 8 तन्न मेको खुइ पचा पुंइसीशो मुर बेक्शा, मेको के सुइ मबाक्तेकम हना, मेको पाप आ पबंम थाप्शो परमप्रभु यावे के दुम्शा, चढ़ेब आन के दुम्ब। मिनू आ पाप क्याम्तीक गेय पचा कली सांड का गेचा माल्ब।
- 9 मिनू इस्राएलीपुकीमी आन परमप्रभु यावे कली गेशो क्युकुशा चढ़ेतीक नेल्ले चढ़ेब कली गेचा माल्नीम। मिनू मेको चढ़ेब केन दुम्ब। गन्ती १८:८

10 मिनू मुर नेल्ल आन परमप्रभु यावे कली गेशो, मेको केन दुम्ब। मार गेम्तेक्म हना यो, मेको चढेब केन दुम्ब' दे अरेमी" देंत।

### मीश मुर कली नाक्शो

11 मिनू परमप्रभु यावेमी मोसा कली

12 "गे इस्राएली आन कली 'सुइ आन मीश हेंथे गाक्शा, आ वोंइश कली मरिम्शो पाप्तु हना,

13 अरु वोंइश मुर नु इप्त हना, मेको आ वोंइश रे खुइश्शो बाक्त हना, मेकोमी सुइम मतुइक्थु, ग्रॉग्रा दिशो सेल्सीशो बाक्त हना यो, मेको सुइम थित्चा मपुंइसीशो बाक्त हना यो,

14 मेको वोंइश मुरुमी आ ग्रॉग्रा दिशो सेल्सीशो मीश आ परबंम रुश पा, आ थुंम मरिम्शो मिम्शो बाक्त हना, मेको आ मीश आंम कली ग्रॉग्रा दिशो मसेल्सीशो बाक्त हना यो,

15 मेको वोंइश मुरुमी आ मीश कली चढेब आ बाक्तीके चाक्चा माल्ब। मिनू मेको आ मीश आ परबंम एफाह का डा १० भाग डा भाग का क्योव्रज फस चाक्चा माल्ब। मेको आ तारी तेल लुक्या नु धूप वोइक्चा मदुम्ब। मारदे हना मेको रुश पशो आ परबंम अन्न चढेतीक बाक्ब। मेको अन्न चढेतीक मरिम्शो पशो मिम्चा कली बाक्ब। एफाह का २२ लिटर डा पुक्तीक बाक्ब।

16 मिनू चढेबमी मेको मीश मुर कली आ नेक्था चाक्शा, परमप्रभु यावे आ डोंइती राप्पाइक्चा माल्ब।

17 मिनू चढेबमी खप के ग्योंबुम नक ब्वाक्कु चाक्चा माल्ब। मिनू मेकोमी गुम्तीक ताम्बु डा खप डा फुरक इच्का हुइश्शा, मेको ब्वाक्कुम कुर पचा माल्ब।

18 मिनू चढेबमी मेको मीश मुर कली परमप्रभु यावे आ डोंइती राप्पा, मेको आ चां पुइक्चा माल्ब। मिनू मेकोमी मेको मिम्चा कली अन्न चढेतीक आ गुइमी वोइक्चा माल्ब। मेको रुश पशो आ परबंम अन्न चढेतीक बाक्ब। मिनू मेको चढेबमी मेको सराप चीले रशो कशो ब्वाक्कु आ गुइमी ग्याइक्चा माल्ब।

19 मिनू चढेबमी मेको मीश मुर कली कसम जपाइश्शा "थमा पा गे सुइ वोंइश मुर नु मइप्शो बाक्ते हना, इ वोंइश नु बाक्शा, हेंथे मगाक्थु, इ कली ग्रॉग्रा दिशो मसेल्सीशो बाक्ते हना, एको कशो ब्वाक्कु तूडीनु, गे सराप चीले मराइनेवे।

20 तन्न गे इ वोंइश नु बाक्शा यो, हेंथे गाक्शा, ग्रॉग्रा दिशो सेल्सीशो बाक्ते हना, गे अरु वोंइश मुर नु इप्शो बाक्ते" हना, देंशा,

21 चढेबमी मेको मीश मुर कली सराप चीले रतीक कसम जपाइक्चा माल्ब। मिनू मेकोमी मीश मुर कली "परमप्रभु यावेमी इ कोव्रज होम्पाइक्तीक नु देल्लो सोव्रपाइक्तीक रोइ पपाइश्शो तशा, गे इ मुर आन दातेमी हिंचा डा कोंइतीक दुम्नेवे।

22 एको सराप चीले रतीक ब्वाक्कु इ कोव्रजम ओव्रशा इ कोव्रज होम्तीक नु इ देल्लो सोव्रतीक रोइ पपाइक्ब" देंचा माल्ब। मिनू मेको मीश मुरुमी "आमेन, मोदेंशोन दुम्ल" देंचा माल्ब।

23 मिनू नोले चढेबमी मेको सराप चीले कागजम ब्रेक्शा मेको कशो ब्वाक्कुम मेको कागज कली मुरचा माल्ब।

24 मिनू नोले मेकोमी मेको मीश मुर कली मेको सराप चीले बाक्शो कशो ब्वाक्कु तूपाइक्चा माल्ब। मिनू मेको सराप चीले बाक्शो ब्वाक्कु मेको मीश मुर आ कोव्रजम ओव्रशा मेको कली शुश खाइक्पाइक्ब। भजन संग्रह १०९:१८

25 मिनू चढेबमी मेको रुश पतीक आ परबंम चढेशो अन्न मेको मीश मुर आ गुइ रे लाइश्शा, परमप्रभु यावे आ डोंइती क्युक्शा, चढेतीकेम चाक्चा माल्ब।

26 मिनू चढेबमी मेको अन्न चढेतीक रे मिम्चा कली योल का हुइश्शा चढेतीकेमी चोचा माल्ब। मिनू नोले मेको कली मेको ब्वाक्कु तूपाइक्चा माल्ब।

27 मिनू मेकोमी मेको मीश मुर कली मेको ब्वाक्कु तूपदानु, मेको ग्रॉग्रा दिशो दुम्शो बाक्त हना, नु आ वोंइश कली मरिम्शो पशो बाक्त हना, मेको सराप चीले बाक्शो कशो ब्वाक्कु मेको आ आगा

ओव्रशा, शुश खाइक्पाइक्ब। मेको आ कोव्रज होम्ब। मिनु मेको आ देल्लो सोव्रब। मिनु मेको मीश मुर आ मुर आन दातेमी हिंचा डा कोंइतीक दुम्ब।

28 तन्न मेको मीश मुरुम आंम कली ग्रांया दिशो मसेल्सीशो नु मरिम्शो मपशो बाक्त हना, मेको ब्वाक्कु मखाइक्थु, आल थीब दुम्ब।

29 आ वोंइश नु बाक्शा यो, हेंथे गाक्शा ग्रांया दिशो सेल्सीशो मीश मुर आ पर्वम रुश पाइब वोंइश कली अरेशो लोव्र बाक्ब।

30 मिनु वोंइश मुर रुश पाइब दुम्शा, आ मीश आ पर्वम रुश पाप्तु हना, मेकोमी आ मीश परमप्रभु यावे आ डोंइती राप्पाइक्चा माल्ब। मिनु चढेबमी मेको अरेशो लोव्र नेल्ले मेको मीश मुर आ पर्वम पचा माल्ब।

31 मिनु मेको वोंइश मुर दोस मताइब दुम्ब। मिनु आ मीशेमी चहिं आ मरिम्शो पशो राइब' दे इस्राएली आन कली शेंदो" दे परमप्रभु यावेमी मोसा कली देंत।

## 6

### परमप्रभु कली नाजिरी दिल्लो

1 परमप्रभु यावेमी मोसा कली

2 "गे इस्राएली आन कली 'सुइ मीश मुर, वोंइश मुरुमी परमप्रभु यावे कली दिल्ला बाक्चा, दे नाजिरी कबल पाप्तु हना, १सामुएल १:११

3 मेकोमी शांबु राकसी तूचा काइ मदुम्ब। मेकोम ग्युरशो अडगुर शांबु नु अडगुर आ रस तूचा मदुम्ब। क्येख नु सोव्रपाइशो अडगुर यो ब्वचा मदुम्ब। आमोस १:११-१२; लूका १:१५

4 गिश नाक्त सम्म मेको नाजिरी दुम्शा दिल्ला बाक्बा, मिश नाक्त सम्म मेको अडगुर आ वांचेर रे आ खोशले सम्म यो ब्वचा मदुम्ब।

5 मेको गिश नाक्त सम्म नाजिरी दुम्शा दिल्ला बाक्बा, मिश नाक्त सम्म आ पिया डा चां प्रेक्चा मदुम्ब। मेको आ नाजिरी दुम्शा दिल्लो नाक्ती मनुम्म सम्म मेकोमी परमप्रभु यावे कली ला दिल्लो बाक्ब। मेकोमी आ चां बारचा गेचा माल्ब। न्यायाधीस १३:५

6 गिश नाक्त सम्म मेको परमप्रभु यावे आ पर्वम दिल्ला बाक्बा, मिश नाक्त सम्म मेको बेक्शो मुर आन नेक्था लचा मदुम्ब।

7 मेको आ आम आफ, आ लोकबपुकी सु बेक्तेक्म हना यो, मेको आन पर्वम मेकोमी आंम कली ग्रांया दिशो सेल्चा मदुम्ब। मारदे हना मेको आ पियाम आ परमप्रभु आ पर्वम दिल्लो चिन्ड बाक्ब। लेवी २१:११

8 आ दिल्ला बाक्शो नाक्त नेल्ले मेको परमप्रभु यावे कली ला दुम्शो बाक्ब।

9 मिनु दोक का का पा सुइ मुर मेको आ नेक्था बेक्शा, आ चां ग्रांया सेल्लु हना, ग्रांया मदिशो दुम्चा कली ७ नाक्तीम आ चां प्रेक्चा माल्ब। गन्ती १९:११, १४, १६

10 मिनु मेकोमी ८ नाक्ती परवा हना यो, ढुकुर हना यो निक्शी गुम्तीक ताम्बु डा ओव्रतीक चढेब आ डोंइती चाक्चा माल्ब। लेवी ५:७

11 मिनु चढेबमी मेको का पाप आ पर्वम चढेतीके नु का चोशा चढेतीके चढेचा माल्ब। मिनु मेको मुर आ पर्वम पाप क्याम्तीक गेय पचा माल्ब। मारदे हना मेको बेक्शो मुर आ नेक्था बाक्शा पाप दुम्शा, ग्रांया दिशो दुम्शो बाक्ब। मिनु मेको नाक्त रे मेकोम आ पिया परमप्रभु यावे कली तिल्ला माल्ब।

12 मिनु मेको मुरुमी आ नाजिरी बाक्तीक नाक्ती नक गोशा परमप्रभु यावे कली दिल्ला माल्ब। मिनु मेकोमी गारचा आ पर्वम चढेचा कली बर्स का गाप्शो सांड का चाक्चा माल्ब। मेको मुर दिल्ला बाक्मेनु, ग्रांया दिशो दुम्तीके आ डोंइती डा नाक्त महिक्सीब।

13 मिनु नाजिरी आन कली अरेशो लोव्र मार बाक्ब देंशा हना, आंम दिल्ला बाक्शो नाक्त गाक्म नोले, मेको मुर आ पतीके मार बाक्ब देंशा हना, मेको कली गुम्तीक ताम्बु आ ओव्रतीक आ डोंइती चाक्चा माल्ब।

14 मिनु मेकोमी परमप्रभु यावे कली मारेइ मदुम्शो थम रिम्शो सांड का चोशा चढेतीक चढेचा माल्ब। मिनु मेकोमी बर्स का गाप्शो मारेइ मदुम्शो थम रिम्शो पाठी का पाप आ परबम चढेचा माल्ब। मिनु मारेइ मदुम्शो थम रिम्शो बर्स का गाप्शो सांड का दुशा बाक्चा आ परबम चढेचा माल्ब।

15 मिनु मेकोमी डालो का बोरब ओख्ती मसुप्शो शोब्ले, थम रिम्शो तेलम निशो फस के बटुकपुकी नु तेल खेक्शो बोरब ओख्ती मसुप्शो बाबरपुकी चढेचा माल्ब।

16 मिनु चढेबमी मेको नेल्ल परमप्रभु यावे आ डोंइती वोइक्चा माल्ब। मिनु मेको पाप आ परबम चढेतीके नु चोशा चढेतीके चढेचा माल्ब।

17 मिनु मेकोमी मेको सांड दुशा बाक्चा आ परबम परमप्रभु यावे कली चढेचा माल्ब। मेको नु डालोम बाक्शो बोरब ओख्ती मसुप्शो शोब्ले चढेचा माल्ब। मिनु मेको चढेबमी मेको नु अन्न चढेतीके नु तूचा थोत्रक चढेतीक चढेचा माल्ब।

18 मिनु नोले मेको नाजिरीमी गुम्तीक ताम्बु ओत्रतीक आ डोंइती आ तिल्लो पिया डा चां प्रेक्चा माल्ब। मिनु मेको चां दुशा बाक्चा आ परबम चढेतीक आ आगाम चोचा माल्ब। प्रेरित १८:१८

19 मिनु आ पिया प्रेक्गा नोले मेको चढेबमी मेको सांड आ लोप्शो बला नु डालो डा बोरब ओख्ती मसुप्शो बटुक का नु बोरब ओख्ती मसुप्शो बाबर का मेको नाजिरी आ गुडम वोइक्चा माल्ब।

20 मिनु चढेबमी मेको कली क्युक्शा परमप्रभु यावे आ डोंइती क्युक्शा चढेतीक चढेचा माल्ब। मिनु क्युक्शा चढेशो, कुथ्रु नु फिला चढेब आ भाग दुम्ब। मेको नोले मेको नाजिरीमी अडगुर शांबु तूतु हना दुम्ब। प्रस्थान २९:२३, २४, २७

21 मिनु कसम जशो नाजिरी कली अरेशो लोत्र मार बाक्ब देशा हना, आ परमप्रभु यावे कली चढेशो नाजिरी आ कसम जशो खोदेशो बाक्चा माल्ब। आ चाप्शो तेम्ने चाप्ब। आ कसम जशो गारचा माल्ब। मिनु आ जिम्मा डा अरेशो लोत्र नेल्ल गारचा माल्ब देनो” दैत।

### हारूनमी गेचा माल्लो आसीक

22 मिनु परमप्रभु यावेमी मोसा कली

23 “गे हारून नु आ तौ आन कली ‘गे इस्राएली आन कली आसीक गेनीनु, मार देंचा माल्नीनी देशा हना, लेवी ९:२२-२३; ब्यवस्था १०:८

24 परमप्रभु यावेमी इन कली आसीक गेवल। इन कली गेना हना यो कोत्रडल। उत्पत्ती २४:१, ३५; भजन संग्रह १२१:-

25 परमप्रभु यावे इन कली तशा ग्येरसेक्ल। मिनु इन कली शिशी पवल। भजन संग्रह ८०:४; प्रस्थान ३४:६-७

26 परमप्रभु यावेमी इन कली कोत्रशा, इन थुं नाइशशा बाक्चा गेवल’ देंचा माल्नीनी। भजन संग्रह ६९:१७-१८; भजन संग्रह ८५:९; यसैया ५७:१९

27 मेकोपुकीमी मोदेशो लोत्र पा, आं नें इस्राएली आन तार वोइक्चा माल्नीम। मिनु गो मेको आन कली आसीक गेनुडमी” दे मोसा कली दैत।

## 7

### इस्राएली आन थर डा ठेयब मुर

1 मोसामी गुम्तीक ताम्बु सेल्ले थुम्शा, मेको नु आ मारेइ मारेइ आन कली तेल बुइक्ताक्मी। मिनु परमप्रभु यावे आ गेय पचा कली वोइक्तु। मिनु मेकोमी चढेतीक नु आ मारेइ मारेइ तेल बुइशशा परमप्रभु यावे आ गेय पचा कली वोइक्तीमी। प्रस्थान ४०:९, १०, १७

2 मिनु इस्राएल डा थर थर नु खिं खिं डा खुप्शा हिकशो मुर आन ठेयब मुरपुकीमी चढेन्तेक्म।

3 मेकोपुकीमी आन चढेतीके परमप्रभु यावे आ डोंइती चाक्तेक्म। मार चाक्तेक्म देशा हना, ६ ओटा बग्गी, १२ ओटा ब्यफ, निक्शी थर डा मुर आन ठेयब मुर आस कली बग्गी का बाक्त। मिनु ठेयब मुर का का पा ब्यफ का का चढेचा कली चाक्तेक्म। मिनु मेकोपुकीमी गुम्तीक ताम्बु आ डोंइती वोइक्तेक्म।

4 मिनु नोले परमप्रभु यावेमी मोसा कली

5 “मेको आन चाक्शो ताक्को। मिनु मेकोमी युम्तीक ताम्बु डा गेय पने चाप्नीम। लेवी आन कली आन आन गेय गारचा डा पा गेमी” दैत।

6 मिनु मोसामी मेको बग्गी नु ब्यफपुकी ताक्शा, लेवी आन कली गेम्तीमी।

7 मिनु मेकोमी बग्गी निक्शी नु ४ ओटा ब्यफ गेरशोन आ तौ आन गेय कोत्रशा, मेको आन कली गेम्तीमी।

8 मिनु ४ ओटा बग्गी नु ८ ओटा ब्यफ मेरारी आ मुर आन गेय कोत्रशा, मेको आन कली गेम्तीमी। चढेब हारून आ तौ इथामार मेको आन कली अरेब बाक्त। गन्ती ४:२८,३३

9 तन्न मेकोमी कोहाथी आन कली मारेड मगेमी। मारदे हना मेकोपुकीमी परमप्रभु यावे आ मार मार थोत्रक कोत्रचा नु आन बलाम कुरचा माल्बाक्तेक्म। गन्ती ४:१५

10 मिनु चढेतीक कली तेल बुडक्तीक नु परमप्रभु यावे आ गेय पचा कली वोडक्तीक नाक्त मेको इस्राएल आ थर डा मुर आन ठेयब मुरुमी यो चढेचा कली मार मार चाक्शा, चढेतीक आ डोंइती वोडक्तेक्म।

11 मिनु परमप्रभु यावेमी मोसा कली “मेकोपुकीमी चढेचा कली मार मार चाक्चा माल्नीम। मेको चढेतीके आं गेय पचा कली वोडक्तीक नाक्ती इस्राएल आ थर डा मुर आन ठेयब मुर का कामी नाक्त का कली चढेतीक चाक्चा माल्नीम” दैत। गन्ती १:४-१६; गन्ती २:३-२९

12 मिनु डोंइती डा नाक्ती यहूदा आ थर डा मुर आन ठेयब मुर अम्मीनादाब आ तौ नहशोनमी आ चढेतीक चाक्तु।

13 मिनु मार चाक्तु देशा हना, सहे का ३० शेकेल डा चांदी के थाल का ७० शेकेल डा चांदी के बोस का चाक्तु। मेको शेकेल युम्तीक ताम्बु डा शेकेल खोदेशो बाक्तेक्म। मेको थाल नु बोस निम्फामी तेलम निशो रिम्शो फसीम प्रिंशो बाक्ताक्स। मेको अन्न चढेतीके बाक्त। ताम्बु डा शेकेल का १२ ग्राम डा क्येट बाक्ब। बजार डा शेकेल चहिं ११.५ ग्राम बाक्ब।

14 मिनु १० शेकेल डा धूपम ब्रीशो सुन के आइक्च बोस का,

15 चोशा चढेचा कली ब्यफ का, सांड का नु बर्स का गाप्शो पाठा का चाक्तु।

16 पाप आ परबम चढेचा कली बोका का,

17 दुशा बाक्चा आ परबम चढेचा कली ब्यफ निक्शी, ५ ओटा सांड, ५ ओटा बोका नु ५ ओटा बर्स का गाप्शो पाठा चाक्तु। मेको अम्मीनादाब आ तौ नहशोन आ चढेतीक बाक्त।

18 मिनु आ दीसा इस्साकार आ थर डा मुर आन ठेयब मुर सुआर आ तौ नेथनेलम आ चढेतीक चाक्तु।

19 मिनु मार चाक्तु देशा हना, सहे का ३० शेकेल डा चांदी के थाल का नु ७० शेकेल डा चांदी के बोस का चाक्तु। मेको शेकेल युम्तीक ताम्बु डा शेकेल खोदेशो बाक्तेक्म। मेको थाल नु बोस निम्फामी तेलम निशो रिम्शो फसीम प्रिंशो बाक्ताक्स। मेको अन्न चढेतीके बाक्त।

20 मिनु १० शेकेल डा धूपम ब्रीशो सुन के आइक्च बोस का,

21 चोशा चढेचा कली ब्यफ का, सांड का नु बर्स का गाप्शो पाठा का चाक्तु।

22 पाप आ परबम चढेचा कली बोका का,

23 दुशा बाक्चा आ परबम चढेचा कली ब्यफ निक्शी, ५ ओटा सांड, ५ ओटा बोका नु ५ ओटा बर्स का गाप्शो पाठा चाक्तु। मेको सुआर आ तौ नेथनेल आ चढेतीक बाक्त।

24 मिनु मेको आ नित्थ नाक्ती जबूलून आ थर डा मुर आन ठेयब मुर हेलोन आ तौ एलीआबमी आ चढेतीक चाक्तु।

25 मिनु मार चाक्तु देशा हना, सहे का ३० शेकेल डा चांदी के थाल का नु ७० शेकेल डा चांदी के बोस का चाक्तु। मेको शेकेल युम्तीक ताम्बु डा शेकेल खोदेशो बाक्तेक्म। मेको थाल नु बोस निम्फामी तेलम निशो रिम्शो फसम प्रिंशो बाक्ताक्स। मेको अन्न चढेतीके बाक्त।

26 मिनु १० शेकेल डा धूपम ब्रीशो सुन के आइक्च बोस का,

27 चोशा चढ़ेचा कली ब्यफ का, सांड का नु बर्स का गाप्शो पाठा का चाक्तु।

28 पाप आ पर्वम चढ़ेचा कली बोका का,

29 दुशा बाक्चा आ पर्वम चढ़ेचा कली ब्यफ निक्शी, ५ ओटा सांड, ५ ओटा बोका नु ५ ओटा बर्स का गाप्शो पाठा चाक्तु। मेको हेलोन आ तौ एलीआब आ चढ़ेतीक बाक्त।

30 मिनु मेको आ सांबु नाक्ती रूबेन आ थर डा मुर आन ठेयब मुर शेदेउर आ तौ एली-सुरमी आ चढ़ेतीक चाक्तु।

31 मिनु मार चाक्तु देशा हना, सहे का ३० शेकेल डा चांदी के थाल का नु ७० शेकेल डा चांदी के बोस का चाक्तु। मेको शेकेल युम्तीक ताम्बु डा शेकेल खोदेशो बाक्तेक्म। मेको थाल नु बोस निम्फामी तेलम निशो रिम्शो फसीम प्रिंशो बाक्ताक्स। मेको अन्न चढ़ेतीके बाक्त। ताम्बु डा शेकेल का १२ ग्राम चांदी बाक्ब।

32 मिनु १० शेकेल डा धूपम ब्रीशो सुन के आइक्च बोस का,

33 चोशा चढ़ेचा कली ब्यफ का, सांड का नु बर्स का गाप्शो पाठा का चाक्तु।

34 पाप आ पर्वम चढ़ेचा कली बोका का,

35 दुशा बाक्चा आ पर्वम चढ़ेचा कली ब्यफ निक्शी, ५ ओटा सांड, ५ ओटा बोका नु ५ ओटा बर्स का गाप्शो पाठा चाक्तु। मेको शेदेउर आ तौ एली-सुर आ चढ़ेतीक बाक्त।

36 मिनु मेको आ नोले डा नाक्ती सिमियोन आ थर डा मुर आन ठेयब मुर सुरी-शदै आ तौ शेलुमीएलमी आ चढ़ेतीक चाक्तु।

37 मिनु मार चाक्तु देशा हना, सहे का ३० शेकेल डा चांदी के थाल का नु ७० शेकेल डा चांदी के बोस का चाक्तु। मेको शेकेल युम्तीक ताम्बु डा शेकेल खोदेशो बाक्तेक्म। मेको थाल नु बोस निम्फामी तेलम निशो रिम्शो फसीम प्रिंशो बाक्ताक्स। मेको अन्न चढ़ेतीके बाक्त।

38 मिनु १० शेकेल डा धूपम ब्रीशो सुन के आइक्च बोस का,

39 चोशा चढ़ेचा कली ब्यफ का, सांड का नु बर्स का गाप्शो पाठा का चाक्तु।

40 पाप आ पर्वम चढ़ेचा कली बोका का,

41 दुशा बाक्चा आ पर्वम चढ़ेचा कली ब्यफ निक्शी, ५ ओटा सांड, ५ ओटा बोका नु ५ ओटा बर्स का गाप्शो पाठा चाक्तु। मेको सुरी-शदै आ तौ शेलुमीएल आ चढ़ेतीक बाक्त।

42 मिनु मेको आ नोले डा नाक्ती गाद आ थर डा मुर आन ठेयब मुर दूएल आ तौ एली-आसाफमी आ चढ़ेतीक चाक्तु।

43 मिनु मार चाक्तु देशा हना, सहे का ३० शेकेल डा चांदी के थाल का नु ७० शेकेल डा चांदी के बोस का चाक्तु। मेको शेकेल युम्तीक ताम्बु डा शेकेल खोदेशो बाक्तेक्म। मेको थाल नु बोस निम्फामी तेलम निशो रिम्शो फसीम प्रिंशो बाक्ताक्स। मेको अन्न चढ़ेतीके बाक्त।

44 मिनु १० शेकेल डा धूपम ब्रीशो सुन के आइक्च बोस का,

45 चोशा चढ़ेचा कली ब्यफ का, सांड का नु बर्स का गाप्शो पाठा का चाक्तु।

46 पाप आ पर्वम चढ़ेचा कली बोका का,

47 दुशा बाक्चा आ पर्वम चढ़ेचा कली ब्यफ निक्शी, ५ ओटा सांड, ५ ओटा बोका नु ५ ओटा बर्स का गाप्शो पाठा चाक्तु। मेको दूएल आ तौ एली-आसाफ आ चढ़ेतीक बाक्त।

48 मिनु मेको आ नोले डा नाक्ती एफ्राइम आ थर डा मुर आन ठेयब मुर अम्मीहुद आ तौ एली-शामामी आ चढ़ेतीक चाक्तु।

49 मिनु मार चाक्तु देशा हना, सहे का ३० शेकेल डा चांदी के थाल का नु ७० शेकेल डा चांदी के बोस का चाक्तु। मेको शेकेल युम्तीक ताम्बु डा शेकेल खोदेशो बाक्तेक्म। मेको थाल नु बोस निम्फामी तेलम निशो रिम्शो फसीम प्रिंशो बाक्ताक्स। मेको अन्न चढ़ेतीके बाक्त।

50 मिनु १० शेकेल डा धूपम ब्रीशो सुन के आइक्च बोस का,

51 चोशा चढ़ेचा कली ब्यफ का, सांड का नु बर्स का गाप्शो पाठा का चाक्तु।

52 पाप आ पब्रम चढेचा कली बोका का,

53 दुशा बाक्चा आ पब्रम चढेचा कली ब्यफ निक्शी, ५ ओटा सांड, ५ ओटा बोका नु ५ ओटा बर्स का गाप्शो पाठा चाक्तु। मेको अम्मीहुद आ तौ एली-शामा आ चढेतीक बाक्त।

54 मिनु मेको आ नोले डा नाक्ती मनस्से आ थर डा मुर आन ठेयब मुर पेदा-सुर आ तौ गमालीएलमी आ चढेतीक चाक्तु।

55 मिनु मार चाक्तु देशा हना, सहे का ३० शेकेल डा चांदी के थाल का नु ७० शेकेल डा चांदी के बोस का चाक्तु। मेको शेकेल गुम्तीक ताम्बु डा शेकेल खोदेशो बाक्तेक्म। मेको थाल नु बोस निम्फामी तेलम निशो रिम्शो फसम प्रिंशो बाक्ताक्स। मेको अन्न चढेतीके बाक्त।

56 मिनु १० शेकेल डा धूपम ब्रीशो सुन के आइक्च बोस का,

57 चोशा चढेचा कली ब्यफ का, सांड का नु बर्स का गाप्शो पाठा का चाक्तु।

58 पाप आ पब्रम चढेचा कली बोका का,

59 दुशा बाक्चा आ पब्रम चढेचा कली ब्यफ निक्शी, ५ ओटा सांड, ५ ओटा बोका नु ५ ओटा बर्स का गाप्शो पाठा चाक्तु। मेको पेदा-सुर आ तौ गमालीएल आ चढेतीक बाक्त।

60 मिनु मेको आ नोले डा नाक्ती बेन्यामीन आ थर डा मुर आन ठेयब मुर गिदेओनी आ तौ आबी-दानमी आ चढेतीक चाक्तु।

61 मिनु मार चाक्तु देशा हना, सहे का ३० शेकेल डा चांदी के थाल का नु ७० शेकेल डा चांदी के बोस का चाक्तु। मेको शेकेल गुम्तीक ताम्बु डा शेकेल खोदेशो बाक्तेक्म। मेको थाल नु बोस निम्फामी तेलम निशो रिम्शो फसम प्रिंशो बाक्ताक्स। मेको अन्न चढेतीके बाक्त।

62 मिनु १० शेकेल डा धूपम ब्रीशो सुन के आइक्च बोस का,

63 चोशा चढेचा कली ब्यफ का, सांड का नु बर्स का गाप्शो पाठा का चाक्तु।

64 पाप आ पब्रम चढेचा कली बोका का,

65 दुशा बाक्चा आ पब्रम चढेचा कली ब्यफ निक्शी, ५ ओटा सांड, ५ ओटा बोका नु ५ ओटा बर्स का गाप्शो पाठा चाक्तु। मेको गिदेओनी आ तौ आबी-दान आ चढेतीक बाक्त।

66 मिनु मेको आ नोले डा नाक्ती दान आ थर डा मुर आन ठेयब मुर अम्मी-शदै आ तौ अही-एजेरमी आ चढेतीक चाक्तु।

67 मिनु मार चाक्तु देशा हना, सहे का ३० शेकेल डा चांदी के थाल का नु ७० शेकेल डा चांदी के बोस का चाक्तु। मेको शेकेल गुम्तीक ताम्बु डा शेकेल खोदेशो बाक्तेक्म। मेको थाल नु बोस निम्फामी तेलम निशो रिम्शो फसम प्रिंशो बाक्ताक्स। मेको अन्न चढेतीके बाक्त।

68 मिनु १० शेकेल डा धूपम ब्रीशो सुन के आइक्च बोस का,

69 चोशा चढेचा कली ब्यफ का, सांड का नु बर्स का गाप्शो पाठा का चाक्तु।

70 पाप आ पब्रम चढेचा कली बोका का,

71 दुशा बाक्चा आ पब्रम चढेचा कली ब्यफ निक्शी, ५ ओटा सांड, ५ ओटा बोका नु ५ ओटा बर्स का गाप्शो पाठा चाक्तु। मेको अम्मी-शदै आ तौ अही-एजेर आ चढेतीक बाक्त।

72 मिनु मेको आ नोले डा नाक्ती आशेर आ थर डा मुर आन ठेयब मुर ओक्रान आ तौ पगीएलमी आ चढेतीक चाक्तु।

73 मिनु मार चाक्तु देशा हना, सहे का ३० शेकेल डा चांदी के थाल का नु ७० शेकेल डा चांदी के बोस का चाक्तु। मेको शेकेल गुम्तीक ताम्बु डा शेकेल खोदेशो बाक्तेक्म। मेको थाल नु बोस निम्फामी तेलम निशो रिम्शो फसम प्रिंशो बाक्ताक्स। मेको अन्न चढेतीके बाक्त।

74 मिनु १० शेकेल डा धूपम ब्रीशो सुन के आइक्च बोस का,

75 चोशा चढेचा कली ब्यफ का, सांड का नु बर्स का गाप्शो पाठा का चाक्तु।

76 पाप आ पब्रम चढेचा कली बोका का,

77 दुशा बाक्चा आ पर्वम चढ़ेचा कली ब्यफ निक्शी, ५ ओटा सांड, ५ ओटा बोका नु ५ ओटा बर्स का गाप्शो पाठा चाक्तु। मेको ओक्रान आ तौ पगीएल आ चढ़ेतीक बाक्त।

78 मिनु मेको आ नेल्ल क्येडा नोले डा नाक्ती नाप्ताली आ थर डा मुर आन ठेयब मुर एनान आ तौ अहीरामी आ चढ़ेतीक चाक्तु।

79 मिनु मार चाक्तु देशा हना, सहे का ३० शेकेल डा चांदी के थाल का नु ७० शेकेल डा चांदी के बोस का चाक्तु। मेको शेकेल गुम्तीक ताम्बु डा शेकेल खोदेशो बाक्तेक्म। मेको थाल नु बोस निम्फामी तेलम निशो रिम्शो फसम प्रिंशो बाक्ताक्स। मेको अन्न चढ़ेतीके बाक्त।

80 मिनु १० शेकेल डा धूपम ब्रीशो सुन के आइक्च बोस का,

81 चोशा चढ़ेचा कली ब्यफ का, सांड का नु बर्स का गाप्शो पाठा का चाक्तु।

82 पाप आ पर्वम चढ़ेचा कली बोका का,

83 दुशा बाक्चा आ पर्वम चढ़ेचा कली ब्यफ निक्शी, ५ ओटा सांड, ५ ओटा बोका नु ५ ओटा बर्स का गाप्शो पाठा चाक्तु। मेको एनान आ तौ अहीरा आ चढ़ेतीक बाक्त।

84 मिनु परमप्रभु यावे आ गेय पचा कली वोइश्शो चढ़ेतीक कली तेल ब्रुइक्तीक नाक्ती इस्त्राएल आ थर थर डा मुर आन ठेयब मुर आन चढ़ेशो मार बाक्तेक्म देशा हना, १२ ओटा चांदी के थाल, १२ ओटा चांदी के बोस नु १२ ओटा सुन के आइक्च बोस बाक्तेक्म।

85 मेको चांदी के थाल का का पा सहे का ३० शेकेल हेल्शो बाक्तेक्म। मेको चांदी के बोस का का पा ७० शेकेल हेल्शो बाक्तेक्म। मेको चांदी के ग्योब नेल्ल नाक्शोनु, गुम्तीक ताम्बु डा शेकेल खोदेशो पा हजार निक्शी ४ सहे शेकेल हेल्शो बाक्त।

86 मिनु मेको १२ ओटा धूपमी ब्रीशो सुन के आइक्च बोस का का पा गुम्तीक ताम्बु डा शेकेल खोदेशो पा १०, १० शेकेल हेल्शो बाक्तेक्म। मेको सुन नेल्ल नाक्शोनु, सहे का २० शेकेल हेल्शो बाक्त।

87 मिनु बी ब्यफ, क्यारश भेडा रे चोशा चढ़ेचा कली १२ ओटा ब्यफ, १२ ओटा सांड, १२ ओटा बर्स का गाप्शो पाठा नु मेकोपुकी नु गारचा डा पा अन्न चढ़ेतीके बाक्तेक्म। मिनु पाप आ पर्वम चढ़ेचा कली १२ ओटा बोका बाक्तेक्म।

88 मिनु बी ब्यफ, क्यारश भेडा रे दुशा बाक्चा आ पर्वम चढ़ेचा कली २४ ओटा ब्यफ, ६० ओटा सांड, ६० ओटा बोका नु ६० ओटा बर्स का गाप्शो पाठा बाक्तेक्म। मेको परमप्रभु यावे आ गेय पचा कली ला मेको चढ़ेतीक कली तेल ब्रुइक्तीक नाक्ती आ नोले चढ़ेशो बाक्तेक्म।

89 मिनु मोसा परमप्रभु यावे नु लोत्र पचा कली गुम्तीक ताम्बुम ओत्रमेनु, मेकोमी कबल पशो सन्दोस सुम्शो शिशी बाक्तीके, करूब निक्शी आस दाते इर रे लोत्र पशो नेंतु। मोपा मेकोमी मोसा नु लोत्र पाप्तु। प्रस्थान २५:१७-२२; प्रस्थान २९:४२; प्रस्थान ३३:७; १ सामुएल ३:३-१४

## 8

बत्ती दातीक वोइश्शो

1 मिनु परमप्रभु यावेमी मोसा कली

2 “गे हारून कली ‘गे मेको बत्ती वोदीनु, मेको ७ ओटा बत्ती दातीक आ डोंइती गे ब्रपतो’ देनो” देंत।

3 मिनु हारूनमी मो पाप्तु। परमप्रभु यावेमी मोसा कली अरेशो खोदेशो पा दातीक आ डोंइती गे ब्रपाइक्तु। प्रस्थान २५:९, ३१-४०

4 मिनु बत्ती दातीके दोपा सेल्शो बाक्त देशा हना, मेको सुन के तुप्शा सेल्शो बाक्त। मेको उइ रे इर सम्म तुप्शा सेल्शो बाक्त। मिनु परमप्रभु यावेमी मोसा कली कोंइशो खोदेशो पा, हारूनमी मेको बत्ती दातीक सेल्लु।

लेवी आ मुर परमप्रभु के दुम्शो

5 परमप्रभु यावेमी मोसा कली

6 “इस्त्राएली आन दाते रे लेवी आन कली चाक्शा, मेको आन कली चोत्रखो सेल्मी।



7 मेको आन कली मार पचा माल्नेवे देशा हना, मेको आन तारी चोत्रखो सेल्लिक ब्वाक्कु बुइक्तीमी। मिनु मेकोपुकीमी आन रां डा चां नेल्ल प्रेक्शा, आन वा मुरशा, चिकसीशा ग्रांग्रा मदिशो सेल्लसीचा माल्नीम। गन्ती १९:९, १७; लेवी १४:८

8 मिनु नोले मेकोपुकीमी ब्यफ का नु तेलम निशो रिम्शो फस अन्न चढेतीके चाक्चा माल्नीम। गे चहिं पाप आ पबंम चढेचा कली ब्यफ का चाक्को।

9 मिनु गे लेवी आन कली गुम्तीक ताम्बु आ डोंइती चाक्शा, इस्राएली नेल्ल आन कली गुम्पाइक्मी।

10 मिनु गे लेवी आन कली परमप्रभु यावे आ डोंइती चाक्गीनु, इस्राएली नेल्लेमी आन गुइ लेवी आन तार वोइक्चा माल्नीम।

11 मिनु हारूनमी लेवी आ मुर आन कली परमप्रभु यावे आ गेय पचा कली मेको आ डोंइती क्युकशा चढेशो खोदेशो पा वोइक्चा माल्ब। प्रस्थान २९:२४

12 मिनु लेवी आ मुरपुकीमी आन गुइ मेको ब्यफ आस पिया तार वोइक्चा माल्नीम। मिनु हारूनमी लेवी आ मुर आन पबंम पाप क्याम्तीक गेय पचा कली ब्यफ का पाप आ पबंम चढेतीके नु अर्को चोशा चढेतीके परमप्रभु यावे कली चढेचा माल्ब।

13 मिनु मेको नोले गे लेवी आ मुर आन कली हारून नु आ तौ आन डोंइती राप्पा, परमप्रभु यावे कली क्युकशा चढेतीक खोदेशो पा वोइक्चा माल्नेवे।

14 मोपा गे लेवी आ मुर आन कली अरु इस्राएली रे तिल्चा माल्नेवे। मिनु लेवी आ मुर आं के दुम्नीम। गन्ती ३:४५

15 मिनु गे लेवी आ मुर आन कली ग्रांग्रा मदिशो सेल्शा, मेको आन कली क्युकशा चढेतीक खोदेशो पा वोइक्मी नोले मेकोपुकीमी गुम्तीक ताम्बुमी गेय पने चाप्नीम।

16 मिनु मेकोपुकी इस्राएली आन दाते रे थमा पा आं कली तिल्शो बाक्नीम। गो मेको आन कली इस्राएली आन नेल्ल क्येडा डोंइती जरमेशो तौ आन पा डा आं कली वोइक्तामी। गन्ती ३:१२-१३

17 मिनु इस्राएली आन दातेम मुर बाक्तेकम हना यो, बी ब्यफ, क्यारश भेडा बाक्तेकम हना यो, डोंइती जरमेशो नेल्ल आं के बाक्नीम। इजीप्ती आन नेल्ल क्येडा डोंइती जरमेशो तौ नेल्ल आन कली सदुमी नाक्तर गे गो मेको आन कली आं कली तिल्शा वोंइसाक्यी। प्रस्थान १३:२

18 मिनु इस्राएली आन डोंइती जरमेशो आन पा डा गो लेवी आ मुर तिल्शा वोंइसाक्यी।

19 मिनु गो इस्राएली आन दाते रे लेवी आ मुर आन कली हारून नु आ तौ आन कली गेतामी। मार कली गेतामी देशा हना, इस्राएली आन पबंम गुम्तीक ताम्बुमी गेय पचा कली इस्राएली आन पबंम पाप क्याम्तीक गेय पचा कली नु इस्राएलीपुकी गुम्तीक ताम्बु आ नेक्था मजाकमल नु मुर बेक्तीक रोइम मबेक्म, दे गेतामी” दे परमप्रभु यावेमी मोसा कली देंत। गन्ती ३:९; गन्ती १:५३

20 मिनु मोसा, हारून नु इस्राएल डा मुर नेल्लेमी लेवी आ मुर आन पबंम परमप्रभु यावेमी मोसा कली अरेशो खोदेशो पा पाम्तेकम।

21 मिनु लेवी आ मुरपुकीमी आंम आन पाप रे ग्रांग्रा मदिशो सेल्लसीशा आन वा मुरतेकम। मिनु नोले हारूनमी मेको आन कली क्युकशा चढेतीक खोदेशो पा परमप्रभु यावे आ डोंइती वोइक्तीमी। मिनु हारूनमी मेको आन कली पाप क्याम्तीक गेय पा ग्रांग्रा मदिशो सेल्लतीमी।

22 मिनु मेको नोले लेवी आ मुरपुकीमी हारून नु आ तौ आन कली वारच पा गुम्तीक ताम्बु डा गेय पाम्तेकम। मिनु परमप्रभु यावेमी मोसा कली लेवी आ मुर आन पबंम अरेशो खोदेशो पा मेकोपुकीमी पाम्तेकम।

23 मिनु परमप्रभु यावेमी मोसा कली

24 “एको लोत्र २५ बर्स गाप्शो नु मेको क्येडा लाक्शो लेवी आ मुर आन पबंम बाक्ब। मिनु मेकोपुकी गुम्तीक ताम्बुमी गेय पचा गोचा माल्नीम। गन्ती ४:३, २३, ३०, ४७; १इतिहास २३:३, २४

25 मिनु मेकोपुकी ५० बर्स लाक्गमेनु, गेय पचा प्रोन्मेक्ल।

26 मिनु मेकोपुकी गुम्तीक ताम्बुमी गेय पाइब आन लोक्ब आन कली वारच पदमेक्ल। तन्न आंमा चहिं गेय मपामेक्ल। गे लेवी आ मुर आन कली मोदेशो पा गेय पपाइक्चा माल्नेवे” देंत।

## 9

पास्सा चाड

प्रस्थान १२:५; लेवी २५:५-८

1 मिनु परमप्रभु यावेमी इस्राएलीपुकी इजीप्त रे जाक्मा आ बर्स निक्शी नोले डोंइती डा महिनाम सीने डा गोरशो रागीमी मोसा कली

2 “गे इस्राएलीपुकीमी आ देशो नाक्ती पास्सा चाड मानेचा माल्नीनी।

3 मेको महिना डा १४ नाक्त डा नाक्नाक्दो मेको चाड मानेचा माल्नीनी। गोपुकीमी मेको आ पर्वम फुल्लुम मुशा ब्रेक्शो लोव्र नु शेंशो पतीके नेल्लेमी मानेचा माल्नीनी” दैत।

4 मिनु मोसामी इस्राएली आन कली “पास्सा चाड मानेचा माल्नीनी” दे अरेप्टु।

5 मिनु मेकोपुकीम डोंइती डा महिना डा १४ नाक्ती डा नाक्नाक्दो सीने डा गोरशो रागीमी पास्सा चाड मानेक्तेक्म। परमप्रभु यावेमी मोसा कली अरेशो खोदेशो पा इस्राएलीपुकीमी पाम्तेक्म।

6 मिनु मेकेर मुर का निक्शी बेक्शो मुर थिशा, ग्रॉग्रा दिशो दुम्शो बाक्तेक्म। मोपा मेकोपुकीमी मेको नाक्ती मेको पास्सा चाड मानेचा मतामे। मेकोपुकी मेको नाक्ती मोसा नु हारून आस डोंइती जाक्तेक्म।

गन्ती १९:११

7 मिनु मेको मुरपुकीमी “गो बेक्शो मुर थिशा ग्रॉग्रा दिशो दुम्शो बाक्तक हना यो, मारदे मेको देशो नाक्ती गोपुकीमी इस्राएली आन दातेमी आंइ परमप्रभु यावे कली चढेतीके चढेचा मताइनीकी?” दैतेक्म।

8 मिनु मोसाम मेको आन कली “रिम्दीन, परमप्रभु यावेमी इन पर्वम मार देंबा, गो मेको नेंचा माल्नुड” दैत।

9 मिनु परमप्रभु यावेमी मोसा कली

10 “गे इस्राएली आन कली ‘सुइ इन दातेमी नु इन चच युइ आन दातेमी बेक्शो मुर थिशा ग्रॉग्रा दिशो दुम्शो बाक्त हना यो, डोन लत हना यो, मेकोमी परमप्रभु यावे कली पास्सा चाड मानेचा माल्ब।

11 मेकोपुकीमी महिना निक्शी डा १४ नाक्ती नाक्नाक्दो मेको मानेचा माल्नीम। मिनु मेकोपुकीमी मेको पाठा कली बोरब ओरूती मसुप्शो शोब्ले, कशो खाइ नु ब्वचा माल्नीम।

12 मिनु मेको आ दीसा सुनी सम्म मारेइ हेंचा मदुम्ब। मिनु मेको आ रुश का यो जिक्चा मदुम्ब। मिनु पास्सा चाड आ पर्वम फुल्लुम मुशा, मार ब्रेक्शो बाक्मे, मेको पचा माल्नीम।

13 तन्न तेको मुर ग्रॉग्रा दिशो मदुम्शो बाक्बा, डोन यो मलशो बाक्बा, मेकोमी पास्सा चाड ममानेप्टु हना, मेको मुर आ मुर आन दाते रे तिल्चा पुंडसीब। मारदे हना मेकोमी आ देशो नाक्ती परमप्रभु यावे कली चढेतीक मचढेवो। मेको मुर आ पाप राइब।

14 मिनु इन दातेमी बाक्शो अर्को रागी डा मुरुमी परमप्रभु यावे कली पास्सा चाड मानेचा दाक्ताक्व हना, मेकोमी मेको आ पर्वम ब्रेक्शो नेल्ल शेंशो पतीक खोदेशो पा पचा माल्ब। मिनु अर्को रागी डा मुर नु इन मुर नेल्ल आन कली पास्सा चाड आ पर्वम ब्रेक्शो लोव्र का दुम्चा माल्ब’ देनो” दैत।

ताम्बु आ तार बाक्शो गोस्स

15 मिनु गुम्तीक ताम्बु वोइक्ने थुम्शो नाक्ती गोस्सुमी मेको कबल पशो सन्दोस वोइश्शो ताम्बु सुम्तु। मेको नाक्नाक्दो रे सुनी सम्म ताम्बु तारी बाक्त। मेको गोस्स मी खोदेशो तांइसीशो बाक्त। प्रस्थान ४०:३४-३५

16 मेको मोदेशो गेना हना यो दुम्शो बाक्त। गोस्सुमी मेको ताम्बु कली नाक्ती सुम्बाक्त। मिनु नाक्दो मी खोदेशो दुम्बाक्त।

17 मिनु मेको गोस्स ताम्बु आ तार रे इर गे लमेनु, इस्राएलीपुकी गाक्चा गोम्तेक्म। मिनु तेकेर मेको गोस्स जुक्ता, मेकेर इस्राएलीपुकीमी आन बाक्तीक सेल्लेक्म। प्रस्थान ४०: ३६-३८

18 मिनु इस्राएलीपुकी परमप्रभु यावे आ अरेशोमी गाक्बाक्तेक्म। मिनु परमप्रभु यावे आ अरेशोमी मेकोपुकीमी आन बाक्तीक सेल्लबाक्तेक्म। मिनु मेकोपुकी मेको गोस्स गुम्तीक ताम्बु तार बाक्म सम्म मेकेर बाक्बाक्तेक्म।

19 मेको गोस्स शुश नाक्त सम्म गुम्तीक ताम्बु तार बाक्त हना यो, इस्राएलीपुकी परमप्रभु यावे आ देशो टिशा मगाक्बाक्तेक्म।

20 कोइ नाक्ती मेको गोस्स गुम्तीक ताम्बु आ तार का निक्शी नाक्त सम्म ला बाक्बाक्त। मिनु मेकोपुकी परमप्रभु यावे आ अरेशो टिशा, बास बाक्बाक्तेक्म। मिनु परमप्रभु यावे आ अरेशो खोदेशो पा गाक्बाक्तेक्म।

21 कोइ नाक्ती मेको गोस्स नाक्दो रे सुनी सम्म ला बाक्बाक्त। मिनु सुनी गोस्स इर लमेनु, मेकोपुकी गाक्बाक्तेक्म। नाक्ती बाक्त हना यो, नाक्दो बाक्त हना यो, मेको गोस्स इर लत हना, मेकोपुकी गाक्बाक्तेक्म।

22 मिनु मेको गोस्स नाक्त निक्शी, महिना का नु मेको क्येडा शुश नाक्त सम्म यो गुम्तीक ताम्बु तार बाक्त हना, इस्राएली आन बाक्तीकेमी बाक्बाक्तेक्म। तन्न गोस्स इर गे लत हना, मेकोपुकी गाक्बाक्तेक्म।

23 मिनु मेकोपुकी परमप्रभु यावेमी अरेशो खोदेशो पा आन बाक्तीक सेल्बाक्तेक्म। मिनु परमप्रभु यावे आ अरेशो खोदेशो पा गाक्बाक्तेक्म। मेकोपुकीमी परमप्रभु यावेमी मोसा कली अरेशो खोदेशो पा पाइबाक्तेक्म।

## 10

### चांदी के तुराही

1 परमप्रभु यावेमी मोसा कली

2 “गे चांदी के तुराही निक्शी सेलो। मेको तुप्शा, सेल्चा माल्नेवे। मिनु गे मेको ताप्शा, इस्राएली आन कली गुम्पाइक्चा माल्नेवे। मिनु गाक्ची ना दुम्मेनु, गे मेको ताप्चा माल्नेवे। गन्ती ३१:६

3 मेको निक्शी कालेम ताप्शोनु, इस्राएली नेल्ल इ डोंइती गुम्तीक ताम्बु आ ओवतीकेमी जाक्शा बुक्चा माल्नीम।

4 तन्न का ला ताप्शोनु, इस्राएली आन थर थर डा मुर आन ठेयब मुरपुकी इ डोंइती जाक्शा बुक्चा माल्नीम।

5 मिनु ठेयब सेंदामी ताप्शोनु, पूर्ब गे बाक्शो मुरपुकी गाक्चा माल्नीम।

6 मिनु निक्शी खेयप ताप्शोनु, दक्खिन गे बाक्शो मुरपुकी गाक्चा माल्नीम। गाक्ची ना दुम्मेनु, गेना हना यो तुराही ताप्चा माल्नीम।

7 गे मुर आन कली गुम्पाइक्ची ना मेको ताप्चा माल्नेवे। तन्न मेको गाक्ची ना डा खोदेशो पा ताप्चा मदुम्ब।

8 मिनु हारून आ तौ चढ़ेब निक्शीमी मेको तुराही ताप्चा माल्नीस। मेको इन कली नु इन चच युइ आन कली गेना हना यो पतीके बाक्ब।

9 मिनु गे इन रागीमी इन कली दिप्ब जोरी सत्रुपुकी नु लडाइ पथ लनीनु, ठेयब सेंदामी तुराही ताप्चा माल्नीस। मो पाइतीनी हना, परमप्रभु यावे, इन परमप्रभुमी इन कली मिम्शा, इन जोरी सत्रु रे प्रोंइब। न्यायाधीस ६:३४

10 मिनु गेपुकी ग्येरशा बाक्नीनु, गे इन पचा माल्शो चाड मानेनीनु, औसी डा चाड मानेनीनु, इन चोशा चढ़ेतीके नु इन दुशा बाक्चा आ पर्बम चढ़ेतीके चढ़ेनीनु, गेपुकीमी तुराही ताप्चा माल्नीनी। मिनु मेको ताप्नीनु, इन परमप्रभुमी इन कली मिम्ब। गो परमप्रभु यावे, इन परमप्रभु नड” देंत। लेवी २३:२४; २राजा ११:१४; २इतिहास ७:६

### इस्राएली सीने डांडा रे गाक्शो

11 मिनु बर्स निक्शी, महिना निक्शी डा २० नाक्ती मेको गोस्स परमप्रभु यावे आ कबल पशो सन्दोस बाक्शो ताम्बु रे इर लत। गन्ती १:१

12 मिनु नोले इस्राएलीपुकी सीने डा गोरशो रागी रे हुल हुल पा गाक्तेक्म। मिनु मेको गोस्स पारान डा गोरशो रागीम नाइसाक्व।

13 मिनु परमप्रभु यावेमी मोसा कली अरेशो खोदेशो पा टिशा, मेकोपुकी गाक्तेक्म। गन्ती २:-

- 14 नेल्ल क्येडा डोंइती यहूदा आ बाक्तीक डा मुर हुल हुल पा आन छेदर कुरशा गाक्तेकम। मेको आन ठेयब मुर अम्मीनादाब आ तौ नहशोन बाक्त।
- 15 मिनु इस्साकार आ बाक्तीक डा मुर आन ठेयब मुर सुआर आ तौ नेथनेल बाक्त।
- 16 मिनु जबूलून आ बाक्तीक डा मुर आन ठेयब मुर हेलोन आ तौ एलीआब बाक्त।
- 17 मिनु नोले ग्रुम्तीक ताम्बु पोक्शा, गेरशोन आ मुरपुकी नु मेरारी आ मुरपुकीमी मेको कुरशा, गाक्तेकम।
- 18 मिनु मेको आन नोले रूबेन आ बाक्तीक डा मुरपुकी हुल हुल पा आन छेदर कुरशा गाक्तेकम। मेको आन ठेयब मुर शेदेउर आ तौ एली-सुर बाक्त।
- 19 मिनु सिमियोन आ बाक्तीक डा मुर आन ठेयब मुर सुरी-शदै आ तौ शेलुमीएल बाक्त।
- 20 मिनु गाद आ बाक्तीक डा मुर आन ठेयब मुर दूएल आ तौ एली-आसाफ बाक्त।
- 21 मिनु कोहाथीपुकी परमप्रभु यावे आ ताम्बु डा मार मार कुरशा, गाक्तेकम। मेको आन जाक्चा क्येडा डोंइती मेको ग्रुम्तीक ताम्बु सेलने थुम्शो बाक्चा माल्बाक्त।
- 22 मेको नोले एफ्राइम आ बाक्तीक डा मुरपुकी हुल हुल पा आन छेदर कुरशा गाक्तेकम। मेको आन ठेयब मुर अम्मीहुद आ तौ एली-शामा बाक्त।
- 23 मिनु मनस्से आ बाक्तीक डा मुर आन ठेयब मुर पेदा-सुर आ तौ गमालीएल बाक्त।
- 24 मिनु बेन्यामीन आ बाक्तीक डा मुर आन ठेयब मुर गिदेओनी आ तौ आबी-दान बाक्त।
- 25 मिनु नेल्ल आन क्येडा नोले दान आ बाक्तीक डा मुर हुल हुल पा आन छेदर कुरशा, गाक्तेकम। मेको आन ठेयब मुर अम्मी-शदै आ तौ अही-एजेर बाक्त।
- 26 मिनु आशेर आ बाक्तीक डा मुर आन ठेयब मुर ओक्रान आ तौ पगीएल बाक्त।
- 27 मिनु नाप्ताली आ बाक्तीक डा मुर आन ठेयब मुर एनान आ तौ अहीरा बाक्त।
- 28 मोपा इस्राएली आन हुल हुल पा गाक्चा माल्शो बाक्तेकम।

### मोसामी आ शिउ आ तौ कली ग्रुम्शो

- 29 मिनु मोसामी मिदयान डा रूएल आ तौ होबाब, आ रिउ कली “परमप्रभु यावेमी आंड कली गेशो रागी लना लन बाक्नीकी। गे यो गोपुकी नु पिने। गो इन कली रिम्शो पाइक्नीकी। मारदे हना परमप्रभु यावेमी ‘इस्राएली आन कली रिम्शो पाइनुड’ दैत” दे मोसामी दैत। प्रस्थान २:१८; प्रस्थान १८:१; न्यायाधीस १:१६; न्यायाधीस ४:११
- 30 होबाबमी “गो मलाइक्नुड। गो आं रागी नु आं मुर आन बाक्तीके लेल्लुड” दैत।
- 31 मिनु मोसामी “आंड कली मप्रोनीन। मारदे हना मेको गोरशो रागीमी ते ताम्बु कीचा मेको तुइक्नीनी। मिनु गे आंड कली लां कोंइब दुम्नीनी।
- 32 गे गोपुकी नु गाक्तीनी हना, परमप्रभु यावेमी आंड कली मार मार रिम्शो पाइबा, गो मेको खोदेंशो पा इन कली पाइनीकी” दैत।
- 33 मिनु मेकोपुकी परमप्रभु यावे आ डांडा रे नाक्त सां सम्म गाक्तेकम। परमप्रभु यावे आ कबल पशो सन्दोस कुरबपुकी मेको आन कली बास बाक्तीक माल्चा, दे मेको आन डोंइडोंइती गाक्तेकम।
- 34 मिनु परमप्रभु यावे आ गोस्स मेको आन गाक्ची ना मेको आन तार बाक्त। प्रस्थान १३:२१; गन्ती ९:१५-२३
- 35 मिनु कुरबपुकीमी मेको कबल पशो सन्दोस कुरशा गाक्मानु, गेना हना यो मोसामी “परमप्रभु यावे, बोक्कीन। इन जोरी सत्रु एर ओंथ ब्रामल। मिनु इन जोरी सत्रु इन क्येडा प्रोक्मल” दैबाक्त। २इतिहास ६:४१; भजन संग्रह ३:८; भजन संग्रह ९:२०; भजन संग्रह १०:१२; भजन संग्रह १७:१३; भजन संग्रह ६८:२; भजन संग्रह १३२:८
- 36 मिनु मेको कबल पशो सन्दोस नाइक्तेमेनु, मेकोमी “परमप्रभु यावे, गे हजार, हजार इस्राएली आन दातेमी लेशा, जाक्कीन” दैबाक्त।

## 11

## इस्त्राएलीपुकीमी गन गन पशो

1 मिनु परमप्रभु यावेमी मुर आन श्येत जशो आ पब्रम गन गन पशो नेंतु। परमप्रभु यावेमी मेको नेंशा, शुश गाडक्ताक्व। मिनु परमप्रभु यावे गाडशशा, मुर आन बाक्तीके गे मी सोडशशा, एर सुर मीम नेक्पाइक्तु। लेवी १०:२

2 मिनु मुरपुकीमी मोसा कली “वारच पने” दे ग्रीतेक्म। मिनु मोसामी परमप्रभु यावे कली पुंडतु। मिनु मेको मी काप्त।

3 मिनु परमप्रभु यावेमी मेको आन दातेमी मी सोइक्तीके, मेको बाक्तीके आ नें तबेरा वोइक्तेक्म।

4 मिनु मेको आन दातेमी बाक्शो अर्को रागी डा मुरपुकीमी मार मार जचा थोव्रक जचा ब्वचा दाक्तेक्म। मिनु इस्त्राएली यो लेंशा डाक्शा “गोपुकीमी श्ये ब्वचा तक हना, दुम वा। प्रस्थान १२:३८; प्रस्थान १६:३; १कोरिन्थी १०:६

5 गो इजीप्तीमी मो ब्वशो डांड श्ये मिम्नीकी। मिनु वोबीस, खाइपुकी, प्याज नु लसुन यो मिम्नीकी।

6 तन्न गो मुल ओले पेंते दुग्शा, एको मन्ना डा लाक्शा मारेइ मथित्नीकी” देंतेक्म।

7 मन्ना चहिं धन्या वांचेर खोदेंशो बाक्त। मेको कोव्रशोनु, खोटो खोदेंशो तांडसीबाक्त। प्रस्थान १६:१४-३१

8 मिनु मुरपुकी लशा, मेको खुग्शा, कोइमी हिल्शा, कोइमी चुशा, कोइमी नेल्शा, कोइम बटुक सेल्शा जाम्तेक्म। मिनु मेको तेलम चोशो शोब्ले खोदेंशो पा ब्रोव्रबाक्त।

9 मिनु नाक्दो आन बाक्तीकेमी सीत यिमेनु, मन्ना यो यीबाक्त।

10 मिनु मोसामी मुर नेल्ल आन आन ताम्बु डा ओव्रतीकेमी राग्शा डाक्शो ताप्तु। मिनु मुरपुकीमी परमप्रभु यावे कली शुश गाइक्पाइक्तीके, मोसामी मेको आन पशो काइ मदाक्शो बाक्त।

11 मिनु मोसामी परमप्रभु यावे कली “गे मारदे आं कली श्येत गेयीनी? मारदे गो इन डोंइती शिशी मतडा? मारदे आं कली इश डा मुर आन कली कोव्रब सेल्यीनी?

12 मार, एको इश डा मुर आं आल नमी डा? मार, गो मेको आन कली थिडमी डा? गे आं कली ‘दूध तूब आल कली आ आममी कुरशा लाइशो खोदेंशो पा, आंइ किकी पिपी आन कली इन गेशो रागीमी कुरशा लावो’ देंनीनी।

13 गो इश डा मुर आन ब्वतीक श्ये ते थित्नुड डा? मिनु मेकोपुकीमी आं कली ‘श्ये ब्वचा गेकी’ दे जाक्शा डाक्तेक्म।

14 गो इश डा मुर आन कली खुल्ने मचाप्नुड। एको आं मचाग्शा डा गेय बाक्ब।

15 मिनु गे आं कली ओदेंशो पाइक्तीनी। मिनु गो इन शिशी ताता हना, साइय्यीनी। मिनु गो आं खतम दुम्तीके तचा ममाल्नुड” देंत। प्रस्थान ३२:३२

16 मिनु परमप्रभु यावेमी मोसा कली “गे इस्त्राएली आन दाते रे ७० जना खाल्पा आन कली खुप्तीमी। मेको आन मुर आन दाते डा ठेयब मुर नु मेको आन कली सासन पाइब मुर दुग्शा माल्नीम। मिनु गे मेको आन कली तुइक्चा माल्नेवे। मिनु मेको आन कली गुम्तीक ताम्बुमी चाक्मी। मिनु मेकोपुकी गे नु बाक्चा माल्नीम। प्रस्थान १८:२१-२६; प्रस्थान २४:९-११

17 मिनु गो यिशा, गे नु लोव्र पाइनुड। मिनु गो इ आगामी बाक्शो सोक्तर रे लाइशशा, मेको आन तारी वोइक्नुड। मिनु मेकोपुकीमी गे नु गारशा, मेको मुर आन श्येत कुरनीम। मिनु गे का ला कुरचा ममाल्नेवे।

18 मिनु गे मुर आन कली ‘गे दीसा कली ग्रॉग्रा मदिशो दुग्शा, ठीक दुमीन। गेपुकीमी श्ये ब्वचा ताइनीनी। मारदे हना गेपुकीमी परमप्रभु यावे आ डोंइती श्ये ब्वचा तक हना, रिग्शो दुम वा, दे डाक्शो बाक्तीनी। आंइ कली एको रागी क्येडा इजीप्तीमी रिग्शो बाक्त” देंतीनी। मोपतीके परमप्रभु यावेमी इन कली श्ये ब्वचा गेब। मिनु गे मेको ब्वाइनीनी। प्रस्थान १९:१०

19 मिनु नाक्त का, नाक्त निक्शी ५ नाक्ती, १० नाक्ती नु २० नाक्त ला ममाइ,

20 गेपुकीमी ब्रीचा डा पा महिना का सम्म श्ये ब्वचा ताइनीनी। मारदे हना गेपुकीम आंम इन दातेम बाक्शो परमप्रभु यावे कली मटिनी। मिनु गे मेको आ डोंइती 'गो मारदे इजीप्त रे यूशा गाक्का?' दे डाक्तीनी" देंत।

21 मिनु मोसामी "गो नु लां गाक्ब मुर ६ लाख बाक्नीम। मो हना यो, गे 'मेको आन कली महिना का सम्म श्ये ब्वचा गेनुडमी' देंतीनी।

22 मार, बी ब्यफ, क्यारश भेडा नेल्ल क्योरशा हना यो, एको इश डा मुर आन कली गाप्बा डा? समुन्द्र डा डांड नेल्ल रेशशा हना यो, नेल्ल आन कली गाप्बा डा?" देंत।

23 मिनु परमप्रभु यावेमी मोसा कली "मार, आं सक्ति ग्युमशो बाक्बा डा? आं देशो लोत्र गाप्बाकम को मगाप्बाकमे, तुइक्नेवे" देंत। यसैया ५०:२; यसैया ५९:१

24 मोपतीके मोसा लाडगा यूशा, मुर नेल्ल आन कली परमप्रभु यावे आ देशो लोत्र नेंपाइक्तीमी। मिनु मेको मुर आन दाते डा ७० जना खाल्पा आन कली ताम्बु आ एर ओंथ राप्पाइक्तीमी।

25 मिनु नोले परमप्रभु यावे गोस्सुमी उइ आगा तोइश्शा, मोसा नु लोत्र पाप्तु। मिनु मेकोमी मोसा आ आगा बाक्शो सोक्त इच्का लाइश्शा, मेको ७० जना खाल्पा आन तार वोइक्तु। मिनु मेको सोक्त मेको आन तार नांडसेनु, मेकोपुकीमी परमप्रभु यावे आ लोत्र पाम्तेकम। तन्न नोनोले मो मपाम।

26 मिनु ७० जना खाल्पा आन दातेमी एल्दाद नु मेदाद माइश्शो मुर निक्शी बाक्ताक्स। मेको आस नें यो ब्रेक्शो बाक्त। तन्न मेको निक्शी गुमतीक ताम्बुम मलसा बाक्त। मिनु परमप्रभु यावे आ सोक्त मेको आस तार यो नांडसे बाक्त। मिनु मेको निक्शीमी मुर आन बाक्तीकेमी परमप्रभु यावे आ लोत्र पाम्से बाक्त।

27 मिनु वोइश मुर का दोरशा जाक्शा, मोसा कली "एल्दाद नु मेदादमी मुर आन बाक्तीकेमी परमप्रभु यावे आ लोत्र पाम्ताक्स" देंत।

28 मिनु नून आ तौ यहोसु मोसा कली वारच पाइब बाक्त। मेको मोसा आ योत्रशो मुरुमी मोसा कली "हजुर, आं होत्रप मेको आस कली तेक्कीन" देंत। गन्ती १३:१६; प्रस्थान २४:१३

29 तन्न मोसामी मेको कली "मार, आं पर्वम गे ईख पाइब दुमे? परमप्रभु यावेमी आ सोक्त आ मुर नेल्ल आन तार वोइश्शा, मेको नेल्ल परमप्रभु यावे आ लोत्र पाइब दुम हना, गिश रिमशो दुम वा" देंत। योएल ३:१; मर्कूस ९:३८-३९

30 मिनु मोसा नु इस्राएली खाल्पा मुर आन बाक्तीके लेत्तेकम।

### इस्राएलीपुकीमी बटटाइ ब्वशो

31 मिनु नोले परमप्रभु यावेमी फश पपाइक्तु। मिनु मेको फशेमी समुन्द्र रे बटटाइपुकी चाक्तु। मिनु मुर आन बाक्तीक आ एर ओंथ नेल्ल नाइक्पाइक्तु। काबु डा नाक्त डा लां सम्म कुबीत निक्निक्शी थांइशो पा नांडसाकम। कुबीत का ०.५ मिटर खोदेशो बाक्ब। प्रस्थान १६:१३

32 मिनु मुरपुकीमी मेको नाक्त रे, नाक्तो रे नु आ दीसा नाक्त सम्म मेको ग्याइक्ताकम। नेल्ल क्येडा इच्का खोइ ग्याइक्बमी यो १० होमेर ग्याइक्ताकमे। मिनु मेकोपुकीम आन बाक्तीक एर ओंथ नेल्ल सोत्रपाइक्तेकम। होमेर का २२० लिटर रिक्ब पुक्तीके का बाक्ब।

33 तन्न मेकोपुकीमी श्ये ब्वना ब्वन परमप्रभु यावे मेको आन पर्वम शुश गाइक्ताकव। मिनु परमप्रभु यावेमी मेको आन कली थम टेयब बेक्तीक रोइ पपाइक्तीमी।

34 मोपतीके मेको बाक्तीके आ नें किब्रोथ-हत्तावा वोइक्तेकम। मारदे हना मेकेर शुश वाल्ब मुर आन कली थिम्तेकम।

35 मिनु मुरपुकी किब्रोथ-हत्तावा रे पा गाक्शा, हसेरोथ गे लाम्तेकम।

## 12

### हारून नु मिरयाम गाइश्शो

1 मिनु हसेरोथमी बाक्मानु, मोसामी कूश रागी डा मीश चाक्तीके मिरयाम नु हारूनमी मोसा कली मरिश्शो लोत्र पाम्ताक्स। मारदे हना मेकोमी कूश रागी डा मीश ग्युंबे पशो बाक्त। प्रस्थान २:२१

2 मिनु मेको निक्शीमी “मार, परमप्रभु यावेमी मोसा नु ला लोव्र पशो बाक्बा डा? मार, मेकोमी गोपुकी नु यो लोव्र मपशो बाक्बा डा?” देंताक्स। मिनु परमप्रभु यावेमी मेको लोव्र नेंतु।

3 मोसा चहिं रागी डा मुर नेल्ले आन क्येडा ब्रेम्शो मुर बाक्त।

4 मिनु परमप्रभु यावेमी रीब पा मोसा, हारून नु मिरयाम आन कली “गे सांफा, गुम्तीक ताम्बुम रे यूडीन” देंत। मिनु मेको सांफा यूतेकम।

5 मिनु नोले परमप्रभु यावे गोस्स के थामम यिशा गुम्तीक ताम्बु आ ओव्रतीक राप्शा, हारून नु मिरयाम आस कली ब्रेत्ताकमसी। मिनु मेको निम्फा जाक्ताक्स। प्रस्थान १६:१०

6 मिनु मेकोमी “आं लोव्र नेनीन। गोपुकी इन दातेमी परमप्रभु यावे आ लोव्र पाइब बाक्त हना, गो मेको कली कोंइतीकेम तपांइसीनुड। गो मेको नु आ डोमुमी लोव्र पाइनुड।

7 तन्न आं गेय पाइब मोसा नु मोदेशो मपाइनुड। मेको आ गेय नेल्लेमी थमा सुडक्चा पुंइसीशो बाक्ब। हिब्रू ३:२

8 गो मेको नु कोव्रमुशा लोव्र पाइनुड। मिनु मेको नु रुप्चा डा लोव्र पा खुइश्शो लोव्र मपाइनुड। मिनु मेको आं नेक्था जाक्ने चाप्ब। मारदे गे आं गेय पाइब मोसा आ पर्वम मरिम्शो लोव्र पचा काड महिंसी?” देंत। प्रस्थान ३३:११; ब्यवस्था ३४:१०

9 मिनु परमप्रभु यावेमी मेको आस पर्वम शुश गाइक्ताक्व। मिनु मेको गाक्त।

10 मिनु मेको गोस्स ताम्बु आ तार रे लमेनु, मिरयाम कोव्र मुशा फुं खोदेशो बुश दुम्त। मिनु हारूनमी मिरयाम कली कोव्रडानु, मेको कोव्ररी दुम्ने थुम्शो बाक्त। ब्यवस्था २४:९

11 मिनु हारूनमी मोसा कली “आं प्रभु, गो मूर्ख दुम्शा, पाप पशो आ पर्वम आंस कली सजाइ मगेने।

12 एको कली आ आम आ कोव्रज रे यूमेनु, आ रां फेके का राक्शो शाम्शो आल खोदेशो दुम्चा मगेने” देंत।

13 मिनु मोसामी परमप्रभु यावे कली “परमप्रभु, एको कली सापतीन” दे पुंइतु। प्रस्थान १५:२६

14 मिनु परमप्रभु यावेमी मोसा कली “मार, मेको आ आफोमी आ कुलुम तोक्शो हना, मेको ७ नाक्त सम्म मुने मदोक्बा डा? मेको कली ७ नाक्त सम्म मुर आन बाक्तीक क्येडा लाडगाम तिल्शा वोतो। मेको नोले ला लेश्शा जाक्चा गेवो” देंत। गन्ती १३:४६

15 मिनु मिरयाम ७ नाक्त सम्म मुर आन बाक्तीक क्येडा लाडगाम तिल्शा वोइक्चा पुंइसाक्व। मिनु मिरयाम कली लेश्शा मचाक्गमे सम्म मुरपुकी यो मगाक्म।

16 मिनु मेको आ नोले मेकोपुकी हसेरोथ रे गाक्शा, पारान डा गोरशो रागीम आन बाक्तीक सेल्लेक्म।

## 13

कनान रागी कली क्यारी पशो

ब्यवस्था १:१९-२५

1 मिनु परमप्रभु यावेमी मोसा कली

2 “गे कनान रागी क्यारी पाइब मुरपुकी सोइक्तो। गो मेको रागी इस्राएली आन कली गेनुड। मेको आन थर थर रे पा मुर का का सोइक्तो। मेको आन मुर आन दाते डा टेयब मुर दुम्चा माल्नीम” देंत।

3 मिनु परमप्रभु यावे आ देशो खोदेशो पा, मोसामी मेको क्यारी पाइब आन कली पारान डा गोरशो रागी रे सोइक्ताक्मी। मेको नेल्ले इस्राएली आन दाते डा टेयब मुर बाक्तेक्म।

4 मिनु सु सु बाक्तेक्म देशा हना, रूबेन आ थर रे जाक्कुर आ तौ शम्मुआ,

5 सिमियोन आ थर रे होरी आ तौ शाफात,

6 यहूदा आ थर रे यपुन्ने आ तौ कालेब, यहोसु १४:७

7 इस्साकार आ थर रे योसेफ आ तौ इगाल,

8 एफ्राइम आ थर रे नून आ तौ होशेआ, गन्ती १३:१६

9 बेन्यामीन आ थर रे रफु आ तौ पाल्ती,

10 जबूलून आ थर रे सोदी आ तौ गददीएल,

11 योसेफ आ तौ मनस्से आ थर रे सूसी आ तौ गाददी,

12 दान आ थर रे गेमल्ली आ तौ अम्मीएल,

13 आशेर आ थर रे मिकाएल आ तौ सेथुर,

14 नाप्ताली आ थर रे वोफसी आ तौ नाहबी,

15 गाद आ थर रे माकी आ तौ गूएल बाक्तेकम।

16 मिनु मोसामी मेको रागी कली क्यारी पथ सोइशशो मुर आन नें एकोन बाक्नीम। मोसामी नून आ तौ होशेआ आ नें यहोसु वोइक्तु। गन्ती ११:२८; १इतिहास ७:२७

17 मोसामी मेको आन कली कनान रागी कली क्यारी पथ सोइक्ताकमी। मिनु मोसामी मेको आन कली “गे एक रे लशा, नेगेब माइशशो दक्खिन डा रागी रे पहाड गे लने।

18 मेको रागी दोदेशो बाकमे, मेकेर डा मुरपुकी बोल्यो बाकमा कों, मबाकमा, शुश बाकमा कों, इच्का खोइ ला बाकमा? मेको नेल्ल कोव्रडीन।

19 मिनु मेको आन रागी रिम्शो बाकम कों, मरिम्शो बाकम? मिनु मेको आन सहर गारो हिरशो बाकम कों महिरशो बाकम?

20 मिनु मेको रागी डा खप दोदेशो बाकमे, मलिलो बाकम कों, पाडकोक्च बाकम? मेकेर रवापुकी बाकमा कों, मबाकमा? महिंब दुमीन। मिनु मेको रागी डा फल फुल चाक्कीन” दे माइक्तीमी। मेना डोंइती डा अडगुर मीची जाक्शो बाक्त।

21 मिनु मेकोपुकी ग्येत्थ लशा, जीन डा गोरशो रागी रे रेहोब सम्म मेको रागी क्यारी पाम्तेकम। रेहोब लेबो-हमाथ आ नेक्था बाक्माक्त।

22 मिनु मेकोपुकी नेगेब गे ग्येत्थ लशा, हेब्रोन सहर जाक्दीम्मा बाक्त। मेकेर अनाक आ मुर अहीमान, शेशै नु तल्मै बाक्बाक्तेकम। हेब्रोन चहिं इजीप्त डा सोआन सहर क्येडा ७ बर्स डोंइती सेल्शो बाक्त।

23 मिनु नोले एश्कोल डा दिंममी जाक्दीत्तेकम। मिनु मेकेर अडगुर सिशशो राशी क्योरशा, मेको कोक्के कामी शुइशशा मुर निक्शीमी कुरशा चाक्तेकस। मेकोपुकीमी अनार नु फोव्रशी गेडा यो चाक्तेकम।

24 मिनु मेको ठेयब अडगुर खोइक्तीके नोले मेको बेसी आ नें एश्कोल डा बेसी वोइक्तेकम।

**क्यारी पथ लाइब आन लोव**

25 मिनु ४० नाक्ती नोले मेकोपुकीमी मेको रागी क्यारी पशा, लेत्तेकम।

26 मिनु लेशशा, मोसा, हारून नु इस्राएली नेल्ल आन बाक्तीके, पारान डा गोरशो रागी कादेशमी जाक्तेकम। मिनु मेको क्यारी पाइबपुकीमी मोसा, हारून नु मुर नेल्ल आन कली आन तशो शेंताकमे। मिनु मेको रागी डा फल फुल कोइताकमे। गन्ती २०:१; उत्पत्ती १६:१४; उत्पत्ती २०:१; ब्यवस्था १:१९, ४६; यहोसु १४:६-७

27 मिनु मोसा कली “गोपुकी इन सोइशशो रागीमी जाक्दीत्तक। मेको रागीम थमा पा दूध नु खुदो शुश बाक्ब। मिनु मेको रागी डा फल फुल एकोन बाक्नीम। प्रस्थान ३:८, १७

28 तन्न मेकेर बाक्ब मुरपुकी बोल्यो बाक्नीम। मिनु मेको आन सहरपुकी गारोम हिरशो नु थम ठेयब बाक्नीम। मिनु गोपुकीमी मेकेर अनाक आ मुर आन कली यो ताइतक।

29 मिनु अमालेक आ मुर नेगेब रागीम बाक्बाक्तेकम। मिनु हित्ती, यबुसी नु एमोरी पहाडम बाक्बाक्तेकम। मिनु कनानी ठेयब समुन्द्र आ नेक्था नु यर्दन खोला आ नेक्था बाक्बाक्तेकम” दैतेकम।

30 मिनु कालेबमी मोसा आ डोंइती बाक्शो मुर आन थुं नाइक्पाइक्चा, दे मोसा कली “गोपुकी रीब पा लशा, मेको रागी इं के सेल्य। मारदे हना गो मेको थमा पा ग्राने चान्पय” दैत। गन्ती १४:६

31 मिनु नोले मेको नु लाइब मुरपुकीमी “गोपुकी मेको मुरपुकी नु लडाइ पथ लने मचापन्य। मारदे हना मेकोपुकी गो इं क्येडा शुश बोल्यो बाक्नीम” दैतेकम।

32 मोपा मेकोपुकीमी क्यारी पथ लतीक रागी आ पबंम मरिम्शो लोव नेंपाइशशा “गोपुकीमी क्यारी पथ लशो रागीमी आ मुर आन कली साइक्ब ताइतक। मिनु आंइ तशो मुरपुकी थम ठेयब बाक्नीम।



33 गोपुकीमी मेकेर नेफीलीमपुकी यो ताइतक। अनाक आ मुर नेफीलीम रे दुम्शो बाक्नीम। मिनु गो मेको आन कली तशा, गो आंमा माले खोदेशो तांइसाक्क। मिनु गो मेको आन डोंइती यो मोदेशो तांइसीनय” दैतेक्म। ब्यवस्था १:२८; ब्यवस्था ९:२

## 14

### इसाएलीपुकीमी थमा मसुइशो

1 मिनु मेको नाक्दो मेको मुर नेल्ले वाइ ब्रेशशा डाक्तेक्म। ब्यवस्था १:२६-४४

2 मिनु इसाएली नेल्ल मोसा नु हारून आस परबम गन गन पाम्तेक्म। मिनु नेल्लेमी मेको आस कली “गोपुकी इजीप्त उइ बेक्शो नकी हना, रिम्शो दुम वा। एको गोरशो रागीम बेक्शो नकी हना यो, दुम वा। गन्ती ११:१; प्रस्थान १६:२-३; प्रस्थान १७:२-३

3 मारदे परमप्रभु यावेमी आंइ कली तरवारम साइक्पाइक्चा कली एको रागी चाक्का? गो आंइ मीशपुकी नु आंइ आलपुकी रोइशशा लाइक्नीम। गोपुकी इजीप्त रागी लेत्चा रिम्शो ममाइ डा?” दैतेक्म। भजन संग्रह १०६:२४-२६

4 मिनु मेकोपुकी “मुल गो लां कोंइब मुर का योव्रशा, इजीप्त रागीम लेय्य” दैमुम्तेक्म।

5 मिनु मोसा नु हारून मेकेर बुक्शो इसाएली नेल्ल आन डोंइती खुम्की पा बाप्ताक्स। गन्ती १६:४

6 मिनु मेको रागीम क्यारी पथ लाइब नून आ तौ यहोसु नु यपुन्ने आ तौ कालेबमी सुरता पा आस आस वा खाक्ताक्स। गन्ती १३:६,८,१६,३०

7 मिनु मेको निक्शीमी इसाएली नेल्ल आन कली “गोपुकी आंइ क्यारी पथ लशो रागी थम रिम्शो बाक्ब।

8 परमप्रभु यावे गोपुकी इं कली तशा ग्येरसाक्व हना, मेकोमी इं कली मेको रागीम चाक्दीप्ब। मिनु मेको रागी दूध नु खुदो शुश बाक्शो रागी बाक्ब। मेको रागी इं कली गेब। गन्ती १३:२७

9 गोपुकी परमप्रभु यावे कली गन गन मपने। मिनु मेको रागी डा मुर आन क्येडा महिनीन। मारदे हना गो मेको आन कली शोब्ले खोदेशो पा नेक्नय। मेको आन कली प्रॉइब सुइ मबाक्नीम। परमप्रभु यावे गोपुकी नु बाक्ब। मेको आन क्येडा महिनीन” दैताक्स। गन्ती १३:३२

10 तन्न मुर नेल्लेमी मेको आस कली “फुल्लु आप्नीकी” दे हिंच कोंइताक्म। मेना परमप्रभु यावे आ छेडछेड इसाएली नेल्ल आन कली गुम्तीक ताम्बुम तपांइसाक्व। प्रस्थान १७:४; प्रस्थान १६:१०

11 मिनु परमप्रभु यावेमी मोसा कली “एको मुरपुकीम गेना सम्म आं कली मटीनीमी? एको आन दातेम आं कोंइशो चिन्ड तशा यो, गेना सम्म आं कली थमा मसुइक्नीमी?

12 गो मेको आन कली बेक्तीक रोइमी साइक्नुडमी। मेको आं मुर खोदेशो मबाक्नीम। मिनु गो इ रे मेको आन क्येडा शुश नु बोल्यो जात का सेल्लुडमी” दैत। प्रस्थान ३२:१०-१४

13 मिनु मोसामी परमप्रभु यावे कली “मोदेशो पाइतीनी हना, इजीप्त डा मुरपुकीमी एको लोव नेंनीम। मारदे हना गे मेको आन कली इन सक्तीमी मेकेर रे गुंइताक्नी।

14 एको रागी डा मुरपुकीम मेको आन कली नेंपाइक्नीम। परमप्रभु यावे, गे इन मुर आन दातेम बाक्शो बाक्नीनी, दे मेकोपुकीमी देशो लोव्र नेंने थुम्शो बाक्नीम। परमप्रभु यावे, गे मेको आन डोंइतीन तपांइसीशो बाक्नीनी। मिनु इन गोस्स मेको आन तार बाक्शो बाक्ब। मिनु गे नाक्ती गोस्स के थामम नु नाक्दो मी के थामम बाक्शा, मेको आन डोंइती गाक्नीनी। प्रस्थान १३:२१-२२; गन्ती ९:१५-२३

15 मिनु मुल गे एको मुर आन कली कालेमी साइक्तीनी हना, इन पशो नेंब रागी रागी डा मुरपुकीमी

16 परमप्रभु यावेमी मेको आन कली गेनुड, दे कसम जशो रागीम चाक्दीन्ने मचब। मोपतीके मेको आन कली गोरशो रागीम साइक्तु” दैनीम। ब्यवस्था ९:२८; यहोसु ७:८-९

17 मोपतीके, परमप्रभु, इन टेयब सक्ति कोंइदीन। गे इन थोक्शो पशो लोव्र खाप्पीन।

18 परमप्रभु यावे रीब पा मगाइक्ब नु गेना हना यो दाक्ब, प्रस्थान ३४:६-७ मेकोमी मरिम्शो पशो नु दूली पशो क्याम्ब, तन्न दोस ताइब कली दोस मताइब मदेब। आन आंम आफ आन पशो पाप मेको आन आल, चच, युइ नु युइ आन आल सम्म रपाइक्ब’ दे थोक्शा लोव्र पशो बाक्तीनी।

19 मिनू गे मेको मुर आन मरिम्शो पशो इन ठेयब नु गेना हना यो दाक्तीकेमी क्याम्दीन। गे इन मुर आन कली इजीप्ट रे एक सम्म आन मरिम्शो पशो क्याम्शो खोदेशो पने” दे पुंडतु। प्रस्थान ३४:१०

20 मिनू परमप्रभु यावेमी “गे इ पुंडशो खोदेशो पा एको मुर आन मरिम्शो पशो क्याम्नुड।

21 मो हना यो गो थमा पा, रागी नेल्ले आं सक्तिमी प्रिनुड। प्रस्थान ९:१६

22 मेकोपुकीमी इजीप्तमी नु गोरशो रागीमी आं ठेयब सक्ति नु छक लाक्चा डा गेय तशा यो, आं कली १० खेयप नाक्शा, मटीब दुम्शा, मेको नेल्लेमी

23 मेको आन किकी पिपी आन कली कसम जशा ‘गेनुड’ देशो रागी ओव्रचा मताइनीम। मिनू आं कली काइ मदाक्बपुकीम मेको रागी मताइनीम। भजन संग्रह ९५:११; हिब्रू ३:११,१७-१९

24 तन्न आं गेय पाइब कालेब आ थुमी अर्को सोक्ती बाक्ब। मिनू मेकोमी आ थुं नेल्लेमी आं कली टिशो बाक्ब। गो मेको कली आ क्यारी पथ लशो रागी चाक्दीत्नुड। मिनू मेको आ तौ चच युइ आन रागी दुम्ब। यहोसु १४:६-९

25 मिनू अमालेक आ मुर नु कनानीपुकी बेंसीम बाक्तीके, गेपुकी दीसा लने। मिनू लल समुन्द्र गे पा गोरशो रागी लने” दैत।

26 मिनू परमप्रभु यावेमी मोसा नु हारून आस कली

27 “गेना सम्म एको मरिम्शो मुरपुकीम आं पबंम गन गन पाइनीमी? गो इस्राएली आन आं कली गन गन पशो नेता। मेकोपुकीम आं कली गन गन पाइनीम। प्रस्थान ३२:३४-३५

28 गे मेको आन कली ‘परमप्रभु यावेमी थमा पा इन देशो खोदेशो पा इन कली पाइनुड।

29 गे नेल्ल गोरशो रागीमी बेक्चा माल्नीनी। नें ब्रेक्शो नेल्ले, २० बर्स गाप्शो नु मेको क्येडा लाक्शो आं कली गन गन पाइब बेक्चा माल्नीम। १कोरिन्थी १०:१०

30 आं कसम जशा, इन कली गेनुड देशो रागीमी सुइ ओव्रचा मताइनीम। यपुन्ने आ तौ कालेब नु नून आ तौ यहोसु ला ओव्रचा ताइनीस।

31 मिनू रोइक्चा पुंडसीनीम, देशो इन आल आन कली चहिं गो मेक चाक्दीत्नुडमी। मिनू मेकोपुकीमी इन मदाक्शो रागीम बाक्शा, तुइक्नीम।

32 गेपुकी चहिं एको गोरशो रागीमी बेक्नीनी।

33 मिनू इन आल मेको गोरशो रागीमी ४० बर्स सम्म गोठला दुम्शा हिरचा माल्नीम। मोपा इन मटिशो आ पबंम श्येत जाइनीम। गे नेल्ल इन नेल्ल क्येडा नोले डा मुर मबेक्नी सम्म मोदेशो पा हिरचा माल्नीम। प्रस्थान १६:३५; ब्यवस्था २:७; ब्यवस्था ८:४

34 गेपुकीमी मेको रागी क्यारी पचा कली ४० नाक्त सम्म माल्शो बाक्तीनी। मोपतीके नाक्त का डा बर्स का पा ४० बर्स सम्म गेपुकीम इन मरिम्शो पशो आ पबंम श्येत जचा माल्नीनी। मिनू गो इन पबंम गाइक्ताक्ड, दे तुइक्नीनी’ दे येरमीया २:१९; गन्ती ३२:१३

35 गो, परमप्रभु यावेमी, लोत्र पाता। मिनू गो एको आं कली गन गन पा बुक्शो मरिम्शो मुर आन कली थमा पा मो पाइनुड। मेको नेल्ल एको गोरशो रागीमीन बेक्शा नुप्नीम” दैत।

36 मिनू मोसाम क्यारी पथ सोइश्शो मुरपुकी लेशशा जाक्शा मेको रागी आ पबंम मरिम्शो लोत्र पा मुर नेल्ल आन कली परमप्रभु यावे कली गन गन पपाइक्तेक्म। १कोरिन्थी १०:५,१०; यहूदा:५

37 मेको रागी आ पबंम मरिम्शो लोत्र चाक्ब मुर नेल्ल परमप्रभु यावे आ डोंइती बेक्चा माल्नीम।

38 मिनू मेको रागी क्यारी पथ लाइब आन दाते डा नून आ तौ यहोसु नु यपुन्ने आ तौ कालेब ला ब्रोंइनीस।

39 मिनू मोसाम मुर नेल्ल आन कली एको लोत्र नेंपदानु, मुर नेल्ल शुश रोंका पाम्तेक्म।

40 मेकोपुकीमी सुनी कना बोक्शा इर पहाड गे डोइश्शा “गेपुकी मुल एक रे परमप्रभु यावे आ कबल पशो रागी लाइनीकी। मारदे हना, गोपुकीम पाप पशो बाक्नीकी” दैतेक्म। ब्यवस्था १:४१

41 तन्न मोसामी मेको आन कली “मारदे गेपुकीमी परमप्रभु यावे आ लोत्र लाक्नीनी? गे मग्रानीनी।

42 गे इर मडोंइसीन। मारदे हना परमप्रभु यावे गेपुकी नु मबाक्ब। मो पाइतीनी हना, इन जोरी सत्रुपुकीमी इन कली साइक्नीम।

43 मिनु अमालेक आ मुर नु कनानीपुकीमी इन कली लडाइ तोइनीम। मिनु गेपुकी तरवारम साइक्चा पुंडसीनीनी। मारदे हना गेपुकी परमप्रभु यावे कली टिचा प्रोंइतीनी। मोपतीके परमप्रभु यावे इन दातेमी मबाक्ब” देंत।

44 मो हना यो मेकोपुकीम लोव्र मनेंथु, इर पहाड गे डोंइसाक्म। तन्न परमप्रभु यावे आ कबल पशो सन्दोस गुन्तीक ताम्बुम बाक्त। मिनु मोसा मुर आन बाक्तीक उइ बाक्त।

45 मिनु मेको पहाडम बाक्ब अमालेक आ मुर नु कनानीपुकी उइ तोइश्शा, मेको आन कली साइक्ना साइक्न होरमा सम्म खेदा पाम्तेक्म। गन्ती २१:३; ब्यवस्था १:४४

## 15

### दोपा चढेचा, दे अरेशो

1 परमप्रभु यावेमी मोसा कली

2 “गे इस्राएली आन कली ‘गो इन कली गेशो बाक्तीक रागीम जाक्दीन्नीनु,

3 गे कसम जशो खाप्चा कली मीम चोशा चढेतीक चढेचा दाक्ताक्नी हना, यो, चोशा चढेतीके चढेचा दाक्तीनी हना यो, क्योरशा चढेचा दाक्ताक्नी हना यो, इन कली देशो चाडमी ग्येरशा परमप्रभु यावे कली चढेचा दाक्ताक्नी हना यो, गे इन गोठ नु बगाल रे परमप्रभु यावे कली आ दाक्शो ब्रोव्रशो रिना पाइश्शो चढेचा माल्नीनी।

4 मिनु सुमी परमप्रभु यावे कली चढेबा, मेकोमी अन्न चढेतीके यो चढेचा माल्ब। मेको अन्न चढेतीक एफाह का डा १० भाग डा भाग का रिम्शो फस, हिन का डा ४ भाग डा भाग का तेल ब्वाइश्शा, चढेचा माल्नीनी। एफाह का २२ लिटर पुक्तीके बाक्ब। हिन का ४ लिटर खोदेशो बाक्ब। लेवी २:-; गन्ती २८:५

5 गे चोशा चढेतीक पाठा का का नु तूचा थोव्रक चढेतीक हिन का डा भाग सां डा भाग का अडगुर शांबु यो चढेचा माल्नीनी। गन्ती २८:७; प्रस्थान २९:४०; लेवी २३:१३

6 सांड का चढेचा दाक्तीनी हना, मेको नु अन्न चढेतीक यो चढेचा माल्नीनी। मेको अन्न चढेतीक एफाह का डा १० भाग डा भाग निक्शी रिम्शो फस नु हिन का डा भाग सां डा भाग का तेल ब्वाइश्शा, चढेचा माल्नीनी।

7 तूचा थोव्रक चढेतीक कली हिन का डा भाग सां डा भाग का अडगुर शांबु चढेचा माल्नीनी। मेको परमप्रभु यावे कली आ दाक्शो ब्रोव्रशो रिना पाइश्शो चढेतीक बाक्ब।

8 मिनु कसम जशो खाप्चा कली कि दुशा बाक्चा आ पर्वम परमप्रभु यावे कली चोशा चढेचा कली कि क्योरशा चढेचा कली ब्यफ का चढेतीनी हना,

9 मेको नु अन्न चढेतीके यो चढेचा माल्नीनी। गे एफाह का डा १० भाग डा भाग सां रिम्शो फस नु आधा हिन तेल ब्वाइश्शा, चढेचा माल्नीनी। एफाह का २२ लिटर पुक्तीक बाक्ब। हिन का ४ लिटर पुक्तीके बाक्ब।

10 मिनु तूचा थोव्रक चढेतीक कली आधा हिन अडगुर शांबु यो मेको चोशा चढेतीक नु चढेचा माल्नीनी। मेको परमप्रभु यावे कली आ दाक्शो ब्रोव्रशो रिना पाइश्शो मीम चोशा चढेतीके बाक्ब।

11 मिनु मेको ब्यफ, सांड, बोका, पाठा नु आइक्च पाठा चढेशोनु, मो पचा माल्नीनी।

12 गेपुकीम दोशो चढेतीनी, मेको नेल्ल आन कली का का पा मो पचा माल्नीनी।

13 मिनु इस्राएली सु सुमी परमप्रभु यावे कली ब्रोव्रशो रिना पाइश्शो मीम चोशा चढेतीके चढेनीमी, मेकोपुकीमी मोदेशो पचा माल्नीमी।

14 मिनु अर्को रागी डा मुर, गेपुकी नु इक्का नाक्त बाक्त हना यो, गेना हना यो बाक्त हना यो, मेकोमी परमप्रभु यावे कली आ दाक्शो ब्रोव्रशो रिना पाइश्शो मीम चोशा चढेतीक चढेचा दाक्ताक्च हना, इन खोदेशो पा पचा माल्ब।

15 मिनू इन गुम्तीकेमी गेपुकी नु बाक्शो अर्को रागी डा मुर आन कली नेल्ल पाला सम्म एको पचा माल्लो कान बाक्ब। गेपुकी नु अर्को रागी डा मुर परमप्रभु यावे आ डोंइती खाल का डा बाक्नीनी। प्रस्थान १२:४८-४९

16 गेपुकी नु गे नु बाक्शो अर्को रागी डा मुर आन कली अरेशो लोव्र नु ठीक पतीक लोव्र खाल डा बाक्चा माल्ब 'देचा माल्नेवे' दे परमप्रभु यावेमी मोसा कली दैत।

### डोंइती डा शोब्ले

17 परमप्रभु यावेमी मोसा कली

18 “गे इस्राएली आन कली परमप्रभु यावेमी इन कली लाइशो, रागीम जाक्दीन्नीनु,

19 गेपुकीमी मेको रागी डा अन्न जनीनु, परमप्रभु यावे कली कोसेली का गेचा माल्नीनी।

20 मिनू इन डोंइती निशो फस रे सेल्लो शोब्ले का परमप्रभु यावे कली गेचा माल्नीनी। खला रे क्युकशा चढेशो खोदेशो पा चढेचा माल्नीनी। नेहेम्याह १०:३८; इजीकीएल ४४:३०

21 मिनू गेपुकीमी नेल्ल इन पाला सम्म इन डोंइती डा निशो फस रे शोब्ले का परमप्रभु यावे कली क्युकशा चढेतीके कली चढेचा माल्नीनी।

### मतुइक्थु पशो पाप

22 मिनू गेपुकीमी मतुइक्थु परमप्रभु यावेमी मोसा कली शेंशो लोव्र नेल्लेमी का मपाइतीनी हना, लेवी ४:१३-२१

23 परमप्रभु यावेमी मोसा रे पा इन कली नु इन नोले डा मुर आन कली शेंशो लोव्र मपाइतीनी हना,

24 गे नु गुम्तीक डा मुरुमी मतुइक्थु पशो पाप आ परबम मेको गुम्तीक डा मुर नेल्लेमी ब्यफ का चोशा चढेचा माल्नीम। मेको परमप्रभु यावे कली आ दाक्शो ब्रोव्रशो रिना पाइशो बाक्ब। मेको आ शेंशो खोदेशो पा अन्न चढेतीक नु तूचा थोव्रक चढेतीक यो चढेचा माल्नीम। मिनू पाप आ परबम बोका का यो चढेचा माल्नीम।

25 मिनू चढेबमी इस्राएली नेल्ल आन परबम पाप क्याम्तीक गेय पचा माल्ब। मिनू मेकोपुकी आन पाप क्याम्चा ताइनीम। मारदे हना मेकोम मतुइक्थु पाप पशो बाक्नीम। मिनू मेकोपुकीमी परमप्रभु यावे कली मीम चोशा चढेतीक चढेचा माल्नीम। मेको आन मतुइशो पाप आ परबम परमप्रभु यावे कली चढेचा माल्नीम।

26 मिनू गुम्तीक डा इस्राएली नु मेको नु बाक्शो अर्को रागी डा मुर नेल्ल माफ ताइनीम। मारदे हना मेको मुर नेल्लेम मतुइक्थु पाप पशो बाक्नीम।

27 मिनू सुइमी मतुइक्थु पाप पापु हना, मेकोमी आ पाप आ परबम बर्स का गाण्शो क्यारश आ पाठी का चढेचा माल्ब। लेवी ४:२७-२८

28 मिनू चढेबमी मेको मुर आ पशो पाप मतुइक्तीके, परमप्रभु यावे आ डोंइती पाप क्याम्तीक गेय पचा माल्ब। मिनू नोले मेको मुरुम माफ ताइब।

29 मतुइक्थु पाप पाइब इस्राएलीपुकी नु मेको नु बाक्ब अर्को रागी डा मुर नेल्ल आन कली मतुइक्थु पाप पशो आ परबम पचा माल्लो गेय खाल का डा बाक्ब।

30 तन्न इस्राएली बाक्त हना यो, अर्को रागी डा मुर बाक्त हना यो, तुइशशा यो, मटिथु पाप पापु हना, मेको परमप्रभु यावे कली पाप पाइब बाक्ब। मेको मुर कली गुम्तीके रे तिल्ला माल्ब। प्रेरित १३:३८; हिब्रू १०:२६-२९

31 मिनू मेको मुरुमी परमप्रभु यावे आ लोव्र लाक्शा, आ अरेशो काइ मटितीके, मेको मुर तिल्ला पुंइसीशा, आ पाप राइब” दैत।

### मुरुम नाइक्तीक नाक्त गेय पशो

32 मिनू इस्राएलीपुकी गोरशो रागीम बाक्मानु, मेकोपुकीमी नाइक्तीक नाक्ती मुर का कली शी खुप्शो थित्तेक्म। प्रस्थान २०:८-१०

33 मिनू मुरपुकीमी मेको शी खुप्ब कली मोसा, हारून नु मुर नेल्ल आन डोंइतीमी चाक्तेक्म।

34 मिनु मेको कली मार पाइक्चा माल्बा मतुइक्तीके चोक्शा वोइक्तेकम। लेवी २४:१२

35 मिनु परमप्रभु यावेमी मोसा कली “मेको मुर कली साइक्चा माल्ब। गुम्तीक डा मुर नेल्लेमी मेको कली मुर आन बाक्तीके रे गुंडशा, फुल्लु आप्शा साइक्चा माल्नीम” दैत। प्रस्थान ३१:१४-१५; प्रस्थान ३५:२-३

36 मिनु गुम्तीक डा मुर नेल्लेमी मेको कली मुर आन बाक्तीके रे गुंडशा, फुल्लु आप्शा साइक्तेकम। परमप्रभु यावेमी मोसा कली दोदेशो पा अरेवा, मोदेशो पा मुरपुकीमी पांत्तेकम।

परमप्रभु आ शेंतीके मिम्चा कली

37 मिनु लेंशा परमप्रभु यावेमी मोसा कली

38 “गे इस्राएली आन कली ‘गेपुकीमी इन फेक्तीक वा आन सुरमी नीलो श्येले के फेने सेलीन। मोदेशो नेल्ल इन पाला सम्म पचा माल्नीनी। ब्यवस्था २२:१२; मत्ती २३:५; प्रस्थान ३९:१

39 मारदे मोदेशो पचा माल्नीनी देंशा हना, गे मेको फेने तशा, परमप्रभु यावे आ शेंतीके नेल्ल मिम्शा, टिचा कली मोदेशो पचा माल्नीनी। इन थुं डा दला दाक्स मपचा कली नु इन मिक्च कली पाप मपपाइक्चा कली मोदेशो पचा माल्नीनी।

40 गे परमप्रभु यावे आ शेंतीक नेल्ल मिम्शा पचा माल्नीनी। मिनु गे इन परमप्रभु आ डोंइती ग्रांघा मदिशो दुम्चा माल्नीनी।

41 गो, परमप्रभु यावे, इन परमप्रभु नड। गो इन परमप्रभु दुम्चा कली इन कली इजीप्त रागी रे गुंडताक्नी। गो परमप्रभु यावे, इन परमप्रभु नड’ देंचा माल्नेवे” दैत।

## 16

कोराह, दाथान नु अबीराम

1 मिनु लेवी आ तो कोहाथ, आ चच इच्चार, आ युइ कोराह, नु रूबेन आ थर डा एलीआब आ तौ निक्शी दाथान नु अबीराम नु पेलेथ आ तौ ओन सल्ला पांत्तेकम। प्रस्थान ६:१६,१८,२१; गन्ती २६:७-९; यहूदा १:११

2 मिनु मेकोपुकीम सहे निक्शी ५० जना इस्राएली ब्रेत्ताकम। मेकोपुकी गुम्तीकेमी योत्रचा पुंडसीशो ठेयब मुर बाक्तेकम। मेको आन कली मुर नेल्लेमी तुइशो बाक्तेकम। मेकोपुकीम मोसा कली दोस गोम्तेकम। गन्ती १२:१-२

3 मिनु मेकोपुकी बुक्शा, मोसा नु हारून आस कली “गे निक्शीमी थम मरिम्शो पाइतीसी। गुम्तीक डा मुर नेल्ले का का पा, ग्रांघा मदिशो बाक्नीम। मिनु परमप्रभु यावे मेको आन दातेमी बाक्ब। गे मारदे इस कली परमप्रभु यावे आ मुर आन क्येडा ठेयब सेल्सीनीसी?” दैतेकम।

4 मिनु मोसा मेको लोत्र नेंशा, खुम्की पा बाप्त। गन्ती १४:५

5 मिनु मेकोमी कोराह नु मेको आ मुर नेल्ल आन कली “दीसा सुनी परमप्रभु यावेमी सु मेको आ मुर बाक्बा, सु ग्रांघा मदिशो बाक्बा नु सु आ नेक्था जाक्दीत्चा गेबा, मेको तुइक्पाइक्ब। २तिमोथी २:१९

6 कोराह, गे नु बाक्ब मुर नेल्लेमी थनौरो चाक्शा जाक्कीन।

7 मिनु गे दीसा मेकेर मी कुर पा परमप्रभु यावे आ डोंइती धूप चोने। मिनु परमप्रभु यावेमी सु कली योत्रबा, मेको ग्रांघा मदिशो बाक्ब। लेवीपुकी, गे थम मरिम्शो पाइतीनी” दैत।

8 मिनु मोसामी कोराह कली “गे लेवीपुकी नेनीन।

9 इस्राएली आन परमप्रभु यावेमी इन कली आ नेक्था जाक्चा गेशा, आ ताम्बु डा गेय पचा कली मुर आन दाते रे योत्रशो बाक्ब। गे गुम्तीक आ डोंइती राप्शा, मेको मुर आन गेय पचा, आइक्च मिम्नीनी? गन्ती ३:६-१३; गन्ती ४:४-२०

10 मेकोमी गे नु इ लोक्ब, लेवी नेल्ल आन कली आ नेक्था जाक्चा गेपुतु। मार, गेपुकीम चढेब आन गेय यो माल्नीनी?

11 गे नु इ मुर नेल्ले परमप्रभु यावे कली दोस गेशा बुक्तीनी। हारून सु बाक्बा डा? गे मेको कली गन गन पनी?” दे माइक्तीमी।

12 मिनु मोसामी एलीआब आ तौ दाथान नु अबीराम आस कली ब्रेथ सोइक्ताक्व। तन्न मेको निक्शीमी “गो मजाक्नस्कु।

13 गे आंड कली दूध नु खुदो शुश बाक्शो रागी रे एको गोरशो रागीम साइक्थ चाक्शा यो, मार, इन कली मजाक्दीम्मे? मिनु गे आंड कली हुकुम यो पचा माल्नीसी?

14 गे आंड कली दूध नु खुदो शुश बाक्शो रागीम चाक्दीन्नी? रू नु अङ्गुर रू गेनी? मार, गे एको मुर आन मिक्च फेत्वा दाक्नीनी? गोपुकी थमा पा मजाक्नीकी” देंताक्स। प्रस्थान ३:८

15 मिनु मोसा शुश गाइश्शा, परमप्रभु यावे कली “मेको आन चढ़ेशो मताक्कीन। गो मेको आन गधा का यो मताक्गु। गो मेको आन कली मरिम्शो यो मपड” देंत।

16 मिनु मोसामी कोराह कली “गे नु इ मुरपुकी नु हारून यो दीसा परमप्रभु यावे आ डोंइती जाक्कीन।

17 गे नेल्लेमी आंम आंम थनौरो चाक्शा, मेकेर धूप कुर पने। मिनु गे का का पा आंम थनौरो परमप्रभु यावे आ डोंइती चाक्कीन। गे नु हारूनम यो इस थनौरो चाक्कीस। मेको सहे निक्शी ५० ओटा थनौरो बाक्नीम” देंत।

18 मिनु मेको का का पा आन थनौरोम मी कुर पा धूप वोइक्तेक्म। मिनु मेकोपुकी मोसा नु हारून गुम्तीक ताम्बु आ ओव्रतीकेमी राप्तेक्म।

19 मिनु कोराहमी गुम्तीक डा मुर नेल्ल आन कली मोसा नु हारून आस परबंम गन गन पचा, दे गुम्तीक ताम्बु आ ओव्रतीकेमी पुक्तीमी। मेना परमप्रभु यावे आ छेडछेड मेको नेल्ल आन डोंइती गूत। गन्ती १६:१०

20 मिनु परमप्रभु यावेमी मोसा नु हारून आस कली

21 “गे निक्शी मेको मुर आन रे दिलीस। मिनु गो याम कामी एको नेल्ल आन कली रोवल चिवल पोक्नुडमी” देंत। उत्पत्ती १९:१४

22 मिनु मोसा नु हारूनमी खुम्की पा “परमप्रभु मुर नेल्ल आन कली ब्रोंडचा गेब परमप्रभु, मुर कामी पाप पतीके गे मुर नेल्ल नु गाइक्नीनी?” देंताक्स। अय्युब १०:१२; अय्युब १२:१०; रसामुएल २४:१७; गन्ती २७:१६

23 मिनु परमप्रभु यावेमी मोसा कली

24 “एको मुर आन कली ‘कोराह, दाथान नु अबीराम आन बाक्तीक रे दिलीन’ दे माइक्मी” देंत।

25 मिनु मोसा बोक्शा दाथान नु अबीराम आस बाक्तीक लत। मिनु इस्राएली आन खाल्पापुकी यो लाम्तेक्म।

26 मिनु मेकोम नेल्ल मुर आन कली “मेको मरिम्शो मुर आन ताम्बु रे दिलशा बाक्कीन। मेको आन के मारेइ मथिने। मो मपाइतीनी हना, मेको आन पापमी पतीके गेपुकी यो साइक्चा पुंडसीनीनी” दे माइक्तीमी।

27 मोपतीके मेकोपुकी कोराह, दाथान नु अबीराम आन ताम्बु रे दिल्लेक्म। मिनु दाथान नु अबीराम आस ताम्बु रे गूशा, मेको आस ताम्बु आ ओव्रतीकेम आस मीश नु आस आलपुकी नु राप्ताक्स।

28 मिनु मोसामी मेको नेल्ल आन कली “परमप्रभु यावेमी आं कली एको गेय पचा कली सोइश्शो बाक्ब, दे गे तुइक्नीनी। एको गेय नेल्ल गो आंमा पशो मनड।

29 मेको मुरपुकी अरु मुरपुकी खोदेंशो पा बेक्तेक्म हना, गो परमप्रभु यावे आ सोइश्शो मनड।

30 तन्न परमप्रभु यावेमी नक गेय का पा, रागीम आ शोव्र पाक्शा, दाक्तु हना, एको आन मारेइ मारेइ सुन्दा सेसीन बेक्शो मुर आन बाक्तीके दोक्तेक्म हना, एकोपुकीमी परमप्रभु यावे आ लोव्र लाक्शो बाक्मा बाक्त, दे गेपुकीमी तुइक्नीनी” देंत।

31 मिनु मेको लोव्र पने थुमा नोले मेको आन बाक्शो रागी ब्रोल्लत। ब्यवस्था ११:६

32 मिनु रागीम आ शोव्र पाक्शा, मेको नु मेको आस खिं डा मुर नेल्ल, कोराह आ खिं डा मुर नेल्ले नु मेको आन मारेइ मारेइ नेल्ल दाक्तु।

33 मिनु मेकोपुकी नु आन मारेइ मारेइ सेसीन बेक्शो मुर आन बाक्तीके लाम्तेक्म। मिनु रागीम मेको आन तार आ शोव्र खेप्ताक्व। मिनु मेकोपुकी गुम्तीक डा मुर आन दाते रे जाम्तेक्म।

34 मिनु आन नेक्था बाक्ब इस्राएली नेल्लेमी मेको आन वाइ ब्रेशो नेंशा “गोपुकी इ कली यो मुल रागीम दाक्ब” देंना देंन प्रोक्तेकम।

35 मिनु परमप्रभु यावे रे मी यूशा, मेको सहे निक्शी ५० जना धूप चोइब आन कली दाक्तु। लेवी १०:१-२; भजन संग्रह १०६:१७-१८

36 मिनु परमप्रभु यावेमी मोसा कली

37 “चढ़ेब हारून आ तौ एलाजर कली थनौरोपुकी ब्रशो मी रे गुंड्या कली नु मी आ फिलीडगो शुश डोन लाइशा फ्र्या कली अरेवो। गन्ती ३:४; प्रस्थान ६:२५

38 मारदे हना मेको पाप पाइबपुकी बेक्तीके आन थनौरोपुकी ग्रांग्रा मदिशो बाक्नीम। मेको थनौरो तुप्शा, चढ़ेतीके गिल्तीक पाता सेल्चा माल्ब। मारदे हना मेको मुर आन थनौरो परमप्रभु यावे आ डोंइती चढ़ेतीके ग्रांग्रा मदिशो दुम्तेकम। मिनु मेको इस्राएली आन कली मिम्तीक चिन्ड दुम्चा माल्नीम” देंत।

39 मिनु चढ़ेब एलाजरमी मेको बेक्शो मुरपुकीम धूप चोशो तांबा के थनौरो गुप्तु। मिनु मेको कली तुप्शा चढ़ेतीक गिल्चा कली पाता सेल्तु।

40 मेको इस्राएली आन कली मिम्तीके बाक्ब। मार मिम्तीके बाक्ब देशा हना, हारून आ मुर डा लाक्शा, अरु मुरपुकी परमप्रभु यावे आ डोंइती धूप चोचा कली आ नेक्था लने मचाप्नीम। मिनु कोराह नु आ मुरपुकी खोदेशो पा साइक्चा मपुंडसीनीम, दे मिम्पाइक्तीक बाक्ब। मिनु परमप्रभु यावे मोसा रे पा एलाजर कली दोदेशो पा लोत्र पवा, मोदेशो पा पाप्तु। गन्ती ३:१०

41 मिनु आ दीसा सुनी इस्राएली नेल्लेमी मोसा नु हारून आस पर्वम गन गन पा “गे निक्शीमी परमप्रभु यावे आ मुर आन कली साइक्तीसी” देंतेकम। प्रस्थान १७:३

42 मिनु मुरपुकीम मोसा नु हारून आस कली गन गन पा बुक्शा, गुम्तीक ताम्बु गे कोव्रडमेनु, गोस्सुमी मेको ताम्बु कली सुम्शो ताम्तेकम। मिनु परमप्रभु यावे आ छेडछेड यूत।

43 मेना मोसा नु हारून गुम्तीक ताम्बु आ डोंइती लाम्ताक्स।

44 मिनु परमप्रभु यावेमी मोसा कली

45 “गे मेको मुर आन दाते रे दिलीस। गो मेको आन कली याम कामी रोवल चिवल पोक्नुडमी” देंत। मिनु मेको खुम्की बाप्ताक्से।

46 मिनु मोसामी हारून कली “मेको थनौरो लाइशा, मेको चढ़ेतीक डा मी कुर पा धूप चोवो। मिनु रीब पा मेको मुर आन दातेमी लाइशा, मेको आन पाप क्याम्तीक गेय पावो। मारदे हना परमप्रभु यावे गाइक्ताक्व। मिनु मुर बेक्तीक रोइ बोक्चा गोप्तु” देंत। लेवी १६:१२,१३,१७; गन्ती १:५३

47 मिनु मोसामी देशो खोदेशो पा हारून थनौरो लाइशा मुर आन दातेमी दोरशा लत। मेना मुर आन दातेमी मुर साइक्ब रोइ जाक्ने थुम्शो बाक्त। मिनु मेकोमी धूप चोशा मुर आन पर्वम पाप क्याम्तीक गेय पाप्तु।

48 मिनु हारून बेक्शो नु सेस मुर आन दातेमी राप्त। मिनु मेको मुर बेक्तीक रोइ देक्त।

49 कोराह बेक्तीकेम बेक्शो प्रोइशा, मेको मुर बेक्तीक रोइम बेक्शो मुर १४ हजार ७ सहे बाक्तेकम।

50 मिनु मेको मुर बेक्तीक रोइ देक्म नोले हारून मोसा आ बाक्तीक, गुम्तीक ताम्बु आ ओव्रतीकेम लेत्त।

## 17

### हारून आ कोक्के

1 मिनु परमप्रभु यावेमी मोसा कली

2 “गे इस्राएली नेल्ल आन कली ‘गे इन किंकी पिपी आन थर थर रे पा का का पा १२ ओटा कोक्के चाक्कीन’ दे माइक्मी। मेको मुर आन नें मेको आन आन कोक्केमी ब्रेक्तो।

3 मिनु हारून आ नें लेवी आ थर डा मुर आन कोक्केम ब्रेक्तो। मारदे हना नेल्ल थर डा ठेयब मुर आन नेंम कोक्के का का दुम्चा माल्ब।

4 मिनु गे मेको कोक्के आन कली ग्युम्तीक ताम्बुमी सल्ला पशो सन्दोस आ डोंइती वोतो। गो मेकेर रे इन कली लोत्र पाइनुड। प्रस्थान २५:२२

5 मिनु आं योत्रशो मुर आ कोक्केम कोच्चा दाप्ब। मोपा गो इस्राएलीपुकीम इस पशो गन गन नाइक्पाइक्नुडमी” दंत। गन्ती १६:५-७

6 मिनु मोसाम इस्राएली आन कली मेको लोत्र नेंपाइक्तीमी। मिनु मेको आन ठेयब मुर नेल्लेमी मेको कली कोक्के का का चाक्शा, गेम्तेक्म। मिनु मेको आन किकी पिपी आन थर थर पा १२ ओटा कोक्के गेम्तेक्म। मिनु हारून आ कोक्के यो मेको आन कोक्के आन दातेम बाक्त।

7 मिनु मोसामी मेको कोक्के नेल्ल परमप्रभु यावे आ सल्ला पशो सन्दोस बाक्शो ताम्बुमी परमप्रभु यावे आ डोंइती वोइक्तु।

8 मिनु मोसा आ दीसा सल्ला पशो सन्दोस बाक्शो ताम्बुम लत। मिनु लेवी आ थर डा मुर, हारून आ कोक्केम कोच्चा दाप्शा, फू बोइश्शा देसी बदाम सिश्शो मीशो ताप्तु।

9 मिनु नोले मोसामी कोक्के नेल्ल खुप्शा, परमप्रभु यावे आ डोंइती रे लाइश्शा, इस्राएली आन कली गेम्तीमी। मिनु मेकोपुकीमी कोत्रशा, आन आन कोक्के लांइसाक्म।

10 मिनु परमप्रभु यावेमी मोसा कली “मरिम्शो पाइब मुर आन कली मिम्तीके दुम्पाइक्का कली हारून आ कोक्के लेंशा सल्ला पशो सन्दोस आ डोंइती लाइश्शा वोतो। मिनु मेकोपुकीमी आं पर्वम गन गन पचा मप्रोंइतेक्म हना, बेक्नीम” दंत। हिबू ९:४

11 मिनु मोसामी परमप्रभु यावे आ देशो खोदेशो पा पाप्तु।

12 मिनु इस्राएलीपुकीमी मोसा कली “कोत्रडीन, गोपुकी खतम दुम्शा जाम्शा लाइनीकी।

13 सु परमप्रभु यावे आ ताम्बु आ नेक्था लाइबा, मेको बेक्ब। मार, गो नेल्ल यो बेक्नीकी?” दंतैक्म। भजन संग्रह १३०:३-४

## 18

### लेवी नु चढेब आन गेय

1 मिनु परमप्रभु यावेमी हारून कली “गे इ तौपुकी नु इ आफ आ खिं डा मुरुम परमप्रभु यावे आ बाक्तीक कली मरिम्शो पशो कुरचा माल्नीनी। मिनु गे नु इ तौपुकीमी चढेतीक गेय पाइब आन मरिम्शो पशो कुरचा माल्नीनी। प्रस्थान २८:३८; लेवी १६:३२-३३

2 मोपतीके गे इ लोकब लेवी आ थर डा मुर आन कली यो इ कली वारच पचा कली चाक्मी। गे नु इ तौपुकीम ताम्बु आ डोंइती गेय पना पन बाक्नीनु, मेकोपुकीम इन कली वारच पामेक्ल। गन्ती ३:६-१०

3 मेकोपुकी इ कली वारच पशा, ताम्बु डा गेय पचा माल्नीम। तन्न मेकोपुकीम ताम्बु डा मार मार थिचा मदुम्नीम। मिनु चढेतीक आ नेक्था जाक्का मदुम्नीम। मो पाम्तेक्म हना, मेकोपुकी नु गे यो बेक्नीनी।

4 मेकोपुकीम इन अरेशो टिशा, ग्युम्तीक ताम्बु डा मारेइ मारेइ गेय पचा माल्नीम। गे इन डा लाक्शा अरु सुइम मेको गेय पचा मताइनीम।

5 मिनु गे इस्राएली आन दातेमी लेंशा गाइक्तीक गेनायो मजाक्ल, दे परमप्रभु यावे आ बाक्तीक नु चढेतीक डा गेय आंमा पचा माल्नेवे। गन्ती १७:११

6 मिनु गो मुल इस्राएली आन दाते रे इ लोकब लेवी आन कली योत्रनुड। गो मेको इ कली गेनुड। मेकोपुकी ग्युम्तीक ताम्बु डा गेय पचा कली आं कली जिम्मा गेशो बाक्नीम। गन्ती ३:१२,४५

7 तन्न गे नु इ तौपुकीम चढेतीक नु फारशो वा आगा डा कोटा डा गेय थम रिम्शो पा पने। चढेतीक गेय इन कली गेतन्नी। अरु सुइ मेकेर जाक्तेक्म हना, मेको साइक्का पुंइसीनीम” दंत। गन्ती १:५१

### चढेब आन भाग



8 मिनु परमप्रभु यावेमी हारून कली “गो आं कली चढ़ेशो इ कली गेतन। इस्राएलीपुकीमी आं कली चढ़ेशो नेल्ल गेतन। मेको इ कली नु इ तौ आन कली चढ़ेतीक गेय पशो डा गेना हना यो इन भाग बाक्ब। लेवी ३:२,१०; लेवी ६:९-११,१९-२२; लेवी ७:६-१०

9 मिनु मी रे पा प्रोइशा आं कली चढ़ेशो इन कली मार बाक्ब देशा हना, मेको आं कली नेल्ल क्येडा चोत्रखो चढ़ेशो अन्न चढ़ेशो बाक्ब हना यो, पाप आ परबम चढ़ेशो बाक्ब हना यो नु गारचा आ परबम चढ़ेशो नेल्ल इ कली नु इ तौ आन कली बाक्ब।

10 मिनु मेको इन कली नेल्ल क्येडा चोत्रखो जचा थोत्रक बाक्ब। मेको इन दाते डा वोंइश मुर नेल्लेमी जने चाप्नीम। मेको इन कली चोत्रखो बाक्ब। लेवी ६:९; लेवी १०:१२,१४

11 मिनु इस्राएलीपुकीमी क्युक्शा चढ़ेतीक चढ़ेन्तेक्म हना, मेको तिल्लशो नेल्ल इ कली नु इ तमी तौ आन कली गेना हना यो इन भाग बाक्ब, दे गेतन्नी। इ खिंम ग्रांघ्रा मदिशो बाक्बो सुइ सुइमी मेको जने चाप्नीम।

12 मिनु मेकोपुकीमी परमप्रभु यावे कली गेशो नेल्ल क्येडा रिम्शो तेल, नेल्ल क्येडा रिम्शो अडगुर शांबु, अन्न नु रिम्शो मारेइ मारेइ गो इ कली गेतन।

13 मेकोपुकीमी परमप्रभु यावे कली चढ़ेथ चाक्बो आन डोंइती मीशो फल फुल नेल्ल इ केन दुम्ब। इ खिंमी ग्रांघ्रा मदिशो बाक्बो मुर नेल्लेमी मेको जने चाप्नीम। प्रस्थान २३:१९; ब्यवस्था १८:३-४

14 इस्राएलम आं कली चढ़ेशो मारेइ मारेइ इ केन बाक्ब। लेवी २७:२८

15 मिनु परमप्रभु यावे कली चढ़ेशो, मुर आन डोंइती जरमेशो, बी ब्यफ क्यारश भेडा आन डोंइती जरमेशो नेल्ल इ केन बाक्नीम। मो दुम्त हना यो, गे मुर आ डोंइती जरमेशो कली प्रोंइचा माल्नेवे। ग्रांघ्रा दिशो बस्तु भाव आन डोंइती जरमेशो यो प्रोंइचा माल्नेवे। प्रस्थान १३:२; प्रस्थान ३४:१९-२०

16 मेको आन कली प्रोंइतीक क्येट महिना का गाप्शो कली चांदी के ५ शेकेल ताक्चा माल्नेवे। मेको ताम्बु डा शेकेल बाक्चा माल्नीम। मेको ताम्बु डा शेकेल का २० गेराह डा बाक्ब। गेराह का ०.६ ग्राम बाक्ब। ताम्बु डा शेकेल का १२ ग्राम डा क्येट बाक्ब। लेवी २७:६,२७

17 मिनु बी, भेडा क्यारश आन डोंइती जरमेशो आन कली प्रोंइने मचाप्नीम। मेको आं केन बाक्नीम। गे मेको आन हुश चढ़ेतीकेमी ब्रुइक्चा माल्नेवे। मिनु मेको आन बोंसो चोचा माल्नेवे। मेको परमप्रभु यावे कली आ दाक्चा ब्रोत्रशो रिना पाइशो मीम चोशा चढ़ेतीक बाक्ब।

18 तन्न आन श्ये इ केन बाक्ब। मेको क्युक्शा चढ़ेशो कुथु नु ग्युरा फिला खोदेशो पा इ केन बाक्ब।

19 मिनु इस्राएलीपुकीमी आं कली चढ़ेशो नेल्ल इ कली नु इ तमी तौ आन कली गेना हना यो कली गेतन्नी। मेको इ कली नु इ चच युइ आन कली परमप्रभु यावे आ डोंइती गेना हना यो लीशो हिकसी आ कबल पशो बाक्ब” दैत। लेवी २:१३; २इतिहास १३:५

20 मिनु नोले परमप्रभु यावेमी हारून कली “गे मेको रागीम मुर आन दातेमी रू मताइनीनी। गो इस्राएली आन दातेमी इन भाग नु इन शोंप नड। गन्ती ३५:-; ब्यवस्था १०:९; ब्यवस्था १२:१२; यहोसु १३:१४,३३; भजन संग्रह १६:५; भजन संग्रह ७३:२६; इजीकीएल ४४:२८

21 गो लेवी आ मुर आन कली गुम्तीक ताम्बुमी गेय पचा कली इस्राएली नेल्ल आन १० भाग डा भाग का गेतामी। लेवी २७:३०

22 मुल रे इस्राएलीपुकी गुम्तीक ताम्बु आ नेक्था जाक्ने मचाप्नीम। जाक्तेक्म हना, पापम पतीकेमी बेक्नीम।

23 तन्न लेवीपुकीमी गुम्तीक ताम्बु डा गेय पचा माल्नीम। मेकोपुकीमी पाप पाम्तेक्म हना, मेको आंमा कुरचा माल्नीम। मेको इन कली गेना हना यो लीब शेंतीके बाक्ब। तन्न मेकोपुकीमी इस्राएली आन दातेमी रू मताइनीनी।

24 मारदे हना गो लेवी आन कली इस्राएली आन परमप्रभु यावे कली चढ़ेशो १० भाग डा भाग का गेतामी। मोपतीके गो मेको आन कली “गे इस्राएली आन दातेमी रू मताइनीनी” दैती” दैत।

25 मिनु परमप्रभु यावेमी मोसा कली

26 “गे लेवी आन कली ‘परमप्रभु यावेमी इन कली मुर आन गुड रे इन भाग दुमचा कली गेशो, इस्राएली आ १० भाग डा भाग का ताक्नीनु, गेपुकीम मेको रे यो परमप्रभु यावे कली १० भाग डा भाग का तिल्शा, गेचा माल्नीनी।

27 मिनु मेको अन्न नु अडगुर शांबु मुर आन रे चाक्शो भाग खोदेशो मिम्सीब।

28 मोपा गे इस्राएली आन रे ताक्शो १० भाग डा भाग का नेल्ल रे तिल्शा परमप्रभु यावे कली १० भाग डा भाग का गेचा माल्नीनी। मेको चढेब हारून कली गेचा माल्नीनी।

29 मिनु गे मार मार ताक्नी, मेको नेल्ल रे परमप्रभु यावे आ भाग तिल्शा माल्नीनी’ दे माइक्मी।

30 मिनु गे मेको आन कली ‘गेपुकीमी नेल्ल क्येडा रिम्शो भाग तिल्नी नोले, मेको लीशो इन रू रे रुप्यो अन्न नु इन अडगुर रू डा शांबु खोदेशो बाक्ब।

31 मिनु गे नु इन खिं डा मुर नेल्ले ते ते जचा दाक्नीनी, मेक मेक जने चाप्नीनी। मारदे हना मेको इन गुम्तीक ताम्बुमी गेय पशो डा गाल्च बाक्ब। मती १०:१०

32 मिनु गे मेको आन नेल्ल क्येडा रिम्शो भाग गेतीके इन कली मारेड दोस मदुम्ब। तन्न इस्राएलीपुकीम आन परमप्रभु यावे कली गेशो थोव्रक दूली पा मचलेने। मो पाइतीनी हना गे बेक्नीनी’ दे माइक्चा माल्नेवे” दे परमप्रभु यावेमी मोसा कली दैत।

## 19

### चोत्रखेतीक आ पर्वम चदेशो

1 परमप्रभु यावेमी मोसा नु हारून आस कली

2 “गे इस्राएली आन कली ‘परमप्रभु यावेमी ब्रेक्शा अरेशो पचा माल्शो लोत्र का एको बाक्ब। गेपुकी थम रिम्शो मारेड मदुम्शो गेनायो जवा मलाप्शो लल बी का आंस बाक्तीक चाक्कीन’ देनीस। हिब्रू ९:१३; लेवी २२:२०; ब्यवस्था २१:३

3 मिनु गे मेको बी कली चढेब एलाजर कली गेसे। मिनु मेकोमी मेको बी कली मुर आन बाक्तीक रे डोन लाइश्शा, आ डोंइती मेको कली क्योरपाइक्चा माल्ब।

4 मिनु चढेब एलाजरमी आ ब्रेप्चोमी आ हुश खुम्शा, गुम्तीक ताम्बु आ डोंइती ७ खेयप बुइक्चा माल्ब। लेवी ४:६, १७

5 मिनु नोले मेको बी चढेब आ डोंइती चोचा माल्ब। आ कुशुल, आ श्ये, आ हुश नु गोबर सुन्दा चोचा माल्ब। लेवी ७:८; लेवी ४:११-१२

6 मिनु चढेबमी लेबानोन डा लाइश्शो रवा आ शी, हिस्सोप के ब्राक्स, लल रड डा ऊन चाक्शा, मेको बी कली जेन्ना जेन्न पशो मीम हुमचा माल्ब। लेवी १४:६

7 मेको नोले चढेबमी आ वा मुरशा, चिक्सीचा माल्ब। नोले मेको मुर आन बाक्तीके लेन्ने चाप्ब। तन्न मेको चढेब नां मलाक्गा सम्म ग्रांग्रा दिशो बाक्ब। लेवी १६:२८

8 मिनु नोले मेको बी चोइबमी आ वा मुरशा, चिक्सीचा माल्ब। मेको नां मलाक्गा सम्म ग्रांग्रा दिशो बाक्ब।

9 मिनु ग्रांग्रा मदिशो मुर कामी मेको बी कली चोशो पुलु खुप्शा, मुर आन बाक्तीके रे डोन ग्रांग्रा मदिशो बाक्तीकेम वोइक्चा माल्ब। मेको इस्राएली आन कली चोत्रखेतीक ब्वाक्कु सेल्चा कली बाक्ब। मेको चोत्रखेतीक कली चढेतीक बाक्ब।

10 मिनु मेको बी चोशो पुलु हुइक्बमी यो आ वा मुरचा माल्ब। मिनु नां मलाक्गा सम्म मेको ग्रांग्रा दिशा बाक्ब। मेको इस्राएलीपुकी नु मेकोपुकी नु बाक्ब अर्को रागी डा मुर नेल्ल आन कली पचा माल्शो गेय बाक्ब।

11 मिनु सुमी बेक्शो मुर कली थीबा, मेको ७ नाक्त सम्म ग्रांग्रा दिशोन बाक्ब।

12 मिनु मेकोम मेको सां नाक्तीम ब्वाक्कु चोत्रखेतीक माल्ब। मिनु ७ नाक्तीम लेंशा चोत्रखेतीक माल्ब। मिनु मेको ग्रांग्रा मदिशो दुम्ब। तन्न मेकोमी सां नाक्त नु ७ नाक्त मचोत्रखेसाक्ब हना, मेको ग्रांग्रा दिशा बाक्ब।

13 मिनू सुमी बेकशो मुर थिशा, मचोवखेसीबा, मेकोमी परमप्रभु यावे आ ताम्बु ग्रांघा दिशो सेल्ब। मेको मुर इस्राएली आन दाते रे तिल्चा पुंडसीब। मारदे हना चोवखेतीक ब्वाक्कु मेको आ तार मबुइशो बाक्ब। मोपतीके मेको ग्रांघा दिशो बाक्ब। मिनू मेको आ ग्रांघा दितीके मेको नु लीब। लेवी १५:३१

14 मिनू मुर आ ताम्बुम बेक्त हना, मेको आ पर्वम पचा माल्शो गेय मार बाक्ब देंशा हना, सु मेको ताम्बुम बाक्बा, सु मेको ताम्बुम जाक्बा, मेको ७ नाक्त सम्म ग्रांघा दिशो बाक्नीम।

15 मिनू मसुम्शो ग्योब नेल्ल ग्रांघा दिशो बाक्नीम।

16 मिनू सुमी लांम तरवारम साइक्चा पुंडसीशो मुर बाक्त हना यो, आंमा बेकशो मुर बाक्त हना यो, मुर आ रुश बाक्त हना यो, मेको थीब मुर ७ नाक्त सम्म ग्रांघा दिशो दुम्ब।

17 मिनू मुरुमी मेको ग्रांघा दिशो मुर कली चोवखेचा कली चढेतीक पुलु ग्योबुम कुर पा नक ब्वाक्कु लुक्चा माल्ब।

18 मिनू नोले ग्रांघा मदिशो मुर कामी हिस्सोप के ब्राक्स मेको चोवखेतीक ब्वाक्कुम नुप्शा, मेको बेकशो मुर आ ताम्बु, मेकेर बाक्शो मारेइ मारेइ, मेक बाक्ब मुर आन कली, रुश थीब मुर आन कली, साइक्चा पुंडसीशो मुर थीब, बेकशो मुर नु तुरस थीब मुर आन कली मेको ब्वाक्कु बुइक्चा माल्ब।

19 मिनू ग्रांघा मदिशो मुरुमी सां नाक्तीम नु ७ नाक्तीम ग्रांघा दिशो मुर आन कली मेको चोवखेतीक ब्वाक्कु बुइक्चा माल्ब। मिनू ७ नाक्तीम मेको आन कली चोवखेतीके नुप्ब। मिनू नोले मेकोपुकीम आन वा मुरशा, आन रां चिक्सीचा माल्नीम। मिनू मेकोपुकी नां लाक्गा नोले ग्रांघा मदिशो दुम्नीम। गन्ती १९:१२-१३

20 मिनू सु ग्रांघा दिशो दुम्शा यो, मचोवखेसीबा, मेकोमी परमप्रभु यावे आ ताम्बु ग्रांघा दिशो सेल्ब। मेको मुर इस्राएली आन दाते रे तिल्चा पुंडसीब। मारदे हना चोवखेतीक ब्वाक्कुम मेको कली मबुइशो बाक्ब। मोपतीके मेको ग्रांघा दिशो बाक्ब।

21 मिनू मेको, मेको कली गेना हना यो आ पतीक दुम्ब। मिनू मेको ब्वाक्कु बुइक्ब मुरुम आ वा मुरचा माल्ब। मिनू सुमी चोवखेतीक ब्वाक्कु थीबा, मेको नां मलाक्गा सम्म ग्रांघा दिशो दुम्शो बाक्ब।

22 ग्रांघा दिशो दुम्शो मुरुमी मार थिवा, मेको नेल्ल ग्रांघा दिशो दुम्नीम। मिनू सुमी मेको ग्रांघा दिशो थोव्रक थीबा, मेको यो नां मलाक्गा सम्म ग्रांघा दिशो दुम्ब” दैत।

## 20

सेरथे फुल्लु रे ब्वाक्कु बुक्शो

1 मिनू डोंइती डा महिनाम इस्राएली नेल्ले जीन डा गोरशो रागीम जाक्तेक्म। मिनू कादेशमी बाक्तीक सेल्शा बाक्तेक्म। मिनू मिरयाम मेक उइ बेक्त। मिनू मेक उइ थिम्तेक्म। गन्ती १३:२१; गन्ती १२:१५

2 मिनू मेकेर मुर आन कली ब्वाक्कु मबा। मिनू मुरपुकी मोसा नु हारून आस पर्वम मरिम्शो पा बुक्तेक्म। प्रस्थान १७:१-७

3 मिनू मेकोपुकीमी मोसा कली जिचा तोशा मेको कली “गो आंइ लोक्बपुकी परमप्रभु यावे आ डोंइती बेक्मानु, गोपुकी यो बेक्शो नकी हना, रिम्शो दुम वा।

4 गे मारदे परमप्रभु यावे आ मुर, आंइ कली एको गोरशो रागीम चाक्नी? मुल गोपुकी नु आंइ बी ब्यफ, क्यारश भेडा नेल्ल एक बेक्ब दुम्तक।

5 गे मारदे आंइ कली इजीप्त रे एको मरिम्शो रागीम चाक्नी। एको रागीम अन्न, फोव्रशी, अडगुर नु अनार मारेइ मथिंसीब। एकोक्के तूचा कली ब्वाक्कु यो मबा” दैतेक्म।

6 मिनू नोले मोसा नु हारून मुर आन बाक्तीक रे लशा, गुम्तीक ताम्बु आ ओव्रतीकेमी खुम्की पा बाप्ताक्स। मिनू परमप्रभु यावे आ छेडछेड मेको आस डोंइती गूत।

7 मिनू परमप्रभु यावेमी मोसा कली

8 “एको कोक्के लतो। मिनू गे नु इ लोक्ब हारून लशा, मुर आन कली पुक्कीस। मिनू मेको आन डोंइतीन एको फुल्लु कली हुकुम पावो। मिनू फुल्लु रे ब्वाक्कु यीब। मिनू गे मुर आन डोंइती एको

सेरथे फुल्लु कली 'ब्वाक्कु बुक्को' दे मतो। मोपा गे मुर आन कली मेको सेरथे फुल्लु रे ब्वाक्कु यिपाडक्नेवे। गे मोपा मुर नु मेको आन बी ब्यफ क्यारश भेडा आन कली तूचा गेनेवे" देंत।

9 मिनु मोसामी मेको कोक्के परमप्रभु यावेम देंशो खोदेंशो पा ताक्तु। गन्ती १७:२५

10 मिनु मोसा नु हारूनमी मुर नेल्ल आन कली सेरथे फुल्लु आ डोंइती पुक्ताक्स। मिनु मोसाम मेको आन कली "गे गन गन पाडबपुकी नेनीन। मार, गो एको सेरथे फुल्लु रे इन कली ब्वाक्कु बुक्पाडशशा गेन्ती?" दे माइक्तीमी। भजन संग्रह १०६:३२-३३

11 मिनु मोसामी आ गुड क्युक्शा आ कोक्केमी निक्शी खेयप मेको सेरथे फुल्लु कली तुप्तु। मिनु मेकेर शुश ब्वाक्कु बुक्शा गूत। मिनु मुरपुकी नु आन बी ब्यफ, क्यारश भेडामी तूतेक्म।

12 तन्न परमप्रभु यावेमी मोसा नु हारून आस कली "गे आं कली थमा ममुइक्तीके नु आं ठेयब सक्ति इस्राएली आन डोंइती मकोइतीके, गे एको मुर आन कली गो इन कली गेशो रागीम चाक्दीत्चा मताइनीसी" देंत। गन्ती २७:१४; ब्यवस्था १:३७; ब्यवस्था ४:२१; ब्यवस्था ५०:५१

13 मोपतीके मेको ब्वाक्कु कली मेरीबा डा ब्वाक्कु देंसीब। मेकेर इस्राएलीपुकीमी परमप्रभु यावे कली जिचा तोम्तेक्म। मिनु मेकोमी आ सक्ति कोइताक्व। भजन संग्रह ८१:८

### इस्राएली आन कली लचा मगेशो

14 मिनु मोसामी कादेश रे एदोम डा पिप कली "इन लोक्ब इस्राएलमी इन कली 'गो आंइ कली दुम्शो श्येत गे तुडक्नीनी। उत्पत्ती ३६:१, ३१; ब्यवस्था २:१-८; ब्यवस्था २३:८

15 आंइ किकी पिपी इजीप्त लशा, मेकेर शुश बाक्शो बाक्तेक्म। मिनु इजीप्तीपुकीमी आंइ किकी पिपी नु आंइ कली दिप्शा, मरिम्शो पाम्तेक्म।

16 मिनु गोपुकीमी परमप्रभु यावे कली पुंडतक। मिनु मेकोमी आंइ पुंडशो नेंशा, आ स्वर्ग डा गेय पाइब का सोइशशा, गो आंइ कली इजीप्त रे गुंडशा एक चाक्तु। मुल गो इन रागी डा सांद कादेश देंशो सहरम बाक्शो बाक्नीकी। प्रस्थान २३:२०

17 मिनु गो आंइ रागी रे पा लचा गेने। गोपुकी रू नु अडगुर रू रे पा मलाइनीकी। गोपुकीम इन तेकोइ इनार डा ब्वाक्कु मतूनीकी। गो पिप आ ठेयब लां रे पा लाइनीकी। इन रागी मलाक्का सम्म गो ग्युरा पेरा मपाइनीकी' देंशो बाक्ब, देनीन" दे मुर सोइक्ताक्मी। गन्ती २१:२२; ब्यवस्था २:१-८; न्यायाधीस ११:१७

18 तन्न एदोममी मेको कली "गेपुकी एको रागी रे पा लचा मताइनीनी। मो पाइतीनी हना, गोपुकीमी गोपुकी इन कली लडाइ तोइनीकी" देंत।

19 मिनु इस्राएलीपुकीमी मेको कली "गेपुकी ठेयब लां रे पा लाइनीकी। मिनु गो नु आंइ बी ब्यफ क्यारश भेडामी इन ब्वाक्कु तूतक हना, मेको डा क्येट थाप्नीकी। आंइ कली इन रागी रे पा ला लचा गेने" देंतेक्म।

20 तन्न मेकोपुकीमी "गेपुकी लचा मताइनीनी" देंतेक्म। मिनु एदोममी मेको आन कली लडाइ तोचा कली शुश या कुरशा, ठेयब हुल लडाइ पाइब चाक्शा जाक्त।

21 मोपा एदोममी इस्राएली आन कली आ रागी रे पा लचा मगेमी। मोपतीके इस्राएलीपुकी मेकेर रे लेत्तेक्म।

### हारून बेक्शो

22 मिनु इस्राएली कादेश रे गाक्शा, होर डांडामी जाक्तेक्म।

23 मिनु नोले परमप्रभु यावेमी एदोम रागी डा सांद डा होर डांडामी मोसा नु हारून आस कली

24 "हारून आ किकी पिपी नु बाक्थ लाइब। गे निम्फा मेरीबा डा ब्वाक्कुम आं देंशो मटितीके, गोम इस्राएली आन कली गेशो रागीम हारून ओल्लचा मताइब।

25 हारून नु मेको आ तो एलाजर आस कली होर डांडा लाइशशा लावो।

26 मिनु हारून आ वा पुइशशा, मेको आ तो एलाजर कली फेक्तो। मेको नोले हारून आ किकी पिपी नु बाक्थ लचा कली बेक्ब" देंत। प्रस्थान २९:४-७

27 मिनु मोसामी परमप्रभु यावे आ देशो खोदेशो पा पाप्तु। मिनु मुर नेल्ल आन डोंडती रे मेकोपुकी होर डांडा लाम्तेक्म।

28 मिनु मोसामी हारून आ वा पुइश्शा, आ तौ एलाजर कली फेक्ताक्व। मिनु हारून मेको डांडा तार बेक्त। मिनु मोसा नु एलाजर मेको डांडा रे बुप्ताक्स। गन्ती ३३:३८-३९; ब्यवस्था १०:६

29 मिनु इस्राएली नेल्लेमी हारून बेक्शो तुइश्शा, ३० नाक्त सम्म रोंका पाम्तेक्म। ब्यवस्था ३४:८

## 21

### कनानी आन रागी ग्राशो

1 मिनु नेगेबम बाक्ब कनानी आरद डा पिपम इस्राएली अथारीम डा लां रे पा पिना पिन बाक्नीम, देशो लोत्र नेंतु। मिनु मेकोमी इस्राएली नु लडाइ पा, इस्राएली का निक्शी आन कली ग्याइक्ताक्व। गन्ती १४:४४,४५; न्यायाधीस १:११-१५

2 मिनु इस्राएलीपुकीमी परमप्रभु यावे कली “गे एको मुर आन कली थमा पा आंड गुइमी गेतीनी हना, गोपुकीमी मेको आन सहर नेल्ल रोवल चिवल पोक्नीकी” दे कसम जाम्तेक्म। ब्यवस्था १३:१६; ब्यवस्था २०:१४,१६,१७; यहोसु ६:१७; न्यायाधीस १:१७; १सामुएल १५:३

3 मिनु परमप्रभु यावेमी इस्राएली आन पुंडशो लोत्र नेंशा, मेको कनानी आन कली मेको आन गुइमी गेप्टु। मिनु इस्राएलीपुकीमी मेकोपुकी नु मेको आन सहर नेल्ल खतम पोक्तेक्म। मोपतीके मेको रागी आ नें होरमा वोइक्तेक्म। होरमा हिब्रू लोत्रमी खतम दुम्तीके देसीब। गन्ती १४:१४,४५; ब्यवस्था १:४४

### कांसा के बुस्स

4 मिनु मेकोपुकी एदोम रागी कली हेरशा लचा, दे होर डांडा रे लल समुन्द्र गे लाम्तेक्म। तन्न मुरपुकी शुश गाक्चा माल्तीके दाम्तेक्म। गन्ती ११:४-६

5 मिनु मेकोपुकीमी परमप्रभु नु मोसा आस पबर्म गन गन पा “मारदे गे आंड कली एको गोरशो रागीम बेक्पाइक्चा कली इजीप्त रागी रे गुंडशा एक चाक्सी? एकेर जचा थोत्रक मबा। ब्वाक्कु यो मबा। गो एको मब्रोत्रशो जचा थोत्रक क्येडा ब्रीताक्व” दैतेक्म।

6 मिनु नोले परमप्रभु यावेमी बीस पाइश्शो बुस्स मेको मुर आन दातेमी सोइक्ताक्व। मिनु बुस्सपुकीमी मुर आन कली कोक्तेक्म। मिनु शुश इस्राएली बेक्तेक्म। १कोरिन्थी १०:९

7 मिनु मुरपुकी मोसा आ बाक्तीक जाक्शा “गोपुकीमी परमप्रभु यावे नु इन पबर्म मरिम्शो लोत्र पा पाप पाइतक। मेको बुस्सपुकी खेरचा, दे परमप्रभु यावे कली आंड पबर्म पुनीन” दैतेक्म। मिनु मोसामी मेको मुर आन पबर्म पुंडतु। प्रस्थान ३२:३०-३४

8 मिनु परमप्रभु यावेमी मोसा कली “गे मेको बीस पाइश्शो बुस्स खोदेशो पा बुस्स का सेल्ला, खांबा काम क्युक्को। मिनु सु बुस्सुम कोक्शो बाक्मे, मेकोमी मेको बुस्स कोत्रशा, ब्रोंडब” दैत। २राजा १८:४; यूहन्ना ३:१४

9 मिनु मोसाम कांसा के बुस्स का सेल्लु। मिनु मेको कली खांबा काम क्युक्कु। मिनु सु बुस्सुमी कोक्शो बाक्मा, मेकोपुकीम कांसा के बुस्स कोत्रडमेनु, ब्रोंडतेक्म।

### इस्राएलीपुकी मोआब रागी लशो

10 मिनु इस्राएलीपुकी गाक्शा, ओबोथम बाक्तीक सेल्लेक्म।

11 मिनु ओबोथ रे गाक्शा, मोआब आ पूबर् गे डा सांद इये-अबारीम डा गोरशो रागीम बाक्तीक सेल्लेक्म।

12 मिनु मेकोपुकी मेकेर रे गाक्शा, जेरेद डा बेसीम बाक्तीक सेल्लेक्म।

13 मिनु मेकोपुकी मेकेर रे गाक्शा, एमोरी आन सांदम ग्यूतीक गोरशो रागीम बाक्शो अरनोन खोला आ आइक्ची हांबुम आन बाक्तीक सेल्लेक्म। मेको अरनोन खोला मोआब आ सांद बाक्ब। मेको एमोरी नु मोआबी आन दातेम बाक्ब।

14 मोपतीके परमप्रभु यावे आ लडाइ डा किताबमी दोपा ब्रेकशो बाकब देशा हना “वाहेब सहर सुफाह नु अरनोन खोला आ दिंम, यहोसु १०:१३; २सामुएल १:१८

15 नु आर माइशो बाक्तीके सम्म लाइब लुकच लतीक लां। मेको मोआब आ सांद सम्म लशो बाकब” देशो बाकब।

16 मिनु मेकेर रे मेकोपुकी बेयर लाम्तेकम। मिनु परमप्रभु यावेमी मोसा कली “मुर आन कली पुक्मी। मिनु गो ब्वाक्कु गेनुडमी” देशो कुवा मेकेर बाकब।

17 मिनु नोले इस्राएलीपुकीम एको कुम्सो पाम्तेकम। “कुवा, ब्वाक्कु बुक्शा गूडो। मिनु मेको आ परबम कुम्सो पावो।

18 मेको कुवा मेको ठेयब मुरपुकीम दोशो बाक्तेकम। मिनु मुरपुकीमी मेको कुवा पिप आ सुन के कोक्केम दोशो बाक्तेकम” दे कुम्सो पाम्तेकम। मिनु मेकोपुकी गोरशो रागी रे यूशा मत्ताना लाम्तेकम।

19 मिनु नोले मत्ताना रे नाहालीएल, नाहालीएल रे बामोथ सम्म

20 बामोथ रे मोआब डा दिंम बाक्शो बेंसी सम्म, गोरशो रागी रे तांडसीतीक इर पिस्गा डांडा सम्म लाम्तेकम।

### सीहोन नु ओग बुशो

21 मिनु नोले इस्राएलीपुकीमी एमोरी आन पिप सीहोन आ बाक्तीकेम मुर आन कली सोइशशा ब्यवस्था २:२६-३७

22 “गो आंड कली इन रागी रे पा लचा गेने। गो रू नु अडगुर रू रे पा मलाइनीकी। गोपुकीम इन तेकोइ कुवा डा ब्वाक्कु मतूनीकी। इन रागी मलाक्का सम्म गो पिप आ ठेयब लां रे पा लाइनीकी” देपाइक्तेकम।

23 तन्न सीहोनमी इस्राएली आन कली आ रागी लाक्शा लचा मगेवो। मेकोम आ लडाइ पाइबपुकी खुप्शा, गोरशो रागीम इस्राएली आन कली लडाइ तोप्टु। मेकोमी याहास सम्म जाक्शा, इस्राएली नु लडाइ पाप्टु।

24 मिनु इस्राएलीपुकीम मेको कली तरवारम क्योरशा साइक्तेकम। मिनु अरनोन खोला रे यब्बोक खोला सम्म मेको आ रागी आन के सेल्लेकम। मिनु अम्मोनी आन सांद सम्म मेकोपुकीम आन रागी सेल्लेकम। मारदे हना, अम्मोनी आन सांद बोल्यो बाक्त।

25 इस्राएलीपुकीम मेको सहर नेल्ल आन के सेल्लेकम। मिनु मेकोपुकीम एमोरी आन सहर नेल्ल नु हेशबोन नु मेको आ एर ओथ डा गाउं नेल्लेम बाक्तेकम।

26 हेशबोन सहर एमोरी आन पिप सीहोन आ सहर बाक्त। पिप सीहोनमी मोआबी आन डोंइती डा पिप नु लडाइ पा मेको आ रागी अरनोन खोला सम्म आ के सेल्लो बाक्त।

27 मोपतीके कुम्सो पाइबपुकीम “गेपुकी हेशबोन सहरम जाक्की। मिनु मेको लेंशा सेल्लसीन। सीहोन आ सहर लेंशा सेलीन।

28 हेशबोन रे मी यूत। सीहोन आ सहर रे ब्रशो मी यूत। मिनु मेको मीम मोआब डा आर सहर नु अरनोन डा डांडा दाक्तु।

29 आबी आबी, मोआब, केमोश आ मुरपुकी बेक्तेकम। एमोरी आन पिप सीहोनमी मेको आ तौ आन कली प्रोक्ब सेल्लतीमी। आ तमी आन कली ग्याइक्चा पुंडसीब सेल्लतीमी। न्यायाधीस ११:३४; १राजा ११:१७

30 मोपा मेको आन थेरशो रू हेशबोन रे दीबोन सम्म खतम दुम्त। मिनु मेदेबा मीम नेक्चा क्येडा डोंइती गो मेको खतम पोक्तका” दे कुम्सो पाम्तेकम।

31 मोपा इस्राएलीपुकी एमोरी आन रागीम आन खिं सेल्लेकम।

32 मिनु मोसामी याजेर रागी कली क्यारी पथ मुर सोइक्ताक्व। मिनु मेकोपुकीमी मेको आन एर ओथ डा गाउं आन के सेल्लेकम। मेकेर डा एमोरी आन कली खेरतेकम।

33 मेको नोले मेकोपुकी हिरशा बाशान डा लां रे पा डोंइशशा लाम्तेकम। मिनु बाशान डा पिप ओग नु आ मुरपुकी इस्राएली नु लडाइ पचा कली यूशा एद्रेइमी जाक्तेकम। ब्यवस्था ३:१-११

34 मिनु परमप्रभु यावेमी मोसा कली “मेको नु महिनो। मारदे हना गो मेको कली आ मुर नेल्ल नु मेको आ रागी यो यो इ कली गेतन। गे हेरबोन डा एमोरी आन पिप सीहोन कली पाइशशो खोदेशो पा मेको कली यो पतो” दे माइक्तु। भजन संग्रह १३६:१७-२२

35 मोपतीके मेको कली, मेको आ तौपुकी नु मेको आ मुर नेल्ल आन कली का यो मप्रोंइथु साइशशा, मेको आन रागी आन के सेल्लेक्म।

## 22

### बालाक नु बालाम

1 मिनु इस्राएलीपुकी गाकशा, यरीको यर्दन खोला आ आइक्वी हांबुम बाकशो मोआब डा दिममी बाक्तीक सेल्लेक्म।

2 मिनु सिप्पोर आ तौ बालाकमी इस्राएलीपुकीम एमोरी आन कली मार पाइशशो बाक्मा, मेको नेल्ल तुइशशो बाक्त।

3 मिनु मोआब डा मुर इस्राएली आन कली तशा साप्पा हितेक्म। मारदे हना मेको शुश बाक्तेक्म। मोपतीके मेको आन थु ग्येल्थ लुकच दुम्त।

4 मिनु मोआबीपुकीमी मिदयान डा खाल्पा आन कली “दोपा ब्यफोम घांस बाक्तीक दिम चाइशशा घांस नेल्ल ब्वाइबा, मोपा एको हुलपुकीमी इ कली एर ओंथ नेल्ल रे ब्वाइनीम” दैतेक्म। मेना सिप्पोर आ तौ बालाक मोआब डा पिप बाक्त।

5 मेकोमी आमाव रागी युफ्रेटीस माइशशो ठेयब खोला आ नेक्था, पेशोर सहरम बाकशो बेओर आ तौ बालाम कली मुरपुकी ब्रथ सोइक्ताक्व। मेकोपुकीमी “इजीप्ट रे जाकशो मुरुम रागी नेल्ल ब्रीतेक्म। मेकोपुकी आं नेक्था जाकशा बाकशो बाक्नीम। गन्ती ३१:८; यहोसु २४:९; मीका ६:५

6 मुल गे जाक्को। आं कली वारच पा, मेको मुर आन कली सराप चीले पाइक्मी। मारदे हना मेकोपुकी आं क्येडा शुश नु बोल्यो बाक्नीम। मो पाइतीनी हना, गो मेको आन कली ग्राशा, आं रागी रे गुंडे चबु वा। मारदे हना गे सु कली आसीक गेनीनी, मेको आसीक राइनीम। मिनु सु कली सराप चीले पाइनीनी, मेको सराप चीले राइनीम, दे गो तुइक्नुड” दे सोइक्ताक्व। २पत्रुस २:१५

7 मिनु मोआब नु मिदयान डा खाल्पापुकीम मेको गेय पचा कली क्येट कुरशा, बालाम आ बाक्तीक जाकशा, बालाक आ लोत्र शोत्रेक्म।

8 मिनु बालाममी मेको आन कली “मुलाक्दो एकेन बाक्कीन। मिनु परमप्रभु यावेमी आं कली मार देंबा, गो मेकोन इन कली देंनुड” दैत। मोपतीके मेको मोआब डा ठेयब गेय पाइब मुरपुकी मेको नाक्दो बालाम आ खिं उइ बाक्तेक्म।

9 मिनु परमप्रभु बालाम आ बाक्तीक जाकशा, मेको कली “गे नु बाक्ब मुरपुकी सु नमी?” दैत।

10 मिनु बालाममी परमप्रभु कली “मोआब डा पिप, सिप्पोर आ तौ बालाकमी आं कली

11 ‘इजीप्ट रे गूशा जाकशो मुरपुकीम रागी नेल्ल ब्रीशो बाक्नीम। मुल जाकशा आं कली वारच पा मेको आन कली सराप चीले पाइक्मी। मो दुम्त हना, गो मेको आन कली लडाइ पा ग्राशा, खेरेन चाप्नुड डा कों?’ दे लोत्र कुर पा सोइशशो मुर बाक्ब” दैत।

12 मिनु परमप्रभुमी बालाम कली “गे एकोपुकी नु मलावो। गे मेको मुर आन कली सराप चीले मपाइक्मी। मारदे हना मेकोपुकी आसीक रशो बाक्नीम” दैत।

13 मिनु बालाम सुनी कना बोक्शा, मेको बालाक आ सोइशशो मुर आन कली “गेपुकी इन रागी लने। मारदे हना, परमप्रभु यावेमी आं कली गेपुकी नु लचा मगेयी” दे माइक्तीमी।

14 मिनु मोआब डा ठेयब मुरपुकी बालाक आ बाक्तीक जाकशा “बालाम गोपुकी नु जाक्ने मबिस्से” दैतेक्म।

15 मिनु बालाकमी लेंशा, मेको आन क्येडा ठेयब नु शुश मुरपुकी सोइक्ताक्मी।

16 मिनु मेकोपुकी बालाम आ बाक्तीक जाक्दीशशा “सिप्पोर आ तौ बालाकमी इन कली ‘आं बाक्तीक जाक्चा मारेइम मतेक्गल।

17 गो थमा पा इ कली मान पशा, ठेयब सेल्लुड। गे मार देंनीनी, गो मेकोन पाइनुड। मिनु जाक्शा, मेको मुर आन कली सराप चीले पाइक्मी' देंत" देंतेक्म।

18 तन्न बालाममी बालाक आ गेय पाइब मुर आन कली "बालाकमी सुन नु चांदीम ब्रीशो आ दरवार गेती हना यो, गो परमप्रभु यावे, आं परमप्रभु आ लोत्र आइक्च बाक्त हना यो, ठेयब बाक्त हना यो, मेको लोत्र लाक्ने मचाप्नुड। १राजा १३:८

19 मिनु अरु आन खोदेंशो पा गेपुकी यो, मुलाक्दो एक उइ बाक्कीन। मिनु परमप्रभु यावेमी आं कली लेंशा मार मार देंबा गो तुइक्नुड" देंत।

20 मिनु मेको नाक्दो परमप्रभु बालाम आ बाक्तीक जाक्शा, मेको कली "एको मुरपुकी इ कली ब्रेथ जाक्शो बाक्तेक्म हना, बोक्को, मिनु मेकोपुकी नु लावो। तन्न गो इ कली मार देंडा, मेको ला पावो" देंत।

21 मिनु बालाम सुनी कना बोक्शा, आ गधा छादेशा मोआब डा ठेयब मुरपुकी नु लत।

### बालाम आ गधा

22 मिनु मेको मोपा लतीके परमप्रभु गाइक्ताक्व। मिनु परमप्रभु यावे आ स्वर्ग डा गेय पाइब कामी मेको कली तेक्चा, दे लाम राप्शा बाक्त। मिनु बालाम आ गधाम डोइश्शा लना लन बाक्त। मेको आ गेय पाइब निक्शी यो मेको नु गाक्शो बाक्ताक्स। उत्पत्ती १६:७

23 मिनु मेको गधामी परमप्रभु यावे आ स्वर्ग डा गेय पाइब शोइश्शो तरवार शेशा, लाम बाक्शो ताप्तु। मिनु मेको गधा हिंशा, लां रे रूम लत। मिनु बालामम गधा कली लां गे सोइक्चा कली तुप्तु। यहोसु ५:१३

24 मिनु परमप्रभु यावे आ स्वर्ग डा गेय पाइब आइक्च लाम राप्शा बाक्त। मेको लां निम्फा पटटी गारो प्रोव्रशो अडगुर रू आस दातेमी बाक्त।

25 मिनु मेको गधामी परमप्रभु यावे आ स्वर्ग डा गेय पाइब कली तशा, गारो गे हेंसेसीशा गाक्त। मिनु बालाम आ खोइली मेको गारोम खोरताक्व। मिनु मेकोमी मेको कली लेंशा तुप्तु।

26 मिनु लेंशा परमप्रभु यावे आ स्वर्ग डा गेय पाइब इक्का ग्येत्थ लशा, ग्युरा पेरा तेइ रे मलाक्चा डा पा आइक्च लामि राप्त।

27 मिनु बालाम आ गधाम परमप्रभु यावे आ स्वर्ग डा गेय पाइब कली तशा, गु ब्रेशा बाक्त। मिनु बालाम थाम्पा गाइश्शा, आ गधा कली कोक्केमी तुबा बाक्त।

28 मिनु नोले परमप्रभु यावेमी मेको गधा कली ब्वाक्ब सेल्लु। मिनु मेकोमी बालाम कली "गो इन कली मार पडा? मारदे गे आं कली सां खेयप तुप्यीनी?" देंत। २ पत्रुस २:१६

29 मिनु बालाममी मेको गधा कली "गे आं कली शाक्ती। गो आं गुडम तरवार बाक्शो हना, गो इ कली मुलन साइक्न वा" दे माइक्तु।

30 तन्न गधाम बालाम कली "गो डोइती रे मुल सम्म इन डोइश्शो गधा मनडा डा? गो डोइती इन कली गेनायो ओदेंशो मपड" देंत। मिनु मेकोमी "मपवी" देंत।

31 मिनु परमप्रभु यावेमी बालाम कली मिक्च ताइब सेल्लु। मिनु मेकोमी तरवार शोइश्शो परमप्रभु यावे आ स्वर्ग डा गेय पाइब का लाम राप्शो ताप्तु। मिनु बालाम खुम्की पा बाप्त।

32 मिनु मेको परमप्रभु यावे आ स्वर्ग डा गेय पाइबमी मेको कली "मारदे इ गधा कली खेयप सां तुबी? कोत्रडो, गो इ लां तेक्चा कली जाक्शो बाक्नुड। मारदे हना गे आं डोइती इ दला दाक्स पाप्तीवी।

33 इ गधामी आं कली तशा, खेयप सां सम्म आं बाक्तीक रे प्रोक्त। मेकोम आं कली तशा, मप्रोक्शो हना, गो इ कली मुल साइक्ने थुमु वा। तन्न मेको कली चहिं सेसीन सोइक्तु वा" दे माइक्तु।

34 मिनु बालाममी परमप्रभु यावे आ स्वर्ग डा गेय पाइब कली "गो पाप पाता। आं लां तेक्शा इन राप्शो गो मतुइक्तु। मिनु इन डोइती एको मरिश्शो बाक्त हना, गो लेशशा लाइनुड" देंत।



35 मिनू परमप्रभु यावे आ स्वर्ग डा गेय पाइबमी बालाम कली “एको मुरपुकी नु लावो। तन्न गो इ कली मार लोत्र पाइनुडा, गे मेको ला देनो” दे माइव्तु। मोपतीके बालाम बालाक आ सोइशशो ठेयब मुरपुकी नु लत।

36 मिनू बालाकमी बालाम जाक्शो नेशा, मेकोमी आ रागी आ सुर अरनोन खोला डा सांद डा सहर इर-मोआब सम्म मेको कली युम्थ लत।

37 मिनू बालाकमी बालाम कली “गो इन कली ब्रेथ मुर सोइक्ताक्डमी। तन्न गे मारदे आं बाक्तीक मजाक्नी? गो इ कली मान पने मचाप्नुडा डा?” दैत।

38 मिनू बालाममी बालाक कली “मुल गो इन बाक्तीके जाक्ती। मार देंचा माल्नुडा, दे मतुइक्नुड। परमप्रभु मार देंबा, गो मेको ला देने चाप्नुड” दैत।

39 मिनू बालाम बालाक नु लत। मिनू मेको नेल्ल किरयथ-हुसोथमी जाक्तेकम।

40 मिनू बालाकमी ब्यफ नु क्यारश भेडा क्योरशा चढ़ेशा, बालाम नु मेको नु बाक्ब ठेयब मुर आन कली यो थुलतीमी।

41 आ दीसा सुनी बालाकमी बालाम कली लाइशशा, बामोथ-बालमी डोइशशा लत। मिनू मेकेर रे बालाममी इच्का मुर आन कली ताप्तु। यहोसु १३:१७

## 23

### बालाममी आसीक गेशो

1 मिनू बालाममी बालाक कली “आं कली ७ ओटा चढ़ेतीक सेलीन। मिनू ७ ओटा ब्यफ नु ७ ओटा सांड ठीक सेलीन” दैत।

2 मिनू बालाकमी बालाममी देशो खोदेशो पाप्तु। मिनू बालाक नु बालाममी ब्यफ का नु सांड का चढ़ेतीक का काम चढ़ेन्ताक्से।

3 मिनू नोले बालाममी बालाक कली “गे इन चोशा चढ़ेतीके आ नेक्था राप्शा बाक्कीन। गो चहिं एर गे लाइनुड। परमप्रभु यावे आं कली युम्थ जाक्बा, कों। मिनू मेकोमी आं कली मार कोइबा, मेको इन कली देनुड” दैत। मिनू मेको गोरशो डांडा डोंइसाक्व।

4 मिनू परमप्रभुमी बालाम कली गुमानु, बालाममी मेको कली “गो ७ ओटा चढ़ेतीके सेल्पाइशशा, मेकेर ब्यफ का का नु सांड का का चढ़ेता” दैत।

5 मिनू परमप्रभु यावेमी बालाम कली लोत्र पशा “गे बालाक आ बाक्तीके लेतो। इ कली देशो लोत्र मेको कली मतो” दैत।

6 मिनू मेको बालाक आ बाक्तीके लेशशा जाक्त। मेना बालाक नु मोआब डा ठेयब मुरपुकी चोशा चढ़ेतीके आ नेक्था राप्शा बाक्तेकम।

7 मिनू बालाममी परमप्रभु आ देशो लोत्र पा बालाकमी आं कली अराम रागी रे चाक्तु। नां दाप्तीके डा पहाडम बाक्ब मोआबी आन पिपमी आं कली “जाक्कीन, मिनू आं पा डा याक्ब कली सराप चीले पने। इस्राएली आन कली हिंच कोंइदीमी” दैत।

8 मिनू “परमप्रभुमी सराप चीले मपाइशशो आन कली, गो दोपा सराप चीले पाइक्नुडमी? परमप्रभु यावेमी हिंच मकोइशो आन कली, गो दोपा हिंच कोंइनुडमी?”

9 गो सेरथे फुल्लु तार बाक्शा, मेको आन कली ताइनुड। गो डांडाम बाक्शा, मेको आन कली कोव्रनुड। मेको आन का ला बाक्ब जात डा मुर बाक्नीम। मिनू रागी रागी डा मुर नु मखाल्सीनीम।

10 याक्ब आ मुर फुरक खोदेशो पा शुश दुम्शो बाक्नीम। इस्राएल डा मुर आन ४ भाग डा भाग का यो, सुम हिकने चाप्नीमी डा? उत्पत्ती १३:१६ गे आं कली ठीक पाइब मुर आन कली खोदेशो पा बेक्चा गेयीनी। मिनू आं बेक्तीके मेको आन केन खोदेशो दुम्ल” दैत।

11 मिनू बालाकमी बालाम कली “गे आं कली मार पनी? गो इन कली आं जोरी सत्रु आन कली सराप चीले पाइक्चा कली ब्रेशशा चाक्तन्नी। तन्न गे दूली पा मेको आन कली आसीक कका गेतीनी” दैत।

12 मिनु मेकोमी “गो परमप्रभु यावेम आं थुंम वोइशशो देशो लोत्र ब्वाक्चा माल्नुड” दैत। गन्ती २२:३८

### बालाममी लेंशा आसीक गेशो

13 मिनु बालाकमी मेको कली “गो नु अर्को बाक्तीके पिने। गे एकेर रे मेको आन कली ताइनीनी। मेकेर रे मेको आन कली इच्का ला ताइतीनी। नेल्ल आन कली तने मचाप्नीनी। मेको आन कली मेकेर रे सराप चीले पतीन” दैत।

14 मिनु मेकोमी मेको कली चोफीम डा रू पिस्मा डांडाम लाइक्तु। मिनु ७ ओटा चढ़ेतीक सेल्शा, मेको तारी ब्यफ का का नु सांड का का चढ़ेप्टु।

15 मिनु बालाममी बालाक कली “गो परमप्रभु यावे कली ग्रुमथ एर लाइनुड। गे चहिं एको इन चोशा चढ़ेशो आ नेक्था राप्शा बाक्कीन” दैत।

16 मिनु परमप्रभु यावेमी बालाम कली ग्रुमथा, आ थुंमी लोत्र वोइशशा, मेको कली “गे बालाक आ बाक्तीके लेतो। इ कली देशो लोत्र मेको कली मतो” दैत।

17 मिनु मेको बालाक आ बाक्तीके लेशशा जाक्त। मेना बालाक नु मोआब डा ठेयब मुरपुकी चोशा चढ़ेतीके आ नेक्था राप्शा बाक्तेक्म। मिनु बालाकमी मेको कली “परमप्रभु यावेम मार दैम?” दे हिल्लो पाप्टु।

18 मिनु बालाममी परमप्रभु आ देशो लोत्र पा “बालाक बोक्शा, आं लोत्र नेनो। सिप्पोर आ तौ इ नोफा दाइक्तो।

19 परमप्रभु मुर ममाइ। मेकोमी जोल मपाइब। मेको बेक्शा लाइब मुर खोदेशो पा आ थुं मफाइक्ब। मेकोमी लोत्र थोक्शा दैम डा मेरे पाइब। मेकोम पाइक्नुड दैम डा मेरे मेको मपाइक्बा डा? १ सामुएल १५:२९

20 नेनीन, गो मेको आन कली आसीक गेतीक लोत्र तशो बाक्नुड। मेकोमी मेको आन कली आसीक गेशो बाक्ब। मिनु गो मेको फाइक्ने चाप्टुडा डा?

21 याकूब कली मरिम्शो मदुम्ब, देशो बाक्ब। मिनु इस्राएली आन कली श्येत मदुम्ब। मेको परमप्रभु यावे, आन परमप्रभु मेकोपुकी नु बाक्ब। मिनु मेको आन दातेमी पिप बाक्ब।

22 परमप्रभुमी मेको आन कली इजीप्ट रे गुंडशा, आ सक्तिम मेको आन कली ब्वाकी डा ब्यफ खोदेशो सेल्शो बाक्ब।

23 थमा पा, याकूब कली राइब मारेइ मन्तर तन्तर मबाक्ब। इस्राएली आन कली राइब मारेइ लिंक्नु कोत्रतीके मबाक्नीम। मुल याकूब नु इस्राएल आ पबंम परमप्रभु आ पशो कोत्रडीन।

24 कोत्रडीन, मेको जात डा मुर गुप्सनी खोदेशो पा बोक्नीम। प्रेक्शा ग्राम्चा चिक्शो गुप्स खोदेशो पा मेको छुल बोक्ब। मेकोमी सिखार मब्वा सम्म नु सिखार आ हुश मतूडा सम्म मनाइक्ब” दैत। गन्ती २४:९; इजीकीएल १९:२

25 मिनु बालाकमी बालाम कली “मेको आन कली सराप चीले मगेने, आसीक यो मगेने” दैत।

26 तन्न बालाममी बालाक कली “परमप्रभु यावेमी मार दैबा, गो मेको पचा माल्नुड, दे गो इन कली ना कना मदेंडा डा?” दैत।

27 मिनु बालाकमी बालाम कली “मुल पिने, गो इन कली अर्को बाक्तीकेमी लाइक्नन्नी। मेकेर रे गे आं पा डा मेको आन कली सराप चीले पचा कली परमप्रभुमी दाक्बा को?” दैत।

28 मिनु बालाकमी बालाम कली पेओर डांडाम लाइक्तु। मेकेर रे गोरशो रागी नेल्ल तांडसाक्ब। गन्ती २२:४१; गन्ती २५:३

29 मिनु बालाममी बालाक कली “एकेर आं कली ७ ओटा चढ़ेतीक सेलीन। मिनु ७ ओटा ब्यफ ७ ओटा सांड ठीक पने” दैत।

30 मिनु बालाकमी बालाममी देशो खोदेशो पा पाप्टु। मिनु चढ़ेतीक नेल्लेमी ब्यफ का का नु सांड का का चढ़ेप्टु।

1 मिनू बालाममी परमप्रभु यावेमी इस्राएली आन कली आसीक गेचा थुं पशो बाक्त, दे तुइक्ताक्व। मिनू मेको डोंइती डा खोदेशो पा परमप्रभु कली हिल्लो पथ मला। तन्न मेकोमी आ कुल गोरशो रागी गे हिरशा कोवतु।

2 मिनू बालाममी कोवना कोवन, इस्राएली आन कली थर थर पा बाक्शो ताम्तीमी। मिनू परमप्रभु आ सोक्तीम मेको कली सुम्नु।

3 मिनू मेकोमी परमप्रभु आ पपाइशो लोव पा “गो बेओर आ तौ बालाम, मिक्च ताइब नड, आ देशो लोव मार बाक्त देशा हना, १सामुएल ९:९

4 गो, परमप्रभु आ लोव नेंबमी, एको लोव पाइनुड। गो नेल्ल क्येडा सक्ति पाइशो आ कोंइशो ताइनुड। मिनू गो आ डोंइती बाप्शा, मेको कली ताइनुड।

5 याकूब आ मुर इन ताम्बु गिश रिम्शो बाक्नीमी। गे इस्राएली इन बाक्तीके दारशो बाक्नीम।

6 मेको खजूर रवा खुम्शो ठेयब दिम खोदेशो बाक्ब। मेको खोला आ नेक्था खुम्शो फू रू खोदेशो बाक्ब। मेको परमप्रभु यावेमी खुम्शो ठेयब ध्यू कुमारी खोदेशो बाक्ब। ब्वाक्कु आ नेक्था वाशो लेबानोन डा लाइशो रवा खोदेशो बाक्ब।

7 मेको आन गरपुकीम ब्वाक्कु ब्रीशा क्युप्ब। मिनू मेको आन रू शुश ब्वाक्कु ताइनीम। मेको आन पिप अगाग क्येडा यो ठेयब बाक्ब। मिनू मेको आ राज्य ठेयब सेल्चा पुंडसीब।

8 परमप्रभुमी मेको आन कली इजीप्ट रे गुंडशा चाक्शो बाक्ब। आ सक्ति इस्राएली आन कली ब्वाकी डा ब्यफ आ ग्योव खोदेशो बाक्ब। रागी रागी डा जोरी सत्रु आन कली क्याम्ब। मेको आन रुश जिकब। मेको आन लिब्रामी मेको आन कली ख्रिशशा साइक्ब।

9 मेको गुप्स खोदेशो पा बाप्शा बाक्ब। गुप्सनी खोदेशो पा बाप्शा बाक्ब। सुम मेको कली पोक्बा डा? इस्राएली, सुमी इन कली आसीक गेनीमी, मेको आसीक राइनीम। सुमी इन कली सराप चीले पाइक्नीमी, मेको सराप चीले राइनीम” देंत। गन्ती २३:२४; उत्पत्ती ४९:९; उत्पत्ती १२:३; उत्पत्ती २७:२९

10 मिनू बालाक बालाम कली तशा, शुश गाइक्ताक्व। मिनू मेकोमी आ गुइ क्युकशा, बालाम कली “गो इ कली आं जोरी सत्रु आन कली सराप चीले पाइक्चा कली कका ब्रेत्ताक्न। तन्न गे मेको आन कली सां खेयप आसीक कका गेप्तीवी।

11 मोपतीके मुल गे दोरोर पा इ खिं लेतो। गो इ कली ठेयब सेल्नुड, दे मिम्शो नड। तन्न परमप्रभु यावेमी इ कली मान ततीक रे तेक्तु” देंत।

12 मिनू बालाम बालाक कली “गे आं कली ब्रेत्थ सोइशो मुर आन कली गो

13 “बालाकमी आं कली सुन नु चांदीम ब्रीशो आ दरवार गेती हना यो, परमप्रभु यावे आ लोव लाक्शा आं मिम्शोमी मारेइ रिम्शो नु मरिम्शो पने मचाप्नुड। परमप्रभु यावेमी आं कली मार देंबा, गो मेकोन देंनुड’ मदेशो नडा डा? गन्ती २२:१८

14 मुल गो आं मुर आन बाक्तीके लाइनुड। तन्न इस्राएलीपुकीम इन मुर आन कली नोले मार पाइक्नीमी, मेको इन कली शेनुड” देंत।

### बालाममी परमप्रभु आ लोव पशो

15 मिनू बालाममी परमप्रभु आ पपाइशो लोव पा “गो बेओर आ तौ बालाम, मिक्च ताइब नड, आ देशो लोव मार बाक्त देशा हना,

16 गो, परमप्रभु आ लोव नेंबमी, एको लोव पाइनुड। गो नेल्ल क्येडा ठेयब तुइशशा, नेल्ल क्येडा सक्ति पाइशो आ कोंइशो ताइनुड। मिनू गो आं मिक्च मसुम्शो आ डोंइती बाप्शा,

17 गो मेको कली ताइनुड, तन्न मुल ममाइ। गो मेको कली कोवनुड। तन्न आ नेक्था रे ममाइ। याकूब रे पा सोरुल का दाप्ब। मिनू इस्राएली रे पा पिप का गूब। मिनू मेकोमी मोआब रागी आ सांद रे पा खतम सेल्ब। मिनू शेथ आ थर डा मुर आन कली खतम पोक्ब। मत्ती २:२; लूका १:७८; उत्पत्ती ४९:१०; २सामुएल ८:२

18 एदोम रागी आ केन सेल्ब। मिनु सेडर रागी ग्राब। मिनु इस्राएल बोल्यो दुम्ब। २सामुएल ८:१४; येरमीया ४९:७-२२

19 याकूब रे पा हुकुम पाइब का गूब। मिनु इर सहर डा लीशो आन कली साइबक” देंत। मीका ५:१,७,८

20 मिनु बालाममी अमालेक आ मुर आन कली कोव्रशा “अमालेक आ मुरपुकी रागी रागी नेल्ल क्येडा डोंइती डा बाक्तेकम। तन्न मेकोपुकी गेना हना यो जाम्शा लाइनीमी” देंत। प्रस्थान १७:१४; १सामुएल १५:२-३,७

21 मिनु नोले मेकोमी केनी डा मुर आन कली कोव्रशा “इन बाक्तीक रागी बोल्यो बाक्ब। इन बाक्तीक सेरथे फुल्लुमी सेल्शो ग्योव्र खोदेशो बाक्ब। १सामुएल १५:६

22 तन्न गे काइन सहर डा मुरपुकी मीम चोचा पुंडसीनीनी। गिश सम्म अश्शुरीमी इन कली फ्रेशा लाइक्नीम” देंत।

23 मिनु लेशा मेकोमी लोव्र पा “आबी, परमप्रभुम मोदेशो पवानु, सु ब्रोंइने चाप्बा डा?

24 कितीम रे जहाजपुकी जाक्नीम। मिनु मेकोपुकीम अश्शुर नु एबेर कली श्येत गेनीम। मिनु मेकोपुकी यो खतम दुम्नीम” देंत। उत्पत्ती १०:-४; उत्पत्ती १०:२१-२२

25 मिनु बालाम बोक्शा, आ खिं लेत्त। मिनु बालाक यो आ लां लत। गन्ती ३१:८,१६

## 25

### शितीममी मूर्ति पूजा पशो

1 इस्राएलीपुकी शितीममी बाक्मानु, मुरपुकी मोआबी आन तमीपुकी नु इप्शा, मरिम्शो पचा गोम्तेकम। गन्ती ३३:४९; १कोरिन्थी १०:८

2 मिनु मेकोपुकीम इस्राएली आन कली आन देवी देवता आन कली चढ़ेतीकेम ब्रेत्ताकम। मिनु मेकोपुकीम मेको आन भोज जशा, मेको आन देवी देवता आन डोंइती बाप्तेकम।

3 मोपा इस्राएलीपुकीम पेओर डांडा डा बाल देवता कली पूजा पचा गोम्तेकम। मिनु परमप्रभु यावे इस्राएली आन पर्वम गाइक्ताक्व। ब्यवस्था ४:३; भजन संग्रह १०६:२८

4 मिनु परमप्रभु यावेमी मोसा कली “एको मुर आन ठेयब मुर नेल्ल आन कली चाक्शा क्युक्शा साइश्शा, परमप्रभु यावे आ डोंइती नाप्शो नांम वोइक्मी। मिनु परमप्रभु यावे इस्राएली आन पर्वम आ थाम्पा गाइश्शो नांडसीब” देंत। ब्यवस्था २१:२२-२३; २सामुएल २१:६-९

5 मिनु मोसाम इस्राएली आन निसाफ पाइब आन कली “गे नेल्लेमी पेओर डांडा डा बाल देवता कली पूजा पाइब इन मुर नेल्ल आन कली साइक्चा माल्नीनी” दे माइक्तीमी। प्रस्थान ३२:२७

6 मिनु इस्राएलीपुकी गुन्तीक ताम्बु आ ओव्रतीकेम डाक्शा बाक्मानु, मेना इस्राएली काम मोसा नु इस्राएली नेल्ल आन डोंइती आ खिंम मिदयानी मीश का चाक्तु। गन्ती ३१:१६

7 मिनु चढ़ेब हारून आ चच, एलाजर आ तौ फिनेहासमी मेको तशा, मेको बोक्शा, आ गुड्मी तूतीक का शेशा, प्रस्थान ६:२५

8 मेको इस्राएली आ नोनोले लशा, आ बाक्तीक ओव्रशा, मेको इस्राएली नु मेको मीश मुर निम्फा आस कली एर ओंथ खिप्पाइश्शा थोक्तीम्सी। मिनु इस्राएली आन दाते रे मेको मुर बेक्तीक रोड जाम्त।

9 तन्न मेको मुर बेक्तीक रोडम बेक्बपुकी २४ हजार बाक्तेकम। भजन संग्रह १०६:२९-३१

10 मिनु परमप्रभु यावेमी मोसा कली

11 “चढ़ेब हारून आ चच, एलाजर आ तौ, फिनेहासमी इस्राएली आन पर्वमी आं गाइश्शो नाइक्पाइक्तु। फिनेहासमी आं रुश पशो तुइश्शा, आ जौब बोक्शा, आं गाइश्शो नाइक्पाइक्तु। मिनु मेको आन कली मसदुमी।

12 मोपतीके गे मेको कली ‘परमप्रभुमी इ कली आं थुं नाइक्तीक कबल पाइब। १इतिहास ९:२०; यसैया ५४:१०; मलाकी २:५

13 मिनु मेको कबल इ कली नु इ चच युइ आन कली बाकब। मेको गेना हना यो चढेब दुम्तीक कबल बाकब। मारदे हना गे इ परमप्रभु आ परबम जोंब बोक्शा, गेय पाप्तीवी। मिनु गेमी इस्राएली आन परबम पापु क्याम्तीक गेय पाप्तीवी' देनो" देंत।

14 मेको मिदयानी मीश मुर नु साइक्चा पुंडसीब इस्राएली आ नें जिम्मी बाक्त। मेको सालु आ तौ सिमियोन आ थर डा खिं का डा ठेयब मुर बाक्त।

15 मेको साइक्चा पुंडसीब मिदयानी मीश मुर आ नें कोज्बी बाक्त। मेको सुर आ तमी बाक्त। मेको मिदयान डा ठेयब मुर बाक्त।

16 मिनु परमप्रभु यावेमी मोसा कली

17 "मिदयानी आन कली श्येत गेशा, साइक्मी। गन्ती ३१:२-१०

18 मारदे हना, मेकोपुकीमी इन कली यो श्येत गेचा गोम्तेक्म। मिनु इन कली बाल-पेओर कली पूजा पपाइक्तेक्म। मेना मिदयान डा ठेयब मुर आ तमी कोज्बीमी इन कली श्येत गेपाइक्तु। मेको चहिं मुर साइक्चा रोइ बोक्म नाक्त साइक्चा पुंडसाक्व। पेओर कली पूजा पतीके मो दुम्शो बाक्त" देंत।

## 26

इस्राएली आन कली हिक्शो

1 मेको मुर बेक्तीक रोइ दुम नोले परमप्रभु यावेमी मोसा नु चढेब हारून आ तौ एलाजर आस कली

2 "इस्राएली नेल्ल आन दातेमी २० बर्स गाप्शो नु मेको क्येडा लाक्शो लडाइम लने चाप्ब आन कली थर थर पा हिक्कीस" देंत। गन्ती १:२-४७;

3 मिनु मोसा नु चढेब एलाजरमी यरीको आ आइक्ची हांबु यर्दन खोला आ शुंइच मोआब डा दिंमम इस्राएली आन कली गुम्पाइशशा

4 "परमप्रभु यावेमी मोसा कली अरेशो खोदेशो पा २० बर्स गाप्शो नु मेको क्येडा लाक्शो मुर आन कली हिक्कीन" दे माइक्तीमी। मिनु इजीप्ट रे गूशा जाक्शो इस्राएलीपुकी एकोन बाक्तेक्म।

5 इस्राएल आ डोइती जरमेशो तौ रूबेन आ थर, हनोक आ खिं खिं डा मुरपुकी, पल्लु आ खिं खिं डा मुरपुकी, उत्पत्ती ३५:२३-२६; उत्पत्ती ४६:८-२७; १इतिहास ४:-८:-

6 हेसोन आ खिं खिं डा मुरपुकी नु कारमी आ खिं खिं डा मुरपुकी बाक्तेक्म।

7 एको रूबेन आ थर डा खिं खिं डा मुरपुकी बाक्तेक्म। मेको नेल्ल आन कली हिक्शोनु, ४३ हजार ७ सहे ५० जना बाक्तेक्म।

8 पल्लु आ तौ आन दातेमी का एलीआब बाक्त।

9 एलीआब आ तौपुकी, नेमुएल, दाथान नु अबीराम बाक्तेक्म। एकोपुकी मेको दाथान नु अबीराम आन दाते डा ठेयब मुरपुकी बाक्तेक्म। मेकोपुकी कोराह आ हुलम ब्वांइसीशा मोसा नु हारून नु जिचा पोक्शा, परमप्रभु यावे आ परबम दूली पा बोक्शो बाक्तेक्म। गन्ती १६:१,१२

10 मिनु रागीम आ शोत्र पाक्शा मेको आन कली कोराह नुन दाक्शो बाक्त। मेना सहे निक्शी ५० जना आन कली मीम खतम पोक्शो बाक्त। मेकोपुकी मरिम्शो पाइब दुम्शो बाक्तेक्म।

11 तन्न कोराह आ तौपुकी चहिं मबेक्शो बाक्तेक्म।

12 सिमियोन आ थर डा मुर आन खिं खिं डा मुरपुकी का का पा हिक्शोनु, नेमुएल आ खिं खिं डा मुरपुकी, यामीन आ खिं खिं डा मुरपुकी, याकीन आ खिं खिं डा मुरपुकी,

13 जेराह आ खिं खिं डा मुरपुकी नु शावल आ खिं खिं डा मुरपुकी बाक्तेक्म। उत्पत्ती ३६:१३

14 एको सिमियोन आ थर डा खिं खिं डा मुरपुकी बाक्तीम। मेको नेल्ल आन कली हिक्शोनु, २२ हजार सहे निक्शी बाक्तेक्म।

15 गाद आ थर डा मुर आन खिं खिं डा मुरपुकी का का पा हिक्शोनु, सेफोन आ खिं खिं डा मुरपुकी, हाग्गी आ खिं खिं डा मुरपुकी, शुनी आ खिं खिं डा मुरपुकी,

16 ओज्नी आ खिं खिं डा मुरपुकी, एरी आ खिं खिं डा मुरपुकी,

17 अरोद आ खिं खिं डा मुरपुकी नु अरेली आ खिं खिं डा मुरपुकी बाक्तेक्म।

18 एको गाद आ थर डा खिं खिं डा मुरपुकी बाक्तेकम। मेको नेल्ल आन कली हिक्शोनु ४० हजार ५ सहे जना बाक्तेकम।

19 मिनु यहूदा आ तौ एर नु ओनान बाक्ताक्स। तन्न मेको कनान रागीम बेक्ताक्स। उत्पती ३८:७-१०

20 यहूदा आ थर डा मुर आन खिं खिं डा मुरपुकी का का पा हिक्शोनु, शेलाह आ खिं खिं डा मुरपुकी, पेरेस आ खिं खिं डा मुरपुकी, जेराह आ खिं खिं डा मुरपुकी बाक्तेकम।

21 मिनु पेरेस आ चच युड डा मुर चहिं, हेसोन आ खिं खिं डा मुरपुकी नु हामुल आ खिं खिं डा मुरपुकी बाक्तेकम। रूथ ४:१८

22 एको यहूदा आ थर डा खिं खिं डा मुरपुकी बाक्तेकम। मेको नेल्ल आन कली हिक्शोनु, ७६ हजार ५ सहे जना बाक्तेकम।

23 इस्साकार आ थर डा मुर आन खिं खिं डा मुरपुकी का का पा हिक्शोनु, तोला आ खिं खिं डा मुरपुकी, पुवा आ खिं खिं डा मुरपुकी,

24 याशुब आ खिं खिं डा मुरपुकी नु शिम्रोन आ खिं खिं डा मुरपुकी बाक्तेकम।

25 एको इस्साकार आ थर डा खिं खिं डा मुरपुकी बाक्तेकम। मेको नेल्ल आन कली हिक्शोनु, ६४ हजार सहे सां बाक्तेकम।

26 जबूलून आ थर डा मुर आन खिं खिं डा मुरपुकी का का पा हिक्शोनु, सेरेद आ खिं खिं डा मुरपुकी, एलोन आ खिं खिं डा मुरपुकी नु याहलेल आ खिं खिं डा मुरपुकी बाक्तेकम।

27 एको जबूलून आ थर डा खिं खिं डा मुरपुकी बाक्तेकम। मेको नेल्ल आन कली हिक्शोनु, ६० हजार ५ सहे जना बाक्तेकम।

28 मिनु योसेफ आ तौ मनस्से नु एफ्राइम आस थर डा मुर आन खिं खिं डा मुर आन कली का का पा हिक्शोनु,

29 मनस्से आ चच युड डा माकीर आ खिं खिं डा मुरपुकी बाक्तेकम। माकीर गिलाद आ आफ बाक्त। यहोसु १७:१-६

30 गिलाद आ चच युडपुकी इएजेर आ खिं खिं डा मुर रे इएजेर, हेलेक आ खिं खिं डा मुरपुकी,

31 असीएल आ खिं खिं डा मुरपुकी, शेकेम आ खिं खिं डा मुरपुकी,

32 शेमीदा आ खिं खिं डा मुरपुकी नु हेफेर आ खिं खिं डा मुरपुकी बाक्तेकम। हेफेर आ तौ सेलोफेहाद के चहिं तौ मबाक्थु, तमीपुकी ला बाक्तेकम।

33 हेफेर आ तौ सेलोफेहाद आ तमी आन नें महलाह, नोआह, होग्ला, मिल्का नु तिरचा बाक्तेकम। गन्ती २७:१

34 एको मनस्से आ थर डा खिं खिं डा मुरपुकी बाक्तेकम। मेको नेल्ल आन कली हिक्शोनु, ५२ हजार ७ सहे बाक्तेकम।

35 एफ्राइम आ थर डा मुर आन खिं खिं डा मुरपुकी का का पा हिक्शोनु, शुथेलाह आ खिं खिं डा मुरपुकी, बेकेर आ खिं खिं डा मुरपुकी नु तहन आ खिं खिं डा मुरपुकी बाक्तेकम।

36 मिनु शुथेलाह आ खिं खिं डा मुरपुकी चहिं एरान आ खिं खिं डा मुर बाक्तेकम।

37 एको एफ्राइम आ थर डा खिं खिं डा मुरपुकी बाक्तेकम। मेको नेल्ल आन कली हिक्शोनु, ३२ हजार ५ सहे बाक्तेकम। मेको योसेफ आ चच युड आन खिं खिं डा मुरपुकी बाक्तेकम।

38 बेन्यामीन आ थर डा मुर आन खिं खिं डा मुरपुकी का का पा हिक्शोनु, बेला आ खिं खिं डा मुरपुकी, अशबेल आ खिं डा मुरपुकी, अहीराम आ खिं खिं डा मुरपुकी,

39 शुफाम आ खिं खिं डा मुरपुकी नु हुफाम आ खिं खिं डा मुरपुकी बाक्तेकम।

40 मिनु बेला आ तौ आरद नु नामान बाक्ताक्स। आरद आ खिं खिं डा मुरपुकी नु नामान आ खिं खिं डा मुरपुकी बाक्तेकम।

41 एको बेन्यामीन आ थर डा खिं खिं डा मुरपुकी बाक्तेकम। मेको नेल्ल आन कली हिक्शोनु, ४५ हजार ६ सहे बाक्तेकम।

42 दान आ थर डा मुर आन खिं खिं डा मुरपुकी का का पा हिकशोन, शुहाम आ खिं खिं डा मुरपुकी बाक्तेकम। मेको दान आ थर डा खिं खिं डा मुरपुकी बाक्तेकम।

43 एको शुहाम आ खिं खिं डा मुर नेल्ल आन कली हिकशोन, ६४ हजार ४ सहे बाक्तेकम।

44 आशेर आ थर डा मुर आन खिं खिं डा मुरपुकी का का पा हिकशोन, इम्नाह आ खिं खिं डा मुरपुकी, इश्वी आ खिं खिं डा मुरपुकी, बेरीआ आ खिं खिं डा मुरपुकी,

45 हेबर आ खिं खिं डा मुरपुकी नु माल्कीएल आ खिं खिं डा मुरपुकी बाक्तेकम।

46 आशेर आ तमी आ नें सेराह बाक्त।

47 एको आशेर आ थर डा खिं खिं डा मुरपुकी बाक्तेकम। मेको नेल्ल आन कली हिकशोन ५३ हजार ४ सहे बाक्तेकम।

48 नाप्ताली आ थर डा मुर आन खिं खिं डा मुरपुकी का का पा हिकशोन, याहसेल आ खिं खिं डा मुरपुकी, गुनी आ खिं खिं डा मुरपुकी,

49 येसेर आ खिं खिं डा मुरपुकी नु शिल्लेम आ खिं खिं डा मुरपुकी बाक्तेकम।

50 एको नाप्ताली आ थर डा खिं खिं डा मुरपुकी बाक्तेकम। मेको नेल्ल आन कली हिकशोन, ४५ हजार ४ सहे बाक्तेकम।

51 इस्राएली वोंइश मुर नेल्ल आन कली हिकशोन, ६ लाख हजार का ७ सहे ३० जना बाक्तेकम।

52 मिनु परमप्रभु यावेमी मोसा कली

53 “मेको आन खिं खिं डा मुर गिश बाक्नीमी, दे मिम्शा, रागी आंम के सेल्चा कली योक्शा गेमी।

54 गे मेको आन कली ठेयब थर आन कली ठेयब रागी नु आइक्च थर आन कली आइक्च रागी पा योक्शा गेमी। थर का का आन कली मेको आ मुर आन कली कोत्रशा हुकुम पचा गेमी।

55 मो हना यो मेको रागी चिठठा आप्शा योक्चा माल्ब। मेकोपुकीमी आन किकी पिपी आन नें नें खोदेशो पा अधिकार पामेकल। गन्ती ३३:५४; यहोसु १४:२

56 ठेयब नु आइक्च आन दातेमी आन अधिकार पतीके चिठठा आप्शा योक्चा माल्ब” देत।

57 मिनु लेवी आ थर डा मुर का का पा हिकशोन, सु सु बाक्तेकम देशा हना, गेरशोन आ खिं खिं डा मुर, कोहाथ आ खिं खिं डा मुर, मेरारी आ खिं खिं डा मुर बाक्तेकम। गन्ती ३:१७-२०; प्रस्थान ६:१६-२५

58 मिनु लेवी आ थर डा खिं खिं डा मुर अरु सु सु अरु बाक्तेकम देशा हना, लिब्नी आ खिं खिं डा मुर, हेब्रोन आ खिं खिं डा मुर, माहली आ खिं खिं डा मुर, मुशी आ खिं डा मुर, कोराह आ खिं डा मुर बाक्तेकम। कोहाथ चहिं अग्राम आ किकी बाक्त। गन्ती ३३:२०; गन्ती १३:२२

59 अग्राम आ मीश आ नें योकेबेद बाक्त। मेको चहिं लेवी आ थर डा इजीप्त रागीमी थिशो तमी बाक्त। मेकोमी अग्राम रे हारून नु मोसा नु आस समी मिरयाम आन कली थिम्तीमी।

60 मिनु हारूनमी नादाब, अबीहु, एलाजर नु इथामार थिम्तीमी।

61 तन्न नादाब नु अबीहु चहिं परमप्रभु यावे आ डोंइती अरु मी रे पा चोशा चढ़ेतीके, बेक्ताक्स। लेवी १०:१-२

62 मेको वोंइश आल नेल्ले महिना का नु मेको क्येडा लाक्शो हिकशोन २३ हजार बाक्तेकम। मेकोपुकी अरु इस्राएली आन खोदेशो पा लडाइ पचा कली महिकशो बाक्तेकम। मारदे हना मेकोपुकी इस्राएली आन दातेमी आंम आन रागी कली मगेशो बाक्त।

63 मिनु मोसा नु एलाजर चढ़ेबमी मेको नेल्ल आन कली हिकताक्स। मेना मेकोपुकी मोआब डा दिंम यर्दन आ शुंइच, यरीको आ नेक्था बाक्तेकम।

64 तन्न मोसा नु हारूनमी सौनै डा गोरशो रागीम हिकशो इस्राएली का यो मबाकम। गन्ती १:-

65 मारदे हना, परमप्रभु यावेमी मेको आन परबंम “मेकोपुकी थमा पा गोरशो रागीमीन बेक्चा माल्नीम” देशो बाक्त। यपुन्ने आ तौ कालेब नु नून आ तौ यहोसु डा लाक्शा, मेको आन दाते डा का यो सेस मलीम। गन्ती १४:२२-३८

## 27

सेलोफेहाद आ तमीपुकी

गन्ती ३६:-

1 योसेफ आ तौ मनस्से, मनस्से आ तौ माकीर, माकीर आ तौ गिलाद, गिलाद आ तौ हेफेर, हेफेर आ तौ सेलोफेहाद आ तमीपुकी महलाह, नोआह, होग्ला, मिल्का नु तिरचा बाक्तेकम। गन्ती २६:३३; यहोसु १७:३-६

2 मेकोपुकी मोसा, चढेब एलाजर, ठेयब मुरपुकी नु मेकेर बाक्ब मुर नेल्ले आन डोंइती गुम्तीक ताम्बु आ लाप्यो आ डोंइती बाक्तेकम।

3 मिनू सेलोफेहाद आ तमीपुकीमी “आंड आफ गोरशो रागीम बेक्त। तन्न मेको परमप्रभु यावे आ पर्बम मरिम्शो पा बोक्ब कोराह आ हुलम मबाक्शो बाक्त। तन्न मेको आ आंम पाप पतीके बेक्त। मिनू मेको के तौ मबाक्म। गन्ती १६:७; उत्पती ३:१९

4 मिनू तौ मबाक्तीके आंड आफ आ नें आ थर आ मुर आन दाते रे मारदे क्याम्सीबा? आंड आफ आ लोक्बपुकी नु आंड कली यो अडस गेने” देंतेकम।

5 मिनू मोसामी मेको आन पोक्शो लोत्र परमप्रभु यावे आ डोंइती चाक्तु।

6 मिनू परमप्रभु यावेमी मोसा कली

7 “सेलोफेहाद आ तमीपुकीम पोक्शो लोत्र ठीक बाक्ब। गे थमा पा मेको आन कली आन आफ आ लोक्ब आन दातेमी अडस गेचा माल्नेवे। मिनू गे मेको आन आफ आ अडस मेको आन कली गेमी।

8 मिनू गे इस्राएली आन कली ‘सुइ मुर तौ मथिथु, बेक्त हना, मेको आ तमी आन कली आ अडस गेचा माल्नीनी।

9 मेको के तमी यो मबाक्त हना, मेको आ अडस आ लोक्ब आन कली गेचा माल्नीनी।

10 मेको के आ लोक्ब यो मबाक्त हना, मेको आ अडस आ आफ आ लोक्ब कली गेचा माल्नीनी।

11 मिनू मेको आ आफ आ लोक्ब यो मबाक्त हना, मेको आ अडस आ थर डा नेल्ल क्येडा आ नेक्था डा मुर कली गेचा माल्नीनी। मिनू मेको अडस मेको केन दुम्ब’ दे माइक्मी” देंत। मेको लोत्र परमप्रभु यावेमी मोसा कली देंशो, इस्राएली आन कली फुल्लुम मुशा ब्रेक्शो नु अरेशो लोत्र बाक्ब।

यहोसु लां कोंइब दुम्शो

12 मिनू परमप्रभु यावेमी मोसा कली “गे एको अबारीम पहाड डा डांडा डोंइसो। मिनू इस्राएली आन कली गेशो रागी कोत्रडो। गन्ती २१:११; ब्यवस्था ३२:४८-५२

13 मिनू गे मेको रागी तवी नोले, गे इ लोक्ब हारून खोदेशो पा इ किकी पिपी नु बाक्थ लाइनेवे। गन्ती २०:२४-२८

14 मारदे हना जीन डा गोरशो रागीमी मुरपुकी गो नु जिचा पोक्मेनु, गे यो मटिसी। मेरीबाथ-कादेश डा ब्वाक्कुम मुर आन डोंइती गे आं कली ठेयब मसेल्यीसी” देंत। गन्ती २०:१२-१३

15 मिनू मोसामी परमप्रभु यावे कली

16 “परमप्रभु यावे, मुर नेल्ल आन ब्रोंइचा गेब परमप्रभु, एको मुर आन कली लां कोंइब मुर का वोतीन। गन्ती १६:२२

17 मिनू मेको मुर आन डोंइती गाक्ल। मिनू मेको आन कली लतीक नु जाक्तीक लां कोंइदल। मोपा परमप्रभु यावे आ मुर गोठला मबाक्शो भेडा खोदेशो मदुम्मल” देंत। मीका ५:३; मत्ती ९:३६

18 मिनू परमप्रभु यावेमी मोसा कली “गे आं सोक्त पाइश्शो नून आ तौ यहोसु कली चाक्शा, इ गुड मेको आ तार वोतो। प्रस्थान ३३:११; ब्यवस्था ३४:९

19 मिनू मेको कली चढेब एलाजर नु मुर नेल्ल आन डोंइती राप्पतो। मिनू मेको मुर नेल्लेम तचा डा पा मेको कली एको गेय जिम्मा गेवो।

20 मोपा गे मेको कली इ अधिकार गेवो। मिनू इस्राएली नेल्लेमी मेको आ देंशो टीमेक्ल। प्रस्थान ३४:२९-३०; २राजा २:९,१५



21 मिनु यहोसु चढेब एलाजर आ डोंइती राप्चा माल्ब। मिनु एलाजरमी ऊरीम यहोसु आ परबम मार देंबा, दे परमप्रभु यावे आ डोंइती हिल्लो पचा माल्ब। यहोसु आ देंशोमी इस्राएली नेल्ले मेको नु लडाइ पथ लचा नु लेत्चा माल्नीम” देंत। प्रस्थान २८:३०; ब्यवस्था ३३:८

22 मिनु मोसामी परमप्रभु यावेमी अरेशो खोदेंशो पा पाप्तु। मेकोमी यहोसु कली चाक्शा चढेब एलाजर नु इस्राएली नेल्ल आन डोंइती राप्पाइक्तु।

23 मिनु मोसामी परमप्रभु यावेमी देंशो खोदेंशो पा आ गुइ यहोसु आ तार वोइश्शा, आ गेय पचा कली जिम्मा गेप्तु।

## 28

### नाक्त किंत किंत डा चढेतीके

1 परमप्रभु यावेमी मोसा कली

2 “गे इस्राएली आन कली मीम चोशा चढेतीके आं जचा थोव्रक, आं दाक्शो ब्रोव्रशो रिना पाइश्शो चढेतीके गे आं देंशो नाक्त चढेचा माल्नीम, दे शेंचा माल्नेवे। लेवी २१:६

3 मिनु गे मेको आन कली ‘गे परमप्रभु यावे कली मीम चोशा चढेतीके मार चढेचा माल्नीनी देंशा हना, मारेइ मदुश्शो थम रिम्शो बर्स का गाप्शो पाठा निक्शी नाक्त किंत किंत चढेचा माल्नीनी। प्रस्थान २९:३८-४२

4 मिनु का सुनी नु का नाक्दो चढेचा माल्नीनी।

5 मेको नु अन्न चढेतीके कली एफाह का डा १० भाग डा भाग का रिम्शो फस नु हिन का डा ४ भाग डा भाग का खाक्शो तेल ब्वाइश्शा चढेचा माल्नीनी। एफाह का २२ लिटर पुक्तीक बाक्ब। हिन का ४ लिटर बाक्ब। ४ भाग डा भाग का लिटर का बाक्ब।

6 एको परमप्रभु यावे कली गेना हना यो मीम चोशा चढेतीके बाक्ब। मेको आ दाक्शो ब्रोव्रशो रिना पाइश्शो सीनै डांडाम देंशो खोदेंशो पा चढेतीके बाक्ब।

7 मेको नु तूचा थोव्रक चढेतीके पाठा का कली हिन का डा ४ भाग डा भाग का अडगुर शांबु चढेचा माल्नीनी। मेको परमप्रभु यावे आ बाक्तीकेम परमप्रभु यावे आ डोंइती मोइक्चा माल्नीनी।

8 मेको अर्को पाठा नां रिक्चावानु, चढेचा माल्नीनी। मेको नु सुनी डा खोदेंशो पा अन्न चढेतीके नु तूचा थोव्रक चढेतीके चढेचा माल्नीनी। एको परमप्रभु यावे कली मीम चोशा चढेतीके आ दाक्शो ब्रोव्रशो रिना पाइश्शो चढेतीके बाक्ब।

### नाइक्तीक नाक्त डा चढेतीके

9 मिनु नाइक्तीक नाक्तीम मारेइ मदुश्शो थम रिम्शो बर्स का गाप्शो पाठा निक्शी चढेचा माल्नीनी। मेको नु अन्न चढेतीके तेल ब्वाइश्शो रिम्शो फस एफाह का डा १० भाग डा भाग निक्शी चढेचा माल्नीनी। मिनु मेको नु तूचा थोव्रक चढेतीके यो चढेचा माल्नीनी। एफाह का २२ लिटर पुक्तीक बाक्ब। मत्ती १२:५

10 मेको नाइक्तीक नाक्ती डा चोशा चढेतीके बाक्ब। मेको नाक्त किंत किंत डा चोशा चढेतीके नु तूचा थोव्रक चढेतीके चढेचा यो मेको चढेचा माल्नीनी।

### औसी डा चढेतीके

11 मिनु गे नेल्ल महिना डा डोंइती डा नाक्त परमप्रभु यावे कली चोशा चढेतीके चढेचा माल्नीनी। मेको ब्यफ निक्शी, सांड का नु ७ ओटा मारेइ मदुश्शो थम रिम्शो बर्स का का गाप्शो पाठा चढेचा माल्नीनी। गन्ती १०:१०; इजीकीएल ४६:१, ३, ६; यसेया १:१३

12 मिनु मेको ब्यफ का का पा नु अन्न चढेतीके तेलम निशो रिम्शो फस एफाह डा १० भाग डा भाग सां चढेचा माल्नीनी। मेको सांड का नु अन्न चढेतीके तेलम निशो रिम्शो फस एफाह का डा १० भाग डा भाग निक्शी चढेचा माल्नीनी। एफाह का २२ लिटर पुक्तीके बाक्ब। गन्ती १५:२-१२

13 मिनू मेको ७ ओटा पाठा नु का का पा एफाह डा १० भाग डा भाग का तेलम निशो रिम्शो फस चढेचा माल्नीनी। एको परमप्रभु यावे कली आ दाकशो ब्रोव्रशो रिना पाइशो मीम चोशा चढेतीके बाकब।

14 मेको नु तूचा थोव्रक चढेतीके ब्यफ का का नु आधा हिन अडगुर शांबु बाकचा माल्ब। सांड नु हिन का डा भाग सां डा भाग का अडगुर शांबु बाकचा माल्ब। मिनू पाठा नेल्ल नु हिन का डा ४ भाग डा भाग का अडगुर शांबु चढेचा माल्नीनी। मेको बर्स डा महिना नेल्ल डा औसीम चोशा चढेतीके बाकनीम।

15 मिनू पाप पशो आ परबम बोका का परमप्रभु यावे कली चढेचा माल्नीम। मेको नाक्त कित कित डा चोशा चढेतीक नु तूचा थोव्रक चढेतीके चढेशा यो मेको चढेचा माल्नीनी।

### पास्सा नाक्त डा चढेतीक

16 मिनू डोंइती डा महिना डा १४ नाक्ती परमप्रभु यावे कली पास्सा चाड डा चढेतीके चढेचा माल्नीनी। लेवी २३:५-१४

17 मिनू मेको महिना डा १५ नाक्ती ठेयब चाड का मानेचा माल्नीम। मेको चाडम ७ नाक्त सम्म बोरब ओख्ती मसुप्शो शोब्ले जचा माल्नीनी।

18 डोंइती डा नाक्तीम परमप्रभु यावे नु गुम्तीके का दुम्चा माल्ब। मेको नाक्ती गे काइ गेय मपने।

19 गे परमप्रभु यावे कली मीम चोशा चढेतीके चढेचा माल्नीनी। मार चढेचा माल्नीनी देंशा हना, ब्यफ निक्शी, सांड का नु बर्स का का गाप्शो ७ ओटा पाठा चढेचा माल्नीनी। मेको नेल्ल मारेइ मदुम्शो थम रिम्शो बाकचा माल्नीम।

20 मेको नु अन्न चढेतीके तेल व्वाइशो रिम्शो फस दुम्चा माल्ब। मेको ब्यफ का नु एफाह का डा १० भाग डा भाग सां चढेचा माल्नीनी। मेको सांड का नु एफाह का डा १० भाग डा भाग निक्शी चढेचा माल्नीनी। एफाह का २२ लिटर खोदेशो बाकब।

21 मिनू मेको ७ ओटा पाठा नु एफाह डा १० भाग डा भाग का का पा रिम्शो फस चढेचा माल्नीनी।

22 मिनू इन पाप आ परबम पाप क्याम्तीक गेय पचा कली बोका का चढेचा माल्नीनी।

23 मिनू सुनी डा चोशा चढेतीके, मेको गेना हना यो पचा माल्शो चोशा चढेतीक बाकब, मेको चढेचा माल्नीनी।

24 गे मोदेशो चढेतीके ७ नाक्त सम्म नाक्त कित कित जचा थोव्रक कली चढेचा माल्नीनी। मेको परमप्रभु यावे कली आ दाकशो ब्रोव्रशो रिना पाइशो मीम चोशा चढेतीक बाकब। मेको नाक्त कित कित डा चोशा चढेतीके नु तूचा थोव्रक चढेतीके चढेशा यो मेको चढेचा माल्नीनी।

25 मिनू ७ नाक्तीम परमप्रभु यावे नु गुम्तीके का दुम्चा माल्ब। मेको नाक्ती गे काइ गेय मपने।

### डोंइती मीशो अन्न डा चाड

26 डोंइती मीशो अन्न नु फल फुल डा चाड नाक्त गे परमप्रभु यावे कली नक अन्न रे अन्न चढेतीक चढेनीनी। मेको हप्ता डा चाड बाकब। मेना परमप्रभु यावे नु गुम्तीके का दुम्चा माल्ब। मेको नाक्ती गे काइ गेय मपने। लेवी २३:१५-२१; ब्यवस्था १६:१०

27 गे परमप्रभु यावे कली चोशा चढेतीके चढेचा माल्नीनी। मेको परमप्रभु यावे कली आ दाकशो ब्रोव्रशो रिना पाइशो चढेतीके बाकब। गेपुकीमी ब्यफ निक्शी, सांड का नु बर्स का का गाप्शो ७ ओटा पाठा चढेचा माल्नीनी।

28 मेको नु अन्न चढेतीके तेल व्वाइशो रिम्शो फस दुम्चा माल्ब। मेको ब्यफ का नु एफाह का डा १० भाग डा भाग सां चढेचा माल्नीनी। मेको सांड का नु एफाह का डा १० भाग डा भाग निक्शी चढेचा माल्नीनी। एफाह का २२ लिटर खोदेशो बाकब।

29 मिनू मेको ७ ओटा पाठा नु भाग का रिम्शो फस चढेचा माल्नीनी।

30 मिनू इन पाप आ परबम पाप क्याम्तीक गेय पचा कली बोका का चढेचा माल्नीनी।

31 मिनू नाक्त कित कित डा चोशा चढेतीक नु मेको अन्न चढेतीक गेपुकीम मेको नु आ तूचा थोव्रक चढेतीक चढेचा माल्नीनी। मेको ब्यफ, सांड, पाठा नेल्ल मारेइ मदुम्शो थम रिम्शो बाकचा माल्नीम।

## 29

## नक बर्स डा चाड

1 गेपुकी ७ महिना डा डोंइती डा नाक्ती गुम्तीके का सेल्चा माल्नीनी। मेको नाक्ती गे काइ गेय मपने। मेको नाक्ती गे तुराही ताप्चा माल्नीनी। गन्ती १०:१०; लेवी २३:२४-२५

2 गे परमप्रभु यावे कली चोशा चढेतीके चढेचा माल्नीनी। मेको परमप्रभु यावे कली आ दाक्शो ब्रोव्रशो रिना पाइश्शो चढेतीके बाक्ब। गेपुकीमी ब्यफ का, सांड का नु बर्स का का गाप्शो ७ ओटा पाठा चढेचा माल्नीनी। मेको मारेइ मदुम्शो थम रिम्शो दुम्चा माल्नीम।

3 मिनु मेको ब्यफ नु अन्न चढेतीके, तेल ब्वाइश्शो रिम्शो फस एफाह का १० भाग डा भाग सां नु सांड नु १० भाग डा भाग निक्शी चढेचा माल्नीनी। एफाह का २२ लिटर पुक्तीके का बाक्ब। भाग सां ६ नु आधा लिटर खोदेशो बाक्ब। भाग निक्शी ४ नु आधा लिटर खोदेशो बाक्ब।

4 मिनु मेको ७ ओटा पाठा नु का का पा भाग का चढेचा माल्नीनी।

5 मिनु इन पाप आ परबम पाप क्याम्तीक गेय पचा कली बोका का चढेचा माल्नीनी।

6 मेको नेल्ले औंसी नाक्त डा चोशा चढेतीक नु मेको नु अन्न चढेतीके, नाक्त किंत किंत डा चोशा चढेतीक नु मेको नु अन्न चढेतीके, मेको नेल्ल नु तूचा थोव्रक चढेतीके यो चढेचा माल्नीनी। मेको नेल्ले परमप्रभु यावेमी देशो खोदेशो पा आ दाक्शो ब्रोव्रशो रिना पाइश्शो मीम चोशा चढेतीक बाक्नीम।

## पाप क्याम्तीक नाक्त डा चाड

7 मेको ७ महिना डा १० नाक्त परमप्रभु यावे नु गुम्तीके का दुम्चा माल्ब। मेको नाक्ती गे माइजा बाक्शा, काइ गेय मपने। लेवी २३:२७-३२

8 गे परमप्रभु यावे कली चोशा चढेतीके चढेचा माल्नीनी। मेको आ दाक्शो ब्रोव्रशो रिना पाइश्शो चढेतीके बाक्ब। मिनु गे ब्यफ का, सांड का नु बर्स का का गाप्शो ७ ओटा पाठा चढेचा माल्नीनी। मेको थम रिम्शो मारेइ मदुम्शो दुम्चा माल्नीम।

9 मिनु मेको ब्यफ नु अन्न चढेतीके, तेल ब्वाइश्शो रिम्शो फस एफाह का डा १० भाग डा भाग सां नु सांड नु १० भाग डा भाग निक्शी चढेचा माल्नीनी। एफाह का २२ लिटर खोदेशो बाक्ब

10 मिनु मेको ७ ओटा पाठा नु का का पा भाग का का पा चढेचा माल्नीनी।

11 मिनु मेको नु पाप पशो आ परबम बोका का चढेचा माल्नीनी। मेको पाप पशो क्याम्तीक गेय पचा कली चढेशा यो नाक्त किंत किंत डा चोशा चढेतीके, मेको नु अन्न चढेतीके नु तूचा थोव्रक चढेतीके चढेचा माल्नीनी। लेवी १६:११-२८

## गोठ सेल्शा बाक्तीक चाड

12 गे ७ महिना डा १५ नाक्ती परमप्रभु यावे नु गुम्तीके का सेल्चा माल्नीनी। मेको नाक्ती गे काइ गेय मपने। गे परमप्रभु यावे कली ७ नाक्त सम्म चाड मानेचा माल्नीनी। लेवी २३: ३४-४३

13 गेपुकीमी परमप्रभु यावे कली चोशा चढेतीके चढेचा माल्नीनी। मेको आ दाक्शो ब्रोव्रशो रिना पाइश्शो मीम चोशा चढेतीके बाक्ब। मेको चोशा चढेतीके मार बाक्चा माल्नीम दॅंशा हना, १३ ओटा ब्यफ, सांड निक्शी नु बर्स का गाप्शो १४ ओटा पाठा बाक्चा माल्नीम। मेको नेल्ल थम रिम्शो मारेइ मदुम्शो बाक्चा माल्नीम।

14 मिनु मेको नु अन्न चढेतीके तेल ब्वाइश्शो रिम्शो फस बाक्चा माल्ब। मेको १३ ओटा ब्यफ आन कली का का पा एफाह का डा १० भाग डा भाग सां चढेचा माल्नीम। मेको सांड निक्शी नु एफाह का डा १० भाग डा भाग निक्शी रिम्शो तेल ब्वाइश्शो फस चढेचा माल्नीम। एफाह का २२ लिटर खोदेशो बाक्ब।

15 मिनु मेको १४ ओटा पाठा नु का का पा भाग का का रिम्शो फस चढेचा माल्नीनी। भाग ला ब्रेक्शो बाक्त हना, एफाह डा १० भाग डा भाग का मिम्सीब। मेको २ लिटर २०० सी सी बाक्ब।



34 मिनु मेको नु पाप पशो आ पर्वम बोका का चढ़ेचा माल्नीनी। मेको पाप पशो क्याम्तीक गेय पचा कली चढ़ेशा यो नाक्त कित कित डा चोशा चढ़ेतीके, मेको नु अन्न चढ़ेतीके नु तूचा थोव्रक चढ़ेतीके चढ़ेचा माल्नीनी।

35 मिनु मेको आ नोले डा नाक्त गे परमप्रभु यावे नु गुम्तीके का सेल्चा माल्नीनी। मेको नाक्त गे काइ गेय मपने।

36 गे परमप्रभु यावे कली चोशा चढ़ेतीके चढ़ेचा माल्नीनी। मेको आ दाक्शो ब्रोव्रशो रिना पाइश्शो चढ़ेतीके बाक्ब। मिनु गे ब्यफ का, सांड का नु बर्स का का गाप्शो ७ ओटा पाठा चढ़ेचा माल्नीनी। मेको नेल्ल मारेइ मदुम्शो थम रिम्शो बाक्चा माल्नीनी।

37 मेको नु अन्न चढ़ेतीके नु तूचा थोव्रक चढ़ेतीके डोंइती डा खोदेशो पा ब्यफ, सांड नु पाठा आन कली हिक्शा, चढ़ेचा माल्नीनी।

38 मिनु मेको नु पाप पशो आ पर्वम बोका का चढ़ेचा माल्नीनी। मेको पाप पशो क्याम्तीक गेय पचा कली चढ़ेशा यो नाक्त कित कित डा चोशा चढ़ेतीके, मेको नु अन्न चढ़ेतीके नु तूचा थोव्रक चढ़ेतीके चढ़ेचा माल्नीनी।

39 मिनु गे मेको चढ़ेतीके नेल्ले इन कली डोंइती देंशो नाक्तीम परमप्रभु यावे कली चढ़ेचा माल्नीनी। मेको नु इन नाक्त कित कित डा चढ़ेतीके, इन ग्येरशा चढ़ेतीके, चोशा चढ़ेतीके, इन अन्न चढ़ेतीके, इन तूचा थोव्रक चढ़ेतीके नु इन दुशा बाक्चा आ पर्वम चढ़ेतीके चढ़ेशा यो मेको चढ़ेचा माल्नीनी' देनो' देंत।

40 मिनु परमप्रभु यावेमी मोसा कली अरेशो खोदेशो पा मोसाम लोव्र नेल्ल इस्राएली आन कली शेंताक्मी।

## 30

कसम जचा आ पर्वम शेंशो

1 मिनु मोसामी इस्राएल आ थर थर डा ठेयब मुर आन कली “परमप्रभु यावेमी अरेशो मार बाक्त देंशा हना,

2 मुर कामी परमप्रभु यावे कली लोव्र पाप्तु हना यो, कसम जाप्तु हना यो, मेकोमी आ पशो लोव्र पचा नु आ कसम जशो खाप्चा माल्ब। मेको आ शोव्र रे मार लोव्र गूशो बाक्मे, मेकोमी मेको खाप्चा माल्ब।

3 मिनु मीश आलमी आ आम आफ आस ख्विम बाक्मेनु, परमप्रभु यावे कली लोव्र गेप्तु हना यो, कसम जाप्तु हना यो, लेवी २७:२-२५; ब्यवस्था २३:२२; न्यायाधीस ११:३५; उपदेसक ५:३,४; गन्ती ६:१-२१

4 मिनु मेको आ आफोमी आ लोव्र नेंशा यो सिक्सी पा बाक्त हना, मेको आ गेशो लोव्र बाक्त हना यो कसम बाक्त हना यो लीब।

5 तन्न आ आफोमी मेको नेंना नाक्ती 'मेको मदुम्ब' देंत हना, मेको आ लोव्र गेशो नु आ कसम जशो मलीब। मेको आ आफोमी मदुम्ब देंतीके परमप्रभु यावेमी मेको आ पाप क्याम्ब।

6 मिनु मेकोम कसम जशो बाक्त हना यो, ममिम्थु लोव्र गेवा नोले आ ग्युंवे दुम्त हना,

7 मिनु आ वोंइशेमी मेको नेंशा यो सिक्सी पा बाक्त हना, मेको आ गेशो लोव्र बाक्त हना यो कसम बाक्त हना यो मेको लीब।

8 तन्न मेको आ वोंइशेमी मेको लोव्र नेंना नाक्त मेको कली 'मदुम्ब' देंत हना, मेको आ जशो कसम नु आ ममिम्थु गेशो लोव्र मलीब। मिनु परमप्रभु यावेमी मेको आ पाप क्याम्ब।

9 आ वोंइश बेक्शो नु आ वोंइशेमी प्रोंइशो मीश मुरुमी कसम जाप्तु हना, मेको लीब।

10 सुइ मीश मुरुमी आ वोंइश आ ख्विम बाक्शा, लोव्र गेप्तु हना, कसम जाप्तु हना,

11 मिनु आ वोंइशेमी मेको नेंशा यो सिक्सी पा बाक्त हना, मेको आ गेशो लोव्र बाक्त हना यो, कसम बाक्त हना यो, मेको लीब। येरमीया ४४:१९, २५

12 तन्न आ वोंइशेमी मेको नेंशा 'मदुम्ब' देंत हना, मेको आ गेशो लोव्र डा कसम मलीब। आ वोंइशेमी मेको आ गेशो लोव्र क्याम्शो बाक्त। मिनु परमप्रभु यावेमी मेको मीश मुर आ पाप क्याम्ब।

- 13 आ वोंइशेमी आ मीश आ मारेइ लोत्र गेशो, आ मारेइ कसम जशो पचा गेने नु कयाम्ने चाप्व।  
 14 तन्न मेको आ वोंइशेमी मेको नेंशा यो नाक्त कित कित सिक्सी पा बाक्त हना, मेकोमी आ कसम जशो नु आ गेशो लोत्र पचा गेशो बाक्ब।  
 15 तन्न मेकोमी नेंना आ नाक्त का निक्शी नोले 'मेको मदुम्ब' देंत हना, मेकोमी आ मीश आ तशो दोस कुरचा माल्व" देंत।  
 16 एको वोंइश मीश नु आ आम आफ आस खिंम बाक्शो मीश आल आ पर्वम फुल्लुम मुशा ब्रेक्शो लोत्र एको बाक्ब। एको लोत्र परमप्रभु यावेमी मोसा कली अरेशो बाक्ब।

## 31

मिदयान डा मुर आन कली ग्राशो

- 1 मिनु परमप्रभु यावेमी मोसा कली  
 2 "इस्त्राएली आन पर्वम गे मिदयान डा मुर आन कली क्येक्क लेत्तीमी। मेको आ नोले गे बेक्नेवे" देंत।  
 3 मिनु मोसामी मुर आन कली "इन लडाइ पाइब आन दाते डा मिदयान नु लडाइ पचा कली नु परमप्रभु यावेमी मेको आन कली क्येक्क लेत्चा कली इन मुर आन कली ठीक पने।  
 4 गे इस्त्राएली आन थर थर नेल्ल रे हजार का का मुर लडाइ पचा कली सोइक्तीने" देंत।  
 5 मोपतीके इस्त्राएली आन शुश मुर रे थर थर रे हजार का का पा, १२ हजार लडाइ पाइब मुर या कुरशा ठीक दुम्तेक्म।  
 6 मिनु मोसामी थर नेल्ल रे हजार का का मुर आन कली लडाइम सोइक्ताक्मी। मिनु मेकोपुकी नु चढेब एलाजर आ तौ फिनेहास यो सोइक्ताक्व। मेकोमी परमप्रभु यावे आ ताम्बु डा माल्शो नु लडाइ डा तुराही ताप्तीक कुरशो बाक्त। गन्ती १०:२  
 7 परमप्रभु यावेमी मोसा कली अरेशो खोदेंशो पा मेकोपुकीम मिदयान डा मुर नु लडाइ पाम्तेक्म। मिनु मेको आन वोंइश मुर नेल्ल आन कली साइक्तेक्म। ब्यवस्था २०:१३  
 8 मेकोपुकीमी मिदयान डा ५ जना पिप एवी, रेकेम, सुर, हुर नु रेबा आन कली साइक्तेक्म। मिनु मेको नु बाक्ब अरु मुर यो साइक्तेक्म। मिनु बेओर आ तौ बालाम कली यो तरवारमी साइक्तेक्म। यहोसु १३:२१-२२; गन्ती २२:५  
 9 मिनु इस्त्राएलीपुकीम मिदयान डा मीश मुरपुकी नु आल ब्रेपच ग्याइक्तेक्म। मेको आन बी ब्यफ, क्यारश भेडा नु आन शोंप नेल्ल लाइक्तेक्म।  
 10 मिनु मेको आन बाक्शो सहर नेल्ल नु मेको आन ताम्बु नेल्ल क्रोइक्तेक्म।  
 11 मेको आन ग्राशो मुर, बी ब्यफ, क्यारश भेडा, नु शोंप नेल्ल लाइशशा गाक्तेक्म।  
 12 मिनु यरीको आ आइक्की हांबु यर्दन खोला आ शुंइचीम मोआब डा दिंममी बाक्शो ताम्बुम मोसा, चढेब एलाजर नु इस्त्राएली नेल्ल आन डोंइती चाक्तेक्म।  
 13 मिनु मोसा, चढेब एलाजर नु मेको आन दाते डा ठेयब मुर नेल्ल मेको आन कली ग्रुम्थ, लाडगा गूतेक्म।  
 14 मिनु मोसामी लडाइ रे ग्राशा, लेशशा जाक्शो हजार का नु सहे का डा कप्तान आन कली तशा गाइक्ताक्व।  
 15 मिनु मोसाम मेको आन कली "मार गे मीश मुर नेल्ल आन कली सेसीन प्रोंइनी?  
 16 एको मीश मुरपुकीमी बालाम आ देंशो पशा, इस्त्राएली आन कली पेओरम परमप्रभु यावे कली मरिम्शो पपाइशशो बाक्तेक्म। मोपतीके परमप्रभु यावे आ मुर आन दातेमी मुर साइक्ब रोइ गूत। गन्ती २५:१-३; प्रकाश २:१४  
 17 मोपतीके वोंइश आल नेल्ल वोंइश मुर नु बाक्शो मीश मुर नेल्ल आन कली सतीन। न्यायाधीस २१:११-१२  
 18 तन्न वोंइश मुर नु मबाक्शो मीश आल नेल्ल चहिं इन कली वोंइसीन।

19 गेपुकी सु सुम मुर साइशो बाक्नी नु बेक्शो मुर आन कली थिशो बाक्नी मेको नेल्ल ७ नाक्त सम्म इन बाक्तीक आ लाडगाम बाक्कीन। मिनु सां नाक्त नु ७ नाक्ती गेपुकीमी इन कली ग्रांग्रा मदिशो सेल्सीशा, इन ग्याइशो आन कली यो ग्रांग्रा मदिशो सेलीन। गन्ती १९:११-२०

20 गेपुकीम वा नेल्ले, कुशुल के मार मार, क्यारश आ चां के सेल्लो नु शी के मार मार नेल्ल ग्रांग्रा मदिशो सेलीन” देंत।

21 मिनु चढ़ेब एलाजरमी लडाइम लाइब मुर नेल्ल आन कली “परमप्रभु यावेमी मोसा कली फुल्लुम मुशा ब्रेक्शो आ अरेशो लोत्र मार बाक्त देंशा हना,

22 ‘सुन, चांदी, कांसा, फलाम, टीन नु सिसा,

23 मीम मनेक्ब मारेइ मारेइ थोत्रक मीम क्रोइशशा, ग्रांग्रा मदिशो दुम्ब। मीम नेक्चा डा थोत्रक चहिं ग्रांग्रा मदिशो दुम्तीक ब्वाक्कुमी ग्रांग्रा मदिशो सेल्ले चाप्नीमी।

24 मिनु ७ नाक्ती गेपुकीमी इन वा मुरचा माल्नीनी। मिनु गेपुकी ग्रांग्रा मदिशो दुम्नीनी। मेको नोले गे इन बाक्तीके ओत्रने चाप्नीनी’ ” देंत।

लडाइम रोइशो मार मार

25 मिनु परमप्रभु यावेमी मोसा कली

26 “गे, चढ़ेब एलाजर नु मुर आन थर डा ठेयब मुरपुकीम ‘ग्याइशो मुर नु बी ब्यफ, क्यारश भेडा आन कली हिक्शा ब्रेक्चा माल्नीनी।

27 मेको नेल्ल के भाग निक्शी सेलीन। भाग का लडाइम लाइब आन कली नु भाग का अर्को मुर नेल्ल आन कली बाक्ब। यहोसु २२:८; १सामुएल ३०:२४-२५

28 लडाइम लाइब मुर आन भाग रे मुर, बी ब्यफ, गधा नु क्यारश भेडा ५ सहे रे का परमप्रभु यावे कली गेचा माल्नीनी।

29 मेको लडाइ पाइब आन भाग रे ताक्शा, चढ़ेब एलाजरमी परमप्रभु यावे कली चढ़ेचा माल्ब।

30 मिनु इस्राएली आन भाग रे मुर, बी ब्यफ, गधा नु क्यारश भेडा ५० रे का ताक्शा, परमप्रभु यावे आ ताम्बुम गेय पाइब लेवी आ थर डा मुर आन कली गेचा माल्नीनी’ देनो” देंत।

31 मिनु परमप्रभु यावेमी मोसा कली अरेशो खोदेशो पा मोसा नु चढ़ेब एलाजरमी पाम्ताक्स।

32 मेको लडाइ पाइबपुकीमी रोइशो गिश बाक्तेकम देंशा हना, क्यारश भेडा ६ लाख ७५ हजार

33 बी ब्यफ ७२ हजार

34 गधा ६१ हजार

35 वोंइश मुर नु मबाक्शो मीश आलपुकी ३२ हजार जना बाक्तेकम।

36 मेको लडाइम लाइब आन भाग गिश बाक्तेकम देंशा हना, क्यारश भेडा ३ लाख ३७ हजार ५ सहे,

37 मेको रे पा ६ सहे ७५ ओटा परमप्रभु यावे कली गेशो बाक्तेकम।

38 बी ब्यफ ३६ हजार बाक्तेकम। मेको रे पा ७२ ओटा बी ब्यफ परमप्रभु यावे कली गेशो बाक्तेकम।

39 गधा ३० हजार ५ सहे बाक्तेकम। मेको रे पा ६१ ओटा गधा परमप्रभु यावे कली गेशो बाक्तेकम।

40 मिनु मीश आल १६ हजार जना बाक्तेकम। मेको रे पा ३२ जना परमप्रभु यावे कली गेशो बाक्तेकम।

41 परमप्रभु यावेमी मोसा कली देशो खोदेशो पा मोसामी परमप्रभु यावे कली गेशो भाग चढ़ेब एलाजर कली गेप्टु।

42 मोसामी लडाइम लाइब मुर रे योक्शा अर्को इस्राएली आन कली गेशो,

43 क्यारश भेडा लाख सां ३७ हजार ५ सहे बाक्तेकम,

44 बी ब्यफ ३६ हजार बाक्तेकम,

45 गधा ३० हजार ५ सहे बाक्तेकम,

46 नु मीश आल १६ हजार जना बाक्तेकम।

47 परमप्रभु यावेमी अरेशो खोदेशो पा मोसामी इस्राएली आन भाग रे मुर नु बी ब्यफ, क्यारश भेडा हिक्शा, ५०, ५० रे का का गुंइशा परमप्रभु यावे आ बाक्तीकेमी गेय पाइब लेवी आ थर डा मुर आन कली गेप्टु।

48 मिनु लडाइ पाइब आन हजार का नु सहे का डा कप्तान मोसा आ बाक्तीके जाक्तेकम।

49 मिनु मेकोपुकीमी मोसा कली “इन गेय पाइब, गोपुकीमी आंइ लडाइ पाइब आन कली हिक्तक। मिनु आंइ के मुर का यो मजाम्शो बाक्नीम।

50 मिनु गो नेल्ल आंइ थिश्शो सुन के गहाना, बाला, छाप थोक्तीक औंठी, नचे नु साडलीपुकी परमप्रभु यावे कली चढ़ेशा, आंइ पबंम पाप क्याम्तीक गेय पचा, दे चाक्शा जाक्ताक्क” देंतेकम। न्यायाधीस ८:२४-२६

51 मिनु मोसा नु चढ़ेब एलाजरमी मेको आन चाक्शो सुन के गहाना नेल्ल ताक्ताक्से।

52 मिनु हजार, हजार डा कप्तान नु सहे, सहे डा कप्तान आन चाक्शो परमप्रभु यावे कली चढ़ेशो सुन १६ हजार ७ सहे ५० शेकेल बाक्तेकम। शेकेल का ११.५ ग्राम बाक्ब।

53 लडाइम लाइब आन रोइश्शो मार मार आंम आंमा लांइसीशो बाक्तेकम।

54 मिनु मोसा नु चढ़ेब एलाजरमी हजार का, हजार का, नु सहे का, सहे का मुर आन कप्तानपुकीमी चाक्शो सुन ताक्शा, परमप्रभु यावे आ गुम्तीक ताम्बुम वोइक्ताक्स। मेको परमप्रभु यावे आ डोंइती इस्राएली आन कली मिप्पाइक्चा कली वोइक्ताक्स। प्रस्थान ३०:१२-१६

## 32

रूबेन नु गाद आस खिं खिं डा मुर  
ब्यवस्था ३:१२-२२

1 मिनु रूबेन आ थर डा मुर नु गाद आ थर डा मुर आन के शुश बी ब्यफ बाक्तेकम। मिनु मेकोपुकीमी याजेर नु गिलादमी रिम्शो योव्रतीक ताम्तेकम।

2 मिनु गाद आ थर डा मुर नु रूबेन आ थर डा मुरुमी मोसा, चढ़ेब एलाजर नु गुम्तीक डा ठेयब मुर आन बाक्तीक जाक्शा

3 “अतारोथ, दीबोन, याजेर, निम्ना, हेश्बोन, एलेआले, सेबाम, नेबो नु बेओन,

4 परमप्रभु यावेमी मेको रागी इस्राएली आन डोंइती खतम पोक्शो बाक्त। मेको रागी बी ब्यफ योव्रचा कली रिम्शो बाक्ब। मिनु इन गेय पाइब, गोपुकी नु बी ब्यफ यो बाक्नीम।

5 गे आंइ कली दाक्ताक्नी हना, एको रागी आंइ कली गेकी। आंइ कली यर्दन आइक्की हांबु मलाइक्की” देंतेकम।

6 मिनु मोसामी गाद आ थर डा मुर नु रूबेन आ थर डा मुर आन कली “इन लोकबपुकी एर लडाइम लमानु, गेपुकी चहिं एक बाक्नीनी?

7 मारदे गे परमप्रभु यावे आ गेशो आइक्की हांबु डा रागीम लचा कली इस्राएली आन थुं क्याल्नीनी?

8 गो इन आफ आन कली कादेश-बारनेआ रे एको रागी क्यारी पथ सोइक्तुनु, मेकोपुकीमी यो इन खोदेशो पशो बाक्तेकम। गन्ती १३:-

9 मिनु मेकोपुकी एश्कोल डा खोला लशा, एको रागी ताम्तेकम। मिनु परमप्रभु यावेमी गेशो रागीम मलचा, दे इस्राएली आन थुं क्याल्शो बाक्तेकम।

10 मिनु मेको नाक्ती परमप्रभु यावे गाइक्ताक्व। मिनु मेकोमी कसम जशा

11 “इजीप्त रे जाक्शो २० बर्स गाप्शो नु मेको क्येडा लाक्शो सुइ मेको अब्राहाम, इसहाक नु याकूब नु कसम जशो रागी ओव्रचा मताइनीम। मारदे हना आं कली मटीयीमी। गन्ती १४:२२-३८; गन्ती २६:६५

12 केनीज्जी यपुन्ने आ तौ कालेब नु नून आ तौ यहोसु ला ओव्रचा ताइनीस। मारदे हना मेको निक्शीमी थमा पा आं नोले खोइक्तीस्सी’ दे कसम जाप्तु” दे मोसामी देंत। गन्ती १४:७-९; यहोसु १४:६-१५

13 मिनु मोसामी “परमप्रभु यावे इस्राएली आन पबंम गाइक्ताक्व। मिनु मेकोमी मेको आन कली ४० बर्स सम्म गोरशो रागीम हिरपाइक्तीमी। परमप्रभु यावे आ डोंइती मरिम्शो पाइब मबेकम सम्म मोदेशो पाप्तु।



14 मिनू मुल गे, पाप पाइबपुकी, परमप्रभु यावेमी इस्राएल आ परबम गाइशो बाकत। मिनू गेपुकीमी चिनु तेम्शो बाक्नीनी।

15 गेपुकीम मेको आ नोले खोइकने मबिस्साक्नी हना, मेकोमी एको मुर नेल्ल आन कली एको गोरशो रागीमीन प्रॉइब। मिनू गे मेको मुर नेल्ल आन कली खतम सेल्ब दुम्नीनी” दे माइक्तीमी।

16 मिनू मेकोपुकी मोसा आ नेक्था जाक्शा “गो आंइ भेडा आन कली गोठ नु आंइ आल आन कली सहर सेल्चा दाक्नीकी।

17 तन्न गोपुकी चहिं इस्राएली आन कली मेको आन बाक्तीकेमी मचाक्दीशो सम्म मेको आन डोंइडोइती लडाइ पा लाइनीकी। मेना आंइ मीशपुकी नु आंइ आलपुकी चहिं एको रागी डा मुर आन रे मारेड पाइक्चा मपुंडसीथु, मेको सहर डा गारो आगाम बाक्नीम।

18 इस्राएल डा मुर नेल्लेमी आन योवशो रागी मतामे सम्म गो आंइ खिं मलेन्कीकी।

19 गोपुकीमी यर्दन खोला आ आइक्ची हांबु नु मेको क्येडा एर गे रागी मताक्नीकी। मारदे हना, आंइ भाग यर्दन ओंथ हांबु पूर्व गे दुम्शो बाक्ब” दैतेक्म। यहोसु १३:८

20 मिनू मोसामी मेको आन कली “दुम्ब। गेपुकी परमप्रभु यावे आ डोंइती लडाइम लाइनीनी हना, यहोसु १:१२-१५

21 नु परमप्रभु यावेमी आ जोरी सत्रु आन कली खेरशा मेको रागी मफ्रुवा सम्म गेपुकी परमप्रभु यावे आ डोंइती लडाइ पा यर्दन आइक्ची हांबु लाइतीनी हना,

22 मिनू मेको रागी परमप्रभु यावे आ डोंइती ग्रानी नोले, गे लेन्ने चाप्नीनी। मिनू इन पुंडशो रागी परमप्रभु यावे आ डोंइती इन के दुम्ब।

23 तन्न गेपुकीम मो मपाइतीनी हना, परमप्रभु यावे आ डोंइती पाप पाइनीनी। मिनू इन पाप थमा पा राइनीनी।

24 गेपुकी इन मीश नु आल आन कली सहर नु इन बी ब्यफ, क्यारश भेडा आन कली गोठ सेलीन। तन्न इन गेशो लोव्र खाप्चा माल्नीनी” दैत।

25 मिनू गाद नु रूबेन आस थर डा मुरपुकीमी मोसा कली “इन गेय पाइब, गोपुकी इन अरेशो पाइनीकी।

26 आंइ आलपुकी, आंइ मीशपुकी, आंइ बी ब्यफ, क्यारश भेडा नेल्ल एको गिलाद सहरमी बाक्नीम।

27 तन्न इन गेय पाइब, गोपुकी इन अरेशो खोदेशो पा परमप्रभु यावे आ डोंइती लडाइ पचा कली या कुरशा लाइनीकी” दैतेक्म।

28 मिनू मोसामी मेको आन परबम चढेब एलाजर, नून आ तौ यहोसु नु इस्राएली आन थर थर डा टेयब मुर आन कली अरेम्तीमी।

29 मिनू मोसाम मेको आन कली “गाद नु रूबेन आस थर डा मुर गेपुकी नु या कुरशा, परमप्रभु यावे आ डोंइती लडाइ पा यर्दन आइक्ची हांबु लाम्तेक्म हना, नु मेको रागी इन गुडम दुम नोले, गेपुकीमी गिलाद रागी मेको आन कली गेचा माल्नीनी।

30 तन्न मेकोपुकी या कुरशा लडाइ पा गेपुकी नु यर्दन आइक्ची हांबु लने मबिस्साक्म हना, मेकोपुकी इन दातेमी कनान रागीमीन आन रागी तचा माल्नीम” दे माइक्तीमी।

31 मिनू गाद नु रूबेन आस थर डा मुरपुकीमी “परमप्रभु यावेमी इन गेय पाइब, आंइ कली मार देंमे मेको पाइनीकी।

32 गोपुकी या कुरशा परमप्रभु यावे आ डोंइती आइक्ची हांबु कनान रागी लाइनीकी। तन्न आंइ योवशो रागी यर्दन ओंथ हांबुमी बाक्ल” दैतेक्म।

33 मिनू मोसामी गाद आ थर, रूबेन आ थर नु योसेफ आ तौ मनस्से आ उइक्थ थर डा मुर आन कली एमोरी आन पिप सीहोन आ राज्य नु बाशान डा पिप ओग आ राज्य, मेको रागी नु आ एर ओंथ डा सहर नेल्ल गेम्तीमी। यहोसु १३:१५-३२

34 मिनू गाद आ थर डा मुरपुकीमी दीबोन, अतारोथ, आरोएर,

35 अत्रोथ-शोफान, याजेर, योग-बेहा,

- 36 बेथ-निम्ना, बेथ-हारान नेल्ल गारोम हिरशो सहर सेल्लेक्म। मिनु भेडा आन कली गोठ यो सेल्लेक्म।
- 37 मिनु रूबेन आ थर डा मुरपुकीमी हेशबोन, एलेआले नु किरयथ-थाइम,
- 38 नेबो, बाल-मेओन नु सिब्मा लेशा सेल्लेक्म। मिनु मेकोपुकीमी आन लेशा सेल्लो सहर कली नक नें वोइक्तेक्म।
- 39 मनस्से आ तौ माकीर आ चच युइ गिलादम लशा, मेको आन के सेल्ला, मेकेर बाक्ब एमोरी आन कली खेरतेक्म।
- 40 मोपतीके मोसामी मनस्से आ तौ माकीर आ चच युइ आन कली गिलाद गेप्तु। मिनु मेकोपुकी मेकेर बाक्तेक्म। ब्यवस्था ३:१४; न्यायाधीस १०:३-४
- 41 मनस्से आ तौ याइर लशा, मेकेर डा गाउं आंम के सेल्लु। मिनु मेको नेल्ल आन नें हव्वोथ-याइर वोइक्तु।
- 42 मिनु नोबाह लशा केनाथ नु मेको आ गाउंपुकी आंम के सेल्लु। मिनु मेको नेल्ल आन नें आ नें रे पा नोबाह वोइक्तु।

## 33

### इसाएली आन गाक्शो लां

- 1 मिनु इस्राएली लडाइ पाइब खोदेशो पा इजीप्त रे हुल हुल पा गाक्तेक्म। मोसा नु हारून मेको आन लां कौडब बाक्ताक्स।
- 2 मिनु मोसामी परमप्रभु यावेमी देशो खोदेशो पा ते ते लचा माल्बा, नेल्ल ब्रेक्ताक्व। मिनु आन गाक्शो लां डा रागी नु सहर तेको तेको बाक्तेक्म देशा हना,
- 3 मेकोपुकी डोंइती डा महिना डा १५ नाक्ती रामेसेस रे गाक्चा गोम्तेक्म। मिनु इजीप्ती नेल्ल आन डोंइती काइ महिथु पास्सा चाड आ दीसा नाक्ती गाक्चा गोम्तेक्म। प्रस्थान १:११; प्रस्थान १२:२,६; प्रस्थान ३:१९
- 4 मेना इजीप्तीपुकीमी परमप्रभु यावेमी साइशो आन डोंइती जरमेशो तौ आन कली थिम्शो बाक्तेक्म। मिनु परमप्रभु यावेमी मेको आन देवी देवता आन कली यो निसाफ पशो बाक्त।
- 5 मिनु इस्राएलीपुकी रामेसेस रे गाक्शा, सुक्कोथ सहर जाक्दीशशा बाक्तीके सेल्ला बाक्तेक्म। प्रस्थान १२:३७
- 6 मिनु सुक्कोथ सहर रे गाक्शा, गोरशो रागी आ सुर डा एथाम सहरम बाक्तीके सेल्ला बाक्तेक्म। प्रस्थान १३:२०
- 7 मिनु एथाम रे गाक्शा, बाल-सेफोन गे बाक्शो पी-हहीरोथ लेल्लेक्म। मिनु मिग्दोल आ नेक्था बाक्तीके सेल्ला बाक्तेक्म। प्रस्थान १४:२
- 8 मिनु पी-हहीरोथ रे गाक्शा, समुन्द्र आ दाते रे पा गाक्शा, गोरशो रागीम जाक्तेक्म। मेकोपुकी नाक्त सां डा लां एथाम डा गोरशो रागीम गाक्शा, माराह माइक्तीकेमी बाक्तीके सेल्ला बाक्तेक्म। प्रस्थान १४:२२; प्रस्थान १५:२३
- 9 मिनु माराह रे गाक्शा, एलीम जाक्तेक्म। एलीमम १२ ओटा ब्वाक्कु बुक्तीके नु ७० ओटा खजूर रवा बाक्तेक्म। मिनु मेकेर बाक्तीके सेल्ला बाक्तेक्म। प्रस्थान १५:२७
- 10 मिनु मेकोपुकी एलीम रे गाक्शा, लल समुन्द्र आ नेक्था बाक्तीके सेल्ला बाक्तेक्म।
- 11 मिनु मेकोपुकी लल समुन्द्र रे गाक्शा, सीन माइशो गोरशो रागीम बाक्तीके सेल्ला बाक्तेक्म। प्रस्थान १६:१
- 12 मिनु सीन माइशो गोरशो रागी रे गाक्शा, दोफकामी बाक्तीके सेल्ला बाक्तेक्म।
- 13 मिनु दोफका रे गाक्शा, आलुशमी बाक्तीके सेल्ला बाक्तेक्म।
- 14 मिनु आलुश रे गाक्शा, रेफीदीममी बाक्तीके सेल्ला बाक्तेक्म। मेकेर मुर आन कली तूतीक ब्वाक्कु मंबा। प्रस्थान १७:१
- 15 मिनु रेफीदीम रे गाक्शा, सीने डा गोरशो रागीम बाक्तीक सेल्ला बाक्तेक्म।
- 16 मिनु सीने डा गोरशो रागी रे गाक्शा, किब्रोथ-हत्तावामी बाक्तीक सेल्ला बाक्तेक्म। गन्ती ११:३४
- 17 मिनु किब्रोथ-हत्तावा रे गाक्शा, हसेरोथमी बाक्तीक सेल्ला बाक्तेक्म।

- 18 मिनु हसेरोथ रे गाक्शा, रिथ्माहमी बाक्तीके सेल्शा बाक्तेक्म। गन्ती १२:१६
- 19 मिनु रिथ्माह रे गाक्शा, रिम्मोन-पेरेसमी बाक्तीके सेल्शा बाक्तेक्म।
- 20 मिनु रिम्मोन-पेरेस रे गाक्शा, लिब्नामी बाक्तीके सेल्शा बाक्तेक्म।
- 21 मिनु लिब्ना रे गाक्शा, रिस्साहमी बाक्तीके सेल्शा बाक्तेक्म।
- 22 मिनु रिस्साह रे गाक्शा, केहेलाथामी बाक्तीके सेल्शा बाक्तेक्म।
- 23 मिनु केहेलाथा रे गाक्शा, शेफेर डांडा आ नेक्था बाक्तीके सेल्शा बाक्तेक्म।
- 24 मिनु शेफेर डांडा रे गाक्शा, हरादामी बाक्तीके सेल्शा बाक्तेक्म।
- 25 मिनु हरादा रे गाक्शा, मखेलोथमी बाक्तीके सेल्शा बाक्तेक्म।
- 26 मिनु मखेलोथ रे गाक्शा, तहाथमी बाक्तीके सेल्शा बाक्तेक्म।
- 27 मिनु तहाथ रे गाक्शा, तेराहमी बाक्तीके सेल्शा बाक्तेक्म।
- 28 मिनु तेराह रे गाक्शा, मिथ्कामी बाक्तीके सेल्शा बाक्तेक्म।
- 29 मिनु मिथ्का रे गाक्शा, हश्मोनाहमी बाक्तीके सेल्शा बाक्तेक्म।
- 30 मिनु हश्मोनाह रे गाक्शा, मोसेरोथमी बाक्तीके सेल्शा बाक्तेक्म।
- 31 मिनु मोसेरोथ रे गाक्शा, बेने-याकानमी बाक्तीके सेल्शा बाक्तेक्म। ब्यवस्था १०:६-७
- 32 मिनु बेने-याकान रे गाक्शा, होर-हगीद-गादमी बाक्तीके सेल्शा बाक्तेक्म।
- 33 मिनु होर-हगीद-गाद रे गाक्शा, योल्बाथाहमी बाक्तीके सेल्शा बाक्तेक्म।
- 34 मिनु योल्बाथाह रे गाक्शा, अब्रोनाहमी बाक्तीके सेल्शा बाक्तेक्म।
- 35 मिनु अब्रोनाह रे गाक्शा, एस्योन-गेबेरमी बाक्तीके सेल्शा बाक्तेक्म। १राजा ९:२६; १राजा २२:४९
- 36 मिनु एस्योन-गेबेर रे गाक्शा, जीन डा गोरशो रागीम बाक्शा, कादेशमी बाक्तीके सेल्शा बाक्तेक्म। गन्ती २०:१
- 37 मिनु कादेश रे गाक्शा, एदोम रागी आ सांदमी बाक्शो होर डांडा आ नेक्था बाक्तीके सेल्शा बाक्तेक्म। गन्ती २०:२२-२९; ब्यवस्था ३४:१-१२
- 38 मिनु परमप्रभु यावे आ देशो खोदेशो पा, चहेब हारून होर डांडा डोइश्शा लत। मिनु मेकेर बेक्त। मेना इस्राएली इजीप्त रागी रे गूशो ४० बर्स ५ महिना डा डोंइती डा नाक्ती बाक्त।
- 39 हारून होर डांडा तार बेक्मेनु, हारून सहे का २३ बर्स दुग्शो बाक्त।
- 40 कनान डा नेगेब देशो रागीम हुकुम पाइब पिप आरादमी इस्राएली पिन पिन पाइश्शो बाक्नीम, देशो लोत्र नेंतु। गन्ती २१:१
- 41 मिनु मेकोपुकी होर डांडा रे गाक्शा, सल्मोनामी बाक्तीके सेल्शा बाक्तेक्म।
- 42 मिनु सल्मोना रे गाक्शा, पुनोनमी बाक्तीके सेल्शा बाक्तेक्म।
- 43 मिनु पुनोन रे गाक्शा, ओबोथमी बाक्तीके सेल्शा बाक्तेक्म। गन्ती २१:१०-११
- 44 मिनु ओबोथ रे गाक्शा, मोआब डा सांदमी बाक्शो इये-अबारीममी बाक्तीके सेल्शा बाक्तेक्म।
- 45 मिनु इयीम रे गाक्शा, दीबोन-गादमी बाक्तीके सेल्शा बाक्तेक्म। गन्ती ३२:३४
- 46 मिनु दीबोन-गाद रे गाक्शा, अल्मोन-दिब्लाथाइममी बाक्तीके सेल्शा बाक्तेक्म।
- 47 मिनु अल्मोन-दिब्लाथाइम रे गाक्शा, नेबो सहर आ डोंइती अबारीम डा पहाडम बाक्तीके सेल्शा बाक्तेक्म।
- 48 मिनु अबारीम डा पहाड रे गाक्शा, यर्दन आ शुंडचीमी बाक्शो यरीको रे आइक्ची हांबु मोआब डा दिंममी बाक्तीके सेल्शा बाक्तेक्म। गन्ती २२:१; ब्यवस्था ३२:४९
- 49 मिनु यर्दन खोला आ शुंडच डा मोआब डा दिंममी बेथ-येशीमोथ रे पा आबेल-शिक्तीम सम्म बाक्तीके सेल्शा बाक्तेक्म। गन्ती २५:१
- कनानी आन कली गुंड्या, दे अरेशो
- 50 मिनु यरीको आ आइक्ची हांबु यर्दन खोला आ नेक्था मोआब डा दिंममी परमप्रभु यावेमी मोसा कली

51 “गे इस्राएली आन कली ‘गे यर्दन खोला शूकशा, कनान रागीमी जाकदीन्नीनु, प्रस्थान २३:२३-२४; प्रस्थान ३४:१२-१४

52 मेको रागी डा मुर नेल्ल आन कली मेको रागी रे खेरचा माल्नीनी। मिनु मेको आन मुशा सेल्शो नु कांसा के सेल्शो मूर्ति नेल्ल कली खतम पोक्कीन। मेको आन डांडा डा थानपुकी प्रेशा खतम पोक्का माल्नीनी।

53 गे मेको रागी इन के सेल्शा, मेक उइ बाक्कीन। मारदे हना गो मेको रागी इन कली गेता।

54 मिनु गे थर थर आन खिं खिं डा मुर आन कली हिकशा, रागी योव्रशा, मेको रागी योक्सीन। शुश खिं पाइश्शो थर आन कली ठेयब रागी गेचा, शुश खिं मपाइश्शो थर आन कली आइक्च रागी गेचा माल्नीनी। सुका आ नें बाजीम कोंडबा, मेको मेको थर केन दुम्ब। इन किकी पिपी आन थर थर पा मेको रागी योक्कीन। गन्ती २६:५४-५५

55 तन्न गे मेको रागीम बाक्ब मुर आन कली इन डोंइती रे मखेरतीनी हना, मेको लीशो मुर इन मिक्चीम कसीडगर नु इन कोव्रखाम थोक्शो चू खोदेशो दुम्नीम। मिनु गे ते बाक्तीनी हना यो, मेकोपुकीमी इन कली श्येत गेनीम। प्रस्थान २३:३१-३३; यहोसु २३:१२-१३

56 मिनु गो मेको आन कली मार पदुमी, दे मिम्शा बाक्डा, मेको इन कली पाइनुड’ दे माइक्मी” देंत।

## 34

### कनान रागी डा सांद

1 मिनु परमप्रभु यावेमी मोसा कली

2 “इस्राएली आन कली ‘गे कनान रागी ओव्रनीनु, इन कली योक्शा गेशो रागी आ सांद तेको बाक्नीम देशा हना, इजीकीएल ४७:१३-२०; ब्यवस्था ३२:८

3 इन दक्खिन डा रागी जीन डा गोरशो रागी रे एदोम सम्म बाक्ब। इन दक्खिन डा सांद हिकसी समुन्द्र आ पूर्व रे गोचा माल्ब। यहोसु १५:२-४

4 मिनु अक्रब्बीम डा ग्येथ लतीक लां डा दक्खिन गे जीन गे लाइब। कादेश-बारनेआ आ दक्खिन सम्म जाकदीत्या माल्ब। मिनु नोले हासार-अददार रे पा अज्मोन जाकदीत्या माल्ब।

5 मिनु नोले मेको सांद अज्मोन रे पा हिरशा, इजीप्त डा खोला सम्म जाकदीश्शा ठेयब समुन्द्र नुप्ब।

6 मिनु पच्छिम डा सांद ठेयब समुन्द्र बाक्ब। मेको ठेयब समुन्द्र आ शुंडच इन पच्छिम गे डा सांद बाक्ब।

7 मिनु इन उत्तर गे डा सांद ठेयब समुन्द्र रे होर डांडा सम्म फ्रेंचा माल्नीनी।

8 मिनु होर डांडा रे लेबो-हमाथ सम्म फ्रेंदीन। मिनु मेको सेदाद सम्म जाकदीत्या माल्ब।

9 मिनु नोले सिप्रोन सम्म जाकदीत्या माल्ब। मिनु हासार-एनानमी नुप्ब। मेको इन उत्तर गे डा सांद बाक्ब।

10 मिनु इन पूर्व डा सांद हासार-एनान रे शेफाम सम्म फ्रेंदीन।

11 मिनु शेफाम रे उइ बुप्शा ऐन डा पूर्व गे डा रिब्ला सम्म जाकदीत्या माल्ब। मिनु नोले मेको सांद बुप्शा, किन्नेरेथ समुन्द्र आ पूर्व डा शुंडच सम्म जाकदीत्या माल्ब।

12 मिनु मेको सांद यर्दन खोला रे पा हिकसी समुन्द्र सम्म जाकदीश्शा नुप्ब। इन रागी आ एर ओंथ डा सांद एको बाक्नीम’ दे माइक्मी” देंत।

13 मिनु मोसामी इस्राएली आन कली “परमप्रभु यावे आ अरेशो खोदेशो पा फेन्टे आप्शा ९ थर नु आधा थर आन कली गेशो रागी बाक्ब।

14 मारदे हना रूबेन आ थर डा खिं खिं डा मुर, गाद आ थर डा खिं खिं डा मुर नु मनरसे आ उडक्थ थर डा खिं खिं डा मुर आन भाग तने थुम्शो बाक्तेक्म। गन्ती ३२:२९-३३

15 मेको निक्शी नु उडक्थ थर डा मुरपुकीमी यरीको ओंथ हांबु, यर्दन खोला आ पूर्व गे आन आन रागी तशो बाक्नीम” देंत।

16 मिनु परमप्रभु यावेमी मोसा कली

17 “इन कली रागी योक्शा गेब मुर आन नें मार बाक्नीस देशा हना, डोंइती मेको चढेब एलाजर नु नून आ तौ यहोसु बाक्नीस। यहोसु १४:१; ब्यवस्था १:३८

18 मिनु गे थर थर डा मुर आन ठेयब मुर का का योव्रचा माल्नेवे।

19 मेको थर थर डा ठेयब मुर सु सु बाक्नीम देशा हना, यहूदा आ थर डा यपुन्ने आ तौ कालेब,

गन्ती १३:६,३०

20 सिमियोन आ थर डा अम्मीहुद आ तौ शेमुएल,

21 बेन्यामीन आ थर डा किस्लोन आ तौ एलीदाद,

22 दान आ थर डा योगली आ तौ बुक्की,

23 योसेफ आ तौ मनस्से आ थर डा एफोद आ तौ हन्नीएल,

24 योसेफ आ तौ एफ्राइम आ थर डा शिफतान आ तौ केमुएल,

25 जबूलून आ थर डा पारनाक आ तौ एली-जाफान,

26 इस्साकार आ थर डा अज्जान आ तौ पाल्तीएल,

27 आशेर आ थर डा शेलोमी आ तौ अहीहुद,

28 नाप्ताली आ थर डा अम्मीहुद आ तौ पेदाहेल बाक्नीम।

29 मिनु मेको परमप्रभु यावेमी अरेशो इस्राएली आन कली कनान रागी योक्ब थर थर डा योव्रशो ठेयब मुर एको बाक्नीम” देंत।

## 35

लेवी थर डा मुर आन सहर

1 परमप्रभु यावेमी यरीको आ आइक्वी हांबु यर्दन खोला आ शुंडच मोआब डा दिंमम मोसा कली यहोसु २१:१-३

2 “गे इस्राएल आन कली ‘गे इन आंम सेल्शो रागी रे लेवी आ थर डा मुर आन कली सहरपुकी गेचा माल्नीनी। मिनु मेको आन कली मेको सहर आन एर ओंथ बी ब्यफ, क्यारश भेडा योव्रतीके गेचा माल्नीनी। गन्ती १८:२०; लेवी २५:३२-३४

3 मेको सहरपुकी मेको आन कली बाक्तीक दुम्नीम। बी ब्यफ, क्यारश भेडा योव्रतीक मेको आन बी ब्यफ, क्यारश भेडा आन कली दुम्ब।

4 मिनु गे लेवी आ थर डा मुर आन कली गेशो सहर मेर डा योव्रतीक मेको सहर आ गारो आ एर ओंथ रे हजार का कुबीत बाक्चा माल्ब। कुबीत का ०.५ मिटर बाक्ब।

5 गे सहर आ लाडगा पूर्व गे हजार निकशी कुबीत, दक्खिन गे हजार निकशी कुबीत, पच्छिम गे हजार निकशी कुबीत नु उत्तर गे हजार निकशी कुबीत पुक्चा माल्नीनी। मिनु सहर मेको आ दातेम बाक्चा माल्ब। मेको आन सहर डा योव्रतीके मेकोन बाक्नीम’ देनो” देंत।

ब्रोंडशा बाक्तीक सहर

6 मिनु “गे लेवी आ थर डा मुर आन कली गेशो सहर रे ६ ओटा सहर चहिं ब्रोंडशा बाक्तीक सहर दुम्चा माल्नीम। गे मेकेर मुर साइक्ब मुर कली प्रोक्चा गेचा माल्नीनी। मेको नु तेम्शा ४२ ओटा सहर दुम्चा माल्नीम। प्रस्थान २१:१३

7 गे लेवी थर डा मुर आन कली नेल्लेमी ४८ ओटा सहर नु मेको आन एर ओंथ डा योव्रतीक रू गेचा माल्नीनी।

8 मिनु ठेयब रागी तशो इस्राएली आन थर रे शुश सहर गेचा नु आइक्च रागी तशो इस्राएली आन थर रे का निकशी सहर गेचा माल्नीनी। मेको थर थर डा मुरुमी आ योक्शा गेशो रागी गारचा डा पा लेवी थर डा मुर आन कली सहरपुकी गेचा माल्नीम, देंचा माल्नेवे” दे परमप्रभु यावेमी मोसा कली देंत। गन्ती २६:५४

9 मिनु परमप्रभु यावेमी लेंशा मोसा कली

10 “गे इस्राएली आन कली ‘गेपुकी यर्दन खोला शोक्शा कनान रागी जाक्दीन्नी नोले,

11 गे ब्रोंडशा बाक्तीक सहर योव्रचा माल्नीनी। मिनु मतुडक्थु, मुर साइक्बु हना, मेको मुर साइक्ब मुर मेकेर प्रोक्ने चाब्ब।

12 मेको सहरपुकी क्येक्क लेप्ब आन क्येडा ब्रोंडशा बाक्तीक सहर दुम्ब। मिनु मेको मुर साइक्ब मेको सहर डा मुर आन दातेमी निसाफ पचा पुंडसीचा डोंडती साइक्चा मपुंडसेक्ल।

13 मिनु इन योत्रशो ब्रोंडशा बाक्तीक सहर ६ ओटा दुम्चा माल्नीम।

14 गे यर्दन खोला आ ओंथ हांबुमी सां नु कनान रागीमी सां सहर ब्रोंडशा बाक्चा कली तिल्चा माल्नीनी।

15 मेको ६ ओटा सहर इस्राएली, आन दातेम बाक्ब अर्को रागी डा मुर नु लां गाक्ब मुर आन कली ब्रोंडशा बाक्तीक सहर दुम्ब। मोपा मतुडक्थु मुर साइक्ब मुर मेकेर प्रोक्शा लशा बाक्ने चाप्नीम।

### मुर साइक्चा आ पर्वम ब्यवस्था १९:४-१३

16 सुइमी फलाम के मारेइमी आप्शा, मुर साइक्तु हना, मेको मुर साइक्ब बाक्ब। मेको मुर साइक्ब कली साइक्चान माल्ब।

17 सुइ मुरुमी मुर आन कली फुल्लु आप्शा साइक्तु हना, मेको मुर साइक्ब बाक्ब। मेको मुर साइक्ब कली साइक्चान माल्ब।

18 सुइमी मुर कली शीम तुप्शा साइक्तु हना, मेको मुर साइक्ब बाक्ब। मेको मुर साइक्ब कली साइक्चान माल्ब।

19 मेको क्येक्क लेप्बमी मेको मुर साइक्ब कली साइक्चा माल्ब। मेको कली गुमानुन, मेको कली साइक्चा माल्ब।

20 मिनु सुइमी मुर कली काइ मदाक्थु नेप्शा, मार मार आप्शा कि लांम बाप्शा साइक्तु हना,

21 गुइम तुप्शा साइक्तु हना, मेको मुर कली साइक्चा माल्ब। मेको मुर साइक्ब बाक्ब। मेको क्येक्क लेप्बमी मेको मुर साइक्ब कली गुमानु, मेको कली साइक्चा माल्ब।

22 तन्न सुइमी मुर कली मगाइक्थु, मतुडक्थु, चुशा तोक्तु हना, कि मारेइ थोत्रक आबानु मेको कली ख्रशा बेक्त हना,

23 मेको आ वारचमी ठेयब फुल्लु ग्याइक्तानु, आ गुइ रे दोक्शा ख्रशा बेक्त हना,

24 मेको सहर डा मुरपुकीमी मेको मुर साइक्ब नु क्येक्क लेप्ब आस दातेमी निसाफ पचा माल्नीम।

25 मिनु मेको सहर डा मुरपुकीमी मेको मुर साइक्ब कली क्येक्क लेप्ब आ गुइ रे प्रोंडचा माल्नीम। मिनु नोले सहर डा मुरपुकीमी मेको मुर साइक्ब ब्रोंडशा बाक्तीक सहर सोइक्चा माल्नीम। मिनु मेको मुर साइक्ब तेल लुक्शो ठेयब चढेब मबेक्म सम्म मेकेर बाक्चा माल्ब। लेवी २१:१०

26 तन्न मेको मुर साइक्ब मेको आ ब्रोंडशा बाक्तीक सहर रे ग्रूत हना,

27 मिनु क्येक्क लेत्चा माल्ब मुरुमी मेको कली गुम्शा साइक्तु हना, मेको कली साइक्ब दोस मताइब।

28 मारदे हना मेको साइक्ब ठेयब चढेब मबेक्म सम्म मेको ब्रोंडशा बाक्तीक सहरम बाक्चा माल्ब। तन्न ठेयब चढेब बेक्म नोले ला मेको आ रू खिंम लेत्ने चाप्ब।

29 मिनु मेको गेना हना यो परमप्रभु यावेमी इन कली फुल्लुम मुशा ब्रेक्शो नु आ शेंशो लोत्र बाक्ब। मिनु गेपुकी ते बाक्तीनी हना यो, इन तौ चच युइ नेल्ल पाला डा मुरुमी पचा माल्नीम।

30 सुइम सुइ आन कली साइक्तु हना, मेको मुर साइक्ब कली सांकळी आन लोत्र नेंशा ला साइक्चा माल्ब। तन्न सांकळी का आ लोत्र नेंशा ला मेको कली मसाइक्चा। ब्यवस्था १७:६; ब्यवस्था १९:५

31 गेपुकी साइक्चा पुंडसीब मुर प्रोंडचा कली मेको आ पा डा क्येट मताक्कीन। मेको मुर साइक्ब कली साइक्चा माल्ब। भजन संग्रह ४९:८-९

32 ब्रोंडशा बाक्तीक सहरम प्रोक्शो मुर, ठेयब चढेब मबेक्थु, आ खिं रू लेत्चा गेचा कली गे क्येट मताक्कीन। ठेयब चढेब मबेक्म सम्म मेको आ खिं रूमी लेत्चा मताइब।

33 मिनु गेपुकीमी इन बाक्तीक रागी ग्रॉग्रा दिशो मसेलीन। मारदे हना रागी हुशेम ग्रॉग्रा दिशो सेल्ब। मिनु मेको ग्रॉग्रा मदिशो सेल्ने मचाप्नीम। हुश ख्राक्श पोक्ब कली साइक्शा ला मेको रागी ग्रॉग्रा मदिशो सेल्ने चाम्सीब।

34 गे इन बाक्शो रागी ग्रॉग्रा दिशो मसेलीन। गो यो मेकेर बाक्नुड। मारदे हना गो परमप्रभु यावे इस्राएली आन दातेमी बाक्नुड' दे इस्राएली आन कली देनो" देत। लेवी १८:२४-२८; प्रस्थान २९:४५

## 36

सेलोफेहाद आ तमी आन थेरशो रू तशो  
गन्ती २७:१-११

1 योसेफ आ युड, मनस्से आ चच माकीर आ तौ गिलाद आ खिं खिं डा योसेफ आ थर का डा ठेयब मुरपुकी, मोसा नु इस्राएली आन थर थर डा ठेयब मुर आन डोंडती जाक्तेकम।

2 मिनु मेकोपुकीमी “परमप्रभु यावेमी आंड होवप, इन कली इस्राएली आन कली रागी योक्शा गेचा, दे अरेशो बाक्त। मिनु आंड लोकब सेलोफेहाद आ शोंप चहिं मेको आ तमी आन कली गेचा माल्ब, दे परमप्रभु यावेमी अरेशो बाक्त। गन्ती २६:५५

3 तन्न मेको मीश आलपुकीम इस्राएली आन अरु थर डा मुर नु ग्युंवे पाम्तेकम हना, मेको आन शोंप वोंडश मुर आन शोंपोम तेम्सीब। मोपा मेको आन भाग आंड किकी पिपी आन रागी रे जाम्शा लाइब।

4 मिनु प्रोंडतीक बर्स जाकमेनु, मेको मीश मुर आन रू यो ग्युंवे पा लाइब मुर आन रूम तेम्सीब। मोपा गो आंड थर रागी रे जाम्शा लाइब” दैतेकम। लेवी २५:१०-१३

5 मिनु परमप्रभु यावेमी मोसा कली अरेशो खोदेशो पा मोसामी इस्राएली आन कली “योसेफ आ तौ आन थर डा मुर आन देशो लोव्र थमा बाक्ब।

6 परमप्रभु यावेमी सेलोफेहाद आ तमी आन पर्बम अरेशो मार बाक्त देशा हना, मेकोपुकीमी आन दाक्शो वोंडश आल ग्युंवे पने चाप्नीम। तन्न आन आफ आ खिं खिं डा मुर नु ला ग्युंवे पने चाप्नीम।

7 मो दुम्मेनु इस्राएली आन रागी थर का रे अर्को थरम मयाक्सीब। मारदे हना इस्राएली नेल्ल आन किकी पिपी आन रागीम बाक्चा माल्नीम।

8 सुइ मीश आल आ आफ आ शोंप तशो बाक्त हना, मेकोमी आ आफ आ खिं खिं डा मुर का ग्युंवे पचा माल्ब। मोपा इस्राएली नेल्ले आन किकी पिपी आन थर डा रागी लीब।

9 मिनु इस्राएली आन रागी थर का रे अर्को थरम याक्चा मदुम्ब। मोपा इस्राएली नेल्ल आन आंम रागीम बाक्चा ताइनीम” दैत।

10 सेलोफेहाद आ तमीपुकीमी परमप्रभु यावेमी मोसा कली अरेशो खोदेशो पा पाम्तेकम।

11 सेलोफेहाद आ तमीपुकी महलाह, तिरचा, होग्ला, मिल्का नु नोआहमी आन आफ आ लोकब आन तौपुकी नु ग्युंवे पाम्तेकम। गन्ती २६:२९-३४

12 मेकोपुकीमी योसेफ आ तौ मनस्से आ थर डा मुरपुकी नु ग्युंवे पाम्तेकम। मोपा मेको आन शोंप आन थर नु आन आफ आ खिं खिं डा मुर नु लीत।

13 एको परमप्रभु यावेमी मोसा कली शेंतीके नु ठीक पतीके लोव्र बाक्ब। मिनु मोसामी इस्राएली आन कली नेल्ल अरेशो बाक्ब। मेना मेकोपुकी यर्दन खोला आ शुंडच, मोआब डा दिममी यरीको आ नेक्था बाक्तेकम।

## ब्यवस्था

**ब्रेक्ब मुर:** एको किताब यो मोसा आ ब्रेक्शो बाक्ब। मोसा परमप्रभु आ अरेशो लोत्र ब्रेक्ब नु कुम्सो सेल्ब बाक्त। ब्यवस्था ३१:९, २२, २४ मोसा बेक्म नोले अरु मुरपुकीम ब्रेक्शो बाक्तेक्म। का निकशीम “यहोसुम ब्रेक्शो बाक्ब” देंनीम। मोसामी डांडा डोडक्चा क्येडा डोंडती आंमा ब्रेक्शो बाक्ब, दे यो मिम्नीम।

**गेना ब्रेक्शो:** एको किताब इस्राएलीपुकी गोरशो रागीम हिरशा ४० बर्स ११ महिना डा डोंडती नाक्त रे ३० नाक्त सम्म डा ब्रेक्स बाक्ब। मोसामी आ बेक्चा क्येडा डोंडती ब्रेक्शो कि ब्रेक्पाइश्शो बाक्त।

**मार ब्रेक्शो:** एको किताब परमप्रभु आ अरेशो लोत्र लेंशा शेंतीक ला ममाड, परमप्रभु आ रेंशो नेल्ल टिचा आ पबर्म लोत्र बाक्ब। एको नेल्ल मोसा आ पशो लोत्र बाक्ब।

होरेब रे कादेश सम्म गाक्शो

1 मोसामी एको ब्रेक्शो लोत्र इस्राएली नेल्ल आन कली शेंशो बाक्ब। मिनु मेना मेकोपुकी सुफ माइश्शो दिंम आ ओंथ हांबुम बाक्तेक्म। मेको बाक्तीके अराबाहम, पारान, तोफेल, लाबान, हसेरोथ नु दी-साहाब आन दातेमी यर्दन खोला आइक्ची हांबु डा रागीम बाक्ब।

2 होरेब रे पा कादेश-बारनेआ सम्म, सेइर डा लां रे लचा कली ११ नाक्त माल्ब।

3 मिनु परमप्रभु यावेमी मोसा कली मार मार शेंदा, मेको मोसामी ४० बर्स नु ११ महिना डा डोंडती डा नाक्तीमी मेको इस्राएली नेल्ल आन कली शेंताक्ब। गन्ती ३३:३८

4 डोंडती मेकोपुकीमी हेश्बोन डा एमोरी आन पिप सीहोन नु अशतारोथ नु एद्रेइ सहरम बाक्ब बाशान डा पिप ओग नु लडाइ पा ग्रातेक्म। गन्ती २१:२१-३५

5 मिनु यर्दन खोला आइक्ची हांबुम, मोआब रागीम बाक्शा, मोसामी परमप्रभु यावे आ अरेशो लोत्र शेंचा गोप्तु।

6 मिनु मोसामी “होरेब डांडाम बाक्शो परमप्रभु यावे, इ परमप्रभुमी ‘गेपुकी एको पहाडम शुश नाक्त बाक्तीनी। गन्ती १०:११-१२

7 मुल गे गाक्चा गोने। कनानी आन रागी लने। एमोरी आन पहाड नु दिंम लने। मेको आ नेक्था डा अराबाह माइक्तीके यो लने। मेको पहाड बाक्ब। मेको शेफेलाह, नेगेब नु समुन्द्र आ नेक्था डा कनानी आन रागी बाक्ब। गे लेबानोन नु युफ्रेटीस माइश्शो ठेयब खोला सम्म लने’ देंत।

8 मिनु लेंशा परमप्रभु यावेमी ‘कोव्रडीन, मेको रागी इन डोंडती बाक्ब। मेकेर ओव्रशा, मेको रागी आंम के सेलीन। मारदे हना गो मेको रागी इन किकी पिपी अब्राहाम, इसहाक, याकूब नु आन चच युड आन कली गेनुड’ दे कसम जाता” देंत। उत्पत्ती १२:७; गन्ती ११:१४

मोसामी निसाफ पाइब वोइश्शो

9 मिनु गो इन कली “गो आं का ला इन कली कोव्रने मचाप्नुड। प्रस्थान १८:१८

10 मिनु परमप्रभु यावे, इन परमप्रभुमी इन कली शुश सेल्शा, गे मुल सरीड डा सोरुल खोदेंशो पा शुश दुम्शो बाक्तीनी। ब्यवस्था १०:२२; उत्पत्ती १५:५

11 परमप्रभु यावे, इन किकी पिपी आन परमप्रभुमी इन कली का का पा हजार क्येडा शुश सेलल। आ रेंशो खोदेंशो पा इन कली आसीक गेवल।

12 दोपा गो का ला इन श्येत तशा, इन जिशो खेशो नेल्ल गारपाइक्ने चाप्नुडा डा?

13 मिनु गे इन थर थर रे निप्स पाइश्शो, लोत्र रुप्ब नु मारेइ मारेइ तुइक्ब मुर योव्रडीन। मिनु गो मेको आन कली इन कली कोव्रब सेल्नुड।

14 मिनु गेपुकीमी आं कली ‘इन रेंशो लोत्र रिम्शो बाक्ब’ देंतीनी।

15 मोपतीके गो इन थर डा निप्स पाइश्शो, तुइक्ब नु ठेयब मुरपुकी योव्रशा, इन कली कोव्रब सेल्ता। मिनु इन थर थर डा हजार का, सहे का, ५० नु १० जना मुर आन कली का का पा कोव्रब ठेयब मुरपुकी सेल्ताक्मी। आंम इन थर थर डा मुरपुकी यो योव्रताक्मी। प्रस्थान १८:२५



16 मेना गो इन कली निसाफ पाइब आन कली 'इन लोकब आन दातेमी जिशो खेशो रिम्शो पा नेशा, ठीक पा निसाफ पने। इस्राएली नु रागी डा मुर जिशो यो नेल्ल आन कली ठीक पा निसाफ पने। लेवी १९:१५

17 निसाफ पनीनु, मुर आन कुल मकोवडीन। गेपुकीमी आइक्च नु ठेयब मुर, नेल्ल आन लोत्र नेनीन। सुइ कली महिनीन। मारदे हना निसाफ परमप्रभु आ गुडमी बाक्ब। इन मचाप्शो निसाफ चहिं गो नेनुड। मेको कली आं बाक्तीक चाक्कीन' दे माइक्ताकमी। ब्यवस्था १६:१९; २इतिहास १९:६-७; प्रस्थान २१:६

18 मेना गो इन पचा माल्शो गेय नेल्ल अरेतन्नी।

### मोसामी क्यारी पाइब सोइश्शो

19 मिनु नोले परमप्रभु यावे, इं परमप्रभुमी देशो खोदेशो पा गोपुकी होरेब डांडा रे पा एमोरी आन बाक्तीक पहाड लाइतक। गोपुकी एको हिंचा डा ठेयब गोरशो रागी लकानु, गे मेको नेल्ल तुइक्नीनी। मोपा गो कादेश-बारनेआम जाक्तक। गन्ती २०:१

20 मिनु गो इन कली 'परमप्रभु यावे, इं परमप्रभुमी इं कली गेशो एमोरी आन पहाड रागीमी जाक्तीनी।

21 कोवडीन, परमप्रभु यावे, इन परमप्रभुमी एको रागी इन कली गेशो बाक्त। मिनु परमप्रभु यावे, इन किकी पिपी आन परमप्रभुमी देशो खोदेशो पा मेकेर इर लशा, आंम के सेलीन। गोपुकी महिनीन। सुर्ता मपने' देती।

22 मिनु गे नेल्लेमी आं कली 'मेको रागी डा मारेड मारेड तुइक्चा कली आंइ डोंइती क्यारी पाइबपुकी सोइक्तीन। मेकोपुकीम तेको लां गाक्चा नु तेको सहर जाक्दीत्नीकी, दे शेने चाप्नीमी' देतीनी। गन्ती १३:२

23 मिनु गो मेको लोत्र ठीक लाक्ती। गो इन थर थर डा का का पा १२ जना मुर योव्रताकमी।

24 मिनु मेकोपुकी पहाड गे लशा, एश्कोल डा दिंम जाक्दीश्शा, क्यारी पथ लांमतेकम।

25 मिनु मेकोपुकीमी मेको रागी डा फल फुल कुरशा चाक्शा, आंइ कली 'परमप्रभु यावे, इं परमप्रभुमी गेशो रागी शुश रिम्शो बाक्ब' देतेकम।

### इस्राएलीपुकीमी मटिशो

26 तन्न गेपुकी परमप्रभु यावे, इन परमप्रभुमी देशो मटिशु, मेको रागी लचा मबिस्सीनी।

27 मिनु गे इन बाक्तीक ताम्बुमी गन गन पा 'परमप्रभु यावेमी आंइ कली मदाक्तीके नु एमोरी आन गुड रे पा साइक्पाइक्चा कली आंइ कली इजीप्त रे गुंइशा, एक चाक्शो बाक्ब। गन्ती १४:-

28 मारदे मेकेर लचा? मेको क्यारी पाइबपुकीमी आंइ कली मेकेर डा मुरपुकी आंइ क्येडा लाइश्शो नु बोल्यो बाक्नीम। मेको आन सहर आन गारो सरीड थिचा डा पा लाइश्शो बाक्नीम। मिनु मेकेर गोपुकीमी अनाकीम डा मुर यो ताइतक, दे हिंच कोंइताकम' दे गन गन पाइतीनी। ब्यवस्था ९:१-२; गन्ती १३:३३

29 मिनु गो इन कली हिंशा, खिंखि मपने। मेको आन कली तशा महिनीन। प्रस्थान १४:१४-२५; यहोसु १०:१४

30 इन डोंइती गाक्ब, परमप्रभु यावे, इन परमप्रभुमी इन पा डा लडाइ पाइब। दोपा इजीप्त रागीमी इन डोंइती मार मार पवा, मोपा पाइब।

31 मिनु गोरशो रागीम गेपुकी गाक्नीनु, आफोम आ तौ कली कुरशो खोदेशो पा, परमप्रभु यावे, इन परमप्रभुमी इन कली एक जाक्की सम्म कुरशो बाक्त। गे आंमा तुइक्नीनी। ब्यवस्था ८:५; प्रस्थान १९:४

32 मोदेशो दुन्त हना यो गे परमप्रभु यावे, इन परमप्रभु कली थमा मसुइक्नी।

33 मेको इन डोंइती इन कली बाक्तीके कोंइथ गाक्त हना यो, गे थमा मसुइक्नी। मिनु लां कोंइचा कली नाक्दोम मी नु नाक्तीम गोस्स दुम्शा इन कली लां कोंइताक्व। प्रस्थान १३:२१

### थमा मसुइक्ब सजाइ तशो

34 मिनु परमप्रभु यावेमी इन रेयके पा लोत्र पशो नेशा गाइश्शा

35 'एको मरिम्शो मुर आन दातेमी मुर का ला मेको आन किकी पिपी आन कली गेशो रिम्शो रागी लचा ताइब। गन्ती १४:२३-२४

36 मेको यपुन्ने आ तौ कालेब बाक्ब। मेको नु आ तौ चचम मेको आ थेक्शो रागी ताइनीम। मारदे हना मेकोमी आं कली, परमप्रभु यावे कली थमा पा नोले खोइशशो बाक्त' दे कसम जशा देंत।

37 मिनु परमप्रभु यावेमी इन पशो तशा, आं पबर्म यो गाइक्ताक्व। मिनु मेकोमी आं कली 'गे यो मेको रागी ओव्रचा मताइनेवे। गन्ती २०:१२

38 इ के गेय पाइब नून आ तौ यहोसु चहिं ओव्रचा ताइब। गे मेको आ थुं बारपाइक्चा माल्लेवे। मारदे हना यहोसुमी इस्राएली आन कली मेको रागी योक्शा गेचा माल्ल' दे परमप्रभुमी कसम जशा देंत। गन्ती ३४:१७

39 मिनु गेपुकीमी इन आल ब्रेप्य आन पबर्म 'मेको गोरशो रागीमी बेक्नीम' देंतीनी। तन्न मेकोपुकी ओव्रचा ताइनीम। इन आइक्च तौपुकी ओव्रचा ताइनीम। मेको रागी मेको आन कली गेनुड। मिनु मेकोपुकीमी मेको रागी आंम के सेल्नीम।

40 मिनु गेपुकी चहिं लेशशा गोरशो रागी लल समुन्द्र गे लने। गन्ती १४:२५

41 मिनु गेपुकीमी आं कली 'गे परमप्रभु यावे कली पाप पाइतक। परमप्रभु यावे, इ परमप्रभुमी शेशो खोदेशो पा गो लडाइ पथ लाइनीकी' देंतीनी। मिनु गे नेल्ले इन या पिम्साक्नी। मिनु गो ग्रानीक, दे मिम्शा, पहाडी रागी कली लडाइ तोचा, दे ग्येत्थ लाइतीनी। गन्ती १४:४०

42 मिनु परमप्रभु यावेमी आं कली 'गेपुकी इन जोरी सत्रु रे ब्रुइनीनी, गे मेको डांडा डोइशशा मलने। लडाइ मपने। मारदे हना गो इन दातेमी मबाक्शो बाक्नुड, दे मेको आन कली माइक्मी' देंत।

43 मिनु गो इन कली मेको लोव्र पाता। तन्न गेपुकीमी नेंसीन मनेंनी। टेयब लेशशा, परमप्रभु यावे आ लोव्र मबित्थु मटिथु, गे डांडा डोंइसाक्नी।

44 मिनु मेको डांडाम बाक्ब एमोरीपुकीमी गेपुकी नु लडाइ पांमतेक्म। मिनु मेकोपुकीमी सुरब आन हूल खोदेशो पा इन कली खेदा पांमतेक्म। मिनु सेडर नु होरमा सम्म खेदा पा इन कली फ्रुमतेक्म। गन्ती १४:४५

45 मिनु गेपुकी लेशशा जाक्शा, परमप्रभु यावे आ डोंइती डाक्तीनी। तन्न मेकोमी इन डाक्शो मनेन। इन पुंइशो लोव्र यो मगेवो।

46 मिनु नोले गे शुश नाक्त कादेशम बाक्तीनी। ब्यवस्था २:१४

## 2

### इस्राएलीपुकी गाक्शो

1 मिनु परमप्रभु यावेमी आं कली देशो खोदेशो पा गोपुकी गोरशो रागी लल समुन्द्र गे लाइतक। मिनु शुश नाक्त सम्म सेडर डांडा हिरना हिरन बाक्तक। गन्ती २१:४

2 मिनु परमप्रभु यावेमी आं कली

3 'गेपुकी शुश नाक्ती एको डांडा कली हिरना हिरन बाक्तीनी। मुल उत्तर गे लने।

4 गे मुर आन कली मुल गे सेडरम बाक्ब, इन लोकबपुकी एसाव आ चच युइ आन रागी लाइनीनी। मेकोपुकी इन कली तशा हिनीम। मिनु गेपुकी होस पचा माल्लीनी। गन्ती २०:१४

5 मेकोपुकी नु काइ मजिने। मारदे हना गो मेको आन रागी रे इन कली खोइल थेक्तीक खोमो रू यो मगेनुड। गो सेडर पहाड एसाव कली गेशो बाक्नुड। उत्पत्ती ३६:८

6 मिनु इन माल्लो जचा थोव्रक मेको आन के ग्याप्शा ला जने। ब्वाक्कु यो मेको आन के ग्याप्शा तूडीन।

7 मारदे हना परमप्रभु यावे, इन परमप्रभुमी इन पशो नेल्लेमी इन कली आसीक गेशो बाक्ब। गेपुकी मेको टेयब गोरशो रागीम गाक्नीनु, इन कली कोव्रतु। मिनु परमप्रभु यावे, इन परमप्रभु ४० बर्स सम्म गेपुकी नु बाक्त। इन माल्लो नेल्ल ताइतीनी' दे परमप्रभुमी देंत। गन्ती १४:३३

8 मिनू गो, सेडरम बाक्ब एसाव आ चच युइ, आंड लोकब आन बाक्तीक दिम डा अराबाह डा लां रे पा एलाथ नु एस्योन-गेबेर रे मगाक्थु, गो मोआब डा गोरशो रागी गे लाइतक।

9 मिनू परमप्रभु यावेमी आं कली 'मोआब नु लडाइ मपने। मेकोपुकी नु काइ मजिने। मेको रागी इ कली मगेनन। मारदे हना गो आर सहर लोत नु आ चच युइ आन कली गेता। उत्पत्ती १९:३६-३७

10 मिनू डोंइती मेकेर एमीमपुकी बाक्तेकम। मेको शुश नु लाइशशो मुर बाक्तेकम। अनाकीम डा मुर खोदेशो शुश लाइशशो कोल्शो मुर बाक्तेकम। ब्यवस्था १:२८

11 मिनू अनाकीम डा मुर आन कली खोदेशो पा रेफाइम माइशशो मुरपुकी शुश कोल्शो मुर देंनीम। मिनू मोआबीम मेको आन कली एमीम देंनीम।

12 डोंइती होरीपुकी यो सेडरम बाक्शो बाक्तेकम। मिनू नोले एसाव आ मुरपुकीम मेको आन कली साइशशा, मेको आन रागीम बाक्तेकम। परमप्रभु यावेमी इस्राएली आन कली गेशो रागी मेकोपुकीम आंम के सेल्शो खोदेशो पा, मोआब डा मुरपुकीमी मेको रागी आंम के सेल्शो बाक्तेकम' देंत। उत्पत्ती १४:६

13 मिनू नोले परमप्रभुमी 'गेपुकी जेरेद खोल्सा शोक्सीन' देंत। मिनू गो जेरेद खोल्सा शोक्साक्क। गन्ती २१:१२

14 मिनू डोंइती परमप्रभु यावेमी कसम जशो खोदेशो पा कादेश-बारनेआ रे जेरेद खोल्सा आइक्की हांबु सम्म जाक्चा नु लडाइ पाइब नेल्ल मनुम्मा सम्म आंड कली ३८ बर्स माल्ताक्व। गन्ती १४:३४

15 थमा पा परमप्रभु यावेमी मेको लडाइ पाइब आन कली आंमान क्याम्ताक्व। गन्ती १६:३१-३२; गन्ती २१:६; गन्ती २५:३-५

16 मिनू मुर आन दाते डा लडाइ पाइब नेल्ल बेक्ने थुम्मे नोले

17 परमप्रभु यावेमी आं कली

18 गे मुलाक्त मोआब डा सांद आर सहर लाक्शा, लचा माल्नीनी। गन्ती २१:१३,१५

19 मिनू गे अम्मोनी आन रागी जाक्दील्नीनी। मेको नु लडाइ मपने। काइ मजिने। मारदे हना अम्मोनी आन रागी इन कली मगेनुड। मेको लोत नु आ चच युइ आन कली गेतामी। उत्पत्ती १९:३८

20 मेको रागी यो लाइशशो कोल्शो मुर आन रागी बाक्त। डोंइती मेकेर रेफाइम माइशशो मुर बाक्तेकम। तन्न अम्मोनीपुकीमी मेको आन कली जाम्जुम्मीम देंनीम।

21 मेको शुश दुश्शो नु लाइशशो अनाकीम डा मुर खोदेशो बाक्तेकम। मिनू परमप्रभु यावेमी मेको आन कली अम्मोनी आन डोंइती खतम सेल्लु। मिनू मेको नेल्ल आन कली खेरशा, अम्मोनी मेको आन बाक्तीकेम बाक्तेकम।

22 परमप्रभुम सेडरम बाक्ब एसाव आ खिं खिं डा मुर आन पबंम यो मोदेशोन पाप्तु। मेको आन डोंइती होरी आन कली खतम सेल्लु। मिनू होरी नेल्ल आन कली खेरशा, मुल सम्म एसाव आ खिं खिं डा मुर मेकेर बाक्नीम।

23 मिनू मेको मोदेशो पा गाजा डा काफ्तोर सहर रे जाक्शो काफ्तोरीपुकीमी आव्वीम सहर डा मुर आन कली साइक्तेकम। मिनू मेको आन बाक्तीकेमी बाक्तेकम' देंत। उत्पत्ती १०:१४; यहोसु १३:३

पिप सीहोन नु लडाइ पा ग्राशो

24 मिनू परमप्रभुमी 'बोक्कीन। गाक्चा गोने। मिनू अरनोन खोल्सा शोक्सीन। मारदे हना गो हेश्बोनम बाक्शो एमोरी आन पिप सीहोन नु आ रागी इन कली गेता। मेको इन के सेल्ना सेल्ल लडाइ पने।

25 मुलाक्त रे गो जात जात डा मुर नेल्ल आन कली इन लोव्र नेशा, इन क्येडा हिंशा, खिंखि पाइब सेल्लुडमी' देंत। प्रस्थान २३:२७

26 मिनू गो केदेमोथ माइशशो गोरशो रागी रे हेश्बोन डा पिप सीहोन नु दुचा गारचा आ पबंम मुरपुकी लोव्र पथ सोइक्ताक्डमी। गन्ती २१:२१-२६

27 मार लोव्र सोइक्ताक्डमी देशा हना 'आंड कली इन रागी रे लचा गेकी। गो एर ओथ मपथु, ठेयब लां खोइशशा गाक्नीकी।

28 गे जचा थोवक क्येत ताकशा आंड कली लेयडीन। ब्वाक्कु यो क्येत ताकशा गेकी। आंड कली गाक्तीक लां ला गेकी।

29 मोपा सेडरम बाक्ब एसाव आ खिं खिं डा मुरपुकीमी नु आर सहरम बाक्ब मोआबी डा मुरपुकीमी गाक्चा गेम्तेक्म। परमप्रभु यावे, इं परमप्रभुमी गेशो यर्दन खोला आडक्ची हांबु डा रागी जाक्दीचा सम्म लां गेने' दैथ, मुरपुकी सोडक्ताक्डमी।

30 तन्न हेरबोन डा पिप सीहोनमी आंड कली गाक्तीक लां मगेव। मारदे हना परमप्रभु यावे, इन परमप्रभुमी इन पा डा लडाइ पा ग्राचा कली मेको आ थुं खकटा नु मटीब सेला बाक्त। मिनु मोदेशो दुम्त। प्रस्थान ४:२१

31 मिनु परमप्रभु यावेमी आं कली 'गो सीहोन नु आ रागी इन कली जिम्मा गेचा गोव्रता। मेको आ रागी लडाइ पा आंम के के सेलीन' दैत। यहोसु १०:१२; येरमीया २४:८; रोमी १:२४; रोमी ४:२५; ८:३२

32 मिनु सीहोन नु आ मुर नेल्ल गोपुकी नु लडाइ पथ याहास माडक्तीकेमी जाक्तेक्म।

33 मिनु परमप्रभु यावे, इं परमप्रभुमी मेको कली साडक्च, दे इं कली जिम्मा गेप्टु। मिनु गोपुकीमी मेको कली, मेको आ तौ नु मेको आ मुर नेल्ल आन कली साडक्तक।

34 मेना गो मेको आन सहर नेल्ल आंड के सेल्लतक। आन मुर नेल्ल कली साडक्तक। वोंइश मुर, मीश मुर नु आल नेल्ल साडक्तक। का कली यो मप्रोंइथु, नेल्ल आन कली साडक्तक।

35 गो आंड ग्राशो सहर डा मारेइ मारेइ आंम के सेल्ला, बी ब्यफ, क्यारश भेडा यो आंड कली वोंइसाक्क।

36 अरनोन खोल्ला डा दिंमम बाक्ब आरोएर सहर रे गिलाद सम्म आंड ग्राने मचाप्चा डा सहर कान मबाक्म। परमप्रभु यावे, इं परमप्रभुमी मेको नेल्ल आंड कली ग्राचा गेप्टु। यहोसु १३:९; २सामुएल २४:५

37 यब्बोक खोल्ला आ नेक्था बाक्ब अम्मोनी आन रागी, पहाड डा सहरपुकी नु परमप्रभु यावे, इं परमप्रभुमी इं कली मलचा देंशो रागी ला मलक।

### 3

#### पिप ओग कली ग्राशो

1 मिनु नोले गो बाशान ग्येत्थ लाइतक। मिनु बाशान डा पिप ओग नु आ मुर नेल्ले गोपुकी नु लडाइ पथ एट्रेडम जाक्तेक्म। गन्ती २१:३३-३५

2 मिनु परमप्रभु यावेमी आं कली 'मेको आन कली तशा महिनो। मारदे हना गो मेको नु आ मुर नेल्ल आन कली इन गुइमी गेता। मेको आ रागी नु आ मुरपुकी इन के दुम्त। मिनु गे हेरबोनम बाक्शो एमोरी आन पिप सीहोन कली खोदेशो पा मेको कली यो पने' दैत।

3 मिनु परमप्रभु यावे, इं परमप्रभुमी बाशान डा पिप ओग कली यो नु आ मुर नेल्ल आन कली इं गुइमी गेप्टु। मेकेर यो का कली यो मप्रोंइथु, नेल्ल आन कली साडक्तक।

4 मेना गो मेको आ सहर नेल्ल ग्रातक। का यो मली। बाशान डा ओग आ राज्यम अरगोब माइशो रागी नेल्ल पा ६० ओटा सहर ग्रातक।

5 मेको सहर नेल्ले लाइशो गारो हिरशो बाक्तेक्म। मेको गारो डा ठेयब लाप्यो आग्लो पाइशो बाक्तेक्म। मेको प्रोंइशा, अरु गारो महिरशो शुश गाउं यो ग्रातक।

6 मिनु हेरबोन डा पिप सीहोन कली खोदेशो पा मेको सहर डा वोंइश मुर, मीश मुर नु आल नेल्ल साडक्तक।

7 मिनु बी ब्यफ, क्यारश भेडा नु सहर डा मारेइ मारेइ आंड कली वोंइसाक्क। ब्यवस्था २०:१३-१८

8 मोपा गो यर्दन ओंथ हांबु डा एमोरी पिप निक्शी आस रागी ग्रातक। अरनोन खोल्ला रे हेरमोन डांडा सम्म डा रागी ग्रातक। ब्यवस्था ४:४८; १इतिहास ५:२३; भजन संग्रह २९:६

9 सीदोनीपुकीमी हेरमोन डांडा कली सिरियोन नु एमोरीपुकीमी सेनीर देंनीम।

10 गोपुकी दिंम डा सहर नेल्ले, गिलाद रागी नेल्ल, बाशान, साल्का नु एट्रेड सम्म, बाशानम बाक्शो ओग आ राज्य नेल्ल ग्रातक।

11 मिनु बाशान डा पिप ओग चहिं मेको लाइशो मुर, रेफाइम आन दातेमी नेल्ल क्येडा नोले साइक्या पुंडसाक्व। मिनु मेको आ फलाम के खाट मुल सम्म अम्मोनी आन सहर रब्बाहम बाक्ब। मेको खाट ९ कुबीत लाइशो नु ४ कुबीत ब्रेम्शो बाक्ब। कुबीत का आधा मिटर कि हात का खोदेशो बाक्ब।

यर्दन आ पूर्व डा रागी योक्शो

गन्ती ३२:-

12 मिनु मेना तेको तेको रागी आंइ के सेल्लतक देशा हना, अरनोन खोल्ला आ नेक्था दिंम बाक्शो आरोएर रे गिलाद पहाड आधा नु मेकेर डा सहरपुकी सम्म गो रूबेन आ थर नु गाद आ थर डा मुर आन कली गेतामी।

13 गिलाद डा लीशो, ओग आ राज्य, बाशान रागी नेल्ल, मनस्से आ उइक्थ थर डा मुर आन कली गेतामी। बाशान नु अरगोब रागी नेल्ल रेफाइम माइशो, लाइशो मुर आन रागी देनीम।

14 मनस्से आ युड याइरमी अरगोब डा रागी नेल्ल, गेशुरी नु माकाथी आन सांद सम्म लाइक्तु। मेको बाशान कली आ नें हव्वोथ-याइर चोइक्तु। मेको मुल सम्म बाक्ब।

15 मिनु गो माकीर कली गिलाद गेता।

16 मिनु गो रूबेन आ थर नु गाद आ थर डा मुर आन कली मार गेतामी देशा हना, गिलाद रे अरनोन खोल्ला आ दाते सम्म नु आ नेक्था डा दिंम यब्बोक खोल्ला सम्म गेतामी। मेको अम्मोनी आन सांद बाक्ब।

17 मिनु मेको अराबाह दिंम, यर्दन नु आ नेक्था डा किन्नेरेथ रे अराबाह समुन्द्र, मेको हिक्सी समुन्द्र यो देनीम, सम्म नां दाप्तीके डा पिस्गा डांडा रूबेन आ थर नु गाद आ थर डा मुर आन कली गेतामी। यहोसु ११:२; यहोसु १९:३५; मर्कूस ६:५३

रूबेन नु गाद आस कली लोत्र पशो

18 मेना गो इन कली ‘परमप्रभु यावे, इन परमप्रभुमी एको रागी इन के दुम्चा कली गेशो बाक्ब। मो हना यो इन दाते डा लडाइ पाइब वोंइश मुरपुकी इन या पिम्सीशा, इन लोक्ब इस्राएली आन डोंइती यर्दन खोला शोक्चा माल्नीनी।

19 मिनु इन मीश, इन आलपुकी नु इन बी ब्यफ, क्यारश भेडा गो इन कली गेशो सहरम ला बाक्चा ताइनीम। इन के बी ब्यफ, क्यारश भेडा शुश बाक्नीम, दे तुइक्नुड।

20 परमप्रभु यावेमी इन कली खोदेशो पा इन लोक्ब आन कली मनाइक्पदा सम्म मोदेशो दुम्चा माल्ब। मिनु परमप्रभु यावे, इन परमप्रभुमी यर्दन आइक्ची हांबु मेको आन कली गेशो रागी आंम के मसेल्मे सम्म गेपुकीमी मो पचा माल्नीनी। मिनु नोले गोम इन कली गेशो रागी लेशशा, जाक्ने चाप्नीनी’ दे माइक्मी” देत।

मोसामी परमप्रभु नु लोत्र पशो

21 मिनु मेना गो यहोसु कली “परमप्रभु यावे, इन परमप्रभुमी एको पिप निक्शी आस कली मार मार पवा, गे मेको नेल्ल ताप्तीवी। मुल गे आइक्ची हांबु शोक्सेनु, परमप्रभु यावेमी मेकेर डा राज्य नेल्ल आन कली यो मोदेशोन पाइब। गन्ती २७:१८-२२

22 मेको आन क्येडा महिनीन। मारदे हना परमप्रभु यावे, इन परमप्रभुमी इन पा डा लडाइ पाइब” दे माइक्ता। ब्यवस्था १:२९-३०

मोसामी परमप्रभु नु लोत्र पशो

23 मिनु मेना गो परमप्रभु यावे कली

24 “परमप्रभु, परमप्रभु यावे, गे इन गेय पाइब कली इन ठेयब पतीके नु सक्ति कोइचा गोइतीनी। मिनु स्वर्ग नु रागीम बाक्ब तेको प्रभु इन खोदेशो पा ठेयब पतीके नु सक्ति पाइशो गेय पने चाप्बा डा?

25 मेको यर्दन आइक्ची हांबु डा रिम्शो रागी, ठेयब पहाड नु लेबानोन तडल, दे आं कली यर्दन खोला आइक्ची हांबु शोक्चा गेयीनी” दे पुंडता।

26 तन्न इन पतीके परमप्रभु यावे गो नु गाइशो बाक्त। मिनु मेकोमी आं पुंडशो मनेन। मिनु परमप्रभु यावेमी आं कली “मुल रे एको आ परबम लोव्र मपावो। गन्ती २०:१२

27 गे पिस्मा डांडा डोइशशा, पच्छिम, उत्तर दक्खिन नु पूर्व गे कोवडो। मारदे हना गे यर्दन आइक्की हांबु शोक्चा मताइनेवे।

28 मिनु गे यहोसु कली अरेशा, लोव्र पा ठेयब थुं पाइशो सेलो। मारदे हना मेकोमी मुर आन डोंइती शोक्शा, इ तशो रागी मेको आन के दुम्चा कली योव्रब” दे परमप्रभुम आं कली देंत। ब्यवस्था ३१:३,७;

29 मिनु गोपुकी बेथ-पेओर आ डोंइती डा दिमम बाक्तक।

## 4

### लेंशा परमप्रभु आ लोव्र शेंशो

1 मिनु मोसामी “मिनु गे इस्राएली नेल्ले, गो इन कली परमप्रभु यावे आ फुल्लुम मुशा ब्रेक्शो लोव्र नु आ निसाफ पतीक लोव्र शेंनुड। इन नोफा दाइक्तीन। मिनु आ शेंशो पने। मेको पाइतीनी हना, गे ब्रोंइचा ताइनीनी। मिनु गे परमप्रभु यावे, इन किकी पिपी आन परमप्रभुमी इन कली गेशो रागी ओव्रचा नु इन के सेल्चा ताइनीनी।

2 मिनु गो इन कली परमप्रभु यावे, इन परमप्रभु आ लोव्र शेंशा ‘परमप्रभु आ शेंशो पचा माल्ब’ दे अरेनुड। गेपुकीमी आं शेंशो लोव्र कली का यो मतेम्दीन। का यो मशोलीने। ब्यवस्था १३:१; हितोपदेस ३०:६; प्रकाश २२:१८-१९

3 मिनु परमप्रभु यावेमी बाल-पेओर मूर्ति आ नोले खोइक्ब आन कली मार पवा, गे आंमा ताइतीनी। मिनु परमप्रभु यावे, इन परमप्रभुमी बाल-पेओर आ नोले खोइक्ब वोंइश मुर नेल्ल साइक्तु। गन्ती २५:३-९

4 गे परमप्रभु यावे, इन परमप्रभु कली आ नोले खोइक्बपुकी चहिं नेल्ल ब्रोंइशो बाक्नीनी।

5 मिनु परमप्रभु यावे, आं परमप्रभुमी आं कली अरेशो खोदेंशो पा, गो इन कली आ फुल्लुम मुशा ब्रेक्शो लोव्र नु आ निसाफ पतीक लोव्र शेंतान्नी। मारदे शेंतान्नी देंशा हना, गे जाक्शा इन के सेल्चा चिक्शो रागीमी मेको नेल्ल पचा, दे शेंतान्नी।

6 मोपतीके गेपुकीमी एको लोव्र होस पा, टिने। मेकोमी इन कली तुइक्ब नु रुप्ब मुर सेल्ब। मिनु जात जात डा मुरपुकी मेको फुल्लुम मुशा ब्रेक्शो लोव्र नेल्ल नेंशा, मेकोपुकीमी ‘मेको ठेयब जात डा मुर थमा पा तुइक्ब नु रुप्ब मुर बाक्नीम’ देंनीम। यसैया २:३

7 मिनु परमप्रभु यावे इं परमप्रभुमी आंइ नेक्था बाक्शो नु आंइ पुंडशो लोव्र नेंब खोदेंशो पा तेको अर्को ठेयब जात डा देवी देवताम मोदेंशो पाइनीमी? २सामुएल ७:२३

8 मुलाक्त गो इन कली परमप्रभु यावे आ अरेशो लोव्र नेल्ले नेंपाइक्नुड। मिनु तेको ठेयब जात डा मुर इं खोदेंशो रिम्शो पचा कली फुल्लुम मुशा ब्रेक्शो लोव्र नु निसाफ पतीक लोव्र नेंचा ताइनीमी। येरमीया ८:८

### परमप्रभु आ अरेशो लोव्र

9 इन आंम तशो इन थुंम वोइशशा, मप्रेंथु, होस पा बाक्कीन। गे ब्रोंइनी सम्म इन थुंम वोतीन। इन आल नु चच युइ आन आन कली शेंदीन। भजन संग्रह १०३:२

10 मिनु गेपुकी काबु परमप्रभु यावे, इन परमप्रभु आ डोंइती होरेब डांडा तार राष्शो बाक्तीनी, मेको मिम्तीन। मिनु परमप्रभु यावेमी आं कली मुर आन कली आं डोंइती पुक्मी। गो मेको आन कली आं लोव्र नेंपाइक्नुडमी। मिनु मेकोपुकी रागीम मबेक्मा सम्म आं कली मान पा हिंचा शेंसामल। मिनु मेकोपुकीमी एको लोव्र आन तमी तौ आन कली शेंचा माल्नीम” देंत। प्रस्थान १९:१७; ब्यवस्था ६:७

11 मिनु गे आ नेक्था जाक्शा, डांडा आ पुंम राप्तीनी। मेको डांडाम सरीड सम्म मी ब्रत। मिनु छिडछिड, ठेयब गोस्स नु नाक्दो खोदेंशो बाक्त।

12 मिनु परमप्रभु यावेमी मी आ दाते रे गेपुकी नु लोव्र पाप्तु। गे मेको आ लोव्र नेंतीनी, तन्न मारइ मतनी। ब्यवस्था ५:४,२४

13 मिनु मेकोमी गे नु कबल पाप्तु। आ अरेशो १० ओटा लोत्र गे टिशा पने, दे गेप्तु। मिनु मेकोमी मेको लोत्र फुल्लु निकशी तार मुशा गेप्तु। प्रस्थान ३१:१८

14 मिनु मेना परमप्रभु यावेमी आं कली “मेको आन कली आं फुल्लुम मुशा ब्रेकशो लोत्र नु निसाफ पतीक लोत्र शेंदो। नोले आन गाकशो आंम के सेल्शो रागीमी मेको लोत्र टिशा पचा, दे मेको लोत्र शेंदो” दे माइक्ती।

15 मिनु परमप्रभु यावेमी इन कली होरेब डांडाम मी रे लोत्र पवानु, गे मारेड मतनी।

16 मिनु गे इन कली मूर्ति सेल्शा, खतम मसेल्सीन। गे होस पा बाक्कीन। तेकोड वोइश मुर, मीश मुर, प्रस्थान २०:४

17 रागी डा बी ब्यफ, क्यारश भेडा, जन्तु सरीडम बेरब चिकब,

18 खपीम गाक्ब, ब्वाक्कुम बाक्ब डांड के मूर्ति काइ मसेलीन।

19 मिनु गे सरीड इर कोत्रशा, परमप्रभु यावे, इन परमप्रभुमी जात जात डा मुर नेल्ल आन कली गेशो नां, तास्ला, सोरुल नेल्ल तशा, मेको आन डोंडती सेउ पा पूजा मपने। होस पा बाक्कीन। ब्यवस्था १७:३; रोमी १:२३

20 परमप्रभु यावेमी इन कली आंम मुर सेल्चा, दे फलम चोतीके खोदेशो इजीप्त रागी रे गुंडताक्व। मोदेशो पा मुलाक्त बाक्ब, दे तुइक्नीनी। १राजा ८:५१; यसैया ४८:१०; येरमीया ११:४; प्रस्थान १९:५-६; यसैया १९:२५

21 मिनु परमप्रभु यावे इन पतीके, आं पबंम गाइक्ताक्व। मेकोमी आं कली “गे यर्दन खोला मशोक्थु, इस्राएली आन कली गेशो रिम्शो रागी लचा मताइनेवे” दे कसम जाप्तु। ब्यवस्था ३:२६

22 मिनु गो यर्दन खोला मशोक्थु, मुल बाक्शो रागीमी बेक्चा माल्नुड। तन्न गेपुकी यर्दन शोक्शा, मेको रिम्शो रागी इन के सेल्नीनी।

23 मिनु परमप्रभु यावे, इन परमप्रभुमी गे नु पशो कबल मप्रेक्थु, होस पा बाक्कीन। गे मप्रेथु परमप्रभु यावे, इन परमप्रभुमी देशो टिशा मारेड के मूर्ति मसेलीन।

24 मारदे हना परमप्रभु यावे, इन परमप्रभु ठेयब मी खोदेशो नु रुश पाइब परमप्रभु बाक्ब। ब्यवस्था ९:३; प्रस्थान २४:१७; यसैया १०:१७; हिब्रू १२:२९; प्रस्थान २०:५

### दूली पाइब परमप्रभु गे लेशो

25 मिनु गेपुकी मेको रागीमी शुश बर्स बाक्शा, तमी तौ, चच युइ थिशा बाक्नीनी। तन्न परमप्रभु यावे, इन परमप्रभुमी मदक्चा डा पा मारेड के मूर्ति सेल्शा, परमप्रभु यावे कली गाइक्पाइक्तीनी हना,

26 गो मुलाक्ती सरीड नु रागी कली इन दूली पशो आ पबंम सांकछी वोइक्नुड। गे यर्दन आइक्की हांबु डा इन के सेल्चा चिकशो रागीम रीब पा खतम दुम्नीनी। गे शुश नाक्त मेकेर बाक्चा मताइनीनी। गे क्याम्चा पुंडसीनीनी। ब्यवस्था ३०:१९; ब्यवस्था ३१:२८; ब्यवस्था ३२:१;

27 मिनु परमप्रभु यावेमी इन कली जात जात डा मुर आन दातेमी ब्रापाइक्ब। मिनु परमप्रभु यावेमी इन कली कोंडशो रागी रागी आन दातेमी इक्का ला लीनीनी।

28 मिनु गेपुकीमी मेकेर डा मुर आन सेल्शो शी के, फुल्लु के मताइब, मनेब, मजाइब नु मनाम्ब मूर्ति आन कली पूजा पाइनीनी। ब्यवस्था २८:३६; भजन संग्रह ११५:४-७

29 तन्न गे मेकेर बाक्शा, परमप्रभु यावे, इन परमप्रभु कली माल्नीनी। मिनु गे थमा पा इन थुं नेल्लेम माल्तीनी हना, गे मेको कली थिल्लीनी। भजन संग्रह २७:८; येरमीया २९:१३-१४

30 आं देशो लोत्र मोदेशो पा दुम्शा, श्येत जनीनु, गे नोले डा नाक्तीम परमप्रभु यावे, इन परमप्रभु गे लेत्नीनी। आं देशो लोत्र टीनीनी। ब्यवस्था ३०:२

31 मारदे हना परमप्रभु यावे, इन परमप्रभु, शिशी पाइब परमप्रभु बाक्ब। इन किकी पिपी नु कसम जशा पशो कबल मप्रेब। मेकोमी इन कली मप्रोंडथु, खतम मसेल्ब।

32 मिनु गे इन क्येडा डोंडती डा नाक्त मिम्तीन। परमप्रभुमी मुर नु रागी सेल्शो रे मुल सम्म ओदेशो ठेयब गेय पशो आ पबंम लोत्र नेंनी? तनी?

33 अरु सुइ मुरुम गे इन खोदेंशो पा परमप्रभुमी मी रे लोत्र पशो नेंन्मे?। मिनु गे नेंशा यो ब्रोंइशो बाक्नीनी। प्रस्थान २०:१,१९

34 मिनु तेको देवी देवतामी इन कली खोदेंशो पा शुश रागी आन दाते रे आंम मुर सेल्चा कली योत्रशो बाक्बा? मुर आन कली नाक्शा, चिनु कोंइशा, छक लाक्चा डा गेय पा, मेको आन पर्वम लडाइ पा, शुश हिंचा डा सक्तिमी, परमप्रभु यावे, इन परमप्रभुमी इन कली इजीप्त रागी रे गुंडशो गे ताइतीनी। ब्यवस्था ७:१९; ब्यवस्था २९:२

35 गे मारदे मेको ताइतीनी देंशा हना, परमप्रभु यावे, का ला परमप्रभु बाक्ब। मेको क्येडा लाक्शा अर्को परमप्रभु मबाक्ब, दे तुइक्पाइक्चा कली इन कली कोंइताक्व।

36 मिनु मेकोमी सरीड रे इन कली शेंचा, दे आ सेंदा नेंपाइक्व। मिनु खपीम इन कली आ ठेयब मी कोंइताक्व। गे मी आ दाते रे आ लोत्र पशो नेंतीनी। प्रस्थान २०:१,१८,२०

37 मिनु इन किकी पिपी आन कली दाक्तीके, आन चच युइ आन कली योत्रशा, मेकोमी आंमान आ ठेयब सक्तिमी इन कली इजीप्त रे गुंडताक्व। प्रस्थान ३३:१४

38 इन कली रागी गेचा, दे इन डोंइती इन क्येडा सक्ति पाइशो नु शुश मुर आन कली आन रागी रागी रे गुंडताक्व। मिनु गे रागी इन के सेल्चा कली ठीक दुश्शो बाक्नीनी। मोदेंशो मुलाक्ती बाक्ब, दे तुइक्नीनी।

39 मिनु गे मुलाक्ती परमप्रभु यावे, का ला सरीड नु रागी डा परमप्रभु बाक्ब। मेको डा लाक्शा अर्को सुइ परमप्रभु मबाक्ब। एको लोत्र गे मुलाक्ती थमा पा तुइक्तीन। मिनु इन थुंम लील।

40 मुलाक्त गो इन कली माइशो परमप्रभु यावे आ फुल्लुम मुशा ब्रेक्शो लोत्र नु आ शेंशो टिने। मो पाइतीनी हना, इन आल नु चच आन कली रिश्शो दुम्ब। मिनु परमप्रभु यावे, इन परमप्रभुमी इन कली गेना हना यो बाक्चा कली गेशो रागीम गे शुश नाक्ती बाक्चा ताइनीनी।

### मुर साइशशा प्रोक्तीक सहर

41 मिनु मोसामी यर्दन खोला नां दाप्तीक गे सहर सां योत्रतु। ब्यवस्था १९:२-१३; गन्ती ३५:६-२९

42 डोंइती मगाइक्मुशो, मतुइक्थु मुर का कली साइक्ब मुर मेकेर प्रोक्शा लने चाप्ब। मोदेंशो मुर मेको सहरम प्रोक्शा, ब्रोंइचा ताइब।

43 मोसामी रूबेन आ थर डा मुर आन कली गोरशो रागी डा दिंमम बेसेर सहर योत्रतु। गाद आ थर डा मुर आन कली गिलाद डा रामोथ सहर योत्रतु। मनस्से आ थर डा मुर आन कली बाशान डा गोलान सहर योत्रतु।

### परमप्रभु आ अरेशो मिम्पाइशो

44 मोसामी इस्राएली आन कली परमप्रभु यावे आ अरेशो लोत्र शेंताक्व।

45 मिनु मेको परमप्रभु यावे आ आ देंशो, आ फुल्लुम मुशा ब्रेक्शो लोत्र नु आ निसाफ पतीक लोत्र बाक्नीम। मोसामी मेको नेल्ल इस्राएली आन कली इजीप्त रे गुंडची ना शेंताक्व।

46 मिनु मेना मेकोपुकी यर्दन ओंथ हांबु, बेथ-पेओर आ डोंइती बाक्शो बेंसीम बाक्तेक्म। मेको डोंइती हेरबोनम बाक्शो सीहोन, एमोरी आन पिप आ रागी बाक्त। मेको रागी मोसा नु इस्राएलीपुकीमी इजीप्त रे गाक्मा नोले लडाइ पा ग्राशो बाक्तेक्म। गन्ती २१:२४

47 मेको रागी आंम के सेल्शा, बाशान डा पिप ओग आ रागी यो आंम के सेल्शो बाक्तेक्म। मेको निक्शी एमोरी आन पिप बाक्ताक्स। मेको रागी यर्दन ओंथ हांबु नां दाप्तीके गे बाक्त।

48 मेको रागी अरनोन खोल्सा आ नेक्था बाक्ब आरोएर सहर रे सिरीयोन माइशो, हेरमोन पहाड, ब्यवस्था ३:८-९

49 मिनु यर्दन आ ओंथ हांबु नां दाप्तीके गे अराबाह नेल्ल पिस्गा डांडा नु आ दिंमम अराबाह समुन्द्र माइशो, हिक्सी समुन्द्र सम्म इस्राएलीपुकीमी आंम रागी सेल्ने थुंमो बाक्तेक्म।



## 5

१० ओटा अरेशो लोव्र  
प्रस्थान २०:-

1 मिनु मोसामी इस्राएली नेल्ल आन कली ब्रेशा, मेको आन कली “इस्राएली नेनीन। परमप्रभु यावे आ फुल्लुम मुशा ब्रेकशो लोव्र नु आ निसाफ पतीक लोव्र नेनीन। मुलाक्ती गो मेको इन कली शेनुड। गे मेको लोव्र शेंसीशा, होस पने।

2 मिनु परमप्रभु यावे, ई परमप्रभुमी हारेब डांडाम गोपुकी नु कबल का पाप्तु। प्रस्थान १९:५

3 परमप्रभु यावेमी ई किंकी पिपी नु एको कबल मपथु, मुलाक्त एकेर बाक्शो गोपुकी नु पशो बाक्त। ब्यवस्था २९:१४

4 परमप्रभु यावेमी गो आंइ नेक्था डांडाम बाक्शो, मी आ दाते रे लोव्र पाप्तु। ब्यवस्था ५:२४

5 मारदे हना गे मी तशा हिंतीनी, डांडा मडोइसीनी। गो परमप्रभु यावे आ लोव्र इन कली शेंचा, दे परमप्रभु यावे नु इन दातेम, राप्शो बाक्ती” देंत।

6 मिनु परमप्रभुमी इन कली “वाइलीम वाइल दुम्शा बाक्शो इजीप्त रे गुंइशा एक चाक्ब, गो परमप्रभु यावे, इन परमप्रभु नड।

7 आं क्येडा लाक्शा सुइ देवी देवता आन कली ठेयब सेल्शा ममानेचा। ब्यवस्था ११:१६,२८

8 सरीडमी, रागीमी, रागी आ आगामी ब्वाक्कुम बाक्ब मारेइ जन्तु के गोपुकीमी आंम कली मूर्ति मसेल्सीन। ब्यवस्था २७:१५

9 मेको आन डोइती मबपीन। मेको आन कली पूजा मपने। मारदे हना गो परमप्रभु यावे, इन परमप्रभु रुश पाइब परमप्रभु नड। आ कली मटीब आम आफ बाक्ताक्स हना, मेको आ आल, चच, युइ नु युइ आन युइ सम्म सजाइ ताइनीम। ब्यवस्था ४:२४

10 मिनु सुम आं कली दाक्बा नु आं शेंशो लोव्र टीबा, मेको आन चच युइ आन हजार हजार पाला सम्म गेना हना यो दाक्नुडमी।

11 गे परमप्रभु यावे, इन परमप्रभु आ नें मो मथिने। मारदे हना सुमी परमप्रभु यावे आ नें मोशा थिप्ब, मेकोम पाप पाइब” देंत।

12 परमप्रभु यावे, इन परमप्रभुमी अरेशो खोदेशो पा नाइक्तीक नाक्ती परमप्रभु आ नाक्ती बाक्ब, दे नाइक्सीन।

13 ६ नाक्त गे इन गेय पने।

14 मिनु मेको आ नोले डा ७ नाक्ती चहिं परमप्रभु यावे, इन परमप्रभु आ नाइक्तीक नाक्त बाक्ब। मेको नाक्ती मारेइ गेय मपने। गे इन तमी तौ, वाइलीम वाइल, ब्यफ, गधा, क्यारश भेडा नेल्ल नु इन सहरम बाक्शो अर्को रागी डा मुर नेल्ल आन कली इन खोदेशो पा गेय मपपतीन।

15 मिनु गोपुकी इजीप्तमी वाइल दुम्तीके मप्रेदीन। परमप्रभु यावे, इन परमप्रभुमी शुश सक्ति पाइशो नु आ ठेयब बोल पतीकेमी इन कली गुंइशा, एक चाक्तु। मोपतीके परमप्रभु यावे, इन परमप्रभुमी इन कली नाइक्तीक नाक्ती नाइक्चा माल्ब, दे अरेशो बाक्ब। ब्यवस्था १५:१५; ब्यवस्था १६:१२; ब्यवस्था २४:१६,२२

16 परमप्रभु यावे, इन परमप्रभुमी अरेशो खोदेशो पा इन आंम आफ कली मान पने। मो पाइतीनी हना, परमप्रभु यावे, इन परमप्रभुमी इन कली गेशो रागीम रोइ मपथु, शुश नाक्त ब्रोइशा बाक्नीनी।

17 मुर मसाइक्चा।

18 आंम मीश क्येडा अरु नु मइप्चा।

19 खुइ मपचा।

20 आंम नेक्था डा मुर आन पबर्म जोल पा सांकछी मबाक्चा।

21 आंम नेक्था डा मुर आ खिं, आ मीश, आ रू, आ वाइलीम वाइल, आ बी ब्यफ, गधा मेको के मार बाक्त हना यो, मेको तशा मवाल्चा। मीका २:२

परमप्रभु आ लोव्र मिम्पाइशो

22 परमप्रभु यावेमी डांडाम नेल्ल इन कली एको लोत्र नेंपाइवतु। मेकोमी मी, गोस्स नु हिंचा डा छिडछिड खोदेशो पा आ दाते रे ठेयब सेंदामी इन कली लोत्र पाप्तु। मिनु मेकोमी मारेइ मतेम्द। मिनु नोले मेकोमी मेको अरेशो लोत्र फुल्लु निक्शीम ब्रेक्शा, गेती। प्रस्थान ३१:१८

23 मिनु गेपुकीमी डांडाम मी ब्रशो तशा, छिडछिड रे सेंदा नेंनीनु, गे इन थर थर डा ठेयब मुरपुकी नु खाल्पापुकी आं नेक्था जाक्तेक्म।

24 मिनु गेपुकीमी “परमप्रभु यावे, इं परमप्रभुमी इं कली आ ठेयब पतीके नु आ छेडछेड कोंइताक्व। मिनु गोपुकीमी मेको आ सेंदा मी आ दाते रे नेंतक। मुलाक्त मार ताइतक देंशा हना, परमप्रभुमी मुर नु लोत्र पाइब। मो हना यो मुर मबेक्म, दे ताइतक। ब्यवस्था ४:१२-१३, ३३

25 मुल गोपुकी एको ठेयब मीमी मारदे बेक्चा? गोपुकी मुल यो परमप्रभु यावे, इं परमप्रभु आ सेंदा नेंना नेंन बाक्तय हना, बेक्नय।

26 मिनु सु मुरुम इं खोदेशो पा ब्रोंइशा बाक्ब परमप्रभु आ सेंदा मी आ दाते रे पा नेंशा यो ब्रोंइशो बाक्बा?

27 गे आ नेक्था लने। मिनु परमप्रभु यावे, इं परमप्रभु आ देशो लोत्र नेंशा, आंइ कली नेल्ल शेंदीन। मिनु मेको नेंशा पाइनीकी” देंतीनी।

28 मिनु परमप्रभु यावेमी इन पशो लोत्र नेंतु। मिनु आं कली “मुरपुकीम इ कली देंशा लोत्र नेंता। आन देंशो नेल्ल रिम्शो बाक्ब।

29 आं कली मान पा हितेक्म हना, आं शेंशो गेना हना यो टिम्तेक्म हना, मेको नु आन आल आन कली गेना हना यो रिम्शो दुम्ब। ब्यवस्था २९:३

30 मेकेर लावो। मिनु मेको आन कली ‘इन ताम्बुम लेत्तीन’ दे माइक्मी।

31 तन्न गे आं नेक्था बाक्को। मिनु गेमी आं शेंशो नेल्ल, आं फुल्लुम मुशा ब्रेक्शो लोत्र नु आं निसाफ पतीक लोत्र इ कली देंनन। मिनु मेकोपुकीमी मेको आन कली गेशो रागीम मेको पचा माल्नीम” दे परमप्रभुम देंत।

32 मोपतीके इन परमप्रभु यावेमी इन कली शेंशो होस पा टिने। गेपुकी ग्युरा पेरा गे मलथु, आ लां खोतीन। ब्यवस्था ४:२; ब्यवस्था २८:१४; यहोसु १:७; हितोपदेस ४:२७

33 परमप्रभु यावे, इन परमप्रभुमी इन कली कोंइशो लां ठीक पा गाक्कीन। मो पाइतीनी हना, गे ब्रोंइनीनी, इन कली रिम्शो दुम्ब नु इन के सेल्चा चिक्शो रागीम शुश नाक्ती ब्रोंइनीनी।

## 6

नेल्ल क्येडा ठेयब अरेशो लोत्र

1 मिनु मोसामी “परमप्रभु यावेमी इन कली माइश्शो फुल्लुम मुशा ब्रेक्शो लोत्र नु निसाफ पतीक लोत्र बाक्ब। मिनु गो इन कली शेंचा माल्नुड, दे आं कली माइक्ती। गेपुकी मुल इन लशा, इन के सेल्चा चिक्शो रागीम बाक्नीनु, मेको पचा माल्नीनी।

2 गेपुकी मबेक्नी सम्म परमप्रभु यावे, इन परमप्रभु कली मान पा हिंचा माल्नीनी। गो इन कली माइश्शो परमप्रभु आ फुल्लुम मुशा ब्रेक्शो लोत्र नु आ शेंशो नेल्ले थुंम वोइक्चा माल्नीनी। गे, इन तौ नु इन चच युइ नेल्लेमी होस पा टिचा माल्नीमी। मो पाइतीनी हना, शुश नाक्त ब्रोंइनीनी।

3 मोपतीके इस्राएलीपुकी, इन नोफा दाइश्शा, एको पचा कली होस पा बाक्कीन। गे शुश सोशो बोशो दुम्शा इन कली रिम्शो दुम्ल। डोंइती परमप्रभु यावे, इन किकी पिपी आन परमप्रभुमी मेको आन कली मोदेशो पा लोत्र पाप्तु। मेको दूध नु खुदो शुश बाक्शो रागी इन के दुम्ब। लूका ११:२८

4 इस्राएलीपुकी, नोफा दाइश्शा, नेनीन। परमप्रभु यावे, का ला इं परमप्रभु बाक्ब। मर्कूस १२:२९; १कोरिन्थी ८:४-६

5 मिनु गेपुकी परमप्रभु यावे, इन परमप्रभु कली इन थुं नेल्लेमी, इन सोक्त नेल्लेमी नु इन बोल नेल्लेमी दाक्चा माल्नीनी। ब्यवस्था १०:१२; २राजा २२:२५; मती २२:३७

6 मिनु गो इन कली मुलाक्ती अरेशो लोत्र इन थुंम वोइक्चा माल्नीनी। ब्यवस्था ११:१८-२०

7 मिनु गेपुकीम मेको लोव्र इन आल आन कली शेंचा माल्नीनी। मिनु खिंम बाक्नीनु, लांम गाक्नीनु, इप्शा बाक्नीनु, बोक्नीनु, मेको अरेशो लोव्र आन पर्वम लोव्र पने। उत्पती १८:१९

8 मिनु मेको मिम्चा कली इन गुडम फ्रेंशा वोतीन। मेको इन कुप्फीम फ्रेंचा माल्नीनी। प्रस्थान १३:९; मती २३:५

9 मिनु मेको इन खिं डा थाम नु इन लाप्चोपुकीम ब्रेक्शा वोतीन।

10 मिनु डोंइती परमप्रभु यावे, इन परमप्रभुमी इन किकी पिप अब्राहाम, इसहाक नु याकूब आन कली 'मेको रागी इन चच युइ आन कली गेनुड' दे कसम जाप्टु। मुल मेकेर गे इन मसेल्शो ठेयब रिम्शो सहर,

11 इन मसेल्शो रिम्शो थोव्रकीम ब्रीशो खिं, इन मदोशो इनारपुकी, इन मखुम्शो अडगुर रू नु तेल रवा रू ताइनीनी। मिनु गे शुश जचा तूचा तशा, ब्यवस्था ८:३०

12 परमप्रभु यावे कली मप्रेंचा, दे होस पा बाक्कीन। मेकोमी इन कली इन वाइलीम वाइल दुम्शो इजीप्ट रे गुंडताक्व।

13 गेपुकी परमप्रभु यावे, इन परमप्रभु कली मान पा हिनीन। मेको कली गेय पने। मिनु मेको आ नेम ला कसम जने। ब्यवस्था १०:२०; मती ४:१०

14 गे इन एर ओंथ डा रागीम बाक्शो जात जात डा मुर आन देवी देवता आन नोले मखोतीन।

15 मारदे हना परमप्रभु यावे, इन परमप्रभु, रुश पाइब परमप्रभु इन दातेमी बाक्ब। मो पाइतीनी हना, परमप्रभु यावे, इन परमप्रभु इन पर्वम शुश गाइक्ब। मिनु मेकोमी इन कली रागी रे क्याम्ब। प्रस्थान २०:५

16 गेपुकीमी मास्साहमी परमप्रभु यावे, इन परमप्रभु कली नाक्शो खोदेशो पा, मेको कली मनाक्तीन। मती ४:७; प्रस्थान १७:२-७

17 गेपुकीमी परमप्रभु यावे, इन परमप्रभुमी इन कली माइश्शो आ शेंशो लोव्र, आ देशो नेल्ल नु आ फुल्लुम मुशा ब्रेक्शो लोव्र शुश होस पा पने।

18 मिनु परमप्रभु यावे आ डोंइती तेको ठीक नु रिम्शो बाक्बा, मेको पने। मोपा इन कली रिम्शो दुम्ब। मिनु परमप्रभु यावेमी इन किकी पिप नु कसम जशो, रिम्शो रागी इन के सेलीन।

19 मेको नोले परमप्रभु यावेमी देशो खोदेशो पा इन जोरी सत्रु नेल्ल आन कली इन डोंइती रे खेरब। प्रस्थान २३:२७-२८

### परमप्रभु आ ठेयब पतीके

20 मिनु नोले इन तौपुकीमी इन कली 'परमप्रभु यावे, इं परमप्रभुमी आ देशो लोव्र, आ फुल्लुम मुशा ब्रेक्शो लोव्र नु आ निसाफ पतीक लोव्र आन अर्थ मार में?' दे हिल्लो पाम्तेक्म हना, प्रस्थान १३:१४

21 गे मेको आन कली 'गो इजीप्ट डा पिप फाराओ आ वाइलीम वाइल बाक्तय। मिनु शुश सक्ति पाइश्शो परमप्रभु यावेमी मेक रे गुंडताक्व। भजन संग्रह ४४:२

22 मिनु परमप्रभु यावेम गोपुकीम तचा डा पा इजीपती डा पिप फाराओ नु आ खिं डा मुर नेल्ल कली खतम सेल्चा, दे ठेयब नु हिंचा डा चिन्ड नु छक लाक्चा डा गेय पाप्टु।

23 मिनु आंइ किकी पिपी आन कली गेनुड देशा कसम जशो रागीम इं कली चाक्चा कली मेकेर रे गुंडताक्व।

24 मिनु परमप्रभु यावेमी एको फुल्लुम मुशा ब्रेक्शो लोव्र नेल्ल पचा माल्ब, दे माइश्शो बाक्त। गोपुकी परमप्रभु यावे, इं परमप्रभु कली मान पा हित्तय हना, आंइ कली नेल्ल नाक्त रिम्शो दुम्ब। मिनु आंइ कली ब्रॉइंचा गेब। मुलाक्त मोदेशो बाक्ब।

25 मिनु गोपुकी मेको आ शेंशो नेल्ल परमप्रभु यावे, इं परमप्रभु आ डोंइती पाइतय हना, मेकोमी रिम्शो दुम्ब' दे इन तौ आन कली देंचा माल्नीनी" देंत। ब्यवस्था ९:५-६; रोमी २:१३, १९-२४

1 मिनू मोसामी “परमप्रभु यावे, इन परमप्रभुमी इन कली गेशो रागीम चाकदीत्ची ना, इन ओव्रचा क्येडा डोंडती हिती, गिरगाशी, एमोरी, कनानी, परिजी, हिच्ची नु यबुसी आन कली खेरब। मेको नेल्ल इन क्येडा बोल्यो नु शुश मुर पाइशशो ७ रागी डा मुर बाक्नीम। ब्यवस्था ३१:३

2 मिनू परमप्रभु यावे, इन परमप्रभुमी मेको आन कली इन गुडमी जिम्मा गेप्टु हना, गे मेको नेल्ल आन कली साइक्चा माल्नीनी। मेकोपुकी नु कबल मपने। मिनू शिशी यो मपने।

3 मेकोपुकी नु ग्युंवे मपचा। इन तमी मेको आन तौ कली ग्युंवे पा मगेन। इन तौ कली आन तमी मचाक्चा। प्रस्थान ३४:१५-१६

4 मारदे हना मेकोपुकीमी इन तौ आन कली आंम देवी देवता गे कीनीम। परमप्रभु यावे कली गेय मपथ, देवी देवता आन नोले खोइक्पाइक्नीम। मो दुम्मेनु, परमप्रभु यावे शुश गाइशशा, इन कली रीब पा साइक्ब।

5 मेको आन कली मार पचा माल्नीनी देंशा हना, मेको आन चढ्ढेतीक प्रेत्चा माल्नीनी। मेको आन लाइशशो मूर्ति जिकचा माल्नीनी। मेको आन अशेराह देवी आ मूर्ति खोइक्चा माल्नीनी। मेको आन शी मुशा सेल्शो मूर्तिपुकी मीम हुम्चा माल्नीनी। ब्यवस्था १२:२-३

6 मारदे हना गे परमप्रभु यावे, इन परमप्रभु आ आंम मुर बाक्नीनी। परमप्रभु यावेमी नेल्ल जात जात डा मुर आन दाते रे इन कली आंम मुर सेल्चा, दे योव्रतु। प्रस्थान १९:५-६

7 मिनू परमप्रभु यावेमी जात जात आन क्येडा गे शुश मुर बाक्तीके इन कली दाक्शा योव्रशो ममाइ। थमा पा, गे जात जात डा मुर आन क्येडा आइक्च जात बाक्नीनी। ब्यवस्था १०:१५

8 तन्न परमप्रभु यावेमी इन कली दाक्ब। मिनू मेकोमी ‘इन किकी पिपी नु पशो कबल खाप्नुड’ देंत। मोपतीके परमप्रभु यावेमी शुश सक्ति पाइशशोमी इन कली वाइलीम वाइल सेल्शो इजीप्ट डा पिप फाराओ रे प्रोंडशा, गुंइताक्ब। होसे ११:१

9 परमप्रभु यावे, इन परमप्रभुमी आ कबल काइ मप्रोंडब आ देंशो पाइब परमप्रभु बाक्ब। मिनू परमप्रभु कली दाक्ब नु आ शेंशो टीब आन कली हजार पाला सम्म आ पशो कबल खाप्ब नु आ शिशी कोइना कोइन बाक्ब। प्रस्थान २०:६

10 मेकोमी आ कली मदाक्ब आन कली चहिं क्येक्क लेशशा, साइक्ब। आ कली मदाक्ब आन कली शुश मफाल्थु, मेको आन कली शोल्मो पा साइक्ब। नहुम १:२

11 मोपतीके गो मुलाक्त इन कली माइशशो आ शेंशो, आ फुल्लुम मुशा ब्रेक्शो लोव्र नु आ निसाफ पतीके लोव्र होस पा पने।

12 मिनू गेपुकीमी एको ठीक पतीके लोव्र होस पा नेंशा टिशा, पाइतीनी हना, इन परमप्रभुमी इन किकी पिपी नु कसम जशा, पशो कबल खाप्शा इन कली मप्रोंडब। प्रस्थान २३:२२-३१

13 मेकोमी इन कली दाक्शा, आसीक गेशा, शुश सेल्ब। मेकोमी इन आल आन कली आसीक गेब। इन किकी पिपी आन कली कसम जशा गेशो रागीमी इन रू डा फल फुल, इन अन्न, इन अडगुर शांबु नु तेल, इन बी ब्यफ आन बाछा नु इन क्यारश भेडा आन चाइक्ब नेल्ल आन कली आसीक गेब। होसे २:७-१२

14 गे नेल्ल जात जात डा मुर आन क्येडा आसीक राइब दुम्नीनी। इन दातेमी सुइ वोंडश मुर नु मीश मुर आल मथीब मबाक्नीम। इन बी ब्यफ, क्यारश भेडा थारा मदुम्नीम।

15 मिनू परमप्रभु यावेमी रोइ नेल्ल इन क्येडा डोन वोइक्ब। गे इन तशो इजीप्ट डा हिंचा डा रोइ इन कली मपपाइक्ब। तन्न इन कली मदाक्ब आन कली मेको रोइ कोप्ब। प्रस्थान ९:१-१२

16 मिनू गे परमप्रभु यावे, इन परमप्रभुमी इन कली जिम्मा गेशो जात जात डा मुर नेल्ल कली रीब पा साइक्नीनी। मिनू गे मेको आन कली शिशी मपने। मेको आन देवी देवता आन कली सेउ मपने। मारदे हना मो पाइतीनी हना, गे खतम दुम्नीनी। प्रस्थान २३:३३; प्रस्थान ३४:१२; यहोसु २३:१३

17 मिनू गे इन थुमी ‘एको रागी रागी डा मुर आंइ क्येडा शुश बाक्नीम। गो मेको आन कली दोपा गुंइशा, खेरने चाप्नीकी डा?’ मदेनीन। गन्ती १३:३१; गन्ती १४:१-४

18 मेको आन क्येडा महिनीन। परमप्रभु यावे, इन परमप्रभुमी फाराओ नु इजीप्ट रागी डा मुर नेल्ल कली मार मार पवा, मेको मिम्तीन।

19 गेपुकीमी परमप्रभु यावे, इन परमप्रभुमी आ ठेयब नाक्तीक, आ पशो चिन्ड नु छक लाक्या डा गेय, आ शुश सक्ति पाइइशो नु ठेयब बोल पतीकेमी इन कली युंडताकव। गे आंमा तशो बाकनीनी। मिनु परमप्रभु यावे, इन परमप्रभुमी इन हिंशो जात जात डा मुर नेल्ल आन कली इजीप्ती आन कली खोदेशो पाइब। ब्यवस्था ४:३४; ब्यवस्था २९:२

20 मिनु परमप्रभु यावे, इन परमप्रभुमी मेको आन के लीशो नु इन कली तशा हिंशा खुइइशा बाकशो मुरपुकी यो मुर साइकब रोइ सोइइशा साइकब।

21 गेपुकी चहिं मेको आन क्येडा महिनीन। मारदे हना परमप्रभु यावे, इन परमप्रभु इन दातेमी बाकब। मेको ठेयब नु मान पा हिंचा डा परमप्रभु बाकब।

22 मिनु परमप्रभु यावे, इन परमप्रभुमी मेको रागी रागी डा मुर आन कली इन डोंइती रे का का पा युंडब। गेपुकीमी मेकेर डा मुर आन कली कालेम साइक्या मताइनीनी। मो पाइतीनी हना, इन एर ओंथ डा ब्वाकी डा जन्तु शुश दुग्नीम।

23 मिनु परमप्रभु यावे, इन परमप्रभुमी मेको जात जात डा मुर आन कली शुश वाम ग्याम सेल्शा, का का पा साइक्या सम्म, इन कली जिम्मा गेब।

24 मिनु मेकोमी मेको आन पिप यो इन कली जिम्मा गेब। मिनु गे मेको आन नें रागी रे क्याम्नीनी। इन डोंइती सुइ मबाकनीम।

25 गेपुकीमी मेको आन शी मुशा सेल्शो मूर्तिपुकी मीम हुग्चा माल्नीनी। मूर्तिम बाकशो सुन चांदी बाकत हना, वाल्शा आंम कली मवोंइसीन। मारदे हना मोदेशो पाइतीनी हना, इन कली मरिम्शो दुग्ब। मेको परमप्रभु यावे, इन परमप्रभु कली ग्रांरा बाकब।

26 मिनु गेपुकीमी मारेइ ग्रांरा दिचा डा थोत्रक इन खिंम मचाक्कीन। मो पाइतीनी हना गेपुकी यो मेको आन खोदेशो पा सराप राइब दुग्नीनी। गेपुकीमी मेको नेल्ल कली ग्रांरा दिशो दुग्तीके, तिल्चा माल्नीनी” देंत। यहोसु ७:११-१२

## 8

### परमप्रभु आ अरेशो नेंशा टिचा

1 मिनु मोसामी “गो मुलाकत इन कली परमप्रभु आ शेंशो नेल्ल माइकतन्नी। गेपुकीमी मेको होस पा पचा माल्नीनी। मो पाइतीनी हना, गेपुकी ब्रोंइचा ताइनीनी, सोशा बोशा शुश दुग्नीनी नु परमप्रभु यावेमी इन किकी पिपी आन कली ‘मेको गेनुड’ दे कसम जशो रागी ओवशा इन के सेल्शा बाक्या ताइनीनी।

2 मिनु परमप्रभु यावे, इन परमप्रभुमी इन कली ४० बर्स सम्म गोरशो रागीमी बाकपाइकतु। इन कली मारदे मोदेशो पापतु देशा हना, इन कली ब्रेम्पाइक्या, इन थुं नाक्या नु गे इन नेल्ल थुंमी आ शेंशो पाइनीनी देय मपाइनीनी, दे तुइक्या कली इन कली मेको ४० बर्स सम्म मेकेर गाकपाइकतु। ब्यवस्था १३:४; उत्पत्ती २२:१; प्रस्थान १६:४; प्रस्थान २०:२०; न्यायाधीस २:२२

3 मिनु मेकोमी इन कली ब्रेम्पाइक्या, दे शोत्रलु बेकपाइकतु। मिनु मेकोमी इन किकी पिपी कली इन मतुइइशो मन्ना जपाइकतु। मारदे इन कली मन्ना जपाइकतु देशा हना, मुरुम जचा थोत्रक जशा ला मब्रोंइनीम, तन्न परमप्रभु यावे आ लोत्र रे ब्रोंइनीम, दे तुइक्याइक्या कली मन्ना जपाइकतु। प्रस्थान १६:१३-१५; मत्ती ४:४

4 मेको ४० बर्स सम्म इन फेकशो वा मजे। इन खोइल महोम्म। ब्यवस्था २९:४

5 मिनु मुरपुकीमी दोदेशो पा आन तौ आन कली शेंचा, दे सजाइ गेनीमी, मोदेशो पा परमप्रभु यावे, इन परमप्रभुमी इन कली शेंचा, दे सजाइ गेपतु। मेको तुइक्या माल्नीनी। यसैया २८:२६; येरमीया ३०:११; येरमीया ४६:२८

6 मिनु गेपुकीमी परमप्रभु यावे, इन परमप्रभु आ शेंशो पना पन बाक्कीन। परमप्रभु आ लां गाकशा, मेको कली मान पा हिनीन।

7 परमप्रभु यावे, इन परमप्रभुमी इन कली रिम्शो रागी लाइकब। मेकेर खोला, दिंम नु पहाड रे बुकशो ब्वाक्कु नु दोम्ली बाक्नीम।

८ मेको रागीम चेरब, क्योत्रज, अडगुर बोट, फोत्रशी रवा, दारीम बोट, तेल रवा नु खुदो बाकब।

९ मेको रागीम गे काड श्येत मजथु, मारेइमी खांचो मदुम्नीनी। मेको रागी डा फुल्लुमी फलाम बाकब। मेको आ पहाड रे गे तांबा गुंडनीनी।

१० मिनु गेपुकीमी मरूनी सम्म जशा तूशा, इन कली गेशो रिम्शो रागी आ पर्वम परमप्रभु यावे, इन परमप्रभु कली ठेयब सेल्चा मालनीनी।

११ मिनु गे परमप्रभु यावे, इन परमप्रभु कली मप्रेदीन। मिनु मुलाक्त गो इन कली देशो आ शेंशो, आ निसाफ पतीके लोत्र नु आ फुल्लुम मुशा ब्रेक्शो लोत्र यो मप्रेचा, दे होस पा बाक्कीन।

१२ मिनु गेपुकी जशा तूशा, रूशा, रिम्शो खिं सेल्शा बाक्नीनी,

१३ मिनु इन बी ब्यफ नु क्यारश भेडा शुश दुम्शा, इन सुन चांदी नु इन मारेइ मारेइ शुश दुम्मेनु,

१४ गेपुकी ठेयब लेशशा, वाइलीम वाइल दुम्तीक इजीप्ट रे गुंडब परमप्रभु यावे, इन परमप्रभु कली मप्रेचा, दे होस पा बाक्कीन।

१५ मेकोमी इन कली ठेयब हिंचा डा गोरशो रागीम बाक्पाइक्तु। मेकेर बीस पाइशो बुस्स नु बिच्छी बाक्तेक्म। मेकोमी इन कली सोत्रशो रागीम हिरताक्व। मिनु इन पर्वम ठेयब फुल्लु रे ब्वाक्कु बुक्पाइक्तु। गन्ती २१:६; प्रस्थान १७:६

१६ मिनु मेकोमी इन कली गोरशो रागीम मन्ना जचा गेपु। मेको इन किकी पिपी आन मतुइशो जचा थोत्रक बाक्त। मारदे मोदेशो पापु देशा हना, मेको नेल्ल इन कली ब्रेम्पाइक्वा, नाक्वा नु नोले रिम्शो पचा कली पापु।

१७ मिनु गे नोले इन थुमी 'गो आंम आंइ सक्तिम एको शोंप चेम्तक' दे मदेनीन।

१८ तन्न परमप्रभु यावे, इन परमप्रभुमी आंइ कली शोंप चेम्तीक सक्ति गेपु, दे मिम्तीन। मेकोमी इन किकी पिपी नु कसम जशा पशो कबल गेना हना यो लीपाइक्व। मोदेशो पा मुलाक्त बाक्व, दे तुइक्नीनी। ब्यवस्था ४:३१

१९ मिनु गे परमप्रभु यावे, इन परमप्रभु कली प्रेशा, देवी देवता आन नोले खोइक्तीनी, मेको आन कली पूजा पाइतीनी नु मेको आन डोंइती बाप्तीनी हना, गो इन कली 'गेपुकी थमा पा साइक्वा पुंडसीनीनी' दे मुलाक्ती लोत्र का पाडनुड।

२० मिनु परमप्रभु यावेमी इन डोंइती रागी रागी डा मुर आन कली खतम सेल्शो खोदेशो पा, गेपुकीमी आ लोत्र मनेशु, मटीतीनी हना, परमप्रभु यावे, इन परमप्रभुमी इन कली यो खतम सेल्ब" दैत।

## 9

### परमप्रभुमी लडाइ पशो

१ मिनु मोसामी "गे इस्राएलीपुकी, नोफा दाइशशा, नेनीन! मुल गे मेको रागी ओत्रचा कली यर्दन खोला शोक्नीनी। इन क्येडा ठेयब नु सक्ति पाइशो रागी रागी, सरीड थिचा चिक्शो गारो हिरशो सहरपुकी इन के सेल्नीनी। ब्यवस्था १:२८

२ मेकेर अनाक आ चच युड बाक्नीमी। मेकोपुकी ठेयब नु लाइशो मुर बाक्नीम, दे तुइक्नीनी। गे डोंइती 'अनाकीम डा मुर आन डोंइती सु राप्ने चाप्बा डा' दे लोत्र पशो नेंतीनी।

३ परमप्रभु यावे, इन परमप्रभु इन डोंइडोंइती शोक्शा लाइब, दे तुइक्वा मालनीनी। मेको नेल्ल ग्यु दाक्व मी खोदेशो बाक्व। मिनु मेको आन कली मी खोदेशो पा दाक्व। मेकोमी इन कली जिम्मा गेब। मिनु परमप्रभु यावेमी देशो खोदेशो पा, गे मेको आन कली खेरशा रीब पा साइक्नीनी। ब्यवस्था ४:२४

४ मिनु परमप्रभु यावे, इन परमप्रभुमी मेको आन कली इन डोंइती रे खेरानु, गे इन थुमी 'परमप्रभु यावेमी आंइ ठीक पतीके एको रागीम चाक्तु' दे ममिम्तीन। मेको रागी रागी डा मुर आन मरिम्शो पतीके परमप्रभु यावेमी मेको आन कली इन डोंइती रे खेरब। ब्यवस्था ८:१७; उत्पती १५:१६

5 गेपुकी इन ठीक पतीक नु इन ठीक थुं दुम्तीके मेको आन रागी इन के सेल्चा तशो मननी। तन्न मेको रागी रागी डा मुर आन मरिम्शो पतीके परमप्रभु यावे, इन परमप्रभुमी मेको आन कली खेरब। मिनु इन किकी पिप अब्राहाम, इसहाक नु याकूब नु जशो कसम खाप्चा कली मो पाडब। ब्यवस्था ६:२५

6 परमप्रभु यावे, इन परमप्रभुमी इन ठीक पतीक आ पबंम इन कली मेको रिम्शो रागी इन के सेल्चा कली मगेवो। मारदे हना गे शुश मटीब मुर बाक्नीनी। प्रस्थान ३२:९

7 मिनु गेपुकी गोरशो रागीम परमप्रभु यावे, इन परमप्रभु कली दोपा गाडक्पाइक्नी, मेको मप्रेंदीन। इजीप्त रागी रे गे एक जाक्नी सम्म गे परमप्रभु यावे आ देशो मटिशो बाक्तीनी।

8 मिनु होरेब डांडामी यो गे परमप्रभु यावे कली गाडक्पाइक्तीनी। मिनु परमप्रभु यावेमी इन कली क्याम्चा डा पा शुश गाडक्ताक्व। प्रस्थान ३२:१-२४

9 मिनु गो परमप्रभु यावेमी गेपुकी नु पशो कबल डा लोत्र ब्रेक्शो फुल्लु ब्रथ डांडा डोंइसाक्यी। मिनु गो ४० नाक्त नु ४० नाकदो मेकेर बाक्ती। शोब्ले मजड, ब्वाक्कु यो मतूडु। प्रस्थान ३४:२८

10 मिनु परमप्रभु यावेमी, आम गुडम ब्रेक्शो फुल्लु निक्शी गेती। मिनु मेको फुल्लु तार मार ब्रेक्शो बाक्त देशा हना, परमप्रभु यावेमी डांडामी इन कली पशो लोत्र नेल्ल ब्रेक्शो बाक्त। परमप्रभुमी मेको गुम्ची नाक्त डांडाम ब्रशो मी आ दाते रे इन कली लोत्र पशो बाक्त।

11 मिनु मेको ४० नाक्ती नाकदो थुम्ची ना परमप्रभु यावेमी मेको कबल डा लोत्र ब्रेक्शो फुल्लु निक्शी आं कली गेती।

12 मिनु परमप्रभु यावेमी आं कली 'बोक्को, रीब पा एक रे ब्रुपो। मारदे हना इ इजीप्त रे गुंडशो मुरपुकीमी आं देशो लां रीब पा प्रोंइतेक्म। आम आन कली खतम सेल्लेक्म। गोम मेको आन कली मपचा देशो पाम्तेक्म नु आम कली सुन के मूर्ति सेल्लेक्म' दैत।

13 मिनु परमप्रभु यावेमी आं कली 'गो एको मुर आन कली कोव्रता। मिनु एकोपुकी काइ मटीब बाक्नीम।

14 मुल आं कली पुंडचा प्रोंइयी। मिनु गो मेको आन कली खतम सेल्लुड। मिनु मेको आन नें रागी रे क्याम्नुड। मिनु गे रे पा मेको आन क्याडा ठेयब नु सक्ति पाइश्शो जात का सेल्लुड' दैत।

15 मिनु गो डांडा रे बुप्ती। मेको डांडाम मी ब्रस डा ब्रस बाक्त। मिनु गो मेको कबल डा लोत्र ब्रेक्शो फुल्लु निक्शी कुरता।

16 मिनु गेपुकीमी परमप्रभु यावे, इन परमप्रभु कली पाप पा, आम कली बाछा आ मूर्ति सेल्सीशो बाक्तीनी। परमप्रभु यावेमी इन कली अरेशो लां रीब पा प्रोंइशा दूली लां खोइक्नी बाक्त।

17 मिनु गो मेको फुल्लु निम्फा ताइश्शा, इन डोंइती प्रोल्ला।

18 मिनु डोंइती खोदेशो पा, गो परमप्रभु यावे आ डोंइती बाप्शा, ४० नाक्ती ४० नाकदो शोब्ले मजड, ब्वाक्कु यो मतूडु। इन पशो पाप आ पबंम मोदेशो पा बाक्ती। गे परमप्रभु यावे कली काइ मरिम्शो पा गाडक्पाइक्तीनी।

19 मारदे हना गो परमप्रभु यावेमी इन पबंम गाइश्शा, चुरशा पशो तशा, साप्पा हिंती। मेकोमी इन कली थमा पा साइक्च, दे मिम्शो बाक्त। मिनु परमप्रभु यावेमी मेना यो आं पुंडशो लोत्र नेंतु। हिब्रू १२:२१

20 परमप्रभु यावे हारून आ पबंम यो शुश गाइश्शा 'मेको कली साइक्नुड' दे मिम्शो बाक्त। गो हारून आ पबंमी यो पुंडता।

21 मिनु इन पशो पाप, मेको बाछा लाइश्शा, मीम हुम्ताक्ड। मेको कली तुप्शा, फस सेल्ला। मिनु मेको फस पहाड रे यिशो खोलाम ताइक्ताक्ड।

22 मिनु गेपुकीमी तबेरा, मास्साह नु किब्रोथ-हत्तावामी यो परमप्रभु यावे कली गाडक्पाइक्तीनी। गन्ती ११:३; प्रस्थान १७:७; गन्ती ११:३४

23 मिनु परमप्रभु यावेमी गे कादेश-बारनेआ रे लशा, इन कली 'मेकेर लने। मिनु इन कली गेशो रागी इन के सेलीन' दे सोइक्ताक्व। मिनु गेपुकीमी परमप्रभु यावे, इन परमप्रभु आ अरेशो मबित्थु, गन गन पा मेको कली थमा मसुइक्नी। मेको आ लोत्र यो मटिनी। गन्ती १३:२, ३१; गन्ती १४:१-४

24 गो इन कली तुडक्तु रेन गे परमप्रभु यावे आ लोव्र मटिथु गन गन पाइतीनी।

मोसामी इस्नाएली आन परबम पुंइशो

25 मोपतीके परमप्रभु यावे आ डोंइती गो ४० नाक्ती ४० नाक्दो सम्म बाप्शा बाक्ती। मारदे हना परमप्रभु यावेमी 'गे इन कली क्याम्नुड' देशो बाक्त। ब्यवस्था ९:१८

26 मिनु गो परमप्रभु यावे कली 'परमप्रभु, इन मुर आन कली मक्याम्दीन। गे मेको आन कली प्रोंइशा इन शुश सक्ति पाइशोमी इजीपत रागी रे गुंइताक्नी।

27 इन वाडल अब्राहाम, इसहाक नु याकूब आन कली मिम्तीन। एको मुर आन खकटा थुं, इन अरेशो मटितीके नु आन मरिम्शो पतीके मकोव्रडीन।

28 गे मेको आन कली क्याम्ताक्नी हना, आंइ कली गुंइशो रागी डा मुरपुकीमी "परमप्रभु यावेमी मेको आन कली देशो रागी चाक्दीन्ने मचापतीके, मेको आन कली मदाक्तीके गोरशो रागीम साइक्चा कली एक रे गुंइशा लाइक्तु" देंनीम। गन्ती १४:१६

29 मेको इन मुर बाक्नीम। मिनु गे शुश सक्ति नु ठेयब बोलमी गुंइशा चाक्तीनी' दे परमप्रभु कली पुंइशा, लोव्र पाता" देंत।

## 10

लेंशा फुल्लुम मुशा ब्रेक्शो लोव्र

1 मेना परमप्रभु यावेमी आं कली "डोंइती डा खोदेशो पा फुल्लु निक्शी चेतो। मिनु आं कली गुम्थ, डांडा डोंइसो। मिनु शी के सन्दोस का यो सेलो। प्रस्थान ३४:१; प्रस्थान २५:१०

2 मिनु गो डोंइती डा इ प्रोल्शो फुल्लुम ब्रेक्शो लोव्र खोदेशो पा, नक फुल्लुम लेंशा ब्रेक्नुड। मिनु गो मेको कली सन्दोसम कुर पा वोतो" माइक्ती। प्रस्थान ३२:१९

3 मिनु गो बोल्यो शी के सन्दोस का सेल्ला। मिनु डोंइती डा खोदेशो पा फुल्लु निक्शी चेल्ला। मिनु मेको चेशो फुल्लु निक्शी कुरशा, डांडा डोंइसाक्यी।

4 मिनु परमप्रभु यावेमी डोंइती डांडाम लोव्र पशो खोदेशो पा मेको १० ओटा लोव्र लेंशा ब्रेक्ताक्व। मेको लोव्र, गेपुकीम डांडा डा मी आ दाते रे नेंशो ननी। मिनु परमप्रभु यावेमी मेको ब्रेक्स पाइशो चेशो फुल्लु निक्शी गेती।

5 मिनु मेको कुरशा गो डांडा रे ब्रुप्ती। मिनु गो मेको चेशो फुल्लु निक्शी कली आं सेल्शो सन्दोस आगाम कुर पा वोडक्ता। मिनु परमप्रभु यावेमी आं कली अरेशो खोदेशो पा मेको फुल्लु सन्दोस आगाम बाक्नीस। प्रस्थान २५:२१

हारून बेक्शो

6 मिनु इस्नाएलीपुकी बेयरोथ-बेने-याकान रे गाक्शा, मोसेराह माइक्तीके जाक्तेक्म। मेकेर हारून बेक्त। मिनु मेको कली मेकेर थिम्तेक्म। मिनु आ तौ एलाजरमी आ पा डा चढ्ढेतीक गेय पचा गोप्तु। गन्ती ३३:३१-३३; गन्ती २०:२८; गन्ती ३३:३७-३९

7 मिनु इस्नाएलीपुकी मेकेर रे गाक्शा, गुदगोदा गे लाम्तेक्म। मिनु गुदगोदा रे गाक्शा, शुश ब्वाक्कु बाक्तीके योत्बाथाह जाक्तेक्म।

8 मेना परमप्रभु यावेमी लेवी आ थर डा मुर आन कली योव्रतीमी। मार कली योव्रतीमी देशा हना, परमप्रभु यावे आ कबल डा लोव्र कुरपाइशो सन्दोस कुरचा, परमप्रभु यावे कली गेय पचा कली आ डोंइती राप्चा नु आ नेंम मुर आन कली आसीक गेचा कली योव्रतीमी। मुल सम्म मोदेशो बाक्व। ब्यवस्था १८:५; गन्ती ६:२३-२७

9 मोपतीके लेवीपुकीम आन लोक्ब खोदेशो पा रागी डा रू मतामे। परमप्रभु यावे मेको आन शोंप बाक्व। परमप्रभु यावे, इन परमप्रभुमी दोदेशो देंमे, मोदेशो दुम्त। गन्ती १८:२०

परमप्रभुमी मोसा आ पुंइशो गेशो



10 मिनू गो डोंइती डा खोदेशो पा ४० नाक्ती ४० नाकदो डांडाम बाप्शा बाक्ती। मेना यो परमप्रभु यावेमी आं लोव्र नेंतु। मिनू इन कली मसद।

11 मिनू परमप्रभु यावेमी आं कली “मुल बोक्शा लावो। मुर आन डोंइती गाक्चा कली लावो। मिनू गो मेको आन किकी पिपी आन कली कसम जशा गेशो रागी मेकोपुकी ओव्रशा, आम के सेल्चा माल्नीम” दे माइक्ती।

### परमप्रभु आ दाक्शो

12 मिनू गो इस्राएलीपुकी, परमप्रभु यावे, इन परमप्रभुमी इन कली मार पशो दाक्ब देशा हना, गेपुकी परमप्रभु यावे, इन परमप्रभु कली मान पा हिंचा माल्नीनी। गेपुकी मेको आ लां गाक्शा, मेको कली दाक्चा नु इन थुं नु सोक्त नेल्लेमी परमप्रभु यावे, इन परमप्रभु कली गेय पचा माल्नीनी। मीका ६:८

13 दोपा दाक्चा नु गेय पचा देशा हना, गो मुलाक्ती इन कली देशो परमप्रभु यावे आ शेंशो नु आ फुल्लुम मुशा ब्रेक्शो लोव्र पचा माल्नीनी। मेको इन कली थम रिम्शो दुम्ब।

14 मिनू नेनीन, स्वर्ग नु सरीड नु रागी नु मेकेर बाक्ब मारेइ मारेइ नेल्ल परमप्रभु यावे, इन परमप्रभु केन बाक्ब।

15 मो हना यो परमप्रभु यावेमी इन किकी पिपी आन कली तशा, दाक्ताक्ब। मिनू मेको आन चच युइ, इन कली जात जात डा मुर नेल्ल आन दाते रे योव्रतु। मोदेशो पा मुलाक्ती बाक्ब, दे तुइक्नीनी। ब्यवस्था ७६

16 मोपतीके इन थुं कली खोइक्तीक चिनु खोतीन। मिनू मटीब मदुमीन।

17 मारदे हना परमप्रभु यावे, इन परमप्रभु देवी देवता आन परमप्रभु बाक्ब। मेको प्रभु आन प्रभु बाक्ब। मेको नेल्ल क्येडा ठेयब, सक्ति पाइशो नु हिंचा डा परमप्रभु बाक्ब। मेकोमी सुइ आन कुल मकोव्रब। मेकोमी घूस मताक्ब।

18 मेकोमी रोम रोइक्च नु वोंइश बेक्शो मीश मुर आन कली ठीक निसाफ पाइब। मेकोमी अर्को रागी डा मुर आन कली दाक्ब। मिनू मेको आन कली जचा फेक्चा गेब।

19 मिनू गेपुकी यो अर्को रागी डा मुर आन कली दाक्तीन। मारदे हना गे यो इजीप्तमी अर्को रागी डा मुर बाक्तीनी। प्रस्थान २२:२०-२३

20 गेपुकीमी परमप्रभु यावे, इन परमप्रभु कली मान पा हिंचा माल्नीनी। मेको आ गेय पचा माल्नीनी। मेको आ नोले खोइशशा, आ नेमी कसम जचा माल्नीनी।

21 मेकोन इन कली ठेयब सेल्टीके बाक्ब। मिनू इन परमप्रभु दुम्शा, इन पबंम हिंचा डा ठेयब गेय पाइब मेकोन बाक्ब। गे मेको नेल्ल आंमा तशो बाक्नीनी।

22 इन किकी पिपी इजीप्त रागी लमानु, ७० जना मुर ला लशो बाक्तेक्म। मिनू मुल परमप्रभु यावे, इन परमप्रभुमी इन कली सरीड डा सोरुल खोदेशो पा शुश सेल्लु। उत्पती ४६:२७; ब्यवस्था १:१०

## 11

### परमप्रभु यावे आ ठेयब गेय

1 मिनू मोसामी “गे परमप्रभु यावे, इन परमप्रभु कली दाक्चा माल्नीनी। गे नाक्त किंत किंत मेको आ ब्रेक्शा अरेशो लोव्र, आ फुल्लुम मुशा ब्रेक्शो लोव्र, आ निसाफ पतीक लोव्र नु आ शेंशो नेल्ल टिने।

2 मिनू परमप्रभु यावे, इन परमप्रभुमी इन आल आन डोंइती मारेइ यो छक लाक्चा डा गेय नु सजाइ मकोइद। तन्न मेकोमी दोपा आ ठेयब पतीकेमी शुश सक्ति पाइशो नु ठेयब बोल पतीकेमी इन कली इजीप्त रागी रे गुंइशो, गे नेल्लेम तशा तुइशशा मिम्चा माल्नीनी। ब्यवस्था ४:३६

3 मिनू इजीप्त रागी नु आ पिप फाराओ नु मेको आ मुर नेल्ल आन कली कोइशो चिन्ड नु आ पशो गे नेल्ले तशो तुइशशो बाक्नीनी।

4 मिनू मेकोमी इजीप्त डा लडाइ पाइक्ब, शारा नु बग्गी आन कली पशो नेल्ल तुइक्नीनी। इन कली खेदा पामेनु, मेकोमी मेको आन कली लल समुन्द्र डा ब्वाक्कुम साइक्चा कली खुम्तु, मेको यो तशो बाक्नीनी। मुल सम्म मेको लडाइ पाइब आन हुल खतम दुम्शा बाक्नीम। प्रस्थान १४:२५,२७

5 मिनू एको रागी मजाक्शो सम्म गोरशो रागीम मेकोमी इन कली मार मार पवा, मेको गे तुइश्शो बाक्नीनी।

6 मिनू मेकोमी रूबेन आ चच निकशी, एलीआब आ तौ दाथान नु अबीराम आस कली पशो तुइक्नीनी। दोपा खपीम आ शोव्र पाक्शा इझाएली आन दातेमी मेको आस कली दाक्गा। मिनू आस खिं डा मुर नु आस ताम्बु नु मेको आस मारेइ मारेइ दाक्शो गेपुकीम तुइश्शो बाक्नीनी। गन्ती १६:२५-३४

7 गेपुकी परमप्रभु यावेमी पशो ठेयब गेय नेल्ले तशो बाक्नीनी।

8 मोपतीके गो मुलाक्ती इन कली देशो परमप्रभु यावे आ शेंशो नेल्ल टिशा पने। मेको पाइतीनी हना, गेपुकी बोल्यो दुम्नीनी। मिनू खोला शोक्शा इन के सेल्चा चिक्शो रागीम ओव्रशा, थमा पा इन के सेल्चे चाप्नीनी।

9 मोपा गे परमप्रभु यावेमी इन किकी पिपी नु आन चच युइ, इन कली, गेशो रागीम शुश ब्रॉइशा बाक्चा ताइनीनी। मेको रागीम शुश दूध नु खुदो बाक्ब। प्रस्थान ३:१७

10 मारेदे हना मेको इन के सेल्चा चिक्शो रागी, इन गूशा पिशो इजीप्त रागी खोदेशो ममाइ, मेकेर वांचेर शोक्शा, गिग खाइ रू कली ब्वाक्कु कुर पचा मालताक्नी।

11 मेको गे शोक्चा, इन के सेल्चा चिक्शो रागी, डांडा नु बेंसी डा रागी बाक्ब। मेकेर रेउ यिशा, रागी जिप्पाइक्ब।

12 परमप्रभु यावे, इन परमप्रभुमी मेको रागी कली कोव्रब। मेकोमी बर्स डा डोंइती डा नाक्तर नेले डा नाक्तर सम्म, गेना हना यो कोव्रब।

13 मिनू मुलाक्ती गो इन कली देशो आं शेंशो नेंतीनी, गे परमप्रभु यावे, इन परमप्रभु कली इन थुं सोक्तर नेल्लेमी दाक्शा नु मेको कली गेय पाइतीनी हना, लेवी २६:३-५; येरमीया ५:२४

14 मेना परमप्रभु यावेमी इन कली 'गो इन रू कली गारचा डा रेउ गेनुइ। डोंइती नु नोले डा रेउ ठीक पा गेनुइ। मोपा इन अन्न, इन अडगुर नु तेल रवा आन फल खुप्ने चाप्नीनी।

15 मिनू गो इन बी ब्यफ, क्यारश भेडा आन कली योव्रतीकेम घांस वापाइक्नुइ। मिनू गे जशा तूशा रूनीनी' दे परमप्रभुमी इन कली देंत।

16 मोपतीके सुइम इन कली हेंथे गाक्पाइक्चा मगेने, होस पा बाक्कीन। गेपुकी परमप्रभु क्येडा डोन लाइतीनी नु देवी देवता आन कली सेउ पाइतीनी हना,

17 परमप्रभु यावेमी गाइश्शा रागीम रेउ मयिपाइक्ब। मिनू मारेइ खुप्चा मताइनीनी। मिनू परमप्रभु यावेमी इन कली गेशो रिम्शो रागी रे कयाम्ब। ब्यवस्था २८:२३-२४; लेवी २६:१९-२०

### आसीक नु सराप

18 मिनू गेपुकीमी आं देशो लोव्र इन थुंम वोतीन। मेको मिम्चा कली इन गुइमी चिन्ड फ्रेंदीन। मिनू कुप्फीम फ्रेंतीके खोदेशो पा फ्रेंचा मालनीम। ब्यवस्था ६:६-९

19 आंम खिंम बाक्नीनु, लां गाक्नीनु, इप्थ लनीनु नु बोक्नीनु इन तमी तौ आन कली मेको अरेशो आ पबर्म लोव्र पा शेंदीन।

20 इन खिं डा थाम तारी नु लाप्चो तारी ब्रेक्तीन।

21 मिनू गे नु इन आलपुकी परमप्रभु यावेमी इन किकी पिपी आन कली 'गेनुइ' दे कसम जशो रागीमी शुश ब्रॉइनीनी। रागी तार सरीड बाक्म सम्म शुश ब्रॉइनीनी।

22 गेपुकीमी गो इन कली देशो अरेशो लोव्र नेल्ल होस पा पाइतीनी नु परमप्रभु यावे, इन परमप्रभु कली दाक्ताक्नी हना, मेको आ लां नेल्ल गाक्शा, मेको कली मप्रॉइतीनी हना,

23 परमप्रभु यावेमी मेकेर डा रागी रागी डा मुर नेल्ल कली इन डोंइती रे खेरब। मिनू गे इन क्येडा शुश नु सक्ति पाइश्शो रागी रागी डा मुर आन रागी इन के सेल्नीनी। ब्यवस्था ७:१-२

24 गे इन खोइलीम थेक्शो रागी नेल्ल गे इन के दुम्ब। गोरशो रागी रे लेबानोन सम्म नु ठेयब खोला युफ्रेटीस रे पच्छिम डा समुन्द्र सम्म इन के सांद दुम्ब।

25 गे नु लडाइ पा सुइ मग्रानीम। परमप्रभु यावे, इन परमप्रभुमी आ देशो खोदेशो पा तेको रागी थेक्नीनी, मेकेर डा मुर आन कली इन कली तशा हिंतीक थुं गेब। प्रस्थान २३:२७

26 नेनीन, मुलाक्त गो आसीक नु सराप इन डोंइती वोइक्नुड। ब्यवस्था ३०:१,१५,१९

27 गे परमप्रभु यावे, इन परमप्रभु आ शेंशो टीतीनी हना, आसीक राइनीनी। ब्यवस्था २८:२,१५

28 परमप्रभु यावे, इन परमप्रभु आ शेंशो मटिथु, गो मुलाक्ती इन कली देशो लचा माल्शो लां रे हेंथे गाक्तीनी नु इन मतुइश्शो देवी देवता आन नोले खोइक्तीनी हना, सराप राइनीनी।

29 मिनु परमप्रभु यावे, इन परमप्रभुमी इन कली इन के सेल्चा चिक्शो रागीम ओइचानीनु, गेरीजीम डांडा रे आसीक गेचा नु एबाल डांडा रे सराप पचा माल्नीनी। ब्यवस्था २७:१२-१३; यहोसु ८:३३-३४

30 मेको डांडापुकी यर्दन आइक्ची हांबु, नां रिक्तीक गे यर्दन बेसी डा लां आ नोले, अराबाहमी बाक्शो कनानी आन रागीम बाक्नीस। मेको गिल्याल आ डोंइती मोरेह माइश्शो ब्वाकी आ नेक्था बाक्नीस। उत्पत्ती १२:६

31 मिनु गेपुकी यर्दन शोक्शा, परमप्रभु यावे, इन परमप्रभुमी इन कली गेशो रागी ओव्रनीनी। मिनु गे मेको इन के सेल्शा, मेकेर बाक्नीनी।

32 मुलाक्त गो इन कली शेंशो फुल्लुम मुशा ब्रेक्शो लोत्र नु ठीक पतीक लोत्र नेल्ल पशा, होस पा बाक्कीन” देंत।

## 12

### परमप्रभु यावे आ बाक्तीके

1 मिनु मोसामी “मेको परमप्रभु यावे आ फुल्लुम मुशा ब्रेक्शो लोत्र नु आ ठीक पतीक लोत्र बाक्नीम। गे मेको नेल्ल परमप्रभु यावे, इन किकी पिपी आन परमप्रभुमी इन के सेल्चा कली गेशो रागीम मबेक्नी सम्म टिचा माल्नीनी।

2 मिनु गे तेको रागी डा मुर आन कली खेरनीनी, मेको आन देवी देवता आन थान नेल्ल प्रेत्चा माल्नीनी। मेको लाइश्शो डांडाम, पहाडीम नु नेल्ल रवा आन पुंम बाक्शो बाक्नीम। ब्यवस्था ७५,२५; प्रस्थान ३४:१३

3 गे मेको आन चहेतीक प्रेत्चा माल्नीनी। मेको आन लाइश्शो मूर्तिपुकी जिक्चा माल्नीनी नु मेको आन मूर्ति मीम हुम्चा माल्नीनी। मिनु मेको शी के सेल्शो मूर्तिपुकी खोल्शा बिप्रेचा माल्नीनी। मिनु आन नें क्याम्चा माल्नीनी।

4 मिनु गेपुकीमी मेको आन देवी देवता आन कली ठेयब सेल्शो खोदेशो पा परमप्रभु यावे, इन परमप्रभु कली ठेयब मसेलीन।

5 परमप्रभु यावे, इन परमप्रभुमी इन थर थर आन बाक्तीक रागीमी ते बाक्चा दाक्बा, मेको माल्शा मेकेर लचा माल्नीनी।

6 मिनु इन चोशा चढ़ेशो, क्योरशा चढ़ेशो, इन १० भाग डा भाग का, इन गेचा डा चढ़ेशो, इन देशो चढ़ेशो नु इन आंम दाक्शो चढ़ेशो, इन बी ब्यफ आन डोंइती जरमेशो नु इन क्यारश भेडा आन डोंइती जरमेशो मेकेर लाइक्चा माल्नीनी।

7 मिनु गे नु इन खिं डा मुर नेल्लेमी परमप्रभु यावे, इन परमप्रभुमी इन कली आसीक गेशो गेय मिम्चा, दे मेकेर परमप्रभु यावे, इन परमप्रभु आ डोंइती जशा तूशा, ग्येरसीचा माल्नीनी।

8 गोपुकीम मुल सम्म ‘आंम पशो ठीक बाक्ब’ दे पशो खोदेशो पा मुल मपने।

9 मारदे हना गेपुकी मुल सम्म परमप्रभु यावे, इन परमप्रभुमी गेशो नाइक्तीके नु रागी मजाक्दीश्शो बाक्नीनी।

10 तन्न यर्दन शोक्शा, परमप्रभु यावे, इन परमप्रभुमी इन कली गेशो रागीमी बाक्नीनी, मिनु इन एर ओथ बाक्शो इन जोरी सत्रु रे ब्रॉइशा, श्येत मजथु बाक्नीनी। यहोसु १:१३; यहोसु २१:४४; १राजा ५:५; भजन संग्रह ९५:११; होसे २:२०; हिब्रू ४:११

11 मेना परमप्रभु यावे, इन परमप्रभुम आ बाक्तीके का योवब। गो इन कली अरेशो इन चोशा चढेशो, इन क्योरशा चढेशो, इन १० भाग डा भाग का, इन गेचा डा चढेशो नु इन मार मार परमप्रभु यावे कली देशो चढेशो मेकेर चाक्चा माल्नीनी।

12 मिनु गेपुकी, इन तमी तौ, वाइलीम वाइल, इन सहरम बाक्शो आंम कली शोंप मतशो लेवी नेल्ल परमप्रभु यावे, इन परमप्रभु आ डोंइती ग्येरसीचा माल्नीनी। व्यवस्था १०:९

13 इन चोशा चढेतीक ते ते थिन्नी मेक मेक मचढेन, गे होस पा बाक्कीन।

14 तन्न परमप्रभु यावेमी इन थर थर आन दातेमी योव्रशो आ बाक्तीकेम ला चढेने चाप्नीनी। मेकेर ला इन चोशा चढेतीके चाक्चा माल्नीनी। गो आं अरेशो गेय नेल्ल मेकेर पचा माल्नीनी।

15 तन्न गेपुकी श्ये ब्वचा दाक्तीनी हना, परमप्रभु यावे, इन परमप्रभुमी इन कली आसीक गेशो खोदेशो पा इन सहर सहरमी क्योरशा, ब्वने चाप्नीनी। ग्रॉग्रा दिशो नु ग्रॉग्रा मदिशो मुर नेल्लेमी ब्वने चाप्नीम। गेपुकीम किरश नु रोकेशो खोदेशो पा ब्वने चाप्नीनी। व्यवस्था १२:२२; व्यवस्था १४:५

16 तन्न हुश चहिं मब्वने। मेको ब्वाक्कु खोदेशो पा खपीम ताइक्तीन। लेवी ३:१७; लेवी १७:११

17 इन अन्न, अडगुर शांबु नु तेल आन १० भाग डा भाग का चढेशो, बी ब्यफ नु क्यारश भेडा आन डोंइती जरमेशो, इन देशो चढेशो, इन आंम दाक्शा गेशो नु इन गेचा माल्शो चढेशो चहिं आंम सहरम मजने मब्वने।

18 तन्न परमप्रभु यावे, इन परमप्रभु आ डोंइती, आ योव्रशो बाक्तीकेमी मेको गेपुकी नु इन तमी तौ, वाइलीम वाइल नु इन सहरम बाक्शो लेवीपुकी नु जने ब्वने। गेपुकी इन पशो नेल्लेमी परमप्रभु यावे, इन परमप्रभु आ डोंइती ग्येरसीने। व्यवस्था १४:२३

19 इन रागीम गेना सम्म बाक्नीनी, मेना सम्म लेवी आ थर डा मुर आन कली रिम्शो कोव्रडीन। व्यवस्था १२:१२; व्यवस्था १४:२७

20 मिनु परमप्रभु यावे, इन परमप्रभुम आ कबल पशो खोदेशो पा इन रागी बारपाइक्ब। गेपुकी श्ये ब्वचा दाक्तीनी हना, रूचा डा पा ब्वने।

21 परमप्रभु यावे, इन परमप्रभु आ योव्रशो बाक्तीके इन क्येडा डोन बाक्त हना, परमप्रभु यावेमी इन कली गेशो बी ब्यफ नु क्यारश भेडा आ अरेशो खोदेशो पा इन सहरम क्योरशा ब्वने चाप्नीनी।

22 मिनु किरश नु रोकेशो ब्वशो खोदेशो पा परमप्रभु आ डोंइती ग्रॉग्रा दिशो नु ग्रॉग्रा मदिशो नेल्लेमी ब्वने चाप्नीम। व्यवस्था १२:१५

23 होस पा हुश गेनायो ब्वचा मदुम्ब। मारदे हना हुशेमी ब्रोंइतीक सोक्त बाक्ब। श्ये नु ब्रोंइतीक सोक्त ब्वचा मदुम्ब। व्यवस्था १२:१६

24 मेको ब्वचा मदुम्ब। मेको कली ब्वाक्कु खोदेशो पा खपीम ताइक्चा माल्नीनी।

25 गेपुकीम मेको मब्वचा। मिनु गे परमप्रभु यावे आ डोंइती मार ठीक बाक्मे, मेको पतीके, गेपुकी नु इन नोले डा इन आल आन कली रिम्शो दुम्ल।

26 तन्न गेपुकी इन परमप्रभु कली गेशो थोव्रकपुकी नु इन गेचा माल्शो, इन दाक्शा गेशो कुरशा परमप्रभु यावे आ योव्रशो बाक्तीकेम लचा माल्नीनी।

27 मिनु इन चोशा चढेशो श्ये नु मेको आ हुश परमप्रभु यावे, इन परमप्रभु कली चढेतीकेम चढेचा माल्नीनी। इन क्योरशा चढेशो आ हुश परमप्रभु यावे, इन परमप्रभु कली चढेतीके आ पुंम जारचा माल्नीनी। मेको आ श्ये गे ब्वने चाप्नीनी। व्यवस्था १२:६

28 गेपुकीमी होस पा आं अरेशो लोव्र नेल्ल नेनीन। मिनु टिशा पाइतीनी हना, इन कली नु इन नोले डा इन तमी तौ आन कली गेना हना यो रिम्शो दुम्ब। परमप्रभु यावे, इन परमप्रभु आ डोंइती रिम्शो नु ठीक पाइबपुकी रिम्शो दुम्नीम।

29 परमप्रभु यावे, इन परमप्रभुमी मेको रागी रागी डा मुर आन कली इन डोंइती क्याम्ब। गे मेको आन कली खेरचा कली जाक्नीनी। मिनु थमा पा खेरशा, मेको आन बाक्तीकेम बाक्नीनी।

30 इन डोंइती क्याम्शो मुर आन देवी देवता आन पबंम मेको रागी रागी डा मुरपुकीमी आन देवी देवता कली दोपा टेयब सेल्मे? गो यो मोदेशो पाइनीकी, दे हिल्लो पा लोव्र मपने। होस पा बाक्कीन।

गे यो मेको आन खोदेशो पा हेंथे गाक्तीनी हना, मेको आन खोदेशो पा साइक्चा पुंडसीनीनी। प्रस्थान २३:२४; इजीकीएल २०:३२

31 गेपुकीमी परमप्रभु यावे, इन परमप्रभु कली मोदेशो मपने। मारदे हना मार मार परमप्रभु यावे आ डोइती ग्रांरा दित्चा डा बाक्मे, मेकोपुकीमी आन देवी देवता आन कली नेल्ल पांमतेक्म। मेकोपुकीमी आंम तमी तौ आन कली मेको आन देवी देवता आन परबंम मीम चोशा चढ्मेतेक्म।

32 गो इन कली दोशो अरेडा, मेको नेल्ल होस पा पने। गेपुकीमी मारेड मतेम्दीन, मारेड मशोलीने” देंत।

## 13

### मूर्ति पूजा मपने

1 मिनु मोसामी “इन दातेमी परमप्रभु यावे आ लोत्र पाइब, डोमु शेंब ‘चिन्ड नु छक लाक्चा डा गेय दुम्ब’ देंब।

2 मिनु आन देशो खोदेशो पा दुम्शा मेकोपुकीमी ‘गेपुकी आंइ डोइती मतुइश्शो देवी देवता आन नोले खोइय्या। मेको आन कली ठेयब सेल्य’ दे लोत्र पांमतेक्म हना,

3 गेपुकीमी मेको परमप्रभु यावे आ लोत्र पाइब, डोमु शेंब, आन लोत्र काइ मनेनीन, मटिने। मारदे हना परमप्रभु यावे, इन परमप्रभुमी गे इन थुंनु सोक्त नेल्लेमी परमप्रभु यावे, इन परमप्रभु कली दाक्नीनी देय मदाक्नीनी, दे इन थुं नाक्शो बाक्ब।

4 गेपुकी परमप्रभु यावे, इन परमप्रभु कली ला खोतीन। मिनु मेको कली ला मान पा हिनीन। मिनु मेको आ शेंशो पचा माल्नीनी। मेको आ देशो टिशा, मेको कली गेय पशा, मप्रोंइथु बाक्कीन। ब्यवस्था ८:२

5 मिनु गेपुकीमी परमप्रभु यावे आ लोत्र पाइब मेको डोमु डा लोत्र शेंब कली साइक्चा माल्नीनी। मारदे हना मेकोमी परमप्रभु यावे, इन परमप्रभु कली प्रोंइपाइक्चा, दे इन कली दूली शेंताक्ब। मिनु इन कली वाइलीम वाइल दुम्तीके रे इजीप्तर रे गुंइशा एक चाक्ब परमप्रभु यावे, इन परमप्रभु बाक्ब। मोदेशो मुरपुकीमी इन कली परमप्रभु यावे आ कोंइशो लां रे हेंथे गाक्पाइक्चा दाक्नीम।

6 मिनु सुइमी इ कली खुइश्शोमी हेंथे गाक्चा कली लेम्ब, मेको इ लोक्ब बाक्त हना, इ आफ आ तौ बाक्त हना, इ आंम आ तौ बाक्त हना, इ आंम आ तमी बाक्त हना, इ दाक्शो मीश बाक्त हना, इ शुश दाक्शो वारच बाक्त हना, नु मेकोमी ‘गे नु इ किकी पिपीमी मतुइश्शो देवी देवता आन कली सेउ पय’ देंतेक्म हना, ब्यवस्था १८:२०; १कोरिन्थी ५:९, १३

7 इन एर ओंथ बाक्शो जात जात डा इन नेक्था रागी डा बाक्ल कि डोन रागी डा बाक्ल आन देवी देवता बाक्तेक्म हना यो,

8 मेको लेम्ब आ लोत्र मनेंचा, आ देशो मटिचा। गे मेको कली शिशी मपथु, मेको कली मखुइक्थु,

9 मेको कली थमा पा साइक्चा माल्नीनी। मिनु गे नेल्ल क्येडा डोइती मेको कली साइक्च, दे आप्चा माल्नेवे। नोले ला इ मुर नेल्लेम आप्शा साइक्चा माल्नीनी।

10 मिनु नेल्लेमी मेको कली मबेक्म सम्म फुल्लु आप्चा माल्नीम। मारदे हना इन वाइलीम वाइल दुम्तीके इजीप्तर रे गुंइब परमप्रभु यावे, इन परमप्रभु रे हेंथे गाक्ब सेल्चा माल्शो बाक्त। ब्यवस्था १७:७

11 मिनु इस्राएली नेल्ल मेको नेंशा, हिंचा माल्नीम। मिनु इन दातेमी मोदेशो मरिम्शो गेनायो मपमेक्ल।

12 मिनु परमप्रभु यावे, परमप्रभुमी इन कली बाक्चा कली गेशो सहर काम

13 इन दाते रे मरिम्शो वोंइश मुरपुकी बोक्शा, सहर डा मुर आन कली दूली पपाइश्शा, मेकोपुकीमी ‘लय, देवी देवता आन कली पूजा पय’ देंतेक्म हना, गेपुकी मेको देवी देवता गेनायो मतुइश्शो बाक्तीनी हना,

14 गेपुकीम रिम्शो पा खोदील निदील पा हिल्लो पचा माल्नीनी। मिनु मेको मरिम्शो थमा पा इन दातेमी पशो बाक्त हना,

15 गेपुकीमी मेको सहर डा मुर आन कली थमा पा क्योरशा साइक्चा माल्नीनी। मेको सहर नेल्ल कली खतम सेल्चा माल्नीनी। मिनु मेकेर बाक्शो बी ब्यफ, क्यारश भेडा नेल्ल यो साइक्चा माल्नीनी।

16 मेकेर बाक्शो मारेइ मारेइ, मेको सहर आ दातेम खुप्चा माल्नीनी। मिनु मेको खुप्शो नु सहरम मी सुइक्तीन। मेको परमप्रभु यावे, इन परमप्रभु कली चोशा च्हेशो खोदेशो दुम्ल। मेको सहर गेना हना यो फोहोर ताइक्तीके दुम्ल। मिनु मेको सहर कली लेंशा मसेलीन। व्यवस्था २०:१६-१८

17 मिनु गेपुकीमी मथिचा देशो थोव्रक मारेइ मलतीन। मिनु परमप्रभु यावे आ गाइशो नाइक्ब कों, इन कली शिशी पा दाक्ब। इन किकी पिपी नु कसम जशो खोदेशो पा इन कली शूश सेल्ब।

18 गेपुकी परमप्रभु यावे, इन परमप्रभु आ देशो टीतीनी, मुलाक्ती गो इन कली देशो आं शेंशो नेल्ल पाइतीनी हना, गेपुकी परमप्रभु यावे, इन परमप्रभु आ डोंइती ठीक पाइब दुम्नीनी” देंत। यहोसु ७:-

## 14

ब्वचा नु मब्वचा डा श्ये

लेवी ११:-

1 मिनु मोसामी “गेपुकी परमप्रभु यावे, इन परमप्रभु आ तमी तौ ननी। बेक्शो मुर आ परबम इन कुशुल प्रेक्चा मदुम्ब। इन चां प्रेक्चा मदुम्ब। लेवी १९:२७-२८; येरमीया ४७:५; इजीकीएल ७:१८

2 मारदे हना गेपुकी परमप्रभु यावे, इन परमप्रभु आ आंम मुर बाक्नीनी। मिनु परमप्रभु यावेमी जात जात डा मुर नेल्ल आन दाते रे इन कली आ मुर सेल्चा कली योव्रत।

3 गेपुकीमी मारेइ ग्रांया दिचा डा थोव्रक मजने मब्वने।

4 गेपुकीमी ब्वचा दुम्ब जन्तु तेको बाक्नीम देशा हना, ब्यफ, क्यारश, भेडा,

5 रोकेश, किरश, बरांट, कौरो किरश, साबर, चितल नु थार बाक्नीम।

6 मिनु गेपुकीमी जन्तु आन दातेमी तेको नेल्ल गेंच चेशो नु शोकोल हेक्ब बाक्नीमी, मेको आन कली ब्वचा दुम्ब।

7 तन्न शोकोल हेक्ब नु गेंच जेशो आन दातेमी तेको मब्वचा देशा हना, दलओठ, खरायो, रोंगु डा खरायो मब्वचा। मारदे हना मेकोपुकी शोकोल हेक्नीम हना यो, आन गेंच मजेशो बाक्नीम। मेको इन कली ग्रांया बाक्ब।

8 मिनु पोव्र आन गेंच जेशो बाक्नीम हना यो, शोकोल महेक्नीम। मेको इन कली ग्रांया बाक्ब। मेको आन श्ये मब्वचा, आन सिनु यो थिचा मदुम्ब।

9 ब्वाक्कुम बाक्बपुकीमी फ्रां नु कत्ला पाइशो ब्वचा दुम्ब।

10 तन्न फ्रां नु कत्ला मपाइशो मब्वने। मेको इन कली ग्रांया बाक्ब।

11 गेपुकीमी ग्रांया मदिचा डा चिक्ब नेल्ल ब्वने चाप्नीनी।

12 तन्न गेपुकीमी ब्वचा मदुम्शोपुकी चहिं ककाकुली, ब्वारदे, गिद, कुही,

13 नेल्ल खाल डा ब्वारदे,

14 खद,

15 सुतुमर्ग, हुहुचील, हांस, नेल्ल खाल डा बेसारा,

16 हुहुचील, कोइरालो नु बुक्स,

17 धनेस, सिनु ब्वाइब गिद हांडगील,

18 सारस, नेल्ल खाल डा बोकुला, फाप्रे चिक्बी नु पकातिक्ती चहिं मब्वने।

19 फ्रां पाइशो माले फटेडग्रा नेल्ल इन कली ग्रांया बाक्ब। मेकोपुकी मब्वचा।

20 तन्न ग्रांया मदिचा डा फ्रां पाइशो नेल्ल ब्वने चाप्नीनी।

21 गेपुकीमी परमप्रभु यावे, इन परमप्रभुम आ कली योव्रशो मुर बाक्नीनी। मोपतीके आंमा बेक्शो जन्तुपुकी ब्वचा मदुम्नीनी। गे नु बाक्शो अर्को रागी डा मुर आन कली मेको गेने चाप्नीनी। मेकोपुकीमी मेको ब्वाम्तेक्म हना यो, लेयतेक्म हना यो, ठीक दुम्ब। क्यारश आ पाठा आ ममा आ दूधम मक्येने। प्रस्थान २२:३०; प्रस्थान २३:१९

१० भाग डा भाग का च्हेचा

22 गेपुकीमी गेनायो मप्रोंइचा डा पा बर्स बर्स डा इन रूम नु खेतम वाशा सिशशो नेल्ल रे १० भागम भाग का तिल्ला वोइशशा, गेचा माल्नीनी। लेवी २७:३०

23 मिनु परमप्रभु यावे, इन परमप्रभु आ योत्रशो बाक्तीकेमी मेको आ डोंइती जचा माल्नीनी। मार जचा ब्वचा माल्नीनी देंशा हना, इन १० भाग डा भाग का अन्न, इन अडगुर शांबु, इन तेल, इन कली डोंइती जरमेशो ब्यफ नु क्यारश भेडा जचा ब्वचा तूचा माल्नीनी। मो पाइतीनी हना, गे मबेक्नी सम्म परमप्रभु यावे, इन परमप्रभु कली मान पा हिंचा शेंसीनीनी। ब्यवस्था १२:१७-१८; ब्यवस्था १९:२३

24 मिनु परमप्रभु यावे, इन परमप्रभु आ योत्रशो बाक्तीक इन बाक्तीके रे शुश डोन बाक्त हना, नु परमप्रभु यावे, इन परमप्रभुमी इन कली आसीक गेपु नु इन १० भागम भाग का मेकेर लाइक्ने मचाप्तीनी हना,

25 मेको इन तिल्ला वोइशशा १० भागम भाग का लेयडीन। मेको रे ताकशो क्येट लाइशशा, परमप्रभु यावे, इन परमप्रभु आ योत्रशो बाक्तीके लने।

26 मिनु इन दाकशो खोंदेशो पा बी ब्यफ, क्यारश भेडा, अडगुर शांबु, रकसी मेको क्येटीमी ग्यापीन। मिनु गे नु इन खिं डा मुर परमप्रभु यावे, इन परमप्रभु आ डोंइती जशा ब्वशा ग्येरसीने।

27 इन सहरम बाक्ब लेवी आ थर डा मुर आन कली रिम्यो पा कोत्रडीन। मारदे हना मेकोपुकी इन खोंदेशो पा शोंप मतामे। ब्यवस्था १२:१२, १९;

28 मिनु बर्स सां नोले गे इन रुशो डा १० भागमी भाग का इन सहर डा वोइक्तीकेम वोइक्चा माल्नीनी। ब्यवस्था २६:१२-१५; लेवी २७:३२-३३

29 मिनु इन खोंदेशो पा शोंप मताइब लेवी आ थर डा मुरपुकी, अर्को रागी डा मुर, रोम रोइक्च नु वोंइश बेक्शो मीश मुरपुकी मेकेर जाक्शा, रूथ्री जचा ब्वचा तामेक्ल। मो पाइतीनी हना, परमप्रभु यावे, इन परमप्रभुमी इन कली इन पतीक नेल्लेमी आसीक गेब" देत।

## 15

### ७ बर्स नु जेर

1 मिनु मोसामी "गे इन कली ७ बर्स नोले जेर क्याम्तीक बर्स बाक्ब। प्रस्थान २३:१०-११

2 मेको मथाप्तीक माफ गेतीक बर्स दोपा पचा माल्नीनी देंशा हना, सु सुमी आ वारच, दे लोकब आन कली जेर गेम्तेक्म हना, मेको गेबपुकीमी जेर ताक्ब आन कली गेशो जेर मथाप्पाइक्थु प्रोन्मेक्ल। मेकोमी आ वारच नु आ लोकब आन कली जेर आ पर्बम गेन कि गेन, दे पुंडेचा मदुम्ब। मारदे हना परमप्रभु यावे रे पा जेर क्याम्तीक डा बर्स बाक्ब। नेहेम्याह ५:१०; नेहेम्याह १०:३२

3 अर्को रागी डा मुर आन कली चहिं गेन कि गेन, दे पुंडेन चाप्नीनी। तन्न इन लोकब आन कली चहिं दोशो जेर बाक्मे मेको प्रोंइचा माल्नीनी।

4 इन दातेमी सुइ पुडग मबाक्म कों? मारदे हना परमप्रभु यावेमी योत्रशा गेशो इन के सेल्लो रागीम इन कली शुश आसीक गेब।

5 गेपुकीमी परमप्रभु यावे, इन परमप्रभु आ देंशो होस पा टीतीनी हना, इन कली अरेशो नेल्ल पाइतीनी हना, सुइ पुडग मदुम्नीनी।

6 मारदे हना परमप्रभु यावे, इन परमप्रभुमी इन कली देंशो खोंदेशो पा इन कली आसीक गेब। मिनु गे शुश रागी रागी डा मुर आन कली जेर गेब दुम्नीनी। गेपुकीम चहिं जेर पुंडेचा ममाल्नीनी। मिनु गेपुकीमी शुश रागी रागी डा मुर आन कली हुकुम पाइनीनी। तन्न मेकोपुकीमी इन कली हुकुम मपाइनीम। ब्यवस्था २८:१२

7 मिनु परमप्रभु यावे, इन परमप्रभुमी इन कली गेशो रागीम, सहर कामी बाक्शो इन लोकब का पुडग बाक्त हना, इन थुं खकटा पा मबाक्कीन। 'काइ मगेनुड' दे मदेनीन। १यूहन्ना ३:१७

8 तन्न गे शिशी पा मेको कली आ माल्लो नेल्ल जेर गेने। लूका ६:३४-३५

9 मिनू इन थुमी 'जेर क्याम्तीक बर्स जाक्चा चिक्ताक्व' दे इन पुडग लोक्ब आ पबर्म गन गन पा, मेको कली वारच पा जेर गेचा मदाक्नीनी हना, होस पने। मेको पुडगुमी इन पबर्म परमप्रभु यावे कली पुडब। मिनू गे पापी दुम्नीनी।

10 गेपुकीमी मेको कली हाडशो थुं पा गन गन मपथु गेने। मारदे हना ओं पतीकेन परमप्रभु यावे, इन परमप्रभुमी इन कली इन पशो नेल्लेमी आसीक गेब। २कोरिन्थी ९:६-७

11 मारदे हना रागीम श्येत जशो पुडगपुकी गेना हना यो बाक्नीम। मोपतीके गो इन कली इन रागीम बाक्शो श्येत जाडब इन लोक्ब नु पुडग आन कली तशा, हाडशो मुर दुम्शा गेन। मत्ती २६:११; यसेया ५८:७; याकूब २:१५-१६

### ७ बर्स डा वाइलीम वाइल

प्रस्थान २१:१-६

12 मिनू इन हिब्रू आन दाते डा लोक्ब, मीश मुर वोंडश मुर, आंम कली इन गुडमी लेयसीनीम हना, मेकोमी इन कली ६ बर्स गेय पचा माल्नीम। मेको ७ बर्समी मेको आन कली प्रोंडशा लचा गेचा माल्नीनी। येरमीया ३४:१४

13 मिनू गे मेको प्रोंडनीनु, श्येतथ गुड मसोडक्तीन।

14 परमप्रभु यावे, इन परमप्रभुमी इन कली आसीक गेशो रे इन क्यारश भेडा इन अन्न नु अडगुर शांबु रे मेको कली शुश गेशा सोडक्तीन।

15 गेपुकी इजीप्त रागीमी वाइलीम वाइल दुम्शा बाक्तीनी। मिनू परमप्रभु यावे, इन परमप्रभुमी इन कली प्रोंडतु, मेको मिम्तीन। मोपतीके गो मुलाक्ती दोपा पचा, दे गो इन कली शेंनुड। ब्यवस्था ५:१५

16 मिनू मेकोमी इन कली नु इन मुर आन कली दाक्शा, मेकोमी 'गो इन कली मप्रोंडथु, एकेन गेय पाइनुड' दैत हना,

17 गे मेको मुर कली लाप्चोमी राप्पाइशशा लूजे का लाइशशा, मेको आ नोफा लाप्चो डा शी तारी ख्रिस्ता माल्नीनी। मिनू मेको मबेक्म सम्म इन वाइल दुम्ब। वाइलीम कली यो मोदेशो पचा माल्नीनी।

18 गेपुकीमी मेको आन कली प्रोंडशा सोडक्चा श्येत मलाक्कीन। मारदे हना गाल्च ताक्शा गेय पाडब आन क्येडा निक्शी खेयप हिक्शो खोदेशो पा मेकोमी ६ बर्सम गेय पने थुम्शो बाक्ब। गेपुकीमी इन प्रोंडशो वाइलीम वाइल कली रिम्शो पा गेतीनी हना, परमप्रभु यावे, इन परमप्रभुमी इन कली इन पशो नेल्लेमी आसीक गेब।

### डोंडती जरमेशो ब्यफ नु सांड

19 इन बी ब्यफ आ डोंडती जरमेशो बाछा नु इन क्यारश भेडा आ डोंडती जरमेशो पाठा परमप्रभु यावे, इन परमप्रभु कली गेचा माल्नीनी। इन डोंडती जरमेशो ब्यफ लाइशशा गेय मपचा। डोंडती जरमेशो सांड आन कली ऊन मप्रेक्चा। प्रस्थान १३:२, १३-१६

20 मिनू बर्स बर्सम गेपुकी नु इन खिं डा मुर नेल्लेमी परमप्रभु यावे आ बाक्तीकेमी परमप्रभु यावे, इन परमप्रभु आ डोंडती ब्वचा माल्नीनी। ब्यवस्था १४:२३

21 तन्न मेको ब्यफ, सांड कली मारेड दुम्शो बाक्त हना, कोडटे बोडटे बाक्त हना, नु मिक्च मताडब मारेड दुम्शो बाक्त हना, गेपुकीमी मेको कली परमप्रभु यावे, इन परमप्रभु कली चढ़ेचा मदुम्ब। लेवी २२:२०

22 गेपुकीमी इन सहरमी किशश नु रोकशो ब्वशो खोदेशो पा परमप्रभु आ डोंडती ग्रांन्रा दिशो नु मदिशो नेल्लेमी ब्वने चान्नीम। ब्यवस्था १२:१५, २२

23 मेको आ हुश ला मब्वचा। मेको ब्वाक्कु खोदेशो पा खपीम ताडक्चा माल्नीनी" दैत। ब्यवस्था १२:१६



1 मिनू मोसामी “गेपुकीमी आबीब महिनाम परमप्रभु यावे, इन परमप्रभु आ पास्सा चाड मानेचा माल्नीनी। मारदे हना परमप्रभु यावे, इन परमप्रभुमी आबीब महिना डा नाकदो इन कली इजीप्त रे गुंडताकव। प्रस्थान १२:-

2 मिनू गेपुकीमी परमप्रभु यावे आ नें वोइक्का कली आ योत्रशो बाक्तीकेमी परमप्रभु यावे, इन परमप्रभु कली बोका नु ब्यफपुकी क्योरशा पास्सा चाड मानेचा माल्नीनी।

3 गेपुकीमी ग्युरशो बोरब ओरुली सुप्शो शोब्ले मेको श्ये नु मजने। गेपुकी ७ नाक्त सम्म ग्युरशो बोरब ओरुली मसुप्शो शोब्ले जचा माल्नीनी। मेको इन श्येत डा शोब्ले बाक्ब। मारदे हना गे इजीप्त रे चुइश्शा गूतीनी। मिनू गेपुकीमी मबेक्नी सम्म इजीप्त रे ग्यूरशो नाक्ती मिम्चा कली मेको पास्सा चाड मानेचा माल्नीनी। प्रस्थान १२:११

4 मिनू ७ नाक्त सम्म इन रागी नेल्लेमी ग्युरशो बोरब ओरुली बाक्का ममुम्ब। मिनू गेपुकी डोंइती डा नाकदो क्योरशो श्ये सुनी सम्म मारेइ हेंचा ममुम्ब।

5 परमप्रभु यावे, इन परमप्रभुमी इन कली गेशो सहरमी मेको पास्सा चाड डा मार मार क्योरने मचाप्नीनी।

6 परमप्रभु यावे, इन परमप्रभुमी आ नें वोइक्का कली नोले योत्रशो बाक्तीकेमी मेको पास्सा चाड डा मार मार क्योरचा माल्नीनी। गे मेको इजीप्त रे गुंडशा, नां रिक्की ना पचा माल्नीनी।

7 मिनू गे मेको श्ये कली वाल्शा, परमप्रभु यावे, इन परमप्रभुमी नोले योत्रशो बाक्तीकेम चोचा माल्नीनी। मिनू सुनी लेशशा, आम आम ताम्बु लने।

8 गे ६ नाक्त सम्म ग्युरशो बोरब ओरुली मसुप्शो शोब्ले जचा माल्नीनी। मिनू ७ नाक्तीम परमप्रभु यावे, इन परमप्रभु आ परबंम बुक्तीक नाक्त बाक्ब। मेको नाक्ती मारेइ गेय मपने।

पास्सा आ ७ हप्ता नोले डा चाड

9 मिनू मीशो बाली रिक्का गोशो नाक्त रे गेपुकीमी ७ हप्ता हिक्का माल्नीनी।

10 मिनू गेपुकी हप्तापुकी डा चाड परमप्रभु यावे, इन परमप्रभु कली मानेचा माल्नीनी। परमप्रभु यावे, इन परमप्रभुमी इन कली आसीक गेशो खोदेशो पा इन ग्येरसीशो थुंमी चढेशा चाड मानेचा माल्नीनी। प्रस्थान ३४:२२

11 मिनू गेपुकी, इन तमी तौपुकी, वाइलीम वाइल, इन सहरम बाक्शो लेवी आ थर डा मुरपुकी, इन दातेमी बाक्शो अर्को रागी डा मुरपुकी, रोम रोइक्च नु आन वोंइश बेक्शो मीश मुर नेल्ल परमप्रभु यावे, इन परमप्रभु आ नें वोइक्का कली नोले योत्रशो बाक्तीकेमी मेको आ डोंइती ग्येरसीचा माल्नीनी।

12 गेपुकी इजीप्त रागीम वाइलीम वाइल दुम्शो मिम्चा माल्नीनी। गे मेको फुल्लुम मुशा ब्रेक्शो लोत्र होस पा टिचा माल्नीनी। ब्यवस्था ५:१५

बाली नाली ओंइतीक चाड

13 मिनू इन रू डा अन्न अडगुर मारेइ मारेइ खुम्ने थुम्शा, गेपुकीमी बाली नाली ओंइतीक चाड ७ नाक्त सम्म मानेचा माल्नीनी।

14 मिनू गेपुकी, इन तमी तौ, इन वाइलीम वाइल, इन सहरम बाक्शो लेवीपुकी, अर्को रागी डा मुरपुकी, रोम रोइक्च नु आन वोंइश बेक्शो मीश मुरपुकी, नेल्लेमी ग्येरसीशा मेको चाड मानेचा माल्नीम। ब्यवस्था २६:११; यसैया ३०:२९

15 मिनू गेपुकीमी परमप्रभु यावे, इन परमप्रभु आ योत्रशो बाक्तीकेमी ७ नाक्त सम्म मेको चाड मानेचा माल्नीनी। मारदे हना परमप्रभु यावे, इन परमप्रभुमी इन कली बाली नाली शुश गेब नु इन मारेइ मारेइ पशोमी इन कली आसीक गेब। मोपतीके गेपुकी शुश ग्येरसीचा माल्नीनी।

16 मिनू परमप्रभु यावे, इन परमप्रभुमी आ नोले योत्रशो बाक्तीकेमी इन दाते डा वोंइश मुर नेल्ले सां खेयप परमप्रभु यावे आ डोंइती जाक्दीत्या माल्नीम। ग्युरशो बोरब ओरुली मसुप्शो शोब्ले डा पास्सा माइश्शो चाड, ७ हप्ता नोले डा हप्ता डा चाड नु बाली नाली ओंइतीक गोठ सेल्टीक चाडम जाक्दीत्या माल्नीम। मिनू परमप्रभु यावे आ डोंइती श्येत्थ गुड जाक्का ममुम्ब।

17 परमप्रभु यावे, इन परमप्रभुमी आसीक गेशो खोदेशो पा नेल्लेमी आन चाप्शो गेचा माल्नीम।

### निसाफ पतीके

18 मिनु मुर आन कली ठीक निसाफ पचा कली गेपुकीमी इन थर थर डा नु परमप्रभु यावे, इन परमप्रभुमी इन कली गेशो सहर सहरम निसाफ पाइब नु ठेयब मुर योव्रशा वोइक्चा माल्नीनी। व्यवस्था १:१६-१८; गन्ती ११:१६

19 निसाफ हेंथे मपने। कुल मकोव्रडीन। घूस मजने। मारदे हना घूसमी जोक्ब तुइक्ब मुर आन मिक्च सिल्व। मिनु ठीक पाइबमी घूस जशा दूली लोव्र पाइब। १सामुएल ८:३

20 मिनु परमप्रभु यावे, इन परमप्रभुमी गेशो रागीम ब्रोइचा नु इन के सेल्चा, दे ठीक पतीक लां खोतीन।

### चढेतीके परमप्रभु कली ला बाक्ब

21 गेपुकीमी अशेराह देवी आ लाइश्शो मूर्ति परमप्रभु यावे, इन परमप्रभु कली चढेतीक आ नेक्था खुक्चा मदुम्ब। व्यवस्था ७:५; २राजा २३:४

22 गेपुकीमी तेकोइ अर्को मूर्ति वोइक्चा मदुम्ब। मारदे हना मेको नेल्ल परमप्रभु यावे, इन परमप्रभुमी कली ग्रांरा दीब” देंत। लेवी २६:१; येरमीया २:२७

## 17

1 मोसामी “गेपुकीमी परमप्रभु यावे, इन परमप्रभु कली कोडटे बोडटे गाक्ब मिक्च मताइब, मारेइ दुम्शो ब्यफ भेडा चढेचा मदुम्ब। मोदेशो परमप्रभु यावे, इन परमप्रभु कली ग्रांरा बाक्ब। लेवी २२:२०; मलाकी १:६-९

### मूर्ति पूजा आ पर्वम

2 मिनु परमप्रभु यावे, इन परमप्रभुमी इन कली गेशो सहरमी सुइ वोंइश मुर मीश मुरुमी परमप्रभु यावे, इन परमप्रभु आ डोंइती मरिम्शो पा आ कबल कली प्रोंइशा, ब्यवस्था १३:७-१२

3 मेकोपुकीमी देवी देवता खोइश्शा, मेको आन कली ठेयब सेल्शा, नां, तास्ला, सोरुल आन डोंइती बाप्शा गोम ‘मपन देशो’ पाम्तेक्म हना, ब्यवस्था ४:१९

4 मिनु मुरपुकीम मेको आन पर्वम इन कली शेंताक्म हना, गेपुकीम रिम्शो पा खोदील निदील पा हिल्लो पचा माल्नीनी। मिनु मेको थमा पा इन इस्राएलमी मोदेशो ग्रांरा दिचा डा गेय पशो बाक्त हना,

5 मेको मोदेशो ग्रांरा पाइब वोंइश मुर हना यो, मीश मुर हना यो इन सहर रे गुंइशा, फुल्लु आप्शा साइक्चा माल्नीनी। लेवी २४:१४

6 साइक्चा पुंइसीब आन पर्वम मुर निक्शी नु सांमी ‘गो ताता, सांकछी दुम्ती’ देतेक्म हना, ला साइक्चा दुम्ब। का ला सांकछी बाक्त हना साइक्चा मदुम्ब। व्यवस्था १९:१५; १राजा २१:१०; हिबू १०:२८

7 मेको आन पशो ताइब सांकछीपुकीमी नेल्ल क्येडा डोंइती मेको आन कली साइक्चा, दे फुल्लु आप्चा माल्ब। मेको नोले ला नेल्ल अरुम पचा माल्नीम। मिनु मोपा गेपुकीमी मरिम्शो नेल्ल इन दाते रे गुंइचा माल्नीनी।

### नेल्ल क्येडा ठेयब निसाफ

8 मिनु इन सहरम मुर साइक्तीके, रू योक्तीके, तुम्मुतीके नु मारेइ मारेइ मचाप्चा डा निसाफ बाक्त हना, इन सहर रे परमप्रभु यावे, इन परमप्रभु आ योव्रशो बाक्तीकेम लचा माल्नीनी।

9 मिनु गेपुकी चढेब, लेवी आ थर डा मुर नु मेना गेय पाइब निसाफ पाइब कली ‘मार पचा’ दे हिल्लो पचा कली गुम्थ लचा माल्नीनी। मेकोमी इन कली दोपा निसाफ पचा शेंनीम। २इतिहास १९:८, ११

10 मिनु परमप्रभु यावे आ योव्रशो बाक्तीकेमी मेकोपुकीमी इन कली मार देंनीम, मेको मोदेशो पा ठीक पा निसाफ पचा माल्नीनी। मिनु इन कली दोपा शेंदमे, मोपा होस पा पचा माल्नीनी।

11 मेको इन कली शेंशा अरेशो लोव्र नु निसाफ पतीके गे पचा माल्नीनी। मेको लोव्र नेंशा, ग्युरा नु पेरा गे मलने।

12 सुइम ठेयब लेशशा, परमप्रभु यावे, इन परमप्रभु आ गेय पचा कली वोइशशो चढेब, निसाफ पाइब आन लोत्र मटिपु हना, मेको साइकचा पुंडसीब। मिनु मोपा गेपुकीमी इसाएली, इन दाते रे मरिम्शो नेल्ल गुंड्या माल्नीनी।

13 मिनु मुर नेल्लेमी मेको नेशा हिंशा मोदेशो मपाइक्नीम।

पिप योव्रतीके आ पर्वम

14 मिनु गेपुकी परमप्रभु यावे, इन परमप्रभुमी इन कली गेशो रागी जाकदीशशा, इन के सेल्शा बाक्नीनु, गेपुकीमी 'एर ओंथ डा रागी रागी खोदेशो पा आंइ कली यो पिप का वोइक्चा माल्नीक' देंतीनी हना, १सामुएल ८:५-९

15 परमप्रभु यावे, इन परमप्रभुमी योव्रशो मुर कली ला वोइक्चा दुम्ब। इन लोकब आन दाते रे योव्रशा पिप वोइक्चा माल्नीनी। अर्को जात डा मुर पिप सेल्चा मदुम्ब, इन लोकब कली ला सेल्चा माल्ब।

16 मेकोमी शुश शारा आंम कली मवोदल। मिनु मेकोमी शारा ग्याप्चा कली मुर आन कली इजीप्त मसोइकतल। मारदे हना परमप्रभु यावेमी 'मेको लां गेनायो लेशशा मलने' देंत। १राजा १०:२६-२९

17 मिनु परमप्रभु यावे रे डोन मलल, दे मीश मुर शुश चाक्चा मदुम्ब। मिनु मेकोम आंम कली शुश सुन चांदी मखुप्तल। १राजा ११:१-८; १राजा १०:१४

18 मिनु मेको पिपमी सासन पवानु, चढेब, लेवी आ थर डा मुर आन किताब रे परमप्रभु यावे आ अरेशा लोत्र किताब काम ब्रेक्चा माल्ब।

19 मेको लोत्र मेको नु बाक्चा माल्ब। मिनु मेकोमी परमप्रभु यावे, आ परमप्रभु कली मान पा हिंचा कली शेंसीचा कली मबेक्म सम्म नाक्त कित कित पढेचा माल्ब। मेको अरेशो लोत्र नेल्ल नु फुल्लुम मुशा ब्रेक्शो लोत्र होस पा पचा माल्ब।

20 मेकोमी आंम लोकब आन दातेमी आंम कली ठेयब मसुदल। परमप्रभु यावे आ शेंशो लोत्र रे डोन मलल। ग्युरा पेरा गे मलल। मिनु आं तौ चचपुकीमी इसाएल डा राज्य कली शुश नाक्ती सम्म सासन पामेक्ल" देंत। ब्यवस्था ५:२९

## 18

लेवी आ थर डा चढेब आन गेय

1 मोसामी "लेवी आ थर डा चढेब, नु लेवी आ थर डा मुर नेल्लेमी रू मथेरनीम। परमप्रभु यावे कली चोशा चढेशो नु मेको कली गेशो मेकोपुकीम जामेक्ल। ब्यवस्था १०:९; गन्ती १८:८-२०; १सामुएल २:२८; १कोरिन्थी ९:१३

2 मेको आन लोकब आन दातेमी मारेइ शोप मताइनीम। आं देशो खोदेशो पा परमप्रभु यावे मेको आन शोप बाक्ब।

3 मिनु मुरपुकीमी ब्यफ, भेडा, क्यारश क्योरशा चढेमेनु, चढेब कली मार गेचा माल्नीम देशा हना, आ बला रे खोइल सम्म, शांपे निक्शी नु कोव्रज गेचा माल्नीम।

4 मिनु इन डोंइती रिक्शो अन्न, डोंइती डा अडगुर शांबु, डोंइती डा खाक्शो तेल नु भेडा आन डोंइती प्रेक्शो ऊन गेचा माल्नीम। प्रस्थान २३:१९

5 मारदे हना परमप्रभु यावे, इन परमप्रभुमी नेल्ल इन थर रे लेवी आ थर योव्रशो बाक्त। मारदे योव्रशो बाक्त देशा हना, मेको नु आ तौपुकी गेना हना यो परमप्रभु यावे आ डोंइती राप्शा, आ गेय पचा कली योव्रशो बाक्त।

6 मिनु इसाएलम बाक्ब लेवी आ थर डा मुर तेको तेको सहर रे परमप्रभु यावे आ योव्रशो बाक्तीके जाक्शा, न्यायाधीस १७:७; न्यायाधीस १९:१

7 परमप्रभु यावे आ डोंइती राप्ब आ लोकब नेल्ल खोदेशो पा परमप्रभु यावे, आ परमप्रभु कली गेय पने चाक्ब।

8 मेको नु आ मार मार लेयशो क्येट बाक्त हना यो, अरु चढेब खोदेशो पा उइक्थ उइक्थ जचा ताइब।

मपचा डा ग्रांरा दिशो गेय

9 परमप्रभु यावे, इन परमप्रभुमी इन कली गेशो रागी जाकदीन्नी नोले मेकेर डा रागी रागी डा मुर आन पशो ग्रांघ्रा दिशो गेय शेंसीशा काइ मपने।

10 मेको ग्रांघ्रा दिशो गेय मार बाकब देशा हना, आंम तमी तौ आन कली मीम चोशा चढेशा, लिंक्यु कोव्रचा, टुना मुना पचा, मन्तर तन्तर पचा, लेवी १८:२१; लेवी १९:२६,३१

11 ठेयब मिक्च पचा, बेकशो मुर रे लोव्र पचा नु बेकशो मुर आ अर्ती नेंथ माल्चा मेको नेल्ल ग्रांघ्रा दिचा डा गेय बाकब। मोदेशो पाइब इन दातेमी काइ मदुम्ब। लेवी २०:२७; १सामुएल २८:३-२०

12 मोदेशो पाइब मुर परमप्रभु यावे आ डोंइती ग्रांघ्रा दिचा डा बाक्नीम। मेको ग्रांघ्रा दिचा डा गेय आ पबंम परमप्रभु यावे, इन परमप्रभुमी मेको मुर आन कली इन डोंइती रे गुंडब।

13 परमप्रभु यावे, इन परमप्रभु आ डोंइती गेपुकी थमा सुइक्चा पुंडसीब रिम्शो पाइब दुमीन। उत्पत्ती ६:९; उत्पत्ती १७:१

14 मारदे हना गे खेरचा चिक्शो रागी रागी डा मुरुम टुना मुना पाइनीम नु लिंक्यु कोव्रनीम। परमप्रभु यावे, इन परमप्रभुमी इन कली मोदेशो पचा मगेब।

### परमप्रभु आ लोव्र पाइब

15 परमप्रभु यावे, इन परमप्रभुमी इन दाते रे आं खोदेशो पा आ लोव्र पाइब का योव्रब। गेपुकीमी मेको आ लोव्र नेंचा माल्नीनी। गन्ती १२:६-८; यूहन्ना १:४५; यूहन्ना ६:१४; यूहन्ना ७:४०; प्रेरित ३:२२; प्रेरित ७:३७

16 मिनु होरेब डांडाम युम्या नाक्त परमप्रभु यावे, इन परमप्रभु कली मार पुंडतीनी देशा हना ‘गो परमप्रभु यावे, आंइ परमप्रभु आ सेंदा लेंशा नेंचा मदाक्नीक। मिनु मेको ठेयब मी लेंशा तचा मदाक्नीकी। लेंशा, ताइताक हना, बेक्नीकी, को’ दे हिंशा पुंडतीनी। प्रस्थान २०:१९; हिब्रू १२:१९

17 मिनु परमप्रभु यावेम आं कली ‘मेकोपुकीमी रिम्शो लोव्र पांमतेक्म’ देंत। ब्यवस्था ५:२५

18 मिनु परमप्रभु यावेमी आं कली ‘इ खोदेशो पा आं लोव्र पाइब, आन लोकब आन दाते रे का योव्रनुड। आं देंचा माल्शो लोव्र गो मेको कली देंपाइक्नुड। मिनु आं अरेशो लोव्र मेकोमी नेल्ले मुर आन कली देंब। प्रस्थान ४:१२; यसैया ६:८; येरमीया १:९; मत्ती १०:१९

19 मिनु सुमी मेको आं नेंम, देशो लोव्र मटीबा, मेको कली गो सजाइ गेनुडमी।

20 तन्न तेको आं लोव्र पाइबमी आं मदेशो लोव्र देशा नु अरु देवी देवता आन देशो लोव्र पाप्टु हना, मेको आं लोव्र पाइब कली साइक्चा माल्नीनी। ब्यवस्था १३:२-६; येरमीया १४:१३-१५

21 मिनु गे इन थुमी “परमप्रभु यावे आ लोव्र बाकबा देय मबाकबा मेको दोपा तुइक्नय?” दे मिमताक्नी हना,

22 मेको परमप्रभु यावे आ लोव्र पाइबमी परमप्रभु यावे आ नेंमी लोव्र पाइब, तन्न मेको लोव्र मगाप्ट नु मदुम्त हना, मेको आं देशो ममाइ। मेको आं लोव्र पाइबमी आंमा थुं डा लोव्र पाप्टु। गेपुकी मेको कली तशा महिनीन’ दे परमप्रभुमी देंत” दे मोसामी इस्त्राएली आन कली लोव्र पाप्टु। येरमीया २३:१४; येरमीया २८:-; इजीकीएल १३:३-१६

## 19

### मुर साइशशा प्रोक्तीक सहर

1 मिनु परमप्रभु यावे, इन परमप्रभुमी रागी रागी डा मुर आन कली खेरशा इन कली गेशो रागीमी आन सहर नु खिंपुकी इन के दुम्मेनु,

2 मेना परमप्रभु यावे, इन परमप्रभुमी इन कली गेशो रागीम गे सहर सां तिल्चा माल्नीनी। ब्यवस्था ४:४१-४३

3 मिनु परमप्रभु यावे, इन परमप्रभुम इन कली गेशो रागी कली का का पा प्रोक्तीक सहर योव्रचा, दे भाग सां सेल्चा माल्नीनी। मेको का का पा सहर सांम मुर साइक्ब मुर प्रोक्शा, लशा बाक्तीक सहर सेल्चा माल्नीनी।

4 मिनु सुइमी गेहे मपथु, साइक्चा ममिम्थु मुर का कली साइक्तु हना, मेकेर प्रोक्शा लशा ब्रोंइल।

5 दोदेशो दुम्ने चाण्व देशा हना, आन वारच नु शी खोइकथ ब्वाकी लमानु, रवा तिम्मेनु, मेको खा डा फलम बुइशशा, लशा, ख्रशा आ वारच बेक्त हना, मोदेशो पा मुर साइक्ब मुर मेको सहरम प्रोक्शा लने चाप्नीम।

6 मेको सहर डोन बाक्त हना बेक्ब मुर आ मुरपुकीम मेको कली क्येक्क लेत्चा कली लांमी खेदा पा साइक्ब। तन्न मेको मुर साइक्चा मपुंडसीब बाक्ब। मारदे हना मेको आ वारच बाक्त।

7 मोपतीके गो इन कली “सहर सां तिल्चा माल्नीनी” दे माइक्तन्नी।

8 मिनु परमप्रभु यावे, इन परमप्रभुमी इन किकी पिपी नु कसम जशो खोदेशो पा इन रागी बारपाइक्तु हना,

9 मिनु गे मुलाक्ती शेशो परमप्रभु यावे आ अरेशो नेल्ल होस पा पाइतीनी हना, मिनु गे परमप्रभु यावे, इन परमप्रभु कली दाक्ताक्नी हना, गे नेल्ल नाक्ती मेको आ लांम गाक्तीनी हना, मेको सहर सां कली अर्को सहर सां तेम्चा माल्नीनी।

10 मोपा परमप्रभु यावे, इन परमप्रभुमी इन कली गेशो रागीम दोस मताइब कली मसदमेक्ल। दोस मताइब कली साइक्नीम हना, इन दातेमी साइक्चा डा पाप राइब।

11 तन्न मुरुम डोंइती रे ईख कुरशा, गेहे पशा, बाप्शा मुर कली तुप्शा साइक्तु हना, प्रोक्तीक सहर काम प्रोक्त हना,

12 मेको मुर आ सहर डा खाल्पापुकीमी मेको कली चाक्पाइशशा, क्येक्क लेण्व आन गुइमी साइक्पाइक्चा कली जिम्मा गेमेक्ल।

13 मेको कली शिशी मपन। मिनु इस्पाएलम सुम मारेइ दोस मतशो मुर कली हुश खाक्श पोक्शो पाप मोदेशो पा क्याम्चा माल्ब। ब्यवस्था २१:८-९

### सांद याक्चा मदुम्ब

14 मिनु गे परमप्रभु यावे, इन परमप्रभुमी इन कली इन के सेल्चा कली गेशो रागीम बाक्तीनी हना, इन किकी पिपीमी वोइशशो इन नेक्था डा मुर आन सांद याक्चा मदुम्ब। ब्यवस्था २७:१७

### सांकछी आन लोत्र गारचा माल्ब

15 मुर कामी दोस ताइब दुम्शो बाक्त देंतेक्म हना, सांकछी का आ लोत्र ला नेंशा मदुम्ब। सांकछी निक्शी, सां आन लोत्र गारत हना ला मेको कली दोस गेचा। ब्यवस्था १७:६; गन्ती ३५:३०; यूहन्ना ८:१७; २कोरिन्थी १३:१; हिब्रू १०:२८

16 मिनु जोल पा सांकछी बाक्शा, मुर का कली दोस गेचा कली बोक्त हना,

17 दोस गेब नु दोस ताइब निम्फा, परमप्रभु यावे आ डोंइती, चढेब नु निसाफ पाइब आ नेक्था जाक्चा माल्नीस।

18 मेको निसाफ पाइबमी मेको निक्शी आस कली खोदील निदील पा हिल्लो पचा माल्ब। दोस गेब आ लोत्र जोल बाक्त हना, दूली पा आ लोक्ब कली दोस गेशो बाक्त हना,

19 मेकोम आंम लोक्ब कली मार पचा मिम्शो बाक्मे, मेको कली मोन पचा माल्ब। मोपा गे इन दाते रे मरिम्शो पतीके क्याम्चा माल्नीनी।

20 मिनु अरु मुरपुकीमी मेको नेंशा हिंचा माल्नीम। मिनु नोले इन दातेमी मोदेशो मरिम्शो मपाइनीम।

21 मिनु गेपुकीमी शिशी मपने। साइक्ब कली साइक्चा माल्ब। मिक्च पुक्ब कली आ मिक्च पुक्चा माल्ब। खुइ जिक्व कली आ खुइ जिक्चा माल्ब। गुइ खोइल जिक्व कली आ गुइ खोइल जिक्चा प्रस्थान २१:२३-२५

## 20

### लडाइ आ पर्बम लोत्र

1 मिनु मोसामी “गेपुकी लडाइ पथ लनीनु, शारा नु बग्गीपुकी तशा, इन जोरी सत्रु इन क्येडा शुश बाक्तेक्म हना, महिनीन। मारदे हना परमप्रभु यावे, इन कली इजीप्त रे गुंडब इन परमप्रभु गेपुकी नु बाक्ब।

2 मिनु लडाइम लचा क्येडा डोंइती चढेबमी लडाइ पथ लाइब आन डोंइती लशा

3 'इसाएलीपुकी नेनीन, गेपुकी मुल लडाइ पथ लचा चिक्शो बाक्नीनी। मोपतीके आडक्च थुं मपने। महिनीन। मेको आन कली तशा, ग्रीचोक पा इन थुं ग्येत्थ लुकच मदुमीने।

4 मारदे हना परमप्रभु यावे, इन परमप्रभु इन जोरी सत्रु नु लडाइ पा इन कली ग्रापाइक्चा कली गेपुकी नु लाइब' देंचा माल्ब।

5 मिनु आन टेयब मुरपुकीमी मुर आन कली 'सु इन दातेमी नक खिं का सेल्शा, ओव्रतीक चाड ममानेशो बाक्त हना, मेको आ खिं लेशशा, लचा माल्ब। मेको लडाइम बेक्त हना, आ खिंम अर्को मुर चाड सेल्शा ओव्रब, मेको मदुम्ब। ब्यवस्था १:१५; ब्यवस्था १६:१८

6 सुइ इन दातेमी अडगुर रू खुम्शा, जचा मतशो बाक्तीनी हना, इन खिं लेशशा लने। मेको लडाइम बेक्त हना, आ अडगुर रू अर्कोम जाइब, मेको मदुम्ब। ब्यवस्था २८:३०; लेवी १९:२४-२५

7 सुइ इन दातेमी मीश आल का पुंडशा ग्युंवे पचा चिक्शो बाक्तीनी हना, मेको खिं लेशशा लचा माल्ब। मेको लडाइम बेक्त हना, मेको मीश आल अर्कोम लाइक्ब। मेको मदुम्ब' देंचा माल्नीम। ब्यवस्था २४:५

8 मिनु मेको टेयब मुरपुकीमी लेंशा मुर आन कली 'इन दातेमी सुइम हिंब नु आ थुं लुकच लाइब बाक्त हना, मेको आ खिं लेशशा लचा माल्ब। मेकेर बाक्त हना, आ लोकब आन थुं यो ग्येत्थ लुकच लपाइक्ब' देंचा माल्नीम। न्यायाधीस ७:३

9 मिनु टेयब मुरपुकीमी मो देंने थुम्मे नोले, मेकोपुकीमी लडाइ पाइब आन डोंइती गाक्चा कली, टेयब मुरपुकी योव्रचा माल्नीमी।

### लडाइ दोपा पचा, दे शेंशो

10 मिनु गेपुकी सहर का कली लडाइ पथ, आ नेक्था जाक्दीन्नी नोले मेको आन कली 'लडाइ मपय, गुइ पोक्कीन' देंचा माल्नीनी।

11 मिनु मेकोपुकीमी 'दुम्ब' दे गुइ पोक्तेक्म हना, मेकेर डा मुर नेल्ले आन कली वाइलीम वाइल खोदेशो पा गेय पाइब सेल्चा माल्नीनी।

12 तन्न मेको सहर डा मुरपुकीमी इन देंशो मबित्थु लडाइ पचा दाक्ताक्म हना, मेको सहर कली पुम्दीन।

13 मिनु परमप्रभु यावे, इन परमप्रभुमी मेको सहर इन कली गेपु हना, गेपुकीमी मेकेर डा वोंइश मुर नेल्ल आन कली तरवारम साइक्चा माल्नीनी। ब्यवस्था ३:६-७; गन्ती ३१:७, १४-१८

14 तन्न मीश मुर, आलपुकी, बी ब्यफ, क्यारश भेडा नु सहरम बाक्शो मारेइ मारेइ इन के दुम्ब। मोपा परमप्रभु यावे, इन परमप्रभुमी गेशो ग्राशो थोव्रक तशा ग्येरसीन।

15 आंम नेक्था डा रागी रागी कली ममाइ, तन्न डोन डा सहर कली मोदेशो पचा माल्नीनी।

16 तन्न परमप्रभु यावे, इन परमप्रभुमी मेको जात जात डा मुर आन सहर इन कली गेशो सहरम मार मार सेस बाक्मे, मेको साइक्चा माल्नीनी। गन्ती २१:१-३; यहोसु १०:४०

17 परमप्रभु यावे, इन परमप्रभुमी अरेशो खोदेशो पा, हित्ती, एमोरी, कनानी, परिज्जी, हिंवी नु यबुसी नेल्ल आन कली साइश्शा क्याम्चा माल्नीनी।

18 मो मपाइतीनी हना, मेको आन देवी देवता आन कली ग्रांशा दिचा डा पतीके शेंसीनीनी। मोपा परमप्रभु यावे, इन परमप्रभु कली मरिम्शो पा पाप पाइनीनी।

19 मिनु गेपुकीमी सहर का कली लडाइ पा शुश नाक्त सम्म पुम्शा बाक्नीनु, मेको सहर डा रवापुकी मतिम्चा। मारदे हना गेपुकीमी नोले मेको आन फल जने चाप्नीनी। मार, मेको एर ओंथ डा रवापुकी मुर खोदेशो बाक्नीमी डा?

20 तन्न इन तुइश्शो जचा फल मसिप्ब रवा तिम्ने चाप्नीनी। मिनु मग्रानी सम्म मेको रे सहर डा गारो डोइक्तीके सेल्ने चाप्नीनी" देंत।

1 मिनू परमप्रभु यावे, इन परमप्रभुमी इन कली गेशो इन के सेल्चा चिकशो रागी डा दिम मेर बेक्शो मुर का थिल्लीनी नु मेको साइकब मुर मतुंडसाक्व हना,

2 इन खाल्पा नु निसाफ पाइबपुकी लशा, मेको साइशो मुर तेको एर ओंथ डा सहर क्येडा नेक्था बाक्बा, पुक्चा माल्नीम।

3 मिनू मेको आ नेल्ल क्येडा नेक्था डा सहर आ खाल्पापुकीमी गेय मपपाइशो नु हलो मवाक्शो बी बाछा का चाक्चा माल्नीम।

4 मिनू मेको खाल्पापुकीमी मवाक्शो नु वांचेर मशोक्शो रू नु गेना हना यो ब्वाक्कु बाक्शो खोला आ नेक्था लाइशा, मेको बाछा आ शुर रोप्चा माल्नीम।

5 मिनू चढेब, लेवी आ तौपुकी मेको आ नेक्था जाक्चा माल्नीम। मारदे हना परमप्रभु यावे, इन परमप्रभु आ गेय पचा नु आ नेमी आसीक गेचा कली योव्रतु। मिनू जिशो खेशो बाक्त हना, मेको आन देशो पचा माल्नीम। ब्यवस्था १७:८-९

6 मिनू मेको साइशो मुर आ सहर नेक्था डा खाल्पापुकी मेको शुर रोप्चा साइशो खोला डा बी तार आन गुइ चिकसीमल। मत्ती २७:२४

7 मिनू मेकोपुकीमी “गोपुकी आंड गुइमी हुश खाक्श मपोक्शो। सुम पवा मेको यो मतुइशो।

8 मोपतीके परमप्रभु यावे इन श्येत रे प्रोंइशो इन मुर इस्राएली आंड पाप क्याम्दीन। इन मुर इस्राएली आन दातेमी एको दोस मतशो मुर कली पोक्शो हुश खाक्श आ पाप गो आंड दातेमी मलील” दे पुंडचा माल्नीम। मिनू मेको हुश खाक्श पोक्तीके पाप क्याम्सीब।

9 मोपा गेपुकीमी दोस मतशो मुर कली साइक्चा पुंडसीतीके इन दाते रे गुंडचा माल्नीनी। मारदे हना गेपुकीमी परमप्रभु यावे आ डोंइती ठीक पचा माल्नीनी। गन्ती ३५:३३

#### लडाइम तशो मीश आल

10 मिनू गेपुकीमी लडाइम लनीनु, परमप्रभु यावे, इन परमप्रभुमी इन जोरी सत्रु आन कली इन गुइमी गेवानु,

11 मिनू फ्रेंशा लाइशो आन दातेमी दारशो मीश आल का ताइतीनी नु मेको नु ग्युंबे पचा दाक्ताक्नी हना,

12 मेको कली इन खिंम लतीन। मिनू मेको मीश आलम आ चां फ्रेंचा नु आ ग्ये खोइक्चा माल्ब।

13 मिनू नोले मेकोमी आ माइत वा पुइशा नक वा फेक्चा माल्ब। मेको इन खिंम बाक्शा, महिना का सम्म आ आंम आफ आन परबंम रोंका पचा माल्ब। मिनू नोले मेको कली ग्युंबे पा मेको निक्शी मीश वोंइश दुम्ने चाप्नीम।

14 मिनू गे मेको कली तशा ब्रीताक्नी हना, मेको कली तिल्चा दाक्ताक्नी हना, मेको कली प्रोंइशा लचा गेन। गे मेको कली लेयचा मताइनीनी। मिनू वाइलीम कली खोदेशो पचा मताइनीनी। मारदे हना मेको इन मीश बाक्त।

#### डोंइती जरमेशो तौ

15 मिनू वोंइश मुर का के मीश निक्शी बाक्शा, का आ दाक्शो नु का आ मदाक्शो मीश बाक्त हना, मेको निक्शीमी तौ का थिशा, आ मदाक्शो मीशेम चहिं डोंइती तौ थिशो बाक्त हना, उत्पत्ती २९:३०-३२

16 अडस पशोनू, आ दाक्शो मीश आ तौ, मदाक्शो आ तौ प्रोंइशा, डोंइती जरमेशो तौ सेल्ने मचाप्ब।

17 मेकोमी आ मदाक्शो मीश आ तौ “डोंइती जरमेशो तौ बाक्ब” दे आ शोंप डा भाग निक्शी गेचा माल्ब। मारदे हना मेको आ डोंइती डा सक्तिम थिशो बाक्ब। डोंइती जरमेशो तौ आ अधिकार मेको केन बाक्ब। उत्पत्ती ४९:३

#### हेंथे गाक्ब तौ कली सजाइ

18 मिनू मुर का हेंथे गाक्ब मटीब तौ का बाक्त हना, मेको आ आम आफ आस देशो काइ मटीब बाक्त हना, तुप्शा, शेंशा यो मेको आस देशो मटिप्टु हना, ब्यवस्था २७:१६; प्रस्थान २०:१२

19 मेको आ आंम आफोम मेको कली ग्याइशशा, सहर डा खाल्पा आन डोंइती सहर डा लाप्चो आ नेक्था चाक्चा माल्नीम।

20 मिनु नोले मेको निक्शीमी सहर डा खाल्पा आन कली “एको आंस तौ हेंथे गाक्ब नु मटीब बाक्ब। एकोमी आंस अरेशो मटीब। एको शुश जाइब नु रकसी शांबु तूब बाक्ब” देंसल।

21 मिनु मेको सहर डा मुर नेल्लेमी मेको कली फुल्लु आप्शा साइक्चा माल्नीम। मिनु गेपुकीमी इन दाते डा मरिम्शो क्याम्चा माल्नीनी। मिनु इस्त्राएली नेल्लेमी मेको नेशा, हिंचा माल्नीम।

### मरिम्शो पाइब कली सजाइ

22 मिनु मुर कामी बेक्चा माल्शो सजाइ तशा, गेपुकीमी मेको कली रवाम क्युक्तीनी हना, गन्ती २५:४; यहोसु ८:२९; यहोसु १०:२६-२७; १सामुएल ३१:१०; २सामुएल ४:१२; २सामुएल २१:६,९

23 मेको आ लास आ दीसा सुनी सम्म रवाम क्युकशा, वोइक्चा मदुम्ब। मेको नाक्तीन मेको कली थिम्चा माल्नीनी। मारदे हना क्युकशा साइशो मुर परमप्रभुम पशो सराप चीले बाक्ब। परमप्रभु यावे, इन परमप्रभुमी गेशो रागी कली ग्रान्ना दिशो मसेलीन। यहोसु ८:१९; यहोसु १०:२७; यूहन्ना १९:३१; गलाती ३:१३

## 22

### वारच पतीके आ पर्वम अरेशो

1 गे इन लोकब आन ब्यफ, भेडा हेंथे गाक्शो ताइक्तीनी हना, गे मेको कली इन लोकब आ बाक्तीकेम चाक्दीतीन। प्रस्थान २३:४

2 इन लोकब इन नेक्था मबाक्त हना, मेको आ होव्रप मतुइक्ताक्नी हना, गे मेको आन कली इन खिं चाक्शा वोतीन। मिनु ममाल्मे सम्म इन खिंम थुलीन। मिनु मेको मुर ब्रथ जाक्त हना, लेल्तीन।

3 मिनु जाम्शो गधा, वासी नु मारेइ मारेइ जाम्शो थिल्तीनी हना, मेको मोदेंशो पचा माल्नीनी। वारच पचा मप्रोनीन।

4 मिनु इन नेक्था डा मुर आ गधा, ब्यफ लांम थिश्शो ताइतीनी हना, मतशो खोदेंशो मपने। मेको कली पोक्चा कली वारच पतीन।

5 मीश मुरुमी वोंइश मुर आन फेक्तीक वा मफेक्सीन। वोंइश मुरुमी मीश मुर आन फेक्तीक वा मफेक्सीन। सु सुमी मेको पाइबा, मेको परमप्रभु यावे, इन परमप्रभु कली ग्रान्ना बाक्ब।

6 मिनु गे, रवाम खपीम चिक्ब आ ग्योत्र का थिल्तीनी हना, मेको ग्योत्रम ब्वोफु कि चाइक्ब बाक्तेकम हना, गे मेको चिक्बी नु आ चाइक्ब आन कली लाइक्चा मदुम्ब।

7 मेको चिक्ब कली बेरचा गेचा माल्नीनी। आ चाइक्ब आन कली लाइक्चे चाप्नीनी। मो पाइतीनी हना, गे रिम्शो पा बाक्चा ताइनीनी। मिनु इन ब्रोंइतीक नाक्त शुश दुम्नीम।

8 गे नक खिं सेल्तीनी हना, खिं तार एर ओंथ नेल्ल थरपु हिरचा माल्नीनी। मारदे हना मुर का दोक्त हना, गे इन खिं तार दोस मतशो मुर कली साइक्तीक पाप राइब।

9 गेपुकीमी इन अडगुर रूमी अरु वांचेर तेम्शा मशोक्कीन। मो पाइतीनी हना, इन शोक्शो निम्फा परमप्रभु कली मगारचा डा दुम्ब। लेवी १९:१९

10 गे ब्यफ नु गधा कालेम वाक्चा मदुम्ब।

11 गे ऊन नु सुती ब्वाइशशा प्रोत्रशो फेक्चा मदुम्ब।

12 गे इन फेक्तीक वा आ कुनामी झुम्का क्युकशा सेलीन। गन्ती १५:३८

### मीश मुर आन पर्वम अरेशो

13 मिनु मुर कामी ग्युंवे पा आ मीश नु बाक्शा, नोले मदाक्ताक्ब हना,

14 आ मीश प्रोंइचा कली आ मीश आ पर्वम “आं ग्युंवे पशो मीश आल नु बाक्डानु, कन्ने मबा” देंत हना,

15 मेना मेको मीश आल आ आम आफोम आस तमी कन्ने दुम्तीक चिनु लाइशशा, सहर डा ठेयब लाप्चोम बाक्ब खाल्पा आन बाक्तीके लचा माल्नीस।



16 मिनु मीश मुर आ आफोम मेको खाल्पा आन कली “गो आं तमी मेको मुर कली ग्युंभे पा गेता। मिनु मेकोमी मुल आं तमी कली मदाक्ब।

17 मिनु मेकोमी आं तमी नु ब्राचा कली ‘इ तमी कन्ने मबाक्शो बाक्त’ देंत” देंशा, मेको इप्शो वा मेको खाल्पा आन डोंइती ब्राचा माल्ब।

18 मिनु सहर डा खाल्पापुकीमी मेको वोंइश मुर कली सजाइ गेचा माल्नीम।

19 मिनु मेको वोंइश मुरुम मेको मीश मुर आ आफ कली सहे का चांदी के शेकेल थाप्चा माल्ब। मारदे हना इस्राएल डा कन्ने मीश आल आ नें मरिम्शो सेल्चा माल्शो बाक्त। मिनु मेको आ मीश कली मबेक्म सम्म प्रॉइने मचाप्ब। शेकेल का ११.५ ग्राम चांदी के क्येट बाक्ब। व्यवस्था २२:२९

20 तन्न मेको वोंइश मुर आ देंशो थमा बाक्त हना, मिनु कन्ने आ चिनु मेको मीश आल नु मबाक्शो बाक्त हना,

21 मेको मीश मुर कली आ आफ आ खिं डा लाप्चोम चाक्चा माल्नीम। मिनु मेको आ सहर डा वोंइश मुर नेल्लेमी मेको कली फुल्लु आप्शा साइक्चा माल्नीम। मारदे हना मेकोमी आ आफ आ खिंम तेल्लेम पा इस्राएलम काइ मरिम्शो पाप्तु। मिनु मोपा गेपुकीमी इन दातेमी पशो मरिम्शो क्याम्चा माल्नीनी। उत्पत्ती ३४:७

### वोंइश मुर आ पर्वम अरेशो

22 मिनु वोंइश मुर का अरु आन मीश नु इप्शो थितेक्म हना, मेको निम्फा आस कली साइक्चा माल्नीम। मेको मीश मुर नु बाक्शो वोंइश मुर यो साइक्चा माल्नीम। मिनु मोपा गेपुकीमी इन इस्राएलम पशो मरिम्शो क्याम्चा माल्नीनी। लेवी २०:१०; २सामुएल ११:४

23 मिनु ग्युंभे पचा कली पुंइशो मीश आल का कली सहरम अरु वोंइश मुर काम गुम्तु हना, मेको नु इप्त हना,

24 मेको निम्फा आस कली सहर डा ठेयब लाप्चो रे गुंइशा, फुल्लु आप्शा साइक्चा माल्नीम। मेको मीश आल वारच पन, दे मयीतीके नु मेको वोंइश मुर आ इस्राएली लोकब आ मीश आल नु बाक्तीके, निम्फा आस कली साइक्चा माल्नीम। मिनु मोपा गेपुकीमी इन दातेमी पशो मरिम्शो क्याम्चा माल्नीनी।

25 तन्न मेको वोंइश मुरुम मेको ग्युंभे पचा कली पुंइशो मीश आल कली रूम थित्तु हना, मेको कली ग्याइशशा बिथोलो पाप्तु हना, मेको वोंइश मुर कली ला साइक्चा माल्ब।

26 मेको मीश आल कली मारेइ मपचा। मारदे हना मेकोमी साइक्चा पुंइसीचा डा पाप मपशो बाक्ब। मेको पाप कली साइशशो खोदेंशो बाक्ब।

27 मेको पुंइशो मीश आल रूमी वाइ ब्रेशशा ग्रीम माइ, तन्न सुइमी वारच मपामे माइ।

28 मिनु वोंइश मुर काम ग्युंभे पचा कली मपुंइशो कन्ने मीश आल कली ग्याइशशा, मेको नु बाक्शो, थित्तेक्म हना, प्रस्थान २२:१५

29 मेको नु बाक्शो वोंइश मुरुम मेको मीश आल आ आफ कली ५० शेकेल चांदी थाप्चा माल्ब। मिनु मेको वोंइश मुरुम मेको मीश आल नु बाक्तीके, आ मीश दुम्चा माल्ब। मेकोमी मेको कली मबेक्म सम्म प्रॉइने मचाप्ब। मारदे हना मेको मेको नु इप्त।

30 मुरुमी आ आफ आ मीश कली चाक्ने मचाप्ब। आ आफ नु इप्शो मीश मुर नु आ तौ इप्चा मदुम्ब। लेवी १८:८; २सामुएल १६:२२

## 23

### परमप्रभु आ अरेशो लीशो लोत्र

1 मिनु वोंइश मुर कली आल मथीब सेल्चा कली आ चारतीक खोइशशो बाक्त हना, परमप्रभु यावे आ गुम्तीकेमी ओव्रने मचाप्ब। यसेया ५६:३-४; प्रेरित ८:२७

2 तेल्लेम पा थिशो आल परमप्रभु यावे आ गुम्तीकेमी ओव्रने मचाप्ब। मेको आ १० पाला सम्म परमप्रभु यावे आ गुम्तीकेमी ओव्रचा मताइनीम। एज़ा ९:२; एज़ा १०:-

3 अम्मोनी नु मोआबी परमप्रभु यावे आ गुम्तीकेमी ओव्रने मचाप्नीम। मेको आ १० पाला सम्म परमप्रभु यावे आ गुम्तीकेमी ओव्रचा मताइनीम। उत्पत्ती १९:३७-३८

4 मारदे हना गे इजीप्त रे यूनूनु, मेकोपुकीमी जचा थोव्रक नु ब्वाक्कु कुरशा इन कली गुम्थ मपीम। मिनु मेकोपुकीमी यो इन कली सराप पचा, दे बेओर आ तौ बालाम मेसोपोटामीया आ नेक्था डा अराम-नाहाराइम डा पेशोर सहर रे क्येट गेशा ब्रेत्ताक्म। गन्ती २२:५-६

5 मो हना यो परमप्रभु यावे, इन परमप्रभुमी बालाम आ लोव्र मनेन। मेकोमी मेको सराप के आसीक सेल्लु। मारदे हना परमप्रभु यावे, इन परमप्रभुमी इन कली दाक्ताक्म।

6 मोपत्तीके गेपुकीमी गेनायो मोआबी नु अम्मोनी नु मगरीन, वारच मदुमीन। एजा ९:१२

7 मिनु गेपुकीमी एदोमी आन कली ग्रांग्रा मदित्वा। मारदे हना मेकोपुकी इन लोकब बाक्नीम। गेपुकीमी इजीप्ती आन कली ग्रांग्रा मदित्वा। मारदे हना गेपुकी मेको आन रागीम बाक्शो बाक्तीनी।

8 मेको आन युड आन पाला रे परमप्रभु यावे आ गुम्तीकेमी ओव्रचा गेने चाप्नीनी।

### लडाइ पाइब आन बाक्तीके

9 मिनु गेपुकी लडाइ पथ लनीनु, इन ताम्बुम नेल्ल मरिम्शो रे डोन बाक्कीन।

10 मिनु इन दाते डा वोंडश मुर का नाक्दोम ग्रांग्रा दितीके दुम्त हना, मेको बाक्तीके रे डोन लचा माल्ब। मिनु लडाइ पाइब आन बाक्तीके मओव्रचा। लेवी १५:१६-१८

11 मिनु मेको मुर नाक्नाक्दो चिक्सीशा, नां रिक्ची ना लेंशा आ बाक्तीके ओव्रचा ताइब।

12 मिनु गेपुकी लडाइ पाइब आन बाक्तीक मेर डाइक्तीके का सेल्चा माल्ब।

13 गेपुकी इन थोव्रक नु दोतीक का यो बाक्चा माल्ब। डाइक्चा कली लनीनु, पोव्रला दोशा, आगा डाइशशा नोले ख्री सुम्शा वोतीन।

14 मारदे हना इन कली प्रोंडचा नु इन जोरी सत्रु आन कली इन कली जिम्मा गेचा कली परमप्रभु यावे, इन परमप्रभु इन लडाइ पाइब आन बाक्तीकेम बाक्ब। मेकोमी इन कली इन जोरी सत्रु रे प्रोंडचा नु मेको आन कली इन गुडम गेब। मोपत्तीके इन बाक्तीके रिम्शो, आ खोदेशो दुम्चा माल्ब। मिनु इन दातेमी ग्रांग्रा दित्वा डा ताप्तु हना, इन बाक्तीक रे गाक्ब। लेवी २६:१२

### प्रोक्शो मुर आन पर्वम शेंशो

15 मिनु वाइल का आ होव्रप रे प्रोक्शा, इन बाक्तीकेम जाक्त हना, गेपुकीमी मेको कली लेंशा आ होव्रप कली गेचा मदुम्ब।

16 मेको इन दातेमी आ दाक्शो सहरमी बाक्चा गेने। गेपुकीमी मेको कली श्येत मगेने। फिलेमोन १२-१६

17 मिनु इस्राएली आन तमी कि तौ मन्दीर डा तेल्लेम पाइब दुम्चा मदुम्ब। होसे ४:१४; १राजा १४:२४; २राजा २३:७

18 वोंडश मुर, मीश मुर तेल्लेम पशो क्येट परमप्रभु यावे, इन परमप्रभु आ ख्विम कबल खाप्चा कली चाक्चा मदुम्ब। मारदे हना मेको परमप्रभु यावे, इन परमप्रभु कली ग्रांग्रा बाक्ब। प्रकाश २२:१५

19 मिनु गेपुकीमी क्येट, जचा थोव्रक नु मारेइ मारेइ जेर गेशो इन आंम लोकब रे मेको आ चाइक्ब मताक्चा। प्रस्थान २२:२४; लेवी २५:३६

20 अर्को रागी डा मुर आन कली चाइक्ब गेपाइक्ने चाप्नीनी। तन्न इन लोकब आन कली जेर गेशा आ चाइक्ब मथाप्पाइक्चा। मिनु मेको टीतीनी हना, परमप्रभु यावे, इन परमप्रभुमी गे लचा चिक्शो इन के सेल्चा चिक्शो रागीमी इन कली आसीक गेब।

21 मिनु गेपुकीमी परमप्रभु यावे, इन परमप्रभु नु कसम जनीनु, मेको खाप्शा, थाप्चा कली मरिम्दीन। मारदे हना परमप्रभु यावे, इन परमप्रभुमी कसम खाप्शो कोव्रचा दाक्ब। मो मपाइतीनी हना, गे पाप राइनीनी। गन्ती ३०:३

22 तन्न गेपुकी कसम मजाइतीनी हना, गे पाप मराइतीनी।

23 गेपुकीमी मार देंनी, मेको खाप्शा, पचा माल्नीनी। मारदे हना गे परमप्रभु यावे, इन परमप्रभु नु आंमान कसम जाइतीनी।

24 म्नु गेपुकी इन लोकब आ अङ्गुर रूमी ओवतीनी हना, मरूनी सम्म सेक्शा बवने चाप्नीनी। तन्न कुरशा लाइक्चा मताइनीनी। मती १२:१

25 म्नु गेपुकी इन लोकब आ बाली मीशो रूमी ओवतीनी हना, जचा कली बाली सेक्चा ताइनीनी। तन्न रिक्चा चहिं मताइनीनी।

## 24

### ग्युंवे पा प्रोइतीक आ पर्वम

1 म्नु मुर कामी ग्युंवे पा आ मीश नु बाक्शा, नोले ला मेको मरिम्शो बाक्त, दे तुइश्शा, मेको कली प्रोइचा कली ब्राचा आ पर्वम ब्रेक्स गेशा, आ खिं रे सोइक्ताक्व हना,

2 मेको लशा, अर्को आ मीश दुम्मेनु,

3 म्नु मेको अर्को वोंइशेम यो मरिम्शो बाक्त, दे तुइश्शा, मेको कली मदाक्थु प्रोइचा कली ब्राचा आ पर्वम ब्रेक्स गेशा, आ खिं रे सोइक्ताक्व हना, कि मेको मुर आंमा बेक्त हना,

4 मेको आ डोंइती प्रोइशो वोंइशेम मेको मीश मुर अरु वोंइश नु बाक्शा ग्रॉग्रा दुम्शो नोले लेंशा चाक्ने मचाप्ब। मारदे हना मोदेशो पशो परमप्रभु यावे आ डोंइती ग्रॉग्रा बाक्ब। परमप्रभु यावे, इन परमप्रभुमी इन कली गेशो रागीमी पाप मचाक्कीन।

### रिम्शो दुम्चा कली अरेशो

5 वोंइश मुर कामी नक ग्युंवे पशो बाक्त हना, मेको लडाइम लचा मदुम्ब। अरु गेय यो “मेको कली पावो” दे अरेचा मदुम्ब। बसं का सम्म मेको आ खिंम बाक्शा आ नक चाक्शो मीश नु ग्येरसीचा माल्ब। ब्यवस्था २०:७

6 सुइमी सुइ आन यात जाकटी मवोइक्चा। मारदे हना मेको मबाक्त हना दोपा शोब्ले सेलने चाप्नीमी?

7 सुइ मुरुमी इस्राएली लोकब कली ग्याइश्शा खुइ पा आ वाइल सेलतु हना, लेयतु हना, मेको खुइ कली साइक्चा माल्नीम। मोपा गेपुकीमी इन दाते रे मरिम्शो नेल्ले गुंइचा माल्नीनी। प्रस्थान २१:१६

8 कोव्र मुतीक तशा होस पा बाक्कीन। चढेब, लेवीपुकीमी मेको आ पर्वम इन कली शेंशो खोदेशो पा नेल्ल पचा माल्नीनी। गो मेको आन कली अरेशो खोदेशो पा होस पा बाक्कीन।

9 गेपुकी इजीप्त रे ग्रूशा पिनीनु, परमप्रभु यावे, इन परमप्रभुमी लॉम मिरयाम कली पशो गेय मप्रेंदीन। गन्ती १२:१०-१५

10 म्नु गेपुकीमी इन वारच कली जेर गेनीनु, मेको के मार मार जाकटी पुंइथ आ खिं मओवडीन।

11 लाइगामीन रिम्दीन। म्नु जेर लाइबमी मेको जाकटी लाइगा गुंइशा गेब।

12 मेको मुर प्रुडग बाक्त हना, मेको आ जाकटी इन खिंम वोइश्शा ब्रशा मइपीन।

13 नां रिक्ची ना मेको जाकटी लेश्शा गेने। म्नु मेकोमी मेको आ फेक्तीक फेक्शा इप्थ लने चाप्ब। म्नु मेकोम इन कली आसीक गेब। मेको परमप्रभु यावे, इन परमप्रभु आ डोंइती ठीक पतीक बाक्ब। प्रस्थान २२:२५; अय्युब २२:६; आमोस २:८; ब्यवस्था ६:२५

14 गेपुकीमी इस्राएल डा कि इन सहरम बाक्शो अर्को रागी डा प्रुडग नु र्येत जाइब खेल्लाम इन कली गेय पाप्तु हना, आ ततीक ठीक पा गेने।

15 गेय पची नाक्ती नां मरिक्थु, आ तचा डा गाल्च गेचा माल्नीनी। मेको प्रुडग मुर आ गाल्च माल्ब बाक्ब। ठीक पा मगेतीनी हना, मेकोमी इन मरिम्शो पशो आ पर्वम परमप्रभु यावे नु लोत्र पाइब। म्नु गे पाप राइनीनी।

16 मुर आ तमी तौम साइक्चा डा पाप पाप्तु हना, आफ कली मसाइक्चा। म्नु आफोमी साइक्चा डा पाप पाप्तु हना, आ तमी तौ आन कली मसाइक्चा। सुमी पाप पाइबा, मेको ला साइक्चा पुंइसीब। २राजा १४:६

17 म्नु अर्को रागी डा मुर नु रोम रोइक्च आन कली निसाफ दूली मपने। म्नु वोंइश बेक्शो मीश मुर आन फेक्तीक वा जाकटी मवोतीन।

18 गेपुकी इजीप्त रागीम वाइलीम वाइल दुम्शो मिम्तीन। मिनु परमप्रभु यावे, इन परमप्रभुमी इन कली मेक रे प्रोइशो मप्रेंदीन। मोपतीके गो इन कली मोदेशो पचा, दे अरेता। व्यवस्था ५:१५

19 गेपुकीमी खेतम बाली नाली रिकशा, मुठा का खेतम प्रेंताकनी हना, लेशा ब्रथ मलने। मेको मुठा अर्को रागी डा मुर, रोम रोइक्च नु वोंइश बेक्शो मीश मुर आन कली बाक्ब। मो पाइतीनी हना, परमप्रभु यावे, इन परमप्रभुमी इन गेय नेल्लेमी इन कली आसीक गेब। लेवी १९:९-१०

20 गेपुकीमी तेल रवा आ फल थेप्तीनी हना, लेंशा लीशो फल मथेपीन। मेको लीशो फल अर्को रागी डा मुर, रोम रोइक्च नु वोंइश बेक्शो मीश मुर आन कली बाक्नीम।

21 गेपुकीमी इन अडगुर रू डा अडगुर सेक्तीनी हना, लेंशा लीशो फल मसेक्कीन। मेको लीशो फल अर्को रागी डा मुर, रोम रोइक्च नु वोंइश बेक्शो मीश मुर आन कली बाक्नीम।

22 गेपुकी इजीप्त रागीम वाइलीम वाइल दुम्शो, मिम्तीन। मोपतीके गो इन कली मोदेशो पचा, दे अरेता।

## 25

### तुप्तीक सजाइ

1 मिनु मोसामी “वोंइश मुर निकशी जिम्ताक्स हना, मुददा कोम्मुडनीस। मिनु निसाफ पाइबमी का कली रिम्शो नु का कली मरिम्शो देंब। प्रस्थान २३:७

2 मिनु मरिम्शो पाइब का तुप्चा सजाइ पुंडसाक्व हना, मेको निसाफ पाइब आ डोंइतीन मेको कली खोल्शा, मेको आ पाप गिश खेयप तुप्चा डा बाक्मे, मिश खेयप मेको कली तुप्चा माल्नीम।

3 मेकोमी ४० खेयप सम्म तुप्चा दुम्ब। मेको क्येडा शुश तुप्पाइक्तु हना, इन लोक्ब इन डोंइती मुने दोक्ब। २कोरिन्थी ११:२४

### वी ब्यफ आ पर्वम अरेशो

4 दांइ पशो ब्यफ कली फुडला पाइक्चा मदुम्ब। १कोरिन्थी ९:९; १तिमोथी ५:१८

### खिं डा शोंप आ पर्वम अरेशो

5 मिनु लोक्ब निकशी काथा बाक्ताक्स हना, का तौ मथिथु, बेक्त हना, मेको आ मीशेम अर्को खिं डा मुर नु ग्युंवे पचा मदुम्ब। बेक्शो मुर आ लोक्बमी मेको मीश मुर कली ग्युंवे पचा माल्ब।

6 मिनु मेको आ डोंइती जरमेशो तौ कली मेको बेक्शो आ नें वोइक्चा माल्नीम। मिनु मोपा आ नें इस्राएल रे मक्याम्सीब।

7 तन्न आ रिउम आ भोग्यु वोइक्चा मबिस्साक्व हना, मेको मीश मुरुमी सहर डा ठेयब लाप्चोम बाक्ब खाल्पा आन नेक्था लशा ‘आं रिउम आ लोक्ब आ नें इस्राएलम वोइक्ने मबिस्से। मेकोमी आ पचा माल्शो गेय मपावो’ देंचा माल्ब।

8 मिनु मेको सहर डा खाल्पापुकीमी मेको कली ब्रेशा, मेको नु लोत्र पचा माल्नीम। मिनु मेकोमी ‘गो एको कली मचाक्नुड’ दे आ थुं मलेत्ताक्व हना,

9 आ भोग्युम सहर डा खाल्पा आन डोंइती मेको आ जुत्ता पुइश्शा आ कुलम तोक्चा माल्ब। मिनु मेको मीश मुरुम ‘सुम आ लोक्ब आ खिं डा मुर सेल्चा मदाक्बा, मेको कली ओं पाइक्चा माल्ब’ दे लोत्र पचा माल्ब।

10 मिनु इस्राएलमी मेको आ खिं डा मुर आन कली ‘जुत्ता पुंडसीशो मुर’ दे नें वोइक्चा माल्नीम।

### जीब आस कली हेंथे वारच पशो

11 मिनु वोंइश मुर निकशी राम्शी पाम्सेनु, का आ मीश जाक्शा, आ वोंइश कली प्रोइचा, दे अर्को आ खुइश्शो थोत्रक ग्याइक्ताक्व हना,

12 गेपुकीमी मेको कली शिशी मपाइक्थु, आ गुइ खोइक्चा माल्ब।

### पुक्तीक नु नाक्तीकेम जोल मपने

13 मिनु इन पुक्तीक नाक्तीक ठेयब नु आइक्च बाक्चा मदुम्ब। लेवी १९:३५-३६; इजीकीएल ४५:१०; आमोस ८:५; मीका ६:११

14 इन खिमी यो निक्शी खाल डा पुक्तीके एफाह मदुम्ब। एफाह का २२ लिटर रिक्ब पुक्तीके बाक्ब।

15 तन्न इन खिमी ठीक नाक्तीक नु ठीक पुक्तीक बाक्चा माल्नीम। मो पाइतीनी हना, परमप्रभु यावे, इन परमप्रभुमी गेशो रागीम शुश नाक्त ब्रोंडनीनी।

16 मारदे हना मरिम्शो पुक्बपुकी, परमप्रभु यावे, इन परमप्रभु आ डोंइती ग्रांघ्रा दित्वा डा बाक्नीम।

अमालेकी आन नें क्याम्दीन

17 मिनु गेपुकी इजीप्त रे पिनीनु, अमालेक डा मुरपुकीमी इन कली लांम मार पामे मेको मप्रेंदीन। प्रस्थान १७:८-१६

18 मेकोपुकीमी इन कली लडाइ तोशा, गेपुकी लांम गाक्शो रे दनीनु नोले गाक्ब नेल्ल आन कली साइशो बाक्तेक्म। मेकोपुकी परमप्रभु क्येडा महिम।

19 मोपतीके परमप्रभु यावे, इन परमप्रभुमी इन कली योव्रशा गेशो इन के सेल्चा चिक्शो रागीम इन जोरी सत्रु नु लडाइ पशा, नाइक्साक्नी हना, अमालेकी आन नें रागीरे क्याम्चा माल्नीनी। मेको मप्रेंदीन” देंत। १सामुएल १५:२-३

## 26

डोंइती मीशो अन्न चढ़ेतीक

1 मिनु मोसामी “परमप्रभु यावे, इन परमप्रभुमी इन कली गेशो रागी जाक्दीशशा, इन के सेल्शा, मेक बाक्नीनु,

2 परमप्रभु यावे, इन परमप्रभुमी इन कली गेशो रागी डा डोंइती मीशो मारेइ मारेइ डालो काम कुर पा परमप्रभु यावे, इन परमप्रभु आ योव्रशो बाक्तीकेम लतीन। प्रस्थान २३:१९; लेवी २:१४

3 मिनु गे मेना गेय पाइब चढ़ेब आन बाक्तीक लचा माल्नीनी। मिनु मेको कली गो परमप्रभु यावे, इन परमप्रभु आ डोंइती ‘परमप्रभु यावेमी आंइ किकी पिपी नु कसम जशा गेनुड, देंशो रागीम गो मुलाक्ती जाक्ती’ देंचा माल्नीनी।

4 मिनु मेको चढ़ेबमी मेको डालो इन गुइ रे ताक्शा, परमप्रभु यावे, इन परमप्रभु कली चढ़ेतीक आ डोंइती वोइक्चा माल्ब।

5 मिनु गेपुकीमी परमप्रभु यावे, इन परमप्रभु आ डोंइती ‘आं किकी पिपी हिरब अरामी बाक्तेक्म। मेको इजीप्त रागीम अर्को रागी डा मुर दुम्शा बाक्शो बाक्त। डोंइती मेको शुश मुर मबाक्म। नोले शोशा बोशा शुश नु बोल्यो ठेयब रागी डा मुर दुम्तेक्म। ब्यवस्था ६:२०-२५; यहोसु २४:२-१३; भजन संग्रह ७८:-; भजन संग्रह १०५:-; भजन संग्रह १३६:-

6 मिनु इजीप्तीपुकीम आंइ कली मरिम्शो पा दिप्शा, आंइ कली शुश गेय पपाइक्तेक्म।

7 मिनु गोपुकीमी परमप्रभु यावे, इं किकी पिप आन परमप्रभु कली पुंडतक। मिनु मेकोमी आंइ पुंडशो नेंशा, आंइ श्येत तशा नु दोपा आंइ कली दिप्शो बाक्मा, मेको ताप्तु।

8 मिनु परमप्रभु यावेमी शुश सक्ति पाइशशो ठेयब बोल पतीकेमी हिंचा डा चिन्ड नु छक लाक्चा डा गेय कोंइशा, आंइ कली इजीप्त रे गुंइशा एक चाक्तु।

9 मेकोमी एकेर चाक्शा, एको रागी आंइ कली गेप्तु। मिनु एको रागीम दूध नु खुदो शुश बाक्त।

10 मिनु परमप्रभु यावे, आं कली गेशो रागी डा डोंइती डा मीशो मारेइ मारेइ इन बाक्तीक चाक्ता’ देंचा माल्तीनी। मिनु मेको नेल्ल परमप्रभु यावे, इन परमप्रभु आ डोंइती वोइशशा, मेको परमप्रभु यावे, इन परमप्रभु आ डोंइती बाप्शा ठेयब सेल्चा माल्नीनी।

11 मिनु गे परमप्रभु यावे, इन परमप्रभुमी इन कली नु इन खिं डा मुर आन कली शुश गेशो तशा, लेवीपुकी नु गेपुकी नु बाक्ब अर्को रागी डा मुरपुकी ग्येरसीचा माल्नीमी। ब्यवस्था १६:११-१४

पुडग आन कली गेतीक

12 मिनू गेपुकीमी बर्स सां सांमी इन बाली नाली डा मारेइ मारेइ रे इन सहरम १० भाग डा भाग का तिल्शा वोइक्चा मालनीनी। मेको इन सहर डा लेवी आ थर डा मुर, अर्को रागी डा मुर, रोम रोइक्च नु वोंइश बेक्शो मीश मुर आन कली गारचा डा जचा थोव्रक बाक्ब। ब्यवस्था १४:२७-२९

13 मिनू गेपुकीमी परमप्रभु यावे, इन परमप्रभु आ डोंइती 'गो इन भाग आं खिं रे तिल्शा, इन शेंशो खोदेंशो पा लेवी आ थर डा मुर, अर्को रागी डा मुर, रोम रोइक्च नु वोंइश बेक्शो मीश मुर आन कली गेता। गो इन शेंशो नेल्ल पाता। गो मेको काइ मप्रेंदु' देंचा मालनीनी।

14 रोंका पडानु, मेको रे मारेइ मजड। गो ग्रॉग्रा दिशो बाक्डानु, मेको रे मारेइ मयुंइदु। मिनू बेक्शो मुर आन कली यो मेकेर रे मारेइ मगेशो बाक्ती। गो परमप्रभु यावे, आं परमप्रभु आ देंशो टिशा, इन अरेशो नेल्ल खाप्शो बाक्ती। गन्ती १९:१४-१५; इजीकीएल २४:१७, २२; होसे ९:४

15 इन स्वर्ग डा बाक्तीके रे कोव्रशा, इन मुर, इस्त्राएली, आंइ कली आसीक गेने। मिनू आंइ किकी पिपी नु कसम जशा गेशो शुश दूध नु खुदो बाक्शो रागी कली यो आसीक गेने" दे परमप्रभु कली लोव्र पचा मौलब।

### परमप्रभु आ कबल डा लोव्र

16 मिनू मोसामी "मुलाक्त परमप्रभु यावे, इन परमप्रभुमी इन कली मेको फुल्लुम मुशा ब्रेक्शो लोव्र नु निसाफ पतीक लोव्र पचा मालनीनी। गेपुकीमी मेको कली इन थुंम वोइश्शा, इन थुं नु सोक्त नेल्लेमी टिने।

17 गेपुकीमी मुलाक्ती परमप्रभु यावे कली 'गे आंइ परमप्रभु बाक्नीनी। गो इन लां खोइक्नीकी। मिनू इन फुल्लुम मुशा ब्रेक्शो लोव्र, इन शेंशो नु इन निसाफ पतीके लोव्र पाइनीकी नु इन देंशो टीनीकी" दे परमप्रभु कली लोव्र पाइतीनी।

18 मिनू मुलाक्ती परमप्रभु यावेमी इन कली 'गो इन कली आं दाक्शो मुर सेल्ला। आं शेंशो नेल्ल टिचा मालनीनी।

19 गो आं सेल्लो रागी रागी आन दातेमी इन कली नेल्ल क्येडा ठेयब सेल्लुड। मान पाइक्चा पुंइसीशा, इन नें ठेयब सेल्चा नु शुश दारशो सेल्लुड। मिनू परमप्रभु यावे, इन परमप्रभु आ मुरपुकी दुम्चा मालनीनी" दे परमप्रभु यावेमी इन कली देंशो बाक्त" देंत। ब्यवस्था १८:१

## 27

### मिम्तीक फुल्लु थारशा

1 मिनू मोसा नु इस्त्राएल डा खाल्पापुकीमी मुर आन कली "मुलाक्ती इन कली देंशो शेंशो लोव्र नेल्ल टिशा पने।

2 परमप्रभु यावे, इन परमप्रभुमी इन कली गेशो यर्दन आइक्ची हांबु डा रागीमी शोक्सीनी नोले डा नाक्तीमी ठेयब फुल्लु थारशा, बुलु बुइक्तीन।

3 मिनू शोक्सीनी नोले गेपुकीमी मेको अरेशो लोव्र नेल्ले मेको फुल्लु तार ब्रेक्चा मालनीनी। मो पाइतीनी हना, परमप्रभु यावे, इन परमप्रभुमी इन कली गेशो रागी ओव्रचा ताइनीनी। परमप्रभु यावे, इन किकी पिपी आन परमप्रभुमी इन कली देंशो खोदेंशो पा इन कली दूध नु खुदो शुश बाक्शो रागी गेब।

4 यर्दन आइक्ची हांबु जाक्दीन्नी नोले गो इन कली अरेशो, मेको फुल्लुपुकी एबाल डांडाम थारशा बुलु बुइक्तीन।

5 मिनू मेकेर रे गेपुकीमी परमप्रभु यावे, इन परमप्रभु कली फुल्लु के चढेतीक का सेलीन। मेको सेलीनु, मेको फुल्लु आन कली फलम के यामी काइ मथिचा। प्रस्थान २०:२५

6 गेपुकीमी परमप्रभु यावे, इन परमप्रभु कली चढेतीक सेलीनु, मप्रोल्लो फुल्लु के सेलीन। मिनू मेको तारी परमप्रभु यावे, इन परमप्रभु कली चोशा चढेतीक मेकेर चढेचा मालनीनी।

7 मिनू गेपुकीमी दुशा बाक्चा आ परबम चढेतीक चढेचा मालनीनी। मिनू गेपुकीमी परमप्रभु यावे, इन परमप्रभु आ डोंइती मेको जशा ब्वशा ग्येरसीने। ब्यवस्था १२:७

8 मिनू मेको फुल्लु आन तारी एको अरेशो लोव्र नेल्ल मुशा, रिम्शो पा ब्रेक्चा मालनीनी" देंत।

### परमप्रभु मुर नु पशो कबल

9 मिनु मोसा नु चढेब, लेवीपुकीमी इस्माएली नेल्ल आन कली “इस्माएलीपुकी ब्वालेइ पा, नेनीने। मुलाक्ती गेपुकी परमप्रभु यावे, इन परमप्रभु आ मुर दुम्तीनी। ब्यवस्था २६:१८-१९

10 मोपतीके परमप्रभु यावे, इन परमप्रभु आ देशो टिने। मुलाक्ती गो इन कली माइशो आ शेंशो लोव्र नु आ फुल्लुम मुशा ब्रेकशो लोव्र नेल्ल टिने” दैतेकम।

### सराप नु आसीक राइब

11 मिनु मेको नाक्तीम मोसामी मुर आन कली

12 “गेपुकी यर्दन आइक्ची हांबु शोक्सीने थुम्नी नोले, सु सुमी मुर आन कली आसीक गोचा कली गेरीजीम माइशो डांडाम राप्शा बाक्चा माल्नीम देशा हना, सिमियोन, लेवी, यहूदा, इस्साकार, योसेफ नु बेन्यामीन राप्शा बाक्चा माल्नीम। ब्यवस्था ११:२९

13 मिनु सु सुमी मुर आन कली सराप पचा कली एबाल माइशो डांडाम राप्शा बाक्चा माल्नीम देशा हना, रूबेन, गाद, आशेर, जबूलून, दान नु नाप्ताली राप्शा बाक्चा माल्नीम।

14 मिनु लेवीपुकीमी नेल्ल इस्माएल डा मुर आन कली ठेयब सेंदामी लोव्र पचा माल्नीम” दैत।

### सराप रचा आ पर्बम शेंशो

15 मिनु मेकोपुकीमी “सु मुरुमी मुशा, यपाइशशा मूर्ति सेलब, मेको परमप्रभु यावे कली ग्रांग्रा दित्वा डा बाक्ब। मिनु मेको जोक्ब मुरुमी आ सेल्लो मूर्ति कली खुइशशोमी वोइक्ब, मेको मुर सराप राइब” दैतेकम। मिनु मुर नेल्लेमी “आमेन, मोदेशो दुम्ल” दैचा माल्नीम। प्रस्थान २०:४,२३

16 मिनु “सु मुरुमी आंम आम आफ कली मान मपाइब, मेको मुर सराप राइब” दैतेकम। मिनु मुर नेल्लेमी “आमेन, मोदेशो दुम्ल” दैचा माल्नीम। प्रस्थान २१:१७

17 मिनु “सु मुरुमी आ नेक्था डा मुर आ रू डा सांद याक्ब, मेको मुर सराप राइब” दैतेकम। मिनु मुर नेल्लेमी “आमेन, मोदेशो दुम्ल” दैचा माल्नीम। ब्यवस्था १९:१४

18 मिनु “सु मुरुमी मिक्च मताइब कली हेंथे लां कोइब, मेको मुर सराप राइब” दैतेकम। मिनु मुर नेल्लेमी “आमेन, मोदेशो दुम्ल” दैचा माल्नीम। लेवी १९:१४

19 मिनु “सु मुरुमी अर्को रागी डा मुर, रोम रोइक्च नु वोंइश बेक्शो मीश मुर आन कली ठीक निसाफ मपाइबा, मेको मुर सराप राइब” दैतेकम। मिनु मुर नेल्लेमी “आमेन, मोदेशो दुम्ल” दैचा माल्नीम। प्रस्थान २२:२०-२१

20 मिनु “सु मुर आ आफ आ मीश नु इप्बा, मेको मुर सराप राइब। मारदे हना मेकोमी आ आफ कली मुने तोक्ब” दैतेकम। मिनु मुर नेल्लेमी “आमेन, मोदेशो दुम्ल” दैचा माल्नीम। लेवी १८:८

21 मिनु “सु मुरुमी बी ब्यफ, क्यारश भेडा नु इप्ब, मेको मुर सराप राइब” दैतेकम। मिनु मुर नेल्लेमी “आमेन, मोदेशो दुम्ल” दैचा माल्नीम। लेवी २२:१८

22 मिनु “सु मुर आ समी नु इप्ब, मेको आ आफ आ तमी बाक्त हना यो आ आम आ तमी बाक्त हना यो, सराप राइब” दैतेकम। मिनु मुर नेल्लेमी “आमेन, मोदेशो दुम्ल” दैचा माल्नीम। लेवी १८:९,११

23 मिनु “सु मुर आ शिमी नु इप्ब, मेको मुर सराप राइब” दैतेकम। मिनु मुर नेल्लेमी “आमेन, मोदेशो दुम्ल” दैचा माल्नीम। लेवी १८:१७

24 मिनु “सु मुरुमी बाप्शा, मुर कली साइक्ब, मेको मुर सराप राइब” दैतेकम। मिनु मुर नेल्लेमी “आमेन, मोदेशो दुम्ल” दैचा माल्नीम। प्रस्थान २१:१२; गन्ती ३५:२०

25 मिनु “सु मुरुमी क्येट ताक्शा, दोस मतशो मुर कली साइक्ब, मेको मुर सराप राइब” दैतेकम। मिनु मुर नेल्लेमी “आमेन, मोदेशो दुम्ल” दैचा माल्नीम। प्रस्थान २३:८

26 मिनु “सु मुरुमी एको अरेशो लोव्र नेल्ल खाप्शा मपाइब, मेको मुर सराप राइब” दैतेकम। मिनु मुर नेल्लेमी “आमेन, मोदेशो दुम्ल” दैचा माल्नीम। गलाती ३:१०

## 28

## टीबपुकी आसीक राइनीम

1 मिनु मोसामी “मुलाक्त गो इन कली माइश्शो परमप्रभु यावे, इन परमप्रभु आ देशो नेल्ल होस पा टिशा, आ शेंशो पाइतीनी हना, परमप्रभु यावे, इन परमप्रभुमी इन कली नेल्ल रागी रागी डा मुर आन क्येडा ठेयब सेल्ब। ब्यवस्था २६:१९

2 गे परमप्रभु यावे, इन परमप्रभु आ देशो टिशा पाइतीनी हना, गेपुकी एको आसीक नेल्ल राइनीनी।

3 गेपुकी सहरम बाक्शा, आसीक राइनीनी। मिनु रूम बाक्शा, आसीक राइनीनी। उत्पत्ती ४९:२५-२६

4 इन आलपुकी, इन बाली नाली, इन बी ब्यफ नु इन क्यारश भेडा नु गोठ नेल्ल आसीक रशा सोशा बोशा लाइनीमी।

5 इन फस वोइक्तीक डालो नु फस नित्तीक बोस आसीक राइनीम।

6 गेपुकी खिंडगा ओव्रनीनु, आसीक राइनीनी। मिनु लाडगा गूनीनु, आसीक राइनीनी। भजन संग्रह १२१:८

7 मिनु परमप्रभु यावेमी इन कली लडाइ पाइब इन जोरी सत्रु आन कली इन डोंडती बुपाइक्ब। मेको लां कामी इन कली लडाइ पथ जाकनीम। मिनु बुशा, शाउ शिउ ब्रशा ७ ओटा लां रे प्रोक्नीम।

8 मिनु परमप्रभु यावेमी इन भकारीमी आसीक गेब। मिनु गे मार मार पाइनीनी रिम्शो दुम्चा कली आसीक गेब। मिनु परमप्रभु यावे, इन परमप्रभुमी इन कली गेशो रागीमी इन कली आसीक गेब। लेवी २५:२१

9 मिनु गेपुकीमी परमप्रभु यावे, इन परमप्रभु आ शेंशो लोत्र टिशा पाइतीनी हना नु आ लांमी गाक्तीनी हना, आ कसम जशो खोदेशो पा इन कली आंम मुर सेल्शा वोइक्ब। प्रस्थान १९:५-६

10 मिनु ‘गेपुकी परमप्रभु यावे आ नें पाइश्शो मुर बाक्नीनी’ दे जात जात डा मुर नेल्लेम तुइश्शा, इन कली तशा, शुश हिनीम।

11 मिनु परमप्रभु यावेमी इन किकी पिपी आन कली गेनुडमी देशो रागीमी गेपुकी शुश आल थीब दुम्नीनी। इन बी ब्यफ, क्यारश भेडा आन चाइक्ब शुश दुम्नीम, इन बाली नाली नेल्ल सोशा बोशा लाइनीनी। इन रागी रिम्शो दुम्ब।

12 मिनु परमप्रभु यावेमी नेल्ल सरीड डा शोंप वोइक्तीक रोक्शा, इन रू कली माल्ची ना रेउ यिपाइक्ब। मिनु गे मार मार पाइनीनी, मेको कली आसीक गेब। मिनु गेपुकीमी शुश रागी रागी डा मुर आन कली जेर गेनीनी, गे चहिं सुइ आन जेर मताक्नीनी। ब्यवस्था १५:६

13 मिनु मुलाक्ती इन कली माइश्शो परमप्रभु यावे, इन परमप्रभु आ शेंशो होस पा टिशा पाइतीनी हना, परमप्रभु यावेमी इन कली पिया खोदेशो पा, मुर आन कली अरेब सेल्ब। मीलु खोदेशो पा अरु आन कली खोइक्ब ममाइ। मिनु गे शुश ठेयब दुम्शा लाइक्नीनी।

14 मिनु आं देशो लोत्र नेल्ल पाइतीनी हना, आइदी आइक्था पा अरु देवी देवता आन हेंथे लां मलाइतीनी हना, मोदेशो आसीक राइब दुम्नीनी। ब्यवस्था ५:२९-३२

## मटीबपुकी सराप राइनीम

15 मिनु गे परमप्रभु यावे, इन परमप्रभु आ देशो मटीब दुम्तीनी हना, मुलाक्ती गो इन कली माइश्शो आ शेंशो नु आ फुल्लुम मुशा ब्रेक्शो लोत्र नेल्ल होस पा मपाइतीनी हना, एको सराप चीले नेल्ल राइनीनी। मिनु गेपुकी सराप रशो मुर दुम्नीनी। दानीएल ९:११

16 गेपुकी सहरम बाक्शा, सराप राइनीनी। मिनु रूम बाक्शा, सराप राइनीनी।

17 इन फस वोइक्तीस डालो नु इन फस नित्तीक बोस सराप राइनीम।

18 इन आल, इन बाली नाली, इन बी ब्यफ, इन क्यारश भेडा गोठ सराप राइनीम।

19 गेपुकी खिंडगा ओव्रनीनु, सराप राइनीनी, मिनु लाडगा गूनीनु, सराप राइनीनी।

20 मिनु परमप्रभु यावे कली टिचा प्रॉइशा बाक्तीनी हना, इन मार मार पतीकेमी इन थुं ग्यशा सराप राइनीनी। इन मरिम्शो पतीके गे रीब पा क्याम्चा पुंडसीनीनी।



21 म्नु परमप्रभु यावेमी इन कली गेशो नु इन के सेल्शो रागी रे गुंडचा सम्म इन कली मुर बेक्तीक रोड पपाइक्व।

22 म्नु परमप्रभु यावेमी इन कली रां सोक्तीक रोड, जोरो, शुश गार मुइक्तीके, रेउ मयितीके, नेल्ल बाली नाली सोव्रतीके बूंखी डाइक्तीके रोड सोइक्व।

23 म्नु इन तारी बाक्शो सरीड कांसा खोदेशो दुम्ब। म्नु इन रू डा खप फलम खोदेशो दुम्ब। ब्ववस्था ११:१७

24 म्नु परमप्रभु यावेमी इन रागीम रेउ कली फुरक सेल्ब। म्नु गेपुकी खतम मदुम्नी सम्म सरीड रे मोदेशो पा फुरक इन तारी यिना यिन बाक्व।

25 म्नु परमप्रभु यावेमी इन कली इन जोरी सत्रु आन डोंइती बुपाइक्व। गेपुकी मेकोपुकी नु लडाइ पथ लां कामी लाइनीनी, म्नु बुशा शाउ शिउ ब्रशा ७ ओटा लां रे प्रोक्या माल्नीनी। म्नु राज्य राज्य डा मुर नेल्ल आन डोंइती ग्रान्रा दिशो दुम्नीनी।

26 म्नु गेपुकी बेक्नीनु, चिक्वपुकी नु ब्वाकी डा जन्तुपुकीमी इन श्ये ब्वाइनीम। म्नु मेको आन कली खेरब 'हा हाइ' दे ग्रीब सुइ मबाक्नीम।

27 म्नु परमप्रभु यावेमी इन कली इजीप्त रागी डा कान मुपाइक्व, साने मचाप्या डा पा गार नु लुतो पपाइक्व। प्रस्थान ९:९

28 म्नु परमप्रभु यावेमी इन थुं ग्यपाइक्व, मिक्च मतपाइक्व नु निप्स ग्यशो दुम्पाइक्व।

29 म्नु मिक्च मताइबमी एर ओंथ सुल्ना सुल्न गाक्शो खोदेशो पा गेपुकी नाक्तीन सुल्शा गाक्नीनी। म्नु गेपुकीमी मार पाइतीनी हना यो, रिम्शो मदुम्नीनी। म्नु गेपुकी नाक्त किंत किंत तुप्या नु रोइक्वा पुंडसीशा बाक्नीनी। सुइमी इन कली वारच मपाइब। यसेया ५९:१०

30 गेपुकी मीश आल का कली पुंडनीनी, तन्न अरु वोंइश मुरुम मेको नु इप्ब। म्नु खिं का सेल्नीनी, तन्न आंमान बाक्वा मताइनीनी। म्नु गेपुकीम अडगुर रू का खुम्नीनी, तन्न आंमान ब्वचा मताइनीनी।

31 म्नु इन डोंइती इन बी ब्यफ क्योर्नीम, तन्न आ श्ये ब्वचा मताइनीनी। इन गधा इन कली तचा डा पा रोइक्नीम, मलेत्नीम। इन क्यारश भेडा इन जोरी सत्रु आन कली गेनीम। म्नु इन कली वारच पाइब सुइ मबाक्नीम।

32 इन तमी तौपुकी अर्को रागी डा मुर आन कली गेनीम। म्नु गे मेको तशा, नाक्त किंत किंत मेको आन लां कोव्रशा बाक्नीनी, तन्न मारेइ पने मचाप्नीनी।

33 इन मतुइश्शो मुरपुकीमी इन रू डा खुम्शो जाइनीम। म्नु गेपुकी गेना हना यो श्येत जचा नु दिप्चा पुंडसीनीनी। न्यायाधीस ६:३

34 म्नु इन मिक्चीम तशोपुकीम इन निप्स ग्यपाइक्व।

35 म्नु परमप्रभु यावेमी इन पोक्च नु खोइलीम गेनायो मसाब गार मुपाइक्व। म्नु मोदेशो गारम इन पिया रे दिम्ला सम्म रां नेल्ल सुम्पाइक्व। म्नु सुइम इन कली सापाइक्ने मचाप्ब।

36 म्नु परमप्रभु यावेमी इन कली नु इन योव्रशो पिप कली, गेपुकी नु इन किकी पिपी यो मतुइश्शो जात डा मुर आन रागी कोइब। म्नु गेपुकीमी मेकेर रे शी नु फुल्लु के देवी देवता आन कली गेय पाइक्नीनी। ब्ववस्था ४:२८

37 म्नु परमप्रभु यावेमी इन कली खेरशा जात जात डा मुर आन दातेमी इन पबंम शुक्शी पा, देतीके सेल्शा, शुक्शी पचा पुंडसीनीनी। १राजा ९:७; येरमीया २४:९

38 गेपुकीमी शुश वांचेर शोक्नीनी, तन्न इक्का ला रुप्नीनी। मारदे हना मालेपुकीमी मेको नेल्ल नेक्नीम। मीका ६:१५

39 गेपुकीमी अडगुर रू खुम्नीनी, तन्न बुस्स जोल्शा अडगुर खुप्या नु अडगुर शांबु तूचा मताइनीनी।

40 गे इन बाक्तीक तेइ तेइ तेल रवा बाक्नीम, तन्न खेक्चा कली तेल मताइनीनी। मारदे हना मेको फल हेम्शा दोक्नीम।

41 गे तमी तौ थीनीनी, तन्न मेकोपुकी इन के मदुम्नीम। मेकोपुकी ग्याइश्शा अर्को रागी लाइक्वा पुंडसीनीम।

42 इन रवा नु बाली नाली नेल्ले मालेपुकीमी खतम सेल्नीम।

43 मिनू गेपुकी नु बाक्व अर्को रागी डा मुर क्येट थीब दुम्शा, डोंडती क्येडा ठेयब दुम्नीम, तन्न गेपुकी दोक्ना दोक्न लाइनीनी।

44 मेकोपुकीमी इन कली जेर गेनीम। तन्न गेपुकीमी मेको आन कली जेर गेने मचाप्नीनी। मेकोपुकी पिया खोदेशो दुम्नीम, गेपुकी चहिं मीलु खोदेशो दुम्नीनी। व्यवस्था २८:१२-१३

45 मिनू मेको सराप चीले नेल्ल गे मबेक्नी सम्म राइनीनी। मारदे हना गेपुकीमी परमप्रभु यावे, इन परमप्रभु आ शेशो लोत्र नु आ फुल्लुम मुशा ब्रेक्शो लोत्र नेल्ल होस पा मटिनी।

46 मिनू मेको सराप इन कली नु इन चच युइ आन कली छक लाक्चा डा नु हिंचा डा बाक्नीमी।

47 मारदे हना गेपुकी मारेइ मारेइमी गाप्शो बाक्नीनु, गे परमप्रभु यावे, इन परमप्रभु कली ग्येरसीशा नेल्ल थुंम टिशा गेय मपनी।

48 मोपतीके परमप्रभु यावेमी इन कली जोरी सत्रु सोइक्व। गेपुकी शोत्रलु बेक्शा नु तूतू दाक्ना दाक्न, फेक्चा मतथु नु मारेइ मगाप्शो दुम्शा, मेको आन गेय पचा माल्नीनी। मिनू मेकोमी इन कली मक्वाम्दमे सम्म फलम के हलो इन तारी वोइक्नीम। येरमीया २८:१३-१४

49 मिनू परमप्रभु यावेमी नेल्ल क्येडा डोन बाक्शो रागी रे मरुप्शो लोत्र पाइब मुरपुकी बेरशो ककाकुली खोदेशो पा इन तारी जुक्पाइक्व। हबकुक् १:८; यसैया ३३:१९; येरमीया ५:१५

50 मेको मुरपुकी काइ शिशी मपाइशो बाक्नीम। मेकोपुकीमी खाल्पा आन कली मान मपाइनीम। मिनू आल आन कली यो काइ शिशी मकोइनीम।

51 मिनू गेपुकी खतम मदुम्नी सम्म मेकोपुकीमी इन थुल्शो बी ब्यफ, क्यारश भेडा नु बाली नाली जाइनीम। मिनू मेकोपुकीमी इन अन्न, अङ्गुर शांबु, तेल, बी ब्यफ आन चाइक्व, क्यारश भेडा आन पाठा का यो मगेनीम।

52 मिनू मेकोपुकीमी इन सहर नेल्ल आन कली पुम्नीम। मिनू गेपुकीमी 'सुइम आंइ कली मफुइब' दे इन बोल्यो नु ग्येत्थ लाइशो ठेयब गारो कली थमा सुइक्तीनी, तन्न मेकोपुकीमी परमप्रभु यावे, इन परमप्रभुमी इन कली गेशो रागी डा सहर नेल्ल पुम्शा, गारो प्रेलीम।

53 मिनू मोदेशो पा इन जोरी सत्रुपुकीमी इन कली पुम्दमेनु, गे श्येत जशा, परमप्रभु यावे, इन परमप्रभुमी इन कली गेशो तमी तौ आन श्ये ब्वाइनीनी। लेवी २६:२९; २राजा ६:२८-२९; येरमीया १९:९; बिलाप २:२०; बिलाप ४:१०; इजीकीएल ५:१०

54 मिनू गेपुकी इन दाते डा नेल्ल क्येडा रिम्शो थुं पाइशो नु ठीक पाइब वोंइश मुरुमी यो आ लोकब, आ दाक्शो मीश नु आ लीशो आ तमी तौ आन कली शिशी मपथु, जचा थोत्रक रोइक्व।

55 मिनू मेकोमी मेको आन कली आ ब्वचा माल्शो आ आल आ श्ये सुइ आन कली मगेब। मारदे हना जोरी सत्रुपुकीमी सहर पुम्शा जचा थोत्रक मारेइ मबाक्व।

56 मिनू इन दाते डा नेल्ल आन क्येडा शकल मकल पाइशो नु नेल्ल क्येडा सुख जशो, आ खोइलीमी खप यो थेक्ने मबिप्ब मीश मुरुम आ दाक्शो वोंइश नु आ तमी तौ कली गेहे पा कोत्रब।

57 मारदे गेहे पा कोत्रब देशा हना, आ नक थिशो आल नु आल आ उत्रो आ पर्बम गेहे पा कोत्रब। मिनू जोरी सत्रुम सहर पुम्तीके श्येत जशा, मेको मीश मुरुम खुइशोमी आ उत्रो 'आंमा ब्वाइनुड' दे मिम्ब।

58 मिनू गेपुकीमी एको किताबमी ब्रेक्शो अरेशो लोत्र नेल्ले टिशा मपाइतीनी हना, मेको ठेयब नु हिंचा डा परमप्रभु यावे, इन परमप्रभु आ नें कली मान पा महिंतीनी हना,

59 परमप्रभु यावेमी इन कली नु इन चच युइ आन कली गेचा डा श्येत डोंडती मतशो खोदेशो पा ठेयब फाल्ने मचाप्चा श्येत गेब। मेको ठेयब श्येत नु ठेयब नु मसाचा डा रोइ पपाइक्व।

60 मिनू परमप्रभु यावेमी हिंचा डा इजीप्त रागी डा मुर बेक्तीक रोइ इन कली पपाइक्व। मिनू मेको बेक्तीक डा रोइ इन दातेमी याक्सीब। व्यवस्था २८:२७

61 मिनू मेको अरेशो लोत्र डा किताबम मब्रेक्शो रोइ नु बेक्तीक रोइ यो इन कली पपाइक्व। परमप्रभु यावेमी गेपुकी खतम मदुम्नी सम्म मोदेशो पपाइक्व।

62 मिनु गेपुकी डोंइती सरीड डा सोरुल खोदेशो पा शुश बाक्तीनी। मिनु नोले इच्छा ला लीनीनी। मारदे हना गेपुकीमी परमप्रभु यावे, इन परमप्रभु आ देशो मटिनी।

63 मिनु परमप्रभु यावेमी दोपा इन कली रिम्शो पचा नु शुश सेल्चा कली ग्येरसीशो बाक्मे, मोपा परमप्रभु यावेमी इन कली खतम सेल्चा नु क्याम्चा कली ग्येरसीशो बाक्ब। मिनु मेकोमी गे ओत्रचा नु इन के सेल्चा चिक्शो रागी रे इन कली तुल्ब। हितोपदेस १:२६

64 मिनु परमप्रभु यावेमी इन कली जात जात डा मुर आन दातेमी फ्राइब। मिनु गेपुकीमी मेकेर डा इन किकी पिपी नु इन मतुइश्शो शी नु फुल्लु के देवी देवता आन कली गेय पाइनीनी।

65 मेको रागी रागी डा मुर आन दातेमी गे नाइक्चा मताइनीनी। इन कली गेना हना यो खेरनीमी। मिनु परमप्रभु यावेमी मेकेर इन कली हिंब थुं गेब। मिनु फाल्ने मचाप्ब नु थुं लुकच लाइब मुर दुम्नीनी।

66 मिनु गेपुकी दीसा मार दुम्बा 'ब्रोंइनुडा, मब्रोंइनुडा' दे मारेइ मतुइक्थु, नाक्दो नाक्ती हिंशा बाक्चा माल्नीनी।

67 मिनु सुनी कना गेपुकीमी 'नां रिक्शो हना, रिम्शो दुम वा' देंनीनी। मिनु नां रिक्ची ना 'नां सोव्रशो हना, गिश रिम्शो दुम वा' देंनीनी। मारदे हना मार मार ताइनीनी, गे शुश हिंनीनी।

68 परमप्रभु यावेमी इन कली जहाजम इजीप्त रागीम लेशशा सोइक्ब। गो मेको लां आ पर्वमी 'गेपुकीमी एको लां गेनायो लेंशा लचा मदुम्ब' दे गो इन कली देंती। मेकेर जाक्शा इन कली इन जोरी सत्रु आन कली वाइलीम वाइल सेल्चा कली लेयचा दाक्नीम, तन्न सुडम इन कली मग्याप्नीम" देंत। ब्यवस्था १७:१६; होसे ८:१३

## 29

### अर्ती गेशो नु हिंच कोंइशो

1 मिनु होरेब डांडामी परमप्रभु यावेमी इस्राएली नु पशो कबल नु तेम्शा, मोआब रागीम मोसा कली इस्राएली आन कली तेम्चा डा लोत्र मार बाक्नीम देशा हना, ब्यवस्था ५:२

2 मोसामी इस्राएली नेल्ल आन कली ब्रेश्शा "परमप्रभु यावेमी इजीप्तमी फाराओ नु मेको आ गेय पाइब नेल्ल नु आ रागी कली पशो गेपुकीमी नेल्ल तशो बाक्नीनी। प्रस्थान १९:४

3 गेपुकी मेको ठेयब नाक्तीके ताइतीनी। मिनु मेको ठेयब चिन्ड नु छक लाक्चा डा गेय यो ताइतीनी। ब्यवस्था ४:३४; ब्यवस्था ७:१९

4 तन्न मुल सम्म परमप्रभु यावेमी इन कली रुप्तीक थुं, कोव्रतीक मिक्च नु नेतीक नोफा मगेशो बाक्ब। ब्यवस्था ५:२६

5 मिनु गो इन कली ४० बर्स सम्म गोरशो रागीम लां कोंइताक्नीनी। इन फेक्तीक मजे, जुत्ता यो मजे। ब्यवस्था ८:४

6 गेपुकीमी शोब्ले मजनी, अडगुर शांबु नु रकसी यो तूचा मतनी, तन्न ब्रोंइतीनी। मिनु गो परमप्रभु यावे, इन परमप्रभु नड, दे गेपुकीमी रुप्तीनी।

7 मिनु गेपुकी एको रागीम जाक्नीनु, हेरबोन डा पिप सीहोन नु बाशान डा पिप ओग गोपुकी नु लडाइ पचा कली गुम्शा जाक्ताक्स। मिनु गो मेको आन कली फुइतय। गन्ती २१:२१-३५

8 मिनु गोपुकीमी मेको आन रागी ग्राशा, रूबेन आ थर, गाद आ थर नु मनस्से आ थर डा आधा मुर आन कली आन के सेल्चा कली रू गेशो। गन्ती ३२:-

9 मोपतीके एको कबल पशो लोत्र होस पा पने। मिनु मो पाइतीनी हना, गे मार मार पनी, मेको रिम्शो दुम्ब।

10 मिनु गे नेल्ल परमप्रभु यावे, इन परमप्रभु आ डोंइती राप्शो बाक्नीनी। इन थर थर डा ठेयब मुरपुकी, इन खाल्पापुकी, ससान पाइबपुकी नु इस्राएली नेल्ल,

11 इन आलपुकी नु इन मीशपुकी, अर्को रागी डा इन दातेमी बाक्शो मुरपुकी, शी चाक्ब नु ब्वाक्कु कुरब नेल्ल बाक्नीम। यहोसु ९:२७

12 मारदे नेल्ल बाक्शो बाक्तीनी देशा हना, परमप्रभु यावे, इन परमप्रभुमी गे नु कसम जशो कबल मुलाक्त परमप्रभु यावे, इन परमप्रभुमी गे नु पाइब।

13 दोपा परमप्रभु यावेमी इन किकी पिपी अब्राहाम, इसहाक नु याकूब नु कसम जशो बाकमे, मोपान मुलाक्ती इन परमप्रभुमी इन कली आंम के मुर सेल्चा कली कबल पाप्तु।

14 मिनु गो मेको कसम जशो कबल परमप्रभु यावे, इं परमप्रभु आ डोंइती राप्शा बाकब इन कली ला ममाइ, ब्यवस्था ५:३; उत्पत्ती १७:७

15 तन्न सु सु मुलाक्त मबाक्तेकम हना, यो मेको कबल पाइनुड।

16 गो दोपा इजीप्त रागीम बाक्या, तुइक्नीनी। गोपुकी रागी रागीम गाक्शा, दोपा जाक्या, दे यो तुइक्नीनी।

17 मिनु गे आन ग्रॉग्रा दित्या डा शी, फुल्लु, सुन नु चांदी के देवी देवता आन कली यो तशो बाक्नीनी।

18 मिनु इन दाते रे सुइ वोंइश मुर, मीश मुर, खिं डा मुर नु थर डा सुइ आन थुं परमप्रभु यावे, इं परमप्रभु रे नोले शोंइसीशा, मेको रागी रागी डा देवी देवता आन कली पूजा पचा दाकब बाक्नीम कों? इन दातेमी मोदेशो ओश्येर पाइश्शो शाक्श का बाक्बा कों? ब्यवस्था ३२:३२; होसे १०:४; आमोस ६:१२; हिब्रू १२:१५

19 मिनु मोदेशो पाइब मुर मेको कसम डा लोव्र नेंशा, आ थुंमी 'गो आंम मिन्तीके पशा बाक्ती हना यो, गो सराप मराइनुड। गो आसीक ताइब बाक्ती' दे मिम्ब। मोदेशो मिन्तीके नेल्ल आन कली खतम सेल्ब।

20 मिनु परमप्रभु यावेमी मोदेशो मुर आ पाप मक्याम्ब। परमप्रभु यावे मेको कली तशा, आ गाइक्या नु आ गेहे पतीके मी खोदेशो पा ब्राइब। मिनु मेको अरेशो लोव्र डा किताबम ब्रेक्शो सराप नेल्ल मेको मुर कली राइब। मिनु परमप्रभु यावेमी मेको आ नें रागी रे क्याम्ब। ब्यवस्था २८:१५-६८

21 मिनु परमप्रभु यावेमी मेको कली इस्माएली आन थर रे तिल्शा, मेको अरेशो किताबम ब्रेक्शो कबल डा सराप नेल्ल रपाइक्ब।

22 इन नोले जरमेशो पाला, इन नोले जाक्शो तमी तौ नु डोन रागी डा मुरपुकीमी मेको रागी डा स्येत नु परमप्रभु यावेमी मेको आन कली गेशो बेक्तीक डा रोड तशा

23 मेको रागी नेल्लेम मी ब्रशा गन्धक नु हिक्सी बाक्ब। मारेइ मशोक्शो, काइ गिग मग्रूशो मारेइ मवाशो बाक्ब। मेको परमप्रभु यावेमी चुरशा गाइश्शो सोदोम नु गोमोररा, अदमाह नु सेबोयीम खतम सेल्शो रागी खोदेशो बाक्ब। उत्पत्ती १९:२४

24 मिनु रागी रागी डा मुर नेल्लेमी 'परमप्रभु यावेमी एको रागी कली मारदे ओदेशो सेला? एको आ पर्बम मारदे मोदेशो शुश चुरशा गाइक्ता?' दे हिल्लो पाइनीम।

25 मिनु मेकोपुकीमी 'मेको परमप्रभु यावे, आन किकी पिपी आन परमप्रभुमी मेको कली इजीप्त रे गुंडची ना पशो कबल प्रोंइने थुंमशो बाक्तेकम।

26 मिनु मेकोपुकीमी आन मतुइश्शो नु परमप्रभुम मपचा देशो देवी देवता आन डोंइती बाप्शो बाक्तेकम।

27 मोपतीके परमप्रभु यावे एको रागी आ पर्बम शुश गाइक्ताक्ब। मिनु मेकोमी एको किताबम ब्रेक्शो सराप नेल्ल मेको रागी कली रपाइक्तु।

28 मिनु परमप्रभु यावेमी चुरशा, गाइश्शा, आ ठेयब गाइश्शोम मेको आन कली आन रागी रे खेरशा, अर्को रागीम ताइक्ताक्ब। मेको मोदेशो मुलाक्त दुमशो बाक्ब' देनीम।

29 मिनु मारेइ मारेइ खुइश्शो परमप्रभु यावे, इं परमप्रभु के बाक्ब। तन्न मेको अरेशो लोव्र नेल्ल टिचा नु मेको तुइक्तीके आंइ के नु आंइ तमी तौ के बाक्ब" दैत। ब्यवस्था ३२:३४

## 30

### परमप्रभु यावे गे लेत्चा

1 मिनु गो इन कली देशो लोव्र, दोपा आसीक राइनीनी नु दोपा सराप राइनीनी, गे मेको नोले आंमा तशो, परमप्रभु यावे, इन परमप्रभुमी इन कली रागी रागी डा मुर आन दाते रे खेरा नु ला तुइक्नीनी। ब्यवस्था २८:-

2 मिनु गो मुलाकती इन कली अरेशो खोदेशो पा गे नु इन तमी तौ इन थुं नु सोक्त नेल्लेमी परमप्रभु यावे, इन परमप्रभु गे लेशशा टिचा दाक्तीनी हना, ब्यवस्था ४:३०; लेवी २६:४०

3 मेना परमप्रभु यावे, इन परमप्रभुमी इन रिम्शो नाक्ती लेप्पाइक्ब। मिनु परमप्रभु यावे, इन परमप्रभुमी इन कली शिशी पाइशशा, जात जात डा मुर आन दातेमी ब्रापाइक्तीके रे खुप्शा चाक्ब। इजीकीएल १६:५३; येरमीया २९:१४; आमोस ९:१४; येरमीया ३२:३७

4 मिनु गे शुश डोन रागी सम्म खेरचा पुंडसाक्नी हना यो परमप्रभु यावे, इन परमप्रभुमी इन कली खुप्शा एक चाक्ब। ब्यवस्था २८:६४; नेहेम्याह १:९

5 मिनु परमप्रभु यावे, इन परमप्रभुमी इन कली इन किकी पिपी आन रागीमी चाक्ब। मेको रागी इन के बाक्ब। मिनु मेकोमी इन कली इन किकी पिपी क्येडा शुश नु रिम्शो सेल्व।

6 मिनु परमप्रभु यावे, इन परमप्रभुमी इन थुं नु इन तमी तौ आन थुं खोइक्तीक चिनु खोदेशो पा खोइक्ब। मोपा ला गे परमप्रभु यावे, इन परमप्रभु कली इन थुं नु सोक्त नेल्लेमी दाक्शा, ब्रोइने चाप्नीनी। ब्यवस्था १०:१६; येरमीया ४:४; इजीकीएल ११:१९; रोमी २:२९

7 मिनु परमप्रभु यावे, इन परमप्रभुमी मेको सराप नेल्ल इन कली खेदा पाइब, इन कली गेहे पाइब जोरी सत्रु आन कली रपाइक्ब।

8 मुलाकती गो इन कली माइशशो गे लेशशा परमप्रभु यावे आ शेंशो नेल्ल टीनीनी।

9 मिनु परमप्रभु यावे, इन परमप्रभुमी इन पतीके नेल्लेमी इन कली आसीक गेब। मेकोमी इन कली शुश तमी तौ, बी ब्यफ, क्यारश भेडा नु इन रू डा अन्न शुश सेल्व। मारदे हना परमप्रभु यावेमी इन किकी पिपी आन कली रिम्शो पशो खोदेशो पा इन कली यो रिम्शो पचा दाक्ब।

10 गेपुकीम परमप्रभु यावे, इन परमप्रभु आ देशो टीतीनी हना, आ शेंशो, आ फुल्लुम मुशा ब्रेक्शो लोत्र नु मेको अरेशो लोत्र डा किताबम ब्रेक्शो लोत्र पाइतीनी हना, गे इन थुं नु सोक्त नेल्लेमी परमप्रभु यावे, इन परमप्रभु गे लेत्तीनी हना, गे लेंशा आसीक राइनीनी।

### परमप्रभु आ लोत्र इन नेक्था बाक्शो

11 मिनु गो मुलाकत इन कली माइशशो परमप्रभु यावे आ शेंशो मरुप्चा डा नु इन पने मचाप्चा डा मबाक्ब। मेको इन नेक्था बाक्ब।

12 मेको लोत्र इर सरीडमी मबाक्ब। मिनु गेपुकीमी “सु सरीड लशा मेको लोत्र आंइ कली चाक्बा? मिनु मेको नेंशा, पाइनीकी” देंचा ममाल्नीनी। रोमी १०:६-८

13 मिनु मेको समुन्द्र आ आइक्ची हांबु यो मबाक्ब। गेपुकीमी “सुम आंइ कली समुन्द्र आइक्ची हांबु मेको ब्रथ लाइबा? मिनु मेको नेंशा, पाइनीकी” देंचा ममाल्नीनी।

14 मेको अरेशो लोत्र इन नेक्था बाक्ब। गे मेको आ पबर्म लोत्र पाइनीनी। मिनु मेको पचा कली इन थुमी बाक्ब।

### ब्रोइचा नु बेक्चा

15 मिनु मुलाकती गो ब्रोइतीक नु रिम्शो दुम्तीक, बेक्तीक नु मरिम्शो दुम्तीक इन कली कोइशो बाक्नुड। ब्यवस्था ११:२६

16 मिनु गोम मुलाकत इन कली माइशशो परमप्रभु यावे आ शेंशो, आ फुल्लुम मुशा ब्रेक्शो लोत्र नु आ निसाफ पतीक लोत्र टीतीनी हना, परमप्रभु यावे, इन परमप्रभु कली दाक्ताक्नी हना, मेको आ लां गाक्तीनी हना, गे ब्रोइशा, सोशा बोशा, शुश दुम्शा बाक्नीनी। मिनु परमप्रभु यावे, इन परमप्रभुमी इन ओव्रचा चिक्शो रागीमी आसीक गेब।

17 तन्न गे इन थुं हिरशा मटीब दुम्तीनी हना, नु देवी देवता आन डोंइती बाप्शा, गेय पाइतीनी हना,

18 गो इन कली मुलाकती “गेपुकी थमा पा बेक्नीनी। मिनु यर्दन आइक्ची हांबु इन के सेल्शो रागीमी गे शुश नाक्ती मब्रोइनीनी” देंनुड। ब्यवस्था ८:१९

19 गो मुलाकती सरीड नु रागी कली इन डोंइती सांकछी वोइक्नुड। गो इन कली ब्रोइचा नु बेक्चा, आसीक नु सराप इन कली कोइताक्ड। गे नु इन चच युइ ब्रोइतीक योत्रडीन। ब्यवस्था ४:२६

20 परमप्रभु यावे, इन परमप्रभु कली दाक्तीन। आ देशो टिने। मेको कली मप्रोंइथु बाक्कीन। मारदे हना मेकोम इन कली ब्रोंइचा नु शुश नाक्ती बाक्चा गेब। मिनु गेपुकी परमप्रभु यावेमी इन किकी पिपी अब्राहाम, इसहाक नु याकूब आन कली कसम जशा गेशो रागीम बाक्ने चाप्नीनी।

## 31

### मोसामी यहोसु कली अरेशो

- 1 मिनु मोसामी इस्राएली नेल्ल आन कली एको लोव्र नेंपाइक्तु।
- 2 मिनु मेकोमी “मुलाक्ती गो सहे का २१ बर्स गाप्ती। गो मुल रे इन कली लां कोंइने मचाप्नुड। मिनु परमप्रभु यावेमी आं कली ‘गे मेको यर्दन मशोक्नेवे’ दे माइक्ती। प्रस्थान ७:७; गन्ती २०:१२
- 3 परमप्रभु यावे, इन परमप्रभु इन डोंइती यर्दन शोक्शा, आइक्ची हांबु लाइब। मेकोमी इन डोंइती मेको रागी रागी डा मुर आन कली क्याम्ब। मिनु गेपुकीमी मेको आन कली खेरने चाप्नीनी। मिनु परमप्रभु यावेमी देशो खोदेशो पा यहोसु इन डोंइती शोक्ब। व्यवस्था ३:२२
- 4 मिनु परमप्रभु यावेमी मेको एमोरी आन पिप सीहोन नु ओग नु आन रागी खतम पोक्शो खोदेशो पा, मेको आन कली यो खतम पोक्ब। गन्ती २१:२१-३५
- 5 मिनु परमप्रभु यावेमी मेको आन कली इन जिम्मा गेब। गो इन कली माइश्शो परमप्रभु यावे आ शेशो खोदेशो पा नेल्ल गेपुकीमी मेको आन कली पचा माल्नीनी। प्रस्थान २३:३२-३३
- 6 बोल्यो नु महिब दुमीन। मेको आन कली तशा महिनीन मारदे हना परमप्रभु यावे, इन परमप्रभु गेपुकी नु लाइब। मेकोम इन कली कोव्रशा, मप्रोंइब” दे मोसामी देत। व्यवस्था १:२९-३०
- 7 मिनु मोसामी यहोसु कली ब्रेशशा, इस्राएली नेल्ल आन डोंइती “बोल्यो नु महिब दुमो। मारदे हना परमप्रभु यावेमी मेको इन किकी पिपी आन कली कसम जशा ‘मेको रागी इन कली गेनुड’ देशो बाक्त। मिनु गे मेको रागी मेको आन कली योक्शा गेनीनी। व्यवस्था ३:२८; यहोसु १:६
- 8 मिनु परमप्रभु यावे इ डोंइती लाइब। मेको गे नु बाक्ब। मेकोम इन कली कोव्रशा, मप्रोंइब। महिनीन नु मेको आन कली तशा इन थुं लुक्च मलने” दे मोसामी यहोसु कली देत।

### चढेब आन कली अरेशो लोव्र गेशो

- 9 मिनु मोसामी परमप्रभु आ अरेशो लोव्र ब्रेक्शा, चढेब, लेवी आ थर डा मुर नु इस्राएली आन खाल्पा आन कली गेम्तीमी। मिनु लेवी आ थर डा मुरपुकीमी चहिं परमप्रभु यावे आ सल्ला पतीक सन्दोस कुरशो बाक्तेक्म।
- 10 मिनु मोसाम मेको आन कली “७ बर्स डा प्रोंइतीक बर्समी गोठ सेल्ल्तीक चाडमी व्यवस्था १५:१; व्यवस्था १६:१३
- 11 नेल्ल इस्राएली परमप्रभु यावे, इन परमप्रभु आ योव्रशो बाक्तीकेमी मेको अरेशो लोव्र इस्राएली नेल्ल आन डोंइती पढेचा माल्नीनी।
- 12 गेपुकीमी वोंइश मुर, मीश मुर, आलपुकी नु इन सहरम बाक्शो अर्को रागी डा मुर नेल्ल आन कली खुप्या माल्नीनी। मिनु मेकोपुकीमी मेको अरेशो लोव्र नेंशा, शेंशा, परमप्रभु यावे, इन परमप्रभु कली मान पा हिंब दुम्या माल्नीम। मिनु एको अरेशो लोव्र नेल्ल तुइश्शा पचा माल्नीम।
- 13 मिनु एको अरेशो लोव्र मतुइक्ब, आन आलपुकीमी यो नेंशा रुप्शा, परमप्रभु यावे, इन परमप्रभु कली मान पा हिंचा शेंचा माल्नीम। गेपुकीमी यर्दन खोला आ आइक्ची हांबु इन के सेल्लो रागीम बाक्ची ना मोदेशो पचा माल्नीनी” दे माइक्तीमी।

### यहोसु नु मोसा कली शेशो लोव्र

- 14 मिनु परमप्रभु यावेमी मोसा कली “मुल इ बेक्ची नाक्ती जाक्शो बाक्ब। मोपतीके यहोसु कली ब्रेशशा, मेको कली इ गेय जिम्मा गेनुड। मोपतीके गुम्तीक ताम्बुम जाक्शा, राप्शा बाक्कीस” देत। मिनु मोसा नु यहोसु लशा गुम्तीक ताम्बुम राप्शा बाक्ताक्स।

15 मिनू परमप्रभु यावे युम्तीक ताम्बुम गोस्स के थामम यूत। मिनू गोस्स के थाम ताम्बु आ ओवृतीकेमी बाक्त। प्रस्थान ३२:९

16 मिनू परमप्रभु यावेमी मोसा कली “गे इ किकी पिपी नु बाक्चा चिक्शो बाक्नेवे। गे बेक्डे नोले मेको मुर आन लशो रागीम जाक्दीशशा, मेको रागी डा आन मतुइशशो देवी देवता आन कली खोइक्नीम। आं कली प्रोइशा, गो नु पशो कबल क्याम्नीम।

17 मिनू गो मेको नाक्त मेको आन पर्वम शुश गाइक्नुड। मिनू गो मेको आन कली प्रोइशा, मेको आन कली वारच मपाइनुड। मेकोपुकी रोइक्चा पुंडसीनीम। मिनू मेकोपुकीमी शुश मरिम्शो दुम्शा, ठेयब श्येत जाइनीम। मिनू मेको नाक्त मेकोपुकीमी ‘इं परमप्रभु गोपुकी नु मबाक्तीके इं कली मोदेशो दुम्शो बाक्ब’ देनीम।

18 मिनू मेकोपुकी शुश मरिम्शो पा, देवी देवता आन नोले खोइक्ब दुम्नीम। मोपतीके गो मेको आन कली वारच मपाइनुड।

### मोसा कली ब्रेक्पाइशशो कुम्सो

19 एको कुम्सो ब्रेक्तो। मिनू इस्राएली आन कली शेंदो। मेको रिम्शो तुइक्पतो। मारदे हना मेको कुम्सो इस्राएली आन पर्वम आं सांकछी दुम्चा माल्ब। ब्यवस्था ३२:१-४३

20 गो मेको आन किकी पिपी आन कली गेनुड, दे कसम जशो दूध नु खुदो शुश बाक्शो रागी मेको आन कली गेनुड। मिनू मेकोपुकी जशा ब्वशा, रूशा दोम्नीम। मिनू मेकोपुकीमी देवी देवता खोइशशा, मेको आन गेय पाइनीम। आं कली चहिं आइक्च सेल्नीम गो नु आं कबल क्याम्नीम।

21 मिनू मेको मरिम्शो दुम्शा, शुश श्येत जान्तेक्म हना, मेको कुम्सो मेको आन पशो आ पर्वम आं सांकछी दुम्ब। मारदे हना आन चच युइ मेको कुम्सो शेंसीशा, तुइशशो बाक्नीम। ‘मेको आन कली गेनुड’ दे कसम जशो रागीम चाक्चा क्येडा डोंइती आन मिम्तीके दूली बाक्ब, दे तुइक्नुड” दे परमप्रभु यावेमी मोसा कली देंत। भजन संग्रह १३९:२

22 मिनू मेको नाक्ती मोसामी एको कुम्सो ब्रेक्शा, इस्राएली आन कली शेंताक्मी।

23 मिनू परमप्रभु यावेमी नून आ तौ यहोसु कली अरेशा “बोल्यो नु महिंब दुमो। मारदे हना ‘मेको आन कली गेनुड’ देशो रागीम गे इस्राएली आन कली चाक्दीत्वा माल्नेवे। मिनू गो गे नु बाक्नुड” देंत।

### अरेशो किताब नु कुम्सो

24 मिनू मोसामी मेको अरेशो लोव्र किताबम ब्रेक्ने थुम्शा नोले

25 मेकोमी परमप्रभु यावे आ सल्ला पतीक सन्दोस कुरब लेवी आ थर डा मुर आन कली

26 “एको अरेशो लोव्र डा किताब लाइशशा, परमप्रभु यावे, इन परमप्रभु आ सल्ला पतीक सन्दोस आ नेक्था वोतीन। मोदेशो पा मेको आन पर्वम सांकछी दुम्शा बाक्ब। यूहन्ना ५:४५

27 मारदे हना गो इन मरिम्शो पतीक नु इन मटितीके तुइक्नुड। गो मुल सम्म गेपुकी नु बाक्शा यो, गेपुकी परमप्रभु यावे कली गन गन पा मटीब बाक्तीनी। गो बेक्डा नोले दोशो मरिम्शो पाइनीनी?

28 मिनू गे इन थर थर डा खाल्पा नु ठेयब मुर नेल्ल आं बाक्तीकेम ब्रेशशा खुम्सीन। मिनू गो मेको आन कली एको लोव्र नेपाइक्नुडमी। मिनू मेको गो सरीड नु रागी आन पर्वम सांकछी वोइक्नुड। ब्यवस्था ३२:१

29 मारदे हना गो बेक्डा नोले गेपुकी थमा पा दूली पाइब दुम्नीनी। मेको गो तुइक्नुड। मिनू गेपुकी आं अरेशो लां रे डोन लाइनीनी। मिनू गेपुकीमी परमप्रभु यावे आ डोंइती मरिम्शो पाइनीनी। मिनू मेको इन पतीकेमी मेको कली गाइक्पाइक्नीनी। नोले डा नाक्तीमी इन कली शुश श्येत दुम्ब” देंत।

30 मिनू मोसामी इस्राएली नेल्ल आन डोंइती एको कुम्सो थुम्चा सम्म नेपाइक्तीमी।

## 32

### मोसा आ ब्रेक्पाइशशो कुम्सो

मिनू मोसामी 1 “सरीड, गो मार देनुडा, नोफा दाइशशा नेनो। रागीम, आं लोव्र नेनल। यसैया १:२

2 आं अरेशो लोत्र रेउ खोदेशो पा यीब। आं अरेशो लोत्र सीत खोदेशो पा दोक्ब। कल्लो घांस तार भूस भुसे रेउ खोदेशो पा नु सुवा आन तार ठेयब रेउ खोदेशो पा यीब। यसैया ५५:१०-११

3 मारदे हना गो परमप्रभु यावे आ नें ठेयब सेल्लुड। इं परमप्रभु ठेयब बाक्ब।

4 मेको सेरथे फुल्लु बाक्ब। मेको आ गेय नेल्ल क्येडा रिम्शो बाक्ब। आ लां नेल्ले ठीक बाक्नीम। मारदे हना मेको आ देशो पाइब परमप्रभु बाक्ब। जोल मपाइब, कुल मकोत्रब नु ठीक पाइब बाक्ब।

5 तन्न मेको पाला डा मरिम्शो दुम्शो मुरपुकीमी मेको कली मरिम्शो पाम्तेक्म। मेको दूली पाइब नु हेंथे गाक्ब ला डा बाक्नीम। यसैया १:२-४; मती १७:१७

6 मूर्ख नु निप्स मपाइशो मुरपुकी, मार, गे परमप्रभु यावे कली क्येक्क लेत्नीनी? मार, इन कली सेल्ब इन आफ मेको ममाइ डा? मेको इन कली सेल्ब नु वोइक्ब बाक्ब।

7 साइ डोंइती डा नाक्त मिम्तीन। साइ डा बर्स कली मिम्तीन। इन आफ कली हिल्लो पने। मिनु मेकोमी इन कली शेंनीम। इन खाल्पा आन कली हिल्लो पने। मेकोमी इन कली देनीम।

8 नेल्ल क्येडा ठेयबमी रागी रागी डा मुर आन कली आन रागी गेप्टु। मेकोमी मुर नेल्ल आन कली शुश खाल डा सेल्लु। मेना इस्राएली आन थर डा खिं खिं डा मुर कोवशा, आन सांद योक्शा गेप्टु। उत्पत्ती ११:८; प्रेरित १७:२६

9 मिनु परमप्रभु यावे आ भाग आ मुरपुकी बाक्तेक्म। याकूब आ मुर आन भाग आ योत्रशो रागी बाक्त।

10 मेकोमी याकूब कली सुइ मबाक्शो रागीम थुल्लु। गोरशो रागीमी कोवशा थुल्लु। मिनु मेकोमी मेको कली आ एर ओंथ नेल्ल रे कोवत्रु। मिनु मेको कली आ मिक्क कली खोदेशो पा होस पा कोवत्रु। भजन संग्रह १७:८; इजीकीएल १६:१०-१४; जकरिया २:१२

11 आंम चाइक्ब कली रिम्शो कोवशा जचा गेब, फ्रां प्राक्शा चाइक्ब कली पुब्ब नु आ फ्राम इर कुरब ककाकुली खोदेशो पा, प्रस्थान १९:४

12 परमप्रभु यावेमी मेको कली लां कोइताक्ब। मेको नु अर्को तेकोइ देवता मबाक्म।

13 मेकोमी मेको कली नेल्ल क्येडा रिम्शो रागीम वोइक्तु। मेकोमी रूम शोक्शो थोत्रकीम थुल्लु। मिनु मेको कली रोगु डा खुदो नु फुल्लु रे तेल जचा गेप्टु। भजन संग्रह ८१:१७

14 मिनु बी आन दूध के दहि, भेडा आन दूध नु पाठा नु सांड आन बोंसो ब्वचा गेप्टु। बाशान डा ब्यफ नु क्यारश आन श्ये ब्वचा गेप्टु। नेल्ल क्येडा रिम्शो चेरब फस जशा, अडगुर शांबु तूशा बाक्ते।

15 मिनु येशुरुनमी दोम्शा ताइक्तु। गे दोम्ते। गे दोम्शा, ठेयब लेशो दुम्ते। मेकोमी आ कली सेल्ब परमप्रभु कली प्रोंइतु। मिनु आ श्येत रे प्रोंइब सेरथे फुल्लु, कली प्रोंइतु। येशुरुन याकूब-इस्राएल कली मान पतीक नें बाक्ब। व्यवस्था ३३:५, २६; यसैया ४४:२; व्यवस्था ३१:२०; नेहेम्याह ९:२५

16 मिनु मेकोपुकीमी अर्को देवी देवता आन कली ठेयब सेल्शा, मेको कली गेहे पपाइक्तेक्म। मेकोपुकीमी ग्रांरा दिचा डा थोत्रकीम पतीके मेको कली गाइक्पाइक्तेक्म।

17 मेकोपुकीमी परमप्रभु कली ममाइ, वोल आन कली चढ्तेक्म। आन डोंइती मतुइशो देवी देवता आन कली चढ्तेक्म। आन किकी पिपीमी महिंशो नक सेल्शो देवी देवता आन कली चढ्तेक्म।

18 मिनु गे इन कली सेल्ब सेरथे फुल्लु कली ममिम्तीनी। इन कली थीब परमप्रभु यावे कली प्रेंताक्नी। उत्पत्ती ४९:२४; भजन संग्रह १८:३२; भजन संग्रह ७८:१५-१६

19 मिनु परमप्रभु यावे मेको तशा रुश पाप्टु। मारदे हना आ तमी तौपुकीम मेको कली आइक्क सेल्लेक्म।

20 मिनु मेकोमी 'गो मेको आन कली वारच मपाइनुड। मेको दोपा बेक्नीमी, मेको कोवत्रुड। मारदे हना मेको दूली पाइब पाला डा मुर बाक्नीम। मेको थमा मसुइक्चा डा बाक्नीम।

21 देवी देवता आन पर्वमी आं कली रुश पपाइक्नीम। मूर्ति पूजा पा आं कली गाइक्ब सेल्लतीमी। मोपतीके गो डोन डा मुर आन कली आंम के सेल्शा, एको आन कली रुश पपाइक्नुड। रागी डा मतुइक्ब मुर आन कली गुप्शा, मेको आन कली गाइक्पाइक्नुड। भजन संग्रह ७८:५८; येरमीया २:११; रोमी १०:१९



22 मारदे हना आं गाडक्चा मी खोदेंशो पा ब्रशो बाक्ब। रागी आगा सम्म ब्राइब। रागी नु मेकेर बाक्शो नेल्ले नेक्ब। मेकोमी डांडा आन जग नेल्ल नेक्ब।

23 गो मेको आन कली शुश श्येत गेनुड। गो मेको आन कली ब्रा आप्नुड। दोपा आप्नुड देंशा हना,

24 बेक्चा डा शोत्रल्ल, शुश नाप्शो जोरो, मुर कली साइक्ब रोड नु मेको आन कली बुप्शा ब्वाइब जन्तुपुकी नु खपीम ग्रेशा गाक्ब बीस पाइशो बुस्सपुकी सोइक्नुड।

25 लां लांमी तरवारम मेको आन कली रोम रोइक्च सेल्लुड। खिं खिंम राग्शी पोक्नुड। ठिटा ठिटी, दूध तूब आल, चां बोइशो नेल्ल आन कली खाल का डा पाडनुड। इजीकीएल ५:१७; इजीकीएल १४:२१

26 गो मेको आन कली डोन डोन सम्म ब्रापाइक्नुड। गो मेको आन कली मुर आन दातेम ममिम्पाइक्नुड।

27 तन्न आन जोरी सत्रुपुकीमी दूली मिम्शा “गोपुकीमी इं सक्तिम ग्रातय। एको परमप्रभु यावे आ पशो ममाइ” देंनीम। मिनु आं कली गाइक्पाइक्नीम।

28 मारदे हना मेकोपुकी रागी डा निप्स मपाइशो मुर नम। मेकोपुकी नु मारेइ रुप्तीक थुं मबाक्ब। यसैया २७:११; येरमीया ४:२२

29 मेकोपुकी निप्स पाइशो नम हना, एको लोत्र रुबेम वा। मेको आन बेक्तीक तुइक्तेम वा।

30 मेको आन सेरथे फुल्लुम मेको आन कली लेयने थुम्शो बाक्ब। परमप्रभु यावेमी मेको आन कली प्रोइने थुम्शो बाक्ब। मोपतीके मुर कामी हजार का आन कली खेदा पाप्नु। मुर निक्शीमी १० हजार आन कली खेदा पने चाप्नीसी। लेवी २६:३६-३७; यसैया ३०:१७

31 इं जोरी सत्रुमी “मेको आन सेरथे फुल्लु आंइ सेरथे फुल्लु खोदेंशो ममाइ” दे लोत्र पाप्तेक्म। ब्यवस्था ३२:४, ३७

32 मारदे हना मेको आन अडगुर सोदोम डा अडगुर बाक्नीम। मेको गोमोररा डा अडगुर रूरे दुम्शो बाक्नीम। मेको आन अडगुर बीखम ब्रीशो बाक्नीम। मेको आ गेडा कशो बाक्नीम।

33 मेको आन अडगुर बुस्स आ बीस नु साइक्चा डा बीख बाक्ब।

34 गो एको मिम्शा वोइशो बाक्नुड। आं वोइक्तीकेमी छाप थोक्शा वोइशो बाक्नुड। ब्यवस्था २९:२८

35 सजाइ नु क्येक्क लेत्तीक आं के बाक्ब। मिनु ग्रेक्शा थित्तीक नाक्त नु आन बेक्तीक नाक्त जाक्चा चिक्शो बाक्ब। मेको आन खतम दुम्तीक नाक्त जाक्चा चिक्शो बाक्ब। भजन संग्रह ९४:१; रोमी १२:१९; हिब्रू १०:३०

36 परमप्रभु यावेमी आ मुर आन कली थमा पा वारच पाइब। आ मुर आन कली शिशी पाइब। मेको आन सक्ति लत हना, मुर नु वाइलीम वाइल यो खतम दुम्नीम।

37 मेको आन देवी देवता ते बाक्नीमी? मेको आन खुइक्तीक सेरथे फुल्लु ते बाक्बा डा? ब्यवस्था ३२:३१

38 आन क्योरशा चढ्हेतीके डा बोसो सुमी ब्ववा? मिनु तूचा थोत्रक चढ्हेतीके रे सुम तूडा? मेकोपुकी बोक्शा इन कली वारच पामेक्ल। मिनु इन कली प्रोन्मेक्ल। न्यायाथीस १०:१४; येरमीया २:२८

39 मुल कोव्रडीन, गो ला परमप्रभु नड। आं क्येडा लाक्शा सुइ परमप्रभु मबाक्ब। गो साइक्ब नु ब्रौइपाइक्ब नड। गो गार सेल्लु नु सापाइक्ब नड। आं गुड रे ब्रौइब सुइ मबाक्ब। ब्यवस्था ४:३५; यसैया ४५:५; १सामुएल २:६; प्रस्थान १५:२६; अय्युब ५:१८; होसे ६:१-२

40 मिनु गो आं गुड सरीड गे पोक्शा, गो गेना हना यो ब्रौइशा बाक्शो खोदेंशो पा कसम जाइनुड।

41 गो आं टल्केशो या शेप्ता हना, आं गुडमी निसाफ पचा कली ग्याइक्ताक्ड हना, आं जोरी सत्रु आन कली क्येक्क लेत्नुड। आं कली काइ मदाक्ब आन कली क्येक्क लेत्नुड। येरमीया ४६:१०

42 आं ब्रा आन कली ग्याइशशा साइशो मुर आन हुशेमी गिल्लुड। आं या लाइशो चां पाइशो आं जोरी सत्रु आन श्ये ब्वाइब खोदेंशो सेल्लुड’ दे परमप्रभुमी देंत।

43 गे रागी रागी डा मुरपुकी, ग्येरसीशो मेको आ मुर बाक्नीनी। मिनु नेल्लेमी परमप्रभु कली मान पने। मारदे हना मेकोमी आ गेय पाइब आन हुश आ क्येक्क लेप्ब। आ मुर आन कली मरिम्शो पाइब

आन कली क्येकक लेप्ब। मिनु मेको आन कली काइ मदाकब आन कली क्येकक लेप्ब। मिनु मेकोमी आ मुर आन रागी कली लेंशा रिम्शो सेल्ब” दे मोसामी कुम्सो पाप्तु। रोमी १५:१०; ब्यवस्था २१:८; गन्ती ३५:३३-३४

मोसा आ नोले डा अरेशो लोत्र

44 मिनु मोसा नु नून आ तौ यहोसु मुर आन डोंइती एको कुम्सो डा लोत्र नेंपाइक्ताक्स।

45 मिनु मोसामी इस्राएली नेल्ल आन कली एको लोत्र नेंपाइक्ने थुम्शा,

46 मेको आन कली “मुलाकत गे इन कली आं देशो लोत्र नेल्ल इन थुम वोतीन। इन तमी तौ आन कली देनीन। गे मेको आन कली ‘मेको अरेशो लोत्र नेल्ल होस पा पचा माल्नीनी’ दे मतीन। ब्यवस्था ६:७

47 मारदे हना एको इन कली आइकब लोत्र ममाइ। एको इन ब्रोंइतीक बाकब। एको पशा, गेपुकी यर्दन शोकशा इन के सेल्शो रागीम शुश नाकत ब्रोंइनीनी” दे माइक्तीमी। लेवी १८:५

परमप्रभुमी मोसा कली लोत्र पशो

48 मिनु मेको नाक्ती परमप्रभु यावेमी मोसा कली

49 “गे अबारीम डांडा डोंइसो। यरीको आ नेक्था मोआब रागीम बाकशो नेबो डांडा डोंइसो। मिनु गो इस्राएली आन कली गेशो कनान रागी नेल्ल कोवडो। गन्ती २७:१२; गन्ती ३३:४८

50 मिनु दोपा इ लोकब हारून होर डांडाम बेक्मे नु आ किकी पिपी आ मुर आन बाक्तीक लमे, मोपा गे मेको इ डोइशो डांडाम बेक्नेवे। मिनु बेक्शा इ किकी पिपी आन बाक्तीक लाइनेवे। गन्ती २०:२३-२९

51 मारदे हना गे निक्शीमी जीन डा गोरशो रागी मेरीबाथ-कादेशमी आं ब्वाक्कु आ नेक्था इस्राएली आन दातेमी आं कली थमा मसुइक्कीसी। आं कली टिचा माल्नीम, दे इस्राएली आन डोंइती मकोइथु, आं कली ठेयब मसेल्सी। गन्ती २०:१२-१३

52 गे आं इस्राएली आन कली गेशो रागी डोन रे ताप्तीवी हना यो, गे मेकेर लचा मताइनेवे” दे परमप्रभु यावेमी मोसा कली दैत।

## 33

मोसामी आसीक गेशो

उत्पत्ती ४९:-

1 परमप्रभु आ मुर, मोसामी आ बेक्चा क्येडा डोंइती इस्राएली आन कली मार आसीक गेप्टु देशा हना

2 “परमप्रभु यावे सैनै रे जाकशो बाकब। मेको सेइर रे पा आंइ डोंइती थूत। मेको पारान डांडा रे पा टल्केसाकव। मेको नु लाख लाख आ मुर बाक्तेक्म। आ ग्युरा गे आंम मुर डा ठेयब हुल बाक्तेक्म। न्यायाधीस ५:४

3 थमा पा, मुर आन दातेमी आ मुर शुश दाकशो मुर बाक्नीम। गे इन मुर नेल्ल आन कली कोत्रब बाक्तीनी। मेकोपुकी इन खोइल आ नेक्था गाकशो बाक्तेक्म। इन देशो नेल्ल पाक्तेक्म।

4 मोसामी आंइ कली इन अरेशो लोत्र ‘पचा माल्नीनी’ दे माइक्तु। मेको अरेशो लोत्र याकूब आ जात डा मुर नेल्ल आन के दुम्त।

5 मिनु येशुरुन पिप का दुम्त। मुर आन ठेयब मुरपुकी बुक्तेक्म। मिनु इस्राएल आन थर थर नेल्ल गुम्तेक्म। येशुरुन याकूब-इस्राएल कली मान पतीक नें बाकब। प्रस्थान १५:१८; ब्यवस्था ३२:१५; प्रस्थान १९:७

6 रूबेन आ मुर शुश मदुम्तेक्म हना यो, ब्रोंइशा बाकल, मबेक्ल” दैत।

7 मिनु यहूदा आ पर्बम मार देशो बाकत, देशा हना “परमप्रभु यावे, यहूदा आ लोत्र नेनीन। मेको कली आ मुर आन बाक्तीक चाक्कीन। मेको कली सक्ति गेने। मेको आ जोरी सत्रु आन पर्बम मेको कली वारच पतीन” दैत।

8 मिनू लेवी आ पर्वम मार देशो बाक्त, देशा हना “गे लेवी कली इन थुम्मीम गेने। इन ऊरीम इन थमा सुडक्चा डा गेय पाइब कली गेने। गे मेको कली मास्साहम नाक्ताकनी। गे मेरीबा डा ब्वाक्कुम मेको नु जीतीनी” दैत। प्रस्थान २८:३०; १सामुएल १४:४१; प्रस्थान १७:२,७; भजन संग्रह ९५:८

9 मेकोमी आ आम आफ आस पर्वम “गो मेको आस कली ममिन्नुड। मेकोमी आं खिं डा मुर आन कली प्रोइतु। आ तौ आन कली मतुइक्त। मारदे हना मेकोमी इन लोव्र टिप्टु। मिनू गे नु कबल पशो बाक्त। प्रस्थान ३२:२७-२९; मत्ती १०:३७

10 मेकोपुकीमी याकूब कली इन पतीके लोव्र नु इस्राएली आन कली इन अरेशो लोव्र शेनीम। मेकोपुकीमी इन डोंइती धूप चोइनीम। इन कली इन चढेतीके तार नेल्ल चोशा चढेतीके चढेनीम।

11 परमप्रभु यावे, गे मेको कली आसीक गेने। मेको आन गेय ताक्कीन। मेको कली काइ मदाक्ब आन कली नु आ जोरी सत्रु आन कली लेंशा मबोक्चा डा पा खतम सेलीन” दैत।

12 मिनू बेन्यामीन आ पर्वम मार देशो बाक्त, देशा हना “परमप्रभु यावे आ दाक्शो महिंचा डा पा नाइक्ब। नेल्ल क्येडा ठेयबमी मेको कली नाक्त रे कोव्रब। मेको आ दाक्शो मुर आ बला आस दातेम नाइक्ब” दैत।

13 मिनू योसेफ आ पर्वमी मार देशो बाक्त, देशा हना “परमप्रभु यावे आ रू आन कली आसीक गेवल। मेकोमी इर सरीडु नु उइ रागी डा नेल्ल क्येडा रिम्शो तवल। उत्पत्ती ४९:२५

14 नांम सिशशो फल फुल तवल। महिना महिना डा रिम्शो फल फुल तवल।

15 माइत पहाड डा नेल्ल क्येडा रिम्शो अन्न नु गेना हना यो लीब डांडा डा शुश बाली नाली तवल।

16 मेको रू डा नेल्ल क्येडा रिम्शो सिशशो शुश तवल। मिनू सीने डांडाम बाक्ब आ दाक्शो तवल। मिनू मेको आसीक योसेफ आ पिया तार दुम्ल। प्रस्थान ३:२-४; उत्पत्ती ४९:२६

17 मेको आ लोकब आन दाते डा नेल्ल क्येडा ठेयब मुर, योसेफ आ पिया तार दुम्ल। मेको डोंइती जरमेशो बाछा खोदेशो बाक्ब। मेको ताइब बाक्ब। मेको आ योव्र ब्वाकी डा ब्यफ आ योव्र खोदेशो बाक्ब। मेकोमी जात जात डा मुर आन कली खेरशा, रागी आ सुर सम्म नेचब। मेकोपुकी एफ्राइम आ लाख लाख डा मुर नु मनस्से आ हजार हजार डा मुर बाक्नीम” दैत। उत्पत्ती ४६:२०

18 मिनू जबूलून आ पर्वम मार देशो बाक्त, देशा हना “जबूलून, लाडगा लशा ग्येरसो। मिनू इस्साकार इ ताम्बुम बाक्शा ग्येरसो।

19 मेकोपुकीमी जात जात डा मुर आन कली डांडाम ब्रेत्नीम। मेकेर ठीक दुम्शो चढेतीक चढेनीम। मारदे हना मेकोपुकीमी समुन्द्र डा शोंप नु बाल्वाम खुइशु शोंप जाइनीम” दैत।

20 मिनू गाद आ पर्वम मार देशो बाक्त, देशा हना “गाद कली सोशो बोशो दुम्शा ग्येरसो। गाद गुप्स खोदेशो पा बाप्शा बाक्ब। मेकोमी गुइ नु पिया रेचब।

21 मेकोमी आंम कली नेल्ल क्येडा रिम्शो रागी योव्रतु। मारदे हना मेको कली कप्तान आ भाग वोइशु बाक्त। मेको नेल्ल इस्राएली आन डोंइती गाक्त। परमप्रभु यावेमी देशो ठीक पतीके पाप्तु” दैत। गन्ती ३२:२९-३२

22 दान आ पर्वम मार देशो बाक्त, देशा हना “दान बाशान रे प्रेक्शा, जाक्ब, गुप्स आ चाइक्ब बाक्ब” दैत।

23 मिनू नाप्ताली आ पर्वम मार देशो बाक्त, देशा हना “नाप्ताली, गे परमप्रभु यावे आ दाक्शो, आसीक ताइब बाक्नेवे। गे पच्छिम नु दक्खिन इ के सेलो” दैत।

24 मिनू आशेर आ पर्वम मार देशो बाक्त, देशा हना “मुर आन दातेमी नेल्ल क्येडा आसीक राइब आशेर बाक्ब। मेको आ लोकबपुकीमी मेको कली दाक्तमेक्ल। मेको आ खोइल तेलम चिकसेक्ल।

25 इ आग्लोपुकी फलाम नु कांसा के बाक्नीम। इ नाक्त दोदेशो बाक्मे इ सक्ति यो मोदेशोन बाक्ल” दैत।

26 मिनू “येशुरुन आ परमप्रभु खोदेशो सुइ मबाक्ब। मेको इ कली वारच पाइक्चा कली स्वर्ग रे पीब। मेको सरीड मेर रे मान पचा पुंडसीशा पीब। येशुरुन याकूब-इस्राएल कली मान पतीक नें बाक्ब। आ अर्थ ठीक पाइब बाक्ब। ब्यवस्था ३२:१५

27 साइ नेसी डा परमप्रभु खुइशशा बाक्तीक बाक्ब। इन डोंइती इन जोरी सत्रु आन हुल कली खेरतु। मिनु मेको आन पबर्म खतम सेलीन, देंत।

28 मोपतीके इस्राएली मारेइ मदुम्यु, रिम्यो पा बाक्ब। याकूब आ बाक्तीकेमी श्येत मजाइनीम। मेको अन्न नु अडगुर आ रागीमी सीत यीब। लेवी २५:१८; १राजा ५:५; भजन संग्रह ६८:२७-२८; यसैया ५१:१-२; उत्पत्ती २७:२८

29 गे इस्राएली, ग्येरसीने। परमप्रभु यावेमी प्रोंइचा पुंइसीशो इन खोदेशो जात सु बाक्बा? परमप्रभु यावे इन कली वारच पाइब नु तेक्तीक बाक्ब। मेको इन ग्रातीक तरवार बाक्ब। इन जोरी सत्रु इन डोंइती बाप्नीम। मिनु गे मेको आन चीमी थेक्शा गाक्नीनी” दे आसीक गेशा, देंत। व्यवस्था ४:७-८; भजन संग्रह ३३:१२; भजन संग्रह १४४:१५

## 34

### मोसा बेक्शो

1 मिनु नोले मोसा मोआब रे यरीको आ नेक्था बाक्शो नेबो डांडा रे पिस्मा डांडा डोंइसाक्ब। मेको यरीको एर बाक्ब। परमप्रभु यावेमी मेको कली गिलाद रागी नेल्ल दान सम्म कोंइताक्ब। व्यवस्था ३:२७

2 नाप्ताली आ रागी नेल्ल, एफ्राइम नु मनस्से, यहूदा आ रागी नेल्ल पच्छिम गे डा समुन्द्र सम्म,

3 नेगेब नु दिंम, मेको यरीको डा दिंम बाक्ब। खजूर रवा आ सहर यरीको रे सोआर सम्म कोंइताक्ब। इतिहास २८:१५

4 मिनु परमप्रभु यावेमी मेको कली “इन चच युइ आन कली गेनुइ, दे अब्राहाम इसहाक नु याकूब नु कसम जशो रागी एकोन बाक्ब। गो एको इ कली कोंइतन। तन्न गे मेकेर लचा मताइनेवे” देंत। उत्पत्ती १२:७

5 मिनु परमप्रभु यावेमी आ देशो खोदेशो पा परमप्रभु यावे आ गेय पाइब मोसा मोआब रागीम बेक्त। व्यवस्था ३२:५०

6 मिनु परमप्रभुमी मोसा कली मोआब रागी बेथ-पेओर आ डोंइती दिंम कामी थिम्तु। तन्न मुल सम्म मोसा आ तुरस सुइमी मतुइक्नीम।

7 मोसा बेक्मेनु, मेको सहे का २१ बर्स दुम्यो बाक्त। मेको आ मिक्च ब्राब्रा मदुम्यो बाक्त। आ बोल यो मग्युम्यो बाक्त। व्यवस्था ३१:२

8 मोआब डा दिंम इस्राएलीपुकीमी ३० नाक्त सम्म मोसा आ पबर्म रोंका पाम्तेक्म। नोले मोसा आ पबर्म रोंका पतीक नाक्त नुप्त।

9 मिनु नून आ तौ यहोसु रुप्तीक तुइक्तीक सोक्तीम ब्रीशो बाक्त। मारदे हना मोसामी आ गुइ मेको आ तार वोइशो बाक्त। मिनु परमप्रभु यावेमी मोसा कली माइशो खोदेशो पा इस्राएलीपुकीमी यहोसु कली टिम्तेक्म। गन्ती २७:१८-२३; १तिमोथी ४:१४; २तिमोथी १:६

10 मेना रे मुल सम्म इस्राएली आन दातेमी मोसा खोदेशो परमप्रभु यावे आ लोत्र पाइब सुइ मग्युम। परमप्रभु यावेमी मेको कली थमा पा तुइक्बाक्त। प्रस्थान ३३:११; गन्ती १२६-८; १कोरिन्थी १३:१२

11 मिनु परमप्रभु यावेमी मेको कली इजीप्त रागीमी चिन्ड नु छक लाक्चा डा गेय पथ सोइक्ताक्ब। मोदेशो मुल सम्म सुइम मपावो मोसामी फाराओ, आ गेय पाइब नु रागी डा मुर नेल्ल आन डोंइती कोंइताक्ब।

12 मिनु मेकोमी इस्राएली आन दातेमी सक्तिम पाइशो गेय नु हिंचा डा गेय कोंइशो बाक्त।

## यहोसु

**ब्रेक्ब मुर:** एको किताब ब्रेक्ब मुर आ नें तेइ मब्रेक्शो बाक्ब। तन्न “यहोसुमी मेको नेल्ल परमप्रभु आ अरेशो लोव ब्रेक्तीक किताबमी ब्रेक्ताक्व” दे ब्रेक्शो बाक्ब। टाल्मुत माइशो यहूदी आन माइत किताबमी “ब्रेक्ब मुर यहोसु बाक्ब। मिनु यहोसु बेक्म नोले डा लोव फिनहासम तेम्शो बाक्त” दे ब्रेक्शो बाक्ब। यहोसु २४:२९-३३

**गेना ब्रेक्शो:** एको किताब ब्रेक्ची ना यबुसीपुकी रागीम बाक्शो बाक्तेक्म। यहोसु १५:६३ पिप दाऊदमी आ सासन पची ना मेको आन कली खेरशो बाक्त। एको किताब ब्यवस्था आ नोले डा दुम्शा, मोसा आ बेक्शो रे यहोसु आ बेक्शो सम्म इस्राएली आन इतिहासम बाक्ब।

**मार ब्रेक्शो:** एको किताबम इस्राएली आन १२ थर का का पा आन थेरशो रू योक्तीके ला ममाइ, मेको रागी कली ग्राशा, आंम के सेल्चा कली परमप्रभु यावे आ देशो टितीकेम ला दुम्ब, दे शेशो बाक्ब। मेको आ कोइतीके आकान आ मटितीके बाक्त।

१. कनान रागी आंम के सेल्चा कली ठीक दुम्तीके यहोसु १:- ५:-
२. कनान रागी कली ग्राशो यहोसु ६:-१२:-
३. इस्राएली आन थेरशो रू योक्शो यहोसु १३:-२४:-

इस्राएली रागी ओव्रचा सासीशो

१ परमप्रभु यावे आ गेय पाइब मोसा बेक्म नोले परमप्रभु यावेमी मोसा आ गेय पाइब नून आ तौ, यहोसु कली लोव पाप्तु।

२ परमप्रभु यावेमी मार लोव पाप्तु देशा हना “आं गेय पाइब मोसा बेक्त। मोपतीके गे मुर नेल्ल आन कली लाइक्चा सासो। मिनु गो इस्राएली आन कली गेचा चिक्शो रागी यर्दन खोला आ आइक्ची हांबु लावो। ब्यवस्था ३४:५

३ गोमी मोसा कली देशो खोदेशो पा, इन खोइलीम थेक्शो रागी नेल्ल इन कली गेता। ब्यवस्था ११:२४

४ गोरशो रागी नु लेबानोन रे ठेयब युफ्रेटीस खोला सम्म, हित्ती आन रागी नेल्ल, पच्छिम गे डा ठेयब समुन्द्र सम्म इन रागी दुम्ब।

५ गे मबेक्डे सम्म इ कली सुइमी यो फुने मचाप्नीम। गो दोपा मोसा नु बाक्डा, मोपा गे नु यो बाक्नुड। गो इ कली गेना हना यो कोव्रनुड। मिनु गेनायो मप्रोइनुड। ब्यवस्था ३१:७,८; हिबू १३:५

६ गे बोल्यो नु महिब दुमो। मिनु गो डोंइती ‘इ किकी पिपी आन कली गेनुड’ दे कसम जशो रागी, गे इस्राएली आन कली आंम के सेल्पाइक्चा माल्नेवे। ब्यवस्था ३:२८;

७ गे थम बोल्यो नु महिब दुमो। आं गेय पाइब मोसामी इ कली अरेशो लोव नेल्ल होस पा टिवो। मेको रे ग्युरा पेरा गे मलावो। मिनु गे ते लते हना यो ग्रानेवे। ब्यवस्था ५:२९; ब्यवस्था २९:८; १राजा २:३

८ एको आं अरेशो लोव डा किताब इ थुं रे डोन मवोतो। मेको कली नाक्दो नाक्ती मिम्तो। मेकेर ब्रेक्सीशो नेल्ल होस पा टिवो। मो पाप्तीवी हना, गे ग्राना ग्रान गाक्नेवे। मिनु इ पतीक नेल्ल थम रिम्शो दुम्ब। भजन संग्रह १:२-३

९ गो इ कली ‘बोल्यो नु महिब दुमो’ देंती। इ थुं लुक्च मलल। गे गेनायो हिंशा खिंखि मपावो। मारदे हना गे ते लते हना यो, गो, परमप्रभु यावे, इ परमप्रभु, गे नु बाक्नुड” दे परमप्रभु यावेमी यहोसु कली देंत।

यर्दन खोला शोक्सीचा गोशो

१० मिनु यहोसुमी मेकेर डा ठेयब मुर आन कली “गे नेल्ल मुर आन बाक्तीकेमी लने। मिनु मेको आन कली

11 “बुत लाम्ज कुरशा सासीन। मारदे हना सांबु नाक्ती परमप्रभु यावे, इन परमप्रभुमी गेशो रागी आंम के सेल्चा कली यर्दन खोला शोक्सीचा मालनय” देनेन। दे अरेप्टु।

12 मिनु यहोसुमी रूबेन आ थर, गाद आ थर नु मनस्से आ उडक्थ थर कली ब्यवस्था ३:१२-२०; गन्ती ३२:२०-२९

13 “परमप्रभु यावे आ गेय पाइब मोसामी इन कली अरेशो लोव्र मिम्तीन। मिनु मेकोमी इन कली ‘परमप्रभु यावे, इन परमप्रभुमी इन कली नाइक्पाइक्तीक गेशा, मेको रागी गेनुड’ देशो लोव्र मप्रेदीन।

14 इन मीश नु आलपुकी, बी ब्यफ, क्यारश भेडा नेल्ल मोसामी इन कली गेशो रागी यर्दन ओंथ हांबुम बाक्चा मालनीम। तन्न गे लडाइ पाइब वोंडश मुरपुकी या कुरशा इन लोकब आन कली वारच पचा कली मेको आन क्येडा डोंइती आइक्ची हांबु लचा मालनीनी।

15 मिनु परमप्रभु यावेमी इन लोकब आन कली, इन कली खोदेशो पा नाइक्चा मगेवा सम्म, मेको रागी आंम के मसेल्मे सम्म नु परमप्रभु यावे, इन परमप्रभुमी मेको आन कली गेचा चिकशो रागी मग्रामा सम्म मेको आन कली वारच पचा मालनीनी। मिनु नोले परमप्रभु यावे आ गेय पाइब मोसामी यर्दन आ पूर्व गे इन कली गेशो रागीमी लेशशा, बाक्ने चाप्नीनी” देत।

16 मिनु मेकोपुकीमी यहोसु कली “गे आंइ कली मार मार अरेनी, गो मेको नेल्ल पाइनीकी। मिनु गे आंइ कली ते ते सोइक्नीनी, गो मेक मेक लाइनीकी।

17 दोपा मोसा आ लोव्र नेल्ल टिशो नया, मोपान इन लोव्र यो टीनीकी। दोपा परमप्रभु यावे, इन परमप्रभु मोसा नु बाक्मे, मोपान गे नु यो बाक्ल।

18 सुमी इन अरेशो लोव्र ‘मपाइनुड’ दे इन लोव्र मनेंबा, मेको साइक्चा पुइसीब। मोपतीके गे बोल्यो नु महिब दुमीन” देतेक्म। यहोसु १:६

## 2

### यरीकोम क्यारी पथ सोइश्शो

1 मिनु नून आ तौ यहोसुमी, सुडम मतुइक्चा डा पा, शित्तीम रे मुर निक्शी क्यारी पथ सोइक्ताक्व। मिनु यहोसुमी मेको आस कली “मेको रागी नु यरीको नेल्ल क्यारी पथ लस” देत। मिनु मेको निक्शी मेकेर जाक्दीश्शा, राहाब माइश्शो तेल्लेम आ खिंमी बास बाक्सा बाक्त। मत्ती १:५; हिब्रू ११:३१; याकूब २:२५

2 मिनु मेकेर डा मुर कामी यरीको डा पिप कली “हजुर, मुलाक्त नाक्दो इस्राएल डा मुर निक्शी एको रागी कली क्यारी पथ, जाक्ताक्स” दे मदा बाक्त।

3 मिनु यरीको डा पिपमी राहाब आ बाक्तीकेमी मुर सोइक्ता नाक्त। मेकोपुकीमी राहाब कली “इ खिंमी जाक्शो मेको मुर निक्शी आस कली ग्रुंइशा, एक चाक्को। मारदे हना मेको निक्शी इं रागी नेल्ल कली क्यारी पथ जाक्शो नसी” दे लोव्र सोइक्ता बाक्त।

4 तन्न मेको मीश मुरुमी मेको निक्शी आस कली लाइश्शा, खुइक्तीम्सी बाक्त। मिनु मेकोमी लोव्र चाक्ब आन कली “मेको निक्शी थमा पा आं बाक्तीकेमी जाक्ताक्स। तन्न ते रे जाक्शो नसी गो मतुइक्तु।

5 मिनु नां रिक्शा, सहर डा ठेयब लाप्चो चोक्ची ना, मेको निक्शी ग्रूमा गाक्ताक्स। मेको ते लसा गो मतुइक्नुड। रीब पा माल्तीनी हना, थित्नीनी को” दे लोव्र लेत्ता बाक्त।

6 तन्न मेकोमी मेको निक्शी आस कली तला तारी वोइश्शा, पले आ डाठमी सुम्शा, खुइश्शा वोइश्शा बाक्माक्त।

7 मिनु मेको निक्शी आस कली खेदा पाइबपुकी यर्दन डा लां लशा, खोला सम्म जाक्दीम्मा बाक्त। मेको खेदा पाइबपुकी सहर रे ग्रूमा नोले ठेयब लाप्चो चोक्गमे बाक्त।

8 मेको मीश मुर इप्चा क्येडा डोंइती मेको निक्शी आस बाक्तीक डोइश्शा, गुथ लमाक्त।

9 मिनु मेको मीश मुरुमी मेको आस कली “परमप्रभु यावेमी आंइ रागी इन कली गेशो बाक्ब, दे गो तुइक्नुड। मारदे हना एको रागीम बाक्ब मुर नेल्ल इन कली तशा, शुश हिनीम। प्रस्थान २३:२७

10 गे इजीप्त रागी रे गूशा पिनीनु, परमप्रभु यावेमी इन डोंइती लल समुन्द्र सोत्रपाइक्तु। मिनु यर्दन आइक्ची हांबु डा एमोरी आन पिप सीहोन नु ओग आस कली साइशशा खतम सेल्शो लोत्र गोपुकीमी नैतक। प्रस्थान १४:२१; गन्ती २१:२१-२६

11 मोदेशो लोत्र नेशो नोले, गोपुकी साप्पा हितक। इन पतीक तशा, गो नेल्ल शुश हितक। मारदे हना परमप्रभु यावे, इन परमप्रभु इर स्वर्ग डा नु उइ रागी डा परमप्रभु बाक्ब। यहोसु ५:१; प्रस्थान १५:१४-१५; ब्यवस्था ४:३९

12 मोपतीके गो इस कली वारच पाता। गे परमप्रभु यावे आ नें थिशा, कसम जसे। मार कसम जस देशा हना, गो इस कली वारच पशो खोदेशो पा, गे लडाइ पनीनु, आं खिं डा मुर नेल्ल आन कली यो वारच पसे। आं कली वारच पतीके चिन्ड का गेयीसी। यहोसु ६:२३,२५

13 मिनु आं आम आफ, आं लोकबपुकी नु मेको आन खिं डा मुर नेल्ल आन कली ब्रोंइचा गेन। बेक्चा रे प्रोनीन” दे मेकोमी देंमाक्त।

14 मिनु मेको निक्शीमी “गे आंइ पचशो गेय सुइ आन कली मदेंते हना, नु परमप्रभु यावेमी एको रागी आंइ कली गेवा नोले गो इ कली थमा पा वारच पा रिम्शो पाइनस्कु। इ कली साइक्चा क्येडा डोंइती आंस कली साइक्चा माल्नीम” देंसा बाक्त।

15 मिनु मेको मीश मुरुमी मेको निक्शी आस कली झेल रे डोरी तोक्शा, उइ तोइक्चा गेम्सी बाक्त। मारदे हना मेको आ खिं मेको सहर डा गारोम बाक्माक्त।

16 मिनु मेको मीश मुरुमी मेको निक्शी आस कली “गे डांडा गे लसे। मेक लाइतीसी हना, खेदा पाइबपुकीमी इस कली मथित्नीम। मेको खेदा पाइब एक्य मलेम्मा सम्म, गे सां नाक्ती मेकेर खुंडसीस। मिनु नोले इस लां लसे” देंमाक्त।

17 मिनु मेको निक्शीमी “गे आस देशो मपाप्तीवी हना, गो कसम मजशो खोदेशो दुम्नस्कु।

18 गो लेंशा एक जाक्कानु, गे आंस कली तोइक्तीक झेलम मेको लल डोरी फ्रेंशा वोतो। इ आम आफ, इ लोकब नु इ खिं डा मुर नेल्ल यो इ खिंम बाक्चा माल्नीम।

19 मेना सु इन खिं रे लांम गूबा, मेको साइक्चा पुंडसीब। मिनु आंइ कली मारेइ यो दोस मदुम्ब। सु चहिं इ खिंम बाक्शा यो, साइक्चा पुंडसीबा, मेको आ दोस आंइ तारी दुम्ल।

20 तन्न एको लोत्र गे सुइ कली देंते हना, आंस कली जपाइशशो कसम मराइनीक” देंसा बाक्त।

21 मिनु मेको मीश मुरुमी “इस देशो खोदेशो दुम्ल” देंमाक्त। मिनु मेको निक्शी लसा बाक्त। मिनु नोले मेको मीश मुरुमी आ झेलम मेको लल डोरी फ्रेंशा वोदा बाक्त।

22 मेको निक्शी लशा, डांडामी जाक्दीशशा, खेदा पाइब मलेम्मा सम्म नाक्ती सां मेकेर बाक्सा बाक्त। खेदा पाइबपुकीमी मेको निक्शी आस कली साप्पा माल्मे बाक्त हना यो, मथिदमे बाक्त।

23 मिनु मेको निक्शी डांडा रे बुष्शा, लेशशा, खोला आइक्ची हांबु नून आ तौ यहोसु आ बाक्तीक जाक्दीशशा, मेको कली मार मार दुम्मे, मेको नेल्ल शोत्रताक्स।

24 मेको निक्शीमी यहोसु कली “थमा पा, परमप्रभु यावेमी मेको रागी नेल्ल इ कली गेशो बाक्ब। मेको रागी डा मुर इ कली तशा, शुश हिंशा, खिंखिं पशो बाक्तेक्म” देंताक्स। यहोसु २:९

### 3

#### यर्दन खोला शोक्सीशो

1 मिनु यहोसु सुनी कना बोक्शा, इस्राएलीपुकी नु शित्तीम प्रोंइशा, यर्दन खोलामी जाक्तेक्म। मिनु आइक्ची हांबु शोक्सीचा क्येडा डोंइती मेकेर बास बाक्तेक्म। गन्ती २५:१

2 मिनु सां नाक्त नोले टेयब मुरपुकी मुर आन बाक्तीकेमी लाक्तेक्म।

3 मिनु मेकोपुकीमी मुर आन कली “गेपुकी गेना परमप्रभु यावे, इन परमप्रभु आ कबल पशो सन्दोस चढेब लेवीपुकीम कुरशो ताइनीनी, मेना छुल छाल बोक्शा, इन मारेइ मारेइ कुरशा, मेको आन नोले खोतीन।

4 मो पाइतीनी हना, इन लतीक लां तुडक्नीनी। मारदे हना गे मेको लां डोंइती मगाक्शो बाक्तीनी। गे मेको आन क्येडा हजार निक्शी हात नोले ला गाक्कीन। मेको आन नेक्था मलन” देंतेक्म। कुबीत का, ०.५ मिटर खोदेंशो बाक्ब।

5 मिनु यहोसुमी मुर आन कली “गेपुकी आंम कली परमप्रभु यावे आ डोंइती बाक्चा कली ठीक सेल्सीन। मारदे हना दीसा परमप्रभु यावेमी इं दातेमी छक लाक्चा डा गेय पाइब” देंत। प्रस्थान १९:१०

6 यहोसुमी चढेब आन कली “परमप्रभु आ कबल पशो सन्दोस कुरशा, मुर आन डोंइती गाक्कीन” देंत। मिनु मेकोपुकी सन्दोस कुरशा, मुर आन डोंइती गाक्तेक्म। यहोसु ६:६

7 मिनु परमप्रभु यावेमी यहोसु कली “मुलाक्त रे गो इ कली इस्राएली नेल्ल आन डोंइती ठेयब सेल्नन। दोपा गो मोसा नु बाक्डा, मोपा गे नु यो बाक्नुड, दे नेल्ल आन कली तुडक्पाइक्नुड। यहोसु ४:१४; यहोसु १:५, १७

8 गे कबल पशो सन्दोस कुरब चढेब आन कली ‘गेपुकी यर्दन खोला आ सुर डा ब्वाक्कुम जाक्दीशशा, मेक उइ राप्शा, बाक्चा माल्नीनी’ दे अरेचा माल्नेवे” देंत।

9 मिनु यहोसुमी इस्राएली आन कली “आंथ पिन। मिनु परमप्रभु यावे, इन परमप्रभु आ लोत्र नेनीन” देंत।

10 मिनु यहोसुमी “ब्रोंइशा बाक्ब परमप्रभु इन दातेमी बाक्ब, गे तुडक्ब दुम्नीनी। मिनु मेकोमी कनानी, हिती, हिच्वी, परिज्जी, गिरगाशी, एमोरी नु यबुसी आन कली इन डोंइती रे थमा पा खेरब।

11 कोत्रडीन, रागी नेल्ल आन कली सासन पाइब परमप्रभु आ कबल पशो सन्दोस इन डोंइडोंइती यर्दन शोक्चा कली लाइब।

12 मिनु मुल इस्राएल डा थरपुकी रे १२ जना वोंइश मुर थर का रे का का पा योत्रडीन।

13 गेना परमप्रभु यावे, रागी नेल्ल आन कली सासन पाइब परमप्रभु आ कबल पशो सन्दोस कुरब चढेब आन खोइली यर्दन डा ब्वाक्कुमी खुम्नीमी, मेना इर रे यिशो यर्दन डा ब्वाक्कु नांडसीब। मिनु गारो खोदेंशो पा राप्शा बाक्ब” देंत। भजन संग्रह ९७:५; मीका ४:१३; जकरिया ४:१४

14 मिनु मुर नेल्ल यर्दन शोक्सीचा कली ठीक पा बाक्मानु, चढेबपुकीमी मुर आन डोंइती परमप्रभु यावे आ कबल पशो सन्दोस कुरशा गाक्तेक्म।

15 मिनु बाली नाली रुच्ची ना, खोला गेना हना यो शुश बारशो बाक्ब। मिनु चढेबपुकीमी आन खोइली यर्दन खोला आ सुर डा ब्वाक्कुम खुम्मेनु,

16 इर रे यिशो ब्वाक्कु तेक्साक्व। मेको गारो खोदेंशो दुम्शा, मुर आन लतीके लां रे डोन बाक्त। मेको ते तेक्सीशो बाक्त देश हना, चारेथन आ नेक्था डा आदम सहर माइशोमी तेक्सीशो बाक्त। मिनु इर रे यिशो दिंम डा अराबाह समुन्द्र, मेको कली हिक्सी समुन्द्र यो देनीम, यीब ब्वाक्कु तेक्सीशो बाक्त। प्रस्थान १४:२१-२२; भजन संग्रह ११४:३

17 मिनु मुरपुकी गाक्शा, सोत्रशो खपीम यर्दन शोक्सीचा गोम्तेक्म। मिनु परमप्रभु यावे आ कबल पशो सन्दोस कुरब चढेबपुकी यर्दन आ दातेमी सोत्रशो खपीम राप्शा, रिम्शा बाक्तेक्म। मिनु इस्राएली नेल्ल सोत्रशो खपीम गाक्शा, यर्दन आइक्ची हांबु जाक्दीत्तेक्म।

## 4

### १२ ओटा फुल्लु वोइशशो

1 मिनु मुर नेल्ल यर्दन आइक्ची हांबु शोक्ने थुम्मे नोले परमप्रभु यावेमी यहोसु कली

2 “मेको मुर आन दाते रे १२ जना वोंइश मुर योत्रडो। थर का रे का का पा योत्रशा लावो।

3 मेको आन कली ‘यर्दन आ दातेमी चढेब आन राप्तीके रे १२ ओटा फुल्लु गुप्शा, कुरशा चाक्कीन। मिनु नाक्दो ते बास बाक्नीनी, मेको फुल्लु यो मेक उइ वोतीन’ दे मतो” देंत।

4 मिनु यहोसुमी आ योत्रशो इस्राएली थर नेल्ल डा का का पा १२ जना वोंइश मुर आन कली ब्रेत्ताक्व।



5 मिनु यहोसुमी मेको आन कली “गे यर्दन आ दातेमी परमप्रभु यावे, इन परमप्रभु आ कबल पशो सन्दोस आ डोंइती लने। मिनु मेकेर इस्राएल आ १२ थर खोदेशो पा १२ ओटा फुल्लु बलाम लाप्शा पितीन।

6 मिनु मेको इन कली मिम्तीके दुम्ल। दीसा नित्थी इन तमी तौपुकीमी ‘एको फुल्लु आ अर्थ मार बाकम?’ दे हिल्लो पाम्तेकम हना, प्रस्थान १२:२६;

7 गेपुकीमी मेको आन कली ‘परमप्रभु यावेमी आ कबल पशो सन्दोस यर्दन शोकची ना, मेको आ डोंइती यर्दन डा ब्वाक्कु तेकपाइवकु। मेको यर्दन शोकची ना, यर्दन डा ब्वाक्कु नाइकपाइवकु। एको फुल्लु इस्राएली आन कली गेना हना यो मिम्तीक दुम्ल’ देंचा माल्नीनी” दैत।

8 मिनु परमप्रभु यावेमी यहोसु कली माइशो खोदेशो पा यहोसुमी दोपा अरेवा, मोपा इस्राएल डा १२ थर डा १२ जना वोंइश मुरुमी १२ ओटा फुल्लु यर्दन आ दाते रे पिशशा, मेको आन बाकशो दिममी वोइक्तेकम।

### १२ ओटा फुल्लु यर्दनमी वोइशो

9 मिनु यहोसुमी कबल डा सन्दोस कुरशा चढेबपुकी राप्तीकेमी यो यर्दन खोला आ दातेमी १२ ओटा फुल्लु वोइवकु। मिनु मेको फुल्लुपुकी मुलाकत सम्म बाक्नीम।

10 मिनु सन्दोस कुरब चढेबपुकी यर्दन आ दातेमी परमप्रभु यावेमी यहोसु कली देशो लोत्र नेल्ल मपामे सम्म राप्शा बाक्तेकम। डोंइती मोसामी अरेशो खोदेशो पा यहोसुमी मुर आन कली मअरेवा सम्म राप्शा बाक्तेकम। मिनु मुरपुकी रीब पा शोक्साकम।

11 मिनु मुरपुकी शोक्ने थुम्मे नोले, परमप्रभु यावे आ कबल पशो सन्दोस कुरब आन डोंइती चढेबपुकी यो शोक्साकम।

12 मोसामी मेको आन कली देशो खोदेशो पा, रूबेन आ थर, गाद आ थर नु मनस्से आ उइक्थ थर डा वोंइश मुर या कुरशा, इस्राएली आन डोंइती गाक्तेकम। यहोसु १:१२-१६

13 मिनु परमप्रभु यावे आ डोंइती हेररा ४० हजार लडाइ पाइब, या कुरशो वोंइश मुरपुकी शोक्शा, लडाइ पचा कली यरीको डा दिम गे लाम्तेकम।

14 मेको नाकत परमप्रभु यावेमी यहोसु कली इस्राएली आन डोंइती ठेयब सेल्लु। मिनु मेकोपुकीम मोसा कली हिक्शो खोदेशो पा यहोसु कली यो मबेकम सम्म हिक्तेकम। यहोसु ३:७

15 मिनु परमप्रभु यावेमी यहोसु कली

16 “कबल पशो सन्दोस कुरब चढेब आन कली ‘मुल यर्दन रे इर कुन’ देशो ब्रेत्तो” दे माइवकु।

17 मोपतीके यहोसुमी मेको आन कली “यर्दन रे इर कुन” दे ब्रेत्ताकव।

18 परमप्रभु यावे आ कबल पशो सन्दोस कुरब चढेबपुकी यर्दन आ दाते रे गाक्शा, खोला आ सुर डा सोत्रशो खपीम थेक्त्मे नोले यर्दन डा ब्वाक्कु लेंशा डोंइती डा खोदेशो पा एर ओंथ सुम्शा शांइसाकव।

### गिल्गालमी वोइशो फुल्लु

19 मिनु इस्राएलीपुकी डोंइती डा महिना डा १० नाक्तीमी यर्दन रे गूतेकम। मिनु यरीको आ पूर्व गे गिल्गाल माइक्तीकेमी बास बाक्तीक सेल्साकम। यहोसु ५:९-१०

20 मिनु यहोसुमी मुरपुकीम यर्दन रे गुंइशा पिशशो १२ ओटा फुल्लु गिल्गालमी पुक्पाइवकु।

21 मिनु इस्राएली आन कली “इन तमी तौपुकीमी आन आफ आन कली ‘एको फुल्लु आ अर्थ मार बाक्बा?’ दे हिल्लो पाम्तेकम हना, यहोसु ४:६

22 गेपुकीमी इन तमी तौ आन कली ‘गो इस्राएलीपुकी सोत्रशो खपीम गाक्शा, यर्दन खोला शोक्सीशो नकी’ देंचा माल्नीनी।

23 दोपा परमप्रभु यावे, इन परमप्रभुमी लल समुन्द्र मशोक्सीशो सम्म सोत्रपदा, मोपान आंइ डोंइती यर्दन मशोक्सीशो सम्म मेकेर डा ब्वाक्कु यो सोत्रपाइवकु। यहोसु ३:९-१७; प्रस्थान १४:२१-२२

24 मिनु रागी डा मुर नेल्लेमी परमप्रभु यावे, इन परमप्रभु ठेयब सक्ति पाइशशो बाक्ब, दे तुइक्तेकम। मिनु गे परमप्रभु यावे, इन परमप्रभु कली तुइशशा, गेना हना यो मान पा हिनीन, दे मोदेशो पाप्नु” दैत।

## 5

## खोइक्तीक चिनु खोइश्शो

1 मिनु यर्दन आइक्की हांबु पच्छिम गे डा एमोरी आन पिप नेल्ल नु ठेयब समुन्द्र आ नेक्था डा कनानी आन पिप नेल्लेमी “परमप्रभु यावेमी इस्राएली आन डोंइती यर्दन खोला मशोकसीमा सम्म सोव्रपाइक्तु” दे नेंशा, मेकोपुकी इस्राएली आन कली तशा, साप्पा हिंशा आन थुं लुकच लत। यहोसु ३:१६; यहोसु २:२४

2 मेना परमप्रभु यावेमी यहोसु कली “फुल्लु के खोइक्तीक सेल्शा, चिनु मखोइश्शो इस्राएली आन कली खोइक्तीक चिनु खोतो” दे अरेप्टु। प्रस्थान ४:२५; उत्पत्ती १७:१२-१४

3 मिनु यहोसुमी फुल्लु के खोइक्तीक सेल्शा, गिबेआथ-हारालोथमी इस्राएली आन कली खोइक्तीक चिनु खोइक्तु।

4 यहोसुमी मारदे इस्राएली आन कली खोइक्तीक चिनु खोइक्तु देशा हना, इजीप्त रागी रे पिशो वोंइश मुर नु लडाइ पाइब नेल्ल गोरशो रागीमी बेक्ने थुम्शो बाक्तेक्म।

5 इजीप्त रागी रे पिशो वोंइश मुर नेल्ल आन के खोइक्तीक चिनु खोइक्ने थुम्शो बाक्तेक्म। तन्न गोरशो रागीमी जरमेशो आन कली चहिं खोइक्तीक चिनु मखोइश्शो बाक्तेक्म।

6 मिनु डोंइती परमप्रभु यावेमी आंइ किकी पिपी आन कली “दूध नु खुदो शुश बाक्शो रागी इन चच युइ आन कली गेनुड” दे कसम जाप्टु। तन्न आ लोव्र मटितीके इजीप्त रे पिशो लडाइ पाइब नेल्ल ४० बर्स गोरशो रागीमी मबेक्मा सम्म हिरचा माल्तेक्म। परमप्रभु यावेमी मेको आन मटितीके मेको आन कली “गे इन कली मेको दूध नु खुदो शुश बाक्शो रागी ओव्रचा मगेनुड” दे कसम जशो बाक्त। गन्ती १४:२२-२३

7 मेकोमी आन आफ आन पा डा आन तौ आन कली मेको रागी तचा कली कोल्पाइक्तु। मिनु यहोसुमी मेको आन तौ आन कली खोइक्तीक चिनु खोइक्पाइक्तु। मारदे हना लांमी गाक्तीके मेको आन कली खोइक्तीक चिनु मखोइश्शो बाक्तेक्म।

8 मिनु नेल्ल मुर आन कली खोइक्तीक चिनु खोइक्ने थुम्मे नोले, मेकोपुकी खोइश्शो गार मसाम सम्म आन बाक्तीकेमी बाक्शो बाक्तेक्म।

9 मिनु परमप्रभु यावेमी यहोसु कली “मुलाक्त डा नाक्ती इजीप्त डा इन मुने नेल्ल क्याम्ताक्ड” देंत। मोपतीके मुलाक्त सम्म मेको आन बाक्शो बाक्तीके कली गिल्लाल देशो बाक्नीम। यहोसु ४:१९

## पास्सा चाड मानेशो

10 इस्राएलीपुकी गिल्लाल सहरम बाक्शो बाक्तेक्म। मिनु मेकोपुकीमी महिना डा १४ नाक्ती पास्सा चाड मानेक्तेक्म। मेको यरीको डा दिमम बाक्शो बाक्तेक्म। प्रस्थान १२:६,३९; लेवी २३:१०,१४; २राजा २३:२१;२२; होसे ९:१५

11 पास्सा चाड आ दीसा नाक्ती मेकोपुकीमी मेको रागी डा सिश्शो अन्न रे पा बोर्ब ओख्ती मसुप्शो शोब्ले नु कारशो अन्न जाम्तेक्म।

12 मेको रागी डा अन्न जामे नोले, आ दीसा नाक्त रे मन्ना शोब्ले यिचा नांइसाक्व। मेकोपुकीमी मेको नाक्त रे कनान रागी डा अन्न जाम्तेक्म। प्रस्थान १६:३५

## स्वर्ग डा गेय पाइब नु यहोसु

13 यहोसु यरीको आ नेक्था बाक्मेनु, मेको आ डोंइती गुइमी तरवार शेशा मुर का दोक राप्शो ताप्टु। मिनु यहोसु मेको आ नेक्था लशा “गे आंइ मुर ननी देय आंइ जोरी सत्रु आ मुर ननी?” दे हिल्लो पाप्टु। गन्ती २२:२३,३१

14 मिनु मेकोमी “ममाइ, गो परमप्रभु यावे आ फौज आन कली चलेब नड। मोपतीके जाक्ती” देंत। मिनु यहोसुमी गु बाप्शा सेउ पशा “आं प्रभु, गो इन गेय पाइब नड। आं कली मार लोव्र पाइनीनी?” दे हिल्लो पाप्टु।

15 मिनु परमप्रभु यावे आ फौज आन कली चलेबमी यहोसु कली “इ लिक्शो जुता पुतो। मारदे हना इ बाक्शो परमप्रभु यावे आ बाक्तीक बाक्ब” देंत। मिनु यहोसुमी मेको आ देशो खोदेशो पा आ जुता पुइक्तु। प्रस्थान ३:५

## 6

यरीको सहर कली ग्राचशो

1 मिनु यरीको डा मुरपुकीमी इस्राएली आन कली तशा, आन गारो डा टेयब लाप्चो चोक्तेक्म। मिनु सुइ मुर सहर रे खिंडगा लाडगा मपाम।

2 मिनु परमप्रभु यावेमी यहोसु कली “गो यरीको, मेकेर डा पिप नु मेकेर डा लडाइ पाइब नेल्ल इ कली गेता।

3 मोपतीके ६ नाक्त सम्म, नाक्तीमी खेयप का इ लडाइ पाइब वोइश मुर नेल्ल आन कली मेको यरीको सहर एर ओंथ हिरपतो।

4 मिनु ७ जना चढेब ७ ओटा ताप्तीक ग्रोव कुरशा, परमप्रभु यावे आ सल्ला पतीक सन्दोस कुरशो चढेब आन डोंडडोंइती गाक्चा माल्नीम। मिनु ७ नाक्तीमी गे ७ खेयप मेको सहर एर ओंथ हिरचा माल्नीनी। मेना मेको ७ जना चढेबपुकीमी आन ग्रोव ताम्ना ताम्न गाक्चा माल्नीम।

5 मिनु मेकोपुकीमी शुश रेयके पा ग्रोव ताम्ना ताम्न बाक्मानु, इन मुर नेल्लेमी मेको रेयके नेन्मे नोले, टेयब सेंदा पा ग्रीचा माल्नीम। मोपा ग्रीमानु, मेको सहर डा गारो नेल्ल ब्रेप्ब। मिनु मुर नेल्ल आंम आंम डोंइती बारशा, ब्रेशशो गारो डोइक्चा माल्नीम” दे परमप्रभुम माइक्तु।

6 मिनु नून आ तौ यहोसुमी चढेब आन कली ब्रेशशा, मेको आन कली “परमप्रभु यावे आ कबल पशो सन्दोस कुरीन। मेको ७ जना अरु चढेबपुकी चहिं ७ ओटा ताप्तीक ग्रोव कुरशा, परमप्रभु यावे आ कबल पशो सन्दोस कुरब आन डोंइती गाक्पतीन” देंत।

7 मिनु मेकोमी मुर आन कली “गे यो सहर एर ओंथ हिरसीन। मिनु या कुरशो मुरपुकी परमप्रभु यावे आ कबल पशो सन्दोस आ डोंडडोंइती गाक्चा माल्नीम” देंत।

8 मिनु यहोसुमी देशो खोदेशो पा मेको ७ जना चढेब परमप्रभु यावे आ डोंइती ताप्तीक ग्रोव कुरशा, ताम्ना ताम्न गाक्तेक्म। मिनु परमप्रभु यावे आ कबल पशो सन्दोस कुरबपुकी मेको आन नोले खोइक्तेक्म।

9 मिनु या कुरब चहिं ग्रोव ताप्ब चढेब आन डोंडडोंइती गाक्तेक्म। मिनु मुर नेल्ल सन्दोस आ नोनोले गाक्तेक्म। चढेबपुकी ताप्तीक ग्रोव ताम्ना ताम्न गाक्तेक्म।

10 मिनु यहोसुमी नोनोले गाक्ब मुर आन कली “गे काइ मग्रीडीन। इन सेंदा काइ मनेंसेक्ल। सिक्सी पा गाक्कीन। तेको नाक्त गो इन कली ‘ग्रीडीन’ देंनुडा, मेको नाक्त ला वाइ ब्रेशशा ग्रीचा माल्नीनी” दे माइक्तु।

11 मोपा मेकोपुकी परमप्रभु यावे आ कबल पशो सन्दोस नाक्त कामी खेयप का सहर आ एर ओंथ हिरताक्म। मिनु मुर नेल्ल आन बाक्तीकेमी लशा, बास बाक्तेक्म।

12 मिनु यहोसु सुनी कना बोक्त। मिनु चढेबपुकीमी परमप्रभु यावे आ कबल पशो सन्दोस कुरतेक्म।

13 मिनु परमप्रभु यावे आ कबल पशो सन्दोस आ डोंइती गाक्ब ताप्तीक ग्रोव कुरब ७ जना चढेबपुकीमी ग्रोव ताम्ना ताम्न गाक्तेक्म। या कुरब मेको आन डोंडडोंइती गाक्तेक्म। अर्को नेल्ल परमप्रभु यावे आ कबल पशो सन्दोस आ नोले मेको ताप्शो नेंना नेंन खोइक्तेक्म।

14 मोपा आ दीसा नाक्त यो खेयप का सहर आ एर ओंथ हिरताक्म। मिनु आन बाक्तीकेमी लेत्तेक्म। मोपा ६ नाक्त सम्म मोदेशो पाम्तेक्म।

यरीको सहर डा गारो ब्रेशशो

15 मिनु मेको आ ७ नाक्ती नां सोत्रचा क्येडा डोंइती बोक्शा, डोंइती डा खोदेशो पा मेको सहर एर ओंथ हिरसाक्म। तन्न मेको नाक्ती मेकोपुकीमी मेको सहर ७ खेयप हिरसाक्म।

16 मिनु ७ खेयप हिरसीमा नोले चढेबपुकीमी ताप्तीक ग्रोत्र ताप्ची ना, यहोसुमी मुर आन कली “वाइ ब्रेशशा ग्रीडीन। मारदे हना परमप्रभु यावेमी एको सहर इन कली गेप्टु।

17 एको सहर नु एको आगा बाकशो मारेइ मारेइ खतम सेल्टीक परमप्रभु यावे केन बाकब। राहाब तेल्लेम नु आ खिमी बाकब मुर ला ब्रोडचा ताइनीम। मारदे हना मेकोमी आंइ सोइशशो क्यारी पाइब मुर आस कली खुइशशा प्रोइशो बाक्त। ब्यवस्था २०:१६-१७; यहोसु २:१२-१३; हिबू ११:३१

18 मिनु परमप्रभुमी खतम सेल्चा, देशो थोत्रक लाइक्चा मडुम्ब। होस पा बाक्कीन। गे परमप्रभु आ देशो मटिथु, मारेइ लाइक्तीनी हना, गे आंमा खतम दुम्नीनी। सुइमी मारेइ खुइ पा, इस्राएली आन बाक्तीकेम वोइक्तीनी हना, मेको खतम दुम्ब। मिनु मुर नेल्ल आन कली श्येत जपाइक्ब। लेवी २७:२८; ब्यवस्था १३:१८

19 सुन चांदी, कांसा नु फलाम के सेल्शो थोत्रक नेल्ल परमप्रभु यावे केन बाक्नीम। मेको परमप्रभु यावे आ शोप वोइक्तीकेमी वोइक्चा मालनीम” देंत।

20 मिनु मुरपुकी वाइ ब्रेशशा ग्रीतेकम। मिनु चढेबपुकीमी ग्रोत्र ताम्ना ताम्ना बाक्तेकम। मुरपुकीमी ग्रोत्र ताप्शो नेशा, शुश ग्रीतेकम। मिनु मेको गारो ब्रेतत। मिनु मुरपुकी ग्येत्य बारशा, मेको सहर आंम के सेल्टेकम। हिबू ११:३०

21 मिनु सहर डा मीश मुर वोंइश मुर, आल, खाल्पी खाल्पा बी ब्यफ, क्यारश भेडा, गधा नेल्ल आन कली तरवारम साइक्तेकम।

22 मिनु यहोसुमी मेको क्यारी पाइब निक्शी आस कली “गे मेको तेल्लेम आ खिं लस। मिनु इस कसम जशो खोदेशो पा मेको मीश मुर नु आ खिं डा मुर नेल्ल आन कली गुंइदीस” देंत। यहोसु २:१२-१४

23 मिनु मेको डोंइती क्यारी पाइब ठिटा निक्शी मेको आ खिं ओत्रशा, राहाब कली गुंइताक्स। मेको नु आ आम आफ आ लोक्ब नु आ खिं डा मुर नेल्ल आन कली यो गुंइताक्स। मिनु मेको आन कली इस्राएली आन बाक्तीके आ लाडगाम बाक्चा गेम्ताक्स। गन्ती ३१:१९

24 मिनु मी सुइशशा, मेको सहर नु आगा डा थोत्रक नेल्ल क्रोइक्तेकम। सुन चांदी, कांसा नु फलाम के सेल्शो थोत्रकपुकी ला परमप्रभु यावे आ खिं डा शोप वोइक्तीकेमी वोइक्तेकम।

25 तन्न यहोसुमी राहाब तेल्लेम नु आ खिं डा मुर आन कली प्रोइतु। मारदे हना मेकोमी यहोसु आ यरीको सोइशशो क्यारी पाइब निक्शी आस कली खुइशशा प्रोइशो बाक्त। मेको नाक्त रे राहाब आ खिं डा मुरपुकी इस्राएली आन दातेमी बाक्तेकम। मत्ती १:५; न्यायाधीस १:२५

26 मेना यहोसुमी “सुमी यरीको सहर लेशा सेल्बा, मेको परमप्रभु यावे आ डोंइती सराप राइब। मेकोमी जग फुल्लु वोदानु, आ डोंइती जरमेशो तौ बेक्ब। मिनु आ गारो डा ठेयब लाप्यो वोदानु, आ कान्छा तौ बेक्ब” दे कसम जाप्टु। १राजा १६:३४

27 मिनु परमप्रभु यावेमी यहोसु कली वारच पाप्टु। मेको रागी डा मुर नेल्ल मेको तुइशशा, यहोसु तशा हिंतेकम।

## 7

### आकानमी मार मार खुइ पशो

1 मिनु इस्राएलीपुकीमी मटिथु, खतम सेल्चा माल्शो परमप्रभु यावे आ थोत्रक रे खुइ पांतेकम। यहूदा आ थर डा जेराह आ युड, जब्दी आ चच, कारमी आ तौ आकानमी मलाइक्चा थोत्रक रे पा मार मार खुइ पा लदा बाक्त। मोपतीके परमप्रभु यावे इस्राएली नेल्ल आन कली तशा चुरमाक्त। यहोसु ६:१८

2 मिनु यहोसुमी यरीको रे बेथेल आ पूर्व बेथ-आवेन आ नेक्था ऐ सहरमी मुर आन कली सोइक्ताक्व। मिनु मेको आन कली “गेपुकी मेक लशा, मेको रागी कली क्यारी पन” दे माइक्तु। मिनु मेको मुरपुकी लशा, मेको ऐ सहर कली क्यारी पांतेकम।

3 मिनु मेकोपुकीमी यहोसु बाक्तीक लेशशा जाक्शा “मुर नेल्ल ऐ सहरम लचा ममालनीम। निक्शी सां हजार मुर ला लशा, लडाइ पांतेकम हना, ग्रानीम। नेल्ल कली श्येत मगेन। मारदे हना मेकेर शुश मुर मबाक्म” देंतेकम।

4 मोपतीके हजार सां खोइ मुर ला लाम्तेकम। तन्न मेकोपुकी ऐ सहर डा मुरपुकी नु लडाइ बुशा, प्रोक्शा लेल्तेकम।

5 मिनु ऐ डा मुरपुकीमी ३६ जना इस्राएली आन कली साइक्तेकम। मेकोपुकीमी सहर डा ठेयब लाप्चो रे शेबारीम डा लुकच लतीक लां सम्म खेदा पा, मेको आन कली साइक्तेकम। मिनु इस्राएली आन थुं लुकच लशा, शुश हितेकम।

6 मिनु यहोसु नु इस्राएल डा खाल्पापुकीम सुर्ता पा आंम वा खाक्शा, पियामी फुरक फुइश्शा, परमप्रभु यावे आ कबल पशो सन्दोस आ नेक्था पोक्च थेक्शा, मेकेर नाकदो सम्म बाक्तेकम।

7 मिनु यहोसुमी “परमप्रभु, परमप्रभु यावे, मारदे गे मेको मुर आन कली यर्दन खोला शोक्चा गेनी? मारदे गे आंइ कली एमोरी आन गुइमी साइक्चा कली गेनी? गो यर्दन आइक्ची हांबु ठीक पा बाक्शो नकी।

8 परमप्रभु, इस्राएली आन जोरी सत्रु रे प्रोक्चा माल्तेकम। गो मुल मार पाइनुडा डा?

9 मारदे हना कनानीपुकी नु एको रागी डा मुर नेल्लेमी एको लोत्र नेंशा, आंइ कली पुम्नीम। मिनु आंइ नें रागी रे पा क्याम्नीम। मिनु गे इन ठेयब नें आ पर्वम मार पाइनीनी?” दे परमप्रभु यावे कली लोत्र पाप्तु। प्रस्थान ३२:१२

10 मिनु परमप्रभु यावेमी यहोसु कली “बोक्को। गे मारदे इ कुल खुक्शा, बाप्शा बाक्नेवे?

11 इस्राएलीपुकीमी पाप पाम्तेकम। मेकोपुकीमी आं माइश्शो ‘पचा माल्ब’ दे पशो कबल प्रॉइतेकम। खतम सेल्चा माल्शो थोव्रक खुइ पा लाइश्शा, आंम थोव्रक नु ब्वाइश्शा, खुइश्शा वोइक्तेकम।

12 मोपतीके इस्राएली आन जोरी सत्रु आन कली तशा, प्रोक्नीम। मारदे हना मेकोपुकी यो खतम सेल्चा माल्शो दुम्शो बाक्नीम। मेको आन खतम सेल्चा माल्शो खुइश्शो थोव्रक इन दाते रे मगुंइताक्नी हना, गो गे नु मबाक्नुड।

13 बोक्को। मुर आन कली आं डोंइती ठीक सेल्पतो। मिनु मेको आन कली गे दीसा कली परमप्रभु यावे आ डोंइती ठीक सेल्सीन। मारदे हना परमप्रभु यावे, इस्राएली आन परमप्रभुमी इन दातेमी खतम सेल्चा माल्शो थोव्रक बाक्नीम। मेको मगुंइताक्वी हना, इन जोरी सत्रु क्येडा ग्राने मचाप्नीनी। यहोसु ३:५

14 मिनु गे सुनी कना थर थर डा मुरपुकी बुक्शा, जाक्चा माल्नीनी। मिनु परमप्रभु यावेमी तेको थर कली कोंइबा, मेको थर डा नेल्ल खिं खिं डा मुरपुकी जाक्चा माल्नीम। मिनु परमप्रभु यावेमी तेको खिं डा मुर कली कोंइबा, मेको आ खिं खिं डा मुर आन डोंइती जाक्चा माल्नीम। मिनु परमप्रभु यावेमी तेको खिं कली कोंइबा, मेको खिं रे का का पा वोइश्शा मुरपुकी मुर आन डोंइती जाक्चा माल्नीम।

15 मिनु तेको मुर नु खुइ पशो थोव्रक बाक्बा तुंडसीब, मेको नु आ मारेइ मारेइ मीम हुम्चा पुंडसीब। मारदे हना मेकोमी परमप्रभु यावे आ देंशो मटिथु, इस्राएली आन दातेमी काइ मरिम्शो ग्रॉग्रा दिशो गेय पाप्तु” दे माइक्तु।

16 मिनु यहोसुमी सुनी कना बोक्शा, इस्राएली नेल्ल आन कली थर थर पा बुक्पाइक्तु। मो पशोनु यहूदा आ थर कोंइचा पुंडसाक्व। १सामुएल १०:२०-२१; १सामुएल १४:४१-४२

17 मिनु यहूदा आ खिं खिं डा मुर आन डोंइती जाक्चा माल्तेकम। मिनु जेराह आ खिं खिं डा मुर कोंइचा पुंडसाक्व। मिनु यहोसुमी जेराह आ खिं खिं डा मुर आन कली आ डोंइती जाक्पाइक्तु। मेको रे जब्दी आ खिं डा मुर कोंइचा पुंडसाक्व। गन्ती २६:२०

18 मिनु यहोसुमी मेको आ खिं डा वोइश्शा मुर का का पा मुर आन डोंइती जाक्पाइक्तु। मोपा जाक्मानु, यहूदा आ थर डा जेराह आ युड, जब्दी आ चच, कारमी आ तौ आकान कोंइचा पुंडसाक्व।

19 मिनु यहोसुमी आकान कली “आं तौ, परमप्रभु यावे, इस्राएली आन परमप्रभु कली ठेयब सेलो। मार मार पवी, मेको कली देनो। इ पशो आं कली देनो। लोत्र का यो मखुइक्तो” देंत।

20 मिनु आकानमी यहोसु कली “थमा, गो परमप्रभु यावे, इस्राएली आन परमप्रभु आ डोंइती पाप पाता। गो मार पाता देंशा हना, गन्ती २१:७; न्यायाधीस १०:१०; १सामुएल ७:६; भजन संग्रह ५१:५-६

21 गो खतम सेल्चा माल्शो थोव्रक रे पा शिनार रागी डा रिम्शो फेक्तीक वा, सहे निक्शी शेकेल चांदी नु ५० शेकेल हेल्लो सुन के कोक्के का ताता। गो मेको साप्पा दाक्ताक्ड डा मिन लांडसाक्यी। मिनु मेको आं ताम्बु आगाम थिम्शा वोइक्ता। मेको चांदी नेल्ल क्येडा आगाम बाक्ब” देंत। शेकेल कां ११.५ ग्राम बाक्ब।

22 मिनु यहोसुमी गेय पाइब आन कली आकान आ ताम्बुम सोइक्ताक्व। मेकोपुकी दोरशा लशा, मेको आ ताम्बुमी दोशा, फेक्तीक वा नु खुइइशो थोव्रक नेल्ल गुंडताक्म। मिनु मेको चांदी नेल्ल क्येडा आगाम बाक्त।

23 मिनु मेकोपुकीमी मेको थोव्रक गुंडशा, यहोसु नु इस्राएली नेल्ल आन बाक्तीकेम चाक्तेक्म। मिनु परमप्रभु यावे आ डोंइती वोइक्तेक्म।

24 मिनु यहोसु नु इस्राएली नेल्ल गारशा, जेराह आ खिं डा आकान नु आ खुइ पशो चांदी, फेक्तीक वा नु सुन के कोक्के, मेको आ तमी तौ मेको आ बी ब्यफ, आ गधापुकी, आ भेडापुकी, मेको आ ताम्बु नु मेको नु बाक्शो मारेइ मारेइ आकोर आ बेंसीमी लाइक्तेक्म। लेवी २४:१४-१५

25 मिनु यहोसुमी आकान कली “गे गो आंड कली शुश श्येत गेप्तीवी। मुलाक्ती परमप्रभु यावेमी इ कली श्येत गेब” देंत। मिनु इस्राएली नेल्लेमी मेको आन कली फुल्लुमी आष्शा साइक्तेक्म। मिनु मेको आन कली साइशशा, मीम हुम्ताक्म। ब्यवस्था १३:१६-१७

26 मिनु मेको आन तारी शुश फुल्लु तेल्तेक्म। मेको फुल्लु तेल्तीके मुलाक्त सम्म बाक्ब। मिनु नोले परमप्रभु यावे आ गाइक्चा नांडसाक्व। मिनु मेको बेंसी आ नें आकोर बेंसी वोइक्तेक्म। मेको मुल सम्म बाक्ब। यसैया ६५:१०; होसे २:१७

## 8

### ऐ सहर कली खतम सेल्शो

1 मिनु परमप्रभु यावेमी यहोसु कली “महिनो। इ थुं लुकच मलल। मुल लडाइ पाइब नेल्ल लाइशशा, ऐ सहर कली लडाइ तोवो। मारदे हना गो ऐ सहर डा पिप, मेकेर डा मुरपुकी, सहर नु रागी इ कली गेता।

2 गे यरीको नु मेकेर डा पिप कली मार मार पवी, ऐ सहर नु मेकेर डा पिप कली यो मोदेशो पावो। मेक डा मारेइ मारेइ, बी ब्यफ क्यारश भेडा नेल्ल गे इन कली लांडसीन। मिनु सहर आ नोले गे हुल का मुर बाप्पाइशशा, वोतीन” देंत। यहोसु ६:२१; ब्यवस्था २०:१०-१८

3 मिनु यहोसु नु लडाइ पाइब नेल्ल ऐ सहर कली लडाइ तोथ, लाम्तेक्म। यहोसुमी ३० हजार लडाइ पाइब मुर आन कली योव्रशा, नाक्दो सोइक्ताक्व।

4 मिनु मेकोमी “गे मेको सहर आ नोले बाष्शा बाक्चा मालनीनी। मेको सहर क्येडा डोन मलने। लडाइ पचा कली ठीक दुम्शा, होस पा बाक्कीन।

5 गो नु आं मुर नेल्ल सहर गे बारनीकी। मिनु मेको डोंइती खोदेशो पा आंड कली खेदा पा यूतेक्म हना, गो प्रोक्खु पाइनीकी।

6 मेकोपुकीमी आंड कली खेदा पा खोइक्नीम। आंड कली खेदा पा खोदमेनु, गोपुकी मेको आन कली सहर रे शुश डोन लपाइक्चा कली आंड कली खेदा पपाइक्नीकी। मारदे हना मेकोपुकीमी ‘इस्राएलीपुकी डोंइती डा बुदी गो आंड कली तशा, प्रोक्ना प्रोक्न बाक्नीम’ दे मिम्नीम। मोपा गो प्रोक्कानु, यहोसु ७:५

7 गेपुकी इन बाप्तीके रे बोक्शा गूशा, सहर आम के सेलीन। मिनु परमप्रभु यावे, इन परमप्रभुमी मेको सहर इन कली गेब।

8 परमप्रभु यावेमी आ देशो खोदेशो पा, सहर इन गुइमी गेवा नोले, मेको कली मी सुइक्तीन” दे मेको आन कली देंत।

9 मिनु यहोसुमी मेको आन कली सोइक्ताक्व। मिनु मेकोपुकी ऐ क्येडा पच्छिम बेथेल नु ऐ आस दातेम बाष्शा बाक्तेक्म। मिनु यहोसु मेको नाक्दो आ मुर आन दातेमी बाक्त।

10 मिनु यहोसु सुनी कना बोक्शा, आ मुर आन कली खुप्ताक्व। इस्राएल डा खाल्पा नु ऐ सहर गे लाम्तेक्म।

11 यहोसु नु बाकशो लडाइ पाइब नेल्ल यो मेकेर लाम्तेकम। मिनु ऐ सहर आ डोंइती जाक्तेकम। सहर आ उत्तर गे जाकशा बाक्तेकम। मेको ऐ सहर नु आन दातेमी बेंसी का बाक्त।

12 मिनु डोंइती यहोसुमी ५ हजार लडाइ पाइब आन कली लाइशशा, ऐ क्येडा पच्छिम गे बेथेल नु ऐ आस दातेम बाप्चा कली वोइकतु।

13 मोपा ऐ सहर आ उत्तर गे शुश लडाइ पाइब आन बाक्तीकेमी बाक्मानु, पच्छिम गे मेको बाप्शो ५ हजार लडाइ पाइब बाक्तेकम। मेको नाकदो यहोसु नु आ मुरपुकी बेंसीम बाक्तेकम।

14 मिनु सुनी कना ऐ डा पिपमी मेको आन कली तशा, ऐ डा लडाइ पाइब नु सहर डा वोंइश मुर नेल्ल इस्राएली नु लडाइ पथ लाम्तेकम। पिप नु आ मुर नेल्ल अराबाह माइक्तीकेमी दिंम आ डोंइती जाक्तेकम। तन्न सहर आ नोले मेकोपुकी बाप्शा बाक्शो बाक्नीम मतुइक्तेम।

15 मिनु यहोसु नु इस्राएली नेल्ल ब्रुशो खोदेंशो पा, गोरशो रागी गे प्रोक्खु पाम्तेकम।

16 मेको पिपमी ऐ सहर डा मुर नेल्ल आन कली ब्रेशशा, इस्राएली आन कली खेदा पपाइकतु। मोपा यहोसु कली खेदा पा, मेकोपुकी ऐ सहर क्येडा डोन सम्म लाम्तेकम।

17 ऐ नु बेथेल डा वोंइश मुर नेल्लेमी इस्राएली आन कली खेदा पाम्तेकम। खेदा मपाइब का सम्म यो मलीम। मेकोपुकी आंम सहर डा गारो आ ठेयब लाप्चो रोकशा वोइशशा, इस्राएली आन कली खेदा पाम्तेकम।

18 मिनु परमप्रभु यावेमी यहोसु कली “इ गुडमी बाक्शो तरवार ऐ सहर गे कोंइशा दिंदो। मारदे हना गो मेको सहर इ कली गेनन” देत। मिनु यहोसुमी आ गुडमी बाक्शो तरवार ऐ सहर गे कोंइशा दिताकव।

19 मिनु यहोसुम आ तरवार दिंदानु, मेको बाप्शा बाक्ब लडाइ पाइब नेल्ल बोक्शा बारशा, ऐ सहर आगा ओव्रतेकम। मेकोपुकी ओव्रशा, सहर कली आंम के सेल्शा, मी सुइक्ताकम।

20 मिनु ऐ सहर डा खेदा पाइबपुकीमी बिर हिरशा, कोव्रडमेनु, आंम सहरमी कुन जुइशो ताम्तेकम। मोपा कुन जुइशो तशा, मेकोपुकीमी एर ओंथ प्रोक्ने मचबेम। मारदे हना गोरशो रागी गे प्रोक्खु पाइब इस्राएलीपुकी लेशशा, मेकोपुकी नु लडाइ पचा गोम्तेकम।

21 यहोसु नु इस्राएली नेल्लेमी मेको ऐ सहर बाप्शा बाक्बपुकीमी सहर आंम के सेल्शो ताम्तेकम। सहर रे कुन जुइशो तामे चोटीन, मेकोपुकी बिर हिरशा, ऐ सहर डा वोंइश मुर आन कली साइक्चा गोम्तेकम।

22 मिनु डोंइती बाप्शा बाक्बपुकी सहर रे गूतेकम। मोपा इस्राएलीपुकीमी ऐ सहर डा मुर आन कली आन दाते पा आन एर ओंथ बाक्शा, का कली यो प्रोक्चा मगेम। नेल्ल आन कली साइक्तेकम।

23 मिनु मेकेर डा पिप कली चहिं सेसीन ग्याइशशा, यहोसु आ बाक्तीक चाक्तेकम।

24 मिनु इस्राएलीपुकीमी ऐ डा मुर नेल्ल आन कली, गोरशो रागी डा दिममी साइक्ने थुम्शा, ऐ सहर लेशशा, ओव्रशा, मेकेर बाक्शो आन कली यो तरवारमी क्योरशा साइक्तेकम।

25 मेको नाक्ती साइक्चा पुंडसीशो मुर वोंइश मुर नु मीश मुर नेल्ल पा १२ हजार बाक्तेकम। ऐ डा मुर नेल्ल मोशोन बाक्तेकम।

26 मिनु यहोसुमी ऐ डा मुर नेल्ल साइक्ने मथुम्मे सम्म आ तरवार शेशा दिंशो गुड मतोकग।

27 मिनु परमप्रभु यावेमी यहोसु कली देंशो खोदेंशो पा बी ब्यफ, क्यारश भेडा नु रोइशो मारेइ मारेइ इस्राएलीपुकीमी वोंइसाकम।

28 मिनु यहोसुमी ऐ सहर कली चोशा, गेनायो मसेल्चा डा पा खतम सेल्लु। मोदेंशो मुल सम्म बाक्ब।

29 मिनु मेकोमी ऐ डा पिप कली नां मरिक्म सम्म रवामी क्युकशा वोइक्पाइकतु। मिनु नां रिक्म नोले यहोसुमी पिप आ रां रवा रे शोल्शा, सहर ओव्रतीक लाप्चोम लाइशशा ताइक्पाइकतु। मेको आ तारी शुश फुल्लु तेल्लेकम। मेको मुल सम्म बाक्ब। ब्यवस्था २१:२२-२३

एबाल डांडाम अरेशो लोव्र पढेशो

30 मिनु यहोसुमी परमप्रभु यावे, इस्राएली आन परमप्रभु कली एबाल डांडामी चढेतीक का सेल्लु। ब्यवस्था २७:२-८

31 परमप्रभु यावे आ गेय पाइब मोसामी इस्राएली आन कली देशो खोदेशो पा नु मोसामी अरेशो लोत्र ब्रेकशा किताबम ब्रेकशो खोदेशो, मक्योरशो, फलामम मथिपाइशो फुल्लु खुप्शा, चढेतीक का सेल्लेकम। मेकेर परमप्रभु यावे कली चोशा चढेतीके नु दुशा बाक्वा आ परबम चढेतीके चढेम्तेकम। प्रस्थान २०:२५; प्रस्थान २४:१-८

32 मिनु मेकेर इस्राएली नेल्ल आन डोंडती यहोसुमी परमप्रभु यावे आ अरेशो लोत्र मोसामी मुशा ब्रेकशो खोदेशो पा, फुल्लुमु मुशा ब्रेकताक्व।

33 मिनु इस्राएली नेल्ल, मेको नु बाक्ब अर्को रागी डा मुरपुकी, खाल्पापुकी, ठेयब मुर नु मेको आन ठेयब मुरपुकी परमप्रभु यावे आ कबल पशो सन्दोस आ नेक्था राप्शो बाक्तेकम। मेकोपुकी परमप्रभु यावे आ सन्दोस कुरब लेवी आ थर डा चढेब गे कोव्रशा, राप्शो बाक्तेकम। इस्राएली नु मेको नु बाक्ब अर्को रागी डा मुर नेल्ल आधी गेरीजीम डांडा गे कोव्रशा, अरु आधी एबाल डांडा गे कोव्रशा राप्शो बाक्तेकम। मिनु परमप्रभु यावे आ गेय पाइब मोसामी अरेशो खोदेशो पा यहोसुमी इस्राएली नेल्ल आन कली आसीक गेप्टु। ब्यवस्था ११:२९; ब्यवस्था २७:१२-२६; ब्यवस्था २८:-

34 मिनु नोले यहोसुमी परमप्रभु यावे आ अरेशो लोत्र नेल्ल, आसीक नु सराप आ परबम ब्रेकशो यो पढेप्टु। दोदेशो पा ब्रेकशो बाक्मे, मोदेशो पा पढेप्टु।

35 मोसामी मार मार लोत्र अरेशा, ब्रेकशो बाक्मे, मेको नेल्ल यहोसुमी इस्राएली नेल्ल कली पढेशा नेंपाइव्तु। मेक बाक्शो वोंडश मुर, मीश मुर, आलपुकी नु मेकोपुकी नु बाक्ब अर्को रागी डा मुर आन डोंडती नेल्ल पढेशा नेंपाइव्तु।

## 9

### गिबोन डा मुरपुकीम जोल पशो

1 मिनु यर्दन आइक्ची हांबु पहाड नु दिममी, ठेयब समुन्द्र आ नेक्था नु लेबानोन गे बाक्ब हिती, एमोरी, कनानी, परिज्जी, हिव्वी नु यबुसी आन पिपपुकीमी एको लोत्र नेंशा,

2 मेकोपुकी थुं का दुम्शा, यहोसु नु इस्राएलीपुकी नु लडाइ पचा कली बुक्तेकम।

3 मिनु गिबोन डा मुरपुकीमी यहोसुमी यरीको नु ऐ सहर कली मार मार पवा, मेको लोत्र नेंशा, यहोसु ६:२०-२१; यहोसु ६:२६-२८

4 मेकोपुकीमी डोन रागी रे जाक्शो खोदेशो पा बुत सेल्शा, आन गधा तारी माइत धोक्रो वोइशशा, गाक्शो फेरशो कुशुल के अडगुर शांबु वोइक्तीक कुर पाइक्तेकम।

5 मिनु गाक्शो माइत जुत्ता नु जेक्शो वासी फेक्साकम। मेको आन कुरशो बुत सोव्रशो नु बुंखी डाइशशो बाक्त।

6 मिनु मेकोपुकीमी गिलगाल यहोसु आ बाक्तीकेमी जाक्शा, यहोसु नु इस्राएली नेल्ल वोंडश मुर नेल्ल आन कली “गोपुकी डोन रागी रे जाक्शो नकी। मोपतीके गोपुकी नु गारशा, कबल पने” दैतेकम।

7 मिनु इस्राएलीपुकीमी मेको हिव्वी आन कली “गोपुकी आंइ दातेमी बाक्ब मुर बाक्नीनी, कों? गोपुकी गोपुकी नु दोपा गारने चाप्नीकी डा?” दैतेकम। यहोसु ११:१९; प्रस्थान २३:३२

8 मिनु मेकोपुकीमी यहोसु कली “गो इन गेय पाइब नकी” दे लोत्र लेत्ताकम। मिनु यहोसुमी मेको आन कली “गे सु ननी? ते रे जाक्शो ननी” दे हिल्लो पाप्टु।

9 मिनु मेकोपुकीमी “गो इन गेय पाइबपुकी शुश डोन रागी रे जाक्शो नकी। गोपुकी परमप्रभु यावे, इन परमप्रभु आ परबम शुश नेंतक। मिनु इज्जीप्त रागीमी मार पवा मेको नेल्ल नेंतक।

10 यर्दन आइक्ची हांबु डा एमोरी आन पिप निक्शी, हेरबोन डा पिप सीहोन कली नु अशतारोथम बाक्ब बाशान डा पिप ओग कली मार मार पनी मेको नेल्ल नेंतक। गन्ती २१:२१-३५

11 मोपतीके आंइ ठेयब मुरपुकी नु आंइ रागी डा मुर नेल्लेमी ‘गोपुकीमी लांम जतीक बुत कुरशा, मेको आन कली गुम्थ लने’ दैतेकम। मेको आन कली ‘गो इन गेय पाइब नकी। गे गो नु कबल पा आंइ कली बने, दे देनीन’ दैतेकम।



12 इन कली गुमथ गाकशो नाकती गोपुकीमी आंड खिं रे एको शोब्ले होश कुरशो नकी। मुल सोव्रशा बुंखी डाइशो बाकब।

13 मिनु आंड गाकची ना एको अडगुर शांबुम प्रिंशो कुशुल के थैलो नक बाक्तेकम। मुल कोव्रडीन, एको यो गाकने थुम्तेकम। मेको लाइशो लां दुम्तीके आंड फेकशो वासी नु जुत्ता यो माइत दुम्शा जेक्तेकम” देतेकम।

14 मिनु इस्राएलीपुकीमी आन चाकशो कोसेली ताक्तेकम, तन्न परमप्रभु यावे कली हिल्लो मपथु, जाम्तेकम। गन्ती २७:२१

15 मिनु यहोसुमी मेको आन कली “इन थुं नाइसीन। ब्रॉइचा ताइनीनी” दे कबल पाप्टु। मिनु मेकेर डा ठेयब मुरपुकीमी यो कसम जाम्तेकम।

16 मिनु कबल पशो सां नाक्त नोले मेको मुर आन नेक्था डा मुर आंम दातेमी बाकब मुर बाक्तेकम, दे इस्राएलीपुकीमी नेतेकम।

17 मिनु इस्राएली गाकशा, सां नाक्तीमी मेको आन सहर जाकदीत्तेकम। मेको आन सहर गिबोन, केफीरा, बेयरोथ नु किरयथ-यारीम बाक्तेकम।

18 मिनु इस्राएलीपुकीमी मेको आन सहर कली लडाइ मतोम। मारदे हना इस्राएल डा ठेयब मुरपुकीमी मेको नु परमप्रभु यावे, इस्राएली आन परमप्रभु आ डोंइती कसम जशो बाक्तेकम। मोपतीके मुरपुकीमी इस्राएली आन ठेयब मुर आन पर्वम गन गन पाम्तेकम।

19 मिनु ठेयब मुरपुकीमी इस्राएली नेल्ल आन कली “गोपुकीमी परमप्रभु यावे, इस्राएली आन परमप्रभु आ नेमी कसम जाइतक। मोपतीके गो मेको आन कली ब्रॉइचा गेचा माल्नीकी।

20 मुल मेको आन कली ब्रॉइचा गेचा माल्नीकी। मोदेशो मपाइतक हना, आंड जशो कसममी पतीके, गो सराप राइनीक” दे इस्राएली आन कली देतेकम। गन्ती १:५३; २सामुएल २४:१

21 मिनु ठेयब मुरपुकीमी “मेको आन कली ब्रॉइचा गेन” देतेकम। मिनु मेकोपुकी इस्राएली आन शी चेप्ब नु ब्वाक्कु क्याक्ब वाइल दुम्तेकम। ठेयब मुरुमी दोदेशो देमे मोदेशो दुम्त।

22 मिनु यहोसुमी मेको गिबोन डा मुर आन कली ब्रेशशा “गेपुकी आंड नेक्था गोपुकी नु बाकब बाक्नीनी। तन्न ‘गो डोन रागी डा नकी’ दे मारदे जोल पनी?

23 मोपा जोल पतीके मुल गेपुकी सराप रशो दुम्तीनी। गेपुकी गेना हना यो वाइल दुम्चा माल्नीनी। गेपुकी आं परमप्रभु यावे आ खिं डा शी चेप्ब नु ब्वाक्कु क्याक्ब दुम्तीनी” देत।

24 मिनु मेकोपुकीमी यहोसु कली “परमप्रभु यावे, इ परमप्रभुमी आ गेय पाइब मोसा कली ‘रागी नेल्ल इन के दुम्ब। एको रागी डा मुर नेल्ल सतीन’ दे अरेशो तुइशो नकी। मोपतीके गो इन कली तशा शुश हिंतीके, आंड कली प्रॉइचा कली जोल पाइतक।

25 मुल गो इन गुइमी बाक्नीकी। आंड कली मार पशो नु रिम्शो लाक्नीनी, मोदेशोन पन” देतेकम।

26 मोपा यहोसुमी मेको आन कली इस्राएली आन गुइ रे पा प्रॉइतु। मिनु इस्राएलीपुकीमी मेको आन कली साइक्चा मतामे।

27 मिनु मेको नाक्त रे यहोसुमी मेको आन कली इस्राएली नेल्ल नु परमप्रभु यावे आ चढेतीक कली शी चेप्ब नु ब्वाक्कु क्याक्ब सेल्लु। मेकोपुकीम मुल सम्म मोदेशो पाइनीमी। ब्यवस्था २९:१०; १इतिहास २१:२९; २इतिहास १:३

## 10

### नां नाइशशा बाकशो

1 मिनु यरूसलेम डा पिप अदोनी-सेदेकमी “यहोसुमी ऐ सहर ग्राशा, खतम सेल्लु। मिनु यरीको नु मेकेर डा पिप कली पाइशशो खोदेशो पा मेको ऐ सहर नु मेकेर डा पिप कली यो पाइक्तु। मिनु गिबोन डा मुरपुकी इस्राएली नु गारशा, मुल आन दातेमी बाकशो बाक्तेकम” दे नेंतु। यहोसु ६:-; यहोसु ८:-; यहोसु ९:-

2 मिनु मेको नु आ मुर नेल्ल शुश हिंतेकम। मारदे हना गिबोन थम ठेयब सहर, पिप आ बाक्तीक सहर खोदेशो, बाक्त। मिनु मेको ऐ सहर क्येडा ठेयब बाक्त। मिनु मेकेर डा वोंडश मुर नेल्ल बोल्यो लडाइ पाइब बाक्तेकम।

3 मिनु यरूसलेम डा पिप अदोनी-सेदेकमी हेब्रोन डा पिप होहाम, यरमुथ डा पिप पिराम, लाकीश डा पिप याफीया नु एग्लोन डा पिप देबीर बाक्तीकेमी लोव्र सोइक्ताकम।

4 मिनु मेको आन कली “आं कली वारच पथ पिन। गो नेल्ल गारशा, गिबोन नु लडाइ पय। मारदे हना मेकोपुकी यहोसु नु इस्राएलीपुकी नु गारमा बाक्त” दे लोव्र सोइक्ताकम।

5 मोपा एमोरी आन ५ जना पिप, यरूसलेम, हेब्रोन, यरमुथ, लाकीश नु एग्लोन डा पिप खुम्सीशा, आन लडाइ पाइब नेल्ल नु जाक्शा, गिबोन नु लडाइ पांतेकम।

6 मिनु गिबोन डा मुरपुकीमी गिलगाल सहरम बाक्शो यहोसु कली “मुल, गे इन गेय पाइब, गो आंइ कली मप्रेंदीन। गे रीब पा जाक्कीन। आंइ कली वारच पा प्रोनीन। मारदे हना पहाड रागीम बाक्ब एमोरी आन पिप नेल्ल गो नु लडाइ पचा कली खुम्सीशो बाक्नीम” दे लोव्र सोइक्ताकम।

7 मिनु यहोसुमी आ लडाइ पाइब नेल्ल आन कली लाइशशा, गिलगाल रे लत। मिनु आ नेल्ल क्येडा बोल्यो लडाइ पाइबपुकी यो मेको नु लाम्तेकम।

8 मोपा लमानु, परमप्रभु यावेमी यहोसु कली “मेको आन कली तशा, महिनो। मारदे हना गो मेको आन कली इन गुइमी गेता। मेको आन मुर का सम्म यो इन डोंइती राप्ने मचाप्नीम” देत।

9 मिनु नेल्ल नाकदो यहोसु नु इस्राएली गिलगाल रे गाक्शा, मेक जाक्दीशशा, छक लाक्चा डा पा मेको आन कली लडाइ तोम्तेकम।

10 मिनु परमप्रभु यावेमी एमोरी डा मुर आन कली इस्राएली आन डोंइती वाम ग्याम सेल्शा, मेको आन कली गिबोन सहरम ब्रुपाइक्तु। इस्राएलीपुकीमी मेको आन कली गिबोन रे बेथ-होरोन डा ग्येत्थ लां रे पा खेदा पांतेकम। आजेका नु माकेदा सम्म खेदा पा साइक्तेकम।

11 मिनु मोपा इस्राएली आन डोंइती बेथ-होरोन रे आजेका सम्म ब्रुप्शा प्रोकमानु, परमप्रभु यावेमी सरीड रे ठेयब मुप्स यिपाइक्तु। इस्राएलीपुकीमी तरवारमी क्योरशा बेक्शो क्येडा ठेयब मुप्सीम खशा बेक्शो मुर शुश बाक्तेकम। प्रस्थान ९:२२-२५; अय्युब ३८:२२-२३; हबकुक् ३:११; २सामुएल १:१८

12 मिनु परमप्रभु यावेमी एमोरी आन कली इस्राएली आन गुइमी गेशो नाक्ती यहोसुमी परमप्रभु यावे कली इस्राएली नेल्ल आन डोंइती “नां, गे गिबोन तारी नांइसो। तास्ला, आइयालोन बैसी तारी नाइशशा बाक्को” देत।

13 मिनु यहोसुमी मेको आन कली क्येक्क मलेत्ता सम्म नां नु तास्ला नांइसाकस। मेको लोव्र याशार डा किताबमी यो ब्रेक्सीशो बाक्ब। मिनु नां सरीड आ दातेमी नांइसाकव। मिनु नां मेको नाक्त का मपेरस।

14 मोदेशो डोंइती नु नोले गेनायो मदुम्शो बाक्त। मारदे हना परमप्रभु यावेमी मुर आ लोव्र नेंशा, इस्राएली आन पर्बम लडाइ पाप्तु।

15 मिनु नोले यहोसु नु इस्राएली नेल्ल आंम बाक्तीके गिलगाल लेत्तेकम।

### एमोरी आन पिप साइशशो

16 मिनु मेको ५ जना पिपपुकी चहिं प्रोकशा, माकेदा डा पुक्खीमी खुंडसाकम।

17 मिनु मुरपुकीमी यहोसु कली “मेको ५ जना पिपपुकी माकेदा डा पुक्खीमी खुइशशो बाक्नीम” दे नेंपाइक्तेकम। ब्यवस्था २१:२२-२३

18 मिनु यहोसुमी “ठेयब ठेयब फुल्लु लोक्शा लाइशशा, मेको पुक्खी आ ओव्रतीके सुने। मिनु आ डोंइतीमी खाल पाइबपुकी वोतीन।

19 तन्न गेपुकी मो मबाक्कीन। इन जोरी सत्रु आन कली खेदा पना पन डोंइती बारीन। नेल्ल क्येडा नोले डा सम्म यो सतीन। मेको आन कली लेंशा, आन सहर ओव्रचा मगेन। मारदे हना परमप्रभु यावे, इन परमप्रभुमी मेको इन गुइमी गेशो बाक्ब” देत।

20 मिनु यहोसु नु इस्राएलीपुकीमी मेको आन कली खतम सेल्लेक्म। का निक्शी चहिं प्रोकशा, गारो पाइशशो सहर आगा ओवतेक्म।

21 मिनु मुर नेल्ल माकेदा, यहोसु आ बाक्तीकेमी, रिम्शो पा लेल्लेक्म। मेको इस्राएली आन पर्वम सुइ मुरुमी यो शुक्शी लोव्र पने मचबेम।

22 मिनु यहोसुमी “पुक्खी रोक्शा, मेको ५ जना पिप आन कली आं बाक्तीक चाक्कीन” दैत।

23 मिनु मेकोपुकीमी मेको ५ जना पिप आन कली चाक्तेक्म। यरूसलेम डा पिप, हेब्रोन डा पिप, यरमुथ डा पिप, लाकीश डा पिप नु एग्लोन डा पिप कली पुक्खी रे गुंइशा, यहोसु आ बाक्तीकेम चाक्तेक्म।

24 मिनु मेको आन कली यहोसु आ बाक्तीक चाक्मे नोले, यहोसुमी इस्राएली नेल्ल आन कली खुप्शा, लडाइ पाइब आन ठेयब मुर आन कली “एको पिप आन शुरमी इन खोइलीमी दिम्दीन” दैत। मिनु मेकोपुकीमी जाक्शा, आन खोइलीमी मेको पिप आन शुर दिन्ताक्म।

25 मिनु यहोसुमी मेको आन कली “बोल्यो नु महिब दुमीन। मारदे हना इं परमप्रभु यावेमी गे सु नु लडाइ पाइनीनी, मेको आन कली मोदेशो पाइब” दैत।

26 मेको नोले यहोसुमी मेको ५ जना पिप आन कली तुप्शा साइशशा, ५ ओटा रवामी क्युकपाइक्तु। मिनु नाक्दो सम्म क्युकशा, वोइक्तेक्म।

27 मिनु नां रिक्वी ना, यहोसुमी “मेको आन कली लाइशशा, डोंइती आन खुइशशो पुक्खीमी वोतीन। मिनु मेको पुक्खी आ ओव्रतीकेमी ठेयब फुल्लुपुकी लाइशशा सुने” दे अरेप्टु। मिनु मेको फुल्लु मुल सम्म बाक्नीम। ब्यवस्था २१:२२-२३

### कनान रागी कली ग्राशो

28 मिनु मेको नाक्ती यहोसुमी माकेदा आंम के सेल्लु। मेको सहर डा मुर नेल्ल आन कली नु मेकेर डा पिप कली तरवारमी साइक्तु। मेकोमी मेकेर डा मुर नेल्ल आन कली खतम पोक्तु। सुइ कली यो मप्रोन। मेकोमी यरीको डा पिप कली पशो बुदी माकेदा डा पिप कली यो पाइक्तु।

29 मिनु यहोसु नु इस्राएली नेल्ल माकेदा रे गाक्शा, लिब्ना लाम्तेक्म। मिनु लडाइ पाम्तेक्म।

30 मिनु परमप्रभु यावेमी मेक डा मुर नु पिप कली यो यहोसु नु इस्राएली आन गुइमी गेप्टु। मेकोपुकीमी लिब्ना डा मुर नेल्ल आन कली तरवारमी साइक्तेक्म। सुइ कली यो मप्रोनेम। यरीको डा पिप कली पशो खोदेशो मेकेर डा पिप कली यो पाम्तेक्म।

31 मिनु यहोसु नु इस्राएली नेल्ल लिब्ना रे गाक्शा, लाकीश लाम्तेक्म। मिनु लाकीश कली पुम्शा, लडाइ पाम्तेक्म।

32 परमप्रभु यावेमी लाकीश कली यो इस्राएली आन गुइमी गेप्टु। मिनु मेको आ दीसा नाक्ती यहोसुमी लाकीश आंम के सेल्लु। मिनु मेकेर डा मुर नेल्ल आन कली लिब्ना कली पशो खोदेशो पाप्टु। नेल्ल आन कली तरवारमी साइक्तु।

33 मेना गेजेर डा पिप होराम लाकीश कली वारच पथ जाक्त। मिनु यहोसुमी मेको नु आ लडाइ पाइब नेल्ल आन कली फुशा, का कली यो मप्रोंइथु, ग्याइशशा साइक्तु।

34 मिनु यहोसु नु इस्राएली नेल्ल लाकीश रे गाक्शा, एग्लोन लाम्तेक्म। मिनु मेकेर यो पुम्शा, लडाइ पाम्तेक्म।

35 मेको नाक्ती मेकोपुकीमी एग्लोन कली ग्रातेक्म। मिनु मेकेर डा मुर नेल्ल आन कली तरवारमी साइक्तेक्म। लाकीश कली दोदेशो पामे, एग्लोन कली यो मोदेशो पाम्तेक्म।

36 मिनु यहोसु नु इस्राएली नेल्ल एग्लोन रे ग्येत्थ डोइशशा हेब्रोन लाम्तेक्म। मेकेर यो लडाइ पाम्तेक्म।

37 मिनु मेकोपुकीमी हेब्रोन सहर कली ग्राशा, मेको सहर डा पिप नु आ एर ओंथ गाउं डा मुर नेल्ल आन कली तरवारमी साइक्तेक्म। सुइ कली यो मप्रोनेम। मेकोपुकीमी एग्लोन कली पशो खोदेशो पा, नेल्ल मुर आन कली खतम पोक्तेक्म।

38 मिनु यहोसु नु इस्राएली नेल्ल देबीर गे लेशशा, मेको नु लडाइ पाम्तेक्म।

39 मेकोमी मेकेर डा सहर नेल्ल, आन पिप नु एर ओंथ डा गाउं आन कली ग्रातेक्म। मुर नेल्ल आन कली खतम पोक्तेक्म। सुइ कली यो मप्रोनेम। मेकोपुकीमी हेब्रोन नु मेकेर डा पिप नु लिब्ना कली दोदेशो पामे, मोदेशो पा देबीर नु मेकेर डा पिप कली यो पाम्तेक्म।

40 मोपा यहोसुमी पहाड नेल्ल, नेगेब रागी, पच्छिम नेल्ल डा आइक्च पहाड नु आइक्च डांडा डा देम्सीलो ग्रात। पिप नेल्ल आन कली साइक्तु। का कली यो मप्रोन। मेको ब्रोंइशो नेल्ल आन कली खतम सेल्लु। परमप्रभु यावे, इस्राएली आन परमप्रभुमी दोदेशो अरेवा, मोदेशो पाप्तु। ब्यवस्था २०:१६-१८

41 मिनु यहोसुमी कादेश-बारनेआ, गाजा नु गोशेन रे लाइश्शा गिबोन सम्म नेल्ल ग्रात। यहोसु ११:१६

42 मिनु यहोसुमी मेको आन पिप आन कली नु आन रागी नेल्ल कली कालेम ग्रात। मारदे हना परमप्रभु यावे, इस्राएली आन परमप्रभुमी इस्राएली आन पा डा लडाइ पाप्तु।

43 मिनु नोले यहोसु नु इस्राएली नेल्ल आन बाक्तीके गिल्यालमी लेत्तेक्म। यहोसु १०:१५

## 11

### याबीन नु अरु पिपपुकी ब्रुशो

1 मिनु हासोर डा पिप याबीनमी यहोसुमी पशो नेल्ल नेंशा, मादोन डा पिप योबाब, शिम्रोन डा पिप आकशाफ,

2 उत्तर डा पहाडम बाक्ब पिपपुकी नु किन्नेरोथ डा दक्खिन डा पिप, अराबाह डा पहाडम बाक्ब आन पिप नु पच्छिमम नाफथ-डोर डांडा गे बाक्ब आन पिप, किन्नेरोथ किन्नेरेथ यो बाक्ब।

3 पूर्व नु पच्छिम डा कनानी आन पिप नु एमोरी आन पिप, हिती आन पिप, परिज्जी आन पिप, पहाड रागीम बाक्ब यबुसी आन पिप नु रागी डा हेरमोन डांडा आइदी मिस्पा रागी गे बाक्ब हिक्वी आन पिप, नेल्ल आन कली ब्रेश्शा सोइक्ताक्व।

4 मिनु मेको पिपपुकी नु आन लडाइ पाइब मुर नेल्ल जाक्तेक्म। मेकोपुकी ठेयब समुन्द्र डा बाल्वा खोदेशो पा शुश बाक्तेक्म। मिनु मेको आन के शारापुकी नु बग्गीपुकी यो शुश बाक्तेक्म।

5 मिनु मेको पिप नेल्ल खुम्सीशा, इस्राएली नु लडाइ पचा कली मेरोम माइश्शो ब्वाक्कु आ बुक्तीके आ नेक्था बाक्तेक्म।

6 मिनु परमप्रभु यावेमी यहोसु कली “मेको आन कली तशा महिनीन। मारदे हना दीसा गो मेको आन कली साइश्शा, गे इस्राएली इन गुइमी गेनुड। गे मेको आन शारा आन ठेयब नारी खोइश्शा, आन बग्गी आन कली मीम क्रोतो” दैत।

7 मिनु यहोसु नु आ लडाइ पाइब नेल्लेमी मेरोम माइश्शो ब्वाक्कु बुक्तीके आ नेक्था जाक्दीश्शा, मेकोपुकी नु लडाइ पाम्तेक्म।

8 मिनु परमप्रभु यावेमी मेको आन कली इस्राएली आन गुइमी गेप्तु। मिनु इस्राएलीपुकीमी मेको आन कली ठेयब सहर सीदोन नु मिस्सेपोत-माइम सम्म नु पूर्व डा मिस्पा दिंम सम्म खेदा पा साइक्तेक्म। सुइ कली यो मप्रोनेम। यहोसु १३:६

9 मिनु यहोसुमी परमप्रभु यावेमी देशो खोदेशो पा, मेको आन शारा आन ठेयब नारी खोइश्शा, मेको आन बग्गीपुकी मीम क्रोइक्तु।

10 मिनु यहोसु नु इस्राएलीपुकी मेकेर रे लेश्शा, हासोर ग्रातेक्म। मेकेर डा पिप कली तरवारमी साइक्तेक्म। हासोर चहिं मेको रागी डा नेल्ल क्येडा ठेयब सहर बाक्माक्त।

11 मिनु इस्राएलीपुकीमी मेकेर बाक्ब मुर नेल्ल आन कली तरवारमी साइक्तेक्म। मेकोपुकीमी नेल्ल आन कली खतम सेल्लेक्म। ब्रोंइशो का कली यो मप्रोनेम। मिनु मेकोपुकीमी हासोर सहरम मी सुइक्ताक्म। यहोसु १०:४०

12 मिनु यहोसुमी मेकेर डा पिप नेल्ल आन सहर ग्राशा, पिप नेल्ल आन कली साइक्तु। मिनु परमप्रभु यावे आ गेय पाइब मोसामी देशो खोदेशो पा नेल्ल आन कली खतम पोक्तु।

13 मिनु इस्राएलीपुकीमी अरु डांडाम बाक्शो सहर आन कली मक्रोदेम। यहोसुमी हासोर सहर कली ला क्रोइक्तु।

14 मिनु इस्राएलीपुकीमी मेको सहर डा मार मार थोत्रक नु बी ब्यफ, क्यारश भेडा आम कली वोंइसाकम। तन्न मुर नेल्ल आन कली साइक्तेकम। नेल्ल आन कली खतम सेल्शा, का कली यो मप्रोनेम। ब्यवस्था २०:१०-१५

15 दोपा परमप्रभु यावेमी आ गेय पाइब मोसा कली अरेशो बाकमे, मोपा मोसामी यहोसु कली अरेशो बाकमाकत। मिनु यहोसुमी मोदेशोन पाप्तु। परमप्रभु यावेमी मोसा कली अरेशो लोत्र यहोसुमी का सम्म यो मप्रोन। नेल्ल रिम्शो पा टिप्नु।

16 मोपा यहोसुमी मेको रागी नेल्ल आम के सेल्लु। तेको तेको रागी आम के सेल्लु देशा हना, पहाड, नेगेब नेल्ल, गोशेन नेल्ल नु दिम डा रागी, अराबाह रागी नु इस्राएल डा ठेयब डांडा नु आ दिम, यहोसु १०:४१

17 सेडर ग्येत्य लाइब हालाक माइश्शो डांडा रे पा लेबानोन डा बेंसी हेरमोन डांडा आइदी बाल-गाद सम्म ग्राशा, आम के सेल्लु। मिनु मेकेर डा पिप नेल्ल आन कली ग्याइश्शा साइक्तु।

18 मिनु शुश नाकत सम्म यहोसुमी मेको पिपपुकी नु लडाइ पाप्तु।

19 मिनु गिबोन डा मुर हिव्वीपुकी ला इस्राएलीपुकी नु गारशा सल्ला पाम्तेकम। अरु सहर डा मुरपुकी मेकोपुकी नु गारथ मजाकम। मोपतीके इस्राएलीपुकीमी सहर नेल्ल नु लडाइ पा ग्राशा, आम के सेल्लेकम। यहोसु ९:१५

20 मारदे हना नेल्ल आन कली खतम सेल्शा, दे परमप्रभु यावेमी मेको नेल्ल आन थुं खकटा सेल्शा, नेल्ल खतम दुम्या कली इस्राएलीपुकी नु लडाइ पतीक थुं गेप्तु। मिनु शिशी मपथु, नेल्ल आन कली खतम सेल्पाइक्तु। परमप्रभु यावेमी मोसा कली अरेशो खोदेशो दुम्त। प्रस्थान ४:२१; ब्यवस्था ७:२

21 मिनु मेना यहोसुमी हेब्रोन, देबीर, आनाब नु यहूदा आन पहाड नु इस्राएली आन पहाड रागीमी बाकब अनाकीम डा मुर आन कली खतम सेल्लु। यहोसुमी मेको आन कली नु आन सहर नेल्ल खतम सेल्लु। यहोसु १४:६-१५; ब्यवस्था ९:२

22 इस्राएली आन रागीमी अनाकीम डा मुर का सम्म यो मलीम। गाजा, गाथ नु अशदोदमी का निकशी ला लीतेकम। १सामुएल १७:४; २सामुएल २१:२२

23 परमप्रभु यावेमी मोसा कली देशो खोदेशो पा यहोसुमी रागी नेल्ल ग्राशा, आम के सेल्लु। मिनु यहोसुमी इस्राएली आन थर थर डा मुर आन कली कोत्रशा, रागी रागी योक्शा गेप्तु। मिनु नोले रागी लडाइ रे नाइसाकम। यहोसु १४:१५

## 12

### बुशो पिप आन नें नु आन रागी

1 मिनु इस्राएलीपुकीमी यर्दन डा पूर्व, अरनोन खोला रे हेरमोन डांडा सम्म नु पूर्व डा अराबाह दिम नेल्ल आम के सेल्लेकम। मेको बुशो पिप सु सु बाक्तेकम देशा हना,

2 एमोरी आन पिप सीहोन, मेको हेरबोनमी बाक्शो बाकमाकत। मेकोमी ते ते हुकुम पाइब बाकमाकत देशा हना, अरनोन खोला आ नेक्था बाक्शो आरोएर रे अरनोन खोला आ दाते रे यब्बोक खोला सम्म सासन पाइब बाकमाकत। मेको अम्मोनी आन सांद बाकत। मिनु मेकोमी आधा गिलाद कली यो सासन पशो बाकमाकत। गन्ती २१:२४

3 मिनु पूर्व गे किन्नेरोथ माइश्शो समुन्द्र रे अराबाह दिम नु अराबाह हिकसी समुन्द्र, बेथ-येशीमोथ नु दक्खिन गे पिस्गा डांडा आधी रागी सम्म यो सासन पशो बाकमाकत।

4 मेको बाशान डा पिप, ओग आ रागी बाकत। मिनु मेको रेफाइम आन नोले डा पिप का बाकमाकत। मेको ते ते सासन पाइबाकमाकत देशा हना, अशतारोथ नु एद्रेइमी सासन पाइबाकमाकत। गन्ती २१:३३; ब्यवस्था ३:१०-११

5 हेरमोन डांडा, साल्का, बाशान नेल्ल, गेशुरी आन सांद नु माकाथ आ मुर आन सांद सम्म नु आधा गिलाद रे लाइश्शा, हेरबोन डा पिप सीहोन आ सांद सम्म सासन पाइबाकमाकत।

6 परमप्रभु यावे आ गेय पाइब मोसा नु इस्राएलीपुकीमी मेको आन कली ग्राशा साइक्तेकम। मिनु परमप्रभु यावे आ गेय पाइब मोसामी रूबेन आ थर, गाद आ थर नु मनस्से आ उइक्थ थर डा मुर आन कली “मेको रागी इन के दुम्त” दे गेप्टु। गन्ती ३२:३३

7 मिनु यहोसु नु इस्राएलीपुकीमी यर्दन खोला आ पच्छिम डा पिप आन रागी तेको तेको ग्रातेकम देशा हना, लेबानोन बेसी डा बाल-गाद, सेइर डा ग्येत्थ लां डा हालाक डांडा सम्म ग्रातेकम। मिनु डोंइती देशो खोदेशो पा यहोसुमी इस्राएली आन थर थर डा मुर गिश बाक्नीम, दे कोव्रशा, मेको आन कली “मेको रागी इन के दुम्त” दे गेप्टु। मेको रागी तेको तेको बाक्तेकम देशा हना,

8 पहाड रागी, पच्छिम डा आइक्च डांडापुकी, अराबाह रागी, पहाड डा देम्सीलो, गोरशो रागी नु नेगेब बाक्तेकम। मेकेर तेको जात डा मुर बाक्तेकम देशा हना, हित्ती, एमोरी, कनानी, परिज्जी, हिक्वी नु यबुसीपुकी बाक्तेकम। मिनु ब्रुइब पिप तेको तेको सहर डा बाक्तेकम देशा हना, यहोसु ११:३

9 यरीको डा पिप, ऐ डा पिप, मेको बेथेल आ नेक्था बाक्ब, यहोसु ६:२; यहोसु ८:२९

10 यरूसलेम डा पिप, हेब्रोन डा पिप, यहोसु १०:-

11 यरमुथ डा पिप, लाकीश डा पिप,

12 एलोन डा पिप, गेजेर डा पिप,

13 देबीर डा पिप, गेदेर डा पिप यहोसु १३:३८; न्यायाधीस १:११

14 होरमा डा पिप, आराद डा पिप, न्यायाधीस १:१७; गन्ती २१:१

15 लिब्ना डा पिप, अदुल्लाम डा पिप, यहोसु १०:२९-३०

16 माकेदा डा पिप, बेथेल डा पिप, यहोसु १०:२८

17 ताप्पुआह डा पिप, हेफेर डा पिप, यहोसु १५:५३; १सामुएल ४:१; १इतिहास ५:१६

18 अफेक डा पिप, लशारोन डा पिप,

19 मादोन डा पिप, हासोर डा पिप, यहोसु ११:१, १०

20 शिम्रोन-मेरोन डा पिप, आकशाफ डा पिप,

21 तानाक डा पिप, मेगीददो डा पिप, यहोसु १७:११

22 केदेश डा पिप, कारमेलम बाक्शो योकनाम डा पिप, यहोसु १९:३७; यहोसु १९:११

23 नाफाथ-डोरम बाक्शो डोर डांडा डा पिप, गिल्यालम बाक्शो गोयीम डा पिप, ग्रीक लोव्रम गिल्याल कली गालील यो देब उत्पत्ती १४:१९

24 नु तिरचा डा पिप बाक्तेकम। मेको नेल्ल पा ३१ जना पिप बाक्तेकम। १राजा १४:१७

## 13

### ग्राचा लीशो रागीपुकी

1 मिनु यहोसु शुश खाल्पा दुम्त। मिनु परमप्रभु यावेमी मेको कली “गे मुल शुश खाल्पा दुम्ते। रागी शुश इन के सेल्चा माल्शो लीशो बाक्नीम।

2 मिनु तेको तेको रागी लीशो बाक्तेकम देशा हना, पलिस्ती नु गेशुरी आन रागी नेल्ल, १सामुएल २७:८

3 इज्जिप्त रागी डा पूर्व डा शीहोर खोला रे लाइशशा इज्जिप्त आ उत्तर डा एक्रोन सम्म लीशो बाक्तेकम। मेको नेल्ल कनानी आन रागी बाक्ब। मिनु पलिस्ती आन ५ जना सासन पाइब आन सहर गाजा, अशदोद, अशकलोन, गाथ नु एक्रोन लीशो बाक्नीम। मिनु दक्खिन डा आव्वीम डा मुर आन रागी यो लीशो बाक्त।

4 मिनु दक्खिन गे कनानी आन रागी नेल्ल नु सीदोनी आन मेआरा रागी रे लाइशशा, अफेक सहर एमोरी आन सांद सम्म लीशो बाक्नीम।

5 गेबाली आन रागी, लेबानोन नेल्ल नु पूर्व गे डा हेरमोन डांडा दी डा बाल-गाद रे लाइशशा, लेबो-हमाथ सम्म लीशो बाक्नीम।

6 मिनु लेबानोन रे मिस्रेपोत-माइम सम्म पहाड डा मुर नेल्ल नु सीदोनी आन रागी लीशो बाकनीम। गो मेको मुर नेल्ल आन कली इस्राएली आन डोंइती रे थुंडनुडमी। गोम इ कली अरेशो खोदेशो पा मेको रागी इस्राएली आन कली योक्शा गेवो। मेको रागी आम के सेल्चा कली योक्शा गेमी।

7 मिनु एको रागी ९ थर नु मनस्से आ उइक्थ थर कली योक्शा गेवो” दे परमप्रभु यावेमी यहोसु कली दैत।

रूबेन, गाद नु मनस्से आ उइक्थ थर

8 मिनु डोंइती परमप्रभु यावे आ गेय पाइब मोसामी मनस्से आ उइक्थ थर, रूबेन आ थर नु गाद आ थर आन कली यर्दन आइक्की हांबु पूर्वमी आन रागी गेने थुम्शो बाक्त। यहोसु १३:१५-३२

9 तेको रागी गेशो बाक्त देशा हना, अरनोन खोला आ नेक्था बाक्शो आरोएर सहर नु दिम आ दातेमी बाक्शो मेदेबा सहर डा दिम दीबोन सहर सम्म डा रागी नेल्ल गेशो बाक्त।

10 मिनु हेरबोन सहरम हुकुम पाइब एमोरी आन पिप सीहोन आ सहर नेल्ल अम्मोनी आन सांद सम्म गेशो बाक्त।

11 गिलाद रागी नु गेशुरी नु माकाथी आन रागी नु हेरमोन नेल्ल नु बाशान नेल्ल रे लाइश्शा साल्का सम्म गेशो बाक्त। ब्यवस्था ३:१४; २सामुएल ३:३; २सामुएल १५:८

12 मिनु अशतारोथ नु एद्रेइमी सासन पाइब बाशान सहरम बाक्ब ओग माइश्शो पिप आ रागी नेल्ल गेशो बाक्त। मेको पिप ओग ला रेफाइम आन दातेमी ब्रोंइशा लीशो बाक्माक्त। मोसामी मेको आन कली ग्राशा, खेरशो बाक्त।

13 तन्न इस्राएलीपुकीमी गेशुरी नु माकाथ आ मुर आन कली मखेरेम। मोपतीके मुल सम्म मेको गेशुरी नु माकाथी इस्राएली आन दातेमी बाक्शो बाकनीम।

14 मोसामी लेवी आ थर कली ला रागी मगेवो। मारदे हना परमप्रभु यावे आ देशो खोदेशो पा परमप्रभु यावे, इस्राएली आन परमप्रभु कली चोशा चढ़ेशो मेको आन भाग बाक्ब। यहोसु १३:३३; उत्पत्ती ४९:५; गन्ती १८:२०-२१

रूबेन आ थर डा मुर आन रागी

15 मिनु मोसामी रूबेन आ थर डा खिं खिं डा मुर गिश बाकनीमी, दे कोत्रशा, रागी गेशो बाक्त।

16 मेको आन रागी अरनोन खोला आ नेक्था बाक्शो आरोएर सहर नु मेको दिम आ दातेम बाक्शो सहर नु मेदेबा दिम आ नेक्था डा रागी नेल्ल,

17 हेरबोन नु दिम डा सहर नेल्ल, दीबोन, बामोथ-बाल नु बेथ-बाल-मेओन,

18 याहास, केदेमोथ नु मेफा-आथ,

19 किरयथ-थाइम, सिन्मा नु बेसी डा डांडामी बाक्शो सेरेथ-शाहार,

20 बेथ-पेओर, पिस्मा डा देम्सीलो, बेथ-येशीमोथ,

21 दिम डा सहर नेल्ल नु एमोरी आन पिप सीहोन आ रागी नेल्ल गेशो बाक्त। सीहोन हेरबोनमी सासन पाइब बाक्त। मिनु मोसामी मेको कली नु मिदयान डा सासन पाइब आन कली ग्राशा साइश्शो बाक्त। मेको सासन पाइब सु सु बाक्तेकम देशा हना, मिदयानमी बाक्शो एवी, रेकेम, सुर, हुर नु रेबा, सीहोनमी चोइश्शो सासन पाइब बाक्तेकम।

22 मिनु इस्राएलीपुकीमी मेकोपुकी नु बेओर आ तौ बालाम, लिंक्यु कोत्रब कली यो तरवारमी साइक्तेकम। गन्ती २२:५; गन्ती ३१:८

23 मिनु रूबेन आ थर डा मुर आन सांद यर्दन नु आ मुर सम्म बाक्त। मेको रूबेन आ थर आन खिं खिं डा मुर आन कली गेशो सहर नु गाउंपुकी एकोन बाक्तेकम।

गाद आ थर डा मुर आन रागी

24 मिनु मोसामी गाद आ थर डा खिं खिं डा मुर आन कली कोत्रशा, रागी गेशो बाक्त। उत्पत्ती ४९:१९

25 मेको आन कली याजेर नु गिलाद डा सहर नेल्ल नु अम्मोनी आन आधा रागी, रब्बाह आ पूर्व डा आरोएर सम्म गेशो बाक्त।

26 मिनु हेरबोन रे रामाथ-मिस्पे नु बेतोनीम सम्म नु महा-नाइम रे देबीर सहर सम्म गेशो बाक्त।

27 मिनु हेरबोन डा पिप सीहोन आ लीशो राज्य नेल्ल, दिंम बेथ-हाराम, बेथ-निम्रा, सुक्कोथ, साफोन, यर्दन नु आ सुर मेको आ सांद बाक्त। मेको आन कली यर्दन डा पूर्व गे किन्नेरेथ समुन्द्र आ दक्खिन उइ सम्म गेशो बाक्त।

28 मेको गाद आ थर आन खिं खिं डा मुर आन कली कोव्रशा गेशो रागी डा सहर नु गाउंपुकी एकोन बाक्नीम।

**मनस्से आ थर डा मुर आन रागी**

29 मिनु मोसामी मनस्से आ उइक्थ थर कली रागी गेशो बाक्त। मेको आ खिं खिं डा मुर आन कली गिश बाक्नीम, दे कोव्रशा, रागी योक्शा गेशो बाक्त।

30 मेको आन रागी महा-नाइम रे लाइशशा, बाशान नेल्ल गेशो बाक्त। बाशान डा पिप ओग आ राज्य नेल्ल नु बाशान डा याइर आ सहर नेल्ल पा ६० ओटा सहर गेशो बाक्त। यहोसु १७:१; न्यायाधीस १०:३-४

31 मिनु आधा गिलाद, अशतारोथ नु एद्रेइ बाशान डा पिप ओग आ राज्य डा सहरपुकी मनस्से आ तौ माकीर आ खिं खिं डा आधा मुर आन कली आन खिं खिं कोव्रशा गिश बाक्नीमी योक्शा गेशो बाक्त।

32 मिनु डोंइती मोसामी मेको रागी नेल्ल मोआब डा दिंमम बाक्शा योक्शा गेशो बाक्त। मेको दिंम ते बाक्शो बाक्त देशा हना, यरीको नु यर्दन आ पूर्व गे बाक्त।

33 तन्न लेवी आ थर डा मुर आन कली तेकोइ रागी मगेम। मारदे हना परमप्रभु यावे, इस्राएली आन परमप्रभु मेको आन भाग बाक्ब। यहोसु १३:१४

## 14

**मनस्से नु ९ थर आन रागी**

1 मिनु इस्राएलीपुकीमी कनान रागी डा तेको तेको रागी आंम कली ताम्नेक्म देशा हना, चढ़ेब एलाजर, नून आ तौ यहोसु नु इस्राएल डा थर नेल्ल आन ठेयब मुरपुकीमी इस्राएली आन थर थर आन कली रागी योक्तेक्म। गन्ती ३४:१७

2 मिनु परमप्रभु यावेमी मोसा कली दोपा अरेवा, मोपा मेको ९ थर नु उइक्थ थर आन कली रागी योक्शा गेशो बाक्त। गन्ती २६:५५

3 मारदे हना मोसामी थर निक्शी नु उइक्थ थर आन कली यर्दन खोला आ पूर्वम रागी गेने थुम्शो बाक्त। तन्न लेवी आन कली मेको आन दातेमी तेकोइ रागी मगेशो बाक्त। यहोसु १३:१४,३३; ब्यवस्था १०:९

4 मिनु योसेफ आ तौ मनस्से नु एफ्राइम निक्शी थर बाक्ताक्स। तन्न लेवी आन कली रागी काइ मगेमे बाक्त। मेकोपुकी बाक्चा कली सहरपुकी नु मेको आन बी ब्यफ, क्यारश भेडा योव्रचा कली इच्का रू ला तामे बाक्त। यहोसु २१:-

5 परमप्रभु यावेमी मोसा कली दोदेशो पा अरेवा, मोदेशो पा इस्राएलीपुकीमी थर थर आन कली रागी योक्शा गेम्तेक्म।

**हेब्रोन सहर कालेब कली गेशो**

6 मिनु यहूदा आ थर डा वोंइश मुरपुकी यहोसु बाक्तीक गिल्गालमी जाक्तेक्म। मिनु केनीज्जी यपुन्ने आ तौ कालेबमी मेको कली “परमप्रभु यावेमी कादेश-बारनेआमी आं नु इन पर्वमी परमप्रभु आ मुर मोसा कली देशो लोव्र तुइक्नीनी। गन्ती १४:२४; ब्यवस्था १:३६

7 गो ४० बर्स डा बाक्डानु, परमप्रभु यावे आ गेय पाइब मोसामी कादेश-बारनेआ रे एको रागी कली क्यारी पथ सोइक्ताक्व। मिनु गो क्यारी पा आं तुइशशो लोव्र शोव्रशो नड। गन्ती १३:६,३०

8 गो नु लशो लोकबपुकीमी चहिं मरिश्शो लोव्र पा, मुर नेल्ल आन कली हिंपाइक्तेक्म। तन्न गो परमप्रभु यावे, आं परमप्रभु कली आं थुं नेल्लेमी आ नोल खोइक्ता।



9 मिनु मेको नाक्ती मोसामी आं कली कसम जशा गे ते गाकडे, मेको रागी इ कली नु इ तौ, चच युइ आन कली गेना हना यो कली दुम्ल। मारदे हना इ थुं नेल्लेमी परमप्रभु यावे, आं परमप्रभु नोले खोइक्तीवी।

10 मिनु नेनीन, परमप्रभु यावेमी आं कली ब्रोंइचा गेपु। इस्राएलीपुकी गोरशो रागीमी हिरसामानु, परमप्रभु यावेमी मोसा कली एको लोव्र देशो ४५ बर्स दुम्ल। मिनु मुलाक्ती गो ८५ बर्स दुम्ल।

11 मिनु मोसामी आं कली सोइक्ची ना दोशो बोल्यो बाकडा, मोशोन मुलाक्ती यो बोल्यो बाक्नुड। लडाइ पचा नु खिंडगा लाडगा पचा मेना दोदेशो नडा, मुलाक्ती यो मे मोदेशोन बाक्नुड।

12 मोपतीके एको डांडा डा रागी आं कली गेने। परमप्रभु यावेमी एको आ पर्वम मेनान देने थुम्ल। मिनु 'मेकेर अनाकीम डा मुर बाक्नीम। मिनु मेकेर गारो पाइशो ठेयब सहर बाक्नीम' देशो गे नेंतीनी। मिनु परमप्रभु यावे गो नु बाक्त हना, परमप्रभु यावे आ देशो खोदेशो पा गो मेको आन कली खेरेने चाप्नुड" दैत। यहोसु ११:२१

13 मिनु यहोसुमी मेको कली आसीक गेशा, यपुन्ने आ तौ कालेब कली हेब्रोन सहर गेपु। यहोसु १५:१३-१९; यहोसु २१:११-१२

14 मोपतीके मुल सम्म केनीज्जी यपुन्ने आ तौ कालेब आ रागी हेब्रोन बाक्ब। मारदे हना मेकोमी परमप्रभु यावे, इस्राएली आन परमप्रभु कली आ थुं नेल्लेमी आ नोले खोइशो बाक्त। गन्ती ३२:१२

15 डांडी हेब्रोन कली किरयथ-अरबा देशो बाक्तेक्म। मेको अरबा माइशो मुर अनाकीम डा मुर आन दातेमी नेल्ल क्येडा लाइशो मुर बाक्तेक्म। मिनु मेको रागी लडाइ रे नांडसाक्व। गन्ती १३:२२; यहोसु ११:२३

## 15

### यहूदा आ थर डा मुर आन रागी

1 मिनु योक्शा गेशो यहूदा आ खिं खिं डा मुर आन रागी एदोम रागी रे दक्खिन जीन माइशो गोरशो रागी सम्म बाक्त। उत्पत्ती ४९:८-९; गन्ती ३४:३-५

2 मेको आन रागी डा दक्खिन डा सांद हिकसी समुन्द्र आ दक्खिन रे दक्खिन गे

3 अक्रब्बीम रे ग्येत्थ लाइशो जीन लाक्शा कादेश-बारनेआ आ दक्खिन रे ग्येत्थ लशा, हेस्रोन लाक्शा, अदार सम्म जाक्दीशशा, कारका सहर सम्म बाक्त।

4 मेकेर रे अचमोन लाक्शा इजीप्त डा खोला रे समुन्द्र जाक्दीशशा नुप्शो बाक्त। मेको रागी मेको आन के दक्खिन गे डा सांद बाक्त।

5 मिनु पूर्व डा सांद चहिं हिकसी समुन्द्र यर्दन आ ओव्रतीक सम्म बाक्त। उत्तर डा सांद यर्दन आ ओव्रतीक रे लाइशो

6 बेथ-होगला रे बेथ-अराबाह आ उत्तर लाक्शो बाक्त। मिनु मेको सांद रूबेन आ तौ बोहान आ फुल्लु सम्म ग्येत्थ लशो यहोसु १८:१७

7 नु आकोर नें पाइशो दिंम रे देबीर नु उत्तर गे गिल्याल सम्म बाक्त। गिल्याल अदुम्मीम डा ग्येत्थ लतीक लां रे आइक्ची गे सम्म बाक्त। मेको अदुम्मीम दिंम डा दक्खिन गे बाक्ब। मेको सांद एन-शेमेश नें पाइशो खोला रे लशा, एन-रोगेल सम्म लशो बाक्त। २सामुएल १७:१७

8 मेको सांद हिन्नोम आ तौ आ दिंम रे यबुसी आन सहर आ दक्खिन रे ग्येत्थ खोइशो बाक्त। यबुसी आन सहर यरूसलेम बाक्ब। मिनु मेकेर रे हिन्नोम दिंम डा पच्छिम बाक्शो डांडा ग्येत्थ रे रेफाइम आन दिंम डा उत्तर सम्म लशो बाक्त। २इतिहास २८:३

9 मेको सांद डांडा आ थेपील रे नेप्तोआह नें पाइशो ब्वाक्कु बुक्तीके जाक्दीशशा, एफ्रोन पहाड डा सहर सम्म जाक्दीशशा बाक्त। लेंशा मेको सांद मेको किरयथ-यारीम, मेको कली बालाह यो देनीम, सम्म जाक्दीशशा बाक्त। यहोसु १५:६०; यहोसु ९:१७; यहोसु १८:१५

10 मिनु मेको सांद बालाह रे पा सेइर पहाड सम्म पच्छिम गे हिरब। येआरीम डांडा आ उत्तर गे डा देम्सीलो रे पा बेथ-शेमेश रे लुकच लशा, तिम्नाह सम्म बाक्त। मेको येआरीम डांडा कली केसालोन यो देंनीम। यहोसु १९:४३; न्यायाधीस १४:१

11 मेको सांद लेंशा एक्रोन आ उत्तर गे जाक्दीशशो बाक्त। मिनु शिक्केरोन सहरमी जाक्दीशशा, बालाह डांडा लाक्शा, यब्नेलमी जाक्दीशशो बाक्त। मेको सांद समुन्द्र सम्म बाक्त।

12 पच्छिम डा सांद चहिं ठेयब समुन्द्र सम्म बाक्त। यहूदा आ थर आन खिं खिं डा मुर आन रागी एर ओंथ डा सांद एकोन बाक्नीम। यहोसु १४:६-१५; न्यायाधीस १:१०-१५

13 मिनु परमप्रभु यावेमी यहोसु कली अरेशो खोदेशो पा यहूदा आ थर डा रागी आ दातेमी यपुन्ने आ तौ कालेब कली किरयथ-अरबा गेप्टु। मेको कली हेब्रोन यो देंनीम। मेको अरबा अनाक आ आफ बाक्त।

14 मिनु कालेबमी हेब्रोन रे अनाक आ चच युड सां शेशै, अहीमान नु तल्मै आन कली खेरतीमी।

15 मिनु मेकेर रे देबीरमी बाक्ब मुरपुकी नु लडाइ पथ लत। डोंडती देबीर कली किरयथ-सेफेर देशो बाक्तेक्म।

16 मिनु कालेबमी “सुमी चहिं किरयथ-सेफेर लडाइ पा ग्राशा, खतम पाइबा, मेको कली आं तमी अकसा ग्युंभे पा गेनुड” देत। न्यायाधीस १:१२

17 मिनु कालेब आ लोक्ब केनाज आ तौ ओथनीएलमी मेको सहर ग्रात। मिनु कालेबमी ओथनीएल कली आ तमी अकसा ग्युंभे पा गेप्टु। न्यायाधीस ३:९

18 अकसा ओथनीएल नु लम नोले, अकसामी ओथनीएल कली “आं आफ नु रू का पुन” देत। मिनु अकसा आ गधा रे तोंडसाक्व। मिनु आ आफ कालेबमी अकसा कली “मार माल्दे” दे हिल्लो पाप्टु।

19 मिनु अकसामी “आं कली रिम्शो थोव्रक का गेन। मारदे हना गे आं कली नेगेब डा रू गेतीनी। मुल आं कली ब्वाक्कु बुक्तीके यो गेन” देत। मिनु कालेबमी अकसा कली आइदी नु आइक्था डा ब्वाक्कु बुक्तीके गेप्टु।

20 मिनु यहूदा आ थर डा मुर आन खिं खिं डा मुर आन कली गेशो रागी तेको तेको बाक्नीम देशा हना,

21 यहूदा आ खिं डा मुर आन दक्खिनम बाक्शो एदोम आ सांद गे डा सहरपुकी कब्सेल, एदेर नु यागुर,

22 कीनाह, दिमोना नु अदादाह,

23 केदेश, हासोर नु इश्नान,

24 जीफ, तेयलेम नु बेआलोथ,

25 हासोर-हादत्ता, केरयोथ-हेसोन, मेको कली हासोर यो देंनीम,

26 अमाम, शेमा नु मोलादा

27 हासार-गददा, हेश्मोन नु बेथ-पेलेत,

28 हासार-शुआल, बेयर-शेबा नु बिज्योत्या,

29 बालाह, यीम नु एसेम,

30 एल्लोलद, केसील नु होरमा,

31 सिकलाग, मदमन्ना नु सन्सन्ना,

32 लेबाओत, शिल्हीम, ऐन नु रिम्मोन सहर बाक्नीम। मेको नेल्ल पा २९ ओटा सहर नु आन नेक्था डा गाउं नेल्ल यो बाक्नीम।

33 मिनु दिंम गे चहिं एश्ताओल, सोराह नु अश्ना, न्यायाधीस १३:२५; न्यायाधीस १६:३१

34 जानोह, एन-गन्नीम ताप्पुआह नु एनाम,

35 यरमुथ, अदुल्लाम, सोकोह नु आजैका,

36 शा-आराइम, अदीथैम, गेदेराह नु गेदे-रोथैम बाक्नीम। मेको नेल्ल पा १४ ओटा सहर नु आन नेक्था डा गाउं नेल्ल यो बाक्नीम।

37 मिनु सेनान, हदाशा नु मिग्दल-गाद,

- 38 दिलेआन, मिस्पा नु योकतेल,  
 39 लाकीश, बोस्कत नु एग्लोन,  
 40 कब्बोन, लहमाम नु किल्लीश,  
 41 गेदे-रोथ, बेथ-दागोन, नामा नु माकेदा बाक्नीम। मेको नेल्ल पा १६ ओटा सहर नु आन नेक्था  
 डा गाउं नेल्ल यो बाक्नीम।  
 42 लिब्ना, एथेर नु आशान,  
 43 इफताह, अशना नु नेजीब,  
 44 कैलाह, अकजीब नु मारेशा बाक्नीम। मेको आन बाक्तीक नेल्ल पा ९ ओटा सहर बाक्नीम।  
 यहोसु १९:२९  
 45 मेको एक्रोन सहर नु आ नेक्था डा खिंपुकी नु गाउं नेल्ल, १सामुएल ५:१०; यहोसु १९:४१-४६  
 46 एक्रोन आ पच्छिम गे डा समुन्द्र सम्म अशदोद आ नेक्था डा सहर नेल्ल नु मेकेर डा गाउं नेल्ल  
 47 अशदोद नु मेको आ नेक्था डा खिंपुकी नु गाउं नेल्ल, गाजा नु मेको आ नेक्था डा खिंपुकी नु गाउं  
 नेल्ल नु इजीप्त डा खोला नु ठेयब समुन्द्र आ सुर सम्म बाक्नीम। १सामुएल ५:१; न्यायाधीस १:१८  
 48 मिनु पहाड डा शामीर, यत्तीर नु सोकोह,  
 49 दन्ना, किरयथ-सन्ना, मेको कली देबीर यो देंनीम,  
 50 आनाब, एशतेमोह नु अनीम,  
 51 गोशेन, होलोन नु गिलोह। मेको नेल्ल पा ११ ओटा सहर नु आन नेक्था डा गाउं नेल्ल यो बाक्नीम।  
 52 अराब, दुमा नु एशान,  
 53 यानीम, बेथ-ताप्पुआह नु अफेकाह,  
 54 हुम्ता, किरयथ-अरबा, मेको कली हेब्रोन यो देंनीम, नु सीओर बाक्नीम। मेको नेल्ल पा ९ ओटा  
 सहर नु आन नेक्था डा गाउं नेल्ल यो बाक्नीम।  
 55 माओन, कारमेल, जीफ नु युत्ता,  
 56 येजेल, योकदाम नु जानोह,  
 57 काइन, गिबा नु तिम्माह बाक्नीम। मेको नेल्ल पा १० ओटा सहर नु आन नेक्था डा गाउं नेल्ल  
 यो बाक्नीम।  
 58 हल्हुल, बेथ-सुर नु गेदोर,  
 59 माराथ, बेथ-अनोत नु एल्लेकोन। मिनु मेको नेल्ल पा ६ ओटा सहर नु आन नेक्था डा गाउं नेल्ल  
 यो बाक्नीम।  
 60 किरयथ-बाल, मेको कली किरयथ-यारीम यो देंनीम नु रब्बाह बाक्नीम। मेको नेल्ल पा सहर  
 निक्शी नु आस नेक्था डा गाउं नेल्ल यो बाक्नीम। यहोसु ९:१७; यहोसु १८:१४  
 61 मिनु गोरशो रागीमी बेथ-अराबाह, मिदीन नु सेकाका  
 62 निब्शान, शुश हिक्सी सेल्ब आन सहर नु एन-गेदी बाक्नीम। मेको नेल्ल पा ६ ओटा सहर नु आन  
 नेक्था डा गाउं नेल्ल यो बाक्नीम।  
 63 तन्न यहूदा आ खिं डा मुरपुकीमी यरूसलेम सहरमी बाक्ब यबुसी आन कली खेरने मचबेम।  
 मोपतीके एको यबुसीपुकी मुलाक्त सम्म यरूसलेममी यहूदा आ खिं डा मुरपुकी नु काथा बाक्नीम।  
 यहोसु १८:२८; २सामुएल ५:६-७

## 16

योसेफ आ तौ एफ्राइम आ रागी

- 1 मिनु योक्शा गेशो योसेफ आ खिं खिं डा मुर आन रागी तेको तेको बाक्तेक्म देश हना, यरीको आ  
 नेक्था डा यर्दन रे यरीको खोला आ पूर्व रे ग्येत्थ लाइब गोरशो रागी लाक्शा, बेथेल डा पहाड रागी  
 सम्म बाक्त। उत्पत्ती ४९:२२  
 2 बेथेल कली लूज यो देंनीम। मेकेर रे अरकी आ मुर आन रागी लाक्शा, अतारोथ सम्म जाक्दीशो  
 बाक्त।

3 मिनु पच्छिम गे तोइश्शा याफ्लेत आ मुर आन रागी रे पा आइदी डा बेथ-होरोन नु गेजेर सम्म डा समुन्द्र जाकदीश्शा नुष्शो बाक्त।

4 मिनु योसेफ आ तौ निक्शी, मनस्से नु एफ्राइम आस खिं खिं डा मुरपुकीमी आंम कली रागी ताम्तेक्म।

5 मिनु एफ्राइम आ खिं खिं डा मुर आन रागी तेको तेको बाक्तेक्म देशा हना, मेको आन के सांद पूर्व गे अतारोथ-अदार रे पा आइक्था डा बेथ-होरोन सम्म बाक्त।

6 मिनु मेको सांद ठेयब समुन्द्र सम्म लत। उत्तर गे डा मिकमेथाथ रे लाइश्शा, पूर्व गे तानत-शिलो लाक्शा, पूर्व डा यानोह सम्म जाकदीश्शो बाक्त।

7 मिनु नोले यानोह रे पा अतारोथ नु नाराह सम्म तोइश्शा यरीको जाकदीश्शा, यर्दन सम्म बाक्त।

8 मेको सांद ताप्पुआह रे पा लाइश्शा पच्छिम गे कानाह खोल्ला सम्म लशा समुन्द्रमी जाकदीश्शा नुष्शो बाक्त। मेको एफ्राइम आ खिं खिं डा मुर आन रागी बाक्म।

9 एको क्येडा लाक्शा मनस्से आ खिं डा मुर आन दातेमी एफ्राइम आ खिं डा मुर आन कली यो सहर नु गाउंपुकी गेशो बाक्त। यहोसु १७:९

10 तन्न मेकोपुकीमी गेजेर सहरमी बाक्ब कनानी आन कली मखेरेम। मोपतीके कनानीपुकी मुल सम्म एफ्राइम आ मुर आन दातेमी बाक्नीम। मेकोपुकी वाइलीम वाइल दुम्शा बाक्शो बाक्नीम। न्यायाधीस १:२९; १राजा ९:१६

## 17

### मनस्से आ थर डा मुर आन रागी

1 मिनु योसेफ आ ठेयब तौ मनस्से नु मनस्से आ ठेयब तौ माकीर कली योक्शो रागी गिलाद नु बाशान बाक्माक्त। गिलाद आ किकी पिपी बाक्माक्त। मेकोपुकी बोल्यो लडाइ पाइब बाक्तेक्म। यहोसु १३:३१; गन्ती २६:२९

2 मिनु मेको योत्रशो रागी मनस्से आ लीशो मुर आन कली बाक्त। मिनु मेको लीशो मुर सु सु बाक्तेक्म देशा हना, अबीएजेर आ खिं डा मुर, हेलेक आ खिं डा मुर, असीएल आ खिं डा मुर, शेकेम आ खिं डा मुर, हेफेर आ खिं डा मुर नु शेमीदा आ खिं डा मुर बाक्तेक्म। मेकोपुकी योसेफ आ चच युइ आन खिं खिं डा मुर बाक्तेक्म। न्यायाधीस ६:११, २४; न्यायाधीस ८:३२

3 तन्न मनस्से आ तौ माकीर, मेको आ तौ गिलाद, मेको आ तौ हेफेर नु मेको आ तौ सेलोफेहाद के तमीपुकी ला बाक्तेक्म, तौ मबाक्म। मेको आ तमीपुकी महालाह, नोआह, होंगला, मिल्का नु तिरचा बाक्तेक्म। गन्ती २६:३३; गन्ती २७:१-८; गन्ती ३६

4 मेकोपुकीमी चढेब एलाजर, नून आ तौ यहोसु नु ठेयब मुर आन डोंइती जाक्शा “आंइ कली आंइ लोक्ब आन दातेमीन रागी गेचा, दे परमप्रभु यावेमी मोसा कली अरेशो बाक्ब” दैतेक्म। मिनु यहोसुमी मेको आन कली, परमप्रभु यावे आ दैशो खोदेशो पा, आन बोडो बकान्छा आन दातेमी रागी गेप्नु।

5 मिनु मनस्से कली १० ओटा रागी गेम्तेक्म। मिनु मेको कली यर्दन आ पूर्व डा गिलाद नु बाशान रागी यो तेम्शा गेम्तेक्म।

6 मारदे हना मनस्से आ थर डा तमीपुकीमी यो मेको आन तौ आन दातेमीन रागी ताम्तेक्म। गिलाद रागी चहिं मनस्से आ अरु तौ आन रागी दुम्त।

7 मनस्से आ रागी आशेर रे लाइश्शा शेकेम आ पूर्व डा मिकमेथाथ सम्म बाक्शो बाक्त। मेको सांद दक्खिन गे लशा एन-ताप्पुआह सहरमी बाक्ब आन रागी सम्म जाकदीश्शो बाक्त।

8 मिनु ताप्पुआह आ एर ओंथ डा रागी मनस्से के बाक्त। तन्न मनस्से आ सांदमी बाक्शो ताप्पुआह सहर चहिं एफ्राइम आ खिं डा मुर आन के बाक्त।

9 मेको सांद दक्खिन गे कानाह खोला सम्म जाकदीश्शो बाक्त। एफ्राइम आ सहर आन दातेमी मनस्से आ सहरपुकी यो बाक्तेक्म। तन्न मनस्से आ सांद चहिं खोला आ उत्तर गे डा समुन्द्र जाकदीश्शा नुष्शो बाक्त।

10 दक्खिन गे एफ्राइम आ रागी बाक्त। मिनु उत्तर गे मनस्से आ रागी बाक्त। मनस्से थर आ रागी समुन्द्र रे लशा, उत्तर गे आशेर आ रागी नु पूर्व गे इस्साकार आ रागी सम्म जाकदीशशो बाक्त।

11 इस्साकार नु आशेर आस रागी आस दातेमी मनस्से आ सहर नु गाउं का निक्की यो बाक्तेकम। मेको तेको तेको बाक्तेकम देशा हना, बेथ-शेआन, इब्लाम नु आ एर ओंथ, एन-डोर, तानाक, मेगीददो नु एर ओंथ डा गाउंपुकी बाक्तेकम। मेको कली डांडा सां यो देंनीम। न्यायाधीस १:२७-२८

12 मिनु मनस्से आ थर डा मुरपुकीमी मेको सहर आंम के सेलने मचाप्शो बाक्तेकम। मिनु कनानीपुकी मेकेर बाक्शो बाक्तेकम।

13 मिनु नोले इस्राएलीपुकी बोल्यो दुम्शा, मेको कनानी आन कली वाइलीम वाइल सेल्लेकम। तन्न नेल्ल आन कली मखेरेम। यहोसु १६:१०

14 मिनु योसेफ आ खिं डा मुरपुकीमी यहोसु कली “गे मारदे आंड कली रागी का ला गेनी? गो शुश मुर बाक्नीकी। मिनु परमप्रभु यावेमी आंड कली शुश आसीक गेप्तु” दैतेकम।

15 मिनु यहोसुमी मेको आन कली “गेपुकी मोदेशो शुश बाक्नीनी नु एफ्राइम आ पहाड रागी इन कली आडक्च दुम्त हना, परिज्जी नु रेफाइम आन रागी डा ब्वाकी कोव्रथ लने” दैत।

16 मिनु योसेफ आ खिं डा मुरपुकीमी “पहाड रागी आंड कली मजाकदीपब। मिनु दिंमम बाक्ब कनानीपुकी नु फलाम के बग्गी बाक्नीम। मिनु बेथ-शेआन, एर ओंथ डा मुरपुकी नु येजेल आ दिंममी बाक्बपुकी नु यो फलाम के बग्गी बाक्नीम” दैतेकम।

17 मिनु यहोसुमी योसेफ आ खिं डा मुर, एफ्राइम नु मनस्से आस मुर आन कली “गे शुश मुर नु बोल्यो यो बाक्नीनी। गे रागी का ला मताइनीनी।

18 गे पहाड ब्वाकी डा रागी यो ताइनीनी। मिनु लशा, मेको कली शुश लाइशशो सम्म क्योव्रडीन। मिनु मेको इन के दुम्ब। मेको कनानीपुकी नु फलाम के बग्गी बाक्त हना नु बोल्यो बाक्तेकम हना यो, गेपुकीमी मेको आन कली खेरेने चाप्नीनी” दैत।

## 18

### लीशो रागीपुकी योक्शो

1 मिनु इस्राएल डा मुर नेल्ल शिलोमी बुक्तेकम। मेकेर ग्रुम्तीक ताम्बु कीतेकम। मेना मेको रागी मेको आन रागी दुम्शो बाक्त। न्यायाधीस २१:१९; १सामुएल १:३; येरमीया ७:१२-१५

2 तन्न इस्राएली ७ थरपुकीमी आंम कली रागी मतशो बाक्तेकम।

3 मिनु यहोसुमी इस्राएली आन कली “गे परमप्रभु यावे, इन किकी पिपी आन परमप्रभुमी इन कली गेशो रागी आंम के सेल्चा कली मार रिम्नीनी।

4 मुल गेपुकीमी थर थर रे सां सां मुरपुकी योव्रडीन। गो मेको आन कली रागी कोव्रथ सोडकुड। मिनु मेकोपुकी लशा, आंम आंम रागी दोदेशो बाक्मे, मेको ब्रेक्चा माल्नीम। मिनु नोले आं बाक्तीक लेल्चा माल्नीम।

5 मिनु गे मेको रागी कली ७ भाग पा योक्चा माल्नीनी। यहूदा दक्खिन गे आंम रागीमी बाक्ब। योसेफ आ खिं डा मुर चहिं उत्तर गे मेको आन रागीम बाक्नीम।

6 गेपुकीमी मेको रागी कली ७ भाग पा ब्रेक्स ब्रेक्ने थुम्शा नोले, आं बाक्तीक चाक्कीन। मिनु गो परमप्रभु यावे, ई परमप्रभु आ डोंडती मेको रागी इन कली योक्शा गेनन्नी।

7 तन्न लेवी आ थर डा मुरपुकीमी इन दातेमी रागी मताइनीम। मारदे हना परमप्रभु यावे आ चढ़ेब दुम्तीकेन मेको आन भाग बाक्ब। मिनु गाद, रूबेन नु मनस्से आ उइक्थ थरमी यर्दन आ पूर्व गे आन रागी तशो बाक्तेकम। मारदे हना परमप्रभु यावे आ गेय पाइब मोसामी मेको आन कली आन रागी गेने थुम्शो बाक्त” दैत। यहोसु १३:१४, ३३

8 मिनु मेको मुरपुकी बोक्शा लशा, मेको रागी आ ब्रेक्स ब्रेक्चा गोम्तेकम। यहोसुमी मेको आन कली दोदेशो देमे, मोदेशो पाम्तेकम। मिनु डोंडती यहोसुमी “लने, मेको रागी नेल्ल हिरसीन। मिनु मेको रागी

आ ब्रेक्स ब्रेकशा, आ बाक्तीक चाक्कीन। मिनू गो एक शिलोमी गे इन कली परमप्रभु यावे आ डोंइती योक्शा गेनन्नी” देंत।

9 मिनू मेकोपुकी लशा, रागी नेल्ल हिरसाक्म। मिनू सहर सहर कोव्रशा, मेको रागी ७ भाग सेल्शा ब्रेक्ताक्म। मिनू यहोसु आ बाक्तीके शिलोम लेत्तेक्म।

10 मिनू यहोसुमी शिलोमी परमप्रभु यावे आ डोंइती इस्राएली थर डा खिं खिं डा मुर आन कली मेको रागी योक्शा गेप्तु।

### बेन्यामीन आ मुर आन रागी

11 मिनू योव्रडमेनु, बेन्यामीन आ खिं खिं डा मुरपुकीमी आन रागी ताम्तेक्म। मेको आन रागी यहूदा थर नु योसेफ आस थर निक्शी आन दातेमी बाक्त। उत्पत्ती ४९:२७

12 मेको सांद उत्तर गे यर्दन रे पा लाइश्शा यरीको आ उत्तर डा देम्सीलो लाक्शा, पच्छिम गे डा पहाड लाक्शा गोरशो रागी बेथ-आवेन सम्म जाक्दीश्शो बाक्त। यहोसु ७:२

13 मेकेर रे मेको सांद दक्खिन डा लूज डा देम्सीलो लाक्शा, अतारोथ-अदार आ आइदी जाक्दीश्शो बाक्त। लूज कली बेथेल यो देंनीम। मेको आ दक्खिन गे जाक्दीश्शा, आइदी बेथ-होरोन आ दक्खिन गे डा पहाड रे पा लुकच लशो बाक्त। उत्पत्ती १२:८; उत्पत्ती २८:१९

14 मिनू मेको सांद मेकेर डा पहाड आ डोंइती बाक्शो बेथ-होरोन आ दक्खिन पच्छिम रे पा दक्खिन गे हिरशो बाक्त। मिनू किरयथ-बाल सम्म जाक्दीश्शो बाक्त। किरयथ-बाल कली किरयथ-यारीम यो देंनीम। मेको यहूदा आ थर डा मुर आन सहर बाक्त। मेको पच्छिम गे बाक्ब। यहोसु १५:६-९, ६०

15 दक्खिन गे डा सांद चहिं किरयथ-यारीम आ एर ओंथ डा पच्छिम गे बाक्त। मिनू मेको सांद एफ्रोन रे नेप्तोआह आ ब्वाक्कु बुक्तीकेमी जाक्दीश्शो बाक्त। यहोसु १५:९

16 नोले मेको सांद बेन-हिन्नोम दिंम आ डोंइती डा डांडा आ पुं रे लाइब। मेको रेफाइम आन दिंम डा उत्तर गे बाक्ब। मेको सांद हिन्नोम दिंम गे लशा, यबुसी आन सहर आ दक्खिन डा देम्सीलो रे पा लुकच लशा एन-रोगेलमी तोइश्शो बाक्त।

17 मिनू उत्तर गे लशा, एन-शेमेश लाक्शा, अदुम्मीम आ डोंइती बाक्शो गेलीलोत रे रूबेन आ तौ बोहान आ फुल्लु सम्म जाक्दीश्शो बाक्त।

18 मेकेर रे पा लाक्शा बेथ-अराबाह आ उत्तर डा देम्सीलो रे अराबाह रागीम जाक्दीश्शा नुप्शो बाक्त। यहोसु १५:६३; न्यायाधीस १:२१

19 मेको सांद बेथ-होगला आ उत्तर डा देम्सीलो लाक्शा यर्दन आ दक्खिन गे बाक्शो हिक्सी समुन्द्र आ उत्तर डा ओव्रतीक सम्म लशो बाक्त। मेको दक्खिन गे डा सांद बाक्ब।

20 मिनू यर्दन खोला मेको आ पूर्व डा सांद बाक्ब। बेन्यामीन आ खिं खिं डा मुर आन रागी डा सांद नेल्ल एकोन बाक्नीम।

21 बेन्यामीन आ खिं खिं डा मुरपुकीमी तेको तेको सहर ताम्तेक्म देंशा हना, यरीको, बेथ-होगला, एमेक-केसीस,

22 बेथ-अराबाह, सेमाराइम, बेथेल,

23 आव्वीम, पारा, ओफ्रा,

24 केफार-अम्मोनी, ओप्नी, गेबा मेको आन के बाक्तीक नेल्ल पा १२ ओटा सहर नु मेको आन गाउंपुकी बाक्तेक्म।

25 गिबोन, रामाह, बेयरोथ,

26 मिस्पा, केफीरा, मोचाह,

27 रेकेम, इरपेल, तरालाह,

28 जेला, हा-एलेफ, यबुसी आन सहर, मेको कली यरूसलेम यो देंनीम, गिबा नु किरयथ-यारीम बाक्नीम। मेको आन के बाक्तीक नेल्ल पा १४ ओटा सहर नु आन गाउंपुकी बाक्तेक्म। मेको बेन्यामीन आन खिं खिं डा मुर आन रागी बाक्ब।

## 19

## सिमियोन आ मुर आन रागी

1 मिनु नोले योव्रडमेनु, सिमियोन आ खिं खिं डा मुरपुकीमी आन रागी ताम्तेक्म। मेको आन रागी यहूदा आ खिं खिं डा मुर आन रागी आ दातेमी बाक्त। उत्पत्ती ४९:५

2 मेको आन रागी तेको तेको बाक्त देंशा हना, बेयर-शेबा, मेको कली शेबा यो देंनीम, मोलादा, उत्पत्ती २१:१४, ३१, ३३

3 हासार-शुआल, बलाह, एसेम,

4 एल्लोलद, बेथुल, होरमा,

5 सिकलाग, बेथ-मारकाबोथ, हासार-सूसाह,

6 बेथ-लेबाओथ नु शारूहेन मेको आन के बाक्तीक नेल्ल पा १३ ओटा सहर नु गाउंपुकी बाक्तेक्म।

7 ऐन, रिम्मोन, एथेर नु आशान। मेको आन के बाक्तीक नेल्ल पा ४ ओटा सहर नु मेकेर डा गाउंपुकी बाक्तेक्म। मेको आन एर ओथ डा गाउं नेल्ल बालाथ-बेर, दक्खिन गे डा रामाह सम्म बाक्तेक्म।

8 मेको सिमियोन आ थर डा खिं खिं डा मुर कोव्रशा, मेको सहर नेल्ल आन एर ओथ डा गाउं बालाथ-बेएर नु नेगेब डा रामाह सम्म बाक्ब।

9 मेको सिमियोन आ खिं खिं डा मुर आन रागी बाक्त। मिनु मेको आन रागी यहूदा आ खिं खिं डा मुर आन रे पा तशो बाक्तेक्म। मारदे हना यहूदा थर आन रागी माल्शो क्येडा यो शुश बाक्माक्त। मोपतीके सिमियोन आ खिं खिं डा मुरपुकीमी मेको आन रागी यहूदा आन रागीमी ताम्तेक्म।

## जबूलून आ मुर आन रागी

10 मिनु नोले योव्रडमेनु, जबूलून आ खिं खिं डा मुरपुकीमी आन रागी ताम्तेक्म। मेको आन सांद सारीद सम्म बाक्त। उत्पत्ती ४९:१३

11 मिनु पच्छिम गे मरलाह सम्म लशा, दब्बेशेत लाक्शा, योकनाम आ नेक्था डा खोला सम्म जाकदीत्त।

12 सारीद रे पा लशा, पूर्व नां दाप्तीक गे किस्लोथ-ताबोर रागी रे दाबेराथमी गूशा याफीया सम्म डोइशशा लशो बाक्त।

13 मेकेर रे मेको पूर्व गे लशा, गाथ-हेफेर नु एथ-कासीन सम्म जाकदीशशा, यो रिम्मोन सम्म गूशो बाक्त। मेको सांद नेआह सम्म जाकदीशशो बाक्त।

14 मिनु मेको सांद हन्नातोन उत्तर गे लशा, हिरशा इफताह-एल डा दिंममी जाकदीशशा नुष्शो बाक्त।

15 मेको सांद आगाम काल्ताथ, नहालाल, शिमोन, इदलाह नु बेथलेहेम यो बाक्तेक्म। मेको आन के बाक्तीक नेल्ल पा १२ ओटा सहर नु मेकेर डा गाउंपुकी बाक्तेक्म। न्यायाधीस १:३०

16 जबूलून आ खिं खिं डा मुर आन सहर नु गाउंपुकी एकोन बाक्तेक्म।

## इस्साकार आ मुर आन रागी

17 मिनु नोले योव्रडमेनु, इस्साकार आ खिं खिं डा मुरपुकीमी आन रागी ताम्तेक्म।

18 मेको आन सहर तेको तेको बाक्तेक्म देंशा हना, येजेल, केसुल्लोथ नु शुनेम, २राजा ४:८

19 हाफ्राडम, शीओन नु अनाहारथ,

20 रब्बीत, किशयोन नु एबेस,

21 रेमेथ, एन-गन्नीम, एन-हददाह नु बेथ-पस्सेस बाक्तेक्म।

22 मेको सांद ताबोर, शहसूमा नु बेथ-शेमेश सम्म जाकदीशशा, यर्दनमी नुष्शो बाक्त। मेको आन के बाक्तीक सहर नेल्ल पा १४ ओटा सहर नु मेकेर डा गाउंपुकी बाक्तेक्म।

23 इस्साकार आ खिं खिं डा मुर आन सहर नु गाउंपुकी एकोन बाक्तेक्म।

## आशेर आ मुर आन रागी

24 मिनु नोले योव्रडमेनु, आशेर आ खिं खिं डा मुरपुकीमी आन रागी ताम्तेक्म। मेको आन रागी तेको तेको बाक्तेक्म देंशा हना, उत्पत्ती ४९:२०

- 25 हेलकाथ, हाली, बेतेन नु आकशाफ,  
 26 अल्लामेलेक, अमाद नु मिशाल बाक्तेकम। मिनु मेको सांद पच्छिममी कारमेल नु शीहोर-लिब्नाथ सम्म जाक्दीशो बाक्त।  
 27 मिनु नोले पूर्व गे बेथ-दागोन गे लशा, जबूलून नु इफताह-एल डा दिंम सम्म जाक्दीशो बाक्त। मेको उत्तर गे डा बेथ-एमेक नु नेइल लशा, पेरा गे काबुल रागीमी यूशो बाक्त।  
 28 मिनु एब्रोन, रेहोब, हम्मोन नु कानाह सहर रे पा ठेयब सीदोन सम्म जाक्दीशो बाक्त।  
 29 मिनु मेको सांद रामाह नु गारो पाइशो टायर सहर गे हिरशो बाक्त। मेको सांद लशा, होसाह गे समुन्द्र आ नेक्था डा अकजीब सहरमी नुप्शो बाक्त। यहोसु १५:४४; न्यायाधीस १:३१  
 30 उम्मा, अफेकाह नु रेहोब, नेल्ल पा मेको आन के २२ ओटा सहर नु मेकेर डा गाउंपुकी बाक्तेकम।  
 31 आशेर आ खिं खिं डा मुर आन सहर नु गाउंपुकी एकोन बाक्तेकम।

### नाप्ताली आ मुर आन रागी

- 32 मिनु नोले योव्रडमेनु, नाप्ताली आ खिं खिं डा मुरपुकीमी आन रागी ताम्तेकम। उत्पत्ती ४९:२१  
 33 मेको आन सांद हेलेफ, सा-अनानीममी बाक्शो ठेयब रवा, अदामी-नेकेब लाक्शा, यब्नेल रे लक्कुम सम्म लशा, यर्दनमी नुप्शो बाक्त।  
 34 मेको सांद पच्छिममी अचनोथ-ताबोर रे लाइशशा, हुक्कोकमी यूशो बाक्त। मिनु मेको दक्खिन गे जबूलून सम्म, पच्छिम गे आशेर सम्म, नु पूर्व गे यहूदा आ यर्दन सम्म जाक्दीशो बाक्त।  
 35 मिनु गारो पाइशो सहरपुकी चहिं सिददीम, सेर, हम्माथ, रक्कत, किन्नेरेथ,  
 36 आदामाह, रामाह, हासोर,  
 37 केदेश, एद्रेइ, एन-हासोर  
 38 इरोन, मिगदल-एल, होरेम, बेथ-अनात नु बेथ-शेमेश बाक्तेकम। मेको नेल्ल पा मेको आन के १९ ओटा सहर नु मेकेर डा गाउंपुकी बाक्तेकम। न्यायाधीस १:३३  
 39 मिनु मेको नाप्ताली आ खिं खिं डा मुर आन सहर नु गाउंपुकी एकोन बाक्तेकम।

### दान आ मुर आन रागी

- 40 मिनु नोले योव्रडमेनु, दान आ खिं खिं डा मुरपुकीमी आन रागी ताम्तेकम। मेको आन रागी तेको तेको बाक्तेकम देशा हना, उत्पत्ती ४९:१६  
 41 सोराह, एशताओल नु इर-शेमेश,  
 42 शा-आलब्बीन, आइयालोन नु इथ्लाह,  
 43 एलोन, तिम्माह नु एक्रोन, यहोसु १५:१०  
 44 एल-तेके, गिब्बेथोन नु बालाथ,  
 45 येहुद, बेने-बेराक नु गाथ-रिम्मोन,  
 46 मे-यारकोन, रक्कोन नु योप्पा आ डोंडती डा रागी बाक्तेकम। योना १:३  
 47 मिनु दान आ खिं खिं डा मुर मेको रागी ग्राचा कली श्येत जाम्तेकम। मिनु मेकोपुकीमी लेशेम सहरमी लशा, लडाइ पा तरवारमी मुर नेल्ल आन कली साइशशा ग्रातेकम। मेकोपुकी मेको सहरमी बाक्शा, मेको कली आंम किक्की आ नें दान वोइक्तेकम। न्यायाधीस १८:२७-२९  
 48 मिनु मेको दान आ खिं खिं डा मुर आन सहर नु गाउंपुकी एकोन बाक्तेकम।

### यहोसु आ रागी

- 49 मिनु मेकोपुकीमी रागी नेल्ल योव्रशा, योक्ने थुम्मे नोले इस्राएलीपुकीमी नून आ तौ यहोसु कली मेको आन दातेम रागी गेम्तेकम।  
 50 परमप्रभु यावेमी देशो खोर्देशो पा यहोसुमी पुंइशो एफ्राइम डा पहाड रागी डा तिम्नाथ-सेराह सहर मेको कली गेम्तेकम। मिनु यहोसुमी सहर सेल्शा मेकेन बाक्त। यहोसु २४:३०; न्यायाधीस २:९



51 मिनु चढेब एलाजर, नून आ तौ यहोसु नु इस्राएली आन थर थर डा ठेयब मुर नेल्ल परमप्रभु यावे आ डोंइती शिलोम गुम्तीक ताम्बु आ लाप्चोमी रागी नेल्ल योक्ने थुम्तेक्म। मोपा मेकोपुकीमी रागी योक्तीके गेय यो थुम्तेक्म। यहोसु १४:१; यहोसु १८:१

## 20

साइक्ब प्रोक्शा बाक्तीक सहर

1 मिनु नोले परमप्रभु यावेमी यहोसु कली

2 “गेम इस्राएली आन कली ‘प्रोक्शा बाक्तीक सहरपुकी वोइक्चा माल्नीनी’ दे देंचा माल्नेवे। गो मोसा रे पा इ कली देंशो खोदेंशो पा पावो। गन्ती ३५:९-२९

3 मजोक्थु, मतुइक्थु सुइमी सुइ कली साइक्तु हना, मेको साइक्ब मुर प्रोक्शा, मेको सहर लल। मेको सहर क्येक्क लेप्ब रे पा ब्रोंइतीक सहर दुम्ब।

4 मिनु मेको मोदेंशो सहरमी मुर साइक्ब मुर प्रोक्त हना, मेको सहर डा ठेयब लाप्चोमी राप्शा बाक्चा माल्ब। मिनु सहर डा ठेयब मुर आन डोंइती आं लोत्र नेंपदल। मिनु नोले मेकोपुकीमी मेको मुर कली सहर ओत्रचा नु बाक्तीक खिं गेचा माल्नीम। मिनु मेको मुर मेकोपुकी नु बाक्चा माल्ब।

5 मिनु क्येक्क लेप्ब मुरुमी मेको मुर साइक्ब कली खेदा पाप्तु हना, मेको सहर डा मुरुमी मेको मुर साइक्ब मुर कली जिम्मा गेचा मदुम्ब। मारदे हना मेकोमी मजोक्थु मतुइक्थु साइक्तु।

6 मिनु निसाफ दुम नोले नु मेकेर डा नेल्ल क्येडा ठेयब चढेब मबेक्म सम्म मेको मुर मेको सहरमीन बाक्चा माल्ब। नोले मेको मुर आंम सहर आंम खिंमी, ते रे प्रोक्शा जाक्मे, मेकेन लेन्ने चाप्ब।

7 मिनु मेकोपुकीमी नाप्ताली आ पहाड रागी गालील डा केदेश सहर वोइक्तेक्म। एफ्राइम पहाड रागी डा शेकेम नु यहूदा आ पहाड रागी डा किरयथ-अरबा सहर वोइक्तेक्म। मेको कली हेब्रोन यो देंनीम। ग्रीक लोत्रम गिल्याल कली गालील देंब। यहोसु १९:३७; यहोसु १५:१३

8 यर्दन नु यरीको आ पूर्व गेरूबेन आ थर आन गोरशो रागीमी बाक्शो दिंम डा बेसेर सहर वोइक्तेक्म। गाद आ थर डा गिलाद रागीमी रामोथ सहर वोइक्तेक्म। मनस्से थर आन बाशानमी गोलान सहर वोइक्तेक्म। मेकोपुकी मोपा मुर बाक्तीक सेल्लेक्म। ब्यवस्था ४:४१-४३

9 सुइ इस्राएली नु मेको आन दातेमी बाक्शो अर्को रागी डा मुरुमी मतुइक्थु मुर साइक्तु हना, मेको मोदेंशो वोइश्शो सहरमी प्रोक्ने चाप्ब। निसाफ दुम्चा क्येडा डोंइती क्येक्क लेप्ब मुर आन गुइ रे मेको मुर साइक्चा मपुंइसेक्ल” देंत।

## 21

लेवी आन बाक्तीक सहरपुकी

1 मिनु लेवी थर डा ठेयब मुरपुकी, चढेब एलाजर, नून आ तौ यहोसु नु इस्राएल थर थर डा ठेयब मुर आन डोंइती बुक्तेक्म। यहोसु १४:१; गन्ती ३५:२-८

2 मेको कनान रागी डा शिलोम बुक्शा, मेको आन कली “परमप्रभु यावेमी मोसा कली अरेशो खोदेंशो पा, गे आंइ कली बाक्चा कली सहरपुकी नु आंइ बी ब्यफ आन कली योत्रतीक रूपुकी गेचा माल्नीनी” देंतेक्म।

3 मिनु परमप्रभु यावेमी अरेशो खोदेंशो पा इस्राएलीपुकीमी लेवी आन कली आंम आंम रागी रे पा सहर नु बी ब्यफ, क्यारश भेडा योत्रतीक रूपुकी गेम्तेक्म।

4 मिनु योत्रडमेनु, कोहाथ आ मुर आन खिं खिं डा गूतेक्म। मेकोपुकी लेवी आ थर चढेब हारून आ चच युइ बाक्तेक्म। मेकोपुकीमी यहूदा आ थर, सिमियोन आ थर नु बेन्यामीन आ थर रे पा १३ ओटा सहर ताम्तेक्म। गन्ती ३:१७-३९

5 लीशो खिं खिं डा कोहाथ आ चच युइमी एफ्राइम आ थर, दान आ थर नु मनस्से आ उइक्थ थर रे पा १० ओटा सहर ताम्तेक्म।

6 मिनु गेरशोन आ खिं खिं डा मुर आन चच युइमी इस्साकार आ थर, आशेर आ थर, नाप्टाली आ थर नु बाशानमी बाकब मनस्से आ उइक्थ थर रे पा १३ सहर ताम्तेक्म।

7 मिनु मेरारी आ चच युइ आन खिं खिं डा मुरुमी रूबेन आ थर, गाद आ थर नु जबूलून आ थर रे पा १२ ओटा सहर ताम्तेक्म।

8 मिनु परमप्रभु यावेमी मोसा कली अरेशो खोदेशो पा इस्राएलीपुकीमी लेवी थर डा मुर आन कली मेको सहरपुकी नु बी ब्यफ, क्यारश भेडा योव्रतीक रू गेम्तेक्म।

9 मेकोपुकीमी यहूदा आ थर डा खिं खिं डा मुर नु सिमियोन आ थर डा खिं खिं डा मुरपुकीमी तेको तेको सहर ताम्तेक्म देशा हना,

10 लेवी आ थर डा हारून आ चच युइ, कोहाथ आ खिं खिं डा मुरपुकीमी ताम्तेक्म। मारदे हना नेल्ल क्येडा डोइती योव्रडमेनु, मेको आन नें गूत।

11 मिनु मेकोपुकीमी मेको आन कली यहूदा आ पहाड रागीमी किरयथ-अरबा नु आ नेक्था डा योव्रतीक रूपुकी गेम्तेक्म। किरयथ-अरबा कली हेब्रोन यो देनीम। मेको अरबा अनाक आ आफ बाक्त। यहोसु २०:७

12 तन्न मेकोपुकीमी मेको सहर डा रूपुकी नु मेकेर डा गाउपुकी चहिं यपुन्ने आ तौ कालेब कली गेशो बाक्तेक्म। यहोसु १४:३४; यहोसु १५:१३

13 मिनु चढेब हारून आ चच युइ आन खिं खिं डा मुरपुकीमी मुर साइक्ब मुर प्रोक्शा लशा बाक्तीक सहर हेब्रोन, लिब्ना,

14 यत्तीर, एश्तेमोआ,

15 होलोन, देबीर,

16 ऐन, युत्ता नु बेथ-शेमेश नु आन बी ब्यफ, क्यारश भेडा योव्रतीक रू नेल्ल पा मेको निक्शी थर रे ९ ओटा सहर ताम्तेक्म। १सामुएल ६:१२,१५

17 मिनु बेन्यामीन आ थर रे पा गिबोन नु गेवा,

18 अनाथोथ, अल्मोन नु आन बी ब्यफ, क्यारश भेडा योव्रतीक रू नेल्ल पा ४ सहर ताम्तेक्म। येरमीया १:१

19 चढेब हारून आ चच युइ आन खिं खिं डा मुर आन के नेल्ल पा १३ ओटा सहर नु आन बी ब्यफ, क्यारश भेडा योव्रतीके दुम्त।

20 लेवी आ थर डा कोहाथ आ खिं खिं डा लीशो मुर आन कली योव्रडमेनु, एफ्राइम आ थर आ रागी रे पा तेको तेको सहरपुकी ताम्तेक्म देशा हना, यहोसु २०:७

21 एफ्राइम आ पहाड रागीमी मुर साइक्ब मुर बाक्तीक सहर शेकेम नु गेजेर,

22 किब्साइम नु बेथ-होरोन, नेल्ल पा ४ ओटा सहर नु आन बी ब्यफ, क्यारश भेडा योव्रतीक रू ताम्तेक्म।

23 दान आ थर रे एल-तेके, गिब्बेथोन,

24 आइयालोन, गाथ-रिम्मोन, नेल्ल पा ४ ओटा सहर नु आन बी ब्यफ, क्यारश भेडा योव्रतीक रू ताम्तेक्म।

25 मनस्से आ उइक्थ थर रे पा तानाक नु गाथ-रिम्मोन सहर निक्शी नु आन बी ब्यफ, क्यारश भेडा योव्रतीक रू ताम्तेक्म।

26 कोहाथ आ खिं खिं डा लीशो मुर आन कली १० ओटा सहर नु आन बी ब्यफ, क्यारश भेडा योव्रतीक रू गेम्तेक्म।

27 मेकोपुकीमी लेवी थर डा गेरशोन आ खिं खिं डा मुर आन कली मनस्से आ उइक्थ थर रे पा बाशानमी मुर साइक्ब मुर प्रोक्शा लशा बाक्तीक सेल्शो गोलान नु बेयश्तेराह, सहर निक्शी नु आन बी ब्यफ, क्यारश भेडा योव्रतीक रू गेम्तेक्म। यहोसु २०:८

28 मिनु इस्साकार आ थर रे पा किश्योन, दावेराथ,

29 यरमुथ नु एन-गन्नीम, नेल्ल पा ४ ओटा सहर नु आन बी ब्यफ, क्यारश भेडा योव्रतीक रू गेम्तेक्म।

- 30 मिनु आशेर आ थर रे पा मिशाल नु अब्दोन,  
 31 हेल्काथ नु रेहोब, नेल्ल पा ४ ओटा सहर नु आन बी ब्यफ, क्यारश भेडा योव्रतीक रू गेम्तेक्म।  
 32 मिनु नाप्ताली आ थर रे पा गालील रागीमी मुर साइक्ब मुर प्रोकशा लशा बाक्तीक सहर केदेश, हम्मोथ-डोर नु कारतान, नेल्ल पा सहर सां नु आन बी ब्यफ, क्यारश भेडा योव्रतीक रू गेम्तेक्म। यहोसु २०:७  
 33 मेको गेरशोनी आ सहर नेल्ल पा १३ ओटा सहर नु आन बी ब्यफ, क्यारश भेडा योव्रतीक रू गेम्तेक्म।  
 34 मिनु लेवी आ थर डा लीशो मेरारी आ खिं खिं डा मुर आन कली जबूलन आ थर रे पा योक्नाम, कारताह,  
 35 दीम्नाह नु नहलाल, नेल्ल पा ४ ओटा सहर नु आन बी ब्यफ, क्यारश भेडा योव्रतीक रू गेम्तेक्म।  
 36 मिनु रूबेन आ थर डा बेसेर नु याहास, यहोसु २०:८  
 37 केदेमोथ नु मेफा-आथ, नेल्ल पा ४ ओटा सहर नु आन बी ब्यफ, क्यारश भेडा योव्रतीक रू गेम्तेक्म।  
 38 मिनु गाद आ थर डा मुर साइक्ब मुर प्रोकशा लशा बाक्तीक गिलाद रागी डा रामोथ, महा-नाइम, यहोसु २०:८  
 39 हेशबोन नु याजेर, नेल्ल पा ४ ओटा सहर नु आन बी ब्यफ, क्यारश भेडा योव्रतीक रू गेम्तेक्म।  
 40 मिनु लेवी आ लीशो मेरारी आ खिं खिं डा मुर आन कली योव्रशा १२ ओटा सहर गेम्तेक्म।  
 41 मिनु इस्राएली आन रागी आन दातेमी लेवी आन के ४८ ओटा सहर नु आन बी ब्यफ, क्यारश भेडा योव्रतीक रू दुम्तेक्म।  
 42 एको सहर नेल्ल आन एर ओंथ बी ब्यफ, क्यारश भेडा योव्रतीक रू बाक्तेक्म।  
 43 मोपा परमप्रभु यावेमी इस्राएली आन कली “गेनुड” दे मेको आन किकी पिपी आन कली जशो कसम खाप्तु। मिनु इस्राएलीपुकीमी मेको रागी कली आंम के सेल्शा बाक्तेक्म। उत्पत्ती १२:७  
 44 मिनु परमप्रभु यावेमी इस्राएली आन किकी पिपी आन कली कसम जशो खोदेशो पा नेल्ल रे पा नाइक्वा गेप्तु। मेको आन जोरी सत्रु नेल्ल मेको नु बुम्तेक्म। परमप्रभु यावेमी मेको आन जोरी सत्रु इस्राएली नेल्ल आन गुइमी गेप्तु। ब्यवस्था १२:९-१०  
 45 मिनु परमप्रभु यावेमी पशो रिम्शो लोत्र का सम्म यो मली, नेल्ल खाप्तु। यहोसु २३:१४; १राजा ८:५६

## 22

पूर्ब डा वोंइश मुरपुकी खिं लेशो

- 1 मिनु यहोसुमी रूबेन आ थर, गाद आ थर नु मनस्से आ उइक्थ थर डा वोंइश मुर आन कली ब्रेत्ताक्व।  
 2 मिनु मेको आन कली “परमप्रभु यावे आ गेय पाइब मोसामी इन कली अरेशो नेल्ल पाइतीनी। आं अरेशो लोत्र यो नेल्ल टीतीनी। गन्ती ३२:२०-२२; ब्यवस्था ३:१८-२०  
 3 गेपुकीमी शुश नाक्ती सम्म इन लोक्ब आन कली यो वारच पा मप्रोंइनी। मिनु परमप्रभु यावे, इन परमप्रभु कली अरेशो नेल्ल टीतीनी।  
 4 मुल परमप्रभु यावे, इन परमप्रभुमी आ देशो खोदेशो पा इन लोक्ब आन कली नाइक्वा गेशो बाक्त। मुल गेपुकी परमप्रभु यावे आ गेय पाइब मोसामी इन कली यर्दन आइक्ची हांबु गेशो इन खिं खिं लेतीन। हिब्रू ४:८  
 5 मुल गे परमप्रभु यावे आ गेय पाइब मोसामी अरेशो लोत्र होस पा पने। परमप्रभु यावे, इन परमप्रभु कली दाक्तीन। मेको आ लां गाक्कीन। आ अरेशो लोत्र टिने। मेको कली मप्रोनीन। गे इन थुं नेल्लेमी परमप्रभु यावे आ गेय पने” दैत। ब्यवस्था १०:१२  
 6 मिनु यहोसुमी मेको आन कली आसीक गेशा, सोइक्ताक्व। मिनु मेकोपुकी आंम आंम खिं लाम्तेक्म।

7 मनस्से आ उइक्थ थर कली मोसामी बाशानमी आंम रागी गेप्टु। तन्न अर्को उइक्थ थर कली यहोसुमी यर्दन आ पच्छिम गे मेको आन लोकब नु गेप्टु। मिनु यहोसुमी मेको आन कली आंम आंम खिंम सोइक्ची ना मेको आन कली आसीक गेप्टु।

8 मिनु मेको आन कली “इन जोरी सत्रु रे रोइश्शो शुश शोंप नु शुश बी ब्यफ, क्यारश भेडा, शुश सुन चांदी, कांसा फलाम नु शुश वासी लाइश्शा, इन लोकब आन कली यो योक्शा गेचा माल्नीनी” देंत। गन्ती ३१:२७

9 मोपा रूबेन आ थर, गाद आ थर नु मनस्से आ उइक्थ थर डा वोंइश मुर कनान रागी डा शिलो रे इस्राएलीपुकी नु ब्राशा, गिलाद रागी लेत्तेक्म। मेको रागी परमप्रभु यावे आ देंशो नु मोसा आ पतीकेमी डोंइती रे ग्राशा, आंम के सेल्शा बाक्ने थुम्शो बाक्तेक्म।

10 मिनु मेकोपुकी कनान रागी डा यर्दन खोला आ नेक्था गेलीलोत सहर जाक्दीत्तेक्म। मिनु मेको रूबेन आ थर, गाद आ थर नु मनस्से आ उइक्थ थरमी यर्दन खोला नेक्था थम ठेयब चढ़ेतीक का सेल्तेक्म।

11 मिनु इस्राएलीपुकीमी “रूबेन आ थर, गाद आ थर नु मनस्से आ उइक्थ थरमी कनान रागी आ सांदमी यर्दन आ नेक्था इस्राएली आन रागीमी ठेयब चढ़ेतीक का सेल्तेक्म” देंशो नेतेक्म।

12 मिनु इस्राएलीपुकीमी मेको नेन्मे नोले, मेकोपुकी नु लडाइ पचा कली शिलोमी खुम्साक्म।

13 मिनु इस्राएलीपुकीमी चढ़ेब एलाजर आ तौ फिनेहास कली गिलाद रागीमी रूबेन आ थर, गाद आ थर नु मनस्से आ उइक्थ थर आन बाक्तीकेमी सोइक्ताक्म। गन्ती २५:७

14 मेको नु काथा इस्राएल डा नेल्ल थर रे पा १० जना ठेयब मुर आन कली यो सोइक्ताक्म।

15 मिनु मेकोपुकी रूबेन आ थर, गाद आ थर नु मनस्से आ उइक्थ थर बाक्तीक गिलाद रागी जाक्दीश्शा, मेको आन कली

16 “परमप्रभु यावे आ मुर नेल्लेमी ‘मारदे गेपुकीमी परमप्रभु यावे, इस्राएली आन परमप्रभु रे नोले शोंइसीनी? गे दोपा परमप्रभु यावे रे पा डोन लशा, मेको कली मटिथु, आंम कली चढ़ेतीक सेल्नी? लेवी १७:८-९; ब्यवस्था १२:१३-१४

17 मार, पेओर नु पशो पापम आंइ कली मजाक्दीम्मे? मेना परमप्रभु यावे आ मुर शुश बेक्तेक्म हना यो, मेको आ पाप रे गो मुल सम्म आंम कली ठीक सेल्ने मचाप्शो बाक्नीक। गन्ती २५:१-९

18 मुलाक्त गेपुकी परमप्रभु यावे रे नोले शोंइसीनी? गे मुलाक्ती परमप्रभु यावे कली टिचा प्रोंइतीनी हना, मेको आ दीसा इस्राएली नेल्ल आन कली तशा, गाइक्ब, दे मतुइक्तीनी?

19 मिनु आंम इन रागी ग्रांग्रा दिशो बाक्त हना, ओंथ हांबु परमप्रभु यावे आ रागी नु आ बाक्तीक पिशा, गोपुकी नु रागी योक्कीन। तन्न गे परमप्रभु यावे नु आंइ कली मटिथु, परमप्रभु यावे, इ परमप्रभु आ चढ़ेतीक क्येडा लाक्शा, आंम के चढ़ेतीक मसेलीन।

20 मिनु जेराह आ तौ आकानमी मटिथु, खुइ पवानु, परमप्रभु यावे आ गाइश्शोमी नेल्ल आन कली मार दुम्मे? आकान ला मवे, इस्राएली नेल्लेमी श्येत जाम्तेक्म’ ” देंतेक्म। यहोसु ७:६-१३

21 मिनु रूबेन आ थर, गाद आ थर नु मनस्से आ उइक्थ थरमी इस्राएल आ थर थर डा ठेयब मुर आन कली गन्ती १:१६; गन्ती १०:४

22 “परमप्रभु यावे, नेल्ल क्येडा सक्ति पाइश्शो परमप्रभु यावेमी नेल्ल तुइक्ब। गो परमप्रभु यावे कली मटिशो बाक्तय हना, इस्राएलीपुकीमी यो मेको तुइक्तमेक्ल। मुलाक्त आंइ कली सतीन।

23 गोपुकीमी परमप्रभु यावे आ नोले खोइक्चा प्रोंइशा, आंम कली चढ़ेतीक सेल्शा, मेको चढ़ेतीकेमी चोशा चढ़ेशो, अन्न चढ़ेशो, दुशा बाक्तीक चढ़ेशो चढ़ेतय हना, परमप्रभु यावेमी आंइ कली सजाइ गेवल।

24 तन्न ममाइ, गोपुकीमी मारदे एको चढ़ेतीक सेल्लक देंशा हना, इन चच युइमी आंइ चच युइ आन कली ‘गे परमप्रभु यावे, इस्राएली आन परमप्रभु नु मार पाइक्मुनी डा?

25 परमप्रभु यावेमी यर्दन कली गो आंड सांद सेल्शा गेपु। गे रूबेन आ थर नु गाद आ थर परमप्रभु यावे के मबाक्नीनी। मिनु इन चच युडमी आंड चच युड आन कली परमप्रभु यावे कली मान पा हिंचा तेक्नीमी' देंनीमी कों।

26 मोपतीके गोपुकीमी 'चढ़ेतीक का सेल्य। चोशा चढ़ेतीक नु अरु चढ़ेतीक चढ़ेचा कली ममाइ।

27 तन्न मेको चढ़ेतीक गे नु गो आंड दातेमी नु आंड चच युड आन दातेमी एको चढ़ेतीक सांकछी दुम्ल। मिनु गोपुकीमी परमप्रभु यावे कली आ बाक्तीकेमी ठेयब सेल्य। मिनु मेकेर गो आंड चोशा चढ़ेशो नु दुशा बाक्तीक चढ़ेशो चाक्शा चढ़ेनय। मिनु इन चच युडमी गो आंड चच युड आन कली "गे परमप्रभु यावे आ मुर मबाक्नीनी" दे देंने मचाप्नीम, दे एको चढ़ेतीक सेल्लक। यहोसु २४:२७

28 मिनु गोपुकीमी मेकोपुकीमी खेयप का आंड कली कि आंड चच युड आन कली मोदेशो देंतेक्म हना, गोपुकीमी मेको आन कली मेको आंड किकी पिपीमी परमप्रभु यावे कली चढ़ेतीक सेल्लो थोव्रक कोव्रडीन। चोशा चढ़ेतीक नु अरु चढ़ेतीक चढ़ेचा कली ममाइ, तन्न गे नु गो इं दातेमी सांकछी दुम्ल' दे सेल्लक।

29 मिनु गोपुकीमी थमा पा मुलाक्ती परमप्रभु यावे कली मटिथु, मेको आ नोले खोडक्चा प्रोंडशा एको चढ़ेतीक मसेल्लक। मेको चढ़ेतीकेमी चोशा चढ़ेतीक, अन्न चढ़ेतीक नु अरु चढ़ेतीक चढ़ेचा कली यो मसेल्लक। परमप्रभु यावे, आंड परमप्रभु आ बाक्तीक आ डोंडती बाक्शो चढ़ेतीके क्येडा लाक्शा अरु मसेल्लनीकी" देंतेक्म।

30 मिनु चढ़ेब फिनेहास, मेको नु बाक्ब इस्राएली आन ठेयब मुरपुकी नु थर थर डा ठेयब मुरपुकीमी रूबेन आ थर, गाद आ थर नु मनस्से आ उडक्थ थर आन लोव्र नेंशा ग्येरसाक्म।

31 मिनु चढ़ेब एलाजर आ तौ फिनेहासमी रूबेन, गाद नु मनस्से आ थर डा मुर आन कली "परमप्रभु यावे गो आंड दातेमी बाक्ब, दे मुलाक्ती गोपुकीमी तुडक्ताक्क। मारदे हना एको चढ़ेतीक सेल्लो कली परमप्रभु यावे रे पा नोले मशोंडसीनी। मुल चहिं गेपुकीमी इस्राएली आन कली परमप्रभु यावे आ गुड रे प्रोंडतीनी" देंत।

32 मिनु चढ़ेब एलाजर आ तौ फिनेहास नु ठेयब मुर नेल्ल गिलाद रागी रे रूबेन नु गाद आ थर डा मुर गुम्टीके रे कनान रागी गे लेत्तेक्म। मिनु इस्राएली आन कली मेको लोव्र नेल्ल शेंताक्म।

33 मेको लोव्र नेंशा नेल्ल ग्येरसाक्म। मिनु परमप्रभु कली "गे रिमशो पाइब बाक्नीनी" दे ठेयब सेल्लेक्म। मिनु मेकोपुकीमी लेंशा रूबेन नु गाद आस थर बाक्शो रागी कली खतम सेल्लतीक नु लडाइ पतीक लोव्र गेनायो मपा।

34 मिनु रूबेन नु गाद आस थर डा मुरुमी मेको चढ़ेतीक आ नें "सांकछी" वोडक्तेक्म। मिनु मेको आ अर्थ मार बाक्त देशा हना "गे नु गो इं दातेमी परमप्रभु यावे थमा पा परमप्रभु बाक्ब, दे मेको चढ़ेतीक सांकछी बाक्ब" देंतेक्म।

## 23

### यहोसु आ नोले डा लोव्र

1 मिनु शुश नाक्त नोले परमप्रभु यावेमी इस्राएली आन कली आन जोरी सत्रु रे पा प्रोंडशा, नाडशशा बाक्चा गेपु। मेना यहोसु खाल्पा दुम्ला, शुश बर्स दुम्लो बाक्त। यहोसु २१:४४

2 मिनु यहोसुमी इस्राएली नेल्ल आन खाल्पा, आन ठेयब मुर, आन निसाफ पाइब नु मेको आन सासन पाइब आन कली ब्रेत्ताक्व। मिनु मेकोमी मेको आन कली "गो मुल खाल्पा दुम्लती। शुश बर्स यो दुम्लती।

3 परमप्रभु यावे, इन परमप्रभुमी मेको रागी रागी डा मुर आन कली गे इन पर्वम मार मार पवा, गेपुकीमी मेको नेल्ल ताडतीनी। परमप्रभु यावे, इन परमप्रभुमी इन पचा डा लडाइ आमान पापु।

4 गोम योक्शा, लीशो रागी इन थर थर डा मुर आन कली गेता। मिनु गो यर्दन रे पच्छिम गे डा ठेयब समुन्द्र सम्म रागी नेल्ल ग्राती।

5 परमप्रभु यावे, इन परमप्रभुमी मेको लीशो मुर आन कली इन डोंइती रे गुंडब। मिनु मेकोमी मेको आन कली इन डोंइती रे खेरब। मिनु परमप्रभु यावे, इन परमप्रभुमी देशो खोदेशो पा, मेको आन रागी इन के सेल्नीनी।

6 गे थम बोल्यो दुमीन। मिनु मोसा आ ब्रेक्शो अरेशो लोत्र होस पा टिने। गे ग्युरा पेरा गे गेनायो मलने। ब्यवस्था ५:२९

7 गे इन दातेमी बाक्शो अर्को रागी डा मुरपुकी नु मब्वाइसीन। मेको आन देवता आन नें मथिने। मेको आन नेंमी कसम मजने। मेको आन कली पूजा मपने। मिनु मेको आन डोंइती बाप्शा सेउ मपने। प्रस्थान २३:१३-२४

8 तन्न गेपुकी मुलाकत डा नाकत सम्म पशो खोदेशो पा परमप्रभु यावे, इन परमप्रभु नु ला बाक्कीन।

9 परमप्रभु यावेमी इन डोंइती रे ठेयब सक्ति पाइशो रागी डा मुर आन कली खेरशो बाक्ब। मिनु मुलाकत सम्म मेको रागी डा मुर सुइमी यो गे इन कली ग्राने मचाप्शो बाक्तेकम। लेवी २६:७-८; ब्यवस्था २८:७

10 इन मुर कामी मेको आन के हजार का मुर आन कली खेरने चाप्ब। मारदे हना आ देशो खोदेशो पा इन लडाइ पचा डा परमप्रभु यावे, इन परमप्रभुमी पाइब।

11 मोपतीके गे परमप्रभु यावे, इन परमप्रभु कली दाक्तीन। मिनु होस पने।

12 तन्न गे नोले शोंइसाक्नी हना नु मेको रागी डा इन दातेमी लीशो मुरपुकी नु गारपाइक्तीनी हना, गे इन तमी मेको आन तौ कली गेतीनी हना, इन तौ कली मेको आन तमी चाक्तीनी हना नु मेको मुरपुकी नु गारशा गेय पाइतीनी हना,

13 परमप्रभु यावे, इन परमप्रभुमी मेको रागी डा मुर आन कली इन डोंइती रे मखेरब, दे तुइक्तीन। तन्न मेकोपुकी इन कली ग्याइल नु ब्वारद दुन्नीम। मेकोपुकी इन ची कली युक्तीक नु इन मिक्च कली चू दुन्नीम। परमप्रभु यावे, इन परमप्रभुमी इन कली गेशो रिम्शो रागी रे गे मबेक्नी सम्म मोदेशो दुम्ब। गन्ती ३३:५५; ब्यवस्था ७:१६; न्यायाधीस २:३

14 नेनीन, गो मुल मुर नेल्ल खोदेशो पा बेक्चा चिकताकड। मिनु परमप्रभु यावे, इन परमप्रभुमी इन कली देशो रिम्शो लोत्र मारेइ मली। मेकोमी नेल्ल इन कली खाप्शो बाक्ब। मिनु का सम्म यो मखाइक्थु पाप्तु, दे गे इन थु डा मिम्तीकेमी तुइक्नीनी। यहोसु २१:४५

15 दोपा परमप्रभु यावे, इन परमप्रभुमी इन कली देशो रिम्शो लोत्र नेल्ल खाप्बा, मोपा परमप्रभु यावेमी गे आ अरेशो लोत्र मटीतीनी हना, इन कली देशो हिंच कोंइतीक लोत्र यो खाप्ब। मिनु परमप्रभु यावे, इन परमप्रभुमी इन कली एको रिम्शो रागी रे खेरशा, खतम सेल्ब। ब्यवस्था २८:१५-४७

16 गेपुकी परमप्रभु यावे, इन परमप्रभु आ कबल कली प्रोंइशा, अरु देवी देवता आन कली ठेयब सेल्थ लाइतीनी हना नु मेको आन कली बाप्शा सेउ पाइतीनी हना, परमप्रभु यावे शुश चुरशा, मेकोमी इन कली एको रिम्शो रागी रे रीब पा खेरशा खतम सेल्ब” दैत।

## 24

### शेकेम सहरम पशो कबल

1 मिनु यहोसुमी इस्राएली आन थर नेल्ल कली शेकेममी इस्राएली आन खाल्पा, आन ठेयब मुर, आन निसाफ पाइब नु मेको आन सासन पाइब आन कली ब्रेत्ताकव। मिनु मेको नेल्ल परमप्रभु आ डोंइती जाक्शा बाक्तेकम।

2 मिनु यहोसुमी मुर नेल्ल आन कली “परमप्रभु यावे, इस्राएली आन परमप्रभुमी ‘साइ नेसी इन किकी पिपी, अब्राहाम नु नाहोर आ आफ तेराह युफ्रेटीस खोला आ आइक्ची हांबुम बाक्शो बाक्तेकम। मिनु मेकोपुकीमी अरु देवी देवता आन कली ठेयब सेल्तेकम। उत्पत्ती ११:२६; उत्पत्ती ३१:१९; उत्पत्ती ३५:२

3 तन्न गो इन किकी पिपी अब्राहाम कली खोला आइक्ची हांबु रे पा पित्ता। मिनु मेको कली कनान रागी नेल्ल हिरताकड। मिनु सोशा बोशा, इसहाक माइशो तौ का गेता।

4 मिनु इसहाक कली याकूब नु एसाव माइशो तौ निक्शी गेता। मिनु एसाव कली सेइर पहाडम बाक्चा कली गेता। मिनु याकूब नु आ तौपुकी चहिं इजीप्त रागी लाम्तेक्म। उत्पती ३२:४; उत्पती ४६:६

5 मिनु नोले गो मोसा नु हारून कली सोइक्ताक्डसी। मिनु गो इजीप्त डा मुर आन कली श्येत गेता। मिनु गो इन कली मेकेर रे गुंडताक्नी। प्रस्थान ३:१०

6 मिनु गो इन किकी पिपी आन कली इजीप्त रागी रे पा गुंडशा पित्ता। मिनु मेकोपुकी लल समुन्द्र सम्म जाक्तेक्म। इजीप्त डा मुरपुकीमी इन किकी पिपी आन कली शारा नु बग्गीमी लल समुन्द्र सम्म खेदा पाम्तेक्म। प्रस्थान १२:३३, ५१

7 मिनु खेदा पाइब आन कली तशा मेकोपुकीमी परमप्रभु यावे, आं कली “वारच पाइय्यीकी” दे आं कली थोम्तेक्म। मिनु गो मेकोपुकी नु खेदा पाइब आन दातेमी छिडछिड सेल्ला। मिनु मेको खेदा पाइब नेल्ल आन कली ब्वाक्कुमी खुम्शा साइक्तामी। गो इजीप्त रागी डा मुर आन कली मार मार पडा, गे आंमा ताइतीनी। मिनु नोले गेपुकी शुश नाक्ती सम्म गोरशो रागीमी बाक्तीनी। प्रस्थान १४:--

8 मिनु गो इन कली यर्दन आ पूर्ब एमोरी आन रागीमी चाक्ता। मिनु मेकोपुकीमी गेपुकी नु लडाइ पाम्तेक्म। मिनु गो मेको आन कली इन गुडमी गेता। गो मेको आन कली इन डोंइती खतम सेल्ला। मिनु गेपुकीमी मेको आन रागी आंम के सेल्लतीनी। गन्ती २१:२५, ३१

9 मिनु मोआब डा पिप सिप्पोर आ तौ बालाकमी इस्राएलीपुकी नु लडाइ पचा मिम्शा, इन कली सराप पचा कली बेओर आ तौ बालाम कली ब्रेथ सोइक्ताक्व। गन्ती २२:-

10 तन्न गो बालाम आ लोव्र मनेनु। मोपतीके मेकोमी इन कली आसीक गेस डा गेस पाप्तु। मिनु गो इन कली बालाम आ गुड रे पा प्रोंइता। गन्ती २३:११, २०

11 मिनु नोले गेपुकी यर्दन शोक्सीशा यरीकोमी जाक्तीनी। मिनु यरीको डा मुरपुकी एमोरी, परिज्जी, कनानी, हिली, गिरगाशी, हिठ्वी नु यबुसीपुकीमी गेपुकी नु लडाइ पाम्तेक्म। तन्न गो मेको आन कली इन गुडमी गेता। यहोसु ३:१०; यहोसु ६:१-२१

12 गो इन डोंइडोंइती हिक्वा सोइक्ताक्ड। मेकोमी एमोरी आन पिप निक्शी आस कली खेदा पाम्तेक्म। गे इन तरवार नु लिब्रामी खेदा पचा ममाल्नी। प्रस्थान २३:२८; यहोसु १०:१-२

13 गो इन कली इन मशोक्शो रू, रागी नु इन मसेल्थो सहर गेता। मिनु गेपुकी मेकेर बाक्नीनी। गेपुकीमी मखुम्शो अडगुर रू नु तेल रवा डा फल जना जन बाक्नीनी’ दे परमप्रभुमी देंत’ दे यहोसुमी मुर नेल्ल आन कली देंत। ब्यवस्था ६:१०-११

14 मिनु यहोसुमी “मोपतीके मुल परमप्रभु यावे कली मान पा हिंशा, मेको कली थमा पा मप्रोंइथु, गेय पने। इन किकी पिपीमी खोला आइक्की हांबु नु इजीप्त रागीमी पूजा पशो देवी देवता आन कली ताइक्तीनी। परमप्रभु यावे कली ठेयब सेलीन। यहोसु २४:२; प्रस्थान ३२:-

15 तन्न परमप्रभु यावे आ नें ठेयब सेल्चा मदाक्नीनी हना, सु कली ठेयब सेलीनी? मुलाक्ती योव्रडीन। गे इन किकी पिपीमी खोला आइक्की हांबुम पूजा पशो देवी देवता आन कली ठेयब सेलीनी देय मुल बाक्शो एमोरी आन रागी डा देवी देवता आन कली ठेयब सेलीनी? योव्रडीन। तन्न गो नु आ खिं डा मुरुमी परमप्रभु यावे कली ला ठेयब सेलीनी” देंत। ब्यवस्था ६:१३-१४

16 मिनु मुरपुकीमी “गो गेनायो परमप्रभु यावे कली मप्रोंइनीकी। मिनु अरु देवी देवता आन कली पूजा मपाइनीकी।

17 मारदे हना परमप्रभु यावे, आंइ परमप्रभुमी आंइ कली नु आंइ किकी पिपी आन कली इजीप्त रागीम वाइल दुम्शो खिं रे गुंडशा पिशो बाक्त। मिनु मेकोमी आंइ डोंइती दुम्तीक ठेयब ठेयब छक लाक्चा डा गेय पाप्तु। गो ते लाइतक हना यो, परमप्रभु यावेमी आंइ कली कोव्रना कोव्रन बाक्त।

18 मिनु परमप्रभु यावेमी आंइ डोंइती रे एको रागीम बाक्ब एमोरी आन कली खेरतु। मोपतीके गोपुकीमी यो परमप्रभु यावे कली ठेयब सेलीनक। मारदे हना मेको आंइ परमप्रभु बाक्ब” देंतेक्म।

19 मिनु यहोसुमी मुर आन कली “गेपुकीमी परमप्रभु यावे कली ठेयब सेल्ने मचाप्नीनी। मारदे हना मेको का ला परमप्रभु नु रुश पाइब परमप्रभु बाक्ब। मिनु मेकोमी इन मरिम्शो पशो नु इन पाप मक्याम्ब। ब्यवस्था २९:३; प्रस्थान २०:५

20 गेपुकीमी परमप्रभु यावे कली प्रॉइशा, अरु देवी देवता आन कली पूजा पाइतीनी हना, इन कली डोंइती रिम्शो पा, नोले मरिम्शो पचा गोइब। मिनु इन कली खतम पोक्ब” देंत।

21 मिनु मुरपुकीमी यहोसु कली “ममाइ, गोपुकीमी परमप्रभु यावे कली ठेयब सेल्नीकी” देंतेक्म।

22 मिनु यहोसुमी “गेपुकीमी परमप्रभु यावे कली ‘ठेयब सेल्नीक’ देंशा, गे आंमा सांकछी दुम्तीनी” देंत। मिनु मेकोपुकीमी “गो थमा पा सांकछी दुम्तक” देंतेक्म।

23 यहोसुमी “मुल गेपुकी नु बाक्शो देवी देवता ताइक्तीन। इन थुं परमप्रभु यावे, इस्राएली आन परमप्रभु गे हिरदीन” देंत। उत्पत्ती ३५:२;

24 मिनु मुरपुकीमी यहोसु कली “गो परमप्रभु यावे, आंइ परमप्रभु कली ठेयब सेल्नीकी। मेको आ लोव टीनीक” देंतेक्म।

25 मेको नाक्ती यहोसुमी मुर आन कली कबल पाप्तु। शेकेममी मेको आन कली पतीक नु मपतीक नेल्ल ब्रेक्ताक्व। २राजा २५:३

26 मिनु यहोसुमी मेको ब्रेक्स नेल्ल परमप्रभु आ अरेशो लोव ब्रेक्तीक किताबमी ब्रेक्ताक्व। मिनु मेकोमी ठेयब फुल्लु का लाइशशा, परमप्रभु यावे आ बाक्तीक आ नेक्था डा ठेयब रवा आ पुंम खुक्तु। उत्पत्ती ३५:४; न्यायाधीस ९:६

27 मिनु यहोसुमी मुर नेल्ल आन कली “कोव्रडीन, एको फुल्लु आंइ सांकछी बाक्ब। परमप्रभु यावेमी आंइ कली देंशो लोव नेल्ल एको फुल्लुमी यो तुइशशो बाक्ब। मोपतीके गेपुकीमी इन परमप्रभु कली प्रॉइतीनी हना, गे जोल पाइब बाक्नीनी, दे एको फुल्लु सांकछी बाक्ब” देंत। यहोसु २२:२७; उत्पत्ती ३१:४८

28 मिनु यहोसुमी मेको आन कली मेको आन आंम आंम थेरशो रूमी सोइक्ताक्व।

### यहोसु कली थिम्शो

29 मेको नेल्ल दुम नोले नून आ तौ, परमप्रभु यावे आ गेय पाइब यहोसु सहे का १० बर्समी बेक्त। गन्ती २७:१८-२३

30 मिनु मेकोपुकीमी यहोसु कली गाश डांडा आ उत्तर गे एफ्राइम आ पहाड तिम्नाथ-सेराह माइक्तीक, आंम आ रूमी थिम्तेक्म। यहोसु १९:५०

31 इस्राएलीपुकीमी यहोसु आ ब्रॉइतीक नाक्त सम्म परमप्रभु यावे कली ठेयब सेल्तेक्म। मिनु परमप्रभु यावेमी पशो नेल्ल तशा तुइक्ब खाल्पापुकी बाक्मा सम्म मेकोपुकीमी परमप्रभु यावे कली ठेयब सेल्तेक्म। न्यायाधीस २:७

32 इस्राएलीपुकीमी योसेफ आ रुश कली इजीप्त रागी रे लाइशशा, शेकेम सहरम थिम्तेक्म। याकूबमी मेको रू कली हमोर आ तौपुकी रे सहे का चांदी के शेकेलमी ग्याप्शो बाक्त। हमोर चहिं शेकेम सेल्ब बाक्त। शेकेम योसेफ आ चच युइ आन थेरशो रू दुम्त। शेकेल का ११.५ ग्राम खोदेंशो बाक्ब। उत्पत्ती ५०:२५; उत्पत्ती ३३:१९

33 मिनु हारून आ तौ एलाजर यो बेक्त। मेको कली गिबा सहरमी थिम्तेक्म। मेको एफ्राइम डा पहाड रागीमी बाक्शो सहर, मेको आ तौ फिनेहास कली गेम्तेक्म। ब्यवस्था १०:६



## न्यायाधीस

**ब्रेक्ब मुर:** साइ डोंइती डा मुरपुकीमी “सामुएलमी एको किताब ब्रेक्शो बाक्ब” देशो बाक्तेकम। तन्न सामुएल आ ब्रोंइची ना अर्को परमप्रभु यावे आ लोत्र पाइब यो बाक्तेकम। मेकोपुकीमी यो एको किताब ब्रेक्शो बाक्म माइ, दे यो मिन्मीन।

**गेना ब्रेक्शो:** एको किताब ब्रेक्ब सामुएल बाक्त हना, मेको खाल्पा दुम्मेनु, ब्रेक्शो बाक्त। मारदे हना “मेना इस्राएलमी पिप मबाक्म” दे शुश खेयप एको किताबम ब्रेक्शो बाक्ब। न्यायाधीस १७:७; न्यायाधीस १८:१; न्यायाधीस १९:१; न्यायाधीस २१:२५

**मार ब्रेक्शो:** परमप्रभु यावे आ गेना हना यो दाक्तीके नु शिशी कोंइचा कली लोत्र ब्रेक्शो बाक्ब। दोपा कोंइब देशा हना:

१. इस्राएल डा मुरुम परमप्रभु आ डोंइती मरिम्शो पशो बाक्तेकम। न्यायाधीस ३:७; न्यायाधीस ५:-
२. परमप्रभुमी मेको आन कली सजाइ गेब।
३. इस्राएलीपुकीमी परमप्रभु कली पुंडनीम।
४. परमप्रभुमी मेको आन कली श्येत रे प्रोंइब का सोइक्ब।
५. परमप्रभु गे लेशो मुर आन कली गेना हना यो माफ गेब, दे शेंशो बाक्ब।

अदोनी-बेसेक कली ग्याइशो

१ यहोसु बेकम नोले इस्राएलीपुकीमी परमप्रभु यावे कली “डोंइती आंइ दाते डा तेको थरमी कुशा, कनानी आन कली लडाइ तोचा?” दे हिल्लो पामे बाक्त। उत्पत्ती ४९:८; न्यायाधीस १८:५; न्यायाधीस २०:१८; प्रस्थान २८:३०; गन्ती २७:२१

२ मिनु परमप्रभु यावेमी “यहूदा आ थर डा मुर कुचा मालनीम। नेनीन, गो मेको रागी मेको आन कली गेनुड” देंमाक्त।

३ मिनु यहूदा आ लोकब सिमियोन कली “गे आं कली गेशो रागी ग्राचा कली वारच पथ पिबो। मोपा गो कनानी नु लडाइ पाइनस। नोले गो गे नु इ कली गेशो रागी ग्राचा कली वारच पथ लाइनुड” देंमाक्त। मिनु सिमियोन आ थर डा मुर यहूदा आ थर डा मुर नु लमा बाक्त।

४ मिनु यहूदा आ थर डा मुरपुकीमी लडाइ पा परमप्रभु यावेमी कनानी नु परिज्जी आन कली मेको आन गुडम गेवा बाक्त। मेकोपुकीमी मेको आन कली खेदा पामे बाक्त। बेसेक सहरमी १० हजार मुर आन कली साइशशा ग्रामा बाक्त।

५ मेकेर मेकोपुकीमी अदोनी-बेसेक माइशो पिप नु लडाइ पामे बाक्त। मेकोपुकीमी कनानी नु परिज्जी आन कली ग्रामा बाक्त।

६ मिनु अदोनी-बेसेक प्रोक्माक्त। तन्न यहूदा आ थर डा मुरपुकीमी मेको कली खेदा पा थिशशा, आ गुड खोइल डा बोंग्ये खोइशशा गेमे बाक्त।

७ मिनु अदोनी-बेसेकमी “गुड खोइल डा बोंग्ये खोइशशा ७० जना पिपमी आं निशशा जतीक रे दोक्शो जचा थोत्रक जाप्तेकम। डोंइती गो दोदेशो पडा, मुल परमप्रभुमी आं कली यो मोदेशोन पाप्तु” देंमाक्त। मिनु यहूदा डा मुरपुकीमी मेको पिप कली यरूसलेम चाक्गमे बाक्त। मिनु मेको मेकेर बेक्माक्त।

यरूसलेम नु हेब्रोन कली ग्राशो

८ यहूदा आ थर डा मुरपुकीमी यरूसलेम कली लडाइ पा ग्राशा, आंम के सेल्मे बाक्त। मेकोपुकीमी मेकेर डा मुर आन कली तरवारमी क्योरशा सदमे बाक्त। मिनु सहर कली मी सुइक्ते बाक्त। न्यायाधीस १:२१

९ मिनु नोले यहूदा डा मुरपुकी पहाडी रागीमी, नेगेब नु दिंममी बाक्शो कनानी नु लडाइ पथ लमा बाक्त। यहोसु १०:४०; यहोसु ११:१६-२०

10 मिनु मेकोपुकीमी हेब्रोन डा कनानी नु लडाइ पामे बाक्त। मिनु शेशै, अहीमान नु तल्लै कली ग्रामा बाक्त। हेब्रोन आ डोंइती डा नें किरयथ-अरबा बाक्त। यहोसु १५:१३-१९

### ओथनीएलमी देबीर कली ग्राशो

11 मिनु नोले देबीर डा मुरपुकी नु लडाइ पचा ठीक दुम्मा बाक्त। देबीर कली डोंइती किरयथ-सेफेर देंबाक्तेक्म।

12 मिनु कालेबमी “सुम किरयथ-सेफेर कली लडाइ पा ग्राबा, मेको कली आं तमी अकसा ग्युंवे पा गेनुड” देंमाक्त। यहोसु १५:१६

13 मिनु कालेब आ लोकब केनाज आ तौ ओथनीएलमी किरयथ-सेफेर कली ग्रामाक्त। मिनु कालेबमी आ तमी अकसा कली मेको नु ग्युंवे पा गेवा बाक्त। यहोसु १५:१६-१९

14 मिनु काबु ओथनीएलमी अकसा कली “आं आफ ‘रू का गेयी’ दे पुन” दे मदा बाक्त। मिनु अकसा आ गधा रे तोंइसे बाक्त। मोपा तोइश्शो तशा कालेबमी “गे मार माल्दे?” दे हिल्लो पवा बाक्त।

15 मिनु अकसामी “आं कली मारेइ गेनीनी कों? गे आं कली नेगेबमी रू गेतीनी। मोपतीके मुल आं कली ब्वाक्क बुक्तीक पाइश्शो रू यो गेने” देंमाक्त। मिनु कालेबमी मेको कली आइदी नु आइक्था डा ब्वाक्क बुक्तीके निक्शी गेवा बाक्त।

### यहूदा नु बेन्यामीनम ग्राशो

16 मोसा आ शिउ आ खिं डा होबाब आ चच युइ, केनीपुकी नु यहूदा डा मुरपुकी खजूर रवा आ सहर रे पा आरद सहर आ नेक्था डा नेगेबमी बाक्शो यहूदा डा गोरशो रागीमी लमा बाक्त। मिनु मेकेर बाक्ब अमालेक डा मुरपुकी नु बाक्चा गोव्रमे बाक्त। न्यायाधीस ४:११; गन्ती १०:२९; यहोसु १२:१४

17 मिनु यहूदा डा मुरपुकी आंम लोकब सिमियोन आ थर डा मुरपुकी नु लशा, सेफतमी बाक्ब कनानी आन कली लडाइ पा मेको आन सहर खतम पोक्गमे बाक्त। मोपतीके मेको सहर आ नें होरमा वोदमे बाक्त। ब्यवस्था २०:१२-१८

18 यहूदा आ थर डा मुरपुकीमी गाजा, अश्कलोन, एक्रोन सहर नु मेको आ नेक्था बाक्शो रू नेल्ल आंम के सेल्मे बाक्त।

19 मिनु परमप्रभु यावेमी यहूदा आ थर डा मुर आन कली वारच पतीके मेकेर डा पहाडी रागी नेल्ल आंम के सेल्मे बाक्त। तन्न मेकोपुकीमी दिंम डा मुर आन कली खेरेने मचाप्बमे बाक्त। मारदे हना मेकोपुकी नु फलाम के बग्गी बाक्मा बाक्त।

20 मिनु मोसामी देंशो खोदेंशो पा कालेब कली हेब्रोन सहर गेमे बाक्त। मिनु मेकोमी अनाक आ तौ सां आन कली मेकेर रे खेरा बाक्त। यहोसु १४:६-१५

21 तन्न बेन्यामीन आ थर डा मुरपुकीमी यरूसलेम डा यबुसी आन कली मखेरमे बाक्त। मोपतीके यबुसीपुकी मुलाक्त सम्म यरूसलेममी बेन्यामीन आ थर डा मुरपुकी नु बाक्नीम। न्यायाधीस १:८; यहोसु १५:६३; यहोसु १८:२८

### बेथेल सहर ग्राशो

22 योसेफ आ थर डा मुरपुकीमी बेथेल नु लडाइ पचा कली लमा बाक्त। परमप्रभु यावे योसेफ आ थर डा मुरपुकी नु बाक्माक्त।

23 मेकोपुकीमी बेथेलमी क्यारी पाइब मुर सोइक्तमे बाक्त। डोंइती बेथेल आ नें लूज बाक्माक्त। उत्पत्ती २८:१९; यहोसु १२:१६

24 मेको क्यारी पाइबपुकीमी मुर का कली बेथेल सहर रे गूशो तशा, मेको कली “सहर दोपा ओव्रचा? आंइ कली शेंदीन। गो इन कली मारेइ यो मरिम्शो मपाइनीकी” देंमा बाक्त।

25 मिनु मेको मुरुमी सहर दोपा ओव्रचा, मेको नेल्ल कोइदा बाक्त। मिनु योसेफ आ थर डा मुरपुकीमी मेको सहर ओव्रशा, मेकेर डा मुर नेल्ल आन कली तरवारमी क्योरशा सदमे बाक्त। तन्न मेको लां शोव्रब नु आ खिं डा मुर आन कली मारेइ यो मपामे बाक्त। यहोसु ६:२५

26 मिनू मेको लां कोंडब मुर हित्ती आन रागी लमाक्त। मिनू मेकेर सहर का सेल्शा, मेको सहर आ नें लूज वोदा बाक्त। मेको सहर कली मुलाक्त सम्म लूज देंनीम।

मनस्से नु एफ्राइमम लडाइ ग्राशो

27 मनस्से आ थर डा मुरपुकीमी बेथ-शेआन, तानाक, डोर, इब्लाम नु मेगीददो डा मुर आन कली नु मेकेर डा गाउं डा मुर आन कली मखेरमे बाक्त। मारदे हना कनानीपुकीमी मेकेर बाक्चा थुं पामे बाक्त। यहोसु १७:११-१३

28 नोले इस्राएलीपुकी बोल्यो दुम्शा, मेको आन कली वाइलीम वाइल सेल्ना सेल्न बाक्मा बाक्त। तन्न मेको आन कली गेनायो मखेरमे बाक्त।

अर्को थरपुकीमी ग्राना ग्रान लशो

29 एफ्राइम आ थर डा मुरपुकीमी यो गेजेर सहरमी बाक्ब कनानी आन कली मखेरमे बाक्त। मेकोपुकी गेना हना यो गेजेरमी बाक्मा बाक्त। यहोसु १६:१०

30 जबूलून आ थर डा मुरपुकीमी कित्रोन नु नहलोल सहरमी बाक्ब कनानी आन कली मखेरमे बाक्त। मिनू कनानी जबूलून डा मुर आन दातेमी बाक्शा, आन वाइलीम वाइल दुम्मा बाक्त। यहोसु १९:१५

31 आशेर आ थर डा मुरपुकीमी अक्को, सीदोन, अहलाब, अकजीब, हेलबा, अफीक नु रेहोब सहरमी बाक्ब आन कली मखेरमे बाक्त।

32 मोपा आशेर आ थर डा मुरपुकी कनानी नु बाक्मा बाक्त। मारदे हना सुइ कली मखेरमे बाक्त।

33 नाप्ताली आ थर डा मुरपुकीमी बेथ-शेमेश नु बेथ-अनात सहरमी बाक्ब आन कली मखेरमे बाक्त। मिनू मेकेर डा कनानी नु बाक्मा बाक्त। तन्न बेथ-शेमेश नु बेथ-अनातमी बाक्ब आन कली वाइलीम वाइल सेल्मे बाक्त। यहोसु १९:३८

34 मिनू एमोरीपुकीमी दान आ थर डा मुर आन कली पहाडी रागी मेर सोइक्तमे बाक्त। दिममी यिचा मगेमे बाक्त।

35 एमोरीपुकीमी हार-हेरेस, आइयालोन नु शा-आल्बीम सहरम बाक्चा थुं पामे बाक्त। तन्न योसेफ आ थर डा मुरपुकीमी मेको आन कली लडाइ पा ग्राशा, वाइलीम वाइल सेल्मे बाक्त। यहोसु १९:४२

36 एमोरी आन सांद दक्खिन अक्रब्बीम आइक्था, सेला सहर रे लाइशशा, मेको क्येडा आइक्था सम्म लशो बाक्माक्त।

## 2

स्वर्ग डा गेय पाइबमी लोत्र पशो

1 मिनू परमप्रभु यावे आ स्वर्ग डा गेय पाइब गिल्लाल रे बोकीम सहरमी कुमाक्त। मेकोमी “गो इन कली इजीप्त रे ग्रुंइताकन्नी। इन किकी पिपी आन कली ‘इन कली गेनुड’ देशो रागीमी चाक्तन्नी। गो गे नु पशो कबल गेना हना यो खान्नुड। यहोसु २४:२९-३१

2 मिनू गे एको रागी डा मुरपुकी नु काइ कबल मपने। गे मेको आन चढ़ेतीक प्रेत्चा माल्नीनी। तन्न गे आं देशो मटिनी। लो कोव्रडीन, गे मार पनी?

3 मोपतीके ‘इन डोंइती रे मेको आन कली मखेरनुड। मेकोपुकी इन कली चू खोदेशो दुम्नीम। मिनू मेको आन देवी देवता इन कली ग्याइल खोदेशो दुम्नीम’ देंनुड” देंमाक्त।

4 मोपा परमप्रभु यावे आ स्वर्ग डा गेय पाइबमी देंने थुमा नोले, मेकेर डा मुर नेल्ले डाक्शा रोंका पामे बाक्त।

5 मोपतीके मेको आन बाक्तीक कली बोकीम नें वोदमे बाक्त। मिनू मेकोपुकीमी मेकेर परमप्रभु यावे कली मार मार चढ़ेमे बाक्त। बोकीम आ अर्थ डाक्चा बाक्ब।

यहोसु बेक्शो

6 मिनू यहोसुमी नेल्ल आन कली लचा गेवा नोले, मेकोपुकी आंम आंम थेरशो रागी आंम के सेल्थ लमा बाक्त।

7 मिनु इस्राएलीपुकीमी यहोसु मबेकम सम्म परमप्रभु यावे कली ठेयब सेल्मे बाक्त। मिनु परमप्रभु यावेम इस्राएली आन पर्वम पशो ठेयब गेय ताइब खाल्पापुकी बाक्मा सम्म यो परमप्रभु यावे कली ठेयब सेल्मे बाक्त।

8 मिनु नून आ तो यहोसु, परमप्रभु यावे आ वाइल सहे का १० बर्समी बेक्माक्त।

9 मिनु आ थेरशो रूम थिम्मै बाक्माक्त। आ रू ते बाक्त देशा हना, गाश डांडा आ उत्तर, एफ्राइम डा पहाडी रागीमी बाक्शो तिम्नाथ-हेरसमी बाक्माक्त।

10 मेको पाला डा मुर नेल्ल बेक्मा बाक्त। मिनु मेको आन आल ठेयब दुम्मा बाक्त। मेकोपुकी परमप्रभु यावे कली मतुइक्ब बाक्मा बाक्त। मिनु इस्राएल डा मुर आन कली ठेयब गेय पा वारच पशो यो मतुइश्शो बाक्मा बाक्त।

### इस्राएलीपुकीमी हेंथे पशो

11 मिनु इस्राएलीपुकीमी परमप्रभु यावे आ डोंइती मार मरिम्शो बाक्मे, मेको पामे बाक्त। मेकोपुकीमी बाल देवी देवता आन कली ठेयब सेल्मे बाक्त।

12 मिनु मेको आन कली इजीप्त रागी रे गुंडब, परमप्रभु यावे, आंम किकी पिपी आन परमप्रभु कली प्रोन्मे बाक्त। मेको आन दातेमी बाक्ब जात जात डा मुर आन देवी देवता आन डोंइती बाम्मा बाक्त। मोपा परमप्रभु यावे कली चुरपदमे बाक्त।

13 मेकोपुकीमी परमप्रभु यावे कली प्रॉइशा, बाल नु अशतारोथ देवता कली ठेयब सेल्मे बाक्त।

14 मिनु परमप्रभु यावेमी इस्राएली आन पर्वम गाइश्शा, मेको आन कली रोइक्ब आन गुइमी गेमी बाक्त। मिनु मेकोपुकीमी मेको आन मारेइ मारेइ रोइक्तमे बाक्त। मिनु मेकोमी मेको आन कली आन नेक्था बाक्ब जोरी सत्रु आन हुकुममी बाक्चा गेमे बाक्त। मोपा इस्राएलीपुकीमी आन जोरी सत्रु आन कली ग्राने मचाप्बमे बाक्त।

15 गेना मेकोपुकी लडाइ पथ ग्रूमा, मेना परमप्रभु यावेमी मेको आन कली श्येत गेमी बाक्त। मोपा परमप्रभु यावेमी मेको आन कली डोंइती देशो नु आ कबल पशो खबा बाक्त। मोपतीके मेकोपुकीमी शुश श्येत जामे बाक्त। लेवी २६:१७; ब्यवस्था २:१५; ब्यवस्था २८:२०; १सामुएल १२:१५

16 मिनु नोले परमप्रभु यावेमी मेको आन कली रोइक्ब आन गुइ रे प्रॉइचा कली निसाफ पाइब सोइक्ता बाक्त। मिनु मेको आन कली प्रॉइना प्रॉइन बाक्मा बाक्त। प्रेरित १३:२०

17 तन्न मेकोपुकीमी निसाफ पाइब आन देशो लोत्र मनेन्मे बाक्त। मेकोपुकीमी तेल्लेम पशो खोदेशो पा अरु देवी देवता आन नोले खोदमे बाक्त। मेको आन डोंइती बाम्मा बाक्त। मेकोपुकी परमप्रभु यावे आ शेंशो लोत्र टीब आन किकी पिपी आन गाक्शो लां प्रॉइशा, मटीब दुम्मा बाक्त।

18 गेना परमप्रभु यावेमी मेको आन कली निसाफ पाइब सोइक्ता, मेना परमप्रभु यावे मेको नु बाक्माक्त। मेको निसाफ पाइब मबेकम सम्म आन जोरी सत्रु रे प्रॉइशा वोदा बाक्त। मारदे हना परमप्रभु यावेमी आन जोरी सत्रु रे श्येत जशो तशा शिशी पवा बाक्त।

19 तन्न निसाफ पाइब बेकम चोटीन आन किकी पिपी क्येडा लाक्शा मरिम्शो पामे बाक्त। देवी देवता आन कली ठेयब सेल्शा, मेको आन डोंइती बाप्शा, मेको आन नोले खोदमे बाक्त। आन मरिम्शो पशो प्रॉइने मबिस्समा बाक्त। प्रस्थान ३२:९

20 मोपतीके परमप्रभु यावे इस्राएलीपुकी नु गाइक्ता बाक्त। मिनु “गो मेको आन किकी पिपी आन कली देशो नु कबल पशो एकोपुकीमी खतम सेल्लेक्म। आं देशो लोत्र मटितीके

21 मुल यहोसुमी आ बेक्ची ना मखेरशो रागी रागी डा मुर कली यो इस्राएली आन डोंइती रे मखेरनुड” दे परमप्रभु यावेमी देंमाक्त।

22 इस्राएली आन किकी पिपी परमप्रभु यावे आ लांम गाक्शो खोदेशो पा मेकोपुकी गाक्नीमी कों मगाक्नीमी, दे इस्राएली आन कली नाक्चा कली मेको अर्को जात डा मुर मखेरशो बाक्माक्त। न्यायाधीस ३:१,४; ब्यवस्था ८:२

23 मोपा परमप्रभु यावेमी डोंइती यहोसु आ गुइमी मगेशो रागी रागी डा मुर आन कली मोशीन प्रॉइशा वोइश्शो बाक्माक्त। न्यायाधीस १:२८; भजन संग्रह १०६:३४

## 3

## इस्त्राएली आन कली नाकशो

1 मिनु परमप्रभु यावेमी इस्त्राएली आन कली नाकचा, दे रागी रागी डा मुर इस्त्राएली आन डोंइती रे मखेरशो बाक्माक्त। मेना इस्त्राएली आन नक पाला डा मुरपुकीम कनान रागीम लडाइ पचा आ पर्वम मारेइ मतुइशशो बाक्मा बाक्त। न्यायाधीस २:२२

2 मोदेशो मारेइ मतुइक्व इस्त्राएली आन कली दोपा लडाइ पचा, दे शेंचा कली परमप्रभुमी अर्को जात डा मुर आन कली वोइशशो बाक्माक्त।

3 मेको तेको तेको जात बाक्मा बाक्त देशा हना, ५ जना हुकुम पाइब पलिस्ती, कनानी नेल्ले, सीदोन डा मुर नेल्ले नु बाल-हेरमोन डांडा रे लाइशशा, लेबानोन डा पहाडम लेबो-हमाथ सम्म बाक्व हिव्वीपुकी बाक्मा बाक्त। यहोसु १३:३

4 मिनु परमप्रभु यावेमी इस्त्राएली आन किकी पिपीम मोसा कली गेशो शेंतीके मेकोपुकीमी पाइनीमी कों मपाइनीमी, दे नाकचा कली मेको अर्को जात डा मुर आन कली बाक्चा गेवा बाक्त।

5 मोपा इस्त्राएलीपुकी कनानी, हिती, एमोरी, परिज्जी, हिव्वी नु यबुसी आन दातेमी बाक्शो बाक्मा बाक्त।

6 मिनु मेकोपुकीमी मेको आन तमीपुकी ग्युंवे पा चाक्गमे बाक्त। मिनु आंम तमीपुकी यो मेको आन तौ आन कली ग्युंवे पा गेमे बाक्त। मिनु मेकोपुकीमी मेको आन देवी देवता आन कली यो मार मार चदेशा ठेयब सेल्मे बाक्त। ब्यवस्था ७:३

## ओथनीएल

7 इस्त्राएलीपुकीमी परमप्रभु यावे आ डोंइती मार मरिश्शो बाक्मे, मेको पामे बाक्त। मेकोपुकीमी परमप्रभु यावे, आन परमप्रभु कली प्रेंदमे बाक्त। मिनु बाल नु अशेराह देवी आस कली ठेयब सेल्मे बाक्त।

8 मिनु परमप्रभु यावेमी इस्त्राएली आन कली तशा गाइक्ता बाक्त। मिनु मेसोपोटामीया डा अरामनहाराडम डा पिप कुशन-रिशातैम आ गुइमी लेयडा बाक्त। मेकोम इस्त्राएली आन कली ८ बर्स सम्म सासन पवा बाक्त।

9 मिनु इस्त्राएलीपुकीमी “वारच पाइय्यीकी” दे परमप्रभु यावे कली थोत्रमेनु, इस्त्राएली आन कली प्रोंइचा, दे केनाज आ तौ ओथनीएल कली सोइक्ता बाक्त। मेको कालेब आ लोकब बाक्त। मिनु मेकोमी मेको आन कली प्रोना बाक्त। न्यायाधीस १:१३; यहोसु १५:१७-१८

10 परमप्रभु यावे आ सोक्त मेको तार जाक्माक्त। मिनु मेकोमी इस्त्राएली आन कली निसाफ पवा बाक्त। मिनु मेकोमी लडाइ पचा गोवा बाक्त। मिनु परमप्रभु यावेमी मेसोपोटामीया डा पिप कुशन-रिशातैम कली ओथनीएल आ गुइम गेवा बाक्त। मोपा ओथनीएलमी मेको पिप कली ग्रामाक्त। न्यायाधीस ६:३४

11 केनाज आ तौ ओथनीएल मबेक्म सम्म मेको रागी ४० बर्स सम्म लडाइ रे नांइसे बाक्त।

## एहूद

12 मिनु इस्त्राएलीपुकीमी लेंशा परमप्रभु यावे आ डोंइती मार मरिश्शो बाक्मे, मेको पामे बाक्त। मिनु मेको आन मरिश्शो पशो आ पर्वम परमप्रभु यावेमी मोआब डा पिप एग्लोन कली इस्त्राएली क्येडा बोल्यो सेला बाक्त।

13 मिनु एग्लोनमी अम्मोनी नु अमालेक डा मुर आन कली लडाइ पचा कली खुप्तीमी बाक्त। मिनु इस्त्राएली नु लडाइ पचा गोत्रमे बाक्त। मिनु खजूर रवा बाक्शो सहर आंम के सेल्मे बाक्त। न्यायाधीस १:३६

14 इस्त्राएलीपुकी १८ बर्स सम्म मोआब डा पिप एग्लोन आ सासनमी बाक्मा बाक्त।

15 मिनु इस्त्राएलीपुकीमी लेंशा “वारच पाइक्की” दे परमप्रभु यावे कली थोत्रमेनु, परमप्रभु यावेमी इस्त्राएली आन कली श्येत रे प्रोंइचा कली बेन्यामीन आ थर डा गेरा आ तौ एहूद कली सोइक्ता

बाक्त। मेको पेरा गुडम गेय पाइब बाक्त। मिनु इस्राएलीपुकीमी मेको कली मोआब डा पिप एग्लोन आ बाक्तीकेम तिरो थाप्थ सोइकतमे बाक्त।

16 मिनु एहूदमी आंम कली कुबीत का लाइशशो निकशी गे हेरशो क्योरतीक पाइशशो तरवार का सेल्शा, आ वा आगामी ग्युरा गे खुइशशा पिप्शा कुरा बाक्त। कुबीत का ०,५ मिटर कि ठेयब हात का खोदेशो बाक्ब।

17 मिनु नोले मेकोमी तिरो कुरब लाइशशा, मोआब डा पिप एग्लोन आ बाक्तीके लमाक्त। एग्लोन साप्पा दोम्शो मुर का बाक्माक्त।

18 मिनु मेकोमी तिरो नेल्ल पोक्शा, कुरब मुर नु गाक्माक्त।

19 एहूद चहिं गिल्याल आ नेक्था बाक्शो फुल्लु के मूर्ति आन बाक्तीक रे लेशशा, पिप कली “पिप, गो इन कली खुइशशा लोत्र का पचा माल्नुड” देमाक्त। मिनु पिप एग्लोनम “सिक्सी पने” दे आ नेक्था बाक्ब नेल्ल आन कली लाडगा सोइक्तीमी बाक्त।

20 मिनु मेको पिप आ दरवार डा तला तारी सितल कोठामी बाक्शो बाक्माक्त। मिनु एहूद मेको आ डोंइती जाक्शा “परमप्रभु रे पा गो इन कली लोत्र का देंचा माल्नुड” देमाक्त।

21 मिनु एग्लोन आ निल्तीके रे बोक्शा राम्माक्त। मिनु एहूदमी आ पेरा गुडमी आ ग्युरा गे बाक्शो तरवार गुंइशा, मेको पिप आ कोव्रजमी तूदा बाक्त। २सामुएल २०:९-१०

22 मेको तरवार आ ग्याइक्तीक सम्म ओव्रमाक्त। मिनु कोव्रज डा बोसोम मेको तरवार नेल्ल सुमा बाक्त। मिनु पिप आ कोव्रज रे खी ग्रूमाक्त। मिनु एहूदमी तरवार मगुंइथु, प्रोंइशा वोदा बाक्त।

23 मिनु तला तारी डा कोठा डा लाप्चो चोक्शा, एग्लोन कली आगाम चोक्शा, सांचो पाइशशा वोइशशा, लाडगा ग्रूमाक्त।

24 मिनु गूने थुमा नोले, एग्लोन आ गेय पाइब जाक्मा बाक्त। मिनु लाप्चो चोक्शो तशा “पिप डाइशशा बाक्म को” दे मिम्तमे बाक्त।

25 मेकोपुकी शुश सम्म रिम्स डा रिम्स बाक्शा, मुने यो पामे बाक्त। तन्न पिपमी तला तारी डा कोठा डा लाप्चो यो मरोक्गा बाक्त। मोपतीके मेकोपुकीमी सांचो चाक्शा, लाप्चो रोकगमे बाक्त। मिनु आन पिप कली खपीम गोल्शा बेक्शो तामे बाक्त।

26 मोपा मेकोपुकीमी शुश रिम्शा बाक्मानु, एहूद प्रोक्ने थुम्शो बाक्माक्त। मेको फुल्लु के मूर्ति आन बाक्तीक लाक्शा सेइरा माइक्तीकेमी जाक्दीम्माक्त।

27 मिनु एफ्राइम डा पहाड रागीम जाक्दीम नोले, मेकेर रे मेकोमी तुराही तबा बाक्त। मिनु इस्राएली मेको नु पहाड रे तोइशशा, आ नोले खोदमे बाक्त।

28 एहूदमी “आं नोले खोतीन। मारदे हना परमप्रभु यावेमी इन जोरी सत्रु मोआबी आन कली इन गुडमी गेशो बाक्ब” दे माइक्मी बाक्त। मोपतीके आ नोनोले तोइशशा यिमा बाक्त। मिनु मोआबी मप्रोकमल, दे मेको आ नेक्था डा यर्दन खोला शोक्तीके आन के सेल्मे बाक्त। मिनु सुइ आन कली मेक रे शोक्चा मगेमे बाक्त।

29 मेको नाक्ती १० हजार खोदेशो मोआबी आन कली सदमे बाक्त। मेको नेल्ल बोल्यो लडाइ पाइब बाक्मा बाक्त। मेको का यो प्रोक्चा मतामे बाक्त।

30 मोपा मेको नाक्ती रे इस्राएलीम मोआबी आन कली हुकुम पामे बाक्त। मिनु मेको रागी ८० बर्स सम्म लडाइ रे नांइसे बाक्त।

31 एहूद आ नोले अनाथ आ तौ शाम्गार इस्राएली आन निसाफ पाइब दुम्माक्त। मेकोमी ब्यफ वाक्तीक हरीसमी ६ सहे पलिस्ती आन कली तुप्शा साइक्मी बाक्त। मेकोमी यो इस्राएली आन कली आन जोरी सत्रु रे प्रोंइमी बाक्त। न्यायाधीस ५:६

## 4

### देबोरा नु बाराक

1 एहूद बेक्म नोले इस्राएलीपुकीमी लेंशा परमप्रभु यावे आ डोंइती मार मरिम्शो बाक्मे, मेको पामे बाक्त।

2 मोपतीके परमप्रभु यावेमी मेको आन कली हासोरमी सासन पाइब कनानी आन पिप याबीन आ गुडमी गेवा बाक्त। मेको आ लडाइ पाइब आन ठेयब मुर सीसेरा माइशो बाक्माक्त। मेको हरोशेथ-हा-गोयीममी बाक्माक्त। यहोसु ११:२

3 मिनु लेंशा इस्त्राएलीपुकीमी परमप्रभु यावे कली “वारच पाइय्यीकी” दे थोत्रमे बाक्त। मारदे हना सीसेरा के ९ सहे फलाम के बग्गी बाक्तेक्म। मिनु इस्त्राएली आन कली २० बर्स सम्म शुश श्येत गेशा, दिप्शा वोइशो बाक्माक्त।

4 मेना लप्पीदोथ आ मीश, देबोरा इस्त्राएली आन कली निसाफ पाइब दुम्शो बाक्माक्त। मेको परमप्रभु यावे आ लोत्र पाइब यो बाक्माक्त।

5 मेको एफ्राइम डा पहाडी रागी, रामाह नु बेथेल आ दातेमी बाक्शो देबोरा आ खजूर रवा आ पुंमी बाक्शो बाक्माक्त। मिनु इस्त्राएलीपुकी निसाफ पुंइथ मेक जाक्मा बाक्त। उत्पती ३५:८

6 मेकोमी अबीनोअम आ तौ बाराक कली नाप्ताली डा केदेश सहर रे ब्रेत्थ सोइक्ता बाक्त। मिनु मेको कली परमप्रभु यावे, इस्त्राएली आन परमप्रभुम इ कली “गे लशा, नाप्ताली नु जबूलून आस थर डा १० हजार मुर आन कली योत्रशा, मेको आन कली ताबोर डांडामी पिशशा पिवो। यहोसु २१:३२

7 गो चहिं याबीन आ लडाइ पाइब आन कप्तान सीसेरा आ मुर नु आ बग्गीपुकी गुंइशा, किशोन खोला आ नेक्था चाक्नुड। मिनु इन गुडमी गेनुड” दे मदा बाक्त।

8 मिनु बाराकमी देबोरा कली “गे गो नु लाइतीनी हना, गो लाइनुड। गे गो नु मलाइतीनी हना, गो मलाइनुड” दे लोत्र लेत्ता बाक्त।

9 मिनु देबोरामी “थमा पा, गो गे नु लाइनुड। तन्न एको ठेयब गेय आ ततीक मान गे मताइनेवे। मारदे हना परमप्रभु यावेमी सीसेरा कली मीश मुर का आ गुडमी गेशो बाक्ब” देमाक्त। मिनु देबोरा बोक्शा डा मिन बाराक नु केदेश सहरमी लमाक्त।

10 बाराकमी जबूलून नु नाप्ताली आस थर डा मुर आन कली केदेश सहरमी ब्रेत्ता बाक्त। मोपा १० हजार लडाइ पाइबपुकीमी मेको आ नोले खोदमे बाक्त। मिनु देबोरा मेको नु लमाक्त।

11 मिनु केनी डा मुर, मोसा आ शिउ होबाब आ चच युइ बाक्मा बाक्त। केनी हेबेर चहिं केनी आन दाते रे ब्राशो बाक्माक्त। मोपा ब्राशा, केदेश सहर आ नेक्था एलोन-बे-सा-अनानीममी बाक्शो ठेयब रवा आ नेक्था जाक्दीशशा, आ ताम्बु कीशा बाक्शो बाक्माक्त। न्यायाधीस १:१६; गन्ती १०:२९

12 मिनु सीसेरामी अबीनोअम आ तौ बाराक ताबोर डांडामी लशो बाक्ब देशो नेना बाक्त।

13 मिनु सीसेरामी आ ९ सहे फलाम के बग्गी नु आ लडाइ पाइब आन कली हरोशेथ-हा-गोयीम रे किशोन खोलाम खुप्ता बाक्त।

14 मिनु देबोरामी बाराक कली “बोक्को, मुलाक्त परमप्रभु यावेमी सीसेरा कली इ गुडमी गेशो बाक्ब। परमप्रभु यावे इ डोइती मगाक्बा डा?” देमाक्त। मोपतीके बाराक नु आ १० हजार लडाइ पाइब ताबोर डांडा रे बुम्मा बाक्त।

15 मिनु परमप्रभु यावेमी सीसेरा नु आ बग्गी नेल्ले, आ लडाइ पाइब नेल्ल बाराक नु बुपदा बाक्त। सीसेरा चहिं आ बग्गी रे तोइशशा प्रोक्माक्त। न्यायाधीस ५:२०; उत्पती ३५:५; प्रस्थान २३:२७; व्यवस्था २:२५; यहोसु २:९-११

16 मिनु बाराकमी बग्गीपुकी नु लडाइ पाइब आन कली हरोशेथ-हा-गोयीम सम्म खेदा पा, सीसेरा आ लडाइ पाइब नेल्ल आन कली तरवारमी क्योरशा सदा बाक्त। का यो ब्रोंइचा मतामे बाक्त।

17 सीसेरा चहिं खोइलीमी प्रोक्ना प्रोक्न, केनी हेबेर आ मीश याएल आ ताम्बुमी जाक्माक्त। मारदे हना हासोर डा पिप याबीन नु केनी हेबेर डा मुरपुकी लडाइ मपथ, वारच दुम्शो बाक्मा बाक्त।

18 मिनु याएल सीसेरा कली गुम्चा, दे लाडगा गूमाक्त। मिनु मेकोमी “हजुर ओत्रडीन। महिनीन” देमाक्त। मिनु सीसेरा ताम्बु आगा ओत्रमाक्त। मिनु याएलमी मेको कली खुइशशा, वाम सुमा बाक्त।

19 सीसेरामी याएल कली “आं कली ब्वाक्क तूचा गेन। गो साप्पा तूतू दाक्ती” देमाक्त। मिनु मेकोमी दूथ वोइशो बोस का गुंइशा, मेको कली तूचा गेवा बाक्त। मिनु मेको कली वा फेक्ता बाक्त।

20 मिनू सीसेरामी मेको कली “ताम्बु आ लाप्चोमी राप्शा बाक्को, सुइ जाक्शा ‘एकेर सुइ मुर जाक्मा?’ दे हिल्लो पाम्तेक्म हना, मजाक्म देनो” देंमाक्त।

21 तन्न हेबेर आ मीश याएलमी थात्ला का नु ताम्बु डा किला का लाइशशा, निन्द्रा पशो सीसेरा आ नेक्था लमाक्त। मिनू याएलमी सीसेरा आ पियामी खप सम्म युक्चा डा पा किला थोक्ता बाक्त। मिनू शुश दशा, निन्द्रा पा बाक्शो, सीसेरा बेक्माक्त।

22 मिनू बाराक सीसेरा कली खेदा पा मेक जाक्माक्त। मिनू याएलमी मेको कली गुम्शा “ओव्रडीन, गो इन माल्शो मुर इन कली कोंइनुड” देंमाक्त। मिनू बाराक मेको नु ताम्बु आगा ओव्रमाक्त। मिनू सीसेरा आ पियामी किला युक्शा बेक्शो तवा बाक्त।

23 मेको नाक्ती परमप्रभुमी कनान डा पिप याबीन कली इस्राएलीपुकी नु बुपदा बाक्त।

24 मिनू इस्राएलीपुकीमी कनानी पिप याबीन कली शुश श्येत गेशा, मसदमे सम्म श्येत गेमे बाक्त।

## 5

### देबोरा नु बाराक आस कुम्सो

1 मेको नाक्त देबोरा नु अबीनोअम आ तौ बाराकमी कुम्सो पाम्से बाक्त। मेको निक्शीमी मार कुम्सो पाम्से बाक्त, देंशा हना

2 “इस्राएल डा ठेयब मुरुमी लडाइ पाइब आन कली खुल्मेनु, मेकोपुकीमी आन ठेयब मुर आन कली टिम्तेक्म। मोपतीके परमप्रभु यावे कली ठेयब सेलीन।

3 पिपपुकी, नेनीन। सासन पाइबपुकी, इन नोफा दाइक्तीन। नेनीन। गो परमप्रभु यावे कली कुम्सो पाइनुड। गो परमप्रभु यावे, इस्राएली आन परमप्रभु कली ताप्तीक का ताप्शा, कुम्सो का पाइनुड।

4 परमप्रभु यावे, सेडर रे पा गाक्नी ना, एदोम रागी रे लाइतीनी, मेना रागी नेल्ल खिंखि पाप्तु। रेउ यित। गोस्सुमी रेउ यिपाइक्तु। ब्यवस्था ३३:२; हबकुक् ३:३-६

5 मिनू सीने डांडा डा परमप्रभु यावे आ डोंइती पहाडमी खिनु कुत। परमप्रभु यावे, इस्राएली आन परमप्रभु आ डोंइती डांडा खिंखि पाप्तु। भजन संग्रह ६८:९

6 अनाथ आ तौ शाम्मार आ पालामी, याएल बाक्म सम्म ग्याप्ब लेयब आन हुल ठेयब लां मगाक्ब दुप्तेक्म। मुरपुकी खुइशशो लांमी गाक्चा गोम्तेक्म। न्यायाधीस ३:३१

7 मिनू इस्राएलीपुकीमी आन रूमी शोक्ने खुप्ने मचबेम। देबोरा, गे मेको आन दातेमी मजाक्डे सम्म मारेइ पने मचबेम। गे इस्राएली आन ममा खोदेशो पा जाक्ते।

8 इस्राएलीपुकीमी नक देवी देवता आन कली ठेयब सेल्चा कली योव्रची ना सहर डा लाप्चोमी लडाइ दुम्त। मिनू ४० हजार इस्राएली आन के तेक्तीक नु तरवार मबा।

9 इस्राएली लडाइ पाइब आन ठेयब मुर दाक्नुड। मारदे हना मेकोपुकी महिंथु, लडाइ पचा कली, दे आंम कली जिम्मा गोम्तेक्म। परमप्रभु यावे ठेयब बाक्ब।

10 बुश गथा डोइशशा गाक्बपुकी, राडी तारी निप्बपुकी, खोइलीम गाक्ब नेल्लेमी यो परमप्रभु यावेम मेको लडाइ ‘दोपा पवा’ मेको शेंदीन।

11 मिनू ब्वाक्कु बुक्तीकेमी बाजा ताप्शा ‘परमप्रभु यावे आ ग्रातीक ठेयब बाक्ब’ दे लेंशा कुम्सो पाइनीम। ‘मिनू इस्राएल डा बोल्यो मुर आन ग्राशो आ पर्बम कुम्सो पाइनीम। मिनू परमप्रभु यावेमी रूम शोक्ब आन कली ग्रापाइक्तु’ दे कुम्सो पाइनीम। मिनू परमप्रभु यावे आ मुरपुकी उइ सहर डा ठेयब लाप्चोमी लाम्तेक्म।

12 बोक्को, देबोरा, बोक्को, बोक्शा डा मीन, कुम्सो पावो। अबीनोअम आ तौ बाराक, बोक्को, इ ग्याइशशो मुर आन कली एक रे योल्दो।

13 मिनू ठेयब मुरपुकी उइ गाक्तेक्म। परमप्रभु यावे आ मुरपुकी डोंइती बारशा, बोल्यो मुर नु लडाइ पचा चिक्ताक्म।



14 एफ्राइम आ थर डा मुर दिमम जाक्तेकम। बेन्यामीन आ थर डा मुरपुकीमी मेको आन नोले खोइक्तेकम। माकीर रे आन ठेयब मुर यिम्तेकम। जबूलून आ थर डा मुर आन रागी रे पिशा, आन थर डा कप्तानपुकी जाक्तेकम। यहोसु १७:१

15 इस्साकार आ थर डा हुकुम पाइबपुकी देबोरा नु जाक्तेकम। मिनु इस्साकार आ थर डा मुर बाराक कली मप्रोइथु आ नोले खोइक्तेकम। मेकोपुकी उइ दिममी मेको आ नोले दोरशा लाम्तेकम। मिनु रूबेन आ थर डा मुर चहिं आन दातेमी 'लचा देय मलचा' दे शुश लोत्र पा मिम्ना मिम्न थुं नाक्मुम्तेकम।

16 मारदे गोठम बाक्नीनी? मेको योत्रब आन ताप्शो नेंचा दाक्नीनी? मिनु रूबेन आ थर डा मुर आन दातेमी शुश मिम्ना मिम्न बाक्तेकम।

17 गिलाद डा मुरपुकी यर्दन आइक्की हांबुमी बाक्तेकम। दान आ थर डा मुरपुकी, मारदे डोंगा आन नेक्था रिम्शा बाक्नीनी? मिनु आशेर आ थर डा मुरपुकी समुन्द्र आ नेक्था देश पा बाक्तेकम। मेकोपुकी डोंगा आन नाइक्तीकेमी मेक उइ बाक्शो बाक्तेकम।

18 मिनु जबूलून आ थर डा मुरपुकीमी महिंथु लडाइ पाम्तेकम। मिनु नाप्ताली आ थर डा मुरपुकीमी यो लडाइ पाम्तेकम।

19 कनान डा पिपपुकी लडाइ पा जाक्तेकम। मेगीददो आ नेक्था तानाक सहरमी लडाइ पाम्तेकम। तन्न चांदी नु अरु रोइश्शो मारेइ यो लाइक्चा मताम।

20 मिनु सौरुलपुकीमी सरीड रे लडाइ पाम्तेकम। मेको आन लतीक लां रे सीसेरा नु लडाइ पाम्तेकम। प्रस्थान १४:२५; यहोसु १०:१४

21 मिनु किशोन खोलामी सीसेरा आ लडाइ पाइब आन कली योल्ताक्व। मेको बारशो किशोन खोलाम मोदेशो पाप्तु। आं थुं महिंथु, बारशा, लडाइ पावो।

22 मिनु शारा आन खोइल रेयके पपाइश्शा मेको साप्पा दोरतेकम। आन खोइल ताप्शा, मेको साप्पा दोरतेकम।

23 परमप्रभु यावे आ स्वर्ग डा गेय पाइबमी 'मेरोज कली सराप पावो। मिनु मेकेर बाक्ब मुर आन कली सराप पावो। मारदे हना मेकोपुकीमी परमप्रभु यावे कली मारेइ यो वारच मपाम' देंत।

24 केनी हेबेर आ मीश याएल मीश मुर नेल्ल आन क्येडा आसीक ताइब दुम्ब। ताम्बुमी बाक्ब मीश मुर नेल्ल आन क्येडा आसीक ताइब बाक्ब।

25 सीसेरामी ब्वाक्कु पुंडुतु। तन्न मेकोमी दूध गोप्तु। मेको कली दारशो डप्कामी दहि खेत्ताक्व। न्यायाधीस ४:१९

26 मिनु मेकोमी ताम्बु आ किला तुल्शा, थाल्ला का गुप्तु। मिनु सीसेरा आ पियाम थोक्ताक्व। मेको कली आ रेक्त्रे ख्रिश्शा साइक्वतु।

27 सीसेरा याएल आ खोइलीम बेक्वत। मेको आ खोइलीमी गोल्शा बेक्वत।

28 मिनु सीसेरा आ ममामी झेल रे चिवा पा कोत्रतु। मोपा चिवा पा कोत्रशा 'मेको आ बग्गी मारदे मजाक्मे? आ बग्गी आ रेयके मारदे मनैसे?' दे वाइ ब्वेत।

29 मिनु मेकेर बाक्ब नेल्ल क्येडा अरेब मीश मुरुमी आ देशो लोत्र आंमान लेन्ना लेन्न

30 मेको आन रोइश्शो नेल्ल योक्गमे कों? मुर नेल्ल कली मीश आल का कि निक्शी ताइनीम कों? मिनु सीसेरामी रिम्शो रड पाइश्शो वा ताइबा कों? आं कली बुटा आप्शो दारशो कुप्नी निक्शी चाक्बा कों? दे आंमा नु लोत्र पशो बाक्वत।

31 मिनु परमप्रभु यावे, इन जोरी सत्रु नेल्ल मोपान खतम दुम्मल। इन कली दाक्बपुकी चहिं सुनी दाप्शो नां खोदेशो पा ब्रशा सक्ति पाइश्शो दुम्शा, बाक्मल" दे कुम्सो पाम्से बाक्वत। मिनु ४० बर्स सम्म मेको रागीमी लडाइ मदुम्माक्वत। ब्यवस्था ६:५

## 6

1 मिनू इस्राएलीपुकीमी लेशा परमप्रभु यावे आ डोंइती मार मरिम्शो बाक्मे, मेको पामे बाक्त। मोपतीके परमप्रभु यावेमी मेको आन कली ७ बर्स कली मिदयान डा मुर आन गुइमी गेवा बाक्त।

2 मिनू मिदयान डा मुरपुकीमी इस्राएली आन कली शुश दिप्शा, सक्ति पाइश्शो दुम्मा बाक्त। मोपतीके इस्राएलीपुकी पहाड डा पुक्खी, रोंगु इर लशा, आन खुइश्शा बाक्तीक सेल्मे बाक्त।

3 इस्राएलीपुकीमी वांचेर शोकगमे चोटीन मिदयान डा मुरपुकी, अमालेक डा मुरपुकी नु पूर्व डा मुरपुकी जाक्शा, इस्राएलीपुकी नु लडाइ पाइबाक्मा बाक्त। ब्यवस्था २८:३३

4 मेको आन ताम्बु कीशा बाक्शा, गाजा सम्म डा बाली नाली कली खतम पोकगमे बाक्त। मेकोपुकीमी इस्राएल डा मुर आन कली जचा थोवक काइ महेंदमे बाक्त। आन भेडा, ब्यफ नु गधा नेल्ल रोइश्शा लदमे बाक्त।

5 मेकोपुकी आंम के बी ब्यफ नु ताम्बुपुकी चाक्शा, सल्हा माले खोदेशो पा जाक्मा बाक्त। मुर नु मेको आन दलओठ हिकने मचाप्चा डा पा शुश बाक्तीके, मोपा मेको रागी कली खतम पोकगमे बाक्त।

6 मिनू मिदयान डा मुरपुकीमी इस्राएली आन कली शुश पुडग सेल्मे बाक्त। मिनू इस्राएलीपुकीमी “वारच पाइय्थीकी” दे परमप्रभु यावे कली थोवमे बाक्त।

7 मोपा इस्राएलीपुकीमी परमप्रभु यावे कली मिदयान डा मुर आन पबंम थोवमे नोले

8 परमप्रभु यावेमी मेको आन कली आ लोत्र पाइब का सोइक्ता बाक्त। मिनू मेकोमी “परमप्रभु यावे, इस्राएली आन परमप्रभुम इन कली ‘गो इन कली इजीप्त रागी वाइलीम वाइल दुम्तीक रे प्रोंइशा गुंइशा पित्ता।

9 गो इन कली इजीप्त डा मुर आन गुइ रे नु इन कली श्येत गेब मुर आन गुइ रे प्रोंइशा चाक्ता। मेको इन कली दिप्ब नेल्ल आन कली इन डोंइती रे खेरताक्मी। मिनू मेको आन रागी इन कली गेता।

10 मिनू गो इन कली गो परमप्रभु यावे, इन परमप्रभु नड। गेपुकी एमोरी आन रागीमी बाक्तीनी हना यो, मेको आन देवी देवता आन कली ठेयब मसेलीन। तन्न गे आं लोत्र मनेनी” दे मेको परमप्रभु यावे आ लोत्र पाइबमी माइक्मी बाक्त।

### गिदोन कली ब्रेशो

11 मिनू परमप्रभु यावे आ स्वर्ग डा गेय पाइब जाक्शा, ओफ्रा सहर आ नेक्था बाक्शो ठेयब रवा आ पुंम निस्से बाक्त। मेको रू अबीएजेर आ मुर योआश आ रू बाक्माक्त। योआश आ तौ गिदोन चहिं मिदयान डा मुरपुकी रे खुइक्चा कली अडगुर खाक्तीकेमी चेरब तुम्ना तुम्न बाक्मा बाक्त। यहोसु १७:२

12 मिनू परमप्रभु यावे आ स्वर्ग डा गेय पाइब मेको आ डोंइती गूशा मेको कली “गे महिंथु लडाइ पाइब मुर, परमप्रभु यावे गे नु बाक्ब” देमाक्त।

13 मिनू गिदोनमी मेको कली “हजुर, परमप्रभु यावे गोपुकी नु बाक्त हना, आंइ कली मारदे ओदेशो दुम्मे? मिनू मेको आ छक लाक्का डा गेय नेल्ले ते बाक्नीमी? आंइ किकी पिपीपुकीमी ‘परमप्रभु यावेमी आंइ कली इजीप्त रागी रे गुंइशा पिश्शो’ दे मदेंमा डा? तन्न मुल परमप्रभु यावेमी आंइ कली प्रोंइतु। मिनू आंइ कली मिदयान डा मुर आन गुइमी गेपु” देमाक्त।

14 मिनू परमप्रभु यावे मेको गे लेशा “गे महिंब नु बोल्यो बाक्नेवे। मोपतीके लावो। इस्राएली आन कली मिदयान डा मुर आन गुइ रे प्रोनो। गो इ कली सोइक्नुड” देमाक्त। न्यायाधीस ६:३२; १सामुएल १२:११; हिब्रू ११:३२

15 मिनू गिदोनमी “हजुर, गो दोपा इस्राएली आन कली प्रोंइने चाप्नुडा? आं खिं मनस्से आ थरमी नेल्ल क्येडा आइक्च बाक्ब। मिनू गो आं आफ आ खिंमी यो नेल्ल क्येडा आइक्च मुर बाक्नुड” देमाक्त।

16 मिनू परमप्रभु यावेमी मेको कली “गो गे नु बाक्नुड। मिनू गे मिदयानी नेल्ल आन कली साइक्नेवे” देमाक्त। प्रस्थान ३:१२

17 मिनू मेकोमी “गो इन डोंइती शिशी ताता हना, नु गे थमा पा गो नु लोत्र पाइब बाक्तीनी हना, आं कली चिन्ड का कोंइदीनी।

18 गो इन कली जचा मखेतु सम्म, गे एक रे मलन” देमाक्त। मिनु मेकोमी “गे मजाकडे सम्म गो एकेन बाक्नुड” देमाक्त। न्यायाधीस १३:१५-१६

19 मिनु गिदोन खिं ओव्रशा, क्यारश पाठा का ठीक पवा बाक्त। एफाह का फस के बोरब ओख्ती मसुप्शो शोब्ले चोवा बाक्त। मिनु श्ये डालोम कुर पा आ शेक्क चहिं बोस काम लुकशा, ठेयब रवा आ पुंमी लाइशशा, मेको कली खेत्ता बाक्त। एफाह का २२ लिटर पुक्तीक बाक्ब। एफाह का ५ पाथी खोदेशो बाक्ब। लेवी ४:२८

20 मिनु परमप्रभु आ स्वर्ग डा गेय पाइबमी “मेको श्ये नु बोरब ओख्ती मसुप्शो शोब्ले एको फुल्लु तारी वोतो। आ शेक्क चहिं आ तार मोतो” देमाक्त। मिनु मोदेशोन पवा बाक्त।

21 मिनु नोले परमप्रभु यावे आ स्वर्ग डा गेय पाइबमी मेको श्ये नु शोब्ले कली आ गुडम बाक्शो कोक्केमी थिवा बाक्त। मिनु मेको फुल्लु रे पा मी गूशा, मेको श्ये नु बोरब ओख्ती मसुप्शो शोब्ले नेल्ल नेक्गा बाक्त। मिनु परमप्रभु यावे आ स्वर्ग डा गेय पाइब यो लमाक्त। लेवी ९:१४

22 मिनु गिदोनमी “थमा पा परमप्रभु यावे आ स्वर्ग डा गेय पाइब बाक्माक्त” दे तुइक्ता बाक्त। मिनु “परमप्रभु, परमप्रभु यावे, आं कली वारच पाइय्यीनी। मुलाक्त परमप्रभु यावे आ स्वर्ग डा गेय पाइब कली आं नेक्थान ताता” देमाक्त। न्यायाधीस १३:२२; प्रस्थान ३३:२०

23 मिनु परमप्रभु यावेमी “इ थुं नाइक्तो। महिनो। मारदे हना मबेक्नेवे” देमाक्त।

24 मिनु गिदोनमी परमप्रभु यावे कली चढेतीक का सेला बाक्त। मिनु आं नें “परमप्रभु यावे थुं नाइक्चा गेब बाक्ब” दे नें वोदा बाक्त। मेको चढेतीक मुलाक्त सम्म अबीएजेर आ मुर आन ओफ्रा सहरम बाक्ब।

25 मेको नाक्दो परमप्रभु यावेमी गिदोन कली “इ आफ आ गोठ रे ७ बर्स दुम्शो ब्यफ चाक्को। इ आफ आ बाल देवता नु आ नेक्था बाक्शो अशेराह देवी आ शी के थाम प्रेशशा गेवो” देमाक्त। २राजा ११:१८; २राजा २३:१२-१५

26 मिनु “मेकेर परमप्रभु यावे, इ परमप्रभु कली आं देशो खोदेशो पा चढेतीक का सेलो। मिनु नोले आं कली मेको ब्यफ कली इ प्रेशशा अशेराह देवी आ शी के खोल्लो थाम तारी चोशा चढेतीक का चढेवो” देमाक्त।

27 मिनु गिदोनमी आंम के १० जना गेय पाइब कली लाइशशा, परमप्रभु यावे आ देशो खोदेशो पवा बाक्त। मिनु नाक्त मेको गेय पचा कली आं आफ आ खिं डा मुर नु मेको सहर डा मुर आन कली तशा शुश हिंमाक्त। मोपतीके मेकोमी गेय नेल्ले नाक्दोमी पवा बाक्त।

28 मिनु मेको सहर डा मुरपुकी सुनी कना बोक्शा, बाल देवता आ चढेतीके प्रेशशा, मेको आ नेक्था बाक्शो अशेराह देवी आ मूर्ति यो प्रेशशा नु गिदोनमी सेल्लो चढेतीकेम नोले डा ब्यफ चढेशो तामे बाक्त।

29 मिनु मेकोपुकीमी “एको सुम पवा, माइ?” दे हिल्लो पमुमा बाक्त। शुश हिल्लो पामे नोले योआश आ तौ गिदोनमी पाप्नु, दे तुइक्त्मे बाक्त।

30 मिनु सहर डा मुरपुकीमी योआश कली “इ तौ कली लाइगा गुंडो। मेको बेक्चा माल्ब। मेकोमी बाल देवता आ चढेतीक प्रेदा बाक्त। मिनु आ नेक्था बाक्शो अशेराह देवी आ मूर्ति पाइशशा थाम यो खोला बाक्त। मोपतीके मेको कली साइक्चा माल्नीक” देमा बाक्त।

31 मिनु योआशमी मेको आ नेक्था बाक्शो ग्रीब मुर नेल्ल आन कली “गेपुकी बाल देवता आ पर्बम ग्रीशो ननी? बाल देवता कली वारच पचा दाक्नीनी? सुम मेको कली वारच पाइबा, मेको दीसा सुनी सम्म साइक्चा पुंडसीब। आ चढेतीक प्रेत्चा पुंडसीशो बाल देवता थमा पा देवता बाक्त हना, मेकोमी आंमान आ सक्ति कौंडल” देमाक्त। १राजा १८:२१-३९

32 मेको नाक्त रे मेकोपुकीमी गिदोन आं नें येरूब-बाल, दे वोदमे बाक्त। मेको आ अर्थ “बाल देवता आंमान गिदोन कली आ सक्ति कौंडल। मारदे हना गिदोनमी आ चढेतीक प्रेशशा बाक्ब” देमा बाक्त। न्यायाधीस ७:१

33 मिनु मिदयानी, अमालेकी नु पूर्ब डा मुरपुकी खुम्सीशा, हुल का दुम्मा बाक्त। मेकोपुकी यर्दन खोला शोक्शा, येजेर आ दिमम ताम्बु कीडमे बाक्त।

34 मिनु परमप्रभु यावे आ सोक्तीम गिदोन कली सुमा बाक्ते। मिनु तुराही ताप्शा, अबीएजेर आ मुर नेल्ल आन कली “आं नोले खोतीन” दे ब्रेत्ता बाक्ते। न्यायाधीस ३:१०; न्यायाधीस ११:२९; न्यायाधीस १३:२५

35 मिनु मनस्से आ थर आन बाक्तीकेमी लोव्र कुरब मुर सोइक्ता बाक्ते। मिनु मेको आन कली “आं नोले खोतीन” दे ब्रेत्ता बाक्ते। मिनु मोपा आशेर, जबूलून नु नाप्ताली आन बाक्तीकेम यो लोव्र कुरब मुर सोइक्ता बाक्ते। मिनु मेको नेल्ल गिदोन कली गुम्थ जाक्मा बाक्ते।

36 मिनु गिदोनमी परमप्रभु कली “गे देंनी बुदी आं कली इस्राएली आन कली प्रॉइब सेलतीनी हना,

37 गो भेडा आ ऊन कली खलामी वोइक्नुड। मेको खला डा ऊन कली ला सीतमी जिश्शो नु एर ओंथ डा खप चहिं मजिश्शो बाक्ते हना, इन देशो लोव्र, गे इस्राएली आन कली प्रॉइचा, दे आं कली ब्रेत्तीनी, देशो लोव्र थमा बाक्ते, दे तुइक्नुड” देमाक्ते।

38 मिनु मेको आ देशो खोदेशोन दुम्माक्ते। मेको आ सुनी बोक्शा मेको ऊन रे चिरशा, बोस का ब्वाक्कु गुंडा बाक्ते। एर ओंथ डा खप चहिं मजिश्शो बाक्माक्ते।

39 मिनु लेशा गिदोनमी परमप्रभु कली “गो नु मगाइक्तीन। मिनु आं कली चिनु लोव्र का देंचा गेन। गो इन कली लेशा पुंडनुड। आं कली खेयप का मेको ऊन सोव्रशो नु एर ओंथ डा खप चहिं जिप्पाइश्शा कोंडदीन” देमाक्ते। उत्पत्ती १८:३०

40 मिनु परमप्रभुमी मेको नाक्दो यो गिदोन आ देशो खोदेशो पवा बाक्ते। खप ला जिम्माक्ते, मेको ऊन चहिं सोव्रशो बाक्माक्ते।

## 7

### गिदोन आ मुरपुकीमी ग्राशो।

1 गिदोन कली येरूब-बाल यो देंबाक्तेक्म। मिनु गिदोन नु आ मुर नेल्ले सुनी कना बोक्शा डा मिन हारोद सहर डा ब्वाक्कु बुक्तीके आ नेक्था ताम्बु कीडमे बाक्ते। मिदयान डा मुरपुकीमी चहिं मेको आन उत्तर गे डा मोरेह डांडा आ नेक्था डा दिममी ताम्बु कीडमे बाक्ते। न्यायाधीस ६:३२

2 मिनु परमप्रभु यावेमी गिदोन कली “गे नु बाक्शो मुरपुकी माल्शो क्येडा शुश बाक्नीम। गो मिदयान डा मुर आन कली मोदेशो शुश मुर आन गुइमी गेता हना, इस्राएलीपुकीमी आं कली प्रेशा ‘गो आंमा आंइ सक्तीमी मिदयान डा मुर आन कली ग्राशो नकी’ दे ठेयब लेत्तीम।

3 मोपतीके मुल गे मेको नेल्ल आन कली ‘सुइ मुर हिंशा खिंखि पाइब बाक्तेक्म हना, मेको मुर आन खिं लेत्चा माल्नीम’ दे नैपतो” देमाक्ते। मिनु २२ हजार आन खिं लेशा, १० हजार इस्राएली ला लीमा बाक्ते। ब्यवस्था २०:८

4 मिनु परमप्रभु यावेमी गिदोन कली “मुल यो शुश मुर बाक्नीम। मोपतीके मेको आन कली उइ खोलामी लतो। मेकेर गो मुर योव्रशा गेनुड। गो इ कली ‘एको मुर लाइब’ देंती हना, ‘मेको मुर गे नु लचा माल्ब। एको मुर गे नु मलाइब’ देंती हना, मेको गे नु लचा मलाइब” देमाक्ते।

5 मिनु गिदोनमी मुर आन कली उइ खोलामी लाइक्मी बाक्ते। मिनु परमप्रभु यावेमी गिदोन कली “सु सुमी बाप्शा, खोला डा ब्वाक्कु कुचुममी तुक्शो खोदेशो पा लेंमी तुक्शा तूनीमी, मेको आन कली एर वोतो। सु सुम चहिं खोला डा ब्वाक्कु पोक्च थेक्शा गुइम तूनीमी, मेको आन कली ओंथ वोतो” देमाक्ते।

6 मिनु कुचुम खोदेशो पा ब्वाक्कु तुक्शा तूबपुकी सहे सां दुम्मा बाक्ते। मिनु अरु नेल्लेमी पोक्च थेक्शा आन गुइमी तूडमे बाक्ते।

7 मिनु परमप्रभु यावेमी गिदोन कली “एको सहे सां ब्वाक्कु तुक्शा तूब मुर रे पा मिदयानी आन गुइ रे प्रॉइनुड। लीशो आन कली आंम आंम खिंमी लचा गेमी” देमाक्ते। १सामुएल १४:६

8 मिनु मुरपुकीमी मेको आन बुत लाम्ज नु तुराही वोइश्शा, मेको आन खिं गाक्मा बाक्ते। गिदोनमी मेको सहे सां कली वोइक्मी बाक्ते। मिदयानी आन बाक्तीक चहिं मेको आन क्येडा उइ दिममी बाक्माक्ते।

9 मिनु मेको नाकदो परमप्रभु यावेमी गिदोन कली “बोक्को, मिदयानी आन बाक्तीके ब्रुपो। मारदे हना गो मेको आन कली इ गुडमी नेता।

10 तन्न हिंनेवे हना, इ गेय पाइब पुराह कली लाइशशा ब्रुपो।

11 मिनु लशा, मेको आन लोत्र पशो नेनो। मेको आन लोत्र नेनी नोले, मेको आन कली लडाइ तोचा महिनेवे” देमाक्त। मिनु मेको आ गेय पाइब पुराह नु मिदयानी आन डोंइती डा ताम्बु आ नेक्था लमाक्त। मेकेर लडाइ पाइबपुकी बाक्शो बाक्मा बाक्त।

12 मेको मिदयानी, अमालेकी नु पूर्व डा थर डा मुर नेल्ल शुश सल्ला माले खोदेशो पा दिंममी बाक्शो बाक्मा बाक्त। मेको आन दलओठ ठेयब समुन्द्र डा बाल्वा खोदेशो हिकने मचाप्चा डा पा शुश बाक्मा बाक्त।

13 मिनु गिदोन मेको आन ताम्बु आ नेक्था जाक्दीम्मेनु, मेकेर डा मुर कामी आ वारच कली आ डोमु शोत्रडा बाक्त। मेकोमी “गो आ डोमुमी क्योत्रज शोब्ले का गुलुल पा लोकसीशा, मिदयानी आन बाक्तीकेमी जाक्शा, मेको आन ताम्बु चिप्शो ताता” देमाक्त।

14 मिनु आ वारचमी “थमा पा, मेको इसाएली योआश आ तौ गिदोन आ तरवार बाक्ब। परमप्रभुमी मिदयान नु मुर नेल्ले आन कली मेको आ गुडमी गेप्तु” देमाक्त।

15 मिनु गिदोनमी डोमु नु मेको आ अर्थ नेंशा डा मिन परमप्रभु यावे कली ठेयब सेला बाक्त। मिनु इसाएली आन बाक्तीकेम लेशशा “बोक्कीन, परमप्रभु यावेमी मिदयानी नेल्ल आन कली इन गुडमी गेप्तु” देमाक्त।

16 मिनु मेको सहे सां मुर आन कली, हुल सांमी योक्गा बाक्त। मिनु नेल्ल आन कली का का पा तुराही नु आगा रांको वोइशशो शेत्थ गर का का गेमी बाक्त।

17 मिनु “आं कली कोवडीन। आं खोदेशो पने। गो मेको आन ताम्बु आ नेक्था जाक्दीशा, मार मार पाइनुडा, गे यो मोदेशो पने।

18 मिनु गो नु बाक्ब हुलमी गेना तुराही ताप्नीमी, मेना गे यो आन बाक्तीक एर ओंथ इन तुराही ताप्शा ‘परमप्रभु यावे कली नु गिदोन कली’ दे ठेयब सेंदा पा ग्रीडीन” देमाक्त।

19 गिदोन नु मेको नु बाक्ब सहे का मुरपुकी क्येर नाकदोमी मिदयान डा मुर आन बाक्तीक आ नेक्था जाक्दीम्मा बाक्त। मेको आन खाल पाइब नक फांडसीशो बाक्मा बाक्त। मिनु गिदोन आ मुरपुकीमी तुराही ताप्शा, आन गुडमी कुरशो शेत्थ गर प्रोल्मे बाक्त।

20 मोपा मेको हुल सांमीन तुराही ताप्शा, आन कुरशो गर प्रोल्मे बाक्त। आन पेरा गुडमी रांको नु ग्युरा गुडमी तुराही कुरशा “परमप्रभु यावे कली तरवार का नु गिदोन कली तरवार का” दे ग्रीमा बाक्त।

21 मिनु गिदोन आ मुर नेल्ल मेको आन बाक्तीक एर ओंथ राप्शा बाक्मा बाक्त। मिदयान डा लडाइ पाइबपुकी चहिं नेल्ल वाइ ब्रेशशा प्रोक्मा बाक्त।

22 मिनु मेको सहे सां मुरुमी तुराही ताप्मेनु, परमप्रभु यावेमी मेको मिदयान डा मुर आन दातेमी साइक्मुपाइक्मी बाक्त। मिनु मिदयान डा लडाइ पाइबपुकी सेरेराह गे बेथ-शित्ता सम्म प्रोक्मा बाक्त। मेको आबेल-मेहोलाह आ सांद तब्बाथ सहर आ नेक्था सम्म प्रोक्मा बाक्त। भजन संग्रह ८३:१०; यसैया ९:३; यसैया १०:२६

23 मिनु गिदोनमी नाप्ताली आ थर, आशेर आ थर नु मनस्से आ थर डा मुर आन कली ब्रेशशा, मिदयान डा मुर आन कली खेदा पपदा बाक्त।

24 मिनु गिदोनमी एफ्राइम डा पहाडी रागीम बाक्ब मुर आन कली लोत्र सोइक्ता बाक्त। मार लोत्र सोइक्ता बाक्त, देशा हना “उइ ब्रुष्णा, मिदयानी आन कली सतीन। बेथ-बाराह सम्म यर्दन डा लांमी प्रोक्चा मगेन” दे लोत्र सोइक्ता बाक्त। मिनु मेको ब्रेशशो एफ्राइम आ थर डा मुरपुकीमी बेथ-बरा डा ब्वाक्कुरे यर्दन डा शोक्तीक सम्म डा लां तेक्गमे बाक्त।

25 मेकोपुकीमी मेको मिदयानी आन कली खेदा पस डा पस पा आन कप्तान निकशी ओरेब नु जेयब कली ग्याइक्तमे बाक्त। मिनु मेकोपुकीमी ओरेब कली ओरेब आ फुल्लु तारी नु जेयब कली आ

अङ्गुर खाक्तीक कोलमी सदमे बाक्त। मिनु नोले मेकोपुकीमी ओरेब नु जेयब आस पिया क्योरशा, यर्दन आइक्ची हांम गिदोन आ बाक्तीकेम चाकगमे बाक्त।

## 8

### गिदोन नु एफ्राइम आस मुर

1 मिनु एफ्राइम आ थर डा मुरपुकीमी गिदोन कली “मारदे आंइ कली ओदेशो पाइनीनी? मिदयान डा मुरपुकी नु लडाइ पथ लनीनु, मारदे आंइ कली मब्रेन्नी?” देमा बाक्त। मिनु गिदोन कली शुश दोस गेशा जिचा तोवमे बाक्त।

2 मिनु गिदोनमी “गो मार पडा डा? गे आं क्येडा ठेयब गेय पाइतीनी। मार, अबीएजेर आ मुरपुकीम मिदयान डा मुर नेल्ल आन कली प्रोकपाइक्चा क्येडा एफ्राइम आ थर डा मुरपुकीमी मेको आन कली साइक्चा ठेयब मबाक्बा डा?

3 परमप्रभुमी मिदयान डा कप्तान ओरेब नु जेयब आस कली इन गुडमी गेशो बाक्ब। गेपुकीमी पशो खोदेशो गो पडा डा?” देमाक्त। मिनु आ लोत्र नेशा आन गाइश्शो नाइसे बाक्त।

### पिप आस कली ग्याइश्शो

4 मिनु गिदोन यर्दन खोला जाक्शा, शोक्से बाक्त। मिनु गिदोन नु मेको नु बाक्शो सहे सां मुरपुकी मिदयान डा मुर आन कली खेदा पा दशा योलक योलुक दुम्शा शोत्रलु बेक्शो बाक्मा बाक्त।

5 मिनु गिदोनमी सुक्कोथ डा मुर आन कली “आं मुर आन कली इक्का शोब्ले गेन। मारदे हना एकोपुकी दशा, शोत्रलु बेक्शो बाक्नीम। मिनु गो मिदयान डा पिप जेबाह नु साल्मुन्ना आस कली खेदा पना पन बाक्नुड” दे पुना बाक्त। उत्पत्ती ३३:१७

6 तन्न सुक्कोथ डा ठेयब मुरपुकीमी “मार, जेबाह नु साल्मुन्ना आस कली गे ग्याइक्ने थुमी डा? इ लडाइ पाइब आन कली मारदे शोब्ले गेनीकी?” दे लोत्र लेत्मे बाक्त।

7 मिनु गिदोनमी “परमप्रभु यावेमी जेबाह नु साल्मुन्ना आस कली आं गुडमी गेप्टु हना, गो गोरशो रागी डा चोंक चूमी युक्नन्नी” देमाक्त।

8 मिनु पेनुएल सहरमी लमाक्त। मिनु मेकेर डा मुर आन कली खाल का डा लोत्र पवा बाक्त। मिनु मेकेर डा मुरपुकीमी यो सुक्कोथ डा मुरपुकीमी खोदेशो पा लोत्र लेत्मे बाक्त।

9 मिनु पेनुएल डा मुर आन कली “गो रिम्शो पा लेडडा नोले, गो मेको इन लाइश्शो खिं प्रेशशा गेनन्नी” देमाक्त।

10 मिनु जेबाह नु साल्मुन्ना १५ हजार लडाइ पाइब नु कारकोर सहरमी बाक्सा बाक्त। पूबं डा लडाइ पाइब आन लीशो में मोशोन बाक्मा बाक्त। लाख का २० हजार लडाइ पाइब चहिं साइक्चा पुइसमा बाक्त।

11 मिनु गिदोन नोबाह नु योग-बेहा आ पूबंम बाक्शो ग्याप्ब लेयब आन गाक्तीक लां लशा, जेबाह नु साल्मुन्ना आस लडाइ पाइबपुकीमी लडाइ आ पूबंम मारेइ ममिम्थु बाक्मानु, गिदोनमी लडाइ तोवा बाक्त।

12 मिनु जेबाह नु साल्मुन्ना चहिं मेक रे प्रोकसा बाक्त। गिदोनमी मेको मिदयानी पिप आस कली खेदा पा ग्याइक्ता बाक्त। मोपतीके मेको आन लडाइ पाइब नेल्ले वाम ग्याम दुम्मा बाक्त।

13 मिनु योआश आ तौ गिदोन लडाइ रे हेरेस इर गे लतीक लां रे लेम्माक्त।

14 मिनु सुक्कोथ डा ठिटा का कली ग्याइश्शा, मेको कली “सुक्कोथ डा ठेयब मुर नु खाल्पापुकी, सु सु बाक्नीमी?” दे हिल्लो पवा बाक्त। मिनु मेको ठिटामी सुक्कोथ डा ७० जना ठेयब मुर नु खाल्पा आन नें ब्रेक्शा गेवा बाक्त।

15 मिनु नोले गिदोन सुक्कोथ सहरम जाक्शा, मेकेर डा मुर आन कली “जेबाह नु साल्मुन्ना एकेर बाक्नीस। मेको आस पूबंम गेपुकीमी आं कली ‘मार, जेबाह नु साल्मुन्ना आस कली ग्याइक्ने थुमी डा? इ लडाइ पाइब आन कली गो मारदे शोब्ले गेनीकी डा?’ दे शुक्शी पाइतीनी” देमाक्त।

16 मिनु सुक्कोथ सहर डा ठेयब मुर नु खाल्पा आन कली लाइश्शा, गोरशो रागी डा चोंक चूम युक्मी बाक्त।

17 पेनुएल सहरम बाकशो लाइशो खिं कली प्रेशा, मेकेर डा वोंइश मुर आन कली साइकमी बाक्त।

18 मिनु गिदोनमी जेबाह नु सालमुन्ना आस कली “गे निक्शीमी ताबोरमी साइशो मुर दोदेशो बाकमा?” दे हिल्लो पाम्सी बाक्त। मिनु “इन खोदेशो बाक्तेकम। पिप आ तौ खोदेशो बाकमा बाक्त” दे लोव्व लेत्मे बाक्त।

19 मिनु गिदोनमी “मेकोपुकी आं लोकबपुकी बाक्तेकम। आं आम आ तौपुकी बाक्तेकम। मिनु मेको आन कली मसाइक्नी हना, परमप्रभु यावे ब्रोंइशा, बाकशो खोदेशो पा, गो थमा पा, इस कली ब्रोंइचा गेड वा” दे माइक्सी बाक्त। गन्ती ३५:३१

20 मिनु आ जेठा तौ, येथेर कली “बोक्शा, एको आस कली सांइसी” देंमाक्त। तन्न आ तौ आल बाक्तीके हिंशा, आ तरवार मशोदा बाक्त।

21 मिनु जेबाह नु सालमुन्नामी “आंमान बोक्शा, आंस कली सतीन। मारदे हना गे नु वोंइश मुर आ बोल बाक्ब” देंसा बाक्त। मिनु गिदोन बोक्शा, मेको निक्शी आस कली सांइसी बाक्त। मिनु मेको आस दलओंठ आ शुरमी बाकशो शुश क्येट लाइब गहनापुकी पुइश लदा बाक्त।

### गिदोन आ गेय नेल्ल

22 मिनु इस्राएलीपुकीमी गिदोन कली “गो आंइ कली मिदयानी रे पा प्रोंइतीनी। मुल आंइ कली हुकुम पाइब दुमीन। मिनु इन तौ नु इन चच नेल्ल आंइ सासन पाइब दुम्मल” देंमा बाक्त।

23 मिनु गिदोनमी “गो नु आं तौ ममाइ, तन्न परमप्रभु यावेमी इन कली हुकुम पाइब” देंमाक्त।

24 मेकोमी “गो इन कली थोव्वक का पुंइनुड, मार पुंइनुड देशा हना, गेपुकीमी का का पा इन रोइशो रे पा नोफाम पांइतीक का का आं कली गेने” देंमाक्त। मारदे हना मेको आन जोरी सत्रु इशमाएली बाकमा बाक्त। मेकोपुकीमी सुन के नोफाम पांइतीक पाइबाकमा बाक्त।

25 मिनु मेकोपुकीमी “दुम्ब, गो मेको इन कली गेनीकी” देंमा बाक्त। मिनु वा का ब्रामे बाक्त। मिनु नेल्लेमी आंम के रोइशो सुन मेकेर वोदमे बाक्त।

26 मिनु अरु शुश क्येट लाइकब माला नु आन दलओंठ आ शुरम रेशो सुन के माला, पिप आन फेक्तीक वा मनाक्थु, मेकोमी पुंइशो सुन हजार का ७ सहे शेकेल दुम्माक्त। शेकेल का ११.५ ग्राम खोदेशो बाक्ब। गन्ती ३१:५०

27 मिनु गिदोनमी मेको सुन रे पा निसाफ पतीक ऊरीम नु थुम्मीम बाकशो झोला का सेल्शा, मेको कली आ सहर ओफ्रामी वोदा बाक्त। मिनु इस्राएली नेल्लेमी मेको कली ठेयब सेल्शा, आंम कली दूली पाइब सेल्मे बाक्त। मेको गिदोन नु आ खिं डा मुर आन कली यो हेंथे पपाइक्चा कली बाक्माक्त। न्यायाधीस १७:५;

28 मोपा मिदयान डा मुरपुकी इस्राएली आन गुइमी दुम्शा, मेकोपुकीमी लेंशा लडाइ मपामे बाक्त। मिनु गिदोन बाक्म सम्म इस्राएल रागी ४० बर्स सम्म लडाइ रे नांइसे बाक्त। न्यायाधीस ३:११; न्यायाधीस ५:३१

### गिदोन बेक्शो

29 मिनु नोले योआश आ तौ येरूब-बाल आ खिं लशा, बाकशो बाक्माक्त।

30 गिदोन आ तौ ७० जना बाक्मा बाक्त। मारदे हना मेको आ मीश शुश बाक्मा बाक्त।

31 मेको आ कान्छी मीश शेकेम सहरमी बाक्माक्त। मेकोमी यो तौ का थिमाक्त। गिदोनमी आ तौ आ नें अबीमेलक वोदा बाक्त।

32 मिनु योआश आ तौ गिदोन शुश खूशो दुम्शा बेक्माक्त। मेको कली आ आफ अबीएजेर आ तुरस ओफ्रा सहरमी थिम्मे बाक्त। न्यायाधीस ६:११

33 गिदोन बेक्म नोले इस्राएलीपुकीमी लेंशा बाल देवता कली ठेयब सेल्मे बाक्त। मेकोपुकीमी बाल-बेरीत कली आंम देवता सेल्मे बाक्त। न्यायाधीस २:११; न्यायाधीस ९:४

34 मिनु मेको आन कली एर ओंथ डा जोरी सत्रु रे प्रोंइब परमप्रभु यावे, आन परमप्रभु कली प्रेंदमे बाक्त।

35 येरूब-बाल माइशो गिदोन आ पशो रिम्शो गेय प्रेशा, मेको आन खिं डा मुर आन कली ममिन्थु, आइक्च सेल्मे बाक्त। न्यायाधीस ९:५,९,२४

## 9

### अबीमेलिक पिप दुम्शो

1 येरूब-बाल आ तौ अबीमेलिक आ ममा आ खिं डा मुर आन बाक्तीक शेकेम सहरमी लमाक्त। मेकोमी आ मामा आन खिं डा मुर मौली नेल्ल आन कली न्यायाधीस ८:३१

2 “शेकेम सहर डा मुर नेल्ल कली लोत्र का हिल्लो पन। मार लोत्र हिल्लो पन देशा हना ‘येरूब-बाल आ ७० जना तौ नेल्लेमी इन कली सासन पशो रिम्शो दय गोम इन कली सासन पशो रिम्शो?’ गो इन हुश बाक्नुड, दे मिन्तीन” देमाक्त। न्यायाधीस ९:१८

3 मिनु आ मामापुकीमी मेको शेकेम डा मुर आन कली मेको लोत्र शोत्रडमे बाक्त। मिनु मुर नेल्लेमी “मेको आंइ लोकब बाक्ब” दे अबीमेलिक आ नोले खोइक्चा थुं पामे बाक्त।

4 मिनु मेकोपुकीमी अबीमेलिक कली बाल-बेरीत आ मन्दिर रे पा ७० शेकेल चांदी के क्येट गेमे बाक्त। मिनु मेकोमी मेको क्येट लाइशशा, मरिम्शो पाइब मुर आन कली गेवा बाक्त। मिनु मेकोपुकी मेको आ नोले खोदमे बाक्त। न्यायाधीस ८:३३

5 मिनु मेको नेल्ल आ आफ आ खिं ओफ्रामी लमा बाक्त। मेकेर येरूब-बाल आ तौ नेल्ल आन कली फुल्लु का तारी क्योरशा सदमे बाक्त। तन्न येरूब-बाल आ कान्छा तौ योथाम खुइशशा ब्रोंडमाक्त।

6 मिनु शेकेम नु बेथ-मिल्लो डा ठेयब मुर नेल्ल खुम्सीशा, शेकेममी बाक्शो ठेयब थाम आ नेक्था बाक्शो ठेयब रवा आ पुंमी अबीमेलिक कली पिप सेल्मे बाक्त। उत्पत्ती ३५:४; यहोसु २४:२६

### योथाम आ कथा

7 मिनु ठेयब मुरपुकीमी मेको लोत्र योथाम कली नैपदमे बाक्त। मेको लशा गेरीजीम डांडामी राम्माक्त। मिनु ठेयब सेंदामी “शेकेम सहरम बाक्ब ठेयब मुर नेल्ल, गे आं लोत्र नेंतीनी हना, परमप्रभुमी इन लोत्र नेंब।

8 काबु रवा नेल्ल खुम्सीशा, आंम कली पिप सेल्चा, दे लोत्र पमुमा बाक्त। मिनु मेकोपुकीमी तेल रवा कली ‘आंइ पिप दुमीन’ देमा बाक्त।

9 तन्न तेल रवामी ‘मार, देवी देवता नु मुर आन कली ठेयब सेल्पाइक्ब आंम के रिम्शो तेल सेल्चा प्रोंइशा, गो रवा आन कली सासन पाइनुडा?’ देमाक्त।

10 मिनु रवापुकीमी फोव्रशी रवा कली ‘गे आंइ पिप दुमीन’ देमा बाक्त।

11 मिनु फोव्रशी रवामी ‘मार, आंम के रिम्शो जिज नु ब्रोंवशो फल सेल्चा प्रोंइशा, गो रवा आन कली सासन पाइनुडा?’ देमाक्त।

12 मिनु रवापुकीमी अडगुर बोट कली ‘गे आंइ पिप दुमीन’ देमा बाक्त।

13 मिनु अडगुर बोटमी ‘मार, देवी देवता नु मुर आन कली ग्येरपाइक्ब आं के अडगुर शांबु सेल्चा प्रोंइशा, गो रवा आन कली सासन पाइनुडा?’ देमाक्त।

14 मिनु नोले रवापुकीमी चू रवा कली ‘गे आंइ पिप दुमीन’ देमा बाक्त। २राजा १४:९

15 मिनु चू रवामी ‘गेपुकीमी थमा पा, आं कली इन पिप सेल्चा दाक्नीनी हना, आं नेक्था जाक्शा, आं पुंम बाक्कीन। मबाक्तीनी हना, चू रवा रे पा मी गूशा लेबानोन डा ठेयब रवा नेल्ल आन कली खतम सेल्ब’ देमाक्त” दे कथा सेल्शा ठेयब सेंदा पा देमाक्त।

16 मिनु योथाममी “मुल नेनीन, गे अबीमेलिक कली थमा सुइशशा नु रिम्शो थुंमी पिप सेल्तीनी हना, दुम्ब। मिनु येरूब-बाल नु आ खिं डा मुरुम इन कली रिम्शो पशो खोदेशो पा, गेमी यो मेको आन कली रिम्शो पाइतीनी हना, दुम्ब।

17 आं आफोमी बेक्नुड, दे महिंथु, लडाइ पा इ कली मिदयानी रे पा प्रोंइनु।



18 तन्न मुलाक्त आं आफ आ खिं डा मुर आन कली थम मरिम्शो पाइतीनी। मेको आ ७० जना तौ आन कली फुल्लु तारी क्योरशा साइक्तीनी। मेको आ वाइलीम आ तौ अबीमेलेक कली शेकेम डा पिप सेल्लतीनी। मारदे हना मेको इन लोकब बाक्ब।

19 मिनु मुलाक्त गेपुकीमी येरूब-बाल नु आ खिं डा मुर आन कली रिम्शो पा मान पशो बाक्तीनी हना, गे अबीमेलेक नु ग्येरसीन। मिनु अबीमेलेक यो गेपुकी नु ग्येरसेक्ल।

20 तन्न मोदेंशो मदुत हना, अबीमेलेक रे मी गूशा, शेकेम नु बेथ-मिल्लो डा मुर आन कली खतम पोक्गल। मिनु शेकेम नु बेथ-मिल्लो डा मुर रे मी गूशा अबीमेलेक कली खतम पोक्गल” देंमाक्त। न्यायाधीस ९:५७

21 मिनु योथाम मेकेर रे प्रोकशा, बेयर माइशो सहरमी जाक्दीम्माक्त। मिनु मेको आ लोकब अबीमेलेक तशा हिंशा, मेकेरेन बाक्माक्त।

### अबीमेलेक नु शेकेम डा मुरपुकी

22 अबीमेलेकमी इसाएली आन कली बर्स सां सासन पवा बाक्त।

23 मेना परमप्रभुमी अबीमेलेक नु शेकेम डा टेयब मुर आन दातेमी जिपाइक्चा कली मरिम्शो जिपाइक्ब वोल का सोइक्ता बाक्त। मिनु शेकेम डा टेयब मुरपुकीमी मेको कली जोल पा मरिम्शो पामे बाक्त। १सामुएल १६:१४; १सामुएल १८:१०; १सामुएल १९:९

24 मिनु परमप्रभुमी येरूब-बाल आ ७० जना तौ आन कली हुश खाक्श पोक्तीके, अबीमेलेक नु मेको कली वारच पाइब शेकेम डा टेयब मुर आन कली क्येक्क लेत्चा कली मोदेंशो जिप्पाइक्ब वोल का सोइशो बाक्माक्त। उत्पत्ती ९:६

25 मिनु शेकेम डा टेयब मुरपुकीमी अबीमेलेक कली काइ मदाक्थु, साइक्चा, दे डांडाम बाप्चा कली मुर सोइक्तमे बाक्त। मेकोपुकीमी लांम गाक्ब आन मारेइ मारेइ रोइक्तमे बाक्त। मिनु लांम बाप्शो बाक्नीम, दे अबीमेलेक कली तुइक्पदमे बाक्त।

26 मिनु एबेद आ तौ गाल नु आ खिं खिं डा मुर शेकेममी बाक्चा कली जाक्मा बाक्त। मिनु शेकेम डा टेयब मुरपुकीमी गाल कली थमा सुइशशा, दाक्चा गोत्रमे बाक्त।

27 शेकेम डा मुर आन अडगुर रूमी लशा, अडगुर सेक्शा कोलमी खाक्गमे बाक्त। मिनु आन देवता आ मन्दीरमी चाड मानेचा कली लमा बाक्त। मिनु मेकेर जशा तूशा अबीमेलेक आ पर्बम शुक्शी लोत्र पामे बाक्त।

28 मिनु एबेद आ तौ गालमी “अबीमेलेक सु बाक्बा डा? मार, मेको येरूब-बाल आ तौ ममाइ डा? मेको नु आ लडाइ पाइब आन कप्तान जेबुलमी शेकेम आ आफ हमोर आ मुर आन कली गेय मपामे? गो शेकेम डा मुर, मारदे मेको कली गेय पाइनीकी? उत्पत्ती ३४:२

29 गो शेकेम डा मुर आन कली सासन पाइब बाक्शो नड हना, गो अबीमेलेक कली क्याम्दु वा। गो मेको कली ‘लडाइ पाइब शुश सेल्शा, लडाइ पय’ देड वा” देंमाक्त।

30 मिनु सहर डा सासन पाइब जेबुलमी एबेद आ तौ गाल आ देशो नेंशा, शुश गाइक्ता बाक्त।

31 मिनु मेकोमी खुइशशोमी अबीमेलेक कली लोत्र सोइक्ता बाक्त। मार लोत्र सोइक्ता बाक्त देशा हना “एबेद आ तौ गाल नु आ खिं खिं डा मुर शेकेममी जाक्शा बाक्शा, सहर डा मुर आन कली इन पर्बम मरिम्शो लोत्र पना पन बाक्नीम।

32 मोपतीके गे इन लडाइ पाइब नु नाक्दोन बोक्शा, सहर डा लाडगा डा रूमी रिम्दीन।

33 मिनु सुनी कना नां दाप्ची ना सहर कली लडाइ तोन। मिनु गाल नु आ मुरपुकी लाडगा गूमानु, मेको आन कली मार पचा माल्नीनी, मेको पन” देंमाक्त।

34 मिनु अबीमेलेक नु आ लडाइ पाइब नाक्दोन बोक्शा, ४ हुल दुम्शा, शेकेम आ लाडगाम लडाइ तोचा कली बाप्शा बाक्मा बाक्त।

35 मिनु एबेद आ तौ गाल सहर डा लाडगा लशा, सहर डा ओत्रतीक लाप्चोमी राप्शा बाक्माक्त। मिनु अबीमेलेक नु आ लडाइ पाइब आन बाप्तीक रे गूमा बाक्त।

36 मिनू गालमी मेको आन कली तशा, जेबुल कली “मुरपुकी डांडा रे ब्रुम्ना ब्रुम्न बाक्नीम” देंमाक्त। मिनू जेबुलमी “मेको मुर ममाइ, डांडा आ वांकु बाक्ब। मेको मुर खोदेशो तांडसीनीम” दे लोत्र लेत्ता बाक्त।

37 मिनू लेंशा गालमी “कोव्रडीन, मुरपुकी रागी आ दाते रे ब्रुम्ना ब्रुम्न बाक्नीम। मुर आ हुल का चहिं चिडगा कोइतीक रवा रे यिना यिन बाक्नीम” देंमाक्त। इजीकीएल ३८:१२

38 मिनू जेबुलमी “इ डोंइती डा ठेयब लेशशो लोत्र, ते लाक्गा? गे ‘अबीमेलेक सु बाक्बा? गो मारदे मेको कली गेय पाइनीकी?’ देंशो नवे। इ मदाक्शो मुर मेको मनमी डा? मुल लावो। मेकोपुकी नु लडाइ पावो” देंमाक्त।

39 मोपतीके गालमी शेकेम डा ठेयब मुर आन डोंइती लशा, अबीमेलेक नु लडाइ पवा बाक्त।

40 तन्न अबीमेलेकमी मेको लडाइ ग्रामाक्त। गाल चहिं प्रोकमाक्त। मिनू शुश मुर साइक्चा पुइसमा बाक्त। सहर डा ठेयब लाप्चो सम्म शुश मुर शोल्लो पा बेक्शो बाक्मा बाक्त।

41 मिनू अबीमेलेक लशा, अरुमाह माइक्तीक सहरम बाक्माक्त। जेबुलमी चहिं गाल नु आ खिं खिं डा मुर आन कली शेकेम रे खेरमी बाक्त।

42 आ दीसा शेकेम डा मुरपुकी लाडगा रूमी लमा बाक्त। मिनू मुरपुकीमी मेको लोत्र अबीमेलेक कली नेंपदमे बाक्त।

43 मोपतीके आ लडाइ पाइब आन कली हुल सां पा योक्शा, सहर मेर डा रूमी बाप्शा, बाक्पदा बाक्त। मिनू मुरपुकी सहर रे गूशा पिशो तशा, मेको आन कली साइक्मी बाक्त।

44 अबीमेलेक नु आ हुल रीब पा डोंइती बारमा बाक्त। मिनू सहर ओव्रतीक ठेयब लाप्चोमी लडाइ पचा सासमा बाक्त। अरु हुल निकशी चहिं पिशा, रूमी बाक्शोपुकी नु लडाइ पा मेको आन कली सदमे बाक्त।

45 अबीमेलेकमी सुनी रे नाक्दो सम्म लडाइ पा, मेको सहर कली आंम के सेला बाक्त। मेकेर डा मुर नेल्ल आन कली साइक्मी बाक्त। मिनू सहर खतम पोक्शा, हिकसी फ्रवा बाक्त।

46 मिनू शेकेम डा बोल्यो दरवार डा ठेयब मुरपुकीमी सहर खतम दुम्शो नेंशा, मेकोपुकी एल-बेरीत देवता आ बोल्यो खिं आगा लमा बाक्त। न्यायाधीस ८:३३

47 मिनू मुरपुकीमी “शेकेम डा बोल्यो दरवार डा मुर नेल्ल बुक्शा बाक्नीम” दे अबीमेलेक कली नेंपदमे बाक्त।

48 मिनू अबीमेलेक नु आ लडाइ पाइब सल्मोन डांडामी लमा बाक्त। मेकोमी खा लाइश्शा, शाक्श क्योरशा, बालाम लाप्शा कुरा बाक्त। आ लडाइ पाइब आन कली “गे आं कली मार पशो तनी, रीब पा मोदेशो पन” देंमाक्त।

49 मोपा लडाइ पाइब नेल्लेमी मोदेशो पा शाक्श क्योरशा, यित्मे बाक्त। मिनू अबीमेलेक आ नोले खोदमे बाक्त। मेको शाक्श लाइश्शा, एल-बेरीत आ बोल्यो खिंम तेल्ला, मी सुइक्तमे बाक्त। मिनू शेकेम डा बोल्यो दरवारम बाक्ब नेल्ल बेक्मा बाक्त। मेकेर हजार का खोदेशो वोंइश मुर नु मीश मुर बाक्शो बाक्मा बाक्त।

### अबीमेलेक बेक्शो

50 मिनू मेकेर रे अबीमेलेक थेबेस गे लमाक्त। मिनू मेको थेबेस सहर कली लडाइ पा आंम के सेला बाक्त।

51 मेको सहर आ दातेमी बोल्यो दरवार का बाक्माक्त। मिनू सहर डा मुर नेल्ले, वोंइश मुर नु मीश मुरपुकी मेकेर खुइश्शा, आन नोले लाप्चो चोक्शा, नेल्ल क्येडा तला तारी कौसीमी डोइश्शा बाक्मा बाक्त।

52 मिनू अबीमेलेक मेको बोल्यो दरवार आ नेक्था जाक्शा, लडाइ तोवा बाक्त। मिनू बोल्यो दरवार कली मी सुइक्चा, दे दरवार डा लाप्चो आ नेक्था जाक्दीम्माक्त।

53 मेना मीश मुर कामी तला डा यात तोक्शा, मेको आ पिया प्रोल्ला गेवा बाक्त।

54 मिनू अबीमेलेकमी रीब पा आ या कुरब कली ब्रेश्शा “मुरपुकीमी ‘मीश मुर कामी मेको कली साइक्तु’ दे म्देंमल, दे रीब पा इ तरवार शोइश्शा, साइय्थी” दे मदा बाक्त। मिनू आ या कुरबमी तूदानु, अबीमेलेक बेक्माक्त। १सामुएल ३१:४; २सामुएल ११:२१

55 मिनु इस्राएल डा मुरपुकीमी अबीमेलेक बेकशो तशा, नेल्ल आंम आंम खिं गे लेम्मा बाक्त।

56 मोपा परमप्रभुमी अबीमेलेक आ आफ कली पशो पाप, आ ७० जना लोकब आन कली साइशो आ क्येक्क लेत्ता बाक्त।

57 मिनु परमप्रभुमी शेकेम डा मुर आन मरिश्शो पशो आ पबंम क्येक्क लेत्ता बाक्त। मेकोपुकीमी येरूब-बाल आ तौ योथाम आ सराप रमा बाक्त। न्यायाधीस ९:२०

## 10

तोला नु याइर निसाफ पाइब दुश्शो

1 अबीमेलेक आ नोले इस्साकार आ थर डा, पुआ आ तौ दोदो आ चच तोला माइशो मुर इस्राएली आन कली प्रोंइचा कली जाक्माक्त। मेको एफ्राइम डा पहाडी रागी शामीरमी बाकशो बाक्माक्त। उत्पत्ती ४६:१३; गन्ती २६:२३

2 तोलाम २३ बर्स सम्म इस्राएली आन कली निसाफ पशो बाक्माक्त मिनु नोले बेक्माक्त। मिनु मुरपुकीमी मेको कली शामीरमी थिम्मे बाक्त।

3 तोला आ नोले गिलाद डा मुर याइरम २२ बर्स सम्म इस्राएली आन कली निसाफ पशो बाक्माक्त। गन्ती ३२:४१

4 मेको आ तौ ३० जना बाक्मा बाक्त। मेकोपुकी ३० ओटा गधाम डोइक्बाक्मा बाक्त। मिनु गिलाद डा ३० ओटा सहर मेको आन के बाक्माक्त। मुल सम्म मेको सहर आन नें हव्वोथ-याइर देंनीम। मेको गिलाद रागीम बाक्नीम। ब्यवस्था ३:१४

5 मिनु नोले याइर बेक्माक्त। मिनु मुरपुकीमी मेको कली कामोनमी थिम्मे बाक्त।

अम्मोनीपुकीमी श्येत गेशो

6 मिनु इस्राएलीपुकीमी लेंशा परमप्रभु यावे आ डोंइती मार मरिश्शो बाक्मे, मेको पामे बाक्त। मेकोपुकीमी बाल, अशतारोथ नु देवी देवता आन कली ठेयब सेल्मे बाक्त। मिनु अराम, सीदोन, मोआब नु अम्मोनी नु पलिस्ती आन देवी देवता कली यो ठेयब सेल्मे बाक्त। मोपा परमप्रभु यावे कली प्रोंइशा, मेको कली ठेयब मसेल्मे बाक्त।

7 मोपतीके परमप्रभु यावे मेकोपुकी नु गाइशशा मेको आन कली पलिस्ती नु अम्मोनी आन गुडमी गोवा बाक्त।

8 मेको बर्समी मेकोपुकीमी इस्राएली आन कली थाम्पा श्येत गेशा, साप्पा दिप्मे बाक्त। मिनु यर्दन खोला आ आइक्ची हांबु, पूबं गे गिलाद माइशो एमोरी आन रागीमी बाक्ब इस्राएली आन कली १८ बर्स सम्म थाम्पा श्येत गेशा दिप्मे बाक्त।

9 अम्मोनीपुकीमी ओंथ हाम ला ममाइ, यर्दन आइक्ची हांबु यो शोक्शा, यहूदा आ थर, बेन्यामीन आ थर नु एफ्राइम आ थर डा मुर आन कली लडाइ तोवमे बाक्त। मिनु इस्राएलीपुकीमी शुश श्येत जामे बाक्त।

10 मिनु इस्राएलीपुकीमी परमप्रभु यावे कली “वारच पाइय्कीकी। पाप पाइतक। आंइ परमप्रभु, इन कली प्रोंइशा, बाल देवी देवता आन कली पूजा पाइतक” देंमा बाक्त। १सामुएल १२:१०

11 मिनु परमप्रभु यावेमी इस्राएली आन कली “डोंइती इन कली इजीप्त डा मुर, एमोरी, अम्मोनी नु पलिस्ती आन गुड रे प्रोंइतन्नी।

12 मिनु सीदोन डा मुर, अमालेक आ मुर नु मोआबीपुकीमी इन कली दिप्मेनु “वारच पाइय्कीकी” दे ब्रेत्तीनी। मेना इन कली मेको आन गुड रे प्रोंइता।

13 तन्न गेपुकीमी आं कली प्रोंइशा, अरु देवी देवता आन कली पूजा पा ठेयब सेल्तीनी। मोपतीके मुल रे गो इन कली मप्रोंइनुड।

14 लने, इन योव्रशो देवी देवता आन कली थोन। मेकोपुकीमी इन कली इन श्येत रे प्रोन्मेक्ल” दे परमप्रभु यावेमी देंमाक्त। ब्यवस्था ३२:३७-३८; येरमीया २:२८

15 तन्न इस्राएलीपुकीमी परमप्रभु यावे कली “गोपुकीमी पाप पाइतक। मोपतीके गे आंड कली मार पचा दाकनीनी, मेको पन। तन्न मुल आंड कली प्रोनीन” दे पुन्मे बाक्त।

16 मिनु अरु देवी देवता आन कली ताइशशा, परमप्रभु यावे कली ठेयब सेल्मे बाक्त। मिनु परमप्रभु यावेमी इस्राएली आन कली मेको क्येडा श्येत गेचा मगोमी बाक्त। यहोसु २४:२३; न्यायाधीस २:१८

17 मिनु अम्मोनी लडाइ पचा कली खुम्सीशा, गिलादमी ताम्बु कीशा बाकशो बाक्मा बाक्त। मिनु इस्राएली यो खुम्सीशा, मिस्पामी बाकशो बाक्मा बाक्त। न्यायाधीस ११:२९

18 मिनु गिलाद सहरम बाक्ब इस्राएली लडाइ पाइब आन कप्तान गुम्मुशा “सुम अम्मोनी आन कली लडाइ तोचा गोइबा, मेकोमी गिलादम बाक्ब आन कली हुकुम पाइब” दे लोत्र पमुमा बाक्त। न्यायाधीस ११:६-१०

## 11

### येफता निसाफ पाइब दुम्शो

1 गिलाद सहर डा येफता ठेयब नु बोल्यो लडाइ पाइब मुर बाक्माक्त। मेको गिलाद आ तौ तेल्लेम रे पा थिशो बाक्माक्त।

2 मिनु गिलाद आ मीशमी यो मेको के शुश तौ थिशो बाक्माक्त। मिनु मेकोपुकी कोल्शो दुम्शा, येफता कली खेरमे बाक्त। मेकोपुकीमी येफता कली “आंड आफ आ खिंमी इ के मारेइ यो अडस मबाक्ब। गे अर्को मीश आ तौ नवे” देमा बाक्त। उत्पत्ती २१:१०

3 मोपतीके येफता मेको आ लोकबपुकी रे पा ब्रांडचा कली प्रोकशा, तोब रागीमी लशा बाकशो बाक्माक्त। मिनु मरिम्शो पाइब मुरपुकी मेको नु गारशा, रोइक्थ, लमा बाक्त। न्यायाधीस ९:४; १सामुएल २२:२

4 मिनु इच्का नोले अम्मोनीपुकीमी इस्राएली नु लडाइ पामे बाक्त।

5 मिनु लडाइ दुम्मेनु, गिलाद डा खाल्पापुकीमी तोब रागीमी बाकशो येफता कली ब्रथ लमा बाक्त।

6 मेकोपुकीमी येफता कली “पिन, आंड लडाइ पाइब आन ठेयब मुर दुमीन। मिनु गो अम्मोनी नु लडाइ पने चाप्नीकी” देमा बाक्त।

7 मिनु येफतामी मेको गिलाद डा खाल्पा आन कली “गेपुकीमी आं कली मदाक्थु, आं आफ आ खिं रे खेरतीनी। मुल श्येत जनी ना मारदे आं कली ब्रेत्नीनी?” देमाक्त।

8 मिनु मेको खाल्पापुकीमी येफता कली “मोपतीके गो इन कली ग्रुथ जाक्तक। मुल गोपुकी नु गाक्कीन। मिनु अम्मोनी नु लडाइ पा ग्राशा, गिलादमी बाक्ब नेल्ल आंड ठेयब मुर दुमीन” देमा बाक्त। न्यायाधीस १०:१८

9 येफतामी मेको आन कली “गेपुकीमी आं कली अम्मोनी नु लडाइ पथ लेम्शा लाइक्तीनी नु परमप्रभु यावेमी मेको आन कली आं गुइमी गेपु हना, इन ठेयब मुर दुम्मुडा?” दे माइक्मी बाक्त।

10 मिनु गिलाद डा खाल्पापुकीमी येफता कली “परमप्रभु यावे गो आंड दातेमी सांकछी बाक्ब। गो इन देशो खोदेशो पाइनीकी” देमा बाक्त।

11 मिनु येफता गिलाद डा खाल्पापुकी नु लमाक्त। मेकेर डा मुरपुकीमी मेको कली ठेयब मुर नु लडाइ पाइब आन ठेयब मुर सेल्मे बाक्त। मिनु येफतामी मिस्पामी परमप्रभु यावे आ डोंइती मेको लोत्र नेल्ल शोवडा बाक्त। न्यायाधीस ११:२९; न्यायाधीस १०:१७

12 मिनु येफतामी अम्मोनी आन पिप कली “गे मारदे आंड रागी कली लडाइ तोथ पीनीनी? गे नु आंड दातेमी मार मरिम्शो बाक्बा?” दे हिल्लो पचा कली मुर सोइक्ता बाक्त।

13 मिनु अम्मोनी आन पिपमी येफता आ मुर आन कली “इस्राएलीपुकी इजीप्त रे जाक्शा, अरनोन खोला रे यब्बोक नु यर्दन खोला सम्म आंड रागी लाइक्तेक्म। मेको रागी सिकसी पा लेत्तीन” दे लोत्र सोइक्ता बाक्त।

14 मिनु येफतामी लेंशा मुर सोइशशा अम्मोनी आन पिप कली

15 “येफता आ लोत्र मार बाक्त देशा हना, इस्राएलीपुकीमी गेनायो मोआबी आन रागी नु अम्मोनी आन रागी मलदेम। ब्यवस्था २:९,१९

- 16 इस्राएलीपुकी इजीप्त रे कुशा, गोरशो रागी रे लल समुन्द्र गे कादेश सहरम जाक्दीम्मा बाक्त।
- 17 मिनु एदोम डा पिप कली 'इन रागी डा लां लचा गेकी' दे लोत्र सोइक्तमे बाक्त। तन्न एदोम डा पिपमी मेको लोत्र नंसीन मनेना बाक्त। मिनु मोआबी आन पिप कली यो लोत्र सोइक्तमे बाक्त। तन्न मेको यो मबिस्से बाक्त। मोपतीके इस्राएलीपुकी कादेशमी बाक्मा बाक्त। गन्ती २०:१४-२१
- 18 मेकेर रे एदोम नु मोआब रागी हिरशा, गोरशो रागी रे मोआब आ नां दाप्तीक गे लमा बाक्त। मिनु अरनोन खोला आ नेक्था ताम्बु कीडमे बाक्त। मोआबी आन रागी मओत्रम। मारदे हना अरनोन मोआब आ सांद बाक्माक्त। गन्ती २१:१३
- 19 मिनु नोले हेशबोनम बाक्शो एमोरी आन पिप सीहोन कली 'इन रागी डा लां रे पा आंइ रागी सम्म लचा गेकी' दे लोत्र सोइक्तमे बाक्त। गन्ती २१:२१-३१
- 20 तन्न सीहोनमी इस्राएली आन कली मेकेर रे लाइनीम, दे थमा मसुदा बाक्त। मिनु मुर नेल्ल कली खुप्शा, याहासमी आन ताम्बु कीशा, इस्राएली नु लडाइ पामे बाक्त।
- 21 मिनु परमप्रभु यावे, इस्राएली आन परमप्रभुमी सीहोन नु आ मुर आन कली इस्राएली आन गुडमी गेमी बाक्त। मिनु मेकोपुकीमी मेको आन कली ग्राशा, आन रागीमी बाक्शो एमोरी आन रागी आंम के सेल्मे बाक्त।
- 22 मेकोपुकीमी अरनोन खोला रे पा यब्बोक खोला सम्म नु गोरशो रागी रे पा यर्दन खोला सम्म एमोरी आन रागी आंम के सेल्मे बाक्त।
- 23 मोपा परमप्रभु यावे, इस्राएली आन परमप्रभुमी आंम मुर आन कली रिम्शो पचा, दे एमोरी आन कली खेरा बाक्त। मुल एको रागी लेशा ताक्चा मगारनीनी।
- 24 इन देवता केमोशमी इन कली गेशो ताइनीनी ममाइ डा? परमप्रभु यावे, आंइ परमप्रभुमी मार गेबा, गो यो मेको ताइनीकी। गन्ती २१:२९
- 25 मुल मार, गे मोआबी आन पिप सिप्पोर आ तौ बालाक क्येडा रिम्शो बाक्नीनी? मार, मेकोमी इस्राएली नु जिशा, मेको नु लडाइ पवा डा? गन्ती २२:२; यहोसु २४:९
- 26 इस्राएलीपुकी सहे सां बर्स सम्म हेशबोन नु आ एर ओंथ डा गाउंपुकी, आरोएर नु मेको आ एर ओंथ डा गाउंपुकी नु अरनोन आ नेक्था डा सहर नेल्लेम बाक्मा बाक्त। मारदे मेको क्येडा डोंइती इन के मसेल्नी?
- 27 गोपुकीमी इन कली मारेइ यो मरिम्शो मपशो। तन्न गेपुकीमी आं कली लडाइ तोशा, मरिम्शो पाइनीनी। मुलाक्ती परमप्रभु यावेमी इस्राएली नु अम्मोनी आन दातेमी निसाफ पाइब" दे येफतामी अम्मोनी आन पिप कली लोत्र सोइक्ता बाक्त।
- 28 तन्न अम्मोनी आन पिपमी येफतामी सोइश्शो लोत्र मारेइ खोदेशो मलाक्माक्त।

### येफतामी कसम पशो

- 29 मिनु परमप्रभु यावे आ सोक्तीम येफता कली सुमा बाक्त। मिनु गिलाद नु मनस्से आन रागी लाक्शा, गिलाद डा मिष्पा जाक्दीम्माक्त। मिनु मेकेर रे अम्मोनी आन रागी लमाक्त। न्यायाधीस ६:३४
- 30 येफतामी परमप्रभु यावे कली कबल का पवा बाक्त। मेकोमी मार कबल पवा बाक्त देश हना "परमप्रभु यावे, गे अम्मोनी आन कली आं गुडमी गेतीनी हना, रसामुएल १५:८
- 31 गो अम्मोनी रे रिम्शो पा आं खिं लेत्ती हना, सु आं खिंमी नेल्ल क्येडा डोंइती गो नु ग्रुमथ जाक्बा, मेको इन के दुम्ब। गो मेको कली चोशा चढ़ेनुड" दे कसम जवा बाक्त। २राजा ३:२७
- 32 मिनु येफता अम्मोनी नु लडाइ पथ आइक्ची हांम शोक्शा लमाक्त। मिनु परमप्रभु यावेमी अम्मोनी आन कली येफता आ गुडमी गेवा बाक्त।
- 33 मेकोमी आरोएर रे मिन्नीथ नु आबेल-केरामीम सम्म २० ओटा सहर खतम सेला बाक्त। मोपा इस्राएलीमी अम्मोनी आन कली ग्रामा बाक्त।
- 34 मिनु येफता आ खिं मिस्पामी लेम्माक्त। मिनु आ तमी खैजडी ताप्शा, सिल पना पन मेको कली ग्रुमथ जाक्माक्त। मेको आ तमी का ला बाक्माक्त। अरु आल मबाक्मा बाक्त।

35 मिनु येफतामी आ तमी तवा चोटीन आ वा खाक्शा “आं तमी, आं थुं जिक्तीवी। शुश श्येत गेप्तीवी। गो परमप्रभु यावे कली कसम जाता। मिनु मेको कसम मखाप्थु म्दुम्नुड” देंमाक्त। गन्ती ३०:३

36 मिनु आ तमीमी “आं आफ, परमप्रभु यावे कली कसम जाइतीनी हना, कबल पशो खोदेशो पा आं कली पने। मारदे हना परमप्रभु यावेमी इन जोरी सत्रु अम्मोनी नु क्येक्क लेशो बाक्ब।

37 तन्न आं कली शिशी पन। महिना निक्शी सम्म आं कली प्रोनीन। आं वारचपुकी नु एको डांडाम हिरनुड। गो कन्नेमी बेक्चा माल्ताक्यी, दे रोंका पचा तडल” देंमाक्त।

38 मिनु येफतामी “लावो” देंशा, आ तमी कली महिना निक्शी सम्म प्रोना बाक्त। मिनु मेको आ वारचपुकी नु डांडा लशा डा मीन आ कन्नेमीन बाक्शा बेक्चा माल्शो आ परबम डाक्माक्त।

39 मिनु महिना निक्शी नोले मेको लेशशा जाक्माक्त। मिनु येफतामी परमप्रभु कली आ पशो कसम खबा बाक्त। मिनु मेको मीश आल कन्नेन बेक्माक्त। न्यायाधीस ११:३१; ब्यवस्था १२:२९-३१

40 मेना रे इस्राएल डा तमी नेल्लेमी बर्स बर्समी ४ नाक्त सम्म गिलाद सहर डा येफता आ तमी कली मिम्शा, रोंका पाइनीम।

## 12

### येफता नु एफ्राइम

1 एफ्राइम आ थर डा मुरुमी आ लडाइ पाइब आन कली खुप्ता बाक्त। मिनु मेकोपुकी यर्दन आइक्की हांबु साफोन गे शोक्शा, येफता कली “अम्मोनी नु लडाइ पथ लनीनु, आंइ कली मारदे मब्रेनी? मुल इन कली नु इन खिं कली मी सुइक्नीकी” देंमा बाक्त। न्यायाधीस ८:१

2 मिनु येफतामी “गो नु आं मुर अम्मोनी नु टेयब लडाइ दुम्नेनु, गे इन कली ‘वारच पन’ दे ब्रेशो नड। तन्न गेपुकीमी आंइ कली मेको आन गुड रे मप्रोंइनी।

3 मिनु गेपुकीमी आंइ कली वारच मपाइनीनी, दे तुइक्तु नोले, महिंथु, खोला शोक्शा, अम्मोनी नु लडाइ पथ गाक्तक। मिनु परमप्रभु यावेमी मेको आन कली आंइ गुडमी गेपु। मिनु मारदे मुलाक्ती गेपुकी गो नु जिथ जाक्नीनी?” देंमाक्त। न्यायाधीस ५:१८; न्यायाधीस ९:१७

4 मिनु येफतामी गिलाद डा मुर नेल्ल कली खुप्शा, एफ्राइम आ थर डा मुर नु लडाइ पवा बाक्त। मिनु गिलाद डा मुरपुकीमी मेको आन कली ग्रामा बाक्त। मेको जिचा मारदे बोक्शो बाक्त देंशा हना, एफ्राइम आ थर डा मुरपुकीमी “गे गिलादी एफ्राइम नु मनस्से आन दातेमी बाक्शो ला ननी” दे देशो बाक्मा बाक्त।

5 मिनु गिलादीपुकीमी यर्दन डा शोक्तीक लां एफ्राइम रे रोइशशा, आंम के सेल्मे बाक्त। मिनु गिलाद डा मुरपुकीमी खोला शोक्ब मुर आन कली “गे एफ्राइम आ थर डा मुर बाक्नीनी?” दे हिल्लो पामे बाक्त। “गो मनड” देंमा बाक्त हना,

6 गिलाद डा मुरपुकीमी “मो हना, शिब्बोलेथ देनो” देंबाक्मा बाक्त। मिनु मेकोमी ठीक पा देंने मचाप्थु “सिब्बोलेथ” देंतेक्म हना, मेकेर ग्याइशशा यर्दन आ नेक्था साइक्बाक्मा बाक्त। मेना एफ्राइम आ थर डा मुर ४२ हजार साइक्चा पुंडसमा बाक्त।

7 येफता ६ बर्स सम्म इस्राएली आन निसाफ पाइब दुम्शा बेक्माक्त। मिनु मेको कली आ सहर गिलादमी थिम्मे बाक्त।

### इब्सान, एलोन नु अब्दोन

8 येफता आ नोले बेथलेहेम डा इब्सान इस्राएली आन निसाफ पाइब दुम्माक्त।

9 मेको के ३० जना तौ नु ३० जना तमी बाक्मा बाक्त। मेकोमी आ तमी आन कली अरु थर डा मुर नु ग्युंबे पा गेवा बाक्त। मिनु आ तौ आन कली अरु थर डा ३० जना मीश आल ग्युंबे पा चाक्गा बाक्त। मेको ७ बर्स सम्म इस्राएली आन निसाफ पाइब दुम्माक्त।

10 मिनु इब्सान बेक्माक्त। मिनु मेको कली बेथलेहेममी थिम्मे बाक्त।

11 मेको बेकम नोले जबूलून आ थर डा एलोन १० बर्स सम्म इस्राएली आन निसाफ पाइब दुम्माक्त। गन्ती २६:२६

12 मिनु जबूलून आ थर डा एलोन बेकमाक्त। मिनु मेको कली जबूलून आ रागी डा आइयालोन सहरमी थिम्मे बाक्त।

13 मेको आ नोले पिराथोन सहर डा हिल्लेल आ तौ अब्दोन इस्राएली आन निसाफ पाइब दुम्माक्त।

14 मेको के ४० जना तौ नु ३० जना चच बाकमा बाक्त। मेको आन के ७० ओटा गधा बाकमाक्त। मिनु मेकोपुकी आंम आंम गधामी डोइक्बाकमा बाक्त। मिनु अब्दोनमी ८ बर्स सम्म इस्राएली आन कली निसाफ पशो बाकमाक्त।

15 मिनु नोले पिराथोन सहर डा हिल्लेल आ तौ अब्दोन बेकमाक्त। मिनु अमालेकी आन पहाडी रागी डा एफ्राइम डा पिराथोन सहरमी थिम्मे बाक्त।

## 13

### सिम्सोन जरमेशो

1 मिनु इस्राएलीपुकीमी लेंशा परमप्रभु यावे आ डोंइती मार मरिम्शो बाकमे, मेको पामे बाक्त। मोपतीके परमप्रभु यावेमी मेको आन कली ४० बर्स सम्म पलिस्ती आन गुडमी गेमी बाक्त।

2 मिनु दान आ थर डा मुर का बाकमाक्त। मेको सोराह सहरमी बाक्शो बाकमाक्त। मेको मुर आ नें मानोआह बाकमाक्त। मिनु मेको आ मीश आल मथीब बाकमाक्त।

3 मिनु परमप्रभु यावे आ स्वर्ग डा गेय पाइब मेको मीश मुर आ डोंइती गूशा, मेको कली “गे आल मथीब बाक्नेवे। तन्न मुल गे कोव्रज कुरशा तौ थीनेवे। उत्पत्ती १५:२; उत्पत्ती २५:२१; उत्पत्ती २९:३१

4 मोपतीके होस पा बाक्को, अडगुर शांबु नु अरु दुक्तीक काइ मतूडो, मगारचा डा जचा थोव्रक मजावो। गन्ती ६:२-२१; लेवी ११:-; १सामुएल १:११

5 मारदे हना गे कोव्रज कुरशा, तौ थीनेवे। मेको आ चां गेनायो खोइक्चा मदुम्ब। मारदे हना मेको वोंइश आल जरमसे चोटीन परमप्रभु कली योव्रशो नाजिरी का दुम्ब। मिनु मेकोमी इस्राएली आन कली पलिस्ती आन गुड रे प्रोंइचा गोइब” देमाक्त।

6 मिनु मेको मीश मुरुमी आ वोंइश कली “परमप्रभु आ गेय पाइब मुर का आं बाक्तीक जाक्त। मेको आ कुल हिंचा डा परमप्रभु आ स्वर्ग डा गेय पाइब खोदेंशो बाक्त। मिनु ‘सु बाक्नीनी?’ दे हिल्लो मपड। मिनु मेकोमी यो आ नें मदे।

7 तन्न मेकोमी आं कली ‘गे कोव्रज कुरशा तौ थीनेवे। मिनु अडगुर शांबु नु अरु दुक्तीक मतूडो, मगारचा डा जचा थोव्रक मजावो। मारदे हना मेको आल जरमसे रे मबेकम सम्म परमप्रभु आ योव्रशो नाजिरी का दुम्ब’ दे माइक्ती” देमाक्त।

8 मिनु मानोआहमी परमप्रभु यावे कली “परमप्रभु, इन सोइशशो मुर लेंशा आंस नेक्था सोइक्तीन। मेकोमी आंस कली मेको नोले जरमसीब वोंइश आल कली दोपा कोल्पाइक्चा, गो निकशीमी मार पचा माल्बा, आंस कली शेंदल” दे पुना बाक्त।

9 मिनु परमप्रभुमी मानोआह आ पुंइशो लोव्र नेना बाक्त। मिनु आ मीश रूमी बाक्मेनु, परमप्रभु आ स्वर्ग डा गेय पाइब लेंशा जाक्माक्त। मेना आ वोंइश मेको नु मबाक्शो बाक्माक्त।

10 मिनु आ मीश दोरशा लशा, आ वोंइश कली “मेको डोंइती जाक्शो मुर लेंशा आं बाक्तीक जाक्त” देमाक्त।

11 मिनु मानोआह बोक्शा, आ मीश नु लशा, मेकेर जाक्दीशा, मेको कली “आं मीश नु लोव्र पाइब गे ननी?” दे हिल्लो पवा बाक्त। मिनु मेकोमी “गो नड” देमाक्त।

12 मिनु मानोआहमी “इन देशो लोव्र दुम डा मेरे मेको वोंइश आलमी मार मार पचा दुम्बा, मार मार पचा मदुम्बा” दे हिल्लो पवा बाक्त।

13 मिनु परमप्रभु यावे आ स्वर्ग डा गेय पाइबमी “गो मार मार देंडा, इ मीशेमी रिम्शो पा टिचा माल्ब।

14 अङ्गुर बोट रे सिशशो मारेइ यो जचा मदुम्ब। मेकोमी अङ्गुर शांबु नु अरु दुक्तीक तूचा मदुम्ब। मगारचा डा मारेइ यो जचा मदुम्ब। गो मार मार देंडा, मेकोमी नेल्ल टिचा माल्ब” देंमाक्त। न्यायाधीस १३:४

15 मिनु मानोआहमी परमप्रभु यावे आ स्वर्ग डा गेय पाइब कली “गो इन कली पाठा का क्योरशा क्येनीकी। मोपतीके रिम्दीन” देंमाक्त। न्यायाधीस ६:१८

16 मिनु परमप्रभु यावे आ स्वर्ग डा गेय पाइबमी “आं कली तेक्तीसी हना यो, गो इन क्येशो मजाइनुड। तन्न गेमी चोशा चढेतीक ठीक सेल्लतीनी हना, परमप्रभु यावे कली चढेवो” देंमाक्त। मानोआहमी मेको परमप्रभु यावे आ स्वर्ग डा गेय पाइब बाक्ब, दे मतुइक्ता बाक्त।

17 मिनु मानोआहमी परमप्रभु यावे आ स्वर्ग डा गेय पाइब कली “इन नें मार बाक्बा? मारदे हना इन लोत्र थमा दुन्त हना, गो इन कली ठेयब सेल्ला दाक्नीकी” देंमाक्त। उत्पत्ती ३२:३०

18 मिनु परमप्रभु यावे आ स्वर्ग डा गेय पाइबमी मेको कली “गे मारदे आं नें हिल्लो पाइनेवे? मेको मतुइक्चा डा बाक्ब” देंमाक्त।

19 मिनु मानोआहमी अन्न नु पाठा लाइशशा, फुल्लु तारी छक लाक्चा डा गेय पाइब परमप्रभु यावे कली चढेवा बाक्त। न्यायाधीस ६:२१

20 मिनु मेको चढेतीक रे मी गूशा, सरीड गे लमेनु, परमप्रभु यावे आ स्वर्ग डा गेय पाइब मेको मी नु सरीड गे लमाक्त। मानोआह नु आ मीश कोत्रस डा कोत्रस बाक्शा, सेउ पाप्से बाक्त।

21 मिनु मेको नोले परमप्रभु यावे आ स्वर्ग डा गेय पाइब मानोआह नु आ मीश आ डोंइती गेनायो मगूमाक्त। मिनु मानोआहमी मेको परमप्रभु यावे आ स्वर्ग डा गेय पाइब बाक्माक्त, दे तुइक्ता बाक्त।

22 मिनु मेकोमी आ मीश कली “गो थमा पा बेक्नस। मारदे हना गो परमप्रभु कली ताइतस” देंमाक्त। प्रस्थान ३३:२०

23 तन्न आ मीशेमी “परमप्रभु यावेमी इस कली साइक्चा दाक्शो हना, इस चढेशो चोशा चढेतीक नु अन्न चढेतीक मब्रव वा। इस कली मोदेशो लोत्र मदे वा, मकोइद वा” देंमाक्त।

24 मिनु मानोआह आ मीशेमी तौ का थिवा बाक्त। मेको कली सिम्सोन नें वोदा बाक्त। मेको आल कोल्ना कोल्ल लमाक्त। मिनु परमप्रभु यावेमी मेको कली आसीक गेवा बाक्त। उत्पत्ती २४:१; उत्पत्ती ३५:९; गन्ती २२:६

25 मिनु सोराह नु एशताओल सहर आस दातेमी बाक्शो माहानेह-दान सहरमी बाक्मेनु, परमप्रभु यावे आ सोक्तीमी मेको कली गेय पपाइक्चा गोवा बाक्त। न्यायाधीस ३:९-१०; न्यायाधीस ६:३४; न्यायाधीस १४:६,९; न्यायाधीस १५:१४; गन्ती २४:२-४; १सामुएल १०:६,१०; १सामुएल १६:१३; इजीकीएल ११:५

## 14

### सिम्सोनमी मीश आल दाक्शो

1 काबु सिम्सोन तिम्नाह सहर बुम्माक्त। मिनु मेकेर पलिस्ती मीश आल का तवा बाक्त। यहोसु १९:४३

2 मिनु आ खिं लेशशा, आ आम आफ आस कली “तिम्नाहमी पलिस्ती मीश आल का ताता। मेको नु ग्युंवे पा गेयीनी” दे माइक्सी बाक्त।

3 मिनु आ आम आफोमी “मार, आंइ मुर नु इं थर डा मीश आल मबाक्बा? मिनु गे खोइक्तीक चिनु मखोइशशो, मेको पलिस्ती आ तमी का चाक्चा दाक्नेवे?” देंसा बाक्त। तन्न सिम्सोनमी “मेको मीश आल आं कली चाक्कीन। मारदे हना गो मेको कली दाक्नुड” देंमाक्त। उत्पत्ती ३४:१४; प्रस्थान ३४:१६

4 परमप्रभु यावेम सिम्सोन कली मेको मीश आल कली दाक्पाइशशो बाक्त, दे आ आम आफोमी मतुइशशो बाक्ताक्स। परमप्रभुमी पलिस्ती आन कली खतम पचा कली मोदेशो पशो बाक्माक्त। मेना पलिस्तीपुकीमी इसाएली आन कली सासन पशो बाक्मा बाक्त।



5 मिनू नोले सिम्सोन आ आम आफ नु तिम्नाहमी बुम्माक्त। मिनू मेकेर डा अडगुर रूमी जाकदीम्माक्त। मिनू मेकेर ठिटा गुप्स का यूशा, मेको कली ग्राम्दा बाक्त।

6 मिनू परमप्रभु यावे आ सोक्तीम सिम्सोन कली ठेयब सक्तिम सुमा बाक्त। मिनू आ गुडमी मारेड यो या मबाक्त हना यो, मेको गुप्स कली पाठा खोदेंशो पा सदा बाक्त। मिनू गुप्स साइशो लोत्र आ आम आफ कली मशोव्रडा बाक्त। न्यायाधीस १३:२५

7 मिनू सिम्सोन मेकेर जाकदीशशा, मेको मीश आल नु लोत्र पवा बाक्त। मिनू मेको मीश आल कली दाक्शा लेम्माक्त।

8 मिनू इचका नोले सिम्सोन मेको मीश आल कली ग्युबे पचा कली लेंशा तिम्ना बुम्माक्त। मिनू लां प्रोइशा, साइशो गुप्स कोव्रथ लमाक्त। मिनू राकशो गुप्स आ आगाम हुल का सुरब नु खुदो बाक्माक्त।

9 मिनू खुदो गुंइशा, जना जन लमाक्त। मेकोमी आ आम आफ आस कली यो जचा गेम्सी बाक्त। मिनू जाम्से बाक्त। तन्न मेको खुदो राकशो गुप्स आ आगा रे गुंइशो, दे आ आम आफ कली मशोव्रडा बाक्त।

10 मिनू सिम्सोन आ आफ मेको मीश आल कोव्रथ लमाक्त। मिनू सिम्सोनमी अरुम ग्युम्लेम पशो खोदेंशो पा भोज का गेवा बाक्त।

11 मिनू मेकेर डा मुरपुकीमी सिम्सोन कली ग्रुम्शा, ३० जना वोंइश मुर मेको कली वारच पचा कली चाक्गमे बाक्त।

12 मिनू सिम्सोनमी मेको आन कली “इन कली लोत्र का हिल्लो पाइनन्नी। एको ७ नाक्त डा भोजमी मेको लोत्र लेन्ने चाप्तीनी हना, गो इन कली ३० ओटा बुश फेक्तीक वा नु ३० ओटा शुश क्येट लाइब फेक्तीक वा गेनन्नी।

13 तन्न आं हिल्लो पशो लोत्र लेन्ने मचाप्तीनी हना, गे आं कली ३० ओटा बुश फेक्तीक वा नु शुश क्येट लाइब फेक्तीक वा गेचा माल्नीनी” देंमाक्त। मिनू मेकोपुकीमी “लो दुम्ब, हिल्लो पन” देंमा बाक्त।

14 मिनू सिम्सोनमी मेको आन कली “शुश ब्वाइब रे जचा थोत्रक गूत। बोल्यो रे जिज थोत्रक गूत। मेको मार बाक्बा?” दे हिल्लो पामी बाक्त। मिनू मेकोपुकीमी नाक्त सां सम्म मिम्ना मिम्न बाक्शा, मेको लोत्र मार बाक्बा, दे लेन्ने मचाप्बमे बाक्त।

15 मिनू ४ नाक्तीम मेकोपुकीमी सिम्सोन आ मीश कली “इ वोंइश कली लेम्शा, हिल्लो पावो। मिनू आंइ कली शोव्रडो। मोदेंशो मपाप्तीवी हना, गो इ कली नु इ आफ आ खिं कली मी सुइक्नीकी। आंइ कली पुडग सेल्चा कली निम्तो पवी?” देंमा बाक्त।

16 मिनू सिम्सोन आ मीश आ वोंइश आ डोंइती डाक्शा “गे आं कली काइ मदाक्नीनी। गे थमा पा आं कली मदाक्नीनी। गे आं मुर आन कली लोत्र का हिल्लो पाइतीनी। मिनू मेको लोत्र आ अर्थ चहिं आं कली मदेनी” देंमाक्त। मिनू सिम्सोनमी “मेको लोत्र आ अर्थ आं आम आफ कली लाइयो मदेंड। मिनू इ कली मारदे देंनुडा?” देंमाक्त।

17 मिनू भोज के ७ नाक्ती मनुम्म सम्म आ मीश सिम्सोन आ डोंइती डाक्स डा डाक्स बाक्माक्त। मोपतीके ७ नाक्त सम्म शुश हिल्लो पा पुंइतीके सिम्सोनमी मेको लोत्र आ मीश कली शोव्रडा बाक्त। मिनू मेकोमी लशा, आ मुर आन कली देंमाक्त। न्यायाधीस १६:१६-१७

18 मिनू मेको ७ नाक्ती नां सोत्रचा क्येडा डोंइती सहर डा मुरपुकीमी सिम्सोन कली “खुदो क्येडा जिज, मार बाक्बा डा? गुप्स क्येडा बोल्यो सु बाक्बा डा?” देंमा बाक्त। मिनू सिम्सोनमी “आं मीशेमी इन कली मेको लोत्र मशोव्रड हना, गेपुकीमी लेन्ने मचाप्तीनी वा” देंमाक्त।

19 मिनू परमप्रभु यावे आ सोक्तीम सिम्सोन कली ठेयब सक्तिम सुमा बाक्त। मिनू मेको अशकलोन सहरमी लशा, मेकेर ३० जना मुर साइक्मी बाक्त। मिनू मेको आन के मार मार थोत्रक नु वा पिशशा, मेको लोत्र लेप्ब आन कली शुश क्येट लाइब फेक्तीक वा गेवा बाक्त। मिनू सिम्सोन गाइशशा, आ आफ आ खिं लेम्माक्त।

20 मिनू सिम्सोन आ मीश चहिं सिम्सोन कली वारच पाइब का कली गेमे बाक्त। न्यायाधीस १५:२

## 15

## सिम्सोन आ मीश गुम्थ लशो

1 मिनु इच्का नोले चेरब रिक्ची ना सिम्सोन पाठा का कुरशा, आ मीश कली गुम्थ लमाक्त। मिनु “गो आं मीश आ कोठामी ओव्रचा दाक्नुडः” देंमाक्त। तन्न आ शिउमी ओव्रचा मगेवा बाक्त।

2 मिनु आ शिउमी “आं तमी काइ मदाक्नीनी, दे मिम्ताक्ड। मोपतीके इन कली वारच पाइब कली गेता। मेको आ लोकब मेको क्येडा दारशो मबाक्बा डा? मुल इ मीश आ पा डा मेको कली लतो” देंमाक्त। न्यायाधीस १४:२०

3 मिनु सिम्सोनमी “गो मुल पलिस्ती आन कली थम मरिम्शो पाता हना यो, दोस मताइब दुम्ती” देंमाक्त।

4 मिनु सिम्सोनमी लशा, सहे सां सिवार ग्याइश्शा, निक्निक्शी पा आस मीलु फ्रेंशा, आस दातेमी रांको का यो फ्रेंदा बाक्त।

5 मिनु रांको जेशशा, पलिस्ती आन रिक्शा वोइश्शो चेरब, मीशो चेरब रू, अडगुर रू नु तेल रवा रू आगा सोइक्ता बाक्त।

6 मिनु पलिस्तीपुकीमी “एको सुम पवा?” दे हिल्लो पामे बाक्त। मिनु का निक्शीमी “तिम्ना डा मुर आ चांइवा सिम्सोनमी पाप्तु। मारदे हना आ शिउमी आ तमी, सिम्सोन आ मीश दुम्शा यो आ वारच कली गेप्तु” देंमा बाक्त। मिनु पलिस्तीपुकी लशा, सिम्सोन आ मीश नु आ आफ कली मीम क्रोइश्शा सदमे बाक्त।

7 मिनु सिम्सोनमी मेको आन कली “क्येक्क मलेत्थु मप्रोंडनुडः” दे कसम जवा बाक्त।

8 मिनु सिम्सोनमी मेको आन कली शुश श्येत गेशा, शुश मुर आन कली साइक्मी बाक्त। मिनु मेकेर रे लशा, एताम डा रोंगु डा पुक्खीमी बाक्माक्त।

## पलिस्ती आन कली साइश्शा

9 मिनु पलिस्तीपुकी कुशा यहूदामी ताम्बु कीशा, लेही सहर आ नेक्था बाक्मा बाक्त।

10 मिनु यहूदा आ थर डा मुरपुकीमी मेको आन कली “गे मारदे आंइ कली लडाइ तोइनीनी?” दे हिल्लो पामे बाक्त। मिनु मेकोपुकीमी “गो सिम्सोन कली ग्याइश्शा, फ्रेंचा कली पीतक। मेकोमी आंइ कली मार पवा, गो यो मेको कली मोदेशोन पाइनीक” देंमा बाक्त।

11 मिनु यहूदा डा हजार सां मुर एताम डा रोंगु डा पुक्खीमी यिमा बाक्त। मिनु मेकोपुकीमी सिम्सोन कली “पलिस्तीपुकी आंइ सासन पाइब बाक्नीम, दे गे तुइक्नीनी। गे मारदे आंइ कली मोदेशो पा मरिम्शो पनी?” देंमा बाक्त। मिनु सिम्सोनमी “मेकोपुकीमी आं कली दोदेशो पामे, गो यो में मोदेशो ला पाता” देंमाक्त।

12 मिनु मेकोपुकीमी “गो दा इ कली फ्रेंशा पलिस्ती आन गुइमी गेचा कली जाक्तक” देंमा बाक्त। मिनु सिम्सोनमी “मो हना आं कली मसाइक्नीक, देंशा, कसम जने” देंमाक्त।

13 मिनु मेकोपुकीमी “इन कली फ्रेंशा ला पलिस्ती आन गुइमी गेनीक। गो इन कली मसाइक्नीक” देंमा बाक्त। मिनु मेकोपुकीमी सिम्सोन कली नक डोरी निक्शीमी फ्रेंशा, पुक्खी क्येडा आइक्था कुत्मे बाक्त।

14 मिनु मेकोपुकी लेहीमी जाक्दीत्यामेनु, पलिस्तीपुकीमी मेको कली तशा ग्रीना ग्रीन पिमा बाक्त। मेना परमप्रभु यावे आ सोक्तीमी सिम्सोन कली सुमा बाक्त। मिनु सिम्सोनमी आ कली फ्रेंशो डोरी निक्शी मीम दुप्शो पले खोदेशो पा प्रोदा बाक्त। न्यायाधीस १३:२५

15 मिनु गधा आ पिया डा रुश खप रे गुप्शा, मेकोमी हजार का मुर आन कली तुप्शा सदा बाक्त।

16 मिनु मेकोमी “गो गधा आ पिया डा रुशेमी तुम्ना तुम्न शुश मुर साइक्ता। तेन्ना तेन्न हजार का मुर साइक्ता” देंमाक्त।

17 मेकोमी मो देंने थुम्शा, मेको रुश ताइक्ता बाक्त। मोपतीके मेको ठाउं कली रामाथ-लेही नें वोदमे बाक्त।

18 मिनु सिम्सोनमी ब्वाक्कु तूतू दाक्शा, परमप्रभु यावे कली पुंडशा, “गे इन वाइल कली ठेयब लडाइ ग्रापाइक्तीनी। मुल गो तूतू दाक्शा बेक्नुडा? एको खोइक्तीक चिनु मखोइश्शो आन गुडमी बेक्नुडा?” देंमाक्त।

19 मिनु परमप्रभुमी लेही डा खाल्टा कली प्रोल्शा, मेक रे ब्वाक्क गुंडदा बाक्त। मिनु सिम्सोनमी ब्वाक्कु तूडा बाक्त। मिनु लेंशा, बोल्यो दुम्माक्त। मोपतीके लेही डा ब्वाक्कु बुक्तीक कली मुलाक्त सम्म एन-हाकोरे देंनीम।

20 मिनु पलिस्तीपुकीमी इस्राएली आन कली दिप्शा सासन पामेनु, सिम्सोनमी २० बर्स सम्म इस्राएली आन निसाफ पशो बाक्माक्त।

## 16

### सिम्सोनमी लाप्चो कुरशो

1 काबु सिम्सोन गाजा सहरमी लमाक्त। मिनु मेकेर तेल्लेम का तशा, मेको नाक्दो मेको नु इप्थ लमाक्त।

2 मिनु गाजेज सहर डा मुरपुकीमी “सिम्सोन मेकेर जाक्शो बाक्ब” दे गाजा डा मुर आन कली तुडक्पदमे बाक्त। मिनु मेकोपुकीमी सिम्सोन आ बाक्तीक पुम्तमे बाक्त। मिनु मुरपुकी नाक्दो सहर डा ठेयब लाप्चोमी बाप्शा बाक्मा बाक्त। नाक्दो मेकोपुकी सिक्सी पा बाक्मा बाक्त। मेकोपुकीमी “नां सोव्रचीना साइक्चा” दे सल्ला पशो बाक्मा बाक्त।

3 तन्न सिम्सोन क्येर नाक्दो सम्म ला आ ब्राख्येमी गोल्ला बाक्माक्त। मिनु बोक्शा लशा, सहर डा ठेयब लाप्चो नु आ थाम निक्शी आ दलीन नेल्ल तुल्शा बालाम लाप्शा, हेब्रोन आ नेक्था डा डांडाम लदा बाक्त।

### सिम्सोन नु देलीलाह

4 मिनु नोले सिम्सोनम सोरेक डा दिंममी बाक्ब देलीलाह माइश्शो मीश मुर का दाक्ता बाक्त।

5 मिनु पलिस्ती आन ठेयब मुरपुकी मेको मीश मुर कली ग्रुथ लमा बाक्त। मिनु मेको कली “सिम्सोन कली लेम्शा ‘इ कली सुमी बोल गेबा? दोपा इ कली फ्रेंने चाप्नीकी’ दे हिल्लो पावो। मिनु गो आंड कली शेंदो। मारदे हना गो ग्याइक्चा दाक्नीकी। मिनु ग्याइश्शा गो का का पा इ कली ११, ११ सहे चांदी के शेकेल गेनीकी” देंमा बाक्त।

6 मिनु देलीलाहमी सिम्सोन कली “सुमी इन कली शुश बोल गेवा? दोपा इन कली फ्रेंने चाम्सीबा? मुरपुकीम दोपा इन कली ग्याइक्ने चाप्नीमी? आं कली शेंदीन” दे हिल्लो पवा बाक्त।

7 मिनु सिम्सोनमी “आं कली लिब्रा आ ७ ओटा क्येख डोरीमी फ्रेंताक्यीमी हना, अरु मुर खोदेशो बोल मपाइश्शो दुम्नुड” देंमाक्त।

8 मिनु पलिस्ती आन ठेयब मुरपुकीमी ७ ओटा लिब्रा आ क्येख डोरी चाक्शा, देलीलाह कली गेमे बाक्त। मिनु मेकोमी सिम्सोन कली फ्रेंदा बाक्त।

9 मेकोमी आगा डा कोठामी मुरपुकी खुइश्शा वोइश्शो बाक्माक्त। मिनु मेकोमी “सिम्सोन इन कली साइक्चा, दे पलिस्ती जाक्तेक्म” दे ग्रीमाक्त। मिनु सिम्सोनमी मेको डोरी कली मीम किक्शो पले खोदेशो पा प्रोइश्शा प्रोक्माक्त। मिनु आ बोल चहिं मारम बाक्बा, दे मतुइक्तमे बाक्त।

10 मिनु देलीलाहमी सिम्सोन कली “गे आं कली शुक्शी पा जोल पाइतीनी। तन्न मुल डा मेरे दोपा इन कली पाइक्ने चाम्सीबा, लो, देनीन” देंमाक्त।

11 मिनु सिम्सोनमी “आं कली नक मारेइ यो मफ्रेंशो डोरीमी फ्रेंताक्यीमी हना, अरु मुर खोदेशो दुम्नुड” देंमाक्त।

12 मोपतीके देलीलाहमी नक डोरी चाक्शा, मेको कली फ्रेंदा बाक्त। मेना यो मुरपुकी आ कोठामी खुइश्शा बाक्शो बाक्मा बाक्त। मिनु मेकोमी “सिम्सोन इन कली साइक्चा, दे पलिस्ती जाक्तेक्म” दे ग्रीमाक्त। मिनु सिम्सोनमी मेको डोरी कली श्येले प्रोइश्शो खोदेशो पा प्रोदा बाक्त।

13 मिनू देलीलाहमी लेंशा सिम्सोन कली “गे मुल सम्म आं कली शुक्शी पा जोल पाइतीनी। इन कली दोपा फ्रेंने चाम्सीबा?” दे हिल्लो पवा बाक्त। मिनू सिम्सोनमी “गे आं चां डा ७ ओटा लामा कली तोव्र ओल्टीकेम पाइक्ताक्यी नु मेको तोव्र आ प्रोव्रशो हिरतीक ठीक पा वोइक्तीवी हना, अरु मुर खोदेशो पा बोल मपाइशशो दुम्नुड” देंमाक्त।

14 मोपतीके मेकोमी सिम्सोन इम्मेनु, मेको आ चां डा ७ ओटा लामा कली तोव्र आ प्रोव्रशो हिरतीकेमी हिरशा फ्रेंशा वोदा बाक्त। मिनू मेकोमी “सिम्सोन इन कली साइक्चा, दे पलिस्ती जाक्तेक्म” दे ग्रीमाक्त। मिनू सिम्सोन निन्द्रा रे संशा, तोव्र ओल्टीके, तोव्र नेल्ल नु प्रोव्रशो वा यो उइशशा बोक्माक्त।

15 मिनू देलीलाहमी “आं कली दाक्नुड, दे दोपा देंने चाप्नीनी डा? इन थुंमी आं कली मदाक्शो बाक्नीनी। गे आं कली खेयप सां शुक्शी पा, इन ठेयब बोल मारम बाक्बा, मुल सम्म मशेंदीनी” देंमाक्त।

16 मिनू मेकोमी सिम्सोन कली नाक्त किंत किंत हिल्लो पा श्येत गेवा बाक्त। न्यायाधीस १४:१७

17 मोपतीके सिम्सोनमी आ खुइशशो थमा लोव्र मेको कली शेंदा बाक्त। मेकोमी “मुल सम्म आं चां मप्रेक्शो बाक्ब। मारदे हना गो जरमेसी डा रे परमप्रभु आ योव्रशो नाजिरी का नड। आं चां प्रेक्तेक्म हना, आं बोल लाइब। मिनू गो अरु मुर खोदेशो पा बोल मपाइशशो दुम्नुड” देंमाक्त। न्यायाधीस १३:५

18 मिनू सिम्सोनमी देलीलाह कली आ थुं डा लोव्र नेल्ल शोव्रशा, नोले देलीलाहमी पलिस्ती आन ठेयब मुर आन कली “रीब पा जाक्कीन। मारदे हना मेकोमी आ थुं डा लोव्र नेल्ल शेंताक्यी” दे ब्रेथ सोइक्ता बाक्त। मिनू पलिस्ती आन ठेयब मुरपुकी चांदी कुरशा जाक्मा बाक्त।

19 मिनू देलीलाहमी सिम्सोन कली आ थुकुमी इप्पदा बाक्त। मिनू मुर का ब्रेशशा, आ ७ ओटा लामा प्रेक्पदा बाक्त। मोपा देलीलाहमी सिम्सोन आ बोल जाम्पाइशशा सक्ति मपाइशशो सेला बाक्त।

20 मिनू मेकोमी “सिम्सोन बोक्कीन, इन कली साइक्चा, दे पलिस्ती जाक्तेक्म” दे ग्रीमाक्त। मिनू मेको निन्द्रा रे बोक्माक्त। मिनू गो आम कली गेना हना यो प्रोइनुड, दे मिम्ता बाक्त। तन्न “परमप्रभु यावेमी आं कली प्रोइने थुम्तु” दे मेकोमी मतुइक्ता बाक्त। १सामुएल १६:१४

21 मिनू पलिस्तीपुकीमी मेको कली ग्याइशशा, आ मिक्च पुक्तमे बाक्त। मिनू गाजा सहरम चाक्गमे बाक्त। मिनू कांसा के साडलोमी पाइशशा जेल्खानमी यात हिल्पदमे बाक्त।

22 मिनू नोले आ प्रेक्शो चां लेंशा लाइशशो दुम्माक्त।

### सिम्सोन बेक्शो

23 मिनू पलिस्ती आन ठेयब मुरपुकीमी “इं देवतामी इं सत्रु सिम्सोन कली इं गुइमी गेप्तु” देश, आन देवता दागोन कली ठेयब चढेतीक चढेचा कली नु ग्येरसीचा कली खुम्समा बाक्त।

24 मिनू खुम्सीशो मुरपुकीमी सिम्सोन आ पबंम “इं देवतामी इं सत्रु, इं रागी डा सत्रु, इं रागी डा मुर साइक्ब मुर कली इं गुइमी गेशो बाक्ब” दे ग्रीशा, आन देवता कली ठेयब सेल्मे बाक्त।

25 मिनू शुश ग्येरसीशा “सिम्सोन कली गुंइदीन। मिनू मेकोमी आंइ कली सिल पा कोइदल” दे पुन्मे बाक्त। मिनू सिम्सोन कली जेल्खान रे गुंइदमे बाक्त। मिनू मेकोमी मेको आन कली सिल पा कोइदा बाक्त। मिनू मेकोपुकीमी सिम्सोन कली ठेयब थाम आस दातेमी राप्पदमे बाक्त।

26 मिनू सिम्सोनमी आ गुइ ग्याइशशा खुल्ब ठिटा कली “एको खिं कली तिकब नेल्ल क्येडा ठेयब थाम कली ग्याइक्चा गेयी। मिनू गो मेकेर रक एशशा बाक्नुड” देंमाक्त।

27 मेको खिंम शुश वोंइश मुर नु मीश मुर बाक्मा बाक्त। पलिस्ती आन ठेयब मुरपुकी यो नेल्ल मेकेर बाक्मा बाक्त। हजार सां खोइ वोंइश मुर नु मीश मुर चहिं खिं डा नेल्ल क्येडा तला तार बाक्शा, सिम्सोन आ सिल कोव्रडमे बाक्त।

28 मिनू सिम्सोनमी परमप्रभु यावे कली “परमप्रभु, परमप्रभु यावे, आं कली मिम्तीन। आं कली लेंशा खेयप का सक्ति गेयीनी। परमप्रभु, गो काले आं मिक्च निक्शी आ पबंम मेको आन कली क्येक्क लेत्ने चबुल” दे पुना बाक्त।

29 मिनु सिम्सोनमी मेको खिं कली तिकशा वोडक्ब खिं आ दातेमी वोडशशो थाम निक्शी कली पेरा गुडमी का नु ग्युरा गुडमी अर्को कली ग्याइक्ता बाक्त।

30 मिनु सिम्सोनमी “आं कली पलिस्तीपुकी नु बेक्चा गेन” देशा, आ सक्ति नेल्लेमी बोल पा मेको थाम निक्शी कली नेप्ता बाक्त। मिनु मेको खिं ब्रेम्माक्त। मोपा बाक्शो नेल्ल ठेयब मुर नु अरु मुर नेल्ले चिप्शा बेक्मा बाक्त। मोपा सिम्सोनमी आ ब्रोंडशो क्येडा यो आ बेक्ची ना शुश मुर सदा बाक्त। हिब्रू ११:३२-३४

31 मिनु सिम्सोन आ आफ आ खिं डा मुर नु आ लोकबपुकी मेकेर जाक्शा, आ रां आ आफ मानोआह आ तुरस सोराह नु एशताओल सहर आ दातेमी थिम्मे बाक्त। सिम्सोन २० बर्स सम्म इस्राएली आन निसाफ पाडब दुम्शो बाक्माक्त। न्यायाधीस १३:२५; न्यायाधीस १५:२०

## 17

### मीकाहमी मूर्ति सेल्पाइशशो

1 एफ्राइम डा पहाडम मीकाह नें पाइशशो मुर का बाक्माक्त।

2 मिनु मेकोमी आ आम कली “इन जाम्शो ११ सहे चांदी के शेकेल आ पर्वम सराप पशो, गो नेता। मेको चांदी के शेकेल गो नु बाक्नीम। गो लाइशशो नड। मुल गो लेत्तन्नी” देमाक्त। मिनु मेको आ ममामी “आं तौ, परमप्रभु यावेमी इ कली आसीक गेवल” देमाक्त। लेवी ५:१; हितोपदेस २९:२४

3 मिनु मेको ११ सहे चांदी के शेकेल आ ममा कली लेशशा गेवानु, आ ममामी “एको चांदी आं तौ कली रिम्शो दुम्ल, दे मुशो, चांदीम गिल्लशो मूर्ति सेल्पाइशशा परमप्रभु यावे कली गेनुड। मोपतीके गो मेको चांदी के शेकेल लेंशा इ कली गेनन” देमाक्त। शेकेल का ११:५ ग्राम बाक्ब।

4 आ तौमी मेको चांदी आ ममा कली गेवानु, आ ममामी सहे निक्शी चांदी के शेकेल लाइशशा, चेम्ब कली गेवा बाक्त। मिनु मेकोमी मुशो मूर्ति का सेल्शा मेको कली चांदीम गिला बाक्त। मिनु मेको मीकाह आ खिंमी वोदमे बाक्त।

5 मेको मीकाह के देवता थान का यो बाक्माक्त। मेकोमी चढेब आ डोंइती फेक्तीके निसाफ पतीक ऊरीम नु थुम्मीम बाक्शो झोला सेल्पाइशशा, खिं डा देवतापुकी यो सेल्पदा बाक्त। मिनु आ तौ का कली योत्रशा, चढेब सेला बाक्त। न्यायाधीस ८:२७; उत्पत्ती ३१:१९; प्रस्थान २८:४१

6 मेना इस्राएल रागीमी पिप मबाक्मा बाक्त। मोपतीके सुम मार पचा दाक्मा, मेको पाइक्बाक्मा बाक्त। न्यायाधीस १८:१; न्यायाधीस १९:१; न्यायाधीस २१:२५

7 मिनु यहूदा डा बेथलेहेम रे पा जाक्शो यहूदा आ थर डा रागीम बाक्ब लेवी ठिटा का बाक्माक्त। न्यायाधीस १८:३; ब्यवस्था १८:६-८

8 मेको यहूदा डा बेथलेहेम सहर प्रोंडशा, अर्को सहरम बाक्चा कली बाक्तीक माल्ना माल्ना गाक्माक्त। मोपा गाक्मेनु, मेको एफ्राइम रागी डा पहाड मीकाह आ खिंमी जाक्दीम्माक्त।

9 मिनु मीकाहमी “ते रे जाक्शो नवे?” दे हिल्लो पवा बाक्त। मिनु मेकोमी “गो यहूदा डा बेथलेहेम रे पा जाक्शो लेवी का नड। मिनु बाक्चा कली बाक्तीक का माल्ना माल्ना गाक्ती” देमाक्त।

10 मिनु मीकाहमी “गो नु बाक्को। मिनु आं आफ नु आं चढेब दुमो। गो इ कली बर्स बर्समी १० ओटा चांदी के शेकेल गेनन। मिनु जचा फेक्चा यो गेनन” देमाक्त।

11 मोपतीके मेको लेवी मीकाह नु बाक्चा बिस्से बाक्त। मिनु मीकाहमी मेको कली आ तौ आन दाते डा का खोदेशो पा वोदा बाक्त।

12 मिनु मीकाहमी मेको लेवी ठिटा कली आ गेय गेवा बाक्त। मिनु मेको ठिटा आ चढेब दुम्शा, मेको आ खिंम बाक्माक्त। प्रस्थान २८:४१

13 मिनु मीकाहमी “मुल परमप्रभु यावेमी आं कली सोशो बोशो सेलती, दे तुडक्ताक्ड। मारदे हना लेवी का आं चढेब दुम्शो बाक्ब” देमाक्त।

## 18

## दान आ मुरपुकीम रागी माल्शो

1 मेना इस्राएल रागीम पिप मबाकमा बाक्त। मिनु मेना दान आ थर डा मुरपुकीमी बाक्चा कली रू माल्ना माल्न बाक्मा बाक्त। मारदे हना इस्राएली आन दातेमी योक्शो रागी मथेरशो बाक्मा बाक्त। न्यायाधीस १:३४; यहोसु १९:४०-४८

2 मोपतीके दान आ थर डा मुरपुकीमी सोराह नु एश्ताओल रे ५ जना मुर आन कली क्यारी पथ सोइक्तेमे बाक्त। मिनु मेको आन कली “लन, मिनु मेको रागी कली क्यारी पन” देंमा बाक्त। मिनु मेकोपुकी एफ्राइम आ पहाडी रागी, मीकाह आ खिंमी जाक्शा, बास बाक्मा बाक्त। न्यायाधीस १३:२५

3 मिनु मेकोपुकी मीकाह आ खिंम बाक्मानु, मेको लेवी ठिटा आ लोत्र पशो नेंशा तुइक्तेमे बाक्त। मिनु मेको लेवी कली “सुम इ कली एकेर चाक्गा? एकेर मार पाइनेवे? मार गेय पाइनेवे?” दे हिल्लो पामे बाक्त। न्यायाधीस १७:७

4 मिनु मेकोमी “मीकाहमी गेय गेती। मेको आ चढ़ेब दुम्ती” देंमाक्त।

5 मिनु मेकोपुकीमी मेको लेवी कली “मो हना आंइ गेय रिम्शो दुम्बा देय मदुम्बा, परमप्रभु कली हिल्लो पावो” देंमा बाक्त।

6 मिनु लेवीमी “थुं नाइश्शा लने, परमप्रभु यावेमी इन गेय दाक्शो बाक्ब” देंमाक्त।

7 मिनु मेको ५ जना मुर लशा, लाइश सहरमी जाक्दीम्मा बाक्त। मेकोपुकीमी मेकेर डा मुर आन कली सीदोन डा मुरपुकी खोदेशो पा लडाइ मपथु, रिम्शो नु क्येट थीब दुम्शा, बाक्शो तामे बाक्त। मेकोपुकी नु मारेइ मारेइ बाक्माक्त। मेको आन रागी सीदोनी आन रागी क्येडा डोन बाक्माक्त। मिनु मेकोपुकी आंमा ला बाक्शो बाक्मा बाक्त।

8 मिनु मेको ५ जना मुर सोराह नु एश्ताओल सहरमी लेशशा जाक्मा नोले आन लोकबपुकीमी “मार लोत्र चाक्नी?” दे हिल्लो पामे बाक्त।

9 मिनु क्यारी पाइबपुकीमी “लो, लय। मिनु मेकोपुकी नु लडाइ पय। मारदे हना मेको रागी थम रिम्शो बाक्ब। मुल मार सिक्सी पा बाक्नीनी? मुल लचा कली देश मपने। मिनु मेको रागी कली आंम के सेल्य।

10 गे मेकेर जाक्दीश्शा, कोत्रनीनु, ठेयब रागीमी थम रिम्शो पा बाक्शो जात का डा मुर आन कली ताइनीनी। मेको मुरपुकीमी लडाइ आ पर्बम मारेइ ममिम्शो बाक्नीम। मेको रागी परमप्रभुमी इन गुइमी गेशो बाक्ब। मेको रागीमी बाक्शो मारेइ मारेइ थीसीब” देंमा बाक्त।

## मीकाह आ मूर्ति रोइश्शो

11 मिनु दान आ थर डा ६ सहे या कुरशो मुरपुकी सोराह नु एश्ताओल सहर रे पा गाक्मा बाक्त। न्यायाधीस १३:२, २५

12 मेकोपुकी कुशा, यहूदा डा किरयथ-यारीम आ नेक्था ताम्बु कीशा बाक्मा बाक्त। मोपतीके मुल सम्म मेको कली माहानेह-दान देंनीम। मेको किरयथ-यारीम आ पच्छिममी बाक्ब।

13 मिनु मेक रे गाक्शा, एफ्राइम डा पहाडी रागीम बाक्शो मीकाह आ खिंमी जाक्दीम्मा बाक्त।

14 मिनु डोंइती रागी क्यारी पथ पिशो ५ जना मुरुमी आन लोकब आन कली “एको खिं कामी चढ़ेब आ निसाफ पतीक ऊरीम नु थुम्मीम बाक्शो झोला नु खिं डा देवता, मुशा चांदीमी गिल्शो मूर्ति बाक्नीम। गेपुकीमी तुइक्चा माल्नीनी। मिनु मुल मार पचा माल्बा, मिम्चा माल्नीनी” देंमा बाक्त।

15 मिनु मेकोपुकी मीकाह आ खिं आ नेक्था जाक्शा, लेवी ठिटा आ बाक्तीक जाक्मा बाक्त। मिनु “दोदेशो बाक्नेवे?” दे हिल्लो पामे बाक्त।

16 या कुरशो ६ सहे दान आ थर डा मुरपुकी चहिं लाप्चोमी बाक्मा बाक्त।

17 मिनु डोंइती क्यारी पथ जाक्शो ५ जना मुर खिं आगा ओत्रमा बाक्त। मिनु मेकोपुकीमी मेको मुशा चांदीम गिल्शो मूर्ति, निसाफ पतीके ऊरीम नु थुम्मीम बाक्शो झोला नु खिं डा देवता नेल्ल लदमे बाक्त। मेना चढ़ेब यो मेको ६ सहे मुर नु लाप्चोम राप्शा बाक्शो बाक्माक्त। न्यायाधीस १७:५

18 मिनू मोपा मेको ५ जना मुरुमी मीकाह आ खिंमी ओव्रशा, मेको मुशा चांदीम गिल्शो मूर्ति, चढेब आ डोंइती फेक्शो निसाफ पतीके ऊरीम नु थुम्मीम बाक्शो झोला नु खिं डा देवतापुकी लदमेनु, चढेबमी “मार पनी?” दे हिल्लो पामी बाक्त।

19 मिनू मेकोपुकीमी “ब्वालेइ पावो। लोत्र का यो मपावो। गो नु गाक्शा आंइ आफ नु चढेब दुमो। मार, मुर का आ चढेब दुम्चा रिम्शो देय इस्राएल डा थर का नु आन मुर आन चढेब दुम्चा रिम्शो दुम्बा? लो, मिम्तो” देमा बाक्त।

20 मिनू मेको चढेब बिश्शा, मेको निसाफ पतीके ऊरीम नु थुम्मीम बाक्शो झोला खिं डा देवतापुकी नु मेको मुशा चांदीम गिल्शो मूर्ति कुरशा, मेकोपुकी नु गाक्माक्त।

21 मिनू मेकोपुकी मेकेर रे लेशशा, आन लां खोदमे बाक्त। मेकोपुकीमी आलपुकी, बस्तु भाव नु आन मारेइ मारेइ लाइश्शा, आन डोंइती खुल्शा गाक्मा बाक्त।

22 मिनू दान आ थर मा मुरपुकी मीकाह आ खिं रे इक्का डोन जाक्दीम्मानु, मीकाहमी आ नेक्था डा मुर आन कली ब्रेश्शा खुप्शा, खेदा पा थिम्मी बाक्त।

23 मिनू हुइक्तीमी बाक्त। मिनू दान आ थर डा मुरपुकीमी मीकाह कली “इ कली मार दुम्मे? मारदे मोदेशो पा शुश मुर खुप्तीमी?” देमा बाक्त।

24 मिनू मीकाहमी “आं कली सेल्सीशो देवी देवता नु आं चढेब मुर मारदे लाइक्नी? आं कली मारेइ महेंदीनी। मिनू आं कली ‘इ कली मार दुम्मे?’ दे हिल्लो पाइनीनी?” देमा बाक्त।

25 मिनू दान आ थर डा मुरपुकीमी “ब्वाले पावो। मारदे हना आंइ दाते डा चुरब मुरपुकीमी चुरशा, इ कली नु इ खिं डा मुर आन कली साइक्नीमी” देमा बाक्त।

26 मिनू मेको दान आ थर डा मुरपुकी मेकेर रे गाक्मा बाक्त। मीकाह यो आ क्येडा बोल्यो मुर तशा, मारेइ मपथु, आ खिं लेम्माक्त।

27 मोपा मेको चढेब नु मीकाह आ सेल्सीशो मूर्ति लाइश्शा, मेकोपुकी गाक्मा बाक्त। मिनू मेकोपुकी लाइश सहर नु लडाइ पामे बाक्त। मेकेर डा मुरपुकी थुं नाइश्शा, लडाइ ममिम्थु बाक्शो बाक्मा बाक्त। मिनू दान आ थर डा मुरपुकीमी मेको आन कली तरवारमी साइश्शा, मेको आन सहरम मी सुइक्तमे बाक्त।

28 मेको आन कली प्रोंइब सुइ मबाक्मा बाक्त। मारदे हना मेको सहर सीदोन रे शुश डोन बाक्माक्त। मेको सहर बेथ-रेहोब आ नेक्था डा दिंममी बाक्माक्त। मिनू दान आ थर डा मुरपुकीमी मेको सहर सेल्शा बाक्चा गोत्रमे बाक्त।

29 मिनू मेको सहर कली इस्राएल आ तौ, मेको आन किकी पिपी आ नें दान वोदमे बाक्त। मेको सहर आ नें डोंइती लाइश बाक्माक्त। यहोसु १९:४७

30 मिनू दान आ थर डा मुरपुकीमी मेको मूर्ति पूजा पचा कली वोदमे बाक्त। इस्राएली नेल्ल ग्याइश्शा लाइक्चा मपुंडसीमा सम्म मोसा आ तौ गेरशोम, आ तौ योनाथन नु मेको आ चच युइ दान आ थर डा चढेब दुम्मा बाक्त। १राजा १२:२९; आमोस ८:१४; प्रस्थान १८:३; २राजा १५:२९

31 परमप्रभु आ खिं शिलोमी बाक्म सम्म मेकोपुकीमी मीकाहमी सेल्सीशो मूर्ति कली पूजा पामे बाक्त। यहोसु १८:३; येरमीया ७:१२

## 19

### गिबा सहरम मरिम्शो दुम्शो

1 मेना इस्राएल रागीम पिप मबाक्माक्त। मिनू लेवी का बाक्माक्त। मेको एफ्राइम डा नेल्ल क्येडा नोले डा पहाडी रागीम बाक्शो बाक्माक्त। मेकोमी यहूदा डा बेथलेहेम रे मीश का चाक्शो बाक्माक्त। न्यायाधीस १७:६

2 मिनू आ वोंइश नु गाइश्शा, मेको कली प्रोंइशा आ माइत यहूदा डा बेथलेहेममी लशो बाक्माक्त। मिनू मेको मीश मुर मेकेर बाक्शो ४ महिना दुम्शो बाक्माक्त।

3 मिनु आ वोंइश आ कान्छी मीश कली लेम्शा बिप्पाइशशा, मेको कली पिन्चा कली लमाक्त। मेकोमी वाइल का नु गधा निक्शी यो लदा बाक्त। मिनु मेको आ शिउ आ खिंमी जाकदीम्माक्त। मिनु आ शिउमी मेको कली तशा ग्येरसीशा गुमा बाक्त।

4 मिनु आ शिउमी “बाक्कीन” दे नमो सिमो पवा बाक्त। मोपतीके नाक्त सां सम्म बाक्माक्त। मेकोपुकी जशा तूशा बाक्मा बाक्त।

5 मिनु ४ नाक्त नोले मेको लेवी सुनी कना बोक्शा, गाक्चा कली सासे बाक्त। तन्न आ शिउमी “लचा क्येडा डोंइती मारेइ जने” देंमाक्त।

6 मोपतीके जशा तूशा बाक्सा बाक्त। मिनु आ शिउमी “मुलाक्त नाक्टो का बाक्शा, चिनु ग्येरसीशा लने” देंमाक्त।

7 मिनु मेको निक्शी जशा तूशा बाक्सा बाक्त। मिनु आ शिउमी “चिनु काब नाक्टो बाक्कीन” दे नमो सिमो पवा बाक्त।

8 मिनु ५ नाक्त मेको लचा कली सुनी कना बोक्माक्त। तन्न आ शिउमी “डोंइती जने, नां इक्का चोक्तल। मिनु नोले लने” देंमाक्त। मोपतीके मेको निक्शी नां चोक्चा सम्म बाक्शा, जशा तूशा, बाक्सा बाक्त।

9 मिनु मेको मुर, आ मीश नु आ वाइल नु लचा, दे बोक्मेनु, आ शिउमी “लो, कोव्रडीन, नां रिक्चाप्टु। मोपतीके मुलाक्त नाक्टो बाक्शा, इन थुं ग्येरपतीन। मिनु दीसा सुनी कना बोक्शा इन खिं लेतीन” देंमाक्त। लूका २४:२९

10 तन्न मेको नाक्टो बाक्चा मबिस्से बाक्त। मेक रे बोक्शा, आ मीश, आ वाइल नु गधा निक्शी खुल्शा, मेकोपुकी यबुस आ आइदी जाकदीम्मा बाक्त। यबुस सहर कली यरूसलेम यो देंबाक्मा बाक्त। न्यायाधीस १:२१; १इतिहास ११:४

11 मिनु यबुस आ नेक्था जाकदीम्मानु, नां रिक्चशो बाक्माक्त। मिनु वाइलमी “मुलाक्त नाक्टो लशा, यबुसी आन सहरमी बाक्य” देंमाक्त।

12 तन्न लेवीमी “गो इस्राएली अरु मुर आन सहरम मलाइनीक। गिबा सहरमी लय।

13 लो, गाक्य, गिबा हना यो रामाह सहर हना यो का सम्म जाकदीशा, बास बाक्य” देंमाक्त।

14 मिनु गाक्मा बाक्त। मोपा गाक्मा गाक्मा बेन्यामीन आन गिबा सहर जाक्चामेनु, नां रिक्माक्त। यहोसु १८:२८

15 मिनु मेकेर बास मालशा लामा बाक्त। मिनु सहर डा चोकमी बाक्मा बाक्त। मारदे हना सुइमी मेको आन कली बास बाक्चा कली आन खिंमी मलदमे बाक्त।

16 मिनु खाल्पा का आ रूमी गेय पा नाक्टो खिं लेशशो बाक्माक्त। मेको खाल्पा एफ्राइम डा पहाडी रागी डा बाक्माक्त। तन्न गिबामी बेन्यामीन आ थर डा सहरम बाक्बाक्माक्त।

17 मिनु मेको खाल्पामी इर कोव्रशा सहर डा चोकमी बाक्शो लां गाक्ब मुर आन कली तवा बाक्त। मिनु लशा मेको आन कली “ते रे पिनी? ते लाइनीनी?” दे हिल्लो पवा बाक्त।

18 मिनु मेकोमी “गोपुकी यहूदा डा बेथलेहेम रे एफ्राइम डा नेल्ल क्येडा नोले डा पहाडी रागीम लाइनीकी। गो मेकेर डा नड। गो यहूदा डा यबुस बेथलेहेममी लती। मुल मेक रे लेशशा, आं खिं लना लन बाक्नुड। मिनु सुइमी आंइ कली बास बाक्चा मगेम।

19 गोपुकी नु आंइ गधा कली नल नु जचा थोव्रक बाक्ब। गो, आं मीश नु आं वाइल नेल्ल कली जचा तूचा थोव्रक यो बाक्ब। गो आंइ कली मालशो मारेइ मारेइ गोपुकी नु बाक्ब” दे लोव्र लेत्ता बाक्त।

20 मिनु खाल्पामी “थुं नाइक्तीन। आं खिंम बाक्कीन। इन मालशो नेल्ल गेनन्नी। गोपुकीमी चोकमी बाक्शा, नां सोंइचा काइ मदुम्ब” देंमाक्त।

21 मिनु खाल्पामी आ खिंमी लाइक्मी बाक्त। गधा आस कली जचा गेवा बाक्त। मिनु आन खोइल चिक्शा, जशा तूशा बास बाक्मा बाक्त।

22 मेकोपुकी ग्येरसीशा बाक्शो बाक्मानु, सहर डा मरिम्शो मुरपुकीमी मेको खिं कली दि दा रे पा पुदमे बाक्त। मिनु खिं डा लाप्यो कली खोकोल पना पन “इ खिंमी ओव्रब मुर कली लाडगा गुंइदो।



गोपुकी मेको नु इप्नीकी” दे ग्रीमा बाक्त। उत्पत्ती १९:५-८

23 मिनू खाल्पा लाडगा गूशा, मेको आन कली “आं लोकबपुकी, एको मुर आं वारच बाक्ब। मोदेशो मरिम्शो मपन। एको मुर आं पौना बाक्ब। मेको कली मारेइ यो मपन।

24 एकेर आं कन्ने तमी नु एको पौना आ कान्छी मीश बाक्ब। मेको आस कली लतीन। मिनू इन दाक्शो पन। तन्न एको मुर कली मारेइ यो मपन” देमाक्त।

25 तन्न मेको मुरपुकीमी खाल्पा आ लोव्र काइ मबिस्समा बाक्त। मोपतीके मेको पौनामी आ कान्छी मीश मेको आन बाक्तीक सोइक्ता बाक्त। मिनू मेकोपुकी मेको नाकदो नेल्ल मेको मीश मुर नु इम्मा बाक्त। मेको कली का का पा बिग्रेमे बाक्त। मिनू सुनी सोइक्तमे बाक्त।

26 मिनू सुनी कना आ वोंइश बाक्शो खिं डा लाप्योमी जाक्शा गोल्माक्त। मिनू नां मसोक्म सम्म मेकेरेन गोल्ला बाक्माक्त।

27 मिनू आ वोंइश बाक्शा, मुल गाक्चा, दे लाप्यो रोक्यानु, आ मीश कली लाप्यो आ पुंम गोल्लो तवा बाक्त।

28 मिनू “बोक्को, गाक्च” देंमेनु, मारेइ लोव्र मलेत्ता बाक्त। मिनू आ मीश कली गधा तारी वोइश्शा खिं लदा बाक्त।

29 मिनू खिं जाक्दीश्शा, आ छूरी गुंइशा आ मीश कली क्योरशा, १२ टुक्रा पा इसाएल आ थर नेल्ल आन कली सोइक्ता बाक्त। १सामुएल ११:७

30 मेको टाइब नेल्लेमी “गो इसाएलीपुकीम इजीप्त रागी रे पिशो रे मुलाक्त सम्म ओदेशो मडुम्शो नु मतशो बाक्तय। मोपतीके मुल मार पचा मिम्तीन। मिनू सल्ला पने” देंमा बाक्त। होसे १०:९

## 20

बेन्यामीनी आन कली क्येक्क लेशशो

1 मिनू इसाएली नेल्ले दान रे पा बेयर-शेबा सम्म गिलाद रागी परमप्रभु यावे आ डोंइती मिस्पामी गुम्मा बाक्त। यहोसु १८:२६; १सामुएल ७:५

2 इसाएली आन थर थर डा टेयब मुरपुकी नु तरवार कुरब ४ लाख लडाइ पाइबपुकी परमप्रभु आ मुर आन गुम्तीकेमी जाक्मा बाक्त।

3 मिनू बेन्यामीन आ थर डा मुरपुकीमी इसाएली नेल्ले मिस्पामी बुक्तेक्म, दे तुइक्तमे बाक्त। मिनू इसाएलीपुकीमी मेको लेवी कली “एको मरिम्शो गेय दोपा दुम्मे?” दे हिल्लो पामे बाक्त।

4 मिनू मेको साइक्चा पुंइसीशो मीश मुर आ वोंइश लेवीमी “गो नु आं मीश बास बाक्चा कली बेन्यामीन आ थर डा गिबा सहरमी लशो नस्कु। न्यायाधीस १९:१४; यहोसु १८:२८

5 मिनू मेको नाकदो गिबा सहरम बाक्ब मुरपुकीम आं कली मरिम्शो पचा कली आं बाक्शो खिं पुम्ताक्म। मिनू मेकोपुकीमी आं कली साइक्चा माल्तेक्म। मिनू आं मीश कली कीशा लाइश्शा, मेको नु मबेक्म सम्म का का पा इप्तेक्म।

6 मिनू गो आं बेक्शो मीश कली टुक्रा टुक्रा पा चेक्ता। मिनू इसाएल आ थर नेल्ल आन रागीम सोइक्ताक्ड। मेकोपुकीमी इसाएलमी मोदेशो ग्रान्रा दिशो नु मरिम्शो पामे बाक्त, दे तुइक्पाइक्चा कली गो मो पाता। उत्पत्ती ३४:७

7 मुल गे इसाएली नेल्ल लोव्र पने। मार पचा माल्बा, इन मिम्शो शोव्रडीन” देंमाक्त।

8 मिनू मुर का दुम्शो खोदेशो पा मुर नेल्ले बोक्मा बाक्त। मिनू मेकोपुकीमी “गोपुकी सुइ यो आंम खिं लेशशा मलय। का सम्म यो लेशशा मलय।

9 मुल गोपुकीमी गिबा सहर डा मुर आन कली मार पचा देंशा हना, गो फेन्टे आप्शा, गिबा सहर लशा, लडाइ तोय।

10 इसाएल आ थर नेल्ल डा सहे का रे १० जना, हजार का रे सहे का जना, १० हजार रे हजार का जना मुर लाइश्शा, लडाइ पाइब आन कली जचा थोव्रक क्याप्व नु कुरब सेल्य। मिनू मोपा गो गिबा सहरम बाक्ब बेन्यामीन आ थर डा मुरपुकीम इसाएलम पशो ग्रान्रा दिशो गेय आ पबंम क्येक्क लेत्तय” देंमा बाक्त।

11 मोपा इस्राएली नेल्ले थुं का दुम्शा, मेको सहर नु लडाइ पचा कली खुम्साकमा बाक्त।

12 मिनु इस्राएल आ थर डा मुरपुकीमी बेन्यामीन आ थर डा मुर नेल्ल आन कली “इन दातेमी पशो ग्रांरा दिशो गेय, मार बाक्बा?”

13 मोदेशो मरिम्शो पाइब आन कली आंइ गुइमी गेन। मिनु गो मेको आन कली साइशशा, इस्राएल रागी कली मोदेशो ग्रांरा दिशो रे रिम्शो सेल्नीकी” दे लोव पथ, मुर सोइकतमे बाक्त। तन्न बेन्यामीन आ थर डा मुरपुकीम आंम लोक्ब इस्राएली आन लोव मनेन्मे बाक्त। प्रस्थान २१:१२; गन्ती ३५:३३-३४

14 मिनु बेन्यामीन आ थर डा मुरपुकी इस्राएलीपुकी नु लडाइ पचा कली गिबामी खुम्समा बाक्त।

15 बेन्यामीन आ थर डा मुरपुकीमी रीब पा २६ हजार तरवार कुरशो लडाइ पाइब मेको सहर रे खुप्तमे बाक्त। मेको आन क्येडा लाक्शा गिबा सहर डा मुर यो बाक्मा बाक्त।

16 मेको आन दातेमी ७ सहे पेरा गुइ चलेब, हरद आप्या शुश जोक्ब मुर यो बाक्मा बाक्त। आन सहर नु गिबा रे यो जाक्मा बाक्त।

17 मिनु इस्राएलीपुकीमी चहिं बेन्यामीन आ थर डा मुरपुकी नु लडाइ पचा कली तरवार कुरशो ४ लाख लडाइ पाइब ठीक पामे बाक्त।

18 मिनु इस्राएलीपुकी रीब पा बेथेल लशा, परमप्रभु कली “आंइ इस्राएली आन दातेमी तेको थरमी नेल्ल क्येडा डोंइती बेन्यामीन आ थर डा मुर नु लडाइ पचा?” दे हिल्लो पामे बाक्त। मिनु परमप्रभु यावेमी “यहूदा आ थर डा मुरपुकीमी डोंइती लडाइ पचा मालनीम” देंमाक्त। न्यायाधीस १:१-२; गन्ती २७:२१

19 मिनु इस्राएलीपुकी सुनी कना बोक्शा लशा, गिबा आ नेक्था ताम्बु कीशा बाक्मा बाक्त।

20 मेकोपुकीमी बेन्यामीन आ थर डा मुरपुकी नु लडाइ पचा कली गिबा सहर आ नेक्था ठीक पा बाक्मा बाक्त।

21 मेको नाक्ती बेन्यामीन आ थर डा मुरपुकी गिबा सहर रे लशा, लडाइ पा २२ हजार इस्राएली आन कली सदमे बाक्त।

22 तन्न इस्राएल डा मुरपुकी थुं बारपाइशशा, डोंइती नाक्ती खोदेशो पा लेंशा लडाइ पचा कली ठीक पा बाक्मा बाक्त।

23 मिनु इस्राएलीपुकी लशा, नाकदो सम्म परमप्रभु यावे आ डोंइती डाक्मा बाक्त। मिनु मेकोपुकीमी परमप्रभु यावे कली “आंम लोक्ब बेन्यामीन आ थर डा मुर नु लेंशा लडाइ तोचा देय मतोचा” दे हिल्लो पामे बाक्त। मिनु परमप्रभु यावेमी “मेकोपुकी नु लडाइ पचा कली लन” देंमाक्त।

24 आ दीसा नाक्त यो मेकोपुकीमी बेन्यामीन आ थर डा मुरपुकी नु लडाइ पचा गोव्रमे बाक्त।

25 मिनु बेन्यामीन आ थर डा मुरपुकी मेकोपुकी नु लडाइ पचा कली गिबा रे यूमा बाक्त। मिनु मेकोपुकीमी लेंशा १८ हजार इस्राएली आन कली सदमे बाक्त। उत्पती ४९:२७

26 मिनु इस्राएली नेल्ले बेथेल सहर लमा बाक्त। मिनु मेकोपुकीमी नाकदो सम्म परमप्रभु यावे आ डोंइती डाक्शा माइजा बाक्मा बाक्त। मेकोपुकीमी परमप्रभु यावे कली चोशा चढ़ेतीक नु दुशा बाक्चा आ पर्बम चढ़ेतीक चढ़ेमे बाक्त। न्यायाधीस २०:१८; यहोसु १८:२१-२२

27 मिनु इस्राएलीपुकीमी परमप्रभु यावे कली “मार पचा” दे हिल्लो पामे बाक्त। मारदे हना मेना परमप्रभु आ कबल पशो सन्दोस मेकर बाक्माक्त।

28 मिनु हारून आ तौ एलाजर आ तौ फिनेहासमी मेको कली कोव्रब बाक्माक्त। मिनु इस्राएलीपुकीमी परमप्रभु यावे कली “मुल गो आंइ लोक्ब बेन्यामीन आ थर डा मुरपुकी नु लडाइ पथ लेंशा लचा देय मलचा” दे हिल्लो पामे बाक्त। मिनु परमप्रभु यावेमी “लन, गो दीसा मेको आन कली इन गुइमी गेनन्नी” देंमाक्त। गन्ती २५:७; यहोसु २४:३३

29 मोपतीके इस्राएल डा मुरपुकीमी लडाइ पाइब आन कली गिबा आ एर ओथ बाप्पदमे बाक्त। यहोसु ८:१२,१४

30 मेको सां नाक्ती इस्राएलीपुकी बेन्यामीन आ थर डा मुरपुकी नु लडाइ पथ लमा बाक्त। डोंइती पशो खोदेशो पा लडाइ पचा कली गिबा सहर आ डोंइती ठीक पा बाक्मा बाक्त।

31 मिनु बेन्यामीन आ थर डा मुरपुकी चहिं इस्राएली आन लडाइ पाइब नु लडाइ पचा कली लाडगा यूमा बाक्त। इस्राएलीपुकी सहर रे प्रोक्खु पा मेको आन कली गिबा सहर रे डोन लदमे बाक्त। मिनु बेन्यामीन आ थर डा मुर डोंइती खोदेशो पा इस्राएली सदमे बाक्त। मेकोपुकी ठेयब लांमी बाक्मा बाक्त। लां का बेथेल गे लाइब नु अरु चहिं गिबा नु अर्को रू गे लाइब लां बाक्माक्त। मेकेर ३० जना इस्राएली कली सदमे बाक्त।

32 मिनु बेन्यामीन आ थर डा मुरपुकीमी “गो डोंइती खोदेशो पा ग्राना ग्रान बाक्नय” दे मिम्तमे बाक्त। तन्न इस्राएलीपुकीमी “गो प्रोक्खु पा मेको आन कली सहर रे डोन ठेयब लां सम्म गुंड्या माल्नीक” देमा बाक्त।

33 मोपा इस्राएली आन लडाइ पाइब आन ठेयब हुल आंम आन लडाइ पतीके प्रोंइशा बाल-तामार गे प्रोक्खु पामे बाक्त। मिनु बाप्शा बाक्बपुकी चहिं गेबा आ पच्छिम रे रीब पा यूमा बाक्त। गेबा गिबा सहर दुम्ने चाप्ब।

34 मिनु इस्राएल डा १० हजार योव्रसीशो लडाइ पाइबपुकीमी गिबा गे बारशा ठेयब लडाइ तोमे बाक्त। तन्न बेन्यामीन आ थर डा मुरपुकीमी “ठेयब श्येत जाक्चा चिकशो बाक्त” दे मतुइक्तमे बाक्त।

35 मिनु परमप्रभु यावेमी बेन्यामीन आ थर डा मुर आन कली इस्राएली आन गुड रे खतम सेला बाक्त। मेको नाक्ती इस्राएलीपुकीमी २५ हजार सहै का बेन्यामीन आ थर डा मुर आन कली सदमे बाक्त।

36 मिनु बेन्यामीन आ थर डा मुरपुकीमी “मुल गो बुडतक” दे तुइक्तमे बाक्त। मारदे हना इस्राएलीपुकीमी ब्रुशो देंखु पा गिबा आ नेक्था बाप्शा बाक्ब आन कली थमा सुइश्शा, प्रोक्खु पामे बाक्त।

37 मिनु मेको बाप्शा बाक्बपुकीमी रीब पा लडाइ पा गिबा सहर ओव्रमा बाक्त। मिनु मेकोपुकीमी मोपा ओव्रशा, गिबा डा मुर नेल्ल कली तरवारमी क्योरशा सदमे बाक्त।

38 इस्राएली नु मेको बाप्शा बाक्ब मुर आन सल्ला मार बाक्त देशा हना, मेकोपुकीमी सहर ओव्रशा, प्राशा, मी मुइश्शा सरीड गे कुन सोइक्चा माल्बाक्मा बाक्त।

39 मिनु प्रोक्खु पशो इस्राएल डा ठेयब हुल मेको तशा लेत्चा, दे सल्ला पशो बाक्मा बाक्त। मिनु डोंइती बेन्यामीन आ थर डा मुरपुकीमी इस्राएली आन कली ३० जना साइश्शा “गो थमा पा ग्रानीक” दे मिम्शो बाक्मा बाक्त।

40 मिनु सहर आ दाते रे कुन गूशो तशा, बेन्यामीन आ थर डा मुरपुकीमी नोले हिरशा कोव्रडमे बाक्त। मिनु सहर नेल्लेमी मी ब्रुशो तामे बाक्त।

41 मिनु प्रोक्खु पाइब इस्राएलीपुकी फ्रा लेशशा, बेन्यामीन आ थर डा मुर आन कली लडाइ तोव्रमे बाक्त। मिनु बेन्यामीन आ थर डा मुरपुकी “ला, मुल बेक्साक्व” दे हिंमा बाक्त।

42 मोपतीके बेन्यामीन आ थर डा मुर मेक रे गोरशो रागी गे प्रोक्मा बाक्त। तन्न सहर रे जाक्शो इस्राएलीपुकीमी मेको आन कली दाते पा क्योरशा साइक्चा गोव्रमे बाक्त।

43 मेकोपुकीमी बेन्यामीन आ थर डा मुर नेल्ल कली मनाइक्थ, खेदा पामे बाक्त। मिनु नोहा रे गिबा आ नां दाप्तीके सम्म मेको आन कली खेदा पा साइश्शा ग्रामा बाक्त।

44 मिनु १८ हजार बेन्यामीन आ थर डा मुरपुकी साइक्चा पुंडसमा बाक्त। मेको नेल्ल बोल्यो लडाइ पाइब बाक्मा बाक्त।

45 मिनु लेशशा गोरशो रागी रिम्मोन माइश्शो ठेयब फुल्लु गे प्रोक्मानु, इस्राएलीपुकीमी ठेयब लांमी ५ हजार खोइ बेन्यामीन आ थर डा मुर आन कली सदमे बाक्त। मेकोपुकीमी अरु आन कली गिदोम सहर सम्म खेदा पा हजार निक्शी आन कली सदमे बाक्त।

46 मेको नाक्ती २५ हजार या कुरशो बेन्यामीन आ थर डा मुरपुकी लडाइमी साइक्चा पुंडसमा बाक्त।

47 तन्न ब्रोंइशा लीशो ६ सहै जना बेन्यामीन आ थर डा मुरपुकी गोरशो रागी डा रिम्मोन फुल्लु मेर प्रोक्शा, ४ महिना मेकेर बाक्मा बाक्त। न्यायाधीस २१:१३

48 मिनु इस्राएलीपुकीमी बेन्यामीन आ थर डा मुर नेल्ल आन कली लडाइ पा सदमे बाक्त। सहर कली क्रोइश्शा, मुर नु बस्तु भाव मारेड मारेड सदमे बाक्त। मेकोपुकीमी लीशो सहर नेल्ल आन कली

यो मी सुइक्तमे बाक्त। उत्पत्ती ३४:२५-२९; गन्ती ३५:३०-३४; ब्यवस्था १३:१३-१९

## 21

### लीशो बेन्यामीनी

1 मिनु डोंइती मिस्रामी जाकशो इस्राएलीपुकीमी मार कसम जशो बाक्मा बाक्त देशा हना “गोपुकीमी इं तमी आन कली बेन्यामीन आ थर डा मुर आन कली ग्युंवे पा मगेय” दे कसम जशो बाक्मा बाक्त। न्यायाधीस २०:१

2 मिनु मुरपुकी बेथेल लशा, नाकदो सम्म परमप्रभु आ डोंइती बाक्शा, शुश डाक्मा बाक्त। न्यायाधीस २०:१८, २३, ३६

3 मेकोपुकीमी “परमप्रभु यावे, इस्राएली आन परमप्रभु, मारदे ओदेशो दुम्मे? मुलाक्त मारदे इस्राएली आन थर का जाम्मे?” देमा बाक्त।

4 मिनु आ दीसा मुरपुकी सुनी कना बोक्शा, मेकेर चढेतीके का सेल्शा, चोशा चढेतीक नु दुशा बाक्चा आ पर्वम चढेतीक चढेमे बाक्त।

5 मिनु नोले इस्राएलीपुकीमी “तेको थर परमप्रभु यावे आ डोंइती मजाक्मा?” दे हिल्लो पमुमा बाक्त। मारदे हना मिस्रामी मेकोपुकीमी “परमप्रभु यावे आ डोंइती सु मजाक्बा, मेको कली साइक्चा माल्ब” दे कसम जशो बाक्मा बाक्त।

6 मिनु आंम लोकब बेन्यामीन आ थर डा मुर आन पर्वम डाक्शा “मुलाक्ती इस्राएल डा थर का क्याम्साक्व।

7 लीशो वोंइश मुर आन कली मीश आल चाक्चा कली मार पय? गोपुकीमी परमप्रभु यावे आ डोंइती मेको आन कली आंइ तमी ग्युंवे पा मगेनीक, दे कसम जशो बाक्नीकी” देमा बाक्त।

8 मिनु मेकोपुकीमी “परमप्रभु यावे आ डोंइती इस्राएली आन थर डा मिस्रामी मजाक्ब, सु बाक्मे?” दे हिल्लो पशा, याबेश-गिलाद रे सुइ यो गुम्तीक ताम्बुमी मजाक्मा बाक्त, दे तुइक्तमे बाक्त।

9 मारदे हना मेकोपुकीमी मुर हिकगमेनु, याबेश-गिलाद डा सुइ मुर मजाक्शो तुइक्तमे बाक्त।

10 मोपतीके मेको गुम्शो मुरपुकीमी १२ हजार लडाइ पाइब आन कली याबेश-गिलाद डा वोंइश मुर, मीश मुर, आल ब्रेच नेल्ल कली तरवारमी क्योरशा सतीन, दे हुकुम पा सोइक्तमे बाक्त।

11 मिनु “वोंइश मुर नु मेको नु इग्शो मीश मुर नेल्ल आन कली सतीन। तन्न कन्ने आन कली प्रोनीन” दे हुकुम पामे बाक्त। गन्ती ३१:१७-१८

12 मिनु सोइशोपुकीमी याबेश-गिलादमी ४ सहे सुइ नु मइग्शो कन्ने मीश आल थिश्शा, मेको आन कली कनान डा शिलोम बाक्शो ताम्बुमी चाक्गमे बाक्त।

13 मिनु गुम्शो इस्राएली नेल्लेमी रिम्मोनमी खुइश्शा बाक्शो बेन्यामीन आ थर डा मुर आन कली “गारचा” दे ब्रेथ सोइक्मे बाक्त। न्यायाधीस २०:४७

14 मिनु बेन्यामीन आ थर डा मुरपुकी लेशशा जाक्मा बाक्त। मिनु मेकोपुकीमी मेको आन कली याबेश-गिलादम सेस प्रोंइशो मीश आल गेमे बाक्त। तन्न बेन्यामीन आ थर डा वोंइश मुर आन कली मेको मीश आल मजाक्दीम्माक्त।

15 मिनु इस्राएलीपुकीमी बेन्यामीन आ थर आ पर्वम सुर्ता पस डा पस बाक्मा बाक्त। मारदे हना परमप्रभु यावेमी इस्राएल डा बेन्यामीन आ थर हेररा क्याम्शो बाक्माक्त।

16 मोपतीके मेको गुम्तीक डा खाल्पापुकीमी “मुल लीशो वोंइश मुर आन कली मीश गेचा कली मार पय? मारदे हना बेन्यामीन आ थर डा मीश मुर नेल्ल बेक्तेकम” देमा बाक्त।

17 मिनु मुरपुकीमी “प्रोक्शा ब्रोंइशो बेन्यामीन आ थर डा मुर आन कली चच युइ दुम्चा माल्नीम। मोदेशो मदुम्त हना, इस्राएल रे थर का ग्याम्शा लाइब।

18 तन्न गो मेको आन कली इं तमी गेने मचाप्नय” देमा बाक्त। मारदे हना इस्राएलीपुकीमी “सुम बेन्यामीन आ थर डा मुर कली आ तमी गेबा, मेको सराप राइब” दे कसम जशो बाक्मा बाक्त।

19 मोपतीके “नेनीन, परमप्रभु यावे आ परबम बर्सम काले दुम्ब चाड शिलोमी पाइनीम। शिलो बेथेल आ उत्तर गे बाक्ब। मिनु मेको बेथेल रे शेकेम लतीक ठेयब लां आ पूब नु लेबोना सहर आ दक्खिनम बाक्शो बाक्ब” देमा बाक्त। यहोसु १८:१

20 मिनु बेन्यामीन आ थर डा मुर आन कली “गे लशा अडगुर रूमी खुइशशा बाक्कीन।

21 मिनु शिलो डा मीश आलपुकी सिल पथ जाक्मानु, अडगुर रू रे फो फु गूशा, आंम मीश सेल्चा कली का का पा मीश आल कीडीन। मिनु बेन्यामीन आ थर डा रागी लन। प्रस्थान २१:१६; ब्यवस्था २४:७

22 मिनु मेको मीश आल आन आफ नु लोक्बपुकी जाक्शा, आंइ कली लोत्र पाम्तेक्म हना, गो मेको आन कली ‘बेन्यामीन आ थर डा मुर आन कली शिशी पन। मेको आन कली ग्युंभे पचा गेन। मारदे हना गो लडाइमी मेको मिश डा वोंइश मुर आन कली मीश आल ग्याइक्ने मचाप्क। मिनु गे इन तमी गेशा यो दोस मताइनीनी। मारदे हना गे मेको आन कली इन तमी आंमन मगेनी’ देनीकी” देमा बाक्त।

23 मिनु बेन्यामीन आ थर डा मुरपुकीमी मोदेशो पामे बाक्त। मेको सिल पाइब मीश आल का का आंम मीश सेल्चा कली कीडमे बाक्त। मेको आन रागी लेशशा आंम सहर कली लेशा सेल्शा, मेकेर बाक्मा बाक्त।

24 मेना इस्राएली नेल्ल मेकेर रे लशा ब्राशा, आंम आंम थर नु आंम आंम खिं लमा बाक्त।

25 मेना इस्राएल रागीम पिप मबाक्माक्त। मोपतीके सु सुमी मार मार पचा दाक्मा मेको पाइक्बाक्मा बाक्त। न्यायाधीस १७:६

## रूथ

**ब्रेक्ब मुर:** साइ डा टाल्मुत माइशशो किताबमी “एको किताब ब्रेक्ब सामुएल बाक्ब” दे ब्रेक्शो बाक्ब।

**गेना ब्रेक्शो:** दाऊद आ सासन पची ना ब्रेक्शो बाक्ब। मेको आ सासन ११०४-१६५ बि. सी.म बाक्शो बाक्त।

**मार ब्रेक्शो:** एको किताब डा लोत्र परमप्रभु यावेमी आ वोंइश बेक्शो मीश मुर नु रोम रोइक्च आन कली शिशी पशो सांकली बाक्ब। रूथ मोआबी दुम्शा यो परमप्रभु यावे कली थमा सुइक्ब दुम्त। मेकोमी बोआज नु ग्युबे पा येसु आ किकी पिपी दुम्त। मत्ती १:५

नाओमी नु आ खिं डा मुर

1 निसाफ पाइबपुकीमी इस्राएली आन कली हुकुम पची ना, अन्काल दुम्माक्त। मोपतीके यहूदा रागी डा बेथलेहेम रे मुर का, आ मीश नु आ तौ निक्शी लाइशशा, मोआबी आन रागीम बाक्थ लमाक्त। गन्ती २५:१-५; १सामुएल २२:३-४

2 मेको मुर आ नें एलीमेलेक बाक्माक्त। आ मीश आ नें नाओमी नु आ तौ निक्शी आस नें का के माहलोन, का के किल्योन बाक्माक्त। मेकोपुकी यहूदा रागी डा बेथलेहेम एफ्राथाह सहरम बाक्शो बाक्मा बाक्त। मिनु मोआबी आन रागी जाक्दीशशा, मेक उइ बाक्मा बाक्त। उत्पत्ती ४८:७; मीका ५:१

3 मिनु नाओमी आ वोंइश एलीमेलेक बेक्शा, नाओमी नु आ तौ निक्शी प्रोंइचा पुंडसमा बाक्त। ब्यवस्था ७:३; ब्यवस्था २३:४; नेहेम्याह १३:२३

4 मिनु मेको आ तौ निक्शीमी मोआबी मीश आल चाक्से बाक्त। का आ नें ओरपा, का आ नें रूथ बाक्माक्त। मेकोपुकी मेकेर १० बर्स बाक्मा बाक्त।

5 मिनु माहलोन नु किल्योन निम्फा बेक्सा बाक्त। मोपा आ वोंइश नु आ तौ निम्फा बेक्शा, नाओमी ला लीमाक्त।

रूथ नु आ शिमी

6 मिनु नोले नाओमी आ चाइमी निक्शी नु मोआब रे आ रागी लेत्वा चिक्ता बाक्त। मारदे हना मोआब रागीम बाक्मेनु, नाओमीमी “परमप्रभु यावेम आ मुर आन कली मिम्शा, मेको आन कली जचा गेपु” देशो लोत्र नेना बाक्त। २राजा ८:३

7 मिनु मेको आ चाइमी निक्शी नु आ बाक्तीके रे गाक्शा, यहूदा रागी लमा बाक्त।

8 मिनु नाओमीमी आ चाइमी निक्शी आस कली “इस इस माइत लेतीसे। गे दोपा बेक्शो आन कली नु आं कली रिम्शो पसी, मोपा परमप्रभु यावेमी इस कली रिम्शो पवल।

9 परमप्रभु यावेमी इस कली अर्को वोंइश गेशा, इस थुं नाइशशा बाक्चा गेवल” देंमाक्त। मिनु आ चाइमी आस कली पुक्पु पाइशशा, नेल्ल डाक्मा बाक्त। रूथ ३:१

10 मिनु आ चाइमी निक्शीमी “गो थमा पा इन मुर आन बाक्तीके लाइनस्कु” देंसा बाक्त।

11 मिनु नाओमीमी “आं चाइमी निक्शी लेतीसे। मारदे गो नु लचा दाक्नीसी? मार, गो इस वोंइश दुम्पाइक्चा कली तौ थीने चाप्नुडा डा?

12 आं चाइमी निक्शी लेतीस। गो खाल्पी दुम्शा, ग्युबे पने मचाप्नुड। गो आल मिम्शा, मुलाक्दोन वोंइश नु बाक्शा, तौ थिती हना यो, मेको मकोल्म सम्म

13 रिम्शा बाक्ने चाप्नीसी? मेको आस कली रिम्शा, अर्को ग्युबे मपथु बाक्नीसी? मदुम्ब, आं चाइमी निक्शी। मारदे हना इस क्येडा गो परमप्रभु यावे आ गुड रे श्येत जाइब बाक्ती” देंमाक्त।

14 मिनु मेकोपुकी लेंशा डाक्मा बाक्त। मेको नोले ओरपामी आ शिमी कली पुक्पु पाइशशा वोइशशा, आ मुर आन बाक्तीके लेम्माक्त। रूथ चहिं आ शिमी नुन बाक्माक्त।

15 मिनू नाओमीमी “नेनो, इ देउरानी आ मुर आन बाक्तीके नु आ देवी देवताम लेत्त। गे इ देउरानी आ पशो खोदेशो पावो” देमाक्त।

16 मिनू रूथमी “इन कली प्रॉइपाइश्शा, आं कली लेशशा, सोइक्चा कली ढिपी मपाइय्यीनी। गे ते लाइनीनी, गो यो मेकेन लाइनुड। गे ते बाक्नीनी, गो यो मेकेन बाक्नुड। इन मुरपुकी आं मुर दुम्नीम। इन परमप्रभु आं परमप्रभु दुम्ब।

17 गे ते बेक्नीनी, गो यो मेकेन बेक्नुड। मिनू मेकेन थिम्चा पुंडसीनुड। गो मबेक्थु इन कली प्रॉइतन्नी हना, परमप्रभु यावेमी सजाइ गेयील” देमाक्त।

18 मिनू नाओमीमी रूथमी आ कली प्रॉइसीन मप्रॉइब, दे तुइश्शा, अरु मारेइ मदेंमाक्त।

19 मिनू मेको निम्फा गाक्शा, बेथलेहेम जाक्सा बाक्त। मिनू बेथलेहेम जाक्सानु, सहर डा मुर नेल्लेमी मेको आस पर्वम लोत्र पामे बाक्त। मिनू मीश मुरपुकीमी “मार, एको नाओमीन बाक्बा?” देमा बाक्त।

20 मिनू नाओमीमी “आं कली नाओमी मदेनीन। मारा देनीन। मारदे हना नेल्ल क्येडा सक्ति पाइश्शो परमप्रभु यावेमी आं कली मरिम्शो पाइश्शा, श्येत जपाइक्ती। नाओमी देशो दारशो रुम्सीब, मारा चहिं कशो रुम्सीब।

21 गो मारेइ मारेइमी गाप्शा लशो नड। मुल परमप्रभु यावेमी श्येत्थ लेशशा चाक्ती। गे मारदे आं कली नाओमी देनीनी? नेल्ल सक्ति पाइश्शो परमप्रभु यावेमी आं कली दोस गेशा, मरिम्शो पाइक्ती” देमाक्त।

22 मोपा नाओमी नु आ चाइमी मोआबी रूथ मोआब रागी रे बेथलेहेम जाक्सा बाक्त। मेको बेथलेहेमम जाक्सानु, क्योत्रज मीशो बाक्माक्त।

## 2

रूथ सिला माल्दीशो

1 मिनू नाओमी आ वोंइश एलीमेलक आ खिं डा शुश शोप पाइश्शो नु ठेयब मुर का बाक्माक्त। मेको आ नें बोआज बाक्माक्त।

2 मिनू मोआबी रूथमी नाओमी कली “गो रूम लशा, सु सुम आं कली शिशी पाइनीमी, मेको आन नोनोले सिला बाला गुप्दी डा?” देमाक्त। मिनू आ शिमीमी “दुम्ब, आं चाइमी लावो” देमाक्त।

3 मिनू रूथ लशा, रिक्ब आन नोनोले सिला बाला गुबा बाक्त। आ जाक्दीश्शो रू चहिं एलीमेलक आ खिं डा मुर बोआज आ रू बाक्माक्त।

4 मेना बोआज बेथलेहेम रे जाक्माक्त। मिनू मेकोमी रिक्ब आन कली “परमप्रभु यावे गेपुकी नु बाक्ल” देमाक्त। मिनू रिक्बपुकीमी यो “परमप्रभु यावेमी इन कली आसीक गेवल” देमा बाक्त। रूथ १:२

5 मिनू बोआजमी आ गेय पाइब आन कली कोत्रब कली “एको मीश आल सुम?” दे हिल्लो पवा बाक्त।

6 मिनू मेको गेय पाइब आन कली कोत्रब मुरुमी “एको मोआब रागी रे नाओमी नु जाक्शो मोआबी मीश आल बाक्ब।

7 एकोमी आं कली ‘रिक्ब आन नोनोले मुठा आन नेक्था यो सिला गुप्चा गेयीनी’ दे पुंडतु। मिनू एको सुनी रे इक्कका ला नाइश्शा, सिला गुप्स डा गुप्स बाक्त” देमाक्त।

8 मिनू बोआजमी रूथ कली “नेनो, गे अरु आन रू सिला गुप्थ मलावो। आं गेय पाइब मीश मुर आन नेक्थान बाक्को।

9 मुरपुकीम ते ते रिक्नीमी, मेके मेके लावो। आं गेय पाइब वोंइश मुर आन कली ‘इ कली मथिचा’ दे माइक्तामी। तूतू दाक्ते हना, वोंइश मुर आन चाक्शो गर डा ब्वाक्कु तूडो” देमाक्त।

10 मिनू रूथ मेको आ डोंइती बाप्शा, मेको कली “गो अर्को रागी डा मुर नड, दे तुइश्शा यो मारदे आं कली इश डा शिशी पाइय्यीनी?” देमाक्त। ब्यवस्था २३:४-६

11 मिनू बोआजमी “इ वोंइश बेक्म नोले इ शिमी कली दोदेशो रिम्शो पवी, मेको नेल्ल मुरपुकीम आं कली माइक्तीमी। गे इ आम आफ, इ जरमेशो रागी प्रॉइशा, मतुइश्शो मुर आंइ बाक्तीके जाक्ते। रूथ १:१६, १७

12 परमप्रभु यावेमी इ कली रिम्शो पवल। परमप्रभु यावे, इस्राएली आन परमप्रभुम इ कली वारच पवल, दे मेको आ नेक्था जाक्ते। मेकोमी इ माल्शो नेल्ल गेवल” देमाक्त। भजन संग्रह ३६:८

13 मिनु रूथमी “प्रभु, इन डोंइती शिशी ताता। गे आं थुं नाइक्पाइक्तीनी। गो इन गेय पाइब मबाक्ती हना यो, गे आं कली रिम्शो लोव्र पाइतीनी” देमाक्त।

14 मिनु लाम्ज जची ना, बोआजमी मेको कली “एक पिवो। शोब्ले जावो। इ शोब्ले अडगुर शांबुम तेप्तो” देमाक्त। मिनु रूथ रिक्ब मुर नु निस्से बाक्त। मिनु बोआजमी मेको कली कारशो क्योव्रज गेवा बाक्त। रूथमी रूथी सम्म जशा, हंशा वोदा बाक्त।

15 मिनु मेको बोक्शा, सिला गुप्थ लमाक्त। बोआजमी आ गेय पाइब वोंइश मुर आन कली “मेको कली मुठा आन नेक्नेक्था यो सिला गुप्चा गेने, महुइक्तीन।

16 इक्का बाला तोक्शा गेने। मिनु गुबानु, महुइक्तीन” दे माइक्मी बाक्त। लेवी १०:९-१०

17 मोपा रूथ नां रिक्चावा सम्म सिला गुम्ना गुम्न बाक्माक्त। मिनु तुबानु, एफाह का क्योव्रज दुम्माक्त। एफाह का २२ लिटर पुक्तीके खोदेशो बाक्ब।

18 मिनु मेको कुरशा, सहर जाक्माक्त। आ शिमीमी मिश डा क्योव्रज गुप्शा, चाक्शो तवा बाक्त। मिनु रूथमी आ हेंशो जचा थोव्रक यो गुंइशा, आ शिमी कली गेवा बाक्त।

19 मिनु आ शिमीमी “मुलाक्ती सिला गुप्थ ते लवे? इ कली शिशी पाइब मुर आसीक तवल” देमाक्त। मिनु रूथमी ते सिला गुबा आ शिमी कली शेंदा बाक्त। “मुलाक्ती आं सिला गुप्शो रू डा होव्रप आ नें बोआज बाक्त” देमाक्त।

20 मिनु नाओमीमी आ चाइमी कली “परमप्रभु यावेमी मेको कली आसीक गेवल। मिनु बेक्शो नु ब्रोंइशो मुर आन कली शिशी पचा मप्रोन। मेको मुर इस खाल डा बाक्ब” देमाक्त। रूथ ४:४

21 मिनु मोआबी रूथमी “मेकोमी आं कली ‘क्योव्रज नेल्ल ओंइने मथुमु सम्म आं मुरपुकी नु सिला गुप्थ जाक्को’ देत” देमाक्त।

22 मिनु नाओमीमी “आं चाइमी, मेको आ गेय पाइब मीश मुर नु गाक्चा रिम्शो बाक्ब। इ कली सुइमी अर्को आन रूमी श्येत मगेमेक्ल” देमाक्त।

23 मोपतीके क्योव्रज नु चेरब रिक्ने मनुम्म सम्म, रूथ बोआज आ गेय पाइब मीश मुरपुकी नु सिला गुबा बाक्त। मिनु आ शिमी नु बाक्बाक्माक्त।

### 3

रूथमी नाओमी आ लोव्र टिशो

1 मिनु रूथ आ शिमी नाओमीमी “आं चाइमी, इ कली रिम्शो दुम्चा कली इ खिं पशा बाक्शो तचा दाक्नुडं।

2 बोआज इं खाल डा मुर बाक्ब। गे मेको आ गेय पाइब मीश मुरपुकी नु बाक्ते। मुलाक्दो मेकोमी आ क्योव्रज तुप्तीकेम गेय पाइब।

3 मोपतीके गे चिक्शा, तेल खेक्शा, रिम्शो वा फेक्शा, क्योव्रज तुप्तीकेम लावो। बोआजम मजवा मतूडा सम्म मतपांइसो।

4 मिनु मेको इप्दीमेनु, आ इप्तीके कोव्रशा वोतो। मिनु नोले लशा, आ खोइल गे डा फेक्शो वा हुक्शा गोलो। मिनु गे मार पचा माल्नेवे, मेकोमी इ कली देंब” देमाक्त।

5 मिनु रूथमी “इन देंशो, नेल्ल पाइनुड” देमाक्त।

6 मिनु रूथ क्योव्रज तुप्तीके लशा, आ शिमी आ देंशो खोदेशो पवा बाक्त।

7 बोआज जशा, तूशा ग्येरसे बाक्त। मिनु क्योव्रज पुक्तीके आ नोले इप्थ लमाक्त। मिनु रूथ बोआज आ मतुइक्चा डा पा जाक्शा, आ खोइली गे डा वा हुक्शा, गोल्माक्त।

8 मिनु नाक्दो उडक्थ दुम्मेनु, बोआज सेंसे बाक्त। मिनु आ खोइल गे मीश मुर का गोल्लो तवा बाक्त।



9 मिनु बोआजमी “गे सु नवे?” दे हिल्लो पवा बाक्त। मिनु मेकोमी “गो इन वाइलीम रूथ नड। गे आंइ खाल डा मुर बाक्नीनी, इन वा फेक्तीनी” देमाक्त। इजीकीएल १६:८

10 मिनु बोआजमी “परमप्रभु यावेमी इ कली आसीक गेवल। डोंइती पशो क्येडा मुल डा इ पशो रिम्शो बाक्ब। गे क्येट थीब नु मथीब सुइ ठिटा वोंइश मुर आन नोले मखोदी। रूथ २:११

11 गे महिथु बाक्को। इ माल्शो गो नेल्ल पाइनुड। गे रिम्शो मीश मुर बाक्नेवे। सहर डा मुर नेल्लेमी तुइशो बाक्नीम।

12 गो थमा पा इ खाल डा मुर बाक्नुड। तन्न आं क्येडा यो आं नेक्था डा अर्को मुर का बाक्ब।

13 मुलाकदो एके बाक्को। दीसा सुनी मेको मुरुमी इ नेक्था डा मुर आ पचा माल्शो गेय पाइब, मपापु हना, परमप्रभु यावे ब्रोंइशा बाक्शो खोदेशो पा, गो एको गेय पाइनुड। नां मसोत्रम सम्म इपो” देमाक्त।

14 मिनु रूथ नां मसोत्रम सम्म इम्माक्त। मिनु रिम्शो पा नां मसोत्रथु बोक्माक्त। मिनु बोआजमी “क्योत्रज तुप्तीकेमी मीश मुर का बाक्त, दे सुइम मतुइक्तमेकल।

15 इ कुप्नी दाइक्तो” देमाक्त। मिनु रूथमी दाइक्तानु, ६ सेआह क्योत्रज गेशा कुरपदा बाक्त। मिनु रूथ सहर लेम्माक्त। सेआह का ७ लिटर खोदेशो बाक्ब। मिनु ६ पुक्तीके ४२ लिटर कि १० पाथी खोदेशो बाक्ब।

16 मिनु आ शिमी आ बाक्तीके जाक्दीम्मेनु, आ शिमीमी “आं चाइमी, मार दुम्मे?” दे हिल्लो पवा बाक्त।

17 मिनु रूथमी बोआजमी पशो नेल्ल शेंशा “मेकोमी आं कली ‘इ शिमी आ बाक्तीके श्येथ मलेतो’ दे आं कली ६ सेआह क्योत्रज गेती” देमाक्त। सेआह का ७ लिटर खोदेशो बाक्ब।

18 मिनु नाओमीमी “आं चाइमी, एको दोदेशो दुम्बा, मतुइक्ती सम्म इ थुं नाइशशा बाक्को। मारदे हना मेकोमी मेको गेय मुलाक्तीन मथुमा सम्म आ थुं यो नाइक्चा मताइब” देमाक्त।

## 4

### बोआजम आ नेक्था डा मुर गुम्शो

1 मिनु बोआज सहर डा गारो डा ठेयब लाप्चोम लशा, मेकेर निशशा बाक्माक्त। मिनु याम का नोले रूथ आ नेक्था डा मुर जाक्शो तशा, बोआजमी आ नें थिशा “एके पिशा, निस्सो” दे ब्रेत्ता बाक्त। मिनु मेको निस्से बाक्त।

2 मिनु बोआजमी १० जना सहर डा खाल्पा आन कली यो तेक्शा “निस्सीने” देमाक्त। मिनु मेकोपुकी निस्समा बाक्त।

3 मिनु बोआजमी रूथ आ नेक्था डा मुर कली “मोआब रागी रे जाक्शो नाओमीमी इं लोकब एलीमेलेक आ रू लेयचा चिक्शो बाक्ब।

4 गो इ कली मो देंड, देशो नड। एको सहर डा मुरपुकी नु खाल्पा आन डोंइती गे ग्याप्चा दाक्नेवे हना, ग्यापो। ग्याप्चा मदाक्नेवे हना, आं कली तुइक्पाइय्यी। मारदे हना इ नेक्था डा मुर गो नड” देमाक्त। मिनु मेको मुरुमी “गो ग्याप्नुड” देमाक्त। लेवी २५:२५; येरमीया ३२

5 मिनु बोआजमी “नाओमी रे मेको रू ग्यबी नाक्ती, गे बेक्शो मुर आ मीश मोआबी रूथ यो ताइनेवे। मेको बेक्शो मुर आ नें आ थेरशो रू नु लील, दे मो दुम्चा माल्ब” देमाक्त। ब्यवस्था २५:५-६

6 मिनु रूथ आ नेक्था डा मुरुमी “गो ग्याप्ता हना, आं आंम थेरशो रू मरिम्शो दुम्ब। आं पचा माल्शो गेय गेन पावो। गो ग्याप्ने मचाप्नुड” देमाक्त।

7 इस्राएल रागीमी डोंइती रू ग्याप्मेनु, लेयडमेनु, रू डा होव्रप फांइसीमानु, रू लेयबमी ग्याप्ब कली आ जुत्ता पुइशशा गेचा माल्बाक्माक्त। इस्राएलमी लोव्र फाइक्चा मततीके आ पबर्म मोदेशो पचा माल्बाक्माक्त। ब्यवस्था २५:७-१०

8 मिनु रूथ आ नेक्था डा मुरुमी बोआज कली “गे ग्याम्सो” दे आ जुत्ता पुइशशा गेवा बाक्त।

9 मिनु बोआजमी खाल्पापुकी नु मेकेर बाक्ब मुर आन कली “गो एलीमेलेक, माहलोन नु किल्योन आन थेरशो रू नेल्ले नाओमी रे ग्याप्ता। गे मुलाक्ती सांक्छी दुम्तीनी।

10 माहलोन आ मीश, मोआबी रूथ यो बेक्शो मुर आ नें, आ थेरशो रू नु लील, दे चाक्ता। मोपा आ लोक्ब आन दातेमी नु आ जरमेशो बाक्तीकेम आ नें लील, दे मो पाता। गेपुकी मुलाक्ती सांकछी दुम्तीनी” देंमाक्त।

11 मिनु ठेयब लाप्चोम बाक्ब नु खाल्पा नेल्लेमी “गो सांकछी दुम्तक। परमप्रभु यावेम एको इ खिंम जाक्शो मीश मुर कली राहेल नु लेआ खोदेशो सेलल। मेको निक्शीमी इस्राएल आ खिं सेल्शो बाक्ताक्से। बेथलेहेम एफ्राथाहम इ नें ठेयब दुम्ल।

12 तामारम यहूदा रे थिशो पेरिस आ खिं खोदेशो पा, परमप्रभु यावेमी एको ठिटी मीश मुर रे थिशो आलम इ खिं सेलल” देंमा बाक्त। उत्पत्ती ३८:२९

बोआजम रूथ कली ग्युंभे पशो

13 मिनु बोआजमी रूथ चाक्शा, मेको नु बाक्माक्त। मिनु परमप्रभु यावे आ आसीकमी रूथ कोव्रज कुरशा, तौ का थिमाक्त।

14 मिनु मीश मुरपुकीमी नाओमी कली “परमप्रभु यावे ठेयब बाक्ब। मेकोमी इ कली मुल इ खाल डा मुर नु वोइक्ते। परमप्रभुम इ कली चच का गेते। एको आ नें इस्राएलम ठेयब दुम्ल।

15 एकोमी इ कली मुल नक ब्रोंइतीक गेशा, खाल्पी दुमेनु, इ कली थुल्ब। मारदे हना ७ जना तौ आन क्येडा इ कली दाक्ब चाइमीमी रिम्शो पशो बाक्ब” देंमा बाक्त।

16 मिनु नाओमीमी मेको आल ताक्शा, आ थुकुम वोइश्शा, मेको कली कोव्रब दुम्माक्त।

17 मिनु आ नेक्था डा मीश मुरपुकीमी “नाओमी के चच का दुम्त। गो मेको आ नें ओबेद वोइय्य” देंमुमा बाक्त। मेकोन येस्से आ आफ, दाऊद आ बाजे बाक्माक्त। मत्ती १:५-६; लूका २:३२

दाऊद आ किकी पिपी

18 पेरिसम हेसोन थिमाक्त।

19 हेसोनम राम थिमाक्त। राममी अम्मीनादाब थिमाक्त। १इतिहास २:९-१५

20 अम्मीनादाबमी नहशोन थिमाक्त। नहशोनमी साल्मोन थिमाक्त। गन्ती १:७

21 साल्मोनमी बोआज थिमाक्त। बोआजमी ओबेद थिमाक्त।

22 ओबेदमी येस्से थिमाक्त। येस्सेमी दाऊद थिमाक्त। १सामुएल १६:१, ११-१३

## १ सामुएल

**ब्रेक्ब मुर:** नेल्ल क्येडा डोंइती एको सामुएल किताब निकशी, राजा किताब निकशी नु इतिहास के किताब निकशी नेल्ल ठेयब किताब का बाक्शो बाक्त। नोले ला सेप्तुआगीन्त माइशोमी एको किताब कली ६ ओटा किताब सेल्शो बाक्त। सामुएल नु राजा आन पालाम इतिहास ब्रेक्ब मुर बाक्शो बाक्तेक्म। मेना सामुएल आ ब्रेक्शो तामेनु, परमप्रभु यावे आ लोत्र पाइब नाथान, गाद, येरमीया कि एज़ाम एको किताब ब्रेक्शो दुम्ने चाप्व। १इतिहास २९:२९ पिप दाऊद आ पशो मार मार बाक्मे, मेको डोंइती रे नोले सम्म नेल्ल परमप्रभु यावे आ लोत्र पाइब सामुएल, नाथान नु गाद आन ब्रेक्शो किताबम ब्रेक्शो बाक्ब।

**गेना ब्रेक्शो:** सामुएल किताब निकशी ९७५ बि. सी. नेबुकदनेसरम यरूसलेम खतम सेला नोले डा लोत्र तेम्शा ब्रेक्शो बाक्ब, दे तुंडसीब।

**मारदे ब्रेक्शो:** परमप्रभु यावेमी आ देशो पाइब। चढ़ेब एली, पिप सावल नु इस्राएल डा मुरपुकीम परमप्रभु यावे आ लोत्र मटिशो बाक्तेक्म। परमप्रभुमी चढ़ेब एली आ पा डा सामुएल चढ़ेब नु पिप सावल आ पा डा दाऊद कली पिप सेला बाक्त। परमप्रभु यावेमी आ देशो गेनायो मप्रॉइब।

### डोंइती डा लोत्र

1 रामाथाइम-सोफीम रे जाक्शो मुर का बाक्माक्त। मेको एफ्राइम डा पहाड डा सुफ आ खिं डा बाक्माक्त। मेको आ नें एल्काना बाक्माक्त। एल्काना येरोहाम आ तौ, एलीहु आ चच बाक्माक्त। मेको आ शेर बाजे तोहु नु आ किकी बाजे जूफ माइशो एफ्राइम थर डा बाक्माक्त। १इतिहास ६:१; १इतिहास १२:१९-२०

2 एल्काना के मीश निकशी बाक्सा बाक्त। का आ नें हान्नाह नु अर्को आ नें पेनीनाह बाक्माक्त। पेनीनाह के आल बाक्सा बाक्त, तन्न हान्नाह के आल मबाक्सा बाक्त। उत्पत्ती २९:३१

3 एल्काना बर्स बर्सम आ सहर रे शिलो लाइबाक्सा बाक्त। मेकेर मुर नेल्ल आन परमप्रभु यावे कली ठेयब सेल्शा, चढ़ेतीक चढ़ेचा कली लाइबाक्सा बाक्त। मिनु मेकेर चढ़ेब एली आ तौ निकशी होफनी नु फिनेहास बाक्सा बाक्त। मेको परमप्रभु यावे कली चढ़ेब बाक्सा बाक्त। यहोसु १८:१

4 मिनु एल्कानाम चढ़ेशो नाक्ती आ मीश पेनीनाह आ तमी तौ नेल्ल आन कली चढ़ेशो थोत्रक गेबाक्सा बाक्त।

5 मिनु हान्नाह कली निकशी भाग खोइ गेबाक्सा बाक्त। मारदे हना एल्कानाम हान्नाह कली शुश दाक्बाक्सा बाक्त। तन्न परमप्रभु यावेमी हान्नाह कली आल मथीब सेल्शो बाक्सा बाक्त।

6 हान्नाह के आल मबाक्तीके आ सौतामी मेको कली आ थुं शुश खाइक्पाइशशा, तोक्शा लोत्र पाइक्बाक्सा बाक्त। मारदे हना परमप्रभु यावेमी हान्नाह कली आल मथीब सेल्शो बाक्सा बाक्त।

7 मोपा एल्कानामी बर्स बर्सम परमप्रभु यावे कली चढ़ेथ लमेनु, आ सौतामी हान्नाह कली श्येत गेस डा गेस पतीके हान्नाह डाक्शा, मारेइ मजवा मब्ववा बाक्त।

8 मिनु आ वोंइश एल्कानामी मेको कली “हान्नाह, गे मारदे डाक्स डा डाक्स बाक्डे? मारदे मजवी मब्ववी? गे मारदे इ थुं खाइक्पाइक्नेवे? मार, गो इ कली १० जना तौ आन क्येडा यो शुश दाक्ब मनडा डा?” दैमाक्त।

### हान्नाह आ प्रार्थना

9 मिनु काले शिलोमी जने तूने थुम्मे नोले हान्नाह बोक्सा बाक्त। मिनु परमप्रभु यावे आ डोंइती लशा राम्माक्त। मेना चढ़ेब एली परमप्रभु यावे आ ताम्बु आ ओव्रतीक नेक्था आ नित्तीकेम निशो बाक्सा बाक्त।

10 मिनु हान्नाह आ थुं शुश खाइशशा, डाक्शा, परमप्रभु यावे कली पुना बाक्त।

11 मिनु मेकोमी कबल पा “मुर नेल्ल आन परमप्रभु यावे, गे इन वाइलीम, आं श्येत तशा, आं कली मिम्शा, मप्रैताकनी हना, आं कली तौ का गोयीनी। गो मेको कली मबेकम सम्म परमप्रभु यावे, इन कली जिम्मा गेनुड। मेको आ चां गेनायो मप्रेकसीब मेकोम गेनायो अडगुर शांबु मतूब” दे कबल पवा बाक्त। आमोस २:११; न्यायाधीस १३:५

12 मिनु मेकोमी परमप्रभु यावे आ डोंइती पुंडस डा पुंडस बाकमेनु, एलीम मेको आ शोत्र हिकशो कोव्रशा बाक्माक्त।

13 हान्नाहमी आ थुंम ला पुंडशो बाक्माक्त। मिनु आ शोत्र हिकसाक्व हना यो, आ सेंदा मग्रूमाक्त। मिनु एलीम मेको कली दुक्शो मीश मुर का बाक्त, दे मिम्ता बाक्त।

14 मिनु एलीमी मेको कली “गे गेना सम्म मोपा दुक्शा बाक्नेवे? अडगुर शांबु तूचा प्रोनो” दे मदा बाक्त।

15 मिनु हान्नाहमी “आं प्रभु, गो थुं खाइशशो मीश मुर का बाक्नुड। गो मारेइ अडगुर शांबु मतूड। गो परमप्रभु यावे आ डोंइती आं थुं डा श्येत नेल्ल शोत्रता।

16 आं कली मरिम्शो मीश मुर मसुइय्यीनी। आं थुं खाइक्तीके नु शुश श्येत जतीके गो मुल सम्म पुंडस डा पुंडसन बाक्ती” देंमाक्त।

17 मिनु एलीम “इ थुं नाइशशा लावो। इस्राएली आन परमप्रभुम इ पुंडशो लोत्र गेवल” देंमाक्त।

18 मिनु हान्नाहमी “गो इन शिशी ताइब दुम्डल” देंमाक्त। मिनु नोले मेको लशा, आ वोंइश नु जवा तूडा बाक्त। मिनु नोले लेंशा आ थुं मखाइक्माक्त।

### सामुएल जरमेशो

19 मिनु मेकोपुकी आ दीसा सुनी कना बोक्शा, परमप्रभु यावे कली ठेयब सेल्शा, आन खिं रामाह लेम्मा बाक्त। मिनु एल्काना आ मीश हान्नाह नु इम्माक्त। मिनु परमप्रभु यावेमी हान्नाह कली मिम्ता बाक्त। उत्पती ३०:२२

20 मिनु नोले हान्नाहम कोव्रज कुरशा, तौ का थिमाक्त। मेकोमी आ नें सामुएल वोदा बाक्त। मारदे हना मेकोम “गो मेको परमप्रभु यावे नु पुंडशो नड” देंमाक्त।

### हान्नाहमी आ कबल खाप्शो

21 परमप्रभु यावे कली बर्स बर्स डा चढेतीक चढेशा, आंम कबल खाप्चा कली एल्काना आ खिं डा मुर नु इर शिलो लमाक्त।

22 तन्न हान्नाह चहिं मेकोपुकी नु मलमाक्त। मेकोमी आ वोंइश कली “आलम दूध प्रोना नोले गो एको कली परमप्रभु यावे आ बाक्तीक चोव्रदीनुड। मिनु एको गेना हना यो परमप्रभु यावे आ डोंइती मेक उइ बाक्ब” देंमाक्त।

23 मिनु मेको आ वोंइश एल्कानामी “गे मार दाक्ती, मेकोन पावो। मेकोम दूध मप्रोना सम्म खिं उइ बाक्को। परमप्रभु यावेम आ पशो लोत्र कबल” देंमाक्त। मिनु हान्नाह आलम दूध मप्रोना सम्म खिं उइ बाक्शा, थुल्शा, मेको कली कोल्पदा बाक्त।

24 मिनु दूध प्रोना नोले मेको आल लाइशशा, शिलो लमाक्त। मिनु मेकोमी आ नु बर्स सां डा ब्यफ का, एफाह का फस नु गर का अडगुर शांबु यो इर परमप्रभु यावे आ ताम्बुम लदा बाक्त। मेना मेको आल आइक्चन बाक्माक्त। एफाह का २२ लिटर बाक्ब। मेको ५ पाथी खोंदेशो बाक्ब।गन्ती १५:३,८-११

25 मिनु मेकोपुकीम मेको ब्यफ साइशशा, चढेमे बाक्त। मिनु मेको आल कली एली आ बाक्तीक चाक्दीत्मे बाक्त।

26 मिनु हान्नाहमी मेको कली “आं प्रभु, गे ब्रोंइशा बाक्शो खोंदेशो पा, गो थमा लोत्र पाइनुड। गो परमप्रभु यावे कली पुंडशा, इन डोंइती राप्शा, बाक्ब मीश मुर नड।

27 गो एको वोंइश आल आ पबंम पुंडशो नड। मिनु परमप्रभु यावेमी आं पुंडशो गेती।

28 मोपतीके गो एको कली परमप्रभु यावे कली जिम्मा गेनुड। एको ब्रोंइशा बाक्म सम्म परमप्रभु यावे कली जिम्मा गेंसीशो बाक्ब” देंमाक्त। मिनु मेकोपुकी यो परमप्रभु यावे आ डोंइती बाप्शा, मेको कली ठेयब सेल्मे बाक्त। १सामुएल १:११

## 2

हान्नाहम आ प्रार्थना

1 हान्नाहमी “आं थुं परमप्रभु यावे नु ग्येरसीब। गो परमप्रभु यावे आ परबंम आं पिया पोक्नुड। गो आं जोरी सत्रु आन कली ग्राती। गेम आं कली प्रौंडतीके गो ग्येरसाक्यी। लूका १:४६-५५

2 परमप्रभु यावे खोदेशो अरु सुइ मबाकनीम। इन क्येडा लाकशो अर्को सुइ मबाकनीम। आंइ परमप्रभु, सेरथे फुल्लु खोदेशो अरु सुइ मबाकनीम। ब्यवस्था ४:३५; उत्पत्ती ४९:२४; ब्यवस्था ३२:१८; भजन संग्रह १८:२२

3 ठेयब लेशशो लोव्र नु मरिम्शो लोव्र पचा प्रोनीन। मारदे हना परमप्रभु यावे नेल्ल जोक्ब तुइक्ब बाक्ब। मेकोमी मुर आन पतीके नु लोव्र नेल्ले नाक्ब।

4 सक्ति पाइश्शो मुर आन लिब्रा जिक्शो बाक्ब। तन्न सक्ति मपाइश्शो बोल्यो दुम्शो बाकनीम।

5 डोंइती मारेइ मारेइम गाप्शो मुर यो मुल जचा आ परबंम गेय पाइनीम। तन्न शोव्रलु बेक्शोपुकी रूशो बाकनीम। आल मथीब मीश मुरुमी ७ जना आल थिपुतु। तन्न शुश आल थीब ममा आ थुं बेक्ब।

6 परमप्रभु यावे बेक्पाइक्ब नु सेंपाइक्ब बाक्ब। मेकोमी मुर आन कली बेक्शो मुर आन बाक्तीके सोइक्ब। मिनु मेकोमी सेंपाइक्बे यो चाप्ब। ब्यवस्था ३२:३९; भजन संग्रह ७१:२०

7 परमप्रभु यावे पुडग नु शोप पाइश्शो सेल्ब बाक्ब। मेकोमी आइक्च नु ठेयब यो सेल्ब। भजन संग्रह ७५:८

8 मेकोमी मारेइ मथीब आन कली फुरक रे पोक्ब। पुडग आन कली घुरेन रे पोक्ब। मिनु मेको आन कली पिप आन तौ नु निप्पाइक्ब। मेको ठेयब मुर आन दातेम बाक्चा नु मान पाइक्तीक ताइनीम। मारदे हना रागी आ थाम परमप्रभु यावे केन बाकनीम। मेकोम मेको तार रागी वोइक्तु। भजन संग्रह ११३:७-८

9 मेकोमी थमा सुइक्चा पुंडसीब मुर आन कली कोव्रब। तन्न आ अरेशो लोव्र मटीब आन कली छिडछिडमी खतम पोक्पाइक्ब। मारदे हना मुरपुकीम आन सक्तिमी मग्रानीम। भजन संग्रह ३३:१६

10 परमप्रभु यावे आ परबंम जोरी सत्रु साइक्चा पुंडसीनीम। नेल्ल क्येडा ठेयबमी मेको आन परबंम सरीड रे बुंबु पपाइक्ब। मिनु परमप्रभु यावेमी रागी नेल्ल आन कली निसाफ पाइब। मेकोम आ पिप कली सक्ति गेब। मिनु आ तेल लुक्शो आ पिया पोक्ब” देंमाक्त।

11 मिनु नोले एल्काना आ खिं डा मुरपुकी नु रामाह लेम्माक्त। मेको वोंइश आल चहिं परमप्रभु यावे कली चढेब एली आ डोंइती बाक्शा, परमप्रभु यावे आ गेय पवा बाक्त।

एली आ तौ निक्शीम मरिम्शो पशो

12 एली आ तौ निम्फा हिंचा डा मरिम्शो पाइब बाक्सा बाक्त। मेको निक्शी परमप्रभु यावे कली मान पा महिब बाक्सा बाक्त।

13 मेको चढेब निक्शीमी चढेथ जाक्ब मुर आन कली मार पाइक्बाक्ताक्स देशा हना, मुर आन चाक्शो चढेशो श्ये क्येशा बुइक्तानु, मेको आस गेय पाइब कली ठेयब तूतीक सां पाइश्शो काटा कुरपाइश्शा, लेवी ३:२-५; लेवी ७:११-१७, २८-३४

14 कराइ, ताक्के, दिउरे कि ठेयब बोसुम लोप्शो श्ये तूपाइश्शा, दोशो ग्रूमे मोशो आंम के सेल्बाक्सा बाक्त। मोपा शिलोम चढेथ जाक्शो इस्राएली नेल्ल आन कली मो पाइक्बाक्सा बाक्त।

15 मेको निक्शीमी नेल्ल क्येडा मरिम्शो मार पाइक्बाक्सा बाक्त देशा हना, मेको बोसो चोशा चढेचा क्येडा डोंइती आस गेय पाइबपुकी सोइश्शा “चढेब कली वाल्चा कली श्ये गेवो। लोप्शो श्ये मताक्ब। क्येख ला ताक्ब” देंपाइक्बाक्सा बाक्त।

16 मिनु मेको मुरुमी “ममाइ, डोंइती बोसो चोचा गेयी। मिनु नोले इ दाक्शो लाइक्बे चाप्नेवे” देंमेनु, मेको आस गेय पाइबमी “ममाइ, मुलन गेयी। मगेप्तीवी हना, गो रोइश्शा लाइक्नुड” देंबाक्माक्त।

17 मिनु मेको ठिटा आस मरिम्शो पशो परमप्रभु यावे आ डोंइती ठेयब पाप दुम्माक्त। मारदे हना मुरपुकीमी परमप्रभु यावे कली चढेशो आइक्च मिम्तसे बाक्त।

सामुएल नु आ आम आफ

18 मिनु सामुएल परमप्रभु यावे आ डोंडती गेय पाइक्बाक्माक्त। मेको वोंडश आल सुती वा के कुचु तार चढेब आ फेक्तीके फेक्शा, गेय पाइक्बाक्माक्त। १सामुएल २२:१८; प्रस्थान २८:४-६हिबू लोव्रमी एफोद देशो कुचु आ फेक्तीक बाक्त।

19 मिनु आ ममाम मेको कली बर्स बर्सम आइक्च फेक्तीक वा फेरबाक्माक्त। मिनु आ वोंडश नु बर्स बर्स डा क्योरशा चढेदीमेनु, मेको वा लाइशा गेबाक्माक्त।

20 मिनु एलीमी एल्काना नु आ मीश आस कली आसीक गेशा “एको आल आ पा डा परमप्रभु यावेमी एको मीश रे इन कली आलपुकी गेवल। मारदे हना एको परमप्रभु यावे कली गेप्तीवी” देंबाक्माक्त। मिनु नोले मेको आन खिं लेप्बाक्मा बाक्त।

21 मिनु परमप्रभु यावेमी हान्नाह कली आसीक गेवानु, मेको आल थीब दुम्शा, तौ सां नु तमी निक्शी थिमाक्त। मिनु सामुएल चहिं परमप्रभु यावे आ डोंडती कोलना कोल्ल लमाक्त। लूका १:८०

### एली आ तौ निक्शीम मटिशो

22 मिनु एली थम खूशो दुम्माक्त। आ तौ निक्शीमी इस्राएली आन कली दोदेशो पाम्से, मेको नेल्ल नेना बाक्त। मेकोमी आ तौ गुम्तीक ताम्बु आ डोंडती गेय पाइब मीश मुरपुकी नु इप्शो, यो नेना बाक्त। प्रस्थान ३८:८

23 मोपतीके मेकोमी मेको आस कली “गे निक्शीमी मारदे ओदेशो गेय पसी? गेमी ओदेशो मरिम्शो गेय पाइतीसी देशो लोव्र गो मुर नेल्ल आन शोव्र रे नेता।

24 आं तौ निक्शी ओदेशो गेय पचा प्रोनीस। मारदे हना, परमप्रभु यावे आ मुर आन दातेमी एको लोव्र ब्रशो नेता। एको थम मरिम्शो बाक्ब। गे परमप्रभु यावे आ मुर आन कली पाप पपाइक्नीसी।

25 मुरुमी मुर आन कली पाप पाप्टु हना, परमप्रभुम निसाफ पाइब। तन्न मुरुमी परमप्रभु यावे कली पाप पाप्टु हना, सुम गारपाइक्ने चाप्बा डा” देंमाक्त। मेको लोव्र नेल्ल नेताक्स हना यो, मेको निक्शीमी आस आफ आ लोव्र मटिम्से बाक्त। मारदे हना परमप्रभु यावेम मेको निक्शी आस कली साइक्चा माल्लशो बाक्माक्त। अय्युब १६:२०-२१

### परमप्रभुम एली आ पर्बम लोव्र पशो

26 मिनु सामुएल कोलना कोल्ल लमेनु, परमप्रभु यावे नु मुर आन डोंडती दाक्शो दुम्माक्त। लूका २:५२

27 मिनु परमप्रभु आ लोव्र पाइब का जाक्शा, एली कली “परमप्रभु यावेमी इन कली लोव्र का पाइब। मेको मार बाक्ब देशा हना, गो इन आफ नु आ खिं डा मुर इजीप्ट फाराओ आ रागीमी बाक्मानु, गो मतपांडसीडा डा?

28 गो इस्राएल डा थर नेल्ल रे मेको कली आं कली चढेब दुम्पाइक्चा कली योव्रता। आं कली चढेतीकेम चढेचा, आं कली थूप चोचा, नु आं डोंडती निसाफ पतीक ऊरीम नु थुम्मीम बाक्शो झोला फेक्चा कली योव्रता। इस्राएल डा मीम चढेशो नेल्ल इ आफ आ खिं डा मुर आन कली गेता। ब्यवस्था १८:१; गन्ती १८:८-२०

29 मारदे गे आं देशो चढेशो नु जचा थोव्रक चढेशो नेल्ल आइक्च मिम्ती? मिनु आं क्येडा गे इ तौ आस कली ठेयब सेल्नेवे। आं मुर, इस्राएली आन चढेशो रे गे नेल्ल क्येडा रिम्शो मारदे आंम कली वोंडशीशा, इ तौ आस कली ठेयब सेल्नेवे?” देंमाक्त।

30 मोपतीके परमप्रभु यावे, इस्राएली आन परमप्रभुमी “इ किकी पिपी आन खिं डा मुर नेल्ल गेना हना यो आं डोंडती चढेब दुम्नीम, गो कसम जशो नड” देशो बाक्त। तन्न परमप्रभु यावेमी “मुल ओदेशो मदुम्ब। मारदे हना आं कली ठेयब सेल्ब आन कली गो ठेयब सेल्लुड। आं कली आइक्च सेल्ब नेल्ल आइक्च सेल्चा पुंडसीनीम। प्रस्थान २८:१; मलाकी ३:१६-१८

31 मुल गे नु इ किकी पिपी आन खिं डा मुर आन सक्ति नेल्ल साम्नुड। इ खिं डा मुर सुइ खूशो दुम्चा मताइनीम। १राजा २:२७

32 गे आं मुर इस्राएली आन कली गेशो रिम्शो थोव्रक तशा गेहे पाइनीनी। मिनु इ खिंमी सुइ खूशो सम्म मलीनीम।

३३ तन्न गो इ तौ चच युइ आन दाते डा आं कली चढेतीकेम गेय पाइब, का कली मसाइकुड। मेको शुश डाकशा, आ थुं लुकच लाइकब। मारदे हना मेकोमी आ वोंइश मुर नेल्ल बेकची मजाकथु बेकशो तौइब।

३४ मिनु इ तौ निक्शी होफनी नु फिनेहास काबुमीन बेकनीस। मेको आं देशो लोत्र थमा बाकब, देशो चिन्ड का बाकब। १ सामुएल ४:११

३५ गो आं कली थमा सुइकब चढेब का पोक्नुड। मेकोम आं कली टिशा, आं थुंम मिम्शो पाइब। गो मेको कली गेना हना यो लीब खिं का सेल्लुड। मिनु मेकोमी आं तेल लुकशो आ डोंइती गेना हना यो गेय पाइब। १ राजा २:३५; हिब्रू ५:४-६

३६ मिनु इ खिं डा ब्रोंइशा लीशोपुकी मेको आ डोंइती बाप्शा 'टुक्रा का चांदी, शोब्ले का तचा कली, आं कली चढेतीक गेय गेयीनी। मिनु गो नु जचा थोत्रक बाकल' देनीम" दे परमप्रभु यावेमी देत।

### 3

#### परमप्रभुम सामुएल कली ब्रेशो

१ मिनु सामुएल एली आ देशो टिशा, परमप्रभु यावे आ गेय पना पन बाकमाक्त। मेना परमप्रभु यावे आ लोत्र शुश मनेंसीबाकमाक्त। मिनु ततीक यो शुश मतांइसीबाकमाक्त। आमोस ८:११

२ मिनु काबु नाकदो एली आ इप्तीकेमी गोल्शा बाकमाक्त। आ मिक्च ब्राब्रा दुम्शा, रिम्शो पा तने मचापब दुम्शो बाकमाक्त।

३ मिनु सामुएल परमप्रभु यावे आ ताम्बु डा कबल पशो सन्दोस आ नेकथा इप्शो बाकमाक्त। मेना परमप्रभु आ बत्ती मकाप्शो बाकमाक्त। गन्ती ७:८९

४ मिनु परमप्रभु यावेमी "सामुएल, सामुएल" दे ब्रेत्ता बाक्त। मिनु सामुएलम "गो एक बाक्ती" देमाक्त।

५ मिनु एली आ बाक्तीकेम दोरशा लशा "गे आं कली ब्रेत्ताकयीनी। गो एक बाक्ती" देमाक्त। मिनु एलीमी "गो इ कली मब्रेत्तन, लावो। इपो" दे मदा बाक्त। मिनु मेको लशा इम्माक्त।

६ मिनु परमप्रभु यावेम लेंशा "सामुएल" दे ब्रेम्माक्त। मिनु मेको बोक्शा एली आ बाक्तीक लमाक्त। मिनु मेकोमी "गो एक बाक्ती। गे आं कली ब्रेत्ताकयीनी" देमाक्त। मिनु एलीमी "आं तौ, गो इ कली मब्रेत्तन। लावो। इपो" दे मदा बाक्त।

७ मेना सम्म सामुएलम परमप्रभु यावे कली मतुइश्शो बाकमाक्त। परमप्रभु यावे आ लोत्र मेको कली मतुइक्पाइश्शो बाकमाक्त।

८ मिनु परमप्रभु यावेमी मेको कली सां खेयप ब्रेम्माक्त। मिनु मेको लेंशा एली आ बाक्तीक लशा "गो एक बाक्ती। गे आं कली ब्रेत्ताकयीनी" देमाक्त। मेना एलीमी "परमप्रभु यावेम एको आल कली ब्रेत्ता बाक्त" दे तुइक्ता बाक्त।

९ मिनु मेकोमी सामुएल कली "लशा, गोल्शा, बाक्को। मेकोम लेंशा ब्रेत्ताकव हना 'परमप्रभु यावे, लोत्र पने। इन गेय पाइबम नेंशो बाक्नुड' देनो" दे मदा बाक्त। मिनु सामुएल लशा, आ इप्तीकेम गोल्शा, बाक्माक्त।

१० मिनु परमप्रभु यावे मेकेर जाक्शा, राप्शा, डोंइती डा खोंदेशो पा "सामुएल, सामुएल" दे ब्रेम्माक्त। मिनु सामुएलमी "देनीन, इन गेय पाइबम नेंशो बाक्नुड" देमाक्त।

११ मिनु परमप्रभु यावेम सामुएल कली "गो इस्राएलमी रीब पा गेय का पाइनुड। मेको आ पर्वम नेंबपुकी शुश हिंनीम।

१२ मेको नाक्ती गो एली नु आ खिं डा मुर आन कली आं देशो नेल्ल पाइनुड।

१३ मारदे हना गो मेको कली 'गो इ खिं डा मुर आन कली गेना हना यो सजाइ गेनुड। मारदे हना एलीमी आ तौ निक्शीमी मरिम्शो पशो तुइश्शा यो, मेको आस कली मतेक्ग। १ सामुएल २:२७-३६

१४ मोपतीके गो एली आ खिं डा मुर आन पर्वम कसम जशा, एली आ खिं डा मुर आन मरिम्शो पशो मक्याम्सीब। मेको मारेइ मारेइ चढेशोमी मक्याम्सीब' देशो बाक्नुड" देमाक्त।

15 मिनु सामुएल नां सोवम सम्म इम्माक्त। मिनु बोक्शा परमप्रभु यावे आ खिं डा लाप्चो रोक्या बाक्त। मिनु मेकोम परमप्रभु यावे आ देशो नु कोइशो लोत्र एली कली शेंचा हिंमाक्त।

16 मिनु एलीम सामुएल कली ब्रेशशा “ए आं तौ, सामुएल” देंमाक्त। मिनु मेकोमी “गो एक बाक्ती” देंमाक्त।

17 मिनु एलीमी “मेकोमी इ कली मार देंमे? आं कली मेको नेल्ल मखुइक्थु, देनो। मेकोम इ कली देशो लोत्र का सम्म यो खुइक्ताक्वी हना, परमप्रभुम इ कली थम टेयब सजाइ गेवल” देंमाक्त।

18 मिनु सामुएलम परमप्रभु यावे आ देशो लोत्र नेल्ल शेंदा बाक्त। तेकोइ लोत्र मखुइक्ता बाक्त। मिनु एलीमी “मेको परमप्रभु यावे बाक्ब। मेकोम आ दाक्शो पवल” देंमाक्त। २सामुएल १५:२६

19 मिनु सामुएल कोलना कोलन लमाक्त। परमप्रभु यावे मेको नु बाक्माक्त। मिनु मेकोम आ लोत्र नेल्ल खबा बाक्त।

20 मिनु दान रे बेयर-शेबा सम्म डा इस्राएली नेल्लेमी सामुएल परमप्रभु यावे आ लोत्र पाइब दुम्माक्त, दे तुइक्तमे बाक्त।

21 मिनु परमप्रभु यावेमी शिलोम आंम कली तुइक्पांडसीन सीन बाक्माक्त। मारदे हना परमप्रभु यावेमी सामुएल कली आ लोत्र नेंपदा बाक्त।

## 4

### पलिस्तीपुकीमी लडाइ पशो

1 मिनु सामुएल आ लोत्र नेल्ल इस्राएलम ब्रमाक्त। मेना पलिस्ती इस्राएली नु लडाइ पचा कली लशो बाक्मा बाक्त। इस्राएलीपुकीम एबेन-एजेरमी आन बाक्तीक सेल्मे बाक्त। मिनु पलिस्तीपुकीम अफेकमी आन बाक्तीक सेल्मे बाक्त। यहोसु १५:५३

2 मिनु पलिस्तीपुकी इस्राएली आन डोंइती लडाइ पचा कली गारशा, बाक्मा बाक्त। मिनु लडाइ टेयब दुम्शा, इस्राएलीपुकी बुमा बाक्त। पलिस्तीपुकीम मेकेर ४ हजार खोइ इस्राएली सदमे बाक्त।

3 मिनु लडाइ पाइब आन बाक्तीके लेशशा जाक्मानु, इस्राएली आन खाल्पापुकीमी “मुलाक्ती मारदे परमप्रभु यावेमी आंइ कली पलिस्ती नु बुपदा? गो शिलो रे परमप्रभु यावे आ कबल पशो सन्दोस एक चाक्य। मो पाइतय हना परमप्रभु यावे गोपुकी नु बाक्शा, इं जोरी सत्रु रे प्रोंइब” देंमा बाक्त। प्रस्थान २५:१०; यहोसु ३:६,११

4 मोपतीके मुरपुकीमी शिलोम मुर सोइक्तमे बाक्त। मिनु करूब आस दातेम बाक्ब मुर नेल्ल आन परमप्रभु यावे आ कबल पशो सन्दोस चाक्गमे बाक्त। मिनु एली आ तौ होफनी नु फिनेहास परमप्रभु आ कबल पशो सन्दोस नु बाक्सा बाक्त। प्रस्थान २५:२२; २सामुएल ६:२

5 मिनु परमप्रभु यावे आ कबल पशो सन्दोस लडाइ पाइब आन बाक्तीकेम चाक्मेनु, इस्राएली नेल्ल टेयब सेंदा पा ग्येरशा रेयके पामे बाक्त। मिनु मेको आन रेयके पशो सेंदामी रागी नेल्ल मुरदा बाक्त।

6 मिनु पलिस्तीपुकीम मेको ग्येरशो सेंदा नेंशा “हिबू आन बाक्तीकेम मार दुम्मे? मार रेयके नेंसे?” दे हिल्लो पमुमा बाक्त। मिनु परमप्रभु यावे आ कबल पशो सन्दोस आन बाक्तीकेमी चाक्तेक्म, दे तुइक्तमे बाक्त।

7 मिनु पलिस्तीपुकी हिंशा “परमप्रभु मेको आन बाक्तीकेम जाक्त।

8 आबी, मुल गो बेक्नय। मो देशो डोंइती गेनायो मडुम्शो बाक्त” देंमा बाक्त। “आबी, सुम आंइ कली मेको शुश सक्ति पाइशशो परमप्रभु रे प्रोंइबा? मेकोम इजीप्ती आन कली श्येत गेशा गोरशो रागीम बेक्तीक रोइ पपाइशशा साइशशो बाक्त।

9 गे पलिस्तीपुकी महिनीन। बोल्यो दुमीन। मेकोपुकी दोपा इं वाइल दुम्मा, मोपा गेपुकी यो हिबू आन वाइल मडुम्चा डा पा, इन थुं लुक्य मलपाइक्थु, लडाइ पने। बोल्यो दुम्शा, लडाइ पने” देंमा बाक्त। न्यायाधीस १३:१



१० मिनु पलिस्तीपुकीम लडाइ पामे बाक्त। मिनु इस्राएलीपुकी ब्रुशा, आन आन ताम्बुम प्रोकमा बाक्त। मेको लडाइम शुश मुर साइक्चा पुंडसमा बाक्त। खोइलीम गाक्ब ३० हजार लडाइ पाइबपुकी बेक्मा बाक्त।

११ मिनु परमप्रभु आ कबल पशो सन्दोस रोइश्शा, एली आ तौ होफनी नु फिनेहास आस कली यो सदमे बाक्त। १सामुएल २:३४

### एली बेक्शो

१२ मिनु मेको नाक्ती बेन्यामीन आ थर डा मुर का लडाइ पतीक रे प्रोकशा, खाक्शो वा फेक्सीशा, आ पियाम फुरक फुंडसीशा, दोरशा शिलोम जाक्माक्त।

१३ मेको जाक्मेनु, एली आ नित्तीकेम निश्शा, लां कोव्रशा बाक्शो बाक्माक्त। मारदे हना परमप्रभु आ कबल पशो सन्दोस आ पर्बम थाम्पा सुर्ता पवा बाक्त। मिनु मेको मुर दोरशा, जाक्शा सहर डा मुर नेल्ल आन कली मार दुम्मे, मेको नेल्ल शेंदा बाक्त। मिनु सहर डा मुर नेल्ल ग्रीशा वाइ ब्रेम्मा बाक्त।

१४ मिनु एलीम आन वाइ ब्रेश्शो नेंशा “एको मार रेयके बाक्मे” देमाक्त। मेको मुर दोरोर पा दोरशा, एली आ बाक्तीक जाक्शा, लोत्र नेल्ल शेंदा बाक्त।

१५ मेना एली ९८ बर्स दुम्शो बाक्माक्त। मिनु मिक्च मताइब दुम्शो बाक्माक्त। १सामुएल ३:२

१६ मिनु मेको मुरुम मेको कली “गो लडाइ रे नक जाक्ती। गो लडाइ रे प्रोकशा जाक्ती” देमाक्त। मिनु एलीम “ए, आं तौ, मार दुम्मे” दे हिल्लो पवा बाक्त।

१७ मिनु मेको दोरशा जाक्बमी “इस्राएली पलिस्ती आन क्येडा प्रोक्तेकम। लडाइ पाइब शुश साइक्चा पुंडसाक्म। इन तौ होफनी नु फिनेहास निम्फा साइक्चा पुंडसाक्स। मिनु परमप्रभु आ कबल पशो सन्दोस यो रोइक्ताक्म” देमाक्त।

१८ मिनु मेकोमी परमप्रभु आ कबल पशो सन्दोस आ पर्बम लोत्र पवानु, एली टेयब लाप्चो आ नेक्था बाक्शो आ नित्तीक रे नोले गे गोल्माक्त। मिनु आ शुर जिक्शा, मेको बेक्माक्त। मारदे हना मेको खूशो नु टेयब रां पाइश्शो मुर बाक्माक्त। मेकोम ४० बर्स सम्म इस्राएली आन कली निसाफ पशो बाक्माक्त।

१९ मेको आ चाइमी, फिनेहास आ मीशेमी कोव्रज कुरशो बाक्माक्त। मिनु आ आल थिची ना दुम्शो बाक्माक्त। मिनु मेकोमी परमप्रभु आ कबल पशो सन्दोस रोइश्शा योल्शो नु आ शिउ नु आ वोंइश बेक्शो नेंशा, आ आल थितीक रोइम जेत्ता बाक्त। मिनु गोल्शा आल थिवा बाक्त।

२० मिनु मेको बेक्चा चिक्तानु, आ वारच पाइब मीश मुरुम “इ थुं ग्येत्थ लुक्च म्दुमो। गे तौ का थिप्तीवी” दे मदा बाक्त। तन्न मेकोम लोत्र मलेत्ता बाक्त। मेकोम आ नोफा मदाइक्ता बाक्त। उत्पत्ती ३५:१७

२१ मिनु मेकोमी आल आ नें इकाबोद वोदा बाक्त। मेको आ अर्थ “परमप्रभु आ छेडछेड इस्राएल रे जाम्त” देशो बाक्माक्त। मारदे हना परमप्रभु आ कबल पशो सन्दोस रोइश्शो नु आ शिउ नु आ वोंइश बेक्शो मिम्शा इकाबोद आ अर्थ “इस्राएल डा छेडछेड जाम्त” देशो बाक्त। १सामुएल १४:३; भजन संग्रह ७८:६१

२२ “इस्राएल डा छेडछेड जाम्त। मारदे हना परमप्रभु आ कबल पशो सन्दोस रोइसाक्व” देमाक्त।

## ५

### पलिस्तीपुकीमी श्येत जशो

१ पलिस्तीपुकीम परमप्रभु आ कबल पशो सन्दोस रोइश्शा लाइश्शा, एबेन-एजेर रे अश्दोद सहरम चाक्गमे बाक्त। यहोसु १५:४७

२ मिनु मेकोपुकीम मेको कली लाइश्शा दागोन मूर्ति आ थानम चाक्दीत्मे बाक्त। मिनु दागोन आ नेक्था वोदमे बाक्त। न्यायाधीस १६:२३

3 मिनु आ दीसा अशदोद डा मुरपुकी सुनी कना बोक्शा कोवडमेनु, दागोन आ मूर्ति गोल्शा, परमप्रभु यावे आ कबल पशो सन्दोस आ डोंइती बाप्शो तामे बाक्त। मिनु मेकोपुकीम दागोन कली पोक्शा, आ बाक्तीकेम वोदमे बाक्त।

4 मिनु मेकोपुकी लेंशा आ दीसा सुनी कना बोक्शा कोवडमेनु, दागोन परमप्रभु यावे आ कबल पशो सन्दोस आ डोंइती गोल्शो तामे बाक्त। मिनु मेको मूर्ति आ पिया नु गुड निकशी जिक्शा, लापचो डा शीम बाक्शो तामे बाक्त। दागोन आ रां ला लीशो बाक्माक्त।

5 मोपतीके मेको नाक्त रे अशदोद सहरमी दागोन कली चढेबपुकी नु सु सु दागोन आ थानम ओत्रबाक्मा, मेकोपुकीम दागोन आ थान डा लापचो डा शी मदमिथु, खाक्शा ओत्रबाक्मा बाक्त। सेफन्याह १:९

6 मिनु परमप्रभु यावेमी अशदोद डा मुर आन कली शुश श्येत गेमी बाक्त। मेकोमी मेको अशदोद डा नु मेको आ एर ओंथ डा मुर आन कली गार मुतीक रोडमी श्येत गेमी बाक्त। मिनु मेको आन रागीम शुश यिच यूमा बाक्त। मिनु मेको आन सहर नेल्लेम मारेड मारेड खतम दुम्तीक नु बेक्तीकेम सुमा बाक्त। भजन संग्रह ७८:६६

7 मिनु अशदोद डा मुरपुकीम मोदेशो दुम्शो तशा “इसाएली आन परमप्रभु आ कबल पशो सन्दोस एक वोडक्चा मदुम्ब। मारदे हना मेको आ गाइशमी इं कली नु इं देवता दागोन कली श्येत दुम्शो बाक्ब” देमा बाक्त।

8 मोपतीके मेकोपुकीम पलिस्ती आन ठेयब मुर आन कली ब्रेशशा खुप्शा “गो इसाएली आन परमप्रभु आ कबल पशो सन्दोस मार पय?” दे हिल्लो पामे बाक्त। मिनु मेकोपुकीमी “परमप्रभु आ कबल पशो सन्दोस गाथ सहरम लतीन” देमा बाक्त। मिनु मेकोपुकीम इसाएली आन परमप्रभु आ सन्दोस गाथम चाक्गामे बाक्त। यहोसु ११:२२

9 मिनु गाथम लदमे नोले परमप्रभु यावेम मेको सहर डा मुर आन कली शुश हिंचा डा श्येत गेमी बाक्त। मेकेर डा ठेयब रे आइक्च मुर नेल्ल आन कली गार मुतीक रोड पपाइक्मी बाक्त।

10 मिनु मेकोपुकीमी परमप्रभु आ कबल पशो सन्दोस एक्रोनम सोइक्तमे बाक्त। मिनु इसाएली आन परमप्रभु आ कबल पशो सन्दोस एक्रोनमी चाक्दीत्मेनु, मेकेर डा मुरपुकीम “मारदे मेकोपुकीम इं कली नु इं खिं डा मुर आन कली साइक्चा कली इसाएली आन परमप्रभु आ कबल पशो सन्दोस एक चाक्मे?” दे ग्रीशा रेयके पामे बाक्त। यहोसु १५:४५

11 मोपतीके मेकोपुकीम पलिस्ती आन ठेयब मुर नेल्ल आन कली गुम्शा लोत्र पचा कली ब्रेथ सोइक्तमे बाक्त। मिनु मेको आन कली “इसाएली आन परमप्रभु आ कबल पशो सन्दोस आ बाक्तीकेम लेशशा सोइक्तीन। मेको कली आ बाक्तीकेम चाक्दीतीन। मो मपाइतीनी हना, गो नेल्ल बेक्नय” देमा बाक्त। सहर डा मुर नेल्ल शुश हिंशो बाक्मा बाक्त। मारदे हना परमप्रभु शुश गाइशो बाक्माक्त।

12 मिनु मबेक्शो आन कली गार मुतीक रोडम श्येत जपाइशो बाक्माक्त। मेको सहर डा मुर आन डाक्शो सरीड सम्म जाक्दीमाक्त।

## 6

### परमप्रभु आ सन्दोस लेशशो

1 परमप्रभु यावे आ कबल पशो सन्दोस पलिस्ती आन रागीम बाक्शो ७ महिना दुम्शो बाक्माक्त।

2 मिनु पलिस्तीपुकीम दागोन कली चढेब नु लिंक्यु कोत्रब आन कली ब्रेशशा, मेको आन कली “गो परमप्रभु यावे आ कबल पशो सन्दोस कली मार पय? गो मेको आ बाक्तीकेम दोपा सोइक्तय? आंइ कली शेंदीकी” दे हिल्लो पामे बाक्त।

3 मिनु मेकोपुकीम “गेपुकीम इसाएली आन परमप्रभु आ कबल पशो सन्दोस लेशशा सोइक्तीनी हना, मोशा मसोइक्तीन। परमप्रभु कली दोस आ पबंम चढेतीक नु सोइक्तीन। मिनु नोले गे सानीनी। मिनु मेकोमी लेंशा इन कली श्येत मगेब” देमा बाक्त।

4 मिनु मेकोपुकीम “गो दोस आ पब्रम मार चढेतीक सोइक्नीकी?” दे हिल्लो पामे बाक्त। मिनु मेकोपुकीम “५ ओटा सुन के कान नु ५ ओटा सुन के यिच, इन ५ जना ठेयब मुर खोदेशो पा नु इन कली श्येत गेब कान खोदेशो पा सोइक्तीन। यहोसु १३:३

5 गे इन कान खोदेशो सुन के कान नु रागी कली खतम पोक्ब यिच खोदेशो पा सुन के यिच सेलीन। मिनु इस्राएली आन परमप्रभु कली मान पने। मिनु मेकोमी इन कली, इन देवी देवता आन कली नु इन रागी कली श्येत गेचा प्रोंडबा को?

6 गे मारदे इजीप्त डा मुर नु फाराओ खोदेशो पा इन थुं खकटा सेल्नीनी? मेकोम आ सक्ति कोइदा नोले मेकोपुकी मूर्ख दुम्शा इस्राएली आन कली लचा मगेमे डा?” देमा बाक्त। प्रस्थान ४:२१; प्रस्थान १२:३१

7 मिनु “मुल गे नक बग्गी का सेलीन। मिनु गिक्शो नु गेनायो जुवा मलाप्शो बी निक्शी लतीन। मिनु मेको बी आस कली नारेशा, बग्गी कीपाइक्चा कली ठीक पने। मेको आस बाछा कली चहिं फ्राशा गोठम लतीन।

8 मिनु परमप्रभु यावे आ कबल पशो सन्दोस लाइश्शा, बग्गी तारी वोतीन। मिनु मेको इन दोस आ पब्रम चढेशो सुन के थोत्रकी आइक्च सन्दोस काम कुर पा, मेको आ नेक्था वोतीन। मिनु मेको सोइक्तीन।

9 मिनु मेको बग्गी कली कोत्रशा बाक्कीन। मेको सन्दोस कुरशो बग्गी आ रागी, बेथ-शेमेश ग्येत्थ गे लत हना, परमप्रभुमी एको ठेयब श्येत दुम्पाइश्शो बाक्माक्त, दे तुंडसीब। मो मदुम्त हना, एको श्येत मेकोमी मदुम्पाइश्शो बाक्माक्त। आंमा दुम्शो बाक्तेक्म, दे तुंडसीब” देमा बाक्त।

10 मिनु मेको मुरपुकीमी मो पामे बाक्त। मिनु गिक्शो बी निक्शी चाक्शा, बग्गीम नारेमे बाक्त। मेको आस बाछा चहिं गोठ उड पाइश्शा, वोदमे बाक्त।

11 मिनु परमप्रभु यावे आ कबल पशो सन्दोस नु सुन के यिच नु सुन के कान बाक्शो आइक्च सन्दोस बग्गी तार वोदमे बाक्त।

12 मिनु मेको बी एर ओंथ मपथु, गाक्ची ना ग्रीना ग्रीन इर बेथ-शेमेश ठेयब लां गे लसा बाक्त। मिनु पलिस्ती आन ठेयब मुरपुकी मेको बी आस नोले बेथ-शेमेश डा सांद सम्म लमा बाक्त। यहोसु १५:१०

13 मेना बेथ-शेमेश डा मुरपुकी दिमम चेरब रिक्ना रिक्न बाक्मा बाक्त। मिनु मेकोपुकीम इर गे कोव्रडमेनु, सन्दोस तशा ग्येरशा मेको आ नेक्था लमा बाक्त।

14 मेको बग्गी बेथ-शेमेश डा यहोसु आ रूम जाक्शा, नांइसे बाक्त। मेको आ नेक्था ठेयब फुल्लु का बाक्माक्त। मिनु मेकोपुकीम मेको बग्गी खोइश्शा, मेको बी साइश्शा, परमप्रभु यावे कली चोशा चढेमे बाक्त।

15 मिनु लेवीपुकीम परमप्रभु यावे आ कबल पशो सन्दोस नु मेको आ नेक्था बाक्शो सुन के थोत्रक बाक्शो आइक्च सन्दोस शोल्शा, मेको ठेयब फुल्लु तारी वोदमे बाक्त। मिनु मेको नाक्त बेथ-शेमेश डा मुरपुकीम परमप्रभु यावे कली चोशा चढेतीक नु अरु चढेतीक चढेमे बाक्त।

16 मिनु पलिस्ती आन ५ जना ठेयब मुरुमी मेको नेल्ल तशा, मेको नाक्तीन एक्रोन लेम्मा बाक्त।

17 मिनु मेको पलिस्तीपुकीम मेको आन दोस आ पब्रम परमप्रभु यावे कली सोइश्शो सुन के कान मार कली बाक्मा बाक्त देंशा हना, अशदोद कली का, गाजा कली का, अश्कलोन कली का, गाथ कली का नु एक्रोन कली का बाक्मा बाक्त।

18 मिनु सुन के यिच चहिं गारो हिरशो सहर आन कली नु आन हुकुम पाइब नु आन एर ओंथ डा सहर आन कली का का बाक्माक्त। मिनु मेकोपुकीमी परमप्रभु यावे आ कबल पशो सन्दोस कली लाइश्शा, ठेयब फुल्लु तारी वोदमे बाक्त। मेको फुल्लु मुल सम्म बेथ-शेमेश डा यहोसु आ रूम सांक्छी बाक्ब।

#### कबल पशो सन्दोस लांम बाक्शो

19 मिनु परमप्रभु यावेमी बेथ-शेमेश डा मुर आन दाते डा ७० जना आन कली सदा बाक्त। मारदे हना मेकोपुकीम परमप्रभु यावे आ कबल पशो सन्दोस आगा कोव्रडमे बाक्त। मिनु परमप्रभु यावेमी मोदेशो पशो आ पब्रम मुरपुकी रोका पामे बाक्त। गन्ती ४:२०; २सामुएल ६:६-७

20 मिनु बेथ-शेमेश डा मुरपुकीम “मेको परमप्रभु यावे, का ला परमप्रभु आ डोंइती सु राप्ने चाप्बा डा? मिनु आंड बाक्तीके रे मुल मेको सु आ बाक्तीके लाइक्चा माल्बा?” देमा बाक्त।

21 मिनु मेकोपुकीम किरयथ-यारीम डा मुर आन कली लोत्र कुरब सोइश्शा, मेको आन कली “पलिस्तीपुकीम परमप्रभु यावे आ कबल पशो सन्दोस लेत्ताक्म। उइ यिशा, मेको इन बाक्तीकेम कुतीन” देमा बाक्त। १इतिहास १३:६; भजन संग्रह ३२:३-६

## 7

### सन्दोस किरयथ-यारीम लाइश्शो

1 मिनु किरयथ-यारीम डा मुर जाक्शा, परमप्रभु यावे आ कबल पशो सन्दोस लाइश्शा, डांडाम बाक्ब अबीनादाब आ खिम चाक्दीत्मे बाक्त। मिनु मेको आ तौ एलाजर कली परमप्रभु यावे आ कबल पशो सन्दोस कोत्रचा कली ठीक सेल्मे बाक्त। लेवी ८:-

### मुरपुकी परमप्रभु यावे गे लेशो

2 मिनु मेको सन्दोस किरयथ-यारीमम वोइश्शो, शुश नाक्त दुम्शा, २० बर्स मेकेर बाक्माक्त। मिनु इस्राएली नेल्लेमी “परमप्रभु यावेम इं कली प्रोंइतु” दे सुर्ता पामे बाक्त। १सामुएल ६:२१; १सामुएल ४:२२; १इतिहास १३:६

3 मिनु सामुएलमी इस्राएली नेल्ल आन कली “गे इन थुं नेल्लेमी परमप्रभु यावे गे लेत्चा दाक्ताक्नी हना, इन दाते रे अर्को रागी डा देवी देवता नु अशतारोथ माइश्शो मूर्ति पाइश्शो थाम नेल्ल गुंडदीन। मिनु इन थुं नेल्लेमी परमप्रभु यावे कली ला ठेयब सेलीने। मिनु मेकोम इन कली पलिस्ती आन गुइ रे प्रोंइब” देमाक्त। उत्पत्ती ३५:२; यहोसु २४:२३

4 मिनु इस्राएलीपुकीमी बाल देवता नु मूर्ति पाइश्शो थाम नेल्ल गुंडदमे बाक्त। मिनु परमप्रभु यावे कली ला ठेयब सेल्मे बाक्त। न्यायाधीस १०:१६

5 मिनु सामुएलमी इस्राएली नेल्ल आन कली “मिस्पाम बुक्कीने। मिनु गो परमप्रभु यावे कली इन पर्बम पुंडनुड” देमाक्त। १सामुएल १०:१७; यहोसु १८:२६; न्यायाधीस २०:१

6 मिनु मेकोपुकी मिस्पाम बुक्मा बाक्त। मिनु ब्वाक्कु चाक्शा, परमप्रभु यावे आ डोंइती मोदमे बाक्त। मिनु मेको नाक्ती माइजा बाक्शा, मेकोपुकीमी “गो परमप्रभु यावे आ डोंइती पाप पाइतक” देमा बाक्त। मिनु सामुएलम इस्राएली आन कली मिस्पा सहरम ब्रेश्शा निसाफ पवा बाक्त। २सामुएल २३:१६

7 मिनु पलिस्तीपुकीमी इस्राएली मिस्पाम बुक्तेक्म देशो लोत्र नेंमे बाक्त। मिनु मेको आन ठेयब मुरपुकी इस्राएली नु लडाइ पचा कली लमा बाक्त। मिनु इस्राएलीपुकी मेको नेंशा, पलिस्ती आन कली तशा शुश हिंमा बाक्त।

8 मिनु इस्राएलीपुकीमी सामुएल कली “आंड कली पलिस्ती आन गुइ रे प्रोंइचा कली परमप्रभु यावे, आंड परमप्रभु कली पुंडचा मप्रोनीन। मिनु मेकोम पलिस्ती आन गुइ रे प्रोंइबा को, दे पुनीन” दे सामुएल कली देमा बाक्त। १सामुएल १२:२३; उत्पत्ती २२:१७; १राजा १३:६; येरमीया ३७:३; येरमीया ७:१६

9 मिनु सामुएलमी परमप्रभु यावे कली दूध तूब पाठा का चोशा चढेवा बाक्त। मिनु इस्राएली आन पर्बम ठेयब सेंदा पा परमप्रभु यावे कली पुना बाक्त। मिनु परमप्रभु यावेम मेको आ पुंडशो लोत्र नेना बाक्त।

10 सामुएलम चोशा चढेना ढेन बाक्मेनु, पलिस्तीपुकी इस्राएली नु लडाइ पचा कली आन नेक्था जाक्मा बाक्त। मिनु मेको नाक्ती परमप्रभु यावेमी पलिस्ती आन तारी ठेयब बुंबु पपदा बाक्त। मिनु पलिस्तीपुकी वाम ग्याम दुम्शा, इस्राएली आन डोंइती रे प्रोक्मा बाक्त। उत्पत्ती ३५:५; प्रस्थान १४:२४; प्रस्थान २३:२७; यहोसु १०:१०; न्यायाधीस ४:१५

11 मिनु इस्राएलीपुकीम मेको आन कली मिस्पा रे खेदा पना पन, बेथ-कर आ दी सम्म साइक्ना साइक्न खेदा पामे बाक्त।

12 मिनु सामुएलमी फुल्लु का लाइशशा, मिस्प्या नु येशाना आस दातेमी खुक्का बाक्त। मेको कली एबेन-एजेर नें वोइशशा “परमप्रभु यावेम आंइ कली एक सम्म वारच पाप्नु” देमाक्त।

13 मोपा पलिस्ती बुशा, इस्राएली आन रागी लेंशा मओव्रमा बाक्त। मिनु परमप्रभु यावेम सामुएल बाक्म सम्म पलिस्तीपुकी रे इस्राएली आन कली श्येत मगेपदा बाक्त।

14 मिनु पलिस्ती आन डोंइती ग्राशो सहर एक्रोन रे गाथ सम्म नु आन एर ओंथ डा गाउं नेल्ल इस्राएलीपुकीमी पलिस्ती आन गुइ रे ताक्यामे बाक्त। मिनु इस्राएली नु एमोरीपुकी गारमा बाक्त।

15 मिनु सामुएल बाक्म सम्म इस्राएली आन कली निसाफ पवा बाक्त। न्यायाधीस १०:१-५; न्यायाधीस १२:७-१४

16 मेकोमी बर्स बर्सम बेथेल, गिल्याल नु मिस्प्याम हिरशा, इस्राएली आन कली निसाफ पाइबवाक्माक्त।

17 मिनु मेको रामाह लेप्बाक्माक्त। मारदे हना मेको आ खिं मेकेर बाक्माक्त। मिनु मेकोमी मुर आन कली निसाफ पा, परमप्रभु यावे कली चढेतीक का सेला बाक्त। यहोसु १८:२५

## 8

### इस्राएलीपुकीमी पिप पुंइशो

1 सामुएल खूशो दुम्तीके, आ तौ आन कली इस्राएली आन कली निसाफ पाइब सेल्मी बाक्त।

2 मेको आ डोंइती जरमेशो तौ आ नें योएल नु आ माइला तौ आ नें अबीयाह बाक्माक्त। मेको बेयर-शेबाम निसाफ पाइब बाक्सा बाक्त। १इतिहास ६:१३; आमोस ८:१४

3 तन्न मेको निक्शीमी आस आफोम पशो खोदेशो मपाप्से बाक्त। क्येट पाइशो दुम्चा कली घूस जाम्से बाक्त। दूली निसाफ पाम्से बाक्त। ब्यवस्था १६:१९

4 मोपतीके इस्राएल डा खाल्पा नेल्ल गुम्शा, रामाहम सामुएल आ बाक्तीक जाक्मा बाक्त। १ सामुएल ७:१७

5 मिनु मेकोपुकीमी “गे मुल खूशो दुम्तीनी। इन तौ निक्शी इन देशो लांम मगाक्स। मोपतीके अर्को रागी रागी डा मुर आन खोदेशो पा आंइ कली सासन पचा कली पिप का सेल्शा, गेकी” देमा बाक्त। ब्यवस्था १७:१४-२०; होसे १३:१०; प्रेरित १३:२१

6 तन्न सामुएलम सासन पचा कली पिप पुंइशो लोव्र नेंशा, काइ मदाक्ता बाक्त। मिनु सामुएलमी परमप्रभु यावे नु लोव्र पवा बाक्त।

7 मिनु परमप्रभु यावेमी सामुएल कली “मुरुम मार मार देमा, मेको नेल्ल नेनो। मारदे हना मेकोपुकीम इ कली प्रॉइशो ममाइ, आं कली प्रॉइशो नम। मेकोपुकीम आं कली आन पिप दुम्शो मदाक्शो नम। प्रस्थान १५:१८; गन्ती २३:२१; ब्यवस्था ३३:५; भजन संग्रह २४:७-१०; भजन संग्रह ७४:१२; यसैया ६:५

8 इजीप्त रे गुंइशो नाक्त रे आं कली मार मार पाइय्यीमी, मुल मेकोपुकीम इ कली यो मो पाइनीम। मेकोपुकीम अरु देवी देवता आन नोले खोइशशा, आं कली प्रॉइशो बाक्नीम। मिनु मुल इ कली यो प्रॉइनीम।

9 मिनु मुल मार देना देंन बाक्मा, मेको नेनो। मुल मेको आन कली हिंपाइशशा शेंदीमी। आन सासन पाइब पिपम दोदेशो पाइनीमी, मेको आन कली माइक्मी” देमाक्त।

10 मिनु सामुएलमी पिप पुंइब मुर आन कली परमप्रभु यावेम देशो लोव्र नेल्ल नेंपाइक्मी बाक्त।

11 मिनु सामुएलमी “इन कली सासन पाइब पिपमी मार पाइब देशा हना, इन तौ आन कली लाइशशा, आ बग्गी, शारा नु गेय पाइब सेल्ब। मेकोमी मेको आन कली आ बग्गी आ डोंइडोंइती दोरपाइक्ब।

12 मिनु का निक्शी आन कली हजार का जना आन ठेयब मुर सेल्ब। का निक्शी आन कली ५० जना आन ठेयब मुर सेल्ब। मेको आ रू वाक्शा, आ बाली नाली रूक्ब सेल्ब। मिनु मेको आन लडाइ पतीक या नु बग्गी सेल्पाइक्ब।

13 मेकोमी इन तमी आन कली रॉम खेक्तीक तेल सेल्पाइक्ब। जचा थोव्रक क्येब नु शोब्ले चोइब सेल्चा कली लाइक्ब।

14 मेकोमी इन नेल्ल क्येडा रिम्शो रू, अडगुर रू नु तेल रवा बाकशो रू रोइश्शा, आ गेय पाइब आन कली गेब।

15 मेकोमी इन अन्न १० भागमी भाग का लाइक्ब। इन अडगुर यो मोपान लाइक्ब। मिनु आ कप्तान नु आ खिं डा गेय पाइब आन कली गेब।

16 मेकोमी इन वाइलीम वाइल, इन नेल्ल क्येडा रिम्शो बी ब्यफ नु गधापुकी लाइश्शा आ गेय पपाइक्ब।

17 मेकोमी इन क्यारश भेडा रे १० भाग डा भाग का लाइक्ब। मिनु गेपुकी यो मेको आ गेय पाइब दुम्नीनी।

18 मो दुम्मेनु, इन योत्रशो पिप आ पबर्म ठेयब सेंदा पा पुंइनीनी। तन्न मेना परमप्रभु यावेम इन पुंइशो लोत्र मनेंब” देंमाक्त।

19 तन्न मुरपुकीम सामुएल आ लोत्र नेने मबिस्समा बाक्त। मिनु मेकोपुकीम “ममाइ, आंइ कली पिप का माल्नीकी।

20 गो यो अर्को रागी डा मुर खोदेशो दुन्चा दाक्नीकी। आंइ कली सासन पाइब नु लडाइम आंइ डोंइती गाक्ब पिप का माल्नीकी” देंमा बाक्त।

21 मिनु सामुएलम मेको मुर आन देशो लोत्र नेल्ल नेंशा, परमप्रभु यावे कली नेंपदा बाक्त।

22 मिनु परमप्रभु यावेम “मेको आन देशो खोदेशो पावो। मेको आन कली पिप का गेमी” देंमाक्त। मिनु सामुएलमी इस्राएल डा मुर नेल्ल आन कली आन खिं खिं सोइक्तीमी बाक्त।

## 9

### सावलमी जाम्शो गधा माल्शो

1 बेन्यामीन आ थर डा मुर का बाक्माक्त। मेको आ नें कीश बाक्माक्त। मेको आ आफ अबीएल, मेको आ बाजे जरोर, आ शेर बाजे बेकोराथ नु आ किकी बाजे आफीयाह बेन्यामीन थर डा बाक्माक्त। कीश शोंप पाइश्शो मुर का बाक्माक्त।

2 मिनु मेको आ तौ का बाक्माक्त। मेको आ नें सावल बाक्माक्त। मेको ठिटा दारशो बाक्माक्त। मेना इस्राएल रागीमी मेको क्येडा दारशो अर्को सुइ मबाक्मा बाक्त। मुर नेल्ले मेको आ बला डा लुकच ला बाक्मा बाक्त।

3 मिनु काबु सावल आ आफ कीश आ गधापुकी जाम्मा बाक्त। मिनु मेकोमी आ तौ सावल कली “गेय पाइब ठिटा का लाइश्शा, गधापुकी माल्थ लावो” दे मदा बाक्त।

4 मिनु मेको निक्शी एफ्राइम डा पहाड लाक्शा, शालीशाह रागी रे पा लसा बाक्त। तन्न गधा मथित्से बाक्त। मेको निक्शी शालीम रागी लसा, बेन्यामीन आ रागी रे पा हिरशा, लसा बाक्त। मेकेर यो मथिदसे बाक्त।

5 मिनु मेको निक्शी जूफ रागी ओत्रसा बाक्त। मिनु सावलम आ गेय पाइब कली “मुल गो लेस्स। मुल मलेत्तस हना, आ आफोम गधा आन पबर्म सुर्ता पचा प्रोंइशा, इस पबर्म सुर्ता पाइब” देंमाक्त। १सामुएल १०:२

6 मिनु मेको गेय पाइबम “एको सहरम परमप्रभु आ लोत्र पाइब का बाक्ब। मेको आ देशो नेल्ल गाप्तीके, मेको आ नें थाम्पा चलेशो बाक्ब। गो मेक लांइसाक्व हना, मेकोमी तेको लां लचा माल्बा, मेको शेंबा की?” देंमाक्त।

7 मिनु सावलमी “गो मेक लशा हना, मेको कली मार गेचा? गो इस नु मारेइ जचा थोत्रक मबाक्ब। परमप्रभु आ मुर कली मारेइ कोसेली यो मबाक्ब” दे आ गेय पाइब कली देंमाक्त।

8 मिनु मेको गेय पाइबमी “गो नु ४ भाग डा भाग का शेकेल चांदी बाक्ब। इस कली लां कोइचा, दे गो मेको मुर कली एको चांदी गेनुड” देंमाक्त। शेकेल का ११.५ ग्राम बाक्ब। मेको आ गेशो २.६ ग्राम चांदी के क्येट बाक्त।

9 डोंइती इस्राएल रागीम सुइम परमप्रभु आ लोत्र तुइक्चा माल्ताक्व हना, मार देंबाक्मा बाक्त देशा हना “परमप्रभु यावे आ ततीक ताइब आ बाक्तीक लय” देंबाक्मा बाक्त। तन्न सिनाक्त मुलाक्त

परमप्रभु यावे आ ततीके ताइब कली परमप्रभु यावे आ लोत्र पाइब देनीम। गन्ती २४:३-४; २राजा १७:१३; १इतिहास ९:२२

१० मिनु सावलमी आ गेय पाइब कली “इ देशो रिम्शो बाक्ब। गो मेको आ बाक्तीक लस” देमाक्त। मिनु मेको निक्शी मेको परमप्रभु आ मुर बाक्तीक सहर लसा बाक्त।

११ मिनु मेको निक्शी इर सहर गे लना लन बाक्सानु, ब्वाक्कु दिथ यीब मीश आल आन कली गुम्से बाक्त। मिनु मेको आन कली “परमप्रभु यावे आ ततीक ताइब खिम बाक्मे?” दे हिल्लो पाम्से बाक्त।

१२ मिनु मेकोपुकीमी “ओं, इस डोंइती लना लन बाक्ब। रीब पा लने। मेको मुलाक्त सहर रे जाक्त। मारदे हना मुलाक्त डांडाम क्योरशा चढेतीक नाक्त बाक्ब।

१३ मिनु गे सहरम ओव्रतीसी हना, गे मेको कली जचा कली इर लना लन पशो थित्नीसी। मेको मजाक्म सम्म मुरपुकीम भोज मजाइनीम। मारदे हना, मुरुम जचा क्येडा डोंइती मेकोमी क्योरशा चढेतीकेम आसीक गोब। मिनु नोले ला ब्रेशो मुरपुकीम जाइनीम। मिनु इर लसे, गे मुलाक्ती मेको कली गुम्नीसी” देमा बाक्त।

१४ मिनु इर सहर लसा बाक्त। मिनु सहर ओव्रसानु, सामुएल कली थित्से बाक्त।

### सावलमी सामुएल कली गुम्शो

१५ मिनु परमप्रभु यावेमी सावल आ जाक्चा क्येडा नाक्त का डोंइती सामुएल कली आ मिम्शो लोत्र तुडक्पाइश्शो बाक्माक्त।

१६ मेकोमी “दीसा गो बेन्यामीन रागी डा मुर का इ कली गुम्थ सोइक्नुड। मिनु गे मेको कली आं मुर, इस्राएली, आन पिप सेल्शा, तेल लुक्तो। मेकोमी आं मुर आन कली पलिस्ती आन गुड रे प्रोंडब। मारदे हना गो आं मुर आन श्येत ताता। मेको आन पुंइशो नेता” देमाक्त।

१७ मिनु सामुएलम सावल कली जाक्शो तवा बाक्त। मेना परमप्रभु यावेम मेको कली “आं देशो मुर एकोन बाक्ब। एको आं मुर आन कली सासन पाइब दुम्ब” देमाक्त।

१८ मिनु सावलमी ठेयब लाप्चोम जाक्शा, सामुएल कली “परमप्रभु यावे आ ततीके ताइब आ खिं ते बाक्म, आं कली कोंइदीनी” देमाक्त।

१९ मिनु सामुएलमी सावल कली “परमप्रभु यावे आ ततीके ताइब गो नड। आं डोंइडोंइती इर गाक्कीस। मारदे हना मुलाक्ती गे गो नु जचा माल्नीसी। मिनु दीसा सुनी इ कली लचा गेनुड। इ थुंम मार मार बाक्मे, गो मेको इ कली शेंनन। प्रस्थान २४:११

२० मिनु नाक्त सां डोंइती जाम्शो गधा आन पर्बम सुर्ता मपावो। मेको थिन्ने थुम्तेक्म। नेल्ल क्येडा ठेयब लोत्र मार बाक्ब देशा हना, इस्राएली नेल्लेमी इ कली नु इ किकी पिपी आन खिं डा मुर कली मिम्शो बाक्नीम” देमाक्त।

२१ मिनु सावलमी “गो इस्राएली आन नेल्ल क्येडा आइक्च बेन्यामीन आ थर डा मुर का नड। मिनु आं खिं बेन्यामीन आ थर डा नेल्ल क्येडा आइक्च बाक्ब। मिनु गे मारदे आं कली एको लोत्र देंनी?” दे हिल्लो पवा बाक्त। १सामुएल १५:१७

२२ मिनु सामुएलमी सावल नु आ गेय पाइब आस कली जतीक कोठाम ओइदीम्सी बाक्त। मिनु ब्रेशो मुर आन दातेमी नेल्ल क्येडा ठेयब नित्तीकेम निष्पदा बाक्त। मेकेर मेको नेल्ल पा ३० जना मुर बाक्मा बाक्त।

२३ मिनु सामुएलमी क्येब कली “डोंइती गो इ कली तिल्शा वोइक्चा देशो भाग एक पितो” दे मदा बाक्त।

२४ मिनु मेको क्येबमी फिला चाक्शा, सावल आ डोंइती वोदा बाक्त। मिनु सामुएलमी “इ कली वोइश्शो भाग एकोन बाक्ब। ब्वावो। मुर आन कली ब्रेशो भोजम एको इ कली वोइश्शो भाग बाक्ब” दे सावल कली देमाक्त। मिनु मेको नाक्ती सावल पौनापुकी नु भोज जवा बाक्त।

२५ मिनु नोले मेकोपुकी डांडा रे सहर ब्रुम्मा बाक्त। मिनु सामुएलमी सावल कली खिं तला तारी लाइश्शा लोत्र पवा बाक्त।

२६ मिनू नां सोव्रची ना सामुएलम सावल कली “बोक्को। मुल गो इ कली चोव्रदीनन” देंमाक्त। मिनू सावल नु आ गेय पाइब बोक्सा नोले सामुएल नु काथ काथा गाक्मा बाक्त।

२७ मिनू मेकोपुकी सहर लामे नोले सामुएलम सावल कली “इ गेय पाइब कली डोंइती सोइक्तो” देंमाक्त। मिनू मेकोमी मो पवा बाक्त। मिनू सामुएलमी “गे एकेर रिम्दो। गो इ कली परमप्रभु आ लोव्र नेंपाइक्नन” देंमाक्त।

## १०

### सामुएलम सावल कली पिप सेल्शो

१ मिनू सामुएलमी तेल कुरतीक रे तेल गुंइशा, सावल आ पिया तार लुक्ता बाक्त। मिनू मेको कली पुक्पु पा “परमप्रभु यावेमी इ कली आ मुर इस्माएली आन पिप सेल्लु। गे आ मुर आन कली सासन पाइक्नेवे। मिनू गे मेको आन एर ओंथ डा जोरी सनु आन गुइ रे प्रोंइनेवे। परमप्रभु यावेम थमा पा इन कली आ मुर आन कली सासन पाइब सेल्शो आ चिन्ड मार बाक्ब देंशा हना,

२ गे मुलाक्ती एक रे लाइनीसी। मिनू बेन्यामीन आ सांद सेल्साह सहर आ नेक्था राहेल कली थिम्तीकेमी मुर निक्शी गुम्नीसी। मेको निक्शीमी इस कली “इन माल्लो गधा थित्तेक्म। इन आफोमी मेको आन पर्वम सुर्ता पचा प्रोंइशा, इस पर्वम सुर्ता पा “मुल आं तौ आ पर्वम गो मार पाइनुडा?” देंत देंनीस। उत्पत्ती ३५:१९

३ मिनू मेकेर रे लाक्शा, ताबोर डा ठेयब रवा आ नेक्था सम्म लाइनीसी। मेकेर परमप्रभु कली चढेथ बेथेल गे लाइब मुर सां गुम्नीसी। मेको डोंइती डा मुरुम पाठा सां, दाते डा मुरुम शोब्ले सां नु नोले डा मुरुम गर का अङ्गुर शांब कुरशा गाक्शो बाक्नीम।

४ मिनू मेकोपुकीमी इस कली ‘रिम्शो बाक्नी?’ दे हिल्लो पाइनीम। मिनू इस कली शोब्ले निक्शी गेनीम। मिनू गे मेको ताक्चा माल्नीसी।

५ मिनू नोले गे परमप्रभु आ डांडा गिबेआथ-एलोहीम जाक्नीसी। मेकेर लडाइ पचा कली बाक्शो पलिस्ती बाक्नीमी। मिनू गे मेको सहर ओव्रतीसी हना, डांडा रे यिन यिन पशो परमप्रभु यावे आ लोव्र पाइब आन हुल का गुम्नीसी। मेको आन डोंइती मार मार ताप्तीके ताप्बपुकी गाक्शो बाक्नीम। मिनू मेकोमी परमप्रभु यावे आ लोव्र पाइनीम।

६ मिनू परमप्रभु यावे आ सोक्त इन तार जुक्ब। मिनू गे यो परमप्रभु यावे आ लोव्र पाइनीनी। मिनू गे अर्को मुर दुम्नीनी। न्यायाधीस १३:२५

७ मिनू मोदेशो चिन्ड नेल्ल दुम नोले इ डोंइती मार गेय बाक्बा, मेको पावो। मारदे हना परमप्रभु गे नु बाक्ब।

८ मिनू गे आं डोंइती गिल्गाल यिवो। मिनू गो चोशा चढेचा नु दुशा बाक्चा आ पर्वम चढेचा कली इ बाक्तीक जाक्नुड। गो इ बाक्तीक मजाक्डा सम्म, ७ नाक्त सम्म आं कली रिम्शा बाक्को। मिनू गो जाक्शा गे मार पचा माल्नेवे, इन कली शेंनुड” दे सामुएलम सावल कली देंमाक्त। १सामुएल १३:८

### सावल आ थुं नक सेल्शो

९ मिनू सावल गाक्चा कली सामुएल नु ब्रामेनु, परमप्रभुम सावल आ थुं नक सेला बाक्त। मिनू मेको नोले मेको चिन्ड नेल्ल दुम्माक्त।

१० मिनू मेको गिबा जाक्दीस्सानु, परमप्रभु यावे आ लोव्र पाइब हुल मेको कली गुम्थ, यिशो बाक्मा बाक्त। मिनू परमप्रभु आ सोक्तीम मेको कली सुमा बाक्त। मिनू सावल यो मेको आन दातेमी परमप्रभु यावे आ लोव्र पाइब दुम्माक्त। १सामुएल १९:२०-२४

११ मिनू मेको कली डोंइती रे तुडक्ब मुरपुकीम, परमप्रभु यावे आ लोव्र पाइब आन दातेमी लोव्र पाइब दुम्शो तशा “कीश आ तौ कली मार दुम्मे? मार, सावल यो परमप्रभु यावे आ लोव्र पाइब आन दाते डा का बाक्मे” देंमुमा बाक्त।



12 मिनु मेकेर डा मुर कामी “मेरे आन आफ सु बाकमे?” दे हिल्लो पवा बाक्त। मेना रे मुरपुकीमी “सावल यो परमप्रभु यावे आ लोत्र पाइब आन दाते डा बाकमे?” दे देंतीक लोत्र लीमाक्त।

13 मिनु मेकोमी परमप्रभु यावे आ लोत्र पने थुम्शा, आ खिं लमाक्त।

14 मिनु सावल आ बकान्छाम, सावल नु आ गेय पाइब आस कली “गे निकशी ते लसी?” दे हिल्लो पवा बाक्त। मिनु सावलमी “जाम्शो गधा माल्दीशो नस्कु। गो थिन्ने मचाप्स्कु। मिनु गो सामुएल आ बाक्तीक यो लाइतस्कु” देंमाक्त।

15 मिनु सावल आ बकान्छाम “सामुएलम इ कली मार देंमे? आं कली शेंदीसी” देंमाक्त।

16 मिनु सावलमी “ ‘गधा थित्तेकम’ देंत” देंमाक्त। तन्न पिप दुम्तीके आ पर्वम देशो लोत्र मशेंदा बाक्त।

### सावल इस्राएली आन पिप दुम्शो

17 मेना सामुएलमी मुर आन कली परमप्रभु यावे आ बाक्तीके मिस्पामी गुम्चा, दे ब्रेत्तीमी बाक्त। १सामुएल ७:५

18 मिनु मेकोमी इस्राएली आन कली “परमप्रभु यावे, इस्राएली आन परमप्रभुमी मार देंत देशा हना ‘गो इस्राएली इन कली इजीप्त रागी रे गुंइशा, एक चाक्तन्नी। इन कली श्येत गेब इजीप्ती आन गुड रे प्रोंइतन्नी। मिनु नोले इन कली दिब्ब अर्को रागी डा मुर आन गुड रे यो प्रोंइतन्नी’ देंत।

19 तन्न मुलाक्ती गे इन कली हिंचा डा श्येत नु मरिम्शो रे प्रोंइब इन परमप्रभु कली प्रोंइतीनी। मिनु गेपुकीमी ‘आंइ कली पिप का योत्रशा गेने’ देंतीनी। मोपतीके मुल परमप्रभु यावे आ डोंइती इन थर थर नु खिं खिं डा मुर पा रपीन” दे माइक्मी बाक्त। १सामुएल ८:७

20 मिनु सामुएलमी इस्राएली नेल्ल आन थर आन कली राप्पाइक्मी बाक्त। मिनु बेन्यामीन आ थर योत्रचा पुंडसे बाक्त। १सामुएल १४:४१-४२; यहोसु ७:१६

21 मिनु मेकोमी बेन्यामीन आ थर डा खिं खिं डा मुर आन कली राप्पदा बाक्त। मिनु मात्री आ खिं डा मुर योत्रचा पुंडसमा बाक्त। मिनु मेको नोले कीश आ तौ सावल योत्रचा पुंडसे बाक्त। मिनु मेको कली माल्शा, मथित्ते बाक्त।

22 मिनु मेकोपुकीम परमप्रभु यावे कली “मार, मेको मुर एक बाकबा?” दे हिल्लो पामे बाक्त। मिनु परमप्रभु यावेमी “मेको मार मार आन दातेमी खुइश्शा बाक्शो बाक्ब” देंमाक्त।

23 मिनु मुरपुकी दोरशा लशा, मेको कली चाक्गमे बाक्त। मिनु मेको मुर आन दातेमी राम्मेनु, नेल्ल आन क्येडा लाइश्शो बाक्माक्त। मुर नेल्ले मेको आ बला डा लुक्च ला बाक्मा बाक्त।

24 मिनु सामुएलम मुर नेल्ल आन कली “परमप्रभु यावेमी योत्रशो मुर कली कोव्रडीन। मुर नेल्ल आन दातेमी एको खोदेंशो सुइ मबाक्म” देंमाक्त। मिनु मुर नेल्ल ग्येरशा “पिप शुश ब्रोंइल” दे ग्रीमा बाक्त। मती २१:९

25 मिनु सामुएलमी मुर आन कली पिप आ अधिकार आ पर्वम शेंदीमी बाक्त। मिनु मेको नेल्ल कागजम ब्रेक्शा, परमप्रभु यावे आ डोंइती वोदा बाक्त। मिनु नोले मेकोमी मुर आन कली आन खिं खिं सोइक्तीमी बाक्त।

26 मिनु सावल यो आ खिं गिबा लमाक्त। मिनु परमप्रभुम आन थुं थिशो रिम्शो लडाइ पाइबपुकी मेको नु लमा बाक्त।

27 मेकेर मरिम्शो मुर यो बाक्मा बाक्त। मेकोपुकीमी “एको मुरुम आंइ कली आंइ जोरी सत्रु रे दोपा प्रोंइने चाप्बा डा” देंमा बाक्त। मिनु मेकोपुकीमी सावल कली शुक्शी पा मेको कली मान पतीके यो मारेडु मचाक्मे बाक्त। तन्न सावल सिक्सी पा बाक्माक्त। १सामुएल ११:१२

१ मिनू महिना का नोले अम्मोन डा नाहाशमी याबेश-गिलादम लडाइ पा पुन्दमे बाक्त। याबेश डा वोंडश मुरपुकीम नाहाश कली “गोपुकी नु गरीन। मिनू गो इन गेय पाइब दुम्नीकी” देंमा बाक्त। १सामुएल ३१:११

२ मिनू अम्मोन डा नाहाशमी मेको आन कली “गो गेपुकी नु गारचा कली नेल्ल इन ग्युरा मिक्च पुक्शा ला गेपुकी नु गारनुड। मोपा इस्राएली नेल्ल इन कली मुने तोक्नुड” देंमाक्त।

३ मिनू याबेश सहर डा खाल्पापुकीमी “इस्राएली नेल्ल आन कली नेंपाइक्चा कली आंड कली ७ नाक्त सम्म रिम्दीन। मिनू नोले आंड कली सुइमी प्रॉइने मचाप्टेकम हना, गो इन जिम्मा गेंसीनीकी” देंमा बाक्त।

४ मिनू लोव्र कुरबपुकी सावल आ बाक्तीक गिबा जाक्मा बाक्त। मिनू मुर आन डोंइती मेको लोव्र शेंदमे बाक्त। मिनू मुर नेल्ले ठेयब सेंदा पा डाक्मा बाक्त।

५ मेना सावल रू रे पा ब्यफ खुल्शा जाक्ना जाक्न बाक्माक्त। मिनू मेकोमी “मुरपुकी मारदे ठेयब सेंदा पा डाक्मा” दे हिल्लो पामी बाक्त। मिनू याबेश-गिलाद डा मुरपुकीमी देंशो लोव्र मेको कली शेंदमे बाक्त।

६ मिनू सावलम मेको लोव्र नेनानु, परमप्रभु आ सोक्तीम मेको कली सुमा बाक्त। मिनू सावल थाम्पा गाइक्ता बाक्त। न्यायाधीस १३:२५

७ मिनू मोपा गाइश्शा, हाल का ब्यफ टुक्रा टुक्रा पा चेक्गा बाक्त। मिनू मुर आन कली मेको टुक्रा कुरपाइश्शा इस्राएल रागी नेल्लेमी “सु मुर लडाइ पथ सावल नु सामुएल आस नोले मखोइक्नीमी, मेको आन ब्यफ यो ओदेंशो टुक्रा टुक्रान दुम्नीम देनीन” दे सोइक्तीमी बाक्त। परमप्रभु यावेमी मुर आन कली शुश हिंपाइश्शो बाक्माक्त। मोपतीके मेकोपुकी थुं का दुम्शा, सावल नु सामुएल आस नोले खोदमे बाक्त। न्यायाधीस १९:२९

८ मिनू सावलम मेको आन कली बेसेकम लडाइ पचा कली ठीक पामी बाक्त। मेकेर इस्राएल डा लाख सां नु यहूदा डा ३० हजार मुर दुम्मा बाक्त।

९ मिनू मेको डोंइती लोव्र चाक्ब मुर आन कली “याबेश-गिलाद डा मुर आन कली ‘गे दीसा नाक्त उइक्थ दुम्मेनु, ब्रोंइचा ताइनीनी’ दे मतीन” देंमाक्त। मिनू मेकोपुकीमी याबेश डा मुर आन कली मेको लोव्र शेंदमे बाक्त। मिनू मेको नेंशा, शुश ग्येरसमा बाक्त।

१० मिनू याबेश डा मुरपुकीमी अम्मोनी आन कली “गो दीसा इन बाक्तीक जाक्नीकी। मिनू गे मार पचा दाक्नीनी, मेको पने” देंमा बाक्त।

११ मिनू आ दीसा सावलमी आ मुर आन कली हुल सां सेल्मी बाक्त। सुनी कना रिम्शो पा हाम्सो मदुम्थु, मेको आन जोरी सत्रु आन बाक्तीके ओव्रशा, नाक्ती उइक्थ दुम सम्म लडाइ पा अम्मोनी आन कली फ्रूमे बाक्त। मोपा मुरपुकी निक्शी सम्म काथा मदुम्चा डा पा ब्राशा प्रोक्मा बाक्त।

१२ मिनू मुरपुकीम सामुएल कली “सावलम आंड कली सासन पने चाप्बा डा?” देंब सु बाक्मा? मेको आन कली साइक्चा कली आंड गुइम गेने” देंमा बाक्त। १सामुएल १०:२७

१३ तन्न सावलमी “ममाइ, मुलाक्ती परमप्रभु यावेमी इस्राएली इं कली ग्रापदा नाक्त सुइ साइक्चा मदुम्ब” देंमाक्त। १सामुएल १४:४५

१४ मिनू सामुएलम मुर आन कली “गो गिल्गालम लशा, एको राज्य कली लेंशा सेल्य” देंमाक्त। १सामुएल १०:८

१५ मोपतीके मेको नेल्ल गिल्गालम लशा, परमप्रभु यावे आ डोंइती सावल कली पिप सेल्ये बाक्त। मिनू परमप्रभु यावे आ डोंइती दुशा बाक्चा आ परबंम चढेतीक चढेमे बाक्त। मिनू सावल नु इस्राएली नेल्ले शुश ग्येरसमा बाक्त।

१ मिनू सामुएलमी ग्युशा बाकशो इस्त्राएली नेल्ल आन कली “गो इन पुंइशो नेंता। मिनू गो इन कली सासन पपाइक्चा कली पिप का योव्रशा गेतन्नी। १सामुएल ८:७,२२; १सामुएल ११:१५

२ मुल एको पिप इन ठेयब मुर दुम्यो बाकब। मुल गो खूशो दुमती। आं चां बोइशो बाकब। आं तौ गेपुकी नु बाकशो बाकनीस। गो आं ठिटा रेन इन कली लां कोंइब दुम्यो नड।

३ गो एक बाकती। आं पबर्म मारेइ मरिश्यो लोव्र पचा बाक्त हना, परमप्रभु यावे नु आ तेल लुक्शो आ डोंइती देनीन। गो सुका आ ब्यफ, गधा रोइशो बाकडा? गो सु सु कली श्येत गेडा? गो सु सु आन कली दिबुमी? मिनू सु सु आन निसाफ पची ना घूस जडा? आं कली देनीन। मिनू गो मेको थाप्नुड” दे माइक्मी बाक्त। गन्ती १६:१५

४ मिनू मेकोपुकीमी “आंइ कली श्येत मगोनी। गे आंइ कली मदिप्नी। गे सुइ रे मारेइ मलाइक्नी” देमा बाक्त।

५ मिनू सामुएलम मेको आन कली “गे आं कली दोसी सेल्ले मचाप्नी। मेको आ पबर्म परमप्रभु यावे नु आ तेल लुक्शो सांकछी बाकनीस” देमाबाक्त। मिनू मेकोपुकीमी “मेको सांकछी बाकनीस” देमा बाक्त।

६ मिनू लेंशा सामुएलम मुर आन कली “परमप्रभु यावे सांकछी बाकब। मेकोमी मोसा नु हारून आस कली योव्रतु। मिनू इन किकी पिपी आन कली इजीप्त रागी रे गुंइशा, एक चाक्तु।

७ मिनू गे आं डोंइती बाक्कीन। गो परमप्रभु यावे आ डोंइती गेपुकी नु लोव्र पाइनुड। परमप्रभु यावेमी इन कली नु इन किकी पिपी आन कली दोपा प्रोना, मेको इन कली देनुड।

८ याक्ब इजीप्त रागी बुमेनु, इजीप्त डा मुरपुकीमी मेको आन कली दिप्मे बाक्त। मिनू इन किकी पिपीपुकीमी परमप्रभु यावे कली ‘वारच पाइक्की’ दे पुन्मे बाक्त। मिनू परमप्रभु यावेमी मोसा नु हारून आस कली सोइक्ता बाक्त। मेको निक्शीमी इन किकी पिपी आन कली इजीप्त रे गुंइशा एक चाक्शा बाक्पदसे बाक्त। प्रस्थान ३:७

९ तन्न मेकोपुकीमी परमप्रभु यावे, आन परमप्रभु कली प्रेंताक्म। मेकोमी मेको आन कली प्रोंइशा, सीसेरा आ गुइमी गेवा बाक्त। सीसेरा हासोर डा पिप याबीन आ नेल्ल क्येडा सक्ति पाइशो लडाइ पाइब आन कप्तान बाक्माक्त। परमप्रभुमी मेको आन कली पलिस्ती आन गुइमी गेवा बाक्त। मिनू मोआब डा पिप आन गुइमी यो गेवा बाक्त। मिनू मेकोपुकी मेको नु लडाइ पना पन बाक्मा बाक्त। न्यायाधीस ४:२; न्यायाधीस १०:७; न्यायाधीस १३:१; न्यायाधीस ३:१२

१० मिनू नोले मेकोपुकीम परमप्रभु यावे कली ‘गो पाप पाइतक। गो परमप्रभु यावे कली प्रोंइतक। गो बाल देवता नु अशतारोथ माइशो मूर्ति पाइशो थाम कली पूजा पाइतक। मिनू मुल आंइ जोरी सत्रु आन गुइ रे प्रोनीन। मिनू गो इन कली ला ठेयब सेल्लनीकी’ देमा बाक्त। गन्ती २१:७; यहेसु ७:२०; न्यायाधीस १०:१०; दानीएल ९:९-१९

११ मिनू परमप्रभु यावेमी येरूब-बाल, बाराक, येफता नु सामुएल आन कली सोइक्ता बाक्त। मिनू मेकोपुकीमी इन एर ओंथ बाकशो जोरी सत्रु रे प्रोन्मे बाक्त। मिनू गेपुकी थुं नाइशशा, मारेइ मदुम्यु बाक्चा तशो बाक्तीनी। न्यायाधीस ६:१४, ३२; न्यायाधीस ४:६; न्यायाधीस ११:२९; १सामुएल ७:३

१२ तन्न गे अम्मोनी आन पिप नाहाश कली लडाइ पथ पिशो ताइतीनी। मिनू गेपुकीमी ‘परमप्रभु यावे, इन परमप्रभु इन पिप बाक्त हना यो, आंइ कली सासन पपाइक्चा कली पिप का गेने’ देतीनी। १सामुएल ११:१-२; १सामुएल ८:१९

१३ मुल इन पुंइशो पिप एक बाकब। गेपुकीम एको कली माल्शा, योव्रतीनी। मिनू परमप्रभु यावेमी इन कली पिप का गेपुतु।

१४ गेपुकीम परमप्रभु यावे कली मान पा हिंशा ठेयब सेल्लतीनी हना, मेको आ देशो टीतीनी हना, इन कली सासन पाइब पिपमी यो परमप्रभु यावे, इन परमप्रभु आ नोले खोइक्तु हना, परमप्रभु यावे गेपुकी नु बाकब।

१५ तन्न गेपुकीम परमप्रभु यावे आ देशो ममिम्ताक्नी नु आ देशो मटीतीनी हना, परमप्रभु यावेमी इन कली नु इन पिप कली यो प्रोंइब। न्यायाधीस २:१५

१६ मोपतीके गे बाक्कीन। मिनू परमप्रभु यावेमी इन डोंइती मार ठेयब गेय पाइबा, मेको कोव्रडीन।

17 मुल चेरब रिक्की जाक्शो बाक्ब। मिनु गो परमप्रभु यावे कली रेउ नु बुंबु पुंडनुड। मिनु मेकोम बुंबु पपाइश्शा, रेउ यिपाइक्ब। मिनु गे परमप्रभु यावे आ डोंडती पिप पुंडशा, इन परमप्रभु यावे आ अरेशो लोत्र मटिशो ठेयब पाप बाक्ब, दे तुइक्नीनी” देमाक्त।

18 मिनु सामुएलमी परमप्रभु यावे कली पुना बाक्त। मिनु मेकोमी मेको नाक्ती बुंबु पपाइश्शा रेउ यिपदा बाक्त। मिनु मुर नेल्ल परमप्रभु यावे नु सामुएल तशा, शुश हिंमा बाक्त।

19 मिनु मुर नेल्लेमी सामुएल कली “परमप्रभु यावे, इन परमप्रभु कली आंइ पबर्म ‘गो मबेक्कल’ दे पुनीन। मारदे हना आंइ मरिम्शो पशो ला ममाइ, आंइ कली पिप का माल्नीकी, दे आंइ मरिम्शो पतीक तेम्ताक्क” देमा बाक्त।

20 मिनु सामुएलम मुर आन कली “महिनीन। गेपुकी मेको मरिम्शो नेल्ल पाइतीनी हना यो, परमप्रभु यावे आ नोले खोइक्का मप्रोनीन। मिनु इन थुं नेल्लेम परमप्रभु यावे कली ठेयब सेलीन।

21 मो मपाइतीनी हना, गे शोर गाक्शो दुम्नीनी। मेकोम इन कली वारच मपाइब। श्येत रे यो मप्रोंइब। ब्यवस्था ३२:३७-३८; यसैया ४१:२९

22 मारदे हना परमप्रभु यावेमी आ ठेयब नें आ पबर्म आ मुर आन कली कोव्रशा मप्रोंइब। परमप्रभु यावेमी इन कली आंम आ मुर सेल्चा कली ग्येरसाक्व। प्रस्थान १९:६

23 मिनु गो इन पबर्म पुंडचा प्रोंइचा यो परमप्रभु यावे आ डोंडती पाप बाक्ब। पुंडचा मप्रोंइनुड। गो इन कली रिम्शो नु ठीक लां शेंनुड। १सामुएल ७:८-९; उत्पती १८:२३-३२; प्रस्थान ३२:११-१४,३२

24 मिनु परमप्रभु यावे कली मान पा हिनीन। इन थुं नेल्लेम थमा पा मेको कली ठेयब सेलीन। मेकोमी इन कली गिश ठेयब गेय पशो बाक्मे, मेको मिम्तीन। ब्यवस्था ६:१२-१५

25 तन्न गे मेको तुइश्शा यो, मरिम्शो पाइतीनी हना, गेपुकी नु इन पिप मलीनीनी” देमाक्त।

## 13

### सावल पलिस्ती नु लडाइ पशो

1 सावल पिप दुम्मेनु, ३० बर्स खोदेशो दुम्शो बाक्माक्त। मेकोमी इस्राएल कली ४२ बर्स क्येडा शुश सासन पवा बाक्त। एको लोत्र मतुंडसीब। मारदे हना माइत हिबू किताबमी क्याम्सीशो बाक्माक्त।

2 सावलमी इस्राएल डा हजार सां मुर आन कली योत्रमी बाक्त। मिनु हजार निक्शी आं नु मिक्माशम नु बेथेल डा पहाडीम बाक्मा बाक्त। मिनु हजार का मुर योनाथन नु बेन्यामीन डा गिबाम बाक्मा बाक्त। लीशो मुर आन कली चहिं आन खिं सोइक्तीमी बाक्त।

3 मिनु योनाथनम गेबा डा पलिस्ती आन ठेयब मुर कली सदा बाक्त। मिनु मेको लोत्र पलिस्ती आन दातेमी ब्रमाक्त। मिनु सावलमी “हिबू नेल्लेम नेंन्मेक्ल” दे रागी नेल्लेमी तुराही ताप्पदा बाक्त। १सामुएल १४:४९

4 मिनु सावलम पलिस्ती आन ठेयब मुर साइक्तीके, पलिस्तीपुकीम इस्राएली आन नें थिचा गांश्रा दीनीम देशो नेंन्मे बाक्त। मिनु सावल कली वारच पा लडाइ पचा कली मुर नेल्ल गिल्लालमी ब्रेत्ने बाक्त।

5 मिनु पलिस्तीपुकी इस्राएली नु लडाइ पचा कली बुक्मा बाक्त। मेकोपुकी नु ३० हजार बग्गी, ६ हजार शारा डोइक्बपुकी नु समुन्द्र डा बाल्वा खोदेशो पा हिक्ने मचाप्चा डा पा खोइलीम गाक्ब लडाइ पाइब मुर बाक्मा बाक्त। मेकोपुकी इर गूशा, बेथ-आवेन आ पूर्व गे मिक्माशम आन बाक्तीके सेल्मे बाक्त।

6 मिनु इस्राएलीपुकीमी थम श्येत जामे बाक्त। मारदे हना लडाइ पाइबपुकी थाम्पा आइक्ब सेल्चा पुंडसमा बाक्त। मोपतीके मेकोपुकी पुक्खी, काक्पे, सेरथे फुल्लु आन दातेम, बेक्शो मुर वोइक्तीके नु इनार आगाम खुंडसमा बाक्त।

7 का निक्शी हिबू यर्दन खोला शोक्शा, गाद आन रागी गिलाद जाक्दीम्मा बाक्त। तन्न सावल चहिं गिल्लाल उइ बाक्माक्त। मेको आ नोले खोइक्ब नेल्ले थाम्पा हिंशा खिंखि पामे बाक्त।

8 मिनु सावलमी सामुएल कली ७ नाक्त सम्म रिम्दा बाक्त। तन्न सामुएल गिल्लालमी मजाक्माक्त। मोपतीके मुरपुकी सावल आ बाक्तीक रे नोले शोंइसीमा बाक्त। १सामुएल १०:८

9 मिनु सावलमी “चोशा चढ़ेतीक नु दुशा बाक्चा आ पबर्म चढ़ेतीक एक आं बाक्तीक चाक्कीन” देंमाक्त। मिनु आंमान चोशा चढ़ेतीक चढ़ेवा बाक्त।

10 सावलम चोशा चढ़ेतीक चढ़ेने थुमा नोले सामुएल जाक्माक्त। मिनु सावल मेको कली गुम्थ लमाक्त।

11 मिनु सामुएलमी “एको मार पवी” देंमाक्त। मिनु सावलमी “मुरपुकीम आं कली प्रोंडशा, लशो तातामी। इन जाक्नुड देंशो ना मजाक्नी। पलिस्तीपुकी मिकमाशम बुक्तेक्म।

12 पलिस्तीपुकी गो नु लडाइ पथ गिल्गालम जाक्नीम, दे मिम्ताकड। गो परमप्रभु यावेम शिशी पवल, दे मपुनु। मोपतीके गो आंमान एको चोशा चढ़ेतीक चढ़ेचा माल्ताक्यी” देंमाक्त।

13 मिनु सामुएलमी सावल कली “गे मूर्ख गेय पाप्तीवी। परमप्रभु यावे, इ परमप्रभुमी शेंशो लोत्र मटिवी। गे टिशो नवे हना, परमप्रभु यावेमी इ राज्य इस्राएलमी गेना हना यो लीपद वा।

14 तन्न मुल इ राज्य मली। परमप्रभु यावेम आ दाक्शो मुर का योत्रतु। परमप्रभु यावेमी मेको कली आ मुर आन पिप सेल्ब। मारदे हना, गे परमप्रभु यावे आ लोत्र मटिवी” देंमाक्त। १सामुएल १६:१; प्रेरित १३:२२

15 मिनु सामुएल बोक्शा, गिल्गाल प्रोंडशा, बेन्यामीन आ गिबा गे खोदा बाक्त। लीशो मुरपुकी चहिं सावल आ नोले लडाइ पाइब दुम्चा कली खोदमे बाक्त। मिनु सावलमी मेको मुर आन कली हिक्गानु, मेको नेल्ल पा ६ सहे मुर बाक्मा बाक्त।

16 सावल, मेको आ तौ योनाथन नु मेको नु बाक्शो मुरपुकी नु बेन्यामीन आ रागी गेबाम लीमा बाक्त। पलिस्तीपुकी चहिं मिकमाशम आन बाक्तीक सेल्शा बाक्मा बाक्त।

17 मिनु पलिस्ती आन बाक्तीक रे रोइक्बपुकी हुल सां गूमा बाक्त। हुल का शुआल आ रागीम बाक्शो ओफ्रा गे लमा बाक्त।

18 अर्को हुल बेथ-होरोन गे लमा बाक्त। मिनु लीशो हुल चहिं डांडा गे लमा बाक्त। मेको डांडा रे सेबोयीम डा बेंसी गोरशो रागी तांइसीबाक्माक्त।

19 मेना इस्राएल रागीमी तुप्तील का यो मथिंसीबाक्माक्त। मारदे हना पलिस्तीपुकीम हिबू आन कली तरवार नु तूतीक सेल्चा मगेशो बाक्मा बाक्त। न्यायाधीस ५:८

20 इस्राएलीपुकी आंम फाली, कोदाली, खा नु गुये शेप्थी यो पलिस्ती आन खिं लचा माल्बाक्मा बाक्त।

21 फाली का नु कोदाली का शेप्चा कली शेकेल का के भाग सांमी भाग निक्शी थाप्चा माल्बाक्मा बाक्त। खा नु ब्यफ खुल्तीक कोक्के शेप्चा कली शेकेल का के भाग सांमी भाग का थाप्चा माल्बाक्मा बाक्त। शेकेल का ११.५ ग्राम बाक्ब। मेको शेप्तीक गेय कली का का कली ३.५ ग्राम चांदी थाप्शो बाक्तेक्म।

22 मोपतीके लडाइ दुम्मेनु, सावल नु योनाथन नु बाक्शो लडाइ पाइब आन के तरवार नु तूतीक का यो मबाक्माक्त। तन्न सावल नु योनाथन आस के ला बाक्माक्त।

23 पलिस्तीपुकी मिकमाश डा लां मेर लमा बाक्त।

## 14

योनाथन पलिस्ती बाक्तीके लशो

1 काबु सावल आ तौ योनाथनमी, आ या कुरब कली “पिवो, गो लां खोइश्शा, पलिस्ती आन बाक्तीक लस” देंमाक्त। तन्न मेकोमी मेको लोत्र आ आफ कली मशेंदा बाक्त।

2 मेना सावल गिबा सहर क्येडा लाडगा मिग्रोनम बाक्शो अनार रवा आ पुंमी बाक्शो बाक्माक्त। मेको नु ६ सहे मुर ला बाक्मा बाक्त।

3 मिनु परमप्रभु यावे कली चढ़ेब एली आ तौ फिनेहास, फिनेहास आ तौ अहीतुब नु आ लोकब इकाबोद मेकेर बाक्मा बाक्त। अहीतुब आ तौ अहीयाह शिलोमी चढ़ेब बाक्शा, निसाफ पतीक ऊरीम नु थुम्मीम बाक्शो झोला यो फेक्शो बाक्माक्त। मेको मुरपुकीमी योनाथन पलिस्ती आन बाक्तीके लशो, मतुइक्तमे बाक्त। २सामुएल ८:१७; १सामुएल ४:१९-२१ प्रस्थान २८:६-३०

4 मिनू योनाथन पलिस्ती आन बाक्तीक लतीक लामी ठेयब सेरथे फुल्लु निक्शी बाक्सा बाक्त। का एर गे नु अर्को ओंथ गे बाक्सा बाक्त। का आ नें बोसेस नु अर्को आ नें सेनेह बाक्माक्त।

5 मेको का उत्तर मिकमाश गे नु का दक्खिन गेबा गे बोक्शो बाक्सा बाक्त।

6 योनाथनमी आ या कुरब कली “पिवो, गो मेको खोइक्तीक चिनु मखोइश्शो आन बाक्तीक लस। परमप्रभु यावेमी वारच पाइबा, कों? परमप्रभु यावेमी शुश मुर बाक्तेकम हना यो, इच्का ला बाक्तेकम हना यो, इं कली प्रॉइने चाप्ब” दे मदा बाक्त। न्यायाधीस ७:१७; २इतिहास १४:१०

7 मेको आ या कुरबमी “गे मार पचा दाक्नीनी, पने। गे मार पाइनीनी गो मेको वारच पाइनुड” देमाक्त।

8 मिनू योनाथनमी “दुम्ब, गो आइक्वी गे लस। मिनू पलिस्ती आन कली तपांडसस।

9 मिनू मेकोपुकीमी इस कली ‘गो मजाक्का सम्म रिम्दीस’ दैतेकम हना, गो मेकेर राप्शा बाक्स। गो मेको आन बाक्तीके मलस।

10 तन्न मेकोपुकीमी ‘आंइ बाक्तीक कुस जाक्कीन’ दैतेकम हना, गो इर डोइश्शा लस। मारदे हना परमप्रभु यावेम मेको आन कली इस गुइमी गेशो बाक्माक्त, दे तुइक्नस। मेको गो इस कली चिन्ड बाक्ब” देमाक्त।

11 मोपतीके मेको निक्शी पलिस्ती आन कली तपांडससा बाक्त। मिनू पलिस्तीपुकीम “कोव्रडीन। हिब्रू आन खुइक्तीक पोत्रला रे ग्रीमा बाक्त” देमुमा बाक्त।

12 मिनू पलिस्तीपुकीमी योनाथन नु आ या कुरब आस कली “गो आंइ बाक्तीक गे डोइश्शा कुस। गो इस कली मारेइ कोइनीकी” देमा बाक्त। मिनू योनाथनमी आ या कुरब कली “आं नोले कुवो। परमप्रभु यावेम मेको आन कली इस्राएली आन गुइमी जिम्मा गेशो बाक्त” दे मदा बाक्त।

13 मिनू योनाथन गुइ खोइल थेक्शा डोंइसे बाक्त। मिनू मेको या कुरब आ नोले कुमाक्त। मिनू मेको पलिस्ती योनाथन आ डोंइती गोल्मा बाक्त। मिनू मेको आ नोले जाक्ब आ या कुरबमी मेको आन कली सदा बाक्त।

14 मेको डोंइती डा लडाइमी योनाथन नु आ या कुरबम २० जना खोइ सदसे बाक्त। मेको साइक्तीके रू ४ रोपानी खोदेशो पा दिम का बाक्माक्त।

15 मिनू नोले पलिस्तीपुकी शुश हिंमा बाक्त। मिनू लाडगा मेर बाक्ब मुर नु अरु मुर नेल्ल खिंखि पा हिंमा बाक्त। आन ठेयब मुर नु रोइक्ब नेल्ल शुश हिंमा बाक्त। मिनू खिनु कुशा ठेयब खल्बल दुम्माक्त। १सामुएल ७:१०

16 मिनू बेन्यामीन आ गिबाम खाल पाइब सावल आ मुरपुकीम पलिस्ती आन हुल खल्बल पा एर ओंथ दोरशो तामे बाक्त।

17 मिनू सावलमी सु सु मबाक्मा, दे हिक्पाइक्मी बाक्त। मिनू मेकोपुकीमी योनाथन नु आ या कुरब मबाक्शो तुइक्तमे बाक्त।

18 मिनू सावलमी अहीयाह कली “परमप्रभु आ कबल पशो सन्दोस एक चाक्को” देमाक्त। मेना परमप्रभु आ कबल पशो सन्दोस इस्राएलीपुकी नु बाक्माक्त। १सामुएल २१:१०

19 मिनू सावलम लोत्र पन पना पलिस्ती आन बाक्तीक डा खल्बल ठेयब दुम्ना दुम्न लमाक्त। मिनू मेकोमी चढेब कली “याम का रिम्दो” देमाक्त।

20 मिनू सावल नु आ मुरपुकी रेयके पना पन लडाइ पतीक गे लमा बाक्त। मेना आन जोरी सत्रु ब्रशा आंम आंमा साइक्मशो तामे बाक्त। न्यायाधीस ७:२२; २इतिहास २०:२३

21 मेना सम्म हिब्रूपुकी पलिस्ती नु बाक्मा बाक्त। मेकोपुकीमी यो पलिस्ती आन बाक्तीकेम बाक्शा यो, इस्राएली आन गे लशा सावल नु योनाथन आस कली वारच पदमे बाक्त।

22 एफ्राइम आ पहाडीम बाक्शो प्रोक्शो इस्राएलीपुकीमी पलिस्ती प्रोक्शो लोत्र नेन्मे बाक्त। मिनू मेकोपुकी यो गारशा पलिस्ती आन कली खेदा पामे बाक्त।

23 मेको नाक्ती परमप्रभु यावेमी इस्राएली आन कली ग्रापदा बाक्त। मिनू मेको लडाइ बेथ-आवेन आ आइक्वी सम्म दुम्माक्त। सावल आ लडाइ पाइब १० हजार खोइ दुम्मा बाक्त। मेको लडाइ एफ्राइम डा पहाड नेल्लेम दुम्माक्त।

24 मेको नाक्ती सावलमी ममिम्थु, गेय पवा बाक्त। मेकोमी मुर आन कली “गो आं जोरी सत्रु आन कली क्येक्क लेन्ने मथुमु सम्म, सुम नाकदो दुम्चा क्येडा डोंइती जाइबा, मेको सराप रल” देंशा कसम जपाइक्की बाक्त। मोपा मेको नाक्ती इस्राएली थाम्पा दशो बाक्मा बाक्त। सुइमी मारेइ मजामे बाक्त।

25 मिनु मेकोपुकी ब्वाकीम जाक्मानु, सुरब खुदो चाका तामे बाक्त।

26 तन्न मेकोपुकीम मेकेर खुदो याप्शो तशा यो, कसम जतीके सुइमी खुदो थिसीन मथीमे बाक्त।

27 तन्न आ आफोम मुर आन कली कसम जपाइशो नु मजचा देशो योनाथनमी मनेशो बाक्माक्त। मेकोमी आ गुइमी बाक्शो कोक्के दिंशा, मेको आ डरीमी थोक्शा तुक्गा बाक्त। मिनु आ सक्ति बारमाक्त।

28 तन्न लडाइ पाइब कामी मेको कली “इन आफोमी मो पचा मदुम्ब देशो बाक्ब” देंमाक्त। मेकोमी “मुलाक्त जचा थोव्रक जाइब सराप रल देशो बाक्ब” देंमाक्त। मुरपुकी चहिं शोव्रलुम बेक्चशो बाक्मा बाक्त।

29 मिनु योनाथनमी “आं आफोमी मुर आन कली श्येत गेतीक गेय डा लाक्शा अरु मपशो बाक्ब। कोव्रडीन गो एको खुदो थाम्शा दोशो सक्ति पाइशो दुम्डा।

30 मुरपुकीम जोरी सत्रु रे रोइशो मार मार जचा तशो नम हना, गिश रिम्शो दुम वा। पलिस्ती आन कली यो शुश साइक्ने चबेम वा” देंमाक्त।

31 मेको नाक्ती मेकोपुकीम पलिस्ती आन कली ग्रामा बाक्त। मिनु मेको आन कली मिक्माश रे आइयालोन सम्म खेदा पामे बाक्त। मिनु मोपा लडाइ पाइबपुकी शुश दमा बाक्त।

32 तन्न मुरपुकी शोव्रलुम बेक्चा चिक्शा, मार मार रोइक्चा गोव्रमे बाक्त। मोपा भेडा बी ब्यफ नु बाछा ग्याइक्तमे बाक्त। मिनु खपीमीन साइशशा हुश सुन्दा ब्वामे बाक्त। लेवी ३:१७

33 मुरपुकीम हुश सुन्दा श्ये ब्वाशा “परमप्रभु यावे कली पाप पाम्तेक्म” दे मुरुमी सावल कली शेंदमे बाक्त। मिनु सावलमी “एको दा थम मरिम्शो दुम्त। टेयब फुल्लु का लोक्शा एक चाक्कीन” देंमाक्त।

34 मिनु सावलमी मेको मुर कली “मुर आन दातेमी लशा “ग्याइशो ब्यफ नु भेडापुकी एक चाक्शा ब्वामेक्ल। मिनु हुश सुन्दा ब्वाशा परमप्रभु यावे कली पाप मपामेक्ल” देनो” देंमाक्त। मिनु मेको नाकदो आन ग्याइशो ब्यफ खुल्शा जाक्शा मेकेर सदमे बाक्त।

35 मोपा सावलमी परमप्रभु यावे कली चढेतीक का सेला बाक्त। मेको सावलम परमप्रभु यावे कली सेल्शो नेल्ल क्येडा डोंइती डा चढेतीक बाक्माक्त।

36 मिनु सावलमी “मुल गो उइ लशा पलिस्ती आन कली नाकदो लडाइ तोय। मिनु नां सोव्रम सम्म मेको आन मारेइ मारेइ रोइक्तय। मेको आन कली का यो महेंदय” देंमाक्त। मिनु मुरपुकीम “गे मार पचा दाक्नीनी मेको पने” देंमा बाक्त। मिनु चढेबमी “गो डोंइती परमप्रभु नु सल्ला पय” देंमाक्त।

37 मिनु सावलमी परमप्रभु कली “मार गो पलिस्ती आन कली खेदा पका? गे मेको आन कली इस्राएली आन गुइमी गेनीनी?” दे हिल्लो पवा बाक्त। तन्न परमप्रभुमी मेको कली मारेइ लोव्र मलेत्ता बाक्त। १सामुएल १४:१८; १सामुएल २३:९-१२

38 मिनु सावलम “इस्राएल डा टेयब मुर नेल्ल आं डोंइती जाक्कीन। मिनु मुलाक्त मार पाप दुम्मे तुइक्चा माल्ताक्व।

39 परमप्रभु यावे ब्रोंइशा बाक्शो खोदेशो पा नु इस्राएल श्येत रे प्रोंइब, गो मेको आ नैम कसम जशा देंनुड, आं तौ योनाथनम मेको पाप पशो बाक्त हना यो, मेको कली साइक्चा माल्ब” देंमाक्त। मिनु सुइमी मेको कली लोव्र मलेत्ते बाक्त।

40 मिनु मेकोम इस्राएली नेल्ल आन कली “गे नेल्ल का पटटी बाक्कीन। गो नु आं तौ योनाथन का पटटी बाक्नस्कु” देंमाक्त। मिनु मुरपुकीम “गे मार पचा दाक्नीनी मेकोन पने” देंमा बाक्त।

41 मिनु सावलमी परमप्रभु यावे, इस्राएली आन परमप्रभु कली “मुलाक्ती गे इन गेय पाइब कली मारदे लोव्र मलेत्तीनी? मेको दोस गो नु आं तौ योनाथन नु बाक्त हना यो, तुइक्पतीन” देंमाक्त। परमप्रभु यावे, इस्राएली आन परमप्रभु गे ऊरीम कोंइदीन। तन्न इन मुर दोस ताइब बाक्नीम हना,

थुम्मीम कोइदीन। मिनु मेको मो पामे नोले योनाथन नु सावल आस नेम गूमाक्त। मुरपुकी चहिं ब्रोंडमा बाक्त। १सामुएल २८:६; प्रस्थान २८:३०; गन्ती २७:२१; ब्यवस्था ३३:८

42 मिनु सावलमी “गो नु आं तौ योनाथन आंस दातेमी ऊरीम आपीन” देंमाक्त। मिनु योनाथन आ नेम गूमाक्त।

43 मिनु सावलमी योनाथन कली “गे मार पवी आं कली देने” दे हिल्लो पवा बाक्त। मिनु योनाथनमी “थमा पा गो आं कोक्के आ डरीमी इचका खोइ खुदो थाम्ता। गो एक बाक्ती, गो बेक्चा कली ठीक बाक्नुड” देंमाक्त। यहोसु ७:१९

44 मिनु सावलमी योनाथन बेक्चान माल्ब, दे कसम जवा बाक्त।

45 तन्न मुरपुकीम सावल कली “मार, योनाथन सांडसीबा? मेको योनाथनमी ओमो ठेयब गेय पा इस्राएल कली मग्रापदा? मोदेशो मदुम्ल। गेना हना यो ब्रोंडशा बाक्ब परमप्रभु यावे आ नेमी गो कसम जशा देंनीकी, मेको के चां का यो महम्ल। मारदे हना मेकोम मुलाक्ती परमप्रभु नु गेय पशो बाक्ब” देंमा बाक्त। मोपा मुरपुकीम योनाथन कली प्रोन्मे बाक्त। मिनु मेको मसांडसे बाक्त।

46 मिनु सावलमी पलिस्ती आन कली खेदा पचा प्रोना बाक्त। मिनु पलिस्ती आन खिं लेम्मा बाक्त।

**सावल आ राज्य डा लोव**

47 मिनु सावलमी इस्राएलमी आ सासन पतीके बोल्यो सेल्ने थुमा बाक्त। मिनु मेकोमी मोआबी, अम्मोनी, एदोमी, सोबाह डा पिपपुकी नु पलिस्ती आंम एर ओंथ डा जोरी सत्रु नु लडाइ पवा बाक्त। मेकोपुकी ते ते लमा मेक मेक ग्रामा बाक्त।

48 मेकोमी अमालेकी आन कली ग्रामा बाक्त। मिनु इस्राएली आन कली रोइक्ब हुल आन रे प्रोना बाक्त।

49 सावल आ तौपुकी योनाथन, इशवी नु माल्कीशुआ बाक्मा बाक्त। मेको आ डोंइती जरमेशो तमी आ नें मेराब नु अर्को के मिकाल बाक्माक्त। १इतिहास ९:३९

50 मेको आ मीश चहिं अहीमाज आ तमी अहीनोआम बाक्माक्त। मेको आ लडाइ पाइब आन कप्तान मेको आ बकान्छा नेर आ तौ आब्नेर बाक्माक्त। १सामुएल १७:५५

51 सावल आ आफ कीश नु आब्नेर आ आफ नेर अबीएल आ तौ बाक्सा बाक्त। १इतिहास ९:३६,३९

52 सावल आ पालाम पलिस्तीपुकी नु लडाइ दुम्स डा दुम्स दुम्माक्त। मेकोमी आ थिशो बोल्यो नु सक्ति पाइशो मुर आ गेय पचा कली लाइक्बाक्माक्त।

## 15

**सावलम अमालेकी आन कली ग्राशो**

1 मिनु सामुएलम सावल कली “परमप्रभु यावेम इ कली आ मुर इस्राएली आन पिप सेल्शा तेल लुक्चा, दे आं कली सोइक्ताक्यी। मोपतीके परमप्रभु यावे आ लोव नोफा दाइशशा नेनो। १सामुएल १०:१

2 मुर नेल्ल आन परमप्रभु यावेमी मार देंत, देंशा हना ‘इस्राएली इजीप्त रे गूशा पिमानु, अमालेकीपुकीम मेको आन कली लडाइ तोम्तेक्म। मोपतीके अमालेकी आन कली थमा पा सजाइ गेनुडमी’ देंत। प्रस्थान १७:८-१६; ब्यवस्था २५:१७-१९

3 अमालेकी आन कली लडाइ तोशा, मेको आन कली सतीन। मेको आन शोप नेल्ल खतम पोक्कीन। मारेइ मप्रोनीन। नेल्ल आन कली खतम पोक्कीन। मेको आन मीश मुर, वोंडश मुर, मीश आल, वोंडश आल, दूध तूब आल, बी ब्यफ, क्यारश भेडा, दलओंठ नु गधा नेल्ल आन कली खतम पोक्कीन” देंमाक्त।

4 मिनु सावलमी मुर नेल्ल आन कली तेलाम बाक्तीकेम जाक्चा कली ब्रेशो बाक्त। मेकेर लाख निक्शी खोइलीम गाक्ब लडाइ पाइब नु यहूदा डा १० हजार लडाइ पाइब बाक्मा बाक्त।

5 मिनु सावल अमालेक आ सहरमी जाक्माक्त। मिनु मेकेर बेसीम बाप्शा, इचका नाक्त बाक्मा बाक्त।



6 मेना सावलम केनी डा मुर आन कली “अमालेकी आन कली प्रोइशा उइ यिने, दे लोत्र सोइकता बाकत। मो मपाइतीनी हना, गो इन कली नु मेको आन कली खतम पोक्नुड। मारदे हना इस्राएली इजीप्ट रे यूशा पिमानु, गेपुकीमी वारच पाइश्शो ननी” देमाकत। मोपतीके केनी डा मुरपुकी अमालेकी आन कली प्रोइशा, उइ बुम्मा बाकत। न्यायाधीस १:१६

7 मिनु सावलमी हवीलाह रे इजीप्ट डा पूर्व डा सांद शुर सम्म डा अमालेकी आन कली साइक्मी बाकत।

8 तन्न मेकोमी अमालेकी आन पिप अगाग कली सेसीन ग्याइकता बाकत। अरु नेल्ल आन कली तरवारम सदमे बाकत।

9 सावल नु मेको आ लडाइ पाइबपुकीमी पिप अगाग आ रिम्शो भेडापुकी, बी ब्यफ, दोम्शो बस्तु भाव, पाठापुकी नु वोइक्या डा मारेइ मारेइ प्रोइशा वोदमे बाकत। मेकोपुकीम मेको आन कली खतम पोक्चा मदाकतमे बाकत।

### परमप्रभुमी देशो सावलम मटिशो

10 परमप्रभु यावेमी सामुएल कली

11 “गो बित्चीम ला सावल कली पिप सेलु बाकत। मारदे हना मेकोमी आं नोले खोइक्या प्रोइतु। मिनु आं देशो मटीव” देमाकत। मिनु सामुएल गाइश्शा नाकदो रे परमप्रभु यावे कली पुंडना पुंडन बाकमाकत। उत्पत्ती ६:६

12 मिनु सामुएल सुनी कना बोक्शा सावल कली गुमथ लमाकत। तन्न मुरुमी “सावल कारमेल लत” दे मेको कली नैपदमे बाकत। सावलम आंम कली मिन्तमेक्ल, दे आंम के मूर्ति का सेल्शा, गिल्गालम बुम्ने थुम्शो बाकमाकत। यहोसु १५:५५

13 मिनु मेकोमी सावल कली गुमा बाकत। मिनु सावलम मेको कली “परमप्रभु यावे आ आसीक इन नु बाक्ल। गो परमप्रभु यावे आ देशो टीता” देमाकत।

14 तन्न सामुएलम मेको कली “आं नोफाम नेशो भेडा नु बी ब्यफ आन ग्रीशो चहिं मारम” दे हिल्लो पवा बाकत।

15 मिनु सावलमी “मुरपुकीम मेको अमालेकी रे चाक्शो नम। मुरपुकीम भेडा नु बी ब्यफ रे रिम्शो चहिं परमप्रभु यावे, इन परमप्रभु कली चोशा चढ़ेचा कली प्रोइशा वोइकतेक्म। लीशो आन कली गो नेल्ल साइकतक” देमाकत।

16 मिनु सामुएलम सावल कली “मोक्ल दुम्त। सिनाकदो परमप्रभु यावेम मार देमे, मेको गो इ कली शॅनन” देमाकत। मिनु सावलमी “देनीन” देमाकत।

17 मिनु सामुएलमी “डोंइती गे आंमा कली आंमान शोर गाक्शो मुर मिम्शो ननी। तन्न मुल गे इस्राएली आन पिप बाक्नीनी। परमप्रभु यावेमी इन कली तेल लुकशा इस्राएल डा पिप सेल्लु। १ सामुएल ९:२१

18 परमप्रभु यावेम इन कली मेको पाप पाइब अमालेकी आन कली खतम पोक्चा, दे थमा पा देशो सोइश्शो बाकत। मेको आन कली काइ मवोइक्थु मसाइक्नी सम्म गे लडाइ पस डा पस बाक्चा माल्शो ननी।

19 गे मारदे परमप्रभु यावे आ देशो मटिनी? गे मारदे रोइश्शो मार मार ताक्नी? मिनु परमप्रभु यावे आ डोंइती मार मरिम्शो बाक्मे, मेको पनी” देमाकत।

20 तन्न सावलमी सामुएल कली “गो परमप्रभु यावे आ देशो टीता। गो परमप्रभु यावेम सोइश्शो रागी लती। मिनु अमालेकी आन पिप अगाग कली ग्याइश्शा चाक्ता। गो आ मुर नेल्ल आन कली खतम पोक्तामी।

21 मुरपुकीम रोइश्शो मार मार भेडा नु बी ब्यफ नु रिम्शो थोव्रक गिल्गालम परमप्रभु यावे, इन परमप्रभु कली चढ़ेचा कली वोइश्शो बाक्नीम” देमाकत।

22 मिनु सामुएलमी “परमप्रभु यावेमी चोशा चढ़ेशो नु अरु चढ़ेशो क्येडा आ देशो टिशो दाक्ब। थमा पा, चढ़ेशो क्येडा आ देशो टिचा रिम्शो बाक्ब। मिनु सांद आ बोसो चढ़ेचा क्येडा आ देशो टिचा रिम्शो बाक्ब। यसैया १:११-१७; येरमीया ७:२२; होसे ६:६; आमोस ५:२१-२२; मीका ६:६-८; जकरिया ७:५-७; मत्ती ९:१३; मत्ती १२:७

23 मेको आ देशो मटिचा लिक्यु कोव्रचा खोदेशो पाप बाकब। मटिचा हेंथे पतीके मूर्ति पूजा पशो खोदेशो बाकब। मारदे हना गे परमप्रभु यावे आ देशो टिचा प्रोंडतीनी। मेकोम इन कली यो पिप सेल्टीक रे प्रोंडशो बाकब” देंमाक्त। १सामुएल १६:१

24 मिनु सावलम सामुएल कली “गो पाप पाता। परमप्रभु यावे आ देशो नु इन लोत्र ममिम्तु। मारदे हना गो मुर आन क्येडा हिंती। मिनु मुर आन देशो टीता।

25 तन्न गो मुल आं पाप माफ तडल, दे पुंडनुड। गो नु जाक्कीन। मिनु गो परमप्रभु यावे कली ठेयब सेलनुड” देंमाक्त।

26 मिनु सामुएलमी “गो गे नु मलेत्नुड। गे परमप्रभु यावे आ देशो प्रोंडतीनी। मिनु परमप्रभु यावेमी यो इन कली इस्राएल डा पिप दुम्तीक रे प्रोंडतु” देंमाक्त।

27 मिनु सामुएल गाक्चवानु, सावलम आ वा आ सुर ग्याइक्ता बाक्त। मिनु मेको गाक्माक्त।

28 मिनु सामुएलम मेको कली “मुलाक्त रे परमप्रभु यावेम इस्राएल डा राज्य खाक्शा अर्को कली गेप्टु। इन नेक्था डा, इन क्येडा रिम्शो मुर का कली गेप्टु। १सामुएल २८:१७

29 परमप्रभु यावे इस्राएल डा मान ताइब बाकब। मेकोमी आ लोत्र मफाइक्ब। आ थुं यो मफाइक्ब। मेको थुं फाइक्ब बेक्शा लाइब मुर खोदेशो ममाइ” देंमाक्त। गन्ती २३:१९

30 मिनु सावलमी “गो पाप पाता। मो हना यो खुशो नु इस्राएली आन डोंडती आं मान ततीक गेने। गो नु लेतीन। मिनु गो परमप्रभु यावे, इन परमप्रभु कली ठेयब सेलनुड” देंमाक्त।

31 मोपतीके सामुएल सावल नु लेशशा लमाक्त। मिनु सावलमी परमप्रभु यावे कली ठेयब सेला बाक्त।

32 मिनु सामुएलमी “अमालेकी आन पिप अगाग कली एक चाक्कीन” देंमाक्त। मिनु अगाग ओंखां पा गाक्शा, मेक जाक्माक्त। मिनु अगागमी “थमा पा, एको बेक्चा डा श्येत बाकब” देंमाक्त।

33 मिनु सामुएलमी “दोपा इ तरवारम मीश मुर आन कली आल मपाइशो सेला, मोपा इ ममा यो मीश मुर आन दातेमी आल मपाइशो दुम्ब” देंमाक्त। मिनु सामुएलमी अगाग कली परमप्रभु यावे आ डोंडती गिल्गालम क्योरशा सदा बाक्त।

34 मिनु सामुएल रामाहम लमाक्त। सावल चहिं आ खिं गिबा लमाक्त।

35 मिनु सामुएल मबेकम सम्म गेनायो सावल कली ग्रुथ मलमाक्त। तन्न परमप्रभु यावेम “सावल कली बिन्वीम ला इस्राएल डा पिप सेलु बाक्त” देशो, मिम्शा सुर्ता पस डा पस बाक्माक्त।

## 16

### सामुएलम दाऊद कली पिप सेलशो

1 परमप्रभु यावेमी सामुएल कली “गे सावल आ पर्बम गेना सम्म सुर्ता पा बाक्नेवे? गो मेको कली पिप दुम्तीक रे गुंडताकड। मुल गे नु बाक्शो ग्रोत्रमी तेल कुर पा लतो। गो इ कली बेथलेहेम डा येस्से आ बाक्तीक सोइक्नन। मारदे हना, गो मेको आ तौ का कली पिप सेल्चा कली योव्रता” देंमाक्त। १सामुएल १५:२३, ३५

2 मिनु सामुएलमी “गो दोपा लने चापुनुडा? एको लोत्र सावलम नेंशा, आं कली साइक्ब” देंमाक्त। मिनु परमप्रभु यावेम “गे मगिक्शो बी का लतो। मिनु परमप्रभु यावे कली क्योरशा चढेथ जाक्त, देनो।

3 येस्से कली यो मेको चढेतीक चाडम ब्रेत्तो। मिनु गे मार पचा माल्नेवे गो शेंनन। गो सु कली कोंडनुडा मेको कली गे तेल लुक्तो” देंमाक्त।

4 मिनु सामुएलमी परमप्रभु यावे आ देशो खोदेशो पवा बाक्त। मेको बेथलेहेम लमाक्त। मिनु सहर डा खुशोपुकी खिंखि पा ग्रुथ जाक्शा, मेकोपुकीमी “गे मारदे जाक्नी? मार, नेल्ल रिम्शोन बाक्बा” देंमा बाक्त।

5 मिनु सामुएलमी “नेल्ल रिम्शोन बाक्ब। गो परमप्रभु यावे कली चढेथ जाक्ती। गेपुकी आंम कली ठीक सेल्सीशा, चढेतीकेम जाक्कीन” देंमाक्त। मिनु मेकोम चहिं येस्से नु आ तौ आन कली परमप्रभु यावे आ डोंडती ठीक सेल्शा चढेतीकेम ब्रेत्तीमी बाक्त।

6 मिनु मेको नेल्ल जाक्मा नोले सामुएलमी एलीआब कली तशा “परमप्रभु यावेम तेल लुकचा देशो मुर एकोन बाक्ब” दे मिम्ता बाक्त।

7 तन्न परमप्रभु यावेम मेको कली “मेको दारशो नु लाइशशो बाक्त हना यो, मेको कली ममिम्तो। गो मेको कली पिप मसेल्लुड। गो, परमप्रभु यावेम मुरुम खोदेशो पा मकोव्रनुड। मुरुम रं दारशो कोव्रशा मिम्मीम। गो मुर आ थुं कोव्रनुड” देमाक्त। येरमीया १७:१०; प्रकाश २:२३; प्रेरित १०:३४

8 मिनु येस्सेमी अबीनादाब कली ब्रेत्ता बाक्त। मिनु सामुएल आ डोंइती गाक्पदा बाक्त। तन्न मेकोमी “ममाइ, परमप्रभु यावेम योव्रशो एको ममाइ” देमाक्त।

9 मिनु येस्सेमी शम्माह कली चाक्गा बाक्त। तन्न सामुएलमी “परमप्रभु यावेम एको कली यो मयोव्रड” देमाक्त।

10 मोपा येस्सेमी आ ७ जना तौ आन कली सामुएल आ डोंइती चाक्मी बाक्त। तन्न सामुएलमी “एको तेकोइ आन कली परमप्रभु यावेम मयोव्रमी” देमाक्त। १इतिहास २:१३-१५; १सामुएल १७:१२

11 मिनु सामुएलमी “मार इ तौ नेल्ल ओशोन नमी” देमाक्त। मिनु येस्सेमी “मुल यो कान्छा का नु बाक्ब। तन्न मेको दा भेडा गोठला बाक्ब” देमाक्त। मिनु सामुएलम येस्से कली “मेको कली ब्रेत्थ सोइक्तो। मेको मजाक्म सम्म गो मनित्थु बाक्नय” देमाक्त। १सामुएल १७:१४

12 मोपतीके मेकोमी मेको कली ब्रथ मुर सोइक्ता बाक्त। मेको लल चोव्रको पाइशशो, दारशो मिक्च पाइशशो नु दारशो ठिटा का बाक्माक्त। मिनु परमप्रभु यावेम सामुएल कली “बोक्शा, मेको कली तेल लुक्तो। एकोन बाक्ब” देमाक्त।

13 मिनु सामुएलमी तेल बाक्शो ग्रोव्र गुंइशा, आ लोक्ब आन डोंइती तेल लुक्ता बाक्त। मिनु परमप्रभु यावे आ सोक्त दाऊद तार जुक्ता बाक्त। मिनु मेना रे मेको नुन बाक्माक्त। मिनु सामुएल रामाह डा लां खोदा बाक्त। २सामुएल २:४; २सामुएल ५:३; भजन संग्रह ८९:२१

### दाऊद सावल आ या कुरब दुमशो

14 मिनु परमप्रभु यावे आ सोक्तीम सावल कली प्रोना बाक्त। परमप्रभु यावे रे मरिम्शो पाइब सोक्तीम मेको कली श्येत गेवा बाक्त।

15 मेको आ गेय पाइबपुकीम सावल कली “कोव्रडीन हजुर, परमप्रभुमी इन कली श्येत गेब सोक्त गेशो बाक्ब।

16 इन डोंइती बाक्शो इन गेय पाइब आन कली इन पर्वम बीना ताप्ब का माल्शा चाक्कीन, दे मारदे मदेनी? परमप्रभु रे मेको मरिम्शो पाइब सोक्तीम इन कली सुम्ब। मेना मेको मुरुम बीना ताप्ब। मिनु गे सानीनी” देमा बाक्त।

17 मिनु सावलमी आ गेय पाइब आन कली “रिम्शो बीना ताप्ब मुर का मालीन। मिनु मेको कली आं बाक्तीक चाक्कीन” देमाक्त।

18 मिनु मेको आ गेय पाइब आन दाते डा काम “बेथलेहेम डा येस्से आ तौ आन दातेमी, काम ताप्शो गो नेशो बाक्नुड। मेको बोल्यो मुर बाक्ब। मिनु रिम्शो लडाइ पाइब, निप्स स्वाप्शा ब्वाक्ब नु दारशो यो बाक्ब। परमप्रभु यावे मेको नु बाक्शो बाक्ब” देमाक्त।

19 मोपतीके सावलमी लोव्र कुरब मुर कली येस्से आ बाक्तीक सोइक्ता बाक्त। मिनु मेकोम आ भेडा योव्रब तौ दाऊद कली सावल आ बाक्तीक सोइक्तीक हुकुम पवा बाक्त।

20 मिनु येस्सेमी कुशुल के थैलो का शांबु, पाठा का इक्का खोइ शोब्ले कुर पा नु आ तौ दाऊद कली सावल आ बाक्तीक सोइक्ता बाक्त।

21 मिनु दाऊद सावल आ बाक्तीक जाक्माक्त। मिनु मेको आ गेय पतीकेमी योव्रसे बाक्त। सावलम मेको कली थाप्पा दाक्चा गोवा बाक्त। मिनु मेको सावल आ या कुरब दुम्माक्त।

22 मोपतीके सावलम येस्से कली “दाऊद आं गेयमीन बाक्ल। मारदे हना गो मेको तशा ग्येरसाक्यी” दे लोव्र कुरब सोइक्ता बाक्त।

23 मिनु परमप्रभु रे मरिम्शो श्येत गेब सोक्त सावल तार जुक्तानु, दाऊदमी बीना ताप्बाक्माक्त। मिनु मरिम्शो पाइब सोक्तीम प्रोंइशा लमेनु, सावल साबाक्माक्त।

## 17

## दाऊद नु गोल्याथ

1 पलिस्तीपुकीम लडाइ पचा कली आन लडाइ पाइब आन कली खुप्तमे बाक्त। मिनु यहूदा डा सोकोहम बुक्का बाक्त। मेकोपुकीमी सोकोह नु आजका आस दाते एफेस-दामीम आन बाक्तीके सेल्मे बाक्त। यहोसु १५:३५

2 सावल नु इस्राएलीपुकी यो गुप्शा एलाह डा दिंम आन बाक्तीके सेल्मे बाक्त। मेकोपुकी पलिस्ती आन डोंइती लहर पा राम्मा बाक्त।

3 पलिस्तीपुकी डांडा का नु इस्राएलीपुकी अर्को डांडा पा बाक्का बाक्त। मेको आन दातेमी दिंम का बाक्का बाक्त।

4 मिनु पलिस्ती आन बाक्तीक रे गाथ डा गोल्याथ नें पाइशो बोल्यो लडाइ पाइब का गूशा, पिमाक्त। मेको ६ कुबीत ३ इन्च लाइशो बाक्का बाक्त। कुबीत का ०.५ मिटर बाक्ब। यहोसु ११:२२

5 मेको आ पियामी कांसा के टोपी बाक्का बाक्त। ५ हजार शेकेल डा कांसा के फेक्तीक फेक्शो बाक्का बाक्त। शेकेल का ११.५ ग्राम, तोला का खोदेशो बाक्ब।

6 मेको आ खोइलीम कांसा के मुइक्तीक मुइशो बाक्का बाक्त। मेको आ बलाम ठेयब कांसा के या कुरशो बाक्का बाक्त।

7 मेको आ तूतीक आ ग्याइक्तीके वा प्रोव्रब आन शी खोमो बाक्का बाक्त। मेको आ तूतीके फलाम के बाक्का बाक्त। मेको ६० शेकेल डा बाक्का बाक्त। मेको आ या कुरब मेको आ डोंइडोंइती गाक्बाक्का बाक्त। शेकेल का ११.५ ग्राम बाक्ब। मेको या ६९० ग्राम बाक्त। इतिहास ११:२३

8 मेको मुर राप्शा, इस्राएल डा मुर नेल्ल आन कली ठेयब सेंदा पा “ए सावल आ गेय पाइबपुकी, गेपुकी मारदे लडाइ पथ जाक्नीनी? गो पलिस्ती नड। गो नु लडाइ पचा कली इन मुर योव्रडीन। मिनु लडाइ पथ पिन। गे सावल आ गेय पाइब मननी डा?

9 आ कान लडाइ पा मेकोम आं कली साइक्ने चाप्ती हना, गो इन वाइल दुम्नीकी। तन्न गो मेको कली ग्राती हना, गेपुकी आंइ वाइल दुम्शा, आंइ गेय पचा माल्नीनी” देंमाक्त।

10 मिनु लेंशा “गो मुलाक्ती इस्राएल डा लडाइ पाइब आन कली आइक्च मिन्नुड। मुर का सोइक्तीन। मिनु गो लडाइ पाइक्नस्कु” देंमाक्त। २राजा १९:१६; भजन संग्रह ७४:१८; सेफन्याह २:८

11 मिनु सावल नु इस्राएलीपुकी मेको पलिस्ती आ देशो नेंशा, थाम्पा हिंमा बाक्त।

12 दाऊद बेथलेहेम, एफ्राथाह सहर डा यहूदा डा येस्से माइशो आ तौ बाक्का बाक्त। मेको येस्से के ८ जना तौ बाक्का बाक्त। सावल आ पालाम मेको खाल्पा बाक्का बाक्त। १सामुएल १६:१-११

13 येस्से आ तौ, जेठा, माइला नु साइला लडाइ पचा कली सावल आ नोले खोइशो बाक्का बाक्त। मेको जेठा एलीआब, आ माइला अबीनादाब नु आ साइला शम्माह बाक्का बाक्त।

14 दाऊद चहिं कान्छा बाक्का बाक्त। मेको टिट्टा सां चहिं सावल आ नोले खोइशो बाक्का बाक्त।

15 मेना दाऊद सावल आ बाक्तीके नु बेथलेहेम आ आफ आ क्यारश भेडापुकी कोव्रचा कली एर ओंथ पाइक्बाक्का बाक्त।

16 मेको पलिस्ती ४० नाक्त सम्म नाक्दो सुनी आन डोंइती जाक्शा आ राप्तीकेम राप्का बाक्का बाक्त।

17 काबु नाक्ती येस्सेमी आ तौ दाऊद कली “इ लोक्ब आन कली एको ४ पाथी तांब्रा नु १० ओटा शोब्ले लाइशो रीब पा चोव्रथ लावो।

18 एको १० ओटा दूध के सेल्शो जचा थोव्रक चहिं आन हजार का मुर आन कप्तान कली लतो। इ लोक्बपुकी दोदेशो पा बाक्का कोव्रडो। मिनु मेको आन रे मारिइ चिनु कुरशा जाक्को” दे मदा बाक्त।

19 मेना सावल, दाऊद आ लोक्ब सां नु इस्राएली नेल्ले एलाह डा दिंम पलिस्ती नु लडाइ पना पन बाक्का बाक्त।

20 मिनु आ दीसा सुनी कना दाऊद आ भेडापुकी मुर आन कली “कोव्रडीन” दे येस्से आ देशो खोदेशो पा, मेको चोव्रथ गाक्का बाक्त। लडाइ पाइब नेल्ल आन आन राप्तीकेम राप्शा लडाइ के बाजा ताप्मे ना, मेको आन बाक्तीकेम जाक्दीम्मा बाक्त।

21 इस्राएली पलिस्ती आन डोंइतीमी, पलिस्ती इस्राएली आन डोंइतीमी लहर पा राम्मा बाक्त।

२२ मार मार वोइक्ब आन कली, मार मार गेशा, दाऊद आ लोक्ब आन राप्तीकेम मेको आन कली गुन्थ दोरशा लमाक्त।

२३ मिनु मेको आ लोक्बपुकी नु लोत्र पना पन बाक्मेनु, मेको गाथ डा पलिस्ती गोल्याथ आ हुल रे यूशा, डोंडती डा खोदेशो पा ग्रीमाक्त। मेको लोत्र दाऊदम नेना बाक्त।

२४ इस्राएलीपुकी मेको मुर कली तामे चोटीन प्रोक्बाक्मा बाक्त।

२५ मेकोपुकीमी “कोवडीन, मेरे मुर नाक्त किंत किंत यूशा इस्राएली आन कली ग्रीशा हिंपाइक्ब। मेरे मुर कली साइक्ब कली पिपम शुश इनाम गेब। आ तमी यो मेको मुर कली गेशा ग्युंवे पाइब। मेको आ खिं डा मुर आन कली इस्राएलमी पिप आ गेय पतीक रे थमा पा प्रोंडब” देमा बाक्त।

२६ मिनु दाऊदमी आ नेक्था बाक्ब आन कली “मेरे पलिस्ती कली साइक्ब नु इस्राएली आन कली मुने दोक्तीक रे प्रोंडबमी मार ताइबा? गेना हना यो ब्रोंडशा बाक्ब परमप्रभु आ लडाइ पाइब आन कली शुक्शी पाइब मेरे खोइक्तीक चिनु मखोइश्शो पलिस्तीम मार मिम्बा?” देमाक्त।

२७ मिनु मेको आ परबम मार दुम्बा? मेको कली साइक्ब मुर कली मार पांडसीबा, दे मुरपुकीमी दाऊद कली शेंदमे बाक्त।

२८ मेको कली मुरपुकी नु लोत्र पा बाक्शो आ लोक्ब एलीआबम नेना बाक्त। मिनु मेको गाइक्ता बाक्त। मेकोम दाऊद कली “गे मारदे एक बाक्डे? गोरशो रागीम बाक्शो मेको इक्का खोइ भेडापुकी यो सु कली कोत्रपाइक्मी? गो इ कली तुइक्नुड। गे मटीब नु हेंथे पाइब बाक्नेवे। गे एक लडाइ कोत्रथ ला जाक्शो नवे” दे मदा बाक्त।

२९ मिनु दाऊदमी “मुल गो मार पडा डा? गो हिल्लो पचा यो मताइनुडा?” देमाक्त।

३० मिनु मेको ब्राशा अर्को मुर आन बाक्तीक लशा, मेको लोत्र हिल्लो पामी बाक्त। तन्न नेल्लेमी मेको कली मोदेशो लोत्र मदमे बाक्त।

३१ मिनु दाऊदम देशो लोत्र मुरपुकीम सावल कली शेंदमे बाक्त। मिनु मेकोमी दाऊद कली ब्रेत्थ सोइक्ता बाक्त। १ सामुएल १७:३१

३२ मिनु दाऊदम मेको कली “गे ग्येत्थ लुक्च मदुमीन। गो इन गेय पाइब लशा मेको पलिस्ती नु लडाइ पाइक्नुड” देमाक्त।

३३ मिनु सावलमी “गे लशा, मेको पलिस्ती नु लडाइ पने मचाप्नेवे। गे नक डा आलन बाक्नेवे। मेको साइ रेन लडाइ पाइब मुर बाक्ब” दे मदा बाक्त।

३४ मिनु दाऊदमी सावल कली “गो आं आफ आ भेडा गोठला नड। जोइ वां जाक्शा। भेडा बगाल रे योल्नीम।

३५ मेना गो मेको आन कली खेदा पा लशा, आन शोत्र रे मेको रोइश्शा चाक्नुड। आं कली क्राइक्चा कली मेको लेत्तेक्म हना, मेको आन कली आन शांपेम ग्याइश्शा तुप्शा साइक्नुडमी

३६ गो जोइ वांपुकी साइश्शो बाक्नुड। मेको खोइक्तीक चिनु मखोइश्शो पलिस्ती यो मेको आन खोदेशो दुम्ब। मेकोमी गेना हना यो ब्रोंडशा बाक्ब परमप्रभु आ लडाइ पाइब आन कली शुक्शी पशो बाक्ब।

३७ आं कली जोइ नु वां आन शोत्र रे प्रोंडब परमप्रभु यावेमी मेको पलिस्ती आ गुइ रे यो प्रोंडब” देमाक्त। मिनु सावलमी “लावो, परमप्रभु यावे गे नु बाक्ल” देमाक्त।

३८ मिनु सावलमी दाऊद कली आ लडाइम फेक्तीक फेक्पदा बाक्त। कांसा के टोपी आ पियाम गुप्ता बाक्त। मिनु आ कांसा के फेक्तीक यो फेक्ता बाक्त।

३९ मेको नोले मेको आ तरवार पिप्ता बाक्त। मिनु दाऊद गाक्चा थुं पवा बाक्त। तन्न मचबा बाक्त। मारदे हना मेकोमी मेको गेना यो मफेक्शो, मपांइशो बाक्माक्त। मोपतीके मेकोम सावल कली “गो एको पांइशा, फेक्शा लने मचाप्नुड। मारदे हना गो एको गेनायो मपांइशो मफेक्शो नड” देमाक्त। मिनु मेकोमी मेको नेल्ल पुइक्मी बाक्त।

४० मेको नोले मेकोमी आ कोक्के कुरा बाक्त। मिनु खोला रे ५ ओटा सिल सिल देशो फुल्लु गुबा बाक्त। मिनु आ झोलाम कुर पवा बाक्त। मिनु आ हुरद शेशा, मेको पलिस्ती नु लडाइ पथ लमाक्त।

४१ मेको पलिस्ती आ या कुरब कली डोंडती गाक्पाइश्शा, दाऊद आ बाक्तीक गे पिमाक्त। मेको आ तेक्तीक कुरबमी मेको कली वारच पशो बाक्माक्त।

४२ मिनु मेकोमी दाऊद कली तशा, रिस्से बाक्त। मिनु लल चोवचो, पाइश्शो दारशो ठिटा कली तशा, शुक्शी पचा गोवा बाक्त। १सामुएल १६:१२

४३ मिनु मेको पलिस्तीम दाऊद कली “मार, गो कुचुम नडा? मिनु कोक्के शेशा, गो नु लडाइ पथ जाक्डे” मदा बाक्त। मिनु मेकोमी आ देवता आ नें थिशा दाऊद कली सराप पवा बाक्त।

४४ मेकोमी “पिवो, गो इ श्ये चिक्ब नु ब्वाकी डा जन्तु आन कली ब्बचा गेनुड” दे मदा बाक्त।

४५ मिनु दाऊदमी पलिस्ती कली “गे, गो नु लडाइ पचा कली तूतीक तरवार कुरशा, पिशो बाक्नेवे। तन्न गो गे नु लडाइ पचा कली मुर नेल्ल आन परमप्रभु यावे, इस्राएल डा लडाइ पाइब आन परमप्रभु आ नेंमी पिशो बाक्नुड।

४६ मुलाक्ती परमप्रभु यावेम इ कली आं गुडम गेब। गो इ कली साइक्नन। मिनु इ पिया खोइश्शा। इ रां नु पलिस्ती आन रां चिक्ब नु ब्वाकी डा जन्तु आन कली ब्बचा गेनुड। मिनु इस्राएलम परमप्रभु का बाक्ब, दे रागी नेल्ल डा मुरुम तुइक्नीम।

४७ मिनु एक बाक्शो मुर नेल्लेम परमप्रभु यावेम तूतीक नु तरवारम मप्रोंडब, दे तुइक्नीम। मारदे हना एको लडाइ परमप्रभु यावे केन बाक्ब। मेकोमी गे नेल्ल इन कली आंइ गुडमी गेब” दे मदा बाक्त। प्रस्थान १५:३; भजन संग्रह २०:८; जकरिया ४:६

४८ मिनु मेको पलिस्ती दाऊद गे पिमाक्त। मिनु दाऊदम मेको नु लडाइ पचा कली, आ डोंडती गे दोरशा लमाक्त।

४९ मेकोमी आ गुड झोलांम कुर पा फुल्लु का गुंडदा बाक्त। मिनु हरदम वोदा बाक्त। मिनु हिरशा, मेको पलिस्ती आ कुप्फीम आबा बाक्त। मिनु मेको फुल्लुम कुप्फ होदा बाक्त। मिनु मेको खपीम गोल्माक्त।

५० मोपा दाऊद आ हरद नु फुल्लुम ग्रामाक्त। मेको नु तरवार मबाक्त हना यो, पलिस्ती गोल्याथ कली सदा बाक्त।

५१ मेको दोरशा मेको पलिस्ती गोल्याथ गे लमाक्त। मिनु आ नेक्था राम्माक्त। मेको आ तरवार खोत रे शोइश्शा, मेको कली साइश्शा आ पिया खोदा बाक्त। पलिस्तीपुकीमी आंम बोल्यो लडाइ पाइब साइश्शो तामे बाक्त। मिनु मेकोपुकी हिंशा प्रोक्मा बाक्त।

५२ मिनु इस्राएली नु यहूदीपुकीमी लडाइ डा ग्रीतीक ग्रीमा बाक्त। गाथ नु एक्रोन डा टेयब लाप्यो सम्म मेको आन कली थाम्पा खेदा पामे बाक्त। शा-आराइम, गाथ नु एक्रोन लतीक लां सम्म आन बेक्शो रां नेल्ल थाम्पा ब्रमाक्त।

५३ पलिस्ती आन कली खेदा पा लेम्मानु, मेकोपुकीमी मेको आन बाक्तीक डा मारेइ मारेइ खुप्तमे बाक्त।

५४ दाऊदमी गोल्याथ आ या मेको आ ताम्बुमीन प्रोंडशा, मेको आ पिया चहिं कुरशा यरूसलेम चाक्गा बाक्त।

५५ मिनु सावलमी दाऊद कली पलिस्तीपुकी नु लडाइ पथ लशो तशा, मेकोम आ लडाइ पाइब आन कप्तान आब्नेर कली “मेको ठिटा सु का आ तौ बाक्मे?” दे हिल्लो पवा बाक्त। मिनु आब्नेरमी “गो इन नेंमी कसम जशा देंनुड, गो मेको कली मतुइक्नुड” देंमाक्त।

५६ पिपम आब्नेर कली “मेको सुका आ तौ बाक्मे रुपो” देंमाक्त।

५७ मिनु दाऊद मेको पलिस्ती कली साइश्शा, लेम नोले आब्नेरमी दाऊद कली सावल आ डोंडती चाक्दीदा बाक्त। दाऊदमी मेको पलिस्ती आ पिया गुडम ग्याइश्शो बाक्माक्त।

५८ मिनु सावलम मेको कली “ए ठिटा, गे सुका आ तौ नवे” दे हिल्लो पवा बाक्त। मिनु दाऊदमी “गो इन गेय पाइब बेथलेहेम डा येस्से आ तौ नड” देंमाक्त।

1 मोपा दाऊदम सावल नु लोव्र पने थुमा बाक्त। नोले योनाथनमी, दाऊद कली आंम कली खोदेशो पा आ थुं रेन दाक्चा गोवा बाक्त। मेको सावलम तुइक्ता बाक्त।

2 मिनु सावलमी दाऊद कली लदा बाक्त। आ आफ आ खिं लेशशा लचा मगेवा बाक्त। १सामुएल १६:२२; १सामुएल १७:१५

3 मिनु योनाथन नु दाऊद आस थुं रेन थमा पा वारच बु दुम्सा बाक्त। मारदे हना मेको निक्शी काम अर्को कली आंम कली खोदेशो पा दाकमुसा बाक्त। मिनु कबल का पाम्से बाक्त। १सामुएल २३:१८; २सामुएल २१:७; १सामुएल १९:१; १सामुएल २०:१७; २सामुएल १:२६

4 मिनु योनाथनमी आ फेक्शो वा प्रुइशशा दाऊद कली गोवा बाक्त। आ तरवार, लिब्रा नु पेटी सुन्दा प्रुइशशा गोवा बाक्त।

5 दाऊदम सावल आ पथ सोइशशो हिंचा डा गेय यो रिम्शो पा पवा बाक्त। मिनु सावलमी दाऊद कली नेल्ल क्येडा सक्ति पाइशशो कप्तान सेला बाक्त। मोपा मेको कली मान बारपाइशशोमी सावल नु आ ठेयब मुरपुकी यो ग्येरसमा बाक्त।

### दाऊद कली साइक्चा माल्शो

6 दाऊदम पलिस्ती आन कली साइशशा लेम्मेनु, इस्राएल डा सहर नेल्ल डा मीश मुर नेल्ल कोव्रथ गूमा बाक्त। सिल पाइब मीश मुरपुकी खैजडी ताप्शा, कुम्सो पना पन, सिल पना पन पिप सावल कली गुम्थ जाक्मा बाक्त। न्यायाधीस ११:३४

7 मिनु मीश मुरपुकीम ग्येरसीशा “सावलम हजार हजार आन कली साइक्तीमी। तन्न दाऊदमी १० हजार, हजार आन कली साइक्तीमी” दे कुम्सो पामे बाक्त। १सामुएल २१:१२; १सामुएल २९:५

8 मिनु सावल थाम्पा गाइक्ता बाक्त। मेको लोव्र नेंशा थाम्पा आ थुं खुरसे बाक्त। मेकोमी दाऊद कली चहिं “१० हजार, हजार तन्न आं कली चहिं हजार हजार ला दैतेक्म। मुल मेको कली पिप सेल्चा का ला लीत” दे मिम्ता बाक्त।

9 मेको नाक्त रे सावलमी दाऊद कली गेहे पचा गोवा बाक्त।

10 आ दीसा परमप्रभु रे मरिम्शो पाइब सोक्त काम सावल कली सुमा बाक्त। मिनु सावलमी आ खिंमी हेंथे पवा बाक्त। मिनु दाऊदमी डोंइती डा खोदेशो पा सावल आ पबंम बीना तबा बाक्त। सावल आ गुडमी तूतीक का बाक्माक्त। १सामुएल १६:१४,२३

11 मेकोम “गो दाऊद कली गारोम क्येप्नुड” दे मिम्शा, आ तूतीक आबा बाक्त। तन्न दाऊद निक्शी खेयप दिल्ला मख्रपाइसे बाक्त। १सामुएल १९:१०; १सामुएल २०:३३

12 मिनु सावल दाऊद कली तशा हिंमाक्त। मारदे हना परमप्रभु यावेम आ कली प्रोंइशा दाऊद नु बाक्शो बाक्ब, दे तुइक्ता बाक्त।

13 मोपतीके सावलम दाऊद कली आ दरवार रे गुंइशा, हजार का मुर आन कप्तान सेला बाक्त। मिनु दाऊदमी आ मुर आन कली लडाइम लाइक्मी बाक्त।

14 मिनु परमप्रभु यावे मेको नु बाक्तीके आ पशो गेय नेल्लेमी मेको रिम्शो दुम्माक्त। १सामुएल १८:५

15 सावलमी दाऊद आ गेय नेल्ल रिम्शो दुम्शो तशा, डोंइती क्येडा हिंमाक्त।

16 इस्राएल नु यहूदा डा मुर नेल्लेमी दाऊद कली दाक्तमे बाक्त। मारदे हना मेको लडाइ पतीकेम लां कोंइशा डोंइती गाक्बाक्माक्त।

17 मिनु सावलम दाऊद कली “गो आं ठेयब तमी मेराब इ कली गेशा ग्युंबे पपाइक्नुड। तन्न गे मेको आ पबंम बोल्यो पा आं गेय पचा माल्नेवे। मिनु परमप्रभु यावे आ पबंम लडाइ पावो” दे मदा बाक्त। मारदे हना सावलम दाऊद कली आंम आ गुडम ममाइ पलिस्ती आन गुड रे साइक्पाइक्चा माल्शो बाक्माक्त।

18 मिनु दाऊदमी “गो सु नडा डा? आं आफ आ खिं डा मुर इस्राएली सु नमी डा? गो पिप आ चांइवा दुम्नुडा?” दैमाक्त। २सामुएल ७:१८

19 मो हना यो सावल आ तमी मेराब नु दाऊद आस ग्युंबे दुम्तीक नाक्त जाक्चा क्येडा डोंइती, मेराब कली मेहोला आ मुर अद्रीएल नु ग्युंबे पा सोइक्ता बाक्त।

20 तन्न सावल आ अर्को तमी मिकाल दाऊद नु दाक्मुसा बाक्त। मेको लोत्र सावलम नेनानु “आं मिम्शो गाप्ब दुम्त” दे मिम्ता बाक्त।

21 मेको आ थुंमी “गो मेको कली दाऊद नु ग्युंवे पपाइक्नुड। पलिस्ती आन गुडम बेक्पाइक्चा कली मेको वाल्पाइक्तीक गेय बाक्ब” देंमाक्त। मोपतीके सावलमी आ चांइवा सेल्चा कली लोत्र पवा बाक्त।

22 मेकोमी आ गेय पाइब आन कली “एको लोत्र सुडम मतुइक्चा डा पा दाऊद कली मतीन” देंमाक्त। मिनु मेकोपुकीम दाऊद कली “पिप इन क्येडा थाम्पा ग्येरशो बाक्ब। मिनु आ गेय पाइब नेल्ल आन दाक्शो यो गे बाक्नीनी। पिप आ खिं डा मुर नु ग्युंवे पतीक नाक्ती यो मुलन बाक्ब” देंमा बाक्त। १सामुएल २२:१४

23 सावल आ मुरपुकीम दाऊद कली मोदेशो लोत्र पामेनु, दाऊदम मेको आन कली “गेपुकीम पिप आ तमी नु ग्युंवे पचा आइक्च लोत्र मिम्तीनी? आं खोदेशो मारेइ मथीब मुरुम ओदेशो पने चाप्नुडा?” दे माइक्मी बाक्त।

24 मिनु दाऊद आ देशो लोत्र आ गेय पाइबपुकीम सावल कली शेंदमे बाक्त।

25 मिनु मेकोमी दाऊद कली “जोरी सत्रु आन क्येक्क लेत्चा कली पिपम ग्युम्ली आ पब्रम सहे का पलिस्ती आन खोइक्तीक चिनु खोइक्तीक डा कुशुल ला पुंडब मतीन” देंमाक्त। मारदे हना पलिस्ती आन गुड रे दाऊद बेक्ल देशो बाक्माक्त।

26 मिनु सावल आ देशो लोत्र आ गेय पाइब मुरपुकीम दाऊद कली नेंपदमे बाक्त। मिनु मेको लोत्रमी मेको पिप आ तमी नु ग्युंवे पचा बिस्से बाक्त।

27 मिनु देशो नाक्त आ डोंइती, नाक्त दाऊद आ मुरपुकी नु लशा सहे निक्शी पलिस्ती आन कली सदमे बाक्त। मिनु मेकोम मेको आन खोइक्तीक चिनु खोइक्तीक डा कुशुल लाइशशा, चांइवा सेल्चीनी, दे पिप आ डोंइती हिक्शा, गेवा बाक्त। मिनु सावलमी आ तमी मिकाल दाऊद कली गेशा ग्युंवे पाइक्ता बाक्त।

28 मिनु सावलमी परमप्रभु यावे दाऊद नु बाक्ब, दे तुइक्ता बाक्त। आ तमी मिकालम मेको कली दाक्ब, दे यो तुइक्ता बाक्त।

29 मिनु सावल दाऊद क्येडा शुश हिंचा गोवा बाक्त। मिनु आ लीशो ब्रोंइतीक नाक्त सम्मन मेको दाऊद आ जोरी सत्रु दुम्माक्त। १सामुएल १८:१२

30 पलिस्ती आन कप्तान का का पा लडाइ पथ जाक्बाक्मा बाक्त। मेकोपुकी मोपा जाक्मानु, सावल आ अरु गेय पाइब आन क्येडा दाऊदमी रिम्शो गेय पवा बाक्त। मोपा मेको आ नें ठेयब दुम्माक्त।

## 19

### योनाथनम दाऊद कली प्रोंइशो

1 सावलमी दाऊद कली साइक्चा, दे आ तौ योनाथन नु आ गेय पाइब नेल्ल आन कली लोत्र पवा बाक्त। तन्न सावल आ तौ योनाथन दाऊद आ वारच बाक्माक्त। १सामुएल १८:३

2 योनाथनमी आ आफ सावलमी दाऊद कली साइक्चा माल्शो बाक्ब, दे दाऊद कली शेंदा बाक्त। मेकोमी दाऊद कली “होस पा, दीसा सुनी सुडमी मतुइक्तीकेमी खुइशशा बाक्कीन।

3 सुनी गो गूशा पीनुड। मिनु इन खुइशशा बाक्तीके आ नेक्था आं आफ नु गुम्नुड। मिनु मेको नु इन पब्रम लोत्र पाइनुड। मारेइ तुइक्ताक्ड हना, गो इन कली शेंनुड” देंमाक्त।

4 मिनु योनाथनम आ आफ कली दाऊद आ पब्रम रिम्शो लोत्र पा “इन गेय पाइब दाऊद कली मारेइ पाप मपने। मारदे हना मेकोमी इन कली मारेइ पाप मपावो। थमा पा, आ पशो गेय नेल्ल इन कली रिम्शो दुम्ब।

5 मेकोमी पलिस्ती कली सदानु, आंमा चहिं बेक्नुड देय ब्रोंइनुड, दे मतुइशशो बाक्त। मिनु परमप्रभु यावेम इस्त्राएल कली ठेयब सेल्चा ग्रापाइक्तु। गे मेको नेल्ल तशा शुश ग्येरशो बाक्तीनी। गे मारदे मेको दोस मताइब दाऊद कली मरिम्शो पचा माल्नीनी? बित्चीम मेको कली मारदे साइक्चा दाक्नीनी?” देंमाक्त। १सामुएल १७:५०



6 मिनु सावलमी योनाथन आ लोव्र नेंशा “परमप्रभु यावे ब्रोंडशा बाकशो खोदेशो पा, दाऊद मसाइक्नुड” दे कसम जवा बाक्त।

7 मिनु योनाथनमी दाऊद कली ब्रेशशा, मेको लोव्र नेल्ल नेंपदा बाक्त। मिनु योनाथनमी दाऊद कली सावल आ बाक्तीके चाक्दीदा बाक्त। मिनु मेकोम डोंइती डा खोदेशो पा सावल आ गेय पवा बाक्त।

8 मिनु लेंशा पलिस्तीपुकी नु लडाइ दुम्माक्त। दाऊदमे मेकोपुकी नु लडाइ पवा बाक्त। मिनु मेकोमी हिंचा डा पा लडाइ पतीके मेको पलिस्ती प्रोकमा बाक्त।

9 मिनु काबु परमप्रभु यावे रे मरिम्शो पाइब सोक्तीम सावल कली सुमा बाक्त। मेना सावल आ खिंमी तूतीक शेशा बाकशो बाक्माक्त। दाऊद चहिं बीना ताप्ना ताप्न बाक्माक्त। १सामुएल १८:१०-११

10 मिनु सावलम दाऊद कली गारोम क्येपचा डा पा तूतीकेम आबा बाक्त। तन्न दाऊद दिल्माक्त। मिनु मेको तूतीक गारोम युक्से बाक्त। दाऊद चहिं ब्रोंडशा प्रोकमाक्त।

11 सावलमी मेको कली सुनी साइक्चा कली दाऊद आ खिंम क्यारी पाइब मुर वोदा बाक्त। तन्न दाऊद आ मीश मिकालमी मेको कली हिंपाइशशा “गे मुल नाक्दोन प्रोकशा मगाक्तीनी हना, दीसा इन कली साइक्नीम” दे मदा बाक्त। भजन संग्रह ५९:१

12 मिकालमी दाऊद कली झेल रे उड तोइक्पदा बाक्त। मिनु मेको सुइमी मतुइक्थु प्रोकमाक्त।

13 मिकालमी मूर्ति चाक्शा, दाऊद आ ब्राख्येम वोदा बाक्त। मिनु आ पिया थॉइसीतीकेम चहिं क्यारश आ चां वोदा बाक्त। उत्पत्ती ३१:१९

14 मिनु सावलमी दाऊद कली कोव्रथ मुर सोइक्तानु, मेकोम “रोइ पशो बाक्ब” देंमाक्त।

15 मिनु सावलमी मेको आन कली “गे आमा दाऊद कली कोव्रडीन” दे सोइक्तीमी बाक्त। मेकोमी “मेको कली आ खाट सुन्दा क्युक्शा एक चाक्कीन। मिनु गो साइक्नुड” दे सोइक्तीमी बाक्त।

16 मिनु मेकोपुकी जाक्मानु, ब्राख्येम मूर्ति नु पिया थॉइतीकेमी क्यारश आ चां ला थित्मे बाक्त।

17 मिनु सावलमी मिकाल कली “गे मारदे आं कली जोल पाइय्यी? आं जोरी सत्रु कली मारदे रिम्शो पा प्रोकपदी?” देंमाक्त। मिनु मिकालमी “मेकोम ‘आं कली रिम्शो पा मप्रोकपाइक्ती हना, गो इ कली साइक्नन’ दे माइक्ती” देंमाक्त।

18 मिनु दाऊद प्रोकशा लशा, रामाह सामुएल आ बाक्तीकेम जाक्दीम्माक्त। मिनु सावलमी मार मार पवा, मेको नेल्ल शेंदा बाक्त। मिनु मेको नु सामुएल लशा नायोथमी बाक्सा बाक्त।

19 मिनु मुर कामी सावल कली “दाऊद रामाह डा नायोथम बाक्ब” दे शेंदा बाक्त।

20 सावलमी दाऊद कली ग्याइक्चा, दे मुर आन कली सोइक्ता बाक्त। मेकोपुकीमी परमप्रभु यावे आ लोव्र पाइब आन हुल परमप्रभु यावे आ सोक्तीम लोव्र पा बाकशो तामे बाक्त। मिनु सामुएल मेको आन टेयब मुर बाक्माक्त। मिनु परमप्रभु आ सोक्तीम मेको आन कली सुमा बाक्त। मिनु मेकोपुकी यो परमप्रभु यावे आ सोक्तीम लोव्र पामे बाक्त। १सामुएल १०:१०-१२

21 मिनु सावलम मेको नेंशा, अर्को हुल का सोइक्ता बाक्त। मेकोपुकीम यो परमप्रभु यावे आ सोक्तीम लोव्र पामे बाक्त। मिनु सावलमी लेंशा अर्को हुल का सोइक्तीमी बाक्त। मिनु मेकोपुकी यो मोदेशो दुम्मा बाक्त।

22 मिनु नोले सावल आंमान रामाहम पिशा, सेकुम बाकशो टेयब कुवाम जाक्माक्त। मिनु मेकोमी “सामुएल नु दाऊद ते बाक्सा?” दे हिल्लो पवा बाक्त। मिनु “मेको निक्शी रामाह डा नायोथम बाक्नीसी” दे शेंदमे बाक्त।

23 मेको रामाह डा नायोथ लना लन पवानु, परमप्रभु आ सोक्तीम मेको कली यो सुमा बाक्त। मिनु रामाह डा नायोथ सम्मन, परमप्रभु यावे आ लोव्र पना पन जाक्दीम्माक्त।

24 मेकोमी यो आ वा पुइशशा, सामुएल आ डोंइती परमप्रभु यावे आ सोक्तीम लोव्र पना पन नाक्त रे नु नाक्दो रे शिश्रा बाक्माक्त। मोपतीके मुरपुकीम “मार, सावल यो परमप्रभु यावे आ लोव्र पाइब आन दातेमी बाक्मे?” देंबाक्मा बाक्त।

## 20

योनाथनम दाऊद कली वारच पशो

1 मिनु दाऊद रामाह डा नायोथ रे प्रोकशा, योनाथन आ बाक्तीक जाक्दीम्माक्त। मिनु मेकोमी योनाथन कली “गो मार पडा? आं दोस मार बाक्बा? मारदे इन आफोम आं कली साइक्चा माल्बा?” दे हिल्लो पवा बाक्त।

2 मिनु योनाथनमी “मोदेशो मटुम्ल। गे मबेक्नीनी। आं आफोम आं कली मदेंथु, आइक्च नु ठेयब गेय मारेड मपाइब। ओदेशो लोत्र आं आफोम आं रे दोपा खुइक्बा डा? मोदेशो मपाइब” देमाक्त।

3 मिनु दाऊदमी “गे आं कली दाक्नीनी, दे इन आफोम तुइक्ब। मेकोमी ‘योनाथनम मतुइक्तल। तुइक्ताक्व हना, आ थुं खाइक्ब’ दे मिम्शो बाक्ब। थमा पा, परमप्रभु यावे ब्रोंडशा बाक्शो खोदेशो पा बेक्तीक आं नेक्था बाक्त” दे कसम जवा बाक्त।

4 मिनु योनाथनमी दाऊद कली “गे मार देंनीनी, गो मेको पाइनुड” देमाक्त।

5 मिनु दाऊदमी योनाथन कली “दीसा औंसी बाक्ब। गो पिप नु बाक्शा, जचा माल्नुड। गो नाक्त सां सम्म रू मेर लशा खुइइशा बाक्नुड।

6 इन आफोम आं मजाक्शो आ पबर्म लोत्र गुंइताक्व हना, मेको कली ‘दाऊदमी बेथलेहेम आ खिंम रीब पा लचा माल्तीके, आं कली हिल्लो पती। मारदे हना मेकेर खिं डा मुर नेल्लेमी बर्सम चढ़ेतीक चढ़ेचा माल्बाक्माक्त’ देनीन।

7 मिनु मेकोम ‘ठीक बाक्ब’ देंत हना, मेको रिम्शो बाक्ब। तन्न मेको गाइइशा चुरशा पाप्तु हना, मेकोमी आं पबर्म मरिम्शो मिम्शो बाक्ब, दे गे तुइक्नीनी।

8 मोपतीके गे इन गेय पाइब, गो नु थमा सुइक्चा डा गेय पने। मारदे हना गे नु गो परमप्रभु यावे आ डोंइती कबल का पशो बाक्नस। गो दोस ताइब बाक्ती हना, गे आं कली साइय्नीनी। इन आफ बाक्तीकेमी मलाइय्नीनी” देमाक्त। १सामुएल १८:३

9 मिनु योनाथनम “मोदेशो लोत्र मपन। आं आफोम इन कली साइक्चा मिम्शो गो तुइक्ताक्व हना, इन कली शेंनुड” देमाक्त।

10 मिनु दाऊदम योनाथन कली “इन आफोम मरिम्शो लोत्र पाप्तु हना, मेको सुम आं कली तुइक्पाइक्बा?” देमाक्त।

11 मिनु योनाथनमी “गो नु पिने” देमाक्त। मिनु मेको निम्फा हिरथ लसा बाक्त।

12 मिनु योनाथनम दाऊद कली “गो इन कली, परमप्रभु यावे, इस्राएली आन परमप्रभु आ डोंइती एको लोत्र पाइनुड। दीसा कि नित्थ नाक्त आं आफ आ थुं थामु नोले मेकोम इन पबर्म रिम्शो मिम्शो बाक्त हना, गो इन कली तुइक्पाइक्नुड।

13 तन्न आं आफोम मरिम्शो मिम्शो बाक्त हना यो, गो इन कली तुइक्पाइक्नुड। गो इन कली मतुइक्पाइक्ता हना नु इन कली मप्रोंइता हना, परमप्रभु यावेमी आं कली सजाइ गेवल। परमप्रभु यावे आं आफ नु बाक्शो खोदेशो पा गे नु यो बाक्ल।

14 गो ब्रोंडडा सम्म परमप्रभु यावेम आ गेना हना यो दाक्शा मप्रोंइशो खोदेशो पा इन दाक्तीक आं कली कोंइदीन।

15 परमप्रभु यावेम रागी रे दाऊद आ जोरी सत्रु नेल्ल क्याम्ताक्व हना यो, गो इन गेना हना यो दाक्तीक आं खिं डा मुर आन रे मक्याम्दीन” दे योनाथनमी दाऊद कली देमाक्त।

16 मेना योनाथनमी दाऊद आ खिं डा मुर नु कबल पा “परमप्रभु यावेम दाऊद आ जोरी सत्रु आन कली माल्शा गुंइदल” देमाक्त।

17 मेको नु दाक्मुशो आ पबर्म योनाथनमी दाऊद नु कसम जवा बाक्त। मारदे हना, मेकोम मेको कली आं कली खोदेशो पा दाक्बाक्माक्त।

18 मिनु योनाथनम दाऊद कली “दीसा औंसी बाक्ब। इन नित्तीक श्येत्थ बाक्शो तशा, गे मबाक्नीनी, दे तुंइसीब।

19 मोपतीके नित्थ नाक्त इन खुइक्तीके उइ मेर लने। इन डोंइती खुइक्तीकेम लशा, फुल्लु आ नेक्था बाक्कीन।

20 मिनु गो मेको फुल्लु आ नेक्था ब्रा सां आप्नुड।

21 मिनु गो मेको वोंइश आल कली ब्रा इ डोंइती बाक्नीम, दे माल्थ सोइक्ताक्ड हना, गे गूशा पिन। परमप्रभु यावे ब्रोंइशा बाक्शो खोदेशो पा गे ठीक बाक्नीनी।

22 तन्न गो मेको वोंइश आल कली ‘कोवडो, ब्रा इ नोले गे बाक्नीम। मेको खुप्शा चाक्को’ देंती हना, गे प्रोक्कीन। मारदे हना परमप्रभु यावेम इन कली सोइश्शो बाक्ब।

23 गो निक्शी इस दातेम पशो लोत्र गेना हना यो लील, दे परमप्रभु यावे सांकछी बाक्ब” देंमाक्त।

24 मोपतीके दाऊद रू मेर खुइश्शा बाक्माक्त। मिनु औसीमी भोज ठीक दुम नोले पिप जचा कली निस्से बाक्त।

25 सावल डोंइती खोदेशो पा आ नित्तीकेम निस्से बाक्त। आ नित्तीके गारो आ नेक्था बाक्शो बाक्त। आबनेर मेको आ नेक्था निस्से बाक्त। योनाथन चहिं राप्शा बाक्शो बाक्माक्त। तन्न दाऊद आ नित्तीक श्येत्थ बाक्माक्त।

26 मेको नाक्त सावलम मारेइ मदेंमाक्त। मेको ग्रॉग्रा दिशो दुम माइ। मोपतीके मजाक्म माइ, दे मिम्ता बाक्त। लेवी १५:१६

27 औसी आ दीसा दाऊद आ नित्तीक श्येत्थ बाक्माक्त। मिनु सावलम आ तौ योनाथन कली “सिनाक्त मुलाक्त येस्से आ तौ भोजम मारदे मजाक्म” दे हिल्लो पवा बाक्त।

28 मिनु योनाथनम सावल कली “दाऊदमी ‘गो बेथलेहेम लाइनुड’ दे लोत्र पाप्तु।

29 मेकोमी ‘आं खिं डा मुरपुकी चढेचा कली सहर लशो बाक्नीम। आं लोकबम आं कली मेक जाक्चा, दे ब्रेत्ताकयी। मिनु गे आ कली शिशी पाइनीनी हना, आं लोकब आन कली युम्थ लचा गेयीनी’ देंत। मोपतीके मेको पिप नु जथ जाक्ने मचब” देंमाक्त।

30 मिनु सावल योनाथन नु गाइश्शा मेको कली “गे दूली पाइब नु मटीब मीश आ तौ, गे येस्से आ तौ कली वारच सेल्शा, मुने दोक्शो बाक्नेवे। मिनु इ ममा इ कली जर्मेशो आ पर्वम मुने दोक्त।

31 येस्से आ तौ रागीम ब्रोंइशा बाक्म सम्म गे मलीनेवे। इ राज्य यो मलीब। मेको कली रीब पा एक चाक्चा कली ब्रेत्थ सोइक्तीमी। थमा पा मेको साइक्चा पुंडसीब बाक्ब” देंमाक्त।

32 मिनु योनाथनमी आ आफ कली “मेको मारदे साइक्चा पुंडसीबा? मेकोम मार पवा डा?” देंमाक्त।

33 मेको लोत्रम पतीके सावलमी आ तूतीक क्युक्शा, आ तौ कली साइक्चा मला बाक्त। मिनु योनाथनमी आ आफोम दाऊद कली साइक्चान माल्शो बाक्माक्त, दे तुइक्ता बाक्त। १सामुएल १८:११

34 मिनु योनाथन गाइश्शा चुरशा आ नित्तीक रे बोक्शा, मारेइ मजवा बाक्त। मारदे हना दाऊद कली साइक्चा माल्शो आ पर्वम सुर्ता पवा बाक्त। आ आफोम दाऊद कली मरिम्शो पचा मिम्शो बाक्माक्त।

35 मिनु आ दीसा सुनी देशो खोदेशो पा, योनाथन दाऊद कली युम्थ लमाक्त। मेको नु वोंइश आल का यो बाक्माक्त।

36 मेकोमी मेको वोंइश आल कली “गो आं आप्शो ब्रा माल्थ लावो” दे मदा बाक्त। मेको वोंइश आल दोरमेनु, योनाथनम आ नोले गे ब्रा आबा बाक्त।

37 मिनु मेको वोंइश आल योनाथनम ब्रा आप्तीकेम जाक्दीम्मेनु, योनाथनम “ब्रा इ नोले गे बाक्ब” दे ब्रेत्ता बाक्त।

38 मिनु योनाथनमी मेको वोंइश आल कली “रीब पा लावो। देश मपावो” दे ब्रेत्ता बाक्त। मिनु मेको वोंइश आल ब्रा गुप्शा आ टेयब मुर आ बाक्तीक चाक्का बाक्त।

39 मेको वोंइश आलम मारेइ मतुइश्शो बाक्माक्त। योनाथन नु दाऊदम ला आस डोंइती देशो लोत्र तुइक्त्से बाक्त।

40 मिनु योनाथनम आ या मेको वोंइश आल कली गेशा “सहरम लतो” दे सोइक्ता बाक्त।

41 मिनु मेको वोंइश आल लम नोले, दाऊद आ खुइक्तीक फुल्लु आ नोले रे गूशा, खेयप सां बाप्शा मान पवा बाक्त। मिनु मेको निक्शी पुक्पु पाइक्मुसा बाक्त। मिनु निम्फा डाक्सा बाक्त। दाऊद योनाथन क्येडा शुश डाक्माक्त।

42 मिनू योनाथनम दाऊद कली “रिम्शो पा लावो। गे नु गो परमप्रभु यावे आ नेंमी कसम जशा, परमप्रभु यावे गे नु गो इस दातेमी बाक्ल। मेको इ चच युइ नु आं चच युइ आन दातेमी गेना हना यो बाक्ल” देंमाक्त। मिनू दाऊद बोक्शा लमाक्त। योनाथन चहिं सहर लेम्माक्त।

## 21

### दाऊद प्रोक्शा नोब नु गाथ लशो

1 मिनू दाऊद नोब डा चढेब अहीमेलेक आ बाक्तीक जाक्माक्त। मिनू अहीमेलेक खिंखि पा दाऊद कली गुम्शा “मारदे इन का ला जाक्नी? गे नु सुइ मबाक्मा” देंमाक्त। १सामुएल २२:९,१९

2 मिनू दाऊदम चढेब अहीमेलेक कली “गो पिप आ हुकुममी जाक्ती। मेको गो सुइ आन कली शेंचा म्दुम्नुड। गो आं मुर आन कली सुइ मबाक्तीकेम गुम्चा नड, दे माइक्तामी।

3 मुल इन नु मार बाक्बा आं कली ५ ओटा शोब्ले कि दोशो बाक्मे, मोशो गेयीनी” देंमाक्त।

4 मिनू चढेबम दाऊद कली “गो नु शोब्ले मबाक्ब। कोंइतीक शोब्ले ला बाक्नीम। तन्न मार, मेरे वोंइश मुरपुकी मीश मुर रे डोन बाक्शो बाक्नीमी?” दे हिल्लो पवा बाक्त। लेवी २४:५-९; प्रस्थान १९:१५

5 मिनू दाऊदमी “गो इन कली थमा लोव्र पाइनुड, गेना हना यो गो लां गाक्वी ना मीश मुर रे डोन बाक्नीकी। एको वोंइश मुर ग्रंथा मदिशो बाक्नीम। मुल मेको क्येडा ग्रंथा मदिशो बाक्नीकी” देंमाक्त।

6 मोपतीके मेकेर अरु शोब्ले मबाक्तीके चढेबमी मेको परमप्रभु यावे आ डोंइती वोइशो कोंइतीक शोब्ले गेवा बाक्त। तेको नाक्ती कोंइतीक शोब्ले परमप्रभु यावे आ डोंइती रे लदमे, मेको नाक्ती अर्को होश शोब्ले वोइक्चा माल्बाक्माक्त। मती १२:३-४

7 सावल आ गेय पाइब आन दाते डा गेय पाइब का यो मेको नाक्ती मेकेर परमप्रभु यावे आ डोंइती दिक्शा, बाक्शो बाक्माक्त। मेको एदोम डा दोएग बाक्माक्त। मेको सावल आ गोठला आन नेल्ल क्येडा ठेयब मुर बाक्माक्त। प्रस्थान २१:१३; लेवी १३:४,३१; १सामुएल २२:९,१८

8 दाऊदम अहीमेलेक कली “गे नु तूतीक तरवारपुकी बाक्नीमी? मारदे हना पिप आ गेय रीब पा पचा माल्तीके गो तरवार नु अरु या कुरचा मतड” देंमाक्त।

9 मिनू चढेबमी “एलाह डा दिंम इन साइशो पलिस्ती गोल्लयाथ आ तरवार एक बाक्ब। मेको निसाफ पतीक ऊरीम नु थुम्मीम बाक्शो झोला आ नोले वाम गिल्ला वोइशो बाक्ब। मेको लाइक्नीनी हना, लतीन। मेको डा लाक्शा एक अर्को या मबाक्ब” देंमाक्त। मिनू दाऊदमी “मेको खोदेशो रिम्शो अर्को तरवार मबाक्ब। आं कली मेकोन गेयीनी” देंमाक्त। १सामुएल १७:५०-५१; न्यायाधीस ८:२७

10 मेको नाक्ती दाऊद बोक्शा सावल रे प्रोक्माक्त। मिनू गाथ डा पिप अकीश आ बाक्तीके जाक्माक्त। भजन संग्रह ५६:१

11 अकीश आ गेय पाइबपुकीम मेको कली “थमा पा रागी डा पिप दाऊद एकोन बाक्ब। एको आ पर्बम सावलम हजार हजार आन कली साइक्तु। दाऊदम १० हजार हजार आन कली साइक्तीमी” दे कुम्सो मपामे डा? १सामुएल १८:७

12 दाऊदम मेको लोव्र आ थुंम वोइशो बाक्माक्त। मिनू मेको गाथ डा पिप अकीश तशा थाम्पा हिंमाक्त।

13 मोपतीके मेकोमी मेको आन डोंइती आ निप्स ग्राइशो खोदेशो दुम्खु पवा बाक्त। मेकोम ठेयब लाप्चोमी रेन्ना रेन्न नु आ राल आ गल शोक्त्रेम तोक्ना तोक्न बाक्माक्त। भजन संग्रह ३४:१

14 मिनू अकीशमी आ गेय पाइब आन कली “एको मुर आ निप्स ग्राइशो बाक्त। एको कली मारदे आं बाक्तीक चाक्नी?

15 गो अरु निप्स ग्राइशो मुर माल्नुडा? गे मारदे एको कली आं डोंइती हेंथे पपाइक्चा कली चाक्नी। मेको आं खिंमी बाक्ल, दे मिन्नीनी?” दे माइक्मी बाक्त।

## 22

दाऊद अदुल्लाम पुक्खीम बाक्शो

1 दाऊद मेकेर रे प्रोक्शा, अदुल्लाम डा पुक्खीम लमाक्त। मिनु मेको आ लोकब नु आ खिं डा मुर नेल्लेम मेको लोव्र नेंमे बाक्त। मिनु मेकोपुकी आ बाक्तीक जाक्दीम्मा बाक्त। भजन संग्रह ५७:१; यहोसु १५:३६

2 श्येत जशो, जेर दुश्शो नु आन थुं मनुशो मुरपुकी मेको आ बाक्तीकेम जाक्मा बाक्त। मिनु दाऊद मेको आन कप्तान दुम्माक्त। मेकोपुकी ४ सहें खोइ बाक्मा बाक्त। न्यायाधीस ११:३

3 मेकेर रे मेकोपुकी मोआब डा मिस्पे लमा बाक्त। मिनु मोआब डा पिप कली “परमप्रभुम आं पर्वम मार पाइबा, मेको मतुइक्तु सम्म आं आंम आफ आस कली इन बाक्तीकेम बाक्चा गेने” देमाक्त। २सामुएल ८:२; रूथ १:३

4 दाऊदमी आ आम आफ आस कली मोआब डा पिप नु वोदा बाक्त। मेको आ बोल्यो खुइश्शा बाक्तीकेम बाक्ची ना सम्म आ आम आफ मोआब डा पिप नु बाक्सा बाक्त।

5 मिनु परमप्रभु यावे आ लोव्र पाइब गादमी दाऊद कली “गे मेको बोल्यो खुइश्शा बाक्तीकेम मबाक्कीन। रीब पा यहूदा रागी लने” देमाक्त। मोपतीके दाऊद हेरेथ डा ब्वाकीम लमाक्त। भजन संग्रह ६३:१

सावल नु नोब डा चढेब

6 मिनु सावलमी दाऊद नु आ मुरपुकी ते बाक्शो बाक्मा मेको नेना बाक्त। सावल गिबा डा डांडाम बाक्शो, ठेयब रवा आ पुंम, गुइम तूतीक शेशा बाक्शो बाक्माक्त। मेको आ गेय पाइब नेल्ल आ एर ओथ राप्शा बाक्शो बाक्मा बाक्त।

7 मिनु सावलमी आ एर ओथ बाक्शो मुर आन कली “गे बेन्यामीन आ थर डा मुर, आं लोव्र नेनीन। मार, येस्से आ तौमी नेल्ल इन कली रू नु अइगुर रू गेबा कौ? नेल्ल इन कली सहें का डा नु हजार का लडाइ पाइब मुर आन कप्तान सेल्बा कौ, दे आस पाइनीनी?

8 मोपतीके गे नेल्लेम आं कली मरिश्शो पशो बाक्तीनी। इन दातेमी सुइम आं कली आं तौ नु येस्से आ तौ कबल पमशो मशेंदीनी। सुइम आं कली आं तौमीन आं गेय पाइब कली जौब पोक्शा, आं कली बाप्पाइश्शो लोव्र मशेंदीनी” देमाक्त। १सामुएल १८:३

9 मिनु सावल आ गेय पाइब नु राप्शा बाक्शो एदोम डा दोएगमी “गो येस्से आ तौ कली नोब डा अहीतुब आ तौ अहीमेलक आ बाक्तीकेम जाक्शो ताता। भजन संग्रह ५२:२; १सामुएल २१:१-१०

10 अहीमेलकम दाऊद आ पर्वम परमप्रभु यावे कली पुंइतु। मेको नोले जचा थोव्रक नु पलिस्ती गोल्याथ आ तरवार यो मेको कली गेप्टु” देमाक्त।

11 मिनु सावलमी नोब डा चढेब अहीतुब आ तौ अहीमेलक नु नोबम बाक्ब आ खिं डा चढेब नेल्ल आन कली ब्रथ सोइक्तीमी बाक्त। मिनु मेको नेल्ल पिप आ डोइती जाक्मा बाक्त।

12 मिनु सावलम “ए अहीतुब आ तौ नेनो” देमाक्त। मिनु मेकोमी “दुम्ब, आं प्रभु” देमाक्त।

13 मिनु सावलम मेको कली “गे नु येस्से आ तौमी आं पर्वम मारदे मरिश्शो पसी? गे मेको कली शोब्ले नु तरवार गेप्तीवी। मेको आ पर्वम परमप्रभु नु पुंइतीवी। मेको आं पर्वम मरिश्शो पचा कली ठीक दुश्शो बाक्ब। मुल आं कली बाप्शा बाक्चा कली मोदेशो पाइतीनी” देमाक्त।

14 मिनु अहीमेलकमी “इन गेय पाइब नेल्लेमी थमा सुइक्चा पुंइसीशो इन चांइवा, इन गेय पाइब दुश्शो, इन खिंम मान पाइक्चा पुंइसीब दाऊद बाक्ब। १सामुएल १८:२२, २७

15 मोदेशो मुर आ पर्वम परमप्रभु नु डोइती डा खेयप सल्ला पुंइशा, मार मरिश्शो पडा डा? मोदेशो लोव्र आं रे डोन बाक्ल। गो नु आं खिं डा मुर आन कली दोस मगेकी। मारदे हना, गो एको आ पर्वम मारिइ मतुइश्शो बाक्नीकी” देमाक्त।

16 मिनु पिपम “अहीमेलक गे थमा पा साइक्चा पुंइसीनेवे। गे नु इ खिं डा मुर नेल्ल साइक्चा पुंइसीनीम” देमाक्त।

17 मिनु सावलम आ नेकथा उड राप्शा बाक्शो आ कली खाल पाइब कली “लशा परमप्रभु यावे कली चढेब आन कली सतो। मारदे हना, मेकोपुकी दाऊद नु गारशो बाक्नीम। मेकोपुकीमी दाऊद प्रोक्शो बाक्ब, दे तुइश्शा यो, आं कली मशेंदीमी” देंमाक्त। तन्न पिप कली खाल पाइबपुकीमी परमप्रभु यावे कली चढेब आन कली साइक्चा थुं मपामे बाक्त।

18 मोपतीके पिपम एदोम डा दोएग कली “ए दोएग लशा चढेब आन कली सतो” देंमाक्त। मिनु दोएग लशा, चढेब आन कली सदा बाक्त। मिनु मेकोमी मेको नाक्ती ८५ जना निसाफ पतीक ऊरीम नु थुम्मीम बाक्शो झोला फेक्शो मुर आन कली साइक्मी बाक्त।

19 सावलमी चढेब आन सहर नोब डा वोंइश मुर, मीश मुर, आलपुकी, ब्यफ गधा नु भेडा नेल्ल आन कली तरवारमी क्योरशा साइक्मी बाक्त। १सामुएल २१:२

20 अहीतुब आ तौ अहीमेलेक आ तौ का अबीयाथार चहिं प्रोक्शा दाऊद आ बाक्तीक जाक्दीम्माक्त। १सामुएल २३:६; मर्कूस २:२६

21 मिनु अबीयाथारमी सावलम दोपा परमप्रभु यावे कली चढेब आन कली सदा, मेको नेल्ल दाऊद कली शेंदा बाक्त।

22 मिनु दाऊदमी अबीयाथार कली “मेको नाक्ती एदोम डा दोएग मेकेर बाक्त। मेकोम सावल कली शेंब, दे गो तुइश्शो नड। इ आफ नु आ खिं डा मुर नेल्ल आन कली साइक्पाइक्ब दोस ताइब गो दुम्ती। १सामुएल २२:९

23 गे एक गो नु बाक्को। महिनो। इ कली साइक्चा माल्बम आं कली साइक्चा माल्शो बाक्ब। गे गो नु मारेइ मद्मुथु बाक्नेवे” दे मदा बाक्त। १राजा २:२६-२७

## 23

### दाऊद सावल रे पा प्रोक्शो

1 मुरपुकीम दाऊद कली “पलिस्तीपुकीम कैलाह नु लडाइ पा अन्न वोइक्तीक रोइक्ना रोइक्न बाक्नीम” देंमा बाक्त। यहोसु १५:४४

2 मिनु दाऊदम परमप्रभु यावे कली “गो लशा पलिस्तीपुकी नु लडाइ पड देय मपड” दे हिल्लो पवा बाक्त। मिनु परमप्रभु यावेम “लशा, मेको आन कली लडाइ तोव्रमी कैलाह कली प्रोनो” देंमाक्त।

3 तन्न दाऊद आ मुरपुकीम मेको कली “गो यहूदा रागीम बाक्शा ला यो हिंनीकी। कैलाह डा पलिस्तीपुकी नु लडाइ पाइतय हना, मेको क्येडा शुश हिंनीकी” देंमा बाक्त।

4 मिनु लेंशा दाऊदमी परमप्रभु यावे कली हिल्लो पवा बाक्त। मिनु परमप्रभु यावेमी “कैलाहम लावो। गो पलिस्ती आन कली इन गुइमी गेनुड” देंमाक्त।

5 मोपतीके दाऊद नु आ मुरपुकी कैलाहम लमा बाक्त। मिनु पलिस्तीपुकी नु लडाइ पामे बाक्त। मेकोपुकीम मेको आन बी ब्यफ रोइक्तमे बाक्त। मेको आन कली मरिश्शो पा फूम बाक्त। मिनु कैलाह डा मुर आन कली प्रोन्मे बाक्त। १सामुएल २२:२०; न्यायाधीस ८:२७

6 अहीमेलेक आ तौ अबीयाथार दाऊद आ बाक्तीक, कैलाह सहर प्रोक्मेनु, निसाफ पतीक ऊरीम नु थुम्मीम बाक्शो झोला यो लाइश्शा लशो बाक्माक्त।

7 दाऊद कैलाह ओव्रशो बाक्ब, दे का निकशी मुरुमी सावल कली शेंदमे बाक्त। मिनु सावलमी “परमप्रभुम मेको कली आं गुइमी गेशो बाक्ब। मारदे हना मेको गारो हिरशो, आग्लो पाइश्शो, सहरम ओव्रशो बाक्ब” दे मिन्ता बाक्त।

8 सावलम आ लडाइ पाइब नेल्ल आन कली कैलाहम लडाइ पा दाऊद नु आ मुर आन कली एर ओंथ रे पुम्चा नम, दे हुकुम पवा बाक्त।

9 मिनु दाऊदमी आमं पर्वम मरिश्शो पचा चिक्शो तुइक्ता बाक्त। मिनु मेकोमी अबीयाथार चढेब कली “निसाफ पतीक ऊरीम नु थुम्मीम बाक्शो झोला चाक्को” दे मदा बाक्त। १सामुएल ३०:७-८

10 मिनु नोले मेकोमी “परमप्रभु यावे, इस्राएली आन परमप्रभु सावल कैलाहम जाक्शा, आं पर्वम एको सहर खतम पोक्चशो बाक्ब, देंशो लोव्र इन गेय पाइबम नेंशो बाक्नुड।

11 मार, कैलाह सहरम बाक्ब मुरपुकीमी आं कली मेको आ गुडम गेनीमी? मार आं नेंशो खोदेशो पा सावल एक जाक्बा? परमप्रभु यावे, इस्राएली आन परमप्रभु, इन गेय पाइब कली शेंदीन” देंमाक्त। मिनु परमप्रभु यावेम “थमा पा मेको एक जाक्ब” देंमाक्त।

12 मिनु दाऊदमी “मार कैलाह डा मुरपुकीमी गो नु आं मुर आन कली सावल आ गुडम गेनीमी?” देंमाक्त। मिनु परमप्रभु यावेम “मो पाइनीम” देंमाक्त।

13 मिनु दाऊदमी आ ६ सहे खोइ मुर लाइशशा, कैलाह रे गाक्माक्त। मिनु तेइ तेइ हिरना हिरन बाक्मा बाक्त। दाऊद कैलाह रे प्रोक्त, देशो लोत्र नेंशा, सावल लेम्माक्त।

14 दाऊद जीफ डा पहाड डा गोरशो रागीमी बोल्यो खुइशशा बाक्तीकेमी खुइशशा बाक्माक्त। सावल मेको कली नाक्त कित कित मालशा गाक्बाक्माक्त। तन्न परमप्रभुम दाऊद कली मेको आ गुडमी मगेवा बाक्त।

15 दाऊद जीफ डा गोरशो रागी डा होरेशम बाक्मेनु, सावलम थमा पा आ कली साइक्चा कली गूशा पिशो बाक्ब, दे तुइक्ता बाक्त।

16 मिनु सावल आ तौ योनाथन दाऊद आ बाक्तीक होरेश जाक्दीम्माक्त। मिनु मेको कली परमप्रभु आ नेंमी आ थुं बारपदा बाक्त।

17 मेकोमी “गे महिनीन। गे आं आफ आ गुड रे मबेक्नीनी। मेकोम इन कली मथिप्ब। गे इस्राएल डा पिप दुम्नीनी। गो इन दी डा दुम्नुड। मेको लोत्र आं आफोम तुइशशो बाक्ब” देंमाक्त। १ सामुएल २०:३०-३१; १ सामुएल २४:२१

18 मिनु नोले मेको निक्शीमी परमप्रभु यावे आ डोंइती कबल पाम्से बाक्त। मिनु दाऊद होरेशम बाक्माक्त। योनाथन चहिं आ खिं लेम्माक्त। १ सामुएल १८:३

19 मिनु जीफ डा मुरपुकीम सावल गिबाम बाक्मेनु “दाऊद आंइ दाते डा बोल्यो खुइशशा बाक्तीक होरेशम बाक्ब। मेको हाकीलाह डांडा रे येशीमोन आ दक्खिन गे बाक्ब। १ सामुएल २६:१; भजन संग्रह ५४:२

20 मुल गे गेना ब्रुप्चा दाक्नीनी, मेना ब्रुपीन। मिनु गो मेको कली इन गुडम गेनीकी” दे लोत्र पामे बाक्त।

21 मिनु सावलमी “थमा पा परमप्रभु यावेम इन कली आसीक गेवल। मारदे हना गो आं कली शिशी पाइतीनी।

22 मुल लशा, चिनु रूपीन। मिनु मेको ते बाक्मे? मेको कली सुम तवा तुइक्तीन। मेको मुर आन मिक्च सिल्व बाक्ब।

23 मेको तेको खुइक्तीकेम बाक्मे, रिम्शो पा रूपीन। मिनु आं बाक्तीक जाक्शा शेंदीनी। मिनु गो गेपुकी नु लाइनुड। मेको एको रागीम बाक्त हना, गो यहूदा आ खिं खिं डा मुर आन दाते रे मालशा गुंइनुड” देंमाक्त।

24 मिनु मेकोपुकी रीब पा सावल क्येडा डोंइती जीफ गे लमा बाक्त। दाऊद नु आ मुर चहिं अराबाह डा माओनम बाक्मा बाक्त। मेको येशीमोन आ दक्खिन गे डा गोरशो रागीम बाक्ब। यहोसु १५:५५

25 सावल आ मुरपुकी नु मेको आन कली मालथ गाक्माक्त। दाऊदमे मेको लोत्र नेंशा, रोंगु लुक्च लशा, माओन डा गोरशो रागीम बाक्मा बाक्त।

26 सावल मेको डांडामी लमाक्त। दाऊद नु आ मुर मेको डांडा आ अर्को पटटी बाक्मा बाक्त। दाऊद नु आ मुरपुकी प्रोक्चा माल्ना माल्न बाक्मा बाक्त। सावल नु मेको आ नोले खोइक्बपुकीम चहिं मेको आन कली ग्याइक्चा कली आन नेक्था जाक्दीम्मा बाक्त।

27 मिनु लोत्र कुरब मुर का सावल आ बाक्तीक जाक्शा “रीब पा जाक्कीन। मारदे हना पलिस्तीपुकीम इन रागीम मारेइ मारेइ रोइक्ना रोइक्न श्येत गेशो बाक्नीम” देंमाक्त।

28 मोपतीके सावल, दाऊद कली खेदा पचा प्रोंइशा, पलिस्तीपुकी नु लडाइ पथ लेम्माक्त। मोपतीके मेको कली “प्रोक्पाइक्ब रोंगु” देंनीम।

29 मेको नोले दाऊद डांडा डोइशशा एन-गेदी डा बोल्यो खुइशशा बाक्तीक मेर बाक्माक्त।

## 24

दाऊद एन-गेदी डा पुक्खीम बाक्शो

1 मिनू सावल पलिस्ती आन कली खेदा पा लेम्मेनु, मुरपुकीमी मेको कली “दाऊद एन-गेदी डा गोरशो रागीम बाक्ब” दे लोत्र पामे बाक्त। यहोसु १५:६२

2 मिनू सावलमी इस्राएल रे योत्रशो हजार सां मुर लाइशशा, दाऊद कली रोकोश आन रोग गे मला बाक्त।

3 मेको लामी भेडा योत्रबपुकी बाक्मा बाक्त। मेको आ नेक्था पुक्खी का यो बाक्माक्त। मिनू सावल मेको आगा डाइक्चा कली ओत्रमाक्त। मेको पुक्खी आ नेल्ल क्येडा आगाम दाऊद नु आ मुरपुकी खुइशशा बाक्शो बाक्मा बाक्त।

4 मिनू दाऊद आ मुरपुकीम “परमप्रभु यावेम देशो खोदेशो पा इन जोरी सत्रु कली इन गुइमी गेतीक नाक्त मुलाक्त बाक्ब। एको कली मार पचा दाक्नीनी मेको पने चाप्नीनी” देमा बाक्त। मिनू दाऊद सिक्सी पा लशा, सावल आ वा आ सुर का रिक्गा बाक्त। भजन संग्रह १४२:१

5 मोपा रिक्गा नोले “ला गो पिप आ वा रिक्ता” दे इक्का हिंमाक्त।

6 मिनू दाऊदम आ मुर आन कली “गो आं ठेयब मुर, परमप्रभु यावेम तेल लुकशो मुर कली मारेइ मपाइनुड। गो मेको कली मसाइक्नुड। मारदे हना मेको परमप्रभु यावे आ तेल लुकशो मुर बाक्ब” देमाक्त।

7 मोपा दाऊदम आ मुर आन कली हुइशशा, सावल कली मारेइ पाइक्चा मगेमी बाक्त। मिनू सावल बोक्शा, पुक्खी रे आ लां खोदा बाक्त। १सामुएल १:३४

8 मेको नोले दाऊद यो पुक्खी रे लाडगा गूमाक्त। मिनू सावल कली “आं प्रभु, आं पिप” दे ब्रेत्ता बाक्त। मिनू सावल आ नोले लेशशा कोत्रडा बाक्त। मिनू दाऊद बाप्शा खुम्की पा सेउ पवा बाक्त।

9 मिनू दाऊदमी “गे मारदे आं पबंम मुर आन लोत्र नैनीनी? गो इन कली मरिम्शो पाइब, दे थमा सुइक्नीनी?”

10 मुलाक्त गेन तुइक्ताक्नी। मुलाक्त पुक्खी आगाम परमप्रभु यावेमी इन कली आं गुइम गेशो बाक्त। का निक्शीम ‘इन कली साइक्चा’ थुं पाम्तेक्म। तन्न गो इन कली प्रोइशा सोइक्ताक्ड। मिनू गो ‘आं प्रभु, इन कली मसाइक्नुड। मारदे हना मेको परमप्रभु यावे आ तेल लुकशो मुर बाक्ब’ देती।

11 कोत्रडीन, आं आफ एको आं गुइम बाक्शो वा कोत्रडीन। गो एको रिक्ता, तन्न इन कली मसदु। मोपतीके गे रुपीन। गो इन कली श्येत गेचा नु साइक्चा ममिम्तु। गो इन कली मारेइ पाप मपड। मो हना यो गे आं कली साइक्चा दाक्नीनी।

12 परमप्रभु यावेम इस दातेम निसाफ पवल। मेकोमी आं पबंम इन कली क्येक्क लेत्ताक्व हना यो, गो इन कली मारेइ मपाइनुड।

13 साइ डोंडती डा लोत्रमी ‘मरिम्शोमी मरिम्शोन जाक्ब’ देशो बाक्ब। मो हना यो गो आं गुइ इन पबंम मक्युक्नुड। रोमी १२:१९; १ पत्रुस २:२३

14 इस्राएल डा पिप सु का आ पबंम बोक्शो बाक्बा? गे सु कली खेदा पना पन बाक्नीनी? बेक्शो कुचुम, चुक्बे का कली खेदा पाइनीनी?

15 परमप्रभु यावे निसाफ पाइब बाक्ब। मिनू मेकोमी इस दातेम निसाफ पवल। परमप्रभु यावेम कोत्रडल। आं परमप्रभु यावेम आं कली इन गुइ रे प्रोइब” देमाक्त।

16 मिनू दाऊद ब्वाक्ने थुमा नोले, सावलम “मार, मेको इ सेंदा बाक्ब, आं तौ दाऊद?” देशा, डाक्माक्त।

17 मिनू मेकोमी दाऊद कली “गे आं क्येडा ठीक पाइब मुर बाक्नेवे। गे आं कली रिम्शो पाप्तीवी। गो चहिं इ कली मरिम्शो पाता।

18 मुलाक्त गे आं कली रिम्शो पाप्तीवी। परमप्रभु यावेमी मुलाक्त आं कली इ गुइम गेप्तु। तन्न गे आं कली मसाइय्यी।

19 सुइमी आंम जोरी सत्रु आन कली थिश्शा, रिम्शो पा लचा मगेब। मोपतीके मुलाक्त इ पशो गेय आ पबंम परमप्रभु यावेम इ कली इनाम गेवल।



20 मुल गो थमा पा तुइक्ताकड गे पिप दुम्नेवे। इ पालाम इस्राएलम थम रिम्शो दुम्ब।

21 मोपतीके परमप्रभु यावे आ नेम आं खिं डा मुर आन कली, आं चच युइ आन कली खतम मपाइनुड। आं नें आं आफ आ खिं रे मक्याम्नुड, दे कसम जावो” देंमाक्त। १सामुएल २३:१७

22 मिनु दाऊदमी सावल नु कसम जवा बाक्त। मिनु सावल आ खिं लेम्माक्त। दाऊद नु आ मुरपुकी चहिं आन बोल्यो खुइश्शा बाक्तीक पुक्खीम लेम्मा बाक्त।

## 25

### सामुएल बेक्शो

1 मिनु सामुएल बेक्माक्त। मिनु इस्राएली नेल्ल बुक्शा, मेको आ परबम रोंका पामे बाक्त। मेको कली आ खिं रामाह उइ थिम्मे बाक्त। मेको नोले दाऊद पारान डा गोरशो रागीम बुम्माक्त। १सामुएल २८:३

### दाऊद, नाबाल नु अबीगेल

2 माओनमी कारमेल डा मुर का बाक्माक्त। मेको शुश शोंप पाइश्शो मुर बाक्माक्त। मेको के हजार सां भेडा नु हजार का क्यारश बाक्मा बाक्त। मेको कारमेलम आ भेडा आन ऊन प्रेक्शो बाक्माक्त। यहोसु १५:५५

3 मेको आ नें नाबाल बाक्माक्त। आ मीश आ नें अबीगेल बाक्माक्त। अबीगेल दारशो नु निप्स पाइश्शो मीश मुर बाक्माक्त। मेको आ वोइश, कालेब आ चच युइ, खकटा थुं पाइश्शो मरिम्शो पाइब बाक्माक्त।

4 दाऊदमी गोरशो रागीम “नाबालमी आ भेडा आन ऊन प्रेक्शो बाक्ब” देशो लोव्र नेना बाक्त।

5 मिनु दाऊदमी आ १० ठिटा मुर आन कली “कारमेल लने। मिनु नाबाल कली ग्रुमीन। मिनु मेको कली आं नेंमी ‘रिम्शो बाक्कीन’ मतीन।

6 मिनु मार देनीन देशा हना ‘इन थुं नाइसेक्ल। इन खिं डा मुर थुं नाइश्शा बाक्चा तामेक्ल। गे नु बाक्ब नेल्ले थुं नाइश्शा बाक्मल।

7 गे नु भेडा आ ऊन प्रेक्ब मुर बाक्नीम, देशो लोव्र नेंता। इन भेडा योव्रबपुकी गो नु बाक्शो बाक्तेक्म। मिनु गो मेको आन कली मारेइ मरिम्शो मपक। मेकोपुकी कारमेलम बाक्मानु, मेको आन के मारेइ मजाम।

8 इन ठिटा आन कली हिल्लो पने। मिनु मेकोपुकीम इन कली शेनीम। मोपतीके आं मुर आन कली रिम्शो पा शिशी पा ब्रने। मारदे हना मुलाक्त चाड का बाक्ब। इन गेय पाइब नु इन तौ दाऊद कली मार गेने चाप्नीनी मेको गेने’ देंत, दे मतीन” देंमाक्त।

9 मिनु दाऊद आ ठिटा मुरपुकी लशा, नाबाल कली दाऊद आ नेंमी मेको लोव्र नेल्ल मदमे बाक्त। मिनु रिम्तमे बाक्त।

10 तन्न नाबालमी दाऊद आ मुर आन कली “दाऊद माइश्शो सु बाक्बा? येस्से आ तौ बाक्बा? सिनाक्त मुलाक्ती आन होव्रप रे प्रोक्शो वाइल शुश बाक्नीम।

11 आं शोब्ले, आं ब्वाक्कु नु ऊन प्रेक्ब आन कली सेल्लो श्ये लाइश्शा, मतुइश्शो मुर आन कली गेनुडा?” दे माइक्मी बाक्त।

12 मिनु दाऊद आ ठिटा मुरपुकी लेश्शा, जाक्दीश्शा, दाऊद कली मेको लोव्र नेल्ल शेंदमे बाक्त।

13 मिनु दाऊदम आ मुर आन कली “नेल्लेमी आंम आंम तरवार पिम्सीन” देंमाक्त। दाऊदमी यो आ तरवार पिम्से बाक्त। मिनु ४ सहे जना खोइ मुर दाऊद आ नोले खोदमे बाक्त। सहे निकशी मुर चहिं मार मार खाल पचा कली मेक उइ बाक्मा बाक्त।

14 मिनु नाबाल आ ठिटा मुर कामी नाबाल आ मीश अबीगेल कली “दाऊदम गोरशो रागी रे आ मुर आन कली आंइ होव्रप कली मान पा, मार मार पुंइथ सोइश्शो बाक्त। तन्न आंइ होव्रपमी मेको आन कली हुइक्ताक्व।

15 मेको मुरपुकीम आंइ कली रिम्शो पशो नम। आंइ कली मारेइ श्येत मगेम। गोपुकी मेकोपुकी नु ब्वाक्कीम नाक्दो नाक्ती एर ओंथ पकानु, आंइ के मारेइ मजाम।

16 गो आंड भेडा योव्रदीकानु, मेकोपुकी नाकदो नाकती आंड एर ओंथ गारो खोदेशो पा बाक्तेकम।

17 गे मार पचा माल्नीनी मेको रिम्शो पा मिम्तीन। मारदे हना, आंड होव्रप नु आ खिं थमा पा खतम दुम्ब। आंड होव्रप थम मरिम्शो बाक्ब। मेको नु लोव्र पने सुइ मचाप्ब” देमाक्त।

18 मोपतीके अबीगेलम रीब पा सहे निक्शी शोब्ले, थैलो निक्शी अडगुर शांबु, क्योरशा ठीक सेल्शो ५ ओटा भेडा, ५ एफाह तांब्रा, सहे का सोव्रपाइश्शो अडगुर के शोब्ले नु सहे निक्शी सोव्रपाइश्शो फोव्रशी गेडा के शोब्ले ठीक पा गधा आन कली कुरपदा बाक्त। एफाह का ७ लिटर खोदेशो पा रीब।

19 मिनु मेकोमी आ ठिटा गेय पाइब आन कली “गे आं डोंइती लने। गो इन नोले पीनुड” माइकमी बाक्त। तन्न आ वोंइश नाबाल कली मेको मशेंदा बाक्त।

20 मिनु मेको डांडाम फारतीक रे गधा लना लन बाक्मानु, दाऊद नु आ मुरपुकी मेको आन गे लुकच बुम्ना बुम्न बाक्मा बाक्त। मिनु अबीगेलमी मेको आन कली गुमा बाक्त।

21 मिनु दाऊदमी “गोरशो रागीम मारेइ मजाम्चा डा पा, मेको मुर आ मार मार खाल पशो मोशा दुम्त। मेकोम आ कली रिम्शो पाइश्शो आ पा डा, आं कली मरिम्शो पाइक्ती” देमाक्त।

22 मिनु दाऊदमी “दीसा सुनी सम्म गो मेको आ खिं डा वोंइश मुर नेल्ल मसाइक्ताकमी हना, परमप्रभुम आं कली मोन पवल” दे कसम जवा बाक्त।

23 मिनु अबीगेलमी दाऊद कली तशा, आ गधा रे फ्रु तोइश्शा, दाऊद आ डोंइती बाम्माक्त।

24 मेको आ खोइलीम बाप्शा “आ प्रभु, दोस ताइब गो नड। इन वाइलीम कली ब्वाक्चा गेने। आं लोव्र नेनीन।

25 आ प्रभु, मेको शोर गाक्शो मुर आ पर्वम मगाइक्तीन। मेको आ नें दोपा नाबाल बाक्मे, मेको मो देशोन बाक्ब। आ नें नाबाल बाक्ब। मिनु मेको मूर्ख बाक्ब। तन्न गो, इन गेय पाइबम, इन सोइश्शो ठिटा आन कली मतडमी।

26 आ प्रभु, परमप्रभु यावे ब्रोंइशा बाक्शो खोदेशो पा नु इन ब्रोंइशा बाक्शो खोदेशो पा, परमप्रभु यावेमी इन कली हुश खाक्श पोक्तीक नु क्येक्क लेत्तीक रे तेक्शो बाक्ब। इन जोरी सत्रु नु इन कली मरिम्शो पाइब नाबाल खोदेशो दुम्मल।

27 मिनु इन गेय पाइबम, आ प्रभु, इन कली चाक्शो कोसेली इन नोले खोइक्ब ठिटा आन कली गेन।

28 इन गेय पाइब आ मरिम्शो पशो डा आं कली माफ गेयीनी। परमप्रभु यावेमी आं प्रभु, इन खिं डा मुर आन कली गेना हना यो रिम्शो पवल। मारदे हना गे परमप्रभु यावे आ पर्वम लडाइ पशो बाक्नीनी। गे बाक्नी सम्म इन कली मारेइ मरिम्शो मदुम्ब। २सामुएल ७:१६

29 सुइ मुरुम इन कली खेदा पा साइक्चा माल्तु हना, परमप्रभु यावे, इन परमप्रभुमी इन कली कोव्रब। तन्न इन जोरी सत्रु आन कली चहिं हुरदम वोइश्शा ताइश्शो फुल्लु खोदेशो पा ताइक्ब। भजन संग्रह ६९:२९

30 परमप्रभु यावेम आं प्रभु, इन कली, आ देशो खोदेशो पा रिम्शो पाप्तु हना नु इन कली इस्राएल डा सासन पाइब सेल्लु हना, २सामुएल ५:२

31 गे मो हुश खाक्श पोक्तीक नु इन गाइश्शोमी मरिम्शो पशो आ पर्वम सुरता पचा ममाल्नीनी। इन थुं खाइक्पाइक्चा ममाल्नीनी। मिनु परमप्रभु यावेमी इन कली रिम्शो पाप्तु हना, इन गेय पाइब, आं कली यो मिम्तीन” देमाक्त।

32 मिनु दाऊदमी अबीगेल कली “मुलाक्ती आं कली गुम्पाइक्चा कली इन कली सोइक्ब परमप्रभु यावे, इस्राएली आन परमप्रभु ठेयब बाक्ल।

33 इन मिम्तीक रिम्शो बाक्ब। गे मुलाक्ती आं कली हुश खाक्श पोक्तीक नु क्येक्क लेत्तीक रे तेक्तीके आसीक राइनीनी।

34 मिनु परमप्रभु यावेम आं कली इ कली श्येत गेतीके रे तेक्शो बाक्ब। मारदे हना गे रीब पा आं कली गुम्थ जाक्तीनी। मो मपशो ननी हना परमप्रभु यावे, इस्राएली आन परमप्रभु ब्रोंइशा बाक्शो खोदेशो पा, सुनी सम्म नाबाल आ खिं डा वोंइश मुर का सम्म यो मलीम वा” देमाक्त।

35 मिनु दाऊदमी अबीगेलमी आ कली चाकशो कोसेली ब्रवा बाक्त। मिनु “इन थुं नाइशशा खिं लेतीन। गो इन लोत्र नेंशा बिस्साक्यी” देंमाक्त।

36 मिनु अबीगेल लेशशा जाकमेनु, नाबालमी आ खिंमी, पिपम खोदेशो पा ठेयब भोज सेल्शा भोज पशो तवा बाक्त। नाबाल ग्येरसीशा शांबुम दुक्शा बाकशो बाकमाक्त। मेको थाम्पा दुक्शा बाकतीके आ मीशेमी सुनी सम्म रिम्शो मरिम्शो मारेइ शेने मचबा बाक्त।

37 सुनी शांबुम प्रोना नोले आ मीशेमी लोत्र नेल्ल शेंदा बाक्त। मिनु मेको आ लुङगीर खाइशशा, फुल्लु खोदेशो दुम्माक्त।

38 मिनु १० नाक्त नोले परमप्रभु यावेमी मेको कली बेक्पदा बाक्त।

39 मिनु दाऊदम नाबाल बेकशो लोत्र नेंशा मेकोमी “परमप्रभु यावे ठेयब बाक्ब। मारदे हना मेकोमी आं कली मरिम्शो पशो आ पबंम नाबाल कली सजाइ गेप्टु। मिनु आ गेय पाइब, आं कली मरिम्शो पतीक रे तेक्ती। नाबाल आ मरिम्शो पशो आ पियामीन मोइक्तु” देंमाक्त। मिनु दाऊदमी अबीगेल कली आ मीश सेल्चा कली लोत्र पथ मुर सोइक्ता बाक्त।

40 मिनु दाऊद आ गेय पाइबपुकी अबीगेल आ बाकतीक कारमेल लशा, मेको कली “दाऊदमी गे नु ग्युंवे पचा कली आंइ कली ब्रथ सोइक्ताक्व” देंमा बाक्त।

41 मिनु अबीगेल बोक्शा बाप्शा सेउ पा “गो इन गेय पाइब आन खोइल चिक्ब वाइलीम नड” देंमाक्त।

42 मिनु अबीगेल रीब पा सासे बाक्त। गधा डोइशशा आ ५ जना गेय पाइब लाइशशा लोत्र चाक्ब दाऊद आ मुरपुकी नु लमाक्त। मिनु मेको आ मीश दुम्माक्त। १सामुएल २७:३; १सामुएल ३०:५; २सामुएल ३:३

43 दाऊदम मेको क्येडा डोंइती येजेले डा अहीनोआम कली यो ग्युंवे पशो बाकमाक्त। मिनु मेको निम्फा मेको आ मीश दुम्सा बाक्त।

44 मेना सावलमी आ तमी, दाऊद आ मीश मिकाल कली गाल्लीम डा लाइश आ तौ पाल्ती कली गेवा बाक्त। २सामुएल ३:१४-१५

## 26

### दाऊदम सावल कली मसाइशशो

1 मिनु जीफ डा मुरपुकी सावल आ बाकतीक गिबाम जाकशा “दाऊद येशीमोन आ आइक्ची हाम हाकीलाह डांडाम खुइशशा बाकशो बाक्ब” दे शेंदमे बाक्त। १सामुएल २३:१९-२४:२३; भजन संग्रह ५४:२

2 मिनु सावलमी दाऊद कली माल्चा, दे हजार सां इसाएल डा योत्रशो मुरपुकी लाइशशा, रीब पा जीफ डा गोरशो रागी गे लमाक्त।

3 येशीमोन आइक्ची हाम डा हाकीलाह डांडा डा लां आ नेक्था आन बाकतीक सेल्मे बाक्त। मेना दाऊद चहिं गोरशो रागीमी बाकमाक्त। मिनु सावलम आ कली खेदा पचा कली गोरशो रागीम जाकशो बाक्ब देशो लोत्र नेंना चोटीन

4 दाऊदमी क्यारी पाइबपुकी सोइक्ता बाक्त। मिनु सावल आ बाकतीके तुइशशा लेम्मा बाक्त।

5 मिनु दाऊद सावल आ बाकतीक गे लमाक्त। मिनु सावल नु आ लडाइ पाइब आन नेल्ल क्येडा ठेयब मुर, नेर आ तौ आब्नेर इप्शा बाकशो थिदा बाक्त। आ मुर नेल्लेम एर ओंथ रे हिरतीकेमी सावल इप्शो बाकमाक्त। १सामुएल १४:५०

6 दाऊदमी हिती अहीमेलेक नु सेरूयाह आ तौ योआब आ लोकब अबीशै गे लेशशा कोत्रशा “सावल आ बाकतीकेम गो नु सु लने चाप्वा” देंमाक्त। मिनु अबीशैमी “गो लाइनुड” देंमाक्त।

7 मिनु नाकदो दाऊद नु अबीशै सावल आ बाकतीकेम ओत्रसा बाक्त। मिनु सावल आ मुर आन दातेमी आ तूतीक आ पिया गे खुक्शा, इप्शो थित्से बाक्त। आब्नेर नु आ मुरपुकी चहिं सावल आ एर ओंथ हिरशा इप्शो बाक्मा बाक्त।

8 मिनु अबीशैमी दाऊद कली “परमप्रभुम मुलाक्ती इन जोरी सत्रु आन कली इन गुडमी गेशो बाक्माक्त। तूतीकेम कालेमीन खप सम्म युक्सीचा डा पा आप्चा कली हुकुम गोयीनी। गो खेयप निक्शी आप्चा ममालडल” देंमाक्त। २सामुएल १६:९

9 तन्न दाऊदमी अबीशै कली “पिप कली साइक्चा ममिम्तो। परमप्रभु यावे आ तेल लुक्शो कली साइक्बपुकी सु चहिं सजाइ मतशो बाक्बा डा?” देंमाक्त।

10 मिनु दाऊदमी लेंशा “परमप्रभु यावे ब्रोंडशा बाक्शो खोदेशो पा, मेकोमीन मेको कली काबु साइक्ब कि आ बेक्ची नाक्त जाक्शा बेक्ब कि लडाइम लशा साइक्चा पुंडसीब। १सामुएल २४:१३

11 गो परमप्रभु यावे आ तेल लुक्शो पिप कली गेनायो मरिम्शो मपाइनुड। तन्न मुल मेको आ पिया गे खुक्शो तूतीक नु आ ब्वाक्कु तूतीक ग्योब कुरशा गाक्स” देंमाक्त।

12 मिनु दाऊदम मेको आ पिया आ नेक्था बाक्शो तूतीक नु आ ब्वाक्क तूतीक कुरशा गाक्सा बाक्त। सुडमी मेको आस कली मतामे बाक्त। मिनु सुड मसेंसीमा बाक्त। मारदे हना परमप्रभु यावेम मेको आन कली मारेइ मतुइक्चा डा पा निन्द्रा पपदा बाक्त। उत्पत्ती १५:१२

13 मिनु दाऊद आइक्ची हाम लशा, डांडा डोइश्शा मेको आन क्येडा डोन राम्माक्त।

14 मिनु दाऊदम नेर आ तौ आब्नेर आ नें थिशा “ए आब्नेर, गे आं लोत्र लेत्ती” देंमाक्त। मिनु आब्नेरमी “गे पिप कली हुइश्शा लोत्र पाइब सु नवे” देंमाक्त।

15 मिनु दाऊदमी आब्नेर कली “मार गे मुर मनवे। मार इस्राएलमी अरु यो इ खोदेशो मुर बाक्नीमी? गे मारदे इ प्रभु, पिप कली रिम्शो पा खाल मपवी? मारदे हना आं मुर का इ प्रभु, इ पिप कली साइक्चा कली मेकेर जाक्त।

16 इन पशो मरिम्शो बाक्ब। परमप्रभु यावे ब्रोंडशा बाक्शो खोदेशो पा गे साइक्चा पुंडसीचा डा बाक्नीनी। मारदे हना गे इन प्रभु कली खाल मपनी। परमप्रभु यावे आ तेल लुक्शो कली खाल मपनी। लो कोवडीन, मेको इन पिप आ पिया गे बाक्शो आ तूतीक नु ब्वाक्कु तूतीक ग्योब ते बाक्म?” देंमाक्त।

17 मेना सावलमी दाऊद आ सेंदा नेंशा “आं तौ दाऊद, मेको इ सेंदा बाक्बा?” देंमाक्त। मिनु दाऊदमी “आं प्रभु, आं पिप, आं सेंदा बाक्ब” दे लोत्र लेत्ता बाक्त

18 मिनु दाऊदम “आं प्रभु, मारदे गे इन गेय पाइब, आं कली, खेदा पाइनीनी? गो मार पडा डा? आं दोस मार बाक्बा?

19 मोपतीके आं प्रभु नु आं पिप, इन गेय पाइब, आं लोत्र नेनीन। परमप्रभु यावेमी इन कली आं कली खेदा पपाइक्चा कली पोक्शो बाक्त हना, मेकोमी चढेतीक का ब्राइबा कों। तन्न बेक्शा लाइब मुरुम इन कली आं कली खेदा पचा कली पोक्शो बाक्त हना, मेको परमप्रभु यावे आ डोंइती सराप रल। मारदे हना मेकोपुकीम मुलाक्त आं कली परमप्रभु यावे आ गेशो रू रे खेरशा ‘लावो, अरु देवी देवता आन कली सेउ पावो’ दे लोत्र पांतेक्म। उत्पत्ती ८:२१; ब्यवस्था ३२:९; २राजा ५:१७

20 मोपतीके परमप्रभु यावे क्येडा डोन आं हुश मशाइक्पतीन। मारदे हना इस्राएल डा पिप चुक्बे का कली माल्थ ग्रूशो बाक्ब। मेको पहाडम थेल्मी सिखार ग्यारशो खोदेशो दुम्त” दे सावल कली देंमाक्त।

21 मिनु सावलमी “गो मरिम्शो पाता। आं तौ दाऊद, लेशशा जाक्को। मुलाक्ती गे आं कली ब्रोंडचा गेती मुल रे गो इ कली गेनायो श्येत मगेनुड। गो मूर्ख दुम्ती। गो थमा पा मरिम्शो पाता” देंमाक्त।

22 मिनु दाऊदमी “पिप आ तूतीक एक बाक्ब। इन ठिटा मुर का कुशा लदल।

23 परमप्रभु यावेम ठीक पाइब नु थमा सुइक्चा पुंडसीब मुर आन कली इनाम गेब। मिनु मुलाक्ती परमप्रभु यावेमी इन कली आं गुडमी गेप्टु। तन्न गो परमप्रभु यावे आ तेल लुक्शो कली साइक्बे मबिस्सीड।

24 दोपा मुलाक्त गो इन ब्रोंडतीक ठेयब मिम्तु, मोपा परमप्रभु यावेम आं ब्रोंडतीक कली ठेयब मिम्तल। मिनु आं कली हिंचा डा श्येत नेल्ल रे प्रोंइयील” देंमाक्त।

25 मिनु सावलमी दाऊद कली “आं तौ दाऊद, गे आसीक र्वेल। गे शुश गेय पशा, नेल्ल रिम्शो पाइनेवे। मिनु गे ग्रानेवे” देंमाक्त। मिनु दाऊद आ लां खोदा बाक्त। सावल चहिं आ बाक्तीक मेर लेम्माक्त।

## 27

### दाऊदमी बाक्तीक पुंड्रशो

1 दाऊदमी “काबु सावलम आं कली साइक्ब। मोपतीके पलिस्ती आन रागीम आं कली प्रोक्शा लचा रिम्शो दुम्ब। मिनु सावलमी इस्राएल आगामी आं कली माल्चा प्रोइब। मिनु गो मेको आ गुइ रे ब्रॉइनुड” दे मिम्ता बाक्त। १ सामुएल २३:२३

2 मोपतीके दाऊद नु आ ६ सहे मुर रीब पा सांद लाक्शा, गाथ डा पिप माओक आ तौ अकीश आ बाक्तीकेम लमा बाक्त। १ सामुएल २१:११-१६

3 दाऊद आ लडाइ पाइब मुर, मेको आन खिं डा मुर नु दाऊद नु आ मीश निक्शी, येजेल् डा अहीनोआम नु कारमेल डा बेक्शो नाबाल आ मीश अबीगेल गाथम अकीश नु बाक्मा बाक्त। १ सामुएल २५:४०-४३

4 दाऊद गाथम प्रोक्शा लत देशो लोत्र मुरुमी सावल कली नैपदमे बाक्त। मिनु मेकोम दाऊद कली माल्चा प्रोना बाक्त।

5 दाऊदम अकीश कली “गे आं कली शिशी पाइतीनी हना, आं कली इन रागी डा तेकोइ सहरम बाक्चा गेयीनी। गो दोपा पिप नु पिप आ सहरम बाक्नुडा?” देंमाक्त।

6 मिनु मेको नाक्ती अकीशम मेको कली सिकलाग गेवा बाक्त। मोपतीके मुल सम्म सिकलाग यहूदा डा पिप आन के बाक्ब। यहोसु १५:३१

7 दाऊद पलिस्ती आन रागीम बर्स का ४ महिना सम्म बाक्माक्त।

8 दाऊद नु मेको आ मुरपुकी लडाइ पथ यूमानु, गेशुरी, गिञ्जी अमालेकी आन मारेइ मारेइ रोइक्बाक्मा बाक्त। मारदे हना मेकोपुकी तेलाम रे शुर सम्म नु इजीप्त सम्म बाक्बाक्मा बाक्त।

9 दाऊदमी मेको आन रागीम मार मार रोइक्तानु, मेकेर डा वोंइश मुर मीश मुर सुइ आन कली का यो मवोइक्थु साइक्बाक्माक्त। क्यारश भेडा, बी ब्यफ, गधा, दलओठ वासी नेल्ल लाइश्शा अकीश आन बाक्तीक लेप्बाक्मा बाक्त।

10 मिनु अकीशमी मेको कली “मुलाक्त गे ते रोइक्तीनी” दे हिल्लो पाइक्बाक्माक्त। मिनु मेकोमी “यहूदा रागी डा नेगेब, येराहमेल आ मुर आन नेगेब नु केनी आन नेगेबम रोइक्ताक्क” देंबाक्माक्त।

11 दाऊदमी सेस मीश मुर वोंइश मुर आन कली गाथम मचाक्बाक्माक्त। मारदे हना मेको आन पशो गेय आ पर्बम दाऊद नु आ मुर आन कली मरिम्शो सेल्नीम, दे दाऊद हिंबाक्माक्त। पलिस्ती नु बाक्म सम्म मेकोम मोदेशो पवा बाक्त।

12 अकीशम “दाऊदम आंम रागी इस्राएलमी मरिम्शो पतीके मेक बाक्चा मताइब। मोपतीके गेना हना यो आं मुर दुम्शा गो नु बाक्ब” दे मिम्शो बाक्माक्त।

## 28

### लडाइ दुम्चशो

1 मेना पलिस्तीपुकीम इस्राएल नु लडाइ पचा, दे आन लडाइ पाइब मुर आन कली खुप्तमे बाक्त। मिनु अकीशम दाऊद कली “गे नु इ मुरपुकी लडाइ पचा कली गो नु लडाइ पतीकेम लचा माल्नीनी। देशो लोत्र तुइश्शो बाक्डे माइ” देंमाक्त।

2 मिनु दाऊदमी अकीश कली “दुम्ब इन गेय पाइबम मार पने चाप्बा, मेको गे तुइक्नीनी” देंमाक्त। मिनु अकीशमी दाऊद कली “गो इ कली बाक्डे सम्म आं कली खाल पाइब सेल्नन” देंमाक्त।

सावल नु एन-डोर डा मीश मुर

3 सामुएल बेक्ने थुम्शो बाक्माक्त। मिनु इस्राएली नेल्लेमी मेको आ परबम रोंका पा मेको कली मेको आ सहर रामाहम थिम्शो बाक्मा बाक्त। सावलमी बेक्शो मुर रे लोत्र पाइब नु लिंक्यु कोत्रब आन कली मेको रागी रे गुंडने थुम्शो बाक्माक्त। १सामुएल २५:१; प्रस्थान २२:१७

4 पलिस्तीपुकीमी नेल्ल क्येडा सक्ति पाइशो आन लडाइ पाइब आन कली गुम्पाइशशा, शुनेम सहरम आन बाक्तीक सेल्मे बाक्त। सावलम इस्राएली नेल्ल आन कली गुम्पाइशशा गिलबोआम आन बाक्तीक सेल्शा बाक्मा बाक्त। यहोसु १९:१८

5 मिनु सावल पलिस्ती आन नेल्ल क्येडा सक्ति पाइशो लडाइ पाइब कली तशा, थाम्पा हिंशा खिंखि पवा बाक्त।

6 मिनु सावलम परमप्रभु यावे कली हिल्लो पवा बाक्त। तन्न परमप्रभु यावेम डोमुम, ऊरीम नु परमप्रभु यावे आ लोत्र पाइब आन रे लोत्र मलेत्ता बाक्त। १सामुएल १४:४१; प्रस्थान २८:३०

7 मोपतीके मेकोमी आ गेय पाइब आन कली “आं कली बेक्शो मुर नु लोत्र पाइब मीश मुर का मालीन। गो मेकेर लशा, मेको कली हिल्लो पाइनुड” देमाक्त। मिनु “एन-डोरम मोदेशो मीश मुर का बाक्ब” दे आ गेय पाइबपुकीमी देमा बाक्त। लेवी १९:३१

8 मिनु सावल अर्को वा फेक्शा, आ मुर निक्शी नु मेकेर लमाक्त। मिनु नाकदो मेको मीश मुर आ बाक्तीक जाक्दीशा, मेको कली “आं कली मार दुम्बा बेक्शो मुर कली हिल्लो पा शेदीनी। मिनु गो तेको बेक्शो मुर कली ब्रेत्चा देनुडा, मेको कली ब्रेत्तीन” देमाक्त।

9 मेको मीश मुरुम मेको कली “सावलम मार पवा मेको गे तुइक्नीनी। मेकोमी बेक्शो मुर नु लोत्र पाइब नु लिंक्यु कोत्रब नेल्ल कली रागी रे गुंडशा खेरतु। मिनु गे मारदे आं कली साइक्पाइक्चा कली ओदेशो गेय पपाइक्चा माल्नीनी?” देमाक्त।

10 मिनु सावलमी परमप्रभु यावे आ नैम कसम जशा, मेको कली “परमप्रभु यावे ब्रोंइशा बाक्शो खोदेशो पा, गे एको गेय आ परबम मारेइ सजाइ मताइनीनी” देमाक्त।

11 मिनु मेको मीश मुरुम “सु कली ब्रेत्चा” दे हिल्लो पवा बाक्त। मिनु सावलमी “सामुएल कली ब्रेत्चा” देमाक्त।

12 मिनु मेको मीश मुरुमी सामुएल कली तशा ठेयब सेंदा पा ग्रीशा सावल कली “गे आं कली मारदे मरिम्शो पवी? गे सावल बाक्डे बाक्त” देमाक्त।

13 मिनु पिपम मेको कली “महिनी। गे मार तवी” देमाक्त। मिनु मेको मीश मुरुम “गो स्वर्ग डा गेय पाइब खोदेशो खप रे गूशो ताता” देमाक्त।

14 मिनु सावलमी “मेको दोदेशो बाक्मे” दे हिल्लो पवा बाक्त। मिनु मेकोमी “खूशो मुर का गूशा कुत। मेकोमी दारशो वा फेक्शो बाक्त” देमाक्त। मिनु सावलमी मेको सामुएल बाक्ब, दे तुइशशा खुम्की पा बाप्शा सेउ पवा बाक्त।

15 मिनु सामुएलमी सावल कली “गे मारदे आं कली श्येत गेशा, गुंडदीनी?” देमाक्त। मिनु सावलमी “गो थम ठेयब श्येतम बाक्नुड। पलिस्तीपुकीम आं कली लडाइ तोशो बाक्नीम। परमप्रभुम आं कली प्रोंइती। मेकोम आं कली आ लोत्र पाइब नु डोमु रे लोत्र मलेत्ती। मोपतीके गो इन कली ‘मुल मार पचा माल्नुडा’ दे हिल्लो पचा कली ब्रेत्ताक्नीनी” देमाक्त।

16 मिनु सामुएलमी “परमप्रभु यावेम इ कली प्रोंइशा, इ जोरी सत्रु दुम्शो बाक्ब, दे तुइशशा यो, गे आं कली मारदे हिल्लो पयी।

17 परमप्रभु यावेम डोंइती आं कली देशो खोदेशो पा पाप्तु। परमप्रभु यावेमी मेको राज्य इ गुइ रे लाइशशा, इ नेक्था डा मुर दाऊद कली गेशो बाक्ब। १सामुएल १५:२८

18 मारदे हना गे परमप्रभु यावे आ देशो मटिवी। अमालेकी आन परबम परमप्रभु यावे आ गाइशो गे मखबी। मोपतीके मेकोम मोदेशो पाप्तु। १सामुएल १५:१८-१९; प्रस्थान १७:१४,१६

19 मुल चिनु तेम्शा, परमप्रभु यावेमी इस्राएली नु इ कली पलिस्ती आन गुइमी गेब। दीसा गे नु इ तौपुकी गो नु बाक्नीनी। परमप्रभु यावेमी इस्राएल डा लडाइ पाइब नेल्ल आन कली पलिस्ती आन गुइमी गेब” देमाक्त। १सामुएल ३१:६

20 मिनु सावल सामुएल आ लोव्र नेंशा हिंशा, आ थुं ग्येथ लुकच दुम्शा, खपीम गोल्माक्त। मिनु नाक्त रे नाक्टो रे मारेड मजतीके मेको आ बोल नेल्ल जाम्माक्त।

21 मिनु मेको मीश मुर सावल आ नेक्था लशा, सावल शुश हिंशो तशा, सावल कली “गो बेक्चा आ पबंम महिंथु, इन देंशो टीता।

22 मोपतीके मुल गे आं लोव्र नेनीन। गो इन कली जचा थोव्रक गेनुड। बोल्यो दुम्शा इन लां गाक्चा कली मेको जने” देमाक्त।

23 मिनु सावलमी “गो मजाइनुड” देमाक्त। तन्न आ गेय पाइबमी यो मेको मीश मुर आ देंशो लोव्रमी लोव्र तेम्दा बाक्त। मिनु मेको आन देंशो लोव्र बिश्शा, खप रे बोक्शा, खाटम निस्से बाक्त।

24 मेको मीश मुर आ खिंमी दोम्शो बाछा का बाक्माक्त। मेको मीश मुरुम मेको बाछा क्योरशा क्येशा, फस निवा बाक्त। मिनु बोर्ब ओस्ती मसुप्शो शोब्ले चोवा बाक्त। प्रस्थान १२:३९

25 मिनु मेकोमी, सावल नु आ गेय पाइब आन कली खेत्तीमी बाक्त। मिनु मेकोपुकीम मेको जशा ब्वशा मेको नाक्टोन गाक्मा बाक्त।

## 29

### दाऊद पलिस्ती नु ब्राशो

1 पलिस्तीपुकीमी लडाइ पाइब आन कली अफेकम पुक्गमे बाक्त। इस्राएलीपुकीम चहिं येजेल डा ब्वाक्कु बुक्तीकेम आन बाक्तीक सेल्मे बाक्त। १सामुएल ४:१; यहोसु १५:५३

2 पलिस्ती आन ठेयब मुरुम आन नेल्ल क्येडा सक्ति पाइश्शो लडाइ पाइब आन कली सहे सहे नु हजार हजार डा हुल पा कप्तान दुम्मा बाक्त। दाऊद नु आ मुरपुकी नोले डा हुलमी अकीश नु गाक्शो बाक्मा बाक्त। यहोसु १३:३

3 मिनु पलिस्ती आन ठेयब मुरपुकीम “एको हिबूपुकी मारदे पिमा?” देमा बाक्त। मिनु अकीशमी “एको इस्राएल डा सावल आ गेय पाइब दाऊद बाक्ब। एको गो नु बर्स का क्येडा यो शुश बाक्त। एको गो नु बाक्म रे मारेड मरिश्शो मतड” देमाक्त। १सामुएल २७:७

4 तन्न पलिस्ती आन ठेयब मुरपुकी गाइश्शा, अकीश कली “मेको मुर कली इन गेशो आ बाक्तीकेम सोइक्तीन। मेकोम आंइ कली वारच पा लडाइ मपवल। मो पान्तु हना, मेकोम आंइ कली वारच पखु पा मरिश्शो पाइब। आंइ कली साइश्शा आ प्रभु आ शिशी तचा मेको कली नेल्ल क्येडा रिम्शो बाक्ब।

5 एको दाऊद बाक्ब। एको आ पबंम डोंडती मुरपुकीम ‘सावलम हजार हजार आन कली साइक्तीमी। तन्न दाऊदमी १० हजार हजार आन कली साइक्तीमी’ दे कुम्सो पना पन, सिल पाम्तेक्म” देमा बाक्त। १सामुएल १८:७

6 मिनु अकीशमी दाऊद कली ब्रेशा “परमप्रभु यावे ब्रोंइशा बाक्शो खोदेंशो पा, गे थमा सुइक्चा पुंडसीब मुर बाक्नेवे। मिनु गे गो नु लडाइ पचा कली आं कली ठीक बाक्ब। मारदे हना इ जाक्शो रे मुल सम्म गेम मारेड मरिश्शो पशो मतड। तन्न मेको कप्तानपुकीमी इ कली थमा मसुइक्नीम।

7 मोपतीके गे रिम्शो पा लेशशा खिं लावो। मेको पलिस्ती आन ठेयब मुर आन मिम्शो खोदेंशो पा मरिश्शो मपावो” देमाक्त।

8 मिनु दाऊदमी अकीश कली “गो मार पडा डा? गो इन गेय पचा गोडा रे गे आं कली मार मरिश्शो पशो तनी? गो आं प्रभु, आं पिप, आ जोरी सत्रु नु लडाइ पचा मताइक्नुडा?” देमाक्त।

9 मिनु अकीशम दाऊद कली “गे आं पबंम दोस मताइब नु परमप्रभु आ स्वर्ग डा गेय पाइब खोदेंशो बाक्नेवे। तन्न पलिस्ती आन कप्तानम ‘गे मेकोपुकी नु लडाइ पथ लचा मदुम्नेवे’ दैतेक्म। २सामुएल १४:१७

10 मोपतीके दीसा सुनी कना बोक्शा, गे नु इ नोले खोइक्ब मुरपुकी आं गेशो सहरम लेतीन। दीसा सुनी कना बोक्कीन। मिनु नां सोव्रम चोटीन लने” देमाक्त।

11 मोपतीके दाऊद नु आ मुरपुकी पलिस्ती आन रागी लेत्या कली सुनी कना बोक्मा बाक्त। पलिस्तीपुकी चहिं येजेल डा लां खोदमे बाक्त।

## 30

दाऊदम सिकलाग डा मुर प्रॉइशो

1 मिनु लेम्मा आ नित्थ नाकती सिकलाग जाकदीम्मा बाक्त। मेना अमालेकीपुकीमी नेगेब रोइक्ने थुम्शा, सिकलागम लडाइ तोशा मी सुइश्शो बाक्मा बाक्त। १सामुएल २७:६

2 मेकोपुकीम मीश मुर, आइक्च नु टेयब मुर नेल्ल आन कली मसाइक्थु सेसीन लाइश्शो बाक्मा बाक्त। मेकोपुकीमी मेको आन कली डोंडोंइती गाक्पाइश्शा लाइक्ना लाइक्न बाक्मा बाक्त।

3 दाऊद नु आ मुरपुकी मेकेर जाकदीम्मानु, सहर कली मीम क्रोइश्शो नु मेको आन मीश नु तमी तौ नेल्ल आन कली योल्शो तुइक्तमे बाक्त।

4 मिनु दाऊद नु मेको नु बाक्शो मुरपुकी डाक्ने मचाप्थी डाक्मा बाक्त।

5 दाऊद आ मीश निम्फा येजेले डा अहीनोआम नु कारमेल डा बेक्शो नाबाल आ मीश अबीगेल निम्फा ग्याइश्शा लाइक्चा पुंइसीसा बाक्त। १सामुएल २५:४२-४३

6 दाऊद कली हिंचा डा दुम्शो बाक्त। मारदे हना मुरपुकीम मेको आन तमी तौ नेल्ल योल्ने थुम्तीके, दाऊद कली फुल्लु आप्शा साइक्नीकी देशो बाक्मा बाक्त। तन्न दाऊदमी परमप्रभु यावे, आ परमप्रभु कली सक्ति पुना बाक्त।

7 मिनु दाऊदमी अहीमेलेक आ तौ चढ़ेब अबीयाथार कली “निसाफ पतीक ऊरीम नु थुम्मीम बाक्शो एफोद चाक्को” दे मदा बाक्त। मिनु चाक्गा बाक्त। १सामुएल २३:९

8 मिनु दाऊदमी परमप्रभु यावे कली “मार, गो मेको रोइक्ब आन कली खेदा पडा? गो मेको आन कली थिन्ने चाप्नुडा?” देंमाक्त। मिनु “मेको आन कली खेदा पावो। थमा पा, गे मेको आन कली थिश्शा, नेल्ल आन कली प्रॉइने चाप्नेवे” देशो नेना बाक्त।

9 मिनु दाऊद नु मेको आ ६ सहे मुर गाक्मा बाक्त। मिनु बेसोर डा खोल्सा सम्म जाकदीम्मा बाक्त। मेकेर दशा गाक्ने मचाप्बपुकी बाक्मा बाक्त।

10 मिनु मेको आन दाते डा सहे निक्शी मुर थाम्पा दशा, बेसोर खोल्सा शोक्ने मचाप्शो बाक्मा बाक्त। मिनु मेकोपुकी मेकेर बाक्मा बाक्त। दाऊद चहिं ४ सहे मुर लाइश्शा खेदा पचा कली लमाक्त।

11 मोपा गाक्ना गाक्न लमानु, मेकोपुकीमी इजीप्त डा मुर का थित्मे बाक्त। मिनु मेको कली दाऊद आ बाक्तीक चाक्गमे बाक्त। मिनु मेको कली जचा तूचा गेमे बाक्त। मिनु मेकोमी जवा तूडा बाक्त।

12 मेको कली डल्ला का फोव्रशी गेडा नु डल्ला निक्शी सोक्शो अडगुर यो गेमे बाक्त। मिनु मेको नेक्गा नोले मेको आ सोक्त पिमाक्त। मारदे हना मेकोम नाक्त सां नु नाक्दो सां सम्म मारेइ मजशो बाक्माक्त।

13 मिनु दाऊदम मेको कली “गे ते रे जाक्शो नवे। सु आ मुर नवे?” दे हिल्लो पवा बाक्त। मिनु मेकोमी “गो इजीप्त डा टिटा का नड। अमालेकी का आ वाइल नड। तन्न गो नाक्त सां डोंइती रे रोइ पतीके आं होव्रपम आं कली प्रॉइशा गाक्त।

14 गो यहूदा रागी डा केरेथी आन नेगेब डा मारेइ मारेइ नु कालेब आ नेगेब तेइ तेइ रोइक्ताक्क। मिनु सिकलाग सहरम मी सुइक्ताक्क” देंमाक्त। २सामुएल ८:१८; यहोसु १४:१३

15 मिनु दाऊदमी “गे आंइ कली लां कोंइशा मेको आन बाक्तीके चाक्दीन्ने चाप्नेवे?” देंमाक्त। मिनु मेकोमी “गे परमप्रभु आ डोंइती ‘आं कली मसाइक्नीकी नु आं होव्रप आ गुइम जिम्मा मगेनीकी’ दे कसम जने। मिनु गो लां कोंइशा मेको आन बाक्तीक चाक्दीत्नुड” देंमाक्त।

16 मिनु मेकोम लां कोंइना कोंइन मेको आन कली उइ चाक्दीदा बाक्त। मेकेर अमालेकी एर ओंथ ब्रशा जशा तूशा सिल पा, आन रोइश्शो मार मार पुक्शा ग्येरशा बाक्शो बाक्मा बाक्त। मारदे हना मेकोपुकीम पलिस्ती नु यहूदा रे शुश मार मार रोइश्शो बाक्मा बाक्त।

17 मिनु दाऊदम मेको आन कली सुनी रे आ दीसा नाक्दो सम्म नेल्ल साइक्मी बाक्त। ४ सहे टिटा मुर ला दलओंठ डोइश्शा प्रोक्मा बाक्त।

18 दाऊदमी अमालेकी आन रोइश्शो नेल्ल लेंशा थिदा बाक्त। मेको आ मीश निम्फा आस कली यो थिदा बाक्त।



19 मेको आन के मारेइ यो मजाम्माक्त। आन खिं डा आइक्ची ठेयब, तमी तौ रोइश्शा लाइश्शा नेल्ल थोत्रक थित्मे बाक्त। मोपा दाऊदमी मारेइ मारेइ प्रोना बाक्त।

20 दाऊद नु आ मुरपुकीम मेकोपुकीम डोंइती रोइश्शो क्यारश भेडा, बी ब्यफ नेल्ल आन कली लदमे बाक्त। मिनु “एको नेल्ल दाऊद के बाक्ब” देंमा बाक्त।

21 नोले दाऊदम बेसोर डा खोल्लसाम नाइश्शा बाक्शो सहे निक्शी मुर आन बाक्तीक जाक्माक्त। मेकोपुकी दाऊद कली नु मेको आ मुर आन कली गुमथ जाक्मा बाक्त। मिनु दाऊदम मेको नेल्ल आन कली “मार दुम्मे? दोपा बाक्नी” दे हिल्लो पवा बाक्त।

22 तन्न दाऊद नु लाइब का निक्शी शोर गाक्शो मुरपुकीम मेको आ लोत्र खोइश्शा दाऊद कली “एको मुरपुकी गो नु मलम। गोपुकीम लशा रोइश्शा चाक्शो मार मार गो मेको आन कली योक्शा मगोनीकी। मेकोपुकीम आन मीश नु आन आलपुकी ला लदमेक्ल” देंमा बाक्त।

23 मिनु दाऊदमी मेको आन कली “परमप्रभु यावेम इं कली प्रोंइतु। एको नेल्ल गेप्टु। इं जोरी सत्रु आन कली इं गुइमी गेप्टु।

24 सुम इन देशो लोत्र बिप्वा? खाल पाइब नु लडाइम लाइब नेल्लेम उइक्थ उइक्थ ताइनीम” देंमाक्त। गन्ती ३१:२४

25 मिनु दाऊदमी इस्राएलम मेको फुल्लुम मुशा ब्रेक्शो खोदेशो पा नु निसाफ पतीक लोत्र पवा बाक्त। मेको मेना रे मुल सम्म लीशो बाक्ब।

26 मिनु दाऊद सिकलागम जाक्शा, रोइश्शो मार मार रे यहूदा डा आ वारच खाल्पा आन कली “परमप्रभु यावे आ जोरी सत्रु रे रोइश्शो मार मार एको इन कली कोसेली बाक्ब” देंशा, सोइक्ता बाक्त।

27 मेकोमी सु सु आन कली कोसेली सोइक्ता बाक्त देंशा हना, बेथेल सहर, नेगेब डा रामोथ सहर, यतीर, सहर

28 आरोएर सहर, सिफ्मोथ सहर, एश्तेमोआ सहर,

29 राकाल सहर, येराहमेल आ मुर आन सहरम बाक्ब आन कली, केनी आन सहरम बाक्ब आन कली, १सामुएल २७:१०

30 होरमा सहर, बोर-अशान सहर, अथाक सहर

31 हेब्रोन सहरम बाक्ब नेल्ल आन कली नु दाऊद नु आ मुर गाक्शो सहर गाउं नेल्ल आन कली कोसेली सोइक्तीमी बाक्त। डोंइती मेकेर दाऊद नु आ मुरपुकीम मार मार पामे बाक्त।

## 31

सावल नु योनाथन बेक्शो

१इतिहास १०:१-१२

1 पलिस्ती नु इस्राएली लडाइ पामे बाक्त। मिनु इस्राएली पलिस्ती आन क्येडा बुशा प्रोक्मा बाक्त। शुश इस्राएली गिल्लोआ डांडाम साइक्चा पुंडसमा बाक्त।

2 पलिस्तीपुकीम सावल नु आ तौ आन कली साप्पा खेदा पामे बाक्त। मिनु सावल आ तौ सां योनाथन, अबीनादाब नु माल्कीशुआ आन कली सदमे बाक्त।

3 लडाइम सावलमी थाप्पा श्येत जवा बाक्त। मारदे हना लिब्रा आप्वम मेको कली खपाइश्शा गार सेल्मे बाक्त।

4 मिनु मेकोम आ या कुरब कली “इ तरवार शोइश्शा आं कली साइय्यी। मिनु मेको खोइक्तीक चिनु मख्रोइश्शोपुकीम आं कली शुक्शी पचा मतामेक्ल” देंमाक्त। तन्न मेको या कुरब हिंशा, मबिस्से बाक्त। मेको नोले सावलमी आ तरवार शोइश्शा आंमा थोक्सीशा बेक्माक्त। न्यायाधीस ९:५४

5 मिनु मेको या कुरबमी सावल बेक्शो तशा, मेको यो आ तरवारम थोक्सीशा मेको नु बेक्माक्त।

6 मोपा सावल, आ तौ सांफा, आ या कुरब नु लडाइ पाइब नेल्ल काबुमीन बेक्मा बाक्त।

7 बेसी नु यर्दन आइक्ची हांबुम बाक्ब इस्राएलीपुकीम लडाइ पाइब इस्राएली प्रोकशो नु सावल नु आ तौ नेल्ल बेक्शो नेंन्मे बाक्त। मोपतीके मेकोपुकी आंम आंम सहर प्रोंडशा प्रोकमा बाक्त। मिनु पलिस्ती जाक्शा मेको सहर आन के सेल्मे बाक्त।

8 आ दीसा पलिस्तीपुकी बेक्शो आन मार मार रोइक्चा कली जाक्मा बाक्त। मिनु मेकोपुकीम गिलबोआ डांडाम सावल नु आ तौपुकी बेक्शो थित्मे बाक्त।

9 मिनु मेकोपुकीम सावल आ पिया ख्रोदमे बाक्त। मिनु आ यापुकी लदमे बाक्त। मेको नोले मेकोपुकीम मेको रिम्शो लोव्न रागी डा तेइ तेइ नु देवी देवता नेल्ल आन कली नेंपाइक्चा, दे मुर सोइक्तमे बाक्त।

10 मेकोपुकीम सावल आ यापुकी अशतारोथ माइश्शो मूर्ति पाइश्शो थाम आ खिमी वोदमे बाक्त। मिनु मेको आ बेक्शो रां बेथ-शान डा गारोम किला थोकशा क्युकशा वोदमे बाक्त। ब्यवस्था २१:२२-२३

11 पलिस्तीपुकीम सावल आ बेक्शो रां कली मार पामे, मेको याबेश-गिलाद डा मुरपुकीम नेंन्मे बाक्त। १सामुएल ११:१-११

12 मिनु मेको आन बोल्यो मुरपुकी नेल्ल नाक्दो रे गाक्शा, सावल नु आ तौ आन बेक्शो रां बेथ-शान डा गारो रे शोल्शा, याबेशम चाक्गमे बाक्त। मिनु मेको आन कली थिम्मे बाक्त।

13 मिनु नोले आन रुश याबेश डा टेयब रवा आ पुमी थिम्मे बाक्त। मिनु मेकोपुकी ७ नाक्त सम्म माइजा बाक्मा बाक्त। २सामुएल १:१२

## २ सामुएल

**ब्रेक्ब मुर:** डोंडती १ सामुएल नु २ सामुएल किताब कान बाक्ताक्स। १इतिहास २९:२९ पिप दाऊद आ पशो मार मार बाक्मे, मेको डोंडती रे नोले सम्म नेल्ल परमप्रभु यावे आ लोत्र पाइब सामुएल, नाथान नु गाद आन ब्रेक्शो किताबम ब्रेक्शो बाक्मा बाक्त।

**गेना ब्रेक्शो:** ९७५ बि. सी. क्येडा नोले परमप्रभु यावे आ लोत्र पाइब रे ब्रेक्शा एको किताब थुम्शो बाक्त।

**मार ब्रेक्शो:** परमप्रभुम इस्राएली आन कली दाक्चा मप्रोंडब आ सांकछी बाक्ब।

दाऊदम सावल बेक्शो लोत्र नेंशो

1 सावल बेक्म नोले दाऊदम अमालेकी आन कली खेदा पशा, लेशशा नाक्त निक्शी सिकलाग सहरम बाक्शो बाक्माक्त। १सामुएल ३०:२६

2 मिनु आ नित्थ नाक्ती, आ वा खाक्शो नु पियाम खप फुंडसीशो मुर का सावल आ बाक्तीक रे जाक्माक्त। मिनु मेको दाऊद आ बाक्तीक जाक्शा, मेको आ डोंडती खुम्की पा बाक्माक्त।

3 दाऊदम मेको कली “गे ते रे जाक्डे?” दे हिल्लो पवा बाक्त। मिनु मेकोमी “गो इस्राएल डा लडाइ पाइब आन बाक्तीके रे प्रोक्शा जाक्ती” देंमाक्त।

4 मिनु दाऊदमी मेको कली “मार दुम्मे? आं कली देंनो” देंमाक्त। मिनु मेकोमी “लडाइ पाइबपुकी लडाइ रे प्रोक्तेक्म। शुश मुर साइक्चा पुंडसाक्म। मिनु सावल नु आ तौ योनाथन यो साइक्चा पुंडसाक्स” देंमाक्त।

5 मिनु दाऊदम मेको लोत्र चाक्ब ठिटा कली “सावल नु आ तौ योनाथन साइक्चा पुंडसाक्स, दे दोपा तुइक्ती?” देंमाक्त।

6 मिनु मेको ठिटामी “गो गिल्लोआ डांडाम बाक्शो नड। मेकेर सावल कली आ तूतीक तिकशा राप्शा बाक्शो ताता। बग्गी डोइक्ब नु शारा डोइक्बपुकीम मेको कली थित्चा चिक्ताक्म। १सामुएल ३१:१-३

7 मिनु मेकोमी नोले लेशशा कोव्रडानु, आं कली तती। मिनु ब्रेत्ताक्यी। मिनु गो “मार देंनी” देंती।

8 मिनु मेकोमी ‘गे सु नवे’ दे हिल्लो पती। मिनु ‘गो अमालेकी का नड’ देंती।

9 मिनु मेकोमी ‘आं नेक्था जाक्को। आं कली साइय्यी। मारदे हना गो बेक्चा चिक्शो बाक्ती। आं सोक्त ला बाक्ब’ देंत।

10 मोपतीके गो आ नेक्था लशा, मेको कली साइक्ता। मारदे हना मेको मप्रोंडब, दे गो तुइक्ताक्ड। मिनु गो मेको आ पिया रे सिरपेच नु आ गुड डा पांडतीके, आं प्रभु, इन बाक्तीकेम चाक्ता” देंमाक्त।

11 मेको लोत्र नेंशा, दाऊदम आ वा खाक्गा बाक्त। मेको नु बाक्ब मुर नेल्लेमी यो मो पामे बाक्त। १सामुएल ४:१२

12 मेकोपुकी नां मरिक्म सम्म सावल नु आ तौ योनाथन आस पर्बम डाक्शा रोंका पा माइजा बाक्मा बाक्त। मारदे हना परमप्रभु यावे आ लडाइ पाइबपुकी नु इस्राएल आ खिं डा मुरपुकी तरवारम साइक्चा पुंडसमा बाक्त। १सामुएल ३१:१३

13 मिनु दाऊदम मेको लोत्र चाक्ब ठिटा कली “गे ते रे जाक्शो नवे?” दे हिल्लो पवा बाक्त। मिनु मेकोमी “गो अर्को रागी डा अमालेकी का आ तौ नड” देंमाक्त।

14 मिनु दाऊदमी “परमप्रभु यावे आ तेल लुक्शो मुर कली साइक्चा महिने?” देंमाक्त। १सामुएल २४:७; १सामुएल २६:९

15 मिनु दाऊदमी आ ठिटा मुर का कली ब्रेशशा “मेको कली सतो” दे अरेवा बाक्त। मिनु मेकोमी मेको कली तुप्शा सदा बाक्त। २सामुएल ४:१०-१२

16 दाऊदमी मेको कली “इ हुश इ पिया तार मोइसेक्ल। मारदे हना गे ‘गो परमप्रभु यावे आ तेल लुक्शो कली साइक्ता’ देंते। इ शोत्रमीन आंम इ कली दोसी सेल्साक्वे” देंमाक्त।

दाऊदम रोंका पतीक कुम्सो सेल्शो

१७ मिनु दाऊदमी सावल नु आ तौ योनाथन आस पर्वम रोंका पतीक कुम्सो पवा बाक्त।

१८ मिनु मेको रोंका पतीक कुम्सो यहूदा डा मुर आन कली शेंचा माल्ब, दे हुकुम पवा बाक्त। मेको कुम्सो याशार आ किताबम ब्रेकशो बाक्ब। २सामुएल १:२२; यहोसु १०:१३

१९ “इसाएल, इ छेडछेड डांडाम साइक्चा पुंडसाक्म। सक्ति पाइशु मुरपुकी दोपा बेक्मा?”

२० गाथम एको लोत्र मपने। अश्कलोन डा लाम एको लोत्र मपने। मो पाइतीनी हना, पलिस्ती आन तमी ग्येरसीनीम। खोइक्तीक चिनु मखोइशो आन तमी ग्येरसीनीम।

२१ गिल्बोआ नें पाइशो डांडा, इ तार सीत नु रेड मयिल। अन्न ग्रेल्ब रू मबाक्ल। मारदे हना सक्ति पाइशो आ तेक्तीक ग्रान्ना दिशो सेल्तेक्म। सावल आ तेक्तीक कली मुल रे तेल मखेक्नीम।

२२ योनाथन आ लिब्रा साइक्चा पुंडसीशो जोरी सत्रु आन हुश नु बोल्यो मुर आन बोसो मलुम्सीथु, गेनायो मले। सावल आ तरवार यो मोशा मले।

२३ सावल नु योनाथन दाक्मुबाक्ताक्स। अरुम यो दाक्चा पुंडसाक्स। ब्रोंडसा नु बेक्सा नु यो काथा दुम्ताक्स। मेको निक्शी ककाकुली क्येडा यो रीब पा पाइब बाक्ताक्स। गुप्स क्येडा यो बोल्यो बाक्ताक्स।

२४ इसाएल डा तमीपुकी सावल आ पर्वम डाक्कीन। मेकोमी इन कली लल दारदारशो शुश क्येट लाइब वा फेक्पाइशो बाक्त। मेकोमी इन कली सुन के गहना पांडपाइशो बाक्त।

२५ सक्ति पाइशो दोपा बेक्मा! मेको लडाइम बेक्तेक्म। योनाथन साइक्चा पुंडसीशा, डांडाम गोल्लो बाक्ब।

२६ आं लोकब योनाथन, गो इ पर्वम रोंका पाइनुड। गो इ कली थाम्पा दाक्ताक्न। इ आं कली दाक्शो टेयब बाक्त। मीश मुर आन कली दाक्तीक क्येडा यो लाक्शो बाक्त।

२७ सक्ति पाइशो दोपा बेक्मा! मेको लडाइम आन या खतम दुन्तेक्म” दे कुम्सो पशो बाक्त।

## २

दाऊद यहूदा डा पिप दुम्शो

१ मेको नोले दाऊदमी परमप्रभु यावे कली “मार गो यहूदा डा सहर काम लडा?” दे हिल्लो पवा बाक्त। मिनु परमप्रभु यावेमी “लावो” देंमाक्त। मिनु दाऊदमी “तेको सहरम लड” दे हिल्लो पवा बाक्त। मिनु “हेब्रोन सहरम लावो” देंमाक्त। १सामुएल २३:६,९; १सामुएल ३०:७-८

२ मोपतीके दाऊद आ मीश निक्शी येजेल डा अहीनोआम नु कारमेल डा बेक्शो नाबाल आ मीश अबीगेल नु मेकेर लमाक्त। १सामुएल २५:४२-४३

३ मिनु दाऊदमी आ नु गाक्ब मुर आन खिं डा मुर नेल्ल यो लाइक्मी बाक्त। मिनु मेकोपुकी हेब्रोन सहरमी बाक्मा बाक्त।

४ मिनु यहूदा डा मुरपुकी जाक्शा, दाऊद कली तेल लुक्शा, आन पिप सेल्मे बाक्त। मिनु मुरपुकीमी दाऊद कली “याबेश-गिलाद डा मुरपुकीम सावल कली थिम्तेक्म” दे नेंपदमे बाक्त। २सामुएल ५:३; १सामुएल १६:१३; १सामुएल ३१:११-१३

५ मिनु दाऊदम याबेश-गिलाद डा मुर आन कली लोत्र कुरब मुर सोइशशा “परमप्रभु यावेम इन कली आसीक गेवल। मारदे हना गे इन प्रभु सावल कली रिम्शो पा थिम्तीनी।

६ मिनु परमप्रभु यावेमी इन कली गेना हना यो दाक्शा मप्रोनल। मिनु गो यो इन पशो गेय आ पर्वम इन कली इनाम गेनुड।

७ मोपतीके बोल्यो नु महिब दुमीन। मारदे हना इन प्रभु सावल बेक्शा लत। मिनु यहूदा डा मुरपुकीम आं कली आन पिप सेल्तीमी” दे लोत्र कुरब मुर सोइक्ता बाक्त।

इश-बोशेथ पिप दुम्शो

८ मेना सावल आ लडाइ पाइब मुर आन टेयब मुर नेर आ तौ आब्नेरमी सावल आ तौ इश-बोशेथ कली यर्दन ओथ हांबु महा-नाइमम चाक्गा बाक्त। १सामुएल १४:५०; उत्पती ३२:२-३

९ मिनु गिलाद, अशशुर, येजेल, एफ्राइम, बेन्यामीन आ थर डा मुर नु इस्राएली नेल्ल आन पिप सेला बाक्त।

१० सावल आ तौ इश-बोशेथ इस्राएल डा पिप दुम्मेनु ४० बर्स दुम्शो बाक्माक्त। मेकोमी बर्स निकशी सम्म सासन पवा बाक्त। तन्न यहूदा डा मुर दाऊद आ नोले खोदमे बाक्त।

११ दाऊदमी हेब्रोन सहरम यहूदा डा मुर आन कली ७ बर्स ६ महिना सम्म सासन पवा बाक्त।

### आसाहेल बेक्शो

१२ नेर आ तौ आबनेर, सावल आ तौ इश-बोशेथ नु आ गेय पाइबपुकी महा-नाइम रे गिबोन लमा बाक्त।

१३ सेरूयाह आ तौ योआबमी दाऊद आ गेय पाइब आन कली लाइशशा गिबोन डा दोम्लीम लडाइ पवा बाक्त। मेको निकशी गिबोन डा दोम्लीम गुम्सा बाक्त। मिनु काम दोम्ली आ आइक्की हांबुम, काम दोम्ली आ ओथ हांबुम आस लडाइ पाइब आन कली राप्पदसे बाक्त। १सामुएल २६:६; यहोसु ९:३, १७

१४ मिनु आबनेरम योआब कली “इ लडाइ पाइब मुर नु आं लडाइ पाइब का का पा गुम्शा इस डोंइती लडाइ पामेक्ल” देमाक्त। मिनु योआबमी “दुम्ब, मो पामेक्ल” देमाक्त।

१५ मोपतीके मेकोपुकी गूशा लशा, बेन्यामीन नु सावल आ तौ इश-बोशेथ आन मुर १२ जना नु दाऊद आ मुर १२ जना का का पा राम्मा बाक्त।

१६ मिनु मेको नेल्लेमी आंम आंम जोरी सत्रु आन पियाम ग्याइशशा कोखाम तरवारम आप्मे बाक्त। मोपा नेल्ल कालेम बेक्मा बाक्त। मोपतीके गिबोन आ नेक्था डा रू कली हेल्काथ-हच्चुरीम देनीम। मेको नें आ अर्थ तरवार आ क्योरतीक देंसीब।

१७ मेको नाक्त थम ठेयब लडाइ दुम्माक्त। मिनु आबनेर नु इस्राएल डा मुर दाऊद आ मुर आन क्येडा बुमा बाक्त।

१८ सेरूयाह आ तौ सांफा योआब, अबीशै नु आसाहेल मेकेर बाक्शो बाक्मा बाक्त। आसाहेल ब्वाकी डा दोरब किशश खोदेशो रीब पा गेय पाइब बाक्माक्त। १इतिहास २:१६

१९ मेकोम ग्युरा पेरा एर ओथ मारेइ मकोत्रथु दोरशा आबनेर कली खेदा पवा बाक्त।

२० मिनु आबनेरम नोले लेशशा कोत्रशा “मार गे आसाहेल नवे?” दे हिल्लो पवा बाक्त। मिनु आसाहेलमी “गो नड” देमाक्त।

२१ मिनु आबनेरमी “ग्युरा गे कि पेरा गे लशा, लडाइ पाइब का कली आ मार मार रोइक्तो” देमाक्त। तन्न आसाहेलमी मेको कली खेदा पचा मप्रोना बाक्त।

२२ मिनु आबनेरमी लेंशा “आं कली खेदा पचा प्रोंइयी। गो इ कली मारेदे साइक्नुडा? इ लोकब योआब आ डोंइती दोपा आं कुल कोंइनुडा?” देमाक्त।

२३ तन्न आसाहेल एर ओथ लने मबिस्से बाक्त। मिनु आबनेरमी आ तूतीक नोले गे आप्शा मेको आ कोत्रज खिदा बाक्त। मिनु मेकेर गोल्शा बेक्माक्त। मिनु आसाहेल बेक्शो बाक्तीके जाक्शा मुर नेल्ल दिक्मा बाक्त। २सामुएल ३:२७

२४ मिनु योआब नु अबीशैमी आबनेर कली खेदा पस डा पस पाम्से बाक्त। मिनु नां मलाक्थु, मेकोपुकी अम्माह डांटा जाक्मा बाक्त। अम्माह डांटा गिअह आ डोंइती, गिबोन रे गोरशो रागी डा लांम बाक्ब।

२५ बेन्यामीन आ थर डा मुर आबनेर गे बुक्मा बाक्त। मिनु हुल का दुम्शा, अम्माह डांटा तार लडाइ पचा कली ठीक दुम्मा बाक्त।

२६ मिनु आबनेरमी ठेयब सेंदा पा योआब कली “मार, गेना हना यो क्योरमुस डा मुस, साइक्मुस डा साइक्मुस बाक्चा? मेको नोले मरिम्शो दुम्ब, दे गे मतुइक्नेवे? आंम लोकब आन कली खेदा पचा प्रोंइचा, दे इ मुर आन कली ममाइक्नेवे?” देमाक्त।

२७ मिनु योआबमी “परमप्रभु ब्रोंइशा बाक्शो खोदेशो पा, गे मो मदेंशो नवे हना, मुरपुकीम दीसा सुनी सम्म यो आन लोकब आन कली खेदा पचा मप्रोनेम वा” देमाक्त।

२८ मिनु योआबम तुराही तबा बाक्त। मिनु मुर नेल्लेमी इस्राएली आन कली खेदा पचा प्रोन्मे बाक्त। मिनु लडाइ नांइसे बाक्त।

29 आब्नेर नु आ मुरपुकी नाकदो रे अराबाह रे गाकशा यर्दन खोला शोकसमा बाक्त। मिनु सुनी रे गाकशा महा-नाइमम जाकदीम्मा बाक्त।

30 मिनु योआबमी आब्नेर कली खेदा पचा प्रॉइशा, लडाइ पाइब आन कली पुकमी बाक्त। मिनु आसाहेल प्रॉइशा, दाऊद आ मुर १९ जना मबाक्मा बाक्त।

31 तन्न दाऊद आ लडाइ पाइबपुकीमी बेन्यामीन आ थर डा मुर नु आब्नेर आ नोले खोइक्ब ३ सहे ६० जना आन कली सदमे बाक्त।

32 मेकोपुकीम आसाहेल कली कुरशा लाइशशा, आ आफ आ तुरस बेथलेहेम सहरम थिम्मे बाक्त। मेको नोले योआब नु आ मुरपुकी नाकदो रे गाकशा नां सोत्र सोत्र हेब्रोन सहरमी जाकदीम्मा बाक्त।

### 3

#### दाऊद आ खिं डा मुर

1 सावल नु दाऊद आस खिं डा मुर शुश नाक्त सम्म लडाइ पस डा पस बाक्मा बाक्त। मिनु दाऊद बोल्यो दुम्ना दुम्न लमाक्त। सावल आ खिं डा मुर चहिं मचाप्ब दुम्ना दुम्न लमा बाक्त। २सामुएल ५:१०

2 हेब्रोनमी दाऊद आ तौपुकी जरमेसीमा बाक्त। मेको आ डोंइती जरमेशो तौ अम्नोन बाक्माक्त। मेको आ ममा येजेल डा अहीनोआम बाक्माक्त। १इतिहास ३:१-४; २सामुएल १३:१

3 मेको आ माइला तौ किलेआब बाक्माक्त। मेको आ ममा कारमेल डा बेकशो नाबाल आ मीश अबीगेल बाक्माक्त। मेको आ साइला तौ अब्सालोम बाक्माक्त। मेको आ ममा गेशुर डा पिप तल्लै आ तमी माकाह बाक्माक्त। २सामुएल १५:१

4 काइला अदोनीयाह बाक्माक्त। मेको आ ममा हग्गीथ बाक्माक्त। ठाइला शेफत्याह बाक्माक्त। मेको आ ममा अबीतल बाक्माक्त। १राजा १:५

5 आ कान्छा इथ्रेआम बाक्माक्त। मेको आ ममा दाऊद आ मीश एगलाह बाक्माक्त। मेको नेल्ल हेब्रोनम जरमेशो दाऊद आ तौ बाक्मा बाक्त।

#### आब्नेरमी दाऊद नु कसम जशो

6 सावल नु दाऊद आस खिं डा मुर आन दातेमी लडाइ दुम्ना दुम्न लमेनु, आब्नेर सावल आ खिंमी बोल्यो दुम्ना दुम्न लमाक्त।

7 मिनु सावल आ कान्छी मीश का बाक्माक्त। मेको आइयाह आ तमी बाक्माक्त। मेको आ नें रिस्पाह बाक्माक्त। मिनु इश-बोशेथम आब्नेर कली “गे आं आफ आ कान्छी मीश नु मारदे इमे?” दे मदा बाक्त।

8 आब्नेरमी इश-बोशेथ आ लोत्र नेंशा गाइशशा “मार, गो यहूदा आ गेय पाइब कुचुम नडा? मुल सम्म गो इ आफ सावल आ खिं डा मुर, आ लोकब नु आ वारच आन कली मानेब मुर बाक्ती। गो इन कली दाऊद आ गुइम मगेड। मो हना यो गे एको मीश मुर आ परबम आं कली दोस गेनीनी।

9 गो परमप्रभुमी दाऊद कली देशो मपाता हना, आं कली सजाइ गेयील। परमप्रभु यावेमी दाऊद कली दोदेशो कसम जवा, गो मोदेशो पाइनुड।

10 ‘सावल आ खिं डा मुर आन राज्य रोइक्चा नु दाऊद कली इस्त्राएल यहूदा नु दान रे बेयर-शेबा सम्म सासन पपाइक्नुड’ दे परमप्रभु यावेमी देशो बाक्ब” दे आब्नेरम इश-बोशेथ कली देंमाक्त।

11 मिनु इश-बोशेथ आब्नेर क्येडा हिंतीके मारेइ लोत्र मलेत्ता बाक्त।

12 मेको नोले आब्नेरम हेब्रोनम बाक्ब दाऊद कली “एको रागी सु के बाक्बा? गे गो नु कबल का पने। मिनु गो इस्त्राएल नेल्ल इन के सेल्चा कली वारच पाइनुड” दे लोत्र कुरब मुर सोइक्ता बाक्त।

13 मिनु दाऊदमी मेको आन कली “दुम्ब। गो गे नु कबल पाइनुड। तन्न गो इ कली लोत्र का पाइनुड। गे सावल आ तमी मिकाल कली मचाक्तीवी हना, आं डोंइती मजाक्को, दे मतीन” दे माइक्मी बाक्त।

14 मिनु दाऊदमी सावल आ तौ इश-बोशेथ कली यो “आं मीश मिकाल गेयी। गो मेको आ परबम सहे का जना पलिस्ती आन खोइक्तीक चिनु खोइशशो कुशुल थाप्ताक्ड” देपाइक्थ मुर सोइक्ता बाक्त। १सामुएल १८:२५-२७

१५ मोपतीके इश-बोशेथम मुर सोइश्शा मिकाल आ वोंइश लाइश आ तौ, पाल्तीएल आ बाक्तीक रे चाक्पदा बाक्त। १सामुएल २५:४४

१६ मेको डाक्ना डाक्न बाहुरीम सहर सम्म मिकल आ नोले खोइश्शा पिमाक्त। मिनु आब्नेरमी “लेश्शा खिं लावो” दे मदा नोले लेम्माक्त।

१७ मिनु नोले आब्नेरम इस्त्राएल डा खाल्पा आन कली “शुश डोंइती रे गेपुकीम दाऊद कली पिप सेल्चा माल्शो ननी।

१८ मुल मेको पची जाक्त। मारदे हना परमप्रभु यावेमी दाऊद कली ‘गो आं गेय पाइब दाऊद आ गुड रे आं मुर इस्त्राएली आन कली पलिस्ती नु आन जोरी सत्रु नेल्ल आन गुड रे प्रॉइनुड’ दे लोव्र थोक्शो बाक्ब” देंमाक्त।

१९ आब्नेरमी बेन्यामीन आ थर डा मुर नु यो लोव्र पवा बाक्त। नोले आब्नेर दाऊद आ बाक्तीक हेब्रोन लमाक्त। मिनु इस्त्राएली नु बेन्यामीन आ थर डा मुर आन पचा देशो लोव्र नेल्ल देंमाक्त।

२० मिनु आब्नेर २० जना मुर नु दाऊद आ बाक्तीक हेब्रोन जाक्दीम्माक्त। दाऊदम आब्नेर नु मेको नेल्ल आन कली भोज गेमी बाक्त।

२१ मिनु आब्नेरमी दाऊद कली “मुल आं कली इस्त्राएली नेल्ल आन कली आं प्रभु, पिप इन डोंइती चाक्चा गेयीनी। मिनु मेकोपुकीम गे नु कबल का पाइनीम। गे इन दाक्शो राज्य कामी रागी नेल्ल डा पिप दुम्नीनी” देंमाक्त। नोले दाऊदमी आब्नेर नु गारशा सोइक्ता बाक्त।

**योआबम आब्नेर कली साइश्शो**

२२ मेना योआब दाऊद आ मुरपुकी नु गारशा, लडाइ पा मार मार रोइश्शा जाक्मा बाक्त। आब्नेर चहिं गाक्ने थुम्तीके दाऊद नु हेब्रोन सहरम मबाक्माक्त। मारदे हना दाऊदम मेको नु गारशा, सोइक्ने थुम्शो बाक्माक्त।

२३ मिनु योआब नु लडाइ पाइब हुल जाक्मानु, मुरुमी “नेर आ तौ आब्नेर दाऊद आ बाक्तीक जाक्मेनु, दाऊदमी मेको नु गारशा सोइक्ताक्ब” दे नेंपदमे बाक्त।

२४ मिनु योआबम पिप आ बाक्तीक लशा “गे एको मार पनी? आब्नेर इन बाक्तीक जाक्माक्त। गे मारदे मेको कली मो लेश्शा सोइक्तीनी?

२५ गे नेर आ तौ आब्नेर कली तुइक्नीनी। मेकोम इन कली जोल पा इन पर्वम रुप्चा कली नु गे मार पा बाक्नी, मेको तुइक्चा कली जाक्शो बाक्ब” देंमाक्त।

२६ मिनु योआब दाऊद आ बाक्तीक रे गूशा, लोव्र कुरब मुर कली आब्नेर आ नोले सोइक्ता बाक्त। मिनु मेकोम आब्नेर कली सिराह डा कुवा रे लेश्शा चाक्दीत्मे बाक्त। तन्न दाऊदम मेको नेल्ल मतुइक्ता बाक्त।

२७ मोपा आब्नेर हेब्रोनम लेश्शा जाक्मेनु, योआबमी लोव्र पचा, दे सुइ मबाक्तीकेम लदा बाक्त। मिनु आ कोव्रजम थोक्गा बाक्त। मोपा मेको आसाहेल साइश्शो आ पर्वम बेक्माक्त। १राजा २:५; २सामुएल २:२३

२८ मिनु नोले दाऊदम मेको लोव्र नेंशा “गो नु आं राज्य परमप्रभु यावे आ डोंइती गेनायो नेर आ तौ आब्नेर साइश्शो आ पर्वम दोस मताइब दुम्नीकी।

२९ मेको दोस योआब नु आ आफ आ खिं डा मुर आन पियाम दुम्ल। योआब आ खिंम ग्रांरा यितीके रोइ पाइब कि कोव्र मुरशो रोइ पाइब कि कोक्के तिकशा गाक्ब कि तरवारम साइक्चा पुंडसीब कि जचा मताइब मुर का गेना हना यो बाक्ल” देंमाक्त।

३० मोपा योआब नु आ लोक्ब अबीशैमी आब्नेर कली सदसे बाक्त। मारदे हना आब्नेरमी मेको आस लोक्ब आसाहेल कली गिबोन डा लडाइम साइश्शो बाक्माक्त। न्यायाधीस ८:१८-२१; २राजा १४:५

३१ मिनु दाऊदमी योआब नु आ नु बाक्ब नेल्ल आन कली “इन वा खाक्कीन। मिनु भाडग्रा फेक्सीन। मिनु आब्नेर आ पर्वम रोंका पने” देंमाक्त। मिनु पिप दाऊद बेक्शो आब्नेर कुरब आन नोले गाक्माक्त।

३२ मिनु आब्नेर कली हेब्रोनम थिम्मे बाक्त। मिनु पिप आब्नेर आ तुरसुम ठेयब सेंदा पा डाक्माक्त। मिनु मुर नेल्ल यो डाक्मा बाक्त।

33 मिनु पिपमी आबनेर आ पब्रम रोंका पशो कुम्सो सेला बाक्त। मेकोमी “मार, आबनेर परमप्रभु यावे आ अरेशो मटीब खोदेशो दुम्शा, बेक्चा माल्दा?”

34 इ गुड मफ्रेशो बाक्त। इ खोइलीम साडलो मपाइशो बाक्त। गे परमप्रभु यावे आ अरेशो मटीब आन डोंइती मेकोपुकी खोदेशो पा गोलते” देमाक्त। मिनु मुर नेल्ल मेको आ पब्रम लेंशा डाक्मा बाक्त।

35 मिनु मुरपुकीमी दाऊद कली “नां लाक्चा डोंइती जने” देमा बाक्त। तन्न दाऊदमी कसम जशा “नां मलाक्गा सम्म गो मारेइ जचा थोत्रक मथीनुड। थीता हना, परमप्रभुमी सजाइ गेयील” देमाक्त।

36 मुर नेल्लेम मेको लोत्र रुष्ठा बिस्समा बाक्त। मिनु ग्येरसमा बाक्त। पिप आ पशो नेल्ल दाक्तमे बाक्त।

37 मेको नाक्ती इस्राएल डा मुर नेल्लेमी नेर आ तौ आबनेर साइशोमी पिप आ दोस मबा, दे तुइक्तमे बाक्त।

38 मिनु पिपमी आ गेय पाइब आन कली “मुलाक्ती इस्राएलमी लडाइ पाइब नु ठेयब मुर का बेक्त, दे तुइक्चा माल्नीनी। १सामुएल २६:१५

39 गो तेल लुकशो पिप दुम्ती हना यो, मुलाक्ती सक्ति मपाइशो दुम्शो बाक्नुड। एको हुश खाक्श पोक्ब सेरूयाह आ तौ गो नु मगारनीम। परमप्रभु यावेमी मरिम्शो पाइब आन कली आन पशो क्येक्क लेप्ब” देमाक्त। २सामुएल २:१८

## 4

### इश-बोशेथ साइक्चा पुंडसीशो

1 सावल आ तौ इश-बोशेथम हेब्रोनम आबनेर साइशो लोत्र नेंशा आ थुं लुकच लमाक्त। मिनु इस्राएली नेल्ल हिंशा ग्येत्थ लुकच दुम्मा बाक्त। २सामुएल ३:२७

2 सावल आ तौ के मार मार रोइक्ब आन हुल डा कप्तान निकशी बाक्सा बाक्त। मेको का आ नें बानाह नु अर्को आ नें रेकाब बाक्माक्त। मेको बेयरोथ सहर डा बेन्यामीन आ थर डा रिम्मोन आ तौ बाक्सा बाक्त। मारदे हना बेयरोथ यो बेन्यामीन आ रागीम बाक्माक्त। यहोसु ९:१७

3 मिनु बेयरोथ सहर डा मुर गित्ताइम सहर प्रोक्शा लशो बाक्मा बाक्त। मिनु मेना रे मेकेर अर्को रागी डा मुर दुम्शा बाक्मा बाक्त। नेहेम्याह ११:१३

4 मिनु सावल आ तौ योनाथन के यो तौ का बाक्माक्त। मेको खोइल निम्फा मदुकब बाक्माक्त। मेको ५ बर्स दुम्मेनु, सावल नु योनाथन बेक्ताक्स देशो लोत्र येजेल रे नेंसे बाक्त। मेको लोत्र नेंशा आ खाल पाइब मीश मुरुमी मेको कली कुरशा प्रोक्मेनु, थिश्शा मेको आल आ खोइल मदुकब दुम्शो बाक्माक्त। मेको आ नें मेफी-बोशेथ बाक्माक्त। मेफी-बोशेथ आ नें मेरीब-बाल नु इश-बोशेथ देनीम। २सामुएल ९:३; १इतिहास ८:३४; १इतिहास ९:४०

5 बेयरोथ सहर डा मुर रिम्मोन आ तौ निकशी रेकाब नु बानाह नाक्ती उइक्थ दुम्मेनु, इश-बोशेथ आ खिंम जाक्सा बाक्त। मेना इश-बोशेथ इप्शो बाक्माक्त। २सामुएल २:८

6 मेको निकशी चेरब लाइक्चशो खोदेशो परखु पा, खिं ओव्रसा बाक्त। मिनु मेको कली कोव्रजम तूशा सदसे बाक्त। मिनु रेकाब नु आ लोक्ब बानाह सुइम मतुइक्थु प्रोक्सा बाक्त।

7 मेको निकशीमी इश-बोशेथ कली दोपा सदसे बाक्त देशा हना, इश-बोशेथ इप्शा बाक्शो कोठा ओव्रशा, मेको कली तूशा साइशशा आ पिया खोइशशा लदसे बाक्त। मिनु नाक्दो रे अराबाह रे गाक्शा, हेब्रोन जाक्सा बाक्त।

8 मिनु मेको निकशीमी मेको पिया दाऊद आ बाक्तीक हेब्रोनमी चाक्सासे बाक्त। मिनु पिप कली “सावल आ तौ इश-बोशेथ आ पिया एको बाक्ब। इन कली साइक्चा माल्ब इन सत्रु बाक्त। मुलाक्ती परमप्रभु यावेमी सावल नु आ चच युइ आन कली क्येक्क लेत्ताक्व” देसा बाक्त।

9 मिनु दाऊदमी बेयरोथ सहर डा रिम्मोन आ तौ रेकाब नु बानाह आस कली “परमप्रभु यावे ब्रोंइशा बाक्शो खोदेशो पा, मेकोमी आं कली आं श्येत नेल्ल रे प्रोंइती।



10 'सावल बेकशो रिम्शो लोत्र बाक्व' दे मिम्शा आं कली देंब मुर कली गो ग्याइशशा सिकलागमी साइक्ता। मेको आ लोत्र आ इनाम बाक्त। २सामुएल १:१५

11 मिनु परमप्रभु यावे आ अरेशो मटीब मुरुमी ठीक पाइब मुर कली आ आंम खिंम बाक्शा, इप्तीकेम इप्शो मुर कली साइक्व आस कली मेको क्येडा यो क्येक्क लेत्वा ममाल्नुडा डा? मार, मुल गो मेको आ हुश आ क्येक्क लेशशा इस कली साइशशा, रागी रे मक्याम्नुडा?" देंमाक्त। २सामुएल ३:३२

12 मिनु दाऊदम टिटा मुर आन कली "मेको आस कली सतीन" दे अरेवा बाक्त। मिनु मेको आस कली सदमे बाक्त। आस गुइ खोइल खोइशशा, हेब्रोन डा दोम्ली आ नेक्था क्युकगमे बाक्त। मिनु मुरपुकीमी इश-बोशेश आ पिया लाइशशा, आब्नेर आ तुरस हेब्रोनमी थिम्मे बाक्त। ब्यवस्था २१:२२-२३

## 5

### दाऊद पिप दुम्शो

#### १इतिहास ११:१-३

1 मिनु नोले इस्राएल आ थर डा मुर नेल्ल दाऊद आ बाक्तीक हेब्रोनम जाक्शा, मेको कली "गो इन हुश नकी।

2 डोंइती सावल आंइ पिप बाक्मेनु, गे लडाइ पाइब आन कली लाइक्तीक नु चाक्तीक पशो ननी। परमप्रभु यावेमी इन कली 'गे आं मुर इस्राएली आन गोठला दुम्चा माल्नेवे। गे इस्राएली आन पिप दुम्नेवे' देशो बाक्व" देंमा बाक्त। १सामुएल १८:१३,१६; १सामुएल १३:१४; १सामुएल २५:३०

3 मिनु इस्राएल डा खाल्पा नेल्ल पिप आ बाक्तीक हेब्रोनम जाक्मा बाक्त। मेकेर पिप दाऊदमी मेकोपुकी नु परमप्रभु यावे आ डोंइती कबल का पवा बाक्त। मिनु मेकोपुकीम दाऊद कली तेल लुक्शा, इस्राएल डा पिप सेल्मे बाक्त। २सामुएल २:४; १सामुएल १६:१३

4 दाऊद ३० बर्स दुम्मेनु, पिप दुम्माक्त। मिनु मेकोमी ४० बर्स सासन पवा बाक्त। १राजा २:११; १इतिहास ३:४; १इतिहास २९:२७

5 मेकोम हेब्रोनम बाक्शा, यहूदा कली ७ बर्स ६ महिना सासन पवा बाक्त। मिनु यरूसलेम सहरमी बाक्शा ३३ बर्स इस्राएल नेल्ल नु यहूदा कली सासन पवा बाक्त।

### दाऊदमी यरूसलेम ग्राशो

#### १इतिहास ११:४-९; १इतिहास १४:१-७

6 नोले पिप दाऊद नु आ मुरपुकी, यरूसलेम सहरम बाक्व यबुसी नु लडाइ पचा कली यरूसलेम लमा बाक्त। मिनु यबुसीपुकीम दाऊद कली "गे एक जाक्ने मचाप्नीनी। मिक्च मताइब नु खोइल मदुक्बम यो इन कली प्रोक्पाइक्नीम" देंमा बाक्त। मोपा दाऊद जाक्ने मचाप्ब, दे मिम्तमे बाक्त। यहोसु १५:६३; न्यायाधीस १:२१; न्यायाधीस १९:१०-१२

7 मो हना यो दाऊदमी गारो हिरशो सियोन ग्रामाक्त। मिनु मेको दाऊद आ सहर दुम्माक्त।

8 मेको नाक्त दाऊदमी "सुम यबुसी आन कली साइक्वा, मेकोम ब्वाक्कु यितीकर दे जाक्शा, दाऊद कली ग्रांया दीब मिक्च मताइब नु खोइल मदुक्ब आन कली सदमेक्ल" देंमाक्त। मोपतीके "मिक्च मताइब नु खोइल मदुक्ब पिप आ खिं ओत्रचा मताइनीम" देशो बाक्मा बाक्त।

9 मिनु दाऊद मेको गारो हिरशो सहरम बाक्शा, मेको आ नें दाऊद आ सहर वोदा बाक्त। मिनु दाऊदमी मिल्लो रे पा आगा एर ओंथ नेल्ल सहर सेला बाक्त।

10 मिनु दाऊद शश ठेयब दुम्ना दुम्न लमाक्त। मारदे हना परमप्रभु यावे मुर नेल्ल आन परमप्रभु मेको नु बाक्माक्त। २सामुएल ३:३

11 टायर डा पिप हीराममी आ लोत्र कुरब आन कली दाऊद आ बाक्तीके सोइक्ता बाक्त। हीरामम लेबानोन डा लाइशशा रवा आ शी नु शी सेल्ब नु गारो प्रोत्रब यो सोइक्ता बाक्त। मिनु मेकोपुकीम दाऊद कली खिं का सेल्मे बाक्त।

12 मिनु दाऊदमी “परमप्रभु यावेम आं कली इस्राएल डा सक्ति पाइश्शो पिप सेल्यी बाक्त। मिनु आ मुर इस्राएली आन पर्बम मेको आन राज्य ठेयब सेला बाक्त” दे तुइकता बाक्त।

13 दाऊद हेब्रोन रे यरूसलेम याक्से नोले मेकोमी मेकेर शुश मीश चाक्गा बाक्त। मेको के अर्को तमी तौ यो जरमेसमा बाक्त। २सामुएल ३:२-५; १इतिहास ३:५-९

14 यरूसलेम सहरम जरमेशो दाऊद आ तौपुकी शम्मुआ, शोबाब, नाथान, सोलोमन, लूका ३:३१; मती १:६

15 इभार, एली-शुआ, नेफेग, याफीया

16 एली-शामा, एली-आदा नु एली-फेलेत बाक्मा बाक्त।

दाऊदम पलिस्ती आन कली फ्रुशो

१इतिहास १४:८-१७

17 पलिस्तीपुकीम दाऊद इस्राएल डा पिप दुम्त देशो लोत्र नेन्मे बाक्त। मिनु पलिस्ती नेल्ल लडाइ पाइब लाइश्शा, दाऊद कली माल्थ लमा बाक्त। तन्न दाऊदम मेको लोत्र नेंशा उइ डा बोल्यो दरवार लशा बाक्माक्त। १सामुएल २२:१; २सामुएल २३:१४

18 मिनु पलिस्तीपुकी जाक्शा, रेफाइम डा बेसीम ब्रशा बाक्मा बाक्त। यहोसु १५:८; यहोसु १८:१६

19 मिनु दाऊदमी परमप्रभु यावे कली “गो पलिस्ती आन कली लडाइ तोतामी हना, गो मेको आन कली आं गुइमी गेनीनी?” दे हिल्लो पवा बाक्त। मिनु परमप्रभु यावेमी “लावो, गो थमा पा मेको आन कली इ गुइम गेनुइ” देमाक्त। १सामुएल ३०:८

20 मिनु दाऊद लशा, बाल-पेराजीमम लडाइ तोमी बाक्त। मिनु मेको आन कली ग्रामाक्त। मिनु दाऊदमी “बारशो व्वाक्कुम आ एर ओंथ प्रेशो खोदेशो पा, परमप्रभु यावेम आं जोरी सत्रु आन कली फ्रुप्तु” देमाक्त। मोपतीके मेकेर बाल-पेराजीम नें लीमाक्त। यसैया २१:२८

21 पलिस्तीपुकीम आन मूर्ति मेक उइ प्रोन्मे बाक्त। मिनु दाऊद नु आ मुरपुकीमी मेको लदमे बाक्त।

22 मिनु लेंशा पलिस्तीपुकी जाक्शा रेफाइम डा बेसीम ब्रशा बाक्मा बाक्त।

23 मिनु दाऊदम लेंशा परमप्रभु यावे कली हिल्लो पवा बाक्त। मिनु परमप्रभु यावेमी “मुल सोजो लडाइ मपावो। हिरशा, ठेयब रवा आ आइक्ची हांबु नोले रे लडाइ पावो।

24 रवा आन डरम लडाइ पाइब आन दोरशो नेंनी चोटी होस पावो। मारदे हना परमप्रभु यावे पलिस्ती आन कली फ्रुचा कली इ डोंइती गाक्ब” देमाक्त।

25 मिनु दाऊदमी परमप्रभु यावेम आ कली देशो खोदेशो पा पवा बाक्त। मिनु पलिस्ती आन कली गेबा रे गेजर सहर डा लां सम्म शोल्मो पा सदमे बाक्त। न्यायाधीस १:२९

## 6

परमप्रभु आ सन्दोस चाक्शो

१इतिहास १३:५; १इतिहास १५:१६

1 मिनु दाऊदमी इस्राएल डा ३० हजार योत्रशो मुर आन कली खुप्तीमी बाक्त।

2 मिनु दाऊद नु मेको मुर नेल्ल परमप्रभु आ सन्दोस चाक्चा कली यहूदा डा बाले सहर रे लमा बाक्त। मेको सन्दोस तार आ नें बाक्त। मुर नेल्ल आन परमप्रभु यावे आ नें मेकेर बाक्ब। मेको करूब आस दातेम बाक्ब। बाले सहर आ अर्को नें किरयथ-यारीम बाक्त। यहोसु १५:९ प्रस्थान २५:२२

3 मेकोपुकीम परमप्रभु आ सन्दोस डांडाम बाक्शो अबीनादाब आ खिं रे गुंइशा, नक बग्गी काम वोदमे बाक्त। अबीनादाब आ तौ निक्शी उज्जाह नु अहीयोमी मेको नक बग्गी खुल्ना खुल्न लदसे बाक्त। १सामुएल ७:१

4 मेकोपुकीम परमप्रभु आ सन्दोस डांडाम बाक्शो अबीनादाब आ खिं रे लदमे बाक्त। अहीयो चहिं मेको बग्गी आ डोंइती गाक्माक्त।

5 मिनु दाऊद नु इस्राएली नेल्ल आन जोब बोक्शा परमप्रभु यावे आ डोंइती कुम्सो पना पन बीना, तार पाइश्शो ठेयब ताप्तीक, खैजडी, मार मार ताप्तीक नु बुप्केल ताप्शा सिल पना पन गाक्मा बाक्त।

6 मेकोपुकी नाकोन आ खलाम जाकमानु, ब्यफ दाइल पांडससा बाक्त। मिनु उज्जाहम आ गुड दिंशा, परमप्रभु आ सन्दोस तिकगा बाक्त।

7 मिनु परमप्रभु यावे उज्जाह कली तशा, गाइक्ता बाक्त। मिनु परमप्रभुमी मेको आ गुड दिंशा, सन्दोस थिशो तशा, आ सन्दोस आ नेक्था उड सदा बाक्त। १सामुएल ६:१९; गन्ती ४:१५

8 मिनु दाऊद गाइक्ता बाक्त। मारेदे हना परमप्रभु यावेम उज्जाह आ पबंम गाइश्शा, मेको कली सदा बाक्त। मोपतीके मेकेर परेस-उज्जा नें वोदा बाक्त। मेको आ नें मुल सम्म मेकोन बाक्व।

9 मेको नाक्ती दाऊद परमप्रभु यावे क्येडा हिंमाक्त। मिनु “मुल गो परमप्रभु यावे आ सन्दोस दोपा लाइक्नुडा?” देंमाक्त।

10 मिनु दाऊदमी परमप्रभु यावे आ सन्दोस आ बाक्तीके, दाऊद आ सहर, लाइक्ने मचबा बाक्त। मिनु आ खिं लाइक्चा आ पा डा मेको गित्त आ खिं डा मुर, ओबेद-एदोम आ खिंमी चाक्दीदा बाक्त।

11 मोपा परमप्रभु यावे आ सन्दोस ओबेद-एदोम आ खिंमी महिना सां सम्म बाक्माक्त। मिनु परमप्रभु यावेमी गित्त आ खिं डा ओबेद-एदोम नु आ खिं डा मुर नेल्ल आन कली आसीक गेमी बाक्त।

### सन्दोस यरूसलेमम चाक्शो

12 मिनु मुरपुकीमी दाऊद कली “परमप्रभु यावेमी, परमप्रभु आ सन्दोस वोइश्शो आ पबंम ओबेद-एदोम आ खिं डा मुर नु आ मारेइ मारेइ आन कली आसीक गेन्तु” दे मदमे बाक्त। मिनु दाऊद लशा, ओबेद-एदोम आ खिं रे थाम्पा ग्येरसीशा, मेको परमप्रभु आ सन्दोस आ सहरमी चाक्गा बाक्त।

13 परमप्रभु यावे आ सन्दोस कुरब मुर ६ पैला गाक्शा नोले, मेकोपुकीम ब्यफ का नु दोमशो बाछा का क्योरशा चढेमे बाक्त। १राजा ८:५

14 दाऊदम सुती के ऊरीम नु थुम्मी कुरतीके पांडशा, परमप्रभु यावे आ डोंइती आ जोंब बोक्शा सिल पवा बाक्त। प्रस्थान २८:६; १सामुएल २:१८; १सामुएल २२:१८

15 मिनु दाऊद नु इस्त्राएल आ खिं डा मुर नेल्ल रेयके पना पन तुराही ताम्ना ताम्न परमप्रभु यावे आ सन्दोस चाक्गमे बाक्त।

16 मिनु परमप्रभु यावे आ सन्दोस दाऊद आ सहरमी चाक्गामेनु, सावल आ तमी मिकालमी झेल रे कोव्रडा बाक्त। मिनु पिप दाऊद कली परमप्रभु यावे आ डोंइती प्रेक्ना प्रेक्न, सिल पशो तशा, आ थुंमी ग्रॉगा दिमाक्त।

17 मिनु मेकोपुकीम परमप्रभु यावे आ सन्दोस वोइक्चा कली दाऊदम कीशो ताम्बुम ओइदमे बाक्त। मिनु दाऊदमी परमप्रभु यावे आ डोंइती चोशा चढेतीक नु दुशा बाक्चा आ पबंम चढेतीक चढेवा बाक्त।

18 दाऊदमी मेको चोशा चढेतीक नु दुशा बाक्चा आ पबंम चढेतीके चढेने थुम्शा, मुर नेल्ल आन परमप्रभु यावे आ नेंमी आ मुर नेल्ल आन कली आसीक गेमी बाक्त। १राजा ८:५५

19 मिनु दाऊदमी इस्त्राएली नेल्ल आन कली नु मेकेर देल्लो मीश मुर, वोंइश मुर नेल्ल आन कली शोब्ले का का, चोकटा का का श्ये, सोव्रशो अडगुर शोब्ले गेमी बाक्त। मिनु मुर नेल्ल आन खिं लेम्मा बाक्त।

20 मिनु दाऊद आ खिं डा मुर आन कली आसीक गेथ लेम्मेनु, सावल आ तमी मिकाल मेको कली गुम्थ लाडगा ग्रूशा पिमाक्त। मिनु मेकोम “मुलाक्ती इस्त्राएल डा पिप थम ठेयब मिम्सीशो बाक्त। मेको मुलाक्त आ गेय पाइब वाइलीम आन डोंइती शिश्रा दुम्शा, मुने मपाइश्शो आइक्च मुर खोदेंशो दुम्त” देंमाक्त।

21 मिनु दाऊदम मिकाल कली “इ आफ नु आ खिं डा मुर आन पा डा आं कली इस्त्राएल डा आ मुर आन पिप सेल्ब परमप्रभु यावे आ डोंइती मो पाता। गो परमप्रभु यावे आ डोंइती ग्येरशा सिल पाइनुड। २सामुएल ५:२

22 गो थमा पा मुल यो मेको क्येडा यो आइक्च दुम्नुड। तन्न मेको आं वाइलीम आन पबंम गे मार देने, मेकोपुकीमी आं कली मो पशो आ पबंम मान पाइनीम” देंमाक्त।

23 मोपतीके मेको सावल आ तमी मिकाल के आ बेक्ची नाक्त सम्म तमी तौ मडुम्मा बाक्त।

## 7

परमप्रभुमी दाऊद नु लोव्र पशो

१इतिहास १७:-

1 मिनु पिप आंम खिंम बाक्म नोले, परमप्रभु यावेम मेको कली आ एर ओंथ डा जोरी सत्रु नेल्ल आन रे नाइक्चा गेवा बाक्त।

2 मिनु पिपमी परमप्रभु यावे आ लोव्र पाइब नाथान कली “कोव्रडीन। गो लेबानोन डा लाइशशो रवा आ शी के सेल्शो खिंम बाक्शो बाक्नुड। तन्न परमप्रभु आ सन्दोस चहिं ताम्बुम बाक्ब” देमाक्त। भजन संग्रह १३२:३-५

3 मिनु नाथानमी पिप कली “दुम्ब, इन थुंम मार बाक्मे, मेको पने। मारदे हना परमप्रभु यावे गे नु बाक्ब” देमाक्त।

4 तन्न मेको नाकदोन परमप्रभु यावेम नाथान कली लोव्र पवा बाक्त।

5 मार लोव्र पवा बाक्त देशा हना “गे लशा, आं गेय पाइब दाऊद कली ‘गे आं कली बाक्चा कली खिं सेलनेवे डा? १इतिहास २२:८; १राजा ५:१७

6 गो इस्राएली आन कली इजीप्त रे चाक्गुमी रे मुल सम्म गेनायो खिंम मबाक्ड। ताम्बु नु अरु बाक्तीकेम बाक्ती। १राजा ८:१६, २७; यसैया ६६:१

7 गो इस्राएल डा आं मुरपुकी नु ते ते गाक्डा, मेक मेक मार आं मुर इस्राएली आन कली कोव्रब, आन थर डा ठेयब मुर आन कली आं कली लेबानोन डा लाइशशो रवा आ शी के खिं मारदे मसेल्नी’ देडा डा?

8 मोपतीके गे आं गेय पाइब दाऊद कली मुर नेल्ल आन परमप्रभु यावेमी मार देत देशा हना ‘इ कली, आं मुर इस्राएली आन कली कोव्रब दुम्पाइक्चा कली भेडा योव्रतीक रे चाक्तन। १सामुएल १६:११-१३; २सामुएल ५:२

9 गे ते ते गाक्डे, मेक मेक गो गे नु बाक्ती। गो इ जोरी सत्रु नेल्ल आन कली इ डोंडती रे खेरतामी। गो इ नें रागी डा ठेयब मुर आन नें खोदेशो पा ठेयब सेल्लुड।

10 गो आं मुर इस्राएली आन कली बाक्तीक का योव्रनुड। मिनु मेकोपुकी आंम आंम रागीम बाक्नीम। मुल रे मेको आन कली सुइम श्येत मगेनीम। डोंडती डा खोदेशो पा मुल रे मेको आन कली सुइम मरिम्शो मपाइनीम, श्येत मगेनीम।

11 आं मुर इस्राएली आन कली निसाफ पाइब योव्रशो रे गो इ कली इ जोरी सत्रु नेल्ल रे नाइक्पाइक्वन। मिनु परमप्रभु यावेमी इ कली चच युइ गेब’ दे मतो” देमाक्त।

दाऊदम आसीक तशो

12 परमप्रभु यावेम दाऊद कली “इ नाक्त नुप्त हना नु इ किकी पिपी नु बाक्थ लचा नोले गो इ खिं डा मुर आन दाते रे का कली इ पा डा पिप सेल्लुड। मिनु मेको आ राज्य बोल्यो सेल्लुड। १राजा ८:२०

13 मिनु मेकोमी आं नैमी खिं का सेल्ल। गो मेको आ राज्य गेना हना यो बाक्ब सेल्लुड। १राजा ५:१९; १राजा ६:१२; भजन संग्रह ८९:४-५; यसैया ९:६

14 गो मेको आ आफ दुम्बुड। मिनु मेको आं तौ दुम्ब। मेकोम मरिम्शो पापु हना, गो मेको कली मुर खोदेशो पा कोक्केम तुप्नुड। भजन संग्रह २:७; भजन संग्रह ८९:२७; लूका १:३२; हिब्रू १:५

15 तन्न गो गेना हना यो आं दाक्तीकेम मप्रोंडनुड। मेको इ डोंडती सावल कली प्रोंडशो खोदेशो पा मेको कली मप्रोंडनुड। १सामुएल १५:२३-२६

16 इ खिं नु इ राज्य गेना हना यो आं डोंडती लीब। इ सासन पतीक गेना यो लीब” देमाक्त। भजन संग्रह ७२:५; यसैया ५५:३

17 मिनु नाथानम मेको देशो लोव्र नु कोइशो नेल्ल दाऊद कली देमाक्त।

दाऊदम परमप्रभु कली ठेयब सेल्शो

18 मिनु पिप दाऊद परमप्रभु यावे आ बाक्तीक ओव्रशा, मेको कली “परमप्रभु यावे, गो सु नडा? आं खिं डा मुर सु बाक्नीमी? मिनु गे आं कली एक सम्म चाक्यीनी?

19 आं कली पशो इन डोंइती आइक्च बाक्ब। गे इन गेय पाइब आ खिं आ पर्वम नोले दुम्ब लोत्र यो पाइतीनी। परमप्रभु यावे, मेको इन मुर आन कली अरेशो लोत्र बाक्ब।

20 परमप्रभु यावे, मुल गो एको क्येडा शुश मार देने चाप्नुडा डा? मारदे हना गे इन गेय पाइब कली रिम्शो पा तुइक्नीनी।

21 गे इन थुंम मिम्शा, थोकशा पशो लोत्र इन गेय पाइब, आं कली तुइक्पाइक्चा कली मोदेशो ठेयब गेय पाइतीनी।

22 मोपतीके परमप्रभु यावे, परमप्रभु गे ठेयब बाक्नीनी। इन खोदेशो अरु सुइ मबाक्नीम। अर्को परमप्रभु यो मबाक्नीम।

23 इन मुर खोदेशो अर्को सु बाक्नीमी? इस्राएली खोदेशो सु बाक्नीमी? रागी नेल्लेमी परमप्रभुम प्रोंइशो इस्राएली खोदेशो अर्को जात यो बाक्मा कों? गे इन नें ठेयब सेल्चा कली गे इन मुर आन कली ठेयब नु छक लाक्चा डा गेय पाइतीनी। गे इन मुर आन डोंइती रे रागी रागी डा मुर नु आन देवी देवता आन कली खेरतीनी। ब्यवस्था ४:७

24 गे इन मुर इस्राएली आन कली गेना हना यो इन मुर दुम्पाइक्चा कली बोल्यो सेलतीनी। मिनु परमप्रभु यावे, गे मेको आन परमप्रभु दुम्तीनी।

25 परमप्रभु यावे, मुल परमप्रभु, इन गेय पाइब नु मेको आ खिं डा मुर आन पर्वम देशो गेना हना यो खपीन। इन थोकशा पशो लोत्र खोदेशो पा पने।

26 मुर नेल्ल आन परमप्रभु यावे इस्राएली आन परमप्रभु बाक्ब। मिनु इन गेय पाइब दाऊद आ खिं गेना हना यो इन डोंइती लीब, दे इन नें गेना हना यो ठेयब सेलनीम।

27 मारदे हना गे, मुर नेल्ल आन परमप्रभु यावे, इस्राएल आ परमप्रभु, इन गेय पाइब कली 'गो इ खिं सेलनुड' देंतीनी। गो महिंथु, एको लोत्र पाता। यसेया ५०:५

28 परमप्रभु यावे, गे परमप्रभु बाक्नीनी। इन लोत्र थमा बाक्ब। गे इन गेय पाइब कली रिम्शो थोकशा पशो लोत्र पाइतीनी। १राजा ८:२६

29 मोपतीके मुल इन गेय पाइब आ खिं कली आसीक गेने। मिनु मेको इन डोंइती गेना हना यो लील। परमप्रभु यावे मेको गे पाइतीनी। मिनु इन आसीकमी इन गेय पाइब आ खिं गेना हना यो आसीक राइब” दे परमप्रभु कली पुना बाक्त।

## 8

दाऊद आ पशो नु ग्राशो लडाइ

१इतिहास १८:१-१३

1 मिनु इच्का नोले दाऊदमी पलिस्ती आन कली लडाइ तोशा ग्रामाक्त। दाऊदमी मेथेग-आम्माह सहर आम के सेला बाक्त।

2 दाऊदम मोआबी आन कली यो फुवा बाक्त। मिनु मेको आन कली खपीम इप्पाइक्मी बाक्त। मिनु डोरी कामी थाप्शा भाग सां सेलमी बाक्त। भाग निक्शी डा मुर आन कली साइक्मी बाक्त। मिनु भाग का डा मुर आन कली प्रोंइमी बाक्त। मिनु मोआबीपुकी मेको आ वाइल दुम्मा बाक्त। मिनु मेकोपुकीम दाऊद कली तिरो थाप्चा माल्मा बाक्त। १सामुएल २२:३

3 मिनु दाऊद युफ्रेटीस खोला आ नेक्थाम आ अधिकार चोइक्चा कली लमेनु, सोबाह सहर डा रेहोब आ तौ पिप हादादेजेर कली यो लडाइ पा ग्रामाक्त।

4 दाऊदम मेको रे हजार का ७ सहे शारा डोइक्बपुकी नु २० हजार जना खोइलीम गाक्ब लडाइ पाइब आन कली ग्याइक्तीमी बाक्त। मिनु दाऊदम बग्गी कीब शारा आन नारी खोदा बाक्त। मिनु आम कली सहे का शारा बग्गी कीचा कली वोदा बाक्त। यहोसु ११:९

5 मेना दमस्कस डा अराम डा मुर सोबाह सहर डा पिप हादादेजेर कली वारच पाइक्चा कली जाक्मा बाक्त। मिनु दाऊदम मेको आन दाते डा २२ हजार अरामी आन कली साइक्मी बाक्त।

6 मिनू दाऊदम मेको अराम डा मुर आन रागी दमस्कसम कोव्रब मुर वोइक्मी बाक्त। मिनू मेकोपुकी दाऊद आ वाइल दुग्शा, तिरो थाप्चा माल्मा बाक्त। मोपा परमप्रभु यावेम दाऊद ते ते गाक्मे, मेक मेक ग्रापदा बाक्त।

7 हादादेजेर आ गेय पाइब आन कुरशो सुन के तेक्तीके दाऊदम आइक्के सेला बाक्त। मिनू मेको यरूसलेम सहरम चाक्गा बाक्त।

8 मेकोमी हादादेजेर आ सहर, बेताह नु बेरोथाइ सहर रे शुश कांसा चाक्गा बाक्त।

9 मिनू हमाथ डा पिप तोइमी “दाऊदम हादादेजेर आ लडाइ पाइब नेल्ल आन कली फ्रुप्तु” दंशो नेना बाक्त।

10 मिनू पिप तोइमी आ तौ योराम कली दाऊद कली ग्रुम्थ सोइक्ता बाक्त। मिनू मेकोमी दाऊद कली “गे लडाइम हादादेजेर कली फ्रुशा रिम्शो पाइतीनी” दंथ नु मान पा ठेयब सेल्लिक लोत्र पथ सोइक्ता बाक्त। मारेदे हना हादादेजेर नु तोइ आस दातेमी लडाइ दुम्ना दुम्न बाक्शो बाक्माक्त। योराममी सुन चांदी नु कांसा के ग्योब यो चाक्गा बाक्त।

11 पिप दाऊदमी मेको यो परमप्रभु यावे कली गेवा बाक्त। आ फ्रुशो रागी नेल्ल डा सुन चांदी मोपा गेबाक्माक्त।

12 एदोम, मोआब, अम्मोन पलिस्ती नु अमालेक रे चाक्शो सुन चांदी, सोबाह सहर डा रेहोब आ तौ पिप हादादेजेर रे रोइश्शो मारेइ मारेइ परमप्रभु यावे कली गेवा बाक्त।

13 दाऊद लडाइ ग्राशा, आ नें चेम्शा लेम्मेनु, हिक्सी बाक्शो बेसीम १८ हजार एदोम डा मुर आन कली साइक्मी बाक्त। भजन संग्रह ६०:२

14 मेकोमी एदोम रागी नेल्लेम कोव्रब मुर वोइक्मी बाक्त। मिनू एदोम डा मुर नेल्ल दाऊद आ वाइल दुम्मा बाक्त। मोपा परमप्रभु यावेम दाऊद ते ते लमे, मेक मेक ग्रापदा बाक्त। उत्पत्ती २७:४०; गन्ती २४:१८

दाऊद आ गेय पाइबपुकी

१इतिहास १८:१४-१७

15 मिनू दाऊदमी इस्त्राएल रागी नेल्लेम सासन पवा बाक्त। मिनू आ मुर नेल्ल आन कली ठीक निसाफ पवा बाक्त।

16 सेरूयाह आ तौ योआब लडाइ पाइब आन ठेयब मुर बाक्माक्त। अहीलुद आ तौ येहो-शाफात मेको आ ब्रेक्ब बाक्माक्त। २सामुएल २:२३-२६

17 अहीतुब आ तौ सादोक नु अबीयाथार आ तौ अहीमेलेक चढ़ेब बाक्सा बाक्त। सेरायाह ब्रेक्ब बाक्माक्त।

18 येहो-यादा आ तौ बेनायाह, केरेथी नु पेलेथी, पिप कली कोव्रब आन ठेयब मुर बाक्माक्त। दाऊद आ तौपुकी चहिं चढ़ेब बाक्मा बाक्त। २सामुएल १५:१८

## 9

दाऊदमी शिशी पशो

1 मिनू दाऊदमी “मार, सावल आ खिं डा मुर सुइ ब्रोंइशो बाक्नीमी? मेको आन कली गो योनाथन आ पर्वम शिशी पाइक्ने चाप्नुडा?” दे हिल्लो पवा बाक्त।

2 सावल आ खिं डा सीबा नें पाइश्शो गेय पाइब मुर का बाक्माक्त। दाऊदम मेको कली ब्रेथ सोइक्ता बाक्त। मिनू पिपमी मेको कली “मार, गे सीबा नवे” देमाक्त। मिनू मेकोम “ओ, गो इन गेय पाइब सीबा नड” देमाक्त। २सामुएल १६:१

3 मिनू पिपमी “सावल आ खिं डा सुइ ब्रोंइशा लीशो बाक्नीमी? गो मेको कली परमप्रभु आ दाक्तीक कोइचा दाक्नुड?” देमाक्त। मिनू सीबाम पिप कली “योनाथन आ तौ का ब्रोंइशा लीशो बाक्ब। मेको आ खोइल निम्फा मदुक्ब बाक्ब” देमाक्त।

4 मिनू पिपमी मेको कली “मेको ते बाक्म?” दे हिल्लो पवा बाक्त। मिनू सीबामी “मेको लो-देबार सहर डा अम्मीएल आ तौ माकीर आ खिंम बाक्ब” देमाक्त। २सामुएल १७:२७

5 मिनु पिप दाऊदमी लो-देबार डा अम्मीएल आ तौ माकीर आ खिंम मुर सोइशशा मेको कली चाक्पदां बाक्त।

6 मिनु योनाथन आ तौ सावल आ चच मेफी-बोशेथ दाऊद आ बाक्तीके जाक्माक्त। मिनु मेकोमी खुम्की पा बाप्शा पिप कली सेउ पवा बाक्त। मिनु दाऊदम मेको कली “मेफी-बोशेथ” देमाक्त। मिनु मेफी-बोशेथमी “गो इन गेय पाइब एक बाक्ती” देमाक्त।

7 मिनु दाऊदम मेको कली “महिंनो, गो इ कली इ आफ योनाथन आ पर्वम शिशी पाइक्नुड। गो इ कली इ बाजे सावल आ रू नेल्ल लेशशा गेनन। मिनु गे गेना हना यो गो नु बाक्शा जाइनेवे” देमाक्त।

8 मिनु मेफी-बोशेथम खुम्की पा बाप्शा “गो सु नडा डा? पिपमी गो बेक्शो कुचुम खोदेशो मुर, आं कली शिशी पाइय्यीनी?” देमाक्त।

9 मिनु दाऊदमी सावल आ गेय पाइब सीबा कली ब्रेशशा “सावल नु आं खिं डा शोंप नेल्ल गो इ होव्रप आ चच कली गेता। २सामुएल १९:२९-३०

10 गे, इ तौपुकी नु इ गेय पाइब नेल्लेमी मेको आ रूम गेय पचा माल्नीनी। मिनु गे इ होव्रप आ चच आ खिं डा मुर आन कली गेचा माल्लेवे। तन्न इ होव्रप आ चच मेफी-बोशेथ गेना हना यो गो नु काथा बाक्शा जाइब” दे मदा बाक्त। सीबा के १५ जना तौ नु २० जना गेय पाइब बाक्मा बाक्त।

11 मिनु सीबाम पिप कली “आं प्रभु पिप, गो इन गेय पाइबमी इन देशो खोदेशो पा नेल्ल पाइक्नुड” देमाक्त। मेफी-बोशेथ पिप आ तौ का खोदेशो पा पिप दाऊद आ खिंम बाक्शा, जवा बाक्त।

12 मेफी-बोशेथ आ तौ का बाक्माक्त। मेको आ नें मीका बाक्माक्त। मिनु सीबा आ खिं डा मुर नेल्ल मेफी-बोशेथ आ गेय पाइब दुम्मा बाक्त।

13 तन्न मेफी-बोशेथ यरूसलेमम बाक्माक्त। मारदे हना मेकोमी गेना हना यो पिप नु जवा बाक्त। मेको आ खोइल निम्फा मदुक्ब बाक्माक्त। २सामुएल ९:३

## 10

### दाऊदमी लडाइ पशो १इतिहास १९:१-१९

1 मिनु नोले अम्मोनी आन पिप बेक्माक्त। मिनु मेको आ पा डा आ तौ हानुन पिप दुम्माक्त।

2 दाऊदम “नाहाशमी आं कली रिम्शो पशो खोदेशो पा गो नाहाश आं तौ हानुन कली रिम्शो पाइनुड” दे मिम्ता बाक्त। मिनु मेकोमी आ आफ बेक्शो आ पर्वम लेम्शो लोव्र नेंपाइक्थ लोव्र कुरब मुर आन कली सोइक्ता बाक्त। मिनु दाऊद आ मुरपुकी अम्मोनी आन रागीम ओव्रमानु, १सामुएल ११:१

3 अम्मोनी आन कली सासन पाइबम आन प्रभु हानुन कली “दाऊदमी इन आफ कली टेयब सेल्या आ पर्वम इन कली लेम्शो लोव्र नेंपाइक्थ सोइशशो बाक्ब, दे थमा सुइक्नीनी? एको मुरपुकी क्यारी पाइब नम। दाऊदमी एको आन कली इन सहर दोपा ओव्रचा, दे क्यारी पथ सोइशशो बाक्ब” देमा बाक्त।

4 मोपतीके हानुनमी दाऊद आ सोइशशो मुर आन कली ग्याइशशा, आन गल शोके उइक्थ उइक्थ खोइशशा नु आन फेक्शो वा क्रातो सम्म खोइशशा सोइक्तीमी बाक्त।

5 मेको आन कली मो पशो दाऊदम नेना बाक्त। मिनु दाऊदमी मेको आन कली गुम्थ मुर सोइक्ता बाक्त। मारदे हना मेकोपुकी थम मुने तोक्चा पुंडसमा बाक्त। मिनु दाऊदमी “मेको आन गल शोके डोइती डा खोदेशो मद्रुम सम्म यरीको सहरमी बाक्मल” देमाक्त।

6 मिनु अम्मोन डा मुरपुकीमी दाऊद कली गाइक्पाइशशो तुइक्तमे बाक्त। मिनु अम्मोन डा मुरपुकीम बेथ-रेहोब, सोबाह डा २० हजार मुर नु अराम डा खोइलीम गाक्ब लडाइ पाइब आन कली गाल्च थाप्शा चाक्गमे बाक्त। मेकोपुकीम माकाह डा पिप नु हजार का मुर नु तोब रागी रे १२ हजार मुरपुकी गाल्च थाप्शा चाक्गमे बाक्त।

7 दाऊदम मेको लोव्र नेंशा, योआब नु लडाइ पाइब नेल्ल आन कली सोइक्तीमी बाक्त।

8 अम्मोन डा मुर जाक्शा सहर ओव्रतीक ठेयब लाप्चोमी ठीक दुम्मा बाक्त। तन्न सोबाह, रेहोब सहर डा, अराम डा मुरपुकी नु तोब नु माकाह रागी डा मुरपुकी चहिँ दिंमम लडाइ पचा कली ठीक दुम्मा बाक्त।

9 योआबम आ डोंइती नु नोले निम्फा पटटी रे लडाइ तोचशो तवा बाक्त। मिनु मेकोमी इस्राएल डा योव्रशो मुर आन कली अरामी आन डोंइती वोइक्मी बाक्त।

10 लीशो मुर चहिँ आ लोक्ब अबीशै आ हुकुममी गेमी बाक्त। मेकोपुकी अम्मोनी आन डोंइती लडाइ तोचा कली ठीक दुम्मा बाक्त।

11 योआबम “अराम डा मुरपुकीम आंइ कली ग्राना ग्रान पिम्तेक्म हना, आंइ कली वारच पने। अम्मोन डा मुरपुकीम इन कली ग्राना ग्रान पिम्तेक्म हना, गो इन कली वारच पाइनीकी।

12 सक्ति पाइश्शो बोल्यो दुमीन। गो आंम मुरपुकी नु आंम परमप्रभु आ सहर आ परबम महिंथु, लडाइ पय। मिनु परमप्रभु यावेमी आ दाक्शो पवल” देंमाक्त।

13 मिनु योआब नु आ मुरपुकी अरामी नु लडाइ पामे बाक्त। मिनु अरामी मेको आन डोंइती रे प्रोक्मा बाक्त।

14 मिनु अम्मोनीपुकीम अराम डा मुर आन कली प्रोक्शो तशा, आं यो अबीशै आ डोंइती रे प्रोक्शा, आन सहर ओव्रमा बाक्त। मिनु योआब अम्मोनी नु लडाइ पचा प्रोंइशा, लेश्शा यरूसलेम जाक्माक्त।

15 तन्न अरामी इस्राएली नु ब्रुशो तशा, लेंशा बुक्मा बाक्त।

16 हादादेजेरमी युफ्रेटीस खोला आ आइक्की हांबु रे अरामी आन कली ब्रेत्थ सोइक्तीमी बाक्त। मिनु मेकोपुकी हादादेजेर आ लडाइ पाइब आन ठेयब मुर शोबाक आ हुकुममी हेलाम सहरम जाक्मा बाक्त।

17 मिनु दाऊदमी मेकोपुकी लडाइ पथ पिशो लोव्र नेना बाक्त। मिनु मेकोम रीब पा इस्राएल डा लडाइ पाइब नेल्ल आन कली खुष्पा यर्दन आइक्की हांबु शोक्से बाक्त। मिनु हेलाम सहरम जाक्मा बाक्त। मेकेर अरामीपुकी दाऊद नु लडाइ पचा कली ठीक दुम्मा बाक्त। मिनु लडाइ पामे बाक्त।

18 तन्न इस्राएलीपुकीम मेको आन कली प्रोक्पदमे बाक्त। मेकेर दाऊदमी ७ सहे बगी डोइक्ब नु ४० हजार शारा डोइक्ब अरामी आन कली सदा बाक्त। लडाइ पाइब आन ठेयब मुर शोबाक कली बेक्चा डा पा गार सेला बाक्त। मिनु मेको लडाइ पतीकेमीन बेक्माक्त।

19 मिनु हादादेजेर कली वारच पाइब पिप नेल्लेमी इस्राएली नु ब्रुशो, दे तुइश्शा, इस्राएली नु गारचा गोव्रमे बाक्त। मिनु इस्राएली आन हुकुममी बाक्ने बिस्समा बाक्त। मेना रे अराम डा मुरपुकीम अम्मोनी आन कली लेंशा गेनायो वारच मपदमे बाक्त।

## 11

### दाऊदमी पाप पशो

1 नक बर्स जाक्मेनु, पिपपुकी लडाइ पथ गूमा बाक्त। दाऊदमी योआब, लडाइ पाइब आन ठेयब मुर नु इस्राएल डा लडाइ पाइब नेल्ल आन कली सोइक्तीमी बाक्त। मिनु मेकोपुकीम अम्मोन खतम पोक्गामे बाक्त। रब्बाह सहर कली पुन्दमे बाक्त। तन्न दाऊद चहिँ यरूसलेम सहरमी बाक्माक्त। १इतिहास २०:१

2 काबु नाक्ती नाक्नाक्दो दाऊद आ इप्तीकर रे बोक्शा, खिं तार हिरसेनु, मेकोमी मीश मुर का चिक्शो तवा बाक्त। मेको थम दारशो बाक्माक्त। मत्ती ५:२८-२९

3 मेको सु बाक्म, दे हिल्लो पथ, मुर का सोइक्ता बाक्त। मिनु मेकोमी “मेको एलीआम आ तमी, हिन्ती उरीयाह आ मीश बाथ्शेबा बाक्त” देंमाक्त। २सामुएल २३:३९

4 मिनु दाऊदम मेको कली ब्रथ सोइक्ता बाक्त। मिनु मेको जाक्माक्त। मिनु दाऊद मेको नु इम्माक्त। मेको मीश मुर मेना आ रं ब्रोल्शा चिक्शो बाक्माक्त। मिनु नोले बाथ्शेबा आ खिं लेम्माक्त। प्रस्थान २०:१४; लेवी २०:१०; ब्यवस्था २२:२२; लेवी १५:१९

5 मिनु मेकोमी कोव्रज कुरा बाक्त “गो कोव्रज कुरशो दुम्ती” दे दाऊद कली लोव्र सोइक्ता बाक्त।



6 मिनू दाऊदमी योआब कली “मेको आ वोंइश हिती उरीयाह कली आं बाक्तीक सोइकतो” दे लोत्र कुरब सोइकता बाक्त। मिनू योआबमी मेको कली दाऊद आ बाक्तीक सोइकता बाक्त।

7 मिनू उरीयाह जाकमेनु, दाऊदमी “लडाइ दोदेशो दुम्मे, योआब नु अरु लडाइ पाइबपुकी मार पामे?” दे हिल्लो पवा बाक्त।

8 मेको नोले दाऊदमी हिती उरीयाह कली “उइ इ खिं लशा नांइसो, इ खोइल चिक्सो” दे मदा बाक्त। मिनू मेको पिप आ खिं रे गूशा गाकमेनु, पिपमी मेको आ नोले कोसली सोइकता बाक्त।

9 तन्न उरीयाह उइ आ खिं मलथु, पिप आ ओव्रतीक लाच्यो आ नेक्था इम्माक्त। मेकेर आ प्रभु आ गेय पाइबपुकी यो इप्शो बाक्मा बाक्त।

10 मिनू दाऊदम उरीयाह उइ आ खिं मला देशो लोत्र नेना बाक्त। मिनू मेको कली “गे लाइशो लां गाक्शा जाकशो बाक्नेवे। मारदे गे उइ इ खिं मलवे?” दे मदा बाक्त।

11 मिनू उरीयाहमी “परमप्रभु आ सन्दोस, इस्राएल नु यहूदा डा मुर नेल्ल, आं प्रभु योआब नु इन गेय पाइब नेल्ल दिंम डा बाक्तीकेम बाक्शो बाक्नीम। मिनू गो दोपा जचा तूचा नु आं मीश नु इप्चा कली खिं लाइक्नुडा? गे इन ब्रोंइशा बाक्शो खोदेशो पा, गो मो पने मचाप्नुड” देंमाक्त।

12 मिनू दाऊदमी उरीयाह कली “मो हना मुलाक्त का एक बाक्को। मिनू दीसा लेशशा सोइक्नन” देंमाक्त। मोपतीके उरीयाह मेको नाक्ती यरूसलेम उइ बाक्माक्त।

13 मिनू आ दीसा दाऊदमी मेको कली आ बाक्तीकेम जथ ब्रेत्ता बाक्त। मिनू मेको कली दुक्पदा बाक्त। तन्न नाक्दो मेको लाडगा गूशा आ प्रभु आ गेय पाइबपुकी नु आ ब्राख्येम इम्माक्त। तन्न मेको उइ आ खिं मलमाक्त।

14 आ दीसा दाऊदमी योआब कली चिठी का ब्रेक्शा, उरीयाह आ गुइमी सोइकता बाक्त।

15 मेको चिठीम “तेकेर ठेयब लडाइ दुम्मे मेकेर उरीयाह कली सोइशशा, गेपुकी चहिं नोले शोंइसीन। मिनू मेको बेक्ल” दे ब्रेक्ता बाक्त। प्रस्थान २०:१३

16 योआब नु लडाइ पाइबपुकीमी सहर कली पुम्दमे बाक्त। मिनू मेकोमी उरीयाह कली थम ठेयब लडाइ दुम्तीकेम सोइकता बाक्त।

17 मिनू सहर डा मुरपुकी फो फु गूशा योआब नु लडाइ पामे बाक्त। दाऊद आ मुरपुकी का निक्शी बेक्मा बाक्त। हिती उरीयाह यो साइक्या पुंडसे बाक्त।

18 मिनू योआबमी लडाइ डा लोत्र नेल्ल देशा, मुर का दाऊद आ बाक्तीकेम सोइकता बाक्त।

19 योआबमी लोत्र कुरब मुर कली “गे लडाइम मार मार दुम्मे, मेको लोत्र नेल्ल पिप कली शेने थुमी नोले,

20 पिप गाइशशा ‘लडाइ पनीनु सहर आ नेक्था मारदे लनी? गारो तार रे आप्नीम, दे मतुइक्नीनी?

21 येरूब-बाल आ तौ अबीमेलेक कली सुम सदा? मीश मुर कामी थेबेस डा गारो रे यात तोक्शा साइशो बाक्ब। मारदे गे गारो आ नेक्था लनी?’ देंत हना, गे मेको कली ‘इन गेय पाइब हिती उरीयाह यो बेक्त’ मतो” दे मदा बाक्त। न्यायाधीस ९:५३-५४

22 मिनू मेको लोत्र कुरब मुर दाऊद आ बाक्तीक जाक्माक्त। मिनू योआब आ देशो खोदेशो पा लोत्र नेल्ल शोव्रडा बाक्त।

23 मिनू मेको लोत्र चाक्ब मुरुमी दाऊद कली “मुरपुकी आंइ कली लडाइ तोचा कली बुक्तेक्म। मिनू फो फु गूशा दिंमम आंइ कली लडाइ तोम्तेक्म। गोपुकीम मेको आन कली सहर आ लाच्यो सम्म खेदा पा लाइतक।

24 मिनू ब्रा आप्बपुकीम इन गेय पाइब आंइ कली गारो तार रे ब्रा आप्तेक्म। मिनू इन मुर का निक्शी बेक्तेक्म। इन वाइल हिती उरीयाह यो बेक्त” देंमाक्त।

25 मिनू दाऊदम मेको कली “गे योआब कली ‘गे मेको साइशो मुर आन पर्वम सुर्ता मपावो। मारदे हना तरवारम गेना हना यो मुर साइक्ब। गे सहर कली लडाइ तोस डा तोस बाक्शा, ग्रानीनी’ दे आ थुं बारपतीन” देंमाक्त।

26 मिनू उरीयाह आ मीशेम आ वोंइश बेक्शो लोत्र नेशा, मेको आ पर्वम रोंका पवा बाक्त।

27 मिनु रोंका पतीक नाक्त नुम नोले दाऊदम मुर सोइश्शा आ खिं चाक्का बाक्त। मिनु मेको दाऊद आ मीश दुम्शा, तौ का थिमाक्त। तन्न दाऊद आ पशो परमप्रभु यावे आ डोंइती थम मरिम्शो बाक्माक्त।

## 12

### नाथान आ कथा

1 परमप्रभु यावेमी आ लोव्र पाइब नाथान कली दाऊद आ बाक्तीक सोइक्ता बाक्त। मिनु मेको दाऊद आ बाक्तीक जाक्शा, मेको कली “सहर कामी मुर निक्शी बाक्सा बाक्त। मुर का शोंप पाइश्शो नु का पुडग बाक्माक्त। प्रस्थान २०:१७

2 शोंप पाइश्शो मुर के शुश क्यारश भेडा नु बी ब्यफ बाक्मा बाक्त।

3 मेको पुडग मुर के पाठी का ला बाक्माक्त। मेको कली ग्याप्शो बाक्माक्त। मेको पाठी कली थुल्शा, आ आलपुकी नु कोल्पदा बाक्त। मिनु मेकोमी मेको आ भाग जशा तूशा बाक्बाक्माक्त। मेको आ थुकुमीन इब्बाक्माक्त। मिनु मेको मुरुमी मेको पाठी कली आ तमी खोदेशोन पाइक्बाक्माक्त।

4 काबु नाक्ती मेको शोंप पाइश्शो मुर आ खिम पौना का जाक्माक्त। मेको शोंप पाइश्शो मुरुम आ पौना कली थुल्चा कली आ क्यारश भेडा रे मारेइ गेचा थुं मपवा बाक्त। तन्न मेको पुडग मुर आ पाठी चाक्शा आ पौना कली ज्चा ब्वचा थोत्रक सेला बाक्त” दे मदा बाक्त।

5 मिनु दाऊदम मेको लोव्र नेंशा, मो पाइब मुर आ पबंम थाम्पा गाइक्ता बाक्त। मिनु मेकोमी नाथान कली “परमप्रभु यावे ब्रोइशा बाक्शो खोदेशो पा मेको मुर साइक्चा पुंडसीब।

6 मेकोम मोपा शिशी मकोइतीके मेको पाठी का के ४ ओटा पाठी गेचा माल्ब” देंमाक्त। प्रस्थान २१:३७

7 मिनु नाथानम दाऊद कली “मेको मुर गेन ननी। इस्राएली आन परमप्रभु यावेमी मार देंत देशा हना ‘गो इ कली तेल लुक्शा, इस्राएल डा पिप सेलतन। सावल आ गुइ रे प्रोंइतन। १राजा २०:४०

8 गो इ कली इ होव्रप आ खिं नु आ मीशपुकी गेतन। गो इस्राएल नु यहूदा डा मुर इ कली गेतन। मोशोम मगाप्ते हना यो, गो अरु शुश गेन वा।

9 गे मारदे आं लोव्र मटिवी? मारदे आं डोंइती मरिम्शो पवी? गे हित्ती उरीयाह कली तरवारम क्योरतीवी। मिनु मेको आ मीश लाइश्शा, आ वोंइश कली अम्मोनी आन गुडम साइक्पाइक्तीवी। २सामुएल ११:३; १राजा १५:५

10 मोपतीके इ खिं गेना हना यो तरवार रे नाइक्चा मताइब। मारदे हना गे आं लोव्र मटिथु, हित्ती उरीयाह आ मीश चाक्तीवी” देंत। २सामुएल १३:२८-२९; २सामुएल १८:१४; १राजा २:२४-२५; २राजा २५:७

11 परमप्रभु यावेमी ‘गो इ कली इ खिं रे श्येत दुम्पाइक्नुड। गो इ मीश आन कली इ डोंइती इ नेक्था डा मुर कली गेनुड। मिनु मेकोमी नाक्तीन मुर नेल्लेम तचा डा पा मेकोपुकी नु इब्ब। २सामुएल १६:२२; अय्युब ३१:९-१०

12 मारदे हना गे मेको खुइश्शा पाप्तीवी। तन्न गो इस्राएली नेल्ल आन तचा डा पा नाक्तीन पाइनुड’ देशो बाक्ब” दे नाथानमी देंमाक्त।

13 मिनु दाऊदमी नाथान कली “गो परमप्रभु यावे आ डोंइती पाप पाता” देंमाक्त। मिनु नाथानम मेको कली “परमप्रभु यावेमी इ पाप क्याम्ताक्व। गे मबेक्नेवे। २सामुएल २४:१०; भजन संग्रह ५१:३; इजीकीएल १८:२१-२३

14 तन्न गे एको पाप पा परमप्रभु यावे कली गाइक्पाइक्तीवी। मोपतीके इ थिशो आल चहिं बेक्ब” देंमाक्त। २सामुएल ११:२७

15 मिनु नाथान आ खिं लमाक्त। परमप्रभु यावेम उरीयाह आ मीश रे पा जरमेशो दाऊद आ आल कली रोइ पपदा बाक्त।

16 मोपतीके दाऊदम मेको आल आ पबंम परमप्रभु कली पुना बाक्त। मेको मारेइ मजथु खिंडगा लशा खपीम गोल्शा नां सोंइदा बाक्त।

17 खिं डा खाल्पापुकीमी मेको कली “गे बोक्कीन” देंमा बाक्त। तन्न मेको मबिस्से बाक्त। मिनु मेकोपुकी नु जने यो मबिस्से बाक्त।

18 मिनु ७ नाक्त नोले आल बेक्माक्त। मिनु दाऊद आ गेय पाइबपुकीम “आल बेक्त” दे दाऊद कली देंचा हिंमा बाक्त। मारदे हना मेकोपुकीमी “आल सेस बाक्मेनु ला यो इं लोत्र मनंन। मुल मेको कली ‘आल बेक्त’ दे दोपा देंचा? मेकोमी आंम आ कली मारेइ मरिम्शो पाइक्वा कौ?” देंमा बाक्त।

19 तन्न दाऊदम आ गेय पाइबपुकीम शिप शिप पा देशो लोत्र नेशा, आल बेक्माक्त, दे तुइक्ता बाक्त। मिनु दाऊदमी आ गेय पाइब आन कली “आल बेक्मे” दे हिल्लो पामी बाक्त। मिनु मेकोपुकीम “बेक्त” देंमा बाक्त।

20 मिनु दाऊद खप रे बोक्शा, चिक्सीशा, तेल खेक्सीशा, अर्को वा फेक्से बाक्त। मिनु परमप्रभु यावे आ बाक्तीक लशा, परमप्रभु यावे कली टेयब सेला बाक्त। मिनु नोले खिं जाक्शा, जचा थोत्रक पुंइशा, जवा बाक्त।

21 मिनु मेको आ गेय पाइबपुकीम मेको कली “गे मार पनी? आल सेस बाक्म सम्म गे मेको आ पर्वम मारेइ मजथु डाक्शा बाक्तीनी। तन्न आल बेक्म नोले बोक्शा जाइतीनी” देंमा बाक्त।

22 मिनु दाऊदमी “आल सेस बाक्म सम्म गो मारेइ मजथु डाक्शा बाक्ती। परमप्रभु यावेमी आं कली शिशी पा, आल ब्रोंइबा, कौ? दे मिम्ताक्ड।

23 तन्न मुल मेको बेक्त। मारदे गो मारेइ मजथु बाक्नुडा? मार गो मेको कली लेशशा चाक्ने चाप्नुडा? गो मेको आ बाक्तीक लाइनुड। तन्न मेको आं बाक्तीक लेशशा मजाक्ब” देंमाक्त।

24 मिनु दाऊदमी आ मीश बाथ्शेबा कली लेम्दा बाक्त। मिनु मेको नु इम्माक्त। मिनु अर्को तौ का थिमाक्त। मेको आ नें सोलोमन वोदमे बाक्त। मिनु परमप्रभु यावेमी मेको कली दाक्ता बाक्त।

25 मिनु मेको आ नें येदीदीयाह वोइक्चा माल्ब, दे आ लोत्र पाइब नाथान रे पा दाऊद कली लोत्र सोइक्ता बाक्त। येदीदीयाह आ अर्थ चहिं “परमप्रभु यावे आ दाक्शो मुर” बाक्ब।

दाऊदम रब्बाह सहर ग्राशो

१इतिहास २०:१-३

26 मेको नोले योआबमी लडाइ पा अम्मोनी आन पिप आ रब्बाह सहर, ग्रामाक्त।

27 मेकोमी “गो रब्बाहम लडाइ पा मेको शुश ब्वाक्कु बाक्शो सहर ग्राती।

28 गेमी लीशो मुर आन कली खुप्शा, मेको सहर कली लडाइ तोशा ग्राडीन। मो मपाइतीनी हना, गो आं के सेलनुड। मिनु मेको सहर आं के दुम्ब” दे दाऊद कली लोत्र सोइक्ता बाक्त।

29 मोपतीके दाऊदम मुर नेल्ल आन कली खुप्तीमी बाक्त। मिनु रब्बाह सहर लमाक्त। मिनु लडाइ तोशा मेको आइक्के सेला बाक्त।

30 मेकोमी मिल्लोम आ पिया रे सिरपेच पुदा बाक्त। मेको टलेन्ट का सुन के बाक्माक्त। मेको तारी हीरा का यो क्येप्शो बाक्माक्त। मेको दाऊद कली गुक्त्मे बाक्त। मेकोम सहर रे शुश मार मार यो रोइश्शा चाक्गा बाक्त। टलेन्ट का ३४ किलो खोइ बाक्ब।

31 मेकोमी मेकेर डा मुर आन कली लाइश्शा आरा, खन्ती नु खामी गेय पपदा बाक्त। मिनु इंटा सेल्टीकेम गेय पपदा बाक्त। मेको अम्मोनी आन सहर नेल्लेम मोदेशो पवा बाक्त। मिनु नोले दाऊद नु आ मुर नेल्ल यरूसलेम लेम्मा बाक्त।

## 13

अम्मोनमी मरिम्शो पशो

1 मेको मो दुम्शो इक्का बर्स दुम्माक्त। मिनु दाऊद आ तौ अब्सालोम के थम दारशो समी का बाक्माक्त। मेको आ नें तामार बाक्माक्त। दाऊद आ अर्को तौ अम्मोनम मेको कली दाक्ता बाक्त। २सामुएल ३:२-३

2 अम्मोन आ सान्मा आ तमी तामार नु दाक्मुतीके, आ थुंम थम मरिम्शो दुम्माक्त। मिनु मेकोमी दाक्तीके मेको रोइ पवा बाक्त। मारदे हना मेको कन्ने मीश आल बाक्तीके, मेकोम मारेइ मरिम्शो पने मचबा बाक्त।

3 तन्न अम्मोन आ वारच का बाक्माक्त। मेको आ नें योनादाब बाक्माक्त। मेको दाऊद आ लोक्ब शिमेआह आ तौ बाक्माक्त। मेको मिक्च सिल्ल मुर का बाक्माक्त। १सामुएल १७:१३

4 मेकोम अम्नोन कली “ए पिप आ तौ, मारदे गे नाक्त किंत किंत मरिम्शो दुम्ना दुम्न लवे? मार दुमे आं कली देनो” दे मदा बाक्त। मिनु अम्नोनमी “गो आं लोकब अब्सालोम आ समी तामार कली दाक्नुड” देमाक्त।

5 मिनु योनादाबमी “रोइ पाता, देखु पा इप्शा बाक्को। मिनु इ आफ इ कली कोव्रथ जाक्त हना, गे मेको कली ‘आं समी तामारम आं कली जचा थोव्रक सेल्शा गेयील। मेकोम जचा थोव्रक आं डोंइती सेलल। मिनु गो मेको आ सेल्शो कोव्रनुड। मिनु मेको आ गुइ रे जाइनुड’ देनो” देमाक्त।

6 मोपतीके अम्नोन “रोइ पाता” देखु पा इप्शा बाक्माक्त। मिनु पिप मेको कली कोव्रथ जाक्माक्त। मिनु अम्नोनमी पिप कली “आं समी तामारम आं डोंइती शोब्ले निक्शी चोशा गेयील। मिनु गो मेको आ गुइ रे जाइनुड” देमाक्त।

7 मिनु दाऊदमी खिंम लोव्र कुरब मुर का तामार आ बाक्तीक सोइक्ता बाक्त। मेकोमी “इ लोकब अम्नोन आ बाक्तीक लशा, मेको कली जचा थोव्रक सेल्शा गेवो” दे लोव्र पथ सोइक्ता बाक्त।

8 मिनु तामार आ लोकब अम्नोन आ खिं लमाक्त। मिनु मेको कली इप्शा बाक्शो थिदा बाक्त। मिनु तामारमी फस निशा, आ डोंइती शोब्ले चोशा गेवा बाक्त।

9 मिनु मेकोम तांइ शेशा अम्नोन आ बाक्तीक लशा, शोब्ले कुर पवा बाक्त। तन्न अम्नोन जने मबिस्से बाक्त। मिनु अम्नोनमी “नेल्ल आन कली लाडगा सोइक्तो” देमाक्त। मिनु मुर नेल्ल लमा बाक्त।

10 मिनु अम्नोनमी तामार कली “मेको जचा थोव्रक आं कोठाम पितो। मिनु गो इ गुइ रे जाइनुड” दे मदा बाक्त। मिनु तामारमी आ चोशो शोब्ले आ लोकब अम्नोन आ कोठाम लदा बाक्त।

11 मिनु मेकोम शोब्ले गेवानु, अम्नोनम मेको कली ग्याइश्शा “आं समी पिवो। गो नु इपो” देमाक्त। लेवी १८:९

12 तन्न तामारमी “ममाइ, आं लोकब, आं कली ओदेशो मपने। इस्राएलम ओदेशो गेय पचा मदुम्ब। ओदेशो मरिम्शो गेय मपने।

13 गो आं मुनेम आं कुल गुंडने मचाप्नुड। गे यो इस्राएलम काइ मरिम्शो मुर दुम्नीनी। आं पबर्म पिप नु लोव्र पने। गो नु ग्युंबे पचा कली पिप बिप्ब” देमाक्त।

14 तन्न मेकोम तामार आ लोव्र का यो मनेना बाक्त। मिनु मेको कली बोल पा ग्याइश्शा, मेको नु इम्माक्त।

15 मिनु नोले अम्नोनम मेको कली मदाक्ता बाक्त। अम्नोन आ डोंइती डा दाक्शो क्येडा नोले डा ग्रांग्रा दिशो शुश बाक्माक्त। मिनु अम्नोनम मेको कली “बोक्शा लावो” दे मदा बाक्त।

16 मिनु तामारमी “ममाइ, आं लोकब, इ पशो गेय क्येडा यो आं कली गुंडशा सोइक्चा थम मरिम्शो बाक्ब” देमाक्त। तन्न अम्नोनम मेको आ लोव्र मनेना बाक्त।

17 मिनु अम्नोनम आ गेय पाइब वोंइश आल कली ब्रेश्शा “एको मीश मुर कली आं डोंइती रे गुंडदो। एको कली गुंडशा आग्लो पतो” देमाक्त।

18 तामारमी कन्ने मीश आल पिप आ तमीमी फेक्तीक लाइश्शो वा फेक्शो बाक्माक्त। मिनु अम्नोन आ गेय पाइब वोंइश आलम तामार कली गुंडशा, आ नोले लाप्चोम आग्लो पदा बाक्त।

19 मिनु तामारमी आ पियाम पुलु फुंडसीशा, आ लाइश्शो वा खाक्गा बाक्त। मिनु आ पियाम गुइ वोइश्शा ठेयब सेंदा पा डाक्ना डाकन लमाक्त।

20 मेको आ लोकब अब्सालोमम “मार, इ लोकब अम्नोन गे नु इम्मे? मुल आं समी सिक्सी पा बाक्को। मेको इ लोकब बाक्ब। सुर्ता मपावो” देमाक्त। मोपतीके तामार आ लोकब अब्सालोम आ खिंमी प्रोंइचा पुंडसीशो मीश मुर खोंदेशो पा बाक्माक्त।

21 मिनु पिप दाऊदम मेको लोव्र नेशा थाम्पा गाइक्ता बाक्त। तन्न अम्नोन कली सजाइ मगेवा बाक्त। मारदे हना आ दाक्शो डोंइती डा तौ बाक्माक्त।

22 अब्सालोमम अम्नोन कली रिम्शो मरिम्शो मारेइ लोव्र मपवा बाक्त। आ समी तामार कली बिथोलो सेल्ल्तीके अब्सालोमम अम्नोन कली काइ मदाक्ता बाक्त।

23 बर्स नकशी नोले अब्सालोमम आ भेडा आन ऊन प्रेक्चा कली मुर आन कली ब्रेत्ता बाक्त। मेको एफ्राइम आ नेक्था बाल-हजोरम बाक्माक्त। मिनु मेको भोजमी पिप आ तौ नेल्ल आन कली ब्रेत्तीमी बाक्त।

24 अब्सालोमम पिप आ बाक्तीक जाक्शा “गो, इन गेय पाइबम, ऊन प्रेक्तीक चाड मानेशो बाक्नुड। पिप नु इन गेय पाइबपुकी यो गो नु गाक्कीन” देंमाक्त।

25 तन्न पिपमी “ममाइ, आं तौ, गो नेल्ल जाक्शा इ कली श्येत मगेनीकी” देंमाक्त। अब्सालोमम “जाक्कीन कि जाक्कीन” देंमाक्त। मिनु पिप मबिस्से बाक्त। तन्न आसीक गेशा सोइक्ता बाक्त।

26 मिनु अब्सालोमम “गे जाक्ने मचाप्नीनी हना यो, आं लोकब अम्नोन कली गो नु लचा गेनीनी कौ?” देंमाक्त। मिनु पिपमी “मारदे मेको गे नु लाइबा?” दे हिल्लो पवा बाक्त।

27 तन्न दाऊदम अम्नोन नु अरु आ तौ मसोइक्ता सम्म अब्सालोमम देंस डा देंस पवा बाक्त। मिनु अब्सालोमम पिप आन कली गारचा डा ठेयब भोज सेला बाक्त।

28 मेकोम आ गेय पाइब आन कली “रिम्शा बाक्कीन। अम्नोन अडगुर शांबुम दुक्त हना, गो ‘मेको कली सतीन’ देंनुड। मिनु गे मेको कली सतीन। मारेइ हिंचा ममाल्नीनी। एको आं हुकुम बाक्ब। महिंथु बाक्कीन” दे माइक्मी बाक्त। लेवी २०:१७

29 मिनु अब्सालोम आ गेय पाइबपुकीम आ देंशो खोदेंशो पा अम्नोन कली पामे बाक्त। मिनु पिप आ तौ नेल्ल आन आन खचचर डोइश्शा डांडा रे खिं प्रोक्मा बाक्त।

#### अब्सालोम प्रोक्शो

30 मेकोपुकी लांम बाक्न बाक्ना पिप कली “अब्सालोमम पिप आ तौ नेल्ल आन कली साइक्तु। सुइ मन्नोइम” देंशो लोव्र चाक्दीत्मे बाक्त।

31 मिनु पिप बोक्शा आ वा खाक्गा बाक्त। मिनु खपीम निस्से बाक्त। मेको आ एर ओंथ बाक्ब आ गेय पाइब नेल्लेमी यो आन वा खाक्गमे बाक्त।

32 मिनु दाऊद आ लोकब शिमेआह आ तौ योनादाबम “आं प्रभु, मेकोमी पिप आ तौ नेल्ल साइक्तु, दे ममिम्तीन। अम्नोन कली ला साइश्शो बाक्ब। अम्नोनम तामार कली बिथोलो सेला नाक्त रे अब्सालोम आ कुल राव किक्शो तांडसीशो बाक्ब।

33 आं प्रभु, पिप आ तौ नेल्ल आन कली साइक्तु देंशो जोल लोव्र मनेनीन। अम्नोन ला साइक्चा पुंडसाक्व” देंमाक्त।

34 मिनु अब्सालोम प्रोक्शा गाक्माक्त। मेना कोव्रब मुरुमी इर गे कोव्रडानु, होरोनाइम डांडा रे पा मुर आन हुल यिशो तवा बाक्त।

35 मिनु योनादाबम पिप कली “गो इन गेय पाइब, आं देंशो खोदेंशो पा पिप आ तौपुकी यिना यिन बाक्नीम” देंमाक्त।

36 मेकोम लोव्र पने थुमानु, पिप आ तौपुकी खिंडगा ओव्रशा ठेयब सेंदा पा डाक्मा बाक्त। पिप नु आ गेय पाइब मुरपुकी यो हुइ हुइ पा डाक्मा बाक्त।

37 तन्न अब्सालोम प्रोक्शा गेशुर डा पिप अम्मीहुद आ तौ तल्लै आ बाक्तीक लशा बाक्माक्त। दाऊद आ तौ आ पबर्म शुश नाक्त सम्म रोंका पवा बाक्त।

38 अब्सालोम गेशुरम प्रोक्म रे बर्स सां सम्म मेक उइ बाक्माक्त।

39 अम्नोन बेक्शो शुश दुम नोले, पिपमी आ थुं अब्सालोम गे हिरदा बाक्त। २सामुएल ३:३; २सामुएल १४:२३; यहोसु १३:११

## 14

#### अब्सालोम कली लेशशा चाक्शो

1 मिनु सेरूयाह आ तौ योआबम पिप आ थुंम अब्सालोम कली दाक्चा गोप्तु, दे तुइक्ता बाक्त।

2 मिनु योआबम मुर का कली तेकोहा सहरम सोइश्शा जोक्ब तुइक्ब मीश मुर का कली चाक्पाइक्मी बाक्त। योआबम मेको मीश मुर कली “रोंका पशो मीश मुर खोदेंशो पखु पावो। रोंका पतीक वा फेक्सो। पियाम तेल मखेक्सो। शुश नाक्त रे बेक्शो मुर आ पबर्म रोंका पशो मीश मुर खोदेंशो पखु पावो।

3 मिनू पिप आ बाक्तीक लशा, आं शेंशो लोत्र देंनो” दे मदा बाक्त। मिनू मार देंचा माल्बा, योआबम मेको कली शेंदा बाक्त।

4 मिनू तेकोहा सहर डा मीश मुर पिप आ बाक्तीक जाक्शा, खप सम्म बाप्शा सेउ पवा बाक्त। मिनू डाक्ना डाक्न “पिप वारच पाइय्थीनी” देंमाक्त।

5 मिनू पिपमी मेको कली “इ कली मार श्येत दुम्मे?” दे मदा बाक्त। मिनू मेकोमी “गो वोंइश बेक्शो मीश मुर का नड। आं वोंइश बेक्त।

6 मेको इन वाइल आ तौ निक्शी बाक्ताक्स। मेको निक्शी दिंमम राम्शी पाम्से बाक्त। मेको आस कली फ्राब सुइ मबाक्मा बाक्त। मिनू काम आ लोक्ब कली तुप्शा सदा बाक्त।

7 मुल आ थर डा मुर नेल्लेमी, इन वाइलीम कली ‘आ लोक्ब साइक्ब कली आंइ गुइम गेने। मिनू गो मेको कली साइक्नीकी। मारदे हना आ लोक्ब कली साइक्तु। गो इ अडस ताइब सुइ मबाक्त हना यो, गो मेको कली साइक्नीक देंतेक्म। मेकोपुकीम मो पाम्तेक्म हना, आं लीशो मी यो कान्नीम। मिनू आं वोंइश आ नें नु चच युइ यो रागी रे क्याम्सीनीम” देंमाक्त। ब्यवस्था १९:११-१३

8 मिनू पिपमी मेको मीश मुर कली “इ खिं लावो। इ निसाफ गो कोत्रनुड” देंमाक्त।

9 मिनू मेको तेकोहा सहर डा मीश मुरुमी पिप कली “आं प्रभु पिप, मेको दोस गो नु आं आफ आ खिं कली दुम्ल। पिप नु इन राज्य दोस मतवल” देंमाक्त।

10 मिनू पिपमी “मुल यो सुइम इ कली मारेइ देंतेक्म हना, मेको आन कली आं बाक्तीक चाक्को। मिनू मेकोपुकीम इ कली लेंशा श्येत मगेनीम” दे मदा बाक्त।

11 मिनू मेको मीश मुरुमी “पिप, गे परमप्रभु यावे, इन परमप्रभु कली मिम्शा गेय पने। मिनू हुश खाक्श पोक्चा नांइसेक्ल। मिनू आं तौ साइक्चा मपुंडसीब” देंमाक्त। मिनू पिपमी “परमप्रभु यावे ब्रोंइशो खोदेंशो पा इ तौ के चां का यो महेम्ब” देंमाक्त। गन्ती ३५:१९-२१

12 मिनू मेको मीश मुरुमी “आं प्रभु पिप, गो इन वाइलीममी मुल यो लोत्र का देंचा ताइक्नुडा कों?” देंमाक्त। मिनू पिपमी “देंनो” देंमाक्त।

13 मिनू मेको मीश मुरुमी “गे परमप्रभु आ मुर आन कली मारदे ओदेंशो पचा मिम्तीनी? गे मोदेंशो पाइतीनी हना, गे दोसी खोदेंशो दुम्नीनी। गे रागी रे गृंइशा सोइश्शो मुर कली लेंशा जाक्चा गेने मबिस्सीनी।

14 गो नेल्ल बेक्चा माल्नय। गो खपीम क्युप्शा हुइक्ने मचाप्चा डा ब्वाक्कु खोदेंशो बाक्नय। तन्न परमप्रभुमी मुर कली मखेरब। मेकोमी आ डोंइती चाक्चा कली मिम्ना मिम्न बाक्ब। इजीकीएल १८:२३

15 गो, इन वाइलीम, एको लोत्र आं प्रभु पिप, इन कली देंथ जाक्ती। मारदे हना मुरपुकीम आं कली हिंच कोंइताक्यीमी। मिनू गो पिप नु लोत्र पाइनुड। मेकोमी आ वाइलीम कली आ पुंडशो गेबा कों?

16 मिनू पिपमी आ गेय पाइब, आं लोत्र नेंशा, गो नु आं तौ आंस कली श्येत गेब मुर रे प्रोंइबा कों, देंती। मारदे हना मेको मुरपुकीमी आंस कली परमप्रभु आ गेशो रू रे क्याम्चा माल्तेक्म।

17 मिनू इन वाइलीम, आं प्रभु, आं पिप, आ लोत्रम आं थुं नाइक्चा गेब। मारदे हना गे, आं प्रभु पिप, परमप्रभु आ स्वर्ग डा गेय पाइब खोदेंशो बाक्नीनी। रिम्शो नु मरिम्शो तिल्ब बाक्नीनी। परमप्रभु यावे, इन परमप्रभु गे नु बाक्ब” देंमाक्त। २सामुएल १९:२८; १सामुएल २९:९

18 मिनू पिपमी मेको मीश मुर कली “आं डोंइती मारेइ लोत्र मखुइक्तो, इ कली लोत्र का हिल्लो पाइक्नुड” देंमाक्त। मिनू मीश मुरुमी “आं प्रभु पिप, देंनीन” देंमाक्त।

19 मिनू पिपमी “मार, एको नेल्ल योआब आ देंशो बाक्मे?” देंमाक्त। मिनू मेको मीश मुरुमी “इन ब्रोंइशा बाक्शो खोदेंशो पा, आं प्रभु पिप, गे मारेइ लोत्र हिल्लो पनीनु, लोत्र लेप्ब के ग्युरा पेरा लतीक मबाक्ब। मारदे हना इन गेय पाइब योआबम आं कली मोदेंशो लोत्र पचा शेंशा सोइक्ताक्यी।

20 योआबमी इन थुं डा मिम्शो गेय फाइक्चा कली मोदेंशो पपाइक्ती। तन्न गे, आं प्रभु, परमप्रभु आ स्वर्ग डा गेय पाइब खोदेंशो पा रुप्तीक थुं पाइश्शो बाक्नीनी। रागीम मार दुम्शो बाक्बा, मेको नेल्ल तुइक्नीनी” देंमाक्त। २सामुएल १४:१७

21 मिनु पिपमी योआब कली “दुम्ब, गो एको लोत्र बिस्साकयी। लशा, मेको ठिटा अब्सालोम कली लेशशा चाक्कीन” देमाक्त।

22 मिनु योआबमी आ कुल खप सम्म बाप्शा, सेउ पवा बाक्त। मेकोमी पिप कली “परमप्रभु यावेमी इन कली आसीक गोवल। मुलाकती गो आं प्रभु, पिप इन डोंइती शिशी ताता, दे तुइक्ताकड। मारदे हना गे आं पुंइशो गेतीनी” देमाक्त।

23 मिनु योआब रीब पा गेशुर लशा, अब्सालोम कली यरूसलेमम चाक्का बाक्त। २सामुएल १३:३७

24 तन्न पिपमी “मेको आ खिंमीन बाकल। आं डोंइती जाक्चा मदुम्ब” देमाक्त। मोपतीके अब्सालोम आ खिंमीन बाक्शा, पिप आ डोंइती मजाक्माक्त।

25 इस्राएल नेल्लेमी अब्सालोम खोदेशो दारशो सुइ मबाक्मा बाक्त। आ पिप्या रे खोइल सम्म मेको के मारेइ मरिम्शो मदुम्शो मबाक्माक्त।

26 मेकोम बर्सम बर्सम आ चां खोइक्बाक्माक्त। मारदे हना हेल्बाक्माक्त। मिनु मेको आ चां पिप आ नाकतीकेम नाक्शोन, सहे निक्शी शेकेल डा दुम्बाक्त। २०० शेकेल २ किलो ३०० ग्राम खोदेशो बाक्ब।

27 अब्सालोम के तौ सां नु तमी का बाक्मा बाक्त। आ तमी आ नें तामार बाक्माक्त। मेको थाम्पा दारशो मीश मुर बाक्माक्त।

28 मिनु अब्सालोम बर्स निक्शी सम्म यरूसलेमम बाक्माक्त। मेको पिप आ डोंइती मजाक्थु बाक्माक्त।

29 मिनु अब्सालोममी पिप कली ग्रुम्चा कली योआब कली लोत्र सोइक्ता बाक्त। तन्न योआब जाक्ने मबिस्से बाक्त। लेंशा ब्रथ सोइक्तानु यो, जाक्ने मबिस्से बाक्त।

30 मिनु अब्सालोमम आ गेय पाइब आन कली “योआब आ रू का आं रू आ नेक्था बाक्ब। मेको के क्योत्रज वाशो बाक्ब, दे गे तुइक्तीनी। मेकेर मी सुइक्तीन” दे माइक्मी बाक्त। मोपतीके अब्सालोम आ गेय पाइबपुकीम मेकेर मी सुइक्तमे बाक्त।

31 मिनु योआब रीब पा अब्सालोम आ खिं लशा, मेको कली “मारदे इन गेय पाइबपुकीम आं रूम मी सुइक्तमे?” दे हिल्लो पवा बाक्त।

32 मिनु अब्सालोममी योआब कली “गो इन कली ब्रथ सोइक्ताकड। गे आं पर्बम पिप कली लोत्र लाइक्नीनी कों, दे मिम्ताकड। गे पिप कली ‘गो मारदे गेशुर रे जाक्चा माल्डा? गो मेक उइ बाक्शो नड हना, रिम्शो दुम वा’ देंचा कली ब्रेथ सोइक्ताकड। गो पिप आ डोंइती लचा तडल। गो मारेइ मरिम्शो पशो बाक्ती हना, दोस ताइब बाक्ती हना, साइय्यील” देमाक्त।

33 मिनु नोले योआब पिप आ बाक्तीक लशा, अब्सालोम आ लोत्र नेंपदा बाक्त। मिनु पिपमी अब्सालोम कली ब्रेथ सोइक्ता बाक्त। मिनु मेको पिप आ डोंइती जाक्शा खप सम्म बाप्शा, सेउ पवा बाक्त। मिनु पिपमी अब्सालोम कली पुक्पु पदा बाक्त।

## 15

### अब्सालोम पिप दुम्चा माल्शो

1 मिनु नोले अब्सालोमम बग्गी का, शारा नु आ डोंइडोंइती दोरचा कली ५० जना मुर आंम कली वौदा बाक्त। १राजा १:५

2 अब्सालोम सुनी कना बोक्शा, सहर ओव्रतीक ठेयब लाप्चोमी बाक्बाक्माक्त। मिनु मुरपुकी पिप कली निसाफ पुंइथ जाक्बाक्तेक्म। अब्सालोममी मेको आन कली का का पा “तेको सहर रे जाक्शो नवे” देंबाक्माक्त। मिनु मेकोमी “इन गेय पाइब इस्राएल डा एको थर रे जाक्शो नड” देंबाक्मा बाक्त।

3 मिनु अब्सालोमम मेको कली “इ लोत्र ठीक बाक्ब। तन्न पिपमी इ कली ठीक निसाफ पा मनेपाइक्ब” देंबाक्माक्त।

4 मिनु नोले अब्सालोममी “गो एको रागी डा निसाफ पाइब दुम्शो नड हना, सु सु कली निसाफ माल्डा, गो मेको नेल्ल आन कली निसाफ गेड वा” देंबाक्माक्त।

5 सुइ मुर मेको कली सेउ पथ जाक्मेनु, मेको कली आ गुइ हाम्शा मुप्शा, पुक्पु पाइक्बाक्माक्त।

6 अब्सालोममी पिप आ निसाफ पतीकेम इस्राएली सु सु जाक्बाकमा, मेको आन कली मोपा आन थु खुइ पाइबाकमाकत।

7 मिनु ४ बर्स नोले अब्सालोमम पिप कली “गे आं कली हेब्रोन लचा गेयीनी। गो परमप्रभु यावे कली पशो कबल खाप्चा दाक्नुड।

8 मारदे हना गो, इन गेय पाइबम अराम डा गेशुरम बाक्डानु, कबल का पाता। गो मार कबल पाता देशा हना, ‘परमप्रभु यावे, गे आं कली थमा पा यरूसलेमम लेशशा चाक्ती हना, गो हेब्रोनम परमप्रभु यावे, इन कली ठेयब सेल्लुड’ दे कबल पाता” देमाकत। उत्पत्ती २८:२०-२१; २सामुएल १३:३७-३८

9 मिनु पिपमी “गे इ थुं नाइशशा लावो” देमाकत। मिनु मेको बोक्शा, हेब्रोन लमाकत।

10 मिनु अब्सालोमम इस्राएल डा थर नेल्ल आन कली सुडम मतुइक्चा डा पा, लोत्र कुरब सोइशशा “तुराही ग्रीशो नैनी चोटी, गेपुकीम ‘अब्सालोम हेब्रोनम पिप दुम्त’ देंनीन” देपाइक्मी बाकत।

11 यरूसलेम डा सहे निकशी जना मुर अब्सालोम आ नोले खोइक्ब दुम्मा बाकत। मेको आन कली अब्सालोमम ब्रेशशो बाक्माकत। तन्न मेकोपुकी मारेइ मतुइक्थु, लशो बाक्मा बाकत।

12 अब्सालोमम आ क्योरशा चढेतीकेम चढेवानु, गिलोह सहर डा अहीथोफेल कली ब्रेथ सोइक्ता बाकत। मेको अहीथोफेल चहिं गिलोह सहर डा दाऊद कली अर्ती गेब मुर बाक्माकत। मोपा पिप कली मरिम्शो गेय पना पन लशा अब्सालोम आ मुर शुश दुम्ना दुम्न लमा बाकत। २सामुएल २३:३४; यहोसु १५:५१

### दाऊद प्रोक्शो

13 मिनु लोत्र कुरब मुर का दाऊद आ बाक्तीकेम जाक्शा “इस्राएल डा मुरपुकी अब्सालोम आ नोले खोइक्तेक्म” देमाकत।

14 मिनु दाऊदम यरूसलेमम आं नु बाक्ब आ ठेयब गेय पाइब आन कली “बोक्कीन, गोपुकी रीब पा प्रोक्चा मालनय। मो मपाइतय हना, गो सुइ अब्सालोम आ गुइ रे ब्रोंइचा मताइनय। रीब पा पने, मो मदुम्त हना, मेकोमी इं क्येडा लाक्शा, इं कली शुश श्येत गेशा, सहर कली लडाइ तोइब” देमाकत।

15 मिनु पिप आ ठेयब गेय पाइबपुकीमी “गे आंइ प्रभु पिपमी, मार देंनी, गो इन गेय पाइबम मेको पाइनीकी” देमा बाकत।

16 मिनु पिपमी आ खिं डा सुइ सुइ आन कली लाइशशा गाक्माकत। मेकोमी १० जना नोले चाक्शो मीश आन कली खिं कोत्रचा कली प्रोंइशा वोइक्मी बाकत।

17 मिनु पिप गाक्माकत। मिनु मुर नेल्ल आ नोले खोदमे बाकत। मिनु नोले डा खिंम चहिं दिक्मा बाकत।

18 मिनु पिप आ ठेयब गेय पाइब, केरेथी नु पेलेथी नेल्ल, गाथ सहर रे जाक्शो ६ सहे गित्त आ खिं डा नु मुर नेल्ल पिप आ डोंइती लाक्गमे बाकत। २सामुएल ८:१८; १सामुएल २७:२

19 मिनु पिपमी गित्त आ खिं डा इत्ताइ कली “मारदे गे यो गो नु पिवे? लेशशा लशा, पिप नु बाक्को। मारदे हना गे अर्को रागी डा मुर नवे। गे इ रागी रे गुंइचा पुंइसीशो मुर नवे।

20 गे सिनाकत साबेर नाकत ला जाक्शो मुर नवे। गो मुलाकत इ कली दोपा गो नु गाक्को देंनुडा? गो ते लाइक्नुडा आंमान मतुइक्नुड। गे खिं लावो। मिनु इ मुर आन कली यो लाइक्मी। परमप्रभु यावेमी इ कली आ गेना हना यो दाक्शा मप्रोंइतीके कोंइदल” देमाकत।

21 तन्न इत्ताइमी पिप कली “परमप्रभु यावे ब्रोंइशा बाक्शो खोदेंशो पा नु आं प्रभु पिप इन ब्रोंइशा बाक्शो खोदेंशो पा, गे ते लाइतीनी हना यो, गो मेक लाइक्नुड। ब्रोंइतीनी हना यो, बेक्तीनी हना यो, गो इन गेय पाइब, इन नु बाक्नुड” दे मदा बाकत।

22 मिनु दाऊदमी इत्ताइ कली “लो, दुम्ब गाक्को” दे मदा बाकत। मोपा गित्त आ खिं डा इत्ताइ, आ मुर नेल्ल नु आ आल नेल्ल नु गाक्मा बाकत।

23 पिप मोपा गाक्मेनु लांम बाक्ब मुर नेल्ल डाक्मा बाकत। पिप किद्रोन खोला शोक्शा गोरशो रागी गे लमा बाकत।

24 मिनु अबीयाथार, सादोक नु लेवी नेल्ल परमप्रभु आ कबल पशो सन्दोस कुरशा, जाक्मा बाकत। मेकोपुकी चहिं सहर डा मुर नेल्ल गूशा मगाक्मा सम्म सन्दोस नाइशशा रिम्शा बाक्मा बाकत।



25 मिनु पिपमी सादोक कली “परमप्रभु आ सन्दोस सहर लेशशा लतीन। परमप्रभु यावेमी आं कली शिशी पाइक्ती हना, आं कली लेशशा जाक्चा गेब। मिनु सन्दोस नु मेको वोइक्तीके लेशा कोव्रचा गेब।

26 तन्न परमप्रभु यावेमी ‘गो इ कली शिशी मपाइनुड’ दैत हना, गो एक उइ बाक्नुड। मेकोम आं कली आ दाक्शो पवल।

27 कोव्रडीन, गे नु इ तौ अहीमाज नु अबीयाथार नु आ तौ योनाथन एको ठिटा निकशी आस कली लाइशशा, सहर लेतीन। १राजा १:४२

28 गो गोरशो रागी आ सुरमी इन लोव्र मनेनु सम्म रिम्शा बाक्नुड। एको लोव्र मप्रेदीन” दैमाक्त।

29 मिनु सादोक नु अबीयाथारम परमप्रभु आ सन्दोस यरूसलेम लेशशा लदसे बाक्त। मिनु मेको मेक उइ बाक्सा बाक्त।

30 तन्न दाऊद जैतून डांडा डा ग्येत्थ लांमी डाक्ना डाक्न लमाक्त। मेकोम आ पिया सुम्शो बाक्माक्त। श्येत्थ खोइल गाक्शो बाक्माक्त। मेको नु गाक्ब नेल्ल यो आन पिया सुम्शा डाक्ना डाक्न गाक्मा बाक्त।

31 मिनु दाऊद कली अहीथोफेल मरिम्शो पाइब आन दातेम अब्सालोम नु बाक्त देशो लोव्र नैपदमे बाक्त। मिनु दाऊदम “परमप्रभु यावे अहीथोफेल आ अर्ती शोर गाक्शो सेलीन” दे पुंना बाक्त। २सामुएल १७:१४

32 मिनु दाऊद परमप्रभु कली ठेयब सेल्लिक डांडा तार जाक्माक्त। मेना अरकी आ खिं डा हुशाइ आ वा खाक्शा, आ पियाम खप फुंडसीशा दाऊद कली गुम्थ जाक्माक्त। १राजा ३:२; यहोसु १६:२

33 दाऊदम मेको कली “गे गो नु गाक्ते हना, आं कली श्येत ला दुम्ब।

34 तन्न गे सहर लेशशा लशा अब्सालोम कली ‘गो इन आफ आ गेय पशो खोदेशो पा इन गेय पाइब दुम्नुड’ दैते हना, मिनु मेक बाक्ते हना, अहीथोफेल आ अर्ती खतम सेल्चा कली आं कली वारच पाइनेवे। २सामुएल १७:७

35 चढेब सादोक नु अबीयाथार गे नु मेक बाक्नीस। पिप आ खिंम मार मार लोव्र नैनी, मेको नेल्ल मेको आस कली शेंदीम्सी।

36 मेको निकशी नु आस तौ मेको नु बाक्नीस। सादोक आ तौ अहीमाज नु अबीयाथार आ तौ योनाथन रे इन नेशो लोव्र नेल्ल आं कली नैपाइक्ने चाप्नीनी” दैमाक्त। २सामुएल १७:१५-२१

37 मिनु दाऊद आ वारच हुशाइ, अब्सालोम यरूसलेमम ओव्रन ओव्रना, सहर जाक्दीम्माक्त। १इतिहास २७:३३

## 16

### सीबामी दाऊद कली गुम्शो

1 दाऊद डांडा तार रे इच्का आइक्ची जाक्दीम्मेनु, मेफी-बोशेथ आ गेय पाइब सीबामी दाऊद कली गुमा बाक्त। मेकोम लगम पाइशशो गधा निकशीम सहे निकशी शोब्ले, सहे का मुठा सोव्रशो अडगुर, सहे का फल फुल नु मसक का अडगुर शांबु कुरपाइशशा, चाक्गा बाक्त। २सामुएल ७:२

2 पिपमी सीबा कली “गे एको नेल्ल मारदे चाक्गी?” दे हिल्लो पवा बाक्त। मिनु सीबाम “एको गधा पिप आ खिं डा मुर डोइक्चा कली बाक्नीस। शोब्ले नु फल फुल चहिं ठिटा आन कली जचा कली बाक्ब। अडगुर शांबु गोरशो रागीम दशा थशो आन कली तूचा कली बाक्ब” दैमाक्त।

3 मिनु पिपमी “इ होव्रप आ तौ ते बाक्म” दे हिल्लो पवा बाक्त। मिनु सीबाम “मेको यरूसलेममीन बाक्शो बाक्ब। मेकोमी ‘मुलाक्ती इस्त्राएलीपुकीम आ बाजे आ राज्य लेशशा गेनीम’ दे रिम्शा बाक्शो बाक्ब” दैमाक्त। २सामुएल १९:२५-३१

4 मिनु पिपमी सीबा कली “मुल मेफी-बोशेथ आ मारेइ मारेइ इ के दुम्ब” दे मदा बाक्त। मिनु सीबामी “आं प्रभु पिप, गो इन वाइल का नड। इन डोइती शिशी तडल” दैमाक्त। १राजा २:८-९; प्रस्थान २२:२७

### शिमेडम दाऊद कली सराप पशो

5 मिनु पिप दाऊद बाहुरीम सहरम जाकमाक्त। मिनु मेकेर सावल आ खिं डा मुर का, गेरा आ तौ शिमेइ यूशा दाऊद कली सराप चीले पना पन पिमाक्त।

6 मेकोम पिप दाऊद नु आ गेय पाइब नेल्ल, लडाइ पाइब नेल्ल नु अरु मुर नेल्ल आन कली एर ओथ नेल्ल फुल्लु क्रोम्दीमी बाक्त। दाऊद आ ग्युरा नु पेरा आ लडाइ पाइब नु आ मुर बाक्मा बाक्त।

7 शिमेइमी “लावो, लावो, ए मुर साइक्ब नु मरिम्शो पाइब” दे ग्रीशा, सराप पवा बाक्त।

8 मिनु “परमप्रभु यावेम सावल आ खिं डा मुर आन हुश आ क्येक्क लेत्ताक्वे। गे मेको आ पा डा सासन पाप्तीवी। मिनु परमप्रभु यावेमी एको राज्य इ तौ अब्सालोम कली गेप्टु। मुल गे खतम दुम्ते श्येत जाइनेवे। मारदे हना गे हुश खाक्श पोक्ब बाक्नेवे” देमाक्त।

9 मिनु सेरूयाह आ तौ अबीशैमी पिप कली “मारदे मेरे बेक्शो कुचुममी आं प्रभु, पिप इन कली सराप पवा? गो आइक्ची हांबु लशा मेरे आ पिया खोइक्नुड” देमाक्त। १सामुएल २६:८

10 तन्न पिपमी “ए सेरूयाह आ तौ, गे गो नु मगारचा डा बाक्नीसी। परमप्रभु यावेमी मेको कली ‘दाऊद कली सराप पावो’ दे सोइश्शो बाक्त हना, सुम तेक्ने चाप्बा डा?” देमाक्त। २सामुएल १९:१७-२४

11 मिनु दाऊदम अबीशै नु आ गेय पाइब नेल्ल आन कली “आं तौमी आं कली साइक्चा माल्ब हना, मेरे बेन्यामीन आ थर डा मुर के मार लोव पचा डा? मेरे कली प्रोनीन। मेरेमी सराप पवल। मारदे हना परमप्रभु यावेमीन मेरे कली सराप पचा गेशो बाक्म माइ।

12 परमप्रभु यावेम मेरे मुलाक्त डा सराप आ पा डा आं श्येत तशा आं कली रिम्शो पाइबा को” देमाक्त।

13 मिनु दाऊद नु आ मुर आन लां खोदमे बाक्त। शिमेइ चहिं दाऊद आ लां गे आइक्ची हांबुड आइक्ची हांबु लमाक्त। लमेनु दाऊद कली सराप पना पन फुल्लु आप्ना आप्न, खप ब्वारना ब्वारन लमाक्त।

14 मिनु पिप नु मेको नु गाक्ब मुर नेल्ल यर्दन खोला आ नेक्था जाक्दीम्मा बाक्त। मिनु मेको थाम्पा दशा नाइसमा बाक्त।

### अब्सालोम यरूसलेम जाक्शो

15 अब्सालोम नु मेको नु बाक्ब इस्राएली नेल्ल यरूसलेम जाक्मा बाक्त। अहीथोफेल यो मेको नु बाक्माक्त।

16 मिनु अरकी आ खिं डा हुशाइ दाऊद आ वारचमी अब्सालोम कली युमा बाक्त। मिनु मेकोमी अब्सालोम कली “पिप गेना हना यो ब्रॉइशा बाक्ल। पिप गेना हना यो ब्रॉइशा बाक्ल” देमाक्त। २सामुएल १५:३७

17 तन्न अब्सालोममी हुशाइ कली “इ वारच कली मप्रॉइतीके, मोदेशो बाक्बा डा? मारदे गे इ वारच नु मलवे” दे मदा बाक्त।

18 मिनु हुशाइमी अब्सालोम कली “ममाइ, परमप्रभु यावे मेकेर बाक्ब मुर नु इस्राएली नेल्लेमी योव्रशो मुर आ गेय पचा मिम्ताक्ड। गो एक बाक्नुड।

19 मुल गो सुका आ गेय पाइनुड डा? पिप आ तौ कली गेय पचा मदुम्बा डा? गो दोपा इन आफ आ गेय पडा, मोपा इन गेय यो पाइनुड” देमाक्त।

### अहीथोफेलमी अर्ती गेशो

20 मिनु अब्सालोममी अहीथोफेल कली “आंइ कली इन अर्ती गेने। गो दोपा गेय पचा माल्नीकी?” दे हिल्लो पवा बाक्त।

21 मिनु अहीथोफेलमी अब्सालोम कली “इन आफोमी आ खिं कोव्रचा कली प्रॉइशा वोइश्शो आ नोले चाक्शो मीशपुकी नु इपो। मोपा इन आफ कली मरिम्शो पशो इस्राएल नेल्लेम नैनीम। मिनु इन नोले खोइक्ब आन थुं बारब” देमाक्त। २सामुएल १५:१६

22 मोपतीके मेकोपुकीम अब्सालोम कली खिं तार ताम्बु का कीडमे बाक्त। मिनु अब्सालोममी इस्राएली नेल्लेम तचा डा पा, आ आफ आ नोले चाक्शो मीशपुकी नु इम्माक्त।

23 मेना मुरपुकीम अहीथोफेल आ अर्ती परमप्रभु आ लोत्र खोदेशो मिम्बाक्सा बाक्त। मोपतीके दाऊद नु अब्सालोमम अहीथोफेल आ अर्ती ठेयब मिम्बाक्सा बाक्त।

## 17

अहीथोफेल आ अर्ती क्याम्शो

1 अहीथोफेलम अब्सालोम कली “आं कली १२ हजार योत्रशो मुर गेयीनी। मिनु गो मुलाकदो दाऊद कली खेदा पाइनुड।

2 मेको दशा, आ थुं लुकच लशा बाक्मेनु, मेको कली थित्नुड। मिनु मेको नु बाक्ब मुर नेल्ल ब्रशा प्रोक्नीम। मिनु गो पिप कली ला साइक्नुड, अरु सुइ मसाइक्नुड।

3 मिनु गो इस्राएली नेल्ल आन कली ग्युम्ली आ ग्युम्ले बाक्तीक जाक्शो खोदेशो पा इन बाक्तीक चाक्नुडमी। गे मुर का आ सोक्त माल्ना माल्न बाक्नीनी। लीशो मुर मारेइ मदुम्नीम” देमाक्त।

4 मिनु अब्सालोम नु इस्राएल डा खाल्पा नेल्लेम अहीथोफेल आ अर्ती दाक्तमे बाक्त।

5 तन्न अब्सालोम “अरकी आ हुशाइ कली ब्रेत्तीन। मेकोमी मार देबा, मेको नेय” देमाक्त। २सामुएल १६:१६

6 मिनु हुशाइ अब्सालोम आ डोंइती जाक्मेनु, अब्सालोममी “अहीथोफेल आ देशो नेल्ल शेंदा बाक्त। मेको आ देशो पचा, दे मपचा? मपचा हना, गे मार मिम्नेवे देंनो” देमाक्त।

7 मिनु हुशाइमी अब्सालोम कली “एको मुल डा अहीथोफेल आ देशो ठीक मदुम्ब” देमाक्त।

8 मिनु हुशाइमी लेंशा “गे इन आफ नु मेको नु बाक्ब मुरपुकी थम जोक्ब लडाइ पाइबपुकी बाक्नीम, दे तुइक्नीनी। मेकोपुकी चाइक्ब रोइक्चा पुंइसीशो वां खोदेशो दुम्शो बाक्नीम। इन आफ लडाइ पतीकेम जोक्ब तुइक्ब बाक्ब। मेको नाकदो आ लडाइ पाइब नु काथा मबाक्ब।

9 मुल यो मेको तेकोइ ढोडोडगा नु अरु बाक्तीकेमी खुइश्शा बाक्म माइ? मिनु इं लडाइ पाइबपुकी डोंइती साइक्चा पुंइसाक्म हना, मेको नेबपुकीमी ‘अब्सालोम आ नोले खोइक्बपुकी बेक्ना बेक्न बाक्नीम’ देशो नेनीम।

10 मोदेशो दुम्मेनु, महिब गुप्स खोदेशो थुं पाइश्शो लडाइ पाइब मुर यो हिनीम। मारदे हना इस्राएली नेल्लेमी इन आफ बोल्यो लडाइ पाइब मुर बाक्ब, दे तुइक्नीम। मेको नु बाक्ब थम बोल्यो बाक्नीम, दे तुइक्नीम।

11 आं अर्ती चहिं मार बाक्ब देशा हना, दान रे बेयर-शेबा सम्म डा इस्राएली नेल्ल आन कली खुप्चा माल्नीम। मेको समुन्द्र डा बाल्वा खोदेशो पा शुश बाक्नीम। मिनु गे मोदेशो पा लडाइ पथ लने।

12 मिनु मेको ते बाक्त हना यो, गो मेको कली थिश्शा लडाइ तोइनय। गो सीत यिशो खोदेशो पा मेको तार जुक्नय। मिनु मेको नु मेको कली खोइक्ब का यो ब्रोंइचा मताइनीम।

13 मेको प्रोक्शा सहर लशा, बाक्तीक पुंइशा बाक्त हना यो गो इस्राएली नेल्ल मेकेर लशा मेको सहर कली डोरीम कीशा फुल्लु का यो खोप्शा मलीपाइक्थु, दिंम चाक्नय” दे हुशाइमी देमाक्त।

14 मिनु अब्सालोम नु इस्राएली नेल्लेमी “अहीथोफेल आ अर्ती क्येडा अरकी आ हुशाइमी गेशो अर्ती रिम्शो बाक्ब” देमा बाक्त। मारदे हना परमप्रभु यावेमी अहीथोफेल आ अर्ती क्याम्शा, अब्सालोम कली खतम पोक्चा कली मो पचा बाक्त। २सामुएल १५:३१-३४

15 मिनु नोले हुशाइमी चढेब सादोक नु अबीयाथार आस कली अहीथोफेलम अब्सालोम नु इस्राएल डा खाल्पा आन कली गेशो अर्ती नु आ गेशो अर्ती नेल्ल शेंदीम्सी बाक्त।

16 मिनु गे दाऊद कली “गोरशो रागी आ सुरम बास मबाक्थु, गोरशा रागी लाक्शा गाक्कीन। मो मपाइतीनी हना, पिप नु आ नु बाक्ब नेल्ल साइक्चा पुंइसीनीम” देमाक्त।

17 मेना योनाथन नु अहीमाज एन-रोगेलमी रिम्शा बाक्शो बाक्सा बाक्त। मिनु वाइलीम का लशा, मेको आस कली शेंबाक्माक्त। मिनु मेको निक्शीमी पिप दाऊद कली शेंबाक्सा बाक्त। मारदे हना सहर डा मुरुम मतामेक्ल, दे मो पाइक्बाक्सा बाक्त। २सामुएल १५:३६; यहोसु १५:७-८

18 तन्न मेना वोंइश आल काम मेको आस कली तशा, अब्सालोम कली शेंदा बाक्त। मोपतीके मेको निक्शी रीब पा बाहुरीम डा मुर का आ खिं जाक्दीस्सा बाक्त। मेको आ लाडगाम इनार का बाक्माक्त। मिनु मेको निक्शी मेको आगा ओव्रसा बाक्त।

19 मेको खिं डा मुर आ मीशेमी सुम्टीक का चाक्शा, मेको तार बिस्कुन हामा बाक्त। सुडम मारेड मतुइक्तमे बाक्त।

20 मिनु अब्सालोम आ गेय पाइब मुरपुकी जाक्शा, मेको मीश मुर कली “अहीमाज नु योनाथन ते बाक्सा” दे हिल्लो पामे बाक्त। मिनु मेकोमी “मेको निक्शी आइक्ची हांबु लाक्ताक्स” देंमाक्त। मेको मुरपुकीम एर ओंथ माल्मे बाक्त, तन्न मथिदमे बाक्त। मोपतीके मेकोपुकी यरूसलेम लेम्मा बाक्त।

21 मिनु मेकोपुकी लमा नोले मेको निक्शी इनार रे गूसा बाक्त। मिनु मेको लशा पिप दाऊद कली नेल्ल शोव्रडसे बाक्त। मेको निक्शीमी दाऊद कली “बोक्कीन, रीब पा खोला शोक्सीन” देंसा बाक्त। अहीथोफेल आ देंशो अर्ती डा लोव्र यो शेंदसे बाक्त।

22 मोपतीके दाऊद नु आ मुरपुकी रीब पा यर्दन खोला शोक्सीमा बाक्त। बुरु रु पा हाम्सो दुम्मेनु, आइक्ची हांबु मजाक्दीप्ब, सुड मलीमा बाक्त।

23 मिनु अहीथोफेलमी आ अर्ती डा लोव्र मबिश्शो तुइश्शा, आ गधा ठीक पा आ सहर डा खिं लमाक्त। मिनु आ खिं डा मुर आन कली देंचा माल्शो लोव्र देंशा, आं चहिं ग्युक्शा बेक्माक्त। मेको मोपा बेक्शा आ आफ आ तुरसुम थिम्चा पुंडसे बाक्त। १सामुएल ३१:४; १राजा १६:१८; मत्ती २७:५

24 मिनु दाऊद महा-नाइमम जाक्दीम्माक्त। मेना अब्सालोम नु मेको नु बाक्शो इस्राएली यर्दन खोला शोक्सीने थुम्मे बाक्त। २सामुएल २:८

25 अब्सालोमम योआब आ पा डा इश्माएली इथा आ तौ आमासा कली कप्तान सेला बाक्त। इथामी अबीगेल कली ग्युबे पवा बाक्त। अबीगेल, नाहाश नु सेरूयाह आस समी आ तमी बाक्माक्त। सेरूयाह योआब आ ममा बाक्माक्त।

26 इस्राएलीपुकी नु अब्सालोमम गिलादमी आन बाक्तीक सेल्मे बाक्त।

27 मिनु दाऊद महा-नाइमम जाक्मेनु, रब्बाहम बाक्ब अम्मोनी नाहाश आ तौ शोबी, लो-देबारम बाक्ब अम्मोएल आ तौ माकीर नु रोगेलीम बाक्ब गिलाद आ मुर बारजील्लाइम, १इतिहास १९:१; २सामुएल ९:४; १राजा २:७

28 ब्रतीक फेक्तीक, ग्योबपुकी, खप के ग्योबपुकी, क्योव्रज नु चेरब, फस, सिबी, दाल,

29 खुदो, दहि, भेडा नु दूध के सेल्शो जचा थोव्रक दाऊद नु मेको नु बाक्ब मुर आन कली चाक्शा, गेमे बाक्त। मारदे हना मेकोपुकीम दाऊद नु आ मुरपुकी गोरशो रागीम शोव्रलु बेक्शो, तूतू दाक्शो नु थाम्पा दशो बाक्नीम, दे तुइक्त्मे बाक्त।

## 18

### अब्सालोम साइक्चा पुंडसीशो

1 दाऊदमी आं नु बाक्शो मुर आन कली लडाइ पचा कली पुक्मी बाक्त। मिनु हजार का नु सहे का डा मुर आन कप्तान योव्रमी बाक्त।

2 मिनु नोले दाऊदमी आ लडाइ पाइब आन कली भाग सां सेल्मी बाक्त। भाग का योआब आ हुकुममी, भाग का सेरूयाह आ तौ अबीशै योआब आ लोक्ब आ हुकुममी नु भाग का गित्त आ खिं डा मुर इत्ताइ आ हुकुममी गेमी बाक्त। मिनु पिपमी “गो यो गेपुकी नु लडाइम लाइनुड” देंमाक्त। २सामुएल १५:१९

3 तन्न मेकोपुकीमी “ममाइ, गे चहिं मलने। बुशा प्रोक्चा माल्ताक्क हना, आंइ कली सुडम मतुइक्नीम। गो उइक्थ बेक्तक हना यो, मेकोपुकीम आंइ कली मकोव्रनीम। तन्न गे आंइ १० हजार खोदेशो बाक्नीनी। मोपतीके गे सहरम बाक्शा, आंइ कली वारच पाइतीनी हना, रिम्शो दुम्ब” देंमा बाक्त।

4 मिनू पिपमी “मो हना गो, गे मार देंनी, मेको पाइनुड” देंमाक्त। मिनू मेको ठेयब लाप्चोम राप्शा बाक्माक्त। मिनू लडाइ पाइबपुकी हजार का, सहे का डा हुल पा आ डोंइती रे लमा बाक्त।

5 पिपमी योआब, अबीशै नु इत्ताइ आन कली “गो आं पर्वम मेको ठिटा अब्सालोम नु मरिम्शो मपने” दे अब्सालोम आ पर्वम लडाइ पाइब आन कली अरेशो मुर नेल्लेम नेन्मे बाक्त। २सामुएल १८:१२

6 मिनू लडाइ पाइबपुकी इस्राएली नु लडाइ पथ जाक्दीम्मा बाक्त। मेको लडाइ एफ्राइम डा ब्वाकीम दुम्माक्त।

7 मेकेर दाऊद आ मुरपुकीम इस्राएली आन कली फूमे बाक्त। मेको नाक्ती थम ठेयब लडाइ दुम्शा २० हजार मुर बेक्मा बाक्त।

8 लडाइ राज्य आ एर ओथ नेल्ल ब्रमाक्त। तरवारम साइशो क्येडा ब्वाकीम साइशो मुर शुश दुम्मा बाक्त।

9 अब्सालोममी दाऊद आ मुर कली तवा बाक्त। अब्सालोम आ खचचर डोइशो बाक्माक्त। मेको खचचर शुश राशी पाइशो ठेयब बोल्यो रवा का आगा रे ग्रीशा लमाक्त। मिनू अब्सालोम आ चां मेको बोल्यो रवा आ राशीम ब्वेक्ता बाक्त। मिनू मेको ग्युकशा लीमाक्त। आ खचचर चहिं ग्रीशा लाक्गा बाक्त।

10 मुर कामी मेको तशा योआब कली “गो अब्सालोम कली बोल्यो ठेयब रवा काम ग्युकशा लीशो ताता” मदा बाक्त।

11 योआबमी मेको मुर कली “गे मेको कली मोपा तशा, मारदे मसदी? गो इ कली १० टुक्रा चांदी नु काम्बरी का गेन वा” देंमाक्त।

12 मेको मुरुम योआब कली “गे आं कली हजार का टुक्रा चांदी गेतीनी हना यो, गो पिप आ तौ आ पर्वम आं गुड मक्युकनुड। मारदे हना पिपमी ‘मेको ठिटा अब्सालोम कली सुम थिप्बा, मेकोमी रिम्शो पने’ दे अबीशै, इत्ताइ नु इन कली देंशो गो नेल्लेम नेंतक। २सामुएल १८:५

13 मिनू गो मेको कली मरिम्शो पा साइक्ता हना, मेको लोत्र पिपमी रीब पा नेंब। मिनू गे दोस मताइब दुम्नीनी” देंमाक्त।

14 मिनू योआबमी “गो गे नु लोत्र पा मग्योलनुड” देंमाक्त। मिनू मेकोमी तूतीक सां शेशा, अब्सालोम मो पा रवाम ग्युकशा बाक्मेनु, आ कुचुमी थोकगा बाक्त। मेना सम्म अब्सालोम सेस बाक्शो बाक्माक्त।

15 मिनू योआब आ या कुरब १० जना मुरुम अब्सालोम कली आ एर ओथ बाक्शा, मेको कली आप्शा सदमे बाक्त।

16 मिनू योआबम तुराही तबा बाक्त। मिनू लडाइ पाइबपुकी इस्राएली आन कली खेदा पचा प्रोंइशा, लेम्मा बाक्त। मारदे हना योआबम लडाइ पाइब आन कली तेक्मी बाक्त।

17 मेकोपुकीम अब्सालोम आ बेक्शो रं लाइशशा, ब्वाकी डा ठेयब ढोडोडगा काम ताइक्तमे बाक्त। मिनू मेको तार शुश फुल्लु पुक्गमे बाक्त। मिनू इस्राएली नेल्ल आन आन खिं प्रोकमा बाक्त। यहोसु ८:२९

18 डोंइती अब्सालोममी पिप आ बेंसीम थाम का खुक्शो बाक्माक्त। मारदे हना मेकोमी “आं नें वोइक्चा कली आं तौ मबाक्ब” देंशो बाक्माक्त। मेकोमी मेको थाम कली आ नें वोइशो बाक्माक्त। मुल सम्म मेको थाम कली अब्सालोम आ थाम देंसीब। २सामुएल १४:२७

19 मिनू सादोक आ तौ अहीमाजम “परमप्रभु यावेम क्येक्क लेत्ताक्व। मिनू पिप कली आ जोरी सत्रु आन गुड रे प्रोंइतु, देंचा कली आं कली दोरपा सोइक्तीनी” देंमाक्त। २सामुएल १५:३६; २सामुएल १७:१७

20 तन्न योआबमी मेको कली “मुलाक्ती इ लोत्र लाइक्तीक नाक्त ममाइ। अर्को नाक्ती गे लोत्र लाइक्चा माल्नेवे। मारदे हना मुलाक्ती पिप आ तौ बेक्शो बाक्ब” देंमाक्त।

21 मिनू योआबमी कूश आ खिं डा मुर का कली “लशा, इ तशो नेल्ल पिप कली नेंपतो” दे मदा बाक्त। मिनू मेको कूश आ मुर योआब कली बाप्शा सेउ पा दोरशा लमाक्त।

22 मिनु सादोक आ तौ अहीमाजम लेशा, योआब कली “मार दुम्त हना यो आं कली कूश डा मुर आ नोनोले दोरशा लचा गेयीनी” देंमाक्त। मिनु योआबमी “आं तौ गे मारदे लाइनेवे? इ लोत्र आ पर्वम गे मारेइ इनाम मताइनेवे” दे मदा बाक्त।

23 मिनु मेकोमी “मार दुम्त हना यो, गो दोरशा लाइनुड” देंमाक्त। मिनु योआबमी “मो हना लावो” देंमाक्त। मिनु अहीमाज यदेन डा बेसी रे पा दोरमाक्त। मिनु मेकोम कूश आ खिं डा मुर कली ग्रामाक्त।

24 मेना दाऊद लाप्यो निक्शी आस दातेमी बाक्शो बाक्माक्त। खाल पाइबमी गारो आ तार लशा कोत्रडा बाक्त। मिनु मुर का दोरशा पिशो तवा बाक्त।

25 मिनु मेको खाल पाइबम पिप कली ठेयब सेंदा पा देंमाक्त। मिनु पिपमी “मेको आ का ला बाक्त हना, मारेइ लोत्र चाक्तु” देंमाक्त। मेको मुर आन नेक्था जाक्माक्त।

26 मिनु मेको खाल पाइबमी अर्को मुर का यो दोरशा पिशो तवा बाक्त। मिनु लाप्यो खाल पाइब कली “कोत्रडीन, दे अर्को मुर का यो आ कान दोरशा पिन पिन बाक्ब” देंमाक्त। मिनु पिपमी “मेकोम यो लोत्र चाक्गा माइ” देंमाक्त।

27 मिनु मेको खाल पाइबमी “मेरे डोंइती दोरब सादोक आ तौ अहीमाज खोदेशो पा दोरत” देंमाक्त। मिनु पिपमी “मेको रिम्शो मुर बाक्ब, मेकोम रिम्शो लोत्र चाक्गा माइ” देंमाक्त।

28 मिनु अहीमाजम पिप कली ठेयब सेंदा पा “नेल्ल रिम्शो बाक्ब” देंमाक्त। मिनु पिप आ डोंइती खुम्की पा बाप्या, पिप कली “परमप्रभु यावे, इन परमप्रभु ठेयब बाक्ब। मेकोम आं प्रभु, पिप इन कली मरिम्शो पाइब आन कली इन गुइमी गेशो बाक्ब” देंमाक्त।

29 मिनु पिपमी “मार मेको टिटा अब्सालोम रिम्शोन बाक्मे?” देंमाक्त। मिनु अहीमाजम “इन गेय पाइब योआबम आं कली सोइक्तानु, गो ठेयब ग्रांग्ये माग्ये दुम्शो ताता। तन्न मार दुम्शो बाक्मे मतुइक्नुड” देंमाक्त।

30 मिनु पिपमी मेको कली “गे मेकेर राप्या बाक्को” दे मदा बाक्त। मिनु मेको मेकेर राप्या बाक्माक्त।

31 मिनु मेको कूश आ मुर जाक्शा मेकोमी “आं प्रभु, आ पिप, इन कली नेल्ल रिम्शो बाक्ब। मारदे हना मुलाक्ती परमप्रभु यावेमी इन कली मरिम्शो पाइब आन गुइ रे प्रोंइशो बाक्ब” देंमाक्त।

32 मिनु पिपमी मेको कूश आ मुर कली “मेको टिटा अब्सालोम रिम्शोन बाक्मे” दे हिल्लो पवा बाक्त। मिनु मेको कूश आ मुरुमी “आं प्रभु, पिप आ जोरी सत्रु नु मरिम्शो पाइब नेल्ल मेको टिटा खोदेशो दुम्मल” देंमाक्त।

33 मिनु पिप आ थुं ग्येत्य लुक्च दुम्शा, मेको ठेयब लाप्यो आ तार डा कोठाम लशा डाक्माक्त। मिनु गाक्ना गाक्न लमेनु “आं तौ अब्सालोम, आं तौ अब्सालोम, इ पा डा गो बेक्शो नड हना, दुम वा। अब्सालोम! आं तौ, आं तौ” दे डाक्माक्त।

## 19

### अब्सालोम आ पर्वम रोंका पशो

1 मिनु योआबम “पिप दाऊद अब्सालोम आ पर्वम डाक्ना डाक्न रोंका पा बाक्शो बाक्ब” देंशो लोत्र नेना बाक्त।

2 मेको नाक्त डा ग्राशो नेल्ल लडाइ पाइब आन कली रोंका पतीक दुम्माक्त। मारदे हना लडाइ पाइबपुकीमी पिप आ तौ आ पर्वम रोंका पशो बाक्ब, दे नेंमे बाक्त।

3 मेको नाक्ती लडाइ पाइबपुकी लडाइम ब्रुशा आन कुल कोंइने मचाप्यु, मुने दोक्शा प्रोक्शो मुर खोदेशो पा सिक्सी पा सहर ओत्रमा बाक्त।

4 पिप आ कुल सुम्शा ठेयब सेंदा पा डाक्ना डाक्ना “आं तौ अब्सालोम, अब्सालोम, आं तौ, आं तौ” देंमाक्त।

5 मिनु योआब पिप आ खिंम ओत्रशा मेको कली “गे मुलाक्ती इन कप्तान नेल्ल आन कली मुने तोक्तीनी। मारदे हना मुलाक्ती मेकोपुकीमी इन कली प्रोंइतेक्म। इन तमी तौ, इन मीशपुकी नु इन नोले चाक्शो मीश आन कली यो प्रोंइतेक्म।

6 इन कली काइ मदाकब कली गे दाक्नीनी। इन कली दाकब आन कली गे काइ मदाक्नीनी। मुलाक्ती गो लडाइ पाइब आन कप्तान नु ठेयब मुर इन डोंइती मारेइ मनकी, दे रुप्पाइक्तीनी। मुलाक्ती अब्सालोम ब्रोंइशा, गो नेल्ल बेकशो नकी हना, गे ग्येरसीनी वा।

7 मुल रीब पा लशा, इन गेय पाइब आन थुं बारपतीन। गे मो मपाइतीनी हना, गो परमप्रभु यावे आ नेमी कसम जशा 'मुलाक्दो गे नु सुइ मबाक्नीम' देंनुड। मिनु डोंइती इन तशो श्येत क्येडा मुलाकत डा श्येत ठेयब दुम्ब" देंमाकत।

8 मिनु पिप बोक्शा, ठेयब लाप्चोम बाक्माकत। मिनु पिप ठेयब लाप्चोम बाक्शो बाक्ब, दे लडाइ पाइब आन कली नेंपदमे बाकत। मिनु लडाइ पाइब नेल्ल पिप आ डोंइती जाक्मा बाकत। मेना सम्म इस्राएली नेल्ल आन आन खिं प्रोक्ने थुंशो बाक्मा बाकत।

### दाऊद यरूसलेम लेशशो

9 इस्राएल डा थर नेल्ल डा मुरुम आंम आंम लोव्र पा "पिपमी आंइ कली आंइ जोरी सत्रु रे प्रोंइतु। पलिस्ती आन गुइ रे यो प्रोंइतु। मुल अब्सालोमम पतीके आंम रागी रे प्रोक्शा गाक्शो बाक्ब।

10 मुल गो इ पिप सेल्शो अब्सालोम लडाइम बेकत। मोपतीके गो मुल मारदे पिप कली लेशशा मचाक्नया?" देंमुमा बाकत।

11 मिनु पिप दाऊदमी सादोक नु अबीयाथार कली "यहूदा डा खाल्पा आन कली 'मारदे गे पिप कली आ खिंमी लेशशा चाक्चा कली नेल्ल क्येडा नोले दुम्चा दाक्नीनी? इस्राएली नेल्लेम देंशो लोव्र पिपमी नेंने थुंशो बाक्ब।

12 गेपुकी आं मुर ननी। आं हुश ननी। पिप कली लाइक्चा कली गे मारदे नोले दुम्नी' मतीस। २सामुएल ५:१

13 मिनु आमासा कली 'गे आं मुर नु आं हुश मनवे? गे योआब आ पा डा गो बाक्डा सम्म कप्तान दुम्नेवे। मो मपाता हना, परमप्रभुमी सजाइ गेवल' देंत मतीस" देंमाकत। २सामुएल १:२५

14 मिनु आमासामी यहूदा डा मुर नेल्लेमी "दाऊद कली ब्रेत्चा माल्ब" दे थुं का सेला बाकत। मिनु मेकोपुकीम पिप कली "गे नु इन गेय पाइब नेल्ल नु लेशशा जाक्कीन" दे लोव्र सोइकतमे बाकत।

15 मोपतीके पिप लेशशा यर्दन जाक्माकत। डोंइती यहूदा डा मुरपुकी गिल्यालम पिप गुम्चा कली जाक्मा बाकत। मेकोपुकीमी पिप कली यर्दन खोला शोकपाइक्थ जाक्मा बाकत।

16 बेन्यामीन आ थर डा मुर बाहुरीम डा गेरा आ तौ शिमेइ यो यहूदा डा मुर नु रीब पा पिप दाऊद कली गुम्थ जाक्माकत।

17 मेको नु हजार का जना बेन्यामीन आ थर डा मुर यो बाक्मा बाकत। सावल आ गेय पाइब सीबा यो आ १५ जना तौ नु आ २० जना गेय पाइब नु मेकेर बाक्शो बाक्माकत। मेकोपुकी पिप आ डोंइती यर्दन खोलाम जाक्दीम्मा बाकत। २सामुएल ९:२,१०; २सामुएल १६:१-४

18 मिनु मेको आइक्ची हांबुम लचा कली पिप आ खिं डा मुर आन कली शोकचा कली नु पिप आ माल्लो पचा कली मेकेर जाक्मा बाकत। मिनु गेरा आ तौ शिमेइ पिप खोला शोकची ना पिप आ डोंइती बाम्माकत।

19 मिनु शिमेइमी पिप कली "आं प्रभु, पिप, गे यरूसलेम प्रोंइची ना आं मरिंशो पशो आ पर्बम दोस मगेथु ममिम्तीन।

20 मारदे हना गो, इन गेय पाइबम पाप पाता, दे तुइक्नुड। मोपतीके गो योसेफ आ खिं डा मुर नेल्ल आन क्येडा डोंइती आं प्रभु पिप इन कली गुम्थ जाक्ती" देंमाकत।

21 मिनु सेरूयाह आ तौ अबीशैमी "परमप्रभु यावे आ तेल लुक्शो कली सराप पतीके शिमेइ साइक्चा मपुंडसीबा डा?" देंमाकत।

22 तन्न दाऊदमी "सेरूयाह आ तौ, गे आं कली काइ मगारब मुर बाक्नीसी। गे मुलाक्ती आं जोरी सत्रु दुम्तीसी? मुलाक्ती इस्राएली तैकोइ मुर साइक्चा मदुम्ब। मुलाक्ती गो इस्राएल डा पिप दुम्ती, दे गो मतुइक्नुडा डा?" देंमाकत। २सामुएल १६:१०

२३ मिनु पिपमी शिमेड कली “गे साडक्चा मपुंडसीनेवे” देमाक्त। मिनु पिपमी मेको लोत्र थमा सेल्चा कली कसम जवा बाक्त। १राजा २:८-९

२४ सावल आ चच मेफी-बोशेथ यो दाऊद पिप कली ग्रुथ उड यिमाक्त। मेकोम पिप गाकम रे ग्राशा मलेम्म सम्म आ खोडल डा ग्ये यो मखोदा बाक्त। आ गल शोक्त्रे यो मप्रेक्गा बाक्त। आ वा यो ममुरशो बाक्माक्त। २सामुएल ९:६

२५ मेको पिप कली ग्रुथ यरूसलेम रे जाक्मेनु, पिपमी मेको कली “मेफी-बोशेथ गे मारदे गो नु मगाक्डे?” दे मदा बाक्त।

२६ मिनु मेकोमी “आं प्रभु पिप, आं गेय पाइबम आं कली मरिम्शो पाप्तु। गो आं गधाम लगम पाइश्शा पिप नु गाक्चा ठीक दुम्शो नड। मारदे हना गो इन गेय पाइब खोडल थेक्ने मचाप्ब मुर नड।

२७ मेको आ लोत्रमी आं प्रभु पिप इन कली आं पर्वम मरिम्शो दुम्पाइक्तु। गे आं प्रभु पिप परमप्रभु आ स्वर्ग डा गेय पाइब खोदेशो बाक्नीनी। गे मार पचा दाक्नीनी मेको पने। २सामुएल १६:३; २सामुएल १४:१७

२८ आं आफ आ खिं डा मुर नेल्ल इन गुडमी बेक्चा डा नकी। तन्न गो इन गेय पाइब आं कली इन नु जचा बाक्चा गेतीनी। मेको क्येडा लाक्शा, गो मार शिशी ताडक्नुडा डा?” देमाक्त। २सामुएल ९:७

२९ मिनु पिपमी “मुल दुम्त। सीबा नु गे रू योक्सीस, देंती” देमाक्त। २सामुएल ९:९-१०; २सामुएल १६:३-४

३० मिनु मेफी-बोशेथमी पिप कली “नेल्ल मेकोम पांडसेक्ल। मारदे हना गे आं प्रभु पिप मारेड मदुम्थु खिं लेशशा जाक्तीनी” देमाक्त।

३१ मिनु गिलाद आ मुर बारजील्लाड यो रोगेलीम रे उड यिमाक्त। मिनु पिप कली यर्दन शोक्चा कली पिप आ नेक्था जाक्माक्त। २सामुएल १७:२७; १राजा २:७

३२ बारजील्लाड ८० बर्स दुम्शो थम खूशो बाक्माक्त। मेकोमी पिप महा-नाइमम बाक्मेनु, पिप कली जचा थोत्रक गेशो बाक्माक्त। मारदे हना मेको थम शोंप पाइश्शो मुर बाक्माक्त।

३३ पिपमी बारजील्लाड कली “गो नुन खोला शोक्शा लय। गो इन कली यरूसलेममी कोव्रशा थुल्शा वोडक्नुड” देमाक्त।

३४ मिनु बारजील्लाडमी पिप कली “गो शुश बर्स मब्रोडनुड। दोपा गो पिप नु यरूसलेम लाइनुड।

३५ मुल गो ८० बर्स दुम्ती। मुल गो रिम्शो नु मरिम्शो दोपा तुडक्नुडा? आं जशो तूशो ब्रोव्रशो नु मब्रोव्रशो मारेड मतुडक्नुड। वोंडश मुर मीश मरुम कुम्सो पशो, गो नेंने मचाप्नुड। मोपतीके गो आं प्रभु पिप इन कली मारदे श्येत तेम्नुडा?

३६ गो इन गेय पाइब यर्दन आइक्ची हांबु इक्का सम्म पिप इन नु लाइनुड। पिपमी आं कली मारदे ओदेशो रिम्शो इनाम गेयीनी?

३७ आं कली लचा गेयीनी। मिनु आं आंम सहरम आं आम आफ आस तुरस आ नेक्था आं लीशो नाक्त थुम्चा गेयीनी। तन्न इन वाडल किम्हाम एक बाक्ब। मेको कली आं प्रभु पिप इन नु आइक्ची हांबु लतीन। गे मार रिम्शो लाक्नीनी, मेकोन पने” देमाक्त। येरमीया ४१:१७

३८ मिनु पिपमी “मो हना किम्हाम गो नु आइक्ची हांबु गाक्ल। मिनु गे मार पचा दाक्नीनी, मेको इन देशो खोदेशो पाइनुड। गे मार दाक्नीनी गो मेको पाइनुड” देमाक्त।

३९ मिनु मुर नेल्ल यर्दन आइक्ची हांबु शोक्समा बाक्त। पिप यो शोक्से बाक्त। मिनु पिपमी बारजील्लाड कली पुक्पु पा आसीक गेवा बाक्त। मिनु बारजील्लाड आंम आ खिं लेम्माक्त।

४० पिप खोला शोक्शा गिल्गाल जाक्माक्त। किम्हाम मेको नु गाक्शो बाक्माक्त। यहूदा डा मुर नेल्ल नु इस्राएल डा उडक्थ मरुम पिप कली इक्का आइक्ची सम्म चाक्दीत्मे बाक्त।

४१ मिनु इस्राएल डा मुर नेल्ल काथा दुम्शा, पिप आ बाक्तीक जाक्मा बाक्त। मिनु मेकोपुकीमी “मारदे आंड लोक्ब यहूदा डा मुरपुकीम इन कली खुड पा लदमे? पिप, आ खिं डा मुर नु इन मुर नेल्ल लाइश्शा यर्दन आइक्ची हांबु चाक्दीत्मे?” देमा बाक्त।



42 मिनु यहूदा डा मुर नेल्लेमी इस्राएल डा मुर आन कली “पिप आंड नेक्था डा मुर बाक्व। गे मारदे आंड पबर्म गाइक्नीनी? मार, गो पिप आ शोंप जका? मार पिपमी गो आंड कली मारेइ गोवा?” देमा बाक्त। २सामुएल १९:१२-१३

43 मिनु इस्राएल डा मुरपुकीम यहूदा डा मुर आन कली “पिप इन क्येडा १० खेयप शुश आंड पिप बाक्व। गे मारदे आइक्च सेल्लनीनी? पिप दाऊद कली लेशशा चाक्ता, दे गोपुकीम डोंडती देशो बाक्नीकी, मेको मप्रेंदीन” देमा बाक्त। तन्न इस्राएल डा मुर क्येडा यहूदा डा मुरपुकीमी ठेयब लोत्र पामे बाक्त। २सामुएल १९:१०-११

## 20

### शेबा आ मरिम्शो पशो

1 शेबा नें पाइशो मरिम्शो पाइब मुर का बाक्माक्त। मेको बेन्यामीन आ थर डा बिक्री आ तौ बाक्माक्त। मेकोम तुराही ताप्शा ग्रीशा “दाऊद नु आंड के मार बाक्वा डा? येस्से आ तौ नु आंड के मारेइ मबाक्व। ए इस्राएली, गे इन ताम्बु ताम्बुम लने” देमाक्त। १राजा १२:१६

2 मोपतीके इस्राएली नेल्लेमी दाऊद कली प्रोंइशा, बिक्री आ तौ शेबा आ नोले खोदमे बाक्त। तन्न यहूदा डा मुरपुकी चहिं दाऊद कली मप्रोंइथु, यर्दन रे यरूसलेम सम्म आ नोले खोइक्स डा खोइक्स पामे बाक्त।

3 मिनु दाऊद आ खिं यरूसलेमम जाक्माक्त। मिनु मेकोम आ खिं कोत्रचा कली वोइशो मेको १० जना नोले चाक्शो मीश आन कली खिं कामी कोत्रब मुर का वोइशशा वोइक्मी बाक्त। मेकोमी आन माल्लो नेल्ल गेमी बाक्त। तन्न मेको नु गेनायो मइम्माक्त। मोपा मेको आन बेक्ची नाक्त सम्म यो मप्रोंइथु वोइक्मी बाक्त। मोपा मेकोपुकी वोइश बेक्शो मीश मुर खोइंशो पा बाक्मा बाक्त। २सामुएल १६:२१

4 पिपमी आमासा कली “यहूदा डा वोइश मुर आन कली खुप्तीमी। मिनु नाक्त सांमी आं बाक्तीकेमी जाक्पाइक्मी। मिनु गे यो जाक्को” दे मदा बाक्त।

5 मोपतीके आमासा यहूदा डा मुर आन कली खुप्या कली गाक्माक्त। तन्न पिपमी देशो क्येडा मेको कली शुश नाक्त माल्दा बाक्त।

6 मिनु दाऊदमी अबीशै कली “अब्सालोम क्येडा बिक्री आ तौ शेबामी इं कली शुश श्येत गेब। पिप आ गेय पाइब आन कली लाइशशा, मेको कली खेदा पावो। मेको गारो हिरशो सहरम ओत्रत हना, इं गुइ रे ब्रोंडब” दे मदा बाक्त।

7 मिनु योआबम केरेथी, पेलेथी नु लडाइ पाइब नेल्ल यरूसलेम रे लाइशशा, बिक्री आ तौ शेबा कली खेदा पवा बाक्त। २सामुएल ८:१८

8 मिनु मेकोपुकी गिबोन डा ठेयब फुल्लु बाक्तीक जाक्मानु, आमासा, मेको आन कली गुम्थ जाक्माक्त। मिनु योआबम लडाइ पतीक वा फेक्शो बाक्माक्त। मेको तार किप्शुर किप्शो बाक्माक्त। मिनु खोतम शुइशशा तरवार किप्शुरम पिप्शो बाक्माक्त। मिनु मेको डोंडती गे लमेनु, मेको तरवार खोत रे दोक्माक्त। मती २६:४८-५०

9 योआबम आमासा कली “आं लोकब आमासा गे रिम्शोन बाक्डे?” दे हिल्लो पवा बाक्त। मिनु मेकोमी आमासा कली पुक्पु पाइक्चा कली आ ग्युरा गुइमी मेको आ गल शोक्रे ग्याइक्ता बाक्त।

10 आमासामी योआब आ गुइमी तरवार बाक्शो मतुइक्ता बाक्त। मिनु योआबमी मेको आ कोत्रजम तूदा बाक्त। मिनु मेको आ गा क्यी खपीम दोक्शा बेक्माक्त। मेकोमी खेयप निक्शी तूचा ममाल्दा बाक्त। मिनु योआब नु आ लोकब अबीशै बिक्री आ तौ शेबा कली खेदा पना पन लसा बाक्त। १राजा २:५

11 मिनु योआब आ ठिटा मुर काम आमासा आ बेक्शो रां आ नेक्था राप्शा “योआब नु दाऊद आस नोले खोइक्बपुकीम योआब आ नोले खोदमेक्ल” देमाक्त।

12 आमासा आ बेक्शो रां हुशेम गिल्शा ठेयब लांमी गोल्शा बाक्माक्त। मिनु मुर नेल्ल लांमी दिक्शा बाक्शो बाक्मा बाक्त। मिनु मेकोम आमासा आ बेक्शो रां कली लां रे लाइशशा आइक्ची खेतम ताइक्ता बाक्त। मिनु मेको कली वा काम सुमा बाक्त।

13 मेको कली ठेयब लां रे लदमे नोले, मुर नेल्लेम बिक्री आ तौ शेबा कली खेदा पचा कली योआब आ नोले खोदमे बाक्त।

14 शेबा इस्राएल डा थर नेल्ल लाक्शा, आबेल डा बेथ-माकाहम जाक्मा सम्म बिक्री आ खिं डा मुर नेल्ल तेइ तेइ रे गुम्मा बाक्त। मिनु मेको आ नोले सहर ओव्रमा बाक्त।

15 योआब आ लडाइ पाइब मुर नेल्ल जाक्शा, आबेल डा बेथ-माकाह कली पुन्दमे बाक्त। मिनु सहर डा गारो गे मार मार तेल्ला, गारो डोइक्तीक ठीक पामे बाक्त। मिनु योआब आ लडाइ पाइबपुकीमी गारो प्रेत्चा गोव्रमे बाक्त।

16 मिनु जोक्ब तुइक्ब मीश मुर काम सहर रे ब्रेशशा “नेनीन, नेनीन, योआब कली ब्रेशशा सोइक्तीन। मिनु गो मेको नु लोव्र पाइनुड” देंमाक्त।

17 मिनु योआब आ डोंइती जाक्माक्त। मिनु मेको मीश मुरुमी “मार, गे योआब ननी?” देंमाक्त। मिनु योआबम “ओं, गो नड” देंमाक्त। मिनु मेको मीश मुरुमी “इन गेय पाइब आं लोव्र रिम्शो पा नेनीन” देंमाक्त। मिनु मेकोमी “नेता” देंमाक्त।

18 मिनु मेकोमी “साइ रे मुरपुकीमी लोव्र नेंचा कली ‘आबेल सहर लचा माल्नीम’ देंशो बाक्ब। मिनु मोपा निसाफ दुम्बाक्त।

19 आं सहर इस्राएल डा सहरपुकीम लडाइ मपाइब, पिप कली दाक्शा मान पाइब सहरम हिकसीब। मिनु गे एको सहर, इस्राएली आन कली कोव्रब ममा खोदेंशो सहर कली खतम सेल्चा माल्नीनी? मारदे गे परमप्रभु यावे आ शोंप कली खतम पोक्चा माल्नीनी?” देंमाक्त। ब्यवस्था ३२:९

20 मिनु योआबमी “गो खतम मपोक्नुड, मक्याम्नुड।

21 गो मो पचा माल्शो मनकी। तन्न एफ्राइम पहाड डा बिक्री आ तौ शेबामी पिप दाऊद कली मरिम्शो पचा माल्शो बाक्ब। मेको मुर कली आंइ कली गेने। मिनु गो सहर प्रोंइशा गाक्नीक” देंमाक्त। मिनु मेको मीश मुरुम योआब कली “मेको आ पिया सहर रे लाडगा ब्वारनीकी” देंमाक्त।

22 मिनु मेको मीश मुरुम आ लोव्र मुर नेल्ल आन कली नेंपाइक्मी बाक्त। मिनु मेकोपुकीम बिक्री आ तौ शेबा आ पिया खोइशशा, योआब कली ब्वारदमे बाक्त। मिनु योआबम तुराही तबा बाक्त। मिनु लडाइ पाइब नेल्ल सहर प्रोंइशा आन खिं खिं लेम्मा बाक्त। योआब चहिं पिप आ बाक्तीके यरूसलेम लेशशा लमाक्त।

### ठेयब मुर आन नें

23 योआब इस्राएल डा लडाइ पाइब आन नेल्ल क्येडा ठेयब मुर बाक्माक्त। येहो-यादा आ तौ बेनायाह केरेथी नु पेलेथी पिप कली खाल पाइब आन ठेयब मुर बाक्माक्त। २सामुएल ८:१६-१८; १राजा ४:४-६

24 अदोराम वाइलीम वाइल आन ठेयब मुर बाक्माक्त। अहीलुद आ तौ येहो-शाफात ब्रेक्ब बाक्माक्त।

25 शेवा चहिं लडाइ पाइब आन ब्रेक्ब बाक्माक्त। सादोक नु अबीयाथार चहिं चढ़ेब बाक्सा बाक्त।

26 याइर आ मुर इरा चहिं दाऊद आ चढ़ेब बाक्माक्त।

## 21

### अन्काल नु रिस्पाह आ कथा

1 पिप दाऊद आ पालाम बर्स सां सम्म अन्काल दुम्स डा दुम्स पवा बाक्त। मिनु दाऊदमी परमप्रभु यावे कली हिल्लो पवा बाक्त। मिनु परमप्रभु यावेमी “सावल नु आ खिं डा मुर आन तार हुश आ दोस बाक्शो बाक्ब। मारदे हना मेकोम गिबोनी आन कली साइक्तु” देंमाक्त।

2 मिनू पिपमी गिबोनी आन कली ब्रेशा, मेकोपुकी नु लोत्र पवा बाक्त। गिबोनी इस्राएली आन थर डा मुर मबाक्मा बाक्त। मेकोपुकी एमोरी रे ब्रोंडशा लीशो बाक्मा बाक्त। इस्राएलीपुकीम मेको आन कली प्रोंडतीक कसम जशो बाक्मा बाक्त। मो हना यो सावलमी इस्राएल नु यहूदा आ पबर्म मेको आन कली क्याम्चा माल्लो बाक्माक्त। यहोसु ९:३,१५,१९

3 दाऊदमी गिबोनी आन कली “गो इन कली मार पड? परमप्रभु यावे आ मुर आन कली आसीक गेचा कली गो दोपा गारपाइक्नुडा?” दे हिल्लो पवा बाक्त। ब्यवस्था ३२:९

4 मिनू गिबोनीपुकीमी “सावल आ खिं नु आंइ खिं डा मुर आन दातेम सुन नु चांदीम गार पाइक्ने मचाम्सीब। इस्राएली का यो साइक्चा मगारनीकी” देंमा बाक्त। मिनू दाऊदम “मिनु मुल गोम इन कली मार पवल, दे मिम्नीनी?” देंमाक्त।

5 मिनू मेकोपुकीम पिप कली “सुम आंइ कली खतम पोक्गा, आंइ कली रागी रे क्याम्दा, मेको कली खतम पोक्चा कली आंइ गुडम गेने।

6 मेको आ ७ जना तौ चच आंइ कली गेने। मिनू गो मेको आन कली परमप्रभु यावे आ डोंइती आ डांडा गिबोन सहरमी साइक्नीकी” देंमा बाक्त। मिनू पिपमी “गो मेको इन कली गेनुड” देंमाक्त। ब्यवस्था २१:२२-२३

7 तन्न पिपमी परमप्रभु यावे आ नेंम नु सावल आ तौ योनाथन नु कसम जतीके सावल आ चच योनाथन आ तौ मेफी-बोशेथ कली प्रोंडशा वोदा बाक्त। १सामुएल २०:१५-१७;

8 पिपमी आइयाह आ तमी रिस्पाहम सावल रे जरमेशो तौ निकशी आरमोनी नु मेफी-बोशेथ चाक्गा बाक्त। मिनू सावल आ तमी मेराबम मेहोला आ मुर बारजील्लाइ आ तौ अद्रीएल रे जरमेशो ५ जना तौ यो चाक्गा बाक्त। २सामुएल ३:७; १सामुएल १८:१९

9 मिनू मेको आन कली गिबोनी आन गुडमी गेमी बाक्त। मेकोपुकीम मेको आन कली परमप्रभु यावे आ डोंइती सदमे बाक्त। मिनू मेको ७ जना कालेम बेक्मा बाक्त। मेकोपुकी क्योव्रज रिक्तीक आ डोंइती डा नाक्त साइक्चा पुंइसीमा बाक्त।

10 आइयाह आ तमी रिस्पाहम रोगु तारी आंम कली बाक्तीक सेल्चा कली भाडग्रा ब्रवा बाक्त। मिनू क्योव्रज ओंइतीक आ डोंइती डा नाक्त रे रेउ यिचा सम्म मेकोमी आ तौ आन बेक्शो रां आन कली खाल पवा बाक्त। नाक्ती आन तार चिक्ब जुक्चा मगेथु, नाक्दो ब्वाकी डा जन्तुम ब्वचा मगेमी बाक्त।

11 मिनू दाऊदमी सावल आ नोले चाक्शो मीश आइयाह आ तमी रिस्पाह आ पशो नेंशा,

12 मेकोमी सावल नु आ तौ योनाथन आस रुश याबेश-गिलादा डा मुर आन गुड रे चाक्गा बाक्त। मेकोपुकीम सावल नु योनाथन आस बेक्शो रां बेथ-शान सहर डा चोक रे लदमे बाक्त। पलिस्तीपुकीमी मेको आस कली गिलबोआम साइश्शा, नोले मेकेर क्युक्शो बाक्मा बाक्त। १सामुएल ३१:१२

13 मेकोम मेकेर रे सावल नु योनाथन आस रुश चाक्गा बाक्त। मिनू मेको रिस्पाह आ तौ आन रुश यो खुप्तमे बाक्त।

14 मेकोपुकीम सावल नु आ तौ योनाथन आस रुश बेन्यामीन आ थर आन रागी डा जेला सहर सावल आ आफ कीश आ तुरसुम थिम्मे बाक्त। पिपमी मेको आन कली मार मार देंमे, मेको पामे बाक्त। मेको नोले परमप्रभुम रागी आ पबर्म पुंइशो लोत्र नेना बाक्त। २सामुएल २४:२५

दाऊदम लडाइ ग्राशो  
१इतिहास २०:४-८

15 पलिस्ती नु इस्राएली लडाइ पामे बाक्त। दाऊद आ मुर नु लडाइ पथ यिमाक्त। मिनू पलिस्ती नु लडाइ पामे बाक्त। मिनू दाऊद थाम्पा दमाक्त।

16 इश्बी-बेनोब रेफाइम आ बोल्यो लाइश्शो मुर का बाक्माक्त। मेको आ तूतीके सहे सां शेकेल कांसा के बाक्माक्त। मिनू नक या का यो पिम्सीशो बाक्माक्त। मेकोमी “दाऊद कली साइक्नुड” देंमाक्त। शेकेल का ११.५ ग्राम बाक्ब। ३०० शेकेल ३ किलो आधा बाक्ब।

17 मेना सेरूयाह आ तौ अबीशै दाऊद कली वारच पाइक्थ जाक्शा, मेको पलिस्ती कली सदा बाक्त। मेना दाऊद आ लडाइ पाइबपुकीमी “मुल रे गे गो नु लडाइमी मगाक्कीन। मारदे हना गे इस्राएल डा छेडछेडन ननी। मेको मकाप्ल” दे कसम जामे बाक्त। २सामुएल २३:१८; २सामुएल २२:२९

18 मिनु नोले लेंशा, गोब सहरम पलिस्तीपुकी नु लडाइ दुम्माक्त। मेना हुशा डा मुर सिबबेकैम साफ माइश्शो रेफाइ आ मुर कली सदा बाक्त। रेफा थम लाइश्शो रेफाइ माइश्शो मुर आन किकी पिपी बाक्शो बाक्त।

19 मिनु लेंशा गोब सहरम पलिस्तीपुकी नु अर्को लडाइ का दुम्माक्त। बेथलेहेम डा यारे-ओरेगीम आ तौ एलहानानम गाथ सहर डा गित आ खिं डा मुर गोल्याथ कली सदा बाक्त। मेको आ तूतीक आ बिड तोव्र प्रोव्रब आन प्रोव्रतीक शी खोमो बाक्माक्त। १सामुएल १७:७

20 मिनु नोले लेंशा गाथ सहरम लडाइ दुम्माक्त। मेकेर यो ठेयब लाइश्शो मुर का बाक्माक्त। मेको आ गुड नु खोइलीम ६, ६ ओटा अम्ला, नेल्ल पा २४ ओटा अम्ला पाइश्शो रेफाइ आन मुर बाक्माक्त।

21 मिनु मेकोम इस्राएली आन कली हिंच कोइदा बाक्त। मिनु दाऊद आ लोक्ब शिमेइ आ तौ योनाथनमी मेको कली सदा बाक्त। १सामुएल १७:१०

22 मेको ४ जना मुर गाथम बाक्ब रेफाइ आन दाते डा बाक्मा बाक्त। मेको नेल्ल दाऊद नु आ मुर आन गुड रे बेक्मा बाक्त।

## 22

दाऊदम परमप्रभु कली ठेयब सेल्शो

भजन संग्रह १८:-

1 परमप्रभु यावेमी दाऊद कली आ जोरी सत्रु नेल्ल नु सावल रे प्रोना नोले दाऊदमी परमप्रभु यावे कली कुम्सो पवा बाक्त।

2 मेकोमी “परमप्रभु यावे आं सेरथे फुल्लु, आं बोल्यो दरवार नु आं कली श्येत रे प्रोइब बाक्ब।

3 आं परमप्रभु आं सेरथे फुल्लु आं खुइक्तीके बाक्ब। मेको आं तेक्तीक नु आं ब्रोइतीक बाक्ब। मेको आं बोल्यो दरवार नु आं फाम्सीतीक बाक्ब। मेको आं कली हुश स्राक्श पोक्तीके रे प्रोइब बाक्ब।

4 गो परमप्रभु यावे कली थोइनुड। मेको ठेयब सेल्चा पुंडसीब बाक्ब। मिनु मेकोम आं कली आं जोरी सत्रु रे प्रोइब।

5 बेक्पाइक्बम आं कली ब्वाक्कु आ छालम खोदेशो पा गिल्ली। खतम पोक्ब बारशो ब्वाक्कुम आं कली सुम्ती।

6 बेक्शो मुर आन बाक्तीकेम आं एर ओथ नेल्ल रे गिल्ली। बेक्पाइक्ब आ ब्वारद आं डोइती बाक्ब।

7 मिनु गो आं श्येत आ पर्वम परमप्रभु यावे कली थोव्रता। गो आं परमप्रभु कली ‘वारच पने’ दे पुंडता। मिनु मेकोमी आ बाक्तीके रे आं सेंदा नेंतु। आं पुंडशो नेंतु।

8 मिनु रागीमी खिनु कुत। सरीड डा जग हिम्साक्म। मारदे हना, परमप्रभु यावे गाइश्शो बाक्त।

9 मेको आ नें रे कुन गूत। मेको आ शोव्र रे ग्राव गु दाक्ब मी गूत। मेकेर रे ब्रशो कोइला गूतेक्म।

10 मेको सरीड रे तोइसाक्व। मेको आ खोइली आगा क्येर गोस्स बाक्त।

11 मेको करूब डोइश्शा बेरत। फश के फ्राम बेरशो तांइसाक्व।

12 मेको छिडछिडम सुम्साक्व। शुश ब्वाक्कु बाक्शो क्येर गोस्स आ एर ओथ बाक्तेक्म।

13 मेको आ डोइती डा छेडछेड रे ब्रशो कोइला गूतेक्म।

14 परमप्रभु यावेमी सरीड रे बंबु पाप्तु। नेल्ल क्येडा ठेयबम आ सेंदा नेंपाइक्तु।

15 मेकोम ब्रा आप्शा, एर ओथ ब्रपाइक्तु। चिला आप्शा, सोइक्ताक्व।

16 समुन्द्र आ पुं तांइसाक्व। रागी आ जग हुक्साक्व। मेको परमप्रभु यावे आ हुइश्शो नु आ सास रे मोदेशो दुम्त।

17 मेकोमी इर रे आ गुड दिशा ग्याइक्ताक्वी। आं कली ठेयब समुन्द्र रे कीशा गुंडताक्वी।

18 मेकोमी आं कली आं बोल्यो जोरी सत्रु नु आं कली काइ मदाक्ब, रे प्रॉइती। मेको आं क्येडा शुश बोल्यो बाक्तेक्म।

19 मेकोपुकीमी गो हिंचा डा श्येत जडा ना आं कली लडाइ तोम्तेक्म। तन्न परमप्रभु यावेमी आं कली तिक्ती।

20 मेकोमी आं कली लाडगा डा ठेयब बाक्तीकेम गुंडशा, श्येत रे प्रॉइती। मारदे हना मेको आं कली तशा ग्येरशो बाक्त।

21 परमप्रभु यावेमी आं कली आं ठीक पशो डा इनाम गेती। आं गुडम हुश मशाइक्पाइक्तीके आं रिम्शो पशो डा गेती।

22 मारदे हना गो परमप्रभु यावे आ लांम गाक्शो बाक्ती। गो आ अरेशो लोव्र मटीब खोदेशो पा आं परमप्रभु रे डोन मलड।

23 मारदे हना आ ठीक पतीक लोव्र आं डोंइती बाक्तेक्म। गो मेको आ फुल्लुम मुशा ब्रेक्शो लोव्र नेल्ल टिशा पाता।

24 मेको आ डोंइती गो दोस मताइब बाक्ती। गो मरिम्शो पतीक रे डोन बाक्ती।

25 मोपतीके परमप्रभु यावेमी आं कली आं ठीक नु रिम्शो पशो आ पा डा गेती।

26 गे मप्रॉइब आन कली मप्रॉइब बाक्तीनी। दोस मताइब आन कली दोस मताइब बाक्तीनी।

27 गे रिम्शो पाइब आन कली रिम्शो पाइब बाक्तीनी। दूली पाइब आन कली दूली पाइब बाक्तीनी।

28 गे ब्रेम्शो मुर आन कली प्रॉइतीनी। तन्न ठेयब लेशशो आन कली आइक्च सेल्लनीनी।

29 परमप्रभु यावे गे थमा पा आं बत्ती खोदेशो बाक्तीनी। परमप्रभु यावेमी आं कली छिडछिडमी छेडछेड दुम्पाइक्ब।

30 इन पतीकेमी गो लडाइ पाइब आन कली ग्रानुड। आं परमप्रभु गो गारो खाक्शा लाक्ने चाप्नुड।

31 परमप्रभु आ लां ठीक बाक्ब। परमप्रभु यावे आ थोशा पशो लोव्र थमा बाक्ब। मेको आ बाक्तीकेम खुंडसीब आन कली तेक्तीक बाक्ब।

32 परमप्रभु यावे क्येडा अर्को तेकोड परमप्रभु मबाक्ब। आंइ परमप्रभु क्येडा लाक्शा अर्को तेकोड सेरथे फुल्लु मबाक्ब।

33 परमप्रभुमी आं कली सक्ति गेती। आं गाक्तीक लां ब्रेम्शो सेल्लु।

34 मेकोम आं कली किश्श खोदेशो पा दोरब सेल्लती। मेकोमी आं कली इर वोइश्शा कोव्रब।

35 मेकोम आं गुड कली लडाइ पचा शेंब। मोपा आं गुडमी कांसा के लिब्रा खुक्ने चाप्ब।

36 गे आं कली इन तेक्शा ब्रॉइतीक गेतीनी। इन वारच पतीकेम आं कली ठेयब सेल्लती।

37 गे आं कली ठीक पा गाक्चा गेतीनी। मोपतीके आं खोइल गेनायो मग्रेक्ब।

38 गो आं जोरी सत्रु आन कली खेदा पा खतम पोक्तामी। गो मेको नेल्ल आन कली खतम मपोक्गुमी

सम्म मलेडड।

39 गो मेको आन कली खतम पोक्शा साइक्नुडमी। मिनु मेकोपुकी गेनायो बोक्ने मचाप्नीम। मेकोपुकी आं खोइली आगाम गोल्तेक्म।

40 गे आं कली लडाइ पचा कली सक्ति गेतीनी। आं जोरी सत्रु आन कली आं डोंइती आइक्च सेल्लतीनी।

41 गे आं जोरी सत्रु आन कली आं डोंइती रे प्रोक्पाइक्तीनी। गो आं कली काइ मदाक्ब आन कली खतम पोक्तामी।

42 मेकोपुकीम कोव्रना कोव्रन बाक्तेक्म। तन्न मेको आन कली प्रॉइब सुड मबाक्ब। मेकोपुकीम परमप्रभु यावे कली पुंडतेक्म। तन्न मेकोमी मेको आन कली लोव्र मलेत्त।

43 गो मेको नेल्ल आन कली रागी डा फुरक खोदेशो पा फस पोक्तामी। गो मेको आन कली लां डा हिलो खोदेशो पा दिम्ताक्डमी।

44 गे आं कली मुर आन जिचा पोक्तीक रे प्रॉइतीनी। गे आं कली रागी रागी डा मुर आन ठेयब मुर सेल्शा वोइक्तीनी। आं मतुइश्शो मुरपुकीम आं कली गेय पाम्तेक्म।

45 अर्को रागी डा मुर जाक्शा आं कली मान पाम्तेक्म। आं लोव्र नेंशा, मेकोपुकी आं देशो टिम्तेक्म।

46 अर्को रागी डा मुर हिंशा ख्रिंख्रि पा आन बोल्यो दरवार रे जाक्तेक्म।

47 परमप्रभु यावे ब्रोंडशा बाकब। आं सेरथे फुल्लु ठेयब बाकब। आं परमप्रभु मान ताइब बाकब। मेको आं कली प्रोंडब, सेरथे फुल्लु बाकब।

48 परमप्रभुम आं परबम क्येक्क लेत्ताक्व। मिनु मुर आन कली आं सासनम वोइक्तीमी।

49 मेकोम आं कली आं जोरी सत्रु रे प्रोंडती। गे आं कली आं जोरी सत्रु आन क्येडा ठेयब सेलतीनी। गे आं कली हुश खाक्श पोक्ब रे प्रोंडतीनी।

50 मोपतीके परमप्रभु यावे, गो रागी रागी डा मुर आन दातेमी इन कली ठेयब सेलनुड। मिनु इन कली ठेयब सेलतीक कुम्सो पाइनुड।

51 परमप्रभु यावे पिप, आं ब्रोंडशा बाक्तीक बाकब। मेकोम आ तेल लुकशो दाऊद कली नु आ चच युड आन कली गेना हना यो दाक्तीक कोइब” दे दाऊदमी परमप्रभु यावे कली ठेयब सेला बाक्त।

## 23

### दाऊद आ नोले डा लोव

1 एको दाऊद आ नोले डा लोव बाकब। येस्से आ तौ दाऊद आ नोले देशो लोव एको बाकब। परमप्रभुमी ठेयब सेल्लो मुर आ पशो लोव एको बाकब। याकूब आ परमप्रभुमी मेको कली तेल लुकशा, पिप सेल्लो बाक्त। इस्राएली आन सक्ति पाइश्शो आन दातेमी दाऊद कली नेल्ल क्येडा दाक्ब बाकब। १सामुएल १६:१३

2 “परमप्रभु यावे आ सोक्त आं रे पा ब्वाक्शो बाकब। मेको आ देशो लोव आं शोव्रम बाकब।

3 इस्राएली आन परमप्रभुम लोव पाप्नु। इस्राएली आन सेरथे फुल्लुमी आं कली ‘सुमी मुर आन कली ठीक निसाफ पाइबा, सुम परमप्रभु कली मान पा हिंशा हुकुम पाइबा,

4 मेको सुनी डा नां खोदेशो बाकब। मेको गोस्स मबाक्शो सुनी दाप्शो नां खोदेशो बाकब। मिनु मेको रेउ यिम नोले वाशो घांस खोदेशो बाकब’ देंत। न्यायाधीस ५:३१

5 मोपा आं खिं परमप्रभु नु बाकब। मारदे हना मेकोमी गो नु गेना हना यो लीब कबल का पशो बाकब। मेको नेल्ल रिम्शो नु लीब। मिनु मेकोमी आं रिम्शो दुम्शो नु आं दाक्शो बारना बारना लपाइक्ब।

6 तन्न परमप्रभु यावे आ अरेशो मटीब फशेम बेरेशो चू खोदेशो बाक्नीम। सुइम मेको कली गुइम थोने मचाप्नीम।

7 सुम मेको कली ताइक्चा दाक्बा, मेकोमी फलाम नु कोक्के लाइश्शा गुप्नीम। मेको मीम हुम्शा, रीब पा दाक्चा पुंडसीनीम” देंत।

### दाऊद आ बोल्यो लडाइ पाइब

#### १इतिहास ११:१०-४७

8 दाऊद आ बोल्यो लडाइ पाइब मुर आन नें मार बाक्तेक्म देशा हना, डोंडती ताह-केमोन आ खिं डा मुर योशेब-बाशेबेथ बाक्माक्त। मेको बोल्यो सां आन दाते डा कप्तान बाक्माक्त। मेकोमी ८ सहे मुर आन कली आ तूतीकेम कालेमी साइक्मी बाक्त।

9 मेको आ नोले डा बोल्यो सां लडाइ पाइब आन दाते डा अहोही आ चच दोदो आ तौ एलाजर बाक्माक्त। मेको दाऊद नु बाक्शो बाक्माक्त। मेकेर पलिस्तीपुकी लडाइ पचा कली बुक्शो बाक्मा बाक्त। मिनु इस्राएलीपुकी प्रोक्मानु, मेको कामीन लडाइ पतीकेम राप्शा,

10 मदम सम्म पलिस्ती आन कली तरवारम क्योरस डा क्योरस पामी बाक्त। मेको आ गुइमी तरवार खोक्शो बाक्माक्त। मोपा परमप्रभु यावेम मेको नाक्ती थाप्पा ग्रापदा बाक्त। मेको नोले मुरपुकी बेक्शो मुर आन मार मार रोइक्थ ला जाक्मा बाक्त।

11 मेको आ नोले डा हरारी आगी आ तौ शम्माह बाक्माक्त। पलिस्तीपुकी लेहीम बुक्शो बाक्मा बाक्त। मेकेर मस शोक्शो थम रिम्शो रू का बाक्माक्त। मिनु अरामीपुकी पलिस्ती आन डोंडती रे बुशा प्रोक्मा बाक्त।

12 मिनु पलिस्तीपुकीमी मुर आन कली खेदा पा लदमेनु, मेको शम्मा मस शोक्शो रू आ दातेमी राप्शा, खाल पा बाक्शो बाक्माक्त। मिनु मेकोमी पलिस्ती आन कली साइक्मी बाक्त। मोपा परमप्रभु यावेमी मेको आन कली थाम्पा ग्रापदा बाक्त।

13 अन्न रिक्तीक डोंडती डा नाक्ती, मेको ३० जना कप्तान आन दाते डा मेको सां अदुल्लाम डा पुक्खी दाऊद आ बाक्तीकेम जाक्शो बाक्मा बाक्त। पलिस्ती आन हुल का चहिं रेफाइम डा बेसीम बाक्तीक सेल्शा बाक्शो बाक्मा बाक्त। १सामुएल २२:१

14 मेना दाऊद डांडा डा गारो हिरशो बोल्यो बाक्तीकेम बाक्शो बाक्माक्त। पलिस्ती आन लडाइ पाइब हुल बेथलेहेमम बाक्मा बाक्त।

15 मिनु काबु नाक्त दाऊद थाम्पा ब्वाक्कु तूतू दाक्शो बाक्माक्त। मिनु मेकोमी तूतू दाक्शा “सुइमी आं कली बेथलेहेम डा ठेयब लाप्चो आ नेक्था बाक्शो इनार डा ब्वाक्कु तूचा गेयीमी हना, रिम्शो दुम वा” देमाक्त।

16 मिनु मेको बोल्यो लडाइ पाइब सां पलिस्ती आन दाते रे ग्रीशा लशा बेथलेहेम डा ठेयब लाप्चो आ नेक्था बाक्शो इनार डा ब्वाक्कु चाक्शा दाऊद कली गेमे बाक्त। तन्न दाऊदम मेको तूने मबिस्से बाक्त। मेकोमी मेको ब्वाक्कु परमप्रभु यावे आ डोंडती मोदा बाक्त।

17 मेकोमी “परमप्रभु यावे आ नेमी गो एको ब्वाक्कु मतूनुड। मार, गो एको मुर आन हुश तूनुडा? एकोपुकीम एको ब्वाक्कु हेररा आन गिम सोइक्चा डा पा लशा चाक्तेक्म” देमाक्त। मोपतीके दाऊदमी मेको ब्वाक्कु मतूडा बाक्त। मेको बोल्यो लडाइ पाइब सां आन ठेयब गेय मेकोन बाक्त।

#### अरु बोल्यो लडाइ पाइब

18 मिनु सेरूयाह आ तौ योआब आ लोक्ब अबीशै मेको ३० जना आन दाते डा ठेयब बाक्माक्त। मेकोमी सहे सां जना मुर आन कली आ तूतीकेम लडाइ पा साइक्मी बाक्त। मेको सांमी “मेको बोल्यो मुर बाक्ब” देमा बाक्त। २सामुएल २१:१७

19 मेको, मेको ३० जना आन दाते डा नेल्ल क्येडा हिक्सीशो मुर बाक्शो बाक्त। मिनु मेको आन कप्तान दुम्माक्त। तन्न मेको बोल्यो मुर सां खोदेशो दुम्ने मचबा बाक्त।

20 कब्सेल सहर डा येहो-यादा आ तौ बेनायाह यो बोल्यो लडाइ पाइब का बाक्माक्त। मेकोमी ठेयब गेय पशो बाक्माक्त। मेकोम मोआब डा अरीएल आ तौ निक्शी साइशो बाक्माक्त। फुं यिम ना मेकोमी खाल्टाम लशा मेकेर गुप्स का साइशो बाक्माक्त। २सामुएल ८:१८; यहोसु १५:२१

21 मेकोमी दारशो बोल्यो इजीप्त डा मुर का कली साइशो बाक्माक्त। मेको इजीप्त डा मुर तूतीक का शेशो बाक्माक्त। तन्न बेनायाह कोक्के का शेशा लशा, मेको इजीप्त डा मुर आ तूतीक आ गुइ रे रोइशशा, मेको कली सदा बाक्त।

22 येहो-यादा आ तौ बेनायाह आ पशो मेकोन बाक्ब। मेको सांमी “मेको बोल्यो लडाइ पाइब का बाक्ब” देमा बाक्त।

23 मेको, मेको ३० जना मुर आन दाते डा हिक्सीशो मुर का बाक्शो बाक्त। तन्न मेको बोल्यो सां खोदेशो दुम्ने मचबा बाक्त। मिनु दाऊदमी मेको कली आं कली खाल पाइब आन ठेयब मुर सेला बाक्त।

24 मिनु मेको ३० जना आन दातेमी सु सु बाक्मा बाक्त देशा हना, योआब आ लोक्ब आसाहेल, बेथलेहेम डा दोदो आ तौ ऐलहानान, २सामुएल २:१८

25 हारोद सहर डा शम्माह, हारोद सहर डा एलीका,

26 पाल्ती आ खिं डा हेलेस, तेकोहा सहर डा इक्केश आ तौ इरा,

27 अनाथोथ सहर डा अबीएजेर, हुशा डा मुर मेबुन्नाइ,

28 अहोही आ खिं डा मुर सल्मोन, नेतोफाह आ खिं डा माहाराइ,

29 नेतोफाह आ खिं डा बानाह आ तौ हेलेब, गिबा सहर डा बेन्यामीन आ थर डा रिबाइ आ तौ इत्ताइ,

30 पिराथोन सहर डा बेनायाह, गाश खोला डा हिददाइ,

31 अरबा आ खिं डा मुर अबी-अल्बोन, बाहुरीम सहर डा अज्मावेथ,

- 32 शा-आल्बोन सहर डा एली-अहबा, याशेन आ तौ योनाथन,  
 33 हरारी सहर डा शम्माह, हरारी सहर डा शरार आ तौ अहीयाम, २सामुएल १५:१२  
 34 माकाह सहर डा अहास्बाइ आ तौ एली-फेलेत, गिलो डा अहीथोफेल आ तौ एलीआम,  
 35 कारमेल पहड डा हेस्रो, यहूदा डा अरब सहर डा पाराड,  
 36 सोबाह सहर डा नाथान आ तौ इगाल, गाद आ थर डा बानी,  
 37 अम्मोनी जेलेक, बेयरोथ सहर डा नहाराड, मेको सेरूयाह आ तौ योआब आ या कुरब बाक्माक्त।  
 38 इथ्री आ खिं डा इरा, इथ्री आ खिं डा गारेब नु २सामुएल ११:३  
 39 हिती आ मुर उरीयाह, मेको नेल्ल पा ३७ जना बाक्मा बाक्त।

## 24

### मुर आन कली हिक्शो

#### १इतिहास २१:-

- 1 मिनु परमप्रभु यावे इस्राएली आन परबम लेंशा गाडक्ता बाक्त। मिनु मेकोमी दाऊद कली मेको आन परबम मरिम्शो पपाइक्चा कली क्युकगा बाक्त। मिनु दाऊदमी “इस्राएल नु यहूदा डा मुर आन कली हिक्कीन” देंमाक्त।  
 2 मिनु पिपमी योआब नु मेको नु बाक्ब लडाइ पाइब आन ठेयब मुर नेल्ल आन कली “दान रे बेयर-शेबा सम्म डा इस्राएल आ खिं खिं डा मुर आन बाक्तीक तेइ तेइ लशा, नेल्ल आन कली हिक्शा, मेको दोशो बाक्मा, आं बाक्तीकेम ब्रेक्शा चाक्कीन” देंमाक्त। प्रस्थान ३०:१२  
 3 तन्न योआबम पिप कली “परमप्रभु यावे, इन परमप्रभुम मुर आन कली सहे का खेयप हिक्शो क्येडा यो शुश सेलल। मेको तचा डा पा इन ब्रॉइची ना दुम्ल। तन्न मारदे आं प्रभु पिप मोदेंशो पचा मालनी?” दे हिल्लो पवा बाक्त।  
 4 तन्न पिप आ अरेशो योआब नु लडाइ पाइब आन ठेयब मुरपुकीम पचा माल्मा बाक्त। मोपतीके योआब नु लडाइ पाइब आन ठेयब मुर पिप आ डोंइती रे इस्राएल डा मुर आन कली हिक्चा कली लमा बाक्त।  
 5 मिनु मेकोपुकी यर्दन खोला शोकशा, आरोएर सहर नु दिंम आ दाते डा सहर रे गाद नु याजेर गे लमा बाक्त। ब्यवस्था २:३६  
 6 मिनु मेकोपुकी हिती आन रागी गिलाद नु कादेश जाक्मा बाक्त। नोले दान लशा, सीदोन जाक्दीम्मा बाक्त।  
 7 मिनु नोले गारो हिरशो सहर टायर, हिक्वी नु कनानी आन सहर नेल्ल लमा बाक्त। नोले यहूदा डा नेगेब डा बेयर-शेबा सहर सम्म लमा बाक्त।  
 8 मिनु ९ महिना नु २० नाक्त नोले मेकोपुकी रागी नेल्ल हिरशा, लेशशा यरूसलेम जाक्मा बाक्त।  
 9 मिनु योआबम पिप कली “या चलेने चाप्ब लडाइ पाइब इस्राएलम ८ लाख नु यहूदाम ५ लाख बाक्तेक्म” दे शेंदा बाक्त।  
 10 मिनु नोले दाऊद मुर आन कली हिक्शो आ परबम आ थुं मनुमाक्त। मिनु दाऊदमी परमप्रभु यावे कली “गो मुर आन कली हिक्शा ठेयब पाप पाता। मुल परमप्रभु यावे, इन वाइल आ मरिम्शो पशो क्याम्दीन। मारदे हना गो थम मूर्ख गेय पाता” देंमाक्त। २सामुएल १२:१३  
 11 मिनु दाऊद सुनी कना बोक्माक्त। मिनु परमप्रभु यावेमी आ लोत्र पाइब गाद कली लोत्र पवा बाक्त।  
 12 मार लोत्र पवा बाक्त देंशा हना “गे दाऊद कली परमप्रभु यावेम इ कली मार देंब देंशा हना ‘गो इ कली लोत्र सां गेनन। मेको आन दाते डा का योत्रचा माल्नेवे। मिनु गो मेको इ कली पाइनुड’ देंत” देंमाक्त।  
 13 मिनु गाद दाऊद आ बाक्तीक जाक्शा “इन कली नु रागी कली बर्स सां सम्म अन्काल दुम्तीके, महिना सां सम्म इन जोरी सत्रुम खेदा पचा पुंइसीतीके नु इन रागीम नाक्त सां सम्म मुर बेक्तीक रोइ जाक्तीके, तेको योत्रनीनी मिष्शा देंनीन। मिनु आं कली सोइक्ब कली मार देंचा माल्नुडा देंनीन” देंमाक्त। येरमीया २४:१०; इजीकीएल ६:११-१२



14 मिनु दाऊदम गाद कली “गो शुश श्येत जशो बाक्नुड। आंड कली परमप्रभु यावे आ गुडम दुग्घान रिम्शो बाक्ब। मारदे हना आ शिशी टेयब बाक्ब। गो मुर आन गुडम मदुम्डल” देमाक्त।

15 मोपतीके परमप्रभु यावेमी आ देशो नाक्त रे इस्राएल नेल्लेम मुर बेक्तीक रोड जाक्पदा बाक्त। मिनु दान रे बेयर-शेबा सम्म ७० हजार मुर बेक्मा बाक्त।

16 मिनु परमप्रभु यावे आ स्वर्ग डा गेय पाइबमी यरूसलेम खतम पोक्चा कली आ गुड मेक गे दिंदा बाक्त। मिनु परमप्रभु यावेमी मुर आन कली खतम सेल्ब आ स्वर्ग डा गेय पाइब कली तेक्शा “मोक्ल, मुल दुम्त” देमाक्त। मेना मेको परमप्रभु यावे आ स्वर्ग डा गेय पाइब यबुसी अरौनाह आ खलाम राप्शो बाक्माक्त। उत्पती १९:१३; प्रस्थान १२:२३; यसैया ५४:१६

17 मिनु दाऊदमी मेको मुर आन कली साइक्ब परमप्रभु आ आ स्वर्ग डा गेय पाइब कली तवा बाक्त। मिनु मेकोमी परमप्रभु यावे कली “पाप पाइब, गो आं का ला नड। इन अरेशो लोत्र मटीब यो गो नड। तन्न एको मुर मार पामे डा? गे आं कली नु आं खिं डा मुर आन कली श्येत गेने” देमाक्त। गन्ती १६:२२

18 मेको नाक्ती गाद दाऊद आ बाक्तीकेम जाक्शा, मेको कली “गे लशा, यबुसी अरौनाह आ खलाम परमप्रभु यावे कली चढ़ेतीक का सेलो” देमाक्त।

19 मिनु परमप्रभु यावेमी अरेशो गादमी देशो खोदेशो पा दाऊद इर डोइश्शा लमाक्त।

20 मिनु अरौनाहम पिप नु आ मुर आन कली आ बाक्तीक गे पिशो तशा, पिप आ डोंइती खुम्की पा बाप्शा सेउ पवा बाक्त।

21 मिनु अरौनाहमी “मारदे आं प्रभु पिप इन वाइल कली युम्थ जाक्नी” दे हिल्लो पवा बाक्त। मिनु दाऊदमी “गो परमप्रभु यावे कली चढ़ेतीक का सेल्चा, दे इ खला ग्याप्थ जाक्ती। मो पाता हना, एको मुर बेक्तीक रोड दिक्वा कौ?” देमाक्त।

22 मिनु अरौनाहमी दाऊद कली “आं प्रभु पिप मेको इन के दुम्त। मिनु दोदेशो दाक्नीनी मोदेशो पा चढ़ेन। चोशा चढ़ेचा कली गो नु ब्यफ बाक्नीम। शी कली जुवा नु दांड पतीक शी बाक्नीम।

23 पिप, गो इन कली मेको नेल्ल गेनुड। परमप्रभु यावे, इन परमप्रभुम इन चढ़ेशो ब्रवल” देमाक्त।

24 तन्न पिपमी अरौनाह कली “ममाइ, गो मेको ग्याप्नुड। गो क्येट मथाप्शो थोत्रक परमप्रभु यावे, आं परमप्रभु कली मचढ़ेनुड” देमाक्त। मोपतीके दाऊदम मेको खला नु ब्यफ डा ५० शेकेल चांदी थाप्शा ग्यबा बाक्त। शेकेल का ११.५ ग्राम बाक्ब।

25 मिनु दाऊदम मेकेर परमप्रभु यावे कली चढ़ेतीक का सेला बाक्त। मिनु चोशा चढ़ेतीक नु दुशा बाक्चा आ पब्रम चढ़ेतीके चढ़ेवा बाक्त। मिनु परमप्रभु यावेमी रागी आ पब्रम पुंइशो लोत्र नेना बाक्त। मिनु इस्राएलम मुर बेक्तीक रोड दिक्माक्त। २सामुएल २१:१४

## १ राजा

**ब्रेक्ब मुर:** नेल्ल क्येडा नोले ब्रेक्ब मुर मतुइक्नीम। एको ब्रेक्ब मुरुमी यहूदा डा पिप आन इतिहास नु इस्राएल डा पिप आन इतिहास डा किताब तुइश्शो बाक्त।

**गेना ब्रेक्शो:** एको किताब ५६१ बि. सी. मेर ब्रेक्शो दुम्या माल्ब। मारदे हना मेना पिप योयाकीन जेल्खान रे यूशो बाक्त।

**मार ब्रेक्शो:** डोंइती १ राजा नु २ राजा हिब्रू लोव्रमी ब्रेक्शो किताब का बाक्त। नेल्ल ग्रीक लोव्रमी सेप्टुआगीन्त माइश्शो किताबम निक्शी सेल्मे बाक्त। डोंइती राजा किताब निक्शी, सामुएल किताब निक्शी, यहोसु नु न्यायाधीस किताब कली “परमप्रभु यावे आ लोव्र पाइब आन किताब” देशो बाक्मा बाक्त। मेको किताबपुकीमी मोसा रे इस्राएली ग्याइश्शा लाइक्चा पुंडसीमा सम्म डा लोव्र नेल्ल ब्रेक्शो बाक्त। १ राजा किताबमी दाऊद खाल्पा दुम्यो रे आ तौ सोलोमन नोले डा यहूदा नु इस्राएल डा पिप आहाब नु आ तौ अहज्याह सम्म डा लोव्र ब्रेक्शो बाक्ब।

अबीशागम पिप कली काल्गी पशो

१ मिनु दाऊद पिप शुश बर्स दुम्या, थम खूशो दुम्माक्त। मिनु वा फेक्सेनु, यो महोमाक्त।

२ मोपतीके मेको आ गेय पाइबपुकीमी मेको कली “आंइ प्रभु पिप इन कली कोव्रचा कली नु इन काल्गी पचा कली, गो कन्ने मीश आल का माल्नीकी। मिनु मेको आंइ प्रभु पिप, इन कली होपाइक्चा कली इन नु इप्ल” देमा बाक्त।

३ मिनु मेकोपुकीमी इस्राएल रागी नेल्लेम दारशो मीश आल का माल्मेनु, शुनेम सहर डा अबीशाग, कन्ने मीश आल कली थित्मे बाक्त। मिनु मेको कली पिप आ बाक्तीक चाक्मे बाक्त।

४ मेको थम दारशो मीश आल बाक्माक्त। मिनु मेकोमी पिप कली कोव्रचा नु आ काल्गी पचा गोवा बाक्त। तन्न पिप मेको नु मबाक्माक्त।

अदोनीयाह पिप दुम्या माल्शो

५ मिनु हग्गीथ आ तौ अदोनीयाहम आंम कली ठेयब सेल्शा “गोन पिप दुमुनुड” देंचा गोवा बाक्त। मोपतीके मेकोम बग्गीपुकी, शारा डोइक्बपुकी नु आ डोंइडोंइती दोरपाइक्चा कली ५० जना मुर ठीक पवा बाक्त। २सामुएल ३:४; २सामुएल १५:१

६ मिनु मेको आ आफोम मेको कली “गे मारदे मोदेशो पवी?” दे गेनायो महुइक्ता बाक्त। अदोनीयाह यो थम दारशो मुर का बाक्माक्त। मेको अब्सालोम क्येडा नोले जर्मेशो बाक्माक्त।

७ मिनु मेकोमी सेरूयाह आ तौ योआब नु चढेब अबीयाथार नु लोव्र गारपदा बाक्त। मिनु मेको निक्शीमी अदोनीयाह कली वारच पदसे बाक्त। १ राजा २:२७

८ तन्न चढेब सादोक, येहो-यादा आ तौ बेनायाह, परमप्रभु यावे आ लोव्र पाइब नाथान, शिमेड, रेड नु दाऊद आ लडाइ पाइबपुकी चहिं अदोनीयाह नु मगारमा बाक्त।

९ मिनु अदोनीयाहमी एन-रोगेल आ नेक्था डा सोहेलेथ देशो फुल्लुम भेडा, ब्यफ नु दोम्यो बस्तु भाव चढेवा बाक्त। मिनु मेकोमी आ लोक्ब नेल्ले, पिप आ तौ नेल्ले नु पिप आ ठेयब गेय पाइब यहूदा डा मुर नेल्ल आन कली ब्रेत्तीमी बाक्त। यहोसु १५:७-८

१० तन्न मेकोमी परमप्रभु यावे आ लोव्र पाइब नाथान, बेनायाह, लडाइ पाइबपुकी नु आ लोक्ब सोलोमन आन कली चहिं मब्रेत्ता बाक्त।

११ मिनु नाथानमी सोलोमन आ ममा बाथशेबा कली “मार गे हग्गीथ आ तौ अदोनीयाह आंइ प्रभु दाऊद आ मतुइक्थु पिप दुम्त देशो लोव्र मनैनी?

१२ मोपतीके मुल नेनीन। आंम इन कली नु इन तौ सोलोमन कली दोपा प्रॉइने चाम्सीबा, मेको आ पर्बम गो इन कली सल्ला गेनुड।

13 मुल रीब पा लशा, पिप दाऊद कली गुमीन। मिनु मेको कली 'आं प्रभु, मार, गे इन वाइलीम नु थमा पा इ तौ सोलोमन आं नोले पिप दुम्ब। मिनु मेको आं नित्तीकेम निप्ब देशो मननी डा? मिनु मुल मारदे अदोनीयाह कका पिप दुम्मे?' देनीन। १इतिहास २८:५-१०

14 मिनु मोपा गे पिप नु लोत्र पना पन बाकनीनु, गो जाक्नुड। मिनु गो इन देशो लोत्रम लोत्र तेम्नुड" देमाक्त।

15 मिनु बाथशेबा पिप आ बाक्तीक कोठाम ओत्रमाक्त। पिप थम खूशो दुम्शो बाक्माक्त। मेना शुनेम सहर डा अबीशागामी मेको आ काल्मी पना पन बाक्माक्त।

16 मिनु बाथशेबाम पिप आ डोंइती बाप्शा आ पोक्च थेक्शा सेउ पवा बाक्त। मिनु पिपम "गे मार पुनी" दे मदा बाक्त।

17 मिनु मेकोमी पिप कली "आं प्रभु, गे इन वाइलीम, आं कली परमप्रभु यावे, इन परमप्रभु आ डोंइती कसम जशा "इ तौ सोलोमन आं नोले पिप दुम्ब। मिनु आं नित्तीकेम निप्ब" देशो ननी।

18 तन्न मुल अदोनीयाह कका पिप दुम्त। एको लोत्र आं प्रभु पिपम मतुइरशो बाक्नीनी।

19 मेकोमी शुश ब्यफ नु दोम्शो बस्तु भाव नु भेडा क्योरशा चदेशो बाक्ब। मिनु पिप आ आल नेल्ले, चढेब अबीयाथार नु लडाइ पाइब आन नेल्ल क्येडा ठेयब मुर योआब नेल्ल आन कली ब्रेशो बाक्ब। तन्न इन गेय पाइब सोलोमन कली चहिं मब्रेशो बाक्ब।

20 मिनु मुल आं प्रभु पिप, इन नोले सु पिप दुम्बा? मिनु इन नित्तीकेम सु निप्बा, दे तुइक्चा कली इस्राएल डा मुर नेल्लेम इन लां कोत्रशो बाक्नीम।

21 मो मदुम्त हना, नोले गे आं प्रभु पिप इन किकी पिपी नु इप्नीनी। मिनु गो नु आं तौ सोलोमन आंस कली मरिमशो पाइब खोदेशो सेल्नीम" दे बाथशेबाम देमाक्त।

22 मिनु मेको पिप नु लोत्र पना पन बाक्मेनु, परमप्रभु यावे आ लोत्र पाइब नाथान जाक्माक्त।

23 मिनु पिप कली "परमप्रभु यावे आ लोत्र पाइब नाथान जाक्शो बाक्ब" देशो लोत्र नेपदमे बाक्त। मिनु नाथान जाक्शा, खप सम्भन बाप्शा, पिप कली सेउ पवा बाक्त।

24 मिनु नाथानम "आं प्रभु पिपमी 'अदोनीयाह आं नोले पिप दुम्ब। मिनु आं नित्तीकेमी निप्ब" देशो ननी देय मननी?

25 मेको मुलाक्ती उइ बुप्शा शुश ब्यफ, दोम्शो बस्तु भाव नु भेडा क्योरशा चदेशो बाक्ब। मिनु मेकोम पिप इन आल नेल्ले, लडाइ पाइब आन ठेयब मुर योआब नु चढेब अबीयाथार नेल्ल आन कली ब्रेशो बाक्ब। मिनु मुल मेको नेल्ल मेको आ डोंइती जना जन, तूना तून 'पिप अदोनीयाह गेना हना यो ब्रोंइशा बाक्ल' देना देन बाक्नीम।

26 तन्न मेकोम इन गेय पाइब आं कली, चढेब सादोक, येहो-यादा आ तौ बेनायाह नु इन गेय पाइब सोलोमन आंइ कली मब्रेत्तीकी।

27 मार, आं प्रभु पिप इन देतीके मो पशो नमी? मिनु गो इन गेय पाइब आंइ कली चहिं इन नोले सु पिप दुम्ब, दे मशेंदीनी" देमाक्त।

दाऊदम सोलोमन कली पिप सेल्शो

28 मिनु पिप दाऊदमी "बाथशेबा कली आं नेक्था ब्रेत्तीन" देमाक्त। मिनु मेको पिप आ डोंइती जाक्शा रम्ममाक्त।

29 मिनु पिपमी "गो आं कली आं श्येत नेल्ल रे प्रोंइब नु गेना हना यो बाक्ब परमप्रभु यावे ब्रोंइशा बाक्शो खोदेशो पा गो कसम जाइनुड।

30 डोंइती गो परमप्रभु यावे, इस्राएली आन परमप्रभु आ नेमी इ कली 'इ तौ सोलोमन आं नोले पिप दुम्ब। मिनु आं नित्तीकेम निरशा, आं पा डा पिप दुम्ब' देती। मुलाक्त गो मेको कसम जशो खान्नुड" देमाक्त।

31 मिनु बाथशेबा पिप आ डोंइती आ पोक्च थेक्शा बाप्शा "आं प्रभु पिप दाऊद गेना हना यो ब्रोंइशा बाक्ल" देमाक्त।

32 मिनु पिप दाऊदम "चढेब सादोक, परमप्रभु यावे आ लोत्र पाइब नाथान नु येहो-यादा आ तौ बेनायाह आन कली ब्रेत्तीने" देमाक्त। मिनु मेको पिप आ डोंइती जाक्मा बाक्त।

33 मिनु पिपम मेको आन कली “गे इन प्रभु, आं ठेयब गेय पाइब आन कली लतीन। मिनु आं तौ सोलोमन कली आं खचरम डोइक्पाइशशा गिहोन सम्म लतीन।

34 मिनु मेकेर चढ़ेब सादोक नु परमप्रभु यावे आ लोत्र पाइब नाथानमी मेको कली तेल लुक्शा इस्राएल डा पिप सेल्सेकल। मिनु तुराही ताप्शा ‘पिप सोलोमन गेना हना यो ब्रोंइशा बाकल’ देंमल।

35 मिनु मेको आ नोले खोतीन। मेको जाक्शा आं नित्तीकेम नित्या माल्ब। मिनु मेकोम आं पा डा सासन पचा माल्ब। मारदे हना गो मेको कली इस्राएल नु यहूदाम सासन पचा कली योत्रता” देंमाक्त।

36 मिनु येहो-यादा आ तौ बेनायाहम पिप कली “आमेन। परमप्रभु यावे, आं प्रभु पिप आ परमप्रभुमी मोदेशोन पवल।

37 दोपा परमप्रभु यावे आं प्रभु पिप इन नु बाक्मे, मोपान सोलोमन नु यो बाकल। मिनु मेको आ राज्य आं प्रभु पिप दाऊद आ राज्य क्येडा यो सक्ति पाइशशो सेलल” देंमाक्त।

### सोलोमन कली पिप सेल्शो

38 मिनु चढ़ेब सादोक, परमप्रभु यावे आ लोत्र पाइब नाथान, येहो-यादा आ तौ बेनायाह नु केरेथी नु पेलेथी उइ बूप्शा सोलोमन कली दाऊद पिप आ खचरम डोइक्पाइशशा गिहोन सम्म लदमे बाक्त। रसामुएल ८:१८

39 मिनु चढ़ेब सादोकमी परमप्रभु यावे आ ताम्बु रे तेल वोइशशो ग्रोत्र गुंइशा सोलोमन कली लुक्शा पिप सेला बाक्त। मिनु मेकोपुकीम तुराही ताम्पे बाक्त। मिनु मुर नेल्लेम ठेयब सेंदा पा “पिप सोलोमन गेना हना यो ब्रोंइशा बाकल” देंमा बाक्त। १इतिहास २३:१; २सामुएल २९:२२

40 मिनु मुर नेल्ल ठेयब सेंदा पा ग्येरशा बांसुरी ताप्शा, मेको आन नोनोले इर डोइशशा लमा बाक्त। मिनु मेको आन ग्येरशा रेयके पशोम रागी नेल्ल मुरदा बाक्त।

41 मिनु अदोनीयाह नु आ मुरपुकीम मेको रेयके नेन्मे बाक्त। मेना मेकोपुकीमी नक भोज जने ला थुम्शो बाक्मा बाक्त। मिनु योआबमी तुराही ग्रीशो नेंशा “सहरम मार रेयके पामे?” देंमाक्त।

42 मिनु मेकोमी मो देंन देंना चढ़ेब अबीयाथार आ तौ योनाथन जाक्माक्त। मिनु अदोनीयाहमी मेको कली “खिंडगा पिवो। गे रिम्शो मुर बाक्नेवे। मिनु गे थमा पा रिम्शो लोत्र चाक्गी माइ” देंमाक्त। रसामुएल १५:२७, ३६

43 मिनु योनाथनमी अदोनीयाह कली “ममाइ, इं प्रभु पिप दाऊदमी सोलोमन कली पिप सेल्लु।

44 पिपमी चढ़ेब सादोक, परमप्रभु यावे आ लोत्र पाइब नाथान, येहो-यादा आ तौ बेनायाह नु केरेथी नु पेलेथी आन कली मेको नु सोइक्ताक्व। मिनु मेकोपुकीम मेको कली पिप आ खचरम डोइक्पाइशशा लाइक्तेक्म।

45 मिनु चढ़ेब सादोक नु परमप्रभु यावे आ लोत्र पाइब नाथानमी मेको कली गिहोनमी तेल लुक्शा, पिप सेल्लाक्स। मिनु मुल मेकोपुकीम मेको कली ग्येरशा इर खिं लाइक्तेक्म। मोपतीके सहरम रेयके दुम्शो बाक्ब। गोपुकीम मेको रेयके नेंशो बाक्नीनी।

46 मुल सोलोमन पिप आ नित्तीकेम निप्ब।

47 मिनु पिप आ खिं डा ठेयब गेय पाइब मुरपुकीमी इं प्रभु पिप दाऊद कली ‘इन परमप्रभुम इन तौ सोलोमन आ नें इन क्येडा यो सक्ति पाइशशो सेलल। मिनु मेको आ नित्तीक इन नित्तीक क्येडा यो सक्ति पाइशशो सेलल’ देंथ लशो बाक्नीम। मिनु पिपमी आ खाटमी बाप्शा

48 ‘परमप्रभु यावे, इस्राएली आन परमप्रभु ठेयब बाक्ब। मुलाक्ती मेकोमी आं सेस बाक्ना बाक्न, आं कली तपाइक्चा कली आं नित्तीकेम पिप का निप्पाइक्त्तु’ देंत” देंमाक्त।

49 मोपतीके अदोनीयाह आ मुरपुकी हिंशा छुल छाल बोक्शा आन लां खोदमे बाक्त।

50 मिनु अदोनीयाह आंमा यो सोलोमन क्येडा हिंशा लशा, चढ़ेतीक डा ग्रोत्र ग्याइक्ता बाक्त।

51 मेको नोले सोलोमन कली “अदोनीयाह पिप क्येडा हिंशा, चढ़ेतीक डा ग्रोत्र ग्याइशशा ‘पिप सोलोमनम आ गेय पाइब आं कली मक्योरनुड, दे कसम जवल’ देंशो बाक्ब” देंशो लोत्र नेंपदमे बाक्त। १राजा २:२८

52 मिनु सोलोमनमी “मेकोमी गो ओदेंब पाइब मुर नड, देने चाप्टु हना, मेको के आ चां का यो महेम्ब। तन्न मेकोम मरिम्शो पशो थिंसाक्व हना, मेको थमा पा साइक्चा पुंडसीब” देंमाक्त। रसामुएल १४:११

53 मिनु पिप सोलोमनम मुर आन कली सोइश्शा, मेको कली चढ़ेतीकर रे उइ तोइक्पदा बाक्त। मिनु अदोनीयाह जाक्शा, पिप सोलोमन कली सेउ पवा बाक्त। मिनु सोलोमनम मेको कली “इ खिं लावो” दे मदा बाक्त।

## 2

दाऊदमी सोलोमन कली अरेशो

1 मिनु दाऊद आ बेक्ची ना जाक्माक्त। मिनु मेकोमी आ तौ सोलोमन कली आ बाक्शो मारेइ मारेइ जिम्मा गेवा बाक्त।

2 मिनु मेकोमी “गो रागी डा मुर नेल्ल आन खोदेशो पा बेक्नुड। मोपतीके गे बोल्यो नु महिंब दुमो।

3 मिनु गे परमप्रभु यावे, इ परमप्रभु आ देशो टिवो। मेको आ लॉम गाक्को। मिनु मोसा आ अरेशो लोव्रम गेशो खोदेशो पा परमप्रभु यावे आ फुल्लुम मुशा ब्रेक्शो लोव्र, आ शेशो, आ देशो पतीक लोव्र नु आ गेशो अर्ती नेल्ल पावो। मिनु गे मार मार पाइनेवे, ते ते लाइनेवे, मेको नेल्ल रिम्शो दुम्ल। ब्यवस्था १७:१४-२०; यहोसु १:७

4 परमप्रभु यावेमी आं कली ‘इ तौ चच नेल्लेम आंमा दोपा बाक्चा माल्बा, दे मिम्ताक्म हना नु आन थुं नु आन सोक्त नेल्लेम आं कली मप्रोंइथु आं डोंडती गाक्तेक्म हना, गेना हना यो इस्राएलम हुकुम पचा कली इ तौ चच का लीब’ दे लोव्र गेशा कबल पशो बाक्ब।

5 सेरुयाह आ तौ योआबम आं कली मार पवा? गे मेको तुइक्नेवे। मेकोमी इस्राएल डा लडाइ पाइब आन टेयब मुर नेर आ तौ आबनेर नु येथेर आ तौ आमासा आस कली साइक्तीम्सी। मेको लोव्र गे आंमा तुइश्शो बाक्नेवे। मेकोमी मेको निम्फा आस कली लडाइ मडुम्थु, थुं नाइश्शा बाक्तीक ना साइक्तीम्सी। मिनु मेको हुशेमीन आ किप्शुर नु आ जुता दोस ताइब सेल्लु। रसामुएल ३:२७; रसामुएल २०:१०

6 मोपतीके इ जोक्ब तुइक्ब थुंम मार पचा देंबा, मेको पावो। तन्न मेको आ बोइश्शो चां थुं मनाइक्थु बेक्शो मुर आन बाक्तीकेम लल।

7 गिलाद डा बारजील्लाइ आ तौ आन कली चहिं मप्रोंइथु रिम्शो पावो। मेको गे नु काथा जाइब आन दातेमी बाक्मल। गो इ लोक्ब अब्सालोम क्येडा प्रोक्शा गाक्डानु, मेकोपुकीम रिम्शो पाम्तेक्म। रसामुएल १७:२७; रसामुएल १९:३२-४१; रसामुएल १५:-

8 मिनु गे बाहुरीम डा बेन्यामीन आ थर डा गेरा आ तौ शिमेइ कली योव्रकी पावो। मेकोमी गो महा-नाइम लडा नाक्त आं कली थाम्पा सराप पाइक्ती। नोले मेको यर्दन खोलाम आं कली गुम्थ जाक्त। मिनु मेना गो मेको कली ‘मसाइक्नन’ दे परमप्रभु यावे आ नें थिशा कसम जाता। रसामुएल १६:५; रसामुएल १९:१७-२४

9 तन्न मुल गे मेको कली दोस मताइब ममिम्तो। गे जोक्ब तुइक्ब मुर बाक्नेवे। मोपतीके मेको कली मार पचा माल्बा, मेको तुइक्नेवे। मेको आ बोइश्शो चां हुश सुन्दा बेक्शो मुर आन बाक्तीकेम सोइक्तो” देंमाक्त।

10 मिनु दाऊद बेक्माक्त। मिनु दाऊद आ सहरम थिम्चा पुंडसे बाक्त।

11 दाऊदम इस्राएलम ४० बर्स सम्म सासन पवा बाक्त। मेकोम ७ बर्स हेब्रोनमी नु ३३ बर्स यरूसलेमम सासन पवा बाक्त। रसामुएल ५:४-५; १इतिहास २९:२७

12 मिनु सोलोमन आ आफ दाऊद आ पा डा पिप दुम्माक्त। मिनु मेको आ राज्य बोल्यो दुम्माक्त।

सोलोमनमी अदोनीयाह साइश्शो

13 मिनु हग्गीथ आ तौ अदोनीयाह, सोलोमन आ ममा बाथ्शेबा बाक्तीक जाक्माक्त। मिनु बाथ्शेबाम मेको कली “मार गे रिम्शो मिम्शा जाक्डे” दे हिल्लो पवा बाक्त। मिनु मेकोमी “ओ रिम्शो पान जाक्ती” देंमाक्त।

14 मिनु मेकोम लेंशा “गो इन कली लोत्र का देनुड” देमाक्त। मिनु मेकोम “दुम्ब देंनो” देमाक्त।

15 मिनु अदोनीयाहम “राज्य आं के बाक्त। गे मेको तुडक्नीनी। मिनु इसाएली नेल्लेम आं कली पिप दुम्ब, दे मिम्शो बाक्तेक्म। तन्न मारेड मारेड दूली दुम्त। मुल राज्य आं लोकब के दुम्त। मारदे हना परमप्रभु यावे आ दाक्शो मेकोन बाक्त।

16 मुल गो इन कली लोत्र का पाडनुड। आं पशो लोत्र मदुम्ब मदेनीन” देमाक्त। मिनु मेकोमी “मेको मार बाक्बा? देंनो” देमाक्त।

17 मिनु अदोनीयाहम “गो शुनेम सहर डा अबीशाग कली ग्युबे पचा तडल, दे पिप सोलोमन कली पुनीन। मेकोमी इन कली मदुम्ब मदेब” देमाक्त। १राजा १:३; २सामुएल ३:७

18 मिनु बाथशेबाम “मेको रिम्शो बाक्ब। गो इ पर्वम पिप नु लोत्र पाडनुड” देमाक्त।

19 मोपतीके बाथशेबा अदोनीयाह आ पर्वम लोत्र पथ पिप सोलोमन आ बाक्तीक लमाक्त। मिनु पिप मेको कली मान पथ बोक्माक्त। मिनु आ ममा आ डोंइती बाप्शा मान पा, आ नित्तीकेम निस्से बाक्त। पिप सोलोमनम आ ममा कली नित्चा कली नित्तीक का चाक्पदा बाक्त। मिनु मेको पिप आ ग्युरा गे निस्से बाक्त।

20 मिनु मेकोमी “गो गे नु आइक्च लोत्र का पचा माल्नुड। मेको आं लोत्र मदुम्ब मदेनो” देमाक्त। मिनु पिपमी आ ममा कली “मार देंनीनी? आं ममा गो इन लोत्र मदुम्ब मदेनुड” देमाक्त।

21 मिनु मेकोमी “इ लोकब अदोनीयाह नु शुनेम सहर डा अबीशाग आस कली ग्युबे पाइक्सी” देमाक्त।

22 मिनु पिप सोलोमनम आ ममा कली “गे मारदे शुनेम सहर डा अबीशाग नु अदोनीयाह आस कली ग्युबे पाइक्चा कली पुंडनी? गे मेको कली राज्य पुंडतीनी हना यो दुम्ब। मारदे हना मेको आं ठेयब लोकब बाक्ब। चढेब अबीयाथार नु सेरूयाह आ तौ योआब आस पर्वम यो पुनीन” देमाक्त। १राजा १:६-७

23 मिनु पिप सोलोमनम परमप्रभु यावे आ नें थिशा “एको आ पर्वम अदोनीयाह साइक्चा मपुंडसाक्व हना, परमप्रभुम आं कली थम मरिम्शो सजाइ गेयील” दे कसम जवा बाक्त।

24 मनु “मुल आं कली आं आफ दाऊद आ राज्यम वोइक्ब नु आ पाडनुड देशो लोत्र खाप्शा, आं थर आन कली सेल्ब परमप्रभु यावे ब्रोंइशा बाक्शो खोदेशो पा, गो कसम जशा देनुड, अदोनीयाह मुलाक्तीन साइक्चा पुंडसीब” देमाक्त।

25 मेको नोले पिप सोलोमनम येहो-यादा आ तौ बेनायाह कली “अदोनीयाह कली तुप्शा सतो” दे हुकुम गेवा बाक्त। मिनु मेकोम अदोनीयाह कली तुप्शा सदा बाक्त।

26 मिनु पिपम चढेब अबीयाथार कली “अनाथोथम बाक्शो इ खिम लावो। गे साइक्चा पुंडसीब बाक्नेवे। मो हना यो मुल गो इ कली मसाइक्नन। मारदे हना गे आं आफ दाऊद आ डोंइती परमप्रभु यावे आ सन्दोस कुरब बाक्ते। मिनु गे मेको आ श्येत नेल्लेम बाक्शो बाक्ते” देमाक्त। १राजा १:७; १सामुएल २२:२०-२३; १सामुएल ३०:७; २सामुएल १५:२४

27 मोपतीके सोलोमनम अबीयाथार कली परमप्रभु यावे कली चढेतीक गेय रे गुंडदा बाक्त। मोपा परमप्रभु यावेमी शिलोम एली आ खिं आ पर्वम देशो लोत्र गाम्माक्त। १सामुएल २:३१-३२

28 मिनु मेको लोत्र नेल्ल योआबम नेना बाक्त। मेको अब्बसालोम गे ममाइ, तन्न अदोनीयाह गे बाक्शो बाक्माक्त। मिनु योआब प्रोक्शा परमप्रभु यावे आ ताम्बुम लमाक्त। मिनु चढेतीक आ ग्रोव ग्याइशशा बाक्माक्त। १राजा १:५१

29 मिनु पिप सोलोमनम “योआब प्रोक्शा लशा, परमप्रभु यावे आ ताम्बुम चढेतीक आ नेक्था जाक्दीशशा बाक्शो बाक्ब” देशो लोत्र नेना बाक्त। मिनु मेकोम येहो-यादा आ तौ बेनायाह कली “योआब कली तुप्शा सतो” दे अंरेशा सोइक्ता बाक्त। प्रस्थान २१:१२-१४

30 मोपतीके बेनायाह परमप्रभु यावे आ ताम्बुम ओव्रशा, योआब कली “पिपम लाडगा गूडो देशो बाक्ब” दे मदा बाक्त। तन्न मेकोम “गो एक उड बेक्नुड” देमाक्त। मिनु बेनायाहमी लशा पिप कली योआब आ लोत्र नेपदा बाक्त।

31 मिनु पिपमी बेनायाह कली “मेको आ देशो खोदेशो पावो। मेको कली साइशशा थिमीन। मोपा योआब आ मोशा हुश खाकश पोक्शो दोस गो नु आं आफ आ खिं रे क्याम्दीन।

32 मिनु परमप्रभु यावेमी मेको आ हुश खाकश पोक्शो मेको आ पियामीन मोइकब। मारदे हना मेकोमी आं आफ दाऊद आ मतुइकथु आ क्येडा ठीक पाइब इस्राएल डा लडाइ पाइब आन ठेयब मुर निक्शी नेर आ तौ आबनेर नु येथेर आ तौ यहूदा डा ठेयब मुर आमासा आस कली साइशशा बाक्त। १ राजा २:५

33 मेको आस हुश आ दोस गेना हना यो योआब नु मेको आ तौ चच आन पिया तार लील। तन्न दाऊद नु मेको आ तौ चच आन तार, मेको आन खिंम नु आन राज्यम परमप्रभु यावे आ डोंइती गेना हना यो थुं नाइशशा बाक्तीक दुम्ल” देमाक्त।

34 मोपतीके येहो-यादा आ तौ बेनायाह इर लमाक्त। मिनु योआब कली तुप्शा सदा बाक्त। मिनु मेको कली गोरशो रागी, आ खिं आ नेक्था आ रूम थिम्मे बाक्त।

35 मिनु पिपमी येहो-यादा आ तौ बेनायाह कली योआब आ पा डा लडाइ पाइब आन ठेयब मुर सेला बाक्त। मिनु चढ़ेब अबीयाथार आ पा डा सादोक कली चढ़ेब सेला बाक्त। १ राजा ४:४

36 मेको नोले पिपमी शिमेइ कली ब्रथ सोइशशा, मेको कली “यरूसलेममी खिं का सेल्शा, मेक उइ बाक्को। मिनु सहर प्रोंइशा तेइ मलावो।

37 सहर प्रोंइशा, किद्रोन खोल्सा शोकसाकवे हना, गे थमा पा साइकचा पुंडसीनेवे। मो पाप्तीवी हना, इ हुश आ दोस इ पियामीन मोंइसीब” दे मदा बाक्त।

38 मिनु शिमेइम पिप कली “गे मार देनी मेको रिम्शो बाक्ब। आं प्रभु पिपम आ वाइल कली देशो खोदेशो पा गो पाइनुड” देमाक्त। मोपतीके शुश नाक्त सम्म शिमेइ यरूसलेममीन बाक्माक्त।

39 तन्न बर्स सां नोले मेको आ वाइल निक्शी प्रोक्शा, गाथ डा पिप माकाह आ तौ अकीश आ बाक्तीक लसा बाक्त। मिनु शिमेइम “इ वाइल निक्शी गाथ सहरम बाक्ताक्स” देशो लोव्र नेना बाक्त।

40 मिनु शिमेइ रीब पा आ गधाम लगम पाइशशा, आ वाइल आस कली माल्थ गाथ डा अकीश आ बाक्तीक लमाक्त। मोपा शिमेइमी गाथ रे आ वाइल निक्शी आस कली चाक्सी बाक्त।

41 मिनु पिप सोलोमन कली शिमेइ यरूसलेम रे गाथ जाकदीशशा लेशशा जाक्शो लोव्र नेंपदमे बाक्त।

42 मिनु पिपमी शिमेइ कली ब्रथ सोइकता बाक्त। मिनु मेको कली “मार, गो इ कली परमप्रभु यावे आ नें थिशा कसम जपाइशशा मनडा डा? गे अर्को रागी लचा कली एको सहर रे गाक्ते हना, साइकचा पुंडसीनेवे, देशो मनडा? मिनु मेना गे आं कली ‘इन देशो लोव्र रिम्शो बाक्ब देशो मनवे?’ मेना गे ‘इन देशो टीनुड’ देशो नवे।

43 मिनु मारदे गे परमप्रभु यावे आ नें थिशा कसम जशो नु आं देशो लोव्र मटिची?” दे हिल्लो पवा बाक्त।

44 मिनु पिपम शिमेइ कली “आं आफ दाऊद आ पबर्म पशो मरिम्शो नेल्ल गे तुइशशा बाक्नेवे। मुल परमप्रभु यावेमी मेको मरिम्शो पशो आ क्येक्क इ पियामीन मोइकब। १ राजा २:८

45 तन्न पिप सोलोमन आसीक ताइब। मिनु परमप्रभु यावे आ डोंइती दाऊद आ राज्य गेना हना यो लीब” देमाक्त।

46 मिनु पिपमी येहो-यादा आ तौ बेनायाह कली हुकुम गेवा बाक्त। मिनु मेको लशा, शिमेइ कली तुप्शा सदा बाक्त। मिनु मेको बेक्माक्त। मोपा पिप सोलोमन आ राज्य बोल्यो दुम्माक्त।

### 3

सोलोमनम तुइक्तीक थुं पुंडशो

२इतिहास १:१-१२

1 सोलोमन आ ग्युबेम पतीके इजीप्त डा पिप फाराओ आ खिं डा मुर दुम्माक्त। मिनु सोलोमनम फाराओ आ तमी नु ग्युबे पवा बाक्त। मिनु मेको कली पिप आ खिं, परमप्रभु यावे आ खिं नु यरूसलेम डा गारो सेल्ने मथुमा सम्म दाऊद आ सहरम चाक्शा वोदा बाक्त। ब्यवस्था २३:८; १ राजा ११:१-२

२ मेना सम्म मुरपुकीम डांडा मेर चढ़ेबाकमा बाक्त। मारदे हना परमप्रभु यावे आ नें कली मान पा तेकोइ खिं मसेल्शो बाक्माक्त।

३ सोलोमनम चहिं परमप्रभु यावे कली दाक्शा, मेको आ लांम गाक्शा आ आफ दाऊद आ पशो खोदेशो पवा बाक्त। तन्न मेकोमी डांडा डा थानम चढ़ेशा, धूप चोइबाक्माक्त।

४ काले पिप सोलोमन गिबोन सह्रम मार मार चढ़ेथ लमाक्त। मारदे हना मेको डांडा नेल्ल क्येडा ठेयब चढ़ेतीक बाक्माक्त। मिनु मेको चढ़ेतीकेम सोलोमनम हजार का मार मार चोशा चढ़ेतीक चढ़ेवा बाक्त। १इतिहास २१:२९; १राजा ९:२

५ मिनु मेको नाकदो परमप्रभु यावे गिबोनम सोलोमन आ डोमुम जाक्शा “गे मार पुंडनेवे, मेको गेनन” देमाक्त।

६ मिनु सोलोमनम “गे इन गेय पाइब, आं आफ दाऊद कली इन ठेयब गेना हना यो दाक्तीक कोइताक्नी। मारदे हना मेको इन कली मप्रोइथु, ठीक पाइब नु रिम्शो थुं पाइश्शो इन नोले खोइक्ब मुर बाक्त। मिनु गे मेको कली इन ठेयब नु गेना हना यो दाक्तीके कोइशो बाक्तीनी। मिनु मुलाक्ती मेको आ नोले आ नित्तीकेम चोइक्चा कली मेको कली तौ का गेतीनी। १राजा १:४८

७ मिनु मुल परमप्रभु यावे, आं परमप्रभु गे इन गेय पाइब, आं कली, आं आफ दाऊद आ पा डा पिप सेलतीनी। मो हना यो गो आइक्च आल का ला बाक्नुड। मिनु गो दोपा लाडगा लचा माल्नुडा, दोपा जाक्चा माल्नुडा, मेको मतुइक्नुड।

८ मुल गो इन गेय पाइब इन योत्रशो मुर इस्राएली आन दातेम बाक्शो बाक्नुड। मेको शुश नु हिकने मचाप्चा डा बाक्नीम। १राजा ४:२०

९ मोपतीके इन गेय पाइब, आं कली इन मुर आन कली ठीक पा सासन पचा कली रुप्तीक थुं गेयीनी। मिनु गो रिम्शो नु मरिम्शो तिल्स जोक्नुड। मो म्दुम्त हना, एको इश्का इन मुर आन कली सुम सासन पने चाप्नीमी डा” देमाक्त।

१० मिनु परमप्रभु यावे सोलोमनम मेको लोत्र पुंडशो तशा, ग्येरसे बाक्त।

११ मोपतीके परमप्रभुमी मेको कली “गेमी एको लोत्र पुंडतीके, तन्न आंम इ पबंम शुश ब्रोंडतीक, शोप चेम्तीके नु इ जोरी सत्रु आन कली साइक्तीक मपुंडतीके, मार ठीक बाक्म, दे रुप्तीक थुं पुंडतीके,

१२ मुल गो इ पुंडशो गेनुड। गो थमा पा इ कली जोक्तीक तुइक्तीक थुं नु रुप्तीक थुं गेनन। डोंडती इ खोदेशो अर्को सुइ मबाक्म। मिनु नोले यो इ खोदेशो सुइ म्दुम्नीम। ब्यवस्था २६:१४

१३ मेको प्रोइशा यो, गो अर्को इ मपुंडशो यो गेनन। गे मबेक्डे सम्म इ कली शोप नु मान ततीके यो गेनन। तेकोइ पिपपुकी गे नु उइक्थ म्दुम्नीम। मती ६:३३

१४ मिनु गे इ आफ दाऊदम खोदेशो पा, आं लांम गाक्ते हना, आं फुल्लुम मुशा ब्रेक्शो लोत्र नु आं शेंतीके टिप्तीवी हना, गो इ कली शुश ब्रोंइचा गेनन” देमाक्त।

१५ मिनु नोले सोलोमन सेंसे बाक्त। मिनु एको दा डोमु कका बाक्त, दे तुइक्ता बाक्त। मिनु मेको नोले यरूसलेम लेम्माक्त। मिनु परमप्रभु यावे आ कबल पशो सन्दोस आ नेक्शा राम्माक्त। मिनु मेकेर चोशा चढ़ेतीक नु दुशा बाक्तीक आ पबंम चढ़ेतीके चढ़ेवा बाक्त। मिनु मेकोमी आ गेय पाइब नेल्ल आन कली भोज का गेमी बाक्त।

### सोलोमन आ निसाफ

१६ मिनु नोले तेल्लेम मीश मुर निक्शी पिप आ डोंडती जाक्शा, राप्सा बाक्त।

१७ मिनु मेको आस दाते डा काम “आं प्रभु, एको मीश मुर नु गो खिं कामीन बाक्नस्कु। मिनु गो एको नु बाक्डानु, आल का थीता।

१८ मिनु गो आल थिडा आ नाक्त सां नोले एकोमी यो आल का थिप्तु। मेकेर गो निक्शी ला बाक्शो नस्कु। मेको खिंम आंस निक्शी डा लाक्शा, अर्को सुइ मबाक्म।

१९ मिनु नाकदो एको मीश मुरुम आ तौ कली चिप्शा सदा बाक्त।

२० मिनु नाकदो उइक्थ दुम्मेनु, गो, इन वाइलीम निन्द्रा पडा ना एको बोक्शा जाक्शा, आं तौ लदा बाक्त। मिनु आ बेक्शो तौ चहिं आं थुकुम वोदा बाक्त।



21 मिनू आ दीसा सुनी गो बोक्शा 'आल दूध तुंडु' देंडानु दा, आल बेक्शो बाक्त। तन्न गो मेको कली सुनी रिम्शो पा शिरशा कोव्रडुनु, मेको आं थिशो तौ ममाइ बाक्त" देंमाक्त।

22 मिनू मेको अर्को मीश मुरुम "ममाइ सेस आल आं तौ बाक्ब। बेक्शो इ के बाक्ब" देंमाक्त। तन्न डोंइती डा मीश मुरुम "ममाइ बेक्शो तौ इ के बाक्ब। सेस चहिं आं तौ बाक्ब" देंमाक्त। मोपा मेको निक्शी पिप आ डोंइती जिम्से बाक्त।

23 मिनू पिपम "कामी 'सेस तौ आं के बाक्ब। बेक्शो चहिं इ के बाक्ब' देंत। मिनू अर्कोम 'ममाइ बेक्शो तौ इ के बाक्ब। सेस चहिं आं तौ बाक्ब' देंत" देंमाक्त।

24 मिनू पिपम "आं कली तरवार का चाक्शा गेयीनी" देंमाक्त। मिनू मेकोपुकीम पिप कली तरवार का चाक्शा गेमे बाक्त।

25 मिनू पिपम "मेको सेस आल कली उइक्थ पा क्योरीन। मिनू उइक्थ भाग का, का कली नु अर्को उइक्थ भाग का अर्को कली गेने" देंमाक्त।

26 मिनू मेको सेस आल आ ममाम आ तौ कली शिशी पा पिप कली "ए प्रभु, एको सेस आल एकोमीन लदल। एको आल कली मसतीन" देंमाक्त। मिनू अर्कोम चहिं "एको आल गे यो लाइक्चा मताइनेवे, गो यो लाइक्चा मताइनुड। एको कली उइक्थ पा क्योरीन" देंमाक्त। यसैया ४९:१५

27 मिनू पिपम आ निसाफ डा लोत्र नेंपाइश्शा "एको सेस आल डोंइती डा मीश मुरु कली गेने। एको आल कली मसतीन। आल आ ममा एकोन बाक्ब" देंमाक्त।

28 मिनू पिप आ निसाफ नेंशा, इस्त्राएली नेल्ल आन थुंमी रिम्शो पशो तुइश्शा, हिंमा बाक्त। मारदे हना मेकोपुकीम ठीक पा निसाफ पचा कली मेको आ थुंम परमप्रभु आ रुप्पाइक्तीक थुं बाक्त, दे तुइक्तमे बाक्त।

## 4

### सोलोमन आ गेय पाइबपुकी

1 मोपा पिप सोलोमनम इस्त्राएल नेल्लेम सासन पवा बाक्त।

2 मेको आ ठेयब गेय पाइब सु सु बाक्मा बाक्त देंशा हना, सादोक आ तौ अजारयाह चढ़ेब बाक्माक्त।

3 शीशा आ तौ एली-होरेफ नु अहीयाह ब्रेक्ब बाक्सा बाक्त। अहीलुद आ तौ येहो-शाफात हिक्शा ब्रेक्शा वोइक्ब मुरु बाक्माक्त।

4 येहो-यादा आ तौ बेनायाह लडाइ पाइब आन ठेयब मुरु बाक्माक्त। सादोक नु अबीयाथार चढ़ेब बाक्सा बाक्त। १राजा २:३४-३५; २सामुएल २३:२०

5 नाथान आ तौ अजारयाह सासन पाइब आन ठेयब मुरु बाक्माक्त। नाथान आ तौ जाबुद चढ़ेब नु पिप आ वारच बाक्माक्त।

6 अहीशार पिप आ खिं डा मारेइ मारेइ कोव्रब मुरु बाक्माक्त। अब्दा आ तौ अदोनीराम गेय पाइब आन कली कोव्रब बाक्माक्त। १राजा ५:२८

7 सोलोमनम इस्त्राएल नेल्लेम १२ जना सासन पाइब वोइश्शो बाक्माक्त। मेकोपुकीम पिप कली नु पिप आ खिं डा मुरु आन कली जचा थोत्रक गारपाइक्बाक्मा बाक्त। मेको नेल्लेमी बर्सम महिना का का कली जचा थोत्रक चाक्तीक गेय पाइक्बाक्मा बाक्त। १सामुएल ८:११-१८

8 मेको आन नें मार मार बाक्मा बाक्त देंशा हना, बेन-हुर, एफ्राइम पहाड डा ठेयब मुरु बाक्माक्त। बेन-हुर देशो हुर आ तौ बाक्ब।

9 बेन-देकेर, माकाज, शा-आल्बीम, बेथ-शेमेश नु एलोन-बेथ-हानान सहर डा ठेयब मुरु बाक्माक्त।

10 बेन-हेसेद, अरुब्बोथ डा ठेयब मुरु बाक्माक्त। मेको आ जिम्माम सोकोह नु हेफेर डा रागी नेल्ल बाक्मा बाक्त।

11 बेन-अबीनादाब नाफाथ-डोर डा ठेयब मुरु बाक्माक्त। बेन-अबीनादाबम सोलोमन आ तमी थाफाथ कली ग्युंवे पशो बाक्माक्त। १सामुएल १६:८

12 अहीलुद आ तौ बाना तानाक सहर, मेगीददो नु बेथ-शेआन डा ठेयब मुर बाक्माक्त। बेथ-शेआन चारेथन आ नेक्था नु येज़ेल आ दी बाक्ब। मेको बेथ-शेआन रे आबेल-मेहोलाह योकमाम सहर आ अर्को पटटी सम्म डा ठेयब मुर बाक्माक्त।

13 बेन-गेबेर रामोथ-गिलाद डा ठेयब मुर बाक्माक्त। मेको आ जिम्मा मनस्से आ तौ याडर आ गिलादम बाक्शो गाउंपुकी बाक्मा बाक्त। मेको के बाशान रागी डा अरगोब गारो हिरशो ६० ओटा ठेयब सहर यो बाक्मा बाक्त। मेको गारो डा लाप्चोम कांसा के आग्लो बाक्मा बाक्त। गन्ती ३२:४१

14 इददो आ तौ अहीनादाब महा-नाइम डा ठेयब मुर बाक्माक्त।

15 अहीमाज नाप्ताली डा ठेयब मुर बाक्माक्त। मेकोम सोलोमन आ तमी बासेमाथ नु ग्युबे पशो बाक्माक्त।

16 हुशाइ आ तौ बाना आशेर नु बेआलोथ डा मुर आन ठेयब मुर बाक्माक्त।

17 पारुआह आ तौ येहो-शाफात इस्साकार डा ठेयब मुर बाक्माक्त।

18 एला आ तौ शिमेइ बेन्यामीन रागी डा ठेयब मुर बाक्माक्त।

19 ऊरी आ तौ गेबेर गिलाद डा ठेयब मुर बाक्माक्त। मेको एमोरी आन पिप सीहोन नु बाशान रागी डा पिप ओग आस रागी डा यो ठेयब मुर बाक्माक्त। मिनु यहूदा रागी कली कोव्रब अर्को मुर मबाक्मा बाक्त।

### सोलोमन आ राज्य

20 यहूदा नु इस्राएल डा मुरपुकी समुन्द्र डा बाल्वा खोदेशो पा शुश बाक्मा बाक्त। मेकोपुकी जशा तूशा ग्येरशा बाक्बाक्मा बाक्त। १राजा ३:८; उत्पत्ती १३:१६

21 सोलोमनम युफ्रेटीस खोला रे पलिस्ती आन रागी इजीप्त डा सांद सम्म डा राज्यम सासन पशो बाक्माक्त। मिनु मेको रागीम सोलोमन कली तिरो थाप्बाक्मा बाक्त। मिनु मेकोपुकी सोलोमन ब्रोइम सम्म मेको आ गेय पाइब दुम्शा बाक्मा बाक्त। उत्पत्ती १५:१८

22 सोलोमन आ खिंमी काबु डा जचा थोव्रक ३० कोर रिम्शो फस नु ६० कोर अरु फस बाक्मा बाक्त। कोर का २२० लिटर डा ठेयब पुक्तीके बाक्ब।

23 मिनु १० ओटा दोम्शो ब्यफ, २० ओटा खर्कम योव्रशो ब्यफ नु सहे का क्यारश भेडा बाक्मा बाक्त। मेको प्रोइशा किश्श, रोकेश नु दोम्शो हांसपुकी यो बाक्मा बाक्त।

24 मारदे हना मेकोम युफ्रेटीस खोला आ पच्छिम गे डा रागी तिफसाह रे गाजा सम्म युफ्रेटीस खोला आ पच्छिम गे बाक्ब पिप नेल्ल आन कली सासन पशो बाक्माक्त। मेको आ राज्य नेल्ल लडाइ मदुम्थु थुं नाइश्शा बाक्शो बाक्मा बाक्त।

25 सोलोमन बाक्म सम्म दान रे बेयर-शेबा सम्म यहूदा नु इस्राएल रिम्शो दुम्शा बाक्सा बाक्त। मुर नेल्ल आंम आंम अडगुर नु फोव्रशी जशा बाक्मा बाक्त। लेवी २५:१८

26 सोलोमन के ४ हजार बग्गी कीब शारा आन कली वोइक्तीक खिं बाक्माक्त। मेको के १२ हजार शारा डोइक्ब बाक्मा बाक्त। २इतिहास ९:२५

27 मिनु मेको १२ जना सासन पाइबपुकीमी महिना महिनाम पाल्पालो पा सोलोमन नु मेको नु बाक्शा जाइब आन कली जचा थोव्रक चाक्बाक्मा बाक्त। मोपा चाक्मेनु, मेकोपुकीम तेकोइ थोव्रक मखाइक्थु चाक्बाक्मा बाक्त।

28 मेकोपुकीमी शारा नु बग्गी कीब शारा आन कली यो क्योव्रज नु नल चाक्बाक्मा बाक्त। नेल्लेम आन पचा डा गेय पाइबाक्मा बाक्त।

### सोलोमन आ जोक्तीक तुइक्तीक

29 परमप्रभुमी सोलोमन कली शुश जोक्तीक तुइक्तीक थुं गेवा बाक्त। मेको आ रुप्तीके समुन्द्र डा बाल्वा खोदेशो पा शुश बाक्माक्त।

30 पूर्ब डा मुर नेल्ल नु इजीप्त डा मुर नेल्ले आन दातेमी सोलोमन के खोदेशो जोक्तीक तुइक्तीक थुं सुइ के मबाक्मा बाक्त।

31 मिनु मेको अरु नेल्ल आन क्येडा जोक्ब तुइक्ब दुम्माक्त। मेको एजाह आ खिं डा एथान नु माहोल आ तौ हेमान, कल्कोल नु दारदा आन क्येडा यो शुश जोक्ब तुइक्ब बाक्माक्त। मिनु मोपा आ जोक्तीके तुइक्तीके रागी रागी डा मुर नेल्ल आन दातेमी ब्रमाक्त।

32 मेकोमी हजार सां अर्ती ब्रेक्ता बाक्त। मिनु हजार का ५ ओटा कुम्सो सेला बाक्त। उपदेसक १२:९

33 मेकोमी रवा आन पर्वम लेबानोन डा लाइशो रवा रे लाइशशा, गारोम चाब हिस्सोप माइशो सुप्तीक बोट सम्म आन पर्वम ब्रेक्ता बाक्त। मिनु मेकोमी चिक्ब, जन्तु, खपीम ग्रेशा गाक्ब जन्तु नु डाइ नेल्ल आन पर्वम यो ब्रेक्ता बाक्त।

34 रागी डा शुश मुर सोलोमन आ जोक्तीक तुइक्ती नेंचा तुइक्चा कली जाक्बाक्मा बाक्त। रागी डा पिपपुकीम सोलोमन आ पर्वम नेंशा, मेको आ लोव्र नेंचा कली मुर आन कली सोइक्बाक्मा बाक्त।

## 5

परमप्रभु आ खिं सेल्चा चिक्शो

२इतिहास २:-

1 टायर डा पिप हीराममी सोलोमन आ आफ आ पा डा पिप दुम्शो बाक्ब देशो लोव्र नेना बाक्त। मिनु मेकोमी आ गेय पाइब आन कली सोलोमन आ बाक्तीक सोइक्ता बाक्त। मारदे हना मेको गेना हना यो दाऊद आ वारच दुम्शा बाक्शो बाक्माक्त। २सामुएल ५:११

2 मिनु सोलोमनम हीराम कली लोव्र सोइक्ता बाक्त।

3 मार लोव्र सोइक्ता बाक्त देशा हना “परमप्रभु यावे, आं आफ दाऊदम आ परमप्रभु आ नें कली मान पा खिं का सेल्चा थुं पशा यो सेल्ने मचब। मारदे हना मेको आ एर ओंथ नेल्ल डा जोरी सत्रु नु लडाइ दुम्तीके नु परमप्रभु यावेमी मग्रापदा सम्म मोदेशो दुम्शो बाक्त। गे मेको लोव्र नेल्ल तुइक्नीनी।

4 तन्न मुल परमप्रभु यावे, आं परमप्रभुमी आं कली सुइ नु लडाइ मपपाइक्थु, थुं नाइशशा बाक्चा गेती। आं कली लडाइ तोशा श्येत गेब सुइ मबाक्नीम।

5 मोपतीके मुल परमप्रभु यावेमी आं आफ दाऊद कली देशो खोदेशो पा, गो परमप्रभु यावे, आं परमप्रभु आ नें कली मान पा, खिं का सेलु देंती। परमप्रभु यावेमी आं आफ दाऊद कली ‘गे इ पा डा पिप दुम्ब इ तौमी आं कली मान पा खिं का सेल्ब’ देशो बाक्त। २सामुएल ७:१३

6 मोपतीके गे आं कली लेबानोन रे लाइशशो रवा क्योरशा चाक्चा हुकुम गेयीनी। आं गेय पाइबपुकी, इन गेय पाइबपुकी नु गारशा गेय पाइनीम। मिनु गे इन गेय पाइब आन कली दोशो गाल्च गेचा देंनीनी, गो मेको गेनुडमी। सीदोनी खोदेशो पा शी क्योरस जोक्ब एक आंइ दातेमी सुइ मबाक्नीम” दे लोव्र कुरब मुर सोइक्ता बाक्त।

7 मिनु हीरामम सोलोमन आ लोव्र नेंशा थाम्पा ग्येरसीशा “परमप्रभु यावे ठेयब बाक्ब। मारदे हना मेकोम दाऊद कली इशका मुर आन कली सासन पाइब जोक्ब तुइक्ब तौ का गेप्टु” देंमाक्त। १राजा १०:९

8 मिनु हीरामम सोलोमन कली “गो इन सोइशशो लोव्र नेंता। इन माल्लो नेल्ल गेनुड। लेबानोन डा लाइशशो रवा नु अरु रवा आन शी खाप्शा गेनुड।

9 आं गेय पाइबपुकीम मेको रवा लेबानोन रे समुन्द्र सम्म चाक्नीम। मिनु गो मेको शी फ्रेंपाइशशा, इन देंतीक सम्म समुन्द्रम योल्पाइशशा सोइक्पाइक्नुडमी। गो मेको आन कली इन देंतीकेम प्राक्पाइक्नुडमी। मिनु गे मेको लाइक्ने चाप्नीनी। मिनु गे आं खिं कली जचा थोव्रक सोइशशा आं मिम्शो खपीन” दे लोव्र कुरब मुर सोइक्ता बाक्त।

10 मोपा हीरामम सोलोमन कली माल्लो लेबानोन डा लाइशशो रवा आ शी नु अरु शी नेल्ले सोइक्ता बाक्त।

11 मिनु सोलोमनम चहिं मेको आ पा डा हीराम आ खिं कली २० हजार कोर चेरब नु २० कोर रिम्शो तेल सोइक्ता बाक्त। मोपा सोलोमनम बर्स बर्सम मेको सोइक्ता बाक्त। कोर का २२० लिटर बाक्ब। १राजा ५:२

12 मिनु परमप्रभु यावेमी कबल पा देशो खोदेशो पा सोलोमन कली जोक्तीक तुडक्तीक थुं गेवा बाक्त। मिनु हीराम नु सोलोमन आस दातेमी दुशा बाक्तीक दुम्माक्त। मिनु मेको निम्फा गारशा बाक्स, दे सल्ला पमुसा बाक्त।

13 मिनु पिप सोलोमनम इस्राएल नेल्ल रे मोशा गेय पाइब ३० हजार मुर आन कली खुप्तीमी बाक्त।

14 मिनु मेकोमी मेको आन कली महिना महिनाम १०, १० हजार पा लेबानोनम सोइक्तीमी बाक्त। मोपा मुरपुकी महिना का लेबानोनम नु महिना निक्शी आन खिंम बाक्मा बाक्त। मेको गेय पाइब आन कली कोत्रब अदोनीराम बाक्माक्त। १राजा ४:६

15 सोलोमन के ७० हजार कुरब नु ८० हजार फुल्लु खोइक्ब मुर पहाडम बाक्मा बाक्त।

16 सोलोमन आ गेय पाइब आन कली कोत्रब ३३ सहे ठेयब मुर बाक्मा बाक्त।

17 मिनु पिप आ अरेशो खोदेशो पा, परमप्रभु यावे आ खिंम जग वोइक्चा कली रिम्शो पा फुल्लु खोइश्शा गुंडदमे बाक्त।

18 मोपा सोलोमन नु हीराम आस मुरपुकी नु गेबाल डा मुरपुकीम खिं सेल्चा कली फुल्लु खोइश्शा शी ठीक सेल्मे बाक्त। यहोसु १३:५; इर्जीकीएल २७:९

## 6

सोलोमनम परमप्रभु आ खिं सेल्शो

२इतिहास ३:१-१४

1 इस्राएली इजीप्ट रे यूशा जाक्शो ४ सहे ८० बर्स दुम्शो बाक्माक्त। मिनु सोलोमनम इस्राएली आन कली हुकुम पशो ४ बर्स नु महिना निक्शी डा जिव महिनाम परमप्रभु यावे आ खिं सेल्चा गोवा बाक्त। मत्ती १:१७

2 सोलोमनमी परमप्रभु यावे कली सेल्शो खिं ६० कुबीत लाइश्शो, २० कुबीत ब्रेम्शो नु ३० कुबीत ग्येथ लाइश्शो बाक्माक्त। कुबीत का ०.५ मिटर खोदेशो बाक्ब।

3 मेको परमप्रभु यावे आ खिं आ डोंइती डा पिंडी आ ब्रेम्शो नु आ लाइश्शो २० कुबीत बाक्माक्त। मेको खिं आ डोंइती गे १० कुबीत लाइश्शो यूशो बाक्माक्त। कुबीत का ०.५ मिटर खोदेशो बाक्ब। १राजा ७:१५-२१

4 मेकोमी खिं आ दी गे गारोम रोकतीक पाइश्शो झेलपुकी सेल्पदा बाक्त।

5 नोले मेकेर चोत्रखो नु नेल्ल क्येडा चोत्रखो बाक्शो खिं आ एर ओंथ डा गारो नेल्लेम बोइश्शो कोठापुकी सेल्पदा बाक्त।

6 मिनु नेल्ल क्येडा आगा डा तला ५ कुबीत ब्रेम्शो बाक्माक्त। मिनु दाते डा तला ६ कुबीत ब्रेम्शो नु नेल्ल क्येडा आ तार डा तला ७ कुबीत ब्रेम्शो बाक्माक्त। मेकोमी ठेयब गारो आ एर ओंथ नेल्ले लाडगा गे पाइद्रा वोइक्चा कली गारो प्रोत्रपदा बाक्त। मोपा पाइद्रा खिं डा गारो मओत्रचा डा पा सेल्पदा बाक्त।

7 खिं सेल्मेनु, फुल्लु खांनीमीन खोदमे बाक्त। मेको खिं सेल्मेनु घन, खा नु मारेड फलाम के या आन रेयके मनैसे बाक्त।

8 नेल्ल क्येडा आगा डा तला डा ओत्रतीक दक्खिन गे बाक्माक्त। मिनु मेकेर रे दाते डा नु आ तार डा तला लचा कली हिरशो थेंकापुकी बाक्मा बाक्त।

9 मोपा मेकोम लेबानोन डा लाइश्शो रवा के पाइद्रा नु फलेक साप्शा खिं सेल्ने थुम्पदा बाक्त।

10 मेकोम खिं आ एर ओंथ नेल्ल आइक्च आइक्च कोठा सेल्पदा बाक्त। मेको कोठा नेल्ल ५, ५ कुबीत लाइश्शो बाक्मा बाक्त। मिनु मेको कोठा नेल्ल लेबानोन डा लाइश्शो रवा आ शीम खिं नु बोइश्शो बाक्मा बाक्त।

11 मिनु परमप्रभु यावेम सोलोमन कली लोत्र पवा बाक्त।

12 मार लोत्र पवा बाक्त देशा हना “एको इ सेल्शो खिं आ परबंम लोत्र पाइनुड। गे आं फुल्लुम मुशा ब्रेक्शो लोत्र पाप्तीवी हना, आं देशो पतीक लोत्र नु आं शेंशो नेल्ल पशा, आं लाम गाक्ते हना, इ आफ दाऊद नु थोकशा पशो कबल गे नु पाइनुड। २सामुएल ७:१३

13 मिनु गो इस्राएल डा आं आल आन दातेम बाक्नुड। मिनु गो आं मुर इस्राएली आन कली गेनायो मप्रॉइनुडमी” देंमाक्त। प्रस्थान २९:४५

14 मोपा सोलोमनम परमप्रभु यावे आ खिं सेल्ने थुमा बाक्त। प्रेरित ७:४७

15 मेकोमी खिं आगा गे डा गारोम लेबानोन डा लाइशशो रवा आ शी के फलेक गारपाइशशा क्येप्पदा बाक्त। खप रे इर डा शी सम्मन शी के फलेक गारपाइशशा क्येप्पदा बाक्त। मिनु खपीम चहिं अरु रवा डा फलेक ब्रपदा बाक्त।

16 सोलोमनमी मेको खिं आगा आ नोले गे २० कुबीत लाइशशो नेल्ल क्येडा चोव्रखो कोठा सेल्पदा बाक्त। मेको कोठा नेल्ले लेबानोन डा लाइशशो रवा आन फलेक गारपाइशशा क्येप्पदा बाक्त। कुबीत का ०,५ मिटर बाक्ब।

17 मेको नेल्ल क्येडा चोव्रखो कोठा आ डोंइती ४० कुबीत लाइशशो बाक्माक्त। १ कुबीत ०,५ खोदेंशो बाक्ब।

18 मेको खिं आ आगा गे लेबानोन डा लाइशशो रवा आ शी के फलेकम चहिं लौका नु बोइशशो फू आ बुटा मुशा आप्शो बाक्मा बाक्त। मेको शी नेल्ल मोदेंशो बाक्मा बाक्त। मेकेर फुल्लु का यो मतांइसीशो बाक्माक्त।

19 मेको आ खिं आ नेल्ल क्येडा आगाम चहिं परमप्रभु यावे आ कबल पशो सन्दोस वोइक्चा कली नेल्ल क्येडा चोव्रखो कोठा सेल्पदा बाक्त।

20 मेको नेल्ल क्येडा चोव्रखो कोठा पुक्शो नु २० कुबीत लाइशशो, २० कुबीत ब्रेमशो नु २० कुबीत ग्येथ लाइशशो बाक्माक्त। मिनु मेकोमी मेकेर नेल्ल क्येख सुन क्येप्पदा बाक्त। मिनु मोदेंशो पा मेकोमी लेबानोन डा लाइशशो रवा आ शी के सेल्शो चढेतीक कली यो सुनम गिल्पदा बाक्त। कुबीत का ०,५ खोदेंशो बाक्ब। १ राजा ७:४८

21 सोलोमनम मेको खिं आगा गे नेल्ल क्येख सुन क्येप्पदा बाक्त। मिनु आगा डा नेल्ल क्येडा चोव्रखो कोठा नेल्ल सुन क्येप्पाइशशा, आ डोंइती सुन के साडलीपुकी क्याइक्पदा बाक्त।

22 मोपा मेकोम खिं आगा नेल्ल सुन क्येप्पदा बाक्त। आगा बाक्तीक डा चढेतीक कली यो सुनम गिल्पदा बाक्त।

23 मेकोमी परमप्रभु यावे आ खिं आगा डा चोव्रखो बाक्तीकेम तेल रवा आ शी के करूब निक्शी सेल्पदा बाक्त। मेको निम्फा १०, १० कुबीत ग्येथ लाइशशो बाक्सा बाक्त। कुबीत का ०,५ खोदेंशो बाक्ब। प्रस्थान ३७:७-९

24 करूब आ फ्रां का ५ कुबीत लाइशशो बाक्माक्त। मिनु अर्को यो ५ कुबीत लाइशशो बाक्माक्त। मिनु फ्रां का आ डर रे अर्को फ्रां आ डर सम्म १० कुबीत लाइशशो बाक्माक्त।

25 मोपान अर्को करूब आ फ्रां यो १० कुबीत लाइशशो बाक्माक्त। मारदे हना मेको करूब निम्फा उइक्थ उइक्थ पा खाल का डा बाक्सा बाक्त।

26 मेको करूब निम्फा खाल का डा पा १०, १० कुबीत लाइशशो बाक्सा बाक्त।

27 मिनु मेकोमी मेको करूब आस कली परमप्रभु यावे आ खिं डा नेल्ल क्येडा चोव्रखो कोठाम वोदा बाक्त। मेको करूब आस फ्रां प्राक्पाइशशा सेल्शो बाक्माक्त। मोपा करूब का आ फ्रां कामी गारो का कली नु अर्को करूब आ फ्रां कामी अर्को गारो कली थिशो बाक्माक्त। मिनु मेको आस अर्को फ्रां चहिं दातेम थिमुशो बाक्सा बाक्त।

28 मिनु मेकोमी मेको करूब आस कली यो सुनम गिल्पदा बाक्त।

29 मेकोमी परमप्रभु यावे आ खिं डा नेल्ल क्येडा चोव्रखो कोठा आ एर ओंथ नेल्ल, गारो नेल्ल करूब, खजूर रवा नु बोइशशो फु आन बुटा मुशा आप्पदा बाक्त। मेको चोव्रखो कोठा आगा नु लाडगा नेल्ल मोदेंशो पा मुशा बुटा आप्पदा बाक्त।

30 मिनु मेकोमी परमप्रभु यावे आ खिं डा नेल्ल क्येडा चोव्रखो कोठा डा खप नेल्ल सुन ब्रपदा बाक्त।

31 मेकोमी नेल्ल क्येडा चोव्रखो कोठा ओव्रचा कली तेल रवा आ शी के लाप्चो निक्शी सेल्पदा बाक्त। मेको लाप्चो डा शी ५ सुर पाइशशो पा सेल्पदा बाक्त।

32 मिनु मेकोम तेल रवा आ शी के लाप्चो निक्शीम करूब, खजूर रवा नु बोइश्शो फु आन बुटा मुशा आप्पदा बाक्त। मिनु सुनम गिल्पदा बाक्त।

33 मेको खिं डा लाप्चो डा शी यो तेल रवा आ शी के ४ पाटे पा सेल्पदा बाक्त।

34 मिनु मेकोमी अरु शी के लाप्चो निक्शी सेल्पदा बाक्त। मेको आगा नु लाडगा डा लाप्चो हिरब लाप्चो बाक्सा बाक्त।

35 मिनु मेकोमी मेकेर नेल्ल करूब, खजूर रवा नु बोइश्शो फु आन बुटा मुशा आप्पदा बाक्त। मिनु सुनम गिल्पदा बाक्त।

36 मिनु मेकोमी खिं आगा डा गारो यो खोइश्शो फुल्लु सां खेयप खोप्शा क्येप्शा, मेको आ तारी लेबानोन डा लाइश्शो रवा के फलेकम सुम्पदा बाक्त।

37 सोलोमनमी सासन पवा आ ४ बर्स जिव माइश्शो महिनामी परमप्रभु यावे आ खिं आ जग वोदमे बाक्त। १ राजा ६:१

38 मिनु ११ बर्स डा बुल माइश्शो महिनामी मेको खिं नेल्ले सेल्ले थुम्मे बाक्त। मेको सेल्ल्या कली ७ बर्स माल्दा बाक्त।

## 7

### सोलोमनम आ खिं सेल्लो

1 सोलोमन आ खिं सेल्ल्या कली १३ बर्स माल्दा बाक्त। मिनु मेकोमी आ खिं नु मारेइ मारेइ सेल्ले थुमा बाक्त। १ राजा ९:१०

2 मेकोमी लेबानोन डा ब्वाकी माइश्शो खिं सेला बाक्त। मेको खिं सहे का कुबीत लाइश्शो, ५० कुबीत ब्रेम्शो नु ३० कुबीत ग्येत्थ लाइश्शो बाक्माक्त। मेको खिं ४ लहर लेबानोन डा लाइश्शो रवा आ शी के थाम पाइश्शो बाक्माक्त। मिनु मेको आ तार लेबानोन डा लाइश्शो रवा आ पाइद्रा वोदा बाक्त। कुबीत का ०.५ मिटर खोदेशो बाक्ब। यसैया २२:८

3 मेको नेल्ल लेबानोन डा लाइश्शो रवा आ शी के फलेकम साप्शो बाक्माक्त। मेको थाम लहर कामी १५ ओटा पा, लहर सांमी ४५ ओटा बाक्मा बाक्त।

4 मेकेर लहर सां पा झेलपुकी वोइश्शो बाक्मा बाक्त। मेकोपुकी एर ओंथ पा कोव्रमुशो बाक्मा बाक्त।

5 लाप्चो डा शी नेल्ल ४ पाटे बाक्मा बाक्त। मेको यो नेल्ल लहर सां पा कोव्रमुशो बाक्मा बाक्त।

6 मेकोमी ५० कुबीत लाइश्शो नु ३० कुबीत ब्रेम्शो थाम पाइश्शो ठेयब पिंडी सेल्पदा बाक्त। मिनु मेको आ डोंइती थाम पाइश्शो ओव्रतीक बाक्माक्त। मेको आ डोंइती इप्तीक का यो बाक्माक्त।

7 मेकोमी निसाफ पचा कली ठेयब निल्लीके बाक्शो कोठा का सेल्पदा बाक्त। मेको कली निसाफ पतीक कोठा, दे नें वोदा बाक्त। मिनु मेकोमी मेको कोठा नेल्ले इर रे उइ सम्म लेबानोन डा लाइश्शो रवा आ शी के फलेक क्येप्पदा बाक्त।

8 मेकोम मेको निसाफ पतीक खिं आ नोले आ बाक्तीक खिं सेल्पदा बाक्त। मेको खिं डोंइती डा खिं खोदेशो पा सेल्पदा बाक्त। मिनु सोलोमनमी आ ग्युबे पा चाक्शो फाराओ आ तमी कली यो मोदेशोन खिं सेल्पदा बाक्त। १ राजा ३:१

9 मेको खिं नेल्ल शुश क्येट लाइब फुल्लु रे पा सेल्लो बाक्मा बाक्त। मेको फुल्लु नेल्ले गारपा अराम खोइश्शो बाक्माक्त। मेको खिं इर रे उइ सम्म नु खिंडगा रे लाडगा सम्म मोदेशो फुल्लु के सेल्लो बाक्मा बाक्त।

10 मेको आ जग फुल्लु ठेयब नु शुश क्येट लाइब बाक्मा बाक्त। मेको पुक्शोन कोइ १० कुबीत लाइश्शो, कोइ ८ कुबीत लाइश्शो बाक्मा बाक्त।

11 मेको आ तार शुश क्येट लाइब, थम गारपा खोइश्शो फुल्लु ब्रपदा बाक्त। मिनु मेको तार लेबानोन डा लाइश्शो रवा आ शी के फलेक गारपा ब्रपदा बाक्त।

12 मिनु ठेयब लाडगाम एर ओंथ नेल्ल खोइश्शा गारपाइश्शो फुल्लु सां खेयप ब्रशा, फुल्लु तार लेबानोन डा लाइश्शो रवा आ शी के फलेक ब्रशो बाक्माक्त। मिनु परमप्रभु यावे आ खिं आगा डा लाडगा नु आ पिंडी यो मोदेशोन बाक्माक्त। १ राजा ६:३६

### हुराम आ गेय

२इतिहास ३:१५-५:१

13 पिप सोलोमनम हुराम कली टायर रे ब्रेत्थ सोइक्ता बाक्त। २इतिहास २:१३-१४

14 मेको आ ममा नाप्ताली आ खिं डा आ वोंइश बेक्शो मीश मुर का बाक्माक्त। मेको आ आफ टायर डा थाम्पा कांसा के गेय पस जोक्ब मुर बाक्माक्त। मोपतीके हुराम यो थाम्पा कांसा के गेय पस जोक्ब बाक्माक्त। मिनु मेको पिप सोलोमन आ बाक्तीक जाक्माक्त। मिनु आ कली गेशो गेय नेल्ल पवा बाक्त।

### कांसा के थाम निक्शी

15 मेकोम यपाइश्शा कांसा के थाम निक्शी सेला बाक्त। मेको थाम का १८ कुबीत लाइश्शो बाक्माक्त। मेको आ एर ओंथ नेल्ल १२ कुबीत बाक्माक्त। मिनु अर्को यो मोदेशोन बाक्माक्त। कुबीत का ०.५ मिटर खोदेशो बाक्त। २राजा २५:१७

16 मिनु मेकोमी मेको थाम आस डरम पिया वोइक्चा कली यपाइश्शो कांसा के पिया निक्शी सेला बाक्त। मेको निम्फा ५, ५ कुबीत लाइश्शो बाक्सा बाक्त।

17 मेकोमी थाम आ पिया कली बुटा आप्शो जाली के ७ ओटा झुम्का सेला बाक्त। मिनु अर्को थाम कली यो मोदेशोन सेला बाक्त।

18 मिनु मेको थाम आ पिया ग्योम्चा कली कांसा के जाली नेल्ल आन एर ओंथ लहर निक्शी बुटा आप्शो दारीमपुकी सेला बाक्त। मिनु मेकोम अर्को कली यो मोदेशो पान सेला बाक्त।

19 मिनु मेको पिंडी डा थाम आन पिया ४, ४ कुबीत लाइश्शो लिली फू खोदेशो पा सेला बाक्त।

20 मिनु मेको थाम आ पियामी कचौरा खोदेशो बाक्तीकेम जाली थाम आ पिया आ एर ओंथ नेल्ल लहर लहर पा सहे निक्शी दारीम क्याइक्चा कली सेला बाक्त। मिनु अर्को थाम कली यो मोदेशोन सेला बाक्त।

21 मिनु मेकोमी परमप्रभु यावे आ खिं आ पिंडीम मेको थाम निक्शी राप्पदा बाक्त। मिनु दक्खिन गे डा थाम आ नें याकीन वोदा बाक्त। मिनु उत्तर गे डा थाम आ नें बोआज वोदा बाक्त।

22 मेको थाम आस पिया लिली फू खोदेशो बाक्मा बाक्त। मोपा मेको थाम आस गेय नुम्माक्त।

### कांसा के ठेयब बोस

23 मिनु मेकोमी कांसा के यपाइश्शा ब्वाक्कु वोइक्तीक ठेयब बोस का सेला बाक्त। मेको आ सुर का रे अर्को सुर सम्म १० कुबीत बाक्माक्त। मेको ५ कुबीत ग्येत्थ लाइश्शो बाक्माक्त। मेको आ एर ओंथ पुक्शोन ३० कुबीत बाक्बाक्त।

24 मेको ठेयब बोस आ एर ओंथ नेल्ल डा सुरमी कुबीत काम १०, १० ओटा लौका आ बुटा आप्शा गुंइशो बाक्माक्त। मोपा मेको ठेयब बोसुम लहर निक्शी लौका सेला बाक्त।

25 मेको ठेयब बोस १२ ओटा ब्यफ आन तार वोइश्शो बाक्माक्त। मेको ब्यफ सां उत्तर गे, सां पच्छिम गे, सां दक्खिन गे नु सां पूर्व गे कोत्रशो बाक्मा बाक्त। मेको ब्यफ नेल्ल लाडगा गे हिरशो बाक्मा बाक्त।

26 मेको बोस ४ आंइची थांइशो बाक्माक्त। मिनु मेको आ शोत्र चहिं कचौरा नु बोइक्चशो लिली फू खोदेशो बाक्माक्त। मेकेर हजार निक्शी बाथ ब्वाक्कु रिक्बाक्माक्त। बाथ का २२ लिटर खोदेशो बाक्ब।

### कांसा के १० ओटा चिकतीक

27 मिनु मेकोमी कांसा के १० ओटा अरु निप्पाइक्तीक सेला बाक्त। मेको नेल्ल ४, ४ कुबीत लाइश्शो ४, ४ कुबीत ब्रेम्शो नु ३, ३ कुबीत ग्येत्थ लाइश्शो बाक्मा बाक्त। कुबीत का ०.५ मिटर खोदेशो बाक्त।

28 मेको निप्पाइक्तीक आन खोइली आन दातेमी बोइक्तीके बाक्मा बाक्त।

29 मेको वोइक्तीकेमी ब्यफ, गुप्स नु करूब आन बुटा आप्शो बाक्मा बाक्त। मेको आन दी गे यो झुम्का क्याइश्शो बाक्मा बाक्त।

30 मेको निप्पाइक्तीक नेल्लेम कांसा के ४, ४ ओटा गुगील बाक्मा बाक्त। मेको बोस आन पुंमी तिक्तीक क्येषो बाक्मा बाक्त। मेको झुम्का आन नेक्था बाक्मा बाक्त।

31 मेको आन रोकतीक कुबीत का ग्येथ लाइशो बाक्मा बाक्त। मेको कुल कुल देशो बाक्मा बाक्त। मेको कुबीत का नु आधा ब्रेमशो बाक्मा बाक्त। मिनु मेको आन रोकतीकेमी बुटा आप्शो बाक्मा बाक्त। मिनु मेको निप्पाइक्तीक चहिं कुल कुल देशो ममाइ ४ पाटे बाक्मा बाक्त।

32 मेको ४ ओटा गुगील आगा गे बाक्मा बाक्त। मिनु मेको गुगील आन बोइक्तीक नु बोइशो बाक्मा बाक्त। मेको गुगील नेल्ल कुबीत का नु आधा डा बाक्मा बाक्त।

33 मेको गुगील बग्गी आन गुगील खोदेशो पा सेल्लो बाक्मा बाक्त। मेको आन गुगील नु आन मारेइ मारेइ यपाइशशा सेल्लो बाक्मा बाक्त।

34 मेको निप्पाइक्तीक आन तिक्तीक ४ पाटे बाक्मा बाक्त। मेको नेल्ल टुक्रा का के सेल्लो बाक्मा बाक्त।

35 मेको निप्पाइक्तीक आन तार आधा आधा कुबीत ग्येथ लाइशो कुल कुल देशो सुर बाक्मा बाक्त। मेको निप्पाइक्तीक आन तार बाक्शा, मेको नु टुक्रा का के बाक्मा बाक्त।

36 मिनु मेकोमी मेकेर तेक तेक श्येथ बाक्मा, मेक मेक गुप्स, करूब नु खजूर रवा आन बुटा आबा बाक्त। मेको आन एर ओंथ नेल्ल मुशा सेल्लो कांसा के मालापुकी सेला बाक्त।

37 मोपा मेकोमी मेको १० ओटा निप्पाइक्तीक सेला बाक्त। मेको नेल्ल खाल का डा पा सेला बाक्त।

38 मेको नोले मेकोम कांसा के १० ओटा चिक्तीक बोस सेला बाक्त। मेको नेल्लेमी ४०, ४० बाथ ब्वाक्कु रिक्बाक्मा बाक्त। मेको पुक्शोनु ४, ४ कुबीत डा बाक्मा बाक्त। मेको निप्पाइक्तीक नेल्ल आन कली का का बाक्मा बाक्त। बाथ का २२ लिटर खोदेशो बाक्ब।

39 मिनु मेकोमी ५ ओटा निप्पाइक्तीके खिं आ दक्खिन गे नु ५ ओटा खिं आ उत्तर गे वोदा बाक्त। मिनु टेयब बोस चहिं परमप्रभु यावे आ खिं आ दक्खिन पूर्व गे वोदा बाक्त।

### परमप्रभु आ खिं डा मार मार

40 हुराममी बोसपुकी, पुलु ताप्तीक नु ग्योबपुकी सेला बाक्त। मोपा हुराममी पिप सोलोमन आ देशो खोदेशो पा परमप्रभु यावे आ खिं डा मारेइ मारेइ सेल्ले थुमा बाक्त।

41 थाम निक्शी, मेको आस डर सुम्चा कली कचौरा खोदेशो पिया निक्शी, मेको थाम आस पिया ग्योम्तीक बुटा आप्शो जाली निक्शी,

42 मेको जाली निक्शी आस कली ४ सहे दारीम, मेको कचौरा खोदेशो पिया पाइशशो थाम निक्शी आस कली सुम्तीक जाली आस कली लहर निक्शी दारीम,

43 मेको १० ओटा निप्पाइक्तीक आन कली १० ओटा बोस,

44 टेयब बोस का मेको आगा डा १२ ओटा ब्यफ सेल्ले थुमा बाक्त।

45 हुराममी बोसपुकी, पुलु ताप्तीक नु ग्योबपुकी सेला बाक्त। मोपा हुराममी पिप सोलोमन आ देशो खोदेशो पा परमप्रभु यावे आ खिं डा मारेइ मारेइ सेल्ले थुमा बाक्त। मेको नेल्ल टल्केशो कांसा के बाक्मा बाक्त।

46 मेको नेल्ल पिपम यर्दन खोला डा दिम सुक्कोथ नु चारेथन आस दातेमी मार मार यपाइक्तीकेम यपाइशशा, सेल्पाइशशो बाक्मा बाक्त।

47 सोलोमनम मेको मिश का थोत्रक सेल्लेके, मेको नेल्ल मनावथुन वोदमे बाक्त। मेको सेल्चा कली दोशो कांसा माल्दा, मेको यो मनावतमे बाक्त।

48 मिनु सोलोमनम परमप्रभु यावे आ खिं दारपाइक्चा कली मारेइ मारेइ थोत्रक नेल्ल सेल्पदा बाक्त। मेकोमी सुन के चढेतीके नु कोइतीक शोब्ले वोइक्तीक सुन के टेबल यो सेल्पदा बाक्त।

49 क्येख सुन के बत्ती दातीक सेल्पाइशशा, नेल्ल क्येडा चोत्रखो बाक्तीक कोठाम दक्खिन गे ५ ओटा नु उत्तर गे ५ ओटा पा वोइक्पदा बाक्त। सुन के फू खोदेशो बुटा, सुन के बत्ती दातीक, सुन के थनारो,



50 क्येख सुन के ग्योब, सल्दो खोइक्तीक कांडची, बोसपुकी थनौरो, कोइला कुरतीके, ब्वाक्कु बुइक्तीक डाडु, कचौरा, थनौरो, नेल्ल क्येडा चोवखो कोटा डा लाप्यो नु अरु लाप्यो डा हेक्तीक नेल्ल क्येख सुन के सेल्पदा बाक्त।

51 मिनु पिप सोलोमनम परमप्रभु यावे आ खिं डा गेय नेल्ल थुम्पदा बाक्त। मिनु मेकोमी आ आफ दाऊदमी जिम्मा गेशो थोव्रकपुकी, सुन, चांदी नु दारपाइक्तीक चाक्पाइश्शा, परमप्रभु यावे आ खिं डा शोंप वोइक्तीकेमी वोइक्पाइक्ती बाक्त।

## 8

कबल पशो सन्दोस चाक्शो

२इतिहास ५:७-७, १०

1 मिनु नोले सोलोमनम इस्राएल डा खाल्पा, इस्राएल डा थर थर डा ठेयब मुर नु इस्राएली आन खिं खिं डा मुर आन कली दाऊद आ सहर, सियोन रे परमप्रभु यावे आ कबल पशो सन्दोस चाक्चा कली यरूसलेम सहरम बुक्चा कली ब्रेप्पाइक्ती बाक्त।

2 मिनु एथानीम माइश्शो ७ महिना डा चाड नाक्ती, इस्राएल डा मुर नेल्ल पिप सोलोमन आ डोंइती बुक्मा बाक्त।

3 मिनु इस्राएल डा खाल्पा नेल्ल जाक्ने थुम्मे नोले, चढेबपुकीमी परमप्रभु यावे आ सन्दोस कुरमे बाक्त।

4 मिनु चढेब नु लेवीपुकीमी परमप्रभु यावे आ सन्दोस नु युन्तीक ताम्बुम बाक्शो परमप्रभु आ मारेड मारेड कुरशा, इर लदमे बाक्त।

5 मिनु पिप सोलोमन इस्राएल डा मुर नेल्ले नु मेको आ डोंइती बुक्ब नेल्लेम, सन्दोस आ डोंइती हिव्के मचाप्या डा पा भेडा नु ब्यफ क्योरशा चढेमे बाक्त। २सामुएल ६:१३

6 मिनु नोले चढेबपुकीमी परमप्रभु यावे आ कबल पशो सन्दोस खिं डा नेल्ल क्येडा चोवखो बाक्तीकेम चाक्शा करूब आस फ्रां आगाम वोदमे बाक्त। २सामुएल ६:१७; १राजा ६:२७

7 मारदे हना मेको करूब आस फ्रांम सन्दोस नु कुरतीक कोक्के कली सुम्शो बाक्सा बाक्त।

8 मेको कुरतीक कोक्के थम लाइश्शो बाक्तीके, मेको आन सुर नेल्ल क्येडा चोवखो बाक्तीक आ डोंइती रे तांडसीबाक्मा बाक्त। तन्न नेल्ल क्येडा चोवखो बाक्तीक आ लाडगा रे मतांडसी बाक्मा बाक्त। मेको मुल सम्म मेकेर बाक्नीम। प्रस्थान २५:१३-१५

9 मिनु होरेब डांडाम परमप्रभु यावेमी इस्राएली आन कली इजीप्त रे गुंडची ना कबल पशो बाक्त। मेना मोसामी मेको कबल पशो लोत्र मुशा ब्रेक्शो फुल्लु निक्शी सन्दोसम कुर पा वोदा बाक्त। मेको सन्दोसम फुल्लु निक्शी डा लाक्शा अर्को मारेड मबाक्माक्त। प्रस्थान २५:२१; ब्यवस्था १०:५

10 मिनु चढेब नेल्ल क्येडा चोवखो बाक्तीक रे गूमानु, परमप्रभु यावे आ खिं गोस्सुम ब्रीमाक्त।

11 मिनु मेकेर गोस्सुम सुम्तीके चढेबपुकीम गेय पने मचाप्मे बाक्त। मारदे हना परमप्रभु यावे आ छेडछेडम आ खिं ब्रीशो बाक्माक्त। प्रस्थान ४०:३४-३५

12 मिनु सोलोमनमी “परमप्रभु यावे क्येर गोस्सुम बाक्ब देशो बाक्ब। प्रस्थान २०:२१

13 गो इन कली गेना हना यो बाक्चा कली गारचा डा खिं का सेल्ला” देमाक्त।

14 मिनु पिपमी लेश्शा कोव्रशा, इस्राएल डा बुक्शो मुर नेल्ल आन कली आसीक गेमी बाक्त। मेना मेकोपुकी चहिं राप्शो बाक्मा बाक्त।

15 मिनु मेकोमी “परमप्रभु यावे, इस्राएली आन परमप्रभु ठेयब बाक्ल। मेकोमी आं आफ दाऊद नु कबल पा, मुल मेको खाप्तु।

16 मारदे हना मेकोमी ‘गो आं मुर आन कली इजीप्त रे गुंडशा चाक्कु रे मुल सम्म इस्राएल डा तेकोड थर डा मुर आन सहरम आं नें बाक्ल, दे आं खिं सेल्चा कली मयोव्रडु। तन्न गो आं मुर इस्राएली आन कली सासन पचा कली दाऊद कली योव्रता’ देंत।

17 आं आफ दाऊदमी परमप्रभु यावे, इस्राएली आन परमप्रभु आ नें कली मान पा खिं का सेल्चा मिम्शो बाक्त। २सामुएल ७:-

18 तन्न परमप्रभु यावेमी आं आफ दाऊद कली 'गे आं नें कली मान पा खिं का सेल्चा मिम्ताक्वी, मेको रिम्शो बाक्त।

19 मो हना यो गे मेको खिं मसेल्नेवे। तन्न इ तौमी आं नें कली मान पा खिं का सेल्ब' देशो बाक्तीनी।

20 मुल परमप्रभु यावेमी 'गो पाइनुड' देशो लोत्र खाप्तु। गो आं आफ दाऊद आ पा डा पिप दुम्शो बाक्नुड। मिनु परमप्रभु यावेमी 'पाइनुड' देशो खोदेशो पा गो इस्राएल डा पिप दुम्ती। मिनु परमप्रभु यावे, इस्राएली आन परमप्रभु आ नें कली मान पा एको खिं सेल्ता।

21 गो मेकेर परमप्रभु यावे आ कबल पशो सन्दोस बाक्तीके का सेल्ता। परमप्रभु यावेमी इं किकी पिपी आन कली इजीप्त रागी रे गुंडशा चाक्गानु, मेकोपुकी नु कबल पशो बाक्माक्त" देंमाक्त।

### सोलोमन आ प्रार्थना

22 मिनु सोलोमनम इस्राएल डा बुक्शो मुर नेल्ल आन दातेम परमप्रभु यावे कली चढ्हेतीक आ डोंइती राप्शा, आ गुड सरीड गे क्युक्गा बाक्त।

23 मिनु मेकोमी "परमप्रभु यावे, इस्राएली आन परमप्रभु इर स्वर्गम नु रागीम इन खोदेशो अर्को तेकोइ परमप्रभु मबाक्नीम। इन कली आन थुं नेल्लेमी नोले खोइक्ब, इन गेय पाइब आन कली पशो कबल खाप्शा, मेको आन कली गेना हना यो दाक्नीनी।

24 गे इन गेय पाइब, आं आफ दाऊद नु पशो कबल खाप्तीनी। मुलाक्ती 'गो पाइनुड' देशो कबल थमा पा खाप्तीनी।

25 मोपतीके परमप्रभु यावे, इस्राएली आन परमप्रभु इन गेय पाइब आं आफ दाऊद नु पशो कबल खाप्तीनी। गे मेको नु कबल पा 'गेना हना यो इ तौ चच रे इस्राएलम पिप दुम्नीम। तन्न मेकोपुकी इ खोदेशो पा आं डोंइती होस पा गाक्तेक्म हना, ला मोदेशो दुम्ब' देशो बाक्तीनी।

26 मोपतीके इस्राएली आन परमप्रभु, इन गेय पाइब आं आफ दाऊद कली 'गो पाइनुड' देशो लोत्र खाप्तीनी" देंमाक्त।

27 मेकोमी "मार, थमा पा परमप्रभु रागीम बाक्बा डा? कोत्रडीन, इर डा ठेयब सरीडम ला यो गे मरिक्नीनी हना, एको आं सेल्शो खिंम दोपा रिक्नीनी डा? यसेया ६६:१; प्रेरित १७:२४

28 मो हना यो परमप्रभु यावे, आं परमप्रभु इन गेय पाइब आं प्रार्थना नु आं पुंडशो लोत्र नेनीन। मुलाक्ती इन गेय पाइबमी इन डोंइती ठेयब सेंदा पा पुंडशो लोत्र नेनीन।

29 मिनु नाक्दो नाक्ती एको खिं कली कोत्रडीन। गे 'गो एको खिंम बाक्नुड' देशो बाक्तीनी। मोपतीके इन गेय पाइब आं लोत्र नेनीन। जकरिया १२:४; प्रस्थान २:२४

30 इन गेय पाइब नु इन मुर इस्राएलीम एको खिं गे कोत्रशा पुंडतेक्म हना, मेको आन पुंडशो गेन। मेको आन लोत्र इर इन बाक्तीक रे नेनीन। मिनु गे मेको आन पुंडशो गेशा, माफ गेने।

31 सुड मुरुमी आ नेक्था डा मुर आन पर्वम मरिम्शो पा कसम जपाइक्तु हना, मेकोम मेको कसम एको इन खिं डा चढ्हेतीक आ डोंइती जाप्तु हना,

32 गे इर स्वर्गम मेको आन लोत्र नेशा, निसाफ पने। मिनु दोस ताइब आ मरिम्शो पशो आ पियामी मोइक्तीन। मिनु ठीक पाइब कली दोस मताइब बाक्ब देंनीन। मोपा ठीक पाइब कली रिम्शो पाइब दुमीन।

33 मिनु इन मुर, इस्राएलीपुकीमी पाप पशा आन जोरी सत्रु नु बुशा, इन गे लेशशा 'गे आंइ परमप्रभु यावे बाक्नीनी' दे एको इन खिं गे कोत्रशा पुंडतेक्म हना,

34 इर स्वर्ग रे मेको आन पुंडशो नेनीन। मिनु इन मुर इस्राएली आन पाप माफ गेन। मिनु मेको आन किकी पिपी आन कली गेशो रागीम लेशशा चाक्कीन।

35 मिनु इन मुरपुकीमी पाप पतीके सरीड चोक्सीशा रेउ मयित हना, इन गेशो सजाइ तुइशशा, 'गे आंइ परमप्रभु यावे बाक्नीनी' दे आन पशो पाप प्रोइतेक्म हना, १राजा १७:१

36 इर स्वर्ग रे मेको आन पुंडशो लोत्र नेशा, इन गेय पाइब, इन मुर इस्राएली आन पाप माफ गेने। मेको आन पचा माल्शो शेंदीन। मिनु मेको आन कली गेशो रागीमी रेउ यिपतीन।

37 मेको रागीम अन्काल दुम्त हना, मुर बेक्तीक रोइ जाक्त हना, बाली नाली सोव्रतीक नु बुक्खी डाइक्तीक रोइ जाक्त हना, सल्हा माले नु बुस्स जाक्तेक्म हना, मेको आन तेकोइ सहरम जोरी सत्रुम पुम्ताक्म हना, मारेइ श्येत नु मारेइ रोइ जाक्त हना,

38 इन मुर इस्राएली सुइम आन थुंम श्येत जशा, एको इन खिं गे कोव्रशा आन गुइ क्युक्शा पुन्मेनु, इन बाक्तीक इर स्वर्ग रे मेको आन पुंइशो नेनीन।

39 गे मुर नेल्ल आन थुं तुइक्तीके, इन बाक्तीक स्वर्ग रे मेको आन लोव्र नेंशा, आन पशो कोव्रशा माफ गेने। मारदे हना गे ला मुर नेल्ल आन थुं तुइक्ब बाक्नीनी। भजन संग्रह १३९:१-२

40 मिनु मेकोपुकी इन कली मान पा हिंशा, आंइ किकी पिपी आन कली इन गेशो रागीम बाक्नीम।

41 मिनु इन मुर इस्राएली ममाइ, तन्न अर्को रागी डा मुर सुइमी इन कली तुइइशा डोन डोन रागी रे जाक्तेक्म हना, गन्ती १५:१४-१६

42 मेकोपुकीम इन ठेयब नें, इन ठेयब सक्ति नु इन वारच पतीके नेंशो बाक्तेक्म। मोदेंशो मुर जाक्शा, एको खिं गे कोव्रशा पुंइतेक्म हना,

43 गे मेको आन लोव्र इन बाक्तीक स्वर्ग रे नेंशा, मेको अर्को रागी डा मुर आन पुंइशो नेल्ल गेने। मिनु इन मुर इस्राएली खोदेंशो पा रागी डा मुर नेल्लेम इन नें तुइक्तेक्म। मिनु इन कली मान पा हिंमल। गे एको आं सेल्शो खिंम बाक्नीनी, दे तुइक्तेक्म।

44 मिनु इन मुर आन जोरी सत्रु नु लडाइ पथ लाम्तेक्म हना, गे मेको आन कली तेइ सोइक्ताक्नी हना, मेकोपुकीम एको इन योव्रशो सहर नु गोम इन कली सेल्शो एको खिं गे कोव्रशा, पुंइतेक्म हना,

45 गे स्वर्ग रे मेको आन पुंइशो नेनीन। मिनु मेको आन कली वारच पतीन।

46 मेकोपुकीम पाप पाप्तेक्म हना, मारदे हना पाप मपाइब सुइ मबाक्नीम। मिनु गे इन गाइइशोमी आन जोरी सत्रु आन गुइम गेतीनी। मिनु मेकोपुकीम मेको आन कली आन रागीम ग्याइइशा लाइक्तेक्म हना, भजन संग्रह १४:३-४; रोमी ३:२३

47 मिनु मेकोपुकीम आन कली ग्याइइशा लाइइशो रागीम श्येत जशा 'गो पाप पाइतक। दूली पा काइ मरिम्शो पाइतक' देंतेक्म हना, नेहेम्याह ९:३३; दानीएल ९:५

48 मिनु मेको आन ग्याइइशा लाइइशो जोरी सत्रु आन रागीमी आन थुं नेल्लेम इन गे लेतेक्म हना, मेको आन किकी पिपी आन कली इन गेशो रागी नु इन योव्रशो एको सहर नु इन नें कली मान पा आं सेल्शो खिं गे कोव्रशा, इन कली पुंइतेक्म हना, दानीएल ६:११

49 इन बाक्तीक इर स्वर्ग रे मेको आन पुंइशो लोव्र नेंशा, आन माल्शो गेन। मिनु मेको आन कली वारच पतीन।

50 मिनु मेको इन मुर आन पाप नु हेंथे पशो नेल्ल माफ गेने। मिनु मेको आन जोरी सत्रुम शिशी पपतीन।

51 मारदे हना मेकोपुकी इन खिं डा मुर बाक्नीम। गे मेको आन कली शुश श्येत गेतीके इजीप्त रागी रे गुंइशा चाक्तीनी।

52 मिनु गे इन गेय पाइब नु इन मुर इस्राएली आन कली कोव्रडीन। मेको आन पुंइशो लोव्र गेना हना यो नेनीन। मिनु मेकोपुकीम इन कली ब्रेम्मानु, मेको आन ब्रेशो नेनीन।

53 मारदे हना गे मेको आन कली इन मुर सेल्चा कली, रागी नेल्ल डा मुर आन दाते रे योव्रशा तिल्तीनी। मोपा आंइ किकी पिपी आन कली इजीप्त रे गुंइशा चाक्नीनु, इन गेय पाइब मोसा कली मोदेंशो लोव्र पशो बाक्तीनी" देंमाक्त। प्रस्थान १९:५-६

54 मोपा सोलोमनम परमप्रभु यावे कली प्रार्थना पा पुंइने थुमा बाक्त। मिनु मेको परमप्रभु यावे कली चढ्ढेतीक आ डोंइती रे बोक्माक्त। मेकेर सरीड गे कोव्रशा आ गुइ क्युक्शा आ पोक्च थक्शा प्रार्थना पशो बाक्माक्त।

55 मिनु मेको राप्शा, ठेयब सेंदा पा बुक्शा बाक्शो इस्राएली नेल्ल आन कली आसीक गेमी बाक्त।

56 मेकोमी “आ मुर इस्राएली आन कली आ देशो खोदेशो पा नाइक्चा गेब परमप्रभु यावे ठेयब बाक्ल। मेकोम आ गेय पाइब मोसा रे पा पाइनुड देशो रिम्शो गेय नेल्ले का सम्म यो मखाइक्थु, पाप्तु। यहोसु २१:४५

57 परमप्रभु यावे इं परमप्रभु इं किकी पिपी नु बाक्शो खोदेशो पा गोपुकी नु यो बाक्ल। मेकोमी इं कली गेनायो मप्रोनल।

58 मेकोमी इं किकी पिपी आन कली शेंशो लोत्र, आ फुल्लुम मुशा ब्रेक्शो लोत्र नु आ ठीक पतीक लोत्र पना पन, इन थुं नेल्लेमी मेको आ लॉम गाक्कीन।

59 गो इं परमप्रभु यावे आ डोंइती पुंडशो लोत्र नाक्दो नाक्ती परमप्रभु यावे, इं परमप्रभु आ डोंइती बाक्ल। मिनु मेकोमी नाक्त किंत किंत आ गेय पाइब नु आ मुर इस्राएली इं माल्शो गेशा, वारच पवल।

60 मिनु रागी डा मुर नेल्लेमी परमप्रभु यावे ला परमप्रभु बाक्ब, दे तुइक्नीम। मिनु मेको डा लाक्शा अर्को सुइ परमप्रभु मबाक्ब, दे यो तुइक्नीम।

61 मोपतीके इं थुं नेल्लेमी परमप्रभु यावे, इं परमप्रभु कली जिम्मा गेसय। मुलाक्त खोदेशो पा गोपुकीमी आ फुल्लुम मुशा ब्रेक्शो लोत्र टिना टिन, आ शेंशो पना पन बाक्च” देमाक्त।

### परमप्रभु आ खिं जिम्मा गेशो

62 मिनु नोले पिप नु इस्राएली नेल्लेमी परमप्रभु यावे आ डोंइती चढ़ेतीक चढ़ेमे बाक्त।

63 सोलोमनमी दुशा बाक्चा आ परबंम २२ हजार ब्यफ नु लाख का २० हजार भेडा चढ़ेवा बाक्त। मोपा पिप नु इस्राएल डा मुर नेल्लेमी परमप्रभु यावे आ खिं कली जिम्मा गेमे बाक्त।

64 मेको नाक्त पिपमी परमप्रभु यावे आ खिं आ डोंइती बाक्शो लाडगा आ दाते डा लाडगा कली यो तिला बाक्त। मारदे हना मेकोमी मेकेर चोशा चढ़ेतीके, अन्न चढ़ेतीके नु दुशा बाक्चा आ परबंम चढ़ेतीके आन बोंसो चढ़ेवा बाक्त। अन्न चढ़ेतीके, दुशा बाक्चा आ परबंम चढ़ेतीके नु चोशा चढ़ेतीक आन बोंसो वोइक्चा कली मेको परमप्रभु यावे आ डोंइती बाक्शो कांसा के चढ़ेतीके आइक्च दुम्माक्त।

65 मिनु सोलोमन नु मेको नु बुक्शा बाक्शो इस्राएली लेबो-हमाथ रे इजीप्त डा खोला सम्म डा ठेयब हुल नेल्लेमी परमप्रभु यावे, इं परमप्रभु आ डोंइती मेको नाक्त रे ७ नाक्त सम्म नु अर्को ७ नाक्त तेम्शा, नेल्ल पा १४ नाक्त सम्म चाड मानेमे बाक्त।

66 मिनु आ दीसा मेकोमी मुर आन कली आन खिं सोइक्तीमी बाक्त। मिनु मेकोपुकीम पिप कली ठेयब सेल्मे बाक्त। मिनु परमप्रभु यावेमी आ गेय पाइब दाऊद नु आ मुर इस्राएली आन कली रिम्शो पशो तशा, ग्येरना ग्येरन आन आन खिं लमा बाक्त।

## 9

### परमप्रभुमी लोत्र पशो

#### २इतिहास ७:११-२२

1 मिनु सोलोमनम परमप्रभु यावे आ खिं, पिप आ खिं नु आ सेल्चा दाक्शो मारेइ मारेइ नेल्ल सेल्ने थुमा बाक्त।

2 मेना परमप्रभु यावेम सोलोमन कली गिबोनम लोत्र पशो खोदेशो पा लेंशा लोत्र पवा बाक्त। १ राजा ३:५

3 मिनु परमप्रभु यावेमी मेको कली “गो इ आं डोंइती पशो प्रार्थना नु इ पुंडशो लोत्र नेता। गो एको इ सेल्शो खिं कली आं के सेल्ता। मिनु गो गेना हना यो एकेर बाक्नुड। आं थुं एकेर बाक्शा, गो एको खिं कली गेना हना यो कोत्रनुड। १ राजा ८:२९

4 मिनु गे चहिं ब्रेम्शो दुम्शा, इ आफ दाऊद खोदेशो पा आं डोंइती गेना हना यो रिम्शो पाइब नु रिम्शो थुं पाइशो दुम्ते हना, आं इ कली शेंशो नेल्ल पना पन, आं फुल्लुम मुशा ब्रेक्शो लोत्र नु आं निसाफ पतीक लोत्र नेल्ल पाप्तीवी हना,

५ गो इ राज्य इस्राएल कली गेना हना यो बोल्यो दुम्पाइक्नुड। मिनू गो इ आफ दाऊद कली 'इ तौ चच रे गेना हना यो इस्राएलम पिप दुम्नीम' दे कबल पशो खोदेशो पा गे नु यो कबल पाइनुड। २सामुएल ७:१२; येरमीया ३३:१७

६ तन्न गे नु इ आलपुकी आं नोले खोइक्चा प्रोइशा, गो इन डोंइती वोइइशो आं शेंशो नु आं फुल्लुम मुशा ब्रेक्शो लोव्र मपाइतीनी हना नु देवी देवता आन कली पूजा पाइतीनी हना,

७ गो इस्राएली आन कली आं गेशो रागी रे खेरनुडमी। मिनू एको आं कली सेल्शो खिं कली प्रोइशा मकोव्रनुड। मिनू इस्राएली चहिं मुर नेल्ल आन दातेमी मुने दोक्शा, ग्रंथा दित्तीक दुम्नीम। ब्यवस्था ४:२६; ब्यवस्था ८:१९-२०; मत्ती २३:३८

८ एको खिं ब्रेइशा, फुल्लु देल्शो दुम्ब। मिनू नोले एकेर गाक्ब मुर नेल्ल छक लाक्नीम। मिनू मुरपुकीमी मेको तशा 'मारदे परमप्रभु यावेमी एको खिं नु एको रागी कली ओं पवा, माइ?' दे शुक्शी पाइनीम।

९ मिनू मुरपुकीमी 'मेकोपुकीमी परमप्रभु यावे, आन परमप्रभुम मेको आन किकी पिपी आन कली इजीप्त रागी रे गुंइशा चाक्तु हना यो, मेको कली प्रोइशा, देवी देवता आन कली मानेशा, पूजा पाम्तेक्म। मोपतीके परमप्रभु यावेमी मेको आन कली मोदेशो श्येत गेप्टु' देंनीम" देंमाक्त।

### सोलोमन नु हीराम

#### २इतिहास ८:७-११

१० सोलोमन कली परमप्रभु यावे आ खिं नु आ बाक्तीक खिं सेल्चा कली २० बर्स माल्दा बाक्त। १राजा ६:३८; १राजा ७:१

११ टायर डा पिप हीराममी सोलोमन कली माल्शो लेबानोन डा लाइशो रवा आ शी, अरु शी, सुन नु आ माल्शो नेल्ल गेशो बाक्माक्त। मोपतीके पिप सोलोमनमी हीराम कली गालील रागी डा २० ओटा सहर गेवा बाक्त। २इतिहास ८:२

१२ मिनू हीरामम टायर रे मेको सोलोमन आ गेशो सहरपुकी कोव्रथ लमाक्त। मिनू मेकोम मेको सहर मदाक्ता बाक्त।

१३ मिनू मेकोमी सोलोमन कली "आं लोक्ब, मेको इ गेशो सहरपुकी दा दोक्का देशो बाक्तेक्मे" देंमाक्त। मिनू मेकोम मेको सहर आन कली "काबुल रागी" देशो नें वोदा बाक्त। मेको सहर आन नें मुल सम्म मेकोन बाक्नीम।

१४ मिनू हीराममी पिप सोलोमन कली सहे का २० टलेन्ट सुन सोइक्ता बाक्त। टलेन्ट का ३४ किलो बाक्ब।

### सोलोमन आ गेय पाइब

१५ पिप सोलोमनम पपाइइशो गेय मार मार बाक्त देशा हना, परमप्रभु यावे आ खिं, आ बाक्तीक खिं, मिल्लो माइइशो बोल्यो दरवार, यरूसलेम डा गारो, हासोर, मेगीददो नु गेजेर सहर सेल्पदा बाक्त।

१६ इजीप्त डा पिप फाराओम गेजेर सहर कली लडाइ तोशा ग्रशा, मेकेर मी सुइइशो बाक्माक्त। मेकोम मेकेर बाक्ब कनानी आन कली साइइशा, मेको सहर आ तमी, सोलोमन आ मीश कली दाइजो गेशो बाक्माक्त। यहोसु १६:१०; १राजा ३:१

१७ मिनू सोलोमनम गेजेर सहर, बेथ-होरोन,

१८ बालाथ नु मेको गोरशो रागी डा तामार नु आ एर ओंथ डा रागी,

१९ सोलोमन आ मार मार वोइक्तीक सहरपुकी, आ बग्गी नु शारा वोइक्तीके नु शारा डोइक्ब आन कली बाक्चा कली सहरपुकी यो सेल्पदा बाक्त। सोलोमनमी यरूसलेम, लेबानोन नु आ सासन पशो राज्य नेल्लेमी मार सेल्चा दाक्शो बाक्मे, मेको सेल्ने थुमा बाक्त। १राजा १०:२६

२० मिनू लीशो एमोरी, हिती, परिज्जी, हिब्वी नु यबुसी चहिं इस्राएली आन थर डा मुर मबाक्मा बाक्त।

२१ इस्राएलीपुकीमी मेको रागीम लीशो मेको आन चच युड आन कली काइ मवोइक्थु साइक्ने मचाप्शो बाक्मा बाक्त। सोलोमनमी मेको आन कली गेय पाइब वाइल सेल्शा वोइक्मी बाक्त। मेको मुल सम्म मोपान बाक्शो बाक्नीम। यहोसु १६:१०

२२ तन्न सोलोमनम इस्राएली सुइ आन कली वाइलीम वाइल मसेल्मी बाक्त। मेकोपुकी चहिं लडाइ पाइब, लडाइ पाइब आन ठेयब मुर, कप्तान, बग्गी चलेब आन ठेयब मुर नु शारा डोइक्ब सेल्मी बाक्त।

२३ मिनु सोलोमन आ ठेयब गेय पाइब ५ सहे ५० जना बाक्मा बाक्त। मेकोपुकी गेय पाइब आन कली कोत्रब बाक्मा बाक्त।

२४ मिनु फाराओ आ तमी दाऊद आ सहर रे पिप सोलोमनम सेल्शा गेशो आंम खिंम लमाक्त। सोलोमनमी मिल्लो माइशशो बोल्यो दरवार यो सेल्पदा बाक्त।

२५ मिनु सोलोमनमी परमप्रभु यावे कली सेल्शो चढेतीकेमी बर्सम खेयप सां परमप्रभु यावे आ डोंइती चोशा चढेतीक नु दुशा बाक्चा आ पर्वम चढेतीक चढेशा धूप यो चोशा चढेवा बाक्त। मोपा मेकोम परमप्रभु यावे आ खिं डा गेय नेल्ल पवा बाक्त।

### सोलोमनम जहाज सेल्पाइशशो

२६ मिनु पिप सोलोमनम लल समुन्द्र आ शुंडच एदोम रागी एलोथ आ नेक्था एस्योन-गेबेर सहरम जहाजपुकी यो सेल्पदा बाक्त। गन्ती ३३:३५; २इतिहास ८:१७-१८

२७ हीराममी समुन्द्र आ पर्वम तुइक्ब नु जहाजम गेय पाइब मुर सोलोमन आ गेय पाइबपुकी नु गेय पपाइक्चा कली सोइक्तीमी बाक्त। १राजा १०:११

२८ मिनु मेकोपुकी जहाजम ओफीर लमा बाक्त। मिनु मेकेरे रे ४ सहे २० टलेन्ट सुन चाक्मे बाक्त। मिनु मेको पिप सोलोमन कली गेमे बाक्त। उत्पत्ती १०:२९

## १०

### शेबा डा पिपीम जाक्शो

२इतिहास ९:१-१२

१ शेबा डा पिपीममी सोलोमन आ रिम्शो पशो नेल्ल, परमप्रभु यावे आ ठेयब नें नु आ पशो नेल्ल नेना बाक्त। मिनु लोत्र लेन्ने मचाप्या डा लोत्र कुरशा सोलोमन कली नाक्चा कली जाक्माक्त। मत्ती १२:४२; १राजा ५:१४

२ मेको शुश मुर नु शुश मस्ला, सुन नु शुश क्येट लाइब हीरा दलओठम कुरपाइशशा यरूसलेम जाक्माक्त। मिनु आ थुंम बाक्शो लोत्र नेल्ल सोलोमन कली देंमाक्त।

३ मिनु सोलोमनम मेको आ हिल्लो पशो लोत्र नेल्ल लेत्ता बाक्त। मेको हिल्लो पशो लोत्र लेत्चा कली पिप कली मारेइ श्येत मदुम्माक्त।

४ मिनु शेबा डा पिपीममी सोलोमन आ जोक्तीक तुइक्तीक नेल्ले, मेको आ सेल्शो पिप आ खिं,

५ मेको आ जचा थोत्रक, मेको आ एर ओथ बाक्ब आ ठेयब गेय पाइब आन बाक्तीके, आ गेय पाइब आन गेय पशो, मेको आन फेक्शो वा, आ ग्योबपुकी, परमप्रभु यावे आ खिंम चोशा चढेतीकपुकी तशा, शुश छक लाक्माक्त।

६ मिनु मेकोमी पिप कली “गो आं रागीमी इन गेय नु जोक्तीक तुइक्तीक आ पर्वम लोत्र नेंता।

७ तन्न गो आंमा जाक्शा, मतडा सम्म थमा मसुदु। मेको आं कली नेंशो दा उइक्थ लाइ यो मनेंशो बाक्ती। इन जोक्तीक तुइक्तीक, इन पशो गेय नु इन शोंप आ पर्वम आं नेंशो क्येडा यो शुश बाक्त।

८ इन मीशपुकी नु इन गेय पाइबपुकीमी गेना हना यो इन जोक्शो तुइशशो लोत्र नेंशा ग्येरसीशो बाक्नीमी।

९ मिनु परमप्रभु यावे, इन परमप्रभु ठेयब बाक्ब। मेकोमी इन कली दाक्शा इस्राएल कली सासन पचा कली पिप सेल्लु। परमप्रभु यावेमी इस्राएली आन कली गेना हना यो दाक्ताक्ब। मोपतीके मेकोमी इन कली ठीक निसाफ पचा नु ठीक पचा कली मेको आन पिप सेल्शो बाक्त” देंमाक्त। १राजा ५:२१

१० मिनु नोले मेकोमी पिप कली सहे का २० टलेन्ट सुन, शुश मस्लापुकी नु शुश क्येट लाइब हीरापुकी गेवा बाक्त। शेबा डा पिपीममी सोलोमन कली गेशो खोदेशो पा शुश मस्ला डोंइती सुइम मचाक्मे बाक्त। टलेन्ट का ३४ किलो बाक्ब।

11 मेको नेल्ल प्रोंडशा यो हीराम आ जहाजपुकीम ओफीर रे सुन चाकबाकमा बाक्त। मेकोपुकीमी जहाजम सिरी खन्ड के शुश क्येट लाइब शी नु हीरापुकी चाकबाकमा बाक्त। १राजा ९:२७-२८

12 मिनु पिपमी मेको सिरी खन्ड के शी रे परमप्रभु यावे आ खिं नु आ बाक्तीके खिं कली क्रेसी डा ग्याइक्तीक सेल्पदा बाक्त। मिनु कुम्सो पाइब आन कली बीना नु तार पाइशशो ताप्तीक यो मेको शी के सेल्पदा बाक्त। मेको मोदेशो पा सिरी खन्ड के शी गेना यो मचाक्शो बाक्मा बाक्त। मिनु मेना रे मुल सम्म यो गेनायो मतांडसीशो बाक्ब।

13 मिनु पिप सोलोमनम शेबा डा पिपीम कली आ गेशो प्रोंडशा यो आ दाक्शा पुंडशो थोत्रक नेल्ल गेवा बाक्त। मेको नोले मेको आ गेय पाइब नेल्ल लाइशशा आ रागी लेम्माक्त।

सोलोमन आ शोंप

२इतिहास ९:१३-२८

14 सोलोमन आ बाक्तीकेम बर्स बर्सम जाक्शो सुन सहे सां ६६ टलेन्ट दुम्बाक्माक्त। टलेन्ट का ३४ किलो बाक्ब।

15 मेको प्रोंडशा, ग्याप्ब लेयब आन चाक्शो, अराब रागी डा पिपपुकी नु अर्को रागी डा सासन पाइबपुकी रे यो सुन जाक्बाक्माक्त।

16 मिनु पिप सोलोमनम तुप्शा सेल्शो सुन के सहे निक्शी टेयब तेक्तीक सेल्पदा बाक्त। मेको का सेल्चा कली ६ सहे शेकेल सुन माल्दा बाक्त। शेकेल का ११.५ ग्राम खोदेशो बाक्ब। १राजा १४:२६

17 मेकोमी तुप्शो सुन के सहे सां आइक्च आइक्च तेक्तीक यो सेल्पदा बाक्त। मेको का सेल्चा कली सहे सां शेकेल सुन माल्दा बाक्त। मिनु पिपमी मेको नेल्ल लेबानोन डा ब्वाकी माइशशो खिंम वोइक्पाइक्मी बाक्त। १राजा ७:२

18 मिनु पिपम हात्ती आ दारा के टेयब नित्तीक का सेल्शा, मेको कली क्येख सुनमी गिल्पदा बाक्त।

19 मेको नित्तीक तार डोइक्तीक ६ ओटा थेंका बाक्मा बाक्त। मेको नित्तीक आ नोले गे कुल कुल पा सेल्शो बाक्माक्त। मेको नित्तीक आ निम्फा गे गुड वोइक्तीक पाइशशो बाक्माक्त। मेको गुड वोइक्तीक आस नेक्था गुप्स निक्शी सेल्शो बाक्माक्त।

20 मेको ६ ओटा थेंका नेल्लेम एर गे का, ओंथ गे का पा १२ ओटा गुप्स बाक्मा बाक्त। मेको मोदेशो नित्तीके तेकोइ राज्य डा पिप आन परबंम मसेल्शो बाक्माक्त।

21 पिप सोलोमन आ तूतीक कचौरा नेल्ल सुन के बाक्मा बाक्त। मिनु लेबानोन डा ब्वाकी माइशशो पिप आ खिंम बाक्शो ग्योब नेल्ले क्येख सुन के बाक्मा बाक्त। चांदी के मारेइ मबाक्मा बाक्त। मारदे हना सोलोमन आ पालाम चांदी मारेइ खोदेशो मबाक्माक्त।

22 मिनु पिप नु हीराम आस जहाजपुकी टारसीस गे लाइबाक्मा बाक्त। मिनु बर्स सां सांमी मेको जहाजम काले टारसीस रे सुन, चांदी, हात्ती आन खुड, बुदी नु मजुर चाक्शा, जाक्बाक्मा बाक्त।

23 मोपा सोलोमन आ शोंप नु आ जोक्तीक तुइक्तीकेमी पिप नेल्ल आन क्येडा टेयब दुम्माक्त।

24 रागी नेल्ल डा मुयपुकी परमप्रभुम सोलोमन कली गेशो जोक्शो तुइशशो लोत्र नेंचा कली जाक्बाक्मा बाक्त।

25 मेको मोपा जाक्ब नेल्लेमी बर्स बर्सम कोसेली सुन चांदी के मार मार, फेक्तीक वा, यापुकी, मस्ला, शारा नु खच्चर चाक्बाक्मा बाक्त।

26 सोलोमनम शुश बग्गी नु शारा तेलमी बाक्त। मेको के १४ सहे बग्गी नु १२ हजार शारा बाक्मा बाक्त। मेकोमी बग्गी आन कली बग्गी वोइक्तीक सहरम वोदा बाक्त। का निक्शी आन कली चहिं आं नुन यरूसलेमम वोइक्मी बाक्त। १राजा ५:६

27 पिपमी यरूसलेमम चांदी फुल्लु खोदेशो पा तेलमी बाक्त। मिनु लेबानोन डा लाइशशो रवा आ शी चहिं शेफेलाह डा फोत्रशी रवा खोदेशो पा शुश तेलमी बाक्त।

28 सोलोमन आ शारा इजीप्त नु क्युए रे ग्याप्शा चाक्शो बाक्मा बाक्त।

29 मेकोपुकीम इजीप्त रे ६ सहे शेकेल चांदीम बग्गी नु सहे का ५० शेकेल चांदीम शारा ग्याप्बाक्मा बाक्त। मिनु पिप आ ग्याप्ब लेयबपुकीम हित्ती आन पिप नु अराम डा पिप नेल्ल आन कली लेयबाक्मा बाक्त। शेकेल का ११.५ ग्राम, तोला का खोदेशो बाक्ब।

# 11

## सोलोमन आ मीशपुकी

1 पिप सोलोमनम फाराओ आ तमी ग्युबे पा यो, मेकोमी शुश अर्को रागी डा मीश मुर, मोआबी, अम्मोनी, एदोमी, सीदोनी नु हित्ती आन कली दाक्तीमी बाक्त। ब्यवस्था १७:१७

2 परमप्रभु यावेमी इस्राएली आन कली मेको रागी डा मुर आन पर्वम “गेपुकीम मेको आन कली ग्युबे पचा मदुम्नीनी। मारदे हना मेकोपुकीम थमा पा इन थुं आन देवी देवता आन नोले खोइक्पाइक्नीम” देशो बाक्माक्त। तन्न सोलोमनम मेको आन कली दाक्तीमी बाक्त। प्रस्थान ३४:१६

3 मेको के ७ सहे ग्युबे पशो मीश नु सहे सां अरु नोले चाक्शो मीश बाक्मा बाक्त। मिनु मेकोपुकीम आ थुं क्याल्पदमे बाक्त।

4 मिनु सोलोमन खूशो दुम्मेनु, मेको आ मीशपुकीम आ थुं अरु देवी देवता आन गे हिरपदमे बाक्त। मिनु मेको आ आफ दाऊद आ थुंम खोदेशो पा आ थुं नेल्लेम परमप्रभु यावे, आ परमप्रभु आ नोले मखोदा बाक्त।

5 मोपा सोलोमन सीदोनी आन अशतोरेश देवी नु अम्मोनी आन ग्रांरा दिशो मूर्ति मोलोक आस नोले खोदा बाक्त। मोलोक नु मोलेक नें वोइशो देवता मिल्कोम यो बाक्त।

6 मोपा सोलोमनम परमप्रभु यावे आ डोंइती मार मरिश्शो बाक्मे, मेको पवा बाक्त। मेको आ आफ दाऊद खोदेशो पा आ थुं नेल्लेमी परमप्रभु यावे आ नोले मखोदा बाक्त।

7 मिनु सोलोमनम मोआब डा ग्रांरा दिशो मूर्ति केमोश नु अम्मोनी आन ग्रांरा दिशो मूर्ति मोलेक आस कली यरूसलेम आ पूर्व गे डा डोंडा काम पूजा पतीक थान सेला बाक्त। गन्ती २१:२९; २राजा २३:१३

8 मेकोमी अर्को रागी डा आ मीश नेल्ल आन कली मोदेशो पवा बाक्त। मेकोपुकीमी आन देवी देवता आन कली धूप चोशा चढेमे बाक्त।

9 मिनु परमप्रभु यावे सोलोमन क्येडा गाइक्ता बाक्त। मारदे हना परमप्रभुमी मेको नु खेयप निकशी लोत्र पशो बाक्त हना यो, मेको परमप्रभु यावे, इस्राएली आन परमप्रभु रे डोन लशो बाक्माक्त। १राजा ३:५; १राजा ९:२

10 परमप्रभु यावेमी सोलोमन कली “अरु देवी देवता आन नोले मखोतो” देशो बाक्माक्त। मो हना यो सोलोमनम परमप्रभु यावे आ शेंशो मपवा बाक्त।

11 मोपतीके परमप्रभु यावेम इस्राएली आन पिप सोलोमन कली “इ मो पशो, आं कबल प्रोंइशो नु इ कली पावो, दे आं फुल्लुम मुशा ब्रेक्शो लोत्र मटितीके गो थमा पा एको इ राज्य रोइशशा इ गेय पाइब कली गेनुड। १सामुएल १५:२८

12 मो हना यो इ आफ दाऊद आ पर्वम इ पालामी मो मपाइनुड। गो एको राज्य इ तौ आ पालाम रोइक्नुड। १राजा १२:१९

13 तन्न गो राज्य नेल्ल मरोइक्नुड। आं गेय पाइब दाऊद नु आं योत्रशो सहर यरूसलेम आस पर्वम इस्राएल डा थर का इ तौ कली गेनुड” देंमाक्त।

## सोलोमन आ जोरी सत्रु

14 मिनु परमप्रभु यावेमी इस्राएली आन मुर एदोम डा पिप आ खिं डा मुर हादाद कली सोलोमन आ जोरी सत्रु सेल्शा पोक्गा बाक्त।

15 डोंइती दाऊदम एदोमी नु लडाइ पवानु, मेको आ लडाइ पाइब आन ठेयब मुर योआबमी मेकेर बेक्शो मुर आन कली थिम्थ लमेनु, मेको रागी डा वोंइश मुर नेल्ल आन कली साइशो बाक्माक्त। २सामुएल ८:१४

16 मेना योआब नु इस्राएली नेल्लेम एदोम डा वोंइश मुर नेल्ल आन कली साइक्ने मथुम्मे सम्म मेकेर ६ महिना बाक्मा बाक्त।

17 मेना हादाद आलन बाक्माक्त। मिनु आ आफ आ गेय पाइब का निकशी एदोमी नु प्रोक्शा इजीप्त लशो बाक्माक्त।



18 मिनु मेकोपुकी मिदयान रे पारानम जाक्मा बाक्त। मिनु पारान रे सुइ मुर आन कली लाइश्शा इजीप्त डा पिप फाराओ आ बाक्तीके लशो बाक्मा बाक्त। मिनु फाराओमी हादाद कली आ रागीम खिं का रू नु जचा तूचा थोवक गार पा गेशा वोइश्शो बाक्माक्त।

19 फाराओमी हादाद कली शुश दाक्ता बाक्त। मिनु मेकोम आ मीश पिपीम तहपेनेस आ लोकब का गेशा ग्युंवे पदा बाक्त।

20 मिनु तहपेनेस आ लोकबमी हादाद रे गेनुबाथ नें पाइश्शो तौ का थिवा बाक्त। मिनु तहपेनेसमी मेको आल कली दूध प्रोइपाइश्शा फाराओ आ खिंम थुला बाक्त। मिनु गेनुबाथ फाराओ आ आलपुकी नुन कोल्माक्त।

21 मिनु हादाद इजीप्तम बाक्मेनु, मेकोम दाऊद बेक्शो नु मेको आ लडाइ पाइब आन ठेयब मुर योआब यो बेक्ने थुम्शो लोव्र नैना बाक्त। मिनु हादादम फाराओ कली “आं कली आं रागी लेत्चा गेयीनी” देमाक्त।

22 तन्न फाराओम मेको कली “आं रागीम इन कली मार मजाक्दीम्मे? मिनु ‘आं रागी लेश्शा लाइनुड’ देंनी” दे हिल्लो पवा बाक्त। मिनु मेकोमी “मारेइ माल्शो मबाक्ब। तन्न आं कली लचा गेयीनी” देमाक्त।

23 मिनु परमप्रभुम सोलोमन आ परबम अर्को जोरी सत्रु का यो पोकगा बाक्त। मेको एल-आदा आ तौ रेसोन बाक्माक्त। मेको आ होव्रप सोबाह डा पिप हादादेजेर रे प्रोक्शा लशो बाक्माक्त। २सामुएल ८:३

24 मिनु दाऊदम सोबाह डा लडाइ पाइब आन कली सदानु, मेको रेसोनमी आ मुर आन कली खुप्ता बाक्त। मिनु मेको मरिम्शो पाइब आन हुल डा ठेयब मुर दुम्माक्त। मिनु मेको मरिम्शो पाइब आन हुल दमस्कस लमा बाक्त। मिनु मेकोपुकीम मेकेर ग्राशा दमस्कस आन के सेल्मे बाक्त। मिनु मेको मेकेर डा पिप दुम्माक्त। २सामुएल १०:१८

25 रेसोन सोलोमन बाक्म सम्मन इस्राएल आ जोरी सत्रु दुम्माक्त। मिनु हादाद आ मरिम्शो पशोम, मेकोम मरिम्शो तेम्दा बाक्त। मिनु अरामम हुकुम पवा बाक्त। मिनु मेको इस्राएल आ जोरी सत्रु दुम्माक्त।

### येरोबाम जोरी सत्रु दुम्शो

26 एफ्राइम आ थर, सेरेदाह सहर डा नेबात आ तौ येरोबाम सोलोमन आ गेय पाइब बाक्माक्त। मेको आ ममा आ नें सेरूआह बाक्माक्त। मेको आ वोंइश बेक्शो मीश मुर बाक्माक्त। मेको येरोबाममी यो सोलोमन कली श्येत गेचा गोवा बाक्त।

27 मेकोमी पिप कली मार पवा बाक्त देंशा हना, सोलोमनम मेको कली मिल्लो बोल्यो दरवार सेल्पाइश्शो नु आ आफ दाऊद आ सहर डा ब्रेश्शो गारो सुपाइश्शो बाक्माक्त। १राजा ९:१५, २४

28 येरोबाम थाम्पा गेय पाइब मुर का बाक्माक्त। मेको ठिटा मुर आ गेय पशो तशा, सोलोमनमी मेको कली योसेफ आ खिं डा गेय पाइब आन कली कोव्रब मुर सेला बाक्त।

29 मिनु येरोबाम यरूसलेम रे अर्को रागी लना लन बाक्माक्त। मेना परमप्रभु यावे आ लोव्र पाइब शिलो सहर डा अहीयाहमी मेको कली लाम गुमा बाक्त। अहीयाहम नक वा फेक्शो बाक्माक्त। लाम गुम्सानु मेको निक्शी ला बाक्सा बाक्त।

30 मिनु अहीयाहमी मेको आ फेक्शो नक वा खाक्शा १२ टुक्रा सेला बाक्त।

31 मिनु मेकोमी येरोबाम कली “१० टुक्रा गुम्सो। मारदे हना परमप्रभु यावे, इस्राएली आन परमप्रभुमी ‘गो एको राज्य सोलोमन आ गुड रे रोइक्नुड। मिनु इ कली १० थर गेनन। १राजा १२:१५; १राजा १४:२

32 थर का मेको केन लीब। आं गेय पाइब दाऊद नु यरूसलेम आ परबम मोदेशो दुम्ब। मारदे हना गो यरूसलेम सहर इस्राएली आन थर नेल्ल आन दाते रे आं के दुम्पाइश्शा योव्रता। भजन संग्रह १३२:१३

33 मेकोमी आं कली प्रोइतीके, गो मो पाइनुड। मेकोमी सीदोनी आन देवी अशतोरेथ, मोआब डा देवता केमोश नु अम्मोनी आन देवता मोलेक कली पूजा पाप्तु। मेको आं लाम मगा। मेकोमी आं डोंइती

मार ठीक बाक्मे, मेको मपावो। मेकोम आ आफ दाऊदम पशो खोदेशो पा, आं फुल्लुम मुशा ब्रेकशो लोत्र नु आं निसाफ पतीक लोत्र मपावो। मोलेक देवता कली मिल्लोम यो देशो बाक्त।

34 मो हना यो गो मेको आ राज्य नेल्ल मरोइक्नुड। गो मेको कली मबेक्म सम्म सासन पाइब सेल्नुड। मेको आं योत्रशो गेय पाइब नु आं शेंशो नु आं फुल्लुम मुशा ब्रेकशो लोत्र टीब दाऊद आ पर्वम मोदेशो पाइनुड। २सामुएल ७:१२

35 तन्न गो मेको आ राज्य आ तौ रे १० थर रोइश्शा इ कली गेनन।

36 थर का चहिं गो मेको आ तौ कली गेनुड। मोपा आं योत्रशा बाक्शो सहर यरूसलेमम आं गेय पाइब दाऊद आ मुर का लीमल। १राजा १५:४; २राजा ८:१९

37 गो इ कली सासन पपाइक्नुड। गे इ दाक्शो नेल्ल आन कली सासन पाइनेवे। गे इस्राएल डा पिप दुम्नेवे।

38 मिनु गे आं गेय पाइब दाऊद खोदेशो पा आं शेंशो नेल्ल पाप्तीवी नु आं लांम गाक्ते हना, आं डोंडती मार ठीक बाक्मे, मेको नेल्ल पाप्तीवी हना, आं फुल्लुम मुशा ब्रेकशो लोत्र नु आं शेंशो नेल्ल आं गेय पाइब दाऊदम खोदेशो पा टिप्तीवी हना, गो गे नु बाक्नुड। गो इ खिं कली गेना हना यो लीपाइक्नुड। मिनु इस्राएल इ कली गेनन। १राजा ९:४

39 मिनु गो दाऊद आ चच युइ आन कली सजाइ गेनुडमी। तन्न गेना हना यो कली ममाइ' दे परमप्रभुम देशो बाक्ब" देंमाक्त।

40 मोपतीके सोलोमनमी येरोबाम कली साइक्चा मला बाक्त। तन्न येरोबाम इजीप्त डा पिप शीशक आ बाक्तीक प्रोक्शा लमाक्त। मिनु सोलोमन मबेक्म सम्म मेकेर बाक्माक्त। १राजा १४:२५

### सोलोमन बेक्शो

41 मिनु सोलोमनम पशो अरु गेय, आ जोक्तीक तुइक्तीक, मार, मेको सोलोमन आ इतिहासम ब्रेकशो मबाक्बा डा? २इतिहास ९:२९-३१

42 सोलोमनमी यरूसलेमम बाक्शा, इस्राएली नेल्ल आन कली ४० बर्स सम्म सासन पवा बाक्त।

43 मिनु नोले मेको बेक्माक्त। मिनु आ आफ दाऊद आ सहरमी थिम्चा पुंडसे बाक्त। मिनु मेको आ पा डा आ तौ रेहोबाम पिप दुम्माक्त।

## 12

### रेहोबामम इस्राएल कली मरिम्शो पशो

#### २इतिहास १०:-

1 रेहोबाम शेकेम सहर लमाक्त। मारदे हना इस्राएली नेल्ले मेको कली पिप सेल्चा कली मेकेर लशो बाक्मा बाक्त।

2 मिनु नेबात आ तौ येरोबामम मेको लोत्र नेना बाक्त। मेको मेना सम्म इजीप्त रागीमी बाक्शो बाक्माक्त। मेको सोलोमन पिप क्येडा प्रोक्शा, लशो बाक्माक्त। मिनु येरोबाम इजीप्त रे लेम्माक्त। १राजा ११:४०

3 मोपतीके मुरपुकीम येरोबाम कली ब्रेत्थ सोइक्तमे बाक्त। मिनु मेको नु इस्राएली नेल्ल जाक्शा रेहोबाम कली

4 "इन आफोमी आंइ कली शुश श्येत गेप्टु। मिनु मुल गे इन आफ खोदेशो मपथु, आंइ कली मोदेशो श्येत रे प्रोनीन। मिनु गो इन गेय पाइब दुम्नीकी" देंमा बाक्त।

5 मिनु रेहोबामम मेको आन कली "आं कली नाक्त सां सम्म मिम्चा गेयीनी। मिनु लेंशा जाक्कीन" देंमाक्त। मोपतीके मुरपुकी खिं लमा बाक्त।

6 मिनु पिप रेहोबाममी आ आफ सोलोमन आ पाला डा सल्ला गेब खाल्पापुकी नु सल्ला पुंडशा "एको मुर आन कली गो मार देंड, गे मार सल्ला गेनीनी?" दे हिल्लो पामी बाक्त।

7 मिनु मेकोपुकीमी "मुलाक्त गे मेको मुर आन कली रिम्शो पाइतीनी हना, गे मेको आन गेय पाइब खोदेशो दुमीन। मिनु मेको आन कली रिम्शो लोत्र पने। मिनु नोले मेकोपुकी गेना हना यो इन गेय पाइब दुम्नीम" देंमा बाक्त।

8 तन्न मेकोमी मेको खाल्पा आन सल्ला मबिस्से बाक्त। मिनु मेकोमी आ खोदेशो आ नु कोल्शो सल्ला गेब ठिटा आन कली सल्ला पुना बाक्त।

9 मिनु मेकोमी मेको आन कली “गे मार देंनीनी? मुरपुकीमी ‘इन आफोम शुश श्येत गेप्टु’ देंतेकम। मुल गो मेको आन कली मार देंचा माल्नुडा?” दे हिल्लो पामी बाक्त।

10 मिनु मेको नु कोल्शो ठिटापुकीम मेको कली “इन कली ‘इन आफोम शुश श्येत गेप्टु, मुल गे आंइ कली मेको श्येत रे प्रोनीनु’ देंब आन कली गे मार देंचा माल्नीनी देंशा हना ‘आं आइक्च ब्रेचो आं आफ आ क्रातो क्येडा यो ठेयब बाक्ब।

11 आं आफोम इन कली श्येत गेप्टु। मुल गो इन कली मेको क्येडा यो शुश श्येत गेनुड। आं आफोम इन कली कोक्केम तुप्पाइशो बाक्त। तन्न मुल गो इन कली बिच्छीम क्राइक्पाइक्ननी” दे मतीन” देंमा बाक्त।

12 मिनु पिपमी नाक्त सां नोले जाक्कीन, दे सोइशशो येरोबाम नु मुर नेल्ले पिप रेहोबाम आ बाक्तीक जाक्मा बाक्त।

13 मिनु पिपमी मेको खाल्पा आन गेशो सल्ला मनेंथु, मेको आन कली मरिम्शो लोत्र पाइक्मी बाक्त। हितोपदेस १५:१

14 मेको ठिटा आन गेशो सल्ला बिश्शा, मुर आन कली “आं आफोम इन कली श्येत गेप्टु। मुल गो इन कली मेको क्येडा यो शुश श्येत गेनुड। आं आफोमी इन कली कोक्केम तुप्पाइशो बाक्त। तन्न मुल गो इन कली बिच्छीम क्राइक्पाइक्ननी” दे माइक्मी बाक्त।

15 मोपा पिपम मेको मुर आन लोत्र मनेना बाक्त। मारदे हना, शिलो सहर डा अहीयाह रे पा नेबात आ तौ येरोबाम कली देंशो लोत्र गाप्चा कली परमप्रभु यावेमी मोदेशो पशो बाक्माक्त। १ राजा ११:२९-३१

### येरोबाम कली पिप सेल्चशो

16 मिनु इस्राएली नेल्लेमी पिपम मेको आन लोत्र मनेंशो तुइशशा, मेकोपुकीम पिप कली “दाऊद नु आंइ के ततीक मार बाक्बा डा? येस्से आ तौ नु आंइ के ततीक मारइ मबाक्ब। इस्राएली, आंम आंम खिं लेतीन। दाऊद गे आंम थुती थाती पांइसो” देंमा बाक्त। मोपतीके इस्राएली आन आन खिं लेम्मा बाक्त। २सामुएल २०:१

17 तन्न पिप रेहोबामम यहूदा डा सहरम बाक्ब इस्राएली आन कली सासन पना पन बाक्माक्त।

18 मिनु पिप रेहोबामम वाइल आन गेय कोत्रब अदोराम कली सोइक्ता बाक्त। तन्न इस्राएली नेल्लेम मेको कली फुल्लु आप्शा सदमे बाक्त। मोपतीके पिप रेहोबाम रीब पा आ बग्गी डोइशशा यरूसलेम प्रोकमाक्त।

19 मोपतीके मेको नाक्त रे मुल सम्म इस्राएलीपुकी दाऊद आ खिं डा मुर नु जोरी सत्रु दुम्शो बाक्नीम।

### येरोबाम इस्राएल डा पिप दुम्शो

#### २इतिहास ११:१-४

20 मिनु इस्राएली नेल्लेमी “येरोबाम लेशशा जाक्शो बाक्ब” देंशो लोत्र नेंशा, मेको कली ब्रेथ सोइक्तमे बाक्त। मिनु मेको कली इस्राएल डा पिप सेल्मे बाक्त। यहूदा आ थर डा मुर ला दाऊद आ खिं डा मुर आ नोले खोदमे बाक्त।

21 मिनु सोलोमन आ तौ रेहोबाम यरूसलेमम जाक्शा, इस्राएली नु लडाइ पा आ राज्य लेत्चा कली यहूदा नु बेन्यामीन आस थर डा लाख का ८० हजार लडाइ पाइब आन कली खुप्तीमी बाक्त।

22 तन्न परमप्रभुमी आ मुर शेमायाह कली लोत्र पवा बाक्त।

23 मार लोत्र पवा बाक्त देशा हना “सोलोमन आ तौ यहूदा डा पिप रेहोबाम, यहूदा नु बेन्यामीन आस थर डा मुर नेल्ल नु लीशो मुर आन कली,

24 परमप्रभु यावेमी ‘गेपुकी आंम लोकब इस्राएली नु लडाइ पचा कली इर मलने। गे नेल्ल इन खिं खिं लेशशा लने। मारदे हना एको आं मिम्शा पशो बाक्ब’ देंनो” देंमाक्त। मोपतीके मेकोपुकी परमप्रभु यावे आ देशो खोदेशो पा लडाइ पथ मलथु, आन खिं खिं लेशशा लमा बाक्त।

### येरोबाम आ पाप

25 मेको नोले येरोबाममी एफ्राइम डा पहाडम बाक्शो शेकेम सहर सेला बाक्त। मिनु आ रागी बोल्यो सेल्शा, मेकेर बाक्माक्त। मेकेर रे लशा मेकोम पेनुएल सहर सेला बाक्त।

26 मिनु येरोबामम आ थुंमी “एको राज्य दाऊद आ खिं गेन लेशशा लाइब।

27 एको मुरपुकी गेना हना यो परमप्रभु यावे आ खिं यरूसलेमम चढ़ेथ लाम्तेक्म हना, मेको आन थुं आन ठेयब मुर यहूदा आ खिं डा पिप रेहोबाम गे लेप्ब। मेकोपुकीम आं कली साइशशा यहूदा डा पिप रेहोबाम गे लेत्नीम” दे मिम्शो बाक्माक्त।

28 मिनु पिपम सल्ला पा सुन के बाछा निक्शी सेल्पदा बाक्त। मिनु मेकोम मुर आन कली “गे मुल यरूसलेम लशा शुश श्येत जाइनीनी। इस्राएली, इन कली, इजीप्त रे गुइशा चाक्ब देवता एकेन बाक्नीम” दे माइक्मी बाक्त। प्रस्थान ३२:४,८

29 मिनु मेकोमी मेको बाछा का बेथेल सहरम नु का चहिं दानम वोदा बाक्त। न्यायाधीस १८:३०

30 मिनु मेको मो पशो इस्राएली पाप दुम्माक्त। मुरपुकी मेको देवता आस कली पूजा पचा कली बेथेल नु दान सम्म लाइबाक्मा बाक्त। १ राजा १४:१६

31 मिनु येरोबामम डांडा तार यो पूजा पतीक थानपुकी सेला बाक्त। मिनु मेकेर लेवी आन मुर मबाक्तेक्म हना यो अर्को थर डा मुर रे चढ़ेबपुकी योव्रशा वोइक्मी बाक्त।

32 मिनु येरोबामम ८ महिना डा १५ नाक्त यहूदा डा चाड खोदेशो पा चाड का मानेतीक नाक्त सेला बाक्त। मिनु थानपुकीम क्योरशा चढ़ेपपाइक्मी बाक्त। मेकोमी आ सेल्शो बाछा आस कली यो मार मार क्योरशा चढ़ेपपाइक्मी बाक्त। मेकोमी बेथेलम आ सेल्शो डांडा डा थानपुकीमी यो चढ़ेब आन कली योव्रशा वोइक्मी बाक्त।

33 मेकोम ८ महिना डा १५ नाक्त आ देशो ना बेथेल डा आ सेल्शो चढ़ेतीकेम मार मार चढ़ेवा बाक्त। मोपा मेकोम इस्राएली आन कली चाड का मानेतीक नाक्त सेला बाक्त। मिनु मेकोमी धूप चोवा बाक्त।

## 13

यहूदा रे जाक्शो परमप्रभु आ मुर

1 मिनु येरोबाम धूप चोचा कली चढ़ेतीक आ नेक्था राम्मेनु, परमप्रभु आ मुर का परमप्रभु यावे आ लोत्र कुरशा यहूदा रे बेथेलम जाक्माक्त।

2 मिनु मेकोमी मेको चढ़ेतीक आ पबंम परमप्रभु यावे आ लोत्र पा “ए चढ़ेतीके! ए चढ़ेतीके! परमप्रभु यावेमी ‘दाऊद आ खिं रे योसीयाह नें पाइशशो आल का जरमेब। मिनु मेकोमी इर थान डा धूप चोइब चढ़ेब आन कली क्योरशा इ तार चढ़ेब। मेको आन रुश इ तार चोइब’ देशो बाक्ब” देंमाक्त। २ राजा २३:१६, २०

3 मेको नाक्त मेको मुरुमी चिन्ड का कोइदा बाक्त। मेकोमी “परमप्रभु यावे आ लोत्र आ चिन्ड मार बाक्ब देशा हना, मेको चढ़ेतीक ब्रेप्ब। मिनु मेकेर बाक्शो पुलु चहिं लाडगाम ब्राइब” देंमाक्त।

4 मिनु येरोबामम परमप्रभु आ मुरुम बेथेल डा चढ़ेतीक आ पबंम ठेयब सेंदा पा देशो लोत्र नेना बाक्त। मिनु मेकोम चढ़ेतीक रे आ गुइ दिंशा “मेरे कली ग्याइक्तीन” देंमाक्त। तन्न येरोबाम आ गुइ मुक्ने मचबा बाक्त।

5 परमप्रभु यावे आ लोत्रमी आ मुर रे देशो लोत्र गाप्शा, चढ़ेतीक ब्रेम्माक्त। पुलु यो लाडगाम ब्रेमाक्त।

6 मिनु पिपमी परमप्रभु आ मुर कली “आं गुइ डोंइती डा खोदेशो दुम्ल, दे परमप्रभु यावे, इन परमप्रभु कली आं पबंम पुनीन” देंमाक्त। मिनु पिप आ देशो खोदेशो पा मेको परमप्रभु आ मुरुम परमप्रभु यावे कली पुना बाक्त। मिनु पिप आ गुइ डोंइती डा खोदेशो दुम्माक्त। प्रस्थान ८:४

7 मिनु पिपम परमप्रभु आ मुर कली “गो नु आं खिं गाक्कीन। मिनु मारेइ जचा थोव्रक जने। मिनु गो इन कली कोसेली गेनन्नी” देंमाक्त।

8 तन्न मेको परमप्रभु आ मुरुमी पिप कली “गे आं कली इन राज्य उइक्थ पा योक्शा गेतीनी हना यो, गो इन खिं मलाइनुड। गो जचा थोव्रक यो मजाइनुड, ब्वाक्कु यो मतनुड।

9 मारदे हना परमप्रभु यावेमी आं कली 'गे मेकेर जचा थोत्रक मजावो। ब्वाक्कु यो मतूडो। मिनु इ लशो लां रे लेशशा मपिवो' देशो बाक्ब" देमाक्त।

10 मोपतीके मेको अर्को लां रे पा लोम्माक्त। डोंडती बेथेल जाक्शो लां रे मलेम्माक्त।

11 मेना बेथेलमी खूशो परमप्रभु यावे आ लोत्र पाइब मुर का बाक्माक्त। मिनु मेको आ तौपुकी जाक्शा, मेको नाक्त परमप्रभु आ मुरुम बेथेलम पशो गेय नेल्ल शेंदमे बाक्त। मेकोपुकीम मेकोमी पिप कली देशो लोत्र यो आन आफ कली शेंदमे बाक्त।

12 मिनु मेको आन आफोमी मेको आन कली "मेको तेको लां रे लम?" दे हिल्लो पामी बाक्त। मिनु आ तौपुकीम यहूदा रे जाक्शो मेको परमप्रभु आ मुर लशो लां कोइदमे बाक्त।

13 मिनु मेकोमी आ तौ आन कली "आं कली गधा काम लगम पाइशशा गेयीनी" दे माइक्मी बाक्त। मिनु मेकोपुकीम मेको कली गधा काम लगम पाइशशा गेमे बाक्त। मिनु मेको गधाम डोइशशा, मेको मुर आ नोले खोदा बाक्त।

14 मिनु मेकोमी परमप्रभु आ मुर माल्शा, मेको कली रवा आ पुंमी नाइशशा बाक्शो थिदा बाक्त। मिनु मेकोमी मेको कली "यहूदा रे जाक्शो परमप्रभु आ मुर गेन ननी?" दे हिल्लो पवा बाक्त। मिनु मेकोम "ओं, गोन नड" देमाक्त।

15 मिनु मेकोमी मेको कली "गो नु आं खिं लशा, मारेइ जचा थोत्रक जने" देमाक्त।

16 तन्न मेकोमी "गो गे नु लेशशा लने मचाप्नुड। इन खिंम ओवने मचाप्नुड। गो एको रागीम मारेइ जने तूने मचाप्नुड।

17 मारदे हना परमप्रभु यावेमी 'गे मेको रागीम जचा थोत्रक मजावो। ब्वाक्कु यो मतूडो। इ लशो लां रे मलेतो' देशो बाक्ब" देमाक्त।

18 मिनु मेको परमप्रभु यावे आ लोत्र पाइब खूशोमी मेको कली "गो यो इन खोदेशो परमप्रभु यावे आ लोत्र पाइब नड। मिनु परमप्रभु यावे आ स्वर्ग डा गेय पाइब काम गो नु जचा तूचा कली इन कली आं खिंम चाक्चा माल्नेवे देत" देमाक्त। तन्न मेकोमी मेको कली जोल पाइशशा बाक्माक्त।

19 नोले मेको परमप्रभु आ मुर लेशशा, मेको नु लमाक्त। मिनु मेको आ खिंम जवा तूडा बाक्त।

20 मिनु मेकोपुकी जना जन बाक्मानु, परमप्रभु यावेमी मेको लेशशा चाक्ब, आ लोत्र पाइब खूशो कली लोत्र पपदा बाक्त।

21 मिनु मेकोमी यहूदा रे जाक्शो, परमप्रभु आ मुर कली ठेयब सेंदा पा "परमप्रभु यावेमी 'गे परमप्रभु यावे आ लोत्र मटिवी। मिनु गे परमप्रभु यावे, इ परमप्रभु आ अरेशो मटिवी।

22 मेको आ मजावो, मतूडो देशो रागीम लेशशा, जथ तूथ जाक्ते। मोपतीके मुल इ बेक्शो रां इ किकी पिपी आन तुरसुम मथिम्सीब' देशो बाक्ब" देमाक्त।

23 मिनु मेको परमप्रभु आ मरुम जने तूने थुमा नोले, मेको कली लेशशा चाक्ब परमप्रभु यावे आ लोत्र पाइब खूशोमी मेको कली आ लगम पाइशशा गधा गेवा बाक्त।

24 मिनु मेको लना लन बाक्मेनु लांम गुप्स का ग्रूशा मेको कली सदा बाक्त। मिनु मेको आ बेक्शो रां लांम गोल्शा लीमाक्त। गधा मेको आ नेक्थान राप्शा बाक्शो बाक्माक्त। मिनु गुप्स यो मेको आ नेक्था राप्शा बाक्शो बाक्माक्त। १ राजा २०:३६

25 मिनु मेको लां रे पा गाक्ब मुरपुकीम मेको आ बेक्शो रां लांम गोल्शा बाक्शो नु गुप्स मेको आ नेक्थान बाक्शो तामे बाक्त। मिनु मेकोपुकीम मेको खूशो परमप्रभु यावे आ लोत्र पाइब आ सहर लशा, मेको लोत्र शोव्रडमे बाक्त।

26 मिनु मेको कली लां रे लेशशा चाक्ब मेको खूशो परमप्रभु यावे आ लोत्र पाइबमी मेको लोत्र नेना बाक्त। मिनु मेकोम "मेको परमप्रभु आ मुर बाक्ब। मेकोम परमप्रभु यावे आ लोत्र मटिशो बाक्त। मोपतीके परमप्रभु यावेम मेको कली गुप्स कली गेवा बाक्त। मिनु परमप्रभु यावेम मेको आ पर्बम पशो लोत्र गाप्चा कली गुप्सम मेको कली सदा बाक्त" देमाक्त

27 मिनु मेको परमप्रभु यावे आ लोत्र पाइब खूशोमी आ तौ आन कली "आं कली गधा काम लगम पाइशशा गेयीनी" दे माइक्मी बाक्त। मिनु गधाम लगम पाइशशा गेमे बाक्त।

28 मिनु मेको लमेनु, मेको मुर बेक्शा लांम गोल्शा बाक्शो नु गधा नु गुप्स मेको आ नेक्था राप्शा बाक्शो थिदा बाक्त। मेको गुप्सम मेको बेक्शो मुर कली मब्वशो बाक्माक्त। गधा कली यो मसाइशो बाक्माक्त।

29 मिनु मेको परमप्रभु यावे आ लोव्र पाइब खूशोमी मेको परमप्रभु आ मुर आ बेक्शो रां गुप्शा गधाम वोदा बाक्त। मिनु मेको आ परबंम रोंका पा थिम्चा कली आ सहरमी चाक्गा बाक्त।

30 मिनु मेकोम मेको बेक्शो मुर कली आ तुरसुमीन थिमा बाक्त। मिनु मेकोपुकीम “ए आंइ लोकब, ए आंइ लोकब” दे रोंका पामे बाक्त। येरमीया २२:१८

31 मिनु मेको कली थिम्ने थुम्शा, मेको परमप्रभु यावे आ लोव्र पाइब खूशोमी आ तौ आन कली “गो बेक्डा नोले आं कली यो मेकेर वोतीन। आं रुश मेको परमप्रभु आ मुर आ नेक्था लीमल।

32 मारदे हना मेको मुर आ देशो, बेथेलम बाक्शो परमप्रभु यावे कली चढ़ेतीक नु सामरीया सहर डा डांडा डा थान आन परबंम देशो नेल्ल थमा पा गाप्ब” देमाक्त।

33 मिनु मेको नोले यो येरोबामम आ मरिम्शो पतीक मप्रौना बाक्त। मेकोम डांडाम बाक्शो थानम थर नेल्ल डा मुर रे चढ़ेब योव्रशा वोइक्ना वोइक्न बाक्माक्त। सुइ मुर चढ़ेब दुम्चा दाक्ताक्व हना, मेको कली तेकोइ डांडा का डा चढ़ेब सेल्शा वोदा बाक्त। १राजा १२:३१; प्रस्थान २८:४१

34 मेको येरोबाम आ खिं डा पाप बाक्त। मोपतीके मेको आ खिं मलीथु, रागी रे क्याम्चा पुंडसे बाक्त।

## 14

### येरोबाम आ तौ बेक्शो

1 मिनु येरोबाम आ तौ अबीयाह रोइ पवा बाक्त।

2 मिनु येरोबाममी आ मीश कली “गे येरोबाम आ मीश नवे, दे मुरुम मतुइक्पाइक्चा डा पा वा फेक्सो। मिनु शिलो सहरम लावो। मेकेर परमप्रभु यावे आ लोव्र पाइब अहीयाह बाक्ब। मेकोम आं कली एको मुर आन पिप दुम्नेवे देशो बाक्त। १राजा ११:२९-३१

3 मिनु गे १० ओटा शोब्ले, आइक्च बटुकु नु गर का खुदो लाइशशा, मेको आ बाक्तीक लावो। मिनु मेकोमी आल कली मार दुम्बा, मेको इ कली शेंब” दे मदा बाक्त।

4 मोपतीके येरोबाम आ मीशम मेकोम देशो खोदेशो पवा बाक्त। मिनु मेको रीब पा शिलो अहीयाह आ खिं लमाक्त। मेना अहीयाह मिक्च मताइब दुम्शो बाक्माक्त। मारदे हना मेको खूशो दुम्शो बाक्माक्त।

5 तन्न परमप्रभु यावेमी अहीयाह कली “येरोबाम आ मीश आ रोइ पशो तौ आ परबंम इ कली हिल्लो पथ जाक्ब। मिनु गे मेको कली आं देशो लोव्र मतो” देमाक्त। मिनु मेको अर्को मीश मुर दुम्खु पा जाक्माक्त।

6 मिनु अहीयाहमी आ लाप्चोम खोइल थेक्शो नेंशा, मेको कली “ए येरोबाम आ मीश खिंङगा पिवो। गे मारदे अर्को मीश मुर खोदेशो दुम्खु पवी? गो इ कली मरिम्शो लोव्र देंचा मालनुड।

7 गे येरोबाम कली परमप्रभु यावे, इस्राएली आन परमप्रभुमी ‘गो इ कली मुर आन दाते डा ठेयब मुर सेल्ता। मिनु आं मुर इस्राएली, आन कली सासन पाइब सेलतन। १राजा ११:३७

8 गो दाऊद आ खिं डा मुर रे राज्य खोइशशा, इ कली गेतन। तन्न गे आं गेय पाइब दाऊद खोदेशो म्दुमे। मेकोमी आं डोंइती मार ठीक बाक्मे, मेको पना पन आं देशो टिप्तु। मिनु आ थुं नेल्लेम आं नोले खोइक्ती।

9 तन्न गे इ क्येडा डोंइती डा मुर नेल्ल आन क्येडा यो शुश मरिम्शो पाप्तीवी। गे इ कली यपाइशशा देवी देवता आन मूर्ति सेल्शा, आं कली गाइक्पाइक्ती। मिनु गे नोले शोंइसाक्वे।

10 मोपतीके गो येरोबाम आ खिंम श्येत चाक्शा, मरिम्शो पाइनुड। गो इस्राएलम बाक्शो येरोबाम आ खिं डा वोंइश मुर, वाइल बाक्तेक्म हना यो, अरु मुर बाक्तेक्म हना यो, नेल्ल आन कली साइक्नुडमी। गो मेको आन कली मनुम्मा सम्म येरोबाम आ खिं कली गोबर चोशो खोदेशो पा चोइनुड। १राजा १५:२९; १राजा २१:२१

11 सहरम बेक्शो येरोबाम आ खिं डा मुर आन कली कुचुमम ब्वाइनीम। मिनु रू मेर बेक्शो आन कली चिक्बीम ब्वाइनीम' दे परमप्रभु यावेमी देशो बाक्ब। १राजा १६:४; १राजा २१:२४

12 मुल गे लेशशा इ खिं लावो। गे सहरम ओवडे चोटी इ आल बेक्ब।

13 मिनु इस्राएली नेल्लेमी मेको आ परबम रोंका पा, मेको कली थिम्नीम। मारदे हना मेको का ला रिम्शो पा थिम्चा पुंडसीब बाक्त। परमप्रभु यावे, इस्राएली आन परमप्रभुमी मेको आल कली दाक्ताक्व।

14 मिनु परमप्रभु यावेमी इस्राएलमी पिप का सेल्ब। मेकोमी येरोबाम आ खिं कली क्याम्ब। मेको मुलाक्तीन बाक्ब। १राजा १५:२९

15 परमप्रभु यावेम इस्राएल कली ब्वाक्कुम एर ओंथ पा हिम्शो बुदी मीलु घांस खोदेशो सेल्ब। मेकोमी इस्राएली आन किकी पिपी आन कली गेशो, एको रिम्शो रागी रे खेरब। मिनु मेको आन कली युफ्रेटीस खोला आ आडक्वी हांबुम एर ओंथ ब्रपाडक्ब। मारदे हना मेकोपुकीम देवी आ मूर्ति पाइशो थाम सेल्शा, परमप्रभु यावे कली गाइक्पाइक्तेक्म। २राजा १७:२३

16 मिनु मेकोमी येरोबामम मरिम्शो पतीके नु इस्राएली आन कली मरिम्शो पपाइशो आ परबम इस्राएल कली प्रॉडब" देमाक्त। १राजा १२:२८-३०; १राजा १३:३४

17 मिनु येरोबाम आ मीश बोक्शा, आ खिं तिरचा सहर लेम्माक्त। मिनु मेको आ खिं डा लाप्चो जाक्मेनु, आल बेक्माक्त।

18 मिनु परमप्रभु यावेम आ गेय पाइब, अहीयाह रे पा देशो खोदेशो पा इस्राएली नेल्लेमी मेको आ परबम रोंका पा थिम्मे बाक्त।

19 येरोबाम आ पशो अरु गेय, मेको आ पशो लडाइपुकी, मेकोम दोदेशो पा सासन पवा, मेको नेल्ल इस्राएल डा पिप आन इतिहासम ब्रेक्शो बाक्ब।

20 येरोबाममी २२ बर्स सासन पवा बाक्त। मिनु मेको बेक्माक्त। मिनु मेको आ पा डा आ तौ नादाब पिप दुम्माक्त। १राजा १५:२५

### यहूदा डा पिप रेहोबाम

#### २इतिहास १२:-

21 मिनु सोलोमन आ तौ रेहोबाम यहूदा डा पिप दुम्माक्त। मेको ४१ बर्स दुम्शो बाक्माक्त। मेकोम यरूसलेम सहरम १७ बर्स सासन पवा बाक्त। परमप्रभु यावेमी इस्राएली आन थर नेल्ल आन दातेम बाक्चा कली मेको सहर योव्रशो बाक्माक्त। रेहोबाम आ ममा आ नें नामा बाक्माक्त। मेको अम्मोनी का बाक्माक्त। १राजा १२:१७

22 यहूदा डा मुरपुकीम परमप्रभु यावे आ डोंइती मार मरिम्शो बाक्मे, मेको पामे बाक्त। मेकोपुकीमी आन किकी पिपीम मरिम्शो पशो क्येडा यो शुश मरिम्शो पामे बाक्त। परमप्रभु यावे कली थाम्पा रुश पपदमे बाक्त।

23 मेकोपुकीम इर डांडा डांडा डा थानम, देवी आ मूर्ति पाइशो थाम नु लाइशो डांडा डा शुश सफा पाइशो रवा आन आगाम थान सेल्समा बाक्त। २राजा १६:१-४

24 मेको रागी डा थानम तेल्लेम वोंइश मुरपुकी यो बाक्मा बाक्त। मेकोपुकीमी परमप्रभु यावेमी आन डोंइती रे खेरशो रागी रागी डा मुर आन ग्रॉग्रा दिशो नेल्ल पामे बाक्त।

25 मिनु रेहोबामम सासन पवा आ ५ बर्सम इजीप्त डा पिप शीशकमी यरूसलेम कली लडाइ तोवा बाक्त। १राजा ११:४०

26 मिनु मेकोमी परमप्रभु यावे आ खिं नु पिप आ खिं डा शुश क्येट लाइब मारेइ मारेइ रोइशशा लदा बाक्त। मेकोम सोलोमन आ सेल्शो सुन के तेक्तीक नेल्ल योल्दा बाक्त। १राजा १०:१६

27 मिनु पिप रेहोबामम मेको आ पा डा कांसा के तेक्तीक सेल्शा, पिप आ खिं डा लाप्चो खाल पाइब आन ठेयब मुर आन कली जिम्मा गेमी बाक्त।

28 मिनु पिप परमप्रभु यावे आ खिंम ओव्रमेनु, मेको खाल पाइबपुकीम मेको तेक्तीके कुरबाक्मा बाक्त। मिनु नोले लेशशा चाक्शा खाल पाइब आन कोठाम वोइक्बाक्मा बाक्त।

29 रेहोबाम आ पशो अरु गेय, मेको आ पशो नेल्ले मार, मेको यहूदा डा पिप आन इतिहासम ब्रेकशो मबाक्बा डा?

30 रेहोबाम नु येरोबाम आस दातेम गेना हना यो लडाइ दुम्स डा दुम्स बाक्माक्त।

31 मिनु रेहोबाम बेक्माक्त। मिनु मेको आ किकी पिपी नु दाऊद आ सहरम थिम्चा पुंडसे बाक्त। मेको आ ममा आ नें नामा बाक्माक्त। मेको अम्मोनी बाक्माक्त। मिनु रेहोबाम आ पा डा आ तौ अबीयाम पिप दुम्माक्त।

## 15

### यहूदा डा पिप अबीयाम

1 मिनु अबीयाम यहूदा डा पिप दुम्माक्त। मेना नेबात आ तौ येरोबाम पिप दुम्शो १८ बर्स दुम्शो बाक्माक्त। २इतिहास १३:-

2 मेकोमी यरूसलेम बर्स सां सासन पवा बाक्त। मेको आ ममा आ नें माकाह बाक्माक्त। मेको अबीशालोम आ तमी बाक्माक्त।

3 मेकोमी आ आफ खोदेशो पा मरिम्शो पवा बाक्त। मेको आ किकी दाऊद खोदेशो पा, आ थुं नेल्लेमी परमप्रभु यावे, आ परमप्रभु आ नोले मखोदा बाक्त।

4 मो हना यो परमप्रभु यावे, मेको आ परमप्रभुमी दाऊद आ पर्वम अबीयाम आ पा डा पिप दुम्पाइक्चा कली तौ का गेवा बाक्त। मोपा यरूसलेम बोल्यो सेला बाक्त। १राजा ११:३६

5 मारदे हना दाऊदमी परमप्रभु यावे आ डोंइती ठीक पशो बाक्माक्त। मेको परमप्रभु यावे आ देशो रे एर ओथ मपवा बाक्त। मेकोमी हिती उरीयाह कली मरिम्शो पशो डा लाक्शा अरु मारेइ मरिम्शो मपवा बाक्त। २सामुएल ११:-; २सामुएल १२:९

6 रेहोबाम नु येरोबाम आस दातेमी लडाइ दुम्स डा दुम्स बाक्माक्त। अबीयाम ब्रोंडम सम्म मोदेशो दुम्माक्त।

7 अबीयाम आ पशो अरु गेय, मेको आ पशो नेल्ले, मार, मेको यहूदा डा पिप आन इतिहासम ब्रेकशो मबाक्बा डा? अबीयाम नु येरोबाम आस दातेम गेना हना यो लडाइ दुम्स डा दुम्स बाक्माक्त।

8 मिनु अबीयाम बेक्माक्त। मिनु मेको दाऊद आ सहरमी थिम्चा पुंडसे बाक्त। मिनु मेको आ पा डा आ तौ आसा पिप दुम्माक्त।

### यहूदा डा पिप आसा

9 आसा यहूदा डा पिप दुम्माक्त। मेना इस्राएल डा पिप येरोबाम पिप दुम्शो २० बर्स दुम्शो बाक्माक्त।

10 मिनु आसामी यरूसलेममी ४१ बर्स सासन पवा बाक्त। मेको आ बगे अबीशालोम आ तमी माकाह बाक्माक्त।

11 आसामी आ किकी दाऊद खोदेशो पा, परमप्रभु यावे आ डोंइती मार ठीक बाक्मे, मेको पवा बाक्त।

12 मेकोमी थानम बाक्ब तेल्लेम वोंइश मुर आन कली रागी रे गुंडदीमी बाक्त। मिनु मेकोमी आ किकी पिपपुकीम सेल्लो मूर्ति नेल्ल ताइक्तीमी बाक्त। २राजा २३:७; २इतिहास १४:१-४

13 मिनु आ बगे माकाह कली राज्य डा ममा रे गुंडदा बाक्त। मारदे हना मेकोमी अशेराह देवी आ प्रांग्रा दिशो थाम पाइशो मूर्ति का सेल्सीशो बाक्माक्त। आसामी मेको मूर्ति पाइशो थाम क्योरशा खोल्शा किद्रोन खोल्साम चोपाइक्मी बाक्त।

14 मेकोमी डर डांडा डा थान चहिं मप्रैतीके लीमा बाक्त। तन्न आसा ब्रोंडम सम्म आ थुं नेल्लेमी परमप्रभु यावे आ नोले खोदा बाक्त। १राजा २२:४४

15 मेकोमी आं नु आ आफोम चदेशो सुन, चांदी नु अरु मार मार परमप्रभु यावे आ खिंम चाक्पाइक्मी बाक्त।

16 मेको पिप आसा नु इस्राएल डा पिप बाशा आस दातेम गेना हना यो लडाइ दुम्स डा दुम्स बाक्माक्त। २इतिहास १६:१-६



17 इस्राएल डा पिप बाशामी यहूदा कली लडाइ तोवा बाक्त। मिनु सुइ आन कली यहूदा डा पिप आसा आ रागी लचा मगेथु, रामाह सहरम गारो प्रोव्रशा तेक्गा बाक्त।

18 मोपतीके आसामी परमप्रभु यावे आ खिं नु दरवार डा लीशो सुन नु चांदी नेल्ल लाइशशा, आ गेय पाइब आन कली गेमी बाक्त। पिप आसामी मेको नेल्ल आ गेय पाइब आन कली गेशा, पिप ताब्रीमोन आ तौ, अराम डा हेज्योन आ चच, पिप बेन-हादाद आ बाक्तीक सोइक्तीमी बाक्त। मेको दमस्कस सहरम बाक्शो बाक्माक्त। २राजा १२:१९

19 मिनु पिप आसामी पिप बेन-हादाद कली “इस आफ गारशो खोदेशो पा, गो यो गारस। गो एको सुन नु चांदी कोसेली सोइक्ताकड। मुल इस्राएल डा पिप बाशा नु पशो कबल प्रोनीन। मिनु मेकोमी आं रागी प्रोनल” दे सल्ला पचा कली मुर सोइक्ता बाक्त।

20 मिनु बेन-हादादमी पिप आसा आ देशो बिस्से बाक्त। मिनु मेकोमी आ लडाइ पाइब आन ठेयब मुर आन कली इस्राएल डा सहर नु लडाइ पथ सोइक्ता बाक्त। मिनु मेकोपुकीम इयोन, दान, आबेल-बेथ-माकाह किन्नेरोथ नेल्ल नु नाप्ताली आ रागी नेल्ल ग्रामा बाक्त। २राजा १५:२९

21 मिनु बाशामी मेको लोव्र नेंशा, रामाह सहर कली बोल्यो सेल्चा प्रोना बाक्त। मिनु तिरचा लेशशा लमाक्त।

22 मिनु पिप आसामी यहूदा डा मुर नेल्ल आन कली “बाशामी रामाह कली बोल्यो सेल्चा कली तेल्लो शी फुल्लु चाक्कीन” दे अरेमी बाक्त। मिनु पिप आसामी मेको शी फुल्लुमी बेन्यामीन डा गेबा नु मिस्पा सहर सेला बाक्त।

23 आसा आ पशो अरु गेय, मेको आ सक्ति, मेको आ पतीके, मेको आ सेल्शो सहर, मार, मेको यहूदा डा पिप आन इतिहासम ब्रेक्शो मबाक्बा डा? मिनु मेको खूशो दुम्मेनु, आ खोइल रोइ पवा बाक्त। २इतिहास १६:११-१४

24 मिनु आसा बेक्माक्त। मिनु मेको आ किकी पिपी नु दाऊद आ सहरम थिम्चा पुंइसे बाक्त। मिनु मेको आ पा डा तौ येहो-शाफात पिप दुम्माक्त। १राजा २२:४१

### इस्राएल डा पिप नादाब

25 येरोबाम आ तौ नादाब इस्राएल डा पिप दुम्माक्त। मेना आसा यहूदा डा पिप दुम्शो बर्स निक्शी दुम्शो बाक्माक्त। मिनु पिप नादाबमी इस्राएलम बर्स निक्शी सासन पवा बाक्त।

26 मेकोम परमप्रभु यावे आ डोइती मार मरिम्शो बाक्मे, मेको पवा बाक्त। मेको आ आफोम खोदेशो पा पाप पा मेको आ लॉम गाक्माक्त। मिनु आ आफोमी इस्राएली आन कली पपाइशो पाप यो पवा बाक्त। १राजा १२:२८-३०

27 मिनु इस्साकार आ खिं डा मुर अहीयाह आ तौ बाशाम मेको कली मरिम्शो पचा गोवा बाक्त। मिनु बाशामी मेको कली गिब्बेथोन सहरम तुप्शा सदा बाक्त। मेको गिब्बेथोन सहर नादाब नु इस्राएली नेल्लेम पुम्शा वोइशो, पलिस्ती आन सहर बाक्माक्त। यहोसु १९:४४

28 मिनु यहूदा डा पिप आसा पिप दुम्शो बर्स सां दुम्मेनु, बाशामी नादाब कली सदा बाक्त। मिनु मेको आ पा डा पिप दुम्माक्त।

29 मिनु मेको पिप दुम चोटीन येरोबाम आ खिं डा मुर नेल्ल आन कली साइक्मी बाक्त। मेकोम येरोबाम आ खिं डा सेस बाक्शो नेल्ल आन कली साइक्मी बाक्त। मोपा परमप्रभु यावेमी आ गेय पाइब शिलो डा अहीयाह रे पा देशो लोव्र नेल्ल खबा बाक्त। १राजा १४:१०-११

30 येरोबाम आ पशो पाप, मेकोमी इस्राएली आन कली पपाइशो पापम पतीके नु मेकोमी परमप्रभु यावे, इस्राएली आन परमप्रभु कली गाइक्पाइक्तीके मो दुम्शो बाक्माक्त।

31 नादाबमी पशो अरु गेय, मेको आ पशो नेल्ल, मार, मेको इस्राएल डा पिप आन इतिहासम ब्रेक्शो मबाक्बा डा?

32 पिप आसा नु इस्राएल डा पिप बाशा आस दातेमी गेना हना यो लडाइ दुम्स डा दुम्स बाक्माक्त।

### इस्राएल डा पिप बाशा

33 मिनू अहीयाह आ तौ बाशामी इस्राएलम सासन पवा बाक्त। मेना आसा यहूदा डा पिप दुम्शो बर्स सां दुम्शो बाक्माक्त। मिनू बाशा तिरचा सहरम बाक्शा २४ बर्स इस्राएल कली सासन पवा बाक्त।

34 मिनू मेको येरोबाम आ लांम गाक्शा, मेकोमी इस्राएली आन कली पपाइश्शो पाप पशा, परमप्रभु यावे आ डोंइती मार मरिम्शो बाक्मे, मेको नेल्ल पवा बाक्त।

## 16

1 मेको नोले परमप्रभु यावेम बाशा आ परबम हानानी आ तौ येहू कली लोत्र पवा बाक्त।

2 मार लोत्र पवा बाक्त देशा हना “गो इ कली फुरक रे पोक्शा आं मुर इस्राएली आन ठेयब मुर सेल्लन। तन्न गे येरोबाम आ लांम गाक्शा, आं मुर इस्राएली आन कली पाप पपाइक्तीवी। मिनू मेको आन पापम पतीके आं कली गाइक्पाइक्तीमी। १राजा १४:७

3 मोपतीके गो बाशा नु आ खिं कली खतम पोक्चा चिक्शो बाक्नुड। मिनू गो इ खिं कली नेबात आ तौ येरोबाम आ खिं खोदेशो सेल्लुड। १राजा १५:२९

4 बाशा, इ खिं डा सहरम बेक्शो मुर आन कली कुचुमम ब्वाइनीम। मिनू रूम बेक्शो मुर आन कली चिक्बपुकीम ब्वाइनीम” देंमाक्त। १राजा १४:११

5 बाशा आ पशो नु अरु गेय, मेको आ सक्ति, मार, मेको इस्राएल डा पिप आन इतिहासम ब्रेक्शो मबाक्बा डा?

6 मिनू बाशा बेक्माक्त। मिनू तिरचा सहरम आ किकी पिपी आ नेक्था थिम्चा पुंइसे बाक्त। मिनू मेको आ पा डा आ तौ एलाह पिप दुम्माक्त।

7 डोंइती परमप्रभु यावेमी हानानी आ तौ, आ लोत्र पाइब येहू कली बाशा नु आ खिं डा मुर आन परबम लोत्र पशो बाक्माक्त। मेकोमी परमप्रभु यावे आ डोंइती मरिम्शो पा गाइक्पाइक्तीके, येरोबाम आ खिं डा मुर खोदेशो दुम्तीके नु येरोबाम नु आ खिं डा मुर आन कली खतम पोक्तीके हानानी आ तौ, आ लोत्र पाइब येहू कली मोदेशो लोत्र पशो बाक्माक्त।

### इस्राएल डा पिप एलाह

8 बाशा आ तौ एलाह इस्राएल डा पिप दुम्माक्त। मेना आसा यहूदा डा पिप दुम्शो २६ बर्स दुम्शो बाक्माक्त। मिनू एलाहम तिरचा सहरम बाक्शा, बर्स निक्शी इस्राएल कली सासन पवा बाक्त।

9 मिनू मेको आ लडाइ पाइब बग्गी चलेब, आन भाग निक्शीमी भाग का डा ठेयब मुर जिम्नीमी मेको कली मरिम्शो पचा गोवा बाक्त। मेना पिप एलाह तिरचा सहरम आ खिं डा मरिइ मरिइ कोत्रब अरचा आ खिं तिरचा सहरम बाक्शा, तूशा दुक्शो बाक्माक्त।

10 मिनू जिम्नी आगा ओत्रशा, मेको कली तुप्शा सदा बाक्त। मिनू मेको आ पा डा पिप दुम्माक्त। मेना आसा यहूदामी पिप दुम्शो २७ बर्स दुम्शो बाक्माक्त। २राजा ९:३१

11 मिनू जिम्नी पिप दुम चोटीन बाशा आ खिं डा मुर नेल्ल आन कली साइक्मी बाक्त। मेकोम बाशा आ खिं डा मुर, मेको आ वारचपुकी नु आ नाता गोत्रता वोंइश मुर नेल्ल आन कली का यो मप्रोंइथु साइक्मी बाक्त।

12 परमप्रभु यावेमी बाशा आ परबम आ लोत्र पाइब येहू रे देशो खोदेशो पा, जिम्नीमी बाशा आ मुर नेल्ल आन कली साइक्मी बाक्त।

13 बाशा नु मेको आ तौ एलाहमी पशो पाप नु इस्राएली आन कली पपाइश्शो पाप आ पतीके, आन शोर गाक्शो मूर्ति सेल्लतीके नु परमप्रभु यावे, इस्राएली आन परमप्रभु कली गाइक्पाइक्तीके मोदेशो दुम्शो बाक्माक्त।

14 एलाह आ पशो नु अरु गेय नेल्ले, मार, इस्राएल डा पिप आन इतिहासम ब्रेक्शो मबाक्बा डा?

### इस्राएल डा पिप जिम्नी

15 मिनू जिम्नी तिरचा सहरम ७ नाक्त सासन पवा बाक्त। मेना आसा यहूदा डा पिप दुम्शो २७ बर्स दुम्शो बाक्माक्त। लडाइ पाइबपुकी चहिं पलिस्ती आन सहर गिब्बेथोन आ नेक्था बाक्तीक सेल्ला बाक्शो बाक्मा बाक्त। १राजा १५:२७

16 मिनु बाक्तीक सेल्शा बाक्ब इस्राएलीपुकीमी जिम्नी आ पशो नु पिप कली साइश्शो लोव्र नेंशा, मेको नाक्तीन मेकोपुकीमी आन बाक्तीक उइ लडाइ पाइब आन टेयब मुर ओम्नी कली इस्राएल डा पिप सेल्मे बाक्त।

17 मिनु ओम्नी नु इस्राएल डा लडाइ पाइब नेल्लेम गिब्बेथोन प्रॉइशा तिरचा कली पुम्दमे बाक्त।

18 मिनु जिम्नीमी सहर ग्राशो तवा चोटी पिप आ खिं ओव्रशा मी सुइश्शा, आंमा यो दुप्शा बेक्माक्त। २सामुएल १७:२३

19 मेकोम परमप्रभु यावे आ डोंइती मार मरिम्शो बाक्मे, मेको पशा, येरोबाम आ लांम गाक्शो बाक्माक्त। मिनु येरोबाम आ पशो पाप नु इस्राएली आन कली पपाइश्शो पाप पतीकेम मेको मोदेंशो दुम्शो बाक्माक्त।

20 जिम्नी आ पशो नु अरु गेय, एलाह कली मरिम्शो पशो, मार, मेको इस्राएल डा पिप आन इतिहासम ब्रेक्शो मबाक्बा डा?

### इस्राएल डा पिप ओम्नी

21 मेको नोले इस्राएल डा मुरपुकी हुल निकशी दुम्मा बाक्त। हुल काम गिनाथ आ तौ तिब्नी कली पिप सेल्चा कली वारच पदमे बाक्त। मिनु हुल का चहिं ओम्नी आ नोले खोदमे बाक्त।

22 तन्न ओम्नी आ नोले खोइक्बपुकी गिनाथ आ तौ तिब्नी आ नोले खोइक्ब आन क्येडा बोल्यो बाक्मा बाक्त। मोपतीके तिब्नी कली साइश्शा, ओम्नी पिप दुम्माक्त।

23 मोपा ओम्नी इस्राएल डा पिप दुम्माक्त। मेना आसा यहूदाम पिप दुम्शो ३१ बर्स दुम्शो बाक्माक्त। ओम्नीमी नेल्ल पा १२ बर्स सासन पवा बाक्त। मेकोम ६ बर्स तिरचा सहरम बाक्शा, सासन पवा बाक्त।

24 मेकोम टलेन्ट निकशी चांदीम शेमेर आ गुइ रे सामरीया डा डांडा ग्याप्शा, मेकेर गारो हिरशो सहर का सेला बाक्त। मिनु मेको सहर डा होव्रप शेमेर आ नें रे पा मेको आ नें सामरीया वोदा बाक्त। टलेन्ट का ३४ किलो बाक्ब।

25 तन्न ओम्नीमी परमप्रभु यावे आ डोंइती मार मरिम्शो बाक्मे, मेको पवा बाक्त। मेकोम आ डोंइती डा पिप नेल्ल आन क्येडा शुश मरिम्शो पवा बाक्त। मीका ६:१६

26 मेको नेबात आ तौ येरोबाम आ पाप डा लांम गाक्माक्त। मेकोमी मेको पाप इस्राएली आन कली पपाइश्शो बाक्माक्त। मिनु मेकोपुकीमी मेको पाप पा आन ग्रॉग्रा दिशो मूर्ति आन पबंम परमप्रभु यावे, इस्राएली आन परमप्रभु कली गाइक्पाइश्शो बाक्मा बाक्त।

27 ओम्नी आ पशो नु अरु गेय, मेको आ सक्ति कोंइतीके नेल्ल, मार, मेको इस्राएल डा पिप आन इतिहासम ब्रेक्शो मबाक्बा डा?

28 मिनु ओम्नी बेक्माक्त। मिनु सामरीया सहरम थिम्चा पुंडसे बाक्त। मिनु मेको आ पा डा आ तौ आहाब पिप दुम्माक्त।

### आहाब इस्राएल डा पिप दुम्शो

29 ओम्नी आ तौ आहाब इस्राएल डा पिप दुम्माक्त। मेना आसा यहूदा डा पिप दुम्शो ३८ बर्स दुम्शो बाक्माक्त। ओम्नी आ तौ आहाब सामरीया सहरम बाक्शा, इस्राएल कली २२ बर्स सासन पवा बाक्त।

30 मिनु ओम्नी आ तौ आहाबमी परमप्रभु यावे आ डोंइती पिप नेल्ल आन क्येडा मरिम्शो पवा बाक्त।

31 नेबात आ तौ येरोबाम आ पाप डा लांम गाक्चा, मेको कली मारेइ खोदेंशो मदुम्माक्त। मेकोम सीदोन डा पिप एथ-बाल आ तमी इजेबेल कली ग्युंबे पवा बाक्त। मिनु बाल देवता कली पूजा पा टेयब सेला बाक्त।

32 मेकोम सामरीयाम बाल आ खिंम बाल कली चढ़ेतीक का सेला बाक्त। २राजा ३:२; २राजा १०:२७-२८; २राजा ११:१८

33 आहाबम अशेराह देवी आ मूर्ति पाइश्शो थाम का यो सेल्पदा बाक्त। मिनु मेकोम आ क्येडा डोंइती डा इस्राएल डा पिप आन क्येडा परमप्रभु यावे, इस्राएली आन परमप्रभु कली शुश गाइक्पाइक्तीक गेय पवा बाक्त।

34 आहाबम सासन पवा ना बेथेल डा हीएलमी यरीको सहर लेंशा सेला बाक्त। मेको आ जग वोदमेनु, मेको आ डोंइती जरमेशो तौ अबीराम बेकमाक्त। मिनु मेको आ ठेयब लाप्चो वोदमेनु, मेको आ कान्छा तौ सेगुब बेकमाक्त। मोपा परमप्रभु यावेमी नून आ तौ यहोसु रे पा देंशो लोत्र खबा बाक्त। यहोसु ६:२६

## 17

खदपुकीम एलीया कली थुल्शो

1 मिनु गिलाद डा तिश्बे सहर डा एलीयाम आहाब कली “परमप्रभु यावे, इस्राएली आन परमप्रभु ब्रोंइशा बाक्शो खोदेंशो पा, गो मेको आ डोंइती राप्शा गेय पाडनुड। इस्राएलम रेउ नु सीत मारेइ मयीब” देंमाक्त। १राजा ८:३५; लूका ४:२५; याकूब ५:१७; प्रकाश ११:६

2 मिनु परमप्रभु यावेमी एलीया कली लोत्र पवा बाक्त।

3 मार लोत्र पवा बाक्त देंशा हना “एको रागी प्रोंइशा, पूब गे लावो। मिनु यर्दन आ पूब गे बाक्शो केरीथ खोलाम लशा खुइशशा बाक्को।

4 गे मेको खोला डा ब्वाक्कु तूडो। मिनु गो इ कली थुल्चा कली मेकेर डा खद आन कली अरेता” देंमाक्त।

5 मिनु मेकोमी परमप्रभु यावे आ देंशो खोदेंशो पवा बाक्त। मिनु मेको यर्दन आ पूबम बाक्शो केरीथ खोला लशा, खुइशशा बाक्माक्त।

6 मिनु खदपुकीम मेको कली नाकदो सुनी शोब्ले नु श्ये चाक्शा, गेमे बाक्त। मिनु एलीया मेको खोला डा ब्वाक्कु तूशा बाक्माक्त।

7 इच्का नाक्त नोले रेउ मयित्तिके मेको खोला डा ब्वाक्कु सोत्रमाक्त।

चारेफाथ डा मीश मुर

8 मिनु परमप्रभु यावेमी मेको कली लोत्र पवा बाक्त।

9 मार लोत्र पवा बाक्त देंशा हना “मुल गे सीदोन डा चारेफाथ सहर लावो। गो मेकेर इ कली थुल्चा कली आ वोंइश बेक्शो मीश मुर का कली अरेता” देंमाक्त। लूका ४:२५-२६

10 मोपतीके मेको चारेफाथ सहरम लमाक्त। मिनु मेको चारेफाथ सहर डा ठेयब लाप्चोम जाक्दीम्मेनु, आ वोंइश बेक्शो मीश मुर का शी खुम्ना खुम्न बाक्शो तवा बाक्त। मिनु मेको कली ब्रेशा “आं कली शिशी पा लोटा का ब्वाक्कु तूचा गेयी। मिनु गो तूनुड” देंमाक्त।

11 मिनु मेको मीश मुर ब्वाक्कु ब्रथ लन लना, लेंशा ब्रेशा “आं कली शिशी पा टुक्रा का शोब्ले यो पिशशा गेयी” देंमाक्त।

12 तन्न मेकोमी “परमप्रभु यावे, इन परमप्रभु ब्रोंइशा बाक्शो खोदेंशो पा बोसुम मुठी का फस नु दुडग्रोम इच्का खोइ तेल डा लाक्शा, आं खिम मारेइ मबाक्ब। गो इच्का खोइ शी खुप्शा, खिं लशा, गो नु आ तौ आंस कली शोब्ले सेलनुड। मिनु गो मेको जशा, बेक्नस्कु” देंमाक्त।

13 मिनु एलीयाम मेको कली “महिनो, खिं लशा इ देंशो खोदेंशो पावो। तन्न मेको क्येडा डोंइती बटुक का सेल्शा, एक आं बाक्तीक चाक्को। मिनु मेको नोले इस कली जचा थोव्रक सेलो।

14 मारदे हना परमप्रभु यावे, इस्राएली आन परमप्रभुमी “गो रागीम रेउ मयिपदु सम्म फस मनुप्ब। मिनु दुडग्रो डा तेल यो मनुप्ब” देंशो बाक्ब” देंमाक्त। २राजा ४:२-४

15 मिनु मेको मीश मुर लशा एलीयाम देंशो खोदेंशो पवा बाक्त। मिनु मेको नेल्ल आन कली शुश नाक्त सम्म जचा थोव्रक गाम्माक्त।

16 मारदे हना एलीया रे पा परमप्रभु यावेम देंशो खोदेंशो पा बोस डा फस मनुम्माक्त। मिनु दुडग्रो डा तेल यो मनुम्माक्त।

17 इच्का नाक्त नोले मेको मीश मुर, मेको खिं डा होत्रपोक्म आ तौ रोइ पवा बाक्त। मिनु मेको नाक्त कित कित मरिम्शो दुम्ना दुम्न लमाक्त। मिनु नोले बेकमाक्त।

18 मिनु मेको मीश मुरुम एलीया कली “परमप्रभु आ मुर, गे नु गो इस दातेम मार मरिम्शो दुम्शो बाक्बा? मार, गे आं पाप कोइशा, आं तौ कली साइक्थ जाक्नी?” देमाक्त।

19 मिनु एलीयाम “इ तौ आं कली गेयी” देमाक्त। मिनु मेकोमी मेको आ तौ आ गुड रे ताक्शा आ बाक्तीक तला तार लदा बाक्त। मिनु मेको कली आ ब्राख्येम वोदा बाक्त।

20 मेको नोले मेकोमी ठेयब सेंदा पा परमप्रभु यावे कली “परमप्रभु यावे, आं परमप्रभु, गो सुका आ खिंम बाक्डा, मेको आ तौ बेक्पा मेको वोंइश बेक्शो मीश मुर कली मारदे श्येत गेनी” देमाक्त।

21 मिनु मेको सां खेयप मेको बेक्शो आल तार गोल्माक्त। मिनु ठेयब सेंदा पा, परमप्रभु यावे कली “परमप्रभु यावे, आं परमप्रभु, एको आल कली लेंशा ब्रोंइपतीन” देमाक्त। २राजा ४:३४; प्रेरित २०:१०

22 मिनु परमप्रभु यावेमी एलीया आ पुंइशो लोत्र नेना बाक्त। मिनु मेको आल ब्रोंइमाक्त।

23 मिनु एलीयाम मेको कली पोक्शा तला तार रे आगा यिदा बाक्त। मिनु मेको आ ममा कली गेशा “कोत्रडो, इ तौ ब्रोंइत” दे मदा बाक्त। लूका ७:१५; हिब्रू ११:३५

24 मिनु मेको मीश मुरुमी एलीया कली “गे परमप्रभु आ मुर बाक्नीनी, दे मुल गो थमा पा तुइक्ताक्ड। मिनु इन देंशो परमप्रभु यावे आ लोत्र थमा बाक्त” देमाक्त।

## 18

### एलीया नु ओबदिया युम्शो

1 मिनु परमप्रभु यावेम रागी सोत्रशो शुश नाक्त नोले बर्स सांमी एलीया कली लोत्र पवा बाक्त। मार लोत्र पवा बाक्त देंशा हना “गे लशा, आहाब कली युमो। मिनु गो रागीम रेउ यिपाइक्नुड” देमाक्त।

2 मोपतीके एलीया आहाब कली युम्थ लमाक्त। मेना सामरीया सहरम ठेयब अन्काल दुम्शो बाक्माक्त।

3 मिनु आहाबमी आ खिं कोत्रब ओबदिया कली ब्रेथ सोइक्ता बाक्त। मेको ओबदिया परमप्रभु यावे कली शुश मान पा हिंशा, थमा सुइक्ब मुर का बाक्माक्त।

4 इजेबेलम परमप्रभु यावे आ लोत्र पाइब आन कली साइक्ना साइक्न बाक्मेनु, ओबदियामी मेको आन दाते डा सहे का जना आन कली लाइश्शा, मेको आन कली प्रोंइचा कली जचा तूचा थोत्रक गेशा ५०, ५० जना डा हुल पा पुक्खी निक्शीम खुइश्शा वोइश्शो बाक्माक्त।

5 मिनु आहाबम ओबदिया कली “रागी डा ब्वाक्कु बुक्तीके, खोल्सा मेर लावो। गो शारा नु खच्चर आन कली प्रोंइचा कली घांस थित्न्सा को? मोपा इ बस्तु भाव आन कली साइक्चा ममाल्नया को?” देमाक्त।

6 मिनु मेको निक्शीमी कोत्रचा कली रागी योक्ससा बाक्त। मिनु आहाब का गे नु ओबदिया अर्को गे लसा बाक्त।

7 मिनु ओबदिया लांम गाक्ना गाक्न बाक्मेनु, एलीयाम मेको कली युमा बाक्त। मिनु ओबदियामी मेको कली तुइश्शा खप सम्मन बाप्शा सेउ पा “आं प्रभु, गे थमा पा एलीयान ननी?” देमाक्त।

8 मिनु एलीयाम “ओं, गो नड। गे लशा इ होत्रप कली ‘एलीया एक बाक्त’ मतो” देमाक्त।

9 मिनु ओबदियामी “गो मार मरिम्शो पडा डा? गे इन गेय पाइब, आं कली साइक्पाइक्चा कली आहाब आ गुडम गेनीनी?”

10 परमप्रभु यावे, इन परमप्रभु गेना हना यो ब्रोंइशा बाक्शो खोदेशो पा, आं होत्रपम इन कली रागी रागी नु राज्य नेल्लेम माल्थ सोइक्ताक्व। तेकोइ रागी नु राज्य मलीशो बाक्ब। मिनु मेकोपुकीमी ‘एलीया एक मबाक्ब। गो थमा पा मेको कली थिन्ने मचाप्का’ देमानु, मेको कसम जचा माल्तेक्म।

11 तन्न मुल गे आं कली लावो, इ होत्रप कली ‘एलीया एक बाक्त, देंनो’ देतीनी।

12 गो इन कली प्रोनु चोटी परमप्रभु यावे आ सोक्तीम इन कली लाइक्ब। मिनु गो लशा आहाब कली मो देंडानु, मेकोमी इन कली मथित्तु हना, आं कली साइक्ब। मो हना यो, गो, इन गेय पाइब, आं आल रेन परमप्रभु यावे कली मान पा हिंशा, थमा सुइक्ब बाक्नुड।

13 आं प्रभु, इजेबेलम परमप्रभु यावे आ लोव्र पाइब आन कली साइक्ना साइक्न बाक्मेनु, गो मार पडा, मेको गे मनेनी डा? गो मेको आन दाते डा सहे का जना आन कली ५०, ५० जना पा पुक्खीम खुइशशा वोइक्तामी। मिनु मेको आन कली जचा तूचा गेतामी।

14 मिनु मुल गे आं कली लावो, इ होव्रप कली 'एलीया एक बाक्त' देंनो, देंतीनी। मेकोमी आं कली थमा पा साइक्ब" देंमाक्त।

15 मिनु एलीयामी "गो मेको आ डोंइती बाक्शो मुर नेल्ल आन परमप्रभु यावे ब्रोंइशा बाक्शो खोदेशो पा, मुलाक्ती थमा पा आहाब कली गुम्नुड" देंमाक्त।

16 मिनु ओबदिया आहाब कली गुम्थ लमाक्त। मिनु मेको कली मेको लोव्र शेंदा बाक्त। मिनु आहाब एलीया कली गुम्थ जाक्माक्त।

### एलीया कारमेल डांडाम बाक्शो

17 मिनु आहाबमी एलीया कली तशा, मेको कली "इस्त्राएल कली श्येत गेब गेन नवे?" दे मदा बाक्त। येरमीया ३८:४

18 मिनु एलीयाम "इस्त्राएल कली श्येत गेब गो मनड। तन्न गे नु इन आफ आ खिं डा मुर इस्त्राएल कली श्येत गेब ननी। मारदे हना गे परमप्रभु यावे आ शेंतीक प्रोंइशा, बाल देवता आ नोले खोइशशो बाक्तीनी। १ राजा १६:३१-३३

19 मोपतीके मुल कारमेल डांडाम इस्त्राएल डा मुर नेल्ल आं कली गुम्पाइक्चा कली ब्रेत्तीन। मिनु इजेबेलम थुल्शा वोइशशो बाल देवता आ नोले दुम्ब लोव्र पाइब ४ सहे ५० जना मुर नु अशेराह देवी आ नोले दुम्ब लोव्र पाइब ४ सहे जना मुर नेल्ल आन कली यो ब्रेत्तीन" देंमाक्त।

20 मोपतीके आहाबमी इस्त्राएली नेल्ल आन कली लोव्र सोइक्तीमी बाक्त। मिनु बाल नु अशेराह देवी आस नोले दुम्ब लोव्र पाइब नेल्ल आन कली कारमेल डांडाम पुक्की बाक्त।

21 मिनु एलीया मुर नेल्ल आन डोंइती राप्शा "गे गेना सम्म थुं निक्शी पा बाक्नीनी? परमप्रभु यावे, थमा परमप्रभु बाक्ब देंनीनी हना, मेको आ नोले खोतीन। बालन परमप्रभु बाक्ब देंनीनी हना, मेको आ नोले खोतीन" देंमाक्त। तन्न मुरपुकीम लोव्र का यो मलेत्थु, सिक्सी पा बाक्मा बाक्त। यहोसु २४:१४; मत्ती ६:२४

22 मिनु एलीयाम मेको आन कली "परमप्रभु यावे आ लोव्र पाइब गो आं का ला लीती। तन्न बाल आ नोले दुम्ब लोव्र पाइब ४ सहे ५० जना बाक्नीम।

23 मुल आंइ कली ब्यफ निक्शी चाक्शा गेने। मिनु मेकोपुकीम का योव्रसीशा मेको कली क्योरशा चेक्शा, शी तार वोइशशा, मी मसुइक्थु वोइक्चा माल्नीम। गो यो मेको अर्को कली क्योरशा मो पान शी तार वोइशशा मी मसुइक्थु वोइक्नुड।

24 मिनु गे इन देवता आ नें थिशा, मेको कली पुनीन। गो परमप्रभु यावे आ नें थिशा, मेको कली पुंइनुड। मिनु पुंइशो नेंशा, मी सोइक्ब, परमप्रभु बाक्ब" देंमाक्त। मिनु मुर नेल्लेमी "दुम्ब इन देंशो लोव्र ठीक बाक्ब" देंमा बाक्त। उत्पती १५:१७

25 मिनु एलीयाम बाल आ लोव्र पाइब नेल्ल आन कली "गे डोंइती ब्यफ का योव्रशा, मेको कली क्योरीन। मारदे हना गे शुश बाक्नीनी। मिनु इन देवता आ नें थिशा पुनीन। तन्न मी मसुइक्तीन" दे माइक्मी बाक्त।

26 मोपतीके मेको आन योव्रशो ब्यफ लांइसीशा, क्योरशा च्देंशा, बाल आ नें थिशा सुनी रे नाक्त सम्म "ए बाल! आंइ कली लोव्र लेत्तीकी" दे ग्रीमा बाक्त। तन्न मेकेर मारेइ मडुम्माक्त। मारेइ सेंदा यो मनेसे बाक्त। मिनु मेकोपुकी मेको आन सेल्शो च्देंतीक आ एर ओंथ प्रेक्ना प्रेक्न सिल पामे बाक्त।

27 मिनु नाक्त उइक्थ दुम्मेनु, एलीयाम मेको आन कली "मुल यो ठेयब सेंदा पा ग्रीडीन। मेको थमा पा देवता बाक्ब। मेको मिम्ना मिम्न बाक्म माइ, ना हिरथ गाक्म कों? ना डोन लम कों? ना इप्शा बाक्म कों? मेको कली पोक्चा माल्ब" दे शुक्शी पा लोव्र पवा बाक्त।

28 मोपतीके मेको चिनु ठेयब सेंदा पा ग्रीमा बाक्त। मिनु मेकोपुकीम आन रिती थिती पा आंम आन रॉ तरवार नु भालाम चेस्सीशा, हुश चुंइसमा बाक्त।

२९ मोपा नाक्त रे नाक्दो चढेची ना सम्म ग्रीना ग्रीन बाक्मा बाक्त। तन्न मेकेर मारेड मडुम्माक्त। मारेड सेंदा यो मनंसे बाक्त। मी यो मयिमाक्त।

३० मिनु एलीयाम मुर नेल्ल आन कली “आं नेक्था जाक्कीन” देंमाक्त। मिनु मेको नेल्ल मेको आ नेक्था जाक्मा बाक्त। मिनु मेकोम डोंडती ब्रेशो परमप्रभु यावे कली चढेतीके लेंशा सेला बाक्त।

३१ मिनु एलीयाम १२ ओटा फुल्लु चाक्मी बाक्त। मेको याकूब आ १२ जना तौ आन थर का का पा १२ ओटा फुल्लु गुबा बाक्त। डोंडती परमप्रभु यावेमी याकूब कली “इ नें इस्राएल दुम्ब” देंशो बाक्माक्त। प्रस्थान २४:४; उत्पत्ती ३२:२९

३२ मिनु मेकोमी मेको फुल्लु रे परमप्रभु यावे आ नेंम चढेतीक का सेला बाक्त। मिनु मेको चढेतीक कली एर ओंथ हिरशा, कुला दोवा बाक्त। मेकेर सेआह अन्न पुक्तीक बोस निक्शी रिक्ब बाक्माक्त। सेआह का ७.३ लिटर बाक्ब।

३३ मिनु नोले शी गार पाइशशा, मेको ब्यफ क्योरशा चेक्शा, मेको शी तार वोदा बाक्त। मिनु मेकोमी मुर आन कली “गे ४ गाग्री ब्वाक्कु चाक्शा, एको चोशा चढेतीक नु शी तार लुक्तीन” दे माइक्मी बाक्त। मिनु मेकोपुकीम मो पामे बाक्त।

३४ मिनु नोले मेकोमी “मेको लेंशा पने” देंमाक्त। मिनु मेकोपुकीम मो पामे बाक्त। मिनु मेकोम लेंशा “चीनु खेयप सां मो पने” देंमाक्त। मिनु मेकोपुकीम खेयप सां यो मो पामे बाक्त।

३५ मिनु चढेतीक आ एर ओंथ डा कुला नेल्ल ब्वाक्कु ब्रीशा क्युम्माक्त।

३६ मिनु नाक्त किंत किंत डा नाक्दो डा चढेची ना परमप्रभु यावे आ लोव्र पाइब एलीयामी मेको आ चढेतीक आ डोंडती लशा “परमप्रभु यावे, अब्राहाम, इसहाक नु इस्राएल आ परमप्रभु, गे का ला इस्राएल रागीम परमप्रभु बाक्नीनी, दे मुलाक्ती एको आन कली तुइक्पतीन। मिनु गो इन गेय पाइब बाक्नुड। मिनु गो एको नेल्ल इन देंतीके पशो बाक्नुड, दे यो एको आन कली तुइक्पतीन।

३७ आं लोव्र लेत्तीनी। परमप्रभु यावे, आं लोव्र लेत्तीनी। मिनु एको मुरपुकीम गेन परमप्रभु यावे, थमा परमप्रभु बाक्नीनी, दे तुइक्तमेक्ल। एको आन थुं लेप्पाइक्ब गेन बाक्नीनी” देंमाक्त।

३८ मिनु इर रे परमप्रभु यावे आ मी यिशा चोशा चढेतीके, चोशा चढेतीक डा शी, फुल्लु नु खप नेल्ल नेक्गा बाक्त। मिनु मेको कुला डा ब्वाक्कु यो सोव्रमाक्त। लेवी ९:२४

३९ मिनु मुर नेल्ल मेको तशा, खुम्की पा बाप्शा “परमप्रभु यावे, थमा पा परमप्रभु बाक्माक्त। परमप्रभु यावे, थमा पा परमप्रभु बाक्माक्त” देंमा बाक्त।

४० मिनु एलीयामी मेको आन कली “बाल आ लोव्र पाइब आन कली ग्याइक्तीन। का यो प्रोक्चा मतामेक्ल” दे माइक्मी बाक्त। मिनु मेकोपुकीम मेको आन कली ग्याइक्तमे बाक्त। मिनु एलीयाम मेको आन कली किशोन खोल्साम लाइशशा साइक्मी बाक्त। प्रस्थान २२:१९; ब्यवस्था १३:६-९

४१ मिनु एलीयाम आहाब कली “लशा जने तूडीन। मारदे हना गो ठेयब रेउ आ रेयके नेता” देंमाक्त। याकूब ५:१८

४२ मिनु आहाब जचा तूचा कली लमाक्त। तन्न एलीया चहिं कारमेल डांडा डोइशशा, मेकेर आ पिया पोक्चीम खेप्शा बाक्माक्त।

४३ मिनु मेकोमी आ गेय पाइब कली “लशा, समुन्द्र गे कोव्रडो” दे मदा बाक्त। मिनु मेको लशा कोव्रडा बाक्त। मिनु मेकोमी “मेकेर मारेड मबा” देंमाक्त। मिनु एलीयामी मेको कली “७ खेयप मेकेर लशा, कोव्रडो” दे सोइक्ता बाक्त।

४४ मिनु ७ खेयप डा पाली मेकोमी “मुर आ गुड खोमो गोस्स का समुन्द्र रे बोक्शो ताता” देंमाक्त। मिनु एलीयाम मेको कली “मुल लशा आहाब कली ‘इन बग्गी ठीक पा, उइ खिं लने। मो मपाइतीनी हना, इन कली रेउम तेक्ब’ दे मतो” देंमाक्त।

४५ मिनु क्येर गोस्सुम सरीड सुम्शा, फश गिवार पा ठेयब रेउ यिचा गोवा बाक्त। मिनु आहाब आ बग्गी डोइशशा येजेल सहर लमाक्त।

४६ मिनु परमप्रभु यावेमी एलीया कली थिवा बाक्त। मिनु मेको आ फेक्शो वा खाइशशा आहाब आ डोंडोंडती येजेल डा ठेयब लाप्चो सम्म दोरशा लमाक्त।

## 19

एलीया प्रोक्शा, होरेब डांडा लशो

1 मिनु आहाबमी इजेबेल कली एलीया आ पशो गेय नेल्ल नु मेकोमी दोपा देवी देवता आन लोव्र पाइब नेल्ल आन कली तरवारम सदा, मेको नेल्ल शेंदा बाक्त।

2 मिनु इजेबेलम एलीया आ बाक्तीकेम “गे दोपा मेको आन कली सदी, मोपा गो दीसा एं ना सम्म इ कली मसाइक्तन हना, देवतापुकीम आं कली यो मोदेशोन पाइय्यीमील। मेको क्येडा यो शुश पाइय्यीमील” दैथ लोव्र कुरब मुर सोइक्ता बाक्त।

3 मिनु एलीया हिंशा, प्रोक्माक्त। मिनु मेको प्रोक्शा यहूदा डा बेयर-शेबा जाक्माक्त। मिनु मेकोमी आ गेय पाइब कली मेक उइ प्रोना बाक्त।

4 मिनु आं चहिं काबु डा लां डोन गोरशो रागीम ओव्रमाक्त। मिनु मेको बुटा आगाम निरशा, परमप्रभु यावे कली “मुल नुप्त। आ सोक्त ब्रने। मारदे हना गो आं किर्की पिपी आन क्येडा रिम्शो मनड” दैमाक्त। अय्युब ७:१५; योना ४:३

5 मिनु नोले बुटा आ आगामीन गोल्शा निन्द्रा पवा बाक्त। मेना परमप्रभु यावे आ स्वर्ग डा गेय पाइब कामी मेको कली ब्रा थिशा “बोक्शा जावो” दैमाक्त।

6 मिनु मेकोमी बोक्शा, एर ओंथ कोव्रडानु, आ पिया गे चोशो होश शोब्ले का नु दुडग्रो का ब्वाक्कु तवा बाक्त। मिनु मेकोम मेको जशा तूशा लेंशा इम्माक्त।

7 मिनु परमप्रभु यावे आ स्वर्ग डा गेय पाइब लेंशा जाक्शा, मेको कली थिशा “बोक्शा जावो। इ लां थम लाइशो बाक्ब” दैमाक्त।

8 मोपतीके मेको बोक्शा, जवा तूडा बाक्त। मिनु मेको आ बोलम मेको ४० नाक्त नु ४० नाक्दो सम्म गाक्शा, परमप्रभु आ डांडा होरेब जाक्दीम्माक्त। प्रस्थान २४:१८

9 मिनु मेकेर डा पुक्खी काम ओव्रशा, मेक उइ नां सोइदा बाक्त। मेकेर बाक्मेनु, परमप्रभु यावेम मेको कली “एलीया, गे एक मार पा बाक्डे?” दे हिल्लो पवा बाक्त।

10 मिनु मेकोमी “परमप्रभु यावे, मुर नेल्ल आन परमप्रभु, गो इन पर्वम शुश गेय पाता। इस्राएलीमी इन कबल प्रोइतेक्म। इन कली चढेतीक प्रेत्तेक्म। मिनु इन लोव्र पाइब आन कली तरवारम क्योरशा साइक्तेक्म। गो आं का ला लीशो बाक्नुड। मिनु मुल मेकोपुकीमी आं कली यो साइक्चा माल्शो बाक्नीम” दैमाक्त। भजन संग्रह ६९:१०; यसैया ४९:४; १राजा १८:२२; रोमी ११:३

11 मिनु परमप्रभु यावेमी “गूडो, आं डोंइती डांडाम रपो” दैमाक्त। मारदे हना परमप्रभु यावे मेकेर रे लन लन बाक्माक्त। मिनु परमप्रभु यावे आ डोंइडोंइती टेयब फश गिवार डांडा आन कली प्रोलना प्रोलन नु फुल्लु आन कली खिन्ना खिन्न जाक्माक्त। तन्न परमप्रभु यावे मेको फशेम मबाक्माक्त। मेको आ नोले टेयब खिनु कुमाक्त। तन्न परमप्रभु यावे मेको खिनुमी यो मबाक्माक्त। प्रस्थान ३३:२२

12 मिनु मेको खिनु आ नोले मी का जाक्माक्त। तन्न मेको मीमी यो परमप्रभु यावे मबाक्माक्त। मिनु मी आ नोले इन्चीली सेंदा का जाक्माक्त।

13 मिनु एलीयामी मेको सेंदा नेंशा, आ वामी आ कुल सुम्से बाक्त। मिनु लाडगा यूशा पुक्खी आ डोंइती राम्माक्त। मिनु मेको आइक्च सेंदाम “एलीया गे एक मार पन पन बाक्डे?” दैमाक्त।

14 मिनु मेकोमी “परमप्रभु यावे, मुर नेल्ल आन परमप्रभु गो इन पर्वम शुश गेय पाता। इस्राएलीमी इन कबल प्रोइतेक्म। इन कली चढेतीक प्रेत्तेक्म। मिनु इन लोव्र पाइब आन कली तरवारम क्योरशा साइक्तेक्म। गो आं का ला लीशो बाक्नुड। मिनु मुल मेकोपुकीमी आं कली यो साइक्चा माल्शो बाक्नीम” दैमाक्त।

15 मिनु परमप्रभु यावेम मेको कली “गे तेको लां रे जाक्शो बाक्डे, मेको लां रे पा लेशशा दमस्कस डा गोरशो रागीम लावो। मिनु गे मेको सहर जाक्दीशशा, हजाएल कली अराम डा पिप सेलो। २राजा ८:१३, १५

16 मिनु निम्शी आ तौ यहू कली यो इस्राएल डा पिप सेलो। आबेल-मेहोलाह डा शाफात आ तौ एलीशा कली इ पा डा आं लोव्र पाइब सेलो। २राजा ९:२-३



१७ मिनु हजाएल आ तरवार रे ब्रोंडशो आन कली येहूमी साइक्ब। मिनु येहू आ तरवार रे ब्रोंडशो आन कली एलीशामी साइक्ब।

१८ मो हना यो, गो ७ हजार जना आन कली इस्राएलम प्रोंडशा वोइक्नुडमी। मेकोपुकीमी बाल आ डोंडती आन पोक्च मथेक्शो बाक्नीम। मिनु मेकोपुकीमी बाल कली पुक्पु मपाइश्शो बाक्नीम” देमाक्त। रोमी ११:४

### एलीयामी एलीशा कली ब्रेशशो

१९ मिनु एलीया मेकेर रे लमाक्त। मिनु शाफात आ तौ एलीशा कली गुमा बाक्त। मेको १२ हाल ब्यफ वाक्ना वाक्न बाक्माक्त। मेको चहिं मेको नेल्ल क्येडा नोले डा हाल वाक्ना वाक्न बाक्माक्त। मिनु एलीया लशा, आ फेक्शो वा मेको आ तार कोप्ता बाक्त।

२० मिनु एलीशामी आ ब्यफ प्रोंडशा, एलीया आ नोनोले दोरमाक्त। मिनु मेकोम “आं कली आं आंम आफ आस कली पुक्पु पाइक्चा गेयीनी। मिनु इन नोले खोइक्नुड” देमाक्त। मिनु एलीयाम “लावो, गो इ कली मार पडा मेको मिम्तो” दे मदा बाक्त। लूका ९:६१-६२

२१ मिनु एलीशाम एलीया कली प्रोंडशा लमाक्त। मिनु मेकोमी आ हाल ब्यफ लाइश्शा क्योरा बाक्त। मिनु मेकोम हलो चोशा श्ये क्येवा बाक्त। मिनु मुर आन कली ब्वचा गेमी बाक्त। मिनु मुरपुकीमी ब्वामे बाक्त। मिनु मेको नोले एलीया आ नोले खोदा बाक्त। मिनु मेको आ गेय पाइब दुम्माक्त।

## २०

### बेन-हादादम लडाइ तोशो

१ अराम डा पिप बेन-हादादम आ लडाइ पाइब नेल्ल आन कली खुप्तीमी बाक्त। मिनु मेकोमी ३२ जना पिप, मेको आन शारा नु बग्गीपुकी लाइश्शा, सामरीया सहर कली पुम्शा लडाइ तोवा बाक्त।

२ मेकोमी लोव्र कुरब आन कली सहरम सोइश्शा, इस्राएल डा पिप आहाब कली “बेन-हादाद आ लोव्र नेनीन,

३ ‘इन सुन चांदी आं के नम। इन नेल्ल क्येडा दारशो मीश नु इन तमी तौ यो आं केन नम’ देत” देनीन, दे सोइक्तीमी बाक्त।

४ मिनु इस्राएल डा पिपमी मेको आन कली “आं प्रभु, पिप इन देशो खोदेशो पा ‘गो नु बाक्शो मारेइ मारेइ इन केन नम, देत’ मतीन” दे सोइक्तीमी बाक्त।

५ मिनु लेंशा बेन-हादादमी लोव्र कुरब सोइश्शा “इन सुन चांदी, इन मीश नु इन तमी तौ नेल्ल आं कली गेन।

६ गो दीसा एं ना आं गेय पाइब आन कली, इन खिं नु इन ठेयब गेय पाइब आन खिंमी इन शुश क्येट लाइब थोव्रक ब्रथ सोइक्नुडमी। मेकोपुकीमी आन दाक्शो मारेइ मारेइ लाइक्नीम” दे लोव्र कुरब सोइक्ता बाक्त।

७ मिनु इस्राएल डा पिपम आ रागी डा खाल्पा नेल्ल आन कली ब्रेशशा, मेको आन कली “गे तुइश्शो बाक्नीनी। मेको मुरुम लडाइ पचा कली खुज्जी माल्ना माल्ना बाक्ब। मेकोम आं मीश, आं आलपुकी नु आं सुन चांदी आ केन नम देमैनु यो, गो मारेइ मदेड” देमाक्त।

८ मिनु खाल्पा नु मुर नेल्लेमी मेको कली “मेको आ लोव्र मनेनीन। गे मेको आ देशो मबिस्सीन” देमा बाक्त।

९ मोपतीके मेकोमी बेन-हादाद आ लोव्र कुरब आन कली “आं प्रभु पिप कली ‘आं ठेयब पिप आ डोंडती पुंइशो नेल्ल गेनुड। तन्न मुल इन पुंइशो लोव्र गो गेने मचाप्नुड’ मुल लशा गेपुकीम बेन-हादाद कली एको लोव्र मतीन” दे माइश्शा सोइक्तीमी बाक्त। मिनु मेको लोव्र कुरबपुकी लशा, आन होव्रप बेन-हादाद कली शोव्रडमे बाक्त।

१० मिनु बेन-हादादम आहाब कली “गो नु शुश लडाइ पाइब बाक्नीम। आं लडाइ पा ग्राशो सामरीया डा फुरक, आं लडाइ पाइब आन कली योल का का गेचा कली यो मगाप्ब। मेको गाप्त हना, देवतापुकीम आं कली खतम पोय्थीमील” देथ मुर सोइक्ता बाक्त।

11 मिनु मेको आन कली इस्राएल डा पिपमी “मेको कली ‘लडाइ ग्राचा गेना गेना, मुल कना मार ठेयब लेशो लोत्र पाइनेवे’ दैत, मतीन” दे सोइक्तीमी बाक्त।

12 मेना बेन-हादाद नु अरु पिप आन बाक्तीकेम शांबु दुक्शा बाक्मानु, मेको लोत्र नेना बाक्त। मिनु मेकोमी रीब पा आ लडाइ पाइब आन कली “लडाइ पचा ठीक दुमीन” दे हुकुम गेमी बाक्त। मिनु मेकोपुकी मेको सहर कली लडाइ तोचा कली ठीक दुम्मा बाक्त।

### आहाबमी बेन-हादाद कली फ़ुशो

13 मेना परमप्रभु यावे आ लोत्र पाइब का इस्राएल डा पिप आहाब आ बाक्तीक जाक्शा, मेको कली “परमप्रभु यावेमी ‘मार, गे एको ठेयब हुल लडाइ पाइब आन कली तवी? कोव्रडो, गो मुलाक्तीन मेको आन कली इ गुइमी गेनुड। मिनु गोन परमप्रभु यावे नड, दे तुइक्नेवे’ दैत” दैमाक्त।

14 मिनु आहाबमी “तन्न मेको सुम पाइबा?” दे हिल्लो पवा बाक्त। मिनु परमप्रभु यावे आ लोत्र पाइबमी “परमप्रभु यावेम ‘हुकुम पाइब ठेयब मुर आन गेय पाइब ठिटापुकीम लडाइ पाइनीम”” दैमाक्त। मिनु पिपमी “लडाइ सुम गोचा माल्बा?” दे हिल्लो पवा बाक्त। मिनु मेको परमप्रभु यावे आ लोत्र पाइबम “गे गोचा माल्नीनी” दैमाक्त।

15 मिनु आहाबमी मेको हुकुम पाइब ठेयब मुर आन गेय पाइब सहे निक्शी ३२ जना ठिटा आन कली खुप्थ सोइक्तीमी बाक्त। मिनु नोले इस्राएली नेल्ल आन कली पुक्मी बाक्त। मेको नेल्ले ७ हजार बाक्मा बाक्त।

16 मिनु नाक्त उइक्थ दुम्मेनु, बेन-हादाद नु मेको आ वारच ३२ जना पिप आन बाक्तीकेमी दुक्शो बाक्मा ना मेकोपुकी गूमा बाक्त।

17 मिनु मेको हुकुम पाइब आन गेय पाइब ठिटापुकी डोंइती बारमा बाक्त। मेना बेन-हादादमी क्यारी पाइबपुकी सोइश्शो बाक्माक्त। मिनु मेकोपुकी जाक्शा “सामरीया रे मुरपुकी पिशो बाक्नीम” दैमा बाक्त।

18 मिनु बेन-हादादम “मेकोपुकी गारचा कली जाक्शो बाक्तेक्म हना, मेको आन कली सेसीन ग्याइक्तीन। लडाइ पथ जाक्शो बाक्तेक्म हना यो, सेसीन ग्याइक्तीन” दे माइक्मी बाक्त।

19 मिनु मेको हुकुम पाइब ठेयब मुर आन गेय पाइब ठिटापुकी सहर रे लाडगा गूमानु, आहाब आ अरु लडाइ पाइबपुकी मेको आन नोले खोइश्शा गूमा बाक्त।

20 मिनु नेल्लेमी आन जोरी सत्रु आन कली सदमे बाक्त। मिनु मो दुम्मेनु अरामी प्रोक्मा बाक्त। मिनु इस्राएलीपुकीम मेको आन कली खेदा पामे बाक्त। तन्न अराम डा पिप बेन-हादाद आ शारा डोइश्शा, अरु शारा डोइक्बपुकी नु प्रोक्माक्त।

21 मिनु इस्राएल डा पिप डोंइती बारशा, शारा नु बग्गी आन कली ग्रामाक्त। मिनु अरामी शुश आन कली साइक्मी बाक्त।

22 मिनु नोले मेको परमप्रभु यावे आ लोत्र पाइब इस्राएल डा पिप आ बाक्तीक जाक्शा, मेको कली “इन लडाइ पाइब आन कली ठीक पा वोतीन। मार पचा माल्बा, मेको रिम्शो पा मिम्तीन। मारदे हना मुल जाक्शो बर्सम अराम डा पिपम लेंशा गेपुकी नु लडाइ पाइब” दैमाक्त।

23 मिनु अराम डा पिप आ गेय पाइबपुकीम आन पिप कली “मेको आन देवता पहाड डा देवता बाक्नीम। मोपतीके मेकोपुकी इ क्येडा शुश बोल्यो बाक्नीम। मुल गोपुकीम मेको आन कली दिंमम लडाइ पाइतय हना, थमा पा गो मेको आन क्येडा बोल्यो दुम्नय।

24 मुल गे मार पचा माल्नीनी देश हना, एको पिप आन कली लडाइ पाइब आन ठेयब मुर रे गुंइदीन। मिनु मेको आन पा डा अर्को मुर योवडीन।

25 डोंइती बेक्शो लडाइ पाइब आन खोदेशो पा, अर्को लडाइ पाइब आन हुल का सेलीन। शारा डोइक्ब आन कली शारा नु बग्गी डोइक्ब आन कली बग्गी ठीक पने। मिनु नोले गो इस्राएली नु दिंमम लडाइ पथ लय। मिनु गो थमा पा मेको आन क्येडा बोल्यो दुम्नय” दैमा बाक्त। मिनु बेन-हादादमी मेको आन सल्ला बिश्शा, मेको आन देशो खोदेशो पवा बाक्त।

26 मिनु मेको जाकशो बर्सम बेन-हादादम लडाइ पचा कली अरामी आन कली पुक्मी बाक्त। मिनु इस्राएली नु लडाइ पचा कली अफेक सहर गे लमा बाक्त।

27 मिनु इस्राएली यो खुम्सीशा, जशा तूशा, मेको नु लडाइ पचा कली हुल हुल पा गूमा बाक्त। इस्राएलीम अरामी आन डोंइती गे आन बाक्तीक सेल्मे बाक्त। मेकोपुकी क्यारश आन आइक्च हुल निक्शी खोदेशो बाक्मा बाक्त। तन्न अरामी चहिं मेको रागी डा दिंम एर ओंथ नेल्ल ब्रीशा बाक्मा बाक्त।

28 मिनु परमप्रभु आ मुर का इस्राएल डा पिप आ बाक्तीकेम जाकशा, मेको कली “परमप्रभु यावेम ‘अरामीपुकीम परमप्रभु यावे, इस्राएली आन परमप्रभु पहाड डा देवता ला बाक्ब। बेंसी डा देवता ममाड, दे मिम्शो बाक्नीम। मोपतीके गो एको ठेयब हुल लडाइ पाइब आन कली इ गुडमी गेनुड। मिनु गे गोन परमप्रभु यावे नड, दे तुइक्नेवे’ दैत” दैमाक्त। प्रस्थान ७:५

29 मिनु मेको आन डोंइती आन बाक्तीकेम कोव्रमुशा ७ नाक्त सम्म बाक्मा बाक्त। मिनु नोले ७ नाक्तीम लडाइ पामे बाक्त। मिनु इस्राएलीपुकीम काबुम अरामी आन खोइलीम गाक्ब लडाइ पाइब लाख का आन कली सदमे बाक्त।

30 मिनु मेको आन दाते डा लीशोपुकी अफेक डा सहरम प्रोक्मा बाक्त। मिनु मेकेर डा गारो ब्रेशशा १७ हजार आन कली चिप्ता बाक्त। बेन-हादाद चहिं सहर ओव्रशा, खुइशशा बाक्माक्त।

31 मिनु मेको आ गेय पाइबपुकी मेको कली “गोपुकीमी इस्राएल आ खिं डा पिपपुकी दा शिशी पाइब बाक्नीम दैशो लोव्र नेशो बाक्नीकी। मोपतीके क्रातोम अरन्डी फेक्सीय। मिनु पियाम डोरी फ्रेंसीशा इस्राएल डा पिप आ बाक्तीक लय। मिनु मेकोम इन कली ब्रोंइचा गेबा की?” दैमा बाक्त।

32 मोपतीके मेकोपुकीमी आन क्रातोम अरन्डी फेक्शा, आन पियाम डोरी फ्रेंसीशा इस्राएल डा पिप आ बाक्तीक लशा मेको कली “इन वाइल बेन-हादादम ‘गो आं कली ब्रोंइचा गेयीमी’ दैशो बाक्ब” दैमा बाक्त। मिनु पिपमी “मार, मेको मुल यो सेसीन बाक्मे? मेको आं लोक्ब बाक्ब” दैमाक्त।

33 मिनु मेको मुरपुकीम पिप आ लोव्र रिम्शो बाक्माक्त दाप्शा “ओं, इन लोक्ब बेन-हादाद मुल यो सेसीन बाक्ब” दैमा बाक्त। मिनु पिपमी मेको आन कली “लशा, मेको कली एक चाक्कीन” दैमाक्त। मिनु बेन-हादाद गूशा जाक्मेनु, आहाबम मेको कली आ बग्गीम डोइक्पदा बाक्त।

34 मिनु बेन-हादादमी मेको कली “आं आफोम इन आफ रे ग्राशो सहर नेल्ल गो लेशशा गेनन्ती। मिनु आं आफोम सामरीयाम पशो खोदेशो पा, गे यो दमस्कसम ग्याप्तीक लेयतीक सेल्ने चाप्नीनी” दैमाक्त। मिनु इस्राएल डा पिप आहाबमी “मेको सल्लाम पतीके गो इ कली प्रोंइनन” दैमाक्त। मोपा आहाबमी दुचा आ पर्बम लोव्र पा, मेको कली प्रोना बाक्त।

### आहाब कली दोस गेशो

35 मिनु परमप्रभु यावे आ लोव्र पा, मेको आ लोव्र पाइब आन दाते डा काम आ वारच का कली “आं कली तुब्यी” दैमाक्त। तन्न मेकोमी तुप्ने मबिस्से बाक्त।

36 मिनु मेको परमप्रभु यावे आ लोव्र पाइबमी “गे परमप्रभु यावे आ अरेशो लोव्र मटितीके आं कली प्रोंइशा लवे चोटीन इ कली गुप्स काम साइक्ब” दैमाक्त। मिनु मेको लम नोले गुप्स काम थिश्शा, मेको कली सदा बाक्त। १राजा १३:२४

37 मिनु मेको परमप्रभु यावे आ लोव्र पाइबमी अर्को मुर का कली युम्शा, मेको कली “आं कली तुब्यी” दैमाक्त। मोपतीके मेकोमी मेको कली तुप्शा, गार सेला बाक्त।

38 मिनु मेको परमप्रभु यावे आ लोव्र पाइब लशा, मतुइक्पांडसीचा डा पा आ मिक्चीम वा फ्रेंशा पिप कली लांम रिम्दा बाक्त।

39 मिनु पिप मेको आ नेक्था रे लमेनु, मेकोमी पिप कली ब्रेशशा “गो इन वाइल लडाइ पतीकेम जाक्दीशो नड। मिनु मेकेर लडाइ पाइब मुर काम फ्रेंशो मुर का चाक्शा आं बाक्तीक जाक्त। मिनु मेकोमी आं कली ‘एको मुर जिम्मा ब्रावो। एको मुर दोकका पा प्रोक्त हना, एको आ पा डा गे बेक्चा माल्नेवे कि टलेन्ट का चांदी थाप्चा माल्नेवे’ दैत। टलेन्ट का ३४ किलो बाक्ब। २राजा १०:२४

40 मिनु गो, इन वाइल, गेय पा बाकडा सम्म, मेको ग्याइशो मुर प्रोक्माक्त” देंमाक्त। मिनु इस्राएल डा पिपमी मेको कली “गे इ निसाफ आंमान पाप्तीवी। मेकोन इ कली पतीक निसाफ बाकब” देंमाक्त।

41 मिनु मेको परमप्रभु यावे आ लोव्र पाइबमी रीब पा आ मिक्चीम फ्रेंशो वा पुदा बाक्त। मिनु इस्राएल डा पिपम मेको कली परमप्रभु यावे आ लोव्र पाइब का बाक्त, दे तुइक्ता बाक्त।

42 मिनु मेकोमी पिप कली “परमप्रभु यावेमी ‘गो साइक्चा कली ठीक पशो मुर कली गे प्रोंइतीवी। मोपतीके मेको आ पा डा गे बेक्चा माल्नेवे। मिनु मेको आ मुर आन पा डा इ मुर बेक्चा माल्नीम” देंत” देंमाक्त।

43 मिनु इस्राएल डा पिपमी “मार लोव्र पवा?” दे गाइश, आ खिं सामरीयाम जाक्माक्त।

## 21

### नाबोथ आ अडगुर रू

1 इच्छा नाक्त नोले मार दुम्माक्त देशा हना, येजेल सहर डा नाबोथ माइशो मुर का बाक्माक्त। मेको के अडगुर रू का बाक्माक्त। मेको अडगुर रू येजेल सहर सामरीया डा पिप आहाब आ दरवार आ नेक्था बाक्माक्त।

2 काबु नाक्ती आहाबमी नाबोथ कली “इ अडगुर रू आं कली गिग खाइ खुम्चा कली गेयी। मारदे हना मेको आं खिं आ नेक्था बाकब। मेको आ पा डा गो इ कली अर्को मेको क्येडा रिम्शो अडगुर रू का गेनन। क्येट देंनेवे हना यो, क्येट गेनन” देंमाक्त।

3 तन्न नाबोथमी आहाब कली “परमप्रभु यावे आ डोंइती मोदेशो पने मचाप्नुड। गो आं किकी पिपी आन गेशो रू इन कली गेने मचाप्नुड” देंमाक्त।

4 मोपतीके आहाब आ थुं खुरसीशा गाइश आ खिं लमाक्त। मारदे हना येजेली नाबोथमी “आं किकी पिपी आन गेशो रू इन कली मगेनुड” देशो बाक्माक्त। मिनु मेको आ कुल किरशा आ ब्राख्येम इप्शा बाक्माक्त। जने यो मबिस्से बाक्त।

5 मिनु मेको आ मीश इजेबेल जाक्शा, मेको कली “गे मारदे इन थुं खुरसीनी? मारदे मारेइ जने मबिस्सीनी?” दे हिल्लो पवा बाक्त।

6 मिनु मेकोम इजेबेल कली “गो येजेली नाबोथ कली ‘इ अडगुर रू ग्याप्चा गेयी कि इ दाकशो रू नु फाइक्स’ माइक्ता। तन्न मेकोम ‘गो आं अडगुर रू इन कली मगेनन्नी’ देंत” देंमाक्त।

7 मिनु मेको आ मीश इजेबेलम मेको कली “गे इस्राएल डा पिप बाक्नीनी। मिनु गे मोदेशो पाइनीनी? बोक्शा, जने तूडीन। मिनु ग्येरसीने। गो येजेली नाबोथ आ अडगुर रू इन कली गेनन्नी” देंमाक्त।

8 मिनु इजेबेलम आहाब आ नेंमी चिठी का ब्रेक्ता बाक्त। मिनु मेकेर पिप आ छाप थोक्ता बाक्त। मिनु मेको नाबोथ आ सहर डा खाल्पा नु ठेयब मुर आन कली सोइक्ता बाक्त।

9 मेकोम मेको चिठीमी “ ‘माइजा बाक्तीक नाक्त का बाकब’ देंनीन। मिनु नाबोथ कली मरिम्शो पाइब आन नित्तीकेम निप्पतीन।

10 मिनु मरिम्शो पाइब मुर निक्शी आस कली मेको आ डोंइती निप्पाइश, एकोम ‘परमप्रभु नु पिप कली सराप पशो बाकब’ दे दोस गेपतीन। मिनु मेको नोले मेको कली लाडगा गुंइशा फुल्लु आप्शा सतीन” दे ब्रेक्ता बाक्त। ब्यवस्था १७:६; मती २६:५९-६१; प्रस्थान २२:२७

11 मिनु इजेबेलम मेको आन कली चिठीम ब्रेक्शो खोदेशो पा, मेको सहर डा मुर, खाल्पा नु मेकेर डा ठेयब मुरपुकीम पामे बाक्त।

12 मिनु मेकोपुकीम माइजा बाक्तीक नाक्त का सेल्मे बाक्त। मिनु नाबोथ कली मरिम्शो पाइब आन कली निप्पाइक्तीकेम निप्पदमे बाक्त।

13 मिनु मेको नोले मेको मरिम्शो पाइब मुर निक्शी जाक्शा, मेको आ डोंइती निस्ससा बाक्त। मिनु मेको निक्शीमी “नाबोथम परमप्रभु नु पिप कली सराप पशो बाकब” दे नेल्लेम नेंचा डा पा दोस गेम्से बाक्त। मिनु मेकोपुकीम मेको कली लाडगा गुंइशा फुल्लु आप्शा सदमे बाक्त।

14 मेको नोले मेकोपुकीमी इजेबेल कली “नाबोथ कली फुल्लु आप्शा साइक्तक” दे लोव्र कुरब मुर सोइक्तमे बाक्त।

15 मिनू इजेबेलम नाबोथ कली फुल्लु आप्शा साइक्तेकम देशो लोत्र नेंना चोटीन आहाब कली “मुल बोक्शा येज़ेल सहर डा नाबोथम इन कली लेयने मबिशशो रू इन के सेलीन। मारदे हना मेको बेक्त” देमाक्त।

16 मिनू नाबोथ बेक्माक्त देशो लोत्र नेंशा, आहाब बोक्शा येज़ेल सहर डा नाबोथ आ अडगुर रू हिरशा आम के सेल्थ लमाक्त।

17 मिनू परमप्रभु यावेमी तिश्बे सहर डा एलीया कली लोत्र पवा बाक्त।

18 मार लोत्र पवा बाक्त देशा हना “इस्त्राएल डा पिप आहाब कली गुम्थ उइ लावो। मेको सामरीयाम बाक्शो नाबोथ आ अडगुर रू आम के सेल्थ लशो बाक्ब।

19 गे मेको कली परमप्रभु यावेमी ‘मार, गे मुर का कली साइश्शा, मेको आ रू इ के मसेली डा?’ देंत, मतो। मिनू मेको कली परमप्रभु यावेमी ‘नाबोथ आ हुश कुचुमम तुक्तीकेमीन इ हुश यो कुचुमम तुक्नीम’ देंत, मतो” देमाक्त। १राजा २२:३८

20 मिनू आहाबमी एलीया कली “आं सत्रु, गे आं कली थिय्यी?” दे मदा बाक्त। मिनू मेकोम “ओं, गो इ कली थित्तन। मारदे हना गे परमप्रभु यावे आ डोंइती मार मरिश्शो बाक्मे, मेको ला पना पन बाक्ते।

21 मोपतीके परमप्रभु यावेमी ‘मुल गो इ तार शुश श्येत कोण्डु। गो इस्त्राएल रागीम बाक्ब, गे नु इ खिं डा वोंइश मुर नेल्ल आन कली साइक्नुडमी। वाइल बाक्मल कि प्रोंइचा पुंइसीशो बाक्मल, नेल्ल आन कली साइक्नुडमी। २राजा ९:७-८

22 मिनू गो इ खिं कली नेबात आ तौ येरोबाम नु अहीयाह आ तौ बाशा आस खिं कली पाइश्शो खोदेशो पाइनुड। मारदे हना गे आं कली गाइक्पाइक्तीके नु इस्त्राएल कली पाप पपाइक्तीके, मो पाइनुड’ देंत। १राजा १५:२९; १राजा १६:११-१२

23 मिनू परमप्रभु यावेम इजेबेल आ पर्वम ‘कुचुमपुकीम इजेबेल कली येज़ेल सहरम ब्वाइनीम। २राजा ९:३३-३६

24 सहरम बेक्शो आहाब आ खिं डा मुर आन कली कुचुमम ब्वाइनीम। मिनू रूम बेक्शो आन कली चिक्बपुकीम ब्वाइनीम’ देंत” देमाक्त। १राजा १४:११; १राजा १६:४; १राजा २१:२४

25 आहाबम आ मीश इजेबेल आ लोत्र नेंशा, परमप्रभु यावे आ डोंइती काइ मरिश्शो पवा बाक्त। मोदेशो मुर अर्को सुइ मबाक्मा बाक्त।

26 मेको परमप्रभु यावेमी इस्त्राएली आन डोंइती रे खेरशो एमोरी खोदेशो पा मेको आन ग्रांग्रा दिशो मूर्ति आन नोले खोदा बाक्त।

27 मिनू आहाबम मेको लोत्र नेंशा, आ वा खाक्गा बाक्त। मिनू अरन्डी फेक्शा माइजा बाक्माक्त। मेको अरन्डी फेक्शा आ थुं लुकच लशा इम्माक्त।

28 मिनू परमप्रभु यावेम तिश्बे सहर डा एलीया कली लोत्र पवा बाक्त।

29 मार लोत्र पवा बाक्त देशा हना “आहाब आं डोंइती ब्रेश्शो दुम्शो तवी? मारदे हना मेको ब्रेम्शो तुम्तीके गो मेको आ पालाम ठेयब श्येत मडुम्पाइक्नुड। तन्न मेको आ तौ आ पालाम मेको आ खिंम ठेयब श्येत चाक्नुड” देमाक्त। २राजा ९:२६

## 22

मीकायामी लोत्र पशो  
२इतिहास १८:-

1 मिनू बर्स सां सम्म अरामी नु इस्त्राएली आन दातेमी लडाइ मडुम्माक्त।

2 तन्न बर्स सां नोले यहूदा डा पिप येहो-शाफात इस्त्राएल डा पिप कली गुम्थ बुम्माक्त। १राजा २२:४१

3 मिनू इस्त्राएल डा पिपमी आ गेय पाइब आन कली “गे नेल्लेम रामोथ-गिलाद इ के बाक्ब, दे तुइक्नीनी। मो हना यो गो मेको अराम डा पिप रे लेशशा ताक्का कली मारेइ मपशो बाक्नय” देमाक्त। यहोसु २१:३८

4 मोपतीके मेकोम येहो-शाफात कली “रामोथ-गिलाद कली लडाइ तोचा कली गे आं कली वारच पाइक्नीनी?” दे हिल्लो पवा बाक्त। मिनु येहो-शाफातमी इस्राएल डा पिप कली “गो इन खोदेशो नड। आं मुरपुकी इन मुर नम। आं शारा नेल्ल इन केन नम” देमाक्त। २राजा ३:७

5 तन्न येहो-शाफातम इस्राएल डा पिप कली “डोंइती परमप्रभु यावे कली हिल्लो पने” देमाक्त।

6 मोपतीके इस्राएल डा पिपम ४ सहे जना खोइ परमप्रभु यावे आ लोत्र पाइब आन कली पुक्शा, मेको आन कली “गो रामोथ-गिलाद कली लडाइ तोड देय मतोड” दे हिल्लो पामी बाक्त। मिनु मेकोपुकीमी “तोन, परमप्रभु यावेम मेको इन गुइमी गेब” देमा बाक्त।

7 मिनु येहो-शाफातम “हिल्लो पचा कली परमप्रभु यावे आ लोत्र पाइब अर्को सुइ मबाक्नीमी” देमाक्त। २राजा ३:११

8 मिनु इस्राएल डा पिपम येहो-शाफात कली “परमप्रभु यावे कली हिल्लो पचा कली अर्को का बाक्ब। मेको इम्लाह आ तौ मीकाया बाक्ब। तन्न गो मेको मुर कली काइ मदाक्नुड। मारदे हना मेकोम आं पबंम गेनायो रिमशो लोत्र मपाइब। गेना हना यो मरिमशो लोत्र ला पाइब” देमाक्त। मिनु येहो-शाफातमी पिप कली “पिपम मोदेशो लोत्र मपवल” देमाक्त। २इतिहास १८:७-२७

9 मिनु इस्राएल डा पिपम आ मुर आन दाते डा का कली ब्रेशशा “इम्लाह आ तौ मीकाया कली रीब पा चाक्को” दे मदा बाक्त।

10 मिनु इस्राएल डा पिप नु यहूदा डा पिप येहो-शाफात पिपम फेक्तीक वा फेक्शा सामरीया डा ठेयब लाप्यो आ डोंइती आस आस नित्तीकेम निश्शा बाक्शो बाक्सा बाक्त। मिनु परमप्रभु यावे आ लोत्र पाइब नेल्ले मेको आस डोंइती बाक्शा नोले दुम्ब लोत्र पना पन बाक्शो बाक्मा बाक्त।

11 मेको आन दाते डा का केनानाह आ तौ सिदकीयाहमी चहिं फलाम के ग्योत्र सेल्सीशो बाक्माक्त। मिनु मेकोमी “परमप्रभु यावेमी ‘गे एको ग्योत्रमी अरामी आन कली नेल्ल मबेक्मा सम्म खुइक्नीनी’ देत” देमाक्त।

12 मिनु परमप्रभु यावे आ लोत्र पाइब नेल्लेमी मेको मोदेशोन लोत्र पशो बाक्मा बाक्त। मेकोपुकीमी “रामोथ-गिलाद कली लडाइ तोशा रीब पा ग्राडीन। मारदे हना परमप्रभु यावेम मेको पिप इन गुइमी गेब” देशो बाक्मा बाक्त।

13 मिनु मीकाया कली ब्रेशशा चाक्ब मुरुम मेको कली “परमप्रभु यावे आ लोत्र पाइब नेल्लेमी लोत्र का पा पिप कली ग्येरपाइशो बाक्नीम। गे यो मेको आन खोदेशो पा रिमशो लोत्र पने” देमाक्त।

14 तन्न मीकायाम चहिं “गो परमप्रभु यावे गेना हना यो ब्रोंइशा बाक्शो खोदेशो पा परमप्रभु यावेमी आं कली मार देबा, मेको ला देनुड” देमाक्त।

15 मिनु मीकाया पिप आ डोंइती जाक्मेनु, पिपमी मेको कली “मीकाया, गो रामोथ-गिलाद कली लडाइ तोड देय मतोड?” दे हिल्लो पवा बाक्त। मिनु मेकोमी “लडाइ तोने। मिनु ग्राडीन। मारदे हना परमप्रभु यावेमी मेको इन गुइमी गेब” देमाक्त।

16 मिनु पिपमी मेको कली “परमप्रभु यावे आ नेमी थमा लोत्र ला पचा, दे गिश खेयप कसम जपाइक्नना?” देमाक्त।

17 मिनु मीकायामी “गो इस्राएली नेल्ल आन कली गोठला मबाक्शो भेडा खोदेशो पा, डांडा मेर ब्रशो तातामी। मिनु परमप्रभु यावेमी ‘मेको मुर आन ठेयब मुर मबाक्ब। मेको नेल्ल आन थुं नाइशशा आन खिं लमल’ देशो बाक्ब” देमाक्त। गन्ती २७:१७; मती ९:३६

18 मिनु इस्राएल डा पिपम येहो-शाफात कली “मार एकोम आं पबंम मरिमशो लोत्र डा लाक्शा अर्को मारेइ मदेब, देंडा ममाइ डा?” देमाक्त।

19 मिनु मीकायामी लोत्र तेम्शा “एको परमप्रभु यावे आ लोत्र नेनीन। गो परमप्रभु यावे आ स्वर्ग डा गेय पाइब नेल्ल आन कली आ ग्युरा गे नु आ पेरा गे राप्पाइशशा, परमप्रभु यावे आ नित्तीकेम बाक्शो ताता। २इतिहास १८:१८; अय्युब १:६; यसेया ६:१

20 मिनु परमप्रभु यावेमी ‘आहाब कली रामोथ-गिलाद नु लडाइ पपाइशशा, मेको कली साइक्पाइक्चा कली सुम क्युक्बा?’ देत। मिनु काम लोत्र का पापु, अर्कोम अर्को लोत्र पापु।

21 मिनु नोले का जाकशा, परमप्रभु यावे आ डोंइती राप्शा 'गो मेको आ थुं क्याक्नुड' देंत। यसैया १९:१४

22 मिनु परमप्रभु यावेमी मेको कली 'दोपा?' दे हिल्लो पापु। मिनु मेकोमी 'गो लशा मेको आ नोले दुम्ब लोत्र पाइब नेल्ल आन शोत्रमी जोल पाइब सोक्त का दुम्नुड' देंत। मिनु परमप्रभु यावेम मेको कली 'गे थमा पा मेको कली क्युकने चाप्नेवे। गे लावो। मिनु इ देंशो पावो' देंत। १यूहन्ना ४:६

23 मोपतीके परमप्रभु यावेम इन नोले दुम्ब लोत्र पाइब नेल्ल आन शोत्रमी जोल पाइब सोक्त कुर पशो बाक्ब। परमप्रभु यावेम इन कली खतम दुम्तीक नाक्त चाक्शो आ पर्बम नेंपाइक्ने थुम्शो बाक्ब" देंमाक्त।

24 मिनु केनानाह आ तौ सिदकीयाह, इर डोइश्शा मीकाया आ चोत्रचो रबा बाक्त। मिनु मेको कली "दोपा परमप्रभु यावे आ सोक्त आं रे पा इ थुंम ब्वाक्थ जाक्मे?" देंमाक्त।

25 मिनु मीकायाम "गे आंमा आगा डा कोठाम खुडक्थ लवे नाक्त, तुइक्नेवे" दे मदा बाक्त।

26 मिनु इस्राएल डा पिपम "मीकाया कली ग्याइक्तीन। मिनु सहर डा ठेयब मुर आमोन नु पिप आ तौ योआश आस जिम्मा गेने।

27 मिनु एको मुर कली चोक्शा वोतीन। गो रिम्शो पा लेशशा मजाक्डा सम्म एको कली शोब्ले नु ब्वाक्कु डा लाक्शा अरु मारेइ मगेने" देंमाक्त।

28 मिनु मीकायाम मेको कली "गे रिम्शो पा लेशशा जाक्तीनी हना, परमप्रभु यावे गो नु मब्वाक्शो बाक्माक्त, देंनुड" देंमाक्त। मिनु मेकोम चिनु लोत्र तेम्शा "गे नेल्लेम एको लोत्र नेंशा, इन थुंम वोतीन" देंमाक्त।

### आहाब साइक्चा पुंइसीशो

29 मिनु इस्राएल डा पिप नु यहूदा डा पिप येहो-शाफात रामोथ-गिलाद लसा बाक्त।

30 मिनु इस्राएल डा पिपम येहो-शाफात कली "गो मतुइक्चा डा वा फेक्शा लडाइ पथ लाडनुड। तन्न गे इन फेक्तीक वा फेक्शा बाक्कीन" देंमाक्त। मिनु इस्राएल डा पिप मतुइक्चाइसीचा डा वा फेक्शा लडाइ पथ लमाक्त।

31 मिनु अराम डा पिपम आ ३२ जना बग्गी डोइश्शा लडाइ पाइब आन ठेयब मुर आन कली "इस्राएल डा पिप डा लाक्शा अरु आइक्च ठेयब सुइ नु लडाइ मपने" दे हुकुम गेशो बाक्माक्त।

32 मिनु बग्गी डोइश्शा, लडाइ पाइब आन ठेयब मुरपुकीम येहो-शाफात कली तशा "थमा पा इस्राएल डा पिप मेकोन बाक्ब" देंशा, मेको नु लडाइ पचा कली लमा बाक्त। तन्न येहो-शाफात ठेयब सेंदा पा वाइ ब्रेम्माक्त।

33 मिनु मेको बग्गी डोइश्शा, लडाइ पाइब आन ठेयब मुरपुकीम "एको दा इस्राएल डा पिप ममाइ बाक्माक्त" दे तुइक्तमे बाक्त। मिनु मेको कली खेदा पचा प्रोइशा लेम्मा बाक्त।

34 तन्न मुर कामी आ लिब्रा खुक्शा, हेंथे पा ब्रा आप्शा सोइक्ता बाक्त। मिनु मेको ब्रामी इस्राएल डा पिप आ कुचु तेक्तीक पाता आ बोंइसेम ख्वा बाक्त। मिनु पिपम आ बग्गी खुल्ब कली "बग्गी हिरशा लडाइ रे गुंइदी। गो ठेयब गार दुम्शो बाक्नुड" देंमाक्त।

35 मिनु नाक्त रे ठेयब लडाइ दुम्माक्त। पिप चहिं आ बग्गीम अरामी आन डोंइती राप्शा बाक्शो बाक्माक्त। मेको आ गार रे गूशो हुश बग्गी आगामीन शाइश्शो बाक्माक्त। मिनु मेको पिप मेको नाक्दोन बेक्माक्त।

36 मिनु नां लाक्गा नोले लडाइ पाइब आन हुलम "मुर नेल्ल इन सहर सहर नु इन बाक्तीक लने" देंशो लोत्र नेन्मे बाक्त।

37 मोपा पिप बेक्माक्त। मिनु मुरपुकीम मेको कली सामरीयाम चाक्शा थिम्मे बाक्त।

38 मिनु मेकोपुकीम मेको बग्गी सामरीया डा दोम्ली काम मुरमे बाक्त। मेकेर कुचुमपुकीम आ हुश तुक्गमे बाक्त। तेल्लेमपुकी मेकेर जाक्शा, चिक्सीमा बाक्त। मोपा परमप्रभु यावे आ देंशो खोदेंशो दुम्माक्त। १राजा २१:१९; २राजा ९:२५-२६

39 आहाब आ पशो अरु गेय, मेको आ पशो नेल्ले, मेको आ सेल्शो हाती आन खुड के खिं नु मेको आ सेल्शो सहरपुकी, मार, मेको इस्राएल डा पिप आन इतिहासम ब्रेक्शो मबाक्बा डा?

40 मोपा आहाब बेक्माक्त। मिनु मेको आ पा डा आ तौ अहाज्याह पिप दुम्माक्त।

यहूदा डा पिप येहो-शाफात

२इतिहास २०:३१-२१:१

41 आसा आ तौ येहो-शाफात यहूदा डा पिप दुम्माक्त। मेना इस्राएल डा पिप आहाबम सासन पशो ४ बर्स दुम्शो बाक्माक्त। १राजा १५:२४

42 येहो-शाफात पिप दुम्मेनु ३५ बर्स दुम्शो बाक्माक्त। मिनु मेकोम यरूसलेमम २५ बर्स सासन पवा बाक्त। मेको आ ममा आ नें अजुबाह बाक्माक्त। मेको शिल्ही आ तमी बाक्माक्त।

43 मेको गेना हना यो आ आफ आसा आ लांम गाक्माक्त। मिनु मेको रे गेनायो मलेम्माक्त। मेकोमी परमप्रभु यावे आ डोंइती मार रिम्शो बाक्मे, मेको पवा बाक्त। मो हना यो मेकोम डांडा मेर सेल्शो थानपुकी मप्रेदा बाक्त। मिनु मेना सम्म मुरपुकीम मेकेर पूजा पना पन धूप चोना चोन बाक्मा बाक्त।

44 येहो-शाफात इस्राएल डा पिप नु यो गारशा बाक्माक्त। १राजा १५:१४; २राजा १२:४

45 येहो-शाफात आ पशो अरु गेय, आ सक्ति कोंइशो, मेको आ लडाइ पशो, मार, मेको यहूदा डा पिप आन इतिहासम ब्रेक्शो मबाक्बा डा?

46 मेकोमी आ आफ आसा आ पालाम लीशो थान डा तेल्लेम वोंइश मुर आन कली क्याम्दा बाक्त। २इतिहास १७:-२०:-

47 मेना एदोमम सुड पिप मबाक्मा बाक्त। मिनु मेकेर सोइशो मुर कामी मेको रागीम सासन पवा बाक्त। १राजा १५:१२

48 येहो-शाफातम ओफीर रे सुन चाक्चा कली टारसीस डा खोदेशो पा जहाजपुकी सेल्पदा बाक्त। तन्न मेकोपुकी एस्योन-गेबेरम बिग्रेतीके समुन्द्रम लने मचाप्मे बाक्त।

49 मेना आहाब आ तौ अहाज्याहम येहो-शाफात कली “इन गेय पाइबपुकी आं गेय पाइब नु जहाजम लचा गेने” देंमाक्त। तन्न येहो-शाफात मबिस्से बाक्त। १राजा ९:२८

50 मिनु नोले येहो-शाफात बेक्माक्त। मिनु मेको आ आफ दाऊद आ सहरम थिम्चा पुंडसे बाक्त। मिनु मेको आ पा डा आ तौ येहोराम पिप दुम्माक्त।

इस्राएल डा पिप अहाज्याह

51 आहाब आ तौ अहाज्याह सामरीयाम इस्राएल डा पिप दुम्माक्त। मिनु मेकोम बर्स निक्शी इस्राएलम सासन पवा बाक्त। मेना यहूदा डा पिप येहो-शाफात पिप दुम्शो १७ बर्स दुम्शो बाक्माक्त। २राजा ८:१६

52 पिप अहाज्याहमी परमप्रभु यावे आ डोंइती मार मरिम्शो बाक्मे, मेको पवा बाक्त। मेको आ आंम आफ नु इस्राएली आन कली पाप पपाइक्ब नेबात आ तौ येरोबाम आ लांम गाक्माक्त। १राजा २२:४०

53 मेकोम बाल देवता कली पूजा पवा बाक्त। मेकोमी आ आफोम परमप्रभु यावे, इस्राएली आन परमप्रभु कली गाइक्पाइशो खोदेशो पा, मेकोमी यो परमप्रभु कली गाइक्पदा बाक्त। १राजा १२:२८-३०



## २ राजा

**ब्रेक्ब मुर:** नेल्ल क्येडा नोले ब्रेक्ब, सुडम मतुडक्नीम। एको ब्रेक्ब मुरुमी यहूदा डा पिप आन इतिहास डा किताब नु इस्राएल डा पिप आन इतिहास डा किताब तुडशशो बाक्त।

**गेना ब्रेक्शो:** ५६१ बि. सी. पिप योयाकीन जेल्खान रे प्रॉइचा पुंडसीशो बर्सम बाक्त।

**मार ब्रेक्शो:** डोंइती १राजा नु २राजा हिब्रू लोव्र रे ब्रेक्शो किताब का बाक्त। मेको ब्रेक्ब मुरुमी ग्रीक लोव्र डा सेप्टुआगीन्त माइशशो किताब निक्शी सेल्मे बाक्त। राजा किताब निक्शी, सामुएल निक्शी, यहोसु नु न्यायाधीस कली डोंइती डा परमप्रभु यावे आ लोव्र पाइब आन किताब देंनीम। मेको किताबपुकीमी मोसामी इस्राएली आन कली इजीप्त रे प्रॉइशा बेबीलोन डा मुर आन कली ग्याइशशा लाइशशो सम्म डा लोव्र नेल्ल ब्रेक्शो बाक्ब।

एलीयाम पिप कली लोव्र पशो

1 मिनु आहाब बेक्म नोले मोआबमी इस्राएली आन कली मटिवा बाक्त। २सामुएल ८:२; २राजा ३:४-२७

2 अहाज्याह सामरीया सहर डा आ खिं डा तला तार रे दोक्शा, गार दुम्माक्त। मोपतीके मेकोमी मुर आन कली “लशा, एक्रोन डा देवता बाल-जेबुब नु पुनीन। गो एको आं गार रे सानुडा देय मसानुडा?” दे हिल्लो पचा कली सोइक्तीमी बाक्त। १राजा २२:५२-५४

3 तन्न परमप्रभु यावे आ स्वर्ग डा गेय पाइबमी तिश्बे सहर डा एलीया कली “बोक्शा लशा, सामरीया डा पिप आ लोव्र कुरब आन कली गुम्शा, मेको आन कली “मार, इस्राएलम परमप्रभु मबाक्बा डा? मिनु गेपुकी एक्रोन डा देवता बाल-जेबुब आ बाक्तीके हिल्लो पथ लनी?” यसैया ८:१९

4 मोपतीके परमप्रभु यावेमी अहाज्याह कली “गे इ रोइ पा गोल्टीक रे मबोक्नेवे। गे थमा पा बेक्नेवे” देशो बाक्ब, देनीन” देमाक्त। मिनु एलीया गाक्माक्त।

5 मिनु मेको लोव्र कुरब मुरपुकी पिप आ बाक्तीक लेशशा जाक्मा बाक्त। मिनु पिपमी “गे मारदे लेशशा जाक्नी?” दे हिल्लो पामी बाक्त।

6 मिनु मेकोपुकीमी “गो आंइ कली गुम्थ मुर का जाक्त। मिनु मेकोमी “लेशशा लशा इन कली सोइक्ब पिप आ बाक्तीक लने। मिनु मेको कली परमप्रभु यावेमी मार, इस्राएलम परमप्रभु मबाक्बा डा? गे एक्रोन डा देवता बाल-जेबुब कली हिल्लो पथ मुर सोइक्तीके, मसानीनी, बेक्नीनी” देत माइक्चा” देमा बाक्त।

7 मिनु पिपमी मेको आन कली “इन कली गुम्शा, मेको लोव्र पाइब मुर दोदेशो बाक्म” दे हिल्लो पामी बाक्त।

8 मिनु मेकोपुकीमी “दलओंठ आ चां के प्रोवशो वा फेक्सीशो नु कुशल के पेटी किम्सीशो बाक्त” देमा बाक्त। मिनु मेकोमी “मेको तिश्बे सहर डा एलीया बाक्ब” देमाक्त। इतिहास १६:१७; मती ३:४

9 मिनु पिपमी ५० जना लडाइ पाइब नु आन कप्तान आन कली एलीया आ बाक्तीक सोइक्तीमी बाक्त। मिनु मेको ठेयब मुर डांडा डोइशशा एलीया आ बाक्तीक लमाक्त। मेना एलीया डांडाम बाक्शो बाक्माक्त। मिनु मेको कप्तानमी “परमप्रभु आ मुर, पिपमी इन कली ‘यिन’ देशो बाक्ब” देमाक्त।

10 मिनु एलीयामी मेको ५० जना डा लडाइ पाइब आन कप्तान कली “गो परमप्रभु आ मुर बाक्ती हना, सरीड रे मी दोक्शा, गे नु इ लडाइ पाइब ५० जना इन कली दाक्गल” देमाक्त। मिनु सरीड रे मी दोक्शा, मेको कप्तान नु आ लडाइ पाइब ५० जना आन कली दाक्गा बाक्त। लूका ९:५४; प्रकाश ११:५

11 मिनु मेको नोले पिपमी अर्को ५० जना लडाइ पाइब नु आन कप्तान कली एलीया आ बाक्तीक सोइक्तीमी बाक्त। मिनु मेको लडाइ पाइब आन कप्तान डांडा डोइशशा लशा “परमप्रभु आ मुर, पिपमी इन कली ‘रीब पा यिन’ देत” देमाक्त।

12 मिनु एलीयाम “गो परमप्रभु आ मुर बाक्ती हना, सरीड रे मी दोक्शा, गे नु इ ५० जना लडाइ पाइब इन कली दाक्गल” देमाक्त। मिनु परमप्रभु आ मी सरीड रे दोक्शा, मेको नु मेको आ लडाइ पाइब ५० जना आन कली दाक्गा बाक्त।

13 मिनु पिपमी लेंशा ५० जना लडाइ पाइब नु आन कप्तान कली सोइक्तीमी बाक्त। मिनु मेको सोइश्शो लडाइ पाइब आन कप्तान डांडा डोइश्शा एलीया आ बाक्तीक लमाक्त। मिनु मेकोमी एलीया आ डोंइती पोक्च थेक्शा सेउ पा “परमप्रभु आ मुर, गो नु एको इन गेय पाइब ५० जना आइ कली शिशी पा ब्रोंइचा गेने।

14 डोंइती डा ५०, ५० जना लडाइ पाइब नु आन कप्तान निक्शी आस कली सरीड रे मी दोक्शा, दाक्तु। तन्न मुल आइ कली शिशी पा ब्रोंइचा गेने” देमाक्त।

15 मिनु परमप्रभु यावे आ स्वर्ग डा गेय पाइबमी एलीया कली “मेको नु उइ बुपो। मेको क्येडा महिनो” देमाक्त। मोपतीके एलीया मेको लडाइ पाइब आन कप्तान नु पिप आ बाक्तीक लमाक्त।

16 मिनु मेकोमी पिप कली “परमप्रभु यावेमी इन कली ‘मार, इस्राएलम परमप्रभु मबाक्बा डा? मिनु गे मुर आन कली एक्रोन डा देवता बाल-जेबुब आ बाक्तीके हिल्लो पथ सोइक्तीनी? मोपतीके गे इन गोल्तीके रे मबोक्नीनी। गे थमा पा बेक्नीनी’ देशो बाक्ब” देमाक्त।

17 मिनु एलीयामी देशो खोदेशो पा, परमप्रभु यावे आ लोव्र गाप्शा अहाज्याह बेक्माक्त। मिनु मेको आ पा डा आ लोकब येहोराम पिप दुम्माक्त। मारदे हना अहाज्याह के तौ मबाक्मा बाक्त। मेना यहूदा डा पिप येहो-शाफात आ तौ येहोराम यहूदा डा पिप दुम्शो बर्स निक्शी दुम्शो बाक्माक्त। येहोराम कली ब्रेत्तीक नें योराम यो बाक्त। २राजा ३:१

18 अहाज्याह आ पशो अरु गेय, मार, इस्राएल डा पिप आन इतिहासम ब्रेक्शो मबाक्बा डा?

## 2

### परमप्रभुम एलीया कली लाइश्शो

1 परमप्रभु यावेमी एलीया कली फश गिवारम क्युक्शा स्वर्ग लाइक्चा चिक्शो बाक्माक्त। मेना एलीया नु एलीशा गिल्गाल प्रोंइशा गाक्ना गाक्न बाक्सा बाक्त।

2 मिनु एलीयामी एलीशा कली “गे एक उइ बाक्को। मारदे हना परमप्रभु यावेमी आं कली बेथेल सोइश्शो बाक्ब” देमाक्त। तन्न एलीशामी “परमप्रभु यावे ब्रोंइशा बाक्शो खोदेशो पा नु इन ब्रोंइशा बाक्शो खोदेशो पा, गो इन कली मप्रोंइनुड” देमाक्त। मोपतीके मेको निक्शी बेथेल बुप्सा बाक्त।

3 मिनु मेकेर परमप्रभु यावे आ लोव्र पाइब आन हुल का जाक्शा, एलीशा कली “परमप्रभु यावेमी मुलाक्ती इन होव्रप कली लाइक्ब, दे तुइक्नीनी?” दे हिल्लो पामे बाक्त। मिनु एलीशामी “गो तुइक्नुड। गे सिक्सी पने” देमाक्त।

4 मिनु एलीयामी मेको कली “एलीशा गे एक बाक्को। मारदे हना परमप्रभु यावेमी आं कली यरीको सोइश्शो बाक्ब” देमाक्त। तन्न मेकोमी “परमप्रभु यावे ब्रोंइशा बाक्शो खोदेशो पा नु इन ब्रोंइशा बाक्शो खोदेशो पा, गो इन कली मप्रोंइनुड” देमाक्त। मोपतीके मेको निक्शी यरीको सम्म बुप्सा बाक्त।

5 मिनु यरीकोम परमप्रभु यावे आ लोव्र पाइब आन हुल का जाक्शा, एलीशा कली “परमप्रभु यावेमी मुलाक्ती इन होव्रप कली लाइक्ब, दे तुइक्नीनी?” दे हिल्लो पामे बाक्त। मिनु मेकोमी “गो तुइक्नुड। गे सिक्सी पने” देमाक्त।

6 मिनु एलीयामी मेको कली “गे एक उइ बाक्को। मारदे हना परमप्रभु यावेम आं कली ‘यर्दन खोला लावो’ दे सोइक्ताक्की” देमाक्त। तन्न एलीशामी “परमप्रभु यावे ब्रोंइशा बाक्शो खोदेशो पा नु इन ब्रोंइशा बाक्शो खोदेशो पा, गो इन कली मप्रोंइनुड” देमाक्त। मोपतीके मेको निम्फा गाक्सा बाक्त।

7 मिनु ५० जना परमप्रभु यावे आ लोव्र पाइबपुकीम एलीया नु एलीशा आस नोले खोदमे बाक्त। मिनु मेको निक्शी यर्दन खोला आ नेक्था राप्शा बाक्सानु, मेकोपुकी डोन रे कोव्रशो बाक्मा बाक्त।

८ मिनू एलीयामी आ फेकशो वा पुइशशा ओल्शा यर्दन खोला डा ब्वाक्कु तुबा बाक्त। मिनू ब्वाक्कु ग्युरा गे नु पेरा गे ब्राशा, सोव्रशो लां दुम्माक्त। मेको निक्शी आइक्वी हांबु मजाक्दीस्सा सम्म मोपा ब्राशा बाक्माक्त। प्रस्थान १४:२१-२२; यहोसु ३:१६

९ मिनू खोला शोक्ससा नोले एलीयाम एलीशा कली “आं कली इ रे पा लाइक्चा पुंडसीचा क्येडा डोंइती गो इ पर्बम मार पड?” देमाक्त। मिनू एलीशामी “इन सोक्त क्येडा भाग निक्शी आं कली गेयीनी” देमाक्त। ब्यवस्था २१:१७

१० मिनू एलीयामी “गे दा ठेयब लोत्र कका पुंडतीवी। तन्न आं कली एकर रे क्युक्शा लाइशशो ताप्तीवी हना, मेको इ पुंडशो गाप्ब। तन्न मताप्तीवी हना, मेको इ पुंडशो मगाप्ब” देमाक्त।

११ मिनू मेको निक्शी लोत्र पना पन गाक्सा बाक्त। मिनू रीब पा मी ब्रशो बग्गी नु शारापुकी गूमा बाक्त। मिनू मेकोपुकीमी मेको निक्शी आस कली फ्रादमे बाक्त। मिनू एलीया फश गिवारम क्युक्शा इर सरीड लाइक्चा पुंडसे बाक्त। उत्पत्ती ५:२४

१२ मिनू एलीशाम मेको तशा, वाइ ब्रेशशा “ए आं आफ! ए आं आफ! इस्राएल डा बग्गी नु शारा डोइक्बपुकी” देमाक्त। मिनू मेना रे एलीशाम एलीया कली लेंशा मतवा बाक्त। मिनू नोले मेकोमी आ वा जेर खाक्गा बाक्त। २राजा ६:२१; २राजा १३:१४

१३ मिनू एलीशाम एलीया आ दोक्शो फेक्शो वा गुबा बाक्त। मिनू लेशशा यर्दन खोला आ नेक्था राम्माक्त।

१४ मिनू मेकोमी एलीया आ फेक्शो वामी ब्वाक्कु तुप्शा “परमप्रभु यावे, एलीया आ परमप्रभु ते बाक्म?” देमाक्त। मिनू ब्वाक्कु तुबा बाक्त। मिनू ब्वाक्कु ग्युरा गे नु पेरा गे ब्रामेनु, मेको ओथ हांबु शोक्से बाक्त।

१५ मिनू मेको कोव्रशा बाक्ब यरीको डा परमप्रभु यावे आ लोत्र पाइब हुलमी “एलीया आ सोक्त एलीशा तार जाक्माक्त” देमा बाक्त। मिनू मेकोपुकी एलीशा कली गुम्थ जाक्मा बाक्त। मिनू मेको आ डोंइती खप सम्मन बाग्मा बाक्त।

१६ मिनू मेकोपुकीम एलीशा कली “कोव्रडीन, गो इन गेय पाइबपुकी नु बोल्यो ५० जना मुर बाक्नीम। मेकोपुकी लशा, इन होव्रप कली माल्चा गेने। परमप्रभु यावे आ सोक्तीम क्युक्शा लाइशशा, मेको कली तेकोइ पहाड, बेसीम वोइशशो बाक्म माइ” देमा बाक्त। तन्न एलीशाम “ममाइ, मेको आन कली मसोइक्तीन” देमाक्त।

१७ तन्न मेकोपुकीम एलीशा कली सोइक्तीन कि सोइक्तीन देमा बाक्त। मिनू एलीशाम मेको आन कली “लो, मो हना सोइक्तीन” देमाक्त। मिनू मेकोपुकीम मेको ५० जना मुर आन कली सोइक्तमे बाक्त। मिनू मेकोपुकीम नाक्त सां सम्म माल्शा मथिदमे बाक्त।

१८ मिनू एलीशा यरीकोम बाक्मेनु, मेकोपुकी लेशशा, मेको आ बाक्तीक जाक्मा बाक्त। मिनू एलीशाम मेको आन कली “मार, गो इन कली मलन मदेडा डा?” दे माइक्मी बाक्त।

### एलीशाम ब्वाक्कु रिम्शो सेल्शो

१९ मिनू मेको सहर डा मुरपुकीम एलीशा कली “एको आंड सहर रिम्शो बाक्ब। तन्न एकर डा ब्वाक्कु मरिम्शो बाक्ब। मिनू एको ब्वाक्कुमी आल शाम्पाइक्ब” देमा बाक्त।

२० मिनू मेकोमी “आं कली नक बोस का गेयीनी। मिनू मेकेर हिक्सी कुर पने” देमाक्त। मिनू मेकोपुकीम मोपा चाक्गामे बाक्त।

२१ मिनू एलीशा मेको ब्वाक्कु बुक्तीकेम लशा, मेको हिक्सी ब्रुइशशा, मेकोमी “परमप्रभु यावेमी मार दंत देशा हना ‘गो एको ब्वाक्कु कली रिम्शो सेल्ता। मुल एकोमी मबेक्पाइक्ब, मशाम्पाइक्ब’ दंत” देमाक्त।

२२ मिनू एलीशा आ देशो खोदेशो पा मेको ब्वाक्कु मुल सम्म रिम्शो बाक्ब।

### एलीशा कली शाक्शो

२३ मेको नोले एलीशा इर बेथेल लमाक्त। मिनू लना लन बाक्मेनु, सहर डा हुल का वोइश आल जाक्शा, मेको कली शाक्शा “ए तालु खुइले, इर लावो। ए तालु खुइले, इर लावो” दे ग्रीमा बाक्त।

24 मिनु मेकोम लेशशा कोवशा, मेको आन कली परमप्रभु यावे आ नेमी सराप पाइक्मी बाक्त। मिनु ब्वाकी रे छाउरी वां निकशी यूशा, मेको आन दाते डा ४२ जना आन कली क्राइशशा साइक्मी बाक्त।

25 मिनु मेको मेकेर रे कारमेल डांडा लमाक्त। मिनु नोले सामरीया लेम्माक्त।

### 3

येहोराम इस्राएल डा पिप दुम्शो

1 आहाब आ तौ येहोराम सामरीयाम इस्राएल डा पिप दुम्माक्त। मिनु मेकोमी १२ बर्स सासन पवा बाक्त। मेना यहूदा डा पिप येहो-शाफात पिप दुम्शो १८ बर्स दुम्शो बाक्माक्त। २राजा १:१७

2 मिनु येहोराममी परमप्रभु यावे आ डोंडती मार मरिम्शो बाक्मे, मेको पवा बाक्त। तन्न मेको आ आंम आफोम पशो खोदेशो चहिं ममाइ। मेकोमी आ आफ आ सेल्शो बाल आ थामपुकी प्रेदा बाक्त। १राजा १६:३२

3 मो हना यो मेकोमी नेबात आ तौ येरोबामम इस्राएली आन कली पपाइशशो पाप मप्रोंइथु, पवा बाक्त।

4 मोआब डा पिप मेशामी भेडा थुल्बाक्माक्त। मिनु मेकोमी गेना हना यो इस्राएल डा पिप कली लाख का पाठा नु लाख का सांड आन ऊन गेबाक्माक्त।

5 तन्न आहाब बेक्म नोले मोआब डा पिपमी इस्राएल डा पिप कली मटिवा बाक्त।

6 मोपतीके पिप येहोराम सामरीया रे जाक्शा, इस्राएली नेल्ल आन कली खुप्तीमी बाक्त।

7 मिनु मेकोमी यहूदा डा पिप येहो-शाफात कली “मोआब डा पिपम आं कली मटीयी। गे आं कली मोआब डा पिप नु लडाइ पचा कली वारच पाइक्नीनी” दे लोव्र कुरब मुर सोइक्तीमी बाक्त। मिनु मेकोमी “गो वारच पाइनुड। गो गे नु बाक्नुड। आं मुर इन मुर नम। आं शारा नेल्ल इन के नम” देमाक्त। १राजा २२:४

8 मिनु येहो-शाफातमी “गो ते रे लडाइ तोय?” दे हिल्लो पवा बाक्त। मिनु येहोराममी “एदोम डा गोरशो रागी रे” देमाक्त।

9 मोपतीके इस्राएल डा पिप, यहूदा डा पिप नु एदोम डा पिप गारशा, लडाइ पथ लमा बाक्त। मिनु मेकोपुकी ७ नाक्त सम्म गाक्मानु, लडाइ पाइब नु आन लाइशशो बी ब्यफ आन कली तूतीक ब्वाक्कु मबाक्माक्त।

10 मिनु इस्राएल डा पिपमी “आबी, परमप्रभु यावेमी गो पिप सां इं कली मोआबी आन गुडमी जिम्मा गेचा कली एक चाक्शो बाक्त” देमाक्त।

11 तन्न येहो-शाफातमी “मार एकेर परमप्रभु यावे आ लोव्र पाइब सुइ मबाक्नीमी? मेको रे पा गो परमप्रभु यावे कली हिल्लो पने चाप्नीक” देमाक्त। मिनु इस्राएल डा पिप आ गेय पाइब आन दाते डा काम “एलीया आ गुडम ब्वाक्कु लुक्ब शाफात आ तौ एलीशा एक बाक्ब” देमाक्त। १राजा २२:५,७; १राजा १९:१९-२१

12 मिनु येहो-शाफातमी “परमप्रभु यावे आ लोव्र मेको नु बाक्ब” देमाक्त। मोपतीके इस्राएल डा पिप, येहो-शाफात नु एदोम डा पिप एलीशा आ बाक्तीक बुम्मा बाक्त।

13 मिनु एलीशाम इस्राएल डा पिप कली “गे नु गो इस के मार बाक्बा डा? इन आम आफ आस नोले दुम्ब लोव्र पाइब आन बाक्तीक लने” देमाक्त। तन्न इस्राएल डा पिपमी मेको कली “ममाइ, परमप्रभु यावेमी गो पिप सांफा आंइ कली मोआबी आन गुडमी जिम्मा गेचा कली एक चाक्शो बाक्ब” देमाक्त।

14 मिनु एलीशामी “गो आं गेय पशो, मुर नेल्ल आन परमप्रभु यावे ब्रोंइशा बाक्शो खोदेशो पा यहूदा डा पिप येहो-शाफात कली मान मपशो नड हना, गो इन कली मसेत्तु वा, मारेइ मसुदु वा” देमाक्त। १राजा १८:१५

15 मिनु मेकोमी “तन्न मुल आं कली तार पाइशशो ताप्तीके ताप्ब का चाक्कीन” देमाक्त। मिनु मेकोमी तार पाइशशो ताप्तीक ताप्बमी तबानु, परमप्रभु यावे आ सक्तिम एलीशा कली सुमा बाक्त। १सामुएल १६:१६

16 मिनु मेकोमी “परमप्रभु यावेमी ‘गे एको खोल्सा डा दिंमम दोम्ली नु शुश खाल्टा दोन’ ” देमाक्त।

17 मारदे हना परमप्रभु यावेमी “गे फश गिवार नु रेउ यिशो मताइनीनी। मो हना यो एको दिम ब्वाक्कुम ब्रीब। मिनु गे, इन बी ब्यफ नु इन शाराम ब्वाक्कु तूनीनी।

18 एको परमप्रभु यावे आ डोंइती आइक्च गेय का ला बाक्ब। मेकोमी मोआबी आन कली यो इन गुडम गेब।

19 गेपुकीम गारो हिरशो सहर नेल्ल नु टेयब दारशो सहर नेल्ल ग्रानीनी। गेपुकीम रिम्शो रवा नेल्ल तिम्नीनी। मिनु ब्वाक्कु यितीक नेल्ल तेक्नीनी। मिनु रू नेल्लेम फुल्लु तेलनीनी, देशो बाक्ब” देमाक्त।

20 मिनु आ दीसा सुनी चढेची ना छक लाक्चा डा पा एदोम रे ब्वाक्कु शाइश्शा यिचा गोवा बाक्त। मिनु रागी नेल्ल ब्वाक्कुम ब्रीमाक्त। गन्ती २८:४-५

21 मेना मोआबीपुकीम पिप नेल्ल गोपुकी नु लडाइ पथ जाक्शो बाक्नीम देशो लोत्र नेन्मे बाक्त। मोपतीके या चलेने चाप्ब वोंइश मुर, ठिटा नु खाल्पा नेल्ल आन कली ब्रेत्मे बाक्त। मिनु मेको आन कली लडाइ पचा कली ठीक पामे बाक्त।

22 मिनु मेकोपुकी आ दीसा सुनी कना बोक्मा बाक्त। मिनु मेना ब्वाक्कुम नां टल्केशो तांइसीशो बाक्माक्त। मिनु मोआबीपुकीम मेको आन डोंइती डा ब्वाक्कु नांम हुश खोंदेशो लल तामे बाक्त।

23 मिनु मेकोपुकीम “एको दा हुश बाक्त। मेको पिपपुकी आंम आंमा लडाइ पा साइक्मुमा बाक्त, थांका। मुल ए मोआबी, मार मार रोइक्थ लय” देमुमा बाक्त।

24 मिनु मोआबी इस्त्राएली आन बाक्तीकेम जाक्मानु, इस्त्राएली यूशा मेको आन कली मप्रोक्पदमे सम्म लडाइ तोत्रमे बाक्त। मिनु इस्त्राएलीम मोआबी आन कली लडाइ तोस डा तोस पामे बाक्त।

25 मिनु मेकोपुकीम मेको आन सहर प्रेशशा श्येत्थ पोक्गमे बाक्त। मिनु मुर नेल्लेमी मेको आन रूम फुल्लु का का ताइश्शा, तेइ तेइ फुल्लुम प्रिंदमे बाक्त। मेकोपुकीम ब्वाक्कु यितीक नेल्ल तेक्गामे बाक्त। मिनु रिम्शो रवा नेल्ल तिम्मे बाक्त। मेकोपुकीम किर-हारेसेथ सहर डा गारो ला हेंदमे बाक्त। तन्न मेको सहर कली हुरद आप्बपुकीम तेक्शा लडाइ तोत्रमे बाक्त।

26 मिनु मोआब डा पिपमी लडाइ बुइनुड, दे तुइश्शा, तरवार शेब लडाइ पाइब ७ सहे जना आन कली लाइश्शा, एदोम डा पिप आ बाक्तीक ओत्रचा कली लमाक्त। तन्न मेकोमी मो पने मचबा बाक्त।

27 मिनु मेकोमी आ पा डा पिप दुम्ब आ डोंइती जरमेशो तौ कली गारोम क्योरशा चोशा चढेवा बाक्त। मिनु इस्त्राएली छक लाक्शा लेशशा आन रागी लमा बाक्त।

## 4

### एलीशामी वारच पशो

1 मिनु परमप्रभु यावे आ लोत्र पाइब का आ मीश जाक्शा टेयब सेंदा पा एलीशा कली “इन गेय पाइब आं वोंइश बेक्त। मेको परमप्रभु यावे कली मान पा हिंब बाक्त, दे तुइक्नीनी। तन्न मुल मेको आ जेर जशो मुर जाक्शा आं आल निक्शी आस कली वाइल सेल्चा कली लाइक्चशो बाक्ब” देमाक्त।

2 मिनु एलीशामी मेको कली “गो इ कली मार पाइनुडा? इ खिंम मार बाक्बा? आं कली देनो” देमाक्त। मिनु मेकोमी “गो, इन वाइलीम आं खिंम गर का तेल डा लाक्शा अर्को मारेइ मबाक्ब” देमाक्त। १ राजा १७:१२

3 मिनु एलीशामी “इ नेक्था डा मुर आन खिं लशा, श्येत्थ गर का निक्शी ला ममाइ, शुश गर पुंडशा चाक्को।

4 मिनु गे खिं ओत्रशा, इ आल आस कली यो आगा ओइशा, लाप्चो चोक्को। मिनु मेको गर डा तेल अर्को गर नेल्लेम कुर पावो। मिनु ब्रीशो गार याक्शा वोतो” देमाक्त।

5 मिनु मेको मीश मुर एलीशा आ बाक्तीक रे गाक्माक्त। मिनु आ खिं जाक्दीश्शा, आ आल आस कली खिंडगा ओइशा लाप्चो चोक्गा बाक्त। मिनु आ चाक्शो श्येत्थ गर शुशेमी तेल प्रिंदा बाक्त।

6 मिनु मेको गर तेलम ब्रीमा बाक्त। मिनु मेकोमी आ तौ कली “अर्को गर चाक्को” देमाक्त। मिनु मेकोमी “मुल श्येत्थ गार का यो मबा” देमाक्त। मिनु तेल यिचा यो देक्माक्त।

7 मिनु मेको लशा, मेको परमप्रभु आ मुर कली शेंदा बाक्त। मिनु मेकोमी “लशा मेको तेल लेयडो। मिनु इ जेर थाप्तो। मिनु लीशो क्येट चहिं इन खिं डा मुर आन कली थुल्चा कली दुम्ल” दे मदा बाक्त।

### एलीशा नु शुनेम डा मीश मुर

8 काबु नाक्ती एलीशा शुनेम सहर लमाक्त। मेकेर शुश शॉप पाइशो मीश मुर का बाक्माक्त। मिनु मेकोम एलीशा कली जथ तूथ ब्रेत्ता बाक्त। मिनु एलीशा मेको मेर गाक्मेनु, जथ तूथ ओत्रबाक्माक्त। यहोसु १९:१८

9 मिनु काबु नाक्त मेको मीश मुरुमी आ वोंडश कली “एको गेना हना यो इं लां रे गाक्ब मुर थमा पा परमप्रभु आ मुर बाक्ब, दे गो तुइक्नुड।

10 गो तला तार थरपु हिरशा मेको कली आइक्च कोठा का सेल्शा गेय। मिनु मेको कोठाम मेको कली खाट का, टेबल का, नित्तीक का नु बत्ती का वोइशशा गेचा। मिनु मेको एक जाक्मेनु, मेकेर बाक्तीक पवल” देंमाक्त।

11 मिनु काबु नाक्त एलीशा जाक्शा, नाइक्चा कली मेको कोठाम लशा गोल्माक्त।

12 मिनु मेकोम आ गेय पाइब गेहाजी कली “मेको शुनेम सहर डा मीश मुर कली ब्रेशशा कुतो” दे मदा बाक्त। मिनु मेकोम, मेको कली ब्रेत्ता बाक्त। मिनु मेको एलीशा आ डोंडती जाक्माक्त।

13 मिनु एलीशाम आ गेय पाइब कली “मेको कली ‘गे आं पर्वम इश्का श्येत पाप्तीवी। मुल गो इ कली मार पने चाप्नुडा? मार, गो इ पर्वम पिप नु लडाइ पाइब आन ठेयब मुर नु मारिइ लोत्र पशा गेना?” दे मेको कली हिल्लो पावो” दे मदा बाक्त। मिनु मेको मीश मुरुमी “गो एक आं मुर आन दातेमीन बाक्नुड” देंमाक्त।

14 मिनु एलीशाम गेहाजी कली “मो हना मुल गो मेको कली मार पने चाप्नुडा?” देंमाक्त। मिनु गेहाजीम “मेको के तौ मबाक्ब। आ वोंडश खूशो दुम्शो बाक्ब” देंमाक्त।

15 मिनु एलीशामी “मेको कली ब्रेत्तो” देंमाक्त। मिनु गेहाजीम मेको कली ब्रेत्तानु, मेको लाप्चोम राम्माक्त। २राजा २:२५

16 मिनु एलीशामी “अर्को बर्स इ थुकुम तौ का बाक्ब” देंमाक्त। मिनु मेकोमी “ममाइ, आं प्रभु, गे परमप्रभु आ मुर बाक्नीनी। मोपा इन वाइलीम आं कली जौल मपने” देंमाक्त। उत्पत्ती १८:१०,१४

17 मिनु मेको कोत्रज कुरशो दुम्शा, एलीशाम देंम ना तौ का थिमाक्त।

18 मिनु मेको आल कोल्शा, काबु आ आफ नु खेतला आन अन्न खुप्तीकेम लमाक्त। २राजा ४:१६

19 मिनु मेकोमी आ आफ कली ठेयब सेंदा पा “आं पिया ब्वती, आं पिया ब्वती” देंमाक्त। मिनु आ आफोम आ गेय पाइब का कली “एको कली आ ममा आ बाक्तीक लतो” दे मदा बाक्त। लूका १०:४

20 मिनु मेको गेय पाइब मुरुम मेको आल कली आ ममा आ बाक्तीक चाक्दीदा बाक्त। मिनु मेको आल आ ममा आ थुकुम नाक्ती उइक्थ दुम सम्म बाक्शा बेक्माक्त।

21 मिनु मेको मीश मुरुमी मेको आल कली इर परमप्रभु आ मुर आ ब्राख्येम लाइशशा खोल्शा वोइशशा लाप्चो चोक्शा गूशा गाक्माक्त।

22 मिनु मेकोमी आ वोंडश कली ब्रेशशा “आं कली गेय पाइब का नु गधा का सोइक्तीनी। मिनु गो रीब पा परमप्रभु आ मुर बाक्तीक लशा लेत्नुड” देंमाक्त।

23 मिनु आ वोंडशेमी “मुलाक्त मारदे लचा माल्दे? औसी यो ममाइ, नाइक्तीक नाक्त यो ममाइ” दे मदा बाक्त। मिनु मेकोमी “लचा माल्नुड” देंमाक्त।

24 मिनु मेकोमी गधाम लगम पाइशशा, आ गेय पाइब कली “गो नाइक्तो मदेडा सम्म खुलो देश मपावो” दे मदा बाक्त।

25 मोपा मेको गाक्शा, परमप्रभु आ मुर बाक्तीके कारमेल डांडाम जाक्माक्त। मिनु परमप्रभु आ मुरुम मेको कली डोन रेन तशा आ गेय पाइब गेहाजी कली “कोत्रड, दे मेरे जाक्ब शुनेम सहर डा मीश मुर बाक्ब।

26 गे दोरशा लशा मेरे कली 'मार नेल्ल रिम्शोन बाक्बा? मार, इ वोंइश रिम्शोन बाक्मे? इ आल रिम्शोन बाक्मे?' दे हिल्लो पावो" दे मदा बाक्त। मिनु मेकोम हिल्लो पवानु "नेल्ल रिम्शोन बाक्नीम" देंमाक्त।

27 मिनु मेको परमप्रभु आ मुर बाक्तीक डांडाम जाक्शा, एलीशा आ खोइल मुबा बाक्त। मिनु गेहाजी मेको कली फ्राचा कली जाक्मेनु, परमप्रभु आ मुरुम एको कली "मपावो, एको कली ठेयब श्येत दुम्शो बाक्ब। तन्न परमप्रभु यावेमी मेको लोत्र खुइशशा, आ कली मशेंदी" देंमाक्त।

28 मिनु मेको मीश मुरुमी "ए आं प्रभु, मार गो तौ पुंइशो नडा डा? आं कली आस कोंइशा मोशा मसेल्यीनी देंशा पुंइशो मनडा डा?" देंमाक्त।

29 मिनु एलीशाम गेहाजी कली "इ किप्शुर किम्सो। एको आं कोक्के कुरशा दोरशा लावो। लांम सुइ ग्रुन्तीवी हना, मेकोपुकी नु लोत्र पचा कली मदिकको। सुइमी इ कली लोत्र पाम्तेक्म हना, मेको आन कली लोत्र मलेत्तो। एको आं कोक्के लाइशशा, मेको आल आ कुलुम वोतो" दे मदा बाक्त।

30 तन्न मेको आल आ ममामी "परमप्रभु यावे ब्रोंइशा बाक्शो खोदेंशो पा नु इन ब्रोंइशा बाक्शो खोदेंशो पा गो इन कली मप्रोंइनुड" देंमाक्त। मोपतीके एलीशा बोक्शा, मेको मीश मुर आ नोले खोदा बाक्त।

31 गेहाजी चहिं डोंइती लशा मेको कोक्के मेको आल आ कुलुम वोदा बाक्त। तन्न मेको मारेइ मदुम्माक्त। मोपतीके एलीशा कली ग्रुन्चा कली गेहाजी लेम्माक्त। मिनु मेको कली "मेको आल मसेस" देंमाक्त।

32 मिनु एलीशा खिं जाक्मेनु, मेको आल कली आ ब्राख्येम बेक्शो थिदा बाक्त।

33 मिनु एलीशा आगा ओत्रशा लाप्चो चोक्शा, परमप्रभु यावे कली पुना बाक्त। प्रेरित ९:४०

34 मेको नोले मेको ब्राख्येम डोंइशशा, मेको आल आ शोत्रम आ शोत्र, मेको आ मिक्चम आ मिक्ची नु मेको आ गुडम आ गुइ वोइशशा, मेको आल तार गोल्माक्त। मिनु मेको आल होना होन लमाक्त। १ राजा १७:२१

35 मिनु एलीशा बोक्शा कोठाम एर ओंथ पवा बाक्त। मिनु मेको लेंशा खाट डोंइशशा मेको आल कली कोत्रडानु, मेको आलम ७ खेयप हाक्च पा, आ मिक्च पाक्गा बाक्त।

36 मिनु एलीशाम गेहाजी कली "मेको शुनेम सहर डा मीश मुर कली ब्रेशशा, एक चाक्को" दे मदा बाक्त। मिनु मेकोमी मेको कली ब्रेत्ता बाक्त। मिनु मेको मीश मुर जाक्मेनु, एलीशामी मेको कली "इ तौ लतो" दे मदा बाक्त।

37 मिनु मेको आगा ओत्रशा एलीशा आ खोइलीम खप सम्मन बाम्माक्त। मिनु मेको नोले आ तौ लाइशशा गूशा लमाक्त।

### बोसुम ओश्येर बाक्शो

38 मिनु एलीशा लेशशा गिल्याल लमाक्त। मेना मेको रागीम ठेयब अन्काल दुम्शो बाक्माक्त। परमप्रभु यावे आ लोत्र पाइब आन हुल का मेको आ डोंइती बाक्मा बाक्त। मिनु मेकोम आ गेय पाइब कली "चुप्लुम ठेयब बोस का काशा एको परमप्रभु यावे आ लोत्र पाइब आन हुल आन कली खोले क्येवो" दे मदा बाक्त।

39 मेको आन दाते डा का चहिं गिग खाइ माल्थ रू मेर लमाक्त। मिनु ब्वाकी डा वोबीस थिदा बाक्त। मिनु मेकोम मेको सेक्शा पोल्टो का पा चाक्गा बाक्त। मेकोमी मेको मार बाक्मे, दे मतुइक्थु प्रेक्शा खोलेम सुप्ता बाक्त।

40 मिनु मुरपुकीम जामेक्ल, दे मेको तेम्शा खेत्तीमी बाक्त। मिनु मेकोपुकीम जशा, ठेयब सेंदा पा "ए परमप्रभु आ मुर, एको बोसुम दा ओश्येर कका बाक्त" देंमा बाक्त। मिनु मेकोपुकीम मेको जने मचाप्मे बाक्त।

41 मिनु एलीशाम "इच्का खोइ फस चाक्कीन" देंमाक्त। मिनु मेकोम मेको फस बोसुम कुर पवा बाक्त। मिनु मेकोमी "मुल मेको आन कली एको जचा गेने" देंमाक्त। मेको नोले मेको बोसुम ओश्येर मबाक्माक्त।

सहे का मुर आन कली थुल्लो

42 मिनु बाल-शालीशा डा मुर काम परमप्रभु आ मुर कली आ डोंइती मीशो क्योव्रज के २० ओटा शोब्ले नु नक मीशो अन्न चाक्शा जाक्माक्त। मिनु एलीशाम “एको मुर आन कली जचा गेने” देमाक्त। मत्ती १५:३३, ३७; मत्ती १६:९-१०; यूहन्ना ६:९

43 मिनु मेको आ गेय पाइबमी “गो एको सहे का मुर आन कली जचा थोव्रक दोपा जचा गेनुडमी” देमाक्त। मिनु मेकोमी लेंशा “एको मुर आन कली जचा गेमी। मारदे हना परमप्रभु यावेम ‘मेको नेल्लेम जशा यो, इच्का हेंब’ देशो बाक्ब” देमाक्त।

44 मिनु मेकोमी मुर आन डोंइती खेत्तीमी बाक्त। मिनु परमप्रभु यावे आ देशो खोदेशो पा, मेको मुरपुकीम जशा यो हेमाक्त।

## 5

### नामान कोव्र पशो रे साशो

1 नामान अराम डा पिप आ लडाइ पाइब आन ठेयब मुर बाक्माक्त। मेको आ होव्रपम मेको कली शुश दाक्बाक्माक्त। मेको शुश हिकसीशो मुर का बाक्माक्त। मारदे हना मेकोम पतीकेन परमप्रभु यावेम अराम कली ग्रापाइशो बाक्माक्त। मिनु मेको थम सक्ति पाइशो लडाइ पाइब मुर यो बाक्माक्त। तन्न मेको कोव्र पशो बाक्माक्त।

2 मिनु अराम रे लडाइ पाइबपुकी लशा इस्राएल डा मीश आल का कली ग्याइशशा चाक्शो बाक्मा बाक्त। मिनु मेको नामान आ मीश आ गेय पाइब दुमशो बाक्माक्त।

3 मिनु मेकोमी आ होव्रपोकम कली “आं होव्रप, आं प्रभुमी सामरीयाम बाक्ब परमप्रभु यावे आ लोव्र पाइब कली गुमशो हना, मेकोमी आ कोव्र सापद वा” देमाक्त।

4 मिनु नामान आ प्रभु पिप बाक्तीक लशा, मेको इस्राएल रे चाक्शो मीश आल आ देशो लोव्र नेल्ल नेंपदा बाक्त।

5 मिनु अराम डा पिपमी “दुम्ब, गे लावो। गो इस्राएल डा पिप कली चिठी का ब्रेक्नुड” देमाक्त। मोपतीके नामान १० टलेन्ट चांदी, ६ हजार शेकेल सुन नु १० जोर फेक्तीक वा कुरशा लमाक्त। टलेन्ट का ३४ किलो बाक्ब। शेकेल का ११.५ ग्राम बाक्ब।

6 मिनु मेकोमी मेको चिठी इस्राएल डा पिप आ बाक्तीक चाक्शा बाक्त। मेको चिठीम इस्राएल डा पिप कली “गो एको चिठी नु आं गेय पाइब ठेयब मुर नामान कली इन बाक्तीक सोइक्ताकड। गे मेको आ कोव्र सापतीन” दे ब्रेक्शो बाक्माक्त।

7 मिनु इस्राएल डा पिपम मेको चिठी पढेवा चोटीन आ वा खाक्शा “मार, गो परमप्रभु नडा डा? मिनु बेक्पाइक्ने नु सेंपाइक्ने चाप्नुडा? मेको मुरुम मारदे एको मुर कली आ कोव्र सापाइक्चा कली आं बाक्तीक सोइक्ता? मेकोम गो नु खुजी माल्तु” देमाक्त।

8 मिनु इस्राएल डा पिपमी आ वा खाक्शो लोव्र परमप्रभु आ मुर एलीशाम नेना बाक्त। मिनु मेकोमी पिप कली “गे मारदे इन वा खाक्नी? मेको मुर कली एक आं बाक्तीक सोइक्तीन। मिनु मेकोमी इस्राएलमी परमप्रभु यावे आ लोव्र पाइब मुर का बाक्ब, दे तुइक्ब” दे लोव्र कुरब मुर सोइक्ता बाक्त।

9 मोपतीके नामान आ बग्गी नु शारापुकी चाक्शा जाक्माक्त। मिनु एलीशा आ सिं आ लाप्योमी राम्माक्त।

10 मिनु एलीशाम मेको कली “गे लशा, यर्दन खोलाम ७ खेयप चिकसीचा माल्नेवे। मिनु इन श्ये डोंइती डा खोदेशो दुम्ब। मिनु गे ग्रांग्रा मदिशो दुम्नीनी” दंथ मुर का कली सोइक्ता बाक्त।

11 तन्न नामान गाइशशा “गो मेको गूशा राप्शा, थमा पा, परमप्रभु यावे, आ परमप्रभु आ नें थिशा पुंइशा, आं गार तार आ गुइ वोइशशा, आं कोव्र सापाइक्ब, दे मिमशो नड।

12 मार, आबाना, फारपार नु दमस्कस डा खोला मेर डा ब्वाक्कु इस्राएल डा ब्वाक्कु नेल्ल क्येडा रिमशो ममाइ डा? मार, गो मेकेर डा ब्वाक्कुम चिक्शा साने मचाप्नुडा डा?” दे गाइशशा गाक्माक्त।

13 तन्न नामान आ गेय पाइबपुकी जाक्शा मेको कली “ए, आंइ आफ, मार परमप्रभु यावे आ लोव्र पाइबमी इन कली ‘श्येत डा गेय का पने’ देशो हना, गे मेको मपाइनीनी डा? मेकोमी इन कली ‘ब्वाक्कुम चिक्शा ग्रांग्रा मदिशो दुमीन’ देमेनु, मेको मारदे मपाइनीनी?” देमा बाक्त।



14 मोपतीके मेको उइ बुम्माक्त। मिनु परमप्रभु आ मुरुम देशो खोदेशो पा, यर्दन खोलाम ७ खेयप चिकसे बाक्त। मिनु मेको आ श्ये नु कुशुल डोंइती डा खोदेशो पा टिटा आन के खोदेशो दुम्माक्त। मिनु मेको ग्रांग्रा मदिशो दुम्माक्त। लेवी १४:७-९; लूका ४:२७

15 मिनु मेको नु आ मुर नेल्ल लेशशा परमप्रभु आ मुर बाक्तीके जाक्मा बाक्त। मिनु मेको एलीशा आ डोंइती राष्णा “इस्त्राएलम डा लाक्शा, अर्को तेकोड रागीम परमप्रभु मबाक्माक्त। मुल गो तुइक्ताक्ड। इन गेय पाइब आं गुइ रे कोसेली का ताक्कीन” देंमाक्त। २राजा ५:५

16 मिनु परमप्रभु यावे आ लोत्र पाइबमी “गो आ गेय पशो, परमप्रभु यावे ब्रोंइशा बाक्शो खोदेशो पा, गो मारेइ मब्राइनुड” देंमाक्त। नामानम मेको कली ताक्कीन कि ताक्कीन देंमाक्त। मो हना यो मेको मबिस्से बाक्त।

17 मिनु नामानमी “गे एको मताक्नीनी हना, इन गेय पाइब, आं कली भारी निक्शी गधाम कुरतीक खप लाइक्चा गेयीनी। मारदे हना मुल गो इन गेय पाइबम, परमप्रभु यावे कली डा लाक्शा अरु तेकोड देवी देवता आन कली चोशा चढ़ेतीक नु अरु चढ़ेतीक मचढ़ेनुड।

18 तन्न एको गेय काम ला परमप्रभु यावेम इन गेय पाइब कली माफ गेवल। मेको आं होत्रप रिम्मोन कली पूजा पथ लमेनु, आं गुइमी ग्याइक्पाइश्शा आगा ओव्रब। मिनु मेकोमी मेकेर पूजा पवानु, गो यो बाच्चा माल्नुड। मोपतीके मेको आ पर्वम परमप्रभु यावेमी आ गेय पाइब, आं कली माफ गेयील” देंमाक्त।

19 मेको नोले एलीशाम मेको कली “इ थु नाइश्शा लावो” दे मदा बाक्त। मिनु नामान गाक्शा इच्का आइक्ची जाक्दीम्मेनु,

20 परमप्रभु आ मुर एलीशा आ गेय पाइब गेहाजी आ थुमी “एको आं होत्रपमी दा एको अरामी नामान आ चाक्शो मारेइ मब्रथु लेशशा कका सोइक्ताक्व। मुल गो परमप्रभु यावे ब्रोंइशा बाक्शो खोदेशो पा, गो मेको आ नोले लशा मारेइ थोव्रक ताक्नुड” दे मिम्ता बाक्त।

21 मोपतीके गेहाजी नामान आ नोले दोरशा लमाक्त। मिनु नामानम मेको कली आ नोनोले दोरशा पिशो तवा बाक्त। मिनु मेको कली गुम्चा कली नामान आ बग्गी रे तोइश्शा “मार नेल्ल टीक बाक्बा?” दे हिल्लो पवा बाक्त।

22 मिनु गेहाजीम “मारेइ मदुम। तन्न आं होत्रपमी आं कली एफ्राइम पहाड डा परमप्रभु यावे आ लोत्र पाइब आन हुल रे टिटा निक्शी जाक्ताक्स। मिनु शिशी पा मेको आस कली ‘टलेन्ट का चांदी नु जोर निक्शी वा गेने’ देंथ सोइक्ताक्यी” देंमाक्त। टलेन्ट का ३४ किलो बाक्ब।

23 मिनु नामानमी मेको कली “थमा पा गे टलेन्ट निक्शी लतीन” देंमाक्त। मिनु नामानमी गेहाजी कली “लतीन कि लतीन” दे मदा बाक्त। मिनु मेको कली टलेन्ट निक्शी चांदी नु जोर निक्शी वा थैलो निक्शीम कुर पा, फ्रेंशा गेवा बाक्त। मेकोमी मेको आ गेय पाइब निक्शी आस कली मेको कुरपाइश्शा गेहाजी कली चोव्रथ सोइक्ता बाक्त। टलेन्ट का ३४ किलो बाक्ब।

24 मिनु मेको गेहाजी डांडाम जाक्शा, मेको गेय पाइब आस गुइ रे ताक्शो थोव्रक आ खिम वोदा बाक्त। मिनु मेको आस कली चहिं सोइक्तीम्सी बाक्त। मिनु मेको गाक्सा बाक्त।

25 मिनु मेको आगा लशा, आ होत्रप एलीशा आ डोंइती राम्माक्त। मिनु एलीशामी “गेहाजी गे ते लवे” दे हिल्लो पवा बाक्त। मिनु गेहाजीम “इन गेय पाइब, गो तेइ मलशो बाक्नुड” देंमाक्त।

26 तन्न एलीशाम मेको कली “मार, मेको मुर आ बग्गी रे तोइश्शा इ कली गुम्थ पिमेनु, आं सोक्त गे नु मबाक्म डा? मुल क्येट, वा, तेल रवा, अडगुर रू, भेडा, ब्यफ नु वाइलीम वाइलपुकी आंम के सेलतीक ना बाक्बा डा?

27 मुल नामान आ कोव्रर पतीक रोइ गे नु इ चच युइ इन खिम गेना हना यो खोक्शा लीब” दे मदा बाक्त। मिनु गेहाजी मेको आ डोंइती रे लमाक्त। मिनु मेको फुं खोदेशो पा बुश पा कोव्रर मुमाक्त।

1 परमप्रभु यावे आ लोत्र पाइब आन हुल काम एलीशा कली “एको इं बाक्शो खिं इं कली थम आइक्च बाक्ब।

2 मुल गो यर्दन खोला आ नेक्था लय। मिनु मेकेर नेल्लेम शी चाक्शा खिं का सेल्सय” देमा बाक्त। मिनु एलीशाम “दुम्ब लने” देमाक्त।

3 मिनु मेको आन दाते डा काम “गे यो इन गेय पाइबपुकी नु लाइनीनी?” देमाक्त। मिनु एलीशाम “दुम्ब गो यो लाइनुड” देमाक्त।

4 मिनु एलीशा मेकोपुकी नु लमाक्त। मिनु मेकोपुकी यर्दन खोला जाक्दीशशा रवा तिम्चा गोत्रमे बाक्त।

5 मिनु मुर काम रवा तिम्ना तिम्न पवानु, आ खा बुइशशा ब्वाक्कुम ओत्रमाक्त। मिनु मेको ठेयब सेंदा पा “आबी, आं प्रभु, मेको दा पुंइशा चाक्शो खा कका बाक्ब” देमाक्त।

6 मिनु मेको परमप्रभु आ मुरुम “मेको ते दोक्म” दे हिल्लो पवा बाक्त। मिनु मेकोम एकेर दोक्त, दे कोइदा बाक्त। मिनु एलीशाम मेकेर शी का खोइशशा ब्वारदा बाक्त। मिनु मेको खा ब्वाक्कु तार प्रूमाक्त।

7 मिनु एलीशाम “शोलशा लतो” देमाक्त। मिनु मेको मुरुम आ गुइ दिंशा शोलशा लदा बाक्त।

### एलीशाम मिक्च मताइब सेल्शो

8 काले अराम डा पिप इस्राएल नु लडाइ पना पन बाक्माक्त। मिनु मेकोम आ गेय पाइब लडाइ पाइब आन ठेयब मुरपुकी नु सल्ला पा “गो आं बाक्तीक मेकेर सेल्नुड” देमाक्त।

9 मिनु परमप्रभु आ मुरुम इस्राएल डा पिप कली “मेकेर रे गाक्की ना होस पा गाक्कीन। मारदे हना अरामी मेकेर लशो बाक्नीम” देमाक्त।

10 मोपतीके इस्राएल डा पिपमी आ मुर आन कली मेकेर गाक्कीनु “होस पा गाक्कीन” दे का निक्शी खेयप हिंच कोइदा बाक्त। मिनु मेकोपुकी होस पा बाक्मा बाक्त।

11 मोपतीके अराम डा पिपमी “इस्राएल डा पिपम इं बाक्तीक दोपा तुइक्ता” दे थाम्पा गाइक्ता बाक्त। मिनु मेकोम आ लडाइ पाइब आन ठेयब मुर आन कली ब्रेशशा “गे इन दाते डा सुमी चहिं इस्राएल डा पिप कली लोत्र शेंदीनी? लो, देनीन” देमाक्त।

12 मिनु मेको लडाइ पाइब आन ठेयब मुर आन दाते डा काम “आं प्रभु पिप, आं प्रभु, गो सुइम मो मपक। तन्न इस्राएल डा परमप्रभु यावे आ लोत्र पाइब एलीशाम गे इन इप्तीक कोठाम ब्वाक्शो यो शेंब” देमाक्त।

13 मिनु पिपमी “मेको ते बाक्मे माल्शा तुइशशा जाक्कीन। मिनु गो मुर आन कली सोइशशा, मेको कली ग्याइक्पाइक्नुड” देमाक्त। मिनु मेकोम “मेको दोथान सहरम बाक्ब” देमाक्त।

14 मिनु पिपम शारा नु बग्गी पाइशशो ठेयब सक्ति पाइशशो लडाइ पाइब आन हुल का मेक सोइक्ता बाक्त। मिनु मेकोपुकी नाक्दो लशा, मेको सहर पुम्दमे बाक्त।

15 मिनु परमप्रभु आ मुर आ गेय पाइब सुनी कना बोक्शा लाइगा प्रूमाक्त। मिनु मेना शारा नु बग्गी पाइशशो लडाइ पाइब आन हुलमी सहर पुम्शो तवा बाक्त। मिनु मेको गेय पाइब लशा आ होत्रप कली “आबी, आं प्रभु, मुल मार पय” देमाक्त।

16 मिनु मेको परमप्रभु यावे आ लोत्र पाइबमी “महिनो। मेकोपुकी नु बाक्शो आन क्येडा गो नु बाक्शो शुश बाक्नीम” देमाक्त।

17 मिनु एलीशामी “परमप्रभु यावे, एको आ मिक्च ताइब सेलीन। मिनु एकोम तवल” दे पुना बाक्त। मिनु परमप्रभु यावे मेको गेय पाइब आ मिक्च ताइब सेला बाक्त। मिनु मेकोमी एलीशा आ एर ओथ डा डांडा नेल्लेम मी ब्रशो शारा नु बग्गीम ब्रीशो तवा बाक्त। यहोसु ५:१३

18 मिनु अरामीपुकी तोइशशा मेको आ बाक्तीक पिमानु, एलीशाम परमप्रभु यावे कली “एको मुर आन कली मिक्च मताइब सेलीन” दे पुना बाक्त। मिनु एलीशाम पुंइशो खोदेशो पा, परमप्रभु यावे मेको आन कली मिक्च मताइब सेल्मी बाक्त। उत्पत्ती १९:११

19 मिनु एलीशाम मेको आन कली “एको लां ममाइ। एको सहर यो ममाइ। गे आं नोले खोइय्यीनी। मिनु गो इन माल्शो मुर आ बाक्तीक चाक्दीत्नन्नी” दे माइक्मी बाक्त। मिनु एलीशाम मेको आन कली सामरीयाम चाक्दीम्मी बाक्त।

20 मिनु मेकोपुकी सामरीया सहरम जाक्दीम्मा नोले एलीशाम “ए परमप्रभु यावे, एको मुर आन कली मिक्च ताइब सेलीन। मिनु एकोपुकीम लेशा तने चाप्मेक्ल” दे पुना बाक्त। मिनु परमप्रभु यावेमी मेको आन कली मिक्च ताइब सेल्मी बाक्त। मिनु मेकोपुकीम कोव्रडमेनु, सामरीया सहरम बाक्शो तामे बाक्त।

21 मिनु इस्राएल डा पिपमी मेको आन कली तशा, एलीशा कली “आं आफ, मार गो एको आन कली सदुमी। एको आन कली सदुमी?” दे हिल्लो पवा बाक्त।

22 मिनु एलीशाम “मेको आन कली मसतीन। मार, गे आंमा इन लिब्रा नु तरवारम ग्याइश्शो आन कली साइक्ने चाप्नीनी डा? गे एको मुर आन कली जचा तूचा गेने। मिनु एकोपुकी जशा तूशा आन होव्रप बाक्तीक लमल” देमाक्त। लेवी १९:१८; २इतिहास २८:९-१५; हितोपदेस २५:२१-२२

23 मिनु पिपमी मेको आन कली ठेयब भोज का सेल्शा थुल्मी बाक्त। मिनु मेकोपुकी जशा तूशा पामे नोले मेको आन कली आन होव्रप बाक्तीक सोइक्तीमी बाक्त। मिनु मेको आन होव्रप बाक्तीक लेम्मा बाक्त। मेना रे अरामीपुकीमी इस्राएली आन कली लडाइ तोतीक नु मार मार रोइक्तीक मपामे बाक्त।

### सामरीयाम अन्काल दुम्शो

24 तन्न इच्का नाक्त नोले अराम डा पिप बेन-हादादमी आ लडाइ पाइब आन कली खुष्पा सामरीयाम सोइश्शा, मेको कली एर ओंथ नेल्ल रे पुम्पदा बाक्त।

25 मिनु मोपा पुम्दमे नोले मेको सहरम थम ठेयब अन्काल दुम्माक्त। मेकेर गधा आ पिया का कली ८० शेकेल चांदी नु काब का डा ४ भाग, डा भाग का ढुकुर आन स्त्री कली ५ शेकेल चांदी थाप्चा माल्दा बाक्त। शेकेल का ११.५ ग्राम बाक्ब। काब का १.२ लिटर खोदेशो पुक्तीक बाक्ब। काब डा ४ भाग डा भाग का, १/४ लिटर खोदेशो बाक्ब।

26 काबु नाक्त इस्राएल डा पिप सहर डा गारो तार हिरसे बाक्त। मिनु मीश मुर काम पिप कली “आं प्रभु पिप, आं प्रभु आं कली वारच पाइय्यीनी” देमाक्त।

27 मिनु पिपमी “परमप्रभु यावेमी इ कली वारच पवल। गो ते रे वारच पाइक्नना? अन्न तुप्तीक रे देय अडगुर स्वाक्तीक रे?” देमाक्त।

28 मिनु पिपम मेको कली “इ कली मार दुम?” दे मदा बाक्त। मिनु मेको मीश मुरुम “एको मीश मुरुम आं कली ‘मुलाक्ती इ तौ ब्वचा योक्को। मिनु दीसा चहिं आं तौ ब्वच’ देत। ब्यवस्था २८:५३

29 मिनु गो आं तौ कली ब्वाइतक। मिनु गो एको कली ‘मुलाक्त ब्वचा कली इ तौ चाक्को’ दे माइक्ता। तन्न एकोम आ तौ खुइश्शा मगुइद” देमाक्त।

30 मिनु पिपमी मेको मीश मुर आ लोव्र नेशा, आ वा स्वाक्मा बाक्त। मुरपुकीम मेको कली आगाम अरन्डी फेक्शो तामे बाक्त। मारदे हना मेको सहर डा गारो तार गाक्शो बाक्माक्त।

31 मिनु मेकोम “मुलाक्त गो शाफात आ तौ एलीशा आ पिया मखोइक्ता हना, परमप्रभुम सजाइ ला ममाइ, मेको क्येडा यो शुश पाइय्यील” देमाक्त।

32 मिनु पिपम आ लोव्र कुरब मुर का कली एलीशा आ बाक्तीक सोइक्ता बाक्त। मेना एलीशा खाल्पापुकी नु आ खिंम बाक्शो बाक्माक्त। तन्न मेको लोव्र कुरब मुर जाक्चा क्येडा डोंइती एलीशाम मेको खाल्पा आन कली “मेको मुर साइक्बम आं पिया खोइक्पाइक्चा कली मुर सोइश्शो गे मतनी? कोव्रडीन, मेको आ लोव्र कुरब जाक्मेनु, लाप्चो चोक्कीन। मिनु थम बोल्यो पा नेप्शा बाक्कीन। मार मेको आ होव्रप मेको आ नोनोले मपिशो बाक्बा डा?” देमाक्त।

33 मिनु एलीशाम मेकोपुकी नु लोव्र पना पन बाक्मेनु मेको लोव्र कुरब मुर जाक्माक्त। मिनु पिपमी “एको खतम दुम्तीक परमप्रभु यावे रे जाक्शो बाक्ब। मुल गो मारदे परमप्रभु यावे कली आस पा बाक्नुडा?” देमाक्त। आमोस ३:६

## 7

जचा थोव्रक तांडसीब देशो

1 एलीशाम “परमप्रभु यावे आ लोव्र नेनीन। परमप्रभु यावेमी ‘दीसा सामरीया डा ठेयब लाप्चो आ डोंइती शेकेल का चांदीमी सेआह माइश्शो पुक्तीक का रिम्शो फस नु शेकेल का चांदीम पुक्तीक निक्शी क्योव्रज लेयसीब’ देशो बाक्ब” देमाक्त। शेकेल का ११.५ ग्राम खोदेशो बाक्ब।सेआह का आगा ७,३ लिटर रिक्शो ठेयब पाथी खोदेशो पुक्तीके बाक्ब। २राजा ७:१६-१९

2 मिनु पिप कली कुक्ब लडाइ पाइब आन ठेयब मुरुम परमप्रभु आ मुर कली “परमप्रभु यावेमी आ सरीड डा झेल नेल्ल रोकतु हना यो, मोदेशो गेनायो दुम्ने मचाप्ब” देमाक्त। मिनु एलीशाम “गे मेको इ मिक्चीमीन ताइनेवे। तन्न जचा चहिं मताइक्नेवे” देमाक्त।

सहर पुम्चा प्रोंइशो

3 मिनु मेको सहर डा लाप्चो आ डोंइती ४ जना कोव्रर पशो मुर बाक्मा बाक्त। मिनु मेकोपुकीम “गो मबेक्या सम्म मारदे एकेर बाक्नया? लेवी १३:४६

4 गो सहर ओव्रतय हना, मेकेर डा अन्कालम बेक्नय। एक उइ बाक्तय हना यो, शोव्रलुम बेक्नय। मोपतीके गो अरामी आन लडाइ पाइब आन बाक्तीकेम लशा, जिम्मा गेसय। मिनु मेकोपुकीम इ कली प्रोंइतेक्म हना, गो ब्रोंइनय। साइक्तेक्म हना, यो बेक्य” देमुमा बाक्त।

5 मिनु मेकोपुकी नाक्नाकदो बोक्शा अरामी आन बाक्तीक गे लमा बाक्त। मिनु मेकोपुकी अरामी आन बाक्तीक आ नेक्था जाक्मानु, सुइ आन कली मतामे बाक्त।

6 मारदे हना परमप्रभुमी अरामी आन कली शारा बग्गी नु ठेयब लडाइ पाइब हुल आन रेयके नेंपाइश्शो बाक्माक्त। मिनु मेकोपुकीम आंम आंमा “इसाएल डा पिपम गोपुकी नु लडाइ पचा कली हित्ती नु इजीप्त डा पिप कली क्येट थाप्शा ब्रेत्तीमी बाक्त, थांका” देमुमा बाक्त। २राजा १९:७

7 मोपतीक मेकोपुकीम आन बाक्तीक ताम्बु यो मो हेंथे पा प्रोंइशा, शारा नु गधा यो प्रोंइशा, आन गिंम पोंइचा कली प्रोक्मा बाक्त।

8 मिनु मेको कोव्रर पशो मुर अरामी आन बाक्तीक जाक्दीम्मा बाक्त। मिनु मेकोपुकी ताम्बु काम ओव्रशा जशा तूशा बाक्मा बाक्त। मिनु सुन चांदी वापुकी एर ओंथ लाइश्शा खुइश्शा वोदमे बाक्त। मेको नोले मेकोपुकी लेंशा अर्को बाक्तीकेम ओव्रमा बाक्त। मिनु मार मार लाइश्शा खुइश्शा वोदमे बाक्त।

9 मिनु मेकोपुकी आंम आंमा “गो मरिम्शो गेय पाइतय। मुलाक्ती रिम्शो लोव्र नेंपाइक्तीक नाक्त बाक्ब। गोपुकी चहिं सिक्सी पा बाक्शो बाक्नय। दीसा सम्म गो ओं पा बाक्तय हना, दोस ताइनय। मुल गो रीब पा लशा, पिप आ दरवारम एको लोव्र नेंपाइय्य” देमुमा बाक्त।

10 मिनु मेकोपुकी लशा, सहर डा ठेयब लाप्चो खाल पाइब आन कली ब्रेश्शा “गोपुकी अरामी आन बाक्तीक लाइतक। मिनु मेकेर मुर का यो मतक। मारेइ चाल चुल मबा। शारा नु गधापुकी पाइक्स डा पाइक्स बाक्तेक्म। मिनु मुर आन ताम्बु यो मो प्रोंइशो बाक्तेक्म” देमा बाक्त।

11 मिनु लाप्चो खाल पाइबपुकीम ठेयब सेंदा पा मेको लोव्र पिप आ खिंम नेंपदमे बाक्त।

12 मिनु पिप नाक्दो कना बोक्शा, आ गेय पाइब मुर आन कली “गो इन कली लोव्र का पाइनुड। अरामीपुकीम गो इ कली मार पामे? गो मेको इन कली देंनुड। गोपुकी शोव्रलु बाक्शो बाक्नय, दे मेकोपुकीम तुइश्शो बाक्नीम। मोदेशो मिम्शा आन बाक्तीक प्रोंइशा, एर ओंथ लशा खुइश्शा बाक्शो बाक्नीम। मेकोपुकीम ‘गोपुकी थमा पा गूनीम। मिनु गो मेको आन कली सेसीन ग्याइश्शा, सहर ओव्रनय’ देशो बाक्नीम” दे माइक्मी बाक्त।

13 मिनु मेको आ गेय पाइब काम “इ सहर डा ५ ओटा शारा आन कली कोव्रथ सोइक्तीन। मेकोपुकी एको बेक्शो इसाएली खोदेशोन दुम्नीम। थमा पा मेकोपुकी एक बेक्ब इसाएली खोदेशोन दुम्नीम। मार दुम्शो बाक्मे, मेको तुइक्चा कली सोइक्तय” देमाक्त।

14 मिनु मेकोपुकीम बग्गी निक्शी निक्निक्शी शारा गुंडदमे बाक्त। मिनु पिपम मेको आन कली “अरामी लडाइ पाइब आन कली मार दुम्मे, मेको रुपीन” दे सोइक्तीमी बाक्त।

15 मिनु मेको यर्दन खोला सम्मन कोवन कोवन लमा बाक्त। मिनु अरामी नेल्लेम रीब पा प्रोकमानु, लां नेल्ल मेको आन प्रोंडशो वासी नु यापुकी तामे बाक्त। मिनु क्यारी पथ लाइब मुरपुकी लेशशा जाक्शा, मेको लोत्र पिप कली शेंदमे बाक्त।

16 मिनु मुरपुकी गूशा, अरामी आन बाक्तीक डा मार मार नेल्ल लदमे बाक्त। मिनु परमप्रभु यावे आ देशो खोदेशो पा सेआह पुक्तीक का रिम्शो फस शेकेल का चांदीम नु पुक्तीक निक्शी क्योत्रज शेकेल का चांदीम लेयडमे बाक्त। शेकेल का ११.५ ग्राम चांदी के क्येट बाक्ब।

17 मिनु पिप कली कुक्शा गाक्ब लडाइ पाइब आन ठेयब मुर कली लाप्चोम कोत्रब सेल्शा वोदमे बाक्त। मिनु मेको कली मुरपुकीम दिम्शा सदमे बाक्त। मिनु पिप मेको कली गुम्थ आ खिम लमेनु, परमप्रभु आ मुरुम देशो खोदेशो पा मेको कली मुरपुकीम ठेयब लाप्चोम दिम्शा साइशो बाक्मा बाक्त।

18 परमप्रभु आ मुरुम पिप कली “दीसा सेआह पुक्तीक का रिम्शो फस शेकेल का चांदीम नु पुक्तीक निक्शी क्योत्रज शेकेल का चांदीम सामरीया डा ठेयब लाप्चो आ डोंइती लेयसीब” देशो बाक्माक्त।

19 मिनु मेको लडाइ पाइब आन ठेयब मुरुम परमप्रभु आ मुर कली “परमप्रभु यावेम आ सरीड डा झेल रोक्तु हना यो, मोदेशो दुम्ने मचाप्ब” देशो बाक्माक्त। मिनु परमप्रभु आ मुरुम “गे मेको मो पशो ताइनेवे, तन्न जचा चहिं मताइक्नेवे” देशो बाक्माक्त।

20 मिनु मेको कली मोदेशोन दुम्माक्त। मारदे हना मेको कली मुरपुकीम लाप्चोम दिम्शा सदमे बाक्त। मिनु मेको बेक्माक्त।

## 8

### शुनेम डा मीशेम आ रू तशो

1 तेको मीश मुर आ तौ कली एलीशाम बेक्शो रे सेंशो बाक्मे, मेको मीश मुर कली एलीशाम “इ खिं डा मुर नेल्ल मेकेर रे गाक्कीन। मिनु इच्का नाक्ती कली ते दुम्बा, मेक लशा बाक्कीन। मारदे हना परमप्रभु यावेम एको रागीम ७ बर्स सम्म अन्काल दुम्पाइक्ब” दे माइशो बाक्माक्त। २राजा ४:३५

2 मिनु मेको परमप्रभु आ मुरुम देशो खोदेशो पा, मेको मीश मुरुम पवा बाक्त। मिनु मेको आ खिं डा मुर नेल्ल लाइशशा लमाक्त। मिनु लशा पलिस्ती आन रागीम ७ बर्स सम्म बाक्मा बाक्त।

3 मिनु ७ बर्स नोले मेको पलिस्ती आन रागी रे लेशशा जाक्माक्त। मिनु मेको आ रू नु खिं लेशशा तचा कली पिप आ बाक्तीक लमाक्त।

4 मेना पिप चहिं परमप्रभु आ मुर आ गेय पाइब गेहाजी कली “एलीशाम पशो ठेयब ठेयब गेय नेल्ल आं कली शेंदी” दे मेको नु लोत्र पना पन बाक्शो बाक्माक्त।

5 मिनु गेहाजीम एलीशाम बेक्शो मुर आन कली दोपा सेंपदा, मेको नेल्ल पिप कली शेंना शेंन बाक्शो बाक्माक्त। मेना मेको आ तौ बेक्शो रे सेंपाइशो मीश मुर आ रू नु खिं लेशशा तडल, दे पिप आ बाक्तीकेम कागज ब्रेक्शा गेथ जाक्माक्त। मिनु गेहाजीम “ए आं प्रभु पिप, एलीशाम बेक्शो रे सेंपाइशो। एको मीश मुर आ तौ बाक्ब। मिनु बेक्शो रे सेंसीशो आ तौ एकोन बाक्ब” देंमाक्त।

6 मिनु पिपमी मेको मीश मुर कली मेको आ पबर्म हिल्लो पवा बाक्त। मिनु मेकोमी यो शोत्रडा बाक्त। मिनु पिपम आ गेय पाइब ठेयब मुर का कली “एकोम आ रागी प्रोंडशा गाक्म नाक्त रे मुल सम्म डा मेको रू डा मारेइ मारेइ एको कली लेशशा गेने” देंमाक्त।

### हजाएलम बेन-हादाद साइशो

7 मिनु एलीशा दमस्कस लमाक्त। मेना अराम डा पिप बेन-हादाद रोइ पशो बाक्माक्त। मिनु मुरपुकीम पिप कली “परमप्रभु आ मुर एक जाक्शो बाक्ब” दे नेंपदमे बाक्त।

8 मिनु पिपमी हजाएल कली “कोसेली लाइशशा, परमप्रभु आ मुर कली गुम्थ लावो। मेको रे पा परमप्रभु यावे कली ‘गो एको रोइ रे सानुडा देय मसानुडा’ दे हिल्लो पपतो” दे अरेवा बाक्त।

9 मिनु हजाएलम दमस्कसम बाक्शो रिम्शो रिम्शो मारेइ मारेइ कोसेली ४० ओटा दलओठम कुरपाइशशा लमाक्त। मिनु मेको आगा ओव्रशा परमप्रभु यावे आ लोत्र पाइब आ डोंइती राम्माक्त।

मिनु मेकोम “इन तौ, अराम डा पिप बेन-हादादमी आं कली ‘गो आं रोड रे सानुडा देय मसानुडा’ दे हिल्लो पथ सोइक्ताक्यी” देंमाक्त।

10 मिनु एलीशाम मेको कली “लशा, पिप कली ‘गे थमा पा सानीनी’ दे मतो” देंमाक्त। तन्न एलीशाहमी “परमप्रभु यावेम आं कली ‘मेको थमा पा बेकब’ देशो बाकब” देंमाक्त।

11 मिनु मेकोमी पर डोशा, हजाएल कली कोव्रस डा कोव्रस बाकमाक्त। मिनु हजाएल मुने पवा बाक्त। मिनु मेको परमप्रभु आ मुर डाकमाक्त। लूका १९:४१-४४

12 मिनु हजाएलम “ए आं प्रभु, गे मारदे डाकनी?” दे हिल्लो पवा बाक्त। मिनु मेकोमी हजाएल कली “गेम इस्राएल डा मुर आन कली काइ मरिम्शो पशो तुइक्नुड। गे मेको आन दरवारम मी सुइक्नेवे। मिनु मेको आन ठिटा मुर आन कली तरवारम क्योरनेवे। मेको आन आइक्च आल आन कली खपीम राप्शा साइक्नेवे। मेको आन कोव्रज कुरशो मीश मुर आन कोव्रज पाक्नेवे” दे मदा बाक्त। २राजा १०:३२

13 मिनु हजाएलमी “गो महिक्शो, कुचुम खोदेशो मुरुम ओदेशो ठेयब गेय दोपा पने चाप्नुड डा?” देंमाक्त। मिनु एलीशाम “परमप्रभु यावेम गे अराम डा पिप दुम्नेवे, दे आं कली कोइशो बाकब” देंमाक्त। १राजा १९:१५

14 मेको नोले हजाएल एलीशा आ डोंडती रे गाकमाक्त। मिनु आ होत्रप बेन-हादाद आ बाक्तीक लेशशा जाकमाक्त। मिनु बेन-हादादम “एलीशाम इ कली मार देंमे?” दे हिल्लो पवा बाक्त। मिनु मेकोमी “गे थमा पा सानीनी नें” दे मदा बाक्त।

15 तन्न आ दीसा हजाएलमी सुम्तीक वा का ब्वाक्कुम नुप्शा, पिप आ कुलुमी सुमा बाक्त। मिनु मोपा मेको पिप बेकमाक्त। मिनु बेन-हादाद आ पा डा हजाएल पिप दुम्माक्त।

### यहूदा डा पिप येहोराम

२इतिहास २१:१, ५-१०; २इतिहास २२:१-६

16 येहो-शाफात आ तौ येहोराम यहूदा डा पिप दुम्शा, सासन पचा गोवा बाक्त। मेना इस्राएल डा पिप आहाब आ तौ येहोराम पिप दुम्शो ५ बर्स दुम्शो बाकमाक्त। मेको निकशी आस नें येहोराम बाक्त। मेको आस कली योराम यो देंमा बाक्त। १राजा २२:५१

17 येहोराम पिप दुम्मेनु, मेको ३२ बर्स दुम्शो बाकमाक्त। मिनु मेकोम यरूसलेममी ८ बर्स सासन पवा बाक्त।

18 मेको इस्राएल डा पिप, आहाब आ खिं डा मुर आन लांम गाकमाक्त। मारदे हना मेकोम आहाब आ तमी ग्युंवे पशो बाकमाक्त। मिनु मेकोम परमप्रभु यावे आ डोंडती मार मरिम्शो बाकमे, मेको पवा बाक्त।

19 मो हना यो परमप्रभु यावेमी आ गेय पाइब दाऊद आ पर्वम यहूदा कली मक्याम्दा बाक्त। मेकोमी दाऊद कली इ तौ चच का गेना हना यो पिप दुम्शा बाकब, दे कबल पशो बाकमाक्त। २सामुएल ७:११-१६; १राजा ११:३६

20 येहोरामम पिप पवा ना एदोम डा मुरुमी यहूदा आ देशो मटिथु, आंम आन पिप का सेल्मे बाक्त।

21 मोपतीके यहूदा डा पिप येहोराम आ बग्गी नेल्ल लाइशशा, आइक्ची हांबु जाइर सहरमी लमाक्त। मिनु एदोमीपुकीम येहोराम आ बग्गी नेल्ल नु आ लडाइ पाइब आन ठेयब मुर नेल्ल आन कली पुम्दमे बाक्त। मिनु मेको आ लडाइ पाइबपुकी चहिं प्रोक्शा, आन आन खिं लेम्मा बाक्त।

22 मोपतीके एदोम मुल सम्म यहूदा रे ब्राशो बाकब। मेना लिब्ना यो यहूदा आ देशो मटिथु ब्राशो बाकमाक्त।

23 मिनु यहूदा डा पिप येहोराम आ पशो अरु गेय, मेको आ पशो नेल्ल, मार, मेको यहूदा डा पिप आन इतिहासम ब्रेक्शो मबाक्वा डा?

24 यहूदा डा पिप येहोराम बेकमाक्त। मिनु मेको आ किकी पिपी नु दाऊद आ सहरमी थिम्चा पुइसे बाक्त। मिनु मेको आ पा डा आ तौ अहाज्याह पिप दुम्माक्त।

### यहूदा डा पिप अहाज्याह

25 मिनु यहूदा डा पिप येहोराम आ तौ अहाज्याह यहूदाम पिप दुम्माक्त। मेना इस्राएल डा पिप आहाब आ तौ येहोराम पिप दुम्शो १२ बर्स दुम्शो बाकमाक्त।

26 अहाज्याह पिप दुम्मेनु २२ बर्स दुम्शो बाक्माक्त। मिनु मेकोम यरूसलेममी बर्स का सासन पवा बाक्त। मेको आ ममा आ नें अथाल्याह बाक्माक्त। मेको इस्राएल डा पिप ओम्री आ चच बाक्माक्त। २राजा ११:१

27 अहाज्याह आहाब आ खिं डा मुर आन लांम गाक्माक्त। मिनु आहाब आ खिं डा मुरपुकीम खोदेशो पा परमप्रभु यावे आ डोंइती मार मरिम्शो बाक्मे, मेको पवा बाक्त। मारदे हना मेको आहाब आ चांइवा दुम्शो बाक्माक्त।

28 यहूदा डा पिप अहाज्याह नु आहाब आ तौ इस्राएल डा पिप येहोराम नु गारशा, अराम डा पिप हजाएल नु लडाइ पचा कली रामोथ-गिलादम लमाक्त। तन्न अरामीपुकीम येहोराम कली गार सेल्मे बाक्त।

29 मिनु अराम डा पिप हजाएल नु लडाइ पथ लमेनु, रामाहम गार दुम्शो रे साचा कली येहोराम येजेल सहरम लमाक्त। मिनु यहूदा डा पिप येहोराम आ तौ अहाज्याह इस्राएल डा पिप आहाब आ तौ येहोराम कली कोत्रथ येजेल सहर लमाक्त। मारदे हना मेको कली गार दुम्शो बाक्माक्त। २राजा १:१४-१६

## 9

### येहू इस्राएल डा पिप दुम्शो

1 परमप्रभु यावे आ लोत्र पाइब एलीशामी परमप्रभु यावे आ लोत्र पाइब आन हुल डा का कली ब्रेशा “इ किप्शुर किप्शा, एको तेल कुरशा रामोथ-गिलादम लावो।

2 मिनु मेक जाक्दीशशा, निम्शी आ चच, येहो-शाफात आ तौ येहू कली मालो। मिनु मेको कली आ वारचपुकी रे फ्राशा, आगा डा कोठाम लतो।

3 मिनु नोले मेको तेल मेको आ पियाम लुक्शा “परमप्रभु यावेम इ कली इस्राएल डा पिप सेल्ता” देशो बाक्ब, दे मतो। मिनु लाप्चो गु रोक्शा प्रोक्को। देश मपावो” दे मदा बाक्त। १राजा १९:१६

4 मोपतीके परमप्रभु यावे आ लोत्र पाइब, ठिटा रामोथ-गिलादमी लमाक्त।

5 मिनु मेको मेक जाक्दीम्मेनु, येहू लडाइ पाइब आन ठेयब मुरपुकी नु गुम्शा काथा बाक्शो थिम्मी बाक्त। मिनु मेकोम येहू कली “लडाइ पाइब आन ठेयब मुरपुकी, गो इन नु लोत्र का पचा माल्नुड” देंमाक्त। मिनु येहूम “गो आंइ दाते डा सु नु लोत्र पचा माल्नेवे?” देंमाक्त। मिनु मेकोम “इन नु” देंमाक्त।

6 मिनु येहू बोक्शा, आगा डा कोठाम ओत्रमाक्त। मिनु मेको ठिटाम येहू आ पियाम तेल लुक्शा “परमप्रभु यावे, इस्राएली आन परमप्रभुमी ‘गो इ कली आं मुर इस्राएली आन पिप सेल्तन।

7 गे इ होत्रप आहाब आ खिं डा मुर आन कली साइक्चा माल्नेवे। मिनु इजेबेलमी आं गेय पा आं लोत्र पाइबपुकी नु आं गेय पाइब मुर आन कली साइशो आ क्येक्क लेल्नुड।

8 आहाब आ खिं डा मुर नेल्ल बेक्चा माल्नीम। इस्राएलम मेको आ खिं डा वोंइश मुर वाइल बाक्मल कि मबाक्मल, गो नेल्ल आन कली साइक्नुडमी। १राजा १४:१०

9 गो आहाब आ खिं कली नेबात आ तौ येरोबाम नु अहीयाह आ तौ बाशा आस खिं खोदेशो सेल्नुड। १राजा १५:२९; १राजा १६:३,११

10 इजेबेल कली चहिं येजेल डा रू काम कुचुमम ब्वाइनीम। मेको कली सुइम मथिन्मीम’ देशो बाक्ब” देंशा, मेको लाप्चो गु रोक्शा दोरशा प्रोक्माक्त। १राजा २१:२३

11 मिनु येहू मेको नोले लडाइ पाइब आन ठेयब मुर आन बाक्तीक जाक्माक्त। मिनु मेकोपुकीम मेको कली “मार नेल्ल रिम्शोन बाक्बा? मेको आ निप्स ग्यशो मुर इ बाक्तीक मारदे जाक्म?” दे हिल्लो पामे बाक्त। मिनु येहूमी मेको आन कली “गे मेको मुर कली तुइक्नीनी। मिनु मेकोम मार देंबा, मेको यो तुइक्नीनी” दे माइक्मी बाक्त।

12 मिनू मेकोपुकीम “गे जोल पाइनीनी। आंड कली थमा लोत्र पने” देमा बाक्त। मिनू येहूम “मेकोमी आं कली मार देत देशा हना, परमप्रभु यावेमी ‘गो इ कली इस्राएल डा पिप सेल्लुड’ देशो बाक्ब” दे माइक्मी बाक्त।

13 मिनू मेकोपुकीम रीब पा आन आ तार फेक्शो वा पुइश्शा, तला डोइक्तीक थेंका डा फुल्लु तार ब्रामे बाक्त। मिनू मेकोपुकीम तुराही ताप्शा, ठेयब सेंदा पा “येहू पिप दुम्त” देमा बाक्त। मत्ती २१:७

### येहूमी येहोराम कली साइश्शो

14 मोपतीके निम्शी आ चच येहो-शाफात आ तौ येहूम येहोराम कली मरिम्शो पचा गोवा बाक्त। मिनू येहोराम नु इस्राएली नेल्ले अराम डा पिप हजाएल आ जोरी सत्रु दुम्शा रामोथ-गिलाद कली खाल पामे बाक्त।

15 तन्न पिप येहोराम चहिं आ गार सापाइक्चा कली येजेल लशो बाक्माक्त। मेको गार अराम डा पिप हजाएल नु लडाइ पवानु, अरामीपुकीम सेल्लो बाक्मा बाक्त। मिनू येहूमी मेको लडाइ पाइब आन ठेयब मुर आन कली “गे गो नु बाक्तीनी हना, सुइ मुर रामोथ-गिलाद सहर रे एको लोत्र शोत्रचा कली येजेल रे यूचा मतामेक्ल” देमाक्त। २राजा ८:२८-२९

16 मिनू येहू आ बग्गीम डोइश्शा येजेल लमाक्त। मारदे हना येहोराम मेकेर नाइश्शा बाक्माक्त। मिनू यहूदा डा पिप अहाज्याह यो येहोराम कली कोत्रथ मेक उइ बाक्शो बाक्माक्त।

17 मिनू येजेल सहर कली कोत्रशा खाल पाइबमी येहू नु आ मुर आन कली जाक्शो तवा बाक्त। मिनू मेकोमी ठेयब सेंदा पा “गो हुल का लडाइ पाइब मुर पिशो तातामी” देमाक्त। मिनू येहोराममी “शारा डोइक्ब का मेको आन कली गुम्थ सोइश्शा ‘मार, गे रिम्शो पथ जाक्शो बाक्नीनी?’ दे हिल्लो पपतो” देमाक्त।

18 मिनू मेको शारा डोइक्ब मुर येहू कली गुम्थ लशा “पिपमी इन कली ‘मार, गे रिम्शो पथ जाक्नी?’ दे हिल्लो पाप्तु” देमाक्त। मिनू येहूम “रिम्शो पथ जाक्डल कि मरिम्शो पथ जाक्डल, गे मारदे माल्दे? आं नोले खोइय्यी” दे मदा बाक्त। मिनू मेको कोत्रशा खाल पाइबमी पिप कली “मेको लोत्र कुरबम मेको आन कली गुम्चा दा गुम्तु, तन्न मेको लेशशा मजा” देमाक्त।

19 मिनू पिपमी अर्को शारा डोइक्ब सोइक्ता बाक्त। मिनू मेको, मेको आन नेक्था जाक्दीश्शा “पिपमी ‘गे रिम्शो पथ जाक्नी’ दे हिल्लो पाप्तु” देमाक्त। मिनू येहूम “रिम्शो पथ जाक्डल कि मरिम्शो पथ जाक्डल इ कली मारदे माल्दे, आं नोले खोइय्यी” दे मदा बाक्त।

20 मिनू मेको कोत्रशा खाल पाइबमी “मेको लोत्र कुरबमी मेको आन कली गुम्चा दा गुम्तु, तन्न मेको यो लेशशा मजा। मेरे बग्गी दोरपाइक्ब दा निम्शी आ चच येहू बाक्त। मारदे हना मेकोम निप्स ग्यशो मुरुमी दोरपाइश्शो खोदेशो पा दोरपाइक्ब” देमाक्त।

21 मिनू येहोराममी “आं बग्गी ठीक पने” देमाक्त। मिनू मेकोपुकीम मेको ठीक पामे बाक्त। मिनू इस्राएल डा पिप येहोराम नु यहूदा डा पिप अहाज्याह आस बग्गी डोइश्शा येहू कली गुम्थ लसा बाक्त। मिनू मेको निक्शीम येहू कली “येजेल सहर नाबोथ आ रूम गुम्से बाक्त। १राजा २१:१

22 मिनू येहोरामम येहू कली तशा, मेको कली “येहू, गे मार रिम्शो मिष्शा गुम्थ जाक्डे?” दे हिल्लो पवा बाक्त। तन्न येहूम इ ममा इजेबेलम आ ग्रांरा दिशो मूर्ति पूजा पाइब, दुना मुना पाइब। मिनू मार रिम्शो पा गुम्थ जाक्नुडा?” देमाक्त।

23 मिनू येहोराममी आ बग्गी लेशशा अहाज्याह कली “अहाज्याह मरिम्शो दुम्त” देना देन प्रोक्माक्त।

24 मिनू येहूम आ लिब्रा कीशा येहोराम आ बला आ दातेमी आबा बाक्त। मिनू मेको ब्राम मेको आ लुइगीर खिदा बाक्त। मिनू मेको आ बग्गीमी गोल्माक्त।

25 मिनू येहूम आ लडाइ पाइब आन ठेयब मुर बिदकार कली “मेरे कली पोक्शा येजेली नाबोथ आ रूम ताइक्तो। गे नु गो मेको आ आफ आहाब नु शाराम काथ काथा लसानु, मेको आ पर्बम परमप्रभु यावेम लोत्र पशो गे तुइश्शो बाक्नेवे। १राजा २१:१९; यसेया १३:१; येरमीया २३:३३-४०



२६ परमप्रभु यावेमी 'गो सिनाक्ती नाबोथ नु मेको आ आल आन हुश ताता। मिनु गो थमा पा इ कली एको रूमी क्येक्क लेत्नुड' देशो बाक्त। मोपतीके मेरे कली पोक्शा परमप्रभु यावे आ देशो खोदेशो पा मेको रूमीन ताइक्तो" दे मदा बाक्त।

### येहूमी अहाज्याह कली साइशो

२७ मिनु येहूदा डा पिप अहाज्याह मेको तशा, बेथ-हाग्गान लतीक लां गे प्रोक्माक्त। मिनु येहू मेको आ नोनोले खेदा पना पन लशा "मेरे कली यो सतीन" देमाक्त। मिनु मेको कली इब्लाम डा गुर डा ग्येत्थ लतीक लांम आप्शा गार सेल्मे बाक्त। तन्न मेको प्रोक्शा मेगीददोम जाक्दीम्माक्त। मिनु मेक उड बेक्माक्त। २इतिहास २२:७-९

२८ मिनु मेको आ गेय पाइब ठेयब मुरपुकीम मेको आ बेक्शो रां यरूसलेमम लाइशशा दाऊद आ सहरम मेको आ किकी पिप नु आ तुरसुम थिम्मे बाक्त।

२९ आहाब आ तौ येहोरामम सासन पवा आ ११ बर्सम अहाज्याह येहूदा डा पिप दुम्शो बाक्माक्त।

### येहूमी इजेबेल कली साइशो

३० मिनु येहू येजेल सहरमी जाक्माक्त। मार मार दुम्मे, मेको नेल्ल इजेबेलम नेशो बाक्माक्त। मिनु मेकोम आ मिक्चीम गाजल खेक्से बाक्त। मिनु चां मिंसीशा झेल रे उड लां गे कोव्रडा बाक्त।

३१ मिनु येहू ठेयब लाप्चो रे ओव्रमाक्त। मिनु इजेबेलम "ए आंम होव्रप कली साइक्ब जिप्नी, मार, गे रिम्शो पथ जाक्डे" दे मदा बाक्त। १राजा १६:९-१०

३२ मिनु मेकोमी इर झेल गे कोव्रशा ठेयब मेको गे कोव्रडमे बाक्त।

३३ मिनु येहूमी "मेको कली झेल रे ताइक्तीन" देमाक्त। मिनु मेकोपुकीम इजेबेल कली उड ताइक्तमे बाक्त। मिनु मेको आ हुश प्रेक्शा कोड गारोमी नु कोड शारा आन कली जुक्तमे बाक्त।

३४ मेको नोले येहू आगा ओव्रशा जचा तूचा थोव्रक जवा तूडा बाक्त। मिनु मेकोमी "मेको सराप रशो मीश मुर कली लाइशशा थिमीन। मारदे हना मेको पिप आ तमी बाक्ब" देमाक्त।

३५ मिनु मुरपुकी मेको कली थिम्चा कली उड ब्रुम्मा बाक्त। तन्न मेकेर आ पिया, गुड नु खोइल डा लाक्शा अरु मारेड मथिदमे बाक्त।

३६ मिनु मेकोपुकी लेशशा जाक्शा येहू कली शेंदमे बाक्त। मिनु मेकोमी "परमप्रभु यावेम आ गेय पाइब तिश्बे सहर डा एलीया रे पा 'इजेबेल कली येजेल सहरम कुचुमम ब्वाइनीम। १राजा २१:२३

३७ इजेबेल आ बेक्शो रां येजेल सहरम मोव्रल खोदेशो पा राक्ब। मिनु मेको कली एको इजेबेल बाक्ब, दे सुइम मतुइक्नीम' देशो बाक्ब" देमाक्त।

## १०

### आहाब आ तौपुकी साइशो

१ आहाब आ ७० जना तौ सामरीया सहरम बाक्शो बाक्मा बाक्त। मोपतीके येहूमी चिठी का ब्रेक्शा सामरीयाम, येजेल डा हुकुम पाइब, खाल्पा नु आहाब आ तौ आन कली कोव्रब मुर आन कली सोइक्ता बाक्त।

२ मेको चिठीम "गे इन होव्रप आ तौ मेकेर बाक्तीके, इन बग्गी, शारा, गारो हिरशो सहर नु यापुकी बाक्तीके,

३ गेपुकीमी इन होव्रप आ तौ आन दातेमी नेल्ल क्येडा रिम्शो नु नेल्ल क्येडा निप्स पाइशो, का कली आ आफ आ पा डा पिप सेलीन। मिनु मेको नोले इन होव्रप आ खिं आ पर्बम लडाइ पने" दे ब्रेक्शा सोइक्तीमी बाक्त।

४ तन्न मेकोपुकी थाम्पा हिंशा सुर्ता पा "पिप निक्शी ला यो मेको आ डोंइती राप्ने मचबेस हना, गो मार पने चाप्नया डा?" देमुमा बाक्त।

5 मोपतीके पिप आ खिं डा खाल पाइबपुकी, सहर डा हुकुम पाइबपुकी, खाल्पापुकी नु आहाब आ तौ आन कली कोत्रब नेल्ल गारशा येहू कली “गोपुकी इन गेय पाइब नकी। गे आंड कली मार देंनीनी, गो मेको पाइनीकी। गो सुइ कली पिप मसेल्नीकी। गे मार पचा दाक्नीनी, मेको पने” दे लोत्र कुरब मुर सोइक्तमे बाक्त।

6 मिनु येहूमी मेको आन कली अर्को चिठी का ब्रेक्शा “गेपुकी आं गे बाक्तीनी हना नु आं अरेशो बिन्नीनी हना, दीसा एं खोइ ना इन होत्रप आ तौ आन पिया कुरशा येजेल सहरमी जाक्कीन” दे ब्रेक्शा सोइक्ता बाक्त। मेना मेको पिप आ ७० जना तौ चहिं आन कली कोत्रब मुर आन खिंमी बाक्शो बाक्मा बाक्त।

7 मिनु मेको चिठी मेक जाक्दीम्मेनु, मेकोपुकीम मेको ७० जना पिप आ तौ आन कली लाइशशा सदमे बाक्त। मिनु मेकोपुकीम मेको आन खोइशशो पिया थुन्सेपुकीम कुर पा येजेल सहरम सोइक्तमे बाक्त।

8 मिनु लोत्र कुरब मुर जाक्शा, येहू कली “मेकोपुकीम पिप आ तौ आन पिया चाक्तेक्म” देंमाक्त। मिनु येहूमी मेको कली “मेको आन कली पुक्थ्री निक्शी पा पुक्शा, सहर डा ठेयब लाप्चो आ डोंइती दीसा सुनी सम्म वोतीन” देंमाक्त।

9 मिनु आ दीसा सुनी येहू लाडगा गूमाक्त। मिनु मेकोम मेकेर राप्शा बाक्ब नेल्ल आन कली “गे दोस ताइब मननी। आंम होत्रप कली मरिम्शो पा साइक्ब मुर दा गो नड। तन्न एको नेल्ल आन कली चहिं सुम सदा?

10 आहाब आ खिं डा मुर आन कली परमप्रभु यावेम देंशो लोत्र का यो मोशा मदुम्ब। परमप्रभु यावेम आ गेय पाइब एलीया रे पा देंशो लोत्र नेल्ल गाप्त” देंमाक्त। १राजा २१:२१

11 मोपा येहूमी येजेलम लीशो आहाब आ खिं डा मुर नेल्ल, मेको आ ठेयब गेय पाइब मुरपुकी, मेको आ वारच नु मेको आ चढेब, नेल्ल आन कली का यो मप्रोंइथु साइक्मी बाक्त। होसे १:४

12 मेको नोले येहू सामरीया गे लमाक्त। मिनु गोठला आन बाक्तीक बेथ-एकेद सहरम जाक्दीम्माक्त।

13 मिनु मेकेर येहूम यहूदा डा पिप अहाज्याह आ मुर आन कली गुमा बाक्त। मिनु येहूमी मेको आन कली “गे सु ननी?” दे हिल्लो पामी बाक्त। मिनु मेकोपुकीम “गो पिप अहाज्याह आ मुर नकी। मिनु गो पिप तौ आन कली नु ठेयब पिपीमी आ तौ आन कली गुम्थ लाइतक” देंमा बाक्त। २इतिहास २२:८

14 मिनु येहूम “एको आन कली सेसीन ग्याइक्तीन” देंमाक्त। मिनु मेकोपुकीम मेको आन कली सेसीन ग्याइशशा बेथ-एकेद सहरम सदमे बाक्त। मेकोपुकीम मेकेर ४२ जना वोंइश मुर आन कली का यो सेस मप्रोंन्मे बाक्त।

15 मिनु मेकोम मेकेर रेकाब आ तौ येहो-नादाब आ कली गुम्थ पिशो तवा बाक्त। मिनु येहूम मेको कली रिम्शो पा “मार गो आं थुं इ गे बाक्शो खोदेंशो पा, गे यो इ थुं नेल्लेम आं गे बाक्नेवे?” दे मदा बाक्त। मिनु येहो-नादाबम “बाक्नुड” देंमाक्त। मिनु येहूमी “मो हना इ गुइ आं कली गेयी” दे मदा बाक्त। मिनु मेकोम आ गुइ गेवा बाक्त। मिनु येहूम मेको कली लाइशशा आ बग्गीम निप्पदा बाक्त। येरमीया ३५:६

16 मिनु येहूम मेको कली “गे गो नु पिने। मिनु परमप्रभु यावे कली आं जोंब बोक्शा गेय पशो कोत्रडीन” दे मदा बाक्त। मिनु मेकोम मेको कली आ बग्गीम लदा बाक्त।

17 मिनु येहू सामरीयाम जाक्दीशशा, परमप्रभु यावेमी एलीया कली देंशो खोदेंशो पा, आहाब आ खिं डा लीशो मुर नेल्ल आन कली का यो मप्रोंइथु, साइक्मी बाक्त। १राजा २१:२१

### बाल कली चढेब आन कली साइशशो

18 मिनु येहूमी मुर नेल्ल आन कली ब्रेशशा, मेको आन कली “आहाबम दा इक्का ला बाल आ पूजा पाप्नु। तन्न येहूमी मेको क्येडा यो थम ठेयब पा पूजा पाइब। १राजा १६:३१-३३

19 मुल बाल आ लोत्र पाइब नेल्ले, मेको आ नोले खोइक्ब नेल्ल नु मेको कली चढेब नेल्ल आन कली ब्रेत्तीन। मेकोपुकी का यो मग्राइक्मल। मारदे हना गो बाल कली ठेयब पूजा का पाइनुड। मेको

पूजाम मजाकब सुइ ब्रोंड्या मताइनीम” देमाक्त। तन्न येहूम बाल आ नोले खोइकब नेल्ल आन कली साइक्या कली मोपा जोल पशो बाक्माक्त।

20 मिनु येहूम “बाल आ परबम चाड का मानेचा माल्ब” देमाक्त। मोपतीके मेकोपुकीम मेको लोव्र नेल्ल आन कली नैपदमे बाक्त।

21 मिनु येहूम मेको लोव्र इस्राएल नेल्लेम नैपाइक्या कली लोव्र कुरब मुर सोइकतीमी बाक्त। मिनु बाल आ नोले खोइकब नेल्ल जाक्मा बाक्त। का यो मलीमा बाक्त। मेकोपुकी बाल आ खिंम जाक्शा क्राक्शी चोक्शी दुम्शा एर डा गारो रे ओंथ डा गारो सम्म दुम्मा बाक्त।

22 मिनु मेकोमी वा चोइकब आन कली “बाल आ नोले खोइकब नेल्ल आन कली वा गुंडदीन” दे माइक्मी बाक्त। मिनु मेकोम मेको आन कली वा गुंडदमे बाक्त।

23 मिनु येहू, रेकाब आ तौ येहो-नादाब नु बाल आ खिं ओव्रमाक्त। मिनु येहूम बाल आ नोले खोइकब आन कली “होस पा एर ओंथ नेल्ल कोव्रडीन। मिनु थमा पा एकेर गे इन दातेम परमप्रभु यावे आ गेय पाइब सुइ मबाक्मल। बाल आ नोले खोइकब ला बाक्मल” देमाक्त।

24 मिनु मेको क्योरशा चढेचा नु चोशा चढेचा कली आगा ओव्रसा बाक्त। येहूमी लाडगाम ८० जना मुर आन कली योव्रशा, मेको आन कली “गो एको मुर आन कली इन जिम्मा गेशो बाक्नुड। सुइम का कली यो प्रोक्चा गेप्टु हना, मेको आ पा डा मेको प्रोक्पाइकब मुर साइक्या पुंडसीब” देशो बाक्माक्त।

25 मिनु येहूम मार मार चढेने थुमा चोटी खाल पाइब नु आ दी डा योव्रशो मुर आन ठेयब मुर आन कली “ओव्रशा, मेको नेल्ल आन कली का यो मप्रोंइथु, क्योरशा सतीन” दे हुकुम गेमी बाक्त। मोपतीके मेको खाल पाइबपुकी नु योव्रशो आन ठेयब मुरपुकीम सुइ आन कली प्रोक्चा मगेथु तरवारम क्योरशा सदमे बाक्त। मिनु मेको आन बेक्शो रॉ लाडगा गुंडशा बाल आ खिं आ लाडगाम ताइक्तमे बाक्त। १राजा १८:४०

26 मिनु मेकोपुकीम बाल आ खिं डा थाम लाडगा गुंडशा चोव्रमे बाक्त।

27 मिनु नोले मेकोपुकीम बाल आ थाम प्रेत्मे बाक्त। मिनु आ खिं यो प्रेत्मे बाक्त। मिनु मेको डाइक्तीक खिं सेल्मे बाक्त। मेको मुल सम्म बाक्ब।

28 मोपा येहूमी इस्राएलमी बाल आ नोले खोइकब नेल्ल आन कली क्याम्दा बाक्त। १राजा १२:२६-३३

29 मो हना यो येहूम इस्राएली आन कली पाप पपाइकब नेबात आ तौ येरोबाम आ पतीक मप्रोना बाक्त। बेथेल नु दान डा सुन के बाछा आस कली पूजा पतीक गेय में डा में वोदा बाक्त।

30 मिनु परमप्रभु यावेम येहू कली “गे आं डोंइती मार रिम्शो बाक्मे, मेको पाप्तीवी। मिनु आं मिम्शो लोव्र आहाब आ खिं डा मुर नेल्ल आन कली पाप्तीवी। मोपतीके इ तौ चच ४ पाला सम्म इस्राएल डा पिप दुम्नीम” देमाक्त।

31 मो हना यो येहूम आ थुं नेल्लेम होस पा परमप्रभु यावे, इस्राएली आन परमप्रभु आ अरेशो मटिवा बाक्त। मेकोमी इस्राएली आन कली पाप पपाइकब येरोबाम आ पाप पतीक मप्रोना बाक्त।

32 मेना परमप्रभु यावेमी इस्राएल कली आइक्च सेल्चा गोवा बाक्त। मिनु हजाएलमी इस्राएल कली लडाइ पा ग्रामाक्त। २राजा ८१२

33 मिनु यर्दन खोला आ पूर्ब गे गिलाद डा रागी नेल्ल, गाद, रूबेन नु मनस्से आन रागी, अरनोन खोला आ नेक्था आरोएर, गिलाद डा लां रे पा बाशान सम्म इस्राएली आन कली फूमी बाक्त।

34 येहू आ पशो अरु गेय, मेको आ पशो नेल्ल नु आ सक्ति मार, मेको इस्राएल डा पिप आन इतिहासम ब्रेक्शो मबाक्बा डा?

35 मिनु येहू बेक्माक्त। मिनु मेको सामरीयाम थिम्चा पुंडसे बाक्त। मिनु मेको आ पा डा आ तौ येहो-अहाज पिप दुम्माक्त। २राजा १३:१

36 येहू सामरीया सहरम बाक्शा २८ बर्स इस्राएल कली सासन पवा बाक्त।

# 11

## अथाल्याह नु योआश

1 अहाज्याह आ ममा अथाल्याहम आ तौ कली साइशशो तशा, पिप आ खिं डा मुर नेल्ल आन कली साइक्चा गोवा बाक्त। २राजा ८:२६; २राजा ९:२७

2 तन्न पिप येहोराम आ तमी, अहाज्याह आ समी येहो-शेबा बाक्माक्त। मेकोमी अहाज्याह आ तौ योआश कली मेको साइक्चा पुंडसीब पिप आ आल आन दाते रे लाइशशा, मेको आ खाल पाइब मीश मुर नु इप्तीके कोठा काम खुइक्ता बाक्त। मोपा अथाल्याहमी मेको आल कली साइक्चा मतवा बाक्त।

3 मिनु मेको आल ६ बर्स सम्म मेको नु परमप्रभु यावे आ खिंम खुइशशा बाक्माक्त। मेना अथाल्याहमी सासन पशो बाक्माक्त।

4 मिनु ७ बर्सम येहो-यादामी सहे, सहे जना पिप कली कोव्रब केरेती नु खाल पाइब आन टेयब मुर आन कली परमप्रभु यावे आ खिंम ब्रेशशा चाक्मी बाक्त। मिनु येहो-यादाम मेको आन कली कबल का पपाइशशा, परमप्रभु यावे आ खिंम कसम जपाइक्मी बाक्त। मिनु मेको आन कली पिप आ तौ कोइदीमी बाक्त। केरेती परमप्रभु यावे आ खिं कोव्रब बाक्नीम।

5 मिनु येहो-यादामी मेको आन कली “गे मार पचा मालनीनी देशा हना, सु सु नाइक्तीक नाक्ती गेय पथ जाक्नीनी, मेकोपुकीम भाग सां डा भाग का पिप आ खिं खाल पने।

6 मिनु अर्को भाग का सुर माइशशो लाप्चोम बाक्कीन। नोले डा भाग लाप्चो खाल पाइब आन नोले गे बाक्शा, दरवार कोव्रचा मालनीम।

7 मिनु गे नाइक्तीक नाक्ती गेय मपाइब हुल निक्शी चहिं परमप्रभु यावे आ खिं खाल पा बाक्कीन।

8 गे नेल्ल आंम आंम गुइम या शेशा, पिप कली खाल पा आ एर ओंथ बाक्चा मालनीनी। इन नेक्था जाक्ब नेल्ल आन कली सतीन। पिप ते लत हना यो, गे मेको आ नेक्था बाक्चा मालनीनी” दे अरेमी बाक्त।

9 मिनु पिप कली कोव्रब आन टेयब मुरपुकीमी चढेब येहो-यादा आ अरेशो नेल्ल पामे बाक्त। मेको नेल्लेमी आन आन मुर आन कली खुप्तमे बाक्त। नाइक्तीक नाक्ती गेय पचा माल्लो नु ममाल्लो नेल्ल चढेब येहो-यादा आ बाक्तीक जाक्मा बाक्त।

10 मिनु मेको चढेबम मेको आन कली परमप्रभु यावे आ खिंम बाक्शो दाऊद आ तूतीक नु तेक्तीक गेमी बाक्त। २सामुएल ८:७

11 मिनु मेको खाल पाइबपुकी आंम आंम या शेशा परमप्रभु यावे आ खिं आ दक्खिन रे उत्तर सम्म, खिं नु चढेतीक आ एर ओंथ पिप कली खाल पा बाक्मा बाक्त।

12 मिनु येहो-यादाम पिप आ तौ कली गुंडदा बाक्त। मिनु मेको आ पियाम सिरपेच गुक्ता बाक्त। मिनु येहो-यादामी मेको कली कबल डा कागज का गोवा बाक्त। मिनु मेको कली तेल लुक्शा पिप सेला बाक्त। मिनु मुरपुकीम गुइ फ्रोक्शा “पिप गेना हना यो ब्रोंइशा बाक्ल” देमा बाक्त। ब्यवस्था १७:१८-१९; १राजा १:३९

13 मिनु अथाल्याहमी खाल पाइब नु मुरपुकी टेयब सेंदा पा रेयके पशो नेना बाक्त। मिनु मेको परमप्रभु यावे आ खिंम बाक्शो मुर आन नेक्था लमाक्त।

14 मिनु मेकोम कोव्रडानु, पिप थाम आ नेक्था राप्पाइशशो तवा बाक्त। मेको आन पतीक पशा टेयब मुरपुकी नु तुराही ताप्बपुकी पिप आ नेक्था बाक्मा बाक्त। मिनु रागी डा मुर नेल्ल तुराही ताप्ना ताप्न ग्येरसीशो बाक्मा बाक्त। मिनु अथाल्याहम आ वा खाक्गा बाक्त। मिनु टेयब सेंदा पा “गो नु रागी नेल्ल खतम! गो नु रागी नेल्ल खतम!” दे वाइ ब्रेम्माक्त।

15 मिनु चढेब येहो-यादामी लडाइ पाइब आन टेयब मुर आन कली “मेको कली खिं रे गुंडदीन। मेको आ नोले खोइक्ब नेल्ल आन कली तरवारम सतीन। मारदे हना ‘मेको परमप्रभु यावे आ खिंम साइक्चा मपुंडसेक्ल’ ” देमाक्त।

16 मिनु मेको कली ग्याइशशा, शारा वोइक्तीक लाइशशा, सदमे बाक्त।

17 मेको नोले येहो-यादामी परमप्रभु यावे, पिप नु आ मुर कली कबल का पवा बाक्त। मेकोपुकी परमप्रभु यावे आ मुर दुम्नीम, दे कबल पवा बाक्त। मिनु मेकोम पिप नु मुर आन दातेम यो कबल का पवा बाक्त।

18 मिनु मेको रागी डा मुर नेल्ल बाल आ खिं लशा, मेको प्रेत्मे बाक्त। मेकोपुकीम मेको आ चढेतीक नु आ मूर्ति जिक्शा ताइकतमे बाक्त। मिनु बाल कली चढेब मत्तान कली चढेतीक आ डोंइती सदमे बाक्त। मिनु चढेब येहो-यादाम परमप्रभु यावे आ खिं कली खाल पाइब मुर योव्रमी बाक्त। २राजा १०:२६-२७; न्यायाधीस ६:२५

19 मिनु येहो-यादामी सहे का जना लडाइ पाइब आन कप्तानपुकी, केरेती, खाल पाइबपुकी नु रागी डा मुर नेल्ल आन कली लाइकमी बाक्त। मिनु मेकोपुकीमी पिप कली परमप्रभु यावे आ खिं रे खाल पाइब आन लाप्यो लां पा पिप आ खिंम चाकगमे बाक्त। मिनु पिप आ नित्तीकेम निप्पदमे बाक्त। करेती परमप्रभु यावे आ खिं कोव्रब बाक्तेकम।

20 मिनु रागी डा मुर नेल्ल ग्येरसमा बाक्त। मिनु सहरम थुं नाइश्शा बाक्तीक दुम्माक्त। मारदे हना अथाल्याह तरवारमी साइक्या पुंडसे बाक्त।

21 योआश पिप दुम्नेनु, मेको ७ बर्स दुम्शो बाक्माक्त। योआश नु येहो-आश नें का बाक्ब, येहो-आश कली योआश यो बाक्ब।

## 12

योआश यहूदा डा पिप दुम्शो

२इतिहास २४:-

1 योआश यहूदा डा पिप दुम्माक्त। मेना येहू इस्राएल डा पिप दुम्शो ७ बर्स दुम्शो बाक्माक्त। मिनु योआशमी यरूसलेमम ४० बर्स सासन पवा बाक्त। मेको आ ममा आ नें सिबीयाह बाक्माक्त। मेको बेयर-शेबा डा बाक्माक्त।

2 योआशमी चढेब येहो-यादाम शेंशो खोदेशो पा, ब्रोंइम सम्म परमप्रभु यावे आ डोंइती मार रिम्शो बाक्मे, मेको पवा बाक्त।

3 मो हना यो मेकोमी डांडाम बाक्शो थानपुकी मताइक्ता बाक्त। मेना सम्म मुरपुकीम मेकेर क्योरशा चढेतीक चढेशा, धूप चोव्रमे बाक्त।

4 मिनु योआशमी चढेब आन कली “परमप्रभु यावे आ खिंमी मुरपुकीमी आन दाक्शा गेशो क्येट, मुर आन कली हिक्शो नु बोक्शो क्येट नु मुरपुकीम ग्येरशा गेशो क्येट नेल्ले परमप्रभु यावे आ खिंम वोतीन। २राजा १४:४; १राजा २२:४४

5 चढेबपुकीमी मेको क्येट मुर रे ताक्चा माल्नीम। मिनु परमप्रभु यावे आ खिं डा बिग्रेशो मार मार बाक्मा, मेको सेल्पाइक्चा माल्नीम” देंमाक्त।

6 तन्न योआशमी सासन पवा आ २३ बर्स सम्म यो चढेबपुकीम मेको बिग्रेशो मारेइ मसेल्पदमे बाक्त।

7 मोपतीके पिप योआशमी चढेब येहो-यादा नु अरु चढेब आन कली ब्रेश्शा “मारदे गे परमप्रभु यावे आ खिं डा ब्रेश्शो मसेल्नी? मुल रे गेपुकीम इन कली गेशो क्येट मताक्कीन। तन्न मेको अरु परमप्रभु यावे आ खिं डा ब्रेश्शो सेल्ब आन कली कोव्रब आ गुडमी गेचा माल्नीनी” देंमाक्त।

8 मोपतीके चढेबपुकीमी “मुल गो क्येट यो मताक्य नु बिग्रेशो यो मसेल्न्य” दे सल्ला पामे बाक्त।

9 मिनु चढेब येहो-यादामी सन्दोस का सेल्शा, मेको आ सुम्तीकेम पोव्रला का सेला बाक्त। मिनु येहो-यादामी मेको सन्दोस परमप्रभु यावे आ खिं आगा ओव्रतीकेम चढेतीक आ नेक्था ग्युरा गे वोदा बाक्त। मिनु परमप्रभु यावे आ खिं डा लाप्यो कोव्रब चढेबपुकीम परमप्रभु यावे आ खिंम चाक्शो क्येट नेल्ल मेकेर कुर पामे बाक्त।

10 मिनु मेकोपुकीमी मेको सन्दोस “शुश क्येट बाक्ब” दे तुइकतमेनु, पिप आ ब्रेक्ब नु नेल्ल क्येडा ठेयब चढेब जाक्शा, मेको परमप्रभु यावे आ खिं डा क्येट हिक्शा थैलोम कुर पा फ्रेंशा वोइक्बाक्मा बाक्त।

11 मिनु मेकोपुकीम मेको हिकगमे नोले, मेको परमप्रभु यावे आ खिंम गेय पाइब आन कली कोत्रब मुर कली गेबाक्मा बाक्त। मिनु मेकोपुकीम मेको रे परमप्रभु यावे आ खिं सेल्ब आन कली गेबाक्मा बाक्त। मेकोपुकीम मेको क्येट शी के गेय पाइब नु सेल्ब आन कली गेबाक्मा बाक्त।

12 मेकोपुकीमी मेको क्येट गारो प्रोत्रब, फुल्लु खोइक्ब नु शी नु खोइश्शो फुल्लु ग्याप्या कली गेबाक्मा बाक्त। मिनु मेको क्येट परमप्रभु यावे आ खिं डा बिग्रेशो सेल्चा कली नु परमप्रभु यावे आ खिं डा अरु मार मार लेंशा सेल्चा कली चलेबाक्मा बाक्त।

13 मेकोपुकीम चांदी के बोस, सल्दो क्राम्तीक थनारो, ग्योब, तुराही नु अरु सुन चांदी के मारेड मारेड सेल्चा कली परमप्रभु यावे आ खिंम चाक्शो क्येट रे मसेल्पदमे बाक्त।

14 मारदे हना मेको क्येट परमप्रभु यावे आ खिं डा बिग्रेशो लेंशा सेल्ब मुर आन कली गेमे बाक्त।

15 मिनु मेको गेय पाइब आन कली गेचा कली, मेको आन कोत्रब मुर आन कली गेशो क्येट सु सु कली गेनी, मार मार पनी, दे हिल्लो मपाइक्बाक्मा बाक्त। मारदे हना मेकोपुकी थमा सुइक्चा पुंडसीशो मुर बाक्मा बाक्त। २राजा २२:७

16 मिनु दोस आ परबंम नु पाप आ परबंम चढेशो क्येट चहिं परमप्रभु यावे आ खिं डा क्येट नु मब्वाइक्तमे बाक्त। मेको चहिं चढेब आन के दुम्बाक्माक्त।

17 मेना अराम डा पिप हजाएल इर कुशा, गाथ कली लडाइ तोशा मेको आ के सेला बाक्त। मेको नोले हजाएल यरूसलेम नु लडाइ पचा कली मेक गे लमाक्त।

18 तन्न यहूदा डा पिप योआशमी मेको आ किकी पिपी, यहूदा डा पिप येहो-शाफात, येहोराम नु अहाज्याहम चढेशो परमप्रभु यावे आ खिं डा क्येट नु आंम आ चढेशो थोत्रक, परमप्रभु यावे आ खिंम बाक्शो थोत्रक नु आ दरवारम बाक्शो सुन नेल्ल अराम डा पिप हजाएल कली सोइक्ता बाक्त। मिनु हजाएल यरूसलेम रे लेम्माक्त। २राजा १०:३२

19 योआश आ पशो अरु गेय नु आ पशो नेल्ल, मार, मेको यहूदा डा पिप आन इतिहासम ब्रेक्शो मबाक्बा डा? १राजा १५:१८

20 मिनु नोले मेको आ गेय पाइब मुरपुकीम मेको कली साइक्चा माल्मे बाक्त। मिनु योआश कली सिल्ला सहर डा लुकच लतीक लां मिल्लो माइश्शो दरवारम सदमे बाक्त। २राजा १४:५

21 मेको कली साइक्ब, योआश आ गेय पाइब शिमेआथ आ तौ योजाकार नु शोमेर आ तौ येहो-जाबाद बाक्सा बाक्त। मिनु योआश बेक्शा आ किकी पिप नु दाऊद आ सहरम थिम्चा पुंडसे बाक्त। मिनु मेको आ पा डा आ तौ अमस्याह पिप दुम्माक्त। २राजा १४:६

## 13

### इस्राएल डा पिप येहो-अहाज

1 येहू आ तौ येहो-अहाज सामरीयाम इस्राएल डा पिप दुम्माक्त। मेना यहूदा डा पिप अहाज्याह आ तौ योआशम सासन पशो २३ बर्स दुम्शो बाक्माक्त। मिनु येहो-अहाजम १७ बर्स सासन पवा बाक्त। २राजा १०:३५

2 मेकोमी परमप्रभु यावे आ डोंइती मार मरिम्शो बाक्मे, मेको पवा बाक्त। मिनु इस्राएली आन कली पाप पपाइक्ब नेबात आ तौ येरोबाम आ लांम गाक्माक्त। मिनु मेकोमी येरोबाम आ लां मप्रोना बाक्त। १राजा १२:२८-३०

3 मोपतीके परमप्रभु यावेमी इस्राएली आन कली तशा गाइक्ता बाक्त। मिनु मेकोमी मेको आन कली शुश खेयप अराम डा पिप हजाएल नु मेको आ तौ बेन-हादाद आस गुडमी गेमी बाक्त। २राजा १०:३२

4 तन्न येहो-अहाजमी परमप्रभु यावे कली पुना बाक्त। मिनु परमप्रभु यावेम मेको आ पुंडशो नेना बाक्त। मारदे हना अराम डा पिपमी इस्राएली आन कली दिम्शा श्येत गेशो तवा बाक्त। उत्पती १६:१३

5 मिनु परमप्रभु यावेमी इस्राएली आन कली प्रोंडब का योत्रडा बाक्त। मिनु मेकोपुकी अरामी आन गुइ रे ब्रोंडमा बाक्त। मिनु इस्राएली डोंइती डा खोदेंशो पा आन आन खिंम बाक्चा तामे बाक्त। २राजा १४:२७

6 तन्न मेकोपुकीमी इस्राएली आन कली पाप पपाइक्ब येरोबाम आ पाप पतीके मप्रोंडशु, पना पन बाक्मा बाक्त। मिनु मूर्ति पाइशशो थाम यो सामरीयाम बाक्स डा बाक्स दुम्माक्त। १राजा १६:३३

7 येहो-अहाज के ५० जना शारा डोइक्ब, १० ओटा बग्गी नु १० हजार खोइलीम गाक्ब लडाइ पाइब डा लाक्शा अर्को मारेइ मलीशो बाक्माक्त। मारदे हना अरु आन कली अराम डा पिपम साइशशा, खप डा फुरक खोदेशो सेल्शो बाक्माक्त।

8 येहो-अहाज आ पशो अरु गेय, मेको आ पशो नेल्ल नु आ सक्ति दोदेशो बाक्मे, मार, मेको इस्राएल डा पिप आन इतिहासम ब्रेक्शो मबाक्बा डा?

9 मिनु येहो-अहाज बेक्माक्त। मिनु मुरपुकीम मेको कली आ किकी पिपी नु सामरीयाम थिम्मे बाक्त। मिनु मेको आ पा डा आ तौ योआश पिप दुम्माक्त।

### इस्राएल डा पिप योआश

10 मिनु येहो-अहाज आ तौ योआश सामरीयाम इस्राएल डा पिप दुम्माक्त। मेना योआश यहूदा डा पिप दुम्शो ३७ बर्स दुम्शो बाक्माक्त। मिनु इस्राएल डा पिप योआशमी १६ बर्स सासन पवा बाक्त। यहूदा डा पिप नु इस्राएल डा पिप आस नें खाल का डा बाक्त। योआश नु येहो-आश नें का बाक्ब, येहो-आश कली योआश यो देशो बाक्त।

11 मेकोमी परमप्रभु यावे आ डोंइती मार मरिम्शो बाक्मे, मेको पवा बाक्त। मिनु इस्राएली आन कली पाप पपाइक्ब नेबात आ तौ येरोबाम आ लांम गाक्माक्त। मिनु मेकोमी येरोबाम आ लां मप्रोना बाक्त।

12 योआश आ पशो अरु गेय, मेको आ पशो नेल्ल, यहूदा डा पिप अमस्याह नु लडाइ पा सक्ति कोंइशो, मार, मेको इस्राएल डा पिप आन इतिहासम ब्रेक्शो मबाक्बा डा? २राजा १४:८-१६

13 मिनु योआश बेक्माक्त। मेको आ पा डा येरोबाम पिप दुम्माक्त। योआश इस्राएल डा पिपपुकी नु सामरीयाम थिम्चा पुंडसे बाक्त। २राजा १४:२३

### एलीशा बेक्शो

14 एलीशा रोइ पवा बाक्त। मिनु नोले मेको रोइ रे बेक्माक्त। मिनु इस्राएल डा पिप योआश मेको कली कोव्रथ लमाक्त। मिनु मेको आ डोंइती डाक्शा “ए, आं आफ! ए, आं आफ! इस्राएल डा बग्गी नु शारा डोइक्बपुकी” देंमाक्त। २राजा २:१२

15 मिनु एलीशामी मेको कली “लिब्रा का नु ब्रा गुपो” देंमाक्त। मिनु मेकोम लिब्रा नु ब्रा गुबा बाक्त।

16 मिनु मेकोमी इस्राएल डा पिप कली “लिब्रा खुक्को” देंमाक्त। मिनु मेकोम खुक्गा बाक्त। मिनु एलीशामी आ गुइ पिप आ गुइ तार वोदा बाक्त।

17 मिनु एलीशामी “पूर्ब गे डा डेल रोकको” दे मदा बाक्त। मिनु रोकगा बाक्त। मिनु एलीशाम मेको कली “ब्रा आपो” दे मदा बाक्त। मिनु मेकोमी आबा बाक्त। मिनु एलीशाम “परमप्रभु यावे आ अराम रागी कली ग्रातीक ब्रा बाक्त। गे अफेक सहरमी अरामी आन कली लडाइ पा ग्रानीनी” दे मदा बाक्त।

18 मिनु लेंशा मेकोम “ब्रापुकी गुपो” देंमाक्त। मिनु मेकोमी गुबा बाक्त। मिनु मेकोमी इस्राएल डा पिप कली “खप तुपो” देंमाक्त। मिनु पिपम खेयप सां तुप्शा नांडसे बाक्त।

19 मिनु परमप्रभु आ मुरुमी गाइशशा मेको कली “गे खपीम ५, ६ खेयप तुप्चा माल्शो नवे। मिनु गे अराम कली गेना हना यो कली ग्राडे वा। तन्न मुल गे अराम कली खेयप सां ला ग्रानेवे” दे मदा बाक्त।

20 मेको नोले एलीशा बेक्माक्त। मुरपुकीम मेको कली थिम्मे बाक्त। मोआब डा रोइक्बपुकी बर्स बर्समी मेको रागी ओव्रबाक्मा बाक्त।

21 काले इस्राएलीपुकीम बेक्शो मुर का थिम्मेनु मोदेशो रोइक्ब मोआबी आन कली तामे बाक्त। मोपतीके मेकोपुकीम मेको बेक्शो मुर एलीशा वोइक्तीकेमी ताइशशा, प्रोक्मा बाक्त। मिनु मेको बेक्शो मुरुम एलीशा आ रुश थिवा चोटी सेस दुम्शा बोक्माक्त।

22 मिनु अराम डा पिप हजाएलमी इस्राएल कली श्येत गेस डा गेस बाक्माक्त। मेना येहो-अहाजम इस्राएलम सासन पशो बाक्माक्त।

23 तन्न परमप्रभु यावेमी अब्राहाम, इसहाक नु याकूब नु पशो कबलम पतीके, मेको आन कली शिशी पाइक्मी बाक्त। मेकोम मेको आन कली मिम्तीमी बाक्त। मिनु परमप्रभु यावेमी मेको आन कली साइक्चा नु आ डोंइती रे तिल्ला थुं मपवा बाक्त। लेवी २६:४२

24 मिनु अराम डा पिप हजाएल बेक्माक्त। मिनु मेको आ पा डा आ तौ बेन-हादाद पिप दुम्माक्त।

25 मिनु येहो-अहाज आ तौ योआशमी आ आफ रे हजाएल आ तौ बेन-हादादम लडाइ पा ग्राशो सहरपुकी लेंशा ताक्गा बाक्त। योआशमी खेयप सां मेको कली ग्रामाक्त। मिनु मोपा मेकोमी इस्राएल डा सहरपुकी लेंशा आं के सेला बाक्त। २राजा १३:१९

## 14

यहूदा डा पिप अमस्याह

२इतिहास २५:-

1 योआश आ तौ अमस्याह यहूदा डा पिप दुम्माक्त। मेना यो-आहाज आ तौ योआश इस्राएल डा पिप दुम्शो बर्स निकशी दुम्शो बाक्माक्त। योआश नु येहो-आश नें का बाक्ब, येहो-आश कली योआश यो देशो बाक्त। २राजा १२:२२

2 यहूदा डा पिप अमस्याह पिप दुम्मेनु २५ बर्स दुम्शो बाक्माक्त। मिनु मेकोमी यरूसलेमम २९ बर्स सासन पवा बाक्त। मेको आ ममा आ नें येहो-अददीन बाक्माक्त। मेको यरूसलेम डा बाक्माक्त।

3 अमस्याहमी परमप्रभु यावे आ डोंइती मार रिम्शो बाक्मे, मेको पवा बाक्त। तन्न मेको आ किकी दाऊदमी पशो खोदेशो चहिं मपवा बाक्त। मेकोमी आ आफ योआशमी पशो खोदेशो पवा बाक्त। २राजा १२:३-४

4 मो हना यो मेकोमी डांडाम बाक्शो थानपुकी मताइक्ता बाक्त। मेना सम्म मुरपुकीम मेकेर क्योरशा चढेतीक चढेशा, धूप चोव्रमे बाक्त।

5 मेकोमी आ राज्य डा गेय बोल्यो सेला नोले, आ आफ कली साइक्ब, आ गेय पाइब आन कली साइक्मी बाक्त। २राजा १२:२१:२२; २सामुएल ३:३०

6 तन्न मेकोमी मोसा आ अरेशो किताबम ब्रेक्शो खोदेशो पा “तमी तौ आन पाप आ पर्बम आन आम आफ आस कली मसतीन। मिनु आम आफ आस पाप आ पर्बम यो आन तमी तौ आन कली मसतीन। सुम पाप पाइनीमी मेको ला साइक्चा पुंइसमल” देशो, मेकोमी परमप्रभु यावे आ लोत्र टिशा, नेल्ल आंम आन पशो पापम ला साइक्चा पुंइसीनीम। ब्यवस्था २४:१६

7 मेकोम हिक्सी के बेंसीम १० हजार एदोमी आन कली साइक्मी बाक्त। मिनु लडाइम सेला सहर ग्राशा, मेको आ नें योकतेल वोदा बाक्त। मेको सहर आ नें मुल सम्म मेकोन बाक्ब।

8 मेको नोले अमस्याहम इस्राएल डा पिप येहू आ चच येहो-अहाज आ तौ योआश कली लडाइ पतीक लोत्र पा “जाक्को, गो नु आं डोंइती राप्था लडाइ पावो” दे लडाइ पचा कली लोत्र कुरब मुर सोइक्ता बाक्त।

9 तन्न इस्राएल डा पिप योआशम यहूदा डा पिप अमस्याह कली “लेबानोन डा चू बुटा काम लेबानोन डा लाइशशो रवा का कली ‘इ तमी आं तौ नु ग्युंवे पचा गेवो’ देंमाक्त। तन्न लेबानोन डा ब्वाकीमी बाक्ब जन्तु का मेको मेर पा पिमाक्त। मिनु मेकोम चू बुटा कली दिम्शा ताइशशा पवा बाक्त। न्यायाधीस ९:१४

10 गे एदोम कली ग्राशा, टेयब लेशशो दुम्तीनी। इन ग्राशोम ग्येरसीने। तन्न इन खिंमी सिक्सी पा बाक्कीन। आंम इन कली नु यहूदा कली मारदे खतम सेल्चा दाक्नीनी?” देंपाइक्थ लोत्र कुरब मुर का सोइक्ता बाक्त।

11 मो हना यो अमस्याहमी मेको लोत्र मनेना बाक्त। मोपतीके इस्राएल डा पिप योआशमी लडाइ तोवा बाक्त। मिनु मेको नु यहूदा डा पिप अमस्याह यहूदा डा बेथ-शेमेशम लडाइ पाप्से बाक्त। यहोसु १५:१०

12 मिनु यहूदा डा पिप इस्राएली आन क्येडा बुमाक्त। मिनु मुर नेल्ल प्रोकमा बाक्त।



13 मिनू इस्राएल डा पिप योआशमी यहूदा डा पिप अहाज्याह आ चच, योआश आ तौ अमस्याह कली बेथ-शेमेशमी ग्याइक्ता बाक्त। मिनू मेको नोले योआश यरूसलेम लेशशा जाक्माक्त। मिनू इस्राएल डा पिपमी यरूसलेम डा गारो एफ्राइम डा ठेयब लाप्चो रे कुना डा ठेयब लाप्चो सम्म ४ सहे कुबीत प्रेप्पदा बाक्त। कुबीत का आधा मिटर खोदेशो बाक्ब।

14 मेकोमी परमप्रभु यावे आ खिम बाक्शो नु पिप आ खिम थिश्शो सुन चांदी नु ग्योब नेल्ल नु मुर यो ग्याइश्शा लदा बाक्त। मिनू नोले सामरीया लेम्माक्त।

15 मेको योआश आ पशो अरु गेय, आ पशो नेल्ल, आ सक्ति नु यहूदा डा पिप अमस्याह नु पशो लडाइ, मार, मेको नेल्ल इस्राएल डा पिप आन इतिहासम ब्रेक्शो मबाक्बा डा?

16 मिनू योआश बेक्माक्त। मिनू इस्राएल डा पिपपुकी नु सामरीयाम थिम्चा पुंडसे बाक्त। मिनू मेको आ पा डा आ तौ येरोबाम पिप दुम्माक्त। २राजा १३:१३

17 यहूदा डा पिप योआश आ तौ अमस्याह, इस्राएल डा पिप येहो-अहाज आ तौ योआश क्येडा १५ बर्स शुश ब्रोंडमाक्त।

18 अमस्याह आ पशो अरु गेय, मार, मेको यहूदा डा पिप आन इतिहासम ब्रेक्शो मबाक्बा डा?

19 मिनू यरूसलेम सहरम मुरपुकीमी मेको कली साइक्चा माल्मे बाक्त। मोपतीके मेको लाकीश सहरम प्रोक्माक्त। तन्न मेको कली खेदा पाइब मुर सोइश्शा मेक उइ साइक्पदमे बाक्त। २राजा १२:२१

20 मिनू मेको आ बेक्शो रां शाराम कुर पा यरूसलेम चाक्गमे बाक्त। मिनू मेको कली आ किकी पिपी नु दाऊद आ सहरम थिम्मे बाक्त।

21 मिनू यहूदा डा मुर नेल्लेम १६ बर्स दुम्शो अमस्याह आ तौ अजारयाह कली मेको आ पा डा पिप सेल्मे बाक्त। २राजा १५:१-२

22 मेकोमी अमस्याह बेक्ने थुमा नोले एलाथ सहर लेंशा सेल्शा लेशशा ताक्गा बाक्त। २राजा १६:६

येरोबाम इस्राएल डा पिप दुम्शो

23 मिनू योआश आ तौ येरोबाम सामरीया सहरम इस्राएल डा पिप दुम्माक्त। मेना योआश आ तौ अमस्याह यहूदा डा पिप दुम्शो १५ बर्स दुम्शो बाक्माक्त। मिनू येरोबाम ४१ बर्स सासन पवा बाक्त। होसे १:१; आमोस १:१

24 मेकोमी परमप्रभु यावे आ डोंइती मार मरिम्शो बाक्मे, मेको पवा बाक्त। मिनू इस्राएली आन कली पाप पपाइक्ब नेबात आ तौ येरोबाम आ लांम गाक्माक्त। मिनू मेकोमी येरोबाम आ लां मप्रोना बाक्त। १राजा १२:२८-३०

25 मिनू परमप्रभु यावे आ गेय पाइब नु आ लोत्र पाइब इस्राएल डा गाथ-हफेर सहर डा अमीतै आ तौ योना आ पशो परमप्रभु यावे, इस्राएली आन परमप्रभु आ लोत्र गाम्माक्त। लेबो-हमाथ रे अराबाह डा समुन्द्र सम्म इस्राएल डा सांद लेंशा सेल्ब येरोबाम बाक्माक्त। योना १:१

26 मारदे हना परमप्रभु यावेमी इस्राएली आन कली शुश श्येत जशो तवा बाक्त। वाइल दुम्शो नु मदुम्शो सुइ मलीमा बाक्त। इस्राएली आन कली वारच पाइब सुइ मबाक्मा बाक्त।

27 परमप्रभु यावेमी इस्राएल कली रागी रे क्याम्चा मदेंतीके, मेकोमी योआश आ तौ येरोबाममी मेको आन कली प्रॉइमी बाक्त। २राजा १३:५

28 येरोबाम आ पशो अरु गेय, मेको आ पशो नेल्ल, आ सक्ति, मेको आ लडाइ पशो नु दोपा यहूदा डा दमस्कस नु हमाथ सहर लेंशा इस्राएल के सेला, मार, मेको इस्राएल डा पिप आन इतिहासम ब्रेक्शो मबाक्बा डा?

29 मिनू येरोबाम बेक्माक्त। मिनू इस्राएल डा पिप नु थिम्चा पुंडसे बाक्त। मिनू मेको आ पा डा आ तौ जकरिया पिप दुम्माक्त। २राजा १५:८

1 मिनु अमस्याह आ तौ अजारयाह यहूदा डा पिप दुम्माक्त। मेना येरोबाम इस्राएल डा पिप दुम्शो २७ बर्स दुम्शो बाक्माक्त। २इतिहास २६:-; २राजा १४:२१

2 मिनु अजारयाह पिप दुम्मेनु १६ बर्स दुम्शो बाक्माक्त। मिनु मेकोम यरूसलेममी ५२ बर्स सासन पवा बाक्त। मेको आ ममा आ नें येकोल्याह बाक्माक्त। मेको यरूसलेम डा बाक्माक्त।

3 मेकोम आ आफ अमस्याह खोदेशो पा, परमप्रभु यावे आ डोंइती मार रिम्शो बाक्मे, मेको पवा बाक्त।

4 मो हना यो मेकोमी डांडाम बाक्शो थानपुकी मताइक्ता बाक्त। मेना सम्म मुरपुकीम मेकेर चढेतीक चढेशा धूप चोत्रमे बाक्त। २राजा १४:३-४

5 मिनु परमप्रभु यावेमी पिप कली कोत्रर मुपदा बाक्त। मिनु मेको मबेक्म सम्म आ कान खिं काम बाक्चा माल्दा बाक्त। मिनु पिप आ तौ योथाममी पिप आ दरवार डा मारेइ मारेइ गेय पशा, राज्य डा मुर आन कली सासन पवा बाक्त। लेवी १३:४६

6 अजारयाह आ पशो अरु गेय, मेको आ पशो नेल्ल, मार, मेको यहूदा डा पिप आन इतिहासम ब्रेक्शो मबाक्बा डा?

7 मिनु अजारयाह बेक्माक्त। मिनु आ किकी पिपी नु दाऊद आ सहरम थिम्चा पुंडसे बाक्त। मिनु मेको आ पा डा आ तौ योथाम पिप दुम्माक्त। २राजा १५:३२

### इस्राएल डा पिप जकरिया

8 मिनु येरोबाम आ तौ जकरिया सामरीयाम इस्राएल डा पिप दुम्माक्त। मेना अजारयाह यहूदा डा पिप दुम्शो ३८ बर्स दुम्शो बाक्माक्त। मिनु जकरियामी ६ महिना सासन पवा बाक्त। २राजा १४:२९

9 मेकोमी आ किकी पिपी खोदेशो पा, परमप्रभु यावे आ डोंइती मार रिम्शो बाक्मे, मेको पवा बाक्त। मिनु इस्राएली आन कली पाप पपाइक्ब नेबात आ तौ येरोबाम आ लांम गाक्माक्त। १राजा १२:२८-३०; आमोस ७:९

10 यावेश आ तौ शाल्लुममी जकरिया कली साइक्चा मला बाक्त। मिनु शाल्लुममी मेको कली मुर आन दातेमीन तुप्शा सदा बाक्त। मिनु मेको आ पा डा शाल्लुम पिप दुम्माक्त।

11 जकरिया आ पशो अरु गेय, मेको आ पशो नेल्ल, इस्राएल डा पिप आन इतिहासम ब्रेक्शो बाक्ब।

12 मोपा परमप्रभु यावेम येहू कली “इ मुर ४ पाला सम्म पिप दुम्मीम” देशो लोत्र गाम्माक्त। मिनु मोदेशोन दुम्माक्त। २राजा १०:३०

### इस्राएल डा पिप शाल्लुम

13 मिनु यावेश आ तौ शाल्लुम सामरीयाम पिप दुम्माक्त। मेना उज्जीयाह यहूदा डा पिप दुम्शो ३९ बर्स दुम्शो बाक्माक्त। मिनु शाल्लुममी सामरीया सहरम महिना का सासन पवा बाक्त।

14 मेको नोले गादी आ तौ मेनाहेम तिरचा सहर रे सामरीयाम कुमाक्त। मिनु मेकोमी यावेश आ तौ शाल्लुम कली तुप्शा सदा बाक्त। मिनु मेको कली साइश्शा, आ पा डा पिप दुम्माक्त।

15 शाल्लुम आ पशो अरु गेय, मेको आ पशो नेल्ल नु जकरिया कली साइश्शो मेको इस्राएल डा पिप आन इतिहासम ब्रेक्शो बाक्ब।

16 मेना मेनाहेममी तिरचा सहर रे लाइश्शा, तिफसाह नु मेको आ एर ओंथ बाक्शो रागी नेल्ल आन कली लडाइ तोत्रमी बाक्त। मारदे हना मेकोपुकीम मेको कली ठेयब लाप्चो रोक्शा मगेमे बाक्त। मेकोम तिफसाह कली खतम सेला बाक्त। मिनु आल कुरशो मीश मुर नेल्ल आन कोत्रज पाक्मी बाक्त। तिफसाह ताप्पुआह सहर आ हिबू नें बाक्ब। यहेसु १२:२४; २राजा ८:१२

### इस्राएल डा पिप मेनाहेम

17 गादी आ तौ मेनाहेम इस्राएल डा पिप दुम्माक्त। मेना अजारयाह यहूदा डा पिप दुम्शो ३९ बर्स दुम्शो बाक्माक्त। मिनु मेनाहेम सामरीयाम १० बर्स सासन पवा बाक्त।

18 मेकोमी परमप्रभु यावे आ डोंइती मार रिम्शो बाक्मे, मेको पवा बाक्त। मिनु मेकोमी ब्रोंडम सम्म इस्राएली आन कली पाप पपाइक्ब नेबात आ तौ येरोबाम आ लां मप्रोना बाक्त।

19 मिनु अस्सुर डा पिप पुलमी मेको रागी कली लडाइ तोवा बाक्त। मिनु मेनाहेममी आ राज्य बोल्या सेल्या कली, पुल कली हजार का टलेन्ट, चांदी गेवा बाक्त। टलेन्ट का ३४ किलो बाक्ब। २राजा १५:२९

20 मेनाहेममी मेको क्वेट इस्राएल डा शोंप पाइशशो मुर रे पोक्का बाक्त। मिनु मेकेर डा मुरपुकीमी अस्सुर डा पिप कली ५० शेकेल चांदी गेचा माल्बाक्मा बाक्त। मोपतीके अस्सुर डा पिप मेको रागीम मबाक्थु, आ रागी लेशशा लमाक्त। शेकेल का ११.५ ग्राम खोदेंशो बाक्ब। २राजा २३:३५

21 मेनाहेम आ पशो अरु गेय, मेको आ पशो नेल्ल, मार, मेको इस्राएल डा पिप आन इतिहासम ब्रेक्शो मबाक्बा डा?।

22 मिनु मेनाहेम बेक्माक्त। मिनु मेको आ पा डा आ तौ पेकाहीयाह पिप दुम्माक्त।

**इस्राएल डा पिप पेकाहीयाह**

23 मिनु मेनाहेम आ तौ पेकाहीयाहम सामरीयाम इस्राएल डा पिप दुम्माक्त। मेना अजारयाह यहूदा डा पिप दुम्शो ५० बर्स दुम्शो बाक्माक्त। मिनु पेकाहीयाह बर्स निकशी सासन पवा बाक्त।

24 मेकोमी परमप्रभु यावे आ डोंइती मार मरिम्शो बाक्मे, मेको पवा बाक्त। मिनु इस्राएली आन कली पाप पपाइक्ब नेबात आ तौ येरोबाम आ लाम गाक्माक्त।

25 मिनु मेको आ लडाइ पाइब आन कप्तान रेमाल्याह आ तौ पेकाहमी मेको पिप कली साइक्चा मला बाक्त। मिनु मेकोम गिलाद डा ५० जना मुर आन कली लाइशशा सामरीया डा पिप पेकाहीयाह आ दरवारम ओव्रशा, मेको कली सदा बाक्त। मिनु अरगोब नु अरीएह आस कली यो सांडसी बाक्त। मोपा पेकाह आ पा डा पिप दुम्माक्त। २राजा १५:१०, १५, ३०

26 पेकाहीयाह आ पशो अरु गेय, मेको आ पशो नेल्ल, इस्राएल डा पिप आन इतिहासम ब्रेक्शो बाक्ब।

**इस्राएल डा पिप पेकाह**

27 रेमाल्याह आ तौ पेकाह सामरीयाम इस्राएल डा पिप दुम्माक्त। मेना अजारयाह यहूदा डा पिप दुम्शो ५२ बर्स दुम्शो बाक्माक्त। मिनु पेकाहमी २० बर्स सासन पवा बाक्त।

28 मेकोमी परमप्रभु यावे आ डोंइती मार मरिम्शो बाक्मे, मेको पवा बाक्त। मिनु इस्राएली आन कली पाप पपाइक्ब नेबात आ तौ येरोबाम आ लाम गाक्माक्त। मिनु मेकोमी येरोबाम आ लाम मप्रोना बाक्त।

29 इस्राएल डा पिप पेकाहमी सासन पवा ना अस्सुर डा पिप तिग्लात-पिलेसेरमी लडाइ तोशा, इयोन, आबेल-बेथ-माकाह, यानोह, केदेश, हासोर, गिलाद, गालील रागी नु नाप्ताली आ रागी नेल्ल आ के सेल्शा, मेकेर डा मुर आन कली ग्याइशशा अस्सुर लाइक्मी बाक्त। १इतिहास ५:२६

30 मिनु एलाह आ तौ होशेआमी रेमाल्याह आ तौ पेकाह कली साइक्चा मला बाक्त। मिनु पेकाह कली तुप्शा सदा बाक्त। मिनु मेको आ पा डा पिप दुम्माक्त। मेना यहूदामी उज्जीयाह आ तौ योथामम सासन पशो २० बर्स दुम्शो बाक्माक्त। २राजा १७:१; २राजा १५:२५

31 पेकाह आ पशो अरु गेय, मेको आ पशो नेल्ल इस्राएल डा पिप आन इतिहासम ब्रेक्शो बाक्ब।

**यहूदा डा पिप योथाम**

32 मिनु उज्जीयाह आ तौ योथाम यहूदा डा पिप दुम्माक्त। मेना रेमाल्याह आ तौ पेकाह इस्राएल डा पिप दुम्शो बर्स निकशी दुम्शो बाक्माक्त। २इतिहास २७:१-७

33 योथाम पिप दुम्मेनु २५ बर्स दुम्शो बाक्माक्त। मिनु मेकोम यरूसलेमम १६ बर्स सासन पवा बाक्त। मेको आ ममा आ नें येरुशा बाक्माक्त। मेको सादोक आ तमी बाक्माक्त।

34 मेकोम आ आफ उज्जीयाह खोदेंशो पा, परमप्रभु यावे आ डोंइती मार रिम्शो बाक्मे, मेको पवा बाक्त। २राजा १५:३, ४

35 मो हना यो मेकोमी डांडा डा थानपुकी मताइक्ता बाक्त। मेना सम्म मुरपुकीम मेकेर चढेतीक चढेशा, धूप चोत्रमे बाक्त। मेकोमी परमप्रभु यावे आ खिं डा उत्तर गे डा ठेयब लाप्चो यो सेल्पदा बाक्त।

36 योथाम आ पशो अरु गेय, मेको आ पशो नेल्ल, मार, मेको यहूदा डा पिप आन इतिहासम ब्रेकशो मबाकबा डा?

37 मेना परमप्रभु यावेमी अराम डा पिप रेसीन नु रेमाल्याह आ तौ पेकाह आस कली यहूदा नु लडाइ पचा कली क्युक्सी बाक्त। २राजा १६:५

38 मिनु योथाम बेकमाक्त। मिनु मेको दाऊद आ सहरम आ किकी पिपी नु थिम्चा पुंडसे बाक्त। मिनु मेको आ पा डा आ तौ आहाज पिप दुम्माक्त।

## 16

### यहूदा डा पिप आहाज

1 मिनु योथाम आ तौ आहाज यहूदा डा पिप दुम्माक्त। मेना रेमाल्याह आ तौ पेकाह इस्राएल डा पिप दुम्शो १७ बर्स दुम्शो बाकमाक्त। २इतिहास २८:१-६

2 आहाज पिप दुम्मेनु २० बर्स दुम्शो बाकमाक्त। मिनु मेकोमी यरूसलेम १६ बर्स सासन पवा बाक्त। मेकोमी आ किकी दाऊदम खोदेशो पा परमप्रभु यावे, आ परमप्रभु आ डोंइती मार रिम्शो बाकमे, मेको मपवा बाक्त।

3 मेको इस्राएल डा पिप आन लाम गाक्माक्त। मेकोमी आ तौ कली चोशा चढ़ेवा बाक्त। मोदेशो प्रांग्रा दिशो गेय पशो आ परबम परमप्रभु यावेमी डोंइती रागी रागी डा मुर आन कली इस्राएल रे गुंडशो बाकमाक्त। लेवी १८:२१

4 मेकोमी डांडा डा थानम, पहाड मेर नु गिग रवा आन पुं नेल्लेमी चढ़ेतीक चढ़ेश धूप चोवा बाक्त।

5 मिनु अराम डा पिप रेसीन नु इस्राएल डा पिप रेमाल्याह आ तौ पेकाहमी यरूसलेम कली लडाइ तोशा पुम्दमे बाक्त। तन्न मेकोम आहाज कली ग्राने मचाप्से बाक्त। यसैया ७:१-९

6 मेना अराम डा पिपमी रेसीन एलाथ डा यहूदी आन कली खेरशा, एलाथ सहर एदोमी आन कली गेवा बाक्त। मिनु एदोम डा मुर मुल सम्म मेकेर बाकशो बाक्नीम। २राजा १४:२२

7 मिनु आहाजम अस्सुर डा पिप तिगलात-पिलेसेर कली “गो इन गेय पाइब नु इन तौ नड। आं कली लडाइ तोइब अराम नु इस्राएल डा पिप रे प्रॉइचा नड। मेकोपुकीम आं कली लडाइ तोशो बाक्नीम” देशा लोत्र कुरब मुर सोइक्ता बाक्त। २इतिहास २८:१६-२७

8 मिनु आहाजमी परमप्रभु यावे आ खिंम बाकशो नु पिप आ खिंम बाकशो सुन नु चांदी नेल्ल अस्सुर डा पिप कली कोसेली सोइक्ता बाक्त। १राजा १५:१८

9 मिनु अस्सुर डा पिपमी मेको आ लोत्र नेना बाक्त। मिनु दमस्कस कली लडाइ तोशा मेको आ के सेला बाक्त। मेकोमी मेकेर डा मुर आन कली ग्याइशशा कीर सहर लाइक्मी बाक्त। मिनु नोले रेसीन कली सदा बाक्त।

10 मिनु पिप आहाज, अस्सुर डा पिप तिगलात-पिलेसेर कली गुम्थ दमस्कस लमाक्त। मिनु मेकोमी दमस्कसम चढ़ेतीक का तवा बाक्त। मिनु मेको दोदेशो बाकमे, मेको नेल्ल ब्रेकशा चढ़ेब उरीयाह आ बाक्तीक सोइक्ता बाक्त।

11 मिनु चढ़ेब उरीयाहम दमस्कस रे पिप आहाजम सोइशो ब्रेक्स खोदेशो पा, चढ़ेतीक का सेला बाक्त। मिनु मेकोमी मेको चढ़ेतीक पिप आहाज दमस्कस रे जाक्चा क्येडा डोंइतीन सेल्ने थुमा बाक्त।

12 मिनु पिप दमस्कस रे लेशशा जाक्शा, मेको चढ़ेतीक कोत्रडा बाक्त। मिनु पिपम चढ़ेतीक आ नेक्था लशा डोंइसे बाक्त।

13 मेकोम मेकेर चोशा चढ़ेतीके नु अन्न चढ़ेतीके चढ़ेवा बाक्त। मिनु तूचा थोत्रक चढ़ेतीक लुक्शा दुशा बाक्चा आ परबम चढ़ेशो आ हुश मेको तार बुइक्ता बाक्त।

14 मेकोमी परमप्रभु यावे आ खिं आ डोंइती बाकशो कांसा के चढ़ेतीक परमप्रभु यावे आ खिं नु चढ़ेतीक आस दातेम मबाक्ल, दे याक्ता बाक्त। नक चढ़ेतीक लाइशशा, मेकेर वोदा बाक्त। मेको माइत चढ़ेतीक चहिं उत्तर गे वोदा बाक्त।

15 मेको नोले पिप आहाजमी चढेब उरीयाह कली “एको ठेयब नक चढेतीकम सुनी चोशा चढेतीके नु नाकदो डा अन्न चढेतीके, पिप आ चोशा चढेतीके, मेको आ अन्न चढेतीके, रागी डा मुर नेल्ल आन चोशा चढेतीके नु मेको आन अन्न चढेतीके नु तूचा थोत्रक चढेतीके चढेवो। चढेतीकेम चोशा चढेतीक नु चढेशो नेल्ल आन हुश बुइक्चा माल्ब। तन्न मेको कांसा के चढेतीके चहिं परमप्रभु यावे कली मारेइ लोत्र हिल्लो पची ना गो मेकेर चढेशा हिल्लो पाइनुड” दे मदा बाक्त।

16 मिनु चढेब उरीयाहम पिप आहाज आ देशो नेल्ल पवा बाक्त।

17 मेको नोले पिप आहाजमी चिकतीक बोस आन नित्तीकपुकी मेको आन एर ओंथ डा चिकतीक बोस गुंडपदा बाक्त। मिनु मेको आ नेक्था बाक्शो ब्वाक्कु कुर पतीक ठेयब बोस कली ब्यफ आन तार रे गुंडपदा बाक्त। मिनु मेको ठेयब बोस कली फुल्लुम तिकशा वोइक्पदा बाक्त। १ राजा ७:२३-३९

18 मेकोमी परमप्रभु यावे आ खिंम सेल्लो नाइक्तीक नाक्त कली सेल्लो ठेयब कोठा नु परमप्रभु यावे आ खिं डा लाडगा पिप आ खिं रे ओत्रतीक अस्सुर डा पिप आ पबंम अर्को सेला बाक्त।

19 आहाज आ पशो अरु गेय नु मेको आ पशो नेल्ल, मार, मेको यहूदा डा पिप आन इतिहासम ब्रेक्शो मबाक्बा डा?

20 मिनु आहाज बेक्माक्त। मिनु दाऊद आ सहरमी आ किकी पिपी नु थिम्चा पुंडसे बाक्त। मिनु मेको आ पा डा आ तौ हिज्कीयाह पिप दुम्माक्त। २ राजा १८:१

## 17

### इसाएल डा पिप होशेआ

1 एलाह आ तौ होशेआ सामरीयाम इस्राएल डा पिप दुम्माक्त। मेना यहूदा डा पिप आहाज पिप दुम्शो १२ बर्स दुम्शो बाक्माक्त। मिनु होशेआम ९ बर्स सासन पवा बाक्त। २ राजा १८:९-१२; २ राजा १५:३०

2 मेकोम परमप्रभु यावे आ डोंइती मार मरिम्शो बाक्मे, मेको पवा बाक्त। तन्न आ डोंइती डा इस्राएल डा पिप आन पशो खोदेशो चहिं मपवा बाक्त।

3 मिनु अस्सुर डा पिप शाल्मानेसेर होशेआ कली लडाइ तोथ जाक्माक्त। मिनु होशेआमी मेको कली तिरो थाप्चा माल्दा बाक्त।

4 तन्न अस्सुर डा पिपमी होशेआम आ कली मटिशो तवा बाक्त। मारदे हना मेकोमी इजीप्त डा पिप सो कली लोत्र कुरब मुर सोइशो तुइक्ता बाक्त। मिनु बर्स बर्सम गेतीक तिरो यो अस्सुर डा पिप कली मथाप्ता बाक्त। मोपतीके अस्सुर डा पिपमी मेको कली ग्याइशशा जेल्खानम चोक्गा बाक्त। होसे १२:२

5 मिनु अस्सुर डा पिपम रागी नेल्ल आन कली लडाइ तोशा, सामरीया जाक्माक्त। मिनु मेको कली लडाइ तोशा, बर्स सां सम्म पुन्दा बाक्त। यसैया २८:२

6 अस्सुर डा पिपमी होशेआम सासन पशो ९ बर्स दुम्मेनु, सामरीया कली ग्रामाक्त। मेकोमी इस्राएल डा मुर आन कली ग्याइशशा अस्सुर लाइक्मी बाक्त। मिनु मेको आन कली हालाह सहर नु गोजान डा खोला हाबोर आ नेक्था नु मादी आन सहरम वोइक्मी बाक्त।

### इसाएली ग्याइक्चा पुंडसीशो

7 मारदे मोदेशो दुम्शो बाक्त देशा हना, परमप्रभु यावे, आन परमप्रभुम मेको आन कली इजीप्त रागी डा पिप फाराओ आ गुइ रे गुंडशा चाक्गा रे इस्राएलीपुकीम देवी देवता आन कली पूजा पशो बाक्मा बाक्त।

8 मेकोपुकीम परमप्रभु यावेमी आन डोंइती गुंडशो रागी रागी डा मुर आन पतीके पशो बाक्मा बाक्त। इस्राएल डा पिप आन पशो मरिम्शो गेय नेल्ल पशो बाक्मा बाक्त। मेकोपुकीमी परमप्रभु यावे कली मटिशो बाक्मा बाक्त। २ राजा १६:३

9 इस्राएल डा मुरपुकीम परमप्रभु यावे, आन परमप्रभु आ डोंइती खुइशशा मरिम्शो पशो बाक्मा बाक्त। खाल पतीक लाइशो खिं रे सहर नेल्लेम आंम कली थान सेल्मे बाक्त।

10 मेकोपुकीम डांडा नेल्ल नु शुश गिग रवा आन पुंमी खुक्शो फुल्लु नु मूर्ति पाइश्शो थामपुकी सेल्मे बाक्त। २राजा १६:४; १राजा १४:२३

11 मेकोपुकीम परमप्रभु यावेमी मेको आन डोंडती रे गुंडशो रागी रागी डा मुर खोदेशो पा डांडा डा थानम धूप चोत्रमे बाक्त। मेकोपुकीम परमप्रभु यावे आ अरेशो काइ मटिथु, गाइक्पदमे बाक्त।

12 मेकोपुकीमी मूर्ति पूजा पामे बाक्त। डोंडती परमप्रभु यावेमी “मोदेशो पचा मदुम्ब” देशो बाक्माक्त।

13 मो हना यो परमप्रभु यावेमी आ लोत्र पाइब नु आ कोंडतीक ताइब नेल्ल रे पा इस्राएल नु यहूदा डा मुर आन कली “गे इन मरिम्शो लां रे लेतीन। आं शेंशो, आं फुल्लुम मुशा ब्रेक्शो लोत्र नु इन किकी पिपी आन कली गेशा आं अरेशो नेल्ल पने” दे आ गेय पाइबपुकीमी मेको आन कली थाम्पा हिंच कोंडपदा बाक्त।

14 तन्न मेकोपुकीम आन थमा मसुडक्ब किकी पिपी खोदेशो पा परमप्रभु यावे आ लोत्र मनेंथु, काइ मटीमे बाक्त।

15 मेकोपुकीम मेको आ फुल्लुम मुशा ब्रेक्शो लोत्र, मेको आन किकी पिपी नु पशो कबल नु हिंच कोंडशो ममिन्तमे बाक्त। मेकोपुकी शोर गाक्शो मूर्ति आन नोले खोइश्शा, आंमा यो शोर गाक्शो दुम्शो बाक्मा बाक्त। मेको आन एर आंथ बाक्ब रागी रागी डा मुर आन नोले खोदमे बाक्त। परमप्रभु यावेमी मेको आन कली “गे मेको आन पशो खोदेशो मपने” देशा, अरेशो बाक्माक्त। प्रस्थान २३:२४

16 मेकोपुकीम परमप्रभु यावे, आन परमप्रभु आ शेंशो मटिथु, आंम कली यपाइश्शा बाछा निक्शी नु मूर्ति पाइश्शो थाम का सेल्समा बाक्त। मेकोपुकी नां, तास्ला नु सोरुल आन डोंडती बाम्मा बाक्त। मिनु बाल देवता कली पूजा पामे बाक्त। १राजा १२:२८; १राजा १६:३३

17 मेकोपुकीम आंम तमी तौ आन कली क्योरशा चोशा चढेमे बाक्त। मिनु लिंक्यु कोव्रशा, मन्तर तन्तर पामे बाक्त। मिनु परमप्रभु यावे आ डोंडती मार मरिम्शो बाक्मे, मेको पना पन बाक्मा बाक्त। मिनु मेको कली गाइक्पदमे बाक्त। लेवी १८:२१

18 मोपतीके परमप्रभु यावे इस्राएल आ पर्बम थाम्पा गाइक्ता बाक्त। मिनु मेको आन कली आ डोंडती रे खेरमी बाक्त। यहूदा आ थर डा मुर ला प्रोंडशा वोइक्चा पुंडसमा बाक्त।

19 मिनु यहूदा आ मुरपुकीम यो परमप्रभु यावे, आन परमप्रभु आ शेंशो लोत्र मटीमे बाक्त। मेकोपुकीम इस्राएली आन पशो पामे बाक्त।

20 मोपतीके परमप्रभु यावेम इस्राएल आ चच युइ नेल्ल आन कली प्रोंडमी बाक्त। मिनु मेको आन कली सजाइ गेशा, रोइक्ब आन गुइमी गेमी बाक्त। आ डोंडती रे मखेरा सम्म मो पवा बाक्त।

21 मेकोमी “इस्राएली आन कली दाऊद आ खिं रे तिल्लुड” दे नेबात आ तौ येरोबाम कली पिप सेल्पदा बाक्त। मिनु येरोबामम इस्राएली आन कली परमप्रभु यावे कली प्रोंडपाइश्शा, टेयब पाप पपाइक्मी बाक्त। १राजा १२:२०

22 मिनु इस्राएलीपुकीम येरोबाम आ पपाइश्शो पाप नेल्ल पामे बाक्त। मिनु मेको मप्रोन्मे बाक्त।

23 परमप्रभु यावेमी आ गेय पा, आ लोत्र पाइबपुकी रे डोंडती देशो खोदेशो पा इस्राएली आन कली आ डोंडती रे खेरमी बाक्त। मोपतीके इस्राएलीपुकी आंम आन रागी रे अस्सुर रागीम ग्याइश्शा लाइक्चा पुंडसमा बाक्त। मिनु मुल सम्म मेक उइ बाक्शो बाक्नीमी। ब्यवस्था २८:६३-६४

### सामरीयाम अर्को रागी डा मुर वोइश्शो

24 मेको नोले अस्सुर डा पिपमी बेबीलोन, कूथाह, अक्वा, हमाथ नु सेफारवाइम रे मुरपुकी चाक्मी बाक्त। मिनु मेको आन कली इस्राएली आन पा डा सामरीया डा सहरपुकीम बाक्पाइक्मी बाक्त। मेकोपुकी सामरीया आंम के सेल्शा मेकेर बाक्मा बाक्त।

25 मिनु डोंडती मेकोपुकी मेकेर बाक्मानु, परमप्रभु यावे कली ममानेमे बाक्त। मोपतीके परमप्रभु यावेमी मेको आन दातेमी गुप्स सोइक्तीमी बाक्त। मिनु मेको गुप्सपुकीम कोइ कोइ आन कली सदमे बाक्त। होसे १३:८

26 मिनु मेकोपुकीमी अस्सुर डा पिप कली “गे इन सोइशशो रागी रागी डा मुर सामरीया डा सहरम बाक्नीम। मेकोपुकीमी मेको रागी डा परमप्रभु आ अरेशो मतुइक्नीम। मोपतीके परमप्रभुम मेको आन दातेमी गुप्स सोइक्ताक्व। मारदे हना मेकोपुकी मेको रागी डा परमप्रभु कली मतुइक्तीके ठेयब सेल्स मजोक्तीके, मेको गुप्समी मुर आन कली साइक्तेक्म” दे लोत्र कुरब मुर सोइक्तमे बाक्त।

27 मिनु अस्सुर डा पिपमी “सामरीया रे ग्याइशशा लाइशशो अस्सुर रागीम चाक्शो तेकोइ चढेब का मेक बाक्चा कली लेशशा सोइक्तमेक्ल। मिनु मेकोमी मेको रागी डा परमप्रभु आ अरेशो लोत्र मुर आन कली शेंचा माल्ब” दे अरेवा बाक्त।

28 मोपतीके डोंइती सामरीया रे ग्याइशशा लाइशशो चढेब का बेथेलम लेशशा जाक्शा, मेकेर बाक्माक्त। मिनु मेकोमी मुर आन कली परमप्रभु यावे कली दोपा ठेयब सेल्चा माल्नीमी मेको शेंदीमी बाक्त।

29 मो हना यो रागी रागी डा मुरपुकीम आंम आन बाक्तीके सहर सहरम आन देवी देवता सेल्शा, मेको डांडा डा थानम वोदमे बाक्त। मोपा आन बाक्शो सहर नेल्लेमी सामरीया डा मुर आन सेल्शो डांडा डा थान यो बाक्मा बाक्त।

30 बेबीलोन डा मुरपुकीम आन देवता सुक्कोथ-बेनोथ सेल्मे बाक्त। कूथ डा मुरपुकीम नेरगल सेल्मे बाक्त। हमाथ डा मुरपुकीम अशीमा सेल्मे बाक्त।

31 अक्वा सहर डा मुरपुकीम निभाज नु तारतक सेल्मे बाक्त। मिनु सेफारवाइम डा मुरपुकीमी आन आल आन कली आन देवता अद्राम्मेलेक नु अनाम्मेलेक आस कली चोशा चढेमे बाक्त। २राजा १७:३१

32 मेकोपुकीम परमप्रभु यावे कली यो ठेयब सेल्मे बाक्त। मिनु डांडा डा थानमी अरु मुर आन कली चढेब सेल्मे बाक्त। मेकोपुकीमी डांडा डा थानपुकीम मुर आन पबंम चढेमे बाक्त। १राजा १२:३१

33 मिनु मोपा मेकोपुकीम परमप्रभु यावे कली ठेयब सेल्शा, आंम आन देवी देवता आन कली यो पूजा पामे बाक्त। तेको रागी रे चाक्शो बाक्मा, मेको आन देवी देवता आन पतीक पशा, पूजा पामे बाक्त।

34 मेकोपुकीमी मुलाक्त सम्म मोदेशो पना पन बाक्नीम। मिनु मेकोपुकीमी परमप्रभु यावे कली मान पा महिनीम। मेको आ फुल्लुम मुशा ब्रेक्शो लोत्र, आ निसाफ पतीक लोत्र, आ अरेशो नु आ शेंशो मपामे बाक्त। परमप्रभु यावेमी मोदेशो पचा माल्नीनी, दे इस्राएल माइशशो याकूब आ आल आन कली अरेशो बाक्माक्त। उत्पत्ती ३२:२९

35 परमप्रभु यावेमी इस्राएली नु कबल का पवा बाक्त। मिनु मेकोमी इस्राएली आन कली “गेपुकीम देवी देवता आन कली ममानेन। मेको आन डोंइती मबपीन। मेको आन गेय मपने। मेको आन कली मारेइ मचढेन। प्रस्थान २३:२४

36 मिनु आ सक्ति नु आ क्युक्शो गुइम इन कली इजीप्ट रे गुंइशा एक चाक्ब परमप्रभु यावे कली ला ठेयब सेलीन। मेको आ डोंइती ला बाप्पीन। मेको कली ला चढेचा माल्नीनी” देंमाक्त।

37 मेकोमी इन कली “आं फुल्लुम मुशा ब्रेक्शो लोत्र नु आं पतीके लोत्र, आं अरेशो नु आं शेंशो लोत्र नेल्ल शुश होस पा गेना हना यो पचा माल्नीनी। गेपुकीमी देवी देवता आन कली मानेचा मदुम्नीनी।

38 गेपुकीम गो नु पशो कबल मप्रेंदीन। मिनु देवी देवता आन कली मानेचा मदुम्नीनी।

39 तन्न गेपुकीम परमप्रभु यावे, इन परमप्रभु कली ला ठेयब सेलीन। मेकोमी इन कली इन जोरी सत्रु आन गुइ रे प्रोंइब” दे अरेशो बाक्माक्त। ब्यवस्था ६:१२-१९

40 मो हना यो मेकोपुकीम मेको लोत्र मनेन्मे बाक्त। मिनु मेको आन डोंइती डा पशो खोदेशो पामे बाक्त।

41 मेको रागी रागी डा मुरपुकीमी परमप्रभु यावे कली ठेयब सेल्शा यो आन मुशा सेल्शो मूर्ति आन कली पूजा पामे बाक्त। मुल सम्म आन चच युइमी आन किकी पिपीम पशो खोदेशो पना पन बाक्नीम।

1 आहाज आ तौ हिज्कीयाह यहूदा डा पिप दुम्माक्त। मेना एलाह आ तौ होशेआ इस्राएल डा पिप दुम्शो बर्स सां दुम्शो बाक्माक्त। २राजा १६:२०

2 मिनु हिज्कीयाह पिप दुम्मेनु, २५ बर्स दुम्शो बाक्माक्त। मेकोमी यरूसलेमम २९ बर्स सासन पवा बाक्त। मेको आ ममा आ नें आबी बाक्माक्त। मेको जकरिया आ तमी बाक्माक्त।

3 मेकोम आ किकी दाऊदम खोदेशो पा, परमप्रभु यावे आ डोंइती मार रिम्शो बाक्मे, मेको पवा बाक्त। २राजा २०:३

4 मेकोम डांडा डा थानपुकी प्रेशा, ताइक्तीमी बाक्त। खुक्शो फुल्लु जिक्शा, मूर्ति पाइश्शो थाम क्योरशा ताइक्तीमी बाक्त। मेकोमी मोसा आ सेल्शो कांसा के बुस्स कली टुक्रा टुक्रा पवा बाक्त। मारदे हना मेना सम्म इस्राएलीपुकीम मेको कली धूप चोइबाक्मा बाक्त। मेकोपुकीम मेको कली नहुश्तन देंबाक्मा बाक्त। २राजा १५:३५; गन्ती २१:८-९

5 हिज्कीयाहम परमप्रभु यावे, इस्राएली आन परमप्रभु कली थमा सुदा बाक्त। मेको आ क्येडा डोंइती डा नु आ क्येडा नोले डा यहूदा डा पिप नेल्ले मेको खोदेशो मदुम्मा बाक्त। २राजा २३:२५

6 मेकोमी परमप्रभु यावे आ नोले खोइक्का गेनायो मप्रोना बाक्त। मिनु परमप्रभु यावेमी मोसा कली शेंशो लोत्र नेल्ल टिवा बाक्त।

7 मिनु परमप्रभु यावे मेको नु बाक्माक्त। मेको आ पशो गेय नेल्लेमी रिम्शो दुम्माक्त। मेको अस्सुर डा पिप कली मटीब दुम्माक्त। मिनु मेको आ देशो मपवा बाक्त।

8 मेकोमी पलिस्ती आन रागी गाजा रे खाल पाइब आन लाइश्शो खिं नु गारो हिरशो सहर नेल्ल ग्रामाक्त।

### सामरीया खतम दुम्शो

9 हिज्कीयाहमी सासन पशो ४ बर्स दुम्माक्त। इस्राएल डा पिप एलाह आ तौ होशेआम सासन पशो ७ बर्स दुम्मेनु, अस्सुर डा पिप शाल्मानेसेरमी सामरीया कली लडाइ तोशा पुम्दा बाक्त। २राजा १७:३-६

10 मिनु अस्सुरीपुकीमी मेको सहर कली बर्स सां सम्म पुम्शा, आन के सेल्मे बाक्त। मेना हिज्कीयाह पिप दुम्शो ६ बर्स नु इस्राएल डा पिप होशेआ पिप दुम्शो ९ बर्स दुम्शो बाक्माक्त। मिनु अस्सुर डा पिपमी सामरीया ग्रामाक्त।

11 मिनु मेकोमी इस्राएली आन कली ग्याइश्शा अस्सुर लाइक्मी बाक्त। मिनु मेको आन कली हालाह, गोजान डा खोला हाबोर आ नेक्था नु मादी आन सहरम बाक्पाइक्मी बाक्त।

12 मारदे हना मेकोपुकीमी परमप्रभु यावे, आन परमप्रभु आ देशो मटिथु, आ कबल पशो हेंथे पशो बाक्मा बाक्त। परमप्रभु यावे आ गेय पाइब मोसामी शेंशो लोत्र मनेशो नु मटिशो बाक्मा बाक्त।

### यरूसलेम कली लडाइ तोशो

२इतिहास ३२:१-१९; यसेया ३६:-

13 पिप हिज्कीयाहमी सासन पशो १४ बर्स दुम्मेनु, अस्सुर डा पिप सन्हेरीबमी यहूदा डा गारो हिरशो सहर नेल्ल कली लडाइ तोशा ग्रामाक्त।

14 मोपतीके यहूदा डा पिप हिज्कीयाहमी लाकीश सहरम बाक्ब अस्सुर डा पिप कली “गो मरिम्शो पाता। आं रागी रे लेतीन। मिनु गे आं कली मार देनीनी, मेको पाइनुड” दे लोत्र कुरब मुर सोइक्ता बाक्त। मिनु अस्सुर डा पिपम हिज्कीयाह कली सहे सां टलेन्ट चांदी नु ३० टलेन्ट सुन थाप्पदा बाक्त। टलेन्ट का ३४ किलो बाक्ब।

15 मिनु हिज्कीयाहमी परमप्रभु यावे आ खिं नु पिप आ खिंम थिश्शो चांदी नेल्ल मेको कली गेवा बाक्त। २राजा १६:८

16 मेना हिज्कीयाहमी परमप्रभु यावे आ खिं डा लाप्चो नु लाप्चो डा शीम आंम आ गिल्शो सुन नेल्ल शोल्शा, अस्सुर डा पिप कली गेवा बाक्त।

### सन्हेरीबम हिंच कोइशो

17 मिनु अस्सुर डा पिपम लडाइ पाइब आन नेल्ल क्येडा ठेयब मुर तारतान, दरवार डा ठेयब मुर राब्सारीस, पिप आ ठेयब गेय पाइब राब्शाके नु ठेयब हुल का लडाइ पाइब आन कली लाकीश रे



पिप हिज्कीयाह आ बाक्तीक यरूसलेम सहरम सोइक्तीमी बाक्त। मिनु मेकोपुकी यरूसलेम जाक्मा बाक्त। मिनु आइक्था दोम्ली डा ब्वाक्कु शाइक्तीक वा मुरब आन लामी जाक्शा राम्मा बाक्त। यसैया ७:३

18 मिनु मेकोपुकीम पिप कली ब्रेत्मे बाक्त। मिनु पिप आ खिं डा ठेयब मुर हिल्लीयाह आ तौ दरवार कोव्रब एल्याकीम, ब्रेक्ब शेब्ना नु आसाफ आ तौ पिप आ लोव्र कुरब योआह मेको आन कली ग्रुमथ जाक्मा बाक्त।

19 मिनु राब्शाकेमी मेको आन कली “हिज्कीयाह कली, ठेयब पिप, अस्सुर डा पिपमी, मार देंब देशा हना, गो सु कली तशा, महिंब बाक्नीनी?

20 गे लोव्र पा ला लडाइ ग्रानीनी डा? सुम इन कली वारच पा आं क्येडा महिंथु, आं कली मटिपदा?

21 गे इजीप्त रागीम इन कली वारच पाइब, दे मिम्नीनी। मेको जिक्शो किन्दा खोदेशो बाक्ब। मेकोमी ‘वारच पाइब’ देंब आन गुइ थोक्ब। ‘मेकोमी वारच पाइब’ देंब नेल्ल आन कली इजीप्त डा पिप फाराओ मोदेशोन बाक्ब।

22 तन्न गे आं कली ‘गो परमप्रभु यावे, आंइ परमप्रभु आ मुर नकी। मेकोम आंइ कली वारच पाइब’ देतीनी हना, मार, हिज्कीयाहम मेको डांडा डा थान नु चढेतीक प्रेशशा यहूदा नु यरूसलेम सहर डा मुर आन कली ‘गेपुकीम यरूसलेमम बाक्शो चढेतीकेम ला चढेचा माल्नीनी’ मदेंम डा? ब्यवस्था १२:१४

23 मुल आं होव्रप अस्सुर डा पिप नु गारीन। इन के मिश डा शारा डोइक्ब बाक्तेकम हना, गो इन कली हजार निक्शी शारा गेनन्नी।

24 आं होव्रप आ नेल्ल क्येडा आइक्च लडाइ पाइब आन ठेयब मुर का कली ला यो दोपा नोले शोइक्पाइक्ने चाप्नीनी डा? गे बग्गी नु शारा डोइक्ब आन परबम इजीप्त कली थमा सुइशो बाक्नीनी।

25 मिनु अर्को लोव्र, मार गो एको रागीम परमप्रभु यावे नु सल्ला मपथु खतम पोक्थ जाक्डा डा? परमप्रभु यावेमी आं कली ‘एको रागीम लडाइ पा खतम पोक्को’ देशो बाक्ब’ देमाक्त।

26 मिनु हिल्लीयाह आ तौ एल्याकीम, शेब्ना नु योआहमी मेको लडाइ पाइब आन ठेयब मुर राब्शाके कली “शिशी पा, इन वाइल गोपुकी नु अरामी लोव्रम ब्वाक्कीन। मारदे हना गो मेको लोव्र रुप्नीकी। गारोम बाक्ब मुर नेल्लेम नेंचा डा पा यहूदी लोव्रम मब्वाक्कीन” देमा बाक्त।

27 तन्न राब्शाकेम मेको आन कली “मार, आं होव्रपमी एको लोव्र इन कली नु इन होव्रप कली ला नेंपाइक्चा कली सोइशो बाक्बा डा? मार, गारोम बाक्ब मुर नेल्ल आन कली यो ममाइ डा? गेपुकीम खोदेशो पा, मेकोपुकीम यो आन खी चारनाक जचा तूचा माल्नीम” देमाक्त।

28 मिनु मेको लडाइ पाइब आन ठेयब मुर राब्शाके राप्शा यहूदी लोव्रमी ठेयब सेंदा पा “ठेयब पिप, अस्सुर डा पिप आ लोव्र नेनीन।

29 मेकोमी मार देंत देशा हना ‘हिज्कीयाहमी इन कली जोल पशो थमा मसुतीन। मारदे हना मेकोमी इन कली आं गुइ रे प्रोइने मचाप्ब’ देंत।

30 हिज्कीयाहमी ‘परमप्रभु यावेम थमा पा इ कली श्येत रे प्रोइब। मिनु एको सहर अस्सुर डा पिप आ गुइम मडुम्ब’ दे इन कली परमप्रभु यावे कली थमा मसुइक्पदल।

31 हिज्कीयाह आ लोव्र मनेनीन। अस्सुर डा पिपम ‘गो नु गारीन। मिनु गूशा आं बाक्तीक जाक्कीन। मिनु गेपुकीमी इन अडगुर रू डा अडगुर नु इन रवा डा फोव्रशी जचा ताइनीनी। इन इनार डा ब्वाक्कु तूचा ताइनीनी। १राजा ५:५

32 गो जाक्शा इन कली आंम इन रागी खोदेशो रागीम लाइक्नन्नी। मेको रागी अन्न नु अडगुर शांबु, शोब्ले नु अडगुर रू, तेल रवा नु खुदो बाक्शो रागी बाक्ब। गेपुकी बेक्तीक आ पा डा ब्रोंइतीक योव्रडीन। हिज्कीयाह आ लोव्र मनेनीन, मेकोम इन कली “परमप्रभु यावेमी इं कली प्रोइब” दे जोल पाइब।

33 मार रागी रागी डा तेकोइ देवी देवताम आन रागी कली अस्सुर डा पिप आ गुइ रे प्रोइने चाप्शो बाक्नीमी डा? यसैया १०:१०-११

34 हमथ नु अरपाद डा देवी देवता ते लाक्वामे? सेफारवाइम, हेना नु इव्वाह डा देवी देवता ते बाक्मा? मार, मेकोपुकीम सामरीया कली आं गुइ रे प्रोइने चाप्मे डा?

35 मार, मेको रागी डा देवी देवता आन दाते डा तेकोइमी आ रागी कली आं गुइ रे प्रॉइने चबा डा? मिनु परमप्रभु यावेमी यरूसलेम कली आं गुइ रे दोपा प्रॉइने चाप्बा डा?’ ” दे इस्राएली आन कली देमाक्त। दानीएल ३:१५

36 तन्न मुर नेल्ल सिक्सी पा बाक्शा, लोत्र का यो मलेत्मे बाक्त। मारदे हना पिपमी मेको आन कली “सुइम लोत्र मलेत्चा” दे अरेशो बाक्माक्त।

37 मिनु पिप, हिज्कीयाह आ तौ दरवार कोत्रब एल्याकीम, ब्रेक्ब शेब्ना नु आसाफ आ तौ पिप आ लोत्र कुरब योआहम आन वा खाक्गमे बाक्त। मिनु हिज्कीयाह आ बाक्तीक जाक्शा, राब्शाके आ लोत्र नेंपदमे बाक्त।

## 19

हिज्कीयाहम परमप्रभु नु लोत्र पशो

२इतिहास ३२:२०-२३; यसेया ३७:१-७

1 मिनु पिप हिज्कीयाहम मेको लोत्र नेंशा, आ वा खाक्गा बाक्त। मिनु अरन्डी फेक्शा, परमप्रभु यावे आ खिं लमाक्त।

2 मेकोमी दरवार कोत्रब एल्याकीम, ब्रेक्ब शेब्ना नु ठेयब चढेब आन कली अरन्डी फेक्पाइश्शा, परमप्रभु यावे आ लोत्र पाइब आमोज आ तौ यसेया आ बाक्तीकेम सोइक्तीमी बाक्त।

3 मिनु मेकोपुकीमी यसेया कली “हिज्कीयाहमी ‘मुलाक्ती श्येत जतीक, हुइक्चा पुंइसीतीक नु मुने दोक्तीक नाक्त बाक्ब। दोपा आल थिचा चिक्शो मीश मुर कली आल थिचा कली बोल मबाक्बा, मोदेशो दुम्शो बाक्ब।

4 परमप्रभु यावे, इन परमप्रभुमी अस्सुर डा पिपमी सोइश्शो मेको राब्शाके आ लोत्र नेल्ल नेंना माइ। आ होत्रप, अस्सुर डा पिपमी ब्रॉइशा बाक्शो परमप्रभु कली शुक्शी पथ सोइश्शो बाक्ब। मिनु परमप्रभु यावे, इन परमप्रभुमी आ नेंशो लोत्र आ पर्बम मेको कली हुइक्बा कों। मोपतीके मुल लीशो मुर आन पर्बम प्रार्थना पने’ दैत” दैमा बाक्त। १सामुएल १७:१०; २राजा १८:३५

5 मिनु पिप हिज्कीयाह आ सोइश्शो गेय पाइबपुकी यसेया आ बाक्तीकेम बाक्मानु,

6 यसेयामी मेको आन कली “परमप्रभु यावेमी इन होत्रप कली ‘इ नेंशो लोत्रम महिनो। अस्सुर डा पिप आ गेय पाइबपुकीमी आं कली शुक्शी पशो लोत्र नेंता।

7 गो मेको आ थुंम सोक्त का कुर पाइनुड। मिनु मेकोमी लोत्र का नेंब। मिनु मेको आ रागी लेशशा लाइब। मेकेर गो मेको कली तरवारम साइक्पाइक्नुड’ दैत, दे मतीन” दे माइक्मी बाक्त। २राजा १९:९; २राजा १९:३५-३७

8 मिनु राब्शाकेमी “अस्सुर डा पिपमी लाकीश प्रॉइतु” देंशो लोत्र नेंना बाक्त। मिनु मेको लेम्माक्त। मिनु मेकोमी पिप कली लिब्ना नु लडाइ पना पन बाक्शो थिदा बाक्त।

9 मिनु मेको पिपमी “एथीयोपीया डा पिप तिरहाकाह गे नु लडाइ पचा कली पिना पिन बाक्ब” देंशो लोत्र नेंना बाक्त। मोपतीके मेकोमी यहूदा डा पिप हिज्कीयाह आ बाक्तीकेम लोत्र कुरब मुर सोइश्शा,

10 यहूदा डा पिप हिज्कीयाह कली “यरूसलेम अस्सुर डा पिप आ गुइम मदुम्ब, दे थोक्शा लोत्र पाइब इ थमा सुइश्शो परमप्रभुमी इ कली जोल मपवल।

11 अस्सुर डा पिपमी रागी नेल्ल आन कली मार पवा, मेको आन कली दोपा खतम पोक्गा, मेको थमा पा नेंतीनी। मिनु मार, ‘गो ब्रॉइनुड’ दे आस पाइनीनी?

12 मार, आं किकी पिपी आन क्याम्शो रागी रागी डा देवी देवताम मेको आन कली प्रॉइने चापे डा? गोजान, हारान, रेचेफ नु तेलास्सार सहरम बाक्ब एदेन डा मुर आन देवी देवता ते लाक्गमे?

13 हमाथ, अरपाद सेफारवाइम सहर, हेना नु इव्वाह डा पिप ते लाक्गमे?” दैपाइक्चा कली मुर सोइक्ता बाक्त।

हिज्कीयाह आ पुंइशो लोत्र

14 मिनु हिज्कीयाह मेको चिठी चाकब मुर आन गुड रे ताकशा पढेवा बाक्त। मिनु परमप्रभु यावे आ खिं लमाक्त। मिनु मेको परमप्रभु यावे आ डोंइती प्राकशा वोदा बाक्त।

15 मिनु हिज्कीयाहमेको परमप्रभु यावे आ डोंइती प्राकशा वोइशशा “परमप्रभु यावे, इस्राएली आन परमप्रभु गे करूब आन तार बाक्नीनी। रागी डा राज्य नेल्लेम गे का ला परमप्रभु बाक्नीनी। गे रागी नु सरीड सेल्ब बाक्नीनी। प्रस्थान २५:२२; भजन संग्रह ८०:२

16 परमप्रभु यावे आं लोव्र नेनीन। परमप्रभु यावे कोव्रडीन, सन्हेरीबम ब्रोंइशा बाकशो परमप्रभु, इन कली शुक्शी पा सोइशशो लोव्र नेनीन।

17 परमप्रभु यावे, अस्सुर डा पिपपुकीम रागी रागी डा मुर नु आन रागी कली खतम पोक्तेकम। एको थमा बाक्ब।

18 मेकोपुकीमी मेको आन देवी देवता आन कली मीम हुम्शा नेक्पाइक्तेकम। मारदे हना मेको परमप्रभु मनम। मेको मुरुमी सेल्शो शी नु फुल्लु के ला बाक्तेकम। मोपतीके मेको खतम दुम्तेकम।

19 मुल परमप्रभु यावे, आंइ परमप्रभु आंइ कली मेको आ गुड रे प्रोनीन, दे पुंइनुड। मिनु रागी नेल्ल डा मुरपुकीम परमप्रभु यावे, गे का ला परमप्रभु बाक्नीनी, दे तुइक्तेमेकल” दे पुना बाक्त।

### यसैयामी सन्हेरीब खतम दुम्ब देशो

20 मिनु आमोज आ तौ यसैयाम हिज्कीयाह कली “परमप्रभु यावे, इस्राएली आन परमप्रभुमी मार दैत देशा हना ‘गो अस्सुर डा पिप सन्हेरीब आ पर्वम इ पुंइशो लोव्र नैता’ दैत।

21 सन्हेरीब आ पर्वम परमप्रभु यावे आ देशो लोव्र मार बाक्ब देशा हना ‘सियोन डा तमीमी इ कली शुक्शी पाइब। मिनु गे प्रोक्शा लवेनु, यरूसलेम डा तमीमी आ पिया हिक्ब।

22 गे सु कली शाकशा शुक्शी पवी? गे सुका आ पर्वम ठेयब लेशशा लोव्र पवी? मेको इस्राएली आन का ला बाकशो परमप्रभु यावे आ पर्वम बाक्ब।

23 गे इ लोव्र कुरबपुकी सोइशशा, परमप्रभु यावे कली शुक्शी पाप्तीवी’। मिनु गे ‘गो आं शुश बग्गीम ठेयब पहाड डोंइसाक्यी। गो लेबानोन डा नेल्ल क्येडा डोन डोंइसाक्यी। गो मेकेर डा नेल्ल क्येडा लाइशशो रवा नु मेकेर डा नेल्ल क्येडा रिम्शो अरु रवा तिम्तामी। गो मेको आ सुर सम्म डा नेल्ल क्येडा ठेयब ब्वाकीम जाक्दील्ली।

24 गो इनार दोशा, अर्को रागी डा ब्वाक्कु तूता। गो आं खोइलीम दिम्शा इजीप्त रागी डा खोला नेल्ल सोव्रपाइक्तामी’ देशो बाक्नेवे।

25 गे ‘गो साइ डोंइती रे मेको नेल्ल देशो नड। गो मेको साइ रे मो पाइनुड देशो नड। मुल गो मेको थुम्ता। मार, मेको मनेशो बाक्नीनी? गे गारो हिरशो सहर आन कली प्रेशशा, फुल्लु तेल्लो खोदेशो सेल्शो बाक्नेवे।

26 मिनु मेको सहर डा मुर आन सोक्त जाम्शा आन थुं लुकच लत। मेकोपुकी रू डा कल्लो घांस खोदेशो दुम्तेकम। मेकोपुकी खिं तार वाशो घांस खोदेशो दुम्शा, वामा चोटीन सोव्रशो बाक्नीम।

27 गो इ बाकशो बोक्शो नेल्ल तुइक्नुड। गो इ लाडगा खिंङगा पशो नेल्ल तुइक्नुड। मिनु आं पर्वम इ गाइशशो तुइक्नुड।

28 मारदे हना गेम आं पर्वम गाइशशा, इ ठेयब लेशशो लोव्र पशो नैता। मोपतीके गो इ नैमी आं बोल्सी ब्वेक्नुड। इ शोव्रमी लगम पाइक्नुड। मिनु गो इ जाक्शो लां रेन लेप्पाइक्वन’ दे परमप्रभु यावेमी सन्हेरीब आ पर्वम दैत” देमाक्त।

29 मिनु लेंशा “मेको नेल्ल थमा दुम्ब, दे मार चिन्ड दुम्ब देशा हना, गेपुकी एको बर्स आंमा वाशो जाइनीनी। मिनु नोले डा बर्स मेको रे वाशो जाइनीनी। मिनु बर्स सांमी गेपुकीम शोक्शा खुप्शा जने, अडगुर खुम्शा जने।

30 मिनु यहूदा आ खिं डा ब्रोंइशा लीशोपुकीम रागीम शाकश थोक्नीम। मिनु रागी तार फल सिन्लीम।

31 मारदे हना यरूसलेम रे लीशो मुरपुकी लाइनीम। सियोन डांडा रे हुल का ब्रोंइशो मुर यूशा जाक्नीम। मुर नेल्ल आन परमप्रभु यावेमी आ जोंब बोक्शा मेको पाइब” देमाक्त। यसैया ९:६

32 मिनु परमप्रभु यावेमी अस्सुर डा पिप आ पबर्म “सन्हेरीब एको सहरम मओव्रब। एको सहरम ब्रा का यो मआप्व। मेको आ तेक्तीक कुरशा एको सहर आ डोंइती मजाक्ब। सहर ओव्रचा कली गारो डोइक्तीक मसेल्ब।

33 मेको आ जाक्शो लां रेन लेशशा लाइब। मेको सहरम मओव्रब।

34 मारदे हना गो आंम आं पबर्म नु आं गेय पाइब दाऊद आ पबर्म मेको सहर कली वारच पा प्रोंइनुड” देंमाक्त। २राजा २०:६

35 मिनु मेको नाकदो परमप्रभु यावे आ स्वर्ग डा गेय पाइब का जाक्माक्त। मिनु मेकोमी अस्सुर डा पिप आ लडाइ पाइब आन बाक्तीकेम ओव्रशा, लाख का ८५ हजार मुर आन कली साइक्मी बाक्त। मिनु आ दीसा सुनी मुरपुकी बोक्मानु मेकेर बेक्शो मुर ला तामे बाक्त। यसैया ३७:३६-३८

36 मोपतीके अस्सुर डा पिप सन्हेरीब ताम्बु पोक्शा लेशशा आ खिं निनवे लमाक्त।

37 मिनु मेको काबु आ देवता निस्को आ खिंमी पूजा पना पन बाक्मेनु, मेको आ तौ अद्राम्मेलेक नु शरेसेरमी मेको कली तरवारम क्योरशा सदसे बाक्त। मिनु प्रोक्शा आरारात रागी लसा बाक्त। मिनु मेको आ पा डा आ तौ एसर-हददोन पिप दुम्माक्त। २राजा १९:७

## 20

### हिज्कीयाह रोइ पशो

२इतिहास ३२:२४-२६; यसैया ३८:१-८

1 मेना हिज्कीयाह रोइ पा बेक्चा चिक्ता बाक्त। मिनु आमोज आ तौ परमप्रभु यावे आ लोव्र पाइब यसैया हिज्कीयाह आ बाक्तीक जाक्शा, “परमप्रभु यावेमी इन कली मार देंत देंशा हना ‘इन खिं डा मुर आन कली इन अरेचा माल्शो लोव्र अरेने। मारदे हना गे बेक्नीनी। मसानीनी’ देंत” देंमाक्त।

2 मिनु हिज्कीयाह गारो गे हिरशा, परमप्रभु यावे कली पुना बाक्त।

3 मेकोमी “परमप्रभु यावे, गो इन डोंइती रिम्शो पा बाक्ती। गो इन कली गेनायो मप्रोंइथु आं थुं नेल्लेमी इन नोले खोइक्ता। इन डोंइती मार रिम्शो बाक्मे, मेको पाता, मेको मिम्तीन” दे आ थुं खाइशशा डाक्माक्त।

4 मिनु यसैया दाते डा लाडगा रे यूचा क्येडा डोंइती परमप्रभु यावेम मेको कली लोव्र पवा बाक्त।

5 मार लोव्र पवा बाक्त देंशा हना “लेशशा लशा, परमप्रभु यावे इ किकी दाऊद आ परमप्रभुमी ‘आं मुर आन कली सासन पाइब हिज्कीयाह कली “गो इ पुंइशो लोव्र नेंता। मिनु इ प्रेक्कु ताता। गो इ कली सापाइक्नुड। मिनु नाक्त सां नोले गे परमप्रभु यावे आ खिं लाइनेवे।

6 गो इ ब्रोंइतीक नाक्त १५ बर्स तेम्नुड। मिनु इ कली नु एको सहर कली अस्सुर डा पिप आ गुड रे प्रोंइनुड। गो आं पबर्म नु आं गेय पाइब दाऊद आ पबर्म एको सहर कली वारच पा प्रोंइनुड” देंत’ देंनो” देंमाक्त। २राजा १९:३४

7 मिनु यसैयामी “मेको कली सापाइक्चा कली आ कानम फोव्रशी गेडा शेष्शा खेक्तीन” देंमाक्त। मिनु मुरपुकीम मेको आ कानम फोव्रशी गेडा शेष्शा खेक्तमे बाक्त।

8 मिनु हिज्कीयाहमी यसैया कली “गो सानुड, मिनु नाक्त सां नोले परमप्रभु यावे आ खिं लाइनुड, दे परमप्रभु यावेमी आं कली दोपा तुइक्पाइक्बा?” दे हिल्लो पवा बाक्त।

9 मिनु यसैयामी “परमप्रभु यावेमी आ देंशो थमा पा पाइब, दे इन कली मार कोंइब देंशा हना, नां आ वांकु १० खेयप डोंइती गे ग्रेल देय नोले गे लेल्ल?” दे हिल्लो पवा बाक्त।

10 मिनु हिज्कीयाहम “नां आ वांकु १० खेयप डोंइती ग्रेचा दा आ गेयन बाक्ब। मेको १० खेयप नोले गे लेत्चा माल्ब” देंमाक्त।

11 मिनु परमप्रभु यावे आ लोव्र पाइब यसैयाम, परमप्रभु यावे कली पुना बाक्त। मिनु परमप्रभु यावेमी आहाज आ नां आ वांकु कोंइतीके १० खेयप नोले गे लेप्पदा बाक्त।

### बेबीलोन डा पिप आ लोव्र

२इतिहास ३२:३१; यसैया ३९:-

12 मेना बेबीलोन डा पिप बालादन आ तौ मेरोदाक-बालादानमी हिज्कीयाह आ बाक्तीकेम कोसेली नु चिठी कुर पा मुर सोइक्ता बाक्त। मारदे हना मेकोम हिज्कीयाह रोइ पा साशो बाक्ब देशो नेना बाक्त।

13 मिनु हिज्कीयाहम मेको चिठी चाक्ब मुर आन कली मान पाइक्मी बाक्त। मिनु मेको आन कली आ शोप वोइक्तीकेम नेल्ल कोइदा बाक्त। सुन चांदी, मस्ला, ब्रोव्रशो रिना पाइश्शो खेक्तीक तेल, आ यापुकी नु आ मार मार वोइक्तीकेम बाक्शो मारेइ मारेइ थोव्रक कोइदीमी बाक्त। हिज्कीयाह आ खिंम नु आ नेक्थाम बाक्शो मेको आन कली मकोइशो मारेइ मलीमाक्त।

14 मिनु नोले परमप्रभु यावे आ लोव्र पाइब यसैया जाक्शा, पिप हिज्कीयाह कली “मेको मुरपुकीम मार देमा? मेकोपुकी ते रे जाक्शो नमी?” दे हिल्लो पवा बाक्त। मिनु हिज्कीयाहमी “एकोपुकी डोन रागी बेबीलोन रे जाक्शो नम” देमाक्त।

15 मिनु मेकोमी “मेकोपुकीम इन खिंम मार मार तामे?” दे हिल्लो पवा बाक्त। मिनु हिज्कीयाहम “एकोपुकीम आं खिंम बाक्शो नेल्ल ताम्तेक्म। आं मार मार वोइक्तीक खिंम बाक्शो मतशो मारेइ मली” देमाक्त।

16 मिनु यसैयाम हिज्कीयाह कली “परमप्रभु यावे आ लोव्र नेनीन।

17 परमप्रभु यावेमी ‘काबु नाक्त इ खिंम बाक्शो मारेइ मारेइ थोव्रक नु इ किकी पिपी नु इन आंम तेल्लो थोव्रक नेल्ल बेबीलोनम चाक्दीत्नीम। मारेइ मप्रॉइनीम। २राजा २४:१३-१४

18 मेकोपुकीम इन तौ का निक्शी यो लाइक्नीम। मिनु मेकोपुकी बेबीलोन डा पिप आ दरवारमी गेय पाइब दुम्नीम” दे परमप्रभु यावे देत” देमाक्त। दानीएल १:३-४

19 मिनु हिज्कीयाहम यसैया कली “इन देशो परमप्रभु यावे आ लोव्र रिम्शोन बाक्ब” देमाक्त। मारदे हना मेकोमी “आं पाला सम्म थुं नाइश्शा बाक्तीक दुम्ब” दे मिम्ता बाक्त। २राजा २२:२०

### हिज्कीयाह बेक्शो

20 हिज्कीयाह आ पशो अरु गेय, मेको आ सक्ति, मेको आ दोम्ली नु ब्वाक्कु लतीके सेल्लो, सहर कली ब्वाक्कु चाक्शो, मार, मेको नेल्ल यहूदा डा पिप आन इतिहासम ब्रेक्शो मबाक्बा डा?

21 मिनु हिज्कीयाह बेक्माक्त। मिनु मेको आ पा डा आ तौ मनस्से पिप दुम्माक्त।

## 21

### यहूदा डा पिप मनस्से

#### २इतिहास ३३:-

1 मनस्से पिप दुम्मेनु, १२ बर्स दुम्शो बाक्माक्त। मिनु मेकोम यरूसलेमम ५५ बर्स सासन पवा बाक्त। मेको आ ममा आ नें हेप्सीबाह बाक्माक्त।

2 मेकोम परमप्रभु यावे आ डोंइती मार मरिम्शो बाक्मे, मेको पवा बाक्त। परमप्रभु यावेमी इस्राएली आन डोंइती रे खेरशो रागी रागी डा मुर आन ग्रॉंरा दिशो गेय पवा बाक्त।

3 मेकोमी आ आफ हिज्कीयाहमी खतम पोक्शो डांडा डा थानपुकी लेंशा सेला बाक्त। मेकोम इस्राएल डा पिप आहाब खोदेशो पा बाल कली चढ़ेतीक नु मूर्ति पाइश्शो थाम सेला बाक्त। इस्राएल डा पिप आहाब खोदेशो पा मेकोमी नां तास्ला नु सोरुल आन कली खुम्की पा बाप्शा पूजा पवा बाक्त। १राजा १६:३३

4 मेकोमी परमप्रभु यावे आ खिंमी मेको देवी देवता आन कली चढ़ेतीकपुकी सेला बाक्त। परमप्रभु यावेमी मेको खिं आ पर्वम “यरूसलेमम गो आं नें वोइक्नुड” देशो बाक्माक्त।

5 मिनु मेकोमी परमप्रभु यावे आ खिं आ लाडगा निम्फामी नां तास्ला नु सोरुल आन कली चढ़ेतीक सेला बाक्त। २राजा २३:१२

6 मेकोमी आ तौ कली चोशा चढ़ेवा बाक्त। मिनु मन्तर तन्तर, टुना मुना पा, बेक्शो मुर रे लोव्र पचा गेशा, लिंक्नु कोव्रडा बाक्त। मेकोम परमप्रभु यावे आ डोंइती शुश मरिम्शो पवा बाक्त। मिनु मेको कली थाम्पा गाइक्पदा बाक्त। २राजा १६:३; लेवी १८:२१

7 मेकोम आ मुशा सेल्शो अशेराह देवी आ मूर्ति परमप्रभु यावे आ खिंम वोदा बाक्त। परमप्रभु यावेमी मेको खिं आ परबंम दाऊद नु आ तौ सोलोमन आस कली “गो एको इस्राएल आ थर नेल्ल आन रे आं योत्रशो यरूसलेम सहर डा एको खिंम आं नें गेना हना यो वोडक्नुड। १राजा ८:२९; १राजा ९:३

8 मिनु इस्राएलीम आं शेंशो होस पना पन बाक्तेक्म हना, मोसा रे पा, मेको आन कली आं अरेशो पना पन बाक्तेक्म हना, मेको आन किकी पिपी आन कली आ गेशो रागी प्रोंइशा गाक्चा ममालनीम।

9 तन्न मुरपुकीम मेको नेंसीन मनेन्मे बाक्त। मनस्सेम मेको आन कली हेंथे लां खोइक्पाइश्शो बाक्माक्त। मिनु मेकोपुकीम परमप्रभु यावेम इस्राएली आन डोंइती रे खतम पोक्शो रागी रागी डा मुर आन क्येडा यो शुश मरिम्शो पामे बाक्त” देंमाक्त।

10 मिनु परमप्रभु यावेम आ गेय पा आ लोत्र पाइब आन रे पा

11 “यहूदा डा पिप मनस्सेम एको ग्रंग्रा दिशो गेय पशो बाक्ब। मेकोम डोंइती बाक्शो एमोरी आन क्येडा यो शुश ग्रंग्रा दिशो गेय पशो बाक्ब। मिनु मेकोमी यहूदा डा मुर आन कली मूर्ति पूजामी पाप पपाइश्शो बाक्ब” देंमाक्त।

12 मोपतीके परमप्रभु यावे, इस्राएली आन परमप्रभुमी “गो यरूसलेम नु यहूदाम शुश खतम दुम्तीक चाक्नुड। मेको नेंब आन नोफामी ग्रीब। यसैया १९:३

13 गो सामरीया कली पुक्तीकेमी यरूसलेम कली पुक्नुड। गो आहाब आ खिं कली थाप्शो डोरीम यरूसलेम कली थाप्नुड। मुरपुकीम दोपा थाल शेक्शा गुक्शा वोइक्नीमी, मोपा गो यरूसलेम कली शेक्शा गुक्शा वोइक्नुड।

14 गो आं लीशो मुर आन कली प्रोंइशा सोइक्नुडमी। मिनु मेको आन कली आन जोरी सत्रु आन गुइमी गेनुडमी। मेको आन जोरी सत्रुम ग्याइश्शा लाइक्चा पुंइसीनीम।

15 मारदे हना मेकोपुकीम आं डोंइती मार मरिम्शो बाक्मे, मेको पाम्तेक्म। मेको आन किकी पिपी आन कली इजीप्त रे गुंइशा चाक्गु रे मुल सम्म आं कली गाइक्पाइक्स डा गाइक्पाइक्स बाक्शो बाक्नीम” देंमाक्त।

16 मेको क्येडा लाक्शा यो मनस्सेम दोस मताइब शुश मुर आन हुश शाइक्पाइश्शा, यरूसलेम आ सुर का रे अर्को सुर सम्म प्रिंदा बाक्त। मिनु मेकोम यहूदा कली पाप पपदा बाक्त। मिनु मेकोपुकीम परमप्रभु यावे आ डोंइती मार मरिम्शो बाक्मे, मेको पामे बाक्त। २राजा २४:४; भजन संग्रह १०६:३८

17 मनस्से आ पशो अरु गेय, मेको आ पशो नेल्ल, मेको आ पशो पाप, मार, मेको यहूदा डा पिप आन इतिहासम ब्रेक्शो मबाक्बा डा?

18 मिनु मनस्से बेक्माक्त। मिनु मेको उज्जा आ खिं डा रूम थिम्चा पुंइसे बाक्त। मिनु मेको आ पा डा आ तौ आमोन पिप दुम्माक्त।

### यहूदा डा पिप आमोन

19 आमोन पिप दुम्मेनु २२ बर्स दुम्शो बाक्माक्त। मेकोम यरूसलेमम बर्स निक्शी सासन पवा बाक्त। मेको आ ममा आ नें मेशुल्लेमेथ बाक्माक्त। मेको योत्बाह डा हारुच आ तमी बाक्माक्त।

20 मेकोम आ आफ मनस्से खोदेशो पा, परमप्रभु यावे आ डोंइती मार मरिम्शो बाक्मे, मेको पवा बाक्त।

21 मेको आ आफ आ लांम गाक्माक्त। मिनु आ आफोम पूजा पशो मूर्ति आन डोंइती खुम्की पा बाक्माक्त। मिनु मेको आन कली पूजा पवा बाक्त।

22 मेकोम परमप्रभु यावे, आ किकी पिपी आन परमप्रभु कली प्रोना बाक्त। मेको परमप्रभु यावे आ लांम मगाक्माक्त।

23 आमोन आ गेय पाइबपुकीम मेको कली साइक्चा माल्मे बाक्त। मिनु मेको कली पिप आ खिंमीन सदमे बाक्त।

24 मिनु मेको रागी डा मुरपुकीम मेको पिप आमोन कली साइक्ब मुर नेल्ल आन कली सदमे बाक्त। मिनु मेको आ तौ योसीयाह कली आ पा डा पिप सेल्मे बाक्त।

25 आमोन आ पशो अरु गेय, मेको आ पशो नेल्ल, मार, मेको यहूदा डा पिप आन इतिहासम ब्रेकशो मबाक्बा डा?

26 मिनु मेको बेकशा उज्जा आ तुरसुम थिम्चा पुइसे बाक्त। मिनु मेको आ पा डा आ तौ योसीयाह पिप दुम्माक्त।

## 22

परमप्रभु आ अरेशो लोत्र थिश्शो

२इतिहास ३४:१-२८

1 योसीयाह पिप दुम्मेनु ८ बर्स दुम्शो बाक्माक्त। मिनु मेकोमी यरूसलेमम ३१ बर्स सासन पवा बाक्त। मेको आ ममा आ नें येदीदाह बाक्माक्त। मेको बोस्कत डा अदायाह आ तमी बाक्माक्त।

2 योसीयाहमी परमप्रभु यावे आ डोंडती मार रिम्शो बाक्मे, मेको पवा बाक्त। मेको ग्युरा पेरा मपथु, आ किकी दाऊद आ लांम गाक्माक्त। २राजा १८:३

3 योसीयाह पिप दुम्मे आ १८ बर्सम मेकोमी मेशुल्लाम आ चच असाल्याह आ तौ ब्रेक्ब शाफान कली परमप्रभु यावे आ खिंम सोइक्ता बाक्त।

4 योसीयाहम मेको कली “ठेयब चढेब हिल्कीयाह आ बाक्तीक लावो। मिनु लाप्यो खाल पाइबपुकीम ताक्शो, मुरपुकीम परमप्रभु यावे आ खिंम चाक्शो क्येट ठीक पा वोइक्चा माल्नीम, दे मतो। २राजा १२:११

5 मिनु मेको परमप्रभु यावे आ खिंम बाक्ब ठेयब गेय पाइब आन कली गेचा नम। मिनु मेकोपुकीम परमप्रभु यावे आ खिंम बिगेशो मार मार सेल्ब आन कली गेमेक्ल।

6 मेकोपुकीम परमप्रभु यावे आ खिंम डा बिगेशो लेंशा सेल्चा कली शी सेल्ब, गारो प्रोत्रब नु मार मार सेल्ब आन कली गेमेक्ल। मिनु शी नु खोइश्शो फुल्लुपुकी ग्याप्मेक्ल।

7 मेको आन कली गेशो क्येट ब्रेक्शा वोइक्चा ममाल्नीम। मारदे हना मेकोपुकी थमा सुइश्शो गेय पाइब बाक्नीम” दे मदा बाक्त। २राजा १७:१६

8 मिनु ठेयब चढेब हिल्कीयाहम ब्रेक्ब शाफान कली “गो परमप्रभु यावे आ खिंम अरेशो लोत्र ब्रेक्शो कागज थित्ता” देंमाक्त। मिनु हिल्कीयाहमी मेको कागज शाफान कली गेवा बाक्त। मिनु शाफानमी मेको पढेवा बाक्त।

9 मिनु मेको ब्रेक्ब शाफान पिप आ बाक्तीक लशा मेको कली “इन गेय पाइबपुकी परमप्रभु यावे आ खिंम लशा, मेकेर डा क्येट परमप्रभु यावे आ खिंम डा गेय कोत्रब आन कली गेम्तेक्म” देंमाक्त।

10 मिनु नोले मेको ब्रेक्ब शाफानमी पिप कली “चढेब हिल्कीयाहम आं कली कागज का गेती” दे शेंदा बाक्त। मिनु नोले शाफानम मेको ठेयब सेंदा पा पडेशा पिप कली नेंपदा बाक्त।

11 मिनु पिपमी मेको कागज डा लोत्र नेंशा, आ वा खाक्गा बाक्त।

12 मिनु नोले पिपमी चढेब हिल्कीयाह, शाफान आ तौ अहीकाम, मीकाया आ तौ आकबोर, ब्रेक्ब शाफान नु पिप आ गेय पाइब आसायाह आन कली येरमीया २६:२४

13 “गे आं पर्वम, आं मुर आन पर्वम नु यहूदा आ पर्वम मेको थिश्शो कागजमी मार ब्रेक्शो बाक्मे, दे परमप्रभु यावे कली हिल्लो पथ लने। मारदे हना परमप्रभु यावे थाम्पा गाइश्शो बाक्ब। इं किकी पिपीम एको कागजम ब्रेक्शो लोत्र मटीमे। मेकोपुकीम इं पर्वम मेकेर ब्रेक्शो लोत्र नेल्ल मपाम” देंमाक्त।

14 मोपतीके चढेब हिल्कीयाह, अहीकाम, आकबोर, शाफान नु आसायाह पिप आ खिंम वासी कोत्रब हारहास आ चच, तिकवाह आ तौ शाल्लुम आ मीश परमप्रभु यावे आ लोत्र पाइब हुल्दा आ बाक्तीके यरूसलेमम हिल्लो पथ लमा बाक्त। मेको आ खिंम यरूसलेम डा नक सहरम बाक्बाक्माक्त।

15 मिनु हुल्दामी मेको आन कली “परमप्रभु यावे, इस्राएली आन परमप्रभुम इन कली आं बाक्तीके सोइक्ब कली मार देंत देंशा हना

16 मेकोमी ‘यहूदा डा पिपम मेको कागजम पडेशो श्येत डा लोत्र, गो मेको श्येत यहूदा नु मेकेर बाक्ब मुर आन कली थमा पा गेनुड।

१७ मारदे हना मेकोपुकीम आं कली प्रॉइशा, देवी देवता आन कली धूप चोम्तेकम। मिनु आन गुडम सेल्शो मूर्ति रे पा आं कली गाइक्पाइक्तीमी। मोपतीके गो एको रागी आ पब्रम गाइक्ताक्यी। मिनु मेको गाइशो मनाइक्ब' दंत। ब्यवस्था ३१:२९; ब्यवस्था ३२:२१-२३

१८ परमप्रभु यावे कली हिल्लो पथ सोइक्ब यहूदा डा पिप कली परमप्रभु यावे, इस्राएली आन परमप्रभुमी मार दंत देशा हना 'गे आं लोत्र नेंतीवी।

१९ गे आं कली टिचा दाक्शा, इ थुं आं डोंइती ब्रेम्शो दुम्शा, गे सुर्ता पा इ वा खाक्शो ताता। मारदे हना गो यहूदा रागी नु मेकेर डा मुर आन पब्रम सराप रशा, मुर मबाक्तीक दुम्ब, देंती। गे मेको आ पब्रम आं डोंइती डाक्शो नेंता।

२० मिनु गे इ थुं नाइशशा बेक्नेवे। मिनु गो यहूदा कली गेशो ठेयब श्येत गे तचा ममाल्नेवे' दे मतो" दे परमप्रभुमी देंमाक्त। मिनु मेकोपुकीम मेको लोत्र पिप आ बाक्तीकेम चाक्गमे बाक्त। २राजा २०:१९; यसैया ५७:१-२

## २३

योसीयाहम परमप्रभु आ लोत्र टिशो

२इतिहास ३४:२९-३५:२५

१ मिनु नोले पिपम यहूदा नु यरूसलेम डा खाल्पा नेल्ल आन कली आ डोंइती बुक्चा, दे ब्रेत्थ सोइक्तीमी बाक्त।

२ मिनु पिप परमप्रभु यावे आ खिं लमाक्त। मिनु मेको नु यहूदा डा मुर नेल्ल, यरूसलेम डा मुर, चढेबपुकी, परमप्रभु यावे आ लोत्र पाइबपुकी नु आइक्च नु ठेयब मुर नेल्ल पिप नु परमप्रभु यावे आ खिं लमा बाक्त। मिनु पिपमी नेल्ल नेंशा, परमप्रभु यावे आ खिंम थिश्शो कबल डा लोत्र ब्रेक्शो कागज पढेवा बाक्त।

३ मिनु पिप थाम आ पुंम राष्शा, परमप्रभु यावे आ डोंइती कबल का पवा बाक्त। मेको कबल मार बाक्त देशा हना, "गो परमप्रभु यावे आ शेंशो, आ देशो लोत्र, आ फुल्लुम मुशा ब्रेक्शो लोत्र आं थुं नु रां नेल्लेमी टिशा पाइनुड। मोपा एको कागजम ब्रेक्शो कबल डा लोत्र नेल्ल खाप्नुड" देंमाक्त। मिनु मेको नोले मुर नेल्लेमी "गोपुकीम यो मेको कबल खाप्नीकी" देंमा बाक्त। प्रस्थान २४:३-८; यहोसु २४:२५

४ मेको नोले पिपमी नेल्ल क्येडा ठेयब चढेब हिल्लीयाह, मेको आ नोले डा अरु चढेबपुकी नु लाप्चो खाल पाइब आन कली "परमप्रभु यावे आ खिं रे बाल देवता, अशेराह देवी, नां तास्ला नु सोरुल आन कली सेल्शो मारेड मारेड बोसपुकी गुंडदीन" दे अरेवा बाक्त। मिनु मेकोपुकीमी मेको नेल्ल यरूसलेम डा किद्रोन खोल्साम चोत्रमे बाक्त। मिनु पुलु चहिं बेथेलम लदमे बाक्त। २राजा २१:३

५ डोंइती यहूदा डा पिपपुकीम यहूदा डा सहर नु यरूसलेम डा डांडा डा थानम बाक्शो देवी देवता आन कली चढेब आन कली वोइशशो बाक्मा बाक्त। मेकोपुकीमी बाल, नां, तास्ला, सोरुल आन कली धूप चोइबाक्मा बाक्त। मिनु पिपम मेको आन कली गुंडपदा बाक्त।

६ मेकोमी अशेराह देवी आ मूर्ति पाइशशो थाम परमप्रभु यावे आ खिं यरूसलेम रे गुंडशा, किद्रोन खोल्साम लाइशशा चोपाइक्मी बाक्त। मिनु मुरपुकीम मेको कली फुरक सेल्मे बाक्त। मिनु मेको आइक्च मुर आन तुरसुम फ्रामे बाक्त। २राजा २१:७

७ मेकोमी तेल्लेम वोंइश मुर आन बाक्तीक प्रेल्मे बाक्त। मेको खिं, अशेराह देवी आ मूर्ति कली नु मीश मुर आन तोत्र प्रोव्रतीके परमप्रभु यावे आ खिं आ नेक्था बाक्शो बाक्माक्त। १राजा १४:२४

८ योसीयाहमी यहूदा डा सहर रे चढेब नेल्ल आन कली गुंडदीमी बाक्त। मिनु गेबा सहर रे बेयर-शेबा सम्म डा डांडा डा थान आन कली ग्रॉग्रा दिशो सेल्पदा बाक्त। मेकोमी सहर डा लाप्चो डा देवता थानपुकी प्रेप्पदा बाक्त। मेको सहर डा सासन पाइब यहोसु आ लाप्चो आ डोंइती गे बाक्माक्त। मेको सहर डा ठेयब लाप्चो आ पेरा गे बाक्माक्त।



9 मेको डांडा डा थान डा गेय पाइब चढेबपुकीम यरूसलेम डा परमप्रभु यावे आ खिं डा चढेतीकेम जाक्ने मचापबमे बाक्त। तन्न मेकोपुकीम आन वारच चढेबपुकी नु बोरब ओख्ती मसुप्शो शोब्ले जाइबाक्मा बाक्त।

10 मिनु पिप योसीयाहम मोलेक कली आन तमी तौ क्योरशा चढेथ मजाकमल, दे बेन-हिन्नोम बेसीम बाक्शो तोफेथ थान कली ग्रांरा दिशो सेल्पदा बाक्त। २राजा १७:१७; लेवी १८:२१

11 मेकोम यहूदा डा पिपपुकीम परमप्रभु यावे आ खिं ओवतीक लाप्चो आ डोंडती नां कली मान पचा कली सेल्शो शारा प्रेशा ताइक्पाइक्मी बाक्त। मेको चहिं नाथान-मेलेक नें पाइशो मुर आ कोठा आ नेक्था बाक्माक्त। मिनु योसीयाहम नां कली मान पचा कली सेल्शो बग्गीपुकी क्रोइक्पाइक्मी बाक्त।

12 आहाज आ तार डा कोठा डा कौसीम यहूदा डा पिपपुकीम सेल्शो चढेतीकपुकी नु परमप्रभु यावे आ खिं डा लाडगा निम्फा गे डा मनस्सेम सेल्शो चढेतीकपुकी प्रेशा, फस पोक्शा, मेको नेल्ल किद्रोन खोल्साम ताइक्पदा बाक्त। २इतिहास २८:२४; २राजा २१:४-५

13 मिनु पिपमी यरूसलेम आ पूर्व गे बाक्शो डांडा डा थान ग्रांरा दिशो सेल्पदा बाक्त। मेको खतम सेल्ब डांडा आ दक्खिन गे बाक्माक्त। मिनु मेकेर पिप सोलोमनमी सीदोनी आन ग्रांरा दिशो अशतोरथ देवी आ मूर्ति, मोआब डा ग्रांरा दिशो देवता केमोश आ मूर्ति नु अम्मोनी आन ग्रांरा दिशो देवता मोलेक आ मूर्ति आन थान सेल्पाइशो बाक्माक्त। मिनु योसीयाहमी मेको आ सेल्शो पूजा पतीक थान प्रेशा ग्रांरा दिशो सेल्पदा बाक्त। मेको मोलेक देवता कली मिल्लोम यो देशो बाक्त। १राजा ११:७

14 मिनु योसीयाहमी थान डा खुक्शो फुल्लु जिक्शा फस पोक्पाइक्मी बाक्त। मिनु मूर्ति पाइशो थाम एशो मेको आ बाक्तीकेम मुर आन रुशेम प्रिपाइक्मी बाक्त।

15 मिनु मेकोम इस्राएली आन कली पाप पपाइक्ब नेबात आ तौ येरोबामम बेथेल डा डांडाम सेल्शो थान यो प्रेप्पदा बाक्त। मेकोम चढेतीक नु थाम यो खतम सेल्पदा बाक्त। मेको थान क्रोइशो, पुलु सेल्पदा बाक्त। मेकोमी मेको मूर्ति पाइशो थाम यो चोपदा बाक्त। मिनु मेको कली फस पोक्पदा बाक्त। मेकोम अशेराह आ थाम यो चोपदा बाक्त। १राजा १२:३२

16 मेको नोले योसीयाहम एर ओंथ कोव्रडा बाक्त। मिनु मेकोमी डांडाम बाक्शो तुरसपुकी तवा बाक्त। मिनु मेकोमी तुरस रे रुश गुंडपदा बाक्त। मिनु मेकोम चढेतीक ग्रांरा दिशो सेल्चा कली मेको चढेतीकेम चोपाइक्मी बाक्त। परमप्रभु आ मुरुमी, येरोबाम चढेतीकेम बाक्मेनु, देशो परमप्रभु यावे आ लोव्र गाप्चा कली योसीयाहमी मो पवा बाक्त। मिनु पिपमी एर ओंथ कोव्रशा, मोदेशो नोले दुम्ब लोव्र पाइब परमप्रभु आ मुर आ तुरस तवा बाक्त। १राजा १३:२

17 मिनु पिपमी “मेरे आं तशो तुरस सु के बाक्मे?” दे हिल्लो पामी बाक्त। मिनु मेको सहर डा मुरपुकीमी “मेरे परमप्रभु आ मुर आ तुरस बाक्ब। मेको यहूदा रे जाक्शा, बेथेल डा चढेतीकमी येरोबाम आ डोंडती मुल इन पशो गेय आ पर्बम नोले दुम्ब लोव्र पाइब, परमप्रभु आ मुर आ तुरस बाक्ब” देमा बाक्त। १राजा १३:३०-३२

18 मिनु मेकोमी “मो हना बाक्चा गेन। सुइम मेको आ रुश मथिने” देमाक्त। मोपतीके मुरपुकीम मेको सामरीया रे जाक्शो परमप्रभु यावे आ लोव्र पाइब आ रुश नु यहूदा रे जाक्शो परमप्रभु आ मुर आ रुश चहिं मशोल्मे बाक्त।

19 मिनु मेको प्रोंडशा पिप योसीयाहम इस्राएल डा पिपपुकीम सामरीया डा सहरपुकीम सेल्पाइशो डांडा डा थान प्रेप्पदा बाक्त। मुरपुकीमी मेको थान सेल्शा पूजा पा परमप्रभु यावे कली गाइक्पाइशो बाक्मा बाक्त। मिनु योसीयाहमी मेको आन कली बेथेलम पशो खोदेशो ग्रांरा दिशो सेल्पाइक्मी बाक्त।

20 पिप योसीयाहमी मेको डांडा डा थानपुकीम बाक्शो चढेतीक तार आन चढेब नेल्ल साइक्पाइक्मी बाक्त। मिनु मेको चढेतीक आन तार मुर आन रुश चोपाइक्मी बाक्त। मिनु मेको नोले यरूसलेम लेम्माक्त।

### पास्सा नाक्त डा चाड लेंशा मानेशो

21 मिनु पिपमी मुर नेल्ल आन कली “परमप्रभु यावे, इन परमप्रभु आ कबल डा लोव्र ब्रेक्शो खोदेशो पा पास्सा नाक्त डा चाड मानेचा मालनीनी” दे माइक्मी बाक्त। ब्यवस्था १६:१-८; यहोसु ५:१०-११

22 इस्राएली आन कली निसाफ पाइबपुकीम हुकुम पामे रे नु इस्राएल नु यहूदा डा पिपपुकीम सासन पामे ना रे मुल सम्म मोदेशो पा पास्सा चाड ममानेशो बाक्मा बाक्त। न्यायाधीस २:१०, १६, १७

23 तन्न पिप योसीयाहम सासन पवा आ १८ बर्सम यरूसलेमम मेको परमप्रभु यावे आ पास्सा नाक्त डा चाड मानेमे बाक्त।

24 परमप्रभु यावे आ खिंमी चढ़ेब हिल्लीयाहमी थिश्शो ब्रेकशो लोत्र खाप्चा कली योसीयाहम बेकशो मुर नु लोत्र पाइब, लिंक्यु कोत्रब नु खिं डा मूर्ति नेल्ल, यहूदा नु यरूसलेमम बाकशो ग्रान्रा दिशो मारेड मारेड नेल्ल ताइक्पाइक्मी बाक्त। लेवी २०:२७; ब्यवस्था २९:१६-१७

25 मोपा योसीयाह खोदेशो पा आ थुं नेल्ले आ रां नेल्ले नु आ सक्ति नेल्लेमी मोसा आ ब्रेकशो लोत्र टिशा गाकशा परमप्रभु यावे गे लेप्ब मेको आ डोंइती नु नोले तेकोइ पिप मडुम्मा बाक्त। २राजा १८:५; ब्यवस्था ६:५

26 मो हना यो परमप्रभु यावेम आ ठेयब पा गाइश्शो चुरशो मलेत्ता बाक्त। यहूदा आ पर्वम मेको आ गाइश्शो मनाइसे बाक्त। मिनु मनस्सेमी यो मेको कली थाम्पा गाइक्पाइश्शो बाक्माक्त। २राजा २१:११-१६

27 मिनु परमप्रभु यावेमी “गो दोपा इस्राएल कली गुंडु, मोपा यहूदा कली यो आं डोंइती रे गुंडुनुड। मिनु गो आं योत्रशो यरूसलेम सहर नु आं नें बाक्ब देशो आं खिं प्रोंडुनुड” देशो बाक्माक्त। २राजा १७:१८; १राजा ८:२९

### योसीयाह बेकशो

२इतिहास ३६:१-८

28 योसीयाह आ पशो अरु गेय, मेको आ पशो नेल्ल, मार, मेको यहूदा डा पिप आन इतिहासम ब्रेकशो मबाक्बा डा?

29 पिप योसीयाहम सासन पवा ना इजीप्त डा पिप फाराओ नेको अस्सुर डा पिप नु लडाइ पचा कली युफ्रेटीस खोला गे लमाक्त। मिनु पिप योसीयाह फाराओ नेको नु लडाइ पचा कली मेकेर लमाक्त। तन्न नेकोम योसीयाह नु लडाइ पा मेको कली मेगीददोम सदा बाक्त।

30 मिनु मेको आ गेय पाइबपुकीम मेको आ बेकशो रां बग्गीम कुर पा मेगीददो रे यरूसलेमम चाक्गामे बाक्त। मिनु मेको कली आ तुरसुमीन वोदमे बाक्त। मिनु मेको रागी डा मुरपुकीम मेको आ तौ येहो-अहाज कली तेल लुक्शा, मेको आ पा डा पिप सेल्मे बाक्त।

### यहूदा डा पिप येहो-अहाज

31 येहो-अहाज पिप दुम्मेनु २३ बर्स दुम्शो बाक्माक्त। मेकोम यरूसलेममी महिना सां सासन पवा बाक्त। मेको आ ममा आ नें हामुतल बाक्माक्त। मेको लिब्ना डा येरमीया आ तमी बाक्माक्त।

32 मेकोमी आ किकी पिपी खोदेशो पा, परमप्रभु यावे आ डोंइती मार मरिम्शो बाक्मे, मेको पवा बाक्त।

33 मिनु फाराओ नेकोमी मेकोम यरूसलेमम सासन मपवल, दे साडलोम फ्रेंशा हमाथ रागी डा रिब्लामी चोक्शा वोदा बाक्त। मिनु मेकोमी यहूदा कली सहे का टलेन्ट चांदी नु टलेन्ट का सुन तिरो थाप्पदा बाक्त। टलेन्ट का ३४ किलो बाक्ब। इजीकीएल १९:४

34 मिनु फाराओ नेकोमी योसीयाह आ तौ एल्याकीम कली मेको आ आफ योसीयाह आ पा डा पिप सेल्शा वोदा बाक्त। मिनु फाराओ नेकोमी मेको आ नें एल्याकीम रे येहो-याकीम वोदा बाक्त। तन्न मेकोमी येहो-अहाज कली इजीप्त रागी लदा बाक्त। मिनु मेको इजीप्त उइ बेक्माक्त। १इतिहास ३:१५

35 मिनु फाराओ नेको आ पुंडशो सुन नु चांदी थाप्चा कली येहो-याकीमम आ रागी डा मुर आन कली तिरो थाप्पाइक्मी बाक्त। मिनु देशो खोइ तिरो थाप्चा कली मेकोमी आ रागी डा मुरपुकी रे सुन नु चांदी पोक्गा बाक्त। २राजा १५:२०

### यहूदा डा पिप येहो-याकीम

36 येहो-याकीम पिप दुम्मेनु मेको २५ बर्स दुम्शो बाक्माक्त। मेकोम यरूसलेममी ११ बर्स सासन पवा बाक्त। मेको आ ममा आ नें जेबीदाह बाक्माक्त। मेको रूमाह सहर डा पेदायाह आ तमी बाक्माक्त।

37 मिनु मेकोमी आ किकी पिपी खोदेशो पा, परमप्रभु यावे आ डोंइती मार मरिम्शो बाक्मे, मेको पवा बाक्त।

## 24

### नेबुकदनेसरमी लडाइ तोशो

1 येहो-याकीममी सासन पवा ना बेबीलोन डा पिप नेबुकदनेसर मेको रागी नु लडाइ पथ जाक्माक्त। मिनु बर्स सां सम्म येहो-याकीम मेको आ सासनम बाक्माक्त। तन्न बर्स सां नोले मेकोमी आ थुं फाइशशा, नेबुकदनेसर कली मटिवा बाक्त। येरमीया २२:१३-१९

2 मिनु परमप्रभु यावेमी यहूदा नु लडाइ पचा कली कल्दी, अरामी, मोआबी नु अम्मोनी आन कली सोइक्तीमी बाक्त। परमप्रभु यावेमी आ गेय पा आ लोत्र पाइब आन देशो खोदेशो दुम्पाइशशा यहूदा कली खतम पोक्पाइक्चा कली मेको आन कली सोइक्तीमी बाक्त।

3 परमप्रभु यावेमी आ मिम्शो खाप्शा, मनस्से आ पशो मरिम्शो नु आ पाप आ पर्बम मेको आन कली आ डोंइती रे ग्रुंइचा कली मो पशो बाक्माक्त। २राजा २१:१०-१६; २राजा २३:२६-२७

4 मारदे हना मनस्सेम दोस मताइब मुर आन कली साइशशा, यरूसलेम कली हुशेम प्रिंशो बाक्माक्त। मिनु परमप्रभु यावेमी मेको कली माफ गेने मबिश्शो बाक्माक्त।

5 मिनु येहो-याकीम आ पशो अरु गेय, मेको आ पशो नेल्ल, मार, मेको यहूदा डा पिप आन इतिहासम ब्रेक्शो मबाक्वा डा?

6 मिनु येहो-याकीन बेक्माक्त। मिनु मेको आ पा डा आ तौ येहो-याकीन पिप दुम्माक्त।

7 इजीप्त डा पिप आ रागी प्रोना नोले लेंशा मजाक्माक्त। मारदे हना बेबीलोन डा पिपम इजीप्त डा खोला रे युफ्रेटीस खोला सम्म डा रागी नेल्ल आ के सेल्शो बाक्माक्त।

### यहूदा डा पिप येहो-याकीन

#### २इतिहास ३६:९-१०

8 येहो-याकीन पिप दुम्मेनु १८ बर्स दुम्शो बाक्माक्त। मेकोमी यरूसलेमम महिना सां सासन पवा बाक्त। मेको आ ममा आ नें नहुशता बाक्माक्त। मेको यरूसलेम डा एल्नाथान आ तमी बाक्माक्त। येरमीया २२:२४-३०

9 येहो-याकीनमी आ आफ खोदेशो पा, परमप्रभु यावे आ डोंइती मार मरिम्शो बाक्मे, मेको पवा बाक्त।

10 मेना बेबीलोन डा पिप नेबुकदनेसर आ लडाइ पाइबपुकी यरूसलेमम लडाइ पथ जाक्शा, मेको सहर कली पुम्शो बाक्मा बाक्त।

11 मिनु आ लडाइ पाइबपुकीम मेको सहर पुम्दमेनु, बेबीलोन डा पिप नेबुकदनेसर जाक्माक्त।

12 मिनु यहूदा डा पिप येहो-याकीन, नेबुकदनेसर कली जिम्मा गेसे बाक्त। मिनु मेको नु मेको आ ममा, आ गेय पाइबपुकी, आ ठेयब मुरपुकी नु आ लडाइ पाइब आन ठेयब मुर नेल्ल बेबीलोन डा पिप कली जिम्मा गेसमा बाक्त। मिनु बेबीलोन डा पिपम सासन पवा आ ८ बर्सम येहो-याकीन कली ग्याइशशा चोक्गा बाक्त।

13 मेकोमी परमप्रभु यावे आ खिं डा शोंप नु पिप आ खिं डा शोंप नेल्ल लदा बाक्त। मेकोमी सोलोमनम सेल्शो परमप्रभु यावे आ खिं डा सुन के बोस खोइशशा लदा बाक्त। मोपा परमप्रभु यावे आ देशो लोत्र गाम्माक्त। २राजा २०:१७

14 मेकोपुकीम यरूसलेम डा ठेयब मुर, लडाइ पाइब आन ठेयब मुर नेल्ल, लडाइ पाइब नेल्ल १० हजार मार मार सेल्स जोक्ब नु तुप्तील नेल्ल ग्याइशशा लदा बाक्त। थम पुडग आन कली ला प्रोंइशा वोदा बाक्त। येरमीया २४:१

15 नेबुकदनेसरमी येहो-याकीन कली ग्याइशशा बेबीलोनम लदा बाक्त। पिप आ ममा, पिप आ मीशपुकी, मेको आ ठेयब गेय पाइबपुकी नु नेल्ल क्येडा जोक्ब तुइक्ब आन कली यरूसलेम रे ग्याइशशा बेबीलोन लदा बाक्त। येरमीया २२:२६

16 बेबीलोन डा पिपमी ७ हजार बोल्यो लडाइ पाइब नु हजार का मार मार सेल्स जोकन नु तुप्तील आन कली ग्याइशशा बेबीलोन लाइक्मी बाक्त। मेको नेल्ल लडाइ पचा कली बोल्यो मुर बाक्मा बाक्त।

17 बेबीलोन डा पिपमी येहो-याकीन आ बकान्छा मतन्याह कली मेको आ पा डा पिप सेला बाक्त। मिनु मेको आ नें सिदकीयाह वोदा बाक्त।

यहूदा डा पिप सिदकीयाह

२इतिहास ३६:११-२१; येरमीया ५२:१-३०

18 सिदकीयाह पिप दुम्मेनु, मेको २१ बर्स दुम्शो बाक्माक्त। मिनु मेकोमी यरूसलेमम ११ बर्स सासन पवा बाक्त। मेको आ ममा आ नें हामुतल बाक्माक्त। मेको लिब्ना सहर डा येरमीया आ तमी बाक्माक्त।

19 मेकोम येहो-याकीमम पशो खोदेशो पा परमप्रभु यावे आ डोंइती मार मरिम्शो बाक्मे, मेको पवा बाक्त। २राजा २३:३७

20 मिनु परमप्रभु यावे आ गाइशशोम पतीके यरूसलेम नु यहूदा डा मुर नेल्ल आन कली आ डोंइती रे गुंडीदीमी बाक्त। मिनु नोले सिदकीयाहमी बेबीलोन डा पिप कली मटिवा बाक्त। २राजा २३:२७

## 25

यरूसलेम खतम दुम्शो

1 सिदकीयाहम सासन पशो ९ बर्स १० महिना डा १० नाक्त बेबीलोन डा पिप नेबुकदनेसर आ लडाइ पाइब नेल्ल चाक्शा यरूसलेम नु लडाइ पथ जाक्माक्त। मिनु यरूसलेम कली पुम्शा एर ओंथ गारो डोइक्तीक सेल्मे बाक्त। येरमीया ३४:१

2 पिप सिदकीयाहमी सासन पशो ११ बर्स दुम्मेनु, सहर पुम्दमे बाक्त।

3 मिनु मेको ४ महिना डा ९ नाक्त सहरम थम ठेयब अन्काल दुम्माक्त। मिनु मेको रागीम मुर आन कली जचा थोव्वक मारेड मबाक्माक्त।

4 मेना पिप नु लडाइ पाइब नेल्ल गारो होइशशा, नाकदो प्रोकमा बाक्त। मेको पिप आ रू रे गारो निक्शी आस दाते डा लाप्चो रे कल्दीपुकी सहर आ एर ओंथ बाक्तेक्म हना यो, प्रोकमा बाक्त। मोपा मेकोपुकी अराबाह गे प्रोकमा बाक्त।

5 तन्न कल्दी डा लडाइ पाइबपुकीम पिप कली खेदा पामे बाक्त। मिनु मेको कली यरीको डा दिममी थित्मे बाक्त। आ लडाइ पाइब नेल्ल मेको कली प्रोंइशा एर ओंथ ब्रमा बाक्त।

6 मिनु मेको कली ग्याइशशा बेबीलोन डा पिप आ डोंइती रिब्ला सहरम चाक्गमे बाक्त। मिनु मेकोमी मेको आन कली निसाफ पवा बाक्त।

7 मेकोपुकीम सिदकीयाह आ तौ आन कली मेको आ डोंइतीन सदमे बाक्त। मिनु नोले सिदकीयाह आ मिक्च पुक्तमे बाक्त। मिनु मेको कली कांसा के साडलोम पाइशशा बेबीलोन लदमे बाक्त। २सामुएल १२:१०

यहूदा डा मुर आन कली लाइशशो

8 बेबीलोन डा पिप नेबुकदनेसरमी सासन पशो १९ बर्स ५ महिना डा ७ नाक्त, नेबुकदनेसर कली खाल पाइब आन ठेयब मुर नेबुजरादान यरूसलेम जाक्माक्त।

9 मिनु मेकोमी परमप्रभु यावे आ खिं, पिप आ दरवार, यरूसलेम सहर डा खिं नेल्ल नु ठेयब खिं नेल्ल मी सुइक्ता बाक्त।

10 मेको पिप कली खाल पाइब आन ठेयब मुर आ हुकुमम बाक्शो कल्दी लडाइ पाइबपुकीम यरूसलेम आ एर ओंथ डा गारो नेल्ल प्रेत्मे बाक्त।

11 मेको पिप कली खाल पाइब आन ठेयब मुर नेबुजरादानमी सहरम प्रोंइचा पुंडसीशो मुर नु अरु बेबीलोन डा पिप कली जिम्मा गेंसीशो मुर आन कली ग्याइशशा बेबीलोन लाइक्मी बाक्त।

12 तन्न मेको पिप कली खाल पाइब आन ठेयब मुरुम अङ्गुर रू रोक्चा नु रू दोचा कली थम पुड्ग आन कली चहिं प्रोइशा वोइक्मी बाक्त।

13 मिनु कल्दीपुकीमी परमप्रभु यावे आ खिंम बाक्शो कांसा के थामपुकी, निप्पाइक्तीकपुकी नु कांसा के ठेयब बोस प्रोल्शा आइक्च सेल्शा बेबीलोन लदमे बाक्त। येरमीया २७:१९-२२

14 मेकोपुकीमी ग्योबपुकी, बेल्लाचपुकी, सल्दो थेप्तीके थनारोपुकी, कचौरापुकी, थनौरोपुकी नु चढेतीकेम चलेतीक कांसा के मारेइ मारेइ ग्योब नेल्ल लदमे बाक्त।

15 मेकोपुकीमी मी कुरतीके नु बोस नेल्ले लदमे बाक्त। मिनु पिप कली खाल पाइब आन ठेयब मुरुमी सुन नु चांदीम सेल्शो मारेइ मारेइ लदा बाक्त।

16 सोलोमनमी परमप्रभु यावे आ खिं कली सेल्शो थाम निक्शी, ठेयब बोस नु निप्पाइक्तीक सेल्शो कांसा नाक्ने मचाप्चा डा बाक्मा बाक्त। १राजा ७:१५; १राजा ७:२३; १राजा ७:२७

17 मेको थाम का १८ कुबीत लाइश्शो बाक्माक्त। मिनु मेको थाम का आ पिया कुबीत सां लाइश्शो बाक्माक्त। मिनु मेको कांसा के जालीम आ एर ओथ क्युकशा हिरशो दारीम बाक्माक्त। अर्को थाम यो जालीम हिरशा मेको खोदेंशो पा सेल्शो बाक्माक्त। कुबीत का आधा मिटर खोदेंशो बाक्ब।

18 मिनु पिप कली खाल पाइब आन ठेयब मुरुम ठेयब चढेब सेरायाह नु मेको आ दी डा सेफन्याह नु लाप्चो कोल्लब सां आन कली यो ग्याइश्शा लाइक्मी बाक्त।

19 मेकोमी सहरम मुल यो लीशो आन दाते डा लडाइ पाइब आन ठेयब मुर नु ५ जना पिप कली सल्ला गोब आन कली यो लाइक्मी बाक्त। मेकोम रागी डा मुर आन कली लडाइ पाइब मुर सेल्चा कली योत्रब ब्रेक्ब ठेयब मुर नु सहरम थिश्शो ६० जना मुर आन कली यो लाइक्मी बाक्त।

20 मेको पिप कली खाल पाइब आन ठेयब मुर नेबुजरादानमी मेको आन कली बेबीलोन डा पिप आ बाक्तीक रिब्ला सहरम चाक्मी बाक्त।

21 मिनु बेबीलोन डा पिपम मेको आन कली हमाथ आ रागीम रिब्लाम साइक्पाइक्मी बाक्त। मोपा यहूदा डा मुर आन रागी रे ग्याइश्शा लाइक्चा पुंडसमा बाक्त। २राजा २३:३३

गेदाल्याहमी सासन पशो

येरमीया ४०:५; येरमीया ४१:३

22 बेबीलोन डा पिप नेबुकदनेसरमी शाफान आ चच अहीकाम आ तौ गेदाल्याह कली यहूदाम प्रोइशा वोइश्शो इक्का खोइ मुर आन कली सासन पाइब सेल्शा वोदा बाक्त।

23 मिनु लडाइ पाइब आन ठेयब मुर नेल्ल नु मेको आन मुरपुकीम बेबीलोन डा पिपम गेदाल्याह कली सासन पाइब सेल्शो लोत्र नेन्मे बाक्त। मिनु मेको नेल्ल गेदाल्याह आ बाक्तीके मिस्पा सहरम जाक्मा बाक्त। मेको नेथन्याह आ तौ इश्माएल, कारेआह आ तौ योहानान, नेतोफाह सहर डा तन्हुमेथ आ तौ सेरायाह, माकाथी आ तौ याजन्याह नु मेको आन मुरपुकी जाक्मा बाक्त।

24 मिनु गेदाल्याहमी मेकोपुकी नु आन मुर आन कली कसम जशा रिम्शो लोत्र पाइक्मी बाक्त। मिनु मेकोम “कल्दी डा ठेयब मुर आन कली तशा महिनीन। रागीम बाक्कीन। मिनु बेबीलोन डा पिप आ गोय पने। मिनु इन कली रिम्शो दुम्ब” दे माइक्मी बाक्त।

25 तन्न ७ महिनाम पिप आ खिं डा मुर एली-शामा आ चच, नेथन्याह आ तौ इश्माएलम १० जना मुर आन कली चाक्शा जाक्माक्त। मिनु मेकोमी गेदाल्याह नु मेको नु मिस्पा सहरम बाक्ब यहूदा नु कल्दी डा मुर आन कली तुप्शा साइक्मी बाक्त।

26 मोपतीके कल्दी आन क्येडा हिंशा आइक्च रे ठेयब मुर नु लडाइ पाइब आन ठेयब मुर नेल्ल प्रोक्शा इजीप्त रागी जाक्दीम्मा बाक्त। ब्यवस्था २८:६८

येहो-याकीन कली प्रोइशो

येरमीया ५२:३१-३४

27 यहूदा डा पिप येहो-याकीन ग्याइश्शा लाइश्शो ३७ बर्स, १२ महिना डा २७ नाक्त दुम्मेनु, प्रोइचा पुंडसे बाक्त। मिनु एवील-मेरोदक बेबीलोन डा पिप दुम्शा सासन पशो आ डोइती डा बर्सम मेको कली प्रोना बाक्त। २राजा २४:१५

28 मेकोमी येहो-याकीन कली रिम्शो लोत्र पवा बाक्त। मिनु मेको कली बेबीलोनम बाक्शो पिप आन दातेमी नेल्ल क्येडा टेयब सेला बाक्त।

29 मोपा येहो-याकीनमी आ चौक्सीशो वा फुदा बाक्त। मिनु आ लीशो नाक्त नेल्ल पिप नु बाक्शा जवा बाक्त।

30 बेबीलोन डा पिपमी मेको कली ब्रॉइम सम्म नाक्त किंत किंत आ माल्शो मारेइ मारेइ गेवा बाक्त।

## १ इतिहास

**ब्रेक्ब मुर:** एको इतिहास किताब निक्शी हिब्रू बाइबलम किताब का बाक्त। मेकेर राजा किताब निक्शी नु सामुएल किताब निक्शीम मब्रेक्शो लीशो लोव्र ब्रेक्शो बाक्ब। एको किताब आ ब्रेक्स एज्रा आ ब्रेक्शो खोदेंशो तांडसीब। मिनु एज्रा किताब इतिहास किताब नु थम गारचा डा बाक्त। २इतिहास ३६:२२-२३ नु एज्रा १:१-३ तन्न एज्रा ब्रेक्ब मुर बाक्त हना यो, अर्को मुरुम यो लोव्र तेम्शो बाक्तेक्म। १इतिहास ३:१९-२४

**गेना दुम्शो:** एको किताब रागी सेल्चा रे पिप कोरेस आ सासन पशो ५३६ बि. सी. सम्म डा बाक्ब। तन्न पिप दाऊद आ पर्वम शुश लोव्र बाक्ब।

**मार ब्रेक्शो:** एको किताब इस्राएली आन इतिहासम तेम्शो लोव्र बाक्ब।

१. आदम रे इस्राएल आ १२ थर १इतिहास १:- १इतिहास ९:-

२. पिप दाऊद आ सासनम इस्राएली आन इतिहास १इतिहास १०:- १इतिहास २९:-

आदम रे अब्राहाम सम्म डा मुर

1 आदम आ तौ सेथ बाक्माक्त। सेथ आ तौ एनोश बाक्माक्त। उत्पत्ती ५:-

2 एनोश आ तौ केनान बाक्माक्त। केनान आ तौ मा-हालालेल बाक्माक्त। मा-हालालेल आ तौ यरेद बाक्माक्त।

3 यरेद आ तौ हनोक बाक्माक्त। एनोक आ तौ मेथुसेलाह बाक्माक्त। मेथुसेलाह आ तौ लमेक बाक्माक्त।

4 लमेक आ तौ नोआह बाक्माक्त। नोआह आ तौ शेम, हाम नु यफेथ बाक्मा बाक्त।

यफेथ आ तौ च्च

5 यफेथ आ तौ गोमेर, मागोग, मादै, यावान, तूबाल, मेशेक नु तिरास बाक्मा बाक्त। उत्पत्ती १०:२-५

6 गोमेर आ तौ अश्केनज, दिफाथ नु तोगारमाह बाक्मा बाक्त।

7 यावान आ तौ एलीशाह, टारशीश, कितीम नु रोदानीम बाक्मा बाक्त।

हाम आ तौ च्च युड

8 हाम आ तौ कूश, इजीप्त, पूत नु कनान बाक्मा बाक्त। उत्पत्ती १०:६-२०

9 कूश आ तौ शेबा, हवीलाह, साब्ताह, रामाह नु साब्तेका बाक्मा बाक्त। रामाह आ तौ शेबा नु देदान बाक्सा बाक्त।

10 कूश निम्रोद आ आफ बाक्माक्त। निम्रोद रागी आ डोंडती सक्ति पाइश्शो मुर का बाक्माक्त।

11 इजीप्त माइश्शो मुर लूदीम अनामीम, लेहाबीम नु नफतुहीम,

12 पथ्रुसीम, कस्लुहीम, काफ्तोरीम आन आफ बाक्माक्त। मेको रे पलिस्ती दुम्शो बाक्मा बाक्त।

13 कनान माइश्शो मुर आ डोंडती थिशो तौ सीदोन नु हेथ आस आफ बाक्माक्त।

14 मेको निक्शी रे यबुसी, एमोरी, गिरगाशी,

15 हिब्वी, अरकी, सिनी,

16 अरवादी, सेमारी नु हमथी दुम्शो बाक्मा बाक्त।

शेम आ तौ च्च युड

17 शेम आ तौ एलाम, अश्शुर, अरपक्शाद, लूद, अराम, ऊज, हुल, गेथेर नु मेशेक बाक्मा बाक्त।

उत्पत्ती १०:२१-३०

18 अरपक्शाद शेलाह आ आफ बाक्माक्त। मिनु शेलाह एबेर आ आफ बाक्माक्त।

19 मिनु एबेरमी तौ निक्शी थिवा बाक्त। का आ नें पेलेग बाक्माक्त। मेको थिशो ना रागी योक्शो बाक्माक्त। मेको आ लोक्ब आ नें योक्तन बाक्माक्त। उत्पत्ती ११:१-९

20 मिनु योक्तन आ च्च युड अल्मोदाद, शेलैफ, हासार-मावेथ, येराह,

२१ हदोराम, उजाल, दिकलाह,

२२ एबाल, अबीमा-एल, शेबा,

२३ ओफीर, हवीलाह नु योबाब बाक्मा बाक्त। मेको नेल्ल योकतन आ चच युइ बाक्मा बाक्त।

उत्पत्ती ११:१०-२६

२४ शेम रे अब्राम सम्म सु सु बाक्मा बाक्त देशा हना, अरपक्शाद, शेलाह,

२५ एबेर, पेलेग रेऊ, उत्पत्ती ११:१०-२६

२६ सेरूग, नाहोर, तेराह,

२७ नु अब्राम बाक्मा बाक्त। अब्राम कली अब्राहाम यो देंबाक्मा बाक्त।

अब्राहाम आ तौ चच युइ

२८ अब्राहाम आ तौ निकशी इसहाक नु इश्माएल बाक्सा बाक्त। उत्पत्ती २१:३; उत्पत्ती १६:१५

२९ इश्माएल आ डोंइती थिशो तौ नेबायोथ बाक्माक्त। मेको आ नोले डा तौ केदार, अदबेल, मिब्साम, उत्पत्ती २५:१३-१६

३० मिश्मा, दुमा, मस्सा, हादाद, तेमा,

३१ येतुर, नाफीश नु केदमा बाक्मा बाक्त। मेको नेल्ल इश्माएल आ तौ बाक्मा बाक्त।

३२ अब्राहाम आ नोले चाक्शो मीश केतुराहमी जिम्नान, योकशान, मेदान, मिदयान, इश्बाक नु शुआह थीमी बाक्त। मिनु योकशान आ तौ शेबा नु देदान बाक्सा बाक्त। उत्पत्ती २५:१-४

३३ मिदयान आ तौ एफाह, एफेर, हनोक, अबीदा नु एल्दाह बाक्मा बाक्त। मेको नेल्ल केतुराह आ तौ चच बाक्मा बाक्त।

३४ अब्राहाम आ तौ इसहाक बाक्माक्त। मिनु इसहाक आ तौ निकशी एसाव नु इस्माएल बाक्सा बाक्त। उत्पत्ती २५:१९-२६

३५ एसाव आ तौ एलीफाज, रूएल, येऊश, यालाम नु कोराह बाक्मा बाक्त। उत्पत्ती ३६:१०-१४, २०-२८

३६ एलीफाज आ तौ तेमान, ओमार, सेफी, गाताम, केनाज, तिम्ना नु अमालेक बाक्मा बाक्त।

३७ रूएल आ तौ नाहाथ, जेराह, शम्माह नु मिज्जा बाक्मा बाक्त।

एदोम आ डोंइती डा मुर

३८ सेइर आ तौ लोतान, शोबाल, सिबोन, अनाह, दीशोन, एजेर नु दीशान बाक्मा बाक्त।

३९ लोतान होरी नु होमाम आ किकी पिपी बाक्माक्त। मिनु लोतान आ समी तिम्ना बाक्माक्त।

४० शोबाल अल्यान, मानाहाथ, एबाल, शेफी नु ओनाम आ थर डा किकी पिपी बाक्मा बाक्त। सिबोन आ तौ आइयाह नु अनाह बाक्सा बाक्स।

४१ अनाह आ तौ दीशोन बाक्माक्त। दीशोन आ तौ हाप्नान, एशबान, इश्नान नु केरान बाक्मा बाक्त।

४२ एजेर आ तौ बिल्हान, जावान नु याकान बाक्मा बाक्त। दीशान आ तौ ऊज नु अरान बाक्सा बाक्त।

एदोम डा पिपपुकी

४३ इस्माएल रागीम पिप दुम्चा क्येडा डोंइती एदोम रागीमी बेओर आ तौ बेला पिप दुम्शा बाक्शो बाक्माक्त। मेको आ सहर दिनहाबा बाक्माक्त। उत्पत्ती ३६:३१-४३

४४ मिनु बेला बेकम नोले बोजा सहर डा जेराह आ तौ योबाब पिप दुम्माक्त।

४५ मिनु योबाब बेकम नोले तेमान डा मुर आन रागी डा हुशाम पिप दुम्माक्त।

४६ मिनु हुशाम बेकम नोले बेदाद आ तौ हादाद पिप दुम्माक्त। मेकोम मोआब रागीम मिदयानी आन कली लडाइ पा फ्रूमी बाक्त। मेको आ सहर आ नें अवीथ बाक्माक्त।

४७ मिनु हादाद बेकम नोले मासेकाह सहर डा सम्ला पिप दुम्माक्त।

४८ मिनु सम्ला बेकम नोले युफ्रेटीस खोला आ नेक्था डा रेहोबोथ डा शावल पिप दुम्माक्त।

४९ मिनु शावल बेकम नोले आकबोर आ तौ बाल-हनान पिप दुम्माक्त।



- 50 मिनु बाल-हनान बेकम नोले हादाद पिप दुम्माक्त। मेको आ सहर आ नें पाही बाक्माक्त। मेको आ मीश आ नें मेहेताबेल बाक्माक्त। मेको मात्रेद आ तमी, मे-जाहाब आ चच बाक्माक्त।
- 51 मिनु हादाद बेक्माक्त। एदोम रे दुम्शो थरपुकी तिम्ना, अल्याह, येथेथ,
- 52 ओहोली-बामा, एलाह, पिनोन,
- 53 केनाज, तेमान, मिब्सार,
- 54 मरदीएल नु यिराम बाक्मा बाक्त। मेको नेल्ल एदोम रे दुम्शो थर बाक्मा बाक्त।

## 2

इस्त्राएल माइशो याकूब आ तौ

- 1 इस्त्राएल आ तौ रूबेन, सिमियोन, लेवी, यहूदा, इस्साकार, जबूलून,  
2 दान, योसेफ, बेन्यामीन, नाप्ताली, गाद नु आशेर बाक्मा बाक्त। उत्पत्ती ३५:२२-२६

यहूदा आ तौ चच

इतिहास ४:-

- 3 यहूदा आ तौ एर, ओनान नु शेलाह बाक्मा बाक्त। मेको आन ममा कनानी मीश बाथ-शुआ बाक्माक्त। मिनु यहूदा आ डोंडती थिशो तौ एरमी परमप्रभु यावे आ डोंडती मरिम्शो पवा बाक्त। मोपतीके परमप्रभु यावेमी मेको कली सदा बाक्त। उत्पत्ती ३८:१-७
- 4 मिनु यहूदा आ चाइमी तामारमी यहूदा रे पा पेरेस नु जेराह थिम्सी बाक्त। मिनु यहूदा आ तौ नेल्ल पा ५ जना दुम्मा बाक्त। उत्पत्ती ३८:२७-३०
- 5 पेरेस आ तौ हेस्रोन नु हामुल बाक्सा बाक्त। उत्पत्ती ४६:१२
- 6 जेराह आ तौ जिफ्री, एथान, हेमान कल्कोल नु दारा बाक्मा बाक्त। मेको नेल्ल ५ जना बाक्मा बाक्त।
- 7 कारमी आ तौ आकान बाक्माक्त। मेकोमी इस्त्राएली आन कली शुश श्येत गेवा बाक्त। परमप्रभु आ थोत्रक लदा बाक्त। यहोसु ७:-
- 8 मिनु एथान आ तौ अजारयाह बाक्माक्त।

राम आ तौ चच

- 9 हेस्रोन आ तौ येराहमेल, राम नु कलूबै बाक्मा बाक्त। रूथ ४:१९-२२; मत्ती १:३
- 10 राम अम्मीनादाब आ आफ बाक्माक्त। अम्मीनादाब नहशोन आ आफ बाक्माक्त। मेको यहूदा आ तौ आन दाते डा नेल्ल क्येडा ठेयब बाक्माक्त। गन्ती १:७; गन्ती २:३; गन्ती ७:११-१२
- 11 नहशोन साल्मा आ आफ बाक्माक्त। साल्मा बोआज आ आफ बाक्माक्त।
- 12 बोआज ओबेद आ आफ बाक्माक्त। ओबेद येस्से आ आफ बाक्माक्त।
- 13 येस्से एलीआब आ आफ बाक्माक्त। मेको आ डोंडती थिशो तौ बाक्माक्त। मेको आ माइला अबीनादाब, साइला शिमेआ, १सामुएल १६:५-१०
- 14 काइला नेथनेल, अन्तरे रदाइ,
- 15 जन्तरे ओसेम नु कान्छा दाऊद बाक्मा बाक्त। १सामुएल १७:१२
- 16 मेको आन समी सेरूयाह नु अबीगेल बाक्सा बाक्त। सेरूयाह आ तौ अबीशै, योआब नु आसाहेल सां बाक्मा बाक्त। २सामुएल २:१८
- 17 अबीगेलम आमासा थिवा बाक्त। मेको आ आफ इश्माएली येथेर बाक्माक्त। २सामुएल १७:२५
- कालेब आ तौ चच
- 18 हेस्रोन आ तौ कालेबमी आ मीश अजुबाह नु येरीओथ रे पा तमी तौ थिवा बाक्त। मेको आ तौ येशेर, शोबाब नु अरदोन बाक्मा बाक्त। १इतिहास २:९,४२
- 19 मिनु अजुबाह बेकम नोले कालेबमी एफ्राथ कली ग्युंबे पवा बाक्त। मिनु मेकोमी हुर थिवा बाक्त। १इतिहास २:५०
- 20 मिनु हुर आ तौ ऊरी बाक्माक्त। ऊरी आ तौ बेजालेल बाक्माक्त। प्रस्थान ३१:२

21 मिनू हेसोन ६० बर्स दुम्मेनु, माकीर आ तमी नु ग्युंवे पवा बाक्त। मेको गिलाद आ समी बाक्माक्त। मिनू हेसोन मेको नु बाक्शा सेगुब थिवा बाक्त।

22 मिनू सेगुब याडर आ आफ बाक्माक्त। याडरम गिलाद डा २३ सहर सासन पवा बाक्त। न्यायाधीस १०:३-६; १रॉजा ४:१३

23 तन्न गेशुर नु अराम आस राज्य निक्शीमी मेको रे हव्वोथ-याडर, केनाथ नु आ नेक्था डा सहर ६० ओटा सहर लडाइ पा प्राशा आस के सेल्से बाक्त। मेको नेल्ल माकीर आ तौ बाक्मा बाक्त। माकीर चहं गिलाद आ आफ बाक्माक्त।

24 हेसोन कालेब-एफ्राथाह सहरम बेकम नोले हेसोन आ मीश अबीयाहम मेको के अशहुर थिवा बाक्त। मेको तेकोहा आ आफ बाक्माक्त। १इतिहास ४:५

### येराहमेल आ तौ चच

25 हेसोन आ डोंइती थिशो तौ येराहमेल बाक्माक्त। येराहमेल आ डोंइती थिशो तौ राम बाक्माक्त। मिनू नोले डा तौ बुनाह, ओरेन, ओसेम नु अहीयाह बाक्मा बाक्त। इतिहास २:९

26 येराहमेल के अर्को मीश का यो बाक्माक्त। मेको आ नें अतारा बाक्माक्त। मेकोमी ओनाम थिवा बाक्त।

27 येराहमेल आ डोंइती थिशो तौ राम आ तौ मास, यामीन नु एकेर बाक्मा बाक्त।

28 ओनाम आ तौ शम्माइ नु यादा बाक्सा बाक्त। मिनू शम्माइ आ तौ नादाब नु अबीशुर बाक्सा बाक्त।

29 अबीशुर आ मीश आ नें अबीहेल बाक्माक्त। मेकोमी अहबान नु मोलीद थिवा बाक्त।

30 नादाब आ तौ सेलेद नु अप्पाइम बाक्सा बाक्त। मिनू सेलेद आल मथिथु बेक्माक्त।

31 अप्पाइम आ तौ इशी बाक्माक्त। मिनू इशी आ तौ शेशान बाक्माक्त। शेशान आ तौ अहलै बाक्माक्त।

32 शम्माइ आ लोकब यादा आ तौ येथेर नु योनाथन बाक्सा बाक्त। मिनू येथेर आल मथिथु बेक्माक्त।

33 योनाथन आ तौ पेलेथ नु जाजा बाक्सा बाक्त। मेको नेल्ल येराहमेल आ तौ चच बाक्मा बाक्त।

34 मिनू शेशान के तौ मबाक्म। तमी ला बाक्मा बाक्त। शेशान के इजीप्त डा यारहा माइरशो वाइल का बाक्माक्त। १इतिहास २:३१; गन्ती२७:७

35 मिनू शेशानमी आ तमी का कली आ वाइल यारहा नु ग्युंवे पदा बाक्त। मिनू आ तमीमी अत्ते थिवा बाक्त।

36 अत्ते नाथान आ आफ बाक्माक्त। नाथान जाबाद आ आफ बाक्माक्त।

37 जाबाद एफलाल आ आफ बाक्माक्त। एफलाल ओबेद आ आफ बाक्माक्त।

38 ओबेद येहू आ आफ बाक्माक्त। येहू अजारयाह आ आफ बाक्माक्त।

39 अजारयाह हेलेस आ आफ बाक्माक्त। हेलेस एलेआसाह आ आफ बाक्माक्त।

40 एलेआसाह सिस्माइ आ आफ बाक्माक्त। सिस्माइ शाल्लुम आ आफ बाक्माक्त।

41 शाल्लुम येकाम्याह आ आफ बाक्माक्त। येकाम्याह एली-शामा आ आफ बाक्माक्त।

### कालेब आ तौ चच युइ

42 येराहमेल आ लोकब कालेब आ डोंइती थिशो तौ मेशाह बाक्माक्त। मेको कली हिबू लोव्रमी मारेशा यो देंसीब, मेको आ तौ जीफ बाक्माक्त। मारेशा आ तौपुकी हेब्रोन आ मुर बाक्मा बाक्त। १इतिहास २:१८

43 हेब्रोन आ तौ कोराह, ताप्पुआह, रेकेम नु शेमा बाक्मा बाक्त।

44 शेमा राहाम आ आफ बाक्माक्त। मिनू रहम योरकेआम आ आफ बाक्माक्त। रेकेम शम्माइ आ आफ बाक्माक्त।

45 शम्माइ आ तौ माओन बाक्माक्त। माओन आ तौ बेथ-सुर बाक्माक्त।

46 कालेब आ अर्को मीश एफाहमी हारान, मोचा नु गाजेज थिवा बाक्त। मिनू हारान गाजेज आ आफ बाक्माक्त।

47 याहदे आ तौ रेगेम, योथाम, गेशान, पेलेत, एफाह नु शाफ बाक्मा बाक्त।

48 कालेब आ अर्को मीश माकाहमी शेबेर नु तिरहानाह थिवा बाक्त।

49 मेकोमी मदमन्ना आ आफ शाफ, मकबेनाह आ आफ शेवा नु गिबा आ आफ थिवा बाक्त। कालेब आ तमी अकसा बाक्माक्त। यहोसु १५:१६; न्यायाधीस १:१२

50 मेको कालेब आ तौ चच युड बाक्मा बाक्त। कालेब आ मीश एफ्राथाह आ डोंडती थिशो तौ हुर बाक्माक्त। हुर आ तौ शोबाल किरयथ-यारीम डा मुर आन आफ बाक्माक्त। †इतिहास २:१९

51 साल्मा बेथलेहेम आ आफ बाक्माक्त। हारेफ बेथ-गादेर आ आफ बाक्माक्त।

52 किरयथ-यारीम आ किकी पिपी शोबाल के अर्को तौ यो बाक्मा बाक्त। मेको हारोए नु मेनुहोथ सहर डा आधा मुर बाक्मा बाक्त।

53 मिनु किरयथ-यारीम सहरम बाक्शो खिं खिं डा मुर इथ्री, पूथी, शुमाथी नु मिश्री बाक्मा बाक्त। मेकोपुकी रे सोराथी नु एस्ताओली दुम्मा बाक्त। †इतिहास ४:२

54 साल्मा आ तौ बेथलेहेम, नेतोफाह अत्रोथ-बेथ-योआब नु मानाहाथ सहर डा आधा मुर नु सोराह सहर डा मुर बाक्मा बाक्त। †इतिहास ९:१६

55 याबेस सहरम बाक्ब मेको आन खिं खिं डा मुर तिराथी, शिमेआथ आ खिं डा मुरपुकी नु सुकाथी बाक्मा बाक्त। मेको हम्माथ सहर रे जाक्शो केनी बाक्मा बाक्त। मेको आन किकी पिपी रेकाब बाक्माक्त। येरमीया ३५:-

### 3

#### दाऊद आ तौपुकी

1 हेब्रोन सहरम थिशो दाऊद आ तौ सु सु बाक्मा बाक्त देशा हना, आ डोंडती थिशो तौ अम्मोन, दाऊद आ मीश येज्रेल डा अहीनोआम के बाक्माक्त। नोले डा तौ दानीएल, दाऊद आ मीश कारमेल डा अबीगेल के बाक्माक्त।

2 नोले डा तौ अब्सालोम, दाऊद आ मीश गेशुर डा पिप तल्लै आ तमी माकाह के बाक्माक्त। नोले डा तौ अदोनीयाह, दाऊद आ मीश हग्गीथ के बाक्माक्त। २सामुएल ३:२-५

3 नोले डा तौ शेफत्याह, दाऊद आ मीश अबीतल के बाक्माक्त। नोले डा तौ इथ्रेआम, दाऊद आ मीश एग्लाह के बाक्माक्त।

4 मेको नेल्ल हेब्रोन सहरम थिशो दाऊद आ तौ बाक्मा बाक्त। दाऊदमी हेब्रोन सहरम ७ बर्स ६ महिना सासन पवा बाक्त। मिनु यरूसलेमम ३३ बर्स सासन पवा बाक्त।

5 यरूसलेम सहरम थिशो दाऊद आ तौ सु सु बाक्मा बाक्त देशा हना, शिमेआ, शोबाब, नाथान नु सोलोमन बाक्मा बाक्त। मेको ४ जना अम्मीएल आ तमी बाथ-शुआम थिवा बाक्त। †इतिहास १४:५-७; २सामुएल ५:१४-१६

6 अरु यरूसलेम सहरम दाऊद आ थिशो तौ इभार, एली-शामा, एली-फेलेत,

7 नोगाह, नेफेग, याफीया,

8 एली-शामा, एली-आदा नु एली-फेलेत ९ जना तौ बाक्मा बाक्त।

9 अरु चाक्शो मीश आन तौपुकी प्रोंडशा, मेको दाऊद आ तौ बाक्मा बाक्त। मिनु मेको आन समी तामार बाक्माक्त। २सामुएल १३:१

#### सोलोमन आ तौ चच युड

10 सोलोमन आ तौ चच युड सु सु बाक्मा बाक्त देशा हना, रेहोबाम आ तौ बाक्माक्त। रेहोबाम आ तौ अबीयाह बाक्माक्त। अबीयाह आ तौ आसा बाक्माक्त। आसा आ तौ येहो-शाफात बाक्माक्त। मत्ती १:७-१२

11 येहो-शाफात आ तौ योराम बाक्माक्त। योराम आ तौ अहाज्याह बाक्माक्त। अहाज्याह आ तौ योआश बाक्माक्त।

12 योआश आ तौ अमस्याह बाक्माक्त। अमस्याह आ तौ अजारयाह बाक्माक्त। अजारयाह आ तौ योथाम बाक्माक्त।

13 योथाम आ तौ आहाज बाक्माक्त। आहाज आ तौ हिज्कीयाह बाक्माक्त। हिज्कीयाह आ तौ मनस्से बाक्माक्त।

14 मनस्से आ तौ आमोन बाक्माक्त। अम्मोन आ तौ योसीयाह बाक्माक्त।

15 योसीयाह आ डोंइती थिशो तौ योहानान बाक्माक्त। योसीयाह आ माइला येहो-याकीम, आ साइला सिदकीयाह नु आ कान्छा शाल्लुम बाक्माक्त।

16 येहो-याकीम आ तौ चच युइ सु सु बाक्मा बाक्त देंशा हना, आ तौ येकोन्याह बाक्माक्त। येकोन्याह आ तौ सिदकीयाह बाक्माक्त। २इतिहास ३६:९-१०

17 मिनु ग्याइश्शा लाइक्चा पुंइसीशो येकोन्याह आ तौ शाल्तीएल बाक्माक्त।

18 अरु ग्याइश्शा लाइक्चा पुंइसीशो माल्कीराम, पेदायाह, शेनास्सार, येकाम्याह, होशामा नु नेदाब्याह बाक्मा बाक्त।

19 पेदायाह आ तौ जेरूब-बाबेल नु शिमेइ बाक्सा बाक्त। जेरूब-बाबेल आ तौ मेशुल्लाम नु हनान्याह बाक्सा बाक्त। मेको आस समी शेलोमीथ बाक्माक्त। एज्रा ३:२,८

20 अर्को हशुबाह, ओहेल, बेरेक्याह, हासादीयाह नु युशब-हेसेद ५ जना तौ बाक्मा बाक्त।

21 हनान्याह आ तौ पेलात्याह नु येशायाह बाक्सा बाक्त। येशायाह आ तौ रेफायाह बाक्माक्त। रेफायाह आ तौ अरनान बाक्माक्त। अरनान आ तौ ओबदिया बाक्माक्त। ओबदिया आ तौ शेकन्याह बाक्माक्त।

22 शेकन्याह आ तौ शेमायाह बाक्माक्त। शेमायाह आ तौ हत्तुश, इगाल, बारयाह, नेआरयाह नु शाफात नेल्ल पा ६ जना तौ बाक्मा बाक्त।

23 नेआरयाह आ तौ एली-ओ-एनाइ, हिज्कीयाह नु अज्जीकाम सां बाक्मा बाक्त।

24 एली-ओ-एनाइ आ तौ होदावीयाह, एल्याशीब, पेलायाह, अक्कुब, योहानान, देलायाह नु अनानी नेल्ल ७ जना बाक्मा बाक्त।

## 4

### यहूदा आ तौ चच युइ

1 यहूदा आ तौ पेरिस, हेस्मोन, कारमी, हुर नु शोबाल बाक्मा बाक्त। १इतिहास २:४-५; १इतिहास ७:१९, ५०

2 शोबाल आ तौ रेआयाह, याहाथ आ आफ बाक्माक्त। याहाथ अहुमै नु लाहाद आस आफ बाक्माक्त। मेको सोराथी आन चच युइ बाक्मा बाक्त। १इतिहास २:५३

3 एताम आ तौ येज्जेल, इश्मा नु इदबाश बाक्मा बाक्त। मेको आन समी आ नें हास्सल-एल-पोनी बाक्माक्त।

4 पेनुएल गेदोर आ आफ बाक्माक्त। एजेर हुशाह आ आफ बाक्माक्त। मिनु कालेब आ मीश एफ्राथाह आ डोंइती थिशो तौ हुर बाक्माक्त। मेको आ तौ चच युइ बेथलेहेम डा मुर बाक्मा बाक्त। १इतिहास २:१९, ५०

5 तेकोहा आ आफ अश्हुर के मीश निकशी बाक्सा बाक्त। मेको का आ नें हेलाह नु अर्को आ नें नाराह बाक्माक्त।

6 नाराहमी अहुज्जाम, हेफेर, तेमेनी नु हाहाशतारी थिवा बाक्त। एको नाराह आ तौ बाक्मा बाक्त।

7 हेलाह आ तौ सेरेथ, इच्छार नु एथान बाक्मा बाक्त।

8 कोस आनुब नु जोबेबा आस आफ बाक्माक्त। मिनु कोस हारुम आ तौ अहारहेल आ चच युइ आन किकी पिपी बाक्माक्त।

9 मिनु याबेस माइश्शो मुर का बाक्माक्त। मेको आ लोक्ब आन क्येडा शुश मान ताइब बाक्माक्त। मेको आ ममामी मेको कली श्येत पा थितीके मेको आ नें याबेस वोइश्शो बाक्माक्त।

10 मिनु याबेसमी इस्राएली आन परमप्रभु कली “आं कली आसीक गेने। आं कली रू तेम्शा गेयीनी। गे गो नु बाक्कीन। आं कली श्येत रे डोन वोइय्यीनी” दे पुना बाक्त। मिनु परमप्रभुमी मेको आ पुंइशो गेवा बाक्त।

11 शुहाह आ लोक्ब के लुब मेहीर आ आफ बाक्माक्त। मेहीर एश्तोन आ आफ बाक्माक्त।

12 एश्तोन बेथ-राफा, पासओह नु तेहीन्नाह आन आफ बाक्माक्त। तेहीन्नाह इर-नाहाश आ आफ बाक्माक्त। मेको रेकाह आ मुर बाक्मा बाक्त।

13 केनाज आ तौ ओथनीएल नु सेरायाह बाक्सा बाक्त। ओथनीएल आ तौ हथाथ नु मेओनोथाइ बाक्सा बाक्त। यहोसु १५:१७; १न्यायाधीस १:१३

14 मेओनोथाइ ओफ्रा आ आफ बाक्माक्त। सेरायाह योआब आ आफ बाक्माक्त। योआब गे-हाराशीम आ आफ बाक्माक्त। मेको मुरपुकी मार मार सेल्स जोक्ब बाक्तीके मेको आन नें मेकोन बाक्माक्त।

15 यपुन्ने आ तौ कालेब आ तौ इरू, एलाह नु नाआम बाक्मा बाक्त। एलाह आ तौ केनाज बाक्माक्त। गन्ती १३:६; गन्ती १४:६

16 येहल्लेल आ तौ जीफ, जीफाह, तिरया नु असारेल बाक्मा बाक्त।

17 एजाह आ तौ येथेर, मेरेद, एफेर नु यालोन बाक्मा बाक्त। मेरेदमी फाराओ आ तमी बिथीयाह ग्युंवे पवा बाक्त। मेकोमी मिरयाम, शम्माइ नु इशबा थिवा बाक्त। इशबा एश्तेमोआ आ आफ बाक्माक्त।

18 मेरेद आ यहूदी मीशेमी येरेद, हेबेर नु येकुथीएल थिवा बाक्त। येरेद गेदोर आ आफ बाक्माक्त। हेबेर सोको आ आफ बाक्माक्त। येकुथीएल जानोह आ आफ बाक्माक्त।

19 होदीयाहम नाहाम आ समी ग्युंवे पवा बाक्त। मेको आ तौपुकी गारम डा कैलाह आ थर नु माकाथी एश्तेमोआ आ थर डा किकी पिपी बाक्मा बाक्त।

20 शिमोन आ तौ अम्नोन, रिन्नाह, बेन-हानान नु तिलोन बाक्मा बाक्त। इशी आ तौ जोहेथ नु बेन-जोहेथ बाक्सा बाक्त।

### शेलाह आ तौ चच युइ

21 यहूदा आ तौ का शेलाह बाक्माक्त। शेलाह आ तौ एर नु लेकाह सहरम बाक्बपुकी बाक्मा बाक्त। आ तौ लादाह नु मारेशा सहरम बाक्बपुकी बाक्मा बाक्त। बेथ-अशबेया सहरम बाक्ब रिम्शो सुती श्येले के वा प्रोत्रब नु गेय पाइब आ चच युइ बाक्मा बाक्त। १इतिहास २:३

22 आ तौ योकीम नु कोजेबा सहरम बाक्ब मुर नु आ तौ योआश नु सारब बाक्मा बाक्त। योआश नु सारबमी मोआबी मीश आल ग्युंवे पाम्से बाक्त। तन्न लेहेम सहर लेशशा जाक्शो बाक्सा बाक्त। (एको लोत्र थम माइत बाक्त।) बेथलेहेम बाक्म कौं, लाशुबी-लाहेम सहर बाक्म, मेको मतुंडसीब।

23 मेकोपुकी खप के ग्योत्रब सेल्ब बाक्मा बाक्त। मिनु नेताइम नु गेदेराह सहरम बाक्शा, पिप आ गेय पाइब बाक्मा बाक्त।

### सिमियोन आ तौ चच युइ

24 सिमियोन आ तौपुकी नेमुएल, यामीन, यारीब, जेराह नु शावल बाक्मा बाक्त। उत्पत्ती ४६:१०

25 शावल आ तौ शल्लुम बाक्माक्त। शल्लुम आ तौ मिब्सांम बाक्माक्त। मिब्सांम आ तौ मिश्मा बाक्माक्त।

26 मिश्मा आ तौ हाम्मुएल बाक्माक्त। हाम्मुएल आ तौ जाक्कुर बाक्माक्त। जाक्कुर आ तौ शिमेइ बाक्माक्त।

27 शिमेइ के १६ जना तौ नु ६ जना तमी बाक्मा बाक्त। तन्न मेको आ लोकब के शुश आल मबाक्मा बाक्त। मोपतीके मेको आन खिं डा मुर यहूदा डा मुर खोदेशो पा शुश मडुम्मा बाक्त।

28 मेकोपुकी बेयर-शेबा, मोलादा, हासार-शुआल, यहोसु १९:२-८

29 बिल्हाह, एसेम नु तोलाद,

30 बेथुएल, होरमा नु सिकलाग,

31 बेथ-मारकाबोथ, हासार-सुसीम, बेथ-बीरी नु शा-आराइम सहरमी बाक्बाक्मा बाक्त। दाऊदम सासन मपवा सम्म सिमियोन आ थर डा मुर मेको सहरम बाक्शो बाक्मा बाक्त।

32 मेकोपुकी अर्को बाक्तीके एताम, ऐन, रिम्मोन, तोकेन नु आशान नेल्ल पा ५ सहर बाक्मा बाक्त।

33 मेको सहर आन एर ओथ डा गाउंपुकीम बाल सहर सम्म आन बाक्तीके बाक्मा बाक्त। मिनु मेकोपुकीमी आन नें तौ चच युइ आन नें ब्रेकना ब्रेकन बाक्शो बाक्मा बाक्त।

34 मेको आन खिं खिं डा ठेयब मुर सु सु बाक्मा बाक्त देशा हना, मेशोबाब, याम्लेक, अमस्याह आ तौ योशाह,

35 योएल, येहू योशीबीयाह आ तौ बाक्मा बाक्त। योशीबीयाह सेरायाह आ तौ बाक्माक्त। सेरायाह असीएल आ तौ बाक्माक्त।

36 एली-ओ-एनाइ, याकोबाह, येशोहायाह, आसायाह, अदीएल, येसीमीएल बेनायाह,

37 जीजा शिफी आ तौ बाक्मा बाक्त। शिफी अल्लोन आ तौ बाक्माक्त। अल्लोन येदायाह आ तौ बाक्माक्त। येदायाह शिमी आ तौ बाक्माक्त। शिमी शेमायाह आ तौ बाक्माक्त।

38 मोदंशो आन नें ब्रेक्शो मुर आन खिं खिं डा ठेयब मुर बाक्मा बाक्त। मिनु आन खिं डा मुर सोशा बोशा शुश दुम्मा बाक्त।

39 मेको आन बस्तु भाव योव्रतीके मालना मालन दिंम नेल्ल आ पूबर्ब गेदोर सहर सम्म लमा बाक्त।

40 मेकेर शुश नु रिम्शो बस्तु भाव योव्रतीके थित्मे बाक्त। मेकेर मारेइ रेयके मनेसीब रिम्शो ठेयब दिंम बाक्माक्त। मेको क्येडा डोंइती हाम आ मुर बाक्शो बाक्मा बाक्त। इतिहास १:८-१६

41 यहूदा डा पिप हिज्कीयाहम सासन पवा ना मेको नें ब्रेक्शो मुरपुकीम गेदोर सहरम बाक्ब हाम नु मेउनीम आस मुर आन ताम्बु नु खिं खतम सेल्मे बाक्त। मुर आन कली सदमे बाक्त। मेकेर रिम्शो बस्तु भाव योव्रतीके बाक्शा, मेक उइ आंमान बाक्शो बाक्मा बाक्त। २रजा १८:३

42 मिनु मेको सिमियोन आ थर डा ५ सहे खोइ मुरुमी सेइर पहाड कली लडाइ तोमे बाक्त। मेको आन ठेयब मुर इशी आ तौ पेलात्याह, नेआरयाह, रेफायाह नु उज्जीएल बाक्मा बाक्त।

43 मेकोपुकीम प्रोकशा लीशो अमालेकी नेल्ल आन कली साइशो बाक्मा बाक्त। मिनु सिमियोन आ थर डा मुर मुल सम्म मेक उइ बाक्शो बाक्नीम। १सामुएल १५:३-८

## 5

### रूबेन आ तौ चच युइ

1 इस्त्राएल आ तौ आन दाते डा नेल्ल क्येडा डोंइती थिशो रूबेन बाक्माक्त। नेल्ल क्येडा डोंइती थिशो बाक्त हना यो, आ आफ आ मीश नु इप्तीके, आ डोंइती थिशो तौ आ तचा डा अधिकार इस्त्राएल आ तौ योसेफ आ तौ आस कली गेशो बाक्माक्त। मिनु रूबेन आ नें, डोंइती डा तौ आ नें ब्रेक्तीकेम मब्रेक्शो बाक्माक्त। उत्पत्ती ३५:२२; उत्पत्ती ४९:३-४

2 मिनु यहूदा आ लोकब आन दातेमी नेल्ल क्येडा ठेयब दुम्त हना यो, मेको रे पा सासन पाइब का मूत हना यो, डोंइती थिशो तौ आ अधिकार योसेफ केन दुम्शो बाक्माक्त। उत्पत्ती ४९:८, १०; ब्यवस्था ३३:७; उत्पत्ती ४९:२२; ब्यवस्था ३३:१३-१७

3 इस्त्राएल आ डोंइती थिशो तौ रूबेन बाक्त। रूबेन आ तौ हनोक, पल्लु, हेस्रोन नु कारमी बाक्मा बाक्त। प्रस्थान ६:१४

4 योएल आ तौ शेमायाह बाक्माक्त। शेमायाह आ तौ गोग बाक्माक्त। गोग आ तौ शिमेइ बाक्माक्त।

5 शिमेइ आ तौ मीकाह बाक्माक्त। मीकाह आ तौ रेआयाह बाक्माक्त। रेआयाह आ तौ बाल बाक्माक्त।

6 बाल आ तौ बेयराह बाक्माक्त। मिनु मेको अस्सुर डा पिप तिल्लथ-पिलेसेरमी ग्याइशशा लाइक्चा पुंइसे बाक्त। मेको रूबेन आ मुर आन दाते डा ठेयब मुर का बाक्माक्त। इतिहास ५:२६

7 रूबेन आ थर डा खिं खिं डा मुर आन नें ब्रेक्तीकेमी ब्रेक्शो बाक्मा बाक्त। मेको आन ठेयब मुर यिएल, जकरिया नु

8 आजाज आ तौ बेला बाक्मा बाक्त। बेला आ तौ शेमा बाक्माक्त। मेको योएल आ खिं डा मुर बाक्मा बाक्त। मेकोपुकी आरोएर सहरम बाक्शो बाक्मा बाक्त। आन रागी नेबो रे बाल-मेओन सम्म बाक्माक्त।

9 मेकोपुकीम पूबर्ब गे गोरशो रागी आ डोंइती युफ्रेटीस खोला आ ओथ हांबु सम्म आन के सेल्शो बाक्मा बाक्त। मारदे हना गिलादम बाक्मानु, आन बस्तु भाव शुश दुम्शो बाक्मा बाक्त।

10 मेकोपुकी सावल आ पालाम हाग्री नु लडाइ पा ग्राशो बाक्मा बाक्त। मिनु मेकोपुकीम गिलाद आ पूबर्ब नेल्लेमी आन ताम्बुमी बाक्शो बाक्मा बाक्त।

### गाद आ तौ चच युइ

- 11 गाद आ मुरपुकी रूबेन आ मुर आन नेक्था बाशान रागीम साल्का सम्म बाक्शो बाक्मा बाक्त।
- 12 मेको आन टेयब मुर योएल बाक्माक्त। मेको आ नोले डा शाफाम बाक्माक्त। मेको आस नोले बाशान रागीम यानाइ नु शाफात बाक्सा बाक्त।
- 13 मिनु आन मुर, आन खिं खिं डा मुर सु सु बाक्मा बाक्त देशा हना, मिकाएल, मेशुल्लाम, शेबा, योराइ, याकान, जिआ नु एबेर नेल्ल पा ७ जना बाक्मा बाक्त।
- 14 मेकोपुकी अबीहेल आ तौ हुरी, हुरी आ तौ यारोआह, यारोआह आ तौ गिलाद, गिलाद आ तौ मिकाएल, मिकाएल आ तौ येशीशाइ, येशीशाइ आ तौ याहदो, याहदो आ तौ बूज,
- 15 अब्दीएल आ तौ आही, आही आ तौ गुनी मेको आ खिं खिं डा आन टेयब मुर बाक्मा बाक्त।
- 16 गाद आ मुरपुकी गिलाद, बाशान नु मेको आ नेक्था डा सहर नेल्लेमी नु शारोन डा बस्तु भाव योव्रतीके सम्म बाक्मा बाक्त।
- 17 यहूदा डा पिप योथाम नु इस्राएल डा पिप येरोबामम सासन पाम्से ना मेको आन नें नेल्ल नें ब्रेक्तीकेम ब्रेक्शो बाक्मा बाक्त। २राजा १५:३२; २राजा १४:२३
- 18 रूबेन, गाद नु मनस्से आ उइक्थ थर डा मुर बोल्यो लडाइ पाइब बाक्मा बाक्त। मेको तेक्तीक नु या कुरमे बाक्त। मेको लिब्रा आप्व नु लडाइ पाइब जोक्ब बाक्मा बाक्त। मेको ४४ हजार ७ सहे ६० जना बाक्मा बाक्त। लडाइ पचा कली ठीक दुम्शो बाक्मा बाक्त।
- 19 मिनु हाग्री, येतुरी, नाफीशी नु नोदाब आ मुर नु लडाइ पामे बाक्त।
- 20 मेकोपुकीमी लडाइम परमप्रभु कली “वारच पाइक्की” दे पुंडतीके, मेको आन जोरी सत्रु हाग्री नु अरु सु बाक्तेकम हना यो, आन गुडमी गेवा बाक्त। मारदे हना मेकोपुकीमी थमा सुदमे बाक्त।
- 21 मेकोपुकीमी बस्तु भाव गिश लदमे बाक्त देशा हना, ५० हजार दलओठ, लाख निकशी ५० हजार भेडा, हजार निकशी गधा नु लाख का मुर आन कली ग्याइशशा लदमे बाक्त।
- 22 मेको लडाइम शुश मुर बेक्मा बाक्त। मारदे हना मेको लडाइ परमप्रभु रे पा दुम्शो बाक्माक्त। मिनु मेकोपुकी ग्याइशशा लाइक्चा मपुंडसामा सम्म मेको आन बाक्तीकेम बाक्मा बाक्त।

### मनस्से आ उइक्थ तौ चच युइ

- 23 मनस्से आ उइक्थ थर डा मुर शुश दुम्शो बाक्मा बाक्त। मेको बाशान रागी रे बाल-हेरमोन, सेनीर हेरमोन डांडा सम्म बाक्शो बाक्मा बाक्त। ब्यवस्था ३:८-९
- 24 मेको आन खिं खिं डा मुर आन टेयब मुर सु सु बाक्मा बाक्त देशा हना, एफेर, इशी, एलीएल, अज्जीएल, येरमीया, होदावीयाह नु याहदीएल बाक्मा बाक्त। मेको नेल्ल बोल्यो लडाइ पाइब मुर बाक्मा बाक्त। मेको आन खिं डा टेयब मुर बाक्मा बाक्त।
- 25 तन्न मेकोपुकीम आन किकी पिपी आन परमप्रभु आ पर्वम मरिम्शो पामे बाक्त। मिनु परमप्रभुम मेको आन डोंडती खतम पोक्शो जात डा मुर आन देवता आन कली पूजा पा आन नोले खोदमे बाक्त।
- 26 मोपतीके इस्राएली आन परमप्रभुमी अस्सुर डा पिप पुल, तिल्गथ-पिलेसेरमी कली क्युकगा बाक्त। मिनु मेकोपुकीम रूवेन, गाद नु मनस्से आ उइक्थ थर डा मुर आन कली ग्याइशशा लदमे बाक्त। मेको आन कली हालाह, हाबोर, हारा नु गोजान खोला सम्म लदमे बाक्त। मेको मुल सम्म मेकेर बाक्शो बाक्नीम। २राजा १५:१९; २राजा १५:२९

## 6

### लेवी आ तौ चच युइ

- 1 लेवी आ तौ गेरशोम, कोहाथ नु मेरारी बाक्मा बाक्त।
- 2 कोहाथ आ तौ अग्राम, इच्चार, हेब्रोन नु उज्जीएल बाक्मा बाक्त। प्रस्थान ६:२०; गन्ती २६:५९; मीका ६:४; प्रस्थान ६:२३; गन्ती २६:६०
- 3 अग्राम आ आल हारून, मोसा नु मिरयाम बाक्मा बाक्त। हारून आ तौ नादाब, अबीहु, एलाजर नु इथामार बाक्मा बाक्त। १इतिहास ६:३५-३८

- 4 एलाजर फिनेहास आ आफ बाक्माक्त। फिनेहास अबीशुआ आ आफ बाक्माक्त।
- 5 अबीशुआ बुक्की आ आफ बाक्माक्त। बुक्की उज्जी आ आफ बाक्माक्त।
- 6 उज्जी जेराहीयाह आ आफ बाक्माक्त। जेराहीयाह मेरायोथ आ आफ बाक्माक्त।
- 7 मेरायोथ अमारयाह आ आफ बाक्माक्त। अमारयाह अहीतुब आ आफ बाक्माक्त।
- 8 अहीतुब सादोक आ आफ बाक्माक्त। सादोक अहीमाज आ आफ बाक्माक्त। २सामुएल ८:१७; २सामुएल १५:२७, ३६
- 9 अहीमाज अजारयाह आ आफ बाक्माक्त। अजारयाह योहानान आ आफ बाक्माक्त।
- 10 योहानान अजारयाह आ आफ बाक्माक्त। मेको अजारयाहम सोलोमनमी यरूसलेमम सेल्शो परमप्रभु यावे आ खिमं चढेतीक गेय पाडबाक्माक्त।
- 11 अजारयाह अमारयाह आ आफ बाक्माक्त। अमारयाह अहीतुब आ आफ बाक्माक्त।
- 12 अहीतुब सादोक आ आफ बाक्माक्त। सादोक शाल्लुम आ आफ बाक्माक्त।
- 13 शाल्लुम हिल्लीयाह आ आफ बाक्माक्त। हिल्लीयाह अजारयाह आ आफ बाक्माक्त।
- 14 अजारयाह सेरायाह आ आफ बाक्माक्त। सेरायाह यहो-सादाक आ आफ बाक्माक्त। २राजा २५:१८; एज्रा ७:१; नहेम्याह १२:२६
- 15 मेना परमप्रभु यावेमी यहूदा नु यरूसलेम कली नेबुकदनेसर आ गुडम गेशो बाक्माक्त। मिनु यहो-सादाक यो ग्याइश्शा लाइक्चा पुंडसीशो बाक्माक्त। २राजा २५:२१

### लेवी आ खिं खिं डा मुर

- 16 लेवी आ तौ गेरशोम, कोहाथ नु मेरारी बाक्मा बाक्त। प्रस्थान ६:१६-१९
- 17 गेरशोम आ तौ आस नें लिब्नी नु शिमेइ बाक्सा बाक्त।
- 18 कोहाथ आ तौ अप्राम, इच्छार, हेब्रोन नु उज्जीएल बाक्मा बाक्त।
- 19 मेरारी आ तौ माहली नु मुशी बाक्सा बाक्त। चढेब लेवी आ खिं खिं डा मुर मेको बाक्मा बाक्त।
- 20 गेरशोम आ तौ चच युइ सु सु बाक्मा बाक्त देशा हना, लिब्नी, लिब्नी आ तौ याहाथ, याहाथ आ तौ जिम्माह,
- 21 जिम्माह आ तौ योआह, योआह आ तौ इददो, इददो आ तौ जेराह नु जेरह आ तौ येआथेराइ बाक्मा बाक्त।
- 22 कोहाथ आ तौ चच युइ सु सु बाक्मा बाक्त देशा हना, अम्मीनादाब, अम्मीनादाब आ तौ कोराह, कोराह आ तौ अस्सीर, १इतिहास ९:१९; प्रस्थान ६:२४
- 23 अस्सीर आ तौ एल्काना, एल्काना आ तौ एब्यासाफ, एब्यासाफ आ तौ अस्सीर,
- 24 अस्सीर आ तौ तहाथ, नाहाथ आ तौ उरीएल, उरीएल आ तौ उज्जीयाह, उज्जीयाह आ तौ शावल बाक्मा बाक्त।
- 25 एल्काना आ तौ सु बाक्सा बाक्त देशा हना, अमासै नु अहीमोथ बाक्सा बाक्त।
- 26 अहीमोथ आ तौ एल्काना, एल्काना आ तौ जोफाइ, जोफाइ आ तौ नाहाथ,
- 27 नाहाथ आ तौ एलीआब, एलीआब आ तौ येरोहाम, येरोहाम आ तौ एल्काना नु एल्काना आ तौ सामुएल बाक्मा बाक्त। १सामुएल १:१
- 28 सामुएल आ डोंइती थिशो तौ योएल नु कान्छा अबीयाह बाक्सा बाक्त।
- 29 मेरारी आ तौ सु सु बाक्मा बाक्त देशा हना, माहली, माहली आ तौ लिब्नी, लिब्नी आ तौ शिमेइ, शिमेइ आ तौ उज्जाह,
- 30 उज्जाह आ तौ शिमेआ, शिमेआ आ तौ हग्गीयाह नु हग्गीयाह आ तौ आसायाह बाक्मा बाक्त।

### परमप्रभु कली कुम्सो पाडबपुकी

- 31 दाऊदमी परमप्रभु यावे आ बाक्तीकेम सन्दोस वोदा नोले कुम्सो पाडब आन कली योव्त्रडा बाक्त। २सामुएल ६:१७
- 32 सोलोमनम यरूसलेमम परमप्रभु यावे आ खिं मसेला सम्म मेकोपुकीमी गुम्तीक ताम्बु आ डोंइती कुम्सो पना पन बाक्मा बाक्त। आन पालो पालोम कुम्सो पना पन बाक्मा बाक्त।



33 मेको कुम्सो पाइब नु आन तौ सु सु बाक्मा बाक्त देशा हना, कोहाथ आ खिं डा कुम्सो पाइब हेमान बाक्माक्त। हेमान योएल आ तौ बाक्माक्त। योएल सामुएल आ तौ बाक्माक्त। १इतिहास १५:१७,१९

34 सामुएल एल्काना आ तौ बाक्माक्त। एल्काना येरोहाम आ तौ बाक्माक्त। येहोराम एलीएल आ तौ बाक्माक्त। एलीएल तोआह आ तौ बाक्माक्त। तोआह जूफ आ तौ बाक्माक्त।

35 जूफ एल्काना आ तौ बाक्माक्त। एल्काना माहाथ आ तौ बाक्माक्त। माहाथ अमासै आ तौ बाक्माक्त। अमासै एल्काना आ तौ बाक्माक्त।

36 एल्काना योएल आ तौ बाक्माक्त। योएल अजारयाह आ तौ बाक्माक्त। अजारयाह सेफन्याह आ तौ बाक्माक्त।

37 सेफन्याह तहाथ आ तौ बाक्माक्त। तहाथ अस्सीर आ तौ बाक्माक्त। अस्सीर एब्यासाफ आ तौ बाक्माक्त। एब्यासाफ कोराह आ तौ बाक्माक्त। कोराह इज्हार आ तौ बाक्माक्त।

38 इच्छाह कोहाथ आ तौ बाक्माक्त। कोहाथ लेवी आ तौ बाक्माक्त। लेवी इस्राएल आ तौ बाक्माक्त।

39 हेमान आ लोकब आसाफ आ ग्युरा गे बाक्शो बाक्माक्त। आसाफ बेरेक्याह आ तौ बाक्माक्त। बेरेक्याह शिमेआ आ तौ बाक्माक्त। १इतिहास १५:१७,१९

40 शिमेआ मिकाएल आ तौ बाक्माक्त। मिकाएल बासैयाह आ तौ बाक्माक्त। बासैयाह माल्कीयाह आ तौ बाक्माक्त।

41 माल्कीयाह एथ्नी आ तौ बाक्माक्त। एथ्नी जेराह आ तौ बाक्माक्त। जेरह अदायाह आ तौ बाक्माक्त।

42 अदायाह एथान आ तौ बाक्माक्त। एथान जिम्माह आ तौ बाक्माक्त। जिम्माह शिमेइ आ तौ बाक्माक्त।

43 शिमेइ याहाथ आ तौ बाक्माक्त। याहात गेरशोम आ तौ बाक्माक्त। गेरशोम लेवी आ तौ बाक्माक्त।

44 हेमान आ लोकब मेरारी आ तौ आ पेरा गे बाक्शो बाक्मा बाक्त। अरु सु सु बाक्मा बाक्त देशा हना, एथान किशी आ तौ बाक्माक्त। किशी अब्दी आ तौ बाक्माक्त। अब्दी माल्लुक आ तौ बाक्माक्त। १इतिहास १५:१९

45 माल्लुक हशाब्याह आ तौ बाक्माक्त। हशाब्याह अमास्याह आ तौ बाक्माक्त। अमस्याह हिल्कीयाह आ तौ बाक्माक्त।

46 हिल्कीयाह अम्जी आ तौ बाक्माक्त। अम्जी बानी आ तौ बाक्माक्त। बानी शेमेर आ तौ बाक्माक्त।

47 शेमेर माहली आ तौ बाक्माक्त। माहली मुशी आ तौ बाक्माक्त। मुशी मेरारी आ तौ बाक्माक्त। मेरारी लेवी आ तौ बाक्माक्त।

48 मेको आन लोकब लेवी आ मुर नेल्ल परमप्रभु आ बाक्तीक ताम्बु डा मार मार पचा कली योव्रशो बाक्मा बाक्त।

### हारून आ चच युइ

49 मिनु हारून नु आ तौपुकीमी ला चढेतीकेम चोशा चढेतीक नु धूप चोशा चढेतीकेम चढेमे बाक्त। मेकोम नेल्ल क्येडा चोव्रखो कोठा डा गेय यो पामे बाक्त। इस्राएली आन पर्वम पाप क्याम्तीक गेय पामे बाक्त। परमप्रभु आ गेय पाइब मोसामी दोदेशो पा अरेवा मोदेशो पा पामे बाक्त। प्रस्थान २८:१; लेवी १६:-

50 हारून आ तौपुकी सु सु बाक्मा बाक्त देशा हना, एलाजर, एलाजर आ तौ फिनेहास, फिनेहास आ तौ अबीशुआ, १इतिहास ५:१०-३४

51 अबीशुआ आ तौ बुक्की, बुक्की आ तौ उज्जी, उज्जी आ तौ जेराहीयाह,

52 जेरह आ तौ मेरायोथ, मेरायोथ आ तौ अमारयाह, अमारयाह आ तौ अहीतुब,

53 अहीतुब आ तौ सादोक, सादोक आ तौ अहीमाज बाक्मा बाक्त।

### लेवी आन सहरपुकी

यहोसु २१:-

54 हारून आ तौ कोहाथ आ खिं खिं डा मुर नेल्ल आन क्येडा डोंडती योव्रशा गेशो बाक्तीके तेको बाक्मा बाक्त देशा हना,

55 मेको आन कली यहूदा आ थेरशो रू रे हेब्रोन सहर नु आ एर ओंथ डा बस्तु भाव योव्रतीके गेमे बाक्त।

56 तन्न मेको सहर डा रू नु आ एर ओंथ डा गाउंपुकी यपुन्ने आ तौ कालेब कली गेमे बाक्त।

57 हारून आ तौ आन कली प्रोक्शा लशा ब्रोंडशा बाक्तीक सहर हेब्रोन, लिब्ना नु आ एर ओंथ डा बस्तु भाव योव्रतीके, यत्तीर, एश्तेमोआ, नु आ एर ओंथ डा बस्तु भाव योव्रतीके,

58 हीलेन नु आ एर ओंथ डा बस्तु भाव योव्रतीके, देबीर नु आ एर ओंथ डा बस्तु भाव योव्रतीके,

59 आशान नु आ एर ओंथ डा बस्तु भाव योव्रतीके, बेथ-शेमेश नु आ एर ओंथ डा बस्तु भाव योव्रतीके नेल्ल गेमे बाक्त।

60 मिनु बेन्यामीन आ थर डा मुर आन थेरशो रू रे मार गेमे बाक्त देशा हना, गेबा नु आ एर ओंथ डा बस्तु भाव योव्रतीके, आलेमेथ नु आ एर ओंथ डा बस्तु भाव योव्रतीके, अनाथोथ नु आ एर ओंथ डा बस्तु भाव योव्रतीके गेमे बाक्त। मिनु कोहाथ आ खिं खिं डा मुर आन कली योक्सीशो सहर नेल्ल १३ ओटा बाक्मा बाक्त।

61 मिनु कोहाथ आ लीशो मुर आन कली मनस्से आ आधा थर डा मुर आन रे बाजी आप्शा १० ओटा सहर गेमे बाक्त।

62 गेरशोम आ खिं खिं डा मुर आन कली बाजी आप्शा इस्साकार आ थर, आशेर आ थर, नाप्ताली आ थर नु बाशान रागीम बाक्ब मनस्से आ आधा थर डा मुर आन थेरशो रू रे १३ ओटा सहर गेमे बाक्त।

63 मेरारी आ खिं खिं डा मुर आन कली बाजी आप्शा रूबेन आ थर, गाद आ थर नु जबूलून आ थर आन थेरशो रू रे १२ ओटा सहर गेमे बाक्त।

64 मोपा इस्राएलीपुकीमी लेवी आन कली सहर नु आन एर ओंथ डा बस्तु भाव योव्रतीके गेमे बाक्त।

65 मेकोपुकीमी यो बाजी आप्शा, यहूदा आ थर, सिमियोन आ थर नु बेन्यामीन आ थर आन थेरशो रू रे मेको नें ब्रेक्शो सहरपुकी गेमे बाक्त।

66 कोहाथ आ तौ आन खिं डा का निक्शी मुर एफ्राइम आ थर डा मुर आन थेरशो रू रे सहरपुकी तामे बाक्त।

67 मेकोपुकीमी मेको आन कली पहाड रागी डा शेकेम सहर नु आ एर ओंथ डा बस्तु भाव योव्रतीके एफ्राइम पहड नु गेजेर सहर नु आ बस्तु भाव योव्रतीक,

68 योक्माम सहर नु आ एर ओंथ डा बस्तु भाव योव्रतीके, बेथ-होरोन सहर नु आ एर ओंथ डा बस्तु भाव योव्रतीके,

69 आइयालोन सहर नु आ एर ओंथ डा बस्तु भाव योव्रतीके, गाथ-रिम्मोन सहर नु आ एर ओंथ डा बस्तु भाव योव्रतीके तामे बाक्त।

70 मनस्से आ उडक्थ थर डा मुर आन थेरशो रू रे आनेर सहर नु आ एर ओंथ डा बस्तु भाव योव्रतीके, बिलाम सहर नु आ एर ओंथ डा बस्तु भाव योव्रतीके मेको नेल्ल कोहाथ आ लीशो मुरपुकीमी तामे बाक्त।

71 मनस्से आ उडक्थ थर डा मुर आन थेरशो रू रे गेरशोम आ मुर आन कली मार गेमे बाक्त देशा हना, बाशानम बाक्ब गोलान सहर नु आ एर ओंथ डा बस्तु भाव योव्रतीके, अशतारोथ सहर नु आ एर ओंथ डा बस्तु भाव योव्रतीके गेमे बाक्त।

72 मिनु इस्साकार आ थर डा मुर आन थेरशो रू रे केदेश सहर नु आ एर ओंथ डा बस्तु भाव योव्रतीके, दाबेराथ सहर नु आ एर ओंथ डा बस्तु भाव योव्रतीके,

73 रामोथ सहर नु आ एर ओंथ डा बस्तु भाव योव्रतीके नु आनेम सहर नु आ एर ओंथ डा बस्तु भाव योव्रतीके गेमे बाक्त।

74 आशेर आ थर डा मुरपुकीमी आन थेरशो रू रे माशाल सहर नु आ एर ओंथ डा बस्तु भाव योव्रतीके नु अब्दोन सहर नु आ एर ओंथ डा बस्तु भाव योव्रतीके,

75 हुकोक सहर नु आ एर ओंथ डा बस्तु भाव योव्रतीके, रेहोब सहर नु आ एर ओंथ डा बस्तु भाव योव्रतीके गेमे बाक्त।

76 नाप्ताली आ थर डा मुर आन थेरशो रू रे गालील डा केदेश सहर नु आ एर ओंथ डा बस्तु भाव योव्रतीके, हम्मोन सहर नु आ एर ओंथ डा बस्तु भाव योव्रतीके नु किरयथ-थाइम सहर नु आ एर ओंथ डा बस्तु भाव योव्रतीके गेमे बाक्त।

77 जबूलन आ थर डा मुरपुकीमी आन थेरशो रू रे मेरारी आ लीशो मुर आन कली रिम्मोनो सहर नु आ एर ओंथ डा बस्तु योव्रतीके, ताबोर सहर नु आ एर ओंथ डा बस्तु भाव योव्रतीके गेमे बाक्त।

78 रूबेन आ थर डा मुरपुकीमी आन थेरशो रू रे यर्दन आ आइक्वी हांबु यरीको आ पूर्व गे गोरशो रागीम बाक्शो बेसेर सहर नु एर ओंथ डा बस्तु भाव योव्रतीके, याहसाह सहर नु आ एर ओंथ डा बस्तु भाव योव्रतीके,

79 केदेमोथ सहर नु आ एर ओंथ डा बस्तु भाव योव्रतीके नु मेफा-आथ सहर नु आ एर ओंथ डा बस्तु भाव योव्रतीके गेमे बाक्त।

80 मिनु गाद आ थर डा मुरपुकीमी आन थेरशो रू रे गिलाद डा रामोथ नु सहर नु आ एर ओंथ डा बस्तु भाव योव्रतीके, महा-नाइम सहर आ एर ओंथ डा बस्तु भाव योव्रतीके,

81 हेरबोन सहर नु आ एर ओंथ डा बस्तु भाव योव्रतीके नु याजेर सहर नु आ एर ओंथ डा बस्तु भाव योव्रतीके गेमे बाक्त।

## 7

### इस्साकार आ तौ चच युइ

1 इस्साकार आ तौ तोला, पुआ, याशुब नु शिप्रोन ४ जना बाक्मा बाक्त। उत्पत्ती ४६:१३; गन्ती २६:२३-२४

2 तोला आ तौ उज्जी, रेफायाह, येरीएल, याहमाइ, इब्साम नु शेमुएल बाक्मा बाक्त। मेको नेल्ले आन खिं खिं डा ठेयब मुर बाक्मा बाक्त। दाऊदम सासन पवा ना तोला आ खिं खिं डा मुर २२ हजार ६ सहे बोल्यो लडाइ पाइब बाक्मा बाक्त।

3 उज्जी आ तौ इज्रायाह बाक्मा बाक्त। इज्रायाह आ तौ मिकाएल, ओबदिया, योएल नु इस्शियाह बाक्मा बाक्त। मेको ५ जना नेल्ल ठेयब मुर बाक्मा बाक्त।

4 मेको प्रोइशा यो अरु मुर आन पाला पाला डा खिं खिं डा मुर आन कली हिकशोन ३६ हजार लडाइ पाइब मुर बाक्मा बाक्त। मारदे हना मेको आन के शुश मीश नु तौ बाक्मा बाक्त।

5 मेको आन खिं खिं डा मुर नेल्ल इस्साकार आ थर डा मुर बाक्मा बाक्त। मेको नेल्ल ८७ हजार बोल्यो लडाइ पाइब बाक्मा बाक्त।

### बेन्यामीन आ तौ चच युइ

6 बेन्यामीन आ तौ बेला, बेकेर नु येदीएल सां बाक्मा बाक्त। १ इतिहास ८:१-२; उत्पत्ती ४६:२१

7 बेला आ तौ एस्बोन, उज्जी, उज्जीएल, येरीमोथ नु इरी ५ जना आन खिं खिं डा ठेयब मुर बाक्मा बाक्त। आन नें ब्रेक्शो २२ हजार ३४ जना बोल्यो लडाइ पाइब बाक्मा बाक्त।

8 बेकेर आ तौ जेमीरा, योआश, एलीएजर, एली-ओ-एनाइ, ओप्त्री, येरेमोथ, अबीयाह, अनाथोथ नु आलेमेथ बाक्मा बाक्त। मेको नेल्ल बेकेर आ तौ बाक्मा बाक्त।

9 मेको आन नें पाला पालामी ब्रेक्शो बाक्मा बाक्त। आन खिं खिं डा मुर आन ठेयब मुर बाक्मा बाक्त। मिनु आन दाते डा २० हजार सहे निकशी बोल्यो लडाइ पाइब बाक्मा बाक्त।

10 येदीएल आ तौ बिल्हान बाक्मा बाक्त। बिल्हान आ तौ येऊश बेन्यामीन, एहूद, केनानाह, जेथान, टारशीश नु अहीशाहार बाक्मा बाक्त।

11 मेको नेल्ल येदीएल आ तौ नु मेको आन खिं खिं डा ठेयब मुर बाक्मा बाक्त। मेको १७ हजार सहे निकशी बोल्यो लडाइ पाइब बाक्मा बाक्त। मेको लडाइ पचा कली ठीक दुम्शो बाक्मा बाक्त।

12 इर आ तौ शुप्पीम नु हुप्पीम बाक्सा बाक्त। आहेर आ तौ हुशीम बाक्मा बाक्त।

### नाप्ताली आ तौ चच युड

13 नाप्ताली आ तौ याहसीएल, गुनी, येसेर नु शाल्लुम बाक्मा बाक्त। मेको बिल्हाह आ चच युड बाक्मा बाक्त। उत्पत्ती ४६:२४

### मनस्से आ तौ चच युड

14 मनस्से आ तौ असीएल बाक्माक्त। मेको आ नोले चाक्शो अरामी मीश रे थिशो तौ बाक्माक्त। मेकोमी गिलाद आ आफ माकीर कली यो थिवा बाक्त।

15 मिनु माकीरमी हुप्पीम नु शुप्पीम आस कली मीश आल का का माल्शा, ग्युंबे पदा बाक्त। माकीर आ समी आ नें माकाह बाक्माक्त। मेको आ माइला तौ आ नें सेलेफेहाद बाक्माक्त। सेलेफेहाद के तमी ला बाक्मा बाक्त। गन्ती २७:१

16 माकीर आ मीश माकाहमी तौ निक्शी थिवा बाक्त। मेको आस नें पेरेश नु शेरेश वोदा बाक्त। पेरेशम तौ निक्शी थिम्सी बाक्त। आस नें ऊलाम नु रेकेम वोदा बाक्त।

17 ऊलाम आ तौ बेदान बाक्माक्त। मेको नेल्ले गिलाद आ तौ चच युड बाक्मा बाक्त। गिलाद माकीर आ तौ नु मनस्से आ चच बाक्माक्त।

18 गिलाद आ समी हाम्मोलेकेथमी तौ सां थीमी बाक्त। मेको इश्होद, अबीएजेर नु महलाह बाक्मा बाक्त।

19 शेमीदा आ तौ अहीयान, शेकेम, लिस्वी नु अन्याम बाक्मा बाक्त।

### एफ्राइम आ तौ चच युड

20 एफ्राइम आ तौ शुथेलाह बाक्माक्त। शुथेलाह आ तौ बरेद बाक्माक्त। बरेद आ तौ तहाथ बाक्माक्त। तहाथ आ तौ एलेआदाह बाक्माक्त। एलेआदाह आ तौ तहथ बाक्माक्त। गन्ती २६:३५

21 तहथ आ तौ जाबाद बाक्माक्त। जाबाद आ तौ शुथेलाह बाक्माक्त। शुथेलाह आ अरु तौ एजेर नु एलेआद बाक्सा बाक्त। मेको निक्शी गाथ डा मुर आन बस्तु भाव रोइक्थ लसानु, गाथ डा मुरपुकीमी मेको आस कली सदमे बाक्त।

22 मेको आस आफ एफ्राइममी मेको आस पबर्म शुश नाक्त सम्म रोंका पवा बाक्त। आ लोकबपुकी मेको कली लेम्थ जाक्मा बाक्त।

23 मेको नोले एफ्राइम आ मीश नु बाक्माक्त। मिनु मेकोमी कोव्रज कुरशा तौ का थिवा बाक्त। मेको आ नें बेरीआ वोदा बाक्त। मारदे हना मेना मेको खिम श्येत दुश्शो बाक्माक्त।

24 एफ्राइम के शेराह माइश्शो तमी का यो बाक्माक्त। मेकोमी आइदी नु आइक्था बेथ-होरोन सहर नु उज्जेन-शेराह सहर सेल्शो बाक्माक्त।

25 एफ्राइम के रेफाह माइश्शो तौ यो बाक्माक्त। रेफाह आ तौ रेशेफ बाक्माक्त। रेशेफ आ तौ तेलाह बाक्माक्त। तेलाह आ तौ तहन बाक्माक्त।

26 तहन आ तौ लादान बाक्माक्त। लादान आ तौ अम्मीहुद बाक्माक्त। अम्मीहुद आ तौ एली-शामा बाक्माक्त। गन्ती १:१०

27 एली-शामा आ तौ नून बाक्माक्त। नून आ तौ यहोसु बाक्माक्त। गन्ती १३:८,१६

28 मेको मुर आन थेरशो रू नु आन बाक्तीके बेथेल सहर नु मेको आ एर ओंथ डा सहर, पूर्ब गे नारान सहर नु आ एर ओंथ डा सहर, पच्छिम गे गेजेर सहर नु आ एर ओंथ डा सहर नेल्ले, शेकेम सहर नु आ एर ओंथ डा सहर, अय्याह नु आ एर ओंथ डा सहर बाक्मा बाक्त। यहोसु १६:१; यहोसु १६:१०

29 मनस्से आ मुर आन सांद बेथ-शेआन नु आ एर ओंथ डा सहर, तानाक नु आ एर ओंथ डा सहर, मेगीददो नु आ एर ओंथ डा सहर नु डोर नु आ एर ओंथ डा सहर बाक्मा बाक्त। मेको सहर नेल्लेम इस्राएल आ तौ योसेफ आ चच युड बाक्शो बाक्मा बाक्त। यहोसु १७:११

### आशेर आ तौ चच युड

30 आशेर आ तौ इम्नाह, इश्वाह, इश्वी नु बेरीआ बाक्मा बाक्त। मेको आन समी सेराह बाक्माक्त।

- 31 बेरीआ आ तौ हेबेर नु माल्कीएल बाक्सा बाक्त। माल्कीएल बिरजाइथ आ आफ बाक्माक्त।  
उत्पत्ती ४६:१७
- 32 हेबेर याफ्लेत, शोमेर, होथाम नु मेको आन समी शुआ आन आफ बाक्माक्त।
- 33 याफ्लेत आ तौ पासाक, बिम्हाल नु अश्वाथ बाक्मा बाक्त। मेकोपुकी याफ्लेत आ तौ बाक्मा बाक्त।
- 34 शेमेर आ तौ आही, रोहगाह, हूब्बाह नु अराम बाक्मा बाक्त।
- 35 आन लोकब हेलेम आ तौ सोफाह, इम्ना, शेलेश नु आमाल बाक्मा बाक्त।
- 36 सोफाह आ तौ सुआह, हारनेफेर, शुआल, बेरी, इम्राह,
- 37 बेसेर, होद, शाम्मा, शिल्शाह, इथ्रान नु बेयरा बाक्मा बाक्त।
- 38 येथेर आ तौ यपुन्ने, पिस्पान नु आराह बाक्मा बाक्त।
- 39 उल्ला आ तौ आराह, हन्नीएल नु रिसीया बाक्मा बाक्त।
- 40 मेको नेल्ल आशेर आ खिं डा मुर नु मेको आन खिं खिं डा ठेयब मुर, बोल्यो लडाइ पाइब नु योत्रशो जोकब तुइकब लां कोइब हिकचा पुंइसीशो मुर बाक्मा बाक्त। मेको आन खिं खिं पा हिकशा, नें ब्रेक्तीकेमी नें ब्रेक्शो लडाइ पाइब २६ हजार मुर बाक्मा बाक्त।

## 8

### बेन्यामीन आ तौ चच युइ

- 1 बेन्यामीन आ डोंइती थिशो तौ बेला, माइला अशबेल, साइला अहाराह, उत्पत्ती ४६:२१
- 2 काइला नोहा नु कान्छा रेफा आन आफ बाक्माक्त।
- 3 बेला आ तौ अददार, गेरा, अबीहुद,
- 4 अबीशुआ, नामान, अहोयाह,
- 5 गेरा, शेफुफान नु हुराम बाक्मा बाक्त।
- 6 एहूद आ तौ आन खिं खिं डा ठेयब मुर बाक्मा बाक्त। मेको गेबा सहरम बाक्शो बाक्मा बाक्त। ग्याइकब मुरपुकीमी मेको आन कली मानाहाथ सहरम बाक्चा गेमी बाक्त। एहूद आ तौ सु सु बाक्मा बाक्त देशा हना,
- 7 नामान, अहीयाह नु गेरा बाक्मा बाक्त। हेग्लाम माइशशो गेरा उज्जा नु अहीहुद आस आफ बाक्माक्त। मेकोपुकी ग्याइशला लाइकचा पुंइसीमा बाक्त।
- 8 मिनु शाहारैममी आ मीश हुशीम नु बारा आस कली प्रोना नोले मोआब रागीम तौपुकी थिवा बाक्त।
- 9 आ मीश होदेशमी योबाब, सिबीया, मेशा, माल्काम,
- 10 येऊस, साकीया नु मिरमाह थीमी बाक्त। मेको शाहारैम आ तौ आन खिं खिं डा ठेयब मुर बाक्मा बाक्त।
- 11 शाहारैम आ मीश हुशीममी यो अहीतुब नु एल्पाल थिम्सी बाक्त।
- 12 एल्पाल आ तौ एबेर, मिशाम नु शेमेद बाक्मा बाक्त। मेकोपुकीम ओनो नु लोद सहर नु आस एर ओथ डा सहर सेल्मे बाक्त।
- 13 मिनु बेरीआ नु शेमा आइयालोन सहरम बाक्ब आन खिं खिं डा मुर आन ठेयब मुर बाक्सा बाक्त। मेको निक्शीमी गाथ सहरम बाक्ब मुर आन कली प्रोक्पदसे बाक्त।
- 14 मिनु बेरीआ आ तौ अहीयो, शाशाक, येरेमोथ,
- 15 जेबदीयाह, आराद, एदेर,
- 16 मिनु बेरीआ तौ मिकाएल, इशपाह नु योहा बाक्मा बाक्त।
- 17 एल्पाल आ तौ जेबदीयाह, मेशुल्लाम, हिज्की, हेबेर,
- 18 इशमेराइ, इज्जीयाह नु योबाब बाक्मा बाक्त।
- 19 शिमेइ आ तौ याकीम, जिक्री, जब्दी,
- 20 एली-एनाइ, सिल्लैथाइ, एलीएल,

- 21 अदायाह, बेरायाह नु शिम्नाथ बाक्मा बाक्त।  
 22 शाशाक आ तौ इश्पान, एबेर, एलीएल,  
 23 अब्दोन, जिक्री, हानान,  
 24 हनान्याह, एलाम, अन्थोथीयाह,  
 25 इफदैयाह नु पेनुएल, बाक्मा बाक्त।  
 26 येरोहाम आ तौ शाम्शेराइ, शेहारयाह, अथाल्याह,  
 27 यारेश्याह, एलीया नु जिक्री बाक्मा बाक्त।  
 28 मेको आन पाला डा खिं खिं डा मुर आन टेयब मुर बाक्मा बाक्त। मिनु यरूसलेम सहरम बाक्शो बाक्मा बाक्त।

### सावल आ खिं डा मुर

- 29 गिबोन आ आफ यिएल गिबोन सहरम बाक्माक्त। मेको आ मीश आ नें माकाह बाक्माक्त।  
 १इतिहास ९:३५-४४  
 30 मेको आ डोंइती थिशो तौ अब्दोन बाक्माक्त। मेको आ नोले डा तौ सुर, कीश, बाल, नादाब,  
 31 गेदोर, अहीयो, जेकेर नु मीक्लोथ बाक्मा बाक्त।  
 32 मीक्लोथ शिमेआह आ आफ बाक्माक्त। मेको नेल्ल यरूसलेम सहरम आन खिं खिं डा मुर आन नेक्था बाक्शो बाक्मा बाक्त।  
 33 नेर कीश आ आफ बाक्माक्त। कीश सावल आ आफ बाक्माक्त। सावल योनाथन, माल्कीशुआ, अबीनादाब नु एश-बाल आन आफ बाक्माक्त। १सामुएल १४:५१; २सामुएल २:८  
 34 योनाथन आ तौ मेरीब-बाल बाक्माक्त। मेरीब-बाल मीकाह आ आफ बाक्माक्त।  
 35 मीकाह आ तौ पिथोन, मेलैक, ताहरेआ नु आहाज बाक्मा बाक्त।  
 36 आहाज येहो-अदाह आ आफ बाक्माक्त। येहो-अदाह आलेमेथ, अज्मावेथ नु जिम्नी आन आफ बाक्माक्त। जिम्नी मोचा आ आफ बाक्माक्त।  
 37 मोचा बिनेआ आ आफ बाक्माक्त। बिनेआ आ तौ रेफा बाक्माक्त। रेफा आ तौ एलेआसाह बाक्माक्त। एलेआसाह आ तौ आसेल बाक्माक्त।  
 38 आसेल के ६ जना तौ बाक्मा बाक्त। मेको आन नें अज्जीकाम, बोकेरु, इश्माएल, शेआरयाह, ओबदिया नु हानान बाक्मा बाक्त। मेको नेल्ल आसेल आ तौ बाक्मा बाक्त।  
 39 मेको आ लोक्ब एशेक आ डोंइती थिशो तौ ऊलाम, माइला येऊश नु कान्छा एली-फेलेत बाक्मा बाक्त।  
 40 ऊलाम आ तौ रिम्शो पा लिब्रा आप्ब नु बोल्यो लडाइ पाइब बाक्मा बाक्त। मेको आन के शुश आल नु चच बाक्मा बाक्त। मेको नेल्ल सहे का ५० जना बाक्मा बाक्त। मेको नेल्ल बेन्यामीन आ थर डा मुर बाक्मा बाक्त।

## 9

### बाबेल रे लेशशा, यरूसलेममी बाक्ब मुर

- 1 मोपा इस्राएली नेल्ल आन खिं खिं डा मुर आन नें ब्रेक्शो बाक्मा बाक्त। मेको आन नें इस्राएल डा पिप आन किताबमी ब्रेक्शो बाक्मा बाक्त। मिनु यहूदा डा मुर आन परमप्रभु आ देशो मटितीके बेबीलोनम ग्याइश्शा लाइक्चा पुंडसीमा बाक्त। २राजा २४:१५-१६  
 2 मिनु नेल्ल क्येडा डोंइती लेशा आम थेरशो रू नु आम आन सहरपुकीम बाक्ब सु सु बाक्मा बाक्त देशा हना, इस्राएल डा मुर, चढ़ेब, लेवी नु परमप्रभु यावे आ खिंम गेय पाइबपुकी बाक्मा बाक्त। यहोसु ९:२३, २७; एज्जा ८:२०  
 3 मिनु यहूदा आ थर डा, बेन्यामीन आ थर डा, एफ्राइम आ थर डा नु मनस्से आ थर डा मुर का निक्शी यरूसलेम सहरम बाक्मा बाक्त। नहेम्याह ११:३-१९  
 4 मेको सु सु बाक्मा बाक्त देशा हना, उथाइ आ आफ अम्मीहुद, अम्मीहुद आ आफ ओम्री ओम्री आ आफ इम्री, इम्री आ आफ बानी बानी आ आफ पेरैस नु पेरैस आ आफ यहूदा बाक्मा बाक्त।  
 5 मिनु शिलो डा मुर रे डोंइती थिशो तौ आसायाह नु आ तौपुकी बाक्मा बाक्त।

6 जेराह आ डोंइती डा तौ येहुएल नु आ खिं खिं डा मुर बाक्मा बाक्त। मेको नेल्ल पा ६ सहे ९० जना बाक्मा बाक्त।

7 बेन्यामीन आ थर डा मुर रे सल्लु आ आफ मेशुल्लाम, मेशुल्लाम आ आफ होदावीयाह, होदावीयाह आ आफ हास्सेनुआ,

8 हास्सेनुआ आ आफ इब्नैआ, इब्नैआ आ आफ येरोहाम येरोहाम आ आफ एलाह, आ आफ उज्जी, उज्जी आ आफ मिक्की, मिक्की आ आफ मेशुल्लाम, मेशुल्लाम आ आफ शेफत्याह, शेफत्याह आ आफ रूएल, रूएल आ आफ इब्नीयाह बाक्मा बाक्त।

9 मिनु आन पाला डा खिं खिं डा ९ सहे ५६ जना मुर बाक्मा बाक्त। मेको नेल्ले आन खिं खिं डा ठेयब मुर बाक्मा बाक्त।

10 चढेब आन दाते डा सु सु बाक्मा बाक्त देशा हना, येदायाह, येहो-यारीब, याकीन,

11 अजारयाह आ आफ हिल्कीयाह, हिल्कीयाह आ आफ मेशुल्लाम, मेशुल्लाम आ आफ सादोक, सादोक आ आफ मेरायोथ, मेरायोथ आ आफ अहीतुब बाक्मा बाक्त। अहीतुब परमप्रभु आ खिं डा नेल्ल क्येडा ठेयब मुर बाक्मा बाक्त। १इतिहास ५:३८-३९

12 मिनु अदायाह आ आफ येरोहाम, येरोहाम आ आफ पाशहुर, पशहुर आ आफ माल्कीयाह, माल्कीयाह आ आफ मासाइ, मासाइ आ आफ अदीएल, अदीएल आ आफ याहजेराह, याहजेराह आ आफ मेशुल्लाम, मेशुल्लाम आ आफ मेशील्लेमीथ, मेशील्लेमीथ आ आफ इम्मर बाक्मा बाक्त।

13 मेको आन खिं खिं डा ठेयब मुर बाक्मा बाक्त। मिनु नेल्ले परमप्रभु आ खिं पचा जोक्ब तुइक्ब हजार का ७ सहे ६० जना बाक्मा बाक्त।

14 मिनु लेवी आ थर डा मुर सु सु बाक्मा बाक्त देशा हना, शेमायाह आ आफ हाशशुब, हाशशुब आ आफ अज्रीकाम, अज्रीकाम आ आफ हशाब्याह, हशाब्याह आ आफ मेरारी बाक्मा बाक्त।

15 मिनु बाकबाकार, हेरेश, गालाल नु मत्तन्याह आन आफ मीका, मीका आ आफ जिक्की, आ आफ जिक्की आ आफ आसाफ बाक्मा बाक्त।

16 मिनु ओबदिया आ आफ शेमायाह, शेमायाह आ आफ गालाल, गालाल आ आफ येदुथून, येदुथून आ आफ बेरेक्याह, बेरेक्याह आ आफ आसा नु आसा आ आफ एल्काना बाक्मा बाक्त। मेकोपुकी नेतोफाह डा मुर आन गाउंमी बाक्शो बाक्मा बाक्त। १इतिहास २:५४

17 लाप्यो खाल पाइबपुकी शाल्लुम, अक्कुब, ताल्मोन नु अहीमान बाक्मा बाक्त। मिनु आन लोकब शाल्लुम आन ठेयब मुर बाक्मा बाक्त।

18 मेको डोंइती पूबं गे पिप आ लाप्यो खाल पाइब बाक्मा बाक्त। मिनु अरु लेवीपुकी लेवी आन बाक्तीक डा लाप्यो खाल पाइब बाक्मा बाक्त।

19 शाल्लुम आ आफ कोरे, कोरे आ आफ एब्यासाफ, एब्यासाफ आ आफ कोराह बाक्मा बाक्त। कोराह आ खिं खिं डा मुर गेय आन ठेयब मुर बाक्तेक्म। मिनु परमप्रभु यावे आ ताम्बु आ ओव्रतीक खाल पाइब आन किकी पिपी खोदेशो पाइब बाक्मा बाक्त। २इतिहास ३४:९

20 मेको क्येडा डोंइती एलाजर आ तौ फिनेहास मेको आन कली कोव्रब ठेयब मुर बाक्मा बाक्त। मिनु परमप्रभु यावे मेको नु बाक्मा बाक्त। गन्ती २५:७-१३

21 जकरिया मेशेलेम्याह आ तौ ग्रुम्तीक ताम्बु डा ओव्रतीक खाल पाइब बाक्मा बाक्त।

22 मेको नेल्ल लाप्यो खाल पाइब योव्रशो सहे निक्शी १२ जना मुर बाक्मा बाक्त। मेको आन नें आन गाउं गाउंमी ब्रेक्तीकेम ब्रेक्शो बाक्मा बाक्त। दाऊद नु परमप्रभु यावे आ लोव्र पाइब सामुएलम थमा सुइक्चा पुंडसीशो मुर आन कली मेको गेय गेम्से बाक्त। १सामुएल ९:८-११

23 मेको नु आन तौ चच परमप्रभु यावे आ बाक्तीक डा ओव्रतीक खाल पाइब बाक्मा बाक्त। मेको बाक्तीक ताम्बु बाक्मा बाक्त।

24 मेकोपुकी परमप्रभु यावे आ बाक्तीके खाल पाइब पूबं, पच्छिम, उत्तर नु दक्खिन एर ओंथ गे बाक्मा बाक्त।

25 मेको आन खिं खिं डा मुर आन गाउंम बाक्मा बाक्त। मेकोपुकी ७, ७ नाक्त पा मेको नु बाक्थ जाक्चा माल्मा बाक्त।

26 मिनु मेको लाप्यो खाल पाइब आन कली कोवब ठेयब मुर लेवी आ मुर ४ जना बाक्मा बाक्त । मेकोपुकी परमप्रभु आ खिं डा कोठा नु शोंप वोइक्तीक कोठा खाल पाइब बाक्मा बाक्त ।

27 मेकोपुकी नाक्दो परमप्रभु आ बाक्तीके आ नेक्था बाक्बाक्मा बाक्त । मारदे हना मेको आन गेय नाक्दो कोव्वतीक बाक्माक्त । मिनु सुनी कुस कुस परमप्रभु आ बाक्तीक रोक्या माल्बाक्मा बाक्त ।

28 मेको आन दाते डा का निक्शीमी परमप्रभु आ बाक्तीके डा गेय पतीक मार मार खाल पाइब बाक्मा बाक्त । मेकोपुकीमी मार मार आगा लदमेनु नु गुंडदमेनु, हिक्शा वोइक्चा माल्बाक्मा बाक्त ।

29 मेको आन दाते डा अरुमी परमप्रभु यावे आ ग्योंब नेल्ल, फस, अङ्गुर शांबु, तेल, धूप नु मस्ला खाल पाइब बाक्मा बाक्त ।

30 चढेब आन तौ डा का निक्शीमी मस्ला ब्वाइक्तीक गेय पाइबाक्मा बाक्त । प्रस्थान ३०:२३-२५

31 मिनु लेवी आ थर डा कोराह आ खिं डा मुर शाल्लुम आ डोंइती थिशो तौ मत्तीथ्याहमी शोब्ले सेल्टीक गेय पाइब बाक्माक्त ।

32 मेको आन खिं खिं डा मुर कोहाथ आ मुर का निक्शीमी नाइक्तीक नाक्ती कोंइतीक शोब्ले ठीक पा वोइक्तीके गेय पाइबाक्मा बाक्त । लेवी २४:५-८

33 मिनु कुम्सो पाइब नु लेवी आन खिं खिं डा ठेयब मुर परमप्रभु यावे आ खिं डा कोठापुकीम बाक्बाक्मा बाक्त । मिनु अरु गेय पचा ममाल्बाक्मा बाक्त । मारदे हना मेको आन गेय नाक्दो नु नाक्ती बाक्माक्त ।

34 मेको नेल्ल आन पालामी लेवी आ थर डा खिं खिं डा ठेयब मुर बाक्मा बाक्त । मिनु यरूसलेम सहरम बाक्बाक्मा बाक्त ।

सावल आ किक नु चच युड

१इतिहास ८:२८-३८

35 गिबोन आ आफ यिएल गिबोन सहरम बाक्शो बाक्माक्त । मेको आ मीश आ नें माकाह बाक्माक्त ।

36 मेको आ डोंइती थिशो तौ अब्दोन बाक्माक्त । मिनु नोले डा तौ सुर, कीश, बाल, नेर, नादाब,

37 गोदोर, अहीयो, जकरिया नु मीक्लोथ बाक्मा बाक्त ।

38 मीक्लोथ शिमे-आम आ आफ बाक्माक्त । मेकोपुकी यो यरूसलेमम आन खिं खिं डा मुर आन नेक्था बाक्बाक्मा बाक्त ।

39 नेर कीश आ आफ बाक्माक्त । कीश सावल आ आफ बाक्माक्त । सावल योनाथन, माल्कीशुआ, अबीनादाब नु एश-बाल आन आफ बाक्माक्त ।

40 योनाथन आ तौ मेरीब-बाल बाक्माक्त । मिनु मेरीब-बाल मीकाह आ आफ बाक्माक्त ।

41 मीकाह आ तौ पिथोन, मेलेक, ताहरेआ नु आहाज बाक्मा बाक्त ।

42 आहाज याराह आ आफ बाक्माक्त । मिनु याराह आलेमेथ अज्मावेथ नु जिम्नी आन आफ बाक्माक्त । जिम्नी मोचा आ आफ बाक्माक्त ।

43 मिनु मोचा बिनेआ आ आफ बाक्माक्त । बिनेआ आ तौ रेफायाह बाक्माक्त । रेफायाह आ तौ एलेआसाह बाक्माक्त । एलेआसाह आ तौ आसेल बाक्माक्त ।

44 आसेल के ६ जना तौ बाक्मा बाक्त । मिनु मेको आन नें अज्जीकाम, बोकेरु, इश्माएल, शेआरयाह, ओबदिया नु हानान बाक्मा बाक्त । मेको नेल्ल आसेल आ तौ बाक्मा बाक्त ।

## 10

सावल नु आ तौपुकी बेक्शो

१सामुएल ३१:-

1 पलिस्तीपुकीम इस्राएल नु लडाइ पामे बाक्त । मिनु इस्राएल डा मुर पलिस्ती आन डोंइती रे प्रोकमा बाक्त । मिनु गिल्लोआ डांडाम साइक्चा पुंडसामा बाक्त ।

2 मिनु पलिस्तीपुकीम सावल नु आ तौ आन कली खेदा पामे बाक्त । मिनु सावल आ तौ सांफा योनाथन, अबीनादाब नु माल्कीशुआ सदमे बाक्त ।



३ मेको लडाइम सावल कली थम श्येत दुम्माक्त। मारदे हना का निकशी ब्रा आप्बपुकीम मेको कली आप्मे बाक्त। मिनु सावल मेको रे गार दुम्माक्त।

४ मोपतीके सावलमी आ या कुरब कली “इ तरवार शोइशशा साइय्यी। खोइक्तीक चिनु मखोइशशोपुकीम आं कली ग्याइशशा मरिम्शो मपाइय्यीमील” दे मदा बाक्त। तन्न आ या कुरब हिंशा, मबिस्से बाक्त। मिनु सावल आ या शोइशशा, तूसे बाक्त।

५ मिनु मेको या कुरबम सावल कली बेक्शो तशा, आं यो आ या शोइशशा आंम कली सांइसे बाक्त।

६ मोपा सावल नु आ तौ सांफा आ खिं डा मुर नेल्ल कालेम बेक्मा बाक्त।

७ मिनु बेसीम बाक्शो इस्त्राएली नेल्लेमी लडाइ पाइब प्रोक्शो नु सावल नु आ तौ बेक्शो तशा, मेको आन सहर प्रॉइशा प्रोक्मा बाक्त। मिनु पलिस्ती मेकेर जाक्दीशशा, मेको सहर आन के सेल्मे बाक्त।

८ मिनु आ दीसा पलिस्तीपुकी बेक्शो मुर आन मार मार गुप्थ जाक्शा, सावल नु आ तौ आन कली गिल्लोआ डांडाम बेक्शो थिल्ले बाक्त।

९ मिनु मेकोपुकीम मेको आ फेक्तीक फुइशशा, आ पिया खोइशशा लाइशशा, आन रागी डा देवता नु मुर नेल्ल आन कली मेको लोन्न नेंपाइक्का कली कुरब मुर आन कली सोइक्त्मे बाक्त।

१० मेकोपुकीम सावल आ या आन देवी देवता आन थानम वोदमे बाक्त। आ पिया दागोन आ थानम क्युकगमे बाक्त।

११ मिनु याबेश-गिलाद सहर डा मुरपुकीमी पलिस्तीमी सावल कली मार मार पदमे, मेको नेंशा,

१२ बोल्यो लडाइ पाइब नेल्ले बोक्शा, सावल नु आ तौ आन रां ब्रथ लमा बाक्त। मिनु मेकोपुकीम मेको आन रां याबेश सहर चाक्गमे बाक्त। मिनु याबेश डा मुरपुकीमी मेको आन कली यावेश डा ठेयब रवा आ पुंम थिम्मे बाक्त। मिनु ७ नाक्त सम्म माइजा बाक्मा बाक्त। २सामुएल २:४-५

१३ मोपा सावल आ परमप्रभु यावे प्रॉइतीके आ पबंम बेक्का माल्दा बाक्त। मेकोमी परमप्रभु यावे आ शेंशो मटिथु, बेक्शो मुर नु लोन्न पाइब आ लोन्न नेना बाक्त। १सामुएल १५:२३; १सामुएल २८:८

१४ मिनु परमप्रभु यावे आ अर्ती ममाल्थु, मनेना बाक्त। मोपतीके परमप्रभु यावेमी मेको कली सदा बाक्त। मिनु आ राज्य येस्से आ तौ दाऊद कली गेवा बाक्त।

## ११

दाऊद इस्त्राएली आन पिप दुम्शो

२सामुएल ५:१-१०

१ मिनु मेको नोले इस्त्राएल डा मुर नेल्ल युम्शा दाऊद आ बाक्तीक हेब्रोन सहरम बुक्मा बाक्त। मिनु मेकोपुकीम “गोपुकी इन मुर नकी। उत्पती २९:१४

२ डोंइती सावल पिप बाक्मेनु, गे इस्त्राएल डा लडाइ पाइब आन ठेयब कप्तान बाक्तीनी। मिनु परमप्रभु यावे, इन परमप्रभुमी इन कली ‘गे आं मुर, इस्त्राएली आन गोठला नु आन पिप दुम्मेवे’ देशो बाक्त” देमा बाक्त।

३ मिनु इस्त्राएल डा खाल्पा नेल्ल पिप आ बाक्तीक हेब्रोन सहरम जाक्मा बाक्त। मिनु दाऊदमी हेब्रोन सहरमी परमप्रभु यावे आ डोंइती मेकोपुकी नु कबल पवा बाक्त। दाऊद कली तेल लुक्शा इस्त्राएल डा पिप सेल्मे बाक्त। दोपा परमप्रभु यावेम सामुएल कली दोदेशो देमे, मोदेशो पामे बाक्त। १सामुएल १६:१, ३, ११, १२

दाऊदम यरूसलेम सहर ग्राशो

४ मिनु दाऊद नु इस्त्राएल डा लडाइ पाइब नेल्ले यरूसलेम लमा बाक्त। मेको यबुस सहर बाक्माक्त। मेकेर यबुसी बाक्शो बाक्मा बाक्त।

५ मिनु यबुसम बाक्ब मुरपुकीमी दाऊद कली “गे एक गेनायो जाक्ने मचाप्नेवे” देमा बाक्त। मो हना यो दाऊदम सियोन डा बोल्यो सहर ग्रामाक्त। मेको कली मुल सम्म दाऊद आ सहर देनीम।

६ दाऊदमी “सु यबुसी आन कली डोंइती लडाइ तोइबा, मेको नेल्ल क्येडा ठेयब कप्तान दुम्ब” देशो बाक्माक्त। मिनु मेकेर डोंइती सेरूयाह आ तौ योआब डोंइसे बाक्त। मोपतीके मेको ठेयब कप्तान दुम्माक्त।

७ मिनु दाऊद मेको बोल्यो सहरम बाक्शो बाक्माक्त। मोपतीके मुरुमी मेको सहर कली दाऊद आ सहर देंमा बाक्त।

८ मिनु दाऊदमी मेको सहर आ एर ओंथ डा गारो तिकतीक रे सहर नेल्ल आ एर ओंथ गारो हिरशा सेला बाक्त। मिनु योआबम लीशो ब्रेशो खिं लेंशा सेला बाक्त।

९ मोपा दाऊद शुश बोल्यो दुम्ना दुम्न लमाक्त। मारदे हना मुर नेल्ल आन परमप्रभु यावे मेको नु बाक्माक्त।

### दाऊद आ बोल्यो लडाइ पाइब

२सामुएल २३:८-३९

१० मिनु दाऊद आ राज्य बोल्यो सेल्ब नु आ लडाइ पाइब आन ठेयब कप्तान आन पर्वम ब्रेक्शो लोत्र एको बाक्माक्त। मेकोपुकी नु इस्माएली नेल्लेमी दाऊद कली आन पिप सेल्मे बाक्त। परमप्रभु यावेमी इस्माएली आन पर्वम दोदेशो लोत्र पवा, मोदेशो पामे बाक्त।

११ दाऊद आ बोल्यो लडाइ पाइब सु सु बाक्मा बाक्त देशा हना, हाकमोनी आ तौ याशोबाम कप्तान सां आन ठेयब कप्तान बाक्माक्त। मेकोमी आ तूतीकेमी कालेमी सहे सां मुर आन कली सदा बाक्त।

१२ मेको आ नोले अहोही डा मुर दोदो आ तौ एलाजर बाक्माक्त। मेको बोल्यो मुर सां आन दाते डा का बाक्माक्त। १इतिहास २७:४

१३ मेको दाऊद नु पलिस्ती नु लडाइ पचा कली पास-दम्मीम बाक्शो बाक्माक्त। मेकेर क्योव्रज रू का बाक्माक्त। मिनु मुर नेल्ल पलिस्ती आन डोंइती रे प्रोकमा बाक्त।

१४ तन्न एलाजर नु दाऊद ला रू आ दातेमी राप्शा बाक्सा बाक्त। मिनु मेको निकशीमी पलिस्ती आन कली ग्राशा क्योव्रज रू कली मारेड दुम्चा मगेम्से बाक्त। मोपा परमप्रभु यावेमी ठेयब पा ग्रापाइश्शा प्रोकपदा बाक्त।

१५ मेको ३० जना कप्तान आन दाते डा सां दाऊद आ बाक्तीके अदुल्लाम डा पुक्खी आ नेक्था बाक्शो सेरथे फुल्लुम लमा बाक्त। मेना पलिस्ती आन लडाइ पाइब रेफाइम डा बैसीम ताम्बु कीशा बाक्शो बाक्मा बाक्त। १सामुएल २२:१

१६ दाऊद बोल्यो बाक्तीकेमी बाक्शो बाक्माक्त। मिनु पलिस्ती आन लडाइ पाइब बेथलेहेम सहरम बाक्शो बाक्मा बाक्त।

१७ मिनु दाऊदमी थाप्पा तूतू दाक्शा “सुइम आं कली बेथलेहेम डा ठेयब लाप्चो आ डोंइती बाक्शो इनार डा ब्वाक्कु तूचा गेयीमी हना, दुम वा” देंमाक्त।

१८ मेना मेको मुर सां पलिस्ती आन दाते रे ग्रीशा लशा बेथलेहेम डा ठेयब लाप्चो आ डोंइती डा इनार डा ब्वाक्कु ताप्शा, दाऊद आ बाक्तीकेम चाक्गामे बाक्त। तन्न दाऊदम मेको तूने मबिस्से बाक्त। मिनु ब्वाक्कु परमप्रभु यावे आ डोंइती मोदा बाक्त।

१९ मेकोमी “आं परमप्रभुम आं कली ओदेशो पचा मगेयील। गो एको मुर आन हुश तूनुडा? मारदे हना एको आन गिंम खतम दुम्चा डा पा लशा ब्वाक्कु चाक्तेकम” देंमाक्त। मोपतीके मेकोमी मेको ब्वाक्कु मतूडा बाक्त। मेको बोल्यो लडाइ पाइब सां आन पशो गेय मेकोन बाक्माक्त।

२० योआब आ लोकब अबीशै मेको ३० जना आन कप्तान बाक्माक्त। मेकोमी आ तूतीकेमी कालेम सहे सां मुर आन कली लडाइ पा साइक्मी बाक्त। मिनु मोपा मेको सां आन दातेमी हिक्चा पुंडसे बाक्त।

२१ मेको ३० जना आन दातेम ठेयब दुम्माक्त। मेको सां आन दातेमी मान तवा बाक्त। मिनु आन कप्तान दुम्माक्त। तन्न मेको डोंइती डा सां आन खोदेशो पा मान मतवा बाक्त।

२२ येहो-यादा आ तौ बेनायाह कब्सेल सहर डा शुश बोल्यो लडाइ पाइब का बाक्माक्त। मेकोमी मोआब डा अरीएल आ तौ निकशी आस कली सदा बाक्त। फुं यिम नाक्त ढोडोडगाम बाक्ब गुप्स का सदा बाक्त।

23 मेकोमी ५ कुबीत लाइशो इजीप्त डा मुर का यो सदा बाक्त। मेको आ तूतीक वा प्रोव्रतीक शी खोमो बाक्माक्त। मेको बेनायाहमी कोक्के का कुरशा, मेको तूतीक इजीप्त डा मुर आ गुड रे रोइशशा, आंम आ तूतीकेमी सदा बाक्त। कुबीत का ०.५ मिटर बाक्ब। १सामुएल १७:७

24 मेको येहो-यादा आ तौ बेनायाह आ पशो बाक्माक्त। मिनु मोपा बेनायाह मेको मुर सां आन दातेम हिकसे बाक्त। १इतिहास २७:५-६

25 मिनु ३० जना आन क्येडा मेकोमी शुश मान तवा बाक्त। तन्न मेको सां आन दातेम महिकसे बाक्त। दाऊदमी मेको कली आ कली खाल पाइब आन टेयब मुर सेला बाक्त।

26 मिनु अरु मान तशो लडाइ पाइब सु सु बाक्मा बाक्त देशा हना, योआब आ लोकब आसाहेल, बेथलेहेम डा दोदो आ तौ एल्हानान,

27 हारोद सहर डा शाम्मीथ, पेलोन डा मुर हेलेस, १इतिहास २७:१०

28 तेकोहा सहर डा इक्केश आ तौ इरा, अनाथोथ डा अबीएजेर,

29 हुशा डा मुर सिब्बेकै, अहोही आ मुर इलाइ,

30 नेतोफाह डा माहाराइ, नेतोफाह डा बानाह आ तौ हेलेद,

31 बेन्यामीन आ थर डा गिबा डा रिबाइ आ तौ इथाइ, पिराथोन डा बेनायाह,

32 गाश डा खोल्सा आ नेक्था बाक्ब हूरै, अरबा आ मुर अबीएल,

33 बाहारुम सहर डा अज्मावेथ, शा-आल्बोन सहर डा एली-अहबा,

34 गिजोन डा मुर हाशेम, हरारी शागे आ तौ योनाथन,

35 हरारी साकार आ तौ अहीयाम्, ऊर आ तौ एलीफाल,

36 मेकारा सहर डा मुर हेफेर, पेलोन डा मुर अहीयाह,

37 कारमेल डा हेस्रो, एज्बाइ आ तौ नाराइ,

38 नाथान आ लोकब योएल, हाग्री आ तौ मिभार,

39 अम्मोनी जेलेक, बेयरोथ सहर डा नहाराइ, मेको नहाराइ डा सेरूयाह आ तौ योआब आ या कुरब बाक्माक्त।

40 इथ्री आ मुर इरा, इथ्री आ मुर गारेब, २सामुएल ११:३

41 हिक्ती उरीयाह, अहलै आ तौ जाबाद,

42 रूबेन आ थर डा शीजा आ तौ अदीना मेको रूबेन आ थर डा मुर आन टेयब मुर का बाक्माक्त।

मेको नु आ मुर नु ३० जना बाक्मा बाक्त।

43 माकाह आ तौ हानान, मिथनी आ मुर योशाफात,

44 अशतारोथ सहर डा मुर उज्जीया, आरोएर आ मुर होथाम आ तौ शामा नु यिएल,

45 शिग्री आ तौ येदीएल नु आ लोकब तिजी आ मुर योहा,

46 महाब आ मुर एलीएल, एल्नाम आ तौ येरीबाइ नु योशावीयाह नु मोआबी इथ्माह,

47 एलीएल, ओबेद नु मेजोबी यासीएल बाक्मा बाक्त।

## 12

### दाऊद आ लडाइ पाइबपुकी

1 दाऊद सिकलाग सहस्म बाक्मेनु, आ बाक्तीक जाक्ब बोल्यो लडाइ पाइब नु लडाइम वारच पाइब बाक्मा बाक्त। मेना दाऊद कीश आ तौ सावल आ डोंइती रे प्रोक्शो बाक्माक्त। १सामुएल २७:६

2 मेकोपुकी लिब्रा कुरब बाक्मा बाक्त। मिनु ग्युरा नु पेरा गुड निम्फामी ब्रा नु हुरद आप्ने चाप्ब बाक्मा बाक्त। मेकोपुकी बेन्यामीन आ थर डा सावल आ खिं खिं डा मुर बाक्मा बाक्त।

3 मिनु सु सु बाक्मा बाक्त देशा हना, मेको आन दाते डा टेयब मुर अही-एजेर नु योआश निम्फा गिबा डा शेमाह आ तौ बाक्सा बाक्त। मिनु अरु अज्मावेथ आ तौ येजीएल नु प्लेत बाक्सा बाक्त। बेराकाह नु अनाथोथ डा येहू बाक्सा बाक्त।

४ गिबोन डा इश्मायाह मेको ३० जना आन दाते डा बोल्यो लडाइ पाइब नु मेको आन ठेयब मुर बाक्मावक्त। अरु येरमीया, याहासीएल, योहानान नु गेदेराह सहर डा योजाबाद,

५ एलुजाइ, येरीमोथ, बेअल्याह, शेमारयाह, हारुफ आ मुर शेफत्याह बाक्मा बाक्त।

६ कोराह आ खिं डा एल्काना, इस्शीयाह, अजारेल, योएजेर नु याशोबाम बाक्मा बाक्त।

७ मिनु गेदोर डा येरोहाम आ तौ योएलाह नु जेबदीयाह बाक्सा बाक्त।

८ मिनु गाद आ थर डा मुर यो गोरशो रागीम दाऊद आ बोल्यो बाक्तीकेम जाक्शो बाक्मा बाक्त। मेको तेक्तीक नु तूतीक कुरशो जोक्ब तुइक्ब लडाइ पाइब बाक्मा बाक्त। मेको आन कुल गुप्स खोदेशो हिंछा डा बाक्मा बाक्त। रोकोश खोदेशो पा दोरने चापब बाक्मा बाक्त।

९ मेको आन ठेयब मुर एजेर बाक्मावक्त। एजेर आ नोले डा ओबदिया बाक्मावक्त। ओबदिया आ नोले डा एलीआब बाक्मावक्त।

१० एलीआब आ नोले डा मिश्मन्नाह बाक्मावक्त। मिश्मन्नाह आ नोले डा येरमीया बाक्मावक्त।

११ येरमीया आ नोले डा अतै बाक्मावक्त। अतै आ नोले डा एलीएल बाक्मावक्त।

१२ एलीएल आ नोले डा योहानान बाक्मावक्त। योहानान आ नोले डा एल्जाबाद बाक्मावक्त।

१३ एल्जाबाद आ नोले डा येरमीया बाक्मावक्त। येरमीया आ नोले डा माकबन्नाइ बाक्मावक्त।

१४ मेको मुरपुकी गाद आ थर डा लडाइ पाइब आन कप्तान बाक्मा बाक्त। मेको आन दाते डा नेल्ल क्येडा आइक्च सहे का नु लडाइ पने चापब नु नेल्ल क्येडा ठेयब हजार का नु लडाइ पने चापब बाक्मा बाक्त।

१५ मेको नेल्ले डोंइती डा महिनाम यर्दन खोला शोक्सामा बाक्त। मेना खोला बारशा लशो बाक्मावक्त। मिनु यर्दन खोला शोक्शा, मेको आ पूर्व नु पच्छिम डा बेसीम बाक्ब मुर नेल्ल आन कली खेदा पा खेरशो बाक्मा बाक्त।

१६ मिनु बेन्यामीन आ थर नु यहूदा आ थर डा का निक्शी मुर गोरशो रागीम दाऊद आ बोल्यो बाक्तीकेम जाक्मा बाक्त।

१७ मिनु दाऊद मेको आन कली ग्रुथ लशा, मेको आन कली “गे गो नु वारचबु दुग्शा, आं कली वारच पाइक्थ जाक्शो ननी हना, गो इन कली दाक्नुड। तन्न गेपुकीम आं कली क्यारी पथ नु आं जोरी सत्रु आन कली शेंथ जाक्तीनी हना, इं किकी पिपी आन परमप्रभुम एको तशा, इन कली निसाफ पवल” देमावक्त।

१८ मेना परमप्रभु आ सोक्तीम मेको ३० जना आन दाते डा कप्तान अमासै कली सुमा बाक्त।

मिनु मेकोम “दाऊद, गो इन मुर नकी। येस्से आ तौ दाऊद गो गे नु बाक्नीकी। इन थुं नाइक्सेक्ल। मिनु इन कली वारच पाइब आ थुं नाइक्सेक्ल। इन परमप्रभु इन कली वारच पाइब बाक्ब” देमावक्त।

मिनु दाऊद म मेको आन कली ब्रावा बाक्त। मिनु मेको आन कली आ हुल डा कप्तान सेल्मी बाक्त।

१९ मिनु दाऊद पलिस्ती नु गारशा, सावल नु लडाइ पथ लमावक्त। मेना मनस्से आ थर डा मुर का निक्शी सावल कली प्रोंइशा, दाऊद आ बाक्तीके जाक्मा बाक्त। तन्न पलिस्ती नु गारशा लडाइ चहिं मपामे बाक्त। मारदे हना पलिस्ती आन सासन पाइबपुकीमी आंम आंमा सल्ला पा दाऊद कली आ नु लडाइ मपपदमे बाक्त। मेकोपुकीम “मेकोमी आ होत्रप सावल कली वारच पा, गो इं कली प्रोंइब। मिनु मो दुम्मेनु, गो लडाइ बुइनय। गो बेक्नय” देमुमा बाक्त। १ सामुएल २९:३-४

२० मिनु दाऊद सिकलाग सहरम लामेनु, मेको आ बाक्तीक जाक्ब मनस्से आ थर डा मुर आदनाह, योजाबाद, येदीएल, मिकाएल, योजाबाद, एलीहु नु सिल्लेथाइ बाक्मा बाक्त। मेकोपुकी मनस्से आ खिं डा हजार का का डा लडाइ पाइब आन कप्तान बाक्मा बाक्त।

२१ मिनु मेकोपुकीमी दाऊद कली मार मार रोइक्ब आन पर्वम लडाइ पचा कली वारच पाइशो बाक्मा बाक्त। मारदे हना, मेको नेल्ल लडाइ पाइब नु कप्तान बाक्मा बाक्त।

२२ थमा पा नाक्त किंत किंत दाऊद आ बाक्तीके अर्को लडाइ पाइब वारच पथ जाक्मा बाक्त। नोले परमप्रभु आ फौज खोदेशो शुश दुम्मा बाक्त।

दाऊद कली वारच पाइब मुर

23 दाऊद हेब्रोन सहरम बाकमेनु, या कुरशा, वारच पाइब लडाइ पाइब शुश जाकमा बाक्त। परमप्रभु यावेम देशो खोदेशो पा सावल आ राज्य रोइशशा दाऊद कली गेचा, दे मो पामे बाक्त।

24 मेको सु सु बाकमा बाक्त देशा हना, यहूदा आ थर डा ६ हजार ८ सहे तेक्तीक नु तूतीक कुरशो लडाइ पाइब बाकमा बाक्त।

25 सिमियोन आ थर डा ७ हजार सहे का बोल्यो लडाइ पाइब बाकमा बाक्त।

26 लेवी आ थर डा ४ हजार ६ सहे मुर बाकमा बाक्त।

27 मेको हारून आ खिं डा टेयब मुर येहो-यादा नु हजार सां ७ सहे मुर बाकमा बाक्त।

28 मिनु ठिटा लडाइ पाइब सादोक नु मेको आ खिं खिं डा मुर २२ जना कप्तान बाकमा बाक्त।  
१इतिहास ५:३४; २सामुएल १५:२४

29 सावल आ खिं डा मुर बेन्यामीन आ थर डा हजार सां मुर बाक्त। तन्न सावल आ खिं डा शुश मुर सावल कली मप्रोइथु बाकमा बाक्त।

30 एफ्राइम आ थर डा २० हजार ८ सहे बोल्यो लडाइ पाइब नु आन खिं डा टेयब मुर बाकमा बाक्त।

31 मनस्से आ उइक्थ थर डा १८ हजार मुर बाकमा बाक्त। मेको दाऊद कली पिप सेल्चा कली योव्रशो मुर बाकमा बाक्त।

32 इस्साकार आ थर डा इस्राएल डा मुर तेको लां गाकपाइक्चा माल्बा, मार मार पचा माल्नीम मारेइ मारेइ तुइक्ब सहे निकशी कप्तान बाकमा बाक्त। मेको आन खिं खिं डा लडाइ पाइब मुर आन कप्तान बाकमा बाक्त।

33 जबूलून आ थर डा ५० हजार लडाइ पस जोक्ब मारेइ मारेइ या कुरब बाकमा बाक्त। मेको आन थुं नेल्लेमी दाऊद कली वारच पाइब बाकमा बाक्त।

34 नाप्ताली आ थर डा हजार का कप्तान नु ३७ हजार तेक्तीक नु तूतीक कुरब लडाइ पाइब मुर बाकमा बाक्त।

35 दान आ थर डा २८ हजार ६ सहे या कुरब लडाइ पाइब बाकमा बाक्त।

36 आशेर आ थर डा ४० हजार लडाइ पचा कली ठीक दुश्शो लडाइ पाइब बाकमा बाक्त।

37 यर्दन खोला आइक्ची हांबु, पूर्ब डा रूबेन आ थर, गाद आ थर नु मनस्से आ उइक्थ थर डा लाख का २० हजार मारेइ मारेइ या कुरब लडाइ पाइब बाकमा बाक्त।

38 मेको लडाइ पाइब नेल्ले दाऊद कली इस्राएल डा पिप सेल्चा कली दाऊद आ बाक्तीक हेब्रोन सहरमी टेयब फौज जाकमा बाक्त। मिनु अरु इस्राएली नेल्लेमी यो दाऊद कली पिप सेल्चा, दे मिश्शो बाकमा बाक्त।

39 मिनु मेको नेल्ले मेकेर जना जन, तूना तून नाक्त सां सम्म दाऊद नु बाकमा बाक्त। मारदे हना मेको आन मुरपुकीम मेको आन कली जचा तूचा थोव्रक ठीक पशो बाकमा बाक्त।

40 मिनु आन नेक्था डा मुर, इस्साकार आ थर, जबूलून आ थर नु नाप्ताली आ थर डा मुर डोन रे गधा, दलओंठ, खचर नु ब्यफपुकीम जचा थोव्रक चाक्शो बाकमा बाक्त। मेकोपुकीम शुश फस, सोव्रपाइशशो फोव्रशी गेडा, सोव्रपाइशशो अडगुर, अडगुर शांबु, तेल, बी ब्यफ, भेडा शुश चाक्शो बाकमा बाक्त। मारदे हना, इस्राएली नेल्ल ग्येरशो बाकमा बाक्त।

## 13

दाऊदम सन्दोस चाक्चा माल्शो  
२सामुएल ६:१-११

1 दाऊदम मार पचा माल्ताक्व हना यो, आ हजार हजार डा लडाइ पाइब आन कप्तान नु सहे सहे डा लडाइ पाइब आन कप्तान आन कली लोव्र पा सल्ला पाइबाकमाक्त।

2 मिनु दाऊदम इस्राएल डा गुश्शो मुर नेल्ल आन कली “गेपुकी रिश्शो मिन्मीनी हना, नु परमप्रभु यावे इं परमप्रभु आ दाक्शो बाक्त हना, गो इस्राएल रागी नेल्लेमी लीशो इं मुरपुकी ‘मुर नेल्ल जाक्कीन’ दे लोव्र कुरब सोइक्तय। मेको आन दातेमी सहर आ एर ओंथ डा बी ब्यफ योव्रतीकम बाक्ब चढेब नु लेवीपुकी बाक्नीम। नेल्ल आन कली ‘जाक्कीन’ दे लोव्र कुरब मुर सोइक्तय।

3 गो इं परमप्रभु आ सन्दोस एक चाक्य। मारदे हना सावल बाकम सम्म, गो मेको कली ममिम्तय” देमाकत।

4 मिनु मेको गुम्शो मुर नेल्लेमी मेको लोत्र बिस्समा बाकत। मारदे हना मुर नेल्लेमी मोदेशो पचा दाकतमे बाकत।

5 मोपतीके दाऊद इजीप्त डा खोला शीहोर रे लेबो-हमाथ सम्म इस्राएली नेल्ल पुक्मी बाकत। मेको नेल्लेमी परमप्रभु आ सन्दोस किरयथ-यारीम रे चाक्या माल्मे बाकत।

6 मिनु दाऊद नु इस्राएली नेल्ल बालाह डोइशशा लमा बाकत। बालाह सहर यहूदा डा किरयथ-यारीमम बाकमाकत। मेकेर रे परमप्रभु, परमप्रभु यावे आ सन्दोस ब्रथ लमा बाकत। परमप्रभु यावे सन्दोस तारी बाकशो करूब आस दातेम बाकशो बाकमाकत। मेको परमप्रभु, परमप्रभु यावे आ सन्दोस बाकमाकत। यहोसु १५:९

7 मिनु मेकोपुकीम परमप्रभु आ सन्दोस अबीनादाब आ खिं रे गुंइशा नक बग्गी कामी कुर पामे बाकत। मिनु उज्जाह नु अहीयोमी मेको बग्गी खुल्ना खुल्न लसा बाकत।

8 मिनु दाऊद नु इस्राएली नेल्ले परमप्रभु आ डोंइती ग्येरशा कुम्सो पना पन आइक्च नु ठेयब तार पाइशो ताप्तीके, खैजडी, बुप्केल नु तुराही ताप्शा, जोंब बोक्शा, सिल पामे बाकत।

9 मिनु मेकोपुकी किदोन आ चेरब तुप्तीकेम जाकमानु, ब्यफोमी सन्दोस हिकपदसे बाकत। मिनु उज्जाहमी सन्दोस तिक्चा कली आ गुड दिंदा बाकत।

10 मिनु परमप्रभु यावे उज्जाह क्येडा गाइशशा, मेको कली सदा बाकत। मारदे हना मेकोमी सन्दोस ग्याइक्चा कली आ गुड दिंदा बाकत। मोपतीके मेको परमप्रभु आ डोंइती बेकमाकत।

11 दाऊदमी परमप्रभु यावे उज्जाह आ पर्बम गाइशशो तशा, चुरमाकत। मिनु मेको बाक्तीके आ नें पेरिस-उज्जाह वोदा बाकत। मेको आ नें मुल सम्म मेकोन बाकब।

12 मेको नाक्ती दाऊद परमप्रभु क्येडा हिंमाकत। मेकोमी “मुल ओं दुम्मेनु, गो परमप्रभु आ सन्दोस दोपा कोत्रशा वोइक्नुडा?” देमाकत।

13 मोपतीके दाऊदम मेको सन्दोस कोत्रशा वोइक्चा कली आ सहर मलदा बाकत। आ कोत्रशा वोइक्चा आ पा डा गित्त आ खिं डा ओबेद-एदोम आ खिं लदमे बाकत।

14 मोपा मेको परमप्रभु आ सन्दोस ओबेद-एदोम आ खिंम महिना सां सम्म लीमाकत। मिनु परमप्रभु यावेमी ओबेद-एदोम आ खिं डा मुर नु आ मारेइ मारेइ कली आसीक गेवा बाकत।

## 14

दाऊद नु आ खिं डा मुरपुकी  
रसामुएल ५:११-२५

1 टायर डा पिप हीराममी आ लोत्र कुरबपुकी दाऊद आ बाक्तीकेम सोइक्ता बाकत। मेको कुरब मुर नु दाऊद आ खिं सेल्चा कली लेबानोन डा लाइशशो रवा आ शी, गारो प्रोत्रब नु शी के गेय पाइब सोइक्तीमी बाकत।

2 मिनु दाऊदमी “मुल परमप्रभु यावेम आं कली इस्राएली आन पिप सेल्लती। मिनु आ मुर इस्राएली आन पर्बम आ राज्य ठेयब नु मान ताइब सेल्लो बाकब” दे तुइक्ता बाकत।

3 दाऊदमी यरूसलेमम बाकमेनु, अर्को मीश चाकमी बाकत। मिनु शुश तमी तौ आन आफ दुम्माकत।

4 यरूसलेमम थिशो आ आल आन नें मार मार बाकमा बाकत देशा हना, शम्मुआ शोबाब, नाथान, सोलोमन,

5 इभार, एली-शुआ नु एली-फेलेत,

6 नोगाह, नेफेग, याफीया,

7 एली-शामा, बेलीआदा नु एली-फेलेत बाकमा बाकत।

दाऊद नु पलिस्ती लडाइ पशो

8 मिनू पलिस्तीमी दाऊद इस्राएल नेल्ल डा पिप दुम्ट देशो लोव्र नेंशा, मेको नेल्ले दाऊद कली माल्थ लमा बाक्त। मिनू दाऊदम मेको लोव्र नेंशा पलिस्ती नु लडाइ पथ लमाक्त।

9 मिनू पलिस्ती जाक्शा, रेफाइम डा बेंसीम मार मार रोइक्तमे बाक्त।

10 मोपतीके दाऊदमी परमप्रभु कली “गो लशा, पलिस्ती आन कली लडाइ तोडमी? गे मेको आन कली आं गुडमी गेनीनी?” दे हिल्लो पवा बाक्त। मिनू परमप्रभु यावेमी “इर डोइश्शा लावो, गो मेको आन कली इ गुडमी गेनन” देंमाक्त।

11 मोपतीके दाऊद नु आ मुरपुकी इर डोइश्शा लशा, बाल-पेराजीमम मेको आन कली लडाइ तोशा ग्रामा बाक्त। मिनू दाऊदमी “परमप्रभुमी खोला आ नेक्था डा रू प्रेशो खोदेशो पा, आं जोरी सत्रु आन कली साइक्मी बाक्त” देंत। मोपतीके मेको बाक्तीक आ नें बाल-पेराजीम वोदमे बाक्त।

12 मेकेर पलिस्तीपुकीम आन देवी देवता प्रॉइशा वोदमे बाक्त। मिनू दाऊदमी “मेको चोने” दे अरेवा बाक्त। ब्यवस्था ७:५-२५

13 मिनू पलिस्तीपुकीम लेंशा बेंसीम मार मार रोइक्चा गोव्रमे बाक्त।

14 मिनू दाऊदमी लेंशा परमप्रभु कली हिल्लो पवा बाक्त। मिनू परमप्रभुम मेको कली “मुल गे इर डोइश्शा मलने। गे नोले रे हिरशा, लचा माल्नेवे। शुश रवा बाक्तीके रे मेको आन नेक्था लशा लडाइ तोव्रमी।

15 गे रवा आन इर डरमी लडाइ पाइब आन गाक्शो नेंनी चोटी मेको आन कली लडाइ तोव्रमी। मारदे हना परमप्रभु इन डोंइती पलिस्ती आन लडाइ पाइब नु लडाइ पथ लाइब” देंमाक्त।

16 मिनू दाऊदमी परमप्रभुम देशो खोदेशो पा लडाइ पवा बाक्त। मिनू मेकोम पलिस्ती आन लडाइ पाइब आन कली गिबोन रे गेजेर सम्म खेदा पा सदमे बाक्त।

17 मोपा दाऊद आ ठेयब दुम्टीके रागी नेल्ल ब्रमाक्त। मिनू परमप्रभु यावेमी रागी रागी डा मुर नेल्ल आन थुमी दाऊद क्येडा हिंतीक थुं वोदा बाक्त।

## 15

दाऊदमी सन्दोस चाक्शो  
२सामुएल ६:१२-१६

1 दाऊदमी आ सहरमी आंम कली खिंपुकी सेला बाक्त। मिनू परमप्रभु आ कबल पशो सन्दोस वोइक्चा कली बाक्तीक का सेल्शा, ताम्बु का कीडा बाक्त।

2 मिनू नोले दाऊदम “लेवी आ थर डा मरुमी ला परमप्रभु आ सन्दोस कुरचा माल्नीम” दे हुकुम पवा बाक्त। मारदे हना परमप्रभु यावेमी लेवी आन कली आ सन्दोस कुरचा नु गेना हना यो परमप्रभु आ गेय पचा कली योव्रशो बाक्मा बाक्त।

3 मिनू दाऊदम परमप्रभु यावे आ कबल पशो सन्दोस आ ठीक पशो बाक्तीकेम चाक्चा कली इस्राएली नेल्ल आन कली यरूसलेम सहरम पुक्मी बाक्त।

4 नोले दाऊदम हारून आ चच युइ नु लेवी नेल्ल आन कली खुपतीमी बाक्त।

5 मेको सु सु बाक्मा बाक्त देशा हना, कोहाथ आ तौ आन ठेयब मुर उरीएल नु सहे का २० जना आन खिं खिं डा मुर बाक्मा बाक्त।

6 मेरारी आ तौ आन ठेयब मुर आसायाह नु सहे निकशी २० जना आन खिं खिं डा मुर बाक्मा बाक्त।

7 गेरशोम आ तौ आन ठेयब मुर योएल नु सहे का ३० जना आन खिं खिं डा मुर बाक्मा बाक्त।

8 एली-जाफान आ तौ आन ठेयब मुर शेमायाह नु सहे निकशी आन खिं खिं डा मुर बाक्मा बाक्त।

9 हेब्रोन आ तौ आन ठेयब मुर एलीएल नु ८० जना आन खिं खिं डा मुर बाक्मा बाक्त।

10 उज्जीएल आ तौ आन ठेयब मुर अम्मीनादाब नु सहे का १२ जना आन खिं खिं डा मुर बाक्मा बाक्त।

11 मिनू दाऊदमी चढ़ेब सादोक नु अबीयाथार नु लेवी उरीएल, आसायाह, योएल, शेमायाह, एलीएल नु अम्मीनादाब आन कली ब्रेत्तीमी बाक्त। २सामुएल १५:२९

12 मिनु मेको आन कली “गे लेवी आन खिं डा ठेयब मुर ननी। परमप्रभु यावे, इस्राएली आन परमप्रभु आ सन्दोस आं ठीक पशो बाक्तीके कुइक्चा, दे इन कली नु इन खिं खिं डा मुर आन कली ठीक सेलीन।

13 डोंइती गे मेको कली मकुरतीके परमप्रभु यावे, इं परमप्रभु गोपुकी नु गाइक्ताक्व। मारदे हना गो मेको सन्दोस कली ठीक पा मचाक्क” देंमाक्त। १इतिहास १३:९-११

14 मोपतीके परमप्रभु यावे, इस्राएली आन परमप्रभु आ सन्दोस चाक्चा कली चढ़ेब नु लेवी आंम आंम कली ठीक सेल्समा बाक्त।

15 मिनु लेवीपुकीम परमप्रभु आ सन्दोस शुइश्शो कोक्केमी आन बलामी कुरमे बाक्त। परमप्रभु यावेम मोसा कली दोपा देंमे, मोपा मोसा आ शेंशो पामे बाक्त। प्रस्थान २५:१४; गन्ती ४:१५

16 मिनु दाऊदम लेवी आन ठेयब मुर आन कली “इन खिं खिं डा मुर कुम्सो पाइब योव्रशा, वोइक्चा माल्नीनी। मेकोपुकी तार पाइश्शो ताप्तीके, बीना नु बुप्केल ताप्शा, ग्येरशा ठेयब सेंदा पा कुम्सो पचा माल्नीम” दे अरेमी बाक्त।

17 मोपतीके लेवीपुकीम योएल आ तौ हेमान नु आ खिं खिं डा मुर बेरेक्याह आ तौ आसाफ, नु मेरारी आ तौ आन खिं खिं डा मुर रे कुशायाह आ तौ एथान आन कली योव्रडमे बाक्त।

18 मिनु मेको आन नोले जकरिया, याजीएल, शेमीरामोथ, येहीएल, उन्नी, एलीआब, बेनायाह, मासेयाह, मत्तीथ्याह, एली-फेलेहु, मीक्नैयाह नु लाप्चो खाल पाइब ओबेद-एदोम नु यिएल आन कली योव्रेडमे बाक्त।

19 मिनु कुम्सो पाइब हेमान, आसाफ नु एथान कांसा के बुप्केल ताप्चा कली योव्रचा पुंइसमा बाक्त। १इतिहास ६:१८; १इतिहास ६:२४; १इतिहास ६:२९; १इतिहास २५:१

20 मिनु जकरिया, अजीएल, शेमीरामोथ, येहीएल, उन्नी, एलीआब, मासेयाह नु बेनायाह अलामोथ देशो आइक्च सेंदा पाइश्शो तार पाइश्शो ताप्तीके ताप्चा कली योव्रचा पुंइसमा बाक्त।

21 मिनु मत्तीथ्याह, एली-फेलेहु, मीक्नैयाह, ओबेद-एदोम, यिएल नु अजजीयाह शेमीनीथ देशो ठेयब सेंदा पाइश्शो बीना ताप्तीके ताप्चा कली योव्रचा पुंइसमा बाक्त।

22 लेवी आन ठेयब मुर केनानीयाह कुम्सो पचा नु ताप्चा जोक्ब तुइक्ब बाक्तीके मेको आन कली चलेब दुम्माक्त।

23 बेरेक्याह नु एल्काना सन्दोस बाक्तीके डा लाप्चो कोव्रब बाक्सा बाक्त।

24 मिनु चढ़ेब शेबान्याह, योशाफात, नेथनेल, अमासै, जकरिया, बेनायाह नु एलीएजर परमप्रभु आ कबल पशो सन्दोस आ डोंइती तुराही ताप्चा माल्बाक्मा बाक्त। ओबेद-एदोम नु येहीयाह यो सन्दोस बाक्तीके डा लाप्चो कोव्रब बाक्सा बाक्त।

25 मिनु दाऊद नु इस्राएल डा खाल्पा नु हजार हजार डा लडाइ पाइब आन कप्तानपुकी ओबेद-एदोम आ खिं लशा, ग्येरशा परमप्रभु यावे आ कबल पशो सन्दोस चाक्गमे बाक्त।

26 मिनु परमप्रभु यावेमी आ कबल पशो सन्दोस कुरब लेवी आन कली वारच पाइक्तीके मेकोपुकीम ७ ओटा ब्यफ नु ७ ओटा सांड चढ़ेमे बाक्त।

27 मिनु दाऊद नु सन्दोस कुरब लेवी, कुम्सो पाइब नु केनानीयाह ताप्ब नु कुम्सो पाइब आन कली चलेब नेल्ल रिम्शो सुती के वा फेक्शो बाक्मा बाक्त। दाऊदम रिम्शो सुती वा के कुचु तार फेक्तीके यो फेक्शो बाक्माक्त। प्रस्थान २५:७

28 मोपा इस्राएली नेल्लेमी ठेयब रेयके पा नु ग्रोव्र, तुराही, बुप्केल, तार पाइश्शो ताप्तीके नु बीना ताप्शा परमप्रभु यावे आ कबल पशो सन्दोस कुइश्शा कुमा बाक्त।

29 मिनु परमप्रभु यावे आ कबल पशो सन्दोस दाऊद आ सहरम ओइदमेनु, सावल आ तमी, दाऊद आ मीश मिकालमी झेल रे कोव्रडा बाक्त। मिनु पिप दाऊद कली ग्येरशा सिल पशो तशा, आ थुंमी पिप कली आइक्च मिम्ता बाक्त।



## 16

दाऊदम मुर आन कली आसीक गेशो  
२सामुएल ६:१७-१९

1 मिनु मेकोपुकीमी परमप्रभु आ कबल पशो सन्दोस चाक्शा, दाऊदमी कीशो ताम्बु आगाम वोदमे बाक्त। मिनु मेकोपुकीमी परमप्रभु आ डोंइती चोशा चढेतीक नु दुशा बाक्चा आ परबम चढेतीक चढेमे बाक्त।

2 मिनु दाऊदमी मेको चोशा चढेतीके नु दुशा बाक्चा आ परबम चढेतीके चढेने थुम्शा, मुर आन कली परमप्रभु यावे आ नेंमी आसीक गेवा बाक्त।

3 मिनु मेकोमी इस्राएली नेल्ल आन कली, मीश मुर नु वोंइश मुर आन कली शोब्ले का का, रये नु अङ्गुर शोब्ले का का जचा ब्वचा गेमी बाक्त।

4 मिनु दाऊदमी परमप्रभु यावे आ सन्दोस आ डोंइती गेय पचा, दे लेवी आन कली योत्रशा वोइक्मी बाक्त। मेकोपुकीमी परमप्रभु कली पुंइतीक लोत्र “गे रिम्शो पाइब बाक्नीनी” दे नु परमप्रभु यावे, इस्राएली आन परमप्रभु कली ठेयब सेल्चा माल्बाक्मा बाक्त।

5 मेको आन ठेयब मुर आसाफ बाक्माक्त। मेको आ नोले डा जकरिया, यिएल, शेमीरामोथ, येहीएल, मत्तीथ्याह, एलीआब, बेनायाह, ओबेद-एदोम नु यिएल ठेयब नु आइक्च तार पाइशो ताप्तीके नु सितार ताप्ब बाक्मा बाक्त। आसाफ बुप्केल ताप्ब बाक्माक्त।

6 मिनु चढेब बेनायाह नु याहासीएलमी नाक्त किंत किंत परमप्रभु आ कबल पशो सन्दोस आ डोंइती तुराही तप्चा माल्बाक्सा बाक्त।

दाऊदमी कुम्सो पशो

भजन संग्रह १०५:१-१५; भजन संग्रह ९६; भजन संग्रह १०६:१,४६,४८

7 मेको नाक्ती दाऊदमी नेल्ल क्येडा डोंइती आसाफ नु आ खिं खिं डा मुर आन कली परमप्रभु यावे कली ठेयब सेल्लतीक कुम्सो पपाइक्मी बाक्त।

8 “परमप्रभु यावे, गे रिम्शो पाइब बाक्नीनी, आ नें थिशा मेको कली पुंनीन। मेको आ पशो जात जात डा मुर आन कली तुइक्पतीन।

9 मेको कली कुम्सो पने। मेको कली ठेयब सेल्लतीक कुम्सो पने। मुर आन कली मेको आ छक लाक्चा डा गेय नेल्ल आन परबम लोत्र पने।

10 मेको आ ठेयब नें आ परबम ग्येरसीन। परमप्रभु यावे कली माल्बपुकीमी ग्येरसीन।

11 परमप्रभु यावे नु मेको आ सक्ति मालीन। मेको नु बाक्चा कली माल्ना माल्न बाक्कीन।

12 मेको आ रिम्शो गेय मप्रेंदीन। आ पशो छक लाक्चा डा गेय नु आ निसाफ पतीके मप्रेंदीन।

13 आ गेय पाइब इस्राएल आ चच युड, याकूब आ आल, आ योत्रशोपुकी परमप्रभु आ पशो गेय मप्रेंदीन।

14 मेको परमप्रभु यावे, इ परमप्रभु बाक्ब। मेकोमी रागी नेल्ल आन कली निसाफ पाइब।

15 आ पशो कबल गेना हना यो मप्रेंदीन। मेको कबल हजार हजार पाला डा मुर आन कली पशो बाक्त।

16 मेकोमी अब्राहाम नु कबल पशो बाक्त। मेकोमी इसहाक नु कसम जशा, थोक्शो लोत्र पशो बाक्त।

17 मेको कबल याकूब कली फुल्लुम मुशा ब्रेक्शा गेशो बाक्त। इस्राएल कली गेना हना यो लीब कबल पशो बाक्त।

18 मेको कबल मार बाक्त देशा हना ‘गो इ कली कनान रागी गेनन। इ रागी नु इ थेरशो रू बाक्ब’ दे मेको कबल बाक्त।

19 मेकोपुकी शुश मुर मबाक्तीके, मान मताइब नु अर्को रागी डा मुर बाक्शा,

20 रागी रागी डा मुर आन दातेम हिरशा, राज्य का रे अर्को जात डा मुर सम्म हिरना हिरन गाक्बाक्तेक्म।

21 परमप्रभु यावेमी सुइमी मेको आन कली दिप्चा मगेमी। मेको आन पर्वम पिप आन कली यो हुइशशा उत्पत्ती १२:१७; उत्पत्ती २०:३,७; उत्पत्ती २६:९

22 ‘आं तेल लुकशो आन कली मथिने। आं नोले दुम्ब लोत्र पाइब आन कली श्येत मगेने’ देशो बाक्त।

23 रागी डा मुर नेल्लेमी परमप्रभु यावे कली कुम्सो पने। नाक्त किंत किंत आ श्येत रे प्रोंइशो आ पर्वम लोत्र पने।

24 रागी रागी डा मुर आन दातेमी मेको आ सक्ति आ पर्वम लोत्र पने। जात जात डा मुर आन दातेमी मेको आ पशो छक लाक्चा डा गेय आ पर्वम लोत्र पने।

25 मारदे हना परमप्रभु यावे ठेयब बाक्ब। ठेयब मान पाइक्चा पुंइसीब बाक्ब। देवी देवता नेल्ल आन क्येडा मान पाइक्चा पुंइसीब बाक्ब।

26 मारदे हना जात जात डा मुर आन देवी देवता नेल्ल मूर्ति बाक्नीम। तन्न परमप्रभु यावेमी सरीड सेल्शो बाक्ब।

27 ठेयब दुम्तीक नु मान ततीक मेको नु बाक्नीस। सक्ति नु ग्येरीक मेको आ बाक्तीकेम बाक्नीस।

28 जात जात डा खिं खिं डा मुरपुकीमी परमप्रभु यावे कली ‘छेडछेड नु सक्ति इन के बाक्ब’ दे ठेयब सेलीन। भजन संग्रह २९:१२

29 परमप्रभु यावे कली आ नें शिरचा डा पा मान पने। चढेतीक चाक्शा, आ डोंइती जाक्कीन। आंम आन कली परमप्रभु यावे आ डोंइती ठीक सेल्शा मेको कली ठेयब सेलीन।

30 रागी नेल्ल मेको आ डोंइती थिर थिर पा खिंखि पने। रागी नेल्ल कली गेना हना यो मदुकचा डा पा वोइशो बाक्ब।

31 सरीड ग्येरसेक्ल। रागी थाम्पा ग्येरसेक्ल। मिनु रागी रागी डा मुर आन दातेमी ‘परमप्रभु यावे पिप बाक्ब’ दैमल।

32 समुन्द्र नु मेकेर बाक्ब मारेइ मारेइ नेल्ल ग्येरशा रेयके पामेक्ल। रू नु मेकेर बाक्ब मारेइ मारेइ ग्येरसीमल।

33 मेना ब्वाकी डा रवा परमप्रभु यावे आ डोंइती ग्येरशा कुम्सो पाइनीम। मारदे हना मेको रागी कली निसाफ पथ जाक्ब।

34 परमप्रभु यावे कली ‘गे रिम्शो पाइब बाक्नीनी’ देनीन। मारदे हना आ दाक्तीक गेना हना यो लीब। २इतिहास २०:२१

35 मिनु गेपुकीम ‘आंइ कली श्येत रे प्रोनीन। गे आंइ कली प्रोंइब परमप्रभु बाक्नीनी। आंइ कली रागी रागी रे खुप्शा, प्रोंइकी’ दे यो देनीनी। गोपुकीमी इन कली ‘गे रिम्शो पाइब बाक्नीनी’ देश इन नें ठेयब सेल्शा, ग्येरशा बाक्नीकी।

36 परमप्रभु यावे, इसाएली आन परमप्रभु गेना हना यो ठेयब बाक्ब। गेना हना यो मोदेशो बाक्ब” दे कुम्सो पवा बाक्त।

मिनु नोले मुर नेल्लेमी “आमेन” देश, परमप्रभु यावे कली ठेयब सेल्मे बाक्त। भजन संग्रह ४१:१४

नाक्त किंत किंत पचा माल्लो

37 मिनु दाऊदम आसाफ नु आ खिं खिं डा मुर आन कली परमप्रभु यावे आ कबल पशो सन्दोस आ डोंइती नाक्त किंत किंत पचा माल्लो गेय पचा, दे वोदा बाक्त।

38 ओबेद-एदोम नु आ खिं डा मुर मेको आन कली वारच पाइब बाक्मा बाक्त। येदुथून आ तौ ओबेद-एदोम नु होसाह लाप्यो कोत्रब आन ठेयब मुर बाक्सा बाक्त।

39 दाऊदम चढेब सादोक नु मेको आ खिं खिं डा चढेब आन कली गिबोनम बाक्शो डांडा डा परमप्रभु यावे आ बाक्तीकेम वोइशो बाक्माक्त। १इतिहास २१:२९

40 मेकोपुकीमी नाक्त किंत नाक्दो नु सुनी चढेतीकेमी चोशा चढेतीक चढेचा माल्लो बाक्मा बाक्त। परमप्रभु यावेमी इसाएली आन कली ब्रेक्शा आ अरेशो लोत्रम खोंदेशो पा नेल्ल पचा माल्ले बाक्त। २प्रस्थान २९:३८-३९

41 हेमान, येदुथून नु आन नें ब्रेक्शो योत्रशो मुर मेको नु बाक्मा बाक्त। मेको परमप्रभु कली “गे रिम्शो पाइब बाक्नीनी। मारदे हना इन दाक्तीक गेना यो लीब” दैचा कली वोइशो बाक्मा बाक्त।

42 हेमान नु येदुथून आस ताप्तीक तुराही नु बुपकेल यो बाक्मा बाक्त। परमप्रभु कली कुम्सो पचा कली अरु ताप्तीके यो बाक्मा बाक्त। येदुथून आ तौपुकी लाप्यो खाल पाइब बाक्मा बाक्त।

43 मिनु नोले मुर नेल्ल आन खिं खिं लेम्मा बाक्त। मिनु दाऊद आ खिं डा मुर आन कली आसीक गेथ लमाक्त।

## 17

परमप्रभुमी दाऊद नु कबल पशो  
२सामुएल ७:१-१६

1 मिनु दाऊद आ खिंम बाकम नोले परमप्रभु यावे आ लोत्र पाइब नाथान कली “गो लेबानोन डा लाइशशो रवा आ शी के खिंम बाकशो बाक्नुड। तन्न परमप्रभु यावे आ कबल पशो सन्दोस ताम्बुम वोइशशो बाक्ब” दे मदा बाक्त।

2 मिनु नाथानम दाऊद कली “गे इन थुंम मार बाक्मे, मेको पने। मारदे हना परमप्रभु गे नु बाक्ब” दे मदा बाक्त।

3 तन्न मेको नाकदो परमप्रभु यावेमी नाथान कली लोत्र पवा बाक्त।

4 मेकोमी “आं गेय पाइब दाऊद कली ‘परमप्रभु यावेमी इ कली मार देंब देशा हना, गे आं कली बाक्तीक खिं मसेलो।

5 इस्त्राएली आन कली इजीप्त रे गुंडशा एक चाक्शो नाक्त रे मुल सम्म गो गेनायो खिंम मबाक्ड। गो ताम्बुम, आं बाक्तीकेम बाक्शो बाक्ती।

6 मिनु गो इस्त्राएली आन दातेम नु ते ते गाक्डा, गो मेको आं मुर आन कली लां कौडब इन निसाफ पाइब आन कली आं कली लेबानोन डा लाइशशो रवा आ शी डा खिं सेलो, दे गेनायो मदेडा’।

7 मोपतीके आं गेय पाइब दाऊद कली मुर नेल्ल आन परमप्रभु यावेमी इ कली मार देंब देशा हना ‘गो क्यारश भेडा योव्रतीके रे आं मुर इस्त्राएली आन पिप दुम्चा कली योव्रतन।

8 गे ते ते लवे, गो यो मेक मेक बाक्शो बाक्ती। मिनु इ लांम बाक्शो इ जोरी सत्रु आन कली खतम पोक्तामी। मुल गो इ कली रागी डा थम ठेयब मुर खोदेशो पा ठेयब सेल्लन।

9 गो आं मुर इस्त्राएली आन कली रागी का योव्रनुड। मिनु गो मेको आन कली मेकेर बाक्पाइक्नुडमी। मिनु मेको आन रागीम बाक्नीम। मुल रे मेको आन कली श्येत गेबपुकी सुडम श्येत मगेनीम।

10 गोमी डोईडोईती आं मुर इस्त्राएली आन कली सासन पाइब निसाफ पाइबपुकी योव्रडुमी रे मेको आन कली मरिम्शो मुरपुकीम श्येत गेशो खोदेशो पा मुल गेनायो श्येत मगेनीम। गो इ जोरी सत्रु नेल्ल आन कली इ सासनम सेल्लुडमी। गो इ परमप्रभु यावेम इ राज्य नु इ खिं बोल्यो सेल्लुड।

11 मिनु इ नाक्त नुष्शा, गे बेक्शा इ किकी पिपपुकी नु लाइनेवे। मिनु नोले गो इ तौ का कली इ पा डा पिप सेल्लुड। मिनु गो मेको आ राज्य महिम्सीब सेल्लुड।

12 मिनु मेकोमीन आं कली खिं का सेल्ल्या माल्ब। गो मेको आ राज्य गेना हना यो लीपाइक्नुड। १इतिहास २२:१०-२८

13 गो मेको आ आफ दुम्नुड। मिनु मेको आं तौ दुम्ब। गो मेको आ डोईती डा सासन पाइब रे आं गेना हना यो दाक्तीके प्रोइशो खोदेशो पा दाऊद रे मप्रोइनुड।

14 गो मेको कली आं खिं नु आं राज्यम गेना हना यो कली वोइक्नुड। मिनु मेको आ सासन पतीक गेना हना यो महिम्सीथु बाक्ब’ देशो लोत्र’ नाथान कली तुडक्पदा बाक्त।

15 मिनु नाथानमी मेको कली देशो लोत्र नु कौइशो नेल्ल दाऊद कली शेंदा बाक्त।

“गे रिम्शो पाइब बाक्नीनी” देशो  
२सामुएल ७:१७-२९

16 मिनु पिप दाऊद परमप्रभु यावे आ बाक्तीक लशा “परमप्रभु यावे, परमप्रभु, गो सु नडा? मिनु आं खिं मार बाक्बा? मिनु गे आं कली एक सम्म चाक्थीनी। उत्पती ३२:११

17 मो हना यो परमप्रभु एको इन डोंइती शुश ममाइ। परमप्रभु यावे, परमप्रभु, गेमी इन कबल इन गेय पाइब आ खिं कली शुश नोले सम्म कली बारपाइशो बाक्नीनी।

18 इन गेय पाइब कली इन गेशो मान आ पर्वम दाऊदम अरु मार देने चाप्बा डा? गे इन गेय पाइब कली रिम्शो पा तुइशो बाक्नीनी।

19 परमप्रभु यावे, गे इन गेय पाइब आ पर्वम नु इन पत दाक्शो गेय खोदेशो पा गे थम ठेयब गेय पशो बाक्नीनी। मिनु एको इन पशो ठेयब कबल तुइकपाइशो बाक्नीनी।

20 इन खोदेशो अर्को सुइ मबाक्नीम। परमप्रभु यावे, इन डा लाक्शा अर्को तेकोइ परमप्रभु मबाक्नीम। डोंइती इन देशो नेशो नेल्ल मुल आंइ मिक्चीम ताइतक। यसैया ४४:६

21 मिनु इन मुर इस्राएली आन कली सु नु थाप्ने चाम्सीबा डा? मेको आन वाइल दुम्तीक रागी रे आंम मुर सेल्चा कली आंमान रागीम चाक्ब अर्को तेको जात डा मुर आन परमप्रभु बाक्नीमी डा? गेमी ठेयब नु हिंचा डा गेय पा इजीप्त रे प्रोंइशो इन मुर आन डोंइडोंइती अर्को जात डा मुर आन कली खेरशा इन मुर आन कली बाक्पाइशो बाक्नीनी।

22 गेम इन मुर इस्राएली आन कली गेना हना यो कली इन के सेल्शो बाक्नीनी। परमप्रभु यावे गे मेको आन परमप्रभु दुम्शो बाक्नीनी।

23 मुल ए परमप्रभु यावे, गे इन गेय पाइब नु मेको आ खिं आ पर्वम मार मिम्शा पशो बाक्नी, मेको गेना हना यो लील। गे मार कबल पशो बाक्नी, मेको गाप्ल।

24 मिनु इन पशो गेय ठेयब दुम्चा कली मेको गेना हना यो लील। मिनु मुर नेल्ल आन परमप्रभु यावे, इस्राएली आन परमप्रभु बाक्ब। मिनु इन गेय पाइब दाऊद आ खिं इन डोंइती बोल्यो दुम्शा लीब।

25 गे आं परमप्रभुम इन गेय पाइब आं खिं सेल्चा कली इन मिम्शो शेंशो बाक्नीनी। मोपतीके गो इन गेय पाइबम इन डोंइती एको प्रार्थना पचा चिक्शो बाक्नुड।

26 ए परमप्रभु यावे, गेन परमप्रभु बाक्नीनी। गे इन गेय पाइब नु एको रिम्शो कबल पशो बाक्नीनी।

27 मेको गेना हना यो इन डोंइती बाक्ल, दे इन गेय पाइब आ खिं कली आसीक गेचा इन मिम्शो बाक्ब। मारदे हना गेन मेको कली आसीक गेशो बाक्नीनी। मिनु मेको गेना हना यो आसीक रशो बाक्ब” दे दाऊदम परमप्रभु कली लोव्र पवा बाक्त। उत्पती १२:३

## 18

### दाऊद आ राज्य बारशो

२सामुएल ८:१-१४

1 मेको आ इच्का नोले दाऊदमी पलिस्ती नु लडाइ पा ग्राशा फूमी बाक्त। मिनु पलिस्ती आन गाथ सहर नु मेको आ एर ओंथ डा गाउं नेल्ल आइक्के सेला बाक्त।

2 मेकोमी मोआबी आन कली यो फूमी बाक्त। मिनु मेकोपुकी दाऊद आ सासनम दुम्शा, मेको कली तिरो थाप्चा माल्मा बाक्त।

3 मिनु दाऊदमी युफ्रेटीस खोला सम्म आ ग्राशो अधिकार ठीक वोइक्थ लमेनु, सोबाह डा पिप हादादेजेर नु हमाथ सम्म लडाइ पवा बाक्त।

4 मिनु दाऊदम मेको रे पा हजार का बग्गी, ७ हजार शारा डोइक्ब नु २० हजार खोइलीम गाक्ब लडाइ पाइब आन कली ग्याइक्तीमी बाक्त। मिनु मेकोम सहे का शारा प्रोंइशा अरु बग्गी डा शारा नेल्ल आन कली खोइल डा नारी खोदमे बाक्त।

5 मिनु सोबाह डा पिप हादादेजेर कली वारच पाइक्चा कली दमस्कस डा अरामीपुकी जाक्मे बाक्त। मिनु दाऊदमी मेको आन दाते डा २२ हजार आन कली साइक्मी बाक्त।

6 मिनु दाऊदम दमस्कस डा अराम सहरम आ ताम्बु कीडा बाक्त। मिनु अरामीपुकी मेको आ सासनम दुम्शा मेको कली तिरो थाप्तमे बाक्त। मोपा दाऊद ते लत हना यो परमप्रभु यावेमे मेको कली ग्रापदा बाक्त।

7 दाऊदम हादादेजेर आ लडाइ पाइब आन ठेयब मुरपुकीम कुरशो सुन के ब्रा, तेक्तीकपुकी रोइश्शा यरूसलेमम चाकगमे बाक्त।

8 दाऊदम हादादेजेर आ तिब्हाथ नु कुन सहर रे शुश कांसा चाकगमे बाक्त। मेको रे पा सोलोमनम ठेयब चिक्तीक बोस, थामपुकी नु ग्योबपुकी सेला बाक्त। १ राजा ७:२३; १ राजा ७:१५

9 मिनु हमाथ डा पिप तोऊमी दाऊदमी सोबाह डा पिप हादादेजेर आ लडाइ पाइब नेल्ल आन कली फुशो लोत्र नेना बाक्त।

10 मिनु दाऊदमी हादादेजेर कली लडाइ फुशो आ पबंम मेको कली रिम्शो पाइतीनी देंथ तोऊम आ तौ हदोराम कली दाऊद आ बाक्तीक सोइक्ता बाक्त। मारदे हना हादादेजेर नु तोऊ आस दातेमी लडाइ दुम्शो बाक्माक्त। मिनु हदोराममी आं नु बाक्शो सुन चांदी नु कांसा के ग्योबपुकी चाकगा बाक्त।

11 मिनु दाऊद पिपम मेको आ चाक्शो सुन नु चांदी के ग्योब नेल्ल परमप्रभु यावे कली चढ़ेवा बाक्त। मेकोमी अकों जात नेल्ल एदोम, मोआब, अम्मोनी, पलिस्ती नु अमालेकी रे चाक्शो सुन चांदी यो चढ़ेवा बाक्त।

12 सेरूयाह आ तौ अबीशैमी हिक्सी आ बेंसीम १८ हजार एदोमी लडाइ पा सदा बाक्त।

13 मिनु मेको आन रागीम ताम्बु कीडा बाक्त। मिनु एदोमी नेल्ल दाऊद आ सासनम दुम्मा बाक्त। मोपा दाऊद ते ते लमे, मेक मेक परमप्रभु यावेमी मेको कली प्रापदा बाक्त।

दाऊद आ कप्तानपुकी  
२सामुएल ८:१५-१८

14 मिनु दाऊदम इस्राएल नेल्लेमी सासन पवा बाक्त। मिनु आ मुर नेल्ल आन कली ठीक निसाफ पवा बाक्त।

15 सेरूयाह आ तौ योआब कप्तान बाक्माक्त। अहीलुद आ तौ येहो-शाफात ठेयब ब्रेक्ब बाक्माक्त।

16 अहीतुब आ तौ सादोक नु अबीयाथार आ तौ अहीमेलेक चढ़ेब बाक्सा बाक्त। शाव्शा लडाइ पाइब आन ठेयब ब्रेक्ब बाक्माक्त। १ इतिहास २४:६

17 येहो-यादा आ तौ बेनायाह केरेथी नु पेलेथी पिप कली खाल पाइब आन कप्तान बाक्माक्त। दाऊद आ तौपुकी चहिं पिप आ गेय पाइब आन ठेयब मुर बाक्मा बाक्त।

## 19

दाऊद आ मुर आन कली मुने तोक्शो

२सामुएल १०:-; २सामुएल ११:१; २सामुएल १२:२६-३१

1 मिनु इच्का नाक्त नोले अम्मोनी आन पिप नाहाश बेक्माक्त। मिनु मेको आ पा डा आ तौ पिप दुम्माक्त। १ सामुएल ११:१

2 मिनु दाऊदमी “आ आफोम आं कली रिम्शो पशो खोदेंशो पा, गो नाहाश आ तौ हानुन नु थमा पा वारचबु दुम्चा माल्नस्कु” देंमाक्त। मिनु मेको आ आफ बेक्शो आ पबंम सुर्ता पशो लोत्र पथ लोत्र कुरब मुर सोइक्ता बाक्त। मिनु दाऊद आ लोत्र कुरबपुकी हानुन कली रिम्शो लोत्र पथ अम्मोनी आन रागीम जाक्दीम्मा बाक्त।

3 मिनु अम्मोनी आन ठेयब मुरपुकीम हानुन कली “दाऊदमी इन कली रिम्शो लोत्र पथ मुर सोइक्तानु, गे दाऊदमी इन आफ कली मान पा मुर सोइश्शो बाक्ब, दे मिम्नीनी? इन रागीम तेरे ओव्रशा खतम पोक्चा, दे कोव्रथ कका सोइश्शो बाक्ब। आ मुरपुकी क्यारी पथ जाक्शो मनमी डा?” दे मदमे बाक्त।

4 मिनु हानुनमी दाऊद आ सोइश्शो मुर आन कली ग्याइश्शा आन चां प्रेक्तमे बाक्त। आन वा इर रे आन देल्लो सम्म रिक्शा सोइक्तमे बाक्त।

5 मिनु दाऊदमी आ मुर आन कली मो पशो लोत्र नेना बाक्त। मिनु मेको आन कली गुम्चा, दे मुर सोइक्तमे बाक्त। मारदे हना मेकोपुकी थाम्पा मुने तोक्चा पुंडसीशो बाक्मा बाक्त। मिनु मेको आन गल शोक्रे डोंइती डा खोदेंशो पा मबारम सम्म मेको आन कली “यरीको सहरम बाक्मल” दे अरेवा बाक्त।

अम्मोनी लडाइ पचा ठीक दुम्शो

६ मिनु अम्मोनीपुकीमी “दाऊद आ डोंइती मरिम्शो पाइतक” दे तुइक्तमे बाक्त। मिनु हानुन नु अम्मोनीपुकीमे मेसोपोटामीया डा अराम-नाहाराइम, अराम-माकाह नु सोबाह रे बग्गीपुकी नु शारा डोइक्व चाक्चा कली हजार का टलेन्ट चांदी सोइक्तमे बाक्त। टलेन्ट का ३४ किलो बाक्व।

७ मिनु मेकोपुकीमी ३२ हजार बग्गी नु माकाह डा पिप नु आ लडाइ पाइब आन कली थाप्शा चाक्चामे बाक्त। मेकोपुकी जाक्शा मेदेबा सहर आ नेक्था ताम्बु कीडमे बाक्त। अम्मोनीपुकी आन सहर सहर रे गूशा लडाइ पचा कली ठीक पामे बाक्त।

८ मिनु दाऊदम मेको लोव्र नेंशा, योआब नु लडाइ पाइब नेल्ल आन कली सोइक्ता बाक्त।

९ अम्मोनीपुकी जाक्शा, सहर ओव्रतीकेमी लडाइ पचा कली ठीक दुम्मा बाक्त। मेको नु जाक्शो पिपपुकी सहर ओव्रतीकेम मबाक्थु, इच्का डोन राप्शा लडाइ पचा ठीक दुम्मा बाक्त।

१० मिनु योआबम आ नोले नु डोंइती निम्फा पटटी रे लडाइ तोचशो तवा बाक्त। मिनु मेकोमी कोइ कोइ योव्रशो हिक्सीशो लडाइ पाइब इस्राएली आन कली अरामी नु लडाइ पथ सोइक्ता बाक्त।

११ मिनु लीशो लडाइ पाइब आन कली आ लोक्व अबीशै आ हुकुममी गेवा बाक्त। मिनु मेको अम्मोनी नु लडाइ पचा कली ठीक दुम्मा बाक्त।

१२ मिनु योआबमी “अरामीपुकी आं क्येडा ग्राचा चिक्ताक्म हना, गे आं कली वारच पथ पिवो। अम्मोनी इं क्येडा ग्राचा चिक्ताक्म हना, गो इ कली वारच पथ पीनुड।

१३ सक्ति पाइश्शो दुमीन। गोपुकी आंम जात नु इं परमप्रभु आ सहर आ पर्बम महिंथु, लडाइ पय। परमप्रभु यावेम मार मिम्शो बाक्बा, मेको पाइब” देंमाक्त।

१४ मिनु योआब नु मेको आ मुरपुकी अरामी आन नेक्था लशा, मेको आन कली खेदा पामे बाक्त। मिनु मेकोपुकी मेको आन क्येडा प्रोक्मा बाक्त

१५ मिनु अम्मोनीपुकी यो अरामी प्रोक्शो तशा, योआब आ लोक्व अबीशै आ डोंइती रे प्रोक्शा सहर ओव्रमा बाक्त। मोपतीके योआब यरूसलेम लेम्माक्त।

१६ मिनु अरामी इस्राएली आन क्येडा बुका बाक्त, दे तुइश्शा, युफ्रेटीस खोला आ आइक्वी हांबु डा हादादेजेर आ कप्तान शोफाक आ हुकुमम बाक्शो अरु अरामी आन कली ब्रेथ सोइक्तमे बाक्त।

१७ मेको आन मो पशो लोव्र दाऊद कली नेंपदमे बाक्त। मिनु मेकोमी रीब पा इस्राएली लडाइ पाइब नेल्ल आन कली खुप्शा यर्दन खोला शोक्शा लडाइ पचा कली सोइक्तीमी बाक्त। मिनु मेकोपुकी लशा लडाइ पचा कली ठीक दुम्मा बाक्त। अरामी यो मोपान दाऊद नु लडाइ पचा कली ठीक दुम्मा बाक्त। मिनु लडाइ पामे बाक्त।

१८ तन्न इस्राएलीपुकीम मेको आन कली फ्रुशा खेदा पामे बाक्त। दाऊदमी ७ हजार अरामी आन बग्गी खुल्ब नु ४० हजार लडाइ पाइब नु मेको आन कप्तान शोफाक आन कली सदमे बाक्त।

१९ मिनु हादादेजेरम आ मुरपुकी इस्राएली आन क्येडा बुशो तशा गारचा कली सल्ला पथ मुर सोइक्ता बाक्त। मिनु दाऊद कली जिम्मा गेसमा बाक्त। मोपतीके मेको नोले गेनायो अरामीपुकीम अम्मोनी आन कली वारच मपामे बाक्त।

## २०

### दाऊदम रब्बाह सहर ग्राशो

१ मिनु बर्खा जाक्मेनु, पिपपुकी लडाइ पथ गूमा बाक्त। मिनु योआबमी लडाइ पाइबपुकी लाइश्शा अम्मोनी आन रागी कली गोरशो सेला बाक्त। मिनु मेको रब्बाह सहर पुम्शा, आ एर ओंथ नेल्ल हिरदा बाक्त। दाऊद चहिं यरूसलेम उइ बाक्माक्त। मिनु योआबमी रब्बाह सहर कली लडाइ पा खतम सेल्शा ग्रामाक्त।

२ मिनु दाऊदमी मेको आन पिप आ पिया रे सिरपेच लदा बाक्त। मेको सुन नाक्शोनु, टलेन्ट का बाक्माक्त। मेको सिरपेचम शुश क्येड लाइब हीरा यो क्येप्शो बाक्माक्त। मेको सिरपेच दाऊद कली गुक्त्मे बाक्त। दाऊदमी मेको सहर रे शुश मार मार रोइश्शा लदा बाक्त। टलेन्ट का ३४ किलो बाक्व

3 मेको रागी डा मुर आन कली गुंडशा, मेको आन कली आरा, कोदाली नु खामी गेय पपदमे बाक्त। मोदेशो दाऊदमी अम्मोनी आन सहर नेल्लेमी पवा बाक्त। नोले दाऊद नु आ मुर नेल्ले यरूसलेम लेम्मा बाक्त।

पलिस्ती नु लडाइ पशो  
२सामुएल २१: १८-२१

4 मेको आ नोले पलिस्तीपुकी नु गेजेर सहरमी लडाइ दुम्माक्त। मेना हुशा डा मुर सिब्वेकै माइशो सिप्पाइ कली सदा बाक्त। सिप्पाइ चहिं रेफाइ आ चच युइ का बाक्शो बाक्माक्त। पलिस्ती बुम्मा बाक्त। १इतिहास २७:११

5 नोले लेशा पलिस्ती नु लडाइ दुम्माक्त। याइर आ तौ एल्हानानमी गित्त आ खिं डा मुर गोल्याथ आ लोकब लाहमी कली सदा बाक्त। मेको आ तूतीक आ ग्याइक्तीक वा प्रोक्ब आन शी खोमो ठेयब बाक्माक्त।

6 मिनु नोले लेशा गाथ सहरमी लडाइ दुम्माक्त। मेकेर लाइशो मुर का बाक्माक्त। आ गुइ नु खोइली नेल्लेम ६,६ ओटा ब्रेच्यो पाइशो नेल्ल पा २४ ओटा ब्रेच्यो पाइशो मुर का बाक्माक्त। मेको रेफाइ आ चच युइ का बाक्माक्त।

7 मेकोमी इस्राएली आन कली शुक्शी पवा बाक्त। मिनु दाऊद आ लोकब शिमेआ आ तौ योनाथनमी मेको कली सदा बाक्त।

8 मेको गाथ डा लाइशो मुर आन चच युइ, रेफाइ आ मुर बाक्मा बाक्त। मिनु दाऊद नु आ मुरपुकीमी मेको आन कली सदमे बाक्त।

## 21

दाऊदम मुर आन कली हिक्शो  
२सामुएल २४:-

1 मिनु सैतानमी इस्राएली आन कली मरिम्शो पचा कली दाऊद कली आ मुर इस्राएली आन कली हिक्पाइक्मी बाक्त।

2 मोपतीके दाऊदम योआब नु आ कप्तान आन कली “बेयर-शेबा रे दान सम्म डा इस्राएली आन कली हिक्शा, आं कली शेंचा नड। मिनु मेकोपुकी दोशो बाक्मा, गो तुइक्चा माल्नुड” दे अरेमी बाक्त।

3 तन्न योआबमी “परमप्रभु यावेमी आ मुर आन कली एको क्येडा यो सहे खेयप हिक्शो खोइ सोशा बोशा शुश सेलल। मेकोपुकी आं पिप इन गेय पाइब मुर मडुम्नीमी डा? गे मारदे मो पचा माल्नीनी? गे मारदे इस्राएली आन कली दोस चाक्नीनी?” देमाक्त। प्रस्थान ३०:१२

4 तन्न पिपमी योआब आ लोव्र मनेना बाक्त। मिनु योआब लशा, इस्राएल नेल्ल हिरशा, यरूसलेमम लेशशा जाक्माक्त।

5 मिनु योआब यरूसलेम जाक्शा, दाऊद कली आ हिक्शो मुरपुकी ओशो बाक्तेक्म, दे शेंदा बाक्त। मेकोमी “इस्राएलम या चलेने चाप्ब, लडाइ पाइब ११ लाख नु यहूदाम ४ लाख ७० हजार बाक्नीम” देमाक्त।

6 तन्न योआबमी लेवी आ थर डा मुर नु बेन्यामीन आ थर डा मुर आन कली महिक्मी बाक्त। मारदे हना योआबमी पिप आ हुकुम पशो कली काइ मदाक्ता बाक्त।

दाऊदम सजाइ तशो

7 मिनु परमप्रभु दाऊद आ पशो तशा, गाइक्ता बाक्त। मिनु इस्राएली आन कली सजाइ गेवा बाक्त १इतिहास २७:२४

8 मिनु दाऊदम परमप्रभु कली “गो मोदेशो पा ठेयब पाप पाता। मुल इन गेय पाइब आं दोस क्याम्दीन। मारदे हना गो थम मरिम्शो पाइब दुम्ती” देमाक्त।

9 मिनु परमप्रभु यावेमी आ लोव्र पाइब गाद कली “गे लशा दाऊद कली

10 परमप्रभु यावेमी इन कली मार लोव्र पाइब देश हना ‘गो इ डोइती लोव्र सां वोइक्नुड। मेको रे का योव्रसो। मिनु मेको इ कली पाइनुड’ देत, मतो” देमाक्त।

11 मिनु गाद दाऊद आ बाक्तीके जाकशा, मेकोमी “परमप्रभु यावेमी इन कली लोव्र पाइब। मिनु गे लोव्र का योव्रसो।

12 ‘गो इ डोंइती लोव्र सां वोइक्नुड। मेको रे का योव्रसो’ देशो बाक्ब। मेको लोव्र सां तेको बाक्नीम देशा हना, डोंइती डा बर्स सां सम्म अन्काल दुम्तीके, नोले डा महिना सां सम्म इन जोरी सत्रुमी खेदा पचा पुंडसीतीके, आन तरवारम इन कली ग्रातीके नु नेल्ल क्येडा नोले डा परमप्रभु यावेमी आ तरवार रे नाक्त सां सम्म रागी नेल्लेम बेक्चा डा रोड पपाइशशा मुर साइक्तीक। मेको लोव्र सांमी का योव्रसो। परमप्रभु यावे आ स्वर्ग डा गेय पाइबमी नाक्त सां सम्म इस्त्राएल रागीम शुश मुर आन कली साइक्तीक। मेको लोव्र सां बाक्तेक्म। का योव्रसो। गो आं कली सोइक्ब कली मार देंचा माल्नुड, देंनीन” देंमाक्त।

13 मिनु दाऊदम गाद कली “गो थम श्येत जाइब दुम्ती। परमप्रभु यावे आ गुडमी दुम्चा गेयीनी। मारदे हना मेको आ शिशी थम ठेयब बाक्ब। तन्न मुर आन गुडमी दुम्चा मगेयीनी” दे मदा बाक्त।

14 मोपतीके परमप्रभु यावेमी इस्त्राएल रागीम बेक्चा डा रोड पपाइक्मी बाक्त। मिनु ७० हजार बेक्मा बाक्त।

15 मिनु परमप्रभुमी आ स्वर्ग डा गेय पाइब का यरूसलेम सहर खतम पोक्चा कली सोइक्ता बाक्त। तन्न मेकोमी खतम पोक्चा चिक्तानु, परमप्रभु यावेमी मेको खतम पोक्तीक तशा, शिशी पा तेक्गा बाक्त। मेकोमी खतम पोक्ब आ स्वर्ग डा गेय पाइब कली “मुल दुम्त। इ गुड तेक्को” दे मदा बाक्त। मेना परमप्रभु यावे आ स्वर्ग डा गेय पाइब यबुसी ओरनान आ खला आ नेक्था राप्शा, बाक्शो बाक्माक्त।

16 मिनु दाऊदमी इर गे कोव्रडानु, परमप्रभु यावे आ स्वर्ग डा गेय पाइब का सरीड नु रागी आस दातेमी राप्शा, आ गुडमी शोइशशो तरवार का यरूसलेम गे दिंशो तवा बाक्त। मिनु दाऊद नु मेको नु बाक्शो खूशोपुकी भाडग्रा फेक्शा खुम्की पा बाम्मा बाक्त।

17 मिनु दाऊदम परमप्रभु कली “मुर आन कली हिक्चा कली गो कका अरेतामी। गो कका पाप पा काइ मरिम्शो पाता। तन्न एको भेडापुकीम मार पामे डा? परमप्रभु यावे, आं परमप्रभु, इन गेचा डा श्येत आं कली नु आं आफ आ खिं कली दुम्ल। तन्न इन मुर आन कली मोदेशो श्येत मगेन” देंमाक्त।

### दाऊदम चढ़ेतीक सेल्शो

18 मिनु परमप्रभु यावे आ स्वर्ग डा गेय पाइबमी गाद कली “गे दाऊद कली ‘यबुसी ओरनान आ खलामी परमप्रभु यावे कली चढ़ेतीक का सेलो’ दे मतो” देंमाक्त।

19 मोपतीके दाऊदमी गादम परमप्रभु यावे आ नेमी अरेशो लोव्र खोदेशो पवा बाक्त।

20 मेना ओरनान आ चेरब दांड पा लेशशा कोव्रडानु, परमप्रभु यावे आ स्वर्ग डा गेय पाइब कली तवा बाक्त। आ नु बाक्शो आ ४ जना तौ चहिं खुंइसमा बाक्त। ओरनान चहिं चेरब तुप्स डा तुप्स बाक्माक्त।

21 दाऊद मेको आ बाक्तीक जाक्दीम्मेनु, ओरनानम पिप कली तशा, आ डोंइती खुम्की पा बाम्माक्त।

22 मिनु दाऊदम ओरनान कली “एको खला डा रू परमप्रभु यावे कली चढ़ेतीक का सेल्चा कली गेयी। मेको गिश बाक्मे, मेको डा क्येट गेनुड। मुर आन कली गेशो बेक्तीक रोड नाइक्सेक्ल” देंमाक्त।

23 मिनु ओरनानमी दाऊद कली “मेको ताक्कीन। हजुर, पिपम मार पचा दाक्नीनी, मेको पने। चोशा चढ़ेचा कली ब्यफपुकी गेनुड। शी कली दांड पशो शी बाक्ब। अन्न चढ़ेचा कली चेरब बाक्ब। गो मो गेता” देंमाक्त।

24 तन्न पिप दाऊदमी ओरनान कली “ममाइ, गो नेल्ल गिश बाक्मे मिश क्येट थाप्नुड। गो मोशा इ मार मार ताक्शा परमप्रभु यावे कली मचढ़ेनुड” देंमाक्त।

25 मोपतीके दाऊदमी ओरनान कली मेको रू डा ६ सहे सुन के शेकेल नाक्शा गेवा बाक्त। सेकेल का ११.५ ग्राम डा चांदी के क्येट बाक्ब।

26 मिनु दाऊदम मेकेर परमप्रभु यावे कली चढ़ेतीक का सेला बाक्त। मिनु चोशा चढ़ेतीक नु दुशा बाक्चा आ पर्बम चढ़ेतीक चढ़ेवा बाक्त। मिनु परमप्रभु यावे आ नें थिशा पुना बाक्त। परमप्रभु यावेमी सरीड रे चोशा चढ़ेतीके तारी मी तोक्शा लोव्र लेत्ता बाक्त। १राजा १८:२४



27 मिनु परमप्रभु यावेमी आ स्वर्ग डा गेय पाइब कली “इ तरवार खोतम पिप्तो” दे मदा बाक्त।

28 मेना दाऊदम परमप्रभु यावेम यबुसी ओरनान आ खलाम आ लोत्र लेत्ताकयी, दे तुइशशा मेकेर चढेवा बाक्त।

29 मोसाम गोरशो रागीम सेल्शो परमप्रभु यावे आ बाक्तीक नु चढेतीके मेना सम्म गिबोन इर डा पूजा पतीकेम बाक्शो बाक्माक्त। १ राजा ३:४; २इतिहास १:३,६

30 तन्न दाऊद परमप्रभु कली पुंइचा मेकेर लने मचाप्शो बाक्माक्त। मारदे हना परमप्रभु यावे आ स्वर्ग डा गेय पाइब आ तरवार क्येडा हिमाक्त।

## 22

परमप्रभु यावे आ खिं सेल्चा चिक्शो

1 मिनु दाऊदमी “एकेर परमप्रभु आ खिं नु इस्राएलीपुकीमी परमप्रभु यावे कली चोशा चढेतीक सेल्चा माल्ब” देंमाक्त।

2 मिनु दाऊदमी “इसाएलम बाक्ब अर्को रागी डा मुर आन कली बुक्कीन” दे अरेवा बाक्त। मिनु मेको आन कली परमप्रभु आ खिं सेल्चा कली फुल्लु खोइक्तीक गेय गेमी बाक्त।

3 दाऊदमी शुश फलाम नु कांसा गेवा बाक्त। मेको लाप्चो नु लाप्चो डा शी आन कली कांटी नु ग्याइक्पाइक्तीके सेल्चा कली वोइशशो बाक्त। मेको नाकने मचाप्चा डा पा शुश बाक्शो बाक्त।

4 मिनु हिक्ने मचाप्चा डा पा लेबानोन डा लाइशशो रवा आन शी तेलपाइमी बाक्त। मारदे हना सीदोन नु टायर डा मुरपुकीमी दाऊद कली लेबानोन डा रवा आन शी शुश चाक्गमे बाक्त।

5 मिनु दाऊदमी “आं तौ सोलोमन मुल सम्म आइक्च नु मतुइक्ब बाक्ब। परमप्रभु यावे कली सेल्शो खिं थम दारशो, रागी नेल्लेमी मिम्चा डा पा नु ठेयब दुम्चा माल्ब। मोपतीके गो मेको सेल्चा कली मारेइ मारेइ ठीक पचा माल्नुड” देंमाक्त। मिनु दाऊदम आ बेक्चा क्येडा डोंइती मार मार शुश तेलमी बाक्त। १इतिहास २९:१

6 मिनु नोले दाऊदमी आ तौ सोलोमन कली ब्रेथ सोइक्ता बाक्त। मेको कली “परमप्रभु यावे इस्राएली आन परमप्रभु कली खिं का सेलो” दे अरेवा बाक्त।

7 मिनु सोलोमन कली “आं तौ, गो परमप्रभु यावे, आं परमप्रभु कली खिं का सेल्चा थुं पशो बाक्ती।

8 तन्न परमप्रभु यावेमी आं कली लोत्र पाप्तु। मेकोमी ‘गे शुश हुश खाक्श पोक्तीवी। गे ठेयब ठेयब लडाइ पाप्तीवी। मोपतीके आं कली खिं सेल्चा मदुम्ब। मारदे गे आं डोंइती रागीम शुश हुश खाक्श पोक्शो बाक्नेवे।

9 गे तौ का थीनेवे। मेको लडाइ मपाइब मुर दुम्ब। गो मेको आ एर ओंथ डा जोरी सत्रु नेल्ल आन कली लडाइ मपाइक्नुड। मिनु मेको आं नें सोलोमन दुम्चा माल्ब। आ सासन पची ना, गो इस्राएलम लडाइ मदुम्पाइक्थु रिम्शो पा बाक्चा गेनुड।

10 मेकोमी आं नें ठेयब सेल्चा कली खिं का सेल्चा माल्ब। मिनु मेको आं तौ दुम्ब। मिनु गो मेको आ आफ दुम्नुड। गो इस्राएलम मेको आ सासन पतीके गेना हना यो बोल्यो सेल्नुड’ दे परमप्रभुम आं कली देंत।

11 आं तौ, परमप्रभु यावे गे नु बाक्ल। मिनु परमप्रभु यावे, इ परमप्रभुमी इ पर्बम देंशो खोदेंशो पा गे मेको कली खिं सेल्चा माल्नेवे। मेको गेय नेल्ल रिम्शो दुम्ल।

12 परमप्रभु यावेमी इ कली रूपतीक नु जोक्ब तुइक्ब थुं गेवल। मेकोमी इ कली इस्राएल कली सासन पचा गेवानु, गे परमप्रभु यावे, इ परमप्रभु आ अरेशो लोत्र टिशा पाइब दुम्नेवे।

13 परमप्रभु यावेमी मोसा कली आ फुल्लुम मुशा ब्रेक्शो लोत्र नु निसाफ पतीक लोत्र इस्राएली आन कली टिशा पचा कली गेशो बाक्त। गे मेको नेल्ल पाप्तीवी हना, इ गेय रिम्शो दुम्ब। गे बोल्यो नु महिब दुमो। हिंशा इ थुं लुक्च लचा मगेवो। १ राजा २:२-३

14 गो शुश श्येत पा परमप्रभु यावे आ खिं सेल्चा कली मार वोइक्ता देशा हना, लाख का टलेन्ट सुन, १० लाख टलेन्ट चांदी नु नाकने मचाप्चा डा पा कांसा नु फलाम खेक्शा वोइक्तामी। मारदे हना मेकेर

शुश बाक्शो बाक्त। शी नु फुल्लुपुकी यो ठीक पा वोइक्तामी। गे अर्को यो तेम्चा माल्नेवे। टलेन्ट का ३४ किलो बाक्ब। १इतिहास २९:२

15 गे नु शुश गेय पाइब बाक्शो बाक्नीम। मार गेय पाइब बाक्शो बाक्नीम देशा हना, फुल्लु खोइक्ब, गारो प्रोव्रब, शी के गेय पाइब, शुश दारशो गेय जोक्शा पाइब यो बाक्नीम।

16 मेकोपुकीमी सुन, चांदी, कांसा नु फलाम के मारेइ मारेइ गेय पाइब बाक्नीम। मुल गेय पचा गोवो। परमप्रभु यावे गे नु बाक्ल” दे दाऊदमी सोलोमन कली मदा बाक्त।

17 मिनु दाऊदमी इस्राएली आन टेयब मुर नेल्ल आन कली “आं तौ सोलोमन कली वारच पने।

18 परमप्रभु यावे, इन परमप्रभु गेपुकी नु बाक्ब। मेकोमी इन रागी नेल्लेमी काइ लडाइ मदुपद। इन थुं नाइक्पाइशशा वोइक्तु। मेकोमी एको रागी डा मुर आन कली आं गुइमी गेशो बाक्त। मारदे हना परमप्रभु यावेमी एको रागी डा मुर आं गुइम गेती। मेको रागीपुकी परमप्रभु यावे नु आ मुर आन सासनमी वोइक्तु। १इतिहास २३:२५

19 मुल इन थुं नेल्लेमी परमप्रभु यावे, इन परमप्रभु कली मालीन। मिनु परमप्रभु यावे, परमप्रभु आ बाक्तीक सेल्चा गोने। मिनु नोले परमप्रभु यावे आ कबल पशो सन्दोस नु परमप्रभु आ ग्योबपुकी परमप्रभु यावे कली सेल्शो खिंमी वोइक्चा माल्नीनी” दे माइक्मी बाक्त।

## 23

### लेवी नु चढेब आन गेय

1 मिनु दाऊद खूशो नु शुश बर्स दुम्शा, आ तौ सोलोमन कली इस्राएल डा पिप सेला बाक्त। १राजा १:२८-४०

2 मिनु मेकोमी इस्राएली आन टेयब मुर नेल्ले नु चढेबपुकी नु लेवी आन कली गुम्पाइक्मी बाक्त।

3 मिनु ३० बर्स गाप्शो नु मेको क्येडा लाक्शो लेवी आन कली हिक्शोनु, मेको नेल्ल ३८ हजार बाक्मा बाक्त।

4 मिनु दाऊदमी लेवी आन पर्वम “मेको आन दाते डा २४ हजार परमप्रभु यावे आ खिं डा गेय कोव्रचा माल्नीम। ६ हजार मेको आन टेयब मुर नु निसाफ पाइब दुम्चा माल्नीम।

5 मिनु ४ हजार लाप्चो खाल पाइब दुम्चा माल्नीम। मिनु नोले डा ४ हजार आं गेशो बाजापुकी ताप्शा, परमप्रभु यावे कली टेयब सेल्तीक कुम्सो पचा माल्नीम” दैमाक्त।

6 मिनु दाऊदम मेको आन कली लेवी आ तौ गेरशोम, कोहाथ नु मेरारी का का पा हुल पा योक्शा गेमी बाक्त। १इतिहास ६:१

7 गेरशोम आ तौ लादान नु शिमेइ बाक्सा बाक्त।

8 लादान आ डोंइती थिशो तौ येहीएल टेयब मुर बाक्माक्त। आ नोले डा जेथाम नु योएल नेल्ल पा सां बाक्मा बाक्त। १इतिहास २६:२१

9 शिमेइ आ तौ शेलोमोथ, हजीएल नु हारान सां बाक्मा बाक्त। मेकोपुकी लादान आ खिं डा टेयब मुर बाक्मा बाक्त।

10 मिनु शिमेइ आ तौ याहाथ, जीना, येऊश नु बेरीआ, ४ जना बाक्मा बाक्त।

11 याहाथ मेको आन टेयब मुर बाक्माक्त। मेको आ नोले डा जीजाह बाक्माक्त। तन्न येऊश नु बेरीआ आस के शुश तौ मबाक्तीके मेको आस कली खिं का डा मुर हुल का सेल्शा हिक्चा पुंडिसमा बाक्त।

12 कोहाथ आ तौ अग्राम, इच्चार, हेब्रोन नु उज्जीएल ४ जना बाक्मा बाक्त।

13 अग्राम आ तौ हारून नु मोसा बाक्सा बाक्त। हारून नेल्ल क्येडा चोव्रखो चढेतीक गेय पाइब सेल्चा कली योव्रचा पुंडसे बाक्त। मेको नु आ तौपुकी गेना हना यो परमप्रभु यावे आ डोंइती चढेचा माल्दमे बाक्त। परमप्रभु आ डोंइती गेय पचा कली नु आ नैमी गेना हना यो आसीक गेचा कली योव्रशो बाक्मा बाक्त। १इतिहास ५:२९; १इतिहास ६:३४; ब्यवस्था १०:८; गन्ती ६:२४-२७

14 मोसा परमप्रभु आ मुर बाक्शो बाक्माक्त। मेको नु आ तौपुकी अरु लेवी आ थर डा मुर खोदेशो पा हिक्शो बाक्मा बाक्त।

- 15 मोसा आ तौ गेरशोम नु एलीएजर बाकसा बाक्त। प्रस्थान १८:३-४
- 16 गेरशोम आ तौ शेबुएल ठेयब मुर का बाक्माक्त। मेको डोंइती डा बाक्माक्त। १इतिहास २६:२४
- 17 एलीएजर आ तौ रेहब्याह ठेयब मुर बाक्माक्त। मेको एलीएजर आ तौ का ला बाक्माक्त। तन्न रेहब्याह के तौ शुश बाक्मा बाक्त। १इतिहास २४:२१-३०
- 18 इचहार आ तौ शेलोमीथ ठेयब मुर बाक्माक्त।
- 19 हेब्रोन आ तौ येरीयाह ठेयब मुर बाक्माक्त। मेको आ माइला अमारयाह, आ साइला याहासीएल, नु आ कान्छा येकामेआम बाक्मा बाक्त।
- 20 उज्जीएल आ तौ मीकाह ठेयब मुर बाक्माक्त। मेको आ नोले डा तौ इस्शीयाह बाक्माक्त।
- 21 मेरारी आ तौ माहली नु मुशी बाक्सा बाक्त। माहली आ तौ एलाजर नु कीश बाक्सा बाक्त। १इतिहास ६:४
- 22 एलाजर तौ मथिथु बेक्माक्त। मेको के तमीपुकी ला बाक्मा बाक्त। मेको आ लोकब कीश आ तौपुकीमी मेको आन कली ग्युंवे पामे बाक्त।
- 23 मुशी आ तौपुकी माहली, एदेर नु येरेमोथ सां बाक्मा बाक्त।
- 24 मेको लेवी आ थर डा खिं खिं डा मुर बाक्मा बाक्त। मेको खिं खिं डा २० बर्स गाप्शो नु मेको क्येडा लाक्शो बाक्मा बाक्त। मेको आन कली हिकशा, आन नें ब्रेक्शो बाक्मा बाक्त। मारदे हना मेकोपुकी परमप्रभु यावे आ खिमं गेय पचा माल्बाक्मा बाक्त।
- 25 मिनु दाऊदमी “परमप्रभु यावे, इस्राएली आन परमप्रभुमी आ मुर आन कली थुं नाइक्चा गेशो बाक्ब। मिनु परमप्रभु यरूसलेम सहरम गेना हना यो बाक्ब।
- 26 मोपतीके मुल रे लेवी आ थर डा मुरपुकी परमप्रभु यावे आ बाक्तीके नु मेको आ मार मार ग्योबपुकी गेनायो कुरचा ममाल्नीम” देंमाक्त। योएल ४:२१
- 27 दाऊद आ नोले देशो लोव्व रे पा मेको २० बर्स गाप्शो नु मेको क्येडा लाक्शो लेवी आ थर डा मुर हिकचा बाक्मा बाक्त।
- 28 मेकोपुकीमी हारून आ तौ परमप्रभु यावे आ खिं डा गेय पतीकेम वारच पचा माल्मा बाक्त। लाडगा नु कोठापुकी कोव्रचा, चोव्रखो थोव्रकपुकी सफा पचा, परमप्रभु आ खिं डा अरु गेय नेल्ल पचा माल्बाक्मा बाक्त।
- 29 मिनु मेकोपुकीमी चढ़ेशो शोब्ले वोइक्चा कली, अन्न चढ़ेतीक डा रिम्शो फसी, बोरब ओरुली मसुप्शो शोब्ले, तेल ब्वाइश्शो चढ़ेतीक, नेल्ल नाक्तीक गेयम वारच पचा माल्बाक्मा बाक्त।
- 30 मिनु मेकोपुकी सुनी कुस कुस नु नाक्दो कुस कुस परमप्रभु यावे आ डोंइती “गे रिम्शो पाइब बाक्नीनी” दे ठेयब सेल्चा माल्बाक्मा बाक्त।
- 31 नाइक्तीक नाक्त परमप्रभु यावे कली चोशो चढ़ेतीक चढ़ेचा कली, औंसी नाक्त नु नेल्ल पचा डा चाड डा चढ़ेतीके गेय परमप्रभु यावे आ डोंइती वारच पचा माल्बाक्मा बाक्त।
- 32 मोपा मेकोपुकीमी ग्रुम्तीक ताम्बु नु चोव्रखो बाक्तीक नेल्ल कोव्रचा माल्मा बाक्त। मिनु मेकोपुकीमी हारून आ तौ चच आन दी बाक्शा परमप्रभु यावे आ खिं डा गेय पचा माल्बाक्मा बाक्त।

## 24

### चढ़ेब आन गेय पाइब योव्रशो

- 1 मिनु योव्रसीशो हारून आ तौ चच सु सु बाक्मा बाक्त देशा हना, आ तौ नादाब, अबीहु एलाजर नु इथामार बाक्मा बाक्त। १इतिहास २३:६; १इतिहास ५:२९
- 2 नादाब नु अबीहु चहिं आस आफ बेक्चा क्येडा डोंइती तौ मथिथु, बेक्सा बाक्त। मोपतीके एलाजर नु इथामार चढ़ेब दुम्शो बाक्सा बाक्त।
- 3 मिनु दाऊदमी एलाजर नु आ तौ सादोक नु इथामार नु आ तौ अहीमेलेक नु मेको आन गेय पचा कली हुल सेल्शा गेमी बाक्त।

4 मिनु इथामार आ खिं खिं डा ठेयब मुर आन क्येडा एलाजर आ खिं खिं डा मुर शुश बाकशो बाकमा बाक्त। मोपतीके एलाजर आ तौ आन खिं खिं डा ठेयब मुर १६ जना आन कली हुल हुल सेल्मे बाक्त। इथामार आ तौ आन खिं खिं डा ठेयब मुर ८ जना आन कली हुल हुल सेल्मे बाक्त।

5 मिनु आन दातेम बाजी आप्शा, आन हुल हुल सेल्मे बाक्त। मारदे हना एलाजर नु इथामार आस तौ आस खिं खिं डा मुर नेल्ल खाल का डा ठेयब मुर बाकमा बाक्त। मेको नेल्ले परमप्रभु नु आ बाक्तीक डा ठेयब मुर बाकमा बाक्त।

6 नेथनेल आ तौ शेमायाह, लेवी आ थर डा ब्रेक्ब का बाकमाक्त। मेकोमी पिप नु ठेयब मुरपुकी, चढ़ेब सादोक, अबीयाथार आ तौ अहीमेलेक, चढ़ेब लेवी आन खिं खिं डा ठेयब मुर आन डोंडती चढ़ेब आन नें ब्रेक्ता बाक्त। एलाजर आ खिं खिं डा नु इथामार आ खिं खिं डा गेय पतीक हुल सेल्मे बाक्त। १इतिहास १८:१६

7 मिनु डोंडती डा बाजी आप्शो येहो-यारीब आ नेंमी, मेको आ नोले डा बाजी येदायाह आ नेंमी,

8 मेको आ नोले डा बाजी हारीम आ नेंमी, मेको आ नोले डा बाजी सेओरीम आ नेंमी,

9 मेको आ नोले डा बाजी माल्कीयाह आ नेंमी, मेको आ नोले डा बाजी मियामीन आ नेंमी,

10 मेको आ नोले डा बाजी हककोस आ नेंमी, मेको आ नोले डा बाजी अबीयाह आ नेंमी, लूका १:५

11 मेको आ नोले डा बाजी येशु आ आ नेंमी, मेको आ नोले डा बाजी शेकन्याह आ नेंमी,

12 मेको आ नोले डा बाजी एल्याशीब आ नेंमी, मेको आ नोले डा बाजी याकीम आ नेंमी,

13 मेको आ नोले डा बाजी हुप्पाह आ नेंमी, मेको आ नोले डा बाजी येशेबे-आब आ नेंमी,

14 मेको आ नोले डा बाजी बिल्गाह आ नेंमी, मेको आ नोले डा बाजी इम्मेर आ नेंमी,

15 मेको आ नोले डा बाजी हेजीर आ नेंमी, मेको आ नोले डा बाजी हप्पीसेस आ नेंमी,

16 मेको आ नोले डा बाजी पेथायाह आ नेंमी, मेको आ नोले डा बाजी येहेजकेल आ नेंमी,

17 मेको आ नोले डा बाजी याकीन आ नेंमी, मेको आ नोले डा बाजी गामुल आ नेंमी,

18 मेको आ नोले डा बाजी देलायाह आ नेंमी नु मेको आ नेल्ल क्येडा नोले डा बाजी माजीयाह आ नेंमी दुम्माक्त। नेल्ल पा २४ हुल बाकमा बाक्त।

19 मेको आन किकी हारूनमी गेशो पतीक लोत्र गेय बाकमाक्त। दोपा परमप्रभु यावे आ खिं लचा ब्रेक्शो बाक्त। परमप्रभु यावे, इस्राएली आन परमप्रभुमी हारून कली गेशा शेंशो लोत्र खेदेशो बाक्शो बाक्त। हारून आ खिं खिं डा लेवी आन गेय पचा माल्मा बाक्त।

### लेवी आ थर डा अरु मुरपुकी

20 मिनु लीशो लेवी आ थर डा मुर सु सु बाकमा बाक्त देशा हना, अग्राम आ तौ आन दाते डा शुबाएल बाकमाक्त। शुबाएल आ तौ आ दाते डा येहदयाह बाकमाक्त।

21 रेहब्याह आ तौ आन दाते डा मेको आन ठेयब मुर इस्शीयाह बाकमाक्त।

22 इच्चार आ तौ आन दाते डा शेलोमोथ बाकमाक्त। शेलोमोथ आ तौ आन दाते डा याहाथ बाकमाक्त।

23 हेब्रोन आ तौ आन दाते डा येरीयाह मेको आन ठेयब मुर बाकमाक्त। मेको आ माइला अमारयाह बाकमाक्त। आ साइला याहासीएल बाकमाक्त। आ कान्छा येकामेआम बाकमाक्त।

24 उज्जीएल आ तौ आन दाते डा मीकाह बाकमाक्त। मीकाह आ तौ आन दाते डा शामीर बाकमाक्त।

25 मिनु मीकाह आ लोक्ब इस्शीयाह आ तौ आन दाते डा जकरिया बाकमाक्त।

26 मेरारी आ तौ आन दाते डा माहली नु मुशी बाकमाक्त। याजीयाह आ तौ बेनो बाकमाक्त।

27 मेरारी आ तौ चच आन दाते डा याजीयाह, बेनो, शोहाम, जाक्कुर नु इब्री बाकमा बाक्त।

28 माहली आ तौ आन दाते डा एलाजर बाकमाक्त। मेको के तौ मबाक्म।

29 कीश आ तौ आन दाते डा येराहमेल बाकमाक्त।

30 मिनु मुशी आ तौ आन दाते डा माहली, एदेर नु येरीमोथ बाकमा बाक्त। मेको लेवी आ थर डा खिं खिं डा मुर बाकमा बाक्त।

31 मेकोपुकीमी पिप दाऊद, सादोक अहीमेलेक नु चढेब आन खिं खिं डा ठेयब मुरपुकी नु लेवी आ थर डा मुर आन डोंइती बाजी आप्मे बाक्त। खिं खिं डा ठेयब मुर नु नेल्ल क्येडा आइक्च नेल्लेम खाल का डा पामे बाक्त। मिनु गेना गेय पचा, दे यो बाजी आप्मे बाक्त। १इतिहास २५:८

## 25

### कुम्सो पाइब नु ताप्ब योव्रशो

1 दाऊद नु आ कप्तानपुकीमी आसाफ आ तौपुकी, हेमान आ तौपुकी नु येदुथून आ तौ आन कली परमप्रभु यावे आ सोकतीम ब्रीशा आइक्च नु ठेयब तार पाइशशो ताप्तीके नु बुप्केल ताप्चा कली योव्रडमे बाक्त। मेको गेय पाइब आन नें ब्रेक्तमे बाक्त। १इतिहास १५:१९

2 मिनु सु बाक्मा बाक्त देशा हना, आसाफ आ तौ आन दाते डा जाक्कुर, योसेफ, नेथन्याह नु अशारेलाह बाक्मा बाक्त। आसाफ मेको आन कली अरेब बाक्माक्त। आसाफमी पिप आ देशो परमप्रभु यावे आ सोकतीम ब्रीशा कुम्सो सेला बाक्त।

3 येदुथून आ तौ नु गेदाल्याह, सेरी, येशायाह, शिमेड, हशाब्याह नु मत्तीथ्याह ६ जना बाक्मा बाक्त। आन आफ येदुथून मेको आन कली अरेब बाक्माक्त। मेकोमी बीना ताप्चा परमप्रभु यावे आ सोकतीम ब्रीशा “गे रिम्शो पाइब बाक्नीनी” दे ठेयब सेलतीक कुम्सो पवा बाक्त।

4 हेमान आ तौपुकी बुक्कीयाह, मत्तन्याह, उज्जीएल, शेबुएल, येरीमोथ, हनान्याह, हानानी, एली-आथा, गिदाल्ती, रोमाप्ती-एजेर, योशबे-काशाह, माल्लोथी, होथीर नु माहाजी-ओथ बाक्मा बाक्त।

5 मेको नेल्ल पिप कली परमप्रभु आ लोव्र पाइब हेमान आ तौ बाक्मा बाक्त। मेकोपुकीमी परमप्रभु आ देशो खोदेशो पा परमप्रभु कली ठेयब सेल्चा माल्मा बाक्त। मारदे हना परमप्रभुमी हेमान कली १४ जना तौ नु तमी सां गेशो बाक्माक्त। २इतिहास ३५:१५

6 मिनु आन आफोमी परमप्रभु यावे आ खिंम मेको नेल्ल आन कली बीना ताप्चा, तार पाइशशो ताप्तीके ताप्चा नु बुप्केल ताप्चा कली शेंशो बाक्माक्त। पिपमी आसाफ, येदुथून नु हेमान आन कली दोपा अरेवा, मोपा पामे बाक्त।

7 मेको नु आन खिं खिं डा मुरपुकी परमप्रभु यावे कली कुम्सो पचा शेंसीशो बाक्मा बाक्त। नेल्ल तुडक्ब जोक्ब बाक्शो बाक्मा बाक्त। कुम्सो पाइब नेल्ल सहै निक्शी ८८ जना बाक्मा बाक्त।

8 मिनु मेकोपुकीमी गेना गेय पचा, दे बाजी आप्मे बाक्त। आइक्च नु ठेयब, शेंसीब नु शेंब खाल का डा बाक्मा बाक्त। १इतिहास २४:३१

9 मिनु डोंइती डा बाजी आप्शो आसाफ आ तौ योसेफ आ नेम गूमाक्त। मिनु मेको आ नोले डा गेदाल्याह, आ लोकबपुकी नु आ तौ आन नेम दुम्माक्त। मेको नेल्ल १२ जना बाक्मा बाक्त।

10 मेको आ नोले डा बाजी जाक्कुर, आ तौपुकी नु आ लोकब आन नेमी दुम्माक्त। मेको नेल्ल १२ जना बाक्मा बाक्त।

11 मेको आ नोले डा बाजी इज्जी, आ तौपुकी नु आ लोकब आन नेमी दुम्माक्त। मेको नेल्ल १२ जना बाक्मा बाक्त।

12 मेको आ नोले डा बाजी नेथन्याह, आ तौपुकी नु आ लोकब आन नेमी दुम्माक्त। मेको नेल्ल १२ जना बाक्मा बाक्त।

13 मेको आ नोले डा बाजी बुक्कीयाह, आ तौपुकी नु आ लोकब आन नेमी दुम्माक्त। मेको नेल्ल १२ जना बाक्मा बाक्त।

14 मेको आ नोले डा बाजी येसारेला, आ तौपुकी नु आ लोकब आन नेमी दुम्माक्त। मेको नेल्ल १२ जना बाक्मा बाक्त।

15 मेको आ नोले डा बाजी येशायाह, आ तौपुकी नु आ लोकब आन नेमी दुम्माक्त। मेको नेल्ल १२ जना बाक्मा बाक्त।

16 मेको आ नोले डा बाजी मत्तन्याह, आ तौपुकी नु आ लोकब आन नेमी दुम्माक्त। मेको नेल्ल १२ जना बाक्मा बाक्त।

17 मेको आ नोले डा बाजी शिमेड, आ तौपुकी नु आ लोकब आन नेमी दुम्माक्त। मेको नेल्ल १२ जना बाक्मा बाक्त।

- 18 मेको आ नोले डा बाजी अजारेल, आ तौपुकी नु आ लोकब आन नेमी दुम्माक्त। मेको नेल्ल १२ जना बाक्मा बाक्त। १इतिहास १२:७
- 19 मेको आ नोले डा बाजी हशाब्ब्याह, आ तौपुकी नु आ लोकब आन नेमी दुम्माक्त। मेको नेल्ल १२ जना बाक्मा बाक्त।
- 20 मेको आ नोले डा बाजी शुबाएल, आ तौपुकी नु आ लोकब आन नेमी दुम्माक्त। मेको नेल्ल १२ जना बाक्मा बाक्त।
- 21 मेको आ नोले डा बाजी मतीथ्याह, आ तौपुकी नु आ लोकब आन नेमी दुम्माक्त। मेको नेल्ल १२ जना बाक्मा बाक्त।
- 22 मेको आ नोले डा बाजी येरेमोथ, आ तौपुकी नु आ लोकब आन नेमी दुम्माक्त। मेको नेल्ल १२ जना बाक्मा बाक्त।
- 23 मेको आ नोले डा बाजी हनान्याह, आ तौपुकी नु आ लोकब आन नेमी दुम्माक्त। मेको नेल्ल १२ जना बाक्मा बाक्त।
- 24 मेको आ नोले डा बाजी योशबे-काशाह, आ तौपुकी नु आ लोकब आन नेमी दुम्माक्त। मेको नेल्ल १२ जना बाक्मा बाक्त।
- 25 मेको आ नोले डा बाजी हानानी, आ तौपुकी नु आ लोकब आन नेमी दुम्माक्त। मेको नेल्ल १२ जना बाक्मा बाक्त।
- 26 मेको आ नोले डा बाजी माल्लोथी, आ तौपुकी नु आ लोकब आन नेमी दुम्माक्त। मेको नेल्ल १२ जना बाक्मा बाक्त।
- 27 मेको आ नोले डा बाजी एली-आथा, आ तौपुकी नु आ लोकब आन नेमी दुम्माक्त। मेको नेल्ल १२ जना बाक्मा बाक्त।
- 28 मेको आ नोले डा बाजी होथीर, आ तौपुकी नु आ लोकब आन नेमी दुम्माक्त। मेको नेल्ल १२ जना बाक्मा बाक्त।
- 29 मेको आ नोले डा बाजी गिदाल्ती, आ तौपुकी नु आ लोकब आन नेमी दुम्माक्त। मेको नेल्ल १२ जना बाक्मा बाक्त।
- 30 मेको आ नोले डा बाजी डा माहाजी-ओथ, आ तौपुकी नु आ लोकब आन नेमी दुम्माक्त। मेको नेल्ल १२ जना बाक्मा बाक्त।
- 31 मेको आ नेल्ल क्येडा नोले डा बाजी रोमान्ती-एजेर, आ तौपुकी नु आ लोकब आन नेमी दुम्माक्त। मेको नेल्ल १२ जना बाक्मा बाक्त।

## 26

### लाप्यो खाल पाइब योवशो

- 1 मिनु लाप्यो खाल पतीक गोय पाइब सु सु बाक्मा बाक्त देशा हना, कोराह आ खिं खिं डा मुर आसाफ आ तौ रे कोराह आ तौ मेशेलेम्याह बाक्माक्त। २इतिहास ८:१४; २इतिहास ३५:१५
- 2 मेशेलेम्याह आ डोंइती थिशो तौ जकरिया, आ माइला येदीएल, आ साइला जेबदीयाह, आ काइला याथ्रीएल,
- 3 आ अन्तरे एलाम, आ जन्तरे येहो-हानान नु आ कान्छा एली-ए-होएनाइ बाक्मा बाक्त।
- 4 ओबेद-एदोम आ डोंइती थिशो तौ शेमायाह, आ माइला येहो-जाबाद, आ साइला योआह, आ काइला साकार, आ अन्तरे नेथनेल, २सामुएल ६:११
- 5 आ जन्तरे अम्मीएल, आ खन्तरे इस्साकार नु आ कान्छा पेउल्लेथाइ ८ जना बाक्मा बाक्त। मारदे हना परमप्रभुमी ओबेद-एदोम कली आसीक गेशो बाक्माक्त।
- 6 मेको आ तौ शेमायाह के यो तौपुकी बाक्मा बाक्त। मेको आन खिं खिं डा ठेयब मुर बाक्मा बाक्त। मारदे हना मेकोपुकी शुश जोक्ब तुइक्ब मुर बाक्मा बाक्त।
- 7 शेमायाह आ तौपुकी ओथनी, रेफाएल, ओबेद नु एल्जाबाद बाक्मा बाक्त। मेको आन लोकब एलीहु नु सेमक्याह यो जोक्ब तुइक्ब मुर बाक्सा बाक्त।
- 8 मेको ओबेद-एदोम आ तौपुकी, मेको आन तौ नु आन लोकब नेल्ले मेको गोय पचा कली जोक्ब तुइक्ब बाक्मा बाक्त। ओबेद-एदोम आ मुर नेल्ले पा ६२ जना बाक्मा बाक्त।
- 9 मेशेलेम्याह आ तौपुकी नु आ लोकबपुकी नेल्ल जोक्ब तुइक्ब मुर बाक्मा बाक्त। मेको नेल्ल १८ जना बाक्मा बाक्त।

10 मेरारी आ तौ होसाह आ तौपुकी सु सु बाक्मा बाक्त देशा हना, शिमी आ डोंडती थियो तौ मबाक्त हना यो, मेको आन ठेयब मुर बाक्माक्त। आ आफोमी मेको कली ठेयब मुर सेला बाक्त।

11 मिनु होसाह आ तौ माइला हिल्लीयाह, आ साइला तेबल्याह नु आ कान्छा जकरिया बाक्मा बाक्त। होसाह आ तौपुकी नु आ लोकबपुकी नेल्ल १३ जना बाक्मा बाक्त।

12 परमप्रभु यावे आ खिं डा लाप्चो खाल पाइब आन हुल नु आन ठेयब मुर आन खिं खिं डा मुरपुकी खोदेशो पा परमप्रभु यावे आ खिमं गेय पचा कली योत्रशो बाक्मा बाक्त।

13 मिनु मेकोपुकीमी आन खिं खिं डा मुर कली तेको लाप्चो खाल पचा, दे बाजी आप्मे बाक्त। खूशो नु ठिटा नेल्ल कली खाल का डा पा बाजी आप्मे बाक्त।

14 मिनु पूर्व डा लाप्चो खाल पचा कली शेलेम्याह आ नेम दुम्माक्त। मेकोपुकीमी आ तौ जकरिया आ पर्वम यो बाजी आप्मे बाक्त। मिनु उत्तर डा लाप्चो खाल पचा कली दुम्माक्त। जकरिया रिम्शो अर्ती गेब बाक्माक्त।

15 ओबेद-एदोम दक्खिन डा ठेयब लाप्चो खाल पाइब दुम्माक्त। आ तौ आन गेय मार मार वोइक्तीक खिं कोत्रतीक बाक्माक्त।

16 मिनु शुप्पीम नु होसाह पच्छिम डा लाप्चो नु शल्लेकेथ माइशो लाप्चो खाल पाइब दुम्सा बाक्त। मेको लाप्चो ग्येत्थ लतीक लामं नेक्नेक्था बाक्माक्त।

17 मिनु पूर्व गे नाक्त किंत किंत ६ जना लेवी, उत्तर गे नाक्त किंत किंत ४ जना, दक्खिन गे नाक्त किंत किंत ४ जना खाल पाइब बाक्मा बाक्त। मार मार वोइक्तीक खिं खाल पचा कली नाक्त किंत किंत निक्निक्शी मुर बाक्सा बाक्त।

18 परमप्रभु यावे आ खिं डा पच्छिम गे डा लामं ४ जना खाल पाइब बाक्मा बाक्त। आ खिं आ नेक्था चहिं खाल पाइब निक्शी बाक्सा बाक्त।

19 मेको नेल्ल कोराह नु मेरारी आस खिं खिं डा लाप्चो खाल पाइब आन हुल बाक्मा बाक्त।

### परमप्रभु आ मार मार कोत्रब मुर

20 मिनु अरु लेवी आ थर डा मुर आन गेय मार बाक्त देशा हना, परमप्रभु आ खिं डा मार मार शोंप वोइक्तीके नु मार मार परमप्रभु कली गेशो वोइक्तीके कोत्रब अहीयाह बाक्माक्त।

21 लादान आ तौपुकी, लादान आ खिं डा गेरशोनी नेल्ले, गेरशोनी आ खिं डा ठेयब मुर येहीएली बाक्मा बाक्त। १इतिहास २३:८

22 येहीएली आ तौ जेथाम नु आ लोकब योएल परमप्रभु यावे आ खिं डा मार मार शोंप वोइक्तीके कोत्रब बाक्मा बाक्त।

23 मिनु अन्नाम आ खिं डा मुरपुकी, इच्छार आ खिं डा मुरपुकी, हेब्रोन आ खिं डा मुरपुकी नु उज्जीएल आ खिं डा मुरपुकी

24 मार मार वोइक्तीके कोत्रब आन ठेयब मुर शेबुएल बाक्माक्त। मेको मोसा आ चच, गेरशोम आ तौ बाक्माक्त। १इतिहास २३:१६

25 गेरशोम आ लोकब एलीएजर आ तौ रेहब्याह बाक्माक्त। मेको आ तौ येशायाह, येशायाह आ तौ योराम योराम आ तौ जिक्री नु जिक्री आ तौ शेलोमोथ बाक्मा बाक्त। १इतिहास २३:१७

26 शेलोमोथ नु आ लोकबपुकी पिप दाऊदमी गेशो, खिं खिं डा ठेयब मुरपुकीमी गेशो, हजार हजार लडाइ पाइब आन कप्तानपुकीमी गेशो नु सहे सहे डा लडाइ पाइब आन कप्तानपुकीमी गेशो शोंप वोइक्तीके कोत्रब बाक्मा बाक्त।

27 मेकोपुकीमी लडाइम रोइशशा चाक्शो मार मार परमप्रभु यावे आ खिमं चालेचा कली गेशो बाक्मा बाक्त।

28 परमप्रभु यावे आ लोत्र पाइब सामुएल, कीश आ तौ सावल, नेर आ तौ आब्नेर नु सेरूयाह आ तौ योआबमी गेशो मारेइ मारेइ शेलोमोथ नु आ लोकबपुकी कोत्रब बाक्मा बाक्त।

29 इच्छार आ थर डा मुर आन दाते रे केनानीयाह नु आ तौ आन कली इस्राएली आन कली कोव्रब नु निसाफ पाइब बाक्मा बाक्त।

30 हेब्रोन आ खिं डा मुर आन दाते रे हशाब्याह नु आ लोकबपुकी हजार का ७ सहे जोक्ब तुइक्ब मुर यर्दन खोला आ पच्छिम गे डा इस्राएल रागी डा परमप्रभु यावे आ खिं डा गेय नु पिप आ गेय आ परबम कोव्रब बाक्मा बाक्त।

31 दाऊद ४० बसंम पिप दुम्तीके हेब्रोन आ मुर रे तेको तेको खिं डा ठेयब जोक्ब तुइक्ब मुर माल्मे बाक्त। मिनु गिलाद डा याजेर सहरमी मेको आन कली शुश थित्मे बाक्त। मिनु येरीयाह मेको आन ठेयब मुर बाक्माक्त।

32 पिप दाऊदमी येरीयाह नु आ लोकबपुकी, हजार निकशी ७ सहे जोक्ब तुइक्ब नु आम आन खिं डा ठेयब मुर दुम्शो आन कली गेय पपाइक्मी बाक्त। मार गेय पपाइक्मी बाक्त देशा हना, मेकोपुकी रूबेन आ थर डा मुर, गाद आ थर डा मुर नु मनस्से आ आधा थर डा मुर आन कली परमप्रभु आ परबम मार गेय पचा नु पिप आ परबम मार गेय पचा मेको कोव्रब सेल्मी बाक्त।

## 27

### लडाइ पाइब आन हुल

1 मिनु इस्राएली आन खिं खिं डा ठेयब मुरपुकी, हजार हजार लडाइ पाइब आन कप्तानपुकी, सहे सहे डा लडाइ पाइब आन कप्तानपुकी नु मेको आन ठेयब मुरपुकी बाक्मा बाक्त। मेकोपुकीमी लडाइ पाइब आन हुल हुल आन कली बसंम महिना महिनामी पालो पा पिप आ गेय पपाइक्बाक्मा बाक्त। लडाइ पाइब आन हुल का का पालो पा बर्स डा महिना का गेय पपदमे बाक्त। हुल काम १४ हजार मुर बाक्मा बाक्त। पिप आ नेल्ल क्येडा ठेयब कप्तान सु सु बाक्मा बाक्त देशा हना,

2 बर्स आ डोंइती डा महिना डा डोंइती डा हुल आन कप्तान जब्दीएल आ तौ याशोबाम बाक्माक्त। मेको आ हुलम १४ हजार मुर बाक्मा बाक्त।

3 मेको परेस आ खिं खिं डा मुर बाक्मा बाक्त। मेको डोंइती डा महिना डा लडाइ पाइब नेल्ल आन कप्तान, क्येडा ठेयब मुर बाक्माक्त।

4 मेको आ नोले डा महिना डा हुल आन कप्तान अहोही आ मुर दोदाइ बाक्माक्त। मेको हुल नेल्ल आन कप्तान क्येडा ठेयब मुर मीक्लोथ बाक्माक्त। मेको आ हुलम १४ हजार मुर बाक्मा बाक्त।

5 मेको आ नोले डा महिना डा हुल आन नेल्ल क्येडा ठेयब कप्तान चढ़ेब येहो-यादा आ तौ बेनायाह बाक्माक्त। मेको आ हुलम १४ हजार मुर बाक्मा बाक्त। १इतिहास ११:२२-२५

6 मेको बेनायाह शुश सक्ति पाइश्शो ३० जना मुर आन दाते डा का बाक्माक्त। मिनु मेको ३० जना सक्ति पाइश्शो मुर आन ठेयब मुर बाक्माक्त। मेको आ तौ अम्मीजाबाद बेनायाह आ लडाइ पाइब आ हुल डा मुर आन कप्तान बाक्माक्त।

7 मेको आ नोले डा महिना डा हुल आन कप्तान योआब आ लोकब आसाहेल बाक्माक्त। मेको आ नोले आ तौ जेबदीयाह कप्तान दुम्माक्त। मेको आ हुलम १४ हजार मुर बाक्मा बाक्त। १इतिहास ११:२६

8 मेको आ नोले डा महिना डा हुल आन कप्तान इज्रायाह आ मुर शाम्हुथ बाक्माक्त। मेको आ हुलम १४ हजार मुर बाक्मा बाक्त।

9 मेको आ नोले डा महिना डा हुल आन कप्तान तेकोहा आ मुर इक्केश आ तौ इरा बाक्माक्त। मेको आ हुलम १४ हजार मुर बाक्मा बाक्त। १इतिहास ११:२८

10 मेको आ नोले डा महिना डा हुल आन कप्तान एफ्राइम आ थर डा, पेलोन आ खिं डा मुर हेलेस बाक्माक्त। मेको आ हुलम १४ हजार मुर बाक्मा बाक्त। १इतिहास ११:२७

11 मेको आ नोले डा महिना डा हुल आन कप्तान जेराह डा हुशा डा मुर सिब्बेकै बाक्माक्त। मेको आ हुलम १४ हजार मुर बाक्मा बाक्त। १इतिहास ११:२९; १इतिहास २०:४



12 मेको आ नोले डा महिना डा हुल आन कप्तान बेन्यामीन आ थर डा अनाथोथ सहर डा अबीएजेर बाक्माक्त। मेको आ हुलम १४ हजार मुर बाक्मा बाक्त। १इतिहास ११:२८

13 मेको आ नोले डा महिना डा हुल आन कप्तान जेरह आ खिं डा नेतोफाह सहर डा मुर माहाराइ बाक्माक्त। मेको आ हुलम १४ हजार मुर बाक्मा बाक्त। १इतिहास ११:३०

14 मेको आ नोले डा महिना डा हुल आन कप्तान एफ्राइम आ थर डा पिराथोन सहर डा बेनायाहम बाक्माक्त। मेको आ हुलम १४ हजार मुर बाक्मा बाक्त। १इतिहास ११:३१

15 मिनु बर्स आ नेल्ल क्येडा नोले डा महिना डा हुल आन कप्तान ओथनीएल आ खिं डा नेतोफाह सहर डा हेल्दाइ बाक्माक्त। मेको आ हुलम १४ हजार मुर बाक्मा बाक्त।

### थर थर डा ठेयब मुरपुकी

16 इस्राएली आन थर थर डा ठेयब मुरपुकी सु सु बाक्मा बाक्त देशा हना, रूबेन आ थर डा जिक्री आ तौ एलीएजर ठेयब मुर बाक्माक्त। सिमियोन आ थर डा माकाह आ तौ शेफत्याह बाक्माक्त।

17 लेवी आ थर डा केमुएल आ तौ हशाब्याह बाक्माक्त। हारून आ खिं डा सादोक बाक्माक्त।

18 यहूदा आ थर डा दाऊद आ लोकब एलीहु बाक्माक्त। इस्साकार आ थर डा मिकाएल आ तौ ओप्त्री बाक्माक्त।

19 जबूलून आ थर डा ओबदिया आ तौ इश्मायाह बाक्माक्त। नाप्ताली आ थर डा अज्रीएल आ तौ येरेमोथ बाक्माक्त।

20 एफ्राइम आ थर डा अजजीयाह आ तौ होशेआ बाक्माक्त। मनस्से आ उडक्थ थर डा पेदायाह आ तौ योएल बाक्माक्त।

21 मिनु गिलादम बाक्शो मनस्से आ उडक्थ थर डा जकरिया आ तौ इददो बाक्माक्त। बेन्यामीन आ थर डा आब्नेर आ तौ यासीएल बाक्माक्त।

22 दान आ थर डा येरोहाम आ तौ अजारेल बाक्माक्त। मेको नेल्ल इस्राएली आन थर थर डा ठेयब मुर बाक्मा बाक्त।

23 मिनु दाऊदमी २० बर्स मगाप्शो आन कली महिकमी बाक्त। मारदे हना परमप्रभु यावेमी “इस्राएली आन कली सरीड डा सोरुल खोदेशो पा शुश सेल्लुडमी” दे कबल पशो बाक्माक्त। उत्पत्ती २२:१७

24 सेरूयाह आ तौ योआबमी मुर आन कली हिक्चा गोवा बाक्त। आ गेय मथुमथु, परमप्रभु यावेमी इस्राएली आन पर्वम गाइक्ता बाक्त। मोपतीके मेना पिप दाऊद आ सासन पची ना मार मार दुम्लो बाक्मा ब्रेक्तीकेम गिश मुर हिक्शो बाक्मा मेको मब्रेक्शो बाक्माक्त। १इतिहास २१:७,१४

### पिप आ मार मार कोव्रबपुकी

25 मिनु अदीएल आ तौ अज्मावेथ पिप आ मार मार वोइक्तीके कोव्रब आन ठेयब मुर बाक्माक्त। उज्जीयाह आ तौ योनाथन चहिं रूमी, सहरपुकीमी, गाउंपुकीमी नु वोइक्तीके लाइश्शो खिंमी बाक्शो पिप आ मार मार कोव्रब आन ठेयब मुर बाक्माक्त।

26 केलुब आ तौ एज्री रूम गेय पा दोइब आन कली कोव्रब आन ठेयब मुर बाक्माक्त।

27 रामाह सहर डा शिमेइ अडगुर रूपुकी कोव्रब आन ठेयब मुर बाक्माक्त। शिफमी आ मुर जब्दी चहिं अडगुर शांबु वोइक्तीके कोव्रब आन ठेयब मुर बाक्माक्त।

28 गेदेराह सहर डा बाल-हनान शेफेलाह डा दिममी बाक्शो तेल रवा नु फल सिप्ब फोव्रशी रवापुकी कोव्रब आन ठेयब मुर बाक्माक्त। योआश चहिं तेल वोइक्तीक कली कोव्रब आन ठेयब मुर बाक्माक्त।

29 शारोन दिम डा शित्राइ मेकेर डा दिममी जोइब बी ब्यफ आन कली कोव्रब आन ठेयब मुर बाक्माक्त। अदलाइ आ तौ शाफात चहिं अरु दिमम जोइब बस्तु भाव आन कली कोव्रब आन ठेयब मुर बाक्माक्त।

30 इश्माएली ओबील दलओठ आन कली कोव्रब आन ठेयब मुर बाक्माक्त। मेरोनोथ डा येहदयाह गधा आन कली कोव्रब आन ठेयब मुर बाक्माक्त। मिनु हाग्री आ मुर याजीज क्यारश भेडा आन कली कोव्रब आन ठेयब मुर बाक्माक्त।

31 मेको नेल्ले पिप दाऊद आ शोंप कोव्रब आन ठेयब मुर बाक्मा बाक्त।

पिप दाऊद आ नेक्था डा मुरपुकी

32 दाऊद आ बकान्छा योनाथन दाऊद कली अर्ती गेब बाक्माक्त। मेको शुश जोक्ब तुइक्ब नु ब्रेक्स तुइक्ब मुर बाक्माक्त। हाकमोनी आ तौ येहीएल पिप आ तौ आन कली कोव्रब बाक्माक्त।

33 मिनु अहीथोफेल यो पिप कली अर्ती गेब बाक्माक्त। अरकी आ मुर हुशाइ पिप आ वारच बाक्माक्त।

34 अहीथोफेल आ नोले बेनायाह आ तौ येहो-यादा नु अबीयाथार पिप कली अर्ती गेब बाक्सा बाक्त। मिनु योआब पिप आ लडाइ पाइब आन ठेयब मुर बाक्माक्त। २सामुएल ८:१६

## 28

परमप्रभु आ खिं सेल्चा मिम्शो

1 मिनु दाऊदमी यरूसलेम सहरम इस्राएली आन ठेयब मुर नेल्ले आन कली गुम्पदा बाक्त। सु सु गुम्पदा बाक्त देशा हना, थर थर डा ठेयब मुर, पिप आ गेय पाइब हुल हुल आन ठेयब मुर, हजार हजार लडाइ पाइब आन कप्तानपुकी, सहे सहे लडाइ पाइब आन कप्तानपुकी, पिप नु आ तौ आन मार मार नु बी ब्यफ कोव्रब आन ठेयब मुरपुकी, दरवारमी गेय पाइब आन ठेयब मुरपुकी, शुश सक्ति पाइशो लडाइ पाइबपुकी नु अरु महिब लडाइ पाइब आन कली गुम्पदा बाक्त।

2 मिनु पिप दाऊद बोक्शा मेको आन कली “आं लोक्ब नु आं मुर आं लोव्र नेनीन। गो परमप्रभु यावे आ कबल पशो सन्दोस कली नाइक्चा कली बाक्तीक का सेल्चा मिम्शो बाक्ती। परमप्रभु यावे, इं परमप्रभु आ खोइल थेक्तीक खोदेशो दुम्चा मालब। गो मेको सेल्चा कली ठीक पाता। १इतिहास २२:६-१०; भजन संग्रह ९९:५; भजन संग्रह १३२:७

3 तन्न परमप्रभुमी आं कली ‘गे आं नें ठेयब सेल्चा कली खिं सेल्चा मदुम्ब। मारदे हना गे लडाइ पा हुश स्राक्श पोक्शो बाक्ते’ देंत।

4 मो हना यो परमप्रभु यावे, इस्राएली आन परमप्रभुमी आं आफ आ खिं खिं रे आं कली गेना हना यो इस्राएलम पिप दुम्चा कली योव्रती। मारदे हना मेकोमी लां कोंडचा कली यहूदा कली योव्रतु। मिनु यहूदा आ थर डा खिं खिं रे आं आफ आ खिं कली योव्रतु। मिनु आ आफ आ तौ आन दातेमी आं कली दाक्शा, इस्राएल डा पिप सेल्लती। उत्पत्ती ४९:१०; १सामुएल १६:१,१२

5 परमप्रभु यावेमी आं कली शुश तौ गेती। परमप्रभु यावेमी आ राज्य इस्राएलम पिप दुम्चा कली आं तौ सोलोमन कली योव्रतु।

6 मिनु आं कली ‘इ तौ सोलोमनमी आं खिं नु आं लाडगा सेल्चा मालब। मारदे हना गो आं तौ दुम्चा, दे मेको कली योव्रता। गो आ आफ दुम्नुड। १इतिहास १७:११-१४

7 मेकोमी आं शेंशो नु निसाफ पतीक लोव्र टिना टिन बाक्ब। मुल खोदेशो पा रिम्शो टिप्टु हना, गो मेको आ राज्य गेना हना यो बोल्यो सेल्नुड’ देंमाक्त।

8 मोपतीके गे परमप्रभु यावे आ नेंम गुम्शो इस्राएली नेल्ल आन डोंइती नु इं परमप्रभु आ डोंइती परमप्रभु यावे, इन परमप्रभु आ शेंतीके टिशा बिस्सीन। मिनु नोले मेको रिम्शो रागी इन के दुम्ब नु इन नोले इन आल आन कली गेना हना यो थरशो रू दुम्ब।

9 आं तौ सोलोमन, इ आफ आ परमप्रभु कली तुइश्शा मालो। इ थुं नेल्लेमी ग्येरशा मेको आ नोले खोतो। मारदे हना परमप्रभु यावेमी इ थुं कोव्रना कोव्रन, इन मिम्शो नु पशो नेल्ल तुइक्ब। गे मेको कली माल्तीवी हना, गे थित्नेवे। तन्न गे मेको कली प्रोंइतीवी हना, इ कली गेना हना यो कली प्रोंइब। येरमीया २९:१३-१४; १राजा ११:३१,३३

10 मुल होस पावो। मारदे हना परमप्रभु यावेमी आंम आ बाक्तीक खिं सेल्चा कली इ कलीन योव्रतु। इ थुं ग्येत्थ लुक्च मपथु, गेय पावो” दे पिप दाऊदमी आ तौ कली मदा बाक्त।

11 मिनु नोले दाऊदम आ तौ सोलोमन कली परमप्रभु यावे आ खिं सेल्लिक ब्रेक्स गेवा बाक्त। मेको खिं डा ब्रेक्समी परमप्रभु आ बाक्तीक, आ पिंडी, अरु खिं, मार मार वोइक्तीक, खिं आ तार डा कोठापुकी, आगा डा कोठापुकी नु सन्दोस नु आ सुम्तीके आ कोठा बाक्शो बाक्माक्त। प्रस्थान २५:९

12 दाऊद आ मिशो नेल्ल मेको ब्रेक्सम बाक्शो बाक्त। मेकोमी परमप्रभु यावे आ खिं डा लाडगा, आ एर ओथ नेल्ल डा कोठापुकी, परमप्रभु आ खिं डा मार मार वोइक्तीक कोठा नु नेल्ल गेशो थोव्रक कली वोइक्तीक कोठा आ तौ कली गेवा बाक्त।

13 मिनु लेवी नु चढेब आन हुल हुल, परमप्रभु यावे आ खिंमी मार मार गेय पचा नु मेकेर मार मार ग्योबपुकी परमप्रभु यावे आ खिं डा गेय कली सेल्चा नेल्ल मेको ब्रेक्सम ब्रेक्शो बाक्माक्त।

14 मार मार गेय पचा कली सुन के ग्योब सेल्चा कली गिश सुन माल्बा, चांदी के ग्योब सेल्चा कली गिश चांदी माल्बा, मेको ब्रेक्शो बाक्माक्त।

15 मिनु सुन के बत्ती दातीक नु आ दियारी आन कली गिश सुन माल्बा, चांदी के बत्ती दातीक नु आ दियारी आन कली गिश चांदी माल्बा नु मार मार गेय कली मार माल्बा नेल्ल ब्रेक्शो बाक्माक्त।

16 लहर पा वोइश्शो कोंइतीक शोब्ले कली सुन के टेबल गिश सुन नु चांदी के टेबल आन कली गिश चांदी माल्बा मेको ब्रेक्शो बाक्माक्त।

17 मिनु कांटा, ब्रुइक्तीक बोस, लोटा नु सुन के बोस आन कली गिश क्येख सुन माल्बा, मेको ब्रेक्शो बाक्माक्त। मिनु चांदी के बोस गिश चांदी माल्ब, मेको ब्रेक्शो बाक्माक्त।

18 क्येख सुन के धूप चोतीक कली गिश क्येख सुन माल्बा, मेको ब्रेक्शो बाक्माक्त। सुन के फ्रां प्राक्शा परमप्रभु यावे आ सन्दोस सुम्ब करूब आस कली कुरब बग्गी के यो ब्रेक्स यो सेल्शो बाक्माक्त। मिनु गिश सुन माल्बा, मेको ब्रेक्शो बाक्माक्त।

19 मिनु दाऊदमी “एको नेल्ल परमप्रभु यावेमी मार पचा, दोपा सेल्चा आं कली शेंताक्यी। मोपा गो मेको नेल्ल गेय डा ब्रेक्स ब्रेक्ताक्ड” दे दाऊदमी देमाक्त।

20 मिनु दाऊदमी आ तौ सोलोमन कली “बोल्यो नु महिंब दुम्शा, एको गेय पावो। महिनो, इ थुं ग्येत्थ लुक्च मपावो। मारदे हना परमप्रभु यावे, आं परमप्रभु गे नु बाक्ब। परमप्रभु यावेमी आ खिंमी गेय पचा कली मारेइ मारेइ सेल्ने मथुमा सम्म इ कली मप्रोंइथु चारच पाइब। ?इतिहास २२:१३; ब्यवस्था ३१:६

21 परमप्रभु आ खिंमी गेय पचा कली चढेब नु लेवी आन हुल हुल ठीक दुम्शो बाक्नीम। मिनु मेको गेय पचा कली शुश जोक्ब तुइक्ब नु ग्येरशो गेय पाइब गे नु बाक्नीम। मिनु ठेयब मुरपुकी नु मुर नेल्लेमी इ देशो नेल्ल टीनीम” दे दाऊदम आ तौ सोलोमन कली देमाक्त।

## 29

### परमप्रभु कली मार मार गेशो

1 मिनु पिप दाऊदमी बुक्शा बाक्शो मुर नेल्ल आन कली “परमप्रभुमी आं तौ सोलोमन का ला योव्रतु। मेको मुल सम्म ठिटा बाक्ब। एको खिं सेल्चा चहिं थम ठेयब गेय बाक्ब। मारदे हना एको खिं मुर आन कली ममाइ, परमप्रभु, परमप्रभु यावे आ खिं बाक्ब। ?इतिहास २२:५

2 गो आं परमप्रभु आ खिं सेल्चा कली मार मार वोइक्ता देशा हना, सुन के थोव्रक कली सुन, चांदी के थोव्रक कली चांदी, कांसा के थोव्रक कली कांसा, फलाम के थोव्रक कली फलाम, शी के थोव्रक कली शी, हीरा नु सुनम ग्याइश्शो हीरा, दारपाइक्चा कली मार मार रड पाइश्शो फुल्लु, मार मार हीरा नु अरु दारशो फुल्लु शुश तेल्ला वोइक्ता।

3 मेको आं परमप्रभु आ बाक्तीके सेल्चा कली खुप्शा वोइश्शो मार मार प्रोंइशा यो आं परमप्रभु आ खिं सेल्चा थाम्पा दाक्तीके गो आंम आं सुन नु चांदी परमप्रभु आ खिं सेल्चा कली गेता।

4 परमप्रभु यावे आ खिं डा आगा डा गारो गिल्चा कली ४३ हजार टलेन्ट ओफीर डा सुन नु ७ हजार टलेन्ट याप्पाइश्शो चांदी वोइश्शो बाक्ब। टलेन्ट का ३४ किलो बाक्ब। १इतिहास २२:१४; प्रस्थान ३५:४-९

5 मिनु रिम्शो जोक्ब तुइक्ब गेय पाइब आन कली एको सुन के थोव्रक कली सुन नु चांदी के थोव्रक सेल्चा कली चांदी वोइश्शो बाक्ब। मुल परमप्रभु यावे कली आं खोदेशो पा सु सुम मार मार गेचा दाक्नीनी?" दे हिलो पवा बाक्त।

6 मिनु खिं खिं डा ठेयब मुरपुकी, इस्राएली आ थर थर डा ठेयब मुरपुकी, हजार हजार डा लडाइ पाइब आन कप्तानपुकी नु सहे सहे डा लडाइ पाइब आन कप्तानपुकी नु पिप आ गेय पाइब आन कली कोव्रब मुरपुकी हाइश्शो दुम्शा मार मार गेमी बाक्त।

7 मेकोपुकीमी ग्येरशा परमप्रभु आ खिं सेल्चा कली मार मार गेमे बाक्त देशा हना, ५ हजार टलेन्ट सुन, नु सुन के क्येट १० हजार दारीके, १० हजार टलेन्ट चांदी, १८ हजार टलेन्ट कांसा लाख का टलेन्ट फलाम गेमे बाक्त। दारीके का ८.४ ग्राम सुन के क्येट बाक्ब।

8 मिनु सु सु नु हीरा बाक्मा, मेकोमी परमप्रभु यावे आ शोंप वोइक्तीक कली गेरशोन आ खिं डा मुर येहीएल आ गुइमी गेमे बाक्त। प्रस्थान ३५:२७

9 मिनु मुरपुकीमी हाइश्शो थुंमी गेशा ग्येरसीशो बाक्मा बाक्त। मारदे हना मेकोपुकीमी ग्येरसीशा परमप्रभु यावे कली शुश गेशो बाक्मा बाक्त। पिप दाऊद यो थाम्पा ग्येरशो बाक्माक्त।

### परमप्रभु कली ठेयब सेल्शो

10 मिनु दाऊदमी मुर नेल्ल आन डोंइती परमप्रभु यावे कली “परमप्रभु यावे, आंइ किकी पिपी इस्राएल आ परमप्रभु, गे गेना हना यो ठेयब बाक्नीनी।

11 परमप्रभु यावे, नेल्ल क्येडा ठेयब दुम्तीके, सक्ति, छेडछेड, ग्रातीके नु मान तचा पुंडसीतीके नेल्ल इन के बाक्नीम। मारदे हना रागी नु सरीडम बाक्शो मारेड मारेड इन के नम। परमप्रभु यावे, मेको राज्य इन के बाक्ब। गे नेल्ल क्येडा ठेयब बाक्नीनी। प्रकाश ४:११;५:१३

12 गे शोंप नु मान ततीक गेब बाक्नीनी। गे नेल्ल आन कली सासन पाइनीनी। बोल नु सक्ति इन गुइमी बाक्ब। गे इन गुइमी ठेयब सेल्शा, सक्ति गेनीनी। २इतिहास २०:६

13 मुल आंइ परमप्रभु, गो इन कली ‘गे रिम्शो पाइब बाक्नीनी’ दे इन नें ठेयब सेल्नीकी।

14 मिनु गो आंइ थुंम ग्येरशा सोम्शा ओपा शुश गेने चाप्नीकी? गो सु नडा? आं मुरपुकी सु बाक्नीमी? मारदे हना नेल्ल थोव्रक इन गुइ रे जाक्नीम। गोपुकीमी इन गेशो रे इन कली गेतक।

15 गोपुकी इन डोंइती शुश नाक्त मबाक्ब अर्को रागी डा मुर दुम्शो बाक्नीकी। आंइ किकी पिपी यो मोदेशो बाक्मा बाक्त। आंइ रागीम बाक्तीके नाक्ती वांकु खोदेशो बाक्नीम। शुश बाक्तीक आस मबाक्ब। भजन संग्रह ३९:१३; हिब्रू ११:१३; अय्युब १४:२

16 परमप्रभु यावे, आंइ परमप्रभु खिं सेल्शा, इन नें ठेयब सेल्चा कली आंइ तेल्लो शोंप नेल्ल इन गुइ रे जाक्शो बाक्ब।

17 आं परमप्रभु, गे मुर आन थुं नाक्शा कोव्रनीनी, दे तुइक्नुड। गे ब्रेम्शो थुं पाइश्शो मुर तशा ग्येरनीनी। गो आं ब्रेम्शो थुं दुम्तीकेमी ग्येरशा एको नेल्ल इन कली चढेता। मुल गो एक बाक्शो इन मुर आन कली ताता। ग्येरशो थुंमी एको नेल्ल चढेम्तेक्म। भजन संग्रह ७:१०

18 परमप्रभु यावे, आंइ किकी पिपी अब्राहाम, इसहाक नु याक्ब आन परमप्रभु, इन मुर आन थुंमी मोदेशो मिम्चा नु पचा गेना हना यो लीपतीन। मिनु मेको आन थुं इन गे कीडीन।

19 आं तौ सोलोमन कली इन शेंतीके, इन देशो नु फुल्लुम मुशा ब्रेक्शो लोव्र आ थुं नेल्लेमी पपतीन। मेकोमी नेल्ल पने चबल। मिनु आं ठीक पा वोइश्शो थोव्रकमी इन खिं सेल्ने चबल” दे दाऊदमी परमप्रभु कली देंमाक्त।

### सोलोमन पिप दुम्शो

20 मिनु नोले दाऊदमी मुर नेल्ल आन कली “परमप्रभु यावे, इन परमप्रभु कली ठेयब सेलीन” देंमाक्त। मिनु मुर नेल्लेमी परमप्रभु यावे, आन किकी पिप आन परमप्रभु कली ठेयब सेल्शा बाम्मा बाक्त। मिनु परमप्रभु यावे नु पिप आ डोंइती बाप्शा, सेउ पामे बाक्त।

21 मिनु आ दीसा नाक्ती मेकोपुकीमी परमप्रभु यावे कली मार मार चढ़ेतीके नु चोशा चढ़ेतीक चढ़ेमे बाक्त। मेकोपुकीमी हजार का ब्यफ, हजार का सांड, हजार का पाठा, तूचा थोत्रक चढ़ेमे बाक्त। इस्राएली नेल्ल आन पर्वम शुश चढ़ेमे बाक्त।

22 मेको नाक्त शुश ग्येरसीशा परमप्रभु यावे आ डोंइती जशा, तूडमे बाक्त। मिनु नोले मेकोपुकीमी दाऊद आ तौ सोलोमन कली लेंशा पिप सेल्मे बाक्त। मिनु सोलोमन कली तेल लुक्शा पिप सेल्मे बाक्त। मिनु सादोक कली चढ़ेब सेल्मे बाक्त। १इतिहास २३:१

23 नोले सोलोमन आ आफ दाऊद आ पा डा परमप्रभु यावे आ नित्तीकेमी निश्शा, पिप दुम्शा, ठेयब दुम्माक्त। इस्राएली नेल्लेमी मेको आ देशो बिस्समा बाक्त। १इतिहास २८:५; १राजा १:३४, ३५, ३९

24 ठेयब मुर नेल्ले, सक्ति पाइश्शो लडाइ पाइब नेल्ले नु पिप दाऊद आ तौ नेल्लेमी यो पिप सोलोमन कली आन पिप बाक्ब, दे कसम जामे बाक्त।

25 मिनु परमप्रभु यावेमी सोलोमन कली इस्राएली नेल्ल आन डोंइती ठेयब सेला बाक्त। मिनु मेको कली राज्य नु मान ततीके शुश गेवा बाक्त। इस्राएलम मेको क्येडा डोंइती डा तेकोइ पिप आन कली मोदेशो मान ततीके मगेशो बाक्माक्त।

#### दाऊद बेक्शो

26 मोपा येस्से आ तौ दाऊदमी इस्राएल नेल्लेमी सासन पवा बाक्त।

27 मेकोमी इस्राएल कली ४० बर्स सासन पवा बाक्त। हेब्रोनम ७ बर्स नु यरूसलेममी ३३ बर्स सासन पवा बाक्त। १राजा २:११

28 मिनु शुश खूशो दुम्शा बेक्माक्त। मेको के शोप नु मान ततीके शुश बाक्माक्त। मिनु आ तौ सोलोमन आ नोले पिप दुम्माक्त। उत्पत्ती २५:८; उत्पत्ती ३५:२९; २इतिहास २४:१५; अय्युब ४२:१७

29 पिप दाऊद आ पशो मार मार बाक्मे, मेको डोंइती रे नोले सम्म नेल्ल परमप्रभु यावे आ लोत्र पाइब सामुएल, नाथान नु गाद आन ब्रेक्शो किताबम ब्रेक्शो बाक्ब। १इतिहास २१:९

30 दोपा सासन पवा, आ सक्ति नु आ पशो नेल्ल, इस्राएली आन तशो नु रागी रागी डा राज्यम मार मार दुम्मे, मेको लोत्र नेल्ल मेकेर ब्रेक्शो बाक्ब।

## २ इतिहास

**ब्रेक्ब मुर:** एजा ब्रेक्ब मुर बाक्त हना यो, अर्को मुरपुकीम यो लोत्र तेम्शो बाक्तेक्म।

**गेना दुम्शो:** १इतिहास खोदेशो पा ५३६ बि. सी. सम्म डा इस्राएली आन इतिहास बाक्ब।

**मार ब्रेक्शो:**

१. सोलोमन आ सासन पची ना डा इस्राएली आन इतिहास। २इतिहास १:- २इतिहास ९:-

२. यहूदा रागी डा पिप आन सासन पची ना डा इस्राएली आन इतिहास। २इतिहास १०:-२इतिहास ३६:-

**सोलोमनम तुइक्तीक थुं पुंडशो**

१राजा ३:१-१५

१ दाऊद आ तौ सोलोमन पिप दुम्शा, आ राज्य बोल्यो दुम्माक्त। मारदे हना परमप्रभु यावे, आ परमप्रभु मेको नु बाक्शा, मेको कली थाम्पा ठेयब मान ताइब सेला बाक्त। १राजा २:१२,४६

२ मिनु सोलोमनम इस्राएली नेल्ल, हजार हजार नु सहे सहे डा लडाइ पाइब आन कप्तान, निसाफ पाइबपुकी, इस्राएली आन ठेयब मुरपुकी नु आन खिं खिं डा ठेयब मुर नेल्ल खुप्शा लोत्र पवा बाक्त।

३ मिनु सोलोमन नु मेको मुर नेल्ल गिबोन सहर आ नेक्था बाक्शो लाइशो डांडाम लमा बाक्त। मारदे हना परमप्रभु यावे आ गेय पाइब मोसाम गोरशो रागीम सेल्शो परमप्रभु आ गुम्तीक ताम्बु मेकेर बाक्माक्त। १इतिहास १६:३९

४ मिनु दाऊदम डोंइती परमप्रभु आ कबल पशो सन्दोस कली किरयथ-यारीम रे आ ठीक पशो बाक्तीके यरूसलेमम चाक्शो बाक्माक्त। मारदे हना मेको कली मेकेर ताम्बु का कीशो बाक्माक्त। १इतिहास १३:६; १इतिहास १५:३,२; १इतिहास १६:१

५ मिनु हुर आ चच ऊरी आ तौ बेजालेलमी सेल्शो कांसा के चोशा चढेतीके परमप्रभु यावे आ बाक्तीके आ डोंइती गिबोनम बाक्शो बाक्माक्त। प्रस्थान ३८:३-८

६ मिनु सोलोमन नु आ खुप्शो मुर नेल्ल इर परमप्रभु यावे आ डोंइती जाक्मा बाक्त। मिनु सोलोमन मेको कांसा के चढेतीक सम्म डोइशशा लमाक्त। मेको गुम्तीक ताम्बु आ डोंइती बाक्शो बाक्माक्त। मेको आ तारी हजार का चोशा चढेतीक चढेवा बाक्त।

७ मेको नाक्दो परमप्रभुम सोलोमन कली तपांडसे बाक्त। मिनु सोलोमन कली “गो इ कली मार गेन? लो पुनो” देमाक्त।

८ मिनु सोलोमनम परमप्रभु कली “गे आं आफ दाऊद कली ठेयब नु गेना हना यो दाक्तीक कोंइताक्नी। मिनु आं कली मेको आ पा डा पिप सेल्शो बाक्नीनी।

९ मुल आं परमप्रभु यावे, गे आं आफ दाऊद कली गेशो इन लोत्र खाप्पीन। मारदे हना गे आं कली एको रागी डा फुरक खोदेशो पा हिक्ने मचाप्चा डा शुश मुर आन पिप सेल्तीनी।

१० आं कली एको मुर आन कली सासन पाइब सेल्तीनी। मोपतीके आं कली रुप्तीक नु तुइक्तीक थुं गेयीनी। मिनु आं कली एको मुर नु रिम्शो पा बाक्चा गेयीनी। मारदे हना एको इश्का इन मुर आन कली सुम सासन पने चाप्चा डा?” देमाक्त।

११ मिनु परमप्रभुम सोलोमन कली “गे आं मुर आन पिप दुम्चा कली रुप्तीक नु तुइक्तीक थुं पुंडतीवी। तन्न गे शुश क्येट नु शोंप, मान ततीके, आंम जोरी सत्रु आन कली साइक्तीके नु आंम कली शुश ब्रोंडडल, दे मपुनी।

१२ मोपतीके गो इ कली रुप्तीक नु तुइक्तीक थुं गेनन। मिनु गो इ कली शुश क्येट, शोंप नु मान ततीके यो गेनन। मेको इ क्येडा डोंइती नु इ क्येडा नोले डा तेकोइ पिपपुकीम मतशो बाक्नीम” दे मदा बाक्त।

१३ मिनु सोलोमन गिबोन सहर आ नेक्था डा डांडा गुम्तीक ताम्बु आ बाक्तीके रे यरूसलेमम जाक्शा, इस्राएली आन कली सासन पवा बाक्त।

सोलोमन आ शोप  
१राजा १०:२६-२९

14 मिनु सोलोमनम शुश बग्गी नु शारापुकी खुप्तीमी बाक्त। मेको के हजार का ४ सहे बग्गी नु हजार का सहे निक्शी शारा बाक्मा बाक्त। मिनु मेकोमी आ बग्गी आन कली बग्गी वोइक्तीक सहरम वोइक्पदा बाक्त। तन्न का निक्शी चहिं आं सहर यरूसलेमम वोइक्पदा बाक्त।

15 सोलोमनम सुन नु चांदी यरूसलेमम बाक्शो फुल्लु खोदंशो पा शुश तेल बाक्त। मिनु लेबानोन डा लाइशशो रवा आ शी, शेफेलाह डा फोव्रशी रवा खोदंशो पा शुश तेल बाक्त।

16 सोलोमनम शारापुकी इजीप्त नु क्युए रे ग्याप्शा, चाक्पाइक्बाक्माक्त। मिनु मेको आ ग्याप्ब लेयबपुकीम क्युएम क्येट थाप्शा ग्याप्शा चाक्बाक्मा बाक्त।

17 मेकोपुकीम इजीप्त रे ग्याप्शा अर्को रागी कली लेयबाक्मा बाक्त। बग्गी का कली ६ सहे चांदी के शेकेल नु शारा का कली सहे का ५० चांदी के शेकेलम लेयबाक्मा बाक्त। मिनु सोलोमन आ ग्याप्ब लेयबपुकीमी मेको हित्ती नु अरामी पिप आन कली लेयबाक्मा बाक्त।

## 2

परमप्रभु आ खिं सेल्चशो  
१राजा ५:१-१८

1 मिनु सोलोमनम परमप्रभु यावे कली मान पचा, दे खिं का नु आंम कली दरवार का सेल्चा थुं पवा बाक्त।

2 मिनु सोलोमनमी ७० हजार कुरब मुर, ८० हजार पहाडम फुल्लु खोइक्चा कली नु मेको गेय पाइब आन कली कोव्रब हजार सां ६ सहे मुर आन कली योव्रमी बाक्त।

3 मिनु सोलोमनम टायर डा पिप हुराम कली “गे आं आफ दाऊद कली आ खिं सेल्चा कली लेबानोन डा लाइशशो रवा आ शी सोइशशो बाक्तीनी। १इतिहास १४:१

4 मिनु मुल गो परमप्रभु यावे, आं परमप्रभु कली मान पचा, दे मेको कली खिं का सेल्चा दाक्नुड। मिनु मेको खिं परमप्रभु यावे आ डोइती ब्रोव्रशो रिना पाइशशो धूप चोचा कली, मेकेर नाक्त कित कित डा कोइतीक शोब्ले हार हार पा चढ़ेचा कली, नाक्दो सुनी चोशा चढ़ेचा कली, नाइक्तीक नाक्ती, औसी नाक्ती नु परमप्रभु यावेम, आंइ परमप्रभु गेना हना यो ‘मानेन’ दे इस्सएली आन कली गेशो चाड मानेचा कली जिम्मा गेचा दाक्नुड।

5 गो आं सेल्चा चिक्शो खिं थम ठेयब नु रिम्शो खिं दुम्चा माल्ब। मारदे हना आंइ परमप्रभु देवी देवता नेल्ल आन क्येडा ठेयब बाक्ब।

6 तन्न सरीड नु स्वर्गम मेको मरिक्ब हना, सुम मेको कली खिं सेल्चे चाप्बा डा? मेको कली मार मार चढ़ेचा क्येडा लाक्शा, आ खिं सेल्ब गो सु नडा डा? २इतिहास ६:१८; १राजा ८:२७

7 मोपतीके गे आं कली सेल्स जोक्ब तुइक्ब मुर का सोइक्तीन। मेको मुरुम सुन, चांदी, कांसा नु फलाम चेम्शा, मार मार सेल्स जोक्चा माल्ब। मेकोमी प्याजी, लल नु नीलो श्येले रे मार मार प्रोव्रस जोक्चा माल्ब। मिनु मार मार मुशा, बुटा आप्चा शेंसीशो मुर दुम्चा माल्ब। मिनु मेकोमी आं आफ दाऊदम योव्रशो मारेइ मारेइ पस जोक्ब यहूदा नु यरूसलेमम गो नु बाक्ब मुरपुकी नु गेय पचा माल्ब।

8 गे आं कली यो लेबानोन डा लाइशशो रवा आ शी नु लेबानोन डा अरु रवा आ शी सोइक्तीनी। मारदे हना इन लेबानोन डा मुरपुकीम रिम्शो पा शी खोइक्स जोक्ब बाक्नीम, दे गो तुइक्नुड। आं गेय पाइब इन गेय पाइब नु गेय पाइनीम।

9 आं कली शुश शी तिम्शा सोइक्तीन। मारदे हना गो ठेयब नु दारशो खिं सेल्चा दाक्नुड।

10 गो इन गेय पाइब रवा तिम्ब आन कली २० हजार कोर हिल्लो चेरब, २० हजार कोर क्योव्रज, २० हजार बाथ अडगुर शांबु नु २० हजार बाथ तेल गेनुडमी” दे लोव्र कुरब मुर सोइक्ता बाक्त। कोर का २२० लिटर पुक्तीके बाक्ब। बाथ का २२ लिटर बाक्ब।

11 मिनु टायर डा पिप हुराममी चिठी का ब्रेक्शा, सोलोमन कली सोइक्ता बाक्त। मिनु मेकोमी “परमप्रभु यावेमी आ मुर आन कली दाक्तीके, इन कली मेको आन पिप सेल्तु।

12 सरीड नु रागी सेल्ब परमप्रभु यावे, इस्राएली आन परमप्रभु ठेयब बाक्ब। मेकोमी पिप दाऊद कली रुप्तीक नु तुइक्तीक थुं पाइश्शो तौ का गेप्टु। मेकोमी परमप्रभु यावे कली खिं का नु आम कली दरवार का सेल्ब।

13 गो इन कली वारच पाइक्चा कली मार मार सेल्स शुश जोक्ब नु तुइक्ब हुराम-अबी कली सोइक्नुड। १राजा ७:१३

14 मेको दान आ थर डा मीश मुर आ तौ बाक्ब। मेको आ आफ चहिं टायर डा बाक्ब। मेको सुन, चांदी, कांसा, फलाम, हीरा, शी नु प्याजी, लल, नीलो श्येले नु रिम्शो पा किरशो सुती श्येले रे प्रोव्रशो वारे मार मार सेल्ने चाप्ब। मुशा मार मार सेल्चा यो जोक्ब बाक्ब। इन कली मार मार ब्रेक्स माल्नीनी, मेकोमी पने चाप्ब। मेको मारेइ मारेइ जोक्ब मुरपुकी नु ठेयब पिप, इन आफ दाऊद आ मारेइ मारेइ सेल्बपुकी नु गेय पने चाप्ब। प्रस्थान ३१:२-६

15 इन ब्रेक्शो खोदेशो पाइन गेय पाइब आन कली चेरब, क्योव्रज, तेल नु अडगुर शांबु सोइक्तीन।

16 गो इन माल्शो शी नेल्ल लेबानोनम तिम्नीकी। मिनु फ्रेशा योप्पा सहर सम्म ठेयब समुन्द्र रे पा सोइक्नीकी। मिनु गे मेकेरे रे यरूसलेम सम्म लतीन” दे चिठी ब्रेक्शा सोइक्ता बाक्त।

17 मिनु सोलोमनम इस्राएलम बाक्शो अर्को रागी डा मुर आन कली हिक्पाइक्मी बाक्त। डोंइती आ आफ दाऊदमी मुर आन कली हिक्पाइश्शो बाक्माक्त। मुल मेकोपुकी लाख का ५३ हजार ६ सहे वोंइश मुर बाक्मा बाक्त। १इतिहास २२:२

18 मेको रे ७० हजार आन कली कुरब, ८० हजार आन कली पहाडम फुल्लु खोइक्ब नु हजार सां ६ सहे आन कली मेको गेय पाइब आन कली कोव्रब सेल्मी बाक्त।

### 3

परमप्रभु यावे कली खिं सेल्शो

१राजा ६:-

1 मिनु सोलोमनमी यरूसलेम डा मोरीयाह डांडाम परमप्रभु यावे आ खिं सेल्चा गोवा बाक्त। डोंइती परमप्रभु यावेमी आ आफ दाऊद कली मेको मोरीयाह डांडाम कोंइशो बाक्माक्त। मिनु दाऊदमी “परमप्रभु आ खिं यबुसी ओरनान आ चेरब तुप्तीकेम सेल्चा माल्ब” दे माइश्शो बाक्माक्त। १इतिहास २१:१८-२६

2 मिनु सोलोमन पिप दुम्शो आ ४ बर्स डा महिना निक्शी डा नाक्त निक्शीमी मेको खिं सेल्चा गोवा बाक्त।

3 सोलोमनम परमप्रभु आ खिं दोमो सेल्चा थुं पशो बाक्माक्त देशा हना, माइत पुक्तीके रे आ लाइश्शो ६० कुबीत नु आ ब्रेम्शो २० कुबीत बाक्माक्त। कुबीत का ०.५ मिटर बाक्ब।

4 खिं आ डोंइती २० कुबीत लाइश्शो, २० कुबीत ब्रेम्शो नु सहे का २० कुबीत ग्येल्थ लाइश्शो पिंडी बाक्माक्त। मेको आगा डा गारोमी क्येख सुनम गिल्पदा बाक्त।

5 मेको खिं आ आगा नेल्ल सला के फलेक क्येप्पदा बाक्त। मिनु नेल्ल कली क्येख सुनम गिल्पदा बाक्त। मेको दारपाइक्चा कली मेको आ तार खजूर रवा नु सिक्रीपुकी बुटा आप्शा सेल्पदा बाक्त।

6 मेको खिं कली दारपाइक्चा कली हीरापुकी क्येप्पदा बाक्त। मेको आन माल्शो सुन पारवाइम माइक्तीके रे चाक्शो बाक्मा बाक्त।

7 मिनु मेको खिं आगा नेल्ले सुनम गिल्पदा बाक्त। मेको आ थाम, लाप्चो आ पुं डा शी, गारो नु लाप्चो नेल्ल गिल्पदा बाक्त। आन गारोम करूबपुकी मुशा सेल्पदा बाक्त।

8 मिनु मेकोमी नेल्ल क्येडा चोव्रखो कोठा सेल्पदा बाक्त। खिं आ ब्रेम्शो आ लाइश्शो यो खाल का डा पा २० कुबीत लाइश्शो नु २० कुबीत ब्रेम्शो सेल्पदा बाक्त। मिनु मेकोमी आ आगा नेल्ल ६ सहे टलेन्ट क्येख सुनम गिल्पदा बाक्त। टलेन्ट का ३४ किलो बाक्ब।

9 मेको कांटी डा सुन नाक्शोनु, ५० शेकेल बाक्मा बाक्त। मेकोमी आ इर गे डा कोठा यो सुनम गिल्पदा बाक्त। शेकेल का ११.५ ग्राम बाक्ब

10 मिनु मेकोमी नेल्ल क्येडा चोव्रखो कोठा कली करूब निक्शी मुशा, सुनम गिल्पदा बाक्त।



11 मेको करूब आस फ्रां नेल्ल प्राकशा पुक्शोनु, २० कुबीत लाइशो बाक्मा बाक्त। मेको करूब आ फ्रां का ५ कुबीत लाइशो बाक्माक्त। मिनु मेको वोइशशा, आ फ्रां काम परमप्रभु यावे आ खिं डा गारो थिशो बाक्माक्त। मिनु मेको आ अर्को ५ कुबीत लाइशो फ्रांम चहिं अर्को करूब आ फ्रां थिशो बाक्माक्त।

12 मोपान अर्को करूब आ फ्रां खिं आ अर्को गे डा गारो थिशा ५ कुबीत लाइशो बाक्माक्त। मिनु मेको आ अर्को फ्रांम अर्को डोंइती डा करूब आ फ्रांम थिशो बाक्माक्त, मेको यो ५ कुबीत लाइशो बाक्माक्त।

13 मेको करूब आस फ्रां नेल्ल पा २० कुबीत प्राकशो बाक्मा बाक्त। मेको निक्शी राप्शो बाक्सा बाक्त। मिनु मेको निक्शीमी मेको खिं गे कोव्रशो बाक्सा बाक्त।

14 मिनु सोलोमनम फारतीक वा नीलो, प्याजी नु लल श्येले नु रिम्शो पा किरशो सुती श्येले रे प्रोवशो वा के सेल्पदा बाक्त। मिनु करूब आ बुटा आप्शा प्रोवपदा बाक्त। प्रस्थान २६:३१

परमप्रभु आ खिं डा थाम निक्शी

१राजा ७:१५-२२

15 मिनु खिं आ डोंइती ३५ कुबीत लाइशो कांसा के थाम निक्शी सेल्पदा बाक्त। मेको आस कली ५ कुबीत लाइशो गुप्तीके गुप्पदा बाक्त।

16 मेको थाम निक्शी आस गुप्तीके एर ओंथ हिरचा कली जाली खोदेशो साडली निक्शी सेल्पाइशशा, सहे का दारीम सेल्शा, मेको दारीम साडलीम क्युकपदा बाक्त।

17 मेको थाम निक्शी परमप्रभु यावे आ खिं आ डोंइती का ग्युरा गे, का पेरा गे राप्पदा बाक्त। मिनु ग्युरा गे डा थाम आ नें याकीन वोदा बाक्त। पेरा गे डा थाम आ नें बोआज वोदा बाक्त। याकीन आ अर्थ “थुं बारपाइक्ब” बाक्ब। बोआज आ अर्थ “मेकोमी सक्ति गेब” बाक्ब।

## 4

खिं कली मार मार सेल्शो

१राजा ७:२३-५१

1 मिनु सोलोमनमी हराम-अबी कली २० कुबीत लाइशो २० कुबीत ब्रेम्शो नु १० कुबीत ग्येत्थ लाइशो कांसा के चढेतीक का सेल्पदा बाक्त। कुबीत का ०.५ मिटर बाक्ब।१इतिहास ७:७

2 मिनु नोले यपाइशशा कांसा के थम ठेयब बोस का सेल्पदा बाक्त। मेको कली दोम्ली देंमा बाक्त। मेको सुर का रे अर्को सुर सम्म १० कुबीत बाक्माक्त। मिनु मेको आ ग्येत्थ लाइशो ५ कुबीत बाक्माक्त। मेको आ एर ओंथ पुक्शोनु ३० कुबीत बाक्माक्त।

3 मेको दोम्ली आ लाडगा गे हार निक्शी ब्यफ दारपाइक्चा कली बाक्माक्त। कुबीत काम १० ओटा ब्यफ बाक्शो बाक्मा बाक्त। मेको बोस नु दारपाइक्तीक ब्यफ कांसा यपाइक्तीक गेय रे कालेमीन सेल्शो बाक्मा बाक्त।

4 मेको दोम्ली १२ ओटा ब्यफ आन तार वोइशशो बाक्माक्त। ब्यफ सां उत्तर गे कोव्रशो, सां पच्छिम गे कोव्रशो, सां दक्खिन गे कोव्रशो नु सां पूर्ब गे कोव्रशो बाक्मा बाक्त। मिनु मेको दोम्ली मेको ब्यफ आन तार वोइशशो बाक्माक्त। मेको ब्यफ आन मीलु आगा गे बाक्शो बाक्मा बाक्त।

5 मेको दोम्ली आ सुर लिली फू आ सफा खोदेशो पा रोम्सीशो बाक्माक्त। मेको आ सुर लोटा के खोदेशो बाक्माक्त। मेको बोस इन्ची सां थांइशो बाक्माक्त। मेको आ आगाम हजार सां बाथ ब्वाक्कु रिक्बाक्माक्त। बाथ का २२ लिटर बाक्ब।

6 मिनु सोलोमनम चिनु तेम्शा १० ओटा आइक्च कांसा के चिकतीक बोस सेल्पदा बाक्त। मिनु मेको के ५ ओटा दोम्ली आ ग्युरा गे नु ५ ओटा आ पेरा गे वोइक्पाइक्मी बाक्त। मिनु चोशा चढेचा कली मार मार मुरचा माल्तेक्म हना, मेकेर मुरबाक्मा बाक्त। मेको दोम्ली चहिं चढेब आन चिकतीक बाक्माक्त।

7 मिनु मोसामी डोंइती बत्ती दातीक सेल्चा शेंशो खोदेशो पा, १० ओटा सुन के बत्ती दातीक सेल्पदा बाक्त। मिनु मेको परमप्रभु यावे आ खिंम ५ ओटा दक्खिन गे नु ५ ओटा उत्तर गे पा वोइक्पदा बाक्त।

8 मेकोमी १० ओटा टेबल यो सेल्शा, परमप्रभु यावे आ खिंम ५ ओटा ग्युरा गे नु ५ ओटा पेरा गे पा वोइक्पदा बाक्त। मिनु सहे का सुन के बुइक्तीक बोस यो सेल्पदा बाक्त।

9 मेकोमी चढेब आन बाक्तीक लाडगा, टेयब लाडगा नु लाडगा डा लाप्चोपुकी सेल्पदा बाक्त। मिनु लाप्चो आन कली कांसाम गिल्पदा बाक्त।

10 मिनु मेको दोम्ली माइशो टेयब ब्वाक्कु वोइक्तीके परमप्रभु यावे आ खिं आ दक्खिन पूर्व गे डा कुनाम वोइक्पदा बाक्त।

### हुराममी मार मार सेल्शो

11 मिनु हुराममी ग्योंब, बेल्चा नु बोसपुकी सेला बाक्त। मोपा हुराममी पिप सोलोमन आ गेशो परमप्रभु आ खिं डा गेय नेल्ल थुमा बाक्त।

12 हुराममी थाम निक्शी, बोस खोदेशो गुप्तीके, मेको आस एर ओंथ क्युकुशो दारपाइक्तीक जाली खोदेशो साडली सेल्शा थुमा बाक्त।

13 मेको साडलीम क्युकुचा कली ४ सहे दारीम सेला बाक्त। मेको थाम आस डरम बाक्शो गुप्तीक बोस आस कली सुम्चा कली सेल्शो जाली खोदेशो साडली नु मेको साडलीम हार निक्शी पा वोइक्चा कली दारीमपुकी,

14 बोसपुकी राप्पाइशशा वोइक्तीके नु बोसपुकी,

15 मेको दोम्ली माइशो टेयब चिक्तीके नु मेको आ राप्पाइक्तीके डा १२ ओटा ब्यफपुकी,

16 ग्योंबपुकी, बेल्चापुकी, श्ये गुंडतीक कांटापुकी नु मेकेर माल्लशो मारेइ मारेइ सोलोमन अरेशो खोदेशो पा हुराममी परमप्रभु यावे आ खिं कली सेल्शो नेल्ल टल्केपपाइशशा कांसा के बाक्मा बाक्त।

17 मिनु पिपमी मेको नेल्ल यर्दन डा दिंम डा खपीम, सुक्कोथ नु सेरेदाह सहर आस दातेम यपाइशशा सेल्पाइशशा बाक्माक्त।

18 मोपा सोलोमनमी मेकेर शुश कांसा के सेल्तीके सेल्पदा बाक्त। मेको कली दोशो कांसा माल्दमे, मेको मतुइशशा बाक्मा बाक्त।

19 मिनु सोलोमनम परमप्रभु आ खिं कली माल्तीक मारेइ मारेइ सुन के चढेतीके, कोइतीक शोब्ले वोइक्तीके टेबलपुकी सेल्पदा बाक्त।

20 मिनु मोसाम देशो खोदेशो पा नेल्ल क्येडा चोव्रखो कोठा आ डोइती दाचा कली क्येख सुन के बत्ती दातीक नु आन तेल वोइक्तीके सेल्पदा बाक्त।

21 मेकोमी क्येख सुन के फू, तेल वोइक्तीके नु थनारोपुकी,

22 क्येख सुन के सल्दो क्योरतीके, बोसपुकी नु डाडुपुकी नु मी कुरतीके सेल्पदा बाक्त। मिनु परमप्रभु यावे आ खिं डा लाप्चो, आगा डा नेल्ल क्येडा चोव्रखो कोठा डा लाप्चो नु टेयब बाक्तीक डा लाप्चो नेल्ल सुन के सेल्पदा बाक्त।

## 5

### कबल पशो सन्दोस चाक्शो

1 मिनु सोलोमनम परमप्रभु यावे आ खिं कली पशो गेय नेल्ल थुमा नोले, आ आफ दाऊदमी परमप्रभु यावे कली गेशो नेल्ल चाक्मा बाक्त। मेको सुन चांदी नु ग्योंब नेल्ल मारेइ मारेइ परमप्रभु आ खिं डा शोंप वोइक्तीकेमी वोइक्पदा बाक्त। १इतिहास १८:११; १इतिहास २९:२-४

2 मिनु नोले सोलोमनम परमप्रभु यावे आ कबल पशो सन्दोस दाऊद आ सहर सियोन रे चाक्चा कली इस्राएल डा खाल्पापुकी, इस्राएली आन थर थर डा टेयब मुर नेल्ले नु इस्राएली आन खिं खिं डा टेयब मुर आन कली यरूसलेममी बुक्चा, दे ब्रेत्तीमी बाक्त।

3 मिनु इस्राएल डा खुम्सीशो मुर नेल्ल ७ महिना डा चाड नाक्ती पिप आ डोइती जाक्मा बाक्त। लेवी २३:३४

4 मिनु इस्राएल डा खाल्पा नेल्ल जाक्मानु, लेवीपुकीम कबल पशो सन्दोस कुरमे बाक्त।

5 मिनु चढेबपुकी नु लेवीपुकीम सन्दोस, युम्तीक ताम्बु नु ताम्बुम बाकशो ग्योब परमप्रभु आ मारेड मारेड थोत्रक कुरशा, इर लदमे बाक्त।

6 मिनु पिप सोलोमन आ डोंइती बुकशो इस्राएल डा मुर नेल्ले मेको कबल पशो सन्दोस आ डोंइती बाकशो बाक्मा बाक्त। मिनु मेकोपुकीम हिकने मचाप्चा डा पा शुश ब्यफ नु भेडा चढेमे बाक्त।

7 मिनु नोले चढेबपुकीम परमप्रभु यावे आ कबल पशो सन्दोस आ बाक्तीक परमप्रभु यावे आ खिं आ आगा डा नेल्ल क्येडा चोत्रखो कोठाम चाकशा करूब आस फ्रां आगाम वोदमे बाक्त।

8 मेको करूब आस फ्रां मेको कबल पशो सन्दोस बाक्तीक आ तारी प्राकशो बाक्सा बाक्त। मोपा मेको करूब निक्शीमी आस प्राकशो फ्रांम कबल पशो सन्दोस नु आ कोक्के सुम्शो बाक्सा बाक्त।

9 मेको कोक्के चहिं थम लाइशो बाक्तीके नेल्ल क्येडा चोत्रखो कोठा रे ठेयब बाक्तीकेम तांइसीशो बाक्माक्त। तन्न मेको लाडगा रे मतांइसीबाक्माक्त। मेको मुल सम्म यो बाक्नीम।

10 मोसामी होरेब डांडाम मेको कबल पशो सन्दोस आगा वोइशो फुल्लु निक्शी क्येडा लाकशा, अरु मारेड मबाक्माक्त। मेना परमप्रभु यावेमी इस्राएली इजीप्त प्रोइशा गाक्मानु, कबल पशो बाक्माक्त। ब्यवस्था १०:५; हिब्रू ९:४

11 मिनु चढेबपुकी नेल्ल क्येडा चोत्रखो कोठा रे यूमा बाक्त। मेकेर बाकशो चढेब नेल्ले आन पालो मरिम्थुन परमप्रभु यावे आ डोंइती जाक्चा कली ठीक सेल्सीशो बाक्मा बाक्त। १इतिहास ८:१४; लूका १:८-९

12 मिनु कुम्सो पाइब लेवी नेल्ल, आसाफ, हेमान, येदुथून नु मेको आन तौपुकी, मेको आन खिं खिं डा वोइश मुर नेल्ल रिम्शो पा किरशो श्येले रे प्रोत्रशो सुती वा फेक्सीशा बुप्केल, ठेयब नु आइक्च तार पाइशो ताप्तीके कुरशा चढेतीक आ पूर्व गे राम्मा बाक्त। मिनु मेकोपुकी नु सहे का २० जना चढेब यो बाक्मा बाक्त। मिनु मेकोपुकी चहिं तुराही ताप्ब बाक्मा बाक्त। १इतिहास १५:१९; १इतिहास १६:३७; १इतिहास १६:४१-४२

13 मिनु तुराही ताप्बपुकी नु कुम्सो पाइबपुकीम खाल का डा सेंदा पा “परमप्रभु यावे, गे ठेयब बाक्नीनी। गे रिम्शो पाइब बाक्नीनी” दे कुम्सो पतीक मेको आन गेय बाक्माक्त। मिनु मेकोपुकीम तुराही, बुप्केल नु अरु ताप्तीक ताप्शा, परमप्रभु यावे कली “गे रिम्शो पाइब बाक्नीनी। इन दाक्तीके गेना हना यो लीब” दे कुम्सो पामे बाक्त। मिनु परमप्रभु यावे आ खिं गोस्सुम ब्रीमाक्त। १इतिहास १६:३४; भजन संग्रह १०६:१

14 मिनु मेको गोस्सुम खिं ब्रीतीके चढेबपुकीम गेय पने मचाप्मे बाक्त। मारदे हना परमप्रभु यावे आ खिं आ छेडछेडम ब्रीशो बाक्माक्त। १इतिहास ७:१-३; प्रस्थान ४०:३५

## 6

सोलोमनम परमप्रभु नु लोत्र पशो

१राजा ८:१२-५३

1 मिनु सोलोमनम “परमप्रभु यावे, गे ‘गो थम क्येर गोस्सुम बाक्नुड’ देशो बाक्तीनी।

2 गो इन कली गेना हना यो बाक्चा कली थम दारशो खिं का सेल्ता” देमाक्त।

3 मिनु नोले पिप खुम्सीशो इस्राएली गे हिरशा, नेल्ल आन कली आसीक गेमी बाक्त। मेना मुर नेल्ले राप्शो बाक्मा बाक्त।

4 मिनु मेकोमी “परमप्रभु यावे, इस्राएली आन परमप्रभु, गे ठेयब बाक्नीनी। गे आं आफ दाऊद नु देशो लोत्र मुल खाप्शो बाक्नीनी।

5 गे आं आफ दाऊद कली ‘गो आं मुर आन कली इजीप्त रागी रे गुंइशा चाक्गुमी रे मुल सम्म आं नें वोइक्चा नु आं खिं सेल्चा कली इस्राएल डा तेकोइ थर आन सहर मयोत्रडु। मिनु गो आं मुर इस्राएली आन कली सासन पपाइक्चा कली पिप मयोत्रडु।

6 तन्न गो आं नें कली मान पचा, दे यरूसलेम कली योत्रता। मिनु दाऊद कली आं मुर इस्राएली आन पिप दुम्चा कली योत्रता’ देशो बाक्तीनी।

7 आं आफ दाऊदम परमप्रभु यावे, इस्राएली आन परमप्रभु आ नें कली मान पा खिं का सेल्चा कली थुं पशो बाक्माक्त। २सामुएल ७:२-१३

8 तन्न परमप्रभु यावे, गे आं आफ दाऊद कली 'गे आं नें कली मान पा खिं का सेल्चा थुं पाप्तीवी। मेको रिम्शो बाक्ब।

9 मो हना यो गे मेको सेल्चा मदुम्नेवे। तन्न इ तौम आं नें कली मान पा खिं का सेल्चा माल्ब' दे माइश्शो बाक्तीनी।

10 मुल परमप्रभु यावे, गे इन देशो लोव्र खाप्तीनी। परमप्रभु यावे, गे इन लोव्र खोदेशो पा गो आं आफ दाऊद आ पा डा पिप दुम्ती। मिनु गो इस्राएल डा पिप आ ठेयब नित्तीकेम निश्शो बाक्नुड। मिनु गो परमप्रभु यावे, इस्राएली आन परमप्रभु, इन नें कली मान पा एको खिं सेल्ता। जकरिया ४:९

11 मिनु गो इन कबल पशो सन्दोस मेको आगाम वोइक्ता। परमप्रभु यावे, इन इस्राएली नु पशो कबल आगाम बाक्ब" देमाक्त। ब्यवस्था ९:९; ब्यवस्था १०:५

### परमप्रभु आ खिं जिम्मा गेशो

12 मिनु सोलोमन परमप्रभु यावे कली चढेतीक आ डोंइती नु इस्राएल डा खुम्सीशो मुर नेल्ल आन डोंइती राप्शा, आ गुइ निम्फा पोक्गा बाक्त।

13 सोलोमनम ५ कुबीत लाइश्शो, ५ कुबीत ब्रेम्शो नु कुबीत सां ग्येथ लाइश्शो कांसा के राप्तीक का सेल्पाइश्शा, लाडगा आ दातेम वोइश्शो बाक्माक्त। मिनु मेको तार राम्माक्त। मिनु नोले खुम्सीशो इस्राएली नेल्ल आन डोंइती आ पोक्च थेक्शा, आ गुइ सरीड गे पोक्गा बाक्त। कुबीत का ०.५ मिटर बाक्ब।

14 मिनु मेकोमी "परमप्रभु यावे, इस्राएली आन परमप्रभु, सरीड नु रागीम इन खोदेशो सुइ मबाक्नीम। गे कबल खाप्ब बाक्नीनी नु इन कली नेल्ल थुंम खोइक्ब इन वाइल आन कली गे गेना हना यो दाक्नीनी।

15 गे इन वाइल, आं आफ दाऊद कली देशो लोव्र खाप्तीनी। इन देशो लोव्र मुलाक्त पाइतीनी।

16 मोपतीके परमप्रभु यावे, इस्राएली आन परमप्रभु इन गेय पाइब, आं आफ दाऊद कली देशो लोव्र खपीन। मार देशो लोव्र खपीन देशा हना, 'इस्राएली आन कली सासन पचा कली गेना हना यो इ मुर बाक्ब। गे आं डोंइती गाक्शो खोदेशो पा इ आलपुकीम आं अरेशो लोव्र पाम्तेक्म हना, इस्राएल डा ठेयब नित्तीकेम पिप दुम्चा कली गेना हना यो इ मुर का बाक्ब' देशो बाक्तीनी। २सामुएल ७:१६

17 मिनु मुल परमप्रभु यावे, इस्राएली आन परमप्रभु, इन गेय पाइब दाऊद कली देशो लोव्र थमा दुम्पतीन।

18 मिनु मार, परमप्रभु थमा पा मुर नु रागीम बाक्बा डा? सरीड नु स्वर्गम इन कली मरिक्ब हना, इन कली सेल्शो खिंम इन कली दोपा रिक्बा डा? १इतिहास २:५

19 इन गेय पाइब, आं पुंइशो, आं पशो लोव्र नेनीन। परमप्रभु यावे, आं परमप्रभु, आं ब्रेश्शो नु आं प्रार्थना नेनीन।

20 मिनु इन देशो लोव्र खोदेशो पा इन नें कली मान पचा कली सेल्शो बाक्तीक, एको खिं कली नाक्दो नाक्ती कोव्रडीन। मिनु इन खिं गे कोव्रशा पुनुनु, आं लोव्र नेनीन।

21 मिनु इन गेय पाइब नु इस्राएली, इन मुरुम एको खिं गे कोव्रशा पुन्मेनु, इन स्वर्ग डा बाक्तीक रे नेनीन। मिनु नेंशा मेको आन पाप क्याम्दीन।

22 सुइम अरु मुर कली पाप पशो बाक्त हना, कसम जचा माल्ताक्व हना, मेको मुर कली इन कली चढेतीक नु इन खिं आ डोंइती कसम जपाइक्तेक्म हना, ब्यवस्था २७:२६; प्रस्थान २२:१०

23 गे स्वर्ग रे मेको नेंशा, मार पचा माल्बा, मेको पने। मिनु इन गेय पाइब आस दातेम निसाफ पने। दोस ताइब कली सजाइ गेने। मिनु दोस मताइब कली प्रोनीन। दोपा ठीक पवा, मेको आ पशो खोदेशो पा, मेको कली गेने।

24 मिनु इस्राएली, इन मुरपुकीमी इन कली पाप पशा, आन जोरी सत्रु नु लडाइ पा बुम्तेक्म हना, तन्न एको इन खिं जाक्शा, इन नें थिशा, इन कली पुंइशा, इन गे लेत्तेक्म हना, ब्यवस्था २८:२५

25 गे स्वर्ग रे मेको आन पुंइशो नेनीन। मिनु इस्राएल डा मुर आन पाप क्याम्दीन। मिनु गे मेको आन कली नु आन किकी पिपी आन कली गेशो रागीम लेशशा चाक्कीन।

26 मिनु मेकोपुकीम इन कली पाप पतीके, रेउ मयित हना, मेकोपुकीम इन बाक्तीक गे कोव्रशा, इन कली पुंइनीम। मिनु गे मेको आन कली सजाइ गेब परमप्रभु बाक्नीनी, दे तुइक्नीम। मिनु आन पाप रे लेशशा, इन कली पुंइतेक्म हना, ब्यवस्था २८:२३-२४

27 गे, स्वर्ग डा बाक्तीक रे मेको आन पुंइशो लोव्र नेनीन। मिनु इन गेय पाइब, इस्राएली आन पाप क्याम्दीन। गे मेको आन गाक्चा माल्लो रिम्शो लां कोइदीन। मिनु गे इन इस्राएल डा मुर आन कली गेशा आन थेरशो रागीम रेउ यिपतीन।

28 मिनु रागीम अन्काल दुम्त हना, मुरपुकी बेक्तीक रोइ पाप्तेक्म हना, चेरब सोव्रतीक रोइ जाकत हना, बुंली डाइक्ताक्व हना, सल्ला सोंपु जोम्तेक्म हना, आन जोरी सत्रुम आन बाक्तीक पुम्ताक्म हना, दोदेंब हिंचा डा श्येत नु रोइ बोक्त हना यो,

29 इन इस्राएल डा मुर नु अरु सुइम आन श्येत इन कली शोव्रशा, एको खिं गे कोव्रशा, आन गुइ पोक्शा, इन कली पुंइतेक्म हना,

30 गे, इन मुर आन पुंइशो इन स्वर्ग डा बाक्तीक रे नेनीन। मिनु मेको आन पाप क्याम्दीन। गे इन मुर आन थुं तुइश्शो खोदेशो पा रिम्शो कली रिम्शो नु मरिम्शो कली मरिम्शो पने। मारदे हना गे ला मुर आन थुं तुइक्व बाक्नीनी। भजन संग्रह १३९:१-४,२३

31 मोपा इन कली मान पा हिंशा, मबेक्मा सम्म इन लां गाक्शा नु इन गेशो आन किकी पिपीम थेरशो रागीम रिम्शो पा बाक्नीम।

32 मिनु इन मुर, इस्राएली मबाक्थु, अर्को रागी डा मुरपुकीम डोन रागी रे जाक्शा, इन टेयब नें, इन सक्ति नु इन वारच पतीके नेंशा, एको खिं गे कोव्रशा, पुंइतेक्म हना,

33 गे, इन स्वर्ग डा बाक्तीक रे मेको आन पुंइशो नेंशा, मेको अर्को रागी डा मुर आन पुंइशो गेने। मोपा इस्राएली खोदेशो पा रागी डा मुर नेल्लेमी इन कली तुइश्शा, इन कली मान पा हिंनीम। मिनु मेकोपुकीम आं सेल्लो खिंम गे थमा पा बाक्नीनी, दे तुइक्नीम।

34 मिनु इन मुरपुकीम आन जोरी सत्रु नु लडाइ पचा कली तेको लां रे सोइक्ताक्नी हना यो, इन योव्रशो सहर नु गोम इन कली मान पा सेल्लो खिं गे कोव्रशा, पुंइतेक्म हना, दानीएल ६:११

35 गे मेको आन पुंइशो लोव्र इन स्वर्ग डा बाक्तीक रे नेंशा आन माल्लो गेशा वारच पने।

36 मिनु मेकोपुकीमी इन कली पाप पाप्तेक्म हना, मारदे हना पाप मपाइब सुइ मबाक्नीम। गे मेको आन कली तशा गाइश्शा, मेको आन कली आन जोरी सत्रु आन गुइमी गेतीनी हना, मेकोमी मेको आन कली ग्याइश्शा, डोन रागी हना यो, आन नेक्था डा रागी हना यो लाइश्शा, चोक्तेक्म हना,

37 मिनु मेको रागीमी मेको आन थुं इन गे लेशशा, मेकोपुकीम 'गो पाप पाइतक, गो दूली पाइतक, गो काइ मरिम्शो पाइतक' देशा, दानीएल ९:५

38 मिनु मेको रागीम आन थुं नेल्लेमी इन गे लेशशा, आन किकी पिपीम थेरशो रागी, इन योव्रशो सहर नु गो इन कली मान पचा कली सेल्लो खिं गे कोव्रशा, इन कली पुंइतेक्म हना,

39 इन स्वर्ग डा बाक्तीक रे मेको आन पुंइशो लोव्र नेनीन। मिनु मेको आन माल्लो गेन। आन पशो पाप नेल्ल क्याम्दीन।

40 मुल आं परमप्रभु, मेको खिं रे इन मुर आन लोव्र नेंशा कोव्रडीन। मिनु आन पुंइशो नेनीन।

41 परमप्रभु यावे, परमप्रभु, मुल बोक्कीन। गे नु इन सक्ति डा कबल पशो सन्दोस इन नाइश्शा बाक्तीकेम जाक्कीन। परमप्रभु यावे, परमप्रभु, इन कली चढेबपुकीम इन मुर आन कली पाप क्याम्तीक गेय पपतीन। मिनु इन कली थमा सुइक्व इन रिम्शो पशो तशा ग्येरसमल। भजन संग्रह १३२:८

42 परमप्रभु यावे, परमप्रभु, गे इन तेल लुक्शो मुर, आं कली मप्रोंइयीनी। इन गेय पाइब दाऊद कली पशो इन गेना हना यो दाक्तीक मिम्तीन” दे सोलोमनम परमप्रभु कली देमाक्त। भजन संग्रह ८९:४-५

## 7

परमप्रभु आ खिंमी चाड मानेशो

१राजा ८:५४-६६

1 मिनु सोलोमनम मेको पुंइने थुमा नोले सरीड रे मी यिमाक्त। मिनु मेको मीम चोशा चढेशो नु अरु चढेशो नेल्ल नेक्का बाक्त। मिनु परमप्रभु यावे आ छेडछेडम आ खिं कली ब्रीमाक्त। लेवी ९:२४; १राजा १८:३८; प्रस्थान ४०:३४

2 मिनु परमप्रभु यावे आ खिं आ छेडछेडम ब्रीतीके, चढेबपुकी परमप्रभु यावे आ खिं ओवने मचम्मे बाक्त।

3 इस्राएली नेल्लेमी मेको मी यिशा नु परमप्रभु यावे आ खिं आ तार छेडछेड बाक्शो तामे बाक्त। मेकोपुकीमी खप सम्मन बाप्शा “परमप्रभु यावे, गे रिम्शो पाइब बाक्नीनी। इन दाक्तीके गेना हना यो लीब” देशा, ठेयब सेल्मे बाक्त। २इतिहास ५:१३-१४; भजन संग्रह १०६:१

4 मिनु नोले पिप नु मुर नेल्लेमी परमप्रभु यावे आ डोंइती चढेमे बाक्त।

5 मिनु पिप सोलोमनम २२ हजार ब्यफ नु लाख का, २० हजार भेडा चढेवा बाक्त। मोपा पिप नु मुर नेल्लेमी मेको खिं परमप्रभु कली जिम्मा गेमे बाक्त।

6 चढेब आन पालो खोदेशो पा बाक्मा बाक्त। लेवीपुकी परमप्रभु यावे कली ताप्तीक ताप्चा कली आन ताप्तीके शेशा बाक्मा बाक्त। पिप दाऊदम मेको ताप्तीकपुकी परमप्रभु यावे कली ठेयब सेल्चा कली “आ दाक्चा गेना हना यो लीब” दे कुम्सो पचा कली, परमप्रभु यावे कली ठेयब सेल्ची ना कली सेल्शो बाक्माक्त। मिनु लेवीपुकीमी कुम्सो पामे बाक्त। चढेबपुकी कोत्रमुशा तुराही ताप्मे बाक्त। मेना इस्राएली नेल्ल राप्शा बाक्मा बाक्त। २इतिहास ४:१

7 मिनु नोले सोलोमनम परमप्रभु यावे आ खिं आ डोंइती डा लाडगा परमप्रभु कली जिम्मा गेवा बाक्त। मिनु मेकेर चोशा चढेतीक चढेवा बाक्त। दुशा बाक्चा आ परबम चढेशो आन बोंसो यो चढेवा बाक्त। मारदे हना मेको आ सेल्शो कांसा के चढेतीकेम चोशा चढेशो, अन्न चढेशो नु बोंसो चढेचा कली मरिक्ता बाक्त। २इतिहास ४:१

8 मेना सोलोमनम ७ नाक्ती सम्म चाड सेला बाक्त। मिनु इस्राएली नेल्ले मेको नु बाक्मा बाक्त। लेबो-हमाथ रे इजीप्त डा खोला सम्म शुश मुरुमी ७ नाक्त सम्म चाड मानेमे बाक्त।

9 मिनु मेकोपुकीमी ८ नाक्तीम परमप्रभु यावे कली ठेयब गुम्तीक का सेल्मे बाक्त। मारदे हना मेकोपुकीम चढेतीक डा जिम्मा गेतीके ७ नाक्त सम्म मानेमे बाक्त। मिनु नोले ७ नाक्त डा चाड यो मानेमे बाक्त। गन्ती ७:१०

10 मिनु ७ महिना डा २३ नाक्तीम सोलोमनम मुर आन कली आन खिं खिं सोइक्तीमी बाक्त। मेकोपुकी थुं नाइश्शा, थम ग्येरसीशा लमा बाक्त। मारदे हना परमप्रभु यावेमी दाऊद, सोलोमन नु आ मुर आन कली थम रिम्शो पवा बाक्त।

11 मो पा सोलोमनम परमप्रभु यावे आ खिं नु आ दरवार सेल्ने थुमा बाक्त। मिनु परमप्रभु यावे आ खिं नु आ खिं सेल्चा थुं पा रिम्शो पा थुमा बाक्त।

परमप्रभुमी लोत्र पशो

१राजा ९:१-९

12 मिनु नोले परमप्रभु यावे नाक्दो सोलोमन आ डोंइती तपांडसीशा, मेको कली “गो इ पुंइशो लोत्र नेता। मिनु गो मेको खिं मुरपुकीमी आं कली मेकेर चढेचा कली योत्रता। ब्यवस्था १२:५-६; यसैया ५६:७; मर्कूस ११:१७; यूहन्ना २:१६

13 गो सरीड कली चोक्शो खोदेशो पा रेड मयिपाइक्ता हना, गो रागी कली खतम पोक्चा कली सल्हा सोइक्ताकड हना, आं मुर आन दातेम बेक्तीक रोड पपाइक्ता हना,

14 मिनु आं मुरपुकी ब्रेम्शो दुम्शा, आं कली पुंइशा, आं कली माल्तेक्म हना, आन मरिम्शो लां रे लेत्तेक्म हना, गो स्वर्ग रे मेको आन पुंइशो नेंनुड। मिनु मेको आन पाप क्याम्नुड। मिनु गो मेको आन रागी कली डोंइती डा खोदेशो पा रिम्शो सेल्नुड।

15 मिनु मेको बाक्तीकेमी मुरपुकीम आं कली पुंडशो लोत्र गो कोत्रशा नोफा दाइक्नुड। २इतिहास ६:४०

16 मारदे हना गो आं नें गेना हना यो बाक्चा कली एको खिं कली योवता। एको आं के ला बाक्ब। गो मेको कली कोत्रनुड। आं थुं गेना हना यो मेकेर बाक्ब।

17 मिनु गे चहिं इ आफ दाऊद आं डोंइती गाक्शो खोदेशो पा गाक्तेवे नु आं इन कली शेंशो फुल्लुम मुशा ब्रेक्शो लोत्र नु आ निसाफ पतीक लोत्र नेल्ल पाप्तीवी हना,

18 गो इ राज्य बोल्यो नु ठेयब सेल्लनुड। गो इ आफ दाऊद कली कबल पशो खोदेशो पा इ कली यो 'गेना हना यो इस्राएली आन कली सासन पचा कली इ खिं डा मुर का बाक्ब' दे कबल पाइनुड। २इतिहास ६:१६

19 तन्न गे नोले शोंइसीशा, गो इ डोंइती वोइशो आं फुल्लुम मुशा ब्रेक्शो लोत्र नु आं शेंतीके मटिप्तीवी हना, नु लशा अर्को देवी देवता आन कली सेउ पा पूजा पाप्तीवी हना,

20 गो इन कली गेशो रागी रे गुंडनुड। मिनु गो आं नें बाक्शो खिं प्रोंइनुड, काइ मकोत्रनुड। मिनु गो एको कली जात जात डा मुर आन दातेमी खिसी नु शुक्शी पाइक्तीक सेल्लनुड। ब्यवस्था २८:६३; १राजा १४:१५

21 मिनु एको खिं आ पबंम मार देंनीमी? मुल ठेयब दारशो बाक्ब। तन्न नोले एको लां रे गाक्ब मुर नेल्ल छक लाक्शा 'मारदे परमप्रभु यावेम एको रागी नु एको खिं ओदेशो सेला?' दे हिल्लो पाइनीम। ब्यवस्था २९:२३-२८; येरमीया २२:८-९

22 मिनु लेशा मुरपुकीम 'मारदे हना मेकोपुकीमी परमप्रभु यावे, आन किकी पिपी आन परमप्रभुमी मेको आन कली इजीप्तर रे गुंडशा चाक्ब परमप्रभु यावे कली प्रोंइतेक्म। मिनु अर्को देवी देवता आंम के सेल्शा, पूजा पा गेय पाम्तेक्म। मोपतीके परमप्रभु यावेमी मेको आन कली मोदेशो श्येत गेप्तु' दे लोत्र लेत्नीम" देंमा बाक्त।

## 8

सोलोमन आ अरु पतीके

१राजा ९:१०-२८

1 मिनु सोलोमनम परमप्रभु यावे आ खिं नु आ दरवार सेल्चा कली २० बर्स माल्दा बाक्त।

2 मिनु पिप हुरामम सोलोमन कली सहरपुकी गेवा बाक्त। मिनु सोलोमन मेको सहर आन कली लेंशा सेला बाक्त। मेकेर इस्राएल डा मुर आन कली बाक्पाइक्मी बाक्त।

3 मिनु सोलोमन हमथ-सोबा लशा, लडाइ पा मेको आ के सेला बाक्त।

4 मिनु गोरशो रागीमी तदमोर माइशो सहर सेला बाक्त। मिनु हमथम यो मार मार वोइक्तीक सहरपुकी सेला बाक्त।

5 मेकोमी आइक्था डा बेथ-होरोन नु आइदी डा बेथ-होरोन यो सेला बाक्त। मिनु गारो हिरशो, ठेयब लाप्चो वोइशो नु आग्लो पाइशो बोल्यो सहर दुम्मा बाक्त।

6 मेकोमी बालाथ सहर नु सोलोमन आ मार मार वोइक्तीक सहरपुकी सेला बाक्त। मिनु बग्गी वोइक्तीक सहर नु शारा आन कली वोइक्तीक सहरपुकी सेला बाक्त। मेकोमी यरूसलेम, लेबानोनम नु आ राज्य नेल्लेमी आ दाक्शो खोदेशो पा सहरपुकी सेला बाक्त।

7 हित्ती, एमोरी, परिज्जी, हिब्वी नु यबुसी इस्राएली मबाक्शो मुर,

8 आन चच युइ इस्राएल रागीम लीशो बाक्मा बाक्त। मारदे हना मेको आन कली मसाइक्थ, ब्रोंइचा गेशो बाक्मा बाक्त। मिनु सोलोमनम मेको आन कली वाइल सेल्शा, गेय पपदा बाक्त। मेको मुल सम्म मोदेशोन बाक्नीम। यहोसु १६:१०

9 तन्न सोलोमनम इस्राएल डा मुर रे मोदेशो वाइल गेय पचा कली सुइ मलदा बाक्त। मेको आन कली लडाइ पाइब, आन ठेयब मुर, आ बग्गी चलेब नु शारा डोइक्ब आन कप्तान सेल्मी बाक्त।

10 पिप सोलोमन के सहे निक्शी ५० जना अधिकार पाइशो मुर बाक्मा बाक्त। मेकोपुकी मुर आन कली कोत्रब बाक्मा बाक्त।

11 मिनु सोलोमनम फाराओ आ तमी कली दाऊद आ सहर रे मेको कली सेल्शो खिंम चाक्या बाक्त । मारदे हना मेकोमी “आं मीश इस्त्राएल डा पिप दाऊद आ खिंमी बाक्चा मदुम्ब । मारदे हना मेको परमप्रभु यावे आ कबल पशो सन्दोस बाक्शो, परमप्रभु आ बाक्तीक ला बाक्ब” देंमाक्त । १राजा ३:३

12 मिनु नोले सोलोमनम परमप्रभु यावे आ खिं डा पिंडी आ डोंइती वोइश्शो आ सेल्शो चढ़ेतीकेम परमप्रभु यावे कली चोशा चढ़ेतीके चढ़ेवा बाक्त । २इतिहास ४:१

13 मोसा आ अरेशो खोदेंशो पा नाइक्तीक नाक्ती, औंसी नाक्ती, बर्स डा चाड सां बोरब ओरुती मसुप्शो जिज शोब्ले जतीक चाड, ७ नाक्त डा चाड नु गोठ सेल्शा बाक्तीक चाड मानेतीक नु नाक्त किंत किंत चढ़ेचा माल्शो चढ़ेतीक चढ़ेवा बाक्त । लेवी २३:-; गन्ती २८:२,४,११,१७,२६; गन्ती २९:१२

14 सोलोमन आ आफ दाऊदम ब्रेक्शो अरेशो लोव्र खोदेंशो पा, तेको चढ़ेबम गेना चढ़ेचा माल्बा, आन पालोम पतीक गेय नेल्ल देंशो बाक्माक्त । मिनु लेवीपुकीमी परमप्रभु यावे कली ठेयब सेल्तीक कुम्सो पचा कली नु चढ़ेब आन कली वारच पचा कली बाक्मा बाक्त । मिनु लाप्चोम खाल पाइब आन कली आन हुल हुल पा योव्रशा, तेको तेको लाप्चोम बाक्चा माल्दा मोपा वोइक्पाइश्शो बाक्माक्त । मारदे हना परमप्रभु आ मूर दाऊद मोदेंशो अरेशो बाक्त । १इतिहास २३:- १इतिहास २६:-

15 मिनु चढ़ेबपुकी नु लेवीपुकीम पिप आ अरेशो नेल्ल ठीक पा पामे बाक्त । मोपा मेकोपुकीमी शोंप वोइक्तीक कोठा यो कोव्रडमे बाक्त ।

16 सोलोमनम परमप्रभु यावे आ खिं डा जग दोवा रे नेल्ल मथुमा सम्म मोदेंशो दुम्माक्त ।

17 मेको नोले सोलोमन ठेयब समुन्द्र आ नेक्था एदोम रागी डा एस्योन-गेबेर नु एलोथ लमाक्त ।

18 मिनु पिप हुराममी आ गेय पाइबपुकी, आ जहाजपुकी नु जहाज चलेब आन कली सोलोमन कली वारच पचा कली ठेयब समुन्द्रम सोइक्ता बाक्त । मेकोपुकी सोलोमन आ गेय पाइबपुकी नु ओफीर लशा, ४ सहे ५० टलेन्ट सुन ग्याप्शा चाक्शा, पिप सोलोमन कली गेमे बाक्त । टलेन्ट का ३४ किलो बाक्ब ।

## 9

शेबा डा पिपीम जाक्शो

१राजा १०:१-१३

1 शेबा डा पिपीममी सोलोमन आ शुश नें चलेशो नेना बाक्त । मिनु मेकोमी सोलोमन कली नाक्चा कली लेन्ने मचाप्चा डा लोव्र हिल्लो पथ यरूसलेमम जाक्माक्त । मेको शुश मुर नु जाक्शा, शुश दलओंठम मस्लापुकी, शुश सुन नु हीरापुकी कुर पा जाक्माक्त । मिनु मेकोमी सोलोमन कली गुम्शा, आ थुम बाक्शो लोव्र नेल्ल हिल्लो पवा बाक्त । मत्ती १२:४२

2 मिनु सोलोमनमी आ हिल्लो पशो लोव्र नेल्ल लेत्ता बाक्त । मेकोमी तेको लोव्र हिल्लो पवा, मेको लोव्र सोलोमनम मारेइ श्येत मलाक्थु, लेत्ता बाक्त ।

3 मिनु शेबा डा पिपीममी सोलोमन आ रुप्तीक थुं नेल्ल तशा, मेको आ सेल्शो खिं,

4 मेको आ टेबल डा जचा थोव्रक, मेको आ एर ओंथ निश्शो आ सरकार डा ठेयब मुरपुकी, मेको आ गेय पाइब आन दारशो वा, अरु आन फेक्तीके नु पिप कली तूचा गेब आन वा कोव्रस डा कोव्रस दुम्माक्त । मिनु परमप्रभु यावे आ खिं लशा, मेको आ चोशा चढ़ेशो तशा, शुश छक लाक्माक्त ।

5 मिनु मेकोमी पिप कली “आं रागीम इन पतीके नु शुश रुप्तीक थुं आ पर्बम नेंशो लोव्र नेल्ल थमा बाक्त ।

6 तन्न गो जाक्शा, आंमा मतडा सम्म मेको आन देंशो लोव्र थमा मसुदु । मेकोपुकीमी आं कली इन रुप्तीक थुं आ पर्बम नेल्ल लोव्र मशोव्रडमे बाक्त । इच्का ला शोव्रडमे बाक्त । तन्न गे शुश रुप्तीक थुं पाइश्शो बाक्तीनी ।

7 इन मुर ग्येरशो मुर बाक्नीमी । नाक्त किंत किंत इन डोंइती गेय पाइबपुकीम इन रुप्तीक थुं डा लोव्र नेंशा, ग्येरसीशो बाक्नीमी ।



8 परमप्रभु यावे, इन परमप्रभु ठेयब बाक्ब। इन कली तशा ग्येरसीशा आ ठेयब नित्तीकेमी इन कली निप्पाइश्शा, आ पा डा पिप सेल्लु। मारदे हना परमप्रभु यावे, इन परमप्रभुम इस्राएली आन कली दाक्शा, गेना हना यो बाक्पाइक्का थुं पाप्तु। मोपतीके इन कली मेकेर ठीक निसाफ पचा नु ठीक पतीके शेंचा, दे आन पिप सेल्लु” दैमाक्त। १इतिहास २९:२३

9 मिनु नोले मेकोमी पिप कली सहे का २० टलेन्ट सुन शुश मस्ला नु शुश हीरा गेवा बाक्त। शेबा डा पिपीममी सोलोमन कली गेशो मस्लापुकी, थम रिम्शो बाक्शा तेइ मथिसीब बाक्माक्त। टलेन्ट का ३४ किलो बाक्ब।

10 मिनु मेको नेल्ल प्रॉइशा, पिप हुराम नु सोलोमन आस गेय पाइबपुकीम ओफीर रे सुन चाक्गमे बाक्त। मिनु मेकोपुकीमी शुश क्येट लाइब शी नु हीरापुकी यो चाक्गमे बाक्त।

11 मिनु पिपमी मेको शी रे परमप्रभु यावे आ खिं नु दरवार कली थेंका सेला बाक्त। कुम्सो पाइब आन कली ठेयब नु आइक्च तार पाइश्शो ताप्तीकपुकी सेला बाक्त। डोंइती मोदेशो रिम्शो शी यहूदा रागीम गेनायो मबाक्शो बाक्माक्त।

12 मिनु पिप सोलोमनम शेबा डा पिपीम कली आ चाक्शा गेशो कोसेली क्येडा यो शुश आ माल्शो मारेइ मारेइ गेवा बाक्त। मिनु नोले मेको आ गेय पाइबपुकी नु आ रागी लेम्माक्त।

सोलोमन आ शोंप नु आ मान तशो  
१राजा १०:१४-२९

13 सोलोमन आ बाक्तीकेम बर्स काम ६ सहे ६६ टलेन्ट सुन ताक्बाक्माक्त। टलेन्ट का ३४ किलो बाक्ब।

14 मेको प्रॉइशा, आ ग्याप्ब लेयबपुकीमी यो चाक्बाक्मा बाक्त। अराब रागी डा पिपपुकी नु रागी रागी डा सासन पाइबपुकीमी यो सोलोमन कली सुन नु चांदी चाक्बाक्मा बाक्त।

15 मिनु पिप सोलोमनमी तुप्शो सुन के सहे निक्शी लडाइ पाइब आन कली ठेयब तेक्तीक सेला बाक्त। मेको तेक्तीक का सेल्चा कली ६ सहे शेकेल सुन माल्मा बाक्त। शेकेल का ११.५ ग्राम डा चांदी के क्येट बाक्ब।

16 मेकोमी लेंशा तुप्शो सुन के सहे सां आइक्च तेक्तीक सेला बाक्त। मेको तेक्तीक का सेल्चा कली सहे सां शेकेल सुन माल्मा बाक्त। मिनु पिपमी मेको नेल्ल लेबानोन ब्वाकी डा खिंम वोइक्पदा बाक्त। १राजा ७:२

17 मिनु पिपम हात्ती आ दारा के ठेयब नित्तीक का सेल्शा, मेको कली क्येख सुनम गिल्पदा बाक्त।

18 मेको ठेयब नित्तीके आ डोंइती ६ ओटा थेंका नु सुन के खोइल वोइक्तीक बोंइसीशो बाक्माक्त। मेको ठेयब नित्तीक आ निम्फा पटटी गुइ वोइक्तीक बाक्माक्त। मेको गुइ वोइक्तीक निम्फा पटटी गे राप्शो गुप्स का का सेल्शो बाक्माक्त।

19 मेको ६ ओटा थेंकामी थेंका कामी एर गे गुप्स का, ओंथ गे गुप्स का पा १२ ओटा गुप्स सेल्शो बाक्माक्त। तेकोइ राज्यम मोदेशो ठेयब नित्तीके गेनायो मसेल्शो बाक्माक्त।

20 सोलोमन आ तूतीक बोस नेल्ल सुन के बाक्माक्त। मिनु लेबानोन ब्वाकी डा खिं डा बोस नेल्ले क्येख सुन के बाक्मा बाक्त। चांदी के मारेइ मसेल्शो बाक्मा बाक्त। मारदे हना सोलोमन आ पालाम चांदी मारेइ खोदेशो मबाक्माक्त।

21 हुराम आ गेय पाइबपुकी पिप सोलोमन आ जहाजपुकी नु टारसीस डा बाक्त। मिनु बर्स सां सांमी मेको पिप आ जहाजपुकीम सुन, चांदी, हात्ती आ दारा, मोरपुकी नु मजुरपुकी चाक्बाक्मा बाक्त।

22 मोपा पिप सोलोमन शोंप पाइश्शो नु रुप्तीक थुंम रागी डा पिप नेल्ल आन क्येडा ठेयब दुम्माक्त।

23 मिनु परमप्रभुम सोलोमन कली गेशो रुप्तीक थुं डा लोव्र नेंचा कली रागी रागी डा पिप नेल्ले मेको कली गुम्थ जाक्बाक्मा बाक्त।

24 मिनु मेको कली गुम्थ जाक्ब नेल्लेमी सुन नु चांदी के मार मार, फेक्तीक वापुकी, यापुकी, मस्लापुकी, शारापुकी नु खच्चरपुकी बर्स बर्सम कोसेली चाक्बाक्मा बाक्त।

25 सोलोमन के ४ हजार शारा नु बग्गीपुकी वोइक्तीक खिं बाक्मा बाक्त। मिनु मेको के १२ हजार शारा बाक्मा बाक्त। मेकोमी शारा नु बग्गी आन कली बग्गी वोइक्तीक सहरम नु का निकशी चहिं आं नु यरूसलेममी वोइक्पाइक्बाक्माक्त। २इतिहास १:१४-१७; १राजा ५:६

26 मेकोमी युफ्रेटीस खोला रे पलिस्ती आन रागी नु इजीप्त आ सांद सम्म सासन पवा बाक्त।

27 पिपमी फुल्लु खोदेशो पा यरूसलेम सहरम चांदी तेला बाक्त। लेबानोन डा ठेयब रवा आ शी शेफेलाहम बाक्शो फोत्रशी रवा खोदेशो पा शुश तेला बाक्त।

28 सोलोमन आ शारापुकी चहिं इजीप्त नु अरु नेल्ल रागी रे ग्याप्शा चाक्बाक्मा बाक्त।

सोलोमन बेक्शो

१राजा ११:४१-४३

29 मिनु पिप सोलोमन आ डोंइती रे डा नोले सम्म पशो नेल्ल परमप्रभु यावे आ लोत्र पाइब नाथान आ इतिहासम मब्रेक्शो बाक्बा डा? मिनु शिलो डा नोले दुम्ब लोत्र पाइब अहीयाहम मब्रेक्शो बाक्बा डा? इददोमी नेबात आ तौ येरोबाम आ पर्बम तशो मब्रेक्शो बाक्बा डा?

30 सोलोमनम यरूसलेमम बाक्शा, इस्राएल नेल्ल कली ४० बर्स सासन पवा बाक्त।

31 मिनु सोलोमन बेक्माक्त। मिनु मुरपुकीम मेको कली आ आफ दाऊद आ सहरमी थिम्मि बाक्त। मिनु मेको आ पा डा आ तौ रेहोबाम पिप दुम्माक्त। १राजा १४:२१

## 10

पिप रेहोबामम अर्ती मनेशो

१राजा १२:१-२४

1 रेहोबाम शेकेमम लमाक्त। मारदे हना इस्राएली नेल्ल मेको कली पिप सेल्चा कली शेकेमम जाक्शो बाक्मा बाक्त।

2 मिनु नेबात आ तौ येरोबामम मेको लोत्र नेनानु, इजीप्त उइ बाक्शो बाक्माक्त। मेको सोलोमन पिप क्येडा प्रोक्शा इजीप्त लशो बाक्माक्त। मिनु येरोबाम इजीप्त रागी रे लेम्माक्त।

3 मिनु मुरपुकीम मेको कली ब्रेथ सोइक्तमे बाक्त। मिनु मेको नु इस्राएली नेल्ल रेहोबाम आ बाक्तीक जाक्शा, मेको कली

4 “इन आफोम आंइ कली हेल्शो गेय पपाइश्शो बाक्त। मुल गे इन आफोम गेशो हेल्शो गेय इक्का सोपी पाइतीनी हना, गो इन कली गेय पाइनीकी” देमा बाक्त।

5 मिनु रेहोबामम “आं कली नाक्त सां सम्म मिम्चा गेयीनी। मिनु लेंशा जाक्कीन” दे सोइक्तीमी बाक्त। मोपतीके मुरपुकी लेश्शा लमा बाक्त।

6 मिनु नोले पिप रेहोबामम आ आफ सोलोमन ब्रोंइशा बाक्मेनु, अर्ती गेब खाल्पापुकी नु अर्ती पुंइशा “एको मुर आन कली मार लोत्र लेत्तुमी? गे मार अर्ती गेनीनी?” दे हिल्लो पवा बाक्त।

7 मिनु मेकोपुकीम “गे एको मुर आन कली शिशो पा रिश्शो लोत्र पाइतीनी हना, मेकोपुकी गेना हना यो इन गेय पाइब दुम्नीम” दे अर्ती गेमे बाक्त।

8 तन्न मेकोमी मेको खाल्पा आन अर्ती मनेना बाक्त। मिनु आ नु कोल्शो ठिटा आन अर्ती पुंइशा

9 “मेकोपुकीम आं आफोम आन कली गेशो हेल्शो गेय सोपी सेल्चा कली पुंइतेक्म। मिनु गो मेको आन कली मार लोत्र लेत्तुमी? गे मार अर्ती गेनीनी?” दे हिल्लो पवा बाक्त।

10 मिनु मेको नु काथा कोल्शो ठिटापुकीम “इन आफोम आंइ कली हेल्शो गेय गेशो बाक्त। मुल मेको सोपी सेल्शा गेकी, दे पुंइब मुर आन कली ‘आं आइक्च ब्रेप्चो आं आफ आ क्रातो क्येडा ठेयब बाक्ब।

11 आं आफोम इन कली हेल्शो गेय पपाइश्शो बाक्माक्त। तन्न मुल गो मेको क्येडा हेल्शो गेय पपाइक्नुड। आं आफोम इन कली कोक्केम तुप्पाइश्शो बाक्माक्त। तन्न मुल गो इन कली बिच्छीम क्राइक्पाइक्नन्नी’ मतीन” दे अर्ती गेमे बाक्त।

12 मिनु येरोबाम नु मेको मुर नेल्ल पिप रेहोबामम देशो खोदेशो पा नाक्त सां नोले रेहोबाम आ बाक्तीकेम जाक्मा बाक्त।

13 मिनु पिपम मेको मुर आन कली मरिम्शो लोव्र पाइमी बाक्त। मारदे हना मेकोमी खाल्पा आन गेशो अर्ती मनेना बाक्त।

14 मिनु मेको ठिटापुकीम गेशो अर्ती बिश्शा, मेको आन कली “आं आफोम इन कली हेल्लो गेय गेशो बाक्माक्त। तन्न मुल गो मेको क्येडा हेल्लो गेय गेनुड। आं आफोम इन कली तुप्पाइश्शो बाक्माक्त। तन्न मुल गो इन कली बिच्छीम क्राइक्पाइक्नन्नी” दे माइक्मी बाक्त।

15 मिनु पिपम मेको मुर आन लोव्र मनेना बाक्त। मारदे हना परमप्रभुमी शिलो डा अहीयाह रे पा नेबात आ तौ येरोबाम आ पबर्म देशो लोव्र खाप्चा कली परमप्रभु यावेम मोदेशो पपाइश्शो बाक्माक्त। १राजा ११:२९-३१

यहूदा थर नु उत्तर डा इस्राएली ब्राशो

16 मिनु उत्तरम बाक्ब इस्राएलीपुकी नेल्लेमी “पिपम आंइ देशो मबिप्ब” दे तुइक्तमे बाक्त। मिनु मेकोपुकीमी पिप कली “दाऊद नु आंइ के मार भाग बाक्बा डा? येस्से आ तौ नु आंइ के मार बाक्बा डा? गे इस्राएलीपुकी, आंम ताम्बुम लने। मुल दाऊद आ खिं डा मुर, गे आंमा इन खिं कली कोव्रडीन” देमा बाक्त। मोपतीके इस्राएली नेल्ल आन ताम्बुम लमा बाक्त।

17 तन्न रेहोबामम यहूदा डा सहरम बाक्ब इस्राएली आन कली सासन पा बाक्माक्त।

18 मिनु पिप रेहोबाममी आ गेय पाइब आन कली कोव्रब हदोराम कली मुर आन बाक्तीकेम सोइक्ता बाक्त। तन्न इस्राएलीपुकीम मेको कली फुल्लु आप्शा सदमे बाक्त। मिनु पिप रीब पा दयु प्रेक्शा आ बग्गी डोइश्शा, यरूसलेम लमाक्त।

19 मिनु मेको नाक्ती रे मुल सम्म उत्तरम बाक्ब इस्राएलीपुकीम दाऊद आ खिं डा मुरपुकी नु मदुथु, सासन पचा मगेशो बाक्नीम।

## 11

रेहोबाम यरूसलेम लेशशो

1 मिनु रेहोबाम यरूसलेमम लेशशा, आंम राज्य लेंशा ताक्चा कली यहूदा नु बेन्यामीन थर डा लाख का ८० हजार बोल्यो लडाइ पाइब मुरपुकी इस्राएली नु लडाइ पचा कली खुप्ता बाक्त। १राजा १२:२१-२४

2 तन्न परमप्रभु यावे आ लोव्र परमप्रभु आ मुर शेमायाह कली जाक्माक्त।

3 मिनु परमप्रभुमी शेमायाह कली “सोलोमन आ तौ यहूदा डा पिप रेहोबाम, इस्राएलम बाक्ब यहूदा डा मुर नु बेन्यामीन डा मुर नेल्ल आन कली,

4 परमप्रभु यावेमी मार देंब देशा हना ‘गे इन लोकबपुकी नु लडाइ पथ इर डोइश्शा मलने। गे नेल्ल इन खिं लेशशा लने। मारदे हना एको नेल्ल आं रे पा पिशो बाक्ब’ दे माइक्मी” देमाक्त। मोपतीके मेकोपुकीम परमप्रभु यावे आ लोव्र टिशा, येरोबाम नु लडाइ पचा थुं मपामे बाक्त।

रेहोबामम यहूदा कली बोल्यो सेल्शो

5 मिनु रेहोबाम यरूसलेमम बाक्शा, यहूदा डा सहरपुकी बोल्यो सेला बाक्त।

6 मेकोमी बेथलेहेम, एताम, तेकोहा,

7 बेथ-सुर, सोको, अदुल्लाम,

8 गाथ, मारेशा, जीफ,

9 अदोरेम, लाकीश, आजेका,

10 सोराह, आइयालोन नु हेब्रोन बोल्यो सेला बाक्त। मेको सहरपुकी यहूदा नु बेन्यामीनम बाक्मा बाक्त।

11 मिनु मेकोमी मेको सहरपुकी थम बोल्यो सेला बाक्त। मिनु मेकेर कप्तानपुकी योव्रशा वोदा बाक्त। मिनु जचा थोव्रक, तेल, अडगुर शांबु खेक्शा वोइक्पदा बाक्त।

12 मिनु मेकोमी सहर नेल्लेम ठेयब तेक्तीक नु तूतीकपुकी, तेलशा वोइक्पदा बाक्त। मिनु मेको सहर नेल्ल थम बोल्यो सेला बाक्त। मोपा मेकोमी यहूदा नु बेन्यामीन आ राज्य बोल्यो सेल्शा सासन पचा बाक्त।

१३ इस्राएल रागीम ब्राशा बाक्शो चढेब नु लेवीपुकी नेल्ल आन बाक्तीक रे रेहोबाम आ बाक्तीक जाक्मा बाक्त।

१४ लेवीपुकीम आन बाक्तीक नेल्ले प्रॉइशा, यहूदा नु यरूसलेमम बाक्थ जाक्मा बाक्त। मारदे हना येरोबाम नु आ तौपुकीमी मेको आन कली परमप्रभु यावे कली चढेतीक गेय पचा मगेमे बाक्त। २इतिहास १३:९

१५ मिनु येरोबाममी डांडा डा थानम आ सेल्शो क्यारश आ मूर्ति नु बाछा आन मूर्ति पूजा पचा कली आ चढेब वोइक्पदा बाक्त।

१६ मिनु सु सुमी परमप्रभु यावे, इस्राएली आन परमप्रभु कली खोइक्चा थुं पशो बाक्मा, मेको इस्राएली नेल्ल परमप्रभु यावे, आन किक्की पिपी आन परमप्रभु कली चढेथ यरूसलेम सहरम लमा बाक्त। मिनु लेवीपुकी मेको आन नोले खोदमे बाक्त। १राजा १२:२६-२७

१७ मेकोपुकीम यहूदा डा राज्य बोल्यो सेल्शा, बर्स सां सम्म सोलोमन आ तौ रेहोबाम कली वारच पदमे बाक्त। मारदे हना मेकोपुकी बर्स सां सम्म दाऊद नु सोलोमन आस रिम्शो लांम गाक्मा बाक्त।

१८ मिनु रेहोबामम महलाथ कली ग्युंवे पा चाक्गा बाक्त। मेको आ आफ दाऊद आ तौ येरीमोथ नु मेको आ ममा चहिं येस्से आ तौ एलीआब आ तमी अबीहेल बाक्माक्त। १सामुएल १६:६

१९ मेकोमी रेहोबाम कली येऊशा, शेमारयाह नु चाहम तौ थिवा बाक्त।

२० मेको आ नोले रेहोबाममी अब्सालोम आ तमी माकाह कली ग्युंवे पवा बाक्त। मेकोमी अबीयाह, अत्तै, जीजा नु शेलोमीथ थीमी बाक्त।

२१ मिनु रेहोबाममी आ ग्युंवे पशो मीशपुकी नु अरु मीश आन क्येडा अब्सालोम आ तमी माकाह कली शुश दाक्बाक्माक्त। मेको के १८ जना ग्युंवे पशो मीश नु ६० जना अरु मीश बाक्मा बाक्त। मेको के २८ जना तौ नु ६० जना तमी बाक्मा बाक्त।

२२ रेहोबामम आ तौ नेल्ल आन दाते डा माकाह आ तौ अबीयाह कली आ नोले, आ पा डा पिप सेल्चा कली मिम्ता बाक्त।

२३ मिनु मेकोमी रुप्तीक थुं पा अर्को तौ आन कली यहूदा नु बेन्यामीन डा रागी डा बोल्यो सहरम सासन पाइब सेला बाक्त। मेको आन कली मार मार माल्मा, शुश गेशा, मेको आन कली शुश मीश आल, मीश सेल्चा कली चाक्शा गेवा बाक्त। २इतिहास २१:३

## १२

### यहूदा कली लडाइ तोशो

१राजा १४:२५-३१

१ रेहोबाम आ राज्य बोल्यो दुम नोले मेको सक्ति पाइश्शो दुम्माक्त। मिनु मेकोमी परमप्रभु यावे आ अरेशो लोत्र प्रोना बाक्त। मिनु मेको नु इस्राएली नेल्लेमी यो परमप्रभु यावे आ अरेशो लोत्र प्रोन्ने बाक्त।

२ मिनु रेहोबामम पिप पशो ५ बर्स दुम्मेनु, इजीप्त डा पिप शीशक यरूसलेम कली लडाइ तोचा कली जाक्माक्त। मारदे हना इस्राएलीपुकीमी परमप्रभु यावे कली प्रॉइशा बाक्मा बाक्त।

३ पिप शीशक हजार का सहे निक्शी बग्गी नु ६० हजार शारा डोइक्ब लडाइ पाइबपुकी चाक्शा जाक्माक्त। शीशक नु इजीप्त रे हिकने मचाप्चा डा पा लिबीया, सुक्कीम नु एथीयोपीया डा लडाइ पाइब मेको नु जाक्मा बाक्त।

४ मिनु मेकोमी यहूदा डा बोल्यो सहरपुकी ग्राना ग्रान यरूसलेम सम्म जाक्माक्त। २इतिहास ११:५-१०

५ मिनु परमप्रभु यावे आ लोत्र पाइब शेमायाह नु रेहोबाम यहूदा डा ठेयब मुर आन बाक्तीक जाक्सा बाक्त। मेकोपुकी शीशक आ लडाइ तोशो रे ब्रॉइचा कली प्रोक्शा, यरूसलेमम बुक्शो बाक्मा बाक्त। मिनु शेमायाहम मेको आन कली “परमप्रभु यावेमी मार दैत देशा हना ‘गेपुकीम आं कली प्रॉइतीनी। मोपतीके गो इन कली प्रॉइशा, शीशक आ गुडमी गेतन्नी’ देशो बाक्ब” दे माइक्मी बाक्त।

6 मिनु इस्राएल डा ठेयब मुरपुकी नु पिप आन थुं ब्रेम्शो दुम्शा “परमप्रभु यावेम थमा लोत्र पवा बाक्त” देमा बाक्त।

7 मिनु परमप्रभु यावेमी मेको आन थुं ब्रेम्शो दुम्शो तशा, मेको शेमायाह कली “मेकोपुकी ब्रेम्शो दुम्तीके, गो मेको आन कली खतम मसेल्लुडमी। तन्न गो मेको आन कली ब्रोंइचा गेनुडमी। आं गाइशो शीशक आ पतीके रे पा यरूसलेमम ममोइक्नुड।

8 मो हना यो मेकोपुकी मेको शीशक आ गेय पाइब दुम्नीम। मोपा मेकोपुकीमी आं कली गेय पचा नु अर्को राज्य डा मुर आन कली गेय पचा गिश फरक दुम्बाकमे, मेको तुइक्नीम” देशो बाक्माक्त।

9 मिनु इजीप्त डा पिप शीशकम यरूसलेम कली लडाइ तोशा ग्राशा, परमप्रभु यावे आ खिं डा शोंप नु पिप आ दरवार डा शोंप लदा बाक्त। मिनु सोलोमन आ सेल्शो सुन के तेक्तीकपुकी यो योल्दा बाक्त।

10 मिनु पिप रेहोबामम मेको सुन के तेक्तीक आन पा डा कांसा के तेक्तीक सेल्शा, पिप आ दरवार डा लाप्यो खाल पाइब आन ठेयब मुर आन कली जिम्मा गेशा वोइक्पदा बाक्त।

11 मिनु पिप परमप्रभु यावे आ खिं ओत्रमेनु, मेको खाल पाइबपुकीम मेको तेक्तीक कुरशा, मेको नु आगा ओत्रबाक्मा बाक्त। मिनु नोले मेकोपुकीम मेको तेक्तीक खाल पाइब आन बाक्तीकेम वोइक्बाक्मा बाक्त।

12 मारदे हना परमप्रभु यावेमी रेहोबाम ब्रेम्शो दुम्शो तशा, मेको आ पबंम गाइक्तीके प्रोना बाक्त। मिनु नेल्ल खतम मसेला बाक्त। मिनु यहूदामी रिम्शो दुम्शो यो बारना बारन लमाक्त। २इतिहास ३२:२६

13 मोपा पिप रेहोबाममी यरूसलेममी आ राज्य बोल्यो सेल्शा, सासन पवा बाक्त। रेहोबाम पिप दुम्मेनु, ४१ बर्स दुम्शो बाक्माक्त। मिनु मेकोमी यरूसलेम सहरम १७ बर्स सासन पवा बाक्त। परमप्रभु यावेम इस्राएल डा थर नेल्ल आन दाते रे आ नें कली मान पा बाक्चा, दे यरूसलेम सहर योत्रशो बाक्माक्त। रेहोबाम आ ममा आ नें नामा बाक्माक्त। मेको अम्मोनी बाक्माक्त। २इतिहास ६:२०

14 रेहोबामम मरिम्शो पवा बाक्त। मारदे हना मेकोमी आ थुं नेल्लेमी परमप्रभु यावे आ नोले मखोदा बाक्त।

15 मिनु रेहोबाम आ डोंइती रे डा नोले सम्म पशो नेल्ल परमप्रभु यावे आ लोत्र पाइब शेमायाह नु इददोम इतिहासम मब्रेक्शो बाक्बा डा? मेकोपुकीम मुर आन किकी पिपी ब्रेक्तसे बाक्त। रेहोबाम नु येरोबाम आस दातेमी गेना हना यो लडाइ दुम्ना दुम्न बाक्माक्त। २इतिहास १३:२२

16 मिनु रेहोबाम बेक्माक्त। मिनु मुरपुकीम मेको कली दाऊद आ सहर, यरूसलेममी थिम्मे बाक्त। मिनु आ तौ अबीयाह पिप दुम्माक्त।

## 13

अबीयाह यहूदा डा पिप दुम्शो

१ राजा १५:३-८

1 येरोबाम पिप पशो १८ बर्स दुम्मेनु, अबीयाह यहूदा डा पिप दुम्माक्त।

2 मेकोमी बर्स सां यरूसलेमम सासन पवा बाक्त। आ ममा गिबा सहर डा उरीएल आ तमी मीकाया बाक्माक्त। मिनु अबीयाह नु येरोबाम आस दातेम लडाइ दुम्ना दुम्न बाक्माक्त।

3 अबीयाहमी लडाइ पचा कली थम बोल्यो ४ लाख लडाइ पाइबपुकी ठीक पवा बाक्त। येरोबामम चहिं ८ लाख बोल्यो लडाइ पाइबपुकी खुप्ता बाक्त।

4 मिनु अबीयाह एफ्राइम डा पहाड रागी डा सेमाराइम डांडाम राप्शा, ठेयब सेंदा पा “येरोबाम नु इस्राएल डा मुर नेल्ल, आं लोत्र नेनीन।

5 मार, गे परमप्रभु यावे, इस्राएली आन परमप्रभु दाऊद नु गेना हना यो लीब हिक्सी कबल पशो मतुइक्नीनी? मेको कबल मार बाक्ब देशा हना, मेको इस्राएली आन राज्य नेल्ल दाऊद नु आ तौ आन कली गेना हना यो कली गेशो बाक्ब, दे मतुइक्नीनी? लेवी २:१३; गन्ती १८:१९

6 मो हना यो दाऊद आ तौ सोलोमन आ गेय पाइब नेबात आ तौ येरोबामम आ होत्रप कली मटिथु, मेको आ पबंम मरिम्शो पाप्नु।

7 मिनू शोर गाकशो मुरपुकी मेको नु बाकशा, सोलोमन आ तौ रेहोबाम कली शुक्शी पाम्तेकम। मेना रेहोबाम आइक्च बाक्माक्त। मोपतीके मारेइ पने मचाप्बा बाक्त।

8 मुल गे दाऊद आ तौम सासन पशो, परमप्रभु यावे आ राज्य नु लडाइ पचा कली मिम्शो बाक्नीनी? गेपुकी थमा पा ठेयब हुल का बाक्नीनी। मार, गेपुकी नु येरोबामम सेल्शो सुन के बाछापुकी इन देवता दुम्चा कली गे नु बाक्नीमी? गे ग्रासीब, दे मिम्नीनी? १राजा २२:२८

9 मार, गेपुकीम हारून आ चच युइ परमप्रभु यावे कली चढ़ेब लेवी आन कली खेरशा, आंम मुर आन कली योव्रशा, अर्को रागी खोदेशो पा चढ़ेबपुकी मसेल्नी डा? सुइ मुरुम चढ़ेब दुम्चा कली बाछा का नु ७ ओटा सांड चाक्शा जाक्त हना, गे मेको कली चढ़ेब सेल्नीनी। मिनू मेको मारेइ पने मचाप्ब मूर्ति कली चढ़ेब दुम्ब। प्रस्थान २१:४८; २इतिहास ११:१५

10 तन्न परमप्रभु यावे आंइ परमप्रभु बाक्ब। मिनू गोपुकीम मेको कली मप्रोंइक। मिनू परमप्रभु यावे कली चढ़ेब हारून आ चच युइ बाक्नीम। मिनू लेवीपुकीमी मेको आन कली वारच पाइनीम।

11 मेकोपुकीम नाकदो नु सुनी परमप्रभु यावे कली चोशा चढ़ेतीक चढ़ेनीम। मेकोपुकीम ब्रोव्रशो रिना पाइशशो धूप चोइनीम। मेकोपुकीम कोंइतीक शोब्ले लहर पा क्येख सुन के टेबलम वोइक्नीम। मेकोपुकी नाकदो कुस कुस सुन के बत्ती दातीकेम बत्ती दानीम। मोपा गोपुकीम आंइ परमप्रभु यावेम देशो नेल्ल थमा पा पाइनीकी। तन्न गेपुकीम मेको कली प्रोंइतीनी। गन्ती २८:३-८

12 परमप्रभु गोपुकी नु बाकशा, आंइ डोंइती गाक्ब। मेको आ चढ़ेब आन तुराही गे नु लडाइ पचा कली ताप्चा चिक्शो बाक्नीम। गे इस्राएली मुरपुकी, गे परमप्रभु यावे, इन किकी पिपी आन परमप्रभु नु लडाइ मपने। गे मग्रानीनी” दैमाक्त। गन्ती १०:९

13 येरोबामम नोले रे जाक्शा लडाइ पचा कली हुल का बाप्पाइशशा वोइशशो बाक्माक्त। मिनू मेको आन लडाइ पाइब आन ठेयब हुलम चहिं यहूदा नु लडाइ पामे बाक्त। येरोबाम आ बाप्पाइशशो हुल चहिं नोले रे जाक्मा बाक्त।

14 मिनू यहूदा डा मुरपुकीम लेशशा कोव्रडमेनु, लडाइ आन डोंइती नु नोले यो बाक्माक्त, दे तुइक्तमे बाक्त। मिनू मेकोपुकीम “वारच पाइक्की” दे परमप्रभु यावे कली वाइ ब्रेशशा थोव्रमे बाक्त। मिनू चढ़ेबपुकीम आन तुराही ताप्मे बाक्त।

15 मिनू यहूदा डा मुरपुकी लडाइ पचा कली वाइ ब्रेशशा, ग्रीमा बाक्त। मोपा ग्रीमानु, परमप्रभुमी येरोबाम नु इस्राएली नेल्ल आन कली अबीयाह नु यहूदा डा मुर आन डोंइती ब्रुपदा बाक्त।

16 मिनू इस्राएलीपुकी यहूदा डा मुर आन डोंइती रे प्रोक्मा बाक्त। मिनू परमप्रभुमी मेको आन कली यहूदा डा मुर आन गुइमी गेवा बाक्त।

17 मोपा अबीयाह नु आ लडाइ पाइबपुकीम इस्राएली आन कली खतम पोक्शा, ग्रामा बाक्त। मिनू इस्राएल डा योव्रशो बोल्यो लडाइ पाइब ५ लाख मुर साइक्चा पुंइसमा बाक्त।

18 मेना इस्राएलीपुकी ब्रुशा, दिप्चा पुंइसमा बाक्त। मिनू यहूदा डा मुरपुकी ग्रामा बाक्त। मारदे हना मेकोपुकीमी परमप्रभु यावे, आन किकी पिपी आन परमप्रभु कली थमा सुइशशो बाक्मा बाक्त।

19 अबीयाहमी येरोबाम कली खेदा पवा बाक्त। मिनू मेकोमी बेथेल सहर नु आ एर ओंथ डा गाउपुकी, येशाना सहर नु आ एर ओंथ डा गाउपुकी नु एफ्रोन सहर नु आ एर ओंथ डा गाउपुकी आंम के सेला बाक्त।

20 मिनू अबीयाह आ पालाम येरोबामम लेशा लडाइ तोने मचबा बाक्त। मिनू परमप्रभु यावेमी येरोबाम कली रोइ पपाइशशा, बेकपदा बाक्त।

21 मिनू अबीयाह बोल्यो दुम्माक्त। मेकोमी १४ जना मीश चाक्मा बाक्त। मिनू मेको २२ जना तौ नु १६ जना तमी आन आफ दुम्माक्त।

22 अबीयाह आ पशो नेल्ले, दोपा बाक्मे मार मार पवा, परमप्रभु यावे आ लोव्र पाइब इददो आ किताबम ब्रेक्शो बाक्ब। २इतिहास १२:१५

## 14

आसा यहूदा डा पिप दुम्शो

१राजा १५:९-१२

1 मिनु अबीयाह बेक्माक्त। मिनु मुरपुकीम मेको कली दाऊद आ सहरमी थिम्मे बाक्त। मिनु मेको आ पा डा आ तौ आसा पिप दुम्माक्त। मेकोमी सासन पवानु, आ रागीमी १० बर्स सम्म लडाइ मडुम्माक्त।

2 मिनु आसामी परमप्रभु यावे, आ परमप्रभु आ डोंइती मार रिम्शो नु ठीक बाक्मे, मेकोन पवा बाक्त।

3 मेकोमी यहूदामी अर्को रागी डा चढेतीकपुकी नु डांडा डा थानपुकी प्रेशा, खुकशो फुल्लु नु मूर्ति पाइशो थाम खोल्पाइशो ताइक्तीमी बाक्त।

4 मिनु मेकोमी यहूदा डा मुर आन कली परमप्रभु यावे, आन किकी पिपी आन परमप्रभु आ माल्शा, आ अरेशो नु आ शेशो लोव्र नेल्ल पचा, दे सासन पवा बाक्त।

5 मेकोमी यहूदा डा नेल्ल सहरम बाक्शो डांडा डा थान नु धूप चोतीके यो प्रेशा गोवा बाक्त। मेको आ सासनमी आ राज्य नाइक्चा तवा बाक्त। २इतिहास १५:१५

6 मेकोमी रागीम लडाइ मडुम्तीके यहूदा डा सहर कली बोल्यो सेला बाक्त। मेना मेको नु सुडम लडाइ मपामे बाक्त। मारदे हना परमप्रभु यावेम मेको कली नाइक्चा गेशो बाक्माक्त। २इतिहास १५:१५

7 मिनु आसामी यहूदा डा मुर आन कली “एको सहरपुकी सेल्य। एको आन एर ओंथ नेल्ल गारो हिरशा लाइशो खिं नु ठेयब आगलो पाइशो लाप्चोपुकी सेल्ला बोल्यो सेल्य। मारदे हना गोपुकीम परमप्रभु यावे, इ परमप्रभु कली माल्शा, मेको रागी इ के बाक्ब। मिनु मेकोमी इ कली थुं नाइक्चा गेप्टु” देमाक्त। मोपतीके मेकोपुकीम सेलतीक गेय पा सोशो बोशो दुम्मा बाक्त।

8 आसा के ठेयब तेक्तीक नु तूतीक बाक्मा बाक्त। यहूदा रे जाक्शो लाख सां लडाइ पाइब बाक्मा बाक्त। मिनु बेन्यामीन रे जाक्शो लाख निकशी ८० हजार आइक्च तेक्तीक नु लिब्रा आप्ब लडाइ पाइबपुकी बाक्मा बाक्त। मेको नेल्ल बोल्यो सक्ति पाइशो लडाइ पाइबपुकी बाक्मा बाक्त।

9 एथीयोपीया डा जेराहमी मेकोपुकी नु लडाइ पचा कली हजार हजार लडाइ पाइबपुकी नु सहे सां बग्गी चाक्शा, मारेशा सम्म जाक्मा बाक्त।

10 मिनु मेकोपुकी जाक्मानु, आसा मेको कली गुम्थ लमाक्त। मिनु मेकोपुकी मारेशा आ नेक्था सेफाथाह डा दिंम लडाइ पामे बाक्त।

11 मिनु आसामी परमप्रभु यावे, आ परमप्रभु कली “परमप्रभु यावे, गे सक्ति पाइशो नु सक्ति मपाइशो मुर आन कली वारच पने चाप्नीनी। सु कली वारच पचा दाक्नीनी, मेकोन चाप्नीनी। परमप्रभु यावे, आंइ परमप्रभु, आंइ कली वारच पाइय्यीकी। मारदे हना गो इन कली थमा सुडक्नीकी। मिनु गोपुकी इन नेमी एको इशका लडाइ पाइब नु लडाइ पथ जाक्तक। परमप्रभु यावे, आंइ परमप्रभु, इन कली सुइ मुरुम ग्राने मचाप्नीम” दे पुना बाक्त। १सामुएल १४:६

12 मिनु परमप्रभु यावेम आसा नु यहूदा डा मुर आन डोंइती एथीयोपीया डा मुर नु लडाइ पा प्रापदा बाक्त। मिनु एथीयोपीया डा मुर प्रोक्मा बाक्त।

13 मिनु आसा नु मेको आ लडाइ पाइबपुकीम मेको आन कली गेरार सम्म खेदा पामे बाक्त। एथीयोपीया डा मुर नेल्ल साइक्चा पुंडसमा बाक्त। मारदे हना परमप्रभु यावे आ लडाइ पाइबपुकीमी मेकोपुकी नु लडाइ पामे बाक्त। मिनु यहूदा डा मुरपुकीम मारेइ मारेइ रोइशशा शुश लदमे बाक्त।

14 मोपा लशा, मेकोपुकीम गेरार आ एर ओंथ डा सहर नेल्ल खतम पोक्गामे बाक्त। मारदे हना मेक डा मुरपुकी परमप्रभु यावे आ पशो तशा शुश हिंमा बाक्त। मिनु यहूदा डा मुरपुकीमी मेको सहर डा मारेइ मारेइ रोइक्तमे बाक्त। मारदे हना मेकेर शुश रोइक्चा डा मार मार बाक्मा बाक्त।

15 मेकोपुकीमी ताम्बुम बाक्शो बस्तु भाव थुल्ब आन कली यो खेदा पा मेको आन शुश क्यारश भेडा दलओंठ रोइशशा, यरूसलेम लेम्मा बाक्त।

## 15

आसा आ रिम्शो गेय

- 1 मिनु परमप्रभु आ सोक्तीम ओदेद आ तौ अजारयाह कली सुमा बाक्त ।
- 2 मिनु मेको आसा कली गुम्थ लशा, मेको कली “आसा, यहूदा डा मुर नु बेन्यामीन डा मुर नेल्ले, आं लोत्र नेनीन। परमप्रभु यावे गे नु बाक्ब। मेको गे नु बाक्ब। गेपुकीम मेको कली माल्तीनी हना, गे थित्नीनी। तन्न गेपुकीमी मेको कली प्रोइतीनी हना, मेकोमी यो इन कली प्रोइब।
- 3 इस्राएली शुश बर्स सम्म थमा डा परमप्रभु नु मबाक्शो बाक्तेक्म। मेको आन कली शेंब चढ़ेब का यो मबाक्शो बाक्माक्त। मिनु परमप्रभु आ अरेशो लोत्र यो मतुइक्तेम। होसे ३:४
- 4 तन्न मेकोपुकीम श्येत जामेनु, परमप्रभु यावे, इस्राएली आन परमप्रभु गे लेशशा, माल्शा, मेको कली थित्तेक्म। मिनु मेको आन कली वारच पात्तु। येरमीया २९:१३-१४
- 5 मेना सुइ लाडगा लशा, रिम्शो पा जाक्ने मचाप्शो बाक्तेक्म। मारदे हना मेकेर शोर गाक्शो शुश मुर बाक्मा बाक्त। मिनु रागीम बाक्ब नेल्लेमी श्येत जाम्तेक्म।
- 6 मेको नेल्ल ठेयब श्येतम बाक्तेक्म। रागी नु रागी लडाइ पाम्तेक्म। सहर नु सहर यो लडाइ पाम्तेक्म। मारदे हना परमप्रभुमी मेको आन कली मार मार श्येत गेना गेन बाक्त। लूका २१:१०
- 7 तन्न गे इन थुं बारपाइश्शा बोल्यो दुम्शा, गेय पने। मारदे हना गे इन पशो गेय डा इनम ताइनीनी” देमाक्त। १कोरिन्थी १५:५८
- 8 मिनु आसाम परमप्रभु यावे आ लोत्र पाइब ओदेद आ तौ अजारयाह आ लोत्र नेंशा, आ थुं बारपदा बाक्त। मिनु यहूदा, बेन्यामीन नु सहर नेल्लेमी नु आ ग्राशो एफ्राइम डा पहाड रागी डा सहरपुकीम बाक्शो ग्रांग्रा दिचा डा मूर्ति नेल्ल लाइश्शा, खतम पोक्गा बाक्त। मिनु परमप्रभु यावे आ खिं डा पिंडी आ डोंइती बाक्शो परमप्रभु यावे कली चढ़ेतीक यो लेंशा सेल्पदा बाक्त।
- 9 मिनु आसामी यहूदा डा मुर, बेन्यामीन डा मुर नु मेको नु बाक्ब एफ्राइम, मनस्से नु सिमियोन रे प्रोक्शो मुर नेल्ल खुप्ता बाक्त। मेकेर बाक्ब एफ्राइम, मनस्से नु सिमियोन डा मुरपुकी परमप्रभु यावे पिप आसा नु बाक्ब, दे तुइश्शा, इस्राएल रे प्रोक्शा, यहूदामी जाक्शो बाक्मा बाक्त। मारदे हना परमप्रभु यावे, आ परमप्रभु यावे मेको नु बाक्शो तुइश्शा, इस्राएल डा शुश मुरपुकी यहूदाम बाक्थ जाक्शो बाक्मा बाक्त। २इतिहास ११:१६; येरमीया ४१:५
- 10 आसा पिप दुम्शो १५ बर्स डा महिना सांम मेको नेल्ले यरूसलेममी बुक्मा बाक्त।
- 11 मिनु मेको नाक्ती मेकोपुकीमी लडाइम रोइश्शा चाक्शो ७ सहे ब्यफ नु ७ हजार क्यारश भेडा चढ़ेमे बाक्त।
- 12 मिनु मेकोपुकीम आन थुं नेल्लेमी परमप्रभु यावे, आन किकी पिपी आन परमप्रभु आ नोले खोइक्चा, दे कबल पामे बाक्त। यहोसु २४:२५
- 13 मिनु सु सुमी परमप्रभु यावे, इस्राएली आन परमप्रभु आ नोले खोइक्चा मबिस्से, मेको साइक्चा पुंइसे बाक्त। खाल्पा बाक्त हना यो, ठिटा बाक्त हना यो, मीश मुर बाक्त हना यो, वोंइश मुर बाक्त हना यो साइक्चा पुंइसे बाक्त।
- 14 मिनु मेको मुर नेल्लेमी “परमप्रभु यावे आ नोले खोइक्चय” दे कसम जशा, ग्येरसीशा ठेयब सेंदा पा, तुराही नु ग्रोत्र ताप्मे बाक्त।
- 15 यहूदा डा मुर नेल्लेमी मेको कसम जतीके ग्येरसमा बाक्त। मारदे हना मेकोपुकीमी आन थुं नेल्लेमी परमप्रभु यावे कली खोइक्चा थमा पा दाक्तमे बाक्त। मिनु परमप्रभु कली थिश्शो बाक्मा बाक्त। मोपतीके परमप्रभु यावेमी मेको नेल्ल आन रागीमी लडाइ मदुम्पाइक्थु, आन थुं नाइक्चा गेवा बाक्त। २इतिहास १४:५-६; २इतिहास २०:३०
- 16 पिप आसामी आ बगे माकाह कली यो पिप आ ममा आ गेय रे गुंइदा बाक्त। मारदे हना मेकोमी अशेराह देवी आ ग्रांग्रा दिचा डा मूर्ति सेल्पदा बाक्त। आसामी मेको मूर्ति क्योरशा जिक्शा फस सेल्शा किद्रोन डा खोलाम चोवा बाक्त। १राजा १५:१३-१५
- 17 तन्न मेकोमी डांडा डा थान नेल्ल इस्राएल रे मगुंइदा बाक्त। मो हना यो आसा मवेक्म सम्म आ थुं नेल्लेमी परमप्रभु यावे आ मुर दुम्शा बाक्माक्त।



18 मेकोमी आ आफोम परमप्रभु कली गेशो थोत्रक नु आ गेशो थोत्रक सुन चांदी नु ग्योबपुकी परमप्रभु आ खिम चाक्का बाक्त।

19 आसा पिप दुम्मेनु, ३५ बर्स सम्म लडाइ का यो मदुम्माक्त।

## 16

पिप आसा आ नोले डा बर्सपुकी

१राजा १५:१६-२४

1 पिप आसाम सासन पशो ३६ बर्सम इस्राएल डा पिप बाशामी यहूदा कली लडाइ तोवा बाक्त। मिनु पिप बाशामी यहूदा डा पिप आसा आ रागी ओव्रतीक नु गृतीक लां नेल्ल तेक्चा कली रामाह सहर कली बोल्यो सेला बाक्त।

2 मिनु आसामी परमप्रभु यावे आ खिं नु पिप आ दरवार डा शोप वोइक्तीक रे सुन नु चांदी गुंइशा, दमस्कस सहरम बाक्शो अराम डा पिप बेन-हादाद कली सोइश्शा, मेको कली

3 “इन आफ नु आं आफ आस दातेम गारशो खोदेशो पा, गे नु गो यो गारस। मुल गो इन कली सुन नु चांदी सोइक्ताक्ड। मोपतीके इस्राएल डा पिप बाशा नु गारशो लोत्र प्रोनीन। मिनु मेकोमी आं कली पचशो लडाइ मपवल” दे लोत्र सोइक्ता बाक्त।

4 मिनु बेन-हादादम पिप आसा आ लोत्र बिस्से बाक्त। मिनु मेकोमी आ लडाइ पाइब आन कप्तान आन कली “इस्राएल डा सहर आन कली लडाइ तोन” दे हुकुम पवा बाक्त। मिनु मेकोपुकीम इयोन सहर, दान सहर, आबेल-मैम सहर नु नाप्ताली आन मार मार वोइक्तीक सहर आन के सेल्मे बाक्त।

5 मिनु बाशामी मेको लोत्र नेंशा, रामाह कली बोल्यो सेल्चा प्रॉइशा, आ गेय नेल्ल तेक्का बाक्त।

6 मिनु नोले पिप आसामी यहूदा डा मुर नेल्ल आन कली खुप्शा, रामाह लाइश्शा, रामाह सहर डा सेल्तीक फुल्लु नु शी नेल्ल कुरपाइश्शा लदा बाक्त। बाशाम मेको फुल्लु नु शी रामाह सहर बोल्यो सेल्चा कली मेकेर वोइश्शो बाक्माक्त। मिनु पिप आसाम मेको चाक्शो फुल्लु नु शीम गेबा नु मिरुपा सहर आस कली बोल्यो सेला बाक्त।

परमप्रभु आ लोत्र पाइब हानानी

7 मेना परमप्रभु यावे आ लोत्र पाइब हानानी यहूदा डा पिप आसा आ बाक्तीकेम जाक्शा, मेको कली “गे अराम डा पिप कली थमा सुइक्तीनी नु परमप्रभु यावे, इन परमप्रभु कली थमा मसुइक्नी। मोपतीके इस्राएल डा पिप आ लडाइ पाइब इन डोंइती रे प्रोक्चा ताम्तेकम।

8 मार, डोंइती एथीयेपीया लिबीया डा लडाइ पाइबपुकी शुश मबाक्मा? बग्गी नु शारा डोइक्ब हिक्ने मचाप्चा डा शुश मबाक्मा? मेना गे परमप्रभु यावे कली थमा सुइक्तीनी। मिनु मेकोमी नेल्ल आन कली इन गुइमी गेप्तु। २इतिहास १४:८-१२

9 परमप्रभु यावेमी सु आन थुंम थमा पा मेको नु बाक्बा, मेकोमी रागी नेल्लेम माल्ना माल्न मेको कली कोत्रशा, मेको आन कली बोल्यो सेल्ब। गे अराम डा पिप नु गारशा मरिश्शो पाइतीनी। मुल रे गे लडाइ पस डा पस बाक्चा माल्नीनी” देंमाक्त। हितोपदेस १५:३

10 मिनु परमप्रभु यावे आ लोत्र पाइबम मोदेशो लोत्र पा, आसा कली शुश गाइक्पदा बाक्त। मिनु मेको कली फ्रेंशा चोक्शा वोइक्पदा बाक्त। मेना पिप आसामी का निक्शी अरु मुर आन कली यो काइ मरिश्शो पवा बाक्त। २इतिहास १८:२६; मत्ती १४:३

11 पिप आसा आ पशो, डोंइती नु नोले डा नेल्ल, मेको यहूदा नु इस्राएल डा पिप आन इतिहास डा किताबम ब्रेक्शो बाक्नीम।

12 आसाम सासन पशो ३९ बर्स दुम्मेनु, आ खोइली राक्तीक रोइ पवा बाक्त। मिनु मेको रोइ शुश ठेयब दुम्माक्त। शुश रोइ पवा बाक्त हना यो परमप्रभु यावे आ वारच पशो कली ममाल्थु, ओरुत्ती खेक्ब आन कली मला बाक्त।

13 मिनु आसा आ सासन पशो ४१ बर्स दुम्मेनु मेको बेक्माक्त।

14 मिनु मुरपुकीमी दाऊद आ सहरम आसामी सेल्पांडसीशो बेक्शो मुर कली वोइक्तीक कोटामी वोदमे बाक्त। मेकेर जोक्ब मुरुमी थम ब्रोव्रशो मार मार ब्वाइइशा ब्रोव्रशो रिना पाइब घांस सेल्शा, मेको आ तारी वोदमे बाक्त। मिनु मुरपुकीम मेको पिप कली मान पचा, दे थम ठेयब मी मुइक्तमे बाक्त। २इतिहास २१:१९; येरमीया ३४:५

## 17

### यहूदा डा पिप येहो-शाफात

1 मिनु पिप आसा बेक्म नोले आ तौ येहो-शाफात पिप दुम्माक्त। मिनु मेकोमी “इस्त्राएल कली तेक्नुड” दे आ लडाइ पाइब बोल्यो सेला बाक्त।

2 मेकोमी यहूदा डा बोल्यो सेल्शो सहर नेल्लेमी लडाइ पाइबपुकी वोदा बाक्त। मिनु यहूदा नेल्ल नु आ आफ आसाम ग्राशो एफ्राइम डा सहरपुकी यो खाल पचा कली लडाइ पाइब वोदा बाक्त।

3 मिनु परमप्रभु यावे येहो-शाफात नु बाक्माक्त। मारदे हना मेको आ किकी पिपी दाऊद आ डोंइती डा नाक्ती रिम्शो पा गाक्शो खोंदेशो पा गाक्माक्त। मेकोमी चारच पचा कली बाल देवता आन कली ममला बाक्त।

4 तन्न मेको परमप्रभु यावे, आ आफ आ परमप्रभु आ नोले खोदा बाक्त। मिनु मेको आ शेंशो पवा बाक्त। मेको इस्त्राएल डा पिप आन लाम मगाक्माक्त।

5 मोपतीके परमप्रभु यावेम मेको आ राज्य बोल्यो सेला बाक्त। मिनु यहूदा डा मुर नेल्लेमी येहो-शाफात कली मार मार चाक्गमे बाक्त। मिनु मेको शुश शोंप पाइइशो नु मान ताइब दुम्माक्त। २इतिहास १८:१

6 मेकोमी परमप्रभु यावे आ लाम गाक्चा कली काइ महिंथु आ थुं बारपदा बाक्त। मेकोम यहूदाम बाक्शो डांडा डा थान नु मूर्ति पाइइशो थाम प्रेशशा ताइक्ता बाक्त।

7 मेकोमी सासन पशो आ बर्स सांमी आ राज्य डा ठेयब गेय पाइब बेन-हेल, ओबदिया, जकरिया, नेथनेल नु मीकाया आन कली यहूदा डा सहरपुकीम मुर आन कली शेंचा कली सोइक्तीमी बाक्त।

8 मेकोपुकी नु लेवीपुकी बाक्मा बाक्त। मेको लेवीपुकी सु सु बाक्मा बाक्त देश हना, शेमायाह, नेथन्याह, जेबदीयाह, आसाहेल, शेमीरामोथ, येहो-नाथान, अदोनीयाह, तोबीयाह, तोबा-दोनीयाह बाक्मा बाक्त। मिनु मेको नु चढ़ेब एली-शामा नु येहोराम यो बाक्सा बाक्त।

9 मेकोपुकीम परमप्रभु यावे आ अरेतीक लोत्र डा किताब मेको नु बाक्शो बाक्त। यहूदा डा सहर नेल्ल डा मुर आन कली शेंदमे बाक्त।

### येहो-शाफात आ सक्ति

10 मिनु यहूदा आ एर ओंथ बाक्शो राज्य डा मुर नेल्ल परमप्रभु यावे क्येडा हिमा बाक्त। मोपतीके मेकोपुकीम येहो-शाफात नु लडाइ मपामे बाक्त।

11 पलिस्ती आन दातेमी का निकशीमी येहो-शाफात कली आन गेचा माल्शो चांदी चाक्गमे बाक्त। मिनु अराबीपुकीमी यो मेको कली ७ हजार ७ सहे सांड नु ७ हजार ७ सहे बोका चाक्गमे बाक्त। १राजा ५:१

12 मिनु येहो-शाफात शुश सक्ति पाइइशो दुम्माक्त। मेकोमी यहूदामी गारो हिरशा, बोल्यो दरवार नु मार मार वोइक्तीक सहरपुकी सेला बाक्त।

13 मेकोमी यहूदा डा सहरपुकीम शुश सेलतीक गेय यो पवा बाक्त। यरूसलेम सहरम लडाइ पाइब नु थम बोल्यो लडाइ पस जोक्ब मुर बाक्मा बाक्त।

14 मेको यहूदा डा मुर आन सिं डेडा हजार हजार लडाइ पाइब आन कप्तान आदनाह बाक्माक्त। मेको नु लाख सां सक्ति पाइइशो लडाइ पाइब बाक्मा बाक्त।

15 मेको आ नोले डा येहो-हानान बाक्माक्त। मेको लाख निकशी ८० हजार लडाइ पाइब आन कप्तान बाक्माक्त।

16 मेको आ नोले डा जिक्री आ तौ अमासीयाह बाक्माक्त। मेको परमप्रभु यावे आ गेय पाइब कली कोत्रब यो बाक्माक्त। मेको लाख निकशी सक्ति पाइइशो लडाइ पाइब आन कप्तान बाक्माक्त।

17 बेन्यामीन आ थर डा एली-आदा बोल्यो लडाइ पाइब बाक्माक्त। मेको नु लाख निक्शी लिब्रा आप्ब नु तेतीक कुरब बाक्मा बाक्त।

18 मिनु मेको आ नोले डा येहो-जाबाद बाक्माक्त। मेको नु लाख का ८० हजार या कुरशो लडाइ पाइब बाक्मा बाक्त।

19 मिनु मेको नेल्ल पिप आ लडाइ पाइब बाक्मा बाक्त। मेको प्रॉइशा अरु लडाइ पाइबपुकी यो यहूदा डा गारो हिरशो सहरम बाक्मा बाक्त।

## 18

मीकायाम आहाब कली लोव्र पशो  
१राजा २२:-

1 मिनु पिप येहो-शाफात शुश शोंप पाइश्शो, मान ताइब नु थाप्पा ठेयब मुर दुम्माक्त। मिनु मेकोमी आहाब आ सिं डा मुर नु ग्युंवे पा नाता सेला बाक्त।

2 मिनु इच्छा बर्स नोले मेको आहाब कली युम्थ सामरीया लमाक्त। मिनु आहाबम मेको नु आ मुर आन कली थुल्चा, दे शुश भेडा नु ब्यफ क्योरा बाक्त। मिनु आहाबमी येहो-शाफात कली रामोथ-गिलाद नु लडाइ पचा कली क्युकगा बाक्त।

3 मिनु इस्राएल डा पिप आहाबमी यहूदा डा पिप येहो-शाफात कली “रामोथ-गिलाद नु लडाइ पचा कली गे आं कली वारच पाइक्नीनी?” देंमाक्त। मिनु मेकोमी “गो गे नु बाक्नुड। आं मुर इन मुर यो बाक्नीम। एको लडाइम गो इन कली वारच पाइक्नीकी” देंमाक्त।

4 तन्न येहो-शाफातमी इस्राएल डा पिप कली “गे डोंइती परमप्रभु यावेम मेको लडाइ आ पर्वम मार देंबा? पुनीन” देंमाक्त। २राजा ३:११

5 मिनु इस्राएल डा पिपमी ४ सहे आ नोले दुम्ब लोव्र पाइब आन कली पुक्शा, मेको आन कली “गो रामोथ-गिलाद कली लडाइ तोड देय मतोड?” दे हिल्लो पामी बाक्त। मिनु मेकोपुकीम “लडाइ तोने। मारदे हना परमप्रभुम मेको आन कली इन गुडम गेब” देंमा बाक्त।

6 तन्न येहो-शाफातमी “परमप्रभु यावे कली हिल्लो पचा कली थमा पा परमप्रभु यावे आ लोव्र पाइब एकेर सुइ मबाक्नीमी?” दे हिल्लो पचा बाक्त।

7 मिनु इस्राएल डा पिपमी येहो-शाफात कली “परमप्रभु यावे कली हिल्लो पचा कली मुर का बाक्ब। मेको इम्लाह आ तौ मीकाया बाक्ब। तन्न गो मेको कली काइ मदाक्नुड। मारदे हना आं पर्वम गेनायो रिम्शो लोव्र मपाइब। मेकोमी मरिम्शो लोव्र डा लाक्शा अरु मारिइ मदेब” देंमाक्त। मिनु येहो-शाफातमी “पिपम मोदेशो लोव्र पचा मडुम्ब” देंमाक्त।

8 मिनु इस्राएल डा पिपम आ गेय पाइब का कली ब्रेशशा “इम्लाह आ तौ मीकाया कली रीब पा चाक्को” दे ब्रथ सोइक्ता बाक्त।

9 मेना इस्राएल डा पिप नु यहूदा डा पिप येहो-शाफात आस आस पिपम फेक्तीक वा फेक्शा, सामरीया डा ठेयब लाप्चो ओव्रतीक डा चेरब तुप्तीक दिमम आस आस ठेयब नित्तीकेमी बाक्शो बाक्सा बाक्त। मिनु मेको नोले दुम्ब लोव्र पाइब नेल्ल मेको आस डोंइती नोले दुम्ब लोव्र पन पन बाक्शो बाक्मा बाक्त।

10 मेको आन दाते डा केनानाह आ तौ सिदकीयाहमी फलाम के ग्रोव्र सेल्सीशो बाक्माक्त। मिनु मेकोमी “परमप्रभु यावेम मार देंत देंशा हना ‘एको ग्रोव्रम गेम अराम डा मुर आन कली खुशा खतम पोक्नीनी’ देंशो बाक्ब” देंमाक्त।

11 मिनु अरु नोले दुम्ब लोव्र पाइब नेल्लेम यो मोदेशो लोव्र पशो बाक्मा बाक्त। मेकोपुकीम “रामोथ-गिलाद कली लडाइ तोशा ग्राडीन। मारदे हना मेको परमप्रभु यावेम पिप आ गुडमी गेब” देंमा बाक्त।

12 मिनु मीकाया कली ब्रेशशा चाक्ब मुरुम मीकाया कली “नेनीन, अरु नोले दुम्ब लोव्र पाइबपुकी नेल्ल थुं का दुम्शा, पिप कली रिम्शो लोव्र पशो बाक्नीम। मिनु इन लोव्र यो मेको आन देशो नु गारचा डा रिम्शो लोव्र पने” देंमाक्त।

13 तन्न मीकायाम “परमप्रभु यावे ब्रोंडशा बाकशो खोदेशो पा, आं परमप्रभुम मार देंबा, मेको लोत्र ला पाइनुड” देंमाक्त।

14 मिनु पिप आ बाक्तीक जाक्मेनु, पिप आहाबमी मेको कली “मीकाया, गो रामोथ-गिलाद कली लडाइ तोक देय मतोक” दे मदा बाक्त। मिनु मेकोमी “लडाइ तोने। मिनु ग्राडीन। मारदे हना परमप्रभु यावेमी मेको इन गुइम गोब” देंमाक्त।

15 तन्न पिपम मेको कली “परमप्रभु यावे आ नेम थमा लोत्र ला पचा, दे गिश खेयप इ कली कसम जपाइक्नना?” दे मदा बाक्त।

16 मिनु नोले मीकायाम “गो इस्राएली नेल्ल आन कली गोठला मबाक्शो भेडा खोदेशो पा पहाडम ब्रशो ताता। मिनु परमप्रभु यावेमी ‘मेको मुर आन के होत्रप मबा। मेको नेल्ल थुं नाइश्शा आन खिं लेम्मल’ देशो नेंता” देंमाक्त। मती ९:३६

17 मिनु इस्राएल डा पिपम येहो-शाफात कली “मार, एकोम आं पर्वम मरिम्शो लोत्र डा लाक्शा अरु मारेइ मदेंब, खतम लोत्र ला देंब, दे गो इन कली मदेंडा डा?” देंमाक्त।

18 मिनु मीकायाम “मुल परमप्रभु यावे आ लोत्र नेनीन। गो परमप्रभु यावे कली आ ठेयब नित्तीकेम निश्शो ताता। मिनु आ स्वर्ग डा गेय पाइब नेल्ले आ ग्युरा गे नु आ पेरा गे राप्शो बाक्तेकम। यसैया ६:१

19 मिनु परमप्रभु यावेमी ‘इस्राएल डा पिप आहाब कली रामोथ-गिलाद नु लडाइ पा साइक्चा पुंडसीचा कली सुमी मेको कली जोल पाइबा?’ देशो नेंता। मिनु काम लोत्र का पाप्तु, अर्कोमी अर्को लोत्र पाप्तु।

20 नोले सोक्त का परमप्रभु यावे आ डोंइती जाक्शा ‘गो मेको कली जोल पाइनुड’ देंत। अय्युब १:६

21 मिनु परमप्रभु यावेमी ‘दोपा?’ दे हिल्लो पाप्तु। मिनु मेकोमी ‘गो लशा आहाब आ नोले दुम्ब लोत्र पाइब नेल्ल आन शोत्रम जोल पाइब सोक्त दुम्नुड’ देंत। मिनु परमप्रभु यावेमी ‘गे मेको कली जोल पावो। गे मेको पने चाप्नेवे। लावो’ देंत।

22 लो कोव्रडीन, परमप्रभु यावेमी इन नोले दुम्ब लोत्र पाइब आन शोत्रम जोल पाइब सोक्त का वोइश्शो बाक्त। परमप्रभु यावेम इन कली खतम सेल्चा थुं पने थुम्शो बाक्ब” देंमाक्त।

23 मिनु केनानाह आ तौ सिदकीयाह इर डोइश्शा लशा, मीकाया आ चोत्रको राप्शा “दोपा परमप्रभु यावे आ सोक्त आं रे पा गे नु लोत्र पथ लम” देंमाक्त।

24 मिनु मीकायाम “मेको गे हिंशा, आगा डा कोठामी खुंडसे नाक्ती कका तुडक्नेवे” देंमाक्त।

25 मिनु नोले इस्राएल डा पिपम “मीकाया कली लाइश्शा, सहर कली हुकुम पाइब आमोन नु पिप आ तौ योआश आस कली गेन। मिनु मेको आस कली

26 ‘पिप आ देशो मार बाक्ब देंशा हना, मेको मुर कली जेल्खानम चोक्शा वोतीन। रिम्शो पा लेश्शा मजाकडा सम्म, एको कली इच्का शोब्ले नु ब्वाक्कु ला गेने’ दे पिपम हुकुम पशो बाक्ब देनीन” देंमाक्त। २इतिहास १६:१०

27 मिनु मीकायामी “गे रिम्शो पा लेश्शा जाक्तीनी हना, परमप्रभु यावे आं रे म्बवाक्शो बाक्माक्त, देंनुड” देंमाक्त। मिनु मेकोमी चिनु लोत्र तेम्शा “मुर नेल्लेमी आं लोत्र नोफा दाइश्शा नेनीन” देंमाक्त।

### आहाब साइक्चा पुंडसीशो

28 मिनु इस्राएल डा पिप नु यहूदा डा पिप येहो-शाफात रामोथ-गिलाद ग्येतथ लसा बाक्त।

29 मिनु इस्राएल डा पिपम येहो-शाफात कली “गो मतुडक्चा डा पा अर्को वा फेक्शा, लडाइम लाइनुड। तन्न गे इन पिपम फेक्तीक वा फेक्शा बाक्कीन” देंमाक्त। मोपा इस्राएल डा पिप अर्को वा फेक्शा, लडाइम लमाक्त।

30 मिनु अराम डा पिपम आ बग्गी चलेब आन कप्तान आन कली “इस्राएल डा पिप कली डा लाक्शा, अरु आइक्च ठेयब सुइ नु लडाइ मपने” दे माइश्शो बाक्माक्त।

३१ मिनु बग्गी चलेब आन कप्तानमी येहो-शाफात कली तशा “मेकोन इस्राएल डा पिप बाकब” देंमाकत। मिनु मेको कली लडाइ तोथ लमा बाकत। तन्न येहो-शाफात ठेयब सेंदा पा वाइ ब्रेम्माकत। मिनु परमप्रभु यावेमी मेको कली वारच पशा, मेको बग्गी चलेब आन कली मेकेर रे लेप्पदा बाकत।

३२ मारदे हना बग्गी चलेब लडाइ पाइब आन कप्तानपुकीमी “एको इस्राएल डा पिप मबाक्माकत” दे तुइशशा, मेको कली खेदा पचा प्रोन्मे बाकत।

३३ तन्न मुर काम आ लिब्रा खुक्शा, हेंथे पा ब्रा आप्शा सोइक्ता बाकत। मिनु मेको ब्रामी इस्राएल डा पिप आ कुचु सुम्तीके नु कुचु तेक्तीक आस दातेम ख्रवा बाकत। मिनु पिपम आ बग्गी चलेब कली “बग्गी हिरशा लडाइ रे गुंडदी। आं कली ब्राम ख्रशा गार सेलती” दे मदा बाकत।

३४ मेको लडाइ नाकत रेन दुम्ना दुम्न लमाकत। मिनु इस्राएल डा पिप आ बग्गीम राप्शा, अरामी नु लडाइ पशो कोव्रडा बाकत। मेको नाकत रे मोपान बाक्माकत। मिनु नां लाक्गानु, मेको बेक्माकत।

## १९

### येहूमी येहो-शाफात कली लोव्र पशो

१ मिनु यहूदा डा पिप येहो-शाफात मारेइ मदुम्थु आ दरवार यरूसलेम लेशशा जाक्माकत।

२ मिनु परमप्रभु यावे आ नोले दुम्ब लोव्र पाइब हानानी आ तौ येहू मेको कली गुम्थ जाक्माकत। मिनु मेकोमी येहो-शाफात कली “मार, मरिम्शो पाइब कली वारच पाइशशा, परमप्रभु यावे आ जोरी सत्रु कली दाक्का ठीक बाक्बा? इन पशो तशा परमप्रभु यावे इन परबम गाइक्ताकत।

३ मो हना यो गे का निक्शी रिम्शो गेय यो पशो बाक्नीनी। गे रागी रे मूर्ति थाम आन कली गुंडताक्नी। मिनु परमप्रभु आ नोले खोइक्का थुं पाइतीनी” देंमाकत। २इतिहास १७:३,६

### निसाफ पाइबपुकी वोइशशो

४ येहो-शाफात आ दरवार यरूसलेमम बाक्माकत। मिनु मेको लेंशा बेयर-शेबा रे एफ्राइम डा पहाड डा मुर आन बाक्तीक लशा, मेको आन कली लेंशा परमप्रभु यावे, आन किकी पिपी आन परमप्रभु गे लेशशा चाक्मी बाकत।

५ मेकोमी यहूदा डा बोल्यो सहर नेल्लेमी निसाफ पाइबपुकी वोदा बाकत।

६ मिनु मेकोमी मेको निसाफ पाइब आन कली “गेपुकीम मार पाइनीनी, मेको मिम्तीन। गेपुकीम निसाफ नेंपाइक्नीनु, मुर आन कली ममाइ तन्न परमप्रभु यावे आ डोंइती निसाफ पाइनीनी। गे निसाफ पची ना मेको गे नु बाक्ब। ब्यवस्था १:१७

७ परमप्रभु यावे कली मान पा हिनीन। होस पा निसाफ पने। मारदे हना परमप्रभु यावे, इं परमप्रभुमी दूली निसाफ मपाइब। मेको कुल मकोव्रब नु घूस मताक्ब निसाफ पाइब बाक्ब” देंमाकत। प्रस्थान १८:२१; ब्यवस्था १०:१७; रोमी २:३१

८ येहो-शाफातम यरूसलेममी लेवीपुकी, चढेबपुकी नु इस्राएल डा खिं खिं आन ठेयब मुर आन कली परमप्रभु यावे आ डोंइती निसाफ पचा कली नु जीब आन दातेमी गारपाइक्का कली वोइशशो बाक्माकत। मिनु मेकोपुकी यरूसलेमम बाक्बाक्मा बाकत। ब्यवस्था १७:८-९; ब्यवस्था १९:१७

९ मिनु मेकोमी मेको आन कली “इन गेय दोपा पचा देशा हना, इन पशो नेल्लेमी परमप्रभु यावे कली मान पा हिंशा, थमा सुइक्का डा दुम्शा, इन थुं नेल्लेमी पचा माल्नीनी।

१० मिनु अरु सहर डा आइक्च निसाफ पाइब इन लोक्ब, इन बाक्तीक सहरम इन कली हिल्लो पचा कली जाक्नीमी। मार बाकत हना यो, मुर साइशशो आ परबम बाकत हना यो, परमप्रभु यावे आ अरेशो लोव्र आ परबम बाकत हना यो, शेंतीक लोव्र आ परबम बाकत हना यो, फुल्लुम मुशा ब्रेक्शो लोव्र नु निसाफ पतीक लोव्र बाकत हना यो, गे मेको आन कली शेंचा माल्नीनी। मोपा मेकोपुकीमी दूली मपथु, परमप्रभु यावे आ डोंइती पाप मपाइनीम। मेकोपुकीम मरिम्शो पाप्तेक्म हना, परमप्रभु इन परबम नु इन लोक्ब, आइक्च निसाफ पाइब आन परबम गाइक्ब। पाप मपथु, रिम्शो शेंदीन।

11 परमप्रभु यावे आ पर्वम तुइक्ब नु इन कली वारच पाइब ठेयब चढेब अमारयाह बाक्ब। मिनु पिप नु राज्य आ पर्वम तुइक्ब यहूदा आ थर डा मुर आन ठेयब मुर इश्माएल आ तौ जेबदीयाह इन कली वारच पाइब बाक्ब। लेवीपुकीम चहिं इन निसाफ पची ना ब्रेक्ब नु मार मार वारच पाइब बाक्नीम। महिंथु इन गेय पने। परमप्रभु यावे रिश्शो पाइबपुकी नु बाक्ल” दे अर्ती गेमी बाक्त।

## 20

### येहो-शाफातम ग्राशो

1 मिनु नोले मोआबी अम्मोनी नु का निक्शी सेइर डांडा रे अर्को जात डा मेउनी माइश्शो मुरपुकी येहो-शाफात नु लडाइ पथ जाक्मा बाक्त।

2 मिनु मुरपुकीमी येहो-शाफात कली “थम ठेयब हुल का लडाइ पाइब एदोम रे इन कली लडाइ तोचा कली जाक्शो बाक्नीम। मेकोपुकी हिक्सी समुन्द्र आ आइक्ची हांबु रे पिना पिन बाक्नीम। मेको हासासोन-तामार जाक्दीत्तेक्म” दे लोव्र नेंपदमे बाक्त। मेको रागी कली एन-गेदी यो देंनीम।

3 मिनु येहो-शाफातम हिंशा, परमप्रभु यावे कली पुंइचा, दे थुं पवा बाक्त। यहूदा रागी डा मुर नेल्ल कली “माइजा बाक्कीन” दे हुकुम पवा बाक्त।

4 मिनु यहूदा डा मुरपुकी परमप्रभु यावे कली “वारच पाइक्की” दे पुंइचा कली बुक्मा बाक्त। यहूदा रागी डा सहर नेल्ल डा मुरपुकी परमप्रभु यावे कली पुंइथ जाक्मा बाक्त। २इतिहास १५:९-१५

5 मिनु येहो-शाफात परमप्रभु यावे आ खिं डा नक लाडगामी यहूदा नु यरूसलेम डा खुम्सीशो मुर आन डोंइती राष्शा

6 “आंइ परमप्रभु यावे, आंइ किकी पिपी आन परमप्रभु गे स्वर्गम बाक्ब परमप्रभु मननी डा? गे रागी रागी डा राज्य सासन पाइब मननी डा? सक्ति नु अधिकार नेल्ल इन के बाक्ब। गे इन क्येडा ग्राब सुइ मबाक्नीम। उत्पत्ती १८:२५; १इतिहास २९:१२

7 आंइ परमप्रभु, मार, गे इन मुर इस्राएली जाक्मानु, एको रागी डा मुर आन कली मखेरनी डा? इन वारच अब्राहाम नु आ चच युइ आन कली मेको रागी गोना हना यो कली गेशो मननी डा?

8 मेकोपुकी मेकेर बाक्शो बाक्तेक्म। मिनु इन नें कली मान पचा, दे इन कली बाक्तीक खिं का सेल्शो बाक्तेक्म।

9 मेकोपुकीम ‘आंइ कली ठेयब श्येत दुम्त हना, लडाइ दुम्त हना, निसाफ पतीके, मुर बेक्तीक रोइ, अन्काल दुम्त हना, इन खिं इन डोंइती राप्नीकी। मारदे हना इन नें कली मान पशो खिं रे आंइ श्येत जशा पुंइशो लोव्र नेंशा, आंइ कली प्रोंइनीनी’ दे पुंइतेक्म। २इतिहास ६:२८-३०

10 आंइ किकी पिपी इजीप्ट रे जाक्मानु, गे इस्राएली आन कली ‘अम्मोनी, मोआबी नु सेइर डांडा डा मुर आन रागी मओव्रडीन’ देशो बाक्तीनी। मोपतीके मेकोपुकी एर ओंथ रे हिरशा, मेको आन कली खतम मसेल्थु लमा बाक्त। ब्यवस्था २:४,५,९,१९

11 तन्न मुल कोव्रडीन, एको मुरपुकीम आंइ कली दोदेशो पा क्येक्क लेल्नीमी। गे आंइ कली गेशो आंइ थेरशो रागी रे आंइ कली खेरचा कली जाक्शो बाक्नीम।

12 आंइ परमप्रभु, गे मेको आन कली निसाफ मपाइनीनी डा? मारदे हना गोपुकी एको शुश मुर आन डोंइती मारेइ पने मचाप्ब बाक्नीकी। मुल गो मार पचा माल्नीकी मारेइ मतुइक्नीकी। तन्न गो इन गे कोव्रनीकी” दे पुना बाक्त।

13 मिनु यहूदा डा मुर नेल्ले, मेको आन मीशपुकी, आन आल ब्रेप्च नेल्ल परमप्रभु यावे आ डोंइती राम्मा बाक्त।

14 मिनु परमप्रभु यावे आ सोक्तीम खुम्सीशो मुर नेल्ल आन दातेमी आसाफ आ खिं डा लेवी याहासीएल कली सुमा बाक्त। मेको जकरिया आ तौ, बेनायाह आ चच बाक्माक्त। आ अरु किकी पिपी यिएल नु मत्तन्याह बाक्सा बाक्त।

15 मिनु मेकोमी “यहूदा नु यरूसलेमम बाक्ब मुर नेल्ले नु पिप येहो-शाफात नेनीन। परमप्रभु यावेमी इन कली मार देब देशा हना ‘गे एको लडाइ पाइब आन ठेयब हुल तशा महिनीन। इन थुं लुकच मलल। मारदे हना एको लडाइ परमप्रभु के बाक्ब। इन के ममाइ। प्रस्थान १४:१३-१४

16 दीसा मेकोपुकी नु लडाइ पथ ब्रुपीन। मेकोपुकी जीज डा ग्येथ लतीक लां रे पा कुइनीम। मिनु गेपुकीम मेको आन कली येरूएल डा गोरशो रागी डा बरखे खोला क्येडा आइदी ग्रुम्नीनी।

17 यहूदा नु यरूसलेम डा मुर, गेपुकीम एको लडाइ पचा ममालनीनी। आं देंतीकेम लने। मिनु रिम्शा बाक्कीन। इन पा डा गो परमप्रभु यावेम लडाइ पा ग्राशो, कोव्रडीन। महिनीन। इन थुं लुकच मलल। गे ग्रूशा, मेकोपुकी नु लडाइ पथ लने। मारदे हना परमप्रभु यावे गेपुकी नु बाक्ब’ ” देंमाक्त।

18 मिनु येहो-शाफातम खपीम बाप्शा सेउ पवा बाक्त। मिनु यहूदा नु यरूसलेमम बाक्ब मुर नेल्ल परमप्रभु यावे आ डोंइती बाप्शा, परमप्रभु यावे कली ठेयब सेल्मे बाक्त।

19 मिनु लेवी, कोहाथ नु कोराह आन मुर बोक्शा परमप्रभु यावे, इस्राएली आन परमप्रभु कली ठेयब सेंदा पा ठेयब सेल्टीक कुम्सो पामे बाक्त।

20 मिनु मेकोपुकी सुनी कना बोक्शा, तेकोहा सहर डा गोरशो रागीम लमा बाक्त। मिनु मेकोपुकी ग्रूशा लमानु, येहो-शाफातम “यहूदा नु यरूसलेमम बाक्ब मुर नेल्लेम आं लोव्र नेनीन। गे परमप्रभु यावे, इन परमप्रभु कली थमा सुतीन। मिनु गे ग्रानीनी। परमप्रभु यावे आ लोव्र पाइब आन लोव्र थमा सुइश्शा बाक्कीन” देंमाक्त। यसैया ७:१; यसैया १८:१६

21 मिनु मेकोमी मुरपुकी नु सल्ला पशा, लडाइ पाइब आन डोंइती रिम्शो वा फेक्शा, परमप्रभु यावे कली ठेयब सेल्टीक कुम्सो पाइब योव्रमी बाक्त। मिनु मेकोपुकीम “परमप्रभु यावे कली ‘गे रिम्शो पाइब बाक्कीनी। मारदे हना इन दाक्तीक गेना हना यो लीब’ ” दे कुम्सो पामे बाक्त। भजन संग्रह १०६:१

22 मिनु मेकोपुकीम कुम्सो पा परमप्रभु यावे कली ठेयब सेल्मे चोटीन परमप्रभु यावेमी बाप्ब हुल का वोदा बाक्त। मिनु यहूदा नु लडाइ पथ जाक्ब अम्मोनी, मोआबी नु सेइर डांडा डा मुर आन कली क्याम्दा बाक्त।

23 मिनु मार दुम्माक्त देशा हना, अम्मोनी नु मोआबी गारशा सेइर डांडा डा मुर आन कली लडाइ पा सदमे बाक्त। मेको आन कली साइक्ने थुम्मे नोले, लीशो मुरपुकी आंम आंमा साइक्मुमा बाक्त।

24 मिनु यहूदा डा मुरपुकी गोरशो रागी डा कोव्रतीक लाइश्शो खिं जाक्शा, लडाइ पाइब आन कली कोव्रडमेनु, मेको आन कली शोल्मो पा खपीम गोल्ला बेक्शो तामे बाक्त। मेको आन दाते डा का सम्म यो प्रोक्ने मचाप्शो बाक्मा बाक्त।

25 मिनु येहो-शाफात नु आ मुरपुकी मार मार रोइक्थ जाक्मा बाक्त देशा हना, मार मार वासी, सुन चांदी के शोप मार मार थोव्रक थित्मे आंम कली कुरने मचाप्शा डा पा रोइक्तमे बाक्त। मिनु मेको आन बस्तु भाव यो लदमे बाक्त। मेकोपुकीम नाक्त सां सम्म मेको रोइश्शो मार मार खुप्तमे बाक्त। मारदे हना मेको थम शुश बाक्माक्त।

26 मिनु ४ नाक्ती मेकोपुकी बेराकाह डा दिंमम ग्रुम्मा बाक्त। मिनु मेकेर परमप्रभु यावे कली ठेयब सेल्मे बाक्त। मुल सम्म मेको आ नें बेराकाह डा दिंम लीशो बाक्ब। बेराकाह आ अर्थ आसीक बाक्ब।

27 मेको नोले यहूदा नु यरूसलेम डा मुर नेल्लेमी येहो-शाफात कली डोंइती गाक्पाइश्शा, ग्येरसीशा यरूसलेम लेम्मा बाक्त। मारदे हना परमप्रभु यावेमी मेको आन कली आन जोरी सत्रु रे ग्रापाइश्शा, थम ग्येरसीशो बाक्मा बाक्त।

28 मिनु मेकोपुकीम ठेयब नु आइक्च तार पाइश्शो ताप्तीके नु तुराही ताम्ना ताम्न यरूसलेमम परमप्रभु यावे आ खिं जाक्मा बाक्त।

29 परमप्रभु यावेमी इस्राएल आ जोरी सत्रु नु लडाइ पा ग्रामाक्त देशो लोव्र नेंशा, रागी रागी डा राज्य डा मुर नेल्ल परमप्रभु क्येडा हिंमा बाक्त।

30 मिनु येहो-शाफात आ राज्यम लडाइ मदुम्थु, नाइसे बाक्त। मारदे हना आ परमप्रभुमी मेको रागी कली एर ओथ नेल्ल रे नाइक्पदा बाक्त। २इतिहास १५:१५

येहो-शाफात आ सासन  
१राजा २२:४१-५०

31 मोपा येहो-शाफातम यहूदाम सासन पवा बाक्त। मेको पिप दुम्मेनु, ३५ बर्स दुम्शो बाक्माक्त। मेकोमी यरूसलेम मी २५ बर्स सासन पवा बाक्त। मेको आ ममा आ नें अजुबाह बाक्माक्त। मेको शिल्ही आ तमी बाक्माक्त।

32 येहो-शाफात आ आफ आसा आ लांम गाक्माक्त। मिनु मेको लां रे ग्युरा पेरा मपवा बाक्त। मेकोमी परमप्रभु यावे आ डोंइती मार ठीक बाक्मे, मेको पवा बाक्त।

33 मो हना यो मेकोमी डांडा डा थानपुकी नेल्ल मप्रेदा बाक्त। मिनु मुरपुकीम आन थुं आन किकी पिपी आन परमप्रभु गे मलेत्मे बाक्त।

34 मिनु हानानी आ तौ येहूम येहो-शाफात आ पशो डोंइती रे नोले सम्म नेल्ल इस्राएल डा पिप आन इतिहासम ब्रेक्शा, चोइश्शो बाक्ब।

35 मिनु नोले यहूदा डा पिप येहो-शाफात, इस्राएल डा काइ मरिम्शो पाइब पिप अहाज्याह नु वारच्चु दुम्माक्त। मेको काइ मरिम्शो पाइब बाक्माक्त। १राजा २२:५२-५४

36 मेकोमी टारशीश लशा ग्याप्तीक लेयतीक गेय पचा कली जहाजपुकी सेल्चा कली अहाज्याह नु गारमाक्त। मिनु मेको टेयब जहाजपुकी एस्योन-गेबेरम सेल्मे बाक्त।

37 मारेशा डा दोदा-वाहु आ तौ एलीएजरमी येहो-शाफात आ पर्बम परमप्रभु आ लोत्र पवा बाक्त। मेकोमी “गे अहाज्याह नु वारच्चु दुम्तीके, परमप्रभु यावेम इन गेय खतम सेल्ब” देंमाक्त। मिनु मेको टेयब जहाजपुकी खतम दुम्मा बाक्त। टारशीश लचा मतामे बाक्त।

## 21

यहूदा डा पिप येहोराम

१राजा २२:५१; २राजा ८:१६-२२

1 मिनु येहो-शाफात बेक्माक्त। मिनु मुरपुकीमी मेको आ किकी पिपी आन कली थिम्तीके दाऊद आ सहरम थिम्मे बाक्त। मिनु आ तौ येहोराम पिप दुम्माक्त।

2 येहो-शाफात आ तौपुकी, येहोराम नु आ लोकबपुकी अजारयाह, येहीएल जकारिया, अजारयाह, मिकाएल नु शेफत्याह बाक्मा बाक्त। मेको नेल्ल यहूदा डा पिप येहो-शाफात आ तौ बाक्मा बाक्त।

3 मेको आन आफोम मेको आन कली सुन, चांदी, शुश क्येट लाइब शोप नु यहूदा डा बोल्यो सहरपुकी यो गेशो बाक्माक्त। तन्न मेको राज्य येहोराम कली गेवा बाक्त। मारदे हना मेको आ डोंइती थिशो तौ बाक्माक्त।

पिप येहोराम आ मरिम्शो पशो

4 मिनु येहोराम आ आफ आ पा डा सासन पा बोल्यो दुम्शा, मेकोमी आ लोकब नेल्ल नु इस्राएल डा का निकशी टेयब मुर आन कली तरवारम क्योरशा साइक्मी बाक्त।

5 येहोराम पिप दुम्मेनु, ३२ बर्स दुम्शो बाक्माक्त। मेकोमी यरूसलेम ८ बर्स सासन पवा बाक्त।

6 मेकोमी आहाब आ खिं डा मुर खोदेशो पा इस्राएल डा पिप आन लांम गाक्माक्त। मारदे हना मेको आ मीश पिप आहाब आ तमी बाक्माक्त। मेकोमी परमप्रभु यावे आ डोंइती मार मरिम्शो बाक्मे, मेको पवा बाक्त।

7 मो हना यो परमप्रभु यावेमी दाऊद नु पशो कबल आ पतीके दाऊद आ खिं डा मुर आन कली साइक्चा मदाक्ता बाक्त। मारदे हना मेकोमी दाऊद नु आ तौ चच युइ आन कली “इ खिं रे गेना हना यो इस्राएली आन कली सासन पाइब का बाक्ब” देशो बाक्माक्त। २सामुएल ७:१२; १राजा ११:३६; भजन संग्रह १३२:१७

8 मिनु येहोराममी सासन पवानु, एदोम डा मुर यहूदा नु मद्रुथु, आंम आ राज्य सेल्शा, आंम पिप सेल्मे बाक्त।



9 मोपतीके येहोराम आ लडाइ पाइबपुकी, कप्तान नु आ बग्गी नेल्ल लाइशशा, एदोम गे लमाक्त। मेकोपुकी नाकदो बोक्शा, आंम कली, आ कप्तान नु आ बग्गी कली पुम्ब एदोमी नु लडाइ पा खेरमे बाक्त।

10 एदोम मुल सम्म यहूदा डा सासन पाइब नु मदुशो बाक्ब। मेना लिब्ना यो येहोराम आ मरिम्शो सासन आ पर्बम बोक्माक्त। मारदे हना येहोरामम परमप्रभु यावे, आ किकी पिपी आन परमप्रभु कली प्रॉइशो बाक्माक्त।

11 मेकोमी यहूदा डा पहाडमी डांडा डा थानपुकी सेला बाक्त। मिनु मेकोमी यरूसलेमम बाक्ब मुर आन कली मूर्ति पूजा पा परमप्रभु कली प्रॉइपाइक्मी बाक्त। मिनु यहूदा कली दूली लांम गाकपदा बाक्त।

12 मिनु येहोराममी परमप्रभु यावे आ लोत्र पाइब एलीया रे चिठी का तवा बाक्त। मिनु मेको चिठीमी “परमप्रभु यावेमी मार दंत देशा हना, परमप्रभु यावे, इन किकी पिपी दाऊद आ परमप्रभुम ‘गे इ आफ येहो-शाफात नु यहूदा डा पिप आसा खोदेशो पा मेको आन लांम मगाकडे।

13 तन्न गे आहाब आ खिं डा मुर खोदेशो पा इस्राएल डा पिप आ लांम गाक्शा, आहाबमी इस्राएली आन कली परमप्रभु प्रॉइपाइशो हेंथे गाक्शो खोदेशो पा, गे यहूदा नु यरूसलेम डा मुर आन कली मूर्ति पूजा पपाइशशा, परमप्रभु कली प्रॉइपाइक्तीवी। मिनु इ आफ आ तौपुकी, इ लोकब आन कली यो साइक्तीवी। मेकोपुकी इ क्येडा रिम्शो मुर बाक्तेक्म।

14 मेको इ पतीके परमप्रभु यावेमी इ खिं डा मुर, इ तौपुकी, इ मीशपुकी नु इ मुर नेल्ल आन कली मुर बेक्तीक रोइ पपाइक्नुड।

15 मिनु गे मसाब कोत्रज डा रोइ पाइनेवे। मिनु मेको रोइम पतीके इ कोत्रज राक्शा इ गा क्यी नाक्त किंत किंत ग्रीनीम’ देशो बाक्ब” दे ब्रेक्शो बाक्माक्त।

16 मिनु मेको नोले परमप्रभु यावेमी येहोराम नु लडाइ पपाइक्चा कली पलिस्ती नु एथीयोपीया आ नेक्था बाक्ब अराबी आन कली क्युक्मी बाक्त।

17 मिनु मेकोपुकीम यहूदा कली लडाइ तोशा, आ आगा ओत्रमा बाक्त। मिनु मेकोपुकीम पिप आ दरवारम थिश्शो शोप नेल्ल, मेको आ तौपुकी नु मेको आ मीशपुकी नेल्ल लदमे बाक्त। मेको आ कान्छा तौ येहो-अहाज डा लाक्शा अर्को तौ मलीमा बाक्त। येहो-अहाज कली अहाज्याह यो देनीम।

18 मेको नेल्ल दुम नोले परमप्रभु यावेमी येहोराम कली मसाक्ब कोत्रज राक्तीक रोइ पपदा बाक्त।

19 मिनु मेको रोइ पा बर्स निक्शी नोले आ कोत्रज राक्शा, आ गा क्यी गूशा, शुश श्येत जशा बेक्माक्त। मिनु मेको आ मुरपुकीम मेको आ किकी पिपी आन पर्बम पशो खोदेशो पा मेको कली मान पचा कली टेयब मी ममुइक्तमे बाक्त। २इतिहास १६:१४

20 मेको पिप दुम्मेनु, ३२ बर्स दुम्शो बाक्माक्त। मेकोमी यरूसलेमम ८ बर्स सासन पवा बाक्त। मेको बेक्मेनु सुइम रोंका मपामे बाक्त। मिनु मुरपुकीमी मेको कली दाऊद आ सहरमी थिम्मे बाक्त। तन्न पिप आन कली थिम्तीकेम मथिम्मे बाक्त। २इतिहास २४:२५

## 22

यहूदा डा पिप अहाज्याह

२राजा ८:२५-२९

1 मेको नोले यरूसलेम डा मुरपुकीम मेको आ पा डा मेको आ कान्छा तौ अहाज्याह कली पिप सेल्मे बाक्त। मारदे हना अराबी नु जाक्शोपुकीम मेको अरु तौ आन कली साइशशा बाक्मा बाक्त। मोपतीके येहोराम आ कान्छा तौ अहाज्याह यहूदा डा पिप दुम्माक्त।

2 अहाज्याह पिप दुम्मेनु, २२ बर्स दुम्शो बाक्माक्त। मेकोमी यरूसलेमम बर्स का सासन पवा बाक्त। मेको आ ममा आ नें अथाल्याह बाक्माक्त। मेको ओप्त्री आ चच बाक्माक्त।

3 मेको यो आहाब आ खिं डा मुर खोदेशो पा मेको आन लांम गाक्माक्त। मारदे हना आ ममामी मेको कली परमप्रभु यावे आ अरेशो मटिचा कली अर्ती गेवा बाक्त।

4 मेकोमी यो आहाब आ खिं डा मुर खोदेशो पा परमप्रभु यावे आ डोंइती मार मरिम्शो बाकमे, मेको पवा बाक्त। मारदे हना आ आफ बेकम नोले मेको मुरपुकीमी अर्ती गेशा, मेको कली खतम सेल्मे बाक्त।

5 मेकोमी आन गेशो अर्ती रामोथ-गिलादम अराम डा पिप हजाएल नु लडाइ पचा कली इस्राएल डा पिप आहाब आ तौ येहोराम नु वारचबु दुम्चा बिस्से बाक्त। मिनु अरामीपुकीम मेको कली गार सेल्मे बाक्त।

6 मिनु योराम रामाह सहरम अराम डा पिप हजाएल नु लडाइम दुम्शो गार साचा कली येजेलम लेशशा लमाक्त। मिनु यहूदा डा पिप येहोराम आ तौ अहाज्याह, आहाब आ तौ, योराम कली गुम्थ येजेलम लमाक्त। मारदे हना मेको रोइ पशो बाक्माक्त। येहोराम योराम यो देंनीम।

7 तन्न परमप्रभु आ मिम्शो खोदेशो पा योराम नु अहाज्याह गुम्सानु, अहाज्याह आ बेक्तीक दुम्माक्त। मेको गुम्शा, अहाज्याह नु येहोराम निम्शी आ तौ येहू कली गुम्थ लसा बाक्त। परमप्रभु यावेमी आहाब आ खिं डा मुर आन कली थुम्पाइक्चा कली येहू कली योत्रशो बाक्माक्त। १राजा १९:१६; २राजा ९:६-७

8 मिनु येहूम आहाब आ खिं डा मुर आन कली सदानु, अहाज्याह आ गेय पाइब यहूदा डा ठेयब मुरपुकी नु मेको नु पिशो आ लोकब आन तौ आन कली यो थिश्शा साइक्मी बाक्त। २राजा १०:१२-१४

9 मेको नोले मेकोमी अहाज्याह कली मला बाक्त। मिनु येहू आ मुरपुकीम मेको कली सामरीयाम थिन्मे बाक्त। मिनु मेकोपुकीम अहाज्याह कली येहू आ बाक्तीक चाक्शा सदमे बाक्त। मिनु मुरपुकीम मेको आ पर्बम “आ थुं नेल्लेमी परमप्रभु यावे आ नोले खोइक्ब येहो-शाफात आ चच एकोन बाक्ब” दे थिम्मे बाक्त। मेको नोले अहाज्याह आ खिं डा मुर सासन पाइब सुइ मलीमा बाक्त। २राजा ९:२७-२९

अथाल्याह नु योआश

२राजा ११:-

10 मिनु अहाज्याह आ ममा अथाल्याहम आ तौ साइश्शो तुइश्शा, मेकोमी यहूदा डा पिप आ खिं डा मुर नेल्ल आन कली साइक्चा कली बोक्माक्त।

11 तन्न पिप येहोराम आ तमी येहो-शबेआथम अहाज्याह आ तौ योआश कली साइक्चा चिक्शो पिप आ तौ आन दाते रे प्रेंइशा लदा बाक्त। मिनु मेको कली कोवब नु मेको आल आस कली इप्तीक कोठा कामी खुइश्शा, वोइक्सी बाक्त। पिप येहोराम आ तमी येहो-शेबा चढेब येहो-यादा आ मीश बाक्माक्त। मारदे हना अहाज्याह आ दिदी बाक्तीके, मेकोमी योआश कली अथाल्याह आ गुइ रे प्रोंइशा खुइश्शा वोइक्पदा बाक्त। मिनु अथाल्याहम मेको कली साइक्चा मतवा बाक्त।

12 मेको रागीम अथाल्याहम सासन पवानु, योआश मेकोपुकी नु ६ बर्स सम्म परमप्रभु आ खिंम खुइश्शा बाक्माक्त।

## 23

योआश यहूदा डा पिप दुम्शो

1 मिनु ७ बर्सम येहो-यादा महिंब दुम्शा, सक्ति कोइदा बाक्त। मेकोमी सहे सहे डा लडाइ पाइब आन कप्तानपुकी, येरोहाम आ तौ अजारयाह, येहो-हानान आ तौ इश्माएल, ओबेद आ तौ अजारयाह, अदायाह आ तौ मासेयाह नु जिक्की आ तौ एली-शाफात नु सल्ला पवा बाक्त।

2 मिनु यहूदा डा सहरपुकी रे लेवीपुकी नु इस्राएल डा खिं खिं डा ठेयब मुर आन कली यरूसलेमम गुम्पाइक्चा कली यहूदा नेल्लेमी लोत्र सोइश्शा, मेकोपुकी जाक्मा बाक्त।

3 मिनु मेकेर जाक्ब खुम्सीशो नेल्लेमी परमप्रभु आ खिंम पिप आ तौ योआश नु कबल पामे बाक्त। मिनु येहो-यादाम मेको आन कली “परमप्रभु यावेमी दाऊद आ तौ चच आन पर्बम देशो लोत्र खोदेशो पा पिप आ तौ पिप दुम्चा माल्ब।

4 मुल गेपुकीम मार पचा माल्नीनी देशा हना, नाइक्तीक नाक्ती गेय पाइब चढेबपुकी नु लेवीपुकी भाग सांमी भाग का ठेयब लाप्चोमी बाक्कीन।

5 मिनु अर्को भाग का पिप आ दरवारम बाक्चा माल्नीम। अर्को भाग काम दरवार आ लाङगा डा ठेयब लाप्चो खाल पने। मिनु अरु मुर नेल्ल परमप्रभु यावे आ लाङगाम बाक्चा माल्नीम।

6 चढ़ेबपुकी नु गेय पाइब लेवीपुकी डा लाक्शा, अरु सुइ आन कली परमप्रभु यावे आ खिं ओव्रचा मगेचा नम। मेकोपुकी ला ओव्रने चान्नीम। मारदे हना मेकोपुकी परमप्रभु यावे आ डोंइती ठीक सेल्शो बाक्नीम। मिनु अरु मुर नेल्लेम परमप्रभु यावे आ ब्रेक्शो अरेशो लोव्र टिशा पचा माल्नीम।

7 लेवीपुकी नेल्ले आन आन या शेशा, पिप आ एर ओंथ बाक्चा माल्नीम। सुइ परमप्रभु यावे आ खिं ओव्रतेक्म हना, मेको कली साइक्चा माल्नीम। पिप ते लत हना यो, मेकोपुकी मेको नुन लचा माल्नीनी” दे माइक्मी बाक्त।

8 मिनु चढ़ेब येहो-यादाम देशो खोदेशो पा लेवीपुकी नु यहूदा डा मुरपुकी नेल्लेमी पामे बाक्त। मेको नेल्लेम नाइक्तीक नाक्ती गेय पाइब आंम मुर आन कली नु गेय थुम्शा नाइश्शो आन कली चाक्गमे बाक्त। मारदे हना चढ़ेब यहोयादाम सुइ आन कली मप्रोंइशो बाक्माक्त।

9 मिनु चढ़ेब येहो-यादाम लडाइ पाइब आन कप्तान आन कली परमप्रभु आ खिंम बाक्शो दाऊद आ सेल्शो तूतीक नु आइक्च नु ठेयब तेक्तीकपुकी गेमी बाक्त।

10 मिनु मेकोमी मुर नेल्ल आन कली आन गुइ गुइमी या शेशा पिप कली खाल पचा कली वोइक्मी बाक्त। मेको आन कली दक्खिन रे उत्तर सम्म नु चढ़ेतीक आ एर ओंथ हिरशा खिं नेल्ल कली खाल पपाइश्शा वोइक्मी बाक्त।

11 मेको नोले येहो-यादाम पिप आ तौ कली लाङगा गुंइदा बाक्त। मिनु मेको आ पियाम सिरपेच गुप्शा, पिप दुम्तीक कागज गेशा, यहोयादा नु आ तौपुकीम मेको कली पिप सेल्शा, तेल लुक्तमे बाक्त। मिनु मेकोपुकीम ठेयब सेंदा पा “पिप शुश ब्रोंइशा बाक्ल” दे ग्रीमा बाक्त।

12 मिनु अथाल्याहमी मुरपुकीमी आन पिप कली ठेयब सेल्शा शुश रेयके पशो नेना बाक्त। मिनु मेको परमप्रभु यावे आ खिं मुर आन बाक्तीकेम जाक्माक्त।

13 मिनु कोव्रडानु, पिप कली थाम आ नेक्था लाप्चोम राप्शा बाक्शो तवा बाक्त। मिनु कप्तानपुकी नु तुराही ताप्बपुकी पिप आ एर ओंथ बाक्शो बाक्मा बाक्त। मिनु मेको रागी डा मुर नेल्ल पिप आ डोंइती ग्येरशा, तुराही ताप्ना ताप्न बाक्शो बाक्मा बाक्त। मिनु कुम्सो पाइबपुकी ताप्तीक ताप्शा, मुर नेल्ल आन डोंइती कुम्सो पना पन बाक्मा बाक्त। मिनु अथाल्याहमी आ वा खाक्शा, ठेयब सेंदा पा “गो नु रागी नेल्ल खतम! गो नु रागी नेल्ल खतम!” दे शुश गाइश्शा ग्रीमाक्त।

14 मिनु चढ़ेब येहो-यादाम लडाइ पाइब आन कप्तान आन कली “मेको कली मुर आन दाते रे गुंइदीन। मेको आ नोले खोइक्ब नेल्ल आन कली तरवारम क्योरशा सतीन। मेको आन कली परमप्रभु यावे आ खिं आगाम मसतीन” दे अरेमी बाक्त।

15 मिनु मेकोपुकीम मेको कली ग्याइक्तमे बाक्त। मिनु पिप आ दरवार डा शारा लाप्चोम लाइश्शा, सदमे बाक्त।

16 मेको नोले येहो-यादामी, मुर नेल्ल नु पिप कली परमप्रभु यावे आ मुर दुम्चा माल्ब, दे कबल पवा बाक्त। २इतिहास १५:१२

17 मिनु मुरपुकी नेल्ल बाल देवता आ खिं ओव्रशा, प्रेत्मे बाक्त। मेको कली चढ़ेतीक नु आ मूर्ति नेल्ल फस पोक्गमे बाक्त। मिनु बाल कली चढ़ेब मत्तान कली चढ़ेतीक आन डोंइती सदमे बाक्त।

18 मिनु येहो-यादामी “दाऊदमी देशो खोदेशो पा परमप्रभु यावे आ खिं कोव्रचा कली लेवी आ थर डा चढ़ेब आन कली जिम्मा गेमी बाक्त। डोंइती दाऊदम मोसामी ब्रेक्शो परमप्रभु यावे आ अरेशो लोव्र खोदेशो पा कुम्सो पन पन ग्येरना ग्येरन परमप्रभु यावे कली चोशा चढ़ेतीक चढ़ेचा माल्नीम” दे अरेशो बाक्माक्त। २इतिहास ७:६; २इतिहास २९:१५-३०

19 येहो-यादाम मारेइ पा ग्रॉग्रा दिशो दुम्शो मुर आन कली ओव्रचा मगेचा कली परमप्रभु यावे आ खिं डा लाप्चोम खाल पाइबपुकी वोइक्पदा बाक्त।

20 मिनु मेकोमी कप्तानपुकी, ठेयब मुरपुकी, मुर आन कली हुकुम पाइबपुकी नु रागी डा मुर नेल्ल आन कली लाइशशा, पिप कली परमप्रभु यावे आ खिं रे पा आइक्था डा लाप्चो रे ओत्रशा, पिप आ दरवारम चाक्गा बाक्त। मिनु पिप कली पिप आ ठेयब नित्तीकेम निष्पदा बाक्त।

21 मिनु रागी डा मुर नेल्ल ग्येरसमा बाक्त। मिनु अथाल्याह तरवारम क्योरशा साइक्चा पुंडसे नोले सहरमी थुं नाइशशा बाक्तीक दुम्माक्त।

## 24

परमप्रभु आ खिं लेंशा सेल्शो

२राजा १२:१-१७

1 योआश पिप दुम्मेनु, ७ बर्स दुम्शो बाक्माक्त। मेकोमी यरूसलेम ४० बर्स सासन पवा बाक्त। मेको आ ममा आ नें बेयर-शेबा डा सिबीयाह बाक्माक्त।

2 मिनु योआशम चढेब येहो-यादा ब्रोडम सम्म परमप्रभु यावे आ डोंइती मार ठीक बाक्मे, मेको पवा बाक्त।

3 येहो-यादामी मेको कली मीश निक्शी योत्रडा बाक्त। मिनु मेको तमी तौ आन आफ दुम्माक्त।

4 मेको आ इच्का नोले योआशम परमप्रभु यावे आ खिं लेंशा ठीक सेल्चा थुं पवा बाक्त।

5 मिनु मेकोमी चढेब नु लेवी आन कली ब्रेशशा “यहूदा डा सहरपुकीम लशा, इस्राएली नेल्ल आन रे परमप्रभु आ खिं लेंशा ठीक सेल्चा कली मेको आन बर्स बर्सम गेतीक क्येट पोक्कीन। एको गेय रीब पा पने” देंमाक्त। तन्न लेवीपुकीम मेको गेय रीब पा मपामे बाक्त।

6 मोपतीके पिपम ठेयब चढेब येहो-यादा कली ब्रेशशा “परमप्रभु यावे आ गेय पाइब मोसामी गोरशो रागीमी मुर आन कली ‘परमप्रभु यावेमी लोत्र पतीक ताम्बु कली क्येट गेचा माल्नीम’ देशो बाक्ब। मारदे गे लेवीपुकी, यहूदा नु यरूसलेम डा मुर रे पोक्चा माल्शो क्येट रीब पा मचाक्नीनी?” दे हिल्लो पवा बाक्त।

7 डोंइती मेको काइ परमप्रभु कली मटीब मीश मुर अथाल्याह नु आ नोले खोइबपुकीम परमप्रभु आ खिं ओत्रशा, मेकेर डा परमप्रभु यावे आ थोत्रक नेल्ल बाल देवता आ पूजा पतीकेम चलेशो बाक्मा बाक्त। २इतिहास २२:३-४

8 मिनु पिपम मेको आन कली सन्दोस का सेल्पाइशशा “परमप्रभु यावे आ खिं डा ठेयब लाप्चो आ लाङगाम वोतीन” दे अरेमी बाक्त।

9 मिनु मेकोपुकीम यहूदा नु यरूसलेम डा मुर नेल्ल आन कली “परमप्रभु आ गेय पाइब मोसाम गोरशो रागीम इस्राएली आन कली देशो थाप्चा माल्शो क्येट मुरपुकीम परमप्रभु यावे आ खिंम चाक्चा माल्नीम” देशा नेंपदमे बाक्त।

10 मिनु ठेयब मुरपुकी नु मुर नेल्लेमी ग्येरशा, आन गेचा माल्शो क्येट चाक्शा, मेको सन्दोस मब्रीम सम्म मेकेर कुर पामे बाक्त।

11 मिनु लेवीपुकीम पिप आ सरकार डा गेय पाइब आन बाक्तीकेम सन्दोस चाक्गामेनु, मेकोपुकीम दोशो क्येट बाक्मे, मेको कोत्रबाक्मा बाक्त। मिनु पिप आ ब्रेक्ब मुरुम मेको ब्रेक्शा, ठेयब चढेब आ गेय पाइबपुकीम मेको सन्दोस श्येतथ सेल्शा, लेंशा आ बाक्तीकेम लाइशशा वोइक्बाक्मा बाक्त। मेकोपुकीम नाक्त कित कित मो पा शुश क्येट खुप्तमे बाक्त।

12 मिनु पिप नु येहो-यादाम मेको क्येट परमप्रभु यावे आ खिं डा गेय पाइब आन कली कोत्रब मुर कली गेमी बाक्त। मेकोपुकीम चहिं गारो प्रोक्ब मुर, शी के गेय पाइब नु फलाम नु कांसा के गेय पाइब आन कली ब्रेशशा, गाल्च गेशा, लेंशा परमप्रभु यावे आ खिं सेल्पदमे बाक्त।

13 मिनु मेको गेय पाइबपुकीमी शुश गेय पा लेंशा ठीक पतीके गेय रिम्शो दुम्ना दुम्न लमाक्त। मेकोपुकीम परमप्रभु आ खिं डोंइती डा खोदेशो पा ठीक नु बोल्यो सेल्मे बाक्त।

14 मिनु मेकोपुकीम गेय थुम्मे नोले मेको लीशो क्येट पिप नु येहो-यादा आस कली लेशशा गेमे बाक्त। मिनु मेको क्येटीम परमप्रभु यावे आ खिं कली ग्योबपुकी सेल्मे बाक्त। गेय पचा कली, चोशा चढेचा

कली माल्तीक थोत्रकपुकी नु सुन नु चांदी के डाडुपुकी नु ग्योबपुकी सेल्मे बाक्त। यहोयादा बाक्म सम्म परमप्रभु यावे आ खिंम नाक्त किंत किंत चोशा चढेतीक चढेमे बाक्त।

15 मिनु येहो-यादा शुश ब्रोइशा खूशो दुम्शा, सहे का ३० बर्स दुम्मेनु, बेक्माक्त। १इतिहास २९:२८

16 मिनु मुरपुकीम मेको कली दाऊद आ सहरम पिप आन कली थिम्तीकेमी थिम्मे बाक्त। मारदे हना मेकोमी इस्माएलमी रिम्शो पवा बाक्त। परमप्रभु नु आ खिं कली यो थम रिम्शो पवा बाक्त।

### पिप योआश आ मरिम्शो पशो

17 मिनु येहो-यादा बेक्म नोले यहूदा डा सरकार आ गेय पाइब पिप योआश कली गुम्थ जाक्शा, मेको कली सेउ पामे बाक्त। मिनु पिपम मेको आन लोत्र नेना बाक्त।

18 मिनु मेकोपुकीम परमप्रभु यावे, आन किकी पिपी आन परमप्रभु आ खिं प्रोइशा, अशेराह आ मूर्ति पाइशो थाम नु अरु मूर्ति आन कली पूजा पामे बाक्त। मोपतीके परमप्रभु यावे यहूदा नु यरूसलेम डा मुर आन पाप आ पबर्म गाइक्ता बाक्त।

19 मो हना यो परमप्रभु यावेम मेको आन कली आ गे लेप्पाइक्चा कली आ लोत्र पाइबपुकी सोइक्तीमी बाक्त। मिनु मेकोपुकीम मेको आन मरिम्शो पशो कोइदमे बाक्त। तन्न मुरपुकीम मेको आन लोत्र मनेन्मे बाक्त।

20 मिनु परमप्रभु आ सोक्तीम चढेब येहो-यादा आ तौ जकरिया कली सुमा बाक्त। मिनु मेको मुर आन डोइती राप्शा मेको आन कली “परमप्रभुमी मार देशो बाक्त, देशा हना, ‘गे मारदे परमप्रभु यावे आ शेंशो मपाइनीनी? मोपतीके गे गेना हना यो श्येत जशा, रिम्शो मदुम्नीनी। गेपुकीम परमप्रभु यावे कली प्रोइतीके, मेकोमी यो इन कली प्रोइशो बाक्ब’ देशो बाक्ब” देमाक्त। मती २३:३५; हिब्रू ११:३७

21 तन्न मेकोपुकीम जकरिया आ पबर्म गारशा, पिप आ हुकुम पतीकेमी जकरिया कली परमप्रभु यावे आ खिं डा लाडगाम फुल्लु आप्शा सदमे बाक्त।

22 पिप योआशम जकरिया आ आफ येहो-यादाम आ कली रिम्शो पशो नेल्ल प्रेंदा बाक्त। मिनु मेको आ तौ कली सदा बाक्त। मिनु आ बेक्ची ना जकरियामी “परमप्रभु यावेम एको तशा, क्येक्क लेत्तल” देमाक्त। २इतिहास २३:-

23 मिनु मेको बर्स नुच्ची ना अराम रागी डा लडाइ पाइबपुकी योआश नु लडाइ पथ जाक्मा बाक्त। मिनु मेकोपुकीम यहूदा नु यरूसलेम जाक्शा, मेकेर डा मुर आन दाते डा सरकार डा गेय पाइब नु ठेयब मुर नेल्ले आन कली सदमे बाक्त। मिनु आन रोइशो मारेइ मारेइ दमस्कस डा पिप कली सोइक्तमे बाक्त। २राजा १२:१८-२२

24 अराम डा लडाइ पाइब इक्का ला बाक्तेक्म हना यो, परमप्रभु यावेमी इस्माएल डा शुश लडाइ पाइब आन कली मेको आन गुइमी गेमी बाक्त। मारदे हना यहूदा डा मुरपुकीम परमप्रभु यावे, आन किकी पिपी आन परमप्रभु कली प्रोइशो बाक्मा बाक्त। मोदेशो पा योआशमी निसाफ नु सजाइ तवा बाक्त।

25 मिनु अराम रागी डा लडाइ पाइबपुकीमी पिप कली शुश गार सेल्शा, गाक्मा नोले, पिप आ ठेयब गेय पाइबपुकीमी गारशा, चढेब येहो-यादा आ तौ कली साइशो आ क्येक्क लेत्चा कली पिप आ ब्राख्येम बाक्मेनु, सदमे बाक्त। मोपा मेको बेक्माक्त। मिनु मुरपुकीम मेको कली दाऊद आ सहरमी थिम्मे बाक्त। तन्न पिप आन कली थिम्तीकेम मथिम्मे बाक्त। २इतिहास २१:२०

26 मेको कली साइक्ब अम्मोनी मीश मुर शिमेआथ आ तौ जाबाद नु मोआबी मीश मुर शिमीथ आ तौ येहो-जाबाद बाक्सा बाक्त।

27 योआश आ चच युइ आन पबर्म ब्रेक्शो लोत्र, मेको आ थाप्चा माल्शो क्येट आ पबर्म लोत्र नु दोपा मेकोमी लेंशा परमप्रभु आ खिं सेला, मेको नेल्ल पिप आन किताबम ब्रेक्शो बाक्ब। मिनु मेको आ पा डा आ तौ अमस्याह पिप दुम्माक्त।

## 25

यहूदा डा पिप अमस्याह

२२राजा १४:१-२०

1 अमस्याह पिप दुम्नेनु, २५ बर्स दुम्शो बाक्माक्त। मेकोमी यरूसलेममी २९ बर्स सासन पवा बाक्त। मेको आ ममा आ नें येहो-अदान बाक्माक्त। मेको यरूसलेम डा बाक्माक्त।

2 मेकोमी परमप्रभु यावे आ डोंइती मार ठीक बाक्मे, मेको पवा बाक्त। तन्न आ थुं नेल्लेम ममाइ।

3 मेकोमी आ राज्य डा सासन बोल्यो दुम नोले, आ आफ कली साइक्व, आ गेय पाइब आस कली साइसी बाक्त। २इतिहास २४:२५

4 तन्न मेको आस आल आन कली मसदा बाक्त। मारदे हना मोसा आ किताबम ब्रेकशो परमप्रभु यावे आ अरेशो “आम आफ आन तमी तौ आन परबम नु तमी तौ आन आम आफ आन परबम साइक्वा मदुम्ब। सुम पाप पाइबा, मेको साइक्वा पुंडसीब” देशो परमप्रभु यावे आ लोत्र टिवा बाक्त। ब्यवस्था २४:१६

5 मिनु अमस्याहम यहूदा नु बेन्यामीन डा मुर नेल्ल आन कली गुम्पाइशशा, आन खिं खिं डा मुर हजार हजार आन कली कप्तान का का नु सहे सहे डा आन कली कप्तान का का वोइक्पदा बाक्त। मेकोमी २० बर्स गाप्शो नु मेको क्येडा लाक्शो मुर नेल्ल आन कली पुक्मी बाक्त। मेको आन कली हिक्शोनु, लाख सां बाक्मा बाक्त। मेको नेल्ल लडाइ पने चापब बाक्मा बाक्त। तूतीक नु तेक्तीक चलने चापब बाक्मा बाक्त।

6 मेकोमी इस्राएल रे लाख का बोल्यो लडाइ पाइब आन कली ब्रेशशा, सहे का टलेन्ट चांदी गोवा बाक्त। टलेन्ट का ३४ किलो बाक्ब।

7 तन्न परमप्रभु आ मुर का मेको आन बाक्तीक जाक्शा “आं पिप, इस्राएल डा लडाइ पाइब आन कली गे नु मलाइक्मी। मारदे हना परमप्रभु यावे इस्राएलीपुकी नु एफ्राइम आ थर डा मुर नेल्ल नु मबाक्ब।

8 गे मोपा बोल्यो दुम्शा बाक्शो मिम्तीनी नु इस्राएल डा लडाइ पाइब लाइक्तीनी हना, परमप्रभुम इन कली इन जोरी सत्रु आन डोंइती बुपाइक्ब। मारदे हना ग्रापाइक्तीक नु बुपाइक्तीक सक्ति परमप्रभु आ गुइम बाक्ब” देमाक्त।

9 मिनु अमस्याहम परमप्रभु आ मुर कली “इस्राएली लडाइ पाइब आन परबम गेशो मेको सहे का टलेन्ट चांदी आ परबम गो मार पाइनुडा?” दे हिल्लो पवा बाक्त। मिनु परमप्रभु आ मुरुम “परमप्रभु यावेम इन कली मेको क्येडा यो शुश गेने चापब” देमाक्त।

10 मोपतीके पिप अमस्याहम एफ्राइम रे जाक्शो लडाइ पाइब आन कली आन खिं लेशशा सोइक्तीमी बाक्त। मिनु मेकोपुकी यहूदा नु शुश गाइक्तमे बाक्त। मिनु थाम्पा चुरशा, आन खिं लेशशा लमा बाक्मा बाक्त।

11 मिनु अमस्याहम बोल पा महिंथु थुं बारपाइशशा, आ लडाइ पाइब आन कली हिक्सी दिमम लाइक्मी बाक्त। मिनु मेकेर सेइर डा १० हजार मुर आन कली साइक्मी बाक्त।

12 मिनु यहूदा डा लडाइ पाइबपुकीम अर्को १० हजार मुर आन कली सेसीन ग्याइशशा, मेको आन कली ठेयब सेरथे फुल्लु तार लाइशशा, नेप्शा ख्रीडमे बाक्त। ख्रीशो नेल्ले चोकटा लाम्टा दुम्शा बेक्मा बाक्त।

13 मेना अमस्याहम लडाइम मलाइक्थु, खिं लेशशा सोइशशा लडाइ पाइबपुकीम यहूदा डा सहरपुकी सामरीया रे बेथ-होरोन सम्म मारेइ मारेइ रोइक्तमे बाक्त। मेकोपुकीम मेकेर हजार सां मुर आन कली सदमे बाक्त। मिनु शुश मार मार रोइशशा लदमे बाक्त।

14 मिनु अमस्याहम एदोमी आन कली ग्राशा लेम्मेनु, सेइर डा मुर आन देवतापुकी चाक्शा आ देवता सेला बाक्त। मिनु मेकोमी मेको देवता आन कली पूजा पा मेको आन कली चढेवा बाक्त।

15 मोपतीके परमप्रभु यावे अमस्याह नु गाइशशा, आ लोत्र पाइब का सोइक्ता बाक्त। मिनु मेकोमी “गे मारदे आ मुर आन कली लायो इ गुइ रे प्रॉइने मचापब देवता आन नोले खोदी?” दे हिल्लो पवा बाक्त।

16 मिनू मेकोमी लोत्र पना पन, पिपमी “मार गोपुकीम इन कली पिप कली अर्ती गेब सेल्शो नकी डा? ब्वाले पावो। मारदे साइक्चा पुंडसीनेवे?” दे मदा बाक्त। मिनू मेको परमप्रभु यावे आ लोत्र पाइबम सिक्सी पचा क्येडा डोंइती “गेम ओं पाइतीनी, आं लोत्र मनैतीके परमप्रभुमी इन कली थमा पा खतम पोक्चा थुं पवा बाक्त। गो तुइक्नुड” देंमाक्त।

17 मेको नोले यहूदा डा पिप अमस्याहम आ अर्ती गेबपुकी नु सल्ला पा इस्राएल डा पिप येहू आ चच येहो-अहाज आ तौ योआश कली “जाक्को। गे नु गो लडाइ पस” दे मदा बाक्त।

18 तन्न इस्राएल डा पिप योआशमी यहूदा डा पिप अमस्याह कली कथा का देंमाक्त। मार कथा देंमाक्त देशा हना “लेबानोन डा चू बुटा कामी लेबानोन डा लाइशो रवा का कली ‘इ तमी आं तौ नु ग्युंवे पचा गेवो’ देंमाक्त। तन्न लेबानोन डा ब्वाकी डा जन्तु का मेको रे पा पिमेनु, मेको चू बुटा कली दिम्शा लाक्का बाक्त। न्यायाधीस १:१४

19 गे एदोम कली ग्राती, दे बोरशा ठेयब मलेतो। गे इ सिं उइ बाक्को। गे मारदे आंम कली नु यहूदा कली खतम पोक्चा माल्नेवे?” दे लोत्र लेत्ता बाक्त।

20 तन्न अमस्याहम मेको लोत्र मनैना बाक्त। मोपतीके परमप्रभुमी मेको कली मुर आन गुडमी गेवा बाक्त। मारदे हना मेकोपुकीम एदोम डा देवता आन कली खोइशो बाक्का बाक्त।

21 मिनू इस्राएल डा पिप योआश डोंइती लमाक्त। मिनू मेको नु यहूदा डा पिप अमस्याह यहूदा डा बेथ-शेमेशम लडाइ पाम्से बाक्त।

22 मिनू यहूदा डा मुरपुकी इस्राएली आन क्येडा बुमा बाक्त। मिनू मेको नेल्ल आन सिं प्रोक्मा बाक्त।

23 मिनू इस्राएल डा पिप योआशमी योआश आ तौ, अहाज्याह आ चच, यहूदा डा पिप अमस्याह कली बेथ-शेमेशम ग्याइशशा यरूसलेमम चाक्का बाक्त। मिनू मेकोमी एफ्राइम डा ठेयब लाप्चो रे सुर डा ठेयब लाप्चो सम्म डा ४ सहे कुबीत लाइशो गागो प्रेदा बाक्त। कुबीत का ०.५ मिटर बाक्ब।

24 मेकोमी ओबेद-एदोम आ खाल पशो परमप्रभु आ खिंम बाक्शो सुन चांदी, ग्योबपुकी नु पिप आ खिंम बाक्शो सुन चांदी शुश क्येट लाइब थोवकपुकी नु मुर आन कली ग्याइशशा लाइशशा, सामरीया लेम्माक्त। पिप आ मुर आन कली यो ग्याइशशा लाइशशा, सामरीया लेम्माक्त। इतिहास २६:१३,१५

25 इस्राएल डा पिप येहो-अहाज आ तौ योआश क्येडा यहूदा डा पिप योआश आ तौ अमस्याह १५ बर्स शुश ब्रोंइमाक्त।

26 अमस्याह आ पशो, आ डोंइती रे नोले सम्म नेल्ल यहूदा नु इस्राएल डा पिप आन इतिहासम ब्रेक्शो बाक्ब।

27 मेको अमस्याह परमप्रभु यावे रे डोन दुम नाक्त रे यरूसलेमम मेको कली साइक्चा, दे सल्ला पा गारशो बाक्का बाक्त। मेको प्रोक्शा ब्रोंइचा कली लाकीशम लमाक्त। तन्न मेकोपुकीम लाकीशम आ नोनोले खेदा पाइब मुर सोइशशा, मेको कली मेक उइ साइक्पदमे बाक्त। २इतिहास २४:२५

28 मेको नोले मेको आ बेक्शो रं शाराम कुर पा, यरूसलेम चाक्गमे बाक्त। मिनू मुरपुकीमी मेको कली आ किकी पिपी आन कली थिम्तीके दाऊद आ सहरम थिम्मे बाक्त।

## 26

यहूदा डा पिप उज्जीयाह

२राजा १४:२१-२२; २राजा १५:१-७

1 मिनू यहूदा डा मुरपुकी नेल्लेम १६ बर्स दुम्शो अमस्याह आ तौ उज्जीयाह कली मेको आ आफ आ पा डा पिप सेल्मे बाक्त।

2 मिनू अमस्याह बेक्म नोले उज्जीयाहमी एलोथ सहर लेंशा ताक्शा, यहूदा कली लेशशा गेशा, रिम्शो सेला बाक्त।

3 उज्जीयाह पिप दुम्मेनु, मेको १६ बर्स दुम्शो बाक्काक्त। मेकोमी यरूसलेमम ५२ बर्स सासन पवा बाक्त। मेको आ ममा आ नें येकोल्याह बाक्काक्त। मेको यरूसलेम डा बाक्काक्त।

4 मेकोमी आ आफ अमस्याह खोदेशो पा परमप्रभु यावे आ डोंइती मार ठीक बाकमे, मेको पवा बाक्त। २इतिहास २५:२

5 मेना जकरिया पिप कली परमप्रभु यावे कली मान पा हिंचा आ पर्बम शेंब बाक्माक्त। मिनु पिपमी जकरिया आ पालाम परमप्रभु यावे आ नोले खोइकना खोइकन बाक्माक्त। मोपा खोदा सम्म परमप्रभुम अमस्याह आ पशो नेल्ल रिम्शो दुम्पदा बाक्त।

6 मिनु मेको पलिस्ती नु लडाइ पचा कली लडाइ पतीकेम लमाक्त। मिनु मेकोमी गाथ, याब्नेह नु अशदोद कली ग्राशा, गारो प्रेशशा गेवा बाक्त। मिनु मेकोमी अशदोद नु आ नेक्था पलिस्ती रागी आन दातेम अरु सहरपुकी सेला बाक्त।

7 परमप्रभुमी मेको कली पलिस्ती, गुर-बालम बाक्ब अराबीपुकी नु मेउनीपुकी नु लडाइ दुम्तीकेम वारच पदा बाक्त।

8 मिनु अम्मोनीपुकीमी उज्जीयाह कली आन गेचा माल्शो मार मार गेमे बाक्त। मिनु मेको आ सोशो बोशो लोत्र इजीप्त आ नेक्था सम्म जाक्दीम्माक्त। मारदे हना मेको शुश सक्ति पाइश्शो दुम्शो बाक्माक्त।

9 मेकोमी यरूसलेमम गारो डा सुर डा ठेयब लाप्चो, बेसी डा ठेयब लाप्चो नु गारो आ सुर हिरतीकेमी यो लाइश्शो खिंपुकी सेला बाक्त। मिनु मेको कली बोल्यो सेला बाक्त।

10 मेकोमी गोरशो रागीम अरु लाइश्शो खिंपुकी सेला बाक्त। मिनु मेकोमी शुश इनारपुकी दोपाइक्मी बाक्त। मारदे हना मेको के शेफेलाह नु दिममी शुश बी ब्यफ बाक्मा बाक्त। मिनु मेको के पहाडम नु रिम्शो खप डा दिमम रू दोइब नु अडगुर रू कोत्रब मुरपुकी बाक्मा बाक्त। मारदे हना मेको खेतीपाती पचा दाक्ब मुर बाक्माक्त।

11 मेको प्रॉइशा, उज्जीयाह के बोल्यो लडाइ पाइब शुश बाक्मा बाक्त। मेकोपुकी गेना हना यो लडाइ पचा कली ठीक दुम्शा बाक्बाक्मा बाक्त। मिनु मेको लडाइ पाइब आन ब्रेक्ब यिएल नु पुक्ब मासेयाहम मेको आन कली हुल हुल सेल्शा, पिप आ कप्तान हनान्याहम देशो खोदेशो पा पाम्से बाक्त।

12 खिं खिं डा बोल्यो सक्ति पाइश्शो लडाइ पाइब हजार निक्शी ६ सहे बाक्मा बाक्त।

13 मेको ठेयब मुर आन हुकुममी पिप कली आ जोरी सत्रु रे वारच पाइक्चा कली लाख सां ७ हजार ५ सहे बोल्यो लडाइ पाइब आन हुल का यो बाक्माक्त।

14 मिनु उज्जीयाहमी लडाइ पाइब नेल्ल आन कली तेक्तीके, तूतीक, फलाम के टोपी, कुचुम पांइतीके, लिब्रा नु हुरद आप्तीक फुल्लु ठीक पा गेवा बाक्त।

15 मेकोमी यरूसलेम डा गारो डा लाइश्शो खिं तारी नु सुरपुकीम जोक्ब मुर आन सेल्शो ब्रा आप्तीक नु ठेयब फुल्लु आप्तीक वोइक्पदा बाक्त। आ ठेयब दुम्तीके तेइ तेइ ब्रशो बाक्माक्त। मेको सक्ति पाइश्शो दुम्माक्त। मारदे हना परमप्रभुमी मेको कली छक लाक्चा डा पा वारच पवा बाक्त। मेको आ पर्बम शुश लोत्र ब्रशो बाक्माक्त।

16 मोपा मेको सक्ति पाइश्शो दुम्तीके ठेयब लेशशा, खतम दुम्माक्त। मेकोमी परमप्रभु यावे, आ परमप्रभु कली मटिथु, धूप चोतीकेम धूप चोचा कली परमप्रभु यावे आ खिं ओत्रमाक्त। २इतिहास २५:१९

17 तन्न चढेब अजारयाह नु अरु परमप्रभु यावे कली चढेब बोल्यो नु महिंब ८० जना मुरुमी मेको आ नोले खोदमे बाक्त।

18 मिनु पिप उज्जीयाह कली तेक्चा, दे “पिप उज्जीयाह परमप्रभु यावे कली धूप चोतीक गेय इन के ममाइ। एको गेय पचा कली जिम्मा गेशो हारून आ चच युइ चढेब आन के बाक्ब। परमप्रभु यावे आ बाक्तीक रे यूडीन। मारदे हना गे दूली पाइतीनी। मिनु मुल परमप्रभु यावेमी इन कली मारेइ मान मगेपाइक्ब” दे मदमे बाक्त। गन्ती १८:७; प्रस्थान ३०:७

19 मिनु गुडम थनोरो शेशा धूप चोचा कली ठीक दुम्शो पिप गाइक्ता बाक्त। मिनु मेको चढेबपुकी नु गाइक्ना गाइक्नन आ कुप्फीम कोत्रर गूमाक्त। मेको नेल्ल चढेब आन डोंइती, परमप्रभु यावे आ खिं आगाम नु धूप चढेतीक आ डोंइती दुम्माक्त।



20 मिनु टेयब चढेब अजारयाह नु अरु चढेबपुकीम मेको कली कोव्रना कोवन मेको आ कुप्फीम कोर गूशो तशा, मेको कली रीब पा परमप्रभु यावे आ खिं रे लाडगा गुंडदमे बाक्त। मेको आंमा यो रीब पा लाडगा गूचा माल्शो बाक्माक्त। मारदे हना परमप्रभु यावेम मेको कली मेको रोडमी आप्शो बाक्माक्त।

21 मिनु पिप उज्जीयाह आ बेक्ची नाक्त सम्मन कोव्ररी दुम्शा बाक्माक्त। मेको कोव्ररी दुम्शा खिं काम आ कान बाक्चा माल्दा बाक्त। मेको परमप्रभु यावे आ खिं रे तिल्चा पुंडसे बाक्त। मिनु मेको आ तौ योथाममी दरवार कली कोव्रशा, मुर आन कली सासन पचा गोवा बाक्त। गन्ती ५:२

22 उज्जीयाह आ पशो नेल्ल डोंडती रे नोले सम्म डा गेय नेल्ल आमोज आ तौ परमप्रभु यावे आ लोत्र पाइब यसैयाम ब्रेकशो बाक्ब। यसैया ६:१; यसैया १:१

23 मिनु उज्जीयाह बेक्माक्त। मिनु मेकोपुकीमी आ किकी पिपी आन कली थिम्तीके आ नेक्था डा रू काम थिम्मे बाक्त। मारदे हना मुरपुकीम “कोव्ररी का बाक्ब” देमा बाक्त। मिनु मेको आ पा डा आ तौ योथाम पिप दुम्माक्त।

## 27

यहूदा डा पिप योथाम

२राजा १५:३२-३८

1 योथाम पिप दुम्मेनु, २५ बर्स दुम्शो बाक्माक्त। मेकोमी यरूसलेम १६ बर्स सासन पवा बाक्त। मेको आ ममा आ नें येरुशाह बाक्माक्त। मेको सादोक आ तमी बाक्माक्त।

2 मेकोमी आ आफ उज्जीयाह खोदेशो पा परमप्रभु यावे आ डोंडती मार ठीक बाक्मे, मेको पवा बाक्त। तन्न मेको आ आफ खोदेशो पा परमप्रभु यावे आ खिं मओव्रमाक्त। मो हना यो मुर आन मरिम्शो गेय पस डा पस बाक्मा बाक्त। २इतिहास २६:२६

3 मेकोमी परमप्रभु यावे आ खिं डा आइक्था डा लाप्चो लेंशा सेला बाक्त। मिनु मेकोमी ओफेल डा गारोम शुश गेय पा बोल्यो पा सेला बाक्त।

4 मेकोमी यहूदा डा पहाडमी यो सहरपुकी सेला बाक्त। मिनु ब्वाकी डा डांडापुकीम बोल्यो दरवार नु लाइश्शो खिंपुकी सेला बाक्त। २इतिहास २६:१०

5 मिनु योथाममी अम्मोनी आन पिप नु लडाइ पा मेको आन कली ग्रामाक्त। मिनु मेको बर्स अम्मोनीपुकीम मेको कली सहे का टलेन्ट चांदी, १० हजार कोर चेरब नु १० हजार कोर क्योव्रज गेमे बाक्त। मिनु मेकोपुकीम आ नोले डा बर्स नु मेको क्येडा नोले डा बर्सम यो मोपान तिरो थाप्तमे बाक्त। टलेन्ट का ३४ किलो बाक्ब। कोर का २२० लिटर खोदेशो बाक्ब।

6 मिनु योथाम परमप्रभु यावे, आ परमप्रभु आ डोंडती रिम्शो गेय पतीके मेको थम सक्ति पाइश्शो दुम्माक्त।

7 योथामम मार मार पवा, मेको आ पशो लडाइ नेल्ले नु आ गाक्शो लां इस्राएल नु यहूदा डा पिप आन इतिहासम ब्रेकशो बाक्ब।

8 मेको पिप दुम्मेनु, २५ बर्स दुम्शो बाक्माक्त। मिनु मेकोमी यरूसलेम १६ बर्स सासन पवा बाक्त।

9 मिनु योथाम बेक्माक्त। मिनु मुरपुकीमी मेको कली दाऊद आ सहरम थिम्मे बाक्त। मिनु आ नोले मेको आ तौ आहाज पिप दुम्माक्त।

## 28

यहूदा डा पिप आहाज

1 आहाज पिप दुम्मेनु, २० बर्स दुम्शो बाक्माक्त। मेकोमी यरूसलेम १६ बर्स सासन पवा बाक्त। मेकोमी आ किकी पिपी दाऊद खोदेशो पा परमप्रभु यावे आ डोंडती मार ठीक बाक्मे, मेको मपवा बाक्त।

2 मेको इस्राएल डा पिप आन लांम गाक्माक्त। मिनु चेम्शा बाल देवता आ मूर्तिपुकी सेला बाक्त।

3 मिनू पिप आहाजम बेन-हिन्नोम आ बेंसीम धूप चढेवा बाक्त। आहाजमी रागी रागी डा मुर आन प्रांग्रा दिशो गेय खोदेशो पा, आ तौ आन कली मीम चोशा चढेवा बाक्त। मोपतीके परमप्रभु यावेमी रागी रागी डा मुर आन कली इस्राएली आन डोंडती रे खेरशो बाक्माक्त। ब्यवस्था १८:९-१२

4 मेकोमी डांडा डा थानपुकीम चढेवा बाक्त। मिनू नेल्ल डांडाम नु ठेयब रवा आ पुंम चढेतीक चढेशा धूप चोवा बाक्त। १राजा १४:२२-२३

5 मोपतीके परमप्रभु यावे, आ परमप्रभुमी मेको कली अराम डा पिप नु बुपाइश्शा, मेको आ गुडमी गेवा बाक्त। मिनू मेकोमी पिप आहाज आ शुश मुर आन कली ग्याइश्शा, दमस्कसम लदा बाक्त। मेको इस्राएल डा पिप नु यो बुमाक्त। मिनू मेको पिपम शुश मुर आन कली सदा बाक्त।

6 रेमाल्याह आ तौ पेकाहमी काबुमीन यहूदा डा लाख का २० हजार मुर आन कली साइक्मी बाक्त। मेको नेल्ल बोल्यो लडाइ पाइब बाक्मा बाक्त। मारदे हना यहूदा डा मुरपुकीम परमप्रभु यावे, आन किकी पिपी आन परमप्रभु कली प्रॉइशो बाक्मा बाक्त।

7 एफ्राइम डा जिक्री माइश्शो बोल्यो लडाइ पाइब मुर काम पिप आ तौ मासेयाह, पिप आ दरवार कोव्रब कप्तान अजीकाम नु पिप आ ठेयब ब्रेक्ब एल्काना आन कली साइक्मी बाक्त।

8 इस्राएलीपुकीमी लाख निक्शी आन थर थर डा मुर ग्याइश्शा लदमे बाक्त। मेको मीश मुर, तमी नु तौ बाक्मा बाक्त। मिनू मेकोपुकीम शुश मार मार यो रोइश्शा, नेल्ल सामरीया लदमे बाक्त।

9 तन्न मेकेर ओदेद नें पाइश्शो परमप्रभु यावे आ लोव्र पाइब का बाक्माक्त। मिनू लडाइ पाइबपुकी सामरीया लेम्मानु, मेको आन कली गुम्थ जाक्माक्त। मिनू मेकोमी मेको लडाइ पाइब आन कली “परमप्रभु यावे, इन किकी पिपी आन परमप्रभु यहूदा डा मुरपुकी नु गाइक्तीके, मेकोमी मेको आन कली इन गुडमी गेप्टु। तन्न गेपुकीम इन गाइक्तीकेम मेको आन कली साइक्तीनी। मेको मो पशो इर स्वर्ग सम्म जाक्दीश्शो बाक्ब। लेवी १९:१८

10 मुल गे यहूदा नु यरूसलेम डा मीश मुर, वोंइश मुर नेल्ल आन कली इन वाइलीम वाइल सेल्चा थुं पाइनीनी। गेपुकीम परमप्रभु यावे, इन परमप्रभु आ डोंडती पाप ला पाइनीनी। अरु मार पाइनीनी?

11 मुल आं लोव्र नेनीन। इन ग्याइश्शो आंम मुर आन कली प्रॉइशा लेत्चा गेने। मारदे हना परमप्रभु यावे इन कली तशा शुश चुरशो बाक्ब” देंमाक्त।

12 मिनू लेंशा का निक्शी एफ्राइम डा ठेयब मुर योहानान आ तौ अजारयाह, मेशील्लेमोथ आ तौ बेरेक्याह, शाल्लुम आ तौ येहीज्क्याह नु हादले आ तौ आमासाम लडाइ रे लेश्शा जाक्शो आन कली गुम्शा,

13 मेको आन कली “गेपुकीम एको ग्याइश्शो आन कली एक चाक्चा मदुम्ब। गेपुकीम मार मिम्शो बाक्नी? मेको आ पर्वम गोपुकीम परमप्रभु यावे आ डोंडती दोस ताइनीकी। मार, गेपुकीम इं मरिम्शो पशो नु इं पाप तेम्चा दाक्नीनी? मार, इं पाप ठेयब मबाक्बा डा? परमप्रभु यावे इस्राएल आ पर्वम डोंडती रे गाइक्ना गाइक्न बाक्ब” दे मदमे बाक्त।

14 मोपतीके लडाइ पाइबपुकीम ग्याइश्शोपुकी नु आन रोइश्शो मारेइ मारेइ मेको आन ठेयब मुर नु मेको देल्शा बाक्शो मुर आन डोंडती प्रोन्मे बाक्त।

15 मिनू ठेयब मुरपुकीमी नें थिशा का निक्शी मुर आन कली ब्रेत्मे बाक्त। मेको ब्रेश्शो मुरपुकीम ग्याइश्शा चाक्शो शिन्ना मुर आन कली रोइश्शो वा फेक्पदमे बाक्त। जुत्ता मुडक्पदमे बाक्त। जचा नु तूचा गेशा, तेल खेक्तमे बाक्त। मिनू थाम्पा दशो नु गाक्ने मचाप्ब मुर आन कली गधा डोइक्पा, खजूर रवा आ सहर, यरीको आन खिं खिं सम्म चोक्डमे बाक्त। मिनू मेकोपुकी सामरीया लेम्मा बाक्त। २राजा ६:२२; हितोपदेस २५:२१-२२

16 मेना पिप आहाजम अस्सुर डा पिप कली “वारच पाइक्की” दे पुंडथ मुर सोइक्ता बाक्त।

17 मारदे हना एदोमीपुकीम लेंशा लडाइ पा यहूदा कली ग्राशा, मेकेर डा मुर आन कली ग्याइश्शा लाइश्शो बाक्मा बाक्त।

18 पलिस्तीपुकीमी यो यहूदा डा शेफेलाह नु नेगेब डा सहरपुकी रोइकतमे बाक्त। मिनु मेकोपुकीम बेथ-शेमेश, आइयालोन, गेदे-रोथ, सोको नु मेको आ गाउंपुकी, तिम्नाह नु मेको आ गाउंपुकी, गिम्जो नु मेको आ गाउंपुकी आंम के सेल्शा बाक्मा बाक्त। यहोसु १५:१०

19 यहूदा डा पिप आहाजम पतीकेन परमप्रभु यावेम यहूदा कली थम आइक्च सेल्शो बाक्माक्त। मारदे हना पिप आहाजम थम मरिम्शो पा परमप्रभु यावे कली प्रोइशो बाक्माक्त।

20 मिनु अस्सुर डा पिप तिल्गथ-पिलेसेर मेको कली वारच पाइक्थ जाक्माक्त। तन्न मेकोमी मेको कली वारच पाइक्चा आ पा डा श्येत कका गेवा बाक्त।

21 मिनु आहाजम परमप्रभु यावे आ खिं, पिप आ दरवार नु आ ठेयब मुर आन खिं रे मार मार लाइश्शा, अस्सुर डा पिप कली “वारच पाइय्यीकी” दे गेवा बाक्त। तन्न मेको नेल्ल मोशा दुम्माक्त।

22 मोपा पिप आहाज दोशो श्येत जवा, मोशोन परमप्रभु यावे क्येडा डोन दुम्माक्त।

23 मेकोमी आंम कली बुपाइक्ब दमस्कस डा देवता आन कली चढेवा बाक्त। मारदे हना मेकोमी “अराम डा पिप आ देवतापुकीम मेको आन कली वारच पाइक्तेक्म। गो यो मेको आन कली मार मार चढेनुड। मिनु आं कली यो वारच पाइय्यीमील” दे मिम्ता बाक्त। तन्न मेको देवतापुकी मेको कली नु इस्राएली नेल्ल आन कली खतम पोक्तीक दुम्माक्त।

24 मेको नोले आहाजमी परमप्रभु आ खिं डा ग्योंबपुकी खुप्शा, खोइश्शा बिग्रेवा बाक्त। मिनु परमप्रभु यावे आ खिं डा लाप्यो चोक्गा बाक्त। मिनु मेकोमी यरूसलेम तेइ तेइ थानपुकी सेला बाक्त।

25 मिनु यहूदा डा सहर सहरमी डांडा डा थानपुकी सेला बाक्त। अरु देवता आन कली मार मार चढेवा बाक्त। मोपा मेकोमी परमप्रभु यावे, आंम किकी पिपी आन परमप्रभु कली थाम्पा गाइक्पदा बाक्त।

26 मिनु मेकोमी नोले सम्म मार मार पवा नु आ डोंइती नु नोले डा गाक्शो लां नेल्ल, यहूदा नु इस्राएल डा पिप आन किताबम ब्रेक्शो बाक्ब।

27 मिनु आहाज बेक्माक्त। मिनु मुरपुकीम मेको कली यरूसलेम सहरम थिम्मे बाक्त। तन्न मेकोपुकीम मेको कली इस्राएल डा पिप आन कली थिम्तीकेम मथिम्मे बाक्त। मिनु मेको आ पा डा आ तौ हिज्कीयाह पिप दुम्माक्त। २इतिहास २१:२०

## 29

### यहूदा डा पिप हिज्कीयाह

1 हिज्कीयाह पिप दुम्मेनु २५ बर्स दुम्शो बाक्माक्त। मेकोमी यरूसलेमम २९ बर्स सासन पवा बाक्त। मेको आ ममा आ नें अबीयाह बाक्माक्त। मेको जकरिया आ तमी बाक्माक्त।

2 मेकोमी आ किकी पिपी दाऊदम पशो खोदेशो पा परमप्रभु यावे आ डोंइती मार ठीक बाक्मे, मेको पवा बाक्त।

### परमप्रभु आ खिं डा गेय

3 मिनु मेको पिप दुम्शो डोंइती डा बर्स डा डोंइती डा महिनाम मेकोमी परमप्रभु यावे आ खिं डा लाप्योपुकी रोक्शा, मेको आन कली सेल्पदा बाक्त। २इतिहास २८:२४

4 मेकोमी चढेब नु लेवी आन कली पुक्शा पूर्व डा लाडगाम गुम्पाइक्मी बाक्त।

5 मिनु मेकोमी मेको आन कली “लेवीपुकी, आं लोत्र नेनीन। मुल गेपुकी आंम कली परमप्रभु यावे आ डोंइती ठीक सेल्सीन। मिनु परमप्रभु यावे, इन किकी पिपी आन परमप्रभु आ खिं ठीक सेलीन। मिनु परमप्रभु यावे आ बाक्तीक रे ग्रान्ना दिशो नेल्ल गुंइशा ताइक्तीन।

6 मारदे हना इं किकी पिपीम परमप्रभु यावे कली प्रोइशा, परमप्रभु यावे, इं परमप्रभु आ डोंइती मार मरिम्शो बाक्मे, मेको पाम्तेक्म। मेकोपुकीम मेको कली प्रोइशा, मेको आ बाक्तीक आ पबंम मारेइ ममिम्तेम। मेकोपुकीम परमप्रभु यावे आ खिं कली हिरशान मकोब्रेडेम।

7 मेकोपुकीम पिंडी डा लाप्योपुकी यो चोक्तेक्म। बत्ती काप्ताक्म। मेकोपुकीम इस्राएली आन परमप्रभु आ खिंम धूप चोचा नु चोशा चढेचा प्रोइतेक्म।

8 मोपतीके परमप्रभु यावे यहूदा नु यरूसलेम आस पर्वम गाइक्ताक्व। मिनु मेकोमी मेको आन कली आन रागी आ नेक्था डा मुर आन डोंइती ग्रांया दित्चा डा शुक्शी पचा डा नु तोक्चा पुंडसीब सेल्लु। मेको गे आंमा तशो बाक्नीनी।

9 मोपतीके इं आफ तरवारम क्योरशा साइक्चा पुंडसाक्म। मिनु इं तमी तौ नु इं मीश ग्याइश्शा लाइक्चा पुंडसाक्म। २इतिहास २८:५-८

10 मिनु मुल गो परमप्रभु यावे, इस्राएली आन परमप्रभु नु कबल पचा थुं पशो बाक्नुड। मोपा इं पर्वम गाइश्शा बेक्बा कों?

11 मोपतीके आं तौपुकी, मुल देश मपने। मारदे हना गे परमप्रभु यावे आ डोंइती राप्शा आ गेय पचा कली नु मेको कली चढ़ेचा कली योव्रसीशो बाक्नीनी” देमाक्त।

12 मिनु लेवीपुकी गेय पचा कली बोक्मा बाक्त। मेको सु सु बाक्मा बाक्त देशा हना, कोहाथी रे अमासै आ तौ माहाथ, अजारयाह आ तौ योएल, मेरारी रे अब्दी आ तौ कीश नु येहल्लेल आ तौ अजारयाह, गेरशोनी रे जिम्माह आ तौ योआह नु योआह आ तौ एदेन,

13 एली-जाफान रे शिम्री नु येहुएल, आसाफ रे जकरिया नु मत्तन्याह,

14 हेमान रे येहुएल नु शिमेइ, येदुथून रे शेमायाह नु उज्जीएल, मेको लेवीपुकी बाक्मा बाक्त।

15 मिनु मेकोपुकीम आन आन लोकब आन कली खुप्तमे बाक्त। मिनु मेकोपुकीम आंम कली परमप्रभु यावे आ डोंइती ठीक सेल्लसीमा बाक्त। मिनु पिपम परमप्रभु यावेमी देशो खोदेशो पा हुकुम पवा बाक्त। मिनु मेकोपुकीम परमप्रभु यावे आ खिं ओव्रशा, ग्रांया दिशो मार मार गुंडदमे बाक्त।

16 मिनु चढ़ेबपुकी परमप्रभु यावे आ खिं ओव्रमा बाक्त। मोपा ओव्रशा, मेकेर बाक्शो ग्रांया दिशो थोव्रक नेल्ल गुंडशा लाडगाम तेल्ले बाक्त। मिनु लेवीपुकीम मेको गुप्शा, किद्रोन खोल्लसाम लाइश्शा ताइक्तमे बाक्त।

17 मेकोपुकीम डोंइती डा महिना डा डोंइती डा नाक्ती ठीक सेल्लीक गेय पचा गोव्रमे बाक्त। मिनु ८ नाक्तीम मेकोपुकी पिडी सम्म जाक्दीम्मा बाक्त। मिनु अर्को ८ नाक्ती नोले मेकोपुकीम परमप्रभु यावे आ खिं नेल्ले ठीक सेल्लो बाक्मा बाक्त। मिनु मेकोपुकीम डोंइती डा महिना डा १६ नाक्तीम मेको गेय थुम्मे बाक्त।

18 मेको नोले मेकोपुकी पिप हिज्कीयाह आ बाक्तीक लशा “गोपुकीम परमप्रभु यावे शोब्ले लहर पा चोइक्तीक टेबल नु मेको आ मारेइ मारेइ ठीक सेल्ले थुम्तक।

19 मिनु पिप आहाजम पिप पवा ना, परमप्रभु यावे कली प्रोंइशा, तिल्ला वोइश्शो थोव्रकपुकी नेल्ल ठीक सेल्ला, आन आन बाक्तीकेम वोइक्तक। मुल मेको परमप्रभु यावे कली चढ़ेतीक आ डोंइती वोइश्शो बाक्नीम” देमा बाक्त।

20 मिनु पिप हिज्कीयाह सुनी कना बोक्शा, सहर डा ठेयब मुर आन कली पुक्पाइश्शा, परमप्रभु यावे आ खिं ग्येत्थ लमा बाक्त।

21 मेकोपुकीम ७ ओटा ब्यफ, ७ ओटा सांड, ७ ओटा पाठा नु ७ ओटा बोका चाक्गामे बाक्त। मेको नेल्ले राज्य, परमप्रभु यावे आ बाक्तीक नु यहूदा आ पाप आ पर्वम चढ़ेचा कली बाक्मा बाक्त। मिनु पिपम मेको नेल्ल हारून आ चच युइ, चढ़ेब आन कली परमप्रभु यावे आ चढ़ेतीकेम चढ़ेचा, दे हुकुम पवा बाक्त।

22 मेकोपुकीम मेको ब्यफ आन कली क्योरमे बाक्त। मिनु चढ़ेबपुकीम मेको आन हुश ताक्शा चढ़ेतीकेम ब्रुइक्तमे बाक्त। मिनु मेकोपुकीम सांड आन कली क्योरमे बाक्त। मिनु मेको आन हुश ताक्शा चढ़ेतीकेम ब्रुइक्तमे बाक्त। मिनु पाठा आन कली क्योरशा, मेको आन हुश ताक्शा चढ़ेतीकेम ब्रुइक्तमे बाक्त।

23 मिनु मेको नोले मेकोपुकीम पाप आ पर्वम चढ़ेतीक बोका आन कली पिप नु मुर आन डोंइती चाक्गामे बाक्त। मिनु पिप नु मुरपुकीम मेको आन तार आन आन गुइ बोदमे बाक्त। लेवी १६:१५-२२

24 मिनु चढेबपुकीम मेको बोका क्योरशा, आन हुश पाप आ पबर्म चढेतीकेम चढेमे बाक्त। इस्राएली नेल्ल आन पबर्म पाप क्याम्तीक गेय पामे बाक्त। मारदे हना पिपम चोशा चढेतीक नु पाप आ पबर्म चढेतीक इस्राएली नेल्ल आन पबर्म चढेचा माल्ब, दे अरेशो बाक्माक्त।

25 मिनु पिपम लेवी आन कली परमप्रभु यावे आ खिंम बुपकेल नु टेयब नु आइक्च तार पाइश्शो ताप्तीके ताप्चा कली ठीक दुम्पाइक्मी बाक्त। मारदे हना डोंइती दाऊदम, परमप्रभु यावे आ लोव्र ताइब, गाद नु नाथान रे पा मोदेशो शेंशो बाक्माक्त। १इतिहास २५:१

26 मिनु लेवीपुकीम दाऊद आ सेल्शो ताप्तीकपुकी नु चढेबपुकीम तुराही शेशा राम्मा बाक्त।

27 मिनु हिज्कीयाहम चोशा चढेशो चढेतीकेम चढेचा माल्नीम, दे हुकुम पवा बाक्त। मिनु चोशा चढेतीकेम चढेचा गोव्रमेनु, परमप्रभु यावे कली कुम्सो पामे बाक्त। तुराही नु इस्राएल डा पिप दाऊदमी सेल्शो ताप्तीक मेको कुम्सो नु ताप्मे बाक्त। १इतिहास २३:५

28 मिनु खुम्सीशो मुर नेल्ले बाप्शा, परमप्रभु यावे कली टेयब सेल्मे बाक्त। कुम्सो पाइबपुकीम कुम्सो पामे बाक्त। मिनु तुराही ताप्बपुकीम तुराही ताप्मे बाक्त। चोशा चढेतीक मनुम्म सम्म मोदेशो पामे बाक्त।

29 मिनु चढेशो नुम नोले पिप नु मेकेर बाक्ब नेल्लेमी बाप्शा टेयब सेल्मे बाक्त।

30 मिनु पिप हिज्कीयाह नु मेको आ सरकार डा टेयब मुरपुकीम लेवी आन कली दाऊद नु परमप्रभु यावे आ लोव्र पाइब आसाफ आ ब्रेक्शो कुम्सो पा परमप्रभु यावे कली टेयब सेल्पदमे बाक्त। मोपा मेकोपुकीम थाम्पा ग्येरसीशा परमप्रभु यावे आ डोंइती बाप्शा टेयब सेल्मे बाक्त। २इतिहास २३:१८

31 मिनु हिज्कीयाहम “मुल गे आंमा परमप्रभु यावे कली जिम्मा गेसाक्नी। गेपुकीम चढेतीक नु ‘गे रिम्शो पाइब बाक्नीनी’ दे चढेतीके चाक्शा परमप्रभु यावे आ खिंम जाक्कीन” देंमाक्त। मोपतीके खुम्सीशो मुरपुकीम चढेतीक नु “गे रिम्शो पाइब बाक्नीनी” दे चढेतीक कुरशा जाक्मा बाक्त। मिनु सुडमी ग्येरसीशा चोशा चढेतीके चाक्चा दाक्ताक्म हना, मेको पामे बाक्त।

32 मिनु मेको खुम्सीशो मुरपुकीम चाक्शो चोशा चढेतीक हिक्शोनु, ७० ओटा ब्यफ, सहे का सांड नु सहे निक्शी पाठा बाक्मा बाक्त। मिनु मेको नेल्ल परमप्रभु यावे कली चोशा चढेचा कली बाक्मा बाक्त।

33 मिनु परमप्रभु यावे कली चढेचा कली गेशो ६ सहे ब्यफ नु हजार सां भेडा बाक्मा बाक्त।

34 तन्न चढेबपुकी इच्का ला बाक्तीके मेको चोशा चढेशो नेल्ल आन कुशुल उक्ने मचाप्मे बाक्त। मोपतीके मेको आन लोकब लेवीपुकीम मेको गेय नेल्ल मनुम्म सम्म नु अरु चढेबपुकीम आंम कली परमप्रभु यावे आ डोंइती ठीक मसेल्मे सम्म वारच पामे बाक्त। मारदे हना आंम कली परमप्रभु यावे आ डोंइती ठीक सेल्चामी चढेब आन क्येडा लेवीपुकी थम होस पाइक्बाक्मा बाक्त। २इतिहास ३:३, १६, १७

35 चोशा चढेतीक नेल्ल नु दुशा बाक्चा आ पबर्म चढेशो आ बोंसो नु चोशा चढेशो कली तूचा थोव्रक चढेतीक शुश बाक्मा बाक्त। मोपा परमप्रभु यावे आ खिंम डा पतीक गेय डोंइती डा खोदेशो पा रिम्शो दुम्माक्त। लेवी ३:१६; गन्ती १५:४-१०

36 मिनु हिज्कीयाह नु मुर नेल्ल थाम्पा ग्येरसमा बाक्त। मारदे हना परमप्रभुम आ मुर आन कली पशो रीब पा छक लाक्चा डा पा दुम्माक्त।

## 30

### पास्सा चाड मानेशो

1 मिनु हिज्कीयाहम इस्राएली नु यहूदा डा मुर आन कली “यरूसलेमम बाक्शो परमप्रभु यावे आ खिंम परमप्रभु यावे, इस्राएली आन परमप्रभु कली पास्सा चाड मानेश जाक्कीन” दे ब्रेत्ता बाक्त। मिनु मेकोमी एफ्राइम नु मनस्से डा मुर आन कली यो चिठी ब्रेक्शा ब्रेत्ता बाक्त। २इतिहास ३५:१

2 मिनु पिप, आ सरकार डा टेयब मुर नु यरूसलेमम खुम्सीशो मुर नेल्लेम निक्शी महिनाम पास्सा चाड मानेचा कली लोव्र गारपदमे बाक्त।

3 मेकोपुकीम डोंइती परमप्रभुम देशो खोदेशो पा मानेने मचाप्शो बाक्मा बाक्त। मारदे हना शुश चढेबपुकीम आंम कली परमप्रभु यावे आ डोंइती ठीक मसेल्सीशो बाक्मा बाक्त। मिनु मुरपुकी यो यरूसलेमम मदेल्लो बाक्मा बाक्त।

4 मिनु पिप नु खुम्सीशो मुर नेल्लेमी मेको चाड मानेतीक लोत्र आ पर्वम “ठीक बाक्ब” देमा बाक्त।

5 मिनु मेकोपुकीम दक्खिन डा बेयर-शेबा रे उत्तर डा दान सम्म डा इस्राएली नेल्ल आन कली परमप्रभु यावे, इस्राएली आन परमप्रभु आ पर्वम पास्सा चाड मानेचा कली यरूसलेमम जाक्चा माल्मा बाक्त। एको क्येडा डोंइती इश्का मुर दुम्शा, एको चाड ममानेशो बाक्मा बाक्त।

6 मिनु पिप नु आ सरकार डा ठेयब मुरुम ब्रेक्शो चिठी चोक्ब मुरपुकी पिप आ देशो खोदेशो पा यहूदा नु इस्राएलम लमा बाक्त। मिनु मेको चिठीम मार ब्रेक्शो बाक्माक्त देशा हना “इस्राएली परमप्रभु यावे, इन किकी पिपी अब्राहाम, इसहाक नु इस्राएल आन परमप्रभु गे लेत्तीन। मेना मेकोमी अस्सुर डा पिपम मलाइश्शो लीशो मुर आन कली लेशा कोत्रब। इस्राएल याकूब आ नें बाक्ब।

7 गेपुकी इन किकी पिपी नु आंम मुर खोदेशो मदुमीन। मेकोपुकीम परमप्रभु यावे, इन किकी पिपी आन परमप्रभु कली प्रोंइतेक्म। मोपतीके परमप्रभु यावेमी मेको आन कली खतम सेला बाक्त। मेको आंमा तशो बाक्नीनी।

8 गेपुकी इन किकी पिपी खोदेशो पा काइ मटीब मदुमीन। तन्न परमप्रभु यावे कली आ अरेशो टिशा, आ बाक्तीकेम जाक्कीन। मिनु ‘मेको गेना हना यो आं बाक्तीकेम बाक्ब’ देशो बाक्ब। गे परमप्रभु यावे कली गेय पने। मोपा इन पर्वम आ गाइश्शो बेक्बा, कों?

9 गे परमप्रभु यावे गे लेत्तीनी हना, ग्याइश्शा लाइक्चा पुंडसीशो इन खिं खिं डा मुर नु इन आलपुकीम ग्याइक्ब मुर रे शिशी तशा, मेकोपुकी एको रागीम लेश्शा जाक्नीम। मारदे हना परमप्रभु यावे, इन परमप्रभु दाक्ब नु शिशी पाइब बाक्ब। गेपुकी मेको गे लेत्तीनी हना, मेको यो इन गे लेप्ब” दे ब्रेक्शो बाक्माक्त।

10 मिनु मेको चिठी चोक्बपुकी एफ्राइम नु मनस्से आस सहर सहर नेल्ल हिरशा जबूलून सम्म जाक्दीम्मा बाक्त। तन्न मुरपुकीम मेको आन कली रिश्शा शुक्शी पामे बाक्त।

11 मो हना यो आशेर, मनस्से नु जबूलून डा मुर का निक्शी ब्रेम्शो दुम्शा यरूसलेम लमा बाक्त। २इतिहास ११:१६

12 परमप्रभु यावेमी यहूदा डा मुर यो थुं का दुम्पदा बाक्त। मिनु मेकोपुकीमी पिप नु सरकार डा ठेयब मुर आन कली देशो, परमप्रभु यावे आ लोत्र खोदेशो पा पामे बाक्त।

13 मिनु शुश मुर महिना निक्शीम बोर्ब ओरुती मसुप्शो शोब्ले डा चाड मानेचा कली यरूसलेमम जाक्मा बाक्त। मेकेर शुश मुर खुम्सीशो बाक्मा बाक्त।

14 मिनु मेकोपुकीम यरूसलेम आ एर ओंथ बाक्शो चढेतीकपुकी नु धूप चोतीक प्रेशा, किद्रोन खोल्साम लाइश्शा ताइक्तमे बाक्त।

15 मिनु मेकोपुकीम महिना निक्शी डा १४ नाक्ती पास्सा चाड मानेतीक पाठा क्योरमे बाक्त। मिनु चढेब नु लेवी परमप्रभु यावे आ डोंइती आंम कली ठीक मसेल्तीके मुने दोक्शो बाक्मा बाक्त। मिनु मुल आंम कली ठीक सेल्शा, परमप्रभु यावे आ खिंम चोशा चढेतीक चढेमे बाक्त। गन्ती ९:१०-१३

16 परमप्रभु आ मुर मोसा आ ब्रेक्शो अरेशो लोत्र खोदेशो पा मेको आन गेय पतीकेम बाक्मा बाक्त। मिनु लेवीपुकीम चाक्शो हुश चढेबपुकीम ताक्शा बुइक्तमे बाक्त।

17 तन्न मेको शुश खुम्सीशो मुर परमप्रभु यावे आ डोंइती आंम कली ठीक सेल्ले मचाप्शो बाक्मा बाक्त। मोपतीके लेवीपुकीमी मेको मुर आन पर्वम आन पास्सा चाड डा पाठा क्योरचा माल्मा बाक्त।

18 मिनु एफ्राइम, मनस्से, इस्राका नु जबूलून रागी रे जाक्शो शुश मुरपुकी परमप्रभु यावे आ डोंइती आंम कली ठीक मसेल्सीशो बाक्मा बाक्त। मो हना यो मेकोपुकीम परमप्रभु यावे अरेशो मपथु, पास्सा चाड मानेमे बाक्त। प्रस्थान १२:-

19 तन्न हिज्कीयाहम मेको आन पर्वम “परमप्रभु यावे गे शिशी पाइब बाक्नीनी। सु सुमी आन थुं नेल्लेमी इन कली, परमप्रभु यावे, आन किकी पिपी आन परमप्रभु खोइक्चा दाक्बा नु इन देशो खोदेशो

पा आंम कली ठीक सेल्ले मचाप्शो बाक्मा, मेको आन कली मारेइ मपन” दे पुना बाक्त।

20 मिनु परमप्रभु यावेम हिज्कीयाह आ पुंइशो लोत्र नेना बाक्त। मिनु मुर आन कली सापाइक्मी बाक्त। २इतिहास ७:१४

21 मिनु यरूसलेमम जाकब इस्राएली नेल्लेमी ७ नाक्त सम्म थाम्पा ग्येरसीशा बोरब ओरूती मसुप्शो शोब्ले डा चाड मानेमे बाक्त। मिनु लेवी नु चढेबपुकीम टेयब सेंदाम कुम्सो पा, ताप्तीक ताप्शा, नाक्त किंत किंत परमप्रभु यावे कली टेयब सेल्लेमे बाक्त।

22 मिनु हिज्कीयाहम परमप्रभु यावे आ गेय रिम्शो पस जोकब लेवी आन कली लोत्र पा आन थुं बारपाइक्मी बाक्त। मिनु मुरपुकीम मेको चाड डा जचा थोत्रक ७ नाक्ती सम्म जना जन बाक्मा बाक्त। मेकोपुकीम दुशा बाक्चा आ पर्वम चढेतीक चढेशा, परमप्रभु यावे, आन किकी पिपी आन परमप्रभु कली “गे रिम्शो पाइब बाक्नीनी” दे ग्येरसीशा बाक्मा बाक्त।

23 मिनु खुम्सीशो मुर नेल्लेमी अर्को ७ नाक्त सम्म चाड मानेचा कली लोत्र गारपदमे बाक्त। मोपतीके मेकोपुकीम अर्को ७ नाक्ती सम्म यो ग्येरशा मेको चाड मानेमे बाक्त।

24 यहूदा डा पिप हिज्कीयाहम मेको खुम्सीशो मुर आन कली हजार का ब्यफ नु ७ हजार भेडा चढेचा कली गेमी बाक्त। मिनु सरकार डा टेयब मुरपुकीम मेको खुम्सीशो मुर आन कली हजार का ब्यफ नु १० हजार भेडा गेमी बाक्त। शुश चढेबपुकीम यो आंम कली परमप्रभु यावे आ डोंइती ठीक सेल्लेमीमा बाक्त।

25 मिनु यहूदा डा खुम्सीशो मुर नेल्ले, चढेब नु लेवीपुकी नेल्ल, इस्राएल रे जाक्शो मुरपुकी नु इस्राएल रे प्रोक्शो यहूदाम बाक्ब मुर नेल्ले ग्येरसीशो बाक्मा बाक्त।

26 मोपा यरूसलेमम थम टेयब ग्येरसीतीक दुम्माक्त। मेको मोदेशो इस्राएल डा पिप दाऊद आ तौ सोलोमन आ पाला रे गेनायो मदुम्शो बाक्माक्त।

27 मिनु चढेबपुकी नु लेवीपुकी बोक्शा मुर आन कली आसीक गेमे बाक्त। मेको आन पुंइशो लोत्र परमप्रभु यावे आ बाक्तीक स्वर्ग सम्म नैसे बाक्त।

## 31

### मुरपुकीम थान प्रेशो

1 मिनु मेको नेल्ल नुप्शा नोले यरूसलेम जाक्शो इस्राएली नेल्ल यहूदा डा सहरपुकीम लशा, पूजा पतीक खुक्शो फुल्लु प्रेत्मे बाक्त। मूर्ति पाइश्शो थाम खोल्मे बाक्त। यहूदा, बेन्यामीन, एफ्राइम नु मनस्से रागी नेल्ल डा डांडा डा थान बुल बाल उइश्शा ताइक्तमे बाक्त। मिनु नोले इस्राएली आन आन सहर नु आन आन बाक्तीकेम लेम्मा बाक्त। २इतिहास २९:५; ब्यवस्था ७:५; २राजा १८:४

### चढेब आन भाग

2 पिप हिज्कीयाहमी चढेब नु लेवी आन कली आन गेय गेना पचा दे पालो पालो पा वोइक्पदा बाक्त। मिनु चढेब नु लेवी आन कली परमप्रभु यावे कली चोशा चढेतीक चढेचा नु दुशा बाक्चा आ पर्वम चढेचा, परमप्रभु यावे कली “गे रिम्शो पाइब बाक्नीनी” दे कुम्सो पा, टेयब सेल्लेतीक कुम्सो नु परमप्रभु यावे आ बाक्तीक डा लाप्चो आ डोंइती गेय पचा कली आन पालो योक्शा गेशो बाक्त।

3 मिनु पिपम आ गोठ रे चोशा चढेचा कली मार गेशो बाक्माक्त देशा हना, नाकदो डा चोशा चढेतीके, सुनी डा चोशा चढेतीके, नाइक्तीक नाक्त डा चोशा चढेतीके, औंसी डा चोशा चढेतीके नु देशो चाड नेल्ल कली चोशा चढेतीक गेशो बाक्माक्त। परमप्रभु यावे आ अरेशो लोत्र दोपा ब्रेक्शो बाक्मे, मोपा पवा बाक्त। गन्ती २८:-

4 मिनु चढेब नु लेवीपुकीम परमप्रभु यावे आ अरेशो लोत्र डा गेय पस डा पस बाक्मल, दे पिपम यरूसलेमम बाक्ब मुर आन कली मेको आन गेचा माल्शो भाग चढेब नु लेवी आन कली गेचा माल्मीम, दे हुकुम पवा बाक्त।

5 मिनू मुरपुकीम पिप आ हुकुम नेन्मे चोटीन आन नेल्ल क्येडा डोंडती डा मीशो नु सिशशो अन्न, नक अडगुर शांबु, तेल, खुदो नु आन रूम सिशशो मार मार शुश चाकशा गेमे बाक्त। मेकोपुकीम आन मारेड मारेड के १० भागम भाग का चाकगमे बाक्त। प्रस्थान २३:१९; ब्यवस्था १४:२२-२३

6 मिनू इस्राएल नु यहूदा डा सहरपुकीम बाक्ब मुरपुकीम यो आन १० भाग डा भाग का बी ब्यफ नु क्यारश भेडा चाकगमे बाक्त। परमप्रभु यावे, आन परमप्रभु कली गेशो थोव्रकरे १० भाग डा भाग का चाकशा तेलमे बाक्त। लेवी २७:३२

7 मेकोपुकीम बर्स डा महिना सांमी चाकशा तेलचा गोव्रमे बाक्त। मिनू ७ महिनाम चाक्ने थुम्मे बाक्त।

8 मिनू हिज्कीयाह नु मेको आ सरकार डा ठेयब मुर जाक्शा, मेको तेलशो थोव्रक तशा, परमप्रभु यावे नु आ मुर इस्राएली आन कली “गे रिम्शो पाइब बाक्नीनी” देंमा बाक्त।

9 मिनू हिज्कीयाहमी मेको तेलशो थोव्रक आन पर्वम चढेब नु लेवी आन कली हिल्लो हिक्सी पामी बाक्त।

10 मिनू सादोक आ खिं डा मुर, ठेयब चढेब अजारयाहम “मुरपुकीम परमप्रभु यावे आ खिं कली आन भाग चाकगमे रे आंइ कली जचा गाप्त। मिनू शुश मार मार हेंशो यो बाक्ब। मारदे हना परमप्रभु यावेम आ मुर आन कली शुश आसीक गेशो बाक्ब। मिनू एको इश्का मार मार हेंशो यो बाक्ब” देंमाक्त।

11 मिनू नोले हिज्कीयाहमी “परमप्रभु यावे आ खिंमी मार मार वोइक्तीक कोठापुकी सेलीन” दे हुकुम पवा बाक्त। मिनू मेको सेल्मे बाक्त।

12 मिनू मुर नेल्लेमी जोल मपथु, आन १० भाग डा भाग का नु परमप्रभु कली गेशो नेल्ल चाकगमे बाक्त। मेको १० भाग डा भाग का ताक्शो कोव्रब ठेयब लेवी कोनन्याह बाक्माक्त। मिनू मेको आ लोक्ब शिमेड चहिं मेको आ दी डा ठेयब मुर बाक्माक्त।

13 मिनू पिप हिज्कीयाह नु परमप्रभु आ खिं डा ठेयब मुर अजारयाहमी कोनन्याह नु आ लोक्ब शिमेड आस कली वारच पाइब येहीएल, अजजीयाह, नाहाथ, आसाहेल, येरीमोथ, योजाबाद, एलीएल, इस्माक्याह, माहाथ नु बेनायाह आन कली योव्रशा वोइक्पदसे बाक्त।

14 मिनू इम्नाह आ तौ कोरे पूर्व डा लाप्चो खाल पाइब लेवी बाक्माक्त। मेकोमी मुर आन परमप्रभु कली ग्येरशा चढेतीक गेशो मारेड मारेड कोव्रब बाक्माक्त। मिनू चढेशो, चाक्शो मारेड मारेड परमप्रभु यावे कली नु सु सु कली योक्चा माल्बा, मेको नेल्ल कोव्रब बाक्माक्त।

15 मिनू कोरे कली चढेब आन सहरम वारच पाइब एदेन, मीन्यामीन, येशुआ, शेमायाह, अमारयाह नु शेकन्याह बाक्मा बाक्त। मेकोपुकीम पालो पालो पा गेय पाइब चढेब खाल्पा नु टिटा नेल्ल आन कली खाल का डा पा थमा पा जोल मपथु, योक्तीक गेय पामे बाक्त।

16 मोपतीके सु सु आन भाग गेचा पुंडसीब बाक्मा, परमप्रभु यावे आ खिं डा गेय पाइब परमप्रभु यावे आ लोव्र खोदेशो पालो पालो पा आन नें ब्रेक्तीक कागजम ब्रेक्शो बाक्मा बाक्त। बर्स सां लाक्शो वोंडश आल आन नें ब्रेक्शो बाक्माक्त।

17 मेको चढेब आन खिं खिं कोव्रशा, ब्रेक्सीशो बाक्मा बाक्त। लेवीपुकी २० बर्स लाक्शो, आन पचा डा गेय नु पालो कोव्रशा ब्रेक्शो बाक्मा बाक्त।

18 चढेब, आन आइक्च आल, आन मीश, आन तमी तौ नेल्ल आन नें ब्रेक्शो बाक्माक्त। मारदे हना मेकोपुकीम “परमप्रभु यावे आ गेय ला पाइनीकी” दे थुं पशो बाक्मा बाक्त।

19 मिनू हारून आ तौ डा चढेब वोंडश मुरपुकी सहर आन नेक्शा डा योक्तीकेम बाक्शो, चढेब आन दातेमी सु सु वोंडश मुर आन नें ब्रेक्शो बाक्मा, मेको आन भाग गेचा पुंडसमा बाक्त। मिनू चढेब नु लेवी आन दातेमी सु सु आन नें ब्रेक्शो बाक्मा, मेको गेचा पुंडसमा बाक्त।

20 मिनू हिज्कीयाहम यहूदा नेल्लेमी मोदेशो पवा बाक्त। मेकोमी परमप्रभु यावे, आ परमप्रभु आ डोंडती मार रिम्शो, मार ठीक नु थमा सुइक्चा पुंडसीशो बाक्मे, मेको पवा बाक्त।

21 मेकोमी परमप्रभु यावे आ खिं डा गेय पतीके, परमप्रभु यावे आ अरेशो लोव्र नु आ शेंशो तुइक्तीकेमी आ परमप्रभु कली आ थुं नेल्लेमी मला बाक्त। मिनू आ पशो नेल्लेमी रिम्शो दुम्माक्त।



भजन संग्रह १:३

## 32

सन्हेरीबम लडाइ पशो

२राजा १८:१३-१९, ३७; यसैया ३६:-; यसैया ३७:-

1 मिनू हिज्कीयाहम मेको रिम्शो गेय नेल्ले पने थुमा नोले, अस्सुर डा पिप सन्हेरीब यहूदा ओव्रशा "यहूदा डा बोल्यो सहरपुकी आंम के सेल्लुड" दे मिम्शा, मेको सहरपुकी आ नेक्था ताम्बु कीडा बाक्त।

2 मिनू हिज्कीयाहमी सन्हेरीब जाक्शा, यरूसलेम कली लडाइ तोचा चिक्शो तवा चोटीन

3 मेकोमी सहर डा लाडगा डा ब्वाक्कु बुक्तीके तेक्चा, दे सरकार डा ठेयब मुर नु कप्तानपुकी नु सल्ला पवा बाक्त। मिनू मेकोपुकीमी पिप कली वारच पामे बाक्त।

4 मेकोपुकीम शुश मुर खुप्शा, आन रागी रे ब्वाक्कु बुक्तीक नु खोल्सा नेल्ल तेक्गमे बाक्त। मिनू मेकोपुकीम "अस्सुर डा पिपपुकी एक जाक्शा, शुश ब्वाक्कु तूचा मतामेक्ल" देंमा बाक्त।

5 मिनू हिज्कीयाहम शुश बोल पा सहर डा ब्रेशो गारो नेल्ल सेल्पदा बाक्त। मिनू आ तार लाइशो खिंपुकी सेल्पदा बाक्त। मिनू मेकोमी गारो डा लाडगा गे अर्को गारो सेल्पदा बाक्त। मिनू दाऊद आ सहर डा गारो तिक्चा कली खप तेल्लपदा बाक्त। मिनू मेकोमी शुश या नु तेक्तीक यो सेल्पदा बाक्त। २इतिहास २५:२३;

6 मेकोमी लडाइ पाइब आन कप्तान योव्रशा, मेको आन कली सहर डा ठेयब लाप्चो आ डोंइती डा दिममी पुक्शा, मेको आन कली आन थुं बारपाइशशा

7 "बोल्यो नु महिंभ दुमीन। अस्सुर डा पिप नु मेको आ चाक्शो शुश मुर तशा, महिनीन। मारदे हना मेकोपुकी नु बाक्शो क्येडा गोपुकी नु बाक्शो का थम ठेयब बाक्ब।

8 मेको नु शुश मुर ला बाक्नीम। तन्न गोपुकी नु परमप्रभु यावे, इं परमप्रभु बाक्ब। मेकोमी इं कली वारच पा इं पा डा लडाइ पाइब" दे यहूदा डा पिप हिज्कीयाहमी मुर आन थुं बारपदा बाक्त। येरमीया १७:५-६

9 मेको नोले अस्सुर डा पिप सन्हेरीबम आ लडाइ पाइब लाकीशम बाक्मानु, यहूदा डा पिप हिज्कीयाह नु यरूसलेम डा मुर नेल्ल आन कली लोव्र नेंपाइक्चा कली मुरपुकी सोइक्ता बाक्त।

10 मिनू मेकोपुकीम "अस्सुर डा पिप सन्हेरीबम मार लोव्र पाइब देंशा हना, गे एर ओंथ रे पुम्शो यरूसलेम सहरम दोपा ब्रोंइने चाप्नीनी, दे सु कली थमा सुइक्नीनी?

11 पिप हिज्कीयाहमी 'परमप्रभु यावे, इं परमप्रभु कली अस्सुर डा पिप आ गुइ रे प्रोंइब, दे जोल मपवा? तन्न मेकोमी इन बाक्तीकेमीन अन्काल नु ब्वाक्कु तूतू दाक्पाइशशा, इन कली बेक्पाइक्चा कली मोदेंशो लोव्र पशो बाक्ब।

12 मार, मेको हिज्कीयाहमी डांडा डा थान नु आ चढेतीक बुल बाल एशशा खतम मपोक्पदा? मिनू यहूदा नु यरूसलेम डा मुर नेल्ल आन कली, चढेतीक काम पूजा पा नु मेकेर ला चढेचा' मदेंम डा?

13 गो नु आं किकी पिपीम अर्को रागी जात जात डा मुर आन कली मार पाइक्का, मेको गोपुकीम मतुइशशो बाक्नीनी डा? मार, मेको रागी रागी डा मुर आन देवताम मेको रागी आन कली आं गुइ रे प्रोंइने चाप्मे डा?

14 आं किकी पिपीम खतम पोक्शो रागी रागी डा मुर आन देवता आन दाते डा तेको देवताम आं गुइ रे आ मुर आन कली प्रोंइने चबा डा? मिनू दोपा इन परमप्रभुमी इन कली आं गुइ रे प्रोंइने चाप्बा?

15 मोपतीके हिज्कीयाहम इन कली जोल पा दूली लां खोइक्पाइक्चा मगेन। मेको कली थमा मसुतीन। मिनू तेकोइ देवतापुकीम आन रागी नु राज्य डा मुर आन कली आं किकी पिपी नु आं गुइ रे प्रोंइने मचाप्शो बाक्तेक्म हना, इन परमप्रभुमी इन कली आं गुइ रे दोपा प्रोंइने चाप्बा डा? देंशो बाक्ब मतीन" देंमाक्त।

16 मिनू सन्हेरीब आ गेय पाइबपुकीमी परमप्रभु यावे नु मेको आ गेय पाइब हिज्कीयाह आ पर्बम चिनु मरिम्शो लोव्र तेम्शा, लोव्र पामे बाक्त।

17 पिप सन्हेरीबम परमप्रभु यावे, इस्राएली आन परमप्रभु कली यो तोक्शा लोत्र पा चिठी ब्रेक्शो बाक्माक्त। मिनु मेको चिठीम मार ब्रेक्शो बाक्माक्त देशा हना “दोपा अर्को रागी रागी डा मुर आन देवतापुकीम आन मुर आन कली आं गुड रे प्रॉइने मचाप्मे, मोपा हिज्कीयाह आ परमप्रभुमी यो आ मुर आन कली आं गुड रे प्रॉइने मचाप्ब” दे ब्रेक्शो बाक्माक्त।

18 मिनु मेकोपुकीम सहर आन के सेल्चा कली यरूसलेम डा गारो तार राप्ब मुर आन कली हिंच कौइचा कली ठेयब सेंदा पा यहूदी आन लोत्रमी मेको चिठीम ब्रेक्शो लोत्र पा ग्रीमा बाक्त।

19 मेकोपुकीम मुर आन गुडम सेल्शो रागी डा देवता आन कली खोदेशो पा यरूसलेम डा परमप्रभु कली तोक्शा लोत्र पामे बाक्त।

### सन्हेरीब कली मुने दोक्पाइशो

20 मेना पिप हिज्कीयाह नु आमोज आ तौ परमप्रभु यावे आ लोत्र पाइब यसैयाम परमप्रभु कली ठेयब सेंदा पा पुन्से बाक्त।

21 मिनु परमप्रभु यावेम आ स्वर्ग डा गेय पाइब का अस्सुर डा पिप आ बाक्तीकेम सोइशशा, आ बोल्यो लडाइ पाइबपुकी, आ कप्तानपुकी नु आ ठेयब मुरपुकी नेल्ल साइक्पदा बाक्त। मिनु सन्हेरीब मुने दोक्शा आ रागी लेम्माक्त। मिनु मेको आ देवता थान ओव्रमेनु, आ तौ का निक्शीमी तरवारम क्योरशा सदमे बाक्त।

22 मोपा परमप्रभु यावेम हिज्कीयाह नु यरूसलेमम बाक्ब मुर आन कली अस्सुर डा पिप सन्हेरीब नु मेको आन जोरी सत्रु नेल्ल आन गुड रे प्रोना बाक्त। परमप्रभु यावेमी मेको रागी कली नाइक्चा गेवा बाक्त।

23 मिनु शुश मुरपुकीम यरूसलेमम परमप्रभु यावे कली मार मार चाक्गमे बाक्त। मिनु यहूदा डा पिप हिज्कीयाह कली शुश शोप चाक्गमे बाक्त। मोपा रागी रागी डा मुर नेल्लेमी मेको कली मान पामे बाक्त।

### हिज्कीयाह रोइ पशो

२राजा २०:-; यसैया ३८:-; यसैया ३९:-

24 मिनु नोले हिज्कीयाह शुश रोइ पा बेक्चा चिक्ता बाक्त। मिनु मेकोमी परमप्रभु यावे कली पुना बाक्त। मिनु परमप्रभु यावेमी मेको कली लोत्र लेशशा, चिन्ड का गेवा बाक्त।

25 तन्न हिज्कीयाहमी परमप्रभु यावेमी मेको कली रिम्शो पशोमी “गे रिम्शो पाइब बाक्नीनी” मदेंथु ठेयब लेशशो दुम्माक्त। मोपतीके परमप्रभु यहूदा नु यरूसलेम आ पर्वम गाइक्ता बाक्त।

26 मिनु हिज्कीयाह नु यरूसलेम डा मुर नेल्लेम ब्रेम्शो सेल्सीमे बाक्त। मोपतीके परमप्रभु यावे हिज्कीयाह आ पालाम मेकोपुकी नु मगाइक्ता बाक्त।

### हिज्कीयाह आ नोले डा नाक्ती

27 हिज्कीयाह शुश शोप पाइशो नु मान ताइब मुर दुम्शो बाक्माक्त। मेकोमी आ सुन चांदी, हीरापुकी, मस्लापुकी तेक्तीकपुकी नु अरु मार मार शुश क्येट लाइब वोइक्तीक खिंपुकी सेला बाक्त।

28 शुश अन्न, नक अडगुर शांबु नु तेल वोइक्तीक खिंपुकी सेला बाक्त। मिनु शुश बी ब्यफ नु क्यारश भेडा आन कली ठेयब गोटपुकी सेला बाक्त।

29 मेकोमी आंम कली सहरपुकी सेला बाक्त। मेको के बी ब्यफ नु क्यारश भेडा शुश बाक्मा बाक्त। मारदे हना परमप्रभुम मेको कली थमा पा शुश शोप गेशो बाक्माक्त।

30 मेको हिज्कीयाहमी गिहोन आ आइक्था डा बुक्शो ब्वाक्कु तेक्शा उइ दाऊद आ सहर आ पच्छिम गे शाइक्पाइशो बाक्माक्त। मेको आ पशो गेय नेल्ले रिम्शो दुम्शा, सोशो बोशो दुम्माक्त।

31 मिनु बेबीलोन डा सरकार डा ठेयब मुर आन सोइशशो मुर मेको रागीम तांइसीशो छक लाक्चा चिन्ड आ पर्वम हिल्लो पथ जाक्मा बाक्त। तन्न परमप्रभुम हिज्कीयाह कली नाक्शा कोत्रचा कली नु मेको आ थुंम बाक्शो मार बाक्बा, दे तुइक्चा कली वारच मपवा बाक्त।।

### हिज्कीयाह बेक्शो

32 हिज्कीयाह आ नोले डा गेय नु आ रिम्शो पशो आमोज आ तौ परमप्रभु यावे आ लोव्र ताडब यसैया आ यहूदा डा पिप आन किताबम ब्रेक्शो बाक्ब।

33 मिनु हिज्कीयाह बेक्माक्त। मिनु मुरपुकीम मेको कली दाऊद आ चच युइ आन कली थिम्तीक देम्सीलो मेर थिम्मे बाक्त। मिनु मेको बेक्मेनु, यहूदा नु यरूसलेम डा मुर नेल्लेमी मान पामे बाक्त। मिनु मेको आ नोले आ तौ मनस्से पिप दुम्माक्त। २इतिहास १६:१४

## 33

### यहूदा डा पिप मनस्से

२राजा २१:१-१८

1 मनस्से पिप दुम्मेनु, १२ बर्स दुम्शो बाक्माक्त। मेकोमी यरूसलेमम ५५ बर्स सासन पवा बाक्त।

2 मेको परमप्रभु यावेम इस्त्राएली आन डोंइती रे खेरशो रागी रागी डा मुर आन ग्रान्रा दिशो लांम गाक्माक्त। मिनु परमप्रभु यावे आ डोंइती मार मरिम्शो बाक्मे, मेको पवा बाक्त। ब्यवस्था १८:९

3 मेकोमी आ आफ हिज्कीयाहम खतम पोक्शो डांडा डा थान लेंशा सेला बाक्त। मिनु मेकोमी बाल देवता आन कली चढेतीक सेला बाक्त। मेकोमी मूर्ति पाइशो थाम यो सेला बाक्त। मेकोमी सरीड डा सोरुल आन कली पूजा पा बाप्शा, सेउ पवा बाक्त। २राजा १८:४

4 मेकोमी परमप्रभु यावे आ खिंम चढेतीकपुकी सेला बाक्त। मेको खिं आ पर्वम परमप्रभु यावेम “यरूसलेमम आं नें गेना हना यो लीब” देशो बाक्माक्त। ब्यवस्था १२:५, ११; १राजा ९:३

5 मेकोमी सरीड डा सोरुल आन कली परमप्रभु यावे आ खिं डा लाडगा निम्फाम चढेतीक सेला बाक्त।

6 मेकोमी आ तौ कली बेन-हिन्नोम आ बेसीम चोशा चढेवा बाक्त। मन्तर तन्तर, टुना मुना पा नु लिंक्नु कोव्रडा बाक्त। मेकोमी टुना मुना पा नु बेक्शो मुर नु लोव्र पवा बाक्त। मिनु जादू कली गेय पपदा बाक्त। मोपा परमप्रभु यावे आ डोंइती थम मरिम्शो पवा बाक्त। मिनु मेको कली गाइक्पदा बाक्त। २इतिहास २८:३; लेवी २०:६

7 मेकोमी मुपाइशो मूर्ति परमप्रभु आ खिंम वोइक्पदा बाक्त। मेको खिं आ पर्वम परमप्रभुम दाऊद नु आ तौ सोलोमन आस कली “गो इस्त्राएल डा थर नेल्ल आन दाते रे यरूसलेम कली योव्रता। मिनु यरूसलेमम बाक्शो एको खिंम गेना हना यो आं नें वोइक्नुड।

8 मेकोपुकीम मोसामी गेशो आं शेशो अरेशो लोव्र नेल्ल पशा, फुल्लुम मुशा ब्रेक्शो लोव्र नु निसाफ पतीक लोव्र होस पा रिम्शो पा पाम्तेक्म हना, गो आन किकी पिपी आन कली गेशो इस्त्राएल रागी रे इस्त्राएली आन कली मयुंडनुडमी” देशो बाक्माक्त।

9 मनस्सेम यहूदा नु यरूसलेम डा मुर आन कली थम दूली लां खोइक्पाइशो बाक्माक्त। परमप्रभु यावेमी इस्त्राएली आन डोंइती खतम पोक्शो रागी रागी डा मुर आन क्येडा यो शुश मरिम्शो पपाइशो बाक्माक्त।

10 परमप्रभु यावेम मनस्से नु आ मुर आन कली लोव्र पवा बाक्त। तन्न मेकोपुकी मबिस्समा बाक्त।

11 मोपतीके परमप्रभु यावेम मेकोपुकी नु लडाइ पपाइक्चा कली अस्सुर डा पिप आ लडाइ पाइब आन कप्तान आन कली चाक्मी बाक्त। मिनु मेकोपुकीम मनस्से कली ग्याइशशा मेको आ शोव्रम बोल्सी ब्वेक्तमे बाक्त। मिनु मेको कली कांसा के साडलोम पाइशशा बेबीलोन लदमे बाक्त।

12 मिनु मेको मोपा श्येत जवानु, परमप्रभु यावे, आ परमप्रभु आ शिशी मला बाक्त। मिनु आ किकी पिपी आन परमप्रभु आ डोंइती आ थुं ब्रेम्पदा बाक्त।

13 मिनु मेकोमी परमप्रभु कली पुना बाक्त। मिनु परमप्रभुम मेको आ पुंइशो नेंशा, लेंशा यरूसलेमम चाक्गा बाक्त। मिनु लेंशा मेकेर डा पिप सेला बाक्त। मिनु मोपा मनस्सेम परमप्रभु यावे, थमा परमप्रभु बाक्ब, दे तुइक्ता बाक्त। १राजा १८:३९

14 मिनू मेको लेशशा नोले दाऊद आ सहर डा लाङगाम अर्को गारो गिहोन आ पच्छिम गे सेला बाक्त। मेको ओफेल हिरशा, डांड लापचो सम्म सेला बाक्त। मेकोमी मेको गारो शुश दुइशशो सेला बाक्त। मिनू मेकोमी यहूदा डा बोल्यो सहर नेल्लेमी कप्तानपुकी वोइक्पदा बाक्त। २इतिहास २७:३

15 मेकोमी अर्को रागी डा देवतापुकी नु मुशा सेल्यो मूर्ति परमप्रभु यावे आ खिरे रंयुंदा बाक्त। मिनू आ परमप्रभु यावे आ खिं बाकशो डांडाम नु यरूसलेमम सेल्यो चढेतीक नेल्ल ताइक्ता बाक्त। मिनू मेको नेल्ल आन कली सहर रे रंयुंदा ताइक्ता बाक्त।

16 मिनू नोले मेकोमी परमप्रभु यावे कली चढेतीके लेंशा सेल्यो, मेकेर दुशा बाक्चा आ परबम चढेतीक नु “गे रिम्यो पाइब बाक्नीनी” दे चढेतीक चढेवा बाक्त। मिनू यहूदा डा मुर आन कली परमप्रभु यावे, इस्राएली आन परमप्रभु कली ला गेय पचा, दे हुकुम पवा बाक्त।

17 मेना सम्म मुरपुकीम डांडा डा थानम चढेमे बाक्त। तन्न परमप्रभु यावे, आन परमप्रभु कली चढेमे बाक्त।

18 मिनू मनस्सेम अरु मार मार पवा, आ परमप्रभु कली पशो पुंडतीक लोत्र, नु परमप्रभु यावे, इस्राएली आन परमप्रभु आ नेमी आ लोत्र पाइब आन लोत्र नेल्ल इस्राएल डा पिप आन इतिहासम ब्रेकशो बाक्ब।

19 मेको आ पुंडतीक लोत्र नु परमप्रभुम आ पुंडशो दोपा नेना, आ ब्रेम्यो दुम्या क्येडा डोंइती पशो पाप नेल्ल नु आ परमप्रभु कली थमा मसुइक्थु, डांडा डा थान ते ते सेला, मूर्ति पाइशशो थाम नु मूर्ति वोइशशो नेल्ल परमप्रभु यावे आ लोत्र पाइब आन इतिहासम ब्रेकशो बाक्ब।

20 मिनू मनस्से बेक्माक्त। मिनू मुरपुकीम आ दरवार डा बाक्तीकेम थिम्मे बाक्त। मेको आ नोले आ तौ आमोन पिप दुम्माक्त।

यहूदा डा पिप आमोन  
२राजा २१:१९-२६

21 आमोन पिप दुम्मेनु, २२ बर्स दुम्यो बाक्माक्त। मेकोमी बर्स निक्शी यरूसलेमम सासन पवा बाक्त।

22 मेकोमी आ आफ मनस्से खोदेशो पा परमप्रभु यावे आ डोंइती मार मरिम्यो बाक्मे, मेको पवा बाक्त। आमोनमी आ आफ मनस्सेम सेल्यो मूर्ति नेल्ले आन कली चढेशा, पूजा पवा बाक्त।

23 तन्न मेकोमी आ आफ मनस्से खोदेशो पा परमप्रभु यावे आ डोंइती आंम कली ब्रेम्यो मसेला बाक्त। आमोन आ पशो मरिम्यो शुश बारना बारन लमाक्त।

24 मिनू आमोन आ दरवारम गेय पाइबपुकीम लोत्र गारपाइशशा, मेको कली सदमे बाक्त।

25 तन्न मेको रागी डा मुरपुकीम पिप आमोन कली साइक्ब आन कली यो सदमे बाक्त। मिनू आ तौ योसीयाह कली मेको आ आफ आ पा डा पिप सेल्मे बाक्त।

## 34

यहूदा डा पिप योसीयाह  
२राजा २२:१-२; २राजा २३:४-१४

1 योसीयाह पिप दुम्मेनु, ८ बर्स दुम्यो बाक्माक्त। मेकोमी यरूसलेमम ३१ बर्स सासन पवा बाक्त।

2 मेकोमी परमप्रभु यावे आ डोंइती मार टीक बाक्मे, मेको पवा बाक्त। मेको ग्युरा पेरा मपथु, आ किकी पिपी दाऊद आ लांम गाक्माक्त। २इतिहास २९:२

मूर्ति पूजा थुम्पाइशशो

3 मेकोमी सासन पशो ८ बर्स दुम्मेनु, ठिटा बाक्ना बाक्ना आ किकी पिपी दाऊद आ परमप्रभु कली माल्चा गोवा बाक्त। मिनू सासन पशो १२ बर्समी यहूदा नु यरूसलेम डांडा डा थानपुकी, मूर्ति पाइशशो थामपुकी नु मुशा नु चेम्या सेल्यो मूर्तिपुकी ताइक्चा गोवा बाक्त। लेवी २६:३०

4 मिनू पिप आ डोंइती बाल देवता आन चढेतीकपुकी प्रेप्पदा बाक्त। मिनू मेको इक्का इर बाकशो धूप चोतीकपुकी नु चढेतीक प्रोल्शा खतम पोक्गा बाक्त। मिनू मेकोमी मूर्ति पाइशशो थाम, चेम्या सेल्यो मूर्तिपुकी फस पोक्मी बाक्त। मिनू मेको कली चढेब आन तुरस तारी फ्रवा बाक्त।

5 मिनु मेकोमी चढेब आन रुश यो आन चढेतीकेम चोवा बाक्त। मोपा मेकोमी यहूदा नु यरूसलेम कली ग्रॉग्रा मदिशो सेला बाक्त। १राजा १३:२

6 मेकोमी मनस्से, एफ्राइम, सिमियोन नु नाप्ताली आन सहर सम्म नु मेको आन एर ओंथ ब्रेशो खिंम बाक्शो २इतिहास ३१:१

7 अशेराह आ चढेतीकपुकी प्रेशना नु मूर्ति पाइश्शो थामपुकी नु मूर्ति नेल्ल फस पोक्गा बाक्त। मिनु मेकोमी इस्राएल रागी नेल्ल डा धूप चोतीक खतम पोक्गा बाक्त। मिनु नोले मेको यरूसलेम लेम्माक्त।

परमप्रभु आ खिं ठीक सेल्शो

२राजा २२:३-२०; २३:१-३

8 मेकोमी आ सासन पशो १८ बर्सम रागी नु परमप्रभु यावे आ खिं ग्रॉग्रा मदिशो सेल्ले थुमा नोले, असाल्याह आ तौ शाफान, सहर डा हुकुम पाइब मासेयाह नु राज्य डा ब्रेक्ब यो-आहाज आ तौ योआह आन कली परमप्रभु यावे, आ परमप्रभु आ खिं बिग्रेशो सेल्थ सोइक्तीमी बाक्त।

9 मिनु मेकोपुकी ठेयब चढेब हिल्लीयाह आ बाक्तीक जाक्शा, परमप्रभु आ खिंम चाक्शो क्येट मेको कली गेमे बाक्त। मेको क्येट लाप्यो खाल पाइब लेवीपुकीम मनस्से, एफ्राइम नु इस्राएल डा लीशो मुर नेल्ल रे, यहूदा, बेन्यामीन नु यरूसलेमम बाक्ब मुर नेल्ल रे खुप्यो बाक्मा बाक्त।

10 मिनु मेकोपुकीमी मेको क्येट परमप्रभु यावे आ खिंम गेय पाइब आन कली कोव्रब आन कली गेमे बाक्त। मिनु मेको कोव्रबपुकीमी गेय पाइब आन कली गेमे बाक्त। मेको क्येट बिग्रेशो सेल्तीक गेय नु मेको कली डोंइती डा खोदेंशो सेल्तीक गेय पचा कली माल्मा बाक्त।

11 मेकोपुकीम मेको यहूदा डा पिपपुकीम प्रोंइशो खिं लेंशा रिम्शो सेल्चा कली माल्मा बाक्त। मेको क्येट शी सेल्ब आन कली शी, दालीन, ग्रोव्रलो ग्याप्या कली गेमे बाक्त। मिनु गारो प्रोव्रब आन कली ख्रोइश्शो फुल्लु ग्याप्या कली गेमे बाक्त।

12 मिनु मुरपुकीम रिम्शो गेय पामे बाक्त। मिनु लेवीपुकी मेरारी आ तौ याहाथ नु ओबदिया, कोहाथ आ तौ जकरिया नु मेशुल्लाम गेय पाइब आन कली कोव्रब चोइश्शो बाक्मा बाक्त। अरु लेवीपुकी ताप्तीक ताप्स शुश जोक्ब बाक्मा बाक्त।

13 मेकोपुकी कुरब मुर कोव्रचा कली नु गेय चलेचा कली चोइश्शो बाक्मा बाक्त। का निक्शी लेवीपुकी ब्रेक्ब, का निक्शी मार माल्बा, मार बाक्बा, तुइक्चा कली नु का निक्शी लाप्यो खाल पाइब बाक्मा बाक्त।

अरेशो लोव्र डा किताब थिश्शो

14 मेकोपुकीम परमप्रभु यावे आ खिंम चाक्शो क्येट गुंडदमेनु, चढेब हिल्लीयाहम मोसा रे पा गेशो परमप्रभु यावे आ अरेशो लोव्र ब्रेक्शो किताब थिदा बाक्त।

15 मिनु हिल्लीयाहम ब्रेक्ब शाफान कली “गो परमप्रभु यावे आ खिंम आ अरेशो लोव्र ब्रेक्शो किताब थिश्शो बाक्नुड” दे मदा बाक्त। मिनु हिल्लीयाहम मेको किताब शाफान कली गेवा बाक्त।

16 मिनु शाफानम मेको किताब पिप आ बाक्तीक चाक्शा “इन गेशो गेय नेल्ल इन गेय पाइबपुकीम पशो बाक्नीम।

17 मेकोपुकीम परमप्रभु यावे आ खिंम बाक्शो क्येट मेकेर डा कोव्रब मुर नु गेय पाइब आन कली गेशो बाक्नीम” देमाक्त।

18 मिनु ब्रेक्ब शाफानम पिप कली “चढेब हिल्लीयाहम आं कली किताब का गेशो बाक्ब” दे शेंदा बाक्त। मिनु शाफानम मेको किताब पिप आ डोंइती पढेशा नेंपदा बाक्त।

19 मिनु पिपम मेको अरेशो लोव्र ब्रेक्शो किताबम ब्रेक्शो लोव्र नेना नोले थुं खाइश्शा, आ वा खाक्गा बाक्त।

20 मिनु पिपमी हिल्लीयाह, शाफान आ तौ अहीकाम, मीकाह आ तौ अब्दोन, ब्रेक्ब शाफान नु पिप कली गेय पाइब आसायाह आन कली,

21 “गो नु इस्राएल नु यहूदाम लीशो मुर आन पर्वम परमप्रभु यावे कली हिल्लो पने। मेको थिश्शो किताबम ब्रेक्शो लोत्र गो नु आंड किकी पिपीम मटितीके परमप्रभु यावे गोपुकी नु शुश गाइश्शो बाक्माक्त। मेको ब्रेक्शो लोत्र गो मपक” देंमाक्त।

22 मोपतीके हिल्लीयाह नु पिपम सोइश्शो मुरपुकी परमप्रभु यावे आ लोत्र पाइब हुल्दा आ बाक्तीकेम हिल्लो पथ लमा बाक्त। मेको पिप आ दरवार डा वासी कोत्रब हासा आ चच तोखाथ आ तो शाल्लुम आ मीशे बाक्माक्त। मेको यरूसलेम डा नक सहरम बाक्बाक्माक्त। मिनु मेको कली नेल्ल लोत्र देंमा बाक्त।

23 मिनु हुल्दाम मेको आन कली “परमप्रभु यावे, इस्राएली आन परमप्रभुम मार देंत देंशा हना, गे आं बाक्तीकेम सोइक्ब मुर कली

24 परमप्रभु यावेम ‘यहूदा डा पिप आ डोंइती पढेशो किताबम ब्रेक्शो सराप नेल्ल खाप्या कली, गो एको रागी नु एकेर बाक्ब मुर नेल्ल आन कली खतम पोक्नुडमी। ब्यवस्था २८:१५-६८

25 मारदे हना मेकोपुकीम आं कली प्रोंइशा, अर्को देवी देवता आन कली चढेशो बाक्नीम। मिनु मेकोपुकीम आंम आन गुडम सेल्शो मूर्तिम आं कली गाइक्पाइश्शो बाक्नीम। मोपतीके गो मेको रागी तशा गाइक्ताकड। मिनु आं गाइश्शो मबेक्ब’ देंत।

26 तन्न परमप्रभु यावे कली हिल्लो पथ इन कली सोइक्ब यहूदा डा पिप कली परमप्रभु यावे, इस्राएली आन परमप्रभुम मार देंत देंशा हना

27 ‘गे परमप्रभु यावेमी मेको रागी नु आ मुर आ पर्वम ब्रेक्शो लोत्र नेंशा, इ थुंम परमप्रभु आ डोंइती ब्रेम्शो सेल्शा, इ वा खाक्शा, डाक्शा, इ पशो लोत्र नेंता। २इतिहास ३३:१२-१३

28 मोपतीके गे एको खतम दुम्तीके मताइनेवे। गे थुं नाइश्शा बेक्नेवे। मिनु इ किकी पिपी आन कली थिम्तीकेम थिम्चा पुंडसीनेवे’ दे मतीने” देंमाक्त। मिनु सोइश्शोपुकीमी हुल्दा आ देंशो पिप कली मदमे बाक्त।

29 मेको नोले पिपम यहूदा नु यरूसलेम डा खाल्पा नेल्ल आन कली गुम्चा, दे ब्रेत्थ सोइक्ता बाक्त।

30 मिनु पिप परमप्रभु यावे आ खिं लमाक्त। मिनु यहूदा डा मुर नेल्ल, यरूसलेमम बाक्ब मुरपुकी, चढेब नु लेवीपुकी, आइक्च नु ठेयब मुर नेल्लेम मेको आ नोले खोदमे बाक्त। मिनु पिपम परमप्रभु यावे आ खिंम थिश्शो आ कबल डा किताब पढेशा नेंपाइक्मी बाक्त।

31 मिनु पिप आ बाक्तीकेम राप्शा, परमप्रभु यावे नु कबल का पवा बाक्त। मार कबल पवा बाक्त देंशा हना, परमप्रभु यावे आ नोले खोइक्चा, मेको आ शेंतीके, आ देंशो नु आ फुल्लुम मुशा ब्रेक्शो लोत्र थुं नेल्लेमी पचा नु मेको किताबम ब्रेक्शो कबल डा लोत्र नेल्ल पचा कली कबल पवा बाक्त। २इतिहास १५:१२

32 मेको नोले यरूसलेम नु बेन्यामीन रे जाक्शो मुर नेल्ल आन कली मेको ब्रेक्शो लोत्र खाप्नीकी, दे कसम जपाइक्मी बाक्त। मिनु यरूसलेमम बाक्ब मुरपुकीम आन किकी पिपी आन परमप्रभु आ कबल खाप्मे बाक्त।

33 मिनु योसीयाहम इस्राएली आन रागी नेल्ल रे ग्रान्ना दिशो मूर्ति नेल्ल युंइशा ताइक्ता बाक्त। मिनु इस्राएलम बाक्ब मुर नेल्ल आन कली परमप्रभु यावे, आंम परमप्रभु आ नोले ठेयब सेल्पदा बाक्त। मेको पिप ब्रोंडम सम्म मुरपुकीम परमप्रभु यावे, आन किकी पिपी आन परमप्रभु कली खोदमे बाक्त।

## 35

योसीयाहम पास्सा चाड मानेशो  
२राजा २३:२१-२३

1 योसीयाहमी यरूसलेममी परमप्रभु यावे कली पास्सा चाड मानेवा बाक्त। मिनु मुरपुकीमी डोंइती डा महिना डा १४ नाक्ती पास्सा चाड डा पाठा क्योरमे बाक्त। प्रस्थान १२:६

2 मिनु पिपमी चढेब आन कली आन आन गेय गेमी बाक्त। मिनु मेकोमी परमप्रभु यावे आ खिंम गेय पचा, दे आन थुं बारपाइक्मी बाक्त।

३ मिनु लेवीपुकी इस्राएली आन कली शेंब बाक्मा बाक्त। मेकोपुकी परमप्रभु यावे आ गेय ला पाइब बाक्मा बाक्त। मिनु पिपमी मेको आन कली “इस्राएल डा पिप दाऊद आ तौ सोलोमनम सेल्शो परमप्रभु यावे आ कबल पशो सन्दोस परमप्रभु यावे आ खिंम वोतीन। मुल रे गेपुकीमी मेको कली इन बालाम कुरचा ममाल्नीनी। मुल परमप्रभु यावे, इन परमप्रभु नु आ मुर इस्राएली आन गेय पने। २इतिहास ५:४-५; १इतिहास २३:२६, २८; प्रस्थान २५:१३-१५

४ इस्राएल डा पिप दाऊद नु आ तौ सोलोमनम ब्रेक्शा गेशो लोत्र टिने। १इतिहास २३:-

५ गे परमप्रभु यावे आ खिंम इन पालोम इन किकी पिपी आन खिं खिं डा मुर गारशा गेय पने। मिनु गेना हना यो खिं खिंमी परमप्रभु यावे कली गेय पाइब लेवी चढेब आन कली वारच पचा कली बाक्चा माल्नीनी।

६ मिनु गे परमप्रभु यावे आ डोंइती ठीक सेल्सीन। पास्सा डा पाठा क्योरिन। दोशो मुरुम मेको पाठा ब्वने चाप्नीम, मोशो ला ब्रेत्तीन। मोसा रे पा परमप्रभु यावे आ देशो लोत्र टिशा, गेय पने” देमाक्त।

७ मिनु योसीयाहम मेकेर बुक्ब मुर नेल्ल आन कली पास्सा चाड मानेचा, दे ३० हजार क्यारश भेडा पाठा नु हजार सां ब्यफ गेमी बाक्त। पिपमी मेको नेल्ल आंम आ गोठ रे पा गेवा बाक्त।

८ मिनु मेको आ सरकार डा गेय पाइबपुकीमी थुं रे ग्येरशा मुर आन कली चढेब नु लेवी आन कली मार मार गेमे बाक्त। परमप्रभु यावे आ खिं डा ठेयब गेय पाइब हिल्लीयाह, जकरियामी नु येहीएलम, चढेब आन कली पास्सा चाड कली हजार निक्शी ६ सहे क्यारश भेडा पाठा नु सहे सां ब्यफ गेमे बाक्त।

९ मिनु लेवी आन ठेयब मुर कोनन्याह नु मेको आ लोकबपुकी, शेमायाह नु नेथनेल, हशाब्याह, यिएल नु योजाबादमी ५ हजार क्यारश भेडा पाठा नु ५ सहे ब्यफ गेमे बाक्त।

१० मिनु चढेतीक गेय ठीक सेल्ले थुम्मे नोले चढेब आन बाक्तीकेम बाक्मा बाक्त। मिनु लेवी आन आन हुल पिपम देशो खोदेशो पा राम्मा बाक्त।

११ मिनु मेकोपुकीम पास्सा चाड डा पाठा क्योरमे बाक्त। मिनु लेवीपुकीम गेशो हुश चढेबपुकीम ताक्शा, चढेतीकेम बुइक्वमे बाक्त। मिनु लेवीपुकीम चहिं मेको आ कुशुल उक्वमे बाक्त।

१२ मिनु मेकोपुकीम मोसा आ किताबम ब्रेक्शो खोदेशो पा मुर आन खिं खिं डा हुल आन कली योक्चा, दे परमप्रभु यावे कली चोशा चढेतीक श्ये तिल्शा वोदमे बाक्त। मिनु ब्यफ आन कली यो मो देशो पामे बाक्त। नोले चढेबपुकीमी मेको चढेचा माल्मा बाक्त।

१३ मिनु पतीके लोत्रम ब्रेक्शो खोदेशो पा पास्सा चाड डा श्ये मीम चोत्रमे बाक्त। मिनु परमप्रभु यावे कली गेशो श्ये खरकुंडा, कराइ नु तस्लाम लोप्मे बाक्त। मिनु मेको मुर नेल्ले आन कली रीब पा योक्शा गेमे बाक्त। प्रस्थान १२:३-१०

१४ मेको नोले आंम कली नु चढेब आन कली जचा थोत्रक ठीक पामे बाक्त। हारून आ खिं डा चढेबपुकी नाक्दो सम्मन चोशा चढेतीक नु बोंसो चढेतीक गेय पचा माल्मा बाक्त।

१५ दाऊद आ देशो खोदेशो पा आसाफ आ चच युइ कुम्सो पाइबपुकी आसाफ, हेमान नु पिप कली परमप्रभु यावे आ लोत्र पाइब येदुथून आन बाक्तीकेम बाक्मा बाक्त। पिप दाऊदम देशो खोदेशो पा मेकोपुकीम पामे बाक्त। लाप्चो खाल पाइबपुकीमी आन गेय प्रोंइचा ममाल्मा बाक्त। मारदे हना आन लोकब लेवीपुकीम मेको आन कली जचा थोत्रक चाक्शा गेमे बाक्त। १इतिहास २५:५; १इतिहास २६:१-९

१६ मोपा पिप योसीयाह आ देशो खोदेशो पा परमप्रभु यावे कली पचा माल्शो गेय ठीक पशो बाक्माक्त। पास्सा चाड मानेचा नु परमप्रभु यावे आ चढेतीकेम चोशा चढेतीक चढेशो बाक्मा बाक्त।

१७ मेना मेकेर बाक्ब इस्राएली नेल्लेमी पास्सा चाड मानेमे बाक्त। मिनु ७ नाक्त सम्म बोरब ओरुती मसुप्शो शोब्ले डा चाड मानेमे बाक्त।

१८ परमप्रभु यावे आ लोत्र पाइब सामुएल आ पाला रे मेना सम्म मोदेशो पा पास्सा चाड इस्राएलम गेनायो ममानेशो बाक्मा बाक्त। पिप योसीयाहम खोदेशो पा तेकोइ पिपम मोदेशो ठेयब पास्सा चाड

मानेशो बाक्मा बाक्त। चढेबपुकी, लेवीपुकी नु यहूदा नु यरूसलेम बाक्ब मुरपुकी नु मेकेर जाक्शो इस्राएल डा मुरपुकी मानेमे बाक्त। २इतिहास ३०:२६

१९ योसीयाहम सासन पशो १८ बर्स दुम्मेनु, मेको पास्सा चाड मानेशो बाक्मा बाक्त।

योसीयाह बेक्शो  
२राजा २३:२८-३०

२० मिनु योसीयाहम परमप्रभु यावे आ खिं डा गेय नेल्ल गारपदा नोले इजीप्त रागी डा पिप नेको, युफ्रेटीस खोला आ शुंइच डा कारकेमीश सहर कली लडाइ तोचा कली गूमाक्त। मिनु योसीयाह मेकोपुकी नु लडाइ पथ लमाक्त।

२१ तन्न नेकोमी “यहूदा डा पिप, गे नु गो इस दातेम मार जितीक खेतीक दुमशो बाक्बा डा? मुलाक्ती गो गे नु लडाइ पचा कली जाक्शो मनड। तन्न गो आं लडाइ तोशो मुरपुकी नु ला गाइशो बाक्नुड। परमप्रभुम आं कली ‘रीब पा लशा लडाइ पावो’ देशो बाक्ब। मोपतीके परमप्रभु आ पबर्म मरिम्शो पा मबोक्कीन। मेको गो नु बाक्शो बाक्ब। बोक्तीनी हना, मेकोमी इन कली खतम पोक्ब” दे आ लोव्र पाइब आन कली सोइक्ता बाक्त।

२२ मो हना यो योसीयाहम मेको आ देशो लोव्र मनेना बाक्त। तन्न मेको नेको नु लडाइ पचा कली अर्को वा फेक्से बाक्त। मेकोमी नेको आ देशो परमप्रभु आ लोव्र मनेना बाक्त। मिनु मेको मेगीददो डा दिंमम मेको नु लडाइ पचा कली रीब पा लमाक्त।

२३ मिनु लिब्रा आप्बपुकीम पिप योसीयाह कली आप्मे बाक्त। मिनु पिपम आ गेय पाइब मुर कली “आं कली लडाइ पतीक रे गुंइदो। मारदे हना गो ठेयब गार दुमशो बाक्नुड” दे मदा बाक्त।

२४ मोपतीके आ गेय पाइबपुकीम मेको कली आ बग्गी रे गुंइशा, अर्को बग्गीम कुर पा यरूसलेम सहरम चाक्गमे बाक्त। मिनु मेको मेकेर बेक्माक्त। मिनु मुरपुकीमी मेको कली आ किकी पिपी आन कली थिन्तीकेम थिम्मे बाक्त। मिनु यहूदा नु यरूसलेम डा मुरपुकीम योसीयाह आ पबर्म रोंका पामे बाक्त।

२५ मिनु येरमीयाम यो योसीयाह आ पबर्म रोंका पशो कुम्सो सेला बाक्त। मिनु कुम्सो पाइब मीश मुर वोंइश मुर नेल्लेमी मुल सम्म मेको रोंका पतीक कुम्सो पा योसीयाह कली मिन्मीम। मिनु मेको रोंका पतीक कुम्सो इस्राएली आन पतीके दुमशो बाक्ब। मेको कुम्सो बिलाप किताबपुकी बाक्नीम।

२६ मिनु योसीयाह आ पतीके, परमप्रभु यावे आ अरेशो टिशो,

२७ मेको आ पशो डोंइती रे नोले सम्म इस्राएल नु यहूदा डा पिपी आन ब्रेक्शो बाक्ब।

## ३६

यहूदा डा पिप येहो-अहाज  
२राजा २३:३०-२४:१७

१ मिनु मेको रागी डा मुरपुकीम योसीयाह आ तौ येहो-अहाज कली चाक्शा, यरूसलेमम मेको आ आफ आ पा डा पिप सेल्मे बाक्त।

२ येहो-अहाज पिप दुम्मेनु २३ बर्स दुमशो बाक्माक्त। मेकोमी यरूसलेमम महिना सां सासन पवा बाक्त।

३ मिनु इजीप्त डा पिपम मेको कली पिप रे गुंइदा बाक्त। मिनु यरूसलेम कली सहे का टलेन्ट चांदी नु टलेन्ट का सुन तिरो थाप्पदा बाक्त। टलेन्ट का ३४ किलो बाक्ब।

४ मिनु इजीप्त डा पिपम येहो-अहाज आ लोक्ब एल्याकीम कली यहूदा नु यरूसलेम डा पिप सेला बाक्त। मिनु मेकोमी मेको आ नें फाइशशा येहो-याकीम वोदा बाक्त। मिनु नेकोम आ लोक्ब येहो-अहाज कली इजीप्त रागी लदा बाक्त। येरमीया २२:४-१२

यहूदा डा पिप येहो-याकीम

५ मिनु येहो-याकीम पिप दुम्मेनु, २५ बर्स दुमशो बाक्माक्त। मेकोमी यरूसलेमम ११ बर्स सासन पवा बाक्त।



6 मेकोमी आ परमप्रभु यावे आ डोंइती मार मरिम्शो बाक्मे, मेको पवा बाक्त। मिनु बेबीलोन डा पिप नेबुकदनेसरम मेको आ रागी कली लडाइ तोशा, मेको कली कांसा के साडलम फ्रेंशा बेबीलोन लदा बाक्त। येरमीया २२:१८

7 नेबुकदनेसरम परमप्रभु यावे आ खिं डा ग्योंबपुकी का निकशी लाइश्शा, बेबीलोनम आ दरवारम वोदा बाक्त। एजा १:७

8 मिनु येहो-याकीम आ पशो, आ पशो ग्रांघा दिशो नु आ दोस तशो गेय नेल्ल इस्राएल नु यहूदा डा पिप आन इतिहासम ब्रेक्शो बाक्ब। मिनु मेको आ नोले मेको आ तौ येहो-याकीन पिप दुम्माक्त।

यहूदा डा पिप येहो-याकीन

9 येहो-याकीन पिप दुम्मेनु, ८ बर्स दुम्शो बाक्माक्त। मिनु मेकोमी यरूसलेमम महिना सां नु १० नाक्ती सासन पवा बाक्त। मिनु मेकोमी परमप्रभु यावे आ डोंइती मार मरिम्शो बाक्मे, मेको पवा बाक्त। येहो-याकीन पिप दुम्मेनु, २राजामी १८ बर्स देंब। २राजा २४:८

10 मिनु बर्खा जाक्चावानु, पिप नेबुकदनेसरम मुर सोइश्शा परमप्रभु यावे आ खिं डा रिम्शो रिम्शो ग्योंबपुकी नु मेको पिप कली बेबीलोनम चाक्पदा बाक्त। मिनु मेकोमी मेको पिप आ खिं डा मुर का सिदकीयाह कली यहूदा नु यरूसलेम डा पिप सेला बाक्त। येरमीया २२:२४-३०

यहूदा डा पिप सिदकीयाह

२राजा १४:१८-२५; येरमीया ५२:१-३०

11 सिदकीयाह पिप दुम्मेनु २१ बर्स दुम्शो बाक्माक्त। मेकोमी यरूसलेमम ११ बर्स सासन पवा बाक्त।

12 मेकोमी आ परमप्रभु यावे आ डोंइती मार मरिम्शो बाक्मे, मेको पवा बाक्त। परमप्रभु यावे आ लोत्र पाइब येरमीयाम मेको कली परमप्रभु यावे आ लोत्र पशो बाक्माक्त। तन्न पिपमी मेको आ डोंइती आ थुं कली ब्रेम्शो मसेला बाक्त। येरमीया ३७:-; ३८:-

13 मिनु पिप नेबुकदनेसरमी मेको कली परमप्रभु आ नेम कसम जपदा बाक्त। तन्न मेको पिप कली यो मरिम्शो पवा बाक्त। मेको मरिम्शो पाइब नु काइ मटीब दुम्शा, परमप्रभु यावे, इस्राएली आन परमप्रभु गे लेन्ने म्बिस्से बाक्त।

14 मेको प्रॉइशा, चढेब नु मुरपुकीम थाम्पा मरिम्शो पा, रागी रागी डा मुर आन ग्रांघा दिशो गेयपुकी नेल्ल पामे बाक्त। मोपा यरूसलेम डा परमप्रभु यावे आ खिं ग्रांघा दिशो सेल्मे बाक्त। ब्यवस्था १८:९

यरूसलेम खतम दुम्शो

15 मिनु परमप्रभु यावे, आन किकी पिपी आन परमप्रभुमी आ लोत्र पाइबपुकी मेको आन दातेम सोइक्ना सोइक्न बाक्शो बाक्माक्त। मारदे हना आ मुर नु आ बाक्तीक कली शिशी पाइक्बाक्माक्त।

16 तन्न परमप्रभु आ लोत्र पाइब आन कली शुक्शी पामे बाक्त। आ लोत्र मटिथु, आ लोत्र पाइब आन कली तोक्शा लोत्र पामे बाक्त। मोपतीके परमप्रभु यावे आ गाइश्शो मबेक्माक्त। लूका २०:१०-१२; प्रेरित ७:५२

यहूदा ग्याइक्चा पुंइसीशो

17 मिनु परमप्रभुम मेको आन कली लडाइ तोपाइक्चा कली कल्दी आन पिप कली चाक्गा बाक्त। मिनु मेकोपुकीमी मेको आन आल आन कली परमप्रभु यावे आ बाक्तीक खिंम तरवारम क्योरशा सदमे बाक्त। मेकोपुकीमी वोंइश आल नु मीश आल आन कली, खाल्पा नु खुशो आन कली काइ शिशी मपामे बाक्त। परमप्रभुम मेको नेल्ल आन कली पिप नेबुकदनेसर आ गुडमी गेमी बाक्त।

18 मिनु मेकोमी परमप्रभु आ खिं डा आइक्च ठेयब ग्योंब नेल्ल, मेकेर डा शोंप नु दरवार नु सरकार डा गेय पाइब आन खिं डा शोंप नेल्ल बेबीलोन लदमे बाक्त।

19 मेकोपुकीम परमप्रभु आ खिं मी सुइक्तमे बाक्त। यरूसलेम सहर डा गारो प्रेत्मे बाक्त। मिनु मेकोपुकीम सहर डा दरवार नेल्लेम मी सुइश्शा, आगा बाक्शो शोंप खतम सेल्मे बाक्त। येरमीया २६:६

20 मिनु मेकोमी तरवार रे ब्रोंडशो नेल्ल आन कली फ्रेंशा बेबीलोन लदमे बाक्त। मिनु पारसी आ राज्य मजाकम सम्म मेकोपुकीम, मेको ग्याइक्चा पुंडसीब आन तमी तौ आन कली वाइलीम वाइल सेल्मे बाक्त।

21 मिनु परमप्रभु यावे आ लोव्र पाइब येरमीया रे पा देशो परमप्रभु यावे आ लोव्र गाप्चा कली ७० बर्स मगाम सम्म इस्त्राएल रागीम आ नाइक्तीक नाक्ती मानेवा बाक्त। मेको रागीम ७० बर्स सम्म श्येत्थ दुम्मेनु, आ नाइक्तीक नाक्ती मानेवा बाक्त। येरमीया २५:११; लेवी २६:३४; बिलाप २:६

कोरेस आ देशो लोव्र

एज्जा १:१-३

22 मिनु पारसी डा पिप कोरेसमी पिप पवा आ डोंडती डा बर्सम येरमीया आ देशो परमप्रभु यावे आ लोव्र गाप्चा कली परमप्रभु यावेम पारसी डा पिप आ थुंमी लोव्र पवा बाक्त। मिनु मेकोमी आ ठेयब राज्य नेल्लेम लोव्र पा ब्रेक्शा, उरदी पपदा बाक्त। येरमीया २९:१०; यसैया ४४:२८

23 फारसी डा पिप कोरेसम मार उरदी पपदा बाक्त। देशा हना “परमप्रभु यावे, स्वर्ग डा परमप्रभुम रागी डा राज्य नेल्ल आं कली गेशो बाक्ब। मिनु मेकोमी आं कली यहूदा डा यरूसलेमम आ कली खिं का सेल्चा कली अरेशो बाक्ब। इन दातेम बाक्शो मेको आ मुर बाक्तेक्म हना ‘परमप्रभु यावे, आ परमप्रभु मेको नु बाक्ल। मिनु मेको यरूसलेम लमल’ देंनुड” देंमाक्त।

## एजा

**ब्रेकब मुर:** एको किताब एजा आंमान इचका ब्रेकशो बाक्त। तन्न नोले मेको नेल्ल सुम ब्रेकता, मतुडक्नीम। डोंडती एजा नु नेहेम्याह किताब का बाक्त। मुरुमी ग्रीक लोव्रमी सेल्ची ना किताब का रे निक्शी सेल्शो बाक्तेकम।

**गेना दुमशो:** एको किताब १०० बर्स डा इतिहास बाक्ब। जेरूब-बाबेल नु ५० हजार ग्याइश्शा लाइक्चा पुंडसीशो इस्राएली यरूसलेम लेशशो रे नेहेम्याह यरूसलेम जाक्शो सम्म डा लोव्र बाक्ब।

५३६ बि. सी. पिप कोरेसमी इस्राएली आन कली लेत्चा गेवा बाक्त।

५३६ बि. सी. चढेतीक लेंशा सेल्शा, गोठ सेल्तीक चाड मानेमे बाक्त।

५३५ बि. सी. परमप्रभु यावे आ खिं लेंशा सेल्चा गोव्रमे बाक्त।

५२० बि. सी. परमप्रभु आ लोव्र पाइब हानगै नु जकरियाम आस गेय पचा गोम्से बाक्त।

५१६ बि. सी. परमप्रभु यावे आ खिं जिम्मा गेशो बाक्त।

५१५ बि. सी. पास्सा चाड मानेशो बाक्तेकम।

४५८ बि. सी. एजा नु १८ हजार इस्राएली लेंशा यरूसलेम लेशशो बाक्तेकम।

४४६ बि. सी. नेहेम्याह यरूसलेम जाक्शो बाक्त।

**मारदे ब्रेकशो:** एको १ इतिहास नु २ इतिहास किताबमी ब्रेकशो नेल्ल दुमशो नोले डा इस्राएली आन इतिहास बाक्ब। परमप्रभु यावे आ खिं लेंशा सेल्शो आ पर्वम ब्रेकशो बाक्ब।

यहूदीपुकी यरूसलेम लेशशो

२इतिहास ३६:२२-२३

1 पारसी रागीमी पिप कोरेस आ डोंडती डा बर्समी परमप्रभु यावेमी येरमीया रे पा देशो लोव्र खाप्चा कली पिप कोरेस आ थुं क्युक्गा बाक्त। मिनु मेको पिपमी आ राज्य नेल्लेमी मेको लोव्र नेंपाइक्चा कली ब्रेकपदा बाक्त। यसैया ४५:१; यसैया ४४:२८

2 मिनु पारसी डा पिप कोरेसमी मार लोव्र ब्रेकपदा बाक्त देशा हना “परमप्रभु यावे, स्वर्ग डा परमप्रभुमी, रागी डा राज्य नेल्ल आं कली गेशो बाक्ब। मिनु मेकोमी आं कली ‘यहूदा रागी डा यरूसलेममी आं खिं सेलो’ दे माइक्ती।

3 मिनु इन दातेमी सु सु परमप्रभु आ मुर बाक्नीमी, मेको नु परमप्रभु बाक्ल। मिनु मेको मुरपुकी इर लशा, यहूदा रागी डा यरूसलेममी बाक्ब परमप्रभु यावे, इस्राएली आन परमप्रभु आ खिं सेलीन।

4 मिनु लीशो यहूदी ते ते बाक्मा, मेकोपुकीमी यरूसलेम परमप्रभु आ खिं सेल्चा कली सुन चांदी, अरु शोप नु बी ब्यफ चाक्शा, आन आंम दाक्शो गेचा माल्नीम” दे पिप कोरेसमी ब्रेकशो बाक्त।

5 मिनु नोले यरूसलेम सहरमी परमप्रभु यावे आ खिं लेंशा सेल्चा कली परमप्रभुमी मुर आन थुं पोक्चा पुंडसीशो यहूदा नु बेन्यामीन आस खिं खिं डा ठेयब मुरपुकी, चढेबपुकी नु लेवी नेल्ल मेकेर लचा कली सासमा बाक्त।

6 मिनु मेको आन नेक्था बाक्ब नेल्लेमी आन डोंडती गेशो प्रोंइशा, चांदी के बोस, सुन के थोव्रक, अरु थोव्रक, बी ब्यफ नु शुश क्येट लाइब मार मार थोव्रक शुश तेम्शा गेशा, मेको आन कली वारच पाम्तेकम।

7 डोंडती नेबुकदनेसरमी यरूसलेममी परमप्रभु यावे आ खिं डा बोसपुकी रोइश्शा चाक्शा, आ देवता आ खिंमी वोइश्शो बाक्माक्त। मिनु पारसी डा पिप कोरेसमी मेको बोस नेल्ल मेकेर रे गुंडपाइक्कु। २इतिहास ३६:७,१८

8 मिनु पारसी डा पिप कोरेसमी मेको बोसपुकी आ शोप कोव्रब मिश्रेदाथ आ गुइ रे पा यहूदा आ खिं डा नेल्ल क्येडा ठेयब मुर शेश-बस्सार कली हिक्पाइश्शा, ब्रेकशा गेप्टु। एजा ५:१४

9 मिनु मेको बोस मार मार बाक्तेकम देशा हना, सुन के बोस ३० ओटा, चांदी के बोस हजार का ओटा, क्योरतीके २९ ओटा,

10 सुन के आइकच बोस ३० ओटा, अरु चांदी के आइकच बोस ४ सहे १० ओटा अरु बोस हजार का ओटा गेशो बाक्त।

11 सुन नु चांदी के बोस नेल्ल पा ५ हजार ४ सहे ओटा बाक्तेकम। मिनु ग्याइशशा लाइकचा पुंडसीशो मुरपुकी बेबीलोन रे यरूसलेम लेशशा जाकमानु, शेश-बस्सारमी मेको बोस नेल्ल यरूसलेममी लेशशा चाक्तु।

## 2

लेशशो इस्राएल डा मुर

नेहेम्याह ७:५-७२

1 बेबीलोन डा पिप नेबुकदनेसरमी यहूदा नु यरूसलेम डा मुर आन कली ग्याइशशा बेबीलोन लाइशशो बाक्त। मेको ग्याइशशा लाइकचा पुंडसीशो आन दाते डा यहूदा नु यरूसलेम आंम आंम सहरम लेशशा जाकशो मुर आन नें मार बाक्तेकम देंशा हना,

2 जेरूब-बाबेल नु बेबीलोन रे यरूसलेम जाकब येशुआ, नेहेम्याह सेरायाह, रेलायाह, मोरदेकै, बिल्शान, मिस्पार, बिगवाइ, रेहुम नु बानाह जाकशो बाक्तेकम। मेको इस्राएली सु सु नु गिश मुर बाक्तेकम देंशा हना,

3 पारोश आ चच युइ २,१७२

4 शेफत्याह आ चच युइ ३७२

5 आराह आ चच युइ ७७५

6 पहाथ-मोआब आ चच युइ आ तौ येशुआ नु योआब आस चच युइ २,८१२

7 एलाम आ चच युइ १,२५४

8 जत्तु आ चच युइ ९४५

9 जक्काइ आ चच युइ ७६०

10 बानी आ चच युइ ६४२

11 बेबाइ आ चच युइ ६२३

12 अज्गाद आ चच युइ १,२२२

13 अदोनीकाम आ चच युइ ६६६

14 बिगवाइ आ चच युइ २,०५६

15 आदीन आ चच युइ ४५४

16 आतेर आ मुर हिज्कीयाह आ चच युइ ९८

17 बेजाइ आ चच युइ ३२३

18 योराह आ चच युइ ११२

19 हाशुम आ चच युइ २२३

20 गिब्बार आ चच युइ ९५

21 बेथलेहेम डा १२३

22 नेतोफाह डा ५६

23 अनाथोथ डा १२८

24 अज्मावेथ डा ४२

25 किरयथ-यारीम केफीरा नु बेयरोथ डा ७४३

26 रामाह नु गोबा डा ६२१

27 मिकमास डा १२२

28 बेथेल नु ऐ डा २२३

29 नेबो डा ५२

30 मग्बीश आ चच युइ १५६

31 अर्को एलाम आ चच युइ १,२५४

- 32 हारीम आ चच युइ ३२०  
 33 लोद, हादीद नु ओनो सहर डा ७२५  
 34 यरीको सहर डा ३४५  
 35 नु सेनाह आ चच युइ ३,६३० जना बाक्तेकम।

### लेशशो चढेब

- 36 लेशशो चढेब सु सु बाक्तेकम देशा हना, येदायाह आ चच युइ, येशुआ आ खिं डा मुर ९७३  
 37 इम्मरे आ चच युइ १,०५२  
 38 पशहुर आ चच युइ १,२४७  
 39 नु हारीम आ चच युइ १,०१७ जना बाक्तेकम।

### लेशशो लेवी नु कुम्सो पाइब

- 40 लेशशा जाकशो लेवी आ मुर सु सु बाक्तेकम देशा हना, येशुआ नु कदमीएल आस चच युइ, नु होदावीयाह आ चच युइ ७४ जना बाक्तेकम। नेहेम्याह १२:८  
 41 कुम्सो पाइबपुकीमी आसाफ आ चच युइ १२८ जना बाक्तेकम।

### लेशशो लापचो खाल पाइब

- 42 लापचो खाल पाइब सु सु बाक्तेकम देशा हना, शाल्लुम, आतेर, ताल्मोन, अक्कुब, हतीता नु शोबाइ आन चच युइ नेल्ल पा १३९ जना मुर बाक्तेकम।

### लेशशो परमप्रभु आ खिं डा वाइल

- 43 परमप्रभु यावे आ खिंमी गेय पाइब वाइल आन चच युइ सु सु बाक्तेकम देशा हना, एजा ८:२०  
 सीहा, हासुफा, तब्बाओथ,  
 44 केरोस, सीआहा, पादोन,  
 45 लेबानाह, हगावाह, अक्कुब,  
 46 हागाब, शाम्लाइ, हानान,  
 47 गिददेल्, गहार, रेआयाह,  
 48 रेसीन, नेकोदा, गज्जाम,  
 49 उज्जा, पासेआह, बेसाइ,  
 50 अस्नाह, मेउनीम, नेफीसीम,  
 51 बाकबुक, हकुफा, हारहुर,  
 52 बस्लुथ, मेहीदा, हारशा,  
 53 बारकोस, सीसेरा, तेमाह,  
 54 नेसीयाह नु हतीफा आन चच युइ बाक्तेकम।  
 55 सोलोमन आ गेय पाइब आन चच युइ सु सु बाक्तेकम देशा हना, सोताइ, हास्सोफेरेथ, पेरुदा,  
 १राजा ९:२१  
 56 यालाह, दारकोन, गिददेल्,  
 57 शेफत्याह, हत्तील, पोकेरेथ-हस्सेबाइम नु आमी आन चच युइ बाक्तेकम।  
 58 परमप्रभु यावे आ खिं डा गेय पाइब नु सोलोमन आ गेय पाइब नेल्ल पा ३९२ मुर बाक्तेकम।  
 यहोसु ९:२३

59 मिनु तेल-मैलाह, तेल-हारशा करूब, अददान नु इम्मरे रे लेशशा जाकब यो बाक्तेकम। तन्न मेकोपुकीमी आन किकी पिपी नु आन खिं डा मुर इस्राएल डा सु रे जाकशो बाक्ता, मेको देने मचबेम।

60 मेकोपुकी देलायाह आ चच युइ, तोबीयाह आ चच युइ नु नेकोदा आ चच युइ नेल्ल पा ६५२ जना बाक्तेकम।

61 परमप्रभु कली चढेब हबायाह आ चच युइ, हककोस आ चच युइ नु बारजील्लाइ आ चच युइ यो आन किकी पिपी नु आन खिं डा मुर इस्राएली सु रे बोशो बाक्ता देने मचबेम। बारजील्लाइ ने

वोइश्शो मुर गिलाद डा बारजील्लाड आ तमी कली ग्युंवे पवा बाक्त। मिनु आ शिउ आ नें वोदा बाक्त। २सामुएल १७:२७; २सामुएल १९:३२

62 मेकोपुकीमी मुर आन नें ब्रेक्तीकेमी आन नें माल्तेकम, तन्न मथिदेम। मोपतीके मेकोपुकीम चढ़ेचा मताम। मिनु चढ़ेतीक गेय रे तिल्चा पुंडसाकम।

63 मिनु ऊरीम नु थुम्मीममी गेय पने चाप्ब चढ़ेब का मगूम सम्म मेकोपुकीमी नेल्ल क्येडा चोवखो चढ़ेतीक थोव्रक रे जचा मताम।

64 मिनु मेकेर जाकब मुर नेल्ल पा ४२,३६० बाक्तेकम।

65 मिनु मेको आन वाइलीम वाइल ७,३३७ मुर बाक्तेकम। मेको आन दातेमी २०० कुम्सो पाइब मीश मुर नु वोइश मुर यो बाक्तेकम।

66 मिनु मेको नु ७३६ शारा नु २४५ खच्चर बाक्तेकम।

67 मिनु मेको नु ४३५ दलओठ नु ६,७२० गधा यो बाक्तेकम। गन्ती १८:९; प्रस्थान २८:३०; १सामुएल १४:४१

68 मिनु मेकोपुकी यरूसलेममी बाक्शो परमप्रभु यावे आ खिं जाकमा नोले का निक्शी खिं डा ठेयब मुरपुकीमी परमप्रभु आ खिं डोंइती डा आ बाक्तीके उइ लेंशा सेल्चा कली ग्येरशा आन दाक्स पा क्येट गेम्तेकम।

69 मेकोपुकीमी आन चाप्स पा सेल्टीक गेय कली ६१ हजार सुन के आदारकोन नु ५ हजार चांदी के मीना नु चढ़ेब आन कली सहे का फेक्तीक वा गेम्तेकम। आदारकोन का ८.४ ग्राम सुन के क्येट बाकब। चांदी के मीना का ६०० ग्राम खोदेशो बाकब।

70 मिनु चढ़ेबपुकी, लेवीपुकी नु का निक्शी अरु मुर यरूसलेम नु आ एर ओथ डा गाउंपुकीमी बाक्तेकम। मिनु कुम्सो पाइबपुकी, लाप्चो खाल पाइबपुकी, परमप्रभु यावे आ खिंमी गेय पाइबपुकी नु लीशो इस्त्राएली नेल्ल आंम आन सहरम बाक्तेकम।

### 3

#### चोशा चढ़ेशो

1 मिनु इस्त्राएली आंम आन गाउं गाउंमी नेल्ल गारपा बाकने थुम्शो बाक्तेकम। आन बाक्शो ७ महिना दुम नोले मुर नेल्ल थुं का डा दुम्शा, यरूसलेममी बुक्तेकम।

2 मेना योसादाक आ तौ येशुआ नु मेको आ वारच चढ़ेब, शाल्तीएल आ तौ जेरूब-बाबेल नु मेको आ खिं डा मुर नेल्लेमी इस्त्राएली आन परमप्रभु कली चढ़ेतीके सेल्लेकम। परमप्रभु आ मुर मोसामी आ अरेशो लोत्रम दोपा ब्रेक्शो बाकमे, मोपा चोशा चढ़ेचा कली मेको चढ़ेतीक सेल्लेकम। एजा २:२; प्रस्थान २७:१; लेवी ६:२

3 मेकोपुकीमी चढ़ेतीक डोंइती ते बाकमे मेकेर लेंशा चढ़ेतीक सेल्लेकम। मारदे हना मेको आन एर ओथ डा अर्को जात डा मुर आन कली तशा हिंशा, सुनी नु नाक्नाकदो परमप्रभु यावे कली चढ़ेतीकेम चोशा चढ़ेतीक चढ़ेम्तेकम।

4 मिनु मेकोपुकीमी गोठ सेल्शा बाक्तीक चाड मानेम्तेकम। मिनु दोपा पतीके ब्रेक्शो बाकमे, मोपा नाक्त किंत किंत डा पचा माल्शो चोशा चढ़ेतीके दोशो चढ़ेचा माल्मा, मोशो चढ़ेम्तेकम। लेवी २३:३४-४३

5 मिनु नाक्त किंत किंत डा चोशा चढ़ेतीके, औसी नाक्त डा चढ़ेतीके नु परमप्रभु यावेमी देशो चाड डा चढ़ेतीके चढ़ेम्तेकम। सु सुमी आन ग्येरशो थुं रे परमप्रभु यावे कली चढ़ेचा दाक्तमे, मेको चढ़ेम्तेकम।

6 मिनु परमप्रभु यावे आ खिं डा जग मवोइश्शो बाक्त हना यो, ७ महिना डा डोंइती डा नाक्त रे परमप्रभु यावे कली चोशा चढ़ेतीक चढ़ेचा गोम्तेकम।

7 मिनु मेकोपुकीमी गारो प्रोव्रब नु शी के गेय पाइब आन कली क्येट गेम्तेकम। मिनु पारसी डा पिप कोरिसमी देशो खोदेशो पा सीदोन नु टायर डा मुर आन कली लेबानोन डा लाइश्शो रवा आ शी समुन्द्र रे पा योप्पा सम्म चाक्चा कली जचा तूचा थोव्रक नु तेल गेम्तीमी। १राजा ५:१६-२५

### परमप्रभु आ खिं लेंशा सेल्शो

8 मिनु मुरपुकी यरूसलेममी बाकशो परमप्रभु आ खिं जाकशो बर्स निकशी नु महिना निकशी दुम्माक्त। मिनु शाल्तीएल आ तौ जेरूब-बाबेल, योसादाक आ तौ येशुआ नु मेको आस लीशो लोकब, चढ़ेबपुकी, लेवीपुकी नु बेबीलोन रे लेशशा यरूसलेम जाकब नेल्लेमी परमप्रभु आ खिं लेंशा सेल्चा गोम्तेक। मिनु परमप्रभु यावे आ खिं सेल्तीक गेय कोव्रचा कली २० बर्स जाकदीशो नु मेको क्येडा लाकशो लेवी आन कली योव्रशा वोइक्तीमी।

9 मिनु परमप्रभु आ खिं सेल्तीक गेय पाइब आन कली कोव्रब येशुआ नु आ तौपुकी नु आ लोकब, कदमीएल नु आ तौपुकी, बिन्नुइ नु होदावीयाह नु हेनादाद आ तौपुकी नु लेवी आन तौ नु खिं डा मुर नेल्ल गेय पाइब आन कली कोव्रब दुम्तेक।

### परमप्रभु आ खिं डा जग

10 मिनु परमप्रभु यावे आ खिं सेल्बपुकीमी जग वोइक्तेक। चढ़ेबमी आन वा फेक्शा तुराही ताप्तेक। आसाफ आ तौ लेवीपुकीम बुप्केल ताप्तेक। इस्राएल डा पिप दाऊदमी अरेशो खोदेशो पा परमप्रभु यावे कली ठेयब सेल्चा कली आन आन बाक्तीकेमी राप्तेक।

11 मिनु मेकोपुकीमी पालो पालो पा कुम्सो पाम्तेक। परमप्रभु यावे कली ठेयब सेल्ना सेल्न “गे रिम्शो पाइब बाक्नीनी” दे मान पा कुम्सो पाम्तेक। मेकोपुकीमी “परमप्रभु यावे रिम्शो पाइब बाकब, नु आ गेना हना यो दाक्तीक इस्राएली नु लीब” दे कुम्सो पाम्तेक। परमप्रभु यावे आ खिं डा जग वोइशो बाक्तीके मुर नेल्लेमी ठेयब सेंदा पा परमप्रभु यावे कली ठेयब सेल्तेक। २इतिहास ५:१३; भजन संग्रह ११८:१

12 परमप्रभु यावे आ डोंइती डा खिं तशो चढ़ेबपुकी, लेवीपुकी नु आन खिं खिं डा ठेयब मुर नु अरु खाल्पापुकी परमप्रभु यावे आ खिं डा जग वोइशो तशा, ठेयब सेंदा पा डाक्तेक। मिनु अरु मुर चहिं ग्येरशा ठेयब सेंदामी रेयके पाम्तेक। हागौ २:३

13 मिनु नेंब मुरपुकीमी ग्येरशा ग्रीशो नु डाकशो मार बाकमे मारेइ मरुबेम। मारदे हना मुर आन रेयके पशो सेंदा थम ठेयब बाक्त। मेको रेयके पशो डोन डोन सम्म नेंसे बाक्त।

## 4

### जोरी सत्रुमी श्येत गेशो

1 लेशशा जाकशो ग्याइशशा लाइक्चा पुंडसीशो यहूदा नु बेन्यामीन आस थर डा मुरपुकीमी परमप्रभु यावे, इस्राएली आन परमप्रभु आ खिं सेल्ना सेल्न बाक्नीम देशो लोव्र आन जोरी सत्रुमी नेंतेक।

2 मिनु मेकोपुकीमी जेरूब-बाबेल, येशुआ नु खिं खिं डा ठेयब मुर आन बाक्तीकेमी जाकशा “गो आंड कली यो गे नु गारशा, मेको खिं सेल्चा गेकी। गो यो गे इन खोदेशो पा इन परमप्रभु कली ठेयब सेल्ना सेल्न बाक्नीकी। मिनु गो आंड कली एक चाकब अस्मुर डा पिप एसर-हददोन आ पाला रे गो यो इन परमप्रभु कली चढ़ेन चढ़ेन बाक्तक” देंतेक। येरमीया ४१:५; २राजा १७:२४-३३; २राजा १९:३७

3 तन्न जेरूब-बाबेल, येशुआ नु इस्राएली आन लीशो खिं खिं डा ठेयब मुरपुकीमी मेको आन कली “एको खिं गो इस्राएली आंड परमप्रभु कली सेल्नीकी। एकेर गे इन पचा माल्शो मारेइ मबाकब। पारसी डा पिप कोरिसमी आंड कली अरेशो खोदेशो पा, गो आंड परमप्रभु यावे, इस्राएली आन परमप्रभु आ खिं आंमान सेल्नीकी” दे माइक्तेक।

4 मिनु नोले मेको रागी डा मुरपुकीमी यहूदी आन कली आन थुं तोक्शा गोम्तेक। मिनु मेको खिं मसेल्पाइक्चा कली हिंच कोइताकम।

### सेल्तीक गेय क्याम्चा माल्शो

5 मिनु यहूदी आन गेय नेल्ल क्याम्पाइक्चा कली, मेकोपुकीमी दरवार डा ठेयब मुर आन कली घूस गोम्तेक। मिनु मेकोपुकीमी पिप कोरिस आ सासन पची ना रे पारसी डा पिप दारा आ सासन पची ना सम्म मोदेशो गेय पना पन बाक्तेक। एजा ४:२४

6 मिनु अहासूरसमी सासन पचा गोवा आ डोंइती डा बर्स, मेको रागी डा मुरपुकीमी यहूदा नु यरूसलेम डा मुर आन कली दोस गेशो ब्रेक्स का ब्रेक्शा सोइक्ताक्मी।

7 मिनु बिश्लाम, मिश्रेदाथ, ताबेल नु मेको आ वारच नेल्ल गारशा पारसी डा पिप आरता-सास्त कली ब्रेक्स का ब्रेक्ताक्म। मेको ब्रेक्स अरामी आन लोवमी ब्रेक्शो बाक्त। मिनु मेको आ अर्थ यो ब्रेक्शो बाक्त।

8 पिप आ सोइश्शो रेहुम नु ब्रेक्तीक गेय पाइब शिम्शाइमी, पिप आरता-सास्त कली यरूसलेम आ पर्वम ब्रेक्स का ब्रेक्ताक्स।

9 पिप आ सोइश्शो रेहुम, ब्रेक्तीक गेय पाइब शिम्शाइ नु मेको निक्शी नु गेय पाइबपुकी, निसाफ पाइबपुकी, पिप आ सोइश्शोपुकी, पारसी डा ठेयब मुरपुकी, एरेक नु बेबीलोनमी बाक्ब सुसा एलाम डा मुरपुकी

10 नु नेल्ल क्येडा ठेयब मान पचा पुंडसीशो ओस्नापरमी ग्याइश्शा लाइश्शो मुर आन रागी रे गुंडशा सामरीया सहर नु आ एर ओंथ नु युफ्रेटीस खोला आ आइक्ची हांबुमी वोइश्शो मुरपुकीमी ब्रेक्ताक्म।

11 मेको सोइश्शो ब्रेक्स डा लोव मार बाक्त देशा हना “पिप आरता-सास्त कली युफ्रेटीस आइक्ची हांबुमी बाक्ब गेय पाइबपुकीमी इन कली ‘रिम्शो बाक्कीन’ देंनीम।

12 पिप इन कली मार लोव तुइक्पाइक्चा दाक्नीकी देशा हना, इन कली प्रोंइशा एको रागीमी जाक्ब यहूदीपुकी यरूसलेममी जाक्तेक्म। मिनु मेकोपुकीमी काइ मटीब नु मरिम्शो पाइब आन सहर कली लेशा सेल्ना सेल्न बाक्नीम। मेकोपुकीमी मेको आ जग लेशा सेल्शा, आ गारो यो प्रोवने थुम्चशो बाक्नीम।

13 पिप इन कली मार लोव तुइक्पाइक्चा दाक्नीकी देशा हना, मेको सहर कली लेशा सेल्तेक्म नु मेको आ गारो प्रोवने थुम्तेक्म हना, मेकोपुकीमी पिप कली थाप्तीके, आन चेम्शो रे थाप्तीक नु आन रू डा थाप्तीके मारेइ मथाप्नीम। मिनु मो पामेनु, पिप इन कली मरिम्शो दुम्ब।

14 गो पिप इन गेशो जाइनीकी। मोपतीके सुइम इन कली मान मपशो कोव्रचा मदाक्नीकी। मोपतीके पिप इन कली एको लोव तुइक्पाइक्चा कली लोव कुरब मुर सोइक्ताक्क।

15 इन किकी पिपीमी ब्रेक्शा वोइश्शो ब्रेक्स माल्शा, कोव्रडीन। मेकेर मार ब्रेक्शो बाक्मे थित्नीनी। मेको सहरम काइ मटीब मुर बाक्नीम। मेकोपुकी पिप नु रागी कली मरिम्शो पाइब बाक्नीम। मोपतीके एको सहर कली खतम पोक्शो बाक्त।

16 मिनु गो पिप इन कली मार लोव तुइक्पाइक्चा दाक्नीकी देशा हना, एको सहर लेशा सेल्तेक्म हना, नु मेको आ एर ओंथ डा गारो प्रोवने थुम्तेक्म हना, युफ्रेटीस आइक्ची हांबुम इन के मारेइ अधिकार मलीब” दे ब्रेक्शो बाक्त।

### पिपमी लोव लेशो

17 मिनु पिपमी “आ सोइश्शो रेहुम, ब्रेक्तीक गेय पाइब शिम्शाइ नु सामरीया सहर नु आ एर ओंथ नु ठेयब खोला आइक्ची हांबु बाक्ब इन गेय पाइब आन कली ‘रिम्शो बाक्कीन’ दे ब्रेक्नुड।

18 इन सोइश्शो ब्रेक्स आ कली रिम्शो पा पदेशा मेको आ अर्थ नेंपाइक्तीमी।

19 मिनु गे इन देशो खोदेशो पा ब्रेक्शा वोइश्शो लोवपुकी माल्पाइक्तामी। मिनु मार थिंसाक्व देशा हना, मेको सहर डा मुरुमी पिप आ सासन पतीकेमी मटिंशो आ पर्वम शुश लोवपुकी ब्रेक्शा वोइश्शो थिंसाक्व। मिनु साइ रे मोदेशो मटितीके, पना पन पिशो बाक्तेक्म।

20 यरूसलेममी सासन पाइब सक्ति पाइश्शो पिपपुकी बाक्तेक्म। मेकोपुकीमी युफ्रेटीस आइक्ची हांबु डा रागी नेल्ल अधिकारम वोइश्शो बाक्तेक्म। मिनु मुरपुकीमी पिप कली थाप्तीके, आन चेम्शो रे थाप्तीके नु आन रू डा थाप्तीके नेल्ल थाप्शो बाक्तेक्म।

21 मोपतीके मेको मुर आन गेय तेक्चा माल्ब, दे मतीन। मिनु गो हुकुम मगेडा सम्म मेको सहर लेशा मसेल्मेक्ल।

22 गेपुकीमी मेको आ पर्वम इन पचा माल्शो गेय हेंथे मपने। पिप आ गेय रिम्शो दुम्पाइक्चा कली मेको मरिम्शो गेय तेक्चा माल्ब” दे लोव कुरब मुर सोइक्ताक्क।



परमप्रभु आ खिं सेल्चा नाइश्शो

23 मिनु रेहुम, ब्रेक्तीक गेय पाइब शिम्शाइ नु मेको नु गेय पाइब आन डोंइती पिप आरता-सास्त आ ब्रेक्स पढेमे चोटीन रेहुम नु मेको नु बाक्ब छुल छाल बाक्शा दोरोर पा यरूसलेम लशा, मेकेर डा यहूदी आन आन सेल्तीक गेय नेल्ल ग्रा यु तेक्तेकम।

24 मे नोले यरूसलेममी परमप्रभु आ खिं सेल्तीक गेय देक्त। मिनु मोदेशो पा पारसी डा पिप दारा आ सासन पशो बर्स निक्शी जाक्दीम सम्म मेको सेल्तीक गेय देक्शा लीत।

## 5

परमप्रभु आ खिं लेंशा सेल्शो

1 मिनु परमप्रभु यावे आ लोत्र पाइब हागै नु इददो आ तौ जकरियामी यहूदा नु यरूसलेममी बाक्ब यहूदी आन कली इस्राएली आन परमप्रभु आ देशो लोत्र पाम्ताक्स। हागै १:१; जकरिया १:१

2 मिनु शाल्तीएल आ तौ जेरूब-बाबेल नु योसादाक आ तौ येशुआमी यरूसलेममी परमप्रभु आ खिं लेंशा सेल्चा गोम्सेनु, परमप्रभु यावे आ लोत्र पाइबपुकीमी यो मेको आन कली वारच पाम्तेकम।

यहूदी आन गेय तेक्चा माल्शो

3 मिनु युफ्रेटीस आइक्ची हांबु डा रागीम सासन पाइब तत्तेनाइ, शेथार-बोजेनाइ नु मेको नु बाक्बपुकी रीब पा यहूदी आन बाक्तीकम जाक्शा “एको खिं लेंशा सेल्चा नु थुम्चा कली इन कली सुम अधिकार गेवा?” दैतेकम।

4 मिनु मेकोपुकीमी मेको खिं सेल्ब आन नें यो पुंडतेकम।

5 तन्न परमप्रभुमी यहूदी आन खाल्पा आन कली वारच पाप्तु। मिनु मेकोपुकी पिप दारा आ बाक्तीकम आन ब्रेक्स जाक्दीश्शा, पिपमी मार देंबा, मेको लोत्र मनेन्मे सम्म, मेको गेय तेक्ने मचबेम। ब्यवस्था ११:१२; १राजा ८:२९

तत्तेनाइमी पिप दारा कली ब्रेक्शो

6 युफ्रेटीस आइक्ची हांबु डा रागी कली हुकुम पाइब, तत्तेनाइ, शेथार-बोजेनाइ नु मेको नु बाक्ब सोइश्शोपुकीमी पिप दारा कली ब्रेक्स का ब्रेक्शा सोइश्शो बाक्तेकम। मेको ब्रेक्स एको बाक्ब।

7 मेको आन सोइश्शो ब्रेक्समी मार ब्रेक्शो बाक्त देशा हना “पिप दारा इन थुं नाइश्शा रिम्शो बाक्कीन।

8 पिप, इन कली लोत्र का तुइक्पाइक्चा दाक्नीकी। मार लोत्र तुइक्पाइक्चा दाक्नीकी देशा हना, गो यहूदा रागीमी ठेयब परमप्रभु आ खिं बाक्तीक लाइतक। मेको ठेयब खोइश्शो फुल्लुमी सेल्नीम। आ गारो तार शी वोइक्ने थुम्तेकम। शुश गेय पा, रीब पा सेल्ना सेल्न बाक्नीम” दे ब्रेक्शो बाक्त।

9 मिनु मेको खाल्पा आन कली “इन कली एको खिं लेंशा सेल्चा नु थुम्चा कली सुम अधिकार गेवा? दे हिल्लो पाइतक।

10 मिनु इन कली ब्रेक्चा नु तुइक्पाइक्चा कली मेको आन ठेयब मुर आन नें यो हिल्लो पाइतक।

11 तन्न मेकोपुकीमी ‘गो सरीड नु रागी डा परमप्रभु आ गेय पाइब नकी। मिनु शुश बर्स डोंइती सेल्शो खिं लेंशा सेल्ना सेल्न बाक्नीकी। मेको डोंइती डा खिं इस्राएल डा ठेयब पिप कामी सेल्शो बाक्त।

12 तन्न आंइ किकी पिपीमी स्वर्ग डा परमप्रभु कली चुरपाइश्शो बाक्तेकम। मिनु मेकोमी मेको आन कली बेबीलोन डा कल्दी आन पिप नेबुकदनेसर आ गुइमी गेशो बाक्त। मिनु मेको पिपमी एको खिं कली प्रेशशो बाक्त। मुर आन कली ग्याइश्शा बेबीलोन रागीमी लाइश्शो बाक्त। २राजा २४:१०-१४; २राजा २५:९

13 तन्न बेबीलोन डा पिप कोरेसमी आ सासन पशो डोंइती डा बर्समी एको परमप्रभु आ खिं लेंशा सेल्चा कली हुकुम गेशो लोत्र ब्रेक्शा गुंइशो बाक्त। एजा १:१-२

14 नेबुकदनेसरमी यरूसलेम डा सुन नु चांदी के बोसपुकी परमप्रभु आ खिं रे लाइशशा बेबीलोन डा मन्दीरम वोइशशो बाक्त। मिनु पिप कोरेसमी मेको बोसपुकी बेबीलोन डा मन्दीर रे गुंडशा शेश-बस्सार कली गेपु। पिप कोरेसमी शेश-बस्सार कली सासन पचा कली योवशो बाक्त। एजा १:७-८

15 मिनु मेको कली 'एको बोसपुकी लाइशशा यरूसलेम डा परमप्रभु आ खिंमी वोतो' देंत। मिनु परमप्रभु आ खिं डोंइती आ बाक्तीक उइ लेंशा सेल्चा माल्नीम" दे माइक्तु।

16 मिनु मेको शेश-बस्सार जाक्शा, यरूसलेममी परमप्रभु आ खिं आ जग वोइक्तु। मेना रे मुल सम्म एको लेंशा सेल्ना सेल्न बाक्नीम। मिनु मेको मुल सम्म सेल्ने मथुशो बाक्ब।

17 मोपतीके मुल पिप, गे दाक्नीनी हना, बेबीलोन डा पिप आन पालामी मार मार दुम्शो बाक्मे, मेको ब्रेक्स वोइक्तीकेमी माल्पतीन। मिनु पिप कोरेसमी यरूसलेममी परमप्रभु आ खिं लेंशा सेल्चा कली हुकुम पशो लोव्र ब्रेक्शा गुंडशो बाक्म कों मबाक्म? मिनु मेको आ परबम इन दाक्शो मार बाक्बा, मेको आंइ कली तुइक्पतीन, दे ब्रेक्शो बाक्त। एजा ८:३६

## 6

### पिप कोरेस आ ब्रेक्स थिश्शो

1 मिनु बेबीलोन रागीमी पिप दारामी सासन पा मार मार ब्रेक्स वोइक्तीकेमी पिप आन ब्रेक्स माल्तेक्म।

2 मिनु मादी रागी डा ठेयब सहर एक-बतानामी तोल्शा वोइशशो ब्रेक्स का थित्तेक्म। मिनु मेको ब्रेक्समी मार ब्रेक्शो बाक्त देंशा हना

3 पिप कोरेसमी सासन पशो डोंइती डा बर्समी यरूसलेममी परमप्रभु आ खिं आ परबम हुकुम पशो ब्रेक्स का गुंडशो बाक्ब। मार लोव्र गुंडशो बाक्ब देंशा हना "मेको खिं लेंशा सेलीन। मेको चढ़ेचा कली नु चोशा चढ़ेतीक चढ़ेचा कली बाक्ब। आ ग्येल्थ लाइशशो ६० कुबीत नु आ पित्थ ब्रेम्शो ६० कुबीत दुम्चा माल्ब। कुबीत का आधा मिटर खोदेशो बाक्ब।

4 मेको खोइशशो फुल्लु के लहर सां नु शी के लहर का पा सेल्चा। मिनु मेको सेल्चा कली आ माल्शो नेल्ल पिप आ क्येट वोइक्तीक रे गेचा।

5 पिप नेबुकदनेसरमी यरूसलेम डा परमप्रभु आ खिं रे गुंडशा बेबीलोन सहरम चाक्शो सुन नु चांदी के बोसपुकी यो लेंशा डोंइती डा आन बाक्तीक उइ वोइक्चा। मेको नेल्ल यरूसलेममी परमप्रभु आ खिंमी लाइशशा वोइक्चा नम" दे ब्रेक्शो बाक्त।

### पिप दारामी वारच पशो

6 मिनु पिप दारामी "युफ्रेटीस आइक्ची हांबु डा रागीमी हुकुम पाइब तत्तेनाइ, शेथार-बोजेनाइ नु इन गेय पाइबपुकी नु युफ्रेटीस आइक्ची हांबुम बाक्ब सोइशशो नेल्ल इन कली

7 परमप्रभु आ खिं सेल्तीक गेय मतेक्कीन। यहूदी आन कली सासन पाइब नु मेको आन खाल्पा आन कली परमप्रभु आ खिं डोंइती डा आ बाक्तीक उइ सेल्चा गेने।

8 मिनु गो हुकुम का पाइनुड। गे यहूदी आन खाल्पा आन कली परमप्रभु आ खिं सेल्चा कली मार पचा माल्नीनी मेको यो इन कली हुकुम गेनन्नी। मेको सेल्तीक गेय पचा कली युफ्रेटीस आइक्ची हांबु डा रागी रे पोक्शो तिरो रे पिप आ क्येट वोइक्तीक रे मेको आन कली माल्शो नेल्ल गेने।

9 मिनु मेको आन कली माल्शो, बाछा, सांड, पाठा स्वर्गम बाक्ब परमप्रभु कली चोशा चढ़ेतीक चढ़ेचा कली गेचा माल्नीनी। यरूसलेममी बाक्ब चढ़ेब आन माल्शो चेरब, हिक्सी, अडगुर शांबु नु तेल मप्रेंथु, नाक्त किंत किंत रीब पा गेचा माल्नीनी।

10 मिनु मेकोपुकीमी स्वर्ग डा परमप्रभु आ दाक्चा डा पा चढ़ेने चाप्नीम। मिनु पिप नु आ तौपुकी शुश ब्रोंइशा बाक्ने चाप्मेक्ल, दे परमप्रभु कली पुंडनीम।

11 मेको प्रोंइशा यो गो एको हुकुम गेनन्नी सुमी एको आं अरेशो लोव्र फाइक्बा, मेको आ खिं डा थाम का गुंडशा, मेको थाममी क्युक्चा पुंडसीब। मिनु मोशो ला ममाइ, आ खिं यो प्रेशा गेचा पुंडसीब।

12 परमप्रभुमी आ नें तुइक्पाइक्का कली यरूसलेममी आ बाक्तीक सेल्पाइश्शो बाक्त। परमप्रभुमी आ हुकुम फाइक्ब नु यरूसलेम आ खिं प्रेक्ब पिप नेल्ल नु अरु मुर, सु बाक्तेक्म हना यो, मेको आन कली खतम पोक्गाल। गो पिप दाराम हुकुम पाता। मेको रीब पा पचा माल्नीम” दे हुकुम पात्तु।

### परमप्रभु आ लोत्र गाप्शो

13 मिनु पिप दारामी अरेशो लोत्र युफ्रेटीस आइक्की हांबु डा रागीम हुकुम पाइब ततेनाइ, शेथार-बोजेनाइ नु मेको नु बाक्ब नेल्लेमी का यो मखाइक्थु पांमतेक्म।

14 मिनु यहूदी आन खाल्पापुकीमी सेल्ना सेलन बाक्तेक्म। परमप्रभु यावे आ लोत्र पाइब हागै नु इददो आ तौ जकरिया आस देशो खोदेशो पा रीब पा दुम्ना दुम्न लत। इस्राएली आन परमप्रभु आ देशो खोदेशो पा, पारसी रागी डा पिप कोरिस आ हुकुम गेशो खोदेशो पा, पिप दारा आ वारच पतीकेमी नु पिप आरता-सास्त आन ब्रेक्शा गुंडशो हुकुम खोदेशो पा मेकोपुकीमी मेको खिं लेंशा सेल्ने थुमतेक्म।

15 पिप दारा आ सासन पशो ६ बर्स दुम्मेनु, अदार माइश्शो महिना डा सां नाक्तीम मेको खिं सेल्ने थुमतेक्म।

### परमप्रभु आ खिं जिम्मा गेशो

16 मिनु नोले इस्राएल डा मुरपुकी, चढ़ेबपुकी, लेवीपुकी नु लेशशा जाक्शो ग्याइश्शा लाइक्का पुंडसीब नेल्लेमी परमप्रभु आ खिं परमप्रभु कली “इन के बाक्ब” दे ग्येरसीशा जिम्मा गेम्तेक्म।

17 मोपा मेकोपुकीमी मेको खिं परमप्रभु कली जिम्मा गेमेनु, सहे का ब्यफ, सहे निक्शी सांड नु ४ सहे पाठा चढ़ेम्तेक्म। मिनु इस्राएली आन पाप आ पर्वम १२ थर आन कली, बोका का का पा, १२ ओटा बोका चढ़ेम्तेक्म। गन्ती ७:१०

18 मिनु मेकोपुकीमी मोसा आ किताबमी ब्रेक्शो खोदेशो पा चढ़ेब आन पालो पालो पा नु लेवी आन पालो पालो पा यरूसलेममी परमप्रभु आ गेय पचा कली लेंशा वोइक्तेक्म। गन्ती ३:६

### पास्सा चाड मानेशो

19 मिनु लेशशा जाक्शो ग्याइश्शा लाइक्का पुंडसीबपुकीमी डोंइती डा महिना डा १४ नाक्तीमी पास्सा चाड मानेम्तेक्म।

20 चढ़ेब नु लेवी नेल्लेमी आंम आन कली ठीक सेल्सीशो बाक्तेक्म। मेको नेल्ल परमप्रभु कली गेय पचा कली ठीक दुम्शो बाक्तेक्म। मेकोपुकीमी लेशशा जाक्शो ग्याइश्शा लाइक्का पुंडसीब, चढ़ेब आन लोक्ब आन कली नु आंम आन कली पास्सा चाड डा पाठा क्योरतेक्म।

21 लेशशा जाक्शो ग्याइश्शा लाइक्का पुंडसीब इस्राएलीपुकीम मेको ब्वांमतेक्म। मिनु रागी डा मरिम्शो दुम्तीके रे दिल्लो परमप्रभु यावे, इस्राएली आन परमप्रभु कली ठेयब सेल्ब मुरपुकी मेको नु गारशा ब्वांमतेक्म। ब्यवस्था १६:१-८

22 मिनु मेकोपुकीमी ग्येरशा ७ नाक्त सम्म बोरब ओरुती मसुप्शो शोब्ले डा चाड मानेम्तेक्म। मारदे हना परमप्रभु यावेमी मेको आन कली ग्येरपाइश्शो बाक्त। मेकोमी अस्सुर डा पिप आ थुं हिरशा, मेको आन कली दाक्पाइश्शो बाक्त। मोपतीके मेको पिपमी इस्राएल डा परमप्रभु आ खिं सेल्चा कली मेको आन कली वारच पाइक्तीमी।

## 7

### एजा यरूसलेममी जाक्शो

1 मिनु मेको नोले, पारसी रागी डा पिप आरता-सास्तमी सासन पची ना, सेरायाह आ तौ एजा बेबीलोन रे कुत। मेको सेरायाह आ आफ अजारयाह बाक्त। अजारयाह आ आफ हिल्कीयाह बाक्त। १इतिहास ५:३९-४०

2 हिल्कीयाह आ आफ शाल्लुम बाक्त। शाल्लुम आ आफ सादोक बाक्त। सादोक आ आफ अहीतुब बाक्त।

3 अहीतुब आ आफ अमारयाह बाक्त। अमारयाह आ आफ अजारयाह बाक्त। अजारयाह आ आफ मेरायोथ बाक्त।

4 मेरायोथ आ आफ जेराह बाक्त। जेराहीयाह आ आफ उज्जी बाक्त। उज्जी आ आफ बुक्की बाक्त।

5 बुक्की आ आफ अबीशुआ बाक्त। अबीशुआ आ आफ फिनेहास बाक्त। फिनेहास आ आफ एलाजर बाक्त। एलाजर आ आफ नेल्ल क्येडा टेयब चढ़ेब हारून बाक्त।

6 मेको एजा बेबीलोन रागी रे जाक्त। मोसा रे पा गेशो, परमप्रभु यावे, इस्राएली आन परमप्रभु आ अरेशो लोत्र जोक्ब तुइक्ब बाक्त। मिनु पिपमी आ पुंडशो नेल्ल गेप्टु। मारदे हना आ परमप्रभु यावे आ गुइ मेको आ तारी बाक्त। एजा ८:१८-२२; नेहेम्याह २:८

7 आरता-सास्त पिप दुम्शो ७ बर्स जाक्दीम्मेनु, का निकशी इस्राएली, का निकशी चढ़ेब, लेवी, कुम्सो पाइब, लाप्चोम खाल पाइब नु परमप्रभु आ खिंमी गेय पाइब मेको नु यरूसलेम लाम्तेकम।

8 मिनु पिपमी सासन पशो ७ बर्स डा ५ महिना दुम्मेनु, मेकोपुकी यरूसलेममी जाक्दीत्तेकम।

9 मिनु डोंइती डा महिना डा डोंइती डा नाक्तीमी बेबीलोन रागी रे यरूसलेम लचा गोम्तेकम। मिनु मेकोपुकी ५ महिना डा डोंइती डा नाक्तीमी यरूसलेम जाक्तेकम। मारदे हना परमप्रभु यावे, आ परमप्रभु आ शिशी पतीक गुइ मेको आन तारी बाक्त।

10 एज्जामी परमप्रभु यावे आ अरेशो लोत्र रुप्चा नु पचा कली आ थुं फ्रेशो बाक्त। मिनु परमप्रभु आ फुल्लुम मुशा ब्रेक्शो नु आ ठीक पतीक लोत्र इस्राएलम शेंचा कली मिम्शो बाक्त।

### पिपम एजा कली ब्रेक्स गेशो

11 मेको पिप आरता-सास्तमी चढ़ेब एजा कली गेशो ब्रेक्स डा लोत्र एको बाक्ब “मेको एजा नेल्ल ब्रेक्स तुइक्ब, परमप्रभु यावेमी इस्राएली आन कली शेंशो नु फुल्लुम मुशा ब्रेक्शो लोत्र रुप्चा जोक्ब बाक्त।

12 ‘पिप आन पिप आरता-सास्तमी स्वर्ग डा परमप्रभु आ अरेशो लोत्र जोक्ब तुइक्ब चढ़ेब एजा कली थुं नाइशशा बाक्को!’

13 गो हुकुम का गेनन। मार हुकुम गेनन देश हना, आ रागीम बाक्शो इस्राएल डा मुर, चढ़ेबपुकी नु लेवीपुकी यरूसलेममी सु लचा दाक्नीमी, मेको गे नु लने चाप्नीम।

14 गो, पिप नु आं ७ जना अर्ती गेबपुकीमी इन कली यहूदा नु यरूसलेममी मार दुम्ना दुम्न बाक्मे, मेको कोत्रचा कली सोइशशो बाक्नीकी। गे नु बाक्ब इन परमप्रभु आ अरेशो लोत्र पशो बाक्मा कों, मपशो बाक्मा, मेको कोत्रडो।

15 गो, पिप नु आं ७ जना अर्ती गेबपुकीमी ग्येरशा गेशो सुन चांदी यरूसलेममी बाक्ब इस्राएली आन परमप्रभु कली लतीन।

16 मिनु गे बेबीलोन रागी नेल्लेमी इ कली गेशो सुन चांदी लाइशशा लने। मुर नु चढ़ेबपुकीमी यरूसलेम सहरम बाक्ब आन परमप्रभु आ खिं कली ग्येरशा गेशो मार मार यो लतीन।

17 मिनु मेको क्येटीमी यरूसलेममी इन परमप्रभु कली चढ़ेतीकेमी चढ़ेचा कली ब्यफ, सांड नु पाठापुकी ग्यापीन। मेको नु चढ़ेचा कली अन्न नु तूचा थोत्रक यो ग्याप्चा माल्नीनी।

18 मेको मोपा ग्याप्शा यो सुन चांदी हैत हना, इन परमप्रभु आ दाक्स पा, गे नु इन लोक्बपुकीमी मार पशो नु रिम्शो लाक्नीनी, मेको पने चाप्नीनी।

19 इन परमप्रभु आ खिंमी गेय पचा कली गेशो बोसपुकी, गे मेको यरूसलेममी परमप्रभु आ डोंइती वोइक्चा माल्नीनी।

20 मिनु इन परमप्रभु आ खिं कली मारेइ माल्ताक्व हना, मेको पिप आ क्येट वोइक्तीक रे शोल्शा, गेय पने चाप्नीनी।

21 गो, पिप आरता-सास्तमी, युफ्रेटीस आइक्ची हांबु डा रागी डा क्येट कोत्रशा वोइक्ब आन कली हुकुम गेतामी। नेल्ल आन कली ‘स्वर्ग डा परमप्रभु आ अरेशो लोत्र जोक्ब तुइक्ब चढ़ेब एज्जामी इन कली मार पुंडतु हना यो, रीब पा गेने।

22 सहे का टलेन्ट चांदी, सहे का कोर चेरब, सहे का बाथ अङ्गुर शांबु, सहे का बाथ तेल नु हिकसी दोशो माल्नीमी मोशो गेन। टलेन्ट का ३४ किलो बाक्ब। कोर का २२० लिटर, ठेयब पुक्तीके बाक्ब। बाथ का २२ लिटर बाक्ब।

23 स्वर्ग डा परमप्रभुमी मार अरेशो बाक्मे आ खिं कली मार माल्दा मेको रीब पा स्वर्ग डा परमप्रभु कली गेने। मो मद्मुत हना, आ गाइश्शो पिप आ राज्य नु आ तौ चच आन तार मोंइसीब।

24 मिनु गो इन कली मार तुइक्पाइक्चा दाक्नीकी देशा हना, चढेब, लेवी, कुम्सो पाइब, लाप्चो खाल पाइब, परमप्रभु आ खिंमी गेय पाइब नु अरु गेय पाइब आन कली पिप कली गेतीक क्येट नु तिरो पोक्चा मताइनीम' दे हुकुम गेनन्नी।

25 मिनु गे, एजा इ परमप्रभुमी इ कली तुइक्ब थुं गेशो बाक्त। मोपतीके युफ्रेटीस आइक्ची हांबु डा रागी कली हुकुम पाइब नु निसाफ पाइब योव्रशा वोइक्चा माल्नेवे। मेकोपुकीमी युफ्रेटीस आइक्ची हांबु डा मुर नेल्ल आन कली निसाफ पचा माल्नीम। मेको परमप्रभु आ अरेशो लोव्र तुइक्ब दुम्चा माल्नीम। गे मतुइक्ब आन कली शेंचा माल्नेवे।

26 इ परमप्रभु आ लोव्र मटीब नु पिप आ अरेशो मटीब, नेल्ल आन कली सजाइ गेचा माल्नीम। मेको आन कली साइक्चा पुंडसीचा डा, रागी रे तिल्चा पुंडसीतीके, मेको आन शोप नेल्ल रोइक्चा पुंडसीतीके नु चोक्चा पुंडसीतीके, मार सजाइ हना यो गेचा माल्नीम” दे ब्रेक्शो बाक्त।

27 मिनु एजामी “परमप्रभु यावे, आंइ किकी पिपी आन परमप्रभु, गे ठेयब बाक्नीनी। यरूसलेममी बाक्शो परमप्रभु यावे, इन खिं आ मान नु छेडछेड बारपाइक्चा कली पिप आ थुंमी मोदेशो रिम्शो पतीके कुर पाइतीनी।

28 मिनु पिप, आ अर्ती गेबपुकी नु गेय पाइब आन ठेयब मुरपुकीमी आं कली दाक्ब सेलतीनी” देत। मारदे हना परमप्रभु यावे, आं परमप्रभु आ गुइ आं तारी बाक्ब, दे तुइश्शा, आं थुं ठेयब सेलता। मिनु गो नु यरूसलेम लचा कली बेबीलोनम बाक्शो इस्राएली आन ठेयब मुर आन कली पुक्ताक्मी।

## 8

बेबीलोन रे लेशशा जाक्ब आन नें

1 पिप आरता-सास्तमी सासन पवाना बेबीलोन रे गो नु लाइब खिं खिं डा ठेयब मुर आन नें ब्रेक्तीकेम ब्रेक्शो सु सु बाक्तेक्म देशा हना, एजा ७:१,७

2 फिनेहास आ चच युइ रे गेरशोम, इथामार आ चच युइ रे दानीएल, दाऊद आ चच युइ रे हत्तुश, इतिहास ३:२२

3 शेकन्याह आ चच युइ, पारोश आ चच युइ, जकरिया नु नें ब्रेक्तीकेम नें ब्रेक्शो १५० जना वोंइश मुर,

4 पहाथ-मोआब आ चच युइ रे, जेराहीयाह आ तौ एली-ए-होएनाइ नु मेको नु २०० जना वोंइश मुर, एजा २:६

5 जत्तु आ चच युइ रे याहासीएल आ तौ शेकन्याह नु ३०० जना वोंइश मुर,

6 आदीन आ चच युइ रे योनाथन आ तौ एबेद नु ५० जना वोंइश मुर,

7 एलाम आ चच युइ रे अथाल्याह आ तौ येशायाह नु ७० जना वोंइश मुर,

8 शेफत्याह आ चच युइ रे मिकाएल आ तौ जेबदीयाह नु ८० जना वोंइश मुर,

9 योआब आ चच युइ रे येहीएल आ तौ ओबदिया नु २१८ जना वोंइश मुर,

10 बानी आ चच युइ रे योसीफीया आ तौ शेलोमीथ नु १६० जना वोंइश मुर, एजा २:१०

11 बेबाइ आ चच युइ रे आ तौ जकरिया नु २८ जना वोंइश मुर,

12 अज्गाद आ चच युइ रे हककातान आ तौ योहानान नु ११० जना वोंइश मुर,

13 नोले जाक्शो अदोनीकाम आ चच युइ रे एली-फेलेत, येहुएल नु शेमायाह नु ६० जना वोंइश मुर,

14 मिनु बिग्वाइ आ चच युइ रे उथाइ, जाक्कुर नु ७० जना वोंइश मुर बाक्तेक्म।

चढेब लेवी आन कली माल्शो

15 गो मेको मुर नेल्ल आन कली अहावा गे लाइब खोला आ नेक्थाम पुक्ताक्मी। मिनु गो मेकेर नाक्त सां सम्म बाक्तीक सेल्शा बाक्तक। मिनु गो मुर नु चढेब आन कली कोवडुमीनु, लेवी आ चच युइ काइ मबाक्म।

16 मिनु गो मुर आन कली एलीएजर, अरीएल, शेमायाह, एल्नाथान, यारीब, एल्नाथान, नाथान, जकरिया नु मेशुल्लाम आन कली ब्रेत्थ सोइक्ताक्ड। मेको लेवी आन दातेमी ठेयब मुर बाक्तेक्म। जोक्ब तुइक्ब योयारीब नु एल्नाथान आस कली यो ब्रेत्थ सोइक्ताक्ड।

17 मिनु गो कासीपीया डा ठेयब मुर इददो आ बाक्तीकेमी “लन” दे सोइक्ताक्डमी। मिनु मेको आन कली कासीपीयाम लशा, इददो मेको आ मुरपुकी नु मेकेर डा परमप्रभु आ खिमं गेय पाइब आन कली “आंइ परमप्रभु आ खिमं गेय पचा कली गेय पाइबपुकी सोइक्तीन” दे माइक्थ सोइक्ताक्डमी।

18 आंइ परमप्रभु आ शिशि पतीके गुइ आंइ तारी बाक्त। मारदे हना मेकोपुकीमी जोक्ब तुइक्ब मुर का चाक्तेक्म। मेको इस्राएल आ तौ लेवी आ तौ माहली आ चच युइ शेरेब्याह माइश्शो मुर बाक्त। मेको आ तौपुकी नु आ लोक्ब नेल्ल पा १८ जना वोइश्श मुर चाक्तेक्म। एजा ७:६

19 मिनु मेकोपुकीमी यो हशाब्याह, मेरारी आ चच युइ येशायाह नु मेको आ लोक्ब नु मेको आन तौ २० जना यो चाक्तेक्म।

20 मिनु मेको आन कली प्रोइशा २२० जना परमप्रभु आ खिमं गेय पाइब यो चाक्तेक्म। डोंइती दाऊद नु आ गेय पाइब ठेयब मुरपुकीमी लेवी आन कली वारच पचा कली योव्रशा वोइश्शो बाक्त। मेको नेल्ल आन नें नें ब्रेक्तीकेम ब्रेक्शो बाक्तेक्म। १इतिहास ९:२

### माइजा बाक्शा, पुंइशो लोव

21 मिनु गो अहावा खोलाम बाक्कानु, गो मुर आन कली “परमप्रभु कली पुंइचा कली गो माइजा बाक्चा मालनय” देती। “परमप्रभु आ डोंइती आंइ दाक्शो मपथु, आंइ कली, आंइ आल आन कली नु आंइ शोंप कली लाम रिम्शो दुम्ल” दे परमप्रभु कली पुंइतक।

22 गो आंइ कली लाम आंइ जोरी सत्रु रे प्रोइचा कली लडाइ पाइब नु शारा डोइक्बपुकी सोइक्तीकी, दे पिप कली पुंइचा मुने पाता। मारदे हना गोपुकीमी पिप कली “आंइ परमप्रभुमी आ नोले खोइक्ब नेल्ल आन कली कोवब। तन्न मेको कली प्रोइब आन कली आ गाइश्शो कोइब” देशो नड।

23 मिनु गो आंइ रिम्शो पा गाक्तीक आ पबंम माइजा बाक्शा, आंइ परमप्रभु कली पुंइतक। मिनु परमप्रभुमी आंइ पुंइशो नंतु।

### परमप्रभु आ शोंप जिम्मा गेशो

24 मिनु गो ठेयब चढेब आन दाते रे १२ जना आन कली योव्रतामी। मेको सु सु बाक्तेक्म देशा हना, शेरेब्याह नु हशाब्याह नु मेको आस लोक्ब १० जना बाक्तेक्म।

25 मिनु पिप आ अर्ती गेब, मेको आ गेय पाइब ठेयब मुरपुकी नु मेकेर बाक्ब इस्राएली नेल्लेमी परमप्रभु आ खिमं कली गेशो सुन चांदी नु अरु बोसपुकी नाक्शा, मेको आन कली गेतामी।

26 गो मेको आन कली ६ सहे ५० टलेन्ट चांदी, अरु सहे का टलेन्ट डा चांदी के बोस नु सुन सहे का टलेन्ट, टलेन्ट का ३४ किलो बाक्ब।

27 सुन के बोस २० ओटा, मेको नेल्ल हजार का आदारकोन डा बाक्नीम। नु सुन खोदेशो रिम्शो कांसा के बोस निक्शी यो गेतामी। आदारकोन सुन के क्येट बाक्ब। टुक्रा का ८.४ ग्राम बाक्ब।

28 मिनु गो मेको आन कली “गे परमप्रभु यावे आ मुर बाक्नीनी। एको बोस यो परमप्रभु यावे आ बोस बाक्नीम। मुरपुकीमी एको सुन नु चांदी इन किकी पिपी आन परमप्रभु कली ग्येरशा गेशो बाक्नीम।

29 गे मेको नेल्ल कली रिम्शो कोवडीन। यरूसलेम परमप्रभु यावे आ खिमं ठेयब चढेबपुकी, लेवी नु इस्राएली आन खिमं खिमं डा ठेयब मुर आन डोंइती नाक्शा मगेशो सम्म होस पा कोवडीन” दे माइक्तामी।

30 मिनु मेको चढेब नु लेवीपुकीमी यरूसलेम बाक्शो आंइ परमप्रभु आ खिमं लाइक्चा कली मेको नाक्शो सुन चांदी नु बोसपुकी ताक्तेक्म।

### इस्राएलीपुकी यरूसलेम जाक्शो

31 मिनु गो डोंडती डा महिना डा १२ नाक्तीमी यरूसलेम लचा कली अहावा खोला रे गाक्तक। मिनु आंइ परमप्रभु आ गुइ आंइ तार बाक्त। मेकोमी पतीके जोरी सत्रु नु लांम बाप्शा बाक्ब रे ब्रोंडतक।

32 मिनु गो यरूसलेम जाक्शा नाक्त सां सम्म नांइसाक्क।

**परमप्रभु आ खिं डा शोंप चाक्शो**

33 मिनु आ दीसा मेको सुन चांदी नु बोसपुकी, आंइ परमप्रभु आ खिंमी लाइश्शा, चढेब उरीयाह आ तौ मेरेमोथ कली नाक्शा गेतक। मेको नु फिनेहास आ तौ एलाजर यो बाक्त। मिनु मेको निक्शी नु लेवी आन दाते डा येशुआ आ तौ योजाबाद नु बिन्नुइ आ तौ नोआदीयाह यो बाक्ताक्स।

34 मेको नेल्ल हिक्शा नाक्शा ब्रेक्शा वोइक्तेक्म।

**जाक्बपुकीमी चोशा चढेशो**

35 लेश्शा जाक्शो ग्याइश्शा लाइक्चा पुंइसीब इस्राएलीपुकीम आन परमप्रभु कली चोशा चढेक्तेक्म। इस्राएली नेल्ल आन परबंम १२ ओटा ब्यफ, १६ ओटा सांड, ७७ ओटा पाठा नु पाप आ परबंम चढेतीके चढेचा कली १२ ओटा बोका चढेक्तेक्म। मेको नेल्ल परमप्रभु यावे कली चोशा चढेतीके बाक्तेक्म। एज़ा ६:१७

36 मेकोपुकीमी पिपमी ब्रेक्शा अरेशो लोत्र युफ्रेटीस आइक्की हांबु डा रागी डा पिप आ गेय पाइब नु हुकुम पाइब आन कली गेक्तेक्म। मिनु मेकोपुकीमी मुर आन कली नु परमप्रभु आ खिं कली ठेयब वारच पाइक्तेक्म।

## 9

**इस्राएली आन मरिम्शो पशो**

1 मिनु मेको नेल्ल पने थुम्शो नोले का निक्शी योत्रचा पुंइसीशो मुरपुकी आं बाक्तीकेम जाक्शा “इस्राएल डा मुरपुकी, चढेब नु लेवीपुकीमी, कनानी हित्ती, परिज्जी, यबुसी, अम्मोनी, मोआबी, इजीप्ती नु एमोरी आन ग्रान्रा दिशो गेय रे डोन मदुम्शो बाक्नीम।

2 मेकोपुकीमी मेको आन तमी आंम कली नु आन तौ आन कली मीश चाक्शो बाक्तेक्म। मोदेशो पा परमप्रभु आ आंम मुरपुकी अर्को रागी डा मुरपुकी नु खाल्साक्म। मिनु योत्रचा पुंइसीशो ठेयब मुर नु सासन पाइब आन परमप्रभु आ देशो मपथु, शुश दोस ताइब बाक्नीम” दैतेक्म। ब्यवस्था ७:३; ब्यवस्था २३:३; गन्ती ११:१७-२५; नेहेम्याह १३:२३

3 मिनु गो मेको लोत्र नेंशा आं फेक्शो वा खाक्ता। आं चां नु गल शोक्ने तुल्ला। मारेइ लोत्र पने मचापथु, सिक्सी पा बाक्ती।

4 मेको ग्याइश्शा लाइक्चा पुंइसीब आन मरिम्शो पतीके आ परबंम इस्राएली आन परमप्रभु आ लोत्र कली मान पा हिंबपुकी आं बाक्तीकेम एर ओंथ बुक्तेक्म। मेकेर रे गो नाक्दो डा चढेतीक सम्म मारेइ लोत्र पने मचापथु, सिक्सी पा बाक्ती।

**एज़ामी परमप्रभु कली पुंइशो**

5 मिनु नाक्दो डा चढेतीक दुम्मेनु, आं खाक्शो वा फेक्शा, गो पोक्च थेक्शा, आं गुइ परमप्रभु यावे, आं परमप्रभु गे दिंशा

6 “आं परमप्रभु, गो इन कली आं कुल कोंइचा थाम्पा मुने पाता। मारदे हना आंइ मरिम्शो पतीके आंइ पिया क्येडा यो लाक्शो बाक्ब। मिनु आंइ दोस सरीड सम्म जाक्दीशो बाक्ब। दानीएल ९:७-८

7 गो आंइ किकी पिपी रे मुलाक्त डा नाक्त सम्म आंइ दोस थम ठेयब बाक्ब। आंइ काइ मरिम्शो पतीके आंइ पिप नु चढेबपुकी अर्को रागी डा पिप आन गुइमी साइक्चा, चोक्चा, मारेइ मारेइ रोइक्चा पुंइसीचा नु शुश मुने तोक्चा पुंइसाक्म। मिनु गोपुकी यो सिनाक्त मुलाक्त मोदेशो दुम्शो बाक्नीकी।

8 तन्न मुल परमप्रभु यावे, आंइ परमप्रभुमी आंइ कली का निक्शी लीशो मुर गेतीनी। आंइ वाइल दुम्तीक रे इक्का नाक्त कली नाइक्चा गेतीके आंइ परमप्रभु आ बाक्तीकेमी बाक्चा ताइतक। याम का कली आंइ कली शिशी पा ग्येरेपाइक्तीनी।

9 गो वाइलीम वाइल बाक्तक हना यो, आंइ परमप्रभुमी आंइ कली मप्रॉइशो बाक्ब। पारसी रागी डा पिप आ डोंइती इन गेना हना यो दाक्तीके कोंइशो बाक्तीनी। आंइ कली नक ब्रोंइचा गेशा, आंइ परमप्रभु आ खिं लेंशा सेल्चा कली नु ब्रेशो नेल्ल लेंशा सेल्चा कली नु यहूदा नु यरूसलेम एर ओंथ गारो प्रोव्रचा गेतीनी।

10 मोदेशो बाक्त हना यो, आंइ परमप्रभु, मुल गो मार देने चाप्नीकी? गोपुकीमी इन शेंशो मटिथु, प्रोंइतक।

11 गे इन लोव्र पाइब रे मार लोव्र पपाइक्तीनी देशा हना 'इन के सेल्चा कली ओव्रशो रागी ग्रॉग्रा दिशो बाक्त। मारदे हना मेको रागी डा मुर आन ग्रॉग्रा दित्चा डा गेयमी मेको रागी डा कुना कुना नेल्ल ब्रीशो बाक्त। लेवी १८:२४-२५

12 मोपतीके गेपुकीमी इन तमी मेको आन तौ आन कली ग्युबे पा मगेन। इन तौ आन कली मेको आन तमी नु ग्युबे पा मचाक्कीन। मिनु गेपुकीमी मेको आन कली रिम्शो दुम्चा नु दारचा कली वारच मपने। मोपा गेपुकी शुश बोल्यो दुम्शा, मेको रागी डा रिम्शो थोव्रक जचा ताइनीनी। मिनु गे मेको रागी इन चच युइ आन कली गेना हना यो आन के दुम्पाइश्शा वोइक्नीनी' दे लोव्र पपाइक्तीनी।

13 गोपुकीमी आंइ मरिम्शो पतीके नु आंइ ठेयब दोस आ पर्बम श्येत जशो बाक्तक। मो हना यो आंइ परमप्रभुमी आंइ तचा माल्शो क्येडा इच्का ला सजाइ गेतीनी। मिनु आंइ कली ब्रोंइचा गेतीनी।

14 गो लेंशा इन शेंशो लोव्र मटिथु, मेको ग्रॉग्रा दिशो गेय पाइब नु ग्युबे पाइनीकी डा? गे गोपुकी नु चुरशा, आंइ कली मसाइक्नीनी डा? मिनु ब्रोंइशा बाक्ब सुइ मलीब।

15 परमप्रभु यावे, इसाएली आन परमप्रभु गे ठीक पाइब बाक्नीनी। मुल गो इच्का खोइ लीशो बाक्नीक। गो आंइ मरिम्शो पतीकेमी इन डोंइती बाक्नीकी। मो हना यो गो इन डोंइती पिया पोक्ने मचाप्नीकी" देती।

## 10

### आन थुं परमप्रभु गे लेशो

1 एजा परमप्रभु आ खिं आ डोंइती गु बाप्शा, आन मरिम्शो पशो नेल्ल शोव्रशा, डाक्ना डाक्न बाक्शो बाक्त। मिनु ठेयब हुल का इसाएली वोंइश मुर, मीश मुर नु आलपुकी एजा आ एर ओंथ बुक्तेक्म। मिनु मेको यो शुश डाक्तेक्म।

2 मिनु एलाम आ चच युइ डा येहीएल आ तौ शेकन्याहमी एजा कली "गो आंइ परमप्रभु कली मटिथु, एको रागी डा अर्को जात डा मीश आल ग्युबे पा चाक्तक। मोदेशो पाइतक हना यो, इसाएली आन कली आस पतीके बाक्ब।

3 मोपतीके मुल आंइ परमप्रभु नु कबल का पय। आ प्रभु नु परमप्रभु आ शेंतीक मान पा हिंशा टीब आन देशो खोदेशो पा एको मीश मुर नु आन आल नेल्ल आन कली प्रॉइशा सोइक्चा कली लोव्र थोक्तय। मिनु परमप्रभु आ अरेशो लोव्रम देशो खोदेशो पय।

4 मिनु मुल बोक्कीन। एको गेय नेल्ल इन के बाक्ब। गो इन कली वारच पाइनीकी। मोपतीके थुं बारपाइश्शा गेय पने" देत।

### कसम जपाइश्शा

5 मोपतीके एजा बोक्शा, ठेयब चढेबपुकी, लेवीपुकी नु नेल्ल इसाएली आन कली "डोंइती देशो लोव्र पाइनीक" दे कसम जपाइक्तीमी। मिनु मेकोपुकीमी कसम जाप्तेक्म।

6 मिनु नोले एजा परमप्रभु आ खिं आ डोंइती रे बोक्शा, एल्याशीब आ तौ येहो-हानान आ कोठाम लत। मिनु मेकोमी शोब्ले मजव ब्वाक्कु यो मतूड। मारदे हना ग्याइश्शा लाइक्चा पुंइसीब आन मटितीके आ पर्बम सुर्ता पना पन बाक्त।

7 मिनु यहूदा नु यरूसलेमम बाक्ब लेशशा जाक्शो ग्याइश्शा लाइक्चा पुंइसीब नेल्ल यरूसलेमम बुक्मल, दे नेंपाइक्तेक्म।



8 मिनु हुकुम पाइब नु खाल्पापुकीमी “सुइ मुर नाक्त सां सम्ममी मजाक्त हना, मेको आ शोंप नेल्ल रोइक्चा पुंडसीब। मिनु लेशशा जाक्शो ग्याइश्शा लाइक्चा पुंडसीब आन दाते रे तिल्ला पुंडसीब” दे यहूदा नु यरूसलेम डा तेइ तेइ लोत्र सोइक्ताक्म।

9 मिनु यहूदा नु बेन्यामीन डा मुर नेल्ल नाक्त सां यरूसलेममी बुक्तेक्म। मेको ९ महिना डा २० नाक्तीम बाक्त। मुर नेल्ल परमप्रभु आ खिं डा लाडगाम निस्साक्म। मेको नेल्ल लोत्र नु ठेयब ठेयब रेउ आ पर्वम खिंखिं पांतेक्म।

10 मिनु चढेब एजा बोक्शा मेको आन कली “गेपुकीमी अर्को जात डा मीश आल ग्युबे पा चाक्तीनी। इस्त्राएली आन दोस तेम्ताक्नी।

11 मुल गे परमप्रभु यावे, इन किकी पिपी आन परमप्रभु आ डोंइती इन मरिम्शो पशो शोत्रडीन। मिनु आ दाक्शो पने। गे मेको रागी डा मुर नु अर्को जात डा मीश रे ब्राडीन” दे मेको आन कली माइक्तीमी।

12 मिनु मेकेर बुक्शो मुर नेल्लेमी ठेयब सेंदामी “इन देशो थमा बाक्ब। गोपुकीमी इन देशो खोदेशो पचा माल्नीकी।

13 तन्न गो एकेर शुश मुर बाक्नीकी। रेउ यिना यिन बाक्ब। मिनु गो हाक्सीतीकेमी राप्शा बाक्ने मचाप्नीकी। एको गेय काबु निक्बुम मथुम्सीब। मारदे हना आंइ दातेमी शुश मुरुम मोदेशो मरिम्शो पांतेक्म।

14 गे आंइ ठेयब मुरपुकीमी यरूसलेमम मेको लोत्र नेंपतीन। मिनु सु सुमी आंइ सहरम अर्को जात डा मीश चाक्मि, मेको सहर डा खाल्पा नु निसाफ पाइब आन डोंइती देशो ना जाक्चा माल्नीम। आंइ परमप्रभु आ थाम्पा गाइश्शो मनांइसे सम्म मोदेशो पने” दे ठेयब सेंदामी लोत्र लेत्ताक्म।

15 मिनु आसाहेल आ तौ योनाथन नु तिकवाह आ तौ याहजैयाह मबिस्सस। मेशुल्लाम नु शब्बेथाइ लेवी निक्शीमी मेको आस कली वारच पाइक्ताक्स।

16 मिनु नोले लेशशा जाक्शो ग्याइश्शा लाइक्चा पुंडसीबपुकीमी मार पांतेक्म देशा हना, चढेब एजा कली खिं खिं डा ठेयब मुर आन कली मेको गेय पपाइक्चा कली नें ब्रेक्शा योत्रपाइक्तेक्म। मिनु मेकोपुकीमी १० महिना डा डोंइती डा नाक्ते रे मेको गेय पचा गोम्तेक्म।

17 मिनु डोंइती डा महिना डा डोंइती डा नाक्ती अर्को जात डा मीश नु ग्युबे पाइब नेल्ल सु सु बाक्मा तुइक्ने थुंतेक्म।

अर्को जात डा मीश चाक्ब आन नें

18 मिनु अर्को जात डा मीश ग्युबे पाइबपुकीमी, चढेबपुकीमी योसादाक आ तौ येशुआ आ चच युइ रे नु आ लोक्ब रे मासेयाह एलीएजर, यारीब नु गेदाल्याह बाक्तेक्म। एजा ३:२

19 मेकोपुकी आन मीश रे ब्रातेक्म। मिनु आन दोस क्याम्चा कली आन बगाल रे सांड का का चढेचा कली चाक्तेक्म।

20 इम्मेर आ चच युइ रे हनानी नु जेबदीयाह,

21 हारीम आ चच युइ रे मासेयाह, एलीया, शेमायाह, येहीएल, नु उज्जीयाह बाक्तेक्म

22 पशहुर आ चच युइ रे एली-ओ-एनाइ, मासेयाह, इश्माएल, नेथनेल, योजाबाद नु एलासाह बाक्तेक्म।

23 लेवीपुकी रे योजाबाद, शिमेइ, केलीता माइश्शो केलायाह, पेशायाह, यहूदा नु एलीएजर बाक्तेक्म। नेहेम्याह ८:७; नेहेम्याह १०:११

24 कुम्सो पाइबपुकी रे एल्याशीब, लाप्चो खाल पाइबपुकीमी शाल्लुम, तेयलेम नु ऊरी बाक्तेक्म।

25 मिनु इस्त्राएल डा पारोश आ चच युइ रे राम्याह, इज्जीयाह, माल्कीयाह मियामीन, एलाजर, हशाब्याह नु बेनायाह बाक्तेक्म।

26 एलाम आ चच युइ रे मत्तन्याह, जकरिया, येहीएल, अब्दी, येरेमोथ, नु एलीया बाक्तेक्म।

27 जत्तु आ चच युइ रे एली-ओ-एनाइ, एल्याशीब, मत्तन्याह, येरेमोथ, जाबाद नु अजीजा बाक्तेक्म।

28 बेबाइ आ चच युइ रे येहो-हानान, हनान्याह, जब्बै नु आथलै बाक्तेक्म।

29 बानी आ चच युइ रे मेशुल्लाम, माल्लुक, अदायाह, याशुब, शेआल नु येरेमोथ बाक्तेक्म।

- 30 पहाथ-मोआब आ चच युइ रे अदना, केलाल, बेनायाह, मासेयाह, मत्तन्याह, बेचालेल, बिन्नुइ नु मनस्से बाक्तेकम।
- 31 हारीम आ चच युइ रे एलीएजर, इस्शीयाह, माल्कीयाह, शेमायाह, शिमेओन,
- 32 बेन्यामीन, माल्लुक नु शेमारयाह बाक्तेकम।
- 33 हाशुम आ चच युइ रे मत्तताह मतेनाइ, जाबाद, एली-फेलेत, येरेमाइ, मनस्से नु शिमेइ बाक्तेकम।
- 34 बानी आ चच युइ रे मा-अदाइ, अग्राम नु ऊएल,
- 35 बेनायाह, बेदैयाह, केलुही,
- 36 वान्याह, मेरेमोथ, एल्याशीब,
- 37 मत्तन्याह, मतेनाइ नु यासु बाक्तेकम।
- 38 बिन्नुइ आ चच युइ रे
- 39 शिमेइ, शेलेम्याह, नाथान नु अदायाह,
- 40 माक-नादेबाइ, शाशाइ, शाराइ,
- 41 अजारेल, शेलेम्याह, शेमारयाह,
- 42 शाल्लुम, अमारयाह नु योसेफ बाक्तेकम।
- 43 नेबो आ चच युइ रे यिएल, मत्तीथ्याह, जाबाद, जेबीना, यददाइ, योएल नु बेनायाह बाक्तेकम।
- 44 मेको नेल्लेमी अर्को जात डा मीश ग्युबे पशो बाक्तेकम। मिनु मेकोपुकीमी आन मीश नु आन आल प्रौइशा सोइक्ताकम।

## नेहेम्याह

**ब्रेक्व मुर:** एको किताब नेहेम्याह आंमान इच्छा ब्रेक्वो बाकत। तन्न नोले सुमी मेको आ ब्रेक्वो नु एजा आ ब्रेक्वो किताब का सेला मतुंडसीब। डोंडती एजा नु नेहेम्याह किताब का बाक्वो बाकत। मेको कली ग्रीक लोव्रमी सेल्शा, मेको किताब का रे निक्शी सेल्शो बाक्तेकम।

**गेना दुम्यो:** ४४६ बि. सी.म नेहेम्याहमी यरूसलेम आ पर्वम लोव्र नेंशो। ४४५ बि. सी.म नेहेम्याह यरूसलेम लशो। ४४५-४३३ बि. सी.म सुसा सहर लेशो। ४३३ बि. सी.म नेहेम्याह लेंशा यरूसलेम लशो।

**मारदे ब्रेक्वो:** एको किताबमी १ इतिहास नु २ इतिहासम ब्रेक्वो नेल्ल दुम्यो नोले डा रागी डा इतिहास बाक्ब। यरूसलेम सहर डा ब्रेक्वो गारो ५२ नाक्तीमी लेंशा प्रोव्रशो आ पर्वम ब्रेक्वो बाक्ब।

नेहेम्याह आ पुंडशो लोव्र

1 एको हाकाल्याह आ तौ नेहेम्याह आ लोव्र बाक्ब। २० बर्स डा किस्लेव महिनामी गो सुसा डा दरवारम बाक्ती।

2 मेना आं लोक्ब हानानी, का निक्शी मुर नु यहूदा रागी रे जाक्त। मिनु गो मेको आन कली “प्रोक्शा, गाक्वो नु ग्याइश्शा, लाइक्चा मपुंडसीशो रे लीशो यहूदीपुकी दोदेशो बाक्नीमी? यरूसलेम दोदेशो तांडसीबा?” दे हिल्लो पातामी।

3 मिनु मेकोपुकीमी आं कली “ग्याइक्चा मपुंडसीशो मेक उइ लीशोपुकीम शुश श्येत जशा, खेदा पचा पुंडसीना सीन बाक्नीम। यरूसलेम डा गारो ब्रेक्वो बाक्ब। मेकेर डा ठेयब लाप्चोपुकी मीम दुम्यो बाक्नीम” देंतेकम। २ इतिहास ३६:१९

4 मिनु गो मेको लोव्र नेंशा निश्शा, सुर्ता पा, शुश नाक्त सम्म डाक्ना डाक्न बाक्ती। मजथु स्वर्ग डा परमप्रभु कली एजा ९:३

5 “परमप्रभु यावे, स्वर्गम बाक्ब परमप्रभु, गे नेल्ल क्येडा ठेयब नु मान पा हिंचा माल्यो परमप्रभु बाक्नीनी। इन कली दाक्शा, इन अरेशो लोव्र टीब आन कली शिशी पाइब नु कबल खाप्ब बाक्नीनी। दानीएल ९:४

6 गो, इन वाइल, इस्राएली आन पर्वम नाक्दो नाक्त पुंडनुड। आं पुंडशो लोव्र नेंचा कली गे इन नोफा दाइक्तीन। मिनु आं गे कोव्रडीन। गो, इस्राएली नु आं आफ आ खिं डा मुर नेल्लेमी इन डोंडती मरिम्यो पाइतक। मिनु गो यो पाप पाता।

7 गे इन वाइल मोसा कली शेंतीक गेतीनी। गोपुकीमी चहिं मेको इन गेशो फुल्लुम मुशा ब्रेक्वो लोव्र नु इन ठीक पतीक लोव्र मटिथु, इन डोंडती मरिम्यो पाइतक।

8 मिनु गे इन वाइल मोसा कली ‘गे आं देशो मटीतीनी हना, गो इन कली रागी रागी डा मुर आन दातेमी फ्राइनन्नी’ देंतीनी। ब्यवस्था ४:२७

9 तन्न ‘आं गे लेत्तीनी, आं शेंतीक लोव्र नेंशा टीतीनी हना, गो इन कली डोन डोन रागी मेर फ्राइतन्नी हना यो, खुप्नन्नी। इन कली खुप्शा, आं नें ठेयब सेल्चा कली आं योव्रशो रागीमी चाक्नन्नी’ दे इन डोंडती पशो लोव्र मिन्तीन। ब्यवस्था ३०:४-९

10 मिनु मेकोपुकी इन वाइली नु इन रागी डा मुर बाक्नीमी। डोंडती गे मेको आन कली इन ठेयब सक्ति नु इन बोल्यो गुडमी प्रोंडशो बाक्तीनी।

11 परमप्रभु, इन नोफा दाइक्तीन। मिनु इन नें कली मान पचा दाक्ब इन वाइल आन पुंडशो लोव्र यो नेनीन। मुलाक्ती आं पुंडशो खपीन। पिप आ डोंडती गो शिशी तडल” दे पुंडता। मेना गो पिप कली तूचा गेब आन ठेयब मुर बाक्ती।

## 2

नेहेम्याह आ पुंडशो तशो

1 आरता-सास्त पिप दुम्लो २० बर्स जाकदीशो बाक्त। मिनु काबु निसान महिनामी पिप आ अडगुर शांबु ठीक पा लाइशा, पिप कली खेत्ताकड। गो सुर्ता पशो नड। पिपमी मेको क्येडा डोंडती आं कली सुर्ता पशो गेनायो मतशो बाक्त।

2 मिनु पिपमी “मारदे इ कुल राव किक्पदी? गे रोड पशो मबाक्नेवे, इ थुं दोक्शो तांडसीब” देंत। मो देंमेनु, गो शुश हिंती।

3 मिनु “हजुर, गेना हना यो ब्रोंइशा बाक्कीन। आं किकी पिपी आन कली थिम्लो सहर, खतम दुम्लो बाक्ब। मिनु गारो डा ठेयब लाप्लो मीम दुम्लो बाक्नीम। मिनु गो दोपा सुर्ता मपाइनुडा डा?” देंती।

4 मिनु पिपमी “गे मार माल्नेवे?” दे हिल्लो पती। मिनु गो आं थुंमी स्वर्गम बाक्ब परमप्रभु कली लोत्र पाता।

5 मिनु गो पिप कली “गे दाक्नीनी नु इन शिशी ताता हना, आं किकी पिपी थिम्लो, यहूदा रागी डा सहर कली लेंशा सेल्थ सोइक्तीनी” देंती।

6 मेना पिपीम पिप नु निशो बाक्त। मिनु पिपमी “मो पचा कली गिश नाक्त माल्नेवे? मिनु गेना लेशा जाक्नेवे?” दे हिल्लो पती। मिनु गो आं माल्लो नाक्त देंती। मिनु पिपम आं देंशो बिशशा लचा गेती।

7 मिनु गोमी पिप कली “गे रिम्लो लाक्नीनी हना, युफ्रेटीस ठेयब खोला आ आइक्की हांबुमी सासन पाइब मुर आन कली, आं कली यहूदा रागी सम्म ग्रीशा लचा गेचा कली ब्रेक्स का ब्रेक्शा गेयीनी।

8 मिनु परमप्रभु यावे आ खिं आ नेक्था डा बोल्यो खिं कली लाप्लो कली, सहर डा गारो डा ठेयब लाप्लो आन कली, नु आं बाक्तीक खिं कली शी माल्नुड। इन ब्वाकी कोत्रब आसाफ कली आं माल्लो शी गेचा, दे यो ब्रेक्स का ब्रेक्शा गेयीनी” दे पुंडता। मिनु पिपमी आं पुंडशो नेल्ल गेती। मारदे हना आं परमप्रभु आ शिशी आं तारी बाक्त। एजा ७:६

9 पिपमी आं कली वारच पाइक्चा कली सिपाइ आन ठेयब मुरपुकी नु शारा डोइक्बपुकी यो गो नु काथा सोइक्ताक्ब। मिनु युफ्रेटीस, ठेयब खोला आ आइक्की हांबु डा ठेयब मुर आन बाक्तीक जाकदीशशा, पिप आ ब्रेक्सपुकी गेतामी।

10 मिनु होरोनी सान्बल्लत नु आ गेय पाइब अम्मोनी तोबीयाह, निम्फा “इसाएली आन कली रिम्लो पाइब का जाक्शो बाक्ब” देंशो नेंशा, थाम्पा चुरताक्स।

### नेहेम्याह यरूसलेम जाक्शो

11 मिनु गो यरूसलेम जाक्शा, नाक्त सां सम्म मेकेर बाक्ती।

12 मिनु नोले गो नाकदो बोक्शा, का निक्शी मुर नु गारो कोत्रथ लती। तन्न आं परमप्रभुमी आं थुंमी यरूसलेम आ पर्वम वोइशशो लोत्र सुइ आन कली मशेंदुमी। मिनु गो आं डोइशशो शारा डा लाक्शा, अरु शारा मलदु।

13 मेको नाकदो गो बेंसी लाप्लो रे ठेयब बुस्स माइशशो ब्वाक्कु बुक्तीके नु मोत्रल लाप्लो गे लती। मिनु यरूसलेम डा ब्रेशो गारो नु मीम दुम्लो ठेयब लाप्लोपुकी कोत्रतामी।

14 मेकेर रे पा ब्वाक्कु बुक्तीक लाप्लो नु पिप दोम्ली गे लती। तन्न आं शारा कली गाक्तीक लां मबा। नेहेम्याह ३:१५

15 मिनु गो मेको नाकदो बेंसी रे ग्येथ डोइशशा, गारो कोत्रतामी। मिनु लेशशा, लेंशा बेंसी लाप्लो रे सहर जाक्ती।

16 मिनु सहर डा ठेयब मुरपुकीम गो ते लडा नु मार पडा, मारेड मतुइक्तेम। मारदे हना गो मेना सम्म यहूदी, चढेब, मान ताइब, ठेयब मुर नु अरु आन कली मारेड मशेंदुमी।

### नेहेम्याहमी मुर आन थुं बारपाइशशो

17 मिनु मेको नोले गो सहर डा मुर नेल्ल आन कली “गे गो आंइ खतम दुम्लो नेल्ल तुइक्नीनी। यरूसलेम यो खतम दुम्लो बाक्ब। मिनु गारो डा ठेयब लाप्लोपुकी मीम दुम्लो बाक्नीम। लो, गो नेल्ल गारशा, यरूसलेम डा गारो सेल्शा, आंइ मुने साम्य” दे माइक्तामी।

18 मिनू आं परमप्रभु आ शिशी आं तारी बाक्तीके नु पिपमी आं कली देंशो लोत्र यो मेको आन कली शेंताक्डमी। मिनू मेकोपुकीमी “लो, गो एको गेय पय” दे ग्येरशा, आन थुं बारपाडक्तेकम।

19 मिनू होरोनी सान्बल्लत, आ गेय पाडब अम्मोनी तोबीयाह नु अराबी गेशेममी चहिं एको लोत्र नेंशा, आंइ कली शुक्शी पा ठेयब लेशशा “गे मार पाइनीनी, हां? पिप आ सासन प्रॉइचा माल्नी?” दे हुडक्ताक्की।

20 मिनू गो मेको आन कली “स्वर्गम बाक्ब परमप्रभुमी आंइ कली गारो सेल्चा गोब। मिनू गो परमप्रभु आ वाइलपुकीमी गारो प्रोवनीकी। यरूसलेममी इन खिं मबाक्ब, एकेर मारेइ यो पशो मबाक्नीनी। मिनू इन कली ते खाइक्नी?” दे मेको आन कली माइक्तामी।

### 3

यरूसलेम डा गारो प्रोव्चा गोशो

1 नेल्ल क्येडा ठेयब चढेब एल्याशीब नु चढेबपुकीमी भेडा लाप्चो सेल्लेकम। मिनू ठेयब लाप्चो सेल्ले थुम्शा “परमप्रभु के बाक्ब” दे थारतेकम। मिनू मेकोपुकीमी मेआ माइश्शो लाइश्शो खिं नु हानानेल माइश्शो लाइश्शो खिं सम्म गारो प्रोव्नन प्रोव्नन “परमप्रभु के बाक्ब” दे वोइक्तेकम। नेहेम्याह १२:१; येरमीया ३१:३८

2 मिनू मेकेर रे बोइश्शा, यरीको डा मुरपुकीमी प्रोव्नतेकम। मिनू मेकेर रे बोइश्शा, इमी आ तौ जाक्कुरमी प्रोव्नतु।

3 मिनू हास्सेनाह आ तौपुकीमी डांइ लाप्चो सेल्लेकम। मेकोपुकीमी ठेयब लाप्चो डा शी वोइश्शा, ठेयब लाप्चो थारशा, लाप्चो नु चोक्तीके आग्लो वोइक्तेकम।

4 मिनू मेकेर रे बोइश्शा, हककोस आ तौ उरीयाह आ तौ मेरेमोथमी गारो प्रोव्नतु। मिनू मेकेर रे बोइश्शा, मेशेजाबेल आ तौ बेरेक्याह आ तौ मेशुल्लाममी सेल्लु। मेकेर रे बोइश्शा, बाना आ तौ सादोकमी प्रोव्नतु।

5 मेकेर रे बोइश्शा, तेकोहा आ मुरपुकीमी प्रोव्नतेकम। मेको आन ठेयब मुरपुकीमी चहिं “गो गारो प्रोव्नतीक गेय पचा आंइ कली मशिरब” दे गारो मप्रोव्नडेम।

6 माइत गारो डा ठेयब लाप्चो पासेआह आ तौ यो-यादा नु बेसोदैयाह आ तौ मेशुल्लाममी सेल्लताक्स। मेकोमी ठेयब लाप्चो डा शी वोइश्शा, लाप्चो थारशा, पाइक्तीक नु चोक्तीके आग्लो वोइक्तेकम।

7 मेकेर रे बोइश्शा, गिबोन डा मेलत्याह नु मेरोनोथ डा मुर यादोन, गिबोन नु मिस्पा डा मुरपुकीमी प्रोव्नतेकम। मेकोपुकी युफ्रेटीस ओंथ हांबु डा जिल्ला डा सासन पाडब आ हुकुममी बाक्तेकम।

8 मेकेर रे बोइश्शा, हारहायाह आ तौ सुन चेम्ब उज्जीएलमी प्रोव्नतु। मेकेर रे बोइश्शा, ब्रोव्नशो रिना पाडब खेक्तीक सेल्लब हनान्याहमी गारो प्रोव्नतु। मेकोपुकीमी ब्रेम्शो गारो सम्म गारो सेल्शा प्रोव्नतेकम।

9 मेकेर रे बोइश्शा, हुर आ तौ रेफायाहमी प्रोव्नतु। मेको रेफायाह चहिं आधा यरूसलेम कली हुकुम पाडब बाक्त।

10 मेकेर रे बोइश्शा, हरुमाफ आ तौ येदायाहमी आ खिं आ डोंइती डा गारो प्रोव्नतु। मिनू मेकेर रे बोइश्शा, हशाब्नेयाह आ तौ हत्तुशमी प्रोव्नतु।

11 मेकेर रे बोइश्शा, हारीम आ तौ माल्कीयाह नु पहाथ-मोआब आ तौ हाश्शुबमी प्रोव्नताक्स। मेको निक्शीमी गारो नु मी मुडक्तीक लाइश्शो खिं यो सेल्लताक्स।

12 मेकेर रे बोइश्शा, हल्लोहेश आ तौ, यरूसलेम डा अर्को आधा हुकुम पाडब शाल्लुम नु आ तमीपुकीमी प्रोव्नतेकम।

13 मिनू मेकेर रे बोइश्शा, हानुन नु जानोह डा मुरपुकीमी बेंसी लाप्चो सेल्लेकम। मेकोपुकीमी ठेयब लाप्चो सेल्शा, थारशा, लाप्चो चोक्तीक आग्लो वोइक्तेकम। मिनू मेकोपुकीमी मोव्नल लाप्चो माइश्शो ठेयब लाप्चो सम्म, हजार का कुबीत गारो प्रोव्नतेकम। कुबीत का आधा मिटर खोदेशो बाक्ब।

14 मिनू मेको मोव्नल लाप्चो रेकाब आ तौ माल्कीयाहमी सेल्लु। मेको बेथ-हक्केरेम जिल्ला डा सासन पाडब बाक्त। मेकोमी ठेयब लाप्चो सेल्शा, थारशा, लाप्चो चोक्तीक आग्लो वोइक्तु।

15 मिनू कोल-होजे आ तौ, मिस्या सहर डा ठेयब हुकुम पाइब शाल्लुममी ब्वाक्कु बुक्तीक लाप्चो प्रोव्रतु। मेकोमी साप्शा ठेयब लाप्चो सेल्शा, थारशा, लाप्चो पाइक्तीके नु चोक्तीके आग्लो वोइव्तु। मेकोमी पिप आ फल फुल रू आ नेक्था डा शेलाह माइशशो दोम्ली डा गारो प्रोव्रशा, दाऊद आ सहर रे बुप्तीके सम्म डा गारो प्रोव्रतु। नेहेम्याह २:१४; २राजा २०:२०; यूहन्ना ९:७

16 मेकेर रे पा बोइशशा, अचबुक आ तौ, उइक्थ बेथ-सुर सहर डा हुकुम पाइब, नेहेम्याहमी प्रोव्रतु। मेकोमी दाऊद नु आ किकी पिपी आन कली थिम्तीके आ आइक्ची रे मुर आन सेल्शो दोम्ली नु सिपाइ आन खिं सम्म गारो प्रोव्रतु।

17 मेकेर रे बोइशशा, लेवीपुकीमी प्रोव्रतेक्म। बानी आ तौ रेहुम मेको आन कली कोव्रब बाक्त। मिनू मेकेर रे बोइशशा, कैलाह सहर डा उइक्थ जिल्लामी हुकुम पाइब, हशाब्याहमी प्रोव्रतु।

18 मेकेर रे बोइशशा, आन लोकबपुकीमी प्रोव्रतेक्म। मेको कैलाह डा लीशो भाग डा हुकुम पाइब, हेनादाद आ तौ बिन्नुइ बाक्त।

19 मेकेर रे बोइशशा, मेको येशुआ आ तौ, मिस्या डा हुकुम पाइब, एजेरमी प्रोव्रतु। मिनू कुना डा लडाइ पाइब आन या वोइक्तीक खिं रे ग्येत्थ लतीके आ डोंइती सम्म यो प्रोव्रतु।

20 मेकेर रे बोइशशा, जब्बे आ तौ बारुकमी प्रोव्रतु। मेकोमी कुना रे नेल्ल क्येडा ठेयब चढेब एल्याशीब आ खिं डा ओव्रतीक सम्म प्रोव्रतु। नेहेम्याह ३:१

21 मेकेर रे बोइशशा, हककोस आ तौ उरीयाह, आ तौ मेरेमोथमी एल्याशीब आ खिं डा ओव्रतीक रे खिं ची सम्म प्रोव्रतु। एजा ८:३३

22 मेकेर रे बोइशशा, आ नेक्था बाक्शो चढेबपुकीमी प्रोव्रतेक्म।

23 मेकेर रे बोइशशा, बेन्यामीन नु हाशुशुबमी आस खिं खिं आस डोंइती डा गारो प्रोव्रताक्स। मेकेर रे बोइशशा, अनान्याह आ चच, मासेयाह आ तौ, अजारयाहमी आ खिं आ नेक्था डा गारो प्रोव्रतु।

24 मेकेर रे बोइशशा, हेनादाद आ तौ बिन्नुइमी अजारयाह आ खिं रे कुना सम्म प्रोव्रतु।

25 मेकेर रे बोइशशा, उजाइ आ तौ पालालमी कुना नु पिप आ खिं आ नेक्था डा लाइशशो खिं आइक्ची एरे सम्म डा गारो प्रोव्रतु। येरमीया ३२:२

26 मेकेर रे बोइशशा, पारोश आ तौ पेदायाह नु ओफेलम बाक्शो परमप्रभु यावे आ खिं डा गेय पाइबपुकीमी नां दाप्तीक गे, ब्वाक्कु लाप्चो आइक्ची नु गारो डा लाइशशो खिं सम्म प्रोव्रतेक्म।

27 मेकेर रे बोइशशा, तेकोहा आ मुरपुकीमी ठेयब लाइशशो खिं आ डोंइती रे ओफेल डा गारो सम्म प्रोव्रतेक्म।

28 शारा लाप्चो आ ग्येत्थ गे चढेबपुकीमी आन खिं डोंइडोंइती डा गारो प्रोव्रतेक्म। २राजा ११:३६

29 मेकेर रे बोइशशा, इम्मेर आ तौ सादोकमी आ खिं डोंइती डा गारो प्रोव्रतु। मेकेर रे बोइशशा, शेकन्याह आ तौ शेमायाहमी गारो प्रोव्रतु। शेकन्याह चहिं नां दाप्तीक लाप्चो डा खाल पाइब बाक्त।

30 मेकेर रे बोइशशा, शेलम्याह आ तौ हनान्याह नु सालाफ आ जन्तरे तौ हानुनमी गारो प्रोव्रताक्स। मेकेर रे बोइशशा, बेरेक्याह आ तौ मेशुल्लाममी आ खिं आ डोंइती डा गारो प्रोव्रतु।

31 मेकेर रे बोइशशा, सुन चेम्ब माल्कीयाहमी कुना डा खिं डा इर डा कोठा सम्म ग्याप्ब लेयब आन खिं रे गारो प्रोव्रशा, खाल पाइब लाप्चो आ डोंइती, कौसी पाइशशो कुना डा तला तारी डा कोठा सम्म गारो प्रोव्रतु।

32 मेको गारो आ कुनाम बाक्शो तला तारी डा कोठा नु भेडा लाप्चो आ दातेमी सुन चेम्ब नु ग्याप्ब लेयबपुकीम गारो प्रोव्रतेक्म।

## 4

### जोरी सत्रुमी गेय तेक्चा माल्शो

1 “गो गारो प्रोव्रना प्रोव्रन बाक्नीकी” देशो लोव्र सान्बल्लतमी नेशा, उरशा, शुश गाइशशा, यहूदी आन पर्बम शुक्शी पाप्तु। नेहेम्याह २:१०,१९

2 मिनु मेकोमी यहूदी आन परबम शुक्शी पा, आ लोकबपुकी नु सामरीया डा लडाइ पाइब आन डोंइती “एको मारेइ सोक्त मपाइश्शो यहूदीपुकीमी मार पना पन बाक्नीमी? मार, मेकोपुकीमी आन गारो लेंशा प्रोवने चाप्नीमी? मार, मेकोपुकीमी चढेनीमी? मार, मेकोपुकीम काबुमी थुम्नीमी? मेको मीम दुष्शो फुल्लुम गारो प्रोवने चाप्नीमी डा?” दे लोव्र पाप्तु।

3 मिनु अम्मोनी डा तोबीयाह सान्बल्लत आ नेक्था बाक्शा “मेकोपुकीमी मेको प्रोवतेकम हना यो, सिवार का मेको तारी डोंइसाक्व हना, नेल्ल ब्रेप्ब” देंत।

4 मिनु गो चहिं “आंइ परमप्रभु, इन नोफा दाइश्शा, नेनीन। गो शुश शुक्शी पाइक्वा पुंइसाक्क। मेको आन पशो शुक्शी लेशशा, मेको आन तार कोप्तीन। मेको आन कली ग्याइश्शा, अरु आन रागी लाइक्पतीन।

5 मेको आन मरिम्शो पतीके नेल्ल क्याम्शा मगेने। मारदे हना मेकोपुकीमी गारो प्रोवब आन कली शुक्शी पा, आन थुं तोक्शा गेम्तेकम” दे परमप्रभु कली पुंइता।

6 मिनु गोपुकीमी आधा लाइश्शो सम्म गारो प्रोव्रशा, एर ओंथ नेल्ल हिरने थुम्शो। मारदे हना प्रोवब मुरपुकीमी आन थुं नुशा, ग्येरशा, गारो प्रोव्रतेकम।

### जोरी सत्रु आन कली तेक्शो

7 मिनु सान्बल्लत, तोबीयाह, अराबीपुकी, अम्मोनीपुकी नु अशदोदीपुकीमी “यरूसलेम डा गारो रिम्शो पा सेल्ना सेल्न बाक्नीम। आ पोव्रला यो सुना सुन बाक्नीम” दे तुइश्शा, शुश गाइक्ताकम।

8 मिनु मेकोपुकी गारशा, यरूसलेम कली लडाइ पा, खतम सेल्चा, दे खुम्साकम।

9 गोपुकी चहिं आंइ परमप्रभु कली पुंइना पुंइन बाक्तक। मिनु गोपुकीमी “मारेइ पाइनीमी, कों” दे मेको आन कली कोव्रशा, नाक्दो नाक्त खाल पाइबपुकी वोइक्तक।

10 मिनु यहूदा डा मुरपुकीमी “फुल्लु कुरब आन बोल जाम्ना जाम्न लत। मारदे हना शोर गाक्शो शी, फुल्लु नु खप शुश दुम्तीके, गोपुकी गारो प्रोवने मचाप्नीकी” दे गन गन पाम्तेकम।

11 मिनु आंइ जोरी सत्रुपुकीमी “मेको आन मतुइक्थु, मतथु, मेको आन दातेमी जाक्दीश्शा, मेको आन कली साइश्शा, आन गेय थुम्पाइय्य” देंमुमा बाक्त।

12 तन्न मेको आन नेक्था बाक्ब गाउं गाउं डा यहूदीपुकी आंइ बाक्तीक जाक्शा “आंइ जोरी सत्रु गोपुकी नु लडाइ पचा कली बुक्शा बाक्नीम” दे शुश खेयप देंतेकम।

13 मोपतीके गो गारो आ नेल्ल क्येडा आइक्च दुम्तीके, आंइ जोरी सत्रु आन शुश श्येत मजथु, ओव्रने चाप्तीकेम, मुर आन कली खुप्ताक्डमी। मेको आन कली तरवार, तूतीक नु लिब्रा कुरपाइश्शा मेकेर वोइक्तामी।

14 मिनु गो मेको आन कली हिंशो तशा “महिनीन। नेल्ल क्येडा ठेयब नु मान पा हिंचा माल्शो परमप्रभु कली मिम्तीन। मिनु आंम लोकब, तमी तौ, मीश नु आंम खिं आ परबम लडाइ पने” दे ठेयब मुरपुकी, सासन पाइबपुकी नु मुर नेल्ल आन कली माइक्तामी। नेहेम्याह १:५

15 आन मिम्शो गोपुकीमी तुइक्ताक्क नु परमप्रभुमी आन मिम्शो नेल्ल क्याम्शा गेवा बाक्त, दे आंइ जोरी सत्रुपुकीमी तुइक्तमे बाक्त। मोपतीके गो नेल्ल आंम आंम गेय पा गारो प्रोव्रथ लेत्तक।

16 मेको नाक्त डा मेरे गो आंइ उइक्थु मुरपुकीमी गारो प्रोव्रशा बाक्शो। मिनु लीशो उइक्थु मुरपुकीमी तूतीक, तेक्तीक नु लिब्रा कुरशा, फलाम के फेक्तीक फेक्शा बाक्तेकम। मिनु ठेयब मुरपुकीमी गारो प्रोव्रब यहूदा डा मुर नु गारशा, आन थुं बारपाइक्तेकम।

17 कुरब मुरपुकीमी आन गुइ कामी कुरतीक नु अर्को गुइमी या कुरतेकम।

18 गारो प्रोव्रब मुरपुकीमी आन किप्शुरमी चुक्ब पिप्शा प्रोव्रतेकम। तुराही ताप्ब आं नेक्था बाक्शो बाक्त।

19 मिनु गोमी ठेयब मुर, हुकुम पाइब नु मुर नेल्ल आन कली “गेय थम ठेयब नु शुश ब्रशा बाक्शो बाक्ब। गोपुकी गारो आ नेक्था, तन्न डोन डोन बाक्नीकी।

20 तेकेर रे तुराही ग्रीशो नेनीनी, मेकेर रीब पा बुक्कीन। आंइ परमप्रभुमी आंइ पर्वम लडाइ पाइब” दे माइक्तामी। प्रस्थान १४:१४

21 मोपा गो उइक्थ मुरपुकीमी गेय पस डा पस बाक्तक। मिनु उइक्थ मुरपुकी सुनी रे नाक्दो सम्म या शेशा बाक्तेकम।

22 मेना गो मुर आन कली “नाक्दो खाल पाइब, नाक्त गेय पाइब नु मेको आन कली वारच पाइब नेल्ल यरूसलेममीन नां सोइचा माल्नीम” दे यो माइक्तामी।

23 मोदेशो पा गो, आं लोकबपुकी, आं गेय पाइबपुकी नु आं नेक्था बाक्ब खाल पाइबपुकी वा मप्रुइक्थु, आंइ या शेशान इप्तक।

## 5

### पुडग आन कली वारच पशो

1 मिनु नोले मार दुम्त देशा हना, मुरपुकी नु आन मीशपुकीमी आंम आन यहूदी लोकब आन पर्वम लोत्र का ब्रपाइक्तेकम।

2 का निक्शीमी “गो, आंइ तमी तौ शुश बाक्नीमी। गो शुश बाक्तीके ब्रोंइचा कली अन्न माल्नीकी” दैतेकम।

3 मिनु का निक्शीमी “अन्कालमी अन्न ग्याप्चा कली आंइ रूपुकी, आंइ अडगुर रूपुकी नु आंइ खिंपुकी जाकट वोइक्चा माल्ताक्क” दैतेकम।

4 मिनु का निक्शीमी “पिप कली तिरो थाप्चा कली आंइ रू नु अडगुर रूपुकी गेशा, जेर ताक्तक।

5 गो यो आंइ लोकब खोदेशो बाक्नीकी। आंइ तमी तौ मेको आन तमी तौ खोदेशो बाक्नीम। मिनु गो आंइ तमी तौ आन कली वाइलीम वाइल दुम्चा कली लेयचा माल्नीकी। आंइ तमी का निक्शी डोंइतीन लेयचा पुंडसाकम। गोपुकीमी मेको आन कली प्रोंइने मचाप्नीकी। मारदे हना आंइ रू नु अडगुर रू नेल्ल मुर आन के दुम्ने थ्युनु” दैतेकम। लेवी २५:३९; २राजा ४:१; यसैया ५०:१; मत्ती १८:२५

6 मोपा मेको आन लोत्र नेंशा, आन डाक्शो तशा, शुश गाइक्ताक्यी।

7 तन्न गो आं थुमी लोत्र पाता। मिनु गो मान ताइब नु ठेयब मुर आन कली हुइश्शा “क्येट आ चाइक्ब ताक्चा, दे आंम लोकब आन कली जेर गेनीनी” दे माइक्ताकमी। मिनु मेको आन पर्वम मुर नेल्ल खुप्ताक्डमी। प्रस्थान २२:२४

8 मिनु गो मेको आन कली “गोपुकीमी अर्को रागीम लेयशो वाइलीम वाइल दुम्शो आंइ लोकब यहूदी आन कली आंइ चाप्शो थाप्शा, मुर आन गुड रे प्रोंइतक। गेपुकी चिहं आंम इन लोकब रागी रागी डा मुर आन कली लेयनीनी? मिनु मेकोपुकीम गो आंमान लेंशा ग्याप्चा माल्नीकी?” दे शुश हुइक्ताक्ड। मिनु मेकोपुकी सिक्सी पा मारेइ मदेंम। लेवी २५:४७-४९

9 मिनु लेंशा “इन पशो मरिम्शो बाक्ब। आंइ जोरी सत्रुपुकीमी आंइ कली शुक्शी मपपाइक्थु, आंइ परमप्रभु कली मान पा हिंशा, गेय पचा ममाल्नीनी डा?

10 गो आंमान, आं लोकबपुकी नु आं गेय पाइबपुकीमी यो मेको आन कली क्येट नु अन्न जेर गेतक। मुल गो चाइक्ब पुंडचा प्रोंइय। ब्यवस्था १५:१-११

11 गो मुलाक्तीन मेको आन रू, अडगुर रू, आन तेल रवा रू नु आन खिं लेशशा गेने। मिनु क्येट, अन्न, नक अडगुर रस नु तेल, मार मार जेर पुन्मे, मेको नेल्ल मो गेने” दे माइक्तामी।

12 मिनु मेकोपुकीमी “गो नेल्ल लेशशा गेनीकी। मेकोपुकी रे मारेइ मताक्नीकी। इन देशो खोदेशो पा नेल्ल पाइनीकी” दैतेकम। मिनु गो चढेब आन कली ब्रेशशा “आंइ देशो खोदेशो पा पाइनीकी” दे कसम जपाइक्तामी।

13 मिनु नोले गो आं फेक्शो वा रे थुर थुर पा फुरक हेम्शा “आन देशो मखाप्ब कली परमप्रभुमी आन खिं नु आन थेरशो रू रे ओं पान थुर थुर पा हेमल। मोपा थुर थुर पा श्येतथ दुम्मल” दैती। मिनु मेकेर बुक्शा बाक्ब नेल्लेमी “आमेन” दैतेकम। मिनु मेकोपुकीमी परमप्रभु यावे कली ठेयब सेल्शा, आन देशो खोदेशो पाम्तेकम। आमेन दैबमी “गो यो मोदेशो मिम्नुड” दैब।



नेहेम्याहमी रिम्शो पशो

14 मिनु आरता-सास्त पिप दुम्शो २० बर्स दुम्मेनु, गो यहूदा रागीमी हुकुम पचा कली योव्रचा पुंडसाक्यी। मेना रे मुल १२ बर्स दुम्त। मेको आरता-सास्त पिप दुम्शो ३२ बर्स दुम्त। मेको १२ बर्स सम्म गो नु आं लोकबपुकीमी हुकुम पाइब आन ततीक जचा थोव्रक मजक।

15 आं क्येडा डोंइती डा आं खोदेशो पा हुकुम पाइबपुकीमी मुर आन कली ठेयब श्येत गेशो बाक्तेकम। मेकोपुकीमी नाक्त किंत किंत डा जचा थोव्रक, शोब्ले, अडगुर शांबु नु ४० चांदी के शेकेल यो लाइशो बाक्तेकम। मिनु मेको आन गेय पाइबपुकीमी यो मुर आन कली साप्पा दिप्शो बाक्तेकम। तन्न गो परमप्रभु कली मान पा हिंशा मोदेशो मपड। चांदी के शेकेल का ११.५ ग्राम डा क्येत बाक्ब।

16 मिनु गो आंमा गारो प्रोव्रतीक गेय यो पाता। गोपुकीमी रू का यो मग्याप्क। आं गेय पाइब नेल्ल गारो प्रोव्रथ जाक्तेकम।

17 मिनु गो नु सहे का ५० जना यहूदी आन ठेयब मुरपुकी काथा बाक्शा जाम्तेकम। मिनु एर ओंथ रागी रे आंड कली ग्रुम्थ जाक्बपुकी यो गो नु बाक्शा जाम्तेकम।

18 नाक्त का कली मार जचा थोव्रक ठीक सेल्शो बाक्त, देंशा हना, ब्यफ का, ६ ओटा रिम्शो दोम्शो भेडा नु ब्वापुकी ठीक सेल्शो बाक्तेकम। मिनु १०, १० नाक्त कली मारेड मारेड अडगुर शांबु यो चाक्शो बाक्त। मोदेशो शुश माल्ती हना यो, गो गेनायो हुकुम पाइब आ तचा माल्शो जचा थोव्रक ममलु। मारदे हना मुरपुकी शुश श्येत जशो बाक्तेकम।

19 गो परमप्रभु यावे कली “आं परमप्रभु, गो एको मुर आन कली मार मार रिम्शो पडा, मेको मप्रेंदीन” देंती। नेहेम्याह १३:१४, २२, ३१

## 6

जोरी सत्रुमी हिंच कोंइशो

1 मिनु नोले सान्बल्लत, तोबीयाह, अराबी गेशेम नु आंड जोरी सत्रुपुकीमी “गोपुकीमी गारो प्रोव्रशा, पोव्रला नेल्ल यो सुने थुम्तक” देशो नेंतेकम। गो ठेयब लाप्चो थारने मथुम्शो बाक्ती।

2 मेना सान्बल्लत नु गेशेममी आं कली “ओनो दिंम डा गाउं काम गुम्य” दे लोव्र सोइक्ताक्यीमी। तन्न मेकोपुकीमी आं कली मरिम्शो पचा माल्शो बाक्तेकम।

3 मिनु गो मेको आन कली “मुल आं के ठेयब गेय का बाक्ब। मोपतीके यिने मचाप्नुड। मेक यिशा, आं गेय क्योल्चा मदाक्नुड” दे लोव्र सोइक्ताक्ड।

4 मिनु मेकोपुकीमी आं कली ४ खेयप सम्म “यिने” दे लोव्र सोइक्ताक्यीमी। मिनु गो यो डोंइती डा खोदेशो पा लोव्र लेशशा सोइक्ताक्डमी।

5 मिनु सान्बल्लतमी लेशा, ५ खेयपमी आं गेय पाइब मुर, नेल्ल आन कली पढेचा डा पा, ब्रेक्स का सोइक्ताक्व।

6 मिनु मेको ब्रेक्समी “अर्को जात डा मुरपुकीमी ‘गे नु यहूदीपुकी गारशा सरकार कली तुल्चशो बाक्नीनी” देंतेकम। गेशेममी यो मोन देंत। मोपतीके गे गारो सेल्ना सेल्न बाक्नीनी। गे चहिं मेको आन पिप दुम्चा माल्शो बाक्नेवे, देशो यो नेंसाक्व। नेहेम्याह २:१९; एज्जा ४:१२

7 मिनु ‘यहूदामी पिप का बाक्ब’ देंपाइक्चा कली परमप्रभु यावे आ लोव्र पाइब आन कली यो योव्रशा, यरूसलेमम लोव्र पथ, वोइशो बाक्ते। मिनु पिपमी एको लोव्र थमा पा नेंब। मोपतीके एको आ पर्वम लोव्रसी पचा कली रीब पा यिने” दे ब्रेक्शो बाक्त।

8 मिनु गो “इ देशो लोव्र नेल्ल जोल बाक्ब। आंम इ मिम्शो बाक्ब” दे लोव्र लेशशा, सोइक्ताक्ड।

9 मिनु मेको नेल्लेमी आंड कली हिंच कोंइचा माल्तेकम। मेकोपुकीमी “एको गारो प्रोव्रचा प्रॉइनीम। मथुम्नीम” दे मिम्मे बाक्त। मिनु गो “परमप्रभु, आं थुं बारपतीन” दे पुंडता।

शेमायाहम रिम्शो लोव्र पखु पशो

10 मिनु काबु गो देलायाह आ तौ, मेहेताबेल आ चच शेमायाह आ खिंमी लती। मेको आ खिंमी चोक्सीशा बाक्शो बाक्त। मेकोमी आं कली “गो निक्शी परमप्रभु यावे आ खिं नेल्ल क्येडा आगा

ओव्रशा, लाप्चोपुकी चोक्शा, बाक्स। मारदे हना मेकोपुकी इन कली साइक्थ पिना पिन बाक्नीम। नाकदो इन कली साइक्थ जाक्नीम” दे माइक्ती।

11 तन्न गो मेको कली “मार, आं खोदेशो मुर प्रोक्बा डा? गो परमप्रभु यावे आ खिंम ओव्रशा, ब्रौडनुडा डा? गो मलाइनुड” दे माइक्ता।

12 मिनु गो “परमप्रभु आ सोइश्शो ममाड, आं कली मरिम्शो पचा, दे सान्बल्लत नु तोबीयाहमी मेको कली नोले दुम्ब लोव्र पपाइक्खु पशो बाक्ताक्स।

13 आं कली हिंच कौंइचा नु पाप पपाइक्का माल्ताक्से। मोपा मेकोमी आं पर्बम मरिम्शो लोव्र ब्रपाइक्का कली क्येट ताक्शो बाक्त” दे तुइक्ताक्ड।

14 मिनु गो “आं परमप्रभु, तोबीयाह नु सान्बल्लत आस पशो मिम्तीन। आं कली हिंच कौंइचा दाक्ब नोले दुम्ब लोव्र पाइब नोआदीयाह माइश्शो मीश मुर नु अरु नोले दुम्ब लोव्र पाइब, नेल्ल आन पतीके यो मिम्तीन” दे परमप्रभु कली पुंडता। नेहेम्याह ३:३३-३७

### यरूसलेम डा गारो सेल्ले थुम्शो

15 एल्ल महिना डा २५ नाक्त गोपुकीमी गारो सेल्ले थुम्तक। सेल्ले थुम्चा कली ५२ नाक्त माल्ताक्क।

16 मिनु आंइ जोरी सत्रुपुकीमी एको लोव्र नेतेक्म, देशो नेशा, आंइ एर ओंथ बाक्शो अर्को जात डा मुर नेल्ल शुश हिंतेक्म। मिनु मेकोपुकीमी “इं परमप्रभुम पशो बाक्त” दे तुइक्ताक्म।

17 मेना यहूदा डा ठेयब मुरपुकीमी तोबीयाह कली शुश ब्रेक्स ब्रेक्शा, सोइक्ना सोइक्न बाक्तेक्म। मिनु तोबीयाहमी यो मेको आन कली ब्रेक्स सोइक्ना सोइक्न बाक्त।

18 मिनु यहूदा डा शुश मुरुमी तोबीयाह आ लोव्र बिश्शा “इन मुर दुम्नीकी” दे कसम जशो बाक्तेक्म। मारदे हना तोबीयाह आ चांडवा आराह आ तौ शेकन्याह बाक्त। मिनु आ तौ येहो-हानानमी बेरेक्याह आ तौ मेशुल्लाम आ तमी चाक्शो बाक्त।

19 मेको मुरपुकीमी आं डोंइती तोबीयाहमी मार मार रिम्शो गेय पाप्तु, दे आं कली लोव्र पाम्तेक्म। मिनु आं देशो लोव्र यो तोबीयाह कली शोव्रतेक्म। मिनु तोबीयाहमी आं कली हिंच कौंइशा चिठीपुकी सोइक्ताक्की।

## 7

### नेहेम्याहम हुकुम पाइब सेल्लो

1 मिनु गारो प्रोव्रने थुम्शा, लाप्चोपुकी थारशा गारपाइश्शा वोइक्ताक्मी। लाप्चो खाल पाइबपुकी, कुम्सो पाइबपुकी नु लेवी नेल्ल योव्रशा वोइक्तामी।

2 मिनु गो आं लोकब हानानी नु लडाइ पाइब आन नेल्ल क्येडा ठेयब मुर हनान्याह आस कली यरूसलेममी हुकुम पाइब सेल्लासी। मारदे हना शुश मुर आन क्येडा हनान्याह दीगो नु रिम्शो पाइब परमप्रभु कली मान पा हिंच बाक्त।

3 मिनु गो मेको आस कली “यरूसलेम डा ठेयब लाप्चोपुकी नां चोक्ता नोले ला रोकपतीन। मिनु नोले खाल पाइबपुकी ठेयब लाप्चोम गेय पची ना लाप्चोपुकी चोक्शा, आग्लो शुइक्का माल्नीम। यरूसलेम डा मुरपुकी का का पा खाल पाइब सेल्ला माल्नीम। का निक्शी गारो कौव्रब सेल्ला, का निक्शी आंम आन खिं आ डोंइती खाल पचा माल्नीम” दे माइक्तामी।

4 सहर ठेयब बाक्ब। मिनु मुर शुश मबाक्तीक, ब्रशा बाक्शो बाक्तेक्म। मिनु सुइमी आन खिं लेशा सेल्लो मबाक्म।

### यरूसलेम लेशा जाक्ब आन नें एञ्जा २:१-६

5 मिनु आं परमप्रभुमी आं कली “ठेयब मुर, सरकार डा अधिकार ताइब नु अरु मुर नेल्ल आन कली बुक्पाइश्शा, मेको नु आन खिं डा मुर आन नें ब्रेक्का माल्नुड” दे मिम्पाइक्ती। मिनु गो ग्याइश्शा

लाइक्या पुंडसीशो रे, यरूसलेम लेशशा जाकब आन नें ब्रेकशो किताब थित्ता। मिनु मेको किताबम सु सु आन नें ब्रेकशो बाक्तेकम देशा हना,

6 डोंइती बेबीलोन डा पिप नेबुकदनेसरमी यरूसलेम नु यहूदा डा मुर आन कली ग्याइशशा लाइशशा बाक्त। मिनु सु सु नोले यरूसलेम नु यहूदा डा आंम आन सहर लेत्चा तशो बाक्तेकम देशा हना,

7 जेरूब-बाबेल, येशुआ, नेहेम्याह, अजारयाह, राम्याह, नाहामानी, मोरदेकै, बिल्शान, मिस्पेरेश बिग्वाइ, नेहुम नु बानाह लेत्चा तशो बाक्तेकम।

8 लेत्चा ताइब इस्माएली सु सु बाक्तेकम देशा हना, पारोश नु आ खिं डा मुर २,१७२

9 शेफत्याह नु आ खिं डा मुर ३७२

10 आराह नु आ खिं डा मुर ६५२

11 पहाथ-मोआब नु आ खिं डा मुर नु येशुआ नु योआब आस खिं डा मुर नेल्ल २,८१८

12 एलाम नु आ खिं डा मुर १,२५४

13 जत्तु नु आ खिं डा मुर ८४५

14 जक्काइ नु आ खिं डा मुर ७६०

15 बिन्नुइ नु आ खिं डा मुर ६४८

16 बेबाइ नु आ खिं डा मुर ६२८

17 अज्गाद नु आ खिं डा मुर २,३२२

18 अदोनीकाम नु आ खिं डा मुर ६६७

19 बिग्वाइ नु आ खिं डा मुर २,०६७

20 आदीन नु आ खिं डा मुर ६५५

21 आतेर नु हिज्कीयाह नु आस खिं डा मुर ९८

22 हाशुम नु आ खिं डा मुर ३२८

23 बेजाइ नु आ खिं डा मुर ३२४

24 हारीफ नु आ खिं डा मुर ११२

25 गिबोन नु आ खिं डा मुर ९५

26 बेथलेहेम नु नेतोफाह सहर डा मुर १८८

27 अनाथोथ सहर डा मुर १२८

28 बेथ-अज्मावेथ सहर डा मुर ४२

29 किरयथ-यारीम, केफीरा नु बेयरोथ सहर डा मुर ७४३

30 रामाह नु गेबा सहर डा मुर ६२१

31 मिकमास सहर डा मुर १२२

32 बेथेल नु ऐ सहर डा मुर १२३

33 अर्को नेबो सहर डा मुर ५२

34 अर्को एलाम आ तौ १,२५४

35 हारीम आ तौ ३२०

36 यरीको सहर डा वोंइश मुर ३४५

37 लोद, हादीद नु ओनो सहर डा वोंइश मुर ७२१

38 सेनाह सहर डा वोंइश मुर ३,९३० जना लेत्चा ताइब बाक्तेकम।

### चढेबपुकी

39 येशुआ आ खिं डा येदायाह आ चच युइ ९७३

40 इम्मर आ चच युइ १,०५२

41 पश्हुर आ चच युइ १,२४७

42 हारीम आ चच युइ १,०१७ जना बाक्तेकम।

### लेवीपुकी

43 होदेवाह आ खिं डा येशुआ नु कदमीएल आस चच युड ७४ जना लेत्या तशो बाक्तेकम।

### कुम्सो पाइबपुकी

44 आसाफ आ चच युड १४८ जना लेत्या तशो बाक्तेकम।

### लाप्यो खाल पाइबपुकी

45 शाल्लुम, आतेर, ताल्मोन, अक्कुब, हतीता नु शोबाइ आन चच युड १३८ जना लेत्या तशो बाक्तेकम।

### परमप्रभु आ खिंम गेय पाइबपुकी

46 सीहा आ तौपुकी, हासुफा आ तौपुकी, तब्बाओथ आ तौपुकी,  
 47 केरोस आ तौपुकी, सीआ आ तौपुकी, पादोन आ तौपुकी,  
 48 लेबाना आ तौपुकी, हगाबा आ तौपुकी, शाल्माइ आ तौपुकी  
 49 हानान आ तौपुकी, गिददेल आ तौपुकी, गहार आ तौपुकी,  
 50 रेआयाह आ तौपुकी, रेसीन आ तौपुकी, नेकोदा आ तौपुकी,  
 51 गज्जाम आ तौपुकी, उज्जा आ तौपुकी, पासेआह आ तौपुकी,  
 52 बेसाइ आ तौपुकी, मेउनीम आ तौपुकी, नेफुशेसीम आ तौपुकी,  
 53 बाकबुक आ तौपुकी, हकुफा आ तौपुकी, हारहुर आ तौपुकी,  
 54 बास्लुथ आ तौपुकी, मेहीदा आ तौपुकी, हारशा आ तौपुकी,  
 55 बारकोस आ तौपुकी, सीसेरा आ तौपुकी, तेमाह आ तौपुकी,  
 56 नु नेसीयाह नु हतीफा आस तौपुकी परमप्रभु यावे आ खिं डा गेय पाइब लेत्या तशो बाक्तेकम।

### सोलोमन आ गेय पाइबपुकी

57 सोताइ आ तौपुकी, सोफेरेथ आ तौपुकी, परीदा आ तौपुकी,  
 58 याला आ तौपुकी, दारकोन आ तौपुकी, गिददेल आ तौपुकी,  
 59 शेफत्याह आ तौपुकी, हत्तील आ तौपुकी, पोकेरेथ-हस्सेबाइम आ तौपुकी नु आमोन आ तौपुकी,  
 60 परमप्रभु यावे आ खिं डा गेय पाइब नु सोलोमन आ खिं डा गेय पाइब आन तौ नेल्ल पा ३९२ जना लेत्या तशो बाक्तेकम।

### का निक्शी अर्को सहर डा मुर

61 तेल-मेलाह, तेल-हारशा, करूब, अददोन नु इम्मर सहर रे कुइब मुर आन किकी पिपी इस्त्राएली बाक्नीम, दे ब्रेक्तीकेमी कोंइने मचबेम।

62 देलायाह, तोबीयाह नु नेकोदा आन तौ नेल्ल पा ६४२ जना बाक्तेकम।

63 चढेब आन दाते रे होबायाह, हककोस आस चच युड नु बारजील्लाड बाक्नीम। बारजील्लाडमी चहिं गिलादी बारजील्लाड आ तमी का ग्युंवे पा आ शिउ आ नें बारजील्लाड माइक्चा पुंडसीशो बाक्त।

64 मेको आन नें ब्रेक्शो मथित्तिके, चढेतीक गेय पचा मशिरनीम, दे तिल्या पुंडसीशो बाक्तेकम।

65 हुकुम पाइबमी ऊरीम नु थुम्मीम रे गेय पाइब चढेब मग्रूम सम्म मेको आन कली चढेशो थोव्वकी जचा मगेमे बाक्त। प्रस्थान २८:३०; गन्ती १८:९; १सामुएल १४:४१

66 यरूसलेम लेशशा जाकब नेल्ल ४२,३६० जना बाक्तेकम।

67 मेको आन वाइलीम वाइल ७,३३७ जना बाक्तेकम। मिनु कुम्सो पाइबपुकी २४५ जना मुर बाक्तेकम।

68 मिनु ७३६ ओटा शारा, २४५ ओटा खच्चर,

69 दलओट ४३५ नु ६,७२० ओटा गधा बाक्तेकम।

परमप्रभु कली ग्येरशा गेशो

एज़ा २:६८-६९

70 मिनु का निक्शी खिं डा ठेयब मुरपुकीमी गारो प्रोव्रचा कली मार मार गेम्तेकम। हुकुम पाइबमी सुन के आदारकोन माइश्शो क्येट हजार का टुक्रा, ५० ओटा बोस नु ५ सहे ३० ओटा चढेब आन कली फेक्तीके वा गेप्टु। आदारकोन का ८.४ ग्राम सुन के क्येट बाकब।

71 मिनु का निक्शी खिं डा ठेयब मुरपुकीमी गेय कली सुन के आदारकोन २० हजार टुक्रा नु चांदी के मीना माइश्शो क्येट हजार निक्शी सहे निक्शी टुक्रा गेम्तेकम। मीना का ६०० ग्राम खोदेशो बाकब।

72 लीशो मुरपुकीमी सुन के आदारकोन २० हजार टुक्रा नु चांदी के मीना हजार निक्शी टुक्रा नु ६७ ओटा चढेब आन कली फेक्तीके वा गेम्तेकम।

73 मिनु चढेबपुकी, लेवीपुकी, लाप्यो खाल पाइबपुकी, कुम्मो पाइबपुकी, परमप्रभु यावे आ खिंमी गेय पाइबपुकी नु अरु नेल्ल इस्राएली आन आम आम सहरमी लशा बाकशो बाक्तेकम।

## 8

एज़ामी परमप्रभु आ लोव्र पढेशो

1 मिनु ७ महिना थेक्चावानु, इस्राएली आम आन आन सहरमी बाकमानु, मुर नेल्ल थुं का दुम्या, ब्वाक्कु लाप्यो आ नेक्था डा ठेयब बाक्तीकेम बुक्तेकम। मिनु मेकोपुकीमी परमप्रभु यावे आ लोव्र जोक्ब तुइक्ब चढेब एज़ा कली “परमप्रभु यावेमी मोसा कली गेशो इस्राएली आन कली अरेशो लोव्र डा किताब चाक्को” दैतेकम। एज़ा ७:६

2 मिनु ७ महिना डा डोंइती डा नाक्तीमी चढेब एज़ामी मेको किताब मुर आन डोंइती चाक्तु। मेकेर वोंइश मुर, मीश मुरपुकी नु सु सु रुप्ने चाप्ब बाक्मा, मेको नेल्ल बुक्शो बाक्तेकम। ब्यवस्था ३१:१०-१३

3 मोपा एज़ामी ब्वाक्कु लाप्यो आ नेक्था डा बाक्तीकेमी सुनी रे नाक्त सम्म वोंइश मुर, मीश मुर नु लोव्र रुप्ने चाप्ब नेल्ल आन डोंइती मेको किताब पढेप्टु। मिनु परमप्रभु यावे आ अरेशो लोव्र डा किताब पढेवानु, नेल्लेमी नोफा दाइश्शा नैतेकम।

4 मिनु परमप्रभु यावे आ लोव्र जोक्ब तुइक्ब एज़ा मुर नेल्ल आन कली रिम्शो नैपाइक्चा कली शी के सेल्शो लाइश्शो राप्तीकेमी राप्शो बाक्त। मेको आ ग्युरा गे मत्तीथ्याह, शेमा, आनायाह, उरीयाह, हिल्कीयाह नु मासेयाह राप्शो बाक्तेकम। मिनु आ पेरा गे पेदायाह, मीशाएल, माल्कीयाह, हाशुम, हशबादानाह, जकरिया नु मेशुल्लाम राप्शो बाक्तेकम।

5 मिनु एज़ामी आ लाइश्शो बाक्तीकेमी राप्शा, नेल्लेम तचा डा पा मुर आन डोंइती मेको किताब प्राक्तु। मेको किताब प्राक्गानु, मुर नेल्ल बोक्तेकम।

6 मिनु एज़ामी नेल्ल क्येडा ठेयब परमप्रभु यावे कली “गे ठेयब ननी” दे मान पवानु, मुर नेल्लेमी आन गुड पोक्शा “आमेन, आमेन” दैतेकम। मिनु नेल्लेमी आन पिया खुक्शा, परमप्रभु यावे आ डोंइती खप सम्म बाप्शा ठेयब सेल्तेकम।

7 मिनु येशुआ, बानी, शेरब्याह, यामीन, अक्कुब, शब्बेथाइ, होदीयाह, मासेयाह, केलीता, अजारयाह, योजाबाद, हानान, पेलायाह नु लेवीपुकीमी मुर आन कली परमप्रभु आ अरेशो लोव्र रुप्पाइक्तेकम। मिनु मुर आन बाक्तीकेम राप्शा बाक्तेकम।

8 मेकोपुकीमी परमप्रभु आ अरेशो लोव्र रुप्चा डा पा पढेम्तेकम। आन पढेशो रुप्मेक्ल, दे मुर आन कली आ अर्थ यो शेंताकम।

9 मिनु परमप्रभु यावे आ अरेशो लोव्र नेंशा, मुर नेल्ल शुश डाक्तेकम। मोपतीके पिप आ वोइश्शो हुकुम पाइब, नेहेम्याह, परमप्रभु यावे आ लोव्र जोक्ब तुइक्ब चढेब एज़ा नु मुर आन कली शेंब लेवीपुकीमी “मुलाक्ती परमप्रभु यावे, इन परमप्रभु आ ठेयब नाक्त बाक्ब। हिशेक मपने। मडाक्कीन” दे मुर आन कली माइक्तेकम।

10 मिनु मेकोपुकीमी मुर आन कली “मुल गे नेल्ल लने। ब्रोव्रशो ब्रोव्रशो जने ब्वने, तूडीन। मिनु मथीब आन कली यो मार मार सोइक्तीने। मारदे हना मुलाक्ती आंइ परमप्रभु आ ठेयब नाक्त बाक्ब। हिशेक मपने। मारदे हना परमप्रभु यावे आ गेशो ग्येरतीकेमी इन थुं बारपाइक्ब” दैतेक्म।

11 मिनु लेवीपुकीमी मुर नेल्ल आन कली “सिक्सी पा बाक्कीन। मुलाक्ती परमप्रभु आ ठेयब नाक्त बाक्ब। हिशेक मपने। मडाक्कीन” दैतेक्म। मारदे हना मुर नेल्ल परमप्रभु यावे आ लोव्र नेंशा डाक्तेक्म। नेहेम्याह ५:१४

12 मिनु मुर नेल्लेमी आन दैशो लोव्र रुप्शा, ठेयब ग्येरतीक चाड मानेचा कली जचा ब्वचा तूचा नु मथीब आन कली मार मार सोइक्चा कली लाम्तेक्म।

### गोठ सेल्शा बाक्तीक चाड

13 मिनु आ दीसा खिं नेल्ल डा ठेयब मुर, चढेब नु लेवी नेल्ल परमप्रभु यावे लोव्र जोक्ब तुडक्ब एजा आ डोंइती परमप्रभु यावे आ अरेशो लोव्र शेंसीचा कली बुक्तेक्म।

14 मिनु परमप्रभु यावेमी मोसा कली “इसाएलीपुकीमी ७ महिना डा ७ नाक्त कली गोठ सेल्शा बाक्तीक चाड मानेचा माल्नीम” दे शेंशा, परमप्रभु यावे आ अरेशो लोव्रम ब्रेक्शो थित्तेक्म। लेवी २३:३४-३६; लेवी २३:४०

15 मिनु मेकोपुकीमी आंम बाक्तीक सहर नेल्लेमी नु यरूसलेम डा मुर आन कली “गे इर ब्वाकी ग्येत्थ लशा, मार मार तेल रवा, मूर रवा, खजूर रवा नु शुश सफा पाइश्शो रवा आन राशी गोठ सेल्शा कली चाक्कीन। मिनु दोदेशो ब्रेक्शो बाक्मे, मोदेशो पने” दे नेंपतीन दैतेक्म। लेवी २३:४०

16 मिनु मुरपुकी लशा, सेउला चाक्तेक्म। मिनु आन खिं तारी, आन लाडगामी, परमप्रभु आ खिं डा लाडगामी, ब्वाक्कु लाप्चो आ नेक्थामी नु एफ्राइम लाप्चो आ नेक्थामी गोठ सेल्शा बाक्तेक्म। नेहेम्याह ८:१

17 मिनु मुर नेल्ल, सु सु ग्याइश्शा लेत्चा पुंडसीशो बाक्मा, मेको नेल्ल, गोठ सेल्शा, आगाम बाक्तेक्म। मिनु नून आ तौ यहोसु आ पाला रे मेको नाक्त सम्म इस्राएलीपुकीमी मोदेशो मपशो बाक्तेक्म। मेको चाडमी मुर नेल्ल शुश ग्येरसाक्म।

18 मिनु डोंइती डा नाक्त रे नोले डा नाक्त सम्म एजा मी नाक्त किंत किंत परमप्रभु आ अरेशो लोव्र डा किताब पढेत्तु। मेकोपुकीमी मेको चाड ७ नाक्त सम्म मानेक्तेक्म। मिनु दोदेशो पा ब्रेक्शो बाक्मे, मोदेशो पा आ दीसा ८ नाक्तीमी चाड थुम्तीक नाक्त नेल्ल क्येडा ठेयब पा मानेक्तेक्म।

## 9

### मुरपुकीमी मरिम्शो पशो

1 मिनु मेको महिना डा २४ नाक्त नोले इस्राएलीपुकी माइजा बाक्शा, अरन्डी फेक्शा नु आन पियामी फुरक देप्शा खुम्साक्म।

2 इस्राएलीपुकीमी अर्को जात डा मुरपुकी रे आंम कली तिल्साक्म। मिनु आन बाक्तीकेम राप्शा, आन मरिम्शो पशो नु आन किकी पिपी आन मरिम्शो पशो शोव्रतेक्म।

3 मिनु नेल्ल आन बाक्तीकेमी राप्शा, घन्टा सां सम्म परमप्रभु यावे, आन परमप्रभु आ अरेशो लोव्र डा किताब पढेशो नैतेक्म। मिनु अर्को घन्टा सां सम्म चहिं आंम आंम आन मरिम्शो पशो शोव्रना शोव्रन, परमप्रभु यावे आ डोंइती बाप्शा, परमप्रभु यावे, आन परमप्रभु कली ठेयब सेल्ना सेल्न बाक्तेक्म।

4 येशुआ, बानी, कदमीएल, शेबान्याह, बुन्नी, शेरैब्याह, बानी नु केनानी लेवी आन शी के सेल्शो राप्तीके डा क्रेसीमी बाक्शा, ठेयब सेदामी परमप्रभु यावे, आन परमप्रभु कली लोव्र पाम्तेक्म।

5 मिनु लेवी येशुआ, कदमीएल, बानी, हशाब्नेयाह, शेरैब्याह, होदीयाह, शेबान्याह नु पेथायाहमी मुर आन कली “बोक्कीन, गेना हना यो बाक्ब परमप्रभु यावे, इन परमप्रभु कली ठेयब सेलीन। ‘इन नें ठेयब बाक्ब। नेल्ल आन ठेयब सेल्तीके आन क्येडा इन नें ठेयब सेल्चा पुंडसीशो बाक्ब’ देचा माल्नीनी” दैतेक्म।

6 मिनू एज्रामी “गे का ला परमप्रभु यावे बाक्नीनी। गे सरीड सेल्टीनी। स्वर्ग नु मेकेर बाक्ब नेल्ल सेल्टीनी। गे रागी नु मेकेर डा मारेड मारेड, समुन्द्र नु मेकेर डा मारेड मारेड आन कली सेल्टीनी। मिनू मेको नेल्ल कली ब्रोंडचा गेतीनी। मिनू स्वर्ग डा गेय पाइबपुकीमी इन कली ठेयब सेल्टीनी।

7 परमप्रभु यावे, गे परमप्रभुमी अब्राम कली योत्रशा, कल्दी आन रागी ऊर सहर रे गुंडशा, अब्राहाम नें वोइक्तीनी। उत्पत्ती ११:३१; उत्पत्ती १७:५

8 मिनू मेको आ थुं इन कली मप्रोंडब, ठीक पाइब बाक्ब, दे तुइश्शा, मेको नु कबल का पाइतीनी। मार कबल पाइतीनी देंशा हना, मेको कली कनानी, हिली, एमोरी, परिज्जी, यबुसी नु गिरगाशी आन रागी आ चच युड आन कली गेनुड, दे कबल पाइतीनी। मिनू गे इन कबल खाप्तीनी। मारदे हना गे ठीक पाइब बाक्नीनी। उत्पत्ती १५:१८-२१

9 मिनू आंड किकी पिपी इजीप्त रागीम बाक्मानु, मेको आन श्येत जशो ताइतीनी। लल समुन्द्रम बाक्शा आन डाक्शो नेंतीनी। प्रस्थान ३:७

10 मिनू गेमी पिप फाराओ आ गेय पाइब नु आ रागी डा मुर नेल्ल आन डोंइती चिन्ड नु छक लाक्चा डा गेय पाइतीनी। मारदे हना मेकोपुकीमी आंड किकी पिपी आन कली ठेयब लेशशा, श्येत गेशो बाक्तेक्म, दे तुइक्ताक्नी। मोदेंशो पा इन नें ठेयब सेल्साक्नी। मुल सम्म मेको मोदेंशो बाक्ब। प्रस्थान १८:११

11 मेको आन डोंइती समुन्द्र कली चेशशा लां का सेल्टीनी। मेकोपुकी सोव्रशो खपीम गाक्शा, समुन्द्र शोक्साक्म। मेको खेदा पाइब आन कली चहिं ब्वाक्कुम खुम्तीनी। फुल्लु ब्वारशा, ब्वाक्कुम ताइश्शो खोदेंशो पा खुम्तीनी। प्रस्थान १४:२१; प्रस्थान १५:५,१०

12 आंड किकी पिपी आन कली नाक्त गोस्स के थामम लां कोंइताक्नी। मिनू नाक्दो आन लां तपाइक्चा कली मी के थाम दुम्शा लां कोंइताक्नी।

13 गे सौने डांडामी यितीनी। मिनू स्वर्ग रे मेकोपुकी नु लोव्र पाइतीनी। गे मेको आन कली इन ठीक पतीक लोव्र, थमा शेंतीके, इन रिम्शो फुल्लुम मुशा ब्रेक्शो लोव्र नु इन शेंतीके गेतीनी। प्रस्थान १९:१८; प्रस्थान २०:१-१७

14 इन नाइक्तीक नाक्त नाइक्चा, दे मेको आन कली तुइक्पाइक्तीनी। मेको आन कली मोसा रे पा इन शेंतीके, इन फुल्लुम मुशा ब्रेक्शो लोव्र नु इन अरेशो लोव्र गेतीनी।

15 मेको आन कली शोव्रलु बेक्मानु, सरीड रे शोब्ले गेतीनी। मेको आन कली तूतू मदाक्चा डा पा, रूचा डा पा सेरथे फुल्लु रे ब्वाक्कु गुंडशा गेतीनी। मिनू मेको आन कली ‘गेपुकी मेको रागी ओव्रशा, नेल्ल आंम के सेलीन’ दे माइक्तीनी। मिनू मेको आन कली ‘गे मेको नेल्ल गेनुड’ दे कसम जाइतीनी। प्रस्थान १६:४,१४,१५; प्रस्थान १७:६

16 मिनू आंड किकी पिपीमी ठेयब लेशशा, आन मिम्शो ला पशा, इन शेंशो मटीब दुम्शो बाक्तेक्म। प्रस्थान ३२:१,९

17 इन कली टिने मबिस्सम। आन दातेमी पशो इन चिन्ड नु छक लाक्चा डा गेय ममिम्शो बाक्तेक्म। मेकोपुकी इन देंशो मटीब दुम्शो बाक्तेक्म। मिनू आन काइ मटितीकेमी इजीप्त रागी लेशशा लशा, लेंशा वाइलीम वाइल दुम्चा कली थुंम वोइश्शो बाक्तेक्म। गे चहिं आंड मरिम्शो पशो क्याम्शा गेब परमप्रभु बाक्नीनी। शिशी पाइब नु गेना हना यो दाक्ब बाक्नीनी। गे ओंखां पा चुरब बाक्शा, गेना हना यो दाक्तीके पाइश्शो बाक्नीनी। मोपतीके गे इन मुर आन कली दाक्शा मप्रोंइनी। प्रस्थान ३४:६

18 मेकोपुकीमी सुन के बाछा सेल्शा ‘इजीप्त रागी रे प्रोंइशा कुइब, आंड परमप्रभु एकोन बाक्ब’ देंमानु यो, इन कली ठेयब शुक्शी लोव्र पशो बाक्तेक्म हना यो, प्रस्थान ३२:४

19 गे मेको आन कली शुश शिशी पशा, गोरशो रागीमी प्रोंइशा मसोंइक्तीनी। आन लतीक लां तपाइक्चा कली नाक्त गोस्स के थाम नु नाक्दो मी के थाम दुम्शा गेनायो मप्रोंइनी।

20 मिनू मेको आन कली शेंचा, दे इन रिम्शो पाइब सोक्त गेतीनी। मेको आन कली मन्ना शोब्ले गेचा मप्रोंइनी। मिनू मेको आन कली रूथ्री पा ब्वाक्कु तूचा गेतीनी। प्रस्थान १६:३५; प्रस्थान १७:६; गन्ती ११:१७-२५; भजन संग्रह ७८:१५-१६; भजन संग्रह ७८:२३-२४

21 गे मेको आन कली ४० बर्स सम्म गोरशो रागीमी मारेड ममाल्चा डा पा थुलतीनी। मेको आन वा मजेक्म, आन खोडल यो गेनायो महोम्म। ब्यवस्था ८:४

22 मेको आन कली राज्य नु जात जात डा मुरपुकी नु ग्रापाडक्तीनी। मेको आन बाक्तीके का का पा योव्रशा गेतीनी। मिनु सीहोन माडश्शो, हेरबोन रागी डा पिप नु ओग माडश्शो, बाशान रागी डा पिप आस रागी यो मेको आन कली गेतीनी। गन्ती २१:२३-२४; गन्ती २१:३३, ३५

23 गे मेको आन तौ सरीड डा सोरुल खोदेशो पा हिकने मचाप्चा डा पा शुश सेलतीनी। मिनु आन किकी पिपी आन कली 'गे मेको रागी आंम के सेलीन' देशो रागीमी चाक्दीत्तीनी।

24 मिनु मेको आन तौ चच युडमी मेको रागी ओव्रशा, आंम के सेल्साक्म। मिनु गे मेको रागीम बाक्ब कनानी नु आन पिपपुकी यो मेको आन गुडम गेतीनी। यहोसु १२:-

25 मेकोपुकीमी एर ओंथ नेल्ल ठेयब गारो हिरशो सहरपुकी ग्राशो बाक्तेक्म। शुश ग्रेल्ब रू आंम के सेल्शो बाक्तेक्म। रिम्शो थोवक्कीम ब्रीशो खिंपुकी आंम के सेल्शो बाक्तेक्म। फुल्लु मुशा सेल्शो इनार, अडगुर रू, तेल रवा रू नु मार मार फल फुल रू शुश तशो बाक्तेक्म। मिनु मेकोपुकीमी जशा ब्वशा, रूशा, दोम्शा इन ठेयब शिशो तशा, ग्येरसीशो बाक्तेक्म। ब्यवस्था ६:१०-११; ब्यवस्था ३२:१५

26 मेको नेल्ल तशा यो इन देशो मटिथु, ठेयब लेशशा, इन अरेशो लोव्र मटीमे बाक्त। इन लोव्र पाडबपुकीमी आन कली 'गे मरिम्शो पाडब बाक्नीनी। आं गे लेतीन' देमानु, मेको आन कली सदमे बाक्त। मिनु मेकोपुकीमी शुश शुक्शी पामे बाक्त।

27 मोपतीके गे मेको आन कली आन जोरी सत्रु आन गुडमी गेनी बाक्त। मेकोपुकीमी मेको आन कली शुश श्येत गेमे बाक्त। मिनु श्येत जामेनु 'वारच पाडक्की' दे इन कली पुन्मेनु, गे स्वर्ग रे आन पुंइशो नेनी बाक्त। गे इन ठेयब शिशोमी मेको आन कली आन जोरी सत्रु रे प्रोइचा कली मुर सोडक्तीनी बाक्त। मिनु मेकोपुकीमी मेको आन कली प्रोन्मे बाक्त। न्यायाधीस ३:९, १५; न्यायाधीस २:१४-२२

28 एर ओंथ डा आन जोरी सत्रु रे प्रोइपांडसीशा, नाडश्शा बाक्मा नोले, लेशा इन मदाक्शो पामे बाक्त। मिनु गे मेको आन कली आन जोरी सत्रु आन गुडमी गेनी बाक्त। आन जोरी सत्रुपुकीमी मेको आन कली हुकुम पामे बाक्त। मिनु लेशा मेकोपुकीमी इन कली 'वारच पाडक्की' दे ग्रीमानु, गे स्वर्ग रे मेको आन पुंइशो नेशा, मेको आन कली इन ठेयब शिशोमी शुश खेयप प्रोइनी बाक्त।

29 मिनु मेको आन कली इन अरेशो लोव्र गे लेत्चा कली, मेको आन कली टिचा शेंदीनी बाक्त। तन्न मेकोपुकी ठेयब लेशशा, इन शेंतीके काड मटिथु, इन पतीक लोव्र मपामे बाक्त। मुरपुकीमी इन पतीक लोव्र पशो नम हना, ब्रोंइचा ताम वा। तन्न मेकोपुकीम इन लोव्र मनेंथु, मटिथु, इन गे आन ची हिरदमे बाक्त। लेवी १८:५

30 गे शुश बर्स सम्म मेको आन कली फालनी बाक्त। इन लोव्र पाडबपुकीमी मेको आन कली इन सोक्त रे पा शेंपाडक्नी बाक्त। तन्न मेकोपुकीमी नेंचा मबिस्समा बाक्त। मोपतीके गे मेको आन कली अर्को जात जात डा मुर आन गुडमी गेनी बाक्त। येरमीया ७:२५-२६; येरमीया ४४:४-६

31 मो पाम्तेक्म हना यो, इन ठेयब शिशोमी मेको आन कली मसाडक्थु, आन श्येत रे प्रोइनी बाक्त। मारदे हना गे शिशो पाडब नु शुश दाक्ब परमप्रभु बाक्नीनी।

32 मिनु आंइ परमप्रभु, गे नेल्ल क्येडा ठेयब सक्ति पाडश्शो नु मान पा हिंचा माल्शो परमप्रभु बाक्नीनी। इन पशो कबल इन गेना हना यो दाक्तीक खाप्ब बाक्नीनी। अस्सुर डा पिप आन पाला रे मुलाक्त सम्म आंइ कली गेशो श्येत, आंइ पिप आन कली, आंइ ठेयब मुर आन कली, इन कली चढेब आन कली, इन लोव्र पाडब आन कली, आंइ किकी पिपी आन कली नु इन मुर नेल्ल आन कली गेशो श्येत कली आडक्च ममिम्तीन। ब्यवस्था ७:९, १२; १राजा ८:२३; नेहेम्याह १:५

33 आंइ कली दुम्तीके, गे ठीक पशो बाक्नीनी। मारदे हना गे आंइ कली रिम्शो पाडतीनी। गोपुकीमी चहिं इन कली थम मरिम्शो पाडतक। दानीएल ९:५, ७

34 आंइ पिप, आंइ ठेयब मुरपुकी, इन कली चढेबपुकी नु आंइ किकी पिपीमी इन अरेशो लोव्र मपथु, इन शेंतीके नु इन गेशो होस पतीक लोव्र मनेंथु, हिकसीन महिक्मे बाक्त।



35 मिनू आन आंम राज्यमी, इन रिम्शो पतीकेमी नु आन बाली नाली शुश ग्रेल्ब ठेयब रागीमी इन कली मान मपामे बाक्त। आन काइ मरिम्शो गेय मप्रोन्मे बाक्त।

36 मुलाकती गो वाइलीम वाइल दुम्शो बाक्नीकी। आंइ किकी पिपी आन कली मेको रागी डा फल फुल जचा नु मेकेर डा रिम्शो रिम्शो थोव्रक तचा कली गेशो बाक्तीनी। इन गेशो रागीमी गो वाइलीम वाइल दुम्शो बाक्नीकी।

37 मेको रागी डा मारेइ मारेइ रिम्शो थोव्रकी गे आंइ कली हुकुम पपाइक्ब पिप आन कली ताइब सेलतीनी। मेको आंइ मरिम्शो पतीके आ पर्वम बाक्ब। मेकोपुकीमी आंइ कली नु आंइ बी ब्यफ नु क्यारश भेडा आन कली आन दाक्स पा पाइनीमी। मोदेशो पा गो शुश श्येत जशो बाक्नीकी” दे एज़ामी परमप्रभु कली लोव्र पाप्तु।

38 मिनू मेको आन पशो नेल्ल मिम्शा, गोपुकीमी परमप्रभु नु कबल का पाइतक। मिनू मेको कबल डा लोव्र नेल्ल ब्रेकताक्क। मेको छाप थोक्शो ब्रेक्सम आंइ ठेयब मुरपुकी, लेवीपुकी नु चढ़ेब आन नें ब्रेक्शो बाक्तेक्म।

## 10

छाप थोक्शो ब्रेक्सम मुर आन ब्रेक्शो नें

1 मेको छाप थोक्शो ब्रेक्स आगाम सु सु आन नें ब्रेक्शो बाक्त देशा हना: हाकाल्याह आ तौ हुकुम पाइब नेहेम्याह नु सिदकीयाह आस नें ब्रेक्शो बाक्त।

2 मिनू चढ़ेबपुकी: सेरायाह, अजारयाह, येरमीया,

3 पशुर, अमारयाह, माल्कीयाह,

4 हत्तुश, शेबान्याह, माल्लुक

5 हारीम, मेरेमोथ, ओबदिया,

6 दानीएल, गिन्नेथोन, बारुक,

7 मेशुल्लाम, अबीयाह, मियामीन,

8 माजीयाह, बिल्गाइ नु शेमायाह आन नें ब्रेक्शो बाक्त।

9 मिनू लेवीपुकी अजन्याह आ तौ येशुआ, हेनादाद आ खिं डा बिन्नुइ, कदमीएल

10 नु मेको आन लोकबपुकी शेबान्याह, होदीयाह, केलीता, पेलायाह, हानान,

11 मीका, रेहोब, हशाब्याह,

12 जाक्कुर, शेरेब्याह, शेबान्याह,

13 होदीयाह, बानी नु बेनीनु आन नें ब्रेक्शो बाक्त।

14 ठेयब मुरपुकी पारोश, पहाथ-मोआब, एलाम, जत्तु, बानी,

15 बुन्नी, अज्गाद, बेबाइ,

16 अदोनीयाह, बिग्वाइ, आदीन,

17 आतेर, हिज्कीयाह, अज्जुर,

18 होदीयाह, हाशुम, बेजाइ,

19 हारीफ, अनाथोथ, नेबाइ,

20 माग्पीअश, मेशुल्लाम, हेजीर

21 मेशेजाबेल, सादोक, यादुअ,

22 पेलात्याह, हानान, आनायाह,

23 होशेआ हनान्याह, हाशुब

24 हल्लोहेश, पिल्हा, शोबेक,

25 रेहुम, हशाब्नाह, मासेयाह,

26 अहीयाह, हानान, आनान,

27 माल्लुक, हारीम नु बानाह आन नें ब्रेक्शो बाक्त।

### इस्राएली आन पशो कबल

28 मिनु लीशो मुरपुकी: चढेबपुकी, लेवीपुकी, लाप्चो खाल पाइबपुकी, कुम्सो पाइबपुकी, परमप्रभु यावे आ खिंमी गेय पाइबपुकी नु परमप्रभु आ अरेशो पचा कली अर्को रागी डा मुरपुकी रे तिलसीशो वोंडश मुर, मीश मुर, आन तमी तौपुकी सु सु रुप्ने चाप्ब बाक्मा, मेको नेल्ल बाक्तेक्म।

29 मेको आन लोकब नु आन ठेयब मुरपुकी नु गारशा, परमप्रभु यावे आ वाइल मोसामी गेशो परमप्रभु आ अरेशो लोव्र टिचा कली थुं का पान्तेक्म। आंइ परमप्रभु यावे आ रेंशो, आ पतीक लोव्र नु आ फुल्लुम मुशा ब्रेक्शो लोव्र तुइश्शा पचा कली कसम जाम्तेक्म।

30 मिनु गोपुकीमी आंइ तमी आन कली मेको रागी डा अर्को जात डा मुर आन कली मगेनीक। आंइ तौ आन कली यो मेको आन तमीपुकी मचाक्नीकी। प्रस्थान ३४:१६; ब्यवस्था ७:३; एज्जा ९:२

31 मिनु मेको रागी डा मुरपुकीमी नाइक्तीक नाक्त मार मार लेयतीक थोव्रक नु अन्न लेयथ चाक्तेक्म हना, गोपुकीमी नाइक्तीक नाक्त नु परमप्रभु आ ठेयब नाक्तीम मेको आन के मारेइ मग्याप्नीकी। मिनु गोपुकी ६ बर्स आ नोले डा बर्सम मारेइ मखुम्नीकी। जेर गेशो बाक्तक हना यो, मेको बर्समी जेर नु आ चाइक्ब काइ मपोक्थु, प्रॉइनीकी। ब्यवस्था १५:१-११; नेहेम्याह ५:१०; नेहेम्याह १३:१५-१८; येरमीया १७:२१-२७

32 मिनु गोपुकीमी बर्स बर्स कली शेकेल का के भाग सां डा भाग का परमप्रभु यावे आ खिं डा गेय कली गेनीकी, दे आंइ थुं फ्रेंताक्क। शेकेल का ११.५ ग्राम डा क्येट बाक्ब। २इतिहास २४:६; मती १७:२४

33 मार पचा कली गेनीकी देशा हना, परमप्रभु आ डोंइती वोइश्शो कोइतीक शोब्ले कली अन्न चढेतीक नु चोशा चढेतीक कली, नाइक्तीक नाक्तीम चढेतीक, औसीम चढेतीक, अरु चाड डा चढेतीक, नेल्ल इं परमप्रभु आ खिं कली माल्शो थोव्रकी, पाप क्याम्पाइक्चा कली चढेतीक, मोदेशो पा इस्राएली आन मरिम्शो पशो क्याम्चा कली नु इं परमप्रभु आ खिंमी पतीक गेय नेल्ल कली गेनीकी।

34 मिनु गो, चढेबपुकी, लेवीपुकी नु मुर नेल्लेमी इं परमप्रभु आ खिं कली कचेत सु सुम क्याक्चा, दे फेन्टे आप्तक। खिं खिं डा मुरपुकी बर्स बर्समी परमप्रभु यावे आ अरेशो लोव्रम ब्रेक्शो खोदेशो पा परमप्रभु यावे, इं परमप्रभु आ खिंम चढेचा कली शी चाक्चा माल्नीम। प्रस्थान २५:३०

35 मिनु बर्स बर्सम नेल्ल क्येडा डोंइती डा आंइ रूम सिश्शो, मार मार रवा आन फल फुल परमप्रभु यावे आ खिंम चाक्नय। लेवी ६:५

36 आंइ नेल्ल क्येडा डोंइती जरमेशो तौ नु बस्तु भाव आन डोंइती जरमेशो परमप्रभु आ अरेशो खोदेशो पा परमप्रभु आ खिंमी चाक्चा कली आंइ थुं फ्रेंताक्क। आंइ नेल्ल क्येडा डोंइती जरमेशो बी ब्यफ, क्यारश, भेडा आंइ परमप्रभु आ खिंमी गेय पाइब चढेब आन कली चाक्नीक, दे थुं फ्रेंताक्क। प्रस्थान १३:२

37 मिनु आंइ निशो फस डा नेल्ल क्येडा डोंइती डा भाग, अन्न चढेतीके, मार मार रवा आन फल, अडगुर शांबु नु तेल चढेब आन कली गेचा, दे परमप्रभु आ खिं डा वोइक्तीक कोठाम चाक्नीकी। मोदेशो पा लेवी नेल्लेम रागी डा १० भाग डा भाग का ताइनीम। मेको लेवीपुकीमी आंइ गेय पतीक सहर जाक्शा, १० भाग डा भाग का पोक्चा माल्नीम। गन्ती १५:२०-२१; गन्ती १८:२१

38 मोदेशो पा लेवीपुकी पोक्थ गाक्मानु, चढेब हारून आ चच युइ यो लेवीपुकी नु गाक्चा माल्नीम। मिनु लेवीपुकी मेको आन पोक्शो रे पा १० भाग डा भाग का परमप्रभु आ खिं डा वोइक्तीक कोठामी वोइक्चा माल्नीम। गन्ती १८:२६, २८

39 मिनु इस्राएली नु लेवीपुकीमी मेको चाक्शो अन्न, अडगुर शांबु नु तेल मार मार वोइक्तीक कोठाम चाक्चा माल्नीम। मारदे हना मेको परमप्रभु आ खिं डा बोसपुकी वोइक्तीके बाक्त। मिनु मेकेर गेय पाइब चढेबपुकी, लाप्चोम खाल पाइबपुकी नु कुम्सो पाइबपुकी यो मेकेर बाक्नीम। मिनु गोपुकीम “परमप्रभु आ खिं श्येत्थ मवोइय्य” दे आंइ थुं फ्रेंताक्क।

यरूसलेम सहरम बाकब मुर

१ इतिहास ९:२-१७

1 मिनु इस्राएली आन ठेयब मुरपुकी यरूसलेममी बाकशो बाक्तेकम। लीशो मुर आन दाते रे सु परमप्रभु यावे आ सहर यरूसलेममी बाकचा ताडबा, दे १० जना मुर आन दाते रे का योत्रचा कली फेन्टे आप्तेकम। अरु ९ जना मुर चहिं अरु बाक्तीकेमी बाक्तेकम।

2 मुरपुकीमी यरूसलेममी ग्येरशा लाइब नेल्ल आन कली आसीक गेम्तेकम।

3 गाउं गाउं डा ठेयब मुर यरूसलेम सहरम बाकशो बाक्तेकम। अरु मुरपुकी, चढेबपुकी, लेवीपुकी, परमप्रभु यावे आ खिंमी गेय पाइबपुकी नु सोलोमन आ खिं डा गेय पाइब आन चच युइ नेल्ल यहूदा डा सहर सहर, गाउं गाउंम आम आम बाक्तीक उइ बाकचा माल्बाक्तेकम।

यरूसलेमम बाकब यहूदी

4 यरूसलेममी यहूदा नु बेन्यामीन आस थर डा मुर का निकशी बाकशो बाक्तेकम। यहूदा आ थर डा मुर सु सु बाक्तेकम देशा हना, उज्जीयाह आ तौ अथायाह, मेको उज्जीयाह आ आफ जकरिया बाक्त। जकरिया आ आफ अमारयाह बाक्त। अमारयाह आ आफ शेफत्याह बाक्त। मिनु शेफत्याह आ आफ मा-हालालेल बाक्त। मिनु मेको पेरेस आ चच युइ बाक्तेकम।

5 मिनु बारुक आ तौ मासेयाह बाक्त। बारुक आ आफ कोल-होजे बाक्त। कोल-होजे आ आफ हाजायाह बाक्त। हाजायाह आ आफ अदायाह बाक्त। अदायाह आ आफ योयारीब बाक्त। योयारीब आ आफ जकरिया बाक्त। मेको शिलो डा मुर आ खिं डा मुर बाक्तेकम।

6 यरूसलेमम बाकब पेरेस आ चच युइ नेल्ल पा ४ सहे ६८ जना बोल्यो नु महिंब वोंडश मुर बाक्तेकम।

यरूसलेमम बाकब बेन्यामीनी

7 मिनु बेन्यामीन आ थर डा मुर सु सु बाक्तेकम देशा हना, मेशुल्लाम आ तौ सल्लु बाक्त। मेशुल्लाम आ आफ योएद बाक्त। योएद आ आफ पेदायाह बाक्त। पेदायाह आ आफ कोलायाह बाक्त। कोलायाह आ आफ मासेयाह बाक्त। मासेयाह आ आफ इथीएल बाक्त। इथीएल आ आफ येशायाह बाक्त।

8 मिनु मेको सल्लु आ नोले गब्बाइ नु सल्लाइ बाक्ताक्से। मेको नेल्ल पा ९ सहे २८ जना बाक्तेकम।

9 जिक्री आ तौ योएल मेको आन कली कोत्रब, ठेयब मुर बाक्त। हास्सेनुआ आ तौ यहूदा योएल नोले सहर डा ठेयब मुर दुश्शो बाक्त।

यरूसलेमम बाकब चढेबपुकी

10 मिनु चढेब सु सु बाक्तेकम देशा हना, योयारीब आ तौ येदायाह, याकीन,

11 हिल्कीयाह आ तौ सेरायाह, हिल्कीयाह आ आफ मेशुल्लाम, मेशुल्लाम आ आफ सादोक, सादोक आ आफ मेरायोथ, मेरायोथ आ आफ अहीतुब चढेब बाक्तेकम। मिनु अहीतुब परमप्रभु आ खिं डा ठेयब मुर बाक्त। २राजा २५:१८; एञ्जा २:२

12 मिनु मेको नु परमप्रभु आ खिंम गेय पाइब लोक्बपुकी ८ सहे २२ जना बाक्तेकम। मिनु येरोहाम आ तौ अदायाह, येरोहाम आ आफ पेलायाह, पेलायाह आ आफ अम्जी, अम्जी आ आफ जकरिया, जकरिया आ आफ पशुर, पशुर आ आफ माल्कीयाह बाक्त।

13 मिनु मेको आ लोक्ब आन खिं डा ठेयब मुरपुकी बाक्तेकम। मेको नेल्ल पा २४२ जना बाक्तेकम। मिनु अजारेल आ तौ अमाशै बाक्त। मेको असारेल आ आफ अहजाइ, अहजाइ, आ आफ मेशील्लेमोथ, मेशील्लेमोथ, आ आफ इम्मेर बाक्त।

14 मिनु मेको आन लोक्बपुकी महिंब ठेयब थुं पाइशो लडाइ पाइब वोंडश मुर बाक्तेकम। मेको नेल्ल पा १२८ जना बाक्तेकम। मेको आन ठेयब मुर हग्गेदोलीम आ तौ जब्दीएल बाक्त।

यरूसलेमम बाकब लेवीपुकी

15 लेवीपुकी सु सु बाक्तेकम देशा हना, हशशुब आ तौ शेमायाह, हाशशुब आ आफ अञ्जीकाम, अञ्जीकाम आ आफ हशाब्याह, हशाब्याह आ आफ बुन्नी बाक्त।

16 मिनु लेवी आन ठेयब मुरपुकी शब्बेथाइ नु योजाबाद बाक्ताक्स। मेको निकशी परमप्रभु आ खिं डा लाडगा माल्शो मारेइ मारेइ गेय पचा कली कोत्रब वोइशो बाक्ताक्स।

17 मिनु मीका आ तौ मत्तन्याह बाक्त। मीका आ आफ जब्दी बाक्त। जब्दी आ आफ आसाफ बाक्त। आसाफमी परमप्रभु कली पुंइची ना “गे रिम्शो पाइब ननी” दे ठेयब सेल्शा, कुम्सो पपाइकब बाक्त। मेको आसाफ आ नोले डा शेंब आ लोकब बाकबुकीयाह बाक्त। मिनु शम्मुआ आ तौ अब्दा, शम्मुआ आ आफ गालाल, गालाल आ आफ येदुथून बाक्त।

18 मेको सहरम बाकब लेवी नेल्ल पा २८४ जना बाक्तेकम।

### लाप्चो खाल पाइबपुकी

19 लाप्चो खाल पाइब सु सु बाक्तेकम देशा हना, अक्कुब ताल्मोन नु आन लोकब नेल्ल पा सहे का ७२ जना बाक्तेकम।

20 मिनु लीशो इस्पाएली, चढेबपुकी नु लेवीपुकी यहूदा डा सहरपुकीमी आंम आंम आन बाक्तीकेमी बाक्शो बाक्तेकम।

21 मिनु परमप्रभु यावे आ खिं डा गेय पाइबपुकी यरूसलेम सहर ओफेल माइक्तीकेमी बाक्शो बाक्तेकम। सीहा नु गिरपा परमप्रभु यावे आ खिं डा गेय पाइब आन कली कोत्रब बाक्ताक्से।

22 यरूसलेममी बाकब लेवी आन कली कोत्रब सु सु बाक्तेकम देशा हना, बानी आ तौ उज्जी बाक्त। उज्जी आ आफ हशाब्याह बाक्त। हशाब्याह आ आफ मत्तन्याह बाक्त। मत्तन्याह आ आफ मीका बाक्त। मेको नेल्ले परमप्रभु आ खिंम कुम्सो पाइब शेंब आसाफ आ चच युइ बाक्तेकम।

23 मिनु पिपमी मेको कुम्सो पाइब आन परबंम आन नाक्त किंत किंत डा पतीके आंमान ब्रेक्शा, अरेवा बाक्त। मेको आन कली मार मार गेचा, दे यो ब्रेक्शो बाक्त।

24 मिनु जेराह आ चच युइ रे मेशेजाबेल आ तौ पेंथायाह बाक्त। मेको मशेजाबेल आ आफ बाक्त। मिनु जेराह आ आफ यहूदा बाक्त। मेको पेंथायाह चहिं मुरपुकीम मार मार माल्नीमी, दे कोत्रब, पिप आ खिंम गेय पाइब बाक्त।

### यरूसलेम एर ओंथ डा गांउ

25 मिनु यहूदा आ थर डा मुरपुकी का निकशी आंम आंम आन खिंम नु रूम बाक्शो बाक्तेकम। मेकोपुकी किरयथ-अरबा नु मेको मेर डा गांउपुकी, दीबोन नु मेको मेर डा गांउपुकीम, येकाब्सेल सहर नु मेको मेर डा गांउपुकीम, यहोसु २०:७

26 येशुआ, मोलादा नु बेथ-पेलेत सहरम,

27 हासार-शुआल, बेयर-शेबा सहर नु मेको मेर डा गांउपुकीम,

28 सिकलाग, मेकोनाह सहर नु मेको मेर डा गांउपुकीम, यहोसु १५:३१

29 एन-रिम्मोन, सोराह, यरमुथ,

30 जानोह, अदुल्लाम सहर नु मेको मेर डा गांउपुकीम, लाकीश नु मेको मेर डा रूपुकीम नु आजेका नु मेको मेर डा गांउपुकीमी बाक्तेकम। मोपा बेयर-शेबा रे हिन्नीम बेसी सम्म बाक्शो बाक्तेकम।

31 बेन्यामीन आ चच युइ गेबा सहर रे मिक्माश, अय्या, बेथेल नु मेको मेर डा गांउपुकीम, यहोसु १८:२२

32 अनाथोथ, नोब, अनान्याह,

33 हासोर, रामाह, गित्ताइम,

34 हादीद, सेबोयीम, नेबल्लात

35 लोद नु ओनो सहरमी गेय पाइब आन बाक्तीक सम्म बाक्तेकम।

36 यहूदामी बाकब का निकशी लेवीपुकी बेन्यामीन थर नु बाक्थ लशो बाक्तेकम।

## 12

## चढ़ेब नु लेवीपुकी

1 शाल्तीएल आ तौ जेरूब-बाबेल नु येशुआ नु काथा लेशशा जाकब चढ़ेब नु लेवीपुकी सु सु बाक्तेकम देशा हना, सेरायाह, येरमीया, एज़ा एज़ा २:२

2 अमारयाह, माल्लुक, हत्तुश,

3 शेकन्याह, रेहुम, मेरेमोथ,

4 इददो, गिन्नेथोड, अबीयाह, लूका १:५

5 मियामीन, मा-अदीयाह, बिल्गाह,

6 शेमायाह, योयारीब येदायाह,

7 सल्लु, अमोक, हिल्कीयाह नु येदायाह बाक्तेकम। मेकोपुकी येशुआ आ पाला डा चढ़ेब नु आन लोकब आन ठेयब मुर बाक्तेकम।

8 मिनु लेवीपुकी सु सु बाक्तेकम देशा हना, येशुआ, बिन्नुड, कदमीएल, शेरेब्याह, यहूदा नु मत्तन्याह बाक्तेकम। मेको नु आन लोकबपुकी परमप्रभु यावे कली ठेयब सेल्ल्तीक कुम्सो पपाइकब बाक्तेकम।

9 मेको आन लोकब बाकबुकीयाह नु उन्नो कुम्सो पची ना आन नेक्था बाकबाक्ताक्स।

10 येशुआ योयाकीम आ आफ बाक्त। योयाकीम एल्याशीब आ आफ बाक्त। एल्याशीब यो-यादा आ आफ बाक्त। नेहेम्याह ३:१

11 यो-यादा योनाथन आ आफ बाक्त। मिनु योनाथन यादुअ आ आफ बाक्त।

## चढ़ेब आन ठेयब मुरपुकी

12 योयाकीम आ पालामी चढ़ेब आन खिं खिं डा ठेयब मुर सु सु बाक्तेकम देशा हना, सेरायाह आ खिं डा ठेयब मुर मेरायाह, येरमीया आ खिं डा ठेयब मुर हनान्याह,

13 एज़ा आ खिं डा ठेयब मुर मेशुल्लाम, अमारयाह आ खिं डा ठेयब मुर येहो-हानान,

14 माल्लुक आ खिं डा ठेयब मुर योनाथन, शेबान्याह आ खिं डा ठेयब मुर योसेफ,

15 हारीम आ खिं डा ठेयब मुर अदना, मेरायोथ आ खिं डा ठेयब मुर हेल्लाड,

16 इददो आ खिं डा ठेयब मुर जकरिया, गिन्नेथोन आ खिं डा ठेयब मुर मेशुल्लाम,

17 अबीयाह आ खिं डा ठेयब मुर जिक्री, मीन्यामीन आ खिं डा ठेयब मुर का, मोअदयाह आ खिं डा ठेयब मुर पिल्लाड,

18 बिल्गाह आ खिं डा ठेयब मुर शम्मुआ, शेमायाह आ खिं डा ठेयब मुर येहो-नाथान,

19 योयारीब आ खिं डा ठेयब मुर मतेनाड, येदायाह आ खिं डा ठेयब मुर उज्जी,

20 सल्लाड आ खिं डा ठेयब मुर कल्लाड, अमोक आ खिं डा ठेयब मुर एबेर,

21 हिल्कीयाह आ खिं डा ठेयब मुर हशाब्याह नु येदायाह आ खिं डा ठेयब मुर नेथनेल बाक्तेकम।

22 पारसी डा पिप दारा आ पालामी चढ़ेब नु लेवी आन खिं डा ठेयब मुर आन नें ब्रेकशा वोडशो बाक्त। चढ़ेब आन नेल्ल क्येडा ठेयब चढ़ेब एल्याशीब, यो-यादा, योहानान नु यादुअ आन पाला सम्म आन खिं डा ठेयब मुर आन नें ब्रेकशो बाक्तेकम।

23 मिनु लेवी आन खिं डा ठेयब मुर आन नें एल्याशीब आ तौ योहानान आ पाला सम्म इतिहास डा किताबमी ब्रेकशो बाक्तेकम।

## परमप्रभु कली ठेयब सेल्लो

24 मिनु लेवी आन ठेयब मुरपुकी हशाब्याह, शेरेब्याह नु कदमीएल आ तौ येशुआम परमप्रभु यावे कली ठेयब सेल्लेकम। आन लोकबपुकी परमप्रभु आ मुर दाऊदम देशो खोदेशो पा मेको आन आइक्ची गे राप्शा, पालो पा परमप्रभु यावे कली कुम्सो पा ठेयब सेल्लेकम। मोपा कुम्सो पाइब आन हुल का एर गे नु हुल का ओथ गे बाक्तेकम। १इतिहास २५:२; २इतिहास २९:२५

25 मत्तन्याह, बाकबुकीयाह, ओबदिया, मेशुल्लाम, ताल्मोन नु अक्कुब चहिं ठेयब लाप्चो आ नेक्था डा मार मार वोडक्तीक कोठा डा लाप्चो खाल पाइब बाक्तेकम। २इतिहास ८:१४

26 मेको नेल्लेमी योसादाक आ चच, येशुआ आ तौ योयाकीम नु हुकुम पाइब नेहेम्याह नु परमप्रभु यावे आ लोत्र जोकब तुइकब चढेब एजा आ पालामी मोदेशो गेय पाइब बाक्तेकम। १इतिहास ५:४०-४१

### गारो सेल्ले थुम्शो

27 मिनु यरूसलेम डा गारो प्रोवने थुम्तीक चाड कली लेवी आन कली आन आन बाक्तीक तेइ तेइ रे माल्शा, यरूसलेममी चाक्तेकम। मारदे चाक्तेकम देशा हना, गारो थुम्तीके परमप्रभु यावे आ डोंइती ग्येरसीशा “गे रिम्शो पाइब ननी” दे ठेयब सेल्लेक कुम्सो पचा नु खैजडी, तार पाइशशो ठेयब ताप्तीके नु बीना ताप्चा कली चाक्तेकम।

28 मिनु कुम्सो पाइबपुकी यरूसलेम नु आ एर ओंथ नु नेतोफाह आ मुर आन बाक्तीक रे यरूसलेममी खुम्साकम।

29 बेथ-गिलगाल नु गोबा सहर नु अज्मावेथ रे यो जाक्तेकम। मारदे हना कुम्सो पाइबपुकीमी यरूसलेम आ एर ओंथम आंम आंम कली बाक्तीके सेल्शा बाक्शो बाक्तेकम।

30 चढेब नु लेवीपुकीमी आंम आंम कली चोत्रखो सेल्सीशा, नोले मुर आन कली नु ठेयब लाप्चोपुकी नु गारो आन कली चोत्रखो सेल्लेकम।

### गारो थुम्शा चाड मानेशो

31 मिनु गो यहूदा रागी डा ठेयब मुर आन कली गारो तार डोइकपाइक्तामी। परमप्रभु यावे कली ठेयब सेल्ब कुम्सो पाइब आन कली ठेयब हुल निकशी पा वोइक्ता। हुल का गारो तारी ग्युरा गे पा, मोत्रल लाप्चो गे लाम्तेकम।

32 मिनु मेको कुम्सो पाइब आन नोले होशयाह नु यहूदा डा ठेयब मुर आन हुल का लाम्तेकम।

33 मिनु मेको आन नोले अजारयाह, एजा, मेशुल्लाम,

34 यहूदा, बेन्यामीन, शेमायाह नु येरमीया लाम्तेकम।

35 मिनु चढेब आन तौ का निकशी तुराही ताप्बपुकी यो मेको आन नोले खोइक्तेकम। योनाथन आ तौ जकरिया, योनाथन आ आफ शेमायाह, शेमायाह आ आफ मत्तन्याह, मत्तन्याह आ आफ मीकाया नु जाक्कुर आ आफ आसाफ बाक्त।

36 मिनु मेको आ लोकबपुकी शेमायाह, अजारेल, मिलालाइ, गिलालाइ, माइ, नेथनेल, यहूदा नु हानानी बाक्तेकम। मेकोपुकीमी परमप्रभु आ मुर दाऊद आ ताप्तीकपुकी ताप्चा गाक्तेकम। मिनु परमप्रभु यावे आ लोत्र जोकब तुइकब एजा मेको आन डोंइती गाक्ब बाक्त।

37 मिनु मेकोपुकी ब्वाक्कु बुक्तीक लाप्चो गे लाम्तेकम। मिनु क्रेसी डोइशशा, ग्येल्थ लशा, दाऊद आ सहर डा गारो डोइशशा, दाऊद आ खिं लाक्शा, पूबं गे बाक्शो ब्वाक्कु लाप्चो गे लाम्तेकम।

38 मिनु परमप्रभु यावे कली “गे रिम्शो पाइब बाक्नीनी” दे कुम्सो पाइब आन अर्को हुल चहिं गारो तारी पेरा गे लाम्तेकम। मिनु गो नु ठेयब मुर आन अर्को हुल मेको आन नोले खोइशशा, मी मुइक्तीक माइशशो लाइशशो खिं लाक्शा, ब्रेम्शो गारो गे लाइतक।

39 मिनु नोले एफ्राइम लाप्चो, माइत गारो डा ठेयब लाप्चो, डांड लाप्चो, हानानेल माइशशो लाइशशो खिं, मेआ माइशशो लाइशशो खिं लाक्शा, भेडा लाप्चो गे लाइतक। मिनु मेकोपुकी जेल्खान लाप्चोम जाक्दीशा नांडसाकम।

40 मेकेर जाक्शा, परमप्रभु कली “गे रिम्शो पाइब बाक्नीनी” दे कुम्सो पाइब आन हुल निकशी परमप्रभु आ खिं आ डोंइती राप्तेकम। मिनु गो नु ठेयब मुर आन हुल का यो मेकेर बाक्तक।

41 मिनु चढेब एल्याकीम, मासेयाह, मीन्यामीन, मीकाया, एली-ओ-एनाइ, जकरिया नु हनान्याहमी तुराही ताप्तेकम।

42 मिनु मासेयाह, शेमायाह, एलाजर, उज्जी, येहो-हानान, माल्कीयाह, एलाम नु एजेर यो मेको नु बाक्तेकम। मिनु कुम्सो पाइबपुकीमी येजरायाह कुम्सो पाइब आन कली शेंब नु कुम्सो पाम्तेकम।

43 मेको नाक्त ठेयब चढेतीक चढेशा, शुश ग्येरशो बाक्तेकम। मारदे हना परमप्रभुमी मेको आन शुं थाम्पा ग्येरपाइव्तु। मीश मुरपुकी नु आलपुकी यो शुश ग्येरसाकम। मिनु यरूसलेम डा मुर आन ग्येरसीशो सेंदा डोन डोन सम्म नेंसाकव।

**खाल पाइब आन गेय**

44 मिनु मेको नाक्त मार मार वोइक्तीक कोठा खाल पाइब मुर आन कली वोइक्तेकम। मेकोपुकी मुर आन गेशो चढेशो, डोंइती सिशो मार मार नु १० भाग डा भाग का चाकशो ताकशा साम्चा कली वोइशो बाक्तेकम। मेकोपुकीमी सहर मेर डा रू रे चढेब नु लेवी आन भाग खुप्शा वोइक्तेकम। मारदे हना यहूदा डा मुरपुकीमी चढेब नु लेवी आन पशो तशा, दाकशा, नेल्ल शुश ग्येरसीशो बाक्तेकम।

45 चढेब नु लेवीपुकीमी परमप्रभु आ देशो खोदेशो पा चोव्रखेतीक गेय पाम्तेकम। मिनु कुम्सो पाइब नु लापचो खाल पाइबपुकी यो दाऊद नु आ तौ सोलोमनमी देशो खोदेशो पा चोव्रखेतीक गेय पाइब बाक्तेकम।

46 मारदे हना दाऊद नु आसाफ आस पालामी कुम्सो पाइब आन कली शेंब का बाकशो बाक्त। मेना यो परमप्रभु कली ठेयब सेल्ल्तीक नु “गे रिम्शो पाइब बाक्नीनी” दे कुम्सो पाइब बाकशो बाक्तेकम। १इतिहास २५:-

47 मिनु इस्राएल डा मुर नेल्लेमी जेरूब-बाबेल नु नेहेम्याह आस पालामी कुम्सो पाइब नु लापचो खाल पाइब आन कली नाक्त किंत किंत डा माल्शो गेम्तेकम। लेवी आन भाग वोइक्तेकम। मिनु लेवीपुकीमी आन ताकशो रे हारून आ चच युड आन भाग वोइक्तेकम। गन्ती १८:२६; नेहेम्याह १०:३९

## 13

**अर्को रागी डा मुर तिल्लशो**

1 मेको नाक्ती मुर आन डोंइती मोसा आ ब्रेकशो किताब पढेशो बाक्त। मिनु मेकेर मार ब्रेकशो बाक्त देशा हना “अम्मोन नु मोआब डा मुरपुकी रे सुड परमप्रभु आ मुर आन गुम्तीकेमी गेनायो जाक्चा मताइनीम। ब्यवस्था २३:४-६

2 मारदे हना मेकोपुकी इस्राएली आन कली शोब्ले नु ब्वाक्कु गेचा कली गुम्थ मजाकशो बाक्तेकम। तन्न इस्राएली आन कली सराप पाइक्चा कली बालाम कली क्येट गेशा, ब्रेशो बाक्तेकम। मो पाम्तेकम हना यो, आंड परमप्रभुमी मेको सराप रे आसीक सेल्ल्शो बाक्त” दे ब्रेकशो बाक्त। गन्ती २२:५-६

3 मिनु मेको अरेशो लोत्र पढेशो नेंशा, अर्को रागी डा मुर नेल्ल आन कली तिल्लेकम।

**चढेब एल्याशीब कली हुइशो**

4 मिनु मेको क्येडा डोंइती चढेब एल्याशीब आंड परमप्रभु आ खिं डा ठेयब कोव्रब बाक्त। मेको तोबीयाह एल्याशीब आ नेक्था डा मुर बाक्त। नेहेम्याह २:१९

5 मिनु चढेब एल्याशीबमी आंम खिं डा मुर, तोबीयाह कली परमप्रभु यावे आ खिं डा वोइक्तीक ठेयब कोठा का गेशो बाक्त। डोंइती मेको कोठामी मार मार शेंशो खोदेशो पा चढेशो १० भाग डा अन्न, धूप, परमप्रभु यावे आ खिं डा बोसपुकी, मुर आन गेशो १० भाग डा भाग का अन्न, अडगुर शांबु नु तेल वोइशो बाक्त। मेको परमप्रभुमी शेंशो खोदेशो पा लेवी, कुम्सो पाइब, लापचो खाल पाइब नु चढेब आन तचा डा भाग वोइशो बाक्त।

6 मेको नेल्ल दुम्ची ना गो यरूसलेममी मबाकशो बाक्ती। मारदे हना गो बेबीलोन डा पिप आरता-सास्त ३२ बर्स जाक्दीम्मेनु, पिप आ बाक्तीकेमी लेत्ती। मिनु इच्का नोले “यरूसलेम लेशशा, लचा गेयीनी” दे पिप कली पुंडता।

7 मिनु गो यरूसलेम जाक्डानु, एल्याशीबमी तोबीयाह कली परमप्रभु आ खिं डा कोठा गेशा, मरिम्शो पशो तुइक्ताकड।

8 मेको तुइशशा, शुश गाइक्ताकड। मिनु गो तोबीयाह आ मार मार नेल्ल मेको कोठा रे गुंडशा ताइक्ताकड।

9 मिनू “मेको कोठा नेल्ल कली रिमशो सेल्चा माल्नीम” दे अरेता। मिनू गो परमप्रभु आ खिं डा बोसपुकी, चढेशो अन्न नु ब्रोव्रशो रिना पाइब थोव्रक लेंशा वोइक्तामी।

10 मिनू लेवीपुकीमी आन तचा माल्शो भाग मतशो बाक्तेक्म, दे आं कली तुइक्पाइक्तेक्म। मोपा मेको लेवीपुकी नु ठेयब सेल्तीक कुम्सो पाइब आन गेय प्रोंइशा, आंम आंम रूमी लशा, गेय पाइबाक्तेक्म। नेहेम्याह १२:४७

11 मोपतीके गो ठेयब मुर आन कली “परमप्रभु यावे आ खिं मारदे प्रोंइनी?” दे हुइक्ताकडमी। मिनू गो लेवी नु कुम्सो पाइब आन कली ब्रेशशा, आन गेय पपाइक्तामी।

12 मिनू यहूदा रागीम बाक्ब नेल्लेमी १० भाग डा भाग का अन्न, नक अडगुर शांबु नु तेल परमप्रभु यावे आ खिं डा मार मार वोइक्तीक कोठामी चाक्तेक्म। गन्ती १८:२१

13 मिनू गो चढेब शेलेम्याह, ब्रेक्ब सादोक नु लेवी आ थर डा पेदायाह मेको सांफा कली मार मार वोइक्तीक कोठा कोव्रब मुर सेल्तामी। मिनू मतन्याह, आ चच नु जाक्कुर आ तौ हानान कली मेको आन कली वारच पाइब सेल्ता। मेकोपुकी थमा सुइक्चा पुंडसीशो मुर बाक्तेक्म। मिनू मेको आन लोकब आन तचा डा थोव्रक गेचा माल्लेक्म।

14 गो परमप्रभु यावे कली “आं परमप्रभु, इन खिं कोव्रशा नु मेकेर डा पशो रिमशो पतीक मप्रेंदीन। आं कली मिन्तीन” देंती। नेहेम्याह ५:१९

#### नाइक्तीक नाक्त

15 मेना गो का निकशी यहूदाम बाक्बपुकीमी नाइक्तीक नाक्ती कोल खाक्शो, चेरब खुप्शो गधा आन कली मार मार कुरपा नाइक्तीक नाक्त यरूसलेममी चाक्शो तातामी। मेकोपुकीमी नाइक्तीक नाक्त अडगुर शांबु, अडगुर नु फोव्रशी यो यरूसलेमम लेयचा कली चाक्तेक्म। मिनू गो मेको आन कली “गे नाइक्तीक नाक्ती मेको मलेयडीन” दे हुइक्ताकडमी। नेहेम्याह १०:३२

16 यरूसलेममी बाक्ब टायर डा मुरपुकीमी यो डांइ नु लेयतीक मार मार थोव्रक नाइक्तीक नाक्त चाक्शा, यरूसलेममी बाक्ब यहूदी आन कली लेयतेक्म।

17 मिनू यहूदा डा ठेयब मुर आन कली हुइशशा “नाइक्तीक नाक्त गे मार मरिमशो गेय पनी? गे नाइक्तीक नाक्त अरु नाक्त खोदेशो सेल्तीनी। गे मतुइक्तीनी?

18 मार, इन किकी पिपीमी यो मोदेशोन मपामे डा? मो दुम्तीके, इं परमप्रभुमी एको सहर नु इं कली एको श्येत गेशो ममाइ डा? मिनू मुल गे नाइक्तीक नाक्त, गेय पतीक नाक्त खोदेशो सेल्शा, परमप्रभु आ गाइक्तीक तेम्नीनी?” दे हुइक्ताकडमी। इजीकीएल २०:१२-१३

19 मिनू “यरूसलेम डा गारो डा ठेयब लाप्चोपुकी नाइक्तीक नाक्त नां रिक्चा क्येडा डोंइती चोक्चा माल्नीम। मिनू नाइक्तीक नाक्त मनुम्म सम्म रोकचा मदुम्ब” दे माइक्तामी। मिनू नाइक्तीक नाक्ती मार मार थोव्रक यरूसलेममी मचाक्यामेक्ल, दे आंम आंम गेय पाइब का निकशी आन कली लाप्चोपुकी खाल पचा कली वोइक्तामी।

20 मिनू नाकदो मेको मार मार ग्याप्ब लेयबपुकीमी यरूसलेम मेर नां सोंइताकम। का निकशी खेयप मोदेशो पाम्तेक्म।

21 मिनू गो मेको आन कली “मारदे नाइक्तीक नाक्त गारो आ डोंइती उड नां सोंइदीनी? गे लेंशा मो पाइतीनी हना, इन कली मो मप्रोंइनन्नी” दे हुइक्ताकडमी। मेको नोले सुइ मुर नाइक्तीक नाक्ती मेकेर मजाक्म।

22 मिनू गो लेवी आन कली ब्रेशशा “आंम कली ठीक सेल्सीने। नाइक्तीक नाक्त परमप्रभु यावे के बाक्ब, दे मानेचा कली ठेयब लाप्चोपुकी खाल पथ बाक्कीन” दे माइक्तामी। मिनू गो “आं परमप्रभु, आं ओदेशो पशो यो मिन्तीन। मिनू इन ठेयब नु गेना हना यो दाक्तीके कोंइदीनी” देंती।

#### अर्को रागी डा मीश चाक्शो

23 मिनू मेना यो गो अशदोदी, अम्मोनी नु मोआबी मीश आन कली चाक्ब यहूदी आन कली युम्तामी।

24 मेको आन आलपुकीमी का निकशी अशदोदी लोव्र पाइबाक्तेक्म। यहूदी आन लोव्र मजोक्थु, अर्को रागी डा मुर आन लोव्र पाइबाक्तेक्म।



25 मिनु गो मेकोपुकी नु जिशा, सराप पाइशशा, का निक्शी आन कली तुप्शा, आन चां रोक्ताकडमी। मिनु मेको आन कली परमप्रभु आ नेमी लोत्र पाइक्तामी। “गे इन तमीपुकी मेको आन तौ कली गेतीनी नु आन तमी इन तौ आन कली चाक्तीनी हना, आंइ कली खतम दुम्पाइक्नीनी” देंती। ब्यवस्था ७:३

26 मिनु “इस्त्राएल डा पिप सोलोमनमी मोदेशो मीश चाक्शा पाप पवा, ममाइ? शुश रागी आन दातेमी मेको खोदेशो पिप सुइ मबाक्म। मिनु परमप्रभुमी मेको कली दाक्शा, इस्त्राएली नेल्ल आन पिप सेल्शो बाक्त। मोदेशो बाक्त हना यो, अर्को रागी डा मीश मुरपुकीमी मेको कली पाप पपाइशशा बाक्तेक्म। १राजा ११:३-८

27 मिनु मार, गोपुकीमी इन लोत्र नेशा, इन खोदेशो पा इं परमप्रभु कली शुश मरिम्शो पा, अर्को रागी डा मीश चाक्तीनी?” दे हुइक्ताकडमी।

28 मिनु नेल्ल क्येडा ठेयब चढेब एल्याशीब आ चच, येहो-यादा आ तौमी होरोनी सान्बल्लत आ तमी का चाक्शो बाक्त। मोपतीके गो मेको कली आं डोंइती रे गुंइशा खेरता। नेहेम्याह २:१०,१९; नेहेम्याह १२:१०

29 “आं परमप्रभु, मेकोपुकीमी इन कली चढेतीक गेय नेल्ल मरिम्शो सेल्तेक्म। मोदेशो पा मेकोपुकीमी चढेब नु लेवी आन पशो कबल प्रोंइतेक्म। मेको मिम्तीन” देंती।

30 मिनु गो मेको आन कली अर्को रागी डा मारेइ मारेइ रे ठीक सेल्तामी। मिनु गो चढेब नु लेवी आन पचा माल्शो गेय लेंशा पपाइक्तामी। गन्ती २५:१२-१३; मलाकी २:८

31 मिनु परमप्रभु आ खिं कली शी नु नेल्ल क्येडा डोंइती सिशशो फल चाक्चा आ पर्वम लोत्रसी गारपाइक्ता। मिनु गो “आं परमप्रभु, आं पशो मिम्शा, आं कली रिम्शो पाइय्यीनी” देंती।

## एस्तर

**ब्रेक्ब मुर:** ब्रेक्ब मुर सु बाक्मे, मेको मतुंडसीब देंनीम। तन्न मोरदेकैमी एस्तर आ पर्वम नेल्ल ब्रेक्शो बाक्ब, देंनीम। एस्तर ९:२० का निकशी मुरुम “एज़ाम ब्रेक्शो बाक्ब” देंनीम।

**गेना डा लोव्र:** इस्राएलीपुकी ग्याइश्शा बेबीलोन लाइक्चा पुंडसीशो नोले जेरूब-बाबेल नु इस्राएली यरूसलेम लेशो बाक्तेक्म। मेको आन दातेमी एज़ा यो बाक्त। एको ५३६-४५८ बि. सी. डा लोव्र बाक्ब। मेना एज़ा नु नेहेम्याह यरूसलेम सहरमी गेय पशो बाक्ताक्स। हागै नु जकरिया यो बाक्सा बाक्त। मेना एस्तर आ किताब ब्रेक्शो बाक्त।

**मारदे ब्रेक्शो:** एको किताब परमप्रभुमी आ मुर आन कली दाक्शा, श्येत रे प्रोंइशो आ पर्वम कोंइशा ब्रेक्शो बाक्ब। मेना रे यहूदीपुकीमी पुरीम चाड मानेनीम। मेको पुरीम चाड एस्तरमी यहूदी आन कली श्येत रे प्रोंइशो आ पर्वम मिन्तीक चाड का बाक्ब।

### पिप अहासूरस आ ठेयब दुम्तीके

1 एको लोव्र नेल्ल अहासूरस माइश्शो पिप आ पालाम दुम्शो लोव्र बाक्ब। अहासूरसमी भारत रे एथीयोपीया माइश्शो कूश रागी सम्म पा १२७ ओटा रागी आन कली सासन पाइब बाक्त।

2 मेना मेको पिप अहासूरसमी आ राज्य डा सुसा दरवारमी आ ठेयब नित्तीकेमी निश्शा सासन पाप्तु।

3 मिनु मेको पिप दुम्शो ३ बर्स जाक्दीम्मेनु, आ हुकुम पाइब मुर नु सरकार डा गेय पाइब नेल्ल आन कली भोज का गेप्तु। मेको भोजमी मादी नु पारसी आन ठेयब मुर नु मेको रागी डा हुकुम पाइब नेल्ल जाक्शो बाक्तेक्म।

4 मिनु मेको पिपमी १८० नाक्त सम्म आ राज्य डा शुश शोंप, आ दारस नु आ ठेयब दुम्तीके मेको आन कली कोंइताक्मी।

5 मेको कोंइतीक नाक्त नुम्मेनु, मेको पिपमी आ दरवार डा ठेयब नु आइक्च मुर नेल्ल आन कली ठेयब भोज गेप्तु। मिनु मेको भोज सुसा दरवार डा लाङगाम ७ नाक्त सम्म दुम्त।

6 मिनु पिप आ दरवार नेल्ल दारपाइक्चा कली बुश नु नीलो वा क्याइश्शो बाक्तेक्म। मेको वापुकी नीलो झुम्का पाइश्शो दारशो मलमल के बाक्तेक्म। मिनु मेको वा आन कली बुश नु नीलो डोरी पाइश्शो, चांदी के ग्याइक्तीकेमी शुश क्येट लाइब बुश फुल्लु के थामम क्युकशो बाक्तेक्म। मेकेर सुन नु चांदी के सेल्शो नित्तीके बाक्तेक्म। मेको बुटा आप्शो शुश क्येट लाइब बुश, गिगी नु क्येर फुल्लुम साप्शो खप तारी वोइश्शो बाक्तेक्म।

7 मिनु मेको मुर आन कली सुन के कचौरामी अडगुर शांबु तूचा गेशो बाक्तेक्म। मेको कचौरा का का पा अर्को अर्को खाल डा बुटा आप्शो बाक्तेक्म। मिनु पिपमी मेको आन कली शुश अडगुर शांबु तूचा गेप्तु।

8 मेको नेल्लेमी आंम आंम दाक्शो पा तूचा ताम्तेक्म। मारदे हना पिपम “नेल्ल आन कली आंम दाक्शो तूचा गेन” दे आ शांबु खेप्ब आन कली माइश्शो बाक्त।

### पिपीम वास्तीमी पिप कली मटिशो

9 मिनु वास्ती पिपीममी यो दरवार डा मीश मुर आन कली पिप अहासूरस आ दरवारमीन ठेयब भोज का गेप्तु।

10 मेको भोज दुम्शो ७ नाक्तीमी पिप अहासूरस अडगुर शांबुम रांडशा, पिपम आ दरवार डा ७ जना शुश अधिकार पाइश्शो गेय पाइब मेहूमान, बिस्था, हारबोना, बिग्थान, आबाग्था, जेथार नु कारकस आन कली

11 “पिपीम वास्ती कली आ सिरपेच गुम्सीशा, मुर नेल्ल नु हुकुम पाइब आन डोंइती आ दारस कोंइचा कली चाक्कीन” दे अरेशा सोइक्ताक्व। मारदे हना मेको पिपीम शुश दारशो बाक्त।

12 तन्न पिपीममी पिप आ सोइश्शो मुर आन देशो मबिस्से। मोपा वास्तीम मबिश्शो तशा, मेको पिप हिंचा डा पा गाडक्ताक्व।

पिपमी वास्ती कली सजाड गेशो

13 मिनु पिपमी “मुल मार पचा” दे जोक्ब तुडक्ब नु लोत्र पाप्तु। मेको जोक्ब तुडक्बमी डोंइती रे पिप कली अर्ती गोबाक्मा बाक्त। मिनु ऐन कानुन जोक्ब तुडक्ब नेल्लेमी “मुल मार पचा” दे सल्ला पाप्तेक्म।

14 मेको पिप कली सल्ला गेब सु बाक्मा बाक्त, देशा हना, पारसी नु मादी डा ७ जना हुकुम पाइब कारशेना, शेथार, अदमाथा, टारशीश, मेरेस, मारसेना नु मेमुकान बाक्मा बाक्त। मेकोपुकी पिप आ डोंइती बाक्शा, नेल्ल क्येडा ठेयब अधिकार पा गेय पाइब बाक्तेक्म।

15 मिनु पिप अहासूरसमी मेको आन कली “आं गेय पाइब रे पा आं सोइश्शो लोत्र पिपीम वास्तीमी मटीव। मोपतीके मेको कली ऐन कानुन कोत्रशा मार पचा?” दे हिल्लो पाप्तु।

16 मिनु मेमुकानमी पिप नु आ सरकार डा हुकुम पाइब नेल्ल आन डोंइती “पिपीम वास्तीमी पिप कली ला ममाड, तन्न हुकुम पाइब नेल्ल आन कली नु पिप अहासूरस आ रागी डा मुर नेल्ल आन कली मरिम्शो पाप्तु।

17 मुल पिपीम आ मरिम्शो पशो मीश मुर नेल्लेमी तुडक्नीम। मोपतीके मेकोपुकीमी यो आन वोंइश कली आडक्च सेल्शा मटीनीम। मेकोपुकीमी ‘पिप अहासूरसमी पिपीम वास्ती कली आ बाक्तीकेमी ब्रेत्ताक्व, तन्न पिपीममी मटीव’ दे लोत्र पाइनीम।

18 मिनु पिपीम आ पशो आ पर्वम नेंब मादी नु पारसी डा सासन पाइब आन मीश मुरपुकीमी, पिप आ सासन पाइब नेल्ल आन कली मुलाक्त डा लोत्र पाइनीम। मिनु मीश मुरुमी आन वोंइश आन कली मटिथु, शुश जिचा पोक्नीम।

19 मोपतीके गे दाक्नीनी हना, पिपीम वास्ती गे इन डोंइती गेनायो जाक्ने मचबल। मिनु आ पिपीम दुम्तीके क्याम्शा, अर्को मेको क्येडा दारशो मीश आल कली पिपीम सेलीन। मेको इन सेल्शो कानुन पारसी नु मादी आन कानुनमी यो गेनायो मक्याम्सीचा डा पा ब्रेक्पतीन। दानीएल ६:९

20 मिनु एको पिप आ ब्रेक्पाइश्शो लोत्र एको राज्य नेल्लेमी नेंतेक्म हना, ठेयब नु आडक्च मीश मुर नेल्लेमी आन वोंइश कली मान पाइनीम” देत।

21 मिनु मेमुकान आ लोत्र पिप नु सासन पाइबपुकीमी “रिम्शो बाक्ब” दे दाक्ताक्म। मिनु पिपमी मेमुकान आ देशो खेदेशो पाप्तु।

22 मिनु मेकोमी आ रागी नेल्ले डा मुर आन आंम आंम ब्रेक्स नु आंम आंम लोत्रमी “खिं डा ठेयब वोंइश मुरुमी आंम खिं डा मुर आन कली अधिकार पचा माल्नीम” दे मुर नेल्ल आन जात जात डा ब्रेक्स नु आंम आंम लोत्रम ब्रेक्पाइश्शा सोडक्ताक्व। एस्तर ३:१२; एस्तर ८:९

## 2

मीश आल खुप्शो

1 मिनु पिप अहासूरस आ गाडक्चा बेक्म नोले मेकोमी वास्ती आ पशो आ पर्वम नु मेको आ पर्वम ब्रेक्शो ब्रेक्स कली मिम्ताक्व।

2 मिनु पिप आ गेय पाइबपुकीमी पिप कली “इन कली दारशो नु कन्ने मीश आल माल्पतीन।

3 इन राज्य डा, रागी नेल्ल डा दारशो नु कन्ने मीश आल चाक्चा, दे मेकेर डा ठेयब मुर आन कली लोत्र सोडक्तीन। मिनु मेको मीश आल आन कली सुसा दरवार डा मीश मुर आन बाक्तीकेमी चाक्चा माल्नीम। मिनु मेको मीश मुर आन कली कोत्रब, इन गेय पाइब हेगे आ जिम्मामी वोडक्चा माल्नीम। मिनु मेको मीश आल आन कली खेक्तीक नु ब्रोत्रशो रिना पाडक्तीक मार मार यो गेचा माल्नीम।

4 मिनु गे तेको मीश आल कली दाक्नीनी, मेको कली वास्ती आ पा डा पिपीम सेलीन” देतेक्म। मिनु पिपमी मेको लोत्र दाक्ताक्व। मिनु मोदेशो पाप्तु।

सुसा दरवारमी

5 मिनु सुसा दरवारमी मोरदेकै माइश्शो यहूदी मुर का बाक्माक्त। मेको बेन्यामीन थर डा याइर आ तौ, शिमेड आ चच, कीश आ युइ बाक्माक्त। १सामुएल ९:१

6 बेबीलोन डा पिप नेबुकदनेसरमी यरूसलेम रे यहूदा रागी डा पिप येकोन्याह नु ग्याइश्शा लाइक्चा पुंइसीशो आन दातेमी मोरदेकै आ किकी पिपी कीश यो बाक्माक्त। २राजा २४:१५

7 मिनु मोरदेकैमी आ बकान्छा आ तमी हदस्सा कली आ तमी खोदेशो सेल्शा, थुल्शा वोइश्शो बाक्माक्त। मेको के आ आम आफ निम्फा बेक्शो बाक्ताक्स। मेकोमी हदस्सा कली एस्तर नें यो वोइश्शो बाक्माक्त। एस्तर रिम्शो नु दारशो मीश आल बाक्माक्त। मेको आ आम आफ बेक्सा नोले मोरदेकैमी मेको कली आंम तमी खोदेशो पा दाक्शा, थुल्शो बाक्माक्त। एस्तर ८:१

### एस्तर दरवारम लाइक्चा पुंइसीशो

8 मिनु पिप आ गुंइशो ब्रेक्स नेंमे नोले, शुश मीश आल आन कली सुसा दरवारमी चाक्तेक्म। मिनु एस्तर कली यो अरु मीश आल नु काथा मीश मुर कोव्रब हेगे कली जिम्मा गेम्तेक्म।

9 मिनु एस्तर कली तशा, मेको हेगे थाम्पान ग्येरसाक्व। मिनु मेकोमी एस्तर कली दारपाइक्चा कली ग्योम्तीक, किप्तीक, खेक्तीक नु रिम्शो जचा थोव्रक नेल्ल गेप्टु। मिनु पिप आ दरवार डा ७ जना नेल्ल क्येडा रिम्शो गेय पाइब मीश आल यो एस्तर कली गेप्टु। मिनु मीश मुर आन कली वोइक्तीक खिंमी एस्तर नु आ कली वारच पाइब आन कली नेल्ल आन क्येडा रिम्शो नु गारशो बाक्तीक गेप्टु।

10 मिनु डोंइती मोरदेकैमी एस्तर कली “इ जात नु इ किकी पिपी सु बाक्नीमी, मेको मशोव्रडो” देशो बाक्तीके, एस्तरमी सुइ आन कली मेको लोव्र मशोव्रशो बाक्त।

11 एस्तर कली दोदेशो बाक्मे? मार पवा, दे तुइक्चा कली मोरदेकै नाक्त किंत किंत मेको मीश आल बाक्तीक खिं आ लाडगा रे एर ओंथ गाक्तीक पाइबाक्त।

12 पिप अहासूरस आ बाक्तीकेम लचा क्येडा डोंइती मीश आलपुकीमी ६ महिना सम्म मूरे तेल खेक्सीशा, अर्को ६ महिना ब्रोव्रशो रिना पाइश्शो तेल नु दारपाइक्तीक मार मार खेक्सीशा, १२ महिना आंम कली दारपाइक्तीक गेय पचा माल्बाक्तेक्म। मोपा १२ महिना जाक्दीम नोले पिप अहासूरस आ बाक्तीकेमी मीश आल का का पा लचा माल्बाक्तेक्म।

13 मिनु मीश आलपुकी पिप आ दरवारम लमानु, मेको आन बाक्तीके रे मार मार लाइक्चा दाक्ते मेको लाइक्चा ताइबाक्तेक्म।

14 मोपा मेकोपुकी नाक्दो का का पा पिप आ बाक्तीकेम लशा, सुनी मेको अरु मीश आल बाक्तीक खिं डा कोव्रब शा-आरगज माइश्शो पिप आ गेय पाइब आ जिम्मामी बाक्चा कली लेत्चा माल्बाक्तेक्म। मिनु पिपमी मेको कली दाक्शा आ नें थिशा मब्रेत्ता सम्म लेंशा पिप आ बाक्तीकेम लचा मताइबाक्तेक्म।

### एस्तर पिपीम दुम्शो

15 मिनु मोरदेकै आ बकान्छा अबीहेल आ तमी एस्तर पिप आ बाक्तीकेम लतीक पालो जाक्त। एस्तर पिप आ बाक्तीकेम लमेनु, मीश आल आन कली कोव्रब ठेयब मुर हेगोम मार मार गेवा, मेको ला लाइश्शा लमाक्त। अरु मारेइ मपुंइदा बाक्त। सु सुमी एस्तर कली तामे, मेको नेल्लेमी एस्तर कली दाक्ते बाक्त।

16 मिनु एस्तर कली पिप अहासूरस आ बाक्तीकेम लदमेनु, अहासूरस पिप दुम्शो ७ बर्स १० महिना जाक्दीशो बाक्माक्त। मेको महिना कली तेबेथ महिना देंबाक्तेक्म।

17 मिनु पिपमी मीश आल नेल्ल आन क्येडा एस्तर कली दाक्ताक्व। मिनु अरु आन क्येडा मेको कली योव्रतु। मिनु एस्तर कली पिपीम आ सिरपेच गुप्शा, वास्ती आ पा डा आ पिपीम सेल्लु।

18 मिनु नोले पिपमी एस्तर कली मान पचा कली हुकुम पाइब नेल्ल नु गेय पाइब आन कली ठेयब भोज का गेप्टु। मिनु रागी नेल्ल डा मुर आन कली गेय मपथु बाक्चा गेशा, पिपम गेचा माल्लो मुर आन कली शुश इनाम गेम्तीमी।

### मोरदेकैमी पिप कली प्रोंइशो

19 मेको कन्ने मीश आल आन कली लेंशा पिप आ दरवारमी चाक्गमेनु, मोरदेकै यो दरवार डा ठेयब लाप्योम बाक्शो बाक्त।

20 मोरदेकै आ देशो खोदेशो पा एस्तरमी आ किकी पिपी मार जात डा बाक्मा, सु बाक्मा सुइ आन कली मशोव्रशो बाक्त। मेकोमी आल बाक्म ना मोरदेकै कली टिशो खोदेशो पा, ठेयब दुम्शा यो टिप्तु।

21 मेना मोरदेकै पिप आ दरवार डा ठेयब लाप्योमी बाक्शो बाक्त। मिनु सु जाक्म, दे कोव्रब, पिप आ ठेयब गेय पाइब बिग्थान नु तैरेश माइश्शो मुर चुरशा गारशा, पिप अहासूरस कली साइक्चा लोव्र पाम्से बाक्त। एस्तर ६:१-२

22 मिनु मेको आस लोव्र मोरदेकैमी नेंशा तुइश्शा, एस्तर कली शेंदा बाक्त। मिनु एस्तरमी मोरदेकै आ नेंमी पिप कली लोव्र नेल्ल शोव्रतु।

23 मिनु मेको लोव्र हिल्लो हिक्सी पामेनु, थमा बाक्त, दे पिपमी तुइक्ताक्व। मिनु मेको ठेयब गेय पाइब आस कली थामम क्युकशा साइक्तेक्म। मिनु नोले पिप आ डोंइती मेको लोव्र नेल्ल इतिहास ब्रेक्तीक किताबमी ब्रेक्ताक्म।

### 3

#### हामान मोरदेकै नु गाइश्शो

1 मिनु नोले पिप अहासूरसमी अगाग आ मुर हम्मदाता आ तौ हामान कली आ मान बारपाइक्तु। मिनु मेको कली हुकुम पाइब नेल्ल आन क्येडा ठेयब सेल्शा, ठेयब मान गेशा वोइक्तु। १सामुएल १५:३२; प्रस्थान १७:१४-१६

2 मिनु पिप आ लोव्र टिशा, दरवार डा गेय पाइब नेल्लेमी दरवार डा ठेयब लाप्योमी हामान आ डोंइती बाप्शा पोक्च थेक्शा, सेउ पाम्तेक्म। तन्न मोरदेकैमी मोदेशो पा पोक्च थेक्शा, सेउ मपावो। मती ४:९-१०

3 मिनु पिप आ दरवार डा ठेयब लाप्योम गेय पाइबपुकीमी मोरदेकै कली “गे मारदे पिप आ देशो मटीनीनी?” दे हिल्लो पाम्तेक्म।

4 मिनु नाक्त किंत किंत मेकोपुकीमी मेको कली मो पा लोव्र पाम्तेक्म। तन्न मोरदेकैमी मेको आन लोव्र का यो मनेन। मोदेशो पशो हामानम फाल्ने चाप्बाक्म कों मचाप्बाक्म, दे कोव्रचा कली, मेकोपुकीमी मेको लोव्र हामान कली शोव्रतेक्म। मारदे हना मोरदेकैमी मेको आन कली “गो यहूदी नड” देशो बाक्त।

5 मिनु मोरदेकैमी आ डोंइती बाप्शा, सेउ पा मान मपशो तशा, हामान साप्पा चुरमाक्त।

#### यहूदी नेल्ल साइक्चशो

6 मिनु हामानमी मोरदेकै आ जात, आ लोक्ब सु बाक्मा, दे तुइक्ता नोले, मेको कली ला ममाइ, तन्न पिप अहासूरस आ राज्य डा यहूदी, मोरदेकै आ जात डा मुर नेल्ल आन कली खतम सेल्तीक लां माल्तु।

7 मिनु अहासूरस पिप दुम्शो १२ बर्स दुम्शा, आ डोंइती डा निसान माइश्शो महिनामी हामान आ अर्ती गोब मेको नु गारशा, यहूदी आन कली गेना साइक्चा, दे हामान आ डोंइती जोक्ब तुइक्ब आन कली साहीत कोव्रपाइक्तु। मेको साहीत कोव्रतीके कली पुर देंतेक्म। मिनु मेको साहीत १२ महिना नोले अदार महिनामी गृत। प्रस्थान १३:४; प्रस्थान १२:२; एस्तर ९:२४

8 मिनु हामानमी पिप अहासूरस कली “इन राज्य डा रागी नेल्लेमी मुर आन दातेमी जात का डा मुर ब्रशा बाक्शो बाक्नीम। मेकोपुकी अरु मुर रे ब्राशा बाक्नीम। मिनु मेको आन पतीके गो नु मगारचा डा बाक्ब। मेकोपुकीमी इन ऐन कानुन मटीनीम। मिनु गेमी मेको आन कली मोदेशो पचा गेचा मदुम्ब। ब्यवस्था ४:५-८

9 मोपतीके गे दाक्नीनी हना, मेको आन कली खतम सेल्चा, दे ब्रेक्स का ब्रेक्पतीन। मिनु गो नोले मेको पिप आ क्येट वोइक्तीके डा गेय पाइब आन कली १० हजार टलेन्ट चांदी पिप आ क्येट वोइक्तीकेमी वोइक्चा कली गेनुड” दंत। टलेन्ट का चांदी ३४ किलो बाक्ब। एस्तर ४:७

10 मिनु पिपमी आ छाप पाइशशो औंठी पुइशशा, यहूदी आन जोरी सत्रु अगाग आ मुर हम्मदाता आ तौ हामान कली गेप्टु।

11 मिनु पिपमी हामान कली “मेको चांदी नु मेको मुरपुकी इन केन बाक्नीम। गे मार दाक्नीनी मेको पने चाप्नीनी” देंट।

12 मिनु डोंइती डा महिना डा १३ नाक्तीमी पिप आ ब्रेक्स पाइब आन कली ब्रेत्ताक्मी। मिनु हामानमी देशो खोदेशो पा रागी नेल्ल इन सरकार डा गेय पाइब नु जात जात डा मुर आन ठेयब मुर नु रागी रागी डा हुकुम पाइब आन कली मेको मुर नेल्ल आन जात जात डा ब्रेक्स नु आंम आंम लोव्रम ब्रेक्पदा बाक्त। मेको ब्रेक्सम पिप अहासूरस आ छाप थोकशा, मेको आ नेमी ब्रेक्शो बाक्त।

13 मिनु मेको सोइशशो मुरपुकीमी मेको ब्रेक्स रीब रीब पा पिप आ रागी डा मुर नेल्ल आन कली सोइक्तेम बाक्त। मेको ब्रेक्समी मार ब्रेक्शो बाक्त देशा हना, अदार माइशशो महिना डा १३ नाक्त, काबुमीन यहूदी नेल्ल आन कली साइक्चा माल्नीम। वोंइश आल रे खाल्पा सम्म नु मीश मुर नु आल ब्रेप्च नेल्ल आन कली यो साइक्चा माल्नीम। मिनु यहूदी आन शोंप नेल्ल रोइक्चा माल्नीम, दे ब्रेक्शो बाक्त।

14 मिनु मेको नाक्त कली सासीशा बाक्चा, दे जात नेल्ल डा मुर आन कली तुइक्पाइक्चा, दे लेशा ब्रेक्स का ब्रेक्शा, रागी डा मुर नेल्ल आन कली का का पा गेशा, उरदी पचा कली सोइक्ताक्म।

15 पिपम मेको लोव्र चोव्रथ लाइक्ब आन कली रीब रीब पा सोइक्ताक्व। मिनु सुसा दरवारमी यो मेको लोव्र ब्रपाइक्तेक्म। मो पामे नोले पिप नु हामान तूचा कली निस्साक्स। तन्न सुसा सहरम चहिं खाल बाल बोक्त।

## 4

यहूदी आन कली प्रोंइचा माल्शो

1 मिनु मोरदेकैमी मेको लोव्र नेल्ल तुइशशा, आ वा स्वाक्तु। मिनु अरन्डी फेक्शा, पुलु मौंइसीशा, ठेयब सेंदामी रोंका पना पन सहरम हिरसाक्व।

2 मिनु मोपा दरवार डा ठेयब लाप्यो आ डोंइती जाक्त। तन्न अरन्डी फेक्शो सुइ मुर दरवार डा ठेयब लाप्यो रे ओव्रचा मताइबाक्तेक्म।

3 पिप आ सोइशशो मेको लोव्र नेंशा, रागी नेल्ल डा यहूदी माइजा बाक्शा, डाक्शा, रोंका पाम्तेक्म। मिनु मेको आन दाते डा शुश मुर अरन्डी फेक्शा, पुलु तारी निस्साक्म।

4 मिनु पिपमी एस्तर आ गेय पाइबपुकी जाक्शा, एस्तर कली मेको लोव्र शोव्रतेक्म। पिपमीमी मेको नेंशा, शुश सुर्ता पाप्टु। मिनु “अरन्डी पुइशशा वा फेक्सीन” दे मोरदेकै कली वा सोइक्ताक्व। तन्न मोरदेकैमी मेको वा ताकेम मबिस्से।

5 मोपतीके एस्तरमी पिप आ वोइशशो आ गेय पाइब हथाक कली ब्रेशशा “मोरदेकै कली मार श्येत दुम्मे? मिनु मेको श्येत दोपा दुम्मे?” दे हिल्लो पथ सोइक्ताक्व।

6 मिनु हथाक पिप आ दरवार डा ठेयब लाप्यो आ डोंइती ठेयब लाडगामी मोरदेकै कली गुम्थ लत।

7 मिनु मोरदेकैमी आंम कली मार दुम्मे, मेको नेल्ल हथाक कली देंट। मिनु हामानमी यहूदी नेल्ल आन कली साइक्चा, दे पिप आ क्येट वोइक्तीकेमी दोशो क्येट वोइक्चा, दे लोव्र पवा, मेको यो हथाक कली शेंताक्व। एस्तर ३:९

8 मिनु मोरदेकैमी सुसामी यहूदी आन कली साइक्चा, दे पिप आ लोव्र ब्रेक्शो ब्रेक्स यो एस्तर कली कोंइशा, तुइक्पाइक्चा, दे हथाक कली गेप्टु। मिनु मेकोमी हथाक कली “आंम मुरुम शिशी तामेक्ल, दे पिप कली नमो सिमो पचा कली एस्तर पिप आ बाक्तीकेमी लचा माल्ब देनीन” देंट।

9 मिनु हथाक एस्तर आ बाक्तीकेम लशा, मोरदेकै आ देशो नेल्ल देंट।

10 मिनु एस्तरमी हथाक कली मोरदेकै आ बाक्तीकेमी सोइशशा,

11 “पिप आ गेय पाइब नु रागी डा मुर नेल्ल पिपमी मब्रेत्थु, वोंइश मुर नु मीश मुर सुइ पिप आ डोंइती लाम्तेक्म हना, साइक्चा पुंइसीनीम। मेको ऐन कानुनम ब्रेक्शो बाक्ब। तन्न पिपमी आ राज दन्ड

मेको मुर गे दिंशा कोइताक्व हना ला, मेको मुर ब्रोंइचा ताइब। मिनु गो ३० नाक्त सम्म मब्रेस्सीशो बाक्नुड” दे देंचा कली सोइक्ताक्व। एस्तर ५:२; एस्तर ८:४

12 मिनु मोपा हथाकमी मोरदेकै कली एस्तर आ सोइश्शो लोव नेल्ल शोवतु।

13 मिनु मोरदेकैमी हथाक कली पिपीम कली “गे पिप आ दरवारम बाक्ते हना यो, यहूदी नेल्ल आन दातेमी गे ला ‘साइक्चा मपुंडसीनुड’ दे ममिम्तो।

14 मो देशो दुम्मेनु, गे सिक्सी पा बाक्तीनी हना, यहूदी आन कली वारच पा प्रोंइचा कली अर्को मुर रे यो जाक्व। तन्न गे नु इं आफ आ खिं डा मुरपुकी चहिं खतम दुम्चा माल्नीम। गे यहूदी आन कली प्रोंइचा कली पिपीम दुम्शो बाक्नेवे, को?” दे एस्तर कली माइक्चा, दे हथाक कली सोइक्ताक्व। उत्पत्ती ४५:७

### यहूदीपुकी माइजा बाक्शो

15 मिनु एस्तरमी मोरदेकै कली

16 “मुसा सहरमी लशा, यहूदी नेल्ल आन कली आं पर्वम माइजा बाक्चा कली पुक्कीन। नाक्त सां नु नाक्दो सां सम्म मारेइ मजने, मारेइ मतूडीन। मिनु गो नु आं गेय पाइबपुकी यो गे खोदेशो पा माइजा बाक्नीकी। मिनु में नोले ऐन कानुनमी मगेशो बाक्त हना यो, गो पिप आ बाक्तीकम लाइनुड। गो खतम दुम्ती हना, यो दुम्डल” दे लोव सोइक्ताक्व।

17 मिनु मोरदेकै लशा, एस्तर आ देशो खोदेशो पाप्नु।

## 5

### एस्तर पिप आ डोंइती जाक्शो

1 मिनु नाक्त सां नोले एस्तरमी पिपीम आ फेक्तीके फेक्साक्व। मोपा लशा, पिप आ दरवार आ लाडगाम बाक्शा, खिं गे कोव्रशा, राप्त। मेना पिप आ खिंमी आ ठेयब नित्तीकेमी निश्शा, लाप्चो गे कोव्रशा, बाक्शो बाक्त।

2 मिनु पिपीम पिपीम एस्तर कली दरवार डा लाडगामी राप्शा बाक्शो तशा, मेको कली शिशी पा, आ शेशा बाक्शो राज दन्ड एस्तर गे दिंताक्व। मिनु एस्तर पिशा, मेको कोक्के आ डर थिप्नु। एस्तर ४:११

3 मिनु पिपीम मेको कली “पिपीम एस्तर, मारदे जाक्नी? गे मार माल्नीनी? आं रागी उइक्थ इन कली गेचा माल्ताक्यी हना यो, मेको इन कली गेनन्नी” देंत। मर्कूस ६:२३

4 मिनु एस्तरमी “हजुर, गे दाक्नीनी हना, मुल नाक्दो गो इन कली सेल्शो भोजमी गे हामान नु काथा जाक्कीने” देंत।

5 मिनु पिपीम एस्तर आ देशो पचा कली हामान कली ब्रेत्चा कली मुर सोइक्ताक्व। मिनु पिप नु हामान एस्तरमी सेल्शो भोज जथ लाम्ताक्स।

6 मिनु पिपीम अडगुर शांबु तूशा, एस्तर कली “गे मार दाक्नीनी? गो इन कली गेनन्नी। आं रागी उइक्थ पुंडतीनी हना यो, गो मेको इन कली गेनन्नी” देंत।

7 मिनु एस्तरमी सेउ पा “गो लोव का पुंडचा दाक्नुड।

8 मिनु गो इन शिशी ताता हना, गे आं पुंडशो गेचा दाक्ताक्नी हना, हजुर, दीसा यो गे निक्शी मुलाक्त डा खोदेशो पा, आं सेल्शो भोजम जाक्कीन। मेना गो इन हिल्लो पशो लोव लेत्नुड” देंत। एस्तर ६:१४

### हामानम आंम कली ठेयब सेल्सीशो

9 मिनु मेको नाक्त हामान शुश ग्येरसीशा, आ थुं जाव बोरपा लत। तन्न हामानमी मोरदेकै कली दरवार डा ठेयब लाप्चोमी बाक्शो नु आ डोंइती बाप्शा मान मपशो तशा, चुरशा लां मताव।

10 मो दुम्त हना यो, हामानमी आ चुरशो मकोइथु, आ खिं लत। मिनु आ खिं जाक्दीश्शा, आ वारच आन कली नु आ मीश जेरेश कली ब्रेत्थ सोइक्ताक्व।

11 मिनु मेको आन कली “आं शोंप, आं थेरशो रू नु शुश तौ बाक्नीम। मिनु पिपमी सासन पाइब नु गेय पाइब नेल्ल आन क्येडा आं कली शुश मान गेशो बाक्ब” दे आ नें बोरपाइशशा लोत्र पाप्तु।

12 मिनु हामानमी “भोशो ला ममाइ, पिपीम एस्तरमी सेल्शो भोजमी आं कली ला ब्रेत्ताक्यी। मिनु दीसा यो पिप नु लचा कली आं कली ब्रेशो बाक्ब।

13 तन्न मेको यहूदी मोरदेकै कली दरवार डा लाप्चोम बाक्शो तडानु, आंम कली मारेइ खोड मलाकड” देंत।

14 मिनु आ मीश जेरेश नु आ वारच नेल्लेमी “५० कुबीत लाइशशो थाम का युक्तीने। मिनु सुनी कना मोरदेकै कली मेकेर क्युकशा साइक्चा कली पिप नु लोत्र पने। मिनु ग्येरशा, पिप नु भोज जथ लने” देंतेकम। मिनु हामानमी मेको लोत्र दाक्ताक्व। मिनु मेकोमी मुर कली क्युकशा साइक्तीक थाम का युक्पाइक्तु। कुबीत का आधा मिटर खोदेशो बाक्ब।

## 6

### मोरदेकैमी ठेयब मान तशो

1 मिनु मेको नाक्दो पिप इप्ने मचब। मिनु पिपमी इतिहास ब्रेक्शो किताब चाक्पाइक्तु। मिनु मेको पढेपपाइशशा नेंतु। एस्तर २:२१-२२

2 मिनु मेको किताबमी पिप आ लाप्चोम बाक्ब बिगथान नु तेरेश माइशशो ठेयब लाप्चोम गेय पाइब निक्शीमी चुरशा पिप अहासूरस कली साइक्चा माल्लो लोत्र नु मोरदेकैमी पिप कली तुइक्पाइशशा आ पर्वम ब्रेक्शो बाक्त।

3 मिनु पिपमी “एको ओं पशो आ पर्वम मोरदेकै कली मारेइ मान नु दर्जा गेशो बाक्मे?” दे हिल्लो पाप्तु। मिनु मेकेर बाक्ब पिप आ गेय पाइबपुकीमी “मोरदेकै आ पर्वम मारेइ मपशो बाक्ब” देंतेकम।

4 मिनु पिपमी “लाडगाम सु बाक्मे?” दे हिल्लो पाप्तु। मेना हामानमी आ युक्शो, मुर कली क्युकशा साइक्तीक थाममी “मोरदेकै कली साइक्चा गेयीनी” दे पिप कली पुंडथ लाडगामी नक जाक्शो बाक्त। एस्तर ५:१४

5 मिनु पिप आ गेय पाइबपुकीमी “हामान लाडगामी राप्शा बाक्त” देंतेकम। मिनु पिपमी “मेको कली खिं गा ब्रेत्तीन” देंत।

6 मिनु हामान खिं गा ओत्रमेनु, पिपमी मेको कली “पिप आंमान मान गेचा दाक्शो मुर कली मार पचा माल्बा?” दे हिल्लो पाप्तु। मिनु हामानमी आ थुं थुंमी “आं डा लाक्शा, तेको मुर कली पिपमी मान गेचा दाक्बा डा?” दे मिम्ताक्व।

7 मिनु मेकोमी पिप कली “पिप सु कली मान गेचा दाक्नीनी,

8 मेको कली पिप आ डोंइती फेक्शो वा नु पिया ग्योम्सीशो पिप आ शारा चाक्पतीने। दानीएल ५:२९

9 मिनु मेको पिप आ डोंइती फेक्शो वा नु आ शारा नेल्ल आन क्येडा मान तशो मुर कली गेचा माल्ब। मिनु नेल्ल क्येडा अधिकार पाइशशो मुरुमी पिपम मान गेचा दाक्शो मुर कली फेक्तल। मिनु मेको कली शारा डोइक्पाइशशा, सहर डा लांमी गाक्पाइक्चा माल्ब। मिनु नेल्लेमी ‘पिपमी मान गेचा दाक्शो मुर कली मार पचा, मेको कोव्रडीन’ देंना देंन हिरदमेक्ल” देंत। उत्पती ४१:४२-४३

10 मिनु पिपमी हामान कली “गे इ देशो खोदेशो पा फेक्तीक नु शारा मुल कना चाक्शा, लाप्चोम बाक्ब यहूदी मोरदेकै कली मोदेशो पावो। इ देशो का यो मखाइक्थु, पावो” दे माइक्तु।

11 मिनु हामानमी फेक्तीक वा नु शारा चाक्शा, मोरदेकै कली मेको वा फेक्शा, शाराम डोइक्पाइशशा, सहर डा लां मेर लाइशशा, आ डोंइती “पिपमी मान गेचा दाक्शो मुर कली मार पचा, मेको कोव्रडीन” देंना देंन मोरदेकै कली हिरताक्व।

12 मिनु नोले मोरदेकै पिप आ दरवार डा ठेयब लाप्चोम लेतत। मिनु हामान चहिं मुने पा कुल सुम्शा दोरोर पा दोरशा, आ खिं लत।



13 मिनु मेकोमी आ मीश जेरेश नु आ वारच नेल्ल आन कली मार दुम्मे, मेको नेल्ल का का पा शोत्रतु। मिनु मेको आ वारचपुकी नु आ मीशेमी मेको कली “इन जोरी सत्रु मोरदेकै, यहूदी बाक्त हना, गे मेको कली मारेइ पने मचाप्नीनी। मुल गे मेको आ डोंइती खतम दुम्नीनी” दैतेक्म।

14 मोपा लोत्र पना पन बाक्मेनु, पिप आ गेय पाइबपुकी जाक्शा, हामान कली पिपीम एस्तरमी सेल्शो भोज जचा कली लाइक्तेक्म। एस्तर ५:८

## 7

एस्तरमी पिप कली पुंडशो लोत्र

1 मिनु पिप नु हामान, निम्फा पिपीम एस्तरमी सेल्शो भोज जथ लाम्ताक्स।

2 मिनु मेको नाक्त यो पिप अडगुर शांबु तूशा, एस्तर कली “गे मार दाक्नीनी? मेको इन कली गेनन्नी। आं रागी उइक्थ पा पुंडतीनी हना यो, गो मेको इन कली गेनन्नी” दैत।

3 मिनु पिपीम एस्तरमी “गोमी इन शिशो तशो बाक्ती नु गे दाक्ताक्नी हना, गो नु आं जात डा मुर आन कली साइक्चा रे प्रोनीन।

4 मारदे हना गो नु आं जात डा मुर नेल्ल क्याम्चा, साइक्चा नु खतम दुम्चा कली लेयसीशो बाक्नीकी। गो वाइलीम वाइल सेल्चा कली ला लेयसीशो बाक्तक हना, गो सिक्सी पा बाक्ड वा। मारदे हना मेको आइक्च लोत्रमी पिप कली मारेइ श्येत मदुम वा” दैत।

5 मिनु पिप अहासूरसमी पिपीम एस्तर कली “मोदेशो पचा माल्ब मुर सु बाक्बा? मिनु मेको मुर ते बाक्बा?” दे हिल्लो पाप्तु।

6 मिनु एस्तरमी “मेको श्येत गेब, मरिम्शो मुर एको हामान बाक्ब” दैत। मिनु हामान पिप नु पिपीम आ डोंइती हिंशा, सेंदा का यो ग्रुंइने मचब।

हामानम साइक्चा पुंडसीशो

7 मिनु पिप चुरशा, भोज रे छुल बोक्शा, दरवार डा फू रूमी लत। हामानमी चहिं “पिपीम आ थुमी आं कली खतम पचा मिम्ताक्व” दे तुइश्शा, पिपीम एस्तर नु माफ पुंडचा कली आ बाक्तीक उइ बाक्त।

8 मिनु पिप फू रू रे लेश्शा, भोज जतीक कोठाम जाक्मेनु, हामान चहिं एस्तर आ इप्तीकेम बाप्शा, आ नेक्था गुर ब्वेशा बाक्शो ताप्तु। मिनु पिपीम ठेयब सेंदामी “मार, मेकोमी पिपीम कली आं डोंइती थिचा मिम्बा?” दैत। मिनु पिपीम मोदेशो देंम नोले, पिप आ गेय पाइबपुकीमी हामान आ कुल सुम्तेक्म।

9 मिनु पिप नु बाक्शा, गेय पाइब आन दाते डा हारबोना माइश्शो कामी “हामान आ खिं आ नेक्था इन कली रिम्शो पाइब नु प्रोंइब मोरदेकै कली क्युक्शा साइक्चा कली ५० कुबीत लाइश्शो मुर साइक्तीक थाम युक्शा वोइश्शो बाक्ब” दैत। मिनु पिपीम “मुल हामान कली मेको थाममी क्युक्शा सतीन” दैत। कुबीत का आधा मिटर खोदेशो बाक्ब।

10 मिनु मेकोपुकीमी मोरदेकै कली साइक्चा, दे युक्शो थाममी, हामान कली लाइश्शा क्युक्तेक्म। मिनु पिप आ थुं नाइसाक्व।

## 8

यहूदीपुकीम अधिकार तशो

1 मिनु मेको नाक्त पिप अहासूरसमी यहूदी आन जोरी सत्रु हामान आ खिं पिपीम एस्तर कली गेप्तु। मारदे हना एस्तरमी पिप कली “गो मोरदेकै आ खिं डा मुर का नड” दे शेंतीके, मोरदेकै पिप आ बाक्तीकेम जाक्चा माल्ताक्व। एस्तर २:७

2 मिनु पिपीम हामान रे रोइश्शो अधिकार डा छाप थोक्तीक औंठी पुइश्शा, मोरदेकै कली गेप्तु। मिनु एस्तरमी मोरदेकै कली हामान आ खिं कली अधिकार पाइब सेल्लु। एस्तर ३:१०

पिपीम एस्तरमी लेशा पुंडशो

3 मिनु एस्तरमी लेंशा पिप आ खोइलीम बाप्शा, डाकशा नमो सिमो पा “अगाग आ मुर हामानमी यहूदी आन पबर्म ब्रेकशो मरिम्शो ब्रेक्स क्याम्शा गेन” दे पुंडतु।

4 मिनु पिपमी आ राज दन्द एस्तर गे शुक्तु। मिनु एस्तर बोक्शा, पिप आ डोंइती राफ्त। एस्तर ४:११; एस्तर ५:२

5 मिनु एस्तरमी “पिपम दाकनीनी नु गो इन शिशी ताता नु आं देशो लोत्र गे दाकनीनी नु आं देशो नेंनीनी हना, अगाग आ मुर हम्मदाता आ तौ हामानमी इन राज्य डा हुकुम पाइब नेल्ल आन कली ‘यहूदी नेल्ल आन कली साइक्या’ दे ब्रेकशा सोइश्शो ब्रेक्स नेल्ल क्याम्शा, दे ब्रेक्स का ब्रेकशा सोइक्तीन।

6 मारदे हना आं जात नु आं खिं डा मुरपुकी खतम दुम्शो गो दोपा फाल्ने चाप्नुडा डा?” दैत।

7 मिनु पिप अहासूरसमी पिपीम एस्तर नु यहूदी मोरदेकै कली “हामानमी यहूदी आन कली खतम सेल्चा माल्तीके, मेको आ खिं पिपीम एस्तर कली गेता। मारदे हना हामान क्युक्या साइक्या पुंडसाक्व।

8 मुल आं नेंमी इन दाक्स पा यहूदी आन कली रिम्शो दुम्चा आ पबर्म नक ब्रेक्स का ब्रेक्तीन। मिनु मेकोमी आं छाप थोक्तीन। मारदे हना पिप आ नेंमी ब्रेकशा, आं छाप थोक्शो हुकुम गेनायो क्याम्ने मचाम्सीब” दैत।

### मोरदेकै आ सोइश्शो ब्रेक्स

9 मिनु सिवान माइश्शो ३ महिना डा २३ नाक्तीम पिपम आ ब्रेक्स पाइब मुर आन कली ब्रेक्ताकमी। मेकोपुकीमी मोरदेकै आ देशो खोदेशो पा यहूदी, सरकार डा गेय पाइब, मान ताइब नु रागी रागी आन कली हुकुम पाइब भारत रे कूश माइश्शो एथीयोपीया सम्म डा १२७ ओटा रागी नेल्लेमी मुर नेल्ल आन ब्रेक्स नु आंम आंम लोत्रम नु यहूदी आन कली आंम आंम आन ब्रेक्स नु आंम आंम आन लोत्रम पिप आ अंरेशो लोत्र ब्रेक्ताकम।

10 मोपा मेको ब्रेक्स कली पिप अहासूरस आ नेंमी ब्रेकशा, पिप आ छाप थोक्ताकव। मिनु मेको ब्रेक्स कली शारा दोरपाइक्व आन कली गेशा, थाम्पान दोरपा चोत्रथ सोइक्ताकम। मेको आन डोइश्शो शारा पिप आ नेल्ल क्येडा रिम्शो शारा बाक्तेकम।

11 मेको ब्रेक्समी मार ब्रेकशो बाक्त देशा हना “सहर नेल्ल डा यहूदी बुक्शा, आंम कली खतम पाइबपुकी रे प्रोंडसीमल। मिनु मेकोपुकीमी तेको तेको जात डा नु तेको तेको रागी डा बुक्शो मुर, सु सुम आन मीश नु आन आल आन कली श्येत गेमे, मेको आन कली काबुमीन क्याम्चा, साइक्या नु खतम सेल्चा कली बुक्चा माल्नीम। मिनु मेकोपुकीमी श्येत गेब मुर आन मारेइ मारेइ रोइक्ने चाप्नीम। एस्तर ३:१३; एस्तर ९:१७-१०, १५, १६

12 पिप अहासूरसमी आ रागी नेल्लेमी मेको श्येत गेब आन कली अदार माइश्शो १२ महिना डा १३ नाक्तीम खतम सेल्चा माल्ब” दे ब्रेकशो बाक्त।

13 मिनु मेको ब्रेक्स नेल्ल रागी डा मुर आन कली तुइक्पाइक्या कली लेंशा मोदेशो ब्रेक्स ब्रेकशा, उरदी पपाइक्या, दे लोत्र सोइक्ताकम। मिनु यहूदी चहिं मेको नाक्त आन जोरी सत्रु आन कली क्येक्क लेत्चा कली सासीशा बाक्मल, दे यहूदी आन कली अरेशा ब्रेकशा सोइक्ताकम।

14 मिनु पिपमी मेको शारा डोइक्व आन कली आ देशो लोत्र चोत्रथ शारा डोइक्पा थाम्पान दोरपाइश्शा सोइक्ताकव। मिनु मेको लोत्र सुसा दरवार रे योक्चा गोम्तेकम।

### यहूदी आन ग्येरतीक नाक्त

15 मिनु मोरदेकै पिप आ बाक्तीक रे दरवार डा ठेयब नीलो नु बुश फेक्तीक वा फेक्शा, पियाजी रड डा बरखी रुक्शा, पियामी सुन के ठेयब सिरपेच गुप्शा, सहर लत। मिनु मोरदेकै कली तशा, सुसा सहर डा मुरपुकी थाम्पान ग्येरसाकम।

16 मिनु यहूदी आन कली मेको नाक्त आन थुं बारपाइक्तीके, शुश ग्येरतीके नु मान ततीके नाक्त दुम्त।

17 मिनु पिप आ ब्रेक्स नु आ हुकुम जाक्दीशो नेल्ल रागी नु सहर नेल्लेमी यहूदी साप्पा ग्येरसाकम। मिनु मेको नाक्त चाड सेल्शा, भोज जाम्तेकम। मिनु मेको रागी डा शुश मुर यहूदी दुम्तेकम। मारदे हना मुर नेल्ल यहूदी आन कली तशा हितेकम।

## 9

## यहूदीपुकीम ग्राशो

1 म्नि अदार माइश्शो १२ महिना डा १३ नाक्त पिप आ ब्रेक्शो लोव्र खाप्तीक नाक्त जाक्त। मेको नाक्त यहूदी आन जोरी सत्रुमी यहूदी आन कली साइक्चा मिम्शो बाक्तेक्म। तन्न मुल यहूदीपुकीम कका आन जोरी सत्रु आन कली साइक्तीक नाक्त जाक्त।

2 मेको नाक्त पिप अहासूरस आ रागी नु सहर डा यहूदी नेल्ल आन जोरी सत्रु आन कली साइक्चा, दे बुक्तेक्म। म्नि मेको यहूदी आन कली सुइमी तेक्ने मचबेम। मारदे हना यहूदी आन कली तशा, मुर नेल्ल शुश हितेक्म।

3 म्नि मोरदेके कली तशा, हिंतीके रागी नेल्ल डा हुकुम पाइबपुकी, सरकार डा गेय पाइबपुकी नु ठेयब मुर नेल्लेमी यहूदी आन कली वारच पाम्तेक्म।

4 मोरदेके पिप आ दरवारमी ठेयब मुर दुम्त। म्नि रागी नेल्लेमी आ नें तुइक्ताक्म। मोपा मेको आ सक्ति बारना बारन लत।

5 म्नि यहूदीपुकीम आन जोरी सत्रु आन कली तरवारम तूशा, क्योरशा साइश्शा थुम्तेक्म। यहूदीपुकीमी आन कली खेदा पाइब मुर आन कली मार पचा दाक्तेम, मेको पाम्तेक्म।

6 यहूदीपुकीमी सुसा दरवारमी ५ सहे मुर आन कली साइक्तेक्म।

7 म्नि मेको हम्मदाता आ तौ हामान आ १० जना तौ पारशान-दाता, दाल्फोन, अस्पाता,

8 पोराता, अदाल्या, अरीदाता,

9 पारमशता, अरीसाइ, अरीदाइ नु वाइजाता बाक्तेक्म। उत्पती १४:२१-२४

10 म्नि मेको यहूदी आन जोरी सत्रु हम्मदाता आ तौ हामान आ १० जना तौ कली यो साइक्तेक्म। मेको आन शोंप नु आन थेरशो रू चहिं मरोइक्तेम।

11 म्नि मेको नाक्त सुसा दरवारमी गिश मुर आन कली सदमे, मेको पिप कली शोव्रतेक्म।

12 म्नि पिपमी पिपीम एस्तर कली “सुसा दरवारमी यहूदीपुकीमी ५ सहे मुर नु हामान आ १० जना तौ नेल्ल आन कली साइक्तेक्म। म्नि अरु आं रागीपुकीमी मार मार पामे माइ? गे मार पुंइतीनी हना यो, मेको गेनन्ती। चिनु मार पुंइतीनी? मेको दुम्ब” देंत।

13 म्नि एस्तरमी “हजुर, गे दाक्नीनी हना, दीसा यो सुसा सहरमी यहूदीपुकीम मुलाक्त डा खोदेशो पचा तामेक्ल, दे हुकुम पने। म्नि हामान आ साइश्शो १० जना तौ आन कली क्युक्तीक थाममी क्युकपतीन” देंत।

14 म्नि पिपमी “मोदेशोन पामेक्ल” दे हुकुम पाप्तु। म्नि सुसा सहरमी पिप आ हुकुम खोदेशो पा, हामान आ साइश्शो तौ नेल्ल आन कली थामम क्युक्तेक्म।

15 म्नि सुसा सहरम बाक्शो यहूदीपुकी अदार महिना डा १४ नाक्तीमी लेंशा बुक्तेक्म। म्नि सुसा सहरमी ३ सहे मुर साइक्तेक्म। तन्न मेको आन शोंप नु आन थेरशो रू मारेइ मरोइक्तेम।

16 म्नि पिप आ रागी डा यहूदीपुकी आंम कली आन जोरी सत्रु रे प्रोंइचा कली बुक्तेक्म। म्नि मेकोपुकीमी आंम कली काइ मदाक्ब ७५ हजार जना मुर आन कली साइक्तेक्म। मोपा मेकोपुकीमी आन जोरी सत्रु रे थुं नाइक्चा ताम्तेक्म। तन्न मेको आन शोंप नु आन थेरशो रू चहिं मारेइ मरोइक्तेम।

## पुरीम चाड सेल्शो

17 म्नि मेको नेल्ल अदार माइश्शो महिना डा १३ नाक्तीम पाम्तेक्म। म्नि मेकोपुकी आ दीसा १४ नाक्तीम नांइसाक्म। म्नि मेको नाक्त चाड का सेल्शा, ग्येरतीक नाक्त सेल्तेक्म।

18 सुसा सहरम बाक्ब यहूदीपुकी चहिं अदार महिना डा १३ नु १४ नाक्त बुक्तेक्म। म्नि १५ नाक्त नांइसाक्म। म्नि मेको नाक्त चाड का सेल्शा, ग्येरतीक नाक्त सेल्तेक्म।

19 मोपतीके डोन डोन गाउं डा नु अर्को सहरम बाक्ब यहूदीपुकीमी अदार माइश्शो महिना डा १४ नाक्त, नाइक्तीक नाक्त, चाड नु ग्येरतीक नाक्त सेल्नीम। मेको नाक्त मेकोपुकीमी कोसेली गेमुइनीम।

20 मिनू मोरदेकैमी मार मार दुम्मे, मेको नेल्ल ब्रेक्ताक्व। मिनू पिप अहासूरस आ नेक्था नु डोन डा रागीम बाक्ब यहूदी नेल्ल आन कली सोइक्ताक्व।

21 मिनू मेकोमी मार ब्रेक्ताक्व देशा हना “अदार महिना डा १४ नु १५ नाक्त यहूदी नेल्लेमी बर्स बर्समी चाड नु ग्येरतीक नाक्त सेल्चा माल्नीम।

22 मारदे हना मेको नाक्त यहूदी आन जोरी सत्रु रे नाइक्चा ताम्तेक्म। मिनू मेको महिनामी आन थुं लुकच लतीक रे ग्येरशो थुं दुम्तेक्म। मिनू आन रोंका पतीके रे ठेयब ग्येरतीक नाक्त फांडसाक्व। मेकोपुकीमी मेको नाक्त चाड का सेल्शा, ग्येरतीक नाक्त सेल्चा माल्नीम। मिनू कोसेली सोइक्मुशा, प्रुडग आन कली मार मार गेचा माल्नीम” दे ब्रेक्शो बाक्त।

23 मोपतीके यहूदीपुकीमी मोरदेकै आ ब्रेक्शो खोदेशो पचा गोम्तेक्म। मिनू मेको मोदेशो पा गेना हना यो पचा कली आन लोत्र थोक्ताक्म।

24 डोंइती यहूदी आन जोरी सत्रु अगाग आ मुर हम्मदाता आ तौ हामानमी यहूदी आन कली खतम सेल्चा नु साइक्चा कली मेको पुर माइशो साहीत कोत्रपाइशो बाक्त। एस्तर ३:७

25 मिनू मेको लोत्र पिप कली तुइक्पदमे नोले पिपमी, ब्रेक्स पा यहूदी आन कली मरिम्शो नु श्येत गेचा मिम्शो नेल्ल हामान आंम आ पियामी कोप्ताक्व। मिनू मेको नु आ तौ थामम क्युकशा साइक्चा पुंडसाक्म, दे छाप आप्शो ब्रेक्तीक का ब्रेक्शा थुंडताक्व। एस्तर ७:१०

26 मेको पुर माइशो साहीत कोत्रशा थोक्शो बाक्त। मिनू मेको नाक्त निक्शी कली पुरीम नें वोइक्तेक्म। मिनू मोरदेकै आ ब्रेक्शो, यहूदी आंमा आन तशो नु अरु आन देशो लोत्र नेंशा,

27 यहूदीपुकीमी आंम आन कली नु आन चच युइ आन कली नु सु सु यहूदी दुम्चा दाक्नीमी, मेको नेल्ल आन कली गेना हना यो बर्स बर्समी मेको नाक्त निक्शी “पुरीम माइशो चाड मानेचा माल्ब” दे रिती थिती वोइक्तेक्म। दोदेशो ब्रेक्शो बाक्मे, मोदेशो पचा माल्तेक्म।

28 मिनू नेल्ल आन पालामी, नेल्ल आन खिं डा मुरपुकीमी, रागी नेल्लेमी नु सहर नेल्लेमी मेको नाक्त निक्शी कली मिम्शा, चाड सेल्चा माल्नीम। मिनू यहूदी आन दातेमी मेको पुरीम चाड कली गेनायो मप्रेंदमेक्ल। गेना हना यो मिम्तेक्ल।

29 मिनू अबीहेल आ तमी एस्तर पिपीम नु मेको यहूदी मोरदेकैमी दोपा नु गेना मेको पुरीम माइशो चाड सेल्चा, मेको आ पबर्म शुश ब्रेक्ताक्स।

30 मिनू मोरदेकैमी पिप अहासूरस आ राज्य डा १२७ ओटा रागीम बाक्शो यहूदी आन कली चिठी ब्रेक्शा सोइक्ताक्व। मार ब्रेक्शो बाक्त देशा हना “इन थुं नाइशशा, आं डोंइती ब्रेक्शो पुरीम चाड मानेचा मप्रोनीन” दे ब्रेक्शो बाक्त।

31 मिनू मेको यहूदी मोरदेकै नु पिपीम एस्तरमी दोदेशो देसा, मोदेशो पा पुरीम चाड ठीक नाक्तीमी पचा कली ब्रेक्शो बाक्त। मिनू यहूदीपुकीमी आंम कली नु आन चच युइ आन कली “मेको पुरीम चाड पचा माल्ब” दे आन थुंमी मिम्चा माल्नीम। मेको माइजा बाक्तीक नाक्त आन रोंका पशो नेल्ल मिम्चा माल्नीम।

32 मिनू एस्तर आ हुकुममी मेको पुरीम डा लोत्र नुप्त। मिनू मेको लोत्र किताबम ब्रेक्शा वोइक्तेक्म।

## 10

### मोरदेकै आ पाला डा यहूदीपुकी

1 मिनू पिप अहासूरसमी आ रागी डा मुर आन कली नु समुन्द्र डा टापुपुकीम बाक्ब मुर आन कली तिरो थाप्पाइक्तु।

2 पिप अहासूरस आ अधिकार नु सक्ति आन पबर्म नु दोपा मेकोमी मोरदेकै कली ठेयब गेय पपदा, मेको आ पबर्म मादी नु पारसी पिप आन इतिहास डा किताबमी ब्रेक्शो बाक्ब। एस्तर २:८,१५

3 मेको यहूदी मोरदेके पिप अहासूरस आ नोले, मेको आ रागी डा नेल्ल क्येडा ठेयब मुर दुम्त। मेको यहूदी आन दातेमी यो नेल्ल क्येडा ठेयब मान तशो मुर बाक्त। मिनू आ लोकबपुकीमी मेको कली शुश

दाक्ताक्म। मारदे हना मेकोमी आ मुर आन कली रिम्शो नु आन थुं नुचा डा गेय पाप्तु। मिनु मेकोमी नेल्ल रिम्शो दुम्ल, दे आ जात डा मुर आन पबर्म पिप कली लोत्र पाप्तु।

## अय्युब

**ब्रेक्ब मुर:** साइ डा टाल्मुत माइश्शो किताबम मोसा एको किताब ब्रेक्ब मुर बाक्ब, दे ब्रेक्शो बाक्ब। तन्न अर्को जोक्ब तुइक्ब मोसा आ बाक्ची ना क्येडा नोले डा मुर ब्रेक्ब बाक्नीम देंनीम।

**गेना बाक्शो:** अय्युब ठेयब मुर दुम्शा, मोसा आ क्येडा डोंइती, अब्राहाम, इसहाक नु याकूब आन बाक्ची ना ब्रोंइशो बाक्त। एको काथा ला ममाइ, थमा पा अय्युब मुर का बाक्त, दे उत्पत्ती रे यो तुंइसीब। अय्युब किताबम ब्रेक्शो नें उत्पत्तीमी यो बाक्नीम।

ऊज	अय्युब १:१	उत्पत्ती १०:२३
साबा	अय्युब १:१५	उत्पत्ती १०:२८
कल्दी रागी	अय्युब १:१७	उत्पत्ती ११:३१
एलीफाज	अय्युब २:११	उत्पत्ती ३६:१५
शुआह	अय्युब २:११	उत्पत्ती २५:२ नु अर्को।

### मार ब्रेक्शो:

१. अय्युब शुश शोप पाइश्शो नु श्येत जाइब दुम्शो अय्युब १:-३:-
२. अय्युब आ वारच नु लोत्र पशो अय्युब ४:-३७:-
३. अय्युब परमप्रभु नु लोत्र पशो अय्युब ३८:-४२:६
४. अय्युब श्येत जवा नोले अय्युब ४२:७-१७

### अय्युब कली नाक्शो

1 साइ नेसी ऊज रागीमी अय्युब नें पाइश्शो मुर का बाक्माक्त। मेको ब्रोंइम सम्म दोस मतथु नु रिम्शो थुं पाइश्शो दुम्शा बाक्चा माल्ब मुर बाक्माक्त। मेको परमप्रभु कली मान पा हिंशा मरिम्शो पतीक रे डोन बाक्ब मुर बाक्माक्त। येरमीया २५:२०; बिलाप ४:२१; इजीकीएल १४:२४,२०; याकूब ५:११

2 मेको के ७ जना तौ नु तमी सां बाक्मा बाक्त।

3 मेको के ७ हजार भेडा, हजार सां दलओठ, ५ सहे हाल ब्यफ नु ५ सहे गधा बाक्मा बाक्त। मिनु शुश वाइलीम वाइल यो बाक्मा बाक्त। मोपा अय्युब पूर्व डा नेल्ल क्येडा शोप पाइश्शो नु ठेयब मुर बाक्माक्त।

4 मेको आ तौपुकीम पाल्पालो पा आन आन खिंमी भोज पतीक पाइबाक्मा बाक्त। मिनु मेकोपुकीम जचा तूचा कली आन समी सांफा आन कली यो ब्रेप्बाक्मा बाक्त।

5 मिनु अय्युबम मेको आन भोज पतीक नाक्त नेल्ल नुम नोले, आ तमी तौ आन कली “परमप्रभु आ डोंइती ठीक सेल्सीन” देंथ, मुर सोइक्बाक्माक्त। मिनु अय्युबमी सुनी कना बोक्शा, मेको आन पर्वम चोशा चढेतीक का का चढेशा, मेको आन पाप क्याम्तीक गेय पाइबाक्माक्त। मारदे हना मेकोमी “आ आलपुकीम मारेइ पा परमप्रभु आ पर्वम पाप पामे को” दे मिम्शा, गेना हना यो मो पाइबाक्माक्त।

### डोंइती डा खेयप नाक्शो

6 मिनु काबु स्वर्गम बाक्ब परमप्रभु आ मुरपुकी परमप्रभु यावे आ डोंइती जाक्मानु, सैतान यो मेकोपुकी नु जाक्माक्त। अय्युब २:१; उत्पत्ती ६:२; १इतिहास २१:१

7 मिनु परमप्रभु यावेमी सैतान कली “गे ते रे जाक्डे?” दे हिल्लो पवा बाक्त। मिनु सैतानमी परमप्रभु यावे कली “रागी डा एर ओंथ नेल्ल हिरशा जाक्ती” देंमाक्त।

8 मिनु परमप्रभु यावेमी सैतान कली “गे आं गेय पाइब अय्युब कली तवी? परमप्रभु कली मान पा हिंब, मरिम्शो पतीक रे डोन बाक्ब, रागीम मेको खोंदेशो पा पाप मपाइब नु ब्रेम्शो मुर अरु सुइ मबाक्नीम” दे मदा बाक्त।

9 मिनू सैतानमी परमप्रभु यावे कली “मार, अय्युब परमप्रभु कली मो मान पा हिंशो बाकबा डा? भजन संग्रह ७३:१३

10 गे मेको कली मेको आ खिं, आ शोंप नु आ मारेइ मारेइ नेल्ल एर ओंथ तेइ तेइ रे थरपु हिरशा, मवोइशो बाकनीनी डा? मेको आ गेय नेल्लेम गे आसीक गेशा वोइशो बाकनीनी। मेको आ क्यारश भेडा नु बी ब्यफ शुश दुम्शो बाकनीम।

11 तन्न गे इन गुड दिंशा, मेको आ मारेइ मारेइ थिने। मिनू मेकोमी इन कली इन डोंइतीन सराप चीले पाइब” देमाक्त।

12 मिनू परमप्रभु यावेम सैतान कली “दुम्ब मोदेशोन दुम्ल। मेको के मार मार बाकमे, मेको नेल्ल इ मिम्शो पावो। तन्न अय्युब कली चहिं मारेइ मपतो” दे मदा बाक्त। मिनू सैतान परमप्रभु यावे आ डोंइती रे गाक्माक्त। ब्यवस्था ८:२

**अय्युब आ मारेइ मारेइ खतम दुम्शो**

13 मिनू काबु अय्युब आ तमी तौ आन ठेयब लोकब आ खिंम, जन जन, तून तून बाकमा बाक्त।

14 मेको नाक्ती लोव्र कुरब मुर का दोरशा जाक्शा अय्युब कली “ब्यफपुकी वाक्ना वाक्न बाक्मानु, नु गधापुकी मेको आन नेक्था जोना जौन बाक्मानु,

15 साबा रागी डा मुरपुकी जाक्शा, गोठला आन कली लडाइ तोशा साइक्तेक्म। मिनू मेको मारेइ मारेइ योल्ताक्म। इन कली एको लोव्र शोव्रचा कली गो का ला ब्रोंइती” देमाक्त।

16 मेकोमी मेको लोव्र पन पना अर्को लोव्र कुरब मुर का जाक्शा, मेकोमी “परमप्रभु आ मी सरीड रे दोक्शा, भेडा नु गोठला नेल्ल आन कली नेक्तु। इन कली एको लोव्र शोव्रचा कली गो का ला ब्रोंइती” देमाक्त। भजन संग्रह ७८:४८

17 मिनू मेकोम लोव्र पन पना, अर्को लोव्र कुरब मुर का जाक्शा “हुल सां कल्दी रागी डा मुर जाक्शा, गोठला आन कली तरवारम क्योरशा दलओंठ नेल्ल योल्ताक्म। इन कली एको लोव्र शोव्रचा कली गो का ला ब्रोंइती” देमाक्त। येरमीया ५१:२४

18 मेकोम लोव्र पन पना अर्को यो दोरशा जाक्शा “इन तमी तौ आन ठेयब लोकब आ खिंम जना जन तूना तून बाक्तेक्म।

19 मेना गोरशो रागी रे फश गिवार जाक्शा, खिं आ एर ओंथ नेल्ल रे थोक्ताक्व। मिनू मेको खिं मेको आन तार ब्रेशशा, मेको नेल्ल आन कली चिप्शा साइक्तु। इन कली एको लोव्र शोव्रचा कली गो का ला ब्रोंइती” देमाक्त।

20 मिनू अय्युब बोक्शा आ वा खाक्मा बाक्त। आ चां प्रेक्मा बाक्त। मिनू खुम्की पा बाप्शा,

21 “गो आं ममा आ कोव्रज रे शिन्ना यिती। शिन्ना लेशशा लाइनुड। गो ते रे श्येत्थी जाक्डा, मेकेन श्येत्थी लेशशा, लाइनुड। मेको नेल्ल परमप्रभु यावेमी गेती। मिनू मेकोमी नेल्ल लेशशा लाइक्तु। परमप्रभु यावे आ नें ठेयब बाक्ल” देमाक्त। उपदेसक ५:१४; १तिमोथी ६:७; याकूब ५:११

22 मेको नेल्लेमी अय्युबमी पाप मपवा बाक्त। परमप्रभु कली दोस मगेवा बाक्त।

## 2

**निक्शी खेयप नाक्शो**

1 मिनू काबु स्वर्गम बाक्ब परमप्रभु आ मुरपुकी परमप्रभु यावे आ डोंइती जाक्मानु, सैतान यो मेकोपुकी नु परमप्रभु यावे आ डोंइती जाक्माक्त। अय्युब १:६

2 मिनू परमप्रभु यावेम सैतान कली “गे ते रे जाक्डे?” दे हिल्लो पवा बाक्त। मिनू मेकोमी परमप्रभु यावे कली “रागी डा एर ओंथ नेल्ल हिरशा जाक्ती” देमाक्त।

3 मिनू परमप्रभु यावेम सैतान कली “गे आं गेय पाइब अय्युब कली तवी? रागीमी मेको खोदेशो अरु सुइ मबाक्नीम। मेको दोस मताइब, गेना हना यो ठीक पाइब नु आं कली मान पा हिंब बाक्ब। मेकोम मरिम्शो मपाइब। गे मेको कली श्येत गेचा कली आं कली क्युक्ती, हना यो मुल सम्म मेको आ थमा सुइक्तीके ग्येत्थ लुक्च मदुम्शो बाक्ब” दे मदा बाक्त।

4 मिनु सैतानम परमप्रभु यावे कली “कुशुल आ पा डा कुशुल। मुरुम ब्रोंडचा कली आ मारेड मारेड मगेबा डा?

5 इन गुड दिंशा, मेको आ रुश नु श्ये थिने। मिनु मेकोम इन डोंडतीन इन कली सराप चीले पाइब” दे लोत्र लेत्ता बाक्त।

6 मिनु परमप्रभु यावेम सैतान कली “लो मो हना, मेको कली इ मिम्शो पावो। तन्न मेको कली मसतो” देंमाक्त।

7 मिनु सैतान परमप्रभु यावे आ डोंडती रे गाक्माक्त। मेकोमी अय्युब आ पिया रे खोइल सम्म गार मुपदा बाक्त। ब्यवस्था २८:२७

8 मिनु अय्युबम ब्वाम्सीचा कली गर आ गम्टे का शेशा पुलु तार निस्से बाक्त।

9 मिनु मेको आ मीशेमी मेको कली “मार, गे मुल सम्म थमा सुडक्चा मप्रोंडनीनी? परमप्रभु कली सराप चीले पा बेक्कीन” दे मदा बाक्त।

10 तन्न अय्युबमी “गे मूर्ख मीश मुर खोदेशो पा लोत्र पाप्तीवी। परमप्रभु आ गेशो रिम्शो चहिं ताक्शा, मरिम्शो चहिं मताक्चा डा?” दे मदा बाक्त। मेको लोत्र नेल्लेम अय्युबमी मारेड पाप मपवा बाक्त। अय्युब १:२२

**अय्युब आ वारच सां जाक्शो**

11 मिनु अय्युब आ वारच सांम मेको कली मोदेशो श्येत दुम्शो लोत्र नेन्मे बाक्त। मेको आन नें तेमान डा एलीफाज, शुआह डा बिल्दाद नु नामा डा सोफार बाक्मा बाक्त। मिनु मेकोपुकीम मेको कली लेम्चा कली नु मेको आ थुं नाइक्पाइक्चा कली गारशा आन खिं प्रोंडशा अय्युब आ खिंम जाक्मा बाक्त। उत्पत्ती ३६:१५; येरमीया ४९:७; उत्पत्ती २५:२; यहोसु १५:४१

12 मिनु मेकोपुकीम अय्युब कली डोन रे तशा, अय्युब कली मतुडक्तमे बाक्त। मिनु मेकोपुकीम अय्युब कली तुडक्तमे नोले वाड ब्रेशशा डाक्शा, श्येत लाक्शा आन वा खाक्शा, आन पियाम फुरक फुंडसमा बाक्त।

13 मिनु मेकोपुकी ७ नाक्ती नु ७ नाक्दो मारेड लोत्र मपथु, मेको आ नेक्था खपीम निस्समा बाक्त। मारदे हना मेकोपुकीम अय्युब कली शुश श्येत दुम्शो तामे बाक्त।

### 3

**अय्युबम लोत्र पशो**

1 मिनु नोले अय्युबम आ जरमेशो नाक्ती कली सराप चीले पवा बाक्त। येरमीया २०:१४-१८

2 मिनु अय्युबम

3 “आं जरमेशो नाक्त खतम दुम्ल। ‘वोंडश आल का जोल्शो बाक्ब’ देशो नाक्दो खतम दुम्ल।

4 मेको नाक्त छिडछिड दुम्ल। परमप्रभुम मेको कली ममिम्तल। मेको नाक्ती हाम्सो मदुम्ल।

5 मेको नाक्ती कली क्येर छिडछिडम सुमल। मेको गोरसुम सुमल। मेको आ छिडछिड हिंचा डा दुम्ल।

6 मेको नाक्दो कली थम छिडछिडम सुमल। बर्स डा नाक्त आन दातेम मेको ग्येरचा मतवल। महिना डा हिक्तीकेम मेको नाक्ती हिक्चा मपुंडसेक्ल।

7 मेको नाक्दो आल मथीब दुम्ल। मेको नाक्दोमी ग्येरशो सेंदा मनेसेक्ल।

8 नाक्त कली सराप चीले पाइब मुरुम, मेको नाक्ती कली सराप चीले पवल। मेकोम लेव्याथन कली पोक्चा कली ठीक दुम्शो बाक्ब।

9 मेको आ सुनी डा सोरुल आ हाम्सो मतांडसेल। मेकोम नां सोत्रचा कली रिम्शो मोशा दुम्ल। नां दाप्शो गेनायो तचा मतवल।

10 मारदे हना मेकोम आं कली जरमेब ममा कली मतेक्गा। मिनु आं कली श्येत मजचा डा पा मखुडक्ती।

11 गो मारदे जरमेसी डा चोटीन मबेक्डा? गो मारदे कोत्रज रे गूडानु मबेक्डा?

12 मारदे आं कली वोडक्चा कली थुकु बाक्मे? मारदे आं कली तुडचा कली दूध बाक्मे?



- 13 मो दुम्शो हना, गो सिक्सी पा गोल्लो बाकड वा। गो इप्शा नाइश्शा बाकड वा। २सामुएल १८:१८
- 14 गो रागी डा पिपपुकी नु मेको आन कली अर्ती गेबपुकी नु बाकड वा। मेकोपुकीम आंम आन कली ब्रेशो दरवारपुकी लेंशा सेल्नीम।
- 15 शुश सुन पाइश्शो तौ नु बाकड वा। मेकोपुकीम आन खिं चांदीम प्रिनीम।
- 16 मारदे गो शाम्शो आल खोदेशो पा थिम्चा मपुंडसीडा? मो दुम्शो हना गो हाम्सो गेनायो मतशो आल खोदेशो पा बाकड वा।
- 17 मेकेर परमप्रभु यावे आ अरेशो मटीबपुकीम ग्रांग्ये माग्ये पने मचाप्नीम। मेकेर दशो मुरपुकी नाइक्चा ताइनीम।
- 18 मेकेर चौक्शा वोइश्शोपुकी नाइक्चा ताइनीम। गेय पपाइक्ब आ सेंदा मनेसीब।
- 19 मेकेर ठेयब नु आइक्च नेल्ल बाक्नीम। वाइलीम वाइल यो आन होत्रप रे ब्रोंइशो बाक्नीम।
- 20 श्येत जाइब कली मारदे हाम्सो तचा गेशो बाक्बा? आन थुं लुकच लशो कली मारदे ब्रोंइचा गेशो बाक्बा?
- 21 मेकोमी बेक्चा कली रिम्शो बाक्ब। तन्न मेको मबेक्ब। मेकोमी थिम्शा वोइश्शो शोंप दोशा माल्लशो क्येडा यो शुश माल्ल। प्रकाश ९:६
- 22 मेकोपुकी तुरसुम जाक्दीम्मानु आन थुं नाइश्शा, शुश ग्येरसीनीम।
- 23 परमप्रभुम लां मताइब आन कली मारदे हाम्सो गेशो बाक्बा? मेको आन एर ओंथ नेल्ल रे थरपु हिरशो बाक्ब। अय्युब १९:८
- 24 आं जचा थोत्रक आ पा डा हुकयी पतीके दुम्शो बाक्ब। आं हुकयी पशो ब्वाक्कु खोदेशो पा यीब।
- 25 गो मार मिम्शा हिंडा, मेकोमीन थित्ती। गो मार तशा शुश हिंडा, मेको आं तार जाक्त।
- 26 आं थुं मनाइसीब। गो सिक्सी पा मबाक्नुड। नाइक्चा मताइनुड। श्येत ला जाक्ब” देंमाक्त।

## 4

### एलीफाजम लोत्र पशो

- 1 मिनु तेमान डा एलीफाजमी अय्युब कली
- 2 “मार, सुइमी गे नु लोत्र पचा माल्लु हना, इन थुं खाइक्पाइक्नीनी? तन्न सु मब्वाक्थु बाक्ने चाप्नीमी डा?
- 3 गे शुश मुर आन कली शेंताक्नी। गे मचाप्ब मुर आन कली बोल्यो सेल्तीनी।
- 4 दाइल पा गोल्लो आन कली इन लोत्रमी आन थुं बारपाइक्तीनी। मिनु गे खोइल मथेक्ब आन कली खोइल थेक्ब सेल्तीनी।
- 5 तन्न मुल इन तार मोदेशो श्येत जाक्मेनु, गे फाल्ने मचाप्ब दुम्शो बाक्नीनी। मेको श्येतमी इन कली थिवानु, इन थुं लुकच लशो बाक्ब।
- 6 मार इन परमप्रभु कली मान पा हिंतीकेम थमा मसुइक्नीनी? इन ठीक पतीकेमी आस मगेबा?
- 7 मारेइ दोस मताइब मुर खतम दुम्शो बाक्नीमी? मेको मिम्तीन। गेना हना यो रिम्शो पाइब मुर साइक्चा पुंडसीनीमी?
- 8 मरिम्शो पाइब नु ग्रांग्ये माग्ये पोक्ब आंम आन पशो ताइनीम। हितोपदेस २२:८
- 9 परमप्रभु आ मुइश्शोम मेकोपुकी खतम दुम्नीम। मिनु मेको आ गाइश्शो आ मीम नेक्चा पुंडसीनीम।
- 10 गुप्स ग्रीमल, बोल्यो गुप्स डरर डरर पामेक्ल। मो हना यो ठिटा गुप्स आन खुइ जिक्चा पुंडसाक्म।
- 11 बोल्यो गुप्सपुकी सिखार ब्वचा मतथु नुप्नीम। मिनु छाउरी गुप्स आन चाइक्ब एर ओंथ ब्राइनीम।
- 12 आइक्च लोत्र का आं नोफाम नेंता। मिनु गो शिप शिप पा लोत्र पशो नेंता।
- 13 नाक्दो डोमु ततीके बाक्ब। मुर ठेयब निन्द्रा पशो बाक्नीम। अय्युब ३३:१५; उत्पत्ती १५:१२
- 14 मोदुम्तीके गो शुश हिंशा खिंखिं पाता। मिनु मेकोम आं पोक्च कली शुश खिंखिं पपाइक्तु।
- 15 फश का आं डोंइती रे पा लत। मिनु आं रां डा चां बोक्तेक्म।

16 मेको दिक्शा बाक्त। तन्न मेको मार बाक्मे, गो मारेइ मतुइक्कु। आं डोंइती मार कका राप्त। नोले सिक्सी दुम्शा, सेंदा का यूत।

17 मेको सेंदामी 'मार बेक्शा लाइब मुर परमप्रभु आ डोंइती नेल्लेम ठीक पाइब दुम्ने चाप्बा डा? मुर आ कली सेल्ब क्येडा रिम्शो दुम्ने चाप्बा डा?' देंत। १राजा ८:४६; भजन संग्रह १४:३; हितोपदेस २०:९

18 परमप्रभुम आ गेय पाइब आन कली थमा मसुइक्ब। मिनु आ स्वर्ग डा गेय पाइब आन कली दोस गेब। अय्युब १५:१५

19 मिनु खप के खिंम बाक्ब मुर मेको आन क्येडा शुश दोस मताइनीमी डा? मुर आन जग फुरक बाक्ब। मेको तुम्ब खोदेंशो पा दिप्शा साइक्चा पुंइसीनीम।

20 मेकोपुकी नाक्त काम साइक्चा पुंइसीनीम। सुइम मतुइक्थु बेक्नीम।

21 मेको आन ताम्बु डा डोरी युंइशो बाक्ब। मेकोपुकी जोक्ब तुइक्ब मदुम्थु बेक्नीमी" देंमाक्त।

## 5

### एलीफाज आ लोत्र

1 मिनु एलीफाजमी "मूल ब्रेशा कोत्रडीन। इन कली सुम लोत्र लेप्बाक्मा? गे सु कली 'वारच पाइय्यीनी' दे ब्रेलीनी?

2 गाइक्तीकेम मूर्ख आन कली साइक्ब। मिनु गेहे पतीकेम मारेइ मजोक्ब आन कली साइक्ब।

3 गो मूर्ख आन शाक्श थोक्शो तशो बाक्नुड। तन्न गो कालेमीन मेको आन खिं कली सराप चीले पाइक्ता। भजन संग्रह ३७:३५-३६

4 मेको आन आल कोत्रब मुर मबाक्नीम। मेकोपुकी ठेयब लाप्चोम साइक्चा पुंइसीनीम। मेको आन कली प्रोंइब सुइ मबाक्ब।

5 शोत्रलु बेक्शोपुकीम मेको आन खुप्शो मारेइ मारेइ नेक्नीम। आन जचा थोत्रक चू आन दाते रे यो खुप्शा योल्नीम। तूतू दाक्शोपुकी मेको आन शोंप तशा वाल्नीम।

6 मारदे हना श्येत जतीके फुरक रे मजाक्ब। खप रे श्येत मयूब।

7 मुरपुकी श्येत जचा कली जरमेसीनीम। मेकोपुकी मी आ फिलीडगो खोदेंशो पा जाम्नीम।

8 गो मेको नड हना, गो परमप्रभु कली मलु वा। आं पुंइशो लोत्र परमप्रभु कली देंड वा।

9 मेकोमी ठेयब, रुन्ने मचाप्चा डा नु छक लाक्चा डा गेय हिकने मचाप्चा डा पा पाइब। अय्युब ९:१०

10 मेकोम खप कली रेउ यिपाइक्ब। मिनु रू कली ब्वाक्कु सोइक्ब।

11 मेकोम महिक्सीशो मुर आन कली ठेयब सेल्ब। मिनु रोंका पाइब आन कली लेंशा ग्येरपाइक्ब। भजन संग्रह ७५:८; लूका १:५२

12 मेकोम मरिम्शो मिम्शा पाइब आन कली आन मिम्शो मदुम्पाइक्ब। मिनु मेकोपुकीम आन मिम्शो पने मचाप्नीम।

13 मेकोमी आंम कली जोक्ब तुइक्ब मिम्शा गेय पाइब कली आंम गेयमी मेको कली ग्याइक्पाइक्ब। मिनु आन मरिम्शो मिम्शो रीब पा खतम दुम्ब। १कोरिन्थी ३:१९

14 मेको आन कली नाक्तीन छिडछिड दुम्ब। मिनु नाक्ती उइक्थ दुम्मेनु, मेकोपुकी नाक्दो खोदेंशो पा सुल्शा गाक्नीम। यसैया ५९:९-१०

15 तन्न मेकोम मारेइ मथीब आन कली आन मरिम्शो लोत्र रे प्रोंइब। मिनु सक्ति पाइश्शो आन गुड रे प्रोंइब।

16 मोपतीके पुडग आन आस बाक्ब। मिनु ठीक मपाइबपुकीमी आन शोत्र खेप्चा माल्नीम।

17 परमप्रभुमी ठीक सेल्चा पुंइसीशो मुर ग्येरसीशो बाक्नीम। मोपतीके नेल्ल क्येडा ठेयब सक्ति पाइश्शो आ शेंशो आइक्च ममिम्तीन। भजन संग्रह ९४:१२; हितोपदेस ३:११

18 मारदे हना मेकोमी गार सेल्ब। मिनु मेकोमीन फ्रेंब। मेकोमी तुप्ब। मिनु मेकोमीन सापाइक्ब। ब्यवस्था ३२:३९; होसे ६:१

- 19 मेकोमी इन कली ६ खेयप श्येत दुम्त हना यो, प्रोंडब। ७ खेयप डा श्येतमी इन कली मथीब। भजन संग्रह ३७:२४; हितोपदेस २४:१६
- 20 मेकोमी अन्काल दुम्मेनु, इन कली बेक्चा रे प्रोंडब। मिनु लडाइ दुम्मेनु, तरवार रे प्रोंडब।
- 21 मेकोम इन कली शुक्शी पाडब रे प्रोंडब। मिनु खतम दुम्तीक नाक्त जाक्मेनु गे हिंचा ममाल्नीनी।
- 22 खतम दुम्तीके नु अन्काल जाक्मेनु, गे रिरशा बाक्नीनी। मिनु गे ब्वाकी डा जन्तु आन क्येडा हिंचा ममाल्नीनी।
- 23 इन रूमी फुल्लु मबाक्नीम। मिनु ब्वाकी डा जन्तुपुकीम इन कली श्येत मगेनीम। यसैया ११:६-९; होसे २:२०
- 24 गे इन ताम्बु मारेड मदुम्शो बाक्ब दे तुडशो बाक्नीनी। मिनु गे इन क्यारश भेडा कली हिकशा कोवनीनु, का यो मजाम्शो बाक्नीम।
- 25 इन चच युड शुश दुम्शो बाक्नीम। इन आल घांस खोदेशो पा शुश दुम्शो बाक्नीम।
- 26 गे खुशो दुम्शा बेक्नीनी। बाली नाली ओइची ना खोदेशो पा, इन नाक्त जाक्ब।
- 27 गोपुकीम एको आन पबर्म हिल्लो हिकसी पाइतक। मिनु नेल्ल थमा बाक्ब। मोपतीके एको नेनीन। मिनु तुडक्तीन” दे एलीफाजमी अय्युब कली मदा बाक्त।

## 6

### अय्युबमी लोव्र लेशो

#### 1 मिनु अय्युबमी

- 2 “आं सुतां नाक्ने चाप्शो हना नु आ शुश हिंचा डा श्येत नाक्शो हना,
- 3 मेको समुन्द्र डा बाल्वा आन क्येडा यो शुश हेल्लो दुम वा। मोपतीके आं लोव्र रिम्शो मबाक्म कों।
- 4 नेल्ल क्येडा ठेयब सक्ति पाइशो आ ब्राम आं कली युक्शो बाक्नीम। आं सोक्तीम मेको आन वीख तूचा माल्ब। परमप्रभुमी आं कली हिंपाइशो बाक्ब। भजन संग्रह ३८:३
- 5 ब्वाकी डा गधा घांस ब्ववानु, ग्रीबा डा? ब्यफ आ खोले जवानु, ग्रीबा डा?
- 6 मब्रोवशो जचा थोव्रक हिकसी मसुथु जने चाम्सीबा? मार ब्वोफु आ बुश ब्रोव्रशो बाक्बा डा?
- 7 गो मेको जचा मदाक्नुड। आं कली काइ मब्रोवब।
- 8 गो आं पुंडशो तड हना, परमप्रभुम आं माल्लो गेशो हना,
- 9 आं कली खतम सेल वा। परमप्रभुमी आं कली साइय्यी वा।
- 10 मेको मोदेशो दुम्शो हना, आं थुं नांइस वा। मिनु शुश खाइशशा यो ग्येरसीड वा। मारदे हना गो का ला परमप्रभु आ लोव्र मलाक्शो बाक्नुड।
- 11 गो आं रिम्शा बाक्तीक सक्ति बाक्बा डा? गो दोपा बेक्नुडा। गो रिम्शा बाक्ने चाप्नुडा डा?
- 12 आं सक्ति फुल्लु खोदेशो बाक्बा डा? आं श्ये कांसा के बाक्बा डा?
- 13 थमा पा, गो आंम कली तिकशा वोइक्ने मचाप्नुड। आं सक्ति नेल्ल लत।
- 14 सुमी आन वारच कली शिशी मपाइनीमी, मेकोम नेल्ल क्येडा सक्ति पाइशो कली मान पा हिंचा थुम्शो बाक्नीम।
- 15 आं लोकबपुकी बारशा यीब खोला खोदेशो बाक्नीम। सोव्रशो खोला खोदेशो बाक्नीम। भजन संग्रह ३८:१२
- 16 आन ब्वाक्कु मरिम्शो दुम्शा, फुं यशो खोदेशो पा जाम्ब।
- 17 मिनु नाप्शोमी मेको आ शाइक्तीक रे जाम्ब।
- 18 मिनु लां गाक्ब आन लां रे हिरना हिरन गाक्नीम। मिनु मेकोपुकी मुर मबाक्तीकेम गाक्शा, बेक्नीम।
- 19 तेमा डा लां गाक्बपुकीम तूचा कली मेको खोला डा ब्वाक्कु माल्तेक्म। साबा डा ग्याप्ब लेयबपुकीम मेको ब्वाक्कु तूचा कली आस पाम्तेक्म। अय्युब १:१५
- 20 मेको आन आस सोव्रशो खोला तशा बेक्त। मेकेर जाक्दीशशा आन थुं बेक्त।
- 21 मुल गे आं कली मोदेशो दुम्तीनी। गे आं खतम दुम्तीके तशा हिनीनी।

- 22 गो इन कली 'आं कली कोसेली चाक्कीन' देंडा डा? गो इन कली 'इन शोंप गेयीनी' देंडा डा?  
 23 मिनु 'आं कली आं जोरी सत्रु आन गुड रे प्रॉइयीनी' देंडा डा? 'आं कली दिप्ब आन गुड रे प्रॉइयीनी' दे गो इन कली गेनायो मदेड।  
 24 आं कली शेदीनी। मिनु गो सिक्सी पा नेंनुड। गो मार दूली पडा, आं कली रुप्पतीन।  
 25 थमा लोव्र बोल्यो बाक्नीमी। तन्न इन देशो लोव्र मार रिम्शो बाक्बा डा?  
 26 गे आं लोव्र रिम्शो सेल्चा माल्नीनी? गे थुं लुकच लशो मुर आ लोव्र फश बाक्ब, दे मिम्नीनी?  
 27 गेपुकीमी रोम रोडक्च आन पबंम फेन्टे आप्नीनी। मिनु इन वारच आन पबंम मार मार फाइक्नीनी।  
 28 मुल आं कली कोव्रडीन। गो इन कली जोल मपाइनुड।  
 29 गे खिं लेतीन। मिनु आं पबंम अरु मरिम्शो मपने। लेतीन। मारदे हना गो ठीक पाइब बाक्नुड।  
 30 मार, आं लोव्रम मारेइ जोल बाक्बा? मार, आं लोव्रम रिम्शो नु मरिम्शो तिलने मचाप्बा डा?" दे अय्युबमी आ वारच कली लोव्र लेता बाक्त।

## 7

अय्युबमी परमप्रभु नु लोव्र पशो

- 1 मिनु अय्युबमी "मुर रागीम बाक्मानु, शुश गेय पचा माल्नीम। मेको आन नाक्ती गेय पाइब आन नाक्त खोदेशो बाक्नीम। अय्युब १४:६  
 2 मेको नाक्दो डा वांकु रिम्शो वाइलीम वाइल खोदेशो पा बाक्नीम। आ गेय पशो डा गाल्च ताक्चा कली रिम्शा बाक्शो खोदेशो बाक्नीम।  
 3 गो महिना नेल्ल मोशीन सोइक्ताक्डमी। नाक्दो कुस कुस श्येत जतीके आं भाग बाक्ब।  
 4 गो नाक्दो इप्चा कली गोल्डानु, गेना नां सोव्रबा, दे मिम्नुड। तन्न नाक्दो शुश लाइश्शो दुम्ब। मिनु गो नां मसोव्रम सम्म एर ओंथ लोकसीशा बाक्नुड।  
 5 आं रां लुस्पुम ब्रीशा, फुरक लुम्सीशो बाक्ब। मिनु आं कुशुल जेशशा नेंने यूशो बाक्ब।  
 6 आं नाक्त वा प्रोव्रब आन थूरी क्येडा यो रीब पा लाइनीम। मेको नेल्ल आस मपाइश्शो दुम्नीम।  
 यसैया ३८:१२  
 7 आं ब्रोंइतीक नाक्ती का ले कीशो सोक्त खोदेशो बाक्नीम, दे मिम्तीन। गो लेंशा रिम्शो नाक्त तचा मताइनुड।  
 8 आं कली ताइबमी लेंशा गेनायो मताइब। गे आं कली कोव्रनीनु, गो लने थुम्शो बाक्नुड।  
 9 गोस्स ब्रशा जाम्शो खोदेशो पा बेक्शो मुर आन बाक्तीक उइ लाइबपुकी गेनायो लेशशा मजाक्नीम।  
 10 मेको आन खिंम लेशशा मजाक्नीम। मिनु मेको आन बाक्तीकेमी मेको आन कली मतुइक्नीम।  
 अय्युब १०:२१; अय्युब १४:१२; भजन संग्रह १०३:१६  
 11 मोपतीके गो सिक्सी पा मबाक्नुड। गो आं थुं डा श्येतम लोव्र पाइनुड। गो आं लुकच लशो थुंम लोव्र पाइनुड।  
 12 मार, गो समुन्द्र नडा? गो समुन्द्र डा ठेयब जन्तु नडा? गे मारदे आं कली खाल पाइब वोइक्नीनी?  
 13 गो आं ब्राख्येम गोल्शा, आं थुं नाइक्ब, दे मिम्नुड। इप्डानु आं श्येत प्रेंनुड, दे मिम्नुड।  
 14 तन्न मेना गे आं कली आं डोमुम हिंपाइक्नीनी। मिनु कोइतीक कोइशा आं कली हिंच कोइनीनी।  
 15 मोपतीके गो मेको रांम ब्रोंइचा क्येडा सोक्त मकीथु बेक्चा दाक्नुड।  
 16 गो ब्रोंइशा बाक्चा मदाक्नुड। गो गेना हना यो ब्रोंइशा बाक्चा मदाक्नुड। गे आं कली प्रॉइयीनी।  
 मारदे हना आं ब्रोंइशो का ले कीशो सोक्त खोदेशो बाक्ब। १राजा १९:४  
 17 मुर मार नमी डा? गे मेको आन पबंम शुश मिम्नीनी? मारदे गे मेको आन कली शुश दाक्नीनी।  
 भजन संग्रह ८:४; भजन संग्रह १४४:३  
 18 गे मेको आन कली सुनी कुस कुस कोव्रनीनी। गे मेको आन कली गेना हना यो नाक्शा कोव्रनीनी  
 19 गिश सम्म आं रे इन मिक्च हिरनीनी? शेप्चुक मदाक्गु सम्म आं कली प्रॉइयीनी।  
 20 गो पाप पाता हना यो, इन कली मार दुम्बा डा, गे मुर आ थुं नाक्शा कोव्रनीनी? गे मारदे आं कली खेदा पस डा पस बाक्नीनी। गे मारदे आं कली तशा ब्रीनीनी?

21 गे मारदे आं हेंथे पशो माफ मगेयीनी? मारदे आं मरिम्शो पशो मक्याम्नीनी? मुल गो बेकनुड। मिनु गे आं कली माल्तीनी हना यो, मथित्नीनी” दे अय्युबमी परमप्रभु यावे कली देंमाक्त।

## 8

बिल्दाद आ डोंइती डा लोव

1 मिनु शुआह डा बिल्दादमी लोव लेशशा

2 “गे गेना सम्म ओदेशो लोव पस डा पस बाक्नीनी। इन लोव ठेयब फश ला बाक्नीम।

3 मार, परमप्रभुम दूली निसाफ पाइबा डा? मार, नेल्ल क्येडा सक्ति पाइशो परमप्रभुम मार ठीक बाक्बा, मेको मतुइक्बा डा? अय्युब ३४:१०

4 इन तमी तौपुकीम मेको आ पर्वम पाप पांतेक्म। मोपतीके मेकोम मेको आन कली आन हेंथे पशो मोइक्ताक्व। अय्युब १:४-५

5 गे नेल्ल क्येडा सक्ति पाइशो परमप्रभु कली माल्तीनी नु मेको कली पुंडतीनी हना,

6 गे ग्रांया मदिचा डा नु गेना हना यो रिम्शो पाइब बाक्तीनी हना, मेको थमा पा इन पो न बोक्ब। मिनु मेकोम इन खिं लेंशा, डोंइती डा खोदेशो पा गेब। भजन संग्रह ३५:२३

7 मिनु इन डोंइती डा बाक्शो क्येडा, इन नोले डा बाक्शो शोप शुश दुम्ब। अय्युब ४२:१०

8 डोंइती डा पाला डा मुर आन कली हिल्लो पने। मिनु मेको आन किकी पिपी आन मिम्शा पशो, मिम्तीन।

9 मारदे हना गोपुकी सिनाक्त ला जरमेशो बाक्नीकी। मिनु गो मारेइ मतुइक्ब बाक्नीकी। रागीम आंइ नाक्ती वांकु खोदेशो ला बाक्ब।

10 मेको किकी पिपीम इन कली मशेंनीमी? इन कली लोव मपाइनीमी? इन कली आन रुपशो लोव मशेंनीमी?

11 ब्वाक्कु मबाक्तीकेम कागज सेल्टीक बोट मवानीम। ब्वाक्कु मबाक्तीकेम बुदी मीलु लाइशो मदुम्नीम।

12 मेको कोल्ना कोल्न बाक्मानु, रिक्ची मजाक्थु, घांस क्येडा यो रीब पा सोल सुल बेक्नीमी।

13 परमप्रभु कली प्रेंबपुकी यो मोदेशो न दुम्नीम। परमप्रभु कली मटीब मुर आन आस यो मोपा जाम्शा लाइब। अय्युब ११:२०; हितोपदेस १०:२८

14 मेको आन आंमा कली थमा सुइक्तीक थम आइक्च श्येले खोदेशो बाक्ब। मेको आन आस माखा आ जाल खोदेशो बाक्ब।

15 मेको आ जालम रक एरशा बाक्त हना, मेको कली मतिक्ब। मेको कली ग्याइक्ताक्व हना यो, मेको ब्रेन्ब।

16 परमप्रभु यावे आ अरेशो मटीबपुकी नां तशो घांस सुवा खोदेशो पा वानीम। मिनु मेको आन शाक्श तेइ तेइ ब्रशा लाइनीम।

17 मेको आन शाक्शम फुल्लु आन कली रुक्नीम। मिनु मेको फुल्लु आन दातेम बाक्नीम।

18 मेको आन बाक्तीक रे खतम दुम्मानु, आन बाक्तीकेम मेको आन कली ‘गो इन कली गेनायो मतशो नडु’ देंब।

19 मेको आन ग्येरशा ब्रोंइतीक नाक्ती मोदेशो बाक्नीम। मिनु अर्को तेइ तेइ खप रे वाशा गूनीम।

20 नेनीन, परमप्रभुमी दोस मताइब मुर कली मतिल्ब। मेकोम मरिम्शो गेय पाइब मुर आन कली वारच मपाइब।

21 मो हना यो, मेकोमी इन कली रिप्पाइक्ब। ग्येरशा ठेयब सेंदाम लोव पपाइक्ब।

22 मिनु परमप्रभुमी इन कली काइ मदाक्ब आन मुने दोक्पाइक्ब। मिनु परमप्रभु यावे आ अरेशो मटीब आन ताम्बु जाम्शा लाइनीम” दे बिल्दादमी अय्युब कली देंमाक्त।

## 9

अय्युबमी लोव लेशशा

1 मिनु अय्युबम लोव लेशशा

2 “गो एको थमा बाकब, दे तुइक्नुड। तन्न परमप्रभु आ डोंइती बेकशा लाइब मुर दोपा ठीक बाकने चाप्बा डा? अय्युब ४०:३-५; भजन संग्रह १४३:२

3 सुइमी मेको नु लोत्र जिपाइक्चा मिम्ताक्व हना, मेकोम हजार का लोत्रम लोत्र का यो लेन्ने मचाप्ब। भजन संग्रह १९:१३

4 मेको जोकब तुइक्ब नु सक्ति पाइश्शो बाकब। मेको कली मटिथु, सु ग्येत्थ लने चाप्बा डा?

5 मेकोम डांडा आन कली आन मतुइक्थुन याक्ब। मिनु गाइश्शा, मेको आन कली लोकब।

6 मेकोम रागी कली आ बाक्तीक रे हिक्ब। मिनु मेको आ थाम नेल्ल ख्रिख्रि पाइनीम।

7 मेकोम नां कली ‘मदपो’ दे अरेब। मिनु सोरुल आन छेडछेड साम्ब।

8 मेको आ कामीन सरीड प्राक्शो बाकब। मेको समुन्द्र आ छाल तार गाक्ब।

9 मेकोमी सप्तबर्सी, मिर्गसीरा नु किरकिटी सोरुल नु दक्खिन डा सोरुल आन हुल सेल्लु। अय्युब ३८:३१; आमोस ५:८

10 मेकोम ठेयब नु मरुप्चा डा गेय पाइब। मिनु हिक्ने मचाप्चा डा छक लाक्चा डा गेय पाइब। अय्युब ५:९

11 मेको आं बाक्तीक रे पा लाइब। गो मेको कली मताइनुड। मेको आ लां खोइश्शा गाक्मेनु, गो मतुइक्नुड।

12 मेकोम रोइक्ताक्व हना, मेको कली सुम तेक्ने चाप्बा डा? सुमी मेको कली ‘गे मार पनी’ दे हिल्लो पने चाप्बा डा?

13 परमप्रभुम आ गाइक्चा मलेप्ब। राहाब माइश्शो समुन्द्र डा ठेयब जन्तु कली वारच पाइबपुकी मेको आ खोइलीम बाप्नीम। अय्युब २६:१२; भजन संग्रह ८९:११

14 मोदेशो बाक्त् हना, गो मेको कली दोपा लोत्र लेन्ने चाप्नुडा डा? गो मार लोत्र देंनुडा डा?

15 गो दोस मतशो बाक्ती हना यो, मेको कली लोत्र लेन्ने मचाप्नुड। आं कली दोस गेब कली गो ‘शिशी पाइय्यीनी’ दे पुंइने ला चाप्नुड।

16 गो मेको कली ब्रेत्तनु, लोत्र लेत्ताक्यी हना यो, मेकोम आं लोत्र नेंतु, दे थमा मसुइक्नुड।

17 मारदे हना मेकोमी आं कली फश गिवारम खतम सेल्ब। मोशान आं गार शुश सेल्ब।

18 मेकोम आं कली लेंशा सोक्त् कीचा यो मगेब। श्येत जपाइश्शा आं थुं लुकच लपाइक्ब।

19 एको सक्ति पाइश्शो लोत्र बाक्त् हना, मेको आं क्येडा बोल्यो बाक्ब। एको ठीक पतीके लोत्र बाक्त् हना, मेको कली सुम सेन्ने चाप्बा डा? अय्युब ९:३३

20 गो दोस मताइब बाक्ती हना यो, आं लोत्रमीन आं कली दोस ताइब सेल्ब। गो दोस मपाइश्शो बाक्ती हना यो, मेकोमी ‘गे दोस ताइब बाक्नेवे’ दे चिन्ड कोंइब।

21 गो दोस मताइब बाक्नुड। मो हना यो गो आं पर्बम मारेइ मतुइक्नुड। गो ब्रोंइचा मदाक्नुड।

22 लोत्र नेल्ल कान बाक्ब। मोपतीके गो मेकोम दोस मताइब नु आ अरेशो मटीब निम्फा आस कली खतम सेल्ब, देंनुड। अय्युब ८:२०; उपदेसक ९:२-३

23 हिंचा डा श्येतमी कालेमीन मुर कली साइक्ब। मेकोम दोस मताइब आन हिंचा डा श्येत जशो आ पर्बम शुक्शी पाइब।

24 रागी परमप्रभु यावे आ अरेशो मटीब आन गुइमी गेशो बाक्ब। मेकोम निसाफ पाइब आन मिक्च सिल्ब। मेकोम मो मपाप्तु हना, सुम पाइबा डा?

25 आं ब्रोंइतीक नाक्त् दोरब आन क्येडा यो शुश दोरशो बाक्ब। मारेइ ग्येरतीक मतथु, मेको नुम्ना नुम्न लाइनीम।

26 मेको बुदी मीलु के सेल्शो डोंगा खोदेशो पा, रीब पा शाइश्शा लाइनीम। ब्वारदे आन सिखार तार जुक्शो खोदेशो पा लाइनीम।

27 गो आं श्येत प्रेंनुड। गो ग्येरशो कुल कोंइशा रित्नुड, देंती हना यो,

28 गो आं श्येत जचा माल्शो तशा हिंनुड। मारदे हना गे आं कली दोस मताइब मदेनीनी, दे तुइक्नुड।

29 गो दोस ताइब दुम्ने थुम्शो बाक्ती हना, मोशान मारदे श्येत पाइनुडा?

- 30 गो साबुनम चिकसाकयी हना यो, आं गुड थम सफा पा चिकसाकयी हना यो, येरमीया २:२२  
 31 गे आं कली हिलोमीन ब्वारनीनी। मिनु आं वाम यो आं कली ग्रांरा दिप्ब।  
 32 मेको आं खोदेशो बेक्शा लाइब मुर ममाइ। मिनु गो मेको कली लोत्र लेन्ने मचाप्नुड। मोदेशो दुम हना, निसाफ पाइब आन डोंइती लोत्र पने चबु वा। उपदेसक ६:१०  
 33 आंस दातेम गारपाइकब सुइ मबाक्म। आंस दातेम गुड वोइकब सुइ मबाक्म।  
 34 परमप्रभुम आ कोक्के आं ची रे याक्त हना, आं कली महिंपद हना,  
 35 गो मेको नु महिंथु लोत्र पड वा। तन्न आ मिम्शो दुम्मेनु, गो तुइक्नुड” दे अय्युबमी शुआह डा बिल्दाद कली देंमाक्त।

## 10

### अय्युब आ थुं लुक्च लशो

- 1 मिनु अय्युबम “गो ब्रोंइचा मदाक्नुड। गो आं श्येत आ पर्वम लोत्र पस डा पस बाक्नुड। गो आं कशो थुंमी लोत्र पाइनुड।  
 2 गो परमप्रभु कली ‘आं कली सजाइ मगेयीनी’ देंनुड। आं कली मारदे निसाफ पाइनीनी, मेको शेंदीनी।  
 3 गे मुर आन कली दिप्शा, ग्येरनीनी? इन सेल्शो आन कली ममिम्चा रिम्शो लाक्नीनी? इन अरेशो लोत्र मटीबमी मरिम्शो पशो दाक्नीनी?  
 4 इन मिक्च मुर आन मिक्च खोदेशो बाक्बा? गे मुर आन कोत्रशो खोदेशो पा कोत्रनीनी? १ सामुएल १६:७  
 5 इन नाक्ती बेक्शा लाइब मुर आन नाक्त खोदेशो बाक्नीमी? इन ब्रोंइतीक बर्स मुर आन बर्स खोदेशो बाक्नीमी?  
 6 गे आं मरिम्शो पशो माल्शा, आं पाप थिश्शा गुंडनीनी?  
 7 गो दोस मताइब बाक्नुड, दे गे तुइक्ताक्नी हना यो, इन गुड रे आं कली सुइम प्रॉइने मचाप्ब, दे यो तुइक्नीनी।  
 8 डोंइती गे आं कली सेल्तीनी। मुल आं कली खतम पोक्नीनी? भजन संग्रह १३९:१४  
 9 गे आं कली खप के सेल्तीनी। मेको मिम्तीन। मिनु मुल फुरक सेल्तीनी? अय्युब ३३:६; उत्पत्ती २:७; उत्पत्ती ३:१९  
 10 गे आं कली दूध मोइश्शो खोदेशो पा आं ममा आ कोत्रजीम वोइक्तीनी। मोदेशो पा आं रां सेल्तीनी?  
 11 गे आं कली श्ये नु कुशुलम ग्योम्शा, रुश नु नाडीम बोइक्ताक्यीनी।  
 12 गे आं कली ब्रोंइतीक सोक्त गेतीनी। मिनु गेना हना यो दाक्ताक्नी। मिनु आं कली ब्रोंइचा गेचा कली कोत्रशा वोइक्तीनी।  
 13 आं कली श्येत गेचा कली डोंइती रे इन थुंम खुइश्शा वोइक्तीनी। मेको इन थुंम बाक्त, दे तुइक्ताक्ड।  
 14 गो पाप पाता हना, गे आं कली कोत्रना कोत्रन बाक्नीनी। मिनु आं मरिम्शो पशो मक्याम्नीनी।  
 15 गो थमान इन अरेशो मटीब बाक्ती हना, आं कली हिंचा डा दुम्ल। गो ठीक पाइब बाक्ती हना यो, आं पिया पोक्ने मचाप्नुड। मारदे हना गो आं मुनेम ब्रीशा, आं श्येत तना तन बाक्नुड।  
 16 गो ठेयब लेशो बाक्ती हना, गे गुप्स कली सिखार ग्यारशो खोदेशो पा आं कली माल्यीनी वा। मिनु लेशा इन ठेयब सक्तिम श्येत गेयीनी वा। यसैया ३८:१३  
 17 गे आं मरिम्शो पशो आ पर्वम नक सांकछी चाक्नीनी। मिनु आं पर्वम इन गाइक्तीक तेम्नीनी। आं पर्वम इन हुल हुल लडाइ पाइबपुकी चाक्नीनी।  
 18 गे मारदे आं कली जरमेपपाइक्नी? आं कली सुइम मतथु, बेक्शो नड हना, रिम्शो दुम वा। अय्युब ३:११; येरमीया २०:१४  
 19 गो जरमेसीन मजरमेशो नड हना, शाम्सीशा तुरसुम जाक्दीश्शो नड हना, दुम वा।

20 आं ब्रोंडतीक नाक्ती शुश मबाक्नीम। आं कली आं कान प्रोंडयीनी। मिनु आं थु इच्का नांडसीबा को?

21 लेशशा मजाक्तीक रागीम लचा क्येडा डोंडती, थम छिडछिड नु क्येर नाक्दो

22 नु ग्रांये माग्ये दुम्तीकेम लचा क्येडा डोंडती आं कली आं कान प्रोंडयीनी। मेकेर डा छेडछेड यो छिडछिड दुम्त” दे अय्युबम परमप्रभु कली देमाक्त। अय्युब ७:१०

## 11

सोफारमी अय्युब कली दोस गेशो

1 मिनु नामा डा सोफारमी

2 “मार, गो एको इश्का लोत्र आ पर्वम लोत्र मलेत्नुडा? मार एको लोत्रमाते आ लोत्र नेल्ल ठीक बाक्बा डा?

3 इन गेनायो मनुप्तीक लोत्रम मुर आन कली सिक्सी पपाइक्बा? गे शुक्शी पनीनु, इन कली मुने मदुम्बा?

4 गे ‘आं शेंशो ठीक बाक्ब। परमप्रभु, आ डोंडती गो ग्रांया मदिशो बाक्ती’ देंनीनी। अय्युब ९:२१; अय्युब १०:७

5 परमप्रभु ब्वाक्ल। मिनु इन कली लोत्र पवल दे आस पाइनुड।

6 मिनु मेकोमी खुइश्शो तुइक्तीक इन कली शेंदल। मारदे हना तुइक्तीक शुश बाक्नीम। परमप्रभुम इन मरिम्शो पशो आ पा डा तचा माल्शो सजाइ मगेव। इच्का ला गेत्तु।

7 मार, गे परमप्रभु आ खुइश्शोम मिम्शो तुइक्ने चाप्नीनी? गे नेल्ल क्येडा ठेयब सक्ति पाइश्शोम मार पने चाप्बा, मेको तुइक्ने चाप्नीनी?

8 मेको सरीड क्येडा यो इर बाक्ब। गे मार पने चाप्नीनी डा? मेको बेक्शो मुर आन बाक्तीक क्येडा यो लुक्च लशो बाक्ब। गे मार तुइक्ने चाप्नीनी डा?

9 मेको पुक्शोनु रागी क्येडा यो लाइश्शो बाक्ब। मिनु समुन्द्र क्येडा यो ब्रेम्शो बाक्ब।

10 मेको जाक्शा, मुर आन कली जेल्खानम चोक्शा, मुर आन कली निसाफ पचा कली खुप्ताक्व हना, सुम मेको कली तेक्ने चाप्बा डा?

11 सु सु शोर गाक्शो मुर बाक्मा, मेको परमप्रभुमी तुइक्ब। मेकोमी मरिम्शो पाइब आन कली तुइक्ब।

12 मूर्ख मुर रुप्व दुम्ने मचाप्ब। मेको मो दुम्त हना, ब्वाकी डा गधा आ चाइक्ब मुर दुम्शा जरमेशो खोदेशो दुम्ब।

13 मो हना यो गे इन थु परमप्रभु गे हिरनीनी, गे इन गुइ पोक्शा, मेको कली पुंडनीनी।

14 मिनु गे मरिम्शो पाइन बाक्तीनी हना, मेको कली थुमीन। मिनु परमप्रभु यावे आ अरेशो मटितीक इन ताम्बुम बाक्चा मगेन।

15 नोले गे थमा पा मारेइ दोस मतथु इन पिया पोक्नीनी। रिम्शो पा महिंथु बाक्नीनी।

16 मिनु गे इन श्येत प्रेंनीनी। गे मेको कली शाइश्शा लशो ब्वाक्कु खोदेशो मिम्नीनी।

17 इन ब्रोंडतीक नाक्त डा छेडछेड खोदेशो दुम्ब। मिनु इन श्येत डा छिडछिड सुनी डा छेडछेड खोदेशो दुम्ब।

18 गे थमा सुइक्नीनी। मारदे हना मेकेर आस बाक्ब। गे कोत्रचा पुंडसीशा, महिंथु रिम्शो पा बाक्नीनी। भजन संग्रह ४:९

19 गे सुइ आन क्येडा महिंथु इप्नीनी। मिनु शुश मुरुम इन शिशी तचा कली आस पाइनीम।

20 तन्न परमप्रभु यावे आ अरेशो मटीब आन मिक्च मताइनीम। मेको आन प्रोक्तीक लां देक्ब। मिनु मेको आन आस बेक्चा बाक्ब” दे सोफारम अय्युब कली देमाक्त। अय्युब ८:१४

## 12

अय्युबम सोफार कली लोत्र पशो



1 मिनु अय्युबम लोत्र लेशशा

2 “गेपुकी थमा पा हिकसीशो मुर बाकनीनी। मिनु तुइक्तीके गेपुकी नु बेक्शा लाइब। गो मेको तुइक्नुड।

3 तन्न इन खोदेशो रुप्तीक थुं आं के यो बाक्ब। गो यो इन खोदेशो जोक्ब तुइक्ब नड। मेको मुर नेल्लेम तुइक्नीम।

4 आं वारचपुकीमी आं पर्वम रिन्नीम। गो परमप्रभु कली पुंडता। मिनु मेकोमी लोत्र लेत्ताक्यी। गो ठीक पाइब दोस मताइब मुर बाक्ती हना यो, आं पर्वम रिन्नीम।

5 श्येत मजाइब, रिम्शो पा बाक्ब मुरपुकीम हिंचा डा श्येत जाइब आन कली तशा ग्रांया दीनीम। गो श्येत जशा ग्रेक्चा चिकशो कली श्येत तेम्नीनी।

6 मिनु रोइक्ब आन ताम्बुम थुं नाइश्शा बाक्नीम। मिनु परमप्रभु कली गाइक्पाइक्बपुकी रिम्शो पा ब्रोंइशा बाक्नीम। मेकोपुकीम आम सक्ति कली ठेयब सेल्नीम। हबकुक् १:११

7 मुल ब्वाकी डा जन्तु आन कली हिल्लो पने। मेकोपुकीम इन कली शेनीम। सरीडम बेरब चिकब आन कली हिल्लो पने। मेकोपुकीम इन कली देंनीम।

8 गो खप कली हिल्लो पने। मेकोमी इन कली शेंब। समुन्द्र डा डांडपुकीम इन कली शेनीम।

9 परमप्रभु यावेम मेको नेल्ल पशो बाक्ब, दे सुम मतुइक्नीमी डा?

10 ब्रोंइशा बाक्ब नेल्ल आन ब्रोंइतीक नु मुर नेल्ल आन ब्रोंइतीक सोक्त मेको आ गुडमी बाक्ब। गन्ती १६:२२; प्रेरित १७:२८

11 जचा थोत्रक ब्रोंवशो नु मब्रोंवशो लेंम तुइश्शो खोदेशो पा, पशो लोत्र रिम्शो नु मरिम्शो नोफाम मनेंबा डा?

12 खाल्पा आन दातेम तुइक्तीक बाक्ब। खूशो आन दातेमी रुप्तीक बाक्ब। अय्युब ८:८

13 मिनु परमप्रभु नु तुइक्तीक नु सक्ति बाक्शो बाक्ब। मेको नु अर्ती गेतीके नु रुप्तीक थुं बाक्शो बाक्ब।

14 मेकोमी प्रेतु हना, मेको लेंशा सेल्ले मचाप्नीम। मेकोमी मुर कली जेल्खानम चोक्तु हना, सुडमी मेको कली गुंडने मचाप्नीम। प्रकाश ३:७

15 मेकोमी ब्वाक्कु तेक्तु हना, रू नेल्ल सोवनीम। मेकोमी ब्वाक्कु प्रोंइतु हना, रागी खतम पोक्ब। १राजा १७:१,७; उत्पत्ती ७:१९-२३

16 सक्ति नु तुइक्तीक परमप्रभु नु बाक्ब। दूली पाइब नु दूली पपाइक्ब, निम्फा आ केन बाक्नीस। १राजा १२:२८-३०; २राजा १९:१०-३७

17 मेकोमी अर्ती गेब आन कली मुने दोक्पाइक्ब। मिनु निसाफ पाइब आन कली मूर्ख सेल्ब।

18 पिप आन फेक्शो वा प्रुइक्ब। मिनु मेको आन कली किप्शुर क्यिप्पाइक्ब।

19 च्ढेब आन कली मुने दोक्पाइश्शा सोइक्ब। डोंइती रे गेय पाइब आन कली गुंडब। १सामुएल २:३०-३२; १सामुएल २२:१८-१९

20 थमा सुइक्चा पुंडसीशो शेंब आन कली सिक्सी पपाइक्ब। खाल्पा आन तुइक्तीक लोत्र शोर गाक्शो सेल्ब।

21 हुकुम पाइब आन कली शुक्शी पचा पुंडसीब सेल्ब। सक्ति पाइश्शो आन कली मचाप्ब सेल्ब। १सामुएल १७:५; १सामुएल ३१:९; २राजा १९:३७; दानीएल ४:२९,३०

22 मेकोम छिडछिड आगाम बाक्शो गुंडब। मिनु थम छिडछिड कली छेडछेड सेल्ब।

23 रागी रागी आन कली हिकसीशो सेल्ब। नोले मेको आन कली खतम सेल्ब। रागी रागी आन कली ठेयब सेल्शा, मेकर डा मुर आन कली एर ओंथ ब्रपाइक्ब।

24 रागी डा हुकुम पाइब आन कली मरुप्ब सेल्ब। मिनु नोले मेको आन कली लां मबाक्शो गोरशो रागीम एर ओंथ हिरपाइक्ब।

25 मिनु मेकोपुकी हाम्सो मबाक्तीके, छिडछिडम सुल्शा गाक्नीम। मेको आन कली दुक्शो मुर खोदेशो पा गोल्चा चिकशा गाक्पाइक्ब।

## 13

अय्युब आ लोव्र

1 गो मेको नेल्ल ताता। गो मेको नेशा रुप्ता।

2 इन तुइशो, गो यो तुइकुड। गो इन क्येडा मतुइक्ब मनड।

3 तन्न गो नेल्ल क्येडा ठेयब सक्ति पाइशो आ डोंइती लोव्र पाइनुड। मिनु गो परमप्रभु नु लोव्र पा, आं पर्वम हिल्लो पाइनुड।

4 गेपुकीम चहिं इन जोल लोव्र पा ठेयब सेल्सीनीनी। गे शोर गाक्शो लेम्ब बाकनीनी।

5 गेपुकी सिकसी पा बाक्शो ननी हना, तुइक्ब मुर बाकनीनी, दे तुंडस वा। हितोपदेस १७:२८

6 मुल आं लोव्र नेनीन। पचा माल्शो लोव्र इन नोफा दाइशशा नेनीन।

7 गेपुकी परमप्रभु आ लोव्र पखु पाइनीनी? मोदेशो जोल लोव्र कली थमा बाक्ब, दे थमा सेल्नीनी?

8 मार गेपुकी परमप्रभु आ कुल कोव्रशा, मेको आ पा डा पचा माल्शो लोव्र देंनीनी?

9 परमप्रभुमी इन कली नाक्शा कोव्रडानु, गे नेल्ल ठीक बाकनीनी? मार, मुर आन मिक्च सिल्शो खोदेशो पा, मेको आ मिक्च यो सिल्ने चाप्नीनी?

10 गे खुइशोमी कुल कोवनीनी, परमप्रभुम इन कली थमा पा हुइक्ब।

11 परमप्रभु आ मान ततीकेम इन कली महिंपाइक्बा? मेको आ हिंच कोइशोमी इन कली ग्येत्थ लुकच मसेल्बा?

12 इन आं कली देशो लोव्र पुलु ला बाकनीम। इन बोल्यो अर्ती खप के बाकनीम।

13 सिकसी पा बाक्कीन। मिनु गो लोव्र पाइनुड। मिनु आं पर्वम मार मार दुम्बा, दुम्ल।

14 गो ब्रोंडनुडा देय मब्रोंडनुडा। गो बेक्नुडा कों ब्रोंडनुडा।

15 मेकोम आं कली साइक्ब। गो आस मपाइनुड। तन्न मुल गो आं लोव्र मेको आ डोंइती वोइक्नुड।

16 परमप्रभु कली मटीब मुर मेको आ डोंइती जाक्ने मचाप्नीम। मेको आं कली प्रोंइतीक दुम्ब।

17 नोफा दाइशशा, आं लोव्र नेनीन। मिनु आं शेशो रिम्शो पा नेनीन।

18 गो आं देंचा माल्शो लोव्र ठीक पाता। मिनु नोले गो दोस मताइब बाक्नुड, दे तुइक्नुड।

19 सुमी आं कली कछडी बाक्शा, दोस गेने चाप्बा? मोदेशो दुम्त हना, गो सिकसी पा फाल्शा बाक्शा, बेक्नुड।

20 परमप्रभु, गो इन कली थोव्रक निकशी पुंडनुड। मिनु गो इन डोंइती रे मखुइक्नुड।

21 आं कली श्येत मगेयीनी। मिनु इन हिंपाइक्तीकेमी आं कली महिंपतीन। अय्युब ९:३४

22 गे आं कली ब्रेत्तीनी। मिनु गो लोव्र लेत्नुड। डोंइती गो ब्वाक्नुड। मिनु गे आं कली लोव्र लेत्तीनी।

23 आं मरिम्शो पशो नु आ पाप गिश बाकनीमी? आं हेंथे पशो नु आं पाप तुइक्पाइय्यीनी।

24 गे मारदे इन कुल खुइक्नीनी? मिनु आं कली इन जोरी सत्रु खोदेशो पाइनीनी। अय्युब १९:११

25 गे बेरशो सफा कली यो हिंच कोइनीनी? गे सोव्रशो भूस आ नोले खोइक्नीनी?

26 गे आं पर्वम कशो लोव्र ब्रेक्नीनी। मिनु आं टिटा ना डा मरिम्शो पशो आ पर्वम सजाइ गेतीनी।

भजन संग्रह २५:७

27 आं खोइलीम ठेंडोरो थोक्ताक्नी। आं लां नेल्ल कोव्रशा, वोइक्नीनी। अय्युब ३३:११

28 मोपतीके मुर राक्शो थोव्रक खोदेशो पा जाम्नीमी। तुम्बुम खोइशो वा खोदेशो पा नुप्शो बाक्नीमी” दे अय्युबमी देंमाक्त।

## 14

ब्रोंडचा नु बेक्चा आ पर्वम लोव्र

1 मिनु लेशा अय्युबमी “मीश मुर रे जरमेशो बेक्शा लाइब मुर इक्का नाक्त ब्रोंडशा, श्येत ला जाइब।

2 मेको फू खोदेशो पा बोइशशा, सोल सुल बेक्ब। वांकु जाम्शो खोदेशो पा जाम्शा लाइब। भजन संग्रह ९०:५

3 गे मोदेशो कोवनीनी? मिनु गे आं कली निसाफ पाइनीनी?

- 4 सुमी ग्रांग्रा दिशो रे ग्रांग्रा मदिशो सेल्ले चाप्बा? सुइमी मचाप्ब।
- 5 मुर आ ब्रोंइतीक नाक्ती हिक्शा वोइश्शो बाक्नीम। मिनु मेको गिश महिना ब्रोंइशो बाक्नीमी, मेको तुइक्नीनी। इन देशो नाक्त लाक्ने मचाप्नीम। भजन संग्रह ३१:१६; भजन संग्रह ३९:५
- 6 गे मुर आन कली मकोवडीन। मिनु नाक्त किंत किंत गेय पाइब मुर खोदेशो ग्येरशा बाक्चा गेन। अय्युब ७१-२
- 7 रवा कली आस बाक्ब। तिम्शो नोले यो कोच्वा दाप्ब। मिनु वाना वान बाक्नीम।
- 8 मेको आ शाक्श खप आगाम चोक्ताक्व हना यो, मेको आ टुटा खप आगाम राक्त हना यो,
- 9 लेंशा इक्का ब्वाक्कु तवानु, वाब। मिनु ठेयब रवा खोदेशो पा राशी दाप्ब।
- 10 तन्न बेक्शा लाइब मुर बेक्शा जाम्शा लाइनीम। मुर आ सोक्त लाइब। मिनु ते लाइबा मतुइसीब?
- 11 दोपा दोम्ली डा ब्वाक्कु इक्का पा सोव्रना सोव्रन लाइबा, दोपा खोला आइक्च दुम्ना दुम्न लशा सोव्रबा,
- 12 मोपा बेक्शा लाइब मुर गोल्ब। मिनु मेको लेंशा गेनायो मबोक्ब। सरीड मक्याम्से सम्म, बेक्शो मुर लेंशा मबोक्नीम। मेको आन निन्द्रा रे मसेंसीनीम। अय्युब ७:१०
- 13 गे आं कली बेक्शो मुर आन बाक्तीकेम खुइक्तीन। इन गाइश्शो मनाइक्तीनी सम्म आं कली खुइक्तीन। मिनु नोले आं कली फ्रक्शा, गो नु ग्रुम्तीक नाक्त का वोतीन। यसैया २६:२०
- 14 मार, बेक्शो मुर लेंशा ब्रोंइनीमी डा? गो रिम्शो नाक्त कली रिम्शा बाक्नुड। आं श्येत मथुमु सम्म रिम्शा बाक्नुड।
- 15 मिनु गे आं कली ब्रेन्नी नोले, गो इन कली लोत्र लेत्नुड। मिनु गे इन आंम गुइम सेल्शो मुर, आं कली, शिशो पाइनीनी।
- 16 गे आं पशो नेल्ल मकोव्रनीनी। गे आं पाप हिक्शा मकोव्रनीनी।
- 17 आं हेंथे पशो नेल्ल ब्रेक्शा, इन थैलोम वोइश्शो बाक्ब। गे आं मरिम्शो पशो नेल्ल सुम्शा वोइश्शो बाक्नीनी। होसे १३:१२
- 18 मिनु डांडा ब्रेश्शा, जाम्शा लाइब। सेरथे फुल्लु मेको आ बाक्तीक रे याक्सीशो बाक्नीम।
- 19 ब्वाक्कुम फुल्लु आन कली योल्ब। बारशो ब्वाक्कुम रागी डा खप योल्ब। मोपा गे मुर आन आस थुम्पाइक्नीनी। रोमी ५:५
- 20 गे मेको आन कली गेना हना यो ग्रानीनी। मिनु मुर बेक्नीम। गे मुर आन रां फाइश्शा ताइक्नीनी।
- 21 मेको आन आल ठेयब दुम्शा मान पाइक्का पुंइसाक्म हना यो, मेकोपुकीम मतुइक्नीम। आइक्च सेल्चा पुंइसाक्म हना यो, मतुइक्नीम।
- 22 मेकोपुकीम आन रां डा श्येत ला तुइक्नीम। मिनु आन पबंम ला रोंका पाइनीम” दे अय्युबमी देंमाक्त।

## 15

एलीफाजमी लोत्र पशो

1 मिनु तेमान डा एलीफाजमी

2 “मार, जोक्ब तुइक्ब मुरुम ओदेशो डर ना पुं डा लोत्र पा लोत्र लेत्चा दुम्बा? मेको आ कोव्रजीम फश लोत्रमी प्रिंचा दुम्बा?

3 जोक्ब तुइक्बमी इन कली शोर गाक्शो लोत्र लेत्चा दुम्बा? मारेइ रिम्शो मपाइब लोत्र लेत्चा दुम्बा?

4 गे परमप्रभु कली मान पा हिंतीके तेक्नीनी। मिनु परमप्रभु कली मिम्शा पुंइचा यो तेक्नीनी।

5 इन देशो नेल्ल इन मरिम्शो पतीके रे पिशो बाक्ब। गे मिलो शिलो पशो दाक्नीनी।

6 इन आंम लोत्रमी इन कली दोस ताइब सेल्ब। गो इन कली दोस मगेनुड। इन लोत्र इन पबंम सांक्छी बाक्ब।

7 गे मुर आन दातेमी नेल्ल क्येडा डोंइती जरमेशो ननी? मार गे डांडा आन क्येडा डोंइती दुम्शो ननी?

- 8 गे परमप्रभु आ अर्ती गेतीकेमी बाक्शा नेंनी? तुइक्तीक इन के ला बाक्ब, दे मिम्नीनी? अय्युब ११:७; रोमी ११:३३
- 9 गो आंड मतुइश्शो गे मार तुइक्नीनी डा? गो आंड मरुप्शो गे मार रुप्नीनी डा? अय्युब १३:२
- 10 मिनु खाल्पा नु खूशोपुकी गो नु बाक्नीमी। इन आफ क्येडा यो खूशो मुर गोपुकी नु बाक्नीमी।
- 11 परमप्रभुम इन कली लेम्शो आइक्च मिम्नीनी? इन कली आइक्च सेंदाम रिम्शो लोत्र पशोमी इन कली मगाम्मे?
- 12 मारदे इन थुंमी इन कली दूली सेल्बा? मिनु गे मारदे गाइश्शा, मिक्च केक्शा कोवनी?
- 13 मारदे गे इन गाइक्तीक परमप्रभु कली कोइनीनी? मिनु गे ओदेशो लोत्र पाइनीनी?
- 14 बेक्शा लाइब मुर नेल्ल दोस ताइब दुम्नीम। मीश मुर रे जरमेशो सु ठीक पाइब बाक्ने चाप्बा डा? अय्युब १४:४
- 15 परमप्रभुम आंम आ मुर आन कली थमा मसुइक्ब। मिनु स्वर्गम बाक्ब यो मेको आ डोंइती दोस ताइब बाक्नीम। अय्युब ४:१८; अय्युब २५:५
- 16 मेको आन क्येडा ग्रांरा दिशो नु खराप दुम्शो कली दोपा थमा सुइक्बा डा? मेकोमी मरिम्शो पतीक ब्वाक्कु तूशो खोदेशो पा तूब कली दोपा थमा सुइक्बा डा?
- 17 मिनु गो इन कली शेंनन्नी। आं लोत्र नेनीन। गो आं तशो इन कली शेंनन्नी।
- 18 जोक्ब तुइक्वमी आन किकी पिपी रे आन तशो नेंशो लोत्र मखुइक्वतमे बाक्त।
- 19 मेको आन कली रागी आंम के सेल्चा कली गेशो बाक्माक्त। मेको आन दातेम अर्को रागी डा मुर सुइ मबाक्मा बाक्त।
- 20 परमप्रभु यावे आ अरेशो मटीब ब्रोंइमा सम्म श्येत जाइनीम। मरिम्शो मुर आन ब्रोंइतीक बर्स नेल्ल मोदेशो बाक्नीम। उत्पत्ती ४:१४
- 21 मेकोपुकीम हिंचा डा रेयके नेंनीमी। मेको मारेइ मारेइ गाप्शा बाक्मानु, मेको आन कली खतम सेल्ब जाक्ब।
- 22 मेकोपुकीमी 'छिडछिड रे लेत्ने मचाप्नीक' दे हिंनीम। मेकोपुकी तरवारम क्योरचा पुंडसीनीम।
- 23 मेकोपुकी जचा थोव्रक माल्शा, हिरना हिरन बाक्नीमी। मिनु आन श्येत जतीक नाक्ती जाक्चा चिक्शो बाक्ब, दे तुइक्नीमी।
- 24 मेकोपुकी श्येत नु हिंतीके आ पर्वम खिंखि पाइनीम। मेकोपुकीमी परमप्रभु कली लडाइ तोइनीम। लडाइ पचा चिक्शो पिप खोदेशो पा सासीशो बाक्नीम।
- 25 मारदे हना मेकोपुकीम परमप्रभु आ पर्वम आन गुइ क्युकशो बाक्नीम। मिनु नेल्ल क्येडा ठेयब सक्ति पाइश्शो कली 'गो इन क्येडा ठेयब नकी' दे मेको कली मटीनीम।
- 26 मिनु ठेयब नु बोल्यो तेक्तीक शेशा परमप्रभु कली लडाइ तोचा कली बारशो बाक्नीम।
- 27 मारदे हना मेकोपुकी शुश जशा, दोम्शो बाक्नीम।
- 28 मेकोपुकी ब्रेश्शो सहर नु मुर मबाक्चा डा खिंम बाक्नीम। मेको खिं ब्रेश्शा फुल्लु देल्शो बाक्नीम।
- 29 मेकोपुकी शोंप पाइश्शो मदुम्नीम। मेको आन शोंप मलीब। मेको रागीम मलीनीम।
- 30 मेकोपुकी छिडछिड रे ब्रोंइने मचाप्नीम। मीम मेको आन टोसा सोत्रपाइक्ब। मेको आन फु कली फशेम योल्ब।
- 31 मेकोपुकीम मबाक्शो लोत्र कली थमा मसुदमेक्ल। मोपा आंम आन कली मरिम्शो मसेल्मेक्ल। मारदे हना मेकोपुकीम मेको आ पा डा मारेइ मताइनीम।
- 32 मेको आन नाक्त जाक्चा क्येडा डोंइतीन मेको आन मारेइ मारेइ नुप्ब। मिनु मेको आन राशी गिगी मदुम्नीम।
- 33 मेकोपुकी क्येखीन हेम्शो अडगुर बोट खोदेशो दुम्नीम। मेको फू हेम्शो तेल रवा खोदेशो दुम्नीम।
- 34 मारदे हना परमप्रभु आ अरेशो मटीब नु गाक्ब शोर गाक्शो बाक्ब। घूस जाइब आन ताम्बुपुकी मीम नेक्ब।
- 35 मेकोपुकीम आल कुरशो खोदेशो पा मरिम्शो मिम्तीके कुरनीम। मिनु मरिम्शो पतीके जरमेनीम। मेको आन थुंम मरिम्शो पचा कली ठीक दुम्नीम" दे एलीफाजम अय्युब कली देमाक्त। यसैया ५९:४

## 16

अय्युबमी लोत्र लेशशो

1 मिनु अय्युबमी

2 “गो ओदेशो लोत्र शुश नेता। गे नेल्ल मोशा लेम्बु पाइब ला बाकनीनी।

3 मार मेको फश लोत्र गेनायो मनुप्बा? मारम इन कली ओदेशो लोत्र पपाइकबा?

4 गे आं खोदेशो बाकनी हना, गो यो इन खोदेशो पा लोत्र पने चबु वा। गो इन कली यो मोदेशो लोत्र पड वा। गो इन कली शुक्शी पा आं पिया हिकशा कोंडन्नी वा। भजन संग्रह २२:८

5 गो इन थुं बारपाइक्तीक लोत्र पड वा। मिनु आं शिशी पाइक्तीकेमी इन कली लेम्द वा।

6 गो ब्वाक्ती हना यो, आं खाइशो मसाब। गो सिक्सी पा बाक्ती हना यो, श्येत जस डा जस बाक्नुड।

7 थमा पा, परमप्रभुम आं कली थाम्पा दपाइक्ती। आं एर ओथ डा नेल्ल आन कली खतम सेल्लु।

8 मेकोम आं कली रोम्पाइक्ती। मिनु एको आं पर्वम सांकछी दुम्शो बाक्ब। गो रुश नु कुशुल ला लीशो बाक्नुड। एको यो आं पर्वम सांकछी दुम्शो बाक्ब।

9 परमप्रभुमी आ गाइशोमी आं कली एर ओथ फ्रशो बाक्ब। मिनु आं कली काइ मदाक्ब। मेकोम आं पर्वम आ खुड शेप्शो बाक्ब। आं जोरी सनुमी आं कली सिम्ले पा कोत्रशो बाकनीम।

10 मुरपुकीम आं कली शुक्शी पशो बाक्तेक्म। मेकोपुकीम आं चोत्रशो शुश राप्शो बाक्तेक्म। आं कली मरिम्शो पाइक्चा कली बुक्तेक्म।

11 परमप्रभुम आं कली थमा मसुइक्ब आन गुडमी गेशो बाक्ब। मिनु परमप्रभु यावेम आं कली आ अरेशो मटीब आन गुडम ब्वारशो बाक्ब।

12 गो रिम्शो पा बाक्शो नड। तन्न मेकोमी आं कली खोइक्तु। आं शुम ग्याइशशा चोकटा लाम्टा सेल्लती। मेकोम आं कली आ मिक्च आ क्रिक्बील सेल्लती। बिलाप ३:१२

13 आ लित्रा आन्बपुकीम आं एर ओथ नेल्ल हिरशो बाक्नीम। मेकोम आं कली शिशी मपथु, आं चिच ख्रिस्ताक्यी। मेकोम आं खाइल पुक्शा खपीम तोक्तु।

14 मेकोम आं कली पाक्ना पाक्न, लडाइ पाइब खोदेशो पा आं गे बारब।

15 गो आं रां सुम्चा कली भाडग्रा फेक्साक्यी। गो आं पिया फुरकुम पुम्ता। लेवी ३७:३४

16 डाक्शा डाक्शा आं कुल लल जिशो बाक्ब। आं मिक्च आ एर ओथ नेल्ल क्येर दुम्शो बाक्ब।

17 मो हना यो आं गुडमी मरिम्शो मपशो बाक्ती। आं पुंइशो लोत्र रिम्शो बाक्ब।

18 ए खप, आं हुश मसुमो। आं पुंइशो लोत्र गेनायो मनाइसेक्ल। उत्पत्ती ४:१०; इजीकीएल २४:७-८

19 मो हना यो आं सांकछी स्वर्गम बाक्ब। आं पर्वम लोत्र पाइब इर बाक्शो बाक्ब। अय्युब १७:३

20 आं वारचम आं कली शुक्शी पाइनीम। गो डाक्शा परमप्रभु गे कोत्रनुड। १सामुएल २:२५

21 मेकोमी परमप्रभु नु आंस दातेमी निसाफ पवल। मुर नु आ वारच आन दातेमी दोपा निसाफ पाइबा, मोपा पवल।

22 इच्छा बर्स नोले गो गेनायो मलेत्चा डा पा लाइनुड” देमाक्त। अय्युब १०:२१

## 17

परमप्रभु कली “वारच पने” दे पुंइशो

1 मिनु अय्युबमी “आं थुं जिक्शो बाक्ब। आं नाक्त नुप्शा लशो बाक्नीम। आं कली तुरस ठीक दुम्शो बाक्ब।

2 थमा पा, आं एर ओथ शुक्शी पाइब बाक्नीम। मेको आन शुक्शी पशो मारेड ममिम्नुड। अय्युब १६:१९

3 परमप्रभु, गे आंमा आं जाकटी दुमीन। अरु सु आं पर्वम जमानी बाक्ने चाप्बा डा?

4 गे मेको आन थुं रे रुक्तीक गुंइताक्नी। मोपतीके गे मेको आन कली ठेयब दुम्चा मगेनी।

5 सुमी आ शोप वारच आन कली कोंइशा योक्चा कली ब्रेप्बा, मेको आ आल जचा मताइनीम।

6 मेकोमी आं कली मुर नेल्ल आन दातेम कथा पतीक का सेल्शो बाक्ब। मुरपुकीमी आं डोंडती तोक्सीनीम। अय्युब ३०:९

7 आं मिक्च श्येत जतीके ब्रा ब्रा दुम्शो बाक्ब। आं गुड खोइल सोव्रशो बाक्नीम। गो वांकु खोदेशो बाक्नुड।

8 रिम्शो थुं पाइश्शो मुर मेको तशा, छक लाक्नीम। दोस मताइबपुकी परमप्रभु यावे आ अरेशो मटीब आन कली तशा गाइक्नीम।

9 मिनु ठीक पाइब मुर आमं लां रिम्शो पा गाक्नीम। मोदेशो मुर बोल्यो क्येडा यो बोल्यो दुम्ना दुम्न लाइनीम।

10 मुल गे नेल्ल लेतीन। गो इन दातेमी निप्स पाइश्शो मुर का यो मतडमी।

11 आं नाक्त नुप्तेक्म। आं मिम्शो नेल्ल मोशा दुम्त। मिनु आं थुं डा मिम्शो जाम्शा लत।

12 मेको मुरपुकीम नाक्दो कली नाक्त देंनीम। मिनु सुनी दुम्मेनु 'नां रिक्त' देंनीम।

13 गो आं आस पशो खिं बेक्शो मुर आन बाक्तीक बाक्त हना, आं ब्राख्ये छिडछिडम सेल्ला हना यो,

14 गो तुरस कली 'गे आं आफ बाक्नीनी' मिनु लुस्पु कली 'आं ममा आं समी बाक्नीमी' देंती हना,

15 आं आस पशो ते लाक्गा? मिनु सुम आं पबंम आस पाइबा?

16 मार एको बेक्शो मुर आन बाक्तीक आ नेक्था लाइबा? मार, गो नेल्ल उड फुरकुम काथा लाइनया?" दे अय्युबम देंमाक्त।

## 18

बिल्दादम लोव्र पशो

1 मिनु शुआह डा बिल्दादमी

2 "गे एको लोव्र गेना थुम्नीनी? डोंडती मिम्तीन। मिनु गो लोव्र पने चाप्नय।

3 मारदे आंइ कली बी ब्यफ खोदेशो मिम्तीनी? गे मारदे आंइ कली निप्स मपाइश्शो सुइक्नीनी?

4 गे इन गाइश्शोम आंम कली खतम सेल्सीनीनी। मार, इन पबंम गो रागी प्रॉइनीकी? सेरथे फुल्लु आन बाक्तीक रे याक्चा?

5 थमा पा, परमप्रभु यावे आ अरेशो मटीब आन बत्ती काप्ब। मिनु मेको आन मी डा राप रे हाम्सो मगूब। हितोपदेस १३:९

6 मेको आन ताम्बुम छेडछेड, छिडछिड दुम्ब। मिनु मेको आन बत्ती काप्शो बाक्ब। अय्युब २१:१७

7 मेको आन लांमी आन खोइली ग्येत्थ लुकच पाइब। मिनु मेको आन थुंम मिम्शा पशोमी मेको आन कली खोल्ब।

8 आमं खोइलीम मेको आन कली ब्वारदम लपाइक्ब। मेको ब्वारदम गिलसीशा बिक्तीकेमी दोक्नीम।

9 मेको आन खोइली ब्रिम्सोम रेट्चा पुंडसीनीम। क्येयलम रेट्चा पुंडसीनीम।

10 मेको आन पबंम खपीम ब्वारद आ डोरी खुइश्शो बाक्ब। मोपा आन लांमी ब्वारद दाइश्शो बाक्ब।

11 शुश हिंतीकेम मेको आन कली खिंखिं पपाइक्ब। ते बाक्तेक्म हना यो, मेकेर हिंतीके यो बाक्ब। लेवी २६:३६

12 मेकोपुकी शोव्रलु बेक्तीके सक्ति मपाइश्शो बाक्नीम। मिनु श्येत दुम्शा गोल्नीम।

13 रोइ पतीकेमी मेको आन कुशुल नेल्ल नेक्शो बाक्ब। बेक्पाइक्ब रोइमी मेको आन गुड खोइली मदुक्ब सेल्ब। गन्ती १२:१०-१२

14 मेको आन ब्रॉइशा बाक्तीक रां आन पबंम 'रिम्शो बाक्ब' दे थमा सुइश्शा, मुल रां रे गुंडचा पुंडसीनीम। मिनु हिंपाइक्ब पिप आ बाक्तीके लाइक्चा पुंडसीनीम।

15 मेको आन ताम्बुम मारेइ मलीब। मेको आन बाक्तीकेम गन्धक बुइश्शो बाक्ब।

16 मेको आन शाक्श खप आगाम सोव्रनीम। मिनु आन राशी सोल सुल बेक्नीम।

17 रागी डा मुरुम मेको आन कली प्रेनीम। मेको आन नें ममिम्नीम।

18 मेको छेडछेड रे छिडछिडम खेरचा पुंडसीनीम। मिनु रागी रे गुंडचा पुंडसीनीम।

19 मेको आन आल मबाक्नीम। आन चच युड यो मबाक्नीम। मेको आन डोंडती डा बाक्तीकेमी सुड ब्रोंडशा मबाक्नीम।

20 पच्छिम डा मुरपुकी मेको आन श्येत जशो नेंशा हिंनीम। पूरब डा मुरपुकी शुश हिंशा खिंखि पाइनीम। भजन संग्रह ३७:१३

21 थमा पा, परमप्रभु आ अरेशो मटीब मुर आन बाक्तीके मोदेशो दुम्ब। परमप्रभु कली मतुडक्व मोदेशो न दुम्नीम” दे बिल्दादम अय्युब कली लोत्र लेत्ता बाक्त।

## 19

अय्युबम लोत्र लेशो

1 मिनु अय्युबमी

2 “गे आं कली गेना सम्म श्येत गेनीनी? मिनु इन लोत्रमी आं कली मरिम्शो सेल्नीनी?

3 आं कली १० खेयप सम्म दोस गेतीनी। आं कली काइ मरिम्शो लोत्र पचा मुने मपाइनीनी?

4 गो थमा पा मरिम्शो पशो बाक्ती हना यो, मेको मरिम्शो पशो आं के बाक्ब।

5 थमा पा, गे आं क्येडा ठेयब दुम्चा मिम्नीनी। मिनु आं श्येत तशा, आं कली मरिम्शो सुडक्नीनी।

6 परमप्रभुमी आं कली मोशा श्येत गेती। आं एर ओंथ नेल्ल ब्वारद दाइशो बाक्ब।

7 गो ‘हुश खाक्श पोक्तीमी’ दे ग्रीती हना यो, आं कली लोत्र मलेप्ब। ‘वारच पाइय्यीनी’ दे पुंडता हना यो, निसाफ मताइनुड। येरमीया २०:८; हबकुक १:२; अय्युब ३०:२०

8 मेकोमी आं लां तेक्शो बाक्ब। मिनु गूशा लने मचाप्नुड। मिनु मेकोमी आं लां छिडछिडम सुम्तु। अय्युब ३:२३; बिलाप ३:७,९

9 मेकोमी आं मान ततीक रोइक्ताक्वी। आं पिया रे आं सिरपेच पुडक्तु।

10 मेकोम आं कली लुकच लाइब सेल्ती। गो खतम दुम्ती। रवा तुल्शो खोदेशो पा आं आस नेल्ल नुप्पाइक्तु।

11 मेको आं पर्वम गाइक्ताक्व। मिनु आं कली आ जोरी सत्रु खोदेशो मिम्ताक्वी। अय्युब १३:२४; अय्युब ३३:१०

12 मेको आ लडाइ पाइबपुकी बुक्शा आं कली पुम्नीम। मेकोपुकीम आं ताम्बु आ एर ओंथ नेल्ल आन बाक्तीक सेल्नीम।

13 मेकोम आं खिं डा मुर आन कली आं क्येडा डोन वोइशो बाक्ब। आं वारच आं कली मतुडक्व दुम्शो बाक्नीम। भजन संग्रह ३१:१२

14 आं नेक्था डा मुर नु गो नु गारब वारच आं क्येडा डोन दुम्तेक्म। भजन संग्रह ३८:१२

15 आं खिंम पौना दुम्शा बाक्बपुकीम प्रेंताक्वीमी। आं वाइलीमपुकीम आं कली अर्को रागी डा मुर खोदेशो पा मतुडशो खोदेशो पाइनीम।

16 गो आं वाइल कली ब्रेत्नुड। तन्न मेकोम लोत्र मलेप्ब। गो मेको कली शुश लेम्शा पुंडचा माल्नुड।

17 आं सास आं मीश कली रिना नु ग्रांग्रा दिशो दुम्शो बाक्ब। गो आं खिं डा मुर आन कली ग्रांग्रा दिशो दुम्शो बाक्ती।

18 आइक्च आलपुकीमी यो आं कली तशा ग्रांग्रा दित्नीम। मिनु आं कली तामेनु, मेकोपुकीम शुक्शी पाइनीम।

19 गो नु गारब वारच नेल्लेम आं कली ग्रांग्रा दित्नीम। आं दाक्शो मुरपुकी आं पर्वम दूली पा बोक्शो बाक्नीम।

20 आं के रुश नु कुशुल ला लीशो बाक्ब। गो बेक्चा चिक्शो बाक्ती।

21 आं वारचपुकी, आं कली शिशी पाइय्यीनी, शिशी पाइय्यीनी। मारदे हना परमप्रभुम आं कली दिप्शा, श्येत गेशो बाक्ब।

22 गेपुकीमी यो परमप्रभुमी आं कली खेदा पशो खोदेशो पा मारदे खेदा पाइनीनी? मार, आं कली मिश डा श्येत गेशा मरूनी?

23 आं पशो लोव्र ब्रेकशो हना, मेको किताबम ब्रेकशो हना, रिम्शो दुम वा।

24 मेको फलाम के याम मुशा नु सिसाम ब्रेकशो हना, फुल्लुम गेना हना यो लीचा डा पा मुशा ब्रेकशो हना, रिम्शो दुम वा।

25 तन्न आं कली श्येत रे प्रोंइब का बाक्ब। मेको नोले डा नाक्त रागीम जाक्शा आं सांकछी दुम्ब। मेको गो तुइक्नुड। यसैया ४१:१४; होसे १३:१४; अय्युब २६:६

26 मिनु आं कुशुल राक्शा खतम दुम नोले, गो आं रांमी परमप्रभु कली ताइनुड। भजन संग्रह १७:१५; भजन संग्रह ७३:२४

27 गो मेको कली आं मिक्चीमीन आं नेक्था ताइनुड। गो मेको तचा कली शुश रिम्ना रिम्न बाक्नुड।

28 गेपुकीमी आं कली 'एको कली दोपा खेदा पचा? मारदे हना श्येत आ शाक्शा एको आ आगाम बाक्ब' देंतीनी।

29 गेपुकी तरवार क्येडा हिनीन। मारदे हना गाइश्शो आ सजाइ तरवार रे पा जाक्ब। मिनु निसाफ का बाक्ब, दे तुइक्तीन" दे अय्युबम लोव्र लेत्तीमी बाक्त।

## 20

सोफारमी लोव्र पशो

अय्युब १५:-; १८:-

1 मिनु नामा डा सोफारमी

2 "नोफा दाइक्तीन। आं मिम्शोम आं कली लोव्र लेप्पाइक्ब सेलती। मारदे हना गो आं थुं काइ मनुशो बाक्नुड।

3 गो आं कली शुक्शी पशो लोव्र नेशो बाक्नुड। आं थुं डा रुप्तीकेम आं कली लोव्र लेप्ब सेल्शो बाक्ब।

4 गे एको माइत लोव्र तुइक्नीनी? मुर रागीम बाक्मा रे एको लोव्र बाक्शो बाक्ब।

5 एको मार लोव्र बाक्ब देशा हना, परमप्रभु यावे आ अरेशो मटीब आन ठेयब लेशो इच्का नाक्त ला लीब। मेको आन ग्येरसीशो याम का ला लीब।

6 मेको आन ठेयब लेत्तीक सरीड खोइ लाइक्त हना यो नु मेको आन पियाम गोस्स कली थिप्नु हना यो, भजन संग्रह ३७:३५-३६

7 मेको ख्री खोदेशो पा जाम्नीम। मिनु मेको आन कली ताइब नेल्लेम 'मेको ते लाक्गमे, खोइ?' देंनीम। मीका ७:१०

8 मेकोपुकी डोमु पशो खोदेशो पा जाम्शा लाइनीम। मेको आन कली मथिसीब। मेकोपुकी नाक्दो तशो ततीक खोदेशो पा जाम्शा लाइनीम।

9 मेको आन कली तुइक्बपुकीम लेशा गेनायो मताइनीम। मिनु आन बाक्तीके रे यो जाम्शा लाइनीम। भजन संग्रह ३७:१०

10 मेको आन आलपुकीम प्रुडग आन शिशी माल्नीम। मिनु मेको आन तौपुकीमी प्रुडग आन शोंप लाइश्शा गेनीम।

11 मेकोपुकी टिटा दुम्शा, सक्ति पाइश्शो बाक्तेक्म हना यो, बेक्शा, तुरस डा फुरकुम वोइक्चा पुंइसीनीम।

12 परमप्रभु यावे आ अरेशो मटीब आन मरिम्शो पशो मेको आन कली ब्रोव्रशो बाक्त हना, मेको आन लें आगाम खुइश्शा वोइक्नीम।

13 मेको आंम कली वोइश्शा, मप्रोंइब। मेको आन शोव्रम वोइक्तेक्म हना यो,

14 मेको आन जचा थोव्रक आन कोव्रजम फांडसीब। मिनु मेकेर बुस्स आन बीस दुम्ब।

15 मेकोपुकीम मेको आन नेक्शो शोंप लेशा मेचा माल्नीम। परमप्रभुमी मेको आन कली मेपाइक्ब।

16 मेकोपुकीम बुस्स आ बीस युप्नीम। मिनु बीस पाइश्शो बुस्सुमी मेको आन कली कोक्शा साइक्ब।

17 मेको आन के तर नु खुदो शुश बाक्त हना यो, ग्येरशा जचा तूचा मताइनीम।



- 18 मेको आन श्येत पा चेम्शो मारेइ मारेइ मजथु लेशशा गेचा माल्नीम। मिनु आन ग्याप्शा लेयशा चेम्शो क्येट ग्येरशा जचा मताइनीम। ब्यवस्था २८:३०-३३
- 19 मारदे हना मेकोपुकीमी पुडुग आन कली दिप्शा श्येत गेम्तेकम। मेकोपुकीम आन मसेल्शो खिं आंम के सेल्शो बाक्नीम।
- 20 मेको आन शोत्रलु गेनायो मउइक्ब। मिनु मेको आन शोंप मलीब।
- 21 मेकोपुकीम जामे नोले मारेइ महेक्ब। मोपा आन शोंप नेल्ल नुप्शा लाइब।
- 22 मेको आन मिम्शो नेल्ल गाप्त हना यो, मेकोपुकी श्येत जाइनीम। मारेइ मारेइ श्येत मेको आन तार कोम्सीब।
- 23 मेकोपुकी रूने थुम्मे नोले, परमप्रभुम आ गाइशो मेको आन तार मोइक्ब। दोशो जामे मोशो परमप्रभुम सजाइ गेचा पुंडसीनीम।
- 24 मेकोपुकी फलाम के या रे प्रोक्तेकम हना यो, कांसा के डर पाइशो ब्राम मेको आन कली खिप्ब।
- 25 मेको ब्रा मेको आन कली खिश्शा यूनीम। मेको ब्रा आन टल्केशो डरम मेको आन खाइल पुक्शा गुंडब। मोपा मेको शुश हिंनीम। ब्यवस्था ३२:४१
- 26 मेको आन शोंप कली थम छिडछिडमी रिम्शा बाक्शो बाक्ब। थाम्पा ब्रशो मीम मेको आन कली दाक्ब। मिनु आन ताम्बुम लीशो मारेइ मारेइ नेक्ब। ब्यवस्था ३२:२२
- 27 स्वर्गम मेको आन मरिम्शो पशो नेल्ल कोइब। रागी मेको आन कली दोस गेचा कली ठीक दुम्शो बाक्ब।
- 28 मेको आन खिं डा शोंप नेल्ल योल्नीम। मेको गाइक्ता नाक्त मेको नेल्ल योल्नीम।
- 29 मेको परमप्रभु यावे आ अरेशो मटीब आन भाग बाक्ब। परमप्रभुमी गेशो इनाम मेकोन बाक्ब” दे लोत्र लेत्ता बाक्त।

## 21

### मटीब आन पर्वम शेंशो

#### 1 मिनु अय्युबमी

- 2 “इन नोफा दाइशशा, आं लोत्र नेनीन। मेको आं कली इन गेशो लेम्तीके बाक्ब।
- 3 गो लोत्र पडानु, आं कली फाल्शा नेनीन। गो लोत्र थुमु नोले आं कली शुक्शी पने चाप्नीनी।
- 4 मार, आं थुं मनुथु पशो लोत्र बेक्शा लाइब मुर आन कली ममाइ। मारदे गो फाल्शा बाक्चा माल्नुडा?
- 5 आं कली कोत्रयीनी। मिनु सिक्सी पने। मारदे हना गो ग्रांया दिचा डा तांडसीनुड। इन शोत्र सुम्सीन। अय्युब ४०:४
- 6 गो आं कली ‘मार दुम्बा’ दे मिम्नुड। मिनु ग्रीचोक पा हिंनुड। आं रां नेल्ल थुर थुर पा खिखि पाइब।
- 7 परमप्रभु यावे आ अरेशो मटीब मुर मारदे ब्रोइना ब्रोइन बाक्नीमी? मारदे मेकोपुकी खूशो दुम्मानु यो बोल्यो नु सक्ति पाइशो दुम्नीमी? येरमीया १२:१
- 8 मेको आन तमी तौ मेकोपुकी नु बाक्नीमी। मिनु मेकोपुकीम आन चच युइ नेल्ल ताइनीम।
- 9 मेको आन खिंम महिंथु बाक्नीम। परमप्रभुम मेको आन कली सजाइ मगेब।
- 10 मेको आन बी ब्यफ सोशा बोशा दुम्नीम। बी नेल्ल गिक्नीमी, गेनायो मशाप्नीम।
- 11 मेको आन आल आन कली क्यारश भेडा आन पाठा खोदेंशो पा ग्यारथ सोइक्नीम। मिनु मेको आन आइक्च आल सिल पना पन प्रेक्शो बाक्नीम।
- 12 मेकोपुकी खैजडी नु बीना ताप्शा कुम्सो पाइनीम। मिनु बांसुरी ताप्शा ग्येरसीनीम।
- 13 मेकोपुकीम आन नाक्त ग्येरशा सोइक्नीम। मिनु मेको आन थुं नाइशशा बेक्शो मुर आन बाक्तीक लाइनीम।
- 14 मेकोपुकीम परमप्रभु कली आंइ रे पा डोन लन। गो इन लाम गाक्चा मदाक्नीकी, देंनीम। अय्युब २२:१७
- 15 ‘नेल्ल क्येडा ठेयब सक्ति पाइशो सु बाक्म? गो मारदे मेको आ गेय पचा माल्नीकी? गो मेको कली पुंडशा मार ताइनीकी डा?’ देंनीम। प्रस्थान ५:२; २ राजा १८:३५; भजन संग्रह १२:५; दानीएल ३:१५

16 परमप्रभु यावे आ अरेशो मटीब आन सोशा बोशा लशो, मेको आंम आन पतीके ममाड। मिनु आन मिम्शो तुइश्शा, गो ग्रांया दीनुड। अय्युब २२:१८

17 परमप्रभु यावे आ अरेशो मटीब आन बत्ती गिश खेयप काम्सीबा? मेको आन पियाम गिश खेयप हिंचा डा श्येत जुक्बा? शुश खेयप मजुक्ब। परमप्रभु आ गाइश्शोमी मेको आन कली गिश खेयप श्येत गोबा? शुश खेयप मगेब।

18 गिश खेयप फशेम बेरशो पराल खोदेशो दुम्नीमी? मेकोपुकी गिश खेयप फश गिवारम बेरपाइश्शो भूस खोदेशो दुम्नीमी? शुश खेयप मदुम्नीम। भजन संग्रह १:४

19 गेपुकीम 'परमप्रभुमी मेको आन मरिम्शो पतीके आन तमी तौ आन कली खेक्शा वोइक्ब' देंनीनी। मोदेशो मदुम्ल। तन्न मेकोमी मेको नेल्ल आन कली सजाइ गेवल। मिनु मेकोपुकीम तुइक्तमेक्ल। अय्युब २०:१०; प्रस्थान २०:५

20 मेकोपुकीम आंमा आन कली खतम दुम्तीक तामेक्ल। मेकोपुकीम नेल्ल क्येडा ठेयब सक्ति पाइश्शो आ गाइश्शो तुइक्तमेक्ल।

21 मुर आन ब्रोंइतीक नुम नोले मेको आन खिं कोवने चाप्नीमी डा? मेको आन ब्रोंइतीक नुप्ब।

22 मुरुम परमप्रभु कली जोक्तीक तुइक्तीक लोव्र शेंने चाप्नीमी डा? मेकोमी इर बाक्ब आन कली यो निसाफ पाइब। उपदेसक ५:७

23 का निक्शी मुर आन माल्लशो नेल्ल गाप्शा बेक्नीम। मेको काइ महिंथु रिम्शा बाक्नीम।

24 मेको आन रां दोम्शो बाक्नीमी। मेको आन रुशेम मासी बाक्ना बाक्न बेक्नीम।

25 का निक्शी चहिं श्येतम ब्रीशा, आन थुं कशो दुम्शा बेक्नीम। मेकोपुकीम गेनायो ग्येरचा मतामे।

26 मिनु मेको नेल्ल काथा थिम्चा पुंइसीनीम। मिनु लुस्पुमी मेको आन कली सुम्नीम। अय्युब ३:१८-१९

27 गेपुकी मार मिम्ना मिम्न बाक्नी, गो मेको रिम्शो पा तुइक्नुड। मेको आं पबर्म दूली मिम्तीक लोव्र बाक्ब, दे गो तुइक्नुड।

28 गेपुकीम 'मेको सासन पाइब आ खिं ते बाक्म? मेको परमप्रभु यावे आ अरेशो मटीब मुर आन ताम्बु ते बाक्नीमी?' दे हिल्लो पाइनीनी।

29 मार, गेपुकीम लां गाक्ब आन कली गेनायो हिल्लो मपनी? गे मेको आन देशो मतुइक्नीनी?

30 शुश हिंचा डा श्येत दुम्मेनु, परमप्रभु यावे आ अरेशो मटीबपुकी ब्रोंइचा ताइनीम। मिनु परमप्रभु आ गाइक्वी नाक्त मेकोपुकी प्रोंइचा पुंइसीनीम।

31 सुइम मेको आन कली दोस मगेनीम। सुइमी मेको आन मरिम्शो पशो आ पा डा क्येक्क मलेत्नीम।

32 मिनु मेको बेक्शा, कुरशा तुरसुम लाइक्चा पुंइसीनीम। मिनु मेको आन तुरसुम खाल पाइब वोइक्नीम।

33 तुरस डा खप यो मेको आन कली रिम्शो बाक्ब। मिनु शुश मुर मेको आन नोले खोइक्नीम। मिनु हिक्ने मचाप्चा डा पा शुश मुर मेको आन क्येडा डोंइती लाम्तेक्म।

34 गेपुकी इन देशो फश लोव्रम दोपा आं कली लेम्नीनी डा?" दे अय्युबमी सोफार कली लोव्र लेत्ता बाक्त।

## 22

एलीफाजमी अय्युब कली दोस गेशो

1 मिनु तेमान डा एलीफाजमी

2 "बेक्शा लाइब मुरुम परमप्रभु कली मार पने चाप्बा डा? शुश जोक्ब तुइक्ब मुरुम यो मेको कली मार गेय पने चाप्बा डा?

3 गे ठीक पाइब बाक्तीनी हना, नेल्ल क्येडा ठेयब सक्ति पाइश्शो कली मार रिम्शो दुम्बा डा? इन पशो नेल्ल दोस मततीक बाक्त हना, मेको कली मार रिम्शो दुम्बा डा? अय्युब ३५:६-८

4 इन परमप्रभु कली मान पा हिंतीके आ पबर्म इन कली महुइक्ब। मेको आ पबर्म इन कली निसाफ मपाइब।

5 इन परमप्रभु यावे आ अरेशो मटितीके ठेयब बाकब। इन मरिम्शो पतीके गेनायो मनुष्य।

6 गे मोशान इन लोकब आ वा जाकटी लाइक्तीनी। आन वा रोइश्शा शिश्रा सेल्तीनी। प्रस्थान २२:२५-२६; अय्युब २४:९-१०

7 गे तूतू दाक्शा, लकचा सोव्रशो मुर आन कली ब्वाक्कु मगेनी। मिनु शोव्रलु बेक्शो मुर आन कली जचा थोव्रक मगेनी। अय्युब ३१:१७; मती २५:४२-४३

8 सक्ति पाइश्शो मुर आन के शुश रू बाक्नीम। मेको आन दाक्शो मुर आन कली मेकेर बाक्चा गेनीम।

9 गे आन वोंइश बेक्शो मीश मुर आन कली श्येत्थ गुड सोइक्ताक्नी। मिनु रोम रोइक्च आन तचा माल्लो मगेनी। अय्युब २९:१२-१३

10 मोपतीके इन गाक्तीक लां आ एर ओंथ नेल्ल ब्वारद दाइश्शो बाक्नीम। मिनु इन कली इन मतुइक्चा डा पा शुश हिंतीके जाक्ब।

11 मिनु तने मचाप्चा डा छिडछिडम इन कली सुम्ब। मिनु ब्वाक्कु बारशा यिशा इन कली सुम्ब।

12 परमप्रभु इर स्वर्गम बाक्ब। सोरुल आन कली कोव्रडीन। गिश इर बाक्नीमी।

13 मोपतीके गे 'परमप्रभुमी मार तुइक्चा डा? मेकोम गोस्स आ छिडछिड रे दोपा निसाफ पाइबा डा?

14 गोस्स आ छिडछिड मेको कली सुम्तीके, मेकोम आंइ कली तने मचाप्ब। मिनु मेको सरीडम एर ओंथ गाक्शा बाक्ब' देंतीनी।

15 गे परमप्रभु यावे आ अरेशो मटीब आन माइत लां मप्रोंइब बाक्नीनी?

16 मेको आन नाक्त मजाक्थु साइक्चा पुंइसाक्म। मेको आन जग ब्वाक्कुम योल्ताक्व। अय्युब १५:३२-३३; उत्पत्ती ७:२१

17 मेको मुरपुकीम परमप्रभु कली 'आंइ रे पा डोन लन। नेल्ल क्येडा सक्ति पाइश्शोमी आंइ कली मार पने चाप्बा डा?' देंतेक्म। अय्युब २१:१४

18 मो हना यो मेकोमी, मेको आन खिं रिम्शो थोव्रकमी प्रिताक्व। तन्न परमप्रभु यावे आ अरेशो मटीब आन मिम्शो काइ मदाक्नुड।

19 ठीक पाइबपुकी मेको आन कली तशा ग्येरसीनीम। दोस मताइबपुकीम मेको आन कली शुक्शी पा रितीम। भजन संग्रह १०७:४२

20 मेकोपुकीमी 'थमा पा, ई जोरी सत्रु साइक्चा पुंइसाक्म। मिनु मेको आन शोंप मीम नेक्लु' देंनीम।

21 परमप्रभु नु गारीन। मिनु थुं नाइक्तीन। मो पाइतीनी हना इन रिम्शो दुम्तीके लेंशा ताइनीनी।

22 मेको आ शेंशो पने। मिनु इन थुंम वोतीन।

23 गे नेल्ल क्येडा ठेयब सक्ति पाइश्शो गे लेतीन। मिनु डोंइती डा खेदेंशो दुम्नीनी। गे इन ठीक मपतीके इन क्येडा डोन वोतीन। अय्युब ८:५-७; अय्युब ११:१४-१५

24 गे सुन फुरक खेदेंशो मिम्ताक्नी हना, ओफीर डा सुन कली खोला डा फुल्लु खेदेंशो मिम्ताक्नी हना,

25 नेल्ल क्येडा ठेयब सक्ति पाइश्शो इन शोंप दुम्ब। मेको इन सुन चांदी दुम्त हना,

26 मेना नेल्ल क्येडा ठेयब सक्ति पाइश्शो कली मिम्शा, ग्येरशा बाक्नीनी। मिनु गे इन पिया पोक्शा परमप्रभु गे कोव्रनीनी।

27 गे मेको कली पुंइनीनु, मेकोमी इन पुंइशो नेंब। मिनु गे इन जशो कसम खाप्नीनी। भजन संग्रह ५०:१४-१५

28 गे मार पाइनुड, दे मिम्नीनी, मेको दुम्ब। मिनु इन लांम छेडछेड दुम्ब।

29 मारदे हना मेकोमी ठेयब लेशो लोव्र पाइब आन कली आइक्च सेल्ब। ब्रेम्शो मुर आन कली चहिं प्रोंइब। १ पत्रुस ५:५

30 मेकोमी दोस ताइब आन कली यो प्रोंइब। गे दोस मताइब बाक्तीके मेको आन कली प्रोंइब" दे एलीफाजमी अय्युब कली लोव्र लेत्ता बाक्त। भजन संग्रह १८:२१, २५; २कोरिन्थी ५:२

## 23

अय्युबम लोत्र पशो

1 मिनु अय्युबमी

2 “मुलाकती आं देशो लोत्र थुं मनुचा डा बाकब। गो हुकयी पना पन बाकती हना यो, परमप्रभुमी आं कली श्येत गेना गेन बाकब।

3 गो मेको कली ते बाकबा, मेको तुइव्तु हना, गो मेको आ बाकतीके लाड वा।

4 गो आं श्येत मेको आ डोंइती नेल्ल शोवडु वा। गो मेको कली आं देंचा माल्शो लोत्र नेल्ल देंड वा।

5 मेकोमी आं कली मार लोत्र लेप्बाकमे गो मेको तुइव्तु वा। मिनु गो मेकोम आं कली मार देंबाकमे मेको रुबु वा।

6 मेको आ ठेयब सक्तिमी गो नु लोत्र पाइबा डा? ममाइ, परमप्रभुमी आं कली गेनायो दोस मगेब।

7 रिम्शो थुं पाइश्शो मुरपुकीमी मेको नु लोत्र पने चाप्नीम। मिनु गो आं निसाफ पाइब रे गेना हना यो प्रोंइचा पुंडसीड वा।

8 गो डोंइती गे लती हना, मेको मेक मबाकब। गो नोले गे लेत्ती हना यो, मेको मेक मबाकब।

9 मेकोमी पेरा गे खुइक्ताकव हना, गो मेको कली मताइनुड। गो ग्युरा गे हिरसीडानु यो मेको कली तने मचाप्नुड। अय्युब ४२:५

10 तन्न मेकोमी आं गाकशो लां तुइकब। मेकोमी आं कली नाकशा कोवयीनु, गो सुन खोदेशो दुम्नुड। भजन संग्रह १७:३; भजन संग्रह १३९:२३-२४

11 गो मेको आ नोले खोइश्शो बाक्नुड। गो मेको आ लांम ला गाकशो बाकती। गो ग्युरा पेरा मपड।

12 गो मेको आ शेंशो पाता। मेको आ लोत्र नाक्त कित कित डा आं जचा थोव्रक क्येडा यो शुश मिम्ताकड।

13 तन्न मेको आ कान बाकब। मिनु सुमी मेको कली तेक्ने चाप्बा डा? मेकोमी आ मिम्शो खोदेशो पाइब।

14 मेकोमी आं कली मार पचा मिम्बा, मेको नेल्ल पाइब। मिनु मोदेशो शुश मिम्ब।

15 मोपतीके गो मेको नु गुम्चा शुश हिंनुड। गो मेको कली मिम्शा हिंशा खिंखि पाइनुड।

16 परमप्रभुम आं थुं थपाइश्शो बाकब। नेल्ल क्येडा ठेयब सक्ति पाइश्शोमी आं कली हिंपाइकब।

17 छिडछिडमी आं कली सिक्सी पपाइक्ने मचाप्ब। मेको छिडछिडमी आं कली सुम्ने मचाप्ब” दे अय्युबमी देंमाक्त।

## 24

परमप्रभु कली मटीब

1 मिनु अय्युबमी “नेल्ल क्येडा ठेयब सक्ति पाइश्शोमी निसाफ पतीके नाक्त मतुइकपदा? आ नेकथा बाकबपुकीम यो मेको आन नाक्त मारदे मतुइक्नीमी? उपदेसक ३:११; उपदेसक ८:६

2 परमप्रभु यावे आ अरेशो मटीब मुरपुकीम सांद डा फुल्लु याक्नीम। मेकोपुकीम क्यारश भेडा खुइ पशा योव्रनीम। ब्यवस्था २७:१७

3 मेकोपुकीम रोम रोइक्च आन गधा खुल्शा लाइक्नीम। मिनु वोंइश बेक्शो मीश मुर आन ब्यफ जाकटी वोंइसीनीम।

4 मेकोपुकीम पुडग आन कली लां मेर चुशा थोक्शा गाक्नीम। रागी डा पुडग आन कली खुइक्पाइक्नीम।

5 ब्वाकी डा गधा गोरशो रागीम जचा थोव्रक माल्शा गाक्शो खोदेशो पा, पुडगपुकी जचा थोव्रक माल्शा गाक्नीम। मिनु गोरशो रागीम मेको आन तमी तौ आन कली जचा थोव्रक माल्नीम।

6 पुडगपुकीम मुर आन रूम सिला माल्नीम। परमप्रभु यावे आ अरेशो मटीब मुर आन अडगुर रूम सिला पाइनीम।

7 वा मबाकतीके मेकोपुकी शिश्रा इप्नीम। मेको आन के ग्यूमी फेक्तीक मबाकब।

- 8 मेको पहाडम बाक्शा रेउम जिल्मीम। फाम्सीतीके मबाक्तीके, फुल्लु आ नेक्था फाम्सीनीम।
- 9 परमप्रभु यावे आ अरेशो मटीबपुकीम रोम रोइक्च आन कली आन ममा आ थुकु रे रोइश्शा, लाइनीम। मिनु मारेइ मथीब मुर आन आल आन कली आन जेर आ पा डा लाइनीम।
- 10 मेकोपुकी वा मबाक्तीके शिन्ना गाक्नीम। शोत्रलु बेक्शा यो, क्योत्रज चेरब आ मुठा कुरनीम। यसैया ५८:७
- 11 मेकोपुकीम गारो आन दातेमी तेल खाक्नीम। अडगुरु खाक्तेकम हना यो तूतू, दाक्शो बाक्नीम। याकूब ५:४
- 12 सहर रे बेक्चा चिक्शो मुर आन हुकयी पशो नेंसीब। मिनु गार दुम्शो मुरुम 'वारच पाइय्यीनी' दे वाइ ब्रेक्ब। मो हना यो परमप्रभुम मेको आन पुंइशो मनेंब।
- 13 का निक्शी मुर छेडछेड आ पर्वम मरिम्शो लोत्र पाइनीम। मेकोपुकीम छेडछेड डा लां मतुइक्थु, मगाक्नीम।
- 14 मुर साइक्ब मुर नां रिक्म नोले बोक्शा पुडग नु मारेइ मथीब आन कली साइक्ब। मिनु नाक्दो मेको खुइ खोदेशो दुम्ब।
- 15 मुर आन मीश नु मुर आन वोंइश नु इक्ब नां रिक्चा रिम्ब। मिनु मेकोमी 'नाक्दो सुइम आं कली मतुइक्तमेक्ल' दे आ कुल फाइक्ब। भजन संग्रह १०:११
- 16 खुइपुकी नाक्दो खिं प्रोल्शा ओवनीम। मिनु नाक्त खुइसीनीम। मिनु मेकोपुकीम छेडछेड मतुइक्नीम।
- 17 मारदे हना क्येर नाक्दो मेको आन कली सुनी बाक्ब। क्येर नाक्दो डा शुश हिंतीके मेको आन वारच बाक्ब।
- 18 मेको मोदेशो मुरपुकी ब्वाक्कु आ तार डा बोग्यो खोदेशो बाक्नीम। मेको आन थेरशो रू सराप चीले तशो बाक्नीम। सुइ मुर आन अडगुर रू गे मलाइनीम।
- 19 दोपा यशो फुं कली नां नु होशोम सोत्रपाइक्बा, मोपा बेक्शो मुर आन बाक्तीकेमी पापी आन कली साम्पाइक्ब।
- 20 मेको आन कली जरमेब कोत्रजीम मेको आन कली प्रेंब। मिनु लुस्पुमी 'मेको ब्रोत्रशो बाक्नीम' दे मिन्मीम। मुरुम मेको आन कली प्रेंनीमी। मोपा परमप्रभु यावे आ अरेशो मटीबपुकी दिम्शो रवा खोदेशो दुम्नीम।
- 21 मेकोपुकीमी आल मथीब मीश मुर आन कली श्येत गेनीम। मिनु आ वोंइश बेक्शो मीश मुर आन कली मारेइ रिम्शो मपाइनीम।
- 22 मो हना यो परमप्रभु आ सक्तिमी मेको बोल्यो मुर आन कली ब्रोंइचा गेब। तन्न गेना बेक्नीमी मतुइक्नीम।
- 23 परमप्रभुम मेको आन कली प्रोंइतु हना यो, मेकोमी मेको आन कली गेना हना यो कोत्रशो बाक्ब।
- 24 याम का कली मरिम्शो पाइबपुकी ग्येत्थ क्युक्चा पुंइसीनीम। मिनु नोले मेको जाम्नीम। अरु खोदेशो पा मेकोपुकी यो बेक्शा लाइनीम। मिनु मेकोपुकी चेरब पेशो खोदेशो पा पेट्सीनीम।
- 25 सुइमी आं कली 'गे जोल पाइब नवे' दे देने मचाप्नीम। मिनु आं कली 'फश लोत्र पाइब' देने मचाप्नीम" देमाक्त।

## 25

बिल्दादमी लोत्र पशो

1 मिनु शुआह डा बिल्दादमी

2 "नेल्ल क्येडा टेयब दुम्तीके नु मान पा हिंतीके परमप्रभु नु बाक्ब। मेकोमी इर स्वर्गम थुं नाइश्शा बाक्तीक सेल्ब।

3 मेको आ लडाइ पाइब हिकने मचाप्चा डा बाक्नीम। मेको आ छेडछेड नेल्ल आन बाक्तीके मजाक्बा डा?

4 बेक्शा लाइब मुर दोपा परमप्रभु आ डोंइती ठीक पाइब दुम्ने चाप्नीमी डा? मीश मुर रे जरमेशो मुर दोपा ग्रॉग्रा मदिचा डा दुम्ने चाप्नीमी डा? अय्युब ९:२; भजन संग्रह १४३:२

5 मेको आ डोंइती तास्लाम ठीक पा छेडछेड मगेब। सोरुल आन छेडछेड मगारचा डा बाक्नीम। अय्युब १५:१५

6 मिनु लुस्पु खोदेशो मुर, दोपा परमप्रभु आ डोंइती ठीक दुम्ने चाप्बा डा?" दे बिल्दादम देंमाक्त। यसैया ४१:१४

## 26

अय्युबमी लोव्र लेशो

1 मिनु अय्युबमी

2 "गे दोपा बोल मपाइश्शो मुर कली वारच पाइक्नी? योक्शो गुइ कली गे दोपा नाइक्चा गेनी?

3 गे मतुइक्ब मुर कली, अर्ती गेतीनी। मिनु गे शुश रिम्शो लोव्र शेंताक्नी।

4 ओदेशो लोव्र पचा कली गे ते शेंसीनी? मिनु तेको सोक्त रे पा ओदेशो लोव्र पनी?" दे अय्युबमी देंमाक्त।

5 "उइ डा मुर आन वांकु खिंखि पाइनीम। ब्वाक्कु नु मेकेर बाक्बपुकी यो खिंखि पाइनीम।

6 परमप्रभु आ डोंइती बेक्शो मुर आन बाक्तीके मखुंडसीशो बाक्ब। मिनु जाम्शा लतीके मसुम्सीशो बाक्ब। भजन संग्रह १३९:८; हितोपदेस १५:११; आमोस ९:२; प्रकाश ९:१

7 मेकोम श्येत्थ बाक्तीकेमी उत्तर डा सरीड प्राक्ब। मिनु रागी कली मारेइ मबाक्तीकेम क्युकब।

8 मेकोमी ब्वाक्कु कली क्येर गोस्सुम तेक्शा वोइक्ब। मिनु मेको गोस्स मप्रोल्लब। ब्वाक्कु मगूब।

9 मेकोमी पूर्ने डा तास्ला कली सुम्ब। मिनु आ गोस्सपुकी मेको आ तारी प्राक्ब।

10 मेकोमी ब्वाक्कु आ सुरम सांद वोइश्शो बाक्ब। छिडछिड नु छेडछेड फ्राचा कली मो पशो बाक्ब।

11 मिनु सरीड डा थामपुकी हिम्सीनीम। परमप्रभु आ हुइश्शोमी हिंशा सिक्सी पाइनीम।

12 मेकोम आ सक्तिम समुन्द्र कली थेल्लु। मिनु आ रुप्तीकेम राहाब माइश्शो समुन्द्र डा टेयब जन्तु कली खतम सेल्लु। अय्युब ९:१३; भजन संग्रह ८९:११

13 मेको आ फश पतीकेमी सरीड हाक्साक्ब। मेकोम दोरशा प्रोक्ब टेयब जन्तु कली साइक्तु। यसैया २७:१

14 मेको आ सक्ति डा आइक्च गेय ला बाक्नीम। मेको रे गो आइक्च सेंदा डा लोव्र ला नेंतक। मिनु मेको आ सक्तिम पशो बुंबु, सुम रुप्ने चाप्बा डा?" देंमाक्त।

## 27

अय्युबम लोव्र पशो

1 मिनु लेंशा अय्युबमी

2 "परमप्रभु यावे ब्रोंइशा बाक्शो खोदेशो पा आं ठीक पशो आ पर्वम मारेइ मदे। नेल्ल क्येडा टेयब सक्ति पाइश्शोम आं थुं खाइक्पाइश्शो बाक्ब।

3 गो आं रांम सोक्त बाक्म सम्म, परमप्रभु आ सोक्त आं नेंम बाक्म सम्म,

4 गो मारेइ जोल मपाइनुड। मिनु मिलो शिलो मपाइनुड। भजन संग्रह ३४:१४

5 गो गेपुकी ठीक बाक्नीनी, दे मदेनुड। गो मबेक्डा सम्म आं रिम्शो पतीक मप्रोंइनुड।

6 गो आं ठीक पतीके कली गेनायो मप्रोंइनुड। गो मबेक्डा सम्म दोस मताइब बाक्नुड। प्रेरित २४:१६; १कोरिन्थी ४:४

7 आं जोरी सत्रु परमप्रभु यावे आ अरेशो मटीब खोदेशो दुम्मल। आं कली मदाक्बपुकी ठीक मपाइब खोदेशो दुम्मल।

8 परमप्रभु यावे आ अरेशो मटीब मुर बेक्चामेनु, परमप्रभुम मेको आन सोक्त लाइक्चावानु, मेको आन के मार आस बाक्बा डा? लूका १२:२०

9 श्येत जचा चिक्तमेनु, आन डाक्शो परमप्रभुमी नेंबा डा?

10 मार, मेकोपुकीम नेल्ल क्येडा ठेयब सक्ति पाइशशो कली मिम्शा ग्येरसीनीमी? मेकोपुकीम गेना हना यो मेको कली मिम्शा पुंडनीमी डा?

11 गो इन कली परमप्रभु आ पशो आ परबम शेनुड। गो नेल्ल क्येडा ठेयब सक्ति पाइशशो आ मिम्शो मखुडकुनुड।

12 मेको गे नेल्लेम ताइतीनी। गेपुकी मारदे फश लोत्र पाइनीनी?

13 परमप्रभु यावे आ अरेशो मटीब आन कली गेशो भाग एकोन बाक्ब। नेल्ल क्येडा ठेयब सक्ति पाइशशोम शिशी मपाइक्ब आन कली गेशो भाग एकोन बाक्ब। हितोपदेस १३:२२; उपदेसक २:२६

14 मेको आन तौ शुश बाक्तेक्म हना यो, मेकोपुकी तरवारम क्योरशा साइक्चा पुंडसीनीम। मिनु मेको आन चच युइ रूथ्री जचा मताइनीम। अय्युब २१:१९

15 मिनु लीशोपुकी बेक्तीक रोइ पा बेक्शा थिम्चा पुंडसीनीम। मिनु आन मीशपुकी रोंका मपाइनीम।

16 मेकोपुकीम फुरक खोदेशो पा चांदी खुत्पाक्म हना यो, खप खोदेशो पा शुश वासी तेल्लेक्म हना यो,

17 मेकोपुकीम तेल्लीमी, तन्न ठीक पाइबपुकीम फेक्नीम। मिनु मेको आन चांदी दोस मताइब आन कली योक्शा गेनीम।

18 मेको आन खिं ग्योत्र खोदेशो पा सेल्शो बाक्ब। अडगुर रू खाल पाइब मुर आन बाक्तीके खोदेशो दुम्ब।

19 मेको शोंप पाइशशो दुम्शा इप्नीम। तन्न मुल रे मोदेशो मदुम्नीम। मेको बोक्मानु, मेको नेल्ल लने थुम्शो बाक्ब।

20 शुश हिंतीकेम मेको आन कली बारशो ब्वाक्कुम खोदेशो पा सुम्ब। मिनु नाक्दो फश गिवारमी मेको आन कली योल्ब।

21 पूब डा फशेमी मेको आन कली बेर पा योल्ब। मिनु मेको आन बाक्तीके योल्चा पुंडसीनीम।

22 फशेमी शिशी मपथु, मेको आन कली योल्ब। मिनु मेकोपुकी मेकेर रे प्रोक्चा मालनीम।

23 मेको फशेमी मेको आन कली तशा, आन गुइ फ्रेक्नीम। मेको आन बाक्तीकेम मेको आन कली शुक्शी पाइब” देमाक्त।

## 28

सोफार आ लोत्र

1 मिनु अय्युबमी “चांदी आन खानी बाक्नीम। सुन यपाइशशा रिम्शो सेल्तीक बाक्नीम।

2 फलाम दोशा खप रे गुंडनीम। फुल्लु रे तांबा यपाइशशा गुंडनीम।

3 मुरुम छिडछिड कली थुम्पाइक्नीम। मेकोपुकी रागी आगा डा छिडछिडम खानी मालना मालन गाक्नीम।

4 मुर आन बाक्तीक रे शुश डोन लाइनीम। मिनु मुरुम मथेक्तीक रागी लाइनीम। मेकोपुकीमी खानी आगा लतीक पोत्रला दोइनीम। मिनु मेकोपुकी सुइ मबाक्तीकेम डोरीम ग्युक्शा बिक्तीकेम गेय पाइनीम।

5 मिनु अन्न रू आन आगाम खानी दोना दोन बाक्नीम। मिनु नेल्ल खल्लब सेल्नीम। खप कली मी सेल्नीम।

6 मेको फुल्लु रे साफीर माइशशो हीरा नु सुन के फुरक गुंडनीम।

7 तेकोड सिखार पाइब चिक्बीम मेकेर लतीक लां मतुइक्ब। मिनु ब्वारदे आ शुश ताइब मिक्चीमी यो मेको मतशो बाक्ब।

8 ठेयब लेशो जन्तु यो मेकेर मजाक्दील्लीम। मिनु गुप्सपुकी मेको लां रे मलाइनीम।

9 मुरुम आन गुडमी सारो फुल्लु क्योरनीम। मिनु पहाड आन कली दिम सेल्नीम।

10 मेकोपुकीम रोगुम पोत्रला मुडनीम। मिनु शुश क्येट लाइब हीरापुकी ताइनीम।

11 मेकोपुकीम खोला आ बुक्तीक मालनीम। मिनु रागीम थिम्शा वोइशशो शोंप गुंडनीम।

12 तन्न तुइक्तीक चहिं ते थिसीबा? मिनु रूप्तीके ते बाक्बा?

- 13 बेकशा लाइब मुरपुकीम मेको आ लां मतुइक्नीम। ब्रोंडशा बाकब मुर आन रागीम मेको मथिसीब।
- 14 मिनु खप आ लुकच लशोमी 'मेको गो नु मबाकब' देंब। मिनु समुन्द्रमी यो 'मेको गो नु मबाकब' देंब।
- 15 मुरुमी सुनमी रुप्तीके ग्याप्ने मचाप्नीम। चांदी नाकशा यो मेको कली थाप्ने मचाप्नीम। हितोपदेस ३:१३-१५
- 16 रुप्तीके कली ओफीर डा सुन, शुश क्येट लाइब ओनीक्स नु साफीर माइशो हीरामी यो ग्याप्ने मचाप्नीम।
- 17 सुन नु सिसा आस क्येडा तुइक्तीके नु रुप्तीके ठेयब बाकब। क्येख सुन के गहाना नु यो मेको फाइक्ने मचाप्नीम।
- 18 लल मूगा नु टल्केब फुल्लु आ परबम लोत्र पचा ममाल्ब। तुइक्तीक थुं मोती आन क्येडा यो शुश क्येट लाइब बाकब। भजन संग्रह १११:१०; हितोपदेस १:७, ९:१०
- 19 एथीयोपीया रागी डा पुरपराज माइशो हीरा मेको नु उइक्थ दुम्ने मचाप्ब। मेको क्येख सुनम ग्याप्ने मचाप्नीम।
- 20 मिनु तुइक्तीक थुं ते रे जाकबा? मिनु रुप्तीके ते बाकबा?
- 21 मेको ब्रोंडशा बाकब नेल्ल आन डोंडती रे खुइशो बाकब। मेको सरीडम बेरब चिकब आन क्येडा यो खुइशो बाकब।
- 22 जाम्शा लतीके नु बेकपाइक्बमी 'गो मेको आ परबम नेंशो ला बाकनस्कु' देंनीस।
- 23 तन्न परमप्रभुमी मेको आ लां तुइक्ब। मेको ते रे जाकबा मेको यो तुइक्ब। हितोपदेस ८:२२-३१
- 24 मारदे हना मेकोमी रागी आ एर ओथ नेल्ल ताइब। मिनु सरीड आगा डा मारेड मारेड नेल्ल आन कली कोत्रब।
- 25 मेकोमी फश कली सक्ति गेप्टु। मिनु समुन्द्र आ सांद वोइक्तु।
- 26 मेकोम 'दोशो रेउ यिचा माल्बा' मेको अरेप्टु। मिनु बुंबु कली आ लां कोंडताकव।
- 27 मेना मेकोम रुप्तीक नु तुइक्तीक कली तशा 'एकर बाकब। मोदेशो दुम्चा माल्ब। मेको रिम्शो बाकब' देंमाक्त।
- 28 मिनु मेकोमी मुर आन कली 'परमप्रभु यावे कली मान पा हितिके तुइक्तीक बाकब। मरिम्शो पतीक रे डोन बाकचा रुप्तीके बाकब' देंत" दे अय्युबमी देंमाक्त। भजन संग्रह १११:१०; हितोपदेस १:७

## 29

डोंडती डा ग्येरशा बाकशो मिम्शो

1 मिनु लेंशा अय्युबमी

- 2 "गो डोंडती डा खोदेशो बाकड हना! मेना परमप्रभुमी आं कली कोत्रशो बाक्त।
- 3 मेना मेको आ छेडछेड आं पिया तार बाक्त। मिनु गो छिडछिडम मेको आ हाम्सोम गाक्ती। भजन संग्रह १८:२९
- 4 गो आं थम रिम्शो नाक्तीम परमप्रभु आं वारच दुम्शा, आं नेक्था बाक्त। भजन संग्रह २५:१४
- 5 मेना मेको नेल्ल क्येडा ठेयब सक्ति पाइशो गो नु बाकशो बाक्त। मिनु आं तौपुकी आं एर ओथ बाक्तेक्म।
- 6 मेना आं लांम दूध शाइशो बाक्त। मिनु सेरथे फुल्लु रे तेल के खोला शाइशो बाक्त।
- 7 गो आं बाक्तीके रे सहर डा ठेयब लाप्चो रे पा लाडगा आं नित्तीकेमी नित्थ लडानु,
- 8 टिटापुकीम आं कली तशा, लां प्रोंडशा गेतीमी। मिनु खूशोपुकी आं कली तशा मान पा राप्तेक्म।
- 9 ठेयब मुरपुकी सिकसी पा बाक्तेक्म। मिनु मेकोपुकीम आन गुइमी आन शोत्र सुम्तेक्म।
- 10 सासन पाइब आन ब्वाक्चा देक्शा, सिकसी पा बाक्तेक्म।
- 11 आं ब्वाक्शो नेंबपुकीम आं कली ठेयब सेल्तीमी। मिनु आं कली तशा 'रिम्शो बाकब' देंतेक्म।
- 12 मारदे हना गो 'वारच पाइक्की' देंब प्रुडग आन कली वारच पा प्रोंडतामी। वारच पाइब मबाक्शो रोम रोइक्च आन कली वारच पाइक्तामी। अय्युब ३१:१६; प्रस्थान २२:२१-२२



- 13 मारेड आस मबाकशो मुरपुकीम आं कली आसीक गेतीमी। गो आन वोंडश बेकशो मीश मुर आन थुं ग्येरपाइक्तामी।
- 14 गो ठीक पतीक कली वा फेकसीशो खोदेशो पा फेक्साक्यी। आं ठीक निसाफ पतीके आ वा नु आं फेटा खोदेशो बाक्त।
- 15 गो मिक्च मताइब आन मिक्च दुम्ती। मिनु खोइल मदुकब आन खोइल दुम्ती।
- 16 मारेड मथीब आन कली आन आफ खोदेशो दुम्ती। गो अर्को रागी डा मुर आन कली आन मुददा कोव्रशा गेतामी। अय्युब ३१:१८
- 17 गो ठीक मपाइब आन सक्ति नेल्ल खतम पोक्तामी। मिनु मेको आन रोडशो लेप्पाइक्ता।
- 18 मेना गो आं खिंम श्येत मजथु बेक्नुड, दे मिम्शो नड। मिनु गो शुश बर्स ब्रोंडनुड, दे मिम्शो नड।
- 19 आं शाकश बारशा ब्वाक्कु बाक्तीक गे लाम्तेक्म। मिनु आं राशीम सीत बाक्त।
- 20 आं सक्ति गेना हना यो बाक्त। मिनु आं गुड डा लिब्रा गेना हना आप्ने चाप्शो बाक्ती।
- 21 गो लोव्र पडानु, मुर नेल्लेमी सिक्सी पा नेतेक्म। मिनु नोफा दाइशशा आ अर्थ नेतेक्म।
- 22 गो आं लोव्र थुमु नोले सुडमी अरु लोव्र तेम्चा ममाल्देम। आं लोव्र मेको आन थुमी सीत खोदेशो पा जिन्ना जिन्न लत।
- 23 मेकोपुकीम बर्खा डा रेड रिम्शो खोदेशो पा आं कली रिम्ताक्यीमी। मिनु नोले डा रेड रिम्शो खोदेशो आन शोव्र वोक पाकशा आं लोव्र नेतेक्म।
- 24 गो ज्याउ रिम्सीडानु, आन थुं बारत। आं ग्येरशो कुल तशा, मेको आन कली लेम्तीक दुम्त।
- 25 गो मेको आन गाक्चा माल्शो लां योव्रशा गेतामी। मिनु गो 'ओं पने' दे अरेतामी। गो पिप आ लडाइ पाइब आन दातेम बाकशो खोदेशो बाक्ती। गो रोंका पाइब आन कली लेम्ब खोदेशो दुम्ती" दे अय्युबमी देमाक्त।

## 30

अय्युब आ थुं लुक्च लशो

- 1 मिनु अय्युबमी "मुल ठिटापुकी आं कली तशा शुक्शी पा रिस्साक्म। मेको आं क्येडा ठिटा बाक्नीम। मेको आन आफ आन कली गो आं क्यारश भेडा खाल पाइब कुचुमपुकी नु काथा वोइक्चा यो मशिरशो मिम्शो नड। अय्युब १९:१८
- 2 मेको आन गेय आं कली शोर गाक्शो बाक्त। मारदे हना मेको आन सक्ति ग्युम्ने थुम्शो बाक्त।
- 3 मेकोपुकी शुश प्रुडग नु शोव्रलु बेकशो बाक्तेक्म। मेकोपुकी गोरशो सोव्रशो रागीम आन जचा थोव्रक माल्तेक्म।
- 4 मेकोपुकीम हिक्सी डाम्शो सुवा, बुटा आन सफा सेक्शा जाइनीम। मिनु मार मार आन शाक्श दोम्तेक्म।
- 5 मेकोपुकी मुर आन दाते रे तिल्ला पुंडसीशो बाक्तेक्म। मुरपुकीम मेको आन कली खेदा पशो खोदेशो पा ग्रीतेक्म।
- 6 मेकोपुकी सोव्रशो खोलामी, पुक्खी आगा नु ब्रोल्लो सेरथे फुल्लु मेर बाक्तेक्म।
- 7 मेकोपुकीमी बुटा आन आगामी ग्रीतेक्म। मिनु बुटा आगामी बुक्तेक्म।
- 8 मेको निप्स मपाइशो, महिक्सीशो मुर बाक्तेक्म। रागी रे तिल्ला खेरचा पुंडसीशो बाक्तेक्म।
- 9 मुल गो मेको आन शुक्शी पतीके कुम्सो दुम्ती। आं पर्बम शुक्शी लोव्र ला पाइनीम। भजन संग्रह ६९:१३; बिलाप ३:६३
- 10 मेकोपुकीम आं कली ग्रान्ग्रा दिशो मिम्नीम। आं क्येडा डोन बाक्नीम। आं कुलुम तोक्चा मुने मपाइनीम। अय्युब १७:६; मती २६:६७
- 11 मारदे हना परमप्रभुमी आं लिब्रा प्राक्शा, आं कली श्येत गेतीके, मेकोपुकीम आं डोंडती 'मारदे मारेड पने चाप्नीक' दे मिम्नीम।
- 12 आं ग्युसा गे थम मरिम्शो मुर बोक्नीम। मिनु आं खोइली ग्रेक्पाइक्नीम। मिनु मेकोपुकीम आं गाक्तीक लां तेक्नीम।

13 मेकोपुकीम आं लां प्रेत्नीम। आं श्येत तेम्नीम। मिनु सुइमी मेको आन कली 'मोदेशो मपचा' दे मतेक्नीम।

14 मेकोपुकी ठेयब पोव्रलाम रिक्थ्री मरिक्थ्री पा ओव्रनीम। मेकोपुकी ब्रेशो गारो रे नेम्मुशा जाक्नीम।

15 मिनु गो शुश हिंना हिंन बाक्नुड। मेकोम आं मान ततीक फशेम खोदेशो पा हरुर पा योल्पाइक्तु। आं शोप बाक्शा रिम्शो दुम्तीके गोस्स खोदेशो पा जाम्शा लत।

16 मुल आं थुं बेक्ना बेक्न लशो बाक्ब। मिनु श्येत जतीक नाक्त ला लीशो बाक्नीम।

17 नाक्दो आं रुश शुश खाइक्नीम। मेको खाइक्तीके गेनायो मनाइक्ब।

18 परमप्रभुमी आ ठेयब सक्तिमी आं वा फ्रुप्ब। मिनु वाम शुरम खाइश्शो खोदेशो पा खाइक्ब। अय्युब ७:५; अय्युब १६:८

19 मेकोमी आं कली हिलोम ब्वारशो बाक्ब। मिनु गो फुरक नु पुलु खोदेशो दुम्शो बाक्नुड।

20 गो इन कली 'वारच पाइय्यीनी' दे पुंडता। तन्न गे आं कली लोव्र मलेत्तीनी। गो इन कली राप्शा रिम्शा बाक्ती। तन्न गे आं कली मकोव्रयीनी। अय्युब १९:७; भजन संग्रह २२:३

21 गे आं कली ठेयब श्येत गेब दुम्शो बाक्नीनी। इन ठेयब सक्तिमी आं कली खेदा पाइनीनी।

22 गे आं कली क्युक्शा फश गिवारम बेरपाइक्तीनी। मिनु आं थुं लुकच लपाइक्तीनी।

23 गे आं कली साइक्नीनी, गो मेको तुइश्शो बाक्नुड। ब्रोंइशो नेल्ल मेको लां लाइनीम।

24 थमा पा, मेकोमी पुडग आन कली श्येत मगेब। मुर श्येत जशा 'वारच पाइय्यीनी' दे ग्रीनीम।

25 मार, गो श्येत जशो मुर आन पर्वम मडाक्डा डा? मार, पुडग आन पर्वम आं थुं मखाइक्म डा?

26 मो हना यो गो रिम्शो दुम्तीक आस पाता। तन्न मरिम्शो कका जाक्त। डेडडेड रिम्शा बाक्ती।

तन्न छिडछिड कका जाक्त।

27 आं थुं गेना हना यो ग्येत्थ लुकच दुम्ब। गो गेना हना यो श्येत जचा माल्नुड।

28 गो क्येर नाक्दोम गाक्नुड। गो गुम्तीकेमी 'वारच पाइय्यीनी' दे पुंडनुड।

29 गो सिवार आन लोक्ब दुम्शो बाक्नुड। हुहुचील आन वारच दुम्शो बाक्नुड।

30 आं कुशुल क्येर दुम्शा, आं रुश नेल्ल चोइनीम।

31 आं बीना रोंका पा ग्रीब। आं बांसुरी डाक्शो मुर आन कली ताप्शो बाक्ब" देंमाक्त।

## 31

अय्युबमी "गो ठीक पाइब नड" देशो

1 मिनु अय्युबमी "गो सुइ मीश आल आन कली मरिम्शो थुंम मकोव्रचा कली, आं मिक्च नु कबल पाता। मत्ती ५:२८-२९

2 मिनु परमप्रभुमी इर रे आं कली गेबा? नेल्ल क्येडा ठेयब सक्ति पाइश्शोमी मार शोप गेबा?

3 मार, ठीक मपाइब आन कली शुश हिंचा डा श्येत मदुम्बा डा? मरिम्शो पाइब आन कली खतम दुम्तीकेम मसुम्बा डा?

4 परमप्रभुम आं पशो नेल्ल तुइक्ब। मिनु आं गाक्शो नेल्ल कोव्रब। अय्युब २३:१०

5 गो हेंथे गाक्शो बाक्ती हना, दूली लां गाक्शो बाक्ती हना,

6 परमप्रभुमी आं कली ठीक नाक्तीकेमी नाक्तील। मिनु मेकोमी आं गेना हना यो रिम्शो पशो तुइक्ब।

7 गो ठीक लां रे ग्येत्थ लुकच लशो बाक्ती हना, आं थुंम आं मिक्चीम दाक्शो खोदेशो पा पशो बाक्ती हना, आं गुइमी ग्रांरा दिशो गेय पशो बाक्ती हना,

8 आं खुम्शो अन्न अरुम जामेक्ल। मिनु आं शोक्शो मारेइ मारेइ तुल्सीमल। उत्पत्ती २६:१६

9 आं कली मीश मुरुम हेंथे गाक्पाइक्ती हना, गो आं नेक्था डा मुर आन लाप्चोमी बाप्शा बाक्शो बाक्ती हना,

10 आं मीश अरु मुर आन वाइलीम दुम्शा लल। मिनु अरु मुर मेको नु इम्मल। २सामुएल १२:३२

11 मारदे हना मेको थम मरिम्शो गेय बाक्ब। मेको निसाफ पचा कली मरिम्शो बाक्ब।

12 मेको जम्शा लतीकेम सोइक्व मी खोदेशो बाक्व। मेकोमी आं बाक्शो मारेइ मारेइ खतम पोक्व।  
13 गो आं वाइलीम वाइल आन थुं मनुशो लोत्र पाता हना, सिक्सी पपाइक्तामी।

14 परमप्रभु आं परबंम बोक्मेनु, गो मार पाइनुडा? मेकोमी आं कली लोत्र पथ ब्रेत्ताक्व हना, गो मार लोत्र लेत्नुडा?

15 आं ममा आ कोव्रजम आं कली सेल्बम मेको आन कली यो मसेला डा? मेकोमीन आंइ कली आंइ ममा आ कोव्रजीम मसेला डा? हितोपदेस १४:३१; मती २५:४०

16 गो पुडग आन कली आन माल्शो थोत्रक मगेशो बाक्ती हना, आन वोंइश बेक्शो मीश मुर आन कली डाक्पाइश्शो बाक्ती हना, अय्युब २९:१२

17 गो आं जचा थोत्रक आं कान जशो बाक्ती हना नु रोम रोइक्च आन कली योक्शा मगेशो बाक्ती हना, मोदेशो दुम्ल।

18 गो रोम रोइक्च आन कली आन आफोमी खोदेशो पा थुलतामी। गो जरमेसीड रेन आन वोंइश बेक्शो मीश मुर आन कली वारच पाइक्तामी। अय्युब २९:१६

19 गो पुडग आन कली वा मफेक्शो ताता हना, नाक्दो फेक्तीक मबाक्शो बाक्त हना,

20 मेको आन कली आं भेडा आन ऊन रे सेल्शो फेक्तीकेम महोपाइक्तीके मेकोपुकीम आं कली आसीक मगेशो बाक्तेक्म हना,

21 गो रोम रोइक्च आन कली मरिम्शो पशो बाक्ती हना, टेयब लाप्चोम बाक्वपुकीमी 'गे ठीक पाइब बाक्नीनी' देशो बाक्तेक्म हना, रूथ ४:१-१०

22 आं बला आं ची रे दोक्ल। आं गुइ जिक्शा दोक्ल।

23 तन्न गो परमप्रभु आ गेशो हिंचा डा श्येत तशा हिंनुड। मिनु गो मेको आ टेयब मान ततीके फाल्ने मचबु।

24 गो सुन कली थमा सुइश्शो नड हना, क्येख सुनमी आं कली रिम्शो ब्रोंइचा गेब, दे मिम्शो नड हना, भजन संग्रह ५२:९

25 गो आं टेयब शोंप तशा शुश ग्येरसीशो बाक्ती हना, आं शुश मारेइ मारेइ बाक्शो आ परबंम आं कली रिम्शो बाक्चा गेब, दे मिम्शो नड हना,

26 गो नां गे कोव्रशा मेको कली टेयब सेल्शो नड हना, तास्ला आ दारस कली टेयब सेल्शो नड हना, ब्यवस्था ४:१९

27 मेकोम आं थुं कली खुइश्शोमी हेंथे मिम्ब सेल्शो बाक्ती हना, मेको कली पुक्पु पाइक्चा कली आं गुइ क्युक्शो बाक्ती हना,

28 मेको नेल्ल सजाइ तचा डा पाप दुम वा। मारदे हना गो स्वर्गम बाक्व परमप्रभु आ परबंम दूली लोत्र पाइब दुम्ल वा।

29 गो आं कली काइ मदाक्वपुकीमी श्येत जशो तशा ग्येरशो बाक्ती हना, मेको आन कली मरिम्शो दुम्तीकेम सुमानु, ग्येरसीशो बाक्ती हना, हितोपदेस २४:१७; भजन संग्रह ५:५; भजन संग्रह ३५:१३-१४

30 गो 'मेकोपुकी बेक्मल' दे सराप चीले पा पाप मपड। १ पत्रुस ३:९

31 आं गेय पाइब नेल्लेम गेनायो 'अय्युब आ भोजम मुर मरूम' मदेंम।

32 अर्को रागी डा मुरपुकी गेनायो लांम इप्चा ममाल्म। लां गाक्व आन कली गेना हना यो आं खिं डा लाप्चो रोक्शो बाक्त। न्यायाधीस १९:२०-२१; १ पत्रुस ४:९; हिब्रू १३:२

33 अरु मुरपुकीम आन हेंथे पशो खुइक्चा माल्शो खोदेशो पा, गो आं थुमी आं मरिम्शो पशो मखुइक्तु।

34 मारदे हना गो हुलपुकीम मार देंनीमी, दे हिंती। मिनु खिं खिं डा आन शुक्शी पतीक रे शुश हिंती। मोपतीके गो सिक्सी पा बाक्ती। गो खिं रे मयूड।

35 गो आं लोत्र नेंब का बाक्शो हना, नेल्ल क्येडा टेयब सक्ति पाइश्शोमी आं लोत्र लेत्तल। आं कली दोस गेशा ब्रेक्शो ब्रेक्स ते बाक्बा? अय्युब २३:३-७

36 थमा पा, गो मेको आं बलाम लाम्सीड वा। गो मेको सिरपेच खोदेशो पा गुक्सीड वा।

37 मिनु आं पशो गेय नेल्ल मेको कली शेंदु वा। गो मेको आ डोंइती टेयब मुर कली गुम्थ लशो खोदेशो पा लड वा।

- 38 आं रू आं कली दोस गेशा ग्रीशो बाकत हना, मेकेर डा खप नेल्ल डाकशो नम हना,  
 39 मेकेर वाशो मार मार मथाप्थु, जशो बाकती हना, मेको रू आ होत्रप कली श्येत गेशो बाकती हना,  
 40 चेरब आ पा डा चोंक चू वामल। क्योत्रज आ पा डा सुवा वामल” देंमाकत। मोपा अय्युबमी आ लोत्र थुमा बाकत।

## 32

एलीहु आ लोत्र

अय्युब ३२:- अय्युब ३७:-

- 1 मिनु मेको मुर सांमी अय्युब कली लोत्र पचा प्रोन्मे बाकत। मारदे हना अय्युबम आंम कली “गो ठीक पाइब नड” देंस डा देंस पवा बाकत।  
 2 मिनु राम आ खिं डा बूज डा बाराकेल आ तौ एलीहु गाइक्ता बाकत। मारदे हना अय्युबमी आंम कली परमप्रभु आ डोंइती शुश पाप मपाइब खोदेशो सेल्मे बाकत। उत्पती २२:२१; अय्युब १३:१८; अय्युब १९:६-७; अय्युब २५:५-६  
 3 अय्युब आ वारच सां आन कली तशा यो गाइक्ता बाकब। मारदे हना मेकोपुकीमी अय्युब कली लोत्र लेन्ने मचाप्मे बाकत। मो हना यो मेकोपुकीम अय्युब कली दोस ताइब सेल्मे बाकत। अय्युब १५:४; अय्युब १८:२१; अय्युब २०:२९; अय्युब २२:५  
 4 मेकोपुकी अय्युब नु लोत्र पामेनु एलीहु चहिं सिक्सी पा बाकशो बाक्माकत। मारदे हना, मेको आन क्येडा आल बाक्माकत।  
 5 मिनु मेको सांमी अय्युब कली लोत्र लेन्ने मचाप्शो तशा, एलीहु गाइक्ता बाकत।  
 6 मिनु बूज डा बाराकेल आ तौ एलीहुम “गो आइक्चीन बाक्नुड। गेपुकी खाल्पा बाक्नीनी। मोपतीके इन डोंइती आं तुइशो मदेंड, दे सिक्सी पा बाकती।  
 7 गो ‘खाल्पा मुर ब्वाक्चा माल्नीम। खूशोपुकीम आन तुइक्तीके शेंदमेकल’ देंती। अय्युब १२:१२  
 8 बेक्शा लाइब मुरपुकी नु नेल्ल क्येडा ठेयब सक्ति पाइशो आ सोक्त बाकब। मिनु मेकोमी मुर आन कली रुप्तीक थुं गेब।  
 9 खाल्पापुकी ला जोक्ब तुइक्ब मबाक्नीम। खूशोपुकी यो मार ठीक बाक्बा, मेको मरुप्नीम।  
 10 मोपतीके गो आं लोत्र नेनीन। गो आं मिम्शो देंचा गेयीनी।  
 11 नेनीन। गो इन लोत्र नेंस डा नेंस बाकती। गो इन लोत्र रिम्मा रिम्मा बाकती। इन मिम्शा पशो जोक्तीक तुइक्तीक लोत्र नोफा दाइशशा नेंशा बाकती।  
 12 गो इन देशो लोत्र नेंना नेंन बाकती। तन्न गेपुकीम अय्युब कली शेंने मचाप्नी। मेको आ लोत्र यो लेन्ने मचाप्नी।  
 13 ‘गोपुकीम तुइक्तीक थुं तशो बाक्नीकी’ मदेंनी। ‘मुरपुकीम ममाइ परमप्रभुमीन मेको कली सजाइ गेवल’ मदेंनी।  
 14 तन्न अय्युबम आं परबम मारेइ मदे। गो इन लोत्र खोदेशो पा मेको कली लोत्र मलेत्तु।  
 15 एकोपुकी श्येत्थ दुम्शो बाक्नीमी। मिनु एकोपुकीमी मारेइ लोत्र लेन्ने मचाप्नीम।  
 16 एकोपुकी मब्वाक्तेकम हना यो, गो रिम्शा बाक्नुडा डा? मारदे हना एकोपुकी राप्शा बाक्नीम, लोत्र चहिं मलेत्तीम।  
 17 मुल गो लोत्र लेत्नुड। आं मिम्शो लोत्र पाइनुड।  
 18 मारदे हना गो शुश लोत्र पचा माल्शो बाक्नुड। आं आगा डा सोक्तीमी आं कली लोत्र पपाइक्ब।  
 19 गो लोत्र पचा मताता हना, नक शांबुम ब्रीशो कुशुल के थैलो खोदेशो पा बुक्ने चाप्नुड।  
 20 आं थुं नाइक्पाइक्चा कली गो ब्वाक्चान माल्नुड। गो लोत्र लेत्त्या माल्नुड।  
 21 गो सुइ आन कुल कोत्रशा लोत्र मपाइनुड। गो सुइ नु मिलो शिलो मपाइनुड।  
 22 मारदे हना गो मिलो शिलो पस मजोक्नुड। मो पाता हना आं कली सेल्बम आं कली रीब पा खतम पोक्ब।

## 33

- 1 अय्युब, मुल आं लोव्र नेनीन। आं देशो लोव्र नेल्ल नोफा दाइशशा नेनीन।  
 2 कोव्रडीन, गो लोव्र लेत्चा कली ठीक दुम्शो बाक्नुड। आं शोव्र लोव्रम ब्रीशो बाक्ब।  
 3 गो आं लोव्रमी 'गो रिम्शो थुं पाइशशो मुर नड' दे कोइनुड। गो मार लोव्र देनुडा, मेको थमा बाक्ब।  
 4 परमप्रभु आ सोक्तीम आं कली सेलती। मिनु नेल्ल क्येडा ठेयब सक्ति पाइशशोमी आ ब्रोंइतीक सोक्त गेती  
 5 गे चान्पीनी हना, आं लोव्र लेत्तीनी। इन देंचा माल्शो लोव्र डोंइतीन मिम्तीन। मिनु गो नु लोव्र पने।  
 6 परमप्रभु आ डोंइती गो यो इन खोदेशोन नड। गो यो खप केन सेल्शो नड। अय्युब १०:९  
 7 गे आं कली तशा महिनीन। गो इन कली श्येत मगेनुड।  
 8 गो इन देंचा माल्शो लोव्र नेल्ल नेंता। मिनु इन ब्वाक्शो नेंता।  
 9 गे 'गो दोस मताइब नु हेंथे मपाइब बाक्नुड। गो मरिम्शो मपाइब, गेना हना यो रिम्शो पाइब बाक्नुड' अय्युब १६:१७; अय्युब २७:६; अय्युब ३१:१-४०  
 10 मो हना यो 'परमप्रभुम आं दोस थिन्ना थिन्न बाक्ब। मेकोमी आं कली आ जोरी सत्रु मिम्शो बाक्ब। अय्युब १३:२६; अय्युब १९:११  
 11 आं खोइलीम ठेंडरो थोक्ताकनी। आं लां नेल्ल कोव्रशा, वोइक्नीनी' दे लोव्र पाइतीनी। अय्युब १३:२७  
 12 तन्न गे दूली मिम्ब बाक्नीनी। गो इन कली लोव्र लेत्तन्नी। बेक्शा लाइब मुर आन क्येडा परमप्रभु ठेयब बाक्ब।  
 13 गे मारदे परमप्रभु नु इन थुं मनुशो लोव्र पाइनीनी। मिनु गे 'मेकोम आं लोव्र काइ मलेप्ब' देंनीनी?  
 14 परमप्रभुमी खेयप का निकशी लोव्र पाइब। तन्न मुरपुकीम मेको मरुप्नीम।  
 15 डोमुमी, नाकदो ततीकेमी, निन्द्रा पशोन, बेक्शा लाइब मुर ब्राख्येम गोल्ला इम्मानु, अय्युब ४:१२-१६  
 16 परमप्रभुम मेको आन नोफा नेंब सेल्ब। मिनु मेको आन कली शेंदानु, 'परमप्रभु आ लोव्र बाक्माक्त' दे तुइक्नीम। अय्युब ३६:१०  
 17 मेकोमी मुर आन कली आन मरिम्शो पशो रे रिम्शो सेल्चा कली नु मेको आन ठेयब लेत्तीक तेक्चा कली लोव्र पाइब।  
 18 परमप्रभुम मेको कली बेक्चा रे प्रोंइचा दाक्ब। मेको आन कली तरवार रे प्रोंइचा दाक्ब।  
 19 मिनु मुर खाइक्स डा खाइक्स पा आन ब्राख्येम इप्शा, सजाइ ताइनीम। मिनु आन रुश गेना हना यो ख्लिखि पाइनीम।  
 20 मोपा मेकोपुकीम आन जचा थोव्रक ग्रॉग्रा दीनीम। मिनु थम ब्रोव्रशो जचा थोव्रक यो मदाक्नीम।  
 21 मिनु मेको आन रां गेयशा सोव्रनीम। मिनु मेको आन खुइशशो रुश तांइसीनीम।  
 22 मेको आन सोक्त लचा चिक्शो बाक्ब। मेको आन ब्रोंइतीक नाक्त नुप्चा चिक्शो बाक्ब।  
 23 मो हना यो मेको मुर आन दातेमी का कली परमप्रभु आ हजार हजार स्वर्ग डा गेय पाइब कामी वारच पा, मेकोमी 'मेको रिम्शो थुं पाइशशो मुर बाक्ब' देंत हना,  
 24 मिनु मेकोमी मुर कली शिशी पा 'मेको मुर कली बेक्चा रे प्रोनीन। मेको कली प्रोंइतीक थोव्रक गो नु बाक्ब' देंत हना, भजन संग्रह ४९:८-११  
 25 मेको मुर आ श्ये ठिटा के खोदेशो पा नक दुम्ब। मेको आ ठिटा ना डा खोदेशो दुम्ब। भजन संग्रह १०३:५  
 26 मिनु मेकोमी प्रार्थना पवानु, परमप्रभुमी नेंब। मेको परमप्रभु आ डोंइती बाक्शा, ग्येरसीशा कुम्सो पाइब। परमप्रभुम मेको आ ठीक पतीक लेंशा डोंइती डा खोदेशो सेल्ब।  
 27 मिनु मेको मुरुम मुर आन बाक्तीक जाक्शा, मेको आन कली 'गो पाप पाता। गो ठीक पतीके कली दूली सेलता। गो आं तचा माल्शो सजाइ मतड।  
 28 मेकोमी आं सोक्त कली बेक्तीक रे प्रोंइतु। मिनु गो छेडछेड तचा कली ब्रोंइती' देंब।  
 29 परमप्रभुमी एको नेल्ल बेक्शा लाइब मुर आन पर्वम पाइब। खेयप निकशी, खेयप सां सम्म मो पाइब।

- 30 बेक्चा चिकशो मुर आन कली तुरसुम लचा रे लेप्पाइक्व। मोपा ब्रोंडतीक छेडछेड लेंशा ताइनीम। भजन संग्रह ५६:१४; भजन संग्रह १०३:४; भजन संग्रह ११६:९
- 31 नेनीन अय्युब आं लोव्र नोफा दाइशशा नेनीन। गे सिकसी पा बाक्कीन। गो लोव्र पाइनुड।
- 32 इन देंचा माल्शो मारेइ लोव्र बाक्त हना, आं कली देनीन। गे ब्वाक्कीन। मिनु गो इन पोन बोक्नुड।
- 33 तन्न इन देंचा माल्शो लोव्र मबाक्त हना, सिकसी पा आं लोव्र नेनीन। मिनु गो इन कली रुप्तीक लोव्र शेनुड” दे एलीहुम देंमाक्त।

## 34

“परमप्रभु ठीक पाइब बाक्ब” देंशो

1 मिनु एलीहुमी

2 “जोक्ब तुइक्ब मुरपुकी आं लोव्र नेनीन। शुश जोक्ब मुरपुकी आं लोव्र इन नोफा दाइशशा नेनीन। अय्युब १२:११

3 मारदे हना दोपा नोफाम लोव्र नेंबा, मोपान लेंम जचा थोव्रक थाम्ब।

4 मोपतीके मार ठीक बाक्बा, मेको गो आंमा योव्रय। मिनु तेको लोव्र रिम्शो बाक्मे, मेको आंमा गारशा कोव्रय।

5 मारदे हना अय्युबम ‘गो दोस मताइब मुर बाक्नुड। तन्न परमप्रभुम आं कली ठीक निसाफ मगेयी। अय्युब ३३:९; अय्युब २७:२

6 गो ठीक पाइब बाक्ती हना यो, आं कली जोल पाइब सुइक्ती। गो हेथे मपाता हना यो, आं गार मसा’ देंत। अय्युब ९:१५,२०; अय्युब ६:४

7 ब्वाक्कु तूशो खोदेंशो पा शुक्शी पाइब, अय्युब खोदेंशो अरु सुइ मबाक्नीम।

8 मेको मरिम्शो गेय पाइब नु बाक्ब। मिनु परमप्रभु यावे आ अरेशो मटीब नु गाक्ब। भजन संग्रह १:१

9 मारदे हना मेकोमी ‘परमप्रभु कली ग्येरशा टिचा, शोर गाक्शो बाक्ब’ देंब। अय्युब ९:२२

10 मोपतीके मारेइ मारेइ तुइक्ब मुरपुकी आं लोव्र नेनीन। परमप्रभुम गेनायो मरिम्शो मपाइब। नेल्ल क्येडा ठेयब सक्ति पाइशशोमी गेनायो दूली मपाइब। अय्युब ८:३; ब्यवस्था ३२:४; २इतिहास १९:७

11 मेकोमी मुर आन कली मेको आन पशो खोदेंशो पा पाइब। मार पाइनीमी, मेकोन ताइनीमी।

12 एको थमा लोव्र बाक्ब। परमप्रभुम गेनायो मरिम्शो मपाइब। नेल्ल क्येडा ठेयब सक्ति पाइशशोमी दूली निसाफ मपाइब। अय्युब १९:६

13 सुम रागी मेको आ जिम्माम गेवा? सुम मेको कली रागी नेल्ल डा अधिकार गेवा?

14 मेकोमी ब्रोंडचा गेब सोक्त नु आ सास लेशशा लाइक्चा मिम्ताक्ब हना,

15 याम कामीन सोक्त पाइशशो नेल्ल बेक्नीम। मिनु मुर लेंशा फुरकुम लेशशा लाइनीम। भजन संग्रह १०४:२९

16 गे इन के रुप्तीक थुं बाक्त हना, आं देंशो नेनीन। गो मार देंडा, मेको नोफा दाइशशा नेनीन।

17 ठीक निसाफ कली काइ मदाक्ब मुर सासन पने चाप्बा डा? मार, गे ठीक पाइब नु सक्ति पाइशशो कली दोस ताइब मिम्नीनी?

18 सुमी पिप कली ‘हिंचा डा मरिम्शो पाइब बाक्नीनी’ देंबा? मिनु ठेयब मुर आन कली ‘परमप्रभु यावे आ अरेशो मटीब बाक्नीनी’ देंबा?

19 मेकोम पिप आ तौ आन कुल मकोव्रब। मेकोम शोप पाइशशो नु प्रुडग नेल्ल आन कली उइक्थ मिम्ब। मारदे हना मेको नेल्ल आ सेल्शो नम।

20 मेकोपुकी याम कामीन बेक्शा लाइनीम। नाक्दो उइक्थ दुम्मेनु, मेकोपुकी खिंखि पा बेक्नीम। सक्ति पाइशशो मुर यो सुइम मारेइ मपाइक्थु बेक्नीम।

21 मेकोमी मुर नेल्ल आन पतीके कोव्रशो बाक्ब। मिनु मेको आन गाक्शो नेल्ल कोव्रशो बाक्ब। अय्युब ३१:४; हितोपदेस ५:२१

22 मेकेर मरिम्शो पाइब आन खुंडसीतीक छिडछिड मबाक्ब। भजन संग्रह १३९:११-१२

- 23 परमप्रभु आ डोंइती निसाफ पुंडथ जाकब मुर आन कली 'एको नाक्त जाककीन' मदेंशो बाकब।
- 24 मेकोम खुदील निदील मपथुन सक्ति पाइशो आन कली तिलब। मिनु मेको आन पा डा अरु आन कली वोइकब।
- 25 मारदे हना मेकोम मेको आन पशो गेय नेल्ल तुइकब। मिनु मेको आन कली काबु नाकदोमीन तिलब। मिनु मेकोपुकी खतम दुम्नीम।
- 26 परमप्रभु यावे आ अरेशो मटिशो आ पबर्म मेको कली खतम पोक्ब। मिनु मेको मुर नेल्लेम ताइनीम।
- 27 मारदे हना मेकोपुकी मेको आ नोले खोइकचा प्रोंइतेकम। मिनु आ कोंइशो लां ममिम्तेम।
- 28 मेकोपुकीम पुडग आन डाकशो मेको आ डोंइती जाकदीपपाइक्तेकम। मेकोम मारेइ मथीब आन पुंडशा ब्रेशो नेंतु। उत्पत्ती १६:११
- 29 तन्न मेको सिक्सी पा बाक्त हना, सुम मेको कली दोस गेने चाप्बा डा? मेकोम आ कुल खुइक्ताकव हना, सुम मेको कली तने चाप्बा डा? रागी डा मुर नेल्ल कली नु मुर का कली मेको कान बाकब।
- 30 मिनु परमप्रभु कली मटीब मुरुम सासन मपवल। मिनु मुर आन कली श्येत गेब सासन पाइब मदुमल।
- 31 मिनु मेकोमी परमप्रभु कली 'गो सजाइ फालता। गो मुल रे मरिम्शो गेय मपाइक्नुड।
- 32 आं मतुइशो आं कली शेंदीनी। गो मरिम्शो पाता हना यो, मुल रे मो मपाइनुड' देंब।
- 33 मार, मेकोम इन देशो खोदेशो पा इन कली पचा माल्बा डा? मारदे हना गे आ देशो मबित्तीनी। गे इन लां योव्रचा माल्नीनी। गो मो मपाइनुड। मोपतीके इन तुइशो आं कली शेंदीनी।
- 34 निप्स पाइशो मुर नेल्लेम नु जोक्ब तुइकब कामी आं लोव्र नेंशा
- 35 'अय्युब मजोक्थु, लोव्र पाइब बाकब। आ लोव्र मरुप्चा डा बाकब' देंनीम। अय्युब ३८:२
- 36 अय्युबम मेको क्येडा तेम्शा श्येत जवल। मारदे हना आ लोव्र परमप्रभु आ अरेशो मटीब आन लोव्र खोदेशो बाकब।
- 37 मेकोमी आ पाप तेम्ब। आंइ दातेमी शुश हेंथे पना पन बाकब। मिनु मेकोमी परमप्रभु आ पबर्म मरिम्शो लोव्र शुश तेम्ब" दे एलीहुमी देंमाक्त।

## 35

एलीहु आ लोव्र

1 मिनु एलीहुमी

2 अय्युब कली "परमप्रभु आ डोंइती 'गो ठीक बाक्नुड' देंचा रिम्शो बाक्बा? अय्युब ३२:२

3 गे मेको कली 'गो पाप मपाता हना, मार दुम्बा डा? मिनु पाप मपथु आं कली मार रिम्शो दुम्बा डा?' देंतीनी। अय्युब ३४:९

4 गे नु इन वारच सां इन कली गो लोव्र लेत्नुड।

5 इर सरीड गे कोव्रडीन। इन क्येडा इर बाकशो गोस्स कली कोव्रडीन।

6 गे पाप पाइतीनी हना, मेको कली मार दुम्बा डा? गे शुश हेंथे पाइतीनी हना यो, मेको कली मार दुम्बा डा?

7 गे ठीक पाइब दुम्तीनी हना, मेको कली मार गेनीनी डा? इन गुइ रे मेकोम मार ताइबा डा? अय्युब २२:२-३; रोमी ११:३५

8 इन परमप्रभु यावे आ अरेशो मटितीके इन कली श्येत दुम्शो खोदेशो पा अरु मुर आन कली यो श्येत दुम्ब। मिनु इन ठीक पतीके रिम्शो दुम्शो खोदेशो पा अरु आन कली यो रिम्शो दुम्ब।

9 शुश दिप्चा पुंडसीतीके मुरपुकी वाइ ब्रेत्नीम। मिनु सक्ति पाइशो आन पबर्म पुंडशा ग्रीनीम।

10 तन्न सुइमी 'आं कली सेल्ब परमप्रभु ते बाक्बा? नाकदो आं कली ठेयब सेल्तीक कुम्सो गेब, परमप्रभु ते बाक्बा? प्रेरित १६:२५

11 मेकोमी आंइ कली रागी डा जन्तु आन क्येडा शुश शेंताक्की। मिनु सरीड डा चिक्ब आन क्येडा आंइ कली जोक्ब तुइक्ब सेल्लु? मदेनीम।

12 मिनु मुरपुकीम डाक्शा पुन्मेनु, मेको आन लोत्र मनेंब। मारदे हना मेको मरिम्शो पाइबपुकी ठेयब लेशो बाक्नीम।

13 थमा पा परमप्रभुमी मेको आन हेंथे पुंडशो लोत्र मनेंब। नेल्ल क्येडा ठेयब सक्ति पाइशोमी मेको लोत्र नोफा मदाइक्ब। यूहन्ना ९:३१

14 मिनु गे 'गो मेको कली मतड' देनीनी। इन पशो नेल्ले मेको आ डोंइती बाक्ब। मोपतीके रिम्दीन। अय्युब २३:८-९

15 परमप्रभु आ गाइशोम सजाइ मगेब। मिनु हेंथे गाक्शो मकोत्रब। उपदेसक ८:११

16 मोपतीके अय्युबम फश लोत्र ला पाप्तु। शुश फश लोत्र ला पाप्तु" देमाक्त।

## 36

परमप्रभु आ गेय ठेयब बाक्ब

1 मिनु एलीहुमी लेंशा

2 "गो नु फाल्शा बाक्तीनी हना, इन कली मारेइ कोंइनुड। गो मुल यो परमप्रभु आ परबम इन कली लोत्र पचा माल्लुड।

3 आं जोक्शो थुं डा लोत्र डोन रे चाक्नुड। आं कली सेल्ब ठीक पाइब बाक्ब।

4 थमा पा, आं लोत्र हेंथे मबाक्ब। आं लोत्र थम पा जोक्ब तुइक्ब मुर इन डोंइती बाक्ब।

5 थमा पा परमप्रभु सक्ति पाइशो बाक्ब। मेकोम सुइ आन कली आइक्च मसेल्ब। मेको आ जोक्तीक तुइक्तीक ठेयब बाक्ब।

6 मेकोमी आ अरेशो मटीब आन कली ब्रोंइचा मगेब। आइक्च मुर आन कली ठीक निसाफ पाइब। भजन संग्रह ७२:४, १२; भजन संग्रह १४६:७-९

7 मेकोम ठीक पाइब आन कली कोत्रब। मिनु मेको आन कली गेना हना यो पिप नु वोइक्ब। मिनु मेकोपुकी ठेयब सेल्चा पुंडसीनीम। भजन संग्रह ११३:७-८

8 तन्न मेको आन कली साडलोम पाइक्ताक्म हना, श्येत जाम्तेक्म हना,

9 मेको आन शुश हेंथे पशो नु ठेयब लेशो आ परबम परमप्रभुमी सजाइ गेशो बाक्ब।

10 मेकोमी मेको आन कली श्येत गेशा रुप्ब मुर सेल्ब। मिनु मेको आन मरिम्शो पतीक रे लेप्पाइक्चा कली अरेब। अय्युब ३३:१६

11 मिनु मेकोपुकीम मेको आ लोत्र नेतेक्म हना, मेको आ अरेशो टिशा आ गेय पाम्तेक्म हना, मेकोपुकीम आन लीशो नाक्ती रिम्शो पा बाक्चा ताइनीम। मिनु आन लीशो बर्स रिम्शो पा लाक्नीम।

12 तन्न मेकोपुकीम मेको आ लोत्र मनेतेक्म हना, मारेइ मतुइक्थु, तरवारम साइक्चा पुंडसीनीम।

13 परमप्रभु कली मान मपाइब मुर गाइक्स डा गाइक्स बाक्नीम। परमप्रभु रे पा सजाइ तामेनु, यो मेकोपुकीम 'वारच पाइक्की' दे मपुंडनीम।

14 मेकोपुकी टिट्टा बाक्की ना मुने दोक्शा बेक्नीम।

15 परमप्रभुमी श्येत जशो आन कली आन श्येत रे प्रोंइब। मोपा मेको आन श्येत तशा, रुप्ब दुम्नीम।

16 मोपा इन कली यो श्येत रे गुंडब। इन कली रिम्शो बाक्तीकेमी वोइक्ब। गे लेंशा ब्रोत्रशो जचा थोत्रक जचा ताइनीनी।

17 गे मुल चहिं परमप्रभु यावे आ अरेशो मटीब आन ततीक सजाइ तन तन बाक्नीनी। मोपान मेको आन दोस नु सजाइम इन कली यो ग्याइक्ब।

18 होस पा बाक्कीन। इन गाइक्तीकेम इन कली शुक्शी मपपदल। मिनु शुश घूस जतीकेमी इन कली हेंथे पाइब मसेलल।

19 गे इन कली 'वारच पाइय्नीनी' दे ग्रीचा शोर गाक्शो बाक्ब। इन शुश शोंप नु इन सक्तिम इन कली श्येत रे प्रोंइने चाप्वा डा?



- 20 गेना नां रिक्बा, मिनु इप्चा, दे ममिम्तीन। मारदे हना मुर आन इप्तीकेम साइक्चा पुंडसीनीम।  
 21 मरिम्शो पतीक गे मलन। होस पा बाक्कीन। मारदे हना गे मेको आ पर्वम श्येत जाइब दुम्तीनी।  
 22 परमप्रभु आ सक्तिम पतीके ठेयब सेल्चा पुंडसीब। मेको खोदेशो शेंब अर्को सु बाक्बा डा? भजन संग्रह २५:९  
 23 सुम मेको कली आ लां कौडशो बाक्बा? मिनु मेको कली 'गे दूली पाइतीनी' दे सुम देने चाप्बा डा?

एलीहु परमप्रभु कली ठेयब सेल्शो

- 24 गे मेको कली मेको आ गेय आ पर्वम ठेयब सेल्चा, मप्रेदीन। मुरपुकीम मेको आ पर्वम कुम्सो पशो बाक्तेक्म।  
 25 मुर नेल्लेमी आ पशो तशा कोव्रतेक्म। तन्न डोन रे ला ताम्तेक्म।  
 26 परमप्रभु थमा पा ठेयब बाक्ब। मिनु गो मेको मतुडक्नीकी। मेको आ बर्स हिकेने मचाम्सीब।  
 27 मेकोम ब्वाक्कु आ तेप्का गुप्ब। मिनु आ सेल्शो गोस्सुम वोडक्ब।  
 28 मिनु सरीड रे रेड यीब। मेकोमी मुर आन कली शुश जिप्पाइक्ब।  
 29 सुम गोस्स आ ब्रशो रूपे चाप्बा डा? आ बाक्तीक रे बुंबु पशो सुम रूपे चाप्बा डा?  
 30 मेकोमी सरीड आ एर ओंथ आ चिला सोडक्ब। मिनु मेको समुन्द्र आगा सम्म लाइब।  
 31 मोपा मेकोम जात जात डा मुर आन कली सासन पाइब। मिनु मेको आन कली शुश जचा थोत्रक गोब।  
 32 मेको आ गुडम चिला बाक्ब। मिनु मेकोमी खपाइक्चा कली आप्ब।  
 33 मेको चिला आ पपाइश्शो रेयकेम मेको आ सक्ति आ पर्वम लोत्र पाइब। मेको हेंथे गाक्ब आन पर्वम रुश पा शुश गाइक्ब।

## 37

एलीहुम लेंशा लोत्र पशो

- 1 मेको तुडश्शा आं लुडगीर थाम्पा प्रेक्ब। मेको आ बाक्तीक प्रौडशा प्रेक्ब।  
 2 नेनीन, आ सेंदाम बुंबु पशो नेनीन। मिनु मेको आ शोत्रम ब्वाक्शो ठेयब सेंदा नेनीन।  
 3 मेकोम सरीड आ एर ओंथ आ सेंदा नेंपाइक्ब। आ चिला रागी डा मुर सम्म दाप्पाइक्ब।  
 4 मेको आ नोले मेको आ ठेयब सेंदा नेंसीब। मेको आ मान पाइक्चा पुंडसीब सेंदा नेंसीब। मिनु मेकोम आ सेंदा नेंपाइक्ब। आ चिला पतीके मतेक्ब।  
 5 परमप्रभु आ सेंदा बुंबु पशो खोदेशो हिंचा डा पा नेंसीब। मेकोमी गोपुकीम मरुप्चा डा पा ठेयब गेय पाइब।  
 6 मेकोम फुं कली 'रागीम दोक्को' देंब। मिनु रेड कली 'धारा खोदेशो पा यीवो' देंब।  
 7 मेको मुर नेल्ल आन चिन्ड का बाक्ब। मिनु आ सेल्शो मुर नेल्लेम 'मेको परमप्रभुम पाप्तु' दे तुडक्नीम।  
 8 मेना ब्वाकी डा जन्तु आन पुक्खी गे लाइनीम। मिनु मेकेर लशा बाक्नीम। भजन संग्रह १०४:२१-२२  
 9 फश गिवार आ बाक्तीक रे गूब। मिनु फश रे पा ग्यू जाक्ब।  
 10 परमप्रभु आ सासमी फुं दुम्ब। मिनु ठेयब ब्वाक्कु नेल्ल रीब पा फुं दुम्नीम।  
 11 मेकोमी ठेयब गोस्स कली ब्वाक्कु कुरपाइक्ब। मिनु गोस्सपुकीमी आ चिला तेड तेड फ्राइनीम।  
 12 मेकोपुकी आ कौडशो रागी आ एर ओंथ डा लां नेल्ल गाक्नीम। मोपा मेकोपुकीमी परमप्रभु आ देशो मुर बाक्शो रागी आ तार नेल्ल पाइनीम।  
 13 परमप्रभुम रागी जिप्पाइक्चा कली रेड यिपाइक्ब। मेकोम मुर आन कली सजाइ गेचा कली नु आ रागी कली शिशी कौड्या कली रेड यिपाइक्ब।  
 14 अय्युब, गे एको लोत्र नेनीन। सिक्सी पा बाक्शा परमप्रभु आ छक लाक्चा डा गेय मिम्तीन।

- 15 परमप्रभुम गोस्स आन गेय दोपा पपाइक्बा? मिनु आ गोस्स रे दोपा चिला दाप्पाइक्बा, मेको गे तुइक्नीनी डा?
- 16 गोस्सपुकी दोपा सरीडम ग्युकशा बाक्नीमी? मेको आ छक लाक्चा डा गेय बाक्ब। मेको नेल्ल जोक्ब बाक्ब, दे गे मतुइक्नीनी?
- 17 दक्खिन डा फशेम इन फेशो वा होश सेल्ब। रागी नेल्ल कली सिकसी पपाइक्ब।
- 18 मार, गे परमप्रभु खोदेशो पा कांसा के ऐना खोदेशो सारो सरीड कली प्राक्ने चाप्नीनी डा?
- 19 मेको कली मार देचा माल्बा, गे मेको आंइ कली शेंदीन। मारदे हना गो छिडछिडम पतीके मारेइ मिम्ने मचाप्नीकी।
- 20 गो मार देनुडा, मेको कली हिल्लो पचा माल्नुडा डा? सुइ मुरुम आंम कली दाक्चा पुंडसीचा मदाक्बा डा?
- 21 हाम्सो बाक्त हना यो, गोस्सुम सुम्शो नां कली मुरुम तने मचाम्सीब। फशेमी गोस्स आन कली योल्दा नोले ला नां कली तने चाम्सीब।
- 22 मेको उत्तर रे हो हो पा दाप्शा यूब। मेको परमप्रभु आ एर अंथ छक लाक्चा डा छेडछेड बाक्ब।
- 23 तन्न गो नेल्ल क्येडा ठेयब सक्ति पाइशो कली थिन्ने मचाप्नीकी। मेको आ नेल्ल क्येडा सक्तिम गेय पाइब बाक्ब। मेकोमी निसाफ पशो नु ठीक पतीके गेनायो दूली मपाइब।
- 24 मोपतीके मुरपुकीम मेको कली तशा मान पा हिंनीम। मिनु आन थुंम 'गो जोक्ब तुइक्ब नड' दे मिम्ब आन कली ठेयब ममिम्ब" दे एलीहुम देमाक्त।

## 38

परमप्रभुम अय्युब कली लोत्र पशो  
अय्युब ३८:-४२:-

- 1 मिनु परमप्रभु यावेमी अय्युब कली फश गिवार रे पा लोत्र लेशशा, अय्युब ३१:३५
- 2 "दूली लोत्र पा अर्ती गेब सु बाक्म? मारेइ मजोक्थु मार लोत्र पवा? अय्युब ३४:३५
- 3 गे बोल्यो मुर खोदेशो दुम्शा रपो। मिनु गो इ कली लोत्र हिल्लो पाइनुड। मिनु गे लोत्र लेत्ती।
- 4 गो रागी आ जग वोदुनु, गे ते बाक्डे? गे रुप्नेवे हना आं कली देनो।
- 5 मेको कली दोमो सेल्चा, दे सुम देमे? गे तुइक्नेवे? मेको पुक्चा कली सुम डोरी कीडा। मेको गे तुइक्नेवे? हितोपदेस ३०:४
- 6 मेको आ जग मार तार वोदा? मेको आ सुर डा फुल्लु सुम वोदा?
- 7 मेना सुनी डा सोरुलपुकीमी कालेम कुम्सो पाम्तेक्म। मिनु स्वर्गम बाक्ब नेल्ल ग्येरसीशा ग्रीतेक्म। भजन संग्रह १९:२; अय्युब १:६
- 8 समुन्द्र रागी आ कोत्रज रे बुक्शा गूमानु, मेको ब्वाक्कु तेक्चा कली सुम लाप्चो चोक्गा? भजन संग्रह १०४:८-९; हितोपदेस ८:२९
- 9 गो मेको कली गोस्स के फेक्तीक सेल्शा, क्येर नाक्दोम मेको कली गिल्शा वोइक्ता।
- 10 मेको आ सांद वोइशशा, थरपु हिरशा, लाप्चोपुकी वोइक्ता।
- 11 मिनु गो मेको कली 'गे ओशो सम्म ला जाक्ने चाप्नेवे। एकेर सम्म ला जाक्नेवे। इन ठेयब छालपुकी मेक उइ देक्चा माल्नीम' दे माइक्तामी।
- 12 गे मुल सम्म 'सुनी दुमो' दे अरेवी? सुनी कली मेको आ बाक्तीके तुइक्पदी?
- 13 मेकोमी रागी आ सुर सम्म हाम्सो सेल्ब। आं अरेशो मटीब आन कली खेरचा कली हिम्ब।
- 14 दोपा खप रे मार मार सेल्सीबा, मोपा रागी फांडसीब। मेको वा कली रडम नुप्शो खोदेशो बाक्ब।
- 15 आं अरेशो मटीबपुकीम छेडछेड मताइनीम। मिनु मेको आन पोक्शो गुइ जिक्चा पुंडसीनीम।
- 16 गे समुन्द्र आ बुक्तीक सम्म जाक्दीने? आ नेल्ल क्येडा लुक्य डा बाक्तीकेम हिरशा गाक्डे?
- 17 बेक्पाइक्ब आ ठेयब लाप्चो इ कली कोइदमे? गे क्येर नाक्दो डा लाप्चोपुकी तवी?
- 18 गे रागी गिश ठेयब बाक्बा, दे तुइक्नेवे? गे मेको नेल्ल तुइक्नेवे हना, आं कली देनो।
- 19 छेडछेड आ लतीक लां ते बाक्बा? मिनु छिडछिड आ बाक्तीक ते बाक्बा?

- 20 गे मेको नेल्ल आन बाक्तीकेम लने चाप्नेवे? मिनु गे मेको आन बाक्तीक लतीक लां तुडक्नेवे?
- 21 थमा पा, गे मेको नेल्ल तुडक्नेवे। मारदे हना मेना गे जरमेने थुम्शो बाक्ते। मिनु गे शुश बर्स ब्रॉइने थुम्तीवी।
- 22 गे शुश फुं बाक्तीकेम ओव्रडे? गे शुश मुप्स बाक्तीक तवी? यहोसु १०:११; यसैया ३०:३०
- 23 गो मेको श्येत डा नाक्ती नु लडाइ डा नाक्त कली खेक्शा वोइक्ता।
- 24 तेको लां रे छेडछेड ब्राइबा? मिनु पूर्व डा फश ते रे गूबा?
- 25 सुम टेयब रेउ लतीक लां सेला? बुंबु पतीक आ लां सुम सेला? अय्युब २८:२६
- 26 मेको मुर मबाक्शो रागी नु गोरशो रागी जिप्पाइक्चा कली बाक्ब।
- 27 मुर मबाक्शो रागी नु सोव्रशो रागी गिगी सेल्चा कली सुम लां सेला?
- 28 मार रेउ आ आफ बाक्बा? सीत कली जरमेब सु बाक्बा?
- 29 सुका आ कोव्रज रे फुं जरमेसे? सरीड रे दोक्ब फुरश आ ममा सु बाक्बा?
- 30 ब्वाक्कु फुल्लु खोदेशो सारो दुम्ब। फुरश समुन्द्र आ तार सारो दुम्ब।
- 31 गे किरकिटी सोरुल आन कली पाइक्ने चाप्नेवे? गे मिर्गसीरा सोरुल कली खिक्शो डोरी आ गाठो प्राक्ने चाप्नेवे? अय्युब ९:९
- 32 मार गे सोरुल आ हुल आन कली आन गाक्शो लां रे गुंइने चाप्नेवे? सप्तबर्सी सोरुल आन हुल कली लां कौंइने चाप्नेवे?
- 33 मार गे स्वर्ग डा फुल्लुम मुशा ब्रेक्शो तुडक्नेवे? गे रागीम मेको मोदेशो सेल्ने चाप्नेवे? येरमीया ३३:२५
- 34 गे गोस्स कली 'रेउ यीवो' दे अरेने चाप्नेवे? मिनु मोपा आंम कली जिप्पाइक्ने चाप्नेवे?
- 35 मार गे चिला कली आ लांम सोइक्ने चाप्नेवे? मार मेकोपुकीम 'गो एक बाक्तक' दे इ कली देंनीमी।
- 36 सुम थुं कली तुडक्तीक गेवा? सुम थुं कली रुप्तीक गेवा?
- 37 सरीड डा मारेइ मारेइ हिक्ने चाप्तीक तुडक्तीक थुं पाइशो सु बाक्बा? मिनु सरीड डा ब्वाक्कु वोइक्तीके रे सुम ब्वाक्कु थोक्ने चाप्बा?
- 38 मोदेशो दुम्त हना, फुरक हिलो दुम्शा, खप डल्ला दुम्शा ग्याइक्मुशा बाक्नीमी।
- 39 गे गुप्स कली आ सिखार माल्शा गेने चाप्नेवे? मेको आ शोव्रलु बेक्शो रूपाइक्ने चाप्नेवे?
- 40 मेको आन पुक्खीम बाक्नीम। खुइशशा सिखार बाप्शो बाक्नीम। गे मेको कली रूपाइक्ने चाप्नेवे?
- 41 एर ओथ हिरशो खद आन चाइक्बमी जचा मतथु परमप्रभु कली पुन्मे नोले सुम मेको आन कली थुल्बा?" दे परमप्रभुमी अय्युब कली देंमाक्त। भजन संग्रह १४७:९

## 39

परमप्रभु आ हिल्लो पशो लोव्र

- 1 परमप्रभुमी अय्युब कली "रोकोश गेना गिक्बा, गे तुडक्नेवे? छाउरी किरश गिक्मेनु मेको तशो बाक्नेवे?
- 2 मेकोपुकीम कोव्रजम चाइक्ब कुरमेनु, गे मेको आन महिना हिक्ने चाप्नेवे? गे मेको आन गिक्ची ना तुडक्नेवे?
- 3 मेकोपुकी गिक्चा कली बाप्नीम। मिनु आन चाइक्ब जरमेनीम। मिनु आन चाइक्ब ब्रॉइशा बाक्नीम।
- 4 मिनु मेको आन चाइक्ब बोल्यो दुम्नीम। ब्वाकीम कोल्नीम। काबु ब्वाकी मेर लशा, लेशशा मजाक्नीम।
- 5 सुम ब्वाकी डा गधा कली प्रोना। सुम मेको आ डोरी पुदा।
- 6 गो मेको आन कली 'बाक्कीन' दे गोरशो रागी गेता। मिनु हिक्सी बाक्शो रागी मेको आन कली गेता।
- 7 मेको सहर डा रेयके रे डोन बाक्नीम। मिनु मेकोम शारा दोरपाइक्ब आन ग्रीशो मनेनीम।
- 8 मेकोम डांडा मेर आन जोतीक सेल्नीम। मिनु गिगी घांस नेल्ल माल्शा नेक्नीम।

- 9 मार ब्वाकी डा सांढे ब्यफोम इ गेय पने बिप्बा? मार मेको इ घांस लाप्तीकेम नां सोंडबा?  
 10 गे मेको कली चाक्ने चाप्नेवे? मार मेकोमी दांदि पा इ रू दिंम सेल्बा?  
 11 मार गे मेको आ बोल तशा इ गेय पपाइक्नेवे? इन गेय नेल्ल पचा गेनेवे?  
 12 मेको इ अन्न कुरशा चाक्चा कली लेशशा जाक्ब, दे थमा सुइक्नेवे?
- 13 ठेयब चिक्वीम ग्येरशा आ फ्रां हाम्ब। तन्न मेको सारस खोदेशो पा बेरने मचाप्ब।  
 14 मेकोम आ ब्वोफु होल दे खपीम वोइक्ब। मिनु मेक उइ प्रोंडब।  
 15 मिनु मेको कली खोइलीम दिम्नीम, दे प्रेंब। ब्वाकी डा जन्तुपुकीम दिम्ने चाप्नीम, दे ममिम्ब।  
 16 मेकोम आंम चाइक्ब, आ के ममाइ खोदेशो पा, आन कली शिशी मपाइब। मेको आ ब्वोफु पतीके मोशा लत हना यो, महिंब।  
 17 परमप्रभुमी मारदे हना मेको कली तुइक्तीक थुं मपाइशो सेल्शो बाक्ब। मिनु मेको कली मारेइ मरुप्ब सेल्शा प्रोंडशो बाक्ब।  
 18 मिनु मेको दोरशा आ फ्रां प्राक्ब। मिनु शारा नु शारा डोइक्ब आन कली कोव्रशा रिप्ब।  
 19 गे शारा कली मेको आ बोल गेनेवे? मेको आ शुर चांम ग्योम्नेवे?  
 20 गे मेको कली सल्हा खोदेशो पा प्रेक्पाइक्नेवे? मेको आ ठेयब सेंदा पा ग्रीशोम नेल्ल आन कली हिंपाइक्ब।  
 21 मेकोम आ गेंचम प्रेक्ना प्रेक्न राप्ब। मेकोम आ बोल नेल्ल कोइशा, लडाइ पतीकेम लाइब।  
 22 मेकोम हिंतीक आ पबंम मारेइ ममिम्ब। मेको तरवार तशा मप्रोक्ब।  
 23 मेको आ ब्रा हुरुर पा ग्रीब। मिनु मेकेर तूतीक नु तरवार हिरनीम।  
 24 तन्न मेको थाम्पा आ जौब बोक्शा, दोरशा लाइब। तुराही ताप्शो नेनानु, मेको सिक्सी पा बाक्ने मचाप्ब।  
 25 मेकोम तुराही ताप्शो नेंशा 'आहा' देंब। मिनु मेकोम डोन रेन लडाइ पाइब आन हुल नु लडाइ डा रिना नेंब।  
 26 ब्वारदे आ फ्रां हाम्शा दक्खिन गे बेरचा कली इ रुप्तीकेमी शेंदी?  
 27 मार ककाकुलीम आ ग्योव्र इर रोगुम सेल्चा कली इ अरेशो बाक्बा?  
 28 मेको रोगुम बास बाक्ब। मिनु आ ग्योव्र मेकेन सेल्ब।  
 29 मेकेर रे आ सिखार कोव्रना कोव्रन बाक्ब। मेकोमी डोन डोन नेल्ल रिम्शो पा तने चाप्ब।  
 30 मेको आ चाइक्बपुकीम हुश तूनीम। मेको ते ते मार मार सिखार बाक्मा, मेको मेकेर बाक्नीम”  
 दे परमप्रभुम अय्युब कली देंमाक्त। हबकुक् १:८; मत्ती २४:२८

## 40

अय्युबमी परमप्रभु कली लोव्र लेशो

- 1 मिनु परमप्रभु यावेमी लेंशा अय्युब कली  
 2 “नेल्ल क्येडा सक्ति पाइशो, गो आं कली दोस गेबमी आं कली लोव्र लेत्चा माल्ब” देंमाक्त।  
 यसैया ४५:९  
 3 मिनु नोले अय्युबमी परमप्रभु यावे कली लोव्र लेशशा  
 4 “गो शोर गाक्शो मुरुम इन कली मार लोव्र लेन्ने चाप्नुडा डा? गो आं गुइम आं शोव सुम्नुड।  
 उत्पती ३२:९; यसैया ६:५; हितोपदेस ३०:३२  
 5 गो खेयप का लोव्र पने थुम्ता। मुल लेंशा लोव्र मपाइनुड। गो खेयप निक्शी ब्वाक्ती, मुल ब्वाक्तीक लोव्र मबाक्ब” देंमाक्त।

परमप्रभु यावेमी आ सक्ति कोइशो

- 6 मिनु परमप्रभु यावेम अय्युब कली फश गिवार रे पा लोव्र लेशशा  
 7 “गे बोल्यो मुर खोदेशो दुम्शा रपो। मिनु गो इ कली लोव्र हिल्लो पाइनुड। मिनु गे लोव्र लेत्ती।  
 अय्युब ३८:३  
 8 गो आं कली ‘दूली पाइब’ देंनेवे? मिनु गे आंमा ठीक पाइब बाक्नुड देंचा कली आं कली दोस गेनेवे?  
 9 मार इ सक्ति परमप्रभु के खोदेशो बाक्बा? गे बुंबु पशो सेंदा खोदेशो पा ग्रीने चाप्नेवे?

- 10 चापनेवे हना, मान ततीकेम नु ठेयब दुम्तीकेम आंम कली ग्योम्सो। गे इ एर ओंथ दारस नु छेडछेड वोंडसो।
- 11 इ गाइक्तीक कोंडदो। मिनु ठेयब लेशशो मुर आन कली कोव्रशा, मेको आन कली दिप्शा आइक्च सेलो।
- 12 ठेयब लेशशो मुर नेल्ल आन कली कोव्रडो। मेको आन कली आइक्च सेलो। मिनु आं अरेशो लोत्र मटीब आन कली आन राप्तीकेमी दिम्दीमी।
- 13 मेको नेल्ल आन कली खपीम खुइक्तीमी। मिनु रागी आगाम मेको आन कुल खुइक्पाइक्मी।
- 14 मिनु गो 'इ ग्युरा गुइमी ग्राने चाप्बाक्ते' दे थमा सुइक्नुड।
- 15 गो इ कली सेल्लो खोदेशो पा बेहेमोथ माइशशो ठेयब जन्तु कली सेलता। मेकोमी बी ब्यफ खोदेशो पा घांस ब्वाइब। बेहेमोथ ब्वाक्कु डा ठेयब जन्तु बाक्ब।
- 16 मेको आ सक्ति आ फिलाम बाक्ब। मिनु आ बोल आ कोव्रजम बाक्ब।
- 17 मेको आ मीलु लेबानोन डा लाइशशो रवा खोदेशो खकटा बाक्ब। मेको आ फिला डा नाडी थम खांडसीशो बाक्नीम।
- 18 मेको आ रुश कांसा खोदेशो बाक्नीम। मिनु मेको आ खोइली फलाम खोदेशो बाक्नीम।
- 19 मेको परमप्रभु आ नेल्ल क्येडा डोंइती डा ठेयब गेय बाक्ब। मो हना यो मेको कली सेल्ब तरवार शेंशा ला मेको आ नेक्था लने चाप्ब।
- 20 डांडामी मेको आ जोतीक बाक्ब। ब्वाकी डा जन्तु नेल्ल मेकेर ग्यारनीम।
- 21 मेको कमल फू आगाम इप्ब। मेको बुदी मीलु नु ब्वाक्कु बाक्तीक मेर खुइशशा बाक्ब।
- 22 कमल फूमि मेको कली आ वांकु गेब। मेको आ एर ओंथ डा खोला मेर बुटा बाक्नीम।
- 23 मेको खोला बारशा कुत हना यो महिंब। बारशो खोला आ गे पित हना यो दिल थिश्शा इप्शा बाक्ब।
- 24 सुइ मुरुम मेको कली आ बोल्सीम रेतने मचाप्ब। सुम मेको आ मिक्च थिने चाप्बा? सुम मेको कली ब्वारदम रेशशा आ नें खिन्ने चाप्बा डा?" दे परमप्रभुमी अय्युब कली देंमाक्त।

## 41

लेव्याथन आ पर्बम लोत्र

- 1 परमप्रभुमी "गे लेव्याथन माइशशो ठेयब जन्तु कली बोल्सीमी रेतने चापनेवे? मेको आ लें डोरीम नेप्ने चापनेवे? भजन संग्रह ७४:१४
- 2 गे मेको आ नें खिश्शा डोरी लिक्ने चापनेवे? मेको आ शांपे बोल्सीम ब्वेक्ने चापनेवे।
- 3 मेकोमी 'आं कली प्रोंइयी, शिशी पाइय्यीनी' दे पुंडबा? मेकोमी इ कली मिलो शिलो पाइबा डा?
- 4 मेकोम गे नु कबल पाइबा? 'गो गेना हना यो वाइल दुम्नुड' देंबा?
- 5 गे मेको नु चिक्ब खोदेशो पा ग्यारने चापनेवे? मार, मेको कली इ मीश आल नु ग्यारचा कली पाइशशा वोइक्चा दाक्नेवे?
- 6 मार, मेको आन पर्बम ग्याप्ब लेयबपुकीम 'ओशो लाइब' देंनीमी? ग्याप्ब लेयबमी आन दातेमी मेको कली भाग भाग सेल्नीमी?
- 7 मार, गे मेको आ कुशुल कली तूतीकेम तूने चापनेवे? मार, डांड साइक्तीक याम मेको आ पिया आप्ने चापनेवे?
- 8 गे 'गो मेको नु लडाइ पाइनुड' दे मिम्ताक्वी हना, मिनु राम्शी पाप्तीवी हना, गे मोदेशो लेंशा गेनायो मपाइक्नेवे।
- 9 सुम मेको कली 'ग्याइक्नुड' दे मिम्बा, मेको मचाप्ब। सुम मेको कली ताइबा, मेको हिंशा गोल्व।
- 10 मेको कली पोक्ने चाप्ब, सुइ मबाक्नीम। मोपा मेको आ डोंइती सु राप्ने चाप्बा डा?
- 11 गो आं कली लडाइ तोशा, सु ब्रोंइशा बाक्ने चाप्बा डा? सरीड आगा डा मारेइ मारेइ आं केन नम।
- 12 गो मेको आ खोइली आ पर्बम लोत्र पाइनुड। मेको आ सक्ति नु मेको आ दारस आ पर्बम इन कली लोत्र पाइनुड।
- 13 मेको आ फेक्शो वा सुम पुइक्ने चाप्बा? मेको आ तेक्तीक कली सुम तूने चाप्बा?

- 14 सुम मेको आ शोत्र पाव्ने चाप्ला? मेको आ खुड हिंचा डा बाक्नीम।  
 15 मेको आ ची तेक्तीकपुकीम सेल्सीशो बाक्ब। मेको थम नेक्था नेक्था पा गार पाइशशा वोइशशो खोदेशो बाक्ब।  
 16 मेको का आ तार अर्को पा बाक्शो बाक्नीम। मोपतीके फश यो मेको आगा ओवने मचाप्लब।  
 17 मेकोपुकी का का पा अर्को नु खोम्सीशा मन्नाचा डा पा बाक्शो बाक्नीम।  
 18 मेकोम हाक्च पवानु, मी गूब। मिनु मेको आ मिक्च सुनी डा नां खोदेशो बाक्ब।  
 19 मेको आ शोत्र रे रांको नु मी आ फिलीडगो गूनीम।  
 20 मेको आ नें रे कुन गूब। मेको शुश बुइशशो रे गूशो सोलोल खोदेशो बाक्ब।  
 21 मेको आ सासमी कोइला ब्रपाइक्ब। मिनु मेको आ शोत्र रे हुरुर पा ब्रशो मी गूब।  
 22 मेको आ शुर शुश बोल्यो बाक्ब। मेको आ एर ओंथ शुश हिंतीक बाक्ब।  
 23 मेको आ श्ये रोम्सीशो बाक्ब। मारेडम चिप्ताक्व हना यो, मेको कली मारेड मडुम्ब।  
 24 मेको आ थुं फुल्लु खोदेशो पा खकटा बाक्ब। मेको यात आ आगा डा फुल्लु खोदेशो पा खकटा बाक्ब।  
 25 मेको बोक्शा राम्मेनु, बोल्यो नेल्ल हिंनीम। मेकोम लडाइ तोवानु, मेको नेल्ल नोले शोइसीनीम।  
 26 तेकोइ तरवारमी मेको कली साइक्ने मचाप्लब। तूतीक, ब्रा नु अरु आप्तीकेम मेको कली मारेड मपाइब।  
 27 मेकोम फलाम कली पराल खोदेशो मिम्ब। कांसा कली राक्शो शी खोदेशो मिम्ब।  
 28 तेकोइ ब्राम मेको कली प्रोकपाइक्ने मचाप्लब। हुरद डा फुल्लु मेको कली भूस खोदेशो बाक्ब।  
 29 थाल्ला मेको कली भूस खोदेशो बाक्ब। तूतीक शेशा बाक्शोनु, मेकोम रिशशा कोत्रब।  
 30 मेको आ कोत्रजीम हेरशो गम्टे खोदेशो बाक्ब। मेको गाक्मेनु दांदे पशो खोदेशो पा गाक्ब।  
 31 मेकोम समुन्द्र डा ब्वाक्कु कली बुइशशो खोदेशो सेल्ब। मिनु समुन्द्र कली ग्योबुम मलम खाल्शो खोदेशो पा खाल्ब।  
 32 मेको गाक्मेनु आ नोले टल्केशो लां प्रोइशा गाक्ब। मेको लां ठेयब समुन्द्र डा बुश चां खोदेशो तांडसीब।  
 33 रागीम मेको नु उडक्थ मारेड मबाक्नीम। मेको हिंतीक मपाइशशो बाक्ब।  
 34 मेकोमी ठेयब लेशो नेल्ल आन कली आइक्च मिम्ब। मेको ठेयब लेशो नेल्ल आन पिप बाक्ब” देमाक्त।

## 42

अय्युब परमप्रभु कली तुइक्ब दुम्शो

1 मिनु अय्युबम परमप्रभु यावे कली

2 “गे मारेड मारेड पने चाप्नीनी, दे गो तुइक्नुड। इन मिम्शो मारेड मारेड सुडम क्याम्ने मचाप्नीम।

3 “दूली लोत्र पा अर्ती गेब सु बाक्म? मारेड मजोक्थु मार लोत्र पवा?” देंतीनी गो थमा पा, आंमा मरुपथु लोत्र पाता। मेको आं रुप्ने मचाप्शो थम छक लाक्चा डा बाक्नीम। अय्युब ३८:२

4 मुल गो लोत्र पाइनुड। नेनीन। गो इन कली लोत्र हिल्लो पाइनुड। मिनु गे आं लोत्र लेत्तीनी। अय्युब ३८:४

5 इन पर्वम नेशो ला बाक्ती। तन्न मुल गो इन कली ताता। अय्युब १९:२६-२७

6 मोपतीके गो आं कली आइक्च मिम्ताक्ड। मिनु गो फुरक नु पुलुम बाक्शा, माफ पुंडनुड” दे अय्युबमी देमाक्त।

अय्युब आ रिम्शो नाक्ती लेशो

7 मिनु परमप्रभु यावेम अय्युब नु लोत्र पने थुम्शा, मेकोम तेमान डा एलीफाज कली “गे नु इ वारच निक्शी इन कली तशा, गो गाइशशो बाक्नुड। मारदे हना गे आं पर्वम थमा लोत्र मपनी। तन्न आं गेय पाइब अय्युबमी आं पर्वम थमा लोत्र पाप्तु।

8 मोपतीके गे ७ ओटा ब्यफ नु ७ ओटा सांड लाइशशा आं गेय पाइब अय्युब आ बाक्तीके लने। मिनु गेपुकीम इन पबर्म चोशा चढेतीक चढेने। मिनु आं गेय पाइब अय्युबमी इन पबर्म आं कली माफ पुंडचा माल्ब। मिनु गो मेको आ पुंडशो लोत्र नेंनुड। मिनु गे इन मूर्ख लोत्र पशो डा सजाइ मगेनन्नी। मारदे हना गे आं पबर्म थमा लोत्र मपनी। तन्न आं गेय पाइब अय्युबमी आं पबर्म थमा लोत्र पाप्तु” देमाक्त। १इतिहास १५:२६; इजीकीएल १४:१४

9 मिनु तेमान डा एलीफाज, शुआह डा बिल्दाद नु नामा डा सोफारमी परमप्रभु यावेम देशो खोदेशो पामे बाक्त। मिनु परमप्रभु यावेमी अय्युब आ पुंडशो लोत्र नेना बाक्त।

10 मोपा अय्युबम आ वारच आन पबर्म पुना नोले, परमप्रभु यावेम अय्युब आ शोंप नेल्ल लेशशा गेवा बाक्त। मिनु मेको आ शोंप नेल्ल, डोंइती डा क्येडा निक्शी खेयप शुश गेवा बाक्त। अय्युब १:२; अय्युब ८:७

11 मेको नोले अय्युब आ लोक्ब नेल्ले, आ समी नेल्ले नु मेको आ डोंइती डा तुइशो मुर नेल्ल जाक्शा, मेको आ खिंम भोज जामे बाक्त। मिनु मेकोपुकीमी अय्युब कली “गे परमप्रभु यावे आ गुइ रे शुश श्येत नु मरिम्शो दुम्तीके ताइतीनी” दे मेको कली थम रिम्शो लोत्र पामे बाक्त। मिनु नेल्लेम मेको कली सुन के क्येट नु सुन के औंठी गेमे बाक्त। अय्युब १९:१३-१४, १९

12 मिनु परमप्रभु यावेम अय्युब कली आ नोले डा ब्रोंइशो नाक्ती कली आ डोंइती डा ब्रोंइशो नाक्ती क्येडा शुश आसीक गेवा बाक्त। मिनु मेको के १४ हजार भेडा, ६ हजार दलओंठ, हजार का हाल ब्यफ नु हजार का गथा दुम्मा बाक्त।

13 मिनु मेको के ७ जना तौ नु तमी सां दुम्मा बाक्त। अय्युब १:२

14 मेकोमी आ डोंइती जरमेशो तमी आ नें येमीमाह, माइली आ नें कैसीया नु कान्छी आ नें केरेन-हाप्पुक वोइक्मी बाक्त।

15 मिनु रागी नेल्लेम अय्युब आ तमी खोदेशो दारशो अरु सुइ मबाक्मा बाक्त। मिनु मेको आन आफोम मेको आन कली आन लोक्बपुकी नु उइक्थ उइक्थ पा शोंप योक्शो गेमी बाक्त। गन्ती २७:८-११

16 मेको नोले अय्युब सहे का ४० बर्स सम्म ब्रोंइमाक्त। मेकोम आ तौपुकी नु ४ पाला सम्म डा चच युइ नेल्ल तवा बाक्त। भजन संग्रह ९०:१०

17 मिनु नोले अय्युब आ नाक्त नेल्ल नेक्शा, शुश ब्रोंइशा खूशो दुम्शा बेक्माक्त। उत्पत्ती २५:८; उत्पत्ती ३५:२९; १इतिहास २९:२८

## भजन संग्रह

**ब्रेक्ब मुर:** भजन संग्रह कली हिबू लोव्रमी “ठेयब सेल्टीक कुम्सो” देंनीम। १५० ओटा कुम्सोमी ७३ ओटा कुम्सो पिप दाऊदम ब्रेक्शो बाक्ब। २ ओटा भजन संग्रह सोलोमनमी सेल्शो बाक्त। ५० ओटा कुम्सो आन ब्रेक्ब मुर मतुइसीब। लीशो २५ ओटा कुम्सो कोराह आ तौपुकी, आसाफ, मोसा, एथान नु हेमान आन सेल्शो बाक्नीम। भजन संग्रह आगामी ५ ओटा किताब बाक्नीम।

१. डोंइती डा किताब १-४१ सम्म मेको कली दाऊद आ किताब देंने चाम्सीब।
२. मेको आ नोले डा किताब ४२-७२ सम्म कोराह आ तौ आन सेल्शो कुम्सो रे गोइब। एकेर आसाफ, दाऊद नु अरु मतुइशो मुर आन के यो बाक्नीम। मेको कली कोराह आ तौ आन किताब देंनीम।
३. मेको आ नोले डा किताब ७३-८९ सम्म एकेर आसाफ आ ८ ओटा कुम्सो बाक्नीम। तन्न कोराह आ तौपुकी, दाऊद, हेमान नु एथान आन कुम्सो यो बाक्नीम। एको कली आसाफ आ किताब देंनीम।
४. मेको आ नोले डा किताब ९०-१०६ सम्म मोसा आ कुम्सो, दाऊद आ कुम्सो निक्शी नु मतुइशो मुर आन के १४ ओटा कुम्सो बाक्नीम। मोपतीके मेको कली मतुइशो मुर आन ब्रेक्शो किताब देंनीम।
५. नेल्ल क्येडा नोले डा किताबम १०७-१५० सम्म बाक्ब। एकेर २८ ओटा कुम्सो मतुइशो मुर, दाऊद आ १५ ओटा कुम्सो नु सोलोमन आ कुम्सो का बाक्नीम। एको किताब कली चाड डा कुम्सो किताब देंनीम।

**गेना ब्रेक्शो:** एको कुम्सो नेल्ल गेना ब्रेक्शो बाक्नीमी, देंने मचाप्सीब। तन्न पिप दाऊद रे इजीकीएल सम्म ३०० बर्समी ब्रेक्शो बाक्नीम। का निक्शी कुम्सो मेको क्येडा माइत यो बाक्नीम।

**मार ब्रेक्शो:** भजन संग्रह डा लोव्र नेल्ल क्येडा शुश माइत नु नक लोव्र डा किताबम यहूदी आन ठेयब किताब बाक्ब। मेको शुश मुर आन पर्वम लोव्र बाक्त हना यो, भजन संग्रह डा ठेयब लोव्र परमप्रभु यावे कली ठेयब सेल्टीक कुम्सो बाक्नीम।

## 1

परमप्रभु कली टीब नु मटीब

१ सु परमप्रभु आ अरेशो लोव्र मटीब नु मगाक्बा, पापी आन लां मखोइक्बा नु परमप्रभु आ पर्वम शुक्शी पाइब नु मबाक्बा, मेको ग्येरसीशो मुर दुम्ब। भजन संग्रह २६:४; भजन संग्रह ११९:१; हितोपदेस ४:१४; येरमीया १५:१७

२ मेको मुरुमी परमप्रभु यावे आ अरेशो लोव्र दाक्शा, नाक्दो नाक्ती मेको कली मिम्ना मिम्न बाक्ब। भजन संग्रह ११९:१४८; यहोसु १:८

३ मिनु मेको मुर खोला आ नेक्था खुम्शो रवा खोदेशो बाक्ब। दोपा मेको आ फल सिट्वी ना सिप्बा नु आ सफा यो महेम्थु बाक्बा, मोपा मेको मुर आ पतीक नेल्ल रिम्शो बाक्ब। भजन संग्रह ९२:१३-१५; येरमीया १७:८

४ परमप्रभु आ अरेशो मटीबपुकी चहिं मोदेशो मबाक्नीम। मेकोपुकी फशेमी बेरपाइशो भूस खोदेशो बाक्नीम।

५ मिनु मेको निसाफ दुम नाक्ती जाम्शा लाइनीम। पापीपुकी ठीक पाइबपुकी नु बाक्चा मताइनीम।

६ परमप्रभु यावेमी ठीक पाइब आन कली लां कोंइब। आ अरेशो मटीब आन लां चहिं जाम्शा लाइब।

## 2

परमप्रभु आ तौ आ सासन



1 मारदे रागी रागी डा मुर नेल्ल गारशा, परमप्रभु यावे आ पब्रम गाइक्नीमी? मारदे जात जात डा मुर जाम्शा लाइब मरिम्शो ला मिन्नीमी? प्रेरित ४:२५-२६; प्रकाश ११:१८

2 मारदे रागी डा पिपपुकी ठेयब मुरपुकी नु गारशा, परमप्रभु यावे नु आ तेल लुकशा सोइशो आस पब्रम

3 “मेको आस देशो मपय, मेको आस कली मटिय” दे लोत्र पमुडनीमी? येरमीया ५:५

4 मिनु स्वर्गम बाकब परमप्रभु चहिं मेको मुर आन कली तशा, रिप्ब। मेको आन पशो तशा शुक्शी पाइब। भजन संग्रह ५९:९

5 मिनु नोले मेको गाइशशा, लोत्र पाइब। मोपा चुरशा, मेको आन कली हिंच कोइब। यसेया ३४:२; प्रकाश ६:१५-१७

6 मिनु मेकोमी “गो आं सियोन डांडामी आं तेल लुकशा सोइशो पिप कली वोइक्ता” देंत। जकरिया ८:३

7 परमप्रभु यावेमी लोत्र पा आं कली “गे आं तौ नवे, मुलाक्ती गो इ कली सेल्ला” देंत। भजन संग्रह ८९:२७-२८; २सामुएल ७:१४; प्रेरित १३:३३; हिब्रू १:५; हिब्रू १:५; हिब्रू ५:५

8 मिनु लेंशा परमप्रभु यावेमी आं कली “गे आं कली पुंडतीवी हना, गो रागी रागी डा मुर इ कली गेनुड। रागी डा सुर सम्म नेल्ल इ कली गेनुड। दानीएल ७:१३-१४; हिब्रू १:२

9 गे मेको आन कली फलाम के कोक्केमी खप के सेल्शो ग्योंब प्रोल्शो खोदेशो पा प्रोल्नेवे” दे लोत्र पाप्नु। प्रकाश २:२७; प्रकाश १२:५; प्रकाश १९:१५

10 मोपतीके गे पिपपुकी, जोक्ब तुइक्ब दुम्शा बाक्कीन। गे निसाफ पाइब हिंशा, होस पा रुप्ब दुमीन।

11 परमप्रभु यावे कली मान पा हिंशा, मेको आ देशो गेय पने। हिंशा खिंखि पा मेको आ डोंइती ग्येरशा बाप्पीन। फिलिप्पी २:१२; हिब्रू १२:२८

12 मिनु आ तौ आ डोंइती बाप्शा, आ खोइल पुक्पु पने। मेको गाइक्ताक्ब हना, गेपुकी लांमीन जाम्शा लाइनीनी। मो मपाइतीनी हना, गाइक्चा चिक्शो बाक्ब। सु सु मेको कली थमा सुइशशा, आ नेक्था लाइनीमी, मेको ग्येरसीशो मुर दुम्नीमी।

### 3

#### सुनी डा कुम्सो

आ तौ अब्सालोम रे प्रोक्म ना डा दाऊद आ कुम्सो। २सामुएल १५:-

1 परमप्रभु यावे, आं कली श्येत गेब शुश बाक्नीमी। आं जोरी सत्रु शुश बाक्नीम।

2 मिनु मेकोपुकीमी आं पब्रम “परमप्रभुमी मेको कली श्येत रे मप्रोंइब” देनीम। ठेयब सेंदा पा।

3 परमप्रभु यावे, गे आं एर ओंथ वोइशो तेक्तीके खोदेशो बाक्नीनी। गे आं कली ठेयब सेल्पाइक्ब, आं थुं बारपाइक्ब नु आं पिया पोक्ब बाक्नीनी। उत्पती १५:१

4 गो परमप्रभु यावे कली ब्रेतुण्ड। मिनु आं कली आ योत्रशो डांडा रे लोत्र लेप्ब। ठेयब सेंदा पा।

5 गो इप्शा, निन्द्रा पा, सेंसाक्यी, मारदे हना परमप्रभु यावे आं कली कोत्रब बाक्ब। भजन संग्रह ४:९

6 गो आं कली हजार हजार मुरपुकीमी पुम्ताक्यीमी हना यो, महिनुड। भजन संग्रह २७:३

7 आं परमप्रभु यावे, बोक्कीन। आं परमप्रभु, आं जोरी सत्रु रे प्रोंइयीनी। मिनु गे मेको आन चोत्रचो राप्तीने। इन अरेशो लोत्र मटीब आन खुइ जिकतीने। गन्ती १०:३५

8 परमप्रभु यावे, गे मुर आन कली प्रोंइब बाक्नीनी। इन आसीक इन मुर नु बाक्ब। ठेयब सेंदा पा।

### 4

#### नाक्दो डा पुंडशो लोत्र

कुम्सो पपाइक्ब कली तार पाइशशो ताप्तीके ताप्शा पतीक दाऊद आ कुम्सो।

1 गो इन कली लोत्र पडानु, आं कली लोत्र लेत्तीने। गे आं कली ठीक सेल्ब परमप्रभु बाक्नीनी। गो श्येत जडानु, आं कली बाक्तीक गेतीनी। गे आं कली शिशी पने। आं पुंडशो नेंशा गेयीनी।

2 गे मुरपुकी, गेना सम्म आं कली मान मपाइनीनी? गेना सम्म गेपुकी जाम्शा लाइब थोवक दाक्नीनी नु जोल पाइनीनी? ठेयब सेंदा पा।

3 परमप्रभु यावेमी आ कली टीब आन कली आ नेक्था वोइक्चा कली योवशो बाक्त, दे तुइक्तीन। मिनु परमप्रभु यावेमी आं पुंइशो लोत्र नेंब।

4 गेपुकी गाइश्शा, पाप मपने। इन ब्राख्येम इप्शा, इन थुं नु लोत्र पने। मिनु सिक्सी पा बाक्कीन। ठेयब सेंदा पा। एफिसी ४:२६

5 मिनु परमप्रभु यावे कली ठीक पतीक चढेने। आ देंशो लोत्र थमा सुइश्शा पने। भजन संग्रह ५१:१९, २१; १पत्रुस २:५

6 शुश मुरुमी “सुमी आंइ कली रिम्शो बाक्चा गेबा” दे हिल्लो पाइनीम। परमप्रभु यावे, इन कुल डा छेडछेड आंइ तार ब्रपतीन। गन्ती ६:२५

7 मेकोपुकी नु अन्न नु अडगुर रस शुश बाक्त हना यो, गे आं कली मेको आन क्येडा ग्येरपाइक्तीनी।

8 गो हेम पा बाक्शा, इप्शा निन्द्रा पाइनुड। मारदे हना परमप्रभु यावे, गे आं कली श्येत मजपाइक्थु, बाक्चा गेनीनी। भजन संग्रह ३:६

## 5

### सुनी डा पुंइशो लोत्र

कुम्सो पपाइक्ब कली मुराली ताप्शा पतीके। दाऊद आ कुम्सो।

1 परमप्रभु यावे, आं देंशो लोत्र नेनीने। आं हुकयी पशो नेनीन।

2 आं पिप, परमप्रभु, आं ठेयब सेंदा नेनीने। मारदे हना गो इन कली लोत्र पा पुंइनुड।

3 परमप्रभु यावे, गे सुनी कना आं सेंदा नेनीनी। गो मार माल्नुडा, मेको इन कली पुंइशा, रिम्शा बाक्नुड।

4 मिनु गे मरिम्शो पाइब आन कली मदाक्ब परमप्रभु बाक्नीनी। इन अरेशो मटीब काइ यो गे नु बाक्ने मचाप्नीम।

5 ठेयब लेश्शो मुरपुकी इन डोंइती राप्ने मचाप्नीम। गे मरिम्शो पाइब आन कली मदाक्नीनी।

6 गे जोल पाइब आन कली खतम पाइनीनी। मिनु हुश ख्वाक्श पोक्ब नु थमा मसुइक्ब मुर आन कली प्रांग्रा दिन्नीनी।

7 गो चहिं इन गेना हना यो ठेयब दाक्तीकेमी इन खिं ओव्रचा ताइनुड। मिनु गो इन कली मान पा हिंशा, इन खिं गे कोव्रशा, पोक्च थेक्शा ठेयब सेल्नुड। भजन संग्रह २६:८

8 आं जोरी सत्रु शुश बाक्नीमी। मोपतीके आं कली इन ठीक पतीके लां कोंइदीने। आं डोंइती इन लां ठीक सेलीन।

9 आं जोरी सत्रुमी जोल ला पाइनीम। आन थुंमी “दोपा खतम सेल्नुडा” दे ला मिन्नीम। आन लकचा मुर थिन्तीके खोदेशो बाक्ब। मेकोपुकी मिलो शिलो पाइब बाक्नीम। रोमी ३:१३

10 परमप्रभु, मेको आन मरिम्शो पशो आंम आन कली दुम्ल। मेको आन शुश मरिम्शो पशो आ पर्वम मेको आन कली इन डोंइती रे तिलीन। मारदे हना मेको इन कली मटीब बाक्तेक्म।

11 सुमी इन कली थमा सुइक्नीमी, मेको ग्येरसीनीम। मेकोपुकी गेना हना यो शुश ग्येरशा, इन खाल पतीकेमी ग्येरशा बाक्नीम। मिनु इन कली तुइश्शा, इन नें दाक्शा, ग्येरशा कुम्सो पाइनीम।

12 मिनु परमप्रभु यावे, गे मेको ठीक पाइब आन कली आसीक गेनीनी। इन दाक्तीके मेको आन कली एर ओंथ वोइश्शो तेक्तीक खोदेशो बाक्ब।

## 6

### श्येत जाइब आ पुंइशो लोत्र

कुम्सो पपाइक्ब कली ८ ओटा तार पाइश्शो ताप्तीके ताप्शा पतीके दाऊद आ कुम्सो।

1 परमप्रभु यावे, गे आं कली तशा गाइक्ताक्नी हना यो, सजाइ मगेयीनी। गे गाइक्ताक्नी हना यो, आं कली श्येत मगेयीनी। येरमीया १०:२४

- 2 परमप्रभु यावे, गे आं कली शिशी पने। मारदे हना गो बेक्चा चिकशो बाक्नुड। गे आं कली सापाइय्यीनी। मारदे हना आं खोइली खिंखि पाइब।
- 3 मिनु आं थुं यो हिंशो बाक्ब। परमप्रभु यावे, गे गेना सम्म आं कली मोदेशो पा बाक्पाइक्नीनी?
- 4 परमप्रभु यावे, गे आं गे लेतीने। इन गेना हना यो दाक्तीकेमी आं थुं बेक्चा रे प्रोइय्यीनी।
- 5 मारदे हना बेक्शो नोले सुइ मुरुमी इन कली ममिन्मीम। मिनु बेक्शो मुर आन बाक्तीकेमी सुइमी इन कली टेयब मसेल्नीमी। भजन संग्रह ३०:१०; भजन संग्रह ८८:११; भजन संग्रह ११५:१७-१८; यसैया ३८:१८
- 6 गो थुं खाइश्शा, डाक्शा दती। गो नाक्दो आं खाट नेल्ल प्रेक्कुमी जिप्पाइक्नुड। आं इप्तीकेमी डाक्शा लो बाक्नुड।
- 7 सुर्ता पतीके मिक्च मताइब खोदेशो दुम्ती। मारदे हना आं जोरी सत्रु शुश बाक्नीम।
- 8 गे मरिम्शो पाइबपुकी, आं क्येडा डोन लने। मारदे हना परमप्रभु यावेमी आं डाक्शो नेंतु।
- 9 परमप्रभु यावेमी आं पुंइशो लोत्र नेंतु। मिनु परमप्रभु यावेमी आं पुंइशो गेब।
- 10 आं जोरी सत्रु नेल्ल मुने दोक्शा, शुश श्येत जाइब दुम्नीम। मिनु मुने दोक्शा, आन बाक्तीके लेत्नीम।

## 7

### परमप्रभु ठीक निसाफ पाइब

दाऊदमी बेन्यामीन थर डा कूश माइश्शो मुर रे श्येत जशा, परमप्रभु यावे आ डोंइती पशो कुम्सो।

1 परमप्रभु यावे, आं परमप्रभु, गो इन कली जिम्मा गेंसीनुड। मिनु खेदा पाइब नेल्ल आन गुइ रे आं कली प्रोइय्यीनी।

2 गे आं कली मप्रोइतीनी हना, मेकोपुकीमी आं कली गुप्सम खोदेशो पा दिप्शा ब्वाइनीम। मिनु सुइमी आं कली मेको आन गुइ रे प्रोइने मचाप्नीम।

3 परमप्रभु यावे, आं परमप्रभु, मेको आन देशो खोदेशो पा, गो आं गुइमी मरिम्शो पाता हना, अय्युब ३१:७-३४

4 गो गे नु दुशा बाक्ब आन कली श्येत गेता हना, आं कली बिल्चीम श्येत गेमेनु, गो क्येक्क लेत्ताक्डमी हना,

5 आं जोरी सत्रुम आं कली खेदा पा ग्रामल। मिनु आं कली खपीम दिप्शा साइय्यीमील। मिनु आं नें जाम्शा लल। टेयब सेंदा पा।

6 परमप्रभु यावे, गे गाइश्शा, बोक्कीन। आं जोरी सत्रु आन पशो तशा, आं कली वारच पथ बोक्कीन। गे “गो निसाफ पचा माल्नुड” दे लोत्र पाइतीनी।

7 मिनु रागी रागी डा मुरपुकी इन डोंइती राप्नीम। मोपतीके इर डा इन बाक्तीकेम मेको आन कली निसाफ पचा कली इन टेयब नित्तीकेमी निस्सीन।

8 परमप्रभु यावे जात जात डा मुर आन कली निसाफ पाइब बाक्ब। परमप्रभु यावे, आं ठीक पशो नु आं आगाम बाक्शो ठीक पाइब थुं तशा, आं कली निसाफ पने। भजन संग्रह १८:२१-२७

9 इन अरेशो मटीब आन मरिम्शो पतीके थुम्पतीन। मिनु नोले गे ठीक पाइब आन कली बोल्थो सेलीन। ठीक पाइब परमप्रभु, गे मुर आन थुं नु आन पतीके नाक्ब बाक्नीनी। भजन संग्रह १०४:३५; भजन संग्रह १३९:१; येरमीया ११:२०; प्रकाश २:२३

10 परमप्रभु आं तेक्तीके बाक्ब। मेकोमी रिम्शो थुं पाइश्शो आन कली श्येत रे प्रोइब।

11 परमप्रभु ठीक निसाफ पाइब बाक्ब। नाक्त किंत मेको पापी आन कली तशा गाइक्ब।

12 थमा पा आ जोरी सत्रुम आन तरवार शेप्नीम। आन लिब्रा कीशा आप्चा कली ठीक पाइनीम। ब्यवस्था ३२:४१

13 मिनु आन साइक्तीक या आंम कली ठीक पशो बाक्नीम। आन ब्राम मी ब्रपाइश्शो बाक्नीम।

14 नेनीन, मेकोमी मरिम्शो ला मिन्नीम। मिनु श्येतम ब्रीशा, जोल पना पन बाक्नीम।

15 मेकोपुकीमी बिक्तीक दोइनीम। मिनु नोले आंम आन दोशो बिक्तीकेमी आंमा बिक्नीम।

हितोपदेस २६:२७

16 मुर आन कली गेचशो श्येत आंमान जाइनीम। मेको आन हुश खाक्श पोक्शो आंम आन पियामीन मोंइसीब।

17 गो परमप्रभु यावे आ ठीक पशो तशा, मेको कली “गे रिम्शो पाइब बाक्नीनी” दे कुम्सो पाइनुड। गो परमप्रभु यावे, नेल्ल क्येडा ठेयब आ नें आ परबंम कुम्सो पाइनुड।

## 8

### परमप्रभुम आ रिम्स कोइशो

कुम्सो पपाइक्ब कली गिल्तीथ कुम्सो आ लायो डा दाऊद आ कुम्सो।

1 परमप्रभु यावे, आंइ परमप्रभु, रागी नेल्लेमी इन नें ठेयब बाक्ब। गे इन छेडछेड सरीड क्येडा आइक्था वोइक्तीनी। प्रस्थान ३:१३-१५

2 आइक्च आल नु बुकलु आलपुकीमी इन कली ठेयब सेल्पांइसाक्नी। मोपा गे इन जोरी सत्रु नु क्येक्क लेप्ब आन कली ब्वालेइ पपाइक्तीनी। मती २१:१६

3 गो सरीड गे कोवडुनु, इन सेल्शो तास्ला नु सोरुल तातामी,

4 गे मोपा ठेयब थोव्वक सेल्तीनी हना, मुर आन परबंम दोपा मिम्ने चाप्नीनी? दोपा मेको आन कली कोवनीनी। हिब्रू २:६-८

5 गे मुर आन कली इन स्वर्ग डा गेय पाइब आन क्येडा इच्का ला आइक्च सेल्तीनी। मुर आन कली मान नु छेडछेडमी सिरपेच गुप्शो खोदेशो पा ग्योम्ताक्नी। हिब्रू २:६-८

6 मिनु इन सेल्शो मारेड मारेड आन कली हुकुम पाइब सेल्तीनी। मोपा मुर इन सेल्शो आन दातेमी नेल्ल क्येडा ठेयब बाक्ब। उत्पत्ती १:२७

7 भेडा, बी ब्यफ, ब्वाकी डा जन्तु,

8 चिकब, समुन्द्रमी बाक्ब डांइ नु समुन्द्रमी मार मार बाक्मा, मेको नेल्ल आन कली हुकुम पाइब सेल्तीनी। १कोरिन्थी १५:२७

9 परमप्रभु यावे, आंइ परमप्रभु, रागी नेल्लेमी इन नें ठेयब बाक्ब।

## 9

### “गे रिम्शो पाइतीनी” दे कुम्सो पशो

कुम्सो पपाइक्ब कली मुथ-लाब्बेन कुम्सो आ लायो। दाऊद आ कुम्सो।

1 परमप्रभु यावे, गो आं थुं नेल्लेमी इन कली “गे रिम्शो पाइतीनी” दे इन कली ठेयब सेल्नुड। इन पशो छक लाक्चा डा गेय नेल्ल आन कली नेंपाइक्नुडमी। भजन संग्रह ४४:२

2 इन कली तुइश्शा, ग्येरनुड। शुश ग्येरशा, गो इन कली ठेयब सेल्तीक कुम्सो पाइनुड। गे नेल्ल क्येडा ठेयब बाक्नीनी।

3 आं जोरी सत्रु इन कली तशा, आन जाक्शो लां रे लेश्शा प्रोक्शा लमानु, गुल गाल थिश्शा, साइक्चा पुंइसाक्म।

4 मारेदे हना गे ठीक निसाफ पाइब बाक्शा, इन ठेयब नित्तीकेमी निश्शो बाक्तीनी। मिनु आं ठीक गेय पशो तुइश्शा, गे आं कली निसाफ पाइतीनी।

5 मिनु गे रागी रागी डा मुर आन कली हुइक्ताक्नी। इन अरेशो मटीब आन कली साइक्तीनी। मेको आन नें लेंशा ममिम्चा डा पा क्याम्ताक्नी।

6 परमप्रभु, आं जोरी सत्रु आन खिं गेनायो मसेल्चा डा पा प्रेत्तीनी। गे मेको आन सहर हु हा प्रेत्तीनी। मिनु मेको आन नें यो काइ मलीथु, जाम्शा लत। भजन संग्रह ३४:१७

7 तन्न परमप्रभु यावे गेना हना यो बाक्ब। निसाफ पचा कली आ ठेयब नित्तीके ठीक पशो बाक्ब।

8 मिनु रागी रागी डा मुर आन कली आ ठीक पतीकेमी निसाफ पाइब। जात जात डा मुर आन कली आन कुल मकोव्वथु, निसाफ पाइब।

9 परमप्रभु यावे दिप्चा पुंडसीशो मुर आन कली बोल्यो दरवार खोदेंशो बाकब। श्येत जशो आन कली बोल्यो खुइश्शा बाक्तीक बाकब।

10 परमप्रभु यावे, इन नें तुइकबपुकीमी इन कली थमा सुइक्नीम। मारदे हना गे इन कली मालब आन कली मप्रोंइतीनी।

11 सियोन डांडामी बाकब परमप्रभु यावे कली ठेयब सेलतीक कुम्सो पने। जात जात डा मुर आन कली आ पशो शेंदीने।

12 मिनु परमप्रभुमी मुर साइकब आन कली आन क्येक्क लेप्ब। मिनु श्येत जशो आन डाक्शो मिम्ब। उत्पत्ती ४:१०; उत्पत्ती ९:५; भजन संग्रह ७२:४; उत्पत्ती १६:११

13 परमप्रभु यावे, आं कली शिशी पने, आं कली मदाकबपुकीमी गेशो श्येत कोवडीन। गे आं कली बेक्चा चिक्शो रे प्रोंइतीनी।

14 मिनु ब्रोंइशा, गो परमप्रभु आ योत्रशो सियोन डा ठेयब लाप्चोम मुर आन कली “परमप्रभुमी आं कली श्येत रे प्रोंइती” दे इन कली ठेयब सेल्शा, ग्येरसीशा तुइक्पाइक्नुडमी। भजन संग्रह २२:२३; भजन संग्रह १३:६

15 रागी रागी डा मुरपुकी आंमा दोशो ठेयब खाल्टाम बिक्शो बाक्नीम। मिनु आन दाइश्शो ग्याइलीमी आंमा रेशो बाक्नीम।

16 परमप्रभु यावेमी मेको ठीक निसाफ पाइब बाकब, दे मुर नेल्ल कली तुइक्पाइश्शो बाकब। आ अरेशो मटीब मुर आंम आन पशोमीन खतम दुम्नीम। ताप्तीकेमी ठेयब सेंदा पा।

17 परमप्रभु आ अरेशो मटीब रागी रागी डा मुरपुकी नु मटीबपुकी बेक्शो मुर आन बाक्तीकेम लाइब बाक्नीम।

18 परमप्रभुमी श्येत जाइब आन कली मप्रेंब। मिनु प्रुडग आन आस पशो गेना हना यो मिम्ब। भजन संग्रह २२:२५; भजन संग्रह १०:१७

19 परमप्रभु यावे, बोक्कीन। मुरपुकी मग्रामल। रागी रागी डा मुर इन डोंइती जाक्शा, निसाफ पचा पुंडसमल। गन्ती १०:३५

20 परमप्रभु यावे, मेको आन कली हिंपतीन। रागी रागी डा मुरपुकीमी “गो मुर ला बाक्नय” दे तुइक्तमेक्ल। ठेयब सेंदा पा।

## 10

### थमा मसुइक्ब आन शुक्शी पशो

1 परमप्रभु यावे, गो आंइ श्येत जची ना, मारदे डोन बाक्शा, खुइक्नीनी?

2 परमप्रभु आ अरेशो लोत्र मटीबपुकीमी ठेयब लेशो दुम्शा, प्रुडग आन कली खेदा पाइनीम। मेको आन मरिम्शो मिम्तीके नु आन पतीकेमी ग्याइक्चा पुंडसीनीम।

3 परमप्रभु आ अरेशो लोत्र मटीबपुकीमी “आं दला दाक्स नेल्ल पने चाप्नुड” दे ठेयब लेत्नीम। लोभी आन कली आसीक गेनीम। मिनु परमप्रभु यावे कली मान मपथ, महिंथु, मेको आ पर्वम शुक्शी लोत्र पाइनीम।

4 मिनु ठेयब लेशशा, आन थुमी “परमप्रभुमी आंइ कली मरिम्शो मसुइक्ब। मारदे हना मेको मबाकब” दे मिम्नीम।

5 मोपा यो मारेइ मारेइम गाप्शा श्येत मजाइनीम। मारदे मेकोपुकीमी इन निसाफ पशो मताइनीमी? मेकोपुकीमी आन जोरी सत्रु आन क्येडा महिंथु मेको आन कली ग्रानीम। आमोस ६:३

6 मिनु मेकोपुकीमी आन थुमी “गो श्येत मजाइनुड। आं चच युइ सम्म यो श्येत मजाइनीम” दे मिम्नीम। भजन संग्रह ७३:६-८

7 मेको मुरपुकीमी सराप नु जोल पना पन बाक्शा, अरु आन कली दिप्शो बाक्नीम। मेको आन लोत्रमी श्येत नु मरिम्शो ला दुम्पाइक्नीम। रोमी ३:१४

8 मेकोपुकीमी गाउं मेर खुइश्शा बाक्शा, दोस मताइब आन कली साइक्नीम। श्येत जाइब आन कली यो बाप्शा बाक्नीम।

9 गुप्स ब्वाकीम बाप्शो खोदेशो पा खुइश्शा, पुडग आन कली रिम्नीम। पुडग आन कली आन ब्वारदम रेशशा ग्याइक्नीम।

10 मिनु मेको गु बाप्शा बाक्नीम। श्येत जाइबपुकी मेको आन सक्तिमी गोल्नीम।

11 मेको आन थुमी “परमप्रभुमी आंइ पशो मताइब। आ कुल खुइक्ताक्व, आंइ पशो प्रेंब” दे मिम्नीम। भजन संग्रह ७३:११; भजन संग्रह ९४:७; यसेया २९:१५

12 परमप्रभु यावे, परमप्रभु, बोक्कीन। परमप्रभु, इन गुइ क्युकशा मरिम्शो पाइब आन कली सजाइ गेने। दिप्चा पुंडसीशो आन कली मिम्शा, वारच पने। गन्ती १०:३५

13 मारदे मेको इन अरेशो मटीब मुरपुकीमी परमप्रभु कली शुक्शी पाइनीमी? मारदे मेकोपुकीमी “आं कली दोसी मसुइक्ब” दे मिम्नीमी?

14 परमप्रभु, गे नेल्ल ताइतीनी। गे श्येत जाइब नु मरिम्शो पाइक्चा पुंडसीब आन कली वारच पाइश्शा, क्येक्क लेप्ब बाक्नीनी। मेको श्येत जाइबपुकी इन कली जिम्मा गेंसीशो बाक्नीम। गे रोम रोइक्च आन कली वारच पाइब बाक्नीनी। भजन संग्रह ६८:६; प्रस्थान २२:२२

15 गे इन अरेशो मटीब नु काइ मरिम्शो पाइब आन गुइ जिकतीन। मेको आन खुइश्शा मरिम्शो पशो कली निसाफ पने! मिनु मोदेशो नोले मलीनीम। अय्युब ३८:१५

16 परमप्रभु यावे गेना हना यो पिप बाक्ब। रागी रागी डा मुरपुकी आ राज्य रे दिल्ला, जाम्शा लाइनीम।

17 परमप्रभु यावे, गे ब्रेम्शो मुर आन पुंडशो लोव्र नेतीनी। गे मेको आन थुं बारपाइश्शा, आन पुंडशो लोव्र नेंचा कली नोफा दाइश्शा बाक्तीनी।

18 गे रोम रोइक्च नु दिप्चा पुंडसीशो मुर आन पबर्म ठीक निसाफ पाइनीनी। मो दुम्मेनु, मुरपुकीमी अरु आन कली लेंशा श्येत मगेनीम।

## 11

### परमप्रभु ठीक पाइब बाक्ब

कुम्सो पपाइक्ब कली दाऊद आ कुम्सो।

1 गो परमप्रभु यावे कली जिम्मा गेसाक्यी। गेपुकीमी आं कली “चिक्ब खोदेशो पा पहाडम बेरो” दे दोपा देने चाप्नीनी?

2 नेनीन, इन अरेशो मटीबपुकीमी आन लिब्रा कीशा, आन ब्रा डोरीम वोइश्शा, ठीक पाइब रिम्शो थुं पाइश्शो मुर आन कली खुइश्शा आप्नीम।

3 जगन ब्रेत्त हना, ठीक पाइबम मार पने चाप्बा डा?

4 परमप्रभु यावे आ खिंमी बाक्ब। आ ठेयब नित्तीके स्वर्गम बाक्ब। मिनु उइ कोव्रना कोव्रन मुर आन कली नाक्ब। हाबाकुक २:२०; यसेया ६६:१; भजन संग्रह ३३:१३-१४

5 परमप्रभु यावेमी ठीक पाइब नु आ अरेशो मटीब आन कली नाक्ब। मिनु हुश खाक्श पोक्चा दाक्ब आन कली काइ मदाक्ब।

6 परमप्रभुमी आ अरेशो मटीब आन तारी मी नु गन्धक यिपाइक्ब। मिनु मेको आन तारी होश फश पपाइक्ब। मरिम्शो पाइब मोदेशो पाइक्चा पुंडसीशो बाक्नीम।

7 परमप्रभु यावे ठीक पाइब बाक्ब। मोपतीके ठीक पतीके दाक्ब। मिनु रिम्शो थुं पाइश्शो मुरपुकीमी आ कुल ताइनीम। मत्ती ५:८

## 12

### मरिम्शो पाइब आन पबर्म लोव्र

कुम्सो पपाइक्ब कली ८ ओटा तार पाइश्शो ताप्तीके ताप्शा पतीके दाऊद आ कुम्सो।

1 परमप्रभु यावे, वारच पाइक्की। इन लां खोइक्ब जाम्शा लाम्तेक्म। मुर आन दातेमी इन कली थमा सुइक्बपुकी यो मबाक्नीम।

2 नेल्लेमी आन नेक्था डा मुर नु जोल ला पमुइनीम। चिप्लो लोत्र पाइब थुं निक्शी पाइश्शो ला बाक्नीम।

3 परमप्रभु यावेमी, मिलो शिलो पाइब नु ठेयब लेशशो लोत्र पाइब नेल्ल आन कली क्यामदल।

4 मोदेशो ठेयब लेशशो लोत्र पाइबपुकीमी “आंइ लोत्रमीन ग्रानीकी। गो जोक्ब तुइक्ब बाक्नीकी। आंइ प्रभु सु बाक्वा डा?” देंनीम। भजन संग्रह ७३:८-९; अय्युब २१:१४-१५

5 परमप्रभु यावेमी “गो पुडग आन कली दिप्शो ताता। श्येत जाइब आन डाक्शो नेंता। मोपतीके गो मुल बोक्नुड, मेको आन कली श्येत मजतीकेम वोइक्नुड” देंब।

6 परमप्रभु यावे आ लोत्र थमा बाक्ब। मेको ७ खेयप यपाइश्शो क्येख चांदी खोदेशो बाक्ब।

7 परमप्रभु यावे, गे इन मुर आन कली कोत्रशा, आंइ कली मरिम्शो पाला डा मुर रे प्रोइकी।

8 मारदे हना मुर आन दातेमी इन अरेशो मपाइब शुश दुम्शा, मरिम्शो पाइबपुकी तेइ तेइ ब्रशो बाक्नीम।

## 13

“वारच पने” दे पुंडुशो

कुम्सो पपाइक्ब कली दाऊद आ कुम्सो।

1 परमप्रभु यावे, आं कली गेना सम्म प्रेंनीनी? गेना सम्म इन कुल खुइक्नीनी? भजन संग्रह ७७:८; हाबाकुक १:२

2 गो गेना सम्म सुर्ता पा, नाक्त किंत किंत आं थुं खाइश्शा बाक्वा माल्नुडा? आं जोरी सत्रु गेना सम्म आं क्येडा बोल्यो बाक्नीमी?

3 परमप्रभु यावे, आं परमप्रभु, आं कली मिम्शा, आं लोत्र लेत्तीनी। आ बोल लेंशा गेयीनी। मो मपाइतीनी हना, गो बेक्नुड।

4 मोदेशो दुम्मेनु, आं जोरी सत्रुम “गो मेको कली ग्रानीकी” दे आं कली हिम्सीशो तशा, ग्येरसीनीम।

5 तन्न गो “गे गेना हना यो दाक्ब बाक्नीनी” दे थमा सुइक्नुड। इन वारच पा प्रोइतीके तशा, आं थुं ग्येरना ग्येरन बाक्ब।

6 परमप्रभु यावेमी आं कली रिम्शो वारच पाइक्ती। गो मेको कली कुम्सो पाइनुड।

## 14

थमा मसुइक्ब आन बुतीके

कुम्सो पपाइक्ब कली दाऊद आ कुम्सो। भजन संग्रह ५३:-

1 मूर्खपुकीमी “परमप्रभु मबाक्ब” दे मिन्मीम। मेकोपुकी ग्रांया दिचा डा दुम्शा, मरिम्शो गेय पाइनीम। मेको आन दातेमी रिम्शो पाइब सुइ मबाक्नीम।

2 परमप्रभु यावेमी स्वर्ग रे मुर आन कली कोत्रब। मारदे कोत्रब देशा हना, मुर आन दातेमी जोक्ब तुइक्ब परमप्रभु कली माल्ब, सुइ बाक्मा कों, दे कोत्रब।

3 तन्न मुर नेल्ल परमप्रभु कली प्रोइशा, दूली पाइब दुम्तेकम। रिम्शो पाइब का यो मबाक्नीम। उत्पती ६:१२; रोमी ३:१०-१२

4 मरिम्शो पाइबपुकीमी परमप्रभु यावे कली मतुइक्नीम। आ मुर आन कली शोब्ले जशो खोदेशो पा नेक्नीम। मेकोपुकीमी परमप्रभु यावे कली यो मपुइनीम। मीका ३:३

5 मिनु नोले मेकोपुकी शुश हिंशा, खिंखि पाइनीम। मारदे हना परमप्रभु ठीक पाइब आन दातेमी बाक्ब।

6 मुरपुकीमी पुडग आन मिम्शो बिग्रेचा दाक्नीम। तन्न परमप्रभु यावे मेको आन खुइक्तीके बाक्ब।

7 सियोन रे इस्त्राएली आन ब्रोंइतीके तामेक्ल। परमप्रभु यावेमी आ मुर आन कली प्रोनानु, याकूब आ चच युड, इस्त्राएली नेल्ल ग्येरसीमल। भजन संग्रह १२६:१

## 15

सु परमप्रभु नु बाक्ने चाप्बा डा?

दाऊद आ कुम्सो। भजन संग्रह २४:२-६; यसैया ३३:१४-१६

1 परमप्रभु यावे, इन बाक्तीकेमी सु बाक्ने चाप्बा डा? इन डांडाम सु बाक्चा ताइबा डा? उपदेसक ४:१७

2 सुमी रिम्शो पना पन बाक्शा, ठीक गेय ला पाइबा नु आ थुं नेल्लेमी थमा लोव्र ला पाइबा,

3 सुमी अरु आन लोव्र मपाइबा, आ नेक्था डा मुर आन कली काइ मरिम्शो मपथु, शुक्शी मपाइबा,

4 सुमी परमप्रभु आ अरेशो मटीब आन कली महिक्थु, परमप्रभु यावे कली मान पा हिब आन कली चहिं हिक्ना हिक्न बाक्बा, कसम जशा, श्येत दुम्मेनु यो, आ कसम जशो मप्रोंइथु बाक्बा,

5 सुमी क्येट जेर गेशा, चाइक्ब मताक्बा, सुमी दोस मताइब कली श्येत गेचा कली घूस मजाइबा, मोदेशो मुर गेना हना यो महिम्सीथु, परमप्रभु यावे आ बाक्तीकेम बाक्चा ताइब। प्रस्थान २२:२४; ब्यवस्था २३:२०-२१

## 16

दाऊदमी परमप्रभु नु लोव्र पशो

दाऊद आ कुम्सो।

1 “परमप्रभु, आं कली कोव्रयीनी। मारदे हना गो इन कली जिम्मा गेंसीशो बाक्नुड।

2 गो परमप्रभु यावे कली ‘गे आं परमप्रभु बाक्नीनी। गो इन क्येडा अर्को मारेइ रिम्शो मतुइक्नुड’ देती। भजन संग्रह ७३:२५

3 रागीम बाक्ब इन योव्रशो मुर, थमा पा ठेयब मुर बाक्नीम। गो मेको मुर आन कली तशा ग्येरसीनुड।

4 मिनु देवी देवता आन नोले खोइक्ब आन श्येत बारना बारन लाइब। मेको आन तूतीक चढेतीक डा हुश गेनायो मचढेनुड। मेको आन नें यो मथीनुड।

5 परमप्रभु यावे, गे आं भाग बाक्नीनी। मिनु आं कचौरा प्रिनीनी। गे आं थेरशो रू कोव्रब बाक्नीनी।

भजन संग्रह ७३:२६; गन्ती १८:२०; बिलाप ३:२४

6 इन गेशो रू रिम्शो बाक्ब। गो थम रिम्शो शोंप ताता।

7 आं कली अती गेब, परमप्रभु यावे कली ठेयब सेल्नुड। नाक्दो यो आं थुमी आं कली मोदेशो पचा शेंब।

8 गो परमप्रभु यावे कली गेना हना यो आं डोंइती वोइक्ता। मोपा मेको आं ग्युरा गे बाक्मेनु, गो महिम्सीनुड। प्रेरित २:२५-२८

9 मोपतीके आं थुं ग्येरसीब। गो आं थुमी कुम्सो पाइनुड। गो महिंथु बाक्ने चाप्नुड।

10 मारदे हना गे आं कली बेक्चा मगेनीनी। इन योव्रशो कली राक्चा मगेनीनी। प्रेरित १३:३५

11 गे आं कली ब्रोंइतीक लां कोंइनीनी। गो इन डोंइती बाक्डानु, आं थुं ग्येरतीकेम ब्रीब। इन ग्युरा गे बाक्डानु, गेना हना यो थम रिम्शो दुम्नुड” दे लोव्र पाता।

## 17

परमप्रभु कली “वारच पने” देशो

दाऊद आ पुंइशो लोव्र।

1 “परमप्रभु यावे, गे ठीक पशो आ पबर्म आं लोव्र नेनीन। आं ब्रेरशो नेनीन। आं जोल मपथु पुंइशो लोव्र इन नोफा दाइरशा नेनीन।

2 आं ठीक दुम्तीके इन लां रे जाक्मल। गे आं ठीक पतीके ताइनीनी। भजन संग्रह ४३:१

3 गे आं कली नाक्ताक्नी। नाक्दो यो आं कली नाक्शा, आं आगामी मारेइ मरिम्शो मथिन्नी। गो मरिम्शो लोव्र मपाइनुड, दे आं थुं फ्रेंशा बाक्ती। भजन संग्रह १३९:१

4 मुर आन पतीके तशा, गो इन लोव्र मिम्शा, हुश खाक्श पोक्ब आन लां मखोइक्नुड।

5 आं खोइली मग्रेक्चा डा पा इन लांम थेक्शो बाक्ती।



6 गो इन कली लोत्र पाता, मारदे हना गे आं लोत्र नेंनीनी। परमप्रभु, इन नोफा आं गे दाइशशा, आं लोत्र नेंनीन।

7 आं कली इन गेना हना यो दाक्तीक इन ग्युरा गुइमी इन कली थमा सुइक्ब आन कली आन जोरी सत्रु रे प्रॉइनीनी।

8 मिक्च दोदेशो रिम्शो पा वोइशशो बाक्बा, मोदेशो पा आं कली यो रिम्शो पा वोतीन। इन फ्रां आगाम पुत्तीनी। ब्यवस्था ३२:१०; भजन संग्रह ६१:५; भजन संग्रह ६३:८; प्रस्थान ३७:७-९

9 मोपा इन अरेशो मटीब, आं कली साइक्चा कली पुम्बपुकीमी आं कली मथित्नीम।

10 मेको आन थुं खकटा पा, टेयब लेशो लोत्र ला पाइनीम।

11 गो ते लती हना यो, मेकोपुकीमी आं कली पुम्नीम। आं कली साइक्चा माल्नीम।

12 मेकोपुकी शोत्रलु बेक्शो गुप्स खोदेशो बाक्नीम। ठिटा गुप्सम बाप्शो खोदेशो पा बाप्शो बाक्नीम।

13 परमप्रभु यावे, बोक्कीन। मेको आन कली दोक्पतीन। आं कली इन तरवारमी इन अरेशो मटीब मुर रे प्रॉइनीनी। गन्ती १०:३५

14 परमप्रभु यावे, इन गुइमी रागी दाक्ब मुर आन गुइ रे प्रॉइनीनी। मेकोपुकी मबेक्मा सम्म रिम्शो ला ताइनीम। गे मेको आन कोत्रज बोत्रशो थोत्रकम प्रिनीनी। मेको आन तौपुकी यो रूथी जाइनीमी। मिनु आन लीशो मारेइ मारेइ आन तौपुकीम ताइनीम।

15 गो चहिं ठीक पा बाक्शा, थमा पा इन कुल ताइनुड। सुनी सेंसीशा, इन कली तशा, रूशो खोदेशो दुम्शा, ग्येरसीनुड” देंती।

## 18

### परमप्रभु कली टेयब सेल्शो

कुम्सो पपाइक्ब कली परमप्रभु यावे आ गेय पाइब दाऊद आ कुम्सो। परमप्रभु यावेमी दाऊद कली आ जोरी सत्रु नु सावल आ गुइ रे प्रोना नोले दाऊद आ पशो कुम्सो।

२सामुएल २२:- 1 परमप्रभु यावे, गे आं सक्ति बाक्नीनी। गो इन कली दाक्नुड।

2 परमप्रभु यावे आं सेरथे फुल्लु, आं बोल्यो दरवार नु आं जोरी सत्रु रे प्रॉइब बाक्ब। आं परमप्रभु, गे आं खुइक्तीके सेरथे फुल्लु बाक्नीनी। परमप्रभु आं तेक्तीके नु आं कली ग्येरपाइक्ब, आं कली प्रॉइब नु आ बोल्यो दरवार बाक्ब। ब्यवस्था ३२:१८

3 गो परमप्रभु यावे नु लोत्र पाइनुड। मेको टेयब सेल्चा पुंडसीब बाक्ब। मेकोम आं कली आं जोरी सत्रु रे प्रॉइब।

4 गो साइक्चा पुंडसीचशो दुम्शा, हेरा बेक्ती। आं कली साइक्ब ब्वाक्कु आ छाल खोदेशो पा जाक्शा, हिंपाइक्ती। भजन संग्रह ११६:३

5 थमा पा साइक्चा पुंडसीब दुम्ती। साइक्बमी आं कली ब्वारदम खोदेशो पा रुक्ताक्यी।

6 गो श्येत जडानु, परमप्रभु यावे कली “वारच पने” दे आं परमप्रभु कली टेयब सेंदा पा पुंडता। मिनु परमप्रभु आ बाक्तीकेम बाक्शा, आं सेंदा नेंतु। आं पुंडशो लोत्र रुप्तु।

7 रागी हिम्शा, खिनु कुत। मिनु डांडा नेल्ल हिम्साक्म। मारदे हिम्साक्म देंशा हना, परमप्रभु आ गाइक्तीकेम हिम्साक्म।

8 आ नें रे कुन कुत। आ शोत्र रे टेयब मी गूशा, ब्रशो कोइला हुरु पा बेरतेक्म। प्रस्थान १९:१८

9 मिनु परमप्रभु सरीड रे यित। आ खोइल आगामी क्येर गोस्स के छिडछिड बाक्त। भजन संग्रह १४४:५-७

10 मेको करूब का डोइशशा, फशेम बेरत। भजन संग्रह ९९:१

11 छिडछिडमी खुइशशा, आ एर ओथ नेल्ल ब्वाक्कु कुरशो क्येर गोस्स बाक्तेक्म।

12 परमप्रभु आ छेडछेड रे मुप्स, मी ब्रशो कोइला नु चिला खोदेशो पा गोस्स यूतेक्म।

13 परमप्रभु यावेमी सरीड रे बुंबु पशो खोदेशो पा आ सेंदा नेंपाइशशो बाक्त।

14 मिनु मेकोमी आ ब्रा आबानु, आं जोरी सत्रु ब्रपाइक्तीमी। टेयब चिला पपाइशशा, प्रोक्पाइक्तीमी।

- 15 परमप्रभु यावे इन हुडक्तीकेमी नु इन नें रे गूशो सोक्तमी समुन्द्र नु रागी आ जग गूत।
- 16 परमप्रभुमी इर रे आं गुड ग्याइश्शा, ठेयब ब्वाक्कु रे कीशा गुंडताक्यी।
- 17 मिनु आं कली मदाक्बपुकी नु आं क्येडा बोल्यो जोरी सत्रु रे प्रोंइती।
- 18 श्येत जडा नाक्त आं जोरी सत्रुम पुम्ताक्यीमी, तन्न परमप्रभु यावेमी वारच पाइक्ती।
- 19 मिनु आं कली प्रोंइशा, रिम्शो ब्रोंइशा बाक्तीकेम चाक्ती। मारदे हना आं कली दाक्शो बाक्त।
- 20 गो दोदेशो पा ठीक पडा, मोदेशो पा परमप्रभु यावेमी आं कली पाप रे डोन बाक्शो तशा, आं कली रिम्शो पाइक्ती।
- 21 मिनु गो परमप्रभु यावे आ लां गाक्शा, आ अरेशो टिशा, आं परमप्रभु रे नोले मशोंइसीड।
- 22 आ पतीके लोत्र नेल्ल आं डोंइती बाक्तेक्म। गो मेको आ फुल्लुम मुशा ब्रेक्शो लोत्र का यो मप्रोनो।
- 23 मिनु मेको आ डोंइती गो दोस मताइब बाक्ती। मिनु गो ठीक मपतीके रे डोन बाक्ती।
- 24 गो दोदेशो पा ठीक पडा, मोदेशो पा परमप्रभु यावेमी आं कली आ डोंइती पाप रे डोन बाक्शो तशा, रिम्शो पाइक्ती।
- 25 गे जमान खाप्ब आन कली जमान खाप्ब बाक्नीनी। गे ठीक पाइब आन कली इन ठीक पतीके कोंइनीनी।
- 26 गे पाप रे डोन बाक्ब आन कली इन पाप रे डोन बाक्तीके कोंइनीनी। तन्न गे दूली पाइबपुकी नु काइ मगारनीनी।
- 27 गे दिप्चा पुंडसीशो मुर आन कली श्येत रे प्रोंइनीनी। मिनु ठेयब लेशो मुर आन कली आइक्च सेल्नीनी। अय्युब २२:२९
- 28 गे आं बत्ती ब्रपाइक्नीनी। परमप्रभु यावे, आं परमप्रभु, गे आं छिडछिड कली छेडछेड सेल्नीनी।
- 29 इन वारच पाइक्तीके गो शुश जोरी सत्रु नु ग्रानुड। इन वारच पाइक्तीके गो ठेयब गारो प्रेक्शा खाक्ने चान्पुड।
- 30 परमप्रभु आ लां ठीक बाक्ब। परमप्रभु यावे आ लोत्र क्येख सुन खोदेशो बाक्ब। सु सु मेको कली जिम्मा गेंसीनीमी, मेको आन कली तेक्तीक बाक्ब।
- 31 परमप्रभु यावे क्येडा अर्को सु परमप्रभु बाक्बा डा? आं परमप्रभु क्येडा अर्को तेको सेरथे फुल्लु बाक्बा डा?
- 32 परमप्रभुमी आं कली शुश सक्ति पाइश्शो सेल्ती। मेकोमी आं लां ठीक सेल्ब।
- 33 मेकोमी आं खोइली किश्श आ खोइली खोदेशो सेल्शा, लाइश्शो इर डा बाक्तीकेमी राप्पाइक्ती।
- 34 मेकोमी आं कली लडाइ पचा नु आं गुड कली कांसा के लिब्रा खुक्चा शेंब।
- 35 गे ब्रोंइतीके डा इन तेक्तीक आं कली गेतीनी। इन ग्युरा गुडमी आं कली वारच पाइश्शा, ठेयब सेल्तीनी।
- 36 आं लां ठेयब सेल्तीनी। मोपतीके आं खोइली मग्रेक्थु, गाक्ने चान्पुड।
- 37 गो आं जोरी सत्रु आन कली खेदा पा थित्तामी। मेको आन कली साइक्ने मथुमु सम्म गो मलेडड।
- 38 गो मेको आन कली बोक्ने मचाप्चा डा पा तुप्तामी। मेकोपुकी आं खोइलीम गोल्तेक्म।
- 39 मारदे हना गे आं कली लडाइ पचा कली शुश सक्ति गेतीनी। आं जोरी सत्रु आन कली आं खोइलीम बाप्पाइक्तीनी।
- 40 गे आं जोरी सत्रु आन कली प्रोकपाइक्तीनी। मिनु गो आं कली काइ मदाक्ब आन कली साइक्तामी।
- 41 मेकोपुकीमी “वारच पाइक्की” दे ग्रीमानु, मेको आन कली प्रोंइब सुइ मबा। परमप्रभु यावे कली पुंडतेक्म हना यो, मेकोमी मेको आन कली लोत्र मलेत्त। हितोपदेस १:२८
- 42 मिनु गो मेको आन कली फशेम बेरपाइश्शो फुरक खोदेशो पा फस सेल्तामी। गो मेको आन कली लां डा ग्रॉग्रा खोदेशो पा ताइक्ताक्डमी।
- 43 गे मुर आन साइक्तीक रे आं कली प्रोंइतीनी। रागी रागी कली सासन पाइब सेल्तीनी। आं मतुइश्शो जात डा मुरपुकी आं गेय पाइब दुम्तेक्म।

- 44 आं अरेशो नेन्मेनु, मेकोपुकीम टिम्तेकम। अर्को रागी डा मुरपुकी आं डोंडती बाप्तेकम।  
 45 अर्को रागी डा मुरपुकी खिंखि पा हिंशा आन बोल्यो दरवार रे व्रूतेकम।  
 46 परमप्रभु यावे ब्रोंडशा बाक्ब आं सेरथे फुल्लु ठेयब दुम्ल। आं कली प्रोंडब परमप्रभु मान ताडब बाक्ल।  
 47 परमप्रभुमी आं कली क्येक्क लेत्तीक सक्ति गेशा, जात जात डा मुर आन कली आं सासनम बाक्ब सेल्लु।  
 48 मेकोमी आं जोरी सत्रु रे प्रोंडती। मेको आन क्येडा आं कली ठेयब सेल्लती। मिनु आं कली दिप्शा हुश खाक्श पोक्ब आन क्येडा प्रोंडती।  
 49 मोपतीके परमप्रभु यावे, रागी रागी डा मुर आन दातेमी गो इन नें ठेयब सेल्ला, इन कली कुम्सो पाडनुड। रोमी १५:९  
 50 परमप्रभुमी आ पिप कली शुश ग्राब सेल्लु। आ तेल लुक्शो पिप दाऊद नु आ चच युड आन कली गेना हना यो दाक्ब। २सामुएल ७:१२-१६

## 19

परमप्रभु आ सेल्लो नेल्ल रिम्शो बाक्ब

कुम्सो पपाडक्ब कली दाऊद आ कुम्सो।

- 1 सरीडमी परमप्रभु आ छेडछेड आ पबर्म लोत्र पाडब। सरीड आ ठेयब दुम्तीकेमी परमप्रभु आ गेय आ पबर्म लोत्र पाडब। रोमी १:१९-२०  
 2 नाक्त कामी अर्को नाक्त कली शेंब। नाक्दो कामी अर्को नाक्दो कली देंब।  
 3 मारेड लोत्र मबाक्ब। ब्वाक्शो यो मनेंसीब।  
 4 मो हना यो रागी नेल्लेम तुडक्नीम। मेकोमी सरीडम नां कली बाक्तीक सेल्लु। रोमी १०:१८  
 5 मेको नां ग्युबे पचा चिक्शो ग्युम्ले खोदेशो बाक्ब। मेको ग्येरसीशा आ लां गाक्ब।  
 6 मेको पूर्ब रे दाप्शा, तेड तेड हिरसीब। मेको आ नाप्शो रे मारेड खुडइशा लीने मचाप्नीम।  
 7 परमप्रभु यावे आ अरेशो लोत्र नेल्ल आन कली गारब। मेकोमी लेंशा ब्रोंडपाडक्ब। परमप्रभु यावे आ देंतीके थमा लोत्र बाक्ब। मेकोमी मतुडक्ब आन कली तुडक्ब सेल्लब।  
 8 परमप्रभु यावे आ ब्रेक्शा अरेशो लोत्र ठीक बाक्शा, मुर आन थुं ग्येरपाडक्ब। परमप्रभु यावे आ शेंशोमी मुर मिक्च ताडब दुम्नीम।  
 9 परमप्रभु यावे कली मान पा हिंचा रिम्शो दुम्शा, गेना हना यो लीब। परमप्रभु यावे आ निसाफ पतीक लोत्र थमा नु गेना हना यो ठीक बाक्नीम।  
 10 मेको सुन क्येडा यो शुश माल्चा डा, क्येख सुन क्येडा यो क्येट लाडब खोदेशो बाक्ब। मेको चाका रे याप्शो खुदो क्येडा यो जिज बाक्ब।  
 11 मेकोमी इन गेय पाडब कली होस पा बाक्पाडक्ब। मेको लोत्र टीबपुकीम ठेयब इनाम ताडनीम।  
 12 आ मतुडक्थु दूली पशो, सुम तुडक्बा डा? आं मतुडक्थु मरिम्शो पशो माफ गेयीनी। अय्युब ४२:३-६  
 13 इन गेय पाडब कली ठेयब लेशो दुम्तीक रे तेक्कीन। ठेयब लेशो दुम्तीकेमी आं कली हुकुम मपवल। मोपा गो दोस नु हेंथे पतीक रे ब्रोंडनुड।  
 14 परमप्रभु यावे, आं सेरथे फुल्लु नु आं कली श्येत रे प्रोंडब, आं पशो लोत्र नु आं मिम्शो ब्रने।

## 20

ग्राचा कली पुंडुशो लोत्र

कुम्सो पपाडक्ब कली दाऊद आ कुम्सो।

- 1 गे श्येत जनीनु, परमप्रभु यावेमी इन लोत्र लेत्तल। याकूब आ परमप्रभु आ नें आ पबर्म इन जोरी सत्रुम थिन्ने मचाप्मेक्कल। हितोपदेस १८:१०  
 2 मेकोमी आ बाक्तीक रे इन कली वारच पाडब सोडक्तल। सियोन रे इन कली वारच पवल।

- 3 मेकोमी इन चढेशो नु चोशा चढेशो नेल्ल मिम्शा ब्रवल। ठेयब सेंदा पा।
- 4 मेकोमी इन दाक्शो नेल्ल गेवल। इन मिम्शो नेल्ल खबल। भजन संग्रह २१:३
- 5 गो इन ग्राशो तशा, ग्येरशा ग्रीशा आंइ परमप्रभु आ नेमी छेदर पोक्नीकी। परमप्रभु यावेमी इन पुंइशो नेल्ल गेवल।
- 6 परमप्रभु यावेमी आ तेल लुकशो पिप कली प्रॉइब, दे मुल तुइक्ताकड। आ स्वर्ग डा बाक्तीकेमी यो इन लोत्र नेंशा, आ सक्ति पाइशो ग्युरा गुइमी वारच पाइब। प्रस्थान १५:६
- 7 कोइ मुरपुकीमी शारा, बग्गी तशा, ग्रानीकी, दे मिम्नीम। तन्न गोपुकी परमप्रभु यावे, आंइ परमप्रभु आ नें मिम्शा, ग्रानीकी। भजन संग्रह ३३:१७; ब्यवस्था २०:१; यसैया ३१:१
- 8 मेकोपुकी गोल्नीम। तन्न गोपुकी राप्स डा राप्स बाक्नीकी।
- 9 परमप्रभु यावे, आंइ पिप कली ग्रापतीन। गो पुंइकानु, आंइ लोत्र लेत्तीन।

## 21

### परमप्रभुम पिप कली वारच पशो

कुम्सो पपाइक्ब कली दाऊद आ कुम्सो।

- 1 परमप्रभु यावे, इन सक्ति तशा, पिप ग्येरसाक्ब। इन प्रॉइतीकेमी मेको शुश ग्येरसाक्ब।
- 2 गे आ थुं डा दाक्शो गेतीनी। आ पुंइशो “मगेनुड” मदेनी। ठेयब सेंदा पा। भजन संग्रह २०:५; भजन संग्रह ३७:४
- 3 गे मेको कली आसीक गेशा, रिम्शो पाइक्तीनी। मिनु आ पियाम क्येख सुन के सिरपेच गुप्ताक्नी।
- 4 मेकोमी “ब्रॉइचा गेयी” दे इन कली पुंइतु। मिनु गे मेको कली गेना हना यो ब्रॉइशा, बाक्चा गेतीनी। भजन संग्रह ६१:७
- 5 इन प्रॉइतीकेमी आ दारस ठेयब दुम्त। शोंप नु मान ततीके मेको तारी वोइक्तीनी।
- 6 गे मेको कली गेना हना यो आसीक राइब सेल्शा, इन डोंइती ग्येरपाइक्तीनी।
- 7 मारदे हना पिपमी परमप्रभु यावे कली थमा सुइशशा, नेल्ल क्येडा ठेयब आ गेना हना यो दाक्तीकेमी पोक् थेक्शा बाक्ब।
- 8 गे इन गुइमी इन जोरी सत्रु नेल्ल आन कली मालशा ग्याइक्तीनी। इन कली काइ मदाक्ब आन कली इन ग्युरा गुइमी साइक्तीनी।
- 9 इन जाक्ची ना मेको आन कली ठेयब चुप्लुम हुम्शो खोदेशो पा हुम्नीनी। परमप्रभु यावे, गे चुरशा, मेको आन कली दाक्शो खोदेशो पा मीम दाक्पाइक्तीनी।
- 10 मेको आन चच युइ आन कली रागी रे क्याम्नीनी। आन आल आन कली मुर आन दाते रे क्याम्नीनी।
- 11 मेकोपुकीमी इन कली मरिम्शो पचा, दे मिम्शो बाक्तेक्म हना यो, आन मिम्शो पने मचाप्नीम। यसैया ८:१०
- 12 गे मेको आन कली प्रोकपाइशशा, आन कुलम ख्रपाइक्चा कली लिब्रा कीनीनी।
- 13 परमप्रभु यावे, इन सक्तिम बोक्नीनी। गोपुकीमी कुम्सो पशा, इन सक्ति ठेयब बाक्ब, दे इन कली ठेयब सेल्नीकी।

## 22

### श्येत जापु हना यो, छेडछेड ताइब

कुम्सो पपाइक्ब कली सुनी डा किरश आ लायो डा दाऊद आ कुम्सो। यसैया ५३:५; मत्ती २७:३५-४६

- 1 आं परमप्रभु, आं परमप्रभु, गे मारदे आं कली प्रॉइयीनी? मारदे गे आं कली वारच मपथु, डोन बाक्नीनी। मारदे आं थोशो मनेनीनी। मत्ती २७:४६
- 2 आं परमप्रभु, गो इन कली नाक्त ब्रेडडानु, गे लोत्र मलेत्तीनी। गो नाक्दो ब्रेडडानु यो, आं थुं नाइक्चा मतड।
- 3 मिनु इस्राएलीपुकीम इन कली ठेयब सेल्तीक कुम्सो पामेनु, गे का ला मेको आन तार बाक्नीनी।

4 आंइ किंकी पिपीम इन कली थमा सुइक्ना सुइक्न बाकशो बाकमा बाक्त। गे मेको आन कली आन जोरी सत्रु रे प्रोंइशो बाक्तीनी।

5 इन कली पुंडशा ब्रेशशा, ब्रोंइचा तशो बाक्तेक्म। इन कली जिम्मा गेंसीशा, थमा सुइशशा, मुने मदोक्म। भजन संग्रह २५:२-३

6 गो चहिं मुर मदुमथु, लुस्पु खोदेशो दुम्ती। मुरपुकीम आं कली शुक्शी पा ग्रांग्रा दित्नीम। अय्युब २५:६; यसैया ४१:१४

7 आं कली ताइब नेल्लेमी आं पर्वम रिशशा, ठेयब लेशशो लोत्र पशा, आन पिया हिम्नीम। अय्युब १६:१०

8 मिनु मेकोपुकीमी “परमप्रभु यावे कली थमा सुइक्ब, परमप्रभु यावेमी इन कली श्येत रे प्रोनल। मारदे हना परमप्रभुमी इन कली दाक्ब” दे शुक्शी पाइनीम। मती २७:४३

9 गो मोदेब दुम्ती हना यो, गे आं कली जरमेपपाइक्तीनी। गो आं ममा आ दूध तूडु रे आं कली कोव्रतीनी।

10 डोंइती रे गो इन के दुम्ती। आं ममामी थियी रे गे आं परमप्रभु बाक्तीनी।

11 गे आं रे डोन मबाक्कीन। मारदे हना गो श्येत जचा चिकशो बाक्नुड। वारच पाइब सुइ मबाक्नीम।

12 ठेयब सांढेपुकीमी पुम्ताक्यीमी। बाशान रागी डा हिंचा डा सांढेपुकीमी यो पुम्ताक्यीमी।

13 शोत्रलु बेक्शा ग्रीशो गुप्स खोदेशो पा आन शोत्र पाक्शा, ग्राम्चा चिकताक्यीमी।

14 गो लुक्शो ब्वाक्कु खोदेशो दुम्ती। आं रुश नेल्ल गलाक गुलुक दुम्तेक्म। आं लुडगीर मयीन खोदेशो दुम्शा, यशो बाक्ब।

15 आं सक्ति ग्युम्त। ब्रोल्लशो खप के गर खोदेशो दुम्त। आं शोत्र सोत्रत। मिनु गे आं कली साइक्चा ठीक पाइतीनी। यूहन्ना १९:२८

16 कुचुमपुकीमी आं कली पुम्ताक्यीमी। काइ मरिम्शो पाइब आन हुल आं एर ओंथ बाक्नीम। आं गुड खोइली खित्ताक्यीमी। यूहन्ना २०:२५,२७

17 गो आं रुश का का पा हिकने चान्पुड। मेकोपुकीमी आं कली शुक्शी पा कोव्रस डा कोव्रस बाक्नीम।

18 आं वासी योक्सीशा, आं फेक्शो वा आ पर्वम “सुम ताइबा” दे फेन्टे ग्यारनीम। यूहन्ना १९:२४

19 परमप्रभु यावे, गे आं क्येडा डोन मबाक्कीन। गे आं कली सक्ति गेब बाक्तीनी। गे रीब पा आं कली वारच पाइय्यीनी।

20 आं कली तरवार नु कुचुम रे प्रोंइयीनी।

21 गुप्स आ शोत्र नु ब्वाकी डा सांढे आन ग्रोत्र रे प्रोंइयीनी। दानीएल ६:२३

22 गो “इन नें ठेयब बाक्ब” दे आं लोक्ब आन कली शेंनुडमी। मिनु थमा सुइक्ब आन गुम्तीकेमी इन नें ठेयब सेल्लुड। भजन संग्रह २६:१२; हिबू २:१२

23 गे परमप्रभु यावे कली मान पा हिंबपुकीमी, मेको कली ठेयब सेलीन। याकूब आ चच युइ, मेको कली “गे नेल्ल क्येडा ठेयब बाक्तीनी” देनीन। इस्त्राएल आ चच युइ नेल्ल मेको कली मान पा हिनीन।

24 मारदे हना मेकोमी श्येत जाइब आन श्येत तशा, आ कुल मखुइक्थु, आं ब्रेशशो नेंतु। हिबू १५:७

25 ठेयब गुम्तीकेमी आं इन कली ठेयब सेल्लीक कुम्सो इन लां रे जाक्ब। आं कसम जशो इन कली मान पा हिंब आन डोंइती खान्पुड।

26 पुडगा मुरपुकी जशा रूनीम। मिनु परमप्रभु यावे कली माल्लपुकीमी “परमप्रभु यावे ठेयब बाक्ब” देनीम। गोपुकी गेना हना यो ब्रोंइशा बाक्चा ताइनीनी। भजन संग्रह ६९:३३

27 रागी रागी डा मुरपुकीमी आं कली मिम्शा, परमप्रभु यावे गे लाइनीम। मिनु रागी डा खिं खिं डा मुरपुकी परमप्रभु आ डोंइती बाप्नीम।

28 मारदे हना मेको राज्य परमप्रभु यावे केन बाक्ब। मिनु मेकोमी रागी रागी डा मुर आन कली सासन पाइब।

29 रागी रागी डा जाइब तूब, शुश क्येट थीबपुकी परमप्रभु आ डोंइती बाप्नीम। मिनु बेक्शा, फुरक दुम्ब नेल्ले मेको आ डोंइती बाप्नीम।

30 मिनु मेको आन चच युइपुकीमी मेको कली सेवा पाइनीम। मिनु आन नोले डा पाला डा मुर परमप्रभु यावे आ परबम शेंचा पुंडसीनीम।

31 मेकोपुकीम नोले जरमेशो मुर आन कली परमप्रभु आ ठीक पतीके आ परबम शेंनीम। मेकोमी प्रोंडतु, दे नेल्ल आन कली तुइक्पाइक्नीम।

## 23

रिम्शो गोठला

दाऊद आ कुम्सो।

1 परमप्रभु यावे आं गोठला बाक्ब। आं माल्शो नेल्ल बाक्ब। उत्पत्ती ४८:१५; यसैया ४०:११; यूहन्ना १०:११-३०

2 आं कली रिम्शो घांस बाक्तीकेम इप्पाइक्ब। ब्रोव्रशो ब्वाक्कु आ नेक्था चाक्दीप्ब। इजीकीएल ३४:१३-१४; प्रकाश ७:१७

3 मेकोमी आं थुं बारपाइक्ब। आं कली आंम आ नें आ परबम ठीक लां कोंडब।

4 मिनु गो बेक्चा डा बेसीम गाक्ती हना यो, महिनुड। मारदे हना गे गो नु बाक्नीनी। इन कोक्के तशा आं थुं नाइश्शा ग्येरनुड। भजन संग्रह ४६:३

5 गे आं कली आं जोरी सत्रु आन डोंइती थुल्नीनी। आं पिया तार तेल लुक्नीनी। आं कचौरा क्युप्चा डा पा प्रिताक्नी। भजन संग्रह ३६:९

6 थमा पा गो मबेक्डा सम्म परमप्रभु आ रिम्शो पतीके नु आ दाक्तीके गो नु बाक्ब। मिनु गो गेना हना यो परमप्रभु यावे आ खिम बाक्नुड। भजन संग्रह ८४:५

## 24

परमप्रभु आ बाक्तीक ओव्रशो

दाऊद आ कुम्सो।

1 रागी नेल्ल, मेकेर डा मारेइ मारेइ नु मेकेर डा ब्रोंइशा बाक्ब नेल्ल परमप्रभु यावे केन बाक्नीम। यूहन्ना १:११; १कोरिन्थी १०:२६

2 मारदे हना परमप्रभुमी मेको नेल्ल आन कली ब्वाक्कु तारी सेल्शा, शुश ब्वाक्कु तारी लीमल, दे सेल्शो बाक्त।

3 सु परमप्रभु यावे आ डांडा डोइक्चा ताइबा डा? सु आ योव्रशो बाक्तीकेम बाक्ने चाप्बा डा? भजन संग्रह १५:-

4 आन गुइमी काइ मरिम्शो मपाइबपुकी, रिम्शो थुं पाइश्शोपुकी, मूर्ति आन डोंइती सेउ मपाइबपुकी नु जोल पा कसम मजाइबपुकी ला मेकेर डोइक्ने चाप्नीम।

5 मेकोपुकीमी परमप्रभु यावे आ आसीक ताइनीम। मिनु पाप रे प्रोंडब परमप्रभुमी मेको आन कली आ ठीक पतीके गेब। यसैया ४८:१८

6 मोदेशो मुरपुकी परमप्रभु कली माल्ब बाक्नीम। मिनु “याकूब आ परमप्रभु, इन कुल तचा दाक्नीक” देंनीम। ठेयब सेंदा पा।

7 मिनु “गे ठेयब लाप्चोपुकी इन पिया पोक्कीन। माइत लाप्चोपुकी रोक्सीन। मिनु मेकेर रे छेडछेड डा पिप ओव्रल। रसामुएल ६:१-१९; यसैया ४०:३-४

8 मेको छेडछेड डा पिप सु बाक्मे? मेको मारेइ मारेइ पने चाप्ब ठेयब सक्ति पाइश्शो परमप्रभु यावे बाक्ब। परमप्रभु यावे लडाइम ग्राब बाक्ब।

9 गे ठेयब लाप्चोपुकी इन पिया पोक्कीन। माइत लाप्चोपुकी रोक्सीन। मिनु मेकेर रे छेडछेड डा पिप ओव्रल।

10 मेको छेडछेड डा पिप सु बाक्मे? मेको मुर नेल्ल आन परमप्रभु यावे बाक्ब। मेको छेडछेड डा पिप बाक्ब”। ठेयब सेंदा पा।

## 25

परमप्रभुमी माफ गेशा, लां कोइब

दाऊद आ कुम्सो।

1 परमप्रभु यावे, गो आं थुमी इन नेक्था दुम्नुड।

2 आं परमप्रभु, गो इन कली मिम्शा, महिंथु बाक्शो बाक्नुड। गो मुने मदोक्डल। आं जोरी सत्रु आं क्येडा मग्रामल।

3 इन लां कोव्रब नेल्ल मुने मदोक्मल। मोशान श्येत गेबपुकी चहिं मुने दोक्मल।

4 परमप्रभु यावे, आं कली इन लां कोइदीनी। इन गाक्तीक लां शेंदीनी।

5 इन थमा पतीकेम आं कली गाक्चा, शेंदीनी। मारदे हना गे आं कली श्येत रे प्रोंइब परमप्रभु बाक्नीनी। गो नाक्त रे इन लां कोव्रशा, बाक्नुड।

6 परमप्रभु यावे, इन शिशी नु गेना हना यो दाक्तीके कली मिम्तीन। मारदे हना मेको साइ डोंइती रेन बाक्त।

7 गो ठिटा बाक्डा ना आं पशो पाप नु आं मरिम्शो पशो प्रेंदीन। परमप्रभु यावे, इन गेना हना यो दाक्तीके नु रिम्शो पतीकेम आं कली मिम्तीन।

8 परमप्रभु यावे रिम्शो नु रिम्शो थुं पाइशो बाक्ब। मोपतीके मेकोमी पाप पाइब आन कली आ लां आ पर्वम शेंब।

9 ब्रेम्शो आन कली ठीक लां कोइशा, आ लां शेंब।

10 परमप्रभु यावे आ कबल नु आ देशो टीब नेल्ल परमप्रभु आ गेना हना यो दाक्तीके नु आ दाक्शा मप्रोंइतीकेमी व्रीशो बाक्नीम।

11 परमप्रभु यावे, आं पाप टेयब बाक्त हना यो, इन नें आ पर्वम आं ठीक मपशो माफ गेयीनी। प्रस्थान ३४:६-७

12 सु सुमी परमप्रभु यावे कली मान पा हिंनीमी, मेको आन कली तेको लां लचा माल्नीमी, मेको शेंब।

13 मिनु मेको आन माल्शो नेल्ल तशा, आन थुं नाइक्नीम। मेको आन आलपुकीम मेको रागी ताइनीम। भजन संग्रह ३७:९

14 परमप्रभु यावे आ कली मान पा हिंब आन वारच बाक्ब। मिनु मेको आन कली आ कबल शेंब।

15 गो गेना हना यो परमप्रभु यावे गे ला कोव्रनुड। मारदे हना मेकोमी आं खोइली ब्वारद रे प्रोंइब।

16 गे आं गे हिरसीने। मिनु आं कली शिशी पाइय्यीनी। मारदे हना गो आं का दुम्शा, श्येत जशो बाक्नुड।

17 आं थुं डा श्येत बारशो बाक्नीम। मेको श्येत रे प्रोंइयीनी।

18 आं श्येत जशो नु आ थुं खाइशो कोव्रडीन। मिनु आं पशो पाप नेल्ल क्याम्दीने।

19 आं जोरी सत्रु आन कली कोव्रडीन, मारदे हना मेको शुश बाक्नीम। मिनु मेकोपुकीमी आं कली काइ मदाक्नीम। भजन संग्रह ३५:१९

20 आं कली खाल पा प्रोंइयीनी। गो मुने मदोक्डल। मारदे हना इन कली जिम्मा गेसाक्यी।

21 रिम्शो पतीके नु रिम्शो थुं बाक्तीकेमी आं कली खाल पयील। मारदे हना गो इन लां कोव्रशा बाक्नुड।

22 परमप्रभु, इस्राएल कली आ श्येत नेल्ल रे प्रोनीन। भजन संग्रह १३०:८

## 26

परमप्रभु आ डोंइती लोव्र पशो

दाऊद आ कुम्सो।

1 परमप्रभु यावे, आं कली निसाफ पने। गो मारेइ दोस तचा डा गेय मपड। परमप्रभु यावे, गो इन कली जिम्मा गेंसीशा, महिम्सीथु बाक्ती।

2 परमप्रभु यावे, गे आं कली नाक्तीन। आं थुं नु मिम्तीक नाक्शा कोव्रडीन।

3 इन गेना हना यो दाक्तीक आं डोंइती बाक्ब। मिनु गो इन कली मप्रोंइथु, गाक्शो बाक्नुड।

- 4 गो दूली पाइब मुरपुकी नु मबाकड। मिनु जोल पाइबपुकी नु गारशा गेय मपड। भजन संग्रह १:३
- 5 मरिम्शो पाइब आन देल्टीके ग्रांग्रा दीनुड। मिनु इन अरेशो मटीब नु मबाकनुड।
- 6 आं गुडमी मारेड मरिम्शो मपड। परमप्रभु यावे, इन कली ठेयब सेल्शा, इन चढेतीके आ एर ओंथ हिरशा बाकनुड। ब्यवस्था २१:६-७; मत्ती २७:२४
- 7 मेना इन नें ठेयब सेल्ना सेल्न कुम्सो पा, इन पशो छक लाकचा डा गेय नेल्ल ठेयब सेंदाम शेंनुड।
- 8 परमप्रभु यावे, इन बाक्तीक खिं नु इन छेडछेड दाकनुड। भजन संग्रह २२:४; भजन संग्रह १२२:१-२
- 9 आं कली मरिम्शो पाइब नु हुश खाक्श पोक्ब नु मसाइय्यीनी।
- 10 मेकोपुकीम मरिम्शो ला पशा, घूस जाइनीम।
- 11 गो चहिं, मारेड दोस तचा डा गेय मपथु, बाक्शो बाकनुड। आं कली शिशी पचा मप्रोंइयीनी।
- 12 परमप्रभु यावे, गो दिंममी राप्शा, शुश मुर आन गुम्तीकेमी इन कली ठेयब सेल्नुड। भजन संग्रह २२:२३

## 27

### परमप्रभु यावे नु थुं का दुम्शो

दारुद आ कुम्सो।

- 1 परमप्रभु यावे आं छेडछेड नु आं कली श्येत रे प्रोंइब बाक्ब। गो सु नु हिंचा माल्नुडा डा? परमप्रभु यावे आं ब्रोंइतीक सक्ति नु आं खुइक्तीक बाक्ब। आं कली सुम हिंच कोंइने चाप्बा डा? मीका ७:८; भजन संग्रह ५६:५
- 2 मरिम्शो मुरपुकी आं श्ये ब्वचा कली आं नेक्था जाकमानु, आं कली खेदा पाइब नु आं जोरी सत्रु दाइल पपाइशशा खोल्चा पुंडसाकम।
- 3 मिनु ठेयब लडाइ पाइब हुलम पुम्ताक्यीमी हना यो, गो महिंनुड। जिचा पोक्तेकम हना यो “परमप्रभुमी आं कली प्रोंइब” दे थमा सुइशशा बाकनुड। भजन संग्रह ३:७
- 4 गो परमप्रभु यावे नु लोव्र का पुंडनुड। मिनु मेको माल्ना माल्न बाकनुड। मेको मार बाक्ब देशा हना “गो मबेक्डा सम्म परमप्रभु यावे आ बाक्तीकेमी बाक्शा, परमप्रभु यावे आ रिम्शो पतीके तचा नु आ खिंम मेको कली माल्शा तुइक्चा दाकनुड। भजन संग्रह २६:८; भजन संग्रह ४२:५; भजन संग्रह ६३:३; भजन संग्रह ८४:४, ५, ११
- 5 मारदे हना श्येत दुम नाक्ती, मेकोमी आं कली आ बाक्तीकेमी खुइशशा वोइक्ब। मिनु आं कली सेरथे फुल्लु तारी वोइक्ब। भजन संग्रह ३१:२१
- 6 मोपा आं एर ओंथ बाक्शो जोरी सत्रु आन डोंइती आं पिया पोक्ब। मिनु गो ग्येरशा ठेयब सेंदामी परमप्रभु यावे कली चढेशा, कुम्सो पाइनुड।
- 7 परमप्रभु यावे, गो इन कली ब्रेडडानु, गो आं लोव्र नेंशा, शिशी पा आं पुंडशो गेयीनी।
- 8 परमप्रभु यावे, इन लोव्रमी ‘आं कली मालीन’ दे ब्रेक्शो खोदेशो पा, आं थुंमी इन कली माल्नुड। ब्यवस्था ४:२९
- 9 इन कुल आं क्येडा मखुइक्तीन। इन गाइक्तीकेमी इन गेय पाइब, आं कली, मतिल्यीनी। गो आं कली वारच पाइब बाक्नीनी। गो नु बाक्शा, मप्रोंइयीनी। गो आं कली श्येत रे प्रोंइब बाक्नीनी।
- 10 आं आम आफोमी आं कली प्रोंइतीसी हना यो, परमप्रभु यावेमी आं कली कोव्रब।
- 11 परमप्रभु यावे, आं कली इन लां शेंदीनी। मिनु आं जोरी सत्रु आन पर्वमी आं कली ठीक लां कोंइदीनी। भजन संग्रह ८६:११; भजन संग्रह १३९:२४
- 12 आं कली खेदा पाइब आन गुडमी मगेयीनी। मारदे हना मेको जोल पा सांकछी बाक्शो बाक्नीम। मेकोपुकी हुश खाक्श पोक्ब बाक्नीम।
- 13 गो ब्रोंइशा बाक्ब आन बाक्तीकेमी, परमप्रभु यावे आ रिम्शो पतीके ताइनुड, दे थमा सुइक्नुड” दे लोव्र पाता। यसैया ३८:११



14 गो इ कली “परमप्रभु यावे आ वारच पतीके रिम्दो। बोल्यो दुमो। इ थुं बारपतो। मिनु परमप्रभु यावे आ वारच पतीके रिम्दो” दे कुम्सो पाता।

## 28

शिशु नु वारच पतीके पुंइशो

दाऊद आ कुम्सो।

1 परमप्रभु यावे, गो इन कली लोव्र पाइनुड। गे आं सेरथे फुल्लु बाकनीनी। आं कली लोव्र मलेत्थु, आं क्येडा डोन मलने। मो पाइतीनी हना, गो बेकशो मुर खोदेशो दुम्नुड।

2 आं पुंइशो लोव्र नेनीन। गो इन योव्रशो बाकतीके रे आं गुइ पोक्शा “वारच पाइय्यीनी” दे आं ब्रेशो लोव्र नेनीन।

3 आं कली इन अरेशो मटीब नु मरिम्शो पाइब मुर नु मक्याम्दीन। मेको आन नेक्था डा मुर नु गारशो लोव्र पाइनीम। तन्न आन थुं मरिम्शो पतीकेमी ब्रीशो बाकनीम। रसामुएल २०:९-१०

4 मेको आन पशो नु थाम्पा मरिम्शो पशो आ पर्वम क्येक्क लेत्तीन। दोदेशो पा पामे, मोदेशो पा क्येक्क लेत्तीन।

5 मेकोपुकीमी परमप्रभु यावे आ पशो नु आ गुइमी सेल्शो मारेइ ममिम्मीम। परमप्रभुमी मेको आन कली गेनायो मबोक्चा डा पा क्याम्शा, लेंशा मसेल्ब। यसैया ५:१२-१३

6 गो परमप्रभु यावे कली ठेयब सेल्नुड। मारदे हना “आं कली वारच पाइय्यीनी” दे आं पुंइशो नेंतु।

7 परमप्रभु यावे आं सक्ति नु आं तेक्तीके बाक्ब। गो मेको कली थमा सुइक्ता। मोपा आं कली वारच पाइक्ती। मोपतीके गो थाम्पा ग्येरसीशो बाक्नुड। गो आं कुम्सोमी मेको कली ठेयब सेल्नुड।

8 परमप्रभु यावे आ मुर आन सक्ति बाक्ब। आ तेल लुक्शो पिप कली प्रॉइब बाक्ब।

9 इन मुर आन कली प्रोनीन। इन रागी कली आसीक गेने। मिनु मेको आन कली गेना हना यो गोठला खोदेशो पा योव्रशा, गुप्शा, कुरशा पने।

## 29

परमप्रभु कली ठेयब सेल्शो

दाऊद आ कुम्सो।

1 गो सक्ति पाइशो आन तौपुकी, परमप्रभु यावे कली “गे सक्ति नु छेडछेड पाइशो बाकनीनी” देनीन। भजन संग्रह १०३:२०-२१

2 गो परमप्रभु यावे कली “इन नें नेल्ल आन क्येडा ठेयब बाक्ब” देनीन। गो परमप्रभु यावे आ दाक्तीकेमी ग्योम्सीशा परमप्रभु यावे आ डोंइती बाप्पीन।

3 परमप्रभु यावे आ सेंदा ब्वाक्कु तारी बाक्ब। छेडछेड डा परमप्रभुमी ठेयब ब्वाक्कु तारी बुंबु पपाइक्ब। परमप्रभु यावे ब्वाक्कु तारी बाक्ब।

4 परमप्रभु यावे आ सेंदा सक्ति पाइशो बाक्ब। परमप्रभु यावे आ सेंदा नेल्ल मान ततीक बाक्ब।

5 परमप्रभु यावे आ सेंदामी लेबानोन डा लाइशो रवा आन कली जिक्ब। परमप्रभु यावे आ लोव्रमी लेबानोन डा लाइशो रवा आन कली जिक्ब।

6 मेकोमी लेबानोन डाडा कली बाछा नु हेरमोन डाडा कली ब्वाकी डा ब्यफ खोदेशो पा प्रेक्पाइक्ब। ब्यवस्था ३:८-९

7 परमप्रभु यावे आ सेंदा चिला खोदेशो बाक्ब।

8 परमप्रभु यावे आ सेंदामी गोरशो रागी हिम्पाइक्ब। परमप्रभु यावेमी कादेश माइशो गोरशो रागी हिम्पाइक्ब।

9 परमप्रभु यावे आ सेंदामी ठेयब रवा कली जिक्पाइक्ब। ब्वाकी डा रवा नेल्ल शोल्मो पा खोल्ब। मिनु नेल्लेमी “परमप्रभु ला ठेयब बाक्ब” दे आ बाक्तीकेमी लोव्र पाइनीम।

10 परमप्रभु यावे आ ठेयब नित्तीके ब्वाक्कु तारी बाक्ब। मेको आ ठेयब नित्तीकेम निश्शा, गेना हना यो सासन पाइब।

11 परमप्रभु यावेमी आ मुर आन कली सक्ति गेब। परमप्रभु यावेमी आ मुर आन कली आसीक गेशा, थुं नाइक्पाइक्ब।

## 30

बेक्चा रे प्रॉइशो

परमप्रभु यावे आ खिं सेल्ले नुम्मेनु पतीक, दाऊद आ कुम्सो।

1 परमप्रभु यावे, गो इन कली मान पाइनुड। मारदे हना गे आं कली उइ रे ग्येत्थ पोक्तीनी। मिनु आं जोरी सनु आन कली आं पबर्म ग्येरचा मगेनी।

2 परमप्रभु यावे, आं परमप्रभु, इन कली “वारच पाइय्यीनी” दे ब्रेडडानु, गे आं कली सापाइक्तीनी।

3 परमप्रभु यावे, गे आं कली बेक्शो मुर आन बाक्तीक रे गुंडताक्यीनी। बेक्शो मुर आन दातेमी आं कली ब्रॉइतीक सोक्त गेशा, प्रॉइतीनी। भजन संग्रह ११६:३,४, ७-९

4 परमप्रभु यावे कली टीबपुकी, मेको कली कुम्सो पने। मिनु आ नें ठेयब सेलीन।

5 मारदे हना आ गाइक्तीक इच्का ला बाक्ब। तन्न आ शिशी पतीके ब्रॉइशो सम्म लीब। मुर नाक्दो रे डाक्चा माल्ताक्ब हना यो, सुनी ग्येरपाइक्चा पुंडसीब। यसैया ५४:७-८

6 गो थुं नाइशशा बाक्डानु “गो गेनायो महिम्सीनुड” देंती।

7 परमप्रभु यावे गेमी शिशी पा आं डांडा बोल्यो सेल्लतीनी। मिनु नोले इन कुल खुइक्तीनीनु, गो हिंती।

8 परमप्रभु यावे, गो इन कली पुंडता। गो इन कली ब्रेलती।

9 गो बेक्डानु, इन कली मार रिम्शो दुम्बा डा? फुरकुमी इन कली ठेयब सेल्बा डा? मार, इन दाक्शा गेनायो मप्रॉइतीक आ पबर्म शेंबा डा? भजन संग्रह ६:६

10 परमप्रभु यावे, आं लोव नेनीन। आं कली शिशी पाइय्यीनी। आं कली वारच पाइब दुमीन।

11 गो रोंका पाइब मुर, सिल पाइब दुम्ती। आं रोंका पतीक अरन्डी पुइशशा, ग्येरतीक किप्शुर खोदेशो पा किप्ताक्यीनी।

12 गो सिक्सी पा मबाक्थु, इन पबर्म कुम्सो पाइनुड। परमप्रभु यावे, गेना हना यो बाक्ब आं परमप्रभु, गो इन कली ठेयब सेल्लनुड।

## 31

परमप्रभु कली जिम्मा गेंसीशो

कुम्सो पपाइक्ब कली दाऊद आ कुम्सो।

1 परमप्रभु यावे गो इन कली जिम्मा गेसीनुड। गो गेनायो मुने मदोक्डल। इन ठीक पतीकेमी आं कली प्रॉइयीनी।

2 इन नोफा दाइक्तीने, आं कली रीब पा प्रॉइयीनी। गे आं खुइक्तीक सेरथे फुल्लु नु आं कली प्रॉइब बोल्यो दरवार दुमीन। भजन संग्रह ७१:३

3 इन नें आ पबर्म आं कली शेंशा, लां कोंइदीनी। मारदे हना गे आं सेरथे फुल्लु नु आं बोल्यो दरवार बाक्नीनी।

4 मेकोपुकीमी आं कली मतचा डा पा ब्वारद दाइक्ताक्म। आं कली प्रॉइयीनी। मारदे हना गे आं सक्ति बाक्नीनी।

5 आं सोक्त इन गुइमी जिम्मा गेनुड। परमप्रभु यावे, गे आं कली श्येत रे प्रॉइतीनी। गे इन मुर आन कली दाक्शा मप्रॉइब परमप्रभु बाक्नीनी। लूका २३:४६

6 गो शोर गाक्शो मूर्ति आन कली सेउ पाइब आन कली ग्रॉंघा दित्लुडमी। गो परमप्रभु यावे इन कली जिम्मा गेसाक्यी।

7 इन गेना हना यो दाक्तीक तशा, ग्येरना ग्येरन बाक्ती। मारदे हना गे आं श्येत तशा, आं थुं लुक्च लशो तुइशशो बाक्नीनी।

8 गे आं कली आं जोरी सनु आन गुइमी मगेनी। गे आं कली रिम्शो ठेयब बाक्तीकेमी बाक्पाइक्तीनी।

9 परमप्रभु यावे, आं कली शिशी पाइय्यीनी। मारदे हना गो श्येत जशो बाक्नुड। आं थुं लुकच दुम्तीके आं मिक्च ओव्रशो नु आं रां सोव्रशो बाक्ब।

10 आं थुं ग्येत्थ लुकच लतीके, गो बेक्चा चिकशो बाक्ती। हुकयी पतीकेमी आ ब्रोंडतीक नाक्ती योल्तेक्म। आं ठीक मपशोमी आं बोल नेल्ल ग्युम्शो बाक्ब। मिनु आं रुश नेल्ल मुक्शो बाक्नीम।

11 आं जोरी सत्रु आन क्येडा आं नेक्था डा मुरपुकीमी शुश शुक्शी पाइक्चा पुंडसीब दुम्ती। आं तुडशो मुर आं कली तशा हिंनीम। आं कली लांम ग्रुम्ब मुरपुकी आं कली तशा हिंशा प्रोक्नीम।

12 बेक्शो मुर खोदेशो पा सुडमी आं कली ममिम्नीम। गो ब्रोल्लशो गर खोदेशो दुम्ती।

13 गो ते लती हना यो हिंतीके ला बाक्ब। मारदे हना शुशेमी आं पर्बम जोल पा लोव्र पशो नेता। मेकोपुकी बुक्शा, आं कली साइक्चा कली सल्ला पाम्तेक्म। येरमीया २०:३

14 तन्न परमप्रभु यावे, इन कली जिम्मा गेंसीशो बाक्नुड। गो “गे आं परमप्रभु बाक्नीनी” देंती।

15 आं ब्रोंडतीक नाक्ती इन गुडमीन बाक्ब। आं जोरी सत्रु नु आं कली खेदा पाइबपुकी रे प्रोंडयीनी। भजन संग्रह १३९:१६; उपदेसक ३:१-८

16 इन छेडछेड डा कुल इन वाइल तारी वोतीन। इन शिशी पतीकेमी आं कली प्रोंडयीनी। भजन संग्रह ८०:४; गन्ती ६:२५

17 परमप्रभु यावे, गो मुने मदोक्डल। मारदे हना गो इन कली “वारच पने” दे पुंडता। इन अरेशो मटीबपुकी मुने दोक्मल। मेकोपुकी बेक्शो मुर आन बाक्तीकेम सिक्सी पा बाक्मल।

18 ठेयब लेशो मुरपुकीम ठीक पाइब आन कली आइक्च सेल्शा, मरिम्शो पाइनीम। जोल पा लोव्र पाइनीम। मेको आन शोव्र खेपतीन।

19 गो इन कली मान पा हिंब आन कली गेना हना यो शुश दाक्नीनी। इन कली जिम्मा गेंसीब आन कली दाक्तीके मुर आन डोंडती कोंडनीनी।

20 इन मुर आन कली मरिम्शो मुर आन क्येडा प्रोंडचा, दे इन बाक्तीकेमी खुडक्नीनी। गो इन मुर आन कली मरिम्शो लोव्र पाइब आन क्येडा खुडक्नीनी। भजन संग्रह २७:५

21 परमप्रभु यावे ठेयब बाक्ब। आं कली बोल्यो सहरम पुम्शो खोदेशो पा आ छक लाक्चा डा दाक्तीके कोंडताक्यी।

22 डोंडती गो हिंशा “गे आं कली मताइनीनी” देंती हना यो “वारच पाइय्यीनी” दे आं पुंडशो लोव्र नेतीनी।

23 परमप्रभु यावे आ मुर नेल्लेमी परमप्रभु कली दाक्तीन। परमप्रभु यावेमी आ कली थमा सुडक्ब आन कली कोव्रब। ठेयब लेशो आन कली आन क्येक्क लेप्ब।

24 परमप्रभु यावे आ लां कोव्रशा रिम्बपुकी, सक्ति पाइशशा, ठेयब थुं पाइशशो दुमीन।

## 32

### मरिम्शो पशो क्याम्चा पुंडसीशो

शेंतीक लोव्र डा दाऊद आ कुम्सो।

1 सु सु आन हेंथे पशो क्याम्चा पुंडसीशो बाक्मा, मेको ग्येरसीशो मुर बाक्नीम। मारदे हना आन पाप सुम्शो बाक्ब। रोमी ४:६-८

2 परमप्रभु यावेमी सु सु आन मरिम्शो पशो ममिम्बा, मेको ग्येरसीशो बाक्नीम। मेको आन थुमी जोल पतीक काइ मबाक्ब।

3 गो आं मरिम्शो पशो आ पर्बम सिक्सी पा बाक्शा, नाक्त रे आं श्येत जशोमी हुकयी पाता। मिनु आं रुश नेल्ल मुक्ताकमे।

4 मारदे हना नाक्दो नाक्ती इन गुडमी चिप्ताक्यीनी। गो नाप्शो नांम किक्शो खोदेशो दुम्ती। ठेयब सेंदा पा। भजन संग्रह ३८:१९; हितोपदेस २८:१३; याकूब ५:१६; यसेया ३८:१७

5 मिनु “गो परमप्रभु यावे कली आं पाप शोव्रनुड” देशा, गो आं मरिम्शो पशो इन डोंडती मखुडक्तु। मिनु गो आं मरिम्शो पशो क्याम्ताक्नी। ठेयब सेंदा पा।

6 मोपतीके इन कली टीब मुर नेल्लेम श्येत जशा, इन कली लोव्र पाइनीम। मिनु ब्वाक्कु बारशा जाक्त हना यो, मेको आन बाक्तीके मजाक्दीप्ब।

7 गे आं खुइश्शा बाक्तीके बाक्नीनी। गे आं कली श्येत रे प्रोंइनीनी। गे आं कली श्येत रे प्रोंइतीक कुम्सो पपाइक्नीनी। ठेयब सेंदा पा।

8 मिनु परमप्रभुमी “गे तेको लांम गाक्चा माल्नीनी, मेको इन कली शेंननी। गो इन कली कोव्रशा, लां कोंइननी।

9 गे मिम्तीके मपाइश्शो शारा नु खच्चर खोदेशो मदुमीन। मेको आन कली बिप्पाइक्चा कली लगम नु चलेतीके माल्ब। मो मदुम्त हना, मेकोपुकी इन नेक्था मजाक्नीम” देंत।

10 इन अरेशो मटीबपुकी शुश श्येत जाइनीम। तन्न परमप्रभु यावे कली थमा सुइक्बपुकी आ गेना हना यो दाक्तीक ताइनीम।

11 गे ठीक पाइबपुकी, परमप्रभु यावे कली मिम्शा ग्येरसीने। रिम्शो थुं पाइश्शोपुकी ग्येरशा, कुम्सो पने।

### 33

परमप्रभु कली ठेयब सेल्शो कुम्सो

1 ठीक पाइबपुकी परमप्रभु यावे कली मिम्शा ग्येरसीने। रिम्शो थुं पाइश्शोपुकीमी परमप्रभु यावे कली ठेयब सेल्तीक कुम्सो पचा शिरनीम।

2 बीना ताप्शा, परमप्रभु यावे कली ठेयब सेलीन। १० ओटा तार पाइश्शो ठेयब ताप्तीक ताप्शा, मेको कली कुम्सो पने।

3 मेको कली नक कुम्सो का पने। रिम्शो पा ताप्शा, ग्येरसीने। भजन संग्रह ४०:४; भजन संग्रह ९६:१; भजन संग्रह ९८:३; भजन संग्रह १४४:९; भजन संग्रह १४९:१; यसैया ४२:१०; प्रकाश ५:९

4 मारदे हना परमप्रभु यावे आ लोव्र थमा बाक्ब। मिनु मेको आ गेय नेल्ल आ दाक्शा मप्रोंइतीकेमी पाइब।

5 मेकोमी ठीक पतीके नु ठीक निसाफ दाक्ब। रागी नेल्ल परमप्रभु यावे आ गेना हना यो दाक्तीकेमी ब्रीशो बाक्ब।

6 परमप्रभु यावेमी लोव्र पशा, सरीड सेल्लु। आ मुइश्शोमी सोरुल नेल्ल दुम्तेक्म। उत्पती १:६, १४

7 मेकोमी समुन्द्र डा ब्वाक्कु कली गारो खोदेशो पा राप्पाइश्शो बाक्त। मिनु मेको कली वोइक्तीकेमी वोइश्शो बाक्त। भजन संग्रह १०४:९

8 रागी नु मेकेर बाक्ब मुर नेल्ले परमप्रभु यावे कली मान पा हिंमल।

9 मारदे हना परमप्रभुमी लोव्र पा मारिइ मारिइ दुम्शो बाक्त। मेकोमी अरेवानु, दुम्शो बाक्तेक्म। भजन संग्रह १४८:५

10 परमप्रभु यावेमी रागी रागी डा मुर आन मिम्शा पशो खतम सेल्ब। मेकोमी जात जात डा मुर आन मिम्शो गेय शोर गाक्शो सेल्ब।

11 परमप्रभु यावे आ मिम्शो गेना हना यो लीब। आ थुंम मिम्शो नेल्ल पाला सम्म लीब।

12 तेको रागीम परमप्रभु, आं परमप्रभु यावे बाक्बा, मेको ग्येरसीशो रागी बाक्ब। मारदे हना मेको योव्रसीशो रागी बाक्ब। ब्यवस्था ३३:२९

13 परमप्रभु यावेमी स्वर्ग रे कोव्रशा, मुर नेल्ल आन कली ताइब।

14 मेकोमी आ बाक्तीक रे रागीम बाक्ब मुर नेल्ल आन कली कोव्रब।

15 मेकोमी मुर नेल्ल आन थुं डा मिम्तीके सेल्ब। मुर नेल्ल आन पशो यो कोव्रब। हितोपदेस २१:१

16 मिनु सुइ पिप लडाइ पाइब आन पतीकेमी ब्रोंइने मचाप्नीम। लडाइ पाइब मुर आन ठेयब बोलम ब्रोंइने मचाप्नीम। १ सामुएल १७:-

17 मिनु “लडाइम शुश शारा बाक्तीके ब्रोंइनीकी” देंचा जोल बाक्ब। मेको आन ठेयब सक्तिम यो प्रोंइने मचाप्ब। भजन संग्रह २०:८

18 परमप्रभु यावेमी आ कली मान पा हिंब नु आ गेना हना यो दाक्तीक कली रिम्ब आन कली कोव्रब।

- 19 मिनु मेको आन कली बेक्चा रे प्रोंडब। मिनु अन्काल दुम्मेनु, ब्रोंडपाइक्ब।
- 20 गोपुकी परमप्रभु यावे आ लां कोव्रशो बाक्नीक। मेको आंइ कली वारच पाइब नु तेक्तीके बाक्ब।
- 21 मिनु परमप्रभु आ परबम आंइ थुं ग्येरब। मारदे हना गोपुकी मेको आ नेमी जिम्मा गेसाक्क।
- 22 परमप्रभु यावे, गो दोपा इन लां कोव्रका, मोपा इन गेना हना यो दाक्तीके गोपुकी नु बाक्ल।

## 34

### परमप्रभुमी कोव्रशो

दाऊद आ कुम्सो। दाऊदमी पिप अबीमेलेक क्येडा हिंशा, निप्स ग्यशो दुम्ची ना पशो कुम्सो। अबीमेलेकमी दाऊद कली खेरानु, दाऊद लशो। १सामुएल २१:१४-१६

1 गो परमप्रभु यावे कली गेना हना यो ठेयब सेलनुड। मेको कली ठेयब सेलतीक लोव्र गेना हना यो आं शोव्रम बाक्ब।

2 परमप्रभु यावे कली मिम्तीके आं थुं बारशा, ग्येरब। ब्रेम्शो थुं पाइशोपुकी यो एको नेंशा, ग्येरसीनीम।

3 गे गो नु परमप्रभु यावे कली ठेयब सेलीन। मिनु गो नेल्ल गारशा, आ नें ठेयब सेल्य।

4 मिनु गो परमप्रभु यावे कली माल्ता। मेकोमी आं लोव्र लेत्ताक्यी। मेकोमी आं कली हिंतीक नु श्येत रे प्रोंडती।

5 मेको आ लां कोव्रबपुकी ग्येरशो दुम्नीम। मेकोपुकी मुने मदोक्मल।

6 एको श्येत जाइबम पुंडतु। मिनु परमप्रभु यावेमी आ लोव्र नेंशा, आ श्येत रे प्रोंडतु।

7 परमप्रभु यावे आ स्वर्ग डा गेय पाइबम परमप्रभु कली मान पा हिंब नेल्ल आन एर ओंथ बाक्शा, खाल पाइब। मिनु मेको आन कली आन श्येत रे प्रोंडब। भजन संग्रह ११:११; उत्पत्ती ३२:२-३; २राजा ६:१७

8 परमप्रभु यावे कली कोव्रडीन, मेको रिम्शो बाक्ब। मेको कली जिम्मा गेंसीबपुकी ग्येरसीशो बाक्नीम। १ पत्रुस २:३

9 परमप्रभु यावे आ मुरपुकी मेको कली मान पा हिनीन। मारदे हना मेको कली मान पा हिंबपुकी मारेड मारेडम गाप्शो बाक्नीम।

10 शुश क्येट थीब आन तमी तौ जचा व्वचा मतथु, शोव्रलु बेक्नीम। तन्न परमप्रभु यावे कली माल्ब मारेड मारेडम गाप्शो बाक्नीम। लूका १:५३

11 आलपुकी, एक जाक्कीन। मिनु आं लोव्र नेनीन। गो इन कली परमप्रभु यावे कली मान पा हिंतीके आ परबम शेंनन्नी।

12 सु सुमी शुश नाक्ती ब्रोंडचा नु रिम्शो तचा दाक्नीमी,

13 मेको मरिम्शो लोव्र नु जोल पतीके रे डोन बाक्चा माल्नीम।

14 मरिम्शो पतीके रे लेशशा, रिम्शो पने। थुं नाइशशा बाक्तीके माल्शा बाक्कीन।

15 परमप्रभु यावेमी ठीक पाइब आन गे कोव्रशा, मेको आन पुंडशो नेंब।

16 परमप्रभु यावेमी मरिम्शो पाइब आन कली कोव्रना कोव्रन बाक्ब। मिनु मेको आन कली मिम्तीके का यो मवोडक्थु रागी रे क्याम्ब। हितोपदेस १०:७

17 ठीक पाइबपुकीमी पुंडनीम। मिनु परमप्रभु यावेमी मेको आन पुंडशो नेंशा, आन श्येत नेल्ल रे प्रोंडब।

18 परमप्रभु यावे थुं लुकच लशो आन नेक्था बाक्ब। आन थुं बेक्शो आन कली प्रोंडब। भजन संग्रह ५१:१९

19 ठीक पाइबपुकी शुश श्येत जाइनीम। तन्न परमप्रभु यावेमी मेको आन कली श्येत नेल्ल रे प्रोंडब। २कोरिन्थी १:५

20 मिनु मेकोमी आन रुश नेल्ल कोव्रब। मुरुम का यो मजिक्नीम। यूहन्ना १९:३६; प्रस्थान १२:४६

21 मिनु परमप्रभु आ अरेशो मटीब आन मरिम्शो पतीकेमी साइक्चा पुंडसीनीम। ठीक पाइब आन कली मदाक्बपुकी दोस तशा सजाड ताइनीम।

22 परमप्रभु यावेमी आ गेय पाइब आन कली श्येत रे प्रोडब। मेको कली जिम्मा गेंसीबपुकी दोस मतथु, काइ सजाइ मताइनीम।

## 35

जोरी सत्रु कली निसाफ पने, देंशो

दाऊद आ कुम्सो।

1 परमप्रभु यावे, आं कली जिचा तोइब आन कली जिचा तोने। आं कली लडाइ तोइब आन कली लडाइ तोने।

2 ठेयब तेक्तीक नु या शेशा, आं कली वारच पथ बोक्कीन।

3 इन तूतीक नु तरवार शेशा, आं कली खेदा पाइब आन लां तेक्कीन। मिनु आं थुं कली “गो इ कली प्रोडब नड” देनीन।

4 आं कली साइक्चा माल्बपुकी खतम दुम्शा, मुने दोक्मल। आं कली मरिम्शो पाइक्चा, दे मिम्बपुकी नोले लेशशा, मुने दोक्मल।

5 मेकोपुकी फशेम योल्लो भूस खोदेशो दुम्मल। मिनु परमप्रभु यावे आ स्वर्ग डा गेय पाइबमी मेको आन कली खेदा पस डा पस पवल।

6 मेको आन लां छिडछिड नु प्रेक्शा थित्तीके दुम्ल। मोपा यो परमप्रभु यावे आ स्वर्ग डा गेय पाइबमी खेदा पवल।

7 मारदे हना मेकोपुकीमी मोशान आं कली ब्वारद दाइक्ताक्यीमी। मिनु मोशान आं कली साइक्चा कली बिक्तीक दोम्तेक्म।

8 मेको आन मतुइक्थु, हिंचा डा ठेयब श्येत दुम्ल। मिनु मेको आन खुइश्शा दाइश्शो ब्वारदम आंमान रेम्मल। मेको आन दोशो बिक्तीकेमी आंमान बिक्शा, बेक्मल।

9 गो चहिं परमप्रभु यावेमी आं कली प्रोडशो तशा ग्येरसीनुड।

10 मिनु गो आं रां नेल्लेमी “परमप्रभु यावे, इन खोदेशो सु बाक्बा?” देंनुड। गे मचापब नु श्येत जाइब आन कली बोल्यो मुर आ गुइ रे प्रोडनीनी।

11 जोल पाइब सांकछीपुकी यूनीम। मिनु आं मतुइश्शो लोव्र हिल्लो पाइनीम।

12 गो मेको आन कली रिम्शो पाता। मेकोपुकीम चहिं मरिम्शो पाइक्तीमी। गो का ला दुम्ती, सुडम आं कली वारच मपाइय्यीमी।

13 मेकोपुकी रोइ पामेनु, गो अरन्डी फेक्शा, माइजा बाक्शा, सुर्ता पाता। गो बाप्शा मेको आन पर्वम परमप्रभु कली पुंडता। अय्युब ३१:२९

14 आं वारच नु आं लोक्ब आन पर्वम खोदेशो पा, मेको आन पर्वम रोंका पाता। आं ममा आ पर्वम खोदेशो पा आं पिया खुक्शा, रोंका पाता। रोमी १२:१५

15 तन्न गो दाइल पांडसीडानु, मेकोपुकी रिश्शा, आं पर्वम शुक्शी पचा कली बुक्तेक्म। आं मतुइश्शो शुक्शी पाइबपुकी आं कली मरिम्शो पचा कली बुक्तेक्म। मिनु मेकोपुकीम आं कली शुक्शी पस डा पस पतीमी।

16 मेकोपुकी नेल्ल क्येडा मरिम्शो दुम्शा, शुक्शी पा, आन खुइ शेप्नीम।

17 परमप्रभु, गे गेना सम्म मेको आन कली कोव्रशा बाक्नीनी? परमप्रभु मरिम्शो पाइबपुकी रे आं कली प्रोडयीनी। आं कली नेल्ल क्येडा बोल्यो मुर रे प्रोडयीनी?

18 मिनु गो शुश मुर आन डोंइती इन कली “गे ठेयब बाक्नीनी” देंनुड। ठेयब हुल आन दातेमी इन कली कुम्सो पा ठेयब सेल्लुड।

19 मेकोपुकी मोशान आं जोरी सत्रु दुम्शा, आं पर्वम ग्येरचा मतामेक्ल। मोशान खेदा पाइबपुकी आं पर्वम आन मिक्च रिक्चा मतामेक्ल। भजन संग्रह २५:१९; भजन संग्रह ६९:५

20 मारदे हना मेकोपुकी थुं नाइश्शा बाक्तीक आ पर्वम लोव्र मपाइनीम। रागीम थुं नाइश्शा बाक्ब आन कली जोल पा दोस गेचा कली मिन्मीम।

21 मेकोपुकीमी ठेयब शोव्र सेल्ला, आं पर्वम “आहा आहा, आंइ मिक्चीम तचा ताइतक” देंनीम।

22 परमप्रभु यावे, गे एको ताइतीनी। मिनु सिकसी पा मबाक्कीन। परमप्रभु यावे आं क्येडा डोन मदुमीन।

23 बोक्कीने। मिनु आं कली वारच पाइय्यीनी। परमप्रभु, आं परमप्रभु यावे, आं पोन बोक्कीन।

24 परमप्रभु यावे, आं परमप्रभु, इन ठीक पतीकेम आं कली निसाफ पने। आं पबंम मेकोपुकी ग्येरचा मतामेक्ल।

25 मेकोपुकीमी आन थुंमी “आहा, आंइ मिश्शो दुम्त” देंचा मतामेक्ल। मेकोपुकीमी “गो मेको कली खतम पोक्तक” देंचा मतामेक्ल।

26 गो श्येत जडानु, आं पबंम रिप्ब नेल्ले मुने दोक्मल। मिनु मेको “क्येडा ठेयब नकी” देंबपुकी मुने दोक्शा आइक्च सेल्चा पुंडसीमल।

27 आं कली दाक्बपुकी आं ठीक पशो तशा, ग्येरसीशा कुम्सो पामेक्ल। मिनु मेकोपुकीमी गेना हना यो “परमप्रभु यावे आ नें ठेयब बाक्ल। मेकोमी आ गेय पाइब कली रिम्शो दुम्शो तचा दाक्ब” देंमल।

28 मिनु गो नाक्त रे इन ठीक पतीके नु इन ठेयब दुम्तीके आ पबंम लोत्र पाइनड।

## 36

### परमप्रभु आ रिम्शो पतीके

कुम्सो पपाइक्ब कली परमप्रभु यावे आ गेय पाइब दाऊद आ कुम्सो।

1 परमप्रभु आ अरेशो मटीब आन थुंमी हेंथे पतीक लोत्र बाक्ब। मार लोत्र बाक्ब देंशा हना “मेकोपुकीम परमप्रभु कली मान पा महिनीम” देंशो लोत्र बाक्ब। रोमी ३:१८

2 मेकोपुकी ठेयब लेशशा “आंइ मरिम्शो पशो गेनायो मतुंडसीब, गो दोस मताइनय” दे मिम्नीम। रोमी ३:१८

3 मेको आन लोत्र मरिम्शो नु जोल ला बाक्ब। मेकोपुकीमी रुप्ब थुंम मिम्शा, रिम्शो पचा प्रॉइने थुम्शो बाक्नीम।

4 मेको आन ब्राख्येम बाक्मानु, आन मरिम्शो पतीक ला मिम्ना मिम्न बाक्नीम। मेको मरिम्शो लां खोइक्नीम। मेकोमी आन थुंमी “मरिम्शो पशो ग्रॉग्रा दिशा मपाइनीकी” दे मदेंनीम। मीका २:१

5 परमप्रभु यावे, इन गेना हना यो दाक्तीके सरीड सम्म जाक्दीशो बाक्ब। इन दाक्शा मप्रॉइतीके गोस्स क्येडा इर बाक्ब।

6 इन ठीक पतीके ठेयब डांडापुकी खोदेशो नु इन निसाफ पशो शुश लुक्च लशो समुन्द्र खोदेशो बाक्ब। गे मुरपुकी, बी ब्यफ, क्यारश भेडा नु जन्तु आन कली कोत्रशा, श्येत रे प्रॉइनीनी।

7 परमप्रभु, इन गेना हना यो दाक्तीक थम रिम्शो बाक्ब। मिनु मुरपुकी इन फ्रां आगाम फाम्सीनीम।

8 मेकोपुकी इन खिं डा जचा तूचामी रूनीम। गे मेको आन कली इन ग्येरतीकेमी ग्येरपाइक्नीनी।

9 मारदे हना गे नु ब्रॉइतीके बाक्ब। मिनु गो इन छेडछेडमी हाम्सो ताइनीकी। येरमीया २:१३; यूहन्ना ४:१४

10 इन गेना हना यो दाक्तीके इन कली तुइक्ब आन तार मोतीन। इन ठीक पतीके रिम्शो थुं पाइशशो आन तार मोतीन।

11 मिनु ठेयब लेशशो मुर आन खोइलीम आं कली मदिम्दीमील। इन अरेशो मटीबपुकीमी आं कली मखेरयीमील।

12 मरिम्शो पाइबपुकी गोल्शा, खतम दुम्शो बाक्नीम। मेकोपुकी बोक्ने मचाप्चा डा पा गोल्शो बाक्नीम।

## 37

### टीब नु मटीब आन पबंम

दाऊद आ कुम्सो।

1 परमप्रभु आ अरेशो मटीब आन कली तशा, गाइशशा, चुरशा मपने। दूली पाइब आन कली तशा, गेहे मपने। हितोपदेस २४:१९

- 2 मारदे हना मेकोपुकी घांस खोदेशो पा रीब पा सोवनीम। गिग खाइ खोदेशो पा सोल सुल बेक्नीम।
- 3 परमप्रभु यावे कली जिम्मा गेंसीशा, रिम्शो पने। रागीम रिम्शो दुम्शा बाक्चा ताइनीनी।
- 4 परमप्रभु यावे कली तुइश्शा, ग्येरसीने। मेकोमी इन थुंम पुंडशो गेब। भजन संग्रह २०:५
- 5 गे परमप्रभु यावे कली जिम्मा गेसीने। मिनु मेकोमी इन पबंम गेय पाइब।
- 6 मेकोमी इन ठीक दुम्तीके छेडछेड खोदेशो पा गूपाइक्ब। इन ठीक पतीके नाक्ती खोदेशो दुम्पाइक्ब। मीका ७:९
- 7 परमप्रभु यावे आ डोंइती सिक्सी पा बाक्शा, मेकोमी पाइब, दे रिम्दीन। आन दला दाक्स पाइब नु मरिम्शो मिम्शा पाइब आन पबंम मचुरीने।
- 8 गाइक्चा नु चुरचा प्रोनीन। मगाइक्तीन। मारदे हना मो पतीकेमी इन कली मरिम्शो पपाइक्ब।
- 9 परमप्रभु आ अरेशो मटीब क्याम्चा पुंडसीनीम। तन्न परमप्रभु यावे आ लां कोवबपुकी रागीम बाक्चा ताइनीम।
- 10 इच्चा नाक्त नोले परमप्रभु आ अरेशो मटीब मलीनीम। गेपुकीमी मेको आन कली माल्तीनी हना यो, मथित्नीनी। मेको आन बाक्तीके श्येतथ बाक्ब।
- 11 ब्रेम्शोपुकी रागीम बाक्चा ताइनीम। मारेइ मारेइ तशा ग्येरशा, ठेयब थुं पा बाक्चा ताइनीम। मत्ती ५:५
- 12 मिनु परमप्रभु आ अरेशो मटीबपुकीमी ठीक पाइब मुर आन पबंम “दोपा श्येत गेचा नमी” दे मिम्शा, आन खुइ शेप्शो बाक्नीम।
- 13 तन्न परमप्रभु मेको आन कली तशा, रिप्ब। मारदे हना मेको आन नाक्त नुप्शो तुइश्शो बाक्ब। अय्युब १८:२०
- 14 परमप्रभु आ अरेशो मटीबपुकीमी प्रुडग नु श्येत जाइब आन कली साइक्चा कली तरवार शोइक्नीम। आन लिब्रा कीनीम। रिम्शो थुं पाइश्शो मुर आन कली साइक्चा माल्नीम।
- 15 तन्न मेको आन तरवारमी आंमा आन लुडगीर तूचा पुंडसीनीम। आन लिब्रा जिक्नीम।
- 16 परमप्रभु आ अरेशो मटीब आन शुश शॉप क्येडा ठीक पाइब आन इच्चा खोइ शॉप रिम्शो बाक्ब। हितोपदेस १५:१६
- 17 मारदे हना परमप्रभु यावे आ अरेशो मटीब आन गुइ जिक्चा पुंडसीनीम। परमप्रभु यावेमी ठीक पाइब आन कली रिम्शो पा बाक्चा गेब।
- 18 परमप्रभु यावेमी दोस मताइब आन नाक्ती तुइक्ब। मिनु मेको आन शॉप गेना हना यो लीब। उपदेसक ८:१२
- 19 ठेयब श्येत दुम नाक्ती मेकोपुकी मुने मदोक्नीम। मिनु अन्काल दुम नाक्ती मेकोपुकी जशा रूचा ताइनीम। हितोपदेस १०:३
- 20 परमप्रभु आ अरेशो मटीबपुकी खतम दुम्नीम। मिनु परमप्रभु यावे आ जोरी सत्रु दिंम डा रिम्शो घांस खोदेशो बाक्नीम। मिनु मेकोपुकी सोल सुल बेक्शा, कुन खोदेशो पा जाम्शा लाइनीम।
- 21 परमप्रभु आ अरेशो मटीबपुकीमी जेर जशा, मथान्नीम। मिनु ठीक पाइबपुकीमी हाइश्शो दुम्शा गेनीम।
- 22 परमप्रभु रे आसीक ताइबपुकीमी रागी ताइनीम। परमप्रभु रे सराप ताइबपुकी जाम्शा लाइनीम।
- 23 परमप्रभु यावेमी आ मुर आन थैक्तीक बोल्यो सेल्ब। मेको आन कली तशा ग्येरब।
- 24 मेको दाइल पांडसाक्म हना यो, मगोल्नीम। मारदे हना परमप्रभु यावेमी मेको आन गुइ ग्याइश्शा, तिक्ब। हितोपदेस २४:१६
- 25 गो ठिटा बाक्ती, मुल खाल्पा दुम्ती। तन्न ठीक पाइबपुकी नु आन तमी तौ नु चच युइमी मुल सम्म पुंडशा जशो गेनायो मतडमी।
- 26 मिनु मेकोपुकीमी नेल्ल नाक्ती हाइश्शो दुम्शा, पुडग आन कली मार मार गेनीम। मिनु मेको आन आलपुकीमी आसीक ताइनीम।
- 27 मरिम्शो पतीके रे डोन बाक्कीन। रिम्शो पने। मिनु गे गेना हना यो ब्रोंइचा ताइनीनी।



28 मारदे हना परमप्रभु यावेमी ठीक निसाफ दाक्ब। आ कली मप्रोंडब आन कली नेल्ल नाक्त गेना हना यो कोव्रब। ठीक पाइब गेना हना यो रिम्शो बाक्चा ताइनीम। तन्न आ अरेशो मटीब आन तमी तौ नु चच युइ तिल्ला पुंडसीनीम।

29 ठीक पाइबपुकीमी रागी ताइनीम। मिनु गेना हना यो मेकेर बाक्नीम। यसैया ६०:२१

30 ठीक पाइबपुकीमी जोक्तीक तुइक्तीक लोव्र पाइनीम। मिनु मेकोपुकीमी ठीक पतीके शेंनीम।

31 आन परमप्रभु आ अरेशो लोव्र मेको आन थुंमी बाक्ब। मिनु हेंथे मपथु, परमप्रभु आ लांम गाक्नीम।

32 परमप्रभु आ अरेशो मटीबपुकीमी बाप्शा, ठीक पाइब आन कली साइक्चा माल्नीम।

33 तन्न परमप्रभु यावेमी ठीक पाइब आन कली मेको आन गुइम दुम्चा मगेब। ठीक पाइब आन निसाफ दुम्मेनु, दोस मताइब दुम्पाइक्ब।

34 परमप्रभु यावे कली रिम्दीन। मेको आ लांम गाक्कीन। मेकोमी इन कली ठेयब सेल्शा, रागी इन कली गेब। मिनु गे परमप्रभु आ अरेशो मटीब आन कली खतम सेल्चा ताइनीनी।

35 गो परमप्रभु आ अरेशो मटीब लेबानोन डा ठेयब रवा खोदेशो दुम्शो ताता। १ सामुएल ३५:२-३८; इजीकीएल ३१:३-१४

36 मिनु गो आ बाक्तीक कोव्रता, मेको मुर मबा। गो मेको कली माल्ता, मथिदु।

37 दोस मताइब आन कली कोव्रडीन। रिम्शो थुं पाइश्शो मुर कली कोव्रडीन। मारदे हना मेकोपुकी थुं नाइश्शा बाक्शो बाक्नीम। उत्पत्ती ३९:७-९

38 तन्न हेंथे पाइब नेल्ल खतम दुम्नीम। परमप्रभु आ अरेशो लोव्र मटीब नेल्ल खतम दुम्नीम। आन तमी तौ चच युइ यो तिल्ला पुंडसीनीम।

39 परमप्रभु यावे ठीक पाइब आन कली वारच पाइब बाक्ब। मिनु मेको आन कली श्येत दुम्मेनु, मेको आन फाम्सीतीके दरवार बाक्ब।

40 परमप्रभु यावेमी मेको आन कली वारच पा प्रोंडब। मिनु आ अरेशो मटीब आन गुइ रे प्रोंडब। मारदे हना मेकोपुकी परमप्रभु कली जिम्मा गेंसीशो बाक्नीम। लूका १८:७-८

## 38

मरिम्शो पशो क्याम्चा, दे पुंडशो

मप्रेंथु मिम्चा कली दाऊद आ कुम्सो।

1 परमप्रभु यावे इन गाइक्तीकेमी आं कली महुइक्तीनी। इन चुरतीकेमी आं कली सजाइ मगेयीनी।

2 मारदे हना इन ब्राम आं कली देशो बाक्नीम। मिनु इन गुइमी आं कली चिप्शो बाक्ब। अय्युब ६:४

3 इन गाइक्तीकेमी आं रां नेल्ल खाइश्शो बाक्ब। आं मरिम्शो पतीकेम आं रुश नेल्ल मुक्शो खोदेशो बाक्नीम।

4 आं मरिम्शो पशोमी आं पिया सम्म गुम्शो बाक्ब। मेको आं कुरने मचाप्चा डा पा हेल्लो बाक्नीम। बिलाप १:१४;

5 आं निप्स काप्शो आ पर्वम आं गार राक्शा, रिना पाइश्शो बाक्नीम।

6 गो नाक्त रे आं पिया खुक्शा, रोंका पा गुर ब्वेशा गाक्शो बाक्नुड।

7 आं ची नेल्ल खाइश्शो बाक्ब। आं रां नेल्ल सेस मबाक्ब।

8 गो गलाक गुलुक दुम्शा, काइ सक्ति मपाइश्शो दुम्शो बाक्ती। आं थुं डा श्येतम शुश हुकयी पाइनुड।

9 आं परमप्रभु, गे आं दाक्शो नेल्ल तुइश्शो बाक्नीनी। आं हुकयी पतीके यो तुइश्शो बाक्नीनी।

10 आं लुङगीर प्रेक्शा, आं सक्ति जाम्त। आं मिक्च ब्रा ब्रा दुम्शो बाक्ब।

11 आं वारच नु आं खिं डा मुर आं श्येत तशा, डोन बाक्नीम। मिनु आं नेक्था डा मुरपुकीमी डोन रे कोव्रनीम। भजन संग्रह ६९:९; भजन संग्रह ८९:९; अय्युब १९:१३-१९

12 आं कली साइक्चा माल्बपुकीमी ब्वारद दाइशशा, वोइशशो बाक्नीम। आं कली श्येत दुम्शो कोव्रकोव्र दाक्बपुकीमी “मेको कली दोपा श्येत गेचा, दोपा मेको आ पबंम जोल पचा” दे नाक्ते रे लोव्र पाइनीम।

13 गो नोफा मनेंब मुर खोदेशो दुम्ती, मनेंनुड। ब्वाक्ने मचाप्ब मुर खोदेशो दुम्ती, काइ लोव्र मपाइनुड। भजन संग्रह ३९:१३

14 गो थमा पा नोफा मनेंब खोदेशो दुम्शा, मारेइ लोव्र मलेत्नुड।

15 परमप्रभु यावे, गो इन कली रिम्नुड। गे आं लोव्र लेत्नीनी। गे परमप्रभु यावे, आं परमप्रभु बाक्नीनी।

16 मिनु गो “मेकोपुकीमी आं पबंम शुक्शी पा ग्येरचा मतामेक्ल। आं कली ग्रेक्शो तशा, बोरचा मतामेक्ल” देती।

17 मारदे हना गो दाइल पांडसीचा चिक्शो बाक्नुड। गो श्येत जस डा जस बाक्नुड।

18 गो आं काइ मरिम्शो पशो शोव्रनुड। आं मरिम्शो पशो मिम्शा सुर्ता पाइनुड। भजन संग्रह ३२:५;

19 आं जोरी सत्रु चहिं रिम्शो पा ब्रोंइशा, बोल्यो दुम्शो बाक्नीम। आं कली मोशान मदाक्ब शुश बाक्नीम।

20 मुरपुकीमी आं रिम्शो पशो आ पा डा आं कली मरिम्शो पाइनीम। मारदे हना गो रिम्शो पाइब बाक्ती हना यो, आं कली खेदा पाइनीम।

21 परमप्रभु यावे, आं परमप्रभु, आं कली मप्रोंइयीनी। आं क्येडा डोन मदुमीन।

22 परमप्रभु, आं कली वारच पाइशशा, श्येत रे प्रोंइचा कली रीब पा जाक्कीन।

## 39

मुर आ ब्रोंइतीक इक्का ला बाक्ब

कुम्सो पपाइक्ब येदुथून कली। दाऊद आ कुम्सो।

१इतिहास २५:१,३ 1 मिनु गो “गो आं गेय नेल्ल होस पा पाइक्नुड। गो लोव्र पचा यो होस पा पाइक्नुड। मरिम्शो पाइबपुकी आं नेक्था बाक्तेक्म हना, गो सिक्सी पा बाक्नुड” देती।

2 गो मब्वाक्थु, सिक्सी पा बाक्ती। मिनु रिम्शो लोव्र यो मपथु, आं थुं डा श्येत बारत। भजन संग्रह ३८:१४

3 आं थुं चोशो बाक्त। शुश मिम्शा, मी ब्रशो खोदेशो दुम्ती।

4 “परमप्रभु यावे, आं बेक्तीक नाक्त कोंइदीनी। आं ब्रोंइचा गिश नाक्त लीमे तुइक्पाइयीनी। गो रीब पा जाम्शा लाइब मुर बाक्नुड। भजन संग्रह ९०:१२; अय्युब १४:५

5 गे आं ब्रोंइतीक नाक्त बिक्ता का निक्शी खोदेशो सेल्तीनी। आं ब्रोंइतीक नाक्त इन डोंइती मारेइ ममाइ। मुर नेल्ले आन ब्रोंइतीके जाम्शा लाइब फश खोदेशो बाक्नीम” देती। भजन संग्रह ९०:५-६ टेयब सेंदा पा।

6 मुरपुकी वांकु खोदेशो पा गाक्शो बाक्नीम। मेकोपुकी मोशा सुर्ता पाइनीम। शुश शोंप तेल्नीम। मेको सुम जाइबा मतुइक्नीम। भजन संग्रह ४९:१७-२१; उपदेसक २:१८-२१; लूका १२:१५-२१

7 “परमप्रभु, गो मार कली रिम्ना रिम्न बाक्नुडा? गो इन लां ला कोव्रशा बाक्नुड।

8 आं मरिम्शो पशो रे प्रोंइयीनी। मूर्खपुकीम आं कली शुक्शी मपामेक्ल।

9 गो सिक्सी पा बाक्शा मब्वाक्ड। मारदे हना गे मो पपाइक्तीनी।

10 इन याम पाइशशा लेत्तीन। गो इन तुप्शोमी जाम्शा लाइब दुम्ती।

11 गे मुर आन कली पाप पशो आ पबंम तुप्तीनी। आ दाक्शो तुम्बुम वा नेक्शो खोदेशो पा जाम्शा लाइब। थमा पा मुर नेल्ले आन ब्रोंइतीक जाम्शा लाइब फश खोदेशो बाक्नीम। टेयब सेंदा पा।

12 परमप्रभु यावे, आं पुंइशो लोव्र नेनीन। आं वाइ ब्रेशो नेनीन। आं डाक्शो तशा, वारच पाइय्यीनी। मारदे हना गो इन डोंइती आं किकी पिप खोदेशो पा, रागी डा पौना खोदेशो बाक्नुड। भजन संग्रह ११९:१९; लेवी २५:२३; १ पत्रुस २:११; हिब्रू ११:१३

13 आं बेक्चा डोंइती आं पबंम गाइक्चा प्रोनीन। मिनु गो लेशा ग्येरशा बाक्चा तडल” दे पुंइता।

## 40

“परमप्रभुमी वारच पाप्तु” देशो

कुम्सो पपाइक्व कली दाऊद आ कुम्सो।

1 गो परमप्रभु यावे कली रिम्स डा रिम्स बाक्ती। मेकोमी आं गे कोव्रशा, आं वाइ ब्रेशशा, पुंडशो लोव्र नेंतु।

2 मेकोमी आं कली ग्रांरा दिचा डा हिलोम बिक्शा बेक्तीकर रे गुंडताक्यी। मिनु आं कली सेरथे फुल्लु का तार राप्पाइक्ती। मिनु महिम्सीचा डा पा नाइक्पाइक्ती।

3 मेकोमी आं कली नक कुम्सो का पपाइक्ती। आंइ परमप्रभु कली ठेयब सेल्ल्तीक कुम्सो पपाइक्ती। मिनु शुश मुरुम एको तशा, नेंशा, परमप्रभु यावे कली मान पा हिंशा, मेको कली थमा सुइक्नीम। भजन संग्रह ३३:३

4 सु सुमी परमप्रभु यावे कली थमा सुइक्नीमी, मेको ग्येरसीशो मुर बाक्नीमी। मेकोपुकी ठेयब लेशशो नु जोल डा सक्ति पाइशशो देवी देवता गे लाइब नु मबाक्नीम।

5 मिनु गो “परमप्रभु यावे, आं परमप्रभु, गे आंइ पर्वम पशो छक लाक्का डा गेय नु इन मिम्शो कोंइताक्की। मेको शुश बाक्नीम। इन खोदेशो सुइ मबाक्नीम। गो मेको आन कली शेंशें दाक्ती, देंती हना यो, नेल्ल शेने मचबु। मारदे हना मेको शुश बाक्नीम। भजन संग्रह १३९:१७-१८

6 गे मार मार क्योरशा चढेशो नु जचा चढेशो तशा मग्येरसीनी। तन्न इन अरेशो लोव्र नेंचा कली नोफा दाइक्व सेल्ल्तीनी, चोशा चढेशो नु पाप आ पर्वम चढेशो मपुंडनी। भजन संग्रह ५०:८-१३; भजन संग्रह ५१:१८; १ सामुएल १५:२२; हिब्रू १०:५-१०

7 मिनु गो ‘गो एक बाक्ती, दे परमप्रभु यावे आ लोव्रमी आं पर्वम ब्रेक्शो बाक्व’ देंती।

8 परमप्रभु, गो इन दाक्शो पशोमी आं कली ग्येरपाइक्व। इन अरेशो लोव्र आं थुंम बाक्व।

9 गो ठेयब गुम्तीकेमी इन रिम्शो ब्रोंइतीक लोव्र आ पर्वम लोव्र पाइनुड। परमप्रभु यावे, गो सिक्सी पा मबाक्नुड। मेको गे लुइक्नीनी।

10 गो इन मुर आन कली श्येत रे प्रोंइतीके आं थुंम खुइशशा मवोइक्थु, इन दाक्शा मप्रोंइतीके नु मुर आन कली श्येत रे प्रोंइतीके आ पर्वम लोव्र पाता। गो इन गेना हना यो दाक्तीके नु दाक्शा मप्रोंइतीके आ पर्वम मखुइक्थु, ठेयब गुम्तीकेमी शेंताक्डमी।

11 परमप्रभु यावे, गे इन शिशी पतीके मतेक्कीन। इन गेना हना यो दाक्तीक नु दाक्शा गेनायो मप्रोंइतीकेम आं कली गेना हना यो खाल पर्यीसील।

12 मारदे हना हिक्ने मचाप्चा डा श्येतपुकीमी आं कली पुम्शो बाक्नीम। आं मरिम्शो पतीकेम आं पिया खुक्शो बाक्ती। मेकोपुकी आं पिया डा चां क्येडा यो शुश बाक्नीम। मोपा आं थुं लुकच लशो बाक्व।

13 परमप्रभु यावे, श्येत रे प्रोंइयीनी। परमप्रभु यावे, आं कली वारच पाइक्का कली रीब पा जाक्कीन। भजन संग्रह ७०:-

14 आं कली साइक्का माल्ब नेल्ले मुने दोक्शा, ग्येत्थ लुकच दुम्मल। आं कली श्येत जशो दाक्व नेल्ल लेशशा लशा, खतम दुम्मल।

15 आं कली शुक्शी पाइबपुकीमी ‘आहा, आहा’ देंशो, नेल्ल रे मुने दोक्मल।

16 तन्न सु सुमी इन कली माल्नीमी, मेको नेल्ले इन पर्वम शुश ग्येरसमल। आन श्येत रे प्रोंइचा पुंडसीब नेल्लेमी गेना हना यो ‘परमप्रभु यावे ठेयब बाक्व’ देंमल।

17 गो पुडग नु श्येत जाइब बाक्ती हना यो, परमप्रभुम आं कली मिम्ब। गे आं कली वारच पाइब नु आं कली श्येत रे प्रोंइब बाक्नीनी। आं परमप्रभु देश मपने” दे लोव्र पाता।

## 41

रोइ पाइबमी परमप्रभु कली पुंडशो

कुम्सो पपाइक्व कली दाऊद आ कुम्सो।

- १ सु सुमी पुडग मुर आन पर्वम सुरतां पा, वारच पाइनीमी, मेको आन कली परमप्रभु यावेमी आन श्येत रे प्रोडब। हितोपदेस १४:२१; मत्ती ५:७
- २ परमप्रभु यावेमी मेको आन कली कोत्रशा, खाल पा प्रोडब। मेको रागीम बाक्मानु, ग्येरसमल। गे मेको आन कली आन जोरी सत्रु आन गुडम मगेनीनी।
- ३ मेकोपुकी रोड पा गोलशा बाक्मानु, परमप्रभु यावेमी मेको आन रोड सापाइक्ब।
- ४ गो “परमप्रभु यावे आं कली शिशी पा सापाइय्यीनी। मारदे हना गो इन कली मरिम्शो पाता” देंती।
- ५ आं जोरी सत्रुमी “मेको गेना बेक्बा डा, आ नें क्याम्सीबा?” देंनीम।
- ६ मिनु आं कली सु सुम कोत्रथ जाक्नीमी, मेकोमी आं कली रिम्शो लोत्र पखु पाइनीम। मिनु नोले आं पर्वम “मार, मरिम्शो लोत्र पड” दे मिम्शा, मरिम्शो लोत्र ब्रपाइक्नीम।
- ७ आं कली ग्रान्रा दिप्ब नेल्ल ग्रुशा, आं पर्वम “मार मरिम्शो पाइक्चा” दे नोफा मुडक्मुडक्नीम।
- ८ मेकोपुकीमी “मेको कली बेक्तीक रोडमी ग्याइश्शो बाक्ब, आ गोलतीक रे मबोक्ब” देंनीम।
- ९ गो आं नेक्था डा वारच, आं शोब्ले जाइबमी यो, आं कली ताइक्चा कली आ खोडल क्युकुतु।
- १० परमप्रभु यावे, गे आं कली शिशी पाइश्शा, पोक्यीनी। मिनु गो मेको आन कली क्येक्क लेन्ने चबुल। भजन संग्रह ५५:१३-१५; यूहन्ना १३:१८; प्रेरित १:१६
- ११ मोदेशो पाइतीनी हना, गे आं कली दाक्नीनी, दे तुडक्नुड। मारदे हना आं जोरी सत्रु आं पर्वम ग्येरचा मताइनीम।
- १२ आं रिम्शो थुं आ पर्वम गे आं कली ग्योम्ताक्यीनी। मिनु गे आं कली गेना हना यो इन डोंइती राप्पाइक्तीनी।
- १३ परमप्रभु यावे, इस्राएली आन परमप्रभु कली “गे गेना हना यो ठेयब बाक्नीनी। मेको थमा बाक्ब” देंमल। आमन आमन। भजन संग्रह ७२:१८; भजन संग्रह ८९:५३; भजन संग्रह १०६:४८; भजन संग्रह १५०:६

## ४२

### ठेयब श्येतम परमप्रभु कली मिम्शो

- कुम्सो पपाइक्ब कली शेंतीक कुम्सो। कोराह आ तौ आन कुम्सो। १इतिहास ६:१६,२२; २इतिहास २०:१९
- १ दोपा रोकोशेमी खोला डा ब्वाक्कु तूतू दाक्शा ब्वाक्कु मिम्बा, मोपा आं थुंमी यो परमप्रभु, इन कली मिम्ब।
  - २ मोपा आं थुं ब्रोंइशा बाक्ब परमप्रभु आ नेक्था बाक्चा दाक्ब। गो गेना परमप्रभु आ डोंइती बाक्चा ताइनुडा? भजन संग्रह ६३:२; भजन संग्रह ८४:३; भजन संग्रह १४३:६
  - ३ आं प्रेक्कु नाक्दो नाक्ती आं जचा थोत्रक दुम्शो बाक्ब। मारदे हना मुरपुकीमी नाक्त किंत किंत “इ परमप्रभु ते बाक्मे?” दे शुक्शी पा हिल्लो पस डा पस बाक्नीम। भजन संग्रह ७९:१०
  - ४ मिनु गो मेको नेल्ल मिम्शा, परमप्रभु, इन खिं लाइब शुश मुर आन कली लां कोंइशा, मेकोपुकी नु लना लन बाक्डानु, ग्येरसीशा “गे रिम्शो पाइब बाक्नीनी” दे गो नेल्लेमी कुम्सो पा चाड मानेतक। भजन संग्रह २७:४
  - ५ आं थुं, गे मारदे लुकच लाइनेवे? मारदे ग्येत्थ लुकच दुम्नेवे? परमप्रभुमी मार पाइबा, मेको रिम्दो। मिनु नोले मेकोमी आं कली श्येत रे प्रोइशो तशा, गो परमप्रभु कली ठेयब सेल्नुड। मारदे हना मेको आं कली श्येत रे प्रोइब नु आं परमप्रभु बाक्ब।
  - ६ आं परमप्रभु, आं थुं, ग्येत्थ लुकच दुम्त। गो यर्दन डा दिम नु हेरमोन डा मिसार डांडा रे इन कली मिम्नुड।
  - ७ मिनु इन बारशो ब्वाक्कु आ ग्रीशोमी अर्को ब्वाक्कु कली ब्रेप्ब। मेको इन ब्वाक्कु आ छालमी आं कली सुम्शो बाक्ब।
  - ८ मिनु गो नाक्ती परमप्रभु यावे आ गेना हना यो दाक्तीके तुडक्नुड। मिनु नाक्दो आ कुम्सो आं थुंमी बाक्ब। मेको आं कली ब्रोंइचा गेब परमप्रभु नु लोत्र पतीके बाक्ब।

9 गो परमप्रभु, आं सेरथे फुल्लु कली “गे मारदे आं कली प्रेंदीनी? गो मारदे आं जोरी सत्रु रे पा खेदा पचा पुंडसीशा, थुं ग्येत्थ लुकच दुम्शा, गाक्चा माल्डा?” देंती। ब्यवस्था ३२:४

10 आं कली दिप्बपुकीमी आं रुश जिक्शो खोदेशो पा शुक्शी पाइनीम। मिनु मेकोपुकीमी गेना हना यो “इ परमप्रभु ते बाक्मे” दे शुक्शी पा, हिल्लो पस डा पस बाक्नीम।

11 आं थुं, गे मारदे लुकच लाइनेवे? मारदे ग्येत्थ लुकच दुम्नेवे? परमप्रभुमी मार पाइबा, मेको रिम्दो। मिनु नोले आं कली श्येत रे प्रोंइशो तशा, गो परमप्रभु कली ठेयब सेल्लुड। मारदे हना मेको आं कली श्येत रे प्रोंइब नु आं परमप्रभु बाक्ब।

## 43

“वारच पाइय्यीनी” दे पुंडशो

1 परमप्रभु, आं कली वारच पाइय्यीनी। इन कली थमा मसुइक्ब मुर आन पर्वम आं पोन बोक्कीन। मिनु जोल पाइब नु मरिम्शो पाइब मुरपुकी रे आं कली प्रोंइयीनी।

2 परमप्रभु, गे आं कली प्रोंइब बोल्यो दरवार बाक्नीनी। गे आं कली मारदे प्रोंइयीनी? गो मारदे आं जोरी सत्रुम खेदा पचा पुंडसीशा, रोंका पचा माल्डा?

3 इन छेडछेड नु इन थमा पतीके सोइक्तीन। मिनु मेकोमी आं कली लां कोंइशा इन डांडा नु इन बाक्तीकेमी चाक्यील।

4 मेना गो परमप्रभु कली चढ्ढेतीकेम जाक्नुड। मिनु परमप्रभुमी आं कली शुश ग्येरपाइशशा, आं थुं नाइक्पाइक्ब। परमप्रभु, आं परमप्रभु, गो ठेयब ताप्तीक ताप्शा, कुम्सो पा इन कली ठेयब सेल्लुड।

5 आं थुं, गे मारदे लुकच लाइनेवे? मारदे ग्येत्थ लुकच दुम्नेवे? परमप्रभुम मार पाइबा, मेको रिम्दो। मिनु नोले आं कली श्येत रे प्रोंइशो तशा, गो परमप्रभु कली ठेयब सेल्लुड। मारदे हना मेको आं कली श्येत रे प्रोंइब नु आं परमप्रभु बाक्ब।

## 44

“लेशा वारच पने” दे पुंडशो

कुम्सो पाइक्ब कली सेल्लो शेंतीक कुम्सो। कोराह आ तौ आन कुम्सो।

1 परमप्रभु, साइ आंइ किकी पिपीमी आन पालामी पशो इन गेय नेल्ल आंइ कली शेंताक्म। मिनु गो मेको नेल्ल नैतक। ब्यवस्था ६:२०-२५

2 गे रागी रागी डा मुर आन कली खेरशा, आंइ किकी पिपी आन कली बाक्पाइशो बाक्तीनी। गे मेको मुर आन कली क्याम्शा, आंइ किकी पिपी आन कली सोशा बोशा ब्रपाइशो बाक्तीनी। मोपा मेको आन कली प्रोंइशो बाक्तीनी।

3 मेको आन तरवारम मेको रागी मग्गशो बाक्तेक्म। आन सक्तीमी यो मग्गशो बाक्तेक्म। इन सक्ती नु इन कुल डा छेडछेडमी ग्रातेक्म। मारदे हना गे मेको आन कली दाक्शो बाक्तीनी।

4 गे आं पिप नु आं परमप्रभु बाक्नीनी। याकूब कली ग्रापतीन।

5 इन पतीकेमी आंइ जोरी सत्रु आन कली ग्रानीकी। इन नेमी आंइ जोरी सत्रु आन कली दिम्शा साइक्नीकी।

6 गो आं लिब्राम ग्राती, मदेनुड। मिनु आं तरवारम यो आं कली ग्रापाइक्ने मचाप्ब।

7 तन्न गे आंइ कली आंइ जोरी सत्रु आन क्येडा ग्रापाइक्तीनी। मिनु आंइ कली काइ मदाक्ब आन कली वाम ग्याम सेल्लतीनी।

8 गोपुकीमी नाक्त किंत किंत परमप्रभु कली मिम्शा, आंइ नें बोरपाइक्नीकी। मिनु गोपुकीमी गेना हना यो “इन नें ठेयब बाक्ब” दे ठेयब सेल्लनीकी। ठेयब सेंदा पा।येरमीया ८:२२-२३

9 तन्न गे आंइ कली प्रोंइशा, श्येत जपाइक्तीनी। मिनु गे आंइ लडाइ पाइब नु मलनी।

10 मिनु गे आंइ कली आंइ जोरी सत्रु आन क्येडा ब्रपाइक्तीनी। मिनु आंइ कली मदाक्बपुकीमी आंइ मार मार रोइशशा लाइक्तेक्म।

11 गे आंड कली क्योरचा पुंडसीब भेडा खोदेशो पा प्रोडतीनी। मिनु आंड कली रागी रागीम ब्रापाइक्तीनी।

12 गे इन मुर आन कली मोशा लेयतीनी। मिनु मेको आन कली लेयशा, मारेड ताक्चा थुं मपनी।

13 आंड नेक्था डा मुर आन डोइती आंड कली गाइश्शा, शुक्शी पाइक्चा पुंडसीब सेलतीनी। गे मुर आन कली आंड पर्वम तोक्शो नु मरिम्शो लोव्र पपाइक्तीनी। १कोरिन्थी १५:३१; रोमी ८:३६; भजन संग्रह ७९:४; १राजा ९:७

14 गे आंड कली रागी रागी डा मुर आन दातेम शुक्शी पाइक्चा पुंडसीब सेलतीनी। मुरपुकीमी आंड कली तशा, आन पिया हिम्नीम।

15 गो नाक्त किंत किंत मुने दोक्नुड। आं मुनेमी आं कुल सुम्सीशो बाक्नुड।

16 आं कली शुक्शी पाइब, मरिम्शो लोव्र पाइब, जोरी सत्रुमी पतीके नु क्येक्क लेप्ब आन पतीके मोदेशो दुम्शो बाक्नुड।

17 मोदेशो दुम्त हना यो, गो इन कली मप्रेंदक। मिनु इन कबल यो मप्रोंडक।

18 गो नोले मशोंडसक। इन लां रे ग्येत्थ लुक्च मपक।

19 तन्न गे आंड कली फस पोक्शा, सिवार आन बाक्तीक खोदेशो पा छिडछिडमी सुम्तीनी।

20 गो आंड परमप्रभु आ नें प्रेशो नकी नु अरु देवी देवता आन कली पूजा पशो नकी हना,

21 मार, परमप्रभुमी मतुडक्वा डा? मारदे हना परमप्रभुमी मुर आन थुं डा खुइश्शो नेल्ल तुडक्ब।

22 मो हना यो गो इन पर्वम नाक्त रे साइक्चा पुंडसीनीकी। मिनु क्योरचा चिक्शो भेडा खोदेशो पा हिकसीशो बाक्नीकी। १कोरिन्थी १५:३१; रोमी ८:३६

23 बोक्कीन, परमप्रभु, गे मारदे इप्नीनी? सेंसीने। आंड कली मो पा मप्रोनीने।

24 गे मारदे इन कुल खुइक्नीनी? मिनु आंड श्येत नु आंड कली दिप्शो प्रेंनीनी?

25 आंड थुं लुक्च लशो बाक्ब। आंड रां खपीम गोल्शो बाक्ब।

26 बोक्कीन। मिनु आंड कली वारच पने। इन गेना हना यो दाक्तीकेमी आंड कली एको श्येत रे प्रोंडकी।

## 45

### पिप आ ग्युंबे कली कुम्सो

कुम्सो पपाइक्ब कली लिली फू डा कुम्सो आ लायो। शेंतीक कुम्सो। कोराह आ तौ आन कुम्सो। ग्युंबे डा कुम्सो।

1 आं थुं रिम्शो लोव्रमी ब्रीतीके गो पिप कली कुम्सो पाइक्नुड। आं लें थाम्पा ब्रेक्स जोक्ब मुर आन कलम खोदेशो दुम्शो बाक्ब।

2 गे वोंडश मुर आन दातेमी नेल्ल क्येडा रिम्शो बाक्नीनी। इन लोव्र यो शुश रिम्शो बाक्ब। मारदे हना परमप्रभुमी इन कली गेना हना यो लीब आसीक गेशो बाक्ब।

3 गे बोल्यो मुर, इन किप्शुर किप्शा इन तरवार पिम्सीन। मिनु इन दारस नु इन मान ततीके कोंडदीन।

4 इन मान ततीकेमी, थमा पतीके, ब्रेम्शो थुं दुम्तीके नु इन ठीक पतीकेमी गाक्शा, इन सक्तिमी छक लाक्चा डा गेय कोंडदीन।

5 गे इन हेश्शो ब्रामी इन जोरी सत्रु आन लुडगीरमी देल्नीम। जात जात डा मुर इन डोंडती साइक्चा पुंडसीनीम।

6 परमप्रभु, इन ठेयब नित्तीके गेना हना यो लीब। इन ठीक पतीके इन राज दन्ड खोदेशो बाक्ब।  
हिबू १:८-९ हिबू १:८, ९

7 गे ठीक पतीके दाक्नीनी। इन अरेशो मटीब आन कली चहिं काइ मदाक्नीनी। मोपतीके परमप्रभु, इन परमप्रभुमी इन वारच नेल्ल आन क्येडा इन कली दाक्शा, इन कली तेल लुक्शो खोदेशो पा ग्येरपाइक्त्तु।

8 इन वा नेल्ल एलोव, मूरे नु ब्रोव्रशो रिना पाइशो बाक्नीम। हात्ती आ दारामी दारपाइशो दरवारम बाक्शा, तार पाइशो ताप्तीके ताप्शा इन कली ग्येरपाइक्ब।

9 इन कली मान पाइब आन दातेमी पिप आन तमी यो बाक्नीम। इन ग्युरा गे ओफीर डा सुनम ग्योम्सीशो पिपीम राप्ब।

10 आं तमी, नोफा दाइशशा, नेनो। इ रागी नु इ खिं डा मुर आन कली प्रेंदो।

11 पिपमी इ दारस तशा, इ कली दाक्शो बाक्ब। मेको कली जिम्मा गेंसीशा मान पावो। मारदे हना मेको इ प्रभु बाक्ब।

12 टायर सहर डा मीश आलपुकी कोसेली चाक्शा, जाक्नीम। रागी रागी डा शुश क्येट थीब मुरपुकीम इन शिशी माल्नीम।

13 पिप आ तमी थम दारशो नु सुन के श्येलेम प्रोव्रशो वा फेक्शा, आ बाक्तीकेम बाक्ब।

14 मिनु बुटा आप्शो वा फेक्पाइशशा, मेको कली पिप आ बाक्तीके चाक्नीम। मेको आ गेय पाइब मीश आल आ नोले खोइक्पाइशशा, पिप आ बाक्तीकेमी जाक्नीम।

15 मिनु मुरपुकीमी मेको आन कली ग्येरशो कुम्सो पा लां कोंइनीम। मिनु पिप आ खिं ओंइनीम।

16 मिनु इन आफ आ पा डा इन तौपुकी दुम्नीम। गे मेको आन कली रागी डा सासन पाइब सेल्नीनी।

17 गो इन नें इन चच युइ आन पाला नेल्ल मिम्पाइक्नुड। मोपतीके जात जात डा मुरपुकीमी इन कली गेना हना यो ठेयब सेल्नीम।

## 46

### परमप्रभु आंइ नेक्था बाक्ब

कुम्सो पपाइक्ब कली अलामोथ कुम्सो आ लायो। कोराह आ तौ आन कुम्सो।

1 परमप्रभु आंइ खुइशशा बाक्तीके नु आंइ सक्ति बाक्ब। गो श्येत जकानु, गेना हना यो आंइ नेक्था बाक्शा वारच पाइब बाक्ब।

2 मोपतीके गो महिनीकी। रागी नु डांडापुकी हिम्सीशा समुन्द्रम गुम्तेक्म हना यो गो महिनीकी।

3 मिनु समुन्द्र ग्रीशा, बोग्यो पोक्तु हना यो नु बुइशशा कुशा, डांडापुकी हिम्ताक्ब हना यो गो महिनीकी। ठेयब सेंदा पा।

4 मिनु ठेयब खोला का बाक्ब। मेको रे पा ब्राशो आइक्च खोलापुकीमी परमप्रभु आ बाक्तीके सहर कली ग्येरपाइक्नीम। मेको नेल्ल क्येडा ठेयब आ बाक्तीके सहर बाक्ब। यसैया १२:५

5 मिनु परमप्रभु मेको सहरम बाक्ब। मिनु मेको महिम्सीब। परमप्रभुमी मेको सहर कली नां सोव्रम रेन वारच पाइब।

6 मिनु रागी रागी डा मुरपुकी जिशा खेशा पाइनीम। राज्यपुकी क्याम्चा पुंइसीनीम। परमप्रभुमी आ सेंदा नेंपाइक्तु हना, रागी नेल्ल याइनीम।

7 मुर नेल्ल आन परमप्रभु यावे गोपुकी नु बाक्ब। याकूब आ परमप्रभु आंइ बोल्यो दरवार बाक्ब। ठेयब सेंदा पा।

8 परमप्रभु यावे आ ठेयब गेय कोव्रथ जाक्कीन। मेकोमी रागी खतम पोक्शो कोव्रडीन। २राजा १९:३५

9 मेकोमी नेल्ल क्येडा डोन रागी सम्म डा लडाइ तेक्ब। मेकोमी लिब्रा जिक्शा नु तूतीक नेल्ल दुक्रा दुक्रा सेल्ब। तेक्तीके नेल्ल मीम हुम्ब। भजन संग्रह ७६:४

10 मेकोमी “सिक्सी पा बाक्कीन। गो परमप्रभु नड, दे तुइक्तीन। गो रागी रागी डा मुर आन दातेमी ठेयब दुम्नुड। गो रागी नेल्लेमी नेल्ल क्येडा ठेयब दुम्नुड” देंत।

11 मुर नेल्ल आन परमप्रभु यावे गोपुकी नु बाक्ब। याकूब आ परमप्रभु आंइ बोल्यो दरवार बाक्ब। ठेयब सेंदा पा।

## 47

### परमप्रभु रागी नेल्ल डा पिप बाक्ब

कुम्सो पपाइक्ब कली कोराह आ तौ आन कुम्सो।

- 1 जात जात डा मुर नेल्लेमी इन गुड फ़्रोक्तीन। गे ग्येरशा, परमप्रभु कली कुम्सो पने।
- 2 मारदे हना परमप्रभु यावे, नेल्ल क्येडा ठेयब नु हिंचा डा बाक्ब। मेको रागी नेल्ल डा ठेयब पिप बाक्ब।
- 3 मेकोमी रागी आन कली आंड के सेल्शा, शुश मुर आन कली आंड कली हुकुम पचा गेप्टु।
- 4 मेकोमी आंड कली शोप योत्रशा गेप्टु। मेको याकूब आ दाक्शो रागी बाक्त। मारदे हना परमप्रभुमी याकूब कली शुश दाक्ताक्व। ठेयब सेंदा पा। ब्यवस्था ३२:९
- 5 मुरपुकी शुश ग्येरसमानु, परमप्रभु आ नित्तीकेम लाइब। परमप्रभु यावे तुराही ताप्शो नेंशा लाइब।
- 6 परमप्रभु कली ठेयब सेल्तीक कुम्सो पने। लेंशा ठेयब सेल्तीक कुम्सो पने। आंड पिप कली ठेयब सेल्तीक कुम्सो पने। लेंशा ठेयब सेल्तीक कुम्सो पने।
- 7 मारदे हना परमप्रभु रागी नेल्ल डा पिप बाक्ब। मेको कली ठेयब सेल्तीक कुम्सो का पने। भजन संग्रह ९३:१
- 8 परमप्रभुमी रागी रागी नेल्ल आन कली सासन पाइब। मिनु परमप्रभु आंम आ ठेयब नित्तीकेमी निप्ब।
- 9 मिनु जात जात डा सासन पाइबपुकी नु अब्राहाम आ परमप्रभु आ मुर नेल्ल मेकेर गुम्शो बाक्नीम। मारदे हना रागी रागी डा पिपपुकी परमप्रभु आ गुडमी बाक्नीम। मेको थम ठेयब बाक्ब।

## 48

### सियोन आ दारस नु सक्ति

कोराह आ तौ आन कुम्सो।

- 1 परमप्रभु यावे ठेयब बाक्ब। परमप्रभु आ बाक्तीक सहरम बाक्शा, मान पाइक्चा पुंडसीब बाक्ब। भजन संग्रह ४६:५-६
- 2 आ डांडा दारशो नु लाइशशो बाक्ब। मुर नेल्ले मेको तशा ग्येरसीनीम। सियोन डांडा उत्तर गे बाक्ब। मेको ठेयब पिप आ बाक्तीक सहर बाक्ब। बिलाप २:१५; मत्ती ५:३५
- 3 मिनु परमप्रभु मेको सहर डा बोल्यो दरवारम बाक्ब। मेको ठेयब नु सक्ति पाइशशो बाक्ब, दे नेल्लेम तुडक्नीम।
- 4 पिप नेल्ले गुम्शा, हुल हुल पा लडाइ पचा कली आ डांडती बारतेक्म। २राजा १८:१७-१८; मलाकी १:११
- 5 मिनु मेकोपुकीमी मेको तशा, छक लाक्शा, हिंशा, प्रोक्तेक्म।
- 6 मिनु मेक उड गिक गिक पा खिंखि पाम्तेक्म। आल थिची ना डा रोड पशो मीश मुर खोदेंशो दुम्तेक्म।
- 7 गे टारसीस डा जहाज आन कली पूर्व डा फश पतीकेमी खतम सेल्तीनी।
- 8 आंड डांडती नेंशो लोव, मुर नेल्ल आन परमप्रभु यावे आ सहरम ताइतक। मार ताइतक देशा हना, आंड परमप्रभुमी आ सहर गेना हना यो लीपाइक्चा कली बोल्यो सेल्लु। ठेयब सेंदा पा।
- 9 परमप्रभु, गो इन खिंमी बाक्शा, इन गेना हना यो दाक्तीके मिम्शा, बाक्नीकी।
- 10 परमप्रभु इन नें नु इन कली ठेयब सेल्तीके रागी आ सुर सम्म बाक्ब। गे इन सक्तिमी ग्राना ग्रान बाक्नीनी।
- 11 सियोन डांडा ग्येरसेक्ल। यहूदा डा सहर नेल्ले इन निसाफ पशोमी ग्येरसमल।
- 12 सियोन आ एर ओंथ हिरशा, मेकेर डा लाइशशो खिं हिक्कीन।
- 13 मेकेर डा बोल्यो गारोपुकी रिम्शो पा कोव्रडीन। आ बोल्यो दरवार यो रिम्शो पा कोव्रडीन। मिनु नोले गे इन चच युड आन कली मेको आन पर्वम शेने चाप्नीनी।
- 14 मारदे हना मेको परमप्रभु, आंड परमप्रभु बाक्ब। मेकोमी गेना हना यो आंड कली लां कोइब। यसैया २५:९



## 49

शुश क्येटीम बेक्चा रे प्रॉइने मचाप्ब

कुम्सो पपाइक्ब कली कोराह आ तौ आन कुम्सो।

1 जात जात डा मुर नेल्ले, नेनीन।

2 ठेयब नु आइक्च, क्येट थीब नु पुडग नेल्लेमी नोफा दाइशशा, नेनीन।

3 मिनु गो जोक्शा तुइशशा लोत्र पाइनुड। आं थुंमी मिम्शा पशो लोत्रमी मुर आन कली रुब सेल्ब।

4 गो अर्ती डा लोत्र का नेता। गो ठेयब ताप्तीके ताप्शा, आं लोत्र रुप्पाइक्नुड।

5 मिनु श्येत जतीक नाक्ती जाक्मेनु, श्येत गेबपुकीमी आन ठीक मपशोमी आं एर ओंथ रे पुम्दीमीनु, गो मारदे हिनुडा डा?

6 मेकोपुकीमी आन शुश क्येटीम थमा सुइक्नीमी। आन शुश क्येटीम ठेयब लेत्नीमी।

7 सुइमी आंम लोकब कली क्येट थाप्शा, बेक्चा रे प्रॉइने मचाप्ब। मोपा मेकोमी परमप्रभु कली शुश क्येट थाप्शा आ गिम प्रॉइने मचाप्ब। मीका ६:६-८; मती १६:२६

8 बेक्चा रे ब्रॉइतीक शुश ठेयब बाक्ब। मेको मुरुम गेनायो ग्याप्ने मचाप्नीम। मती १६:२६

9 गेना हना यो ब्रॉइशा बाक्ब, सुइ मबाक्नीम। मुर नेल्ले थिम्चा पुंइसीनीम।

10 मिनु नेल्लेमी जोक्ब तुइक्ब मुर, मूर्ख नु मिम्तीक मपाइशशो नेल्ल बेक्नीम, दे तुइशशो बाक्नीम। मिनु आन शुश क्येट नेल्ल अरु आन कली प्रॉइशा लाइनीम। उपदेसक २:१६; उपदेसक ६:२

11 मिनु आन तुरस गेना हना यो मेको आन खिं दुम्ब। मोदेशो पाला नेल्ल आन कली दुम्ब। मिनु मेकोपुकीमी आन नें आन रू कली वोइशशो बाक्तेक्म हना यो, मोदेशो दुम्नीम।

12 गिश क्येट थीब बाक्तेक्म हना यो, मुरपुकी मलीनीम। मेकोपुकी बेक्शा लाइब जन्तु खोदेशो बाक्नीम। उपदेसक ३:१९

13 आंम आन मिम्शो थमा सुइक्ब नु मेको आन लोत्र नेशा, ग्येरसीब मेको आन नोले डा मुर यो मोदेशो दुम्नीम। ठेयब सेंदा पा।

14 मेकोपुकी भेडा खोदेशो पा बेक्चा कली बाक्नीम। बेक्पाइक्बमी मेको आन कली दाक्ब। सुनी कना रिम्शो थुं पाइशशो मुरपुकीमी मेको आन कली हुकुम पाइनीम। मेको आन बाक्तीके रे डोन दुम्शा, आन रां तुरसुम राक्शा लाइनीम।

15 तन्न परमप्रभुमी आं कली तुरस रे प्रॉइब। मेकोमी थमा पा आ बाक्तीकेम लाइक्ब। ठेयब सेंदा पा।होसे १३:१४; भजन संग्रह ७३:२४

16 मिनु गे शुश क्येट चेम्शा, आन खिं दारपाइक्ना पाइक्न बाक्ब मुर आन कली तशा, महिनीन। अय्युब २१:७-१५

17 मारदे हना मेको बेक्मानु, मारेइ मलाइक्नीम। मेको आन मार मार आन नोले खोइशशा, मलाइनीम। उपदेसक ५:१४; १तिमोथी ६:७

18 मिनु मेको ब्रॉइमा सम्म “गो आसीक ताइब नकी” देनीम। मुरपुकीमी थीब मुर आन कली ठेयब सेल्नीम। १तिमोथी ६:७ लूका १२:१६-२१; लूका १६:१९-३१

19 मो हना यो मेको बेक्शा, आन किकी पिपी आन बाक्तीके लाइनीम। मेकोपुकीमी गेनायो हाम्सो मताइनीम।

20 मुर गिश क्येट थीब बाक्तेक्म हना यो, मेको बेक्शा लाइब बस्तु भाव खोदेशो बाक्नीम।

## 50

परमप्रभु रिम्शो निसाफ पाइब

आसाफ आ कुम्सो।

1 ठेयब सक्ति पाइशशो, परमप्रभु, परमप्रभु यावेमी लोत्र पाप्तु। नां दाप्तीक रे नां पेरतीक सम्म डा रागी कली लोत्र पाप्तु। १इतिहास २५:१

2 परमप्रभु सियोन रे आ दारसम ग्योम्सीशा छेडछेड दुम्शा, गूशो बाक्ब। यसैया ६२:१

3 आंइ परमप्रभु जाक्शा, सिक्सी पा मबाक्ब। मेको आ डोंइती ग्राव यु दाक्ब मी ब्राइब। मिनु आ एर ओंथ नेल्ले कुमीर गिमीर पा फश गिवार पाइब।

4 मेकोमी आ मुर आन कली निसाफ पचा कली सरीड नु रागी डा नेल्ल आन कली ब्रेण्ब। ब्यवस्था ३२:१; यसैया १:२

5 परमप्रभुमी “आं कली थमा सुइक्ब आन कली खुप्तीन। मेकोपुकीमी मार मार क्योरशा चढ़ेशा, गो नु कबल पाम्तेक्म” देंब। प्रस्थान २४:४-११

6 मिनु स्वर्गम बाक्बपुकीमी “एको ठीक पाइब बाक्ब। मारदे हना परमप्रभुमी एको मुर आन कली निसाफ पाइब” देंनीम। टेयब सेंदा पा।

7 मिनु परमप्रभुमी “आं मुरपुकी, नेनीन। गो इन कली लोत्र पाइनुड। गो इस्राएली इन कली दोस गेशा, लोत्र पाइनुड। गो परमप्रभु, इन परमप्रभु नड। प्रस्थान २०:२

8 इन मार मार चढ़ेशो आ पबंम गो इन कली दोस मगेनुड। इन चोशा चढ़ेशो गेना हना यो आं डोंइती बाक्नीम। भजन संग्रह ४०:७; १सामुएल १५:२२; यसैया १:११

9 गो इन खिं डा ब्यफ नु इन गोठ डा बोकापुकी ममाल्नुड।

10 मारदे हना ब्वाकी डा जन्तु नेल्ल नु हजार हजार डांडा डा बी ब्यफ नेल्ल आं केन नम।

11 मिनु गो सरीड डा चिक्ब नेल्ल आन कली तुइक्नुड। मिनु रागी डा सोक्त पाइश्शो नेल्ल आं केन नम।

12 गो शोत्रल्लु बाक्शो नड हना यो, इन कली मदेंड वा। मारदे हना रागी नु रागीम बाक्शो मारेइ मारेइ आं केन नम।

13 मार, गो ब्यफ आन श्ये ब्वाइनुडा डा? बोका आन हुश तूनुडा डा?

14 गे आं कली ‘गे रिम्शो पाइब बाक्नीनी’ देंनीन। मिनु नेल्ल क्येडा टेयब, आं कली इन कसम जशो खपीन। योना २:१०

15 मिनु श्येत जनी नाक्त आं कली पुनीन। मिनु गो इन कली श्येत रे प्रोंइननी। मिनु आं कली ‘गे टेयब बाक्नीनी’ देंनीनी” देंत। भजन संग्रह ९१:१५

16 तन्न परमप्रभुमी आ अरेशो मटीब आन कली “आं फुल्लुम मुशा ब्रेक्शो लोत्र मारदे पढेनी? आं कबल आ पबंम मारदे लोत्र पनी? रोमी २:२१-२३

17 गे आं शेंशो लोत्र ग्रांरा दीतीनी। मिनु आं लोत्र प्रोंइतीनी।

18 गे खुइ आन कली गुम्तीनु, खुइ आन वारच दुम्तीनी। मिनु गे खुइ नु हेंथे गाक्ब नु गारतीनी।

19 गे मरिम्शो लोत्र पाइब नु जोल पाइब बाक्नीनी।

20 मिनु गे इन लोकब आन कली दोस गेशा बाक्नीनी। मिनु कयी का रे जरमेशो इन लोकब आन कली शुक्शी पाइनीनी। उत्पत्ती २:२१

21 गे मेको नेल्ल पाइतीनी हना यो, गो सिक्सी पा बाक्ती। गे आं खोदेशो मिम्साक्नी। तन्न गो इन कली हुइश्शा, इन दोस कोंइननी।

22 गे परमप्रभु कली प्रेंबपुकी तुइक्तीन। मो मपाइतीनी हना, गो इन कली साइक्ननी। मिनु इन कली सुइमी प्रोंइने मचाप्नीम।

23 सु सुमी ‘गे रिम्शो पाइब बाक्नीनी’ देंनीमी, मेकोपुकीमी आं कली टेयब सेल्नीम। मिनु गो मेको आन कली लां सेल्नुड। गो मेको आन कली आं पाप रे प्रोंइतीके कोइनुडमी” दे परमप्रभुमी देंत।

## 51

### आं पाप क्याम्दीन, दे पुंइशो

कुम्सो पपाइक्ब कली दाऊदमी बाथशेबा नु हेंथे पवा नोले नाथान जाक्मेनु, पशो दाऊद आ कुम्सो। २सामुएल १२:१-१५

1 परमप्रभु इन गेना हना यो दाक्तीकेमी आं कली शिशी पने। इन शुश शिशीमी आं हेंथे पशो क्याम्दीन। लूका १८:१७

2 परमप्रभु, इन शिशी पतीकेमी आं मरिम्शो पशो नेल्ल मुरशा गेयीनी। मिनु आं कली पाप रे प्रोंइयीनी।

3 मारदे हना गो आं मरिम्शो पशो तुडक्नुड। मिनु आं पाप गेना हना यो मिम्नुड।

4 गो इन डोंडती ला पाप पाता। इन डोंडती इन मदाक्शो पाता। गे आं कली निसाफ पा, ठीक पाइब बाक्नीनी। आं कली निसाफ पा सजाइ गेतीनी, गे मेको आ पर्वम दोस मताइब बाक्नीनी।

5 थमा पा, गो जरमेसी डा रेन मरिम्शो पाइब बाक्ती। आं ममा आ कोव्रजम जोल्डा रेन मरिम्शो पाइब बाक्ती। रोमी ३:४; यूहन्ना ३:६

6 गे आम पर्वम आम थुं डा थमा मिम्तीकेम दाक्नीनी। मोपतीके गे आं थुं कली जोक्तीक तुडक्तीक शेंदीने।

7 गे हिस्सोप के ब्राक्सुमी आं पाप क्याम्दीन। मिनु आं पाप क्याम्सीशो बाक्ब। मिनु आं कली चिकतीनी। मिनु गो फुं क्येडा बुश दुम्नुड। प्रस्थान १२:२२-२३; यसैया १:१८

8 आं कली ग्येरीतीके नु थुं नाइक्तीके लोत्र नेंपाइय्यीनी। मिनु इन फस पोक्शो आं रुश लेंशा ग्येरसमल। भजन संग्रह ३२:३-४

9 इन कुल आं पाप रे खुइक्तीन। मिनु आं मरिम्शो पशो नेल्ल क्याम्दीन।

10 परमप्रभु, आं थुं क्येख सुन खोदेशो सेलीन। मिनु नक नु ठीक पाइब सोक्त गेयीनी। मत्ती ५:८; इजीकीएल ३६:२६-२७

11 आं कली इन डोंडती रे मखेरयीनी। इन सोक्त आं रे मलतीन।

12 इन पाप रे प्रोंडतीके आ पर्वम ग्येरशो लेंशा गेयीनी। आं थुं इन देशो खोदेशो सेलीन।

13 मिनु गो मरिम्शो पाइब आन कली इन लां कोंडनुडमी। मिनु पाप पाइबपुकी इन गे लेत्नीम।

14 परमप्रभु, गे आं कली पाप रे प्रोंडब परमप्रभु बाक्नीनी। आं हुश खाक्श पोक्शो पाप रे प्रोंडयीनी।

मिनु गो इन प्रोंडतीके आ पर्वम कुम्सो पाइनुड।

15 परमप्रभु आं कली लोत्र पपाइय्यीनी। मिनु गो इन कली ठेयब सेल्लुड।

16 गे मार मार क्योरशा, चढ़ेशोमी मग्येरनीनी। ग्येरसीनी हना, गो क्योरशा चढ़ेड वा। गे चोशा चढ़ेशोम मग्येरसीनीनी। भजन संग्रह ४०:७

17 परमप्रभु, गे मरिम्शो पशो आ पर्वम जिक्शो थुं नु ब्रेम्शो मुर आन थुं दाक्नीनी। भजन संग्रह ३४:३९

18 इन दाक्शो खोदेशो पा सियोन कली रिम्शो दुम्तीक गेने। यरूसलेम डा गारो लेंशा सेलीने।

19 मिनु नोले मुरपुकीमी ठीक पा चढ़ेनीम। मुरपुकीमी इन कली ग्येरपाइक्चा कली चोशा चढ़ेतीक नेल्ल चढ़ेनीम। मिनु इन कली ब्यफ चढ़ेनीम।

## 52

### परमप्रभु आ शिशी नु निसाफ

कुम्सो पपाइक्ब कली। शेंतीक कुम्सो एदोमी दोएगमी सावल कली “दाऊद अहीमेलेक आ बाक्तीकेम खुंइसाक्ब” देंचा नोले डा दाऊद आ कुम्सो। १सामुएल २२:९-१९

1 गे थम बोल्यो मुर, मारदे मरिम्शो पचा आ पर्वम बोरीनीनी? परमप्रभु आ शिशी नाक्त रे लीब।

2 गे नाक्त रे खतम सेल्चा आ पर्वम मिम्नीनी? इन शोत्र शेषो करद खोदेशो बाक्ब। गे जोल पाइब ला बाक्नीनी।

3 गे रिम्शो पचा क्येडा मरिम्शो पचा ला दाक्नीनी। थमा लोत्र पचा क्येडा जोल पचा ला दाक्नीनी। ठेयब सेंदा पा।

4 गे जोल पाइब मुर, मारेइ मारेइ खतम सेल्लतीक लोत्र ला दाक्नीनी।

5 परमप्रभुमी थमा पा इन कली गेना हना यो कली खतम सेल्ब। मेकोमी इन कली इन बाक्तीके रे कीशा, गुंडब। मिनु मेकोमी इन कली ब्रोंडशा बाक्तीक रागी रे इन शाक्श सुन्दा उइश्शा, ताइक्ब। ठेयब सेंदा पा।

6 ठीक पाइबपुकी मेको आन कली तशा, हिनीम। मिनु मेकोपुकीमी रिश्शा कोव्रशा भजन संग्रह ९१:८

7 एको मुर कली कोव्रडीन। एकोमी परमप्रभु कली जिम्मा मगेंसे। आ शुश शोपोम “गो मारेइ मारेइ पने चान्नुड देशा, अरु आन कली खतम पोक्शा, बोल्यो दुम्त” दे रिश्शा, कोव्रनीम।

8 तन्न गो परमप्रभु आ खिमी गिग तेल रवा खोदेशो बाक्नुड। गो आं कली गेना हना यो दाक्ब परमप्रभु कली थमा सुडक्नुड। भजन संग्रह १२:१३-१६

9 गो “इन पशो आ पबर्म गेना हना यो इन कली ठेयब सेल्लुड। गो इन नें ‘पाप रे प्रोडब बाक्ब’ दे आस पाडनुड। मारदे हना इन नें रिम्शो बाक्ब। गो इन कली थमा सुडक्ब आन दातेमी ठेयब सेल्लुड” देंती।

## 53

### मुर आन मरिम्शो पशो

कुम्सो पपाइक्ब कली महालाथ नें पाइश्शो कुम्सो आ लायो। दाऊद आ शेंतीक कुम्सो। भजन संग्रह १४:-

1 मूर्खपुकीमी आन थुमी “परमप्रभु मबाक्ब” देनीम। मेकोपुकी काइ मरिम्शो दुम्शा ग्रांग्रा दिचा डा गेय पाइनीम। रिम्शो पाइब का यो मबाक्नीम।

2 मिनु परमप्रभुमी स्वर्ग रे मुर आन कली कोव्रब। मारदे कोव्रब देंशा हना, आ कली माल्ब, रुप्ब मुर का बाक्म को, दे कोव्रब।

3 मुर नेल्ले हेंथे लां खोइश्शो बाक्नीम। मेको नेल्ले दूली पाइब बाक्नीम। रिम्शो पाइब का यो मबाक्नीम।

4 मार, मरिम्शो पाइबपुकी मारेइ मशेंसीनीमी? मेकोपुकीमी शोब्ले जशो खोदेशो पा आं मुर आन कली नेक्नीम। मेकोपुकीमी परमप्रभु कली काइ मपुंडनीम।

5 मिनु नोले मेकोपुकी थाम्पा हिनीम। डोंइती मोपा हिंतीके मबा। मारदे हना परमप्रभुमी थमा मसुडक्ब आन रुश फ्राइब। मिनु मेकोपुकी मुने दोक्नीम। मारदे हना परमप्रभुमी मेको आन कली तिल्लो बाक्ब।

6 इस्त्राएल कली श्येत रे प्रोडब सियोन रे जाक्शो हना, गिश रिम्शो दुम वा। परमप्रभुमी आ मुर आन कली थुं नाइश्शा, रिम्शो पा बाक्तीक लेंशा गेपु हना, याकूब आ मुर कुम्सो पाइनीम। मिनु इस्त्राएल डा मुर ग्येरसीनीम।

## 54

### “जोरी सत्रु रे प्रोनीन” दे पुंडशो

कुम्सो पपाइक्ब कली तार पाइश्शो ताप्तीके ताप्शा, शेंतीक कुम्सो। जीफ डा मुरपुकीमी सावल कली “दाऊद आंइ दातेमी खुंडसीब” देंशो ना डा दाऊद आ कुम्सो। १सामुएल २३:१९; १सामुएल २६:१

1 परमप्रभु, इन नेमी आं कली प्रोइयीनी। इन ठेयब सक्तिमी आं कली दोस मताइब बाक्ब, दे कोइदीन।

2 परमप्रभु, आं लोव्र नेनीन, आं पुंडशो लोव्र नेनीन।

3 मरिम्शो पाइबपुकी आं गे बारतेक्म। हुश ख्राक्श पोक्बपुकीमी साइक्चा माल्तीमी। मेकोपुकी परमप्रभु कली ममिम्थु, महिनीम। ठेयब सेंदा पा।

4 परमप्रभु थमा पा आं कली वारच पाइब बाक्ब। मेको आं कली ब्रोंइचा गेब बाक्ब।

5 सु सुम आं कली मरिम्शो पाइनीमी, मेको आन कली मरिम्शो दुम्ल। इन दाक्शा मप्रोंइतीकेमी मेको आन कली खतम पोक्कीन।

6 परमप्रभु, गो इन कली आं दाक्तीके चढेनुड। परमप्रभु यावे, गो इन कली “गे रिम्शो पाइब बाक्नीनी” दे इन नें ठेयब सेल्लुड। मारदे हना परमप्रभु यावे रिम्शो पाइब बाक्ब।

7 गे आं श्येत नेल्ल रे प्रोंइतीनी। मिनु गो आं जोरी सत्रु आन कली ग्राती।

## 55

### “आ वारचम प्रोनानु” पुंडशो

कुम्सो पपाइक्ब कली तार पाइश्शो ताप्तीके ताप्शा शेंतीक। दाऊद आ कुम्सो।

1 परमप्रभु, आं लोव्र नेनीन। आं डोंइती रे इन कुल मखुइक्तीन।

2 आं पुंइशो नेंशा, लोत्र लेत्तीनी। गो श्येत जशा, आं थुं ग्येत्थ लुकच दुम्शा, मारदे रोंका पा गाक्ती देशा हना,

3 गो आं जोरी सत्रु आन लोत्र नेंशा, इन अरेशो मटीबपुकीम श्येत गेतीके रोंका पा गाक्ती। मारदे हना मेकोपुकी गाइशशा आं जोरी सत्रु दुम्शा, श्येत गेतीमी।

4 आं थुं ग्येत्थ लुकच पशो बाक्ब। आं कली बेक्चा डा हिंतीकेमी सुम्ती।

5 गो हिंशा खिंखि पाता। गो साप्पा हिंनुड।

6 गो आं के “ढुकुर खोदेशो पा फ्रां बाक्शो हना, बेरशा लशा, नांइसीड वा” देंती।

7 गो थमा पा बेरशा डोन लशा, गोरशो रागीम बाक्ड वा। ठेयब सेंदा पा।

8 गो फश गिवार रे प्रोक्शा, रीब पा फाम्सीड वा।

9 परमप्रभु, मरिम्शो पाइब आन मिम्शो खतम पा गेने। मेको आन लोत्र खाल्शा गेने। मारदे हना गो सहरमी हुश खाक्श पोक्शो नु जिशो खेशो ला ताता।

10 मेकोपुकी नाक्दो नाक्ती सहर डा गारो डोइशशा एर ओंथ हिरशो बाक्नीम। मेको सहरम मरिम्शो पतीके नु श्येत ला बाक्ब।

11 मेको सहरम मारेड मारेड खतम पोक्ब बाक्ब। मुर आन कली दिप्तीके नु जोल पतीके सहर प्रोंइशा मलाइनीम।

12 आं कली काड मदाक्बमी शुक्शी पाइय्यी हना, गो फाल्ने चबु वा। जोरी सत्रुमी आं कली लडाइ तोशो नम हना, गो मेको आन क्येडा प्रोक्शा खुंइसीड वा। भजन संग्रह ४१:१०

13 तन्न गे आ खोदेशो मुर बाक्ते। गो नु बाक्ब आं वारच बाक्नेवे।

14 डोंइती गो गे नु ग्येरशा बाक्शो बाक्ती। गो मुरपुकी नु परमप्रभु आ खिंम काथा गाक्शो नय।

15 बेक्पाइक्बमी आं जोरी सत्रु आन कली आन मतुइक्चा डा पा जाक्शा दाक्गल। मेकोपुकी सेलीन बेक्शो मुर आन बाक्तीके लमल। मारदे हना मेको आन दातेमी मरिम्शो पतीके बाक्ब। गन्ती १६:३१-३३

16 तन्न गो परमप्रभु कली पुंइनुड। मिनु मेकोमी आं कली प्रोंइब।

17 गो सुनी, नाक्दो, नाक्ती श्येत जडानु, परमप्रभु कली आं श्येत आ पर्वम पुंइनुड। मिनु मेकोमी आं लोत्र नेंब।

18 मेकोमी आं कली लडाइ रे मारेड दुम्पाइक्थु, प्रोंइब। शुश मुरुमी आं कली मदाक्ताक्यीमी हना यो, प्रोंइब।

19 परमप्रभु गेना हना यो ठेयब नित्तीकेमी निशशो बाक्ब। मेकोमी मेको आन लोत्र नेंशा, श्येत गेब। ठेयब सेंदा पा। मारदे हना मेकोपुकीमी आन लां गेनायो ठीक मसेल्नीम। परमप्रभु कली मान पा महिंनीम।

20 आं वारचमी आं कली जोल पा श्येत गेती। मेकोमी आ कबल प्रोंइतु।

21 मिनु मेकोमी मिलो शिलो लोत्र पाप्तु। तन्न मेको आ थुंमी जिचा खेचा ला बाक्ब। मेको आ लोत्र तेल खेक्शो खोदेशो बाक्ब। तन्न आ आगाम शोइशशो तरवार बाक्ब। येरमीया ९:७

22 इन थुं डा श्येत नु मार पचा दो पचा देंतीके परमप्रभु यावे आ डोंइती वोतीन। मिनु मेकोमी इन कली कुक्ब। मेकोमी ठीक पाइब आन कली गेनायो हिम्सीचा मगेब। १पत्रुस ५:७

23 तन्न परमप्रभु, गे मरिम्शो पाइब आन कली खतम दुम्तीकेमी ताइक्नीनी। हुश खाक्श पोक्ब नु जोल पाइब आन ब्रोंइतीक नाक्त उइक्थ यो मब्रोंइनीम। तन्न गो इन कली थमा सुइशशा बाक्नुड। भजन संग्रह १०२:२५

## 56

थमा सुइक्ब थुं महिंब थुं बाक्ब

कुम्सो पपाइक्ब कली डोन डा रवाम बाक्शो ढुकुर आ कुम्सो आ लायो। पलिस्तीपुकीमी गाथ सहरम दाऊद कली ग्याइक्ची ना डा दाऊद आ कुम्सो। १सामुएल २१:१०-१५

- 1 परमप्रभु आं कली शिशी पाइय्यीनी। मारदे हना मुरपुकीमी आं कली शुश खेदा पाइनीमी। नाक्त रे आं कली दिप्शो बाक्नीम।
- 2 नेल्ल क्येडा ठेयब, नाक्त रे आं कली दिप्बपुकीमी आं कली श्येत गेनीमी। आं कली खेदा पाइब शुश बाक्नीम।
- 3 गो हिंडानु, इन कली थमा सुइक्नुड।
- 4 मिनु गो परमप्रभु आ लोव्र ठेयब सेल्लुड। मेकोमी प्रॉइब, दे थमा सुइश्शा, महिंथु बाक्नुड। मुरपुकीमी आं कली मार पाइक्ने चाप्नीमी डा? भजन संग्रह २७:१; भजन संग्रह ११८:६; यसैया १२:२; यसैया ५१:१२; मत्ती १०:२८
- 5 नाक्त रे मेकोपुकीमी आं लोव्र दूली सेल्शा लोव्र पाइनीम। मेको आन मिम्शो नेल्ले आं कली श्येत गोचा कली ला बाक्ब।
- 6 मिनु मेकोपुकीमी आं कली क्यारी पा बाप्शा साइक्चा माल्नीम।
- 7 परमप्रभु, मेको आन कली काइ प्रोकचा मगेन। इन गाइक्चामी मेको मुर आन कली खतम पोक्कीन।
- 8 आं रोंका पशो मिम्तीन। आं प्रेक्कु इन ग्योबुम कुर पा वोतीन। मार, मेको इन लोव्र ब्रेक्शो किताबम ब्रेक्शो मबाक्बा डा?
- 9 मिनु गो इन कली “वारच पाइय्यीनी” दे पुनुनु, आं जोरी सत्रु लेशशा प्रोक्नीम। मिनु परमप्रभुमी आं कली दाक्ब, दे तुइक्नुड।
- 10 गो परमप्रभु आ लोव्र ठेयब सेल्लुड। गो परमप्रभु यावे आ लोव्र आ परबम ग्येरशा लोव्र पाइनुड।
- 11 गो “परमप्रभुमी श्येत रे प्रॉइब” दे थमा सुइश्शा, महिंथु बाक्नुड। मुरपुकीमी आं कली मार पाइक्ने चाप्नीमी डा?
- 12 परमप्रभु, गो गे नु कसम जशो, खाप्चा माल्लुड। गो इन कली “गे रिम्शो पाइब बाक्नीनी” दे चढेतीके चढेनुड।
- 13 मारदे हना गे आं कली बेक्चा रे प्रॉइतीनी। मिनु आं कली गोल्चारे प्रॉइतीनी। परमप्रभु, गो ब्रॉइशो आन छेडछेडम गाक्चा तडल। अय्युब ३३:३०

## 57

### श्येत रे प्रॉइब, दे पुंडतीक

कुम्सो पपाइक्ब कली खतम मसेलो देशो कुम्सो आ लायो। दाऊद सावल रे प्रोकमेनु, पुक्खीम बाक्शा, पशो कुम्सो। १सामुएल २२:१

- 1 परमप्रभु शिशी पने। आं कली शिशी पाइय्यीनी। मारदे हना आं थुं गे नु खुंडसीब। एको खतम पोक्ब फश गिवार मनुम्म सम्म गो इन फ्रां आगामी खुंडसीशा बाक्नुड। भजन संग्रह १७:८; भजन संग्रह ११:१-२
- 2 गो नेल्ल क्येडा ठेयब, परमप्रभु कली ब्रेल्लुड। परमप्रभुमी आं परबम आ मिम्शो खाप्ब।
- 3 मेकोमी स्वर्ग रे वारच पाइब सोइश्शा, आं कली प्रॉइब। मिनु आं कली खेदा पाइब आन कली हुइक्ब। ठेयब सेंदा पा। परमप्रभुमी आं कली गेना हना यो दाक्ब। आ दाक्शा मप्रॉइतीकेमी आं कली कोव्रब।
- 4 गो गुप्स आन दातेमी बाक्शो बाक्नुड। गो मुर व्वाइब जन्तु आन दातेमी गोल्शो बाक्नुड। मेको मुर आन खुइ तूतीक नु ब्रा खोदेशो बाक्नीम। मेको आन लें हेश्शो तरवार खोदेशो बाक्ब।
- 5 परमप्रभु, गे सरीड क्येडा ठेयब बाक्नीनी। मिनु रागी इन सक्तिम प्रिदीन।
- 6 मेकोपुकीमी आं खोइली रेप्पाइक्चा कली ब्वारद दाइक्ताक्म। गो श्येत जशा गुर ब्वेशो बाक्नुड। मेकोपुकीमी आं लांम खाल्टा दोम्तेक्म। तन्न मेकोपुकी मेकेर आंमा बिक्तेक्म। ठेयब सेंदा पा।
- 7 परमप्रभु, आं थुं ग्येत्थ लुक्च मपथु बाक्ब। गो ताप्तीक ताप्शा कुम्सो पाइनुड। भजन संग्रह १०८:२-६
- 8 आं थुं सेंशा बोक्को। ताप्तीकपुकी ठीक पा बाक्कीन। मारदे हना गो नां सोव्रचा क्येडा डोंइती कुम्सो पाइनुड।

9 परमप्रभु, गो जात जात डा मुर आन दातेमी इन कली ठेयब सेल्लुड। गो रागी रागी आन दातेमी इन पर्वम कुम्सो पाइनुड।

10 मारदे हना इन गेना हना यो दाक्तीके सरीड सम्म जाक्दीशो ठेयब बाक्ब। मिनु इन दाक्शा मप्रोंडतीके गोस्स सम्म जाक्दीशो ठेयब बाक्ब।

11 परमप्रभु, गे सरीड क्येडा ठेयब बाक्नीनी। मिनु रागी इन सक्तिम प्रिदीन।

## 58

मरिम्शो पाइब कली सजाड

कुम्सो पपाइक्ब कली कुम्सो आ लायो, खतम मसेलो देशो दाऊद आ सेल्लो कुम्सो। भजन संग्रह ८२:२-४

1 गे निसाफ पाइबपुकी, ठीक लोव्र पाइनीनी? गे मुर आन कली ठीक निसाफ पाइब बाक्नीनी?

2 ममाइ, गे इन थुंमी ठीक ममिमीनी। मिनु गे रागीम हुश खाक्श पोक्नीनी।

3 परमप्रभु आ अरेशो मटीबपुकी जरमेसमा रेन मरिम्शो पाइनीम। कोव्रज रेन मरिम्शो पाइब दुम्शो बाक्नीम। मिनु जोल पाइनीम।

4 मेको आन बीस बुस्स आन बीस खोदेशो बाक्ब। मेको थम ठेयब बुस्स आन नोफा सुशो खोदेशो बाक्नीम।

5 मिनु मन्तर तन्तर पाइब नु नु टुना मुना पाइब आन लोव्र मनेनीम।

6 परमप्रभु, मेको आन खुड जिक्तीन। परमप्रभु यावे, गुप्स आन खुड तुल्दीन।

7 मेकोपुकी शाइशो ब्वाक्कु खोदेशो पा जाम्शा, लमल। मेकोपुकीमी लिब्राम ब्रा आप्मेनु, मेको आन ब्रा हेथे लमल।

8 मेकोपुकी गाक्ना गाक्न यशा, दे खोदेशो दुम्मल। मेकोपुकीमी शाम्शो आलपुकीम खोदेशो पा नां मतामेक्ल।

9 इन ग्योबपुकी सोव्रशो चूमी ब्रशो मीम होचा क्येडा डोंडती, मरिम्शो पाइबपुकी जाम्शा लाइनीम।

10 मिनु ठीक पाइबपुकी मरिम्शो पाइब आन कली क्येक्क लेशो तशा, ग्येरसीनीम। मिनु मेको आन हुशेम गाक्नीम।

11 मिनु मुरपुकीमी “ठीक पाइबपुकीमी थमा पा इनाम ताइनीम। थमा पा, परमप्रभु रागीम निसाफ पाइब बाक्ब” देनीम।

## 59

“जोरी सत्रु रे प्रोनीन” दे पुंइशो

कुम्सो पपाइक्ब कली खतम मसेलो देशो कुम्सो आ लायो। दाऊद आ कुम्सो। सावलमी दाऊद आ ख्लिम बाक्म कों, मेको कली साइक्चा, दे क्यारी पथ सोइशो बाक्त। १सामुएल १९:११

1 आं परमप्रभु, आं जोरी सत्रु रे प्रोंडयीनी। आं कली मरिम्शो पाइब आन क्येडा प्रोंडयीनी।

2 आं कली मरिम्शो पाइब नु हुश खाक्श पोक्ब आन रे प्रोंडयीनी।

3 कोव्रडीन, मेकोपुकीमी आं कली साइक्चा कली बाप्शा बाक्शो बाक्नीम। परमप्रभु यावे, गो मारेड मरिम्शो मपथु, मेको मुर साइक्बपुकीमी आं कली जिचा तोशो बाक्नीम।

4 गो मारेड मरिम्शो मपथु, मेकोपुकीमी आं कली साइक्चा चिक्शो बाक्नीम। आं श्येत जशो कोव्रडीन। मिनु वारच पाइक्चा कली बोक्कीन।

5 परमप्रभु यावे, मुर नेल्ल आन परमप्रभु, इस्राएल आ परमप्रभु, रागी रागी आन कली सजाड गेचा कली बोक्कीन। इन कली प्रोंडशा, मरिम्शो पाइब आन कली काइ शिशी मपने। ठेयब सेंदा पा।

6 नाक्दो कुस कुस मेकोपुकी सहर आ एर ओथ कुचुम खोदेशो पा डरर डरर पा हिरसीनीम।

7 मेकोपुकीमी आन शोव्र रे मार गुंडबाक्मा? मेकोपुकीमी साइक्चा डा लोव्र पाइनीम। मिनु मेकोपुकीमी “सुम नेंबा डा” देनीम।

8 तन्न परमप्रभु यावे, गे मेको आन पर्वम रिक्तीनी। गे रागी रागी नेल्ल आन पर्वम रिक्तीनी।

9 गे आं सक्ति बाक्नीनी। गो इन कली ठेयब सेल्शा कुम्सो पाडनुड। परमप्रभु, गे आं बोल्यो दरवार बाक्नीनी। भजन संग्रह ९:१०-११

10 परमप्रभुम आं कली गेना हना यो दाक्तीकेम गुम्ब। मिनु मेकोमी आं कली आं जोरी सत्रु आन कली ग्रापाइक्ब।

11 मेको आन कली मसतीन। मो पाइतीनी हना, आं मुरपुकीमी प्रेनीमी। परमप्रभु, गे आंइ तेक्तीक बाक्नीनी। गे मेको आन कली इन सक्तिमी एर ओंथ ब्रपाइश्शा, आइक्च सेलीन।

12 मेको आन पशो लोत्रमी, आन ठेयब लेशो कोंइनीमी। गे गाइश्शा मेको आन सराप पतीके नु जोल पतीके खतम पोक्कीन।

13 मेको आन कली इन गाइक्तीकेमी सतीन। गे मेको आन कली रागी रे क्याम्ताक्नी हना, मुर नेल्लेमी परमप्रभुमी याकूब कली सासन पाइब, दे तुइक्नीम। ठेयब सेंदा पा।

14 नाक्दो कुस कुस मेकोपुकी सहर आ एर ओंथ कुचुम खोदेशो पा डरर डरर पा हिरसीनीम।

15 मेकोपुकी जचा थोत्रक माल्थ गाक्नीम। मिनु मरूतेक्म हना, ग्रीनीम।

16 तन्न गो चहिं इन सक्ति आ पर्वम कुम्सो पाडनुड। सुनी कना गो इन गेना हना यो दाक्शो आ पर्वम कुम्सो पाडनुड। मारदे हना गे आं ब्रोंइशा बाक्तीक बोल्यो दरवार बाक्नीनी। मिनु श्येत जडानु, आं खुइक्तीक बाक्नीनी।

17 गे, आं सक्ति बाक्नीनी, गो इन कली ठेयब सेल्तीक कुम्सो पाडनुड। गे आं बोल्यो दरवार नु आं कली गेना हना यो दाक्ब परमप्रभु बाक्नीनी।

## 60

### लडाइ बुशा पुंइशो

कुम्सो पपाइक्ब कली कबल डा फू आ लायो। दाऊद आ सेल्शो शेंतीक कुम्सो। मेकोमी अराम-नहाराइन नु अराम-सोबाह नु लडाइ पवानु, योआब लेशशा, १२ हजार एदोमी कली हिक्सी दिमम साइक्तु। रसामुएल ८:३,१३; रसामुएल १०:१३,१८

1 परमप्रभु, गे आंइ कली वारच पाइक्चा प्रोंइशो बाक्तीनी। गे आंइ लडाइ पतीके कली प्रोंइशो बाक्तीनी। गे आंइ पर्वम थाम्पा गाइक्ताक्नी। मुल आंइ कली डोंइती डा खोदेशो पा रिम्शो सेलीन।

2 गे ख्रिनु कुपाइक्तीनी। मिनु रागी कली चेलतीनी। मेको जेशो लेंशा सेलीन। मारदे हना हिम्सीन सीन बाक्ब।

3 परमप्रभु, गे इन मुर आन कली ठेयब श्येत जपाइक्तीनी। गे आंइ कली दिड दाड गोल्ब तूचा थोत्रक तूपाइक्तीनी। भजन संग्रह ७५:९

4 मिनु इन क्येडा मान पा हिंब आन कली प्रोक्तीक लां कोंइचा कली चिन्ड का वोइक्तीनी। मेकेर लमानु, ब्राम मख्राइनीम। ठेयब सेंदा पा।प्रस्थान १७:१५

5 इन सक्तिमी आंइ कली प्रोनीन। मिनु इन दाक्शो मुरपुकी ब्रोंइचा तामेक्ल। भजन संग्रह १०८:७-१४

6 परमप्रभुमी आ बाक्तीक रे “ग्येरपाइक्तीकेमी, गो शेकेम कली योक्नुड। सुक्कोथ डा दिंम पुक्नुड।

7 गिलाद नु मनस्से आं के बाक्नीस। एफ्राइम आं पियाम गुप्तीक बाक्ब। यहूदा आं राज दन्ड बाक्ब। उत्पत्ती ४९:१०

8 मोआब आं चिक्तीके बोस बाक्ब। गो एदोम तार आं जुत्ता ब्वारनुड। गो पलिस्ती आन कली ग्रानुड।

9 सुम आं कली गारो हिरशो सहर सम्म चाक्दीप्बा? सुम आं कली लां कोंइशा, एदोम सम्म चाक्दीप्बा?” देंत।

10 परमप्रभु, गे आंइ क्येडा डोन मलनी? गे आंइ कली प्रोंइतीनी। गे आंइ लडाइ पाइबपुकी नु मलाइनीनी।

11 मिनु आंइ जोरी सत्रु क्येडा ग्राचा कली आंइ कली वारच पने। मारदे हना मुर आन वारच पशो शोर गाक्शो बाक्ब।

12 गो परमप्रभु आ वारच पाइश्शोमी ग्रानीकी। मिनु मेकोमी आंइ जोरी सत्रु आन कली दिम्ब।



## 61

## परमप्रभुमी वारच पशो

कुम्सो पपाइक्व कली तार पाइशो ताप्तीके ताप्शा पतीक, दाऊद आ कुम्सो।

1 परमप्रभु, आं ब्रेशो नेनीन। आं पुंडशो लोव्र नेनीन।

2 गो डोन रागी रे इन कली ब्रेतुड। आं थुं ग्येथ लुकच दुम्मेनु, ब्रेतुड। आं कली लाइशो सेरथे फुल्लु तार लाइय्यीनी।

3 मारदे हना गे आं खुइक्तीके बाक्नीनी। गे डोंइती रे आं जोरी सत्रुमी मथित्तीके बोल्यो लाइशो खिं बाक्नीनी। भजन संग्रह ७१:३; हितोपदेस १८:१०

4 गे आं कली इन ताम्बुमी गेना हना यो बाक्चा गेने। मिनु इन फ्रां आगाम खुइसीनुड। ठेयब सेंदा पा। भजन संग्रह १७:८

5 परमप्रभु, गे आं कसम जशो नेतीनी। गे इन नें कली मान पा हिंब आन कली गेशो खोदेशो पा, आं कली यो गेतीनी।

6 पिप कली शुश ब्रोंइतीक नाक्त गेने। शुश पाला सम्म आ ब्रोंइतीक नाक्त बारपतीन। भजन संग्रह २१:५

7 मेको परमप्रभु आ डोंइती गेना हना यो आ नित्तीकेम बाक्चा तवल। इन गेना हना यो दाक्तीके नु इन दाक्शा मप्रोंइतीकेमी मेको कली खाल पपतीन। २सामुएल ७:१६

8 मेना गो इन नें गेना हना यो ठेयब सेल्टीक कुम्सो पाइनुड। मिनु नाक्त किंत किंत गो आं कसम जशो खाप्नुड।

## 62

## परमप्रभुमी प्रोंइब, देशो

कुम्सो पपाइक्व येदुथून कली दाऊद आ कुम्सो।

1 आं थुंम सिक्सी पा परमप्रभु कली रिम्ब। मेकोमी आं कली प्रोंइब। यसेया ३०:१५

2 मेको ला आं सेरथे फुल्लु नु आं कली वारच पाइब बाक्ब। मेको आं बोल्यो दरवार बाक्ब। गो गेनायो महिम्सीनुड। भजन संग्रह १८:३

3 गे नेल्लेमी मुर का कली गेना सम्म बाप्शा साइक्चा माल्नीनी? गे गोल्चा चिक्शो गारो नु ब्रेत्चा चिक्शो थरपु खोदेशो मुर कली खोल्नीनी?

4 मेकोपुकीमी ठेयब मुर कली साइक्चा माल्शो बाक्नीम। मेकोपुकी जोल पतीकेमी ग्येरसीनीम। मिनु शोव्रम आसीक गेखु पाइनीम। तन्न आन थुंमी चहिं सराप पाइनीम। ठेयब सेंदा पा।

5 आं थुंम सिक्सी पा परमप्रभु कली ला रिम्ब। मारदे हना गो मेको कली आस पाइनुड।

6 मेको ला आं सेरथे फुल्लु नु आं कली वारच पाइब बाक्ब। मेको आं बोल्यो दरवार बाक्ब। गो महिम्सीनुड।

7 आं कली श्येत रे प्रोंइतीके नु मान ततीके परमप्रभु रे जाक्ब। परमप्रभु आं खुइक्तीक सेरथे फुल्लु नु आं बोल्यो दरवार बाक्ब।

8 मुर नेल्ले, गेना हना यो परमप्रभु कली थमा सुतीन। मेको आ डोंइती इन थुं डा लोव्र देंनीन। मारदे हना परमप्रभु इं खुइक्तीके बाक्ब। ठेयब सेंदा पा।

9 महिक्सीशो मुरपुकी फश ला बाक्नीम। हिक्सीशो मुर आन ठेयब दुम्तीके जोल ला बाक्ब। मेकोपुकी नाक्सीमानु, मारेइ मबाक्नीम। हिक्सीशो नु महिक्सीशो मुर नेल्ल मुठी का सोक्त डा ला बाक्नीम।

10 मुर आन कली दिप्शा “रिम्शो दुम्नुड” दे ममिम्तीन। खुइ पशो मार मार तशा, ठेयब मलेतीन। इन शोप शुश दुम्त हना यो, मेको कली थमा मसुतीन। मत्ती १९:२२; लूका १२:१५-२१; १तिमोथी ६:९, १७

11 परमप्रभुमी लोव्र पाप्नु। गो लोव्र निकशी नेता “परमप्रभु के सक्ति बाक्ब।

12 परमप्रभु यावे गेना हना यो दाक्ब बाक्ब” देशो नेंता। गे थमा पा मुर नेल्ल आन कली आन पशो खोदेशो पा गेनीनी। रोमी २:६-११

## 63

परमप्रभु नु बाक्चा दाक्शो

यहूदा आ गोरशो रागीम बाक्शो ना डा दाऊद आ कुम्सो। १सामुएल २२:५

1 परमप्रभु, गे आं परमप्रभु बाक्नीनी। गो इन कली थमा पा माल्नुड। गो ब्वाक्कु तूतू दाक्शो खोदेशो पा आं थुंमी इन कली माल्नुड। गो ब्वाक्कु मबाक्शो रागीम ब्वाक्कु माल्शो खोदेशो पा इन कली माल्स डा माल्स बाक्नुड। भजन संग्रह ४२:३

2 गो इन कली इन बाक्तीकेमी ताता। मिनु इन सक्ति नु छेडछेड ताता।

3 आं ब्रोंडतीके क्येडा इन गेना हना यो दाक्तीके ठेयब बाक्ब। मोपतीके गो इन कली ठेयब सेल्नुड।

4 गो मबेक्डा सम्म इन कली ठेयब सेल्नुड। मिनु गो आं गुड पोक्शा, इन कली प्रार्थना पाइनुड।

5 ब्रोंव्रशो जशो खोदेशो पा इन कली मिम्शा ग्येरनुड। गो कुम्सो पा इन कली ठेयब सेल्नुड।

6 गो आं ब्राख्येम बाक्डानु, इन कली मिम्नुड। मिनु नाक्दो यो इन कली मिम्शा बाक्नुड। येरमीया २६:९

7 मारदे हना गे आं कली वारच पाइब बाक्नीनी। मोपतीके गो इन प्रोंडतीके तुइश्शा, कुम्सो पाइनुड।

भजन संग्रह १७:८

8 आं थुं गे नु बाक्ब। गे आं कली कोव्रब बाक्नीनी।

9 तन्न आं कली साइक्चा माल्बपुकी खतम दुम्शा, खप आगा ओव्रनीम।

10 मेकोपुकी तरवारम साइक्चा पुंडसीनीम। मिनु सिवारम मेको आन कली ब्वाइनीम।

11 तन्न पिप चहिं परमप्रभु नु थुं नाइश्शा ग्येरशा बाक्ब। परमप्रभु आ नेंम कसम जाइबपुकीमी मेको कली ठेयब सेल्नीम। तन्न जोल पाइबपुकी ब्वाक्चा मताइनीम।

## 64

परमप्रभुमी निसाफ पवल

कुम्सो पपाइक्ब कली दाऊद आ कुम्सो।

1 परमप्रभु, आं कली श्येत गेशो आ पर्बम इन कली शेंदुनु, आं लोव्र नेनीन। आं कली आं जोरी सत्रु आन क्येडा प्रोंडयीनी।

2 इन अरेशो मटीब आन क्येडा खुइक्तीनी। मरिम्शो पाइब आन खुइश्शा मिम्शो रे खुइक्तीनी।

3 मेकोपुकीमी तरवार खोदेशो पा आन लें हेप्पाइक्नीम। मेको आन लोव्रमी साइक्ब ब्रा खोदेशो पा आप्नीम।

4 मेकोपुकीमी बाप्शा, दोस मपाइश्शो मुर आन कली आप्नीम। मेकोपुकीमी मेको आन कली महिंथु ब्रा ब्रु आप्नीम।

5 मिनु मेकोपुकीमी आन मरिम्शो पशो आ पर्बम आंम आंमा ठीक पाइतीनी, देंमुइनीम। खुइश्शा ब्वारद दाइक्तीक आ पर्बम लोव्र पाइनीम। मेकोपुकीमी “इं कली सुम ताइबा डा” देंनीम। भजन संग्रह १४:७

6 मेकोपुकीमी मरिम्शो पतीक आ पर्बम गारशा “गो शुश मिम्शा, गेय पाइतय” देंनीम। थमा पा मुर आन मिम्तीके नु थुं मरिम्शो बाक्ब।

7 तन्न परमप्रभुमी मेको आन कली ब्रा आप्ब। मिनु मेको आन मतुइक्थु गोल्नीम।

8 परमप्रभुमी मेको आन कली आन लोव्र आ पर्बम खतम सेल्ब। मेको आन कली साइक्ब। मिनु मेको आन कली ताइब नेल्लेमी हिंशा आन पिया हिक्नीम।

9 नोले मुर नेल्ल हिंनीम। मिनु परमप्रभु आ पशो आ पर्बम लोव्र पाइनीम। मिनु मेको आ पशो मिम्नीम। प्रस्थान ८:१५

10 ठीक पाइबपुकी परमप्रभु यावे आ पबर्म ग्येरसीने। मिनु मेको नु खुंडसीन। रिम्शो थुं पाइशशो मुर नेल्ले ग्येरसीन।

## 65

परमप्रभु कली ठेयब सेल्शो

कुम्सो पपाइक्ब कली। दाऊद आ कुम्सो।

1 परमप्रभु, सियोनमी इन कली ठेयब सेल्तीक कुम्सो पाइनीमी। मिनु आंइ कसम जशो नेल्ल इन डोंइती खाप्नीकी।

2 गे प्रार्थना नेंब बाक्नीनी। मोपतीके मुर नेल्ल इन डोंइती जाक्नीम।

3 गो आंइ पापमी ग्रुम्कानु, आंइ मरिम्शो पशो माफ गेतीनी।

4 सु सु इन योव्रचा पुंडसीशो बाक्नीमी, मेकोपुकी ग्येरसीशो बाक्नीमी। मेको आन कली इन खिंम बाक्पाइक्चा कली चाक्नीनी। गो इन खिं, इन आंम बाक्तीके डा ब्रोवशो थोव्रकमी रूनीकी। भजन संग्रह ६३:३-४; भजन संग्रह ८४:२-५; ब्यवस्था ४:७

5 आंइ पुंडशो लोव्र इन ठेयब गेयमी आंइ कली प्रोंइशा लोव्र लेत्नीनी। परमप्रभु, आंइ कली श्येत रे प्रोंइब बाक्नीनी। गे डोन बाक्ब रागी नु नेल्ल क्येडा डोन डा समुन्द्र आ नेक्था बाक्ब आन आस बाक्नीनी।

6 गे इन सक्तिमी डांडा नेल्ल सेल्तीनी। गे ठेयब सक्ति पाइशशो बाक्नीनी।

7 गे समुन्द्र आन ग्रीशो सिक्सी पपाइक्तीनी। गे समुन्द्र आन बोक्शो नाइक्पाइक्नीनी। मिनु जात जात डा मुर आन जिचा खेचा साम्नीनी। भजन संग्रह ८९:१०

8 मिनु डोन डोन रागीम बाक्बपुकी इन छक लाक्चा डा गेय तशा हिंनीम। परमप्रभु, गे नां दाप्तीके नु नां पेरतीकेम बाक्ब आन कली ग्येरसीशा कुम्सो पपाइक्नीनी।

9 गे रागी हिरशा, रेउ यिपाइक्नीनी। गे मेको कली शुश ग्रेल्पाइक्नीनी। परमप्रभु आ खोला ब्वाक्कुम ब्रीशो बाक्नीम। मोपा मुर आन कली शुश अन्न खेल्नीनी। मारदे हना मेकोन इन मिम्शो बाक्ब। भजन संग्रह ६७:७

10 गे रू नेल्ल ब्वाक्कुम जिप्पाइक्नीनी। मेको कली थेल्नीनी। रेउ यिपाइशशा, मेको कली मार मार वापाइक्ब सेल्नीनी। मिनु मेकेर सिशशो अन्न कली आसीक गेनीनी। भजन संग्रह १०४:१३-१६

11 गे इन गेना हना यो दाक्तीकेमी शुश अन्न ग्रेल्ब सेल्नीनी। इन बग्गी मारेड मारेडम ब्रीशो बाक्नीम।

12 गोरशो रागी डा बी ब्यफ योव्रतीके गिग दुम्नीम। पहाड थाम्पा ग्येरसीशो बाक्नीम।

13 योव्रतीके नेल्ल क्यारश भेडापुकीमी ब्रीशो बाक्नीम। दिमपुकी अन्नमी सुम्सीशो बाक्नीम। मेकोपुकी शुश ग्येरसीशा कुम्सो पाइनीम।

## 66

परमप्रभु वारच पाइब बाक्ब

कुम्सो पपाइक्ब कली कुम्सो का।

1 ए रागी डा मुर नेल्ले, ग्येरशा परमप्रभु कली कुम्सो पने।

2 गे परमप्रभु कली “इन नें ठेयब बाक्ब” दे कुम्सो पने। मेको कली रिम्शो कुम्सो पने।

3 मिनु परमप्रभु कली “इन गेय ठेयब नु हिंचा डा बाक्नीमी। इन जोरी सत्रु इन डोंइती हिंशा, खिंखि पा बाप्नीम। मारदे हना इन सक्ति थम ठेयब बाक्ब” देनीन।

4 रागी डा मुर नेल्ल इन डोंइती बाप्नीम। मेकोपुकीमी इन कली ठेयब सेल्शा, कुम्सो पाइनीम। मिनु इन नें कली ठेयब सेल्शा, कुम्सो पाइनीम। ठेयब सेंदा पा।

5 जाक्कीन, परमप्रभु आ गेय कोव्रडीन। मेकोमी मुर आन दातेमी ठेयब नु हिंचा डा गेय पाप्तु।

6 मेकोमी समुन्द्रम सोव्रशो लां सेल्लु। मुरपुकी सोव्रशो लांम गाक्शा, खोला शोक्साक्म। मेकेर गो मेको आ पबर्म ग्येरसाक्क। प्रस्थान १४:२१-२२; यहोसु ३:१६-१७

7 मेकोमी आ सक्तिमी गेना हना यो सासन पाइब। मेकोमी रागी रागी आन कली कोवब। मेको कली मटीब ठेयब मलेम्मल। ठेयब सेंदा पा।

8 जात जात डा मुरपुकी, आंइ परमप्रभु कली ठेयब सेलीन। मेको कली ठेयब सेल्शो लोत्र नेंसेक्ल।

9 मेकोमी आंइ कली बेक्चा रे प्रॉइतु। आंइ कली ग्रेक्चा मगेव।

10 मारदे हना परमप्रभु, गे आंइ कली नाक्ताक्नी। गे आंइ कली चांदी यपाइश्शो खोदेंशो पा यपाइक्तीनी। हितोपदेस १७:३

11 गे आंइ कली जेल्खानम चोक्पाइक्तीनी। मिनु हेल्लो भारी कुरपाइक्तीनी।

12 गे मुर आन कली आंइ पियाम थेक्पाइक्तीनी। गो मी नु ब्वाक्कुम गाक्तक। तन्न गे आंइ कली ठेयब रागीम चाक्तीनी। यसैया ४३:२

13 गो इन खिंमी चोशा चढ़ेचा कली जाक्नुड। मिनु आं पशो कसम खाप्नुड।

14 गो श्येत जडानु, कसम जाता। मिनु मुल खाप्नुड।

15 गो इन कली दोम्शो बस्तु चढ़ेनुड। गो बोका चढ़ेनुड। गो ब्यफपुकी नु क्यारश चढ़ेनुड। ठेयब सेंदा पा।

16 परमप्रभु कली मान पा हिंबपुकी, नेल्ल जाक्शा नेनीन। मेकोमी आं पबंम मार पवा, मेको गो इन कली शेंनुड।

17 गो मेको कली ठेयब सेंदा पा पुंइता। गो मेको कली ठेयब सेल्ता।

18 आं थुंमी पाप बाक्शो हना, परमप्रभुमी आं लोत्र मनेन वा। हितोपदेस २८:९

19 तन्न परमप्रभुमी आं लोत्र थमा पा नेंतु। मेकोमी आं पुंइशो लोत्र नेंतु।

20 परमप्रभु ठेयब बाक्ल। मारदे हना मेकोमी आं पुंइशो लोत्र गेती। मिनु आं कली गेना हना यो दाक्ब।

## 67

### “रिम्शो पाइतीनी” दे कुम्सो पशो

कुम्सो पपाइक्ब कली तार पाइश्शो ताप्तीके ताप्शा पतीक कुम्सो।

1 परमप्रभुमी इं कली शिशी पा आसीक गेवल। मिनु इं कली आ शिशी कोंइदल। ठेयब सेंदा पा।

गन्ती ६:२४-२५

2 रागी रागी डा मुरपुकीमी इन लां नु इन प्रॉइतीक सक्ति तुइक्तमेक्ल।

3 परमप्रभु, जात जात डा मुरपुकीमी इन कली ठेयब सेल्मेक्ल। मिनु मुर नेल्लेमी इन कली ठेयब सेल्मेक्ल।

4 रागी रागी डा मुरपुकी ग्येरशा सोम्शा, कुम्सो पामेक्ल। मारदे हना गे जात जात डा मुर आन कली कुल मकोत्रथु निसाफ पाइनीनी। मिनु रागी रागी डा मुर आन कली इन लां कोंइनीनी। ठेयब सेंदा पा।

5 परमप्रभु, जात जात डा मुरपुकीमी इन कली ठेयब सेल्मेक्ल। मिनु जात जात डा मुर नेल्लेमी इन कली ठेयब सेल्मेक्ल।

6 मिनु रूम अन्न खेल्ब। इं परमप्रभुमी इं कली आसीक गेब। भजन संग्रह ६५:१०

7 परमप्रभुम, इं कली आसीक गेना गेन बाक्ब। मिनु रागी डा मुर नेल्ले मेको कली मान पा हिंनीम।

## 68

### परमप्रभु कली कुम्सो पशो

कुम्सो पपाइक्ब कली दाऊद आ कुम्सो।

1 परमप्रभु बोक्ब। मिनु आ जोरी सत्रु ब्रशा, आ डोंइती रे प्रोक्नीम। गन्ती १०:३५

2 दोपा फशेमी कुन बेरपाइश्शा योल्बा, मोपा मेको आन कली बेरपाइश्शा योल्पतीन। मी आ नेक्था मयीन यशो खोदेंशो पा परमप्रभु आ अरेशो मटीबपुकी मेको आ डोंइती जाम्शा लाइनीम।

3 तन्न ठीक पाइबपुकी परमप्रभु आ डोंइती ग्येरसमल। मेकोपुकी ग्येरशा सोम्शा बाक्मल।

4 परमप्रभु कली कुम्सो पने। मेको आ नें आ परबम कुम्सो पने। गोस्स तार गाकब कली ठेयब सेल्टीक कुम्सो पने। मेको आ नें परमप्रभु यावे बाकब। गे मेको आ डोंइती ग्येरशा सोम्शा बाककीन। यसैया ५७:१४

5 परमप्रभु आ बाक्तीकेमी बाक्शा, रोम रोइक्च आन आफ बाकब। वोंइश बेक्शो मीश मुर आन कली वारच पाइब यो बाकब। भजन संग्रह १०:१४

6 परमप्रभुमी आ का ला बाक्शो मुर कली बाक्तीक खिं गेब। मेकोमी चोक्सीशो आन कली प्रोंइशा रिम्शो सेल्ब। तन्न मटीबपुकी चहिं नांम दुप्शा सोव्रशो रागीम बाक्चा माल्नीम।

7 परमप्रभु, गे इन मुर आन डोंइडोंइती गाक्तीनी। गे मेको आन कली गोरशो रागीम खुल्नीनी। ठेयब सेंदा पा।प्रस्थान १३:२१

8 परमप्रभु सीनैम बाकब। इस्राएली आन परमप्रभु आ डोंइती खिनु कुत। मिनु शुश रेउ यित। प्रस्थान १९:१६-१८

9 परमप्रभु, गे ठेयब रेउ यिपाइक्तीनी। इन सोव्रने थुम्शो रागी जिप्पाइक्तीनी।

10 इन मुर आन कली मेको रागीम बाक्पाइक्तीनी। मिनु गे, परमप्रभु, इन दाक्तीकेमी श्येत जाइब आन कली थुल्तीनी।

11 परमप्रभुमी आ लोव्र नेंपाइक्तु। मिनु मेको लोव्र शेंब मीश मुर शुश दुम्तेक्म। यसैया ५२:७

12 लडाइ पाइब आन पिप हिंशा दाम दाम पा प्रोक्नीम। मिनु मीश मुरपुकीमी मेको प्रोक्ब आन प्रोंइशो मारेइ मारेइ योक्सीनीम।

13 गे चहिं भेडा आन दातेमी इप्चा दाक्नीनी? चांदीम गिल्लो फ्रां पाइश्शो दुकुर बाकब। मिनु आ ओफ्लापुकी टल्केशो सुनमी गिल्लो बाक्नीम।

14 मिनु नेल्ल क्येडा सक्ति पाइश्शोमी पिप आन कली ब्रपाइक्ची ना सल्मोन डांडामी फु यिपाइक्तु। न्यायाधीस ५:१६

15 बाशान डा डांडा परमप्रभु आ डांडा बाकब। मेको थम ठेयब बाकब। मेकेर डांडा शुश बाक्नीम।

16 गे शुश डांडा पाइश्शो पहाड, मारेदे गे परमप्रभु आ सासन पचा कली योव्रशो डांडा गे कोव्रशा, गेहे पाइनीनी? मेकेर परमप्रभु गेना हना यो बाकब। भजन संग्रह १३२:१३

17 परमप्रभु आ बग्गी हजार हजार क्येडा शुश बाक्नीम। मिनु परमप्रभु सीनै रे आ बाक्तीकेम जाक्शो बाकब।

18 गे इर डोइश्शा लाइतीनी। ग्याइश्शो मुर आन कली लाइक्तीनी। मुर आन दातेमी गे मारेइ मारेइ ताइतीनी। डोंइती मटीब आन दातेमी यो ताइतीनी। परमप्रभु यावे मेकेर बाकब। एफिसी ४:८-१०

19 परमप्रभु कली नाक्त किंत किंत ठेयब सेल्मेक्ल। मेको आंइ श्येत कुरशा, आंइ जोरी सत्रु रे प्रोंइब बाकब। ठेयब सेंदा पा।१कोरिन्थी १०:१३

20 आंइ परमप्रभु श्येत रे प्रोंइब बाकब। मिनु परमप्रभु यावेमी बेक्चा रे प्रोंइब।

21 परमप्रभुमी थमा पा आ जोरी सत्रु आन पिया प्रोल्ब। मेको मुर आन चां पाइश्शो पिया पापम ब्रीशो बाकब।

22 मिनु परमप्रभुमी “गो मेको आन कली बाशान रे चाक्नुडमी। मेको आन कली समुन्द्र आगा रे गुंडनुडमी।

23 गेपुकीमी इन खोइली इन जोरी सत्रु आन हुशेम खुम्नीनी। मिनु इन कुचुमपुकीमी यो आन भाग ताइनीम” दैत।

24 परमप्रभु, मुरपुकीमी इन कली ताइनीम। आं परमप्रभु, आं पिप कली आ बाक्तीकेम लशो ताइनीम। भजन संग्रह २४:७; २सामुएल ६:१३-१५

25 डोंइडोंइती कुम्सो पाइबपुकी गाक्नीम। मेको आन नोले मार मार ताप्बपुकी गाक्नीम। मिनु मेको आन एर ओंथ खैजडी ताप्ब मीश आलपुकी गाक्नीम। प्रस्थान १५:२०

26 परमप्रभु कली गुम्तीकेमी ठेयब सेलीन। परमप्रभु यावे कली इस्राएली आन गुम्तीकेमी ठेयब सेलीन। यसैया ४८:१

27 नेल्ल क्येडा आइक्च थर बेन्यामीन आ खिं डा मुरपुकीमी मेको आन कली लां कोइनीम। यहूदा आ थर डा ठेयब मुर, जबूलून आ थर नु नाप्ताली आ थर डा ठेयब मुर मेको हुलम बाक्नीम।

28 परमप्रभु इन सक्ति कोइदीन। डोंइती पशो खोदेशो पा परमप्रभु, इन सक्ति कोइदीन।

29 मिनू पिपपुकीमी इन कली यरूसलेम डा इन खिं आ पबर्म मार मार चाकनीम। भजन संग्रह ७२:१०

30 बुदी मीलु आन दातेम बाकब जन्तु खोदेशो मुर आन कली हुइकतीन। जात जात डा बाछा आन दातेम बाकब ब्यफ खोदेशो मुर आन हुल कली खेरीन। मेकोपुकी ब्रुमा नोले चांदी चाक्का मालनीम। लडाइ पचा दाकब जात जात डा मुर आन कली ब्रपतीन।

31 इजीप्त रे मुर जाकनीम। एथीयोपीया डा मुरपुकी परमप्रभु कली जिम्मा गेंसीनीम। यसैया १८:७; यसैया १९:२१; यसैया ४५:१४ प्रेरित ८:२७

32 ए रागी डा राज्यपुकी, परमप्रभु कली कुम्सो पने। परमप्रभु यावे कली ठेयब सेलतीक कुम्सो पने। ठेयब सेंदा पा।

33 परमप्रभु डोंइती रे स्वर्गम बाकब। मेको आ सेंदा बुंबु पशो खोदेशो सक्ति पाइशो बाकब।

34 परमप्रभु सक्ति पाइशो बाकब। मेको कली इस्राएलीम मान पाइनीम। मेको आ सक्ति सरीडम बाकब।

35 परमप्रभु, इन बाक्तीकेमी हिंचा डा बाक्तीनी। इस्राएली आन परमप्रभुम आ मुर आन कली सक्ति नु बोल गेब। परमप्रभु ठेयब बाकब।

## 69

### “वारच पने” दे पुंइशो

कुम्सो पपाइक्ब कली लिली फू आ लायो। दाऊद आ कुम्सो।

1 “परमप्रभु, आं कली श्येत रे प्रोंइयीनी। मारदे हना ब्वाक्कु आं शुर सम्म जाकशो बाकब।

2 गो शेक्तीक मबाक्शो हिलो आगाम गुम्ना गुम्न बाक्नुड। शुश लुकच लशो ब्वाक्कुमी गुम्ना गुम्न बाक्नुड। आं एर ओंथ ब्वाक्कु ला बाकब।

3 गो “वारच पने” दे प्रवा किवा पा दती। आं सेंदा सोवती। आं परमप्रभु कली माल्शा आं मिक्च ब्रात्रा दुम्ती।

4 आं कली मोशा काइ मदाक्बपुकी आं चां क्येडा यो शुश बाक्नीम। मिनू मेकोपुकी मोशा आं जोरी सत्रु दुम्शो बाक्नीम। मेकोपुकीमी आं कली साइक्का माल्शो बाक्नीम। आं मरोइशो मार मार थोवक, मेकोपुकीमी ‘लेत्तो’ देंनीम। यूहन्ना १५:२५

5 परमप्रभु, गे आं दूली पशो तुइशो बाक्नीनी। आं दोस इन डोंइती मखुइशो बाकब।

6 इन कली आस पाइबपुकी आं पतीके मुने मदोक्मल। परमप्रभु, मुर नेल्ल आन परमप्रभु यावे, इन कली माल्बपुकी आं पतीके मुने मदोक्मल। गे इस्राएली आन परमप्रभु बाक्नीनी।

7 गो इन पबर्म शुक्शी पाइक्का पुंइसीनुड। मिनू मुनेमी आं कुल सुम्सीशो बाक्नुड। भजन संग्रह ४४:२३

8 गो आं लोकब आन दातेमी मतुइशो मुर खोदेशो दुम्शो बाक्नुड। गो आं ममा आ तौ आंइ दातेमी अर्को रागी डा मुर खोदेशो दुम्ती। भजन संग्रह ३८:१२

9 मारदे हना इन खिं कली दाक्तीके नाक्त कित कित आं डोंइती बाकब। इन कली पशो शुक्शी आं कली दुम्त। भजन संग्रह ११९:१३९; यूहन्ना २:१७; रोमी १५:३

10 गो डाक्शा, माइजा बाक्डानु, मुरपुकीमी रिक्ताक्यीमी।

11 गो भाडग्रा फेक्सीडानु, मुरपुकीमी आं कली शुक्शी पाइक्तीमी।

12 ठेयब लाप्चोम बाक्बपुकीमी आं कली शुक्शी पाइनीम। दुक्शो मुरपुकीमी आं पबर्म कुम्सो पाइनीम। अय्युब ३०:९

13 तन्न परमप्रभु यावे, गो इन कली इन शिशी पाइक्की ना लोत्र पाइनुड। इन गेना हना यो दाक्तीकेमी आं पुंइशो श्येत रे प्रोंइतीके गेयीनी। परमप्रभु आं कली लोत्र लेत्तीनी। यसैया ४९:८

14 आं कली हिलोमी गुम्तीक रे प्रोंइयीनी। आं कली गुम्का मगेयीनी। आं कली काइ मदाक्बपुकी रे प्रोंइयीनी। मेको बारशो ब्वाक्कु रे प्रोंइयीनी।

15 बारशो ब्वाक्कुम आं कली मसुम्यील। ब्वाक्कुम मयोल्दील। बेक्शो मुर आन बाक्तीकेमी आं कली मब्रेत्तील। उत्पत्ती २९:३

16 परमप्रभु यावे, इन गेना हना यो दाक्तीकेमी आं कली लोत्र लेत्तीनी। इन ठेयब शिशी आं गे लेत्तीन। गन्ती ६:२६

17 इन कुल इन गेय पाइब रे मखुइक्तीन। गो श्येत जशो बाक्नुड। आं कली रीब पा लोत्र लेत्तीनी।

18 आं नेक्था जाक्कीन। मिनु आं कली प्रॉइयीनी। आं जोरी सत्रु रे आं कली प्रॉइयीनी।

19 मुरपुकीमी आं परबम दोपा रित्तीमी, मुने तोक्यीमी नु शुक्शी पाइय्यीमी, गे मेको नेल्ल तुइक्नीनी। आं जोरी सत्रु नेल्ल इन डोंइती बाक्नीम।

20 आं कली रिशशा कोत्रशो आ परबम आं थुं जिक्शो बाक्ब। मिनु गो मारेइ पने मचाप्ब दुमशो बाक्ती। आं कली शिशी पाइब 'सुइ बाक्मा कों' दे कोत्रता, तन्न सुइ मबाक्म। लेम्ब यो सुइ मबाक्म।

21 मेकोपुकीमी आं जचा थोत्रकमी खाइल कुर पा गेतीमी। गो तूतू दाक्कानु, ग्युरशो तूचा थोत्रक गेतीमी। मत्ती २७:३४,४८

22 मेको आन जचा थोत्रक आन ब्वारद दुम्ल। मेको आन कली वारच पाइब आन बेक्तीक दुम्ल। रोमी ११:९-१०

23 मेको आन मिक्ची ब्राब्रा दुमशा, मताइब दुम्मल। मेको आन ची गेना हना यो गुर ब्वेशो दुम्ल।

24 गे इन गाइक्चा मेको आन कली मोइक्तीन। इन गाइशशो मेको आन कली दुम्ल।

25 मेको आन बाक्तीके श्येत्थ दुम्ल। मेको आन ताम्बुम सुइ मलीमल। प्रेरित १:२०

26 मारदे हना इन तुप्शो मुर कली खेदा पाइनीम। मेकोपुकीमी इन खाइक्पाइशशो मुर आन कली लडाइ तोइनीम।

27 मेको आन ठीक मपतीकेम ठीक मपतीक तेम्दीन। मेकोपुकीम इन पाप रे प्रॉइतीके मतामेक्ल।

28 ब्रॉइतीक किताब रे मेको आन नें क्याम्सेक्ल। ठीक पाइब आन नें ब्रेक्शो किताबमी मेको आन नें मबाक्ल। प्रस्थान ३२:३२-३३; दानीएल १२:१; लूका १०:२०; फिलिप्पी ४:३

29 परमप्रभु, गो श्येत जशा, रोइ पशो बाक्नुड। इन प्रॉइतीकेमी आं कली खाल पयील" दे परमप्रभु कली लोत्र पाता।

30 गो कुम्सो पा, परमप्रभु आ नें ठेयब सेल्लुड। "गे रिम्शो पाइब बाक्नीनी" दे मेको कली ठेयब सेल्लुड।

31 मार मार क्योरशा, चढेशो क्येडा एको कुम्सो नेंशा, परमप्रभु यावे ग्येरसीब। ग्रोत्र नु गेंच पाइशशो व्यफ चढेशो क्येडा यो शुश ग्येरसीब। भजन संग्रह ५०:८-१३

32 दिप्चा पुंइसीशो मुरपुकी मेको तशा ग्येरसीनीम। परमप्रभु यावे कली माल्बपुकी, इन थुं ग्येत्थ लुकच मदुम्ल।

33 परमप्रभु यावेमी पुडग आन पुंइशो नेंब। मिनु ग्याइक्चा पुंइसीशो आ मुर आन कली आइक्च ममिम्ब।

34 सरीड नु रागीमी मेको कली ठेयब सेल्लेक्ल। समुन्द्र नु मेकेर बाक्शो नेल्लेमी मेको कली ठेयब सेल्लेक्ल।

35 मारदे हना परमप्रभुमी सियोन कली प्रॉइब। मिनु यहूदा डा सहरपुकी लेंशा सेल्लब। मिनु मुरपुकी मेकेर बाक्शा, मेको आन के दुम्ब।

36 मिनु मेको आ गेय पाइब आन आल आन के यो दुम्ब। मेको आ नें दाक्बपुकी मेकेर बाक्नीम।

## 70

“आं कली राइक्तीनी” दे पुंइशो

कुम्सो पपाइक्ब कली मिम्पाइक्चा कली दाऊद आ कुम्सो। भजन संग्रह ४०:१४-१८

1 “परमप्रभु, आं कली राइक्चा कली रीब पा जाक्कीन। परमप्रभु यावे आं कली वारच पचा कली रीब पा जाक्कीन।

2 आं कली साइक्चा माल्बपुकी मुने दोक्शा, वाम ग्याम दुम्मल। आं कली मरिम्शो दुम्शो दाक्बपुकी प्रोक्शा, टेयब मुने दोक्मल।

3 मिनु सुमी आं पब्रम 'ठीक दुम्त!' देमा, मेको मुने पा लल गोंगो जिमल।

4 तन्न सु सुमी इन कली माल्नीमी, मेकोपुकी इन पब्रम ग्येरशा सोम्शा बाक्मल। सु सुमी इन पाप रे प्रोंइतीक दाक्नीमी, मेकोपुकीमी गेना हना यो 'परमप्रभु टेयब बाक्ब' देंमल।

5 गो प्रुडग नु श्येत जाइब बाक्ती हना यो, परमप्रभु रीब पा आं बाक्तीक जाक्कीन। गे आं कली वारच पाइब नु आं कली राइक्ब बाक्नीनी। परमप्रभु यावे, रीब पा जाक्कीन" दे पुंडता।

## 71

खाल्पा दुम्शो ना डा पुंडशो

1 परमप्रभु यावे, गो इन कली जिम्मा गेंसीशो बाक्नुड। गो गेनायो मुने मदोक्डल।

2 इन ठीक पतीकेम आं कली राइश्शा प्रोंइयीनी। आं लोत्र नेंशा, आं कली प्रोंइयीनी।

3 आं प्रोक्शा लशा खुइश्शा बाक्तीके सेरथे फुल्लु दुमीन। गे आं कली प्रोंइचा कली ब्रोंइशा बाक्तीक दरवार बाक्नीनी। मारदे हना गे आं सेरथे फुल्लु नु आं ब्रोंइशा बाक्तीक दरवार बाक्नीनी। भजन संग्रह ३१:३-४

4 आं परमप्रभु, गे आं कली इन अरेशो मटीब आन गुइ रे राइक्तीनी। ठीक मपाइब नु तुप्शा दिप्ब मुर आन गुइ रे राइक्तीनी।

5 मारदे हना परमप्रभु यावे, गे आं आस बाक्नीनी। गो आ ठिटा दुम्डा रेन इन कली थमा सुइक्ता।

6 गो जरमेसीडा रेन इन कली थमा सुइक्ता। गे आं ममा आ कोत्रज रेन आं कली कोत्रज बाक्तीनी। गो इन कली गेना हना यो टेयब सेल्लुड।

7 शुश मुरपुकीमी आं कली तशा "परमप्रभुमी मेको कली ताइक्ताक्व" दे मिन्नीम। तन्न गे आं खुइश्शा बाक्तीक बाक्नीनी।

8 गो इन कली गेना हना यो टेयब सेल्लुड। गो नाक्तर रे इन नें टेयब सेल्लुड।

9 गो खूशो दुम्डानु, आं कली मप्रोंइयीनी। आं सक्ति जाम्मेनु यो आं कली मप्रोंइयीनी।

10 मारदे हना आं जोरी सत्रुमी आं पब्रम मरिम्शो लोत्र पाइनीम। आं कली साइक्चा माल्बपुकीमी लोत्र गारपाइक्नीम।

11 मेकोपुकीमी "परमप्रभुमी मेको कली वारच पचा प्रोंइशो बाक्ब। मेको कली खेदा पा ग्याइक्तय। मारदे हना मेको कली राइक्ब सुइ मबाक्नीम" देनीम।

12 परमप्रभु, आं क्येडा डोन मबाक्कीन। आं परमप्रभु, आं कली राइक्चा कली रीब पा जाक्कीन।

13 आं कली दोस गेबपुकी मुने दोक्शा खतम दुम्मल। आं कली साइक्चा माल्बपुकी तोक्शा लोत्र पाइक्चा, शुक्शी पाइक्चा नु आइक्च सेल्चा पुंडसमल।

14 तन्न गो चहिं इन कली आस पस डा पस बाक्नुड। गो इन कली डोंइती क्येडा टेयब सेल्लुड।

15 गो इन ठीक पतीके आ पब्रम लोत्र पाइनुड। गे आं कली गिश खेयप प्रोंइयीनी, मतुइक्ताक्ड हना यो, गो इन श्येत रे प्रोंइतीके आ पब्रम नाक्तर रे लोत्र पाइनुड।

16 परमप्रभु, गो इन सक्ति पाइश्शो गेय आ पब्रम शेंना शेंन गाक्नुड। मिनु इन ठीक पतीके आ पब्रम इन कली टेयब सेल्लुड।

17 परमप्रभु, गो ठिटा बाक्डा रेन, गे आं कली शेंताक्यीनी। मिनु गो मुल सम्म इन छक लाक्चा डा गेय आ पब्रम लोत्र पाइनुड।

18 परमप्रभु, गो खूशो दुम्शा, आं चां बोइक्म सम्म यो, आं कली मप्रोंइयीनी। मिनु गो आं नोले डा पाला डा मुर आन कली इन सक्ति नु इन ठीक पतीके आ पब्रम शेंनुड। यसैया ४६:४

19 मिनु इन ठीक पतीके टेयब दुम्शा, इर सरीड थीब। गे थम टेयब गेय पाइतीनी। परमप्रभु, इन खोदेशो अरु सु बाक्नीमी डा?



20 गे आं कली शुश नु ठेयब श्येत जपाइक्तीनी हना यो, लेंशा ब्रोंइचा गेनीनी। गे आं कली लुकच लतीक रे लेंशा ग्येत्थ लपाइक्तीनी। १सामुएल २:६

21 गे आं कली लेंशा मान ताइब सेल्शा लेम्नीनी।

22 आं परमप्रभु, गो इन दाक्शा गेनायो मप्रोंइतीके आ पबर्म ठेयब तार पाइश्शो ताप्तीके ताप्शा, ठेयब सेल्लुड। गे इस्राएली आन का ला परमप्रभु बाक्तीनी। गो बीना ताप्शा इन कली कुम्सो पाइनुड। गे इस्राएली आन का ला परमप्रभु बाक्तीनी। २राजा १९:२२; यसैया ४३:३

23 गे आं कली श्येत रे प्रोंइब बाक्तीनी। मोपतीके गो ग्येरशा सोम्शा इन कली कुम्सो पा ठेयब सेल्लुड।

24 गो इन ठीक पतीके आ पबर्म नाक्तर रे लोत्र पाइनुड। मारदे हना आं कली खती पचा माल्बपुकी मुने दोक्शा, मार पचा ना मार पचा दुन्तेक्म।

## 72

### पिप आ पबर्म पुंइशो

सोलोमन आ कुम्सो।

1 परमप्रभु, पिप कली इन निसाफ डा लोत्र गेने। पिप आ तौ कली इन ठीक पतीके गेने।

2 मेकोमी इन मुर आन कली ठीक पतीकेमी निसाफ पवल। इन प्रुडग मुर आन कली ठीक पा निसाफ पवल।

3 मोदेशो ठीक पतीके तशा, डांडा नु पहाड डा रूपुकी अन्न ग्रेल्ब दुम्मल।

4 मेकोमी मुर आन दातेमी प्रुडग आन कली कोवडल। मिनु श्येत जाइब आन तमी तौ आन कली प्रोनल। मेकोमी दिप्ब आन कली खतम पोक्गल।

5 नां तास्ला बाक्सा सम्म नु मुर नेल्ल आन पाला सम्म मेको ब्रोंइशा बाक्ल।

6 मिनु मेको घांस रिक्शो दिममी रेउ यिशो खोदेशो दुम्मल। रेउमी रागी कली जिप्पाइश्शो खोदेशो दुम्मल।

7 मेको आ पालामी मुर आन दातेमी ठीक पतीके ठेयब दुम्मल। मिनु तास्ला लीम सम्म मुर आन थुं नाइक्तीक दुम्मल।

8 मेकोमी समुन्द्र कारे अर्को समुन्द्र सम्म नु ठेयब खोला रे रागी आ सुर सम्म सासन पवल। जकरिया ९:१०

9 गोरशो रागी डा मुरपुकी मेको आ डोंइती बाम्मल। मिनु आ जोरी सत्रुमी फुरक तुक्गमेक्ल।

10 टारशीश नु डोन डा टापु डा पिपपुकीमी मेको कली तिरो थाप्तमेक्ल। शेबा नु सेबा डा पिपपुकीमी मेको कली कोसेली चाक्गमेक्ल। यसैया ६०:९; भजन संग्रह ६८:३०; १राजा १०:१-२

11 पिप नेल्ल मेको आ डोंइती बाम्मल। मिनु रागी रागी डा मुर नेल्लेमी मेको कली गेय पामेक्ल।

12 मारदे हना मेकोमी आ कली पुंइब श्येत जाइब आन कली प्रोंइब। वारच पाइब मबाक्शो प्रुडग आन कली वारच पाइब। अय्युब ३६:१५

13 मचाप्ब नु श्येत जाइब आन कली शिशी पाइब। मेकोमी प्रुडग आन कली साइक्तीक रे प्रोंइब।

14 मेको आन कली दिप्तीक नु हुश खाक्श पोक्तीक रे प्रोंइब। मारदे हना मेको आ डोंइती हिक्सीशो बाक्तीम। भजन संग्रह ९:१३; भजन संग्रह ११६:१५

15 मेको शुश नाक्तर ब्रोंइल। शेबा डा सुन मेको कली चाक्गमेक्ल। मुरपुकीमी मेको आ पबर्म प्रार्थना पस डा पस पामेक्ल। नाक्तर रे मेको कली आसीक गेमेक्ल।

16 मिनु रागी शुश अन्नम ब्रील। डांडा तार यो अन्न ग्रेल्ल। मिनु फल फुल लेबानोन डा खोदेशो पा सिल्ल। सहरम बाक्ब मुर घांस खोदेशो पा सोशा बोशा शुश दुम्मल।

17 मेको आ नें गेना हना यो लील। नां बाक्म सम्म आ नें ठेयब बाक्ल। रागी रागी डा मुर नेल्लेम मेको रे पा आसीक तामेक्ल। मिनु मेकोपुकीमी मेको आ पबर्म “ग्येरसीशो मुर बाक्ब” देंमल। उत्पत्ती १२:३; उत्पत्ती २२:१८

18 परमप्रभु, परमप्रभु यावे, इस्राएली आन परमप्रभु ठेयब बाकब। मेकोमी ला छक लाकचा डा गेय पाइब। भजन संग्रह ४१:१४

19 मेको आ नें गेना हना यो ठेयब बाकब। रागी नेल्ल आ सक्तिमी ब्रील। आमेन, मेको थमा बाकब। यसैया ६:३

20 येस्से आ तौ दाऊद आ प्रार्थना एकोन बाकनीम।

## 73

“परमप्रभु, गो इन मुर नड” देशो

आसाफ आ कुम्सो।

1 परमप्रभु इस्राएल डा मुर आन कली थमा पा रिम्शो पाइब बाकब। आन पाप क्याम्चा पुंडसीशा, रिम्शो थुं पाइश्शो आन कली रिम्शो पाइब बाकब। अय्युब २१:७

2 तन्न गो ग्रेक्शा, आं थेक्तीक साम्चा चिक्शो बाक्ती।

3 मारदे हना गो परमप्रभु आ अरेशो मटीब आन रिम्शो दुम्शो तशा नु मेको आन ठेयब लेशशो तशा, गेहे पाता।

4 मेको आन कली श्येत मबाकब। मेकोपुकी रोड मपशो नु बोल्यो बाकनीम।

5 मेकोपुकी अरुपुकीम खोदेशो पा श्येत मजाइनीम। मेकोपुकी अरु खोदेशो पा श्येत मदुम्नीम।

6 मोपतीके ठेयब लेत्तीके मेको आन माला खोदेशो दुम्ब। आन दिप्शा हुश खाक्श पोक्तीके आन फेक्तीक वा खोदेशो दुम्ब।

7 मेको आन खकटा थुंम मरिम्शो पतीके बाकब। मेको आन थुं डा मरिम्शो पतीके मिम्शा, मिम्ने मजाप्शो बाकब।

8 मेकोपुकीमी शुक्शी पा मरिम्शो लोत्र पाइनीम। मिनु आन ठेयब लेत्तीकेमी मुर आन कली हिंच कोइनीम।

9 मेकोपुकीमी “स्वर्ग नेल्ल आंड के बाकब” देंनीम। मिनु रागी नेल्ल आंम के सेल्नीम।

10 मोपतीके मुरपुकी मेको आन गे लेत्नीम। मिनु आन लोत्र थमा सुइश्शा आन नोले खोइश्शा मेको आन कली ठेयब सेल्नीम।

11 मिनु मेकोपुकीमी “परमप्रभुमी दोपा तुइक्बा डा? मार मेको नेल्ल क्येडा ठेयब तुइक्ब बाकबा डा?” देंनीम। भजन संग्रह १०:११

12 परमप्रभु आ अरेशो मटीबपुकी मोदेशो बाकनीम। मेकोपुकी महिंथु, क्येट चेम्ना चेम्न बाकनीम।

13 गो आयेसो ला रिम्शो थुं पाइश्शो दुम्डा बाक्त। मिनु मोशा दोस मताइब दुम्डा बाक्त। मलाकी ३:१४

14 गो नाक्त रे हिंचा डा श्येत जाता। मिनु सुनी कुस कुस सजाइ ताता।

15 गो मेको आन खोदेशो पाता हना, गो इन मुर आन कली मरिम्शो पदुमी वा।

16 गो एको नेल्ल रुप्चा माल्ता, आं कली थम श्येत दुम्त।

17 मिनु गो परमप्रभु आ खिं ओव्रती। मेना गो मेको आन कली नोले मार दुम्बा, मेको नेल्ल तुइक्ताकड।

18 गे मेको आन कली थमा पा ग्रेक्तीके लांम गाक्पाइक्नीनी। गे मेको आन कली खतम पोक्नीनी।

19 मेको मतुइक्थु रीब पा खतम दुम्नीम। मेकोपुकी हिंतीकेमी योल्चा पुंडसीशो बाकनीम।

20 दोपा मुरपुकी सुनी सेंसीमानु, डोम पशा, थमा ममाइ, दे तुइक्नीमी, मोपा परमप्रभु, गे बोक्ची ना मेको आन कली क्याम्नीनी।

21 डोंइती आ थुं लुकच लशा, कशो दुम्शो बाक्त।

22 गो ममिम्ब नु मारेइ मतुइक्ब बाक्ती। इन डोंइती जन्तु खोदेशो बाक्ती।

23 मो हना यो गो गेना हना यो गे नु काथा बाक्नुड। गे आं ग्युरा गुड ग्याइश्शो बाकनीमी। रोमी ८:३५-३९

24 गे आं कली इन लोव्रमी लां कोइनीनी। मिनु नोले गे आं कली छेडछेडम ताक्नीनी। भजन संग्रह ४९:१६

२५ स्वर्गम इन डा लाकशा, अरु आं के सु बाकनीमी डा? रागीमी यो आं मालशो इन डा लाकशा अरु सुइ मबाकनीम।

२६ आं रां नु आं थुं निम्फा ग्येत्थ लुकच दुम्शो बाकनीस। तन्न परमप्रभु गेना हना यो आं सक्ति नु आं भाग बाकब। भजन संग्रह १६:५

२७ इन क्येडा डोन बाकबपुकी थमा पा जाम्शा लाइनीम। गे इन क्येडा नोले शोइसीशो नेल्ल आन कली खतम पोक्नीनी।

२८ तन्न गो चहिं परमप्रभु आ नेक्था बाक्का दाक्नुड। परमप्रभु यावे आं प्रोक्शा लशा बाक्तीक बाकब। गो इन पशो गेय नेल्ल आन पर्वम लोव पाइनुड।

## ७४

“श्येत रे प्रोइयीकी” दे पुइशो

शेंतीक कुम्सो। आसाफ आ कुम्सो।

१ परमप्रभु, गे मारदे आंड कली मदाक्थु, गेना हना यो प्रोइनीनी? इन भेडा आन कली तशा मारदे गाइक्नीनी?

२ साइ इन ग्याप्शो मुर आन कली मिम्तीन। इन के सेल्चा कली श्येत रे प्रोइशो मुर आन कली मिम्तीन। गे इन बाक्तीक सियोन डांडा कली मिम्तीन। भजन संग्रह ७६:३

३ मिनु गे इन ब्रेशो खिं कली कोव्थ लने। इन जोरी सत्रुमी इन खिं मोदेशो पा खतम पोक्तेकम।

४ इन जोरी सत्रुमी इन बाक्तीक नेल्ल खतम पोक्तेकम। मेकोपुकीमी मेकेर आन छेदर युक्ताकमे।

५ मेकोपुकीमी रवा तिम्शा, नेल्ल श्येत्थ पोक्ब मुर खोदेशो पा पाम्तेकम।

६ मेकोपुकीमी ग्येत्थ डा लाप्चो डा बुटा आप्शो गारो डा शी नेल्ल आन खा नु घनमी खतम पोक्तेकम।

७ मेकोपुकीमी इन खिं कली मी सुइक्ताकम। रागीमी इन युम्तीक खिं नेल्ल मी सुइश्शा खतम सेल्तेकम। २राजा २५:९

८ मेकोपुकीमी आन थुंमी “गो एको आन कली नेल्ल खतम पोक्नीकी” देतेकम। मेकोपुकीमी रागीम बाक्शो इन नेम बुक्तीके खिं नेल्ले मी सुइक्ताकम।

९ गोपुकीमी मारेड छक लाक्का डा गेय मतक। मुल परमप्रभु आ लोव पाइब सुइ मलीम। गेना सम्म एको ओदेशो दुम्बा, गो सुइम मतुइक्नीकी।

१० परमप्रभु, इन जोरी सत्रुमी इन कली गेना सम्म शाक्नीमी? मार, जोरी सत्रुमी इन नें आ पर्वम गेना हना यो शुक्शी पस डा पस बाक्नीमी?

११ गे मारदे इन सक्ति मकोइनीनी? इन गुइ इन वा आगा रे गुंडीन। मिनु मेको आन कली खतम पोक्कीन।

१२ परमप्रभु, गे साइ नेसी रे डा आं पिप बाक्नीनी। गे रागी रागी आन कली प्रोइनीनी।

१३ गे इन सक्तिमी समुन्द्र कली फ्राताक्नी। गे समुन्द्रमी बाक्ब ठेयब जन्तु आन पिया प्रोल्तीनी। भजन संग्रह १०४:६-८; प्रस्थान १४:२१-२२; यसैया २७:१

१४ गे लेव्याथन आ पियापुकी प्रोल्तीनी। मिनु मेको कली गोरशो रागी डा जन्तु आन कली ब्वचा गेतीनी। अय्युब ४०:२५

१५ ब्वाक्कु बुक्पाइक्ब नु खोल्सा सेल्ब गे बाक्नीनी। मिनु गे गेना हना यो यिस डा यिस बाक्ब ठेयब खोला आन कली सोव्रपाइक्तीनी।

१६ नाक्दो इन के बाक्ब। मिनु नाक्ती यो इन के बाक्ब। गे नां नु तास्ला सेल्तीनी। भजन संग्रह १०४:१९

१७ गे रागी रागी आन सांद वोइक्तीनी। गे हिंडुद नु बर्खा सेल्तीनी।

१८ परमप्रभु यावे इन जोरी सत्रुमी इन कली दोपा शाक्मे। मिनु इन कली मटीबपुकीमी दोपा इन नें आ पर्वम शुक्शी पामे? मेको मिम्तीन।

१९ गे इन हुकुर ब्वाकी डा जन्तु आन कली मगेने। गे इन श्येत जशो मुर आन कली गेना हना यो मिम्शा बाक्कीन।

20 गे इन कबल खपीन। मारदे हना रागी डा खुइक्तीके नेल्ले हिंतीके नु हुश खाक्श पतीकेमी ब्रीशो बाक्नीम।

21 दिच्चा पुंडसीब आन कली मुने दोक्चा मगेने। पुडग नु श्येत जाइबपुकीमी इन नें ठेयब सेल्लेक्ल।

22 परमप्रभु, बोक्कीन। मिनु इन पर्वम लडाइ पने। मटीबपुकीमी नाक्तर इ न कली शाक्शो, मिम्तीन। भजन संग्रह १४:१-३

23 इन पर्वम दूली लोत्र पाइब आन रेयके नु इन जोरी सत्रु आन लडाइ पस डा पस पशो मप्रेंदीन।

## 75

### परमप्रभुमी निसाफ पशो

कुम्सो पपाइक्ब कली खतम मसेलो देशो कुम्सो आ लायो। आसाफ आ कुम्सो।

1 परमप्रभु, गो इन कली “गे आंइ कली रिम्शो पाइतीनी” देंतीकी। मारदे हना इन नें आ पर्वम नेंशो बाक्नीकी। मुरपुकीमी इन छक लाक्चा डा गेय आ पर्वम लोत्र पना पन बाक्नीम। यसेया ४६:१३

2 गे “गो आं देशो नाक्ती गो ठीक निसाफ पाइब नड।

3 रागी रागीम खिनु कुमेनु, मुर नेल्ले खिंखि पाइनीम। तन्न रागी डा जग वोइक्ब गो नड” देंतीनी। ठेयब सेंदा पा।

4 गे ठेयब लेशो आन कली “ठेयब लेशो मदुमीन” देशा, इन अरेशो मटीब आन कली “मबोरीन” देंतीनी।

5 गे “स्वर्ग आ पर्वम ठेयब लोत्र मपने। मिनु इन शुर किरशा लोत्र मपने” देंतीनी।

6 पूर्व, पच्छिम नु गोरशो रागी तेइ रे सुइमी मुर आन कली ठेयब सेल्ले मचाप्नीम।

7 तन्न परमप्रभुमी मुर आन कली निसाफ पाइब। मेकोमी का निकशी आन कली दिप्ब, का निकशी आन कली क्युक्ब। १सामुएल २:७

8 परमप्रभु यावे आ गुइमी बोटको का बाक्ब। मेकेर मार मार सुप्शो बोग्यो बोक्शो अडगुर शांबु बाक्ब। परमप्रभुमी मेको तूचा गेब। मिनु रागी रागी डा आ अरेशो मटीबपुकीमी मेको तूचा माल्नीम। भजन संग्रह ६०:५; येरमीया २५:१५-१६

9 तन्न गो चहिं मुर आन दातेमी शुश ग्येरसीशो लोत्र पाइनुड। गो याकूब आ परमप्रभु कली ठेयब सेल्शा, कुम्सो पाइनुड।

10 गे इन अरेशो मटीब नेल्ल आन कली आइक्च सेल्नीनी। तन्न ठीक पाइबपुकी ठेयब सेल्चा पुंडसीनीम।

## 76

### सक्ति पाइशो परमप्रभु यावेमी ग्राब

कुम्सो पपाइक्ब कली तार पाइशो ताप्तीके ताप्शा पतीके, आसाफ आ कुम्सो।

1 यहूदा आ रागीमी परमप्रभु कली तुइक्नीम। मेको आ नें इस्राएल रागीमी ठेयब बाक्ब।

2 आ ताम्बु सालेम सहरमी बाक्ब। आ बाक्तीके सियोनमी बाक्ब। भजन संग्रह १३२:१३

3 मेकोमी मेकेर ब्रशो ब्रापुकी, तेक्तीकपुकी, तरवार नु लडाइ पतीक मारेइ मारेइ जिक्तीमी। ठेयब सेंदा पा। भजन संग्रह ४६:१०

4 गे छेडछेडमी नां खोदेशो तांइसीनीनी। गे गेना हना यो लीब पहाड क्येडा यो ठेयब बाक्नीनी।

5 महिंब मुरपुकी रोइक्चा पुंडसाक्म। मेकोपुकी साइक्चा पुंडसाक्म। लडाइ पाइब आन दातेमी कामी यो आन गुइ क्युक्ने मचबेम।

6 याकूब आ परमप्रभु, इन हुइशोमी शारा नु शारा डोइक्ब निम्फा बेक्ताक्म।

7 गे मान पा हिंचा माल्शो बाक्नीनी। गे गाइक्तीनीनु, इन डोइती सु राप्ने चाप्बा डा?

8 गे स्वर्ग रे इन निसाफ नेंपाइक्तीनी। मिनु रागी हिंशा, सिक्सी पाप्नु। भजन संग्रह ४६:१; हबकुक् २:२०

९ मेना परमप्रभु, गे रागीम दिप्चा पुंडसीशो नेल्ल आन कली प्रोंडचा कली निसाफ पथ बोक्तीनी।  
ठेयब सेंदा पा।

१० थमा पा, मुर आन गाइक्तीकेमी इन कली ठेयब सेल्ल। मिनु इच्का लीशो गाइक्तीकेमी इन कली  
ठेयब सेल्ल।

११ परमप्रभु यावे, इन परमप्रभु आ नें थिशा कसम जशो खपीन। मेको आ नेक्था बाक्ब नेल्लेमी मान  
पा हिंचा डा परमप्रभु कली कोसेली चाक्मेक्ल।

१२ मेकोमी सासन पाइब आन ठेयब लेत्तीके फस पोक्ब। मेको रागी डा पिप आन कली हिंपाइक्ब  
बाक्ब।

## ७७

### श्येत दुम्मेनु, लेम्शो

कुम्सो पपाइक्ब शेंब येदुथून कली आसाफ आ कुम्सो।

१ गो परमप्रभु कली “वारच पाइय्यीनी। आं लोव्र नेनीन” दे ठेयब सेंदा पा ब्रेत्ती।

२ गो श्येत जडानु, परमप्रभु कली माल्ता। गो नाक्दो यो मदथु, परमप्रभु कली पुंडता। आं थुं खाइक्स  
डा खाइक्स बाक्त।

३ गो परमप्रभु कली मिम्ताक्ड, गो रोंका पाता। गो आं श्येत मिम्ना मिम्न बाक्ती। मिनु आं थुं लुकच  
लत। ठेयब सेंदा पा।

४ “गे आं कली निन्द्रा पचा यो मगेनीनी। मिनु गो शुश श्येत जशा, ब्वाक्ने यो मचबु।

५ गो डोंइती डा नाक्त नु साइ डा बर्सपुकी मिम्ताक्ड। भजन संग्रह १४३:५

६ गो नाक्दो आं थुमी रिम्शो बाक्बा देय मरिम्शो बाक्बा” दे मिम्स डा मिम्स बाक्ती।

७ मार, परमप्रभुमी गेनायो आं कली मन्नाइबा? मिनु मेकोमी गेनायो शिशी मपाइबा?

८ मेको आ गेना हना यो दाक्तीक जाम्शो बाक्बा? मेको आ थोक्शा पशो लोव्र शोर गाक्शो दुम्शो  
बाक्बा?

९ मार, परमप्रभुमी शिशी पचा प्रेंशो बाक्बा? मेको गाइरशा, आ शिशी पतीके तेक्शो बाक्बा? ठेयब  
सेंदा पा।

१० मिनु गो “नेल्ल क्येडा ठेयबमी आ थुं फाइक्तीके आं कली श्येत दुम्त” दे मिम्ताक्ड।

११ मिनु “परमप्रभु यावे, गो इन पशो मिम्नुड। गो इन साइ डोंइती डा पशो छक लाक्चा डा गेय  
मप्रेनुड।

१२ गो इन पशो नेल्ल मिम्स डा मिम्स बाक्नुड। साइ डोंइती डा इन छक लाक्चा डा गेय आ पर्वम  
मिम्नुड।

१३ परमप्रभु, इन लां ठीक बाक्ब। आइ परमप्रभु खोदेशो ठेयब अरु तेको देवता बाक्बा डा? प्रस्थान  
१५:११

१४ गे छक लाक्चा डा गेय पाइब परमप्रभु बाक्नीनी। गे जात जात डा मुर आन दातेमी इन सक्ति  
कोंइताक्नी।

१५ गे इन सक्तिमी इन मुर आन कली प्रोंइतीनी। गे याक्ब, योसेफ नु आ चच युइ आन कली  
प्रोंइतीनी। ठेयब सेंदा पा।

१६ परमप्रभु, समुन्द्र डा ब्वाक्कु इन कली तशा हितेक्म। शुश लुकच लशो समुन्द्र खिंखि पाप्तु।

१७ मिनु गोस्सुमी रेउ यिपाइक्तेक्म। सरीड रे ठेयब बुंबु पाप्तु। इन चिला तेइ तेइ ब्रत।

१८ फश गिवारम इन बुंबु पशो नेंसाक्ब। इन चिलामी रागी नेल्ल छेडछेड दुम्त। रागी खिंखि पा  
हिम्साक्ब।

१९ इन लां समुन्द्र रे पा लशो बाक्त। इन गाक्शो लां ठेयब समुन्द्र आ दातेमी बाक्त। मो हना यो इन  
खोइलीम दिम्शो मारेड मतांइसे। प्रस्थान १४:२१-३१

२० मोसा नु हारून आस गुइ रे पा, गे इन मुर आन कली भेडा आन हुल खुल्शो खोदेशो पा  
गाक्पाइक्तीनी” दे परमप्रभु कली लोव्र पता।

## ७८

## परमप्रभुमी मार मार पवा

शेतीक कुम्सो। आसाफ आ कुम्सो।

भजन संग्रह १०६:- १ आं मुरपुकी, आं शेंशो लोव्र नेनीन। इन नोफा दाइशशा आं लोव्र नेनीन।

२ गो कथा पा लोव्र शेंनुड। साइ डोंइती डा लोव्र पाइनुड। मत्ती १३:३५

३ एको लोव्र आंइ किकी पिपीमी आंइ कली नेंपाइशशो नु तुइक्पाइशशो बाक्नीम। प्रस्थान १३:१४; ब्यवस्था ४:९-१०

४ गोपुकी एको लोव्र मेको आन तौ चच आन क्येडा मखुइक्नय। मिनु नोले दुम्ब पाला डा मुर आन कली यो परमप्रभु यावे आ ठेयब नु सक्ति पाइशशो छक लाक्चा डा गेय आ पबंम शेंनीकी।

५ मेकोमी याकूब आ मुर आन कली दोपा बाक्चा माल्बा, मेको देंत। मेकोमी इस्राएलमी मेको आ अरेशो लोव्र वोइक्तु। मिनु परमप्रभुमी आंइ किकी पिपी आन कली “इन आल आन कली शेंदीने” दे माइक्तीमी।

६ मेको आन नोले डा पाला डा मुरपुकीमी एको लोव्र नेल्ल तुइक्तमेक्ल। मिनु मेको आन क्येडा नोले जरमेशो आल कोल्शा तुइशशा, मेकोपुकीमी आन आल आन कली शेंदमेक्ल।

७ मोपा मेकोपुकीमी परमप्रभु कली थमा सुदमेक्ल। मिनु आ पशो मप्रेंदमेक्ल। मिनु आ शेंशो टीमेक्ल।

८ मेको आन किकी पिपी खोदेशो मदुम्मल। मेकोपुकी खकटा थुं पाइशशो नु मटीब पाला डा मुर बाक्तेक्म। मेकोपुकी नोले शोंइसीशा, परमप्रभु कली प्रोंइतेक्म। ब्यवस्था ३२:५-६

९ एफ्राइम डा मुरपुकी लिब्रा शेशा, ठीक दुम्शा, लडाइ दुम्मेनु, प्रोक्तेक्म। न्यायाधीस २:११-१३

१० मेकोपुकीमी परमप्रभु आ कबल पशो मटीम। मिनु मेको आ अरेशो लोव्र मटीम।

११ मेकोपुकीमी परमप्रभु आ गेय नु आन डोंइती पशो छक लाक्चा डा गेय प्रेंताक्म।

१२ मेकोमी मेको आन किकी पिपी आन डोंइती इजीप्त नु सोआन रागीमी छक लाक्चा डा गेय पशो बाक्त।

१३ मेकोमी समुन्द्र कली फ्राशा, लां सेल्लु। मिनु मेको लां रे पा मेको आन कली आइक्ची हांबु शोक्ताक्मी। मेकोमी ब्वाक्कु कली गारो खोदेशो पा एर ओंथ राप्पाइक्तु। प्रस्थान १४:२१-२२

१४ मेकोमी मेको आन कली नाक्त गोस्सुम नु नाक्दो मी आ हाम्सोमी लां कोंइताक्व। प्रस्थान १३:२१

१५ मेकोमी गोरशो रागीमी सेरथे फुल्लु कली प्रोल्शा ब्वाक्कु बुक्पाइक्तु। मिनु शुश ब्वाक्कु तूचा गेम्तीमी। प्रस्थान १७:६; गन्ती २०:७-११; ब्यवस्था ३२:१८

१६ सेरथे फुल्लु रे पा ब्वाक्कु बुक्पाइक्तु। मिनु खोला खोदेशो पा शाइक्पाइक्तु।

१७ तन्न मेकोपुकीमी गोरशो रागीमी नेल्ल क्येडा ठेयब कली मटिथु, मरिम्शो पा डोंइती क्येडा शुश पाप पाप्तेक्म।

१८ मेकोपुकीमी आन दाक्शो पा जचा थोव्रक पुंइशा, परमप्रभु आ थुं नाक्ताक्म। प्रस्थान १६:३; गन्ती ११:४

१९ मेकोपुकीमी थमा मसुइक्थु “मार, परमप्रभुम गोरशो रागीम जचा थोव्रक गेने चाप्वा डा?

२० मेकोमी सेरथे फुल्लु तुप्शा प्रोल्शा ब्वाक्कु बुक्पाइशशा, शुश खोला सेल्लु। मार, मेकोमी आ मुर आन कली शोब्ले नु श्ये यो गेने चाप्वा डा?” देंतेक्म।

२१ मिनु परमप्रभु यावे मेको आन लोव्र नेंशा, थाम्पा गाइक्ताक्व। मिनु परमप्रभुमी याकूब कली दाक्पाइक्चा कली मी सोइक्ताक्व। मिनु इस्राएली आन पबंम शुश चुरत। गन्ती ११:१

२२ मारदे हना मेकोपुकीमी परमप्रभु कली थमा मसुदेम। मिनु “परमप्रभुमी आंइ कली प्रोंइने मचाप्ब” देंतेक्म।

२३ मो हना यो मेकोमी सरीड कली अरेशा सरीड डा लाप्चो रोक्पाइशशा गेप्तु।

२४ मेकोमी मुर आन कली थुल्चा कली सरीड रे मन्ना यिपाइक्तु। मेको आन कली स्वर्ग डा अन्न गेप्तु। प्रस्थान १६:४,१४,१५

२५ मुर नेल्लेमी परमप्रभु आ स्वर्ग डा गेय पाइब आन शोब्ले जांम्तेकम। परमप्रभुमी मेको आन कली शुश जचा गेपु।

२६ मेकोमी सरीडमी पूब डा फश सोइक्ताक्व। मिनु मेको आ सक्तिमी दक्खिन रे फश पपाइक्व। गन्ती ११:३१-३३

२७ मेकोमी फुरक खोदेशो पा श्ये यिपाइक्व। समुन्द्र डा बाल्वा खोदेशो पा चिक्व यिपाइक्व।

२८ मेको चिक्व आन कली आन बाक्तीके एर ओथ दोक्पाइक्व।

२९ मिनु मेकोपुकी मेको ब्वशा रूतेकम। मारदे हना परमप्रभुमी मेको आन कली आन पुंडशो खोदेशो पा गेपु।

३० तन्न मेकोपुकीमी ब्वना ब्वन, आन ब्वशो श्ये आन शोव्रम बाक्ना बाक्न,

३१ परमप्रभु शुश गाइक्ताक्व। मिनु मेको आन दातेम नेल्ल क्येडा बोल्यो मुर आन कली साइक्तीमी। इस्त्राएल डा ठिटा नेल्ल आन कली साइक्तीमी।

३२ मो पा यो मेकोपुकीमी पाप पस डा पस बाक्तेकम। मेको आ छक लाक्चा डा गेय तशा यो, मेकोपुकीमी थमा मसुदेम।

३३ मोपतीके परमप्रभुमी मेको आन नाक्त मोशा नु मेको आन बर्सपुकी श्येत जपाइश्शा साम्तु। गन्ती १४:२२-२३; १कोरिन्थी १०:५

३४ परमप्रभुमी मेको आन दातेमी का निक्शी सदानु, मेको लीशोपुकी मेको गे लेशशा, मेको कली थाम्पा माल्तेकम।

३५ मिनु मेकोपुकीमी परमप्रभु आन सेरथे फुल्लु नु नेल्ल क्येडा ठेयब परमप्रभु मेको आन कली श्येत रे प्रॉइब बाक्माक्त, दे तुइक्ताक्व।

३६ तन्न मेकोपुकीमी आन शोव्रम ला लोव्र पाम्तेकम। मेकोपुकीमी जोल ला पाम्तेकम।

३७ आन थुमी थमा पा मेको आ नोले मखोदेम। आ पशो कबल मटीमे।

३८ मो हना यो परमप्रभु शिशी पाइब बाक्तीके मेको आन ठीक मपशो माफ गेम्तीमी। मेको आन कली मसद। खेयप खेयप मेको आन पब्रम आ गाइश्शो तेक्वु। मेकोमी आ गाइश्शो नेल्ल मयुंडुइद।

३९ परमप्रभुमी “मेको मुर ला बाक्नीम। फश खोदेशो पा लाक्नीम। मिनु लेशशा मजाक्नीम” दे मिम्ताक्व। भजन संग्रह १०३:१४-१६

४० मेकोपुकीमी गोरशो रागीम शुश खेयप परमप्रभु कली मटीमे। परमप्रभु कली मुर मबाक्तीकेमी श्येत गेम्तेकम।

४१ मेकोपुकीमी लेना लेंन आ थुं नाक्ताक्म। मिनु इस्त्राएली आन का ला बाक्शो परमप्रभु कली गाइक्पाइक्तेकम।

४२ मेकोपुकीमी आ सक्ति ममिम्तेम। मेको आन कली आन जोरी सत्रु रे प्रॉइशो यो ममिम्तेम।

४३ परमप्रभुमी इजीप्तीमी आ चिन्ड कौइशा, सोआन रागीमी छक लाक्चा डा गेय पची ना

४४ खोला डा ब्वाक्कु हुश सेल्शो बाक्त। मिनु इजीप्तीपुकीमी मेको ब्वाक्कु तूने मचबेम। प्रस्थान ७:१९-२०

४५ मेकोमी मेको आन बाक्तीकेमी चुरमु बोपाइश्शो बाक्त। मिनु मेकोपुकीमी मेको आन कली क्राइक्तेकम। मिनु परमप्रभुमी क्रुक्कु गूपाइक्वु। मेकोपुकीमी मेको आन कली खतम सेल्तेकम। प्रस्थान ८:२०; प्रस्थान ८:२

४६ परमप्रभुमी मेको आन बाली नाली माले आन कली गेम्तीमी। मेको आन शुश गेय पा वापाइश्शो बाली नाली सल्हापुकीम नेक्पाइक्वु। प्रस्थान १०:१३

४७ मेकोमी मेको आन अङ्गुर बोट मुप्सीमी नु आन फोव्रशी फुरशेम खतम पोक्पाइक्वु। प्रस्थान ९:२५

४८ मेकोमी मेको आन बी ब्यफ मुप्सीम नु क्यारश भेडा आन कली चिलामी आप्तु।

४९ मेको आन पब्रम गाइश्शा, चुरशा, श्येत गोपाइक्चा कली खतम सेल्ब स्वर्ग डा गेय पाइब आन कली सोइक्ताक्व।

५० मेकोमी आ गाइक्तीक कली लां का सेल्लु। मिनु मेको आन कली बेक्चा रे मप्रोन। मेको आन कली मुर बेक्तीक रोइ पपाइक्तीमी। प्रस्थान ९:८-१२

- 51 मेकोमी इजीप्त डा मुर, हाम आ चच युड आन डोंइती जरमेशो तौ नेल्ल साइव्तु। प्रस्थान १२:२९
- 52 मिनु नोले आ मुर आन कली भेडा खोदेशो पा गुंडताक्व। मिनु मेको आन कली भेडा आन हुल खोदेशो पा गोरशो रागीमी लां कोंइशा गाक्पाइक्तीमी। भजन संग्रह ७७:२१
- 53 मेकोमी मेको आन कली मारेइ श्येत मदुम्पाइक्थु गाक्पाइक्तीमी। मोपतीके मेकोपुकी काड महिम। आन जोरी सनु समुन्द्रम गुम्शा बेक्तेक्म। प्रस्थान १४:१९, २२, २७
- 54 मोपा परमप्रभुमी आ मुर आन कली आ रागीमी चाक्तु। आ सक्तिमी ग्राशो डांडाम चाक्तु। प्रस्थान १५:१७
- 55 रागी रागी डा मुर आन कली मेको आन डोंइती रे खेरतु। मिनु इस्राएली आन कली मेको रागी योक्शा, गेम्तीमी। मिनु इस्राएल आ थर थर डा मुर आन कली आन ताम्बुमी बाक्चा गेम्तीमी।
- 56 तन्न मेकोपुकीमी परमप्रभु आ थुं थाम्तेक्म। नेल्ल क्येडा ठेयब परमप्रभु कली मटीम। मिनु मेको आ अरेशो लोव्र मबिस्सम।
- 57 मेको आन किकी पिपी खोदेशो पा नोले शोंइसाक्म। मिनु मेकोपुकी ब्रोइक्चशो लिब्रा खोदेशो पा दूली पाइब दुम्तेक्म।
- 58 मेकोपुकीमी आन मूर्ति वोइशशो डांडामी परमप्रभु कली गाइक्पाइक्तेक्म। मेको आन सेल्शो मूर्तिमी मेको कली गेहे पपाइक्तेक्म। ब्यवस्था ३२:२१
- 59 परमप्रभुमी मेको नेंशा, थाम्पा गाइक्ताक्व। मिनु इस्राएली आन कली थमा पा वारच मपाइक्थु प्रोंइतीमी।
- 60 मेकोमी शिलो डा आ बाक्तीके प्रोंइतु। मेको ताम्बु मुर आन बाक्तीके आन दातेमी वोइशशो बाक्त। १सामुएल १:३; १सामुएल ४:११; येरमीया ७:१२
- 61 मेकोमी आ कबल पशो सन्दोस आ जोरी सत्रु आन गुइमी गेप्टु। मोपा सक्ति पाइशशो कली रोइक्पाइक्तु। भजन संग्रह १३२:८; १सामुएल ४:२१
- 62 मेकोमी आ मुर आन कली तरवारम साइक्पाइक्चा कली गेप्टु। मिनु आ योव्रशो मुर आन कली तशा, थाम्पा गाइक्ताक्व।
- 63 मिनु मीम मेको आन टिटा वोंइश मुर आन कली दाक्तीमी। मिनु आन तमी आन कली ग्युंवे पाइक्चा मतामे।
- 64 मेको आ चढेबपुकी तरवारम क्योरचा पुंडसाक्म। मिनु मेको आन मीश रोंका पने मचबेम। १सामुएल ४:१७-२०
- 65 मिनु नोले परमप्रभु निन्द्रा रे सेंसीशो खोदेशो पा सेंसाक्व। लडाइ पाइब मुर अडगुर शांबु तूशा नोले रिम्शो दुम्शो खोदेशो पा, ठेयब सेंदाम ग्रीत।
- 66 मिनु मेकोमी आ जोरी सत्रु आन कली एर ओंथ ब्रपाइक्तु। मेकोमी मेको आन कली गेना हना यो मुने दोक्पाइक्तु। १सामुएल ५:६-१२
- 67 मेकोमी योसेफ आ थर डा मुर आन कली प्रोंइतु। एफ्राइम आ खिं डा मुर आन कली यो मयोव्रड।
- 68 तन्न मेकोमी यहूदा आ खिं डा मुर आन कली योव्रतु। मेकोमी आ दाक्शो सियोन डांडा कली यो योव्रतु। २इतिहास ६:६
- 69 मेकोमी आ बाक्तीके लाइक्पाइशशा, इर स्वर्ग खोदेशो सेल्लु। आ गेना हना यो कली सेल्शो रागी खोदेशो पा सेल्लु।
- 70 मेकोमी आ गेय पाइब दाऊद कली भेडा गोठ रे योव्रतु।
- 71 परमप्रभुमी दाऊद कली गिक्शो भेडा आन कली योव्रतीक गेय रे गुंडताक्व। मेकोमी दाऊद कली याकूब आ थर डा, परमप्रभु आ मुर आन कली कोव्रचा कली गुंडताक्व। मेको इस्राएल डा मुर परमप्रभु आ शोंप बाक्नीम। १सामुएल १६:११-१२; २सामुएल ७:८
- 72 दाऊदमी आ थुं डा रिम्शो पतीकेमी मेको आन कली कोव्रतीमी। मेकोमी जोक्ब तुइक्ब दुम्शा, मेको आन कली लां कोंइताक्मी।



## ७९

यरूसलेम आ पर्वम रोंका पशो  
आसाफ आ कुम्सो।

१ परमप्रभु, रागी रागी डा मुरपुकी इन योव्रशो रागीम जाक्तेकम। मेकोपुकीमी इन खिं कली ग्रांग्रा दिशो सेल्लेकम। यरूसलेम कली प्रेशशा, फुल्लु देल्लो खोदेशो सेल्लेकम।

२ मेकोपुकीमी इन गेय पाइब आन बेकशो रां चिक्ब आन कली ब्वचा गेम्तेकम। मिनु इन योव्रशो मुर आन श्ये ब्वाकी डा जन्तु आन कली ब्वचा गेम्तेकम।

३ मेकोपुकीमी मेको आन हुश ब्वाक्कु खोदेशो पा यरूसलेम आ एर ओंथ नेल्ल शाइक्पाइक्तेकम। मिनु मेको आन कली थिम्ब सुइ मबाकम।

४ आंइ नेक्था बाक्ब मुरपुकीमी आंइ कली शुक्शी पाइक्नीम। मिनु आंइ एर ओंथ डा मुरपुकीमी आंइ कली रिश्शा तोक्शा लोत्र पाइनीम। भजन संग्रह ४४:१४

५ परमप्रभु यावे, गे गेना सम्म गाइक्स डा गाइक्स बाक्नीनी? इन गेहे पतीके गेना सम्म मी खोदेशो पा ब्रस डा ब्रस बाक्बा?

६ इन कली मतुइक्ब रागी रागी डा मुर नु इन नें मथीब राज्य आन तार इन गाइक्चा मोतीन। येरमीया १०:२५

७ मारदे हना मेकोपुकीमी याक्ब आ थर डा मुर आन कली खतम सेल्लो दाक्तेकम। मिनु आन बाक्तीक खिं प्रेशशा खतम सेल्लेकम।

८ आंइ किकी पिपी आन पशो पाप आ क्येक्क आंइ कली मलेत्तीन। आंइ कली रीब पा इन शिशी गेकी। मारदे हना आंइ थुं लुक्च लशो बाक्ब।

९ आंइ कली श्येत रे प्रॉइब परमप्रभु, इन नें डा सक्तिमी आंइ कली वारच पने। इन नें आ पर्वम आंइ कली प्रोनीन। मिनु आंइ पाप क्याम्दीन।

१० मारदे रागी रागी डा मुरपुकीमी “मेको आन परमप्रभु ते बाक्म?” दे हिल्लो पाइनीमी। रागी रागी डा मुरपुकीमी इन मुर आन कली आन डोंइती साइश्शो आ क्येक्क लेप्ब, दे तुइक्तमेकल। भजन संग्रह ११५:२; योएल २:१७

११ चोक्चा पुंइसीशो आन हुकयी पशो इन डोंइती जाक्ल। साइक्चा पुंइसीब दुम्शो आन कली इन सक्तिमी प्रोनीन।

१२ परमप्रभु आ पर्वम शुक्शी पा मुरपुकीमी मुने तोक्चा माल्लो बाक्नीमी। मेको मो पशो डा आंइ नेक्था डा मुर आन कली ७ खेयप क्येक्क लेत्तीन। भजन संग्रह १३७:७-९

१३ गो इन मुर, इन योव्रशो भेडा खोदेशो नकी। गो इन कली “गे रिम्शो पाइब बाक्नीनी” दे आंइ चच युइ आन पाला सम्म ठेयब सेल्नीकी। मिनु इन पर्वम लोत्र पाइनीकी।

## ८०

परमप्रभु, आंइ कली लेंशा सेल्की

कुम्सो पपाइक्ब कली लिली फू आ लायो डा कबल पतीक, आसाफ आ कुम्सो।

१ इस्राएल डा गोठला, आंइ लोत्र नेनीन। गे योसेफ कली भेडा आन हुल खोदेशो पा खुल्तीनी। गे करूब आन तार ठेयब नित्तीकेमी नित्तीनी। भजन संग्रह १८:११; २सामुएल ६:२

२ एफ्राइम, बेन्यामीन नु मनस्से आन डोंइती इन छेडछेड कोंइदीन। मिनु इन सक्ति कोंइशा, आंइ कली प्रॉइथ जाक्कीन।

३ परमप्रभु, आंइ कली लेंशा सेल्की। इन कुल डा छेडछेड आंइ तार वोतीन। मिनु गो ब्रॉइने चाप्कल।

४ परमप्रभु यावे, मुर नेल्ल आन परमप्रभु, इन मुर आन पुंइशो आ पर्वम गेना सम्म गाइक्नीनी?

५ गे मेको आन कली श्येत डा शोब्ले जपाइक्तीनी। मिनु आन प्रेक्कु तूचा ब्वाक्कु खोदेशो पा शुश दुम्त।

६ गे आंइ कली आंइ नेक्था डा मुर आन कली जीब सेल्लो बाक्तीनी। मिनु आंइ जोरी सत्रुमी आंइ कली शुक्शी पाइब सेल्तीनी।

7 मुर नेल्ल आन परमप्रभु, आंड कली लेंशा सेल्की। इन कुल डा छेडछेड आंड तार वोतीन। मिनु गो ब्रोंइने चाप्कल।

8 गे इजीप्त रे अडगुर बोट का चाक्तीनी। मिनु रागी रागी डा मुर आन कली खेरशा, मेको खुम्तीनी। यसैया ५:१-७; येरमीया २:२१

9 गे मेकेर मेको कली खुम्तीक रू का सेलतीनी। मिनु मेको शाकश थोकशा, रागी नेल्ल ब्रीत।

10 पहाड नेल्ल मेको आ वांकुम सुम्साकम। मिनु मेको आ लाइशो परमप्रभु आ राशीम रवा नेल्ल सुम्साकम।

11 मेको आ राशी समुन्द्र सम्म जाक्दीत्तेकम। मिनु मेको आ कोच्वा चहिं ठेयब खोला सम्म जाक्दीत्तेकम। होसे १०:१

12 मारदे गे मेको आन गारो प्रेन्नी? मेकेर गाक्ब नेल्लेमी मेको आ फल सेक्नीम।

13 ब्वाकी डा पोल्लपुकीमी मेको कली खतम पोक्नीम। मिनु ब्वाकी डा जन्तुपुकी मेकेर जोइनीम।

14 मुर नेल्ल आन परमप्रभु, आंड कली कोवडीन। सरीड रे उड कोवडीन। मेको अडगुर बोट कली कोवडीन। होसे ११:१

15 इन सक्तिमी खुम्शो बोट कली कोवडीन। गे इन तौ इन कली कोल्पाइक्तीनी।

16 आंड जोरी सत्रुमी मेको कली तुल्शा, मीम चोम्तेकम। मेकोपुकी इन हुइशोमी खतम दुम्मल।

इजीकीएल १५:२-४

17 इन ग्युरा गे बाक्ब मुर आ तारी इन गुड लील। मेको कली थुल्शा कोल्पाइक्तीनी।

18 मिनु गो इन डोंइती रे गेनायो नोले मशोंइसीनीकी। आंड कली ब्रोंइचा गेकी। मिनु गो इन नें थिशा, प्रार्थना पाइनीकी।

19 परमप्रभु यावे, मुर नेल्ल आन परमप्रभु, आंड कली लेंशा सेल्की। इन कुल डा छेडछेड आंड तार वोतीन। मिनु गो ब्रोंइनीकी।

## 81

### इसाएलीपुकीमी मटिशो

कुम्सो पपाइक्ब कली गिल्तीथ ताप्शा पतीके, आसाफ आ कुम्सो।

1 आंड कली सक्ति गेब परमप्रभु कली कुम्सो पने। ग्येरशा सोम्शा ठेयब सेंदा पा याक्ब आ परमप्रभु कली कुम्सो पने।

2 खैजडी ताप्शा, कुम्सो पने। रिम्शो बीना नु तार पाइशो ठेयब ताप्तीक ताप्शा कुम्सो का पने।

3 औंसी, पूर्न नु इं ठेयब चाड नाक्त तुराही तापीन। लेवी २३:२४

4 मारदे हना मोदेशो चाड मानेचा इस्राएल डा गेना हना यो पतीके बाक्ब। मेको याक्ब आ परमप्रभु आ अरेशो बाक्ब।

5 मेको लोत्र परमप्रभुमी इजीप्त रे गुंडशो योसेफ आ मुर आन कली अरेशो लोत्र बाक्ब। गो मतुइशो सेंदा का नेंतक।

6 मेको सेंदामी “गो इन बला रे भारी शोल्ला। गे भारी कुरचा ममाल्नीनी। प्रस्थान ६:६; यसैया ९:३

7 गे श्येत जनीनु, आं कली ब्रेत्ताक्नी। मिनु गो इन कली प्रोंइतन्नी। गो इन कली बुंबु रे लोत्र लेत्ताक्नी। गो मेरीबा डा ब्वाक्कुमी इन कली थुं थाम्शा कोवतन्नी। ठेयब सेंदा पा। प्रस्थान १९:१६; प्रस्थान १७:२-७; गन्ती २०:१३

8 आं मुरपुकी, आं अरेशो नेनीन। इस्राएलीपुकी, गे आं लोत्र नेशो ननी हना, रिम्शो दुम वा।

9 इन दातेमी देवी देवता आन कली बाक्चा मगेने। अर्को रागी डा देवी देवता आन डोंइती बाप्शा, सेउ मपने। प्रस्थान २०:२-३

10 गो परमप्रभु यावे, इन परमप्रभु नड। गो इन कली इजीप्त रे गुंडशा एक चाक्तन्नी। इन शोत्र पाक्कीन, मिनु गो प्रिनन्नी।

11 तन्न आं मुरपुकीमी आं लोत्र मनेनेम। इस्राएल आ मुरपुकीमी आं कली मदाक्थु, आं देशो मबिस्सम।

12 मोपतीके गो 'आन दाक्स पामेक्ल' दे आन दला दाक्स पचा गेतामी।

13 आं मुरपुकीमी आं लोव्र नेशो नम हना, इस्राएल डा मुर आं लॉम गाक्शो नम हना,

14 गो मेको आन कली रीब पा आन जोरी सत्रु रे प्रोनमी वा। मेको आन जोरी सत्रु आन कली खतम पोक्गुमी वा।

15 परमप्रभु यावे कली काइ मदाक्बपुकी हिंशा आं डोंइती बांबा पा गाकम वा। मिनु मोदेशो गेना हना यो दुम वा।

16 मिनु गो इस्राएल डा मुर, इन कली नेल्ल क्येडा रिम्शो चेरब जचा गेन्नी वा। मिनु रोका खुदोमी रूपाइक्नी वा” दे परमप्रभुमी देंत। ब्यवस्था ३२:१३

## 82

हुकुम पाइब आन कली हुइश्शो

आसाफ आ कुम्सो।

1 परमप्रभु आ मुर आन गुम्तीकेमी बाक्शो बाक्ब। मेकोमी आ मुर आन दातेमी निसाफ पाइब। १राजा २२:१९

2 मेकोमी “गे गेना सम्म ठीक निसाफ मपाइनीनी? गे गेना सम्म परमप्रभु यावे आ अरेशो मटीब आन कुल कोव्रनीनी?ठेयब सेंदा पा। ब्यवस्था १:१७

3 गे मचाप्ब नु रोम रोइक्च आन कली ठीक पा निसाफ पने। प्रुडग नु दिप्चा पुंइसीशो आन कली ठीक निसाफ पने। यसैया १:१७

4 मचाप्ब नु श्येत जाइब आन कली, परमप्रभु यावे आ अरेशो मटीब आन गुइ रे प्रोनीन।

5 हुकुम पाइबपुकीमी मारेइ मजोक्नीम, मतुइक्नीम। मेकोपुकी छिडछिडम गाक्शो बाक्नीम। रागी आ जग नेल्ल हिम्सीशो बाक्नीम।

6 गो इन पर्बम 'गे अधिकार पाइश्शो बाक्नीनी। गे नेल्ल क्येडा ठेयब आ तौ बाक्नीनी। यूहन्ना १०:३४

7 मो हना यो गे मुर खोदेशो पा बेक्नीनी। अरु मरिम्शो पा हुकुम पाइब खोदेशो पा खतम दुम्नीनी” दे परमप्रभुम देंत। उत्पत्ती १८:२५

8 परमप्रभु बोक्कीन। मिनु रागी कली निसाफ पने। मारदे हना रागी नेल्ल इन के बाक्नीम।

## 83

लडाइ पची ना पुंइश्शो लोव्र

आसाफ आ कुम्सो।

1 “परमप्रभु, गे सिक्सी पा मबाक्कीन। मारेइ पने मचाप्ब खोदेशो मदुमीन।

2 इन जोरी सत्रु शुश ग्याल्शो बाक्नीमी। कोव्रडीन, मेकोपुकी बारशा, ग्राचा चिक्शो बाक्नीम।

3 मेकोपुकीमी इन मुर आन कली दोपा साइक्चा, दे लोव्र गारपाइक्नीम। इन कोव्रशो मुर आन कली मरिम्शो पचा कली खुइश्शा लोव्र गारपाइक्नीम। भजन संग्रह ३५:२०

4 मेकोपुकीमी 'जाक्कीन, गो मेको आन रागी मलीचा डा पा क्यामदय। मिनु इस्राएल आ नें मलील' देंनीम।

5 मेकोपुकी थुं का दुम्शा, इन कली मरिम्शो पचा कली लोव्र गारपाइक्नीम।

6 मेको एदोम, इश्माएल, मोआब नु हाग्री आ मुरपुकी,

7 गेबाल, अम्मोन, अमालेक, पलिस्ती नु टायर डा मुरपुकी बाक्नीम।

8 अस्सुर यो मेकोपुकी नु गारशो बाक्ब। मेको नेल्ल लोत आ खिं डा सक्ति पाइश्शो मुर बाक्नीम। ठेयब सेंदा पा।

9 मिदयानी आन कली पाइश्शो खोदेशो पा मेको आन कली पतीन। सीसेरा नु याबीन कली किशोन खोलाम पाइश्शो खोदेशो पतीन। न्यायाधीस ७:१४; यसैया ९:३; न्यायाधीस ४:२

10 मेकोपुकी एन-डोर सहरम खतम दुम्शा, रू कली मोव्रल खोदेशो दुम्तेक्म।

11 गे मेको आन कली नु मेको आन ठेयब मुर आन कली ओरेब नु जेयब आस कली खोदेशो सेलीन। मेको आन सासन पाइब नेल्ल कली जेबाह नु सालमुन्ना खोदेशो सेलीन। न्यायाधीस ७:२५; न्यायाधीस ८:२१

12 मेकोपुकीमी 'परमप्रभु आ रिम्शो रागी इं के सेल्य' देंमुत्तेकम।

13 आं परमप्रभु, मेको आन कली फशेम योल्शो फुरक नु फशेम बेरपाइशशो भूस खोदेशो सेलीन।

14 दोपा मीम ब्वाकी नेक्बा नु आ होशेमी पहाड जेप्बा,

15 मोपा इन फश गिवारम मेको आन कली खेदा पने। इन फश गिवारम मेको आन कली हिंच कोइदीन।

16 मेको आन कली मुने तोक्कीन। मोपा मुरपुकीमी परमप्रभु यावे, इन कली माल्मेक्ल।

17 मेकोपुकी गेना हना यो मुने दोक्मल। आन थुं लुकच लमल। मेकोपुकी मुने दोक्शा, खतम दुम्मल।

18 मेकोपुकीमी इन नें परमप्रभु यावे बाक्ब, दे तुइक्तमेक्ल। गे रागी डा नेल्ल क्येडा ठेयब बाक्नीनी" दे परमप्रभु कली ठेयब सेल्ला। होसे १२:१६

## 84

### परमप्रभु आ खिं कली दाक्शो

कुम्सो पपाइक्ब कली गिल्तीथ ताप्शा पतीके कोराह आ तौ आन कुम्सो। १इतिहास २६:१

1 "मुर नेल्ल आन परमप्रभु यावे, इन बाक्तीके गिश रिम्शो बाक्ब।

2 गो आं थुं नेल्लेमी परमप्रभु यावे आ खिं डा लाडगा लचा दाक्नुड। गो ग्येरशा सोम्शा ब्रोंडशा बाक्ब परमप्रभु कली कुम्सो पाइनुड। भजन संग्रह ४२:३

3 मिनु चिक्बपुकीमी यो इन चढ़ेतीके आ नेक्थामी ग्योत्र सेल्शा, आन चाइक्ब पुक्नीम। गे, मुर नेल्ल आन परमप्रभु यावे, आं पिप नु आं परमप्रभु बाक्नीनी।

4 इन खिंम बाक्चा ताइब आसीक तशो बाक्नीम। मेकोपुकीमी गेना हना यो इन कली कुम्सो पा ठेयब सेल्नीम। ठेयब सेंदा पा। भजन संग्रह ६५:५

5 गे इन सक्ति ताइब नेल्ल ग्येरसीशो बाक्नीम। मेको आन थुंमी सियोन कली मिम्ना मिम्न बाक्नीम।

6 मेकोपुकी बाका माइशो गोरशो रागी डा दिम रे पा लमानु, मेकोपुकीमी मेकेर ब्वाक्कु बुक्शो रागी सेल्नीम। डोंइती रेउ यिशा, ब्वाक्कु देम्ब।

7 मेकोपुकी शुश बोल्यो दुम्नीम। मेकोपुकी परमप्रभु आ डोंइती सियोनम जाक्नीम।

8 परमप्रभु यावे, मुर नेल्ल आन परमप्रभु, आं पुंइशो लोत्र नेनीन। याक्ब आ परमप्रभु आं लोत्र नेनीन। ठेयब सेंदा पा।

9 परमप्रभु, आंइ कली कोत्रब कली कोत्रडीन। इन आंइ कली गेशो पिप कली कोत्रडीन।

10 मिनु हजार का नाक्त ते ते बाक्चा क्येडा काबु नाक्त इन खिंम बाक्चा रिम्शो बाक्ब। इन अरेशो मटीब आन ताम्बुम बाक्चा क्येडा आं परमप्रभु आ खिं डा लाप्चो खाल पाइब दुम्चा दाक्नुड। भजन संग्रह २७:४

11 मारदे हना परमप्रभु, परमप्रभु यावे नां नु तेक्तीक बाक्ब। परमप्रभु यावेम ठेयब दुम्तीक नु मान गेब। मेकोमी ठीक लां खोइक्ब आन कली रिम्शो पाइब।

12 मुर नेल्ल आन परमप्रभु यावे, इन कली जिम्मा गेंसीशो थमा सुइक्बपुकी ग्येरसीशो बाक्नीम" देंती।

## 85

### थुं नाइक्तीक लोत्र

कुम्सो पपाइक्ब कली कोराह आ तौ आन कुम्सो।

1 परमप्रभु यावे, गे इन रागी कली शिशी पाइतीनी। याक्ब आ रिम्शो दुम्तीके लेंशा सेल्तीनी।

2 गे इन मुर आन ठीक मपशो माफ गेतीनी। मेको आन पाप नेल्ल सुम्तीनी। ठेयब सेंदा पा।

3 गे इन गाइक्चा नेल्ल साम्तीनी। मिनु चुरचा प्रोंइतीनी।

4 आंइ कली पाप रे प्रोंइब परमप्रभु, आंइ कली लेंशा डोंइती डा खोदेशो सेल्की। मिनु इन आंइ कली मदाक्तीके समीन।

5 मार, गे गेना हना यो गोपुकी नु गाइक्स डा गाइक्स बाक्नीनी? गे गोपुकी नु आंइ चच युइ आन पाला सम्म गाइक्स डा गाइक्स बाक्नीनी?

6 मार, गे इन मुर आंइ कली गे नु ग्येरसीचा कली लेंशा, मबोकपाइक्नीनी?

7 परमप्रभु यावे, गे इन गेनायो मनुष्व दाक्तीके कोंइदीकी। मिनु आंइ कली श्येत रे प्रोंइकी।

8 परमप्रभु, परमप्रभु यावेमी मार देबा, आं कली नेंपतीन। मेकोमी आ मुर, आ लोव्र टीब नु आंम कली जिम्मा गेंसीशो मुरपुकी नु थुं नाइक्तीक लोव्र पाइब। मेको आन कली लेंशा दूली गाक्चा मगेने। येरमीया २९:११; मीका ५:४

9 परमप्रभु कली मान पा हिंब मुर ब्रोंइचा ताइनीम। मेको आ छेडछेड इं रागीम बाक्ल।

10 गेना हना यो दाक्तीक नु थमा पा दाक्शा मप्रोंइतीक गारनीस। ठीक पतीक नु थुं नाइक्तीक पुक्पु पमुइनीस।

11 थमा पा दाक्शा मप्रोंइतीके खप रे वाशो खोदेशो पा यूब। मिनु ठीक पतीकेमी सरीड रे कोव्रब।

12 परमप्रभु यावेमी मार रिम्शो बाक्मे, मेको गेब। मिनु आंइ रागीम बाली नाली ग्रेल्पाइक्ब।

13 ठीक पतीकेमी मेको आ डोंइती गाक्शा, आन लां सेल्ब।

## 86

### श्येत जशोन, पुंइशो लोव्र

दाऊदमी परमप्रभु कली पुंइशो लोव्र।

1 परमप्रभु यावे, आं पुंइशो लोव्र नेनीन। मिनु लोव्र लेत्तीनी। मारदे हना गो प्रुडग नु श्येत जशो बाक्नुड।

2 आं कली खाल पा साइक्चा मगेयीनी। मारदे हना गो इन कली थमा सुइश्शा, इन गेय पाइब नड। गे आं परमप्रभु बाक्नीनी।

3 परमप्रभु, आं कली शिशी पाइय्यीनी। मारदे हना गो नाक्तर रे इन कली ब्रेश्शो बाक्नुड।

4 इन गेय पाइब आ थुं ग्येरपतीन। मारदे हना गो आं थुं परमप्रभु, इन कली जिम्मा गेनुड।

5 परमप्रभु, गे रिम्शो पाइब नु माफ गेब बाक्नीनी। इन कली पुंइब नेल्ल आन कली गेना हना यो दाक्नीनी।

6 परमप्रभु यावे आं पुंइशो लोव्र नेनीने। मिनु शिशी पाइक्चा कली आं पुंइशो नेनीन।

7 गो श्येत जडानु इन कली पुंइनुड। मिनु गे आं लोव्र लेत्तीनी। भजन संग्रह ५०:१५

8 परमप्रभु, देवी देवता आन दातेमी इन खोदेशो अरु तेकोइ मबाक्नीम। इन पशो गेय खोदेशो पा अरु सुइम मपाइनीम। भजन संग्रह १३५:५; प्रस्थान १५:११

9 परमप्रभु, इन सेल्शो रागी रागी डा मुर इन डोंइती बाप्शा, इन नें थिशा, इन कली ठेयब सेल्चा माल्नीम।

10 मारदे हना गे ठेयब बाक्नीनी। मिनु छक लाक्चा डा गेय पाइनीनी। गे ला परमप्रभु बाक्नीनी।

11 परमप्रभु यावे, आं कली इन लां खोइक्चा शेंदीनी। मिनु गो इन थमा पतीकेमी गाक्नुड। आं कली थुं का पा इन कली मान पा हिंब सेल्यीनी। यूहन्ना १४:६

12 परमप्रभु यावे, आं परमप्रभु, गो आं थुं नेल्लेमी “गे रिम्शो पाइब बाक्नीनी” देंनुड। मिनु गो गेना हना यो इन नें ठेयब सेल्लुड।

13 मारदे हना इन गेना हना यो आं कली दाक्तीके ठेयब बाक्ब। गे आं कली बेक्शो मुर आन नेल्ल क्येडा आगा डा बाक्तीके रे प्रोंइतीनी।

14 परमप्रभु, शिशी मपाइब मुरपुकीमी आं कली खेदा पतीमी। मरिम्शो पाइब आन हुलमी साइक्चा माल्तीमी। मेकोपुकीमी इन कली ममिम्मीम।

15 तन्न परमप्रभु, गे दाक्ब नु शिशी पाइब परमप्रभु बाक्नीनी। रीब पा मगाइक्ब, गेना हना यो दाक्शा मप्रोंइब बाक्नीनी। भजन संग्रह १०३:८; प्रस्थान ३४:६

16 आं कली कोव्रशा, शिशी पाइय्यीनी। इन गेय पाइब कली इन सक्ति गेने। इन वाइलीम आ तौ कली श्येत रे प्रोनीन।

17 गे इन दाक्तीके चिन्ड का गेयीनी। मिनु आं कली काइ मदाक्बपुकी मेको तशा, मुने दोक्मल। मारदे हना परमप्रभु यावे, गे आं कली वारच पाइतीनी। मिनु लेम्ताक्यीनी।

## 87

मुर आन नें आ किताबम ब्रेकशो

कोराह आ तौ आन कुम्सो।

1 परमप्रभुम आ डांडामी आ सहर सेल्लु।

2 परमप्रभु यावेमी याकूब आ मुर आन बाक्तीके क्येडा सियोन सहर डा गारो डा लाप्यो दाक्ब।

3 परमप्रभुम आ सहर आ पबर्म रिम्शो लोव्र पशो बाक्ब। ठेयब सेंदा पा।

4 राहाब नु बेबीलोनम आं कली तुइक्नीस। पलिस्ती आन रागी, टायर नु एथीयोपीया यो मेको नु बाक्नीम। मिनु मेको आन पबर्म “एको नु मेको मेकेर जरमेशो नम” देंनीम। इजीप्त रागी कली राहाब यो देंनीम। भजन संग्रह ६७:४-५

5 सियोन आ पबर्म चहिं “मुर नेल्ल मेकेर रेन जरमेशो बाक्नीम। मारदे हना नेल्ल क्येडा ठेयबमी मेको कली रिम्शो सेल्शा कोव्रब” देंनीम।

6 परमप्रभु यावेमी जात जात डा मुर आन नें का का पा आ किताबमी ब्रेक्ब। मिनु “एको नु मेको सियोनमी जरमेशो बाक्ब” दे ब्रेक्ब। ठेयब सेंदा पा।

7 कुम्सो पाइब नु सिल पाइबपुकीमी “आंइ आसीक नेल्ल सियोनम बाक्ब” दे कुम्सो पाइनीम। भजन संग्रह ३६:१०

## 88

“वारच पाइय्यीनी” दे पुंडशो

कुम्सो पपाइक्ब कली महलेथ आ कुम्सो। कोराह आ तौ आन कुम्सो। एज़ाह आ मुर हेमान आ सेल्शो शंतीक कुम्सो।

१ इतिहास ६:१८ 1 परमप्रभु यावे, आं परमप्रभु, गे आं कली श्येत रे प्रोंइब बाक्नीनी। नाक्दो नाक्त गो इन डोंइती पुंडशो बाक्नुड।

2 आं पुंडशो लोव्र इन डोंइती जाक्ल। आं लोव्र नेनीन।

3 मारदे हना आं थुं श्येतम व्रीशो बाक्ब। मिनु गो बेक्चा चिकशो बाक्नुड।

4 गो बेक्शा लाइब मुर नु हिक्सीशो दुम्ती। गो सक्ति मपाइशो मुर खोदेंशो दुम्ती।

5 गो बेक्शो मुरपुकी नु तिल्ला पुंडसीशो बाक्नुड। तुरसुम बाक्शो साइक्चा पुंडसीशो मुर खोदेंशो दुम्ती। मोपा इन क्येडा डोन बाक्शो इन मफ्रुक्शो मुर खोदेंशो दुम्ती।

6 गे आं कली बेक्शो मुर आन बाक्तीके छिडछिड डा नेल्ल क्येडा आगा डा बाक्तीकेमी वोइक्तीनी।

7 इन गाइक्तीकेमी आं कली दिप्यो बाक्ब। मिनु इन छालम आं कली सुम्तीनी। ठेयब सेंदा पा।

8 गे आं वारच आन कली गो नु गुम्चा हिंपाइक्तीनी। गो आं वारच आन कली हिंचा डा दुम्ती। गो चोक्सीशो, श्येत रे ब्रोंइशा, प्रोक्ने मचाप्नुड। भजन संग्रह ३८:१२

9 सुर्ता पतीके आं मिक्च ब्रा ब्रा दुम्ती। परमप्रभु यावे, गो नाक्त कित कित इन कली पुंडना पुंडन बाक्नुड। मिनु इन नेमी आं गुड पोक्नुड।

10 मार, गे बेक्शो मुर आन कली छक लाक्चा डा गेय पाइनीनी? मार, मेको बेक्शो मुरपुकीम बोक्शा, इन कली ठेयब सेल्नीमी? ठेयब सेंदा पा। भजन संग्रह ६:६; यसैया ३८:१८

11 मार, गे इन गेना हना यो दाक्तीके आ पबर्म बेक्शो मुर आन बाक्तीकेमी लोव्र पाइनीमी? इन दाक्शा मप्रोंइतीके आ पबर्म तुरसुम शेनीमी?

12 मार, इन छक लाकचा डा गेय छिडछिडमी तुडक्नीमी? इन श्येत रे प्रोंइतीके बेकशो मुर आन दातेमी तुडक्नीमी डा?

13 परमप्रभु यावे, गो चहिं सुनी कना इन कली लोव्र पाइनुड।

14 परमप्रभु यावे, गे आं कली मारदे प्रोंइयीनी? मारदे इन कुल खुइक्तीनी?

15 गो ठिटा रेन श्येत जशा, बेकचा चिकशो बाक्नुड। इन हिंच कोंइशोमी गो श्येत जशो बाक्नुड। मिनु आं थुं लुकच लशो बाक्ब।

16 गे आं पर्वम गाइक्ताक्नी। इन हिंच कोंइशोमी आं कली खतम पोक्शो बाक्ब।

17 मेकोपुकीम नाक्तर रे ब्वाक्कु खोदेशो पा आं एर ओंथ नेल्ल हिरशो बाक्नीम। मेकोपुकीम आं कली पुम्शा हिंच कोंइताक्यीमी।

18 गे आं कली दाक्ब नु आं चारच आन कली आं कली तशा हिंपाइक्तीनी। मिनु छिडछिड आं नेक्था डा चारच दुम्शो बाक्ब।

## 89

### परमप्रभुम आ दाक्तीके मप्रोंइब

एजाह आ मुर एथान आ कुम्सो।

1 परमप्रभु यावे, गो इन गेना हना यो दाक्तीक आ पर्वम कुम्सो पाइनुड। गो नेल्ल पाला डा मुर आन कली इन दाक्तीकेम गेनायो मप्रोंइब बाक्नीनी, दे शेंनुड।

2 गे इन दाक्तीक गेना हना यो लीपाइक्चा कली वोइक्तीनी। इन दाक्शा गेनायो मप्रोंइतीके सरीड खोदेशो ठेयब बाक्ब।

3 गे “गो आं योव्रशो नु कबल पाता। आं गेय पाइब दाऊद नु कसम जाता। मार कसम जाता देशा हना, यसैया ५५:३; भजन संग्रह १३२:११

4 गो गेना हना यो इ चच युइ रे पिप का सेल्लुड। मिनु इ पिप दुम्तीके नेल्ल आन पाला सम्म लीपाइक्नुड” देंतीनी। ठेयब सेंदा पा। २सामुएल ७:१६; प्रेरित २:३०

5 परमप्रभु यावे, स्वर्गम बाक्ब नेल्लेमी इन छक लाकचा डा गेय आ पर्वम इन कली ठेयब सेल्लीम। इन मुर आन गुम्तीकेमी इन दाक्शा गेनायो मप्रोंइतीके आ पर्वम इन कली ठेयब सेल्लीम।

6 सरीडमी परमप्रभु यावे कली सु नु थाप्ने चाम्सीबा डा? मिनु स्वर्गम बाक्ब आन दातेमी सु परमप्रभु यावे खोदेशो बाक्बा डा? १राजा २२:१९

7 आंम मुर आन बुक्तीकेमी परमप्रभु कली मान पा हिंनीम। मेको आ एर ओंथ बाक्ब नेल्ल आन क्येडा मेको शुश ठेयब नु मान पा हिंचा माल्लो बाक्ब।

8 परमप्रभु यावे, मुर नेल्ल आन परमप्रभु, इन खोदेशो ठेयब सक्ति पाइशो सु बाक्बा डा? इन दाक्शा मप्रोंइतीके इन एर ओंथ बाक्ब।

9 गे बारशो समुन्द्र कली हुकुम पाइनीनी। मिनु मेको आन छाल बोक्मेनु गे नाइक्पाइक्नीनी। भजन संग्रह ६५:८; मत्ती ८:२६

10 गे राहाब कली बेकशो जन्तु खोदेशो पा साइक्तीनी। इन जोरी सनु आन कली इन सक्तिमी एर ओंथ ब्रपाइक्तीनी। इजीप्त रागी कली राहाब यो देंनीम। भजन संग्रह ८७:४अय्युब ९:१३; अय्युब २६:१२; यसैया ३०:७; यसैया ५१:९

11 सरीड नु रागी निम्फा इन के बाक्नीस। रागी नु मेकेर बाक्शो नेल्ल इन सेल्लो बाक्नीम। भजन संग्रह २४:१

12 उत्तर नु दक्खिन इन सेल्लो बाक्नीस। ताबोर नु हेरमोन इन नेम ग्येरशा कुम्सो पाइनीस।

13 गे सक्ति पाइशो बाक्नीनी। गे बोल्यो नु ठेयब बाक्नीनी।

14 ठीक पतीक नु कुल मकोव्रथु निसाफ पतीके इन राज्य डा सक्ति बाक्ब। इन दाक्शा गेनायो मप्रोंइतीके इन डोंइती बाक्ब।

15 इन कली ग्येरशा ठेयब सेल्लपुकी ग्येरसीशो मुर बाक्नीम। मारदे हना मेकोपुकी, परमप्रभु यावे, इन डोंइती डा छेडछेडमी गाक्नीम।

16 मेकोपुकी नाक्तर रे इन नेमी ग्येरसीनीम। मिनु इन ठीक पतीकेमी थु नाइश्शा बाक्नीम।

17 मारदे हना गे मेको आन सक्ति गेब बाक्नीनी। मिनु गो इन शिशीमी आंड पिया पोक्शो बाक्नीकी।

18 आंड तेक्तीके, आंड पिप इस्राएल डा परमप्रभु यावे केन बाक्ब।

19 साइ डोंइती गे इन कली मप्रोंइब मुर आन कली कोंइतीक कोंइशा, लोत्र पाइतीनी। मिनु गे “गो लडाइ पाइब का कली सक्ति गेता। गो मुर आन दाते रे का कली ठेयब सेल्ला। १सामुएल १३:१४; १सामुएल १६:१३

20 गो आं गेय पाइब, दाऊद कली थित्ता। गो मेको तारी तेल लुक्ताक्ड।

21 मिनु गो मेको कली कोव्रनुड। मिनु सक्ति गेनुड।

22 आ जोरी सत्रुमी मेको कली ग्राने मचाप्नीम। परमप्रभु आ अरेशो मटीबपुकीमी मेको कली दिप्ने मचाप्नीम।

23 मेको आ जोरी सत्रु आन कली मेको आ डोंइती खतम पोक्नुड। मिनु मेको कली काइ मदाक्ब आन कली साइक्नुडमी।

24 आं दाक्शा मप्रोंइतीके नु आं गेना हना यो दाक्तीके मेको नु बाक्ब। मिनु आं नेमी मेकोमी आ पिया पोक्ने चाप्ब। आ सक्ति बारब।

25 गो मेको कली समुन्द्र नु ठेयब खोला नेल्ल कली हुकुम पाइब सेल्लुड। भजन संग्रह ७२:८

26 मेकोमी आं कली ‘गे आं आफ बाक्नीनी। आं परमप्रभु, आं कली श्येतर रे प्रोंइब सेरथे फुल्लु बाक्नीनी’ देंब। २सामुएल ७:१४

27 गो मेको कली आं डोंइती जरमेशो तौ सेल्लुड। रागी डा पिप नेल्ल आन पिप सेल्लुड।

28 गो मेको कली गेना हना यो दाक्नुड। मिनु मेको नु पशो कबल खाप्नुड।

29 गो मेको आ चच युइ आन कली गेनायो मग्याम्चा डा पा वोइक्नुड। मिनु मेको आ सासन पतीके सरीड लीम सम्म बाक्ब।

30 तन्न मेको आ चच युइपुकीमी आं अरेशो लोत्र प्रोंइतेक्म हना, आं निसाफ पतीके लोत्र मटिप्तेक्म हना,

31 आं पचा देंशो, आं फुल्लुम मुशा ब्रेक्शो लोत्र मपाप्तेक्म हना, आं शेंशो मटिप्तेक्म हना,

32 गो मेको आन पाप आ पबर्म कोक्केमी सजाइ गेनुडमी। गो मेको आन ठीक मपशो आ पबर्म तुप्शा सजाइ गेनुडमी।

33 तन्न गो मेको आन कली आं गेना हना यो दाक्तीकेम मप्रोंइनुड। आं दाक्शा मप्रोंइतीके मेको नु लीब।

34 गो आं कबल नेल्ल खाप्नुड। आं डोंइती देंशो लोत्र थमा पा पाइनुड।

35 गो आं नेमी काले कसम जाता, गो दाऊद कली जोल मपाइनुड।

36 मेको आ चच युइ गेना हना यो लीनीम। मिनु मेको आ सासन पतीके आं डोंइती नां बाक्म सम्म बाक्ब। भजन संग्रह ७२:१७

37 तास्ला खोदेंशो पा मेको आ सासन पतीके गेना हना यो बाक्ब। सरीड बाक्शो खोदेंशो पा गेना हना यो बाक्ब” देंतीनी। ठेयब सेंदा पाउत्पती ९:१३

38 तन्न गे इन तेल लुक्शो कली प्रोंइशो बाक्तीनी। गे इन तेल लुक्शो आ पबर्म शुश गाइक्ताक्मी।

39 गे इन गेय पाइब नु पशो कबल प्रोंइशो बाक्तीनी। गे मेको आ सिरपेच खपीम ताइश्शा, ग्रॉग्रा दिशो सेल्लतीनी।

40 आ गारो नेल्ल प्रेशशा, आ दरवार नेल्ल खतम पोक्तीनी।

41 मेको लां रे पा लाइब नेल्लेमी मेको आ मार मार रोइश्शा लाइक्तेक्म। मेको आ नेक्था डा मुरपुकीमी मेको कली शुक्शी पाइक्तेक्म।

42 गे मेको आ जोरी सत्रु आन कली बोल्यो सेल्लतीनी। गे मेको आ जोरी सत्रु नेल्ल आन कली ग्येरपाइश्शो बाक्तीनी।

43 गे मेको कली बुपाइक्तीनी। मिनु लडाइमी चारच मपाइक्मी।

44 गे मेको आ ठेयब दुम्तीके खतम पोक्तीनी। मिनु मेको आ सासन पतीके साम्शा गेतीनी।



45 मेको आ ब्रोंइतीके नाक्त इच्का ला सेल्टीनी। गे मेको कली मुनेम सुम्पाइक्तीनी। ठेयब सेंदा पा।

46 परमप्रभु यावे, गे गेना सम्म खुइश्शा बाक्नीनी? इन गाइक्चा गेना सम्म मी खोदेशो पा ब्राइबा?

47 परमप्रभु, आं ब्रोंइशा बाक्तीक नाक्त इच्का ला बाक्ब। गे मुर नेल्ल आन कली जाम्शा लाइब सेल्शो बाक्नीनी।

48 मार, मुर गेनायो मबेक्थु, ब्रोंइशा बाक्नीमी? सुम आंम कली बेक्तीक रे प्रोंइने चाप्बा डा? ठेयब सेंदा पा।

49 परमप्रभु यावे, इन साइ डा गेना हना यो दाक्तीके ते लाक्गा? गे दाऊद कली कसम जशा, इन दाक्शा मप्रोंइतीकेमी लोत्र पाइतीनी।

50 परमप्रभु यावे, दोपा इन गेय पाइब, गो शुक्शी पा रिश्शा कोव्चा पुइसीडा, मेको मिम्तीन। गो मारदे जात जात डा मुरपुकीमी शुक्शी पाइश्शो फाल्चा माल्डा? मेको यो मिम्तीन। भजन संग्रह ४४:१-२५

51 परमप्रभु यावे, मारदे इन जोरी सत्रुमी आं कली शुक्शी पाइय्यीमी? मेकोपुकीमी मारदे इन तेल लुक्शो, आं कली ते ते थेक्तु, मेक मेक शुक्शी पाइय्यीमी?

52 परमप्रभु यावे गेना हना यो ठेयब बाक्ल। मेको थमा बाक्ब, आमैन। भजन संग्रह ४१:१४

## 90

### परमप्रभु खुंइसीतीके बाक्ब

परमप्रभु आ मुर मोसा आ पुंइशो लोत्र।

1 परमप्रभु गे नेल्ल पाला सम्म आंइ बाक्तीके दुम्शो बाक्नीनी।

2 मिनू पहाड दुम्चा क्येडा डोंइती नु रागी सेल्चा क्येडा डोंइती गे गेना हना यो बाक्ब परमप्रभु बाक्तीनी।

3 गे मुर आन कली लेशा फुरक दुम्पाइक्नीनी। मिनू गे “मुरपुकी, आं गे लेतीन” देनीनी। भजन संग्रह १४६:४; उपदेसक १:४

4 हजार का बर्स इन कली सिनाक्त खोदेशो बाक्ब। नाक्दो का इन कली याम का खोदेशो बाक्ब। २पत्रुस ३:८

5 गे मुर आन कली फिक्शा, लाइक्नीनी। मुर आन ब्रोंइतीक डोमु तशो खोदेशो बाक्ब। मेकोपुकी सुनी नक वाशो घांस खोदेशो बाक्नीम। भजन संग्रह १०२:१२; भजन संग्रह १०३:१५; अय्युब १४:२; यसेया ४०:६; १पत्रुस १:२४-२५

6 मेको सुनी गिग दुम्नीम। मिनू नाक्दो सोल सुल बेक्नीम।

7 गो इन गाइश्शोमी खतम दुम्शो बाक्नीकी। मिनू इन चुरशो तशा हिनीकी।

8 आंइ मरिम्शो पशो इन डोंइती वोइश्शो बाक्तीनी। आंइ खुइश्शा पशो इन कुल डा छेडछेड आ डोंइती बाक्ब।

9 गो आंइ नाक्त नेल्ले इन गाइश्शोमी लाक्शो बाक्नीकी। आंइ नाक्त नेल्ल हुकयी पशो खोदेशो पा लाक्नीम।

10 आंइ ब्रोंइतीके ७० बर्स ला बाक्ब। बोल पा ब्रोंइतक हना, ८० बर्स सम्म ब्रोंइनीकी। मो हना यो आंइ ब्रोंइतीक नाक्ती नेल्ल श्येत नु मरिम्शो दुम्तीके ला बाक्ब। ब्रोंइतीक नाक्ती रीब पा नुप्ब। मिनू गो बेक्शा लाइनीकी। उपदेसक १:३

11 इन गाइक्तीक सक्ति सुम तुइक्बा? गो इन गाइक्तीके आ पर्वम इन क्येडा हिनीकी।

12 मोपतीके आंइ ब्रोंइतीक नाक्ती गिश बाक्नीमी मिम्शा, हिक्चा शेंदीकी। मिनू गो जोक्ब तुइक्ब थुं पाइश्शो दुम्कल। भजन संग्रह ३९:५-७

13 परमप्रभु यावे, गेना सम्म डोन बाक्नीनी? आंइ गे लेतीन। इन गेय पाइब आंइ कली शिशी पने।

14 सुनी आंइ कली इन गेना हना यो दाक्तीकेमी ग्येरपाइक्की। मिनू गो ब्रोंइका सम्म ग्येरशा कुम्सो पा बाक्ने चाप्कल।

15 गे गिश नाक्त सम्म आंइ कली श्येत गेनी? मिश नाक्त सम्म आंइ कली ग्येरपाइक्की। गो शुश बर्स श्येत जाइतक।

16 इन गेय पाइबपुकीमी इन गेय तुइवतमेक्ल। मिनू मेको आन आल आन कली इन छेडछेड डा सक्ति कोइदीन। यसैया ५:१२

17 परमप्रभु यावे, आंइ परमप्रभु, इन शिशी आंइ तार बाक्ल। मिनू आंइ गुइ डा गेय रिम्शो दुम्ल। थमा पा, आंइ पशो नेल्ल रिम्शो सेलीन।

## 91

श्येत रे प्रॉइतीके

- 1 मु नेल्ल क्येडा ठेयब आ फाप्तीकेम बाक्बा नु नेल्ल क्येडा सक्ति पाइशो आ नेकथा बाक्बा,
- 2 मेकोमी परमप्रभु यावे कली “गे आं खुइक्तीक नु आं बोल्यो दरवार बाक्नीनी। गे आं परमप्रभु बाक्नीनी। गो इन कली थमा सुइक्नुड” देब।
- 3 मेकोमी इ कली चिक्ब ग्याइक्ब मुर आ ब्वारद नु मुर साइक्ब रोइ रे प्रॉइब।
- 4 मेकोमी इ कली आ फ्रांमी फाप्ब। मिनू गे मेको आ फ्रां आगामी खुइशशा बाक्नेवे। मेको आ दाक्शा गेनायो मप्रॉइतीके इ तेक्तीक नु गारो दुम्ब।
- 5 मिनू गे नाक्दो डा हिंतीके नु नाक्ती बेरशा जाक्ब ब्रा तशा महिनेवे।
- 6 छिडछिडम जाक्ब मुर साइक्ब रोइ नु नाक्ती याक्सीब रोइ तशा महिनेवे।
- 7 मिनू हजार का जना मुर इ डोंइती साइक्चा पुंइसीनीम। मिनू इ ग्युरा गे १० हजार मुर साइक्चा पुंइसाक्म हना यो, गे साइक्चा मपुंइसीनेवे।
- 8 परमप्रभु कली मटीबपुकी दोपा क्येक्क लेत्या पुंइसीनीमी, गे मेको ताइनेवे।
- 9 मारदे हना गे “परमप्रभु यावे आं खुइक्तीके बाक्ब” देते। मिनू गे नेल्ल क्येडा ठेयब कली इ बाक्तीक सेलतीवी।
- 10 इ कली मारेइ मरिम्शो मदुम्ब। इ बाक्तीक आ नेकथा मारेइ हिंचा डा मदुम्ब।
- 11 मारदे हना मेकोमी आ स्वर्ग डा गेय पाइब आन कली इ लां नेल्लेमी इ कली वारच पपाइक्ब। मत्ती ४:६
- 12 मेकोपुकीमी इ कली आन गुइ गुइम ताक्शा कुरनीम। इ खोइली फुल्लुम मथोक्पाइक्चा कली मोदेशो पाइनीम।
- 13 गे गुप्स नु बीस पाइशो बुस्स दिम्नेवे। मेको बोल्यो बाक्तेक्म हना यो, मेको आन कली दिम्शा साइक्नेवे। लूका १०:१९
- 14 मिनू परमप्रभुमी “मेकोमी आं कली दाक्तीके, गो मेको कली श्येत रे प्रॉइनुड। मेकोमी आं नें तुइक्तीके, गो मेको कली फाप्नुड।
- 15 मेकोमी आं कली थोइब। मिनू गो आ लोत्र लेत्नुड। मेको श्येत जवानु, गो मेको नु बाक्नुड। मेको कली श्येत रे प्रॉइशा, मान ताइब सेल्नुड। भजन संग्रह ५०:१५
- 16 गो मेको कली शुश ब्रॉइचा गेशा, आं प्रॉइतीके तपाइक्नुड” दे परमप्रभुमी देत। यसैया ५२:१०

## 92

परमप्रभु कली पुंइशो

नाइक्तीक नाक्त पतीक कुम्सो।

- 1 परमप्रभु यावे कली “गे रिम्शो पाइब बाक्नीनी” देंचा रिम्शो बाक्ब। मिनू “इन नें नेल्ल क्येडा ठेयब बाक्ब” दे कुम्सो पचा रिम्शो बाक्ब। भजन संग्रह १४७:१
- 2 सुनी इन गेना हना यो दाक्तीके नु नाक्दो इन दाक्शा मप्रॉइतीके आ पबर्म लोत्र पचा रिम्शो बाक्ब।
- 3 बेन्जो नु तार पाइशो ठेयब ताप्तीक ताप्शा, बीना आ लायोमी मोदेशो कुम्सो पचा रिम्शो बाक्ब।
- 4 मिनू गो “परमप्रभु यावे, इन पशोमी आं कली ग्येरपाइक्तीनी” दे इन पशो तशा, ग्येरशा कुम्सो पाइनुड।
- 5 परमप्रभु यावे, इन गेय थम ठेयब बाक्नीम। इन मिम्तीके यो थम ठेयब बाक्ब। भजन संग्रह १०४:२४; यसैया ५५:९

- 6 निप्स मपाइश्शो मुरपुकीमी मेको तुइक्ने मचाप्नीम। मूर्खपुकीमी मेको रुप्ने मचाप्नीम।  
 7 मिनु परमप्रभु आ अरेशो मटीबपुकी घांस खोदेशो पा बारनीम। मरिम्शो पाइबपुकी फू खोदेशो पा बोइक्नीम। नोले मेकोपुकी गेनायो मलीचा डा पा क्याम्चा पुंडसीनीम।  
 8 तन्न परमप्रभु यावे, गे गेना हना यो ठेयब सेल्चा पुंडसीनीम।  
 9 परमप्रभु यावे, इन जोरी सत्रु क्याम्चा पुंडसीनीम। मरिम्शो पाइब नेल्ल एर ओंथ ब्राइनीम।  
 10 गे आं कली ब्वाकी डा ब्यफ खोदेशो पा सक्ति गेतीनी। आं कली नेल्ल क्येडा रिम्शो तेल लुक्ताक्यीनी। भजन संग्रह २३:५  
 11 गो आं जोरी सत्रु बुशो तशा ग्येरसीनुड। आं कली मरिम्शो पाइबपुकी खतम दुम्शो लोव नेशा, ग्येरसीनुड।  
 12 ठीक पाइबपुकी चहिं खजूर रवा खोदेशो पा बारनीम। मेकोपुकी लेबानोन डा लाइश्शो रवा खोदेशो पा लाइक्नीम। भजन संग्रह १:३; भजन संग्रह ५२:१०  
 13 मेकोपुकी आंइ परमप्रभु यावे आ खिंमी खुम्शो दुम्शा, आंइ परमप्रभु आ लाइगाम बोइक्नीम।  
 14 मिनु मेकोपुकी शुश बर्स दुम्मानु यो, फल सिल्तीम। मेकोपुकी गिग नु नक डा नक लीनीम।  
 15 मिनु गो “परमप्रभु यावे गेना हना यो ठीक पाइब बाकब। मेको आं सेरथे फुल्लु बाकब। मेको नु मारेइ मरिम्शो मबाकब” देंनुड। ब्यवस्था ४२:४

## 93

### परमप्रभु आ ठेयब दुम्तीके

- 1 परमप्रभु यावेमी सासन पाइब। मेको पिप आ वाम ग्योम्सीशो बाकब। परमप्रभु यावेमी आ सक्ति किम्सीशो बाकब। रागी आ जग बोल्यो बाकब, मेको गेनायो महिम्सीब। भजन संग्रह ४७:८; भजन संग्रह ९६:१०; भजन संग्रह ९७:१; भजन संग्रह ९८:६; भजन संग्रह ९९:१; भजन संग्रह १४६:१०; प्रस्थान १५:१८  
 2 इन ठेयब निल्तीके साइ डोंइती रे चोइश्शो बाकत। गे साइ रेन बाकशो बाकतीनी।  
 3 परमप्रभु यावे, समुन्द्र बारशा कुशो बाकब। मेको आ छाल आ रेयके ठेयब दुम्शो बाकब।  
 4 ठेयब समुन्द्र आ रेयके नु समुन्द्र आ बोल्यो छाल क्येडा इरीम बाकब। परमप्रभु यावे नेल्ल क्येडा ठेयब सक्ति पाइश्शो बाकब।  
 5 इन देशो लोव गेना हना यो बाक्नीम। परमप्रभु यावे, इन खिं गेना हना यो इन सक्तिमी व्रीशो बाकब।

## 94

### ब्रोंडचा आ परबम पुंडशो लोव

- 1 परमप्रभुमी क्येक्क लेप्ब। परमप्रभु यावे, परमप्रभु, इन छेडछेड कोइदीन। ब्यवस्था ३२:३५  
 2 रागी कली निसाफ पाइब, बोक्कीन। मिनु ठेयब लेशो आन कली आन पशो डा क्येक्क लेत्तीन। उत्पत्ती १८:२५  
 3 परमप्रभु यावे, इन अरेशो मटीबपुकी गेना सम्म ठेयब लेत्तीमी?  
 4 मेकोपुकीम ठेयब लेशो लोव ला पाइनीम। मरिम्शो पाइब नेल्लेम आन नें बोरपाइक्नीम।  
 5 परमप्रभु यावे, मेकोपुकीमी इन मुर आन कली दिम्शा ताइश्शा पशो बाक्नीम। इन योव्रशो रागी खतम पोक्शो बाक्नीम।  
 6 मेकोपुकीमी आन वोंइश बेक्शो मीश मुर नु अर्को रागी डा मुर आन कली साइश्शो बाक्नीम। मिनु रोम रोइक्च आन कली यो साइश्शो बाक्नीम।  
 7 मिनु मेकोपुकीमी “परमप्रभु यावेमी मताइब। याकूब आ परमप्रभुमी मतुइक्ब” देंनीम। भजन संग्रह १०:११  
 8 गे, निप्स मपाइश्शो मुरपुकी रूपीन। गे, मूर्खपुकी गेना जोक्ब तुइक्ब दुम्नीनी?  
 9 इन नोफा सेल्बमी मनेंबा डा? मिक्च सेल्बमी मताइबा डा? प्रस्थान ४:११  
 10 रागी रागी डा मुर आन कली सजाइ गेबमी इन कली सजाइ मगेबा डा? मेकोमी मुर आन कली मारेइ मारेइ तुइक्पाइक्ब।

11 परमप्रभु यावेमी मुर आन मिम्शो तुडक्वब। मेकोमी इं मिम्शो नेल्ल जाम्शा लाइब, दे यो तुडक्वब।  
१कोरिन्थी १:२०

12 परमप्रभु यावे, गे सु सु कली सजाइ गेशा, शेंदीनी, मेको ग्येरसीशो मुर दुम्नीम। मारदे हना मेको  
आन कली इन अरेशो लोत्र शेंनीनी। अय्युब ५:१७

13 इन अरेशो मटीब मबेक्मा सम्म, गे मेको इन शेंशो आन कली श्येत रे नाइक्वा गेनीनी।

14 मारदे हना परमप्रभु यावेमी आ मुर आन कली मप्रोंडब। मिनु आ योत्रशो रागी यो मप्रोंडब। यसैया  
३७:३३-३५

15 ठीक मुर लेंशा ठीक पतीके ताइनीम। ब्रेम्शो थुं पाइशो मुर ठीक लां खोइक्नीम।

16 परमप्रभु आ अरेशो लोत्र मटीब आन परबंम सु पोन बोक्वा? मरिम्शो पाइब आन परबंम सु पोन  
बोक्वा? भजन संग्रह ११५:१७

17 परमप्रभु यावेम आं कली वारच मपाइशो हना, गो बेक्शो मुर आन बाक्तीके जाक्दीड वा।

18 गो “आं खोइल ग्रेक्त” देंती। मिनु परमप्रभु यावे, इन गेना हना यो दाक्तीकेमी तिक्तीनी।

19 गो आं थुंमी थाम्पा सुर्ता पाता। इन लेम्शोमी आं थुं नाइसाक्व। २कोरिन्थी १:४-५

20 मार, इन अरेशो मटीब हुकुम पाइबपुकी गे नु गारनीमी डा? मेकोपुकीमी इन फुल्लुम मुशा ब्रेक्शो  
लोत्र दूली सेल्लो बाक्नीमी।

21 मेकोपुकीमी ठीक पाइब आन परबंम दोपा मरिम्शो पचा, दे लोत्र गारपाइक्नीम। मिनु दोस मताइब  
आन कली साइक्नीम।

22 तन्न परमप्रभु यावे आं बोल्यो दरवार नु आं खुइक्तीक सेरथे फुल्लु बाक्व।

23 मेकोमी मेको आन मरिम्शो पशो आन पिया तार मोइक्व। मिनु मेको आन अरेशो मटितीके मेको  
आन कली साइक्व। परमप्रभु यावे, आंइ परमप्रभुमी मेको आन कली खतम पोक्व।

## 95

### ठेयब सेल्लीक कुम्सो पय

1 जाक्कीन, ग्येरसीशा परमप्रभु यावे कली कुम्सो पय। इं कली श्येत रे प्रोंडब सेरथे फुल्लु कली  
ठेयब सेंदा पा कुम्सो पय।

2 “गे रिम्शो पाइब बाक्नीनी” देंना देंन, मेको आ डोंइती लय। कुम्सो पा मेको कली ठेयब सेल्य।

3 मारदे हना परमप्रभु यावे ठेयब परमप्रभु बाक्व। देवी देवता नेल्ल आन ठेयब पिप बाक्व। प्रस्थान  
१५:११

4 मिनु रागी डा उइ रे डांडा डा इर सम्म नेल्ल मेको आ गुइम बाक्व।

5 समुन्द्र नु सोत्रशो रागी नेल्ल मेको आ सेल्लो बाक्व।

6 जाक्कीन, मेको कली बाप्शा ठेयब सेल्य। इं कली सेल्ल, परमप्रभु यावे आ डोंइती पोक्व थेक्तय।

7 मारदे हना मेको इं परमप्रभु बाक्व। गो मेको आ योत्रशो भेडा नय। मिनु मुलाक्त मेको आ सेंदा  
नेनीन। भजन संग्रह १००:३; यूहन्ना १०:२७-२८

8 गेपुकी मेरीबाम पशो खोदेशो पा इन थुं खकटा मसेलीन। गेपुकी गोरशो रागी मास्साह माइशोमी  
बाक्वी ना पशो खोदेशो मपने। हिब्रू ३:७-८; हिब्रू ४:७

9 परमप्रभुमी “इन किकी पिपीमी आं पशो गेय नेल्ल ताम्तेक्म हना यो, मेकोपुकीमी आं कली नाक्शा  
कोत्रतीमी। प्रस्थान १७:२,७

10 गो ४० बर्स सम्म मेकोपुकी नु गाइक्ताक्ड। एको दूली पाइब मुर बाक्नीम। आं कली मटीब  
बाक्नीम।

11 मोपतीके गो आं गाइक्तीकेमी ‘एको आन कली आं थुं नाइक्पाइक्तीके मगेनुड’ दे कसम जाता”  
दे परमप्रभुम देंत। गन्ती १४:२२-२३; हिब्रू ४:३

## 96

परमप्रभु रागी नेल्ल डा पिप बाक्ब

१इतिहास १६:२३-३३

1 परमप्रभु यावे कली नक कुम्सो का पय। रागी रागी डा मुर नेल्लेमी परमप्रभु यावे कली कुम्सो पने।

2 परमप्रभु यावे कली कुम्सो पने। आ नें ठेयब सेलीन। गे नाक्त किंत किंत मेको मुर आन कली श्येत रे प्रोइशो आ पबर्म रागी रागी डा मुर आन कली शेंदीने।

3 रागी रागी डा मुर आन दातेमी मेको आ सक्ति आ पबर्म लोव्र पने। जात जात डा मुर आन दातेमी आ छक लाक्चा डा गेय आ पबर्म लोव्र पने।

4 मारदे हना परमप्रभु यावे ठेयब बाक्ब। ठेयब सेल्शा मान पाइक्चा पुंडसीब बाक्ब। मेको देवी देवता नेल्ल आन क्येडा मान पा हिंचा माल्लशो बाक्ब।

5 मारदे हना जात जात डा मुर आन देवी देवता शोर गाक्शो मूर्ति ला बाक्नीम। तन्न परमप्रभु यावेमी सरीड सेल्लु।

6 मान ततीके नु नेल्ल क्येडा ठेयब दुम्तीके मेको नु बाक्ब। मेको आ बाक्तीक सक्ति नु छेडछेडम ब्रीशो बाक्ब।

7 गे रागीम बाक्ब खिं खिं डा मुरपुकीमी परमप्रभु यावे कली “गे सक्ति नु छेडछेड पाइशो बाक्नीनी” दे ठेयब सेलीन।

8 गेपुकीमी परमप्रभु यावे आ नें थिशा, मेको कली “गे ठेयब बाक्नीनी” देनीन। चढेतीक चाक्शा, मेको आ बाक्तीक डा लाडगाम जाक्कीन।

9 रिम्शो पतीकेमी ग्योम्सीशा, परमप्रभु यावे कली “गे ठेयब बाक्नीनी” दे लोव्र पने। रागी डा मुर नेल्ले मेको आ डोंइती मेको कली मान पा खिंखि पने।

10 गे रागी रागी डा मुर आन दातेमी “परमप्रभु यावे पिप बाक्ब” दे शेंदीन। रागी महिम्सीचा डा पा सेल्शो बाक्ब। मेको मयाक्सीब। मेकोमी जात जात डा मुर आन कली कुल मकोव्रथु निसाफ पाइब। भजन संग्रह ९३:१

11 सरीड नु रागी ग्येरसीसल। समुन्द्र नु मेकेर बाक्ब नेल्ल रेयके पामेक्ल। भजन संग्रह ९८:७-९; यसैया ४९:१३

12 रू नु मेकेर वाशो नेल्ल ग्येरसीमल। मिनु ब्वाकीम बाक्शो रवा नेल्ल ग्येरशा,

13 परमप्रभु यावे आ डोंइती कुम्सो पाइनीम। मारदे हना परमप्रभु यावे जाक्ब। मेको रागी कली निसाफ पथ जाक्ब। मेकोमी रागी नेल्ल कली ठीक पतीकेमी निसाफ पाइब। मिनु जात जात डा मुर आन कली थमा पा आन कुल मकोव्रथु निसाफ पाइब। भजन संग्रह ८२:८; प्रेरित १७:३

## 97

परमप्रभु नेल्ल क्येडा ठेयब बाक्ब

1 परमप्रभु यावे पिप बाक्ब। रागी ग्येरसेक्ल। डोन डोन डा रागी डा मुरपुकी यो ग्येरसीमल। भजन संग्रह ९३:१

2 मेको आ एर ओंथ गोस्स नु ठेयब छिडछिड बाक्ब। ठीक पतीके नु ठीक निसाफ मेको आ सासन पतीक जग बाक्ब।

3 मेको आ डोंइडोंइती मी लशा, आ एर ओंथ डा जोरी सत्रु नेल्ल आन कली दाक्ब। हबकुक ३:४

4 मेको आ चिलामी रागी नेल्ल हाम्सो दुम्ब। रागी रागी डा मुर मेको तशा खिंखि पाइनीम।

5 परमप्रभु यावे आ डोंइती डांडा मयीन खोदेशो पा याइनीम। रागी नेल्ल परमप्रभु यावे आ डोंइती मोदेशो दुम्ब। यहोसु ३:१३

6 मिनु स्वर्गम मेको आ ठीक पतीके नेल्ल कोंइब। जात जात डा मुर नेल्लेमी मेको आ छेडछेड ताइनीम। भजन संग्रह ६७:५-६; यसैया २४:२१-२२

- 7 मूर्ति पूजा पाइब नेल्ल मुने तोक्चा पुंडसीनीम। मूर्ति कली थमा सुइक्बपुकी मुने दोक्नीम। देवी देवता नेल्ल परमप्रभु आ डोंइती बाप्पीन। येरमीया ४६:२५; हिब्रू १:६
- 8 परमप्रभु यावे आ निसाफ पशो नेंशा, सियोन नु यहूदा डा सहर नेल्ल ग्येरसीनीम।
- 9 मारदे हना परमप्रभु यावे, गे रागी डा नेल्ल क्येडा ठेयब बाक्नीनी। देवी देवता नेल्ल आन क्येडा गे शुश ठेयब बाक्नीनी। प्रस्थान १५:११
- 10 परमप्रभु यावेमी मरिम्शो पतीक कली काड मदाक्ब मुर आन कली दाक्ब। आ कली थमा सुइक्ब आन कली कोत्रब। मेको आन कली आ अरेशो मटीब आन गुइ रे प्रोंडब।
- 11 ठीक पाइब आन कली छेडछेड बाक्ब। मिनु ब्रेम्शो थुं पाइशो मुर आन कली ग्येरतीक बाक्ब।
- 12 ठीक पाइबपुकी परमप्रभु यावे नु ग्येरसीन। मेको कली “गे रिम्शो पाइब बाक्नीनी” देनीन।

## 98

### परमप्रभुमी वारच पाइब

कुम्सो का।

- 1 परमप्रभु यावे कली नक कुम्सो का पय। मारदे हना मेकोमी छक लाक्चा डा गेय पाप्तु। मेको आ ठेयब सक्तिमी ग्रात। भजन संग्रह ३३:३; यसैया ५९:१६; यसैया ६३:५
- 2 परमप्रभु यावेमी आ ग्रातीके कोइशा, आ श्येत रे प्रोंइतीके रागी रागी आन डोंइती कोइताक्ब।
- 3 मेकोमी इस्राएली आन कली आ गेना हना यो दाक्तीके नु आ दाक्शा मप्रोंइतीके कोइताक्ब। रागी नेल्ल डा मुरपुकीमी आंइ परमप्रभुम मेको आन कली श्येत रे प्रोंइशो ताम्तेक्म। यसैया ५२:१०
- 4 रागी रागी डा मुर नेल्ल परमप्रभु यावे कली ग्येरसीशा कुम्सो पने। साप्पा ग्येरसीशा मेको कली ठेयब सेलीन।
- 5 गे ठेयब नु आइक्च तार पाइशो ताप्तीक ताप्शा परमप्रभु यावे कली कुम्सो पा ठेयब सेलीन।
- 6 आंइ पिप, परमप्रभु यावे आ डोंइती ग्येरसीशा तुराही नु ग्राव ताप्पीन। भजन संग्रह ९३:१
- 7 समुन्द्र नु मेकेर बाक्ब नेल्लेमी परमप्रभु कली ठेयब सेलीन। रागी नु रागीम बाक्ब नेल्लेमी यो परमप्रभु कली ठेयब सेलीन। भजन संग्रह ९६:११-१३
- 8 समुन्द्र डा छालपुकीमी आन गुइ क्रोक्चा मालनीम। डांडा नेल्ल ग्येरसीशा परमप्रभु यावे आ डोंइती कालेम कुम्सो पने।
- 9 मारदे हना परमप्रभु यावे रागी कली निसाफ पथ जाक्ब। मेकोमी ठीक पा जात जात डा मुर आन कुल मकोत्रथु निसाफ पाइब।

## 99

### परमप्रभु यावे पिप बाक्ब

- 1 परमप्रभु यावे पिप बाक्ब। जात जात डा मुरपुकी खिंखि पामेक्ल। मेको करूब आन तारी बाक्ब। रागीम खिनु कुल। भजन संग्रह ९३:१; भजन संग्रह १८:११
- 2 परमप्रभु यावे सियोनम ठेयब बाक्ब। जात जात डा मुर नेल्ल आन क्येडा ठेयब बाक्ब।
- 3 मेको नेल्लेमी इन ठेयब नु हिंचा डा नें कली ठेयब सेल्मेक्ल। परमप्रभु यावे का ला बाक्ब।
- 4 सक्ति पाइशो पिपम, ठीक निसाफ दाक्ब, गे कुल मकोत्रथु, याक्ब आ रागीमी ठीक पतीके नु ठीक निसाफ वोइक्तीनी। यसैया ९:६
- 5 परमप्रभु यावे, आंइ परमप्रभु कली ठेयब सेलीन। आ खोइल थेक्तीकेमी मान पने। मारदे हना मेको का ला परमप्रभु बाक्ब। भजन संग्रह १३२:७-८; १इतिहास २८:२; बिलाप २:१
- 6 मोसा नु हारून मेको कली चढेब बाक्ताक्स। परमप्रभु यावे कली पुंइशा लोत्र पाइब आन दातेमी सामुएल का यो बाक्त। मेकोपुकीमी परमप्रभु यावे कली पुंइशा लोत्र पामेनु, मेकोमी मेको आन कली लोत्र लेशो बाक्त।

7 मेकोमी गोस्स के थाम रे पा मेकोपुकी नु लोव्र पशो बाक्त। मेकोपुकीमी मेको आ देशो नु आ फुल्लुम मुशा ब्रेक्शो लोव्र टिशो बाक्तेक्म।

8 परमप्रभु यावे, आंइ परमप्रभु, गे मेको आन कली लोव्र लेशो बाक्तीनी। गे मेको आन कली माफ गेब परमप्रभु बाक्तीनी। गे मेको आन मरिम्शो पशो आ क्येक्क यो लेशो बाक्तीनी। प्रस्थान ३४:७

9 परमप्रभु यावे, आंइ परमप्रभु कली ठेयब सेलीन। मेको कली आ डांडाम मान पने। मारदे हना परमप्रभु यावे, आंइ परमप्रभु का ला बाक्ब।

## 100

“रिम्शो पाइब बाक्ब” दे पशो कुम्सो

परमप्रभु कली “गे रिम्शो पाइब बाक्तीनी” दे चढेतीकेम पशो कुम्सो।

1 रागी रागी डा मुर नेल्ल परमप्रभु यावे कली ग्येरसीशा कुम्सो पने।

2 ग्येरसीशा परमप्रभु यावे कली ठेयब सेलीन। गे कुम्सो पना पन आ नेक्था लने।

3 परमप्रभु यावे का ला परमप्रभु बाक्ब, दे रुपीन। मेकोमी इं कली सेल्शो बाक्त, गो मेको आ मुर बाक्नय। गो मेको आ योव्रतीक डा भेडा बाक्नय। भजन संग्रह ९५:७

4 मिनु “गे रिम्शो पाइब बाक्तीनी” दे आ ठेयब लाप्चो रे ओव्रडीन। आ कली मान पा आ लाडगाम ठेयब सेल्लिक कुम्सो पने। मेको कली “गे रिम्शो पाइब बाक्तीनी” दे आ नें कली मान पा ठेयब सेलीने। भजन संग्रह १०६:१

5 मारदे हना परमप्रभु यावे रिम्शो पाइब बाक्ब। मिनु आ गेना हना यो दाक्तीके लीब। मिनु आ दाक्शा मप्रॉइतीके नेल्ल पाला सम्म बाक्ब।

## 101

पिप आ मिम्शो लोव्र

दाऊद आ कुम्सो।

1 परमप्रभु यावे, गो इन दाक्शा मप्रॉइतीक नु इन ठीक निसाफ पतीक आ पर्वम इन कली कुम्सो पाइनुड।

2 गो दोस मततीक लां शेंसीचा दाक्नुड। गो मेको गेना पने चाप्नुडा? गो आं खिंमी रिम्शो थुं पाइश्शो मुर दुम्शा बाक्चा दाक्नुड।

3 गो मारेइ मरिम्शो मिम्शा कोव्रचा मदाक्नुड। नोले शॉइसीब आन पतीके काइ मदाक्नुड। गो मोदेशो मदुम्डल। हितोपदेस २०:८, २८

4 दूली पतीक थुं आं क्येडा डोन बाक्चा माल्ब। मिनु गो मरिम्शो पतीके यो तुइक्चा मदाक्नुड।

5 सु आ नेक्था डा मुर आन पर्वम मरिम्शो लोव्र पाइबा, गो मेको कली खतम सेल्नुड। ठेयब लेशो नु बोरशो थुं पाइश्शो मुर आन कली आं नेक्था बाक्चा मगेनुड।

6 गो रागी डा थमा सुइक्चा पुंइसीब मुर आन कली दाक्शा कोव्रनुड। मिनु गो नु बाक्चा गेनुडमी। सु सु दोस मततीक लां गाक्नीमी, मेको आन कली आं गेय पाइब सेल्नुडमी। हितोपदेस २२:११

7 दूली पाइब आन कली आं खिंम बाक्चा मगेनुडमी। जोल पाइबपुकी आं डोंइती बाक्चा मताइनीम।

8 गो सुनी कुस कुस रागीम बाक्ब परमप्रभु आ अरेशो लोव्र मटीब आन कली खतम सेल्नुडमी। मोपा परमप्रभु यावे आ सहरम बाक्ब मरिम्शो पाइब मलीनीम। हितोपदेस २०:२६

## 102

श्येत जशा आस पशो

श्येत जाइबमी परमप्रभु यावे आ डोंइती पुंइशो।

1 परमप्रभु यावे आं पुंइशो नेनीन। आं डाक्शा पुंइशो इन बाक्तीकेम जाक्ल।

2 गो श्येत जडा नाक्ती इन कुल मखुइक्तीन। गो ब्रेडडा नाक्ती आं लोव्र फ्रा लेत्तीनी।

3 मारदे हना आं नाक्त कुन बुद पा जाम्नीम। मिनु आं रुश नेल्ल ठेयब मीम नाप्शो खोदेशो पा चोशो बाक्नीम।

4 आं थुं घांस खोदेशो पा बेक्ब। मोपतीके गो आं शोब्ले यो जने मचबु।

5 हुकयी पा आं कुशुल नेल्ल रुशेम क्येप्शो बाक्नीम।

6 गो गोरशो रागी डा हुहुचील खोदेशो दुम्शो बाक्नुड। गो ब्रेशो खिं आन दातेम बाक्ब बुक्स खोदेशो दुम्शो बाक्नुड।

7 गो इप्ने मचाप्थु, खिं तार आ का ला बाक्शो चिक्ब खोदेशो दुम्शो बाक्नुड।

8 नेल्ल नाक्त आं जोरी सत्रुमी आं कली शुक्शी पा बाक्नीम। आं कली शुक्शी पाइबपुकीमी आं नें थिशा साराप पाइनीम।

9 मारदे हना गो शोब्ले खोदेशो पा पुलु जाइनुड। मिनु प्रेक्कु ब्वाइशो ब्वाक्कु तनुड।

10 एको नेल्ल इन गाइक्तीकेमी दुम्शो बाक्ब। मारदे हना गे आं कली क्युकशा, ताइक्ताक्यीनी।

11 आं ब्रोंइतीक नाक्त पेरचा चिक्शो नां खोदेशो बाक्ब। मिनु गो घांस खोदेशो पा बेक्शो बाक्नुड।  
भजन संग्रह १०:५-६

12 परमप्रभु यावे, गे गेना हना यो पिप बाक्नीनी। मिनु गे नेल्ल पाला सम्म बाक्नीनी। भजन संग्रह १३५:१३

13 गे बोक्शा, सियोन कली थमा पा शिशी पाइनीनी। मेको कली शिशी पतीक नाक्त जाक्शो बाक्ब।

14 मारदे हना इन गेय पाइबपुकीमी मेकेर डा फुल्लु यो दाक्नीम। मिनु मेकेर डा फुरक कली यो शिशी पाइनीम।

15 रागी रागी डा मुरपुकी परमप्रभु यावे आ नें नेंशा हिंनीम। रागी डा पिप नेल्ले मेको आ सक्ति तशा हिंनीम।

16 मारदे हना परमप्रभु यावेमी सियोन कली लेशा सेल्ब। मिनु आ छेडछेडमी गूब।

17 मेकोमी श्येत जाइब आन पुंइशो नेंब। मिनु आन पुंइशो गेब।

18 एको लोत्र मुल जाक्ब पाला आन कली ब्रेक्चा माल्ब। मिनु नोले जरमेबपुकीमी परमप्रभु यावे कली ठेयब सेल्नीम।

19 मारदे हना परमप्रभु यावेमी इर आ बाक्तीक रे कोव्रशो बाक्ब। परमप्रभु यावेमी स्वर्ग रे कोव्रशो बाक्ब। भजन संग्रह १४:२

20 मेकोमी ग्याइशशा चोक्चा पुंइसीशो आन हुकयी पशो नेंब। मिनु साइक्चा पुंइसीब आन कली प्रोंइब।

21 मोपा “परमप्रभु यावे ठेयब बाक्ब” दे सियोन डा मुर आन कली शेंदमेक्ल। मिनु यरूसलेम डा मुरपुकीम मेको कली ठेयब सेल्मेक्ल।

22 मिनु जात जात नु राज्य राज्य डा मुर बुक्शा, परमप्रभु यावे कली ठेयब सेल्नीम। भजन संग्रह ८७:४; येरमीया ६०:३-१०; लूका १३:२९-३०

23 गो टिटा बाक्ना बाक्न, परमप्रभुमी आं सक्ति क्युम्ताक्यी, आं ब्रोंइतीक नाक्त क्युम्ताक्यी।

24 मिनु गो “आं परमप्रभु, आं कली बेक्ची मजाक्थु, मलाइय्यीनी। इन नाक्त नेल्ल पाला सम्म लीनीम” देंती। भजन संग्रह ५५:२४

25 साइ डोंइती गे रागी आ जग सेल्शो बाक्तीनी। मिनु सरीड इन गुइ डा गेय बाक्ब। हिब्रू १:१०-१२

26 मेको नेल्ल जाम्शा लाइनीम। तन्न गे गेना हना यो बाक्नीनी। मेको रागी नु सरीड वा खोदेशो पा माइत दुम्शा जेक्नीम। गे फेक्तीके वा फाइशो खोदेशो पा, मेको आन कली फाइक्नीनी। मिनु मेकोपुकी जाम्शा लाइनीम। २पत्रुस ३:१०

27 तन्न गे गेना हना यो खाल का डा बाक्नीनी। मिनु इन नाक्त गेनायो मनुप्नीम।

28 इन गेय पाइब आन चच युइ रिम्शो पा बाक्चा माल्नीम। मिनु आन चच युइ इन डोंइती बोल्यो दुम्शा बाक्नीम।



## 103

परमप्रभु कली ठेयब सेल्शो

दाऊद आ कुम्सो।

1 आं थुं, परमप्रभु यावे कली ठेयब सेलो। मिनु गो आं थुं नेल्लेमी आ नें ठेयब सेलनुड।

2 आं थुं, परमप्रभु यावे कली ठेयब सेलो। मिनु इ कली रिम्शो पशो नेल्ल मप्रंदो। ब्यवस्था ४:९

3 मेकोमी इ मरिम्शो पशो नेल्ल क्याम्शा गेशो बाक्ब। मिनु इ रोड नेल्ल सापाइक्ब। भजन संग्रह ३२:१

4 मेकोमी इ कली खतम दुम्तीक रे प्रोंडब। इ कली आ गेना हना यो दाक्तीके नु शिशी पतीकेमी कोव्रब।

5 मेकोमी इ ब्रोंडतीक नाक्त नेल्ल इ माल्शो खाप्शा गेब। मिनु इ ब्रोंडतीके ककाकुली के खोदेशो पा लेंशा ठिटा सेल्ब। यसैया ४०:३१

6 परमप्रभु यावेमी दिप्चा पुंडसीशो नेल्ल आन कली चारच पा ठीक निसाफ पाइब।

7 मेकोमी मोसा कली आ लां नु इस्राएल डा मुर आन कली आ गेय कोंडताक्ब। प्रस्थान ३३:१३

8 परमप्रभु यावे शिशी पाइब नु रिम्शो पाइब बाक्ब। मेको रीब पा मगाइक्थु, आ गेना हना यो दाक्तीके शुश कोडब। भजन संग्रह ८६:१५

9 मेकोमी गेना हना यो “गे दूली पाइतीनी” मदेब। मिनु गेना हना यो मगाइक्ब। यसैया ५७:१६

10 मेकोमी इं पशो पाप आ पबर्म सजाइ मगेब। मिनु इं मरिम्शो पशो डा क्येक्क मलेप्ब।

11 रागी रे सरीड दोशो इर बाक्बा, मोशोन आ गेना हना यो दाक्तीके आ कली मान पा हिंब आन कली पशो बाक्ब। भजन संग्रह ३६:६; यसैया ५५:८-९

12 नां दाप्तीक रे नां पेरतीक दोशो डोन बाक्बा, मोशोन आंइ मरिम्शो पशो नेल्ल डोन तिल्लो बाक्ब।

13 आफोमी आ तमी तौ आन कली दोदेशो पा शिशी पाइबा, मोदेशो पा परमप्रभु यावेमी आ कली मान पा हिंब आन कली शिशी पशो बाक्ब। लूका १५:११-२४

14 मारदे हना गो दोपा सेल्सीशो बाक्नीकी, मेकोमी तुडक्ब। मेकोमी गो फुरक ला बाक्नीक, दे यो तुडक्ब। उत्पत्ती २:७; उत्पत्ती ३:१९

15 मुर आन ब्रोंडतीके घांस खोदेशो बाक्ब। रूमी बोइश्शो फू खोदेशो पा बोइक्ब। भजन संग्रह ९०:५-६; अय्युब ७:१०

16 मिनु फश पवानु, मेको जाम्शा लाइब। मिनु आ बाक्तीक यो मतुडक्ब।

17 तन्न परमप्रभु यावे आ गेना हना यो दाक्तीक आ कली मान पा हिंब नु गेना हना यो लीब। मिनु आ ठीक पतीके आन तौ चच आन पाला सम्म लीब। लूका १:५०

18 सु सुमी कबल पा, आ शेंशो टीनीमी, मेकोपुकी नु आ गेना हना यो दाक्तीक लीब।

19 परमप्रभु यावेमी आ ठेयब नित्तीके स्वर्गम वोइश्शो बाक्ब। मिनु स्वर्ग नु रागीम बाक्शो नेल्ल कली सासन पाइब।

20 परमप्रभु यावे आ स्वर्ग डा गेय पाइबपुकी, परमप्रभु यावे कली ठेयब सेलीन। गे सक्ति पाइश्शो, आ देशो टीबपुकी मेको कली ठेयब सेलीन। यसैया ६:१-४; भजन संग्रह २९:१; भजन संग्रह १४८:-; दानीएल ७:१०

21 गे स्वर्ग डा गेय पाइबपुकी परमप्रभु यावे कली ठेयब सेलीन। आ गेय पाइब नेल्ल परमप्रभु यावे आ दाक्शो पने।

22 परमप्रभु यावे आ सासन पतीकेमी बाक्शो, आ सेल्शो नेल्लेमी परमप्रभु यावे कली ठेयब सेलीन। आं थुं, परमप्रभु यावे कली ठेयब सेलो।

## 104

परमप्रभु ठेयब बाक्ब

1 आं थुं, परमप्रभु यावे कली ठेयब सेलो। परमप्रभु यावे, आं परमप्रभु गे थम ठेयब बाक्नीनी। ठेयब दुम्तीके नु मान ततीके इन के बाक्ब।

2 गे छेडछेड कली वा फेक्शो खोदेशो पा फेक्शो बाक्नीनी। मिनु सरीड कली ताम्बु खोदेशो पा प्राक्शा कीशो बाक्नीनी।

3 गे इन बाक्तीक डा थाम ब्वाक्कु तारी सेल्शो बाक्नीनी। गे गोस्स कली इन बग्गी सेल्शो बाक्नीनी। मिनु गे फश आ फ्रां तार डोइश्शा गाक्ब बाक्नीनी। उत्पत्ती १:६-८; भजन संग्रह १८:१०-१२

4 मिनु गे फश कली इन लोत्र चोत्रब नु मी कली इन गेय पाइब सेल्शो बाक्नीनी। हिबू १:७

5 रागी गेना यो महिम्सेक्ल, दे आ जग वोइक्तीनी। मती २४:३५; प्रकाश २१:१

6 गे मेको कली वा बुद पा ब्वाक्कुमी सुम्तीनी। मिनु ब्वाक्कु डांडा तार सम्म जाक्दीशो बाक्त।

7 गे हुइक्तीनीनु, मेको प्रोक्ब। इन बुंबु पशो सेंदामी मेको दोरोर पा लाइब।

8 मेको ब्वाक्कु डांडा ग्येत्थ बारशा, दिंम मेर शाइक्ब। मिनु इन देशो बाक्तीके सम्म लाइनीम।

9 मेको लेंशा रागी कली सुम्थ मजाक्मल, दे गे सांद सेल्तीनी। अय्युब ३८:८-११; हितोपदेश ८:२९

10 गे दिंम मेर ब्वाक्कु बुक्तीक सेल्तीनी। मिनु मेको डांडा आन दाते रे शाइश्शा लाइनीम।

11 गे ब्वाकी डा जन्तु नेल्ल आन कली तूचा गेनीनी। ब्वाकी डा गधापुकीमी यो मेकेर डा ब्वाक्कु तूशा, ब्रॉइनीम।

12 मेको खोला आन नेक्था चिक्बपुकीमी आन ग्योत्र सेल्नीम। मिनु राशीम बाक्शा कुम्सो पाइनीम।

13 इन इर डा बाक्तीक रे रेउ यिपाइश्शा डांडा आन कली जिप्पाइक्नीनी। इन गेय पशोमी रागी नेल्ल ग्येरसीनीम।

14 गे बी ब्यफ आन कली घांस वापाइक्नीनी। मिनु खप रे मुर आन कली जचा थोत्रक वापाइक्नीनी।

15 मिनु गे मुर आन थुं ग्येरपाइक्चा कली अडगुर सिप्पाइक्नीनी। मिनु आन कुल दारपाइक्चा कली तेल नु आन रां बोल्यो सेल्चा कली शोब्ले गेनीनी।

16 परमप्रभु यावे आ खुम्शो लेबानोन डा लाइश्शो रवा शुश ब्वाक्कु ताइब बाक्नीमी।

17 मेकेर चिक्बमी आन ग्योत्र सेल्नीम। मिनु ठेयब बुश चिक्बपुकीमी सला रवाम आन ग्योत्र सेल्नीम।

18 लाइश्शो डांडापुकी ब्वाकी डा क्यारश आन कली बाक्नीम। सेरथे फुल्लु आइक्च जन्तु आन खुइक्तीके बाक्नीम।

19 मिनु गे बर्खा नु हिंडद कोइंचा कली तास्ला सेल्तीनी। नांमी आ दाप्तीक पेरतीक तुइक्ब। भजन संग्रह ७४:१६

20 गे छिडछिड सेल्तीनी। मिनु नाक्दो दुम्ब। मेना ब्वाकी डा जन्तु प्रूनीम।

21 मिनु गुप्स आ चाइक्बपुकीमी सिखार माल्शा, ग्रीशा आन जचा थोत्रक परमप्रभु आ गुड रे पुंइनीम।

22 मिनु नां दाप्मेनु, मेको आन पुक्खीम लशा, खुइश्शा गोल्नीम।

23 मुरपुकी चहिं आन गेय पथ लाइनीम। मिनु नाक्दो सम्म गेय पाइनीम।

24 परमप्रभु यावे, इन गेय ठेयब नु शुश बाक्नीम। गे जोक्ब तुइक्ब दुम्शा, नेल्ल सेल्तीनी। रागी नेल्ल इन सेल्शो मारेइ मारेइम ब्रीशो बाक्ब। उत्पत्ती १:३१

25 मेकेर ठेयब नु ब्रेम्शो समुन्द्र बाक्ब। मिनु मेकेर हिक्ने मचाप्चा डा पा ठेयब नु आइक्च जन्तु रमल ग्यमल पा बाक्नीम।

26 मेकेर रे जहाजपुकी यो गाक्नीम। मिनु गे मेकेर ग्यारचा कली लेव्याथन यो सेल्तीनी।

27 मिनु मेको नेल्लेमी “जचा थोत्रक गेकी” दे इन कली कोवनीम। भजन संग्रह १४५:१५-१६

28 गे मेको आन कली गेनीनु, मेकोपुकीमी खुप्नीम। इन मुठी प्राक्नीनु, मेकोपुकी ब्रोत्रशो नु रिम्शो थोत्रकीमी रूनीम।

29 मिनु इन कुल खुइक्तीनीनु, मेकोपुकी श्येत जाइनीम। मेको आन सोक्त लाइक्नीनु, मेकोपुकी बेक्नीम। मिनु लेंशा फुरक दुम्नीम। उत्पत्ती ३:१९

30 मिनु इन सोक्त सोइश्शा, मेको आन कली सेल्तीनी। मिनु गे रू आन कली लेंशा सेल्तीनी।

31 परमप्रभु यावे आ सक्ति गेना हना यो लीशा बाक्ल। परमप्रभु यावे आ गेय तशा, आंमा ग्येरसेक्ल।

- 32 गे रागी कली कोवनीनु, मेको खिंखि पाइब। गे डांडा कली थिनीनु, कुन यूब।  
 33 गो ब्रोंडडा सम्म परमप्रभु यावे कली कुम्सो पना पन बाक्नुड। गो मबेक्डा सम्म आं परमप्रभु कली ठेयब सेल्शा, कुम्सो पना पन बाक्नुड।  
 34 मेकोमी आं मिम्शो दाक्तल। मारदे हना गो परमप्रभु यावे कली मिम्शा ग्येरसीनुड।  
 35 पाप पाइबपुकी रागी रे क्याम्चा पुंडसीमल। मिनु आ अरेशो मपाइबपुकी मलीमल। आं थुं परमप्रभु यावे कली ठेयब सेलो। परमप्रभु यावे कली ठेयब सेलो।

## 105

### परमप्रभु कली मान पतीके

- 1 परमप्रभु यावे कली “गे रिम्शो पाइब बाक्नीनी” दे लोत्र पने। जात जात डा मुर आन कली परमप्रभु आ पशो तुइक्पतीन। इतिहास १६:८-२२  
 2 मेको कली कुम्सो पने। मेको कली ठेयब सेल्तीक कुम्सो पने। मुर आन कली आ पशो छक लाक्चा डा गेय शेदीन।  
 3 गे परमप्रभु आ नें तुइक्तीके ग्येरसीन। परमप्रभु यावे कली माल्ब आन थुं ग्येरसीमल।  
 4 गे परमप्रभु यावे नु आ सक्ति मालीन। गे गेना हना यो मेको आ नेक्था बाक्चा मालीन।  
 5 गे मेको आ पशो रिम्शो गेय मिम्तीन। आ छक लाक्चा डा गेय नु आ निसाफ पशो मिम्तीन।  
 6 मेको आ गेय पाइब अब्राहाम आ चच युड नु याकूब आ तौपुकी, आ योत्रशो नेल्ल मिम्तीन।  
 7 मेको परमप्रभु यावे, आंइ परमप्रभु बाक्ब। मेको आ निसाफ रागी नेल्ल कली बाक्ब।  
 8 मेकोमी आ पशो कबल गेना हना यो मिम्ब। आ देशो लोत्र हजार हजार पाला सम्म मिम्ब। ब्यवस्था ७:९  
 9 मेकोमी अब्राहाम नु मेको कबल पशो बाक्त। मिनु इसहाक नु यो थोक्शा लोत्र पशो बाक्त।  
 10 मेकोमी आ फुल्लुम मुशा ब्रेक्शो लोत्र याकूब कली गेशो बाक्त। मिनु मेको इस्राएल कली गेना हना लीब कबल बाक्ब।  
 11 मेकोमी “गो इ कली कनान रागी गेनुड। मेको इन के दुम्ब” देशो बाक्त। उत्पत्ती १२:७  
 12 मेना मेको आन कली हिक्शोनु, इच्का खोइ ला बाक्मा बाक्त। मिनु मेकेर अर्को रागी डा मुर यो बाक्मा बाक्त।  
 13 मेकोपुकी रागी का रे अर्को रागी नु राज्य का रे अर्को राज्य पा हिरना हिरन बाक्बाक्मा बाक्त।  
 14 परमप्रभुमी मेको आन कली सुइमी श्येत गेचा मगेमी बाक्त। मिनु मेको आन पबंम पिप आन कली हुइक्तीमी बाक्त। गन्ती २३:७-१०  
 15 मेकोमी “आं तेल लुक्शो आन कली मथिने। आं लोत्र पाइब आन कली मारेइ मपतीन” दे हुइक्तीमी बाक्त।  
 16 मिनु परमप्रभुमी मेको रागीमी अन्काल सोइश्शा, अन्न नेल्ल खतम सेल्शा, उत्पत्ती ४१:५४  
 17 मुर का कली मेको आन डोंइती सोइक्ता बाक्त। मेको योसेफ वाइल सेल्चा कली लेयचा पुंडसीशो बाक्त। उत्पत्ती ३७:२८  
 18 मिनु मेको कली आ खोइलीम साडलो पाइश्शा, आ शुरमी फलाम के साडलो पाइक्तमे बाक्त।  
 19 मिनु योसेफ आ लोत्र थमा मदुम सम्म, परमप्रभु यावेमी मेको कली वारच पवा बाक्त।  
 20 मिनु पिपमी मुर सोइश्शा, मेको कली प्रोना बाक्त। जात जात डा मुर आन कली सासन पाइबमी मेको कली प्रोना बाक्त। उत्पत्ती ४१:१४  
 21 मिनु मेकोमी योसेफ कली आ दरवार डा ठेयब मुर सेल्शा, आ शोंप नेल्ल आन होत्रप सेला बाक्त।  
 22 मिनु आ आइक्च हुकुम पाइब आन कली शेंचा नु खाल्पा आन कली तुइक्ब सेल्चा कली योसेफ कली चोदा बाक्त।  
 23 मिनु इस्राएल डा मुर इजीप्तमी ओत्रमा बाक्त। मिनु याकूब हाम आ रागीमी बाक्ब दुम्माक्त। उत्पत्ती ४६:१,७

- 24 मिनु परमप्रभु यावेमी आ मुर आन कली शुश सोशा बोशा सेल्मी बाक्त। मिनु मेको आन कली आन जोरी सनु आन क्येडा बोल्यो सेल्मी बाक्त। प्रस्थान १:७,१२
- 25 परमप्रभुमी इजीप्ती आन थुं इस्राएली आन कली काड मदाकब सेल्मी बाक्त। मिनु इस्राएली आन कली काड मरिम्शो पाइब सेल्मी बाक्त।
- 26 मिनु परमप्रभुमी आ योव्रशो गेय पाइब मोसा नु हारून आस कली मेकेर सोइक्ता बाक्त। प्रस्थान ३:१०; प्रस्थान ४:१४-१६
- 27 मेको निक्शीमी हाम आ रागी डा मुर आन दातेमी परमप्रभु आ चिन्ड नु छक लाक्चा डा गेय कौइदसे बाक्त। प्रस्थान ७:-१२:-
- 28 मेकोमी छिडछिड सोइक्ता बाक्त। मिनु मेकेर छिडछिड दुम्माक्त। तन्न मेकोपुकीमी मेको आ लोव्र मटीमे बाक्त।
- 29 मेकोमी मेको आन ब्वाक्कु हुश सेलानु, मेकेर डा डांइ नेल्ल बेक्मा बाक्त।
- 30 आन रागीमी कुक्कुपुकी जाक्शा, आन पिप आन बाक्तीके सम्म जाक्दीम्मा बाक्त।
- 31 परमप्रभुमी लोव्र पवानु, आन रागी भुस्ना नु चुरमुमी ब्रीमा बाक्त।
- 32 मेकोमी रेउ आ पा डा मुप्स यिपदा बाक्त। मिनु मेको रागी नेल्लेमी चिला दाप्पदा बाक्त।
- 33 मिनु मेकोमी आन अडगुर बोट नु फोव्रशी रवा नेल्ल खतम सेल्शा, रागी नेल्ल डा रवा फस पोक्गा बाक्त।
- 34 मेकोमी लोव्र पवानु, माले जाक्मा बाक्त। हिक्ने मचाप्चा डा पा माले नु आन चाइक्ब शुश जाक्मा बाक्त।
- 35 मेकोपुकीमी मेको रागी डा बाक्शो गिग नु फल फुल नेल्ल नेक्गमे बाक्त।
- 36 मिनु मेकोमी आन डोंइती थिशो तौ सदा बाक्त। आन डोंइती डा बोल डा आल खतम सेला बाक्त।
- 37 मिनु नोले परमप्रभुमी इस्राएली आन कली सुन चांदी कुरपाइश्शा मेक रे गुंडदीमी बाक्त। मिनु मेको रे यूब नेल्ल बोल्यो बाक्मा बाक्त। प्रस्थान १२:३५
- 38 मिनु इजीप्त रागी डा मुरपुकी इस्राएलीपुकी यूशा लमानु, शुश ग्येरसामा बाक्त। मारदे हना मेको आन कली तशा शुश हिंशो बाक्मा बाक्त।
- 39 मिनु परमप्रभुमी आ मुर आन कली सुम्चा कली गोस्स सोइक्ता बाक्त। मिनु नाक्दो गाक्चा कली मी के थाम गेमी बाक्त। प्रस्थान १४:२०
- 40 मेको आन पुंडतीके मेको आन कली चिक्ब गेमी बाक्त। मिनु सरीड रे जचा थोव्रक यिपदा बाक्त। प्रस्थान १६:१३-१५
- 41 मेकोमी सेरथे फुल्लु रे ब्वाक्क बुक्पदा बाक्त। मिनु मेको गोरशो रागीमी खोला खोदेंशो पा शांडसे बाक्त। प्रस्थान १७:६
- 42 मारदे हना परमप्रभुमी आ थोक्शा पशो लोव्र नु आ गेय पाइब, अब्राहाम कली मिम्ता बाक्त।
- 43 मोपा परमप्रभुमी आ योव्रशो मुर आन कली ग्येरपाइश्शा गुंडदीमी बाक्त। मिनु मेकोपुकी कुम्सो पा यूमा बाक्त।
- 44 मिनु परमप्रभुमी रागी रागी डा मुर आन रागी नु आन शोंप मेको आन कली गेमी बाक्त।
- 45 मेकोपुकीमी परमप्रभुमी फुल्लुम मुशा ब्रेक्शो लोव्र, आ अरेशो लोव्र टीमेक्ल, दे मोदेंशो पवा बाक्त। परमप्रभु यावे कली ठेयब सेलीन।

## 106

### ठेयब सेलतीके

- 1 परमप्रभु यावे कली ठेयब सेलीन। गेपुकीमी “गे रिम्शो पाइब बाक्नीनी” दे लोव्र पने। मारदे हना मेको रिम्शो पाइब बाक्ब। मिनु आ दाक्तीके गेना हना यो लीब। भजन संग्रह १००:४-५; प्रस्थान १०७:१; प्रस्थान ११८:१; १इतिहास १६:३४
- 2 सुमी परमप्रभु यावे आ सक्ति पाइश्शो गेय आ पबंम देंने चाप्बा डा? सुमी मेको कली ठेयब सेलतीक नेल्ल देंने चाप्बा डा? यूहन्ना २१:२५; हिब्रू ११:३२
- 3 सु सुमी ठीक पा निसाफ पाइनीमी नु गेना हना यो ठीक बाक्नीमी, मेको ग्येरसीशो मुर बाक्नीम।

4 परमप्रभु यावे, गे इन मुर आन कली शिशी पनी ना, आं कली यो मिम्तीन। मेको आन कली प्रोंडनीनु, आं कली यो वारच पन।

5 मिनु मोपा गो इन योव्रशो मुर आन रिम्शो पा बाक्शो तने चाप्नुड। मिनु इन मुर ग्येरसीशा बाक्शो तशा, ग्येरसीनुड। गो इन योव्रशो मुर दुम्शा ग्येरसीनुड।

6 गोपुकी नु आंड किकी पिपीम पाप पाइतक। गोपुकीमी मरिम्शो पा इन अरेशो लोव्र मटिक। दानीएल ९:५

7 इजीप्त रागीम बाक्शो आंड किकी पिपीम इन छक लाक्चा डा गेय ममिम्शो बाक्तेकम। मिनु इन शुश गेना हना यो दाक्तीके प्रेशो बाक्तेकम। मिनु लल समुन्द्रमी नेल्ल क्येडा ठेयब कली गाइशशा लोव्र पशो बाक्तेकम। प्रस्थान १४:११-१२

8 मोदेशो पाम्तेकम हना यो, परमप्रभुमी आ नें आ परबम मेको आन कली श्येत रे प्रोंडशो बाक्त। मोदेशो पा आ ठेयब सक्ति कोंडशो बाक्त।

9 मेकोमी लल समुन्द्र कली हुइक्तानु, सोव्रशो बाक्त। मिनु मेको आन कली गोरशो रागी खोदेशो पा, समुन्द्र डा लां रे खुल्शो बाक्त।

10 मिनु मेको आन कली आन जोरी सत्रु आन गुइ रे प्रोंडशो बाक्त। मोपा आ प्रोंडशो मुर दुम्शो बाक्तेकम।

11 मेको ब्वाक्कुमी आन जोरी सत्रु आन कली सुम्शा साइशशा, का यो मलीशो बाक्तेकम।

12 मिनु नोले आ देशो थमा सुइशशो बाक्तेकम। मिनु परमप्रभु कली ठेयब सेल्लतीक कुम्सो पशो बाक्तेकम। प्रस्थान १५:२१

13 तन्न मेकोपुकीमी परमप्रभु आ पशो रीब पा प्रेशो बाक्तेकम। मेको आ अर्ती नेंचा मबिश्शो बाक्तेकम।

14 मिनु मेकोपुकी गोरशो रागीम बाक्मानु, आन शोव्र रक सुइशशो बाक्त। मिनु परमप्रभु कली गोरशो रागीम नाक्शा कोव्रशो बाक्तेकम। गन्ती ११:४-६

15 मिनु परमप्रभुमी मेको आन पुंडशो गेशो बाक्त। तन्न मेको आन दातेमी बेक्तीक रोइ सोइशशो बाक्त।

16 मिनु मेकोपुकीमी परमप्रभु यावे रे पा योव्रसीशो मोसा नु हारून आस कली गेहे पशो बाक्तेकम। गन्ती १६:१-३

17 मिनु रागी जेशशा, दाथान कली दाक्शो बाक्त। मिनु अबीराम आ हुल कली सुम्शो बाक्त। गन्ती १६:३१-३५

18 मिनु मेको आन दातेमी मी यूशा, परमप्रभु आ अरेशो मपाइब आन कली ग्राव गु दाक्शो बाक्त।

19 मेकोपुकीमी होरेब डांडाम बाछा का सेल्शा, मेको मूर्ति कली पूजा पशो बाक्तेकम। प्रस्थान ३२:१-६

20 मेकोपुकीमी आन मान पशो परमप्रभु आ पा डा घांस ब्वाइब ब्यफ आ मूर्ति कली ठेयब सेल्शो बाक्तेकम। रोमी १:२३

21 मेकोपुकीमी आन कली श्येत रे प्रोंडब नु इजीप्तम ठेयब गेय पाइब आन परमप्रभु कली प्रेशो बाक्तेकम। ब्यवस्था ३२:१८

22 मेकोमी हाम आ रागीमी छक लाक्चा डा गेय नु लल समुन्द्र आ नेक्था शुश हिंचा डा गेय पशो बाक्त।

23 मोपतीके मेकोमी “मेको आन कली खतम सेल्लुड” दे मिम्शो बाक्त। तन्न आ योव्रशो मुर मोसामी “मेको आन कली मोदेशो मपचा” दे पुंडशो बाक्त। मिनु आ गाइशशो नाइशशो बाक्त। प्रस्थान ३२:११, ३२; ब्यवस्था ९:२५-२९; इजीकीएल १३:४-५

24 मिनु नोले मेकोपुकीमी परमप्रभु आ गेशो रागी मदाक्शो बाक्तेकम। आ थोक्शा पशो लोव्र थमा मसुइशशो बाक्तेकम। गन्ती १४:२-४; ब्यवस्था ८:७-१०

25 मेकोपुकीमी आन ताम्बुम गन गन पशो बाक्तेकम। मिनु परमप्रभु यावे आ देशो मटिशो बाक्तेकम।

26 मोपतीके मेको आन कली “गो इन कली गोरशो रागीम साइक्नुड।

27 मिनु इन चच युइ आन कली रागी रागीम फ्राइनुड” दे कसम जशो बाक्त।

२८ मिनू मेकोपुकीमी पेओर डा बाल कली पूजा पशो बाक्तेकम। मिनू बेक्शो मुर आन कली चढ़ेशो जशो बाक्तेकम। गन्ती २५:३

२९ मेकोपुकीमी आन पतीकेमी परमप्रभु कली गाइक्पाइश्शो बाक्तेकम। मिनू मेको आन दातेम बेक्तीक रोइ गूशो बाक्त।

३० मिनू फिनेहास बोक्शा परमप्रभु कली पुंड्रशो बाक्त। मिनू मेको मुर बेक्तीक रोइ नांडसीशो बाक्त। गन्ती २५:१२-१३

३१ मेको आ पुंड्रतीके इस्राएलीपुकीमी “फिनेहास ठीक पाइब बाक्ब” दे शुश पाला सम्म मिम्शो बाक्तेकम।

३२ मेकोपुकीमी मेरीबा डा ब्वाक्कु आ नेक्था परमप्रभु कली गाइक्पाइश्शो बाक्तेकम। मोपतीके मेको आन पबंम मोसा कली मरिम्शो दुम्शो बाक्त। गन्ती २०:२-१३

३३ मेकोपुकीमी मोसा कली गाइक्पदमेनु, मोसाम मरिम्शो लोत्र पशो बाक्त।

३४ मिनू मेकोपुकीमी परमप्रभु यावे आ देशो खोदेशो पा जात जात डा मुर आन कली मसदमे बाक्त। ब्यवस्था ७:१२; ब्यवस्था १२:२-३; न्यायाधीस १:२८; न्यायाधीस २:२३-३:६

३५ मेकोपुकीमी रागी रागी डा मीश आल आन कली ग्युबे पामे बाक्त। मिनू रागी रागी डा मुर आन पशो यो पामे बाक्त।

३६ मेकोपुकीमी मेको आन मूर्ति आन कली पूजा पामे बाक्त। मिनू मेको आन कली ग्याइल खोदेशो दुम्माक्त।

३७ मेकोपुकीमी आंम तमी तौ वोल आन कली चढ़ेमे बाक्त। २राजा २१:६, १६

३८ मेकोपुकीमी आन पाप मपशो तमी तौ आन कली कनानी आन मूर्ति कली चढ़ेशा, आन हुश जारदमे बाक्त। मेको आन हुशेमी मेको रागी ग्रांग्रा दिशो दुम्माक्त।

३९ मोपा मेको आन गेयम पतीके ग्रांग्रा दिशो दुम्शा, तेल्लेम खोदेशो दुम्मा बाक्त।

४० मोपतीके परमप्रभु यावे आ मुर नु गाइक्ता बाक्त। आ योत्रशो मुर आन कली तशा ग्रांग्रा दिमाक्त।

४१ मिनू मेकोमी मेको आन कली रागी रागी डा मुर आन गुइम गेमी बाक्त। मिनू मेको आन जोरी सत्रुम मेको आन कली सासन पामे बाक्त। न्यायाधीस २:१४

४२ मिनू आन जोरी सत्रुमी मेको आन कली दिप्शा, आन सक्तिम हुकुम पामे बाक्त।

४३ मिनू परमप्रभुमी मेको आन कली शुश खेयप प्रोइमी बाक्त। तन्न मेकोपुकीमी गेनायो परमप्रभु कली मटीमे बाक्त। मेको आन मरिम्शो पतीकेमी खतम दुम्मा बाक्त।

४४ तन्न परमप्रभुमी मेको आन डाक्शो नेंशा, आन श्येत जशो रे प्रोइमी बाक्त।

४५ मिनू मेकोमी मेको आन कली पशो कबल मिम्ता बाक्त। मिनू मेको आ गेना हना यो शुश दाक्तीक डा शिशी कोइदीमी बाक्त।

४६ मिनू परमप्रभुमी इस्राएली आन कली सासन पाइब आन थुमी शिशी पतीक कुर पवा बाक्त।

४७ मिनू गे “परमप्रभु यावे, आंइ परमप्रभु, आंइ कली प्रोनीन। मिनू इन कली ‘गे रिम्शो पाइब बाक्नीनी’ देंचा कली नु इन नें ठेयब सेल्शा ग्येरसीचा कली आंइ कली रागी रागी रे खुप्तीन। ब्यवस्था ३०:३; १इतिहास १६:३५

४८ परमप्रभु यावे, इस्राएली आन परमप्रभु गेना हना यो ठेयब बाक्ल। मिनू मुरपुकीमी ‘मोदेशो दुम्ल। आमेन’ देनीन” परमप्रभु यावे ठेयब बाक्ब। भजन संग्रह ४१:१४; १इतिहास १६:३६

## १०७

“गे रिम्शो पाइब बाक्नीनी” देशो

१ गे परमप्रभु यावे कली “गे रिम्शो पाइब बाक्नीनी” दे कुम्सो पने। मारदे हना मेको आ दाक्तीके गेना हना यो लीब। भजन संग्रह १०६:१

२ परमप्रभु यावेमी श्येत रे प्रोइचा पुंड्रसीशोपुकीमी मोपा कुम्सो पचा माल्नीम।

३ मेको आन कली रागी रागी रे खुप्ताक्मी। पूब, पच्छिम, उत्तर, दक्खिन नु ब्वाक्कु बुक्तीके रे नु ब्वाक्कु शाइक्तीक रे खुप्ताक्मी।

- 4 का निक्शी गोरशो रागी मेर हिरशा, मुर बाक्तीक सहर मथिदेम।  
 5 मेकोपुकी जचा तूचा मतथु बेक्चा चिक्ताक्मे।  
 6 मोपा श्येत जशा, परमप्रभु यावे कली पुंडतेक्म। मिनु मेकोमी मेको आन कली आन श्येत रे प्रोंडतु।  
 7 मेकोमी मेको आन कली पित्थ लाम खुल्लीमी। मिनु मुर बाक्तीक सहरम चाक्दीत्तीमी।  
 8 मेकोपुकीमी परमप्रभु यावे कली “गे रिम्शो पाइब बाक्नीनी” देंचा माल्नीम। मारदे हना मेकोमी मुर आन कली गेना हना यो दाक्शा, मेको आन कली वारच पा, छक लाक्चा डा गेय पाइब।  
 9 मेकोमी तूत दाक्ब आन कली तूपाइक्ब। मिनु शोत्रलु बेक्शो आन कली ब्रोत्रशो जचा थोत्रकमी रूपाइक्ब। लूकी १:५३  
 10 का निक्शी श्येत जशा छिडछिडम बाक्तेक्म। चोक्चा पुंडसीशोपुकी साडलोम पाइक्चा पुंडसीशा, श्येत जशो बाक्तेक्म।  
 11 मारदे हना मेकोपुकीमी परमप्रभु आ लोत्र मटिशो बाक्तेक्म। नेल्ल क्येडा ठेयब आ अर्ती मनेनेम।  
 12 मोपतीके मेकोपुकीमी शुश गेय पचा माल्तेक्म। मेकोपुकी गोल्तेक्म। तन्न मेको आन कली वारच पाइब सुड मबाक्म।  
 13 मोपा श्येत जशा, परमप्रभु यावे कली पुंडतेक्म। मिनु मेकोमी मेको आन कली आन श्येत रे प्रोंडतु।  
 14 मेकोमी मेको आन कली आन श्येत नु छिडछिड रे गुंडताक्मी। मिनु मेको आन साडलो प्रोडक्तु।  
 15 मेकोपुकीमी परमप्रभु यावे कली “गे रिम्शो पाइब बाक्नीनी” देंचा माल्नीम। मारदे हना मेकोमी मुर आन कली गेना हना यो दाक्शा, मेको आन कली वारच पा, छक लाक्चा डा गेय पाइब।  
 16 मेकोमी कांसा के लाप्चोपुकी प्रोल्ब। मिनु फलाम के बार जिक्व।  
 17 का निक्शी मूर्ख दुम्शा, आंम आन मरिम्शो पतीकेमी श्येत जाप्तेक्म।  
 18 मेकोपुकीमी जचा थोत्रक ग्रान्रा दिशा, मारेड जत मदाक्म। मिनु बेक्चा चिक्ताक्म।  
 19 मोपा श्येत जशा, परमप्रभु यावे कली पुंडतेक्म। मिनु मेकोमी मेको आन कली आन श्येत रे प्रोंडतु।  
 20 मेकोमी आ लोत्र सोडशशा, मेको आन कली सापाइक्तु। मेको आन कली बेक्चा रे प्रोंडतु।  
 21 मेकोपुकीमी परमप्रभु यावे कली “गे रिम्शो पाइब बाक्नीनी” देंचा माल्नीम। मारदे हना मेकोमी मुर आन कली गेना हना यो दाक्शा, मेको आन कली वारच पा, छक लाक्चा डा गेय पाइब।  
 22 मेकोपुकीमी “गे रिम्शो पाइब बाक्नीनी” दे चढेमेक्ल। मिनु परमप्रभु आ पशो नेल्ल ग्येरशा कुम्सो पा शेंदमेक्ल।  
 23 का निक्शी जहाज डोइशशा, समुन्द्रम लाम्तेक्म। मेकोपुकी ग्याप्ब लेयब दुम्शा, ठेयब समुन्द्रम गाक्तेक्म।  
 24 परमप्रभु यावेमी ठेयब समुन्द्रम मार मार छक लाक्चा डा गेय पवा, मेको ताम्तेक्म।  
 25 मिनु मेकोमी अरेशा, ठेयब फश गिवार पपाइक्तु। मिनु ठेयब समुन्द्र आ छाल पोक्तु।  
 26 मेकोपुकी सरीड सम्म जाक्दीत्तेक्म। मिनु लेंशा ठेयब समुन्द्रमी दोक्तेक्म। मिनु मेकोपुकी शुश हिंशा वाम ग्याम दुम्तेक्म।  
 27 मिनु मेकोपुकी दुक्शो मुर खोदेशो पा गोल्चा चिक्शा गाक्तेक्म। मिनु मारेड पने मचाप्ब दुम्तेक्म।  
 28 मोपा श्येत जशा, परमप्रभु यावे कली पुंडतेक्म। मिनु मेकोमी मेको आन कली आन श्येत रे प्रोंडतु।  
 29 मेकोमी फश गिवार दिक्पाइक्तु। मिनु ठेयब समुन्द्र आ छाल दिक्तेक्म।  
 30 मिनु फश गिवार दिक्मेनु, मेकोपुकी ग्येरसाक्म। मिनु मेकोमी मेको आन कली आन जहाज नाइक्तीकेम चाक्दीत्तु।  
 31 मेकोपुकीमी परमप्रभु यावे कली “गे रिम्शो पाइब बाक्नीनी” देंचा माल्नीम। मारदे हना मेकोमी मुर आन कली गेना हना यो दाक्शा, मेको आन कली वारच पा, छक लाक्चा डा गेय पाइब।  
 32 मेकोपुकीमी मुर आन गुम्तीकेमी परमप्रभु कली ठेयब सेल्मेक्ल। खाल्पा आन दातेमी “परमप्रभु ठेयब बाक्ब” देंमल।  
 33 मेकोमी खोला आन कली गोरशो रागी सेल्ब। ब्वाक्कु बुक्तीके आन कली सोत्रशो रागी दुम्पाइक्ब।

34 मेकोमी ग्रेलब रू कली हिकसी रू सेल्व। मारदे हना मेकेर बाकब मुर आ अरेशो मटीब बाकनीम। उत्पत्ती १९:२४-२५

35 मेकोमी गोरशो रागी कली दोम्ली बाकशो रागी सेल्व। मिनु थाम्पा सोत्रशो रागीम शुश ब्वाक्कु बुक्पाइक्व।

36 मेकेर शोत्रलु बेकशो मुर आन कली बाक्चा गेब। मिनु मेकोपुकीमी मेकेर बाक्तीक सहर सेल्नीम।

37 मेकोपुकीमी रूमी वांचेर शोक्नीम। अडगुर खुम्नीम। मिनु मेको नेल्ल शुश ग्रेल्नीम।

38 मेकोपुकी परमप्रभु आ आसीक तशा, सोशा बोशा दुम्नीम। मिनु आन बी ब्यफ आन कली यो शुश दुम्पाइक्व।

39 मिनु मेकोपुकी दिप्चा पुंडसीतीके नु श्येत जतीके शुश मलीशो बाक्तेक्म।

40 मिनु परमप्रभुमी मेकेर डा हुकुम पाइब आन कली लां मबाक्शो गोरशो रागीम गाक्पाइक्तीमी। अय्युब १२:२१

41 तन्न मेकोमी श्येत जाइब आन कली श्येत रे प्रॉइब। मिनु मेको आन खिं डा मुर आन कली भेडा आन हुल खोदेशो पा शुश सेल्व।

42 मिनु रिम्शो थुं पाइशो मुरपुकी मेको तशा, ग्येरसीनीम। मिनु परमप्रभु आ अरेशो मटीब कोत्रस डा कोत्रस दुम्शा ब्वाक्ने मचाप्नीम। अय्युब २२:१९-२०

43 सु जोक्ब तुइक्व बाक्मे, मेकोमी एको लोत्र रुबल। मिनु परमप्रभु यावे आ गेना हना यो दाक्तीके आ पर्वम मिन्तल।

## 108

### ठेयब सेल्टीक कुम्सो

दाऊद आ कुम्सो।

1 परमप्रभु, गो थमा सुइक्व दुम्ती। गो थमा पा इन नोले खोइक्व दुम्ती। गो ताप्तीक ताप्शा कुम्सो पाइनुड। आं थुं मुल सेंसो! भजन संग्रह ५७:८-१२

2 ठेयब तार पाइशो ताप्तीके नु बीना बोक्कीस। गो सुनी कली सेंपाइक्नुड।

3 परमप्रभु यावे गो जात जात डा मुर आन दातेमी इन कली “गे रिम्शो पाइब बाक्नीनी” देंनुड। मिनु रागी रागी डा मुर आन दातेमी इन कली ठेयब सेल्शा कुम्सो पाइनुड।

4 मारदे हना इन गेना हना यो दाक्तीक सरीड खोदेशो ठेयब बाक्ब। मिनु इन दाक्शा मप्रॉइतीके गोस्स खोदेशो पा इर डोन लाइब। भजन संग्रह ३६:६; भजन संग्रह ५७:११

5 परमप्रभु, गे सरीड क्येडा यो ठेयब बाक्नीनी। इन छेडछेड रागी नेल्ल आन तार बाक्ल।

6 मिनु इन सक्तिमी आंइ कली वारच पने। मिनु आं लोत्र लेत्तीनी। इन दाक्शोपुकी ब्रॉइमल। भजन संग्रह ६:७-१४

7 परमप्रभुमी आ बाक्तीक रे “गे ग्येरसीशा शेकेम कली योक्नुड। मिनु सुक्कोथ डा दिंम पुक्शा, योक्नुड।

8 गिलाद आं के बाक्ब। मिनु मनस्से यो आं केन बाक्ब। एफ्राइम आं फलाम के ताकी बाक्ब। यहूदा आं राज दन्ड बाक्ब।

9 मोआब आं ब्वाक्कु तेम्तीक बोस बाक्ब। गो एदोम तार आं जुता ब्वारनुड। गो पलिस्ती आन कली ग्राशा, ग्येरशा ग्रीनुड” देंत।

10 सुम आं कली गारो हिरशो सहर सम्म चाक्दीप्बा? सुम आं कली लां कोंइशा एदोम सम्म चाक्दीप्बा?

11 परमप्रभु गे आंइ कली प्रॉइतीनी। मुल गे आंइ लडाइ पाइब नु मगाक्नीनी।

12 गे आंइ जोरी सत्रु आन कली फुचा कली वारच पने। मारदे हना मुर आन वारच पशो शोर गाक्शो बाक्ब।

13 गो परमप्रभु आ वारच पशोम ला ग्रानीकी। मिनु मेकोमी आंइ जोरी सत्रु आन कली दिम्ब।



## 109

क्येक्क लेत्वा कली पुंडशो लोव

कुम्सो पपाइक्क कली दाऊद आ कुम्सो।

1 “परमप्रभु, गो इन कली ठेयब सेल्लुड। गे सिक्सी पा मबाक्कीन।

2 मारदे हना इन अरेशो मटीब नु जोल पाइबपुकीमी आं पर्वम जोल पा लोव पाइनीम।

3 मेकोपुकीमी आं कली काइ मदाक्थु, लोव पा, आं कली जिचा तोशा मोशा ग्राम्नीम।

4 मेकोपुकीमी आं दाक्शो आ पा डा, आं कली दोस गेनीम। मो हना यो गो मेको आन पर्वम पुंडुड।

5 मोपा मेकोपुकीमी आं रिम्शो पाइशो आ पा डा मरिम्शो पाइनीम। आं दाक्शो आ पा डा आं कली काइ मदाक्नीम।

6 मेकोपुकीमी मेको कली दोस गेचा कली परमप्रभु आ अरेशो मटीब का वोतीन। मेको कली दोस गेचा कली मेको आ ग्युरा गे राप्चा माल्ब। मत्ती ५:४३,४४; लूका २३:३४

7 मिनु मेको आ निसाफ दुम्मेनु, मेको दोस ताइब दुम्ल। मिनु मेको आ परमप्रभु कली पुंडतीक लोव पाप दुम्ल।

8 मेको आ ब्रोंडतीके नाक्त इक्का ला दुम्ल। मिनु मेको आ गेय अर्कोम पवल। प्रेरित १:२०

9 मेको आ तमी तौ रोम रोइक्क दुम्मल। मिनु मेको आ मीश वोंडश बेक्शो मीश दुम्ल।

10 मिनु आ तमी तौ हिरशा पुंडशा जाइब दुम्मल। मेको आन ब्रेशो खिं रे यो खेरचा पुंडसीमल।

11 मेको कली जेर गेबमी मेको आ मारेइ मारेइ नेक्गल। अरु मुरुमी मेको आ चेम्शो नेल्ल रोइक्कमेक्क।

12 सुइमी मेको कली शिशी मकोइदमेक्क। आ तमी तौ आन कली यो शिशी मपामेक्क।

13 मेको आ खिं डा मुर नेल्ल क्याम्सीमल। मिनु आ तमी तौ आन पालाम मेको आन नें क्याम्सेक्क। इजीकीएल १८:२०-२३

14 मिनु परमप्रभु यावेमी मेको आ किकी पिपी आन पशो पाप मिम्चा माल्ब। मेको आ ममा आ पशो पाप मक्याम्सेक्क। प्रस्थान २०:५

15 मेको आन पाप गेना हना यो परमप्रभु यावे आ डोंडती लील। मिनु सुइमी मेको आन कली रागीम ममिम्तमेक्क।

16 मारदे हना मेकोमी काइ शिशी मपव। तन्न पुडग, श्येत जाइब नु थुं लुक्क लशो मुर आन कली साइक्का कली खेदा पाप्तु।

17 मेकोमी सराप चीले पचा दाक्ताक्क। मिनु मेको सराप चीले रल। मेकोमी आसीक गेचा मदाक्क। मोपतीके आसीक मेको रे डोन बाक्क।

18 मेकोमी सराप चीले वा फेक्सीशो खोदेशो पा फेक्साक्क। सराप आ रांम ब्वाक्कु खोदेशो पा बाक्क। तेल खोदेशो पा मेको आ रुशेम ब्रील। गन्ती ५:२४

19 मेकोमी सराप चीले आ वा खोदेशो पा फेक्सेक्क। मिनु किप्शुर खोदेशो पा नाक्त किंत किंत किम्सेक्क।

20 परमप्रभु यावेमी आं कली दोस गेब नु आ पर्वम मरिम्शो लोव पाइब कली मोदेशो सजाइ गेवल।

21 तन्न परमप्रभु यावे, परमप्रभु, गे इन नें आ पर्वम आं कली वारच पाइय्यीनी। मारदे हना इन गेना हना यो दाक्तीके ठेयब बाक्क।

22 गो पुडग नु श्येत जाइब दुम्ती। मिनु आं थुं खाइशो बाक्क।

23 गो नां लाक्शो ना डा वांक्कु खोदेशो पा जाम्शो बाक्नुड। थुर थुर पाइशो सल्हा खोदेशो बाक्नुड।

24 गो माइजा बाक्डानु, आं खोइली योक्शो बाक्क। मिनु गेयशो बाक्नुड।

25 आं कली दोस गेबपुकी आ कली तशा गाइक्नीम। मिनु आन पिया हिम्नीम।

26 परमप्रभु यावे, आं परमप्रभु, वारच पाइय्यीनी। इन गेना हना यो दाक्तीकेमी आं कली प्रोंडय्यीनी।

27 मेकोपुकीमी ‘परमप्रभु यावेम आं कली वारच पाइब’ दे तुइक्कमेक्क।

28 मेकोपुकीमी सराप चीले पामेक्क। तन्न गे आसीक गेने। मेकोपुकी बोक्मानु, मुने दोक्कमल। तन्न इन गेय पाइब ग्येरसीब। लूका ६:२७-२८

29 आं कली दोस गेब आन कुल मुनेम सुम्सीमल। मिनु आन मुने दोक्तीके फेक्तीके वा खोदेशो पा फेक्सीमल।

30 गो परमप्रभु यावे कली 'गे थम रिम्शो पाइब बाक्नीनी' देनुड। शुश मुर आन दातेमी गो मेको कली ठेयब सेल्लुड" देती।

31 मारदे हना मेको श्येत जाइब आन कली साइक्ब आन गुइ रे प्रॉइशा वारच पाइब बाक्ब।

## 110

### परमप्रभुम पिप कली अधिकार गेब

दाऊद आ कुम्सो।

1 परमप्रभु यावेमी, आं परमप्रभु कली "गे आं ग्युरा गे निस्सो। मिनु गो इ जोरी सत्रु आन कली इ खोडल थेक्तीके सेल्लुडमी। मत्ती २२:४४; प्रेरित २:३४; हिब्रू १:१३; १कोरिन्थी १५:२५; फिलिप्पी २:८-११; हिब्रू १०:१२-१३

2 परमप्रभु यावेमी सियोन रे पा इन सक्ति डा राज दन्द दिब। मिनु गे इन जोरी सत्रु आन कली सासन पने" देंत। भजन संग्रह २:६

3 गे लडाइ पनी नाक्ती इन मुर आन थुंम ग्येरशा इन नोले खोइक्नीम। सुनी डा सीत खोदेशो पा इन रागी डा ठिटापुकी खुम्सीशा इन नेक्था जाक्नीम।

4 मिनु परमप्रभु यावेमी "गे मेल्लीसेदेक खोदेशो पा गेना हना यो चढेब दुम्नेवे" दे कसम जाप्तु। मेकोमी आ थुंमफाइक्ब। उत्पत्ती १४:१८-२०; हिब्रू ५:६, १०; हिब्रू ६:२०; हिब्रू ७:१७, २१

5 परमप्रभु इन ग्युरा गे बाक्ब। मेको गाइक्ता नाक्ती पिप आन कली खतम पोक्ब। भजन संग्रह २:२, ५, ९

6 मेकोमी रागी रागी डा मुर आन कली निसाफ पाइब। मिनु मेको आन रागी बेक्शो मुरुम प्रिब। मिनु बेक्शो मुर आन पिया रागी मेर फ्राइब। दानीएल २:४४

7 मेकोमी लां आ नेक्था डा खोला डा ब्वाक्कु तूब। मोपतीके मेको सक्ति पाइशशो दुम्शा ग्राब।

## 111

### परमप्रभु कली ठेयब सेल्लिक कुम्सो

1 परमप्रभु यावे कली ठेयब सेलीन। गो रिम्शो थुं पाइशशो मुर आन दातेमी आं थुं नेल्लेमी "परमप्रभु, गे रिम्शो पाइब बाक्नीनी" दे गुम्तीकेम देनुड।

2 परमप्रभु यावे आ गेय थम ठेयब बाक्नीम। सु सुम मेको कली दाक्नीमी, मेकोपुकीमी मेको शेसीनीम।

3 मेको आ गेय ठेयब नु मान पाइक्चा पुंइसीब बाक्नीम। मिनु परमप्रभु आ ठीक पतीके गेना हना यो लीब।

4 मेकोमी आ छक लाक्चा डा गेय मिम्पाइशशो बाक्ब। परमप्रभु यावे दाक्ब नु शिशि पाइब बाक्ब। प्रस्थान १२:१-२२

5 मेकोमी आ कली मान पा हिंब आन कली जचा गेब। मिनु आ पशो कबल गेना हना यो मिम्ब। भजन संग्रह १४५:१५

6 मेकोमी आ मुर आन कली रागी रागी डा मुर आन शोप गेशा, आ सक्ति कौइशो बाक्ब।

7 मेको आ गेय नेल्ल आ देशो खोदेशो नु ठीक बाक्नीम। आ अरेशा ब्रेक्शो लोत्र नेल्ल थमा सुइक्चा माल्शो बाक्नीम।

8 मेको गेना हना यो लीब बाक्नीम। मुरपुकीमी मेको मप्रॉइथु, आन थुं नेल्लेमी टिचा मालनीम।

9 मेकोमी आ मुर आन कली श्येत रे प्रॉइतु। मेकोमी आ पशो कबल गेनायो मक्याम्चा कली सेल्लो बाक्त। मेको आ नें का ला मान पा हिंचा डा बाक्ब।

10 परमप्रभु यावे कली मान पा हिंचा तुइक्ब दुम्चा कली गोतीक बाक्ब। मिनु सु सुमी मेको पाइनीमी मेको शुश रुब्ब दुम्नीम। परमप्रभु कली ठेयब सेल्लिके गेना हना यो लीब। हितोपदेस १:७

## 112

दाक्का मप्रॉइब आन ग्येरशो

- 1 परमप्रभु यावे कली ठेयब सेलीन। सु परमप्रभु यावे कली मान पा हिंबा, मेको ग्येरसीशो मुर बाक्ब। मेकोमी परमप्रभु आ शेंशो शुश दाक्ब। भजन संग्रह १:२; हितोपदेस २०:७
- 2 मेको आ चच युड रागीम ठेयब मुर दुम्नीम। रिम्शो थुं पाइश्शो मुर आन पाला आसीक राइनीम।
- 3 मेको आन खिंमी शोंप बाक्ब। मेको आन ठीक पतीके गेना हना यो लीब।
- 4 रिम्शो थुं पाइश्शो मुर छिडछिडम बाक्तेक्म हना यो, छेडछेड दुम्ब। मेको मुर आन कली दाक्ब, शिशो पाइब नु ठीक पाइब बाक्नीम।
- 5 हाइश्शो दुम्शा, गेब मुर आन कली रिम्शो दुम्ब। मेकोपुकीमी आन गेय ठीक पतीकेमी पाइनीम।
- 6 ठीक पाइबपुकी गेनायो मप्रेंसीनीम। मेको आन कली मिम्तीके गेना हना यो लीब।
- 7 मेको मरिम्शो लोव्र नेंशा, महिनीम। मेको आन थुं नेल्लेमी परमप्रभु यावे सक्ति पाइश्शो बाक्ब, दे तुडक्नीम।
- 8 मेको आन थुं ग्येत्थ लुकच मपथु, महिनीम। मिनु नोले आन जोरी सत्रु आन कली ब्रुशो ताइनीम। भजन संग्रह ९१:८
- 9 मेकोपुकीमी हाइश्शो थुं पा पुडग आन कली मार मार गेम्तेक्म। मेको आन ठीक पतीके गेना हना यो लीब। मेको मान ताइब बाक्नीम। २कोरिन्थी ९:९
- 10 मिनु परमप्रभु आ अरेशो मटीबपुकीमी मेको नेल्ल तशा आन थुं खुरसीनीम। मेको आन खुड शेष्शा, थाम्पा गाइक्नीम। मेको आन मिम्शो गेनायो मजाक्दीप्ब।

## 113

परमप्रभु आ मान ततीके

- 1 परमप्रभु यावे कली ठेयब सेलीन। परमप्रभु यावे आ गेय पाइबपुकी परमप्रभु यावे आ नें ठेयब सेलीन। गे “परमप्रभु यावे आ नें ठेयब बाक्ब” देनीन।
- 2 परमप्रभु यावे आ नें मुल रे गेना हना यो ठेयब सेल्मेक्ल।
- 3 नां दाप्तीक रे नां पेरतीक सम्म परमप्रभु यावे आ नें ठेयब सेल्चा मालनीम। भजन संग्रह ५०:१
- 4 परमप्रभु यावे रागी रागी डा नेल्ल आन क्येडा ठेयब बाक्ब। मेको आ छेडछेड स्वर्ग क्येडा यो इर बाक्ब।
- 5 परमप्रभु यावे, आंइ परमप्रभु खोदेशो अर्को सु बाक्बा डा? सु नेल्ल क्येडा इर निश्शो बाक्बा डा? प्रस्थान १५:११; यसेया ५७:१५
- 6 मेकोमी सरीड नु रागी कोल्लब।
- 7 मेकोमी पुडग आन कली फुरकुम निश्शो रे पोक्ब। मिनु श्येत जाइब आन कली ग्रोग्रा दितीक रे पोक्ब। १सामुएल २:८; लूका १:४८; उत्पत्ती ४१:४०-४१
- 8 मेको आन कली आ मुर आन ठेयब मुर नु निप्पाइक्का कली पोक्ब।
- 9 मिनु मेकोम आल मथीब मीश मुर आन कली ग्येरसीशो ममा सेल्ब। परमप्रभु यावे कली ठेयब सेलीन। उत्पत्ती २१:२ १सामुएल १:२०; लूका १:५७-५८

## 114

इस्साएलीपुकी इजीप्त रे ब्रॉइशो

- 1 इस्साएली इजीप्त रे ब्रॉइशा जाक्मानु, याक्ब आ खिं डा मुर अर्को जात डा लोव्र ब्वाक्तीक रे गूशा जाक्मानु, प्रस्थान १२:४१
- 2 यहूदा परमप्रभु आ बाक्तीक नु इस्साएल आ राज्य दुम्त।
- 3 मोदेशो दुम्शो तशा समुन्द्र प्रोक्त। यर्दन खोला दूली पा शाइक्त। प्रस्थान १४:२१-२२; यहोसु ३:१३, १६
- 4 डांडा बोका खोदेशो पा प्रेक्तेक्म। पहाड भेडा खोदेशो पा प्रेक्तेक्म।

- 5 समुन्द्र, गे मारदे प्रोकडे? यर्दन खोला, मारदे दूली गे शांडसे? यहोसु ४:२३-२४  
 6 डांडा गे मारदे बोका खोदेशो पा प्रेक्नी? पहाड गे मारदे भेडा खोदेशो पा प्रेक्नी?  
 7 रागी, परमप्रभु आ डोइती खिखि पावो। याकूब आ परमप्रभु आ डोइती खिखि पावो। प्रस्थान १९:१८  
 8 मेकोमी सेरथे फुल्लु कली फाइशशा, ब्वाक्कु देम्तीके सेल्लु। मिनु शेराल फुल्लु फाइशशा, ब्वाक्कु बुक्तीके सेल्लु। प्रस्थान १७:६

## 115

### परमप्रभु यावे ला परमप्रभु बाक्ब

भजन संग्रह १३५:१५-२०

- 1 परमप्रभु यावे, आंड कली ममाइ, इन नें ठेयब सेल्चा गेने। इन गेना हना यो दाक्तीके नु दाक्शा मप्रोइतीके आ पबर्म इन नें ठेयब सेल्चा मालशो बाक्ब।  
 2 रागी रागी डा मुरपुकीमी “मेको आन परमप्रभु ते बाक्म?” दे मारदे हिल्लो पाइनीमी? भजन संग्रह ४२:४  
 3 आंड परमप्रभु स्वर्गम बाक्ब। मेकोमी मार दाक्ता, मेको पाइब।  
 4 मेको आन मूर्तिपुकी मुर आन गुइम सेल्शो सुन नु चांदी के बाक्नीम। ब्यवस्था ४:२८; यसैया ४४:९-२०  
 5 मिनु मेको आन के शोत्र बाक्नीम, तन्न ब्वाक्ने मचाप्नीम। मिक्च बाक्नीम, तन्न तने मचाप्नीम।  
 6 मिनु मेको आन के नोफा बाक्नीम। तन्न नेंने मचाप्नीम। नें बाक्नीम, तन्न नाम्ने मचाप्नीम।  
 7 मेको आन के गुइ बाक्नीम, तन्न सुल्ने मचाप्नीम। खोइल बाक्नीम, तन्न गाक्ने मचाप्नीम। मेकोपुकीमी आन शोत्र रे मारिइ सेंदा गुंइने मचाप्नीम।  
 8 मेको आन कली सेल्ब यो मोदेशोन बाक्नीम। मिनु मेको आन कली थमा सुइक्ब यो मोदेशोन दुम्नीम।  
 9 गे इस्राएलीपुकी, परमप्रभु यावे कली थमा सुतीन। मेको इन कली वारच पाइब नु तेक्तीक बाक्ब।  
 10 हारून आ खिं डा मुरपुकी, परमप्रभु यावे कली थमा सुतीन। मेको इन कली वारच पाइब नु तेक्तीक बाक्ब।  
 11 सु सुम परमप्रभु यावे कली मान पा हिंशा, थमा सुइक्नीमी, मेको आन कली वारच पाइब नु तेक्तीक बाक्ब।  
 12 परमप्रभु यावेमी आंड कली मिम्ब। मिनु आसीक गेब। मेकोमी इस्राएल डा मुर आन कली आसीक गेब। मेकोमी हारून आ खिं डा मुर आन कली आसीक गेब।  
 13 मेकोमी परमप्रभु यावे कली मान पा हिंब आइक्च ठेयब नेल्ल आन कली आसीक गेब।  
 14 परमप्रभु यावेमी इन कली नु इन आल आन कली सोशा बोशा दुम्पदल।  
 15 सरीड नु रागी सेल्ब परमप्रभु यावेमी इन कली आसीक गेवल। भजन संग्रह १३४:३  
 16 स्वर्ग परमप्रभु यावे केन बाक्ब। तन्न रागी चहिं मुर आन कली गेशो बाक्ब।  
 17 बेक्शो मुर नु बेक्शो मुर आन बाक्तीकेम लाइबपुकीमी परमप्रभु यावे कली ठेयब मसेल्नीम। यसैया ३८:१८  
 18 तन्न गो दा मुल रे गेना हना यो परमप्रभु यावे कली ठेयब सेल्नीकी। परमप्रभु यावे कली ठेयब सेलीन।

## 116

### परमप्रभु कली ठेयब सेल्शो

- 1 गो परमप्रभु यावे कली दाक्नुड। मारदे हना मेकोमी आं पुंइशो नु ब्रेशो नेंशो बाक्ब।  
 2 मेकोमी आं लोत्र नेंतु। मोपतीके गो ब्रोंडडा सम्म मेको कली पुंइशा लोत्र पाइनुड।  
 3 गो बेक्चा चिक्शो बाक्ती। हेररा तुरसुम लाइक्चा पुंइसीशो बाक्ती। सुर्ता पतीके नु हिंतीके थुंम सुम्शो बाक्ती।

- 4 मेना गो परमप्रभु यावे आ नें थोशा “परमप्रभु यावे, आं कली ब्रोंडचा गेयीनी” दे पुंडता।  
 5 परमप्रभु यावे शिशी पाइब नु ठीक पाइब बाकब। आंइ परमप्रभु शुश दाकब बाकब।  
 6 परमप्रभु यावेम आइक्च थु पाइशो आन कली कोत्रब। आं थु लुक्च लमेनु, मेकोमी आं कली श्येत रे प्रोंइती।  
 7 आं थु लेंशा नांडसो। मारदे हना परमप्रभु यावेमी इ कली रिम्शो पाइशो बाकब। भजन संग्रह ४२:६  
 8 गे आं सोक्त कली बेक्चा रे प्रोंइती बाक्तीनी। आं कली डाक्तीक नु दाइल पाइक्तीक रे प्रोंइतीनी।  
 9 गो ब्रोंइती मुर आन बाक्तीक रागीमी परमप्रभु यावे आ डोंइती गाक्नुड। भजन संग्रह १४२:६  
 10 गो शुश श्येत जशा यो, आं थमा सुइक्तीक मप्रोनु।  
 11 गो सुर्ता पा श्येत जडानु “मुर नेल्ले जोल पाइब ला बाक्नीम” देंती। रोमी ३:४  
 12 परमप्रभु यावेमी आं कली गिश रिम्शो पाइय्यी, गो मेको आ पा डा मेको कली मार गेनुडा?  
 13 गो “गे आं कली श्येत रे प्रोंइतीनी” देंशा, परमप्रभु यावे आ नें थिशा, मेको कली ठेयब सेल्लुड।  
 14 गो परमप्रभु यावे आ डोंइती मुर आन दातेमी आं जशो कसम खाप्नुड।  
 15 परमप्रभु यावे आ मुर बेक्चा मेको कली थम ठेयब बाकब। भजन संग्रह ७२:१४  
 16 परमप्रभु यावे, गो इन गेय पाइब नड। गो इन गेय पाइब मीश मुर आ तौ, इन वाइल नड। गे आं कली बेक्तीक रे प्रोंइतीनी।  
 17 गो इन कली “गे रिम्शो पाइब बाक्नीनी” दे चढेतीक चढेनुड। मिनु परमप्रभु यावे, इन नें थिशा, इन कली ठेयब सेल्लुड। योना २:१०  
 18 गो परमप्रभु यावे आ मुर नेल्ल आन डोंइती आं जशो कसम खाप्नुड।  
 19 परमप्रभु यावे आ खिं डा लाडगा नु यरूसलेमम बाकबपुकी परमप्रभु यावे कली ठेयब सेलीन।

## 117

### परमप्रभु कली ठेयब सेलीन

- 1 रागी रागी डा मुर नेल्लेम परमप्रभु यावे कली ठेयब सेलीन। जात जात डा मुर नेल्लेम मेको कली मान पने! रोमी १५:११  
 2 मारदे हना परमप्रभु यावे आ गेना हना यो दाक्तीके नु आ दाक्शा गेनायो मप्रोंइतीके ठेयब बाकब। मिनु आ दाक्शा गेनायो मप्रोंइतीके गेना हना यो लीब। मोपतीके परमप्रभु यावे कली ठेयब सेलीन। प्रस्थान ३४:६

## 118

### ठेयब सेल्लुक् कुम्सो

- 1 परमप्रभु यावे कली “गे रिम्शो पाइब बाक्नीनी” देनीन। मारदे हना मेको रिम्शो पाइब बाकब। मिनु आ दाक्तीके गेना हना यो लीब। भजन संग्रह १०६:१  
 2 इस्राएलीपुकीमी “मेको आ दाक्तीके गेना हना यो लीब” देंमल।  
 3 हारून आ खिं डा मुरपुकीमी “मेको आ दाक्तीके गेना हना यो लीब” देंमल।  
 4 परमप्रभु यावे कली मान पा हिंबपुकीमी “मेको आ दाक्तीके गेना हना यो लीब” देंमल।  
 5 गो श्येत जडानु, परमप्रभु यावे कली पुंडता। मिनु मेकोमी आं लोत्र लेत्ताक्यी। मिनु आं कली श्येत रे प्रोंइती।  
 6 परमप्रभु यावे गो नु बाक्तीके गो महिनुड। मुरपुकीमी आं कली मार पाइक्ने चाप्नीमी डा? रोमी ८:३१; भजन संग्रह ५६:५; हिब्रू १३:६  
 7 परमप्रभु यावे गो नु बाक्शा, आं कली वारच पाइब बाकब। गो आं कली काइ मदाकब आन कली ग्राशा कोंइनुडमी।  
 8 मुर आन कली तशा “मेकोमी वारच पाइनीम” देंचा क्येडा परमप्रभु यावे नु फाम्सीचा रिम्शो बाकब। भजन संग्रह १४६:३

9 मिनु हुकुम पाइब मुर आन कली तशा “मेकोमी वारच पाइनीम” देंचा क्येडा परमप्रभु यावे नु फाम्सीचा रिम्शो बाक्ब।

10 रागी रागी डा मुर नेल्लेमी आं कली पुम्ताक्यीमी। तन्न गो परमप्रभु यावे आ नेमी नेल्ल आन कली खतम पोक्ताकमी।

11 मेकोपुकीमी आं कली तेइ तेइ रे पुम्ताक्यीमी। तन्न गो परमप्रभु यावे आ नेमी नेल्ल आन कली खतम पोक्ताकमी।

12 मेकोपुकीमी आं कली सुरबुम खोदेशो पा गिल्लीमी। मेकोपुकी चूम ब्रशो मी खोदेशो पा ब्राम्तेकम। तन्न गो परमप्रभु यावे आ नेमी मेको आन कली खतम पोक्ताकमी।

13 गो नेप्चा पुंडसीशा, गोल्चा चिक्शो नड। तन्न परमप्रभु यावेमी वारच पाइक्ती।

14 परमप्रभु यावे आं बोल नु सक्ति बाक्ब। मिनु मेको आं कली श्येत रे प्रॉइब दुम्शो बाक्ब। प्रस्थान १५:२

15 ठीक पाइब आन ताम्बुमी ग्येरशो नु ग्राशा कुम्सो पशो नेंसीब। परमप्रभु यावेमी सक्ति पाइश्शो गेय पाइब।

16 परमप्रभु यावेमी “गो ग्राती” दे आ ग्युरा गुइ पोक्शो बाक्ब। परमप्रभु यावेमी सक्ति पाइश्शो गेय पाइब।

17 गो मबेक्नुड, तन्न ब्रॉइशा बाक्शा, परमप्रभु यावे आ पशो नेल्ल शेनुडमी।

18 परमप्रभु यावेमी आं कली शुश सजाइ गेती। तन्न बेक्चा मगेयी। २कोरिन्थी ६:९

19 आं कली परमप्रभु यावे आ खिं डा लाप्चो रोक्कीन। मिनु गो ओव्रशा, परमप्रभु यावे कली “गे रिम्शो पाइब बाक्नीनी” देनुड।

20 एको परमप्रभु यावे आ लाप्चो बाक्ब। ठीक पाइबपुकी एको लाप्चो रे ओव्रनीम। यसैया २६:२

21 गे आं पुंडशो नेंशा, लोव्र लेत्ताक्यीनी। मोपतीके गो इन कली “गे रिम्शो पाइब बाक्नीनी” देनुड। गे आं कली श्येत रे प्रॉइब दुम्तीनी।

22 खिं सेल्बपुकीमी गारो प्रोव्रडमेनु “एको फुल्लु मगार” दे ताइक्तमे बाक्त। मिनु मेको मगारथु ताइश्शो फुल्लु चहिं जग डा सुरे फुल्लु दुम्माक्त। यसैया २८:१६; मत्ती २१:४२

23 मेको परमप्रभु यावेमी पशो बाक्ब। गो मेको तशा, छक लाक्नीकी।

24 परमप्रभु यावेमी मुलाक्ती डा नाक्ती सेल्शो बाक्ब। गोपुकी कुम्सो पा ग्येरसय।

25 परमप्रभु यावे आंइ कली श्येत रे प्रॉइकी। परमप्रभु यावे आंइ गेय रिम्शो दुम्ल।

26 परमप्रभु यावे आ नेमी जाक्ब आसीक रशो बाक्ब। गो परमप्रभु यावे आ खिं रे पा इन कली आसीक गेनीकी। मत्ती २१:९; मत्ती २३:३९

27 परमप्रभु यावे ला परमप्रभु बाक्ब। मेकोमी आ छेडछेड आंइ तार दाप्पाइश्शो बाक्ब। रवा आ राशी शेशा, ग्येरशा, चढेतीक आ ग्रोव्र ग्योम्दीन। प्रस्थान २७:१-२

28 गे आं परमप्रभु बाक्नीनी। गो इन कली “गे रिम्शो पाइब बाक्नीनी” देनुड। गे आं परमप्रभु बाक्नीनी। मिनु गो इन कली मान पा ठेयब सेल्नुड।

29 गे परमप्रभु यावे कली “गे रिम्शो पाइब बाक्नीनी” देनीन। मारदे हना मेको रिम्शो पाइब बाक्ब। मिनु आ दाक्तीके गेना हना यो लीब। भजन संग्रह १०६:१; भजन संग्रह १०७:१; भजन संग्रह ११८:१; भजन संग्रह १३६:१

## 119

परमप्रभु आ अरेशो लोव्र ठेयब सेल्शो

एको भजन संग्रह कली सुन के हिबू आकछेर यो देंनीम। मारदे हना मेको आ टुक्रा टुक्रा हिबू लोव्र डा आल्फाबेट रे पा गोइनीम। डोंइती डा टुक्रा आलेफ देंसीब, अध्याय नेल्ल आन डोंइती डा हिबू आकछेर लोव्रमी आलेफ बाक्ब।

आलेफ

1 सु सु रिम्शो पाइनीमी नु दोस मताइब बाक्नीमी, मेको ग्येरसीशो मुर बाक्नीम। मारदे हना मेकोपुकीमी परमप्रभु यावे आ अरेशो टिशो बाक्नीम। भजन संग्रह ११२:१-२

2 सु सुमी परमप्रभु आ देशो मिम्शा पाइनीमी नु आन थुं नेल्लेमी मेको कली माल्नीमी, मेकोपुकी ग्येरसीशो मुर बाक्नीम।

3 मेको मुरपुकी काइ मरिम्शो मपथु, परमप्रभु आ लांम गाक्नीम।

4 गे इन ब्रेक्शा अरेशो आंइ कली होस पा पचा कली गेशो बाक्तीनी।

5 गो गेना हना यो इन फुल्लुम मुशा ब्रेक्शो लोत्र पशा गाकडल।

6 गो इन शेंतीके नेल्ले होस पा पशो नड हना, मुने मदोक्ड वा।

7 गो इन निसाफ पतीक लोत्र शेंसाक्यी हना, इन कली रिम्शो थुंमी ठेयब सेल्ले चाप्नुड।

8 गो इन फुल्लुम मुशा ब्रेक्शो लोत्र टीनुड। आं कली काइ मप्रोइयीनी।

बेथ

9 टिटा वोंइश मुर दोपा हेंथे मपथु, आन लांम गाक्ने चाप्नीमी? मेको इन लोत्र टिशा ला मो पने चाप्नीम।

10 गो आं थुं नेल्लेमी इन कली माल्नुड। आं कली इन शेंतीके रे डोन लचा मगेयीनी।

11 गो मरिम्शो मपडल, दे इन लोत्र आं थुंम वोइशशो बाक्नुड।

12 परमप्रभु यावे, इन नें ठेयब बाक्ब। आं कली इन फुल्लुम मुशा ब्रेक्शो लोत्र शेंदीनी। भजन संग्रह ११९:२६, ६४, ६८

13 गो इन देशो पतीक लोत्र नेल्ल शेंनुडमी।

14 गो शुश शोंप तशा ग्येरसीशो मुर खोदेशो पा इन देशो लां तशा ग्येरसाक्यी।

15 गो इन ब्रेक्शा अरेशो मिम्ना मिम्न, इन लां कोत्रशा गाक्नुड।

16 गो इन फुल्लुम मुशा ब्रेक्शो लोत्र तुइशशा, ग्येरसाक्यी। इन लोत्र मप्रेंनुड।

गिमेल्

17 इन गेय पाइब कली रिम्शो पने। मिनु गो इन लोत्र टिशा ब्रोंइडल।

18 गे आं कली मिक्च ताइब सेल्यीनी। मोपा गो इन अरेशो लोत्र डा छक लाक्चा डा गेय तने चबुल।

19 गो रागीम पौना का बाक्नुड। गे इन शेंतीके लोत्र आं मतुइक्चा डा पा मखुइक्तीन। भजन संग्रह ३९:१३

20 आं थुं गेना हना यो इन पतीक लोत्र तुइक्चा कली माल्स डा माल्स बाक्ब।

21 गे इन शेंशो प्रोंइब ठेयब लेशो नु सराप रशो मुर आन कली हुइक्नीनी। ब्यवस्था २७:२६; गलाती ३:१०

22 गे मेको आन शुक्शी पतीके नु दोस गेतीके आं क्येडा डोन वोतीन। मारदे हना गो इन देशो टीब मुर बाक्ती।

23 मिनु सासन पाइबपुकी बुक्शा, आं कली मरिम्शो पाइक्चा कली लोत्र गारपाइक्नीम। मो हना यो गो, इन गेय पाइबमी, इन फुल्लुम मुशा ब्रेक्शो लोत्र मिम्स डा मिम्स बाक्नुड।

24 इन देशो लोत्र आं थुं ग्येरपाइक्ब नु आं कली अर्ती गेब बाक्नीम।

दालेथ

25 आं थुं लुक्च लशो बाक्ब। इन लोत्र पतीकेमी आं थुं बारपाइय्यीनी।

26 गो इन कली आं पशो तुइक्पाइक्तन्नी। मिनु गे आं लोत्र लेत्ताक्नी। इन फुल्लुम मुशा ब्रेक्शो लोत्र शेंदीनी।

27 गे इन ब्रेक्शा अरेशो लोत्र रुप्पाइय्यीनी। मिनु गो इन छक लाक्चा डा गेय मिम्स डा मिम्स बाक्नुड।

28 आं थुं सुर्ता पा लुक्च लत। इन लोत्र पतीकेमी आं कली ब्रोंइचा गेयीनी।

29 दली लां आं क्येडा डोन वोतीन। मिनु गे शिशी पा इन अरेशो लोत्र शेंदीनी। भजन संग्रह ११९:१०४, १२८

30 गो इन कली मप्रोंइतीक लां योत्रता। गो इन पतीक लोत्र आं डोंइती वोइक्ता।

31 परमप्रभु यावे, गो इन देशो थमा पा पाइनुड। आं कली मुने मदोकपाइय्यीनी।

32 गो इन शेशो पना पन बाक्ती। मिनु गे आं रुप्तीक थुं बारपाइक्नीनी।

हे

33 परमप्रभु यावे, इन फुल्लुम मुशा ब्रेकशो लोव्र शेंदीनी। मिनु गो मेको नोले सम्म मप्रोंडनुड।

34 गो आं कली रुप्तीक थुं गेयीनी। मिनु गो इन अरेशो लोव्र आं थुं नेल्लेमी पाइनुड।

35 इन शेंतीके लांम गाकपाइय्यीनी। मारदे हना गो मेको कली दाक्नुड।

36 आं थुं कली इन देशो ला मिम्पतीन। शुश क्येट चेम्तीके ममिम्पतीन।

37 मरिम्शो थोव्रक मकोव्रपाइय्यीनी। इन दाक्चा डा पा ब्रोंडचा गेयीनी।

38 गो इन गेय पाइब कली इन थोकशा पशो लोव्र खाप्पीन। इन थोकशा पशो लोव्र इन कली मान पा हिंब आन कली बाक्ब।

39 हिंचा डा शुक्शी पाइक्चा पुंडसीतीक आं क्येडा डोन वोतीन। मारदे हना इन पतीक लोव्र रिम्शो बाक्नीम।

40 इन ब्रेकशा अरेशो लोव्र शुश दाक्नुड। इन निसाफ पतीकेमी आं कली ब्रोंडचा गेयीनी।

चाव

41 परमप्रभु यावे, इन गेना हना यो दाक्तीक आं कली दुम्ल। इन थोकशा पशो लोव्र खोदेशो पा आं कली श्येत रे प्रोंडयीनी।

42 मिनु गो आं कली शुक्शी पाइब आन कली लोव्र लेन्ने चाप्नुड। मारदे हना गो इन लोव्र थमा सुइक्नुड।

43 गो इन थमा लोव्र पचा कली मतेकयीनी। मारदे हना गो इन पतीक लोव्र आस पा बाक्नुड।

44 गो इन अरेशो लोव्र थमा पा गेना हना यो टीनुड।

45 मिनु गो सुइ क्येडा महिंथु बाक्नुड। मारदे हना इन ब्रेकशा अरेशो लोव्र माल्ता।

46 गो पिप आन डोंइती इन देशो लोव्र आ पबंम लोव्र पाइनुड। मिनु मुने मदोक्नुड। मती १०:१८

47 गो इन शेंतीके तुइश्शा ग्येरसीनुड। मारदे हना गो मेको कली दाक्नुड।

48 गो इन शेशो लोव्र ठेयब सेल्चा दाक्नुड। मोपा इन फुल्लुम मुशा ब्रेकशो लोव्र मिम्ना मिम्न बाक्नुड।

चायीन

49 इन गेय पाइब कली पशो लोव्र मिम्तीन। आं कली मेको आ लां कोव्रपाइय्यीनी।

50 गो श्येत जडानु, इन थोकशा पशो लोव्रमी आं कली लेम्शा ब्रोंडचा गेब।

51 ठेयब लेशशो मुरुमी आं कली शुश शुक्शी पाइनीम। तन्न गो इन अरेशो लोव्र मप्रोंडनुड।

52 परमप्रभु यावे, गो इन साइ डोंइती डा पतीक लोव्र मिम्शा, आं थुं नाइक्नुड।

53 इन अरेशो लोव्र प्रोंडब मुर आन पबंम गो गाइश्शा चुरशा बाक्ती।

54 गो ते बाक्ती हना यो, इन फुल्लुम मुशा ब्रेकशो लोव्र आं कुम्सो दुम्शो बाक्तेकम।

55 परमप्रभु यावे, गो नाक्दो इन कली मिम्शा, इन अरेशो लोव्र पाइनुड।

56 गो आसीक राइब दुम्ती। मारदे हना गो इन ब्रेकशा अरेशो लोव्र टिशा बाक्ती।

हेथ

57 परमप्रभु यावे, गे आं परमप्रभु बाक्नीनी। गो इन लोव्र टिना टिन बाक्नुड।

58 गो आं थुं नेल्लेमी इन कली पुंडता। इन थोकशा पशो लोव्र खोदेशो पा, आं कली शिशी पाइय्यीनी।

59 गो इन पतीके मिम्शा, इन देशो लोव्र डा लांम गाक्नुड।

60 गो इन शेंतीके रीब पा टीनुड। गो देश मपाइनुड।

61 इन अरेशो लोव्र मटीबपुकीमी आं कली फ्रेंताक्यीमी हना यो, गो इन अरेशो लोव्र मप्रेंनुड।

62 गो नाक्दो बोक्शा, इन निसाफ पतीक लोव्र आ पबंम इन कली ठेयब सेल्नुड। भजन संग्रह ४२:९

63 गो इन कली मान पा हिंब नु इन ब्रेकशा अरेशो लोव्र टीब आन वारच नड।

64 परमप्रभु यावे, रागी इन गेना हना यो दाक्तीकेमी ब्रीशो बाक्ब। इन फुल्लुम मुशा, ब्रेकशो लोव्र शेंदीनी।



### टैथ

- 65 परमप्रभु यावे, इन लोत्र खोदेंशो पा गे इन गेय पाइब कली रिम्शो पाइक्तीनी।  
 66 आं कली रुक्ब नु तुइक्ब सेलीन। मारदे हना गो इन शेंतीके थमा सुइक्नुड।  
 67 गो श्येत जचा क्येडा डोंइती हेंथे लां खोइश्शो नड। तन्न मुल इन लोत्र टीनुड।  
 68 गे रिम्शो पाइब नु दाक्ब बाक्तीनी। मोपतीके आं कली इन फुल्लुम मुशा, ब्रेक्शो लोत्र शेंदीनी।  
 69 टैयब लेश्शो मुरपुकीमी आं पर्वमी जोल पाइनीम। गो चहिं आं थुं नेल्लेमी इन ब्रेक्शा अरेशो लोत्र पना पन बाक्नुड।  
 70 मेको आन थुं थांइशो बाक्ब। तन्न गो इन अरेशो लोत्र तुइश्शा ग्येरसीशो बाक्नुड।  
 71 गे आं कली श्येत जपाइक्तीनी, मेको रिम्शो बाक्त। मोपा इन फुल्लुम मुशा ब्रेक्शो लोत्र शेंसाक्वी।  
 72 मिनु हजार हजार टुक्रा सुन चांदी क्येडा इन अरेशो लोत्र आं कली रिम्शो बाक्ब।

### योध

- 73 गे आं कली सेल्टीनी। मिनु इन शेंशो लोत्र शेंसीचा कली रुप्तीक थुं गेयीनी।  
 74 इन कली मान पा हिंबपुकी आं कली तशा ग्येरसीनीम। मारदे हना गो इन लोत्र डा लां कोवना कोव्रन बाक्नुड।  
 75 परमप्रभु यावे, इन निसाफ पतीके ठीक बाक्तीनीम। गो मेको तुइक्नुड। गे आं कली इन दाक्शा मप्रोंइतीकेमी श्येत गेतीनी।  
 76 इन गेय पाइब, आं कली इन गेना हना यो दाक्तीकेमी इन थोक्शा पशो लोत्र खोदेंशो पा लेम्दीनी।  
 77 गे आं कली शिशी पाइतीनी हना, गो ब्रोंइनुड। मारदे हना इन अरेशो लोत्र तुइश्शा, ग्येरसाक्वी।  
 78 टैयब लेश्शो मुर मुने दोक्मल। मारदे हना मेकोपुकीमी आं कली मो दिम्ताक्वीमी। गो चहिं इन अरेशा ब्रेक्शो लोत्र मिन्ना मिन्म बाक्नुड।  
 79 इन कली मान पा हिंब आं नेक्था जाक्मल। मोपा इन देंशो लोत्र रूप्मेकल।  
 80 गो इन फुल्लुम मुशा ब्रेक्शो लोत्र पशा दोस मतडल। मोपा मुने मदोक्डल।

### काफ

- 81 गो आं श्येतम इन प्रोंइतीक शुश माल्नुड। मिनु गो इन लोत्र डा लां कोवना कोव्रन बाक्नुड।  
 82 गो इन थोक्शा पशो लोत्र शुश रिम्ना रिम्न बाक्नुड। मिनु “आं कली गेना लेम्नीनी?” दे हिल्लो पाइनुड।  
 83 मारदे हना गो कुनम वोइश्शो कुशुल के थैलो खोदेंशो बाक्नुड। मो हना यो गो इन फुल्लुम मुशा ब्रेक्शो लोत्र मप्रेंदु।  
 84 गो, इन गेय पाइब, दोशो सम्म फाल्चा माल्नुडा? गे आं कली खेदा पाइब आन कली गेना निसाफ पाइनीनी?  
 85 टैयब लेश्शोपुकीमी आं कली खाल्टा दोम्तेक्म। मेकोपुकी इन अरेशो काइ मपाइब बाक्तीनी।  
 86 इन शेंतीके नेल्ले गेना हना यो लीनीम। मिनु मेकोपुकीमी आं कली मोशा खेदा पाइनीम। आं कली वारच पाइय्यीनी।  
 87 मेकोपुकीमी आं कली रागी रे हेररा क्याम्ताक्वीमी। गो चहिं इन ब्रेक्शा अरेशो लोत्र मप्रोनु।  
 88 इन गेना हना यो दाक्तीकेमी ब्रोंइपाइय्यीनी। मोपा गो इन देंशो टिना टिन बाक्नुड।

### लामेध

- 89 परमप्रभु यावे गेना हना यो बाक्ब। इन लोत्र स्वर्गम वोइश्शो बाक्ब। यसैया ४०:८  
 90 इन मुर आन कली दाक्शा मप्रोंइतीके पाला पाला सम्म लीब। गे रागी सेल्शा वोइक्तीनी। मिनु मेको महिम्सीब।  
 91 इन लोत्र पतीकेमी मेको महिम्सीब। मारदे हना नेल्लेमी इन लोत्र टीनीम।  
 92 इन अरेशो लोत्रम आं कली मग्येरपाइश्शो हना, गो आं श्येतम बेक्ड वा। येरमीया १५:१६  
 93 गो इन अरेशा ब्रेक्शो लोत्र गेनायो मप्रेंनुड। मारदे हना गे मेको आ पतीकेमी आं कली ब्रोंइपाइक्तीनी।  
 94 गो इन मुर नड। आं कली प्रोंइयीनी। मारदे हना गो इन ब्रेक्शा अरेशो लोत्र माल्ता।

95 इन अरेशो लोत्र मटीबपुकीमी आं कली साइक्चा कली बाप्शो बाकनीमी। गो चहिं इन देशो मिम्शा बाकनुड।

96 मुरुमी नेल्ल क्येडा रिम्शो मारेड सेलने मचाप्नीम। गो मेको तुडक्नुड। तन्न इन शेंशो लोत्र नेल्ल क्येडा रिम्शो बाक्ब।

### मेम

97 गो इन अरेशो लोत्र शुश दाक्नुड। गो नाक्त कित कित मेको आ पर्वम मिम्नुड। भजन संग्रह १:२

98 गो इन शेंशो लोत्रम आं जोरी सत्रु आन क्येडा आं कली तुडक्ब सेल्लब। मारदे हना मेको गेना हना यो गो नु बाक्ब।

99 मिनु आं कली शेंब आन क्येडा गो जोक्ब तुडक्ब दुम्ती। मारदे हना इन देशो मिम्ना मिम्न बाक्ती।

100 गो खाल्पा आन क्येडा यो जोक्ब तुडक्ब दुम्ती। मारदे हना इन ब्रेक्शा अरेशो लोत्र टिना टिन बाक्नुड।

101 गो इन लोत्र टिचा कली मरिम्शो लां मखोइक्थु बाक्नुड।

102 गो इन देशो पतीक लोत्र रे डोन म्लड। मारदे हना गे आं कली शेंताक्यीनी।

103 इन देशो लोत्र ब्रोत्रशो बाक्ब। मेको खुदो क्येडा यो जिजी बाक्ब।

104 इन ब्रेक्शा अरेशो लोत्र रे रुप्व दुम्ती। मोपतीके गो दूली पतीक नेल्ल काइ मदाक्नुड। भजन संग्रह ११९:२९

### नुन

105 इन लोत्र आं खोइली कली छेडछेड बाक्ब, आं लां तचा कली रांको खोदेशो बाक्ब। २पत्रुस १:१९

106 गो इन निसाफ पतीक लोत्र पाइनुड, दे कसम जशा खाप्ता।

107 परमप्रभु यावे, गो शुश श्येत जाइनुड, इन लोत्रम देशो खोदेशो पा आं कली ब्रोइचा गेयीनी।

108 परमप्रभु यावे, गो इन कली टेयब सेल्लो, चढेतीक खोदेशो पा ब्रने। मिनु आं कली इन पतीक लोत्र शेदीनी। भजन संग्रह १९:१५

109 गो गेना हना यो बेक्चा चिक्शा बाक्ती। मो हना यो गो इन अरेशो लोत्र मप्रेंनुड।

110 इन अरेशो लोत्र मटीबपुकीमी आं कली व्वारद दाइशो बाकनीम। मो हना यो इन ब्रेक्शा अरेशो लोत्र मप्रोंइनुड।

111 इन देशो लोत्र गेना हना यो आं शोंप बाक्ब। मारदे हना मेकोमी आं थुं शुश ग्येरपाइक्ब।

112 गो इन फुल्लुम मुशा ब्रेक्शो लोत्र मबेक्डा सम्म पाइनुड, दे आं थुं फ्रेंशा बाक्ती।

### सामेख

113 गो थुं निकशी पाइशो मुर आन कली काइ मदाक्नुड। मिनु इन अरेशो लोत्र दाक्नुड। भजन संग्रह ३१:७; १राजा १८:२१

114 गो आं खुडक्तीक नु तेक्तीक बाकनीनी। गो इन लोत्र डा लां कोव्रना कोव्रन बाक्नुड।

115 गो आं परमप्रभु आ शेंतीके पने चबुल, गे मरिम्शो पाइबपुकी, आं क्येडा डोन लने।।

116 इन थोक्शा पशो लोत्र खोदेशो पा आं कली ब्रोइचा गेयीनी। मिनु गो इन लां कोव्रशा, मुने मदीक्डल।

117 आं कली प्रोंइचा कली वारच पाइय्यीनी। गो गेना हना यो इन फुल्लुम मुशा ब्रेक्शो लोत्र दाक्नुड।

118 इन फुल्लुम मुशा ब्रेक्शो लोत्र डा लां रे हेंथे गाक्ब नेल्ल आन कली तिल्लीनी। मारदे हना मेको आन लां जोल बाक्त।

119 रागी डा इन अरेशो मटीब नेल्ल आन कली पुलु खोदेशो पा फिक्तीनी। मोपतीके गो इन देशो लोत्र दाक्नुड। यसैया १:२५

120 गो इन कली मान पा हिंशा खिंखि पाइनुड। मिनु गो इन निसाफ पतीक मिम्शा हिंनुड।

### आयीन

121 गो टीक निसाफ पाता। आं कली दिप्ब आन कली जिम्मा मगेयीनी।

122 इन गेय पाइब कली वारच पा, रिम्शो पने। इन कली मटीबपुकीमी आं कली दिप्चा मगेने।

- 123 गो इन प्रोंइतीक नु इन ठीक निसाफ पा पशो लोव्र कली शुश कोव्रशा रिम्नुड।  
 124 इन गेय पाइब कली इन गेना हना यो दाक्तीकेमी वारच पने। मिनु आं कली इन फुल्लुम मुशा ब्रेक्शो लोव्र शेंदीनी।  
 125 गो इन गेय पाइब नड। आं कली रुप्तीक थुं गेयीनी। मोपा गो इन देंशो रुप्ने चबुल।  
 126 परमप्रभु यावे, इन गेय पची ना दुम्शो बाक्ब। मारदे हना मुरपुकीम इन अरेशो लोव्र मटीम।  
 127 गो सुन नु क्येख सुन क्येडा इन शेंतीके दाक्नुड।  
 128 मोपतीके गो आं लां नेल्लेमी इन ब्रेक्शा अरेशो लोव्र मिम्नुड। मिनु दूली लां नेल्ल काइ मदाक्नुड।  
 भजन संग्रह ११९:२९

पे

- 129 इन देंशो लोव्र शुश रिम्शो बाक्नीम। मोपतीके गो मेको टिना टिन बाक्नुड।  
 130 इन लोव्र नेंशोनु, रुप्तीक थुं गेब। मतुइक्ब आन कली तुइक्ब सेल्ब।  
 131 गो ब्वाक्कु तूतू दाक्शो खोदेंशो पा इन शेंशो लोव्र माल्ना माल्न बाक्नुड।  
 132 गे आं गे लेश्शा शिशी पने। इन नें दाक्ब आन कली शिशी पशो खोदेंशो पा आं कली यो शिशी पने।  
 133 आं कली इन थोक्शा पशो लोव्र डा लां गाक्पाइय्यीनी। मरिम्शो पतीकेम आं कली हुकुम पचा मगेने।  
 134 आं कली मुर आन दिप्तीक रे प्रोंइयीनी। मिनु गो इन ब्रेक्शा अरेशो लोव्र पने चबुल।  
 135 इन कुल इन गेय पाइब तार नां खोदेंशो पा ब्रपतीन। मिनु इन फुल्लुम मुशा ब्रेक्शो लोव्र आं कली शेंदीनी।  
 136 गो डाक्नुड। मारदे हना मुरपुकीमी इन अरेशो लोव्र मटीम।

चाधे

- 137 परमप्रभु यावे, गे रिम्शो पाइब बाक्नीनी। मिनु इन पशो निसाफ ठीक बाक्नीम।  
 138 गे इन देंशो लोव्र ठीक निसाफ पतीकेमी वोइक्तीनी। गो मेको कली थमा सुइक्नीकी।  
 139 गो चुरना चुरन बाक्नुड। मारदे हना आं कली खेदा पाइबपुकीमी इन लोव्र प्रेंताक्म। भजन संग्रह ६९:१०  
 140 इन थोक्शा पशो लोव्र शुश रिम्शो बाक्ब। मिनु गो, इन गेय पाइबमी मेको दाक्नुड।  
 141 गो आइक्च बाक्नुड। आं कली सुइमी महिक्नीम। मो हना यो गो इन ब्रेक्शा अरेशो लोव्र मप्रेंनुड।  
 142 इन निसाफ पतीके गेना हना यो ठीक बाक्ब। मिनु इन अरेशो लोव्र थमा लोव्र बाक्ब।  
 143 गो हिंती नु श्येत जाइब दुम्ती हना यो, इन शेंतीकेम आं कली ग्येरपाइक्ब।  
 144 इन देंशो गेना हना यो ठीक बाक्नीम। आं कली रुप्तीक थुं गेतीनी हना, गो ब्रोंइनुड।

क्वोफ

- 145 गो आं थुं नेल्लेमी इन कली पुंइनुड। परमप्रभु यावे आं लोव्र लेत्तीनी। गो इन फुल्लुम मुशा ब्रेक्शो लोव्र टिना टिन बाक्नुड।  
 146 गो इन कली “गे आं कली श्येत रे प्रोंइयीनी” दे पुंइनुड। मिनु गो इन देंशो पाइनुड।  
 147 गो नां मदाप्थु बोक्शा, इन कली “वारच पाइय्यीनी” दे पुंइनुड। गो इन लोव्र डा लां कोव्रना कोव्रन बाक्नुड।  
 148 गो इन थोक्शा पशो लोव्र मिम्चा कली नाक्दो सेंना सेंन बाक्ती।  
 149 इन गेना हना यो दाक्तीकेमी आं पुंइशो नेनीन। परमप्रभु यावे, इन निसाफ पतीकेमी आं कली ब्रोंइचा गेयीनी।  
 150 आं कली खेदा पाइबपुकी आं कली साइक्चा कली आं नेक्था जाक्नीम। मेकोपुकी इन अरेशो लोव्र रे डोन बाक्नीम।  
 151 तन्न परमप्रभु यावे, गे आं नेक्था बाक्नीनी। इन शेंशो लोव्र नेल्ल थमा बाक्ब।  
 152 गो डोंइती रे इन देंशो लोव्र पढेशा, मेको गेना हना यो कली सेल्शो बाक्ब, दे तुइक्ताक्ड।

रेश

153 आं श्येत जशो कोव्रडीन, गो श्येत जाइनुड। मिनु आं कली प्रोंइयीनी। मारदे हना गो इन अरेशो लोव्र मप्रेंदु।

154 गे आं निसाफ पाइब दुमीन। मिनु आं कली प्रोंइयीनी। इन थोकशा पशो लोव्र खोदेशो पा ब्रोंइचा गेयीनी।

155 इन अरेशो लोव्र मटीब आन कली गे श्येत रे मप्रोंइनीनी। मारदे हना मेकोपुकीमी इन फुल्लुम मुशा ब्रेकशो लोव्र पचा ममलेम।

156 परमप्रभु यावे, इन शिशी ठेयब बाक्ब। इन निसाफ पतीक लोव्र खोदेशो पा आं कली ब्रोंइचा गेयीनी।

157 आं कली खेदा पाइब नु आं जोरी सत्रु शुश बाक्नीम। मो हना यो गो इन देशो लोव्र मप्रोनु।

158 मेको नोले शोंइसीशो आन कली तशा ग्रोंग्रा दीती। मारदे हना मेकोपुकीमी इन शेंशो टिचा प्रोंइतेक्म।

159 गो इन ब्रेकशा अरेशो लोव्र दाक्नुड, दे मिम्तीन। परमप्रभु यावे, इन गेना हना यो दाक्तीकेमी आं कली ब्रोंइचा गेयीनी।

160 इन लोव्र नेल्ले थमा बाक्ब। मिनु इन निसाफ पतीक लोव्र गेना हना यो ठीक बाक्नीम। यूहन्ना १७:१७

सिन नु शिन

161 ठेयब मुरपुकीमी आं कली बिल्चीम खेदा पाइनीमी। तन्न आं थुं इन लोव्र क्येडा हिंब।

162 गो शुश शोंप तशा, ग्येरसीचा क्येडा इन लोव्र तशा ग्येरसाक्यी।

163 दूली पतीके नु जोल पतीक काइ मदाक्थु, ग्रोंग्रा दीनुड। तन्न इन अरेशो लोव्र दाक्नुड।

164 गो इन निसाफ पतीक लोव्र आ पर्वम इन कली नाक्त कित कित ७ खेयप ठेयब सेल्नुड।

165 इन अरेशो लोव्र दाक्बपुकी थुं नाइश्शा बाक्चा ताइनीम। मेको आन कली मारेइ श्येत मदुम्ब।

166 परमप्रभु यावे, गो इन श्येत रे प्रोंइतीक कली रिम्शा बाक्नुड। मिनु इन शेंशो पाइनुड।

167 गो इन देशो लोव्र टिना टिन बाक्ती। मिनु गो मेको कली थाम्पा दाक्नुड।

168 इन ब्रेकशा अरेशो लोव्र नु इन देशो लोव्र टिना टिन बाक्नुड। मारदे हना आं पशो नेल्ल इन डोंइती बाक्नीम।

थाव

169 परमप्रभु यावे, आं पुंइशो लोव्र नेनीन। इन लोव्रम देशो खोदेशो पा आं कली रुप्ब थुं गेयीनी।

170 आं पुंइशो लोव्र नेनीन। इन थोकशा पशो लोव्र खोदेशो पा श्येत रे प्रोंइयीनी।

171 गे आं कली इन फुल्लुम मुशा, ब्रेकशो लोव्र शेंताक्यीनी। मोपतीके गो इन कली ठेयब सेल्ना सेल्न बाक्नुड।

172 गो इन थोकशा पशो लोव्र आ पर्वम कुम्सो पाइनुड। मारदे हना इन शेंशो लोव्र नेल्ल ठीक बाक्ब।

173 गे आं कली वारच पाइय्यीनी। मारदे हना गो इन ब्रेकशा अरेशो लोव्र योव्रशा, आं के सेल्तामी।

174 परमप्रभु यावे, गो इन श्येत रे प्रोंइतीक कली रिम्नुड। इन अरेशो लोव्र दाक्शा ग्येरसीनुड।

175 गे आं कली ब्रोंइचा गेयीनी। मिनु गो इन कली ठेयब सेल्नुड। मिनु इन पतीक लोव्रमी आं कली वारच पव्ल।

176 गो जाम्शो भेडा खोदेशो पा लां जाम्शो बाक्नुड। इन गेय पाइब, आं कली माल्यीनी। मारदे हना गो इन शेंशो लोव्र मप्रेंनुड। यसैया ५३:६

## 120

“वारच पाइय्यीनी” दे पुंइशो

लां डा कुम्सो।

1 गो श्येत जडानु, परमप्रभु यावे कली पुंइनुड। मिनु मेकोमी आं लोव्र लेप्ब।

2 परमप्रभु यावे, आं कली जोल पाइब नु लें निकशी पाइश्शो मुर रे प्रोंइयीनी।

3 मिनु गे जोल पाइब, इ कली मार पचा? गे लें निक्शी पाइश्शो मुर इ कली अरु मार पाइक्चा माल्बा?

4 लडाइ पाइबमी आ हेश्शो ब्रा आप्ब। मिनु ब्रशो कोइला इ तार जुक्पाइक्नीम।

5 गो श्येत जाइब दुम्ती। गो मेशेक रागीम बाक्चा माल्नुड। केदार आ ताम्बु आन दातेम बाक्चा माल्नुड।

6 गो थुं नाइश्शा बाक्चा काइ मदाक्ब आन दातेमी शुश बाक्ती।

7 गो थुं नाइश्शा बाक्चा दाक्ब मुर नड। तन्न गो लोत्र पडानु, मेकोपुकी लडाइ पचा कली ठीक दुम्नीम। रोमी १२:१८

## 121

परमप्रभुम वारच पा, श्येत रे प्रोंइशो

लां डा कुम्सो।

1 गो डांडा गे कोत्रनुड। आं कली वारच पाइब ते रे जाक्बाक्मे?

2 सरीड नु रागी सेल्ब परमप्रभु यावेमी आं कली वारच पाइब।

3 मेकोमी इ खोइल ग्रेक्चा मगेब। इ कली कोत्रब गेनायो मइप्ब।

4 इस्नाएली आन कली वारच पाइब थमा पा गेनायो मनाइसीब, गेनायो मइप्ब।

5 परमप्रभु यावे इ कली खाल पाइब बाक्ब। परमप्रभु यावे इ ग्युरा गे डा फाम्सीतीके बाक्ब।

6 मिनु नाक्ती नांम इ कली मनाप्ब। नाक्दो तास्लाम इ कली मारेइ मरिम्शो पने मचाप्ब।

7 परमप्रभु यावेमी इ कली श्येत नेल्ल रे प्रोंइब। मेकोमी इ कली ब्रोंइचा गेब। गन्ती ६:२४-२६

8 परमप्रभु यावेमी गे लाडगा खिंडगा पवीनु यो इ कली खाल पाइब। मुल रे गेना हना यो मो पाइब। ब्यवस्था २८:६

## 122

यरूसलेम आ पर्बम पुंइशो

लां डा कुम्सो। दाऊद आ कुम्सो।

1 मेकोपुकीमी आं कली “परमप्रभु यावे आ खिं लय” देतेक्म। मिनु गो ग्येरसाक्यी। भजन संग्रह २६:८; इजीकीएल ४८:३५

2 गोपुकीमी “यरूसलेम, इ ठेयब लाप्चोपुकीमी राप्शो बाक्नीकी” देतक।

3 यरूसलेम रिम्शो पा सेल्शो सहर बाक्ब। मेकेर खिं नेक्नेक्था बाक्नीम।

4 मिनु इस्नाएल आ थर थर डा मुरपुकी परमप्रभु यावे आ मुर दुम्तीके मेकेर लाइनीम। परमप्रभु यावेमी इस्नाएली आन कली दोपा अरेवा, मोपा मेकोपुकीमी मेकेर लशा “गे रिम्शो पाइब बाक्नीनी” दे आ नें ठेयब सेल्नीम।

5 मेकेर निसाफ पाइब आन नित्तीक बाक्नीम। मेकेर दाऊद आ चच युइ आन नित्तीके बाक्नीम।

6 यरूसलेम कली “रिम्शो दुम्ल” दे आसीक गेने। मिनु “यरूसलेम, इ कली दाक्बपुकी रिम्शो दुम्मल। जकरिया ४:७

7 इ गारो आगामी थुं नाइश्शा बाक्तीक दुम्ल। इ गारो डा लाइश्शो खिंमी मारेइ श्येत मदुम्ल” देनीन।

8 मिनु गो आं लोकब नु आं वारच आन पर्बम “इ आगामी थुं नाइश्शा बाक्तीक दुम्ल।

9 मिनु परमप्रभु यावे, आंइ परमप्रभु आ खिं आ पर्बम इन कली रिम्शो दुम्शो तचा दाक्नुड” देती।

## 123

“शिशी पने” दे पुंइशो

लां डा कुम्सो।

1 इर स्वर्ग डा नित्तीकेम बाक्ब, गो इन गे कोत्रशा इन कली पुंइनुड।

2 दोपा वाइलपुकीम आन होत्रप आन गुड गे कोवनीमी नु वाइलीमपुकीमी आन होत्रपोक्म आन गुड गे कोवनीम, मोपा गोपुकीमी परमप्रभु यावे गे कोवनीकी। आंड कली शिशी मपवा सम्म मोपा कोवनीकी।

3 परमप्रभु यावे, आंड कली शिशी पने। आंड कली शिशी पने। मारदे हना गो शुश दिप्चा पुंडसीशो बाक्नीकी।

4 ठेयब लेशशोपुकी नु मरिम्शो पाइबपुकीमी आंड कली महिक्थु शुश श्येत गेतीके गो ब्रीताक्क।

## 124

परमप्रभु यावेमी वारच पशो

लां डा कुम्सो। दाऊद आ कुम्सो।

1 परमप्रभु यावे गोपुकी नु मबाक्शो हना,

2 मुरपुकीमी आंड कली लडाइ तोत्रमेनु, परमप्रभु यावे गोपुकी नु मबाक्शो हना,

3 मेकोपुकीमी आंड कली तशा गाइक्तमेनु, आंड कली सेलीन दाक्मोम वा।

4 मिनु बारशा जाक्शो ब्वाक्कुम आंड कली योल्द वा। मिनु मेको ब्वाक्कुम आंड कली सुम वा।

भजन संग्रह ६९:१६; भजन संग्रह ४२:८

5 मेको बारशो ब्वाक्कुम आंड कली मोशा योल्शा लद वा।

6 परमप्रभु यावे ठेयब बाक्ब। मारदे हना मेकोमी आंड कली क्रिम्चा मगेव।

7 मिनु गोपुकी सिखारी आन ब्वारद रे ब्रोंइशो चिक्ब खोदेंशो पा प्रोक्तक। मेको ब्वारद ब्रोंइक्त। मिनु गोपुकी प्रोक्तक।

8 सरीड नु रागी सेल्ब परमप्रभु यावेमी आंड कली वारच पशो बाक्ब।

## 125

परमप्रभु आ मुर नु बाक्ब

लां डा कुम्सो।

1 परमप्रभु यावे कली थमा सुइक्बपुकी सियोन डांडा खोदेंशो बाक्नीमी। मेको याक्ने मचाप्सीब। गेना हना यो बाक्ब।

2 यरूसलेम आ एर ओंथ नेल्ल पहाड बाक्नीम। मिनु मुल रे गेना हना यो परमप्रभु यावेमी मेको खोदेंशो पा आ मुर आन एर ओंथ बाक्ब।

3 परमप्रभु आ अरेशो मटीब आन हुकुम पतीके ठीक पाइब आन रागीम मदुम्ब। मिनु ला ठीक पाइबपुकीमी दूली मपाइनीम।

4 परमप्रभु यावे, रिम्शो पाइब नु रिम्शो थुं पाइश्शो मुर आन कली रिम्शो पने।

5 तन्न परमप्रभु यावेमी नोले शोंइसीशा मरिम्शो लां खोइक्ब आन कली मरिम्शो पाइश्शा खतम पोक्ब। इस्राएलमी थुं नाइश्शा बाक्तीक दुम्ल। भजन संग्रह १२८:६; गलाती ६:१६

## 126

“वारच पने” दे पुंडशो

लां डा कुम्सो।

1 परमप्रभु यावेमी ग्याइश्शा लाइक्चा पुंडसीशो आन कली सियोनम लेशशा चाक्गानु, गोपुकी डोमु तशो खोदेंशो दुम्तक। भजन संग्रह १४:७

2 मिनु गोपुकी शुश ग्येरसीशा रिस्साक्क। थाम्पा ग्येरशा ग्रीतक। मिनु रागी रागी डा मुरपुकीमी “परमप्रभु यावेमी मेको आन कली वारच पा, ठेयब गेय पाप्तु” देमुम्तेक्म।

3 परमप्रभु यावेमी आंड कली थमा वारच पा ठेयब गेय पाप्तु। मिनु गो शुश ग्येरसाक्क।

4 परमप्रभु यावे, दोदेशो पा नेगेब रागी डा बारशो खोला शाइश्शा लाइनीमी, मोदेशो पा आंइ रिम्शो दुम्तीके लेशशा चाक्कीन।

5 मिनु डाक्ना डाक्न शोक्बपुकीमी ग्येरसीशा खुप्नीम। मत्ती ५:४

6 डाक्ना डाक्न शोक्थ लाइनीम। तन्न ग्रेल्लो क्योव्रज चेरब कुरशा, ग्येरसीशा कुम्सो पा खिं लेत्नीम। यसैया ३५:१०

## 127

परमप्रभु रिम्शो नाक्त गेब बाक्ब

लां डा कुम्सो। सोलोमन आ कुम्सो।

1 परमप्रभु यावेमी खिं मसेल्लो हना, खिं सेल्ब आन गेय मोशा दुम वा। परमप्रभु यावेम सहर खाल मपशो हना, खाल पाइब आन खाल पशो मोशा दुम वा।

2 गे सुनी कना बोक्शा, नाक्दो सम्म शुश गेय पाइनीनी। मिनु इन शोब्ले सुर्ता पा जाइनीनी। मेको मोशा बाक्ब। मारदे हना परमप्रभुमी आ दाक्शो मुर आन कली इप्ची ना आन माल्लो गेब। हितोपदेस १०:२२

3 तमी तौ परमप्रभु यावे आ गेशो बाक्नीम। आलपुकी मेको आ गेशो इनाम बाक्नीम। भजन संग्रह १२८ ३-४; उत्पत्ती ३०:२; उत्पत्ती ३३:५

4 मिनु ठिटा ना थिशो तौपुकी लडाइ पाइब आन गुडम बाक्शो ब्रा खोदेशो बाक्नीम।

5 सु सु आन ब्रा कुरतीके मेकोमी ब्रीशो बाक्नीमी, मेको मुर ग्येरसीशो बाक्नीम। मिनु मेकोपुकी ठेयब लाचोमी आन जोरी सत्रुमी लोव्र पा जिचा पोक्गमेनु, मुने मदोक्नीम।

## 128

परमप्रभु आ आसीक

लां डा कुम्सो।

1 परमप्रभु यावे कली मान पा हिंबपुकी आसीक तशो बाक्नीम। मेकोपुकी परमप्रभु यावे आ लांम गाक्शो बाक्नीम।

2 गे इ पशो गेय रे जाइनेवे। गे ग्येरसीशा मारेइ मारेइमी दारनेवे।

3 मिनु इ मीश इ खिंमी सिश्शो अडगुर बोट खोदेशो बाक्ब। इ आल इ खिंम तेल रवा आ कोच्वा दाप्शो खोदेशो बाक्नीम। भजन संग्रह १२७:३

4 मोपा परमप्रभु यावे कली मान पा हिंब मुर आसीक ताइब।

5 परमप्रभु यावेमी इ कली सियोन रे आसीक गेब। गे मबेक्थु नाक्त कित कित यरूसलेममी रिम्शो दुम्शो ताइनेवे।

6 मिनु गे इ चच युइ आन कली ताइनेवे। इस्राएली आन थुं नाइश्शा बाक्मल। उत्पत्ती ४८:११; भजन संग्रह १२५:५

## 129

जोरी सत्रु आन पर्वम पुंइशो

लां डा कुम्सो।

1 इस्राएलमी “मेकोपुकीमी गो ठिटा बाक्डा रेन आं कली थाम्पा श्येत गेतीमी” देंत।

2 मिनु लेंशा “मेकोपुकीमी गो ठिटा बाक्डा रेन आं कली थाम्पा श्येत गेतीमी। मो हना यो आं क्येडा ग्राने मचबेम।

3 ब्यफ वाक्बपुकीमी आं चीमी वाक्ताक्म। मिनु आं ची नेल्ल चेत्लेक्म” देंत। यसैया ५१:२३

4 परमप्रभु यावे ठीक पाइब बाक्ब। मेकोमी आ अरेशो मटीब आन डोरी प्रोइश्शा गेप्नु।

5 सियोन कली काइ मदाक्बपुकी मुने दोक्शा, लेशशा लमल।

6 मेकोपुकी खिं तार वाशो घांस खोदेशो दुम्मल। मेको बारचा क्येडा डोंइती सोव्रनीम।

7 घांस रिक्बपुकीम मेको मुठी का यो रिक्ने मचापनीम। मुठा फ्रेंबपुकीम मेको अडला का यो प्रिने मचापनीम।

8 मिनु मेको रे पा लाइबपुकीमी “गे परमप्रभु यावे आ आसीक रावो। परमप्रभु यावे आ नेम इ कली आसीक गेनीकी” मदेनीम। रूथ २:४

## 130

शुश श्येत दुम्ची ना पुंडशो

लां डा कुम्सो।

1 परमप्रभु यावे, गो हिंचा डा श्येत जडानु, इन कली पुंडनुड।

2 परमप्रभु यावे, आ लोव्र नेनीन। “शिशो पाइय्यीनी” दे आं पुंडशो लोव्र इन नोफा दाइक्तीन।

3 परमप्रभु यावे, गे आंइ मरिम्शो पशो मिम्ताक्नी हना, इन डोंइती राप्ने चापनीमी डा?

4 गे माफ गेनीनी। मोपतीके मुर इन कली मान पा हिंचा माल्नीम। यसैया ५५:७; रोमी ६:१-२

5 गो परमप्रभु यावे कली रिम्नुड। आं थुं नेल्लेमी यो रिम्नुड। मिनु गो इन लोव्र आस पाइनुड। यसैया २१:११; लूका १२:३५-३६

6 नाक्दो खाल पाइबमी गेना नां सोव्रबा, दे रिम्शो क्येडा यो, गो आं थुं नेल्लेमी परमप्रभु कली शुश रिम्नुड।

7 इस्त्राएल, परमप्रभु यावे कली आस पा बाक्को। मारदे हना परमप्रभु यावेमी गेना हना यो दाक्ब। मेको नु मरिम्शो पशो रे प्रोंइतीक शुश बाक्ब।

8 मिनु मेकोमी इस्त्राएली आन कली आन मरिम्शो पशो नेल्ल रे प्रोंइब। मत्ती १:२१

## 131

ब्रेम्शो थुं पाइशो मुर ग्येरीसीशो

लां डा कुम्सो। दाऊद आ कुम्सो।

1 परमप्रभु यावे, गो ठेयब मलेशो बाक्नुड। गो मबोरशो बाक्नुड। गो आं मचापचा डा नु ठेयब गेयम मग्येल्लुड।

2 मिनु आं थुं ग्येतथ लुक्च मपथु, नाइशशा बाक्ब। आं थुं आ ममा नु बाक्शो आइक्च आल खोदेशो दुम्ब। आं थुं सिक्सी पा बाक्ब आल खोदेशो बाक्ब। भजन संग्रह ६२:२

3 इस्त्राएल, गे मुल रे गेना हना यो परमप्रभु यावे कली आस पा बाक्को।

## 132

परमप्रभु आ खिं आ पर्वम पुंडशो

लां डा कुम्सो।

1 परमप्रभु यावे दाऊद कली फुक्कीन। मेको आ श्येत फाल्शो नेल्ल मिम्तीन।

2 मेकोमी परमप्रभु यावे आ नेम कसम जशो बाक्त। मिनु याकूब आ नेल्ल क्येडा सक्ति पाइशो आ नेम कसम जाप्नु।

3 गो आं खिं मओव्रनुड। मिनु आं ब्राख्येम मइप्नुड। २सामुएल ७:२; प्रेरित ७:४६

4 गो निन्द्रा मपाइनुड। गो मइप्नुड।

5 मारदे मोदेशो पाइनुड देशा हना, गो याकूब आ नेल्ल क्येडा सक्ति पाइशो आ बाक्तीक मथिदु, सम्म मो पाइनुड।

6 गोपुकीमी एफ्राथाहमी परमप्रभु यावे आ कबल पशो सन्दोस आ पर्वम नेंतय। मिनु गोपुकीमी मेको यार सहर डा दिमम थित्तय। १सामुएल ७:१; १इतिहास १३:५-६

7 गो मेको आ बाक्तीक लय। मिनु मेको आ खोइल थेक्तीक आ डोंइती बाप्य।



8 परमप्रभु यावे बोककीन, इन नाइशशा बाक्तीके नु इन सक्ति पाइशशो कबल पशो सन्दोस बाक्तीकेम जाक्कीन। गन्ती १०:३५; २इतिहास ६:४१; भजन संग्रह ७८:६१

9 इन कली चढेबपुकीमी ठीक पतीके वा फेक्शो खोदेशो पा फेक्समल। मिनु इन मुरपुकी ठेयब सेदा पा ग्येरसमल।

10 इन गेय पाइब दाऊद आ पर्बम इन तेल लुकशो कली मप्रोनीन।

11 परमप्रभु यावेमी दाऊद नु लोत्र पा कसम जशो बाक्त। मेकोमी “गो इ सासन पतीकेमी इ तौ का वोइक्नुड” दे लोत्र पशो बाक्त। परमप्रभु यावेमी आ पशो लोत्र खाप्ब। भजन संग्रह ८९:४-५; हिब्रू ६:१७

12 मेकोमी “इ तौपुकीमी आं कबल नु आं देशो पाम्तेक्म हना, मेको आन तौपुकी यो इ सासन पतीकेम सासन पचा ताइनीम” देशो बाक्त।

13 परमप्रभु यावेमी सियोन कली योत्रशो बाक्ब। “आं बाक्तीके मेकेर बाक्ब” दे मिम्शो बाक्ब। भजन संग्रह ६८:१७; भजन संग्रह ७६:३

14 मिनु परमप्रभुमी “एकेर नाइक्नुड। एकेर गेना हना यो बाक्नुड, मारदे हना गो मेको दाक्नुड।

15 मिनु गो मेकेर डा मुर आन कली शुश जचा तूचा गेशा, आसीक गेनुडमी। प्रुडग आन कली रूथ्री जचा गेनुडमी।

16 गो मेकेर डा चढेब आन कली मरिम्शो पतीके रे ब्रोंइतीक दोदेशो बाक्बा तुइक्पाइक्नुडमी। मेकेर डा थमा सुइक्बपुकी कुम्सो पा ग्येरसीनीम।

17 गो मेकेर दाऊद आ खिं डा मुर आन मान बारपाइक्नुड। आं तेल लुकशो मुर कली रिम्शो तौ का गेता। १सामुएल २:१०; १राजा ११:३६

18 गो मेको आ जोरी सत्रु आन कली मुने तोक्नुडमी। मिनु मेको रिम्शो पा सासन पाइब दुम्ब” दे परमप्रभुमी देंत।

## 133

### लोकबपुकी गारशो

लां डा कुम्सो। दाऊद आ कुम्सो।

1 लोकबपुकी गारशा बाक्चा शुश रिम्शो बाक्ब। उत्पत्ती १३:८

2 मेको पियाम लुकशो शुश क्येट थाप्शो तेल खोदेशो बाक्ब। मेको हारून आ गल शोक्रे रे शाइशशा, आ वा सम्म जाक्दीप्ब।

3 मेको हेरमोन डांडा डा सीत सियोन डांडाम यिशो खोदेशो बाक्ब। मेको गेना हना यो ब्रोंइतीक परमप्रभु यावे आ आसीक बाक्ब।

## 134

### नाकदो डा कुम्सो

लां डा कुम्सो।

1 नाकदो परमप्रभु यावे आ खिंम बाक्शा, परमप्रभु यावे आ गेय पाइब नेल्लेमी परमप्रभु यावे कली ठेयब सेलीन।

2 मिनु परमप्रभु यावे आ खिंमी इन गुइ पोक्शा, परमप्रभु यावे कली ठेयब सेलीन।

3 सरीड नु रागी सेल्ब परमप्रभु यावेमी सियोन रे इन कली आसीक गेवल। भजन संग्रह ११५:१५

## 135

### परमप्रभु यावे आ ठेयब गेय

1 परमप्रभु यावे कली ठेयब सेलीन। परमप्रभु यावे आ नें ठेयब सेलीन। परमप्रभु यावे आ गेय पाइबपुकी, मेको कली ठेयब सेलीन।

2 गे परमप्रभु यावे आ खिंमी गेय पाइबपुकी नु आ खिं डा लाडगाम बाकबपुकी, आंड परमप्रभु कली ठेयब सेलीन।

3 परमप्रभु यावे कली ठेयब सेलीन। मारदे हना परमप्रभु यावे रिम्शो पाइब बाकब। मेको कली कुम्सो पने। मारदे हना मेको रिम्शो बाकब।

4 परमप्रभु यावेमी याकूब कली आ मुर दुम्पाइक्चा कली नु इस्राएल कली आंम के सेल्चा कली योत्रशो बाकब। प्रस्थान १९:५-६

5 परमप्रभु यावे थम ठेयब बाकब। मेको गो तुइक्नुड। मिनु आंड परमप्रभु देवी देवता नेल्ल आन क्येडा ठेयब बाकब। भजन संग्रह ८६:८

6 परमप्रभु यावेमी सरीड, रागी, समुन्द्र नु समुन्द्र आ आगामी मार दाकबा, मेको पाइब।

7 मेकोमी रागी आ सुर सुर रे गोस्स पोक्ब। मेकोमी चिला दाप्पाइश्शा, रेउ यिपाइक्ब। मिनु मेकोमी आ बाक्तीक रे फश पपाइक्ब। येरमीया १०:१३

8 मेकोमी इजीप्त रागीमी मुर नु बी ब्यफ, क्यारश भेडा मारेइ मारेइ आन डोंइती जरमेशा नेल्ल आन कली साइक्तीमी। प्रस्थान १२:२९

9 मेकोमी इजीप्त रागीमी फाराओ नु आ गेय पाइब मुर नेल्ल आन डोंइती चिन्ड नु छक लाक्चा डा गेय कोंइताक्ब। भजन संग्रह ७८:४२-५२

10 मेकोमी शुश रागी आन कली खतम पोक्तीमी। मिनु मेकोमी बोल्यो पिप आन कली साइक्तीमी। गन्ती २१:२१-३५

11 मेकोमी एमोरी आन पिप सीहोन, बाशान डा पिप ओग नु कनान डा पिप नेल्ल आन कली साइक्तीमी।

12 मिनु मेकोमी मेको आन रागी आ मुर, इस्राएली आन कली आन के सेल्चा कली गेम्तीमी। यहोसु १२:१-६

13 परमप्रभु यावे इन नें गेना हना यो बाकब। परमप्रभु यावे इन नें गेनायो मक्याम्सीब। भजन संग्रह १०२:१३

14 मारदे हना परमप्रभु यावेमी आ मुर आन कली निसाफ पतीकेमी वारच पाइब। मिनु आ गेय पाइब आन कली शिशो पाइब। ब्यवस्था ३२:३६

15 रागी रागी डा मुर आन मूर्ति सुन नु चांदी के बाक्नीम। मेको नेल्ले मुर आन सेल्शो ला बाक्नीम। भजन संग्रह ११५:४-११

16 मेको आन के शोत्र बाकब, तन्न मब्वाक्नीम। मिक्च बाकब, तन्न मताइनीम।

17 नोफा बाकब, तन्न मनैनीम। मेकोपुकीमी आन सोक्त कीने मचाप्नीम।

18 मेको आन कली सेल्बपुकी यो मोदेशो दुम्मल। मिनु मेको आन कली थमा सुइक्बपुकी यो मोदेशोन दुम्मल।

19 इस्राएल आ खिं डा मुरपुकी, परमप्रभु यावे कली ठेयब सेलीन। हारून आ खिं डा मुरपुकी परमप्रभु यावे कली ठेयब सेलीन।

20 लेवी आ मुरपुकी, परमप्रभु यावे कली ठेयब सेलीन। परमप्रभु यावे कली मान पा हिंबपुकी, परमप्रभु यावे कली ठेयब सेलीन।

21 सियोन रे परमप्रभु यावे कली ठेयब सेल्मेक्ल। यरूसलेमम बाकबपुकीमी परमप्रभु यावे कली ठेयब सेल्मेक्ल। परमप्रभु यावे कली ठेयब सेलीन।

## 136

### परमप्रभु आ दाक्तीके लीब

1 परमप्रभु यावे कली “गे रिम्शो पाइब बाक्नीनी” देनीन। मारदे हना मेको रिम्शो पाइब बाकब। मेको आ दाक्तीके गेना हना यो लीब। भजन संग्रह १०१:६

2 मिनु देवी देवता आन परमप्रभु कली “गे रिम्शो पाइब बाक्नीनी” देनीन। मारदे हना मेको आ दाक्तीके गेना हना यो लीब।

- 3 मिनू परमप्रभु, आन परमप्रभु कली “गे रिम्शो पाइब बाक्नीनी” देनीन। मारदे हना मेको आ दाक्तीके गेना हना यो लीब।
- 4 मेकोमी ला ठेयब छक लाक्चा डा गेय पाइब। मारदे हना मेको आ दाक्तीके गेना हना यो लीब।
- 5 मेकोमी जोक्ब तुइक्ब दुम्तीकेमी सरीड सेल्लु। मारदे हना मेको आ दाक्तीके गेना हना यो लीब।
- 6 मेकोमी ब्वाक्कु तार रागी सेल्लु। मारदे हना मेको आ दाक्तीके गेना हना यो लीब।
- 7 मेकोमी नां तास्ला सेल्लु। मारदे हना मेको आ दाक्तीके गेना हना यो लीब। उत्पत्ती १:१४-१८
- 8 मेकोमी नाक्ती कली नां सेल्लु। मारदे हना मेको आ दाक्तीके गेना हना यो लीब।
- 9 मेकोमी नाक्दो कली तास्ला नु सोरुल सेल्लतीमी। मारदे हना मेको आ दाक्तीके गेना हना यो लीब।
- 10 मेकोमी इजीप्त रागीमी डोंडती जरमेशो नेल्ल आन कली साइक्तीमी। मारदे हना मेको आ दाक्तीके गेना हना यो लीब। भजन संग्रह १३५:८-१२
- 11 मेकोमी इस्राएली आन कली इजीप्ती आन दाते रे गुंडशा चाक्तीमी। मारदे हना मेको आ दाक्तीके गेना हना यो लीब।
- 12 मेकोमी आ ठेयब सक्तिमी मेको आन कली गुंडशा चाक्तीमी। मारदे हना मेको आ दाक्तीके गेना हना यो लीब।
- 13 मेकोमी लल समुन्द्रमी लां सेल्लु। मारदे हना मेको आ दाक्तीके गेना हना यो लीब।
- 14 मेकोमी इस्राएली आन कली मेको लां रे पा शोक्पाइक्तीमी। मारदे हना मेको आ दाक्तीके गेना हना यो लीब।
- 15 मेकोमी फाराओ नु आ लडाइ पाइब आन कली लल समुन्द्रमी योल्पाइक्तु। मारदे हना मेको आ दाक्तीके गेना हना यो लीब।
- 16 मेकोमी आ मुर आन कली गोरशो रागीम लां कोंडताक्तीमी। मारदे हना मेको आ दाक्तीके गेना हना यो लीब।
- 17 मेकोमी ठेयब पिप आन कली साइक्तीमी। मारदे हना मेको आ दाक्तीके गेना हना यो लीब। गन्ती २१:२३-३५
- 18 मेकोमी सक्ति पाइश्शो पिप आन कली साइक्तीमी। मारदे हना मेको आ दाक्तीके गेना हना यो लीब।
- 19 मेकोमी एमोरी आन पिप सीहोन कली साइक्तु। मारदे हना मेको आ दाक्तीके गेना हना यो लीब।
- 20 मेकोमी बाशान डा पिप ओग कली साइक्तु। मारदे हना मेको आ दाक्तीके गेना हना यो लीब।
- 21 मेकोमी मेको आस रागी आ मुर आन कली योक्शा, गेम्तीमी। मारदे हना मेको आ दाक्तीके गेना हना यो लीब।
- 22 मेकोमी मेको रागी आ गेय पाइब इस्राएली आन कली गेम्तीमी। मारदे हना मेको आ दाक्तीके गेना हना यो लीब।
- 23 मेकोमी गो श्येत जकानु, आंड कली मिम्ताक्व। मारदे हना मेको आ दाक्तीके गेना हना यो लीब।
- 24 मेकोमी आंड कली आंड जोरी सत्रु आन गुड रे प्रोंडतु। मारदे हना मेको आ दाक्तीके गेना हना यो लीब।
- 25 मेकोमी ब्रोंडब नेल्ल आन कली जचा गेब। मारदे हना मेको आ दाक्तीके गेना हना यो लीब। भजन संग्रह १४५:१५
- 26 स्वर्ग डा परमप्रभु कली “गे रिम्शो पाइब बाक्नीनी” देनीन। मारदे हना मेको आ दाक्तीके गेना हना यो लीब।

## 137

### बेबीलोनम बाक्ब आन कुम्सो

- 1 गो बेबीलोन डा खोला आ नेक्था बाक्शा, सियोन कली मिम्शा डाक्तक।
- 2 गोपुकीमी आंड तार पाइश्शो ताप्तीके मेकेर डा रवामी क्युक्तक।
- 3 मारदे हना आंड कली ग्याइश्शा लाइक्बपुकीमी मेकेर कुम्सो पपाइक्तेक्म। मिनू आंड कली श्येत गेबपुकीमी ग्येरतीक कुम्सो पपाइक्तेक्म। मेकोपुकीमी आंड कली “सियोन डा कुम्सो का पने” दैतेक्म।
- 4 गो आंड मतुइश्शो रागीमी परमप्रभु यावे आ कुम्सो दोपा पने चाप्नीकी?
- 5 गो यरूसलेम, इ कली प्रेंताक्ड हना, आं ग्युरा गुड मतुक्ब दुम्ल। येरमीया ५१:५०

6 गो इ कली ममिंशो नड हना, गो यरूसलेम कली आं नेल्ल क्येडा ठेयब ग्येरतीके बाक्ब, दे ममिंशो नड हना, आं लें आं कुंकुम क्येप्टल।

7 परमप्रभु यावे, यरूसलेम खतम दुम नाक्ती एदोम डा मुर मार पामे, मेको मिंतीन। मेकोपुकीमी “एको कली प्रेतीन। जग रेन खतम पोक्कीन” दे वाइ ब्रेल्लेक्म। भजन संग्रह ७९:१२; ओबदिया १०:१५

8 बेबीलोन सहर, गे मुल खतम पोक्चा पुंडसीनेवे। गे मार पवी मेको आ क्येक्क लेक्ब ग्येरसीशो मुर बाक्ब।

9 इन आल आन कली ग्याइशशा, फुल्लु तार राप्शा साइक्ब, ग्येरसीशो बाक्नीम। यसैया १३:१६; रोमी १२:१९

## 138

### ठेयब सेल्लिक कुम्सो

दाऊद आ कुम्सो।

1 परमप्रभु, गो आं थुं नेल्लेमी इन कली ठेयब सेल्लुड। गो देवी देवता आन डोंइती इन कली ला ठेयब सेल्लिक कुम्सो पाइनुड।

2 गो इन खिं गे बाप्शा, इन कली “गे रिंशो पाइब बाक्नीनी” देंनुड। मारदे हना इन गेना हना यो दाक्तीकेमी दाक्शा मप्रोंइनीनी। मिनु इन नें नु इन लोव्र नेल्ल आन क्येडा ठेयब बाक्नीम।

3 गो इन कली ब्रेडडानु, आं लोव्र लेत्ताक्यीनी। गे आं कली महिंभ थुं गेशा, बोल्यो सेल्लतीनी।

4 परमप्रभु यावे, रागी डा पिप नेल्लेमी इन लोव्र नेंतेक्म। मोपतीके मेकोपुकीमी इन कली ठेयब सेल्लेक्ल। यसैया २:३

5 मिनु मेकोपुकीमी परमप्रभु यावे आ लां आ पबंम कुम्सो पामेक्ल। मारदे हना परमप्रभु यावे आ सक्ति थम ठेयब बाक्ब।

6 परमप्रभु यावे नेल्ल क्येडा ठेयब बाक्त हना यो, मेकोमी आइक्च मुर आन कली कोव्रब। तन्न ठेयब लेशशो मुर आन क्येडा डोन बाक्ब।

7 मिनु गो शुश श्येत जाता हना यो, गे आं कली प्रोंइनीनी। गे आं कली तशा आं जोरी सत्रु आन गाइशशो रे प्रोंइनीनी। गे इन सक्तिमी आं कली प्रोंइनीनी।

8 परमप्रभु यावेमी आं पबंम आ पचा माल्लो नेल्ल पाइब। परमप्रभु यावे इन दाक्तीके गेना हना यो लीब। इन सेल्लो मुर, आं कली मप्रोनीन।

## 139

### परमप्रभुम मुर आन थुं तुडक्ब

कुम्सो पपाइक्ब कली दाऊद आ कुम्सो।

1 परमप्रभु यावे, गे आं कली नाक्शा तुइशशो बाक्नीनी। भजन संग्रह ७:१०; येरमीया १७:१०

2 गे आं निरशो बोक्शो तुइशशो बाक्नीनी। आं मिंशो नेल्ल तुइक्नीनी।

3 गे आं गाक्शो इप्शो थमा पा तुइक्नीनी। आं पशो नेल्ल गे तुइशशो बाक्नीनी।

4 परमप्रभु यावे, गे आं ब्वाक्चा क्येडा डोंइती आं लोव्र नेल्ल तुइक्नीनी।

5 गे आं एर ओंथ नेल्ल बाक्शा, इन गुड आं तार वोइक्तीनी।

6 मेको तुइक्तीके आं कली थम ठेयब बाक्ब। मिनु गो मेको रुप्ने मचाप्नुड।

7 मिनु गो इन सोक्त क्येडा ते लशा खुइक्ने चाप्नुडा डा? गो इन डोंइती रे ते प्रोक्ने चाप्नुडा डा?

8 गो सरीड लती हना यो, गे मेके बाक्नीनी। गो बेक्शो मुर आन बाक्तीकेम आं बाक्तीक सेल्ला हना यो, गे मेके बाक्नीनी। आमोस ९:२

9 गो नां दाप्तीक सम्म बेरशा लती हना यो, शुश डोन समुन्द्र तार लती हना यो, योना १:३

10 गे मेकेर यो आं कली लां कोंइनीनी। मिनु गे इन सक्तिमी आं कली वारच पाइनीनी।

11 मिनु गो “छिडछिडम आं कली सुम्शा, आ एर ओंथ डा छेडछेड नेल्ल नाक्दो खोदेशो दुम्ल” देती हना यो, अय्युब ३४:२२

12 छिडछिड इन कली छिडछिड मदुम्ब। नाकदो नाक्त खोदेशो पा छेडछेड दुम्ब। मारदे हना छिडछिड इन कली छेडछेड खोदेशो बाकब।

13 मिनु गे आं आगा डा मारेइ मारेइ सेलतीनी। गे आं कली आं ममा आ कोव्रजम सेलतीनी।

14 गो इन कली ठेयब सेलनुड। मारदे हना गे आं कली छक लाक्चा डा नु रिम्शो पा सेलतीनी। इन गेय नेल्ल छक लाक्चा डा बाक्नीम। गे आं कली थमा पा तुइश्शो बाक्नीनी।

15 गो खुइश्शा जोल्ना जोल्न बाक्डानु, गे आं कली तशो बाक्तीनी। मेना गो रागी आगाम जोल्ना जोल्न बाक्शो नड।

16 गे आं मजोल्शो रां तशो बाक्तीनी। मिनु आं कली गेशो ब्रोंइतीक नाक्ती नेल्ले इन किताबम ब्रेक्शो बाक्तेक्म। मेको दुम्चा क्येडा डोंइतीन ब्रेक्शो बाक्त। भजन संग्रह ३१:१६

17 परमप्रभु, इन मिम्शो आं कली थम ठेयब बाक्ब। इन मिम्तीके शुश बाक्नीमी। भजन संग्रह ४०:६

18 गो मेको आन कली हिक्चा माल्लो नड हना, मेको बाल्वा क्येडा यो शुश दुम वा। गो सेंसीडानु, गो गे नु बाक्शो बाक्नुड। भजन संग्रह ६३:७

19 परमप्रभु, गे इन अरेशो मटीब आन कली साइक्नी हना, रिम्शो दुम वा। हुश खाक्श पोक्ब आं क्येडा डोन लमल।

20 मेकोपुकीमी इन पबंम मरिम्शो लोव्र पाइनीमी। मिनु ठेयब लेशशा, शुश मरिम्शो पाइब बाक्नीमी।

21 परमप्रभु यावे, इन कली काइ मदाक्ब आन कली गो यो काइ मदाक्नुडमी। मिनु गो इन कली मरिम्शो पचा कली बोक्ब आन कली तशा ग्रंघ्रा दिल्नुडमी।

22 गो मेको आन कली थमा पा काइ मदाक्नुडमी। मिनु गो मेको आन कली आं जोरी सत्रु मिन्नुडमी।

23 परमप्रभु, गे आं कली नाक्शा, आं थुं कोव्रयीनी। मिनु आं कली कोव्रशा आं मिम्शो तुइक्तीन।

24 गो आं थुंम इन अरेशो मटितीके बाक्म कों? कोव्रडीन। मिनु गे आं कली गेना हना यो ब्रोंइशा बाक्तीक लांम खुल्यीनी।

## 140

### ब्रोंइचा आ पबंम पुंइशो

कुम्सो पपाइक्ब कली दाऊद आ कुम्सो।

1 परमप्रभु यावे, आं कली मरिम्शो पाइब आन गुइ रे प्रोंइयीनी। आं कली हुश खाक्श पोक्ब आन गुइ रे प्रोंइयीनी।

2 मेकोपुकीमी आन थुंमी मरिम्शो पतीक मिम्ना मिम्न बाक्नीम। मिनु जिचा पोक्नीम।

3 मेकोपुकी कोक्चा चिक्शो बुस्स खोदेशो बाक्नीम। मेको आन लोव्र बुस्स आन बीस खोदेशो बाक्ब। ठेयब सेंदा पा।रोमी ३:१३

4 परमप्रभु यावे, इन अरेशो मटीब नु हुश खाक्श पोक्ब मुर आं क्येडा डोन वोतीन। मेकोपुकीमी आं कली दाइल पपाइक्चा माल्नीम।

5 ठेयब लेशशो मुरपुकीमी खुइश्शा आं कली ब्वारद दाइक्ताक्म। डोरी के ब्वारद दाइक्ताक्म। मेकोपुकीमी आं लामी ब्वारद दाइक्ताक्म। ठेयब सेंदा पा

6 मिनु गो परमप्रभु यावे कली “गे आं परमप्रभु बाक्नीनी। परमप्रभु यावे, गे आं पुंइशो लोव्र नेनीन। भजन संग्रह २२:११

7 परमप्रभु यावे, आं परमप्रभु, गे इन सक्तिमी आं कली प्रोंइनीनी। लडाइ दुम्मेनु, गे आं कली प्रोंइनीनी।

8 परमप्रभु यावे, इन अरेशो मटीब आन मिम्शो दला दाक्स दुम्चा मगेने। मो दुम्त हना, मेकोपुकी ठेयब लेल्नीम। ठेयब सेंदा पा।

9 मेको ठेयब लेशशोपुकी आं एर ओंथ बाक्शो बाक्नीम। मेको आन मरिम्शो पशो आंमा रमल। ठेयब सेंदा पा।

10 गे मेको आन तारी ब्रशो कोइला मोतीन। मेकोपुकी गेनायो यूने मचाप्चा पा खाल्टाम बिक्मल।

11 मुर आन पबंम जोल पाइब रागीम मदुम्मल। हुश खाक्श पोक्बपुकी रीब पा खतम दुम्मल।

12 परमप्रभु यावे, श्येत जशो आन कली वारच पाइब नु पुडग आन कली ठीक निसाफ पाइब बाक्नीनी, दे तुइक्नुड।

13 ठीक पाइबपुकीमी, थमा पा इन नें ठेयब सेल्नीम। मिनु रिम्शो थुं पाइशशो मुर इन डोंइती बाक्नीम” देंती।

## 141

“आं कली कोवयीनी” दे पुंडशो

दाऊद आ कुम्सो।

1 परमप्रभु यावे, गो इन कली पुंडनुड। मिनु गे रीब पा जाक्कीन। गो इन कली पुंडशा ब्रेडडानु, आं ब्रेशशो नेनीन।

2 आं पुंडशो लोत्र इन डोंइती थूप खोदेशो दुम्ल। मिनु आं गुड क्युकशो नाकदो डा चढेशो खोदेशो दुम्ल। प्रस्थान ३०:७; प्रस्थान २९:३९

3 परमप्रभु यावे, आं शोत्रमी खाल पाइब का वोतीन। आं कली मरिम्शो लोत्र पचा मगेयीनी। भजन संग्रह ३९:२; याकूब ३:५-६

4 आं थुं कली मरिम्शो मिम्चा मगेने। मरिम्शो पाइब नु गारशा, इन मदाकशो गेय पचा मगेने। मिनु गो मेको आन ब्रोव्रशो जचा थोव्रक जचा मदाक्नुड।

5 ठीक पाइबमी आं कली तुप्यील। मेको आं शिशी बाक्ब। मेकोमी आं कली हुडक्तील। मेको आं पियाम लुकशो तेल खोदेशो दुम्ब। तन्न इन अरेशो मटीब आन तेल आं पियाम मलुम्सेक्ल। मो हना यो गो मेको आन मरिम्शो पशो आ परबम पुंडना पुंडन बाक्नुड। लेवी १९:१७; हितोपदेस २७:५-६

6 मेको आन निसाफ पाइब रोंगु रे तोक्चा पुंडसामानु, मरिम्शो पाइबपुकीमी आं लोत्र “थमा बाक्त” दे रूप्नीम।

7 दोपा फुल्लु प्रोल्शा रू मेर फ्राइनीमी, मोपान मेको आन रुश बेक्शो मुर आन बाक्तीकेमी ब्रशो बाक्नीम।

8 तन्न परमप्रभु यावे, आं परमप्रभु, गो इन गे कोवनुड। गो गे नु फाम्सीनुड। गे आं कली बेक्चा मगेयीनी।

9 गे आं कली मेको आन दाइशशो ब्वारद रे प्रोंइयीनी। आं कली मरिम्शो पाइब आन दाइशशो ब्वारद रे प्रोंइयीनी।

10 इन अरेशो मटीब नेल्ले आंम आन दाइशशो ब्वारदम रेम्मल। गो चहिं मारेड मदुम्थु लाक्नुड।

## 142

“श्येत जशोनु, वारच पाइय्यीनी”

शेतीक कुम्सो। पुक्खीम बाक्शा, दाऊद आ सेल्शो कुम्सो। १सामुएल २४:४

1 गो परमप्रभु यावे कली वाइ ब्रेत्नुड। गो परमप्रभु यावे कली पुंडनुड।

2 आं लोत्र नेल्ल मेको आ डोंइती वोइक्नुड। गो मेको कली आं श्येत नेल्ल देंनुड।

3 आं थुं लुकच लत हना, गो मार पचा माल्नुडा, गे मेको तुइक्नीनी। मुरपुकीमी आं गाक्तीक लांमी ब्वारद दाइक्ताक्म।

4 गो आं ग्युरा गे कोव्रता, मिनु आं कली मिम्ब सुइ मबाक्म। आं कली खुइक्तीके तेइ मबाक्ब। सुइमी आं कली वारच मपाइय्यीमी।

5 परमप्रभु यावे गो इन कली ब्रेत्ताक्ड। गो “गे आं खुइक्तीके बाक्नीनी। ब्रोंइशा बाक्ब आन रागीमी गे आं भाग बाक्नीनी” देंती। भजन संग्रह २७:१३

6 आं पुंडशो लोत्र नेनीन। मारदे हना आ थुं शुश लुकच लत। आं कली खेदा पाइब रे प्रोंइयीनी। मारदे हना मेकोपुकी आं क्येडा बोल्यो बाक्नीम।

7 आं कली आं चोक्सीतीके रे प्रोंइयीनी। मिनु गो इन कली “गे रिम्शो पाइब बाक्नीनी” देंने चबुल। मिनु आं कली रिम्शो पशो तशा, ठीक पाइबपुकी आं एर ओथ बाक्शा ग्येरसीनीम।

## 143

श्येत जामेनु, पुंइशो

दाऊद आ कुम्सो।

1 परमप्रभु यावे, आं पुंइशो लोव्र नेनीन। “गो शिशी तडल” दे इन दाक्शा मप्रोंइतीकेमी आं पुंइशो लोव्र नेनीन। मिनु इन ठीक पतीकेमी आं लोव्र लेत्तीनी।

2 मिनु इन गेय पाइब कली निसाफ पा दोस मगेने। मारदे हना ब्रोंइशोपुकी इन डोंइती ठीक पाइब सुइ मबाक्नीम। भजन संग्रह १३०:३; अय्युब १:२; रोमी ३:२०

3 आं जोरी सत्रुमी आं कली खेदा पतीमी। आं कली खपीम खोलशा, साइक्या चिकताक्यीमी। मेकोपुकीमी आं कली बेक्शो मुर आन बाक्तीकेम खोंदेशो पा छिडछिडम बाक्पाइक्तीमी।

4 मोपतीके आं थुं लुकच लत। मिनु गो वाम ग्याम दुम्ती।

5 गो साइ डोंइती डा नाक्त मिम्नुड। मिनु इन गेय नेल्ल मिम्ना मिम्न बाक्नुड। इन गुइम पशो नेल्ल मिम्नुड। भजन संग्रह ७७:६

6 गो आं गुइ इन गे दिनुड। मिनु कोक्त रूमी ब्वाक्कु माल्शो खोंदेशो पा, आं थुंमी इन कली माल्ब। टेयब सेंदा पा। भजन संग्रह ४२:२-३

7 परमप्रभु यावे, गे आं कली रीब पा लोव्र लेत्तीनी। आं थुं लुकच लशो बाक्ब। इन कुल आं क्येडा मखुइक्तीन। मो दुम्त हना, गो बेक्शो मुर आन बाक्तीक लाइब मुर खोंदेशो दुम्नुड।

8 आं कली सुनी इन गेना हना यो दाक्तीके आ पबर्म नेपाइय्यीनी। मारदे हना गो इन कली थमा सुइक्नुड। गो तेको लां गाक्चा माल्नुडा, मेको आं कली शेंदीनी। गो इन लां कोव्रशा बाक्नुड।

9 परमप्रभु यावे, गे आं कली आं जोरी सत्रु रे प्रोंइयीनी। मारदे हना गो इन बाक्तीकेमी खुइक्थ जाक्नुड।

10 आं कली इन दाक्शो पचा कली शेंदीनी। मारदे हना गे आं परमप्रभु बाक्नीनी। इन रिम्शो सोक्तीम आं कली ठीक लांम गाक्पाइय्यीनी।

11 परमप्रभु यावे, इन नें आ पबर्म आं कली ब्रोंइचा गेयीनी। इन निसाफ पतीकेमी आं कली श्येत रे प्रोंइयीनी।

12 इन गेना हना यो दाक्तीकेमी आं जोरी सत्रु आन कली खतम पोक्कीन। मिनु आं जोरी सत्रु नेल्ल आन कली सतीन। मारदे हना गो इन गेय पाइब बाक्नुड।

## 144

ग्राचा कली पुंइशो लोव्र

दाऊद आ कुम्सो।

1 परमप्रभु यावे, आं सेरथे फुल्लु, टेयब बाक्ब। मेकोमी आं कली लडाइ पचा शेंब।

2 गो आं कली दाक्ब, आं दरवार, आं खुइश्शा ब्रोंइशा बाक्तीके, आं कली श्येत रे प्रोंइब नु आं तेक्तीक बाक्नीनी। गो इन बाक्तीकेमी खुइश्शा बाक्नुड। गे आं कली मुर आन कली सासन पाइब सेल्नीनी। भजन संग्रह १८:३

3 परमप्रभु यावे, मुर आइक्च बाक्तेक्म हना यो, गे मेको आन कली कोव्रनीनी। बेक्शा लाइब मुर मार नमी डा? तन्न गे मेको आन कली मिम्नीनी।

4 मुर कीशो सोक्त खोंदेशो बाक्नीम। मेको आन ब्रोंइतीक नाक्ती जाम्शा लाइब वांकु खोंदेशो बाक्नीम। अय्युब १४:२

5 परमप्रभु यावे, इन सरीड रे तोइश्शा यिने। डांडा आन कली थिशा, कुन गूपतीन। भजन संग्रह १८:१०-१७

6 चिला दाप्पाइश्शा, मेको एर ओंथ ब्रपतीन। इन ब्रा आप्शा मेको आन कली खेदा पने।

7 इर रे इन गुइ दिदीन। मिनु आं कली बारशो खोला नु अर्को रागी डा मुर आन गुइ रे प्रोंइयीनी।

8 मेकोपुकीमी जोल नु मरिम्शो ला पाइनीम।

9 परमप्रभु, गो इन कली नक कुम्सो का पाइनुड। १० ओटा तार पाइश्शो ताप्तीक ताप्शा, इन कली कुम्सो पाइनुड। भजन संग्रह ३३:३

10 गे पिप आन कली ग्रापाइक्नीनी। गे इन गेय पाइब दाऊद कली बेक्चा रे प्रोंइतीनी।

11 आं कली मुर साइक्ब तरवार रे प्रोंइयीनी। अर्को रागी डा मुर आन गुइ रे प्रोंइयीनी। मेकोपुकीमी जोल नु मरिम्शो ला पाइनीम।

12 मिनु आंइ तौपुकी कोल्मानु, रवा खोदेशो दुम्मल। आंइ तमीपुकी दरवारम बाक्शो मुशो थाम खोदेशो दुम्मल।

13 आंइ अन्न वोइक्तीके शुश खाल डा अन्नमी ब्रीमल। आंइ भेडा हजार हजार दुम्मल। आंइ भेडा आंइ रूम लाख लाख दुम्मल।

14 आंइ बीपुकी गिक्ब दुम्मल। आंइ गारो मब्रेल्ल। आंइ कली सुइमी ग्याइश्शा मलदमेक्ल। मिनु आंइ लांमी सुइ डाक्शो मनेसीब।

15 मोदेशो आसीक ताइब मुर ग्येरसीशो बाक्नीम। सु मुर आन परमप्रभु, परमप्रभु यावे बाक्बा, मेको ग्येरसीशो मुर बाक्नीम। ब्यवस्था ३३:२९

## 145

### ठेयब सेल्टीक कुम्सो

परमप्रभु कली “ठेयब बाक्नीनी” देशो दाऊद आ कुम्सो।

1 आं परमप्रभु, गे आं पिप बाक्नीनी। गो इन कली मान पाइनुड। इन नें गेना हना यो ठेयब सेल्लुड।

2 गो इन कली नाक्त कित कित ठेयब सेल्लुड। गो इन नें गेना हना यो ठेयब सेल्लुड।

3 परमप्रभु यावे ठेयब बाक्ब। मेको ठेयब सेल्चा शिरशो बाक्ब। मिनु मेको आ ठेयब दुम्तीके सुइमी रूप्ने मचाप्नीम।

4 पाला का डा मुरुम आन नोले डा पाला डा मुर आन कली “इन गेय ठेयब बाक्नीम” दे शेंचा माल्नीम। मेकोपुकीमी इन सक्ति पाइश्शो गेय आ पर्वम लोव्र पचा माल्नीम।

5 आं पिप, गो इन शुश दारस डा मान ततीके नु इन छक लाक्चा डा गेय आ पर्वम मिम्ना मिम्न बाक्नुड। भजन संग्रह १९:२-७

6 मुरपुकीमी इन ठेयब सक्ति आ पर्वम लोव्र पचा माल्नीम। मिनु गो इन ठेयब दुम्तीके आ पर्वम शेंनुडमी।

7 मेकोपुकीमी इन शुश रिम्शो पतीके आ पर्वम चाड मानेचा माल्नीम। मिनु इन ठीक पतीके आ पर्वम ठेयब सेंदा पा कुम्सो पचा माल्नीम।

8 परमप्रभु यावे दाक्ब नु शिशी पाइब बाक्ब। मेको रीब पा मगाइक्ब। मिनु मेको आ गेना हना यो दाक्तीके ठेयब बाक्ब। प्रस्थान ३४:६

9 परमप्रभु यावे नेल्ल आन कली रिम्शो पाइब बाक्ब। मिनु आ सेल्लो नेल्ल आन कली शिशी पाइब।

10 परमप्रभु यावे, इन सेल्लो मारेड मारेडमी इन कली “गे रिम्शो पाइब बाक्नीनी” देंचा माल्नीम। मिनु इन कली थमा सुइक्बपुकीमी ठेयब सेल्चा माल्नीम।

11 मेकोपुकीमी इन राज्य डा रिम्शो दुम्तीके आ पर्वम लोव्र पचा माल्नीम। इन सक्ति आ पर्वम लोव्र पचा माल्नीम।

12 मेकोपुकीमी इन ठेयब सक्ति पाइश्शो गेय नु इन राज्य डा दारस आ पर्वम मुर आन कली तुइक्पाइक्चा माल्नीम।

13 इन राज्य गेना हना यो लीब राज्य बाक्ब। इन सासन पतीके पाला पाला सम्म बाक्ब। परमप्रभु यावेमी आ देशो नेल्ल पाइब। मिनु आ पशो मारेड मारेड शिशीम पाइब।

14 मिनु परमप्रभु यावेमी गोल्शो नेल्ल आन कली पोक्ब। मेकोमी आन थुं लुकच लशो आन कली आन थुं बारपाइक्ब। भजन संग्रह १४६:८



- 15 मारेइ मारेइमी इन गे कोवनीम। मारदे हना गे मेको आन कली आन जची ना जचा थोवक गेनीनी। भजन संग्रह १०४:२७-२८; भजन संग्रह १३६:२५
- 16 गे हाइशो दुमशा, ब्रोइब नेल्ल कली रूपाइक्नीनी।
- 17 परमप्रभु यावे नेल्ल ठीक पाइब बाक्ब। मिनु आ गेय नेल्ले शिशीम पाइब।
- 18 परमप्रभु यावे आ कली पुंडब नेल्ल आन नेक्था बाक्ब। सु सुमी मेको कली थमा पा पुंडनीमी, मेको आन नेक्था बाक्ब।
- 19 मेकोमी आ कली मान पा हिंब नेल्ल आन दाक्शो गेब। मेकोमी मेको आन पुंडशो नेंब। मिनु मेको आन कली श्येत रे प्रोइब। हितोपदेस १०:२४
- 20 परमप्रभु यावेम आ कली दाक्ब नेल्ल आन कली कोवब। तन्न मेकोमी आ अरेशो मटीब नेल्ल आन कली खतम पोक्ब।
- 21 गो परमप्रभु यावे कली टेयब सेल्शा, लोव पाइनुड। सोक्त पाइशो नेल्लेमी मेको कली गेना हना यो टेयब सेल्नीम।

## 146

### मचाप्व कली वारच पाइशो

- 1 परमप्रभु यावे कली टेयब सेलो। आं थुं, परमप्रभु यावे कली टेयब सेलो।
- 2 गो ब्रोइडा सम्म परमप्रभु यावे कली टेयब सेल्लुड। गो मबेक्डा सम्म आं परमप्रभु कली कुम्सो पा टेयब सेल्लुड।
- 3 गे रागी डा सासन पाइब मुर आन कली थमा मसुतीन। मारदे हना मेकोपुकीमी अरु आन कली वारच पने मचाप्नीम। भजन संग्रह ११८:८-९; येरमीया १७:५
- 4 मेको आन सोक्त लाइब। मिनु मेकोपुकी खप दुम्नीम। मेना मेको आन मिम्शा पशो नेल्ल जाम्शा लाइब। उत्पत्ती ३:१९; उपदेसक ३:२०
- 5 याकूब आ परमप्रभु वारच पाइक्चा पुंडसीब मुर, ग्येरसीशो बाक्नीम। मेकोपुकीमी परमप्रभु यावे, आन परमप्रभु आ लां कोवशो बाक्नीम। येरमीया १७:७
- 6 मेको सरीड नु रागी समुन्द्र नु मेकेर बाक्ब आन कली सेल्ब बाक्ब। मेकोमी आ देशो गेना हना यो पाइब।
- 7 मेकोमी दिप्चा पुंडसीब आन कली ठीक निसाफ पाइब। शोत्रलु बेक्शो आन कली जचा गेब। परमप्रभु यावेमी चोक्चा पुंडसीशो आन कली प्रोइब।
- 8 परमप्रभु यावेमी मिक्च मताइब आन कली ताइब सेल्ब। मिनु आन थुं लुकच लशो मुर आन कली आन थुं बारपाइक्ब। परमप्रभु यावेमी ठीक पाइब आन कली दाक्ब। भजन संग्रह १४५:१४
- 9 मिनु परमप्रभु यावेमी अर्को रागी डा मुर आन कली कोवब। मेकोमी वोंइश बेक्शो मीश मुर नु रोम रोइक्च आन कली यो कोवब। तन्न आ अरेशो मटीब आन मिम्शो दुम्चा मगेब। प्रस्थान २२:२०-२१
- 10 परमप्रभु यावेमी गेना हना यो सासन पाइब। सियोन, इ परमप्रभुमी पाला पाला सम्म सासन पाइब। परमप्रभु यावे कली टेयब सेलीन। भजन संग्रह ९३:१

## 147

### परमप्रभु कली टेयब सेल्शो

- 1 परमप्रभु यावे कली टेयब सेलीन। मारदे हना आंइ परमप्रभु कली टेयब सेल्लेक कुम्सो पचा रिम्शो नु शिरशो बाक्ब। भजन संग्रह ९२:२
- 2 परमप्रभु यावेमी यरूसलेम कली सेल्ब। मेकोमी इस्त्राएल रे खेरशो ब्रशा बाक्शो मुर आन कली खुप्व।
- 3 मेकोमी थुं जिक्शो आन कली सापाइक्ब। मिनु मेको आन कली वाम फ्रेंब। यसैया ६१:१
- 4 मेकोमी सोरुल आन कली हिक्शा, का का पा आन नें वोइक्ब। यसैया ४०:२६

- 5 आंइ परमप्रभु ठेयब बाक्ब। मेको आ सक्ति नेल्ल क्येडा ठेयब बाक्ब। आ रुप्तीक सक्ति सुइम तुइक्ने मचाप्नीम। लुका १:५२
- 6 परमप्रभु यावेम श्येत जाइब आन कली कोत्रब। तन्न आ अरेशो मटीब आन कली खपीम ताइक्ब।
- 7 रे परमप्रभु यावे कली ठेयब सेल्टीक कुम्सो पने। तार पाइशशो ताप्तीके ताप्शा आंइ परमप्रभु कली कुम्सो पा ठेयब सेलीन।
- 8 मेकोमी सरीड कली गोस्सुम सुम्पाइक्ब। रागी कली रेउ यिपाइक्ब। मिनु डांडाम घांस वापाइक्ब।
- 9 मेकोमी जन्तु नु बी ब्यफ आन कली थुल्ब। खद आन चाइक्ब आन कली यो जचा गेब। अय्युब ३८:४१
- 10 मेको शारा आन सक्ति तशा मग्येरसीब। मुर आन रीब पा दोरशो मारेइ ममिम्ब।
- 11 तन्न परमप्रभु यावेमी आ कली मान पा हिंब नु आ गेना हना यो दाक्तीके कली रिम्ब आन कली दाक्ब।
- 12 यरूसलेम, परमप्रभु यावे कली ठेयब सेलो। सियोन, इ परमप्रभु कली ठेयब सेलो।
- 13 मारदे हना मेकोमी इ सहर डा लाप्चोपुकी बोल्यो सेल्लो बाक्ब। मिनु इ आगाम बाक्ब आल आन कली आसीक गेब।
- 14 मेकोमी इ सांदमी लडाइ मदुम्पाइक्ब। मेकोमी इ कली रिम्शो चेरबीम रूपाइक्ब।
- 15 मेकोमी आ शेंतीके रागीम सोइक्ब। मेको आ लोत्र रीब पा तेइ ते ब्राइब। अय्युब ३८:२२-३०
- 16 मेकोमी ऊन खोदेशो पा फुं यिपाइक्ब। मिनु पुलु खोदेशो पा फुरश यिपाइक्ब।
- 17 मेकोमी फुल्लु खोदेशो पा मुप्स यिपाइक्ब। मेको आ काइशशो फशेमी सु राप्ने चाप्वा डा?
- 18 मेकोमी लोत्र पा फुरश यिपाइक्ब। मेकोमी फश पपाइक्ब। मिनु ब्वाक्कु शाइक्पाइक्ब।
- 19 मेकोमी आ लोत्र याक्कूब कली शेंब। मिनु इसाएल कली आ फुल्लुम मुशा ब्रेक्शो लोत्र नु आ पतीक लोत्र शेंब। ब्यवस्था ४:८; प्रेरित १४:१६; रोमी ३:२
- 20 मेकोमी अर्को रागी डा सुइ मुर आन पबंम मोदेशो मपावो। मिनु मेकोपुकीमी आ पतीक लोत्र मतुइक्नीम। परमप्रभु यावे कली ठेयब सेलीन।

## 148

### परमप्रभु कली ठेयब सेल्लो

- 1 परमप्रभु यावे कली ठेयब सेलीन। परमप्रभु यावे कली सरीड रे ठेयब सेलीन। इर रे मेको कली ठेयब सेलीन। भजन संग्रह १०३:२०-२२
- 2 आ स्वर्ग डा गेय पाइबपुकी, मेको कली ठेयब सेलीन। आ स्वर्गम बाक्ब नेल्लेमी मेको कली ठेयब सेलीन।
- 3 नां नु तास्ला मेको कली ठेयब सेलीस। छेडछेड पाइशशो सोरुल नेल्लेमी मेको कली ठेयब सेलीन। उत्पत्ती १:१-२७
- 4 नेल्ल क्येडा इर सरीड नु मेको आ तार बाक्ब ब्वाक्कु नेल्लेमी मेको कली ठेयब सेलीन।
- 5 मेकोपुकीमी परमप्रभु यावे कली ठेयब सेल्लेक्ब। मारदे हना मेकोमी लोत्र पवानु, मेको दुम्तेक्म। भजन संग्रह ३३:९
- 6 मेकोमी मेको आन कली गेना हना यो बाक्मल, दे वोइक्तु। मिनु मेकोमी मेको आन कली अरेवानु, आन बाक्तीकेम बाक्शा टिम्तेक्म।
- 7 रागी रे पा ब्वाक्कुम बाक्ब ठेयब जन्तु नु शुश लुक्च लशो ब्वाक्कु, परमप्रभु यावे कली ठेयब सेलीन।
- 8 मी नु मुप्स, फुं नु फुरश नु फश गिवारमी आ देशो टीनीम।
- 9 पहाड नु डांडा, फल फुल सिप्ब रवा नु लाइशशो रवा नेल्ले,
- 10 ब्वाकी डा जन्तु नु बी ब्यफ नेल्ले, आइक्च खपीम ग्रेशा गाक्ब जन्तु नु बेरब चिक्ब नेल्ले
- 11 रागी डा पिपपुकी नु जात जात डा मुर नेल्ले, रागी डा सासन नु हुकुम पाइब नेल्ले,
- 12 वोंइश आल नु मीश आल, खाल्पा खाल्पी नु आल नेल्लेमी परमप्रभु यावे कली ठेयब सेलीन।

13 मेको नेल्लेमी परमप्रभु यावे आ नें ठेयब सेल्मेक्ल। मारदे हना मेको आ नें ला ठेयब बाक्ब। मेको आ मान ततीक डा छेडछेड रागी नु सरीड तार बाक्ब।

14 मेकोमी आ मुर आन कली सक्ति पाइशो नु ठेयब सेल्लु। आ कली थमा सुइक्ब नेल्ले नु आ नेक्था बाक्ब इस्राएलीपुकीमी परमप्रभु यावे कली ठेयब सेलीन। ब्यवस्था ४:७-८

## 149

परमप्रभु कली ठेयब सेल्लो

1 परमप्रभु यावे कली ठेयब सेलीन। परमप्रभु यावे कली नक कुम्सो का पने। थमा सुइक्ब आन गुम्तीकेमी मेको कली ठेयब सेलीन। भजन संग्रह ३३:३

2 इस्राएल आ कली सेल्ब आ पर्वम ग्येरसेक्ल। सियोन डा मुर आन पिप आ पर्वम ग्येरसमल। भजन संग्रह १००:३; भजन संग्रह ९३:१

3 मेकोपुकीमी सिल पना पन मेको आ नें ठेयब सेल्मेक्ल। खैजडी नु बीना ताप्शा, मेको कली कुम्सो पामेक्ल।

4 मारदे हना परमप्रभु यावे आ मुर आन पर्वम ग्येरसीशो बाक्ब। आइक्च मुर आन कली ग्रातीकेमी ग्योम्ब।

5 थमा सुइक्बपुकी शुश ग्येरसमल। मिनु आन ब्राख्येमी यो ग्येरशा कुम्सो पामेक्ल।

6 मेकोपुकीमी परमप्रभु कली ठेयब सेल्लिक कुम्सो पामेक्ल। मेको आन गुडमी निम्फा गे क्योरतीक पाइशो तरवार बाक्ल।

7 मेकोपुकीमी रागी रागी डा मुर आन कली सजाइ गेशा, क्येक्क लेत्नीम।

8 मिनु मेको आन पिप आन कली साडलो नु मेको आन ठेयब मुर आन कली फलाम के फ्रेतीकेम फ्रेने चाप्नीम।

9 मिनु मेकोपुकीमी ब्रेक्शा अरेशो कोवशा, मेको आन कली निसाफ पाइनीम। मेको परमप्रभु आ मुर आन रिम्शो बाक्ब। परमप्रभु यावे कली ठेयब सेलीन। यसैया ३४:-; यसैया ६३:४-६; योएल ४:२-२४

## 150

परमप्रभु कली ठेयब सेल्लो

1 परमप्रभु यावे कली ठेयब सेलीन। परमप्रभु कली आ बाक्तीकेमी ठेयब सेलीन। परमप्रभु यावे कली आ सरीड डा ठेयब बाक्तीकेमी ठेयब सेलीन।

2 मेको कली आ सक्ति पाइशो गेय आ पर्वम ठेयब सेलीन। मेको कली आ नेल्ल क्येडा ठेयब दुम्तीके आ पर्वम ठेयब सेलीन।

3 तुराही ताप्शा, मेको कली ठेयब सेलीन। तार पाइशो ताप्तीक नु ठेयब ताप्तीक ताप्शा, मेको कली ठेयब सेलीन।

4 खैजडी ताप्शा, सिल पा मेको कली ठेयब सेलीन। तार पाइशो ताप्तीक नु बांसुरी ताप्शा, मेको कली ठेयब सेलीन।

5 आइक्च बुक्केल ताप्शा, मेको कली ठेयब सेलीन। ठेयब सेंदा पा मुरब बुक्केल ताप्शा, मेको कली ठेयब सेलीन।

6 सोक्त पाइशो नेल्लेमी परमप्रभु यावे कली ठेयब सेलीन। परमप्रभु यावे कली ठेयब सेलीन। भजन संग्रह ४१:१४; प्रकाश ५:१३

## हितोपदेश

**ब्रेक्ब मुर:** सोलोमनमी मुर आन देशो लोत्र खुप्शा नु आं थुं डा तुइक्तीक लोत्र एको किताबम ब्रेक्शो बाक्ब। गेना ब्रेक्शो: एको किताब सोलोमोन आ सासन पची ना १६५-१२६ बि. सी.म ब्रेक्शो बाक्ब।

**गेना ब्रेक्शो:** एको किताब सोलोमोन आ सासन पची ना १६५-१२६ बि. सी. ब्रेक्शो बाक्ब।

**मार ब्रेक्शो:**

१. सोलोमनम “जोक्ब तुइक्ब थुं मालीन” हितोपदेश १:- ९:-

२. सोलोमोनम “हेंथे मगाक्कीन” हितोपदेश १०:-२४:३४

३. अरु जोक्ब तुइक्बम ब्रेक्शो रिम्शो पतीक लोत्र हितोपदेश २२:१७-२४:३४

४. सोलोमनम “मुर आन दातेमी रिम्शो बाक्कीन” हितोपदेश २५:-२९:-

५. आगुर नु लेमुएलम “खिं डा मुर ग्येरसीशो दुम्चा माल्नीम” दे ब्रेक्शो बाक्ब। हितोपदेश ३०:-३१:- हितोपदेश किताब डा शेंसीचा माल्शो लोत्र: परमप्रभु यावे कली मान पा हिंब मुर जोक्ब तुइक्ब दुम्शा, रिम्शो दुम्नीम।

एको किताब आ शेंशो लोत्र

१ एको दाऊद आ तौ इस्राएली आन पिप सोलोमोन आ देशो लोत्र बाक्ब। १राजा ५:९-१२

२ एको किताबम तुइक्तीके नु अर्ती टिचा आ पबंम शेंसीतीके लोत्र बाक्ब। मेको शेंसाक्नी हना, गेरुब नु जोक्ब तुइक्ब दुम्नीनी।

३ मिनु ब्रेक्ब मुर आ अर्ती सुमी टीबा, मेकोमी तुइश्शा गेय पने चापब। ठीक पतीके, ठीक निसाफ पतीके नु कुल मकोत्रथु रिम्शो पने चापब।

४ मारेइ मजोक्ब आन कली निप्स खाप्शा गेय पचा शेंब। ठिटा आन कली जोक्ब नु होस पाइब सेल्ब।

५ जोक्ब तुइक्ब नेल्लेमी एको लोत्र रिम्शो पा नेंबमी तेम्शा शुश रुब दुम्नीम। निप्स पाइश्शो मुर जोक्ब दुम्शा,

६ एको देंतीक लोत्र, कथा, जोक्ब तुइक्ब आन लोत्र नु खुइश्शो लोत्र रूपनीम।

७ परमप्रभु यावे कली मान पा हिंचा तुइक्तीक दुम्चा कली गोतीक बाक्ब। मूर्खपुकीमी तुइक्तीके नु अर्ती मदाक्नीम। हितोपदेश ८:१३; हितोपदेश ९:१०; अय्युब २८:२८; भजन संग्रह १११:१०

मरिम्शो पाइब नु मगाक्को

८ आं तौ, इ आफ आ अर्ती नेनो। इम्मा आ शेंशो मप्रोनो। हितोपदेश ६:२०; ब्यवस्था २१:१८-२१

९ मारदे हना मेको इ पिया डा ग्योम्तीके नु इ कली सुन के माला नस।

१० आं तौ, मरिम्शो पाइब मुरुम इ कली “हेंथे पय” दे लोत्र पांतेक्म हना, मेको आन लोत्र मबिस्सो। हितोपदेश १६:२९; ब्यवस्था १३:७-९

११ मेकोपुकीमी “पिवो, मुर साइक्चा कली बाप्शा बाक्ब। रिम्शो पाइब कली बाप्शा,

१२ मेको कली बेक्शो मुर आन बाक्तीकेम सोइक्तय। गो मेको कली सेसीन तुरसुम सोइक्तय।

१३ मिनु गोपुकीमी आ बाक्शो शोंप नेल्ल रोइक्नय। मेको रोइश्शामी आंम आंम खिं प्रिनय।

१४ गे, गोपुकी नु लते हना, नेल्ल गारशा योक्सय” देंतेक्म हना यो,

१५ आं तौ, गे मेकोपुकी नु मलावो। मेकोपुकी नु मगाक्को।

१६ मारदे हना मेकोपुकी मरिम्शो गेय पचा कली रीब पा दोरनीम। हुश खाक्श पोक्चा कली चुइक्नीम।

१७ चिक्बीमी तचा डा पा ब्वारद दाइश्शो शोर गाक्शो गेय बाक्ब।

१८ मेको मुरपुकी साइक्चा पुंडसीचा कली बाप्शो बाक्नीम। आंमान खतम दुम्चा कली बाप्शा बाक्नीम।

१९ मुर आन मार मार रोइश्शा, तेल्सीबपुकी मोदेशो पा साइक्चा पुंडसीनीम।

तुड़क्तीकेमी मुर आन कली अरेब

20 लां मेर तुड़क्तीके लोत्र नेंसीब। सहर मेर आ सेंदा गूब। हितोपदेश ८:१-३

21 मेको शुश मुर आन देलतीके मेर ब्रेन्ना ब्रेन्न बाक्ब। सहर ओत्रतीक ठेयब लापचोमी आ लोत्र पाइब।

22 मार लोत्र पाइब देशा हना “गे मारेइ मजोक्बपुकी, गेना सम्म मारेइ मजोक्ब दुमचा दाक्नीनी? गे शुक्शी पाइबपुकी, गेना सम्म शुक्शी पचा दाक्नीनी? गे मूर्खपुकी, गेना सम्म तुड़क्तीके कली काइ मदाक्नीनी?”

23 गे आं हुइश्शो लोत्र नेनीन। आं मिम्शो इन कली देंनुड। आं लोत्र इन कली तुड़क्पाइक्नुड।

24 मिनु गो इन कली ब्रेत्तुनु, गेपुकीम मनेंनी। गो आं गुइ हामुनु, सुइ मपिनी। यसैया ६५:२, १२

25 आं अर्ती नेल्ल मटितीके, आं हुइश्शो नेंचा मदाक्तीके,

26 गो यो गे श्येत जनी ना, रिश्शा बाक्नुड। मिनु गे शुश हिंनीना, गो शुक्शी पाइनुड” दे लोत्र पाइब।  
व्यवस्था २८:६३

27 शुश हिंतीके ठेयब फश खोदेशो पा इन तारी जाक्त हना, श्येत फश गिवार खोदेशो पा इन तार जाक्त हना, श्येत नु हिंतीकेम इन कली सुम्तु हना,

28 मेना आं कली थोनीनु, गो इन कली लोत्र मलेत्नुड। गेपुकीमी आं कली शुश माल्तीनी हना यो, मथित्नीनी। यसैया ५९:२; मीका ३:४

29 मेकोपुकीम जोक्तीक कली काइ मदाक्तीके नु परमप्रभु यावे कली मान मपथु महिंतीके,

30 आं अर्ती मनेंतीके, आं हुइश्शो नेंचा मदाक्तीके,

31 मेकोपुकीमी आन आन पशो मरिम्शो गेय आन इनाम तचा माल्नीम। मिनु आन आन मरिम्शो पतीकेमी ब्रीमल।

32 मारदे हना मारेइ मजोक्ब आन मटितीके साइक्चा पुंडसीनीम। मूर्ख आन मारेइ ममिम्तीके खतम दुम्नीम।

33 तन्न सु सुम आं लोत्र नेंनीमी, मेकोपुकी श्येत मजाइनीमी। महिंथु, रिम्शो दुम्शा बाक्नीमी।

## 2

तुड़क्तीकेमी बेक्तीक रे प्रॉइब

1 आं तौ, गे आं लोत्र नेनो, आं शेंशो इ थुंम वोइक्तीवी हना,

2 गे इ नोफा दाइश्शा, तुड़क्तीक लोत्र नेतीवी नु रुप्तीके दाक्तीवी हना,

3 गे जोक्तीके तुड़क्तीक माल्शा, रुप्तीके कली ठेयब सेंदा पा पुंडीतीवी हना, याकूब १:५

4 गे मेको कली चांदी खोदेशो पा माल्तीवी नु थिम्शा वोइश्शो शॉप माल्शो खोदेशो पा दोप्तीवी हना,

5 गे परमप्रभु यावे कली दोपा मान पा हिंचा माल्बा, मेको तुड़क्ने चाप्नेवे। मिनु गे परमप्रभु कली तुड़श्शा शेंसीने चाप्नेवे।

6 मारदे हना परमप्रभु यावे तुड़क्तीक थुं गेब बाक्ब। आ शोत्र रे जोक्तीक नु रुप्तीक लोत्र गूब। दानीएल २:२०-२३

7 मेकोमी रिम्शो थुं पाइश्शो मुर आन कली तुड़क्तीक थुं गेब। मेको दोस मताइब आन कली तेक्तीके बाक्ब। भजन संग्रह ७:११

8 परमप्रभु यावेमी ठीक निसाफ बाक्बा देय मबाक्बा मेको कोत्रब। आ लां गाक्ब आ मुर आन कली कोत्रब।

9 मिनु गे ठीक पतीके नु ठीक निसाफ, कुल मकोत्रथु रिम्शो पतीके नु रिम्शो लां मार बाक्मे रुप्नेवे।

10 मेना तुड़क्तीके इ थुंमी ओत्रब नु इ जोक्तीकेमी इ थुं कली ग्येरपाइक्ब। १कोरिन्थी १:३०

11 मिनु होस पतीकेमी इ कली खाल पाइब। रुप्तीकेमी इ कली कोत्रब।

12 मेकोमी इ कली मरिम्शो लां नु दूली लोत्र पाइब मुर रे प्रॉइब।

13 मेकोपुकी रिम्शो थुं पाइश्शो मुर आन लाम गाक्चा प्रॉइशा, छिडछिड ड़ा लाम गाक्नीमी,

14 मेकोपुकी थम मरिम्शो पचा कली ग्येरसीनीम। शुश दूली नु मरिम्शो पतीकेमी ग्येरसीनीम।

- 15 मेको आन पतीक काइ मरिम्शो बाक्ब। हेंथे लां गाक्ब बाक्नीम।  
 16 होस पतीके नु रुप्तीकेमी इ कली हेंथे पाइब मीश मुर नु आ वाल्चा डा लोत्र रे यो प्रॉइब।  
 17 मेकोमी आ ग्युबे पशो वॉइश कली प्रॉइशा, परमप्रभु यावे आ डोंइती पशो कबल प्रेंताक्ब।  
 18 मेको आ खिं ओत्रब नेल्ल बेक्तीक लां लाइनीम। मेको आ खिं डा लां बेक्शो मुर आन बाक्तीक लतीक लां बाक्ब।  
 19 मोदेंशो मीश मुर आ बाक्तीक लाइबपुकी गेनायो लेन्ने मचाप्नीम। मिनु ब्रोंइतीक लां यो मताइनीम।  
 20 मोपतीके रिम्शो मुर आन लां गाक्को। ठीक पाइब आन लां गाक्को।  
 21 मारदे हना रिम्शो थुं पाइशो मुर रागीम बाक्चा ताइनीम। दोस मताइबपुकी रागीम लीनीम। भजन संग्रह ३७:९; मत्ती ५:५  
 22 तन्न परमप्रभु यावे आ अरेशो मटीबपुकी आन शाक्श रेन रागी रे तुल्चा पुंडसीनीम। थमा मसुइक्बपुकी सुवा खोदेंशो पा ताइक्चा पुंडसीनीम। भजन संग्रह ३७:१०

### 3

#### थमा सुइक्बमी आसीक ताइनीम

- 1 आं तौ, आं अरेशो मप्रेंदो। मिनु आं शेंशो लोत्र इ थुंमी वोतो। लेवी १८:५  
 2 मारदे हना मेकोमी इ कली शुश बर्स ब्रोंइतीक नु थम रिम्शो बाक्चा गेनीस।  
 3 गेना हना यो दाक्शा गेनायो मप्रोंइथु, बाक्को। मेको निक्शी कली माला खोदेंशो पा रेल्शा, इ थुंम ब्रेक्शो खोदेंशो पा वोतो। ब्यवस्था ६:८; येरमीया ३१:३३  
 4 मो पाप्तीवी हना, गे परमप्रभु आ आसीक ताइनेवे। मुर नेल्लेमी इ कली रिम्शो देंनीम।  
 5 गे इ थुं नेल्लेमी परमप्रभु यावे आ देशो मिम्शा, थमा सुतो। इ आंम जोक्शो तुइशो थमा मसुतो।  
 6 इ पतीक नेल्लेमी “परमप्रभु यावेमी मार दाक्बा” दे मिम्तो। मो पाप्तीवी हना, परमप्रभु यावेमी इ कली ठीक लां कोंइब।  
 7 गे “गो जोक्ब तुइक्ब मुर नड” दे मिम्तो। तन्न परमप्रभु यावे कली मान पा हिनो। मरिम्शो पतीके रे डोन बाक्को। यसेया ५:२१  
 8 मो पाप्तीवी हना, मेको इ रां कली सापाइक्तीके बाक्ब। मिनु इ गुइ खोइल बोल्यो दुम्नीम।  
 9 इ शोंपोमी परमप्रभु यावे कली मान पावो। मिनु इ बाली नाली रे नेल्ल क्येडा डोंइती सिशशोमी आ नें ठेयब सेलो। प्रस्थान २३:१९  
 10 मो पाप्तीवी हना, इ कोठो भकारी अन्नमी शुश ब्रीशो बाक्नीम। इ अडगुर खाक्तीके अडगुर रसम ब्रीशो बाक्नीम।  
 11 आं तौ, परमप्रभु यावेमी इ कली देशो रिम्शो पावो। आ हुइशो नेंशा, मरिम्शो मसुतो। हिब्रू १२:५-६; अय्युब ५:१७-१९  
 12 मारदे हना परमप्रभु यावेमी आ दाक्शो मुर आन कली ला हुइक्ब। मेकोमी रिम्शो आफोमी आ दाक्शो तौ कली खोदेंशो पा सजाइ गेब। १कोरिन्थी ११:३२; प्रकाश ३:१९

#### तुइक्तीकेमी मुर कली रिम्शो सेलब

- 13 तुइक्तीके ताइब नु रुप्बपुकी ग्येरसीशो मुर बाक्नीम।  
 14 मारदे हना तुइक्तीके चेम्शो चांदी क्येडा शुश रिम्शो बाक्ब। मिनु आ चेम्शो सुन क्येडा यो शुश क्येट लाइब बाक्ब। हितोपदेस ८:१०  
 15 तुइक्तीके हीरा क्येडा शुश क्येट लाइब बाक्ब। इ माल्शो मारेइ मारेइ नेल्ल मेको क्येडा आइक्च बाक्नीम।  
 16 मेको आ ग्युरा गुइमी शुश ब्रोंइतीक नाक्त बाक्नीम। आ पेरा गुइमी शोंप नु मान ततीके बाक्ब।  
 17 मेको आ लां रिम्शो नु थुं नाइक्तीके बाक्नीम।  
 18 मेको नु बाक्बपुकी शुश नाक्त ब्रोंइनीम। मेको कली मुप्शा बाक्ब आन पबंम मुरपुकीमी “मेकोपुकी ग्येरसीशो मुर बाक्नीम” देंनीम। हितोपदेस ११:३०; हितोपदेस १३:१२; हितोपदेस १५:४

- 19 परमप्रभु यावेमी आ तुइक्तीकेमी रागी सेल्लु। आ रुप्तीकेमी सरीड वोइक्तु। हितोपदेश ८:२२-३१
- 20 आ जोक्तीकेमी ब्वाक्कु बुक्पाइक्तु। मिनु गोस्स रे फुरश यिपाइक्तु।
- 21 आं तौ, आं देशो गेय पचा क्येडा डोंइती मिम्शा, गेनायो मप्रोनो। ठीक तुइक्तीके नु होस पतीके गे नु बाक्कल।
- 22 मारदे हना मेको इ ब्रोंइतीक नु इ दारस बाक्नीस।
- 23 मिनु गे इ लांम रिम्शो पा गाक्डे नु इ खोइल दाइल मपाइब।
- 24 गे निस्सेनु, हिंचा ममाल्लेवे। इमेनु ब्रोंवशो निन्द्रा पाइनेवे। भजन संग्रह ३:६
- 25 शुश हिंचा डा दुम्मेनु, महिनो। फश पवानु, परमप्रभु यावे आ अरेशो मटीबपुकी खतम दुम्मानु, गे महिनो।
- 26 मारदे हना परमप्रभु यावे गे नु बाक्ब, मेकोमी इ खोइल कली रेलतीक रे प्रोंइब। हितोपदेश १०:२९
- मुर आन कली वारच पावो देशो
- 27 मिनु मुर आन कली गेचा डा गेवो। इ गुइमी बाक्त हना, शिम मदुमो।
- 28 गे नु बाक्त हना “दीसा जाक्को। मिनु गेनन” दे इ नेक्था डा मुर आन कली मदेनो।
- 29 इ नेक्था बाक्ब कली मरिम्शो पचा ममिम्तो। मारदे हना इ कली थमा सुइशशा, इ नेक्था बाक्ब।
- 30 इ कली मारेइ मरिम्शो मपथु जिचा मपोक्को।
- 31 रोइक्ब मुर आ मारेइ मारेइ तशा, मवल्लो। मेको आ लांम काइ मगाक्को।
- 32 मरिम्शो दूली पाइब तशा, परमप्रभु यावे ग्रॉग्रा दीब। रिम्शो थुं पाइशोपुकी चहिं मेको नु बाक्चा ताइनीम। भजन संग्रह २५:१४
- 33 परमप्रभु यावेमी आ अरेशो मटीब आन खिं डा मुर आ सराप राइब। तन्न ठीक पाइब आन खिंम आसीक राइब।
- 34 मिनु परमप्रभु यावेमी ठेयब लेशशो शुक्शी पाइब मुर आन कली शुक्शी पाइब। ब्रेम्शो थुं पाइशशो आन कली चहिं शिशी पाइब। १ पत्रुस ५:५
- 35 तुइक्ब मुरपुकी मान पाइक्चा पुंइसीनीम। तन्न मटीब मूर्खपुकी मुने दोक्नीम।

## 4

### तुइक्तीक थुं रिम्शो बाक्ब

- 1 आं तोपुकी, आं अर्ती नेनीन। गे जोक्ब तुइक्ब दुम्चा कली इन नोफा दाइशशा नेनीन।
- 2 गो इन कली रिम्शो पा अरेनुड। आं शेशो लोव्र मप्रोनीन।
- 3 गो यो आं आफ नु बाक्शो बाक्ती। गो आं ममा आ दाक्शो तौ बाक्ती।
- 4 मिनु आं आफोमी आं कली “आं लोव्र इ थुंमी वोतो। मिनु आं शेशो टिशा ब्रोनो। लेवी १८:५
- 5 तुइक्तीके मालो नु जोक्ब तुइक्ब दुमो। आं देशो लोव्र मप्रोनो।
- 6 मेको कली मप्रोंइतीवी हना, इ कली कोव्रब। मेको कली दाक्ताक्वी हना, इ कली खाल पाइब।
- 7 तुइक्तीके आ गोतीक मार बाक्त देशा हना, तुइक्तीके शुश माल्चा माल्लेवे। मार ताप्तीवी हना यो, नेल्ल क्येडा ठेयब जोक्ब तुइक्ब दुमो।
- 8 मेको कली ठेयब सेल्लतीवी हना, इ कली ठेयब सेल्लब। गे मेको कली मुप्तीवी हना, इ कली मान ततीक गेब।
- 9 मेकोमी इ पिया दारशो पा ग्योम्पाइक्ब। इ पिया तारी रिम्शो सिरपेच गुक्ब” दे शेंताक्वी।

### तुइक्तीकेमी ब्रोंइचा गेब

- 10 आं तौ, इ नोफा दाइशशा, आं लोव्र नेशा, ब्रावो। मो पाप्तीवी हना, गे शुश ब्रोंइनेवे। हितोपदेश ३:२
- 11 गो इ कली तुइक्तीक लां शेंताक्न। गो इ कली रिम्शो थुं डा मुर आन लांम गाक्पाइक्तन।
- 12 गे गाक्डेनु, इ कली सुइम मतेक्नीम। मिनु दोरते हना, दाइल मपांइसीनेवे।
- 13 अर्ती कली मिम्शा, मेको कली मप्रेंदो। मेको कली टिवो। मारदे हना मेको इ ब्रोंइतीक बाक्ब।

- 14 परमप्रभु यावे आ अरेशो मटीब नु मगाक्को। मरिम्शो पाइब आन लां मगाक्को भजन संग्रह १:१
- 15 मेकोपुकी नु मगाक्को। आन लां मलावो। आन लां हेरशा लावो।
- 16 मारदे हना मेकोपुकी मरिम्शो मपामे सम्म इप्ने मचाप्नीम। मुर कली मथिपदमे सम्म निन्द्रा मपाइनीम। भजन संग्रह ३६:५; मीका २:१
- 17 परमप्रभु यावे आ अरेशो मटितीके मेको आन जचा थोव्रक खोदेशो बाक्ब। हुश खाक्श पोक्तीके आन तूचा थोव्रक खोदेशो बाक्ब।
- 18 तन्न ठीक पाइब आन लां सुनी डा छेडछेड खोदेशो बाक्ब। मेको नाक्ती उडक्थ दुम सम्म बारना बारन शुश छेडछेड दुम्ब। हितोपदेश २४:२०
- 19 परमप्रभु यावे आ अरेशो मटीब आन लां क्येर नाक्दो डा छिडछिड खोदेशो बाक्ब। मेकोपुकीम मारेइमी दाइल पाइक्नीम, दे मतुइक्नीम।
- 20 आं तौ, आं लोव्र नेनो। इ नोफा दाइरशा, आं देशो नेनो।
- 21 आं लोव्र कली गेना हना यो मिम्तो। मिनु मेको कली इ थुमी वोतो।
- 22 मारदे हना सु मेको ताइबा, मेको आ ब्रॉइतीक दुम्ब। मिनु मेको आ रां नेल्ल कली सापाइक्तीक बाक्ब। हितोपदेश ३:८
- 23 नेल्ल आन क्येडा इ थुं कली कोव्रडो। मारदे हना मेको रे इ ब्रॉइतीक जाक्ब।
- 24 इ शोव्र कली मरिम्शो लोव्र पचा मगेवो। हेंथे लोव्र इ क्येडा डोन वोतो।
- 25 इ मिक्ची मरिक्थु ठीक पा डोंइती कोव्रडो। सिका मपथु डोंइती गे कोव्रडो। हितोपदेश १७:२४
- 26 ठीक लां ला गाक्को। मिनु इ पतीके नेल्ल रिम्शो दुम्नीम।
- 27 ग्युरा पेरा मलावो। मरिम्शो पतीक नेल्ल रे डोन बाक्को। यहोसु १:७

## 5

तेल्लेम क्येडा होस पचा

- 1 आं तौ, आं तुइक्तीक नेशा शुश मिम्तो। आं रुप्तीक तुइक्चा कली इ नोफा दाइक्तो।
- 2 मोपा गे होस पा बाक्शा, जोक्शा लोव्र पने चाप्नेवे।
- 3 हेंथे पाइब मीश मुर आ शोव्र रे खुदो याप्ब। मिनु मेको आ लोव्र तेल क्येडा ग्रेन्देल बाक्ब। हितोपदेश २:१६-१९
- 4 नोले मेको मीश मुर ककीर खोदेशो कशो नु निम्फा गे हेरेशो धार पाइरशो तरवार खोदेशो दुम्ब।
- 5 मेको आ लां बेक्चा कली लुक्च लाइब। मेको बेक्शो मुर आन बाक्तीके लचा कली आंम कली तेक्ने मचाप्ब।
- 6 मिनु मेको ब्रॉइचा गेब लां रे डोन लाइब। मेको आ लां हेंथे बाक्त हना यो, मेकोमी मारेइ मतुइक्ब।
- 7 मुल आं तौपुकी, आं लोव्र नेनीन। आं देशो लोव्र मनेशो खोदेशो मपने।
- 8 मोदेशो मीश मुर क्येडा डोन बाक्कीन। मिनु आ खिं डा लाप्चो आ नेक्था मलने।
- 9 लाइतीनी हना, गे इन मान अरु आन कली गेशा, साइक्ब आ गुइमी दुम्नीनी।
- 10 मिनु अरु मुरुमी इन शोप नेल्ले जाइनीम। इन श्येत पा चेम्शो मारेइ मारेइ अरु आन खिं लाइब।
- 11 मिनु नोले गे श्येत जशा, बेक्चा चिक्शा हुकयी पा, रां नेल्ल सोव्रशा गेयशो दुम्नीनी।
- 12 मिनु गे “गो मारदे परमप्रभु आ शेंशो मपडा, माइ? मारदे आ हुइरशो मटिडा माइ?
- 13 गो आं कली शेंब आन लोव्र मनेंनु। आं कली अर्ती गेब आन लोव्र मटिड।
- 14 मुल गो खतम दुम्ती। मुर नेल्ल आन तुइक्चा डा पा खतम दुम्ती” देंनेवे। ब्यवस्था २२:२८-२९
- 15 मिनु गे आंम कुवा डा ब्वाक्कु नु आंम बुक्तीके डा ब्वाक्कु तूशो खोदेशो पा गे इ मीश नु बाक्को।
- 16 इ बुक्शो ब्वाक्कु, लां मेर लचा गेनेवे? अरु मीश रे थिशो आल लांमी बाक्मानु, इ कली रिम्शो दुम्बा?
- 17 इ आल इ के ला दुम्ल। मेको अरु आन के मदुम्ल।



18 इ बुक्शो ब्वाक्कुम आसीक तवल । इ ठिटा बाक्ची ना ग्युंवे पशो मीश आल नु ग्येरसीशा बाक्को । उपदेसक ९:९

19 मेको दारशो किश्श नु रिम्शो रोकशो खोदेशो बाक्ब । मेको आ दारस नु दाक्तीकेमी गे गेना हना यो ग्येरशा बाक्को ।

20 आं तौ, गे मारदे मारेइ मतुइक्थु हेंथे मीश मुर नु गाक्नेवे? गे मारदे अरु मुर आ मीश कली मुप्नेवे?

21 मारदे हना परमप्रभु यावेमी मुर आ पशो नेल्ल ताइब । मेकोमी मुर आन लां नाक्ब ।

22 परमप्रभु यावे आ अरेशो मटीब मुर आ मरिम्शो पशोमी ग्याइक्चा पुंडसीब । मेको आ पाप आ ग्याइलीमी रेट्चा पुंडसीब ।

23 आंम कली चलेने मचाप्थु, हुइश्शो मटितीके मेको बेक्ब । आ मरिम्शो पतीकेम मेको जाम्शा लाइब ।

## 6

### ४ ओटा होस पतीके

1 आं तौ, इ नेक्था डा मुर आ जमानी दुम्ते हना, सल्ला पने थुम्शो बाक्ते हना, हितोपदेश ११:१५; हितोपदेश २०:१६; हितोपदेश २२:२६

2 गे इ लोवमी फ्रेंसीशो बाक्ते हना, गे ग्युम्चशो बाक्नेवे ।

3 मुल मार पचा माल्नेवे देशा हना, गे आंम कली प्रोनो । मारदे हना गे इ नेक्था डा मुर आ गुइमी बाक्नेवे । मेको कली नमो सिमो पा आ डोंइती बाप्पो ।

4 इप्शा मबाक्को । काइ निन्द्रा मपावो ।

5 किश्श सिखारी आ गुइ रे ब्राइशो नु चिक्ब ग्याइक्ब आ गुइ रे बेरशो खोदेशो पा, गे यो आंम कली प्रोनो ।

6 गे अल्से, रकमिक्च आन कली कोवडो । आन पशो कोवडो । मिनु जोक्ब तुइक्ब दुमो । हितोपदेश १०:४; हितोपदेश २०:४

7 मेको आन कली अरेब, सासन पाइब नु हुकुम पाइब मबाक्तेकम हना यो,

8 मेकोपुकीमी जचा थोव्रक खेक्चा कली खुप्ची ना खुप्नीम ।

9 गे अल्से, गेना सम्म इप्शा बाक्नेवे? गेना निन्द्रा रे सेंसीशा बोक्नेवे?

10 याम का डा निन्द्रा पतीके, याम का डा मुकु जिशा बाक्तीके नु याम का कुचुमी गुइ वोइश्शा, नाइश्शा बाक्तीकेमी, हितोपदेश २४:३३-३४

11 पुडग दुम्तीके खुइ खोदेशो पा जाक्ब । इन मार मार माल्तीके या कुरशो लडाइ पाइब खोदेशो पा जाक्ब ।

12 हिंचा डा मरिम्शो पाइब नु शोर गाक्शो मुर हेंथे लोव पा गाक्नीम । हितोपदेश १०:३१-३२

13 मिक्च रिक्शा, खोइलीमी चाल पा, ब्रेप्चोमी यो चाल पाइनीम । हितोपदेश १०:१०

14 मेको आन दूली थुंमी मरिम्शो मिन्मीम । मेकोपुकीमी गेना हना यो मुर आन कली जिपाइक्नीम ।

15 मोपतीके मेको आन मतुइक्चा डा पा मेको आन तार श्येत जाक्ब । मिनु मारेइ पचा मतथु, खतम दुम्नीम ।

16 परमप्रभु यावेमी ६ ओटा थोव्रक काइ मदाक्ब । ७ ओटा थोव्रक पशो तशा ग्रांग्रा दीब ।

17 मेको मार बाक्नीम देशा हना, ठेयब लेत्तीके, जोल पतीके, दोस मताइब मुर आन कली हुश खाक्श पोक्तीके,

18 मरिम्शो पचा कली मिम्ब थुं, मरिम्शो पचा चुइक्तीके,

19 जोल पाइब सांक्छी बाक्तीके नु वोबु आन दातेम जिचा पोक्ब काइ मदाक्ब । मेको ७ ओटा थोव्रक बाक्नीम ।

### वोंइश मुर आन कली अर्ती

20 आं तौ, इ आफ आ अरेशो टिवो, इम्मा आ शेंशो लोव मप्रोनो । हितोपदेश १:८

21 मेको गेना हना यो इ थुंम वोतो । मेको कली माला खोदेशो पा रेल्सो ।

22 मिनू गे ते लते हना यो, मेकोमी इ कली लां कोंइनीस। गे इप्ते हना, मेकोमी इ कली खाल पाइनीस। गे सेंसेनु, गे नु लोत्र पाइनीस। भजन संग्रह ११९:१७२

23 मारदे हना मेको अरेशो बत्ती नु शेंशो छेडछेड बाक्नीस। ठीक पचा कली हुडक्तीके ब्रोंइचा गेब लां बाक्ब।

24 मेकोमी हेंथे गाक्ब मीश मुर रे डोन बाक्पाइक्नीम। मिनू हेंथे गाक्ब ग्युंवे पशो मीश मुर आन ग्रेन्देल लोत्र रे डोन बाक्पाइक्नीम। हितोपदेश २:१६

25 मेको आ दारशो कुल तथा इ थुंमी मवलो। मेको आ कोत्रशोमी इ कली हेंथे मगाक्पदल।

26 तेल्लेम आ गाल्च शोब्ले का डा ला बाक्ब। तन्न ग्युंवे पशो मीश मुर नु बाक्चा वोंइश मुर आ ब्रोंइतीक नेल्ल रोइक्ब।

27 मुरुमी आ कुचुमी मी वोइक्तु हना, आ वा मदुप्बा डा?

28 मुर ब्रशो कोइला तार गाक्त हना, मेको आ खोंइली मचोंइबा डा?

29 अरु मुर आ मीश नु इप्ब मुर मोदेशो दुम्शा, सु मेको मीश मुर कली थीबा, मेको सजाइ मतथु, मब्रोंइब। हितोपदेश ५:८-१४

30 खुइमी शोत्रलु बेक्शा, जचा थोत्रक खुइ पाप्तु हना, मेको मुने मदोक्ब।

31 तन्न मेको ग्याइक्चा पुंइसाक्व हना, आ खुइ पशो ७ खेयप तेम्शा थाप्चा माल्ब। मेकोमी आ खिं आ शोंप नेल्ल थाप्चा माल्ब। प्रस्थान २१:३७

32 मोपा मुर आन मीश नु इप्ब, निप्स मपाइशो मूर्ख बाक्ब। मोदेशो पाइबमी आंम कली खतम सेल्ब।

33 मेको तुप्चा नु मुने तोक्चा पुंइसीब। मेको आ मुने गेनायो मक्याम्सीब।

34 मिनू मेको मीश मुर आ वोंइश शुश गाइक्ब। मिनू मेकोमी क्येक्क लेत्ची नाक्ती मेको कली मारेइ शिशी मपाइब।

35 मेको कली गिश क्येट गेप्तीवी हना यो, मेकोमी मताक्ब।

## 7

### हेंथे पाइब मीश मुर

1 आं तौ, आं लोत्र टिवो। आं शेंशो लोत्र इ थुंम वोतो।

2 गे आं अरेशो मप्रैताक्वी हना, गे ब्रोंइनेवे। आं शेंशो इ मिक्च खोदेशो पा होस पा वोतो।

3 मेको कली इ ब्रेप्चोम फ्रेंदो। इ थुंमी ब्रेक्शा वोतो।

4 गे तुइक्तीक कली “आं समी ननी” देनो। मिनू जोक्तीक तुइक्तीके कली “आं नेल्ल क्येडा गारब वारच बाक्नीनी” दे लोत्र पावो।

5 मो पाप्तीवी हना, मेकोमी इ कली हेंथे पाइब ग्युंवे पशो मीश मुर आ ग्रेन्देल लोत्र रे प्रोंइब।

6 मिनू गोमी आं खिं डा झेल रे कोंवता। गोमी लां गे कोंवता।

7 मिनू गो मार ताता देंशा हना, मारेइ मजोक्ब नु ठिटा आन दातेमी निप्स मपाइशो ठिटा का कली ताता।

8 मेको वोंइश आल लां मेर गाक्शो ताता। मेको हेंथे गाक्ब मीश मुर आ खिं गे लना लन पशो ताता।

9 गो मेको कली नां रिचावानु, छिडछिड दुम्ची ना ताता।

10 मेको मीश मुर मेको कली गुम्चा कली गूत। तेल्लेम खोदेशो पा फेक्शा “मेको कली हेंथे खोइक्पाइक्नुड” दे मिम्शो बाक्त।

11 मेको मीश मुर मारेइ महिंब नु मुने मपाइब बाक्ब। मेको गेनायो आ खिंम बाक्चा मदाक्ब।

12 मिनू मेको लां एर ओंथ, शुश मुर बाक्तीके मेरे हिरशा, कुना मेर रिम्ना रिम्न बाक्ब।

13 मिनू मेको मीश मुरुमी मेको कली ग्याइशशा, पुक्पु पा मुने मपथु

14 “गो मुलाक्ती दुशा बाक्चा आ पबंम चढ्हेतीके चढ्हेचा माल्शो नड। मेको आं कसम मुलाक्ती खाप्ता। लेवी ७:१५-१७

15 मोपतीके गो इ कली गुम्थ जाक्ती। गो इ कली शुश माल्शा थित्ता।

- 16 गो आं ब्राख्येमी बरखी ब्राता। मेको इजीप्त रागी डा श्येलेम प्रोव्रशो बाकब।  
 17 गो आं ब्राख्येमी मूरे, एलोव्र नु सिन्कौलीमी ब्रोव्रशो रिना पपाइक्ता।  
 18 पिवो। गो निक्शी इप्स। नेल्ल नाकदो काथा ग्येरसीशा इप्स।  
 19 मारदे हना आं वोंइश खिमी मबाकब। मेको डोन लत।  
 20 मेको शुश क्येट कुरसीशा लत। मोपतीके पूर्ने सम्म मजाकब” देंत।  
 21 मोपा शुश लेम्शा, मेकोमी वोंइश आल कली लाइक्तु। आ मिलो शिलो लोव्रमी मेको कली हेंथे खोइक्पाइक्तु।  
 22 मिनु मेको वोंइश आल मेको मीश मुर आ नोले रीब पा खोइक्तु। क्योरचा कली खुल्लो ब्यफ खोदेंशो पा गाकत। ब्वारदमी रेट्चा कली प्रेक्शो किश्श खोदेंशो पा मेको आ नोले लत।  
 23 मिनु ब्राम ख्रशा, बेक्चा सम्म रिम्ब। चिक्ब ब्वारदम रेट्चा चिक्शो खोदेंशो पा “बेक्नुड” दे मतुइक्ब।  
 24 मुल आं तौपुकी, आं लोव्र नेनीन। इन नोफा दाइश्शा, आं लोव्र नेनीन।  
 25 इन थुं मोदेंशो मीश मुर आ लांम लचा मगेने। मेको आ हेंथे लां मलने।  
 26 मेकोमी शुश मुर आन कली खतम सेल्लु। आ साइश्शो शुश बाक्नीम।  
 27 मेको आ खिं बेक्शो मुर आन बाक्तीक लतीक लां खोदेंशो बाकब। मेको लां बेक्तीक कोटा जाक्दीप्ब।

## 8

### तुइक्तीके ठेयब बाकब

- 1 तुइक्तीकेमी लोव्र मपाइबा डा? रुप्तीकेमी ठेयब सेंदा पा मब्रेप्बा डा? हितोपदेश १:२०-२३  
 2 मेको लां आ नेक्था डा डांडा तारी नु ब्रालाम दोक राप्ब।  
 3 ठेयब लाप्चो आ नेक्था सहर आ डांडती, मेको आ ओव्रतीकेमी ठेयब सेंदामी ग्रीब।  
 4 मार देंशा ग्रीब देंशा हना, मुरपुकी, गो इन कली लोव्र पाइनुड। मुर नेल्ल आन कली लोव्र पाइनुड।  
 5 मारेइ मजोक्बपुकी होस पतीके शेंसीन। निप्स मपाइश्शो बाक्तीनी हना, निप्स पाइश्शो दुमीन।  
 6 नेनीन, गो रिम्शो लोव्र पाइनुड। आं लोव्र ठीक बाकब।  
 7 गो थमा लोव्र ला पाइनुड। परमप्रभु यावे आ अरेशो मटितीके तशा, गो ग्रांरा दीनुड।  
 8 गो ठीक लोव्र ला पाइनुड। दूली नु हेंथे लोव्र मपाइनुड।  
 9 मिनु मेको आं लोव्र रुपब आन कली मखुइश्शो लोव्र बाकब। जोक्ब आन कली ठीक लोव्र बाकब।  
 10 चांदी आ पा डा आं अर्ती खुप्तीन। क्येख सुन आ पा डा जोक्ब थुं मालीन। हितोपदेश ३:१४  
 11 मारदे हना हीरा क्येडा तुइक्तीके रिम्शो बाकब। इ माल्लो मारेइ मारेइ नेल्ल मेको क्येडा आइक्च बाक्नीम।  
 12 गो तुइक्तीके नड। गो होस पतीक नु बाक्नुड। गो जोक्ब नु मिम्ब दुम्नुड।  
 13 परमप्रभु यावे कली मान पा हिंचा, मरिम्शो पचा कली काइ मदाक्चा बाकब। फुरती कोंइचा, ठेयब लेशशो दुम्चा, मरिम्शो थुं डा गेय पचा नु दूली लोव्र पचा काइ मदाक्नुड।  
 14 अर्ती नु ठीक पा तुइक्तीक गो नु बाक्नीस। गो नु जोक्तीक तुइक्तीक नु बोल यो बाक्नीम।  
 15 गो रे पा पिपपुकीमी सासन पाइनीम। हुकुम पाइबपुकीमी ठीक पा अरेतीक लोव्र पाइनीम।  
 हितोपदेश १६:१२  
 16 आं पतीकेमी रागी रागी डा हुकुम पाइबमी हुकुम पाइनीम।  
 17 सुमी आ कली दाक्नीमी, गो यो मेको आन कली दाक्नुड। सुम आं कली शुश माल्नीमी, मेकोमी आं कली थिल्लीम।  
 18 शोंप नु मान गो नु बाक्नीस। मिनु मनुप्ब शोंप नु सोशा बोशा ग्येत्थ लतीक गो नु बाक्नीस।  
 19 सुन नु क्येख सुन क्येडा आं गेशो फल रिम्शो बाकब। आं रे पा गूशो मारेइ मारेइ चांदी क्येडा रिम्शो बाक्नीम।  
 20 गो ठीक पतीक लां गाक्नुड। ठीक निसाफ पाइनुड।

21 आं कली दाक्ब आन कली गो शुश शोप गेनुड। गो मेको आन मार मार वोडक्तीक नेल्ल प्रिंशा गेनुड।

22 मिनु मेकोमी “परमप्रभु यावेमी नेल्ल सेल्चा क्येडा डोंइती आं कली सेल्लती। अय्युब २८:२३-२८

23 नेल्ल क्येडा डोंइती डा गो नड। रागी क्येडा डोंइती यो गो नड।

24 समुन्द्र दुम्चा क्येडा डोंइती गो नड। ब्वाक्कु बुक्चा क्येडा डोंइती गो बाक्ती।

25 डांडापुकी दुम्चा क्येडा डोंइती नु पहाड दुम्चा क्येडा डोंइती गो नड।

26 मेकोमी रू नु रागी सेल्चा क्येडा डोंइती गो नड। खप सेल्चा क्येडा डोंइती गो नड।

27 मेकोमी सरीड प्राक्शा वोडक्ची ना गो नड।

28 गोस्स कली सरीडमी वोडक्ची ना नु खप आगा डा ब्वाक्कु बुक्तीके कली ठीक पा वोडक्चा ना,

29 ठेयब समुन्द्र आ शुइच वोडक्ची ना नु रागी आ जग वोडक्ची ना गो नड। भजन संग्रह १०४:९

30 मेना गो परमप्रभु यावे आ नेक्शा जोक्ब तुडक्ब गेय पाइब खोदेशो पा बाक्शो नड। मेकोमी नाक्त किंत किंत आं कली तशा ग्येरसाक्ब। गो यो मेको नु ग्येरसीशा बाक्ती।

31 मिनु आ मुरपुकीम ब्रीशो रागी तशा ग्येरसाक्ची। गो मुर आन कली तशा ग्येरसाक्ची।

32 आं तौपुकी, मुल आं लोत्र नेनीन। आं कोइशो लां गाक्बपुकी ग्येरसीशो मुर दुम्नीम।

33 आं अर्ती नेशा जोक्ब तुडक्ब मुर दुमीन। मेको कली मप्रोनीन।

34 सुम आं लोत्र नेबा, मेको ग्येरसीशो मुर दुम्ब। मेको मुरुम नाक्त किंत किंत आं लाप्चो कोव्रशा आं कली रिम्ब।

35 सुम आं कली थिप्बा, मेको ब्रोंइचा ताइब। मिनु परमप्रभु यावेमी मेको कली दाक्ब।

36 आं कली मथिप्बपुकी चहिं आम कली खतम सेल्नीम। आं कली काइ मदाक्ब नेल्ले बेक्चा दाक्नीम” दैत।

## 9

### तुडक्तीके नु मारेड मतुडक्तीके

1 तुडक्तीकेमी आमं खिं सेल्शा, ७ ओटा थाम खुक्तु।

2 मेकोमी भोज सेल्लु अडगुर शांबु ब्रोंवपाइशशा, राडी ब्रशा, जचा कली ठीक पशो बाक्त।

3 आ वाइलीम आन कली “सहर डा डांडा रे मुर आन कली ब्रेत्तीन” दे सोइक्ताक्ब।

4 “मारेड मजोक्ब नेल्ल एक जाक्कीन” दैत। निप्स मपाइशो आन कली

5 “जाक्कीन, आं शोब्ले जने। आं ब्रोंव पा सेल्शो शांबु यो तूडीन” दैत।

6 क्येख मुर आन लां गाक्चा प्रोनीन। मिनु जोक्ब तुडक्ब आन लां गाक्शा, ब्रोंइशा बाक्कीन।

7 सुमी शुक्शी पाइब आन कली “रिम्शो दुमो” देबा, मेको दिप्चा पुंडसीब। सुमी परमप्रभु यावे आ अरेशो मटीब आन कली हुडक्बा, मेको मरिम्शो पाइक्चा पुंडसीब।

8 सुमी शुक्शी पाइब आन कली हुडक्बा, मेको काइ मदाक्चा पुंडसीब। सुमी चहिं जोक्ब तुडक्ब आन कली हुडक्बा, मेको दाक्चा पुंडसीब।

9 जोक्ब तुडक्ब आन कली अर्ती गेशोनु, डोंइती क्येडा जोक्ब तुडक्ब दुम्नीम। ठीक पाइब आन कली शेंशोनु, मेको क्येडा ठीक पचा शेंसीनीम।

10 परमप्रभु यावे कली मान पा हिंचा जोक्तीक तुडक्तीक गोतीक बाक्ब। मिनु सुमी मेको का ला परमप्रभु यावे कली तुडक्बा, मेको रूप्ब दुम्ब। हितोपदेश १:७

11 मारदे हना आं पतीकेमी गे शुश नाक्ती ब्रोंइनेवे। इ ब्रोंइतीक शुश बर्स तेम्चा पुंडसीनेवे।

12 गे जोक्ब तुडक्ब दुम्ते हना, मेको इ कलीन दुम्ब। गे शुक्शी पाइब दुम्ते हना, मेको रे पिशो दोस नेल्ल इ केन बाक्ब।

13 मूर्ख मीश मुर शुश रेयके पाइब। मेको मारेड मजोक्ब नु मारेड मतुडक्ब बाक्ब।

14 मेको आ खिं डा लाप्चोमी निप्ब। सहर आ इर डा नित्तीकेमी निप्ब।

15 सु सु आन गेय पा मेको लां गाक्नीमी, मेकोमी मेको आन कली ब्रेण्व।

16 मिनु “सु सु मारेड मजोक्ब बाक्नी, एक जाक्कीन” देंब। मिनु मेकोमी निप्स मपाइशो आन कली

17 “खुइ पशो ब्वाक्कु ब्रोत्रशो बाक्ब। मिनु खुइशशा जशो जचा थोत्रक यो थाम्पा ब्रोत्रब” देंब।

हितोपदेश २०:१७

18 मिनु मेको लां गाक्ब मुरपुकीमी “मेको आ खिं बेक्शो मुर आन बाक्तीके बाक्ब” दे मतुइक्नीम।

मिनु मेको आ पौनामी आन कली बेक्शो मुर आन बाक्तीकेमी ब्रेशो बाक्नीम, दे मतुइक्नीम।

## 10

सोलोमन आ ब्रेक्शो लोत्र

1 जोक्ब तुइक्ब तौमी आ आफ कली ग्येरपाइक्ब। तन्न मूर्ख तौमी चहिं आ ममा कली सुर्ता पपाइक्ब।

2 परमप्रभु यावे कली मटिथु, चेम्शो शोप शोर गाक्ब। सु ठीक पाइब बाक्मे मेको बेक्तीक रे ब्रोइब।

3 परमप्रभु यावेमी ठीक पाइब मुर आन कली शोत्रलु बेक्पाइशशा मवोइक्ब। तन्न आ अरेशो मटीब आन कली आन जत दाक्शो मगेब। भजन संग्रह ३७:१९, २५

4 सु अल्से बाक्मे, मेको पुडग दुम्ब। शुश गेय पाइब मुर चहिं शोप पाइशशो दुम्ब। हितोपदेश ६:६

5 सु अन्न खुप्ची ना खुप्बा, मेको होस पाइब तौ का बाक्ब। अन्न रुप्ची ना इण्व तौमी आ आफ कली मुने तोक्ब।

6 ठीक पाइब मुर आसीक राइनीम। तन्न परमप्रभु यावे आ अरेशो मटीब आन कली आन मरिम्शो पशोमी सुम्ब।

7 ठीक पाइब कली मिम्शा आसीक गेब। परमप्रभु यावे आ अरेशो मटीब आन नें चहिं जाम्शा लाइब। अय्युब १८:१७; भजन संग्रह ९:६

8 जोक्ब तुइक्ब थुं पाइशशो मुरुमी शेंशो लोत्र टीब। तन्न हेंथे लोत्र पाइब मूर्ख खतम दुम्ब।

9 गेना हना यो रिम्शो पाइब मुर कली सुइमी मारेड मपाइनीम। सु चहिं दूली लां गाक्बा, मेको आ पबंम नेल्लेमी “मरिम्शो पाइब” दे तुइक्नीम।

10 मिक्च रिक्बपुकीमी मुर आन कली श्येत गेनीम। तन्न सुमी महिंथु हुइक्बा मेकोमी थुं नाइशशा बाक्चा गेब। हितोपदेश ६:१२-१३

11 ठीक पाइब मुर आन लोत्र पतीकेमी ब्रोइनीम। तन्न परमप्रभु यावे आ अरेशो मटीब आंम आन लोत्र पतीकेमी खतम दुम्नीम।

12 मुर आन कली काइ मदाक्शोनु, जिचा बोक्ब। मुर आन कली दाक्शोनु चहिं, आन मरिम्शो पशो नेल्ल सुम्सीब। १पत्रुस ४:८

13 मिम्ब मुर आन लोत्र रुप्चा डा बाक्ब। तन्न ममिम्ब मुरपुकी तुप्चा पुंइसीनीम।

14 जोक्ब तुइक्ब मुर नु जोक्तीक बाक्ब। तन्न हेंथे लोत्र पाइब मूर्खमी खतम दुम्तीक चाक्ब।

15 शोप पाइशशो मुर आन शोप मेको आन बोल्यो दरवार खोदेशो बाक्ब। पुडग मुर आन श्येत दुम्तीकेम मेको आन कली खतम सेल्व। हितोपदेश १८:११

16 ठीक पाइब मुर आन गेय पतीकेमी ब्रोइनीम। परमप्रभु यावे आ अरेशो मटीब आन चेम्शो नेल्ल मरिम्शो गेय पा नुप्शा लाइब।

17 सु सुमी अर्ती टीनीमी, मेको ब्रोइचा गेब लां गाक्नीम। हुइशशो मनेब चहिं हेंथे लां गाक्नीम।

18 सुमी मुर काइ मदाक्बा, तन्न “दाक्नुड” देंबा, मेको मुर जोल्फे बाक्ब। सुम मुर आन पबंम जोल फ्राइबा, मेको मूर्खे बाक्ब।

19 शुश लोत्र पाइब मुरपुकीमी शुश गल्ली पाइनीम। होस पाइब मुर शुश मब्वाक्नीम।

20 ठीक पाइब मुर आन लोत्र रिम्शो चांदी खोदेशो बाक्ब। परमप्रभु यावे आ अरेशो मटीब आन थुं शोर गाक्शो बाक्ब।

- 21 ठीक पाइब मुर आन लोत्रमी शुश मुर आन कली रिम्शो दुम्ब। तन्न मूर्ख आन निप्स मपाइक्तीके बेक्शा लाइनीम।
- 22 परमप्रभु यावे आ आसीकम मुर आन कली शोप पाइश्शो सेल्ब। मेकोमी मारेइ श्येत मतेम्ब। भजन संग्रह १२७:२
- 23 मूर्ख मरिम्शो पचा कली ग्येरसीनीम। रुप्ब मुर जोक्ब तुइक्ब गेय तशा ग्येरसीनीम।
- 24 परमप्रभु यावे आ अरेशो मटीब मुर आन हिंशोम श्येत जाइनीम। तन्न ठीक पाइब मुर आन दाक्शो ताइनीम। हितोपदेश १:२७; भजन संग्रह ३७:४
- 25 श्येत फश गिवार खोदेशो पा जाक्मेनु परमप्रभु यावे आ अरेशो मटीबपुकी जाम्शा लाइनीम। तन्न ठीक पाइब मुर गेना हना यो ब्रोंइशा बाक्नीम। हितोपदेश १२:७
- 26 दोपा ग्युरशोमी खुइ ग्रिम्बा नु कुनमी मिक्च दुक्बा, मोपा अल्सी पाइब आन होत्रप आन कली दुम्नीम।
- 27 परमप्रभु यावे कली मान पा हिंतीकेमी ब्रोंइतीक नाक्त तेम्सीब। तन्न परमप्रभु यावे आ अरेशो मटीब आन ब्रोंइतीक नाक्ती खोंइसीब।
- 28 ठीक पाइब आन आस पतीके तशा ग्येरसीनीम। तन्न परमप्रभु यावे आ अरेशो मटीब आन आस पतीके जाम्शा लाइब। भजन संग्रह ९:१९; अय्युब ८:१३
- 29 परमप्रभु यावे आ लां रिम्शो थुं पाइश्शो मुर आन कली खुइश्शा ब्रोंइशा बाक्तीक बाक्ब। तन्न मरिम्शो पाइब आन कली मेको लां खतम दुम्तीक बाक्ब।
- 30 ठीक पाइब मुर गेनायो ग्येत्य लुक्च मदुम्नीम। परमप्रभु यावे आ अरेशो मटीबपुकी चहिं रागीमी मलीनीम। हितोपदेश २:२२
- 31 ठीक पाइब मुरुमी तुइक्तीक लोत्र पाइब। तन्न दूली लोत्र पाइब मुर आ लें फेत्चा पुंडसीब। भजन संग्रह ३७:३०
- 32 ठीक पाइब मुरुमी रिम्शो लोत्र पस जोक्ब। तन्न परमप्रभु यावे आ अरेशो मटीबपुकी दूली ला ब्वाक्स जोक्नीम।

## 11

### गेब मुरुमी तेम्शा गेचा पुंडसीब

- 1 परमप्रभु यावेमी जोल पा नाक्तीक तशा, ग्रांघा दीब। तन्न ठीक नाक्तीक तशा शुश ग्येरसीब। लेवी १९:३५-३६
- 2 ठेयब लेशशो मुर मदाक्चा पुंडसीब। तन्न तुइक्तीक ब्रेम्शो मुर नु बाक्ब। हितोपदेश १६:१८
- 3 रिम्शो थुं पाइश्शो मुर आन कली गेना हना यो आन रिम्शो पतीकेमी लां कोंइब। तन्न थमा सुइक्चा मपुंडसीब मुर आन कली आन मरिम्शो पतीकेमी खतम सेल्ब।
- 4 गाइश्शो नाक्ती शुश शोप शोर गाक्शो दुम्ब। तन्न ठीक पतीकेमी बेक्तीक रे प्रोंइब। लूका १२:२०; हितोपदेश १०:२
- 5 दोस मताइब आन ठीक पतीकेमी मेको आन लां थेल्ब। तन्न परमप्रभु यावे आ अरेशो मटीब आन मटितीकेमी खतम दुम्नीम।
- 6 रिम्शो थुं पाइश्शो मुर आन ठीक पतीकेम ब्रोंइचा ताइनीम। तन्न थमा सुइक्चा मपुंडसीब मुर आन मरिम्शो पतीकेमी ग्याइक्चा पुंडसीनीम।
- 7 परमप्रभु यावे आ अरेशो मटीब मुर बेक्मानु, आन आस यो जाम्शा लाइब। मेको आन मिम्शो नेल्ल मदुम्ब। हितोपदेश १०:२८
- 8 ठीक पाइब मुर हिंचा डा श्येत रे प्रोंइचा पुंडसीनीम। तन्न परमप्रभु यावे आ अरेशो मटीबपुकी मेको श्येतमी हुम्सीनीम।
- 9 मरिम्शो मुर आन लोत्रमी आन नेक्था डा मुर आन कली खतम सेल्नीम। तन्न ठीक पाइब मुर मेको आन जोक्तीकेमी प्रोंइचा पुंडसीनीम।

10 ठीक पाइब मुर आन कली रिम्शो दुम्त हना, सहर डा मुर नेल्ल ग्येरसीनीम। परमप्रभु यावे आ अरेशो मटीब खतम दुम्मानु, मुर नेल्ल थाप्पा ग्येरसीनीम।

11 रिम्शो थुं पाइश्शो मुर आसीक तामेनु, सहर कली रिम्शो दुम्ब। तन्न परमप्रभु यावे आ अरेशो मटीब आन लोत्रमी सहर कली मरिम्शो दुम्ब। हितोपदेश २८:१२

12 सुमी अरु मुर आन कली आइक्च सेल्बा, मेको निप्स मपाइश्शो बाक्ब। तन्न निप्स पाइश्शो मुर सिक्सी पा बाक्ब। भजन संग्रह १५:३

13 लोत्र क्याल्बमी खुइश्शो लोत्र यो फ्राइनीम। तन्न थमा सुइक्चा पुंडसीब मुरुमी मोदेशो लोत्र ख्राप्पा वोइक्नीम।

14 लां कौंइब मबाक्त हना, रागी खतम दुम्ब। तन्न अर्ती गेब शुश बाक्तेक्म हना, मेको लीब।

15 अरु मुर आन जमानी बाक्शोनु, मरिम्शो दुम्ब। तन्न जमानी मबाक्शो रिम्शो दुम्ब। हितोपदेश ६:१-२

16 रिम्शो थुं पाइश्शो मीश मुर कली मान पाइनीम। तन्न मरिम्शो पाइब मीश मुनेमी सुम्सीशो बाक्ब। गेय मपाइब मुर पुडग दुम्ब। तन्न आंट पा गेय पाइबमी क्येट चेम्ब।

17 रिम्शो पाइब मुरपुकीमी आंम कली रिम्शो पाइनीम। तन्न मरिम्शो पाइबपुकी श्येत गेंसीनीम।

18 परमप्रभु यावे आ अरेशो मटीब मुरुमी क्येट चेम्ब, तन्न मलीब। तन्न ठीक पाइब मुरुमी इनाम ताइनीम।

19 सु गेना हना यो ठीक पाइब बाक्बा, मेको ब्रौंइब। तन्न सु मरिम्शो पचा कली चुइक्बा, मेको बेक्ब। हितोपदेश १९:२३

20 मरिम्शो थुं परमप्रभु यावे कली ग्रान्ग्रा बाक्ब। तन्न दोस मताइब रिम्शो थुं पाइश्शो मुर आन लां गाक्शो तशा ग्येरसीब।

21 मरिम्शो पाइब मुर सजाइ मतथु मब्रौंइनीम। मेको थमा बाक्ब। तन्न ठीक पाइब आन चच युइ ब्रौंइचा ताइनीम।

22 निप्स मपाइश्शो दारशो मीश मुर सुन के मुन्द्री पांइशो पोत्र खोदेशो बाक्ब। हितोपदेश ३१:३०

23 ठीक पाइब मुर आन दाक्शो थमा पा ताइनीम। परमप्रभु यावे आ अरेशो मटीबम गाइक्पाइक्नीम।

24 का निक्शी मुरुम शुश गेनीम हना यो, आन शोंप मेको क्येडा बारब। का निक्शी चहिं आन गेचा माल्शो मगेथु, पुडग दुम्नीम। मत्ती २५:२९; २कोरिन्थी ९:६

25 हाइश्शो मुरुमी शुश ताइब। सुम अरु आन कली वारच पाइक्बा, मेकोमी आंमा यो वारच पाइक्चा पुंडसीब।

26 अरु आन कली अन्न मगेथु खेक्शा वोइक्ब मुर सराप पाइक्चा पुंडसीब। तन्न अन्न लेयब मुर आसीक ताइब।

27 सुम रिम्शो पतीके माल्शा पाइबा, मेकोमी शिशी माल्ब। सुम मरिम्शो पतीके माल्बा, मेको मरिम्शो पाइक्चा पुंडसीब।

28 सुमी आ शोंप कली थमा सुइक्बा, मेको रीब पा बेक्ब। ठीक मुर चहिं गिग घांस खोदेशो पा बारशा लाइब। भजन संग्रह ५२:९-१०

29 आंम खिं डा मुर आन कली श्येत चाक्बमी मारेइ मथेरब। मिनु मूर्खपुकी जोक्ब तुइक्ब आन वाइल दुम्नीम।

30 ठीक पाइब मुर आन पतीके ब्रौंइचा गेब रवा खोदेशो बाक्ब। तन्न हुश ख्राक्श पोक्बमी मुर आन कली साइक्ब। हितोपदेश ३:१८

31 ठीक पाइब मुरपुकीमी रागीम बाक्मानु, आन ठीक पशो डा इनाम ताइनीम। परमप्रभु यावे आ अरेशो मटीब नु मरिम्शो पाइबपुकीमी यो आन मरिम्शो पशो डा इनाम ताइनीम। १ पत्रुस ४:१७-१८

1 सु सुमी शेंसीतीके दाक्नीमी, मेकोमी जोक्तीक दाक्नीम। सुमी हुडक्तीक काड मदाक्नीमी, मेको निप्स मपाइश्शो बाक्नीम। हितोपदेश १३:१; हितोपदेश १३:१८

2 परमप्रभु यावेमी रिम्शो पाइब मुर आन कली दाक्ब। दूली मिम्शा हेंथे पाइब आन कली चहिं दोस गेब।

3 परमप्रभु यावे आ अरेशो मटीब रिम्शो मबाक्नीम। तन्न ठीक पाइब बोल्यो शाक्श पाइश्शो रवा खोदेशो बाक्नीम।

4 रिम्शो मीश आ वोंइश आ सिरपेच खोदेशो बाक्ब। मुने तोक्ब मीश चहिं आ वोंइश कली राक्शो रुश खोदेशो बाक्ब। हितोपदेश ३१:१०-३१

5 ठीक पाइब मुर आन मिम्शो ठीक बाक्ब। तन्न परमप्रभु यावे आ अरेशो मटीब आन अर्ती चहिं दूली बाक्ब।

6 परमप्रभु यावे आ अरेशो मटीब आन लोत्र मुर साइक्तीक बाक्ब। तन्न रिम्शो थुं पाइश्शो मुर आन लोत्रमी मेको आन कली प्रोंइब।

7 परमप्रभु यावे आ अरेशो मटीबपुकी बेक्शा जाम्शा लाइनीम। ठीक पाइब नु मेको आन खिं डा मुर नोले सम्म लीनीम। हितोपदेश १०:२५

8 निप्स पाइश्शो मुरपुकी मान ताइनीम। दूली थुं पाइश्शो मुर आन कली चहिं महिक्नीम।

9 “ठेयब मुर नड” देंखु पा जचा मताइब मुर दुम्चा क्येडा महिक्सीशो दुम्शा, वाइल का बाक्शो रिम्शो बाक्ब।

10 ठीक पाइब मुरपुकीमी आंम बी ब्यफ, क्यारश भेडा आन कली रिम्शो कोत्रनीम। तन्न परमप्रभु यावे आ अरेशो मटीबपुकीमी शिशी मपाइनीम। प्रस्थान २३:५

11 सु सुमी आंम रूम शोक्नीमी, मेकोमी जचा शुश ताइनीम। तन्न सु सुमी शोर गाक्शो लोत्र पा गाक्नीमी, मेको निप्स मपाइश्शो बाक्नीम। हितोपदेश २८:१९

12 परमप्रभु यावे आ अरेशो मटीबपुकी रोइश्शो थोत्रकीम आस पाइनीम। तन्न ठीक पतीके आ शाक्शम फल सिप्पाइक्ब।

13 मरिम्शो पाइब मुर आंम मरिम्शो लोत्रमी ग्याइक्चा पुंडसीनीम। तन्न ठीक पाइब मुर श्येत रे ब्रोंइचा ताइनीम।

14 मुरपुकी आंम लोत्रम पतीके मान ताइनीम। मिनु गेय पाइब मुरपुकीमी आन गेय डा इनाम ताइनीमी। हितोपदेश १८:२०

15 मूर्खपुकी आंम लां नेल्ले “ठीक बाक्ब” दे मिम्नीम। तन्न जोक्ब तुइक्बमी अर्ती नेनीम।

16 मूर्खपुकीमी आन गाइक्चा रीब पा कोइनीम। तन्न होस पाइश्शो मुर कली मरिम्शो लोत्र पांम्तेक्म हना यो, सिक्सी पा बाक्ब।

17 सुमी थमा लोत्र पाइबा, मेकोमी ठीक पतीके कोइब। तन्न जोल पाइब सांक्छीमी गेना हना यो दूली लोत्र पाइब।

18 मुर आन ममिम्थु पशो लोत्रमी तरवार खोदेशो पा थोक्ब। तन्न जोक्ब तुइक्ब मुर आन लोत्रमी सापाइक्ब। हितोपदेश १३:३

19 थमा लोत्र पाइब मुर गेना हना यो लीनीम। तन्न जोल पाइब मुर याम का ला लीनीम।

20 मरिम्शो मिम्ब आन थुंमी जोल ला बाक्ब। तन्न थुं नाइक्तीक अर्ती गेब ग्येरशा बाक्नीम।

21 ठीक पाइब मुर आन कली श्येत मदुम्ब। तन्न परमप्रभु यावे आ अरेशो मटीब आन कली श्येतम गिल्लो बाक्नीम।

22 परमप्रभु यावेम जोल पाइब आन कली तशा ग्रांग्रा दीब। जोल मपथु, आ अरेशो टीब आन कली तशा ग्येरसीब।

23 निप्स पाइश्शो मुरुमी आ तुइश्शो मकोइब। तन्न मूर्खमी मूर्ख लोत्र पाइब।

24 शुश गेय पाइब मुर हुकुम पाइब दुम्नीम। तन्न अल्सी पाइब चहिं वाइल दुम्नीम।

25 सुर्ता पतीकेम मुर आन थुं लुक्य लपाइक्ब। तन्न रिम्शो लोत्रमी मेको आन कली ग्येरपाइक्ब। हितोपदेश १६:२४



- 26 ठीक पाइबपुकीमी आन वारच आन कली रिम्शो अर्ती गेनीम। तन्न परमप्रभु यावे आ अरेशो मटीबपुकीमी दूली लां कोइनीम।  
 27 अल्से सिखारीम सिखार मताइनीम। तन्न शुश गेय पतीकेमी मुर आन कली शोंप पाइशो सेल्ब।  
 28 ठीक पतीक लामी ब्रोंइतीक बाक्ब। मेको लां गाक्बपुकी मबेक्नीम।

## 13

ब्रोंइचा गेब मार बाक्बा?

- 1 जोक्ब तुइक्ब तौमी आ आफ आ शेंशो दाक्ब। तन्न शुक्शी पाइबमी हुइशो मनेंब। हितोपदेस १:८; १२:३  
 2 आन लोव्रम पतीके मुरपुकीम मारेइ मारेइ रिम्शो ताइनीम। तन्न थमा मसुइक्चा डा मुरपुकी दूली पचा ला दाक्नीम।  
 3 मिम्शा लोव्र पाइब मुरुम आंम कली ब्रोंइपाइक्नीम। तन्न ममिम्थु ब्वाक्बपुकीमी आंम कली खतम सेल्नीम। हितोपदेस १२:१८; हितोपदेस २१:२३  
 4 अल्सेपुकी वाल्नीमी। मिनु मारेइ मताइनीम। तन्न शुश गेय पाइब मुरपुकीमी मारेइ मारेइ ताइनीम।  
 5 ठीक पाइब मुरुमी जोल मदाक्नीम। तन्न परमप्रभु यावे आ अरेशो मटीब मुरुमी मुने दोक्चा डा नु दोस तचा डा गेय ला पाइनीम।  
 6 ठीक पतीकेमी रिम्शो थुं पाइशो मुर आन कली कोव्रब। तन्न परमप्रभु यावे आ अरेशो मटीब आन पाप पतीकेमी मेको आन कली खतम सेल्ब।  
 7 का निक्शी मुर पुडग बाक्शा यो “क्येट थीब नड” देखु पाइनीम। का निक्शी मुर चहिं क्येट थीब बाक्शा यो “पुडग नड” देखु पाइनीम। प्रकाश २:९; प्रकाश ३:१७  
 8 शुश शोंप बाक्शो मुरुमी आंम कली प्रोंइने चाक्ब। तन्न पुडगपुकी हिंच कोइचा मपुंडसीनीम।  
 9 ठीक पाइब मुर बत्ती खोदेंशो छेडछेड पा ब्राइनीम। तन्न परमप्रभु यावे आ अरेशो मटीब आन बत्ती काप्शा लाइब। अय्युब १८:५-६  
 10 ठेयब लेशो नु सुइ कली ममिम्ब मुर जिचा पोक्ब बाक्ब। तन्न अर्ती नेंब मुर तुइक्तीके नु बाक्ब। हितोपदेस १:५  
 11 मरिम्शो पा चेम्शो शोंप नुप्शा लाइब। तन्न इच्का इच्का पा चेम्शो शोंप बारना बारन लाइब।  
 12 शुश आस पा यो मदुम्त हना, थुं लुकच लाइब। तन्न आ मिम्शो गाप्त हना, ब्रोंइचा गेब रवा बाक्ब।  
 13 अर्ती डा लोव्र मदाक्ब मुरुम आंम कली श्येत चाक्ब। तन्न अरेशो टीबपुकीमी इनाम ताइनीम।  
 14 जोक्ब तुइक्ब मुर आन शेंशो ब्रोंइचा गेब ब्वाक्कु बुक्तीके खोदेंशो बाक्ब। मेको रे पा मुर मबेक्नीम।  
 15 रिम्शो मिम्ब मुर कली नेल्लेमी दाक्नीम। तन्न खराप मुर आन लां हिंचा डा बाक्ब।  
 16 जोक्ब तुइक्ब मुरुमी निप्स खाप्शा नेल्ल गेय पाइब। तन्न मूर्खमी आंम मूर्ख दुम्तीके कोइब।  
 17 मरिम्शो लोव्र कुरबमी श्येत चाक्ब। तन्न थमा सुइक्चा डा लोव्र कुरब मुरुम थुं नाइक्चा डा लोव्र चाक्ब।  
 18 सुमी अर्ती मनेंबा, मेको पुडग नु सुइम मदाक्शो मुर दुम्ब। तन्न हुइशो नेंब मुरुम मान ताइब।  
 19 मुर आंम दाक्शो तामेनु, आन थुं कली रिम्शो दुम्ब। तन्न मूर्खमी आन मरिम्शो पतीके रे लेत्चा मदाक्नीम।  
 20 सु जोक्ब तुइक्ब नु गाक्बा, मेको जोक्ब तुइक्ब दुम्ब। तन्न मूर्ख नु गाक्ब श्येत जाइब।  
 21 मरिम्शो पाइब आन कली श्येतम खोइक्ब। तन्न ठीक पाइब आ माल्शो मारेइ मारेइ जाक्दीप्ब। हितोपदेस २८:८; अय्युब २७:१३-१७; उपदेसक २:२६  
 22 रिम्शो मुरुमी आ चच युइ आन कली शोंप हेंशा वोइक्ब। तन्न मरिम्शो पाइब आन शोंप ठीक पाइबपुकीम ताइनीम।  
 23 पुडग आन रूमी शुश अन्न खेल्ब। तन्न ठीक मपाइबमी मेको रोइशशा लाइक्ब। हितोपदेस २२:१५

24 सुमी आ तौ कली शेंशा मतुप्बा, मेकोमी आ तौ कली मदाकब। तन्न सुमी आ तौ कली दाकबा, मेकोमी आ तौ कली शेंब।

25 ठीक पाइबमी रूत्री जचा ताइनीम। तन्न परमप्रभु यावे आ अरेशो मटीब शोत्रलुन बाकचा माल्नीम।

## 14

ठीक पतीकेमी रागी बारपाइकब।

1 जोकब तुइकब मीश मुरुमी आंम खिं रिम्शो सेल्व। तन्न मूर्ख मीश मुरुमी आ खिं कली आंम गुडमी प्रेव्ब।

2 सु रिम्शो थुं पाइश्शो मुर बाकमे, मेकोमी परमप्रभु यावे कली मान पा हिंब। तन्न सु हेंथे गाकबा, मेको मुरुमी परमप्रभु यावे कली मदाकब।

3 मूर्ख आन लोव्रमी आंम आन कली तेप्ब। तन्न जोकब तुइकब मुर आन लोव्रमी मेको आन कली कोव्रब।

4 ब्यफ मबाक्त हना, अन्न वोइक्तीके श्येत्थ बाकब। तन्न बोल्यो ब्यफ पाइश्शो मुर के शुश अन्न बाकब।

5 थमा लोव्र पाइब सांकछीमी जोल मपाइब। तन्न जोल पाइब सांकछीमी जोल पना पन बाकब। प्रस्थान २०:१६; प्रस्थान २३:१

6 शुक्शी पाइबमी तुइक्तीके माल्ना माल्न बाक्त हना यो, मथिप्ब। रुव्व मुर मोशा जोकब दुम्नीम।

7 मूर्खपुकी नु मगाकको। मारदे हना मेकोपुकी नु जोक्तीक लोव्र मबाकब।

8 निप्स पाइश्शो मुर आन तुइक्तीकेमी तेको लां गाकचा माल्नीमी तुइक्नीम। तन्न मूर्ख आन मूर्ख पतीकेमी हेंथे लां कोइब।

9 मूर्खमी पाप आ परबंम चढेतीके कली शुक्शी पाइनीम। तन्न रिम्शो थुं पाइश्शो मुरुमी परमप्रभु आ दाक्शो तशा ग्येरब।

10 थुं डा श्येत थुंम ला तुइकब। मिनु थुं आ ग्येरसीशो थुंमी ला तुइकब। रोमी १२:१५

11 परमप्रभु यावे आ अरेशो मटीब आ खिं प्रेत्या पुंइसीब। तन्न रिम्शो थुं पाइश्शो मुर आन ताम्बु सोशो बोशो दुम्शा लाइब। हितोपदेश १२:७

12 मुर आन कली आंम पशो लां ठीक तांइसीब हना यो, नोले मेको बेक्पाइकब लां बाकब।

13 मुर आ कुल रिस्साकव हना यो, आ थुं खाइश्शो बाकने चाप्ब। ग्येरसीशो थुं नोले सुरता पाइब बाकब।

14 दूली पाइब आन दूली पशो डा ताइनीम। मिनु रिम्शो पाइबमी आन रिम्शो पशो डा ताइनीम।

15 मारेइ मजोक्ब मुरुमी मारेइ मारेइ लोव्र थमा सुइकब। तन्न निप्स पाइश्शो मुरुमी आन पशो नेल्ल मिम्नीम।

16 जोकबपुकी होस पा मरिम्शो पतीक रे डोन लाइनीम। तन्न मूर्ख मारेइ ममिम्थु, होस मपाइब।

17 रीब पा गाइकब मुरुमी मूर्खें गेय पाइब। मिनु मुर आन कली दोपा श्येत गेडा, दे मिम्ब। मेको सुइम मदाकचा पुंइसीब।

18 मारेइ मजोक्ब मूर्खें गेयम ग्योम्सीशो बाक्नीम। तन्न निप्स पाइश्शो मुर जोक्तीके सिरपेच गुप्शो खोदेशो बाक्नीम।

19 मरिम्शो पाइब मुरपुकी रिम्शो मुर आन डोंइती बाप्नीम। मिनु परमप्रभु यावे आ अरेशो मटीबपुकी ठीक पाइब आन लाप्चोमी बाप्नीम।

20 आंम नेक्था डा मुरुमी पुडग कली मदाक्नीम। तन्न शोप पाइश्शो मुर आन के वारच शुश बाक्नीम।

21 सुम आ नेक्था डा मुर कली दिप्बा, मेकोमी पाप पाइब। तन्न सुमी पुडग आन कली वारच पाइबा, मेको ग्येरसीशो मुर बाकब। भजन संग्रह ४१:२

22 मार, मरिम्शो मिम्शा पाइब हेंथे लां मगाक्नीमी, डा? रिम्शो पचा मिम्शा पाइबमी गेना हना यो दाक्शा मप्रोंइचा पुंइसीनीम।

23 गेय पतीक नेल्लेमी दारतीक बाकब। तन्न लोव्र पा ला बाकब मुर पुडग दुम्ब।

- 24 जोकब मुर आन तुइक्तीके आन सिरपेच खोदेशो बाकब। तन्न मूर्ख आन पशो आन माला खोदेशो बाकब।
- 25 थमा सांकछीमी मुर आन कली प्रोंइब। तन्न जोल पाइब सांकछीमी जोल ला पाइब।
- 26 परमप्रभु यावे कली मान पा हिंचा, मेको मुर आ खुइशशा ब्रोंइशा बाक्तीक बाकब। मेको आ आलपुकीमी यो मेको ताइनीम। हितोपदेश १८:१०
- 27 परमप्रभु यावे कली मान पा हिंचा ब्वाक्कु बुक्तीक खोदेशो पा ब्रोंइतीक बाकब। मेको रे पा मुरपुकी बेक्पाइक्ब आ ब्वारद रे ब्रोंइनीम।
- 28 पिप आ दारस आ रागी डा शुश मुर बाक्नीम। तन्न मुर नुप्तेक्म हना, हुकुम पाइब जाम्शा लाइब।
- 29 रीब पा मगाइक्ब शुश रुप्ब मुर बाकब। तन्न रीब पा गाइक्ब मुर मूर्ख दुम्शा लाइब। हितोपदेश १६:३२; हितोपदेश १९:११
- 30 नांइसीशो थुंमी मुर आन कली ब्रोंइचा गेब। तन्न गेहेमी मुर आन रुश मुपाइक्ब।
- 31 सुम पुडग आन कली दिप्बा, मेकोमी पुडग आन कली सेल्ब कली शुक्शी पाइब। तन्न सुमी पुडग आन कली शिशी पाइबा, मेकोमी परमप्रभु यावे कली मान पाइब। हितोपदेश १७:५; अय्युब ३१:१३-१५; मत्ती २५:४०
- 32 परमप्रभु यावे आ अरेशो मटीबपुकी मरिम्शो पतीकेमी जाम्शा लाइनीम। तन्न ठीक पाइब मुर आंम आन गेना हना यो रिम्शो पतीकेमी ब्रोंइशा बाक्चा ताइनीम।
- 33 रुप्ब मुर नु तुइक्तीक बाकब। तन्न मूर्ख आन थुंमी तुइक्तीक मथिंसीब।
- 34 रागीम ठीक पाइब शुश बाक्तेक्म हना, मेकोपुकीम मेको रागी ठेयब नु रिम्शो सेल्नीम। तन्न मरिम्शो पाइब शुश बाक्तेक्म हना, मेको रागी कली महिक्सीशो सेल्नीम।
- 35 पिपमी जोक्शा गेय पाइब कली दाक्ब। तन्न मुने पचा डा गेय पाइबमी पिप आ गाइशो डा सजाइ ताइब। उत्पत्ती ४१:३७-४०

## 15

### हाक्शो कुलम ग्येरपाइक्ब

- 1 ब्रोंइशो पा लोव्र लेशोनु, गाइक्तीके तेक्ब। तन्न हुइशशा पशो लोव्रमी मुर आन कली गाइक्पाइक्ब। हितोपदेश २५:१५; १राजा १२:१३-१६
- 2 जोक्ब तुइक्ब मुरपुकीमी लोव्र पाम्तेक्म हना, नैबपुकी जोक्ब दुम्चा दाक्नीम। तन्न मूर्ख आन लोव्र शोर गाक्शो बाक्ब।
- 3 परमप्रभु यावेमी नेल्ल ताइब। मेकोमी रिम्शो पाइब नु मरिम्शो पाइब नेल्ल आन कली ताइब। २इतिहास १६:९
- 4 रिम्शो लोव्र मुर आन कली ब्रोंइचा गेब रवा खोदेशो बाक्ब। तन्न दूली लोव्रमी मुर आन थुं जिक्ब।
- 5 मूर्खमी आ आम आफ आस शेंशो लोव्र मपाइब। तन्न सुमी शेंशो नेंशा पाइबा, मेको होस पाइब बाक्ब।
- 6 ठीक पाइब मुर आन खिंमी शुश शोप बाक्ब। तन्न परमप्रभु यावे आ अरेशो मटीबपुकी श्येत जाइनीम।
- 7 जोक्ब तुइक्ब मुर आन लोव्रमी जोक्तीक फ्राइब। मूर्ख आन लोव्र मोदेशो मबाक्ब।
- 8 परमप्रभु यावे आ अरेशो मटीब आन चढेशो तशा, परमप्रभु यावे ग्रांरा दीब। तन्न रिम्शो थुं पाइशशो मुर आन पुइशो नेंशा ग्येरसीब। हितोपदेश २१:२७; यसेया १:११, १५; हितोपदेश २८:९; लूका १८:९-१४
- 9 परमप्रभु यावे आ अरेशो मटीब मुर आन लां परमप्रभु यावे कली ग्रांरा बाक्ब। तन्न सुमी ठीक पाइबा, मेको कली दाक्ब।
- 10 नोले शोंइसीशो मुर हिंचा डा सजाइ ताइनीम। तन्न हुइशशो काइ मदाक्ब मुर बेक्चा माल्ब।
- 11 दोदेशो पा परमप्रभु यावेमी बेक्शो मुर आन बाक्तीके नु जाम्शा लतीके तुइक्बा, मोदेशो पा मुर आन थुं कली यो तुइक्ब। अय्युब २६:६; भजन संग्रह १३९:८; प्रकाश ९:१, ११; येरमीया १७:१०

12 मुरुम शुक्शी पाइब आन कली “मोदेशो मपावो” दे अरेशो काइ मदाकनीम। मेकोपुकी जोकब तुइकब मुर आन नेक्था मलाइनीम।

13 ग्येरशो थुं पाइइशो मुर आ कुल हाकसीशो तांडसीब। तन्न सुर्ता पाइब आन थुं लुकच लाइब।

14 रुप्ब थुं पाइइशो मुरुमी जोक्तीके माल्ब। तन्न मूर्खमी मूर्खें पचा ला दाकनीम।

15 श्येत जाइब आन नाक्ती मरिम्शो बाकनीम। तन्न ग्येरसीशो थुं पाइइशो मुर आन नाक्ती नेल्ल चाड खोदेशो बाकनीम। हितोपदेस १७:२२

16 शुश शोप नु मेको आ पर्बम श्येत जचा क्येडा इच्का ला शोप बाक्शा परमप्रभु यावे कली मान पा हिंचा रिम्शो बाक्ब।

17 काइ मदाकशो मुर नु ब्रोवशो श्ये खमे जचा क्येडा, दाकमुशा चूले खमे जशो रिम्शो बाक्ब।

18 शुश गाइकब मुरुमी जिचा पोक्ब। तन्न रीब पा मगाइकब मुरुमी जितीके तेक्ब।

19 अल्सी आन लां चूम ब्रीशो बाक्ब। तन्न रिम्शो थुं पाइइशो मुर आन लां थेल्लो बाक्ब।

20 जोकब तुइकब थुं पाइइशो तौमी आ आफ कली ग्येरपाइकब। तन्न मूर्ख तौमी चहिं आ ममा कली महिक्ब। हितोपदेस १०:१

21 निप्स मपाइइशो मुर मूर्खें गेय पचा ग्येरसीनीम। तन्न रुप्ब मुर गेना हना यो आंम लांम गाकनीम।

22 अर्ती मनेंथु गेय पाइब आन गेय शोर गाकशो बाक्ब। तन्न अर्ती गेब शुश बाक्तेक्म हना, मेको आन गेय रिम्शो दुम्ब। हितोपदेस ११:१४

23 मुरुम ठीक पा लोत्र लेन्ने चाप्टु हना, ग्येरपाइकब। माल्ची ना माल्लो लोत्र पचा, गिश रिम्शो बाक्ब।

24 जोकब तुइकब मुर ब्रोइचा गेब ग्येतथ लां लाइब बाकनीम। मोपा बेक्शो मुर आन बाक्तीक लतीक लुकच लां मलाइनीम।

25 परमप्रभु यावेमी ठेयब लेशशो मुर आन खिं प्रेशशा गेब। तन्न वोंइश बेक्शो मीश मुर आन के रू डा सांद एर ओंथ दुम्चा मगेब।

26 परमप्रभु यावेमी मरिम्शो मुर आन मिम्शो लोत्र ग्रांया दीब। तन्न रिम्शो मुर आन लोत्र तशा ग्येरसीब।

27 शिममी आंम खिं डा मुर आन कली श्येत गेनीम। तन्न घूस मजाइबपुकी ब्रोइनीम। भजन संग्रह १५:५

28 ठीक पाइब मुरपुकीमी लोत्र लेत्चा क्येडा डोंइती मिम्नीम। तन्न परमप्रभु यावे आ अरेशो मटीबपुकीम हेंथे लोत्र पाइनीम।

29 परमप्रभु यावे आ अरेशो मटीब आन क्येडा डोन बाक्ब। तन्न ठीक पाइब आन पुंइशो लोत्र नेंब। हितोपदेस १५:२९; यूहन्ना ९:३१

30 ब्रशो कुलमी थुं कली ग्येरपाइकब। रिम्शो लोत्रमी रां कली बोल्यो सेल्ब।

31 सुमी रिम्शो अर्ती नेंशा पाइबा, मेको जोकब तुइकब मुर आन दातेम बाक्ब।

32 सुमी रिम्शो अर्ती नेंशा मपाइबा, मेकोमी आंम कली यो मदाक्ब। तन्न अर्ती नेंबमी आ रुप्तीके बारपाइकब।

33 परमप्रभु यावे कली मान पा हिंतीके तुइक्तीक कली शेंसीतीक बाक्ब। मिनु मान तचा क्येडा डोंइती ब्रेम्शो थुं पाइइशो दुम्चा माल्ब। हितोपदेस १८:१२; हितोपदेस २२:४

## 16

परमप्रभुम मुर आन कली लां कोइब

1 मुर आन थुमी मिम्मा मिम्न बाकनीम। तन्न लोत्र लेत्तीक परमप्रभु यावे रे जाक्ब।

2 आंमा पशो गेय आंमा कली ठीक मिम्सीब। तन्न परमप्रभु यावेमी मुर आन थुं नाक्ब।

3 इन पशो नेल्ल परमप्रभु यावे कली जिम्मा गेन। मिनु इन मिम्शो जाक्दीप्ब। भजन संग्रह ३७:३

4 परमप्रभु यावेमी मारेड मारेड नेल्ल गेय पचा कली सेल्लु। आ अरेशो मटीब कली यो नोले डा श्येत नाक्त कली सेल्लु। रोमी ९:२२

5 परमप्रभु यावे ठेयब लेशशो आन कली तशा ग्रांग्रा दीब। मेकोपुकी सजाइ मतथु मब्रोंडनीम।

6 दाकशा गेनायो मप्रोंडतीकेमी मरिम्शो पतीक क्याम्सीब। मिनु सु परमप्रभु यावे कली मान पा हिंबा, मेको मरिम्शो रे डोन लाइब।

7 परमप्रभु यावेमी मुर आन पशो तशा ग्येरसाक्व हना, मेको कली आ जोरी सत्रु नु यो गारपाइशशा वोइक्व। उत्पत्ती ३१:२४; उत्पत्ती ३३:४

8 मरिम्शो पा चेम्शो शुश क्येट क्येडा रिम्शो पा चेम्शो इक्का खोइ क्येट ठीक बाक्व। हितोपदेश १५:१६

9 मुरुमी आंम आ लां आंमान मिन्नीम। तन्न परमप्रभु यावेमी मेको आन गाक्तीक लां कोइब। हितोपदेश १९:२१; येरमीया १०:२३

10 परमप्रभु यावेमी पिप कली ब्वाक्पाइक्व। मेकोमी निसाफ पशोन, दूली निसाफ मपाइब।

11 ठीक पा नाक्तीक नु पुक्तीक परमप्रभु यावे केन बाक्व। झोलाम बाक्शो नाक्तीक फुल्लु नेल्ल आ सेल्लो बाक्नीम। हितोपदेश ११:१

12 पिपमी मरिम्शो पाइब आन कली तशा ग्रांग्रा दीब। मारदे हना ठीक पतीकेमी आ राज्य बोल्यो सेल्ल।

13 पिपमी ठीक लोत्र पाइब आन कली तशा ग्येरसीब। थमा लोत्र पाइब आन कली दाक्व।

14 पिप गाइक्ताक्व हना, मुर साइक्ने चाप्ब। रुप्व मुरुमी आ गाइक्चा नाइक्पाइक्ने चाप्ब। हितोपदेश १९:१२; हितोपदेश २०:२

15 पिप आ कुल हाक्शो बाक्त हना, ब्रोंइचा गेब। मेको आ दाक्शो सोत्रशो रू कली रेड खोदेशो बाक्व।

16 क्येख सुन तचा क्येडा तुइक्तीक तचा रिम्शो बाक्व। चांदी तचा क्येडा रुप्तीक तचा रिम्शो बाक्व।

17 रिम्शो थुं पाइशशो मुर मरिम्शो लां रे डोन बाक्व। मिनु मरिम्शो मपथु, होस पा बाक्व ब्रोंइचा ताइनीम।

18 मुर खतम दुम्चा क्येडा डोंइती ठेयब लेत्नीम। नुप्चा क्येडा डोंइती मुर बोर्नीम। हितोपदेश १८:१२

19 ठेयब लेशशो आन रोइशशो थोत्रक योक्सीचा क्येडा ब्रेम्शो दुम्शा, श्येत जशो आइक्च मुरपुकी नु बाक्चा रिम्शो बाक्व।

20 सुम शेंशो लोत्र नोफा दाइशशा नेंबा, मेको मुर सोशा बोशा ग्येत्थ लाइब। सु परमप्रभु यावे कली थमा सुइक्वा, मेको ग्येरसीशो बाक्व।

21 जोक्व तुइक्व थुं पाइशशो मुर कली रुप्व मुर देंनीम। ब्रोत्रशो लोत्रम शेंतीक कली बारपाइक्व।

22 सु नु तुइक्तीके बाक्वा, मेको ब्रोंइचा गेब ब्वाक्कु बुक्तीके खोदेशो बाक्व। तन्न मूर्ख आन मूर्ख पतीकेमी सजाइ ताइनीम।

23 जोक्व तुइक्व मुरुमी लोत्र पचा क्येडा डोंइती मिन्नीम। मोपा आन जोक्तीक बारना बारन लाइब।

24 ब्रोत्रशो लोत्र खुदो खोदेशो बाक्व। मेकोमी थुं कली ब्रोत्रशो नु रां कली बोल्यो सेल्ल। हितोपदेश १२:२५

25 मुरुमी का निक्शी लां रिम्शो बाक्व, दे मिन्नीम। तन्न नोले मेको लां बेक्तीक लां बाक्व।

26 गेय पाइब आन कोत्रजमी मेको कली गेय पपाइक्व। मेको आ शोत्रलुमी गेय पतीक थुं गेब।

27 हिंचा डा पा मरिम्शो पाइब मुरुमी मरिम्शो ला मिम्ब। मेको आ लोत्र मी खोदेशो पा ब्रशो बाक्व।

28 दूली मुरुमी जिचा पोक्व। मिनु नोफा मुइक्वमी गारशो वारच आन कली फ्राब।

29 हुश खाक्श पोक्व मुरुमी आ नेक्था डा मुर आन कली यो हेंथे पपाइक्व। मिनु मेको आन कली मरिम्शो लां खोइक्पाइक्व।

30 मिक्च रिक्बमी दूली गेय पचा मिम्शो बाक्नीम। मोदेशो मिम्शा सिक्सी पा बाक्बमी मरिम्शो पचा चिक्शो बाक्व।

31 बोइशशो चां मान ततीक सिरपेच खोदेशो बाक्व। मेको ठीक पाइब मुर आन लांम ला थीसीब। हितोपदेश २०:२९

- 32 लडाइ पाइब बोल्यो मुर दुम्या क्येडा फाल्ब मुर दुम्या रिम्यो बाकब। मिनु सहर कली ग्राब क्येडा आंम गाइक्या कली तेकब रिम्यो बाकब। हितोपदेश १४:२९
- 33 मुरुम फेन्टे आप्शा, परमप्रभु यावे कली हिल्लो पाइनीम। मिनु परमप्रभु यावेमी लोत्र लेप्ब।

## 17

### ग्येरशो थुं

- 1 जिना जिन ब्रोत्रशो जचा क्येडा सिक्सी पा थुं नाइश्शा पोकतो खमे जचा रिम्यो बाकब। हितोपदेश १५:१७
- 2 जोकब तुइकब वाइलमी आ होत्रप आ मरिम्यो पाइब तौ कली अरेब। मिनु मेको वाइलमी खिं डा तौ खोदेशो पा रू ताइब।
- 3 सुन चांदी यपाइश्शा नाक्या कली ग्योंब नु मी माल्ब। तन्न परमप्रभु यावेमी मुर आन थुं नाकब भजन संग्रह ६६:१०
- 4 मरिम्यो पाइब मुरुमी परमप्रभु यावे आ अरेशो मटीब आ लोत्र नेब। जोल पाइबमी खतम सेल्लतीक लोत्र नेचा कली नोफा दाइकब।
- 5 सुम पुडग आन कली शुक्शी पाइबा, मेकोमी आ कली सेल्ब, परमप्रभु यावे कली आइकच सेल्ब। सु मुर आन कली श्येत जशो तशा ग्येरसीबा, मेको सजाइ मतथु मब्रोंइब। हितोपदेश १४:३१
- 6 खाल्पा खाल्पी आन सिरपेच आन चच युइ नमी। मिनु आल आन ग्योम्सीशो आन आम आफ बाक्नीम।
- 7 मूर्खपुकीमी रिम्यो लोत्र पचा मशिरनीम। मेको क्येडा ठेयब मुरपुकीमी जोल पचा मशिरब।
- 8 घूस गेबमी आ घूसमी मारेइ मारेइ पने चाप्ब, दे मिम्ब। मेको ते लत हना यो आ देशो खाप्ब।
- 9 सुमी अरु आन मरिम्यो पशो सुम्बा, मेकोम वारच सेल्ब। तन्न मुर आन मरिम्यो पशो देंना देंन बाकबमी वारच आन कली फ्राब।
- 10 मूर्ख मुर कली सहे खेयप तुप्या क्येडा जोकब तुइकब मुर खेयप का देशोनु रूप्ब।
- 11 मरिम्यो मुरपुकीमी गेना हना यो जिचा पोकनीम। तन्न मेको कली सजाइ गेचा कली शिशी मपाइब मुर सोइश्शो बाकब।
- 12 मूर्ख मुरुमी मूर्ख पवा ना गुम्या क्येडा आ चाइकब रोंइसीशो वां कली गुम्या रिम्यो बाकब।
- 13 सुमी रिम्यो पाइब आन कली मरिम्यो पाइबा, मेको आ खिं रे मरिम्यो गेनायो मलाइब।
- 14 दोपा प्रोंइशो ब्वाक्कु बोल पा शाइकबा, मोपा जिचा पोकतीक बाकब। मोपतीके जिचा ठेयब दुम्या क्येडा डोंइती मेको कली तेक्कीन।
- 15 सुमी परमप्रभु यावे आ अरेशो मटीब आ पर्वम “ठीक पाइब बाकब” देंबा, मिनु ठीक पाइब आ पर्वम “ठीक पाइब मबाकब” देंबा, मेको निम्फा आस कली परमप्रभु यावेमी ग्रांफ्रा दीब। यसेया ५:२३
- 16 मूर्ख आ गुडमी तुइक्तीक थुं ग्याप्या कली क्येट मारदे माल्बा डा?। मेको के शेंसीतीक थुं मबाकब।
- 17 वारचमी गेना हना यो दाक्ब। लोकबपुकी चहिं श्येत जशो ना वारच पचा कली जरमेशो बाक्नीम।
- 18 सु आ नेक्था डा मुर आ पर्वम जमानी बाक्चा कली सल्ला पाइबा, मेको मरुप्ब मुर बाकब।
- हितोपदेश ६:१-५
- 19 जिचा दाक्बमी पाप कली यो दाक्ब। लाइश्शो लाप्यो सेल्बमी मुर आन रुश जिक्पाइकब।
- 20 मरिम्यो थुं पाइश्शो मुर आन कली मारेइम मगाप्ब। दूली पा जोल पाइब मुर हिंचा डा श्येत जाइब।
- 21 मूर्ख तौमी आ आम आफ आस कली सुर्ता पपाइकब। मूर्ख आ आफ गेनायो ग्येरचा मताइब।
- 22 ग्येरसीशो थुंमी रां कली सापाइकब। तन्न लुकच लशो थुंमी मुर कली सोत्रपाइकब। हितोपदेश १५:१३-१५
- 23 परमप्रभु यावे आ अरेशो मटीब मुरुमी निसाफ दूली सेल्चा कली खुइश्शा घूस जाइब। प्रस्थान २३:८
- 24 रूप्ब मुरुम आ तुइक्तीके माल्ब। तन्न मूर्खमी रागी आ सुर सम्म कोत्रशो बाकब। हितोपदेश ४:२५

- 25 मूर्ख तौमी आ आफ कली सुर्ता पपाइक्व। आ आम कली गेना हना यो डाक्पाइक्व।  
 26 दोस मताइब मुर कली सजाइ गेचा क्येडा ठेयब मुर आन कली रिम्शो पचा कली तुप्चा मरिम्शो बाक्व।  
 27 जोक्व थुं पाइश्शो मुर शुश मब्वाक्नीम। रुप्ब मुर आन गेय पचा डोंइती मिम्शा, बाक्नीम। हितोपदेस १०:१९; याक्व १:१९  
 28 मूर्ख ब्वालेइ पा बाक्त हना, मूर्ख मुर यो रुप्ब मुर खोदेशो तांडसीब। लोत्र मपाम्तेक्व हना निप्स पाइश्शो खोदेशो तांडसीनीम। अय्युब १३:५

## 18

### लोत्रमी बेक्तीक नु ब्रोंइतीक बाक्व

- 1 सु मुर रे ब्राशा बाक्वा, मेकोमी आंम कली ला रिम्शो पचा दाक्व। मेकोमी रुप्तीक थुं पाइश्शो मुर आन लोत्र काइ मनेब।  
 2 मूर्खमी मारेइ लोत्र रुप्चा थुं मपाइब। तन्न “गो जोक्नुड” दे आ मिम्शो लोत्र ला पाइब।  
 3 परमप्रभु यावे आ अरेशो मटितीक नु महिक्मुतीके यो जाक्व। मिनु मुने दोक्तीक नु मान मततीके यो जाक्व।  
 4 मुर आन लोत्र शुश लुकच लशो ब्वाक्कु खोदेशो बाक्व। तुइक्तीके शुश ब्वाक्कु बुक्शा गूशो खोदेशो बाक्व।  
 5 दोस ताइब आ कुल कोत्रशा, दोस मताइब कली दूली सेल्चा, ठीक निसाफ ममाइ। ब्यक्वशा १:१७  
 6 मूर्ख आ लोत्रमी जिचा पोक्व। मिनु मेको तुप्चा पुंडसीब।  
 7 मूर्ख आ लोत्र पतीकेमी आंमान खतम दुम्ब। आ लोत्रमी मेको कली साइक्व।  
 8 नोफा मुइक्व आन लोत्र शुश ब्रोंइशो जचा थोत्रक खोदेशो बाक्व। मेको मुर आन थुं सम्म जाक्दीप्ब। हितोपदेस २६:२२  
 9 अल्सी पाइब मुर हेंथे पाइब आ लोक्व बाक्व। हितोपदेस १०:४  
 10 परमप्रभु यावे आ नें बोल्यो लाइश्शो खिं खोदेशो बाक्व। ठीक पाइबपुकी मेकेर दोरशा लशा, ब्रोंइशा बाक्नीम। हितोपदेस १४:२६; भजन संग्रह ६१:४  
 11 शीब मुर आन शोंप मेको आन कली बोल्यो सहर खोदेशो बाक्व। मेकोपुकीमी आन शोंप कली ठेयब गारो खोदेशो मिन्नीम। हितोपदेस १०:१५  
 12 खतम दुम्चा क्येडा डोंइती मुर ठेयब लेत्नीम। मान तचा क्येडा डोंइती मुर ब्रेम्शो दुम्नीम। हितोपदेस १६:१८  
 13 सुमी लोत्र नेंचा क्येडा डोंइती लोत्र लेप्बा, मेको मूर्ख दुम्तीके मुने दोक्व मुर बाक्व।  
 14 मुर आ थुंमी रां डा रोइ फाल्ने चाप्ब। तन्न आ थुं लुकच लत हना, सुम फाल्ने चाप्बा डा?  
 15 निप्स पाइश्शो मुर आ जोक्तीके बारना बारन लाइब। जोक्व तुइक्व मुरुमी मेको क्येडा जोक्चा कली नोफा दाइक्व।  
 16 सुमी कोसली गेबा, मेकोमी ठेयब मुर नु लोत्र पचा यो ताइब। उत्पती ४३:११  
 17 सुमी जितीकेमी डोंइती ब्वाक्वा, मेको कली नोले डा मुर मब्वाक्म सम्म नेल्लेमी ठीक मिम्शा थमा सुइक्नीम।  
 18 फेन्टे आप्शोनु, जिचा खेचा देक्व। मिनु ठेयब मुर आन जिचा नाइक्पाइक्व।  
 19 थुं खाइक्पाइश्शो लोक्व कली लेम्चा गारो हिरशो सहर ग्राचा क्येडा श्येत बाक्व। मुर आन जितीक खेतीके बोल्यो खिं डा आग्लो खोदेशो बाक्व।  
 20 मुर आन लोत्रमी ब्रोंइनीम। मेको आन रिम्शो लोत्र पशोमी जचा ताइनीम। हितोपदेस १२:१४  
 21 मुर आन लोत्रमी बेक्तीक नु ब्रोंइतीक बाक्व। तेको कली दाक्नीनी, मेको आ ततीक ताइनीनी।  
 22 सुमी मीश ताइबा, मेको कली रिम्शो दुम्ब। मेको मुर परमप्रभु यावे आ दाक्शो मुर दुम्ब। हितोपदेस १९:१४; हितोपदेस ३१:१०  
 23 पुडग मुरुमी ब्रेम्शो लोत्र पा पुंडनीम। तन्न शुश शोंप पाइश्शो मुरुमी ठेयब लेशो लोत्र लेत्नीम।

24 का निक्षी मुरुमी “वारच नड” देखु पाइनीम। तन्न आंम लोकब क्येडा थमा पा दाकब वारच गेना हना यो आ वारच नु काथा बाकब। हितोपदेश १७:१७

## 19

पुडग आन कली वारच पावो

1 दूली लोत्र पा गाकब मूर्ख दुम्चा क्येडा पुडग नु गेना हना यो रिम्शो पाइब मुर दुम्चा रिम्शो बाकब। हितोपदेश २८:६

2 गे मार मार मालनीनी मेको आ पर्वम मतुडक्ताकनी हना, मेको शोर गाकशो बाकब। सु रीब पा गाकबा, मेको आ लां जाम्ब।

3 मुर आन मूर्ख पतीकेमी खतम दुम्नीम। मो हना यो मेकोपुकीमी परमप्रभु यावे कली दोस गेनीम। बिलाप ३:३९

4 शुश क्येट बाकब मुर नु शुश वारच बाकनीम। तन्न पुडग आन कली आन बाकशो वारचमी यो प्रोइनीम। हितोपदेश १४:२०

5 जोल पा सांकछी बाकब मुर सजाइ मतथु मब्रोंडब। मिनु जोल पाइब यु बुइश्शा प्रोक्ने मचापब। हितोपदेश २१:२८; ब्यवस्था १९:१८-२१

6 शुश मुरुमी ठेयब मुर आन शिशी दाकनीम। मिनु सुमी अरु कली गेबा, मेको आ वारच शुश बाकनीम।

7 पुडग मुर कली आ लोकबपुकीमी यो पोंइनीम। मेको आन क्येडा आ वारचपुकीमी प्रोइनीम। मेकोमी मेको आन कली ब्रेपब, तन्न सुइम मनेनीम।

8 सुम आंम कली दाकबा मेकोमी तुइक्तीक मालब। रुपब मुर सोशा बोशा ग्येत्थ लाइब।

9 जोल पा सांकछी बाकब मुर सजाइ मतथु मब्रोंडब। मिनु जोल पाइब मुर खतम दुम्नीम

10 मूर्ख मुर क्येट थीब मुर खोदेशो पा बाकचा मशिरब। मिनु वाइलमी ठेयब मुर आन कली हुकुम पचा यो मशिरब।

11 निप्स पाइश्शो मुर ओंखां पा गाइकनीम। मिनु अरुमी थुं खाइक्तीक लोत्र पाम्तेकम हना यो, मेको सिक्सी पा बाकचा आ मान बाकब। हितोपदेश १४:२९

12 पिप आ गाइश्शो गुप्स आ ग्रीशो खोदेशो बाकब। आ दाक्तीक चहिं घांस तार दोक्शो सुनी डा सीत खोदेशो बाकब। हितोपदेश १६:१४-१५

13 निप्स मपाइश्शो तौ आ आफ कली श्येत बाकब। मिनु गेना हना यो जिचा पोक्ब मीश, तप तप पा याप्शो ब्वाक्कु खोदेशो बाकब। हितोपदेश २७:१५-१६

14 खिं नु शोप आम आफ रे तांडसीब। तन्न होस पाइब मीश चहिं परमप्रभु यावे रे तांडसीब। हितोपदेश १८:२२

15 अल्सी पतीकेमी निन्द्रा पपाइकब। अल्से शोत्रलुन बाकचा मालनीम।

16 सुमी परमप्रभु यावे आ शेंशो टीनीमी, मेको ब्रोंडचा ताइनीम। सुमी मटीनीमी मेको बेक्चा मालनीम। हितोपदेश १६:१७

17 सुमी पुडग कली शिशी पा गेबा, मेकोमी परमप्रभु यावे कली गेब। मिनु परमप्रभु यावेमी मेको कली नेल्ल लेपब। हितोपदेश १४:३१; भजन संग्रह ४१:२-४; दानीएल ४:२४; मत्ती ५:७; मत्ती २५:४०; २कोरिन्थी ९:६

18 आस बाकम सम्म इ तौ कली शेंशा तुपो। तन्न मेको कली तुप्शा मसतो। ब्यवस्था २१:१८-२१

19 रीब पा शुश चुरब मुर सजाइ ताइब। गे मेको कली तेक्चा माल्तीवी हना, मेको क्येडा शुश गाइकब।

20 नोफा दाइश्शा अर्ती नेंशा, शेंतीक टिने। मो पाइतीनी हना, तुइक्तीक पाइश्शो मुर दुम्नीनी।

21 मुर आ थुंमी शुश मिम्तीक बाकनीम। तन्न परमप्रभु यावे आ मिम्शो ला दुम्ब। हितोपदेश १६:९

22 शिशी पाइब मुर दुम्चा रिम्शो बाकब। जोल पाइब दुम्चा क्येडा पुडग दुम्चा रिम्शो बाकब।

23 परमप्रभु यावे कली मान पा हिंचा ब्रोंडतीक बाकब। मो दुम्त हना, गे महिंथु, श्येत मजथु बाकनीनी।



- 24 अल्सेपुकीमी आन गुइ खमेम खुम्नीम। तन्न आन गुइ शोव्र सम्म मचाक्नीम। हितोपदेश २६:१५
- 25 शुक्शी पाइब आन कली तुप्शोनु, मारेइ मजोक्बपुकी होस पा बाक्चा शेंसीनीम। निप्स पाइश्शो मुर कली हुइश्शोनु, मेको क्येडा जोक्ब दुम्ब। हितोपदेश २१:११
- 26 सुमी आ आफ कली श्येत गेबा नु आ आम कली खेरबा, मेको ग्रांरा दिशो नु मुने तोक्ब तौ बाक्ब।
- 27 आं तौ, गे जोक्ब मुर आन लोव्र रे हेंथे लचा प्रोनो। मो पाप्तीवी हना गे शेंशो लोव्र नेने चाप्नेवे। याकूब १:२२
- 28 शोर गाक्शो सांकलीमी निसाफ पतीक आ पर्बम शुक्शी पाइब। मेकोमी परमप्रभु यावे आ अरेशो मटीब। मरिम्शो पतीके जचा थोव्रक खोदेशो पा दाक्ब।
- 29 सजाइ शुक्शी पाइब आन कली बाक्ब। तुप्तीके मूर्ख आन ची कली माल्ब। हितोपदेश २६:३

## 20

### जोल पा नाक्तीक

- 1 अडगुर शांबुमी हेंथे ब्वाक्पाइक्ब। राकसीमी राम्शी पपाइक्ब। सु मेको तूशा दुक्नीमी, मेको जोक्ब तुइक्ब मडुम्नीम। हितोपदेश २३:२९-३५; हितोपदेश ३१:५; होसे ४:११
- 2 पिप आन शुश गाइश्शो गुप्स आन ग्रीशो खोदेशो बाक्ब। सुम मेको कली गाइक्पाइक्बा, मेको साइक्चा पुंडसीब। हितोपदेश १६:१४
- 3 राम्शी पतीक रे डोन बाक्ब मुरुमी मान ताइब। तन्न मूर्ख नेल्ल रीब पा राम्शी पाइब बाक्नीम।
- 4 ग्यू दुम्तीके अल्सेमी ब्यफ मवाक्ब। मिनु अन्न रिक्ची ना मारेइ यो मताइब। हितोपदेश ६:६-११;
- 5 मुर आन थुं डा मिम्शो लुक्च लशो ब्वाक्कु खोदेशो बाक्ब। तन्न निप्स पाइश्शो मुरुमी ला मेको कीशा गुंइने चाप्ब।
- 6 शुश मुरुमी “गो रिम्शो मुर नड” दे अरु आन कली तुइक्पाइक्नीम। तन्न थमा सुइक्चा डा मुर सु थिन्ने चाम्सीबा डा?
- 7 ठीक पाइब मुर गेना हना यो रिम्शो पाइब बाक्ब। मेको आ आलपुकी ग्येरसीशो बाक्नीम। भजन संग्रह ११२:१२
- 8 निसाफ पाइब निल्तीकेम निश्शो पिपमी कोव्रशा, रिम्शो नु मरिम्शो नेल्ल तिल्लब। भजन संग्रह १०१:३
- 9 मिनु सुमी “गो आं थुं रिम्शो सेल्ला। आं पाप क्याम्ताक्ड” देने चाप्बा डा? हितोपदेश ३०:१२; अय्युब ४:१७; अय्युब ९:२-३
- 10 जोल पा नाक्तीक नु मगारशो पुक्तीक निम्फा परमप्रभु यावे कली ग्रांरा बाक्ब।
- 11 मिनु आल यो आन पतीकेमी दोदेशो दुम्नीमी मेको कौंडनीम। ठीक पाइब नु रिम्शो थुं पाइश्शो आल बाक्ब, दे तुंडसीब। हितोपदेश २२:६
- 12 नेंचा कली नोफा नु कोव्रचा कली मिक्च मेको निम्फा परमप्रभु यावेमी सेल्लु।
- 13 शुश मइप्पो, मारेदे हना गे प्रुडग दुम्नेवे। सेंसीशा बाक्को। मिनु शुश जचा ताइनेवे।
- 14 ग्याम्ब मुरुमी “एको मरिम्शो बाक्ब। मरिम्शो बाक्ब” दे इक्का आइक्ची लशा “गो सस्तो ग्याप्ता” दे आ नें बोरपाइक्ब।
- 15 शुश सुन नु शुश क्येट लाइब हीरा बाक्नीम। तन्न मेको आन क्येडा जोक्तीक लोव्र पाइब मुर रिम्शो बाक्ब।
- 16 अर्को रागी डा मुर आ पर्बम जमानी दुम्शो मुर, आ वा रोइश्शा लतीन। मुर आ पर्बम जमानी बाक्शो आ मारेइ मारेइ नेल्ले लतीन। हितोपदेश ६:१-२; हितोपदेश २७:१३
- 17 खुइ पा जशो शोब्ले डोंडती शुश ब्रोव्रब। नोले मेको फुल्लु नाक्शो खोदेशो दुम्ब। हितोपदेश ९:१७
- 18 अर्ती नेंब मुर आ मिम्शो रिम्शो दुम्ब। जोक्ब तुइक्ब आन लोव्र नेंशा ला लडाइ पावो। हितोपदेश २४:६
- 19 लोव्र क्याल्ब मुरुमी खुइश्शा पशो लोव्र यो फ्राइब। मोपतीके शुश लोव्र पाइब मुर नु वारच मदुमो।

- 20 सुम आ आम आफ आस कली सराप पाइबा, मेको आ बत्ती नेल्ल क्येडा छिडछिडमी काप्ब। हितोपदेश ३०:१७; प्रस्थान २१:१७
- 21 डोंडती रीब पा थेरशो रू नोले आसीक मराइब।
- 22 गे मरिम्शो पाइब कली क्येक्क लेल्लुड मदने। परमप्रभु यावेमी पाइब, दे रिम्दो। मिनु इ कली वारच पाइब। हितोपदेश २४:२९; रोमी १२:१७
- 23 जोल पा नाक्तीक तशा परमप्रभु यावे ग्रांग्रा दीब। मिनु दूली नाक्तीक ठीक मबाक्नीम।
- 24 परमप्रभु यावेमी मुर आन कली लां कोंडब। सुमी आंम लां रुप्ने चाप्बा डा?
- 25 मुरुमी ममिम्शु “परमप्रभु यावे केन बाक्ब” दैशा, कसम जचा, थम हिंचा डा बाक्ब। मारदे हना नोले मिम्शा, मार दुम्बा डा?
- 26 जोक्ब तुइक्ब पिपमी परमप्रभु यावे आ अरेशो मटीब आन कली तिल्लब। मिनु मेको आन कली साइक्ब।
- 27 मुर आन थुं परमप्रभु यावे आ बत्ती बाक्ब। मिनु मेकोमी रां नेल्ल कली कोव्रब। १कोरिन्थी २:११
- 28 गेना हना यो दाक्शा गेनायो मप्रोंडतीकेमी पिप कली खाल पाइब। आ ठीक पतीकेमी आ सासन पतीके मजाम्ब। हितोपदेश १६:१२
- 29 ठिटा आन दारस आन बोल्यो रां बाक्ब। मिनु खाल्पा आन दारस आन बोइश्शो चां बाक्ब।
- 30 तुप्शो गारमी लेंशा मरिम्शो मपपाइक्ब। मिनु तुप्शोमी यो मुर आन थुं कली रिम्शो पाइब सेल्ब।

## 21

### परमप्रभु कली टीबम रिम्शो पाइब

- 1 पिप आ थुं परमप्रभु यावे आ गुडमी खोला डा ब्वाक्कु खोदेशो बाक्ब। दोथ गे लाइक्चा दाक्ता, मोथ गे लाइक्ब। भजन संग्रह ३३:१५
- 2 मुरुमी आंम कली गेना हना यो “ठीक पाता” दे मिम्नीम। तन्न परमप्रभु यावेमी मुर आन थुं नाक्ब।
- 3 परमप्रभु यावे आ डोंडती मार मार च्ढेचा क्येडा ठीक पतीके नु रिम्शो निसाफ पतीके आ दाक्शा ब्रतीक बाक्ब। १सामुएल १५:२२; होसे ६:६
- 4 टेयब लेशो नु बोरशो मुर दुम्चा, परमप्रभु यावे आ अरेशो मटीब आन छेडछेड बाक्ब। मेको पाप बाक्ब।
- 5 शुश गेय पाइब आन मिम्तीकेमी सोशा बोशा ग्येत्थ लां खोइक्पाइक्ब। तन्न रीब पा ममिम्शु गेय पाइब मुर प्रुडग दुम्ब।
- 6 जोल पा शुश शोप चेम्तीके फशेमी योल्शा जाम्शो कुन खोदेशो बाक्ब। मोदेशो पाइबपुकी साइक्चा पुंइसीनीम।
- 7 परमप्रभु यावे आ अरेशो मटीब आन हुश ख्वाक्श पोक्तीकेमी साइक्चा पुंइसीनीम। मारदे हना मेकोपुकीमी मार ठीक बाक्मे, मेको पचा मबिन्तीम।
- 8 दोस ताइब मुर आन लां हिरशो बाक्ब। दोस मताइब मुर आन पतीक चहिं ठीक बाक्ब।
- 9 गेना हना यो जिचा पोक्ब मीश नु टेयब खिंम बाक्चा क्येडा, तला डा कुना कामी बाक्चा रिम्शो बाक्ब।
- 10 परमप्रभु यावे आ अरेशो मटीबपुकीमी मरिम्शो ला पचा दाक्नीम। मेकोपुकीमी आन नेक्था डा मुर आन कली यो शिशी मपाइनीम।
- 11 शुक्शी पाइब कली सजाइ गेशोनु, मारेइ मजोक्ब मुर इक्का जोक्ब तुइक्ब दुम्नीम। मिनु जोक्ब तुइक्ब मुर आन कली शेंशोनु, आन जोक्तीके बारब। हितोपदेश १९:२५
- 12 ठीक पाइबमी परमप्रभु यावे आ अरेशो मटीब मुर आन खिं कोव्रना कोव्रन बाक्ब। मिनु परमप्रभुमी आ अरेशो मटीब आन कली ख्तम पोक्ब।
- 13 सुमी प्रुडग आन पुंइशो मनैबा, मेकोमी यो पुनानु, सुइमी यो मनैनीम।
- 14 खुइश्शोमी मार मार गेशोनु, चुरब मुर यो मचुरनीम। मिनु वा आगामी खुइश्शा गेशोमी टेयब गाइक्तीक तेक्ब। १सामुएल २५:१८-३५
- 15 निसाफ दुम्मेनु ठीक पाइब ग्येरसीनीम। तन्न मरिम्शो पाइबपुकी हिंनीम।

- 16 सुइ मुर रुप्तीक लां प्रोइतु हना, मेको बेक्शो मुर आन बाक्तीक लशा नाइक्ब।
- 17 सुम आंम दाक्शो पना पन बाक्बा, मेको प्रुडग दुम्ब। सुमी अङ्गुर शांबु नु तेल दाक्बा, मेको मुर यो प्रुडग दुम्ब। हितोपदेश २३:२१
- 18 ठीक पाइब आन पा डा परमप्रभु यावे आ अरेशो मटीबपुकीम सजाइ ताइनीम। मिनु गेना हना यो रिम्शो पाइब आन पा डा थमा सुइक्चा मपुंडसीब मुर सजाइ ताइनीम।
- 19 शुश जिचा पोक्ब नु चुरब मीश नु बाक्चा क्येडा गोरशो रागीमी बाक्चा रिम्शो दुम्ब।
- 20 जोक्ब तुइक्ब मुर आन खिंम शुश क्येट लाइब शोंप नु तेल बाक्ब। तन्न मूर्खमी आ बाक्शो नेल्ल शुम्ब।
- 21 सु मुरुमी ठीक पतीके नु शिशी पतीके आ नोले खोइक्बा, मेको ब्रोंडशा, सोशा बोशा दुम्शा मान ताइब दुम्ब।
- 22 जोक्ब तुइक्ब मुर कामी बोल्यो लडाइ पाइब आन सहर कली लडाइ तोप्टु। मिनु मेकोमी आन बोल्यो, थमा सुइश्शो, ब्रोंडशा बाक्तीक सहर ग्रात।
- 23 सुमी मिम्शा ठीक लोत्र पाइबा, मेकोमी आंम कली श्येत रे प्रोंडब। हितोपदेश १३:३
- 24 ठेयब लेशशो, बोरशो मुर आ नें शुक्शी पाइब बाक्ब। मेकोमी ठेयब लेशशो नु बोरशो गेय ला पाइब।
- 25 अल्से गेय मपतीके बेक्नीम। मारदे हना अल्से आन गुइम गेय पने मबिप्ब। हितोपदेश १३:४
- 26 नाक्त रे अल्सेमी मारेइ मारेइ माल्ब। तन्न ठीक पाइबमी मखेक्थु, गेब।
- 27 परमप्रभु यावे आ अरेशो मटीब आन चढ़ेशो ग्रांग्रा दिशो बाक्ब। मेकोमी मरिम्शो मिम्शा चढ़ेशो शुश ग्रांग्रा बाक्ब। हितोपदेश १५:८
- 28 जोल पाइब सांकछी जाम्शा लाइनीम। तन्न रिम्शो पा नोफा दाइश्शा नेंब मुर थमा डा सांकछी बाक्ब। हितोपदेश १९:५,९
- 29 परमप्रभु यावे आ अरेशो मटीब मुर बोल्यो मुर खोदेंशो पा गाक्नीम। तन्न गेना हना यो रिम्शो थुं पाइश्शो मुर मिम्ना मिम्न गाक्नीम।
- 30 मुर आन तुइक्तीक, रुप्तीके अर्ती गेतीके परमप्रभु यावे आ डोंइती थम आइक्च बाक्ब। भजन संग्रह ३३:१०-११
- 31 लडाइ पची नाक्त कली शारा ठीक पशो बाक्ब। तन्न ग्रातीक परमप्रभु यावे आ गुइमी बाक्ब। भजन संग्रह ३३:१७

## 22

### श्येत गोबम श्येत जाइब

- 1 शुश क्येट शोंप क्येडा मान पाइश्शो रिम्शो बाक्ब। सुन चांदी क्येडा दाक्चा पुंडसीचा रिम्शो बाक्ब। उपदेसक ७:१
- 2 क्येट थीब नु प्रुडग मुर के गारतीक का बाक्ब। मेको मार बाक्ब देंशा हना, परमप्रभु यावेमी मेको निम्फा आस कली सेल्लु। हितोपदेश २९:१३
- 3 निप्स पाइश्शो मुर श्येत जाक्चा चिक्शो तशा, खुंडसीनीम। तन्न मारेइ मजोक्ब मुरुमी मारेइ मतुइक्थु श्येत जाइनीम। हितोपदेश २७:१२
- 4 ब्रेम्शो थुं पाइश्शो नु परमप्रभु यावे कली मान पा हिंब मुर आन इनाम शोंप, मान ततीक नु ब्रोंइतीक बाक्ब। हितोपदेश १५:३३
- 5 दूली पाइब आन लाम चू नु ग्याइल बाक्नीम। होस पाइबपुकी मेको आन क्येडा डोन बाक्नीम।
- 6 इ तौ कली गारचा डा पा रिम्शो शेंदो। मेकोमी खाल्पा दुम्चा सम्म मेको लां मप्रोंडब। हितोपदेश २०:११
- 7 क्येट थीबमी प्रुडग कली अधिकार पाइब। जेर ताक्ब मुर जेर गेब आ वाइल बाक्ब।
- 8 मुरुमी ठीक मपतीके शोक्तेक्म हना, ठेयब श्येत खुप्नीम। मिनु आ गाइक्तीके आ कोक्के जिक्ब। अय्युब ४:८

9 हाइशशो मुरुमी आसीक ताइब। मारदे हना मेकोमी आ जचा थोत्रक प्रुडग नु योक्ब। हितोपदेश १९:१७

10 शुक्शी पाइब कली खेरो। मिनु जिचा खेचा नुप्ब। जिचा नु तुम्मुचा तेकसीब। हितोपदेश २६:२०

11 सु रिम्शो थुं नु ठीक लोत्र पचा दाक्नीमी, मेको पिप आ वारच दुम्नीम। कलस्सी ४:६; भजन संग्रह १०१:६

12 परमप्रभु यावेमी तुइक्ब मुर आन कली कोत्रब। तन्न हेंथे पाइब आन थमा सुइक्चा मपुंडसीब लोत्र थुम्पाइक्ब।

13 अल्सेमी “लाडगामी गुप्स का बाक्ब। गो लाडगा लती हना, आं कली साइक्ब” देंब। हितोपदेश २६:१३

14 हेंथे गाक्ब मीश मुर आ लोत्र ठेयब खालटा खोदेशो बाक्ब। परमप्रभु यावे आ गाइशशो ताइबपुकी मेको खाल्टाम बिक्नीम। हितोपदेश ५:३

15 वोंडश आल आन थुंमी मरिम्शो पतीक यो बाक्ब। तन्न शेंशा इक्का तुप्शोन, आ मरिम्शो पतीके प्रोंडब। हितोपदेश १३:२४; हितोपदेश २३:१३-१४; हितोपदेश २९:१७

16 आंम कली शोंप पाइशशो सेल्चा कली प्रुडग आ थोत्रक लाइक्चा नु क्येट थीब कली कोसेली गेचा, मेको निम्फा प्रुडग दुम्तीक गेय बाक्ब।

### जोक्ब तुइक्ब मुर आ लोत्र

17 इ नोफा दाइशशा जोक्ब तुइक्ब दुम्शा, आं लोत्र नेनो। मिनु आं लोत्र इ थुंम वोतो! हितोपदेश २४:२३

18 मारदे हना मेको लोत्र इ थुंमी वोइक्तीवी हना, इ कली रिम्शो दुम्ब। मिनु गे मेको गेना हना यो शेंने चाप्नेवे।

19 गे परमप्रभु यावे कली थमा सुतो, दे मुलाक्ती गो इ कली एको लोत्र शेंताक्ड।

20 गो इ कली ३० ओटा देंतीके, अर्ती नु जोक्तीक लोत्र मब्रेक्तु डा?

21 मारदे ब्रेक्ताक्ड केंशा हना, इ कली मार ठीक बाक्बा नु मार थमा बाक्बा, दे कोंड्या कली ब्रेक्ताक्ड। मोपा गे इ कली सोइक्ब आन कली थमा लोत्र लेन्ने चाप्नेवे।

22 प्रुडग आन के मारेइ मबाक्ब, दे मेको आन के मारेइ मरोइक्तो। मिनु श्येत जाइब कली ठीक निसाफ पावो। प्रस्थान २३:६

23 मारदे हना परमप्रभु यावेमी मेको आन कली वारच पाइब। मेकोमी मेको रोइक्ब आन ब्रोंइतीक रोइक्ब।

24 गाइक्ब मुर नु वारच मटुमो। मिनु शुश चुरब नु मगाक्को। हितोपदेश १५:१८

25 मेको नु गाक्ते हना, मोदेशोन दुम्शा, ग्याइक्चा पुंडसीनेवे।

26 मुर आन जेर आ पर्बम कसम जशा जमानी मबाक्को। हितोपदेश ६:१

27 मारदे हना गे थाप्ने मचाप्तीवी हना, इ ब्राख्ये यो रोइक्चा पुंडसीनेवे।

28 इ किकी पिपीमी वोइशशो सांद डा फुल्लु गेनायो मयाक्तो। हितोपदेश २३:१०; ब्यवस्था २७:१७

29 जोक्ब गेय पाइब आन कली तनी? मेकोपुकी पिप आन कली गेय पाइब दुम्नीम। मेकोपुकीमी आइक्च मुर आन कली गेय मपाइनीम।

## 23

### आल आन कली रिम्शो पा शेंदीन

1 सासन पाइब नु जथ बाक्डेनु, इ डोंइती मार बाक्मे, मेको रिम्शो पा कोत्रडो।

2 गे शुश जचा ब्वचा दाक्ताक्वी हना, इ लाकचामी छूरी वोतो।

3 मेको आ ब्रोंवशो जचा थोत्रक तशा मवलो। मारदे हना मेकोम इ कली खल्बल सेल्ब।

4 क्येट थीब मुर खोदेशो दुम्चा कली मिम्शा बोल मपावो। जोक्ब तुइक्ब दुम्शा मोदेशो मिम्चा प्रोनो।

हितोपदेश २८:२२

5 मेको याम का तशा नोले, चिक्ब खोदेशो पा बेरशा लाइब। मेको ककाकुली खोदेशो पा सरीड गे बेरशा लाइब।

- 6 शिमि आ खिमी भोज जथ मलावो। मेको आन ब्रोवशो जचा थोवक तशा मवलो।  
 7 मारदे हना मेकोम इ लाकचामी चांम खोदेशो पा कारब। मेकोमी इ कली जने तूडीने देत हना यो, मेको आ थुं गे नु मबाक्ब।  
 8 इ इच्का जशो नेल्ल मेचा कुइब। मेको कली इ ठेयब सेल्शा देशो लोव्र नेल्ल मोशीन लाइब।  
 9 मूर्ख आ डोंइती लोव्र मपावो। मारदे हना इ जोक्ब तुइक्ब लोव्र नेंशा, शुक्शी ला पाइब।  
 10 गे साइ डोंइती वोइश्शो सांद डा फुल्लु मयाक्तो। मिनु रोम रोइक्च आन रू मचाइक्तो। हितोपदेस २२:२८  
 11 मारदे हना मेको आन कली श्येत रे प्रोंइब बोल्यो बाक्ब। मेकोमी मेको आन पर्वम इ कली श्येत गेब।  
 12 रिम्शो शेंतीक नेनो। जोक्तीक लोव्र नेंचा कली इ नोफा दाइक्तो।  
 13 इ आल आन कली रिम्शो पा शेंचा मप्रानो। मेको आन कली सजाइ गेशा तुप्तीवी हना, मेको मबेक्नीम। हितोपदेस २२:१५  
 14 गे मेको कली इच्का तुप्तीवी हना, मेको आन कली बेक्शो मुर आन बाक्तीक लतीक लां रे प्रोंइनेवे।  
 15 आं तौ, गे जोक्ब तुइक्ब दुम्ते हना, आं थुं यो ग्येरसीब।  
 16 गे ठीक लोव्र पवीनु, गो आं थुं रेन साप्पा ग्येरसीनुड।  
 17 पापी आन कली गेहे मपावो। तन्न नाक्त किंत किंत परमप्रभु यावे कली मान पा हिनो।  
 18 मो पाप्तीवी हना, इ ब्रोंइतीक नु इ मिम्शो नेल्ल जाक्दीप्ब।  
 19 आं तौ, आं लोव्र नेनो। जोक्ब तुइक्ब दुमो। मिनु इ थुं कली ठीक लांमी ग्येत्थ गाक्पतो।  
 20 शांबु तूब नु शुश श्ये व्वाइबपुकी नु मबाक्को।  
 21 मारदे हना दुक्ब नु शुश जाइब व्वाइब मुरपुकी पुडग दुम्नीम। शुश दुक्शा बाक्तीकेमी जेक्शो वा फेक्पाइक्ब। हितोपदेस २१:१७  
 22 इ आफ आ लोव्र नेनो। इ आम खाल्पी दुम्नेनु, मेको कली आइक्च मसेलो। हितोपदेस १:८  
 23 थमा पतीक कली ग्यापो। मेको कली गेनायो मलेयडो। तुइक्तीक, शेंतीक नु रुप्तीक ग्यापो।  
 24 ठीक पाइब तौ तशा, आ आफ ग्येरसीब। जोक्ब तुइक्ब थुं पाइश्शो तौ तशा आ आफ शुश ग्येरसीब। हितोपदेस १०:१  
 25 इ आम आफ ग्येरसीसल। इ कली थीब गेना हना यो ग्येरशा बाक्ल।  
 26 आं तौ, इ थुं आं कली गेयी। आं पशो कोव्रडो।  
 27 तेल्लेम मीश मुर ठेयब खाल्टा खोदेशो बाक्ब। ग्युंवे पा यो हेंथे पाइब मीश मुर लुक्च लशो इनार खोदेशो बाक्ब। हितोपदेस २२:१४; हितोपदेस ७:१०-१४  
 28 मेको खुइ खोदेशो पा लांमी बाप्शा बाक्ब। मिनु हेंथे गाक्ब वोंइश मुर शुश सेल्ब।  
 29 सु श्येत जाइबा? सु सुर्ता पाइबा? सुम राम्शी पोक्बा? सुम गाली पाइबा? सु बिन्चीम गार दुम्बा? सु का आ मिक्च लल जिशो बाक्बा? हितोपदेस २०:१; यसेया ५६:१२  
 30 मेको नाक्दो सम्म शुश अडगुर शांबु तूब बाक्नीम। व्वाइश्शो अडगुर शांबु तूब बाक्नीम।  
 31 गे लल अडगुर शांबु कोव्रस डा कोव्रस मबाक्को। गिश दारशो बाक्मे, दे मकोव्रडो। मेको रिम्शो पा कोव्रजम लाइब।  
 32 मिनु मेकोमी नोले बुस्सुमी खोदेशो पा कोक्ब। मेको बीस पाइश्शो कोक्ब बुस्स खोदेशो बाक्ब।  
 33 मिनु इ मिक्चीमी मार मार ताइनेवे। मिनु दूली लोव्र पाइनेवे।  
 34 मिनु गे समुन्द्र आ दातेमी इप्शो खोदेशो दुम्नेवे। पला आ डल तारी इप्शो खोदेशो दुम्नेवे।  
 35 मिनु गे मार देनेवे, देशा हना “आं कली तुप्तीमी, तन्न मखाइक्ड। तुप्तीमी तन्न मतुइक्वतु। मुल गेना सेसीशा, लेंशा तूनुडा?” देनेवे।

- 1 मरिम्शो पाइब मुर आन मार मार तशा, गेहे मपने। मिनु मेको नु मबाक्कीन।
- 2 मारदे हना मेको आन थुमी हुश खाक्श पोक्चा ला मिम्नीम। मिनु मेकोपुकीमी मरिम्शो आ पर्वम ला लोत्र पाइनीम।
- 3 तुइक्तीकेमी खिं सेल्सीब। रुब्ब मुरुमी आ खिं सेल्शा रिम्शो पा बाक्ब।
- 4 जोक्तीकेमी मेको खिं डा कोठापुकी शुश क्येट लाइब नु रिम्शो थोत्रकीमी प्रिब। हितोपदेश ३१:१०-३१
- 5 बोल्यो लडाइ पाइब आन क्येडा जोक्ब तुइक्ब लडाइ पाइब रिम्शो बाक्नीम। मिनु बोल पाइशशो मुर आन क्येडा जोक्ब तुइक्ब मुरुमी अधिकार ताइब।
- 6 मारदे हना रिम्शो लां कोंइब बाक्त हना, लडाइ पने चाप्नीनी। अर्ती गेब शुश बाक्तेक्म हना, लडाइ ग्रानीनी। हितोपदेश २०:२८; हितोपदेश ११:१४
- 7 मूर्खपुकीमी तुइक्तीके रूपे मचाप्नीम। मेकोपुकीमी ठेयब लाप्चो डा गुम्तीकेमी लोत्र पने मचाप्नीम।
- 8 सुमी काइ मरिम्शो पचा मिम्बा, मेको कली मरिम्शो पाइब देंनीम।
- 9 मूर्खे गेय पाप बाक्ब। मिनु शुक्शी पाइब कली तशा मुर नेल्ल ग्रान्ना दीनीम।
- 10 श्येत नाक्ती गोल्चा चिक्ताक्वी हना, इ बोल दोशो बाक्म डा?
- 11 मुर कली साइक्चा, दे कीशा लाइशशो ताप्तीवी हना, मेको आन कली प्रोंइथ लावो। मिनु साइक्चा पुंइसीचा चिक्शो कली वारच पावो। भजन संग्रह ८२:४
- 12 मिनु गे “गो मेको मतुइक्तु” देते हना, थुं नाक्बम इ मरिम्शो पशो तुइक्ब। इ कली कोत्रबमी नेल्ल तुइक्ब। मेकोमी मुर आ मरिम्शो पशो डा क्येक्क लेप्ब।
- 13 आं तौ, खुदो जावो। मारदे हना मेको रिम्शो बाक्ब। चाका रे याप्शो खुदो जीजी पा ब्रोत्रब।
- 14 मार मिम्चा माल्नेवे देशा हना, जोक्तीक तुइक्तीक इ थुं कली खुदो खोदेशो जिज बाक्ब। मेको ताप्तीवी हना, इ कली नोले सम्म रिम्शो दुम्ब। इ मिम्शो जाक्दीप्ब।
- 15 गे परमप्रभु यावे आ अरेशो मटीब ठीक पाइब आन खिं खतम पोक्चा कली बाप्शा मबाक्को। मेको ठीक पाइब आ बाक्तीकेमी हुश खाक्श मपोक्को।
- 16 ठीक पाइब मुरपुकी ७ खेयप गोल्तेक्म हना यो, लेंशा बोक्नीम। तन्न परमप्रभु यावे आ अरेशो मटीबपुकी मबोक्चा डा पा गोल्नीम। भजन संग्रह ३७:२४
- 17 इ जोरी सत्रु जाम्शा लाम्तेक्म हना, मग्येरसो। मेकोपुकी दाइल पा थिस्साक्म हना, मरिस्सो। अय्युब ३१:२९
- 18 गे मेको तशा ग्येरसाक्वे हना, परमप्रभु यावेमी इ पशो मदाक्ब। मिनु इ जोरी सत्रु आन पर्वम गाइशशो नाइशशा मेको आन कली वारच पाइब।
- 19 काइ मरिम्शो पाइब आन पर्वम मगाइक्तो। परमप्रभु यावे आ अरेशो मटीब आन पर्वम गेहे मपावो। भजन संग्रह ३७:१
- 20 मारदे हना काइ मरिम्शो पाइब शुश नाक्त मलीनीम। मिनु परमप्रभु यावे आ अरेशो मटीब आन बत्ती काप्शा लाइब। हितोपदेश १३:९
- 21 आं तौ, परमप्रभु यावे नु पिप कली मान पा हिनो। मेको आस कली मटीब नु मगाक्को। १ पत्रुस २:१७
- 22 मारदे हना मेको आस पतीके रे गे मतुइक्थु श्येत जने चाप्नेवे। मिनु मेको आस खतम पोक्तीक सुम तुइक्बा?

### अरु अर्ती

- 23 एको लोत्र जोक्ब तुइक्ब मुर आन देशो बाक्ब। निसाप पतीकेमी कुल कोत्रमुचा मरिम्शो बाक्ब। लेवी १९:१५
- 24 सुमी पाप पाइब कली “गे ठीक पाइब बाक्नीनी” देबा, जात जात डा मुरपुकीमी मेको कली सराप पाइनीम। रागी रागी डा मुरपुकी मेको आ पर्वम ग्रान्ना दीनीम।
- 25 तन्न सुमी मरिम्शो पाइब कली अरेबा, मेको ग्येरसीनीम। मिनु मेको शुश आसीक ताइनीम।

- 26 थमा लोत्र लेत्चा, मुर कली पुक्पु पशो खोदेशो बाक्ब। हितोपदेश १५:२३  
 27 डोंइती इ लाडगा डा गेय थुमो। इ रूमी मार मार शोक्को। मिनु नोले इ खिं सेलो।  
 28 गे इ नेक्था डा मुरुम मारेइ मपथु, मेको आ पर्बम सांकछी मबाक्को। गे जोल मपावो। प्रस्थान २०:१६  
 29 गे “मेकोम आं कली मार पवा, मेको कली यो मोदेशोन पाइनुड। गो मेको कली क्येक्क लेत्नुड” मदेनो। हितोपदेश २०:२२  
 30 गो अल्से मुर का आ रू रे पा लती। निप्स मपाइशो मुर आ अडगुर रू रे पा कोव्रना कोव्रन लती।  
 31 मिनु गो मार ताता देशा हना, मेको रू नेल्ल चूम सुम्शो बाक्त। खप नेल्ल चूले वाशो बाक्तेक्म। मिनु रू एर ओंथ डा गारो यो ब्रेशो बाक्त।  
 32 मिनु गो नेल्ल कोव्रशा, मिम्ताक्ड। मिनु शेंतीक लोत्र का रुप्ता। मार रुप्ता देशा हना,  
 33 याम का डा इप्चा। याम का डा निन्द्रा पचा। याम का गुड फिल्मा पा बाक्चामी हितोपदेश ६:९-११  
 34 पुडग दुम्तीके नु श्येत जतीके या कुरब मुर खोदेशो पा रीब पा मेको मुर तारी जाक्ब, दे रुप्ता।

## 25

सोलोमन आ अरु ब्रेक्शो लोत्र

- 1 एको सोलोमन आ अरु दंतीक लोत्र बाक्नीम। मिनु यहूदा डा पिप हिज्कीयाह आ मुरपुकीमी मेको ब्रेक्शो बाक्तेक्म। हितोपदेश १:१; हितोपदेश १०:१  
 2 परमप्रभुमी का निकशी लोत्र खुइशशा आ सक्ति कोंडब। तन्न पिपमी नेल्ल तुइक्पाइशशा, आ सक्ति ठेयब सेल्ब।  
 3 सरीड गिश ग्येत्थ बाक्बा, रागी गिश लुकच लाइबा नु पिप आ थुंमी मार मिम्बा, मेको सुइमी यो तुइक्के मचाप्नीम।  
 4 चांदी यपाइशशा, आ कस गुंडताक्म हना, चेम्बमी रिम्शो थोव्रक चेम्ने चाप्ब।  
 5 मोपा पिप आ डोंइती रे परमप्रभु यावे आ अरेशो मटीब आन कली तिलीन। मिनु पिप आ हुकुम पतीके बोल्यो दुम्ब। हितोपदेश १६:१२  
 6 पिप आ डोंइती आंम कली ठेयब मसेलो। मिनु पिप आ ठेयब गेय पाइब आन बाक्तीक लचा ममालो।  
 7 मारदे हना ठेयब आन दातेमी इ कली “याक्सो”, माइक्चा पुंडसीचा क्येडा “एक कुने, निस्सीन” दे ब्रेशो रिम्शो बाक्ब।  
 8 गे मार मरिम्शो ताप्तीवी हना यो, रीब पा निसाफ पतीकेमी मलावो। मारदे हना इ नेक्था डा मुरुम इ कली मुने तोक्ते हना, मार पाइनेवे। लूका १४:७-११  
 9 गे इ नेक्था डा मुर नु आंमा रीब पा लोत्र पावो। मेको मुर आ मरिम्शो पशो मफ्रावो। हितोपदेश २०:१९  
 10 मिनु इ फ्रशो लोत्र नेंबमी इ कली मुने तोक्डे। मिनु इ नें गेना हना यो मरिम्शो लीब।  
 11 रिम्शो गारचा डा लोत्र पशोन, चांदी के थालम वोइशशो सुन के स्याउ खोदेशो बाक्ब। हितोपदेश १५:२३  
 12 जोक्ब तुइक्ब मुर आ हुइक्तीक लोत्र नेंब मुर कली सुन के औंठी नु गहना खोदेशो बाक्ब।  
 13 थमा लोत्र क्याक्ब मुर, आ होत्रप कली हुप्शो नाक्त अन्न रुप्ची ना डा फु खोदेशो पा रिम्शो बाक्ब। मेको लोत्रम आ होत्रप आ थुं बारपाइक्ब।  
 14 सु मुरुमी मारेइ मगेथु, गेता, दे ठेयब लोत्र पाइबा, मेको मुर रेउ मयिपाइक्ब गोस्स नु फश खोदेशो बाक्ब।  
 15 फाल्तीकेमी हुकुम कली बिप्पाइक्के चाप्नीम। ब्रोत्रशो लोत्रमी रुश जिकने चाप्ब। हितोपदेश १५:१  
 16 खुदो थित्तीवी हना, शुश मजावो, इ कली गाप्चा डा पा जावो। मारदे हना शुश जाप्तीवी हना, मेचा कुइक्ब।

- 17 इ नेक्था डा मुर आ खिं शुश मलावो। मारदे हना मेकोमी इ कली शुश जाक्शो तशा ब्रीब।
- 18 आंम नेक्था डा मुर कली जोल पा सांकछी गेब मुर कोक्के तरवार नु हेरशो ब्रा खोदेशो बाक्ब।
- 19 श्येत जशो ना थमा मसुइक्चा डा मुर कली थमा सुइक्चा खाइरशो खुइ नु मदुक्ब खोइल खोदेशो बाक्ब।
- 20 सुमी थुं खाइरशो मुर आन डोंइती कुम्सो पाइबा, मेको ग्यूमी वा रोइरशो नु गारमी हिकसी खेक्शो खोदेशो बाक्ब। मिनु वा खोइक्ब तुम्बु नु शी खोइक्ब बुस्स खोदेशो मेको सुर्ता पाइब मुर आ थुं बाक्ब।
- 21 इ जोरी सत्रु शोत्रलु बेक्तेक्म हना, मेको आन कली थुलो। तूतू दाक्तेक्म हना, मेको आन कली ब्वाक्कु तूचा गेवो। रोमी १२:२०
- 22 मो पाप्तीवी हना, मेको आन पिया तारी ब्रशो कोइला मोइरशो खोदेशो दुम्ब। मिनु परमप्रभु यावेमी इ कली इनाम गेब।
- 23 उत्तर रे पा फशेमी रेउ यिपाइरशो खोदेशो पा, खुइरशो लोत्र फ्राइबमी मुर आन कुल राव किकपाइक्ब।
- 24 गेना हना यो जिचा पोक्ब मीश नु बाक्चा क्येडा खिं आ तला तारी कुना कामी लशा सिक्सी पा बाक्चा रिम्शो दुम्ब।
- 25 तूतू दाक्ब मुर कली ब्रोत्रशो ब्वाक्कु खोदेशो पा डोन रागी रे जाक्शो रिम्शो लोत्र बाक्ब। हितोपदेश १५:२५
- 26 ठीक पाइब मुर परमप्रभु यावे आ अरेशो मटीब नु गारत हना, मेको हिलोम बुक्शो ब्वाक्कु नु शुश ग्रोग्रा बाक्शो कुवा खोदेशो बाक्ब।
- 27 शुश खुदो जचा नु आंम कली ठेयब मिम्शा मान पाइक्चा पुंडसीचा, निम्फा मुर कली मरिम्शो बाक्ब।
- 28 सुमी आंम कली ठीक पा चलेने मचाप्बा, मेको गारो ब्रेशो सहर खोदेशो बाक्ब। हितोपदेश २९:११

## 26

### मुर आन दाते डा मरिम्शो गेय

- 1 हुप्शो महिनाम फु नु अन्न रुप्ची ना रेउ यिशो खोदेशो पा मूर्ख आन कली मान पशो मगारचा डा बाक्ब।
- 2 फुर फुर पा बेरब भडगेरा नु हुरुर पा बेरब बेल्लुम खोदेशो पा मगारचा डा सराप शोर गाक्शो बाक्ब।
- 3 शारा कली सिरकाना, गधा कली करेली नु मूर्ख आ ची कली कोक्के माल्ब। हितोपदेश १९:२९
- 4 मूर्ख कली मूर्ख खोदेशो पा लोत्र मलेत्तो। मो पाप्तीवी हना, गे यो मूर्ख दुम्नेवे।
- 5 मूर्ख कली आ मूर्ख खोदेशो पा लोत्र मपाप्तीवी हना, मेकोमी आंम कली निप्स पाइरशो मिम्सीब।
- 6 सुम मूर्ख कली लोत्र चोत्रथ सोइक्बा, मेकोमी आंम खोइली खोइरशो नु हुश खाक्श पोक्शा श्येत जशो खोदेशो बाक्ब।
- 7 मूर्ख आन देतीके लोत्र खोरन्डे मुर आ खोइल खोदेशो पा शोर गाक्शो बाक्ब।
- 8 मूर्ख कली मान पचा, फुल्लु कली श्येलेमी फ्रेशा आप्चा माल्शो खोदेशो बाक्ब।
- 9 शांबु दुक्शो मुर आ गुइमी चू ओत्रशो खोदेशो पा मूर्ख कली देतीक लोत्र बाक्ब।
- 10 मूर्ख मुर नु लां गाक्ब मुर आन कली गेय पपाइक्चा, हेंथे लिब्रा आप्शा गार सेल्ब मुर खोदेशो बाक्ब।
- 11 कुचुममी मेशा लेंशा जशो खोदेशो पा, मूर्ख मुरुमी मूर्ख गेय लेंशा पना पन बाक्ब। २ पत्रुस २:२२
- 12 आंम कली “जोक्ब तुइक्ब मुर नड” दे मिम्ब मुर क्येडा मूर्खन रिम्शो बाक्ब। हितोपदेश ३:७
- 13 अल्से मुरुमी “लाडगामी गुप्स का बाक्ब। लां मेर गुप्स हिरशो बाक्ब” देंब। हितोपदेश २२:१३
- 14 लाप्चो रोकशो चोक्शो खोदेशो पा, अल्से मुर आ ब्राख्येमी एर ओंथ लोकसीशा इप्ब। हितोपदेश ६:९-११
- 15 अल्से मुरुमी आ गुइ खमेम खुम्ब। मिनु मेको गुइ आ शोत्र सम्म लाइक्चा यो अल्सी पाइब। हितोपदेश १९:२४



- 16 शुश रुष्णा लोत्र लेख ७ जना मुर क्येडा मूर्खमी आंम कली “रुख जोकब नड” दे मिम्सीब।
- 17 सु मुर आन जितिक खेतीकेम ओत्रबा, मेको लाम गाकशो कुचुम आ नोफा ग्याइशशा कीशो खोदेशो बाकब।
- 18 दोपा निप्स ग्यशो मुरुमी ब्रशो लिब्रा हेंथे पा आप्वा,
- 19 मोपा आ नेक्था डा मुर कली जोल पशा नोले “गो इ कली शाक्ता ला” देंब।
- 20 शी मबाक्त हना, मी काप्व। मोदेशो पा नोफा मुडकब मुर मबाक्त हना, जिचा खेचा मबोकब।
- हितोपदेश २२:१०
- 21 दोपा मी मुडकचा कली कोइला नु ब्रचा कली शी माल्बा, मोपा रीब पा गाइकब मुर जिचा पोक्ब बाकब। हितोपदेश १५:१८
- 22 नोफा मुडकब आन लोत्र शुश ब्रोत्रशो जचा थोत्रक खोदेशो बाकब। मेको मुर आन थुं सम्म जाकदीप्व। हितोपदेश १८:८
- 23 मरिम्शो थुं डा ब्रोत्रशो लोत्र खप के बोसुम चांदी खेकशो खोदेशो बाकब।
- 24 जोरी सत्रुमी शोत्रमी रिम्शो लोत्र पाइनीम। तन्न आन थुंमी मरिम्शो मिम्नीम। मती १२:४५
- 25 इ जोरी सत्रुमी गे नु ब्रोत्रशो लोत्र पाप्टु हना यो, मेको कली थमा मसुतो। मारदे हना मेको आ थुंमी ७ ओटा ग्रांग्रा दिचा डा लोत्र खुइशशा बाक्नीम।
- 26 सुमी काइ मदाकशो मुर कली “गो इ कली दाक्नुड” देंखु पाइबा, मेको आ देंखु पतीके मुर आन गुन्तीकेमी गूब।
- 27 सुमी मुर पिक्चा, दे खाल्टा दोइबा, मेको आंमान बिक्ब। सुमी मुर कली चिप्पाइक्चा, दे फुल्लु लोकबा, मेको आंमा लोकसीशा थिरशा लाइब। भजन संग्रह ६:१६; उपदेशक १०:८
- 28 जोल पाइबमी सु कली जोल पवा, मेको कली काइ मदाकब। मिलो शिलो लोत्र पाइब मुरुमी नेल्ल खतम सेल्व।

## 27

### आंम कली ठेयब मसेलो

- 1 “दीसा पाइनुड” दे ठेयब लेशशो लोत्र मपावो। मारदे हना मेको नाक्त मार दुम्बा गे मतुइक्नेवे। याकूब ४:१३,१४
- 2 अरु मुरुमी इ कली ठेयब सेल्वेक्ल। गे आंमा आंम कली ठेयब मसेलो। अरु आन शोत्र रे ठेयब देंमल, इ आंम शोत्रमी “गो ठेयब नड” मदेनो।
- 3 फुल्लु नु बाल्वा हेल्लो बाक्नीम। तन्न मूर्खमी गेशो श्येत मेको निम्फा आस क्येडा हेल्लो बाकब।
- 4 गाइक्चा मरिम्शो बाकब। चुरचा मेको क्येडा मरिम्शो बाकब। रुश पतीके कली सु फाल्ने चाप्वडा?
- 5 खुइशशा दाक्चा क्येडा नेल्लेमी तुइक्चा डा पा हुइक्चा रिम्शो बाकब। लेवी १९:१७
- 6 वारचमी हुइशशो रिम्शो पचा कली बाकब। तन्न मदाकब मुर आन पुक्पु पाइशशो हिंचा डा बाकब। भजन संग्रह १४१:५; मती २६:४९
- 7 साप्पा रूशो कोत्रजमी खुदो यो मदाकब। तन्न शोत्रलु बेक्शो मुर कली मब्रोत्रशो जचा थोत्रक यो ब्रोत्रब।
- 8 खिं रे डोन लशो मुर ग्योत्र रे डोन बेरशो चिक्ब खोदेशो बाकब।
- 9 ब्रोत्रशो रिना पाइशशो तेल नु धूपमी मुर आन थुं ग्येरशो सेल्व। तन्न वारच आ अर्ती मेको क्येडा रिम्शो बाकब।
- 10 इ वारच कली नु इ आफ आ वारच कली मप्रोनो। श्येत जवी ना, इ लोकब आ खिं मलावो। मारदे हना डोन बाकशो लोकब क्येडा नेक्था बाकब मुर रिम्शो बाकब। हितोपदेश १८:२४
- 11 आं तौ, जोकब तुइक्ब दुमो। मिनु गो ग्येरनुड। मोपा गो इ पबंम लोत्र पा आं कली आइक्च सेल्व आन कली लोत्र लेन्ने चाप्नुड।

12 निप्स पाइश्शो मुर श्येत जाक्चा चिक्शो तशा, खुंडसीनीम। तन्न मारेइ मजोक्ब मुरुमी मारेइ मतुइक्थु श्येत जाइनीम। हितोपदेश २२:३

13 अर्को रागी डा मुर आन पबर्म जमानी दुम्शो मुर, आ वा रोइश्शा लतीन। मुर आ पबर्म जमानी बाक्शो आ मारेइ मारेइ नेल्ले लतीन। हितोपदेश २०:१६

14 सुमी सुनी कना बोक्शा, आ नेक्था डा मुर कली ठेयब सेंदामी आसीक पाइबा। मेको आसीक ताइबमी “सराप पाइक्ती” देंब।

15 गेना हना यो जिचा पोक्ब मीश रेउ यिमेनु तप तप पा याप्ब ब्वाक्कु खोदेशो बाक्ब। हितोपदेश १९:२३

16 मेको कली अरेचा फश गिवार कली नाइक्पाइक्चा खोदेशो नु ग्युरा गुडमी तेल गुप्चा खोदेशो बाक्ब।

17 फलाममी फलाम कली शेप्शो खोदेशो पा, मुर कामी अर्को कली शेप्ब।

18 सुमी फोव्रशी र्वा खाल पाइबा, मेकोमी फल जचा ताइब। सुम आ होव्रप कली रिम्शो पा कोव्रबा, मेको मान पाइक्चा पुंडसीब।

19 दोपा ब्वाक्कुम कुल तांडसीबा, मोपा मुर आ थुं दोदेशो बाक्बा, मेको अर्कोम तुइक्बा।

20 बेक्शो मुर आन बाक्तीके नु जाम्शा लतीके गेनायो मरूशो खोदेशो पा, मुर आ मिक्च यो गेनायो मरूब। उपदेशक १:८

21 चांदी यपाइक्चा कली गारचा डा ग्योब नु सुन यपाइक्चा कली यो गारचा डा ग्योब माल्शो खोदेशो पा, मुर आ पतीक अर्को मुर आन ठेयब सेल्टीक रे पा तुंडसीब।

22 मूर्ख कली अन्न नु चुल्मुम वोइश्शा तूलीमी चुशा हना यो, आ मूर्खे पचा गेनायो मयूब।

23 इ क्यारश भेडा दोदेशो तांडसीनीमी रिम्शो पा कोव्रडो। इ बी ब्यफ आन कली होस पा कोव्रडो।

24 मारदे हना शोप गेना हना यो मलीब। सिरपेच यो नेल्ल पाला कली मलीब।

25 घांस जाम्शा लाइब। मिनु नक कोच्चा दाप्ब। मिनु पहाड रे घांस खुप्नीमी,

26 पाठा आ ऊन इन कली वा फेक्चा दुम्ब। बोका लेयशा रू ग्याप्ने चाप्नीनी।

27 क्यारश आ दूध इ कली, इ खिं डा मुर आन कली नु इ गेय पाइब आन कली तूचा गाप्ब।

## 28

### परमप्रभु कली टीब ग्येरशो बाक्ब

1 परमप्रभु यावे आ अरेशो मटीब सुइम खेदा मपथु यो प्रोक्नीम। ठीक पाइबपुकी गुप्स खोदेशो पा महिंथु बाक्नीम। यसैया ५७:२१

2 रागी डा मुरपुकीमी मरिम्शो पान्तेक्म हना, हुकुम पाइब शुश दुन्नीम। तन्न निप्स पाइश्शो हुकुम पाइब बाक्त हना, गेना हना यो रिम्शो बाक्ब।

3 हुकुम पाइब मुरुमी पुडग आन कली दिप्तु हना, मेको बाली नाली बिग्रेब ठेयब रेउ खोदेशो बाक्ब।

4 परमप्रभु यावे आ अरेशो प्रॉइबपुकीमी अरु अरेशो मटीब आन कली ठेयब सेल्टीम। तन्न परमप्रभु यावे आ अरेशो टीब मुरपुकीमी मरिम्शो पाइब आन कली तशा, मेको आन पबर्म सुर्ता पाइनीम।

5 मरिम्शो मुरपुकीमी निसाफ पतीके मार बाक्बा, दे मरूप्नीम। तन्न परमप्रभु यावे आ देशो पचा दाक्बपुकीमी नेल्ल रिम्शो पा रुप्नीम।

6 हेंथे गाक्ब, थुं निक्शी पाइश्शो नु शुश क्येट थीब मुर दुम्चा क्येडा रिम्शो थुं पाइश्शो ठीक लां गाक्ब पुडग मुर दुम्चा रिम्शो बाक्ब। हितोपदेश १९:१

7 सुमी परमप्रभु यावे आ अरेशो टीबा, मेको जोक्ब तुइक्ब तौ बाक्ब। सु चहिं शुश जाइब नु दुक्ब मुर आ वारच दुम्बा, मेकोमी आ आफ कली मुने तोक्ब।

8 सुम आ क्येट मुर कली शुश चाइक्ब ताक्चा कली गेबा, मेको आ क्येट पुडग आन कली शिशी पाइब मुर कली हेक्ब।

9 सुमी परमप्रभु यावे आ अरेशो लोव्र नेशा मटीबा, मेको आ परमप्रभु कली पुंडतीक लोव्र यो ग्रंथा दिशो बाक्ब। हितोपदेश १५:८

10 सुमी रिम्शो थुं पाइश्शो मुर कली मरिम्शो लां हेंथे गाक्पाइक्बा, मेको आंमा दोशो खाल्टामी बिक्व। तन्न दोस मताइबपुकीमी रिम्शो ताइनीम।

11 शोंप पाइश्शो मुरुमी आंम कली “गो जोक्ब तुइक्ब नड” दे मिम्ब। तन्न निप्स पाइश्शो पुडग मुरुमी मेको कली दोदेशो बाक्ब, दे रिम्शो पा तुइक्ब।

12 ठीक पाइबपुकी ग्रामानु, नेल्ल ग्येरसीनीम। तन्न परमप्रभु यावे आ अरेशो मटीबपुकी ठेयब दुम्तेक्म हना, मुरपुकी खुंडसीनीम। हितोपदेश ११:११

13 सुमी आंम पशो मरिम्शो पतीके खुइक्बा, मेको सोशो बोशो मदुम्ब। तन्न सुमी आंम पशो मरिम्शो शोत्रबा नु प्रोंडबा, मेको शिशी ताइब। भजन संग्रह ३२:३-५; १यूहन्ना १:८-९

14 परमप्रभु यावे कली मान पा ह्निं मुर गेना हना यो ग्येरशा बाक्चा ताइब। तन्न मरिम्शो थुं पाइश्शो मुर श्येत जाइनीम।

15 परमप्रभु यावे आ अरेशो मटीबमी पुडग आन कली सासन पाप्तु हना, मेको ग्रीब गुप्स नु प्रेक्शा ग्राम्ब वां खोदेशो बाक्ब।

16 मरुप्ब हुकुम पाइब मरिम्शो दिप्ब मुर बाक्ब। तन्न जोल पा चेम्शो क्येट काइ मदाक्ब मुर शुश नाक्ती ब्रोंडब।

17 सुमी मुर साइक्बा, मेको मबेक्म सम्म प्रोक्शा गाक्चा माल्ब। सुइमी यो मेको कली वारच मपामेक्ल। उत्पत्ती ४:१४

18 सु गेना हना यो रिम्शो पाइब बाक्बा, मेको रिम्शो बाक्ब। तन्न सु लां निक्शी हेंथे पा गाक्बा, मेको कालेम जाम्शा लाइब।

19 सुमी आंम रूमी गेय पाइबा, मेको मुर आ खिंमी शुश अन्न बाक्ब। शुश लोत्र पा बाक्ब मुर चहिं पुडग दुम्शा लाइनीम।

20 थमा सुइक्ब मुर शुश आसीक ताइनीम। तन्न सुम रीब पा क्येट चेम्चा दाक्बा, मेको सजाइ मतथु, मब्रोंडब। हितोपदेश १३:११

21 कुल कोत्रमुचा मरिम्शो बाक्ब। तन्न मुरुमी आइक्च शोब्ले तचा कली मरिम्शो पाइनीमी कों। हितोपदेश १८:५; ब्यवस्था १:१७

22 कुंडद मुर रीब पा क्येट थीब दुम्चा दाक्ब। मिनु “नोले थमा पा पुडग दुम्नुड” दे मेकोमी ममिम्ब। हितोपदेश २३:४; १तिमोथी ६:९

23 मिलो शिलो पाइब मुर आन क्येडा मुर कली हुइक्ब नोले मान पाइक्चा पुंडसीब।

24 सुमी आ आम आफ आस मार मार रोइश्शा “आं शोंप बाक्ब” देंबा, मेको खतम पोक्ब आ वारच बाक्ब। मत्ती १५:५

25 शिंम मुरुमी जिचा पोक्ब। तन्न सुमी परमप्रभु यावे कली थमा सुइक्बा मेको आसीक ताइब।

26 सुमी आंम निप्स कली थमा सुइक्बा, मेको मूर्ख बाक्ब। तन्न सु तुइक्तीक थुं डा लां गाक्बा, मेको ब्रोंडचा ताइब। हितोपदेश ३:५-६

27 सुमी पुडग कली गेबा, मेको आंमा यो श्येत मजाइब। तन्न सुमी पुडग आन पर्वम शिशी मपाइबा, मेको शुश सराप ताइब।

28 परमप्रभु यावे आ अरेशो मटीबपुकी ठेयब मुर दुम्तेक्म हना, मुरपुकी खुंडसीनीम। मिनु मेको बेक्तेक्म हना, ठीक पाइब मुर सोशा बोशा शुश दुम्नीम।

## 29

### तुप्शो नु हुइश्शोम वारच पाइनीस

1 शुश हुइक्चा पुंडसीशा यो, काइ मटीब दुम्तेक्म हना, मेको आन मतुइक्थु वारच पाइक्चा मपुंडसीथु, खतम दुम्नीम। हितोपदेश १५:१०

2 ठीक पाइबपुकी सासन पाइब दुम्तेक्म हना, मुर नेल्ल ग्येरसीनीम। तन्न परमप्रभु यावे आ अरेशो मटीब मुरुमी सासन पाप्तु हना, मुर श्येत जाइनीम। हितोपदेश ११:१०

3 सुमी तुडक्तीक थुं दाक्बा, मेकोमी आ आफ कली ग्येरपाइक्ब। तन्न तेल्लेम नु गाक्ब मुरुम आ शोंप नेल्ल खेरब। लुका १५:१३,३०

4 पिप आ ठीक पतीकेमी आ रागी लीब। तन्न मेकोमी शुश तिरो पोक्तु हना, आ रागी खतम सेल्ब।

5 सुमी आ नेक्था डा मुर कली क्युकशा लोत्र पाइबा, मेकोमी मेको कली ग्याइल दाइशो बाक्ब।

6 मरिम्शो पाइब मुर आ मरिम्शो पतीकेमी श्येत जाइब। ठीक पाइब मुर चहिं शुश ग्येरसीशा कुम्सो पाइनीम।

7 ठीक पाइब मुरुम पुडग आन कली दोपा ठीक पचा, दे तुडक्नीम। तन्न परमप्रभु यावे आ अरेशो मटीबपुकीमी मारेड मरुप्नीम।

8 शुक्शी पाइब मुरपुकीमी सहर खल्लब सेल्नीम। तन्न जोक्ब तुडक्ब मुरपुकीमी जिचा खेचा तेक्नीम।

9 जोक्ब तुडक्ब मुर मूर्ख नु निसाफ पतीकेमी लत हना, मेको मूर्खमी जिचा पोक्शा, रिशशा मगारब।

10 हुश खाक्श पोक्ब मुरुमी दोस मताइब मुर आन कली काइ मदाक्ब। मेकोमी रिम्शो थुं पाइशो मुर कली साइक्चा माल्ब।

11 मूर्ख मुरुमी आ गाइक्चा नेल्ल कोंडब। जोक्ब तुडक्ब मुरुम चहिं आ गाइशो तेक्शा, मकोंडब। हितोपदेश १२:२३; हितोपदेश २५:२८

12 सासन पाइबमी जोल लोत्र नेंतु हना, मेको आ गेय पाइब नेल्ल परमप्रभु यावे आ अरेशो मटीब दुम्नीम।

13 पुडग नु मेको आन कली दिप्ब आन के थोत्रक का गारशो बाक्ब। मेको मार बाक्ब देंशा हना, परमप्रभु यावेमी मेको निम्फा आस कली मिक्च ताइब सेल्शो बाक्त। हितोपदेश २२:२; अय्युब ३३:३०; भजन संग्रह १३:४

14 पुडग आन कली ठीक पा निसाफ पाइब पिप आ सासन गेना हना यो लीब। हितोपदेश १६:१२

15 वोंडश आल आन कली तुप्शा, हुइशोनु, जोक्ब तुडक्ब दुम्नीम। मारेड मशेंशो वोंडश आलम चहिं आ आम कली मुने तोक्ब। हितोपदेश २२:१५; १राजा १:६

16 परमप्रभु यावे आ अरेशो मटीब मुरपुकी शुश दुम्तेक्म हना, मरिम्शो पतीक बारशा लाइब। तन्न ठीक पाइबपुकीम मेको आन खतम दुम्शो ताइनीम। भजन संग्रह ३७:३५-३६

17 इ तौ कली रिम्शो पा शेंदो। मिनु मेकोमी इ थुं नाइक्पाइशशा इ कली ग्येरपाइक्ब। हितोपदेश २३:१३

18 परमप्रभु यावे आ लोत्र पाइब मुर मबाक्तेक्म हना, मुर नेल्ल हेंथे पाइब दुम्नीम। तन्न मेकोपुकीम आन परमप्रभु यावे आ अरेशो टिम्तेक्म हना, ग्येरसीशो मुर दुम्नीम।

19 इ गेय पाइब कली लोत्रम ला शेंने मचाप्नेवे। मारदे हना मेकोमी इ लोत्र रूप्तु हना यो मटीब।

20 ममिम्थु लोत्र पाइब क्येडा मूर्खन रिम्शो बाक्ब। उपदेसक १:२; याकूब १:१९

21 इ वाइल कली आल रे नम पाइशशा थुलतीवी हना, नोले मरिम्शो दुम्ब।

22 चुरब मुरुमी राम्शी पोक्ब। गाइशशा बाक्ब मुरुमी शुश मरिम्शो पपाइक्ब। हितोपदेश १५:१८; हितोपदेश २२:२४

23 मुर आन ठेयब लेशशोमी मेको कली आइक्च सेल्ब। ब्रेम्शो थुं पाइशो मुर चहिं मान ताइब।

24 खुइ नु वारचुबु दुम्ब मुरुमी आंम आ कली मदाक्ब। खुइ पचा पुंइसीब मुर आ सराप नेंबमी यो मारेड मदेब। लेवी ५:१

25 मुर क्येडा हिंचा ब्वारद खोदेंशो बाक्ब। तन्न परमप्रभु यावे कली थमा सुइक्चा ब्रोंडतीक बाक्ब। मत्ती १०:२८

26 शुश मुरुमी सासन पाइब नु गुम्चा दाक्नीम। तन्न परमप्रभु यावे रे मुरपुकीम ठीक निसाफ ताइनीम।

27 ठीक पाइबपुकीमी मरिम्शो पाइब तशा ग्रॉग्रा दीनीम। तन्न परमप्रभु यावे आ अरेशो मटीबपुकीमी ठीक पाइब आन कली तशा ग्रॉग्रा दीनीम।

## 30

## आगुर आ लोत्र

1 एको मास्सा डा याकेह आ तौ आगुर आ देशो लोत्र बाक्ब। मेकोमी इथीएल नु उकल कली एको लोत्र पाणु। मेकोमी “गो परमप्रभु कली माल्ना माल्न बाक्ती, तन्न मथिदु। उत्पती २५:१२-१४

2 थमा पा गो मुर आन दातेमी निप्स मपाइशशो मुर दुम्ती। गो नु मुर आन के खोदेशो रुतीक मबाक्ब।

3 गो जोक्ब तुइक्ब दुम्चा मशेंसीड। मिनु का ला बाक्शो परमप्रभु यावे कली मतुइक्नुड।

4 सु स्वर्ग लशा, लेशशा यिशो बाक्बा डा? सुम फश कली आ गुइमी ग्याइक्ने चाप्बा डा? सुम समुन्द्र डा ब्वाक्कु कुम्लो पने चाप्बा डा? सुम रागी आ सुर सेला? मेको आ नें मार बाक्बा? मेको आ तौ आ नें मार बाक्बा? गे तुइक्नेवे हना” देनो। अय्युब ३८:२८-३४

5 परमप्रभु आ लोत्र नेल्ल थमा बाक्ब। सु मेकेर लशा खुइसीबा, मेको कली श्येत रे तेक्ब। भजन संग्रह १२:७

6 मेको आ लोत्रमी मारेइ यो मतेम्दो। तेम्ताक्वी हना, इ कली हुइशशा, गे जोल पाइब मुर देंचा पुइसीनेवे। ब्यवस्था ४:२

7 मिनु “गो इन कली थोत्रक निक्शी पुइनुड। आं बेक्चा क्येडा डोंइती मेको आं कली गेयीनी।

8 हेंथे पतीके नु जोल पतीक आं क्येडा डोन वोतीन। आं कली पुडग मसेल्यीनी नु शुश क्येट थीब यो मसेल्यीनी। आं कली माल्चा डा जचा थोत्रक गेयीनी। तिमोथी ६:६-८

9 मारदे हना गो नु मारेइ मारेइ बाक्त हना, गो इन कली प्रेनुड। मिनु “परमप्रभु यावे सु बाक्बा?” देनुडा कों? मिनु गो पुडग दुम्ती हना, खुइ पा आं परमप्रभु आ नें आइक्च सेल्शा मुने तोक्नुडा कों?” देती। प्रस्थान ५:२

10 गेय पाइब आ परबंम आ होत्रप नु मरिम्शो लोत्र मपावो। मो पाप्तीवी हना, मेकोमी इ कली सराप पाइब। मिनु गे श्येत जाइनेवे।

11 का निक्शी मुरुमी आन आफ कली सराप पाइनीम। मिनु आन आम कली आसीक मगेनीम।

12 का निक्शी मुरुमी आंम कली “गो गेना हना यो रिम्शो पाइब मुर नड” देनीम। तन्न मेको आन मरिम्शो पशो मक्याम्मीशो बाक्ब। हितोपदेश २०:९

13 का निक्शी मुर ठेयब लेशशो बाक्नीम। मेको शुश बोरशो बाक्नीम।

14 का निक्शी मुर आन खुइ तरवार नु छूरी खोदेशो बाक्ब। मेकोपुकीमी पुडग आन कली नाक्शा, श्येत जाइब आन कली ब्वाइनीम।

15 मिनु याफे आ तमी निक्शी बाक्नीस। मेको निक्शीमी “गेयी, गेयी” देनीस। मिनु अरु थोत्रक सां बाक्नीम। मेकोपुकी गेनायो मरुनीम। अर्को ४ ओटा थोत्रक बाक्नीम। मेकोमी गेनायो “मोक्ल” मदेनीम।

16 बेक्शो मुर आन बाक्तीके, आल मथीब कोत्रज, ब्वाक्कु मतशो सोत्रशो रू नु मी, एको ४ ओटा थोत्रकमी गेनायो “गाप्ती” मदेनीम।

17 आफ कली शुक्शी पाइब नु आम कली मटीब मुर आन मिक्च खदीमी कोक्शा गुंइनीम। मिनु गिदपुकीमी ब्वाइनीम। हितोपदेश २०:२०

18 थोत्रक सां बाक्नीम। मेको तशा गो छक लाक्ती। ४ ओटा थोत्रक कली यो रुप्ने मचबु।

19 मेको मार बाक्तेक्म देशा हना, ककाकुली आ सरीडम बेरतीके, रोगु मेर बुम्स आन गाक्तीके, ठेयब समुन्द्रमी जहाज आन गाक्तीके नु वोंइश मुर नु मीश आल आस लां मेको रुप्ने मचबु।

20 हेंथे गाक्ब मीश मुरुमी जाइब। मिनु आ शोत्र शोप्शा “गो मारेइ मरिम्शो मपड” देब।

21 मिनु थोत्रक सांमी रागी कली खिंखिं पपाइक्नीम। ४ ओटा थोत्रक मेको फाल्ने मचाप्चा डा बाक्नीम। उपदेशक १०:६-७

22 मेको ४ ओटा थोत्रक मार बाक्तेक्म देशा हना, वाइल पिप दुम्शो, मूर्ख जशा ब्वशा रूशो,

23 मरिम्शो मीश आल कली ग्युबे पशो नु वाइलीम आ होत्रपोक्म आ पा डा मेको खिं डा होत्रपोक्म दुम्शो, एको ४ ओटा फाल्ने मचाप्चा डा थोत्रक बाक्नीम। ब्यवस्था २४:१-४

- 24 रागीम ४ ओटा आइक्च थोत्रक बाक्नीम। तन्न मेकोपुकी थम जोक्ब तुइक्ब बाक्नीम।
- 25 रकमिक्च शुश बोल मपाइशो बाक्तेक्म हना यो, आन जचा थोत्रक खुप्ची ना खुप्शा तेलनीम।
- हितोपदेश ६:६-८
- 26 ब्वित्ती खोदेशो जन्तु शुश बोल मपाइशो बाक्नीम। मो हना यो मेकोमी आन खिं रोंगुम सेल्नीम।
- 27 मिनु माले आन के पिप मबाक्ब। मोदेशो बाक्तेक्म हना यो, मेकोपुकी लडाइ पाइब खोदेशो पा तांती खिक्शा गाक्नीम।
- 28 खोते आन कली गुडम ग्याइक्ने चाम्सीब हना यो, मेकोपुकी पिप आ दरवारमी बाक्नीम।
- 29 मिनु थोत्रक सां बाक्नीम। मेको ठेयब मुर खोदेशो पा गाक्नीम। मिनु ४ ओटा थोत्रक बाक्नीम।
- मेको ठेयब लेशशा हिरनीम।
- 30 मेको मार बाक्नीम देशा हना, गुप्स, जन्तु नेल्ल आन दातेमी नेल्ल क्येडा बोल्यो बाक्ब। मेको सुइ क्येडा महिंब।
- 31 ठेयब लेशशा गाक्ब भाले, बोका नु आ सेना आन डोंइती गाक्ब पिप बाक्नीम।
- 32 गे मूर्ख दुम्शा, आंम कली ठेयब सेल्तीवी हना, गे मरिम्शो पचा मिम्शो बाक्ते हना, इ कुल सुम्सो।
- 33 मिनु दूध खाक्शोनु नौनी घ्यू गूब। नें तुप्शोनु, हुश यीब। मोपान गाइक्चा बोक्त हना, राम्शी बोक्ब।

## 31

### लेमुएल आ देशो लोत्र

- 1 पिप लेमुएल आ लोत्र। मिनु पिप आ ममामी एको लोत्र पिप कली शेंशो बाक्त। हितोपदेश ३०:१
- 2 मेकोमी “आं तौ, गो इ कली मार देंनुडा डा? गो इ पर्वम परमप्रभु यावे कली पुंडता।
- 3 इ बोल मीश मुर आन कली मगेवो। मेको हेंथे गाक्बपुकीमी पिप आन कली खतम सेल्नीम। ब्यवस्था १७:१७; १राजा ११:१,४
- 4 लेमुएल, पिप कली अडगुर शांबु तूचा मशिरब। मिनु सासन पाइबमी रकसी काइ तूचा मदुम्ब।
- हितोपदेश २०:१
- 5 ठेयब मुरपुकी तूशा दुक्तेक्म हना, अरेशो लोत्र प्रेंनीम। मिनु श्येत जाइब आन कली निसाफ पतीकेमी दूली पाइनीम। मेको काइ मदुम्ब।
- 6 खतम दुम्चा चिक्शो मुर आन कली रकसी तूचा गेवो। मिनु अडगुर शांबु थुं लुक्च लशो आन कली गेवो।
- 7 मोपा तूशा, मेकोपुकीमी आन प्रुडग दुम्तीके प्रेंनीम। मिनु आन श्येत ममिन्मी।
- 8 ब्वाक्ने मचापब नु मग्येरसीशो नेल्ल आन पर्वम ठीक निसाफ पावो। अय्युब २४:१२
- 9 श्येत जशो नु प्रुडग आन कली ठीक निसाफ पशा वारच पावो” देमाक्त।

### रिम्शो गेय पाइब मीश मुर

- 10 रिम्शो गेय पाइब मीश आल सुम थिन्ने चापबा डा? मेको हीरा मोती क्येडा शुश क्येट लाइब बाक्ब। हितोपदेश १८:२२
- 11 मेको आ वोंइशमी मेको कली रिम्शो पा थमा सुइक्ने चापब। मिनु आस माल्शो मारेइ मारेइ गाक्ब।
- 12 मेको ब्रोंडम सम्म आ वोंइश कली रिम्शो पाइब। मरिम्शो गेनायो मपाइब।
- 13 मेकोमी ऊन नु रुवा खुप्शा, पाइशा शुश गेय पाइब।
- 14 शुश लेयतीक मारेइ मारेइमी ब्रीशो जहाज खोदेशो पा मेकोमी खिंमी जचा थोत्रक चाक्ब।
- 15 मेको सुनी कना बोक्शा मार मार जचा तूचा क्येपाइक्ब। आ वाइलीम आन कली मार गेय पचा माल्बा, नेल्ल अरेब।
- 16 शुश मिम्शा नोले मेकोमी रू का ग्यापब। मिनु मेकेर आंमा चेम्शो क्येटीमी अडगुर खुम्ब।
- 17 मेको आ रिम्शो गेय पतीके आ गुइ बोल्यो बाक्नीम।
- 18 मेकोमी आ लेयतीक थोत्रक रिम्शो पा लेयसीशो ताइब। नाक्दो आ बत्ती मकापब।
- 19 मेकोमी प्यूरी लाइशशा, पांइतो पांइब। आ वा आंमा पोंत्रब।

- 20 मेकोमी पुडग आन कली वारच पाइब। मिनु श्येत जाइब आन कली आन माल्शो गेब।
- 21 मेको ग्यू पची ना महिंब। मारदे हना आ मुर नेल्लेमी होशो वा फेक्शो बाक्नीमी।
- 22 मेकोमी आ ब्रतीक रिम्शो पा सेल्ब। मेको आ फेक्तीक प्याजी रड डा रिम्शो पा किरशो सुती वा के बाक्नीम।
- 23 मेको आ वोइश ठेयब मुर दुम्शा, सहर डा ठेयब लाप्चोमी बाक्मेनु, रागी डा खाल्पा आन दातेमी बाक्ब।
- 24 मेकोमी सुती के फेक्तीक वा सेल्शा लेयब। किप्शुर यो ग्याप्ब लेयब आन कली लेयब।
- 25 मेको नु सक्ति नु मान ततीके बाक्ब। मेकोमी दीसा मार दुम्बा, दे रिश्शा सुर्ता मपाइब।
- 26 मेकोमी लोव्र पवानु, जोक्ब तुडक्ब लोव्र ला पाइब। मिनु मुर आन कली शिशी पचा कली शेंब।
- 27 मेकोमी आ खिं डा मुर आन कली रिम्शो पा कोव्रब। गेय मपथु, हेंथे पा मजाइब।
- 28 मेको आ आलपुकीमी “आंइ आम ग्येरसीशो बाक्ब” देनीम। आ वोइशेमी यो मेको कली मान पाइब।
- 29 मेकोमी “शुश मीश मुरपुकीमी रिम्शो पाइनीम। मेको आन क्येडा गे रिम्शो पाइब बाक्नेवे” देब।
- 30 मुर आन दारस जोल बाक्ब। मेको दारस जाम्शा लाइब। तन्न परमप्रभु यावे कली मान पा हिंब मीश मुर मान पाइक्चा पुंडसीब। हितोपदेश ११:२२
- 31 मेको मीश मुर कली आ गेय पा चेम्शो गेवो। सहर डा ठेयब लाप्चोमी मुर नेल्लेमी मेको कली मान पामेक्ल।

## उपदेसक

**ब्रेक्ब मुर:** सोलोमनम ब्रेक्शो बाक्ब देंसीब।

**गेना ब्रेक्शो:** सोलोमनमी एको किताब १३० बि. सी. क्येडा डोंइती, आ सासन पशो थुम्ची ना ब्रेक्शो बाक्ब, दे मिम्नीम।

**मार ब्रेक्शो:** मारेइ मारेइ जाम्शा लाइब। मुर ब्रोंइशो सम्म परमप्रभु आ गेशोम ग्येरशा बाक्चा माल्ब। थमा पा जोक्तीक तुइक्तीक थुं परमप्रभु कली मान पा हिंशा आ देशो टिशा पचा माल्ब।

नेल्ल जाम्शा लाइब बाक्नीम

1 एको दाऊद आ तौ, यरूसलेम डा पिप आ शेंशो लोव्र बाक्ब।

2 मेको शेंबमी “जाम्शा लाइनीम, मारेइ मारेइ जाम्शा लाइब बाक्नीम। जाम्शा लाइनीम, नेल्ल जाम्शा लाइब बाक्नीम।

3 मुरुम रागीम श्येत पा गेय पा, मार ताइनीमी डा? नांम दुप्शा श्येत पा गेय पा, मार दुम्बा डा? उपदेसक २:२३

4 पाला का लाइब। मिनु अर्को पाला जाक्ब। तन्न रागी गेना हना यो लीब। भजन संग्रह १०:३

5 नां दाप्ब। मिनु नां पेरब। मेको लेंशा आ दाप्तीकेम रीब पा जाक्ब।

6 फश दक्खिन गे पाइब। मिनु उत्तर गे लाइब। मेको गेना हना यो आ हिरतीकेम हिरशा लेप्ब।

7 खोला नेल्ल शाइश्शा समुन्द्रम लाइनीम। तन्न समुन्द्र गेनायो मब्रीब। खोला ते गे शाइक्नीमी, मेक गेन शाइस डा शाइस बाक्नीम।

8 तेकोइ आइदी रे आइक्था सम्म रिम्शो मबाक्नीम। सुइमी देशा देने मचाप्नीम। कोव्रशा मिक्च गेनायो मरूब। नेंशा नोफा गेनायो मदाइब। भजन संग्रह १०:१०; हितोपदेस २७:२०

9 मार मार दुम्शो बाक्मे, मेको लेंशा दुम्ब। मार पशो बाक्मे, मेको लेंशा पांइसीब। रागीम मारेइ नक मबाक्नीम” देंत।

10 मारेइ आ पर्वम सुइमी “कोव्रडीन, एको नक बाक्ब” देंने चाप्नीमी? मेको दा डोंइती रेन मेकेर बाक्त। मेको साइ डोंइती रेन बाक्त।

11 साइ डोंइती डा मुर आन कली सुइम ममिम्नीम। मिनु मुल जाक्ब मुर कली नोले डा मुरुम यो ममिम्नीम।

जोक्तीक तुइक्तीक जाम्शा लाइब

12 गो, एको लोव्र शेंबमी यरूसलेममी इस्राएल डा पिप दुम्शा सासन पाता।

13 गो आं जोक्तीक तुइक्तीकेम रागीमी मार मार पांइसीबा, मेको नेल्ल तुइक्चा दाक्ताक्ड। परमप्रभुमी मुर आन कली मोदेशो तुइक्चा माल्तीक थुं गेशा, श्येत गेप्तु।

14 गो रागीमी पशो गेय नेल्ल ताता। मेको नेल्ल जाम्शा लाइब बाक्नीम। मेको फश कली खेदा पशो खोदेशो बाक्ब।

15 मार रोम्सीशो बाक्बा, मेको कली दिपाइक्ने मचाम्सीब। मबाक्शो थोव्रक हिक्ने मचाम्सीब। उपदेसक ७:१३

16 गो आं थुमी “कोव्रडीन, गो आं क्येडा डोंइती यरूसलेममी सासन पाइब नेल्ल आन क्येडा शुश जोक्ब तुइक्ब थुं पाइश्शो मुर दुम्ती। गो मारेइ मारेइ तशा तुइक्ताक्ड।

17 गो जोक्तीक तुइक्तीक रुप्चा, बौला दुम्तीक नु मूर्ख दुम्तीक तुइक्चा थुं पाता। तन्न मेको दा फश कली खेदा पशो खोदेशो ला बाक्त, दे तुइक्ताक्ड। उपदेसक २:१२; उपदेसक ७:२५

18 मारेदे हना शुश जोक्तीक तुइक्तीकेम शुश श्येत जपाइक्ब। गे दोशो जोक्ब तुइक्ब दुम्नीनी, मोशो श्येत जाइनीनी” दे तुइक्ताक्ड।



## 2

नेल्ल जाम्शा लाइब बाकब

1 मिनु गो आंम कली “मुल गो ग्येरसीनुड। मिनु ग्येरसीशो थुं कली कोव्रशा दाक्नुड। तन्न मेको यो जाम्शा लाइब ला बाक्त, दे तुइक्ताकड।

2 रिस्सीचा यो मूर्खे गेय बाकब। मिनु ग्येरसीशा बाक्शोनु, मार रिम्शो दुम्बा डा?

3 गो आंम कली ग्येरपाइक्चा कली इच्का अडगुर शांबु तूता। मो पडानु आं थुंम बाक्शो जोक्तीक तुइक्तीक मला। मूर्ख आ गेय रुप्चा कली मोदेशो पाता। मिनु गो मुर आन कली इच्का नाक्त रागीम ब्रोंइचा कली रिम्शो गेय मार बाक्बा, दे रुप्चा मालता। हितोपदेस ३१:४

4 गो ठेयब गेय पाता। गो आंम कली खिंपुकी सेल्शा, अडगुर रू यो सेलतामी।

5 गो फल फुल रूपुकी नु बाक्तीकपुकी यो सेल्शा मेकेर नेल्ल खाल डा फल फुल रवापुकी खुम्तामी।

6 रिम्शो पा बारना बारन लशो रवा आन कली ब्वाक्कु लुक्चा कली ठेयब दोम्ती सेलतामी।

7 गो वाइलीम वाइलपुकी ग्याप्तामी। आं खिंमी जरमेशो वाइलीम वाइल यो बाक्तेकम। गो शुश बी ब्यफ नु क्यारश भेडा थुलतामी। गो आं क्येडा डोंइती यरूसलेमम बाक्ब सुइ आन के आं के खोइ बी ब्यफ नु क्यारश भेडा मबाक्म।

8 गो आं कली सुन चांदी नु रागी रागी डा पिप रे शुश शोंप तेलतामी। गो कुम्सो पाइब मीश मुर नु वोंइश मुर वोइक्ताकमी। आंम कली ग्येरपाइक्चा कली शुश मीश चाक्तामी।

9 यरूसलेममी आं क्येडा डोंइती डा मुर नेल्ल आन क्येडा गो ठेयब दुम्ती। आं जोक्तीक तुइक्तीके गो नुन लीत। १राजा १०:२३

10 गो मार कोव्रचा दाक्डा, मेकोन कोव्रता। आं दाक्शो नेल्ल पाता। मोपा आं पशो गेय नेल्लेमी आं थुं कली ग्येरपाइक्कु। मेको आ श्येत पा पशो गेय रे ताता।

11 मो हना यो मेको आं पशो गेय नेल्ले नु आं मार मार तचा कली श्येत पा पशो गेय नेल्ल कोव्रडुनु, मेको नेल्ल जाम्शा लाइब बाक्तेकम। मेको नेल्ल फश कली खेदा पशो खोदेशो शोर गाक्शो गेय ला बाक्तेकम।

तुइक्तीक नु मूर्खे जाम्शा लाइब

12 मिनु गो जोक्तीक तुइक्तीक, निप्स ग्यशो दुम्तीक नु मूर्खे दुम्तीके रुप्चा थुं पाता। पिपम डोंइती थुम्शो गेय आ क्येडा नोले जाक्बम मार पने चाप्बा डा? डोंइती नेल्ल पशो बाक्त।

13 मिनु गो मार ताता देशा हना, दोपा छिडछिड क्येडा छेडछेड रिम्शो बाक्बा, मोपान मूर्खे दुम्चा क्येडा जोक्तीक तुइक्तीक रिम्शो बाक्ब।

14 रुप्ब मुर मारेइ मारेइ ताइनीम। तन्न मूर्खे चहिं छिडछिडमी गाक्नीम। तन्न नोले मेको नेल्ल खाल का पा लाइनीम।

15 मिनु मूर्खे कली दुम्तीक आं कली यो दुम्ब। गो मारदे जोक्ब तुइक्ब दुम्डा? मिनु गो आंमा कली ‘मेको यो जाम्शा लाइब बाक्ब’ ” देंती।

16 मारदे हना जोक्ब तुइक्ब नु मूर्खे निम्फा आस कली नोले सुइम ममिन्नीम। मेको निम्फा आस कली प्रेंसीब। जोक्ब तुइक्ब दोदेशो पा बेक्बा, मूर्खे यो मोदेशो पा बेक्ब। भजन संग्रह ४९:११

17 मोपतीके गो ब्रोंइचा मदाक्कु। मारदे हना रागीमी पशो गेय नेल्ल श्येत ला बाक्त। मेको नेल्ल जाम्शा लाइब बाक्तेकम। मेको फश कली खेदा पशो खोदेशो ला बाक्त।

गेय पशो नेल्ल जाम्शा लाइब

18 रागीमी आं श्येत पशो गेय नेल्ल आन कली गो काइ मदाक्कु। मारदे हना मेको गो आं नोले जाक्ब आन कली प्रोंइचा माल्नुड। उपदेसक २:२१; भजन संग्रह ३९:७

19 मिनु मेको आ नोले जाक्ब जोक्ब तुइक्ब बाक्म कौ मूर्खे बाक्म, दोपा तुइक्बा? मो हना यो आ श्येत पा पशो गेय नेल्ले मेको केन दुम्ब। मेको यो जाम्शा लाइब बाक्त।

20 मिनु आं श्येत पा मिम्शा पशो गेय नेल्लेम आं थुं लुक्च लत।

21 मारदे हना सुइमी जोक्ब तुइक्ब दुम्शा शुश गेय पाप्टु हना यो, मेको आ पशो नेल्ल अरु मुर आन कली प्रोंइशा वोइक्चा माल्ब। मेको ताइब मुरुमी मेको आ पर्वम मारेइ श्येत मपशो बाक्ब। एको यो जाम्शा लाइब नु थम मरिम्शो बाक्ब।

22 मुरुमी रागीम बाक्शा शुश श्येत गेय पा, मार ताइनीमी डा?

23 मेको नाक्त किंत किंत श्येत जाइनीम। मिनु नाक्दो यो आन थुं नाइक्चा मताइनीम। मेको यो जाम्शा लाइब बाक्ब।

24 मुरुमी जचा, तूचा नु आंम गेयमी ग्येरशा बाक्चा क्येडा लाक्शा अरु मारेइ रिम्शो मबाक्ब। मेको यो परमप्रभु रे जाक्शो तशो बाक्नुड। उपदेसक ३:१२, २२; उपदेसक ५:१७; उपदेसक ८:१५; उपदेसक ९:७

25 मारदे हना परमप्रभु रे मजाक्त हना, सुम जचा नु रिम्शो पा बाक्चा ताइबा डा?

26 परमप्रभुमी आ दाक्शो मुर कली जोक्तीक तुइक्तीके नु रुप्शा ग्येरतीक थुं गेब। तन्न मरिम्शो पाइब आन कली खुप्तीक नु तैलीक गेय पपाइक्ब। मिनु नोले मेको नेल्ल आ दाक्शो मुर आन कली गेब। मेको यो जाम्शा लाइब नु फश कली खेदा पशो खोदेशो ला बाक्ब। हितोपदेस १३:२२; हितोपदेस २८:८

### 3

#### मारेइ मारेइ आन पतीक ना बाक्ब

1 मारेइ मारेइ के पतीक ना बाक्ब। रागीमी मारेइ मारेइ आन के पतीक ना बाक्ब। उपदेसक ८:६; भजन संग्रह ३१:१६

2 जरमेतीक ना बाक्ब। मिनु बेक्तीक ना बाक्ब। खुम्तीक ना बाक्ब। मिनु तुलतीक ना बाक्ब।

3 साइक्तीक ना बाक्ब। मिनु सापाइक्तीक ना बाक्ब। प्रेत्तीक ना बाक्ब। मिनु सेलतीक ना बाक्ब।

4 डाक्तीक ना बाक्ब। मिनु रिक्तीक ना बाक्ब। रोंका पतीक ना बाक्ब। मिनु सिल पतीक ना बाक्ब।

5 फुल्लु फ्रतीक ना बाक्ब। मिनु मेको खुप्तीक ना बाक्ब। मुप्तीक ना बाक्ब। मिनु ममुप्तीक ना बाक्ब।

6 माल्तीक ना बाक्ब। मिनु साम्तीक ना बाक्ब। वोइक्तीक ना बाक्ब। मिनु ताइक्तीक ना बाक्ब।

7 खाक्तीक ना बाक्ब। मिनु फेरतीक ना बाक्ब। सिक्सी पा बाक्तीक ना बाक्ब। मिनु लोइ पतीक ना बाक्ब।

8 दाक्तीक ना बाक्ब। मिनु मदाक्तीक ना बाक्ब। लडाइ पतीक ना बाक्ब। मिनु दुशा बाक्तीक ना बाक्ब।

9 गेय पाइबमी आन श्येत पा गेय पशो रे मार ताइनीमी डा?

10 परमप्रभुमी मुर नेल्ल आन कली श्येत डा गेय गेप्टु। गो मुर मेको गेय पस डा पस तातामी।

11 मेकोमी मारेइ मारेइ आन कली गारपाइश्शा सेल्लु। मेकोमी गेना हना यो ब्रोंइशा बाक्तीके मुर आन थुंम वोइक्तु। मो हना यो मेकोपुकीमी परमप्रभुमी डोंइती रे नोले सम्म मार पवा, मेको रुप्ने मचाप्नीम। उपदेसक ८:१७

12 मुर ब्रोंइमा सम्म ग्येरशा नु रिम्शो पा बाक्चा माल्नीम। मेको क्येडा रिम्शो अरु मारेइ यो मबाक्ब, दे तुइक्नुड। उपदेसक २:२४

13 परमप्रभु आ दाक्शो मार बाक्ब देशा हना, मुर नेल्लेमी जशा, तूशा आन गेयम ग्येरशा बाक्मल, देशो बाक्ब।

14 परमप्रभुमी मार पाइबा, मेको गेना हना यो लीब, दे गो तुइश्शो बाक्नुड। मेकेर मारेइ तेम्ने नु गुंइने मचाप्नीब। मुर नेल्लेमी परमप्रभु कली हिंशा मान पामेक्ल, दे मोदेशो पाप्टु।

15 मार बाक्मे, मेको डोंइती रेन बाक्त। मेको मुल दुम्ब डोंइती रेन बाक्त। मिनु परमप्रभुमी डोंइती दुम्शो लेंशा दुम्पाइक्ब।

#### रागी डा ठीक निसाफ पतीके

16 मिनु गो रागीम अर्को का यो ताता। मार ताता देशा हना, ठीक निसाफ पतीक आ पा डा काइ मरिम्शो पतीक बाक्बाक्त। ठीक पतीक आ पा डा जोल पतीक बाक्बाक्त।

17 गो आं थुंमी “परमप्रभुमी ठीक पाइब नु आ अरेशो लोव मटीब निम्फा आस कली निसाफ पाइब। मारदे हना मेकोमी मारेइ मारेइ नेल्ल कली नु गेय नेल्ल कली आ पतीक ना सेल्लतु। उपदेसक १२:१४

18 गो आं थुंमी मुरपुकी बस्तु भाव खोदेशो नकी, दे तुइकतमेकल, दे परमप्रभुमी मेको आन कली नाकशा कोवब” दे यो मिम्ताकड।

19 मुर नु बस्तु भाव आन लां खाल का डा बाकब। मेको खाल का डा पा बेकनीम। का दोपा बेकबा, अर्को यो मोपान बेकब। मेको नेल्ल खाल का डा पा सोक्त कीनीम। मुर आन ततीके बस्तु भाव आन क्येडा रिम्शो मबाकब। मारदे हना नेल्ल जाम्शा लाइब बाकनीम। भजन संग्रह ४९:१३,२१

20 मेको नेल्ल बेकनीम। मारदे हना मेको नेल्ल खप रे दुम्शो नम। मोपतीके मेको नेल्ल लेंशा खप दुम्नीम।

21 मिनु मुर आन सोक्त चहिं ग्येत्थ नु बस्तु भाव आन सोक्त चहिं खप लुकच लाइब, दे सुम तुइश्शो बाकबा डा?

22 मोपतीके मुर नेल्ले आम गेयमी ग्येरसीशा बाककीन। मेको नेल्ल क्येडा रिम्शो बाकब। मारदे हना मुरुमी आ नोले मार दुम्बा, दोपा तुइक्ने चाप्वा डा?

## 4

दिप्चा पुंडसीब नु श्येत जाइब

1 मिनु गो रागीम कोवडनु, मेकेर थम मरिम्शो पशो ताता। गो दिप्चा पुंडसीशो आन डाक्शो ताता। मेको आन कली लेम्ब सुइ मबाकम। मेको मरिम्शो पाइब सक्ति पाइश्शो बाकतेकम। दिप्चा पुंडसीब आन कली चहिं लेम्ब सुइ मबाकम।

2 बेकशो मुर, ब्रोंइशो आन क्येडा ग्येरसीशो बाकनीम, दे तुइक्ताकड।

3 तन्न मेको निम्फा आस क्येडा मुल मजरमेशो मुर ग्येरसीशो बाकब। मारदे हना मेकोमी रागीम मरिम्शो दुम्शो मतशो बाकब। उपदेसक ६:३

4 मिनु गो मार ताता देशा हना, मुरपुकी श्येत पा अरु आन कली गेहे पतीके रे जोकब दुम्नीम। मेको यो जाम्शा लाइब नु फश कली खेदा पशो खोदेशो ला बाकब।

5 मूर्ख मुर फिम्ला पा बाकब। मिनु आ खतम दुम्तीक आंमान चाकब।

6 फश कली खेदा पशो खोदेशो पा, शुश श्येत पा शुश चेम्चा क्येडा, थुं नाइश्शा इक्का खोइ चेम्चा रिम्शो बाकब। हितोपदेस १५:१६

7 मिनु गो लेंशा रागीम अरु जाम्शा लाइब थोवक तातामी।

8 मेको मार ताता देशा हना तमी तौ नु सुइ लोक्ब मपाइश्शो मुर का बाकत। तन्न मेकोमी शुश श्येत पा गेय पाइबाकत। आ गेय गेनायो मथुम्थु, आ शोंपोम थुं मनुइबाकत। मिनु काबु मेकोमी आंम कली “गो मारदे मोदेशो श्येत डा गेय पना पन बाक्नुड? गो मारदे आंम कली मारेइ रिम्शो मपाइनुडा?” दंत। मेको यो जाम्शा लाइब नु श्येत जतीक ला बाकब।

9 मिनु का क्येडा निकशी दुम्शो रिम्शो बाकब। मारदे हना मेकोपुकीमी आंम श्येत पा पशो गेय रे पा रिम्शो ततीक ताइनीम। उत्पत्ती २:१८

10 दोकका पा का थिस्साक्व हना, मेको आ वारचमी मेको कली पोक्ब। तन्न आबी, का ला दुम्शा थिश्शोनु, पोक्शा वारच पाइब मबाकत हना, मरिम्शो दुम्ब।

11 मोदेशो पा मुर निकशी काथा इप्ताक्स हना, मेको निकशी जेनीस। तन्न का ला इप्शोनु, दोपा जेचा डा?

12 का कली अरुमी फुइनीम। तन्न निकशी दुम्ताक्स हना, आंम कली प्रोंइने चाप्नीस। थमा पा पोया सांमी किरशो डोरी रीब पा मब्रोइकब।

रिम्शो दुम्चा यो जाम्शा लाइब

13 अर्ती मनैब खूशो मूर्ख पिप क्येडा जोकब तुइक्ब पुडग ठिटा का दुम्चा रिम्शो बाकब।

14 मेको जेल्खान रे गूशा पिप दुम्शो बाकम को? मेको पुडग बाकत हना यो पिप दुम्ने चाप्ब।

15 गो रागी डा मुर नेल्ल मेको पिप आ गेय पाइब ठिटा आ नोले खोइशो तातामी।

16 मेकोमी शुश मुर आन कली वारच पाप्नु। तन्न मेको क्येडा नोले जाकबपुकी मेको तशा मग्येरसम। मेको थमा पा जाम्शा लाइब नु फश कली खेदा पशो खोदेशो बाकब।

## 5

परमप्रभु कली मान पा हिनीन

1 परमप्रभु आ खिं लनीनु, मूर्ख आन क्योरशा चदेशो चढेचा क्येडा परमप्रभु आ लोत्र होस पा नेंचा रिम्शो बाकब। मारदे हना मूर्खमी मरिम्शो पचा प्रॉइस मजोक्नीम। भजन संग्रह १५:१; यसैया ३३:१४-१६; मत्ती ५:२३-२४; १सामुएल १५:२२

2 ब्वाक्या कली मचुइक्तीन। परमप्रभु आ डोंइती रीब पा लोत्र मपन। परमप्रभु स्वर्गमी बाकब। गे चहिं रागीम बाक्नीनी। मोपतीके शुश मब्वाक्कीन।

3 दोपा शुश सुर्ता पतीकेम डोमु ताइनीमी, मोपा मूर्खमी शुश लोत्र पाइब। याकूब १:१९; मत्ती ६:७

4 गे परमप्रभु आ डोंइती कसम जनीनु, मेको खाप्चा कली देश मपने। परमप्रभु मूर्ख आन कली तशा मग्येरब। गे इन कसम जशो खाप्पीन। ब्यवस्था २३:२२; १सामुएल १:११,२८; भजन संग्रह ५०:१४

5 कसम जशा मखाप्चा क्येडा, कसम मजशो रिम्शो दुम्ब।

6 इ लोत्रमी इ कली पाप मपपदल। मिनु परमप्रभु आ खिं डा लोत्र कुरब कली “आं कबल पशो प्रेंदु बाक्त” मदेनीन। इ लोत्रमी पतीके परमप्रभु गाइशशा इ गेय नेल्ल खतम पोक्ब।

7 शुश लोत्र नु शुश डोमुमी जाम्शा लाइब सेल्ल। मोपतीके परमप्रभु कली मान पा हिनीन। येरमीया २३:२७-२८

शोंप यो जाम्शा लाइब बाकब

8 राज्य कामी पुडग आन कली दिप्शो नु मेको आन कली ठीक निसाफ मपशो ताइतीनी हना, छक मलाक्कीन। मारदे हना मेको आन क्येडा अधिकार पाइशो का बाकब। मिनु मेको नेल्ल आन क्येडा टैयब अर्को का बाकब। प्रस्थान २३:६

9 पिपमी रू डा गेय पाइब आन कली अरेशा रिम्शो कोव्रतु हना, मेको रागी रिम्शो दुम्ब।

10 सुमी क्येट दाक्बा, मेको कली क्येटीमी गेनायो मजाक्दीन्ब। सुम शोंप दाक्बा, मेको मुर आ चेम्शोमी गेनायो मरूब। मेको यो जाम्शा लाइब बाकब। हितोपदेस २८:२२; लूका १२:१५

11 शोंप शुश बारमेनु, मेको जाइबपुकी यो बारनीम। मिनु मेको होत्रप कली कोत्रचा डा लाक्शा, अरु मार रिम्शो दुम्बा डा?

12 शुश गेय पाइब मुर दोशो जाप्तु हना यो, निन्द्रा पचा दाक्ब। तन्न शोंप पाइशो मुर आ शुश शोंपोम पतीके मेको कली निन्द्रा मजाक्ब।

13 गो रागीमी थम श्येत लाक्चा डा मरिम्शो पशो का तशो बाक्नुड। मेको मार बाकब देशा हना मुरुमी आंमा खतम दुम्चा कली शोंप तेल्लो बाकब। मत्ती १९:२२

14 मेकोमी दोकका पा आ शोंप थुमा नोले, मेको के आल दुम्ब। मेना मेको आ गुइमी मारेड मबाक्ब।

15 मुर ममा आ कोव्रज रे पा शिश्रा जाक्ब। मिनु मेको दोपा जाक्मे, मोपान लेशशा लाइब। मेकोमी आ श्येत पा चेम्शो मारेड लाइक्चा मताइब। अय्युब १:२१; भजन संग्रह ४९:१८; १तिमोथी ६:७

16 एको यो श्येत लाक्चा डा मरिम्शो का बाकब। मुर दोपा जाक्बा, मोपान लेशशा लाइब। मिनु मेको कली मार रिम्शो दुम्बा डा? मारदे हना मेको आ पशो श्येत नेल्ल फश खोदेशो दुम्ब।

17 मुरुमी आन ब्रोंइतीक नाक्त सम्म श्येत पा जशा तूशा, हिंशा, रोइ पा, सुर्ता पाइनीम।

18 मिनु गो मार ताता देशा हना, परमप्रभुमी गेशो एको इक्का नाक्ती ब्रोंइतीकेमी रागीम जचा, तूचा नु आंम श्येत पा पशो गेयमी ग्येरसीचा मुर कली रिम्शो बाक्त। मारदे हना मेकोन, मेको आ भाग बाकब।

19 मेको क्येडा लाक्शा परमप्रभुमी मुर आन कली शुश शोंप नु रूफुकी गेब। मिनु मेको कली मेको नेल्ल ताक्चा नु आंम गेयमी ग्येरशा बाक्चा गेब। मेको परमप्रभु आ गेतीक बाकब।

20 मेकोमी आ ब्रोंडतीक नाक्त शुश ममिम्ब। मारदे हना परमप्रभुमी मेको कली आ थुंमी ग्येरपाइशशा वोइक्ब। भजन संग्रह ७३:२६

## 6

### परमप्रभुमी मारेइ मारेइ गेब

- 1 गो रागीमी अर्को मरिम्शो का यो तशो बाक्नुड। मेकोमी मुर आन कली थाम्पा दिप्शो बाक्ब।
- 2 परमप्रभुमी मुर आन कली शोंप, रू नु मान ततीक गेब। मोपा मेको कली आ दाक्शो पचा कली मारेइ श्येत मदुम्ब। तन्न परमप्रभुम मेको कली मेको ग्येरशा जचा मगेथु, अर्को मुर कली ग्येरशा जचा गेब। मेको यो जाम्शा लाइब बाक्ब।
- 3 सुइ मुर का के सहे का जना आल बाक्शा, मेको शुश बर्स ब्रोंडशा यो आ चेम्शो जशा मग्येरसीब, रिम्शो पा थिम्चा यो मपुंडसीब। मेको क्येडा शाम्शा लशो आल कली रिम्शो बाक्ब। उपदेसक ४:३
- 4 शाम्शा लशो आल जाम्शा लचा कली जरमेसीशो बाक्ब। मिनु मेको छिडछिडमी जाम्शा लाइब। मिनु छिडछिडमीन मेको आ नें सुम्ब।
- 5 मेकोम गेनायो नां मतशो बाक्ब। मेकोम मारेइ मजोक्शो यो बाक्ब। मो हना यो मेको मुर क्येडा मेको आल आ नाइशशो रिम्शो बाक्ब।
- 6 मेको मुर हजार का बर्स ब्रोंडशा यो आ दाक्शो पने मचापतु हना, मेको मार नाइक्चा ताइबा डा? मेको नेल्ल मबेक्नीमी डा?
- 7 मुर आ श्येत पशो नेल्ल आ कोव्रज प्रिंचा कली ला बाक्ब। मो हना यो मेको आ शोत्रलु बेक्तीक गेनायो मनुप्ब। उपदेसक १:८
- 8 मूर्ख मुर क्येडा जोक्ब तुइक्ब मारम रिम्शो बाक्नीमी? पुडग मुर अर्को आन डोंडती रिम्शो पस जोक्शा, मार ताइबा डा?
- 9 मार मार माल्नुड, दे शुश मिम्चा क्येडा आ तशोम ग्येरसीशा बाक्चा रिम्शो बाक्ब। मेको यो जाम्शा लाइब नु फश कली खेदा पशो खोदेशो बाक्ब।
- 10 मार बाक्बा, मेको नेल्ल आन नें वोइक्ने थुम्शो बाक्ब। मिनु मुर आ थुंम मार बाक्बा, मेको तुंडसीब। आंम क्येडा बोल्यो मुर कली सुइमी मारेइ देंने मचापब। अय्युब ९:२-४, ३२
- 11 मेको शुश लोत्र पापतु हना यो, मेको क्येडा शोर गाक्शो बाक्ब। मिनु तेको रिम्शो बाक्बा?
- 12 मुर इक्का नाक्त ब्रोंडब बाक्ब, मार रिम्शो बाक्मे, मेको सुम तुइक्बा डा? मुर आ नाक्त वांकु खोदेशो पा लाक्ब। मेको बेक्शा लम नोले मार दुम्बा, दे सुम देंने चापबा डा? १इतिहास २९:१५; भजन संग्रह १४४:४

## 7

### नेल्ल क्येडा ठेयब रूप्तीक

- 1 शुश क्येट लाइब खेक्तीक क्येडा रिम्शो नें ठेयब बाक्ब। मिनु जरमेशो नाक्त क्येडा बेक्तीक नाक्त रिम्शो बाक्ब। हितोपदेस २२:१
- 2 भोज जतीक खिंम लचा क्येडा रोंका पशो खिंम लचा रिम्शो बाक्ब। मारदे हना मुर नेल्ल मोदेशो पा लाइनीम। मिनु मुल सम्म ब्रोंडशो मुरपुकीमी मेको आ पर्वम मिन्मीम।
- 3 रिन्चा क्येडा सुर्ता पचा रिम्शो बाक्ब। मारदे हना सुर्ता पतीकेम थुं कली रिम्शो सेल्ब।।
- 4 जोक्ब तुइक्ब मुर आ थुं रोंका पतीक खिंम बाक्ब। तन्न मूर्ख आ थुं आंम दला दाक्स पतीक खिंम बाक्ब।
- 5 मूर्ख आ कुम्सो नेंचा क्येडा, जोक्ब तुइक्ब आ हुइशशो नेंचा रिम्शो बाक्ब।
- 6 मूर्ख आ रिशशो, चू चोशानु बुक्शो मी खोदेशो बाक्ब। मेको यो जाम्शा लाइब बाक्ब।
- 7 थमा पा दिप्बपुकीम जोक्ब तुइक्ब मुर आन कली मूर्ख सेल्नीम। घूसमी मुर आन थुं मरिम्शो सेल्ब।
- 8 गेय पचा गोशो क्येडा थुम्शो रिम्शो दुम्ब। ठेयब लेशशो थुं पाइशशो दुम्चा क्येडा फाल्तीक थुं पाइशशो दुम्चा रिम्शो बाक्ब।

9 रीब पा मगाइकतो। मारदे हना गाइक्तीक मूर्ख आन थुंम बाक्ब। याकूब १:१९

10 गेपुकीम “डोंइती डा नाक्त, मुल डा नाक्त क्येडा मारदे रिम्शो बाक्मा?” दे मदेनीन। मारदे हना जोक्ब तुइक्बपुकीम मोदेशो लोत्र हिल्लो मपाइनीम।

11 जोक्तीक तुइक्तीके किकी पिपी आन गेशो शोंप खोदेशो पा रिम्शो बाक्ब। मिनु मेकोमी ब्रोंडब आन कली रिम्शो पाइब।

12 दोपा क्येटीम मुर आन कली वारच पाइबा, मोपा जोक्तीक तुइक्तीकेम यो मुर आन कली वारच पाइब। मिनु जोक्तीक तुइक्तीकेमी मुर आन कली ब्रोंडचा गेब। हितोपदेस ३:१-२

13 परमप्रभु आ गेय मिम्तीन। मेको आ रोप्शो थोत्रक कली सुमी दिंपाइक्ने चाप्बा डा? उपदेसक १:१५

14 नाक्त रिम्शो दुम्मेनु ग्येरसीन। तन्न नाक्त मरिम्शो दुम्मेनु मिम्तीन। मेको निम्फा परमप्रभुमी सेल्शो बाक्ब। मोपा मुरुमी नोले आंम कली मार दुम्बा, दे मतुइक्नीम।

15 गो आं इच्चा नाक्त ब्रोंइतीकेमी ठीक पाइब मुर आ ठीक पशोमी खतम दुम्शो नु मरिम्शो मुर आ मरिम्शो पशोमी शुश बर्स ब्रोंइशो ताता। उपदेसक ८:१४; भजन संग्रह ७३:१२-१४

16 शुश ठीक पाइब मदुमो। मिनु शुश जोक्ब तुइक्ब यो मदुमो। गे मारदे आंमा खतम सेल्सीनेवे? लूका १८:११-१२

17 गे परमप्रभु आ अरेशो मटीब नु शुश मूर्ख यो मदुमो। गे मारदे बेक्ची मजाक्थु बेक्चा दाक्नेवे?

18 का कली वोतीन नु अर्को कली यो मप्रोनीन। मारदे हना परमप्रभु कली मान पा हिंब, मेको नेल्ल रे डोन बाक्नीम।

19 जोक्तीक तुइक्तीकेमी जोक्ब तुइक्ब मुर कली सहर डा १० जना हुकुम पाइब आन क्येडा यो सक्ति पाइशो सेल्ब।

20 थमा पा रागीमी मारेइ मारेइ ठीक पाइब नु गेनायो पाप मपाइब सुइ मबाक्नीम। भजन संग्रह १४:३

21 मुरपुकीमी देशो लोत्र नेल्ल मनेनो। मो पाप्तीवी हना इ वाइलीमी इ कली सराप पशो नेनेवे।

22 मारदे हना गे गिश खेयप अरु आन कली सराप पवी, मेको इ थुंम बाक्ब।

23 गो मारेइ मारेइ जोक्तीक तुइक्तीकेम नाक्शा कोत्रता। मिनु गो “थमा पा जोक्ब तुइक्ब दुम्नुड” देती। तन्न रुप्ने मचबु।

24 शुश डोन बाक्ब नु शुश लुकच लशो थोत्रक सुम तुइक्ने चाप्बा डा?

25 मोपतीके गो जोक्तीक तुइक्तीक नु नेल्ल तुइक्चा थुं पाता। मिनु परमप्रभु आ अरेशो मटिचा मूर्ख गेय बाक्ब। मिनु मूर्ख गेयमी निप्स ग्यशो दुम्शो बाक्ब। भजन संग्रह १४:१

26 मेको बेक्तीक क्येडा मरिम्शो ब्वारद दाइशो खोदेशो मीश मुर बाक्त। मेको आ थुं थेम्लु नु मेको आ गुइ चहिं पाइक्तीक साडलो बाक्त। सुम परमप्रभु कली ग्येरपाइक्बा, मेको रे ब्रोंडब। तन्न मेकोमी पाप पाइब कली चहिं आ ग्याइलीम रेप्ब। हितोपदेस २:१६-२२

27 शेंबमी “गो मार तुइक्तु, मेको नेनीन। गो नेल्ल रिम्शो पा तुइक्चा कली नाक्ताक्ड।

28 गो रिम्शो मुर माल्ना माल्न बाक्डानु हजार का वोंइश मुर आन दातेमी मुर का ला रिम्शो पाइब थित्ता। तन्न मीश मुर आन दातेमी का यो मथिदु।

29 परमप्रभुमी मुर आन कली ठीक पाइब सेल्लु। तन्न मुरपुकीम आन दाक्शो पाइनीम” देंत। उत्पत्ती १:२७

## 8

पिप आ देशो टिने

1 जोक्ब तुइक्ब मुर खोदेशो सु बाक्बा? एको लोत्र आ अर्थ सुम तुइक्बा डा? जोक्तीक तुइक्तीकेमी मुर आन कुल हाक्शो सेल्ब। मिनु मेको आ किक्शो कुल फाइशशा रिम्शो सेल्ब।

2 पिप आ देशो टिवो। मारदे हना गे परमप्रभु आ डोंइती कसम जाप्तीवी।

3 पिप आ बाक्तीक रे गाक्चा कली मचुइक्तो। गे मरिम्शो मपावो। मारदे हना पिपमी मार पचा दाक्बा, मेको पाइब।

4 पिप आ लोव्रमी सक्ति बाक्ब। सुम मेको कली “हजुर, गे मार पनी” देने चाप्बा?

5 सुम परमप्रभु आ शेंशो टीबा, मेको कली मारेइ मरिम्शो मदुम्ब। मिनु जोक्ब तुइक्ब मुरुमी ठीक गेय पची ना गेय पस जोक्ब।

6 मुरुमी मार मार पाइनीमी, मेको पतीके ना नु निसाफ पची ना बाक्ब। मुर आन मरिम्शो पतीकेम मुर आन कली दिप्ब। उपदेसक ३:१

7 नोले डा लोव्र सुइमी मतुइक्नीम। मोपतीके सुइम मुर आन कली नोले मार दुम्बा, मेको देने मचाप्नीम। उपदेसक १०:१४

8 फश कली तेक्शा वोइक्तीक सक्ति सुइ के मबाक्ब। मोपान आंम बेक्तीक नाक्त कली सुइमी तेक्ने मचाक्ब। दोपा लडाइ पची ना सुइ खिं लचा मताइनीमी, मोपान मरिम्शो पतीकेमी मरिम्शो पाइब कली गेनायो मप्रॉइब।

9 गो रागीम पशो नेल्ल कोव्रडुनु, नेल्ल ताता। सक्ति पाइश्शो मुरुमी अरु आन कली दिप्शा वोइक्नीम।

### ठीक पाइब नु ठीक मपाइब

10 मिनु गो परमप्रभु आ अरेशो मटीब मुर थिम्चा पुंडसीशो ताता। ठीक पाइब चहिं परमप्रभु आ सहर रे गुंडचा पुंडसीशो बाक्तेक्म। मिनु सहरमी सुइमी मेको आन कली ममिम्बाक्तेक्म। मेको यो जाम्शा लाइब बाक्ब।

11 मुरुमी मरिम्शो पाप्तु हना, रीब पा सजाइ मताप्तु हना, मेकोमी मरिम्शो पना पन बाक्ब। अय्युब ३५:१५-१६; मलाकी ३:१४-१५

12 मरिम्शो पाइब मुर सहे का खेयप मरिम्शो पशा यो शुश नाक्त सम्म ब्रॉइशा बाक्नीम। मो हना यो परमप्रभु कली मान पा हिंब नु आ डोंइती बाक्ब आन कली रिम्शो दुम्ब, दे गो तुइक्नुड। भजन संग्रह ३७:१८; भजन संग्रह ७३:१७-२६

13 तन्न परमप्रभु यावे आ अरेशो मटीब आन कली गेनायो रिम्शो मदुम्ब। मिनु शुश ब्रॉइचा यो मताइनीम। मारदे हना मेकोपुकीमी परमप्रभु कली मान पा महिनीम।

14 रागीम अर्को जाम्शा लाइब गेय का यो दुम्ना दुम्न बाक्ब। ठीक पाइब बाक्नीम। मेकोम परमप्रभु आ अरेशो मटीब खोदेशो पा ताइनीम। मिनु परमप्रभु आ अरेशो मटीब बाक्नीम। मेको ठीक पाइब खोदेशो पा बाक्चा ताइनीम। एको यो जाम्शा लाइब बाक्ब। उपदेसक ७:१५

15 मोपतीके गे ग्येरसीशा बाक्कीन। मारदे हना रागीमी मुर आन कली जचा तूचा नु ग्येरशा बाक्चा डा लाक्शा, अरु मारेइ रिम्शो मबाक्ब। परमप्रभुमी गेशो ब्रॉइतीकेमी गिश श्येत बाक्त हना यो, मेको पने चाप्नीम। उपदेसक २:२४

16 मिनु गो रागीमी मुरपुकीमी मइप्थु नाक्दो नाक्ती गेय पशो कोव्रचा कली नु जोक्तीक तुइक्तीक मार बाक्मे, मेको तुइक्चा कली आं थुं हिरताक्ड।

17 मिनु परमप्रभुमी पशो गेय नेल्ल ताता। रागीम मार दुम्बा, मेको सुइमी तुइक्ने मचाप्नीम। मुरपुकीमी मेको तुइक्चा कली शुश श्येत पाम्तेक्म हना यो, मेको नेल्ल रूप्ने मचाप्नीम। तेकोइ जोक्ब तुइक्ब मुरुमी “गो मेको तुइक्नुड” दैत हना यो, मेकोम थमा पा मतुइश्शो बाक्ब। उपदेसक ३:११; यसेया ५५:८-९

## 9

### मुर आन दुम्तीक का बाक्ब

1 एको लोव्र नेल्ल रे पा गो मार मिम्ताक्ड देशा हना, ठीक पाइब नु जोक्ब तुइक्ब आन पतीक मारेइ मारेइ परमप्रभु आ गुइमी बाक्बाक्त। तन्न मुरुमी आंम कली दाक्तीक नु काइ मदाक्तीक ताइनीम। तन्न मेको मतुइक्बाक्तेक्म।

2 मारदे हना जाम्शा लतीक नु मरिम्शो दुम्तीके मुर नेल्ल आन कली दुम्ब। ठीक पाइब नु परमप्रभु आ अरेशो मटीब, रिम्शो पाइब नु मरिम्शो पाइब, ग्रॉग्रा मदिशो नु ग्रॉग्रा दिशो, चढेतीक चढेब नु मचढेब,

पाप पाइब नु मपाइब नु कसम जाइब नु मजाइब, नेल्ल नोले खाल का डा पा जाम्शा लाइनीम। उपदेसक २:१४; अय्युब ९:२२

3 रागीम दुम्तीक गेय नेल्लेमी मरिम्शो पतीक बाक्ब। मेको नेल्ल बेक्शा लाइनीम। मुर नेल्ल आन थुं मरिम्शो पतीकेमी ब्रीशो बाक्ब। मिनु मेकोपुकी ब्रोंडमा सम्म आन थुं हेथे पतीकेम ब्रीशो बाक्ब। मिनु मेको नोले मेको बेक्शोपुकी नु बाक्थ लाइनीम। उपदेसक ८:११

4 तन्न ब्रोंडशा बाक्बपुकी नु बाक्ब आन के आस बाक्ब। बेक्शो गुप्स क्येडा ब्रोंडशा बाक्शो कुचुम रिम्शो बाक्ब।

5 ब्रोंडशा बाक्शोपुकीम “गो बेक्नीकी” दे तुइश्शो बाक्नीम। तन्न बेक्शोपुकीम मारेइ मतुइक्नीम। मेको आन कली मारेइ इनाम मबाक्ब। मेको आन कली मिम्तीक यो जाम्शा लाइब।

6 मेको आन दाक्तीके, काइ मदाक्तीक नु गेहे पतीक नेल्ल जाम्शा लत। मेकोपुकीम रागीम मार दुम्शो बाक्मे, मेको मारेइ ममिम्नीम।

7 आंम इ लां गाक्को, इ जतीक थोत्रक ग्येरशा जावो। ग्येरशा इ अडगुर शांबु तूडो। मारदे हना परमप्रभुमी इ पशो गेय दाक्ब। उपदेसक २:२४

8 गेना हना यो रिम्शो वा फेक्शा इ ब्रोंडशो तेल खेक्सो।

9 परमप्रभुमी गेशो इच्का नाक्त ब्रोंडशा बाक्तीकेमी आंम दाक्शो मीश नु ग्येरशा बाक्को। मारदे हना रागीमी इ श्येत पा पशो गेय डा भाग मेको बाक्ब। हितोपदेस ५:१८-१९

10 इ डोंडती मार गेय बाक्मे, मेको इ सक्ति नेल्लेमी पावो। मारदे हना बेक्शो मुर आन बाक्तीकेम मारेइ मिम्तीके, जोक्तीके नु तुइक्तीके मबाक्ब।

11 गो रागीमी अर्को थोत्रक का यो तशो बाक्नुड। रीब पा दोरब मग्राब। सक्ति पाइश्शो लडाइ पाइबमी लडाइ मग्राब। जोक्ब तुइक्बमी जचा मताइब। शुश निप्स पाइश्शो मुरुमी क्येट मचेम्ब। जोक्ब मुरुमी मान मताइब। तन्न नेल्लेमी आन गेय पतीक ना नु रागी दोपा बाक्बा, मुर आन गेय दुम्बा देय मदुम्बा मेको ताइनीम। हितोपदेस १६:९

12 मिनु हिंचा डा श्येत गेना जाक्बा, सुइम मतुइक्नीम। शिशो मपाइब आन ग्याइलीम डांइ रेशो नु ब्वारदम चिक्ब रेशो खोदेशो पा मुरपुकी यो ममिम्थु हिंचा डा श्येत जशा बेक्नीम।

### जोक्तीक तुइक्तीक ठेयब बाक्ब

13 गो रागीमी जोक्तीक तुइक्तीक का यो ताता। मेको थम ठेयब बाक्त।

14 साइ डोंडती शुश मुर मबाक्शो आइक्च सहर का बाक्त। मिनु मेको कली शुश सक्ति पाइश्शो पिपमी लडाइ तोवा बाक्त। मेको सहर कली पुम्शा, गारो डोंडक्तीक यो सेला बाक्त।

15 मेको सहरमी जोक्ब तुइक्ब पुडग मुर का बाक्माक्त। मिनु मेकोमी आ जोक्तीक तुइक्तीकेमी मेको सहर कली प्रोना बाक्त। तन्न मेको पुडग मुर कली सुइमी ममिम्तेम बाक्त।

16 मिनु गो “सक्ति क्येडा जोक्तीक तुइक्तीक ठेयब बाक्ब” देंती। तन्न मेको पुडग मुर आ जोक्तीक तुइक्तीक कली आइक्च मिम्ताक्म। मेको आ लोत्र कली सुइमी यो ममिम्तेम।

17 ठेयब सेंदा पा मूर्ख सासन पाइब आ लोत्र क्येडा, जोक्ब तुइक्ब आ ओंखां पा देंशो लोत्र टीनीम।

18 लडाइ पतीक या क्येडा जोक्तीक तुइक्तीक रिम्शो बाक्ब। तन्न पाप पाइब कामी शुश रिम्शो गेय आन कली खतम सेल्ब।

## 10

### मूर्ख नु जोक्ब तुइक्ब

1 मिनु दोपा बेक्शो चुरमुमी ब्रोंडशो रिना पाइश्शो खेक्तीक कली राक्पाइक्बा, मोपा इच्का खोइ मूर्ख दुम्तीकेमी जोक्तीक तुइक्तीक नु मान ततीक नेल्ल खतम पोक्ब।

2 जोक्ब तुइक्ब मुर ठीक लांमी गाक्शो बाक्ब। तन्न मूर्ख मुर दूली लांम गाक्शो बाक्ब।

3 मूर्ख मुर लांम गाक्मेनु, मारेइ ममिम्ब। मिनु नेल्ल आन कली आ मूर्ख दुम्तीके कोइब।



- 4 इ ठेयब मुर इ तशा गाइक्ताक्व हना यो, इ गेय पचा मप्रोनो। सिक्सी पा बाक्शोनो, ठेयब मरिम्शो पशो यो जाम्शा लाइब।
- 5 गो रागीमी मरिम्शो का तशो बाक्नुड। मेको ठेयब दूली गेय सासन पाइबम ला पने चाप्ब।
- 6 मूर्ख आन कली ठेयब मुर सेल्नीम। तन्न शोंप पाइशशोपुकी आइक्च दुम्शा बाक्नीम।
- 7 गो वाइलपुकी चहिं शारा डोइशशा नु सासन पाइब आ तौ चहिं वाइल खोदेशो पा खोइलीम गाक्शो तशो बाक्नुड।
- 8 बिक्तीक दोइब मुर मेको आंमान बिक्ने चाप्ब। मिनु गारो प्रेप्ब कली बुस्सुमी कोक्ने चाप्ब। हितोपदेस २६:२७
- 9 फुल्लु खोइक्ब मुर गार दुम्ने चाक्ब। मिनु शी खोइक्ब मुर आ गेय रे श्येत जने चाप्ब।
- 10 खा महेशशो बाक्त हना, मेको कली शुश बोल माल्ब। तन्न जोक्तीक तुइक्तीकेम मेको कली रिम्शो सेल्ब।
- 11 बुस्स कली लाटा सेल्चा क्येडा डोंइती कोक्तु हना, बुस्स चलेब कली मारेइ रिम्शो मटुम्ब। बजन संग्रह ५८:५-६
- 12 जोक्ब तुइक्ब मुर ब्वाक्मेनु, मान ताइब। तन्न मूर्ख चहिं आ लोव्रमीन खतम दुम्ब।
- 13 मेकोमी डोंइती मूर्ख लोव्र पाइब। मिनु नोले बौला नु निप्स ग्यशो लोव्र पाइब।
- 14 मूर्ख मुर ब्वाक्स डा ब्वाक्स पाइब। मार दुम्बा, सुइम मटुइक्नीम। मेको आ नोले मार दुम्बा, मेको सुम देने चाप्बा डा? उपदेसक ५:२; उपदेसक ८:७
- 15 मूर्ख आ श्येत पा पशो गेयमी दाइब। मेकोमी सहर लतीक लां यो मटुइक्ब।
- 16 आबी, तेको रागी डा पिप आल का बाक्बा, तेको रागी डा सासन पाइबपुकीमी सुनी कना भोज जाइनीमी, मेको रागी खतम दुम्शा लाइब। यसैया ३:४; यसैया ५:११
- 17 तेको रागीमी रिम्शो खिं डा मुर पिप दुम्बा, मेको रागी ग्येरसीशो बाक्ब। मेको रागी डा सासन पाइब भोज जची ना जाइनीम। मेकोपुकी दुक्चा कली ममाइ बोल तचा कली जाइनीम।
- 18 सुइ मुर अल्से बाक्त हना मेको आ खिं ब्रेप्ब। मेको फिम्ला पा बाक्त हना, मेको आ खिं याप्ब।
- 19 ग्येरसीचा कली भोज सेल्नीम। मिनु अडगुर शांबुमी मुर कली ग्येरपाइक्ब। तन्न मेको नेल्ल पचा कली क्येट माल्ब। बजन संग्रह १०४:१५
- 20 इ मिम्तीकेमी यो पिप कली सराप मपावो। शोंप पाइशशो मुर कली इ कोठाम सराप मपावो। मारदे हना सरीड डा चिक्बीम इ लोव्र लद। मिनु बेरशो चिक्बीम इ लोव्र शेंद।

## 11

### मार पचा माल्ब

- 1 इ क्येट डोन सोइक्तो। मिनु शुश नाक्त नोले मेको लेंशा ताइनेवे।
- 2 गे इ के बाक्शो क्येट ७, ८ जना आन कली वोइक्चा गेमी। मारदे हना रागीम दोदेशो ठेयब श्येत जाक्बा, मेको गे मटुइक्नेवे।
- 3 गोस्सुम ब्वाक्कु ब्रीत हना, मेकोमी रागीम रेड यिपाइक्ब। रवा दक्खिन गे गोल्त हना यो, उत्तर गे गोल्त हना यो, मेको ते गे गोल्मे, मेकेरन लीब।
- 4 फश कली मिम्बमी गेनायो मशोक्ब। मिनु गोस्स कोव्रबमी गेनायो मखुप्ब।
- 5 गे फश ते रे जाक्बा नु ममा आ कोव्रजमी आल दोपा ब्रोंइतीक सोक्त ताइबा, मेको मटुइक्नेवे। मोपा मारेइ मारेइ सेल्ब परमप्रभु आ गेय रुप्ने मचाप्नेवे। यूहन्ना ३:८; भजन संग्रह १३९:१३; उपदेसक ८:१७
- 6 गे सुनी इ वांचेर शोक्को। मिनु नाक्दो यो गेय पचा मप्रोनो। मारदे हना मुल शोक्शो नु आपो शोक्शो तेको ग्रेल्बा, मटुइक्नेवे। निम्फा ग्रेल्नीसी कों? मटुइक्नेवे।

### ठिटा आन कली अरेशो

- 7 हाम्सो रिम्शो बाक्ब। मुरुमी नां कली तचा दाक्ब।

८ मुर शुश बर्स ब्रोंडत हना यो, मेको आ ब्रोंडतीकेमी ग्येरसेकल। तन्न मेकोमी छिडछिड डा नाक्त कली यो मिम्तल। मारदे हना मेको शुश बाक्नीम। मुल दुम्ब मारेइ मारेइ जाम्शा लाइब बाक्नीम।

९ ए ठिटा मुर, गे ठिटा बाक्डेनु ग्येरसो। इ थुंमी गे ठिटा बाक्डेनु ग्येरपदल। इ तशो नु इ थुंमी मिम्लो आस नोले खोतो। तन्न परमप्रभुमी मेको नेल्ल तुइशशा निसाफ पाइब, दे मिम्लो। उपदेसक २:२४

१० मोपतीके सुर्ता पतीक कली इ थुं रे पा डोन वोतो। मिनु मरिम्लो नेल्ल इ रां रे डोन वोतो। मारदे हना ठिटा दुम्लतीके नु बोल यो जाम्शा लाइब बाक्ब।

## १२

### डोंडतीन पचा माल्ब देशो

१ इ ठिटा बाक्ना बाक्न इ कली सेल्ब कली मिम्लो। श्येत जतीक नाक्ती नु इ खूशो दुम्लतीक बर्स जाक्मेनु “गो मेको नाक्त मदाक्नुड” देंचा क्येडा डोंडती मिम्लो।

२ नां नु नाक्त डा छेडछेड कली छिडछिडमी सुम्ला क्येडा डोंडती, तास्ला नु सोरुल ब्रात्रा दुम्ला क्येडा डोंडती नु गोस्सुम रेउ यिपाइशशा लेत्चा क्येडा डोंडती

३ खिं खाल पाइबपुकी खिंखिं पाइनीम। बोल्यो मुरपुकी खूशो दुम्लनीम। यात हिल्ब मीश मुर शुश मबाक्तीके, आन गेय नाइक्नीम। मिनु झेल रे कोत्रब आन मिक्च ब्रात्रा दुम्ब।

४ मेना लां डा लाप्लो चोक्सीब। यात हिल्शो सेंदा आइक्च दुम्ना दुम्न लाइब। मुरपुकी चिक्ब आन ग्रीशो नेंशा बोक्नीम। मीश आल आन कुम्सो नेल्ल आइक्च सेंदा पा नेंसीब।

५ मुरपुकी लाइशशो खिं डोइक्चा नु लांम श्येत दुम्बा कों, दे हिंनीमी। बदाम बोइशशा सिम्ब। घांस ब्वाइब माले आ कोत्रजमी ग्रेशा गाक्ब। मारेइ ममाल्ब दुम्ना क्येडा डोंडती इ कली सेल्ब परमप्रभु कली मिम्लो। मारदे हना मुर नेल्ल बेक्नीम। मिनु रोंका पाइब लांम गाक्नीम।

६ चांदी के तार बोइक्चा क्येडा डोंडती नु सुन के कचौरा ब्रोल्ला क्येडा डोंडती, खप के गर ब्वाक्कु बुक्तीकेम प्रोल्ला क्येडा डोंडती नु इनार डा गुगील जिक्या क्येडा डोंडती

७ खप रे बोक्शो फुरक खपीमीन लेत्चा क्येडा डोंडती नु सोक्त गेब परमप्रभु आ बाक्तीकेम सोक्त लेत्चा क्येडा डोंडती परमप्रभु कली मिम्लो। उपदेसक ३:२०; उत्पत्ती ३:१९

८ शेंबमी “जाम्शा लाइब! जाम्शा लाइब! नेल्ल जाम्शा लाइब बाक्नीम” देंब।

### परमप्रभु कली मान पा हिनीन

९ मेको शेंब जोक्ब तुइक्ब मुर ला ममाइ, मेकोमी मुर आन कली जोक्ब तुइक्ब सेल्लु। मेकोमी कोत्रशा नाक्शा, दोदेशो लोत्र बाक्बा, दोपा शुश देंतीक ब्रेक्चा माल्बा, मेको शेंताक्व।

१० मिनु शेंबमी ठीक लोत्र माल्शा गुंडताक्व। मिनु मेकोम मार ब्रेक्ता, मेको ठीक नु थमा बाक्नीम।

११ जोक्ब तुइक्ब आन लोत्र गोठला आन कोक्के खोदेशो बाक्ब। मिनु मेको आन खुप्लो लोत्रपुकी बोल्यो पा थोक्शो कांटी खोदेशो बाक्ब। मेको नेल्ल गोठला का रे पान दुम्लो बाक्ब। यसैया २२:२३

१२ ए आं तौ, मेकेर तेम्लो लोत्र रे होस पा बाक्को। शुश किताब ब्रेक्तीक गेय गेनायो मनुम्ब। मिनु शुश पदेशोनु रां कली दपाइक्ब।

१३ नेनो, नेल्ल क्येडा नोले डा लोत्र मार बाक्ब देंशा हना, परमप्रभु कली मान पा हिनो। मिनु मेको आ शेंशो टिवो। मारदे हना मुर नेल्ल आन पचा माल्लो एकोन बाक्ब। ब्यवस्था ६:२

१४ मारदे हना परमप्रभुमी इं पशो रिम्लो नु मरिम्लो गेय नेल्ल नु खुइशशा पशो नेल्ल निसाफ पाइब। रोमी २:१६; २कोरिन्थी ५:१०

## ठेयब कुम्सो

**ब्रेक्ब मुर:** एको कुम्सो सोलोमनमी ब्रेक्शो बाक्ब।

**गेना ब्रेक्शो:** सोलोमनमी ९:५६-९:२६ बि. सी. आ सासन पची ना ब्रेक्शो बाक्त।

**मार ब्रेक्शो:** एको किताबम शुनाम सहर डा गोठाल्नी मीश आल आ कथा बाक्ब। मेको सोलोमन आ दरवार चाक्चा पुंइसीशो बाक्त। तन्न मेकोमी सोलोमन आ शोंप नु दारस तशा, यो आ दाक्शो नु ग्युंवे पचा चिक्शो गोठला मप्रोंइथु दाक्ना दाक्न बाक्त। एको किताबम भाग सां बाक्ब:

१. पिप आ दरवारम वोइक्चा पुंइसीशो, ठेयब कुम्सो १:-३:५ मेकेर डा मीश आलम पिप आ ठेयब दुम्तीके  
कुम्सो पशो, सोलोमनमी शुलामीथ नु लोत्र पशो आ दाक्शो मुर कली मिम्ना मिम्न बाक्शो,
२. आ दाक्शो गोठला हेरा प्रोंइशो, ठेयब कुम्सो ३:६-८:४  
सोलोमनम शुलामीथ कली ग्युंवे पचा मिम्शो  
शुलामीथम आ दाक्शो गोठला कली मिम्शो सोलोमन आ नोले डा पशो लोत्र
३. आ गोठला कली मप्रोंइथु, आ दाक्तीकेम ग्राशो ठेयब कुम्सो ६:५-८:१४  
शुलामीथ खिं लेश्शा, दरवार डा शोंप मिम्शो  
आ दाक्शो गोठलामी शुलामीथ आ सेंदा नेंचा दाक्शो

“पिप ठेयब बाक्ब” दे कुम्सो पशो

- 1 सोलोमन आ नेल्ल क्येडा ठेयब कुम्सो।
- 2 मेकोमी आं कली पुक्पु पवल। मारदे हना इन दाक्तीके अडगुर शांबु क्येडा यो रिम्शो बाक्ब।
- 3 इन खेक्तीक तेल ब्रोत्रशो रिना पाइश्शो बाक्ब। इन नें ब्रोत्रशो रिना पाइश्शो तेल मोइश्शो खोदेशो बाक्ब। मोपतीके मीश आलपुकीमी इन कली दाक्नीमी।
- 4 गे आं कली लाइय्यीनी। गो रीब पा लय। पिपमी आं कली आ बाक्तीकेम लाइक्ती। गो इन कली तशा ग्येरसीनीकी। गोपुकी अडगुर शांबु क्येडा यो, इन दाक्तीक कली ठेयब सेल्नीकी। मेकोपुकीम गे दारशो दुम्तीके इन कली दाक्नीमी।

आं कली आइक्च ममिम्तीन

- 5 गो क्येर बाक्ती हना यो, दारशो बाक्नुड। ए यरूसलेम डा तमीपुकी, गो केदार आ ताम्बु नु सोलोमन आ फारतीक वा खोदेशो क्येर बाक्नुड। आं कली आइक्च ममिम्तीन।
- 6 आं कली क्येर तशा, मकोत्रयीनी। मारदे हना चोक्शो नांमी आं कली क्येर सेल्ती। आं ममा आ तौपुकी गो नु गाइक्तीके आं कली अडगुर रू कोत्रब सेल्तीमी। तन्न गो आंम अडगुर रू कली चहिं मकोत्रडु।
- 7 ए आं दाक्शो मुर, इन क्यारश भेडा आन कली ते योत्रनीनी? मिनु नाक्त मेको ते नाइक्नीमी? गो मारदे हेंथे गाक्ब मीश मुर खोदेशो पा इन वारच आन बगाल आ नेक्था लचा माल्नुडा?

सोलोमनम शुलामीथ नु लोत्र पशो

- 8 मीश आल आन दाते डा नेल्ल क्येडा दारशो मीश आल, गे क्यारश भेडा आन गाक्तीक लां खोइश्शा, गोठला आन गोठ आ नेक्था इ पाठा आन कली योत्रडो।
- 9 आं दाक्शो मीश आल, गो इ कली फाराओ आ बग्गी डा नेल्ल क्येडा दारशो छाउरी शारा नु थाप्शो बाक्नुड।
- 10 गहना पांइसीशो इ चोत्रचो गिश दारशो बाक्ब। सिक्की पांइसीशो इ शुर थम दारशो बाक्ब।
- 11 गो इ कली सुन नु चांदी खाक्शा सिक्की सेल्नीकी।

- 12 पिप आ इप्तीकेमी बाक्मेनु, आं तेल थम ब्रोव्रशो रिना पाइव्तु।
- 13 आं दाक्शो मुर आं कुचु आ दातेम ब्रोव्रशो रिना पाइब मूरम ब्रीशो थैली खोदेशो बाक्ब।
- 14 आं दाक्शो मुर एन-गेदी डा अडगुर रूमी वाशो हेन्ना फू खोदेशो बाक्ब।
- 15 ए, आं दाक्शो मीश आल गो दारशो बाक्नेवे? शुश दारशो बाक्नेवे। इ मिक्च ढुकुर के खोदेशो बाक्ब।
- 16 ए आं दाक्शो मुर, गे यो दारशो बाक्नेवे। थमा पा दारशो बाक्नेवे। इस ब्राख्ये गिग बाक्ब।
- 17 इस खिं डा पैद्रा लेबानोन डा लाइशशो रवा के बाक्नीम। सला के फलेकम साप्शो बाक्ब।

## 2

गे अर्को खोदेशो मबाक्नीनी

- 1 गो शारोन डा गुलाफ नु बेसी डा लिली फू नड।
- 2 चू आन दातेमी लिली फू बोइशशो खोदेशो पा आं मीश आल, अरु मीश आल आन दातेम बाक्ब।
- 3 आं वोंइश मुर अरु ठिटा आन दातेमी ब्वाकीम बाक्शो रवा आन दाते डा स्याउ रवा खोदेशो बाक्ब। गो मेको आ वांकुम थुं नाइशशा बाक्नुड। मेको आ फल ब्रोव्रशो बाक्नीम।
- 4 मेकोमी आं कली भोज जतीक खिंम लाइक्ती। मेको आ दाक्तीके छेद्र खोदेशो पा कोंइताक्यी।
- 5 आं कली ठीक सेल्चा कली सोव्रपाइशशो अडगुर नु स्याउ गेयीनी। मारदे हना गो दाक्तीकेम थशो बाक्नुड। ठेयब कुम्सो ५:८
- 6 मेको आ पेरा गुइ आं पिया आगाम बाक्ब। मिनु मेको आ ग्युरा गुइमी आं कली मुप्शो बाक्ब।
- 7 मेकोमी “ए, यरूसलेम डा तमीपुकी, गो इन कली, किशश नु रोकोश आन नेमी अरेनुड। आंम दाक्चा क्येडा डोंइती दाक्तीक कली मपोक्कीन” दैत। ठेयब कुम्सो ८:३-४

शुलामीथम आ दाक्शो कली मिम्शो

- 8 लो आं दाक्शो मुर, आ सेंदा नेनीन। कोव्रडीन, मेको पहाड मेर प्रेक्ना प्रेक्न, डांडा मेर दोरना दोरन जाक्शो बाक्ब।
- 9 आं दाक्शो मुर किशश नु ठिटा रोकोश खोदेशो बाक्ब। कोव्रडीन, मेको आंइ गारो आ नोले राप्शा बाक्शो बाक्ब। मेकोमी झेल रे आगा कोव्रना कोव्रन बाक्ब। मेकोमी झेल आगा रे कोव्रना कोव्रन बाक्ब।
- 10 आं दाक्शो मुरुमी आं कली “आं नेल्ल क्येडा दाक्शो नु आं दारशो मीश आल बोक्को। मिनु गो नु गाक्को” दैत। ठेयब कुम्सो २:१३
- 11 मारदे हना मुल हिंउद लाक्तु। मिनु बर्खा यो लाक्ने थुम्तु।
- 12 रागीम फू बोइक्चा गोम्तेक्म।
- 13 फोव्रशी रवाम फोव्रशी सिन्ना सिन्न बाक्नीम। अडगुर फू बोइक्नीम। मेको ब्रोव्रशो रिना पाइब। मेकोमी “आं नेल्ल क्येडा दाक्शो नु आं दारशो मीश आल बोक्को। मिनु गो नु गाक्को” दैत। ठेयब कुम्सो २:१०
- 14 पहाड मेर डा पोव्रला मेर, सेरथे फुल्लु मेर बाक्ब आं दाक्शो ढुकुर, इ कुल कोंइदी। इ सेंदा नेंचा तडल। मारदे हना इ सेंदा रिम्शो बाक्ब। मिनु इ कुल दारशो बाक्ब।
- 15 आंइ कली फ्यउरे ग्याइशशा गेकी। मेको आइक्च फ्यउरेपुकीम अडगुर रू बिग्रेनीम। मारदे हना मुल अडगुर बोइक्नीम।
- 16 आं दाक्शो वोंइश आल आं केन बाक्ब। मिनु गो मेको के बाक्नुड। मेकोमी आ क्यारश भेडा लिली फू आन दातेम योव्रब। ठेयब कुम्सो २:१६
- 17 ग्यू दुम्चा नु वांकु जाम्शा लचा क्येडा डोंइती लेशशा जाक्कीन। आं दाक्शो वोंइश मुर रोंगु मेर बाक्ब किशश नु ठिटा रोकोश खोदेशो दुमीन। ठेयब कुम्सो ४:६

## 3

आ दाक्शो कली मिम्शो

1 गो नाक्दो रे आं ब्राख्येम आं दाक्शो वोंइश मुर् कली माल्ता। गो मेको कली ब्रेत्ताक्ड। तन्न मेकोम लोत्र मलेत्ती। ठेयब कुम्सो ५:६

2 गो बोक्शा, सहर गे लती। मिनु गो आं दाक्शो वोंइश मुर् कली सहर नु लां मेर माल्ता। मोपा माल्ना माल्न बाक्ती, तन्न मथिदु।

3 सहर डा खाल पाइबपुकीम थित्तीमी। मिनु गो “मार, गेपुकीमी आं दाक्शो वोंइश मुर् कली थिन्नी?” दे हिल्लो पाता।

4 मिनु गो मेको आन कली प्रोंइशा इक्का आइक्की ला जाक्दीरशो नड। गो आं दाक्शो वोंइश मुर् कली थित्ता। मिनु गो मेको कली आं ममा आ खिं, आं जरमेसीशो कोटा मचाक्गु सम्म मेको कली ग्याइशशा मप्रोनु। ठेयब कुम्सो ८:२

5 ए यरूसलेम डा तमीपुकी, गो इन कली, किश्र नु रोकोश आन नेमी अरेनुड आंम दाक्का क्येडा डोंइती दाक्तीक कली मपोक्कीन।

सोलोमनम ग्युंवे पचा मिम्शो

6 गोरशो रागी रे मार जाक्बा? कुन के थाम खोदेशो तांडसीब। मिनु मेको मूरे नु धूप खोदेशो ब्रोव्रशो रिना पाइब। मेको ग्याप्ब लेयब आन मस्ला खोदेशो पा रिना पाइक्तु।

7 कोव्रडीन, एको सोलोमन कली कुरतीक बाक्ब। मेको आ एर ओथ ६० जना इस्राएल डा बोल्यो लडाइ पाइबम मेको कली खाल पशो बाक्तेक्म।

8 मेको नेल्लेमी या कुरशो बाक्तेक्म। मेको लडाइ पस जोक्ब बाक्तेक्म। नाक्दो लडाइ दुम्मेनु, आन तरवार पिम्मीशो बाक्तेक्म।

9 पिप सोलोमनम आंम कली कुरतीक का सेल्लु। मेको लेबानोन डा लाइशशो रवा आ शी के सेल्लो बाक्त।

10 मेकोमी मेको आ गुड वोइक्तीक चांदी के नु आ नोले सुन के सेल्लु। आ नित्तीके प्याजी रड के बाक्त। यरूसलेम डा तमीपुकीमी, मेको आ आगा शुश क्येट लाइब शीम साप्शो बाक्तेक्म।

11 ए सियोन डा तमीपुकी, लाडगा गूशा पिने। मिनु पिप सोलोमनम सिरपेच गुक्शो कोव्रडीन। मेको सिरपेच मेको आ ममामी ग्येरसीशा मेको आं ग्युंवे नाक्ती गेशो बाक्त।

## 4

सोलोमन शुलामीथ नु लोत्र पशो

1 आं दाक्शो मीश आल, गे दारशो बाक्नेवे। गे थाम्पा दारशो बाक्नेवे। इ मिक्च इ सुम्तीके आगाम खुइशशो हुकुर आ मिक्च खोदेशो बाक्ब। इ चां गिलाद डांडा रे पा बुप्शो क्यारश आन हुल खोदेशो बाक्ब।

2 इ खुइ चां प्रेक्शा चिक्शो भेडा आन हुल खोदेशो बाक्ब। मेको नेल्ल आन के जौले पाठा बाक्ब। नेल्ल मोदेशो बाक्नीम। ठेयब कुम्सो ६:५-६

3 इ शुइच लल डोरी खोदेशो बाक्ब। इ शोव्र थम दारशो बाक्ब। इ सुम्तीके आगाम इ चोव्रचो चेशशो दारीम खोदेशो बाक्नीस। ठेयब कुम्सो ६:७

4 इ शुर दारुड आ लाइशशो खिं खोदेशो बाक्ब। मेकेर हजार का तेक्तीक क्युकशो बाक्नीम। मेको नेल्ल लडाइ पाइब आन तेक्तीक बाक्नीम।

5 इ दूध निक्शी क्यारश पाठा खोदेशो बाक्नीस। मेको लिली फू आन दातेमी जोइब किश्र आ जौले पाठा खोदेशो बाक्नीस। ठेयब कुम्सो ७:३

6 ग्यू दुम्वा नु वांकु जाम्शा लचा क्येडा डोंइती, गो ब्रोव्रशो रिना पाइब डांडा नु धूप बाक्शो डांडा लाइनुड। ठेयब कुम्सो २:१७

7 आं दाक्शो मीश आल गे नेल्लेम दारशो बाक्नेवे। इ के मारेइ मरिम्शो मबाक्ब।

आं दारशो मीश आल, आं ग्युम्ली!

8 आं ग्युम्ली, लेबानोन रे पा गो नु गाक्को। लेबानोन रे पा गाक्को। आमाना डांडा रे पा यीवो। सेनीर आ डर नु हेरमोन डांडा रे पा गाक्को। गुप्स आन पुक्खी नु जोड आन बाक्तीक डांडा रे पा गाक्को।

9 ए आं समी, आं ग्युम्ली, गे आं कली कोव्रशा, आं थुं खुइ पाप्तीवी। इ माला के गेडा कामीन आं थुं खुइ पाप्तीवी।

10 ए, आं समी, आं ग्युम्ली इ दाक्तीक थम रिम्शो बाक्ब। तेकोइ अडगुर शांबु क्येडा यो, इ दाक्तीक रिम्शो बाक्ब। मस्ला नेल्ल आन क्येडा इ खेक्तीक ब्रोव्रशो रिना पाइशशो बाक्ब।

11 इ शोव रे फू आ रस खोदेशो याप्ब। ए आं ग्युम्ली, इ ले आगाम दूध नु खुदो बाक्ब। इ वा डा ब्रोव्रशो रिना लेबानोन डा रिना खोदेशो बाक्ब।

12 ए आं समी, आं ग्युम्ली, गे चोकशा वोइशशो रू नु सुशा वोइशशो ब्वाक्कु बुक्तीक खोदेशो बाक्नेवे।

13 इ रू दारीम रू खोदेशो बाक्ब। मेकेर नेल्ल क्येडा रिम्शो फल फुल बाक्नीम। हेन्ना बुटा नु ब्रोव्रशो रिना पाइब तेल बाक्नीम।

14 ब्रोव्रशो रिना पाइब तेल, हाव सुप्तीके, सुप्तीक बोट, सिन्कौली, शुश खाल डा ब्रोव्रशो रिना पाइशशो धूप रवा, मूरे, ब्रोव्रशो रिना पाइशशो शी के रवा नु नेल्ल खाल डा ब्रोव्रशो रिना पाइशशो मस्ला बाक्नीम।

15 मेको रू डा ब्वाक्कु बुक्तीक ब्रोव्रशो ब्वाक्कु बुक्तीक बाक्ब। मिनु लेबानोन रे पा शाइशशो खोला बाक्नीम।

16 उत्तर डा फश, बोक्को। ए दक्खिन डा फश, कुवो। आं रूमी फश पावो। मेको आ ब्रोव्रशो रिना डोन सम्म जाक्दील्ल। आं दाक्को वोंइश मुर आ रूमी जाक्ल। मिनु मेकेर डा नेल्ल क्येडा ब्रोव्रशो फल जवल।

## 5

1 ए आं समी, आं ग्युम्ली, गो आं फल फुल रूमी जाक्ती। गो आं ब्रोव्रशो रिना पाइशशो मूरे नु मस्ला खुप्ताकडमी। गो आं सुरबु चाका नु आं खुदो जाडनुड। गो आं अडगुर शांबु नु आं दूध तूनुड। ए वारचपुकी, जने तूडीन। वारचपुकी दाक्तीकेम दुक्को खोदेशो दुमीन।

### डोमु पा आ गोठला कली माल्शो

2 गो गोल्ती, तन्न मइम्ड। नेनीन, आं दाक्को मुरुमी लाप्चो खोकोल पाप्तु। “आं समी, आं दाक्को मीश आल, आं डुकुर, मारेइ मारेइम रिम्शो बाक्को मीश आल लाप्चो रोक्को। आं पिया सीतम जिशशो बाक्ब। आं चां नाक्दो डा सीतम जिशशो बाक्ब” देंत।

3 गो आं वा घुइक्ने थुम्ता। मिनु मार मेको लेंशा फेक्नुडा? गो आं खोइल चिक्ने थुम्ता। मिनु मार मुल लेंशा खप दिम्नुडा? ठेयब कुम्सो ३:१

4 आं दाक्को वोंइश मुरुमी लाप्चो रोक्का कली गुइ पिदानु, मेको तशा आं लुङगीर प्रेक्त।

5 मिनु गो आं दाक्को वोंइश मुर कली लाप्चो रोक्का कली बोक्ती। आं गुइ रे ब्रोव्रशो रिना पाइशशो मूरे याप्त। मिनु आं ब्रेप्चो रे ब्रोव्रशो रिना पाइशशो मूरे याप्शा आग्लोम लुम्साक्ब।

6 मिनु गो आं दाक्को मुर कली लाप्चो रोक्का, तन्न मेको गाक्ने थुमा बाक्त। मेको मेकेर मबा। मेको गाक्तीके गो सुरता पाता। गो मेको कली माल्ता। तन्न मथिदु। गो मेको कली ब्रेत्ताक्ड। तन्न मेकोम लोव्र मलेत्ती।

7 सहर्म हिरशा खाल पाइबपुकीम आं कली थित्तीमी। मिनु मेकोपुकीम आं कली तुप्शा गारै गार सेल्तीमी। गारोम बाक्शा खाल पाइबपुकीमी आं फेक्को वा यो रोइशशा लाइक्तेक्म।

8 ए यरूसलेम डा तमी “गो इन कली ‘गोपुकीम आं दाक्को मुर कली गुम्तीनी हना, मेको कली इन कली दाक्ब मुर दाक्तीकेम थशो बाक्ब’ देनीन” देंत। ठेयब कुम्सो २:५

9 मिनु मेकोपुकीमी “गे नेल्ल क्येडा दारशो मीश आल, इ दाक्को वोंइश मुर दोपा अरु आन क्येडा दाक्को दुम्मे? मारदे मेको इ दाक्को वोंइश मुर ठेयब दुम्मे? मारदे आंइ कली मोदेशो पा अरेनेवे?” देंतेक्म।

- 10 मिनु १० हजार आन दातेम यो आं दाकशो मुर नेल्ल क्येडा दारशो नु आ कुल हाकसीशो बाकब।  
 11 मेको आ पिया क्येख सुन के खोदेशो बाकब। मेको आ चां हिरशो नु खद खोदेशो क्येर बाकब।  
 12 मेको आ मिक्च खोला आ नेक्था बाकब ढुकुर आ मिक्च खोदेशो बाकब। मेको दूधमी मुरशा केप्शो हीरा खोदेशो बाकब।  
 13 मेको आ चोत्रचो ब्रोत्रशो रिना पाइब मस्ला खोदेशो बाकब। मेको आ शुंडच ब्रोत्रशो रिना पाइशो मूरे याप्ब लिली फू खोदेशो बाकब।  
 14 मेको आ गुड हीरा केप्शो सुन के खोदेशो बाकब। मेको आ रां हात्ती आ दाराम नीलो हीरा क्येप्शो खोदेशो बाकब।  
 15 मेको आ खोइल क्येख सुन के नित्तीक पाइशो बुश थाम खोदेशो बाकब। मेको कोत्रशोनु, लेबानोन डा लाइशो रवा खोदेशो पा दारशो बाकब।  
 16 ए यरूसलेम डा मीश आलपुकी, मेको आ शोत्र ब्रोत्रशो लोत्रमी ब्रीशो बाकब। मेको थम दारशो बाकब। मेकोन आं दाकशो वोंइश मुर नु आं वारच बाकब।

## 6

- 1 ए नेल्ल क्येडा दारशो मीश आल, इ दाकशो वोंइश मुर ते लमे? गो गारशा मेको कली माल्थ लय?  
 2 आं दाकशो वोंइश मुर आंम फल फुल रू लत। मेको आ ब्रोत्रशो रिना पाइशो मस्ला रू मेर लत। मेको क्यारश भेडा योत्रचा कली नु लिली फू खुप्चा कली लत।  
 3 आं दाकशो वोंइश मुर आं केन बाकब। मिनु गो मेको के बाकनुड। मेकोमी आ क्यारश भेडा लिली फू आन दातेम योत्रब। ठेयब कुम्सो २:१६

### सोलोमन आ नोले डा लोत्र

- 4 आं दाकशो मीश आल, गे तिरचा सहर खोदेशो बाकनेवे। यरूसलेम सहर खोदेशो रिम्शो तांइसीनेवे। गे छेदर क्युकशो लडाइ पाइब खोदेशो सक्ति पाइशो बाकनेवे।  
 5 इ मिक्चीम आं कली मकोवयी। मारदे हना इ मिक्चीम आं कली मार पचा ना मार पचा सेल्ब। इ चां गिलाद डांडा रे पा बुप्शो क्यारश आन हुल खोदेशो बाकब।  
 6 इ खुइ ऊन प्रेक्शा चिकशो भेडा आन हुल खोदेशो बाकनीम। मेको नेल्ल आन के जौले पाठा बाकब। नेल्ल मोदेशो बाकनीम। ठेयब कुम्सो ४:१-२  
 7 इ सुम्तीके आगाम इ चोत्रचो चेशो दारीम खोदेशो बाकनीस। ठेयब कुम्सो ४:३  
 8 मिनु ६० जना पिपीम बाक्तेकम हना यो, ८० जना नोले चाकशो मीश बाक्तेकम हना यो, नु शुश मीश आल बाक्तेकम हना यो,  
 9 आं मीश आल, आं ढुकुर, आं नेल्ल क्येडा दारशो मीश आल, आ ममामी दाकशो तमी बाकब। आ ममामी “थम दारशो मीश आल बाकब” देंब। मिनु मीश आलपुकीम मेको कली तशा “ग्येरसीशो मीश आल बाकब” देंतेकम। पिपीम नु नोले चाकशो मीशपुकीम मेको कली ठेयब सेल्तेकम।  
 10 सुनी खोदेशो पा दारशो, तास्ला खोदेशो पा दाप्शो, नां खोदेशो पा छेडछेड देशो, हिंचा डा लडाइ पाइब खोदेशो सु बाकबा?

### आ मीश आल लशो

- 11 गो फोरो रवा डा रू मेर दोशो कोच्वा दम्मा, दे कोत्रथ लती। अडगुर बोटमी कोच्वा दम्मा कों, दारीम फू बोइशो बाक्मा कों मबाक्मा, दे कोत्रथ लती।  
 12 मिनु गो आं तुडक्चा क्येडा डोंइती आं मिम्शोमी आं कली आं दाकशो मुर आ नेक्था बग्गीम लाइक्ती।  
 13 शुलामीथ लेशशा पिवो! लेशशा पिवो! लेशशा पिवो। मिनु गो इ कली कोत्रने चाप्कल। गे मारदे शुलामीथ कली लडाइ पाइब आन डोंइती सिल पपाइशो खोदेशो पा कोत्रस डा कोत्रस बाक्चा दाक्नीनी?

## 7

गे नेल्लेम दारशो बाक्नेवे देशो

- 1 पिप आ तमी, जुत्ता लिक्शो इ खोइल गिश दारशो बाक्ब। इ क्रातो थाम्पा मार मार सेल्स जोक्बमी सेल्शो खोदेशो बाक्ब। मेको हीरा खोदेशो बाक्ब।
- 2 इ सपु कुल कुल देशो बोस खोदेशो बाक्ब। मेकेर ब्वाइशो अडगुर शांबुम ब्रीशो बाक्ब। इ कोव्रज लिली फूपुकीमी हिरशो पुक्शो चेरब खोदेशो बाक्ब।
- 3 इ दूध किश्र आ जौले पाठा खोदेशो बाक्नीस। ठेयब कुम्सो ४:३
- 4 इ शुर हात्ती आ खुइ के सेल्शो लाइशो खिं खोदेशो बाक्ब। इ मिक्च बाथ-राब्बीम डा लाप्चो आ नेक्था बाक्शो हेरबोन डा दोम्ली खोदेशो बाक्नीस। इ नें दमस्कस सहर गे कोव्रशो लेबानोन डा लाइशो खिं खोदेशो बाक्ब।
- 5 इ पिया कारमेल डांडा खोदेशो बाक्ब। इ चां पिप आ रड खोदेशो बाक्ब। मोपतीके पिपम इ कली दाक्शो बाक्ब।
- 6 आं दाक्शो मीश आल, गिश दारशो बाक्नेवे। गे नेल्ल क्येडा दारशो बाक्नेवे।
- 7 इ रां खजूर रवा खोदेशो बाक्ब। इ दूध अडगुर सिशो खोदेशो बाक्ब।
- 8 मिनु गो “गो खजूर रवा डोइक्नुड। मिनु मेको आ राशी ग्याइक्नुड” देती। इ दूध अडगुर सिशो खोदेशो नु इ सास स्याउ आ रिना खोदेशो बाक्ब।
- 9 इ पुक्पु पाइशो ब्रोव्रशो अडगुर शांबु खोदेशो बाक्ब। अडगुर शांबु शोत्र नु खुइ रे ओंखां पा शाइशो खोदेशो बाक्ब।
- 10 गो आं दाक्शो मीश आल के नड। मेकोमी आं कलीन मिम्शा बाक्ब।
- 11 आं दाक्शो मुर जाक्कीन। मिनु रू मेर हिरथ लस। मिनु नाक्दो गाउं मेर बास बाक्स।
- 12 गो सुनी कना अडगुर रू लस। अडगुर कोच्वा दाप्शा फू बोइशो बाक्म कों? मिनु दारीम फू बोइशो बाक्म कों। गो मेकेर इ कली आं दाक्तीक गेनन्नी।
- 13 आल थिपाइक्ब फलम ब्रोव्रशो रिना फ्रशो बाक्नीम। नेल्ल खाल डा रिम्शो फल आंइ लाप्चो आ तार बाक्नीम। आं दाक्शो मुर, नक नु सोव्रशो फल इ कली खेक्शा वोइशो बाक्नुड।

## 8

गो आं दाक्शो नु बाक्चा दाक्नुड

- 1 आं ममामी इ कली दूध तुंडशो आं लोक्ब नवे हना, इ कली लाडगाम ग्रुमुनु, पुक्पु पड वा। मिनु सुइमी आं कली मरिम्शो मदेंम वा।
- 2 मिनु गो इ कली आं ममा आ खिं, आं जरमेसीशो कोठाम चाक्गु वा। मेकेर लाइशशा ब्रोव्रशो मार मार सुप्शो दारीम शांबु तूचा गेड वा। मेको आं दारीम रे सेल्शो बाक्ब। ठेयब कुम्सो ३:४
- 3 मेको आ पेरा गुइ आं पिया आगाम बाक्ब। मिनु मेको आ ग्युरा गुइमी आं कली मुप्शो बाक्ब।
- 4 ए यरूसलेम डा तमीपुकी, गो इन कली, अरेनुड। आंम दाक्चा क्येडा डोंइती दाक्तीक कली मपोक्कीन। ठेयब कुम्सो २:६-७

आ गोठला कली दाक्तीक सक्ति

- 5 आंम दाक्शो मुर नु क्येम्सीशा, गोरशो रागी रे जाक्ब सु बाक्बा? गो स्याउ रवा आ पुंमी इन कली सेंताक्ड। मेकेर इन ममामी इन कली कुरतु। मेकेर इन कली थिचा कली आल थितीक रोइ पाप्तु।
- 6 आं कली इन थुंमी छाप थोक्शो खोदेशो पा वोतीन। इन गुइमी यो छाप थोक्शो खोदेशो पा वोतीन। मारदे हना दाक्तीके, बेक्पाइक्ब खोदेशो पा सक्ति पाइशो बाक्ब। मेको आ दाक्शो तुरस खोदेशो मटीब नु शुश ब्रशो मी क्येडा यो शुश ब्राइब बाक्ब। मती २२:३०; रोमी ७:२; उत्पत्ती २:२४; मती १९:५-६; एफिसी ५:२८-३३
- 7 शुश ब्वाक्कुमी दाक्तीक कली क्याम्ने मचाप्ब। बारशो खोलामी यो मेको कली योल्ने मचाप्ब। सुइ मुरुमी आंम दाक्तीक आ पा डा खिं नु आ शोंप नेल्ल गेप्तु हना, मुरुमी मेको कली शुक्शी पाइनीम।

आ खिं लेशो



8 इं के आइक्च समी का बाक्ब। मेको आ दूध मुल सम्म मबाक्ब। मेको कली ग्युंवे पचा कली पुंडथ जाक्तेक्म हना, गो मार पय?

9 मेको गारो खोदेशो बाक्त हना, मेको तारी चांदी के दरवार सेल्य वा। मेको लापचो खोदेशो बाक्शो हना, मेको कली लेबानोन डा लाइशशो रवा आ फलेकमी सुशा वोइ वा।

10 गो गारो खोदेशो नड। मिनु आ दूध लाइशशो खिं खोदेशो बाक्ब। मोपतीके गो मेको कली आ थुं नाइक्पाइक्ब दुम्शो बाक्नुड।

11 सोलोमन के बाल-हामोनमी अडगुर रू का बाक्त। मिनु मेकोम आ रू खाल पाइब मुर आन कली गेवा बाक्त। मिनु मेको बुम्था पाइब नेल्लेमी फल फुल आ पा डा हजार का चांदी के शेकेल थापचा माल्बाक्मा बाक्त। शेकेल का ११.५ ग्राम चांदी के क्येट बाक्ब।

12 तन्न आं के यो अडगुर रू का बाक्ब। ए सोलोमन, मेको हजार का चांदी के शेकेल इन केन बाक्ल। मिनु सहे निक्शी शेकेल चहिं मेको फल फुल खाल पाइब आन के बाक्ल।

आं कली ला माल्शा ब्रेत्तो

13 अडगुर रूमी बाक्ब आं वारचपुकीम इ सेंदा नेंचा दाक्नीम। इ सेंदा आं कली नेंपाइय्यी।

14 आं दाक्शो मुर गे रीब पा मस्ला बाक्शो डांडा डा किश्श खोदेशो नु ठिटा रोकोश खोदेशो दुमो।

## यसैया

**ब्रेकब मुर:** एको किताब यसैयामी ब्रेकशो बाक्त। का निक्शी मुरुम चहिं रे अर्को मुर काम ब्रेकशो बाक्त देनीम। मारदे हना मस्सीह आ पर्वम ब्रेकशो लोत्र बाकब। तन्न परमप्रभु यावे आ सोकतीम मेको लोत्र पपाइकब। मेको ब्रेकब यसैया आंमा यो दुम्ने चाप्व।

**गेना ब्रेकशो:** यसैया पिप उसीजाह ७४०-७३९ बि. सी. परमप्रभु यावे आ लोत्र पाइब दुम्शा ब्रेकशो बाक्त। आ नोले डा ब्रेक्स पिप सन्हेरीब आ लडाइ पचा आ पर्वम बाकब। मेको ७०१ बि. सी.म बाकशो बाक्त। यसैया ४० बर्स परमप्रभु यावे आ लोत्र पाइब बाकशो बाक्त। मेकोमी पिप उज्जीयाह ७६७-७४०/३९ बि. सी., पिप योथाम ७४०/७३९-७३२/३१ बि. सी., पिप आहास ७३२/३१-७१६/१५ बि. सी. नु पिप हिज्कीयाह ७१६/१५-६८७/८६ बि. सी. आन सासन पची ना गेय पशो बाक्त।

**मारदे ब्रेकशो:** यसैया आ लोत्र:

१. मेना बाकशो मुर आन कली बाक्त। यसैया १:- ३९:-
२. मस्सीह, येसु ख्रीस्त आ पर्वम बाक्त। यसैया ४०:-५५:-
३. रागी नेल्ल क्येडा नोले मार दुम्बा मेको आ पर्वम लोत्र। यसैया ५६:-६६:-

### डोंइती डा लोत्र

१ परमप्रभुमी आमोज आ तौ यसैया कली कोंइशो लोत्र एको बाकब। मार लोत्र कोंइशो बाक्त देशा हना, यहूदा नु यरूसलेम आस पर्वम तशो कोंइताकव। मेना पिप उज्जीयाह, योथाम, आहाज नु हिज्कीयाहमी सासन पशो बाक्तेकम। २इतिहास २६:२२

### यहूदाम परमप्रभु आ अरेशो मटिशो

२ सरीड नु रागीम बाकबपुकी नोफा दाइशशा नेनीन। मारदे हना परमप्रभु यावेमी “गो आं आल आन कली थुल्शा, कोल्पाइकतामी। मेकोपुकीम चहिं आं कली मटीयीमी। ब्यवस्था ३२:१; ब्यवस्था ३२:५-६

३ ब्यफोमी आ होत्रप कली तुडकब। गधामी आ होत्रप आ शुंगु तुडकब। तन्न इस्राएल डा मुर मतुडकब बाकनीम। आं मुर मरुपब बाकनीम।

४ आबी, पापम ब्रीशो रागी, मुरपुकी मरिम्शो पतीकेम ब्रीशो बाकनीम। मेको आन आल काइ मरिम्शो पाइब दुम्तेकम। मेकोपुकी शोर गाकशो बाकनीम। परमप्रभु यावे कली प्रोंइशो बाकनीम। इस्राएली आन का ला बाकशो परमप्रभु आ पर्वम ‘ममाल्नीकी’ देशो बाकनीम। मेकोपुकी नोले शोंइसीशो बाकनीम।

५ मारदे गो इन कली लेंशा, तुप्या मालडा? मारदे गे डोंइती क्येडा मटीब दुम्नी। इन पिया नेल्ल रोड पशो खोदेशो बाकब। गे थशो खोदेशो बाकनीनी। येरमीया २:३०

६ पिया रे खोइल सम्म तेइ सेस मबाकब। राकशो गार नु तुप्या हुश यिशो गार ला बाकनीम। मेको नेंने मपुकशो, मफ्रेंशो नु तेल मखेकशो बाकनीम। ब्यवस्था २८:३५

७ इन रागी गोरशो रागी दुम्ब। इन डोंइती इन सहर मीम क्रोइक्तेकम। इन डोंइती इन रू डा मारेइ मारेइ अर्को रागी डा मुरपुकीम नेक्तेकम। मिनु मेकोपुकीम इन रागी लडाइम खोदेशो पा ग्रांग्ये माग्ये सेल्लेकम।

८ सियोन आ तमी, यरूसलेम, चहिं अडगुर रू खाल पतीक खिं, वोबीस रू खाल पतीक गोठ नु एर ओंथ रे जोरी सत्रुम पुम्चा पुंडसीशो सहर खोदेशो बाकब” दे लोत्र पाप्तु।

९ मुर नेल्ल आन परमप्रभु यावेमी “का निक्शी मुर महेंशो हना, गेपुकी सोदोम नु गोमोररा खोदेशो दुम्नी वा” दैत। उत्पती १९:२४-२५; रोमी ९:२९

१० सोदोम डा सासन पाइबपुकी, परमप्रभु यावे आ लोत्र नेनीन। गोमोररा डा मुरपुकी आंइ परमप्रभु आ शेशो लोत्र नेनीन।

11 परमप्रभु यावेमी “इन शुश चढेशो आं कली शोर गाकशो बाकब। गो चोशा चढेशो सांड नु थुल्शो बस्तु भाव आन बोंसोमी रूती। गो ब्यफ, पाठा नु क्यारश आन हुश मदाकनुड। भजन संग्रह ४०:७-९; हितोपदेस १५:८; येरमीया ६:२०; आमोस ५:२२

12 गे आं डोंइती जाकशा, मोदेशो चढेचा, दे सुम देंम? आं लाडगा मथेकतीन।

13 इन चढेतीके मचाककीन। इन धूप चढेशो तशा, गो ग्रांरा दीती। औंसी नु नाइक्तीक नाक्ती डा गुन्तीके डा मरिम्शो पाइब आन हुल तचा मदाकनुड। गन्ती १०:१०

14 इन औंसी नु अरु चाडपुकी काइ मदाकनुड। मेको आं थुंम ग्रांरा दिण्व। मेको आं कली श्येत बाक्नीम। गो फाल्ने मचाणुड।

15 इन गुड क्युकशा, गो नु लोत्र पनीनु, आं कुल खुडकनुड। गेपुकीम शुश पुंडतीनी हना यो, गो मनेनुड। मारदे हना इन गुडम हुश ख्राकश पशो बाकब। हितोपदेस १:२८; हितोपदेस १५:२९; यूहन्ना ९:३१

16 गेपुकी चिक्सीन। ग्रांरा मदिशो दुमीन। मिनु आं डोंइती इन नाक्ती किंत किंत डा मरिम्शो पतीके प्रोनीन।

17 रिम्शो पचा शेंसीन। ठीक निसाफ पतीक मालीन। दिण्चा पुंडसीशो आन कली वारच पने। रोम रोडकच आन कली वारच पने। वोंइश बेकशो मीश मुर आन कली वारच पतीन” देंत। येरमीया ७:५-६

18 मिनु परमप्रभु यावेमी “जाककीन, गोपुकी बुकशा, लोत्रसी पय। इन पाप हुश खोदेशो लल बाकत हना यो, फु खोदेशो बुश दुम्ब। शुश लल बाकत हना यो, मेको ऊन खोदेशो बुश दुम्ब। यसैया ४४:२२; भजन संग्रह ५१:९

19 आं लोत्र नेंशा टीतीनी हना, एको रागी डा ब्रोत्रब्रोत्रशो थोत्रक जचा ताइनीनी। लेवी २५:१८-१९

20 तन्न आं लोत्र मनेंतीनी नु मटीतीनी हना, तरवारम क्योरचा पुंडसीनीनी” दे परमप्रभु यावेमी देंत। लेवी २६:२५

### खतम दुम्शो सहर

21 परमप्रभु यावेमी “आं थमा सुइशो सहर दोपा तेल्लेम दुम्मे? ठीक निसाफ नु ठीक पतीके मेको नु बाकत। मुल मेको मुर साइकब मुरुम ब्रीतेकम।

22 इ चांदी पुलु खोदेशो दुम्त। इ ब्रोत्रशो अडगुर शांबुम ब्वाककु ब्वाइक्ताकम। इजीकीएल २२:१८-२२

23 इ सासन पाइबपुकी मटीब नु खुइ आन वारच दुम्शा, घूस जशा, क्येट ताक्चा दाक्नीम। मेकोपुकीम रोम रोडकच आन कली ठीक निसाफ मपाइनीम। वोंइश बेकशो मीश मुर आन लोत्र मनेंतीम” देंत।

24 मोपतीके परमप्रभु, मुर नेल्ल आन परमप्रभु यावे, इस्त्राएली आन सक्ति पाइशो परमप्रभु यावेमी “गो आं जोरी सत्रु आन तारी आं गाइशो मोइशशा, क्येक्क लेल्नुडमी।

25 गो इन पर्वम आं गुइ क्युकनुड। गो इन मरिम्शो पतीके पुलु खोदेशो पा फिकशा, इन ग्रांरा दिशो नेल्ले गुंडनुड। भजन संग्रह ११९:१९

26 मिनु गो इ निसाफ पाइब, सासन पाइब नु अर्ती गेब आन कली डोंइती डा खोदेशो सेल्नुड। नोले इ कली ‘ठीक पाइब नु परमप्रभु कली मप्रोंइब सहर’ दे नें वोइक्नीम। जकरिया ८:३

27 मिनु सियोन ठीक निसाफ पतीकेमी पाप रे प्रोंइचा पुंडसीब। सहरम बाकब ठीक पतीकेमी पाप रे प्रोंइचा पुंडसीनीम। यसैया ४६:३३

28 तन्न परमप्रभु यावे आ देशो लोत्र मटीब, मेको कली प्रोंइबपुकी कालेमीन खतम दुम्नीम। परमप्रभु यावे कली प्रोंइबपुकी क्याम्चा पुंडसीनीम।

29 गे रवा आगाम पूजा पशो आ पर्वम मुने दोक्नीनी। इन दाकशा योत्रशो रवा रू आ पर्वम शुश मुने दोक्नीनी। यसैया ५७:५; यसैया ६५:३

30 गे सोत्रशो रवा डा सफा पाइशो नु ब्वाककु मतशो रू खोदेशो दुम्नीनी।

31 बोल्यो मुर झुलो खोदेशो दुम्ब। मेको आ गेय मी आ झिल्ला खोदेशो दुम्ब। मेको निम्फा कालेमीन ब्रसानु, सुडम मकाप्नीम” देंत।

## 2

परमप्रभु आ नोले डा राज्य

1 आमोज आ तौ यसैयामी यहूदा नेल्ल नु यरूसलेम आ पर्बम कोइशो नु तशो लोत्र एको बाक्ब।

2 नोले डा नाक्ती परमप्रभु यावे आ खिं सेल्शो डांडा, डांडा नेल्ल आन क्येडा लाइशो दुम्ब। पहाड नेल्ल आन क्येडा यो लाइशो दुम्ब। मिनु रागी रागी डा मुर नेल्ले मेको डांडाम जाक्नीम। मीका ४:१-३; यसैया १९:२३; येरमीया ३:१७

3 रागी रागी डा शुश मुर जाक्शा “जाक्कीन, गोपुकी परमप्रभु यावे आ डांडा डोइशशा, याकूब आ परमप्रभु आ खिं लय। मेकोमी इं कली आ लां शेंब। मिनु गोपुकी मेको आ लांम गाकनय। मारदे हना परमप्रभु यावे आ शेंशो सियोन डांडा रे नु आ लोत्र यरूसलेम रे नेंसीब” देंनीम। ब्यवस्था ४:६; यूहन्ना ४:२२

4 मिनु मेकोमी रागी रागी डा नु जात जात डा मुर आन कली निसाफ पाइब। मिनु मेकेर डा मुर आन कली अरेब। मेकोपुकीमी आन तरवार चेम्शा, फाली सेल्नीम। आन तूतीक चहिं गुये सेल्नीम। रागी का डा मुर अर्को रागी डा मुर नु लडाइ मपाइनीम। लडाइ पचा मशेंसीनीम। यसैया ९:४

मूर्ति पूजा पाइबपुकी

5 याकूब आ खिं डा मुर जाक्कीन। गोपुकी परमप्रभु यावे आ छेडछेडम गाक्य।

6 याकूब आ खिं डा मुर, गे इन डोंइती डा लां प्रोंइतीनी। गे इन थुं पूब डा मुर आन पतीक गेयम ब्रीशो बाक्ब। गे पलिस्ती खोदेशो पा लिंक्यु कोत्रब दुम्तीनी। अर्को जात डा मुर नु खालसाक्नी।

7 मेको आन रागी सुन चांदीम ब्रीशो बाक्ब। मेको आन शोंप हिकने मचाप्चा डा बाक्ब। मेको आन रागीमी शुश शारा बाक्नीम। मेको आन बग्गीपुकी हिकने मचाप्चा डा बाक्नीम। मीका ५:९

8 मेको आन रागी मूर्तिम ब्रीशो बाक्ब। मेकोपुकी आंमा सेल्शो मूर्ति आ डोंइती बाप्नीम। आंमा गुइमी सेल्शो मूर्ति आ डोंइती पोक्च थेक्नीम।

9 मोपतीके मुरपुकी ब्रेम्शो सेल्चा पुंइसीनीम। मुर नेल्ल आइक्च दुम्नीम। गे मेको आन कली माफ मगेन।

10 परमप्रभु यावे आ हिंच कोइतीक नु आ छेडछेड रे पुक्खी आगाम खुंइसीन। फुरक आगाम खुंइसीन।

11 मुर नेल्ल आन ठेयब लेशो आइक्च सेल्चा पुंइसीनीम। बोरशो मुर नेल्ल ब्रेम्शो सेल्चा पुंइसीनीम। मेको नाक्ती परमप्रभु यावे ला ठेयब दुम्ब। यसैया २:११

ठेयब नेल्ल आइक्च सेल्शो

12 मिनु मुर नेल्ल आन परमप्रभु यावेमी काबु नाक्ती ठेयब लेशो, बोरशो मुर नु “गो ठेयब नड” देंब आन कली आइक्च सेल्ब। येरमीया ४६:१०; इजीकीएल ३०:३; योएल १:१५; आमोस ५:१८; सेफन्याह १:१४

13 लेबानोन डा लाइशो रवापुकी, बाशान डा बोल्यो रवापुकी,

14 लाइशो डांडा नेल्ल नु ठेयब पहाड,

15 लाइशो खिं नु बोल्यो गारो,

16 टारसीस डा जहाज नेल्ल, रिम्शो नु शुश क्येट लाइब सेल्शो थोत्रकपुकी

17 नु मुर नेल्ल आन ठेयब लेशो आइक्च सेल्चा पुंइसीनीम। बोरशो मुर नेल्ल ब्रेम्शो सेल्चा पुंइसीनीम। मेको नाक्ती परमप्रभु यावे ला ठेयब दुम्ब। यसैया २:१

18 मेना मूर्ति नेल्ल जाम्नीम।

19 परमप्रभु यावेमी शुश रागी डा मुर आन कली हिंच कोइब नु आ छेडछेड डा ठेयब सक्ति जाक्मेनु, गे पुक्खीम नु खपी आगा डा ढोडोडगाम ओत्रशा खुंइसीन।

20 मेको नाक्ती मुरपुकीम आन पूजा पचा कली सुन चांदी के सेल्शो मूर्ति थाक्यु नु पकातिकती आन डोंइती ताइक्नीम। यसैया ३१:७

21 परमप्रभु यावे रागी डा मुर आन कली हिंच कोंडचा कली जाक्मेनु, मुरपुकी आ हिंच कोंडतीक छेडछेड डा ठेयब सक्तिम मतचा डा पा पुक्खी नु सेरथे फुल्लु डा कापम खुंडसीनीम। रथिस्सलोनिकी १:९-१०

22 मोपतीके नेम सास मुइक्चा पुंडसीशो बेक्शा लाइब मुर रे डोन लने। मेको मारेइ मनम।

### 3

यरूसलेम नु यहूदा कली निसाफ

1 मुल परमप्रभु, मुर नेल्ल आन परमप्रभु यावेमी यहूदा नेल्ल नु यरूसलेम रे मारेइ मारेइ लाइक्ब। मारेइ मारेइ जचा थोव्रक नु ब्वाक्कु नेल्ल यो लाइक्ब। लेवी २६:२६; इजीकीएल ४:१६

2 मिनु बोल्यो मुर, लडाइ पाइब मुर, निसाफ पाइब, परमप्रभु यावे आ लोव्र पाइब, लिंक्यु कोव्रब, खाल्पापुकी,

3 मिनु ५० जना आन कप्तान, मान पाइक्चा पुंडसीब, सल्ला गेब, जोक्ब तुइक्ब, मन्तर तन्तर पाइब नु नेल्ल क्येडा जोक्ब नेल्ल सहर रे योल्ब।

4 मिनु गो वोंडश आल आन कली मेको आन ठेयब मुर सेल्लुड। मिनु आइक्च आलमी मेको आन कली हुकुम पाइनीम। उपदेसक १०:६

5 मिनु मुरपुकी दिप्चा पुंडसीनीम। दिम्मुडनीम। आन नेक्था डा मुर आन कली दिप्नीम। आलपुकीमी खाल्पी खाल्पा आन कली मान मपाइनीम। महिक्सीशो मुरपुकीमी ठेयब मुर आन कली मान मपाइनीम।

6 मिनु मुर कामी आ खिं डा मुर का कली ग्याइश्शा “इ के फेक्तीक वा बाक्ब। मोपतीके आंइ हुकुम पाइब दुमो। मिनु मेको ब्रेश्शो खिं नेल्ल इ अधिकारम बाक्नीम” देंब।

7 तन्न मेको मुरुमी “गो वारच पाइब मनड। आं खिंमी जचा फेक्चा थोव्रक मबाक्ब। गे आं कली मुर आन कली हुकुम पाइब मसेल्यीनी” देंब।

8 मिनु यरूसलेम दाइल पांइसीशा गोलत। यहूदा खतम दुम्त। मारदे हना मेकेर डा मुर आन लोव्र नु आन पतीके परमप्रभु यावे कली काइ मगारचा डा बाक्त। परमप्रभु आंमा मेको आन दातेमी बाक्शा यो, मेकोपुकीम महिंथु मरिंश्शो पना पन बाक्नीम।

परमप्रभुमी निसाफ पशो

9 मेको आन कुलमी आन मरिंश्शो पशो तुइक्पाइक्ब। सोदोम डा मुर खोदेशो पा मेकोपुकीम आन पाप मखुइक्थु शोव्रनीम। आबी, मेकोपुकीमी आंम कली ग्याइश्शा लाइक्चा पुंडसीब सेल्लसीनीम। उत्पत्ती १९:५-९

10 दोस मताइब मुर आन कली रिंश्शो दुम्ब। मारदे हना मेकोमी आ गेय पशो रे जाइब।

11 आबी, दोस ताइब कली हिंचा डा दुम्ब। मारदे हना दोपा मरिंश्शो पवा, मोपा आ मरिंश्शो पशो ताइब।

12 मिनु वोंडश आलपुकीमी आं मुर आन कली दिप्नीम। मीश मुरपुकीम मेको आन कली हुकुम पाइनीम। आं मुरपुकी, इन ठेयब मुरपुकीम इन कली दूली लां खोइक्पाइश्शा, हेंथे गाक्पाइक्नीम।

13 परमप्रभु यावेमी निसाफ पचा चिक्शो बाक्ब। मेकोमी मुर आन कली निसाफ पाइब।

14 मिनु परमप्रभु यावेमी आ मुर आन दाते डा खाल्पापुकी नु हुकुम पाइब आन कली निसाफ पाइब। मेकोमी “गे अडगुर रू नेल्ल आंम के सेल्लतीनी। प्रुडग आन के रोइश्शो मार मार इन खिंम बाक्नीम। यसैया ५:७

15 दोपा गेपुकीमी आं मुर आन कली मो पने चाप्नी? प्रुडग आन कली चिनु प्रुडग सेल्लतीनी” दे परमप्रभु, मुर नेल्ल आन परमप्रभु यावेमी देंत।

मीश मुर आन कली दोस गेशो

16 मिनु परमप्रभु यावेमी “मारदे हना सियोन डा तमीपुकी ठेयब लेश्शो बाक्नीम। मेको आन पिया पोक्शा, आन मिक्च हिरशा, कल्ली लिक्शा, ग्रीपाइश्शा गाक्नीम। १तिमोथी २:९

17 मोपतीके गो सियोन डा तमी आन पिया श्येत्थ सेल्शा, आन खुइश्शो कौंइशा मुने तोक्नुडमी” दे परमप्रभुम देंत।

18 मेना गो मेको आन खोइली डा पांडतीके, मेको आन सुन फू, सुन के गहना,

19 आन नोफा सुन, चुरा, कुल सुम्तीके,

20 कुप्नी, खोइलीम पांडतीके, काम्बरी, ब्रोव्रशो रिना पाइश्शो खेक्तीके नु आन जन्तर,

21 छाप थोक्तीक औंठी नु मुन्द्री,

22 आन शुश क्येट लाइब वा, आ तार फेक्तीक वा, सुम्तीक वा, थैली,

23 पाल्लो वा, रिम्शो सुती वा, आन पियाम गुप्तीक वा नु आन सुम्सीतीक वा नेल्ल लाइक्नुड।

24 मिनु “नोले ब्रोव्रशो रिना पाइश्शो, ग्रॉग्रा दिशो रिना पाइश्शो दुम्ब। काम्बरी किप्तीकेमी, डोरी किप्चा माल्नीम। मेको आन रिम्शो सेल्शो चां, श्येत्थ पिया दुम्नीम। आन दारशो शुश क्येट लाइब फेक्तीकेमी, रां सुम्चा कली अरन्डी फेक्चा माल्नीम। मेको आन दारस नेल्ले लशा, मीम ग्रोइश्शो खोदेंशो दुम्शा मुने दोक्नीम।

25 इन वौंइश तरवारम साइक्चा पुंडसीनीम। इन लडाइ पाइबपुकी लडाइम बेक्नीम।

26 सहर डा लाप्चो सुर्ता पा रोंका पाइनीम। सहर श्येत्थ दुम्शा, खपीम निश्शो मीश मुर खोदेंशो दुम्ब” दे परमप्रभु यावेमी देंत।

## 4

1 मेना ७ जना मीश मुरपुकीमी वौंइश मुर का कली ग्याइश्शा “गो आंइ जचा थोव्रक जाइनीकी। आंइ वा फेक्नीकी। आंइ कली इन नें गेशा, आंइ मुने साम्शा, आल थिपाइक्की” देंनीम।

यरूसलेम लेंशा रिम्शो दुम्शो

2 मेको नाक्ती परमप्रभु यावे आ राशी दारशो नु थम रिम्शो बाक्ब। मिनु रागी आ दारसम ब्रौंइशा लीशो इस्त्राएली आन कली आन थुं बारपाइश्शा, ग्येरपाइक्ब दुम्ब। येरमीया ३३:१५

3 मिनु सु सु सियोन नु यरूसलेमम लीशो बाक्मा, मेकोपुकी “परमप्रभु के बाक्नीम” दे माइक्नीम। मेको आन नें यरूसलेमम ब्रौंइचा कली ब्रेक्सीशो बाक्नीम। यसैया ६:१३; प्रस्थान ३२:३२; भजन संग्रह ६९:२९; मलाकी ३:१६

4 परमप्रभु यावेमी सियोन डा तमी नु यरूसलेम डा मुर आन पाप निसाफ पतीक नु क्याम्तीकेमी क्याम्ताक्व हना,

5 मेना परमप्रभु यावेमी सियोन डांइम आ बाक्तीके खिं नु आ मुर गुम्तीक सेल्ब। मेकेर नाक्ती गोस्स नु कुन वोइश्शा, नाक्दो मी ब्रशो छेडछेड वोइक्ब। मिनु मेको छेडछेडम रागी नेल्ल कली सुम्ब। प्रस्थान १३:२१

6 मेको सुम्तीकेम नाक्ती नांम मनाप्पाइक्तीके, फश गिवार पवानु नु रेउ यिमेनु, फाम्सीतीके दुम्ब।

## 5

अडगुर रू डा कुम्सो

1 गो आं दाक्शो कली कुम्सो का पाइनुड। आ अडगुर रू आ पबंम कुम्सो का पाइनुड। आ दाक्शो के अडगुर रू का बाक्ब। आ अडगुर रू शुश ग्रेल्ब डांइम बाक्ब। यसैया ३:१४; येरमीया २:२१; मर्कूस १२:१-९

2 मिनु मेकोमी रू दोशा, फुल्लु गुप्शा ताइक्ताक्व। मिनु नेल्ल क्येडा रिम्शो अडगुर बोट खुम्तु। मेकोमी रू आ दातेमी खाल पतीक खिं का सेल्लु। मिनु मेकेर कोल का यो सेल्लु। मिनु अडगुर सिम्ब दे आस पाप्तु। तन्न ब्वाकी डा अडगुर कका सित्तेक्म।

3 यरूसलेमम बाक्ब नु यहूदा डा मुरपुकी, गो नु आं अडगुर रू आंस दातेमी निसाफ पने।

4 आं अडगुर रू कली गो नेल्ल पाता। गो मार मपडा डा? गो अडगुर सिम्ब, दे आस पा बाक्ती। तन्न मारदे ब्वाकी डा अडगुर कका सिम्मे?

5 मिनू मुल गो आं अडगुर रू कली मार पाइनुडा, इन कली देंनुड। आ थरपु नेल्ल ग्रुंडनुड। मिनू मार मार ओवनीम। आ गारो नेल्ल प्रेशशा ताइक्नुड। मिनू दिम्शा ताइशशा पाइनीम।

6 गो मेको कली खतम सेल्लनुड। मेको कली ममुंडनुड, मरोक्नुड। मिनू चू नु चोंक वाशा, सुन्मीम। गो गोस्स कली “रेउ मयिपतो” दे माइक्नुड।

7 मारदे हना मुर नेल्ल आन परमप्रभु यावे आ दाक्शो अडगुर रू इस्त्राएल आ खिं डा मुर नु यहूदा डा मुरपुकी बाक्नीम। मिनू मेकोम ठीक निसाफ पतीके रिम्ताक्व। तन्न दूली निसाफ पाम्तेक्म। ठीक पतीके रिम्ताक्व, तन्न मरिम्शो पतीके ला दुम्त।

### मुर आन मरिम्शो पशो

8 आबी, गे शुश खिं नु रू ग्याप्ब। नोले सुड मुर इ नेक्था मबाक्नीम। मारदे हना रू नु खिं नेल्ल इ के बाक्नीम। ब्यवस्था ५:२१

9 मुर नेल्ल आन परमप्रभु यावेमी “थमा पा इन खिं नेल्ल ब्रेत्नीम। मेको ब्रेशो खिं दारशो नु ठेयब बाक्तेक्म हना यो, मुर मबाक्नीम।

10 मिनू ५ बिगा अडगुर रूमी बाथ का अडगुर रस यूब। मिनू होमेर का वांचेरम एफाह का अन्न यूब” दैत। बाथ का २२ लिटर बाक्ब। होमेर का २२० लिटर बाक्ब। एफाह का २२ लिटर पुक्तीक का बाक्ब।

11 आबी, गे राकसी तूचा कली सुनी कना बोक्बपुकी, नाक्दो सम्म शांबू तूना तून दुक्शा बाक्नीनी।

12 बीना, तार पाइशो ठेयब ताप्तीके, खैजडी नु बांसुरी नेशा, शांबू दुक्नीनी। तन्न परमप्रभु यावे आ पशो प्रेशा ममिन्नीनी। आ गुड डा गेय मताइनीनी। आमोस ६:५-६; भजन संग्रह ४४:२

13 मोपतीके आं मुर मारेड मतुइक्थु आन रागी रे ग्याइशशा लाइक्चा पुंडसीनीम। मेको आन ठेयब मुरपुकी शोत्रलुम बेक्नीम। आन हुल शुश ब्वाक्कु तूतू दाक्नीम।

14 बेक्शो मुर आन बाक्तीकेम मेको आन कली दाक्चा कली आ शोत्र पाक्शो बाक्ब। मिनू यरूसलेम डा ठेयब मुर नेल्ल नु मेकेर रेयके पा बाक्ब नेल्ल नरक आ शोत्रम ओवनीम।

15 मुरपुकी बाप्शा, ब्रेम्शो दुम्नीम। ठेयब लेशो मुर आइक्च सेल्चा पुंडसीनीम।

16 तन्न मुर नेल्ल आन परमप्रभु यावे ठीक निसाफ पतीकेम ठेयब बाक्ब। मिनू आ का ला बाक्शो परमप्रभुम आ ठीक पतीके कोंडब। यसैया २:११,१७

17 मिनू पाठापुकी आंम रागीम खोदेशो पा जोइनीम। अर्को रागी डा मुरपुकीमी शोंप नु लीशो मारेड मारेड जाइनीम।

18 आबी, गे मरिम्शो पतीके कली जोल के डोरीम नु पाप कली ठेयब डोरीम पाइशशा, इन नोले कीनीनी।

19 गेपुकीमी “मेकोम आ गेय रीब पा पवल। मिनू गो ताइनय। आंइ तचा डा पा इस्त्राएली आन का ला बाक्शो परमप्रभु आ पचशो दुम्ल” देंनीनी। येरमीया १७:१५; २५नुस ३:४

20 आबी, मरिम्शो कली रिम्शो नु रिम्शो कली मरिम्शो देंबपुकी, छिडछिड कली छेडछेड नु छेडछेड कली छिडछिड देंबपुकी नु कशो कली जिज नु जिज कली कशो देंबपुकी श्येत जाइब बाक्नीनी।

21 आबी “गो जोक्ब तुइक्ब नु निम्स पाइशशा नड” देंबपुकी श्येत जाइनीनी। हितोपदेस ३:७ रोमी १२:१६

22 गेपुकी शांबू तूचा कली बोल्यो दुम्सु पाइनीनी। राकसी ब्वाइक्स जोक्ब बाक्नीनी।

23 गेपुकीम घूस जशा, ठीक मपाइब कली “ठीक पाइब बाक्ब” नु ठीक पाइब कली “ठीक मपाइब बाक्ब” देंनीनी। प्रस्थान २३:८

24 मोपतीके दोपा मीम टुटा नु सोत्रशो घांस नेक्बा, मोपा मेको आन शाक्श राक्ब। मिनू आन फू फुरक खोदेशो पा बेरशा लाइब। मारदे हना मेकोपुकीमी मुर नेल्ल आन परमप्रभु यावे आ लोत्र मटीम। मिनू इस्त्राएली आन का ला बाक्शो परमप्रभु आ लोत्र आ परबम शुक्शी पाम्तेक्म।

25 मोपतीके परमप्रभु यावे आ मुर आन परबम गाइक्ताक्व। मिनू आ गुड क्युक्शा, मेको आन कली तुप्तु। मिनू डांटापुकी खिनु कुशा हिम्साक्म। शुश मुर आन बेक्शो रां लामी ताइशशा खोदेशो दुम्तेक्म।

मोपा आ गाडक्चा मबेक्थु, मुल सम्म आ गुड क्युक्स डा क्युक्स बाक्ब। यसैया ९:१; यसैया १६:२०; यसैया १०:४

26 मेकोमी छेदर क्युक्शा डोन रागी डा मुर आन कली ब्रेप्ब। मिनु रागी आ सुर डा मुर आन कली लाप पा ब्रेप्ब। मिनु मेकोपुकी रीब पा जाक्नीम।

27 मिनु मेको आन दातेमी सुइ मदाइनीम। दाइल मपांडसीनीम। मगोल्नीम। मिनु मइप्नीम। मेको आन किप्शुर मब्रुइक्ब, आन जुत्ता डा डोरी यो मब्रुइक्नीम।

28 मेको आन ब्रा हेरशो बाक्नीम। आन लिब्रा आप्चा कली खुक्शो बाक्नीम। आन शारा मी आ झिल्ला खोदेशो बाक्नीम। आन बग्गी आन गुगील फश गिवार खोदेशो बाक्नीम।

29 मेको आन रेयके गुप्स आन ग्रीशो खोदेशो बाक्ब। मेको गुप्स आ चाइक्ब खोदेशो पा डरर डरर पाइनीम। मेको आन सिखार कली सुइम प्रॉइने मचाप्नीम।

30 मेको नाक्ती समुन्द्र डा ब्वाक्कु ग्रीशो खोदेशो पा, इस्राएल डा मुर आन तारी रेयके पाइनीम। सुइम मेकेर कोव्रतेक्म हना, छिडछिड नु श्येत ला ताइनीम। गोस्सुमी छेडछेड कली सुम्ब।

## 6

### परमप्रभुमी यसैया कली ब्रेरशो

1 मिनु पिप उज्जीयाह बेक्शो बर्सम, गो परमप्रभु यावे कली इर डा ठेयब नित्तीकेमी निरशो ताता। आ वा आ सुरमी आ खिं नेल्ल ब्रीशो बाक्त। २इतिहास २६:२२

2 मेको आ इर गे स्वर्ग डा गेय पाइब सेराफ बाक्शो बाक्तेक्म। मेको आन के ६, ६ ओटा फ्रां बाक्तेक्म। मिनु फ्रां निक्शीमी आन कुल सुम्शो बाक्तेक्म। फ्रां निक्शीम आन खोइली सुम्शो बाक्तेक्म, फ्रां निक्शीमी बेरबाक्तेक्म। १राजा २२:१९

3 मिनु सेराफ कामी अर्को सेराफ कली “मुर नेल्ल आन परमप्रभु यावे का ला ठेयब सक्ति पाइरशो बाक्ब। रागी नेल्ले आ छेडछेडम ब्रीशो बाक्ब” देंत। प्रकाश ४:८

4 मेको आन ब्वाक्शो रेयकेमी परमप्रभु यावे आ खिं डा जग हिम्सीशा, कुनम ब्रीत।

5 मिनु गो “आबी, मुल बेक्ब दुम्ती। मारदे हना गो मरिम्शो लोत्र पाइब बाक्ती। मिनु मरिम्शो लोत्र पाइब आन दातेमी बाक्शो बाक्नुड। मो हना यो गो मुर नेल्ल आन परमप्रभु यावे, पिप कली ताता” देंती। प्रस्थान ३३:२०

6 मिनु सेराफ का थनारोम चढेतीक डा मी गुप्शा, आं नेक्था जाक्त।

7 मिनु मेकोमी आं शोत्र मीम थिपाइरशा “मुल एको मीम इ शोत्र थिप्तु, इ दोस ततीक लोत्र नु इ पाप क्याम्साक्ब” देंत।

8 मिनु परमप्रभु यावेमी “गो सु कली सोइक्नुडा? आंइ पर्वम सु लाइबा?” दे लोत्र पशो नेंता। मिनु “गो बाक्ती। आं कली सोइक्तीनी” देंती।

9 मिनु आं कली “लावो। मेको मुर आन कली ‘नोफा दाइरशा नेंशा यो, मरुप्ब दुमीन। कोव्रशा यो, मतुइक्ब दुमीन’ देनो। मती १३:१०-१५; यूहन्ना १२:४०; प्रेरित २८:२६-२७

10 मेको आन थुं खकटा सेलो। आन नोफा मनेब नु आन मिक्च मताइब सेलो। मोदेशो दुम्शा, मेको आन मिक्च मताइब नु नोफा मनेब दुम्नीम। मोदेशो मदुम्त हना, मेको आं गे लेत्नीम। मिनु गो मेको आन कली सापाइक्चा माल्नुड” देंत। ब्यवस्था २९:३; रोमी ११:८

11 मिनु गो “परमप्रभु, गेना सम्म मो पचा माल्नुडा?” देंती। मिनु मेकोमी “सहर ब्रेरशा मुर मबाक्तीके मदुम सम्म, खिं नेल्ल श्येतथ नु रागी नेल्ल मुर मबाक्शो मदुम सम्म मोदेशो पावो।

12 गो मुर आन कली डोन मखेरुमी सम्म नु सहर शुश प्रॉइशो मदुम सम्म मो पचा माल्नुड।

13 मिनु १० भागम भाग का मुर लीतेक्म हना, मेकोपुकी यो चोचा पुंडसीनीम। ठेयब नु बोल्यो रवा तिम्ला हना यो, आन टुटा लीब। मेको लीशो टुटा आं मुर, इस्राएल आ वांचेर बाक्नीम” देंत। आमोस ५:३; यसैया ७:३; यसैया १०:२०-२१



## 7

यसैयाम आहाज आ थुं बारपाइशो

1 आहाज यहूदा डा पिप बाकत। मेको योथाम आ तौ नु उज्जीयाह आ चच बाकत। आहाज आ सासन पची ना अराम डा पिप रेसीन नु इस्त्राएल डा पिप रेमाल्याह आ तौ पेकाह लडाइ पथ यरूसलेम जाक्ताक्स। तन्न ग्राने मचाप्बेम। २राजा १६:५

2 मिनु मुरपुकीम दाऊद आ खिं डा मुर आहाज कली “अराम डा लडाइ पाइबपुकी एफ्राइम नु गारशा जाक्तेक्म” दे शेंताक्म। मेको नेंशा आहाज नु आ मुर, फशेम रवा हिम्शो खोदेशो पा आन थुं हिम्सीमा बाकत।

3 मिनु परमप्रभु यावेमी यसैया कली “गे नु इ तौ शेआर-याशुब आहाज कली गुमथ लसे। गे मेको कली आइक्था दोम्ली रे ब्वाक्कु यितीके, वा मुरब आन गेय पतीके डा ठेयब लांम थिन्तीसी।

4 मिनु गे मेको कली ‘होस पा, सिक्सी पा बाक्कीन। महिनीन। इन थुं ग्येथ लुक्च मपपतीन। मेको कुन पाइब बुल्सी रेसीन, अराम नु रेमाल्याह आ तौ पेकाह, आन गाइशो तशा, महिनीन। इन थुं ग्येथ लुक्च मपपतीन। यसैया ३०:१५;

5 मारदे हना अराम, एफ्राइम आ मुर नु रेमाल्याह आ तौ पेकाह नु गारशा, इ कली मरिम्शो पचा कली मिम्शो बाक्नीम।

6 मेकोपुकीमी गोपुकी यहूदा लशा, यरूसलेम कली पुम्शा, ग्राशा ताबेल आ तौ कली मेकेर डा पिप सेल्य’ देंतेक्म।

7 मोपतीके परमप्रभु, परमप्रभु यावेमी मार देंब देशा हना ‘मेको आन मिम्शो मदुम्ब। मो पचा मताइनीम।

8 मारदे हना अराम आ पिया दमस्कस बाक्ब। मिनु दमस्कस आ पिया रेसीन बाक्ब। मिनु ६५ बर्स नोले एफ्राइम खतम दुम्शा, मलीब।

9 एफ्राइम आ पिया सामरीया बाक्ब। सामरीया आ पिया रेमाल्याह आ तौ बाक्ब’ गे थमा मसुडक्तीनी हना, थमा पा मलीनीनी” दे परमप्रभु यावेमी देंत। २इतिहास २०:२०

परमप्रभु आ चिन्ड इम्मानुएल

10 मिनु परमप्रभु यावेमी लेंशा आहाज कली

11 “इन परमप्रभु यावे, इन परमप्रभु कली चिन्ड का पुंइदीन। उइ बेक्शो मुर आन बाक्तीक रे हना यो, इर सरीड रे हना यो चिन्ड का पुनीन” देंत।

12 तन्न आहाजमी “गो मपुंइनुड। परमप्रभु यावे आ थुं मथाम्नुड” देंत।

13 मिनु यसैयामी “दाऊद आ खिं डा मुर नेनीन। मुर आन कली दपाइशो खोदेशो पा, आं परमप्रभु कली यो दपाइक्नीनी?

14 मोपतीके परमप्रभुमी इन कली चिन्ड का गेब। मेको चिन्ड मार बाक्ब देशा हना, कन्ने मीश आलम कोव्रज कुरशा तौ का थीब। मेको आ नें इम्मानुएल वोइक्नीम। मती १:२३

15 मेको दहि नु खुदो जची ना रेन रिम्शो पचा नु मरिम्शो मपचा तुइक्ब दुम्ब।

16 मिनु मेको वोंइश आलम मरिम्शो मपचा, रिम्शो पचा तुइक्चा क्येडा डोंइती, इन कली हिंपाइक्ब पिप आस रागी श्येथ दुम्ब।

17 परमप्रभु यावेमी अस्सुर डा पिप आ गुइ रे इन कली, इन मुर आन कली नु इन खिं डा मुर आन कली हिंचा डा श्येत गेपाइक्ब। मोदेशो श्येत एफ्राइम यहूदा रे ब्राम रे गेनायो मदुम्शो बाक्ब” देंत।

यहूदा कली श्येत गेशो

18 मेको नाक्ती परमप्रभु यावेमी इजीप्त डा नील खोला डा चुरमु नु अस्सुर रागी डा सुरब आन कली लाप पा ब्रेप्ब।

19 मेकोपुकी जाक्शा, बेसीम, रोगु आ कापम, चू बुटा तारी नु बस्तु भाव योव्रतीक नेल्लेम बाक्नीम।

- 20 मेको नाक्त परमप्रभुमी युफ्रेटीस खोला आइक्की हांबु रे क्येट थाप्शा चाकशो छोराम, अस्सुर डा पिपमी पिया डा चां नु गिरशी प्रेक्पाइक्ब। मेको छोरामी गाल शोक्ते यो प्रेक्पाइक्ब। २राजा १५:२९
- 21 मेना मुर कामी बी का नु भेडा निकशी थुल्ब।
- 22 मिनु शुश दूध चिम्शा दहि जाइब। मारदे हना मेको रागीम लीशो मुर नेल्लेमी दहि नु खुदो जाइनीम।
- 23 मेना हजार का शेकेल चांदी लाइब हजार का अडगुर बोट खुम्शो रूम चू नु चोंक वानीम। शेकेल का ११.५ ग्राम डा चांदी के क्येट बाक्ब।
- 24 मोपा चू नु चोंक बाक्तीके, मुरपुकी लिब्रा कुरशा मेकेर लाइनीम।
- 25 डोंइती डांडा डा दोशा खुम्शो रूपुकी मेना चू चोंकम सुम्तीके मुरपुकी हिंशा, मेकेर मलाइनीम। बी ब्यफ नु क्यारश भेडा आन कली दिम्पाइक्का कली सोइक्नीम।

## 8

### परमप्रभु आ लोत्र पाइब आ तौ

- 1 मिनु परमप्रभु यावेमी आं कली “गे ठेयब कागज का चाक्को। मिनु रिम्शो पा रुप्चा डा पा ‘माहेर-शालाल-हाश-बाज’ ब्रेक्ते” देंत। माहेर-शालाल-हाश-बाज आ अर्थ गा पा शुश रोइक्का बाक्ब।
- 2 मिनु गो जोल मपाइब सांकछी निकशी चढ़ेब उरीयाह नु येबेरेकीयाह आ तौ जकरिया आस कली वोइक्तासी।
- 3 मिनु गो आं मीश नु बाक्ती। मिनु मेकोमी कोव्रज कुरशा तौ का थिप्तु। मिनु परमप्रभु यावेमी आं कली “मेको आ नें माहेर-शालाल-हाश-बाज वोतो।
- 4 मारदे हना मेको आलम आम आफ देस जोक्का क्येडा डोंइती दमस्कस डा शोंप नु सामरीया डा रोइश्शो नेल्ले अस्सुर डा पिपम लाइक्ब” देंत। यसैया ७:१८; २राजा १६:९
- 5 मिनु परमप्रभु यावेमी आं कली लेंशा
- 6 “मेको मुरपुकीम शीलोआ डा रिम्शो ब्वाक्कु प्रोंइनीम। रेसीन नु रेमाल्याह आ तौ आस क्येडा हिंशा, मेको आस नोले खोइक्तेक्म।
- 7 मोपतीके गो यहूदा डा मुर आन कली श्येत गेपाइक्का कली युफ्रेटीस खोला डा ब्वाक्कु खोदेशो पा अस्सुर डा पिप नु आ लडाइ पाइब शुश आन कली चाक्नुडमी। मिनु मेको खोला बारशो खोदेशो पा आ एर ओंथ नेल्ल सुम्नीम।
- 8 मिनु मेको बारशा, यहूदा आ शुर सम्म जाक्दीत्नीम। आ लडाइ पाइबपुकीमी हाम्शो फ्रॉम खोदेशो पा इन रागी नेल्ल सुम्नीम। तन्न इम्मानुएल, परमप्रभु यावे गे नु बाक्ब” देंत। इम्मानुएल आ अर्थ “परमप्रभु यावे गे नु बाक्ब” देशो बाक्ब। यसैया ७:१४

### यहूदा नु रागी डा मुर आन कली शेंशो

- 9 गे रागी रागी डा मुर गारशा सुर्ता पने। गे खतम दुम्पाइक्का पुंडसीनीनी। गे डोन रागी डा मुर नोफा दाइश्शा नेनीने। लडाइ पचा कली किप्शुर किम्सीन। मिनु हिनीन। लडाइ पचा कली ठीक दुमीन। मिनु सुर्ता पने।
- 10 गे सल्ला पा लोत्रसी गारपाइक्कीनी, तन्न मेको शोर गाक्शो दुम्ब। लोत्र पने, तन्न इन लोत्र मगाप्ब। मारदे हना परमप्रभु गो नु बाक्ब।
- 11 मिनु परमप्रभु यावेमी आं गुइ ग्याइश्शा आं कली लोत्र पा “गे मेको मुर आन खोदेशो मपावो। मेको आन लॉम मगाक्को।
- 12 मुरपुकीम अरु आन पर्वम खुइश्शा मरिम्शो गेय पाइनीम। गे मोदेशो मपने। मेको मार तशा हिनीमी, गे मेको तशा महिनीन। इन थुं ग्येत्थ लुक्च मपपतीन।
- 13 मुर नेल्ल आन परमप्रभु यावे ला मिम्शा, मेको क्येडा हिनीन। मेको कली मान पा हिनीन। मत्ती १०:२८

14 परमप्रभु इन कली नेल्ल क्येडा डोंइती डा मिम्तीके दुम्ल। तन्न इस्राएल आ खिं निक्की डा मुर आन कली दाइल पाइक्तीके नु लां तेक्तीके फुल्लु दुम्ब। मेको यरूसलेम डा मुर आन कली रेप्पाइक्ब ब्वारद दुम्ब। रोमी ९:३३

15 मिनु मुर शुश दाइल पाइशशा गोल्ला, ब्वारदम रेशशा, ग्याइक्चा पुंडसीनीम।

16 आं दैशो लोत्र आं शेंसीब आन कली ला नेंपाइक्चा कली छाप थोकशा, वोतो” दे माइक्ती। दानीएल १२:४

17 मिनु गो याकूब आ खिं डा मुर आन क्येडा आ कुल खुइक्ब परमप्रभु यावे आ लां कोत्रशा, रिम्शा बाक्नुड।

18 मुर नेल्ल आन परमप्रभु यावे सियोन डांडाम बाक्ब। परमप्रभु यावेमी आं कली नु आं कली गेशो आलपुकी इस्राएली आन दातेमी चिन्ड नु कोंइतीक सेल्लतीकी। यसैया ८:३; यसैया ७:३; हिबू २:१३

19 मिनु मुरपुकीमी इ कली “बेक्शो मुर आन कली हिल्लो पावो। लिक्वु कोत्रब चाक्को। वोल आन कली लोत्र पपतो” दे लोत्र पाइनीम। मेको वोल आन रेयके नेंसीब। मिनु मार, सेस मुर आन पर्वम बेक्शो मुर आन कली हिल्लो पचा? मुरपुकीमी आन परमप्रभु कली हिल्लो पचा ममाल्नीमी डा? २राजा १:३

20 गे शेंतीक नु अरेशो लोत्र आ पर्वम परमप्रभु कली हिल्लो पचा माल्नीनी। अरु लोत्र पाइब मुर काइ मरुप्ब बाक्नीम।

21 मेकोपुकी एको रागीम श्येत जशा, शोत्रलु बेक्शा हिरनीम। मिनु शोत्रलुमी गाइशशा, ग्येत्थ गे कोत्रशा, आन पिप नु परमप्रभु कली सराप पाइनीम।

22 मेकोपुकीमी खप गे कोत्रशा, आन पिया खुक्नीम। मिनु मेकेर श्येत नु छिडछिड ताइनीम। हिंचा डा श्येत थम क्येर नाक्दो ला ताइनीम। मेको आन दातेम छेडछेड मबाक्ब। मिनु आन थुं लुकच लाइब।

## 9

### श्येत रे प्रोंइशो

1 शुश हिबपुकी नोले छिडछिडम मगाक्नीम। डोंइती परमप्रभु यावेमी जबूलून नु नाप्ताली आस रागी महिक्सीशो सेल्लु। तन्न नोले मेकोमी यर्दन आ आइक्ची हांब, समुन्द्र आ नेक्था डा नु रागी रागी डा मुर आन गालील रागी रिम्शो सेल्लब। भजन संग्रह १०७:१०-१४; २राजा १५:२९; मत्ती ४:१२-१६

2 छिडछिडम गाक्बपुकीम टेयब छेडछेड ताइनीम। थम छिडछिड डा रागीम बाक्ब आन तार थम छेडछेड दुम्ब।

3 परमप्रभु, गे रागी रागी डा मुर आन कली सोशा बोशा दुम्पाइक्तीनी। मेको आन कली थाम्पान ग्येरपाइक्तीनी। मेको आन कली इन डोंइती बाली नाली ओइची ना खोदेशो पा ग्येरपाइक्तीनी। लडाइ प्राशा, आन रोइशो मार मार योक्सीची ना खोदेशो पा ग्येरपाइक्तीनी।

4 मेको आन हेल्लो जुवा, मेको आन बला डा भार नु मेको आन कली दिप्ब मुर आन कोक्के जिकताक्नी। गे मिदयान रागी डा लडाइम खोदेशो पा मेको आन कली युक्ब आन युक्तीके जिकतीनी। भजन संग्रह ८१:७; न्यायाधीस ७:१४; न्यायाधीस १५:२२

5 मारदे हना लडाइ पाइब आन जुत्ता नु आन फेक्तीक वा नेल्ल हुश लुम्सीशो बाक्नीम। मेको मीम चोतीक दुम्नीम।

6 मारदे हना आंइ कली आल का थिशो बाक्ब। तौ का गेशो बाक्ब। मेको आंइ कली रिम्शो पा सासन पाइब दुम्ब। मेको आ नें मार बाक्ब दैशा हना, छक लाक्चा डा गेय पाइब, जोक्तीक तुइक्तीक अर्ती गेब, सक्ति पाइशशो परमप्रभु, गेना हना यो बाक्ब आफ नु थुं नाइशशा बाक्चा गेब पिप बाक्ब। यसैया २२:२२; मीका ५:१; मीका ४:३

7 मेको आ अधिकार गेना हना यो बारब। दाऊद आ राज्य कली गेना हना यो थुं नाइक्तीके दुम्ब। मेको आ राज्य गेना हना यो ठीक निसाफ नु ठीक पतीकेमी बाक्ब। मेको मुर नेल्ल आन परमप्रभु यावेमी पाइब। २सामुएल ७:१२-१३; लूका १:३२; यसैया ११:१-५; भजन संग्रह ७२:३-४

परमप्रभु इस्राएल आ पबर्म गाइशशो

8 परमप्रभुमी याकूब कली लोत्र का सोइशशो बाक्त। मेको इस्राएल रागी कली दुम्त।

9 मिनु मेको एफ्राइम नु सामरीयाम बाकब नेल्लेम तुडक्ताकम।

10 मेकोपुकीमी ठेयब लेशशा “इंटांम सेल्शो खिं नेल्ल ब्रेत्तेकम। तन्न गोपुकीमी चेम्शो फुल्लुम लेंशा सेल्नीकी। आइक्च रवा नेल्ल तिम्तेकम। तन्न मेकेर ठेयब दुम्ब रवा खुम्नीकी” देंनीम।

11 मोपतीके परमप्रभु यावेमी मेको आन कली श्येत गेब पोक्ब। मिनु मेको आन जोरी सत्रु आन कली “गो लडाइ ग्रानीकी” दे मिम्पाइक्ब।

12 मिनु अराम डा मुर नु रेसीन पूबं रे नु पलिस्ती डा मुर पच्छिम रे जाक्शा, मेकोपुकीमी शुश पाक्शो शोत्रमी खोदेशो पा इस्राएली आन कली दाक्नीम। मोपा यो परमप्रभु आ गाइशशो मनाइक्थु, आ गुइ दिंस डा दिंस बाक्त।

13 मो हना यो मुर आन कली तुप्ब गे मलेम्म। मिनु मेकोपुकीमी मुर नेल्ल आन परमप्रभु यावे कली ममाल्नीम। यसैया १०:३३

14 मोपतीके परमप्रभु यावेमी इस्राएल रे पिया नु मीलु क्योरतु। खजूर रवा आ राशी नु बुदी मीलु घांस काबुमीन क्योरतु।

15 खाल्पा नु हुकुम पाइबपुकी पिया नम। जोल पा परमप्रभु यावे आ लोत्र पाइबपुकी चहिं मीलु नम।

16 मारदे हना इस्राएल डा मुर आन कली शेंबपुकीमी हेंथे लां गाक्पाइक्तेकम। मिनु आन शेंशो नेंबपुकी लां मतुडक्ब दुम्तेकम।

17 मोपतीके परमप्रभु यावेम मेको आन वोंइश आल आन कली तशा, शिशी मपावो। मेको आन रोम रोइक्च नु वोंइश बेक्शो मीश मुर आन कली तशा यो शिशी मपावो। मारदे हना मेको नेल्ल परमप्रभु आ अरेशो मटीब दुम्शा, काइ मरिम्शो पाइब ला बाक्तेकम। मिनु नेल्लेमी मरिम्शो लोत्र पाम्तेकम। मोपा यो परमप्रभु आ गाइशशो मनाइक्थु, आ गुइ दिंस डा दिंस बाक्त।

18 परमप्रभु यावे आ अरेशो लोत्र मटीब मी खोदेशो पा ब्राइब। मिनु मेकोमी चू नु चोंक नेल्ल नेक्ब। मिनु मेको ब्वाकीमी कोक्त बुद पा ब्राइब। आ कुन गोस्स खोदेशो पा रोम्सीशा सरीड गे लाइब।

19 मुर नेल्ल आन परमप्रभु यावे आ गाइशशोमी रागी नेल्ल ग्रोइशशो बाकब। मिनु मुरपुकी चोतीक शी खोदेशो दुम्तेकम। सुइम सुइ आन कली वारच मपामे।

20 मेकोपुकीमी ग्युरा गे डा रोइक्ताकम। तन्न शोत्रलु बेक्तेकम। आन पेरा गे डा ब्वाम्तेकम। तन्न मरूम। मिनु आंम आन खिं डा मुर आन श्ये ब्वाम्तेकम।

21 मनस्सेमी एफ्राइम कली ब्वाप्तु। मिनु एफ्राइममी मनस्से कली ब्वाप्तु। मिनु मेको निकशी यहूदा नु लडाइ पाम्ताक्स। मोपा यो परमप्रभु आ गाइशशो मनाइक्थु, आ गुइ दिंस डा दिंस बाक्त।

## 10

1 आबी, सु सुमी ठीक मदुम्शो ऐन कानुन सेल्नीमी, मुर आन कली दिप्चा डा अरेशो लोत्र ब्रेक्नीमी, यसैया ५:८-२३

2 क्येट मथीब आन कली ठीक निसाफ मपाइनीमी, आन मुर आन दाते डा पुडग आन कली ठीक मपाइनीमी, मेकोपुकीम वोंइश बेक्शो मीश मुर आन मार मार योल्नीमी, रोम रोइक्च आन बाक्शो नेल्ल रोइक्नीम।

3 मिनु सजाइ गेतीक नाक्तीमी मार पाइनीनी? डोन रे जाक्शो हिंचा डा श्येतमी मार पाइनीनी? “वारच पाइय्यीनी” दे सु आ बाक्तीके प्रोक्नीनी? इन शोंप ते वोइक्नीनी?

4 मेको नाक्ती पाइशशो मुर आन दातेमी मबाक्चा नु साइक्चा मपुंइसीचा कली ते प्रोक्नीनी? परमप्रभु आ गाइशशो मनाइक्थु, आ गुइ दिंस डा दिंस बाक्त।

अस्सुर कली सजाइ

5 आबी, अस्सुर रागी, गे आं गाइक्तीक डा कोर्रा, आं गाइक्तीके कोक्के कुरब दुम्ते। यसैया १०:१५

6 गो अस्सुर कली आं कली मटीब रागी कली लडाइ पथ सोइक्नुड। अस्सुर कली आं कली गाइक्पाइक्ब मुर नु सोइक्नुड। मारेइ मारेइ रोइक्पाइक्चा कली सोइक्नुड। मिनु मेको आन कली लांम दिम्पाइक्चा कली सोइक्नुड।

7 तन्न अस्सुरम मेको आ थुंम मवोइक्थु, मोदेंशो ममिम्त। आ थुंमी खतम पोक्चा नु रागी रागी क्यान्चा ला बाक्त।

8 मिनु अस्सुरमी “आं कप्तान नेल्ल पिप मनमी डा?

9 मार, काल्नो सहर कारेकेमीश खोदेंशो ममाइ? हमाथ, अरपाद खोदेंशो ममाइ? मिनु सामरीया दमस्कस खोदेंशो ममाइ डा?

10 मिनु गो दोपा मूर्तिम ब्रीशो रागी ग्राडा, मोपा गो मेको आन क्येडा आइक्च मूर्ति बाक्शो रागी यरूसलेम नु सामरीया कली ग्रानुड। २राजा १८:३२-३५

11 मिनु गो सामरीया नु आ मूर्ति आन कली दोदेंशो पडा, मोदेंशो यरूसलेम नु आ मूर्ति आन कली मपाइनुडा डा?” दैत।

12 मिनु परमप्रभुमी सियोन डांडा नु यरूसलेमम पशो गेय थुमा नोले मेकोमी अस्सुर डा ठेयब लेशो नु बोरशो पिप कली सजाइ गेब। यसैया ३७:३६

13 मारदे हना मेकोमी “गो आं सक्तिमी पाता। गो आं तुइक्तीके नु रुप्तीक थुंमी मोदेंशो पाता। गो रागी रागी डा सांद याक्ताक्ड। मेकेर डा मुर आन शोंप नु मारेइ मारेइ रोइक्ताक्ड। गो आं ठेयब सक्तिमी मेको आन पिप आन कली लुक्च सोइक्ताक्डमी।

14 मिनु गो प्रोंइशो चिक्ब आन ग्योव खोदेंशो पा बाक्तीक नु मुर आन शोंप थित्ता। गो चिक्बीम प्रोंइशो व्बोफु खुप्शो खोदेंशो पा, रागी रागी कली खुप्ताक्ड। मिनु फ्रां हिकशा, तेक्ब सुइ मबाक्म। मिनु सुइम मारेइ मदेंम” दैत।

15 खा क्येडा खा चलेब ठेयब बाक्बा डा?। आरा क्येडा आरा कीब ठेयब बाक्बा डा?। मोदेंशो मदुम्त हना कोक्केमी कोक्के गुप्ब कली याम्पाइक्बा डा?। मिनु शीमी शी कली गुप्ने चाप्बा डा?। यसैया १०:५

16 मोपतीके परमप्रभु, मुर नेल्ल आन परमप्रभु यावेमी अस्सुर डा दोम्शो लडाइ पाइब मुर आन कली बेक्तीक रोइ सोइक्नुड। मिनु मेको आन रां चोशो खोदेंशो पा जेशा नुप्ब।

17 मिनु इस्राएली आन छेडछेड मी दुम्ब। मिनु आन का ला बाक्शो परमप्रभु नाप्पाइक्ब दुम्ब। मिनु मेकोमी आन चू नु चोंक काबुमी नेक्पाइक्ब। ब्यवस्था ४:२४

18 मिनु ब्वाकी डा दारस नु फल फुल नेल्ले मुर खोदेंशो पा सोव्रना सोव्रन लाइनीम। मेको आन रां नु थुं निम्फा खतम दुम्नीम। रोइ पाइब मुर ओंखां पा बेक्शा लशो खोदेंशो पा बेक्शा लाइनीम।

19 मिनु मेको आ ब्वाकी डा लीशो रवा शुश मबाक्नीम। मेको आल कामी यो हिकशा ब्रेक्ने चाप्ब।

### मुर का निक्शी ला लेत्नीम

20 मिनु मेको नाक्ती इस्राएल डा लीशो मुरपुकी नु याक्ब आ खिं डा प्रोक्शा ब्रोंइशो मुरपुकी लेंशा, आंम कली तुप्ब गे मलाइनीम। तन्न मेकोपुकी थमा पा परमप्रभु यावे, इस्राएली आन का ला बाक्शो परमप्रभु आ नोले खोइक्नीम। यसैया ६:१३; यसैया ७:३

21 मिनु का निक्शी याक्ब आ मुरपुकी सक्ति पाइशो परमप्रभु गे लेत्नीम।

22 इन इस्राएल डा मुर समुन्द्र डा बाल्वा खोदेंशो पा शुश बाक्तेक्म हना यो, का निक्शी ला लेत्नीम। अरु चहिं नेल्ल साइक्चा पुंइसीनीम। मिनु ठीक पतीक ठेयब दुम्ब। रोमी ९:२७

23 मारदे हना परमप्रभु, मुर नेल्ल आन परमप्रभु यावेमी डोंइती आ देंशो खोदेंशो पा रागी नेल्ल खतम सेल्ब। यसैया २८:२७

24 मोपतीके परमप्रभु, मुर नेल्ल आन परमप्रभु यावेमी “सियोनम बाक्ब, आं मुरपुकी अस्सुर डा मुर क्येडा महिनीन। इन कली इजीप्तम खोदेंशो पा कोक्केम तुप्तेक्म हना यो, महिनीन।

25 मारदे हना इक्का नोले इन पर्वम आं गाइशो नुप्ब। मिनु अस्सुर डा मुर आन कली गाइशो साइक्नुडमी” दैत।

26 मुर नेल्ल आन परमप्रभु यावेमी मेको आन कली कोराम युक्ब। मेको ओरेब डा सेरथे फुल्लु आ नेक्था डा लडाइम मिदयान कली फुशो खोदेशो दुम्ब। मेकोम इजीप्तम खोदेशो पा आ कोक्के समुन्द्र तार दिंब। न्यायाधीस ७:२५; भजन संग्रह ८३:१०; प्रस्थान १४:२६-२७

27 मेना इन कली गेशो श्येत नुप्ब। मिनु इन शुर डा जुवा दोक्शा जिकब।

28 इन जोरी सत्रु रिम्मोन रे जाक्शो आइयाथम जाक्दीत्तेक्म। मिग्रोन लशा, मिकमाश सहरम आन मार मार वोइक्नीम।

29 मिनु डांडा रे पा लशा, गिबाम बास बाक्नीम। रामाह हिंशा खिंखि पाइब। सावल आ सहर गोबा डा मुर प्रोक्नीम।

30 गाल्लीम डा तमीपुकी ठेयब सेंदा पा ग्रीडीन। गे लाइशाह डा मुर नेनीन। अनाथोथ डा मुर मेको आन कली लोत्र लेत्तीन। १सामुएल २५:४४

31 मादमेनाह नु गेबीम डा मुर ब्रोंइचा कली प्रोक्नीम।

32 मेकोपुकी मुलाक्ती नोबम बाक्नीम। मिनु मेकोपुकीमी सियोन डांडा डा तमी नु यरूसलेम आ डांडा गे आन गुइ क्युक्शा, हिंच कोइनीम। १सामुएल २१:२

33 मिनु परमप्रभु, मुर नेल्ल आन परमप्रभु यावेमी मेको आ राशी हिंचा डा सक्तिम खोइक्ब। नेल्ल क्येडा लाइशो रवा तिम्ब। ठेयब लेशो आन कली आइक्च सेल्ब।

34 मेकोमी ब्वाकी डा रवा आन कली खाम तिम्ब। लेबानोन डा ठेयब लाइशो रवा नेल्ल दिम्नीम।

## 11

### यावे आ सोइशो शिप

1 येस्से आ टुटा रे ठोसा का दाप्ब। मेको आ शाक्श रे वाशो राशीम फल फुल सिप्ब।

2 मिनु परमप्रभु यावे आ सोक्त मेको तारी नाइशशा बाक्ब। मेको जोक्ब तुइक्ब नु रुप्तीक सोक्त बाक्ब। अर्ती गेब नु सक्ति गेब सोक्त बाक्ब। मेको जोक्तीक तुइक्तीक थुं गेब नु परमप्रभु यावे कली मान पा हिंब सोक्त बाक्ब।

3 मेको आ दाक्शो परमप्रभु यावे कली मान पा हिंचा बाक्ब। मेकोमी मुर आन थुं कोत्रशा निसाफ पाइब। सुइ आन लोत्र मनेंथु निसाफ पाइब।

4 ठीक पतीकेमी पुडग आन कली निसाफ पाइब। रागी डा आइक्च नु ठेयब मुर नेल्ल आन कली उइक्थ पा निसाफ पाइब। मिनु रागी डा मुर आन कली आ लोत्रमी तुप्ब। परमप्रभु यावे आ अरेशो लोत्र मटीब आन कली मुइशशा साइक्ब। रथिस्सलोनिकी २:८

5 मेको आ ठीक पतीके आ किप्शुर किप्शो खोदेशो बाक्ब। मेको थमा पा थमा सुइक्तीक आ किप्तीक बाक्ब।

6 मेना फर नु पाठा काथा बाक्नीम। जोइ क्यारश आ पाठा नु इप्ब। बाछा नु गुप्स आ चाइक्ब काथा जोइनीम। आइक्च आलमी मेको आन कली योत्रब। यसैया ६५:२५

7 बी नु वां काथा जोइनीम। मेको आन चाइक्बपुकी काथा बाक्नीम। गुप्समी ब्यफ खोदेशो पा नल ब्वाइब।

8 मिनु दूध तूब आल बुस्स आन पोत्रलाम ग्यारनीम। दूध प्रोंइशो आलमी बीस पाइशो बुस्स आन बाक्तीकेम गुइ शुइक्नीम।

9 आं डांडामी मारेइ श्येत नु खतम दुम्तीके मबाक्ब। मारदे हना दोदेशो पा ब्वाक्कुम समुन्द्र ब्रीबा, मोदेशो पा परमप्रभु यावे कली तुइक्तीकेम रागी नेल्ल ब्रीब।

### इस्राएल नु यहूदा डा लीशो मुर

10 मिनु मेको नाक्ती येस्से आ शाक्श जात जात डा मुर आन कली चिन्ड दुम्ब। मिनु रागी रागी डा मुर नेल्लेमी मेको कली हिल्लो पाइनीम। मेको आ बाक्तीके छेडछेडम बाक्ब। रोमी १५:१२

11 मेना परमप्रभुमी आ लीशो मुर आन कली लेंशा प्रोंइशा चाक्ब। मिनु ते रे प्रोंइशा चाक्ब देंशा हना, अस्सुर, इजीप्त, पथ्रोस, एथीयोपीया, एलाम, शिनार, हमाथ नु समुन्द्र आ नेक्था रे प्रोंइशा चाक्ब। इजीकीएल ३७:२१-२२

12 मेकोमी रागी रागी डा मुर आन कली चिन्ड का वोइक्व। मिनु इस्राएल डा प्रोक्शो मुर आन कली खुव्ब। यहूदा डा ब्रशो मुर आन कली यो तेइ तेइ रे खुव्ब।

13 एफ्राइम आ गेहे पतीके जाम्शा लाइब। यहूदा कली श्येत गेब साइक्वा पुंडसीनीम। मेना एफ्राइममी यहूदा कली गेहे मपाइब। मिनु यहूदामी यो एफ्राइम कली श्येत मगेब।

14 मिनु मेको निक्शी पलिस्ती नु लडाइ पचा कली पच्छिम गे बारनीस। मेकोपुकी गारशा, पूर्ब डा मुर आन मारेइ मारेइ रोइक्नीम। एदोमी नु मोआबी आन कली लडाइ तोइनीम। अम्मोनीपुकीमी मेको आन देंशो टीनीम।

15 मिनु परमप्रभु यावेमी इजीप्त डा समुन्द्र डा ब्वाक्कु नेल्ल सोव्रपाइक्व। मेकोमी युफ्रेटीस तारी यो आ गुइ क्युकशा, मेको रे ७ ओटा खोला सेल्ल। मिनु मुरपुकी गाक्शा शोकशा लाइनीम।

16 अस्सुर डा लीशो आ मुर इस्राएली आन कली जाक्वा कली ठेयब लां का दुम्ब। मेको लां इस्राएली इजीप्त रे यूशा गाक्शो लां खोदेंशो दुम्ब। प्रस्थान १४:२९

## 12

श्येत रे प्रोंइशोपुकीम कुम्सो पशो

1 मेको नाक्ती गेपुकीमी “परमप्रभु यावे, गे रिम्शो पाइब बाक्नीनी। गे आंइ पर्वम गाइक्ताक्नी हना यो, इन गाइक्वा नाइक्साक्व। मुल गे आंइ कली लेम्नीनी।

2 थमा पा, परमप्रभु आं कली पाप रे प्रोंइब बाक्व। गो मेको कली थमा सुइश्शा मर्हिनुड। मारदे हना परमप्रभु यावे आं कली सक्ति नु बोल गेब बाक्व। मेको आं कली श्येत रे प्रोंइब बाक्व” दे कुम्सो पाइनीनी। प्रस्थान १५:२

3 मेको नाक्ती गेपुकी ग्येरशा, पाप रे ब्रोंइतीके इनार रे ब्वाक्कु कीशा प्रिनीनी। यसैया ५५:१; जकरिया १३:१

4 मेको नाक्ती गेपुकीमी “परमप्रभु यावेमी रिम्शो पाप्तु” दे मुर आन कली देनीन। मेकोपुकी नु लोव्र पने। मेको आ गेय रागी रागी डा मुर आन कली तुइक्पतीन। आ नें नेल्ल क्येडा ठेयब बाक्व, दे शेंदीने। इतिहास १६:८; भजन संग्रह १०५:१

5 परमप्रभु यावे कली ठेयब सेल्लतीक कुम्सो पने। मारदे हना मेकोमी थम सक्ति पाइश्शो गेय पशो बाक्व। एको लोव्र रागी नेल्लेमी ब्रपतीन।

6 सियोनम बाक्वपुकी ठेयब सेंदा पा ग्येरशा परमप्रभु कली ठेयब सेल्ला कुम्सो पने। मारदे हना इस्राएली आन का ला बाक्शो परमप्रभु इन दातेमी ठेयब बाक्व।

## 13

बेबीलोन सहर कली निसाफ पशो

यसैया २१:१-१०; यसैया ४७:-; येरमीया ५०:५

1 आमोज आ तौ यसैयामी बेबीलोन आ पर्वम तशो नु तुइश्शो लोव्र एको बाक्व। येरमीया २३:३३

2 रवा मबाक्शो डांडामी छेदर का खुक्कीन। मिनु ठेयब सेंदा पा गुइ हिक्शा, मेको आन कली ठेयब मुर आन लाप्चो रे ओव्रपतीन।

3 परमप्रभुमी “गो आं मुर आन कली पोक्शा, आं ग्येरसीशो, बोल्यो लडाइ पाइब मुर आन कली आं गाइश्शो कौइचा कली ब्रेत्ताक्डमी” देंत।

4 नेनीन, शुश रागी डा मुरपुकी डांडामी रेयके पाइनीम। मेको रेयके शुश राज्य डा खुम्सीशो मुर आन रेयके बाक्व। मुर नेल्ल आन परमप्रभु यावेमी ठेयब हुल लडाइ पाइब पोक्व।

5 मेकोपुकी डोन रागी रे जाक्नीम। रागी डा मुर रे पा जाक्नीम। मिनु परमप्रभु यावेमी गाइश्शा, या शेशा रागी नेल्ल खतम सेल्पाइक्व। योएल १:१५

6 ठेयब सेंदा पा डाक्कीन। मारदे हना परमप्रभु यावे आ नाक्त जाक्चशो बाक्व। नेल्ल क्येडा ठेयब सक्ति पाइश्शो परमप्रभु मेको नाक्ती खतम पोक्थ जाक्व।

7 मोपतीके मुर नेल्ल आन थुं लुकच लशा, मारेड पने मचाप्नीम।

8 मिनु मुरपुकी शुश हिंशा, आन थुं लुकच लशा, शुश सुरता पाइनीम। फाल्ने मचाप्चा डा पा खाइशशा, आल थिचशो मीश मुर खोदेशो पा नकचुर पाइनीम। हिंशा आन कुल कोव्रमुमानु, ब्रशो मी खोदेशो तमुइनीम।

9 नेनीन, परमप्रभु यावे आ नाक्ती हिंचा डा श्येतम जाक्ब। आ गाइशशो चुरशोमी रागी नेल्ल मुर मबाक्तीके सेल्ब। मिनु पाप पाइब आन कली क्याम्ब।

10 सरीड डा सोरुलपुकीम आन छेडछेड साम्नीम। नां दाप्ना दाप्न छिडछिड दुम्ब। तास्लाम छेडछेड मगेब।

11 परमप्रभुमी “गो रागी कली आ मरिम्शो पशो आ पर्वम सजाइ गेनुड। आं अरेशो लोव्र मटिथु, मरिम्शो पाइब आन कली सजाइ गेनुडमी। मिनु ठेयब लेशशो आन ठेयब लेत्तीके साम्पाइक्नुडमी। ठेयब श्येत गेशा हुकुम पाइब आन कली ब्रेम्पाइक्नुडमी।

12 गो मुर आन कली क्येख सुन क्येडा यो रिम्शो सेल्नुडमी। मेको आन कली ओफीर डा सुन क्येडा रिम्शो सेल्नुडमी।

13 मिनु आं गाइक्तीक नाक्ती गो सरीड कली हिम्पाइक्नुड। रागी यो आं गाइशशोमी आ बाक्तीक रे प्रेक्शा ग्रूब” दे मुर नेल्ल आन परमप्रभु यावेमी देत।

14 मुरपुकी खेदा पचा पुंडसीशो किशशु नु गोठला मबाक्शो भेडा खोदेशो दुम्नीम। मेकोपुकी आंम आंम मुर बाक्तीके लाइनीम। आंम आंम रागी मेर प्रोक्नीम।

15 खेदा पा थित्चा पुंडसीशोपुकी तूशा साइक्चा पुंडसीनीम। मिनु ग्याइक्चा पुंडसीशोपुकी तरवारम क्योरचा पुंडसीनीम।

16 आन आल आन कली आन डोंइती खपीम राप्शा साइशशो ताइनीम। मेको आन खिं डा मारेड मारेड योल्नीम। मेको आन मीश बिथोलो पाइनीम। भजन संग्रह १३७:८-९

17 मिनु परमप्रभुमी “नेनीन, गो मादी आन कली गेपुकी नु लडाइ पपाइक्चा कली पोक्नुडमी। मेकोपुकीमी सुन चांदी ठेयब ममिम्नीम।

18 वोंइश आल आन कली लिब्राम साइक्नीम। आइक्च आल नु ठेयब आल नेल्ल आन कली शिशी मपथु साइक्नीम।

19 ठेयब लेशशो कल्दी आन दाक्शो नु राज्य राज्य डा नेल्ल क्येडा दारशो बेबीलोन कली सोदोम नु गोमोररा खोदेशो सेल्नुड। उत्पत्ती १९:२४-२५

20 मिनु मेको सहरम गेनायो लेंशा मुर मबाक्नीम। पाला पाला सम्म मुर मबाक्नीम। मेकेर अराबीपुकीम आन ताम्बु मकीनीम। गोठलापुकीमी आन बस्तु भाव मनाइक्पाइक्नीम।

21 तन्न मेको ब्वाकी डा जन्तु आन बाक्तीक दुम्ब। मेको आन खिंम बुक्स ब्रीशो बाक्नीम। मेकेर ब्वाकी डा ग्रीब जन्तु, ठेयब चिक्ब बाक्नीम। मिनु ब्वाकी डा क्यारश सिल पाइनीम। यसैया २३:१३

22 मेको आन श्येत्थ खिंम फर ग्रीनीम। आन दारशो दरवारमी सिवार ग्रीनीम। मोदेशो दुम्तीक नाक्ती जाक्चशो बाक्ब। मुल रीब पा जाक्ब” देत।

## 14

### इस्त्राएली कली ग्येरपाइशशो

1 मिनु परमप्रभु यावेमी याकूब कली शिशी पा, इस्त्राएल कली योव्रशा लेंशा मेको आन कली आन रागीमी वोइक्ब। मिनु अर्को रागी डा मुरपुकी याकूब आ खिं डा मुर नु गारशा बाक्नीम। जकरिया १:१७

2 मेना रागी रागी डा मुरपुकीमी इस्त्राएली आन कली आन रागी चोव्रदीनीम। इस्त्राएलीपुकीमी मेको रागी डा मुर आन कली परमप्रभु यावे आ रागीमी बाक्शा, आन वाइलीम वाइल सेल्नीम। डोंइती आन कली ग्याइशशा चोक्ब आन कली ग्याइशशा चोक्नीम। मिनु आन कली दिप्ब आन कली हुकुम पाइनीम। यसैया ४९:२२; लेवी २५:२३



बेबीलोन डा पिप साइशशो

3 मिनु परमप्रभु यावेमी इन कली श्येत जतीके, खेदा पचा पुंडसीतीके नु शुश गेय पतीक रे नाइक्चा गेपु हना,

4 गेपुकीमी बेबीलोन डा पिप आ पबर्म “मुर आन कली दिप्ब, दोपा थुम्से? आ श्येत गेशा हुकुम पतीके, दोपा बेक्मे?” दे शुक्शी लोत्र पाइनीनी।

5 परमप्रभु यावेमी आ अरेशो लोत्र मटीब आन कोक्के जिक्तु। मिनु श्येत गेब पिप आ सासन पतीक कोक्के रोइक्ताक्व।

6 डोंडती मेकोमी गाइशशा, मुर आन कली तुप्ना तुप्न बाक्त। मेको पिपपुकीमी रागी रागी कली आन गाइक्तीकेमी मनाइक्थु खेदा पा श्येत गेम्तेक्म।

7 मुल रागी डा मुर नेल्ल सिकसी पा नाइशशा बाक्चा ताइनीम। मिनु ग्येरशा कुम्सो पाइनीम।

8 तोव्रशी रवापुकी नु लेबानोन डा लाइशशो रवापुकीमी यो ग्येरशा “गे खतम दुमे रे आंड कली क्योरब सुइ मजाक्म” देंनीम।

9 मिनु बेक्शो मुर आन बाक्तीकेमी इ जाक्दीशशो आ पबर्म ग्रांग्ये माग्ये दुम्नीम। रागी डा मुरपुकीमी “इन कली ताक्चा कली बोक्नीम। रागी रागी नु जात जात डा पिप आन कली आन नित्तीक रे पोक्शा राप्पाइक्नीम।

10 मेको नेल्लेमी इ कली ‘गे यो आंड खोदेशो पा सक्ति मपाइशशो दुमे बाक्त। गे यो आंड खोदेशो दुम्ते।

11 इ दारस नु इ ठेयब ताप्तीके नेल्ले यो बेक्शो मुर आन बाक्तीके जाक्तेक्म। लुस्पु इ ब्राख्ये दुम्नीम। बुस्स इ फेक्तीक दुम्ब’। इजीकीएल ३२:१८-१९

12 गे सुनी आ तौ, सुकुर सौरुल, दोपा सरीड रे दोक्डे? रागी रागी डा मुर आन कली ग्राब, दोपा क्योरचा पुंडसीशा दोक्डे?” देंनीम।

13 गे इ थुमी “गो स्वर्ग डोइशशा लाइनुड। परमप्रभु आ सौरुल आन क्येडा आइक्था आं नित्तीके वोइक्नुड। मिनु गो उत्तर डा देवी देवता गुम्तीक डांडाम नित्नुड। भजन संग्रह ४८:३; इजीकीएल २८:१४

14 गो गोस्स क्येडा ग्येत्थ डोइशशा लाइनुड। मोपा गो नेल्ल क्येडा ठेयब नु उइक्थ दुम्नुड” देंते।

15 तन्न गे बेक्शो मुर आन बाक्तीकेम तोक्चा पुंडसाक्वे। तुरस क्येडा यो उइ तोक्चा पुंडसाक्वे।

16 इ कली ताइबपुकीमी “मार, मेरे मुरुम रागी हिम्पाइशशा, राज्यपुकी खिंखि पपदा?

17 मेरेम रागी नेल्ल गोरशो रागी सेल्शा, सहर नेल्ल खतम पोक्गा? चोक्सीशो मुर आन कली आन खिं लेत्था मगेब मुर मेरेन बाक्बा?” देंनीम।

18 मिनु रागी नेल्ल डा बेक्शो पिपपुकी बेक्शो पिप आन कली वोइक्तीकेम वोइशशो बाक्नीम।

19 तन्न गे सोव्रशो राशी खोदेशो पा इ तुरस रे डोन ताइक्चा पुंडसाक्वे। तरवारम तूशा साइशशो मुर बाक्तीके लशो मुरपुकी इ सुम्तीके दुम्तेक्म। गे बेक्शा दिम्शो खोदेशो दुम्ते। यसैया ३४:३

20 गे अरु पिप खोदेशो पा थिम्चा मपुंडसे। मारदे हना गे इ रागी खतम सेल्शा इ मुर आन कली साइक्तीवी। मोपतीके मरिम्शो पाइब आन चच युइ आन नें गेनायो ममिम्सीब।

21 आन आफ आन मरिम्शो पशो आ पबर्म आन तौ आन कली क्योरचा कली ठीक दुमीन। मुर आन रागी कली आंम के सेल्ब नु रागी कली सहरम प्रिब कली बोक्चा मगेन। प्रस्थान २०:५

22 मुर नेल्ल आन परमप्रभु यावेमी “गो बेबीलोन डा मुर आन नें, लीशो नु आन आल नु खिं डा मुर नेल्ल क्याम्नुड।

23 गो मेको आन सहर काशश आन बाक्तीके नु ब्वाक्कु देम्तीके सेल्लुड। गो मेको आन कली खतम सेल्ब ब्राक्सुम फिक्नुड” दे मुर नेल्ल आन परमप्रभु यावेम देंत।

अस्सुर आ सक्ति नुप्शो

24 मिनु मुर नेल्ल आन परमप्रभु यावेमी कसम जशा “थमा पा, आं डोंइती मिम्शो खोदेंशो पा दुम्पाइक्नुड। गो आं देंशो पाइनुड।

25 गो अस्सुर डा मुर आन कली आं रागीम साइशशा, आं डांडा दिम्पाइक्नुडमी। मोपा आं जुवा गुंइनुड। मिनु आन श्येत आन बला रे फेतुनुड।

26 एको रागी नेल्ल कली देंशो लोत्र बाक्ब। एको रागी रागी नेल्ल तार दिंशो गुइ बाक्ब।

27 मारदे हना मुर नेल्ल आन परमप्रभु यावेमी मोदेंशो पचा कली मिम्शो बाक्ब। सुम मेको कली तेक्ने चाप्बा डा? आ दिंशो गुइ सुम लेप्पाइक्ने चाप्बा डा? सुइम मचाप्नीम” दैत।

पलिस्ती आन कली लोत्र पशो

येरमीया ४७:-

28 मिनु पिप आहाज बेक्शो बर्सम परमप्रभु यावेमी लोत्र पाप्तु। मार लोत्र पाप्तु देंशा हना, २राजा १६:२०

29 “ए पलिस्तीपुकी, इन कली तुप्ब कोक्के जिक्त, दे मग्येरसीन। मारदे हना बुस्स आ चच युइ रे बीस पाइशशो बुस्स का यूब। मेको रे बीस पाइशशो बेरब बुस्स का यूब।

30 नेल्ल क्येडा डोंइती जरमेशो, प्रुडग आन दाते डा मुरुम जचा ताइनीम। मारेइ मथीब मुरपुकी यो महिंथु बाक्ने चाप्नीम। तन्न इन खिं डा मुर आन कली अन्कालम बेक्पाइक्नुड। मिनु इन लीशो मुर आन कली साइक्नुड।

31 सहर डा ठेयब लाप्चोपुकी, डाक्कीन। सहर नु पलिस्ती नेल्ल हिंशा खिंखि पने। मारदे हना उत्तर रे कुन कुशा, ठेयब हुल, नेल्ल काथा जाक्नीम।

32 मिनु रागी रागी डा लोत्र कुरब आन कली मार देंनीनी? परमप्रभु यावेमी सियोन सेल्लु। मिनु आ मुर आन दाते डा क्येट मथीब मेकेर रिम्शो पा बाक्नीम” दैत।

## 15

मोआबी आन कली श्येत

येरमीया ४८:-; सेफन्याह २:८-११

1 मिनु परमप्रभु यावेम मोआब आ परबम यसैया कली “मारदे हना काबु नाक्दोमी आर-मोआब सहर खतम दुम्त। मिनु मोआब ग्रांग्ये माग्ये दुम्त। काबु नाक्दोमी कीर-मोआब सहर खतम दुम्त। मिनु मोआब ग्रांग्ये माग्ये दुम्त।

2 दीबोन डा मुर देवी देवता आन थान लाम्तेक्म। डांडा डा थानमी डाक्थ लाम्तेक्म। मोआबीपुकीमी नेबो नु मेदेबा सहर आस परबम रोंका पाइनीम। मेको नेल्लेम आन चां नु आन गाल शोक्त्रे प्रेक्शो बाक्नीम।

3 मेकोपुकी सहर डा लांमी अरन्डी फेक्शा, खिं तारी नु बजारम गुम्शा रोंका पा डाक्ना डाक्न बाक्नीम।

4 हेरबोन नु एलेआले सहर डा मुर वाइ ब्रेशशा डाक्नीम। मेको आन डाक्शो याहास सम्म नेंसीब। मोपतीके मोआब डा लडाइ पाइबपुकी खिंखि पा आन थुं लुकच लाइब। यसैया १६:९-११

5 आं थुं मोआब आ परबम वाइ ब्रेशशा डाक्ब। मेकेर डा मुरपुकी सोआर नु एलाथ-शेलीशीया प्रोक्नीम। मेकोपुकी डाक्ना डाक्न लुहीथ डा डांडा डोइक्नीम। मेकोपुकीमी होरोनाइम डा लांमी खतम दुम्चा आ परबम रोंका पाइनीम।

6 निन्नीम डा ब्वाक्कु सोवनीम। घांस नेल्ल सोवनीम, नक खुम्शो मवानीम। गिगी नेल्ल सोवनीम।

7 मोपतीके मेकोपुकीमी आन लीशो मारेइ मारेइ लाइशशा रवा पाइशशो खोल्सा आइक्ची हांबु लाइक्नीम।

8 मारदे हना मोआब रागी नेल्लेमी मेको आन डाक्शो नेंसीब। मेको आन रोंका पशो एरलाइम नु बेयर-एलीम सम्म जाक्दीशशो बाक्ब।

9 मारदे हना दीबोन खोला डा ब्वाक्कु हुशेम ब्रीशो बाक्त। मोपा यो मेको आन कली चिनु श्येत गेनुड। मोआब रे प्रोक्शा ब्रोंइशो नु लीशो मुर आन नोले गुप्स का सोइक्नुड” दैत।

## 16

मोआबीम “वारच पने” देशो

- 1 गेपुकीम सेला सहर रे पा सियोन डा तमी आ डांडा डा पिप कली पाठा सोइक्तीन।
- 2 आन ग्योत्र रे खेरशो एर ओंथ ब्रशा बेरशो चिक्ब खोदेशो पा मोआब डा तमीपुकी अरनोन खोला आ नेक्था बाक्नीम।
- 3 गे अर्ती गेशा, ठीक निसाफ पने। नाक्त बाक्त हना यो, इन वांकु नाक्दो डा खोदेशो सेलीने। गुंडशो मुर आन कली खुइक्तीन। प्रोक्ब आन पर्वम मशेंदीन।
- 4 मोआब रे प्रोक्शो मुर आन कली गेपुकी नु बाक्चा गेने। मेको आन कली साइक्ब रे प्रोंइशा, वारच पने। मुर आन कली दिप्बपुकी मबाक्तेक्म हना, खतम दुम्तीके नुप्त हना, श्येत गेबपुकी रागी रे फिक्चा पुंडसाक्म हना,
- 5 गेना हना यो दाक्ब आ नित्तीक वोंइसीब। मेको दाऊद आ ताम्बुम बाक्ब। मिनु मेको नित्तीकेमी थमा सुइक्चा पुंडसीब ठीक निसाफ पा हुकुम पाइब का निस्सीब। मेकोमी रीब पा कुल मकोव्रथु, निसाफ पाइब।
- 6 गो मोआब आ ठेयब लेशशा पशो लोत्र नेंतय। मेको थम ठेयब लेशशो बाक्ब। मेको आ ठेयब लेत्तीके नु बोरशा लोत्र पतीके फश खोदेशो बाक्ब।
- 7 मोपतीके मोआबी रोंका पामेक्ल। मोआब आ पर्वम रोंका पामेक्ल। थाम्पा रोंका पने। किर-हारेसेथ डा अडगुर शोब्ले आ पर्वम रोंका पने।
- 8 हेरबोन डा रू खतम दुम्तेक्म। सिब्मा डा अडगुर बोट मलीनीम। मेको आ अडगुर शांबुमी रागी रागी डा हुकुम पाइब आन कली दुक्पाइक्तु। मेको आ अडगुर बोट याजेर सम्म लशा, गोरशो रागी सम्म जाक्दीत्त। मेको आन शाक्श ब्रशा, समुन्द्र आ आइक्ची हांबु सम्म जाक्दीत्तेक्म।
- 9 मोपतीके गो सिब्मा डा अडगुर बोट आ पर्वम याजेर खोदेंब पा डाक्नुड। गो इस कली आं प्रेक्कुम जिप्पाइक्नुड। मारदे हना हेरबोन नु एलेआले, इस अडगुर नु अन्न ओइची नाक्त मजाक्ब। यसैया १५:४-९
- 10 मिनु ग्रेल्लेशो रू रे ग्येरशो सेंदा मनेसीब। इस अडगुर रूमी ग्येरशा कुम्सो मपाइनीम। सुइमी अडगुर मखाक्नीम। आन ग्येरशा कुम्सो पतीके जाम्त। येरमीया ४८:३३
- 11 मोपतीके मोआब आ पर्वम आं थुं डाक्ब। मिनु कीर-हेरेस आ पर्वम आ थुं खाइक्ब।
- 12 मिनु मोआबी आन देवी देवता बाक्शो डांडा डोइशशा, शुश प्रार्थना पाम्तेक्म हना यो, मेको शोर गाक्शो दुम्ब।
- 13 एको परमप्रभु यावेमी मोआब आ पर्वम डोंइती देशो लोत्र बाक्ब।
- 14 मुल चहिं परमप्रभु यावेमी “गाल्च ताइबम आ बर्स हिक्शो खोदेशो पा बर्स सांमी मोआब आ दारस जाम्शा लाइब। मिनु आ ठेयब हुल शुश मलीनीम। मेको आ लीशो मुर शुश मदुम्थु, सक्ति मपाइशो दुम्नीम” देंत। यसैया २१:१६

## 17

दमस्कस नु इस्राएल कली श्येत

येरमीया ४९:२३-२७; आमोस १:३-५

- 1 मिनु परमप्रभु यावेम दमस्कस आ पर्वम यसैया कली “दमस्कस सहर खतम दुम्शा मलीब। मेकेर ब्रेशो खिं ला बाक्नीम।
- 2 आरोएर डा सहरपुकी प्रोंइसीशो दुम्शा, क्यारश भेडा योव्रतीके दुम्ब। मेको काइ महिक्सीशो नाइक्तीक दुम्ब।
- 3 एफ्राइम डा बोल्यो दरवार नुप्नीम। दमस्कस डा राज्य मलीब। अराम डा लीशो मुरपुकी इस्राएली आन जाम्शो छेडछेड खोदेशो दुम्नीम” दे मुर नेल्ल आन परमप्रभु यावेम देंत। २राजा १६:९
- 4 मिनु परमप्रभु यावेमी “मेको नाक्ती याक्ब आ मुर आन रिम्स नेल्ल लाइब। मेको नेल्ल गेयनीम।

5 मिनु दोदेशो पा चेरब रिक्ब मुरुमी गुड कामी चेरब ग्याइशशा, अर्को गुडमी रिक्बा, मोदेशो पा रेफाइम डा बेसीम सिला गुप्तीक बाक्ब।

6 तेल रवा हिक्शा गेडा नेल्ल तोक्शा यो का निकशी लीशो खोदेशो पा, मेको आ डल नु राशीमी का निकशी ला लीनीम” दे परमप्रभु यावे, इस्राएली आन परमप्रभुमी देत।

7 मेको नाक्ती मुरपुकीमी आंम कली सेल्ब कली मिन्नीम। मिनु इस्राएली आन का ला बाक्शो परमप्रभु यावे गे कोवनीम।

8 मेकोपुकीम आंम आन गुडमी सेल्शो देवी देवता आन कली चढेचा ममिन्नीम। आंमा आन सेल्शो मूर्ति पाइशशो थाम नु धूप चोतीके कली मकोवनीम।

9 मेको नाक्ती आन बोल्यो सहरपुकी हिक्वी नु एमोरी आन प्रोइशो सहर खोदेशो दुम्नीम। मेको आन सहर इस्राएली आन पर्बम प्रोइशो बाक्तेक्म। मेकेर डा मारेइ मारेइ नेल्ल खतम दुम्शो बाक्तेक्म।

10 मारदे हना गे इन कली पाप रे प्रोइब परमप्रभु कली प्रेताक्नी। मिनु इन खुइक्तीक सेरथे फुल्लु कली मफुक्नी। गे अर्को रागी डा रिम्शो अडगुर खुम्तीनी। यसैया ६:२-३; ब्यवस्था ३२:१५

11 गे दारशो बोट खुम्तीनी हना यो, मिनु आ दीसा सुनी बोइक्पाइक्तीनी हना यो, मेकेर खुप्चा कली मारेइ मलीब। श्येत जतीके नु खाइशशो मसातीके नाक्त मोदेशो दुम्ब।

### शुश रागी डा मुर आन हुल

12 आबी, शुश रागी डा मुर आन रेयके, समुन्द्र डा ब्वाक्कु खोदेशो पा नेंसीब। आबी, रागी रागी डा मुर आन ग्रीशो बारशो खोला आ रेयके खोदेशो बाक्ब।

13 रागी रागी डा मुरपुकी ठेयब ब्वाक्कु ग्रीशो खोदेशो पा ग्रीनीम। तन्न परमप्रभुमी मेको आन कली हुइक्ब। मिनु मेकोपुकी डोन प्रोक्नीम। मेको डांडा डा फश गिवारम बेरपाइशशो भूस फुरक खोदेशो दुम्नीम।

14 नाक्दो हिंचा डा श्येत जाइनीम। नां सोवचा क्येडा डोंइती मेको नेल्ल बेक्नीम। आंइ मार मार रोइक्ब नु खुइ पाइबपुकी मोदेशो दुम्नीम। यसैया ३७:३६

## 18

### कूश रागी आ पर्बम लोव्र पशो

1 आबी, शुश बेरशो रेयके नेंसीशो एथीयोपीया खोला आ आइक्वी हांबुम बाक्शो रागी। सेफन्याह ३:१०

2 गे लोव्र कुरब मुर आन कली रीब पा डोंगाम समुन्द्रम सोइक्ताक्वी। गे लोव्र कुरबपुकी, लाइशशो मुर नु रीब पा गेय पाइब मुर आन रागी लन। डोन नु नेक्था डा मुर नेल्ल मेको आन कली तशा हिंनीम। मेको सक्ति पाइशशो नु ग्राब रागी डा मुर बाक्नीम। आन रागी शुश खोलाम चेशशो बाक्ब।

3 गे रागी रागीम बाक्ब मुरपुकी, रागी नेल्लेम ब्रोंइबपुकी डांडाम छेदर खुक्शो ताइतीनी हना, कोव्रडीन। तुराही ताप्शो बाक्त हना, नेनीन।

4 मारदे हना परमप्रभु यावेमी आं कली “गो आं बाक्तीके रे पा सिक्सी पा कोव्रनुड। नाप्शो नां डा नाक्त खोदेशो नु बाली नाली रिक्वी ना हुप्शो नांमी गोस्स का गूशो खोदेशो पा सिक्सी पा कोव्रशा बाक्नुड।

5 अडगुर मीचा क्येडा डोंइती फू बोइशशा, गेडा सिप्ब, मिनु मीब। मेना मेकोमी अडगुर कली गुयेम मुंइशा, आ बरशो राशी खोइशशा ताइक्ब।

6 मिनु डांडा डा ठेयब चिक्ब नु रागी डा जन्तु आन कली ब्वचा गेब। होश दुम्तीके ठेयब चिक्ब मेको तारी नित्नीम। मिनु हिंडम ब्वाकी डा जन्तुपुकीम मेको ब्वशा, मेको आ तारी इप्नीम” देत।

7 मेना लाइशशो नु दारशो मुरपुकीमी मुर नेल्ल आन परमप्रभु यावे कली मार मार चाक्नीम। मिनु मेको आन कली तशा डोन नु नेक्था डा मुरपुकी हिंनीम। मेकोपुकी सक्ति पाइशशो नु ग्राब रागी डा मुर

बाक्नीम। मेको आन रागी खोलाम चेशो बाक्ब। मेको आन मार मार मुर नेल्ल आन परमप्रभु यावे आ बाक्तीके सियोन डांडाम चाक्नीम। भजन संग्रह ६८:३०-३२; प्रेरित ८:२७

## 19

इजीप्त कली निसाफ पशो

येरमीया ४६:-; इजीकीएल २९:-३२:-

1 मिनु परमप्रभु यावेम इजीप्त आ पर्वम यसैया कली “कोव्रडीन, परमप्रभु यावे रीब पा बेरब गोस्सुम इजीप्त रागी जाक्ब। मेकेर डा मूर्तिपुकी हिंशा खिंखि पाइनीम। इजीप्त डा मुर आन थुं लुकच लाइब।

2 गो इजीप्त डा मुर आन कली आंम आंमा लडाइ पपाइक्नुडमी। मोपा मेको आन लोकब नु लडाइ पाइनीम। आन नेक्था डा मुर लडाइ पमुइनीम। सहर सहर लडाइ तोमुइनीम। राज्य राज्य लडाइ तोमुइनीम।

3 मिनु इजीप्त डा मुर आन थुं लुकच लाइब। गो मेको आन मिम्शो खतम सेल्लुड। मिनु मेकोपुकीमी आन मूर्ति नु बेक्शो मुर आन सल्ला नेंचा माल्नीम।

4 गो इजीप्त डा मुर आन कली शिशो मपथु, सासन पाइब आ गुडमी जिम्मा गेनुडमी। मिनु हिंचा डा पिपमी मेको आन कली सासन पाइब” दे परमप्रभु, मुर नेल्ल आन परमप्रभु यावेमी देंत।

5 मिनु नील खोला डा ब्वाक्कु सोव्रना सोव्रन लशा, ब्वाक्कु मबाक्शो दुम्ब।

6 मेकेर डा ब्वाक्कु रिना पाइब। मिनु इजीप्त डा नील खोला डा आइक्च खोलापुकी सोव्रशा शुश मलीनीम।

7 नील खोला आ नेक्था दिंम दुम्शा, मुरपुकीम रू सेल्लनीम। तन्न आन शोक्शो मारेड मारेड सोव्रशा, फशेम योल्ब।

8 मिनु डाइ साइक्ब मुर नेल्ल रोंका पाइनीम। बोल्सी ग्यारबपुकी नु ग्याइल आप्बपुकी “मार पचा, दो पचा” देनीम।

9 श्येले सेल्ब नु वा प्रोव्रबपुकीम सुर्ता पाइनीम। वा प्रोव्रब हिंनीम।

10 प्रोव्रना प्रोव्रन बाक्बपुकी राव किक्नीम। मिनु गाल्च ताक्शा गेय पाइबपुकी रोंका पाइनीम।

11 सोआन डा ठेयब मुरपुकी मूर्ख बाक्नीम। फाराओ कली अर्ती गेबपुकीम दूली अर्ती गेनीम। गे दोपा फाराओ कली “गो जोक्ब तुइक्ब नड। गो साइ डोंइती डा पिप आ खिं रे पिशो बाक्नुड” देने चाप्नीनी?

12 गे, निप्स पाइशो मुरपुकी ते बाक्नी? गेपुकीम मुर नेल्ल आन परमप्रभु यावेमी इजीप्त कली मार पचशो बाक्मे, मेको लोव्र पा मुर आन कली तुइक्पतीन।

13 सोआन डा ठेयब मुरपुकी मूर्ख दुम्तेक्म। मेम्फीस डा ठेयब मुरपुकीम जोल लोव्र कली थमा सुइक्नीम। मिनु मेको आन नेल्ल क्येडा ठेयब मुरपुकीमी इजीप्त डा मुर आन कली हेंथे लां खोइक्पाइक्नीम।

14 परमप्रभु यावेमी मेको आन कली ग्रांये मागये पोक्तीक सोक्तीम प्रिंताक्मी। मेकोपुकीम इजीप्त रागी कली दुक्शो मुर आन मेशो तार गाक्शो खोदेशो सेल्लेक्म।

15 इजीप्त रागी कली सुइमी वारच पने मचाप्नीम।

16 मेको नाक्ती इजीप्त डा मुर आन थुं मीश मुर आन थुं खोदेशो दुम्ब। मेकोपुकी मुर नेल्ल आन परमप्रभु यावेमी आ गुड क्युक्शो तशा खिंखि पा हिंनीम।

17 इजीप्त रागी डा मुरपुकी यहूदा डा मुर आन क्येडा हिंनीम। मुर नेल्ल आन परमप्रभु यावेमी इजीप्त रागी कली मार पचशो बाक्बा, मेको लोव्र नेंब नेल्ल हिंनीम।

रागी सां आन कली आसीक

18 मिनु मेको नाक्त इजीप्त रागी डा ५ ओटा सहरमी कनानी आन लोव्र ब्वाक्नीम। मिनु सहर डा मुरपुकीमी, मुर नेल्ल आन परमप्रभु यावे आ नेमी कसम जाइनीम। मेको सहर का आ नें इर-हेरेस बाक्ब। इर-हेरेस आ अर्थ नां आ सहर देसीब। यसैया ६५:१६; येरमीया १२:१६

19 मेको नाक्ती इजीप्त रागी आ दातेमी परमप्रभु यावे कली चढेतीके का सेल्नीम। मिनु मेको आ सांदमी परमप्रभु यावे कली थाम का सेल्नीम। लेवी २६:१

20 मेको थाम इजीप्त रागीमी मुर नेल्ल आन परमप्रभु यावे कली मिम्तीक चिन्ड का दुम्ब। मारदे हना मेकोपुकीमी श्येत गेचा पुंडसीतीके परमप्रभु यावे कली “वारच पाइक्की” दे लोत्र पाइनीम। मिनु परमप्रभु यावेमी मेको आन कली आन श्येत रे प्रॉइब का सोइक्ब। मेकोमी लडाइ पा मेको आन कली श्येत रे प्रॉइब।

21 मिनु परमप्रभु यावेमी आंम कली इजीप्त डा मुर आन डोंइती तुइक्पाइसीब। मिनु मेको नाक्त इजीप्त डा मुरपुकीमी परमप्रभु यावे कली थमा सुइक्नीम। मिनु मार मार चोशा चढेतीक चढेशा, कबल पा, आन पशो कबल खाप्नीम। यसैया ६६:१९

22 परमप्रभु यावेमी इजीप्त डा मुर आन कली तुप्ब। मिनु सापाइक्ब। मिनु मेकोपुकी परमप्रभु यावे आ नोले खोइक्नीम। मिनु मेको आन पुंडशो लोत्र नेशा। मेको आन कली सापाइक्ब।

23 मिनु मेको नाक्ती इजीप्त रे अस्सुर सम्म ठेयब लां का दुम्ब। मिनु अस्सुर रागी डा मुरपुकी इजीप्त जाक्नीम। इजीप्त डा मुरपुकी अस्सुर लाइनीम। मिनु इजीप्त नु अस्सुर डा मुर गारशा परमप्रभु यावे कली ठेयब सेल्नीम।

24 मिनु मेको नाक्ती इजीप्त, अस्सुर नु इस्माएल नेल्ल क्येडा नोले डा इस्माएल रागी दुम्ब। मेको रागी रागी आन दातेमी मेको सांफा आसीक ताइब दुम्नीम। ब्यवस्था ४:२०; रोमी १५:१०

25 मिनु मुर नेल्ल आन परमप्रभु यावेमी आसीक गेशा मेको आन कली “आं इजीप्त डा मुर, आं सेल्शो अस्सुर रागी नु आं योत्रशो इस्माएल डा मुरपुकी आसीक रमल” देंब।

## 20

### अस्सुरमी ग्राशो

1 मिनु अस्सुर डा पिप सारगोन आ सासनमी आ कप्तान लडाइ पथ लशा, अशदोद सहर ग्रात। २राजा १८:१७

2 मेना परमप्रभु यावेमी आमोज आ तौ यसैया कली “इ फेक्शो अरन्डी नु जुत्ता पुतो” देंत। मिनु मोपा यसैया जुत्ता मलिकथु, वा मफेक्थु, शिन्ना गाक्चा गोप्तु।

3 मिनु परमप्रभु यावेमी “आं गेय पाइब यसैया दोपा शिन्ना नु जुत्ता मलिकथु बर्स सां सम्म इजीप्त नु एथीयोपीयाम चिन्ड कोंइचा कली गाक्मे,

4 मोपा अस्सुर डा पिपमी इजीप्त रागी नु एथीयोपीया डा मुर आन कली ग्याइशशा लाइक्ब। ठिटा नु खूशो नेल्ल आन कली शिन्ना, जुत्ता मलिकपाइक्थु नु देल्लो तपाइशशा लाइशशा, इजीप्त कली मुने तोक्ब।

5 मिनु सु सुमी ‘एथीयोपीया डा मुरुम आंइ कली वारच पाइनीम। इजीप्त बोल्यो बाक्ब’ देंनीमी, मेको नेल्ल मुने दोक्नीम।

6 मिनु मेको नाक्ती समुन्द्र आ नेक्था बाक्ब मुरपुकीमी ‘कोत्रडीन, डोंइती वारच पा अस्सुर नु लडाइ पन, दे ब्रेशशो रागी आस कली अस्सुर डा पिपम ग्याइशशा लाइक्तु। गो मुल दोपा ब्रॉइचा’ देंनीम” देंत।

## 21

### बेबीलोन आ पर्वम लोत्र पशो

यसैया १३:-; यसैया १४:-

1 मिनु परमप्रभु यावेम समुन्द्र आ नेक्था डा गोरशो रागी आ पर्वम यसैया कली “नेगेब रे फश पिना पिन बाक्ब। मेको गोरशो रागी रे पीब। मेको हिंचा डा रागी बाक्ब।

2 गो हिंचा डा लोत्र का नेता। श्येत गेबपुकीम श्येत ला गेनीम। खतम पोक्बपुकीमी खतम ला पोक्नीमी। एलाम, गे कुवो। गे लशा, मादी रागी डा मुर पुन्देनी। गो मेको आन हुकयी पचा तेक्नुड” देंत।

3 मोपतीके आं पोक्य खिंखि पाइनीम। गो सुत्केरी रोड पशो आल थिचशो मीश मुर खोदेशो दुम्ती। गो राप्ने मचाप्यु, नेने नु तने मचाप्या डा श्येत जशो बाक्नुड।

4 गो ग्रांग्ये माग्ये दुम्शो बाक्नुड। आं दाक्शो हाम्सोमी नाइक्चा मलनु, आं कली खिंखि पपाइक्ती।

5 मेकोपुकीमी जचा कली ठीक सेल्नीम। वा ब्राइनीम। जाइनीम, तूनीम। ए, कप्तानपुकी, बोक्कीन इन तेक्तीक तेल खेक्तीन।

6 मारदे हना परमप्रभुमी आं कली “कोव्रब मुर का वोतो। मेकोम मार ताइबा, शोव्रडल।

7 मेकोमी शारा डोइक्ब आन कली जोड जोड पा जाक्ना जाक्न ताइब, गधा डोइक्ब नु दलओंठ डोइक्ब ताप्नु हना, शुश कोव्रशा, नोफा दाइश्शा नेनल” देत।

8 मिनु कोव्रब मुरुमी गुप्स खोदेशो पा, ठेयब सेंदा पा “परमप्रभु, गो नाक्दो नाक्ती खाल पतीकेमी खाल पा राप्शा बाक्शो बाक्नुड।

9 कोव्रडीन, शारा डोइक्ब जोर जोर पा जाक्ना जाक्न बाक्नीम” देत। मिनु मेकोमी “बेबीलोन ब्रुत। मेको आन देवी देवता आन मूर्ति नेल्ले खपीम ताइक्चा पुंडसाक्म” देत। प्रकाश १८:२

10 गे आं तुप्शो नु क्राप्शो रागी डा मुरपुकी, मुर नेल्ल आन परमप्रभु यावे, इस्राएली आन परमप्रभु रे नेंशो लोव्र गो इन कली देती।

एदोम आ पर्वम पशो लोव्र

येरमीया ४९:७-२२, २८-३३

11 मिनु परमप्रभु यावेमी दुमा आ पर्वम यसैया कली ब्यवस्था २:५

12 गो सेडर रे सेंदा का नेंता। मेको सेंदामी “ए, खाल पाइब मुर, नाक्दो दोशो दुम्मे? दोशो लीमे? ए, खाल पाइब नाक्दो दोशो दुम्मे? दोशो लीमे?” देत। मिनु खाल पाइबमी “नां सोव्रब, मिनु नां रिक्ब। मारेड हिल्लो पचा बाक्त हना, आं बाक्तीक जाक्कीन। मिनु हिल्लो पयीनी” देत।

अराब रागी आ पर्वम पशो लोव्र

13 मिनु परमप्रभु यावेमी गोरशो रागी आ यसैया कली “ए, अराब रागी डा मुरपुकी गे अराब डा मुर मबाक्तीकेमी बाक्स बाक्चा माल्नीनी। गे दलओंठ डोइश्शा देदान आ थर डा ग्याप्ब लेयब पिने।

14 तेमा रागी डा मुरपुकी, ब्वाक्कु तूतू दाक्ब आन कली ब्वाक्कु चाक्कीन। प्रोक्शा जाक्ब आन कली शोब्ले कुरशा, गुप्थ लने।

15 मारदे हना मेकोपुकी शोइश्शो तरवार, खुक्शो लिब्रा नु ठेयब लडाइ रे ब्रोंइशा जाक्शो बाक्नीम” देत।

16 मिनु परमप्रभुमी आं कली “गाल्च ताइबम आ बर्स हिकशो खोदेशो पा बर्स का नोले केदार आ दारस नेल्ल जाम्ब। यसैया १६:१४

17 मिनु केदार डा लडाइ पाइब लिब्रा आप्ब मुर का निकशी ला लीनीम। मारदे हना एको परमप्रभु यावे, इस्राएली आन परमप्रभु आ देशो लोव्र बाक्ब” देत।

## 22

यरूसलेम आ पर्वम लोव्र पशो

1 मिनु परमप्रभु यावेमी कोइतीक बेसी आ पर्वम यसैया कली “गे नेल्ल मार दुम्नी डा मीन, नेल्ल इन खिं तार डोंइसीनी?

2 गे, ग्रांग्ये माग्ये नु रेयकेम ब्रीशो सहर, इ बेक्शो मुरपुकी तरवारम क्योरशा साइश्शो मनम। लडाइम साइश्शो यो मनम।

3 इ सासन पाइब कालेम प्रोक्तेक्म। लिब्रा मआप्यु ग्याइक्चा पुंडसाक्म। डोंइती सु सु डोन प्रोक्तेक्म हना यो, मेको कालेम ग्याइक्चा पुंडसाक्म।

4 मोपतीके गो आं कली मकोव्रयीनी। गो हुड हुड पा डाक्नुड। आं कली लेम्चा थुं मपने। मारदे हना आं दाक्शो मुर खतम दुम्तेक्म” देत। येरमीया ८:२३

5 मिनु नाक्त काम परमप्रभु, मुर नेल्ल आन परमप्रभु यावेमी कोंडतीक बेसीम दिम्शा ताइश्शा नु प्रांग्ये माग्ये पपाइक्ब। गारो प्रेशशो डांडा सम्म “वारच पने” दे वाइ ब्रेशशो सेंदा नेंसीब।

6 एलाममी ब्रा कुरतीके कुरतु। मुरपुकी बग्गी डोइश्शा गाक्चा गोम्तेक्म। कीर सहर डा मुरपुकीमी तेक्तीके शोल्लेक्म।

7 इ रिम्शो बेसी बग्गीम ब्रीशो बाक्नीम। शारा डोइक्ब सहर डा ठेयब लाप्चो आ डोंडती ठीक दुम्शो बाक्नीम।

8 परमप्रभुमी यहूदा आ सुम्तीके हुक्तु। मेको नाक्ती गेपुकी पिप आ या वोइक्तीके, ब्वाकी डा खिं मिम्ताक्नी।

9 मिनु गेपुकीमी दाऊद आ सहर डा खिं शुश रेक्शो ताइतीनी। मिनु आइदी दोम्ली डा ब्वाक्कु ताप्तीनी। यसैया ७:३

10 मिनु गे यरूसलेम डा खिं हिक्शा, प्रेशशा, सहर डा गारो बोल्ल्यो सेल्लतीनी। येरमीया ३३:४

11 मिनु गे सहर डा गारो निक्शी आस दातेमी माइत दोम्ली डा ब्वाक्कु तेम्तीनी। तन्न इन कली मोदेशो पपाइक्ब कली ममिम्तीनी। डोंडती रे नेल्ल सेल्ब कली चहिं मान मपनी।

12 मेको नाक्ती परमप्रभु, मुर नेल्ल आन परमप्रभु यावेमी डाक्चा, रोंका पचा, चां खोइक्चा नु अरन्डी फेक्पाइक्चा कली इन कली ब्रेत्ताक्व। आमोस ८:१०

13 तन्न गेपुकीमी ग्येरशा, ब्यफ नु भेडा क्योरशा, ब्वशा, अडगुर शांबु तूशा “लो, जय ब्वय, तूय, मारदे हना दीसा बेक्नय” देंतीनी। १कोरिन्थी १५:३२

14 मुर नेल्ल आन परमप्रभु यावेमी आं कली “मेको इन मरिम्शो पशो मबेक्नी सम्म लीब” दे परमप्रभु, मुर नेल्ल आन परमप्रभु यावेमी देंत।

### एल्याकीम कली योत्रशो

15 मिनु परमप्रभु, मुर नेल्ल आन परमप्रभु यावेमी “गे खिं नेल्ल कली कोत्रब शेब्ना आ बाक्तीकेम लावो। यसैया ३६:३

16 मिनु मेको कली ‘गे मार पना पन बाक्नीनी? गे इ के एकेर मार बाक्बा डा। एकेर इ मुर सु बाक्नीमी। मारदे डांडामी तुरस मुपदी? मारदे सेरथे फुल्लु आगाम मुर बाक्तीके सेल्लनी?’ देंत

17 परमप्रभु यावेमी इन कली एक रे मरिम्शो पा डोन ताइक्ब। इन कली बोल्ल्यो पा ग्याइक्ब।

18 इ कली हिरशा हुरद आप्शो खोदेशो पा ठेयब रागीमी ताइक्ब। मिनु गे मेक उइ बेक्नेवे। इ दारशो बग्गी यो मेक उइ लीनीम। गे इ होत्रप आ खिं कली मुने तोक्ब बाक्नेवे

19 गो इ कली इ गेय रे गुंइशा, आइक्च सेल्लन।

20 मेको नाक्ती गो हिल्लीयाह आ तौ आं गेय पाइब एल्याकीम कली ब्रेत्नुड।

21 मिनु गो मेको कली इ वा फेक्पाइक्नुड। इ किप्शुर किप्पाइक्नुड। मिनु इ अधिकार मेको कली गेनुड। मिनु मेको यरूसलेम नु यहूदा डा मुर आन आफ दुम्ब। उत्पत्ती ४५:८

22 गो दाऊद आ खिं डा सांचो मेको कली गेनुड। मेकोमी रोक्ब, सुइम मचोक्नीम। मेकोमी चोक्ब सुइम मरोक्नीम। प्रकाश ३:७

23 मिनु गो मेको कली किला खोदेशो पा सारो खपीम युक्नुड। मेको आ किकी पिपी आन खिं डा मान पाइक्चा पुंइसीब दुम्ब।

24 मिनु आ आफ आ खिं डा ठेयब मुर नु आल चच युइ नेल्ले मेको आ अधिकारम बाक्नीम। खिं डा बोस नेल्ल मेको आ अधिकारम बाक्नीम” देंत।

25 मेको नाक्ती मुर नेल्ल आन परमप्रभु यावेमी “मेको सारो खपीम युक्शो किला हिम्पाइक्ब। मेको कली क्योरशा ताइक्नीम। मिनु आ पतीक अधिकार नेल्ल जाम्ब” दे परमप्रभु यावेमी देंत।



1 मिनु परमप्रभु यावेमी टायर आ पर्वम यसैया कली “गे, टारसीस डा जहाजपुकी रोंका पने। मारदे हना टायर खतम दुम्शो बाक्ब। मेकेर खिं नु जहाज नाइक्तीके मलीब। साइप्रस टापु रे जाक्ब आन कली नैपाइशो बाक्तेक्म। इजीकीएल २७:१२

2 समुन्द्र आ नेक्था बाक्बपुकी रोंका पने। गे सीदोन डा ग्याप्ब लेयबपुकी इन मुर समुन्द्र शोकसाक्म।

3 इन मुर ठेयब ब्वाक्कु शोकशा, लशो बाक्तेक्म। शीहोरम शोकशो अन्न नु नील खोला आ एर ओंथ खुष्पो इन ग्याप्तीक लेयतीक बाक्त। मिनु गे रागी रागी डा मुर आन ग्याप्ब लेयब बाक्तीनी।

4 सीदोन, गे मुने पावो। मारदे हना समुन्द्र डा बोल्यो टायर सहरमी ‘गो सुत्केरी रोइ मपड। गो आल मथिड। गो वोंइश आल नु मीश आल आन कली मथुलु’ देतीनी।

5 इजीप्त रागीम टायर आ पर्वम लोत्र जाक्दीम्मेनु, मेकेर डा मुर हिंनीम।

6 गेपुकी टारशीश शोकशा, लने। समुन्द्र आ नेक्था बाक्ब मुरपुकी रोंका पने।

7 मार, मेको इन ठेयब सहर बाक्बा डा? मेको साइ डोंइती रेन बाक्शो सहर बाक्त। मेकेर डा ग्याप्ब लेयब मुरपुकी डोन डोन सम्म लाम्तेक्म।

8 सुमी टायर कली मोदेशो पचा मिम्ता? डोंइती टायर सिरपेच योक्ब बाक्त। आ ग्याप्ब लेयब मुर पिप आ तौ खोदेशो बाक्तेक्म। आ ग्याप्ब लेयबपुकी रागीम मान पाइक्चा पुंडसीब बाक्तेक्म।

9 मिनु मुर नेल्ल आन परमप्रभु यावेमी मेको मिम्ताक्व। आ शुश दारस आ पर्वम ठेयब लेत्तीके खतम सेल्चा नु आ मान पाइक्चा पुंडसीब आन कली मुने तोक्चा कली मिम्ताक्व।

10 टारशीश डा जहाजपुकी इन रागी लने। मुल रे मेकेर जहाज नाइक्तीके मबाक्ब। इजीकीएल २७:१२

11 परमप्रभु आ गुइ समुन्द्र तार दिंशो बाक्ब। मिनु राज्य राज्य आन कली हिम्पाइशो बाक्ब। परमप्रभु यावेमी कनान रागी डा बोल्यो दरवार आन कली खतम सेल्चा” दे अरेशो बाक्ब।

12 मिनु मेकोमी “गे दिप्चा पुंडसीशो कन्ने तमी सीदोन, मुल रे ठेयब लेशो मबाक्नेवे। बोक्को, साइप्रस टापु गे लावो। गे मेकेर यो इ थुं नाइशशा बाक्चा मताइनेवे” दैत।

13 कल्दी डा मुर आन रागी कोत्रडीन। अस्मुरम ममाइ, कल्दीपुकीम सहर नेल्ल मुर मबाक्तीके सेल्लेक्म। मेको टायर सहर ब्वाकी डा जन्तु आन बाक्तीक सेल्लेक्म। मेको सहर पुम्चा कली लाइशो खिं सेल्लेक्म। सहर डा दरवार प्रेत्तेक्म। सहर नेल्ल खतम सेल्लेक्म।

14 टारशीश डा जहाजपुकी रोंका पने। मारदे हना इन बोल्यो दुम्तीके प्रेत्तेक्म।

15 मिनु नोले टायर ७० बर्स, पिप का आ ब्रोंइतीके बर्स खोदेशो, मदुम्म सम्म प्रेंचा पुंडसीब। मिनु मेको ७० बर्स नोले टायर सहर तेल्लेम आ कुम्सो देशो खोदेशो दुम्ब।

16 गे प्रेंसीशो तेल्लेम, इ बीना रिम्शो पा ताप्शा, सहरम हिरसो। शुश कुम्सो पावो। मिनु इ कली फुकनीमी कौं?

17 मिनु ७० बर्स नोले परमप्रभु यावेमी टायर सहर कली मिम्ब। मिनु मेकोम लेंशा आ तेल्लेम पशो डा क्येट ताइब। मिनु मेकोमी तेको तेको रागी डा राज्य डा पिपपुकी नु तेल्लेम पाइब।

18 मिनु आ तेल्लेम पा चेम्शो क्येट परमप्रभु यावे के दुम्ब। मेको क्येट महेंनीम। आ चेम्शो क्येट परमप्रभु यावे आ डोंइती बाक्ब। मेको क्येट मुर आन कली जचा फेक्चा कली गेनीम।

## 24

रागी नेल्ल आन कली निसाफ

1 परमप्रभु यावेमी रागी नेल्ल मुर मबाक्तीक सेल्ब। नेल्ल श्येत्थ सेल्ब। रागी कली ग्येत्थ लुक्च पा मेकेर डा मुर नेल्ल आन कली ब्रपाइक्ब।

2 मुर आन कली दोदेशो दुम्बा, चढ़ेब आन कली यो मोदेशो दुम्ब। वाइल आन कली दोदेशो दुम्बा, आन होत्रप आन कली यो मोदेशो दुम्ब। वाइलीम आन कली दोदेशो दुम्बा, आन होत्रपोक्म आन कली यो मोदेशो दुम्ब। ग्याप्ब आन कली दोदेशो दुम्बा, लेयब आन कली यो मोदेशो दुम्ब। जेर थुइक्ब आन कली दोदेशो दुम्बा, जेर गेब आन कली यो मोदेशो दुम्ब।

- 3 रागी थमा पा श्येतथ नु मुर मबाक्तीके दुम्ब। मारदे हना मेको परमप्रभु यावे आ देशो लोव बाक्ब।
- 4 रागी फू खोदेशो पा सोल सुल बेक्ब। रागी नेल्ले मोदेशो दुम्नीम। रागी डा मान पाइक्चा पुंडसीब नेल्ल बेक्नीम।
- 5 रागीम बाक्ब मुरपुकीमी रागी कली खतम सेल्नीम। मारदे हना मेकोपुकीमी परमप्रभु यावे आ अरेशो मटीम। परमप्रभु आ फुल्लुम मुशा ब्रेक्शो लोव कली ममिन्तेम। आ गेना हना यो लीब कबल पशो मखबेम।
- 6 मोपतीके सरापमी रागी कली खतम सेल्शो बाक्ब। मिनु मेकेर बाक्ब आन पापम पतीके श्येत जाइनीम। का निकशी ला लीनीम।
- 7 अडगुर शांबु ग्युरब। अडगुर बोट सोवनीम। डोंइती ग्येरसीशा बाक्ब मुर नेल्ल हुकयी पाइनीम।
- 8 बाजा ताप्ब आन ग्येरशो रेयके मनंसीब। ग्येरशो मुर आन सेंदा मलीब। बीना ताप्ब आन रेयके जाम्ब।
- 9 मुल रे अडगुर शांबु तूडमेनु, कुम्सो मपाइनीम। राकसी तूब आन कली राकसी काइब।
- 10 मेको ग्रंग्ये माग्ये सहर खतम दुम्ब। मेको खिं डा लाप्चो नेल्ल चोकसीशा, सुइ ओवने मचाप्नीम।
- 11 लां गाक्ब मुरपुकी अडगुर शांबु मबाक्तीके सुरतां पाइनीम। ग्येरसीतीके नेल्ल नुप्ब। रागी डा ग्येरसीतीके जाम्त।
- 12 सहर मुर मबाक्तीक दुम्शा, आ गारो डा ठेयब लाप्चो ब्रेत्तेक्म।
- 13 मोदेशो रागी नु रागी रागी डा मुर आन कली दुम्चा माल्ब। तेल रवा आन फल थेष्शा नु अडगुर सेक्शा यो सीला लीशो खोदेशो पा रागी नेल्ल मोदेशो दुम्चा माल्ब।
- 14 मिनु मेको लीशो मुरपुकी ग्येरशा ठेयब सेंदा पा “परमप्रभु यावे ठेयब बाक्ब” दे पच्छिम रे कुम्सो पाइनीम।
- 15 मोपतीके पूर्व डा मुर “परमप्रभु यावे ठेयब बाक्ब” दे मेको कली ठेयब सेलीन। समुन्द्र आ नेक्था बाक्ब आन कली “परमप्रभु यावे, इस्त्राएली आन परमप्रभु आ नें कली मान पने” देंमानु, मेको कली मान पाइनीम।
- 16 गो रागी आ सुर रे परमप्रभु कली ठेयब सेल्तीक कुम्सो पशो नेंतय। ठीक पाइब, परमप्रभु कली ठेयब सेल्तीक कुम्सो बाक्नीम। तन्न गो शुश श्येत जाइब दुम्ती। आबी, गो श्येत जाइब दुम्ती। मारदे हना दूली पाइबम, मुल सम्म दूली पाइनीम। मिनु मेको क्येडा यो दूली पाइनीम।
- 17 गो रागी डा मुरपुकी, इन डोंइती शुश हिंचा डा बाक्ब। इन डोंइती बिक्तीके नु ब्वारद बाक्नीम।
- 18 मिनु सु सु शुश हिंचा डा रेयके नेंशा प्रोक्नीमी, मेको बिक्तीकेम बिक्नीम। सु सु बिक्तीके रे ग्रीनीमी, मेको ब्वारदम रेल्नीम। मारदे हना सरीड डा डेल रोकसीशो बाक्नीम। मिनु रागी आ जग हिम्सीशो बाक्ब। येरमीया ४८:४३-४४; आमोस ५:१९; उत्पती ७:११
- 19 मिनु रागी एशशा, ब्रोल्ल। खिनुम हिम्सीब। २पत्रुस ३:१०
- 20 रागी अडगुर शांबुम दुक्शो मुर खोदेशो पा एर ओंथ हिम्सीब। खिनुम हिम्शो कटेरा खोदेशो पा हिम्सीब। मुर आन हेंथे पतीकेमी मेको मोदेशो सेल्लु। मिनु रागी गेनायो मबोक्या डा पा गोल्लब।
- 21 मेको नाक्ती परमप्रभु यावेमी स्वर्गम बाक्ब सक्ति पाइशशो आन कली सजाइ गेब। मिनु रागी कली सासन पाइब पिप आन कली सजाइ गेब। दानीएल १०:१३; येरमीया ४६:२५
- 22 जेल्खानम खुम्सीशो मुर खोदेशो पा बिक्तीकेमी खुम्सीचा पुंडसीनीम। मेको जेल्खानम चोक्या पुंडसीशा, शुश नाक्त नोले सजाइ ताइनीम।
- 23 मेना तास्ला लल जीब, नां आ छेडछेड जाम्ब। मारदे हना मुर नेल्ल आन परमप्रभु यावेमी सियोन डांडा नु यरूसलेमम सासन पाइब। खाल्पा आन डोंइती आ छेडछेड कोंइब।

## 25

### ग्येरशा कुम्सो पशो

- 1 परमप्रभु यावे, आं परमप्रभु बाक्नीनी। गो इन कली मान पशा, इन नें ठेयब बाक्ब, दे कुम्सो पाइनुड। मारदे हना गे छक लाक्चा डा गेय पाइतीनी। इन डोंइती मिम्शो मप्रोंइथु, थमा पा थुम्तीनी।

2 मारदे हना गे सहर कली फुल्लु तेल्लीके खोदेशो सेलतीनी। गारो हिरशो सहर कली प्रेत्तीनी। अर्को रागी डा मुर आन दरवार मुल मली। मिनु मेको गेनायो मसेलनीम।

3 मोपतीके बोल्यो मुरपुकीम इन कली मान पाइनीम। बोल्यो राज्यपुकी इन क्येडा हिंनीम।

4 मारदे हना गे पुडग नु मारेइ मथीब आन कली वारच पाइब बाक्तीनी। फश गिवार पवानु, फाम्सीतीके नु नां पवानु, सितल थेरतीके बाक्तीनी। मारदे हना मेको शिशी मपाइक्ब आन गाइक्चा, फश गिवार गारोम थोकसीशो खोदेशो बाक्ब। यसैया ४:६

5 सोव्रशो रागीमी नांम नाप्पाइश्शो खोदेशो पा, अर्को रागी डा मुर आन रेयके पतीक साम्तीनी। नां कली गोस्सुम सुम्शो खोदेशो पा, शिशी मपाइब आन ग्राशा ग्येरशा पतीके कुम्सो तेक्तीनी।

### परमप्रभु आ गेशो भोज

6 मिनु मुर नेल्ल आन परमप्रभु यावेमी सियोन डांडामी रागी नेल्ल डा मुर आन कली थम ठेयब भोज का सेल्ल। ब्रोव्रशो नु चोकशो अडगुर शांबु नु ब्रोव्रशो जचा थोव्रक के भोज गेब। मत्ती २२:२-४

7 मिनु मेकोमी मेको डांडामी जात जात डा मुर आन थुं डा सुम्तीके हुक्ब। रागी रागी डा मुर आन सुम्तीके हुक्ब। मेना मेकोमी मुर आन कली मवेक्पाइक्ब।

8 मेना परमप्रभु, परमप्रभु यावेमी मुर नेल्ल आन प्रेक्कु फिक्ब। आ मुर आन कली मदाक्तीके रागी नेल्ल रे गुंडब। मारदे हना परमप्रभु यावेमी मेको लोत्र पाप्तु। १कोरिन्थी १५:५५; प्रकाश ७:१७

9 मिनु मेको नाक्ती मुरपुकीमी “कोव्रडीन, मेको आंइ परमप्रभु बाक्ब। गो मेको आ लां कोव्रतक। मिनु मेकोम आंइ कली श्येत रे प्रोइतु। मेको आंइ रिम्शा बाक्शो परमप्रभु यावे बाक्ब। गोपुकी आ प्रोइशो तशा ग्येरसाक्क। भजन संग्रह ४८:१५

10 मारदे हना परमप्रभु यावे आ गुड मेको डांडा तार बाक्ब। मिनु मोआब रागी डा मुर आन बाक्तीके दिम्चा पुंडसीनीम। मेको नेल्ल मोव्रल वोइक्तीके खोदेशो पा दिम्चा पुंडसीनीम।

11 मिनु दोपा दोम्ली ग्यारब मुरपुकीमी आन गुड दिनीमी, मोपा मेकोपुकीमी आन गुड दिनीम। मिनु परमप्रभुमी मेको आन ठेयब लेशशो नु आन सक्ति आइक्च सेल्ल।

12 मिनु आ बोल्यो नु लाइश्शो गारो प्रेशशा, आइक्च सेल्ला, खप नु उइक्थ सेल्ल। मिनु फुरक दुम्पाइक्ब” देनीम।

## 26

### परमप्रभु आ मुर आन कुम्सो

1 मेको नाक्ती यहूदा रागी डा मुरपुकीम मार कुम्सो पाइनीम देशा हना “आंइ सहर बोल्यो बाक्ब। परमप्रभुमी आंइ कली ग्राचा गेब। लडाइ पाइब आन कली ओव्रने मचाप्तीके गारो हिरब।

2 मेको सहर डा गारो डा लाप्चो रोककीन। ठीक पाइब नु परमप्रभु यावे कली थमा सुइक्चा मप्रोइब ओव्रने चाप्मेक्क। भजन संग्रह ११८:२०

3 गे ग्येत्थ लुकच मनुम्ब थुं पाइश्शो मुर आन कली थुं नाइक्चा गेनीनी। मारदे हना मेकोपुकी इन कली थमा सुइक्ब बाक्नीम।

4 गे परमप्रभु यावे कली गेना हना यो थमा सुतीन। मारदे हना परमप्रभु यावे गेना हना यो बाक्ब, सेरथे फुल्लु का बाक्ब। ब्यवस्था ३२:४

5 मारदे हना मेकोमी ठेयब लेशशो मुर ब्रेम्पाइक्तु। आन सहर कली आइक्च सेल्ला, खपीम वोइश्शा, फुरक नु उइक्थ सेल्लु।

6 मुरपुकीम मेको कली दिम्नीम। पुडग मुरपुकीमी मेको कली दिम्नीम। क्येट मथीबम यो मेको कली दिम्नीम।

7 ठीक निसाफ पाइब आ लां ग्येत्थ बाक्ब। गे ठीक पाइब आ लां थेलतीनी।

8 परमप्रभु यावे, गो इन निसाफ पतीके कली रिम्नीकी। आंइ थुं नेल्लेमी इन नें नु इन कली मिम्शा बाक्नीकी।

9 गो नाकदो इन कली शुश मिन्नुड। गो आं थुंमी इन कली माल्ना माल्न बाक्नुड। मारदे हना गे रागी डा मुर आन कली निसाफ पाइतीनी हना, रागीम बाक्बपुकीमी ठीक पतीके शेंसीनीम। भजन संग्रह ६३:१७

10 परमप्रभु यावे आ अरेशो लोत्र मटीब मुरपुकीमी शिशी ताम्तेकम हना यो, ठीक पतीके मशेंसीनीम। मेकोपुकीमी ठीक पाइब आन रागीमी दूली पाइनीम। मिनु परमप्रभु यावे कली मान मपाइनीम।

11 परमप्रभु यावे, इन गुड मेको आन परबम क्युकशो बाक्तीनी हना यो, मेकोपुकीमी मतुडक्नीम। गे इन मुर आन कली दाक्शो तशा, मेकोपुकी मुने दोक्मल। इन जोरी सत्रु आन कली नेक्ब मीमी मेको आन कली यो नेक्गल। यसैया ३७:३२

12 परमप्रभु यावे, गे आंइ कली थुं नाइक्चा गेनीनी। मारदे हना मार रिम्शो पका, मेको नेल्ल इन रे पा पिशो बाक्ब। यसैया ९:६

13 आंइ परमप्रभु यावे अरु ठेयब मुरुम आंइ कली हुकुम पाम्तेकम। तन्न गे का ला आंइ कली अरेब बाक्नीनी।

14 बेक्शो मुर मब्रोइनीम। वांकु मबोक्नीम। मारदे हना गे मेको आन कली साइशशा, मेको आन कली मिम्तीक यो क्याम्ताक्नी।

15 तन्न गे रागी डा मुर आन कली सोपाइशशा बोपाइशशा शुश सेलतीनी। गे मान ताइब बाक्नीनी। गे मेको रागी कली ठेयब सेलतीनी।

16 परमप्रभु यावे, मेको मुरपुकीमी श्येत जशा, इन कली माल्तेकम। इन गेशो सजाइ तशा, आइक्च सेंदाम इन कली पुंडतेकम। होसे ५:१५

17 दोपा आल थिचा चिक्शो मीश मुरुम आ आल थिची ना वाइ ब्रेशशा, रोम्सीबा, मोपा परमप्रभु यावे, गो इन डोंइती बाक्तक। यूहन्ना १७:२१; प्रकाश १२:२

18 मिनु गोपुकी यो कोव्रज कुरशा रोम्साक्क। तन्न फश ला थीतक। गोपुकी आंइ रागी कली प्रोंइने मचाप्क। मिनु आल थिशा यो शुश दुम्ने मचाप्क।

19 इन बेक्शो मुरपुकी लेंशा ब्रोंइनीम। आन बेक्शो रां सेंसीनीम। गे फुरकुम बाक्बपुकी, बोक्कीन। ग्येरसीशा कुम्सो पने। मारदे हना इन सुनी डा सीत छेडछेडम ब्रशो बाक्ब। मिनु रागीमी शुश डोंइती बेक्शो मुर आन कली गुंडब। इजीकीएल ३७:१-१४; मती २७:५२-५३

20 आं मुरपुकी जाक्शा, इन खिं ओव्रडीन। मिनु इन नोले लाप्चो चोक्कीन। गाइक्चा मनुम्म सम्म इक्का नाक्ती खुंडसीन। मती ६:६

21 मारदे हना परमप्रभु यावे आ बाक्तीके रे जाक्ब। मिनु रागीम बाक्ब मरिम्शो पाइब आन कली सजाइ गेब। मिनु रागी तार देम्शो हुश नु साइशशो मुर नेल्ल मखुइक्थु कोंइब" दे कुम्सो पाइनीम। उत्पत्ती ४:१०-११; प्रकाश १८:२४

## 27

### इसाएल कली श्येत रे प्रोंइशो

1 मेको नाक्ती परमप्रभु यावेमी आ हिंचा डा, ठेयब नु सक्ति पाइशशो तरवारमी खेदा पना पन लेव्याथन माइशशो बुस्स कली सजाइ गेब। ग्रेशा गाक्ब बुस्स लेव्याथन नु समुन्द्रम बाक्ब ठेयब जन्तु कली साइक्ब। भजन संग्रह ७४:१४

### अडगुर रू आ परबम नक कुम्सो

2 मिनु मेको नाक्ती "नेल्ल क्येडा रिम्शो अडगुर रू का बाक्ब" दे कुम्सो पने। यसैया ५:१-७

3 गो, परमप्रभु यावेमी मेको कली गेना हना यो कोव्रशा, ब्वाक्कु लुक्नुड। मरिम्शो मदुम्ल, दे गो मेको कली नाकदो नाक्ती कोव्रनुड।

4 गो मगाइक्नुड। चू चोंक वाम हना, गो मेको आन कली लडाइ तोशो खोदेशो पा, तुल्शा चोडमी वा।

5 मोदेशो मदुम्त हना, मेको गो नु गारशा, आं कली वारच सेल्ब। आं कली वारच सेल्ब।

6 मिनु नोले डा नाक्तीमी याकूबम आ शाकश थोक्ब। इस्राएल फू बोइशशा, नक राशी दाप्ब। मिनु रागी नेल्ल मेको आन फल फुलमी ब्रीब।

7 मार, परमप्रभुमी आ कली तुप्ब आन कली तुप्शो खोदेशो पा मेको आन कली यो तुप्बा? परमप्रभुम आ कली साइक्ब आन कली साइशो खोदेशो पा मेको यो साइक्चा पुंडिसमा? येरमीया ३०:११

8 ग्याइशशा लाइक्चा पुंडिसीशो रागी रे गुंडशो मुर नु लडाइ पाइतीनी। परमप्रभुमी मेको आन कली मुइशशा, पूब डा फश पवानु, ठेयब फश गिवारमी योल्पाइक्ब।

9 मोपतीके मेको रे पा याकूब आ मुर आन दोस क्याम्सीब। मेको आन पाप पशो आ परबम मो पचा पुंडिसीशो बाक्तेक्म। मेकोमी चढेतीके डा फुल्लु खरी खोदेशो पा फस सेल्ब। मिनु मूर्ति पाइशशो थाम नु धूप चोशा चढेतीक काइ मलीपाइक्ब। लेवी २६:३०

10 मारदे हना गारो हिरशो सहर मुर मबाक्तीके दुम्त। मेकेर गोरशो रागी खोदेशो पा मुर मबाक्नीम। मेकेर बाछा जोशा नांडसीनीम। मिनु आ राशी ब्वाइनीम।

11 मिनु मेको आ राशी सोव्रशा, जिक्नीम। मिनु मीश मुरपुकी जाक्शा, चोचा कली शी खुप्नीम। मारदे हना मेकोपुकी रुप्तीक मपाइशशो थर डा मुर बाक्नीम। मोपतीके मेको आन कली सेल्बमी मेको आन कली शिशी मपाइब। येरमीया ४:२२; ब्यवस्था ३२:१८

12 मिनु मेको नाक्ती परमप्रभु यावेमी युफ्रेटीस खोला रे इजीप्त डा ब्वाक्कु मबाक्शो खोला सम्म अन्न तुप्ब। गे इस्राएल डा मुरपुकी का का पा खुप्चा पुंडिसीनीनी।

13 मेको नाक्ती ठेयब तुराही का ग्रीब। मिनु अस्सुर रागीम जाम्शो नु इजीप्त रागीम खेदा पचा पुंडिसीशो मुरपुकी जाक्नीम। मिनु यरूसलेम डा परमप्रभु यावे आ डांडामी आ कली ठेयब सेल्नीम। यसैया ११:११-१२; योएल ३:५

## 28

### सामरीया कली निसाफ

1 आबी, गे एफ्राइम डा दुक्शो ठेयब लेशशो मुरपुकी, इन दारस फू खोदेशो पा बेक्ब। मेकेर ब्रोव्रशो जाइब नु दुक्शो मुर ला बाक्नीम। अडगुर शांबुम मेको आन कली नेक्शो बाक्ब।

2 कोव्रडीन, परमप्रभु नु बोल्यो नु सक्ति पाइशशो का बाक्ब। मेको मुप्स ब्वांडसीशो फश गिवार खोदेशो बाक्ब। शुश रेड ब्वांडसीशो फश गिवार खोदेशो बाक्ब। परमप्रभुमी मेको कली रागी तार तोक्ब। २राजा १७:५-६

3 एफ्राइम डा दुक्शो मुर आन दारशो माला कली दिम्शा ताइशशा पाइनीम।

4 मिनु मेको आ पिया डा दारस, फू खोदेशो पा बेक्ब। मेकेर ब्रोव्रशो जाइब ला बाक्नीम। मेको नेल्ल क्येडा डोंइती मीशो फोव्रशी खोदेशो बाक्नीम। सुम मेको ताइबा, मेकोम सेक्शा ब्वाइब।

5 मेको नाक्ती मुर नेल्ल आन परमप्रभु यावे आ लीशो मुर आन कली छेडछेड पा ब्रशो सिरपेच नु पियाम चुइक्तीके दुम्ब।

6 निसाफ पाइब कली ठीक पतीक सोक्त दुम्ब। मिनु लडाइ पाइब आन कली सहर डा लाप्चो रे खेरतीक सक्ति गेब दुम्ब।

### चढेब नु परमप्रभु आ लोत्र पाइब

7 चढेब नु परमप्रभु यावे आ लोत्र पाइबपुकी यो अडगुर शांबुम दुक्नीम। राकसीम दुक्शा, दिड दाड गोल्चा चिक्शा गाक्शो बाक्नीम। चढेब नु परमप्रभु यावे आ लोत्र पाइबपुकी राकसीम दुक्शा गाक्नीम। अडगुर शांबुम दुक्तीके आन मिम्तीके ग्रांग्ये माग्ये दुम्त। मेकोपुकी राकसीम दुक्शा, दिड दाड गोल्चा चिक्शा गाक्शो बाक्नीम। मेकोपुकीम फश लोत्र ला पाइनीम। मतुइक्थु दूली निसाफ पाइनीम।

8 मेको आन जतीक मेर नेल्ले आन मेशोम ब्रीशो बाक्नीम। नेल्ल ग्रांया दिशो बाक्ब।

9 मेकोपुकीमी सु आन कली जोक्तीक तुइक्तीक लोत्र रुप्पाइक्नीमी? सु कली आन देशो लोत्र शेनीमी डा? मेकोपुकीमी नक दूध प्रोइशो आल आन कली शेचा चिक्त्मे?

10 मेकोपुकीम “परमप्रभु आ ब्रेकशा अरेशो पावो कि पावो, पावो कि पावो, पावो कि पावो। इच्का एकेर इच्का मेकेर” देनीमी।

11 थमा पा, मेकोमी अर्को रागी डा मरुप्चा डा लोत्र पा, आ मुर आन कली शेंब। ब्यवस्था २८:४९; येरमीया ५:१५; १कोरिन्थी १४:२१

12 मिनु परमप्रभुमी मेको आन कली “मेको थुं नाइक्तीक बाक्ब। गे दशो मुर आन कली नाइक्चा गेने। थुं बारपाइक्तीक एकोन बाक्ब” देंत। मो हना यो मेकोपुकीमी मनैथु मटीमे। यसैया ३०:१५; मत्ती ११:२८-२९

13 मोपतीके परमप्रभु यावे आ लोत्र मेको आन कली यो आन खोदेशो पा मरुप्चा डा लोत्र दुम्ब। मिनु “ब्रेकशो, अरेशो पावो कि पावो, पावो कि पावो, पावो कि पावो। इच्का एकेर, इच्का मेकेर” देशो बाक्ब। मिनु मेकोपुकी लशा, नोले गे गोल्शा आन गुइ खोइली जिक्नीम। मिनु ब्वारदम रेशशा, ग्याइक्चा पुंडसीनीम।

14 मोपतीके गे शुक्शी पाइबपुकी, परमप्रभु यावे आ लोत्र नेनीन। गे यरूसलेम डा मुर आन कली हुकुम पाइनीनी।

15 मिनु गेपुकीमी “गोपुकीमी बेक्पाइक्ब नु कबल पमुशो बाक्नीकी। बेक्शो मुर आन बाक्तीके नु सल्ला पाइतक। ठेयब श्येत जाक्त हना यो, आंइ कली मारदे म्दुम्ब। मारदे हना जोल पतीके नु गारशा खुइश्शो बाक्नीकी। दूली पतीकेमी फाम्सीशो बाक्नीकी” देतीनी।

16 मोपतीके परमप्रभु, परमप्रभु यावेमी “कोव्रडीन गो सियोन डांडाम जग फुल्लु का वोइक्नुड। मेको रिम्शो नु बोल्यो मुर डा फुल्लु बाक्ब। मेको शुश क्येट लाइब थम बोल्यो जग डा फुल्लु बाक्ब। सु सु मेको कली थमा सुइक्नीमी, मेको आन थुं लुक्य मलाइब। भजन संग्रह ११८:२२; एफिसी २:२०; यसैया ७:९

17 गो ठीक निसाफ कली गारो प्रोव्रची ना क्युक्तीक डोरी खोदेशो सेल्नुड। मिनु ठीक पतीके कली घन्टी खोदेशो सेल्नुड। मिनु मुप्सीम मेको जोल पा खुइक्तीके खतम सेल्ब। ब्वाक्कुमी फाम्सीतीके योल्ब।

18 मेना इन बेक्पाइक्ब नु पशो कबल नुप्ब। इन बेक्शो मुर आन बाक्तीक नु पशो सल्ला जाम्ब। मिनु मेको हिंचा डा श्येत जतीक जाक्शा, इन कली सुम्ब।

19 मेको गिश खेयप जाक्त हना यो, इन कली सुम्ब। मारदे हना मेको सुनी कुस कुस जाक्ब। नाक्दो नाक्ती यो जाक्ब। मेको लोत्र रुप्चा चहिं शुश हिंचा डा बाक्ब।

20 मुर दिसामानु “इप्तीके आइक्च दुम्ब। फेक्तीक वामी सुम्समानु’ आन रां मसुम्ब” देंत।

21 मारदे हना परमप्रभु यावे पेराजीम डांडाम बोक्शो खोदेशो पा बोक्ब। मेको गिबोन डा बेसीम गाइश्शो खोदेशो पा गाइक्ब। मोपा मेकोम आ गेय पाइब। मेको आ गेय छक लाक्चा डा बाक्ब। मिनु मरुप्चा डा बाक्ब। २सामुएल ५:२०; १इतिहास १४:११; १इतिहास १४:१६

22 शुक्शी लोत्र मपने। मो पाइतीनी हना इन कली फ्रेंशो डोरी खांडसीब। मारदे हना परमप्रभु, मुर नेल्ल आन परमप्रभु यावेमी “रागी नेल्ल खतम सेल्नुड” देशो नेता। यसैया १०:२२-२३

23 नेनीन, आं लोत्र नेनीन। नोफा दाइश्शा, होस पा बाक्शा आं लोत्र नेनीन।

24 मार, शोक्चा कली ब्यफ वाक्ब मुरुमी गेना हना यो ब्यफ वाक्बा? मार, गेना हना यो कुटीम दोशा, रू थेल्लीनी?

25 डल्ला प्रोल्चा कली लेडको पशा, सोंप नु मस्ला मशोक्नीमी? चेरब मशोक्नीमी? क्योव्रज रूम क्योव्रज शोक्नीम। मिनु मोत्रल कली भूस फ्राइनीम।

26 मारदे हना आन परमप्रभुमी मेको आन कली रिम्शो पा शेंताक्ब।

27 सोंप कली दांड मपाइनीम। मस्ला कली तूलीमी मतुप्नीम। सोंप कली आइक्च कोक्के नु मस्ला कली सिरकनामी तुप्नीम।

28 शोब्ले चोचा कली चेरब हिल्लीम। तन्न मतुप्नीम। फस सेल्चा कली दांड मपाइनीम।

29 मेको मोदेशो नेल्ल मुर नेल्ल आन परमप्रभु यावेमी शेंशो बाक्ब। मेको अर्ती गेतीकेम छक लाक्चा डा नु तुइक्तीकेम नेल्ल क्येडा ठेयब बाक्ब।

## 29

अरीएल सहर कली श्येत दुम्शो

1 आबी, अरीएल, अरीएल सहर। दाऊद मेकेर बाक्शो बाक्त। गे मेकेर बर्स बर्स बाक्शा, चाड मानेन मानेन बाक्तीनी। अरीएल चढेतीक बाक्तीके यरूसलेम आ याइनी नें बाक्ब।

2 मो हना यो, गो मेको कली श्येत गेनुड। मेकेर डाक्शा, रोंका पाइनीम। यरूसलेम आं कली अरीएल का बाक्ब।

3 गो दाऊदम खोदेशो पा इ कली पुम्पाइक्नुड। गारो डोइक्चा कली लाइशो खिं सेल्पाइक्नुड। गो मोदेशो गेय शुश पपाइक्नुड। लूका १९:४३

4 गे उइ खप रे लोत्र पाइक्नेवे। मिनु फुरक रे पा ब्वाक्नेवे। इ लोत्र फुरक रे नेंसीब। इ सेंदा वोल आन सेंदा खोदेशो पा खप आगा रे ग्बूब। इ लोत्र फुरक आगा रे पा आइक्च सेंदा पा नेंसीब।

5 तन्न इ जोरी सत्रु आन हुल फुरक खोदेशो पा शुश दुम्नीम। सक्ति पाइशोपुकी बेरशो भूस खोदेशो दुम्नीम। मेको नेल्ल याम कामी दुम्ब।

6 मिनु मुर नेल्ल आन परमप्रभु यावे इ कली ग्रुम्थ जाक्ब। मेको बुंबु, खिनु ठेयब रेयके नु जाक्ब। मेको हिरशो फश गिवार नु ठेयब मी नु जाक्ब।

7 रागी रागी डा शुश मुरुमी अरीएल नु लडाइ पाइनीम। लडाइ पाइब नेल्लेमी मेको आन बोल्यो दरवार प्रेशा, श्येत गेनीम। मेको डोमु तशो नु नाक्दो कोंइतीक तशो खोदेशो पा दुम्ब।

8 दोदेशो पा शोत्रलु बेक्शो मुर आन डोमुम जशो ताइनीमी, मिनु सेंसीमानु शोत्रलुम बाक्नीमी। दोदेशो पा तूत दाक्ब मुरुमी डोमुम तूशो ताइनीमी, मिनु सेंसीमानु आन लाक्चा सोत्रशो बाक्बा, मोदेशो पा सियोन डांडा नु लडाइ पाइब रागी रागी डा मुरपुकी दुम्नीम।

परमप्रभु यावे आ गेय

9 छक लाक्शा कोत्रडीन। मिक्च क्रिप्शा, मिक्च मताइब दुमीन। दुक्शो दुमीन। तन्न अडगुर शांबुम ममाइ। गोल्चा चिक्शा गाक्कीन, तन्न राकसीम ममाइ।

10 मारदे हना परमप्रभु यावेमी इन तार शुश निन्द्रा पपाइक्ब सोक्ती मोइशो बाक्ब। मेकोमी गे परमप्रभु यावे आ लोत्र पाइब इन कली मिक्च मताइब सेल्लु। मिनु इन पिया सुम्तु।

11 मेको इन कली कोंइशो लोत्र नेल्ले, इन कली छाप थोक्शो किताब खोदेशो दुम्त। मेको पढेस जोक्ब कली “पढेवो” दे गेतीनी हना, मेकोमी “गो पढेने मचाप्नुड, मारदे हना एको छाप थोक्शो किताब बाक्ब” देब।

12 मेको पढेस मजोक्ब कली गेशा “एको पढेवो” देतीनी हना, मेकोमी “गो पढेस मजोक्नुड” देब।

13 परमप्रभु यावेमी “एको मुरपुकी लोत्र पशा आं नेक्था जाक्नीम। मिनु आन शोत्रमी आं कली ठेयब सेल्नीम। तन्न आन थुंम चहिं आं क्येडा डोन बाक्नीम। मेको आन आं कली मान पतीके मुर आन शेंशो ला बाक्ब। यसैया १:१५; यसैया ५८:२-३; मत्ती १५:८-९

14 मोपतीके गो एको मुर आन दातेमी छक लाक्चा डा, हिंचा डा नु मरुप्चा डा गेय पाइनुड। मेको आन जोक्ब तुइक्ब मुर आन तुइक्तीके जाम्शा लाइब। निप्स खाप्शो गेय पाइब आन निप्स खाप्तीके खुइक्चा पुंइसीनीम। १कोरिन्थी १:१९; मत्ती ११:२५

15 गे सु सुमी आंमा मिम्शा पशो गेय परमप्रभु यावे आ डोंइती खुइक्नीनी नु छिडछिडम गेय पशा, इं कली सुम ताइबा डा? इं कली सुम तुइक्बा डा?” देनीनी। भजन संग्रह १०:११

16 गे दूली पाइबपुकी, खप के ग्योंब सेल्ब मुर खप खोदेशो मिम्सीबा? मिनु सेल्शो थोत्रकमी आ कली सेल्ब कली “मेकोम आं कली मसेल्थी” देबा डा? सेल्सीशोमी सेल्ब कली “मेको मारेड मरुप्ब बाक्ब” देने चाप्बा? यसैया ४५:९

नोले रिम्शो दुम्ब, दे आस पशो

17 मिनु इच्छा नोले लेबानोन फल फुल रू दुम्ब। फल फुल रू चहिं ब्वाकी खोदेशो दुम्ब।

18 मेको नाक्ती नोफा मनेबपुकी किताब डा लोत्र नेनीम। गेना हना यो छिडछिडम बाक्ब, मिक्च मताइबपुकी मिक्च ताइब दुम्नीम। यसैया ३५:५; मती ११:५

19 मिनु ब्रेम्शो मुर परमप्रभु यावे कली मिम्शा ग्येरसीनीम। मिनु क्येट मथीबपुकी इस्राएली आन परमप्रभु यावे कली मिम्शा थाप्पा ग्येरसीनीम।

20 मारदे हना हिंचा डा मरिम्शो पाइब मलीनीम। शुक्शी पाइबपुकी जाम्शा लाइनीम। मरिम्शो पचा माल्बपुकी साइक्चा पुंडसीनीम।

21 मेकोपुकीमी मुर आन कली निसाफ पतीकेमी बुपाइक्नीम। मिनु ठीक पाइब नु निसाफ पाइब कली ब्वारदम रेप्पाइक्नीम। मारेड मरिम्शो मपाइब कली मोशा दोस गेपाइक्नीम। आमोस ५:१०

22 मोपतीके अब्राहाम कली प्रोइब परमप्रभु यावेमी याकूब आ खिं डा मुर आन कली “मुल रे याकूब आ खिं डा मुर मुने मदोक्नीम। आन कुल ग्येरसीशो तांडसीनीम।

23 मिनु मेकोमी आन आल आन दातेम, आं पशो गेय, ताइनीम। मिनु आं नें ठेयब सेल्नीम। याकूब आ का ला बाक्शो परमप्रभु यावे कली तशा मान पा हिंनीम। इस्राएली आन परमप्रभु कली तशा मान पा हिंनीम।

24 मिनु काइ मरुब् मुरपुकी रुब्ब दुम्नीम। मिनु गन गन पाइबपुकी परमप्रभु आ शेंतीके लोत्र नेनीम” देंत।

## 30

मुरुम इजीप्त कली थमा सुइश्शो

1 मिनु परमप्रभु यावेमी “आबी, गे काइ मटीब आलपुकी, गे आंम इन मिम्शो पाइनीनी। तन्न आं देशो मटीनीनी। गे कबल का पाइनीनी। तन्न आं दाक्शो मिम्शो कबल ममाइ। पाप तारी पाप तेम्नीनी। यसैया १:२

2 मेकोपुकीमी आं अर्ती आ पबंम हिल्लो मपथु, इजीप्त रागी लाइनीम। मिनु मेकेर डा पिप फाराओम वारच पपाइसीनीम। मेकोपुकीमी इजीप्त रागीम फाम्सीचा माल्नीम। २राजा १८:२१

3 मिनु फाराओ आ वारच पतीकेम इन कली मुने तोक्ब। मिनु इजीप्त रागीम फाम्सीचा माल्तीके इन कली थम आइक्च सेल्ब।

4 मिनु इजीप्त डा ठेयब मुरपुकी सोआन नु मेको आन सोइश्शोपुकी हानेस जाक्दीश्शो बाक्नीम।

5 मेको नेल्ल मुने दोक्नीम। मारदे हना इन कली वारच पने मचापथु, शोर गाक्शो दुम्नीम। तन्न इन कली मुने दोक्ब नु शिशी मताइब सेल्नीम।

6 मिनु परमप्रभु यावेमी दक्खिन डा नेगेब डा जन्तु आन पबंम यसैया कली मेको रागी हिंचा डा नु श्येत डा रागी बाक्ब। मेकेर गुप्सनी नु ग्रीब गुप्स, बुस्स नु बीस पाइश्शो बेरब बुस्स बाक्नीम। मिनु मुरपुकीमी आन शोंप गधा आन तारी नु शुश क्येट लाइब थोत्रक दलओठ आन तारी कुरपाइश्शा गाक्नीम। मेको शोर गाक्शो नु वारच मपाइब आन कली गेचा कली कुरपाइक्नीम। ब्यवस्था ८:१५

7 मारदे हना इजीप्त डा मुर आन वारच पतीके शोर गाक्शो नु थमा पा वारच मपतीके बाक्ब। मोपतीके गो मेको कली लोत्र मपाइब, राहाब, दे नें वोइक्ता” देंत। भजन संग्रह ८९:११

परमप्रभु कली मटीबपुकी

8 मिनु परमप्रभु यावेमी यसैया कली “मुल गे लावो, मेको मुर आन डोंइती आं लोत्र फुल्लु तार ब्रेक्तो। मिनु किताबम ब्रेक्तो। नोले सम्म लील, दे नु गेना हना यो सांकछी दुम्पाइक्चा कली ब्रेक्तो।

9 मारदे हना एको मुर काइ मटीब बाक्नीम। थमा मसुइक्ब आल बाक्नीम। मेको आलपुकीमी परमप्रभु यावे आ शेंतीक लोत्र नेंचा मदाक्नीम।

10 मेकोपुकीमी नोले दुम्ब लोत्र ताइब आन कली ‘मतने। मकोवडीन’ देनीम। मिनु परमप्रभु यावे आ लोत्र पाइब आन कली ‘ठीक पचा आ पबंम आंइ कली लोत्र मपने। जोल पा हना यो, आंइ दाक्शो लोत्र ला पने। आमोस २:१२



11 परमप्रभु यावे आ लां प्रोनीन। एर ओंथ लने। इस्राएली आन का ला बाक्शो परमप्रभु आ पर्बम मशेंदीन' देंनीम" देंत।

12 मोपतीके इस्राएली आन का ला बाक्शो परमप्रभुम "मारदे हना गेपुकीमी आं देंशो नेंचा मदाक्नीनी, मुर आन कली दिप्तीके नु दूली पतीके कली ला थमा सुइक्नीनी। मिनु मेको पाइनीनी।

13 मोपा इन मरिम्शो पशो ब्रेत्चा चिक्शो लाइश्शो गारो खोदेंशो दुम्शो बाक्ब। मेको इन मतुइक्थु याम काम ब्रेप्ब।

14 दोदेंशो पा मुरुमी खप के ग्योब बोल्यो पा प्रोल्नीमी, मेको के चुप्लु रे मी कोइला गुप्चा नु कुवा रे ब्वाक्कु ताप्चा डा टुक्रा का यो मलीबा, मोदेंशो पा प्रोल्चा पुंइसीनीनी" देंत।

15 मिनु परमप्रभु, इस्राएली आन का ला बाक्शो परमप्रभु यावेमी "आं गे लेशशा, सिक्सी पा बाक्नी हना, ब्रोंइनी वा। सिक्सी पा बाक्तीनी नु थमा सुइक्तीनी हना, गे बोल्यो दुम्नी वा। तन्न गे मटिनी। यसैया ७:४; प्रस्थान १४:१४

16 गेपुकीमी 'ममाइ, गो शारा डोइश्शा प्रोक्नीकी' देंनीनी 'मोपतीके गे प्रोक्चा माल्नीनी' देंत। मिनु गेपुकीमी 'रीब पा दोरेब शारा डोइक्नीकी' देंनीनी। मोपतीके इन कली खेदा पाइबपुकी यो दोरनीम।

17 मिनु मुर कामी हिंच कोइशोमी, हजार का मुर प्रोक्नीम। ५ जना मुरुम हिंच कोइशोमी नेल्ल प्रोक्शा, डांडा तारी कोक्के का खुक्शो खोदेंशो पा लीनीनी। डांडा तार डा छेदर का खोदेंशो पा लीनीनी" देंत। ब्यवस्था ३२:३०

### परमप्रभुम सियोन नु कबल पशो

18 मुल सम्म परमप्रभु यावेमी इन कली शिशी पचा कली रिम्ब। इन कली आ दाक्तीके कोइचा कली बोक्ब। मारदे हना परमप्रभु यावे ठीक निसाफ पाइब परमप्रभु बाक्ब। सु सुम मेको कली रिम्नीमी, मेको ग्येरसीशो बाक्नीम।

19 यरूसलेमम बाक्ब सियोन डा मुरपुकी, गे लेंशा मडाक्नीनी। मेकोमी इन ब्रेश्शो नेंशा, इन कली थमा पा शिशी पाइब। इन लोत्र नेंशा, लोत्र लेप्ब। यसैया ६५:२४

20 परमप्रभुमी इन कली श्येत डा शोब्ले नु श्येत डा ब्वाक्कु गेपु हना यो, मुल रे इन कली शेंब मखुंडसीब। गेपुकीमी इन कली शेंब कली ताइनीनी।

21 मिनु गेपुकीमी "ग्युरा लां लड कों, पेरा लां लड" देंनीनु, इन नोले लोत्र कामी "लां मेकोन बाक्ब, मेको लां गाक्कीन" देंशो नेंनीनी। ब्यवस्था ५:३२

22 मेना इन मुशा सेल्शो चांदी नु सुनम गिल्शो मूर्तिपुकी ग्रांघ्रा दीनीनी। गे मेको आन कली ग्रांघ्रा दिचा डा वा खोदेंशो पा ताइक्नीनी। मिनु मेको आन कली "डोन लने" दे ताइक्नीनी। यसैया २७:९

23 मिनु परमप्रभुमी इन शोक्शो रू कली रेउ यिपाइश्शा, अन्न सिप्पाइक्ब। मिनु अन्न ग्रेल्शा, शुश जचा ताइनीनी। मेना इन बी ब्यफ टेयब दिममी जोइनीम।

24 इन गेय पपाइश्शो ब्यफ नु गधापुकीमी ग्योलोम क्राप्शा, हिक्सी सुप्शो जचा थोव्रक जाइनीम।

25 आइक्च नु टेयब डांडा नेल्ल रे ब्वाक्कु बुक्शा, खोल्सा नु खोला यिशा, टेयब लडाइ दुम नाक्ती गारो डा लाइश्शो खिं यो ब्रेत्नीम।

26 मिनु तास्ला आ छेडछेड नां आ छेडछेड खोदेंशो दुम्ब। नां आ छेडछेड चहिं ७ ओटा नां आ छेडछेड खोदेंशो दुम्ब। मेको ७ नाक्त डा छेडछेड दुम्ब। मेना परमप्रभु यावेमी आ मुर आन गार फ्रेंब। तुप्शो गार सापाइक्ब।

### अस्सुर कली निसाफ पशो

27 कोव्रडीन, परमप्रभु यावे डोन रे जाक्ना जाक्न बाक्ब। आ गाइश्शो मी खोदेंशो पा ब्रशा, शुश कुन ग्यूब। आ शोव चुरचामी ब्रीशो नु आ लें ग्राव गु दाक्ब मी खोदेंशो बाक्ब।

28 आ सास शुर सम्म खुम्ब बारशो खोला खोदेंशो बाक्ब। मिनु मेकोमी रागी रागी डा मुर आन कली खतम सेलतीक ग्योलोम क्राप्शा, आन शोवमी हेंथे लां कोइब लगम पाइक्ब।

29 गेपुकी चाड मानेतीक नाकदोम कुम्सो पशो खोदेशो पा ग्येरसीनीनी। गेपुकी बांसुरी ताप्बपुकी नु परमप्रभु यावे, इस्राएली आन सेरथे फुल्लु आ डांडा लाइब खोदेशो पा ग्येरसीशो मुर बाकनीनी। ब्यवस्था १६:१४

30 मिनु परमप्रभु यावेमी आ ठेयब सेंदामी लोत्र पशा नेंपाइक्ब। मेकोमी गाइशशा चुरशा, आ गुड याम पाइशशा, मारेइ मारेइ नेक्ब मी ब्रपाइशशा, बुंबु पपाइशशा, रेउ नु मुप्स यिपाइशशा कोइब।

31 मिनु परमप्रभु यावेमी अस्सुर डा मुर आन कली कोक्केम तेप्ब। मेको आ सेंदा नेंशा, अस्सुर डा मुर साप्पान हिनीम। २राजा १९:३५-३७

32 मिनु परमप्रभु यावेमी गिश खेयप तुप्बा, मीश खेयप खैजडी नु बीना ताप्शो नेंसीब। परमप्रभु आंमा अस्सुर डा मुरपुकी नु लडाइ पाइब।

33 मारदे हना डोंइती रे ठेयब चोतीके का सेल्शो बाक्त। मेको थमा पा पिप कली सेल्शो बाक्त। मेको शुश लुकच लशो नु ब्रेमशो बाक्त। मेकेर मी नु शुश शी बाक्त। परमप्रभु यावे आ मुइशशो गन्धक खोदेशो पा मेको मी ब्राइब।

## 31

### परमप्रभुमी यरूसलेम कली कोत्रब

1 आबी, इजीप्त रागी कली “वारच पाइक्की” दे लाइबपुकी, मेकोपुकी शारा कली थमा सुइक्ब बाकनीम। बग्गी कली थमा सुइक्नीम। मारदे हना मेकेर शुश बाकनीम। शारा डोइक्ब आन कली थमा सुइक्नीम। मारदे हना मेको शुश बोल्यो बाकनीम। तन्न मेकोपुकीम इस्राएली आन का ला बाक्शो परमप्रभु यावे कली ममिम्थु, हिल्लो मपाइनीम। यसैया ३०:१-२; भजन संग्रह २०:८

2 मो हना यो परमप्रभु तुइक्ब बाक्ब। मिनु श्येत दुम्पाइक्ब। आ मिम्शो पशा, मरिम्शो पाइब आन खिं नु मेको आन कली वारच पाइब नु लडाइ पाइब। आमोस ३:६; गन्ती २३:१९

3 इजीप्त डा मुर, मुर ला बाक्नीम। मेको परमप्रभु मनम। आन शारा बेक्ब बाकनीम। सोक्त मनम। परमप्रभु यावेमी आ गुइ दिदानु, वारच पाइब दाइल पांइसीनीम। मिनु वारच पपांइसीब नेल्ले कालेमी बेक्नीम।

### अस्सुर कली निसाफ

4 मिनु परमप्रभु यावेमी आं कली “गुप्स कि गुप्स आ चाइक्ब आन सिखार तारी डरर डरर पाइनीमी। गोठलापुकीमी मेको आन सिखार रोइक्चा, दे जाक्तेकम हना, गुप्स मेको आन ग्रीशो नेंशा महिनीम। मेको आन पशो रेयकेमी गुप्स आन कली मप्रोकपाइक्ब। मोपा मुर नेल्ल आन परमप्रभु यावे सियोन डांडा नु आ आइक्च डांडामी लडाइ पथ यीब।

5 दोपा चिक्बपुकीमी आन चाइक्ब आन तार फिल फिल पा कोत्रथ बेरनीमी, मोपा मुर नेल्ल आन परमप्रभु यावेमी यरूसलेम कली कोत्रब। मेको कली कोत्रशा, प्रोंइशा, आ नेक्था बाक्शा खाल पाइब। मत्ती २३:३७

6 ए इस्राएली, गे हेंथे पा शुश डोन लाइबपुकी, परमप्रभु गे लेतीन। येरमीया ७:३-५

7 मारदे हना मेको नाक्ती गे नेल्लेमी इन सुन नु चांदी के मूर्ति नेल्ल बेरपाइक्नीनी। गे मेको पाप पा इन आंम गुइमी सेल्लतीनी। यसैया २:२०

8 मेना अस्सुर तरवारम साइक्चा पुंइसीब। तन्न मेको तरवार बेक्शा लाइब मुर के ममाइ। मेकोमी नेल्ल आन कली खतम सेल्ब। मेको तरवार तशा मुर नेल्ल प्रोक्नीम। मिनु आन ठिटापुकी वाइल दुम्नीम। यसैया ३७:३६

9 अस्सुर डा पिप, सेरथे फुल्लु खोदेशो बोल्यो बाक्त हना यो, हिंशा प्रोक्ब। आ कप्तान आन छेदर प्रोंइशा प्रोक्नीम। परमप्रभु यावेमी आं चुप्लु सियोनम नु आं मी यरूसलेम बाक्ब” देंत। ब्यवस्था ३२:३१

## 32

## नोले डा राज्य

1 कोव्रडीन, नोले ठीक पाइब पिप काम सासन पाइब। ठेयब मुर नेल्लेमी ठीक निसाफ पाइनीम। यसैया ३३:१७; येरमीया २३:५

2 मिनु मेको मुर नेल्ल फश रे खुइसीतीके, रेउ यिमेनु फाम्सीतीके, सोव्रशो रागीमी ब्वाक्कु यितीके नु थम होश रागीमी ठेयब सेरथे फुल्लु आ वांकु खोदेशो बाक्नीम।

3 कोव्रब मुर आन मिक्च ब्राब्रा मदुम्नीम। नेबपुकीमी नोफा दाइशशा नेनीम।

4 रिम्शो पा रुप्ने मचाप्बपुकीमी तुइक्तीक शेंनीम। लेम्से पाइबपुकी रिम्शो पा ब्वाक्ने चाप्नीम। यसैया ३५:६

5 मेना मुरुमी मूर्ख आन कली रिम्शो थुं पाइशशो मुर मदेनीम। खुइ नु जोल पाइब आन कली हाइशशो मुर मदेनीम। हितोपदेस २८:१६

6 मारदे हना मूर्ख मुर मूर्ख लोव्र ला पाइनीम। मेको आन थुंमी मरिम्शो पचा ला मिम्शा बाक्नीम। परमप्रभु यावे कली मटीनीम। मेको आ पबर्म दूली शेंनीम। शोव्रलु बेक्ब आन थुं श्येत्थ लीपाइक्नीम। मिनु तूतू दाक्ब आन कली तूचा मगेनीम।

7 मोदेशो मरिम्शो पाइब आन गेय मरिम्शो बाक्ब। परमप्रभु यावे आ अरेशो मटीबम “दोपा आं दाक्शो पने चाप्नुडा?” दे प्रुडग आन कली जोल पा नु मारेइ मथीबम ठीक लोव्र पाम्तेक्म हना यो, मेको आन कली खतम सेल्नीम।

8 तन्न रिम्शो थुं पाइशशो मुरपुकीमी रिम्शो गेय ला मिम्नीम। मिनु गेना हना यो रिम्शो गेय पा बाक्नीम।

## परमप्रभु आ सोक्त जाक्ब

9 गे ठेयब लेशशो मीश मुरपुकी बोक्कीन। मिनु आं लोव्र नेनीन। गे काइ महिंथु बाक्ब तमीपुकी इन नोफा दाइशशा, आं लोव्र नेनीन। यसैया ३:१६-४:१

10 गे काइ महिंबपुकी बर्स का नोले श्येत जशा खिंखि पाइनीनी। मारदे हना अडगुर सेक्चा मताइनीनी। फल फुल मसिल्लीम।

11 गे ठेयब लेशशो मीश मुर खिंखि पने। गे काइ महिंबपुकी खिंखि पा हिनीन। इन वा प्रुडशशा अरन्डी फेक्सीन।

12 इन रिम्शो रू नु अडगुर बोट आन पबर्म इन कुचु तुप्शा डाक्कीन।

13 आं मुर आन रूम चू नु चोंक वानीम। ग्येरसीशो मुर आन खिं नु सहर नेल्ल मोदेशो दुम्ब।

14 मारदे हना दरवार डा मुर नेल्ल प्रोक्नीम। शुश मुर बाक्शो सहर श्येत्थ दुम्ब। ओफेल माइशशो ग्येत्थ लुकच गाक्तीक लां नु मेकेर खाल पाइब मुर आन बाक्तीक गेना हना यो पुक्खी दुम्नीम। मेकेर ब्वाकी डा गधा ग्येरसीशा बाक्नीम। मिनु क्यारश भेडा आन जोतीक दुम्ब।

15 मिनु नोले परमप्रभु यावेमी आ सोक्ती इं तार मोइक्ब। मेना मुर मबाक्तीके गोरशो रागी ग्रेल्शो रू दुम्ब। मिनु मेको ग्रेल्शो रू ब्वाकी खोदेशो दुम्ब। यसैया ४४:३; यसैया २९:१७

## थुं नाइशशा बाक्तीक राज्य

16 मेना मुर मबाक्तीके रागीमी ठीक निसाफ पाइनीम। ठीक पाइबपुकी ग्रेल्शो रूमी बाक्नीम।

17 ठीक पतीकेम थुं नाइक्चा गेब। ठीक पतीके आ सिल्लीके सिक्सी पा बाक्चा नु गेना हना यो थमा सुइक्चा बाक्ब।

18 आं मुरपुकी थुं नाइशशा, महिंथु बाक्तीकेम बाक्नीम। लडाइ मदुम्थु, रिम्शो बाक्तीकेमी सिक्सी पा बाक्नीम। येरमीया ३३:१६

19 तन्न ब्वाकी नेल्ल जाम्शा लाइब। सहर श्येत्थ दुम्ब।

20 ब्वाक्कु आ नेक्था वाचेर शोक्बपुकी गे ग्येरसीशो मुर बाक्नीनी। गे गधा नु बी ब्यफ आन कली जोथ मो सोइक्ने चाप्नीनी।

## 33

सियोन कली खतम पोक्ब रे प्रौडशो

1 आबी, गे खतम पोक्ब, मुल सम्म गे खतम पोक्चा मपुंडसीशो बाक्नेवे। गे रोइक्ब बाक्नेवे। तन्न सुइमी मारेइ मरोइक्थु, गे खतम पोक्चा पुंडसीनेवे। मिनु इ रोइक्चा नुप्त हना, इ मारेइ मारेइ रोइक्चा पुंडसीनेवे। मती ७:२

2 परमप्रभु यावे, आइ कली शिशो पाइक्की। गो इन कली रिम्ना रिम्न बाक्नीकी। गे सुनी कुस कुस आइ सक्ति दुमीन। श्येत जची ना आइ कली प्रौडब दुमीन।

3 शुश रेयके नेशा, जात जात डा मुर प्रोक्नीम। इन सक्ति तशा, रागी रागी डा मुर एर ओथ ब्राइनीम।

4 मेकोपुकीमी सल्ला खोदेशो पा शुश मारेइ मारेइ रोइक्नीम। दोपा सल्ला प्रेक्शा दोरनीमी, मोपा मुरपुकी प्रेक्शा रोइक्चा कली दोरनीम।

5 परमप्रभु यावे मान ताइब बाक्ब। मेको इर, आ बाक्तीकेमी बाक्ब। मेकोमी सियोन डा मुर आन कली ठीक निसाफ नु ठीक पतीके पपाइक्ब।

6 मिनु सियोन इ नाक्ती नेल्ल रिम्शो दुम्ब। मेना शुश पाप रे प्रौडतीके, तुइक्तीके नु जोक्तीके गे नु बाक्ब। सियोन डा मुर आन शोंप परमप्रभु यावे कली मान पा हिंचा बाक्ब।

7 नेनीन, मेको आन बोल्यो मुरपुकी लांम ग्रीनीमी। गारपइक्तीक लोत्र चाक्ब मुर हुइ हुइ पा डाक्नीम। यसैया २९:१

8 ठेयब लां श्येत्थ दुम्शो बाक्नीम। मुर मेको लांम मगाक्नीम। गारपाइक्तीक लोत्र क्याम्सीशो बाक्ब। सांकछीपुकी महिक्सीब दुम्शो बाक्नीम। आन कसम जशो जाम्त। आन पचा माल्लो गेय मपाइनीम।

9 रागी रोंका पशा, गोरशो दुम्शो बाक्ब। लेबानोन मुने दोक्शा, बेक्त। शारोन गोरशो रागी खोदेशो दुम्त। बाशान नु कारमेलम आस सफा तोक्नीस।

10 परमप्रभु यावेमी “मुल गो बोक्नुड। गो गेय पचा गोइनुड। गो मान पाइक्चा पुंडसीनुड।

11 गेपुकीम भूस के कोत्रज कुरशा, पराल थीनीनी। इन सास मी बाक्ब। मेकोमी इन कली दाक्ब।

12 मिनु जात जात डा मुर बुलु खोदेशो पा ब्राइनीम। मेकोपुकी क्योरशो चू मीम जेशो खोदेशो पा जेत्चा पुंडसीनीम।

13 गे डोन रागी डा मुरपुकी, गो मार पशो बाक्नुडा, मेको नेनीन। गे आं नेक्था बाक्बपुकी आं सक्ति तुइक्तीन।

14 सियोनम बाक्ब पाप पाइबपुकी हिंनीम। परमप्रभु यावे आ अरेशो मटीब खिंखि पाइनीम। सु खतम पोक्ब मी नु ब्रौडशा बाक्ने चाप्पा? आइ दातेमी सु गेना हना यो ब्रशो मी नु ब्रौडशा बाक्ने चाप्पा?” देंत। यसैया १०:१७; येरमीया २३:२९

15 सु ठीक पाइबा, रिम्शो थु डा लोत्र पाइबा, गेयी कि गेयी, दे क्येट मताक्बा, सुम घूस मजाइबा नु “हुश खाक्श पोक्थ” देंमान, मेको आन लोत्र मटीबा नु मरिम्शो पाइब आन पशो काइ तचा मदाक्बा। भजन संग्रह १५:५; भजन संग्रह २४:३-४

16 मेको इर डा मुर बाक्नीम। मेको आन खुंडसीतीके सेरथे फुल्लु के सेल्लो दरवार बाक्ब। मेकोमी आन जचा थोत्रक ताइनीम। मेको आन ब्वाक्कु बुक्तीके शुश दुम्ब।

मान ताइब पिप आ रागी

17 गेपुकीमी पिप कली आ दारसम ग्योम्सीशा ताइनीनी। मिनु मेकोपुकीमी ठेयब रागी कली ताइनीम।

18 मिनु गेपुकी इन डोंइती डा हिंतीके मिन्नीनी। हिक्ब मुर ते लमा? क्येट पोक्ब मुर ते लाक्गमे? मिनु मेको लाइशो खिं हिक्ब ते बाक्मा?

19 गेपुकीम मेको मटीब मुर आन कली मुल रे मताइनीनी। मरुप्चा डा लोत्र पाइब मुर आन कली लेशा मताइनीनी। यसैया २८:११; ब्यवस्था २८:४९-५०

20 गो आंइ देशो ना डा चाड मानेतीक सहर सियोन कली कोवडीन। गे सिक्सी पा बाक्ब मुर आन सहर यरूसलेम कली ताइनीनी। यरूसलेम गेनायो मयाक्सीब ताम्बु खोदेशो बाक्ब। मेको आ किला गेनायो मतुल्सीब। आ डोरी गेनायो मप्रोंडसीब।

21 मेकेर आंइ मान तशो, परमप्रभु यावे गो नु बाक्ब। मेकेर ठेयब खोला नु नादी बाक्नीम। मेकेर दाप्लोम शाक्तीक डोंगा मगाक्नीम। मेकेर ठेयब जहाजपुकी यो लने मचाप्नीम।

22 मारदे हना परमप्रभु यावे आंइ कली निसाफ पाइब बाक्ब। परमप्रभु यावे आंइ कली सासन पाइब बाक्ब। परमप्रभु यावे आंइ पिप बाक्ब। मेकोमी आंइ कली श्येत रे प्रोंडब।

23 गे इन जहाज डा डोरी शुंडसीशो बाक्नीम। मुरपुकीम मेको डोंगा आ दातेम बाक्शो थाम बोल्यो पा राप्पाइशा सेल्ले मचबेम। मेकोपुकीम मेको आ वा क्युक्ने मचबेम। मेना रोइशो मार मार शुश योक्सीनीम। खोइल मदुकबपुकीम यो रोइशो मार मार रे आन भाग ताक्नीम।

24 सियोनम बाक्ब सुइमी “गो रोइ पशो बाक्नुड” मदेनीम। मेकेर बाक्ब मुर आन मरिम्शो पशो क्याम्चा पुंडसीशो बाक्नीम। जकरिया १२:८

## 34

### एदोम कली निसाफ

1 गे रागी रागी डा मुर, आं नेक्था जाक्कीने। जात जात डा मुर नोफा दाइशा नेनीन। रागी नु रागीम बाक्शो मारेइ मारेइम नेन्मेक्ल।

2 मारदे हना परमप्रभु यावे रागी रागी नेल्ल आन परबम गाइक्ब। मेको आन लडाइ पाइब आन परबम चुरब। मेको आन कली क्याम्चा कली साइक्ब कली गेशो बाक्ब।

3 मेको साइशो मुर आन कली ताइक्नीम। मेको आन रिना कुइब। डांडापुकी मेको आन हुशेम जिल्लीम।

4 सरीड डा मारेइ मारेइ जाम्नीम। सरीड कागज खोदेशो पा ओल्सीब। सोरुल अडगुर बोट आ सोव्रशो सफा नु फोव्रशी रवा आ सोव्रशो गेडा खोदेशो दुम्नीम। प्रकाश ६:१३-१४

5 परमप्रभुमी “आं तरवारम सरीडमी गेय थुम्शा नोले, गो एदोम तारी लाइनुड। गो मेकेर डा मुर आन कली निसाफ पाइनुड” देंत। ब्यवस्था ३२:४१-४२; येरमीया ४९:७-२२

6 परमप्रभु यावे आ तरवार हुशेम गुम्शो बाक्ब। बोंसो लुम्सीशो बाक्ब। मेको क्यारश भेडा आन हुश नु बोका आन चिच डा बोंसो लुम्सीशो बाक्ब। मारदे हना बोज्रामी परमप्रभु यावेमी ठेयब चढ़ेतीक गेय पाइब। एदोम रागीमी शुश मुर आन कली साइक्ब। यसैया ६३:१

7 ब्वाकी डा ब्यफ मुरपुक नु गोल्नीम। बाछापुकी बोल्यो सांढे ब्यफपुक नु गोल्नीम। मेको आन रागी हुशेम जारशो बाक्ब। मेकेर डा खप बोंसोम व्रीशो बाक्ब।

8 काबु परमप्रभु यावे आ क्येक्क लेत्तीक नाक्त बाक्ब। सियोन आ परबम ठीक सेल्चा कली क्येक्क लेत्तीक बर्स का बाक्ब। यसैया ६३:४

9 मेना एदोम डा खोलापुकी अलकत्रा दुम्नीम। मिनु आ खप चहिं गन्धक दुम्ब। एदोम रागी ब्रशो अलकत्रा दुम्ब। उत्पत्ती १९:२४

10 मेको नाकदो नाक्त गेनायो मकाप्ब। आ कुन गेना हना यो कुस डा कुस बाक्ब। मेको पाला पाला सम्म गोरशो रागी दुम्शा बाक्ब। मेकेर रे सुइ मगाक्नीम। मलाकी १:४

11 तन्न मेकेर ठेयब चिक्ब नु काइश आन बाक्तीके दुम्ब। मेकेर हुहुचील नु खदपुकी बाक्नीम। परमप्रभुमी मेको रागी कली गांग्ये माग्ये सेल्ब। आ ठेयब मुर मार पचा दो पचा दुम्नीम।

12 मेको रागी कली राज्य मदेनीम। मेकेर हुकुम पाइब सुइ मलीम।

13 मेको आन दरवारम चू वानीम। मेको आन बोल्यो दरवारम चूले नु चोंक वानीम। मेकेर सिवार नु ठेयब चिक्ब आन बाक्तीके दुम्ब। यसैया १३:२१-२२

14 मेकेर वां नु फर गुम्नीम। वोल ब्रेम्मुइनीम। ब्वाकी डा वोलम आ वारच कली ब्रेप्ब। नाकदो डा वोल मेकेर बास बाक्नीम।

15 मेकेर बुक्सुम ग्यात्र सेल्शा, ब्वाफु पा पुक्शा, चाइक्ब गुंडब। मेकेर ब्वारदे गुम्शा, निक्शी निक्शी पा बाक्नीम।

16 परमप्रभु यावे आ किताबम माल्शा पढेने। मेकेर नेल्ल ब्रेक्शो बाक्ब। मेको नेल्ल निक्शी निक्शी बाक्नीमी। मारदे हना परमप्रभु यावेमी लोत्र पा मेको आन कली अरेप्तु। आ सोक्तीमी मोदेशो दुम्पाइशो बाक्ब। प्रस्थान ३२:३२

17 परमप्रभुमी मेको आन कली मेको रागी पुक्शा योक्शा, गेशो बाक्ब। मेको रागी गेना हना यो मेको आन के दुम्शा, पाला पाला सम्म मेकेर बाक्नीम।

## 35

### परमप्रभु आ मुर ग्येरसीशो

1 मुर मबाक्शो नु ब्वाक्कु मबाक्शो रागी ग्येरसीनीम। गोरशो रागी ग्येरसीशा शुश फू बोइक्पाइक्ब। यसैया ३२:१५

2 मिनु मेको थाम्पा बोइशशा, ग्येरसीशा कुम्सो पना पन बाक्नीम। लेबानोन, आ दारस मेकोम ताइब। कारमेल नु शारोन आन मान ततीक मेको कली गेशो बाक्ब। मेकोपुकीमी परमप्रभु यावे आ मान ततीके नु आइ परमप्रभु आ छेडछेड ताइनीम।

3 इन मारेइ पने मचाप्ब गुइ बोल्यो सेलीन। इन खिंखि पाइब पोक्च बोल्यो सेलीन। हिबू १२:१२

4 हिंभ थुं पाइशशो मुर आन कली “इन थुं फ्रेदीन। महिनीन” दे मतीन। इन परमप्रभु एक बाक्ब। मेको क्येक्क लेत्वा कली जाक्ब। परमप्रभुमी हिंचा डा सजाइ गेब। मेको जाक्शा इन कली प्रॉइब।

5 मेना मिक्च मताइबपुकीमी ताइनीम। नोफा मनेबपुकीमी नेनीम। यसैया २९:१८

6 खोइल मदुक्ब मुर किशश खोदेशो पा प्रेक्नीम। मब्वाक्बपुकीमी ग्येरसीशा कुम्सो पाइनीम। मारदे हना मुर मबाक्तीकेम ब्वाक्कु बुक्नीम। गोरशो रागीमी खोला यीनीम।

7 मिनु थम होश बाल्वा दोम्ली दुम्ब। सोत्रशो खप रे ब्वाक्कु बुक्ब। मिनु सिवार आन बाक्तीकेमी घांस नु बुदी मीलु वानीम। यसैया ४१:१८

8 मेकेर ठेयब लां का दुम्ब। मेको लां कली “परमप्रभु यावे आ लां बाक्ब” दे नें वोइक्नीम। ग्रांघा दिशो मुर मेको लां लचा मताइनीम। परमप्रभु आ मुर ला मेको लां लचा ताइनीम। सु सु मेको लां लाइनीमी, मेकोपुकी मूर्ख बाक्तेक्म हना यो, मजामीम। यसैया ५६:३-८; येरमीया ३१:८

9 मेकेर गुप्स मबाक्नीमी। मुर ब्वाइब जन्तु यो मलाइनीम, मबाक्नीम। तन्न पाप रे प्रॉइशो मुर ला मेको लां गाक्नीम।

10 परमप्रभु यावेमी श्येत रे प्रॉइशो मुर ला लेशशा जाक्नीम। मिनु सियोनमी कुम्सो पना पन ओवनीम। मेकोपुकी गेना हना यो ग्येरसीशा बाक्नीम। ग्येरसीना सीन बाक्नीम। आन श्येत जशा, हुकयी पतीके लेशशा मजाक्ब। यसैया ५१:११; प्रकाश २१:४

## 36

### सन्हेरीबम यहूदा नु लडाइ पशो

२राजा १८:१३-२राजा १९:३७; २इतिहास ३२:१-२३

1 पिप हिज्कीयाहम सासनम पवा आ १४ बर्सम, अस्सुर डा पिप सन्हेरीबम यहूदा डा गारो हिरशो सहर आन कली लडाइ पा ग्रात।

2 मिनु अस्सुर डा पिपम लाकीश डा राब्शाके माइशशो, आ कप्तान नु लडाइ पाइब शुश पिप हिज्कीयाह आ बाक्तीके यरूसलेममी सोइक्ताक्ब। मिनु मेको आइक्था दोम्ली डा ब्वाक्कु यितीके वा मुरब आन रू डा लांमी राप्तेक्म। यसैया ७:३

3 मिनू दरवार कोवब, हिल्कीयाह आ तौ एल्याकीम, पिप आ ब्रेकब शेब्ना नु आसाफ आ तौ योआह लाडगा गूशा मेको आन बाक्तीक लाम्तेकम। यसैया २२:२०

4 मिनू राब्शाकेमी मेको आन कली “गे हिज्कीयाह कली अस्सुर डा ठेयब पिपमी इन कली मार दैत दैशा हना, ‘गे मार कली आस पा थमा सुइक्नीनी?’

5 गे इन फश लोव्रम लडाइ दोपा पचा तुइक्तीक नु लडाइ पतीक सक्ति बाक्बा? गे आं कली मटिथु, सु कली आस पा थमा सुइक्नेवे?

6 गे जिक्शो कोक्के खोदेशो इजीप्त कली थमा सुइक्नेवे? सु सु मेको कोक्के तिक्शा गाक्नीमी, मेको आन गुड थोक्ब। सु सुमी इजीप्त डा पिप फाराओ कली थमा सुइक्नीमी, मेको कोक्केम थोक्शो खोदेशो दुन्मीम। इजीप्त डा फाराओ मोदेशो बाक्ब’ दे मतीन। इजीकीएल २९:६-७

7 तन्न गे, आं कली ‘गोपुकी परमप्रभु यावे, आंइ परमप्रभु कली थमा सुइक्नीकी’ दैतीनी हना, हिज्कीयाहमी मेको आ थान नु आ चढेतीकेपुकी मप्रेंदा डा? मिनू यहूदा नु यरूसलेमम बाक्ब आन कली ‘गे एको चढेतीके आ डोंइती चढेचा माल्नीनी’ मदेंमे? २राजा १८:४

8 गे आं होव्रप, अस्सुर डा पिप नु बाजी पावो। मिनू इ के शारा डोइक्ब मुर बाक्तेकम हना, गो इ कली हजार निक्शी शारा गेनन।

9 गे बग्गी नु शारा डोइक्ब आन परबम इजीप्त कली थमा सुइक्नेवे। गे आं होव्रप आ नेल्ल क्येडा आइक्च कप्तान का कली यो खेरने मचाप्नेवे।

10 मार, गो एको रागी खतम सेल्चा कली परमप्रभु यावे कली हिल्लो मपथु, जाक्डा डा? परमप्रभु यावेम आं कली ‘लावो, मेको रागी कली खतम सेलो’ दे माइक्ती” दैत।

11 मिनू एल्याकीम, शेब्ना नु योआहमी मेको राब्शाके कली “इन गेय पाइबपुकी नु अरामी लोव्र ब्वाक्कीन। गो मेको लोव्र रुप्नीकी। गारोम बाक्ब मुर नेल्ल आन नेंचा डा पा यहूदी लोव्र पा म्वाक्कीन” दैतेकम।

12 तन्न राब्शाकेमी “मार, आं होव्रपमी इन होव्रप नु इन कली ला लोव्र पथ सोइक्ती डा? गारोम बाक्ब मुरपुकीम यो रुप्चा माल्नीमी। मारदे हना मेकोपुकीम यो इन खोदेशो पा आन ख्नी जचा नु आन चारनाक तूचा माल्नीम” दैत।

13 नोले मेको राब्शाकेमी मुर आन नेक्था राप्शा यहूदी आन लोव्रमी ठेयब सेंदा पा “अस्सुर डा ठेयब पिप आ लोव्र नेनीन।

14 मेकोमी मार दैत हना ‘हिज्कीयाह आ जोल लोव्र थमा मसुतीन। मेकोम इन कली प्रोंइने मचाप्ब।

15 हिज्कीयाहमी इन कली “परमप्रभु यावेम इन कली रिम्शो पाइब। परमप्रभु यावेमी इन कली थमा पा श्येत रे प्रोंइब। एको सहर अस्सुर डा पिप आ गुइमी मदुम्ब” देशो लोव्र थमा मसुतीन।

16 हिज्कीयाह आ लोव्र मनेनीन, मारदे हना अस्सुर डा पिपमी इन कली “गो नु गारीन। मेकेर रे गूशा आं बाक्तीके जाक्कीन। मो पाइतीनी हना, गे नेल्ल इन रू डा अडगुर बोट नु इन फोव्रशी रवा ताइनीनी। मिनू इन आंम कुवा डा ब्वाक्कु तूचा ताइनीनी। १राजा ५:५; मीका ४:४

17 मिनू नोले गो इन कली आंम रागी खोदेशो अर्को रागी काम लाइक्नन्नी। मेको रागीम शुश अन्न नु अडगुर शांबु बाक्ब। मेको शोब्ले नु अडगुर रूम ब्रीशो रागी बाक्ब” दैत।

18 हिज्कीयाहमी इन कली “परमप्रभु यावेमी इ कली श्येत रे प्रोंइब” देशा, हेंथे लां कोंइचा मगेने। मार, रागी रागी डा देवी देवता काम यो आन रागी अस्सुर डा पिप आ गुइ प्रोंइने चाप्मे डा? यसैया ३७:१२

19 हमथ नु अरपाद डा देवी देवता ते लाक्गमे? सेफारवाइम डा देवी देवता ते लाक्गमे? मेकोपुकीमी सामरीया कली अस्सुर आ पिप गुइ रे प्रोंइने चाप्मे डा?

20 एको रागी नेल्ले डा तेको देवी देवताम आ रागी आं गुइ रे प्रोंइने चाप्बा डा? मार, परमप्रभु यावेमी यरूसलेम कली आं गुइ रे प्रोंइने चाप्बा डा?” ” दैत।

21 तन्न मेकोपुकी सिक्सी पा बाक्शा, राब्शाके कली काइ लोव्र मलेत्तेम। मारदे हना पिपमी मेको आन कली “लोव्र मलेत्तीन” दे माइश्शो बाक्त।

22 मिनु दरवार कोव्रब, हिल्कीयाह आ तौ, एल्याकीम, ब्रेकब शेब्ना नु इतिहास ब्रेकब आसाफ आ तौ, योआहम आन वा खाक्शा हिज्कीयाह आ डोंइती जाक्शा, मेको राब्शाके आ लोव्र नेल्ल शोव्रतेक्म।

## 37

### यरूसलेम कली प्रोंइशो

1 मिनु पिप हिज्कीयाहमी मेको लोव्र नेंशा, आ वा खाक्शा, अरन्डी फेक्शा परमप्रभु यावे आ खिं लत।

2 मिनु मेकोमी आ दरवार कोव्रब एल्याकीम, ब्रेकब शेब्ना नु चढेब आन दाते डा खूशो आन कली अरन्डी फेक्पाइश्शा, आमोज आ तौ यसैया आ बाक्तीक सोइक्ताक्व।

3 मिनु मेकोपुकीमी यसैया कली “हिज्कीयाहमी ‘मुलाक्ती श्येत जतीके, तुप्पाइसीतीके नु शुक्शी पाइक्चा पुंडसीतीके नाक्त बाक्ब। आल थिचशो मीश मुरुमी आल थिचावानु, थिचा कली बोल मबाक्शो खोदेशो दुम्त।

4 इन परमप्रभु यावे, इन परमप्रभुमी राब्शाके आ लोव्र नेना माइ। अस्सुर डा पिपमी मेको कली गेना हना यो ब्रोंइशा बाक्ब परमप्रभु कली शुक्शी पथ सोइक्ताक्व। मेको आ लोव्र नेंशा, परमप्रभु यावे, इन परमप्रभुमी मेको कली सजाइ गेबा कों? मोपतीके लीशो मुर आन पर्वम पुनीन’ दैत” दे मेकोपुकीमी दैतेक्म।

5 मोपा हिज्कीयाह आ मुरपुकी यसैया आ बाक्तीक जाक्मानु,

6 यसैयामी मेको आन कली “गेपुकीमी पिप कली ‘परमप्रभु यावेम इन कली मार देशो बाक्ब देशो हना, इन नेंशो अस्सुर डा पिप आ मुरुमी आं कली शुक्शी पशो लोव्र आ पर्वम महिनीन।

7 गो मेको कली हिंब थुं का गेनुड। मिनु हिंचा डा लोव्र नेंशा, मेको आ रागी लेशशा लाइब। मिनु गो मेको कली आ रागीम क्योरशा साइक्पाइक्नुड दैत’ दे मतीन” दे माइक्तीमी।

8 मिनु राब्शाके आ पिप बाक्तीके लेम्मेनु “पिपम लाकीश प्रोंइतु” देशो लोव्र नेना बाक्त। मिनु लमेनु, अस्सुर डा पिप लिब्ना डा मुर नु लडाइ पना पन बाक्शो थिदा बाक्त।

9 अस्सुर डा पिपमी एथीयोपीया डा पिप तिरहाकाह “गे नु लडाइ पथ जाक्ना जाक्न बाक्ब” देशो लोव्र नेना बाक्त। मिनु मेको लोव्र नेंशा, हिज्कीयाह आ बाक्तीकेमी आ मुर आन कली लोव्र कुरब पा सोइक्ताक्व।

10 मार लोव्र सोइक्ताक्व देशो हना, यहूदा डा पिप हिज्कीयाह कली “इन थमा सुइश्शो परमप्रभुमी इन कली दूली लां मखोइक्पांइसीन। ‘यरूसलेम अस्सुर डा पिप आ गुइमी मदुम्ब’ दैनीनी।

11 गे अस्सुर डा पिपपुकीमी रागी नेल्ल आन कली क्याम्शो, लोव्र नेंशो बाक्नीनी। मार गे चहिं ब्रोंइनीनी डा?

12 आं किकी पिपमी क्याम्शो रागी रागी गोजान, हारान, रेचेफ नु तेलास्सारम बाक्शो एदेन डा मुर आन देवी देवतामी मेको रागी प्रोंइने चाप्मे डा? यसैया ३६:१८

13 हम्माथ, अरपाद, सेफारवाइम, हेना नु इव्वाह डा पिपपुकी ते लाक्गमे? दे मतीन” दैत।

### हिज्कीयाह आ पुंडशो

14 मिनु हिज्कीयाहमी मेको लोव्र कुरब मुर आन गुइ रे मेको चिठी ताक्शा, पढेप्टु। मिनु मेको चिठी परमप्रभु यावे आ खिं लाइश्शा, परमप्रभु यावे आ डोंइती प्राक्शा वोइक्तु।

15 मिनु हिज्कीयाहमी परमप्रभु यावे कली

16 “मुर नेल्ल आन परमप्रभु यावे, इस्त्राएली आन परमप्रभु, गे करूब आस तार बाक्ब बाक्नीनी। गे ला रागी नेल्ल डा राज्य डा परमप्रभु बाक्नीनी। सरीड नु रागी इन सेल्लो बाक्नीस।

17 परमप्रभु यावे, आं लोव्र नेनीन। परमप्रभु यावे, कोव्रडीन। सन्हेरीबमी गेना हना यो ब्रोंइशा बाक्ब परमप्रभु, इन कली शुक्शी पथ सोइश्शो लोव्र नेनीन।

18 परमप्रभु यावे, थमा पा अस्सुर डा पिपपुकीमी रागी रागी नेल्ल क्याम्ताक्म।



19 मेको आन देवी देवता मीम हुम्ताक्म। मारदे हना मेकोपुकी मुर आन गुडमी सेल्शो, शी नु फुल्लु के बाक्नीम। मेकोपुकी इन खोदेशो मनम। मोपतीके खतम सेल्चा पुंडसाक्म।

20 परमप्रभु यावे, आंड परमप्रभु, मुल आंड कली सन्हेरीब आ गुड रे प्रोनीन। रागी नेल्ल डा मुरपुकीम गे ला परमप्रभु यावे बाक्नीनी, दे तुइक्तमेक्ल” दे पुंडशा, लोत्र पाप्तु। यसैया ४०:५; दानीएल ६:२७

यसैयामी पिप कली लोत्र पशो

21 नोले आमोज आ तौ यसैयामी हिज्कीयाह कली “परमप्रभु यावे, इस्राएली आन परमप्रभुमी ‘अस्सुर डा पिप सन्हेरीब आ पर्वम इ पशो लोत्र गो नेता’ दैत।

22 परमप्रभु यावेमी सन्हेरीब आ पर्वम मार दैत दैशा हना ‘सियोन डा कन्ने तमी इ पर्वम शुक्शी पा रिशो बाक्ब। यरूसलेम डा तमीमी इ नोले कोत्रशा, आ पिया हिक्शो बाक्ब।

23 गे सु कली शुक्शी पवी? सु आ पर्वम गे ठेयब लेशो लोत्र पवी? गे इस्राएली आन का ला बाक्शो परमप्रभु आ डोंइती ठेयब लेशो दुमे?

24 मिनु इ सोइशो गेय पाइब मुर रे पा परमप्रभु कली शुक्शी लोत्र पपाइक्तीवी’ दैत। मिनु गे ‘आं शुश बग्गीमी डांडा डोंइसाक्यी। लेबानोन नेल्ल डोंइसाक्यी। गो मेकेर डा लाइशो रवा नु रिम्शो रवा नेल्ले आन कली तिम्तामी। गो नेल्ल क्येडा इर नु डोन नु ठेयब ब्वाकी सम्म जाक्दीत्ती। यसैया १४:८

25 गो इनार दोशा ब्वाक्कु तूता। आ खोइलीमी इजीप्त डा ठेयब खोला नेल्ल सोत्रपाइक्ता, दे शुक्शी पपाइक्तीवी।

26 गो आं डोंइती मिम्शो, गे मतुइक्ती? आं डोंइती मिम्शो गो मुल पाइनुड। गे गारो हिरशो सहर आन कली फुल्लु तेल्तीक सेल्चा माल्नेवे।

27 मेकेर डा मुर आन सक्ति जाम्शा, हिंब दुम्शा, मुने पा, मारेइ पने मचबेम। मेकोपुकी रू डा घांस नु खिं तार वाशो घांस खोदेशो दुम्तेक्म। मेको वाचा क्येडा डोंइती सोत्रब।

28 गो इ बोक्शो, इ निशो नेल्ल तुइक्नुड। इ लशो, पिशो तुइक्नुड। मिनु गे आं पर्वम गाइक्ताक्वी।

29 मारदे हना गे आं पर्वम गाइक्तीनु, इ ठेयब लेशो नेता। मोपतीके गो इ नेम बोल्सी का ब्वेक्नुड। मिनु इ शोत्रमी लगम पाइशो इ जाक्शो लां लेप्पाइशो सोइक्नन’ दैत, दे मतीन” दे मुर सोइताक्मी।

30 मिनु परमप्रभु यावेमी हिज्कीयाह कली “इ कली एको चिन्ड दुम्ब। मुलाक्त थोचे आंमा वाशो बाली नाली जाइनीनी। माइक्थी आंमा दोक्शा वाशो बाली नाली जाइनीनी। तन्न न्युं चहिं आंमा शोक्शा खुप्तीन। अडगुर खुम्शा जने।

31 यहूदा आ खिं डा लीशोपुकी लेशा, सोशा बोशा, शाक्श थोक्शा, फल सिल्तीम। शुश दुम्नीम।

32 मारदे हना यरूसलेम रे लीशोपुकी लाइनीमी। सियोन डांडा रे हुल का ब्रोंइशोपुकी यूनीम। मुर नेल्ल आन परमप्रभु यावेमी, गो मेको पाइनुड” दैत। यसैया ९:६

33 मोपतीके परमप्रभु यावेमी अस्सुर डा पिप आ पर्वम “मेको सहरम मजाक्ब। ब्रा का यो मआप्ब। सहर आ डोंइती ब्रा तेक्तीके मकुरनीम। सहर ओत्रचा कली गारो डोइक्तीक मसेल्नीम।

34 मेको तेको लां जाक्मे, मेको लां लेप्ब। सहर मओत्रब।

35 गो मेको सहर कली आं पर्वम नु आं गेय पाइब दाऊद आ पर्वम आन गुड रे प्रोंइशा, वोइक्नुड” दैत।

36 मिनु परमप्रभु यावे आ स्वर्ग डा गेय पाइब का अस्सुर डा मुर आन बाक्तीकेम लशा, लाख का ८५ हजार जना मुर सदा बाक्त। मिनु मुरपुकी सुनी बोक्शा कोत्रडमेनु, बेक्शो मुर ला ताम्तेक्म। यसैया १७:१४; यसैया ३१:८

37 मो दुम्मेनु अस्सुर डा पिप सन्हेरीब लेशो लशा निनवे सहरम बाक्त।

38 मिनु आ देवता निस्रोक आ खिंमी बाप्शा पूजा पना पन बाक्मेनु, आ तौ अद्राम्मेलेक नु शरेसेरमी मेको कली तरवारमी क्योरशा साइक्ताक्स। मिनु मेको निक्शी प्रोक्शा, आरारात रागी लाम्ताक्स। मिनु मेको आ पा डा आ तौ एसर-हददोन पिप दुम्त।

## 38

हिज्कीयाह रोड पशो

२राजा २०:१-११; २इतिहास ३२:२४

1 मेना हिज्कीयाह रोड पा बेक्चा चिकता बाक्त। मिनु परमप्रभु यावे आ लोव्र पाइब आमोज आ तौ, यसैया जाक्शा, पिप कली “परमप्रभु यावेमी इन कली ‘गे बेक्नेवे, मब्रॉइनेवे। इ खिं नेल्ल ठीक सेलो’ दैत” दे माडव्तु।

2 मिनु हिज्कीयाहमी, आ कुल गारो गे हिरशा, परमप्रभु यावे कली

3 “परमप्रभु यावे, गो इन डोंइती थमा पा थुं निक्शी मपथु, बाक्ती। मेको मिम्तीने। गो इन डोंइती नेल्ल रिम्शो पाता” दैत। मिनु हिज्कीयाह शुश डाक्त। २राजा १८:२-६

4 मिनु परमप्रभु यावेमी यसैया कली

5 “हिज्कीयाह आ बाक्तीक लावो। मेको कली परमप्रभु यावे, इ किकी दाऊद आ परमप्रभुमी इ कली ‘गो इ पुंडशो लोव्र नैता। इ प्रेक्कु ताता। नेनो, गो इ ब्रॉइतीक नाक्ती १५ बर्स तेम्नुड।

6 मिनु गो इ कली नु एको सहर कली अस्सुर डा पिप आ गुड रे प्रॉइनुड। एको सहर कली वारच पाइनुड।

7 परमप्रभु यावेमी आ देशो पाइब दे इ कली आ गेशो चिन्ड मार बाक्ब देशा हना,

8 आहाज आ घरी आ वांकु उड लने थुम्शो बाक्ब। मेको कली परमप्रभु यावेमी १० खेयप नोले लेप्पाइक्ब’ दे मतो” दैत। मिनु नां आ वांकु लाक्ने थुम्शा यो, १० खेयप नोले लेत्त।

हिज्कीयाह आ ब्रेक्शो लोव्र

9 यहूदा डा पिप हिज्कीयाह रोड पा साम नोले आ ब्रेक्शो लोव्र मार बाक्त देशा हना,

10 गो थम रिम्शो पा बाक्ना बाक्न, बेक्शो मुर आन बाक्तीके लचा माल्नुड।

11 मिनु गो परमप्रभु यावे कली “गो परमप्रभु यावे, इन कली ब्रॉइशो मुर आन रागी मताइनुड। गो मुल मुर आन कली मताइनुड। रागीम बाक्ब आन कली मताइनुडमी। भजन संग्रह २७:१३

12 आं बाक्तीक खिं, गोठ खोदेशो पा, प्रेशशा आं रे डोन याक्ताक्म। तोव्र प्रोव्रबमी वा तोल्शो खोदेशो पा, गो आं ब्रॉइतीक नाक्त तोल्शो बाक्नुड। गो तोव्र रे खोइक्चा पुंडसाक्ड। नाक्दो नाक्ती आं कली बेक्पाइक्नीनी” दे परमप्रभु कली लोव्र पाता।

13 सुनी सम्म आं थुं कली रिम्पाइक्ना पाइक्न बाक्ती। गुप्सम खोदेशो पा आं खोइल जिकताक्यीनी। काबु नाक्दो नाक्तीमी गो आं कली खतम पोक्तीनी।

14 गो बेल्लुम नु बोकुला खोदेशो पा ग्रीती। ढुकुर खोदेशो पा रोंका पाता। गो शुश ग्येत्थ कोव्रतीके आ मिक्च पारताक्यी। आं थुं लुक्च लत। गो “परमप्रभु, गो श्येत जाइनुड। आं कली वारच पाइय्यीनी।

15 तन्न गो मार देनुडा डा? मारदे हना गे आं कली लोव्र पाइतीनी। मोदेशो आंमा पाइतीनी। आं निन्द्रा नेल्ल प्रोक्त। आं थुं लुक्च लत हना यो गो इन कली ठेयब सेल्नुड।

16 परमप्रभु, मोदेशो श्येत रे मुर ब्रॉइनीम। आं थुं यो मेको रे ब्रॉइब। गे आं कली सापाइशशा, ब्रॉइचा गेतीनी।

17 एको श्येत थमा पा आं कली ब्रॉइचा कली बाक्त। गे आं कली दाक्शा, श्येत रे गुंडताक्यीनी। मारदे हना गे आं पाप नेल्ल क्याम्ताक्नी। भजन संग्रह ३२:५; मीका ७:१८-१९

18 बेक्शो मुर आन बाक्तीकेमी इन कली ठेयब मसेल्ब। बेक्पाइक्बम इन कली ठेयब सेल्ने मचाप्ब। बेक्शो मुरुम इन वारच पाइक्तीक आस मपाइनीम। भजन संग्रह ६:६; भजन संग्रह ११५:१७

19 ब्रॉइशोपुकीम ला इन कली ‘गे रिम्शो पाइब बाक्नीनी’ देनीमी। मिनु गो मुलाक्ती मोदेशो पाइनुड। आफपुकीमी गे थमा सुइक्चा माल्शो बाक्नीनी, दे आन आल आन कली शेनीम” दे हिज्कीयाहमी दैत।

20 परमप्रभु यावेमी आं कली श्येत रे प्रॉइब। मोपतीके गोपुकीमी तार पाइशशो ताप्तीके ताप्शा कुम्सो पाइनीकी। गो ब्रॉइका सम्म मोदेशो पाइनीकी। परमप्रभु यावे आ खिंमी कुम्सो पा ताप्शा बाक्नीकी, दे हिज्कीयाहमी ब्रेक्शो बाक्त।

21 मिनु यसैयामी “सापाइक्चा कली फोव्रशी रवा आ फल रे सेल्शो ओरुती चाक्शा, एको गार तार खेक्चा माल्नीनी” देंत। यसैया ३८:२१-२२, यसैया ३८:६ नु ७ आन दातेमी वोइक्चा माल्ब। २राजा २०:७-८ मोदेशो बाक्ब।

22 डोइती हिज्कीयाहमी “गो परमप्रभु यावे आ खिं लचा ताइनुड, देशो चिन्ड, मार दुम्बा डा?” दे हिल्लो पशो बाक्त।

## 39

बेबीलोन रे मुर जाक्शो

२राजा २०:१२-१९; २इतिहास ३२:२७-३१

1 मेना बेबीलोन डा पिप बालादान आ तौ मेरोदाक-बालादानमी हिज्कीयाह कली चिटी नु कोसेली कुर पाइश्शा, मुर आन कली सोइक्ता बाक्त। मारदे हना मेकोमी “हिज्कीयाह रोइ पशा, छक लाक्चा डा पा सात” देशो लोव्र नेना बाक्त।

2 मिनु हिज्कीयाहमी मेको आन कली तशा, ग्येरशा आ शोप वोइक्तीके खिं नेल्ल कोइदा बाक्त। मार कोइदा बाक्त देंशा हना, सुन चांदी, मस्लापुकी, रिम्शो शुश क्येट लाइब थोव्रक, तेल, आ या वोइक्तीके नेल्ल नु आ शोप नेल्ले कोइदा बाक्त। आ खिं नु आ रागीमी मेको आन कली मकोइशो मारेइ मलीमाक्त।

3 मिनु परमप्रभु यावे आ लोव्र पाइब यसैया, पिप हिज्कीयाह आ बाक्तीके जाक्शा “मेको मुरपुकीम मार देंमा, ते रे जाक्मा?” देंत। मिनु हिज्कीयाहमी “एकोपुकी डोन रागी बेबीलोन रे जाक्शो नम” देंत।

4 मिनु “मेकोपुकीम इन खिंमी मार मार तामे?” दे हिल्लो पाप्तु। मिनु हिज्कीयाहमी “आं खिंमी बाक्शो मारेइ मारेइ ताम्तेक्म। मेको आन कली मारेइ मारेइ कोइताक्ड” देंत।

5 मिनु यसैयामी हिज्कीयाह कली “मुर नेल्ल आन परमप्रभु यावे आ लोव्र नेनीन

6 “इ खिंम बाक्शो, इ किकी पिपीमी तेल्ला वोइश्शो मुल सम्म बाक्शो मारेइ मारेइ काबु बेबीलोन चाक्दीत्नीम। मारेइ मलीनीम” दे परमप्रभु यावेमी देंत। २राजा २४:१३

7 मिनु इ तौ कोइ कोइ आन कली लाइश्शा, बेबीलोन डा पिप आ दरवारमी गेय पाइब सेल्नीम” देंत।

8 मिनु हिज्कीयाहमी यसैया कली “इ देशो परमप्रभु यावे आ लोव्र रिम्शो बाक्ब” देंत। मारदे हना मेकोमी “गो ब्रोइडा सम्म लडाइ मदुम्ब रिम्शो दुम्ब” दे मिम्शो बाक्माक्त।

## 40

इस्त्राएली आन थुं बारपाइश्शो

1 इन परमप्रभुमी “आं मुर आन कली लेम्दीन, लेम्दीन।

2 यरूसलेम कली आ थुं बारपाइक्तीके लोव्र पने। आ श्येत नुप्त। आ मरिम्शो पशो क्याम्शो बाक्ब। मारदे हना परमप्रभु यावे रे पा आ मरिम्शो पशो आ परबम निकशी खेयप सजाइ ताप्तु” देंत। होसे २:१६; येरमीया १६:१८

3 मिनु ब्रेम्ब मुर आ सेंदा कामी “मुर मबाक्तीकेमी परमप्रभु यावे आ लां सेलीन। गोरशो रागीमी इ परमप्रभु कली लां रिम्शो पा फुल्लु ग्रीक्शा थेलीने। लूका ३:४-६; यूहन्ना १:२३

4 बेसी नेल्ले ग्येतथ पोक्चा पुंइसीनीम। डांडा नु पहाड फ्रेम्चा पुंइसीनीम। दिंम मदुम्शो बाक्तीके दिंम दुम्चा माल्ब। फुल्लु बाक्तीके रिम्शो दुम्चा माल्नीम। यसैया ४९:११

5 मेना परमप्रभु यावे आ छेडछेड यूब। मेको मुर नेल्लेम ताइनीम। मारदे हना परमप्रभु यावेमी एको लोव्र देशो बाक्ब” दे लोव्र पाप्तु।

6 मिनु लोव्र पाइब कामी आं कली “शेंदो” देंत। मिनु गो “मार शेंनुडा?” दे हिल्लो पाता। मिनु मेकोमी “मुर नेल्ले घांस खोदेशो बाक्नीम। मेको आन दारस नेल्ल रू डा फू खोदेशो बाक्ब। भजन संग्रह ९०:५-६; याकूब १:१०-११

7 घांस सोव्रब, मिनु आ फू हेम्ब। मारदे हना परमप्रभु यावेमी मेको आन कली मुडक्ब। मुर थमा पा घांस खोदेशो बाक्नीम।

8 घांस सोव्रब, आ फू हेम्ब। तन्न आंड परमप्रभु आ लोव्र गेना हना यो लीब” देंत। भजन संग्रह ११९:८५; लूका २१:३३

9 “गे टेयब डांडा डोंइसीन। सियोन रिम्शो लोव्र कुरब बाक्ब। टेयब सेंदा पा शेंदो। यरूसलेम रिम्शो लोव्र कुरब बाक्ब। महिंथु, टेयब सेंदा पा शेंदो। यहूदा सहर डा मुर आन कली ‘इन परमप्रभु एकेर बाक्ब’ देनो।

10 कोव्रडीन, परमप्रभु, परमप्रभु यावे सक्ति पाइश्शो दुम्शा जाक्ब। मिनु हुकुम पाइब। आ इनाम आ नु बाक्ब। आ गेतीके आ डोंइती बाक्ब। यसैया ६२:११

11 आ बगाल कली गोठलाम खोदेशो पा योव्रब। मेकोमी आ पाठा पाठी आन कली मुप्शा कुरब। दूध तुंडब आन कली आन चाप्चा डा पा गाक्पाइश्शा खुल्ब। यूहन्ना १०:११

### परमप्रभु यावे आ पशो

12 सुमी ब्वाक्कु नेल्ल आ योलम पुक्गा? सुमी सरीड बित्ताम थाप्ता? सुमी रागी डा फुरक पुक्तीकेम पुक्गा? सुमी डांडा आन कली नाक्शा, पहाड आन कली नाक्तीक तारी वोदा?

13 परमप्रभु यावे आ सोक्त कली सुम शेंदा? आ कली अर्ती गेब सु बाक्बा? रोमी ११:३४; १कोरिन्थी २:१६

14 सुम मेको कली मेको नेल्ल रुप्चा कली अर्ती गेवा? सुम मेको कली ठीक निसाफ पचा कली शेंदा?

15 रागी रागी डा मुर नेल्ले चिरशो गर डा लीशो ब्वाक्कु खोदेशो नु नाक्तीकेम लीशो फुरक खोदेशो बाक्नीम। टापु आन कली फुरक खोदेशो पा बेरपाइक्ब।

16 लेबानोन डा ब्वाकी डा शी मी मुडक्चा कली मगारब। मेकेर डा जन्तुपुकी चोशा चढ़ेचा कली मजाक्दीत्नीम।

17 रागी रागी डा मुरपुकी मेको आ डोंइती मारेड मनम। मेको श्येत्थ नु मारेड मबाक्शो बाक्नीम, दे मिम्ब।

18 मिनु गे परमप्रभु कली सु नु थाप्नीनी? मिनु सु आं नेक्था वोइक्ने चाप्नीनी। यसैया ४६:५; प्रस्थान २०:४; प्रेरित १७:२९

19 मूर्ति का? मूर्ति चेम्बमी मूर्ति कली यपाइक्ब। सुन चेम्बमी मेको सुनम खुम्ब। मेको कली चांदी के साडली सेल्ब।

20 का निक्शीमी कोसेली गेचा कली बोल्यो, मराक्चा डा शी योव्रनीम। शी के गेय पाइब जोक्ब मुर का माल्ब। मिनु मेकोमी महिक्सीचा डा पा मूर्ति सेल्पाइक्ब।

21 गेपुकी मतुइक्तीनी, मनेनी? डोंइती रे इन कली मशेंदमे? रागी सेल्चा रे गे मरुप्नी?

22 एको रागी नेल्ल आन तार बाक्ब, मेकोन बाक्ब। रागीम बाक्बपुकी माले खोदेशो बाक्नीम। मेकोमी सरीड कली वा खोदेशो पा प्राक्ब। मिनु मेको मुर आन कली ताम्बु खोदेशो दुम्ब।

23 मेकोमी सासन पाइब आन कली शोर गाक्शो सेल्ब। हुकुम पाइब जाम्शा लाइनीम।

24 मेकोपुकी का निक्शी ला शोक्सीशो बाक्नीम। का निक्शी ला खुम्सीशो बाक्नीम। शाक्श थोक्ची ना दुम्मेनु, मेको आन तार मुडक्ब। मिनु मेको बेक्नीमी। मिनु फश गिवारमी पराल खोदेशो पा योल्ब।

25 आं कली सु नु थाप्नीनी। मिनु गो नु उइक्थ सु बाक्बा?” दे का ला बाक्शो परमप्रभुम देंत।

26 गेपुकी ग्येत्थ कोव्रडीन। मेको आन कली सुम सेला? मेकोमी शुश राप्पाइश्शा, मेको आन कली हिक्ब। मेको आन नें थिशा, ब्रेप्ब। मारदे हना मेको आ टेयब सक्तिम पतीके का यो मजाप्नीम। भजन संग्रह १४७:४; उत्पत्ती १:१४-१८

27 गे मारदे ए याक्ब, देनीनी? इस्राएलीपुकी “मारदे आं लां परमप्रभु यावे, आं परमप्रभु आ डोंइती खुइश्शो बाक्ब देनीनी?। मारदे आं कली पशो दूली निसाफ मतुइक्ब” देनीनी?

28 मिनु “मार, गे मतुइक्तीनी, मनेनी? परमप्रभु यावे गेना हना यो बाक्ब परमप्रभु बाक्ब। मेको रागी रागी कली सेल्ब बाक्ब। मेको मथाइब नु मदाइब। आ तुइक्तीके नेल्ल क्येडा ठेयब बाक्ब।

29 मेकोमी दाइब आन कली बोल गेब। मचाप्ब आन कली सक्ति गेब।

30 ठिटापुकी यो दशा थाइनीम। मिनु मचाप्थु गोल्नीम।

31 तन्न परमप्रभु यावे आ लां कोव्रबपुकी नक सक्ति ताइनीम। ककाकुली खोदेशो पा आन फ्रां प्राक्शा बेरशा ग्येत्थ लाइनीम। मेकोपुकी दोरशा, मदाइनीम। गाक्शा यो मथाइनीम” दैत। भजन संग्रह १०३:५

## 41

परमप्रभुमी मुर आन कली ब्रेरशो

1 परमप्रभु यावेमी “समुन्द्र आ नेक्था बाक्ब मुरपुकी सिक्सी पा आं लोत्र नेनीन। जात जात डा मुरपुकीम आन सक्ति लेशा तामेक्ल। मिनु मेकोपुकी आं नेक्था जाक्शा, लोत्र पामेक्ल। गो काथा निसाफ पतीकेम बुक्य।

2 सुमी पूर्व रे आ गेय पचा कली ग्राब का कली पोक्गा? मेकोमी रागी रागी डा मुर आन कली आ गुडम गेब। मेकोमी पिप आन कली दिम्शा, आ तरवारम मेको आन कली फुरक खोदेशो सेल्ब। आ लिब्रामी फशेम बेरशो भूस खोदेशो सेल्ब। यसैया ४४:२८; यसैया ४५:१,१३; यसैया ४८:१४-१५

3 मेकोमी मेको आन कली खेदा पवानु, मारेइ मदुम्थु आ खोइलीम लां कली हेरा मथीनीम।

4 मेको सुमी पपाइश्शा पवा? सुम साइ डोंइती रे पाला पाला डा मुर आन कली ब्रेत्ता? गो परमप्रभु यावे, नेल्ल क्येडा डोंइती डा नु नेल्ल क्येडा नोले डा नड। यसैया ४४:६; यसैया ४८:१२; प्रकाश १८:१७

5 समुन्द्र आ नेक्था बाक्ब मुरपुकी मेको तशा, हिनीम। रागी आ सुर सम्म हिम्सीब। मिनु मेकोपुकी जाक्शा, आं नेक्था पिम्तेक्म।

6 वारच पमुशा, आन थुं बारपाइक्मुशा ‘ठेयब थुं पावो’ दैमुइनीम।

7 मिनु दारशो थोवक सेल्स जोक्बमी चेम्ब आ थुं बारपाइक्ब। घन तुप्बमी चेम्ब आ थुं बारपाइश्शा ‘एको रिम्शो दुम्त’ दैशा, महिम्सेक्ल, दे काटी थोक्ब” दैत।

इस्त्राएली आन कली लोत्र पशो

8 मिनु परमप्रभु यावेमी “आं गेय पाइब इस्त्राएल, आं योव्रशो याक्ब, आं वारच अब्राहाम आ चच युड बाक्ब। यसैया ४२:१९; यसैया ४३:१०; यसैया ४४:१,२१; यसैया ४५:४; भजन संग्रह १३५:४; याक्ब २:२३

9 इ कली रागी आ सुर रे ब्रेत्ताक्न। नेल्ल क्येडा डोन रे चाक्शा, गो इ कली ‘गे आं गेय पाइब बाक्नेवे’ दैती। गो इ कली योव्रता। मिनु गो गे नु बाक्नुड।

10 महिनो, मारदे हना गो गे नु बाक्नुड। आइक्च थुं मपावो। मारदे हना गो इ परमप्रभु नड। गो इ कली बोल्यो सेल्शा, वारच पाइनुड। गो इ कली आं ग्राब ग्युरा गुइमी वारच पाइनुड। यसैया ४३:१

11 गे नु गाइक्ब नेल्ल मुने दोक्शा, शिशो मताइनीम। इ जोरी सत्रु नेल्ल फश खोदेशो दुम्शा, जाम्शा लाइनीम।

12 गे मेको आन कली माल्तीवी हना यो, मथित्नेवे। इ कली लडाइ तोइबपुकी फश खोदेशो दुम्शा, जाम्शा लाइनीम।

13 मिनु गो परमप्रभु यावे, इ परमप्रभुमी इ ग्युरा गुइ ग्याइक्नुड। मिनु गो इ कली ‘महिनो’ दैशा, वारच पाइनुड।

14 गे महिक्सीशो याक्ब महिनो। इक्कका ला लीशो इस्त्राएलीपुकी महिनीन। गो इ कली वारच पाइनुड, दे परमप्रभु यावेमी दैत। इ कली पाप रे प्रोंइब इस्त्राएली आन का ला बाक्शो परमप्रभु, गो नड। यसैया ४३:३

15 मुल गो इ कली हेल्शो अन्न तुप्तीके सेल्नुड। मेको हेरशो, नक नु खुइ पाइश्शो बाक्ब। गे डांडा आन कली तुप्शा, फस सेल्नेवे। पहाड आन कली भूस खोदेशो सेल्नेवे।

16 गे मेको आन कली हारशा, फशेम योल्पाइक्नेवे। मिनु फश गिवारम मेको आन कली एर ओंथ फ्रशा योल्ब। मेना गे परमप्रभु यावे कली तुइश्शा, ग्येरनेवे। इस्राएली आन का ला बाकशो परमप्रभु आ मुर दुम्शा, ग्येरसीनेवे” दैत।

17 मेकोमी लेंशा “पुडग नु क्येट मथीबम ब्वाक्कु माल्नीम। तन्न मथिल्तीम। मेकोपुकी तूतू दाकशा, आन लाकचा सोत्रब। गो, परमप्रभु यावेमी, मेको आन लोत्र नेंनुड। मिनु गो, इस्राएली आन परमप्रभुमी मेको आन कली मप्रोंइथु, मेको नु बाक्नुड।

18 गो गोरशो डांडामी ब्वाक्कु गूपाइक्नुड। बेंसीमी ब्वाक्कु बुक्पाइक्नुड। गो मुर मबाक्तीकेम ब्वाक्कु देम्शो नु सोत्रशो रागीम ब्वाक्कु बुक्पा गूपाइक्नुड। यसैया ३५:१,७; यसैया ४३:१९; प्रस्थान १७:६; भजन संग्रह १०७:३५

19 मुर मबाक्तीकेमी लेबानोन डा लाइश्शो रवा वापाइक्नुड। बोल्यो रवा, तेल रवा नु शुश अरु रवा खुम्नुड। गोरशो रागीमी तोत्रशी नु अरु रवा यो खुम्नुड।

20 मुर नेल्लेमी परमप्रभु यावे आ पशो बाक्ब, दे तशा, तुइश्शा, मिम्शा रुप्चा माल्नीम। इस्राएली आन का ला बाकशो परमप्रभुमी मोदेशो सेल्लु” दैत।

### मूर्तिमी सक्ति कोंइदमेक्ल, देशो

21 परमप्रभु यावेमी “इन लोत्र मार बाक्बा, देनीन। थमा बाक्ब, दे कोंइदीन, दे गो, याकूब आ पिपमी देंनुड।

22 मेको आन कली चाकगमेक्ल। मिनु मार मार दुम्मे, मेको देनीन। डोंइती मार दुम्मे, मेको लोत्र पने। गे मेको आन कली मिम्शा, नोले मार दुम्बा, तुइक्चा कली शेंदीन। यसैया ४३:८,९; यसैया ४४:७

23 नोले मार दुम्बा आंइ कली तुइक्पतीन। मोपा ला गे गेय पने चाप्ब बाक्नीनी, दे तुइक्नीकी। गे रिम्शो पने कि मरिम्शो पने। मोपा गो इन कली तशा तुइश्शा शुश हिंनीकी।

24 गे मारेइ मननी। इन पशो नेल्ल फश बाक्ब। सु सुमी इन कली योत्रनीमी मेकोपुकी ग्रान्ना दिशो बाक्नीम।

25 गो उत्तर रे का कली ब्रेत्ताक्ड। मिनु मेको जाक्त। नां दाप्तीके रे आं नेंमी लोत्र पाइब ब्रेत्ताक्ड। मेकोम ठेयब मुर आन तारी खप दिम्शो खोदेशो पा दिम्ब। खप के ग्योब सेल्बम दोदेशो पा खप नीबा, मोदेशो पा मेको आन कली नीब।

26 सुमी डोंइती रे आंइ कली तुइक्पदा? मेको गो तुइक्चा माल्नीकी। मिनु सुमी डोंइती शेंदा? ‘मेको ठीक बाक्ब’ दैने चाप्नीकी। सुइमी मशेंदेम, सुइमी लोत्र मपामे। मिनु सुइमी इन पशो लोत्र मनेनेम।

27 मिनु गो डोंइती सियोन कली शेंताक्ड। गो यरूसलेम कली ग्येरपाइक्ब लोत्र पाइब का सोइक्ताक्ड। यसैया ५२:७

28 तन्न गो कोवडुनु, सुइ मथिदु। अर्ती गेब सुइ मबाक्म। गो हिल्लो पाता, सुइम लोत्र मलेत्तीनी।

29 मेको नेल्ल फश बाक्नीम। आन गेय नेल्ल फश बाक्ब। मिनु देवी देवता आन मूर्ति फश बाक्नीम” दैत।

## 42

### परमप्रभु यावे आ गेय पाइब

1 परमप्रभुमी “आं गेय पाइब कली कोवडीन। गो मेको कली सक्ति गेनुड। आं योत्रशो गेय पाइब तशा, आं थुं ग्येरसीब। गो मेको कली आं सोक्तीम प्रिताक्ड। मेकोमी रागी रागी डा मुर आन कली ठीक निसाफ पाइब। यसैया ४९:१-६; यसैया ५०:४-११; यसैया ५२:१३-यसैया ५३:१२; मत्ती १२:१८-२१; मत्ती ३:१७

2 मेकोमी जिचा मपोक्ब। शुश रेयके मपाइब। लां पित्थ आ सेंदा मनेंसीब।

3 मेकोमी जिक्चशो किन्दा मजिक्ब, काप्चशो मी यो मकाप्ब। मेकोमी थमा पा ठीक निसाफ पाइब। भजन संग्रह ३४:१९

4 मेकोम रागी नेल्लेम मुर आन कली ठीक निसाफ पतीक लां मकोंडदा सम्म ग्युम्शा मगोल्ब। समुन्द्र आ नेक्थाम बाक्ब मुरपुकी आ शेंशो नेंचा दाक्शा, मेको कली रिम्नीम” दंत।

5 मेको परमप्रभु, परमप्रभु यावे आ लोत्र बाक्ब। मेकोमी सरीड कली सेल्शा प्राक्तु। मिनु रागी खप फ्राशा, मेकेर मार मार वापाइक्तु। मेकोमी मेकेर बाक्शो मुर आन कली आ ब्रोंइतीक गेब। मेकेर बाक्ब आन कली यो आ सोक्त गेब। उत्पती १:-

6 मेकोमी “गो, परमप्रभु यावे नड। गो इ कली आं ठीक पतीकेमी ब्रेत्ताक्न। गो इ गुड ग्याइश्शा, इ कली कोत्रशा बाक्नुड। गो मुर आन पा डा इ कली आं कबल खाप्ब सेल्तन। रागी रागी डा मुर आन कली छेडछेड दुम्पाइक्चा कली सोइक्ताक्न। यसैया ४९:६,८

7 मारदे सोइक्ताक्न देशा हना, मिक्च मताइब आन कली तपाइक्चा, जेल्खानम बाक्ब आन कली प्रोंइचा नु छिडछिड रे गुंइचा कली सोइक्ताक्न। यसैया ३५:५; यसैया ४५:१९; भजन संग्रह १२६:१-४

8 गो, परमप्रभु यावे नड। आं नें मेकोन बाक्ब। आं मान ततीक अरु आन कली मगेनुडमी। आं ठेयब दुम्तीके मूर्ति आन कली मगेनुडमी। प्रस्थान ३:१५; यसैया ४८:११

9 कोत्रडीन, डोंइती डा देशो लोत्र दुम्ने थुम्तु। गो दुम्चा क्येडा डोंइती नक लोत्र शेंनुड। मेको दुम्चा क्येडा डोंइती इन कली तुइक्पाइक्नुड” दंत। यसैया ४८:६

### रागी डा मुरपुकीम कुम्सो पामेक्ल

10 परमप्रभु यावे कली नक कुम्सो का पने। रागी आ सुर डा मुरपुकी परमप्रभु यावे कली कुम्सो पशा ठेयब सेलीन। समुन्द्र नु समुन्द्रम बाक्बपुकी परमप्रभु कली ठेयब सेलीन। समुन्द्र आ नेक्था बाक्ब नेल्लेमी मेको कली ठेयब सेलीन। भजन संग्रह ३३:३

11 गोरशो रागी नु मेकेर डा सहर कुम्सो पने। केदार आ बाक्तीक डा मुर नेल्ले कुम्सो पने। सेला डा मुरपुकी ग्येरशा कुम्सो पने। डांडा तार रे ठेयब सेंदा पा ग्रीडीन।

12 मेकोपुकीमी परमप्रभु यावे कली मान पामेक्ल। मिनु “परमप्रभु यावे गिश ठेयब बाक्बा” दे समुन्द्र आ नेक्था बाक्ब मुर आन कली शेंदमेक्ल।

13 परमप्रभु यावे बोल्यो लडाइ पाइब खोदेशो पा यूब। लडाइ पाइब खोदेशो पा आ जोंब बोक्पाइक्ब। मेको ठेयब रेयके पा ग्रीब। मिनु आ जोरी सत्रु आन कली आ ठेयब सक्ति कोंइब।

14 मिनु “गो शुश सिकसी पा बाक्ती, ब्वालेइ पा आंम कली तेक्शा बाक्ती। मुल आल थिचशो मीश मुर बुदी, वाइ ब्रेत्नुड। आं सोक्त कीनुड।

15 गो डांडा नु पहाड आन कली गोरशो सेल्नुड। गिगी मारेइ मारेइ सोत्रपाइक्नुड। गो ब्वाक्कु बाक्तीक कली सोत्रशो रागी सेल्नुड। दोम्ली सोत्रपाइक्नुड।

16 मिनु मिक्च मताइब आन कली आन मतुइश्शो लांमी खुल्नुडमी। आन मतुइश्शो गाक्तीक लांमी गाक्पाइक्नुडमी। मेको आन डोंइती बाक्शो छिडछिड कली छेडछेड सेल्नुड। मिनु फुल्लु बाक्तीक कली दिंम सेल्नुड। एको मप्रोंइथु पाइनुड। यसैया ४०:४

17 मुशा सेल्शो मूर्ति नु चेम्शा सेल्शो मूर्ति आन कली थमा सुइश्शा ‘गे आं देवी देवता बाक्नीनी’ दंबपुकी गिम्सीशा, मुने दोक्नीम” दंत।

18 परमप्रभु यावेम “गे नोफा मनेंबपुकी नेनीन। गे मिक्च मताइबपुकी एक कोत्रडीन। यसैया ४३:८

19 आं गेय पाइब खोदेशो पा मिक्च मताइब सु बाक्नीमी? आं सोइश्शो लोत्र कुरब खोदेशो नोफा मनेंब सु बाक्नीमी? सु आं कली जिम्मा गेंसीशो खोदेशो मिक्च मताइब बाक्नीमी? सु परमप्रभु यावे आ गेय पाइब खोदेशो मिक्च मताइब बाक्नीमी डा? यसैया ४१:८

20 मेकोमी शुश मार मार ताइब। तन्न मकोत्रब। मेको नोफा नेंब बाक्ब, तन्न मनेंब” दंत। यसैया ५३:१

21 परमप्रभु यावेमी आ ठीक पतीके तशा, ग्येरसीशो बाक्त। मेकोमी आ शेंतीके ठेयब सेल्शा नु थम रिम्शो दुम्पाइक्ब।

22 तन्न मेको मुरपुकी रोइश्शो नु खुइ पचा पुंडसीशो बाक्नीम। मेको नेल्ल बिक्तीकेमी बिक्शो नु जेल्खानमी खुइश्शो बाक्नीम। मेको सिखार खोदेशो दुश्शो बाक्नीम। मेको आन कली प्रोंडब सुइ मबाक्ब। मेको रोइक्चा पुंडसीब दुश्शो बाक्नीम। मिनु “मेको आन कली लेंशा गेने” देंब सुइ मबाक्ब।

23 इन दातेमी मेको नेंशा वारच पाइब, सु बाक्बा? मुल रे नोफा दाइश्शा, होस पा बाक्ब, सु बाक्बा?

24 सुमी याकूब आ मुर आन कली रोइक्ब आन गुइमी गेवा? सुमी इस्राएली आन कली खुइ आन गुइमी गेवा? मेको पपाइक्ब परमप्रभु यावे ममाइ? मेकोपुकीम मेको कली पाप पांतेक्म। मेकोपुकी मेको आ लांम गाक्ने मबिस्सम नु आ अरेशो मटीम।

25 मोपतीके परमप्रभु यावे मेको आन पर्वम शुश गाइक्ताक्व। मेको आन कली लडाइ डा श्येत दुम्पाइक्तु। मेको आन एर ओंथ नेल्ल मी जेत्ताक्व। मो हना यो मेकोपुकीमी काइ मरुबेम। मी जेशशा यो आन थुं परमप्रभु यावे गे मलेत्तेम।

## 43

### परमप्रभुमी पाप रे प्रोंडशो

1 याकूब, इ कली नु इस्राएल कली सेल्ब परमप्रभु यावेमी “महिनीन। इन कली पाप रे प्रोंडता। गो इन नें थिशा ब्रेत्ती। गे आं मुर बाक्नीनी।

2 गे ब्वाक्कु शोकशा, गाक्चा माल्ते हना यो, गो गे नु बाक्नुड। खोला शोक्साक्वे हना यो, मेकोम इ कली मयोल्ब। मीम गाक्शा लवेनु, मेकोम इ कली मजेप्ब। मेको मीम इ कली मदाक्ब। प्रस्थान १४:२१; भजन संग्रह ६६:१२; दानीएल ३:२५-२७

3 मारदे हना गो परमप्रभु यावे, इ परमप्रभु नड। गो इस्राएली आन का ला बाक्शो परमप्रभु नड। गो इ कली पाप रे प्रोंडब नड। गो इजीप्त रागी इ पा डा गेता। मिनु एथीयोपीया नु सेबा रागी इ कली प्रोंडचा कली गेता। यसैया ४१:१४

4 मारदे हना गे आं योव्रशो मुर बाक्नीनी। गे मान ताइब दुम्नीनी। गो इन कली दाक्नुड। मोपतीके गो इन पा डा अरु मुर आन कली गेनुड। इन बेक्चा आ पा डा रागी रागी डा मुर आन कली गेतामी।

5 महिनीन, गो गेपुकी नु बाक्नुड। गो इन आल आन कली नां दाप्तीक पूर्व रे चाक्नुड। मिनु नां पेरतीके पच्छिम रे खुप्शा तेल्लुड। यसैया ११:११-१६; येरमीया ३०:१०

6 गो उत्तर कली ‘प्रोंडशा सोइक्तीमी’ माइक्नुड। दक्खिन कली ‘मतेक्मी’ आं तौ आन कली डोन रागी रे चाक्कीन। मिनु आं तमी आन कली रागी आ सुर रे चाक्कीन।

7 आं नेंम ब्रेत्चा पुंडसीशो मुर नेल्ल चाक्कीन। गो मेको आन कली आं कली ठेयब सेल्चा कली वोइक्तामी। मेको आन कली सेल्ब गो नड। येरमीया १४:९

8 मेको मिक्च बाक्शा यो मताइब, नोफा बाक्शा यो मनेंब आन कली गुंइदीन।

9 रागी रागी डा मुर नेल्ल खुम्समल। जात जात डा मुर नेल्ल बुक्मल। मेको आन दातेमी सुमी एको लोव्र पवा? मुल मार दुम्मे? सुम डोंइती मेको नोले दुम्ब लोव्र पवा? आ सांकछी ब्रेश्शा, चाक्गल। मिनु मुरुमी मेको नेंशा “थमा बाक्ब” देंमल” देंत। यसैया ४१:२२, २६

10 परमप्रभु यावेमी “गेपुकी आं सांकछी बाक्नीनी। मिनु गे आं योव्रशो गेय पाइब बाक्नीनी। गे आं कली तुइश्शा थमा सुइक्ब दुश्शो बाक्नीनी। मिनु गो परमप्रभु नड, दे रुप्नीनी। आं डोंइती सुइ परमप्रभु मबा, आं नोले यो सुइ परमप्रभु मडुन्नीम। यसैया ४४:३

11 गो परमप्रभु यावे नड। आं क्येडा लाक्शा पाप रे प्रोंडब मबाक्ब। यसैया ४५:२१; ब्यवस्था ३२:३९

12 इन दातेमी देवी देवता मबाक्थु, गो इन कली शेंशा, पाप रे प्रोंडशा, लोव्र नेंपाइक्ता। गे आं सांकछी बाक्नीनी।

13 गो परमप्रभु नड। नोले सम्म गो मेको नड। सुइमी आं गुइ रे प्रोंडने मचाप्ब। गो गेय पडानु, सुइमी आं कली तेक्ने मचाप्ब” देंत।



14 मिनु परमप्रभु यावे, इन कली पाप रे प्रोंडब, इस्राएली आन का ला बाकशो परमप्रभुमी “इन पा डा गो बेबीलोन सहर कली लडाइ पाइब सोइक्नुड। मेको आन ठेयब लाप्यो डा आगलो जिक्नुड। गो कल्दी आन ग्रीतीक कली रेंका पपाइक्नुड।

15 गो, इन परमप्रभु यावे, इन का ला बाकशो परमप्रभु नड। गो इस्राएल कली सेल्ब, इन पिप नड” देंत।

16 मिनु परमप्रभु यावेमी “सुमी समुन्द्रमी लां का सेल्बा? सुमी ठेयब ब्वाक्कुमी गाक्तीक लां सेल्बा डा? प्रस्थान १४:२२; यहोसु ३:१६

17 सुमी बग्गी नु शारा, लडाइ पाइब नु बोल्यो मुर आन कली मेको लांम सोइक्ता? मेकोपुकी गोल्शा, बोक्ने मचाप्नीम। मेकोपुकी सल्दो खोदेशो पा ग्याइश्शा काप्चा पुंडसीनीम। प्रस्थान १४:२३-२८

18 डोंइती डा दुम्शो ममिम्तीन। साइ डोंइती मार दुम्मे, मेको ममिम्तीन।

19 गो नक गेय का पचा चिक्शो बाक्नुड। मुल मेको दुम्चशो बाक्ब। गे मेको मतुइक्नीनी? गो मुर मबाक्तीकेम लां का सेल्नुड। यसैया ४१:१८

20 मिनु ब्वाकी डा जन्तु, सिवार नु ठेयब चिक्बपुकीमी आं कली मान पाइनीम। मारदे हना गो मुर मबाक्तीकेमी रेउ यिपाइक्नुड। गोरशो रागीमी खोला शाइक्पाइक्नुड। आं योव्रशो मुर आन कली तूचा गेचा, दे गो गोरशो रागीमी खोला शाइक्पाइक्नुड।

21 आं कली ठेयब सेल्चा कली मेको मुर आन कली सेल्तामी। १पत्रुस २:९

22 तन्न याकूब, गे आं कली ठेयब मसेली। इस्राएल, गे आं नोले खोइक्चा आ पर्वम मारेइ ममिम्ती।

23 गे इ भेडा आं कली चोशा मचढेयी। इ चढेशोमी आं कली मान मपवी। गो इ कली जचा थोव्रक चढेचा माल्नेवे, दे श्येत मगेड। धूप चोचा माल्नेवे, दे मदेंड। यसैया १:११-१५

24 गे आं कली ब्रोव्रशो रिना पाइब थोव्रक ग्याप्शा मचाक्गी। इ चढेशो आन बोंसो मगेयी। तन्न इ पाप पतीकेमी गे आं कली श्येत गेप्तीवी। इ मरिम्शो पतीकेमी आं कली श्येत जपाइक्ती। २कोरिन्थी ५:२१

25 गो नड, इ हेंथे पशो क्याम्नुड। गो मेको आं पर्वम पाइनुड। गो इ पाप लेंशा ममिम्नुड। यसैया ४४:२२; येरमीया ३१:३४

26 आं कली दोस गेयी। निसाफ पथ लय। दोपा गे आं डोंइती ठीक बाक्नेवे, मेको लोव्र पावो।

27 इ डोंइती डा किकीम पाप पाप्तु। गे नु गारशा लोव्र पाइबम आं कली मरिम्शो पाप्तेक्म। यसैया ४१:८; उत्पत्ती ३५:११-१२

28 मोपतीके गो आं खिंम चढेब आन कली ‘गेय पचा मदुम्ब’ सेल्तामी। गो याकूब कली खतम सेल्ता। मिनु इस्राएल शुक्शी पाइक्चा पुंडसीब सेल्ता” दे परमप्रभुमी देंत।

## 44

### थमा पा इस्राएली मुर दुम्शो

1 मिनु “याकूब, आं गेय पाइब, मुल नेनो। आं योव्रशो इस्राएल, नेनो।

2 इ कली कोव्रजीम सेल्शा, वारच पाइब परमप्रभु यावेमी ‘आं गेय पाइब याकूब महिनो। येशुरुन गो इ कली योव्रता। यशुरुन इस्राएल आ नें का बाक्ब। ब्यवस्था ३२:१५

3 मारदे हना गो सोव्रशो रागी तारी ब्वाक्कु लुक्नुड। सोव्रशो खपीम खोला शाइक्पाइक्नुड। गो इ चच युड आन तारी आं सोक्त मोइक्नुड। इ आल आन कली आसीक गेनुड’। यसैया ३२:१५; योएल ३:१

4 मेकोपुकी घांस खोदेशो पा शुश बारनीम। ब्वाक्कु आ नेक्था वाशो रवा खोदेशो दुम्नीम।

5 मिनु कामी ‘गो परमप्रभु यावे आ मुर नड’ देंब। अर्कोमी ‘आ नें याकूब बाक्ब’ देंब। मिनु अर्कोमी ‘गो परमप्रभु यावे आ मुर नड’ दे आ गुडम ब्रेक्शा ‘आं नें इस्राएल बाक्ब’ देंब” देंत।

6 मिनु परमप्रभु यावे, इस्राएली आन पिप नु मेको आन कली पाप रे प्रोंडब, मुर नेल्ल आन परमप्रभु यावेमी “गो नेल्ल क्येडा डोंइती नु नेल्ल क्येडा नोले डा नड। गो आं डा लाकशा, अरु परमप्रभु मबाकनीम। यसैया ४१:४; यसैया ४३:११; प्रकाश १:१७

7 सु आं खोदेंशो बाकबा? मेकोमी ‘गो परमप्रभु खोदेंशो नड’ दे उरदी पवल। मेकोमी आं डोंइती देंल। सुम साड डोंइती नोले दुम्तीक लोव पवा? मुल मार दुम्बा? मेकोमी देंल। यसैया ४१:२२; ब्यवस्था १८:२२

8 गे ख्रिंखि पा महिनीन। गो साड रे इन कली मदेंडा डा? गेपुकी आं सांकछी बाकनीनी। गो आं डा लाकशा अरु परमप्रभु बाकनीमी? आं क्येडा लाकशा अरु सेरथे फुल्लु मबाकब। गो मेको मतुइक्नुड” देंत। १सामुएल २:२

### मूर्ति शोर गाकशो बाकनीम

9 मिनु “मूर्ति सेल्ब नेल्ल फश खोदेंशो बाकनीम। मेको आन सेल्चा दाकशो मूर्ति शोर गाकशो बाकनीम। मेको आन पर्वम शेंबपुकी मिक्च मताइब खोदेंशो दुम्शा, मारेड मतुइक्नीम। मोपतीके मेको मुने दोक्नीम। यसैया ४५:१६; भजन संग्रह ११५:४-८; येरमीया १०:३-१६

10 सुम यपाइश्शा मुशा रिम्शो गेय पने मचापब देवता आ मूर्ति सेल्बा?

11 मेको आ नोले खोइक्ब नेल्ल मुने दोक्नीम। मेको मूर्ति सेल्चा जोक्ब मुर ला बाकनीम। मेकोपुकी बुक्शा, राम्मल। ग्रीचोक पा हिंमल। मिनु गेना हना यो मुने दोक्मल। यसैया ४२:१७

12 तुप्तीलमी मूर्ति चेम्ब। मेकोमी मीम गेय पाइब। बोल्यो गुडमी घनमी तुप्शा सेल्ब। मेको शोव्रलु बेक्शा, आ बोल साम्ब। ब्वाक्कु मतूथु, गेय पने मचापब। यसैया ४०:१८-२०

13 शी मुइबमी शी कली श्येलेम थाप्शा, ब्रेक्स पा बस्ताम क्योकशा, लेंशा थाप्शा, कोव्रशा ब्रेक्स पाइब। मिनु मुर खोदेंशो पा सेल्ब। दारशो मुर खोदेंशो पा सेल्ब। मिनु नोले मन्दीरम निप्पाइक्ब।

14 मेकोमी लेबानोन डा लाइश्शो रवा तिम्ब। ब्वाकी डा बोल्यो शी के रवा का योव्रशा ब्वाकी डा अरु रवा नु कोल्पाइक्ब। लेबानोन डा लाइश्शो रवा का खुम्ब। मेको तारी रेउ यिशा, मेको ठेयब दुम्ब। मिनु मेकोमी सला रवा का खुम्ब। रेउम मेको कली कोल्पाइक्ब।

15 मेको रवा आ शी चोचा कली दुम्ब। मेको शी रे मी मुइश्शा थेरब। मेको शी चोशा, शोब्ले चोइब। मेको शी रेन मूर्ति यो सेल्शा, आ डोंइती सेउ पा बापब।

16 मेकोमी आधा शी चोशा, मेको तार श्ये चोइब। मेको ब्वशा रूशा, मी थेरब। मिनु मेकोमी ‘गो होती, मी थेरचा ताता’ देंत।

17 मिनु आ लीशो शी रे मूर्ति का सेल्ब। मिनु मेको आ डोंइती बाप्शा पूजा पाइब। मिनु मेको कली ‘आं कली श्येत रे प्रोंइयीनी। मारदे हना गे आं परमप्रभु बाकनीनी’ दे पुंइब” देंत।

18 मेको मुरपुकीमी मारेड मतुइक्थु, मरुप्नीम। मारदे हना मेको मिक्च मताइनीमी। आन थुं मरोक्सीशो बाकब। मेकोपुकी मारेड मरुपब बाकनीम।

19 सुडमी मारेड ममिम्ब कामी “गो मेको शी आधा मीम चोता। मेको मी तारी शोब्ले चोशा, श्ये वाल्शा ब्वाता। मुल गो मेको आ लीशो ठुटा रे ग्रांरा दिशो मूर्ति सेल्चा दुम्बा डा? गो मेको आ डोंइती बाप्चा दुम्बा डा?” देंब सुड मबाकब।

20 सु सुमी पुलु कली सेउ पाइनीमी, मेको आन दूली थुंमी दूली मिम्पाइश्शो बाकनीम। मेकोमी आंम कली प्रोंइने मचापब। मिनु “आंइ सेल्शो मूर्ति जोल बाकब” मदेंनीम।

### इस्राएली आन कली प्रोंइशो

21 याक्ब गे एको लोव मिम्तो। इस्राएल मिम्तो। मारदे हना गे आं गेय पाइब बाक्नेवे। गो इ कली सेल्लन, गे आं गेय पाइब बाक्नेवे। इस्राएल इ कली मप्रेंनन। यसैया ४१:८

22 गो इ पाप गोस्स खोदेंशो पा जाम्पाइक्ता। इ हेंथे पशो यो क्याम्ताक्ड। गे आं गे लेतो। मारदे हना गो इ कली पाप रे प्रोंइतन। यसैया ४३:२५

23 गे सरीड कुम्सो पावो। रागी नेल्ल रेयके पा, शुश कुम्सो पने। गे डांडा, ब्वाकी नु रवा नेल्लेमी कुम्सो पने। मारदे हना परमप्रभु यावेमी याकूब कली श्येत रे प्रोंडतु। इस्राएल रागीमी आं नें ठेयब सेल्शो बाकब। यसैया ४९:१३; यसैया ५५:१२; भजन संग्रह ९६:११-१३

पिप कोरेस कली गोठला वोइश्शो

24 मिनु परमप्रभु यावे, इ कली श्येत रे प्रोंडब, इ कली कोव्रजीम सेल्बमी “गे मारेइ मारेइ सेल्ब परमप्रभु यावे नड। गो आं कामी सरीड प्राक्ता। रागी वोइक्ता। यसैया ४५:१२

25 गो जोल पाइब आन नोले दुम्ब लोत्र शोर गाक्शो सेल्नुड। लिंक्यु कोव्रब आन निप्स क्यातामी। जोक्ब तुइक्ब आन कली दिप्शा, मेको आन जोक्तीके तुइक्तीके नेल्ल मूर्ख सेल्ता। यसैया २९:१४

26 गो आं गेय पाइब आ लोत्र थमा बाकब। मिनु आं सोइश्शो लोत्र कुरबम आं देशो पाइब। गो यरूसलेम आ पर्वम ‘मेकेर शुश मुर दुम्मीम’ देनुड। मिनु यहूदा डा सहर लेशा सेल्चा पुंडसीनीम। मेको आन प्रेशो खिं नक सेल्नुड।

27 गो शुश लुकच लशो ब्वाक्कु सोव्रपाइक्नुड। गो इ खोला आन कली सोव्रपाइक्नुड। यहोसु ४:२३

28 कोरेस आं गोठला बाकब। मेकोमी आं मिम्शो गेय पाइब। मेकोमी ‘यरूसलेम लेशा सेल्चा माल्ब’ देंब। आं खिं आ पर्वम ‘नक जग सेल्नुड’ ” देंत। २इतिहास ३६:२३; एजा १:१-४

## 45

परमप्रभुमी कोरेस कली योव्रशो

1 मिनु परमप्रभु यावेमी कोरेस कली तेल लुकशा, आ ग्युरा गुइ ग्याइक्ता बाक्त। मारदे मो पवा बाक्त देशा हना, रागी रागी डा मुर आन कली फुपाइक्चा, रागी रागी डा पिप आन कली मुने तोक्चा नु आ डोंइती लाप्चो रोक्शा, मचोक्चा कली बाक्त। यसैया ४१:२

2 परमप्रभु यावेमी मेको कली “गे इ डोंइडोंइती गाक्नुड। डांडा आन कली दिंम सेल्नुड। कांसा के लाप्चो जिक्नुड। फलाम के आग्लो जिक्नुड।

3 गो इ कली हिंचा डा छिडछिडम वोइश्शो शोंप गेनुड। इ कली खुइश्शा वोइश्शो सुन चांदी गेनुड। मिनु गे, परमप्रभु यावेमी इ कली नें थिशा ब्रेप्ब, इस्राएली आन परमप्रभु, गो नड, दे तुइक्नेवे।

4 आं गेय पाइब, याकूब, आ योव्रशो इस्राएल कली गो इ नें थिशा, ब्रेत्नुड। गो इ कली ठेयब नें गेशा ब्रेत्ताक्ड हना यो, गे आं कली मतुइक्ती।

5 गो परमप्रभु यावे नड। गो आं डा लाक्शा सुइ परमप्रभु मबाक्ब। गे आं कली मतुइक्ताक्यी हना यो, गो इ कली ठीक सेल्लतन। प्रस्थान २०:३

6 इ कली मार पचा कली ठीक सेल्लतन देशा हना, नां दाप्तीक रे नां पेरतीक सम्म गो आं डा लाक्शा अरु सुइ परमप्रभु मबाक्ब, दे मुर नेल्ल आन कली तुइक्पाइक्चा कली ठीक सेल्लतन। गो परमप्रभु यावे नड, गो आं डा लाक्शा अरु सुइ परमप्रभु मबाक्ब।

7 गो छेडछेड नु छिडछिड सेल्ब नड। गो थुं नाइक्पाइक्ब नु श्येत जपाइक्ब सेल्ब नड। गो, परमप्रभु यावेमी, मेको नेल्ल पाइनुड। आमोस ३:६

8 सरीड, रेड यिपतो। ठीक पतीके रेड खोदेशो पा यिल। रागी रोक्सेक्ल, पाप रे प्रोंइतीके ठोसा खोदेशो पा यूब। मेको ठीक पतीके नु कालेमीन कोल्सल। मेको नेल्ल सेल्ब, गो, परमप्रभु यावे नड।

9 आबी, सुमी आ कली सेल्ब कली दोस गेबा, मेको गर आ गम्टे का खोदेशो बाक्ब। मार, खपीमी खप के ग्योंब सेल्ब कली ‘मार पवी?’ देंबा डा? गेयमी गेय पाइब कली ‘मजोक्ब बाक्ते’ देंबा डा? अय्युब ४०:२; यसैया २९:१६; येरमीया १८:६; रोमी ९:२०

10 आबी, सुमी आ आफ कली ‘मारदे आं कली सेल्यी?’ मिनु मीश मुर कली ‘गे मारदे आल थितीक रोइ पाइनेवे?’ ” देंब।

11 मिनु परमप्रभु यावे, इस्राएली आन का ला बाक्शो परमप्रभु यावे नु इस्राएल कली सेल्बमी, मार देंब देशा हना “गे आं कली ‘आं आल ते लाइनीनी’ दे हिल्लो पाइनेवे? आं गेय आ पर्वम आं कली अरेचा मालनेवे?”

12 गो रागी नु रागीम बाक्ब मुर आन कली सेल्ला। गो आं गुडमी सरीड प्राक्ता। मिनु मेकेर मार मार बाक्मा, मेको नेल्ल सेल्लामी। यसैया ४४:२४

13 गो कोरेस कली ठीक पचा कली पोक्ता। गो मेको आ लां नेल्ल दिंम सेल्लुड। मेकोमी आं सहर सेल्चा माल्ब। मिनु मेकोमी ग्याइश्शो लाइश्शो मुर आन कली प्रोंडब। मेकोम क्वेट नु मारेड कोसेली मताक्ब” दे मुर नेल्ल आन परमप्रभु यावेमी देंत। यसैया ४१:२

### परमप्रभुम श्येत रे प्रोंडब देशो

14 मिनु परमप्रभु यावेमी “इजीप्त डा शोप, एथीयोपीया डा मारेड मारेड नु साबा रागी डा लाइश्शो मुरपुकी इ के दुम्नीम। मेको इ नोले खोइक्नीम। मेकोपुकी फ्रेंशो दुम्शा, इ गे जाक्शा, इ डोंइती बाप्शा ‘थमा पा परमप्रभु गे नु बाक्ब। मेको डा लाक्शा अरु सुइ परमप्रभु मबाक्ब’ दे पुइनीम” देंत।

15 थमा पा, गे परमप्रभु बाक्नीनी। गे खुंइसीशो बाक्नीनी। गे इस्राएली आन परमप्रभु, श्येत रे प्रोंडब बाक्नीनी। रोमी ११:३३; यसैया ४३:११

16 मूर्ति सेल्ब नेल्ल मुने दोक्शा, कालेम आन कुल राव किक्शा लाइनीम। यसैया ४४:९-११

17 तन्न परमप्रभु यावेमी इस्राएल कली श्येत रे प्रोंडब। मेको गेना हना यो लीब श्येत रे प्रोंइतीकेमी बाक्ब। गे गेना हना यो मुने मदोक्थु, इन कुल मकिक्पाइक्नीनी।

18 मिनु परमप्रभु यावे सरीड नु रागी सेल्ब बाक्ब। मुर मबाक्तीके मसेल्थु, मुर आन कली बाक्तीक सेल्लु। मेकोमी “गो परमप्रभु यावे नड। आं डा लाक्शा अरु सुइ परमप्रभु मबाक्ब।

19 गो छिडछिड डा रागीमी खुइश्शो लोव्र मपड। गो याकूब आ आल आन कली ‘गे आं कली खल्बलम मालीने’ मदेंड। गो, परमप्रभु यावेमी थमा नु ठीक लोव्र ला पाइनुड” देंत। यसैया ४८:१६

### मूर्तिम बेबीलोन प्रोंइने मचाप्नीम

20 मिनु परमप्रभु यावेमी “गे नेल्ल खुम्सीशा बुक्कीन। गे रागी रागी डा लीशो मुर आं नेक्था जाक्कीन। शी के मूर्ति कुरबपुकी मारेड मतुइक्ब बाक्नीमी। मेकोपुकीमी आन मूर्ति कली पुंइना पुंइन बाक्नीमी। तन्न मेकोपुकीमी श्येत रे प्रोंइने मचाप्नीम।

21 इ लोव्र शेंशा, लोव्र पावो। लोव्र पमुने। साइ डोंइती एको लोव्र सुम देंमे? सुमी तुडक्पदा? मेको नोले दुम्ब लोव्र सुम पवा? गो, परमप्रभु यावे मनडा डा? आं डा लाक्शा, अरु सुइ परमप्रभु मबाक्ब। गो ठीक पाइब नु श्येत रे प्रोंडब परमप्रभु यावे नड। आं डा लाक्शा, अरु सुइ परमप्रभु मबाक्ब।

22 आं गे लेतीन। मिनु पाप रे प्रोंइचा पुंइसीन। रागी डा सुर सम्म मो पने। मारदे हना गो परमप्रभु नड। आं डा लाक्शा अरु सुइ परमप्रभु मबाक्ब।

23 गो आं नेंमी कसम जाता। गो ठीक लोव्र पाता। एको लोव्र मक्याम्सीब। मुर नेल्ले आं डोंइती पोक्च थेक्चा माल्नीम। आं नेंमी कसम जचा माल्नीम। रोमी १४:११; फिलिप्पी २:१०-११

24 ‘परमप्रभु यावे ला ठीक पतीके नु सक्ति गेब बाक्ब’ दे कसम जाइनीम। परमप्रभु यावे कली मटीब नेल्ल आं बाक्तीकेम जाक्शा मुने दोक्चा माल्नीम। येरमीया २३:६

25 इस्राएल आ चच युइ नेल्लेम ‘परमप्रभु यावेमी इ कली ठीक सेल्ब। गोपुकी आ मुर दुम्तय’ दे ग्येरसीनीम” देंत। येरमीया ९:२२-२३

## 46

### बेबीलोन डा मूर्ति खतम दुम्शो

1 बेल गुर ब्वेत। नेबो दिड गोल्त। मेको आन मूर्तिपुकी बी ब्यफ आन कली कुरपाइक्नीम। इन कुरशो थोव्रक गे दशो बी ब्यफ आन कली कुरपाइक्नीनी। येरमीया ५०:२

2 मिनु मेकोपुकी कालेम दिड गोल्शा, गुर ब्वेनीम। आन भारी प्रोंइने मचाप्नीम। मिनु आंमा ग्याइश्शा लाइक्चा पुंइसीनीम।

3 “याकूब आ खिं डा मुर, आं लोव्र नेनीन। इस्राएल आ खिं डा लीशो मुरपुकी आं लोव्र नेनीन। गे जरमेसीनी रे इन कली कुरता। गे कोव्रजीम बाक्नी रेन इन कली कुरता।

4 गेपुकी खूशो दुम्नी सम्म गो खाल का डा बाक्नुड। इन चां बोडक्म सम्म यो इन कली कुरनन्नी। गो इन कली सेल्शा, कुरनुड। इन कली कुरशा, पाप रे प्रॉइनन्नी। भजन संग्रह ७१:१८

5 गेपुकी आं कली सु नु थाप्नीनी, सु नु उडक्थ बाक्त देंनीनी। आं कली सु खोदेशो बाक्त देंनीनी? यसैया ४४:१-२०

6 मिनु शुश सुन थीब नु चांदी नाक्बपुकीमी चेम्ब कली ब्रेत्नीम। मिनु मेको रे मूर्ति सेल्पाइक्नीम। मेको आं डोंइती बाप्शा पूजा पाइनीम।

7 मिनु मेको कली गुप्शा, बलाम कुरशा, लाइशशा, आ बाक्तीकेम वोदमेनु, मेकेर मदुक्थु, मगाक्थु बाक्ब। सुइमी मेको आं डोंइती जाक्शा 'प्रॉइयीनी' देंत हना, मेकोमी लोत्र मलेप्ब। सुइ आन कली श्येत रे प्रॉइने मचाप्ब" देंत। १राजा १८:२६

### परमप्रभुम आ मिम्शो पाइब

8 मिनु "गे हेंथे गाक्बपुकी, आं देशो मिम्तीन। साइ डा लोत्र इन थुंम वोतीन।

9 साइ डोंइती डा माइत लोत्र मिम्तीन। मारदे हना गो परमप्रभु नड, आं डा लाक्शा, अरु सुइ परमप्रभु मबाक्नीम। गो परमप्रभु नड, आं खोदेशो सुइ मबाक्नीम। यसैया ४४:६

10 गो साइ डोंइती रे नोले सम्म मार दुम्मे, नेल्ल शेंनुड। डोंइती रे मुल सम्म मदुम्शो यो देंनुड। मिनु गो आं मिम्शो मफाइक्थु, नेल्ल पाइनुड। आ मिम्शो नेल्ल खानुड।

11 गो पूर्व रे सिखार ग्यारब चिक्ब का ब्रेत्नुड। मिनु डोन रागी रे आं मिम्शो नेल्ल पाइब मुर का कली ब्रेत्नुड। गो आं देशो लोत्र खानुड। आं मिम्शो पाइनुड। यसैया ४१:२

12 गे खकटा थुं पाइशोपुकी नेनीन। गे पाप रे प्रॉइतीके रे शुश डोन बाक्नीनी।

13 आं पाप रे प्रॉइतीक चाक्नुड, मेको डोन मबाक्ब। गो इन कली रीब पा पाप रे प्रॉइनुड। गो आं पाप रे प्रॉइतीक सियोनम वोइक्नुड। इस्राएल कली आं छेडछेड गेनुड" देंत।

## 47

### बेबीलोन सहर खतम दुम्शो

1 मिनु "गे कन्ने तमी बेबीलोन तोइशशा फुरकुम निस्सो। बेबीलोन डा कल्दी आ तमी, ठेयब नित्तीक मबाक्थु, खपीम निस्सो। मारदे हना मुल रे इन कली 'दारशो नु अरु आन क्येडा शुश दाक्शो तमी' मदेनीम।

2 फस हिल्लो। इ कुल सुम्सीशो वा हाक्सो। इ गुने ग्येत्थ क्युकसो फिला कोइशा खोला शोक्सो।

3 इ वा हुक्शा, इ शिन्ना रां कोइचा मालनेवे। इ मुने दोक्तीके तांइसीब। गो इ कली क्येक्क लेत्नुड। गो सुइ कली मप्रॉइनुडमी। नहुम ३:५

4 आंइ कली श्येत रे प्रॉइब, मुर नेल्ल आन परमप्रभु यावे, इस्राएली आन का ला बाक्शो परमप्रभु बाक्ब।

5 कल्दी आ तमी ब्वालेइ पा छिडछिडम लशा निस्सो। मारदे हना गे मुल रे राज्यपुकी डा पिपीम माइक्चा मपुंइसीनेवे।

6 गो आं मुर आन कली तशा गाइशशा, मेको आन कली 'आं मुर मनम' खोदेशो सेल्तामी। मेना इ गुइमी गेतामी। मिनु गे मेको आन कली काइ शिशी मपदी। खूशो आन कली यो श्येत गेशा, हेल्शो जवा लाप्ताक्वी। जकरिया १:१५

7 मिनु गे 'गो गेना हना यो पिपीम बाक्नुड' देंते। गे आं मुर आन कली मरिम्शो पाप्तीवी। नोले मार दुम्बा, मेको ममिम्ती।

8 मोपतीके गे दला दाक्स पाइब, नेनो। गे रिम्शो पा महिंथु बाक्ते। इ थुंमी 'गो ठेयब नड, आं क्येडा लाक्शो अरु सुइ मबाक्ब। गो वोंइश बेक्शो मीश मुर मदुम्नुड। आं आल बेक्शो मताइनुड' देंते। सेफन्याह २:१५; प्रकाश १८:७

9 वोंइश बेक्शो मीश मुर दुम्तीके श्येत नेल्ल ताइनेवे। इ आल बेक्शो ताइनेवे। नाक्ती का, याम कामीन एको श्येत निक्शी इ कली दुम्नीस। शुश मन्तर तन्तर, ठेयब सक्ति पाइशशो टुना मुना पाप्तीवी हना यो, मो दुम्शो ताइनेवे।

10 गे, परमप्रभु यावे आ अरेशो मटिथु 'आं कली सुइम मताइब' दे हेम्मा पा बाक्शा, मिम्ताक्वी। मिनु इ शुश तुइक्तीके नु जोक्तीकेम इ कली दूली लां खोइक्पाइक्तु। इ थुंमी 'गो नड। आं क्येडा लाक्शो अरु सुइ मबाक्नीम' देते। भजन संग्रह १०:११

11 तन्न मुल गे शुश श्येत जाइनेवे। इ मन्तर तन्तरमी तिकने मचाप्नेवे। गे शुश हिंचा डा श्येत जाइनेवे। गे मेको तेक्ने मचाप्नेवे। मुल सम्म मतुइशशो जाम्तीक नु नुप्तीक इ तारी जाक्ब।

12 गे इ टुना मुना नु मन्तर तन्तर शुश पावो। गे आल रेन मोदेशो पाप्तीवी। मेको पवीनु, ठीक दुम्बा कों? मेको श्येत मजाक्बा कों? दानीएल २:२

13 गे शुश अर्ती नेंशा दशो बाक्नेवे। मिनु कल्दीपुकीमी सरीड कोव्रशा, इ कली पाप रे प्रोन्मेक्ल। मिनु सोरुल कोव्रबमी औसीमी इ कली मार दुम्बा, मेको देंमल।

14 मेकोपुकी टुटा दुम्नीम। मिनु मीम मेको आन कली नेक्ब। आंमा मेको मी रे प्रोंइसीने मचाप्नीम। मेको मी थेरचा डा मदुम्थु, आ डोंइती बाक्ने मचाप्नीम।

15 गे नु गेय पाइब मुरपुकी मोदेशो मुर बाक्नीमी। गे आल रेन मेकोपुकी नु ग्याप्तीक लेयती गेय पाप्तीवी। मेको का का पा आन आंम लां खोइक्नीम। मिनु इ कली प्रोंइब सुइ मबाक्नीम" देते।

## 48

### परमप्रभुम नोले दुम्ब लोव्र शेंशो

1 मिनु परमप्रभु यावेमी "याकूब आ खिं डा मुर, नेनीन। इन कली इस्राएल नें वोइशशो बाक्ब। गे यहूदा आ चच युइ बाक्नीनी। गे परमप्रभु यावे आ नें थिशा, कसम जाइनीनी। गे इस्राएली आन परमप्रभु कली ठेयब सेल्खु पाइनीनी। यसैया ५१:१

2 मेकोपुकी आंम आंमा 'गोपुकी परमप्रभु आ योवशो सहर डा नकी' देनीम। इस्राएली आन परमप्रभु आ परबम मेकोम आंइ कली कोव्रब" दे मिम्नीनी। मेको आ नें मुर नेल्ल आन परमप्रभु यावे बाक्ब।

3 गो इन कली साइ डोंइती डा लोव्र डोंइती रेन शेंताक्नी। गो लोव्र पा नेंपाइक्तन्नी। नोले गो मेको याम काम पाता। मिनु दुम्तेक्म।

4 गे मटीब बाक्नीनी। इन शुर फलाम खोदेशो बाक्ब। इन कुप्फी कांसा खोदेशो बाक्ब। गो मेको तुइशशो बाक्नुड।

5 मोपतीके गो इन कली मेको दुम्चा क्येडा डोंइती शेंताक्नी। मिनु गे "मेको आं मूर्तिम पाप्तु। आं मुशा सेल्शो मूर्तिम नु आं चेम्शा सेल्शो मूर्तिमी मेको पाप्तु" देने मचाप्नी।

6 गे मेको नेल्ल नेंशो बाक्नीनी। मुल गे नेल्ल कोव्रडीन। मिनु मेको आ परबम लोव्र मपाइनीनी? मुल रे गो इन कली नक लोव्र नेंपाइक्नन्नी। इन मतुइशशो खुइशशो लोव्र शेंनन्नी।

7 मेको डोंइती डा ममाइ, गो मेको मुल पाता। डोंइती मनेंशो ननी। मिनु गेपुकीमी "गो डोंइती रे तुइशशो नकी" देने मचाप्नीनी।

8 गे मेको मनेंशो मतुइशशो बाक्नीनी। साइ डोंइती रे नोफा मनेंब बाक्तीनी। गे जोल पा गेय पाइब बाक्नीनी। मेको गो तुइक्ताक्ड। आल रेन गे काइ मटीब बाक्तीनी, दे तुइक्ताक्ड।

9 आं नें आ परबम आं गाइक्तीके तेक्नुड। आं कली ठेयब सेल्तीके, गो इन परबम आं गाइक्तीके तेक्नुड। इन कली मसाइक्चा कली मो पाइनुड।

10 कोव्रडीन, गो इन कली यपाइक्ता, तन्न चांदी खोदेशो पा ममाइ। शुश श्येत जपाइशशा, नाक्ताक्नी। ब्यवस्था ४:२०

11 गो आं परबम पाइनुड। मारदे आं नें ग्रांघा दिशो सेल्चा गेनुडा? आं छेडछेड नु सक्ति अरु आन कली मगेनुडमी। यसैया ४२:८

इस्त्राएल कली पाप रे प्रोंइशो

12 याकूब आं लोव्र नेनो। आं ब्रेशो इस्त्राएल नेनो। “गो, गो नड। गो नेल्ल क्येडा डोंइती नु नेल्ल क्येडा नोले डा नड।

13 गो रागी आ जग वोइक्ता। आं ग्युरा गुइमी सरीड प्राक्ता। मेको आन कली ब्रेल्लतुनेल्ल गूशा राप्नीम।

14 गे नेल्ले खुम्सीशा, आं लोव्र नेनीन। मेको आन दातेमी सुम मोदेशो शेंदा? परमप्रभु यावेम मेको आन कली दाक्ब। मिनु मेको बेबीलोन आ पबंम बोक्ब। कल्दी डा मुर आन कली लडाइ तोइब। यसैया ४१:२

15 गो एको लोव्र पाता। गो मेको कली ब्रेशा, चाक्ता। मिनु मेकोमी आं मिम्शो गेय रिम्शो पा पाइब।

16 आं नेक्था जाक्शा, एको लोव्र नेनीन। गो डोंइती रे खुइशो लोव्र काइ मपड। एको गोशो रे गो बाक्शो नड। मुल परमप्रभु, परमप्रभु यावेमी आ सोक्त गेशा, आं कली सोइक्ताक्यी” दैत। यसैया ४५:१९

बेबीलोन रे गूडीन देशो

17 इन कली श्येत रे प्रोंइब इस्त्राएली आन का ला बाक्शो परमप्रभुमी “गो परमप्रभु यावे, इन परमप्रभु नड। गो इन कली रिम्शो दुम्चा कली शेंनुड। मिनु तेको लां लचा माल्नीनी, मेको कोंइनुड।

18 गेपुकी आं शेंशो टिशो ननी हना, इन सोशा बोशा लतीके ठेयब खोला खोदेशो दुम वा। इन रिम्शो दुम्तीके समुन्द्र खोदेशो दुम वा। ब्यवस्था ५:२९

19 मिनु इन आल समुन्द्र डा बाल्वा खोदेशो पा शुश दुम वा। मिनु इन चच युइ अन्न खोदेशो पा शुश दुम वा। आन नें गेनायो मक्याम्म वा। मिनु आं डोंइती रे खतम मदुम वा। उत्पती २२:१७

20 “बेबीलोन रे गूडीन। कल्दी आन रागी रे प्रोक्कीन’ दे ठेयब सेंदा पा नेल्ल आन कली नेंपतीन। रागी डा सुर सम्म नेंपतीन। गेपुकीमी ‘परमप्रभु यावेमी आ गेय पाइब याकूब कली पाप रे प्रोंइतु’ दे नेंपतीन” दैत। येरमीया ५१:६; प्रकाश १८:४

21 मेकोमी मेको आन कली गोरशो रागीम लदानु, मेकोपुकी ब्वाक्कु तूतू मदाक्म। मारदे हना मेकोमी सेरथे फुल्लु रे ब्वाक्कु बुक्पाइक्तु। सेरथे फुल्लु प्रोलानु, शुश ब्वाक्कु गूत।

22 परमप्रभु यावेमी “आं अरेशो लोव्र मटीब आन थुं नाइक्चा मताइनीम” दैत। यसैया ५७:२१

## 49

परमप्रभु यावे आ गेय पाइब

यसैया ४२:१-४

1 गे समुन्द्र आ नेक्था बाक्बपुकी, होस पने। गे डोन रागी डा मुरपुकी, होस पने। परमप्रभु यावेमी आं कली आ जरमेचा क्येडा डोंइती रेन ब्रेशो बाक्त। गो आं ममा आ कोव्रजीम बाक्डानु, मेकोमी आं कली नें गेती।

2 मेकोमी आं शोव हेरशो तरवार खोदेशो सेल्लु। आं कली आ गुइमी सुम्शा, खुइक्ताक्यी। मेकोमी आं कली हेरशो ब्रा खोदेशो सेल्ला, आ ब्रा कुरतीकेम कुर पा खुइशशा वोइक्ती। हिब्रू ४:१२; प्रकाश १:१६; यसैया ५१:१६

3 मिनु आं कली “गे आं गेय पाइब बाक्नेवे। गे इस्त्राएल नवे। इ पतीकेमी आं सक्ति कोंइनुड” दैत।

4 मिनु गो “गो मो गेय पाता। आं बोल मो खेरता। गो मार पचा माल्लुडा। मेको परमप्रभु यावे नु बाक्ब। आं परमप्रभुमी आं तचा माल्लो गेब” दैती। १कोरिन्थी १५:५८

5 मुल परमप्रभु यावेम आ गेय पाइब सेल्लती। मिनु गो याकूब कली आ गे लेप्पाइक्चा कली नु इस्त्राएल मेको आ नेक्था खुप्शा वोइक्चा कली मेकोमी आं कली आं ममा आ कोव्रजीम सेल्लती। मारदे हना गो परमप्रभु यावे आ डोंइती मान ताइब दुम्ती। आं परमप्रभु आं सक्ति दुम्त।

6 मिनु मेकोमी “याकूब आ थर डा मुरपुकी नु इस्त्राएल डा लीशो मुर आन कली डोंइती डा खोदेशो सेल्ला कली इ कली आइक्च गेय का बाक्ब। गो इ कली रागी रागी डा मुर आन कली छेडछेड

दुम्पाइक्नुड। मिनु मेको आं पाप रे प्रोंइतीके रागी डा सुर सम्म बल” देंत। यसैया ४२:६; यसैया ६०:३; लूका २:१२; प्रेरित १३:४७

7 परमप्रभु यावेम, इस्राएली आन श्येत रे प्रोंइब, इस्राएली आन का ला बाक्शो परमप्रभु यावेमी काइ मदाक्शो नु रागी डा मुरुम खेदा पचा पुंडसीशो नु हुकुम पाइब आन वाइल आन कली “पिपपुकी मेको कली तशा, राप्नीम। हुकुम पाइबम आ देंशो पाइब परमप्रभु यावे आ डोंइती बाप्नीम। इ कली योव्रब इस्राएली आन का ला बाक्शो परमप्रभु आ डोंइती बाप्नीम” देंत।

### इस्राएली कली पाप रे प्रोंइब

8 मिनु परमप्रभु यावेमी “शिशो पतीक नाक्त गो इ लोव्र नेंशा, लोव्र लेत्ताक्न। प्रोंइतीके नाक्त गो इ कली वारच पाता। गो इ कली कोव्रशा, आं कबल डा मुर सेल्ला। गो रागी लेंशा सेल्चा कली मोदेंशो पाता। इन थेरशो रू लेंशा इन कली गेचा कली मो पाता। भजन संग्रह ६९:१४; २कोरिन्थी ६:२; यसैया ४२:६

9 गो जेल्खानम बाक्ब आन कली ‘मूडीन’, छिडछिडम बाक्ब आन कली ‘छेडछेडम मूडीन’ देंचा कली ब्रेत्ताक्न। मेकोपुकी आं भेडा बाक्नीम। लांमी जोचा ताइनीम। गोरशो डांडा मेको आन रिम्शो पा जोतीके बाक्तीके दुम्ब।

10 शोव्रलु मबेक्नीम, तूतू मदाक्नीम। नां नु होश फश नु नांमी मेको आन कली मनाप्ब। मारदे हना मेको आन कली शिशो पाइबमी मेको आन कली खुल्ब। प्रकाश ७:१६

11 मिनु गो आं डांडा नेल्ले लां सेल्लुड। आं ठेयब लां रिम्शो पा सेल्पाइक्नुड। यसैया ४०:४

12 नेनीन, मेकोपुकी डोन रे जाक्नीम। मेकोपुकी उत्तर रे पच्छिम रे नु स्येने रागी रे जाक्नीम” देंत। स्येने रागी इजीप्त आ दक्खिनम यहूदी आन बाक्तीके का बाक्ब। मेको कली आस्वान यो देंनीम। लूका १३:२९

13 सरीड, ग्येरसीशा कुम्सो पावो। रागी, ग्येरसो। डांडापुकी ग्येरशा, कुम्सो पने। मारदे हना परमप्रभु यावेमी आ मुर आन कली लेम्ताक्व। मेकोमी श्येत जाइब आन कली शिशो पाइब। यसैया ४४:२३

### सियोन डा शुश मुर

14 तन्न सियोनमी “आं परमप्रभु यावे, परमप्रभुम आं कली प्रोंइशा प्रेंताक्वी” देंत।

15 मिनु परमप्रभुम “सुइ मीश मुरुम आ दूध तूब आल कली प्रेंबा डा? आंम आ आल कली शिशो मपाइबा डा? मेकोम आ आल कली प्रेंने चापु हना यो, गो इ कली मप्रेनुड। उत्पत्ती २१:१६; १राजा ३:२६; येरमीया ३१:२०

16 कोव्रडो, गो इ कली आं गुइमी ब्रेक्ताक्न। इ गारोपुकी गेना हना यो आं डोंइती बाक्नीम।

17 इ तमी तौ रीब पा जाक्नीम। इ कली खतम पोक्ब गूशा लाइनीम” देंत।

18 कोव्रडो, मिक्च हिरशा कोव्रडो। मेको नेल्ल गुम्शा, इ बाक्तीक जाक्नीम। परमप्रभु यावेमी “गो ब्रोंइशा बाक्शो खोदेंशो पा, गे मेको लेशशा जाक्ब आन कली माला खोदेंशो पा रेलसीचा माल्नेवे। गुम्ली खोदेंशो पा मेकोपुकीमी ग्योम्सीचा माल्नेवे। यसैया ६०:४

19 थमा पा इ प्रेशो खिं, मुर मबाक्शो रागी नु इ खतम दुम्शो रागीम मुर मरिक्थी दुम्नीम। इ जोरी सनु डोन लाइनीम।

20 इन ब्राची ना डा जरमेशो आलपुकीमी इ कली ‘एको रागीम आंइ कली मरिक्त, अर्को बाक्तीक रू गेकी’ देंनीम। यसैया ५४:१

21 मिनु गे इ थुमी ‘एको आलपुकी आं कली सुम थिशा गेयी? गो आल मथीब दुम्शो बाक्ती। आं रागी रे ग्याइशशा लाइक्चा पुंडसाक्वी। सुम मेको आन कली थुल्शा कोल्पदा? गो दा आं का ला लीशो बाक्ती। एको ते रे जाक्मा?’ दे मिम्नेवे” देंत।

22 मिनु परमप्रभु, परमप्रभु यावेमी “गो आं गुइ रागी रागी गे दिनुड। गो जात जात डा मुर आन डोंइती आं छेदर खुक्शा कोंइनुड। मिनु मेकोपुकीमी इ तौ आन कली कुचुम मुप्शा नु इ तमी आन कली चीम कुरशा चाक्नीम। यसैया ६०:४



23 मिनु पिपपुकी इ कली कोव्रब आफ नु पिपीमपुकी इ कली दूध तुंडब ममा दुम्नीम। मेकोपुकी इ डोंडती बाप्शा, इ फुरक लुम्सीशो खोइली तुक्नीम। मिनु गो परमप्रभु यावे नड, दे तुडक्नेवे। आं लां रिम्शा बाक्बपुकी मुने मदोक्नीम” देंत। भजन संग्रह ७२:९; यसैया ६०:१६

24 बोल्यो मुर आन रोइश्शो सिखार सुम रोइक्ने चाप्नीमी डा? हिंचा डा पिपम चोक्शो मुर आन कली सुम प्रोंइने चाप्नीमी डा?

25 तन्न परमप्रभु यावेमी “बोल्यो मुर आन ग्याइश्शो मुरपुकी यो लाइक्चा पुंडसीनीम। हिंचा डा पिपम चोक्शोपुकी प्रोंइचा पुंडसीनी। गे नु लडाइ पाइबपुकी नु गो लडाइ पाइनुड। इ आल आन कली गो कोव्रशा प्रोंइनुड। मती १२:२९

26 इ कली श्येत गेब आन कली आंम आन श्ये ब्वपाइक्नुड। मेकोपुकी अङ्गुर शांबुम दुक्शो खोदेशो पा आंम आन हुशेम दुक्नीम। मिनु मुर नेल्लेमी “गो इ कली श्येत रे प्रोंइब, इ परमप्रभु यावे नड। गो इ कली पाप रे प्रोंइब, याकूब आ सक्ति पाइश्शो परमप्रभु नड” दे तुडक्नीम” देंत।

## 50

### परमप्रभुम इस्त्राएली कली हुइश्शो

1 मिनु परमप्रभु यावेमी “गोम इन ममा कली प्रोंइशा गेशो छोड पत्र ते बाक्म? गो तेको आं कली जेर गेब कली इन कली लेयन्नी? ममाइ, गे इन पापम पतीके लेयसीशो ननी। इन हेंथे पतीकेमी इन ममा प्रोंइचा पुंडसीशो बाक्ब। यसैया ५४:६; ब्यवस्था २४:१; यसैया ५२:३

2 गो जाक्डानु, मारदे सुइ मबाक्मा? गो ब्रेडडानु, मारदे सुइमी लोव्र मलेत्ता? आं गुइ इन कली पाप रे प्रोंइने मचाप्चा डा दुम्शो बाक्मे? इन कली प्रोंइने चाप्तीक सक्ति गो नु मबाक्बा? गो हुइक्तुनु, समुन्द्र सोव्रब। खोलापुकी ब्वाक्कु मबाक्शो गोरशो रागी सेल्लुड। ब्वाक्कु मबाक्तीके डाइपुकी बेक्शा, राक्शा, रिना पाइनीम। यसैया ५९:१; गन्ती ११:२३; प्रस्थान १४:२१

3 गो सरीड कली छिडछिडम गिल्शा, अरन्डी फेक्पाइक्नुड” देंत।

### परमप्रभु आ गेय पाइबमी टिशा

यसैया ४२:१-४

4 परमप्रभु, परमप्रभु यावेमी आं कली शेंब सेलती। गो मचाप्शो मुर आन कली लोव्र पा आन शुं बारपाइक्ब दुम्ती। मेकोम आं कली सुनी कुस कुस पोक्ब। आं कली शेंसीब खोदेशो पा नोफा दाइश्शा नेंब सेल्लब।

5 परमप्रभु, परमप्रभु यावेमी आं कली आ लोव्र नेंपाइक्ती। मिनु गो आ लोव्र टिशा, नोले मशोंइसीड। भजन संग्रह ४०:७

6 गो आं ची तुप्ब आन कली तुप्चा गेतामी। गाल शोक्रे ब्विप्ब आन कली चोव्रचो दाइश्शा गेतामी। गो शुक्शी पाइक्चा नु तोक्चा पुंडसीतीक रे आं कुल मखुइक्तु। यूहन्ना १९:१; मती २६:६७-६८

7 तन्न परमप्रभु, परमप्रभु यावेमी आं कली वारच पाइक्ती। मोपतीके गो शिशी मताइब मदुम्ड। आं कुल शेराल फुल्लु खोदेशो सेल्लता। गो मुने मदोक्नुड, दे तुइश्शो नड। इजीकीएल ३:८-९

8 “गे रिम्शो पाइब बाक्नेवे” देंब आं नेक्था बाक्ब। गो नु सु लडाइ पाइबा? कालेमी बोक्शा राप्य। दोस गेब, सु बाक्मा? मेको आं डोंडती जाक्मल। रोमी ८:३३

9 परमप्रभु, परमप्रभु यावेमी आं कली वारच पाइब। आं कली दोस गेब, सु बाक्नीमी? मेको नेल्ले फेक्शो वा खोदेशो पा माइत दुम्नीम। मिनु तुम्बुम मेको कली नेक्नीम।

10 इन दातेमी परमप्रभु यावे कली मान पा हिंब सु बाक्नी? मिनु आं गेय पाइब आं देशो टीब सु बाक्नी? मेको छिडछिडम गाक्शा, छेडछेड काइ मताइब बाक्त हना यो, परमप्रभु यावेम “आं कली श्येत रे प्रोंइब” दे थमा सुइश्शा, आ परमप्रभु कली जिम्मा गेंसीशो बाक्ब।

11 गे नेल्ल खिं सुइक्ब बाक्नीनी। कोक्त सुइक्ब बाक्नीनी। इन सुइश्शो मीम गाक्कीन। गे आं गुइ रे मार ताइनीनी? गे गोल्शा शुश श्येत जाइनीनी।

## 51

## सियोन आ थुं बारपाइशशो

1 परमप्रभु यावे कली माल्ब नु ठीक पचा दाक्ब आन कली “आं लोव्र नेनीन। तेको सेरथे फुल्लु रे मुचा पुंडसीशो बाकनी नु तेको खप रे दोशा गुंडचा पुंडसीनी, मेको कली कोव्रडीन। यसैया ४८:१; ब्यवस्था ३३:२८

2 इन किकी पिपी अब्राहाम नु इन कली थीब सारा आस कली कोव्रडीन। मारदे हना गो मेको कली आ का बाक्मेनु, ब्रेत्ताकड। मिनु मेको कली आसीक गेशा, आ चच युड आन कली सोपाइशशा बोपाइशशा शुश सेल्लाक्मी” देंत। यसैया ४१:८; उत्पत्ती १२:१-२

3 परमप्रभु यावेमी सियोन आ थुं बारपाइक्ब। आ खतम सेल्लशो बाक्तीके नेल्ल नक सेल्लब। आ मुर मबाक्तीके कली एदेन खोदेंशो सेल्लब। आ गोरशो रागी कली परमप्रभु यावे आ रू खोदेंशो सेल्लब। मेकेर शुश ग्येरनीम। “गे रिम्लो पाइब बाक्नीनी” दे कुम्सो पशो नेंसीब। उत्पत्ती २:८

4 मिनु परमप्रभुमी “आं मुरपुकी, आं लोव्र नेनीन। आं रागी डा मुरपुकी इन नोफा दाइक्तीन। मारदे हना गो आं लोव्र शेंनुड। आं ठीक निसाफ जात जात डा मुर आन कली तुइक्पाइक्नुड। मेको आन कली छेडछेड दुम्ब।

5 गो आं ठीक पतीके रीब पा चाक्नुड। गो ग्राचा चिकशो बाक्नुड। मिनु गो जात जात डा मुर आन कली निसाफ पाइनुड। समुन्द्र आ नेक्था बाक्ब मुरपुकीम आं लां कोव्रनीम। आं वारच पतीके रिन्नीम। यसैया ४२:४

6 मिनु सरीड गे कोव्रडीन। खप गे कोव्रडीन। मारदे हना सरीड कुन खोदेंशो पा जाम्ब। रागी वा खोदेंशो पा जेक्ब। रागीम बाक्ब मुर नेल्ल भुस्ना खोदेंशो पा बेक्नीम। आं पाप रे प्रोंडतीके चहिं गेना हना यो लीशा बाक्ब। आं ग्रातीके गेनायो मनुप्ब। भजन संग्रह १०२:२६-२७; मती २४:३५

7 गे ठीक पतीके तुइक्बपुकी आं लोव्र नेनीन। आं शेंशो थुंमी वोइक्ब मुर आं लोव्र नेनीन। मुर आन शुक्शी पशो नेंशा महिनीन। मेको आन तोक्शा पशो लोव्र नेंशा सुर्ता मपने। यसैया मती ५:११

8 मारदे हना तुम्बुम वा नेक्शो खोदेंशो पा, मेको आन कली नेक्नीम। बुस्सुम ऊन खोइशशो खोदेंशो पा खोइक्नीम। आं ग्राचा चहिं गेना हना यो लीशा बाक्ब। आं पाप रे प्रोंडतीके पाला पाला नेल्ल आन कली लीब” देंत।

## परमप्रभु यावे आ गेय

9 परमप्रभु यावे सेंसीन, सेंसीन। सक्ति पाइशशो दुमीन। साइ डोंडती आंइ किकी पिपी आन कली पशो खोदेंशो पा, पने। साइ गे राहाब माइशशो समुन्द्र डा जन्तु कली मसाइक्नी डा? ठेयब बुस्स कली मतूदीनी डा? भजन संग्रह ८९:११

10 समुन्द्र सोव्रपाइक्ब, गे मननी डा? गे समुन्द्र कली चेशशा आ पुंम लां मसेल्नी डा? इन पाप रे प्रोंडशो, इन मुर आन कली शोक्पाइक्चा कली मोदेंशो पाइतीनी। प्रस्थान १४:२१-२२

11 परमप्रभु यावे आ प्रोंडशोपुकी लेत्नीम। मेकोपुकी कुम्सो पना पन सियोनम जाक्नीम। मिनु गेना हना यो ग्येरशा बाक्नीम। शुश ग्येरतीके, मेको आन श्येत नु हुकयी पतीके जाम्शा लाइब। यसैया ३५:१०

12 परमप्रभुमी “गो इन कली थुं बारपाइक्ब नड। गे मुर तशा, मारदे हिंनीनी? मुरपुकी घांस खोदेंशो पा बेक्नीम। भजन संग्रह ५६:५; मती १०:२८; यसैया ४०:१,६

13 गे इन कली सेल्लब परमप्रभु यावे कली प्रेंताक्नी। मेकोमी सरीड प्राक्तु। रागी आ जग वोइक्तु। इन कली श्येत गेब मुर गाइक्तमेनु, गे नाक्त किंत किंत हिंनीनी। मेकोमी इन कली खतम सेल्ल्या चिकशो बाक्त। तन्न मुल आ गाइशशो ते लाक्गा? यसैया ४४:२४

14 मिनु चोक्सीशा गु बाप्शो मुर कली रीब पा प्रोंडनीम। मेकोपुकी मबेक्नीम। गेना हना यो जचा ताइनीम।

15 मारदे हना गो परमप्रभु यावे, इन परमप्रभु नड। गो समुन्द्र डा छाल पोक्नुड। आं नें मुर नेल्ल आन परमप्रभु यावे बाक्ब। येरमीया ३१:३५

16 गो इ कली आं लोत्र पपाइक्ता। गो इ कली आं गुड डा वांकुमी सुम्शा वोइक्तन। सरीड प्राक्व नु रागी आ जग वोइक्व गो नड। मिनु सियोन कली 'गे आं मुर बाक्नीनी' देंशो बाक्नुड" देंत।

दिप्चा पुंडसीशो यरूसलेम बोक्को

17 यरूसलेम बोक्को। परमप्रभु यावे इ पर्वम गाइश्शा, श्येत तूचा गेप्टु। गे दिड दाड गोल्पाइक्व कचौरा तूशा श्येतथ सेल्टीवी। भजन संग्रह ६०:५; भजन संग्रह ७५:९; येरमीया १३:१२-१३; प्रकाश १६:१९

18 मेको आ थिशो आल आन दातेमी, मुर आन कली शेंब सुइ मबाक्म। आ कोल्शो आल आन दातेमी मेको आन कली लां कोइब सुइ मबाक्म।

19 इ कली श्येत निक्शी जाक्ताक्स। मेको लां नेल्लेम गोल्शो बाक्नीम। डोंइती डा श्येत इन सहर प्रेशशा, खतम दुम्तीके नु नोले डा श्येत अन्काल नु लडाइम, बेक्तीके बाक्त। सुम इ थुं बारपाइक्वा?

20 इ आलपुकी थाम्तेक्म। मेको लांम गोल्शो बाक्नीम। मेको ब्वारदम रेशशो रोकोश खोदेंशो दुम्शो बाक्नीम। परमप्रभु यावे आ गाइक्तीके नु हुइक्तीके मोदेंशो दुम्शो बाक्नीम। बिलाप २:११,१९

21 मोपतीके गे गार पाइश्शो मुर नेनीन। गे दुक्शो बाक्नीनी, तन्न अडगुर शांबुम ममाइ।

22 परमप्रभु यावे, इ होत्रप दुम्शा परमप्रभुमी "गो आं मुर आन कली वारच पाइब बाक्नुड। गो इ दिड दाड गोल्पाइक्व कचौरा इ गुड रे लाइक्ता। मुल रे गे आं गाइक्तीक कचौरा लेंशा तूचा ममालेवे।

23 मिनु इ कली श्येत गेब आ गुइमी मेको कचौरा गेनुड। डोंइती मेकोपुकीमी इ कली लांम बाप्पो। "इ तारी गाक्नीक" देंतेक्म। मिनु गे इ ची गाक्तीक लां खोदेंशो सेल्टीवी" देंत। भजन संग्रह १२९:३

## 52

परमप्रभुम सियोन कली ब्रेशशो

1 मिनु परमप्रभुमी "बोक्को। सियोन बोक्को। सक्ति पाइश्शो दुमो। इ दारशो वा फेक्सो। यरूसलेम, गे परमप्रभु यावे आ सहर बाक्नेवे। मुल रे खोइक्तीक चिनु मखोइश्शो नु ग्रांरा दिचा डा मुर मेकेर ओवने मचाप्नीम।

2 यरूसलेम, इ फुरक थुर थुर पाइसो। बोक्को। गे ग्याइश्शा चोक्चा पुंडसीशो सियोन आ तमी, इ शुर डा साडलो प्रुतो" देंत।

3 परमप्रभु यावेमी "गे मोशान लेयसाक्नी। मिनु मोशान प्रोंइचा पुंडसीनीनी। यसैया ५०:१

4 साइ डोंइती आं मुर उइ इजीप्त रागीम अर्को रागी डा मुर दुम्थ लाम्तेक्म। मिनु अस्सुर डा मुरपुकीमी यो मेको आन कली मोशान श्येत गेम्तेक्म" दे परमप्रभु, परमप्रभु यावेमी देंत। उत्पत्ती ४६:५-६; २राजा १७:६

5 मिनु परमप्रभु यावेमी "गो मार पाइनुडा डा? आं मुर आन कली मोशान लाइक्तेक्म। मेको आन कली हुकुम पाइबपुकीमी ठेयब लेशशो लोत्र पा नाक्तर रे आं नें आ पर्वम शुक्शी पाइनीम। इजीकीएल ३६:२०

6 मोपतीके आं मुर आन कली आं नें तुइक्पाइक्नुडमी। काबु नाक्ती मेकोपुकीमी 'गो मेको लोत्र पाइब बाक्नुड' दे तुइक्चा माल्नीम" देंत।

ग्येरपाइक्व लोत्र

7 डांडा मेरे ग्येरपाइक्व लोत्र शेंशा गाक्व आन खोइली शुश रिम्शो बाक्नीम। मेकोपुकीमी थुं नाइक्वा आ पर्वम लोत्र शेंनीम। मेकोपुकी रिम्शो लोत्र पाइब बाक्नीम। पाप रे प्रोंइतीक शेंनीम। सियोन कली "इ परमप्रभुम सासन पाइब" देंनीम। यसैया ४१:२७; नहुम २:१; रोमी १०:१५

8 नेनीन, इ कली कोत्रब नेल्लेमी ठेयब सेंदा पा ग्येरशा कुम्सो पाइनीम। मारदे हना मेकोमी परमप्रभु यावे सियोन गे लशा लेशशा पिशो ताइनीम। यसैया ६२:६; इजीकीएल ३:१७

9 यरूसलेम डा ब्रेशशो खिं ग्येरशा कुम्सो पने। मारदे हना परमप्रभु यावेमी आ मुर आन थुं बारपाइक्वतु। मिनु मेकोमी यरूसलेम कली श्येत रे प्रोंइतु।

10 परमप्रभु यावेमी रागी रागी डा मुर आन डोंइती आ सक्ति कोंइताकव। मिनु रागी आ सुर सम्म डा मुर नेल्लेमी आंइ परमप्रभुमी दोपा पाप रे प्रोंइबा, मेको ताइनीम।

11 गूडीन, गूडीन, मेके रे गूडीन। ग्रांग्रा दिशो थोवक मथिने। मेको आन दाते रे गूडीन। परमप्रभु यावे आ खिं डा मार मार कुरबपुकी परमप्रभु आ डोंइती जाकशा, इन कली ठीक सेलीन।

12 मारदे हना गे रीब पा लचा ममालनीनी। प्रोक्शा लचा यो ममालनीनी। मारदे हना परमप्रभु यावे इन डोंइती गाकव। मिनु मेको इस्राएली आन परमप्रभुमी इन कली लां कोंइशा खुल्व। प्रस्थान १२:११; ब्यवस्था १६:३; प्रस्थान १३:२१

परमप्रभु आ गेय पाइब

यसैया ४२:१-४

13 कोव्रडीन, आं गेय पाइबम ग्राना ग्रान गाकव। मेको मान पा ठेयब सेल्चा पुंडसीशा, थम ठेयब दुम्ब।

14 मिनु शुश मुर मेको कली तशा हितेकम। मारदे हना मेको काइ मरिम्शो तांडसीशो बाक्त। मुर मोदेशो मरिम्शो मतांडसीनीम। आ रां यो मुर आन रां क्येडा मरिम्शो बाक्त। मिनु मेको कली तशा, मुरपुकी हितेकम।

15 मिनु मेकोमी रागी रागी डा शुश मुर आन कली छक लाकपाइकव। मिनु पिपपुकी मेको कली तशा, सिक्सी पा बाक्नीम। मारदे हना मेको आन डोंइती गेनायो मशेंसीशो ताइनीम। मेको आन मनेंशो लोव्र आ पर्वम शुश मिम्चा माल्नीमी। यसैया ६५:१; रोमी १५:२१

## 53

परमप्रभु यावे आ गेय पाइब

1 आंइ नेंशो लोव्र सुम थमा सुदमे डा? मिनु परमप्रभु यावे आ सक्ति सुम तामे डा? यूहन्ना १२:३८; रोमी १०:१६; यसैया ५२:१०

2 मेको आ डोंइती बिरवा खोदेशो पा कोलत। सोव्रशो खपीम शाकश खोदेशो पा कोलत। मिनु मुरुम मेको कली कोव्रचा थुं मपाम। मेको दारशो नु मान ताइब खोदेशो काइ मतांडसीशो बाक्त। मेको मदारशो ममाल्चा डा मुर खोदेशो बाक्त। यसैया ११:१

3 मिनु अरुमी मेको कली ग्रांग्रा दिशा प्रोंइतेकम। मेको श्येत जाइब नु रोइ पाइकव बाक्त। मेको कली तशा, मुरुम आन कुल खुइक्ताकम। मेको ग्रांग्रा दित्चा पुंडसेनु, सुइम महिक्गेम। भजन संग्रह २२:७-८; मर्कूस ९:१२

4 थमा पा मेकोमी आंइ श्येत कुरुतु, आंइ रोइ पतीक नेल्ल लाइक्तु। मो हना यो गोपुकीमी मेको कली परमप्रभुमी सजाइ गेशा, तुप्शा, दिप्शो खोदेशो लाक्तक। मती ८:१७

5 तन्न मेको आंइ हेंथे पतीके आ पर्वम तुप्शा गार सेल्चा पुंडसाकव। आंइ मरिम्शो पशो आ पर्वम साइक्या पुंडसाकव। आंइ कली पाप रे प्रोंइचा कली सजाइ ताप्तु। मेको कली तुप्शो गारमी गोपुकी सातक। रोमी ४:२५; १पत्रुस २:२४

6 गो नेल्ले भेडा खोदेशो दुम्शा लां साम्तक। गो नेल्ले आंम आंमा लां खोइक्तक। परमप्रभु यावेमी आंइ मरिम्शो पशो नेल्ले मेको आ तारी वोइक्तु। १पत्रुस २:२५; १यूहन्ना ३:५

7 मिनु मुरपुकीमी मेको कली दिप्शा श्येत गेम्तेकम। मिनु श्येत जशा यो सिक्सी पा मारेइ मदें। साइक्या चिक्शो पाठा खोदेशो पा सिक्सी पा बाक्त। मिनु ऊन खोइक्व आन डोंइती बाक्शो भेडा खोदेशो पा सिक्सी पाप्तु। मेको आन कली लोव्र का यो मपव। मर्कूस १४:६५; यूहन्ना १:२९; प्रेरित ८:३२

8 मिनु मेको कली दूली निसाफ पा साइक्तेकम। नोले मेको कली मार दुम्बा, सुम मेको मिन्ने चाप्बा डा? मेको ब्रोंइशो मुर आन बाक्तीक रे साइक्या पुंडसाकव। मुर आन हेंथे पतीके मेको सजाइ तशा साइक्या पुंडसाकव।

9 मुरपुकीमी मेको कली परमप्रभु यावे आ अरेशो मटीब आन कली थिम्तीकेमी थिम्तेकम। आ तुरस क्येट थीब नु बाक्त। मेकोमी गेना हना यो ठीक ला पाप्तु। मिनु जोल मपव हना यो मेको कली मो पाप्तेकम। १पत्रुस २:२२; १यूहन्ना ३:५

10 परमप्रभु यावेमी मेको कली मोदेशो पा तुप्शा, श्येत गेचा दाक्ताकव। मेकोमी आ रां पाप क्याम्चा कली चढेपु। मो हना यो मेको कली आ आल खोदेशो शुश थमा सुइकब आन कली ताइब। मिनु शुश नाक्त सम्म ब्रोंइब। मेको आ पतीके नेल्ल परमप्रभु यावे आ दाकशो गेय दुम्ब। लेवी ५:१५; मत्ती २०:२८; भजन संग्रह २०:३१

11 मेको आ श्येत जशो रे मेकोमी छेडछेड ताइब। मेको आ तुइक्तीकेमी शुश मुर आन कली ठीक पतीके तुइक्पाइकब। मेकोमी आन मरिम्शो पशो कुरब। १कोरिन्थी १:३०; यूहन्ना १:२९

12 मोपतीके गो मेको कली ठेयब नु सक्ति पाइशशो नु वोइक्नुड। मेकोमी बोल्यो मुर नु मार मार योक्सीब। मारदे हना मेको साइकब नु मरिम्शो मुरपुकी नु हिक्सीचा पुंडसाकव। शुश पापी आन पाप कुरुतु। मिनु हेंथे गाकब मुर आन पबर्म परमप्रभु यावे कली पुंडतु। मर्कूस १५:२८; लूका २२:३७; लूका २३:३३-३४

## 54

### परमप्रभुम सियोन कली दाकशो

1 मिनु परमप्रभु यावेमी “गे आल मथीब मीश मुर, कुम्सो पावो। आल थितीक रोइ गेनायो मपशो मीश मुर, कुम्सो पा ग्येरसो। मारदे हना ग्युंवे पशो मीश मुर आ आल क्येडा, आ का ला बाकब मीश मुर आ आल शुश दुम्नीम। यसैया ४९:२०; गलाती ४:२७

2 इ ताम्बु ठेयब सेलो। इ बाक्तीक डा ब्रतीक ब्रावो। शिम मदुमो। इ ताम्बु डा डोरी लाइशो सेलो। आ किलापुकी रिम्शो पा खुक्को।

3 मारदे हना गे शुश दुम्शा, ग्युरा पेरा गे ब्राइनीनी। मिनु इ चच युइमी रागी रागी डा मुर आन कली हुकुम पाइनीम। मिनु मुर मबाक्तीके मुर शुश दुम्शा ब्रीनीम।

4 गे महिनो। मारदे हना गे मुने मदोक्नेवे। इ थुं लुकच लचा मगेवो। गे शिशी ताइनेवे। गे इ ठिटी बाक्डे ना डा मुने प्रेनेवे। इ वोंइश बेकशो ना डा श्येत लेंशा ममिम्नेवे। भजन संग्रह २५:७; येरमीया ५१:५

5 मारदे हना इ कली सेल्व इ वोंइश बाकब। मेको आ नें मुर नेल्ल आन परमप्रभु यावे बाकब। इ कली श्येत रे प्रोंइब इस्राएली आन का ला बाकशो परमप्रभु बाकब। मेको आ नें रागी नेल्ल डा परमप्रभु बाकब।

6 मारदे हना परमप्रभु यावेमी इ कली प्रोंइसीशो नु थुं लुकच लशो मीश मुर कली खोदेशो पा ब्रेत्ताकव। मुल गे ठिटी ना चाक्शा नोले प्रोंइशो मीश आल खोदेशो बाक्नेवे। यसैया ५०:१

7 गो इ कली याम का प्रोंइतन। तन्न गो इ कली शुश शिशी पा लेंशा खुप्ताकन। भजन संग्रह ३०:६

8 गो शुश गाइशा, याम का आं कुल इ डोंइती रे खुइक्ताकड। तन्न आं गेना हना यो दाक्तीकेमी इ कली शिशी पाइनन” दे इ कली पाप रे प्रोंइब परमप्रभु यावेमी देंत। यसैया ६०:१०; बिलापा ३:३१-३२

9 मिनु लेंशा “मेको आं कली नोआह आ नाक्ती खोदेशो बाकब। दोपा गो नोआह आ पाला डा ब्वाक्कुम लेंशा रागी कली मसुम्ब, दे कसम जडा, मोपा गे नु मगाइक्नुड, दे कसम जाता। मिनु गो इ कली महडक्नुड। उत्पत्ती ९:११-१७

10 डांडापुकी याक्सीनीम, पहाडपुकी हिम्सीनीम। तन्न आं गेना हना यो दाक्तीक इ क्येडा डोन मलाइब। इ थुं नाइक्चा गेब कबल मक्याम्सीब” दे इ कली शिशी पाइब परमप्रभु यावेमी देंत। इजीकीएल ३७:२६

11 मिनु लेंशा “गे श्येत जाइब, फश गिवारम राप्चा पुंडसीशा, थुं बारपाइक्चा मपुंडसीशो, गो इ गारो बोल्यो सेल्लुड। मिनु इ जग साफीर माइशो नीलो हीरा के सेल्लुड। प्रकाश २१:१८-२१

12 इ खिं रूबीन माइश्शो लल हीराम साप्नुड। इ सहर डा ठेयब लाप्चो सिसा खोदेशो हीराम सेल्नुड। इ कली हिरशो गारो नेल्ले हीरा के सेल्नुड” देंत।

13 मिनु परमप्रभु यावेमी इ तमी तौ नेल्ल आन कली शेंब। मेको आन थु नाइश्शा हेम्मा पा बाक्चा ताइनीम। यूहन्ना ६:४५

14 मिनु ठीक पतीकेमी इ कली बोल्यो सेल्ब। गे श्येत गेब आन क्येडा डोन बाक्नेवे। मिनु गे काड महिनेवे। मारदे हना हिंचा डा श्येत इ नेक्था मजाक्ब।

15 मिनु “सुड इ कली श्येत गेचा कली खुम्साक्म हना, आं पशो ममाइ। सुमी इ कली लडाइ तोडबा, मेको इ पबंम साइक्चा पुंडसीनीम।

16 कोव्रडीन, गो तुप्तीलपुकी सेल्तामी। मेकोपुकीमी मी मुइश्शा, लडाइ पचा कली या सेल्नीम। गो खतम सेल्चा कली खतम सेल्ब कली यो सेल्ता। गो मारेड मारेड खतम सेल्ब आन कली यो सेल्तामी। २सामुएल २४:१६

17 गे नु लडाइ पचा कली सेल्शो यामी मग्रानीम। इ कली सुमी निसाफ पची ना दोस गेबा, मेको नेल्ल फुचा पुंडसीनीम। मोपा प्रातीके परमप्रभु यावे आं गेय पाइब आन अडस बाक्ब। मेको आं गेशो ठीक पतीके बाक्ब” दे परमप्रभु यावेमी देंत।

## 55

### रागी नेल्ल डा मुर आन कली ब्रेशो

1 मिनु परमप्रभु यावेमी “तू द्वाक्बपुकी ब्वाक्कु बाक्तीकेम जाक्कीन। क्येत मथीबपुकी यो जाक्कीन। मिनु ग्याप्शा जने। क्येत मथाप्थु, मोशा अडगुर शांबु नु दूध ग्यापीन। यूहन्ना ७:३७; प्रकाश २२:१७

2 मारदे जचा मद्मुशो थोव्रक कली क्येत थाप्नीनी? मारदे मरूपाइक्ब थोव्रक कली इन चेम्शो क्येत थाप्नीनी? आं लोव्र नोफा दाइश्शा नेनीन। रिम्शो थोव्रक जने। मिनु ब्रोवशो जशा, ग्येरसीने।

3 इन नोफा दाइश्शा, आं गे जाक्कीन। नेंशा, ब्रॉइनीनी। गे ब्रॉइशा बाक्चा कली आं लोव्र नेनीन। मिनु गो गेपुकी नु गेना हना यो लीब कबल का पाइनुड। दाऊद कली खोदेशो पा इन कली यो गेना हना यो दाक्नुड। २सामुएल ७:८-१६; येरमीया ३१:३१-३४; प्रेरित १३:३४

4 नेनीन, गो मेको कली जात जात डा मुर आन कली सांकछी सेल्ता। जात जात डा मुर आन कली ठेयब मुर नु हुकुम पाइब सेल्ता।

5 नेनीन, गे इन मतुइश्शो रागी रागी डा मुर आन कली ब्रेत्नीनी। मिनु इन कली मतुइश्शो रागी रागी डा मुरपुकी इन गे जाक्नीम। परमप्रभु यावे, इन परमप्रभु, इस्राएली आन का ला बाक्शो परमप्रभु आ पबंम मेकोपुकी जाक्नीम। मारदे हना मेकोमी इन कली आ खोदेशो रिम्शो पा सेल्शो बाक्त” देंत।

6 परमप्रभु यावे कली मथिन्नी सम्म मालीने। मेको आ नेक्था बाक्मेनु, मेको कली पुनीन। येरमीया २९:१३-१४; आमोस ५:४

7 परमप्रभु यावे आ अरेशो मटीबमी आन लां प्रोन्मेक्ल। मिनु ठीक मपाइबमी आन मरिम्शो मिम्शो प्रोन्मेक्ल। परमप्रभु यावे गे लेम्मल। मिनु मेकोमी मेको आन कली शिशी पाइब। मेकोपुकी आंइ परमप्रभु गे लेम्मल। मारदे हना मेकोमी शुश माफ गेब। इजीकीएल १८:२७; इजीकीएल ३३:१; भजन संग्रह १३०:४

8 परमप्रभु यावेमी “आं मिम्शो इन मिम्शो खोदेशो ममाइ, इन लां आं लां खोदेशो ममाइ। रोमी ११:३३

9 सरीड, रागी क्येडा इर बाक्शो खोदेशो पा आं लां, इन लां क्येडा इर बाक्ब। मिनु आं मिम्शो इन मिम्शो, क्येडा इर बाक्ब।

10 सरीड रे रेड नु फु यिशा, मोशीन मलेप्ब। मेकोमी खप जिप्पाइश्शा बाली नाली ग्रेल्पाइक्ब। शोक्ब कली वांचेर गेशा, मुर आन कली जचा गेब।

11 आ लोव्र यो मोदेशो बाक्ब। मेको श्येत्थ मलेप्ब। गो मेको कली मार पथ सोइक्तु, मेको पाइब। आं दाक्शो थमा पा पाइब। आं मिम्शो पाइब। मत्ती १३:८

12 मिनु गेपुकी ग्येरसीशा लाइनीनी। रिम्शो पा लेत्नीनी। इन डोंइती डांडा नु पहाड कुम्सो पाइनीम। मिनु ब्वाकी डा रवा नेल्लेमी गुड फ्रोक्नीम। यसैया ४४:२३

13 मिनु चू आन पा डा सला रवा नु चूले आन पा डा दारशो आइक्च फू रवा वानीम” दैत। मेको परमप्रभु यावे कली मिम्तीके नु गेना हना यो मजाम्थु, चिन्ड का दुम्शा बाक्ब। यसैया ४१:१९-२०

## 56

नाइक्तीक नाक्ती आसीक ताइनीम

1 मिनु परमप्रभु यावेमी “ठीक निसाफ पने। मार ठीक बाक्मे मेको पने। मारदे हना आं पापर प्रोंइतीक रीब पा जाक्ब। मेना गो ग्राब बाक्नुड, दे नेल्लेम तुइक्नीम।

2 सु मेको पाइबा, मेको ग्येरसीशो मुर दुम्ब। आं नाइक्तीक नाक्ती नाइक्ब नु अरु नाक्ती खोदेशो पा गेय मपाइब नु मरिम्शो मपाइब, ग्येरसीशो मुर बाक्ब” दैत। यसैया ५८:१३; उत्पत्ती २:२-३; प्रस्थान १६:२३; प्रस्थान २०:८; येरमीया १७:२१-२२

3 परमप्रभु यावे आ लोत्र टीब अर्को रागी डा मुरुम “परमप्रभु यावेमी आं कली आ मुर रे तिलब” दैचा मगेने। मिनु आल मथीबपुकीमी “गो सोत्रशो रवा खोदेशो नकी” दैचा मगेने। यसैया १४:१; ब्यवस्था २३:२

4 मारदे हना परमप्रभु यावेमी “आल मथीब मुरुमी आं नाइक्तीक नाक्ती नाइशशा, आं दाक्शो पाप्तेक्म नु आं कबल मप्रोंइथु बाक्तेक्म हना,

5 गो मेको आन कली आं खिंमी नु आ गारोमी मिम्तीके नु ठेयब नें गेनुडमी। आं तमी तौ आन क्येडा मेको आन कली रिम्शो नें गेनुडमी। मेको आन कली गेना हना यो लीब नें गेनुडमी। मेको आन नें मख्रोंइसीब दुम्ब।

6 मिनु परमप्रभु यावे आ नोले खोइक्ब, अर्को रागी डा मुरपुकी, सु सुमी आं कली ठेयब सेल्नीमी, आं कली दाक्नीमी, आं गेय पाइब दुम्नीमी, नाइक्तीक नाक्ती नाइशशा, अरु नाक्त खोदेशो गेय मपाइनीमी नु आं कबल पना पन बाक्नीमी।

7 मेको नेल्ल आन कली आं योत्रशो डांडाम चाक्नुडमी। आं प्रार्थना पतीक खिं ओंइशा, ग्येरपाइक्नुडमी। मेको आन चोशा चढेशो नु अरु चढेशो आं कली चढेतीकेम ब्राइनुड। मारदे हना आं खिं रागी डा मुर नेल्ल आन कली प्रार्थना पतीक खिं देंनीम” दैत। मर्कूस ११:१७

8 मोदेशो लोत्र पाइब परमप्रभु, परमप्रभु यावेमी खेरशो इस्त्राएली आन कली खुप्ब। मिनु “गो मेको आन कली अरु खुप्शो मुर नु देल्पाइक्नुड। मेकोपुकी नु बाक्पाइक्चा कली तेम्नुडमी” दैत।

कोत्रब आन कली हुइशशो

9 परमप्रभु यावेमी “गे जन्तु नेल्ल नु ब्वाकीम बाक्ब जन्तु नेल्लेम, जाक्शा ब्वने। येरमीया १२:९

10 इस्त्राएली आन कली कोत्रब मुर मिक्च मताइब खोदेशो बाक्नीम। मेको मारेइ मजोक्ब मतुइक्ब बाक्नीम। मेकोपुकी सिक्सी पा बाक्शा, होक्ने मचाप्ब कुचुम खोदेशो बाक्नीम। मेको डोमु तचा, इप्चा नु निन्द्रा पचा ला दाक्नीम। इजीकीएल ३:१७; इजीकीएल ३३:६-९

11 कुचुमपुकी शुश जचा ब्वचा दाक्नीम। गेनायो मरूनीम। मेको गोठला यो मोदेशो मरुप्ब बाक्नीम। मेको नेल्ल आंम आन लां खोइक्ब बाक्नीम। मारेइ मारेइ आंम के सेल्चा दाक्नीम। मेको नेल्ल खाल का डा बाक्नीम। येरमीया ६:१३

12 मेकोपुकीमी ‘जाक्कीन, अडगुर शांबु ग्याप्य। राकसी तूशा, दुक्क्य। दीसा यो मुलाक्त डा खोदेशो दुम्ब। मेको क्येडा यो रिम्शो दुम्ब’ देंनीम” दैत।

## 57

परमप्रभु कली मटीबपुकी

1 ठीक पाइब बेक्नीम। सुइमी मेको आन परबम सुर्ता मपाइनीम। परमप्रभु यावे कली मप्रोंइथु, दाक्बपुकी लाइक्चा पुंडसीनीम। मारदे मो पाइनीमी, मेको सुइमी मरुप्नीम। ठीक पाइब हिंचा डा श्येत दुम्चा क्येडा डोंइती लाइक्चा पुंडसीनीम। मीका ७:२

2 मेकोपुकी थुं नाइश्शा बाक्तीकेम लाइनीम। रिम्शो थुं पाइश्शो मुर आंम आन बाक्तीकेम नाइश्शा बाक्नीम। २राजा २२:२०; दानीएल १२:१३

### मूर्ति पूजा पाइबपुकी

3 “तन्न गेपुकी एक जाक्कीन। गे मन्तर तन्तर पाइब आ तमी तौ नु हेंथे गाक्ब वोंइश मुर नु तेल्लेम आ आलपुकी एक जाक्कीन। होसे २:४

4 गे सुका आ परबम शुक्शी लोत्र पनी। सुका आ परबम इन शोत्र रोक्नी? मारदे इन लें गुंडनीनी? मार, गे हेंथे पाइब आन तमी तौ मननी डा? गे जोल पा थिशो आल बाक्नीनी। २राजा १६:२-४; येरमीया २:२०, २३, २४

5 गे ठेयब रवा आन पुंमी तेल्लेम खोदेशो पा, मूर्ति पूजा पाइनीनी। गे गिगी रवा नेल्ल आन पुंमी मोदेशो पाइनीनी। गे इन आल आन कली खोल्सा नु सेरथे फुल्लुमी चढ़ेनीनी।

6 बेंसी डा खोला डा रिम्शो फुल्लु इन कली वारच पाइब बाक्नीम। मेको आन कली तूचा थोत्रक चढ़ेतीनी। मिनु अन्न यो चढ़ेतीनी। मार, गो मेको कोत्रशा इन परबम सिक्सी पा बाक्नुडा डा?

7 गे लाइश्शो नु ठेयब डांडामी इन ब्राख्ये सेलतीनी। गे मेकेर चढ़ेथ लाइतीनी।

8 मिनु इन लाप्यो डा शीम नु लाप्यो आ नोलेमी इन देवी देवता आन चिन्ड वोइक्तीनी। गे आं कली प्रोंइशा, इन ब्राख्ये हुक्तीनी। गे मोदेशो पशा, इन ब्राख्ये ठेयब सेलतीनी। गे इन परबम मेको नु कबल पाइतीनी। गे मेकोपुकी नु बाक्चा दाक्ताक्नी। मिनु मेको आन शिश्शा रं कोत्रतीनी।

9 गेपुकी तेल कुरशा मोलेक आ बाक्तीक लाइतीनी। ब्रोत्रशो रिना पाइब तेल शुश सेलतीनी। गेपुकीमी इन लोत्र कुरब आन कली डोन सम्म सोइक्ताक्नी। बेक्शो मुर आन बाक्तीके सम्म सोइक्ताक्नी।

10 गेपुकी इन लाइश्शो लां गाक्तीके दाइतीनी। मो हना यो मेको शोर गाक्शो दुम्त मदेनी। गेपुकी नक सक्ति ताइतीनी। मोपतीके मेको आन नोले खोइक्चा मप्रोंइनी। येरमीया २:२५

11 गे सु क्येडा शुश हिंशा, जोल पनी? मिनु आं कली मफुकथु ममिम्तीनी। गो सिक्सी पा बाक्शा, आं मिक्च क्रिप्ताक्ड। मिनु गे आं कली तशा महिनी? भजन संग्रह ५०:२१

12 गो इन ठीक पशो नु इन गेय तुइक्पाइक्नन्नी। तन्न मेको इन कली मारेइ रिम्शो मदुम्ब।

13 गेपुकी श्येत जशा, थोनीनु, इन खुप्शो मूर्तिपुकीम इन कली प्रोन्मेक्ल। तन्न फशेमी मेको आन कली बेरपाइश्शा योल्ब। मुइश्शोमी मेको जाम्शा लाइनीम। तन्न सु सु आं गे जाक्शा पुंडसीनीमी, रागी मेको आन के दुम्ब। मिनु आं डांडा मेको आन के दुम्ब” देंत। भजन संग्रह ३७:९-११

### परमप्रभुम पाप रे प्रोंइब

14 मिनु परमप्रभुमी “सेलीन, सेलीन। रिम्शो लां सेलीने। आं मुर आन गाक्तीक लां डा दाइल पाइब फुल्लु याक्तीन” देंत। यसैया ४०:३; यसैया ६२:१०

15 मिनु ठेयब नु इर डा, गेना हना यो बाक्ब आ नें का ला बाक्शो परमप्रभुमी “गो नेल्ल क्येडा इर डा आं बाक्तीकेमी बाक्नुड। मिनु गो थुं लुकच लशो नु दिप्चा पुंडसीशो मुर नु बाक्नुड। गो दिप्शो मुर नु आन थुं लुकच लशो आन थुं बारपाइक्चा कली मेकोपुकी नु बाक्नुड। भजन संग्रह ११३:५-९; यसैया ६६:१-२; भजन संग्रह ५०:१९

16 मिनु गो गेना हना यो दोस मगेनुड। गाइक्स डा गाइक्स मबाक्नुड। मोपा बाक्ती हना, आंम आं सेल्लो मुर आन थुं थाइब। भजन संग्रह १०३:९

17 मेको आन परमप्रभु यावे आ अरेशो मटिथु, शिम दुम्तीके गाइक्ताक्ड। गो मेको आन कली तुप्शा थाइश्शा गाइक्ताक्ड। तन्न मेकोपुकी नोले शोंइसीशा आंम आन लां लाम्तेक्म।



18 गो मेको आन पशो ताता। तन्न गो मेको आन कली सापाडकुनुडमी। मेको आन कली कुक्शा, आन थुं बारपाडकुनुडमी। मेको आन दाते डा रोंका पाइब आन कली थुं बारपाडक्तीक लोत्र पाइनुड” देत। प्रस्थान १५:२६

19 मिनु परमप्रभु यावेमी “डोन नु नेक्था बाक्ब नेल्ल आन थुं नाइशशा बाकमल। मिनु गो मेको आन कली सापाडकुनुडमी। गन्ती ६:२६; लूका २:१४; एफिसी २:१७; प्रस्थान १५:२६-; येरमीया १७:१४; यहूदा १:१३; यसैया ४८:२२; हितोपदेस २८:१

20 तन्न आं अरेशो लोत्र मटीबपुकी समुन्द्र डा फशेम क्युकुशो समुन्द्र डा ब्वाक्कु खोदेशो बाक्नीम। गेना हना यो रेयके पाइब ब्वाक्कु खोदेशो बाक्नीम। मेको ब्वाक्कुमी ग्रांग्रा दिचा डा थोत्रक नु हिलो गुंडब” देत।

21 आं परमप्रभुमी “आं अरेशो मटीब आन थुं नाइशशा बाक्चा मताइनीम” देत।

## 58

माइजा बाक्चा आ पर्वम शेंशो

1 मिनु परमप्रभु यावेमी “ठेयब सेंदा पा ग्रीडो। तुराही खोदेशो पा ठेयब सेंदा पावो। आं मुर आन काइ मटिशो नु याकूब आ खिं डा मुर आन पाप तुइक्पाइक्मी। मीका ३:८

2 मेकोपुकी मटीब बाक्तेकम हना यो, आं कली नाक्त किंत किंत माल्नीम। आं लां तुइक्चा दाक्नीम। मेकोपुकी ठीक पाइब रागी डा मुर खोदेशो दुम्शा, आन परमप्रभु, आं ठीक पतीक लोत्र मप्रोंडशो खोदेशो बाक्नीम। मिनु आं कली ठीक निसाफ पुंडनीम। परमप्रभु आ नेक्था जाक्चा दाक्नीम। यसैया २९:१३-१४

3 मेकोपुकीमी ‘गो मारदे माइजा बाक्का? गे मताइनीनी। गो मारदे आंम कली ब्रेम्शो सेल्का? गे मतुइक्तीनी’ देतेकम। गे इन माइजा बाक्ची ना इन आंम मिम्शो पाइनीनी। मिनु इन गेय पाइब नेल्ल आन कली दिप्नीनी। येरमीया १४:१२

4 गेपुकी जिशा खेशा तुम्मुचा कली ला माइजा बाक्नीनी। इन मुडकीमी तुप्या कली ला माइजा बाक्नीनी। मोदेशो माइजा बाक्शा, इन सेंदा इर सम्म मजाक्दीप्व।

5 आं योत्रशो माइजा बाक्तीक मोदेशो बाक्बा डा? मार, आंम कली काबु ला ब्रेम्शो सेल्चा? बुदी मीलु घांस गुक्शो खोदेशो पा इन पिया खुक्शा, अरन्डी फेक्शो नु पुलु तार निरशो कली माइजा बाक्शो देनीनी? मेको परमप्रभु यावे आ दाक्शो बाक्ब, देनीनी? जकरिया ७:५-६; मती ६:१६-१८

6 आं दाक्शो माइजा बाक्तीके मार बाक्ब, देशा हना, ठीक निसाफ मतशो आन कली प्रोंडचा नु दिप्शा श्येत गेचा पुंडसीशो आन जुवा प्रुडक्चा बाक्ब।

7 आंम जचा थोत्रक शोत्रलु बेक्ब नु योक्चा, खिं मबाक्शो नु प्रुडग आन कली इन खिंम बाक्चा गेचा, शिश्रा बाक्ब आन कली वा फेक्चा गेचा नु इन लोक्ब आन कली वारच पचा, आं दाक्शो माइजा बाक्तीक बाक्ब। ब्यवस्था १५:११; इजीकीएल १८:७; मती २५:३५-३६

8 मो पाइतीनी हना, गे सुनी डा नां दाप्यो खोदेशो दुम्नीनी। मिनु गे रीब पा सानीनी। इन कली वारच पाइब इन डोंडती गाक्ब। परमप्रभु यावे आ छेडछेडमी इन नोले खोइक्ब। भजन संग्रह ३७:६; यसैया ५२:१२

9 मेना गे पुंडनीनी। मिनु परमप्रभु यावेमी लोत्र लेप्व। मिनु गे ‘वारच पने’ दे थोइनीनी। मिनु मेकोमी ‘गो एके बाक्ती’ देब। गे इन दाते रे मरिम्शो पतीक जुवा ताइक्ताक्नी हना, ब्रेप्यो पोक्शा, मरिम्शो लोत्र पचा प्रोंडतीनी हना, रिम्शो दुम्ब। यसैया ३०:१९

10 गे शोत्रलु बेक्ब आन कली इन जचा थोत्रक गेतीनी हना, श्येत जाइब आन माल्शो गेतीनी हना, इन छेडछेड छिडछिडम ब्राइब। इन नाक्दो डा छिडछिड नाक्ती डा छेडछेड खोदेशो दुम्ब।

11 मिनु परमप्रभु यावेमी इन कली गेना हना यो लां कोंडब। गे श्येत जनी ना इन माल्शो नेल्ल गेब। मिनु इन रुश बोल्यो सेल्ब। गे ब्वाक्कु लाब्वेशो फल फुल रू खोदेशो बाक्नीनी। गे गेनायो मसोत्रब ब्वाक्कु बुक्तीके खोदेशो दुम्नीनी। येरमीया ३१:१२

12 मिनु गे इन साइ डा ब्रेशो खिंपुकी लेंशा सेल्नीनी। साइ डोंइती डा सेल्शो जग लेंशा वोइक्नीनी। मिनु इन कली गारो सेल्ब, खिं सेल्ब नु लां लेंशा सेल्ब, दे नें वोइक्नीम। यसैया ६१:४

13 गे नाइक्तीक नाक्ती अर्को नाक्त खोदेशो मसेल्तीनी हना, मेको आं नाक्तीमी इन गेय मपाइतीनी हना नु आं योव्रशो नाक्त कली रिम्शो नाक्त बाक्ब देंतीनी हना, परमप्रभु यावे आ नाक्त ठेयब बाक्ब देंतीनी हना, गे मेको नाक्ती कली ठेयब सेल्शा, इन गेय मपाइतीनी हना, इन दला दाक्स मपाइतीनी हना, यसैया ५६:२-४

14 गेपुकी परमप्रभु यावे कली मिम्शा ग्येरसीनी वा। मिनु गो इन माल्शो नेल्ल गेन्नी वा। मिनु गो इन किकी याक्ब आ शॉप जचा गेन्नी वा” दे परमप्रभु यावे आ देंशो बाक्ब।

## 59

### परमप्रभुम पाप क्याम्ब

1 कोव्रडीन, परमप्रभु यावे आ मुर आन कली पाप रे प्रोंइतीक सक्ति मपाइशो मदुम्शो बाक्ब। आ नोफा मथांइशो बाक्ब। यसैया ५०:२

2 इन मरिम्शो पतीकेमी इन कली इन परमप्रभु रे फ्राशो बाक्ब। इन पाप आ पर्वम इन डोंइती रे आ कुल खुइशो बाक्ब। मोपतीके इन लोव्र मनेंब।

3 इन गुइ हुश लुम्सीशो बाक्नीम। गे नेल्ल मरिम्शो पाइब बाक्नीनी। गे जोल पना पन बाक्तीनी। गे ओल ओल लोव्र पाइनीनी। यसैया १:१५

4 सुइमी ठीक निसाफ मपाइनीम। सुइमी ठीक निसाफ पाइक्चा मपुइसीनी। गे जाम्शा लाइब कली थमा सुइशशा, जोल पाइनीनी। मेकोपुकीम हेंथे पतीकेम ब्रीशा, मरिम्शो पतीके ला थीनीम। भजन संग्रह ७:१५

5 बीस पाइशो बुस्स आ ब्वोफु रे चाइक्ब पुक्नीम। माखा आ जाल प्रोव्रनीम। मेको ब्वोफु जाइब बेक्नीम। ब्वोफु दिम्शा पुक्तेक्म हना, बुस्स गूब।

6 मेको जाल फेक्सीचा नु सुम्सीचा मदुम्ब। मेको आन सेल्शो थोव्रकमी आन रां सुम्ने मचाप्नीम। मेको आन गेय मरिम्शो पतीक गेय बाक्ब। मेको हुश खाक्श पोक्ब बाक्नीम।

7 मेकोपुकी मरिम्शो पचा कली ला दोरनीम। दोस मताइब आन कली साइक्चा कली चुइक्नीम। मेको आन मिम्शो मरिम्शो बाक्ब। आन लॉमी बिग्रेतीक नु खतम पोक्तीक बाक्ब। रोमी ३:१५-१७; हितोपदेस १:१६; येरमीया २:३४

8 मेकोपुकीम थुं नाइक्पाइक्तीक आ पर्वम मारेइ मतुइक्नीम। मेको आन लॉम ठीक निसाफ मबाक्ब। मेकोपुकी हेंथे लां खोइक्नीम। सु सु मेको हेंथे लां गाक्नीमी, मेको यो थुं नाइशशा बाक्चा मताइनीम।

9 मोपतीके ठीक निसाफ पतीके आंइ क्येडा डोन बाक्ब। गो ठीक पतीके मताइनीकी। गोपुकी छेडछेड डा लां कली कोव्रनीकी, तन्न छिडछिड ला बाक्ब। गो नाक्त डा हाम्सो माल्नीकी, तन्न छिडछिड ला बाक्ब।

10 मिक्च मताइब खोदेशो पा गारो सुल्शा गाक्नीकी। मिक्च मपाइशो मुर खोदेशो पा सुल्नीकी। नाक्दो खोदेशो पा नाक्ती यो दाइल पांइसीनीकी। गो बोल्यो मुर आन दातेम बेक्शो मुर खोदेशो दुम्तक। ब्यवस्था २८:२९

11 गो नेल्ल वां खोदेशो पा ग्रीनीकी। हुकुर खोदेशो पा रोंका पाइनीकी। गो ठीक निसाफ माल्ना माल्न बाक्नीकी, तन्न मथिल्लीकी। पाप रे ब्रोंइतीक माल्नीकी, तन्न मेको आंइ क्येडा डोन बाक्ब।

12 इन डोंइती आंइ हेंथे पशो शुश बाक्ब। आंइ पशो पापमी इन कली तुइक्पाइक्ब। गो मरिम्शो पाइब बाक्नीकी, दे तुइक्नीकी। आंइ हेंथे पशो थमा पा गोपुकी नु बाक्ब। गोपुकी आंइ मरिम्शो पशो तुइक्नीकी। येरमीया १४:१७

13 गोपुकी हेंथे गाक्शा, परमप्रभु यावे रे नोले शॉइसाक्क। आंइ परमप्रभु आ नोले खोइक्चा प्रोंइतक। आंइ लोव्र मुर आन कली दिच्चा नु परमप्रभु यावे कली मटिचा डा बाक्ब। गोपुकी जोल कली थमा सुइशशा, ब्रपाइशो बाक्तक।

14 मिनु ठीक निसाफ मबाक्ब। ठीक पतीके डोन बाक्ब। सुइ सुइमी जोल पाइनीम। मिनु रिम्शो थुं पाइश्शो मुर बाक्ने मचाप्नीम।

15 थमा पतीक तेइ मथिंसीब। रिम्शो पाइब आन मारेइ मारेइ रोइक्का पुंडसीनीम। मिनु परमप्रभु यावेमी मेको ताप्टु। मिनु ठीक निसाफ मबा, दे थम गाइश्शो बाक्त।

16 मिनु वारच पाइब सुइ मबाक्शो तशा, छक लाक्त। मोपतीके मेकोमी आंम आ सक्तिम ग्रात। आ ठीक पतीकेम आ कली वारच पाइक्तु। इजीकीएल १३:४-५

17 मेकोमी ठीक पतीके कांसा के फेक्तीके खोदेशो पा फेक्शा, पाप रे प्रोइतीक ताकी खोदेशो पा गुक्साक्ब। क्येक्क लेत्तीक वा खोदेशो पा फेक्साक्ब। आ थुंमी थमा पा पाइनुड, दे वा खोदेशो पा रुक्साक्ब।

18 परमप्रभुमी मेको आन पशो खोदेशो पा मेको आन कली क्येक्क लेप्ब। आ जोरी आन कली आ गाइश्शो कौंडब। आ सत्रु आन कली क्येक्क लेप्ब। समुन्द्र आ नेक्था बाक्ब आन कली क्येक्क लेप्ब।

19 मिनु नां पेरतीकेमी बाक्ब मुरपुकीमी परमप्रभु यावे कली मान पा हिंनीम। नां दाप्टीक डा मुरपुकी परमप्रभु यावे आ छेडछेड तशा, मान पा हिंनीम। मारदे हना मेको परमप्रभु यावे बारशो खोला खोदेशो पा जाक्ब। मिनु आ फशेमी मेको आन कली मुइश्शा खेरब।

20 मिनु सियोनम का जाक्ब। मिनु मेकेर डा मुर आन कली पाप रे प्रोइब। मेकोमी हेंथे पतीके रे लेप्ब याकूब आ खिं डा मुर आन कली रोमी ११:२६

21 “गो नु पशो कबल मार बाक्त देशा हना, आं सोक्त इन तार बाक्ब। गो आं लोत्र इन शोवम कुर पाता। मेकेर गेना हना यो बाक्शा इन आलपुकीम मेको लोत्र पना पन बाक्नीमी। मेको लोत्र गेना हना यो इन चच युडम यो पना पन बाक्नीम” दे परमप्रभु यावेमी देत। येरमीया १:९

## 60

### सियोन आ छेडछेड जाक्शो

1 परमप्रभुम “बोक्को। मिनु ग्येरसो। मारदे हना इ छेडछेड जाक्शो बाक्ब। परमप्रभु यावे आ छेडछेड इ तार जाक्शो बाक्ब।

2 छिडछिडम रागी कली सुम्तु। क्येर नाक्दोमी जात जात डा मुर आन कली सुम्तु। तन्न परमप्रभु यावे इ तारी गूब। आ छेडछेड इ तारी तांडसीब।

3 रागी रागी डा मुरपुकी इ छेडछेडम जाक्नीम। पिपपुकी इ सुनी डा छेडछेडम जाक्नीम। यसैया २:२-३; प्रकाश २१:२४

4 इ मिक्च हिरशा, कोव्रडो। इ मुर नेल्ल गुम्शा, इ बाक्तीके जाक्नीम। इ तौपुकी डोन रागी रे जाक्नीम। इ तमी आन कली मुष्शा कुरशा चाक्नीम। यसैया ४९:१८; यसैया ४९:२२; यसैया ६६:१२

5 गे मेको तशा थाम्पा ग्येरनेवे। इ थुं ग्येरसीशा प्रेक्ब। मारदे हना समुन्द्रम चाक्शो मारेइ मारेइ इ के दुम्ब। रागी रागी डा शोप नेल्ल इ के दुम्नीम।

6 गे शुश दलओठ ताइनेवे। मिदयान नु एफाह डा दलओठ आन चाइक्बपुकीमी इ रागी ब्रीनीम। मिनु शेबा रे यो चाक्नीम। मेकोपुकीमी सुन नु धूप चाक्शा ‘परमप्रभु यावे ठेयब बाक्ब’ दे ग्येरशा आं पर्वम शेंनीम। भजन संग्रह ७२:१०; मत्ती २:१-११

7 केदार डा क्यारश भेडा नेल्ल इ बाक्तीकेमी देल्नीम। नेबायोथ डा सांडपुकीमी इ गेय पाइनीम। मेकोपुकी आं कली चढेतीकेम गारचा डा बाक्नीम। मिनु गो आं दारशो खिं ग्योम्नुड।

8 गोस्स खोदेशो पा बेरब नु ढुकुर आ बाक्तीकेम बेरशा लशो खोदेशो पा बेरबपुकी सु बाक्मा?

9 समुन्द्र आ नेक्था डा मुरपुकीम आं लां कोव्रनीम। डोंइती टारसीस डा जहाजम इ आल आन कली डोन रागी रे चाक्नीम। मेको आन सुन चांदी यो मेकोपुकी नु बाक्ब। मेको परमप्रभु यावे, इ परमप्रभु आ नैमी जाक्नीम। इस्राएली आन का ला बाक्शो परमप्रभु आ पर्वम चाक्ब। मारदे हना मेकोमी इन कली दारशो सेल्शो बाक्ब। यसैया ४२:४; यसैया ५५:५

10 मिनु अर्को रागी डा मुरपुकीम इ गारो प्रोव्रशा हिरनीम। मेको आन पिपपुकीमी इ गेय पाइनीम। डोंइती गाइश्शा, इ कली तुप्तन। तन्न मुल आं दाक्तीकेमी शिशी पाइवतन। यसैया ५४:८

11 इ सहर डा गारो डा लाप्यो रोक्स डा रोक्स बाक्नीम। नाकदो नाक्ती इ लाप्यो मचोक्शो बाक्नीम। मोपा रागी रागी डा मुरपुकीमी आन शॉप चाक्नीम। मेको आन पिप आन डोंइती गाक्नीम। प्रकाश २:२५-२६

12 मिनु तेक तेको रागी नु तेक तेको राज्य डा मुरपुकीमी इ गेय मपाइनीमी, मेकोपुकी खतम दुम्नीम। थमा पा क्याम्या पुंडसीनीम।

13 लेबानोन डा दारस इ बाक्तीके चाक्नीम। मेकेर डा लाइश्शो रवा आन शी आं बाक्तीके दारपाइक्चा कली चाक्नीम। मोपा गो आं बाक्तीके दारपाइक्नुड।

14 इ कली दिप्ब आन चच युइ इ बाक्तीकेम जाक्शा बाप्नीम। इ कली प्रांग्रा दीब नेल्ल इ खोइलीम बाप्नीम। मिनु मेकोपुकीमी इ कली 'परमप्रभु यावे आ सहर नु इस्राएली आन का ला बाक्शो परमप्रभु आ सियोन' देंनीम। यसैया १४:२

15 डोंइती गे प्रोंइचा पुंडसीशो नु काइ मदाक्चा पुंडसीशो बाक्ते। इ रागी रे पा सुइ मगाक्बाक्तेकम। मुल गो इ कली गेना हना यो मान तपाइश्शा, पाला पाला सम्म ग्येरसीतीके सेल्लन। यसैया ४९:१४

16 गे रागी रागी डा दूध तूनेवे। मिनु गे पिप आन दूध तूनेवे। मिनु गो इ कली श्येत रे प्रोंइब बाक्नुड। याकूब आ सक्ति पाइश्शो परमप्रभु इ कली पाप रे प्रोंइब बाक्नुड, दे तुइक्नेवे। यसैया ४९:२०

17 मिनु गो कांसा आ पा डा सुन चाक्नुड। फलाम आ पा डा चांदी चाक्नुड। शी आ पा डा कांसा नु फुल्लु आ पा डा फलाम चाक्नुड। मिनु गो थुं नाइक्तीके इ कली कोव्रब सेल्लुड। ठीक पतीके इ ठेयब मुर सेल्लुड।

18 मो दुम नोले इ रागीमी हुश खाक्श पोक्शो आ पर्वम मनेंसीब। इ सांदम खतम दुम्शो लोव्र मनेंसीब। तन्न गे इ गारो कली पाप रे प्रोंइतीके नें वोइक्नेवे। गारो डा ठेयब लाप्यो आन कली ठेयब सेल्लीक नें वोइक्नेवे।

### परमप्रभु सियोन डा छेडछेड बाक्ब

19 मेना इ कली नाक्त डा नां छेडछेड मदुम्ब। नाकदो तास्ला हाम्सो मदुम्ब। मारदे हना इ परमप्रभु इ कली गेना हना यो छेडछेड बाक्ब। मिनु इ परमप्रभु इ दारस बाक्ब। यसैया २४:२३; प्रकाश २१:२३; प्रकाश २२:५

20 मिनु मेना रे इ नां गेनायो मलाक्ब। मिनु इ तास्ला यो मलाक्ब। मारदे हना परमप्रभु यावे गेना हना यो इ छेडछेड बाक्ब। इ रोंका पतीक नाक्ती नुप्त। यूहन्ना ८:१२; याकूब १:१७

21 इ रागी डा मुर नेल्ल ठीक पाइब दुम्नीम। मेको आन बाक्तीके रागी गेना हना यो आन के दुम्ब। मेकोपुकी आं खुम्शो बाक्नीम। मेकोपुकी आं सेल्लो मुर दुम्शा, आं कली ठेयब सेल्लनीम।

22 मेको नेल्ल क्येडा महिकसीशो थर का दुम्नीम। मिनु नेल्ल क्येडा आइक्च मुरपुकी ठेयब रागी ब्रीशा, सक्ति पाइश्शो दुम्नीम। मेना गो, परमप्रभु यावेमी मेको रीब पा पाइनुड" देत।

## 61

### सियोन कली श्येत रे प्रोंइतीके

1 "परमप्रभु, परमप्रभु यावे आ सोक्त आं तार बाक्ब। मारदे हना परमप्रभु यावेमी तेल लुक्ताक्यी। मेकोमी आं कली दिप्शो पुडग मुर आन कली ग्येरपाइक्ब लोव्र नेंपाइक्चा कली, थुं जिक्शो आन कली आन थुं बारपाइक्चा कली, चोक्चा पुंडसीशो मुर आन कली प्रोंइचा कली नु जेल्खान बाक्ब आन कली युंइचा कली सोइक्ताक्यी। यसैया १:२; मत्ती ११:५; लूका ४:१८-१९

2 मिनु आं कली परमप्रभु यावे आ शिशी पाइब बर्स नु आंइ परमप्रभु आ क्येक्क लेत्तीक नाक्त नु रोंका पाइब आन थुं बारपाइक्तीक नाक्त बाक्ब, दे तुइक्पाइक्चा कली यो सोइक्ताक्यी। लेवी २५:१०,१३; यसैया ६३:४

3 मेकोमी आं कली सियोनम रोंका पाइब आन कली पुलु आ पा डा दारशो पियाम ग्योम्तीके ग्योम्पाइक्चा कली, हिशेक आ पा डा ब्रोव्रशो रिना पाइब तेल खेक्चा कली नु आइक्च थुं दुम्तीके आ

पा डा ठेयब सेल्लतीक थुं फेक्तीक खोदेशो पा फेक्पाइक्चा कली सोइक्ताक्यी। मेको मुर आन कली 'ठीक पतीके रवा' दे नें वोइक्तेकम। मेको परमप्रभु यावे आ खुम्शो आ दारस कोंइतीके बाक्नीम।

4 मिनु मेकोपुकीमी साइ डोंइती खतम दुम्शो ब्रेशो माइत खिंपुकी लेंशा सेल्लनीम। मेकोमी ब्रेशो सहर लेंशा सेल्लनीम। मिनु शुश पाला रे मुर मबाक्थु, श्येत्थ दुम्शो सहर लेंशा सेल्लनीम। यसैया ५८:१२

5 मिनु अर्को रागी डा मुर जाक्शा, इन क्यारश भेडा योत्रनीम। मेकोपुकीमी इन रू दोइनीम। इन अडगुर बोट मुंडनीम। यसैया ६०:१०

6 तन्न इन कली 'परमप्रभु यावे कली चढेब नम' देंनीम। मिनु 'आंइ परमप्रभु आ गेय पाइब नम' दे यो देंनीम। गेपुकीमी रागी रागी डा मुर आन शोंप ताइनीनी। मिनु मेको आन शोंपोम ग्येरनीनी। प्रस्थान १९:६; १पत्रुसे २:५,९

7 मारदे हना गे अरु क्येडा निक्शी खेयप मुने दोक्तीनी। मिनु इन कली ग्रान्रा दित्ताकम। मोपतीके गे इन रागीमी निक्शी खेयप रू ताइनीनी। मिनु गेना हना यो ग्येरसीतीके गे नु बाक्ब।

8 गो, परमप्रभु यावेमी, ठीक पतीके दाक्नुड। रोइक्तीक नु हेंथे पतीक गेय काइ मदाक्नुड। गो मेको आन कली थमा पा आन पशो खोदेशो पा गेनुडमी। गो मेकोपुकी नु गेना हना यो लीब कबल पाइनुड। यसैया ५४:१०; यसैया ५५:३

9 मिनु रागी रागी डा मुरुम मेको आन चच युइ आन कली तुइक्नीम। मिनु जात जात डा मुरुम मेको आन आल आन कली तुइक्नीम। मेको आन कली ताइब नेल्लेमी 'मेरे परमप्रभु यावे रे पा आसीक तशो मुर बाक्नीम' देंनीम।

10 गो परमप्रभु यावे कली मिम्शा, ग्येरसीनुड। आं थुं नेल्लेमी आं परमप्रभु कली मान पाइनुड। मारदे हना मेकोमी आं कली पाप रे प्रोंइतीके वा खोदेशो पा फेक्पाइश्शा, ठीक पतीकेमी सुम्ती। दोदेशो पा ग्युम्लेम माहुर चुइक्सीबा नु ग्युम्लीम ग्योम्सीबा, मोदेशो पा परमप्रभु यावेमी आं कली ग्योम्ताक्यी। मती २२:११-१२

11 दोपा रूमी बाली नाली वापाइक्बा नु मेकेर वांचेर वापाइक्बा, मोपा परमप्रभु, परमप्रभु यावेमी ठीक पतीके नु ठेयब सेल्लतीके रागी रागी डा मुर आन डोंइती दुम्पाइक्ब" देंत।

## 62

सियोन आ नोले डा दारस

1 परमप्रभु यावेमी "गो सियोन आ पर्वम सिक्सी पा मबाक्नुड। यरूसलेम आ पर्वम गो मनांइसीनुड। मेको आ ठीक पतीके सुनी डा छेडछेड खोदेशो पा मगूम सम्म नु आ पाप रे प्रोंइचा पुंइसीतीके ब्रशो तोत्रशी खोदेशो मदुम सम्म मनांइसीनुड।

2 मिनु रागी रागी डा मुरुमी इ ठीक पशो ताइनीम। मिनु पिप नेल्लेमी इ छेडछेड ताइनीमी। मिनु इ कली नक नें थिशा ब्रेत्नीमी। मेको नें परमप्रभु यावेमी वोइश्शो बाक्ब। यसैया ६५:१५; प्रकाश २:१७

3 गे परमप्रभु यावे आ गुइमी दारशो सिरपेच का दुम्नेवे। मिनु इ परमप्रभु आ गुइमी गे पिपीम आन सुन फू खोदेशो दुम्नेवे। २तिमोथी ४:८

4 मिनु गे मेना रे 'ताइक्चा पुंइसीशो' माइक्चा मपुंइसीनेवे। इ रागी मुर मबाक्तीके रागी माइक्चा मपुंइसीब। 'गो इ कली तशा ग्येरसाक्यी' दे नें वोइक्चा पुंइसीनेवे। इ रागी ग्युंवे पशो खोदेशो दुम्ब। मारदे हना परमप्रभु यावे इ कली तशा ग्येरसीब। इ रागी ग्युंवे पशो खोदेशो दुम्ब। यसैया ५४:६; यसैया ६०:१५; होसे २:२१

5 दोपा ठिटा वोंइश मुरुम मीश आल कली ग्युंवे पाइबा, मोपा इ कली सेल्लमी इ कली ग्युंवे पाइब। मिनु दोपा ग्युम्ले आ ग्युम्ली कली तशा ग्येरसीबा, मोपा परमप्रभु इ कली तशा ग्येरसीब।

6 यरूसलेम, गो इ गारो तार खाल पाइब मुर वोइक्ता। मेकोपुकी नाक्दो नाक्ती सिक्सी पा मबाक्नीम। परमप्रभु यावे कली मिम्पाइक्बपुकी, मनांइसीन" देंत। यसैया ५२:८

7 परमप्रभु यावेम यरूसलेम कली बोल्यो नु ठेयब मसेला सम्म मेको कली यो नाइक्चा मगेन। मिनु रागी नेल्ल डा मुर आन डोंइती तुइक्पाइक्चा कली मेको पने।

8 परमप्रभु यावेमी आ ग्युरा गुड क्युक्शा, कसम जाप्टु। मार कसम जाप्टु देंशा हना “मुल रे गो इ अन्न इ जोरी सत्रु आन कली जचा मगेनुड। मिनु अर्को रागी डा मुर आन कली इ अडगुर शांबु तूचा मगेनुड। मारदे हना गे मेको आ परबम शुश श्येत पाप्तीवी। यसैया ६५:२१-२२

9 सु सुमी अन्न ओइनीमी, मेकोपुकीमी जचा ताइनीम। मिनु आं कली टेयब सेल्नीम। मिनु सु सुमी खुप्नीमी, मेकोपुकीमी आं खिं डा लाडगाम तूनीम” दे कसम जाप्टु।

10 ओव्रडीन, टेयब लाप्चो रे ओव्रडीन। मिनु मुर आन गाक्तीके लां थेल्ला, सेलीन। टेयब लां रे फुल्लु याक्तीन। जात जात डा मुर आन कली चिन्ड वोतीन। यसैया ५७:१४

11 परमप्रभु यावेमी रागी आ सुर सम्म डा मुर नेल्ल आन कली “सियोन आ तमी कली ‘इ कली पाप रे प्रोंडब जाक्ना जाक्न बाक्ब। इ कली गेतीक इनाम मेको नु बाक्ब। मेको इ ततीक इनाम आ डोंइती गाक्ब’ देंशो बाक्ब। जकरिया ९:९; यसैया ४०:९-१०

12 मिनु मेको आन कली ‘परमप्रभु यावे आ मुर नम। परमप्रभु यावे आ पाप रे प्रोंइशो मुर नम’ दे ब्रेल्नीम। मिनु इ कली ‘माल्ला, थिश्शो नु गेनायो मप्रोंइसीब सहर’ माइक्चा पुंइसीनेवे” दे कसम जशा, लोव्र पशो बाक्ब। यसैया ३५:१०

## 63

### परमप्रभुमी एदोम कली सजाइ गेशो

1 एदोम रे सु जाक्ना जाक्न बाक्बा? लल जिशो वा फेक्शा, बोझा रे जाक्ब सु बाक्मे? मेको दारशो वा फेक्शा, टेयब सक्तिमी गाक्ब सु बाक्म। “गो ठीक पतीके लोव्र पाइनुड। गो पाप रे प्रोंइतीक सक्ति पाइश्शो नड” देंत। यसैया ३४:६

2 मिनु गो “इन फेक्शो वा मारदे लल जिशो बाक्मे? मारदे इन वा अडगुर खाक्ब आन के खोदेंशो दुम्मे?” देंती। प्रकाश १९:१३

3 मिनु मेकोमी “गो आं कान अडगुर खाक्ता। गो नु जात जात डा मुर सुइ मबाक्म। मिनु गो गाइश्शा, मेको आन कली खाक्ता। चुरशा मेको आन कली दिम्ताक्डमी। मेको आन रस आं वाम ब्रुइसाक्व। मिनु आं वा नेल्ल लल दुम्त। योएल ४:१३; प्रकाश १४:२०

4 मारदे हना आं थुंम क्येक्क लेत्तीक नाक्त बाक्त। मिनु आं मुर आन कली प्रोंइतीके बर्स जाक्शो बाक्ब। यसैया १३:९; यसैया ३४:८; यसैया ६१:२

5 मिनु एर ओंथ कोव्रडुनु, वारच पाइब सुइ मबाक्म। मिनु गो नु गेय पाइब सुइ मबाक्म। मोपतीके गो आं सक्तिमी ग्राती। आं गाइक्तीकेमी आं कली वारच पाइक्ती।

6 मिनु गो गाइश्शा जात जात डा मुर आन कली दिम्ताक्डमी। गो चुरशा मेको आन कली खतम सेल्तामी। गो मेको आन हुश खपीम जारताक्ड” देंत। यसैया ५१:१७

### परमप्रभु आ शिशी पशो मिम्शो

7 गो परमप्रभु यावे आ मुर आन कली शिशी पतीक गेय मिम्नुड। मारदे हना मेको आ परबम परमप्रभु यावे कली टेयब सेल्चा माल्नीकी। मिनु आंइ कली मार मार पशो आ परबम, इस्त्राएल आ खिं डा मुर आन कली शुश दाक्ताक्व। मिनु मेको आन कली शिशी कोंइशा, गेना हना यो दाक्शो बाक्त। मोपतीके मेको कली टेयब सेल्चा माल्नीकी।

8 मेकोमी “मेकोपुकी थमा पा आं मुर बाक्नीम जोल मपाइब आल बाक्नीम” देंत। मोपतीके परमप्रभु यावे मेको आन कली श्येत रे प्रोंइब दुम्त। ब्यवस्था ३२:५,२०

9 मेको आन श्येत तशा, आं सोइश्शो मुर ममाइ, परमप्रभु यावे आ स्वर्ग डा गेय पाइब यो ममाइ, परमप्रभुमी मेको आन कली प्रोंइतु। आ दाक्तीके नु शिशी पतीकेमी मेको आन कली साइ डोंइती रे पाप रे प्रोंइशा, मेको आन कली मुप्शा, कुरशो बाक्त। प्रस्थान ३३:१४-१५

10 तन्न मेकोपुकीमी काइ मटिथु, आ सोक्त कली थुं खाइक्पाइक्तेक्म। मोपतीके परमप्रभु यावे मेको आन जोरी सत्रु दुम्शा, आंमा मेकोपुकी नु लडाइ पाप्टु।

11 मिनु नोले मेकोपुकीमी साइ डोंइती डा नाक्ती मिम्ताक्म। मेको आ गेय पाइब मोसा आ पाला ना डा नाक्ती मिम्ताक्म। मिनु मेकोपुकीमी “समुन्द्र रे पा गोठला नु आ बगाल गुंडब ते बाक्म? मेको आन कली परमप्रभु यावे आ सोक्त वोइक्ब, ते बाक्मे? प्रस्थान २:५; गन्ती ११:१७

12 सुमी आ सक्ति पाइश्शो गुइ मोसा आ ग्युरा गे गाक्चा कली वोदा? सुमी आंम कली गेना हना यो आ नें लीपाइक्चा कली समुन्द्रम लां सेला? प्रस्थान १४:२९

13 सुम मेको आन कली समुन्द्र आगा डा लां रे पा खुला? मेकोमी गोरशो रागीम शारा आन कली गाक्पाइश्शो खोदेशो पा दाइल मपपाइक्थु, गाक्पाइक्तु।

14 बी ब्यफ बेंसी बुष्शो खोदेशो पा परमप्रभु यावे आ सोक्तीम मेको आन कली नाइक्पाइक्तु। इन नें ठेयब सेल्चा कली इन मुर आन कली मोदेशो पा खुलतीनी।

15 सरीड डा इन छेडछेड डा बाक्तीके रे उइ कोवडीन। इन वारच पचा दाक्तीके नु इन सक्ति ते बाक्मे? इन थुं डा आंइ कली दाक्तीके नु इन शिशी पतीके ते बाक्म? गो मेको मतक। ब्यवस्था २६:१५

16 गे आंइ आफ बाक्नीनी। मिनु अब्राहाममी आंइ कली मतुइश्शो बाक्त। इस्राएलम आंइ कली मतव। गे, परमप्रभु यावे, आंइ आफ, आंइ श्येत रे प्रोंडब बाक्नीनी। मेको साइ रे इन नें बाक्ब। ब्यवस्था ३२:६

17 परमप्रभु यावे, गे मारदे आंइ कली इन लां रे हेंथे गाक्चा गेकी। गे मारदे आंइ कली इन कली मान पा महिब दुम्चा कली आंइ थुं खकटा सेल्नी? गे इन गेय पाइब आन परबम नु इन जात डा मुर आन परबम लेतीन। यसैया ५७:१७

18 इन योव्रशो मुरपुकी इक्का नाक्त सम्म ला एको रागीम बाक्चा ताम्तेक्म। तन्न मुल आंइ जोरी सत्रुमी इन योव्रशो बाक्तीके खतम सेल्लेक्म। बजन संग्रह ७९:१

19 गोपुकी डोंइती रे इन सासन पशो मुर खोदेशो मदुम्क। इन नेंमी ब्रेत्चा पुंडशीशो मुर खोदेशो मदुम्क” देंतेक्म।

## 64

1 परमप्रभु यावे, गे सरीड रोक्शा, यिनी हना, रिम्शो दुम वा। इन डोंइती डांडा हिम्सीम वा।

2 मिनु दोपा मीम सोव्रशो राशी जेप्बा, मिनु ब्वाक्कु बुइक्पाइक्बा, मोपा इन जोरी सत्रु आन कली इन नें तुइक्पतीन। मिनु रागी रागी डा मुर इन डोंइती हिंशा खिंखि पाइनीम।

3 मिनु गे आंइ ममिम्शो हिंचा डा ठेयब गेय पाइनीनी। गे यिनीनु, इन डोंइती डांडा खिंखि पाइनीम। १कोरिन्थी २:९

4 सु सुमी मेको कली रिम्नीमी, मेकोमी, मेको आन परबम गेय पाइब। मारदे हना साइ डोंइती रे गे डा लाक्शा अरु परमप्रभु बाक्ब, दे सुइम मनेशो नु मतशो बाक्तेक्म। प्रस्थान ३२:५-१०

5 गे ग्येरशा ठीक पतीके मिम्शा पाइब आन कली वारच पाइब बाक्नीनी। मेको मुरपुकी इन लांम गाक्शा, इन कली मिम्ब बाक्नीम। गे आंइ पाप पशो आ परबम गाइक्ताक्नी। मारदे हना गे खुंडसाक्नी। मिनु गो हेंथे गाक्तक।

6 गो नेल्ल ग्रॉग्रा दिशो मुर खोदेशो दुम्तक। आंइ ठीक पतीके नेल्ल ग्रॉग्रा दिशो लुम्सीशो वा खोदेशो दुम्त। गो सफा खोदेशो पा सोल सुल बेक्नीकी। आंइ मरिम्शो पशो फश खोदेशो दुम्शा, आंइ कली बेरपाइक्ब।

7 मिनु इन नें थीब सुइ मबाक्नीमी। इन कली थिंचा माल्ब सुइ मबाक्नीम। मारदे हना गे आंइ डोंइती रे इन कुल खुइक्ताक्नी। आंइ मरिम्शो पतीके मतेक्नी। यसैया ६३:१६; यसैया ४५:९; बिलाप ४:२; रोमी ९:२१

8 मो हना यो परमप्रभु यावे, गे आंइ आफ बाक्नीनी। गो खप नकी, गे खप के ग्योब सेल्ब बाक्नीनी। गो नेल्ले इन सेल्शो नकी।

9 परमप्रभु यावे, शुश मगाइक्तीने। आंइ मरिम्शो पशो गेना हना यो ममिम्तीन। आंइ कली कोवडीन, गो नेल्ल इन मुर बाक्नीकी।

10 इन योत्रशो सहरपुकी गोरशो रागी दुम्शो बाक्ब। सियोन यो गोरशो रागी दुम्शो बाक्ब। यरूसलेम मुर मबाक्तीके दुम्शो बाक्ब। भजन संग्रह २४:७

11 आंइ योत्रशो नु दारशो, आंइ किकी पिपपुकीमी इन कली ठेयब सेल्शो खिं मीम ग्रोइक्त्। आंइ दाक्शो खिं नेल्ले ब्रेन्ने थुम्तेक्म।

12 परमप्रभु यावे, गे मेको तशा यो, सिक्सी पा बाक्नीनी? ब्वालेइ पा बाक्शा, आंइ कली सजाइ जपाइक्नीनी?

## 65

### परमप्रभुमी सजाइ गेशो

1 परमप्रभु यावेमी “गो आं कली मतुइक्ब आन कली माल्ब सेल्तामी। आं कली ममाल्बमी आं कली थित्तीमी। आं नें मथीब रागी डा मुर आन कली गो ‘गो एके बाक्ती। गो एके बाक्ती’ दे माइक्तामी। रोमी १०:२०

2 गो काइ मटीब मुर आन कली नाक्त् रे आं गुइ हाम्शा वारच पाइक्चा माल्ता। मेकोपुकी आंम आन दला दाक्स पा मरिम्शो लां ला खोइक्तेक्म। रोमी १०:२१

3 मेको मुरपुकीमी आं कली गेना हना यो गाइक्पाइक्स डा गाइक्पाइक्स पा फू बारीम चढेनीम। इंटा तारी धूप चोइनीम।

4 मेकोपुकी तुरस आगाम बाक्शा, खुंडसीशा नां सोइताम। मेकोपुकीमी पोत्र श्ये ब्वाइनीम। आन ग्योबुम ग्रांया दिशो श्ये क्येनीम। यसैया ६६:१७; लेवी १:७

5 मेकोपुकीमी ‘गे मेके उइ बाक्कीन। आंइ नेक्था मपिने। मारदे हना इन थिशो मजाइनुड’ देनीम। मेकोपुकी आं कली मरिम्शो रिना पाइश्शो कुन खोदेशो दुम्शा, गेना हना यो ब्रशो मी बाक्नीमी।

6 कोव्रडीन, आं डोइती मार ब्रेक्शो बाक्त् देश हना ‘गो सिक्सी पा मबाक्नुड। तन्न गो क्येक्क लेत्नुड। गो थमा पा क्येक्क लेत्नुड’।

7 गो इन मरिम्शो पशो नु इन किकी पिपी आन मरिम्शो पशो कालेमी क्येक्क लेत्नुड। मेकोपुकीमी डांडा तार धूप चोशा, आं कली शुक्शी पाइक्तीमी। मिनु गो इन पशो आ क्येक्क लेल्न्नी” दे परमप्रभु यावेमी देंत। मारदे हना मेकोपुकीमी डांडाम धूप चोशा, पहाड मेर आं पबंम शुक्शी लोत्र पाम्तेक्म। मेको आन पशो पाप आन थुकुम प्रिशा क्येक्क लेत्नुडमी।

8 मिनु परमप्रभु यावेमी “दोपा अडगुर आगाम रस बाक्बा, मिनु ‘मेको कली मताइक्चा, रस बाक्ब’ देनीमी, मोपा मबिग्नेचा कली आ आगाम आसीक बाक्ब। गो मेको आं गेय पाइब आन पबंम मोदेशो पाइनुड। यसैया ६:१३; उत्पत्ती १८:२६-३२

9 मिनु गो याक्कूब आ चच युइ रे जाक्पाइक्नुड। मिनु यहूदा आ थर डा आं डांडा ताइब मुर गुंइनुड। मेको आं योत्रशो मुर आन के दुम्शा, आं गेय पाइब आन बाक्तीके दुम्ब।

10 मिनु शारोन आं मुर आन क्यारश भेडा योत्रतीके नु आकोर माइश्शो दिमम बी ब्यफ जोपाइक्तीके दुम्ब। मेको आं कली माल्ब आन कली दुम्ब। यसैया ३३:९; यहोसु ७:२६

11 तन्न गे परमप्रभु यावे कली प्रोइबपुकी, आं योत्रशो डांडा प्रेबपुकी गाद देवता कली चढेतीके सेल्नीनी। मिनु गे मेनी देवी कली ब्वाइश्शो तूतीके चढेनीनी।

12 गो इन कली तरवारम साइक्पाइक्चा कली जिम्मा गेनन्नी। गे क्योरपांडसीचा कली गुर ब्वेनीनी। मारदे हना गो इन कली ब्रेत्तुनु, गे आं लोत्र मलेत्तीनी। गो लोत्र पडानु, गे मनेनी। गो आं डोइती मरिम्शो नु आं मदाक्शो गेय ला योत्रशा, पाइतीनी” देंत। यसैया ६६:४; येरमीया ७:१३

13 मोपतीके परमप्रभु यावेमी “आं गेय पाइबपुकी जचा ताइनीम। गे चहिं शोत्रलु बेक्नीनी। आं गेय पाइब तूचा ताइनीम। गे चहिं तूत दाक्शा बाक्नीनी। आं गेय पाइबपुकी ग्येरनीमी, गे चहिं मुने दोक्नीनी। यसैया ५५:१



14 आं गेय पाइबपुकी थुंम ग्येरसीशा, कुम्सो पाइनीमी। गेपुकी चहिं श्येत जशा, इन थुं लुक्च लशा खाइशशा, वाइ ब्रेशशा डाक्नीनी।

15 आं योत्रशोपुकीमी सराप पची ना इन नें थीनीम। मिनु नोले गो परमप्रभु, परमप्रभु यावेमी इन कली साइक्नन्नी। तन्न आं गेय पाइब आन कली नक नें वोइक्नुडमी। यसैया ६२:२

16 मिनु सु सुम रागीमी आसीक पुंइनीमी, मेकोपुकी थमा सुइक्चा पुंइसीब परमप्रभु आ नेंमी आसीक ताइनीम। मिनु रागीमी सु सुमी कसम जाइनीमी, मेकोपुकीमी थमा सुइक्चा पुंइसीब परमप्रभु आ नेंमी कसम जाइनीमी। मारदे हना डोंइती डा श्येत नुप्शा, प्रेने थुम्शो बाक्नीम। मिनु आं डोंइती रे खुंइसीशो बाक्नीम। यसैया १९:१८; येरमीया ४:२

### नक सरीड नु नक रागी

17 मिनु गो नक सरीड नु नक रागी सेल्लुड। डोंइती डा नेल्ल प्रेशा, लेंशा मारेइ ममिम्सीब। यसैया ६६:२२; २पत्रुस ३:१३; प्रकाश २१:१

18 गेपुकी आं सेल्लोमी शुश ग्येरसीने। मारदे हना गो यरूसलेम कली कुम्सो पपाइशशा, आ मुर नेल्ल आन कली ग्येरपाइक्नुडमी। यसैया ६६:२२; यसैया ३५:१०; यसैया २५:८; प्रकाश २१:४

19 गो यरूसलेम तशा ग्येरसीनुड, आं मुर आन कली तशा, आं थुं ग्येरशा प्रेक्ब। मेना मेकेर डाक्शो नु श्येत जशा डाक्शो मनेंसीब।

20 का निक्शी नाक्त ला ब्रोंइब आल मेकेर मबाक्नीम। मिनु मेकेर सुइ यो खूशो दुम्चा क्येडा डोंइती मबेक्नीम। सहे का बर्स ब्रोंइशा बेक्ब कली टिटा देंनीम। मिनु सहे का बर्स मगाप्यु, बेक्ब मुर कली 'सराप रशो मुर का बाक्त' देंनीम। जकरिया ८:४

21 मेकोपुकी खिं सेल्ला, बाक्नीम। मिनु मेकेर अडगुर खुम्शा, ग्येरशा ब्वाइनीम। यसैया ६२:८

22 आंम आन सेल्लो खिंमी अरु मबाक्नीम। आन खुम्शो अडगुर अरुम म्बवाइनीम। आं मुरपुकी र्वा खोदेशो पा शुश बर्स ब्रोंइनीम। आं योत्रशो मुरपुकीम आंम आन गुइ डा गेय ग्येरशा जाइनीम। ब्यवस्था २८:३०; अय्युब १४:७

23 मेकोपुकीमी मोशा गेय मपाइनीम। श्येत जपाइक्चा कली आल मथीनीम। मारदे हना मेकोपुकी परमप्रभु यावे आ आसीक ताइब आन आल बाक्नीम। मिनु आन आल मेको नु बाक्नीम।

24 मिनु गो मेको आन पुंइचा क्येडा डोंइती, लोत्र लेत्नुडमी। आन लोत्र पन पना नेंनुड। यसैया ३०:१९; यसैया ५८:९

25 मेना फर नु पाठा काथ काथा जोइनीसी। गुप्सम चहिं ब्यफोम खोदेशो पा पराल ब्वाइब। बुस्सुम खप जाइब। आं योत्रशो डांडामी मारेइमी मरिम्शो मपाइनीम" दे परमप्रभु यावेमी देंत। यसैया ११:६-९; उत्पत्ती ३:१४

## 66

### निसाफ पशो

1 मिनु परमप्रभु यावेमी "स्वर्ग आं नित्तीके नु रागी आं खोइल वोइक्तीक बाक्ब। गे आं कली दोदेशो खिं सेल्ले चाप्नीनी? तेकेर नाइक्नुडा? १राजा ८:२७; बिलाप २:१; प्रेरित ४:४९; प्रेरित १७:२४

2 मारेइ मारेइ आं सेल्लो मनमी डा? मोपतीके मेको नेल्ल आं के नम" दे परमप्रभु यावेम देंत। मिनु लेंशा "मो हना यो गो आं लोत्र नेंशा, हिंशा, खिंखि पा श्येत जाइब नु आ थुं जिक्शो मुर आन कली कोत्रनुड।

3 मिनु सुमी ब्यफ साइक्बा, मेको मुर साइक्ब खोदेशो बाक्ब। सुमी पाठा का चढ़ेबा, मेको कुचुम आ शुर जिक्ब खोदेशो बाक्ब। सुमी अन्न चढ़ेबा, मेको पोत्र आ हुश चढ़ेब खोदेशो बाक्ब। सुमी मिम्शा चढ़ेतीके धूप चोइबा, मेको मूर्ति पूजा पाइब खोदेशो बाक्ब। मेको आन दला दाक्स पाइनीमी। आन ग्रॉगा दिशो गेयमी ग्येरसीनीमी। १सामुएल १५:२२-२३

4 गो मेको आन कली शुक्शी पाडनुड। मिनु आन हिंशो श्येत आन तार मोडकुनुड। मारदे हना गो मेको आन कली ब्रेडडानु, लोत्र मलेत्तेम। गो लोत्र पाता। तन्न मेकोपुकीम आं लोत्र मननेम। आं डोंडती मरिम्शो पांतेक्म। आं मदाक्शो ला पांतेक्म” देंत। यसैया ६५:१२

**परमप्रभुम सियोन कली ठीक सेल्शो**

5 परमप्रभु यावे आ लोत्र क्येडा हिंशा, खिंखि पाडबपुकीम “आं लोत्र नेनीन। इन लोकबपुकीमी गेपुकी आं मुर दुम्तीके इन कली काड मदाक्शु, तिल्लीम। मेकोपुकीमी ‘परमप्रभु यावे कली ठेयब सेलल। मिनु गो इन ग्येरशा बाक्शो तकल’ देंनीम। तन्न मेकोपुकी मुने दोक्नीम। लूका ६:२२

6 नेनीने, सहर रे ठेयब रेयके नेंसीब। परमप्रभु यावे आ खिं रे सेंदा का नेंसीब। मेको परमप्रभु यावे आ सेंदा बाक्ब। आ जोरी सनु आन कली क्येक्क लेत्चा कली ठेयब सेंदा पा लोत्र पाडब” देंतेक्म।

7 मिनु परमप्रभु यावेमी “सियोनमी सुत्केरी रोड पचा क्येडा डोंडती आल थिप्तु। सुत्केरी रोड पचा क्येडा डोंडती तौ का थिप्तु।

8 मोदेंशो लोत्र सुम नेन्मे, सुम तामे? मार, नाक्त कामी रागी का दुम्बा डा? याम कामी रागी का जरमेसीबा डा? सियोनमी सुत्केरी रोड पचा चिक्तानु, आलपुकी थिप्तु।

9 गो आल थिचा चिक्पाडशशा डा मीन, थिचा मगेनुडा डा? गो आल थिचा गेबमी, तेक्नुडा डा?” दे इन परमप्रभुमी देंत। यसैया ३७:३

10 मिनु गे यरूसलेम कली दाक्ब नेल्लेमी मेको नु ग्येरसीन। गे मेको आ पर्वम रोंका पाडब नेल्ल ग्येरसीन।

11 गेपुकी मेको आ दूध युप्शा, रूशा, इन थुं बारपतीन। मेको आ रिम्स तशा ग्येरसीने। यसैया ६०:१६

12 मारदे हना परमप्रभु यावेमी “गो ठेयब खोला खोदेंशो पा मार मार गेनुड। मिनु बारशो खोला खोदेंशो पा रागी रागी डा मुर आन शोंप गेनुड। मिनु गे जाडनीनी। गेपुकी मुप्शा, कुरचा पुंडसीनीनी। थुकुम ग्यारपाडक्चा पुंडसीनीनी। यसैया ६०:४

13 दोपा आल आ ममामी आल आ थुं बारपाडक्चा, मोपा गो इन कली इन थुं बारपाडक्चनीनी। गे यरूसलेम सहरमी इन थुं बारपाडक्चा पुंडसीनीनी। बजन संग्रह १३१:२

14 गेपुकी मेको कली तशा, शुश ग्येरशा, इन थुं बारपाडक्चनीनी। गे घांस बारशो खोदेंशो पा बारनीनी” देंत। परमप्रभु यावेमी आ गेय पाडब आन कली वारच पाडब, दे मुर नेल्लेमी तुडक्नीम। मेको आ जोरी सनु आन पर्वम गाडक्ब।

15 परमप्रभु यावे मी नु जाक्ब। आ बग्गीपुकी फश गिवार खोदेंशो पा गाक्नीम। आ गाडशो चुरशोमी क्येक्क लेप्ब। आ हुडक्तीके हुरु पा ब्रशो मी खोदेंशो बाक्ब। बजन संग्रह ५०:३; प्रकाश १९:११-१५

16 मारदे हना परमप्रभु यावेमी मीमी निसाफ पाडब। मुर नेल्ल आन कली आ तरवारम निसाफ पाडब। मिनु परमप्रभु यावेमी मोपा साडशो शुश दुम्नीम।

17 मिनु “सु सु देवी देवता आन डोंडती जाक्चा कली चोत्रखेसीशा, आंम कली ठीक सेल्लीमी, फू रू लशा, मेको रू आ दातेमी बाक्ब पोत्र श्ये ब्वाडब आ नोले खोडशशा, मेको यो पोत्र श्ये ब्वशा, प्रांग्रा दिचा डा थोत्रकपुकी नु यिच ब्वाडनीमी, मेकोपुकी कालेमी साडक्चा पुंडसीनीम” देंत। यसैया ६५:३-५; इजीकीएल ८:११

18 परमप्रभु यावेमी “गो मेको आन पतीके नु आन मिम्तीके तुडकुनुड। मिनु रागी रागी डा मुर नेल्ल नु नेल्ल खाल डा लोत्र पाडब मुर आन कली खुप्नुड। मिनु मेको मुर जाक्शा, आं छेडछेड ताडनीम।

19 मिनु गो मेको आन दातेमी चिन्ड का वोडकुनुड। मिनु मेको आन दाते डा प्रोंडशो आन कली रागी रागीम सोडकुनुडमी। गो मेको आन कली टारशीश, पूत नु लूद सोडकुनुडमी। लूद डा मुर चहिं लिब्रा आप्ब बाक्नीम। गो तूबल, यावान नु समुन्द्र आ नेक्था डा रागी मेर सोडकुनुडमी। मेकोपुकीमी आं नें मतुडक्ब आं छेडछेड मताडब रागी रागी डा मुर आन कली आं पर्वम शेंनीम। मत्ती १८:१९ तूबल नु यवान ग्रीस रागी बाक्ब।

20 मिनु इन लोक्ब नेल्ल आन कली रागी रागी रे परमप्रभु यावे आ डोंइती चढेशो खोदेशो पा यरूसलेमम चाक्नीम। मेकोपुकी शारा, बग्गी, कुरतीके, गधा नु दलओंठम डोइक्पाइश्शा, आं योव्रशो डांडाम चाक्चा पुंडसीनीम। दोपा इस्राएलीपुकीमी आन अन्न चढेतीके सफा ग्योबुम परमप्रभु यावे आ खिं चाक्नीमी, मोपा मेकोपुकीमी पाइनीम। यसैया ६०:३-७

21 गो मेको आन दाते रे चढेब नु लेवी योव्रनुडमी” दे परमप्रभु यावेमी देंत।

22 मिनु “दोपा आं सेल्शो नक सरीड नु नक रागी आं डोंइती गेना हना यो बाक्बा, मोपा इन नें नु इन चच युड आन नें गेना हना यो लीनीम। यसैया ६५:१७

23 मिनु नोले औंसी रे औंसी सम्म नु नाइक्तीक नाक्ती रे नाइक्तीक नाक्ती सम्म मुर नेल्ले आं कली टेयब सेल्चा कली आं डोंइती जाक्नीम। गन्ती १०:१०

24 मिनु मेकोपुकी गूशा आं कली काइ मटीब आन बेक्शो रां कोव्रथ लाइनीम। मेको आन लुस्पु मबेक्नीम, आन मी यो मकापब। मेको मुर नेल्ल आन कली ग्रांघ्रा दितीके दुम्नीम” दे परमप्रभु यावेमी देंत। मर्कुस ९:४८

## येरमीया

**ब्रेक्ब मुर:** एको किताब येरमीयाम ब्रेक्शो बाक्ब। पिप योयाकीमम आ हुकुम पची ना येरमीयामी आ लोव्र नेल्ल आ ब्रेक्ब मुर बारुक कली ब्रेक्पाइक्तु। साइ डोंइती रे यहूदी नु ख्रीस्तीयन नेल्लेम मेको किताब येरमीया आ ब्रेक्शो बाक्ब, दे तुइक्नीम।

**गेना ब्रेक्शो:** मेना अस्सुर रागी खतम दुम्त। मेदी नु कल्दी डा मुरपुकीमी अस्सुर डा ठेयब सहर निनवे कली लडाइ पा ग्रातेक्म। मिनु मेको रागी आस दातेमी योक्साक्स। ६०९-६०६ बि. सी. मेर पिप नेबुकदनेसरमी इजीप्त कली लडाइ पा ग्रात। नोले डोंइती डा यहूदी आन कली ग्याइश्शा लाइक्तीके बाक्त। मेको ६०६ बि. सी.म बाक्त। मेको आ नोले डा ग्याइश्शा लाइक्तीक ५९८ बि. सी.म बाक्त। मिनु नेल्ल क्येडा नोले डा ग्याइश्शा लाइक्तीके ५८६ बि. सी.म बाक्त।

**मारदे ब्रेक्शो:** यहूदा डा मुर परमप्रभु गे मलेत्तेम हना, निसाफ पचा पुंडसीनीम। यरूसलेम सहर फुचा पुंडसीब। मिनु नोले थुं बारपाइक्तीके लोव्र शुश ताइब। मिनु इस्राएली मदुम्शो अर्को रागी डा मुर यो मेको नक कबल डा शिशी ताइब दुम्ने चाप्नीम।

### येरमीया सु बाक्म

1 एको चढेब हिल्कीयाह आ तौ येरमीया आ लोव्र बाक्ब। मेको बेन्यामीन आ रागी अनाथोथ सहरम बाक्शो बाक्त। येरमीया ११:२१; यहोसु २१:१८; ब्यवस्था ३३:३२

2 यहूदा डा आमोन आ तौ पिप योसीयाहम सासन पवा आ १३ बर्समी परमप्रभु यावेमी येरमीया कली लोव्र पाप्तु। २राजा २१:२४; २राजा २२:१

3 मिनु यहूदा डा योसीयाह आ तौ येहो-याकीम आ पाला नेल्ले नु यहूदा डा योसीयाह आ तौ सिदकीयाहम सासन पवा आ ११ बर्स डा ५ महिनाम परमप्रभु यावेम येरमीया कली लोव्र पना पन बाक्त। मेना यरूसलेम डा मुर ग्याइश्शा लाइक्चा पुंडसीशो बाक्तेक्म। २राजा २३:३४; २राजा २४:१७; २राजा २५:२-२१; येरमीया ३९:९

### येरमीया कली ब्रेक्शो

4 मिनु परमप्रभु यावेमी आं कली मार लोव्र पाप्तु देशा हना,

5 “गो इ कली कोव्रजीम जोल्चा क्येडा डोंइती तुइक्ताक्ड। गो इ कली जरमेचा क्येडा डोंइती योव्रशा तिल्लन। मिनु इ कली रागी रागी डा मुर आन कली आं लोव्र पाइब सेल्लतन” देंत। यसैया ४९:१; गलाती १:१५

6 मिनु गो “परमप्रभु, परमप्रभु यावे, गो दोपा ब्वाक्चा माल्नुडा, मजोक्नुड। गो आलन बाक्नुड” देंती। प्रस्थान ४:१०; यसैया ६:५-७

7 तन्न परमप्रभु यावेमी आं कली “गो आल बाक्नुड मदेनो। गो इ कली सु सु आन बाक्तीक सोइक्नना, मेकेर लचान माल्नेवे। मिनु गो इ कली मार अरेडा, मेको देंचा माल्नेवे।

8 गे मेको आन क्येडा महिनो। मारदे हना गो इ कली प्रोंडचा कली गे नु बाक्नुड” दे परमप्रभु यावेमी देंत। प्रस्थान ३:१२

9 मिनु नोले परमप्रभु यावेम आ गुइ दिंशा, आं शोव्र थिप्तु। मिनु आं कली “मुल आं लोव्र इ शोव्रम कुर पाता। प्रस्थान ४:१२

10 नेनो, मुलाक्ती गो इ कली रागी रागी नु राज्य आन परबम लोव्र पाइब सेल्लन। तुल्चा नु प्रेत्या कली, खतम पोक्चा, ग्रांग्ये माग्ये पपाइक्चा नु सेल्चा नु खुम्चा कली वोइक्तन” देंत। येरमीया १८:७-१०

11 मिनु परमप्रभु यावेमी आं कली “येरमीया, गे मार, तवी?” देंत। मिनु गो “देसी बदाम रवा आ राशी का ताता” देंती।

12 मिनु परमप्रभु यावेमी “गे ठीक ताप्तीवी। मारदे हना गो आं लोव्र नेल्ल दुम्ल, दे योव्रकी पा बाक्ती” देंत। येरमीया ३१:२८

13 मिनु परमप्रभु यावेमी लेंशा आं कली “गे मार, तवी?” दे हिल्लो पाप्तु। मिनु गो “बुइश्शो मार, मार बाकशो ग्योब का उत्तर रे याक्सीशा यिशो ताता” देंती।

14 मिनु परमप्रभु यावेमी आं कली “उत्तर रे एको रागीम बाकब मुर नेल्ल आन कली श्येत जाकब। येरमीया ४:६; येरमीया ६:१,२२; येरमीया १०:२२; येरमीया २५:९; येरमीया ५०:४१

15 गो उत्तर डा राज्य डा जात जात डा मुर आन कली ब्रेत्तुड। मिनु मेको नेल्ल जाकशा, यरूसलेम डा टेयब लापचो ओव्रतीक लांमी, एर ओथ डा गारो नेल्ल नु यहूदा डा सहर आ डोंइती आन पिप आन नित्तीक वोइक्नीम। मेकोपुकी मेको आन पर्वम लडाइ पचा कली जाक्नीम।

16 मेकोपुकीमी आं कली प्रॉइशा, आं अरेशो मटितीके, गो मेको आन पर्वम आं निसाफ नेंपाइक्नुडमी। मेकोपुकीमी अरु देवी देवता आन कली धूप चोम्तेक्म। मिनु आन गुडमी सेल्शो देवी देवता आन कली पूजा पाम्तेक्म।

17 गे चहिं बोक्शा, ठीक दुमो। मिनु गो इ कली मार, मार, अरेडा, मेको आन कली माइक्मी। गे मेको आन क्येडा महिनो। मो पाप्तीवी हना, गो इ कली मेको आन डोंइती हिंपाइक्नन।

18 मुलाकती गो इ कली गारो हिरशो बोल्यो सहर, फलाम के थाम नु कांसा के थरपु खोदेशो सेल्लन। मोपा गे यहूदा डा पिपी, हुकुम पाइबपुकी, चढेबपुकी नु रागी डा मुर नेल्ले आन मरिम्शो पशो आ पर्वम लोत्र पने चाप्नेवे। येरमीया १५:२०; इजीकीएल ३:८-९

19 मेकोपुकीमी इ कली लडाइ तोइनीम। तन्न इ क्येडा ग्राने मचाप्नीम। मारदे हना इ कली प्रॉइचा कली गो गे नु बाक्नुड” दे परमप्रभु यावेमी देंत।

## 2

### इसाएली आन कली प्रॉइशो

1 मिनु परमप्रभु यावेमी आं कली

2 “लावो, परमप्रभु यावेमी यरूसलेम कली मार देंत देशा हना ‘गे इ ठिटी बाकची ना आं कली ग्युल्लीम खोदेशो पा दाक्ताक्यी। गे आं कली मारेड मशोक्शो गोरशो रागीमी आं नोले खोइक्ती। गो मेको मिम्नुड। होसे २:१६; होसे १३:५

3 इस्राएल आंम परमप्रभु यावे कली आ का ला बाकशो ग्युल्ली खोदेशो बाक्त। मेको, आ गेय डा डोंइती डा फल खोदेशो बाक्त। मेको कली नेक्ब नेल्ल दोस ताइब दुम्तेक्म। मेको श्येत जाम्तेक्म’ देनो” दे माइक्ती। प्रस्थान २८:३६; आमोस ६:१; याकूब १:१८

4 गे याकूब आ खिं डा मुर नु इस्राएल आ खिं डा मुर नेल्ले, परमप्रभु यावे आ लोत्र नेनीन।

5 परमप्रभु यावेमी मार देंत देशा हना “इन किकी पिपीम आं कली मार, दोस गेयीमी? मारदे आं कली प्रॉइशा, डोन लमा? मेकोपुकी शोर गाक्शो मूर्ति आन नोले खोइक्तेक्म। मिनु मेको यो शोर गाक्शो दुम्तेक्म। मीका ६:३

6 मेकोपुकीमी ‘आंइ कली इजीप्त रागी रे गेंडब परमप्रभु यावे ते बाकबा? मेकोमी आंइ कली गोरशो रागीम लां कोंइशा गाक्पाइक्तु। मेको मुर मबाक्तीक गोरशो रागी नु शुश खाल्टा बाक्शो रागी बाक्त। ब्वाक्कु मबाक्शो नु छिडछिड डा रागी बाक्त। मेको सुइ मगाक्तीक नु सुइ मुर मबाक्तीक रागी बाक्त’ देंतेक्म। ब्यवस्था ८:१५

7 गो इन कली रिम्शो रागीम चाक्तन्नी। मेकेर डा फल नु रिम्शो थोव्रक जपाइक्चा कली चाक्तन्नी। तन्न गेपुकी जाक्शा, आं रागी मरिम्शो सेल्लतीनी। आं रागी कली ग्रॉग्रा दिशो सेल्लतीनी। ब्यवस्था १:२५; न्यायाधीस २:१-२

8 चढेबपुकीम ‘परमप्रभु यावे ते बाकबा?’ मदेंम। आं अरेशो लोत्र शेंबपुकीम आं कली मतुइक्तीमी। सासन पाइबपुकी आं कली ममिम्शु, हेथे गाक्तेक्म। आं लोत्र पाइबपुकीम बाल देवता आ नेम नोले दुम्ब लोत्र पाम्तेक्म। मिनु शोर गाक्शो मूर्ति आन नोले खोइक्तेक्म” देंत।

9 मोपतीके परमप्रभु यावेमी “गो इन कली लेंशा दोस गेचा माल्नुड। गो इन चच युइ आन कली दोस गेनुड।

10 कितीम माइशो साइप्रस डा समुन्द्र आ नेक्था बाक्ब आन कली कोवडीन। केदारमी क्यारी पाइब मुर सोइशशा कोवडीन। मार, मेकेर मोदेशो गेय दुम्शो बाक्बा?

11 मार, तेकोइ रागी डा मुरुम आन देवी देवता फाइशो बाक्नीमी डा? मेको परमप्रभु मनम हना यो, मफाइक्नीम। तन्न आं मुरपुकीम आन ठेयब सक्ति पाइशो कली शोर गाक्शो मूर्तिपुकी नु फाइक्तेक्म। रोमी १:२३

12 गे सरीडम बाक्बपुकी एको लोत्र नेशा हिंशा, छक लाक्कीन। मिनु थाम्पा हिंशा थिर थिर पा खिंखि पने।

13 मारदे हना आं मुरपुकीम निक्शी खेयप मरिम्शो पाम्तेक्म। मेकोपुकीमी, ब्रोंइतीक ब्वाक्कु बुक्तीके, आं कली प्रोंइतेक्म। मिनु आंम कली सोव्रशो रागीमी ब्वाक्कु मदेम्तीक इनार दोम्तेक्म। येरमीया १७:१३; भजन संग्रह ३६:१०; यूहन्ना ७:३८

14 मार, इस्राएल वाइल का बाक्बा? आ होत्रप आ खिम जरमेशो वाइल का बाक्बा डा? मेको मारदे रोइक्चा पुंडसे?

15 गुप्सपुकी मेको कली तशा ग्रीनीम। ठेयब सेंदा पा ग्रीनीम। मेकोपुकीमी आ रागी कली मुर मबाक्तीके सेल्लेक्म। मेको आ सहर नेल्ल ब्रेल्लेक्म। मिनु मेकेर मुर मबाक्नीम। येरमीया ४:७

16 मेम्कीस नु ताहपनेस डा मुरपुकीम इन पिया डा सिरपेच पुइक्तेक्म। येरमीया ४४:१

17 इन कली लां कोंडब, इन परमप्रभु यावे कली प्रोंइशा, गे मोदेशो श्येत आंमा इन कली मचाक्नी डा?

18 गे मारदे इजीप्त रागी लाइनीनी? नील खोला डा ब्वाक्कु तूथ लाइनीनी? गे अस्सुर रागी लनीनु, मार रिम्शो दुम्बा डा? गे युफ्रेटीस खोला डा ब्वाक्कु तूथ लाइनीनी?

19 इन परमप्रभु यावे आ अरेशो लोत्र मटितीकेमी इन कली सजाइ गेब। इन प्रोंइशोमी इन कली हुइक्ब। गेपुकीम इन परमप्रभु यावे कली प्रोंइशो थम मरिम्शो नु इन थुं कशो दुम्शो बाक्ब, दे तुइक्तीन। मिनु आं कली मान पा हिंतीके गे नु मबाक्ब” दे परमप्रभु, मुर नेल्ल आन परमप्रभु यावेमी देंत।

20 परमप्रभु यावेमी “साइ डोंइती रे गे इ जुवा जिक्तीवी। मिनु इ डोरी प्रोंइक्तीवी। मिनु गे ‘गो इ गेय मपाइनुड’ देंते। गे डांडा नु रवा नेल्ल आन पुंम तेल्लेम पाप्तीवी। यसैया ५७:५५; इजीकीएल ६:१३

21 गो इ कली नेल्ल क्येडा रिम्शो अडगुर बोट खुम्ता। गे दोपा मरिम्शो दुम्शा ब्वाकी डा अडगुर बोट खोदेशो दुमे? भजन संग्रह ८०:९; यसैया ५:१-४

22 गे इ कली मार, मार, हिकसी नु शुश साबुनम चिक्साक्वे हना यो, इ दोस ततीके लुम्शीशो आं डोंइती बाक्ब” दे परमप्रभु, परमप्रभु यावेमी देंत।

23 मिनु “गे ‘गो ग्रॉग्रा मदिशो नड’ दे दोपा देंने चाप्नेवे? ‘गो बाल देवता आ नोले मखोइशो बाक्नुड’ दे गे दोपा देंने चाप्नेवे? गे बेसीम मार, पवी? मेको मिम्तो। गे थाम्पा एर ओथ दोरशा गाक्ब दलओंठ बाक्नेवे।

24 गे गोरशो रागीम बाक्चा दाक्ब, फश नाम्शा गाक्ब ब्वाकी डा गधेनी बाक्नेवे। मेको आ डागो माल्तीके सुम तेक्ने चाप्बा डा? सु सुमी मेको कली माल्नीमी, मेको मदाइनीम। मारदे हना ब्वांइसीतीक महिनाम मेको कली थिल्लीम।

25 इ खोइल शिन्ना मगाक्को। गे तूतू दाक्शा खिं रे मलावो। तन्न गे ‘एको मोशा बाक्ब। मारदे हना गो अर्को रागी डा देवता आन कली दाक्ताक्ड। मिनु मेको आन नोले खोइक्नुड’ देंते।

26 दोपा खुइ ग्याइक्चा पुंडसेनु, मुने दोक्बा, मोपा इस्राएल आ खिं डा मुरपुकी मुने दोक्नीम। मेकोपुकी, आन पिपी, आन ठेयब मुरपुकी, आन चढ़ेबपुकी नु मेको आन जोल पा परमप्रभु यावे आ लोत्र पाइबपुकी मुने दोक्नीम।

27 मेकोपुकीमी रवा कली ‘गे आं आफ नवे’ मिनु फुल्लु कली ‘गे आं कली जरमेब नवे’ देंनीम। मेकोपुकीमी आं कली आन ची हिरशा कोइशो बाक्नीम। आन कुल ममाइ। मो हना यो मेको श्येत जामे नाक्ती जाक्शा ‘आंइ कली प्रोंइकी’ देंनीम। येरमीया ७:२४; येरमीया १८:१७; येरमीया ३२:३३

28 तन्न आंम इन सेल्लो देवी देवता ते लाकगमे? मेकोपुकीमी इन कली प्रॉइने चाप्तेकम हना, इन श्येत जची ना मेको आन कली जाकपतीन। मारदे हना यहूदा, गे इ के गिश सहर बाकमा, मिश देवी देवता बाकनीम। ब्यवस्था ३२:३७-३८; न्यायाधीस १०:१४; येरमीया ११:१३

29 गेपुकीम मारदे आं कली गन गन पाइनीनी? गे नेल्ल आं कली काइ मटीब दुम्लो बाकनीनी।

30 गो इन आल आन कली मोशा तुप्तामी। गो मेको आन कली शेंचा दाक्ताकड। तन्न मबिस्सम। इन कली सोइश्शो आं लोत्र पाइब इन तरवारमी साइकचा पुंडसाकम। गेपुकी गु दाकब गुप्स खोदेशो बाकनीनी। यसैया १:५; मत्ती ५:१२; मत्ती २२:६; मत्ती २३:३७; मर्कूस १२:५

31 मिनु गे, मुल डा पाला डा मुरपुकी, परमप्रभु यावे आ लोत्र मिम्तीन। मार, गो इस्राएली आन कली मुर मबाकशो रागी नु थम छिडछिड डा रागी दुम्ला डा? मारदे आं मुरपुकीम 'गो आंइ कली हिरचा कली सुइम तेक्ने मचापब। गो इन डोंइती गेनायो लेंशा मजाकनीकी' देंमा?

32 मार, मीश आलम आ सुन चांदी नु ग्युम्लीम आ ग्युंवे पशो दारशो वा प्रेने चाप्नीमी डा? तन्न आं मुरपुकीम दा आं कली शुश नाकती रे प्रेंताक्यीमी।

33 गे दाकमुतीक मालशा गाकचा कली शुश जोकब बाक्नेवे? मिनु गे परमप्रभु यावे आ अरेशो लोत्र मटीब मीश मुर अरु लां शेंशा गाक्पाइकतीवी।

34 इ फेकशो वाम दोस मताइब नु पुडग आन हुश लुम्सीशो बाकब। मिनु गेमी मेको आन कली खिं प्रोल्शा खिं ओव्रशो मथिदी। मेको मोदेंशो नेल्ल दुम्ना दुम्न यो, येरमीया २६:२०-२३; प्रस्थान २३:७

35 गे 'गो दोस मताइब बाक्नुड। मेको थमा पा गो नु मगाइकब' देंनेवे। मारदे हना गेमी 'गो पाप मपड' देंतीके गो इ कली निसाफ पाइनुड। यसैया ४३:२५-२६

36 गे इ गाक्तीक लां फाइकना फाइकन एर ओंथ पाइक्नेवे? दोपा अस्सुरम इ कली मुने दोकपदा। मोपान इजीप्तमी यो इ मुने तोकब। २राजा २२:३३-३५; यसैया ३०:३

37 गे मेकेर रे यो हिंचा डा पा प्रोकचा माल्नेवे। मारदे हना परमप्रभु यावेमी थमा सुइकचा कली योव्रशो आन कली आ नेक्था मजाकचा डा पा तिल्लु। मेको आन वारच पतीके इ कली शोर गाकशो बाकब" दे परमप्रभुम देंत।

### 3

#### नाता खोइश्शो

1 मिनु परमप्रभु यावेमी "वोंइश मुरुमी आ मीश कली प्रॉइशा, छोड पत्र गेपु हना, मेको मीश मुर अर्को वोंइश मुर आ मीश दुम्त हना, मेको वोंइश मुरुम लेंशा आ मीश कली चाक्बा को? मो दुम्त हना मेको रागी ग्रॉग्रा दिशो मदुम्बा डा? गे चहिं तेल्लेम का खोदेशो पा शुश आन बाकतीके जाकदीश्शो बाक्ते। मिनु मार, गे आं गे लेशशा जाक्नेवे?" दे परमप्रभु यावेमी देंत। ब्यवस्था २४:१-४

2 परमप्रभु यावेम "इर कोव्रडो। गोरशो डांडा मेर कोव्रडो। गे सु नु मइमे? गे मुर मबाकतीके अराब खोदेशो पा लांमी बाकशा, गे नु इप्ब मुर आन कली रिम्ना रिम्न बाक्ते। गे इ तेल्लेम पतीके नु आं अरेशो मटितीकेम मेको रागी ग्रॉग्रा दिशो सेल्टीवी। होसे ४:१३

3 मोपतीके रेउ मयिशो बाक्त। मिनु बर्खा डा रेउ मयी। मो हना यो गे मुने मपाइश्शो बाक्नेवे। गे इ मुनेम लल मजिनेवे। येरमीया ३:१९; येरमीया ३१:९; यसैया ६३:१६

4 मार, गे मुल नक आं कली 'आं आफ, आं ठिटी रे डा वारच, देंते।

5 मार, मेको गेना हना यो गाइक्स डा गाइक्स बाक्बा डा? मार, इन गाइकचा गेना हना यो बाक्बा डा? दे आं कली ब्रेत्ते। मिनु गे ओदेंशो लोत्र पाइनेवे। तन्न मार मरिम्शो बाक्मे, मेको नेल्ल पाप्तीवी" दे परमप्रभु यावेमी देंत।

#### थमा मसुइकब इस्राएली

6 योसीयाहम सासन पची ना परमप्रभु यावेमी आं कली "थमा सुइक्ने मचापब इस्राएलम मार, पवा, मतवी? मेकोमी डांडा नेल्ल डोइश्शा, गिगी रवा नेल्ल आन पुंम तेल्लेम पाप्तु। येरमीया २:२०

7 मेकोमी मोदेशो नेल्ल पा आं गे लेप्ब, दे मिम्ताक्ड। तन्न मेको मले। मिनु मेको नेल्ले जोल पाइब आ लोकब यहूदाम ताप्तु। २कोरिन्थी ७:८-९; इजीकीएल २३:२,४१

8 मेको थमा सुइक्ने मचाप्ब इस्राएल कली आ शुश तेल्लेम पतीके, गो छोट पत्र गेशा, सोइक्ताक्ड, दे तुइशशो बाक्त। मो हना यो आ लोकब देखु पशो यहूदामी मेको तशा महिंथु। मेकोमी यो तेल्लेम पाप्तु।

9 इस्राएलमी आ तेल्लेम पतीके थम आइक्च मिम्ताक्व। मेकोमी फुल्लु नु रवापुकी नु यो लशा तेल्लेम पा रागी ग्रान्रा दिशो सेल्लु।

10 मेको नेल्ल दुम्त हना यो, मेको आ लोकब देखु पशो यहूदा आ थुं नेल्लेमी आं गे मले। आं गे लेशशो खोदेशो ला पखु पाप्तु” दे परमप्रभु यावेम देंत।

11 मिनु नोले परमप्रभु यावेमी आं कली “थमा सुइक्ने मचाप्ब इस्राएल, जोल पा मरिम्शो पाइब यहूदा क्येडा ठीक पाइब दुम्त।

12 ‘गे लावो। मिनु एको लोत्र उत्तर गे शेंदीमी। थमा सुइक्ने मचाप्ब इस्राएल, परमप्रभु यावेम लेतो। गो इ कली तशा मगाइक्नुड। मारदे हना गो शिशी पाइब नड। गो गेना हना यो मगाइक्नुड’। प्रस्थान ३४:६;

13 गे ‘गो पापी नड। गो आं परमप्रभु यावे कली काइ मटीब दुम्ती। मिनु गिगी रवा नेल्ल आन पुंमी अरु देवी देवता आन कली दाक्ताक्ड’ देंते। मिनु आं देशो मटिवी। इ पाप शोवडो, दे मतो” देंत।

14 मिनु परमप्रभु यावेम मेको आन कली “लेतीन। थमा सुइक्ने मचाप्ब आलपुकी लेतीन। मारदे हना गो इन होव्रप नड। गो सहर रे मुर का कली नु खिं रे मुर निक्शी आस कली योव्रनुडमी। मिनु इन कली सियोनम चाक्नन्नी। यसैया ६:१३

15 मिनु गो इन कली आं थुं नु गारब गोठलापुकी गेनुड। मिनु मेको जोक्ब नु रुप्व दुम्शा, इन कली थुल्लनीम। येरमीया २३:३-४; यसैया ४४:२८; इजीकीएल ३४:२३

16 गे रागीम सोशा बोशा शुश दुम्तीनी हना, मुरपुकीम गेनायो ‘परमप्रभु यावे आ कबल पशो सन्दोस’ मदेनीम” देंत। मिनु परमप्रभु यावेम “मेकोपुकीमी मेको कली ममिन्नीम। मेको कली सुइमी ममाल्लीम। मेको खोदेशो लेंशा अर्को यो मसेल्लनीम। गन्ती १०:३३-३६; २राजा २५:८-९; हिब्रू ४:१४-१६

17 मेना यरूसलेम कली ‘परमप्रभु यावे आ ठेयब निल्लेके’ देंनीम। मिनु रागी रागी डा मुर नेल्ल मेकेर देल्लनीम। मुर नेल्ल परमप्रभु यावे आ नेक्था यरूसलेमम देल्लनीम। मेना रे आन थुं डा मरिम्शो लोव्र मपाइनीम। प्रस्थान १७:१६; यसैया २:२-४; मती ४:२

18 मेको नाक्ती यहूदा आ खिं डा मुर, इस्राएल आ खिं डा मुरपुकी नु गारनीम। मिनु मेकोपुकी कालेम उत्तर रे पा इन किकी पिपी आन कली गेशो रागीम जाक्नीम। यसैया १:१-१३

19 मिनु गो इन कली आंम आल आन दातेमी बाक्चा गेनुड। गो इन कली रिम्शो रागी का गेनुड। मेको रागी नेल्ल आन दाते डा नेल्ल क्येडा दारशो रिम्शो रागी बाक्ब। मिनु गे आं कली ‘आं आफ’ देंनीनी। गे नोले मशोइक्ब दुम्तीनी, दे मिम्ताक्ड। ब्यवस्था ७:६; ब्यवस्था ३२:६; ब्यवस्था ८:७; येरमीया ३:४

20 तन्न दोपा थमा सुइक्ने मचाप्ब मीश मुरुम आ वोंइश कली प्रोंइबा, मोपा गे थमा सुइक्ने मचाप्ब, इस्राएल, गे आं कली प्रोंइती” दे परमप्रभु यावेम देंत।

21 गोरशो डांडाम वाइ ब्रेशशो सेंदा का नेंसीब। मेको इस्राएल आ आल आन शुश डाक्शो सेंदा बाक्ब। मारदे हना मेकोपुकी दूली लांम गाक्शो बाक्तेक्म। मेकोपुकीमी परमप्रभु यावे, आन परमप्रभु कली प्रेंशो बाक्तेक्म। येरमीया ३:२

22 मिनु मेकोमी “थमा सुइक्ने मचाप्ब आलपुकी लेतीन। इन थमा सुइक्ने मचाप्तीके सापाइक्नन्नी” देंत। मिनु मेकोपुकीमी “दुम्ब, गो इन गे लेशशा, जाक्नीकी। मारदे हना गे परमप्रभु यावे, आंइ परमप्रभु बाक्नीनी।

23 थमा पा, पहाड डा देवी देवता आन थान जोल बाक्नीम। डांडा मेर ठेयब चाड सेल्लेके नेल्ल जोल बाक्नीम। थमा पा परमप्रभु यावे, आंइ परमप्रभु इस्राएल कली पाप रे प्रोंइब बाक्ब।



24 गोपुकी आंइ ठिटा ठिटी रेन मेको मुने तोक्ब गेयमी आंइ किकी पिपी रे श्येत पा गेय पशो नेल्ल नेक्तु। मेको आन क्यारश भेडा, आन बी ब्यफ नु आन तमी तौ आन कली नेक्तु।

25 मुल गो इं मुनेम गुम्य। मिनु इं दोस ततीकेमी इं कली सुमल। मारदे हना गो परमप्रभु यावे, इं परमप्रभु कली पाप पाइतय। इं किकी पिपी नु गो इं ठिटा ठिटी रेन मुल सम्म परमप्रभु यावे, इं परमप्रभु आ देशो मटिशो बाक्तय” देंतेक्म। येरमीया १४:७,२०

## 4

### परमप्रभुमी इस्राएल कली ब्रेशो

1 परमप्रभु यावेम “गे इस्राएलीपुकी, आं गे लेशशा जाक्तीनी हना, गेपुकीम इन ग्रांग्रा दिशो थोत्रक आं डोंइती रे ताइक्ताक्नी हना, गेपुकी हेंथे मगाक्ब दुम्नीनी।

2 कसम जची ना गेपुकीम “परमप्रभु यावे ब्रोंइशा बाक्शो खोदेशो पा” दे कसम जाइतीनी हना, गे थमा लोत्र पा, ठीक निसाफ पाइब नु रिम्शो थुं पाइब मुर दुम्तीनी हना, रागी रागी डा मुर परमप्रभु आ नें थिशा आसीक पमुइनीम। मिनु मेकोपुकी आ आल दुम्तीके ग्येरसीनीम” देंत। ब्यवस्था १०:२०; यसैया ६५:१६

3 मिनु परमप्रभु यावेमी यहूदा डा मुर नु यरूसलेमम बाक्ब आन कली “इन कोक्त रूमी डल्ला थोक्तीन। चू आन दातेमी मशोक्कीन। इजीकीएल १०:१२

4 परमप्रभु यावे आ परबम खोइक्तीक चिनु खोंइसीन। तन्न इन थुंम खोइक्तीक चिनु खोंइसीन। गे यहूदा डा मुरपुकी नु यरूसलेममी बाक्ब वोंइशमुरपुकी, मो मपाइतीनी हना, इन मरिम्शो पतीके आं गाइक्चा मी खोदेशो पा ब्रशा यूब। मिनु सुडम काप्ने मचाप्चा डा पा मेकोमी जेप्ब” देंत। येरमीया ९:२५; ब्यवस्था १०:१६; रोमी २:२९; कलस्सी २:११; येरमीया ६:७,१०

### उत्तर रे श्येत जाक्शो

5 परमप्रभु यावेमी “यहूदामी शेंदीन। मिनु यरूसलेमम उरदी पने। गे रागी नेल्लेमी तुराही तपीन। टेयब सेंदा पा ‘नेल्ल गुम्य। मिनु गो टेयब गारो हिरशो सहरमी प्रोक्य’

6 सियोन गे लचा कली छेदर क्युककीन। ब्रोंइचा आ परबम देश मपथु रीब पा प्रोक्शा लने। मारदे हना गो उत्तर रे टेयब श्येत नु खतम दुम्तीके चाक्नुड। येरमीया १:१४

7 गुप्स का आ पुक्सी रे यूशा, जाक्शो बाक्ब। रागी रागी कली खतम पोक्ब का यूब। मेको आ बाक्तीक रे यूशा, इन रागी कली मुर मबाक्तीके सेल्ब। इन सहर डा खिं नेल्ल ब्रेलीम। मेकेर मुर बाक्ने मचाप्नीम। येरमीया २:१५; येरमीया ५:६; येरमीया २५:३८; येरमीया ४९:१९; येरमीया ५०:४४

8 मोपतीके अरन्डी फेक्शा रोंका पने। मिनु डाक्कीन” देंत। मारदे हना परमप्रभु यावे आ हिंचा डा पा गाइशो इं रे मयाक्सीशो बाक्ब। येरमीया ६:२६

9 मिनु परमप्रभु यावेम “मेको नाक्ती पिप नु हुकुम पाइब नेल्ल आन थुं लुकच लाइब। चढेबपुकी हिंशा ग्येत्य लुकच दुम्नीम। मिनु परमप्रभु यावे आ लोत्र पाइबपुकी ग्रीचोक पा हिंनीम” देंत।

10 मिनु गो “परमप्रभु, ए परमप्रभु यावे, गो आंइ शुरमी तरवार जाक्मेनु यो, गे ‘इन थुं नाइशशा बाक्कीन’ दे गे एको मुर नु यरूसलेम कली मरिम्शो पा जोल पाइशो बाक्तीनी” देंती। येरमीया ६:१४

11 परमप्रभुमी “मेना मार लोत्र पाइनीम देशा हना ‘एको मुर नु यरूसलेम कली गोरशो रागी डा डांडा रे होश फश आं पुडग मुर आन बाक्तीक जाक्ब। तन्न मेको फशेम क्राप्चा यो मदुम्ब, हारचा यो मदुम्ब।

12 मेको फशेम मेको पने मचाप्ब। मारदे हना मेको शुश बोल्यो फश गिवार बाक्ब। मिनु गो मेको आन कली निसाफ पतीक लोत्र पाइनुडमी।

13 कोत्रडीन, मेको गोस्स खोदेशो पा गाक्शो बाक्ब। मेको आ बग्गी फश गिवार खोदेशो पा जाक्नीम। मेको आ शारा ककाकुली आन क्येडा रीब पा दोरनीम। आबी, गो खतम दुम्तय’ दे लोत्र पाइनीमी” देंत।

14 मिनु परमप्रभु यावेम “ए यरूसलेम, गे पाप रे ब्रोंइचा तचा कली इ थुं इ परमप्रभु यावे कली मटितीके रे चिक्सो। गेना सम्म इ मरिम्शो मिम्तीक इ थुंम बाक्चा गेनेवे? येरमीया ६:८; यसैया १:१४

15 दान रे सेंदा कामी 'एफ्राइम डांडा रे खतम दुम्तीके जाकब'।

16 रागी रागी डा मुर आन कली एको लोत्र पावो। एक जाकतेकम। यरूसलेम कली डोन रागी रे सहर पुम्चा कली लडाइ पाइब जाकशो बाकनीम। मिनु यहूदा डा सहर आन पबर्म लडाइ पा ग्रीनीमी।

17 मेकोपुकी रू खाल पाइकबपुकी खोदेशो पा, एर ओथ नेल्ल हिरशा बाकशो बाकनीम। मारदे हना मेकेर डा मुरपुकी आं कली काइ मटीब बाकनीम" दे परमप्रभु यावेमी देंत। येरमीया १:१५; येरमीया ६:३

18 मिनु परमप्रभु यावेमी "इ दूली लां गाकतीके नु इ पतीके इ कली मोदेशो दुम्शो बाकत। इ सजाइ मेकोन बाकब। मेको शुश कशो बाकब। मिनु मेकोमी इ थुं खाइकपाइकतु" देंत।

19 मिनु गो हिंती, हिंती। गो श्येत जशा हुकयी पाइनुड। आं लुडगीर खाइशशा, तुक तुक पापुतु। गो सिक्सी पा बाकने मचापुनुड। मारदे हना गो तुराही ताप्शो नेंता। मेको लडाइ डा रेयके बाकब।

20 खतम दुम्तीक तार खतम दुम्तीक जाकब। रागी नेल्ल मुर मबाकतीक दुम्त। आं ताम्बु नु फारतीक वा नेल्ल याम काम खतम दुम्तेकम।

21 गो गेना सम्म लडाइ डा छेदर तचा माल्नुडा? मिनु गेना सम्म तुराही ताप्शो नेंचा माल्नुडा?

22 आं मुर मूर्ख बाकनीम। मेकोपुकीमी आं कली मतुइकनीम। मेको निप्स मपाइशशा आल बाकनीम। मेको आन के रूप्तीक मबाकब। मेको मरिम्शो पचा कली जोकब बाकनीम। तन्न रिम्शो पस मजोक्नीम। यसैया २७:११

23 मिनु "गो रागी कली कोव्रता। मेको मारेइ मबा। मिनु मेकेर नेल्ल श्येतथ बाकत। मिनु सरीड गे कोव्रडुनु, मेकेर मारेइ छेडछेड मबाकम। उत्पत्ती १:२

24 मिनु गो डांडा आन कली कोव्रडुनु, मेकोपुकी खिखि पशो बाकतेकम। पहाड नेल्ल एर ओथ हिम्सीशो बाकतेकम।

25 मिनु गो कोव्रडुनु, सुइ मबाकशो बाकत। सरीड डा चिकब नेल्ल बेरशा प्रोक्ने थुम्शो बाकतेकम।

26 मिनु कोव्रडुनु, रिम्शो खप बाकशो रू नेल्ल गोरशो रागी दुम्तेकम। मिनु मेकेर डा सहर नेल्ल ब्रेशो बाकतेकम। मोदेशो पा परमप्रभु यावेमी आ शुश गाइकतीकेमी पापुतु" देंती।

27 मिनु परमप्रभु यावेम मार, देंत देंशा हना "रागी नेल्ल मुर मबाकतीके दुम्त हना यो, गो मेको नेल्ल मक्याम्नुडमी। येरमीया ५:१८; येरमीया १०:२४; येरमीया १८:३-८; आमोस ९:८

28 मोपतीके रागीम रोंका पचा माल्ब। मिनु सरीड छिडछिड दुम्चा माल्ब। मारदे हना गो लोत्र पाता। गो डोंइती मिम्ताकड। आं थुं मलेपब। आं थुं महिरब।

29 शारा डोइकबपुकी नु लिब्रा आप्ब आन सेंदा नेंशा, सहर नेल्ल डा मुरपुकी प्रोक्शो बाकनीम। मिनु मेको ब्वाकीम प्रोक्शा खुइकनीम। का निक्शी फुल्लु तार डोइशशा लाइनीम। सहर नेल्ल प्रोंइशो बाकनीम। मेकेर सुइ मबाकनीम।

30 गे गोरशो सेल्चा पुंइसीशो रागी मार, पना पन बाकडे? गे लल वाम ग्योम्सीशा, सुन के गहना पांइसीशा, आंम कली ग्योम्सीशा आ अर्थ मार, बाकबा? गे मारदे गाजल खेकसीशा इ मिक्च ठेयब सेल्नेवे? आंम कली दारशो सेल्चा मोशान बाकब। इ कली दाकब मुरपुकीम इ कली ग्रांगा दिशशो बाकनीम। इ कली साइक्या माल्शो बाकनीम।

31 गो सुत्केरी रोइ पशो मीश मुर आ सेंदा खोदेशो नेंता। मेको डोंइती डा आल थिचा चिकशो मीश मुर आ सेंदा खोदेशो बाकत। सियोन आ तमीमी आ गुइ दिंशा आ सास कीशा 'आबी, आं कली साइकब आन डोंइती थाइनुड' देंत" दे परमप्रभु देंत।

## 5

### मुर का यो रिम्शो मबाकनीम देशो

1 परमप्रभुमी "यरूसलेम डा लां आ एर ओथ कोव्रशा गाकको। नेल्ल कोव्रशा इ तशो नेल्ल ब्रेकतो। आ लाडगा मेर माल्शा कोव्रडो। मिनु मेकेर ठीक गेय पाइब नु थमा लोत्र माल्ब मुर का यो थित्तीवी हना, गो यरूसलेम कली माफ गेनुड। उत्पत्ती १८:२२-३२

2 मेकोपुकीमी 'परमप्रभु यावे ब्रोंडशा बाक्शो खोदेशो पा' दे कसम जाइनीम। मो हना यो मेकोपुकीमी जोल लोत्र पाइनीम" देंत। येरमीया ४:२

3 मिनु "परमप्रभु यावे, गे थमा लोत्र तचा ममाल्नीनी डा? गे मेको आन कली तुप्तीनी। तन्न मेकोपुकी मखाइक्म। गे मेको आन कली खतम सेल्टीनी। तन्न मेकोपुकीमी इन देशो पचा मबिल्टीम। मेकोपुकीमी आन कुल फुल्लु क्येडा यो खकटा सेल्टेक्म। मेकोपुकी लेशशा जाक्ने मबिस्सम। येरमीया २:३०; येरमीया७:२८; येरमीया ९:२; यसैया ४८:४

4 मेकोपुकी दा प्रुडग ला बाक्नीम। मेकोपुकी मूर्ख बाक्नीम। मारदे हना मेकोपुकीम परमप्रभु यावे आ लां मतुइक्नीम। आन परमप्रभु आ अरेशो मतुइक्नीम।

5 गो शुश क्येट थीब मुर आन बाक्तीके लशा, मेको आन कली लोत्र पाइनुड। मेकोपुकीम थमा पा परमप्रभु यावे आ लां, आन परमप्रभु आ अरेशो यो तुइक्नीम" देंती। तन्न मेकोपुकी खाल का डा दुम्शा, जुवा जिक्शो बाक्तेक्म। मिनु डोरी यो प्रोइशो बाक्तेक्म। येरमीया २:२०

6 मोपतीके परमप्रभुमी "ब्वाकी डा गुप्स कामी मेको आन कली ग्राम्शा साइक्ब। गोरशो रागी डा फर कामी मेको आन कली खतम सेल्व। जोइ का मेको आन सहर कोत्रना कोत्रन बाक्शो बाक्ब। सु मेकेर रे यूबा, मेकोमी मेको कली क्राइशशा चोकटा लाम्टा सेल्व। मारदे हना मेकोपुकी शुश हेथे गाक्ब बाक्नीम। मेको आन मटितीके ठेयब बाक्ब" देंत। येरमीया ४:७

7 मिनु परमप्रभु यावेम "गो इन कली दोपा माफ गेने चाप्नुडा डा? इन आलपुकीम आं कली प्रोइतेक्म। मिनु परमप्रभु आ नैम ममाइ, अर्को देवी देवता आन नैमी कसम जाम्तेक्म। गो मेको आन माल्शो नेल्ल खाप्ता हना यो, मेकोपुकीम तेल्लेम पाम्तेक्म। मिनु तेल्लेम आन खिमं क्राक्थ्री चोक्थ्री दुम्तेक्म।

8 मेकोपुकी थाम्पा दोम्शो, गेय मपाइब शारा खोदेशो बाक्नीम। मेको आंम नेक्था डा मुर आन मीश आन परबंम ग्रीनीम। इजीकीएल २२:११

9 मार, गो एको आ परबंम मेको आन कली सजाइ मगेनुडमी डा? मार, गो ओदेशो रागी डा मुर आन कली क्येक्क मलेत्नुडमी?" दे परमप्रभु यावेम देंत। येरमीया ५:२९; येरमीया ९:८

10 परमप्रभु यावेम आं कली "गे मेको आन अडगुर बोट दिम्शा ताइशशा पावो। तन्न नेल्ल श्येत्थ मपोक्को। मेको आ राशी इत्तो। मारदे हना मेको परमप्रभु यावे आ मुर मनम।

11 मारदे हना इस्राएल नु यहूदा डा मुरपुकीम थमा पा प्रोइतीमी" देंत।

12 मेकोपुकीमी परमप्रभु यावे आ परबंम "मेको मतुइक्नीकी। मेकोमी मारेइ मपाइब। गो मारेइ मरिम्शो मताइनीक। गो लडाइ नु अन्काल मताइनीक।

13 परमप्रभु यावे आ लोत्र पाइबपुकी फश बाक्नीम। मारदे हना परमप्रभु यावे आ लोत्र मेकोपुकी नु मबा। तन्न मेको लोत्र मेको मो देंब आन कली दुम्ब" देंतेक्म।

14 मोपतीके परमप्रभु यावे, मुर नेल्ल आन परमप्रभुमी मार देंत देशा हना "मेकोपुकीमी मोदेशो लोत्र पतीके, गो आं लोत्र इ शोत्रम मी खोदेशो सेल्लुड। मेको मुर आन कली शी सेल्लुड। मिनु मेको मीम नेल्ल आन कली दाक्ब सेल्लुडमी।

15 ए इस्राएल, इन कली खतम सेल्ला कली डोन रागी डा मुर चाक्नुड। मेको रागी डा मुरपुकी शुश बोल पाइशो बाक्नीम। आन रागी साइ डोंइती डा बाक्ब। गे मेको मुर आन लोत्र मतुइक्नीनी। आन ब्वाक्शो मरुप्नीनी। येरमीया ६:२२; यसैया २८:१

16 मेको आन ब्रा कुरतीके रोकशो तुरस खोदेशो बाक्नीम। मेको मुर नेल्ल थम सक्ति पाइशो लडाइ पाइब बाक्नीम।

17 मेकोपुकीमी इन खुप्शो अन्न नु जचा थोत्रक नेल्ल नेक्नीम। मिनु इन तमी तौ नेल्ल आन कली यो लाइक्नीम। मेकोपुकीमी इन क्यारश भेडा नु बी ब्यफ नेल्ल नेक्नीम। मेकोपुकीमी इन अडगुर नु फोत्रशी नेल्ल नेक्नीम। मिनु इन थमा सुइशो बोल्यो गारो हिरशो सहर नेल्ल तरवारम क्याम्नीम।

18 मो हना यो, गो मेको नाक्ती इन कली नेल्ल मसाइक्पाइक्नुड। येरमीया ४:२७

19 मिनु इन मुरपुकीम 'मारदे इं परमप्रभु यावे, इं परमप्रभुमी इं कली ओदेशो पवा?' दे हिलो पाम्तेकम हना, गे मेको आन कली 'गेपुकीम दोपा आं कली प्रोंइशा, आंम रागीम अरु देवी देवता आन कली पूजा पनी, मोपा मुल गेपुकीम इन मतुइइशो रागीम अर्को रागी डा मुर आन गेय पाइनीनी' देशो बाकब माइकमी। येरमीया १६:१०-१४

20 याकूब आ मुर आन कली एको लोत्र माइकमी। यहूदामी एको लोत्र ठेयब सेंदा पा नेल्ल आन कली नेंपाइकमी। यसैया ६:९-१०; मत्ती ८:१८

21 गे मूर्ख नु मिम्तीक मपाइइशो मुरपुकी, एको लोत्र नेनीन। इन मिक्की बाकब, तन्न मताइनीनी। इन नोफा बाकब, तन्न मनेनीनी।

22 मार, गे आं कली मान पा हिंचा ममाल्नीनी डा? गे आं डोंइती खिंखि मपाइनीनी? गो समुन्द्र आ सांद कली बाल्वा वोइक्ता। आ छाल बोक्तेकम हना यो, मेको कली खाक्ने मचाप्नीम। मेकोपुकी शुश बोल पाम्तेकम हना यो, मेको कली लाक्ने मचाप्नीम। ठेयब रेयके पाम्तेकम हना यो, लाक्ने मचाप्नीम। बजन संग्रह १०४:९

23 तन्न मेको मुर आन थुं खकटा नु काइ मटीब बाकब। मेकोपुकी हिरशा लाम्तेकम।

24 मेकोपुकीमी 'गेपुकी परमप्रभु यावे, इं परमप्रभु कली मान पा हिंय। मेकोमी माल्ची ना रेउ गेब। मेकोम बर्खा नु हिंडड डा रेउ गेब। मिनु अन्न रिक्शा खुप्ची ना डा नाक्ती गेब' मदेंम" देंत। ब्यवस्था ११:१४

25 परमप्रभु यावेमी "इन मरिम्शो पशोम एको नेल्ल मरिम्शो दुम्त। इन पाप आ पर्वम गे मेको रिम्शो मताइनीनी। यसैया ५९:२

26 आं मुर आन दातेमी मरिम्शो पाइब मुर बाक्नीम। मेकोपुकी चिक्ब साइक्ब मुर खोदेशो पा, बाप्शा बाक्शो बाक्नीम। मेकोपुकीम मुर आन कली ग्याइक्चा कली ब्वारद दाइक्नीम।

27 चिक्बीम ब्रीशो ओगील खोदेशो पा, मेको आन खिं खुइ पशो थोत्रकम ब्रीशो बाकब। मोपतीके मेको ठेयब मुर नु शुश क्येट थीब दुम्तेकम।

28 मेकोपुकी दोम्शा लल जिशो नु शोंप पाइइशो दुम्शो बाक्नीम। मेको आन परमप्रभु यावे आ अरेशो मटितीके कली तेक्तीक मारेइ मबाकब। मेकोपुकीम रोम रोइक्च आन कली रिम्शो दुम्ल, दे मेको आन कली ठीक निसाफ मगेनीम। मेकोपुकीमी क्येट मथीब आन कली वारच पा ठीक निसाफ मपाइनीम। प्रस्थान २२:२१; यसैया १:१७

29 मार, एको आ पर्वम, गो मेको आन कली सजाइ मगेनुडमी? मिनु गो एको रागी डा मुर आन कली क्येक्क मलेत्नुडमी?" दे परमप्रभु यावेमी देंत। येरमीया ५:९

30 मिनु परमप्रभु यावेम "एको रागीम ग्रान्ना दिचा डा नु शुश हिंचा डा श्येत दुम्त।

31 परमप्रभु यावे आ लोत्र पाइबपुकीम जोल पा लोत्र पाइनीम। दोपा परमप्रभु यावे आ लोत्र पाइबपुकीम जोल पा लोत्र पाइनीमी, मोपा चढ़ेबपुकीम मुर आन कली हुकुम पाइनीम। मिनु आं मुरपुकी चहिं मोदेशोन दुम्चा दाक्नीम। तन्न नोले डा नाक्ती मार, पाइनीनी?" देंत। इजीकीएल १३:६

## 6

### यरूसलेम कली पुम्शो

1 परमप्रभु यावेमी "बेन्यामीन आ आलपुकी ब्रोंइशा बाक्चा कली यरूसलेम रे प्रोक्कीन। तेकोहा सहरमी तुराही ताप्पीन। बेथ-हक्केरेम तार चिन्ड कोंइशा वोतीन। मारदे हना उत्तर रे मरिम्शो पतीक नु खतम दुम्तीके यिशो बाकब। आमोस १:१; येरमीया १:१४

2 सियोन सहर दारशो योवतीके खोदेशो बाकब। तन्न सियोन आ तमी क्याम्चा पुंडसीब।

3 गोठला आन हुल सुन्दा मेको नु लडाइ पचा कली जाक्नीम। मेकोपुकीमी आन ताम्बु आ एर ओंथ कीनीम। मिनु नेल्लेम मेको आन हुल योव्रशा खतम सेल्नीम" देशो बाकब। येरमीया ४:१७

4 मिनु मेकोपुकीम “मेको नु लडाइ पचा कली ठीक दुमीन। बोक्कीन। गोपुकीम नाक्त उडक्थ दुम्मेनु, मेको कली लडाइ तोय। नाक्ती लाक्ना लाक्न बाक्ब। नाक्दो डा वांकु लाइश्शो दुम्ना दुम्न बाक्ब।

5 बोक्कीन। गो नाक्दो मेको कली लडाइ तोय। मिनु मेको आ दरवार प्रेय्य” देंनीम।

6 मुर नेल्ल आन परमप्रभु यावेम “मेको आ रवापुकी क्योरशा तिमीन। मिनु यरूसलेम डा गारो डोइक्तीक सेलीन। मेको सहर कली सजाइ गेचा माल्ब। मेको सहर मरिम्शो पतीकेम ब्रीशो बाक्ब।

7 इनारम दोपा आ ब्वाक्कु बारपाइक्बा, मोपा मेकोमी आ परमप्रभु यावे आ अरेशो मटितीके बारपाइक्ब। मेको आ आगाम काइ मरिम्शो पतीक नु मारेइ मारेइ खतम पोक्तीक आ पर्बम लोत्र नेंसीब। मेको आ रोइ नु आ सेल्शो गार गेना हना यो आं डोंइती बाक्नीम।

8 गे यरूसलेम, एको इ कली अरेशो मपाप्तीवी हना, गो इ कली तशा ग्रॉग्रा दिशा प्रॉइनुड। गो इ कली गोरशो नु मुर मबाक्शो सेल्लुड” देंत।

9 मुर नेल्ल आन परमप्रभु यावेमी मार देंत, देशा हना “गे अडगुर रिम्शो पा सिला पशो खोदेशो पा इस्राएल डा लीशो मुर आन कली सिला पने। अडगुर सेक्ब मुर खोदेशो पा राशी ग्याइश्शा, फल सिला पने।

10 गो सु कली लोत्र पा हिंच कोंइदु? आं लोत्र सुम नेंबा? मेकोपुकीम नेंने मचाप्नीम। मेको आन नोफा सुशो बाक्नीम। परमप्रभु यावे आ लोत्र आ पर्बम गाइक्नीम। मेको नेंचा मदाक्नीम” देंत। येरमीया ४:४; प्रेरित ७:५१

11 तन्न गो परमप्रभु यावे आ गाइक्तीकेम ब्रीशो बाक्नुड। गो मेको हेरा तेक्ने मचाप्नुड। मिनु मेकोमी “मेको लां मेर गाक्ब आल आन तार मोतो। बुक्शा बाक्शो ठिटा आन तार मोतो। मीश वोंइश निम्फा लाइक्चा पुंडसीनीस। खाल्पा नु खूशो लाइक्चा पुंडसीनीम।

12 मारदे हना गो आं गुइ मेको रागीम बाक्ब आन तार दिनुड, मेको आन खिं अर्को आन के दुम्नीम। आन रू नु आन मीश यो अरु आन के दुम्नीम” दे परमप्रभु यावेम देंत।

13 परमप्रभु यावेमी “नेल्ल क्येडा आइक्च मुर रे नेल्ल क्येडा ठेयब सम्म ठीक पा मचेम्शो क्येट तचा कली शिम दुम्शो बाक्नीम। परमप्रभु यावे आ लोत्र पाइब रे चढ़ेब सम्म नेल्ल जोल पाइब दुम्शो बाक्नीम। येरमीया ८:१०-१२; इजीकीएल १३:१०-१६; १थिस्सलोनिकी ५:३

14 मेकोपुकीमी आं मुर आन कली ममिम्थु, आन गार सापाइक्खु पशो बाक्नीम। मेकोपुकीमी थुं नाइक्तीक मबाक्त हना यो ‘नांइसीन, नांइसीन’ देंनीम।

15 मेकोपुकीमी मुने दोक्चा डा गेय पाम्तेक्म। ग्रॉग्रा दिशो गेय पाम्तेक्म। तन्न मेकोपुकी मुने मदोक्म। मुनेम लल जिचा देशो मार, बाक्बा, दे मतुइक्तेम। मोपतीके साइक्चा पुंडसीशो आन दातेमी साइक्चा पुंडसीनीम। गो मेको आन कली सजाइ गेडानु, मेको खतम दुम्नीम” दे परमप्रभु यावेमी देंत।

16 मिनु परमप्रभु यावेम मार, देंत देशा हना “लां ब्रातीकेम राष्शा कोत्रडीन। माइत लां आ पर्बम हिल्लो पने। मेको रिम्शो लां ते बाक्बा, दे हिल्लो पने। मिनु मेको लांमीन गाक्कीन। मिनु इन थुं नाइक्चा ताइनीनी। तन्न मेकोपुकीम ‘गो मेक मगाक्नीकी’ देंनीम। मत्ती ११:२९

17 गो इन कली खाल पाइबपुकी योत्रतामी। मिनु गो इन कली ‘तुराही ताप्शो नोफा दाइश्शा नेनीन’ देंती। तन्न मेकोपुकीम ‘गो मनेनीकी’ देंतेक्म।

18 मोपतीके गे रागी रागी डा मुर नेनीन। बुक्तीक डा मुर नेल्लेमी मेको आन कली मार, दुम्बा, दे तुइक्तीन।

19 रागी नेल्ल नेनीन। गो एको मुर आन कली ठेयब श्येत चाक्नुड। मेको श्येत आन पशो आ पा डा बाक्ब। मारदे हना मेकोपुकीमी आं पचा देशो लोत्र मपामे। मिनु आं शेंशो लोत्र काइ मटीम। यसैया १:२

20 गो शेबा रे चाक्शो धूप ममाल्लुड। डोन रागी रे चाक्शो बिक्च यो ममाल्लुड। गो इन चोशा चढ़ेशो मब्राइनुड। गो इन क्योरशा चढ़ेशोम मग्येरनुड” देंत। भजन संग्रह ४०:७; यसैया १:११-१५

21 मोपतीके परमप्रभु यावेम मार, दैत दैशा हना “कोवडीन, गो एको मुर आन डोंइती दाइल पाइक्तीके थोवक वोइक्नुड। मिनु आम आफ, आलपुकी कालेम नु आन नेक्था डा मुर नु आन वारच कालेम खतम दुम्नीम” दैत।

22 परमप्रभु यावेमी “कोवडीन, उत्तर डा रागी रे हुल का मुर जाक्नीम। रागी आ सुर रे ठेयब रागी डा मुर बारशा जाक्नीम। येरमीया ५:१५; ब्यवस्था २८:४९

23 मेकोपुकी लिब्रा नु तरवार शेशा ठीक दुम्शो बाक्नीम। मेकोपुकी मरिम्शो पाइब नु काइ शिशो मपाइब बाक्नीम। आन रेयके समुन्द्र ग्रीशो खोदेशो बाक्ब। मेकोपुकी शारा डोइशशा सियोन आ तमी, इ कली लडाइ तोचा कली ठीक दुम्शो बाक्नीम” दैत। येरमीया ५०:४२

24 गोपुकीम मेको आन परबम मारेइ मारेइ लोव नैतक। मिनु आंइ गुइ खोइली योक्त। गो शुश हितक। गो सुत्केरी रोइ पशो मीश मुर खोदेशो दुम्तक।

25 “रू मेर मलने। लां मेर मगाक्कीन। मारदे हना इन जोरी सत्रु आन गुइमी तरवार बाक्ब। मिनु एर ओंथ नेल्ल शुश हितक बाक्ब” देशो नैतक। येरमीया २०:३

26 मिनु “आं श्येत जाइब मुरपुकी अरन्डी फेक्सीन। मिनु इन पिया तारी पुलु फुइसीन। का ला बाक्शो आल बेक्शो आ परबम खोदेशो पा रोंका पने। मारदे हना आंइ कली साइक्ब याम काम जाक्ब” दैत। येरमीया ४:८; आमोस ८:१०

27 परमप्रभु यावेमी “गो इ कली आं मुर आन पशो नाक्ब नु रिम्शो सेल्ब सेलतन। मोपा गे मेको आन पशो तुइशशा, मार, पाइनीमी, दे नाक्ने चाप्नेवे।

28 मेको नेल्ल आन थुं खकटा बाक्शा, काइ मटीब बाक्नीम। मेकोपुकी जोल पा सांक्छी बाक्ब नु गाक्नीमी। मेकोपुकी कांसा नु फलाम खोदेशो खकटा बाक्नीम। मेको नेल्ल मरिम्शो बाक्नीम। इजीकीएल २२:१८

29 मुरुमी यपाइक्चा कली भाटी कीना कीन मी ठेयब सेलनीम। तन्न यपाइक्तीक गेय मोशा दुम्त। मारदे हना परमप्रभु यावे आ अरेशो मटीब आन कली तिल्शो बाक्नीम।

30 तन्न मेको आन कली मरिम्शो तिल्शो चांदी, दे नें वोइक्नीम। मारदे हना परमप्रभु यावेम मेको आन कली तिल्शो बाक्त” दैत। १राजा ९:७

## 7

येरमीया कली लोव पपाइशो

येरमीया २६:-

1 परमप्रभु यावेम येरमीया कली,

2 “गे आं खिं डा लाप्चोम राप्शा ‘गे यहूदा डा मुर नेल्ल परमप्रभु यावे आ लोव नेनीन। गे परमप्रभु यावे कली ठेयब सेल्चा कली एक जाक्ब यहूदा डा मुर परमप्रभु यावे आ लोव नेनीन’ देनो” दैत।

3 मुर नेल्ल परमप्रभु यावे, इस्राएली आन परमप्रभुमी मार, दैत दैशा हना “इन गाक्तीक लां नु इन पशो नेल्ल रिम्शो सेलीन। मो पाइतीनी हना, गो गेपुकी नु एकेर बाक्नुड। येरमीया १८:११; येरमीया २५:५; येरमीया २६:१३; यसेया १:१६

4 मिनु ‘एको परमप्रभु यावे आ खिं बाक्ब। एको परमप्रभु यावे आ खिं बाक्ब। एको परमप्रभु यावे आ खिं बाक्ब’ देशो जोल लोव थमा मसुतीन।

5 गोपुकीम थमा पा इन गाक्तीक लां नु इन पशो रिम्शो सेलतीनी हना, गे थमा पा अरु मुर आन कली ठीक नु रिम्शो पाइतीनी हना,

6 गोपुकीमी अर्को रागी डा मुर आन कली, रोम रोइक्च नु आन वोंइश बेक्शो मीश मुर आन कली मदिप्तीनी हना, दोस मताइब मुर आन कली मसाइक्तीनी हना नु आंम इन कली श्येत सेल्चा, दे देवी देवता आन नोले मखोइक्तीनी हना, येरमीया ५:२८

7 गो गेपुकी नु एक बाक्नुड। साइ डोंइती इन किकी पिपी आन कली गेशो रागीम गेना हना यो गेपुकी नु बाक्नुड।

8 तन्न गेपुकी दा जोल लोत्र कली थमा सुइक्नीनी। मेको नेल्ल मोशा बाक्नीम।

9 गेपुकीम खुइ पाइनीनी, मुर साइक्नीनी, मुर आन मीश नु इप्नीनी, जोल पा कसम जाइनीनी, बाल देवता कली पूजा पाइनीनी नु इन मतुइशशो देवी देवता आन नोले खोइक्नीनी। होसे ४:२

10 मो हना यो आं डोंइती आं नें बाक्शो खिंम राप्शा बाक्नीनी। आं डोंइती राप्शा 'गो रिम्शो बाक्नीकी' देनीनी। मेकेर रे लेशशा इन ग्रांग्रा दिचा डा गेय लेशा पाइनीनी।

11 मार, आं नेंमी बाक्शो आं खिं इन डोंइती रोइक्ब आन बाक्तीक खिं दुम्मे? गो यो इन कली कोव्रना कोव्रन बाक्नुड। मती २१:१३

12 मुल आं बाक्तीक शिलो लने। गो मेकेर डोंइती आं नेंमी बाक्तीक सेल्शो नड। मिनु गो इस्राएल डा मुर आन कली आं अरेशो मटितीके मार पदु? मेकेर लशा कोव्रडीन। यहोसु १८:१; १सामुएल ४:४,१२; भजन संग्रह ७८:६०

13 मिनु गेपुकीम एको नेल्ल पना पन बाक्नीनु, गो इन कली गेना हना यो लोत्र पाता। तन्न गेपुकीम मनेनी। गो इन कली ब्रेत्ताक्नी, तन्न गेपुकीम लोत्र मलेत्तीनी। येरमीया २५:३; यसैया ६५:१२

14 मोपतीके गो मेको आं नेंम सेल्शो खिं कली नु इन किकी पिपी नु इन कली गेशो रागी कली शिलो खोदेशो सेल्नुड। गे मेको खिं कली थमा सुइक्तीनी।

15 मिनु गो इन कली आं डोंइती रे गुंइननी। गो इन कली, इन लोक्ब एफ्राइम आ आल नेल्ल आन कली खोदेशो पा खेरननी" दे परमप्रभु यावेमी दैत। २राजा १७:१८,२०,२३

16 परमप्रभु यावेम आं कली "गे मेको मुर आन पर्वम मपुनो। मेको मुर आन पर्वम मारेड मपुनो। मेको आन पर्वम आं कली लोत्र मपावो। मारदे हना गो इ पुंइशो मनेनुड। येरमीया ११:१४; येरमीया १४:११; येरमीया ३७:३; येरमीया ४२:२; प्रस्थान ३२:१-११; १सामुएल १२:२३

17 गे मेको यहूदा डा सहर नु यरूसलेम डा लां मेर पशो मतवी? येरमीया १९:१३; येरमीया ४४:१७-१९; यसैया ६:५,११

18 मेको आन आलपुकीम शी खुप्नीम। आन आफपुकीम मी मुइक्नीम। मिनु मीश मुरपुकीम सरीड डा पिपीम कली बटुक चोचा कली फस नीनीम। अरु देवी देवता आन कली तूचा थोत्रक चढेनीम। आं कली गाइक्पाइक्चा कली मो पाइनीम।

19 मिनु मार, मेकोपुकीमी आं कली गाइक्पाइक्चा कली मो पशो मनमी डा? मिनु मार, मेकोपुकीमी श्येत जचा कली मो पशो मनमी डा?" दैत

20 मोपतीके परमप्रभु, परमप्रभु यावेम "आं गाइशो नु आं चुरशो मेकेर मोइक्चा माल्ब। मुर, बी ब्यफ, क्यारश भेडा, रू डा रवा नु रागी डा मारेड मारेड आन तारी मोइक्चा माल्ब। मेको मकाप्ब मीम नेल्ल दाक्ब" दे परमप्रभु यावेमी दैत।

21 मिनु मुर नेल्ल आन परमप्रभु यावे, इस्राएली आन परमप्रभुमी मार दैत देशा हना "इन चोशा चढेतीकेम क्योरशा चढेतीके तेम्दीन। मिनु मेको श्ये ब्वने। १सामुएल १५:२२; भजन संग्रह ५०:७-१५; होसे ८:१३; मीका ६:६-८

22 मारदे हना इन किकी पिपी आन कली इजीप्त रे गुंइशा चाक्शो नाक्ती, गो मेको आन कली चोशा चढेतीक नु क्योरशा चढेतीक आ पर्वम लोत्र मपड। मिनु मेको आन कली मअरेडमी।

23 तन्न गो मेको आन कली मार अरेतीक का गेतामी देशा हना 'आं देशो टिने। मिनु गो इन परमप्रभु नड। मिनु गे आं मुर दुम्नीनी। गो इन कली तेको लां लचा, दे अरेनुडा, मेको लां गाक्कीन। मो पाइतीनी हना, इन कली रिम्शो दुम्ब' दैती। येरमीया ११:४; येरमीया २४:७; येरमीया ३०:२२; येरमीया ३१:१,३३; येरमीया ३२:३८; लेवी २६:१२; इजीकीएल ११:२०; इजीकीएल १४:११; इजीकीएल ३४:३०; इजीकीएल ३७:२७

24 तन्न मेकोपुकीमी आं अरेशो मटीम। आं लोत्र मनेनेम। मेको आन खकटा थुं डा मरिम्शो पतीकेमी आंम दला दाक्स पांतेक्म। आन ची हिरताक्म, आं कुल गे मकोव्रयीमी। येरमीया ११:८; यसैया ६५:२

25 इन किकी पिपी इजीप्त रे यूशा जाक्मा रे मुल सम्म नाक्त कित कित आं गेय पाइब, आं लोत्र पाइब नेल्ल आन कली मेको आन बाक्तीके सोइक्ताक्डमी। येरमीया २५:४

26 तन्न मेकोपुकीमी आं लोत्र मनेनेम। आं लोत्रमी आन नोफा मदाइक्तेम। मटीब ला दुम्तेकम। मिनु मेकोपुकीमी आन किकी पिपी आन क्येडा यो शुश मरिम्शो पाम्तेकम। येरमीया १६:१२

27 मिनु गे मेको आन कली एको लोत्र नेल्ल देंचा माल्नेवे। तन्न मेकोपुकीमी इ लोत्र मनेनीम। गे मेको आन कली ब्रेत्तीनु, यो मेकोपुकीमी इ लोत्र मलेत्नीम।

28 गे मेको आन कली 'एको परमप्रभु यावे, आन परमप्रभु आ लोत्र मटीब रागी डा मुर बाक्नीम। सजाड ताम्तेकम हना यो, मरुबेम। मिनु मेको आ पचा माल्ब देंशो मपामे। थमा लोत्र जाम्त। मेकोपुकीम जोल ला पाइनीम। येरमीया ५:१

29 गे इ चां प्रेक्शा ताइक्ते। मिनु गोरशो डांडा मेर रोंका पा गाक्को। मारदे हना परमप्रभु यावेमी आ कली गाइक्पाइक्ब आन पाला डा मुर आन कली प्रोंइशा तिल्लु' देनो' देंत। मीका १:३६

### मुर साइक्तीक बेसी

30 परमप्रभु यावेम "यहूदा डा मुरपुकीम आं डोंइती मरिम्शो पशो बाक्नीम। मेकोपुकीमी आं नेम सेल्शो खिंम आन ग्रांया दिशो थोत्रक वोइक्तेकम। मोपा आं खिं ग्रांया दिशो दुम्त। येरमीया ३४:३२; २राजा २१:४-५

31 मिनु मेकोपुकीमी तोफेथम आन थान सेल्तेकम। मेको हिन्नोम आ तौ आ बेसी बाक्ब। मेकेर आंम तमी तौ आन कली मीम चोशा चढेम्तेकम। गो मोदेंशो गेनायो ममिन्तु, मेको आन कली यो मअरेडमी। येरमीया १९:५-७; येरमीया ३२:३६; लेवी १८:२१

32 मोपतीके होस पा बाक्कीन। मेको बेसी कली तोफेथ नु हिन्नोम आ तौ आ बेसी देंचा प्रोंइनीम। शुश नाक्त रिम्चा ममाल्नीनी। तन्न मुर साइक्तीक बेसी, दे नें वोइक्नीम। मारदे हना तोफेथमी आन बेक्शो मुर मरिक्थ्री थिम्नीम। येरमीया १९:६

33 मिनु मेको मुर आन बेक्शो रां सरीड डा चिक्बपुकी नु रागी डा जन्तु आन कली ब्वतीक दुम्ब। मेको आन कली हिंच कोइशा, प्रोक्पाइक्ब सुइ मबाक्नीम। येरमीया ९:२१

34 मिनु गो यहूदा डा सहर नु यरूसलेम डा लां रे थुं नाइश्शा बाक्तीक, ग्येरशो सेंदा नु ग्युम्ली ग्युम्ले आन सेंदा क्याम्नुड। मारदे हना रागी मुर मबाक्तीके दुम्ब" दे परमप्रभु यावेमी देंत। येरमीया १६:९; येरमीया २५:१०; येरमीया ३३:११

## 8

### “मारेड मारेड मोशा दुम्नीम” देंशो

1 परमप्रभु यावेम “मेना यहूदा डा पिप आन रुश, सरकार आ गेय पाइब आन रुश, चढेब आन रुश, परमप्रभु यावे आ लोत्र पाइब आन रुश नु यरूसलेममी बाक्ब मुर आन रुश मेको आन तुरस रे याक्नीम।

2 मिनु मेको रुश नेल्ल, नां, तास्ला नु सोरुल आन डोंइती फ्रचा माल्नीम। मारदे हना मेको मुरपुकीमी मेको आन कली गेय पा शुश दाक्ताकम। मेको आन नोले खोइक्ब दुम्तेकम। मेको आन कली लां कोइब सेल्शा पूजा पाम्तेकम। मेको रुश आन कली खुष्शा थिम्चा मदुम्ब। मेको खप कली मोव्रल दुम्चा माल्नीम। ब्यवस्था ४:१९

3 एको मरिम्शो खिं डा लीशो मुर नेल्लेमी, ते प्रोक्पाइक्तामी हना यो, मार देंनीम देंशा हना 'गो ब्रोंइचा क्येडा यो बेक्चा दाक्नीकी' देंनीम" दे मुर नेल्ल आन परमप्रभु यावेमी देंत।

### पाप कली सजाड

4 गे मेको आन कली परमप्रभु यावेमी मार देंत, देंशा हना “मुरपुकी गोल्नीमी। मिनु मार, मेको लेंशा मबोक्नीमी डा? मिनु सुइ लां जाम्शा ग्युरा पेरा गे लमानु, मेकोपुकी लेशशा मजाक्नीमी डा?

5 मो हना यो एको मुरपुकी मारदे ची हिरशा गाक्मा? मारदे मेको नोले शोंइसीना सीन बाक्नीमी? आन मरिम्शो पतीके मप्रोंइथु, लेशशा जाक्ने मबिन्तीम।



6 गो, आं नोफा दाइशशा नेंनु, मेकोपुकीम आं कली ठीक लोव्र मपाइनीम। आन मटिशो आ पर्वम माफ मपुंडनीम। मेकोपुकीमी 'गो मरिश्शो पाता' मदेनीम। नेल्ल आन दला दाक्स पाइनीम। मेकोपुकी शारा खोदेशो पा लडाइम दोरनीम।

7 सरीडम बेरब सारसम आ लची ना नु लेत्वी ना तुइक्ब। मिनु ढुकुर, बेल्लुम नु बोकुला आन लची ना नु लेत्वी ना तुइक्नीम। तन्न आं मुरपुकीमी आंम परमप्रभु यावे आ देशो पतीक लोव्र मतुइक्नीम। यसैया १:३

8 मिनु गेपुकीम दोपा 'गो जोक्ब तुइक्ब बाक्नीकी। मिनु परमप्रभु यावे आ अरेशो लोव्र गो नु बाक्ब' देने चाप्नीनी? थमा पा देशा हना, सास्त्री आन जोल पा ब्रेक्शोम मेको आन कली जोल सेल्शो बाक्ब। सास्त्री ब्रेक्चा जोक्ब मुर बाक्नीम

9 जोक्ब तुइक्ब मुरपुकी मुने तोक्चा पुंडसीनीम। मेकोपुकी हिनीम। मेकोपुकी लाइक्चा पुंडसीनीम। मारदे हना मेकोपुकी परमप्रभु यावे आ लोव्र मटीनीम। मेको आन जोक्तीक तुइक्तीक मार बाक्म माइ?

10 मोपतीके गो मेको आन मीश अरु आन कली नु मेको आन रू लडाइ ग्राब आन कली गेनुडमी। नेल्ल क्येडा आइक्च मुर रे नेल्ल क्येडा ठेयब सम्म ठीक पा मचेश्शो क्येट तचा कली शिम बाक्नीम। परमप्रभु यावे आ लोव्र पाइब रे चढेब सम्म नेल्ल जोल पाइब दुश्शो बाक्नीम। येरमीया ६:१३-१५; यसैया ५६:११

11 मेकोपुकीमी आं मुर आन कली ममिश्थु, आन गार सापाइक्खु पशो बाक्नीम। मेकोपुकीमी थुं नाइक्तीक मबाक्त हना यो 'नांडसीन, नांडसीन' देनीम।

12 मेकोपुकीमी मुने दोक्चा डा गेय पाम्तेक्म। ग्रान्ना दिशो गेय पाम्तेक्म। तन्न मेकोपुकी मुने मदोक्म। मुनेम लल जिचा देशो मार, बाक्बा, दे मतुइक्तेम। मोपतीके साइक्चा पुंडसीशो आन दातेमी साइक्चा पुंडसीनीम। गो मेको आन कली सजाइ गेनुड। मिनु मेको खतम दुम्नीम" दे परमप्रभु यावेमी देंत।

13 परमप्रभु यावेम "गो, अडगुर सेक्नुड देंडानु बोटम अडगुर मबाक्म। फोव्रशी रवाम फोव्रशी मबाक्म। मेको आन सफा यो सोव्रतेक्म। मेकोपुकी आं गेशो यो रोइक्चा पुंडसीनीम" दे परमप्रभु यावेमी देंत।

14 मुरुमी "गो मारदे एकेर निश्शा बाक्चा। मुर आन कली पुक्शा, गो गारो हिरिशो सहर आ आगा मेर प्रोक्य। मिनु मेकेरेन बेक्य। मारदे हना परमप्रभु इं परमप्रभु यावेम इं कली बेक्पाइक्चा कली सोइश्शो बाक्ब। मिनु इं कली बीस ब्वाइश्शो ब्वाक्कु तूचा गेत्तु। मारदे हना गो परमप्रभु यावे कली पाप पाइतय। येरमीया ९:१४

15 गोपुकीम थुं नाइश्शा बाक्तीक आस पाइतय। तन्न मारेइ रिश्शो मदुम। साचा आ पर्वम रिम्ताक्य। तन्न शुश हिंतीक ला दुम्त" देतेक्म। येरमीया १४:१९

16 मिनु "दान रे जोरी सत्रु आन शारा आन सोव सोव पशो नेंसाक्व। मेको आन शारा आन ग्रीशो आ पर्वम रागी नेल्ल खिखि पाइब। मेकोपुकी रागी नु मेकेर बाक्शो मारेइ मारेइ, सहर नु मेकेर बाक्ब नेल्ल आन कली दाक्चा कली जाक्शो बाक्नीम। येरमीया ४:१५

17 कोव्रडीन, गो इन दातेम बीस पाइश्शो बुस्सपुकी सोइक्नुडमी। मेको बुस्स आन कली मारेइ मन्तर तन्तर मराइब। मिनु मेकोपुकीमी इन कली कोक्नीम" दे परमप्रभु यावेम देंत।

18 मिनु "गो आं ग्येरसीतीक नेल्ल जाम्त। गो आं थुं खाइक्ती। येरमीया ४:१९

19 श्येत जशो आं मुर आन डाक्शो नेनीन। डोन रागी रे नेनीन। मार, परमप्रभु यावे सियोनम मबाक्शो बाक्बा डा? मेको आ पिप मेकेर मबाक्शो बाक्बा? मारदे मेकोपुकीमी आं कली आन मूर्ति नु आन शोर गाक्शो अर्को रागी डा देवी देवता आन पर्वम गाइक्पाइय्यीमी?

20 बाली नाली रिक्ची ना लाक्तु। बर्खा नुप्त। मो हना यो इं श्येत रे ब्रोइची ना मजा।

21 आं श्येत जशो मुर आ पर्वम गो रेंका पा थुं खाइक्ती।

22 मिनु गिलादमी मारेइ खेक्तीक मबाक्बा? मार, मेकेर इ कली ओरुक्ती पाइब मबाक्बा? मारदे आं श्येत जशो मुर मसामा?" देंत। येरमीया ४६:११

## 9

## परमप्रभुमी लोव्र पशो

1 परमप्रभुमी “आं पिया ब्वाक्कु बुक्तीक दुम्शो हना, नु आं मिक्ची प्रेक्कु बुक्तीक दुम्शो हना, गो नाक्दो नाक्ती डाक्ड वा। श्येत जशो साइशो आं मुर आन पर्वम डाक्ड वा। येरमीया १३:१७; लूका १९:४१

2 गोरशो रागीम मुर आन कली बास बाक्तीक बाक्शो हना, गो आं मुर आन कली प्रॉइशा, मेकेर लशा बाक्ड वा। मिनु मेको आन रे डोन लड वा। मारदे हना मेको नेल्ल आन नाता खोइशशा अरु नु इप्नीम। मेको नेल्ल मरिम्शो हुल का बाक्नीम।

3 मेकोपुकीम जोल पस ला जोक्नीम। मोपा जोल पतीकेमी रागी डा ठेयब मुर दुम्तेक्म। थमा लोव्र पतीकेमी ममाइ। मेकोपुकी मरिम्शो पशो का रे अर्को मरिम्शो पाइनीम। मिनु आं कली मतुइक्नीम। येरमीया ५:१

4 आंम नेक्था डा मुरपुकी रे होस पा बाक्कीन। आंम लोकब आन कली यो थमा मसुतीन। मारदे हना इन लोकब नेल्ल मिक्च सिल्व बाक्नीम। मिनु इन नेक्था डा मुरपुकी हिरशा, इन पर्वम जोल पा दोस गेना गेन बाक्नीम। येरमीया १२:६; भजन संग्रह ४१:१०; मीका ७:५-६

5 मेको नेल्लेम आन नेक्था डा मुर आन कली जोल पाइनीम। सुइमी थमा लोव्र मपाइनीम। मेकोपुकीम जोल पचा शेंसीशो बाक्नीम। मेकोपुकीम मरिम्शो ला पाइनीम।

6 मेकेर दिम्मुतीके नु जोल पमुतीके ला बाक्ब। मेकोपुकीमी आं कली तुइक्चा मदाक्नीम” दे परमप्रभुमी यावे, मुर नेल्ल आन परमप्रभुमी देंत।

7 मोपतीके मुर नेल्ल आन परमप्रभु यावेम “गो मेको आन कली यपाइशशा नाक्नुडमी। पाप पाइब आं मुर आन कली गो अरु मार पने चाप्नुडा डा?

8 मेको आन लें बीस पाइशशो ब्रा खोदेशो बाक्ब। मेकोपुकीम जोल लोव्र ला पाइनीम। मुर नेल्लेम आन नेक्था डा मुर नु रिम्शो लोव्र पखु पाइनीम। तन्न आन थुंमी दोपा मेको कली ब्वारद दाइक्चा, दे मिन्मीम। बजन संग्रह १२:३

9 मार, मोदेशो पशो आ पर्वम गो मेको आन कली सजाइ मगेनुडमी? ओदेशो रागी डा मुर आन कली गो सजाइ गेचा माल्नुड” दे परमप्रभु यावेम देंत। येरमीया ५:९, २९

10 गे डांडा आन पर्वम डाक्शा रोंका पने। मिनु गोरशो रागी डा योव्रतीक आन पर्वम बिलाना पने। मेको गोरशो सेल्शो बाक्नीम। मेकेर सुइ मगाक्नीम। मिनु मेकेर बी ब्यफ क्यारश भेडा आन ग्रीशो मनेंसीब। सरीड डा चिकब नु जन्तु नेल्ल प्रोक्शा लाम्तेक्म। येरमीया ४:२५; येरमीया १२:४

11 गो यरूसलेम कली खिं ब्रेशशा देल्टीके सेल्नुड। सिवार आन बाक्तीके सेल्नुड। गो यहूदा डा सहर आन कली मुर मबाक्तीके सेल्नुडमी। मिनु मेकेर सुइ मबाक्नीम। येरमीया २६:१८

12 मेको लोव्र रुप्चा कली जोक्ब तुइक्ब सु बाक्बा डा? परमप्रभु यावेम सु कली लोव्र पवा, मेकोमी एको शेंने चाप्ब। मारदे मेको रागीम ब्रेशशो खिं ला बाक्नीमी? मारदे मेको मुर मबाक्तीके खोदेशो दुम्शा, सुइ लने मचाप्चा डा पा, श्येत्थ दुम्शो बाक्बा? लूका १९:४२

13 मारदे हना मेकोपुकीमी आन डोंइती वोइशशो आं अरेशो लोव्र प्रॉइतेक्म। आं देशो मटिथु आन दला दाक्स पाम्तेक्म।

14 मेको आन खकटा थुंमी आन दला दाक्स पा बाल देवता आ नोले खोइक्तेक्म। मेको आन किकी पिपी शेंशो लांम गाक्तेक्म। येरमीया ७:२४

15 मोपतीके परमप्रभु यावे, मुर नेल्ल आन परमप्रभु, इसाएली आन परमप्रभुमी “गो एको मुर आन कली कशो थोव्रक उम्नुडमी। मिनु तूचा कली बीस ब्वाइशशो ब्वाक्कु तूपाइक्नुडमी। येरमीया २३:१५; येरमीया ८:१४

16 गो मेको आन कली रागी रागी डा मुर आन दातेमी फ्राइनुडमी। मेकेर आन मतुइशशो नु आन किकी पिपी आन मतुइशशो मुर बाक्नीम। मिनु गो मेको आन कली मसदुमी सम्म मेको आन नोनोले तरवार सोइक्नुड” देंत। लेवी २६:३३

17 मिनू मुर नेल्ल आन परमप्रभु यावेमी “मुल मिम्तीन। रोंका पाइब मीश मुर आन कली ब्रेत्तीन। मेको आन दाते डा नेल्ल क्येडा रोंका पस जोक्ब कली ब्रेत्थ सोइक्तीन” दैत

18 मेकोपुकीमी “रीब पा जाकमल। मिनू आंइ पर्वम रोंका पामेक्ल। इं मिक्च नेल्ल प्रेक्कु मदुम सम्म नु इं मिक्च आ पारला रे ब्वाक्कु खोदेंशो पा प्रेक्कु मदोक्म सम्म, मेकोपुकीमी रोंका पामेक्ल।

19 सियोन रे रोंका पशो नेंसाक्व। गोपुकी खतम दुम्तय। गोपुकी मुनेम सुम्सीशो बाक्नय। गोपुकीम आंइ रागी प्रोंइचा माल्नीकी। मारदे हना मेकोपुकीम आंइ खिं प्रेत्तेक्म” दैतेक्म।

20 मिनू गे मीश मुरपुकी परमप्रभु यावे आ लोव्र नेनीन। मेको आ लोव्र नेंचा कली इन नोफा दाइक्तीन। इन तमी आन कली रोंका पचा शेंदीन। आंम नेक्था डा मुर नु रोंका पतीक शेंमुने।

21 बेक्पाइक्ब ड्रेल रे डोइश्शा आंइ बाक्तीकेम ओव्रत। मेको आंइ आल आन कली लां रे नु आंइ टिटा आन कली बुक्शा बाक्तीक रे साइक्चा कली जाक्त।

22 परमप्रभु यावेमी “गे मुर आन कली मोदेंशो लोव्र पावो ‘मुर आन बेक्शो रं रूम मोव्रल खोदेंशो पा दोक्नीम। अन्न खुप्ब मुर आन नोले प्रोंइशो अन्न खोदेंशो पा, गोल्ला लीशो बाक्नीम। मिनू मेको आन कली सुइम सिला मपाइनीम’ देनो” दैत। येरमीया ७:३३; येरमीया १४:१६; येरमीया १६:४; येरमीया २५:३३; भजन संग्रह ७९:२

### मार आ पर्वम नें बोरपाइक्चा

23 परमप्रभु यावेम “जोक्ब तुइक्ब मुरपुकी आन जोक्तीक तुइक्तीक आ पर्वम ठेयब मलेम्मल। सक्ति पाइश्शो मुरपुकी आन सक्ति आ पर्वम ठेयब मलेम्मल। शुश शोंप पाइश्शो मुरपुकी आन शुश शोंपोम ठेयब मलेम्मल।

24 तन्न सु ठेयब लेत्तीमी, मेकोपुकीम ‘गो परमप्रभु यावे कली तुइक्नुड’ दैमल ‘मेको थमा पा परमप्रभु यावे बाक्ब, दे तुइक्नुड, दे नें बोरपाइक्ने चाप्नीम। परमप्रभु यावेमी रागी कली शिशो पाइब, ठीक निसाफ नु ठीक पाइब बाक्ब’ दैमल। मारदे हना मेको आं दाक्शो बाक्ब, दे ग्येरसीनुड” दे परमप्रभु यावेम दैत। १कोरिन्थी १:३१; २कोरिन्थी १०:१७

### चिनु मखोइश्शो खोदेंशो दुम्शो

25 परमप्रभु यावेम “राम ला खोइक्तीक चिनु खोइश्शो मुर आन गुम्तीक नाक्ती थमा पा जाक्ब।

26 गो इजीप्त, यहूदा, एदोम, अम्मोन, मोआब नु गोरशो रागीम बाक्ब, आन चां एर ओथ खोइक्ब मुर नेल्ल आन कली गुम्नुड। मारदे हना मेको नेल्ल खोइक्तीक चिनु मखोइश्शो बाक्नीम। मिनू इस्राएल आ खिं डा मुर नेल्ल यो आन थुंम खोइक्तीक चिनु मखोइश्शो बाक्नीम” दैत। लेवी १९:२७; येरमीया ४:४; लेवी २६:४१; ब्यवस्था ३०:६

## 10

### परमप्रभु नु मूर्ति

1 गे इस्राएल आ खिं डा मुरपुकी, परमप्रभु यावेम इन कली मार, दैमे, मेको नेनीन।

2 परमप्रभु यावेम “रागी रागी डा मुर आन पतीक मशेंसीने। सरीड डा चिन्ड तशा, महिनीन। रागी रागी डा मुरपुकी मेको तशा हिंनीम। प्रस्थान २३:२४; २राजा २१:६

3 मारदे हना जात जात डा मुर आन पतीक जोल बाक्ब। मेकोपुकीमी ब्वाकी डा रवा का तिम्नीम। मिनू शी के मार, मार, सेल्ब जोक्बमी मुशा मूर्ति सेल्नीम। यसेया ४४:१३-१७

4 मिनू मुरपुकीमी, मेको कली सुन नु चांदीम गिल्लीम। मिनू मेको महिम्सेक्ल दे घनमी कांटी थोक्नीम। मिनू मेको महिम्सीब।

5 मेको आन मूर्ति वोबीस रूम वोइश्शो खेरच खोदेंशो बाक्नीम। मेको ब्वाक्ने मचाप्नीम। मेको आन कली कुरचा माल्नीम। मारदे हना मेकोपुकी गाक्ने मचाप्नीम। मेको तशा महिनीन। मारदे हना मेकोपुकीमी मारेइ मरिम्शो पने मचाप्नीम। मारेइ रिम्शो यो पने मचाप्नीम” दैत। भजन संग्रह ११५:७; यसेया ४६:७

6 परमप्रभु यावे, इन खोदेशो सुइ मबाक्नीम। गे ठेयब बाक्नीनी। मिनु इन सक्तिमी इन नें ठेयब सेल्टीनी। भजन संग्रह ८६:८

7 गे रागी रागी डा पिप, इन कली सुम मान पा महिनीमी डा? गे मान पाइक्चा शिरशो बाक्नीनी। रागी रागी डा मुर आन जोक्ब तुइक्ब नु मेको आन राज्य नेल्लेमी इन खोदेशो सुइ मबाक्नीम।

8 मूर्ति आन शेंतीक निप्स मपाइशो नु मूर्ख लोव्र बाक्ब। मेको शी क्येडा रिम्शो मबाक्ब।

9 टारशीश रे तुप्शो चांदी चाक्नीम। मिनु उफाज रागी रे सुन चाक्नीम। मेको मार मार सेल्स जोक्ब नु सुन चेम्बपुकी आन गेय बाक्ब। मिनु मेको आन कली नीलो नु प्याजी रड डा वा फेक्पाइक्नीम। मेको नेल्ल मार मार सेल्स जोक्ब मुर आन गेय बाक्नीम।

10 तन्न परमप्रभु यावे थमा डा परमप्रभु बाक्ब। मेको ब्रोंइशा बाक्ब परमप्रभु नु गेना हना यो लीब पिप बाक्ब। मेको गाइक्तानु, रागीम खिनु कुइब। मिनु रागी रागी डा मुरपुकीम मेको आ गाइशो फाल्ने मचाप्नीम। येरमीया ५:२

11 गे मेको आन कली “मेको सरीड नु रागी मसेल्ब देवी देवता रागी नु सरीड आगा रे क्याम्चा पुंइसीनीम।

12 तन्न मेकोमी आ सक्तिमी रागी सेल्लु। मेकोमी आ जोक्तीक तुइक्तीकेमी रागी रागी कली वोइक्तु। मिनु मेकोमी आ रुप्तीकेम सरीड प्राक्तु। येरमीया ५१:१५-१९

13 मेकोमी लोव्र पवानु, सरीड रे रेड यीब। मेकोमी रागी आ सुर रे गोस्स आन कली पोक्ब। मेकोमी रेड नु चिला पपाइक्ब। मिनु फश आ बाक्तीक रे फश पपाइक्ब। भजन संग्रह १३५:७

14 मुर नेल्ल निप्स मपाइशो नु मारेइ मतुइक्ब बाक्नीम। सुन चेम्ब नेल्ल आन मूर्तिम पतीके मुने दोक्नीम। मेको आन मूर्तिपुकी जोल बाक्नीम। मेको आन के सोक्त मबाक्ब। यसैया ४५:१६

15 मेको शोर गाक्शो ला बाक्नीम। मुर आन मिम्शो ला बाक्नीम। मेको आन कली सजाइ गेशोनु, जाम्नीम।

16 परमप्रभु यावे, याक्ब आ भाग बाक्ब। मेको मारेइ मारेइ सेल्ब बाक्ब। मिनु इसाएल मेको आ शोंप बाक्ब। मेको आ नें मुर नेल्ल आन परमप्रभु यावे बाक्ब” देनो। ब्यवस्था ३२:९

### सजाइ जाक्ब देशो

17 गे पुम्चा पुंइसीशो सहर इ कुम्लो खप रे गुपो।

18 मारदे हना परमप्रभु यावेम “गो मेको रागी डा मुर आन कली ताइक्नुडमी। मेको आन कली शुश श्येत गेनुडमी। मिनु मेकोपुकीम तुइक्नीम” देंत।

19 आबी, तन्न आं गार आ पबर्म हिंती। आं गार मसाब। तन्न गो आंम कली “थमा पा, एको आं सजाइ बाक्ब। गो एको फाल्चा माल्नुड” देंती।

20 आं ताम्बु ब्रेत्त। मेको आ डोरी नेल्ल ब्रोंइक्तेक्म। आं आलपुकी गाक्तेक्म। मुल मेकोपुकी मबाक्नीम। मुल आं ताम्बु कीशा गेब नु आं बाक्तीकेम फारतीक वा वोइशशा गेब सुइ मबाक्नीम।

21 गोठलापुकी निप्स मपाइशो बाक्नीम। मेकोपुकीमी परमप्रभु यावे कली हिल्लो मपाइनीम। मोपतीके मेकोपुकी रिम्शो म्दुम्नीम। मेको आन क्यारश भेडा नेल्ल ब्राम्तेक्म। येरमीया २३:१

22 रेयके का जाक्शो बाक्ब। मेको नेनीन। उत्तर रागी रे ठेयब प्रांग्ये माग्ये दुम्शो बाक्ब। मेकोमी यहूदा इन सहरपुकी मुर मबाक्तीके सेल्ब। मेको सिवार आन बाक्तीक दुम्नीम। येरमीया १:१४

### येरमीया आ पुंइशो लोव्र

23 परमप्रभु यावे, मुर आन ब्रोंइतीक आंम आन गुइम मबाक्ब, गो मेको तुइक्नुड। बेक्शा लाइब मुरपुकीम आंम लां आंमा सेल्ने मचाप्नीम। हितोपदेस १६:९

24 परमप्रभु यावे, आं कली रिम्शो सेल्यीनी। तन्न ठीक निसाफ पतीकेम ला रिम्शो सेल्यीनी। इन गाइक्तीकेम ममाइ। मो दुम्त हना, गे आं कली साइक्नीनी। येरमीया ३०:११; येरमीया ४६:२८; भजन संग्रह ६:२; हबक्कुक १:१२

25 इन कली मतुइक्ब रागी रागी डा मुर नु इन नें थिचा मदाक्ब जात जात डा मुर आन तार इन गाइक्तीक मोतीन। मारदे हना मेकोपुकीमी याक्ब कली नेक्शा दाक्शा पशो बाक्नीम। मेकोपुकीमी मेको कली थमा पा दाक्शो बाक्नीम। मिनु मेको आ बाक्तीक मुर मबाक्तीके सेल्शो बाक्नीम।

## 11

### कबल क्याम्शो

1 परमप्रभु यावेम येरमीया कली,

2 “गे एको कबल डा लोत्र नेनो। मिनु यहूदा डा मुरपुकी नु यरूसलेममी बाक्ब आन कली लोत्र पावो।

3 गे मेको आन कली ‘इसाएली आन परमप्रभु यावेम मार दैत देशा हना, सु सुमी एको कबल मखाप्नीमी, मेको सराप राइनीम। ब्यवस्था २७:२६;

4 गो मेको कबल डा पचा माल्शो गेय इन किकी पिपी आन कली श्येत जतीक इजीप्त रागी रे गुंडची ना अरेशो नडमी। गो मेको आन कली आं अरेशो यो टिने। इन कली अरेशो लोत्र नेल्ल पा आं मुर दुम्नीनी। मिनु गो इन परमप्रभु दुम्नुड। येरमीया ७:२३

5 गो इन किकी पिपी आन कली दूध नु खुदो शुश बाक्शो रागी का गेनन्नी, दे कसम जशो खान्पुड। मिनु मेको रागी मुल इन अधिकारम बाक्ब’ देनो” दैत। मिनु गो “परमप्रभु यावे, मोदेशो दुम्ल” दे लोत्र लेत्ताक्ड। प्रस्थान ३:८

6 मिनु परमप्रभु यावेम आं कली “यहूदा डा सहर नेल्लेम नु यरूसलेम डा लां मेर एको कबल डा लोत्र उरदी पा, मेको कबल डा लोत्र नेंशा पने।

7 गो इन किकी पिपी आन कली इजीप्त रे प्रोइशा चाक्पुमी रे मुल सम्म ‘आं लोत्र टिने’ दे अरेना अरेन बाक्ती। येरमीया २५:४

8 तन्न मेकोपुकीमी आन नोफा मदाइक्तेम। आं देशो लोत्र मटीमे। मेको आ पा डा मेकोपुकीमी आन खकटा थुमी मरिम्शो पा काइ मटीमे। गो मेको आन कली आं कबल डा लोत्र नेल्ल पने, दे अरेता। तन्न मेको पने मबिस्सम” दैत। येरमीया ३:१७; येरमीया ७:२६; येरमीया १३:१०; येरमीया १८:१२; ब्यवस्था २८:१५-६८

9 मिनु परमप्रभु यावेम आं कली “यहूदा डा मुरपुकी नु यरूसलेममी बाक्बपुकीम मरिम्शो पचा मिम्नीम।

10 मेको आन किकी पिपी आन मरिम्शो पतीक गे लेशशा लाम्तेक्म। आं अरेशो मटीम। पाप गे लेशशा लाम्तेक्म। अरु देवी देवता आन कली पूजा पा, मेको आन नोले खोइक्तेक्म। गो मेको आन किकी पिपी नु पशो कबल इसाएल आ खिं डा मुर नु यहूदा आ खिं डा मुर नेल्लेमी क्याम्ताक्म” दैत।

11 मोपतीके परमप्रभु यावेमी “गो थमा पा, मेको आन कली ठेयब श्येत गेनुडमी। मिनु मेको रे प्रोक्ने मचाप्नीम। आं कली पुंडतेक्म हना यो, गो मेको आन लोत्र मनैनुड। भजन संग्रह १८:४२; यसैया १:१५; इजीकीएल ८:१८

12 मिनु नोले यहूदा सहर डा मुरपुकी नु यरूसलेमम बाक्ब मुरपुकीमी लशा, मेको आन पूजा पशो देवी देवता आन कली पुंडनीम। तन्न मेकोपुकीमी मेको आन कली आन श्येत रे गेनायो मप्रोइनीम। येरमीया २:२८; ब्यवस्था ३२:३७-३८

13 यहूदा, इ के दोशो सहर बाक्मा, मोशो इ देवी देवता दुम्तेक्म। यरूसलेममी गिश लां बाक्मा, मीश मुने दोक्तीक बाल देवता कली चढेतीक सेल्तेक्म।

14 येरमीया, गे मेको जात डा मुर आन पर्वम मपुनो। मेको आन पर्वम डाक्शा प्रार्थना पा मपुनो। मारदे हना मेकोपुकी श्येत जामे ना मेको आन पुंडशो मनैनुड। येरमीया ७:१६

15 आं दाक्शो मुरपुकी आं खिं ओव्रचा मार अधिकार बाक्बा? मेको नेल्ल मरिम्शो पाइब बाक्नीम। आं कली चढेशो श्येम इन कली सजाइ गेतीक रे तेक्ने चाप्बा डा? मिनु गे ग्येरने चाप्नीनी” दे परमप्रभु यावेमी दैत। रोमी ११:२८; होसे ८:१३

16 परमप्रभु यावेम इन कली रिम्शो फल सिम्ब दारशो गिगी तेल रवा, दे नें वोइक्तु। तन्न मेकोम ठेयब फश गिवार पपाइशशा, मेको कली मी सुइक्ब। मिनु मेकोम आ राशी आन कली दाक्ब।

17 मुर नेल्ल आन परमप्रभु यावेम इन कली खुम्तु। मिनु मेकोमी इन कली मरिम्शो पचशो बाक्ब। मारदे हना इस्राएल आ खिं डा मुर नु यहूदा आ खिं डा मुरुम मरिम्शो पाम्तेक्म। परमप्रभुमी “मेकोपुकीमी बाल देवता कली मार मार च्देशा आं कली गाइक्पाइक्तीमी” देंत।

### येरमीया कली साइक्चा माल्शो

18 परमप्रभु यावेम आं कली मेको मुरपुकीम मार पचा माल्शो बाक्मा, मेको कोंइशा तुइक्पाइक्ती। गे आं कली, आन मरिम्शो पचशो कोंइताक्वीनी।

19 गो साइक्चा कली लाइशशो मारेइ पने मचाप्ब पाठा का खोदेशो बाक्ती। मेकोपुकीमी आं पर्वम “एको रवा कली आ फल सुन्दा तिम्य। एको कली ब्रोंइशा बाक्ब आन रागी रे क्योरशा ताइक्तय। मिनु एको आ नें गेनायो ममिम्सेक्ल” देंशा मरिम्शो पशो गो मतुइक्तु। यसैया ५३:७

20 तन्न गे, मुर नेल्ल आन परमप्रभु यावे, ठीक पा निसाफ पाइनीनी। मिनु थुं नु सोक्त नाक्शा कोवनीनी। गेमी मेको आन कली क्येक्क लेशशो गो कोवचा तडल। मारदे हना गो इन कली आं निसाफ पतीक जिम्मा गेशो बाक्नुड। भजन संग्रह ७:१०; येरमीया १७:१०; येरमीया २०:१२

21 मोपतीके आं कली साइक्चा माल्ब अनाथोथ डा मुर आन पर्वम परमप्रभु यावेम “मेको मुरपुकीम इ कली ‘परमप्रभु यावे आ नेमी लोव्र मपावो। लोव्र पाप्तीवी हना, गे आंइ गुइ रे बेक्नेवे’ देंनीम। येरमीया १:१

22 मोपतीके मुर नेल्ल आन परमप्रभु यावेम ‘गो मेको आन कली सजाइ गेनुडमी। मेको आन ठिटा मुरपुकी तरवारम क्योरशा साइक्चा पुंइसीनीम। मिनु मेको आन तमी तौ चहिं अन्कालम बेक्नीम।

23 मेकोपुकी सुइ मब्रोंइनीम। मारदे हना मेको आन कली सजाइ गेतीक बर्सम गो अनाथोथ डा मुर आन तार ठेयब श्येत चाक्नुड” देंशो बाक्ब।

## 12

### येरमीयामी लोव्र पशो

1 परमप्रभु यावे, गो इन कली दोस गेता हना, गे ठीक पाइब बाक्नीनी। तन्न गो आं निसाफ इन डोंइती वोइक्नुड। दोस ताइबपुकी मारदे सोशा बोशा लाइनीमी? थमा मसुइक्ब मुर मारदे रिम्शो दुम्ना दुम्न बाक्नीमी? भजन संग्रह ७३:३

2 गे मेको आन कली खुम्तीनी। मिनु मेकोपुकीमी शाक्श थोक्शा, बारशा, फल गेनीम। मेको आन लोव्रम ला इन नेक्था बाक्नीम। तन्न मेको आन थुंमी इन क्येडा डोन बाक्नीम।

3 मो हना यो परमप्रभु यावे, गे आं कली तुइक्नीनी। गे आं कली कोव्रशा, नाक्नीनी। आं थुं गे नु बाक्ब। मेको आन कली साइक्चा कली लाइशशो भेडा खोदेशो पा, कीशा लतीन। मिनु साइक्तीक नाक्त कली तिल्शा वोतीन। भजन संग्रह १३९:१

4 रागीम गेना सम्म रोंका पाइबा? मिनु रू डा घांस गेना सम्म सोल सुल बेक्नीमी? मेकेर बाक्बपुकीम परमप्रभु यावे आ अंरेशो लोव्र मटितीके, मेकेर डा जन्तु नु चिक्ब नेल्ल बेक्तेक्म। मोपा मेकोपुकीमी “आंइ कली मार, दुम्शो बाक्बा, मेकोमी मारेइ मतुइक्ब” देंनीम। येरमीया ९:९

### परमप्रभुम लोव्र लेशशो

5 परमप्रभु यावेम “गे दोरब मुरपुकी नु दोरते हना, मेकोपुकीमी इ कली दपाइक्तेक्मी हना, गे शारा नु दोपा दोरने चाप्नेवे? गे मारेइ मदुम्तीकेमी गोल्ते हना, यर्दन खोला डा ब्वाकीम मार पाइनेवे?

6 इ लोक्बपुकी नु इ खिं डा मुरपुकीमी इ कली मरिम्शो पाम्तेक्म हना, मेकोपुकी इ पर्वम ठेयब सेंदा पा रेयके पा जाक्नीम। मेकोपुकीमी गे नु रिम्शो लोव्र पाम्तेक्म हना यो, मेको आन कली थमा मसुइक्मी।

7 गो आं खिं प्रोंइता। आं थेरशो रू प्रोंइता। मिनु आं दाक्शो कली आ जोरी सत्रु आन गुइमी गेता।

8 आ थेरशो रू ब्वाकी डा गुप्स खोदेशो दुम्त। मेको आं कली कोव्रशा ग्रीब। मोपतीके गो मेको कली काइ मदाक्नुड।

9 मार, मेको सिवार आं थेरशो रू तशा गेहे पाइबा डा? आं डोंइती छिर छिर पाइशशो सिखारी चिक्ब खोदेशो मदुम डा? मेको कली अर्को सिखारी चिक्बपुकीम पुम्शा राम्शी तोव्रमेक्ल। लावो, लशा ब्वाकी डा जन्तु नेल्ल आन कली पुक्मी। मिनु मेको कली ब्वपाइक्चा कली चाक्मी। यसेया ५६:९

10 शुश गोठलापुकीम आं अडगुर रू खतम सेल्लेक्म। मेकोपुकीमी आं भाग दिम्शा ताइशशा पाम्तेक्म। मेकोपुकीमी आं दारशो भाग कली गोरशो रागी खोदेशो पा मुर मबाक्तीक सेल्लेक्म। येरमीया ६:३

11 मेकोपुकीम रागी गोरशो सेल्लेक्म। मेको रागी कली आं डोंइती सोव्रशो नु सुइ मबाक्तीक सेल्लेक्म। रागी नेल्ल गोरशो सेल्लेक्म। मिनु सुइ आन थुं मखाइ” दैत।

12 गोरशो रागी डा डांडा मेर नेल्ल श्येल्थ पोक्बपुकी क्राक्थ्री चोक्थ्री पा जाक्शो बाक्नीम। मारदे हना परमप्रभु यावे आ तरवारम रागी आ सुर का रे अर्को सुर सम्म क्योरब। मिनु सुइ मब्रोंइनीम।

13 मेकोपुकीमी चेरब शोक्नीम। मिनु चू सिप्पाइक्नीम। मेकोपुकीमी श्येत पा गेय पाइनीम, तन्न नेल्ल शोर गाक्ब। मोपतीके मेको आन खुम्शा मुने दोक्शो आंमा फाल्मेक्ल। मारदे हना परमप्रभु यावे आ ठेयब पा गाइशशो इन तार जुक्शो बाक्ब। होसे ८:७

14 परमप्रभु यावेमी आं कली मरिम्शो पाइब आं नेक्था डा मुर आन पर्बम “गो आं मुर इस्राएली आन कली गेशो, मेको आन किकी पिपी आन शोंप रोइशशो बाक्नीम। मोपतीके गो मेको आन कली आन रागी रे तुल्शा ताइक्नुडमी। मिनु गो यहूदा आ खिं डा आ मुर आन कली मेको आन दाते रे तिल्लुडमी।

15 तन्न गो मेको आन कली तुलुमी नोले लेंशा शिशि पाइक्नुडमी। मिनु मेको नेल्ल आन कली आन आन किकी पिपी आन शोंप गेशा, आन रागीम लेंशा चाक्नुडमी।

16 मिनु मेकोपुकीमी मोपा बाल आ नेंम कसम जाम्तेक्म, मोपा आं मुर आन लां थमा पा शेंताक्म हना, मेकोपुकीम परमप्रभु यावे ब्रोंइशा बाक्शो खोदेशो पा, आं नेंम कसम जाइनीम। आं मुर आन पतीके रिम्शो पा शेंसाक्म हना, मेकोपुकी आं मुर आन दातेमी बाक्चा ताइनीम। ब्यवस्था ६:१८; येरमीया ४:२

17 तन्न तेकोइ जात डा मुरुम मेको लोव्र मनैतेक्म हना, गो मेको आन कली तुल्शा ताइक्नुडमी” दे परमप्रभु यावेम देशो बाक्ब।

## 13

### सुती के धोती

1 परमप्रभु यावेम आं कली “लशा सुती के धोती का ग्यापो। मिनु मेको पांडसो। तन्न मेको कली ब्वाक्कुम जित्चा मगेवो” दे माइक्ती।

2 मोपतीके गो परमप्रभु यावेम देशो खोदेशो पा, सुती के धोती का ग्याप्शा पांडसाक्यी।

3 मिनु लेंशा परमप्रभु यावेम आं कली

4 “बोक्को, इ ग्याप्शा पांडसीशो धोती कुरशा मुल युफ्रेटीस लावो। मिनु सेरथे फुल्लु आ आगाम बाक्शो जेशशो फुल्लुम मेको खुइशशा वोतो” दे माइक्ती।

5 मोपतीके गो परमप्रभु यावेम देशो खोदेशो पा, मेको युफ्रेटीसम खुइशशा वोइक्ता।

6 मिनु शुश नाक्त नोले परमप्रभु यावेम आं कली “बोक्को, युफ्रेटीस लावो। मिनु मेकेर गो डोंइती इ कली खुइशशा वोतो देशो धोती चाक्को” दे माइक्ती।

7 मिनु गो युफ्रेटीसम लती। मिनु आं खुइशशा वोइक्तीक रे मेको धोती दोशा गुंडताक्ड। तन्न मेको धोती नेल्ल मुक्ने थुमा बाक्त। मेको थमा पा, शोर गाक्शो दुम्माक्त।

8 मिनु परमप्रभु यावेम आं कली मार दैत देशा हना,

9 “आदेशो पा गो यहूदा आ ठेयब लेत्तीक नु यरूसलेम आ थाम्पा ठेयब लेत्तीक खतम पोक्नुड।

10 मेको मरिम्शो पाइब मुरपुकीम आं लोत्र नेंने मबिस्सम। मेकोपुकीमी आन खकटा थुमी आन दला दाक्स पतीकेमी अरु देवी देवता आन कली पूजा पचा कली नु मेको आन गेय पचा कली लाम्तेकम। मिनु मेकोपुकी एको धोती खोदेशो दुन्नीम। मेको थमा पा शोर गाकशो बाकब। येरमीया ११:८

11 मारदे हना दोपा मुरुम आ धोती रांम पांडसीशो बाकबा, मोपा गो इस्राएल आ खिं डा मुर नेल्ल नु यहूदा आ खिं डा मुर नेल्ल आन कली आं मुर दुम्मल, दे आं नेकथा वोइक्तामी। आं कली मान पामेक्ल, आं कली ठेयब सेल्मेक्ल, आं दारसम ग्योम्सीमल, दे पांडसाक्यी। तन्न मेकोपुकीमी आं देशो लोत्र आन नोफा मदाइक्तेम” दे परमप्रभु यावेम देंत।

### अडगुर शांबुम ब्रीशो गर

12 परमप्रभु यावे, इस्राएली आन परमप्रभुमी “गर नेल्ल अडगुर शांबुम ब्रीचा माल्नीम देशो बाकब” दे माइक्मी। मिनु मेकोपुकीम “गर नेल्ल अडगुर शांबुम ब्रीचा माल्ब, दे गो मतुइक्नीकी डा?” देंतेकम हना,

13 गे मेको आन कली परमप्रभु यावेम इन कली मार देंत देशा हना “गो एको रागी नेल्ल डा मुर आन कली, दाऊद पिप आ बाक्तीकेम बाकब पिप आन कली, चढेबपुकी, परमप्रभु यावे आ लोत्र पाइबपुकी नु यरूसलेमीम बाकब नेल्ल आन कली दुक्पाइक्नुडमी। येरमीया २५:१५-२८; यसैया ५१:१७

14 गो मुर आन कली जिपाइक्नुडमी। गो आम आफ नु आन तमी तौ आन दातेमी जिपाइक्नुडमी। गो मेको आन कली दाकशा, शिशी पा साइक्तीक रे आं थुं मलेत्नुड, दे परमप्रभु यावेम” देंत।

15 नोफा दाइशशा नेनीन। ठेयब लेशशो मदुमीन। मारदे हना परमप्रभु यावेम लोत्र पाप्तु।

16 मिनु “गे परमप्रभु यावे, इन परमप्रभुम छिडछिड चाक्चा क्येडा डोंइती मेको कली ‘ठेयब सेलीन’। नां रिक्चा क्येडा डोंइती डांडा मेर इन खोइल दाइल पाइक्चा क्येडा डोंइती मेको कली ‘परमप्रभु यावे ठेयब बाकब’ देनीन। गे हाम्सो आस पाइनीनी, तन्न मेकोमी छिडछिड सेल्शा थम क्येर सेल्ब।

17 तन्न गेपुकीम मेको मनेंतीनी हना, गो इन ठेयब लेशशो आ पतीके, गो आं थुंम सुइ आन मतुइक्चा डा पा डाक्नुड। परमप्रभु यावे आ हुल ग्याइशशा लाइक्चा पुंडसीतीके गो हुइ हुइ पा डाक्नुड। मिनु आं मिक्च रे प्रेक्कु दोक्ब। येरमीया ८:२३; येरमीया १४:१७; लूका १९:४१

18 पिप नु पिप आ ममा आस कली ‘इन नित्तीक रे उइ तोंइसीन। मारदे हना इन पिया रे इन ठेयब दुम्तीक सिरपेच दोक्ब’ माइक्सी” देंत। २राजा २४:१-१६; यसैया ६२:३; बिलाप ५:१६

19 नेगेब रागी डा सहर आन लाप्चो चोक्सीनीम। मिनु मेको आन कली रोक्ब सुइ मबाक्नीम। यहूदा डा मुर नेल्ल ग्याइशशा लाइक्चा पुंडसीशो बाक्नीम। मेको आन कली थमा पा ग्याइशशा लाइक्तेकम।

20 ए यरूसलेम, उत्तर रे जाक्ब जोरी सत्रु आन कली कोत्रडो। इ कली गेशो बगाल, इ दारशो भेडा ते बाक्नीमी?

21 गेमी आंम मुर सेल्चा कली इ लेम्शो मुर आन कली परमप्रभु यावेम इ कली हुकुम पाइब सेल्ब। मिनु गे मार, देंनेवे? मार, सुत्केरी दुम्चशो मीश मुर खोदेशो पा, इ कली श्येत मदुम्बा डा?

22 “मिनु गे इ थुंम ‘आं कली मारदे ओदेशो श्येत दुम्मे’ देंनेवे। गेमी शुश मरिम्शो पतीके इ गुने क्युक्साक्वे। मिनु इ रांमी मरिम्शो पाइक्चा पुंडसाक्वे। यसैया ४७:२-३; इजीकीएल १६:३७

23 मार, एथीयोपीयामी आ कुशुल डा रड फाइक्ने चाप्बा डा? मार, जोइमी आ चां डा थोप्ला फाइक्ने चाप्बा डा? गे मरिम्शो पचा बानी दुम्तीके रिम्शो पने मचाप्नेवे।

24 गो इ कली गोरशो रागी रे जाक्शो फशेम योल्शो भूस खोदेशो पा फ्राइनन।

25 इ कली वोइशशा आं गेशो भाग मेकोन बाकब” देशो बाकब। परमप्रभु यावेम “गेमी आं कली प्रेशो बाक्नेवे। मिनु जोल आन कली थमा सुइशशा बाक्नेवे।

26 गो आंमा इ गुने इ शोत्र सम्मन क्युक्नुड। मिनु मोपा इ मुने नेल्ल तांडसीब।

27 गो पहाडीम नु रू मेर इ पशो ग्रान्ना दिशो गेय ताता। इ मुरपुकी नु इप्शो, इ रेयके पशो नु इ मुने मपथु, तेल्लेम दुम्शो तशो बाक्नुड। आबी आबी, यरूसलेम गे ग्रान्ना दिशो दुम्नेवे। गेना सम्म मोदेशो बाक्नेवे?” देंत।



## 14

## रागी नेल्ल सोव्रशो

1 परमप्रभु यावेमी रेउ मयिचा आ पर्वम येरमीया कली मार, लोव्र पाप्तु देशा हना,  
 2 “यहूदा रोंका पाइब। मेको आ सहर डा ठेयब लाच्योपुकी सक्ति मपाइश्शो दुम्यो बाक्नीम। मेकोपुकी रू आ पर्वम सुरता पाइनीम। मिनु यरूसलेम आ वाइ ब्रेश्शो सरीड सम्म जाकदीश्शो बाक्ब।  
 3 मेकेर डा ठेयब मुरपुकीम आन वाइल आन कली ब्वाक्कु ब्रथ सोइक्नीम। मिनु मेकोपुकी कुवाम लमानु ब्वाक्कु मथित्नीम। मिनु मेकोपुकी श्येत्थ ग्योब कुरशा लेशशा जाक्नीम। मिनु मेकोपुकी मुने दोक्शा मारेइ पने मचाप्ब दुम्या, आमाइ, दे हिंशा आन पिया सुम्सीनीम।

4 रागीम रेउ मयितीके रागी नेल्ल सोव्रशा जेशो बाक्ब। रू डा गेय पाइबपुकी मारेइ पने मचाप्ब दुम्या, आमाइ, दे आन कुल सुम्सीनीम। योएल १:११

5 घांस मबाक्तीके ब्वाकी डा किश्शेमी यो आ नक जरमेशो पाठा प्रोंइशा गाक्ब।

6 ब्वाकी डा गधापुकी गोरशो डांडाम राप्शा सिवार खोदेशो पा ग्रीनीम। गिगी जोतीक ठाउं मबाक्तीके मेको आन मिक्ची ब्रा ब्रा दुम्नीम।

7 मिनु आंइ मरिम्शो पशोम आंइ पर्वम सांकछी गेम्तेक्म हना, परमप्रभु यावे, गे इन नें आ पर्वम शिशी पने। मारदे हना गो इन कली प्रोंइशा, थम मरिम्शो दुम्तक। गोपुकीम इन पर्वम पाप पशो बाक्तक। दानीएल ९:४-९

8 ए इस्राएल आ आस पतीके, श्येत जवानु मेको कली प्रोंइब, गे एको रागीम मारदे अर्को रागी डा मुर खोदेशो दुम्नीनी? गे मारदे नाकदो का ला बाक्ब, लां गाक्ब मुर खोदेशो दुम्नीनी?

9 गे मारदे इन थुं ग्येत्थ लुकच दुम्या बाक्शो मुर खोदेशो दुम्नीनी? मारदे प्रोंइने मचाप्ब सक्ति मबाक्शो लडाइ पाइब खोदेशो दुम्नीनी? परमप्रभु यावे, गे आंइ दातेम बाक्शो बाक्नीनी। गो इन नेंमी ब्रेत्चा पुंइसीशो बाक्नीकी। आंइ कली मप्रोनीन” देंनीम। येरमीया १५:१६; यसैया ४३:७

10 परमप्रभु यावेमी मेको मुर आन पर्वम “मेकोपुकी थमा पा हिरना हिरन बाक्नीम। हेंथे गाक्चा दाक्नीमी। थमा पा ठीक लां मगाक्नीम। मोपतीके परमप्रभु यावेम मेको आन कली मब्राइब। मुल मेकोमी आन मरिम्शो पशो आ पर्वम मिम्ब। मिनु मेको आन कली आन पाप आ पर्वम सजाइ गेब” देंत।

11 मिनु परमप्रभु यावेम आं कली “एको जात डा मुर आन कली रिम्शो दुम्पाइक्चा कली मपुनो। येरमीया ११:१४; येरमीया ७:१६

12 मेकोपुकी माइजा बाक्तेक्म हना यो, गो मेको आन पुंइशो मनेनुड। मेकोपुकीमी चोशा चढेतीके, अन्न चढेतीके चढेम्तेक्म हना यो, गो मेको आन कली मब्राइनुडमी। मेको आ पा डा गो मेको आन कली, तरवार, अन्काल नु बेक्तीक रोइम साइक्नुडमी” दे माइक्ती। यसैया ५८:३; येरमीया ६:२०

## परमप्रभु आ लोव्र जोल पाइबपुकी

13 मिनु गो “परमप्रभु यावे, कोव्रडीन। इन लोव्र पाइबपुकीम दा मेको आन कली ‘गे तरवारम साइक्चा मपुंइसीनीनी। अन्काल मपाइनीनी। मिनु शुश नाक्ती सम्म एको रागीम थुं नाइश्शा बाक्चा ताइनीनी’ देशो बाक्नीम” देंती।

14 मिनु परमप्रभु यावेम आं कली “आं लोव्र पाइबपुकीम दा आं नेम जोल पा लोव्र पशो बाक्नीम। गो मेको आन कली मसोइक्तुमी। गो मेको आन कली लोव्र मपड। मेकोपुकीमी इन कली जोल पा, लिक्वु कोव्रशा, फश लोव्र पाइनीम। आन थुं डा जोल लोव्र पाइनीम। येरमीया २३:२१-२२; येरमीया २७:९, १४, १५; येरमीया २९:८-९; इजीकीएल १३:६

15 मोपतीके परमप्रभु यावेम मेको आ लोव्र पाइब आन पर्वम, सुम आ नेम लोव्र पाइनीमी, मेको आन कली सोइश्शो मनड। मो हना यो मेकोपुकीम ‘तरवार नु अन्कालम एको रागी कली मताइब’ देशो बाक्नीम। मुल तरवार नु अन्कालमीन जोल पा आं लोव्र पाइबपुकी साइक्चा पुंइसीनीम। ब्यवस्था १८:२०

16 मिनू जोल पा आं लोव्र नेंपाइक्चा पुंडसीबपुकी चहिं तरवार नु अन्कालम पतीके यरूसलेम डा लां मेर ताइक्चा पुंडसीनीम। मेको, मेको आन मीश नु मेको आन तमी तौ आन कली थिम्ब सुइ मबाक्नीम। मारदे हना गो मेको आन तचा डा श्येत मेको आन तारी मोइक्नुड” दे माइक्ती। येरमीया ९:२१

17 गे मेको आन कली “आं मिक्च रे नाक्दो नाक्ती प्रेक्कु यिशा बाक्ल। मारदे हना आं मुर, ग्युंवे मपशो तमी थाम्पा श्येत जशो बाक्ब। ठेयब गार दुम्चा डा पा मेको तुप्चा पुंडसीशो बाक्ब। येरमीया १३:१७

18 गो मेको रागी लती हना, तरवारम साइक्चा पुंडसीशोपुकी ताइक्नुडमी। गो मेकेर डा सहरम ओव्रती हना, मेकेर अन्काल पशो मुरपुकी ताइनुडमी। परमप्रभु यावे आ लोव्र पाइबपुकी नु चढेब नेल्ल मारेइ मतुइक्थु, आन गेय पना पन बाक्नीम” दे माइक्ती।

19 मिनू गो “मार, गे यहूदा कली थमा पा प्रॉइने थुम्शो बाक्नीनी? मार, गे सियोन कली ग्रॉग्रा दिशशो बाक्नीनी? गे आंइ कली मारदे मसापाइक्चा डा पा तुप्नी? गोपुकी थुं नाइशशा बाक्तीक आस पाइतक, तन्न मारेइ रिम्शो मदुम। सानीकी कों दे आंस पाइतक, तन्न हिंतीक कका जाक्त। येरमीया ८:१५

20 परमप्रभु यावे, गोपुकीम इन अरेशो लोव्र मटिशो नु आंइ किकी पिपी आन मरिम्शो पशो शोव्रनीकी। गोपुकीम थमा पा इन डोंइती पाप पशो बाक्नीकी। येरमीया ३:२५; भजन संग्रह ५१:५-७; भजन संग्रह १०६:६

21 इन नें आं पर्वम आंइ कली शोर गाक्शो ममिम्तीन। गो इन सक्ति पाइशशो नित्तीक कली आइक्च मसेल्पाइक्नीकी। इन पशो कबल मिम्तीन। गे मेको मक्याम्दीन।

22 रागी रागी डा मुर आन देवी देवता आन दाते डा तेकोइमी रेट यिपाइक्ने चाप्नीमी डा? मार, सरीड आमा रेट यिपाइक्ने चाप्चा डा? मेको पाइब गे परमप्रभु यावे, आंइ परमप्रभु मननी डा? मोपतीके गो इन कली आस पाइनीकी। मारदे हना गे ला एको नेल्ल पने चाप्नीनी” देंती।

## 15

### परमप्रभुम लोव्र लेशशो

1 मिनू परमप्रभु यावेमी आं कली “मोसा नु सामुएलमी आं डोंइती जाक्शा पुंडताक्स हना यो, आं थुं एको जात डा मुर आन गे मलेप्ब। मेको आन कली आं डोंइती रे गुंडदीमी। मेको आन कली लचा गेमी। प्रस्थान ३२:११; १सामुएल ७:९; इजीकीएल १४:१४

2 मिनू मेकोपुकीमी ‘गो ते लाइनीकी?’ दे इ कली हिल्लो पाम्तेक्म हना, गे मेको आन कली परमप्रभु यावेमी ‘बेक्तीक रोइ पा बेक्चा ब्रेक्सीशो बाक्तीनी हना, बेक्तीक गेन लने। तरवारम साइक्चा पुंडसीचा ब्रेक्सीशो बाक्तीनी हना, तरवार गेन लने। शोव्रलुम बेक्चा ब्रेक्सीशो बाक्तीनी हना, शोव्रलुमीन बेक्कीन। ग्याइशशा लाइक्चा पुंडसीचा ब्रेक्सीशो बाक्तीनी हना, ग्याइशशा लाइक्चा पुंडसीन’ देनो। येरमीया ४३:११; जकरिया ११:९

3 गो मेको आन कली ४ ओटा साइक्तीक श्येत सोइक्नुडमी। गो साइक्चा कली तरवार, कीशा लाइक्चा कली कुचुम, दाक्पाइक्चा कली नु खतम सेल्चा कली सरीड डा चिक्ब नु रागी डा जन्तु सोइक्नुडमी। इजीकीएल १४:२१; येरमीया ७:३३

4 यहूदा डा पिप हिज्कीयाह आ तौ मनस्सेम यरूसलेममी मार पशो बाक्मे, मेको आ पर्वम गो मेको कली खतम पोक्नुड। मिनू मेको तशा रागी डा राज्य नेल्लेम ‘आबी, आबी’ दे हिंनीम। २राजा २१:११-१६; २राजा २३:२६

5 गे यरूसलेम, सुमी इ कली शिशी पाइबा? इ पर्वम सुम रोंका पाइबा? गे दोदेशो बाक्नी? दे हिल्लो पचा कली सु दिक्बा?

6 गे आं कली प्रॉइशो बाक्नेवे। गे नोले शोंइसीन सीन बाक्नेवे। मोपतीके गो आं गुइ क्युक्शा इ कली साइक्नुड। मुल गो आं गाइशशो मतेक्नुड।

7 गो मेको आन कली राज्य डा सहर डा ठेयब लाप्चोमी ग्योलोम हारशो खोंदेशो हारताक्ड। गो आं मुर आन कली शुश श्येत गेशा खतम सेल्ता। मारदे हना मेको आन मरिम्शो पतीक रे मलेम्म। मती ३:१२

8 मेको आन वोंइश बेक्शो मीश मुरपुकी समुन्द्र डा बाल्वा क्येडा शुश दुम्तेक्म। नाक्ती उइक्थ दुम्मेनु, तौ नु आन ममा आन पर्वम साइक्ब का चाक्नुड। गो कालेम मेको आन तार सुर्ता पतीक नु ग्रीचोक पा हिंतीके चाक्नुड।

9 मिनु ७ जना बेक्शो तौ आन ममा थत। नाक्ती बाक्ना बाक्न मेको आ नां लाक्तु। मिनु मेको मुने दोक्शा शुक्शी पाइक्चा पुंडसाक्व। मेको क्येडा यो ब्रोंइशो आन कली आन जोरी सत्रुम तरवारम क्योरपाइइशा, साइक्पाइक्नुडमी” दे परमप्रभु यावेम देंत। आमोस ८:९

10 आं ममा, मारदे आं कली जरमेनी। गो आं कली रागी नेल्लेम सुइ सुइम जिचा पोक्शा, गो नु सुइ मदुइनीम। गो मेको आन कली ना जेर गेशो बाक्नुडा, ना मेको आन रे जेर जशो बाक्नुडा। मो हना यो मुर नेल्लेम आं कली सराप पाइनीम। येरमीया २०:१४

11 परमप्रभु यावेम आं कली “थमा पा, गो इ कली रिम्शो पा, प्रॉइनन। गो थमा पा श्येत नु मरिम्शो दुम्मेनु इ जोरी सत्रु आन कली, इ गेय पपाइक्नुडमी।

12 मार, मुरुमी उत्तर डा फलाम नु कांसा जिक्ने चाप्बा डा?

13 इन पापम पतीके इन रागी नेल्लेम इन शोंप नु इन मारेइ मारेइ गो मोशान रोइइशो मार मार खोदेशो पा योक्शा गेनुडमी। येरमीया १७:३

14 गो इन कली आंम इन मतुइइशो रागीम इन जोरी सत्रु आन वाइल सेल्नुड। मारदे हना आं गाइइशोम मी का जेक्ब। मेको गेना हना यो ब्रशा बाक्ब” दे परमप्रभु यावेमी देंत।

15 मिनु गो “परमप्रभु यावे, गे नेल्ल तुइइशो बाक्नीनी। आं कली मिम्तीन। मिनु आं कली कोव्रडीन। आं कली श्येत गेब आन कली क्येक्क लेत्तीन। गे मेको आन पर्वम शुश फाल्शा बाक्नीनी। आं कली मसाइय्यीनी। गो इन पर्वम शुक्शी पाइक्चा पुंडसाक्वी, गे मेको तुइक्नीनी।

16 इन लोव्र बाक्त हना, गो नोफा दाइइशा नेता। मेको आं कली ग्येरतीक नु आं थुं कली नाइक्पाइक्ब दुम्त। मारदे हना परमप्रभु यावे, मुर नेल्ल आन परमप्रभु, गो इन के नड। ब्यवस्था ८:३; ब्यवस्था ३२:४६-४७; इजीकीएल ३:१-३; प्रकाश १०:८-९

17 गो दला दाक्स पा बाक्ब आन हुलम गेनायो मलड। गो मेकोपुकी नु मार्येरसीड। गो आं कान बाक्ती। मारदे हना इन गुइ आं तार बाक्त। मिनु गे आं कली गाइक्तीकेम प्रिंशो बाक्तीनी।

18 आं श्येत जतीक मारदे मनुम्मे? मिनु आं गार मारदे मसाब दुम्मे? गे आं कली मरिम्शो नु ब्वाक्कु मबाक्शो खोला खोदेशो दुम्तीनी” देती।

19 मोपतीके परमप्रभु यावेम “गे थमा पा लेत्ते हना, गो इ कली लेंशा ब्राइनुड। गे आं डोंइती रपो। रिम्शो लोव्र ला पाप्तीवी हना नु फश लोव्र मपाप्तीवी हना, गे आं लोव्र पाइब दुम्मेवे। मिनु एको मुरपुकी इ गे लेत्नीम। तन्न गे मेको आन गे मलेतो।

20 गो इ कली, एको मुर आन डोंइती कांसा के बोल्यो गारो सेल्नन। मेकोपुकीमी इ कली लडाइ तोइनीम। तन्न इ क्येडा मग्रानीम। मारदे हना गो इ कली प्रोंइचा कली नु वारच पाइक्चा कली गे नु बाक्नुड। येरमीया १:१८-१९

21 गो इ कली आं अरेशो मटीब आन गुइ रे प्रॉइनन। मिनु शिशी मपाइक्ब आन गुइ रे यो प्रॉइनन” दे परमप्रभु यावेमी देंत।

## 16

### परमप्रभुम निसाफ पशो

1 मिनु परमप्रभु यावेमी आं कली मार देंत देशा हना

2 “गेमी एको रागीम ग्युंवे पचा नु तमी तौ थिचा मदुम्मेवे” देंत।

3 मारदे हना एको रागीम जरमेशो तमी तौपुकी नु आन आंम आफ आन पर्वम परमप्रभु यावेम

4 “मेकोपुकी मसाब रोडम बेक्नीम। मेको आन पर्वम सुडम रोंका मपाइनीम। मेको आन कली सुडम मथिन्मीम। मेकोपुकी खपीम मोवल खोदेशो पा बाक्नीम। मेको तरवार नु अन्कालम बेक्नीम। आन बेकशो रां सरीड डा चिक्ब नु रागी डा जन्तु आन ब्वतीक थोवक दुम्नीम” दैत। येरमीया १:२१

5 मारदे हना परमप्रभु यावेम “गे मुर बेकशो खिंमी रोंका पथ नु रोंका पाइब आन कली लेम्थ मलावो। मारदे हना गो मेको जात डा मुर रे थुं नाइक्तीक, गेना हना यो दाक्तीके नु शिशि पतीके लाइक्ने थुम्ता।

6 एको रागीम आइक्च नु ठेयब नेल्ल बेक्नीम। मेको आन कली सुडम मथिन्मीम। मेको आन पर्वम सुडम रोंका मपाइनीम। आंम रां रिक्सीब नु चां प्रेक्ब सुड मबाक्नीम। येरमीया ४१:५; येरमीया ४७:५; येरमीया ४८:३७८; लेवी १९:२७-२८; ब्यवस्था १४:१

7 मिनु बेक्ब आन पर्वम रोंका पाइब नु आम आफ आस कली लेम्चा कली सुडम तूचा थोवक मगेनीम।

8 गे भोज पशो खिंम मओवडो। मिनु मेकोपुकी नु जचा तूचा कली मनिसो।

9 मारदे हना मुर नेल्ल आन परमप्रभु यावे, इस्राएली आन परमप्रभुमी ‘गो एको रागी रे इन पालाम, इन डोंइती रे थुं नाइश्शा बाक्तीक, ग्येरशो सेंदा नु ग्युम्ली ग्युम्ले आस सेंदा क्याम्नुड’। येरमीया ७:३४

10 मिनु गे एको मुर आन कली एको लोव नेल्ल देंनेनु, मेकोपुकीमी इ कली ‘मारदे परमप्रभु यावेम आंइ कली ओदेशो ठेयब मरिम्शो दुम्तीक देंमे? आंइ मरिम्शो पशो मार बाक्बा? गो परमप्रभु यावे, आंइ परमप्रभु कली मार पाप पका डा?’ देंनीम। येरमीया ५:१९

11 मिनु गे मेको आन कली ‘इन किकी पिपीमी आं कली प्रोंइशा, देवी देवता आन नोले खोइश्शा, मेको आन कली पूजा पा ठेयब सेल्लेक्म। मोपा आं कली प्रोंइशा आं अरेशो मपामे।

12 गेपुकीमी इन किकी पिपी आन क्येडा शुश मरिम्शो पाइतीनी। नेनीन, गे एकेर बाक्ब नेल्लेमी इन खकटा थुंमी इन दला दाक्स पाइनीनी। मिनु गे आं लोव नेंचा मदक्नीनी। येरमीया ७:२६

13 मोपतीके गो इन कली इन मतुइश्शो रागी नु इन किकी पिपी आन मतुइश्शो रागीम ताइक्नन्नी। मिनु गेपुकीम मेकेर नाक्दो नाक्ती देवी देवता आन कली पूजा पाइनीनी। मारदे हना गो इन कली शिशि मपाइनुड’ देनो” दे परमप्रभुमी आं कली दैत। ब्यवस्था २८:६४

14 मिनु परमप्रभु यावेमी “परमप्रभु यावे ब्रोंइशा बाक्शो नु मुर आन कली इजीप्त रागी रे गुंइशा एक चाक्शो खोदेशो पा मदेंतीक नाक्ती थमा पा जाक्नीम।

15 तन्न मार देंनीम देशा हना, मेकोपुकीमी “परमप्रभु यावे ब्रोंइशा बाक्शो नु इस्राएली आन कली उत्तर डा रागी नु तेको तेको रागी रे चाक्शो खोदेशो पा” देंनीम। मारदे हना गो मेको आन कली आन किकी पिपी आन कली गेशो रागीम चाक्नुडमी। येरमीया २३:७-८

16 मुल गो शुश ग्याइल आप्ब आन कली ब्रेश्शा सोइक्नुडमी। मिनु मेकोपुकीमी मेको आन कली ग्याइक्नीम। नोले गो लेंशा शुश सिखारी आन कली ब्रेश्शा सोइक्नुडमी। मिनु मेकोपुकीमी, मेको आन कली तेकोइ डांडा नु तेकोइ पहाड नु सेरथे फुल्लु डा काक्पे रे माल्शा गुंइनीम।

17 मारदे हना गो मेको आन लां नेल्ल तुइक्नुड। मेको आं डोंइती मखुइश्शो बाक्नीम। मेको आन मरिम्शो पशो यो आं डोंइती मखुइश्शो बाक्ब। अय्युब ३४:२१

18 गो मेको आन मरिम्शो पशो नु आन पाप आ पर्वम मेको आन कली निक्शी खेयप सजाइ गेनुडमी। मारदे हना मेकोपुकीमी सोक्ती मपाइश्शो मूर्तिपुकीम आं रागी ग्रांरा दिशो सेल्लेक्म। मिनु आं थेरशो रू आन ग्रांरा दिशो देवी देवताम प्रिताक्म” दैत। यसेया ४०:२

19 मिनु मेकोपुकीमी “परमप्रभु यावे, गे आं सक्ति नु आं खुइश्शा, ब्रोंइशा बाक्तीक बाक्नीनी। गे श्येत जची ना आं खुइक्तीके बाक्नीनी। रागी रागी डा मुर रागी डा सुर रे इन डोंइती जाक्नीम। मिनु मेकोपुकीमी ‘आंइ किकी पिपी आन देवी देवता जोल ला बाक्तेक्म। मेको शोर गाक्शो बाक्तेक्म। भजन संग्रह ३६:७

20 मार, बेक्शा लाइब मुरपुकीम आंम देवी देवता सेल्ले चान्नीमी डा? तन्न मेकोपुकी देवी देवता मनम” देंनीम।

21 मोपतीके गो मेको आन कली थमा पा रूप्पाइक्नुडमी। गो मेको आन कली आं सक्ति नु आं टेयब दम्तीके आ परबम शेनुडमी। मिनु मेकोपुकीमी आं नें यावे बाक्ब, दे तुडक्नीम” दे परमप्रभु यावेमी दैत। प्रस्थान ३:१२

## 17

### पाप रे प्रॉइतीके नु निसाफ

1 परमप्रभु यावेमी “यहूदा आ पाप फलाम के मुतीकेम मुशा ब्रेक्शो बाक्ब। मेको हीरा पाइश्शो मुतीकेमी आन थुं नु आन चढ़ेतीक डा ग्रोवपुकीम मुशा ब्रेक्शो बाक्ब। २राजा २३:४-१८

2 मेको आन आलपुकीमी यो आन चढ़ेतीक नु आन मूर्ति पाइश्शो थाम आन कली मिन्मी। मेको नेल्ल गिगी रवा आन पुंम नु लाइश्शो पहाड तार बाक्तेक्म।

3 मेको डांडा तार नु रूम बाक्तेक्म। मिनु इन रागी डा शोंप नु इन रिम्शो मारेइ मारेइ थोवक नेल्ल इन पाप पतीकेम रोइक्पाइक्नुड। येरमीया १५:१३

4 इन पाप पतीकेम गो इन कली गेशो, इन थेरशो रू साम्नीनी। मिनु गो इन कली इन मतुइश्शो रागीम इन जोरी सत्रु आन वाइल दुम्पाइक्नन्नी। मारदे हना आं गाइक्तीके मी ब्रशो खोदेशो बाक्ब। मिनु मेको गेना हना यो ब्रस डा ब्रस बाक्ब” दैत।

5 परमप्रभु यावेम मार दैत देशा हना “सु सुमी मुर आन कली थमा सुइक्नीमी, मेको सराप राइनीम। आन रां डा सक्तिम थमा सुइक्ब यो सराप राइनीम। मारदे हना मेको आन थुं परमप्रभु यावे रे डोन लशो बाक्ब। भजन संग्रह ११८:८; भजन संग्रह १४६:३; २इतिहास ३२:८

6 मेको गोरशो रागी डा पोश्रा रवा खोदेशो बाक्नीम। मेकोमी रिम्शो दुम्मेनु यो, मारेइ मताइनीम। मेको मुर मबाक्तीक रागी डा नेल्ल क्येडा सोव्रशो खपीम नु हिक्सी बाक्शो रागीम बाक्नीम। येरमीया ४८:६

7 परमप्रभु यावे कली थमा सुइक्ब मुर आसीक रशो बाक्नीम। मेकोपुकीम परमप्रभु यावे कली आस पशो बाक्नीम। बजन संग्रह १४६:५

8 मेको ब्वाक्कु आ नेक्था खुम्शो रवा खोदेशो बाक्नीम। मेकोमी आन शाकश खोला आ सुर सम्म चाक्दीत्नीम। मेको हुत्तानु, महिनीम। मेको आन सफापुकी गेना हना यो गिगी बाक्नीम। नां पवानु मेको मारेइ सुर्ता मपाइनीम। मेको गेना हना यो फल सिप्ब बाक्नीम” दैत। भजन संग्रह १:३

9 मुर आन थुं नेल्ल क्येडा जोल पाइब बाक्ब। गेना हना यो दूली पाइब बाक्ब। मेको कली सुम रुप्ने चाप्बा डा? १सामुएल १६:७; बजन संग्रह ७:१०; हितोपदेस १५:११; रोमी २:६

10 गो, परमप्रभु यावेमी मुर आन कली नाक्नुड। आन थुंम मार बाक्मे, मेको कोव्रनुड। आन गाक्शो लां नु आन पशो कोव्रशा, इनाम गेनुडमी।

11 मुर, आंम आ मपशो ब्बोफु पुप्ब क्येन्ने खोदेशो बाक्ब। मेकोमी हेंथे पा शोंप चेम्ब। मेको आ ब्रॉइतीक नाक्ती उइक्थ दुम्मेनु, मेको आ शोंपोम मेको मुर कली प्रॉइब। मिनु आ बेक्ची ना मेको कली मूर्ख मिन्सीब। लूका १२:२०

12 डोइती रे मान तशा बाक्शो इन सक्ति पाइश्शो नित्तीके आंइ ब्रॉइशा बाक्तीक बाक्ब। येरमीया ३:१७

13 गे इस्त्राएली आन आस पशो परमप्रभु यावे, इन कली प्रॉइब नेल्ल मुने दोक्नीम। इन कली प्रॉइशा गाक्ब मुर नेल्ल फुरकुम नें ब्रेक्शो खोदेशो ला बाक्नीम। मारदे हना मेकोपुकीमी गेना हना यो ब्रॉइचा गेब ब्वाक्कु, परमप्रभु यावे कली प्रॉइशो बाक्नीम। येरमीया २:१३

### येरमीया आ पुंइशो

14 मिनु गो “परमप्रभु यावे आं कली सापाइय्यीनी। मिनु गो सानुड। आं कली प्रॉइयीनी। मिनु गो ब्रॉइनुड। मारदे हना गे आं सक्ति बाक्नीनी। प्रस्थान १५:२६; बजन संग्रह ६:३

15 मेकोपुकीमी आं कली ‘परमप्रभु यावे आ लोव्र ते बाक्म? मुल मेको नेल्ल गाप्ल’ दैतेक्म। बजन संग्रह ५:१९

16 तन्न गो इन गोठला दुम्तीक रे मप्रोक्ड। गे तुइक्नीनी। गो नोले डा नाक्ती सुर्ता पचा ममाल्नुड, दे मिम्शो बाक्नुड। गो मार दँडा, मेको इन डोंइती बाक्ब।

17 गे आं कली हिंपाइक्ब मदुमीन। गो खतम दुम्चा डा नाक्ती गेन आं खुंइसीतीके बाक्नीनी।

18 आं कली खेदा पाइब आन कली मुने तोक्कीन। तन्न आं कली चहिं मुने मतोक्वीनी। मेकोपुकी हिंमल। तन्न आं कली चहिं हिंतीक रे प्रॉइयीनी। मेको आन ठेयब श्येत डा नाक्त चाक्कीन। मेको आन कली निक्शी खेयप डा श्येतम सतीन” देती। बजन संग्रह ३५:४

नाइक्तीक नाक्त आ पबंम लोत्र

19 परमप्रभु यावेम आं कली “गे मुर आन ओव्रतीक ठेयब लाप्चो आ नेक्था रपो। मेको लाप्चो रे यहूदा डा पिप लाडगा खिंडगा पाइब। यरूसलेम डा गारो डा लाप्चो नेल्ल आन डोंइती लशा रपो। नेहम्याह १३:१५-२२

20 मिनु मेको आन कली ‘एको ठेयब लाप्चो रे पा आगा ओव्रब यहूदा डा पिप, मेकेर डा मुर नेल्ल नु यरूसलेममी बाक्ब मुर नेल्ल परमप्रभु यावे आ लोत्र नेनीन’ देनो” देत।

21 परमप्रभु यावेमी “गेपुकी होस पा बाक्कीन। मिनु गे नाइक्तीक नाक्त ठेयब लाप्चो आगाम मारेइ भारी मकुरीन। यरूसलेम डा गारो डा ठेयब लाप्चो रे पा आगा मारेइ मओइदीन। प्रस्थान २०:८-१०

22 “गेपुकी नाइक्तीक नाक्ती इन खिं रे भारी मकुरीन। मेको नाक्ती मारेइ गेय मपने। गो इन किकी पिपी आन कली शेंशो खेदेंशो पा नाइक्तीक नाक्त कली अरु नाक्ती खेदेंशो मपने। मारदे हना मेको आं नाक्त बाक्ब” देती। यसेया ५६:२

23 तन्न मेकोपुकीमी मनेनेम। आन नोफा मदाइक्तेम। मिनु मेको आन थुं खकटा दुम्तीके मटीमे नु शेंशो नेने मबिस्सम। येरमीया ११:८

24 तन्न गेपुकीमी आं लोत्र नेतीनी हना, नाइक्तीक नाक्ती सहर नु ठेयब लाप्चो रे मारेइ भारी आगा मओइताक्नी हना नु नाइक्तीक नाक्त आं नाक्त मिम्शा, मारेइ गेय मपाइतीनी हना,

25 दाऊद आ नित्तीकेम निष्ब पिप, आन गेय पाइब मुरपुकी एको सहर डा ठेयब लाप्चो रे शाराम कीशो बग्गीम डोइश्शा ओव्रनीम। यहूदा डा मुर नु यरूसलेममी बाक्ब जाक्नीम। मिनु एको सहरमी गेना हना यो मुर शुश बाक्नीम। येरमीया २२:४

26 मिनु यहूदा डा सहर रे नु यरूसलेम आ एर ओंथ डा गाउं रे, बेन्यामीन आ रागी रे, शेफेलाह डा दिंम रे, पहाड रे नु नेगेब रे चोशा चढेतीके, क्योरशा चढेतीके, अन्न चढेतीके, धूप चढेतीक नु ‘गे रिम्शो पाइब बाक्नीनी’ दे चढेतीके चाक्शा, परमप्रभु यावे आ खिंम जाक्नीम।

27 तन्न गेपुकीमी आं लोत्र मनेतीनी हना, नाइक्तीक नाक्ती आं नाक्त बाक्ब, दे ममिम्ताक्नी हना नु नाइक्तीक नाक्त भारी कुरशा यरूसलेम डा ठेयब लाप्चो आगा ओव्रतीनी हना, आं देंशो मबिस्साक्नी हना, गो यरूसलेम डा ठेयब लाप्चोमी गेनायो मकाप्ब मी जेतनुड। मिनु मेकोमी यरूसलेम डा दरवार दाक्ब” दे परमप्रभु यावेमी देत। इजीकीएल २०:१२-१३

## 18

खप के ग्योब सेल्ब

1 परमप्रभु यावेमी आं कली मार लोत्र पाप्तु देशा हना

2 मेकोमी “उइ खप के ग्योब सेल्ब आ खिं लावो। मिनु गो इ कली आं लोत्र नेपाइक्नुड” देत।

3 मोपतीके गो उइ खप के ग्योब सेल्ब आ खिं लती। मिनु मेकेर मेकोमी आ गुगील हिरशा गेय पाप्तु।

4 मिनु मेको आ सेल्शो खप के ग्योब आ गुइम वारसाक्व। मिनु मेकोमी मेको खप के आ दाक्शो अर्को ग्योब का सेल्लु।

5 मिनु परमप्रभु यावेमी आं कली

6 “इसाएल आ खिं डा मुर, एको खप के ग्योब सेल्बमी खोदेशो पा गो इन कली पाइवने मचापनुडा डा? इसाएल आ खिं डा मुर, मेको खप के ग्योब सेल्ब आ गुडम खप बाक्शो खोदेशो पा, गे यो आं गुडम खप खोदेशो बाक्नीनी। यसैया ४५:९; रोमी ९:२१

7 गो याम कामीन तेकोइ रागी, तेकोइ राज्य आन कली तुल्शा ताइशशा, जिक्शा खतम सेलनुड। गो मेको पने चापनुड। येरमीया १:१०

8 तन्न मेको आ देशो रागी डा मुर आन मरिम्शो पतीक रे आं गे लेत्तेक्म हना, गो आं मिम्शो मेको आन कली ठेयब श्येत गेतीक रे फाइक्नुड। श्येत मगेनुडमी। येरमीया २६:३; इजीकीएल ३३:११; जोना ३:१०

9 मिनु अर्को याम काम गो तेकोइ रागी, तेकोइ राज्य आन कली सेल्शा वोइवने चापनुड।

10 तन्न मेकोपुकीम आं लोव्र मनंथु, आं डोंइती मरिम्शो पांतेक्म हना, गो मेको आन कली रिम्शो मसेलनुडमी।

11 मोपतीके गे यहूदा डा मुर आन कली नु यरूसलेममी बाक्ब मुर आन कली परमप्रभु यावेम इन कली मार दंत देशा हना ‘नेनीन, गो इन कली मरिम्शो पाइनुड। गो इन कली श्येत गेनुड। मोपतीके गे इन मरिम्शो लां रे लेतीन। मिनु इन लां नु इन पतीके रिम्शो सेलीन’ देंनो। येरमीया ७:३

12 तन्न मेकोपुकीमी ‘मो पचा मोशा बाक्ब। गो आंइ मिम्शो पाइनीकी। गो आंइ थुं खकटा सेलीनीकी, दे लोव्र लेत्ताक्म’ देंनीम” दंत। येरमीया ६:६; येरमीया ११:८

13 मोपतीके परमप्रभु यावेम “रागी रागी डा मुर आन दातेम लशा हिल्लो पावो। ओदेशो लोव्र सुम नेशो बाक्नीमी? ग्युंबे मपशो मीश आल इसाएलम थम ग्रांरा दिशो गेय पशो बाक्ब।

14 मार, लेबानोन डा फुं सिरियोन रोगु आ काक्पे रे जाम्बा?। मार, आ बुक्तीके पहाड रे गूशा यिशो खोला डा शाइशो ब्वाक्कु सोव्रबा डा?।

15 तन्न आं मुरपुकीम आं कली प्रंताक्म। मेकोपुकीमी शोर गाक्शो मूर्ति आन कली चोशा चढ्ढेक्तेक्म। मेको माइत लांम दाइल पपांइसाक्म। मिनु मेकोपुकी मेको माइत ठेयब लां प्रॉइशा, आइक्च लां मेर गाक्तेक्म।

16 मेकोपुकीम आन रागी हिंचा डा सेल्तेक्म। मिनु मेको रागी गेना हना यो शुक्शी पतीक दुम्त। मेकेर रे सु सु गाक्मा मेको ग्रीचोक पा हिंनीम। मिनु ‘आबी, आबी’ देंनीम। येरमीया १९:८

17 गो मेको आन कली पूर्व डा फशेम खोदेशो पा आन जोरी सत्रु आन डोंइती एर ओंथ ब्रपाइक्नुडमी। मेको आन हिंचा डा नाक्ती गो मेको आन कली आं ची कांइनुडमी। आं कुल मकोइनुडमी” दंत। येरमीया २:२७

18 मिनु मेकोपुकीम “मुल गोपुकीम येरमीया कली दोस गेय। मारदे हना चढ्ढेब आन शेंशो लोव्र मग्याम्ब। जोक्ब तुइक्ब आन अर्ती यो मग्याम्ब। मिनु परमप्रभु यावे आ लोव्र पाइब आन देशो लोव्र यो मजाम्ब। मोपतीके मुल गो येरमीया कली दोस गेय। मिनु मेको आ देशो तेकोइ लोव्र मनंय” दंतेक्म।

19 मिनु येरमीयामी “परमप्रभु यावे आं लोव्र नेनीन। आं कली दोस गेबपुकीम मार देंनीमी, मेको नेनीन।

20 मार, रिम्शो आ पा डा मरिम्शो पांइसीबा डा? मो हना यो आं कली खाल्टा दोशो बाक्तेक्म। गो मेको आन परबंम पुंइना पुंइन बाक्ती, मेको मिम्तीन। मेको आन कली वारच पचा कली नु इन गाइशो तेक्चा कली पुंइता।

21 मोपतीके मेको आन आल आन कली अन्काल पपतीन। मेको आन कली तरवारम साइक्पतीन। मेको आन मीश आल मबाक्शो नु आन वॉइश बेक्शो मीश मुर दुम्मल। मेको आन वॉइश मुर बेक्तीक रोइम बेक्मल। मेको आन टिटा वॉइश मुरपुकी लडाइम तरवारम साइक्चा पुंइसमल।

22 गेमी मेको आन कली आन मतुइक्थु साइक्ब चाक्नीनु, मेको आन खिं रे डाक्शो ब्रेशो नेंसेक्ल। मारदे हना मेकोपुकीमी आं कली ग्याइक्चा कली खाल्टा दोशो बाक्तेक्म। मिनु आं खोइल फ्रिन्चा कली खुइशशा ब्वारद दाइशो बाक्तेक्म।

23 मिनू परमप्रभु यावे, आं कली साइक्चा माल्शो नु मरिम्शो पाइब नेल्ल आन कली तुइक्ताक्नी। मेको आन मरिम्शो पशो माफ मगेने। इन डोंइती रे मेको आन पाप मतिलीन। मेको इन डोंइती दाइल पांइसीमल। गे गाइक्तीनीनु, मेको आन कली मार पचा माल्बा, मेको पने” दैत। मत्ती ६:१५

## 19

### ब्रोल्लो गुर

1 परमप्रभु यावेमी “लशा खप के ग्योब सेल्ब रे ब्वाक्कु कुर पतीक ग्योब का ग्यापो। मिनू का निकशी मुर आन दाते डा खाल्पा नु का निकशी चढेब आन कली लाइक्मी।

2 मिनू गे हिन्नोम आ तौ आ बेंसीम बाक्शो गम्टे लाप्चोम लावो। गो इ कली मार शेंदु, मेको लोव्र मेकेर ठेयब सेंदा पा नेंपाइक्मी। येरमीया ७:३१

3 यहूदा डा पिप नु यरूसलेमम बाक्ब मुरपुकी परमप्रभु यावे आ लोव्र नेनीन। मुर नेल्ल आन परमप्रभु यावे, इस्राएली आन परमप्रभुमी ‘आं लोव्र नेनीन। गो एको रागीम थम मरिम्शो दुम्पाइक्नुड’ मेको आ पबंम लोव्र नेंब नेल्ल आन नोफा दाइक्नीम। २राजा २१:१२

4 मेको मुरपुकीमी आं कली प्रोंइतीमी। मिनू एकेर अर्को रागी डा देवी देवता आन कली चढेशा, एको रागी ग्रॉग्रा दिशो सेल्लेक्म। मेको देवी देवता आन किकी पिपी नु यहूदा डा पिपम यो मतुइश्शो बाक्तेक्म। मिनू मेकोपुकीम रागी कली दोस मताइब आन हुशेम प्रिताक्म।

5 मेकोपुकीमी आंम आल आन कली बाल देवता कली मीम चोशा चढेचा कली डांडाम थान सेल्ला सेल्ल बाक्तेक्म। मेको मो पन, दे गो मअरेडमी। गो मेको मशेंदुमी। मोदेशो गेनायो ममिन्तु। येरमीया ७:३१-३३; लेवी १८:२१

6 मोपतीके होस पा बाक्कीन। मेको बेंसी कली तोफेथ नु हिन्नोम आ तौ आ बेंसी, दे वोइश्शो नें प्रोंइनीम। मेको शुश नाक्त रिम्चा ममाल्नीनी। तन्न मेको कली मुर साइक्तीक बेंसी, दे नें वोइक्नीम। येरमीया ७:३२

7 गो एको रागीमी यहूदा नु यरूसलेम आस मिम्शो मदुम्पाइक्नुड। गो मेको आन कली आन जोरी सत्रु आन डोंइती तरवारम साइक्पाइक्नुडमी। सु सुम मेको आन कली साइक्चा दाक्नीमी, मेको आन गुइम गेनुडमी। आन बेक्शो रां चहिं सरीड डा चिक्ब नु रागीम बाक्ब ब्वाकी डा जन्तु आन कली ब्वचा गेनुडमी।

8 मिनू गो मेको सहर कली हिंचा डा सेल्लुड। मिनू मेको सहर गेना हना यो शुक्शी पतीक दुम्ब। मेकेर रे सु सु गाक्मा, मेको ग्रीचोक पा हिंनीम। मिनू आ खतम दुम्तीके आ पबंम आबी, आबी देंनीम। येरमीया १८:१६

9 मेको आन कली आन तमी तौ आन श्ये ब्वपाइक्नुडमी। सहर पुम्तीके मुर नेल्ल आन नेक्था डा मुर आन श्ये ब्वाइनीम। आन जोरी सत्रु नु मेको आन कली साइक्चा माल्ब आन गेशो श्येतम मोदेशो पाइनीम। लेवी २६:२९; ब्यवस्था २८:५३

10 मिनू नोले गे मेको ब्वाक्कु कुर पतीक खप के ग्योब, गे नु लाइब आन डोंइती प्रोलो।

11 मिनू गे मेको आन कली मुर नेल्ल आन परमप्रभु यावेमी ‘दोपा खप के ग्योब सेल्ब आ ग्योब गेनायो मबोंइसीचा डा पा ब्रोल्ले, मोपा गो मेको मुर आन कली नु एको सहर आन कली प्रोल्लुड। तोफेथमी मुर थिन्तीक मनुम्म सम्म बेक्शो मुर थिन्नीम। यसैया ३०:१२-१४; येरमीया ७:३२

12 गो एको सहर नु एकेर बाक्ब मुर आन कली मो पाइक्नुडमी। गो एको सहर कली तोफेथ खोदेशो सेल्लुड।

13 यरूसलेम डा खिंपुकी नु यहूदा डा पिप आन खिंपुकी तोफेथ खोदेशो पा ग्रॉग्रा दिचा डा दुम्नीम। तेको तेको खिं तारी सरीड डा नां, तास्ला नु सोरुल आन कली चढेशा, अरु देवी देवता आन कली तूचा थोव्रक चढेमे, मेको खिं नेल्ल ग्रॉग्रा दिचा डा दुम्नीम ‘देनो’ दे परमप्रभु यावेमी दैत। येरमीया ३२:२९; २राजा २३:१२; सेफन्याह १:३



14 मिनू परमप्रभु यावेमी येरमीया कली लोत्र पथ, तोफेथ सोडक्ताकव। मिनू येरमीया मेकेर रे जाकशा, परमप्रभु यावे आ खिं डा लाडगाम बाकशा, मुर नेल्ल आन कली

15 मुर नेल्ल आन परमप्रभु यावे, इस्राएली आन परमप्रभुमी मार देत देशा हना “गो एको सहर नु आ नेक्था डा सहर डा मुर नेल्ल आन कली आं डोंइती देशो टैयब श्येत जपाडकुडमी। मारदे हना मेको आन थुं खकटा बाकब। मिनू आं लोत्र नेंचा मदाक्नीम” दे माडक्तीमी।

## 20

### येरमीया नु चढेब पशहुर

1 मिनू इम्मेर आ तौ चढेब पशहुर परमप्रभु यावे आ खिंम गेय पाडब आन टैयब मुर बाकत। मेकोमी येरमीया आ लोत्र पशो नेंतु।

2 मिनू पशहुरमी परमप्रभु यावे आ लोत्र पाडब येरमीया कली तुप्तु। मिनू परमप्रभु यावे आ खिंम बाकशो बेन्यामीन आ इर तला डा लाप्चोम बाकशो ठेंडरो थोक्ताकव। प्रेरित १६:२४

3 मिनू आ दीसा पशहुरमी येरमीया कली ठेंडरो रे गुंडदानु, येरमीयामी मेको कली “परमप्रभु यावेम इ नें पशहुर मवोडक्थु ‘एर ओंथ नेल्ल रे हितिक’ दे इ नें वोडक्तु। येरमीया २०:१०; येरमीया ६:२५; येरमीया ४६:५; येरमीया ४९:२९; बजन संग्रह ३१:१४

4 मारदे हना परमप्रभु यावेमी गो इ कली नु इ वारच नेल्ल आन कली शुश हिंचा डा सेल्लुड। मेकोपुकी इ डोंइती आन जोरी सत्रु आन तरवारम साडक्चा पुंडसीनीम। गो यहूदा नु मेको आ मुर नेल्ल आन कली बेबीलोन डा पिप आ गुडम गेनुडमी। मेकोमी मेको आन कली ग्याडशशा बेबीलोन लाडक्ब। मिनू तरवारम साडक्ब।

5 गो एको सहर डा शोप नेल्ल, आ चेम्शो क्येट नेल्ल, आ शुश क्येट लाडब थोवक नेल्ल नु यहूदा डा पिप आन शोप नेल्ल आन जोरी सत्रु आन कली गेनुडमी। मेकोपुकीमी आन मारेड मारेड रोडशशा, मेको आन कली ग्याडशशा बेबीलोन लाडक्नीम। यहोसु ३९:६

6 पशहुर, गे नु इ खिंम बाकब नेल्ल ग्याडक्चा पुंडसीशा बेबीलोनम लाडनीनी। गे बेबीलोन लशा, मेकेर बेक्नीनी। इन कली मेकेर थिम्नीम। गे परमप्रभु आ लोत्र दूली सेल्शा, शेताकवी। इ लोत्र नेंब इ वारच नेल्ल इ खोदेशो पा थिम्चा पुंडसीनीम” देत।

### येरमीयाम उजुर पशो

7 मिनू येरमीयाम “परमप्रभु यावे, गे आं कली लेम्शा, इन लोत्र पाडब सेल्लतीनी। मिनू गो इन लेम्शो लोत्र नेंशा बिस्साक्यी। इन सक्तिमी आं कली ग्रातीनी। मुल नाकत रेन मुरुम आं कली शुक्शी पाइनीम। मुर नेल्लेमी आं कली शुक्शी पाइनीमी। येरमीया १:५-७

8 गो लोत्र पची ना टैयब सेंदा पा लोत्र पचा माल्लुड। गो हुश ख्राकश बोक्चा नु खतम दुम्चा आ पर्वम ला ग्रीनुड। परमप्रभु यावे आ लोत्र नाकत रेन आं कली शुक्शी पाडक्तीक नु मरिम्शो पाडक्तीके दुम्त।

9 गो मेको आ पर्वम लोत्र मपाइनुड। आ नें थिशा लेंशा लोत्र मपाइनुड देती हना यो, आ थुंमी ब्रशो मी खोदेशो दुम्त। आं रुशपुकीम तेक्शा वोदुनु, मी खोदेशो दुम्त। गो मेको कली तेक्शा दती। गो थमा पा, मेको कली तेक्ने मचाप्नुड। १कोरिन्थी ९:१६

10 गो शुश मुरपुकीम नोफा मुडक्मुशा लोत्र पशो नेंता। मेकोपुकीमी ‘एर ओंथ नेल्ल हिंचा डा श्येत बाकब। येरमीया कली दोस गेय। मेको आ पर्वम उजुर पय’ देंनीम। आं नेक्था डा वारच नेल्लेमी ‘गेना दाडल पांडसीबा’ दे आं कली कोवनीम। मिनू लेंशा ‘गो मेको आ पर्वम लोत्र पा मेको कली ग्राने चाप्नीकी। गो मेको क्येडा ग्राशा क्येक्क लेत्तय’ देंतेक्म” देत। येरमीया २०:३; येरमीया १८:१८

11 तन्न परमप्रभु यावे बोल्यो लडाइ पाडब का खोदेशो पा गो नु बाकब। मोपतीके आं कली खेदा पाडबपुकी दाडल पांडसीशा, गोल्नीम। मिनू मेकोपुकीम आं कली मग्रानीम। मेको थाम्पा मुने दोक्नीम। मारदे हना मेको आन मरिम्शो पशो गेनायो मप्रेंसीब। येरमीया १:८,१९

12 मुर नेल्ल आन परमप्रभु यावे, गे ठीक पाइब आन कली नाक्शा कोवनीनी। गे मुर आन थुनु आन मिम्तीके कोवनीनी। आं कली मेको आन कली क्येक्क लेशशो तचा गेयीनी। मारदे हना गो आं निसाफ पतीके इन कली जिम्मा गेता। येरमीया ११:२०

13 मिनु “परमप्रभु यावे कली कुम्सो पने। परमप्रभु यावे ठेयब बाक्ब” दे कुम्सो पने। मेकोमी क्येट मथीब आन कली मरिम्शो पाइब आन गुड रे प्रॉइतु।

14 गो आं जरमेशो नाक्त सराप रल। आं ममाम आं कली जरमेशो नाक्त आसीक मतवल। येरमीया १५:१०; अय्युब ३:३-११; अय्युब १०:१८

15 आं आफ कली “इ के आल का जरमेसाक्व। तौ का जरमेसाक्व” दे लोव्र शेंब सराप रल। मेकोमी आं आफ कली ग्येरपाइक्तु।

16 परमप्रभु यावेमी मेको मुर कली शिशी मपथु, मेको मुर खतम पोक्शो सहर खोदेशो दुम्ल। मेकोमी सुनी डाक्शो ब्रेशो नु नाक्ती लडाइ डा तुराही ताप्शो नेनल। उत्पती १९:२४-२८

17 मारदे हना मेकोमी आं कली आं ममा आ कोव्रज उइ मसाइय्यी। मो दुम्शो हना, आं ममा, आं तुरस दुम वा। मिनु आ कोव्रज गेना हना यो ठेयब दुम वा।

18 गो मारदे कोव्रज रे यूडा? गो शुश गेय नु सुर्ता पचा कली जरमेसाक्वी। मिनु नाक्त कित कित मुने दोक्चा कली जरमेसाक्वी।

## 21

### पिप सिदकीयाह आ पुंइशो मनेशो

1 मिनु पिप सिदकीयाहम माल्कीयाह आ तौ पशहुर नु मासेयाह आ तौ चढ़ेब सेफन्याह आस कली लोव्र कुर पा येरमीया आ बाक्तीकेम सोइक्ताक्सी। मेना परमप्रभु यावेमी येरमीया कली लोव्र पापतु। येरमीया ३९:१-१०; येरमीया २९:२५-२६; येरमीया ३७:३; येरमीया ५२:२४

2 मेको निक्शीमी “हजुर, परमप्रभु यावे कली आइ पबंम हिल्लो पने। मारदे हना बेबीलोन डा पिप नेबुकदरेसरमी आइ कली लडाइ तोन तोन बाक्ब। साइ डोंइती शुश खेयप पशो खोदेशो पा परमप्रभु यावेमी आइ पबंम छक लाक्चा डा गेय पाइबा को? मिनु मोपा मेकोपुकी आइ रे पा लेशशा लाइनीमी को?” देताक्से।

3 मिनु येरमीयामी मेको आस कली

4 “परमप्रभु यावे, इस्राएली आन परमप्रभुमी मार लोव्र पापतु देशा हना, गे सिदकीयाह कली ‘गारो आ लाडगाम बाक्शो इन कली पुम्ब बेबीलोन डा पिप नु कल्दी नु लडाइ पशो इन गुड डा यापुकी इन गे लेप्पाइक्नुड। मिनु गो मेको आन कली खुप्शा, एको सहर आगाम ओइनुडमी।

5 गो आं दिंशो गुड, सक्ति नु आं थाम्पा गाइशशा, चुरशा नु ग्युश्रा बोक्शा, गे नु लडाइ पाइनुड।

6 गो एको सहरम बाक्ब मुर नु बस्तु भाव नेल्ल आन कली साइक्नुडमी। मिनु मेकोपुकी ठेयब बेक्तीक रोइम बेक्नीम’ देंत, दे मतीस।

7 मिनु नोले परमप्रभु यावेमी ‘गो यहूदा डा पिप सिदकीयाह, मेको आ गेय पाइबपुकी नु मेको सहर डा बेक्तीक रोइ, तरवार नु अन्काल रे ब्रोंइशो मुर आन कली बेबीलोन डा पिप नेबुकदरेसर आ गुडम गेनुडमी। गो मेको आन कली साइक्चा माल्ब आन जोरी सत्रु आन गुडम जिम्मा गेनुडमी। मिनु मेकोमी मेको आन कली तरवारम साइक्पाइक्ब। मेकोमी मेको आन कली शिशी मपथु, मप्रॉइब नु दाक्तीके मकोइथु, साइक्पाइक्ब’ मतीस’ दे माइक्तीम्सी।

8 मेकोमी “गेमी मेको मुर आन कली ‘परमप्रभु यावेमी “गो इन डोंइती ब्रोंइशा बाक्तीक नु बेक्तीक लां वोइक्ता। ब्यवस्था ३०:१५

9 मेको सहरम बाक्ब मुर तरवार, अन्काल नु मुर बेक्तीक रोइम बेक्चा माल्नीम। तन्न सु लाडगा गूशा, इन कली पुम्ब कल्दी आन कली जिम्मा गेसीबा, मेको ब्रोंइब। मेकोम आ सोक्त ला प्रॉइब। येरमीया ३८:२

10 गो एको सहर कली थमा पा क्याम्नुड। रिम्शो पचा कली ममिम्नुड। एको सहर बेबीलोन डा पिप आ गुडम गेनुड। मेकोमी एको सहर कली मीम क्रोडक्व” दैत’ देनो” दैत। येरमीया ३४:२

11 परमप्रभु यावेम “यहूदा डा पिप आ खिं डा मुर आन कली ‘परमप्रभु यावे आ लोव्र नेनीन।

12 गे दाऊद आ खिं डा मुर सुनी कुस कुस ठीक निसाफ पने। रोडक्चा पुंडसीशो आन कली मरिम्शो पाइब आन गुड रे प्रोनीन। मो मपाइतीनी हना, इन मरिम्शो पतीके आं गाडक्तीके मी खोदेशो पा ब्राइब। मेको सुडम काप्ने मचाप्चा डा पा ब्राइब। येरमीया २२:३; येरमीया ७:२०

13 एको दिंमम बाक्बपुकी रोंगु तार सेल्शो सहर गो इन कली लडाइ तोडनुड। गे आंइ कली जाक्शा, सुम लडाइ तोडबा डा? “आंइ खुडक्तीके सु ओवने चाप्चा डा? आंइ बाक्तीकेम सु ओवने चाप्चा डा?” देंनीनी।

14 गो इन कली इन पशो खोदेशो पा कोव्रशा, सजाइ गेनन्नी। गो इन ब्वाकीम मी सुडक्नुड। मिनु मेकोमी इन एर ओथ बाक्शो मारेइ मारेइ नेक्ब, दे परमप्रभु यावेमी दैत’ देनो” दैत। गलाती ६:७; इजीकीएल २१:३

## 22

पिप शाल्लुम येहो-याकीम नु कोन्याह

1 परमप्रभु यावेम “उड यहूदा डा पिप आ दरवारम लशा, मेकेर मार लोव्र पचा माल्नेवे देशा हना,

2 ‘दाऊद आ नित्तीकेम निप्ब, यहूदा डा पिप, इन गेय पाइबपुकी नु मेको ठेयब लाप्चो रे ओव्रबपुकी परमप्रभु यावे आ लोव्र नेनीन।

3 परमप्रभु यावेमी मार दैत देशा हना “गे ठीक निसाफ पने। ठीक गेय पने। रोडक्चा पुंडसीशो आन कली मरिम्शो पाइब आन गुड रे प्रोनीन। अर्को रागी डा मुर, रोम रोडक्च नु आन वोंइश बेक्शो मीश मुर आन कली मरिम्शो मपने। मिनु एको रागीम मारेइ दोस मताइब आन हुश मशाइक्पतीन। येरमीया २१:१२

4 मारदे हना गेपुकीम थमा पा एको आं लोव्र पाइतीनी हना, एको दरवार डा ठेयब लाप्चो रे पा ओव्रशा, दाऊद आ नित्तीकेम निप्ब पिप गेना हना यो बाक्ब। मेको बग्गी नु शाराम जाक्शा, मेको आ गेय पाइब मुरपुकी नु अरु मुरपुकी नु ओव्रब”। येरमीया १७:२३

5 तन्न गेपुकीम एको आं लोव्र मपाइतीनी हना, परमप्रभु यावेम “गो आं नेमी कसम जशा, एको दरवार क्याम्नुड” दे मतो” दैत। १राजा ९:८

6 मारदे हना यहूदा डा पिप आ दरवार आ पर्वम परमप्रभु यावेमी “गे आं कली गिलाद नु लेबानोन डा डांडा खोदेशो बाक्नेवे। गो इ कली गोरशो रागी नु मुर मबाक्शो सहर खोदेशो सेल्नुड, दे कसम जाता।

7 गो इ कली या कुरशा, खतम सेल्ब आन कली ठीक पाडनुड। मेकोपुकीम इ नेल्ल क्येडा रिम्शो लाइशो लेबानोन डा रवा तिन्नीम। मिनु मीम हुम्नीम।

8 मिनु शुश रागी रागी डा मुरपुकी एको सहर रे पा लाइनीम। मिनु मेको नेल्लेमी ‘परमप्रभु यावेम, मारदे एको ठेयब सहर कली ओदेशो पवा?’ देंमुइनीम।

9 मिनु मेको आन कली ‘मारदे हना मेकोपुकीमी परमप्रभु यावे, आन परमप्रभु आ कबल पशो प्रोंइशा, देवी देवता आन कली पूजा पा, मेको आन कली गेय पाम्तेक्म’ देशा लोव्र लेत्चा पुंडसीनी” देंनीन।

10 बेक्शा लशो आन पर्वम मडाक्कीन। मेको आन पर्वम रोंका मपने। मेको क्येडा यो ग्याइशशा लाइशो मुर आन पर्वम डाक्कीन। मारदे हना मेको गेनायो मलेप्ब। मेकोमी आ रागी गेनायो मताइब। २राजा २३:२९-३४

पिप शाल्लुम आ पर्वम लोव्र

11 परमप्रभु यावेम यहूदा डा पिप योसीयाह आ तौ शाल्लुम आ पर्वम लोव्र पाइब। मेको आ आफ आ पा डा यहूदा डा पिप दुम्त। मिनु मुल मेको एक रे लत। मेको एक लेशशा मजाक्ब। शाल्लुम कली योआहास यो देंनीम। १इतिहास ३:१५; २इतिहास ३६:१-४

12 मेको कली तेको रागीम ग्याइशशा लदमे। मेको मेक उइ बेक्ब। मेकोमी एको रागी लेंशा गेनायो मताइब।

13 “आबी, आबी, सुमी पाप पतीकेमी आ खिं सेल्बा, सुम आ खिं डा आइक्था डा कोठा ठीक मपतीकेमी सेल्बा, मेकोमी आ नेक्था डा मुर आन कली मोशा गेय पपाइक्ब। मिनु मेको आन कली आन गेय पशो डा गाल्च मगेब। २राजा २४:१४; मीका ३:१०; लेवी १९:१३; याकूब ५:४

14 मेकोमी ‘गो आं कली तला तार शुश ठेयब कोठा पाइशशो खिं का सेल्लुड’ देंब। मेकोमी झेलपुकी सेल्ब। मेको कली लेबानोन डा लाइशशो रवा आ शीम क्येप्शा, मेको कली लल रड खेक्ब।

15 मार, गे पिप नवे? मारदे हना गे गारो नेल्ल बोल्यो शीम क्येप्नेवे? इ आफ नु जचा तूचा थोत्रक बाक्त। मेकोमी ठीक निसाफ नु ठीक गेय पाप्तु। मिनु मेको कली रिम्शोन दुम्त।

16 मेकोमी पुडग नु मारेइ मथीब आन कली ठीक निसाफ पाप्तु। मिनु मेको कली रिम्शोन दुम्त। मेको आं कली तुडक्ब मुरुम पाइनीम” दे परमप्रभु यावेम देंत।

17 तन्न इ मिक्च नु इ थुंम ठीक पा मचेम्शो क्येट ला बाक्ब। गे दोस मताइब आन हुश शाइक्पाइक्नेवे। गे मुर आन कली दिप्शा हुश खाक्श पोक्नेवे। मरिम्शो पचा नु रोइक्चा ला दाक्नेवे।

18 मोपतीके परमप्रभु यावेम “यहूदा डा पिप योसीयाह आ तौ येहो-याकीम आ पर्बम ‘आबी, मुरपुकीमी मेको आ पर्बम रोंका पची ना आं लोक्ब, आबी, आ समी मदेनीम’ मेको आ पर्बम मडाक्नीम। मिनु ‘आबी, आं प्रभु, आबी, मान ताइब पिप’ दे मेको आ पर्बम मडाक्नीमी। २राजा २३:३४

19 मेको कली गधा का थिम्शो खोदेशो पा, कीशा लाइशशा यरूसलेम डा ठेयब लाप्चो आ डोंइती गुंइशा ताइक्नीम” देंत। येरमीया ३६:३०

20 लेबानोनम लशा ठेयब सेंदा पा ग्रीडो। इ सेंदा बाशानम नेंपाइक्मी। अबारीम पहाड रे ठेयब सेंदा पा ग्रीडो। मारदे हना इ दाक्शो मुर नेल्ल बेक्तेक्म।

21 गे रिम्शो पा बाक्डेनु, गो इ कली लोत्र पाता। तन्न गे “गो मेको मनेनुड” देंते। गे ठिटा बाक्डे ना रेन मोदेशो बाक्ते। गे आं देशो मटिवी।

22 इ गोठला नेल्ल आन कली फशेम बेर पाइशशा योल्ब। मिनु इ वारच नेल्ल ग्याइशशा लाइक्चा पुंइसीनीम। मेना गे इ मरिम्शो गेयम पतीके मुने दोक्शा, आमाइ, मेको श्येत नेल्ल परमप्रभु यावे आ अरेशो मटितीके दुम्शो बाक्ब।

23 लेबानोनम बाक्ब मुर, लेबानोन डा लाइशशो रवा आन दातेमी खिं सेल्ब मुरपुकी, श्येत नु सुत्केरी रोइ पशो खोदेशो दुम्तीनी हना, दोपा हुकयी पाइनीनी।

24 परमप्रभु यावेम “गो दोपा ब्रोंइशा बाक्डा, मोपा यहूदा डा पिप येहो-याकीम आ तौ कोन्याह माइशशो येहो-याकीम कली ‘गे आं ग्युरा गुड डा छाप थोक्तीक औंठी नवे हना, गो इ कली गुंइशा ताइक्तन वा।कोन्याह कली योयाकीम यो देनीम। २राजा २४:८-१६; येरमीया २४:१

25 गो इ कली साइक्चा माल्ब मुर आन गुइम गेनन। गे मेको आन कली तशा हिनेवे। गो इ कली मेको बेबीलोन डा पिप नेबुकदरेसर नु कल्दी आन गुइम गेनन।

26 गो गे नु इ कली जरमेब इ ममा इस कली अर्को रागीम ताइक्नन्सी। मिनु गे निम्फा मेकेर बेक्नीसी।

27 तन्न मेको आस लेत्चा माल्शो रागीम, लेत्चा मताइनीस।

28 मार, एको कोन्याह माइशशो मुर सुइम मदाक्शो ब्रोंल्शो ग्योब खोदेशो बाक्बा डा? मेको मोदेशो ग्योब कली सुइम ममाल्नीम। मोपतीके मेको नु मेको आ आल आन मतुइशशो रागीम ताइक्चा पुंइसीनीमी?’ ” देंत। कोन्याह माइशशो येहो-याकीम आ तौ कली येकोन्याह यो देनीम। येरमीया २४:१

29 ए रागी, रागी डा मुर नेल्ल, परमप्रभु यावे आ लोत्र नेनीन।

30 परमप्रभु यावेमी “मेको मुर आ नें क्याम्सीब, दे ब्रेक्शा वोतो। मेको मुर बाक्म सम्म मारेइ पने मचाप्ब। मेको आल मपाइशशो मुर दुम्ब। मारदे हना मेको के तेकोइ मुर रिम्शो मदुम्नीम। मेको आ चच युड दाऊद आ नित्तीकेम नित्चा मताइनीम। मेकोपुकीमी यहूदा आ नित्तीकेम निशशा हुकुम पचा मताइनीम” देंत। इतिहास ३:१७-२४

## 23

मरिम्शो गोठला आन पर्वम लोव्र

1 परमप्रभु यावेमी “आबी, गे आं भेडा आन कली एर ओंथ ब्रपाइक्व गोठला” देंत। इजीकीएल १४:५; येरमीया १०:२१; जकरिया ११:५

2 मोपतीके परमप्रभु यावे, इस्राएली आन परमप्रभुमी आ मुर आन कली योव्रब गोठला आन पर्वम “गेपुकीम आं बगाल आन कली फ्राइतीनी। मिनु मेको आन कली खेरतीनी। मेको आन कली मकोवनी। मोपतीके गो इन मरिम्शो पशो आ पर्वम कोव्रनुड। इन कली सजाइ गेनुड” दे परमप्रभु यावेमी देंत।

3 परमप्रभु यावेमी “गो आं लीशो बगाल नेल्ल आन कली इन खेरशो रागी रे खुप्शा लेशशा, आन बगालम चाक्नुडमी। मिनु मेकोपुकी मेकेर सोशा बोशा शुश दुम्नीम।

4 गो मेको आन कली योव्रब गोठलापुकी वोइक्नुडमी। मिनु मेको आन कली योव्रनीम। मेना भेडा महिनीम। सुर्ता मपाइनीम। मेको आन दाते डा का यो मजाम्नीम” दे परमप्रभु यावेमी देंत। येरमीया ३:१५

5 परमप्रभु यावेम “गो दाऊद आ मुर रे ठीक पाइब राशी का वापाइक्नुड। मेको नाक्त थमा पा जाक्ना जाकन बाक्ब। पिप कामी आ जोक्तीक तुइक्तीकेम सासन पाइब। मिनु मेकोमी आ रागीमी ठीक निसाफ नु ठीक गेय पाइब। जकरिया ३:८; यसैया ३२:१

6 मेकोम सासन पवा ना यहूदा श्येत रे प्रोंइचा पुंडसीब। मिनु इस्राएल मारेइ मदुम्शु बाक्ब। मेको आ नेम मेकोपुकी तुइक्चा पुंडसीनीमी। मेको आ ने “परमप्रभु यावे आंइ कली ठीक पाइब बाक्ब” देंनीम” देंत। ब्यवस्था ३३:२८; येरमीया ३३:१६; यसैया ४५:२४

7 मिनु परमप्रभु यावेमी “परमप्रभु यावे ब्रोंइशा बाक्शो खोदेशो नु मुर आन कली इजीप्त रागी रे गुंडशा एक चाक्शो मदेंतीक नाक्ती थमा पा जाक्नीम।

8 तन्न मार देंनीम देशा हना, मेकोपुकीमी ‘परमप्रभु यावे ब्रोंइशा बाक्शो खोदेशो नु इस्राएली आन चच युइ आन कली उत्तर डा रागी नु तेको तेको रागी रे चाक्शो’ देंनीम। मारदे हना मेको आन रागीम बाक्चा ताइनीम” देंत। येरमीया १६:१४-१५

दूली लोव्र पाइब

इजीकीएल १३:२-१६

9 परमप्रभु यावेम आ लोव्र पाइब आन पर्वम लोव्र पशो बाक्ब। मेको नेंशा आं थुं जिक्त। आं रुश नेल्ल खिंखि पाइनीम। गो दुक्शो मुर खोदेशो दुम्ती। गो अडगुर शांबु शुश तूशा दुक्शो खोदेशो दुम्ती। गो परमप्रभु यावे आ पर्वम नु आ लोव्र आ पर्वम मोदेशो दुम्ती।

10 मारदे हना एको रागी तेल्लेम पतीकेम ब्रीशो बाक्ब। सराप रतीके, रागीम रोंका पाइब। मुर मबाक्तीके बस्तु योव्रतीके सोव्रतेकम। परमप्रभु यावे आ लोव्र पाइब आन पतीके काइ मरिम्शो बाक्ब। आन सक्ति दूली पा चलेनीम। येरमीया १२:४

11 परमप्रभु यावेमी “आं लोव्र पाइब नु चढेब नेल्ल आं कली ममानेब दुम्तेकम। मेकोपुकीमी आं खिंमी यो आं अरेशो लोव्र मटीनीम। येरमीया ५:३१

12 मोपतीके मेको आन लां छिडछिड दुम्शा ग्रेक्ब दुम्ब। मिनु मेकोपुकी मेकेर गाक्मानु, ग्रेक्शा गोल्नीम। मारदे हना गो मेको आन कली सजाइ ततीक बर्सम ठेयब श्येत गेनुड। येरमीया १३:१६; बजन संग्रह ३५:६

13 गो सामरीया डा आं लोव्र पाइब आन दातेमी ग्रांग्रा दिशो गेय ताता। मेकोपुकीमी बाल देवता आ नेम नोले दुम्ब लोव्र पाम्तेकम। मिनु आं मुर इस्राएली आन कली हेंथे लां खोइक्पाइक्तेकम। ब्यवस्था १८:२०-२२; यसैया १:१०; इजीकीएल १३:२३

14 तन्न यरूसलेम डा आं लोव्र पाइब आन दातेम सामरीया क्येडा यो ग्रांग्रा दिचा डा गेय ताता। मेकोपुकीम तेल्लेम पशा जोल ला पाइनीम। मरिम्शो पाइब आन कली बोल्यो सेल्नीम। मोपतीके सुइ मुर परमप्रभु यावे आ अरेशो मटितीक रे मलेल्नीम। मेको नेल्ल आं कली सोदोम खोदेशो नु यरूसलेम डा मुरपुकी चहिं गोमोररा खोदेशो दुम्तेकम” दे परमप्रभु यावेमी देंत।

15 मोपतीके मुर नेल्ल आन परमप्रभु यावेम आ लोव्र पाइब आन परबम “गो मेको आन कली कशो थोवक उम्नुडमी। मिनू तूचा कली बीस ब्वाइशो ब्वाक्कु तूचा गेनुडमी। मारदे हना यरूसलेम डा परमप्रभु यावे आ लोव्र पाइब रेन रागी नेल्लेम परमप्रभु यावे कली थमा मसुइशो बाक्नीम” देंत। येरमीया ९:१५

16 मुर नेल्ल आन परमप्रभु यावेम “गेपुकी आं लोव्र पाइब आन लोव्र मनेनीन। मेकोपुकीमी जोल लोव्र पा इन कली हेंथे गाक्पाइक्नीम। परमप्रभु यावे आ लोव्र ममाइ, तन्न आन थुंम मिम्शो लोव्र नु आन डोमु तशो ना डा लोव्र शेनीम। आन खकटा थुं कली खोइश्या गाक्ब आन कली ‘गे ठेयब श्येत मताइनीन’ देंनीम। येरमीया ६:१३-१४; येरमीया १४:१४

17 मेकोपुकीम आं लोव्र मदाक्ब आन कली गेना हना यो ‘परमप्रभु यावे इन कली थुं नाइश्या बाक्तीक दुम्ब’ देंनीम। मिनू मेकोपुकीम मटिथु आन थुं डा मिम्शोम गाक्ब आन कली ‘इन कली मारेइ हिंचा डा श्येत मदुम्ब’ देंनीम।

18 तन्न सु परमप्रभु यावे आ लोव्र नेंचा नुरुप्चा कली मेको आ अर्ती गेतीकेम बाक्म डा? सुम मेको आ लोव्र शेंचा कली नोफा दाइश्या नेशो बाक्म डा?

19 कोव्रडीन परमप्रभु यावे आ गाइशो फश गिवार खोदेशो पा बोक्ब। परमप्रभु यावे आ अरेशो लोव्र मटीब आन पियामी फश गिवार जुक्ब।

20 परमप्रभु यावे आ गाइशो मलेप्ब। आ मिम्शो नेल्ल पने थुमा नोले ला लेप्ब। नोले डा नाक्ती एको लोव्र रिम्शो पा रुप्नीनी।

21 मेको आं लोव्र पाइब आन कली गो मसोइक्तुमी। मो हना यो मेकोपुकी आन लोव्र कुरशा दोरशा लाम्तेक्म। गो मेकोपुकी नु लोव्र मपड। मो हना यो मेकोपुकीमी लोव्र पांम्तेक्म। येरमीया १४:१४

22 मेकोपुकी आं अर्ती गेतीकेमी बाक्शो हना, मेकोपुकीमी आं मुर आन कली आं लोव्र नेंचा डा पा देंम वा। मिनू मेको आन कली आन मरिम्शो लां नु आन मरिम्शो गेय रे लेत्तेक्म वा” देंत।

23 परमप्रभु यावेम “मार, गो नेक्था डा ला परमप्रभु यावे नडा डा? डोन डा चहिं परमप्रभु मनडा डा?

24 मिनू मुर आं डोंइती रे खुइश्या बाक्ने चाप्नीमी डा? मिनू गो मेको आन कली तने मचाप्नुडमी डा? मार, सरीड नु रागी निम्फा कली गो प्रिंने मचाप्नुडा डा?” दे परमप्रभु यावेमी देंत। बजन संग्रह १३९:७-१६

25 मिनू मेकोमी “गो आं नेमी जोल पाइब आन लोव्र नेंता। गो डोमु ताता। गो डोमु ताता।

26 गेना सम्म मोदेशो दुम्बा? मेको आं लोव्र पाइब आन थुं गेना आं गे लेप्बा? मेको जोल पाइब आंम थुं डा दूली लोव्र पाइबपुकी गेना आं गे लेत्नीमी।

27 मेकोपुकीमी आन डोमु आन परबम लोव्र पा आं नें प्रेपाइक्चा माल्नीम। आन किकी पिपी खोदेशो पा आं नें आ पा डा बाल आ नें ठेयब सेल्शा, आन डोमु डा लोव्र शेंमुम्तेक्म। न्यायाधीस ३:७

28 सुइ आं लोव्र पाइबम डोमु ताप्तु हना, आ डोमु शोव्रडल। तन्न सुइ नु आं लोव्र बाक्त हना, मेकोमी थमा पा आं लोव्र शेंदल। पराल नु चेरब मगारनीस” देंत।

29 परमप्रभु यावेमी “मार, आं लोव्र मी खोदेशो मबाक्बा डा? मेको सेरथे फुल्लु कली प्रोल्ब घन खोदेशो मबाक्बा डा?” दे परमप्रभु यावेमी देंत। हिब्रू ४:१२

30 मिनू परमप्रभु यावेमी “कोव्रडीन, गो मेको आन कली देशो लोव्र खोदेशो पा, मेकोपुकीमी अरु आन कली देशो आं लोव्र आंम के सेल्शा, सुइ पा शेनीम। मोदेशो पा आं लोव्र पाइब आन कली काइ मदाक्नुड।

31 कोव्रडीन, मेकोपुकीमी आंम थुं डा लोव्र पशा ‘परमप्रभु यावे आ लोव्र बाक्ब’ देंनीम। गो मोदेशो लोव्र पाइब आन कली काइ मदाक्नुड।

32 कोव्रडीन, मेकोपुकी जोल पा डोमु डा लोव्र पाइब बाक्नीम। गो मोदेशो पा आं लोव्र पाइब आन कली काइ मदाक्नुड। मेको आन जोल शेतीकेमी आं मुर आन कली हेंथे लां खोइक्पाइक्नीम।

मेकोपुकी काड महिब बाक्नीम। गो मेको आन कली मसोडकुतीमी। गो मेको आन कली मयोवडुमी। मोपतीके मेको आन लोव्र मुर आन कली शोर गाक्शो बाक्ब” दे परमप्रभु यावेमी देंत। येरमीया १४:१४

जोल पाइब आन लोव्र

33 मिनु मुर का, आं लोव्र पाइब का कि चढेब काम इ कली “परमप्रभु यावे आ देशो श्येत लोव्र मार बाक्बा?” दे इ कली हिल्लो पाप्तु हना, गे मेको कली “मेको श्येत गे बाक्नीनी” देनो। मिनु परमप्रभु यावेमी “गो इन कली ताइक्नन्नी, देंत, माइक्मी” देंत। २राजा ९:५५; यसैया १३:१

34 परमप्रभु यावेम “तेकोइ आं लोव्र पाइब, तेकोइ चढेब नु अरु सुइमी ‘एको परमप्रभु यावे आ देशो श्येत बाक्ब’ देंतेक्म हना, गो मेको आन कली नु मेको आन खिं डा मुर आन कली सजाइ गेनुडमी” देंत, दे माइक्मी।

35 मिनु इन दातेम अर्को कली “परमप्रभु यावेम मार लोव्र पवा? दे हिल्लो पचा माल्नीनी।

36 तन्न गे लेशा ‘परमप्रभु यावे आ देशो श्येत लोव्र बाक्ब’ मदेनीन। मारदे हना मुर नेल्ल आन पशो लोव्र श्येत दुम्ब। मोपा गेपुकीम ब्रोइशा बाक्ब परमप्रभु, मुर नेल्ल आन परमप्रभु यावे, इं परमप्रभु आ लोव्र दूली सेल्नीनी।

37 मिनु गे आं लोव्र पाइब नेल्ल आन कली ‘परमप्रभु यावेम इन कली मार, लोव्र लेत्ता? परमप्रभु यावेम मार लोव्र पवा?’ दे हिल्लो पचा माल्नेवे।

38 तन्न गेपुकीमी ‘एको परमप्रभु यावे आ देशो श्येत डा लोव्र बाक्ब’ देंनीनी। मोपतीके परमप्रभु यावेमी ‘मारदे हना गे परमप्रभु यावे आ देशो श्येत डा लोव्र बाक्ब’ देंतीनी। तन्न गो इन कली ‘एको परमप्रभु यावे आ देशो श्येत बाक्ब, मदेनीन’ देंती।

39 मोपतीके गो थमा पा इन कली क्युक्शा, आं डोंइती रे ताइक्नुड। इन कली नु इन किकी पिपी आन कली गेशो सहर पोक्शा ताइक्नुड।

40 मिनु गो इन कली गेना हना यो शिशी मपथु, गेना हना यो मुने दोक्पाइक्नन्नी। मेको गेना यो मप्रेंसीब” दे परमप्रभु यावेमी देंत। येरमीया २०:११

## 24

रिम्शो नु मरिम्शो फोव्रशी गेडा

1 बेबीलोन डा पिप नेबुकदरेसरमी यहूदा डा पिप येहो-याकीम आ तौ येकोन्याह, यहूदा डा पिप आ गेय पाइब, मार मार सेल्स जोक्ब नु तुप्तील आन कली यरूसलेमम ग्याइशशा बेबीलोन लदा बाक्त। मेको नोले परमप्रभु यावेमी आं कली आ खिं आ डोंइती डालो निक्शी फोव्रशी गेडा कोंइताक्वी।येहो-याकीम आ नें २राजा २४:६ योयाकीन बाक्ब। तन्न येरमीया किताबम २२:२४ आ नें कोन्याह बाक्ब। मिनु येरमीया २४:१ येकोन्याह यो देंनीम। २राजा २४:१४-१६

2 मिनु डालो कामी डोंइती डा थम रिम्शो मीशो फोव्रशी गेडा बाक्तेक्म। तन्न अर्को डालोम काड मरिम्शो फोव्रशी गेडा बाक्तेक्म। मेको जचा यो मदुन्चा डा थम मरिम्शो बाक्तेक्म।

3 मिनु परमप्रभु यावेम आं कली “येरमीया गे मार, तवी” दे माइक्ती। मिनु गो “फोव्रशी गेडा तातामी। थम रिम्शो फोव्रशी गेडा नु थम मरिम्शो फोव्रशी गेडा बाक्तेक्म। मेको मरिम्शो फोव्रशी गेडा जचा यो मदुन्चा डा बाक्नीम” देंती।

4 मिनु परमप्रभु यावेमी आं कली इजीकीएल ११:१४-२१

5 परमप्रभु यावे, इस्राएली आन परमप्रभुमी “मेको रिम्शो फोव्रशी गेडा खोदेशो पा, गो यहूदा रे बेबीलोन रागीम ग्याइशशा लाइक्चा पुंडसीशो आन कली मिम्नुड। गो मेको आन कली एकेर रे कल्दी आन रागीम सोइक्ताक्ड।

6 गो मेको आन कली रिम्शो दुम्पाइक्चा कली कोव्रनुड। मिनु गो मेको आन कली एको रागीम लेशशा चाक्नुडमी। गो मेको आन थुं बारपाइक्नुडमी। आन थुं लुकच मलपाइक्नुडमी। गो मेको आन कली खुम्नुडमी। मतुल्लुडमी। येरमीया १:१०; येरमीया ३९:२८

7 मिनु गो मेको आन कली 'गो परमप्रभु यावे नड' दे आं कली तुडक्तीक थुं गेनुडमी। मेकोपुकी आं मुर दुम्नीम। मिनु गो मेको आन परमप्रभु दुम्नुड। मारदे हना मेको आन थुं नेल्लेमी आं गे लेत्नीम। येरमीया ३१:३३-३४; येरमीया ७:२३

8 तन्न गो मेको जचान मदुम्चा डा काइ मदारशो फोव्रशी गेडा खोदेशो पा यहूदा डा पिप सिदकीयाह, मेको आ सरकार डा गेय पाइब, यरूसलेम डा लीशो मुरपुकी नु इजीप्त रागीमी बाक्ब आन कली मरिम्शो पाइनुड। २राजा २४:१७-२०; ब्यवस्था २:३१; येरमीया २९:१६-१९

9 गो मेको आन कली रागी डा राज्य नेल्लेमी शुश हिंचा डा नु काइ मरिम्शो सेल्लुड। मेको आन कली शिशी मताइब, शुक्शी लोत्र नु सराप पाइक्चा पुंडसीब सेल्लुडमी। मेको आन कली खेरशो रागी नेल्लेम मोदेशो पाइनुडमी। १राजा ९:७

10 गो मेको आन कली तरवार, अन्काल नु मुर बेक्तीक रोड सोइक्नुड। मेको आन कली नु आन किकी पिपी आन कली गेशो रागी रे मेको नेल्ल मबेक्मा सम्म मो पाइनुड" दे परमप्रभु यावेमी देंत।

## 25

### ग्याइश्शा लाइक्चा पुंडसीब

1 मिनु परमप्रभु यावेमी येरमीया कली यहूदा डा मुर आन परबम लोत्र पाप्तु। मेना यहूदा डा पिप योसीयाह आ तौ येहो-याकीमपिप दुम्शो ४ बर्स दुम्मेनु, बेबीलोन डा पिप नेबुकदरेसर पिप दुम्शो बर्स का दुम्शो बाक्त। येरमीया ३६:१

2 मिनु परमप्रभु यावे आ लोत्र पाइब येरमीयामी यहूदा डा मुर नेल्ल नु यरूसलेममी बाक्ब मुर नेल्ल आन कली मेको लोत्र पाप्तु।

3 यहूदा डा पिप आमोन आ तौ योसीयाह पिप दुम्शो १३ बर्स रे मुल २३ बर्स सम्म परमप्रभु यावेमी आं कली लोत्र पना पन बाक्त। मिनु गो मेको लोत्र इन कली शेंस डा शेंस बाक्शो बाक्ती। तन्न गेपुकीम इन नोफा मदाइक्तीनी। येरमीया १:२; येरमीया ३६:२

4 मिनु परमप्रभु यावेम आ लोत्र पाइब आन कली मोदें लोत्र पथ सोइक्स डा सोइक्स पाप्तु हना यो, गेपुकीम मेको आन लोत्र मनेंनी। इन नोफा मदाइक्तीनी। येरमीया ७:२५-२६; येरमीया ११:७; येरमीया २६:५; येरमीया २८:८; येरमीया २९:१९; येरमीया ४४:४; २इतिहास ३६:१५-१६

5 मेकोमी "गे नेल्ल इन मरिम्शो पशो नु परमप्रभु यावे आ अरेशो मटितीके रे लेतीन। मिनु परमप्रभु यावेम इन कली नु इन किकी पिपी आन कली गेना हना यो कली गेशो रागीम बाक्चा ताइनीनी। येरमीया ७:३

6 अर्को रागी डा देवी देवता आन कली पूजा पशा, ठेयब सेल्चा कली मेको आन नोले मखोतीन। इन गुइम सेल्शोमी आं कली मगाइक्पाइय्थीनी। मिनु गो इन कली मारेइ श्येत मगेनुड" देंशो बाक्त।

7 परमप्रभु यावेमी "तन्न गेपुकीम आं लोत्रमी नोफा मदाइक्तीनी। इन गुइम सेल्शोमी आं कली गाइक्पाइक्तीनी। मिनु गेपुकी आंमान सजाइ ताइब सेल्सीशो बाक्नीनी" देंत।

8 मोपतीके मुर नेल्ल आन परमप्रभु यावेमी "मारदे हना गेपुकीम आं लोत्र मटिनी।

9 गो उत्तर डा जात नेल्ल नु आं गेय पाइब बेबीलोन डा पिप नेबुकदरेसर कली ब्रेश्शा चाक्नुडमी। गो मेको आन कली एको रागी डा मुर नु एर ओथ डा जात नेल्ल आन परबम चाक्नुडमी। मिनु गो मेको नेल्ल आन कली साइक्पाइक्नुडमी। गो मेको आन कली शुश हिंचा डा, शुक्शी पाइक्चा पुंडसीब नु शिशी मताइब सेल्लुडमी। दानीएल ३:३१-३३

10 मिनु गो मेको आन रे थुं नाइश्शा बाक्तीके, ग्येरशो सेंदा नु ग्युम्ली ग्युम्ले आन सेंदा क्याम्नुड। यात ग्रीशो नु बत्ती आ हाम्सो नेल्ल योल्नुड। येरमीया ७:३४

11 एको रागी डा खिं नेल्ल ब्रेश्शो नु मुर मबाक्शो दुम्नीम। मिनु एको जात डा मुरपुकी ७० बर्स सम्म बेबीलोन डा पिप आ चाइल दुम्नीम। २इतिहास ३६:२१; येरमीया २९:१०; एज्रा १:१-२



12 तन्न ७० बर्स गाम नोले, गो बेबीलोन डा पिप नु कल्दी आन रागी कली मेको आन मरिम्शो पशो डा सजाइ गेनुड। मेको आन रागी गेना हना यो मुर मबाक्तीके सेल्लुडमी” दे परमप्रभु यावेमी देंत।

13 परमप्रभु यावेमी “मेको रागी कली आं देंशो लोव्र नेल्ल, एको किताबम ब्रेक्शो लोव्र नु आं लोव्र पाइब येरमीयामी रागी रागी नेल्ल डा मुर आन कली पशो नोले दुम्ब लोव्र नेल्ल मेको रागीम मोडक्नुड।

14 मिनु रागी रागी डा मुर नु ठेयब पिपमी यहूदा डा मुर आन कली वाइल सेल्लनीम। गो मेको आन पशो नु आन गुडमी सेल्लो कोव्रशा, मेको आन कली क्येक्क लेल्लुडमी” देंत। येरमीया २७:७

### परमप्रभु आ गाइश्शो कचौरा

15 मिनु परमप्रभु यावे, इस्राएली आन परमप्रभुमी आं कली “आं गुड रे आं गाइश्शोमी व्रीशो अडगुर शांबु बाक्शो कचौरा ताक्को। मिनु इ कली सोइश्शो रागी रागी डा मुर नेल्ल आन कली तूपाइक्मी। येरमीया ५१:७; यसैया ५१:१७; प्रकाश १४:१०

16 मेकोपुकीमी मेको तूशा, दिड दाड गोल्शा, मारेइ मिन्ने मचाप्नीम। मारदे हना गो मेको आन दातेमी तरवार सोइक्नुड” देंत।

17 मोपतीके गो मेको कचौरा परमप्रभु यावे आ गुड रे ताक्ता। मिनु गो परमप्रभु यावेमी सोइश्शो रागी नेल्ल नु मुर नेल्ल आन कली तूपाइक्तामी।

18 मिनु मुलाक्ती तशो खोदेशो पा यरूसलेम नु यहूदा डा सहर नेल्ल आन कली श्येत्थ नु मुर मबाक्तीके सेलो। मेकेर डा पिप नु आन सरकार आ गेय पाइब मुर खतम दुम्नीम। मेको सहर शुक्शी पाइक्चा नु सराप पाइक्चा पुंइसीब दुम्त।

19 मेको प्रोइशा यो इजीप्त डा पिप फाराओ, मेको आ गेय पाइब मुर नेल्ले, मेको आ सरकार डा मुरपुकी नु मेको आ मुर नेल्ल आन कली,

20 मेकेर बाक्ब अर्को रागी डा मुर नेल्ले, ऊज रागी डा पिप नेल्ले, पलिस्ती आन पिप नेल्ले, अश्कलोन, गाजा, एक्रोन नु अश्दोद सहरम लीशा बाक्शो मुर नेल्ल आन कली,

21 एदोम, मोआब नु अम्मोन डा मुर नेल्ल आन कली,

22 टायर नु सीदोन डा पिप नेल्ले, समुन्द्र आइक्ची हांबु डा पिप नेल्ल आन कली,

23 देदान, तेमा, बूज नु आन चां एर ओथ खोइक्ब नेल्ल आन कली, येरमीया ९:२५

24 अराब रागी डा पिप नेल्ल, गोरशो रागीम बाक्ब अर्को रागी डा मुर आन पिप नेल्ल आन कली,

25 जिप्ती डा पिप, एलाम डा पिप नु मादी डा पिप नेल्ल आन कली,

26 मिनु उत्तर गे आ नेक्था नु डोन बाक्ब पिप नेल्ल आन कली का का पा तूपाइक्तामी। मिनु नोले अर्को रागीम बाक्शो राज्य नेल्ल डा मुर आन कली तूपाइक्तामी। मिनु मेको नेल्ल आन नोले शेशाक डा पिपमी यो मेको तूचा माल्ब। शेशाक बेबीलोन आ अर्को नें बाक्ब। येरमीया ५१:४१

27 मिनु नोले गे मेको आन कली “मुर नेल्ल आन परमप्रभु यावे, इस्राएली आन परमप्रभुमी मार देंत देंशा हना ‘गे मेको तूशा दुक्शा मेने। मिनु गेना यो मबोक्चा डा पा गोलीन। गो इन दातेम सोइश्शो तरवार आ पर्वम मो दुम्ब’ दे माइक्मी।

28 तन्न मेकोपुकीमी इ गुड रे मेको कचौरा तूने मबिस्साक्म हना, गे मेको आन कली मुर नेल्ल आन परमप्रभु यावेमी ‘गेपुकीम मेको तूचान माल्लनीनी’ देंशो बाक्ब” दे माइक्मी।

29 मेकोमी “कोव्रडीन, मुल गो आं नेंम वोइश्शो सहर कली श्येत गेचा चिक्शो बाक्नुड। मिनु मार, गेपुकी चहिं सजाइ मतथु ब्रोइनीनी डा? इन कली सजाइ मगेथु मप्रोइसीब। मारदे हना गो रागीम बाक्ब मुर नेल्ल आन पर्वम तरवार का ठीक पशो बाक्ती, दे मुर नेल्ल आन परमप्रभु यावेमी देंत” दे माइक्मी। इजीकीएल ९:६; १पत्रुस ४:१७; येरमीया ४९:१२

30 परमप्रभु यावेमी “मुल गे मेको नेल्ल आन पर्वम एको आं लोव्र पावो। मेको आन कली ‘परमप्रभु यावे इर आ बाक्तीक रे ब्वाक्ब। आ बाक्तीक रे आ सेंदा गुंइब। मिनु आंम रागी आ पर्वम मेको ठेयब

सेंदा पा ब्वाक्ब। रागीम बाक्ब नेल्ल आन पर्बम अडगुर खाक्ब खोदेशो पा ग्रीब। होसे ११:१०; योएल ४:१६; आमोस १:२

31 मेको रेयके पा, थोप्ला दाइश्शो, रागी डा सुर सम्म नेंसीब। मारदे हना परमप्रभु यावेम रागी रागी आन कली दोस गेब। मिनु मेकोमी मुर नेल्ल आन कली निसाफ पाइब। मिनु दोस ताइब तरवारम क्योरचा पुंडसीनीम' दे माइक्मी" देंत।

32 मुर नेल्ल आन परमप्रभु यावेमी "कोव्रडीन शुश श्येत दुम्तीक रागी का रे अर्को रागी सम्म ब्रना ब्रन लाइब। रागी आ सुर रे हिंचा डा फश गिवार जाक्ना जाक्न बाक्ब" देंत।

33 मेको नाक्ती परमप्रभु यावे आ साइश्शोपुकी रागी आ सुर का रे अर्को सुर सम्म बाक्नीम। मेको आन पर्बम सुइ रोंका मपाइनीम। मेको बेक्शो मुर आन कली सुइमी खुष्शा मथिन्मीम। मेको आन कली सुइम मथिन्मीम। मेकोपुकी खपीम मोव्रल खोदेशो दुम्नीम। येरमीया ९:२१

34 गे गोठलापुकी रोंका पने। मिनु वाइ ब्रेशशा डाक्कीन। गे मेको बगाल डा लां कोंडबपुकी पुलुम दिड दाड गोलीन। मारदे हना इन कली क्योरशा साइक्तीक नाक्त जाक्शो बाक्ब। गेपुकी गोल्नीनी। मिनु शुश क्येत लाइब ग्योब खोदेशो पा प्रोल्चा पुंडसीनीनी। येरमीया २३:१

35 गोठला आन कली प्रोक्तीक तेइ मबाक्ब। बगाल डा लां कोंडब आन ब्रोंडतीक लां तेइ मबाक्ब।

36 गोठला आन डाक्शो नेनीन। बगाल आन कली लां कोंडब आन हिंमा क्येम्स पशो नेनीन। मारदे हना परमप्रभु यावेम मेको आन बस्तु योव्रतीके क्याम्चा चिक्शो बाक्ब।

37 परमप्रभु यावे आ ठेयब पा गाइश्शोम मेको रिम्शो बस्तु योव्रतीके खतम दुम्नीम।

38 गुप्सम खोदेशो पा मेकोमी आ बाक्तीके प्रोंडतु। मारदे हना मेको आन रागी साइक्ब तरवार नु परमप्रभु आ गाइक्तीक आ पर्बम मुर मबाक्तीके दुम्त। येरमीया ४:७

## 26

येरमीया कली हिंच कोंडशो

येरमीया ७:-

1 यहूदा डा पिप योसीयाह आ तौ येहो-याकीममी सासन पवा आ डोंडती डा बर्सम परमप्रभु यावेमी आं कली लोव्र पाप्तु। २राजा २३:३४-३७

2 परमप्रभु यावेमी मार देंत, देशा हना "आं खिं डा लाइगाम रपो। मिनु आं कली ठेयब सेल्चा कली जाक्ब यहूदा सहर डा मुर नेल्ल आन कली गो इ कली देशो लोव्र नेल्ल मेको आन कली देनो। लोव्र का यो मफेवो।

3 मिनु मेको नेंशा, मेको नेल्ल आन मरिम्शो लां रे लेत्नीमी, को? मिनु मेको आन मरिम्शो पशो आ पर्बम मेको आन कली ठेयब श्येत चाक्तीक रे आं थुं फाइक्नुडा, को? गो मेको आन तार चाक्चशो खतम दुम्तीक मचाक्नुडा, को? येरमीया १८:८; येरमीया ३६:३

4 गेमी मेको आन कली "परमप्रभु यावेम आं लोव्र मार बाक्ब देशा हना, गे आं लोव्र पशो नोफा दाइश्शा मनेंतीनी हना, गो इन डोंडती वोइश्शो आं अरेशो मपाइतीनी हना,

5 गो गेना हना यो इन बाक्तीकेम सोइश्शो आं गेय पाइब, आं लोव्र पाइब आन लोव्र नोफा दाइश्शा मनेंतीनी हना, गेपुकीम मेको रिम्शो पा मनेंशो बाक्तीनी हना, येरमीया २५:४

6 गो मेको खिं कली शिलो खोदेशो सेल्नुड। मिनु मेको सहर कली रागी नेल्ल डा मुर नेल्ल आन दातेमी सराप राइब सेल्नुड' देनो" देंत। २राजा २५:९; येरमीया ७:१२

7 मिनु चढेबपुकी, परमप्रभु यावे आ लोव्र पाइबपुकी नु मुर नेल्लेमी परमप्रभु यावे आ खिंम येरमीयामी देशो लोव्र नेंतेक्म।

8 मिनु परमप्रभु यावे आ अरेशो लोव्र नेल्ल, येरमीयाम मुर नेल्ल आन कली नेंपाइक्ने थुमा चोटी चढेबपुकी, परमप्रभु यावे आ लोव्र पाइबपुकी नु मुर नेल्लेम मेको कली ग्याइश्शा "गे साइक्चान पुंडसीनेवे।

9 गे मारदे परमप्रभु यावे आ नेम लोत्र पा 'एको खिं शिलो खोदेशो दुम्ब। मिनु एको सहर चहिं श्येत्थ नु मुर मबाक्तीके दुम्ब' देने' देशा, परमप्रभु यावे आ खिंम येरमीया आ एर ओंथ मरिक्शी पा मुर देल्लेक्म।

10 मिनु यहूदा डा सरकार आ गेय पाइब मुरपुकीम मेको लोत्र नेंशा, मेकोपुकी पिप आ खिं रे परमप्रभु यावे आ खिंम जाक्तेक्म। मिनु परमप्रभु यावे आ खिं डा नक लापचो आ डोंइती बाक्तेक्म।

11 मिनु चढेबपुकी नु परमप्रभु यावे आ लोत्र पाइबपुकीम, सरकार आ गेय पाइब मुरपुकी नु मुर नेल्ल आन कली "एको मुर कली साइक्चान माल्लब। मारदे हना एकोमी एको सहर आ पबंम मरिम्शो पा परमप्रभु यावे आ लोत्र पाप्टु। मेको गेपुकीम आंमा यो नेंतीनी" देंतेक्म। प्रेरित ६:१३

12 मिनु येरमीयामी सरकार आ गेय पाइब नु अरु मुर नेल्ल आन कली "परमप्रभु यावेम आं कली एको खिं नु एको सहर आ पबंम इन नेंशो लोत्र पचा कली सोइश्शो बाक्ब।

13 मुल गेपुकीम इन पतीक नु इन गेय रिम्शो सेलीन। मिनु आंम परमप्रभु यावे, इन परमप्रभु आ अरेशो टिने। मिनु परमप्रभु यावेम इन कली खतम पोक्तीक रे आ थुं लेप्ब। येरमीया ७:३

14 गो इन गुडम बाक्शो बाक्नुड। इन कली मार रिम्शो नु ठीक दुम्बा, मेको पाइय्यीनी।

15 तन्न गे एको तुइक्तीन। गेपुकीम आं कली साइक्तीनी हना, आंम इन तारी, एको सहर तारी नु एकेर बाक्ब आन तारी दोस मताइब मुर का आ हुश शाइक्पाइश्शो दोस चाक्तीनी। मारदे हना परमप्रभु यावेम इन कली एको लोत्र नेल्ल नेंपाइक्चा कली आं कली सोइश्शो बाक्त" देंत। प्रस्थान २३:७; मती २७:४, २५

16 मिनु सरकार आ गेय पाइब मुर नु अरु मुर नेल्लेम, चढेबपुकी नु परमप्रभु यावे आ लोत्र पाइब आन कली "एको मुर साइक्चा पुंडसीचा डा मुर ममाइ। एको मुरुम इं कली परमप्रभु यावे, इं परमप्रभु आ नेम एको लोत्र नेंपाइक्तु" देंतेक्म।

17 मिनु मेको रागी डा शेंब खाल्पा का निक्शी बोक्शा, मेको देल्शा बाक्शो मुर आन कली

18 "यहूदा डा पिप हिज्कीयाह आ पालाम मोरेशेथ डा मीकाहम परमप्रभु यावे आ लोत्र पशो बाक्त। मेकोमी यहूदा डा मुर नेल्ल आन कली 'मुर नेल्ल आन परमप्रभु यावेम सियोन कली रू खोदेशो पा वाक्सीब। यरूसलेम चहिं फुल्लु तेल्लो खोदेशो दुम्ब। परमप्रभु यावे आ खिं चहिं रवापुकी वाशा सुम्शो डांडा खोदेशो दुम्ब' देशो बाक्त" देंतेक्म। मीका १:१; मीका ३:१२; येरमीया ९:१०

19 मिनु मेकोपुकीमी "मार, यहूदा डा पिप हिज्कीयाह नु यहूदा डा अरु सुइ मुरुम मेको कली सदमे डा? मिनु मार, परमप्रभु यावे क्येडा हिंशा हिज्कीयाहम मेको आ शिशी ममला डा? मिनु परमप्रभु यावेम मेको आन तार चाक्चशो खतम पोक्तीक रे आ थुं मलेत्ता डा? तन्न गोपुकीम आंम इं तार टेयब खतम दुम्तीक चाक्चा चिक्शो बाक्तय" देंतेक्म। येरमीया १८:८

20 मेकोपुकी नु अर्को मुर का यो बाक्त। मेकोमी परमप्रभु यावे आ नेमी लोत्र पाप्टु। मेको किरयथ-यारीमम बाक्ब शेमायाह आ तौ उरीयाह बाक्त। मेकोमी यो मेको रागी नु मेको सहर आस पबंम येरमीयामी खोदेशो पा परमप्रभु यावेम मरिम्शो पचशो आ पबंम लोत्र पाप्टु। यहोसु १:५९

21 मिनु पिप येहो-याकीम नु मेको आ टेयब मुरपुकी, आ कप्तान नेल्लेम उरीयाह आ पशो लोत्र नेंतेक्म। मिनु पिपम मेको कली साइक्चा माल्लु। तन्न मेको लोत्र नेंशा उरीयाह हिंत। मिनु प्रोक्शा इजीप्त रागी लत।

22 मो हना यो येहो-याकीममी आकबोर आ तौ एल्नाथान नु मेको नु अर्को मुरपुकी इजीप्त रागीम सोइक्ताक्व।

23 मिनु मेकोपुकीमी उरीयाह कली इजीप्त रे चाक्तेक्म। मिनु पिप येहो-याकीम आ डोंइती राप्पाइक्तेक्म। मिनु पिपम मेको कली साइक्चा कली तरवार आप्पाइक्तु। मिनु मेको आ बेक्शो रां आइक्च आइक्च मुर आन कली ताइक्तीकेम ताइक्पाइक्तु।

24 तन्न शाफान आ तौ अहीकामम मुल यो येरमीया आ पोन बोक्शा लोत्र पाप्टु। मोपतीके येरमीया साइक्पांइसीचा कली मुर आन गुडम जिम्मा गेचा मपुंइसे। २राजा २२:१२

## 27

यहूदामी नेबुकदनेसर आ गेय पशो

1 यहूदा डा पिप योसीयाह आ तौ सिदकीयाहम सासन पवा आ डोंडती डा बर्सम परमप्रभु यावेम आं कली लोव्र पाप्तु। २राजा २४:१७-१८

2 परमप्रभु यावेमी मार लोव्र पाप्तु देशा हना “कुशुल के डोरी नु थरपु डा शी के जुवा का सेलो। मिनु मेको इ शुरम लाम्सो। येरमीया २८:१०

3 मिनु यहूदा डा पिप सिदकीयाह आ बाक्तीके यरूसलेममी जाक्ब लोव्र कुरब आन कली एदोम, मोआब, अम्मोन, टायर नु सीदोन डा पिप आन बाक्तीकेम मेको लोव्र सोइक्तीमी। येरमीया २५:२१-२२

4 मेको आन होव्रप आन कली एको लोव्र पा ‘मुर नेल्ल आन परमप्रभु यावे इस्राएली आन परमप्रभुम गेपुकीम इन होव्रप आन कली

5 एको रागी, एको रागीम बाक्ब मुरपुकी, बस्तु भाव नु जन्तु नेल्ल आन कली आं ठेयब सक्ति नु आं बोलम सेल्शो नड। मिनु गो सु कली गेचा दाक्नुड, मेको कली गेनुड। येरमीया १२:१७

6 मुल गेपुकी नु इन रागी नेल्ल आं गेय पाइब बेबीलोन डा पिप नेबुकदनेसर आ गुडम गेता। ब्वाकी डा जन्तु आन कली यो सासन पाइब सेल्ला। येरमीया २५:९; यसेया ४५:१,८; इजीकीएल २६:७; दानीएल २:३८

7 मेको आंम इन रागी आ रिम्शो दुम्ची मजाकम सम्म रागी रागी नेल्ल डा मुरपुकीम मेको आ तौ नु मेको आ चच आन गेय पचा माल्नीम। मेको नोले शुश रागी नु ठेयब पिपपुकीमी मेको कली आन वाइल सेल्नीम।

8 तन्न तेकोइ रागी तेकोइ राज्य नु पिपम बेबीलोन डा पिप नेबुकदनेसर आ वाइल दुम्चा नु मेको आ जुवा आन शुरम वोइक्ने मबिस्साकम हना, गो मेको रागी डा मुर आन कली तरवार, अन्काल नु मुर बेक्तीक रोइम सजाइ गेनुडमी। गो मेको आन कली मसाइक्पदुमी सम्म मो पाडनुड’ दे परमप्रभु यावेम देत।

9 मोपतीके गेपुकी ‘बेबीलोन डा पिप आ वाइल दुम्चा माल्नीनी’ देंब, इन नोले दुम्ब लोव्र पाइबपुकी, लिंक्यो कोव्रबपुकी, डोम डा लोव्र शेंबपुकी, टुना मुना नु मन्तर तन्तर पाइब आन लोव्र मनेनीन। येरमीया १४:१३-१४

10 मारदे हना मेकोपुकीमी इन कली देशो नोले दुम्ब लोव्र जोल बाक्ब। मेको लोव्र पतीके इन रागी रे डोन खेरचा पुंडसीनीनी। गो इन कली खेरनुड। मिनु गेपुकी बेक्नीनी।

11 तन्न तेको रागी आ शुर बेबीलोन डा पिप आ जुवा आगाम वोइक्बा, मेको आ वाइल दुम्बा, मेको रागी डा मुर आन कली गो आन रागीमीन दोचा कोक्चा नु बाक्चा गेनुडमी” दे परमप्रभु यावेम देत।

12 मिनु गो मेको लोव्र यहूदा डा पिप सिदकीयाह कली देंती। मेको कली “बेबीलोन डा पिप आ जुवा इन शुरम वोतीन। मिनु मेको नु मेको आ मुर आन वाइल दुमीन। मिनु गे ब्रोंडनीनी।

13 परमप्रभु यावेम बेबीलोन डा पिप आ वाइल मदुम्ब, रागी डा मुर आन कली गे तरवार, अन्काल नु मुर बेक्तीक रोइम बेक्चा माल्नीनी। मारदे गे नु इन मुर बेक्चा दाक्नीनी?

14 गेपुकीम ‘बेबीलोन डा पिप आ वाइल दुम्चा ममाल्नीनी देंब जोल पा परमप्रभु यावे आ लोव्र पाइब आन लोव्र मनेनीन। मारदे हना मेकोपुकीमी इन कली जोल पना पन बाक्नीम’ देंतीनी। येरमीया १४:१४

15 परमप्रभु यावेम ‘गो मेको आन कली मसोइक्तुमी। तन्न मेकोपुकीम आं नैम जोल पा लोव्र पाइनीम। मेको आन लोव्र नेंतीनी हना, गो इन कली एको रागी रे खेरनन्नी। मिनु गे बेक्नीनी। गेपुकी नु इन कली जोल पा लोव्र पाइब मो दुम्नीनी’ देंती” देत।

16 मिनु गो चढ़ेब नु मेको मुर नेल्ल आन कली “परमप्रभु यावेमी ‘गेपुकी इन कली जोल पा आं लोव्र पाइब आन लोव्र मनेनीन। मेकोपुकीमी परमप्रभु यावे आ खिं डा ग्योब नु बोसपुकी रीब पा बेबीलोन रे

चाकसीब' देंनीम। मेकोपुकीमी इन कली जोल पा नोले दुम्ब लोत्र पाइनीम। येरमीया २८:३; २इतिहास ३६:१०

17 मेको आन लोत्र मनेनीन। बेबीलोन डा पिप आ वाइल दुमीने। मिनु गेपुकी ब्रॉइनीनी। मारदे गेपुकीम एको सहर कली मुर मबाक्तीके दुम्पाइक्नीनी?

18 मेकोपुकी थमा पा परमप्रभु यावे आ लोत्र पाइब बाक्तेकम हना नु मेकोपुकी नु परमप्रभु यावे आ लोत्र बाक्त हना, परमप्रभु यावे आ खिम बाक्शो, यहूदा डा पिप आ खिम बाक्शो नु यरूसलेममी बाक्शो मार मार बेबीलोन मलदमेकल, दे मुर नेल्ल आन परमप्रभु यावे कली पुन्मेकल।

19 मारदे हना मुर नेल्ल आन परमप्रभु यावेमी थाम, कांसा के ठेयब चिक्तीके बोस, मेको आ कांसा के निल्तीके नु सहर्म लीशो बोस आन परबम लोत्र पाप्तु। १राजा ७:१५-३९; २राजा २५:१३-१७

20 मेको बेबीलोन डा पिप नेबुकदनेसरमी यहूदा डा पिप येहो-याकीम आ तौ येकोन्याह माइशो येकोन्याह नु यहूदा नु यरूसलेम डा ठेयब मुर नेल्ल आन कली यरूसलेम रे ग्याइशशा लदमेनु, मेको बोस मलदा। येहो-याकीम आ नें २राजा २४:६ योयाकीन बाक्ब। तन्न येरमीया किताबम २२:२४ आ नें कोन्याह बाक्ब। मिनु येरमीया २४:१ येकोन्याह यो देंनीम।

21 मिनु मुर नेल्ल आन परमप्रभु यावे, इस्राएली आन परमप्रभुमी 'आं खिंमी लीशो बोसपुकी, यहूदा डा पिप आ दरवारमी वोइशो बोसपुकी नु यरूसलेममी प्रॉइशो ग्योबपुकी बाक्नीम।

22 मेको नेल्ल आन कली बेबीलोनम चाक्दीत्नीम। मिनु गो मेको आन परबम मकोव्रडु सम्म मेको मेकेर बाक्चा माल्नीम' देशो बाक्ब। मिनु 'गो मेको आन कली लेंशा लेशशा चाक्नुडमी। मिनु लेंशा आन बाक्तीकेमी वोइक्नुडमी' दे परमप्रभु यावेमी देंत' दे माइक्ती। एजा १:१,११

## 28

### हनन्याहम जोल पशो

1 मेको बर्समीन यहूदा डा पिप सिदकीयाहम सासन पशो ४ बर्स ५ महिनाम गिबोनम बाक्ब अज्जुर आ तौ परमप्रभु यावे आ लोत्र पाइब हनान्याहम परमप्रभु यावे आ खिम चढेब नु मुर नेल्ल आन डोंइती लोत्र पा, आं कली २इतिहास १:३,१३

2 "मुर नेल्ल आन परमप्रभु यावे, इस्राएली आन परमप्रभुमी 'गो बेबीलोन डा पिप आ जुवा जिक्ता।

3 बेबीलोन डा पिप नेबुकदनेसरमी आं खिं डा मार मार नु ग्योब एकेर रे बेबीलोनम लाइशो बाक्मे, मेको नेल्ल बर्स निक्शी क्येडा डोंइती गो लेशशा एक चाक्नुडमी। येरमीया २७:१६

4 मिनु गो यहूदा डा पिप येहो-याकीम आ तौ येकोन्याह नु यहूदा रे ग्याइशशा लाइक्चा पुंडसीशो नेल्ल आन कली बेबीलोन रे चाक्नुडमी। मारदे हना गो बेबीलोन डा पिप आ जुवा जिक्शा गेनुड' " दे परमप्रभु यावेमी देंत। येरमीया २७:२०

5 मिनु नोले परमप्रभु यावे आ लोत्र पाइब येरमीयाम परमप्रभु यावे आ खिम राप्शा बाक्शो चढेब नु मुर नेल्ल आन डोंइती मेको परमप्रभु यावे आ लोत्र पाइब हनान्याह कली

6 "आमेन, परमप्रभु यावेम मो पवल। परमप्रभु यावेमी इ पशो लोत्र खबल। परमप्रभु यावे आ खिं डा मार मार ग्योबपुकी नु ग्याइशशा लाइक्चा पुंडसीशो नेल्ल आन कली बेबीलोन रे लेशशा चाक्गल।

7 तन्न इ डोंइती नु मुर नेल्ल आन डोंइती नेंचा डा पा आं देशो लोत्र नेनो।

8 गे नु गो इस डोंइती जाक्ब साइ डा परमप्रभु यावे आ लोत्र पाइबपुकीमी शुश रागी नु ठेयब राज्य आन परबम लडाइ, अन्काल नु मुर बेक्तीक रोइ आन परबम लोत्र पांमे बाक्त।

9 तेको परमप्रभु यावे आ लोत्र पाइबम थुं नाइशशा बाक्तीक आ परबम लोत्र पवा, मेको आ लोत्र गाप्त हना ला, मेको थमा पा परमप्रभु यावेम सोइशो आ लोत्र पाइब बाक्ब, दे तुंडसीब" दे माइक्तु। ब्यवस्था १८:२१-२२

10 मिनु नोले परमप्रभु यावे आ लोत्र पाइब हनान्याहम परमप्रभु यावे आ लोत्र पाइब येरमीया आ शुर रे मेको जुवा शोल्ला जिक्तु।

11 मिनु हनान्याहम मुर नेल्ल आन डोंइती “परमप्रभु यावेमी मार दैत देशा हना ‘गो मोपा बर्स निकशी क्येडा डोंइती रागी रागी डा मुर नेल्ल आन शुर रे बेबीलोन डा पिप नेबुकदनेसर आ जुवा जिक्शा गेनुड’ ” दैत। मेना परमप्रभु यावे आ लोत्र पाइब येरमीया आ लां खोइक्तु। येरमीया २९:१०

12 मिनु परमप्रभु यावे आ लोत्र पाइब हनान्याहम, परमप्रभु यावे आ लोत्र पाइब येरमीया आ शुर डा जुवा जिक्शा गेवा आ इच्का नोले परमप्रभु यावेम येरमीया कली लोत्र पाप्तु।

13 मार लोत्र पाप्तु देशा हना “लशा, हनान्याह कली परमप्रभु यावेमी इ कली मार दैत देशा हना ‘गे शी के जुवा जिक्तीवी। तन्न गो मेको आ पा डा फलाम के जुवा चाक्नुड’ देशो बाक्ब मतो” दैत।

14 मिनु मुर नेल्ल आन परमप्रभु यावे, इस्राएली आन परमप्रभुमी “बेबीलोन डा पिप नेबुकदनेसर आ वाइलीम वाइल दुम्पाइक्चा कली गो रागी नेल्ल डा मुर नेल्ल आन शुरम फलाम के जुवा लाप्नुडमी। थमा पा, मेको आ वाइलीम वाइल दुन्मीम। गो ब्वाकी डा जन्तु आन कली यो आ सासनमी गेतामी, देशो बाक्ब, देनो” दैत। ब्यवस्था २८:४८; येरमीया २७:६

15 मिनु परमप्रभु यावे आ लोत्र पाइब येरमीयाम, परमप्रभु यावे आ लोत्र पाइब हनान्याह कली “ए हनान्याह, नेनो। परमप्रभु यावेमी इ कली मसोइक्त। मिनु गे एको मुर आन कली जोल लोत्र पा थमा सुइक्पाइशो बाक्नेवे।

16 मोपतीके परमप्रभु यावेम ‘गो इ कली एको रागी रे तिल्चा चिकशो बाक्नुड। गे एको बर्सम बेक्नेवे। मारदे हना गे परमप्रभु यावे कली काइ मटिथु जोल लोत्र पाप्तीवी’ दैत” दैत।

17 मिनु मेको बर्स डा ७ महिनाम जोल पा परमप्रभु यावे आ लोत्र पाइब हनान्याह बेक्त।

## 29

### येरमीया आ ब्रेक्स

1 परमप्रभु यावे आ लोत्र पाइब येरमीयामी, यरूसलेम डा ग्याइशशा लाइक्चा पुंडसीशो आन दाते डा ब्रोंइशा लीशो खाल्पा आन कली एको चिठी ब्रेक्शा सोइक्ताक्व। बेबीलोन डा पिप नेबुकदनेसरम यरूसलेम रे चढेब, परमप्रभु यावे आ लोत्र पाइब नु मुर नेल्ल आन कली ग्याइशशा बेबीलोन लाइशो बाक्त।

2 पिप येकोन्याह आ ममा, दरवार डा ठेयब मुरपुकी, यहूदा नु यरूसलेम डा सरकार आ गेय पाइब, रिम्शो पा मारेइ मारेइ सेल्स जोल्ब मुर नु तुप्तीलपुकी यरूसलेम रे ग्याइशशा लाइक्चा पुंडसीमा नोले मेको चिठी ब्रेक्शो बाक्ब। येहो-याकीम आ नें २राजा २४:६ योयाकीन बाक्ब। तन्न येरमीया २२:२४ आ नें कोन्याह बाक्ब। मिनु येरमीया २४:१ येकोन्याह यो दैनीम। २राजा २४:१४-१५

3 मेकोमी मेको चिठी शाफान आ तौ एलासाह नु हिल्कीयाह आ तौ गेमारयाह आस गुडम सोइक्ताक्व। मेको यहूदा डा पिप सिदकीयाहम पिप नेबुकदनेसर कली गेन, दे बेबीलोनम सोइशो बाक्त। मेको चिठीम मार ब्रेक्शो बाक्त देशा हना,

4 मुर नेल्ल आन परमप्रभु यावे, इस्राएली आन परमप्रभुमी मार ब्रेक्पाइशो बाक्त, देशा हना “यरूसलेम रे बेबीलोनम ग्याइशशा लाइक्चा पुंडसीशो नेल्ल आन कली

5 गेपुकी मेकेर खिं सेल्शा बाक्कीन। रूम मार मार शोक्शा जने।

6 ग्युंवे पा, तमी तौ थिने। इन तौ आन कली चाइमी चाक्कीन। इन तमी आन कली ग्युंवे पा गेने। मिनु मेकोपुकीमी तमी तौ थीमेक्ल। मेकेर गेपुकी सोशा बोशा शुश दुमीन। जाम्शा मलने।

7 गो इन कली ग्याइशशा लाइक्पाइशो सहर कली रिम्शो मिम्तीन। मिनु मेको आ पर्वम परमप्रभु यावे कली पुनीन। मारदे हना मेको कली रिम्शो दुम्चा इन कली यो रिम्शो दुम्चा बाक्ब” देशो बाक्त।

8 मुर नेल्ल आन परमप्रभु यावे, इस्राएली आन परमप्रभुमी “इन दातेम बाक्ब परमप्रभु यावे आ लोत्र पाइबपुकी नु लिंक्व कोल्लबपुकीम इन कली जोल पा थमा मसुइक्पदमेक्ल। आन डोमु डा लोत्र मनेनीन। येरमीया १४:१४

9 मेकोपुकीमी जोल पा आं नैमी नोले दुम्ब लोत्र पाइनीम। मेको आन कली गो मसोइक्तुमी” दे परमप्रभु यावेम देशो बाक्ब।

10 परमप्रभु यावेमी “बेबीलोनम मो पशो ७० बर्स गाम नोले गो इन बाक्तीक जाक्नुड। मिनु इन कली एको रागीम लेशशा चाक्नुड, दे आं शिशी पा देशो लोत्र खाप्नुड। येरमीया २५:११-१३

11 मारदे हना गो इन पबर्म शुश मिम्शो बाक्नुड। गो मेको मिम्शो तुडक्नुड। आं मिम्शो इन कली रिम्शो दुम्चा कली बाक्ब। मरिम्शो दुम्पाइक्चा कली ममाइ।

12 गेपुकीम आं नेक्था जाक्शा पुंडनीनु, गो इन पुंडशो नेंनुड।

13 गेपुकीम इन थुं नेल्लेमी आं कली माल्तीनी हना, थित्तीनी। येरमीया ३०:३; ब्यवस्था ४:२९; यसेया ५५:६

14 मिनु गो इन कली थिप्पांडसीनुड। इन जाम्शो शोंप इन कली गेनुड। गो इन कली ग्याइश्शा लाइक्पाइश्शो रागी नेल्ल रे खुप्नुड। तेको रागी रे इन कली ग्याइक्पदु, मेको रागीमी लेशशा चाक्नन्नी” दैत। येरमीया ३०:३; येरमीया ३३:२६

15 गेपुकीम “परमप्रभु यावेम आंइ पबर्म बेबीलोनमी आ लोत्र पाइबपुकी योवतु” देंतीनी।

16 परमप्रभु यावेमी दाऊद आ नित्तीकेम निप्ब पिप नु एको सहरम बाक्ब मुर नेल्ल, इन नेक्था डा मुरपुकी नु ग्याइश्शा लाइक्चा मपुंडसीशो आन पबर्म मार दैत देशा हना,

17 मुर नेल्ल आन परमप्रभु यावेमी “गो मेको आन पबर्म तरवार, अन्काल नु मुर बेक्तीक रोड सोइक्नुड। मिनु गो मेको आन कली राक्शो फोव्रशी गेडा खोदेशो सेल्लुडमी। मिनु मेको थाम्पा राक्शा ब्वचा मडुम्चा डा बाक्नीम। येरमीया २४:८-१०

18 गो मेको आन कली तरवार, अन्काल नु बेक्चा डा रोइमी खेदा पाइनुडमी। मिनु गो मेको आन कली राज्य नेल्लेमी शुश हिंचा डा सेल्लुडमी। मेकोपुकी आं खेरशो रागी नेल्ल आन दातेमी, सराप पाइक्तीके, शुश हिंतीके, शुक्शी पाइक्तीके नु मुने तोक्तीके सेल्लुडमी। ब्यवस्था २८:३७

19 मारदे हना मेकोपुकीमी आं लोत्र मनेनेम। गो आं गेय नु आं लोत्र पाइब आन कली सोइक्ना सोइक्न बाक्ती हना यो मेको आन लोत्र मनेनेम” दे परमप्रभु यावेमी दैत। येरमीया २५:४

20 मोपतीके गे यरूसलेम रे बेबीलोनम सोइश्शो ग्याइश्शा लाइक्चा पुंडसीशो मुल परमप्रभु यावे आ लोत्र नेनीन।

21 मुर नेल्ल आन परमप्रभु यावे, इस्राएली आन परमप्रभुमी “कोलायाह आ तौ आहाब नु मासेयाह आ तौ सिदकीयाहम आं नेमी जोल पाम्ताक्स। ‘गो मेको आस कली बेबीलोन डा पिप नेबुकदरेसर आ गुडमी गेनुडसी। मिनु मेकोमी इन डोंइती मेको आस कली साइक्ब।

22 मेको आस पतीकेन यहूदा रे बेबीलोनम ग्याइश्शा लाइक्चा पुंडसीशो आन दातेमी सराप पाइनीम। परमप्रभु यावेम इ कली सिदकीयाह नु आहाब आस कली खोदेशो सेलल। बेबीलोन डा पिप नेबुकदनेसरमी मेको आस कली मीम हुम्शो बाक्त’ देंनीम।

23 मारदे हना मेको निक्शीमी इस्राएलम थम ग्रांग्रा दिशो गेय पशो बाक्ताक्स। मेको निक्शी आस नेक्था डा मुर आन मीश नु इप्शो बाक्ताक्स। मिनु मेकोम आं मअरेशो लोत्र पाम्ताक्स। गो मेको नेल्ल तुडक्नुड। मिनु गो मेको आ सांकछी बाक्नुड” दे परमप्रभु यावेम दैत।

### शेमायाह कली लोत्र सोइश्शो

24 मिनु गे नेहेलाम डा शेमायाह कली

25 “मुर नेल्ल आन परमप्रभु यावे, इस्राएली आन परमप्रभुमी ‘गे इ नेमी यरूसलेम डा मुर नेल्ल आन कली, मासेयाह, चढ़ेब आ तौ सेफन्याह नु अरु चढ़ेब नेल्ल आन कली चिठी ब्रेक्ताक्वी। गे सेफन्याह कली येरमीया २१:१

26 परमप्रभु यावेम इ कली चढ़ेब येहो-यादा आ पा डा चढ़ेब सेल्लु’ मोपतीके गे परमप्रभु यावे आ खिं डा टेयब मुर दुम्शा, मेको जिम्मा ताक्नेवे। गे मेकेर आन निप्स ग्राइश्शो नु जोल पा परमप्रभु यावे आ लोत्र पखु पाइब आन कली टेंडरो थोक्शा, आन शुर्म फलाम क्युक्शा वोतो। येहो-यादा कली यो-यादा यो ब्रेक्शो बाक्ब।इजीकीएल ९:७; येरमीया २०:२

27 मिनु गे ‘इन दाते डा परमप्रभु यावे आ लोव्र पखु पाइब अनाथोथ डा येरमीया कली मारदे महुइक्तीनी?’

28 मेकोमी बेबीलोनम आंड कली ओदेशो लोव्र सोइक्ताक्व। गे शुश बर्स मेकेर बाक्चा माल्नीनी। मोपतीके खिं सेल्शा बाक्कीन। मिनु रूम मार मार शोकशा जने” दे ब्रेक्शो बाक्त।

29 मिनु चढेब सेफन्याहम मेको चिठी पढेशा परमप्रभु यावे आ लोव्र पाइब येरमीया कली नेपाइक्तु।

30 मिनु मेना परमप्रभु यावेम येरमीया कली लोव्र पाप्तु।

31 नेहेलाम डा शेमायाह आ पर्बम मार लोव्र पाप्तु देशा हना “ग्याइश्शा लाइक्चा पुंडसीशो नेल्ल आन कली एको लोव्र सोइक्तो। शेमायाहम इन कली नोले दुम्ब लोव्र पाप्तु। तन्न गो मेको कली मसोइक्तु। मेकोमी आं लोव्र पा, इन कली जोल लोव्रमी थमा सुइक्पाइक्तु।

32 मोपतीके गो नेहेलाम डा शेमायाह नु मेको आ चच युइ आन कली सजाइ गेनुडमी। मेको आ मुर सुइमी आं मुर रिम्शो दुम्शो तचा मताइनीम। मारदे हना मेकोमी आं कली मटिथु आं पर्बम दूली लोव्र पाप्तु” दे परमप्रभु यावेमी येरमीया कली दैत।

## 30

### इस्त्राएल कली लेंशा सेल्शो

1 मिनु परमप्रभु यावेम येरमीया कली लोव्र पाप्तु।

2 परमप्रभु यावे, इस्त्राएली आन परमप्रभुमी येरमीया कली मार लोव्र पाप्तु देशा हना “गो इ कली देशो लोव्र नेल्ल किताबमी ब्रेक्तो।

3 आं मुर इस्त्राएली नु यहूदा डा मुर आन थु लेशशा नाइक्चा गेतीक नाक्त थमा पा जाक्ब। मिनु गो मेको आन किक्की पिपी आन कली गेशो रागीम लेंशा लाइक्नुडमी। मिनु मेकोपुक्कीमी मेको रागी आंम के सेल्नीम” दैत। येरमीया २९:१४

4 इस्त्राएल नु यहूदा आस पर्बम परमप्रभु यावे आ लोव्र मार बाक्त देशा हना

5 “शुश हिंब नु ग्रीब आन सेंदा नेंसीब। थुं नाइश्शा बाक्तीक जाम्त।

6 मार, वोंइश मुरुम आल थिने चाप्नीमी डा? दे हिल्लो पने। मारदे वोंइश मुर नेल्ल सुत्केरी रोइ पशो खोदेशो पा आन गुइम आन क्रातो दिष्शो ताइनुडमी? मारदे मुर नेल्ल आन कुल बुश दुम्शो बाक्नीमी?

7 आबी, मेको नाक्त दोदेशो हिंचा डा नाक्त दुम्बा। मेको नाक्ती खोदेशो अर्को तेकोइ नाक्ती मदुम्नीम। मेको नाक्ती याकूब कली शुश हिंचा डा श्येत जतीक नाक्ती दुम्ब। तन्न मेको श्येत रे प्रोंइचा पुंडसीब” दैत। योएल २:११; सेफन्याह १:१४-१५

8 मुर नेल्ल आन परमप्रभु यावेमी “गो मेको नाक्ती मेको आन बला रे जुवा जिक्नुड। मिनु गो मेको आन कली फ्रेंशो रे प्रोंइनुडमी। मिनु अर्को रागी डा मुरपुक्कीम मेको आन कली गेनायो वाइल मसेल्नीम। येरमीया २३:५; येरमीया २७:१२; इजीकीएल ३४:२३; होसे ३:५

9 तन्न मेकोपुक्कीम परमप्रभु यावे, आन परमप्रभु, आं कली नु आं सेल्शो पिप दाऊद आ गेय पाइनीम।

10 गे आं गेय पाइब याकूब महिनो। गे इस्त्राएल सुर्ता मपावो। गो इ कली डोन रागी रे चाक्नुड। इ आल आन कली ग्याइश्शा लाइश्शो रागी रे प्रोंइशा चाक्नुड। याकूब कली लेंशा थुं नाइश्शा, हेम्मा पा बाक्तीक दुम्ब। मेको कली सुइम हिंच कोंइने मचाप्नीम। येरमीया ४६:२७; यसैया ४३:५-६

11 मारदे हना गो इ कली प्रोंइचा कली गे नु बाक्नुड। इन कली फ्रशा वोइश्शो रागी रागी डा मुर नेल्ल आन कली साइक्नुडमी। तन्न गो इ कली गेनायो मक्याम्नुड। गो इ कली ठीक सजाइ गेनुड। गो इ कली थमा पा सजाइ मगेथु, मप्रोंइनुड” दे परमप्रभु यावेमी दैत। येरमीया १०:२४; ब्यवस्था ८:५

12 मिनु परमप्रभु यावेम “इ गार मसाब। मेको मरिम्शो बाक्ब। येरमीया १५:१८

13 सुइ इ पोन मबोक्ब। इ गार सापाइक्तीक ओख्ती मबाक्ब। इ कली सापाइक्तीक मारेइ मबाक्ब।



14 इ वारच नेल्लेम इ कली प्रेने थुम्नेकम। मेकोपुकीमी इ कली गेनायो ममिम्नीम। गो इ ठेयब दोस तशो नु इ शुश पाप आ पर्वम पतीके जोरी सत्रुम खोदेशो पा तुप्तन। मिनु शिशी मपाइक्वम खोदेशो पा गो इ कली सजाइ गेतन।

15 मारदे गे इ मसाब गार आ पर्वम वाइ ब्रेशा डाक्नेवे? इ खाइशशो मसाब। मारदे हना इ दोस तशो नु इ शुश पाप पशो आ पर्वम गो इ कली मो पाइशशो बाक्नुड।

16 मोपतीके गे इ कली दाक्ब नेल्ल दाक्चा पुंडसीनीम। इ जोरी सत्रु नेल्ल ग्याइशशा लाइक्चा पुंडसीनीम। इ कली रोइक्बपुकी रोइक्चा पुंडसीनीम। इ कली खतम पोक्ब आन कली गो खतम पोक्नुडमी। यसैया ३३:१; इजीकीएल ३९:१०

17 गो इ कली लेंशा डोंइती डा खोदेशो मारेइ मदुम्शो सेल्लुड। मिनु इ गारपुकी सापाइक्नुडमी। मारदे हना इ कली 'प्रोंइचा पुंडसीशो नु सुइम मिम्चा मपुंडसीशो सियोन' देंनीम" दे परमप्रभु यावेमी देंत। येरमीया ३३:६; यसैया ५७:१८-१९

18 परमप्रभु यावेमी "गो याकूब आ ताम्बु डा शोंप लेंशा गेनुड। मिनु मेको आ बाक्तीक रागी कली शिशी पाइनुड। मेको सहर डा ब्रेशो नेल्ल आ डांडामी लेंशा सेल्सीब। मिनु आ दरवार लेंशा डोंइती डा आ बाक्तीकेमी सेल्सीब।

19 मेकेर 'गे रिम्शो पाइब बाक्नीनी' दे कुम्सो पशो नु थुं नाइशशा बाक्शो ग्येशो सेंदा नेंसीब। गो मेको आन कली शुश सेल्लुडमी। मिनु मेकोपुकी इच्का का ला मदुम्नीम। गो मेको आन कली मान ताइब सेल्लुडमी। मिनु मेको आन कली सुइम शुक्शी मपाइनीम।

20 मेको आन आलपुकी डोंइती डा खोदेशोन दुम्नीम। मिनु मेको आन ग्रुम्तीके आं डोंइती बाक्ब। मेको आन कली दिप्ब नेल्ल आन कली गो सजाइ गेनुडमी।

21 मेको आन कली हुकुम पाइब मेको आन दाते डा का दुम्ब। मेको आन कली सासन पाइब आंम आन मुर बाक्ब। गो मेको कली आं नेक्था चाक्नुड। मिनु मेको आं नेक्था जाक्ब। मारदे हना आं नेक्था आंमा सु जाक्वा डा?" दे परमप्रभु यावेमी देंत। येरमीया ३०:९

22 परमप्रभु यावेम "गे आं मुर दुम्नीनी। मिनु गो इन परमप्रभु दुम्नुड" देंत। येरमीया ७:२३

23 नेनीन, परमप्रभु यावे आ गाइशशोम फश गिवार बोक्ब। मेको आ अरेशो मटीब आन पियाम जुक्ब। येरमीया २३:१९-२०

24 परमप्रभु यावे आ थुंम मिम्शो मगाम्म सम्म मेको आ चुरशो मनाइसीब। गेपुकीमी नोले डा नाक्ती मेको रुप्नीनी।

## 31

### परमप्रभुम इस्राएल कली दाक्शो

1 परमप्रभु यावेमी "गो इस्राएली आन खिं नेल्ल डा मुर आन परमप्रभु दुम्नुड। मिनु मेकोपुकी आं मुर दुम्नीम" देंशो बाक्ब। येरमीया ७:२३

2 परमप्रभु यावेमी "तरवार रे ब्रोंइशो मुरपुकीम गोरशो रागीम शिशी ताम्नेकम। इस्राएल कली नाइक्पाइक्चा दाक्ताक्व हना,

3 परमप्रभु यावे डोन आ बाक्तीके रे जाक्ब। मिनु मेकोमी 'गो इ कली गेना हना यो लीब दाक्तीकेम दाक्ताक्न। मोपतीके गो इ कली दाक्चा मप्रोंइनुड।

4 गो इ कली लेंशा सेल्लुड। गे लेंशा सेल्चा पुंडसीनेवे। मिनु गे कन्ने मीश आल, इस्राएल, गे लेंशा इ खैजडी शेशा, ग्येशीशोपुकी नु सिल पथ लाइनेवे।

5 गे सामरीया डा डांडा मेर लेंशा अडगुर खुम्नेवे। मेको रू डा गेय पाइबपुकीम खुम्नीम। मिनु मेको आ फल जशा ग्येशीनीम।

6 मेना एफ्राइम पहाड डा खाल पाइबपुकीम जाक्कीन, गोपुकी सियोनम बाक्ब परमप्रभु यावे, इ परमप्रभु आ बाक्तीक लय' दे ब्रेत्तीक नाक्त जाक्ब" देंत।

7 परमप्रभु यावेमी “याकूब आ परबम ग्येरशा ठेयब सेंदा पा कुम्सो पने। मिनु रागी रागी डा नेल्ल क्येडा ठेयब रागी आ परबम ठेयब सेंदा पा ग्रीडीन। मिनु परमप्रभु यावेम आ मुर आन कली श्येत रे प्रोंडतु। इस्राएल डा लीशो आन कली प्रोंडतु।

8 नेनीन, गो मेको आन कली उत्तर डा रागी रे चाक्नुडमी। मिनु गो मेको आन कली रागी डा सुर रे खुप्नुडमी। मेकोपुकी आन दातेमी मिक्च मताइब, गुड खोडल मदुक्ब, कोव्रज कुरशो मीश मुर नु सुत्केरी रोड पशो मीश मुर यो बाक्नीम। मेको आन ठेयब हुल लेशशा एकेर जाक्चा माल्नीम। यसैया ३५:८-१०; इजीकीएल ३४:१६

9 मेकोपुकी डाक्ना डाक्न जाक्नीम। गो मेको आन कली शिशी पा लेशशा चाक्नुडमी। गो मेको आन कली खोला आ नेक्था गाक्पाइक्नुडमी। दाइल मपांडसीचा डा पित्थ लांम खुल्नुडमी। मारदे हना गो इस्राएल आ आफ दुम्शो बाक्नुड। मिनु एफ्राइम आं डोंइती जरमेशो तौ बाक्ब।

10 गे रागी रागी डा मुरपुकी, परमप्रभु यावे आ लोव्र नेनीन। डोन डा समुन्द्र आ नेक्था डा रागी नेल्ल आन कली नेपतीन। मेको आन कली ‘इस्राएल कली ब्रपाइक्बम मेको आन कली गुम्पाइक्ब। मिनु गोठलाम आन बगाल आन कली खाल पशो खोदेशो पा, मेकोमी इस्राएली आन कली कोव्रब’ दैत।

11 मारदे हना परमप्रभु यावेम याकूब आ मुर आन कली प्रोंडतु। मिनु मेकोम आन कली आन क्येडा बोल्यो मुर आन गुड रे प्रोंडतु।

12 मेकोपुकी जाक्शा इर सियोनम ठेयब सेंदा पा कुम्सो पाइनीम। मेकोपुकीम परमप्रभु यावे आ रिम्शो पशो आ परबम ग्येरनीम। अन्न, अडगुर शांबु नु तेल तशा, क्यारश भेडा आन पाठा नु बी ब्यफ आन कली तशा ग्येरनीम। मेको ब्वाक्कुम जिशो फल फुल रू खोदेशो दुम्नीम। मेकोपुकी लेशा गेनायो सुर्ता मपाइनीम। येरमीया ५८:१

13 मेना ठिटी मीश मुर ग्येरशा सिल पाइनीम। ठिटा नु खाल्पा ग्येरनीम। गो मेको आन रोंका पतीके ग्येरतीकेम फाइक्नुड। गो मेको आन थुं बार पाइशशा, सुर्ता पतीक आ पा डा ग्येरतीक थुं गेनुडमी।

14 गो चढेब आन कली शुश गेशा रूपाइक्नुडमी। मिनु आं मुरपुकी आं शुश गेशोम रूशा ग्येरनीम” दे परमप्रभु यावेम दैत।

15 परमप्रभु यावेम “रामाम सेंदा का नेंसाक्ब। मेको रोंका पशो नु हिशेक पा डाक्शो बाक्ब। राहेल आ आल आन परबम डाक्ब। मेको लेम्शोनु, मबिस्से। मारदे हना मेको आ आल बेक्तेक्म” दैत। उत्पत्ती ३५:१६-२०; १सामुएल १०:२; मत्ती २:१८

16 परमप्रभु यावेमी “डाक्चा नाइक्तीन। इन मिक्च रे प्रेक्कु मतोककीन। मारदे हना इन गेय डा इनाम ताइनीनी। मेको आन जोरी सनु आन रागी रे लेशशा जाक्नीम।

17 नोले इन रिम्शो दुम्तीक लां कोव्रनीनी। इन तमी तौ आंम आन रागीम लेशशा जाक्नीम” दैत।

18 परमप्रभु यावेम “गो एफ्राइम आ डाक्शा पुंडशो नेंता” दैत। मिनु एफ्राइममी “गे आं कली शेंताक्यीनी। गो इनु शेंशो रुप्ता। गो मटीब बोहोर खोदेशो बाक्ती। आं कली लेत्चा गेयीनी। गो लेत्चा ताइनुड। मारदे हना गे परमप्रभु यावे, गे आं परमप्रभु बाक्नीनी।

19 गो नोले शोंडसीशा, इन गे लेत्ती। आं हेंथे पशो तुडक्तु नोले आं कुचु तुप्ता। गो मुने दोक्ती। मारदे हना गो आं ठिटा ना डा पाप कुरशो बाक्ती” दे डाक्शा दैत।

20 मिनु “मार, एफ्राइम आं दाक्शो तौ ममाइ डा? मेको आ परबम गो मग्येरनुडा? गो मेको कली हुडक्ताक्ड हना यो, मेको कली मिम्ना मिम्न बाक्ती। मोपतीके गो मेको कली मुल सम्म दाक्नुड। गो मेको कली थमा पा शिशी पाइक्नुड” दे परमप्रभु यावेम दैत। यसैया ४९:१५; होसे ११:८

21 लां तुडक्तीक चिन्ड वोतो। लां कोंइतीक थाम खुक्को। गे तेको ठेयब लां रे लाइनेवे, मेको लां रिम्शो पा मिम्तो। गे कन्ने मीश आल इस्राएल, लेतो। इ सहरम लेतो।

22 गे काइ मटीब तमी, गे गेना सम्म रिम्नेवे? मारदे हना परमप्रभु यावेम मेको रागी डा मुर आन पशो नक सेल्लु। मेको मीश मुरुम वोंइश मुर कली दाक्ब।

23 मुर नेल्ल आन परमप्रभु यावे, इस्राएली आन परमप्रभुमी “गो मेको आन शोंप लेशशा गेता हना, मेकोपुकीमी लेंशा यहूदा रागी नु मेको आ सहरपुकीम ‘गे ठीक पाइब नु परमप्रभु यावे आ डांडा, परमप्रभु यावेमी इ कली आसीक गेवल’ देंनीम। जकरिया ८:३

24 यहूदा नु मेको आ सहर नेल्ले काथा बाक्नीम। रू डा गेय पाइब नु आन बगाल नु हिरब गोठला नेल्ल काथा बाक्नीम।

25 गो दशो आन कली लेंशा बोल्यो सेल्लुडमी। मिनु थशो आन कली लेंशा बोल गेनुडमी” देंत।

26 गो ओशोमीन सेंसाक्की। मिनु एर ओथ कोव्रशा, गो रिम्शो पा इप्ती, दे तुइक्ताक्ड।

27 मिनु परमप्रभु यावेमी “गो इस्राएल आ खिं डा मुर, यहूदा आ खिं डा मुर नु क्यारश भेडा, बी ब्यफ आन कली सोशा बोशा दुम्पाइक्तीक नाक्त थमा पा चाक्नुड।

28 गो दोपा मेको आन कली तुल्या, प्रेत्या, ताइक्चा नु खतम पोक्चा कली मरिम्शो पडा, मोपा गो मेको आन कली सेल्चा नु खुम्चा कली कोव्रनुड। येरमीया १:१०

29 मेको नाक्ती मुरपुकीम लेंशा ‘आम आफोम ग्युरशो अडगुर ब्वाम्तेक्म। मिनु आन आल आन खुइ ग्रिम्तेक्म’ मदेनीम। इजीकीएल १८:२; प्रस्थान २०:५; बिलाना ५:७

30 तन्न मुर नेल्ल आन पाप आ परबंम बेक्नीम। सुम ग्युरशो अडगुर ब्वाइबा, मेको आ खुइ ग्रिम्ब” देंत।

31 परमप्रभु यावेमी “गो इस्राएल आ खिं डा मुर नु यहूदा आ खिं डा मुर नु नक कबल का पाइनुड। मेको नाक्ती थमा पा जाक्ना जाक्न बाक्नीम। हिब्रू ८:८-१२

32 मेको कबल मेको आन किकी पिपी आन कली इजीप्त रे गुंइची ना पशो कबल खोदेंशो ममाइ। गो मेको आन वोंइश खोदेंशो बाक्ती हना यो, मेकोपुकीमी मेको कबल मखबेम।

33 तन्न इस्राएल आ खिं डा मुर नोले डा नाक्ती डा कबल मार बाक्त देंशा हना, गो आं अरेशो मेको आन थुंम वोइक्नुड। मिनु आन थुंम मेको ब्रेक्शा गेनुडमी। मिनु गो मेको आन परमप्रभु दुम्नुड। मिनु मेकोपुकी आं मुर दुम्नीम। इजीकीएल ११:१९; हिब्रू १०:१६-१७; येरमीया ७:२३

34 मेना रे परमप्रभु यावे कली तुइक्तीन, दे मुर कामी अर्को कली मशेंनीम। मारदे हना आइक्च रे ठेयब नेल्लेम आं कली तुइक्नीम। गो मेको आन मरिम्शो पशो माफ गेनुडमी। मिनु लेंशा गेनायो मेको आन पाप ममिम्नुड” दे परमप्रभु यावेमी देंत। येरमीया ३३:८; यसेया ४३:२५; रोमी ११:२६-२७

35 मेको परमप्रभु यावेम नाक्ती हाम्सो सेल्चा कली नां वोइक्तु। मिनु तास्ला आ लां कोंइताक्व। नाक्दो हाम्सो सेल्चा कली सोरुल वोइक्तु। मेकोमी समुन्द्र आ छाल पोक्चा कली शाक्तु। मेको आ नें मुर नेल्ल आन परमप्रभु यावे बाक्व।

36 मिनु परमप्रभु यावेमी “आं डोंइती नां, तास्ला नु सोरुल जाम्तेक्म हना ला, इस्राएली यो आं डोंइती रागी का मदुम्नीम” देंत। येरमीया ३३:२५; रोमी ११:१

37 परमप्रभु यावेमी “सरीड कली पुक्ने जाप्त हना, रागी आ जग माल्शा गुंइने चाम्साक्व हना, ला गो इस्राएल आ आल आन कली तिल्लुडमी” देंत।

38 परमप्रभु यावेम “हानानेल आ लाइशो खिं रे सुर डा ठेयब लाप्चो सम्म आं नेंम लेंशा सहर सेल्ल्तीक नाक्ती थमा पा जाक्ना जाक्न बाक्नीम।

39 पुक्तीक डोरी मेको रे पा गरिब डा डांडा सम्म जाक्दीप्ब। मिनु मेको रे हिरशा गोआह सम्म जाक्दीप्ब।

40 बेक्शो मुर आन बेसी नेल्ल पुलु ताइक्तीक दिंम नु किद्रोन कोल्सा सम्म डा रू नेल्ल नु शारा लाप्चो डा कुना सम्म परमप्रभु यावे के दुम्ब। मिनु मेको गेनायो तुल्शा खतम मपोक्सीब” देंत।

## 32

### येरमीयामी रू ग्याप्शो

1 परमप्रभु यावेम येरमीया कली लोव्र पाप्तु। मेना यहूदा डा पिप सिदकीयाहम सासन पशो १० बर्स दुम्मेनु, नेबुकदरेसर आ सासन पशो १८ बर्स दुम्शो बाक्त।

2 मेना बेबीलोन डा पिप आ लडाइ पाइबपुकीम यरूसलेम पुम्ताक्म। परमप्रभु यावे आ लोत्र पाइब येरमीया चहिं यहूदा डा पिप आ दरवार खाल पाइब मुर आ जेल्खानम बाक्त। मेको यहूदा डा पिप आ लाङगाम बाक्त। २राजा २५:१-२

3 यहूदा डा पिप सिदकीयाहम मेको कली मेकेर चोक्शो बाक्त। मिनु मेकोमी “गे मारदे मोदेशो पा परमप्रभु यावे आ लोत्र पाइनेवे? परमप्रभु यावेमी ‘गो एको सहर बेबीलोन डा पिप आ गुडम गेचशो बाक्नुड। मिनु मेकोमी एको आंम के सेल्ब। येरमीया २१:७; येरमीया ३४:२

4 यहूदा डा पिप सिदकीयाह कल्दी आन गुड रे मब्रोइब। मेको थमा पा बेबीलोन डा पिप आ गुडम गेचा पुंडसीब। मिनु मेको नु कोत्रमुशा, लोत्र पाइब।

5 मेकोमी सिदकीयाह कली बेबीलोन लाइक्ब। मिनु गो मेको कली मकोव्रडु सम्म मेकेर बाक्ब। गे कल्दी नु लडाइ पाप्तीवी हना मगानेवे’ दे परमप्रभु यावे आ लोत्र पवी” देशा चोक्शो बाक्त। येरमीया ५२:११

6 मिनु येरमीयामी परमप्रभु यावेम आं कली लोत्र पाप्तु। मार लोत्र पाप्तु देशा हना,

7 “इ बकान्छा शाल्लुम आ तौ हनामेल इ बाक्तीक जाक्शा, इ कली ‘अनाथोथम बाक्शो आं रू ग्यापीन। मारदे हना ग्याप्चा अधिकार इन के बाक्ब’ देब” देत। लेवी २५:२५; रूथ ४:३-४

8 मिनु नोले परमप्रभु यावेम देशो खोदेशो पा आं बकान्छा आ तौ हनामेल पिप आ खिं खाल पाइब आन लाङगा जाक्शा, मेकोमी “बेन्यामीन आ रागी अनाथोथम बाक्शो आं रू ग्यापीन। मेको ग्याप्चा अधिकार इन केन बाक्ब। मोपतीके गे मेको ग्याम्सीन” देत। मिनु गो एको परमप्रभु यावे आ लोत्र बाक्माक्त, दे तुडक्ताक्ड।

9 मोपतीके गो आं बकान्छा आ तौ हनामेल आ अनाथोथम बाक्शो रू ग्याप्ता। मिनु गो मेको कली चांदी के १७ शेकेल नाक्शा गेता। शेकेल का ११.५ ग्राम डा चांदी के क्येट बाक्ब।

10 मिनु गो कागज ब्रेक्शा, छाप थोक्शा सांकछीपुकी वोइश्शा चांदी के शेकेल नाक्शा गेता।

11 मिनु गो आं रू ग्याप्शो ब्रेक्शो छाप थोक्शो कागज ताक्ता। छाप थोक्शो नु छाप मथोक्शो कागज यो ताक्ता।

12 मिनु गो मेको रू ग्याप्शो ब्रेक्शो कागज आं बकान्छा आ तौ हनामेलम आ डोंइती, सांकछी नु पिप कली खाल पाइब आ लाङगाम बाक्शो यहूदी आन डोंइती माहसेयाह आ चच, नेरीयाह आ तौ बारुक कली गेता। मेको सांकछी नेल्ल आन नें यो कागजम ब्रेक्शो बाक्तेक्म।

13 गो मेको नेल्ल आन डोंइती बारुक कली

14 “मुर नेल्ल आन परमप्रभु यावे, इस्राएली आन परमप्रभुमी मार देत देशा हना, मेको शुश नाक्त सम्म लील, दे मेको रू ग्याप्शो कागज, छाप थोक्शो नु मथोक्शो, निम्फा खप के ग्योंब कामी कुर पावो” देत।

15 मारदे हना मुर नेल्ल आन परमप्रभु यावे, इस्राएली आन परमप्रभुमी “मेको रागीमी खिं, रू नु अङ्गुर रू ग्याप्नीम” देत। येरमीया ३२:१५

16 मिनु गो नेरीयाह आ तौ बारुक कली मेको रू ग्याप्शो कागज गोडा नोले, गो परमप्रभु यावे कली एको लोत्र पा

17 “परमप्रभु, परमप्रभु यावे, इन ठेयब सक्ति नु दिशो गुडम गे सरीड नु रागी सेल्लतीन। इन कली मारेड गेय मचाप्चा डा मबाक्ब। येरमीया २७:५; उत्पत्ती १८:१४; लूका १:३७

18 हजार हजार पाला सम्म इन गेना हना यो दाक्तीक कोइनीनी। तन्न आम आफ आन हेंथे पशो आन नोले जाक्ब आन आल आन कली रपाइक्नीनी। गे ठेयब नु सक्ति पाइश्शो परमप्रभु बाक्नीनी। इन नें मुर नेल्ल आन परमप्रभु यावे बाक्ब। प्रस्थान २०:५-६

19 इन अर्ती ठेयब नु इन गेय नेल्ल क्येडा सक्ति पाइश्शो बाक्नीम। मुर आन पशो मारेड मारेड इन डोंइती तचा डा पा बाक्नीम। गे मुर नेल्ल आन कली कोत्रनीनी। गे नेल्ल आन लां नु आन पशो तशा इनाम गेनीनी। रोमी २:६

20 गे इजीप्त रागीमी चिन्ड नु छक लाक्चा डा गेय कोइताक्नी। मिनु मुल सम्म इस्राएल नु मुर नेल्ल आन दातेमी इन नें ठेयब सेल्लतीन।

11 गे इन मुर इस्राएली आन कली इजीप्त रे चिन्ड नु छक लाक्वा डा गेय इन सक्ति नु बोल नु शुश हिंचा डा श्येत कोंइशा गुंडताकनी।

12 मिनु गे मेको आन किकी पिपी आन कली कसम जशो, मेको दूध नु खुदो शुश बाक्शो रागी गेतीनी।

13 मिनु मेकोपुकी ओव्रशा, मेको रागी आन के सेल्लेक्म। तन्न मेकोपुकीमी इन देंशो, इन अरेशो नु मार पचा माल्बा शेंशो मबिस्सम। गे मेको आन कली पन देंशा शेंशो लोत्र मेकोपुकीमी मटीमे। मोपतीके गे एको ठेयब श्येत नेल्ल मेको आन तार चाक्तीनी।

14 कोव्रडीन, एको सहर आन के सेल्चा कली नु गारो डोइक्वा कली लां सेल्चा कली मार मार तेल्तेक्म। मेको सहर कली तरवार, अन्काल नु मुर बेक्तीक रोइम पतीके, मेको लडाइ तोइब कल्दी आन गुडम दुम्त। गे मार देनी, मेको दुम्त। गे आंमा ताइनीनी।

15 मो हना यो परमप्रभु, परमप्रभु यावे, गे आं कली ‘एको सहर कल्दी आन गुडम दुम्त हना यो, क्येट गेशा, साकछी आन कली ब्रेशा, रू ग्यापो’ देंतीनी” दे येरमीया देंत।

16 मिनु परमप्रभु यावेम येरमीया कली लोत्र पाप्तु।

17 मार, लोत्र पाप्तु देंशा हना “गो परमप्रभु यावे, ब्रोंइशो नेल्ल आन परमप्रभु नड। मार, तेकोइ गेय आं पने मचाप्या डा बाक्वा डा?” देंत। गन्ती १६:२२; येरमीया ३२:१७

18 मोपतीके परमप्रभु यावेमी “गो एको सहर कल्दी आन गुड नु बेबीलोन डा पिप नेबुकदरेसर आ गुडम गेचा चिक्ताकड। मिनु मेकोमी एको सहर ग्राब।

19 एको सहर कली लडाइ तोइब कल्दी जाक्शा मी सुइक्नीम। तेको खिं तारी आं कली गाइक्पाइक्वा कली बाल देवता कली चढ़ेमे नु देवी देवता आन कली तूचा थोव्रक चढ़ेशा लुक्तेमे, मेको नेल्ल क्रोइक्नीम। येरमीया १७:१३

30 मारदे हना इस्राएल डा मुर नु यहूदा डा मुरुम आन ठिटा रेन आं डोंइती मरिम्शो गेय डा लाक्शा अरु मारेइ मपामे। थमा पा इस्राएल डा मुरपुकीम आन गुड डा गेयम आं कली गाइक्पाइक्वा डा लाक्शा, अरु मारेइ मपामे।

31 एको सहर सेल्मे नाक्ते रे मुल सम्म आं कली गाइक्पाइक्वा, चुरपाइक्वा पतीमी। मोपा गो एको कली आं डोंइती रे तिल्लुड।

32 मेको इस्राएल नु यहूदा डा मुरपुकीमी आं कली गाइक्पाइक्वा कली आन मरिम्शो पशो आन पब्रम पाइनुड। मेको आन पिप, आन सरकार डा गेय पाइब, आन चढ़ेब, आं लोत्र पाइबपुकी, यहूदा डा मुरपुकी नु यरूसलेममी बाक्बपुकी नेल्लेम मोदेंशो पाम्तेक्म।

33 मेकोपुकीमी आं कली आन ची हिरशा कोंइशो बाक्नीम। आन कुल ममाइ। गो मेको आन कली शेंना शेंन बाक्ती हना यो, मनेनेम रिम्शो पचा कली ममिम्तेम। येरमीया २:२७

34 मेकोपुकीमी आं नें वोइश्शो खिंम आन ग्रांरा दिशो देवी देवता वोइक्तेक्म। मिनु आं खिं कली ग्रांरा दिशो सेल्लेक्म।

35 मेकोपुकीमी हिन्नोम आ तौ आ बेसीम बाल देवता आन थान सेल्लेक्म। मिनु मेकोपुकीमी मेकेर आन तमी तौ आन कली मोलेक कली चोशा चढ़ेक्तेक्म। गो मेको आन कली मेको मअरेडमी। गो मेको गेनायो ममिम्तु। मोदेंशो ग्रांरा दिशो गेय पशा, यहूदा डा मुर आन कली पाप पपाइक्तेक्म” देंत। येरमीया ७:३१; येरमीया १९:५; इजीकीएल २०:२५-२६

36 मोपतीके परमप्रभु यावे, इस्राएली आन परमप्रभुमी “गेपुकीमी एको सहर आ पब्रम ‘तरवार, अन्काल नु मुर बेक्तीक रोइम बेबीलोन डा पिप आ गुडम गेशो बाक्ब’ देंतीनी।

37 कोव्रडीन, गो मेको आन कली आं गाइश्शो, चुरशो नु ठेयब ग्युश्रा बोक्तीकेमी तेको रागीम खेरुमी, मेको रागी नेल्ल रे गुप्पाइक्नुडमी। गो मेको आन कली लेंशा एको रागीम लेश्शा चाक्नुडमी। मिनु मेको आन कली रिम्शो पा मारेइ मडुम्थु बाक्पाइक्नुडमी। ब्यवस्था ३०:३

38 मिनु मेकोपुकी आं मुर दुम्नीम। मिनु गो मेको आन परमप्रभु दुम्नुड। येरमीया ७:२३

39 गो मेको आन कली थुं का दुम्तीक नु गाक्तीक लां का गेनुडमी। मेकोपुकी गेना हना यो आं कली मान पा हिंनीम। मेको आंम आन कली नु आन आल आन कली रिम्शो दुम्ब। इजीकीएल ३६:२७

40 गो मेकोपुकी नु गेना हना यो लीब कबल का पाइनुड। गो मेको आन कली रिम्शो पचा कली गेनायो मप्रॉइनुड। मिनु गो मेको आन थुंमी आं कली मान पा हिंतीके वोइक्नुड। मोपा मेकोपुकीम आं कली मप्रॉइनीम। येरमीया ३१:३१-३४

41 गो मेको आन कली रिम्शो पना पन ग्येरसीनुड। मिनु थमा पा गो आं थुंनु आं सोक्त नेल्लेम मेको आन कली एको रागीम वोइक्नुडमी” दैत। ब्यवस्था २८:६३; आमोस ९:१५

42 परमप्रभु यावेमी “दोपा गो एको मुर आन कली ओं पा शुश श्येत गेडा, मोपा गो मुल आं दैशो रिम्शो पतीक नेल्लेम, मेको आन कली रिम्शो पाइक्नुडमी।

43 एको रागीम रू ग्याप्नीम। मेको आ पबंम गेपुकीम ‘एको मुर नु बस्तु भाव मारेइ मबाक्शो रागी बाक्ब। मारदे हना एको कल्दी आन गुडम गेशो बाक्ब’ देनीनी।

44 मेकोपुकीम क्येटीम रू ग्याप्नीम। मेको आन नें ब्रेक्शो ग्याप्शो कागज, सांकछी वोइश्शा, छाप थोक्नीम। मोदैशो बेन्यामीन आ रागी, यरूसलेम आ एर ओंथ, यहूदा डा सहरम, पहाडीम, शेफेलाहम नु नेगेबम मोदैशो पाइनीम। मारदे हना गो मेको आन शोप लेशशा गेनुड” दे परमप्रभु यावेम दैत। येरमीया ३२:१५; येरमीया २९:१४,३०

## 33

“यरूसलेम लेशा सेल्लुड” दैशो

1 परमप्रभु यावेमी येरमीया कली पिप आ दरवार खाल पाइब मुर आ जेल्खानम बाक्मेनु निक्शी खेयप लोत्र पाप्नु। येरमीया ३२:२

2 मिनु रागी सेल्ब परमप्रभु यावेमी लोत्र पाप्नु। मेको रागी बोल्यो सेल्ब आं नें यावे बाक्ब।

3 मेकोमी “आं कली ब्रेत्ती। मिनु गो इ कली लोत्र लेत्नुड। मिनु गो इ मतुइश्शो ठेयब नु खुइश्शो शोत्रक शेनुड” दैत।

4 इस्राएली आन परमप्रभु यावेमी “एको सहर डा खिं नु यहूदा डा पिप आन खिं प्रेशशा, कल्दी नु लडाइ पचा कली सहर आगा रे यो गारो डोइक्तीक लां सेल्नीम। यूसैया २२:१०

5 कल्दी सहर ओव्रशा लडाइ पाइनीम। मेकोपुकीमी मेको खिं कली बेक्शो मुर आन रांमी प्रिनीम। गो आं गाइश्शो नु चुरशोम साइश्शो मुर आन बेक्शो रांम प्रिनीम। मारदे हना आं अरेशो लोत्र मटीब आन पतीके एको सहर रे आं कुल खुइक्ताक्ड।

6 गो आं मुर आन कली सापाइक्नुडमी। मिनु गो मेको आन कली सापाइश्शा, आन माल्शो गेशा मारेइ मदुम्थु रिम्शो पा बाक्चा गेनुडमी। येरमीया ३०:१७

7 गो यहूदा नु इस्राएल डा मुर आन शोप लेशशा गेनुडमी। मिनु मेको आन कली डोइती डा खोदैशो सेल्लुडमी। येरमीया २९:१४; येरमीया २४:६

8 गो आं पबंम पशो आन हेंथे पतीके नु पाप नेल्ल रे मेको आन कली ठीक सेल्लुडमी। मिनु गो मेको आन हेंथे पशो नु पाप पशो माफ गेनुडमी। येरमीया ३१:३४; येरमीया ५०:२०

9 मिनु एको सहर आं डोइती ग्येरपाइक्तीक, ठेयब सेल्लुकी नु आं कली मान पतीके दुम्ब। मिनु रागी रागी डा मुरुम गो इस्राएली आन कली मार मार रिम्शो पशो नैनीम। मिनु मेको आन कली रिम्शो नु आन माल्शो क्येडा शुश गेशो तशा आं पबंम हिंशा खिंखिं पाइनीम” दैत।

10 परमप्रभु यावेमी “मेको सहर आ पबंम गेपुकीम ‘एको मुर नु बस्तु भाव मारेइ मबाक्शो रागी बाक्ब। यहूदा डा सहर नु यरूसलेम डा लां गाक्ब मुर नु बस्तु भाव, जन्तु मबाक्थु, श्येत्थ दुम्शो बाक्ब। मेको मारेइ मबाक्शो सहरम लेशा, येरमीया ३२:४३

11 थुं नाइश्शा बाक्तीक, ग्येरशो सेंदा, ग्युम्ली ग्युम्ले आन सेंदा, कुम्सो पशो सेंदा नु परमप्रभु यावे आ खिंम, गे रिम्शो पाइब बाक्नीनी” देशा सेंदा लेशा नैसीब। मुर नेल्ल आन परमप्रभु यावे कली ‘परमप्रभु

यावे, गे शिशी पाइब बाकनीनी' देनीन। मारदे हना मेको रिम्शो पाइब बाकब। मेको आ दाक्तीक गेना हना यो बाकब। गो रागी डा मुर आन कली डोंडती डा खोदेशो पा थुं नाइक्चा गेनुड" दे परमप्रभु यावेम देंत। येरमीया ७:३४; एजा ३:११; बजन संग्रह १०६:१

12 मुर नेल्ल आन परमप्रभु यावेमी "मुर नु क्यारश भेडा, बी ब्यफ मबाक्शो रागीम लेंशा सहर नेल्लेमी गोठला आन क्यारश भेडा नाइक्तीक नु योत्रतीक दुम्ब।

13 मिनु पहाड डा सहर, शेफेलाह, नेगेब बेन्यामीन आ रागी यरूसलेम आ एर ओथ नु यहूदा डा सहरम गोठलापुकीमी क्यारश भेडा लेंशा हिक्शा ओइनीम" दे परमप्रभु यावेम देंत। येरमीया ३२:४४

दाऊद नु लेवी कली पशो कबल

14 परमप्रभु यावेम "इसाएल आ खिं डा मुर नु यहूदा आ खिं डा मुर आन कली आं थोक्शा पशो लोत्र खाप्तीक नाक्त थमा पा जाकना जाकन बाकनीम। येरमीया २३:५-६; जकरिया ३:८

15 मेको नाक्ती, मेना गो दाऊद आ खिं रे ठीक पाइब राशी का दाप्पाइक्नुड। मिनु मेकोमी रागीम ठीक निसाफ नु ठीक गेय पाइब।

16 मेको नाक्ती यहूदा श्येत रे प्रोंइचा पुंइसीब। मिनु यरूसलेम मारेइ मदुम्थु बाकब। मिनु मेको आ नें आंइ कली ठीक सेल्ब परमप्रभु यावे" देंनीम। ब्यवस्था ३३:२८

17 मारदे हना परमप्रभु यावेम "गेना हना यो दाऊद आ खिं डा मुर का इसाएलमी पिप दुम्ब। २सामुएल ७:१२-१३; १राजा १:५; भजन संग्रह ८९:३०

18 गेना हना यो लेवी आ थर डा चढेब का आं डोंडती चोशा चढेचा कली, अन्न चढेचा कली नु क्योरशा चढेचा कली बाकब" देंत। गन्ती २५:१२-१३; नेहेम्याह १३:२९

19 परमप्रभु यावेम येरमीया कली लोत्र पाप्तु।

20 मार, लोत्र पाप्तु देशा हना "गेपुकीमी गो नु नाकदो पशो कबल नु नाक्त पशो कबल क्याम्ने चाप्तीनी हना, नाकदो नु नाक्ती आं देशो ना मदुम्तेकम हना, येरमीया ३१:३५-३६; उत्पत्ती ८:२२

21 ला आं गेय पाइब दाऊद नु आ तौ का पिप दुम्ब, देशो कबल क्याम्ने चाप्तीनी। मिनु गो आं लेवी थर डा मुर चढेब नु पशो कबल यो क्याम्ने चाप्तीनी। गन्ती २५:१२-१३; हिब्रू ९:११-१४

22 दोपा सरीड डा सोरुल हिक्ने मचाप्चा डा बाकनीमी नु समुन्द्र डा बाल्वा पुक्ने मचाप्चा डा बाक्बा, मोपा गो आं गेय पाइब दाऊद आ चच युइ नु आं कली गेय पाइब लेवी आ थर डा मुर आन कली सोपाइश्शा बोपाइश्शा शुश सेल्लुडमी" देंत। उत्पत्ती १५:५

23 परमप्रभु यावेम येरमीया कली लोत्र पाप्तु।

24 मार लोत्र पाप्तु देशा हना "मेको मुरपुकी मार, देना देन बाक्मा, मार, गे मननेनी? मेकोपुकीमी 'परमप्रभु यावे आ योत्रशो खिं निक्शी डा मुर आन कली प्रोंइशा तिल्लो बाकब" देतेकम। मो देंतीके मेको मुरपुकीमी आं मुर आन कली आइक्च सेल्शा, मुल रे रागी का यो मनम, दे मिन्नीम" देंत।

25 परमप्रभु यावेमी "गो नाकदो नु नाक्त नु आं कबल मपाता हना, सरीड, रागीम आं देशो मपाम्तेकम हना,

26 गो याकूब आ आल नु आं गेय पाइब दाऊद आ चच युइ आन कली तिल्लुडमी। मोपा मेको अब्राहाम, इसहाक नु याकूब आन मुर आन कली पिप दुम्चा कली मयोत्रनुडमी। तन्न गो मेको डोंडती खोदेशो पा, मेको आन थुं नाइक्चा गेनुडमी। मिनु मेको आन कली शिशी पाइनुडमी" देंत।

## 34

सिदकीयाह कली हिंच कोइशो

1 परमप्रभु यावेम येरमीया कली बेबीलोन डा पिप नेबुकदरेसर, मेको आ लडाइ पाइब नेल्ल, रागी डा राज्य नेल्ल नु मेको आ सासन पशो रागी डा मुर नेल्लेम यरूसलेम नु आ एर ओथ डा सहर नेल्ल आन कली लडाइ तोम्तेकम। मेना इसाएली आन परमप्रभु यावेमी येरमीया आं कली लोत्र पाप्तु। येरमीया ५२:४; २राजा २५:१-२

2 मिनू परमप्रभु यावे, इस्राएली आन परमप्रभुमी आं कली “यहूदा डा पिप सिदकीयाह आ बाक्तीक लावो। मिनू मेको कली परमप्रभु यावेमी ‘गो एको सहर बेबीलोन डा पिप आ गुडम गेनुड। मिनू मेकोमी एको सहर कली मीम क्रोडकब। येरमीया २१:१०

3 गे मेको आ गुड रे ब्रोंडचा मताडनेवे। गे थमा पा ग्याडक्चा पुंडसीशा मेको आ गुडम दुम्नेवे। गे बेबीलोन डा पिप कली तशा, मेको नु कोवमुशा लोव्र पाडनेवे’ दे बेबीलोन लचा माल्नेवे” देंत। येरमीया ३२:४

4 मो हना यो ए यहूदा डा पिप सिदकीयाह, परमप्रभु यावे आ लोव्र नेनीन “गे तरवारम साडक्चा मपुंडसीनीनी। येरमीया ५२:११

5 गे इन थुं नाडशशा बेक्नीनी। मिनू दोपा इन किकी पिपी इन डोंडती डा पिप आन कली मुरपुकीमी ब्रोवशो रिना पाडब थोव्रक चोशा थिम्मे, मोपा मेकोपुकीमी इन कली यो थिम्नीम। इन परबम ‘आंड प्रभु’ दे रोंका पाडनीम। गो मेको लोव्र पाता, दे नेल्लेम नेंचा डा पा देनो” दे परमप्रभु यावेमी देंत। २इतिहास १६:१४; येरमीया २२:१८

6 मिनू येरमीयामी मेको लोव्र नेल्ल यरूसलेममी यहूदा डा पिप सिदकीयाह कली देंत।

7 बेबीलोन डा पिप आ लडाइ पाडब मुरपुकी यरूसलेम नु यहूदा डा अरु सहर नु लडाइ पना पन बाक्शो बाक्तेक्म। लाकीश नु आजेका नु यो मेकोपुकीमी लडाइ पचा मप्रोंडशो बाक्तेक्म। मेको यहूदा डा गारो हिरशो सहर निक्शी ला लीशो बाक्ताक्स।

### वाइल आन कली प्रोंडतीक बर्स

8 मेना परमप्रभु यावेम येरमीया कली लोव्र पाप्तु। मेना यहूदा डा पिप सिदकीयाहम यरूसलेम डा मुर नेल्ल नु वाइलीम वाइल नेल्ल आन कली प्रोंडचा माल्नीम, दे कबल पशो बाक्त। येरमीया ३४:१४

9 मेना मुर नेल्लेम आंम हिबू वाइलीम वाइल आन कली प्रोंडचा माल्तेक्म। सुडम यो आंम हिबू लोक्ब आन कली वाइलीम वाइल सेल्चा मदुम।

10 मिनू मेको लोव्र टीब टेयब मुर नु कबल टीब मुर नेल्लेमी आंम आन वाइलीम वाइल आन कली प्रोंडचा नु लेंशा अर्को वाइलीम वाइल मवोडक्चा नम, देशो बिस्साक्म। मिनू मेकोपुकी गारशा, मेको आन कली प्रोंडतेक्म।

11 मिनू नोले लेंशा मेकोपुकीमी आन थुं लेशशा आन प्रोंडशो वाइलीम वाइल आन कली लेंशा चाक्शा वाइलीम वाइल सेल्तेक्म।

12 मिनू परमप्रभु यावेम येरमीया कली लोव्र पाप्तु।

13 मार, लोव्र पाप्तु देशा हना “परमप्रभु यावे, इस्राएली आन परमप्रभुमी ‘गो मेको आन किकी पिपी आन कली इजीप्त रागी डा वाइलीम वाइल दुम्तीक खिं रे प्रोंडशा चाक्तामी। मिनू गो मेकोपुकी नु कबल पाता।

14 तेकोड ७ बर्सम इन कली लेयसीशो मुर इन हिबू लोक्बम इन कली ६ बर्स गेय पवा नोले, ७ बर्सम मेको कली प्रोंडचा माल्ब’ देती। तन्न इन किकी पिपीम आं लोव्र मटीम। आन नोफान मदाइक्तेम। प्रस्थान २१:२; लेवी २५:३९-४१; ब्यवस्था १५:१२

15 गेपुकीम चहिं नक माफ पुंडशा आं डोंडती नेल्ल आन कली प्रोंडचा नम, देशो लोव्र ठीक पाडतीनी। मिनू गेपुकीमी आं नें बाक्तीक खिंम आं डोंडती कबल का पाडतीनी। लेवी २५:१०

16 तन्न नोले इन थुं फाडशशा आं नें ग्रांग्रा दिशो सेलतीनी। गे नेल्लेम इन डोंडती प्रोंडशो वाइलीम वाइल आन कली लेशशा चाक्तीनी, देशो बाक्ब” देंत।

17 मोपतीके परमप्रभु यावेमी “गेपुकीम आं देशो मटिनी। मिनू आंम रागी डा आंम नेक्था डा मुर नु आंम वारच आन कली वाइलीम वाइल दुम्तीक रे मप्रोंडनी। मोपतीके गो मुल इन कली प्रोंडननी। गो इन कली तरवार, मुर बेक्तीक रोड नु अन्कालम साडक्पाडक्चा कली प्रोंडननी। गो इन कली राज्य नेल्लेम शुश हिंचा डा सेलननी।

18 आं कबल क्याम्ब नु आं डोंडती पशो कबल डा पतीके मपाडब मुर आन कली बाछा खोदेशो सेलनुडमी। मेको कली फेक निक्शी सेल्तेक्म। मिनू मेको आ दाते रे गाक्तेक्म।



19 मिनु मेको बाछा आ फेके निक्शी आस दाते रे गाक्ब यहूदा नु यरूसलेम डा सरकार आ गेय पाइब, दरवार डा ठेयब मुरपुकी, चढेबपुकी नु रागी डा मुर नेल्ल

20 आन जोरी सत्रु आन गुडम नु आन कली साइक्चा माल्ब आन गुडम गेचा पुंडसीनीम। मेको आन बेक्शो रां सरीड डा चिक्ब नु रागी डा जन्तु आन ब्वतीक दुम्ब। येरमीया ७:३३

21 यहूदा डा पिप सिदकीयाह नु मेको आ सरकार डा गेय पाइब आन कली साइक्चा माल्ब, आन जोरी सत्रु आन गुडम नु बेबीलोन डा पिप आ लडाइ पाइब आन गुडम गेनुडमी। मेको लडाइ पाइबपुकी इन रे लेशशा लशो बाक्तेक्म” देंत। येरमीया ३७:५

22 परमप्रभु यावेमी “गो मेको आन कली अरेनुडमी। मिनु गो मेको आन कली एको सहरमी लेशशा चाक्नुडमी। मेकोपुकीमी एको सहर नु लडाइ पा ग्रानीम। मिनु एको कली क्रोडक्नीम। मिनु गो यहूदा डा सहर कली मुर मबाक्शो सेल्लुड” देंत। येरमीया ३७:८

## 35

### येरमीया नु रेकाबी

1 यहूदा डा पिप योसीयाह आ तौ येहो-याकीमम सासन पवा ना परमप्रभु यावेम येरमीया कली लोत्र पाप्तु। २राजा २३:३४

2 मार, लोत्र पाप्तु देशा हना “गे रेकाबी आन खिं लशा, मेकोपुकी नु लोत्र पावो। मेको आन कली परमप्रभु यावे आ खिं डा कोठा कामी ओंइदीमी। मिनु मेको आन कली अडगुर शांबु खेत्तीमी” देंत। १इतिहास २:५५

3 मोपतीके गो हाबासीन्याह आ तौ येरमीया, आ तौ याजन्याह नु मेको आ लोक्बपुकी, मेको आ तौ नेल्ल नु रेकाबी आन खिं डा मुर नेल्ल आन कली लाइक्तामी।

4 मिनु गो मेको आन कली परमप्रभु यावे आ खिंम परमप्रभु आ मुर हानान आ तौ आन कोठाम चाक्तामी। हानान परमप्रभु आ मुर यिगदाल्याह आ तौ बाक्त। मेको कोठा चहिं ठेयब मुर आन कोठा आ नेक्था बाक्त। मेको शाल्लुम आ तौ लाप्चो खाल पाइब, मासेयाह आ कोठा आ तार बाक्त।

5 मेको नोले गो अडगुर शांबु आ गर नु बोटकोपुकी रेकाबी आन डोंइती वोइक्ता। मिनु मेको आन कली “अडगुर शांबु तूडीन” दे माइक्तामी।

6 तन्न मेकोपुकीमी “गो अडगुर शांबु मतूनीकी। मारदे हना रेकाब आ तौ आंइ किकी योनादाबम आंइ कली ‘गेपुकी नु इन आलपुकीम गेनायो अडगुर शांबु मतूडीन। २राजा १०:१५

7 मेको प्रोंइशा यो गेपुकीम गेनायो खिं मसेलीन। वांचेर मशोक्कीन। अडगुर मखुमीन। गेपुकीम मोदेशो गेय गेनायो मपने। तन्न इन बाक्शो रागीम शुश सम्म ब्रोंइमल, दे गेना हना यो ताम्बुपुकीम बाक्शा हिरशा गाक्कीन’ दे शेंशो बाक्त।

8 मिनु गो आंइ किकी रेकाब आ तौ योनादाब आ शेंशो नेल्ल पाइतक। गोपुकी आंमा नु आंइ मीशपुकी नु आंइ तमी तौ नेल्लेम गेनायो अडगुर शांबु मतूक।

9 गो बाक्चा कली खिं यो मसेलीनीकी। अडगुर रू, अरू रू नु वांचेर गोपुकी नु मबाक्ब।

10 गो ताम्बुम बाक्शा, आंइ किकी योनादाबम शेंशो नेल्ल पाइतक।

11 तन्न बेबीलोन डा पिप नेबुकदरेसरमी एको रागी कली लडाइ तोप्तु। मिनु गोपुकीम ‘कल्दी नु अरामी आन लडाइ पाइबपुकी रे प्रोक्चा कली यरूसलेम लय’ देंतक। मोपतीके गो यरूसलेममी बाक्शो बाक्नीकी” देंतेक्म।

12 मिनु नोले परमप्रभु यावेम येरमीया कली लोत्र पाप्तु।

13 मुर नेल्ल आन परमप्रभु यावे, इस्राएली आन परमप्रभुमी मार लोत्र पाप्तु देशा हना “गे यहूदा डा मुर नु यरूसलेममी बाक्ब आन कली लशा ‘मार, गे आं देशो मपाइनीनी? मिनु आं लोत्र मटीनीनी?’ देंत” दे माइक्मी।

14 परमप्रभु यावेमी “मार, रेकाब आ तौ योनादाबम आ चच युइ आन कली ‘गेपुकीम अडगुर शांबु मतूडीन’ दे शेंशो लोत्र मेकोपुकी टीनीमी। मोपतीके मेकोपुकीमी मुल सम्म अडगुर शांबु मतूनीम। मारदे

हना मेकोपुकीमी आन किकी पिपीम शेंशो टिशो बाक्नीम। तन्न गो इन कली लोव्र पना पन बाक्ती। मो हना यो गेपुकीम आं लोव्र मटिनी। येरमीया २५:४

15 गो इन कली आं गेय नु आं लोव्र पाइब आन कली सोइवना सोइवन बाक्ती। मेकोपुकीमी इन कली 'गे नेल्ल इन मरिम्शो लां रे लेतीन। मिनु इन मरिम्शो गेय रिम्शो सेलीन। मिनु देवी देवता आन कली पूजा पचा नु आन नोले खोइक्चा प्रोनीन। मिनु गे इन किकी पिपी आन कली गेशो रागीम बाक्चा ताइनीनी' देंती। तन्न गेपुकीम आं देंशो लोव्र मनेंनी नु मटिनी। मत्ती २३:३७

16 रेकाब आ तौ योनादाब आ चच युइमी आन किकी पिपीमी अरेशो टीनीम। तन्न एको मुरपुकीम आं देंशो मटिशो बाक्नीम" देंत।

17 मोपतीके मुर नेल्ल आन परमप्रभु यावे, इस्राएली आन परमप्रभुमी "नेनीन, गो यहूदा नु यरूसलेमम बाक्ब मुर आन कली आं देंशो ठेयब श्येत नेल्ल चाक्नुड। मारदे हना गो मेको आन कली लोव्र पाता, तन्न मेकोपुकीमी मननेम। गो मेको आन कली ब्रेत्ताक्डमी, तन्न मेकोपुकीमी लोव्र मलेत्तीमी" देंत। येरमीया ७:१३-१५

18 मिनु येरमीयामी रेकाबी आन चच युइ आन कली "मुर नेल्ल आन परमप्रभु यावे, इस्राएली आन परमप्रभुमी गेपुकीम इन किकी योनादाब आ देंशो टिना टिन नु मेको आ शेंशो नेल्ल नु इन कली अरेशो नेल्ल पाइतीनी।

19 मोपतीके रेकाब आ तौ योनादाब आ चच युइ का गेना हना यो आं डोंइती बाक्चा ताइब" दे मुर नेल्ल आन परमप्रभु यावे, इस्राएली आन परमप्रभुम देंत।

## 36

येहो-याकीमम तोल्लशो कागज चोशो

1 यहूदा डा पिप योसीयाह आ तौ येहो-याकीममी सासन पवा आ ४ बर्सम परमप्रभु यावेम येरमीया कली लोव्र पाप्तु। येरमीया २५:१

2 मार लोव्र पाप्तु देशा हना "गो योसीयाहम सासन पवा रे मुल सम्म इ कली इस्राएल, यहूदा नु रागी नेल्ल डा मुर आन पबर्म देशो लोव्र नेल्ल कागजम ब्रेक्तो। येरमीया २५:३

3 मो दुम्मेनु, गो मेको आन कली गेचशो ठेयब श्येत दुम्तीके आ पबर्म यहूदा डा मुरपुकीम तुइश्शा, आन मरिम्शो पतीके रे लेत्नीमी कों? मिनु गो मेको आन मरिम्शो पशो नु आन पाप पशो क्याम्शा गेनुडमी" देंत। येरमीया २६:३

4 मिनु येरमीयामी नेरीयाह आ तौ बारुक कली ब्रेप्पाइक्तु। मिनु बारुकम येरमीयामी ब्रेक्पाइश्शो परमप्रभु यावेम देंशो लोव्र नेल्ल कागजम ब्रेक्ताक्व। येरमीया ३२:१२; येरमीया ४५:१

5 मिनु येरमीयामी बारुक कली "गो परमप्रभु यावे आ खिं लने मचाप्नुड।

6 मोपतीके गे तेकोइ माइजा बाक्तीक नाक्त परमप्रभु यावे आ खिं लशा, आं इ कली ब्रेक्पाइश्शो कागजम बाक्शो लोव्र मुरपुकीम नेंचा डा पा पढेशा नेंपाइक्मी। यहूदा डा सहर रे जाक्शो मुर नेल्लेम नेंचा डा पा पढेशा नेंपाइक्मी।

7 मो दुम्मेनु मेकोपुकीमी आन पुंइशो लोव्र परमप्रभु यावे आ नेक्था चाक्नीमी, कों? मिनु मेको नेल्लेम आन मरिम्शो लां प्रॉइनीमी, कों? मारदे हना परमप्रभु यावेम आ मुर आन पबर्म गाइश्शा चुरशा देंशो लोव्र ठेयब बाक्ब" देंत।

8 मिनु नेरीयाह आ तौ बारुकम परमप्रभु यावे आ लोव्र पाइब येरमीया आ देंशो नेल्ल पाप्तु। मेकोमी मेको परमप्रभु यावे आ लोव्र ब्रेक्शो कागज परमप्रभु यावे आ खिंम पढेशा नेंपाइक्तीमी।

9 यहूदा डा पिप योसीयाह आ तौ येहो-याकीम आ सासन पशो ५ बर्स ९ महिनाम यरूसलेममी बाक्शो मुर नेल्ल नु यहूदा डा सहर रे जाक्शो मुर आन कली यरूसलेमम परमप्रभु यावे आ डोंइती नेल्ल आन कली नेंपाइश्शा माइजा बाक्तीक लोव्र पाम्तेक्म।

10 मिनू बारुकमी येरमीया आ ब्रेक्पाइश्शो लोव्र परमप्रभु यावे आ खिंम मुर नेल्लेमी नेंचा डा पा पढेप्टु। मेकोमी मेको लोव्र ब्रेक्ब शाफान आ तौ गेमारायाह आ बाक्तीके परमप्रभु यावे आ खिंम डा नक लाप्चो आ नेक्था डा कोठाम बाक्शा, पढेप्टु। २राजा २२:३

11 मिनू गेमारायाह आ तौ शाफान आ चच मीकायामी मेको कागजम ब्रेक्शो परमप्रभु यावे आ लोव्र नेल्ल नेंतु।

12 मिनू मेको तोइश्शा, पिप आ खिंम ब्रेक्ब आ बाक्तीके ओव्रदीतत। मेकेर ठेयब मुर नेल्ल बाक्तेक्म। मेकेर सु सु बाक्तेक्म देशा हना, ब्रेक्ब एली-शामा, शेमायाह आ तौ देलायाह, आकबोर आ तौ एलनाथान, शाफान आ तौ गेमारायाह नु हनान्याह आ तौ सिदकीयाह बाक्तेक्म। येरमीया २६:२२

13 मिनू मीकायामी बारुकम मुर नेल्लेम नेंचा डा पा पढेशो लोव्र नेल्ल नेंतु। मिनू मेको लोव्र नेल्ल मेको आन कली शेंताक्मी।

14 मिनू ठेयब मुर नेल्ल गारशा, नेथन्याह आ तौ शेलेम्याह आ चच कूशी आ युड येहूदी कली “लशा, नेरीयाह आ तौ बारुक कली मुर आन कली पढेशा नेंपाइश्शो कागज कुरशा एक जाक्को मतो” दे सोइक्ताक्मे। मोपतीके गोदाल्याह आ तौ बारुक मेको कुरशा, आन बाक्तीके जाक्त। २राजा २२:११

15 मिनू मेकोपुकीमी मेको कली “निश्शा, मेको आंइ कली पढेशा नेंपाइक्की” देंतेक्म। मोपतीके बारुकम मेको आन कली, मेको पढेशा नेंपाइक्तीमी।

16 मिनू मेकोपुकीमी मेको पढेशो नेल्ल नेंशा हिंशा आन कुल कोव्रमुम्तेक्म। मिनू मेकोपुकीमी बारुक कली “गोपुकीम एको लोव्र नेल्ल पिप कली नेंपाइक्चा माल्नीकी” देंतेक्म।

17 मिनू मेकोपुकीमी बारुक कली “गे एको लोव्र नेल्ल दोपा ब्रेक्ती? आंइ कली शेंदीकी। येरमीयामी इ कली ब्रेक्पदा?” दे हिल्लो पाम्तेक्म।

18 मिनू बारुकम “मेकोमी आं कली एको लोव्र नेल्ल ब्रेक्पाइक्ती। मिनू गो एको कागज मसीम ब्रेक्ताक्ड” दे माइक्तीमी।

19 मिनू मेको ठेयब मुरपुकीम बारुक कली “गे नु येरमीया निम्फा लशा, खुंइसीस। गे निक्शी ते बाक्सी, दे सुडम मतुइक्तेक्म” दे माइक्तेक्म। येरमीया २५:८-११; येरमीया ७:२०; येरमीया ९:९-१०

20 मिनू मेकोपुकीमी मेको कागज ब्रेक्ब एली-शामा आ कोठाम वोइश्शा, पिप आ बाक्तीक लशा, पिप कली मेको लोव्र नेल्ल शेंताक्मे।

21 मिनू पिपमी मेको कली “कागज चाक्को” दे येहूदी कली सोइक्ताक्व। मिनू मेकोमी ब्रेक्ब एली-शामा आ कोठा रे ग्रुंइशा चाक्तु। मिनू येहूदीम पिप नु पिप आ नेक्था बाक्ब ठेयब मुर आन कली मेको पढेशा नेंपाइक्तु।

22 मेना मेको बर्स डा ९ महिना बाक्तीके, पिप हिंउदम बाक्तीके, खिंम बाक्शो बाक्त। मेको आ डोंइती मी ब्रशो बाक्त।

23 मिनू येहूदीम सां नु ४ हरप पढेने थुमानु, पिपम कागज खोइक्तीकेम खोइश्शा, मीम हुम्ताक्व। मेको तोल्लो कागज नेल्ल मनुम्म सम्म पिपम मो पना पन बाक्त।

24 पिप नु मेको आ गेय पाइबपुकी मेको लोव्र नेंशा महिमं। मेकोपुकीमी आन वा यो मखाक्गेम।

25 एलनाथान, देलायाह नु गेमारायाहम पिप कली “मेको कागज मचोने” दे पुन्मेनु यो, पिपमी मेको आन लोव्र मनेन।

26 मेको आ पा डा पिपमी आ तौ येराहमेल, अज़ीएल आ तौ सेरायाह नु अब्देल आ तौ शेलेम्याह आन कली मेको ब्रेक्ब बारुक नु परमप्रभु यावे आ लोव्र पाइब येरमीया कली फ्रेंशा चाक्चा नस, दे हुकुम गेम्तीमी। तन्न परमप्रभु यावेम मेको आस कली खुइक्ने थुम्शो बाक्त।

27 मिनू येरमीयामी ब्रेक्पाइश्शो बारुकम ब्रेक्शो मेको तोल्लो कागज पिपम चोने थुमा नोले, परमप्रभु यावेमी येरमीया कली

28 “अर्को कागज काम यहूदा डा पिप येहो-याकीममी चोशो डोंइती डा कागजम बाक्शो लोव्र नेल्ल लेंशा ब्रेक्तो” देत।

29 मिनु गे यहूदा डा पिप येहो-याकीम आ पर्वम परमप्रभु यावेम “गे मेको तोल्शो कागज चोप्टीवी। मिनु गे बारुक कली गे मारदे बेबीलोन डा पिप थमा पा जाक्शा, एको रागी श्येत्थ पोक्ब। मिनु मेकोमी मुर नु बस्तु भाव नेल्ल आन कली साइक्ब, दे कागजम ब्रेक्ती?” दैते।

30 मोपतीके परमप्रभु यावेमी यहूदा डा पिप येहो-याकीम आ पर्वम “मुल रे दाऊद आ नित्तीकेम मेको आ चच युड तेकोइ मनिन्लीम। मेको पिप आ बेक्शो रां नाक्त नांम नु नाक्दो फुरशेम जिप्पाइक्चा डा पा तांडसीब। येरमीया २२:३०; येरमीया २२:१९

31 गो मेको कली, मेको आ आल आन कली नु आ गेय पाइब आन कली आन मरिम्शो पशो आ पर्वम सजाइ गेनुडमी। गो मेको आन कली, यरूसलेममी बाक्ब आन कली नु यहूदामी बाक्ब नेल्ल आन कली आं दैशो ठेयब श्येत नेल्ल गेनुड। मारदे हना मेकोपुकीमी आं दैशो लोत्र मनेनेम” दैत।

32 मिनु येरमीयामी अर्को कागज का चाक्शा नेरीयाह आ तौ ब्रेक्ब बारुक कली गेप्टु। मिनु मेकोमी येरमीयाम दैशो खोदैशो पा यहूदा डा पिप येहो-याकीममी मीम चोशो कागज डा लोत्र नेल्ल मेको कागजम ब्रेक्ताक्व। मिनु येरमीयामी अरु शुश लोत्र यो मेकेर तेम्ताक्व।

## 37

### येरमीया कली चोक्शो

1 बेबीलोन डा पिप नेबुकदरेसरमी योसीयाह आ तौ सिदकीयाह कली यहूदा डा पिप सेल्शो बाक्त। मिनु येहो-याकीम आ तौ कोन्याह आ पा डा मेकोमी सासन पचा गोप्टु। येहो-याकीम आ अर्को नें कोन्याह बाक्ब। २राजा २४:१७

2 मिनु मेको, मेको आ गेय पाइबपुकी नु मेको रागी डा मुर नेल्लेम परमप्रभु यावे आ लोत्र पाइब येरमीया आ दैशो परमप्रभु यावे आ लोत्र मनेनेम।

3 मो हना यो पिप सिदकीयाहम शेलेम्याह आ तौ येहुकल नु मासेयाह आ तौ चढेब सेफन्याह आस कली परमप्रभु यावे आ लोत्र पाइब येरमीया आ बाक्तीकेम “आंइ पर्वम इं परमप्रभु यावे नु पुंइशा गेने” दैथ, मुर सोइक्ताक्व। येरमीया ७:१६; येरमीया ४२:२

4 मेना सम्म येरमीया मुर आन दातेमी एर ओंथ गाक्ना गाक्न बाक्त। मारदे हना मेना सम्म मचोक्सीशो बाक्त।

5 मेना फाराओ आ लडाइ पाइबपुकी इजीप्त रे जाक्शो बाक्तेक्म। मिनु कल्दी डा मुरपुकीमी यरूसलेम कली एर ओंथ नेल्ल रे पुम्शो लोत्र नैतेक्म। मिनु मेकोपुकी यरूसलेम रे नोले शोइसाक्म।

6 मिनु परमप्रभु यावेम येरमीया कली लोत्र पाप्टु।

7 मार लोत्र पाप्टु दैशा हना “परमप्रभु यावे, इस्त्राएली आन परमप्रभुमी ‘यहूदा डा पिपम आं कली हिल्लो पथ इ बाक्तीक सोइक्ताक्व। मेको कली इ कली वारच पाइक्थ जाक्ब फाराओ आ लडाइ पाइब आन रागी इजीप्त लेशशा लाइनीम, दे मतो।

8 मिनु कल्दी लेशशा जाक्नीम। मिनु एको सहर कली लडाइ तोइनीम। मिनु मेकोपुकीमी एको सहर ग्राशा, मीम क्रोइक्नीम’ दैशो बाक्ब, दैत, मतो” दैत। येरमीया ३४:२२

9 परमप्रभु यावेमी “गेपुकीमी कल्दीम थमा पा आंइ कली लडाइ तोइनीम, दे मिम्तीन। मारदे हना मो पाइनीम।

10 गेपुकी नु लडाइ पाइब कल्दी नेल्ल आन कली गे ग्रातीनी हना, मेको आन गार दुम्शोपुकी ला आन ताम्बुम लीतेक्म हना यो, मेकोपुकी जाक्शा एको सहर कली मी सुइक्नीम” दैत।

11 फाराओ आ लडाइ पाइबपुकीम पतीके कल्दी यरूसलेम रे नोले शोइसीची ना

12 येरमीया आं रू डा भाग ताक्चा कली यरूसलेम रे गूशा बेन्यामीन आ रागी गे लचा गोप्टु। येरमीया ३२:८-९

13 मिनु मेको बेन्यामीन लाप्चोमी जाक्दीम्मेनु, हनान्याह आ चच शेलेम्याह आ तौ खाल पाइब आन ठेयब मुर इरीयाहम येरमीया कली ग्याइश्शा “गे प्रोक्शा कल्दी आन बाक्तीकेम लशो बाक्नेवे” दैत।

14 मिनू येरमीयामी “एको लोव्र थमा ममाइ। गो कल्दी आन बाक्तीके प्रोक्शा लशो मनड” दैत। तन्न इरीयाहम मेको आ लोव्र मनेन। मिनू मेकोमी येरमीया कली ग्याइश्शा ठेयब मुर आन बाक्तीके चाक्तु।

15 मिनू मेकोपुकी येरमीया तशा गाइक्ताक्व। मिनू मेको कली तुप्शा, ब्रेक्ब योनाथन आ खिम चोक्शा वोइक्तेक्म। मारदे हना मेको खिम जेल्खान सेल्शो बाक्तेक्म। येरमीया २०:२

16 मेकोपुकीमी येरमीया कली जेल्खानम चोक्तेक्म। मिनू येरमीया थम छिडछिडम शुश नाक्त सम्म बाक्त।

17 मिनू पिप सिदकीयाहम मेको कली गुंडथ सोइक्ताक्व। मिनू मेको कली दरवारम चाक्शा सुइम मतुइक्चा डा पा “मार, परमप्रभु यावे रे पा मारेइ लोव्र बाक्मे?” दे हिल्लो पाप्तु। मिनू येरमीयामी “ओ, बाक्ब। गे बेबीलोन डा पिप आ गुइम गेचा पुंडसीनीनी, देशो बाक्ब” दैत।

18 मिनू येरमीयामी पिप सिदकीयाह कली “गो इन कली, इन गेय पाइब ठेयब मुर आन कली नु एको मुर आन कली मार पडा डा? गे मारदे आं कली जेल्खानम चोक्यीनी?

19 इन कली नु एको रागी कली लडाइ तोचा कली बेबीलोन डा पिप मजाक्ब, दे इन कली दैब, परमप्रभु यावे आ लोव्र पाइबपुकी ते बाक्मा?

20 तन्न मुल आं प्रभु, पिप गो इन कली पुंडनुड। आं पुंडशो लोव्र नेनीन। आं दैचा माल्शो लोव्र इन डोंइती दैचा तडल। गो आं कली ब्रेक्ब योनाथन आ खिम मसोइक्तीनी। मो दुम्त हना, गो मेकेर बेक्नुड” दैत।

21 मिनू पिप सिदकीयाह आ हुकुममी येरमीया पिप आ दरवार खाल पाइब मुर आ जेल्खानम वोइक्चा पुंडसाक्व। मिनू सहर डा शोब्ले चोतीक रे मनुम्म सम्म, नाक्त किंत किंत मेको कली शोब्ले चाक्शा गेम्तेक्म। मोपा येरमीया पिप आ दरवार खाल पाइब आ जेल्खान डा लाडगाम बाक्त। येरमीया ३२:२

## 38

### येरमीया कली इनारमी तोक्शो

1 मिनू मत्तान आ तौ शेफत्याह, पशहुर आ तौ गेदाल्याह, शेलेम्याह आ तौ युक्ल नु माल्कीयाह आ तौ पशहुरमी येरमीयामी मुर नेल्ल आन कली दैशो लोव्र नैतेक्म। मेको आ लोव्र मार बाक्त दैशा हना, येरमीया २१:१

2 परमप्रभु यावेम “सु सु एको सहरमी बाक्नीमी, मेकोपुकी तरवार, अन्काल नु मुर बेक्तीक रोइम बेक्नीम। तन्न सु सु गुइ पोक्शा, कल्दी आन बाक्तीके जाक्दीत्नीमी, मेकोपुकी चहिं ब्रॉइनीम। मेको आन गिम प्रोइशा लडाइ रे ब्रॉइनीम” देशो बाक्त। येरमीया २१:९

3 मिनू परमप्रभु यावेमी “एको सहर थमा पा बेबीलोन डा पिप आ लडाइ पाइब आन गुइम दुम्ब। मिनू मेकोपुकीमी एको सहर आन के सेल्नीम” दैत, दे येरमीयाम देशो बाक्त।

4 मिनू ठेयब मुरपुकीम पिप कली “एको मुर कली साइक्चा माल्ब। मारदे हना एकोमी ओदेशो लोव्र पा, एको सहरमी लीशो लडाइ पाइब नु मुर नेल्ल आन थुं लुक्च लपाइश्शो बाक्ब। एको मुरुम मुर आन कली रिम्शो ममाइ मरिम्शो पचा दाक्ब” दैतेक्म।

5 मिनू पिप सिदकीयाहम “मेको इन गुइमीन बाक्ब। गो इन कली मारेइ पने मचाप्नुड” दे माइक्तीमी।

6 मोपतीके मेकोपुकीमी येरमीया कली लाइश्शा, पिप आ तौ माल्कीयाह आ इनारम तोक्तेक्म। मेको इनार पिप आ दरवार खाल पाइब आ लाडगाम बाक्त। मिनू मेकेर डोरीम फ्रेंशा इनारम तोक्तेक्म। मेको इनारमी ब्वाक्कु मबाक्माक्त। हिलो ला बाक्माक्त। मिनू येरमीया मेको हिलोम गुम्त।

7 मेकेर पिप आ खिम गेय पाइब एबेद-मेलेक नें पाइश्शो मुर का बाक्त। मेको एथीयोपीया डा बाक्त। मेकोमी येरमीया कली इनारम तोक्शो नैतु। मेना पिप बेन्यामीन लाप्चोमी बाक्शो बाक्त। येरमीया ३९:१५-१८

8 मिनू एबेद-मेलेक पिप आ खिम रे लशा पिप कली

9 “आं प्रभु, आं पिप, एको मुरपुकीम परमप्रभु यावे आ लोत्र पाइब येरमीया कली इनारम तोक्शा मरिम्शो पात्तेक्म। सहरम शोब्ले नुम नोले मेको मेकेर शोत्रलुम बेक्ब” दंत।

10 मिनु पिपम कूशी, एथीयोपीया डा एबेद-मेलेक कली “एक रे मुर सां आन कली लाइशशा, मेको परमप्रभु यावे आ लोत्र पाइब येरमीया कली बेक्चा क्येडा डोंइती इनार रे गुंडदीन” दे अरेप्टु। का निकशी मुरुमी ३० जना मुर ब्रेशो बाक्ब।

11 मोपतीके एबेद-मेलेकम मेको मुर आन कली लाइव्तु। मिनु पिप आ खिं डा मार मार वोइक्तीक आगा डा कोठाम लत। मिनु मेकेर रे माइत जेक्शो वासी गुंडताक्व। मिनु मेकोमी येरमीया कली मेको वासी डोरीम फ्रेशा तोक्तु।

12 मिनु एथीयोपीया डा एबेद-मेलेकमी येरमीया कली “इ बला आगा नु डोरी आन दातेमी एको माइत जेक्शो वासी वोतो” दंत। मिनु येरमीयामी मो पाप्टु।

13 मिनु मेकोपुकीमी डोरीम येरमीया कली इनार रे गुंडताक्मे। मेको नोले येरमीया पिप आ दरवार खाल पाइब मुर आ जेल्खान डा लाडगाम बाक्त।

### सिदकीयाहम लेंशा हिल्लो पशो

14 मिनु पिप सिदकीयाहम परमप्रभु यावे आ लोत्र पाइब येरमीया कली ब्रेथ सोइक्ताक्व। मिनु परमप्रभु यावे आ खिं डा निकशी लाप्यो नोले डा ठेयब लाप्यो आ डोंइती चाक्पाइक्तीमी। मिनु पिपम येरमीया कली “गो इ कली लोत्र का निकशी हिल्लो पाइनुड। आं डोंइती गे मारेइ लोत्र मखुइक्तो” दे माइक्तु।

15 मिनु येरमीयामी सिदकीयाह कली “गो इन कली लोत्र पाता हना, गे आं कली साइक्नीनी। गो इन कली अर्ती गेतन्नी हना, गे मेको मनंनीनी” दंत।

16 मिनु पिप सिदकीयाहम सुइ आन मतुइक्चा डा पा, येरमीया नु कसम जशा “परमप्रभु यावे ब्रोंइशा बाक्शो खोदेशो पा, गो इ कली सोक्त गेप्टु। गो मेको आ नेमी कसम जशा देनुड। गो इ कली मसाइक्नुड। गो इ कली साइक्चा माल्ब मुर आन गुइम मगेनन” दंत। येरमीया ३८:४-५

17 मिनु येरमीयामी सिदकीयाह कली “मुर नेल्ल आन परमप्रभु यावे, इस्राएली आन परमप्रभुमी ‘गे बेबीलोन डा पिप आ ठेयब मुर आन कली आंमान जिम्मा गेसाक्नी हना, इन सोक्त ब्रोंइब। मिनु एको सहर क्रोइक्चा मपुंडसीब। मिनु इन खिं डा मुरपुकी यो ब्रोंइनीमी।

18 तन्न गे आंमान बेबीलोन डा पिप आ ठेयब मुर आन गुइम जिम्मा मगेसाक्नी हना, एको सहर कल्दी आन गुइम गेंसीब। मिनु मेकोपुकीमी एको कली क्रोइक्नीम। मिनु गे मेको आन गुइ रे मब्रोंइनीनी’ देशो बाक्ब” दंत।

19 मिनु पिप सिदकीयाहम येरमीया कली “कल्दी आन बाक्तीकेम प्रोक्शा लशो यहूदीपुकी तशा, गो हिंशो बाक्नुड। मारदे हना कल्दीपुकीम आं कली मेको आन गुइम जिम्मा गेतीमी हना, मेकोपुकीमी आं कली मरिम्शो पाइक्नीम” दंत।

20 मिनु येरमीयामी “मेकोपुकीमी इन कली मेको आन गुइम जिम्मा मगेनीम। गो इन कली देशो परमप्रभु यावे आ लोत्र तिने। मिनु इन कली रिम्शो दुम्ब। इन सोक्ती यो ब्रोंइब।

21 तन्न गे मेको आन गुइम जिम्मा गेंसीने मबिस्साक्नी हना, परमप्रभु यावेम आं कली कोंइशो एकोन बाक्ब।

22 यहूदा डा पिप आ दरवारम प्रोंइसीशो मीश मुर नेल्ल बेबीलोन डा पिप आ ठेयब मुर आन बाक्तीके लाइक्नीम। मिनु मेको मीश मुरपुकीम इन कली ‘इन थमा सुइशो इन वारचपुकीम इन कली जोल पात्तेक्म। मुल इन खोइली हिलोम गुम्शो बाक्ब। इन वारचपुकीम इन कली प्रोंइशो बाक्नीम’ देनीम।

23 इन मीशपुकी नु इन आल नेल्ल कल्दी आन बाक्तीके चाक्दीत्नीम। गे आंमा यो कल्दी आन गुइ रे ब्रोंइचा मताइनीनी। बेबीलोन डा पिपम इन कली ग्याइक्ब। मिनु एको सहर चहिं क्रोइक्नीम, देशो बाक्ब” दंत। येरमीया ३२:४; येरमीया ३४:३

24 म्नु सलदकीयाहम येरमीया कली “एको लोवसी पशो सुडम मतुडक्तमेकल। मो मदुम्त हना, गे साडक्चा पुंडसीनेवे।

25 गो गे नु लोवत्र पशो ठेयब मुरपुकीम तुडक्ताकम हना, म्नु इ बाक्तीक जाक्शा ‘पलप कली मार, देंनी? म्नु पलपम मार, देंने? आंड रे मारेड लोवत्र मखुडक्तीन। मो पाडतीनी हना गो इन कली साडक्कीकी, दे इ कली हल्लो पाम्तेकम हना,

26 गेमी मेको आन कली “गो आं कली साडक्चा कली योनाथन आ खलंम मसोडक्तीनी” दे गो पलप नु लोवत्र का ला पाता’ देंनो” दे माडक्तु।

27 म्नु ठेयब मुर नेल्ल येरमीया आ बाक्तीक जाक्शा, हल्लो पाम्तेकम। म्नु मेकोमी पलपम देशो खोदेशो पा, मेको आन कली माडक्तीमी। मोपतीके मेकोपुकीमी मेको कली अरु मारेड हल्लो मपामे। मारेदे हना पलप नु येरमीया आस दातेम पशो लोवत्र सुडम मतुडक्तेम।

28 म्नु यरूसलेम ग्रातीक नाक्त सम्म येरमीया पलप आ दरवार खाल पाडब मुर आ लाडगा डा जेल्खानम बाक्शो बाक्त। येरमीया ३७:२१

## 39

### यरूसलेम क्याम्चा पुंडसीशो

1 यहूदा डा पलप सलदकीयाहम सासन पवा आ ९ बर्स १० महलनाम बेबीलोन डा पलप नेबुकदरेसर नु मेको आ लडाइ पाडब नेल्ल जाक्शा, यरूसलेम कली लडाइ तोशा एर ओंथ नेल्ल रे पुम्ताकम। येरमीया ५२:४-१६; २राजा २५:१-१२

2 म्नु सलदकीयाहम सासन पशो ११ बर्स ४ महलना ९ नाक्ती मेको सहर डा गारो प्रेशशा ओवत्रतेकम।

3 म्नु यरूसलेम ग्राशा, बेबीलोन डा पलप आ ठेयब मुर नेल्ल जाक्शा दाते डा लाप्चोमी बाक्तेकम। नेरगल-शरेसेर, साम्गार-नेबो, सारसेकीम नेल्ल क्येडा ठेयब नलसाफ पाडब नेरगल-शरेसेर नु बेबीलोन डा पलप आ ठेयब गेय पाडब मुर नेल्ल जाक्शा बाक्तेकम।

4 म्नु यहूदा डा पलप सलदकीयाह नु आ लडाइ पाडब नेल्लेम मेको आन कली ताम्तेकम। म्नु मेकोपुकी गारो नलक्शी आस दातेम बाक्शो लाप्चो, पलप आ फल फुल रू रे पा नाक्दोन सहर रे प्रोक्शा, अराबाह गे लाम्तेकम।

5 तन्न कल्दी आन लडाइ पाडबपुकीम मेको आन कली खेदा पाम्तेकम। म्नु सलदकीयाह कली यरीको डा दलंम थलत्तेकम। म्नु मेकोपुकीमी मेको कली ग्याडशशा, हमाथ रागी डा रलब्ला देशो सहरमी बेबीलोन डा पलप नेबुकदरेसर आ बाक्तीके चाक्दीत्तेकम। म्नु मेकोमी सलदकीयाह कली सजाइ गेतीक देंत।

6 मेको रलब्लामी बेबीलोन डा पलपम सलदकीयाह आ तौ आन कली आ डोंडतीन साडक्तीमी। म्नु यहूदा डा ठेयब मुर आन कली यो साडक्तीमी।

7 मेकोमी सलदकीयाह आ मलक्ची फेत्ताकव। म्नु बेबीलोन लाडक्चा कली साडलोमी फ्रेंपाडक्तु।

8 कल्दीपुकीम पलप आ दरवार नु मुर आन खलंम मी सुडक्ताकमे। म्नु यरूसलेम डा गारो प्रेत्तेकम।

9 म्नु पलप कली कोवत्रब आन कप्तानम नेबुजरादानमी सहरमी प्रोंडचा पुंडसीशो लीशो मुरपुकी, मेको आन बाक्तीक प्रोक्शा जाक्ब नु अरु लीशो मुर आन कली फ्रेंशा बेबीलोन लाडक्तीमी।

10 तन्न पलप कली कोवत्रब आन कप्तान नेबुजरादानमी मारेड मपाडशशो पुडग आन कली यहूदा रागीमी प्रोंडशा वोडक्तीमी। म्नु मेको आन कली मेकोमी अडगुर रू नु अरु रूपुकी गेम्तीमी।

11 म्नु बेबीलोन डा पलप नेबुकदरेसरमी आ कली कोवत्रब आन कप्तान नेबुजरादान कली येरमीया आ पर्वम

12 “मेको कली लाडशशा, रलम्लो पा कोवत्रशा वोतीन। मेको कली मारेड मरलम्लो मपावो। मेकोमी इ कली देशो खोदेशो पा, गे मेको कली पावो” दे माडक्तु। येरमीया ४०:४

13 मोपतीके पलप कली कोवत्रब आन कप्तान नेबुजरादान, नेल्ल क्येडा ठेयब मुर नेबुशाज्बान, नलसाफ पाडब ठेयब मुर नेरगल-शरेसेर नु बेबीलोन डा पलप आ अरु ठेयब मुरपुकीम

14 मुर सोइश्शा, येरमीया कली जेल्खान डा लाडगा रे चाक्पाइक्तेक्म। मेको कली आ खिंम लाइक्तीक जिम्मा शाफान आ चच अहीकाम आ तौ गेदाल्याह कली गेम्तेक्म। मोपा येरमीया आ मुरपुकी नु बाक्त। येरमीया ३८:२८; येरमीया ४०:५-६, १४-१६

15 मिनु येरमीया जेल्खान डा लाडगाम बाक्मेनु, परमप्रभु यावेम येरमीया ३८:७

16 मार, लोत्र पशो बाक्त देश हना “लशा, कूशी एथीयोपीया डा मुर एबेद-मेलेक कली ‘मुर नेल्ल आन परमप्रभु यावे, इस्राएली आन परमप्रभुमी रिम्शो पा ममाइ, तन्न श्येत गेशा, एको सहर आ पर्वम गो मार पाइनुड देशो बाक्डा, मेको खाप्चा चिक्शो बाक्नुड। मेको इ डोंइतीन मेको नाक्ती दुम्ब।

17 तन्न गो इ कली मेको नाक्ती प्रॉइनन। मिनु गे तेको मुर आन क्येडा हिनेवे मेको आन गुडम मदुम्नेवे’ दैत मतो।

18 परमप्रभु यावेमी ‘गो इ कली थमा पा प्रॉइनन। गे तरवारम साइक्चा मपुंडसीनेवे। गे लडाइ रे इ गिंम प्रॉइशा प्रोक्नेवे। मारदे हना गे आं कली थमा सुइश्शो बाक्नेवे देशो बाक्ब’ दे मतो” दे परमप्रभु यावेमी दैत।

## 40

### येरमीया कली प्रॉइशो

1 मिनु पिप कली कोत्रब आन कप्तान नेबुजरादानमी, येरमीया कली साडलोमी फ्रेंशा यरूसलेम नु यहूदा डा फ्रेंशो मुरपुकी नु बेबीलोन लाइक्चा चिक्शो थिदा बाक्त। मिनु येरमीयामी रामाह प्रोना नोले परमप्रभु यावेमी मेको कली लोत्र पाप्तु। येरमीया ३९:११-१४

2 मिनु पिप कली कोत्रब आन कप्तानमी येरमीया कली थिश्शा, मेको कली “परमप्रभु यावे, इ परमप्रभुम एको रागीम ठेयब श्येत गेतीक आ पर्वम लोत्र पशो बाक्त।

3 मुल परमप्रभु यावेम एको रागी क्याम्ताक्व। मिनु मेकोमी आ देशो खोदेशो पाप्तु। मारदे हना गेपुकीम परमप्रभु यावे कली पाप पाइतीनी। मिनु मेको आ देशो मटिनी। मोपतीके इन कली ओदेशो दुम्त।

4 तन्न मुलाक्ती गो इ गुइ डा साडलो प्रुइक्ताक्न। गे गो नु बेबीलोन लचा दाक्नेवे हना, गाक्को। गो इ कली रिम्शो पा कोत्रनुड। तन्न गे गो नु बेबीलोन लल मदाक्ते हना, बाक्को। कोत्रडो, एको रागी नेल्ल इ डोंइती बाक्ब। गे ते लल दाक्नेवे, मेक लने चाप्नेवे” दे माइक्तु। येरमीया ३९:१२

5 मो हना यो येरमीया लचा चिक्तानु नेबुजरादानमी लेशशा कोत्रशा “शाफान आ तौ अहीकाम आ चच गेदाल्याह आ बाक्तीक लावो। मेको कली बेबीलोन डा पिपम यहूदा राज्य डा हुकुम पाइब सेल्शो बाक्ब। मेकेर मेको नु अरु मुरपुकी नु बाक्को। गे ते लत दाक्डे, मेक लावो” माइक्तु। मिनु मेको पिप कली कोत्रब कप्तानमी मेको कली जचा थोत्रक नु अरु कोसेलीपुकी गेप्तु। मिनु मेको कली प्रॉइतु। येरमीया ३९:१४

6 मोपतीके येरमीया अहीकाम आ तौ गेदाल्याह आ बाक्तीके मिस्पा सहर लत। मिनु मेको नु रागीम प्रॉइशा वोइश्शो मुरपुकी नु बाक्त।

### गेदाल्याह यहूदाम हुकुम पशो

7 मिनु लडाइ पाइब आन ठेयब मुर नेल्ल नु आन मुरपुकीमी “बेबीलोन डा पिपमी अहीकाम आ तौ गेदाल्याह कली मेको रागी डा हुकुम पाइब सेल्लु। मिनु मेको रागी डा नेल्ल आन क्येडा प्रुडग मीश मुर, आल नु प्रुडग मुर आन कली फ्रेंशा बेबीलोन मलाइश्शो मेको गेदाल्याह नु बाक्नीम” देशो नेतेक्म। २राजा २५:२२-२४

8 मिनु मेको नेल्ल मिस्पा सहरम गेदाल्याह आ बाक्तीकेम लाम्तेक्म। नेथन्याह आ तौ इश्माएल, कारेआह आ तौ योहानान नु योनाथन, तन्हुमेथ आ तौ सेरायाह, नेतोफाह आ मुर एफाइ आ तौपुकी, माकाथी आ तौ येजन्त्याह नु मेको आन मुर नेल्ल लाम्तेक्म। येरमीया ४१:१, ११



9 मिनू शाफान आ चच अहीकाम आ तौ गेदाल्याहम मेकोपुकी नु मेको आन मुर नु कसम जशा “कल्दी आन गेय पचा कली महिनीन। रागीम बाक्शा बेबीलोन डा पिप आ गेय पने। मिनू इन कली रिम्शो दुम्ब।

10 गो इं बाक्तीक जाक्ब कल्दी आन डोंइती इन ठेयब मुर दुम्शा लोत्र पचा कली मिस्पा सहरमी बाक्नुड। गेपुकीम चहिं अङ्गुर, बर्खाम सिप्ब फल फुल नु तेल इन ग्योंबुम वोतीन। मिनू इन योव्रशो सहरमी बाक्कीन” दे माइक्तीमी।

11 मिनू मोआब, अम्मोन, एदोम नु अर्को रागीपुकीम बाक्ब यहूदी नेल्लेम मेको लोत्र नैतेक्म। बेबीलोन डा पिपम का निकशी मुर आन कली यहूदामी प्रोंइशा वोइश्शो बाक्ब, दे नैतेक्म। मिनू शाफान आ चच अहीकाम आ तौ गेदाल्याह कली मेकेर डा हुकुम पाइब सेल्शा वोइश्शो बाक्ब, दे यो नैतेक्म।

12 मिनू नोले यहूदी नेल्ल ते ते ब्रशो बाक्मा, मेक मेक रे लेश्शा, यहूदा रागी मिस्पाम गेदाल्याह आ बाक्तीकेम जाक्तेक्म। मिनू मेकोपुकीम शुश फल फुल नु अङ्गुर नु पोंव्रशी खुप्ताक्मे।

13 मिनू कारेआह आ तौ योहानान नु गाउं गाउंम बाक्शो लडाइ पाइब मुर आन ठेयब मुर गेदाल्याह आ बाक्तीके मिस्पाम जाक्तेक्म।

14 मिनू मेको कली “अम्मोनी आन पिप बालीसमी नेथन्याह आ तौ इश्माएल कली इन कली साइक्चा कली सोइश्शो बाक्ब, दे तुइक्नीनी?” दैतेक्म। तन्न अहीकाम आ तौ गेदाल्याहम मेको आन लोत्र थमा मसुद।

15 मिनू कारेआह आ तौ योहानानम मिस्पाम गेदाल्याह कली “सुइम मतुइक्चा डा पा नेथन्याह आ तौ इश्माएल कली साइक्चा कली आं कली हुकुम गेयीनी। एको लोत्र सुइम मतुइक्नीम। इन एर ओंथ नेल्ल देल्शो यहूदी आन कली ब्रपाइक्चा कली नु यहूदामी लीशो आन कली साइक्चा कली मेकोमी मारदे इन कली साइक्चा मला?” दैत।

16 तन्न अहीकाम आ तौ गेदाल्याहम कारेआह आ तौ योहानान कली “गे मोदेशो गेय मपावो। मारदे हना इश्माएल आ पबंम इ पशो लोत्र थमा ममाइ” दे माइक्तु।

## 41

गेदाल्याह कली साइश्शो

२राजा २५:२५

1 मिनू मेको ७ महिनाम पिप आ खिं डा मुर एली-शामा आ चच नेथन्याह आ तौ इश्माएल नु पिप आ नेल्ल क्येडा ठेयब गेय पाइब अरु १० जना मुर मिस्पा सहरम अहीकाम आ तौ गेदाल्याह आ बाक्तीके जाक्तेक्म। मेको नेल्ल मेकेर काथा शोब्ले जन जनु बाक्तेक्म। येरमीया ४०:८

2 मेना नेथन्याह आ तौ इश्माएल नु मेको १० जना मुर बोक्शा, बेबीलोन डा पिपम हुकुम पाइब सेल्शा वोइश्शो शाफान आ चच अहीकाम आ तौ गेदाल्याह कली तरवारम क्योरशा साइक्तेक्म। येरमीया ४०:५

3 मिनू इश्माएलमी मिस्पाम गेदाल्याह नु बाक्शो यहूदी नेल्ल नु मेकेर बाक्शो लडाइ पाइब कल्दी आन कली यो साइक्तीमी।

4 मिनू मुरपुकीमी गेदाल्याह साइश्शो लोत्र तुइक्चा क्येडा डोंइती आ दीसा सुनी,

5 शेकेम, शिलो नु सामरीया रे आन गाल शोक्रे प्रेक्शो, आन वा खाक्शो नु आन रां चेशो ८० जना मुरपुकी परमप्रभु यावे आ खिम अन्न चढ़ेचा कली नु धूप चोचा कली जाक्तेक्म। येरमीया १६:६

6 नेथन्याह आ तौ इश्माएल मिस्पा रे डाक्ना डाक्न, मेको आन कली ग्रुथ जाक्त। मिनू मेको आन कली ग्रुथा मेकोमी “अहीकाम आ तौ गेदाल्याह आ बाक्तीक जाक्कीन” दैत।

7 मिनू मेकोपुकी सहर आ आगा ओव्रतेक्म। मिनू नेथन्याह आ तौ इश्माएल नु मेको आ मुरपुकीम मेको आन कली साइक्तेक्म। मिनू मेको आन बेक्शो रां इनार काम ताइक्ताक्म।

8 तन्न मेको आन दाते डा १० जना मुरपुकीम इश्माएल कली “आंइ कली मसाइक्की। गोपुकी नु रू कामी खुइश्शा, वोइश्शो चेरब क्योव्रजी तेल नु खुदो बाक्नीम” दैतेक्म। मोपतीके मेकोमी मेको आन कली प्रोंइतीमी। मेको आन कली अरु नु मसद।

9 मेको इनारम इश्माएलमी मुर आन कली साइश्शा ताइश्शो बाक्त। मेको इनार पिप आसाम इस्राएल डा पिप बाशा क्येडा हिंशा ब्रोंडचा कली दोशो बाक्त। नेथन्याह आ तौ इश्माएलमी मेको इनार आ साइश्शो मुरपुकीम प्रिंताक्व। १राजा १५:१६-२४

10 मेको नोले इश्माएलमी, मिस्पाम बाक्शो लीशो मुर नेल्ल, पिप आ तमीपुकी नु अरु मुर नेल्ल आन कली ग्याइक्ताक्मी। मेको आन कली पिप कली कोल्लब आन कप्तान नेबुजरादानमी अहीकाम आ तौ गेदाल्याह आ गुडम गेशो बाक्त। मिनु नेथन्याह आ तौ इश्माएलम मेको नेल्ल आन कली ग्याइश्शा खोला आइक्ची हांबु अम्मोनी आन रागीम लाइक्चा कली गाक्त।

11 मिनु कारेआह आ तौ योहानान नु मेको नु बाक्शो लडाइ पाइब आन ठेयब मुर नेल्लेम नेथन्याह आ तौ इश्माएलमी मरिम्शो पशो नेल्ल नेतेक्म। येरमीया ४०:८, १३-१६

12 मिनु मेको नेल्लेम आन मुर नेल्ल आन कली लाइश्शा नेथन्याह आ तौ इश्माएल नु लडाइ पथ गाक्तेक्म। मिनु मेकोपुकीमी मेको कली गिबोन डा ठेयब दोम्ली आ नेक्था थित्तेक्म। २सामुएल २:१३

13 मिनु इश्माएलम ग्याइश्शा लाइश्शो मेको नु बाक्शो मुरपुकीम, कारेआह आ तौ योहानान नु मेको नु बाक्शो लडाइ पाइब आन ठेयब मुर नेल्ल आन कली तशा, ग्येरसाक्म।

14 मिनु इश्माएलमी मिस्पा रे ग्याइश्शा लाइश्शो मुर नेल्ल कारेआह आ तौ योहानान आ बाक्तीके लेशशा जाक्तेक्म।

15 तन्न नेथन्याह आ तौ इश्माएल नु ८ जना अरु मुर योहानान रे प्रोक्शा अम्मोनी आन रागी लाम्तेक्म।

16 मिनु अहीकाम आ तौ गेदाल्याह कली सदमे नोले, नेथन्याह आ तौ इश्माएलमी गिबोन रे चाक्शो ब्रोंडशो आन कली लडाइ पाइबपुकी, मीश मुरपुकी, आलपुकी नु दरवारम गेय पाइब मुर आन कली, कारेआह आ तौ योहानान नु मेको नु बाक्शो लडाइ पाइब आन ठेयब मुरपुकीम गिबोन रे लेत्ताक्म।

17 मिनु मेकोपुकी इजीप्त लचा कली मिम्शा बेथलेहेम डा गेरुथ-किम्हामम बास बाक्तेक्म। २सामुएल १९:३८; येरमीया ४३:७

18 मेकोपुकी कल्दी आन क्येडा हिंशो बाक्तेक्म। मारदे हना बेबीलोन डा पिपमी मेको रागी कली योव्रशा वोइश्शो हुकुम पाइब अहीकाम आ तौ गेदाल्याह कली नेथन्याह आ तौ इश्माएलमी साइश्शो बाक्त।

## 42

### इजीप्त लशो

1 मिनु लडाइ पाइब आन ठेयब मुर नेल्ले, कारेआह आ तौ योहानान, होशयाह आ तौ येजन्याह नु आइक्च ठेयब मुर नेल्ले येजन्याह कली अजारयाह यो ब्रेक्नीम।

2 परमप्रभु यावे आ लोव्र पाइब येरमीया आ बाक्तीके जाक्तेक्म। मिनु मेको कली “गो आंइ पुंइशो नेनीन। मिनु परमप्रभु यावे, इन परमप्रभु कली आंइ पबंम नु लीशो मुर नेल्ल आन पबंम पुनीन। मारदे हना शुश मुर रे का निक्शी ला लीतक। मेको गे आंमा ताइतीनी। येरमीया ३७:३

3 मिनु परमप्रभु यावे, इन परमप्रभुम गो ते लचा माल्नीकी, मार पचा माल्नीकी, मेको कोइदल, दे पुनीन” देतेक्म।

4 मिनु परमप्रभु यावे आ लोव्र पाइब येरमीयामी मेको आन कली “दुम्ब। गो इन पबंम इन देशो खोदेशो पा परमप्रभु यावे इन परमप्रभु कली पुंइनुड। मिनु परमप्रभु यावेम मार देमे, मेको नेल्ल इन कली शेनुड। गो इन डोंडती मारेइ लोव्र मखुइक्नुड” देत।

5 मिनु मेकोपुकीमी येरमीया कली “परमप्रभु यावे, इन परमप्रभुमी कोइशो नु आंइ कली देशो लोव्र गोपुकीम मपाइतक हना, परमप्रभु यावे आंइ पबंम थमा नु ठीक लोव्र पाइब सांकछी दुम्ल।

6 मेको रिम्शो दुम्ल कि मरिम्शो दुम्ल। गो परमप्रभु यावे, इं परमप्रभु आ बाक्तीक इन कली सोइक्ताक्क। गोपुकीम मेको आ अरेशो टीनीकी। मिनु परमप्रभु यावे, इं परमप्रभु आ लोव्र टितीके, गो आंइ कली रिम्शो दुम्ल” देतेक्म।

7 मिनु १० नाक्त नोले परमप्रभु यावेम येरमीया कली लोव्र पाप्तु।

8 मिनु येरमीयामी कारेआह आ तौ योहानान नु मेको नु बाक्शो लडाइ पाइब आन ठेयब मुर नेल्ल, आइक्की नु ठेयब मुर नेल्ल आन कली ब्रेत्ताक्मी।

9 मिनु येरमीयामी मेको आन कली “गे आं कली परमप्रभु यावे, इस्राएली आन परमप्रभु आ डोंइती पुंडथ सोइक्ताक्यीनी।

10 मिनु परमप्रभु यावेमी इन कली ‘एको रागीमीन बाक्तीनी हना, गो इन कली रिम्शो सेल्लन्नी, मप्रेत्नन्नी। गो इन कली खुम्नन्नी, मतुल्लन्नी। मारदे हना गो इन कली खतम पोक्शो आ पबर्म आं थुं खाइश्शो बाक्नुड। येरमीया १:१०

11 मुल गे बेबीलोन डा पिप क्येडा महिनीन। मारदे हना गो इन कली मेको आ गुइ रे प्रोंइचा नु श्येत मगोपाइक्चा कली गेपुकी नु बाक्शो बाक्नुड।

12 गो इन कली शिशी पाइक्नन्नी। मिनु मेकोमी इन कली शिशी पा इन बाक्शो रागीमीन वोइक्ब’ देशो बाक्ब।

13 तन्न गेपुकीम परमप्रभु यावे, इन परमप्रभु आ लोत्र मटीतीनी हना ‘गेपुकी एको रागीम मबाक्नीकी’ देतीनी हना, येरमीया २९:१७-१८

14 गेपुकी इजीप्त लशा बाक्नीकी। मारदे हना मेकेर लडाइ मताइसीब, तुराही ताप्शो सेंदा मनेंसीब, शोब्ले जचा मतथु शोत्रलुम मबेक्सीब। गो मेकेन बाक्नीकी देतीनी हना,

15 यहूदा डा लीशोपुकी, परमप्रभु यावे आ लोत्र नेनीन। मुर नेल्ल आन परमप्रभु यावे, इस्राएली आन परमप्रभुम ‘गेपुकी इजीप्त लशा मेकेर बाक्चा कली थमा पा मिम्शो बाक्तीनी हना,

16 तेको तरवार रे पा गे हिंशा प्रोक्शो बाक्नी, मेको तरवारमी इन कली इजीप्तमी साइक्ब। मिनु तेको अन्काल रे पा, गे हिंशो बाक्नी, मेको इजीप्तमी इन नोनोले जाक्ब। मिनु गे मेकेर बेक्नीनी।

17 सु सु इजीप्त लशा बाक्नीमी, मेको नेल्ल तरवार, अन्काल नु मुर बेक्ती रोइम बेक्नीम। गो इन कली खतम पोक्तीक रे का यो मब्रोंइनीनी” देशो बाक्ब” देंत।

18 मुर नेल्ल आन परमप्रभु यावे, इस्राएली आन परमप्रभुम “दोपा आं गाइश्शो नु चुरशो यरूसलेमम बाक्ब मुर आन तार मोंइसे, मोपान गेपुकी इजीप्त लाइतीनी हना, आं चुरतीके इन तार मोंइसीब। इन श्येत जशो तशा मुर हिंनीम। गेपुकी सराप राइब नु शुक्शी पाइक्चा पुंडसीब दुम्नीनी। गेपुकीम लेंशा एको रागी गेनायो कोत्रचा मताइनीनी” देशो बाक्ब। येरमीया २५:९; येरमीया ४४:१२

19 ए यहूदा डा लीशोपुकी, परमप्रभु यावेमी इन कली “गेपुकी इजीप्त मलने, देंशो लोत्र तुइश्शा वोतीन। मुलाक्ती गो इन कली हिंच कोइशा लोत्र पाता।

20 गेपुकीम ठेयब मरिम्शो का पाइतीनी। गेपुकीम आं कली परमप्रभु यावे, इन परमप्रभु आ डोंइती परमप्रभु यावेम, आंइ परमप्रभु मार देंबा, मेको नेल्ल आंइ कली शेंदीकी। मिनु गो मेको नेल्ल पाइनीकी देतीनी।

21 मुलाक्ती गो मेको नेल्ल इन कली शेंताक्न्नी। परमप्रभु यावे, इन परमप्रभुम मार देंचा, दे सोइक्ती, मेको लोत्र इन कली देंती, तन्न मुल सम्म मटिशो बाक्नीनी।

22 मोपतीके मुल एको लोत्र थमा पा तुइश्शा वोतीन। इन बाक्चा कली लचा दाक्शो रागीमीन गेपुकी तरवार, अन्काल नु मुर बेक्तीक रोइम बेक्नीनी देंशो बाक्ब” देंत।

## 43

### येरमीया इजीप्त लाइक्चा पुंडसीशो

1 मिनु येरमीयामी परमप्रभु यावे, आन परमप्रभु आ पशो लोत्र नेल्ल मेको आन कली देंने थुम्तु। परमप्रभु यावे, आन परमप्रभुमी येरमीया कली मेको आन कली मेको लोत्र पथ सोइश्शो बाक्ब।

2 मिनु होशायह आ तौ अजारयाह कारेआह आ तौ योहानान नु मटीब मुर नेल्लेम येरमीया कली “गे जोल पाइतीनी। गेपुकी इजीप्तम बाक्थ लचा मदुम्नीनी देंचा कली परमप्रभु यावे, आंइ परमप्रभुमी इन कली सोइश्शो ममाइ। येरमीया ४२:१९

3 तन्न कल्दीपुकीम आंइ कली सदमेक्ल कि ग्याइश्शा बेबीलोनमी लदमेक्ल, दे मिम्शा, नेरीयाह आ तौ बारुकमी इन कली आंइ पर्बम मरिम्शो पचा कली क्युकशो बाक्ब” देंतेक्म। येरमीया ३६:३२

4 मोपतीके कारेआह आ तौ योहानान, लडाइ पाइब आन ठेयब मुर नेल्ले नु अरु मुर नेल्लेम यहूदामी बाक्चा माल्ब, देंशो परमप्रभु यावे आ लोत्र मटीम।

5 मेको आ पा डा कारेआह आ तौ योहानान नु लडाइ पाइब आन ठेयब मुर नेल्लेम यहूदामी बाक्शो मुर नेल्ल आन कली, जात जात डा मुर आन दातेम ब्रशा लेंशा यहूदामी बाक्थ जाक्शो मुर नेल्ल आन कली खुप्शा लाइक्तेक्म।

6 मेकोपुकीम पिप कली कोव्रब आन कप्तान नेबुजरादानमी शाफान आ चच अहीकाम आ तौ गेदाल्याह आ गुडम गेशो, मीश मुरपुकी, वोंइश मुरपुकी, आल ब्रेप्चपुकी, पिप आ तमीपुकी, येरमीया नु नेरीयाह आ तौ बारुक कली यो लाइक्तेक्म।

7 मोपा परमप्रभु यावे आ अरेशो मटिथु, मेकोपुकी इजीप्त लाम्तेक्म। मिनु ताहपनेसम जाक्दीत्तेक्म। येरमीया ४२:१४-१७; २राजा २५:२६

8 मिनु परमप्रभु यावेम ताहपनेसम येरमीया कली लोत्र पाप्तु।

9 मार लोत्र पाप्तु देंशा हना “इ गुडमी ठेयब ठेयब फुल्लु क्युकको। मिनु यहूदीपुकीम कोव्रना कोव्रन बाक्मानु, ताहपनेसम बाक्शो फाराओ, आ दरवार डा आगा ओव्रतीक लामी खुइश्शा थिम्शा वोतो।

10 मिनु मेको आन कली मुर नेल्ल आन परमप्रभु यावे, इस्राएली आन परमप्रभुमी ‘गो आं गेय पाइब बेबीलोन डा पिप नेबुकदरेसर कली ब्रेल्लुड। मिनु आं खुइश्शा वोइश्शो एको फुल्लु तार गो मेको आ नित्तीके सेल्लुड। मेकोमी मेको तार आ बाक्तीक ताम्बु कीब। येरमीया २५:९

11 मेको जाक्शा इजीप्त कली लडाइ तोइब। मिनु बेक्तीक रोडम बेक्चा ब्रेक्शो, बेक्तीक रोड पा बेक्नीम। ग्याइश्शा लाइक्चा पुंइसीचा ब्रेक्शो, ग्याइश्शा लाइक्चा पुंइसीनीम। मिनु तरवारम साइक्चा पुंइसीचा ब्रेक्शो, तरवार साइक्चा पुंइसीनीम। येरमीया १५:२

12 मेकोमी इजीप्त डा मूर्ति आन खिंम मी सुइक्ब। मेकोमी मेको आन खिं आन कली क्रोइक्ब। मिनु मेको देवी देवता आन कली लाइक्ब। मिनु गोठलापुकीम दोपा आन वा रे नेक्स गुप्नीमी, मोपा मेकोमी इजीप्त रागी डा मूर्ति आन कली गुप्शा ताइब। मिनु मारेइ मदुम्थु आ रागी लेप्ब। येरमीया ४६:२५

13 मेकोमी इजीप्त डा हेल्योपोलीस सहरम बाक्शो नां आ मूर्ति बाक्शो थामपुकी प्रेप्ब। मिनु इजीप्त डा देवी देवता आन खिंम मी सुइक्ब” देंशो बाक्ब” देंत।

## 44

### मूर्ति पूजा पतीके जाम्शो

1 परमप्रभु यावेमी येरमीया कली इजीप्त मिगदोल, ताहपनेस, मेम्फीस नु पथ्रोस रागीम बाक्ब यहूदी नेल्ल आन पर्बम लोत्र पाप्तु। येरमीया ४३:७

2 मुर नेल्ल आन परमप्रभु यावे, इस्राएली आन परमप्रभुमी मार लोत्र पाप्तु देंशा हना “गो यरूसलेम नु यहूदा डा सहर नेल्ल आन कली शुश श्येत गेता। गेपुकीमी मेको आंमा ताइतीनी। मेको सहर कोव्रडीन। मुर मबाक्तीके श्येतथ दुम्शो बाक्नीम।

3 मारदे मोदेशो दुम्त देंशा हना, मेकेर डा मुरुमी आं अरेशो मटिथु, गाइक्पाइक्तीमी। मेकोपुकीमी देवी देवता आन कली चढ़ेशा मेको आन नोले खोइक्तेक्म। डोंइती मेकोपुकी, गेपुकी नु इन किंकी पिपीमी यो मेको आन कली मतुइश्शो बाक्तेक्म।

4 मो हना यो गो आं गेय पाइब आं लोत्र पाइब आन कली मेको आन बाक्तीके सोइक्ना सोइक्न ‘गो इन कली मेको आं काइ मदाक्शो ग्रंथा दिशो गेय मपन’ देंपाइक्तामी। येरमीया २५:४

5 तन्न मेकोपुकीमी मननेम। आन नोफान मदाइक्तेम। मेको आं अरेशो मटितीक रे मलेम्म। मेकोपुकीमी देवी देवता आन कली चढ़ेचा मप्रोनेम।

6 मोपतीके गो यहूदा डा सहर नु यरूसलेम डा लामं आं शुश गाइशशो नु चुरशो मोइक्ता। मिनु मेको सहर ब्रेशशो नु मुर मबाक्तीके दुम्तेक्म। मुलाक्ती मोदेशो बाक्ब” देंत।

7 मिनु मुल मुर नेल्ल आन परमप्रभु यावे, इस्राएली आन परमप्रभुमी “मारदे गेपुकीम आंम इन कली मोदेशो श्येत गेनीनी? यहूदा आ दाते रे मीश मुर, वोंइश मुर, आल नु दूध तूब आल नेल्ल आन कली तिल्पाइशशा, सुइ इन कली मलीपाइक्नी। येरमीया ४२:२२

8 मारदे गेपुकीमी इन गेयमी आं कली गाइक्पाइक्नीनी? मारदे गे इजीप्तमी बाक्शा, देवी देवता आन कली चढ़ेशा आं कली गाइक्पाइक्नीनी? गेपुकी क्याम्चा पुंइसीशा, रागी डा मुर नेल्ल आन दातेमी सराप चीले राइब नु शुक्शी पाइक्चा पुंइसीब दुम्नीनी।

9 गे इन किकी पिपी आन मरिम्शो पशो प्रेंदीनी? यहूदा डा पिप नु आन पिपीम आन मरिम्शो पशो, इन आंम मरिम्शो पशो, इन मीशेमी यहूदा रागीम नु यरूसलेम डा लामं मरिम्शो पशो प्रेंदीनी? येरमीया ७:१७-१८

10 मुल सम्म मेकोपुकीमी आंम कली ब्रेम्शो मसेल्सम। आं कली मान पा महिम। गो आं अरेशो नु आं फुल्लुम मुशा ब्रेक्शो लोव इन डोंइती नु इन किकी पिपी आन डोंइती वोइक्ता। मिनु मेको, गेपुकी नु इन किकी पिपीमी मटिनी” देंत।

11 मोपतीके मुर नेल्ल आन परमप्रभु यावे, इस्राएली आन परमप्रभुमी “गो इन कली ठेयब श्येत गेशा, यहूदा डा मुर नेल्ल आन कली क्याम्मुड। आमोस ९:४

12 इजीप्त लशा बाक्चा कली मिम्ब यहूदा डा लीशो मुर नेल्ल थमा पा जाम्शा लाइनीम। मेको नेल्ल इजीप्तमी साइक्चा पुंइसीनीमी। तरवार नु अन्कालमी बेक्नीम। ठेयब नु आइक्च नेल्ल तरवार नु अन्कालमी बेक्नीम। इन श्येत जशो तशा मुर हिनीम। गेपुकी सराप राइब नु शुक्शी पाइक्चा पुंइसीब दुम्नीनी। येरमीया ४२:१४-१७

13 गो दोपा यरूसलेम कली तरवार, अन्काल नु मुर बेक्तीक रोइम सजाइ गेडा, मोपा इजीप्तम बाक्ब आन कली यो सजाइ गेनुडमी।

14 मोपा इजीप्तम बाक्शो यहूदा डा लीशो मुर सुइ प्रोक्चा मताइनीम। सुइ मब्रोंइनीम। मिनु सुइ यहूदा रागी लेत्चा मताइनीम। मो हना यो मेकेर बाक्चा कली लचा दाक्नीम। डोंइती प्रोक्शा लशो का निक्शी ला लेत्चा ताइनीमी” देंत।

15 मिनु आन मीशेम देवी देवता आन कली चढ़ेशो तुइक्ब वोंइश मुर नेल्ल, ठेयब हुल मीश मुर नु इजीप्त रागी डा पथ्रोस रागीमी बाक्ब नेल्लेमी येरमीया कली यसैया ११:१

16 “गे परमप्रभु यावे आ नेमी आंइ कली पशो लोव गो मनेनीकी।

17 मेको आ पा डा आंइ कसम जशो खाप्नीकी। गोपुकी सरीड डा पिपीम कली चढ़ेशा, मेको कली तूचा थोव्रक लुक्नीकी। गोपुकी, आंइ किकी पिपी, आंइ पिपीपुकी नु आंइ ठेयब मुरपुकीम यहूदा डा सहर नु यरूसलेम डा लामं मोदेशो पाम्तेक्म। मेना गोपुकी शुश जचा ताइतक। मिनु आंइ माल्शो क्येडा शुश तशा, श्येत मजक। येरमीया ७:१७-१८; होसे २:७

18 तन्न गोपुकीम सरीड डा पिपीम कली चढ़ेचा प्रोंइशो रे नु तूचा थोव्रक लुक्चा प्रोंइशो रे मारेइ मतक। तरवार नु अन्कालम जाम्ना जाम्न लाइतक” देंतेक्म।

19 मिनु मीश मुरपुकीम “गो थमा पा सरीड डा पिपीम कली चढ़ेना ढेन बाक्नीकी। मिनु मेको कली तूचा थोव्रक लुक्नीकी। आंइ वोंइशेम वारच मपथु, मेको कली बटुक चोका नु तूचा थोव्रक लुक्तका डा?” दे लोव पाम्तेक्म। गन्ती ११-१३

20 मिनु येरमीयामी आ कली लोव लेप्ब वोंइश मुर नु मीश मुर नेल्ल आन कली

21 “गेपुकी, इन किकी पिपी, इन पिप, इन ठेयब मुर नु एको रागी डा मुरपुकीम यहूदा डा सहर नु यरूसलेम डा लामं चढ़ेशो परमप्रभु यावेम मतुइक्बा डा? मार, मेकोमी ममिम्ता डा?

22 परमप्रभु यावेम इन मरिम्शो पशो नु इन पशो ग्रॉग्रा दिशो गेय तशा फाल्ने मचब। मोपतीके इन रागी श्येत्थ नु मुर मबाक्तीके दुम्त। सराप चीले रशा, मुर मबाक्शो रागी दुम्त। मेको मुल सम्म मोदेशोन बाक्ब।

23 इन चोशा चढेतीके, इन परमप्रभु यावे कली पाप पशो, आ देशो मटिशो नु आ अरेशो, आ फुल्लुम मुशा ब्रेक्शो लोत्र नु आ शेंशो मटितीके इन कली ठेयब श्येत दुम्त। मेको आ पबर्म श्येत जाइनीनी” दे माइक्तीमी।

24 मिनु येरमीयामी मेको मुर नेल्ल नु मीश मुर नेल्ल आन कली “गे इजीप्तम बाक्ब यहूदा डा मुर नेल्ल परमप्रभु यावे आ लोत्र नेनीन।

25 मुर नेल्ल आन परमप्रभु यावे, इस्राएली आन परमप्रभुमी ‘गे नु इन मीश, इन देशो, गोपुकीमी आंइ कसम जशो खाप्नीकी। गो सरीड डा पिपीम कली धूप चढेशा, मेको कली तूचा थोत्रक लुक्नीकी’ दे इन कसम जशो थमा पा खपीन।

26 मोपतीके गे इजीप्तम बाक्ब यहूदी नेल्ल परमप्रभु यावे आ लोत्र नेनीन। परमप्रभु यावेमी गो आं ठेयब नेमी कसम जाइनुड। मुल मेको इजीप्त रागीम बाक्ब यहूदा डा मुर आन शोत्र रे ‘परमप्रभु, परमप्रभु यावे ब्रॉइशा बाक्शो खोदेशो पा’ दे देंतीकेमी आं ने गेनायो मदेनीम।

27 मारदे हना गो मेको आन कली रिम्शो पचा कली ममाइ, मरिम्शो पचा कली कोवना कोव्रन बाक्नुड। इजीप्तम बाक्ब यहूदी नेल्ल मनुम्मा सम्म तरवार नु अन्कालम बेक्नीम। आमोस ९:४

28 तरवार रे ब्रॉइशोपुकी इजीप्त रे यहूदा रागीमी का निक्शी ला लेत्चा ताइनीम। मिनु इजीप्तम बाक्ब यहूदा डा मुर नेल्लेमी ‘आं देशो थमा बाक्म देय मेको आन लोत्र थमा बाक्ब’ दे नोले तुडक्नीम” देंत।

29 मिनु परमप्रभु यावेम “आं देशो थमा पा पाइनुड। मेको आ चिन्ड मार बाक्ब देशा हना, गो इन कली मेको रागीमी सजाइ गेनुड। मेको नोले गो आ देशो पाइनुड, दे इन कली तुडक्तीके बाक्ब” देंत।

30 परमप्रभु यावेम “गो इजीप्त डा पिप फाराओ होफ्रा कली आ जोरी सत्रु नु मेको कली साइक्चा माल्ब आन गुडमी गेनुड। दोपा गो यहूदा डा पिप सिदकीयाह कली आ जोरी सत्रु बेबीलोन डा पिप नेबुकदरेसर आ गुडमी गेडा, मोपा इजीप्त डा पिप कली साइक्ब आन गुडमी गेनुड” दे परमप्रभु यावेमी देंत। इजीकीएल २९:१९

## 45

### बारुक कली अरेशो

1 यहूदा डा पिप योसीयाह आ तौ येहो-याकीममी सासन पवा आ ४ बर्सम नेरीयाह आ तौ बारुकमी परमप्रभु यावे आ लोत्र पाइब येरमीया आ ब्रेक्पाइशो लोत्र कागजम ब्रेकना ब्रेकन बाक्मेनु, येरमीयामी बारुक कली येरमीया ३६:४

2 परमप्रभु यावे, इस्राएली आन परमप्रभुमी इ कली मार देंब देशा हना,

3 गे “आबी, आबी, आं कली मार दुम्बा। परमप्रभु यावेमी आं श्येतम सुर्ता पतीक तेम्ताक्व। गो हुकयी पना पन दती। गो तेइ नाइक्चा मतड” देंते।

4 गे मेको कली “परमप्रभु यावेमी ‘आं डोंइती सेल्शो मुल प्रेतुड। गो मार खुमु मेको नेल्ल तुल्शा ताइक्नुड। मेको रागी नेल्ल कली दुम्ब।

5 मिनु गे आंम इ कली मारेइ मारेइ ठेयब थोत्रक माल्नेवे? गे मेको ममालो। मारदे हना गो मुर नेल्ल आन कली ठेयब श्येत जपाइक्नुडमी। तन्न गे ते लाइनेवे, मेके गो इ कली लडाइ रे ब्रॉइचा गेनुड’ ” दे परमप्रभु यावेमी बारुक आ पबर्म देंत। येरमीया ३९:१८; येरमीया ४३:४-६

## 46

### इजीप्त रागी आ पबर्म शेंशो

येरमीया ४६:-; येरमीया ५१:-; यसैया १९:-; इजीकीएल २९:- ३२:-

1 परमप्रभु यावेम रागी रागी आन पबर्म आ लोत्र पाइब येरमीया कली लोत्र पापुतु।

2 मार लोत्र पापुतु देशा हना “इजीप्त रागी आ पबर्म, इजीप्त डा पिप फाराओ नेको आ लडाइ पाइबपुकी युफ्रेटीस खोला आ नेक्था कारकेमीश सहरमी बाक्शो बाक्तेकम। यहूदा डा पिप योसीयाह

आ तौ येहो-याकीममी सासन पवा आ ४ बर्सम बेबीलोन डा पिप नेबुकदनेसरमी लडाइ तोशा ग्रात। २राजा २३:२९

3 आइक्च नु ठेयब तेक्तीक ठीक पने। लडाइ पचा कली डोंइती बारीन।

4 शाराम लगम पाइक्तीन। शारा डोंइसीन। कांसा के ताकी गुक्शा इन तूतीक शेप्पीन। इन कांसा के फेक्तीक फेक्सीन।

5 गो मारदे मेको आन कली हिंशो तडमी? मेकोपुकी नोले शोंइसीशो बाक्नीम। मेको आन लडाइ पाइबपुकी आन थुं लुकच लत। मेकोपुकी रीब पा प्रोक्तेक्म। मेकोपुकीमी नोले लेशशा मकोवनीम। तेइ तेइ हिंतीकेइ हिंतीके बाक्ब” दे परमप्रभु यावेम देंत। येरमीया २०:३

6 परमप्रभु यावेमी “रीब पा प्रोक्ब यो प्रोक्ने मचाप्नीम। लडाइ पाइबपुकी यो ब्रोंइचा मताइनीम। मेकोपुकी उत्तर गे डा युफ्रेटीस खोलाम दाइल पांइसीशा गोल्नीम।

7 एको नील खोला खोदेशो पा बारशा जाक्ब, अरु ठेयब खोला बोक्शा कुशो खोदेशो पा जाक्ब, सु बाक्मे?

8 इजीप्त रागी नील खोला खोदेशो पा बारशा जाक्ब। ठेयब खोला बोक्शा कुशो खोदेशो पा जाक्ब। मेकोमी ‘आं कली बारशा रागी कली सुम्चा गेने। सहर नु मेकेर डा मुर आन कली साइक्चा गेयीनी।

9 शारापुकी दोरशा डोंइती लने। बग्गी खुल्बपुकी थाम्पा दोरपतीन। लडाइ पाइबपुकी बारीने। कूश एथीयोपीया नु पूत डा मुरपुकीमी तेक्तीक कुरनीम। लूद डा मुरपुकीमी लिब्रा आप्नीम।

10 मेको नाक्ती परमप्रभु, मुर नेल्ल आन परमप्रभु यावे आ नाक्त बाक्ब। मेको क्येक्क लेत्तीक नाक्ती बाक्ब। आंम जोरी सनु आन कली क्येक्क लेत्तीक नाक्ती बाक्ब। मुरुम तरवारम साइक्नीम। तरवार हुश तूशा, आ तूत दाक्शो रूब। मारदे हना मुर नेल्ल आन परमप्रभु यावेमी उत्तर गे डा रागीमी, युफ्रेटीस खोला आ नेक्था क्योरशा चढेब। यसैया २:१२; ब्यवस्था ३२:४१-४२

11 गे कन्ने मीश आल इजीप्त, इर गिलादम लशा खेक्तीके चाक्को। गे शोर गाक्शो शुश खाल डा ओरुक्ती खेक्साक्वे। तन्न गे मसानेवे। येरमीया ८:२२

12 रागी रागी डा मुरपुकीम इ मुने दोक्शो लोत्र नेंतेक्म। इ वाइ ब्रेशोम रागी नेल्ल ब्रीब। मारदे हना लडाइ पाइब, लडाइ पाइब नु थोकमुइनीम। मिनु मेको नेल्ल कालेमी गोल्नीम” दे परमप्रभु यावेमी देंत।

13 परमप्रभु यावेम बेबीलोन डा पिप नेबुकदरेसरम इजीप्त कली लडाइ तोथ जाक्चा आ पर्बम येरमीया कली लोत्र पाप्तु।

14 मार लोत्र पाप्तु देंशा हना “इजीप्तमी एको लोत्र नेंपतो। मिगदोलमी एको लोत्र नेंपतो। मेम्फीस नु ताहपनेसमी यो एको लोत्र नेंपतो। गे नेल्ल ठीक दुम्शा आंम आंम राप्तीकेम रपीन। मारदे हना तरवारम इन एर ओंथ नेल्ल साइक्तु।

15 मारदे इ बोल्यो लडाइ पाइब प्रोक्नीमी। मारदे बोक्शा मराप्नीमी? मारदे हना परमप्रभु यावेम मेको आन कली साइक्तु।

16 इ लडाइ पाइबपुकी थोकमुशा गोल्नीम। मिनु मेकोपुकीमी ‘लो, इ मुर आन बाक्तीक लय। इं जरमेशो रागी लेशशा लय’ दे साइक्ब तरवार आ पर्बम मो देंमुइनीम।

17 इजीप्त डा पिप फाराओ कली फश लोत्र पाइब, दे नें वोतीन। मेकोम आ गेय पतीक नाक्ती साम्तु” देंत।

18 परमप्रभु, पिपमी “आं ब्रोंइशा बाक्शो खोदेशो पा” देंत। मेको पिप आ नें मुर नेल्ल आन परमप्रभु यावे बाक्ब। पहाड आन दाते डा ताबोर पहाड खोदेशो पा का जाक्ब। मेको समुन्द्र आ नेक्था डा कारमेल खोदेशो पा जाक्ब।

19 गे इजीप्त डा दारशो तमी ग्याइशशा लाइक्चा पुंइसीचा कली इ मार मार कुम्लो पावो। मारदे हना मेम्फीस श्येत्थ दुम्ब। मेको खिं नेल्ल ब्रेशशा, मुर मबाक्तीके दुम्ब।

20 इजीप्त रागी दारशो मगिक्शो बी का खोदेशो बाक्ब। तन्न उत्तर रे डांस का जाक्ब।

21 मेको आ गाल्च ताक्शा लडाइ पाइबपुकी यो दोमशो बाछा खोदेशो बाक्नीम। मेको यो नेल्ल हिरशा लशा काथा प्रोक्तेक्म। मेको राप्शा मुदिकनीम। मारदे हना मेको आन हिंचा डा श्येत जतीक नाक्ती जाक्शो बाक्ब। मेको आन सजाइ तची ना जाक्त।

22 मेकोमी ग्रेशा गाक्शा, प्रोक्शो बुस्सुम खोदेशो पा रेयके पाइब। मारदे हना आ जोरी सत्रु डोंइती बारशा, खा कुरशा रवा तिम्ब मुर खोदेशो पा जाक्नीम।

23 परमप्रभु यावेमी “मेकोपुकीमी आ ब्वाकी नेल्ल तिम्चा माल्नीम। मारदे हना हिक्ने मचाप्चा डा बाक्नीम। मेकोपुकी सल्हा क्येडा शुश बाक्नीम” देंत।

24 मिनु इजीप्त आ तमी मुने तोक्चा पुंडसीब। मेको उत्तर रे जाक्ब मुर आन गुडम जिम्मा गेचा पुंडसीब।

25 मुर नेल्ल आन परमप्रभु यावे, इस्राएली आन परमप्रभुम “गो थेबेस सहर डा आमोन फाराओ, इजीप्त रागी नु आ देवी देवता नु आ पिप आन कली सजाइ गेनुड। गो फाराओ नु मेको आ सक्ति कली थमा सुइक्ब नेल्ल आन कली सजाइ गेनुड। येरमीया ४३:१२-१३; यसैया २४:२१

26 गो मेको आन कली साइक्चा माल्ब बेबीलोन डा पिप नेबुकदरेसर नु आ लडाइ पाइब आन ठेयब मुर आन गुडमी गेनुडमी। मेको नोले इजीप्त रागी डोंइती डा खोदेशो पा मुर बाक्तीक रागी दुम्ब” दे परमप्रभु यावेम देंत। इजीकीएल २९:१४

27 मेकोमी “आं गेय पाइब याक्ब, गे महिनो। इस्राएल गे सुर्ता मपावो। गो इ कली डोन रागी रे प्रोंडनुड। इ चच युइ आन कली ग्याइश्शा लाइश्शा, वोइश्शा रागी रे प्रोंइशा चाक्नुडमी। याक्ब लेंशा श्येत मजथु, थुं नाइश्शा बाक्ब। मिनु मेको कली सुइम हिंच मकोंइनीम। येरमीया ३०:१०

28 आं गेय पाइब याक्ब गे महिनो। मारदे हना गो गे नु बाक्शो बाक्नुड। गो इ कली तेको रागी डा मुर आन दातेमी ब्रपदु, मेको रागी डा मुर नेल्ल आन कली क्याम्नुडमी। तन्न गो इ कली मक्याम्नुड। गो इ कली ठीक सजाइ गेनुड। गो इ कली सजाइ मगेथु मप्रोंडनुड” देंत। येरमीया १०:२४; येरमीया ३०:११

## 47

पलिस्ती आन पर्बम देशो लोत्र

यसैया १४:२९-३२; इजीकीएल २५:१५-१७

1 फाराओमी गाजा कली लडाइ तोचा क्येडा डोंइती, पलिस्ती आन पर्बम परमप्रभु यावेम आ लोत्र पाइब येरमीया कली लोत्र पाप्तु।

2 परमप्रभु यावेमी मार लोत्र पाप्तु देशा हना “कोल्रडीन उत्तर रे ब्वाक्कु बारशा यिशो बाक्ब। मेकोमी रागी नु मेकेर बाक्शो मारेइ मारेइ आन कली सुम्ब। सहरपुकी नु मेकेर बाक्शो नेल्ल आन कली खुम्ब। मिनु मुर नेल्ल वाइ ब्रेत्नीम। मेको रागीम बाक्ब मुर नेल्ल डाक्नीम।

3 प्रेक्शा दोरशा गाक्ब शारा आन खोइली आ रेयके नु जोरी सत्रु आन बगी आन रेयकेमी आफपुकीम आन आल आन कली वारच पाइक्चा कली मलेत्नीम। मेको आन गुइ तिक्ने मचाप्ब दुम्शा ग्युक्शो बाक्नीम।

4 मारदे हना पलिस्ती नेल्ल आन कली खतम पोक्शा साइक्तीक नाक्ती जाक्शो बाक्ब। टायर नु सीदोन आस कली वारच पाइक्ने चाप्ब नेल्ल बेक्नीम। मारदे हना परमप्रभु यावेम पलिस्ती आन कली साइक्चा चिक्शो बाक्ब। काफतोर डा टापु आ शुंडचीम रे जाक्शो लीशो नेल्ल आन कली साइक्चा चिक्शो बाक्ब। आमोस १:६-७; सेफन्याह २:४; जकरिया ९:५; यूहन्ना १:२२; येरमीया १६:६; येरमीया ४८:३७; आमोस ९:७

5 गाजाम रेंका पचा कली आ चां प्रेक्शो बाक्ब। अशकलोन खतम दुम्शा, सिक्सी पाइब। गे लीशो अनाकीमपुकी गेना सम्म इन रां चेंइसीनीनी?” देशो बाक्ब।

6 “परमप्रभु यावे आ तरवार, गे ग्रीचा गेना नाइक्नेवे? इन तरवार खोतम पिप्तीन। गे नाइश्शा सिक्सी पा बाक्कीन।



7 गे दोपा सिक्सी पा बाक्ने चाप्नीनी? मारदे हना परमप्रभु यावेमी मेको कली अरेशो बाक्ब। मेकोमी मेको कली अश्कलोन नु समुन्द्र आ शुंडच डा रागी आन कली गेय पचा कली अरेशो बाक्ब?” दैत।

## 48

मोआब आ पर्वम लोव्र

यसैया १५:-; यसैया १६:-; इजीकीएल २५:८-११; आमोस २:१-३; सेफन्याह २:८-११

1 मुर नेल्ल आन परमप्रभु यावे, इस्राएली आन परमप्रभुमी मोआब आ पर्वम मार लोव्र पाप्तु देशा हना “नेबो सहर मुर मबाक्तीके दुम्ब। किरयथ-थाइम मुने दोक्ब। मेको ब्रुत। मेको आ बोल्यो दरवार नेल्ल मुने तोक्शा प्रेशशा ताइक्चा पुंडसाक्म।

2 मुल रे मोआब कली ठेयब मसेल्नीम। मुरपुकीम हेरबोनम लोव्र गारपाइक्तेक्म। मेकोपुकीमी ‘जाक्कीन, गो मेको कली रागी का मदुम्चा डा सेल्य। ए मादमेन सहर, इ कली यो सिक्सी पपाइक्नीम। इ कली तरवार शेशा खेदा पाइनीम’ दैतेक्म।

3 नेनीन, होरोनाइम रे वाइ ब्रेशशो नेंसीब। खतम दुम्तीके नु क्याम्तीके आ पर्वम डाक्शो नेंसीब।

4 मोआब आ आलपुकीमी ‘मोआब खतम पोक्चा पुंडसाक्व’ दे वाइ ब्रेशशा डाक्नीम।

5 मेकोपुकी लुहीथ डा ग्येत्थ लांमी हिशेक पा डाक्ना डाक्न डोइक्नीम। मारदे हना होरोनाइम डा लुक्च लतीक लांमी श्येत जशा डाक्शो नेंसीब।

6 पोक्कीन, आम कली प्रोइचा कली दोरीन। गोरशो रागी डा गधा खोदेशो दुमीन। येरमीया १७:६

7 गेपुकीम इन गेय नु इन शोपोम थमा सुइक्तीनी। गेपुकी यो ग्याइशशा लाइक्चा पुंडसीनीनी। केमोश देवता आ चढेब नु आ नोले खोइक्ब मुरपुकी नु ग्याइशशा लाइक्चा पुंडसीब। गन्ती २१:२९; न्यायाधीस ११:२४; १राजा ११:७

8 खतम पोक्ब सहर नेल्लेम जाक्ब। मिनु सहर का यो मप्रोइसीब। बेंसी क्याम्सीब। मिनु दिम खतम दुम्ब। परमप्रभु यावे आ देशो मोदेशो बाक्त।

9 मोआब कली फ्रां गेन। मारदे हना मेको थमा पा बुडब। मेको आ सहर श्येत्थ दुम्शा, मुर मबाक्तीके दुम्नीम” दैत।

10 सु सुमी परमप्रभु यावे आ गेय देश पा पाइनीमी, मेको सराप राइनीम। आम तरवार कली हुश ख्राक्श पोक्तीके रे तेक्ब सराप राइनीमी।

11 मोआब आ टिटा रेन नांडसीशा बाक्शो बाक्ब। मेको गरमी कुर पा वोइशशो अडगुर शांबु खोदेशो बाक्ब। मेको ग्योब का रे अर्को ग्योबुम मलेशो बाक्ब। मेको ग्याइशशा लाइक्चा मपुंडसीशो बाक्ब। मोपतीके मेको डोइती डा खोदेशोन बाक्ब। मेको आ ब्रोवशो रिना मजाम्शो बाक्ब। सेफन्याह १:१२

12 मोपतीके परमप्रभु यावेमी “गो गर रे मोइक्ब आन कली मेको आ बाक्तीके सोइक्नुडमी। मिनु मेकोपुकीमी मेको मोइशशा, गर श्येत्थ सेल्शा प्रोलनीम। मेको नाक्त थमा पा जाक्ना जाक्न बाक्ब।

13 दोपा इस्राएल आ मुर आंम थमा सुइशशो बेथेल रे पा मुने तोक्चा पुंडसमा, मोपा मोआब यो केमोश रे पा मुने तोक्चा पुंडसीब।

14 गेपुकीम ‘गोपुकी बोल्यो नु सक्ति पाइशशो लडाइ पाइब बाक्नीकी’ दे दोपा देने चाप्नीनी?

15 मोआब नु आ सहर आन कली खतम पोक्ब जाक्त। मेको आ नेल्ल क्येडा रिम्शो टिटा मुर नेल्ल साइक्चा पुंडसीचा कली लाम्तेक्म” दे पिपम दैत। मेको आ नें मुर नेल्ल आन परमप्रभु यावे बाक्ब।

16 मेकोमी “हिंचा डा श्येत जतीक नाक्ती मोआब आ नेक्था जाक्शो बाक्ब। मेको आ श्येत जतीके रीब पा जाक्ब।

17 मेको आ एर ओंथ बाक्ब नेल्ल नु मेको आ पशो तुइक्ब नेल्ल मेको आ पर्वम रोंका पने। मिनु ‘दोपा सक्ति पाइशशो राज्य क्याम्चा पुंडसे। पिप आ कोक्के दोपा जिक्मे’ देनीन।

18 ए दीबोन डा तमी, गे ठेयब नित्तीके रे तोइशशा, सोव्रशो रागीम निस्सो। मारदे हना मोआब कली खतम पोक्ब इ कली लडाइ तोचा कली जाक्त। मेकोमी इ गारो हिरशो सहर नेल्ल खतम पोक्वतु।

19 आरोएर सहरम बाक्बपुकी लांमी राप्शा कोव्रडीन। प्रोक्शो वोइश मुर नु मीश मुर आन कली ‘मार, दुम्मे’ दे हिल्लो पने।

20 मोआब ब्रुत। मेको मुने दोक्त। रोंका पा डाक्कीन। ‘मोआब मुर मबाक्तीक दुम्त’ दे अरनोन खोला आ शुंइचीम लशा देनीन।

21 डांडा तार डा दिंम निसाफ पतीके नाक्ती जाक्शो बाक्ब। होलोन, याहसाह नु मेफा-आथ,

22 दीबोन, नेबो नु बेथ-दिब्लाथाइम आन तारी,

23 किरयथ-थाइम बेथ-गामुल नु बेथ-मेओन,

24 केरयोथ, बोझा नु मोआब आ नेक्था नु डोन डा सहर नेल्ल आन तारी निसाफ पतीके जाक्शो बाक्ब।

25 मोआब आ ग्रोत्र खोइक्साक्ब। मिनु मेको आ गुइ जिक्त” दे परमप्रभु यावेमी देंत।

26 मिनु लेंशा “मेको कली दुक्पतीन। मारदे हना मेको ठेयब लेशशो बाक्ब। मोआब आ मेशोमी दिड दाड गोल्ल। मिनु मेको शुक्शी पाइक्चा पुंइसीब दुम्ल। येरमीया २५:१५

27 मार, गे इसाएल कली शुक्शी पशो मनवे? मेको खुइ आन दातेमी ग्याइक्चा पुंइसे डा, मेको आ परबम लोत्र पामेनु, इ पिया हिकशा शुक्शी पवी?

28 मोआबम बाक्बपुकी, इन सहर प्रॉइशा, फुल्लु मेर लशा बाक्कीन। रोंगु डा ढोडोडगा आ शोत्रम ग्योत्र सेल्ब दुकुर खोदेशो दुमीन।

29 गो मोआब आ ठेयब लेशशो आ परबम लोत्र नेंतक। मेको आ ठेयब दुम्तीके, बोरतीके, ठेयब लेत्तीके नु थुं डा ठेयब दुम्तीके आ परबम नेंतक।

30 गो मेको आ ठेयब लेशशो तुइक्नुड। तन्न मेको आ ठेयब लेशशो मारेइ मबाक्ब। मिनु मेको आ गेय जाम्शा लाइब बाक्ब।

31 मोपतीके गो मोआब आ परबम रोंका पाइनुड। गो मोआब नेल्ल आन परबम डाक्नुड। गो कीर-हेरेस डा मुर आन परबम हिशेक पाइनुड।

32 गो याजेर डाक्शो क्येडा इ परबम शुश डाक्नुड। ए सिब्मा डा अडगुर बोटपुकी, इन राशी समुन्द्र आ आइक्ची हांबु जाक्दीत्तेक्म। मेकोपुकी याजेर डा समुन्द्र सम्म जाक्दीत्तेक्म। इ मीशो फल फुल नु इ अडगुर खतम पोक्ब जाक्तेक्म।

33 मोआब डा फल फुल रू रे ग्येरतीक नु थुं नाइश्शा बाक्तीके जाम्ने थुम्तु। गो अडगुर खाक्तीक तेक्ता। सुइमी ग्येरशा ग्रीशा, मखाक्नीम। मेको आन वाइ ब्रेशो ग्येरशा वाइ ब्रेशो ममाइ।

34 हेरबोन नु एलेआले वाइ ब्रेत्नीस। मेको याहास सम्म नेंसीब। सोआर रे होरोनाइम, एग्लाथ-शेलीशीया सम्म वाइ ब्रेशो नेंसीब। मारदे हना निम्रीम डा ब्वाक्कु यो सोवने थुम्शो बाक्ब।

35 गो मोआब कली खतम सेल्लुड। डांडा डा थानम चढेब नु देवी देवता आन कली धूप चोइब आन कली खतम सेल्लुडमी” दे परमप्रभु यावेमी देंत।

36 मिनु परमप्रभु यावेमी “मोपतीके आं थुं बांसुरीम खोदेशो पा मोआब आ परबम रोंका पाइब। आं थुं कीर-हेरेस डा मुर आन परबम बांसुरीम खोदेशो पा रोंका पाइब। मेको आन चेम्शो शोंप नेल्ल जाम्त। यसैया १५:७

37 मेको नेल्लेम आन चां प्रेक्शो बाक्नीम। मिनु आन गल शोक्त्रे यो खोइश्शो बाक्नीम। मेको नेल्ल आन गुइ चेशशो बाक्नीम। मिनु आन क्रातो भाडग्रामी गिल्लीशीो बाक्नीम। येरमीया १६:६

38 मोआबी आन खिं तारी नु लां मेर रोंका पशो डा लाक्शा अर्को मारेइ मनेंसीब। मारदे हना गो मोआब कली सुइम ममाल्चा डा ग्योब खोदेशो पा प्रोल्ला” दे परमप्रभु यावेमी देंत।

39 मेको दोपा ब्रोल्मे, मोपा रोंका पाइनीम। मोआब दोपा मुने दोक्शा आ कुल खुइक्ता, मोपा मोआब आ एर ओंथ बाक्ब नेल्लेम मेको आन परबम शुक्शी पा हिंशा कोत्रचा डा दुम्शो बाक्ब।

40 मिनु परमप्रभु यावेमी “कोत्रडीन, मेको ककाकुली खोदेशो पा जुक्ब। मेको आ फ्रां हाम्शा, मोआब तारी जुक्ब। येरमीया ४९:२२

41 केरयोथ नु अरु सहर ब्रुडनीम। आन जोरी सत्रुमी मेको आन हिरशो सहर आन के सेल्लनीम। मेको नाक्ती मोआब डा लडाइ पाइब आन थुं सुत्केरी रोइ पशो मीश मुर आन थुं खोदेशो दुम्नीम।

42 मोआब रागी का दुम्शा मलीचा डा पा खतम दुम्त। मारदे हना मेको परमप्रभु यावे आ डोंइती ठेयब लेशशो बाक्त।

43 मोआबम बाक्बपुकी इन डोंइती हिंचा डा बिक्तीके नु ब्वारद बाक्नीम। यसैया २४:१७-१८

44 हिंचा डा श्येत रे प्रोक्ब बिक्तीकेम बिक्नीम। मिनु बिक्तीके रे डोइशशा गूब ब्वारदम रेत्चा पुंडसीनीम। मारदे हना गो मोआब कली आ सजाइ गेतीक बर्सम मोदेशो पाइनुड” दे परमप्रभु यावेमी दैत।

45 परमप्रभु यावेमी “प्रोक्बपुकी हेरबोन आ वांकुमी दिक्नीम। मारदे हना हेरबोन रे मी का गूत। सीहोन आ खिं रे मी गूत। मेकोमी मोआब आ कुप्फ नु जीब नु मरिम्शो पाइब आन पिया जेप्ब। गन्ती २१:२८-२९

46 आबी, आबी, मोआब, केमोश देवता आ मुर बेक्तेक्म। इ तौपुकी ग्याइशशा लाइक्चा पुंडसाक्म। इ तमी ग्याइशशा लाइक्चा पुंडसाक्म।

47 मो हना यो गो नोले डा नाक्ती मोआब आ शोंप लेशशा गेनुड। मोपा मोआब आ निसाफ नुप्त्” दे परमप्रभु यावेमी दैत।

## 49

अम्मोन आ परबम लोव्र

इजीकीएल २५:३-७; आमोस १:१३-१५; सेफन्याह २:८-११

1 अम्मोनी आन परबम परमप्रभु यावेमी “मार, इस्राएल आ तौपुकी मबाक्नीमी? मार, मेको आ हक ताइब सुइ मबाक्नीमी? मारदे मिल्लोम देवता आ मुरपुकीमी गाद आ बाक्तीके आन के सेल्मे? मिनु मारदे मिल्लोम आ मुर सहरम बाक्थ लमा?” दैत। मिल्लोम देवता मोलेक यो देनीम। १राजा ११:५

2 मोपतीके परमप्रभु यावेमी “गो अम्मोनी आन रब्बाह कली लडाइ डा तुराही ताप्शो नेंपाइक्नुड। मेको श्येत्थ डांडा खोदेशो दुम्ब। मिनु मेको आ एर ओंथ डा गांउ मीम क्रोइक्चा पुंडसीनीम। मेना इस्राएलमी आ कली रोइक्ब आन कली रोइक्ब” दे परमप्रभु यावेमी दैत।

3 परमप्रभु यावेमी “हेरबोन रोंका पावो। मारदे हना ऐ सहर खतम पोक्शो बाक्ब। गे रब्बाह डा तमी, वाइ ब्रेशशा डाक्कीन। भाडग्रा फेंसीशा रोंका पने। वाम ग्याम दुम्शा एर ओंथ दोरीन। मारदे हना मिल्लोम, आ चढेबपुकी नु आ नोले खोइक्ब ग्याइशशा लाइक्चा पुंडसाक्म।

4 गे मारदे इ सक्तिम ठेयब लेशशा बाक्नेवे? इ सक्ति ग्युम्ब। गे हेथे गाक्ब तमी, गे इ शोंप कली थमा सुइशशा ‘सुमी आं कली लडाइ तोइबा डा’ देनेवे।

5 गो परमप्रभु, मुर नेल्ल आन परमप्रभु यावे नड। गो इ नेक्था बाक्ब मुर रे हिंतीक श्येत गेपाइक्नुड। गे नेल्ल एर ओंथ फ्रचा पुंडसीनीनी। मिनु प्रोक्शो आन कली खुप्ब सुइ मबाक्नीम।

6 मो हना यो गो नोले अम्मोनी आन शोंप लेशशा गेनुड” दे परमप्रभु यावेमी दैत। येरमीया ४८:४७

एदोम आ परबम लोव्र

यसैया २१:११; यसैया ३४:५-१५; इजीकीएल २५:१२-१४; आमोस १:११-१२

7 मुर नेल्ल आन परमप्रभु यावेमी एदोम आ परबम “मुल तेमान सहरम तुइक्तीक मबाक्बा डा? मार, रूप्ब मुर आन अर्ती जाम्शा लमे? मार, मेको आन रुप्तीक योल्मे?

8 ए देदानम बाक्बपुकी, लेशशा प्रोक्कीन। लुकच लने। मारदे हना गो एसाव कली सजाइ गेची ना मेको कली हिंचा डा श्येत गेनुड।

9 अडगुर सेक्बपुकी इ बाक्तीके जाक्तेक्म हना, मार, मेकोपुकीम अरु सीला गुप्तीके मप्रोंइनीमी डा? मार, नाक्दो खुइ जाक्शो नम हना, मेकोपुकीमी आन कली माल्शो थोव्रक ला मलाइक्नीमी डा?

10 तन्न गो एसाव कली शिश्रा सेल्ला। गो मेको आ खुइक्तीक नेल्ल तांइसीतीके सेल्ला। मिनु मेको खुइक्चा मताइब। मेको आ आल, आ खिं डा मुर, आ नेक्था बाक्ब नु आंमा यो मली।

11 इ रोम रोइक्च आन कली प्रोंइशा वोतो। गो मेको आन कली कोव्रनुडमी। मिनु वोंइश बेक्शो मीश मुरपुकीमी यो आं कली थमा सुइक्चा तामेक्ल” दैत।

12 परमप्रभु यावेमी “श्येत डा कचौरा तूचा ममाल्शोमी यो मेको तूचा माल्ताक्व हना, मार, गे सजाइ मतथु ब्रोंड्या ताइनेवे? गे सजाइ तचा माल्नेवे। गे मेको तूचा माल्नेवे। येरमीया २५:१५, २८, २९; भजन संग्रह १३७:७

13 मारदे हना बोझा ब्रेशशा हिंचा डा, शुक्शी पाइक्चा पुंडसीब, श्येत्थ नु सराप पाइक्तीके दुम्ब, दे आं नेम कसम जाता। मिनु आ सहर नेल्ले गेना हना यो कली ब्रेशशा लीनीम” दैत।

14 गो परमप्रभु यावे आ लोव्र कुरब रे पा लोव्र का नेंता। लोव्र कुरब का रागी रागी डा मुर आन पर्वम सोइश्शो बाक्ब। मेकोमी “लडाइ तोचा कली बुक्कीन। लडाइ पचा कली सासीन” दैत।

15 परमप्रभु यावेम “मुल गो इ कली रागी रागी आन दाते डा नेल्ल क्येडा आइक्च सेल्लन। मुरपुकीमी इ कली महिक्नीम।

16 गे सेरथे फुल्लु आ पुक्खीम बाक्नेवे। इ हिंच कोइतीके नु इ थुं डा ठेयब लेत्तीकेमी इ कली जोल पाम्ताक्स। गे डांडा डा बाक्तीक आंम के सेल्लतीवी। गेमी इ बाक्तीक ककाकुली आ ग्योत्र खोदेशो पा इर सेल्लतीवी हना यो, गो इ कली मेकेर रे उइ तोक्नन” दे परमप्रभु यावेम देशो बाक्ब।

17 परमप्रभु यावेम “एदोम थम हिंचा डा दुम्ब। सु सु मेकेर लाइनीमी, मेको एदोम आ शुश श्येत तशा हिंनीमी। मिनु शुक्शी पाइनीम।

18 दोपा सोदोम, गोमोरा नु मेको आस एर ओंथ डा सहर नेल्ल श्येत्थ दुम्मा, मोपा मेकेर सुइ मलीनीम। सुइ मबाक्नीम। येरमीया ५०:४०; यसैया १:९

19 यर्दन आ नेक्था डा ठेयब ब्वाकी रे बस्तु भाव योव्रतीकेम गुप्स जाक्शो खोदेशो पा गो एदोम कली याम कामी मेको आ रागी रे गुंडनुड। गो सु कली सासन पचा कली योव्रडु, मेको कली गेनुड। आं खोदेशो सु बाक्बा? आं कली सुम अरेने चाप्बा डा? तेको गोठला आं डोंइती राप्ने चाप्बा डा?” दे परमप्रभु यावेमी दैत येरमीया ५०:४४-४६

20 मोपतीके परमप्रभु यावेम एदोम आ पर्वम पचा चिक्शो गेय नु तेमान सहरम बाक्ब आन पर्वम मेको आ मिम्शो दोदेशो बाक्बा, मेको नेनीन। थमा पा बगाल डा आइक्च कीशा लाइक्चा पुंडसीनीम। मेको आन पतीके आन योव्रतीक खतम दुम्ब।

21 मेको आन गोल्लो रेयकेमी रागी खिंखि पाइब। मेको आन वाइ ब्रेशो लल समुन्द्र सम्म नेसीब।

22 कोव्रडीन, मेको ककाकुली खोदेशो पा बेरशा जाक्ब। मिनु मेको जुक्शा बोझा तार मेको आ फ्रां हाम्ब। मेको नाक्ती एदोम डा लडाइ पाइब आन थुं सुत्केरी रोइ पशो मीश मुर आन थुं खोदेशो दुम्ब। येरमीया ४८:४०

दमस्कस आ पर्वम लोव्र

यसैया १७:१-३; आमोस १:३-५

23 परमप्रभु यावेमी दमस्कस आ पर्वम “हमाथ नु अरपाद वाम ग्याम दुम्शो बाक्नीस। मारदे हना मेको निक्शीमी मरिम्शो लोव्र नेताक्स। मेको हिंशा आस थुं ग्येत्थ लुक्च दुम्शो बाक्नीस। मिनु समुन्द्र खोदेशो पा सिक्सी पा बाक्ने मचाप्नीस।

24 दमस्कस मचाप्ब दुम्शो बाक्ब। मेको प्रोक्त। मेको शुश हिंब। मेको सुत्केरी रोइ पशो मीश मुर खोदेशो पा सुर्ता पा हिंब।

25 दोपा मेको नें चलेशो सहर प्रोंड्या पुंडसे? मेको सहर डा मुर शुश ग्येरसाक्म।

26 मुल मेको आ ठिटा मुरपुकी लां मेर गोल्लीम। मिनु मेको नाक्ती मेको आ लडाइ पाइब नेल्ल खतम दुम्नीम।

27 गो दमस्कस डा गारोपुकीम मी सुइक्नुडमी। मेकोमी बेन-हादाद आ गारो हिरशो सहर खतम सेल्ब” दे मुर नेल्ल आन परमप्रभु यावेम दैत।

केदार नु हासोर आस पर्वम लोव्र

28 बेबीलोन डा पिप नेबुकदरेसरम केदार नु हासोर आस कली ग्रात। एको केदार नु हासोर आस पर्वम पशो लोत्र बाक्ब। मिनु परमप्रभु यावेमी “बोक्कीन। केदार मेर लने। पूर्व डा मुर आन कली खतम पोक्कीन। यसैया २१:१६-१७; यहोसु ११:१०

29 मेको आन ताम्बु, मेको आन क्यारश भेडा, मेको आन वासी नु आन मारेड मारेड लतीन। आन दलओठ रोडशशा आंम के सेल्सीन। मिनु मुरपुकीम ‘एर ओंथ नेल्ल हिंचा डा श्येत बाक्ब’ दे ग्रीचा माल्नीम। येरमीया २०:३

30 ए, हासोरम बाक्बपुकी, रीब पा प्रोक्कीन। लुकच लशा खुडशशा बाक्कीन। बेबीलोन डा पिप नेबुकदरेसरमी इन कली मरिम्शो पचा मिम्शो बाक्ब। मेकोम इन कली मरिम्शो पचा कली गेय का पशो बाक्ब” दे परमप्रभु यावेमी देंत।

31 मिनु “बेबीलोन डा पिप नेबुकदनेसरमी इन कली श्येत गेचा मिम्ब। इन कली मरिम्शो पचा मिम्ताक्व। बोक्कीन, थुं नाइशशा रिम्शो पा बाक्ब मुर गे बारीन। मेको रागी डा मुर आन के ठेयब लाप्चो नु चोक्तीके मबाक्नीम। मेको रागी डा मुर अरु क्येडा डोन बाक्नीम।

32 मेको आन दलओठ रोडक्चा पुंडसीनीम। आन बी ब्यफ यो रोडक्चा पुंडसीनीम। मेको चां प्रेक्शो मुर आन कली तेड तेड ब्रापाइक्नुडमी। मिनु मेको आन कली हिंचा डा श्येत गेनुड। येरमीया २५:२३

33 हासोर सिवार आन बाक्तीके दुम्ब। मेको गेना हना यो कली मुर मबाक्तीक रागी दुम्ब। मेकेर सुड मबाक्नीम, मेकेर सुड मुर बाक्थ मलाइनीम” दे परमप्रभु यावेम देंत। येरमीया ४९:१३

### एलाम आ पर्वम लोत्र

34 यहूदा डा पिप सिदकीयाहम सासन पचा गोवा ना परमप्रभु यावेम आ लोत्र पाइब येरमीया कली एलाम आ पर्वम लोत्र पाप्तु। येरमीया २५:२५

35 मुर नेल्ल आन परमप्रभु यावेम मार लोत्र पाप्तु देश हना “गो एलाम आ लिब्रा जिक्नुड। मेको आन लिब्रा आन ठेयब सक्ति बाक्ब। यसैया २२:६

36 गो एलाम डा मुर आन कली सरीड आ एर ओंथ नेल्ल रे फश गिवार पपाइशशा एर ओंथ ब्रापाइक्नुडमी। एलाम डा ग्याइशशा लाइक्चा पुंडसीशो नेल्ल रागी रागीम ब्राइनीम।

37 मेको एलाम डा मुर आन कली, आन जोरी सत्रु नु मेको आन कली साइक्चा माल्ब आन डोंइती शुश हिंब सेल्लुडमी। गो मेको आन कली ठेयब श्येत गेनुड। गो मेको आन कली साइक्ने मथुमु सम्म मेको आन नोले तरवार सोइक्नुड। इजीकीएल ३२:२४

38 गो आं नित्तीके एलामम सेल्लुड। मिनु मेकेर डा पिपी नु मेको आन ठेयब मुर आन कली साइक्नुडमी” दे परमप्रभु यावेमी देंत।

39 परमप्रभु यावेमी “मो हना यो गो मुल नोले डा नाक्ती एलाम डा मुर आन शोप लेशशा गेनुडमी” दे परमप्रभु यावेमी देंत।

## 50

### बेबीलोन आ पर्वम लोत्र

यसैया १३:-; यसैया १४:-

1 परमप्रभु यावेम बेबीलोन नु कल्दी आन रागी आ पर्वम येरमीया कली लोत्र पाप्तु। यसैया ४६:१

2 मार लोत्र पाप्तु देश हना “रागी रागी डा मुर आन दातेमी एको लोत्र नेपतो। छेदर पोक्शा नेल्ल आन कली नेंपाइशशा ठेयब सेंदा पा देनो। लोत्र का यो मखुइक्तो। बेबीलोन बुत। बेल देवता मुने दोक्त। मेरोदक देवता सुर्ता पाइब। मेको आन मूर्ति मुने दोक्नीम। मेको सुर्ता पाइनीम। बेल बेबीलोन सहर डा देवता बाक्ब।

3 उत्तर रे रागी का डा मुरपुकीम मेको कली लडाइ तोइनीम। मिनु मेको आ रागी श्येत्थ सेल्लनीम। मेकेर सुड मबाक्नीम। मुर नु जन्तु नेल्ल प्रोक्नीम।

4 मेको नाक्ती इस्राएल डा मुरपुकी नु यहूदा डा मुरपुकी काथा डाक्ना डाक्न परमप्रभु यावे, आन परमप्रभु कली माल्थ गाक्नीम। येरमीया ३१:९

5 मेकोपुकीमी 'सियोन गे लतीक लां ते बाक्बा?' दे हिल्लो पाइनीम। मिनु 'इन गाकशो लांन बाक्ब' देंनीम। मेकोपुकीमी गेना हना यो लीब मप्रेंतीके कबल पा परमप्रभु यावे कली जिम्मा गेंसीनीम। येरमीया ३२:४०

6 आं मुरपुकी जांमशो भेडा खोदेशो बाक्तेकम। मेको आन गोठलापुकीम मेको आन कली हेंथे गाकपाइशो बाक्तेकम। मिनु मेको आन कली डांडा मेर हिरपाइशो बाक्तेकम। मेकोपुकी डांडा पहाड सम्म हिरसाकम। मिनु आन गोठ प्रेंताकमे। येरमीया २३:१

7 मेको आन कली थिप्बपुकीम मेको आन कली नेक्तेकम। मिनु मेको आन जोरी सत्रुमी 'गो दोसी मनकी। मारदे हना मेकोपुकीमी परमप्रभु यावे कली पाप पांतेकम। मेको आन ठीक पा जोतीके नु आन किकी पिपी आन आस पशो, परमप्रभु यावे बाक्त' देंतेकम।

8 बेबीलोन रे प्रोक्कीन। कल्दी आन रागी प्रोनीन। मिनु क्यारश भेडा आन कली लां कोंडब बोका खोदेशो दुमीन। येरमीया ५१:६; यसैया ४८:२०

9 मारदे हना गो उत्तर रे ठेयब रागी रागी डा लडाइ पाइब आन कली बेबीलोन आ पबंम क्युकशो बाक्नुड। मेकोपुकी लडाइ पचा कली सासीनीम। मिनु मेको कली लडाइ तोइनीम। मेको आन ब्रा थाम्पा लडाइ पस जोक्ब मुर खोदेशो बाक्नीम। मेकोपुकी मोशा मलेलीम।

10 मोपा कल्दी रागी रोइक्या पुंडसीब। मिनु मेको कली रोइक्ब नेल्ल रूनीम" दे परमप्रभु यावेम देंत।

11 परमप्रभु यावेम "गे ग्येरसीनीनी। शुश ग्येरसीने। गे आं शोंप रोइक्ब बाक्नीनी। दांइ पाइब मगिकशो बी खोदेशो पा प्रेनीनी। गे शारा खोदेशो पा ग्रीनीनी।

12 इन ममा थाम्पा मुने दोक्ब। इन कली जरमेब शिशी मताइब। मेको इन रागी रागी आन दातेमी नेल्ल क्येडा आइक्च दुम्ब। मेको मुर मबाक्तीके सोत्रशो रागी नु गोरशो रागी दुम्ब।

13 परमप्रभु यावे आ चुरतीकेमी मेकेर सुइ मबाक्नीम। मेको थम श्येत्थ रागी दुम्ब। बेबीलोन रे पा गाक्ब मेको तशा हिंनीम। मिनु मेको आ श्येत तशा शुक्शी पाइनीम। येरमीया ५१:३७

14 गे लिब्रा आप्बपुकी, बेबीलोन आ एर ओंथ इन बाक्तीकेम राप्शा बाक्कीन। ब्रा कली का यो महेक्थु आप्पीन। मारदे हना मेकोमी परमप्रभु यावे कली पाप पाप्टु।

15 मेको आ एर ओंथ नेल्ल बाक्शा, ठेयब सेंदा पा ग्रीडीन। मेको इन कली जिम्मा गेंसीब। मेको आ बोल्यो दरवार एत्तेकम। मेको आ गारो प्रेंत्या पुंडसीशा दोक्तेकम। मारदे हना मेको परमप्रभु यावे आ क्येक्क लेशो बाक्ब। मेको कली क्येक्क लेत्तीन। मेकोमी अरु आन कली पाइशो खोदेशो पा मेको कली यो पतीन। प्रकाश १८:६

16 गे बेबीलोनम वांचेर शोक्ब आन कली खेरीन। मीशो अन्न रिक्ब आन कली खेरीन। खतम पोक्ब तरवारम पतीके नेल्ल आन कली आन आन खिं डा मुर आन बाक्तीके लेशशा लचा गेने। मेको नेल्ल आन आन रागी प्रोक्का माल्नीम।

17 इस्राएल गुप्सपुकीम खेदा पा एर ओंथ ब्रपाइशो भेडा खोदेशो दुम्शो बाक्ब। मेको कली डोंडती अस्सुर डा पिपम दाक्तु। मिनु नेल्ल क्येडा नोले बेबीलोन डा पिप नेबुकदरेसरमी मेको आ रुश नेल्ल नेक्तु" देंत।

18 मोपतीके मुर नेल्ल आन परमप्रभु यावे, इस्राएली आन परमप्रभुमी "गो बेबीलोन डा पिप नु मेको आ रागी कली अस्सुर डा पिप कली सजाइ गेशो खोदेशो पा, सजाइ गेनुड। २राजा १९:३५

19 गो इस्राएल कली आं कली योव्रतीकेम लेशशा चाक्नुड। मिनु मेको कारमेल नु बाशान मेर जोइब। एफ्राइम नु गिलाद डा पहाड मेर मेको आ शोत्रलु बेक्शो रूब।

20 मेको नाक्ती इस्राएल आ मरिंमशो पशो माल्शा कोत्रशा हना यो, मथिंसीब। यहूदा आ पाप माल्शा हना यो, मथिंसीब। मारदे हना गो आं प्रोंडशा वोइशो लीशो आन कली आन पाप पाफ गेतामी। येरमीया ३३:७-८

21 मेराथाइम रागी कली लडाइ तोने। पेकोद आ मुर आन कली लडाइ तोने। मिनु नेल्ल खतम पोक्कीन। गो इन कली अरेशो खोदेशो पा, नेल्ल पने" दे परमप्रभु यावेमी देंत।

22 लडाइ डा रेयके नु ठेयब खतम दुम्तीके आन नेक्था बाक्ब।

23 दोपा रागी नेल्ल डा घन जिक्शा फस दुम्मे, मोपा बेबीलोन रागी रागी आन दातेमी शुश हिंचा डा दुम्ब। येरमीया ५१:२०

24 बेबीलोन, गो इ कली ब्वारद का दाइक्ताकड। गे मतुइक्थु ग्याइक्चा पुंडसीनेवे। मिनु इ कली थिश्शा, ग्याइक्चा ताइतक। मारदे हना गे परमप्रभु यावे कली मरिम्शो पशो बाक्ते।

25 परमप्रभु यावेम आ या वोइक्तीक खिं रोक्तु। मिनु आ चुरशो डा या गुंडताक्व। मारदे हना मुर नेल्ल आन परमप्रभु यावेमी कल्दी आन रागीम गेय का पचा माल्ब।

26 मेको आ एर ओंथ नेल्ल रे लडाइ पथ जाक्कीन। मेको आ अन्न वोइक्तीक खिं रोक्कीन। मेको कली अन्न खोदेशो पा तेलीन। मेको कली मारेइ मलीशो खतम सेलीन। मेको के मारेइ मलील।

27 मेको आ सांढे ब्यफ नेल्ल सतीन। मेको आन कली क्योरचा कली लतीन। आबी, आबी, मेको आन नाक्ती जाक्त। मेको आन कली सजाइ गेतीक नाक्ती जाक्त।

28 मिनु परमप्रभुमी “नेनीन, बेबीलोन रे प्रोक्ब मुर नु मेकेर बाक्ब अर्को रागी रे प्रोक्शो मुरुम सियोनम ‘परमप्रभु यावे, आंइ परमप्रभुमी क्येक्क लेप्ब। आ खिं आ पर्वम क्येक्क लेप्ब’ दे नेल्लेम नेंचा डा पा शेंनीम।

29 बेबीलोनी आन कली लिब्रा आप्बपुकी ब्रेत्तीन। लिब्रा आप्ब नेल्ल आन कली ब्रेत्तीन। मेको आ एर ओंथ नेल्ल ताम्बु कीशा मुर आन कली तेक्कीन। मेकेर रे सुइ ब्रोंइचा मतामेक्ल। मेको आ पशो खोदेशो पा मेको कली क्येक्क लेत्तीन। मेकोमी पशो खोदेशो पा, मेको कली यो पतीन। मारदे हना मेकोमी इस्राएली आन का ला बाक्शो परमप्रभु यावे कली शुक्शी पाप्तु। येरमीया ५०:१५

30 मोपतीके मेको आ ठिटा मुरपुकी लां मेर गोल्नीम। मिनु मेको आ लडाइ पाइब नेल्ल खतम दुम्नीम” दे परमप्रभु यावेम देंत।

31 परमप्रभु, मुर नेल्ल आन परमप्रभु यावेमी “गो इ कली ठेयब लेशो दुम्तीके काइ मदाक्नुड। इ नाक्ती जाक्त। इ कली सजाइ गेतीक नाक्ती जाक्त।

32 ठेयब लेशो मुर दाइल पा गोल्ब। मेको कली पोक्ब सुइ मबाक्नीम। मिनु गो मेको आ सहरम मी सुइक्नुड। मेको मीम मेको आ एर ओंथ बाक्ब नेल्ल आन कली दाक्ब” देंत।

33 मुर नेल्ल आन परमप्रभु यावेमी “इस्राएल डा मुर नु यहूदा डा मुर श्येत गेचा नु दिप्चा पुंडसीनीम। मेको आन कली ग्याइश्शा लाइक्बपुकीम मेको आन कली लचा मगेनीम।

34 मो हना यो मेको आन कली श्येत रे प्रोंइब सक्ति पाइश्शो बाक्ब। मेको आ नें मुर नेल्ल आन परमप्रभु यावे बाक्ब। मेकोमी मेको आन कली आ सक्तिमी थमा पा वारच पाइब। मिनु रागी कली रिम्शो दुम्पाइक्ने चाप्ब। तन्न बेबीलोनम बाक्ब आन कली चहिं थुं नाइक्चा मगेब” दे परमप्रभु यावेमी देंत।

35 मिनु परमप्रभु यावेमी “कल्दी आन कली तरवार का जाक्त। बेबीलोनम बाक्ब नेल्ल आन कली, आन ठेयब मुर आन कली नु आन जोक्ब तुइक्ब मुर आन कली यो तरवार जाक्त।

36 मेको आ जादू कली यो तरवार का जाक्त। मोपतीके मेकोपुकी मूर्ख दुम्नीम। मेको आ लडाइ पाइब आन कली यो तरवार का जाक्त। मिनु मेको खतम दुम्नीम।

37 मेको आ शारा, आ बग्गी नु मेको आन दातेम बाक्ब अर्को रागी डा लडाइ पाइब आन कली साइक्चा कली तरवार जाक्त। मोपतीके मेकोपुकी मीश मुर खोदेशो दुम्नीम। मेको आ शोंप नेल्ल आन कली तरवार जाक्त। मेको नेल्ल रोइक्तीक दुम्ब। येरमीया ५१:३०

38 मेको आ ब्वाक्कु सोल्लचा कली काइ रेउ मयी। मारदे हना मेको शुश मूर्ति आन रागी बाक्ब। मिनु मेको आ देवी देवता आन पर्वम निप्स ग्राइश्शो खोदेशो दुम्ब।

39 मोपतीके बेबीलोन सहरम ब्वाकी डा जन्तु नु फरपुकी बाक्नीम। मिनु मेकेर ठेयब चिक्ब बास बाक्नीम। मेकेर मुल लेंशा नेल्ल पाला सम्म मुर मबाक्नीम।

40 मिनु सोदोम, गोमोररा नु मेको आस एर ओंथ डा गाउं आन कली लोकशो खोदेशो पा बेबीलोन सहरमी सुइ मबाक्नीम। मेकेर मुर मबाक्तीके दुम्ब” दे परमप्रभु यावेमी देंत। येरमीया ४९:१८; उत्पत्ती १९:२४-२५

41 कोव्रडीन, मुरपुकी उत्तर रे जाक्ना जाक्न बाक्नीम। शुश जात डा नु शुश पिप आन जोब बोक्शा डोन रागी रे जाक्नीम। येरमीया १:१४

42 मेकोपुकी लिब्रा नु तूतीक कुरशो, थम मरिम्शो पाइब नु शिशी मपाइक्ब बाक्नीम। मेको आन रेयके समुन्द्र ग्रीशो खोदेशो बाक्ब। मेकोपुकी शारा डोइश्शा जाक्नीम। मेको लडाइ तोचा कली आन बाक्तीकेम राप्नीम। बेबीलोन आ तमी, इ कली लडाइ तोचा कली जाक्नीम। येरमीया ६:२३

43 मिनु बेबीलोन डा पिपम मेको आन पर्वम लोव्र नंतु। मिनु आ थुं लुक्य लत। मेको सुत्केरी रोइ पशो मीश मुर खोदेशो पा सुर्ता पा हित।

44 यर्दन आ नेक्था डा ठेयब व्वाकी रे बस्तु योव्रतीकेम गुप्स जाक्शो खोदेशो पा गो मेको कली याम कामी मेको आ रागी रे गुंडनुड। गो सु कली सासन पचा कली योव्रडु, मेको कली गेनुड। आं खोदेशो सु बाक्बा? आं कली सुम अरेने चाप्बा डा? तेको गोठला आं डोंइती राप्ने चाप्बा डा? येरमीया ४९:१९

45 मोपतीके परमप्रभु यावेम बेबीलोन आ पर्वम पचा चिक्शो गेय नु कल्दी रागी डा मुर आन पर्वम मिम्शो दोदेशो बाक्बा, मेको नेनीन। थमा पा लाइक्चा पुंडसीनीम। बेबीलोन डा प्रुडग मुर आन कली यो कीशा लाइक्चा पुंडसीनीम। मेको आन बाक्तीक मेको तशा हिंब।

46 बेबीलोन कली ग्रामानु, मेको आन रेयकेम रागी खिंखि पाइब। मेको आन वाइ ब्रेशो रागी रागी डा मुर आन दातेमी नेंसीब।

## 51

### बेबीलोन खतम दुम्शो

1 मिनु परमप्रभु यावेमी “गो बेबीलोन नु लेब-कमाइ डा मुर आन पर्वम खतम सेल्ब फश गिवार कली सोइक्नुड। खतम सेल्ब फश गिवार कली यो खतम सेल्ब सोक्त देंसीब।

2 गो बेबीलोन कली क्राप्ब मुर सोइक्नुडमी। मेकोपुकीम बेबीलोन आ श्येत जतीक नाक्ती आ एर ओंथ नेल्ल रे जाक्शा, मेको आ रागी श्येत्थ सेल्नीम। येरमीया १५:७

3 लिब्रा आप्बम आ लिब्रामी ब्रा मचुइक्तल। मिनु लडाइ पाइबमी आ लडाइ डा वा मफेक्सेक्ल। मेको आ ठिटा मुर आन कली मप्रोनीन। मेको आ लडाइ पाइब नेल्ल आन कली सतीन।

4 मेकोपुकी कल्दी आन रागीम साइक्चा पुंडसीनीम। मेकोपुकी आ लां मेर गार दुम्शा गोल्नीम।

5 मिनु इसाएल नु यहूदा परमप्रभु, मुर नेल्ल आन परमप्रभु यावे रे मप्रोंइसीशो बाक्ब। मेको आन रागी इसाएली आन का ला बाक्शो परमप्रभु यावे कली पापम ब्रीशो बाक्ब। यसैया ५४:४; येरमीया ५०:२९

6 बेबीलोन आ दाते रे प्रोक्कीन। मुर नेल्ल आंम आंम गिम प्रोंइचा कली प्रोक्कीन। मेको आ दोसम पतीकेम गे मबेक्कीन। मारदे हना मेको परमप्रभु यावे आ क्येक्क लेत्तीक नाक्ती बाक्ब। मेकोमी मेको कली आ तचा माल्शो सजाइ गेब। येरमीया ५०:८; प्रकाश १८:४

7 बेबीलोन परमप्रभु यावे आ गुडम सुन के कचौरा का बाक्त। मेकोमी रागी नेल्ल डा मुर आन कली दुक्पाइक्तु। रागी रागी डा मुरपुकीम मेको आ अडगुर शांबु तूतेक्म। मोपतीके मेको रागी डा मुर निप्स ग्यशो दुम्तेक्म। प्रकाश १७:४; येरमीया २५:१५; प्रकाश १८:३

8 बेबीलोन याम कामी गोल्त। मिनु दुक्का दुक्का सेल्चा पुंडसाक्व। मेको आ पर्वम रोंका पने। मेको आ गारम खेक्चा कली खेक्तीक चाक्कीन। मो पशोनु, मेको साबा कों। यसैया २१:९

9 गोपुकीम बेबीलोन कली सापाइय्य वा। तन्न मेको मसाब। गो मेको कली प्रोंइतक। मिनु आंम आंम रागी लेत्तक। मारदे हना मेको आ निसाफ पशो सजाइ स्वर्ग सम्म जाक्दीश्शो बाक्ब। मेको सरीड सम्म बोक्शो बाक्ब।

10 परमप्रभु यावेमी आंइ ठीक पतीके कोइताक्व। जाक्कीन, मिनु इं परमप्रभु यावेमी मार पवा, मेको सियोनमी नेंपाइश्शा देंय।



11 इन ब्रा शेप्पीन। मिनु ब्रा कुरतीक प्रिदीन। परमप्रभु यावेम मादी आन पिप कली लडाइ पपाइवकु। मारदे हना मेकोमी बेबीलोन कली खतम सेल्चा कली मिम्ताक्व। मेको आ खिं आ पर्वम क्येक्क लेत्तीके बाक्व। यसैया १३:१७; येरमीया ५०:२८

12 बेबीलोन डा गारो आ डोंडती छेदर खुक्कीन। शुश कोव्रब वोतीन। खाल पाइब वोतीन। बाप्ब आन कली ठीक पा वोतीन। परमप्रभु यावेमी बेबीलोन डा मुर आन पर्वम आ मिम्शो पाप्तु।

13 गे शुश ब्वाक्कु आ नेक्था बाक्नेवे। इ शोंप शुश बाक्नीम। मुल इ नाक्ती जाक्त। इ ब्रोंडतीक नाक्त नुप्त। प्रकाश १७:१

14 मुर नेल्ल आन परमप्रभु यावेम आ नेम कसम जाप्तु। गो थमा पा सल्हा खोदेशो पा लडाइ पाइब मुर जाक्पाइशशा, इ रागी प्रिनुडमी। मिनु मेकोपुकीमी इ क्येडा ग्राशो आ पर्वम ठेयब सेंदा पा रेयके पाइनीम।

15 मेकोमी रागी कली आ सक्तिम सेल्लु। मेकोमी आ तुइक्तीकेम रागी कली वोइवकु। मेकोमी आ रूपतीकेम सरीड प्राक्तु। येरमीया १०:१२-१६

16 मेकोमी लोव्र पवानु, सरीडमी रेउ यिशा, गरड गुरुड पाइब। मेकोमी रागी आ सुर रे गोस्स पोक्व। रेउ नु काथ काथा चिला दाप्पाइक्व। मिनु फश आ बाक्तीक रे गुंडशा, फश पपाइक्व। बजन संग्रह १३५:७

17 मुर नेल्ल मूर्ख नु मजोक्व मतुइक्व बाक्नीम। सुन चेम्ब नेल्ल आन मूर्तिम पतीके मुने दोक्नीम। मारदे हना मेको आन सेल्शो मूर्ति सौक्त मपाइशशो जोल बाक्नीम।

18 मेको शोर गाक्शो बाक्नीम। मेको मुर आन मिम्शो ला बाक्नीम। मेको आन कली सजाइ गेशोन, मेकोपुकी खतम दुम्नीम।

19 परमप्रभु यावे मेको खोदेशो ममाइ। परमप्रभु यावे याक्व आ भाग बाक्व। मेको आन खोदेशो ममाइ। मारदे हना परमप्रभु यावे मारेइ मारेइ सेल्ब बाक्व। मिनु इस्राएली मेको आ मुर बाक्नीम। मेको आ नें मुर नेल्ल आन यावे बाक्व।

20 बेबीलोन, गे लडाइ पचा कली आं तुप्तीके नु लडाइ पतीक या बाक्नेवे। गो इ रे पा रागी रागी डा मुर आन कली तुप्तामी। गो इ रे पा राज्य आन कली खतम पोक्तामी। येरमीया ५०:२३

21 गो इ रे पा शारा नु शारा डोइक्व आन कली तुप्तामी। गो इ रे पा बग्गी नु बग्गी चलेब आन कली तुप्तामी।

22 गो इ रे पा वोंडश मुर नु मीश मुर आन कली तुप्तामी। गो इ रे पा खूशो नु ठिटा आन कली तुप्तामी। गो इ रे पा ठिटी नु ठिटा आन कली तुप्तामी।

23 गो इ रे पा गोठला नु मेको आ बगाल कली तुप्तामी। गो इ रे पा रू दोइब नु आन ब्यफ आन कली तुप्तामी। गो इ रे पा सरकार आ गेय पाइब नु हुकुम पाइब आन कली तुप्तामी।

24 गो इ डोंडती बेबीलोन नु कल्दी रागीम बाक्व मुर नेल्लेम सियोनम मरिम्शो पशो आ पर्वम क्येक्क लेत्तुड" दे परमप्रभु यावेम देत। येरमीया ५०:२९; अय्युब १:१७

25 परमप्रभु यावेमी "गे मारेइ मारेइ आन कली साइक्व डांडा, गो इ कली काइ मदाक्नुड। गे रागी नेल्ल खतम सेल्नेवे। गो आं गुड दिशा, इ कली रोंगु रे उड तोक्नन। मिनु कोक्त जेशो डांडा सेल्नन।

26 खिं डा सुर वोइक्चा कली इ रे पा फुल्लु का यो मलाइक्नीम। जग वोइक्चा कली यो इ फुल्लु मलाइक्नीम। तन्न गे गेना हना यो कली श्येत्थ रागी दुम्चा माल्नेवे" दे परमप्रभु यावेम देत।

27 मिनु परमप्रभु यावेमी "गे रागीम छेदर का खुक्कीन। रागी रागी आन दातेमी तुराही तपीन। मेको नु लडाइ पचा कली रागी रागी डा मुर आन कली ठीक सेलीन। राज्य आन कली बेबीलोन नु लडाइ पचा कली पोक्कीन। आरारात, मिन्नी नु अश्केनजमी बेबीलोन नु लडाइ पाइब आन ठेयब मुर का योव्रडीन। सल्हा आन हुल खोदेशो पा शुश शारा चाक्कीन। यसैया १३:३ उत्पत्ती १०:३

28 मेको नु लडाइ पचा कली रागी रागी डा मुर आन कली पोक्कीन। मादी आन पिप, मेको आन हुकुम पाइब, मेको आन ठेयब मुर नु मेको आन हुकुम पशो रागी नेल्ल डा मुर आन कली पोक्कीन" देत।

29 खिनु कुशा रागी खिंखि पाइब। मारदे हना परमप्रभु यावेम बेबीलोन कली श्येत्थ नु मुर मबाक्तीके सेल्लुड देशो लोत्र गाप्ब।

30 बेबीलोन डा लडाइ पाइबपुकीम लडाइ पचा प्रॉइतेक्म। मेको आन बोल्यो दरवारम बाक्नीम। मेको आन सक्ति जाम्त। मेकोपुकी मीश मुर खोदेशो दुम्तेक्म। मेको आन खिम मी सुइक्ने थुम्तेक्म। मेको आन लाप्चो डा आगलो जिक्शो बाक्नीम। येरमीया ५०:३७

31 लोत्र कुरबम अर्को लोत्र कुरब आन कली लाम गुम्नीम। मेकोपुकीमी बेबीलोन डा पिप कली “मेको सहर नेल्ल ग्रातेक्म।

32 मिनु खोला शोक्तीके ग्रातेक्म। जोरी सत्रु आन कली ओव्रचा मगेचा कली सेल्ल्यो तेक्तीक नेल्ल मी सुइक्ताक्मे। मिनु लडाइ पाइबपुकी शुश हिंशा वाम ग्याम दुम्तेक्म” देशा पिप कली लोत्र नेंपाइक्नीम।

33 मिनु मुर नेल्ल आन परमप्रभु यावे, इस्राएली आन परमप्रभुमी “बेबीलोन आ तमी दांड पतीक खला का खोदेशो दुम्ब। मेको दिप्चा पुंडसीब। इच्का नोले रिक्ची नाक्ती रीब पा जाक्ब” देत।

34 सियोनमी “बेबीलोन डा पिप नेबुकदरेसरमी आं कली दाक्ती। आं कली खतम सेल्लती। आं कली श्येत्थ गर खोदेशो सेल्लती। आं कली अजीडगरम खोदेशो पा दाक्ती। मिनु ब्रोत्रशो जचा थोत्रकम खोदेशो पा आ कोत्रज प्रिंताक्व। मिनु नोले आं कली ताइक्ताक्यी।

35 आं मुर आन कली साइशशो आ पर्बम बेबीलोन क्येक्क लेत्चा पुंडसीब” देत। सियोन डा यरूसलेममी “कल्दी रागीम बाक्ब मुरपुकीम ‘आं हुश आ क्येक्क लेत्चा पुंडसीनीम’ देंचा माल्नीम” देत।

36 मोपतीके परमप्रभु यावेमी “गो इ पो न बोक्नुड। गो इ कली गेशो श्येत आ क्येक्क लेत्नुड। गो मेको आ समुन्द्र सोत्रपाइक्नुड। आ ब्वाक्कु बुक्तीके यो सोत्रपाइक्नुड।

37 मिनु बेबीलोन खिं ब्रेशशा देल्लो, सिवार आन बाक्तीके, हिंचा डा नु शुक्शी पाइक्चा पुंडसीतीके नु मुर मबाक्तीक दुम्ब। येरमीया ५०:१३

38 मेकेर डा मुर नेल्ल गुप्स खोदेशो पा ग्रीनीम। मेकोपुकी गुप्स आन चाइक्ब खोदेशो पा डरर डरर पाइनीम।

39 नोले मेकोपुकी बोक्शा, मार मार माल्मेनु, गो मेको आन कली तूतीक खेत्नुड। मिनु गो मेको आन कली रिशशा ग्यारशा मपामे सम्म दुक्पाइक्नुडमी। मिनु गेना हना यो कली इप्नीम। मिनु गेनायो मसेंसीनीम” दे परमप्रभु यावेमी देत।

40 मिनु परमप्रभु यावेमी “गो मेको आन कली क्योरचा कली कीशा लाइशशो पाठा, सांड नु क्यारश खोदेशो पा चाक्नुडमी।

41 शेशाक सहर कली दोपा ग्राने चाप्मे? रागी नेल्ल डा ठेयब नु दारशो सहर ब्रुत। बेबीलोन दोपा रागी रागी आन दातेमी शुश हिंचा डा दुम्मे? शेशाक बेबीलोन कली अरु नें का बाक्ब। येरमीया २५:२६

42 समुन्द्र डोइशशा बेबीलोन कली सुम्तु। समुन्द्र आ ग्रीशो छालम मेको कली सुम्तु।

43 मेको आ सहरपुकी हिंचा डा दुम्तेक्म। सोत्रशो, गोरशो नु मुर मबाक्तीके दुम्तेक्म। मेको रे पा सुइ मगाक्नीम।

44 गो बेबीलोन डा बेल देवता कली सजाइ गेनुड। मिनु आ दाक्शो थोत्रक मेपाइक्नुड। मुल रागी रागी डा मुर मेकेर चोक्थ्री क्राक्थ्री पा मलाइक्नीम। बेबीलोन आ गागो ब्रेत्त। येरमीया ५०:२; यसैया ४६:१

45 आं मुरपुकी मेकेर रे गूशा पिने। गे नेल्ल ब्रोंइचा कली प्रोक्कीन। परमप्रभु यावे आ ठेयब पा गाइशशो रे प्रोक्कीन।

46 रागीम मारेइ रेयके नेंनीनु, इन थुं ग्येत्थ लुक्च मदुमीन। महिनीन। एको बर्सम खाल का डा रेयके नु अर्को बर्सम अर्को खाल डा रेयके नेंसीब। मेको रागीम हुश खाक्श पोक्शोनु, सासन पाइब कामी अर्को सासन पाइब कली जिचा तोशो रेयके बाक्ब।

47 गो बेबीलोन डा मूर्ति आन कली सजाइ गेनुडमी। मेको आ रागी नेल्ल मुने दोक्नीम। मिनु मेको आ मुर नेल्ल मेको आ दातेमी साइक्चा पुंडसीनीम। मोदेशो नाक्ती थमा पा जाक्ब।

48 मिनु नोले सरीड, रागी नु मेकेर बाकब नेल्लेमी बेबीलोन बुशो आ पर्वम ग्येरशा वाइ ब्रेत्नीम। मारदे हना मेको आन कली क्येक्क लेप्ब उत्तर रे जाक्नीम” दे परमप्रभु यावेम देंत। प्रकाश १८:२०

49 परमप्रभु यावेमी “इसाएली आन कली साइक्तीके बेबीलोन बुचा माल्ब। बेबीलोनम रागी डा मुर आन कली साइक्तीके बेबीलोन यो साइक्चा पुंडसीब।

50 गे तरवार रे ब्रोंइशा प्रोक्कीन। देश मपने। डोन रागीम बाक्शा, परमप्रभु यावे कली मिम्तीन। यरूसलेम इन थुंम वोतीन” देंत। भजन संग्रह १३७:५

51 मेकोपुकीमी “आंड कली शुक्शी पाइश्शो नेंशा, गो मुने दोक्तक। गो आंड कुल सुन्तक। मारदे हना परमप्रभु यावे आ खिंम अर्को रागी डा मुर जाक्शा ओव्रतेक्म” देंतेक्म।

52 परमप्रभु यावेमी “गो मेको आ रागी नेल्लेमी आन मूर्ति आन कली सजाइ गेनुडमी। मिनु मेकेर गार दुम्शो मुर हुकयी पाइनीम। मेको नाक्ती थमा पा जाक्ब।

53 बेबीलोन इर सरीड सम्म बोक्त हना यो, आ इर डा सहर बोल्यो सेल्लु हना यो, गो मेको कली खतम सेल्बपुकी सोइक्नुडमी” दे परमप्रभु यावेमी देंत। उत्पत्ती ११:४; यसैया १४:१३

54 परमप्रभु यावेम “बेबीलोन रे वाइ ब्रेश्शो सेंदा नेंसीब। कल्दी डा मुर आन रागी रे मारेइ मारेइ प्रेशो रेयके नेंसीब।

55 परमप्रभु यावेम बेबीलोन कली श्येत्थ सेल्ब। मिनु मेको आ ठेयब सेंदा सिक्सी पपाइक्ब। मेको आ छाल समुन्द्र खोदेशो पा रेयके पाइब।

56 बेबीलोन कली खतम पोक्ब जाक्ब। बेबीलोन डा लडाइ पाइबपुकी ग्याइक्चा पुंडसीनीम। मेको आन लिब्रा जिक्नीम। मारदे हना परमप्रभु यावे क्येक्क लेप्ब बाक्ब। मेकोमी आ पशो आ पा डा नेल्ल गेब। ब्यवस्था ३२:३९-४१

57 गो मेको आ सरकार डा गेय पाइब, जोक्ब तुइक्ब, मेको आ हुकुम पाइब, नु आ लडाइ पाइब नेल्ल आन कली दुक्पाइक्नुडमी। मिनु मेकोपुकी गेना हना यो कली इप्नीम। लेंशा मबोक्नीम” दे पिपम देंत। मेको पिप आ नें मुर नेल्ल आन परमप्रभु यावे बाक्ब।

58 मुर नेल्ल आन परमप्रभु यावेम “बेबीलोन डा ब्रेम्शो गारो दिंम दुम्ब। मिनु मेको आ लाइश्शो ठेयब लाप्चोपुकी मीम नेक्ब। मुरपुकी मोशा गेय पाइनीम। रागी रागी डा मुर आन श्येत पा पशो गेय नेल्ल मी कली ला दुम्ब” दे परमप्रभु यावेमी देंत। हबकुक् २:१३

59 परमप्रभु यावे आ लोव्र पाइब येरमीयामी माहसेयाह आ चच नेरीयाह आ तौ सेरायाह पिप आ गेय पाइब कली अरेप्टु। मिनु मेको यहूदा डा पिप सिदकीयाहम सासन पवा आ ४ बर्सम पिप नु बेबीलोन लशो बाक्त। येरमीया ३६:४

60 येरमीयामी बेबीलोनम जाक्चा चिक्शो श्येत आ पर्वम डा लोव्र कागज काम ब्रेक्ताक्ब। बेबीलोन आ पर्वम नेल्ल ब्रेक्ताक्ब। येरमीया ५०:१-५०,५८

61 मिनु येरमीयाम सेरायाह कली “गे बेबीलोनम जाक्दीनेनु, एको लोव्र नेल्ल पढेवो।

62 ‘परमप्रभु यावे, गे एको रागी कली खतम पोक्नुड’ देंतीनी। ‘एकेर मुर नु बी ब्यफ, क्यारश भेडा, मारेइ बास मबाक्चा डा पा श्येत्थ रागी सेल्लुड। एको गेना हना यो मुर मबाक्तीके दुम्ब’ देंतीनी” देनो।

63 मोपा एको कागज पढेने थुम्शा, फुल्लु काम फ्रेंशा युफ्रेटीस खोलाम ताइक्तो। प्रकाश १८:२१

64 मिनु “कागज ब्वाक्कुम गुम्शो खोदेशो पा बेबीलोन आं चाक्शो श्येत आ पर्वम गुम्ब। मेको गेनायो गूने मचाप्ब, देंचा माल्नेवे” देंत। मोपा येरमीया आ लोव्र नुप्त।

## 52

यरूसलेम खतम दुम्शो

येरमीया ३९:१-१०; २राजा २४:१८-२५-७; २इतिहास ३६:११-२१

1 सिदकीयाह पिप दुम्मेनु, २१ बर्स दुम्शो बाक्त। मिनु मेकोम यरूसलेममी ११ बर्स सासन पाप्तु। मेको आ ममा आ नें हामुतल बाक्त। मेको लिब्ना डा येरमीया आ तमी बाक्त।

2 मिनु मेकोम येहो-याकीममी खोदेशो पा परमप्रभु यावे आ डोंइती मार मरिम्शो बाक्मे, मेको पाप्तु।

3 मिनु यरूसलेम नु यहूदा डा मुरपुकीमी परमप्रभु यावे कली शुश गाइक्पाइक्तेकम। मोपतीके मेकोमी मेको आन कली आ डोंइती रे तिल्तु। मिनु बेबीलोन डा पिप सिदकीयाहम कली मटीव।

4 सिदकीयाहम सासन पवा आ ९ बर्स, १० महिना, १० नाक्त बेबीलोन डा पिप नेबुकदरेसरमी आ लडाइ पाइब नेल्ल कुरशा, यरूसलेम नु लडाइ पथ जाक्त। मिनु मेकोपुकीमी सहर आ लाडगा रे पुम्ताकम। सहर डा गारो डोइक्चा कली एर ओंथ डोइक्तीक सेल्लेकम।

5 मोपा पिप सिदकीयाहम सासन पवा आ ११ बर्सम सहर आ एर ओंथ नेल्ल रे पुम्ताकम।

6 मिनु ४ महिना डा ९ नाक्ती सहरम थम ठेयब अन्काल दुम्त। मिनु मेको सहर आ आगामी जचा कली मारेइ मबा।

7 मिनु सहर डा गारो प्रेत्तेकम। मिनु लडाइ पाइब नेल्ल प्रोक्तेकम। कल्दी डा मुरपुकी सहर आ एर ओंथ बाक्तेकम। मो हना यो मेकोपुकी पिप आ फल फुल रू डा गारो निक्शी आस दाते डा लाप्चो रे पा यूशा प्रोक्तेकम। मिनु मेकोपुकी अराबाह रागी गे लाम्तेकम।

8 तन्न कल्दी डा लडाइ पाइबपुकीमी पिप सिदकीयाह कली खेदा पाम्तेकम। मिनु मेको कली यरीको डा दिमम थित्तेकम। मेको आ लडाइ पाइब नेल्ल ब्रशा एर ओंथ दुम्तेकम।

9 मिनु मेको ग्याइक्चा पुंडसाक्व। मिनु मेकोपुकीमी पिप कली हमाथ रागी डा रिब्लामी बेबीलोन डा पिप आ डोंइती चाक्तेकम। मिनु मेकेर बेबीलोन डा पिपमी मेको कली आ सजाइ नेंपाइक्तु।

10 मेको रिब्लामी बेबीलोन डा पिपमी सिदकीयाह आ तौ आन कली मेको आ डोंइतीन साइक्तीमी। मिनु यहूदा डा ठेयब मुर नेल्ल आन कली यो रिब्लाम साइक्तीमी।

11 मिनु मेकोमी पिप सिदकीयाह आ मिक्च फेत्ताक्व। मिनु मेको कली कांसा के साडलोमी पाइक्ताकम। मिनु मेको कली बेबीलोनमी लाइशशा मबेकम सम्म चोक्शा वोइक्तु। येरमीया ३२:५

12 बेबीलोन डा पिप नेबुकदरेसरमी सासन पवा आ १९ बर्स ५ महिना १० नाक्ती पिप कली खाल पाइब आन कप्तान नेबुजरादान यरूसलेममी जाक्त।

13 मिनु मेकोमी परमप्रभु यावे आ खिं, पिप आ दरवार नु यरूसलेम डा खिं नेल्लेम मी सुइक्ताक्व। मेकोमी ठेयब खिं नेल्लेम मी सुइक्ताक्व।

14 मिनु पिप कली खाल पाइब आन कप्तान नु बाक्शो कल्दी डा लडाइ पाइब नेल्लेम यरूसलेम आ एर ओंथ बाक्शो गारो नेल्ल प्रेत्तेकम।

15 मिनु पिप कली खाल पाइब आन कप्तान नेबुजरादानमी नेल्ल आन क्येडा पुडग, सहरम प्रोंइशा वोइशशो मुरपुकी बेबीलोन डा पिप आ बाक्तीके प्रोक्शा जाक्दीशशो मुरपुकी नु लीशो मार, मार, सेल्स जोक्ब मुर आन कली ग्याइशशा लाइक्तीमी।

16 तन्न पिप कली खाल पाइब आन कप्तान नेबुजरादानमी रागी डा अडगुर रू नु अरु रूम गेय पचा कली, थम पुडग आन कली ला प्रोंइशा वोइक्तीमी।

17 कल्दीपुकीमी परमप्रभु यावे आ खिंम बाक्शो कांसा के थामपुकी, कांसा के ठेयब चिक्तीके बोस, मेको आ कांसा के नित्तीके लाइक्तेकम। कल्दीपुकीमी मेको नेल्ल प्रोल्ला, बेबीलोन लाइक्तेकम। येरमीया २७:१९-२२; १राजा ७:१५-३९; २राजा २५:१३-१७

18 मेकोपुकीमी बोसपुकी, बेल्लापुकी, सल्लो खोइक्तीक कांइची, अरु बोसपुकी, डाडु नु कांसा के बोस नेल्ल नु चढ़ेचा कली माल्लशो मारेइ मारेइ लाइक्तेकम।

19 पिप कली खाल पाइब आन कप्तानम सुन नु चांदीम सेल्लशो आइक्च लोटापुकी, कोइला कुर पतीक, बोसपुकी, बत्ती दातीकपुकी, डाडु, तूचा थोत्रक चढ़ेशोनु माल्तीक बोसपुकी नेल्ल लाइक्तु। १राजा ७:१५-३७

20 पिप सोलोमनम परमप्रभु यावे आ खिं कली सेल्पाइशशो ठेयब थाम निक्शी, कांसा के ठेयब चिक्तीके बोस मेको आगाम बाक्शो १२ ओटा कांसा के ब्यफ नु मेको आगाम बाक्शो नित्तीके बाक्तेकम। मेको आन कांसा नाक्ने मचाप्चा डा शुश बाक्त।

21 मेको थाम निम्फा १८, १८ कुबीत लाइशशो, १२, १२ कुबीत ब्रेम्शो नु आस थांइशो ४, ४ अडगुल बाक्ताक्व। मिनु आस आगा चहिं श्येत्थ बाक्ताक्व। कुबीत का ०.५ मिटर खोदेशो बाक्ब।

22 मेको आ तार कांसा के पिया पाइशो बाक्त। मेको आ पिया ५ कुबीत लाइशो बाक्त। मेको आ पिया कांसा के जाली नु दारीम आ बुटामी एर ओथ नेल्ल हिरशो बाक्त। मिनु अर्को थाम यो डोंइती डा खोदेंशो पा सेल्शो बाक्त।

23 मेको आस एर ओथ नेल्ल १६ ओटा दारीम बाक्तेकम। मेको आस एर ओथ नेल्ल डा जाली कली हिरशो दारीम सहे का बाक्तेकम।

24 मिनु पिप कली खाल पाइब आन कप्तानमी ठेयब चढेब सेरायाह, मेको आ नोले डा चढेब सेफन्याह नु लाप्चो खाल पाइब सां आन कली ग्याइशशा लाइक्तीमी।

25 मिनु मेकोमी सहरम मेना सम्म लीशो लडाइ पाइब आन कली कोव्रब कप्तान का नु पिप कली अर्ती गोब ७ जना मुर आन कली ग्याइशशा लाइक्तीमी। मेको रागीम लडाइ पाइब आन कली पुक्ब आन कप्तान आ ब्रेक्ब मुर नु सहरमी थिशो अरु ६० जना वोंइश मुर आन कली यो ग्याइशशा लाइक्तीमी।

26 मिनु मेको पिप कली खाल पाइब कप्तान नेबुजरादानमी मेको आन कली लाइशशा रिब्लामी बेबीलोन डा पिप आ बाक्तीकम चाक्तीमी।

27 मिनु बेबीलोन डा पिपम मेको आन कली हमाथ रागी रिब्ला सहरम साइक्तु। मोपा मेकोपुकी यहूदा आ रागी रे ग्याइशशा लाइक्चा पुंइसाकम।

28 मिनु नेबुकदरेसरमी सासन पवा आ ७ बर्सम ग्याइशशा लाइशशो मुरपुकी हिकशोनु, हजार सां २३ जना यहूदी बाक्तेकम।

29 मेकोमी सासन पवा आ १८ बर्सम यरूसलेम रे ८ सहे ३२ जना आन कली ग्याइशशा लाइक्तु।

30 मेकोम सासन पशो २३ बर्स दुम्मेनु, पिप कली खाल पाइब आन कप्तान नेबुजरादानमी ७ सहे ४५ जना यहूदी आन कली ग्याइशशा लाइक्तीमी। मिनु मेको मुर नेल्ल पा ४ हजार ६ सहे जना बाक्तेकम।

येहो-याकीन कली प्रोंइशो  
२राजा २५:२७-३०

31 यहूदा डा पिप येहो-याकीन कली ग्याइशशा लाइशशो ३७ बर्समी एवील-मेरोदक बेबीलोन डा पिप दुम्त। मेको आ सासन पशो १२ महिना २५ नाक्ती दुम्मेनु, मेकोमी यहूदा डा पिप येहो-याकीन कली चोक्तीक रे प्रोंइपाइक्तु।

32 मेकोमी मेको नु रिम्शो पा लोत्र पा बेबीलोनम आं नु बाक्शो पिप नेल्ल आन क्येडा ठेयब सेल्शा, मेको कली मान गेशा वोइक्तु।

33 मोपा येहो-याकीनमी आ जेल्लखानम फेक्तीक वा प्रुइशशा, आ लीशो नाक्ती नेल्ल पिप नु जशा बाक्शा पाप्तु।

34 बेबीलोन डा पिपमी येहो-याकीन कली नाक्त किंत किंत मेको मबेकम सम्म आ माल्लशो मारेड मारेड गेप्तु।

## बिलाप

**ब्रेक्ब मुर:** एको किताब येरमीयामी ब्रेक्शो बाक्ब।

**गेना ब्रेक्शो:** एको किताब ५८७-५८६ वि. सी. परमप्रभु यावे आ खिं नु यरूसलेम खतम दुम नोले ब्रेक्शो बाक्ब।

**मारदे ब्रेक्शो:** येरमीया आ सेल्शो बिलाप ५ ओटा कुम्सो बाक्नीम। मेको कुम्सोपुकीम मार लोत्र बाक्ब देशा हना:

१. डोंइती डा लोत्र यरूसलेम सहर वोंइश बेक्शो मीश खोदेशो दुम्शो बाक्ब।
२. आ नोले डा लोत्र परमप्रभु यावे आ निसाफ पचा आ पबंम बाक्ब।
३. नोले डा लोत्र ब्रेक्बमी आंम आ पबंम ब्रेक्ब।
४. नोले डा लोत्र लेंशा ठेयब श्येत आ पबंम बाक्ब।
५. मिनु नेल्ल क्येडा नोले डा लोत्र “परमप्रभु, गे लेत्चा गेयीनी” दे पुंडतीक बाक्ब।

यरूसलेममी “वारच पने” दे पुंडशो

1 मेको सहरम गिश श्येत्थ दुम्मे। डोंइती मेकेर शुश मुर बाक्तेकम। मेको आ वोंइश बेक्शो मीश मुर खोदेशो दुम्त। मेको डोंइती रागी रागी आन दातेमी ठेयब बाक्त। मेको रागी पिप आ तमी खोदेशो बाक्त। मुल मेको सहर वाइल खोदेशो दुम्त। येरमीया ५१:५

2 मेको नाक्दो हिशेक पा डाक्ब। आ प्रेक्क यिना यिन बाक्नीम। मेको आ दाक्शो मुर आन दाते डा सुइम मेको कली आ थुं बारपाइक्चा डा लोत्र मपाइनीम। आ वारच नेल्लेम मेको कली प्रोंइतेकम। मुल मेको आ जोरी सत्रु दुम्तेकम। भजन संग्रह ६९:२१

3 यहूदा श्येत जशा, ग्याइश्शा लाइक्चा पुंडसाक्ब। मुल श्येत पा गेय पाइब दुम्त। मुल मेको रागी रागी डा मुर आन दातेमी बाक्ब। नाइक्चा कली बाक्तीक मबा। आ कली खेदा पाइबपुकीमी मेको कली श्येतमी ग्याइश्शा लाइक्तेकम।

4 सियोन लतीक लां रोंका पाइनीम। मारदे हना सुइमी चाड मानेचा कली मेकेर रे मगाक्नीम। सहर डा ठेयब लाप्चो नेल्ल श्येत्थ बाक्नीम। आ चढेबपुकी हुकयी पाइनीम। आ मीश आल सुर्ता पाइनीम। मिनु सहरम श्येत जशो बाक्ब।

5 मेको आ जोरी सत्रु आ होत्रप दुम्तेकम। मेको आन माल्शो शुश ताइनीम। मारदे हना परमप्रभु यावेमी मेको आ शुश हेंथे पशो तशा, यरूसलेम कली श्येत गेप्तु। मेको आ आल ग्याइश्शा लाइक्चा पुंडसीशा, आन जोरी सत्रु आन डोंइती लाम्तेकम।

6 सियोन आ तमी रे पा आ मान पचा पुंडसीतीके नेल्ल लने थुम्तु। आ पिप आ तौपुकी जोतीकेम थिश्शो रोकोश खोदेशो दुम्तेकम। मेको बोल मपाइश्शो दुम्शा, आन कली खेदा पाइब आन डोंइती प्रोक्ना प्रोक्न बाक्नीम।

7 यरूसलेममी ठेयब श्येत जतीक नु सुर्ता पतीक नाक्ती जाक्चा क्येडा डोंइती आंम के बाक्शो शोंप नेल्ल मिम्ब। मेको आ मुर आन जोरी सत्रु आन गुइमी गेचा पुंडसीची ना सुइमी मेको कली वारच मपाम। आ जोरी सत्रुम मेको आ श्येत तशा शुक्शी पाम्तेकम।

8 यरूसलेममी ठेयब पाप पाप्तु। मोपतीके मेको शुक्शी पाइक्चा पुंडसाक्ब। डोंइती मेको कली मान पाइब नेल्ले मुल महिक्नीम। मारदे हना मेकोपुकीमी मेको कली शिश्ना ताम्तेकम। मेको आंमान हुकयी पा आ कुल खेइक्ब।

9 मेको आ ग्रॉग्रा दितिके आ गुनेमी केम्साक्ब। मेकोमी नोले डा नाक्त ममिम्त। मेको आ तशो श्येत हिंचा डा बाक्त। आ थुं बारपाइक्ब सुइ मबाक्म। मेकोमी “परमप्रभु यावे, आं श्येत कोवडीन। आं जोरी सत्रुमी आं कली ग्रातेकम।

10 आ जोरी सत्रुमी आ शोप नेल्ल रोडक्ताक्यीमी। गे मेको आन कली इन बाक्तीके खिंम ओव्रचा मगेतीनी हना यो, यरूसलेममी रागी रागी डा मुर इन खिं ओव्रचा ताम्तेकम। येरमीया ५२:१७-१९; ब्यवस्था २३:४

11 मेको आ मुर नेल्ल हुकयी पा, अन्न माल्ना माल्न गाकनीम। लेंशा बोल्यो दुम्चा कली आन शोप लेयनीम। परमप्रभु यावे, मुल आं कली कोव्रडीन। गो महिक्सीशो दुम्ती” देंती।

12 गे एको लां रे पा लाडब तशा, आन पर्बम मारेड ममिम्नीनी? एर ओंथ नेल्ल कोव्रडीन। आं श्येत क्येडा यो अरु हिंचा डा श्येत बाक्बा? परमप्रभु यावेमी आ शुश गाडक्तीकेमी आं कली मेको श्येत गेती।

13 मेकोमी इर रे मी सोडक्ताकव। मिनु आं रुश आगा ओव्रपाडक्ती। आं खोइल कली ग्याइल दाइशा रेप्पाडक्ती। आं कली आ डोंइती रे तिल्ली। मेकोमी नेल्ल नाक्त आं कली मुर मबाक्तीके नु बोल मपाइश्शो सेल्लती।

14 मेकोमी आं हेंथे पतीके जुवा खोदेशो सेल्लु। मिनु मेको आ गुडमी फ्रेंसाकव। मेको आं बला तारी शुश हेल्शो बाक्ब। मोपा आं बोल ग्युम्त। मिनु परमप्रभुमी आं कली आं ग्राने मचाप्चा डा मुर आन गुडमी गेती।

15 परमप्रभुमी आं दाते डा लडाइ पाडब नेल्ल आन कली प्रोंइतु। मुल मेकोमी आं कली वारच मपथु, आ ठिटा वोंइश मुर नेल्ल आन कली साडक्तु। परमप्रभुम अडगुर खाक्शो खोदेशो पा यहूदा डा कन्ने मीश आल, यरूसलेम कली खाक्शो बाक्ब। यसैया ६३:३

16 गो मार कली डाक्नुडा, मार कली आं प्रेक्क यीनीम देंशा हना, आं कली लेम्ब नु आं थुं बारपाडक्ब आ क्येडा डोन बाक्नीम। आं आल लने थुम्तेकम। मारदे हना आं जोरी सत्रु आं क्येडा बोल्यो बाक्तेकम।

17 सियोनमी पुंइचा कली आ गुड दिताकव। तन्न आ थुं बारपाडक्ब सुइ मबाक्म। परमप्रभु यावेमी “याकूब आ नेक्था डा मुर आ जोरी सत्रु दुम्चा माल्नीम” दे अरेप्टु। मिनु मेको आन दातेम यरूसलेम ग्रान्ना दिचा डा दुम्त। येरमीया १:८

18 परमप्रभु यावे ठीक पाडब बाक्ब। मारदे हना गो आ लोव्र काइ मटीब दुम्ती। तन्न गे जात जात डा मुर नेल्ल नेनीन। आं श्येत कोव्रडीन। आं मीश आल नु ठिटा वोंइश आल नेल्ल ग्याइश्शा लाडक्चा पुंइसाक्म। येरमीया ३:४२; येरमीया ५:१६

19 गो आं दाक्शो मुर आन कली ब्रेत्ताकड। तन्न मेकोपुकीमी आं कली प्रोंइतीमी। आं चढेब नु खाल्पा आन बोल लेप्पाइक्चा कली जचा थोवक माल्न माल्ना सहरम बेक्तेकम।

20 “परमप्रभु यावे कोव्रडीन, गो शुश श्येत जाता। गो इन देंशो मटीब दुम्तीके आं थुं चोती। आं थुं साप्पा सेक्बेर पाडब। लाडगाम तरवारमी साडक्ब। मिनु खिं आगाम बेक्तीक बाक्ब।

21 मुरपुकीमी आं हुकयी पशो नेंतेकम। आं कली थुं बारपाडक्ब सुइ मबाक्नीम। आं जोरी सत्रु नेल्लेमी आं श्येत जशो आ पर्बम नेंतेकम। आं कली मोदेशो दुम्शो तशा ग्येरसाक्म। गे इन देंशो नाक्त जाक्ल। मेकोपुकी यो आं खोदेशो पा श्येत जामेक्ल। येरमीया ४:२१

22 मेको आन मरिम्शो पशो नेल्ल इन डोंइती बाक्ल। मिनु गे आं हेंथे पशो आ पर्बम आं कली पशो खोदेशो पा मेको आन कली यो पतीन। गो शुश हुकयी पाडक्नुड। आं थुं लुक्च लत” देंत।

## 2

### सियोन सुर्ता पशो

1 परमप्रभु गाइश्शा, सियोन आ तमी कली मुने तोक्तु। इस्राएल आ दारस कली सरीड रे पा रागीमी तोक्तु। आ गाइश्शो नाक्ती आंम खोइल वोडक्तीक सियोन कली यो प्रेंताक्व। भजन संग्रह १३२:७-८

2 परमप्रभुमी शिशी मपथु याकूब आ बाक्तीक नेल्ल खतम सेल्लु। मोपा चुरशा यहूदा आ तमी आ गारो हिरशो सहर नेल्ल खतम सेल्लु। मेकोमी मेको राज्य नु आ सासन पाडब आन कली मान मताइब, आइक्च सेल्लु।

3 मेकोमी शुश चुरशा, इस्राएल डा सक्ति नेल्ल खतम सेल्लु। मेकोमी आ जोरी सत्रु आन डोंडती सियोन कली वारच पचा प्रोंडतु। मेको याकूब आ बाक्तीके आ एर ओंथ नेल्ल ग्राव गु दाक्ब मी खोदेशो दुम्त।

4 परमप्रभुमी सियोन आ जोरी सत्रु खोदेशो दुम्शा, आ लिब्रा कीतु। आ जोरी सत्रु खोदेशो दुम्त। आंइ दाक्शो नेल्ल आन कली साइवतु। परमप्रभुमी आ चुरशो मी खोदेशो पा सियोन आ तमी आ ताम्बु तारी मोइवतु।

5 मुल परमप्रभु सियोन आ जोरी सत्रु खोदेशो दुम्त। मेकोमी इस्राएल कली खतम सेल्लु। आ दरवार नेल्ल आन कली खतम पोवतु। आ गारो डा लाइशो खिं नेल्ल प्रेतु। मिनु यहूदा आ तमी कली शुश रोंका नु हिशेक पपाइवतु।

6 मेकोमी आंम ताम्बु कली रू डा कटेरा खोदेशो पा प्रेतु। मेकोमी आ बाक्तीके खतम सेल्लु। परमप्रभु यावेमी सियोनम चाड नु नाइक्तीक नाक्ती मानेतीक प्रोंडतु। आ शुश गाइशोम पिप नु चढ़ेब नेल्ल आन कली मुने तोक्तु। अय्युब २:१३; येरमीया ५:१२

7 परमप्रभुम आंम कली चढेतीक नु आ बाक्तीके निम्फा प्रोंडतु। मेको आन दरवार डा गारो जोरी सत्रु आन गुइमी गेपु। मोपा मेकोपुकीमी परमप्रभु यावे आ खिंमी चाड डा नाक्त खोदेशो पा रेयके पाप्तेक्म।

8 परमप्रभु यावेमी सियोन आ तमी आ गारो प्रेत्या कली मिम्ताक्व। मेको आ तारी पुक्तीके कीतु। मेकोमी खतम सेल्चा कली आ गुइ मतेक्ग। मेकोमी गारो नु आ बोल्यो सेल्लतीके निक्शी कली रोंका पपाइवतु। मिनु मेको कालेक्म ब्रेत्ताक्स। २राजा २१:१३

9 मेको आ टेयब लाप्यो खपीम दोक्तेक्म। मेकोमी आ आग्लो जिक्शा खतम पोवतु। मेकेर डा पिप नु आन तौ नेल्ल रागी रागी डा मुर आन दातेमी बाक्नीम। मेकेर लां कोंडब परमप्रभु यावे आ अरेशो मबाक्ब। मिनु परमप्रभु यावे आ लोव पाइबपुकीमी परमप्रभु यावे रे पा मारेइ लोव मताइनीम।

10 सियोन डा खाल्पा खपीम निश्शा, सिक्सी पा बाक्नीम। मेकोपुकीमी आन पियामी फुरक फुइसीनीम। मिनु भाडग्रा फेक्शा बाक्नीम। यरूसलेम डा मीश आलपुकीमी आन पिया खप सम्म बाप्पाइशो बाक्नीम।

11 गो डाक्ना डाक्न बाक्नुड। आं थुं चोइब। आं थुं खाइक्ब। मारदे हना आं मुर खतम दुम्तेक्म। आल नु दूध तूब आलपुकी सहर डा लॉम शोव्रलु बेक्नीम।

12 मेकोपुकीमी आन ममा आन कली “जचा तूचा थोव्रक ते बाक्म” दे हिल्लो पाइनीम। मेकोपुकी सहर डा लॉम गार दुम्शो लडाइ पाइब खोदेशो पा थाइनीम। मिनु आन ममा आन थुकुम बेक्नीम।

13 ए यरूसलेम आ तमी, गो इ पर्वम मार देंडा? गो इ कली मार नु थापुतु? ए सियोन आ कन्ने तमी इ थुं बारपाइक्चा कली इ कली मार नु थापुतु? इ श्येत समुन्द्र खोदेशो पा टेयब बाक्ब। सुइम इ कली सापाइक्ने मचब।

14 इ परमप्रभु यावे आ लोव पाइब आन लोव्र नेल्ल जोल नु शोर गाक्शो बाक्तेक्म। मेकोपुकीमी इ कली रिम्शो दुम्ल, दे इ मरिम्शो पशो आ पर्वम लोव्र मपाम। तन्न मेकोपुकीमी इ पर्वम पशो लोव्र नेल्ल जोल नु दूली लां कोंडब बाक्त। येरमीया १४:१४-१६; येरमीया २३:१६-२२

15 इ नेक्था रे पा लाइब नेल्लेमी इ कली तशा शुक्शी पाइनीम। यरूसलेम आ तमी तशा शुक्शी पा आन पिया हिम्नीम। मेकोपुकीमी “एको सहर कली नेल्ल क्येडा दारशो नु रागी डा नेल्ल क्येडा दाक्शो सहर देंनीमी, ममाइ डा?” देंनीम। भजन संग्रह ४८:३; इजीकीएल १६:१४

16 इ जोरी सत्रु नेल्लेमी इ पर्वम मरिम्शो लोव्र पा शुक्शी पाइनीम। मेकोपुकीमी आन गाइक्तीकेमी “गो मेको कली खतम सेल्लतक। एको नाक्ती कोव्रचा कली रिम्ताक्क। मुल गो ताइतक” देंनीम।

17 परमप्रभु यावेमी मार मिम्ता नु डोंडती मार पाइनुड देंमे, मेको पापुतु। साइ डोंडती हिंच कोंइशा देशो लोव्र मुल पापुतु। मेकोमी शिशी मपथु, नेल्ल खतम सेल्लु। मिनु इ जोरी सत्रु आन कली इ पर्वम ग्येरपाइवतु। इ जोरी सत्रु आन सक्ति टेयब सेल्लु।



18 गे सियोन आ तमी, आ गारो परमप्रभु कली ठेयब सेंदा पा पुनो। इ प्रेक्क खोला खोदेशो पा नाक्दो नाक्त यिपतो। याम का यो मनाइसो। शुश डाक्को।

19 बोक्को। नाक्दो डाक्शा पुनो। खाल पाइब आन गेय पची ना यो मो पावो। इ थुं डा श्येत परमप्रभु आ डोंइती ब्वाक्कु खोदेशो पा लुक्तो। लांमी बाक्ब इ शोत्रलु बेक्शो आल आन परबंम इ गुड परमप्रभु गे पोक्शा पुनो।

20 “परमप्रभु यावे कोव्रडीन। गे सु कली ओदेशो पा श्येत गेनी। मार मीश मुरपुकीमी आंम आल आन कली ब्वचा माल्नीमी? मार इन कली चढेब नु इन लोत्र पाइबपुकी इन बाक्तीकेमी साइक्चा पुंडसीचा माल्नीमी? ब्यवस्था २८:५३-५७; येरमीया १९:९

21 ठिटा नु खाल्पापुकी लांम गोल्लो बाक्नीम। आ ठिटी मीश मुर नु ठिटा वोंइश मुर तरवारमी साइक्चा पुंडसाक्म। गे इन गाइश्शो नाक्ती मेको आन कली शिशो मपाइक्थु साइक्तीनी।

22 गे एर ओंथ डा आं जोरी सत्रु आन कली चाड मानेचा कली खोदेशो पा ब्रेत्ताक्नी। परमप्रभु यावे आ गाइश्शो नाक्तीमी सुइ मुर प्रोक्शा ब्रोंइचा मताइनीम। गो आं थिशो नु कोल्पाइश्शो आल आन कली आं जोरी सत्रुमी साइक्तेक्म” देंती।

### 3

#### मुर आन परबंम रोंका पशो

1 परमप्रभु आ चुरशोमी आं कली कोक्केम तुप्ती।

2 मेकोमी आं कली खेदा पा छेडछेड रे छिडछिडमी गाक्पाइक्ती।

3 मेकोमी नाक्त कित कित आं कली श्येत गेना गेन बाक्ब।

4 आं रां नु कुशुल नेल्ल सोव्रपाइक्ती। मिनु आं रुश जिक्तु।

5 मेकोमी आं कली सुर्ता पतीक नु श्येत जतीकेम पुम्शा गिल्पाइक्ती।

6 मेकोमी साइ नेसी डा बेक्शो मुर आन कली खोदेशो पा आं कली छिडछिडमी बाक्पाइक्ती।

7 मेकोमी आं कली प्रोक्ने मचबल, दे चोक्ती। आं कली हेल्शो साडलोमी पाइक्ताक्की।

8 गो “वारच पाइय्नीनी” दे शुश ब्रेत्ती। तन्न आं ब्रेश्शो नेशा यो सिकसी पा बाक्त। भजन संग्रह २२:३; भजन संग्रह ६९:४

9 मेकोमी आं लां ठेयब फुल्लुमी तेक्तु। मिनु आं लां हिरशो सेल्लु।

10 मेको ग्राम्चा कली बाप्शा बाक्शो वां खोदेशो बाक्ब। मिनु खुइश्शा बाप्शा बाक्शो गुप्स खोदेशो बाक्ब।

11 मेकोमी आं कली आं लां रे पा लाइश्शा, बेदर क्दर पोक्ती। मेकोमी आं कली सुइ मपाइश्शो सेल्लु।

12 मेकोमी आ लिब्रा कीशा, आं कली आप्ती।

13 मेको आ ब्रामी आं लुडगीर ख्रित्ताक्की।

14 आं मुर नेल्ले आं परबंम रिर्त्नीम। मेकोपुकी नाक्त कित कित आं परबंम शुक्शी पा कुम्सो पाइनीम। अय्युब ३०:९

15 मेकोमी आं थुं खाइक्पाइश्शा, आं कली कशो तूचा थोत्रक तूपाइक्ती।

16 मेकोमी आं कली फुल्लु जपाइश्शा, पुलुमी निप्पाइक्ती।

17 गो थुं नाइश्शा बाक्चा मताइक्नुड। ग्येरशा बाक्चा मार बाक्मे, मेको प्रेंताक्ड।

18 मोपतीके गो “आं दारस नेल्ल जाम्शा लत। गो परमप्रभु यावे रे ताइनुड, दे आस पशो यो नेल्ल जाम्शा लत” देंती।

19 आं श्येत आ परबंम मिम्तीके नु आं खिं मबाक्तीके खाइल खोदेशो पा कशो दुम्ती।

20 गो मेको गेना हना यो मिम्नुड। मोपतीके आं थुं लुक्च लत।

21 तन्न गो परमप्रभु आ लोत्र फ्रुक्शा, आ लां कोव्रनुड।

22 परमप्रभु यावे आ गेना हना यो दाक्तीक गेनायो मनुप्ब। आ शिशो गेनायो मनुप्ब। नेहेम्प्याह ९:३१

23 मेको सुनी कुस कुस नक दुम्शो बाक्ब। इन देशो गेना हना यो थमा बाक्ब।

24 आं थुंमी “परमप्रभु यावे आं भाग बाक्ब। मोपतीके गो मेको कली आस पाइनुड” देंती। भजन संग्रह १६:५; भजन संग्रह ३:२६

25 परमप्रभु यावेमी आ कली रिम्ब आन कली रिम्शो पाइब। सुमी मेको कली माल्नीमी, मेको आन कली रिम्शो पाइब।

26 सिक्सी पा परमप्रभु यावे आ श्येत रे प्रोंइतीके रिम्चा रिम्शो दुम्ब। रोमी ८:२५

27 ठिटा बाक्शो ना आंम जुवा कुरचा रिम्शो दुम्ब।

28 परमप्रभुमी मुर कली आ का ला सिक्सी पा बाक्चा गेप्टु हना, मेको कली रिम्शो दुम्ब।

29 मुरुमी आ शोत्र खपीम वोदल। मोपा मेको के आस बाक्बा कों?

30 मेको आ चोत्रचो राप्चा गेशा, शुश शुक्शी पाइक्चा पुंडसीब दुम्ब। मती ५:३९

31 परमप्रभुमी मुर आन कली आ डोंइती रे गेना हना यो मतिल्लब। यसैया ५४:८

32 मेकोमी श्येत गेप्टु हना यो, लेंशा शिशी पाइब। मेको आ गेना हना यो दाक्तीक थम ठेयब बाक्ब।

33 मारदे हना मेकोमी सुइ मुर आन कली श्येत गेचा मदाक्ब।

34 रागी डा जेल्खानम चोक्चा पुंडसीशो नेल्ल आन कली खोइलीमी दिन्मीम।

35 नेल्ल क्येडा ठेयब आ डोंइती मुर आन कली ठीक निसाफ मगेथु, दूली पाइनीम।

36 मुर आन कली दूली निसाफ पाइनीम। परमप्रभुमी मेको नेल्ल मताइबा डा?

37 परमप्रभुम अरेंशो गेय सुमी अरेने नु पपाइक्ने चाप्बा डा? यसैया ४५:७; आमोस ३:६

38 मार नेल्ल क्येडा ठेयब आ शोत्र रे रिम्शो नु मरिम्शो लोत्र मयूबा डा?

39 मारदे मुरुमी आंम पाप आन पबंम सजाइ तामेनु, गन गन पाइनीमी?

40 गो आंम कली नाक्शा कोत्रशा, परमप्रभु यावे गे लेत्नय।

41 गो आंइ थुं नु गुइ स्वर्ग डा परमप्रभु गे पोक्व।

42 गोपुकीमी हेंथे गाक्शा, इन देंशो काइ मटिक। मिनु गे आंइ कली माफ मगेनी। भजन संग्रह १०६:६

43 गे चुरशा आंइ कली खेदा पाइतीनी। काइ शिशी मपथु साइक्तीनी।

44 आंइ पुंडशो इन बाक्तीक मजाक्चा डा पा, गे गोस्सुमी गिल्साक्नी।

45 गे आंइ कली शुश जात डा मुर आन दातेमी ग्रान्रा दिशो सेल्लतीनी।

46 आंइ जोरी सत्रु नेल्लेम आन शोत्र रोक्शा शुक्शी पाम्तेक्म।

47 शुश हिंचा डा मरिम्शो दुम्तीक आंइ तार जाक्त।

48 आं मुर नेल्ल खतम दुम्शो तशा, गो शुश डाक्ती।

49 गो डाक्स डा डाक्स बाक्नुड। नाइक्चा मताइनुड।

50 परमप्रभु यावेमी स्वर्ग रे पा उइ मकोत्रडा सम्म मो पाइनुड। भजन संग्रह १०२:२०-२१

51 आं सहर डा मीश आल आन कली मरिम्शो दुम्शो तशा आं थुं खाइक्ती।

52 आं जोरी सत्रुमी आं कली मोशीन चिक्ब कली खोदेंशो पा सिखार ग्यारतेक्म।

53 मेकोपुकीमी आं कली सेसीन खाल्टामी ताइक्ताक्वीमी। आं कली फुल्लुमी यो आप्तीमी।

54 ब्वाक्कुम आं पिया सम्म सुम्ती। मिनु गो “मुल आं ब्रोंडस ओशोन बाक्माक्त।

55 परमप्रभु यावे, शुश लुक्च लशो खाल्टा रे पा गो इन नें थोवता।

56 गे आं थोशो लोत्र नेंतीनी। आं कली प्रोंइचा कली आ थोशो लोत्र नेनीन। इन नोफा मसुने। तन्न

आं कली श्येत रे प्रोनीन।

57 गो इन कली थोडानु, गे आं नेक्था जाक्तीनी। मिनु आं कली ‘महिनो’ देंतीनी।

58 परमप्रभु गे आं कली वारच पाइक्तीनी। मिनु बेक्चा रे प्रोंइतीनी।

59 परमप्रभु यावे, गे आं कली पशो मरिम्शो नेल्ल ताइतीनी। आं कली निसाफ गेयीनी।

60 मेकोपुकीमी आं कली मरिम्शो पचा कली सल्ला पशो नेल्ल ताइतीनी।

61 परमप्रभु यावे, गे मेको आन आं कली हिंच कोइशा पशो लोत्र नेल्ल नेंतीनी।

62 मेकोपुकी नेल्ल नाक्त आं पबंम खुइश्शो लोत्र पा, नोफा मुइक्मुम्तेक्मे।

- 63 मेकोपुकी निस्सामानु, बोक्मानु, आं पर्वम शुक्शी पा कुम्सो पाइनीम। येरमीया ३:१४  
 64 परमप्रभु यावे, मेको आन पशो कोव्रशा, मेको आन कली क्येक्क लेत्तीन। येरमीया १:२१; भजन संग्रह १३७:८; १पत्रुस २:२३; १पत्रुस ३:९  
 65 मेको आन थुं सुम्शा गेन। इन सराप मेको आन कली रल।  
 66 मेको आन कली गाइशशा खेदा पन। परमप्रभु यावे, सरीड आगा रे मेको आन कली खतम पोक्कीन” देती।

## 4

### सियोन कली सजाड

- 1 सुनमी आं दारस नेल्ल साम्तु। क्येख सुन मदारशो दुम्त। शुश क्येट लाइब हीरा नेल्ल लां मेर फ्राइसीशो बाक्नीम।  
 2 सियोन आ दाक्शो आलपुकी, डोंइती सुन खोदेशो मिम्शो बाक्तेक्म। मुल खप के ग्योंब खोदेशो दुम्तेक्म।  
 3 सिवारैम आन चाइक्ब आन कली दूध तुंडनीम। तन्न आं मुरपुकी काइ मरिम्शो दुम्तेक्म। मेकोपुकी गोरशो रागीम बाक्ब ठेयब चिक्ब खोदेशो दुम्तेक्म। अय्युब ३०:१४-१६  
 4 दूध तूब आल आन लें शुश तूतू दाक्शा, आन कुंकुमी खोक्ताक्व। आलपुकीमी जचा थोव्रक पुंडनीम। तन्न सुइमी मेको आन कली मारेइ मगेनीम।  
 5 ब्रोव्रशो ब्रोव्रशो जाइबपुकी मुल लां मेर बेक्नीम। दारशो वासी फेक्शा कोल्शो मुल पुलु ताइक्तीकेम बाक्नीम।  
 6 मारदे हना आं मुर आन कली गेशो सजाड सोदोम कली गेशो सजाड क्येडा ठेयब बाक्त। मेको कली याम कामीन लोक्या पुंडसाक्व। उत्पत्ती १८:२०; उत्पत्ती १९:२४-२५  
 7 मेकेर पिप आ तौपुकी फु नु दूध क्येडा बुश बाक्तेक्म। मेको आन रां मानीक हीरा क्येडा लल बाक्तेक्म। मेको आन चां नीर हीरा खोदेशो बाक्तेक्म।  
 8 मुल मेको आन रां कुकी क्येडा क्येर दुम्तेक्म। मेको आन कली लां मेर यो सुइमी मतुइक्नीम। मेको आन कुशुल रुशेम केप्शो बाक्ब। मेकोपुकी शी खोदेशो पा सोव्रशो बाक्नीम।  
 9 जचा मतथु शोव्रलु पा बेक्बपुकी क्येडा तरवारमी क्योरशा साइक्चा पुंडसीबपुकी ग्येरसीशो बाक्नीम। रू डा फल मथिक्थु, मेकोपुकी सोव्रशा लाइनीम।  
 10 ब्रेम्शो थुं पाइशशो मीश मुरपुकीमी आंम आन आल क्येम्तेक्म। मेको आन जचा थोव्रक दुम्त। गो आ मुर आन कली खतम सेल्टीके मोदेशो दुम्त। येरमीया २:२०  
 11 परमप्रभु यावेमी आ चुरशो नेल्ल कोइताक्व। मेकोमी आ हिंचा डा पा गाइशशो नेल्ल कोइताक्व। मोपा सियोनम मी सुइक्ताक्व। मिनु मेकेर डा जग नेल्ल दाक्तु।  
 12 आ जोरी सत्रु यरूसलेम डा ठेयब लाप्चो रे पा ओव्रनीम, देशो रागी नेल्ल डा पिप नु मेकेर बाक्ब मुर सुइमी यो थमा सुइक्ने मचबेम।  
 13 परमप्रभु यावे आ लोव्र पाइब आन पाप नु चढेब आन मरिम्शो पशो आन पर्वम मो दुम्शो बाक्त। मेकोपुकीमी सहर आ दातेम ठीक पाइब मुर आन कली हुश खाक्श पोक्तेक्म।  
 14 मेकोपुकी मिक्च मताइब खोदेशो पा लां मेर हिरसाक्म। मेकोपुकी हुश लुम्सीशो बाक्तेक्म। मेको आन वा सुइम मथिचा डा बाक्त।  
 15 मुरपुकीमी मेको आन कली “लने, ए ग्रांरा दिशो मुर आंइ कली मथिने” दे ग्रीनीम। मोपतीके मेकोपुकी प्रोक्ब नु हिरब मुर दुम्तेक्म। रागी रागी डा मुरपुकीमी “मुल मेको गोपुकी नु बाक्चा मताइनीम” देतेक्म। लेवी १३:४५  
 16 परमप्रभु यावेमी मेको आन कली मोपा ब्रपाइक्तीमी। मुल लेंशा मेको आन कली शिशी मपाइक्ब। सुइमी चढेब आन कली मान मपामे। खाल्पा आन कली यो महिक्गेम। येरमीया २:६; येरमीया ५:१२; लेवी १९:३२

17 वारच पाइब जाक्बा, कों देशा लां कोव्रशा मिक्च चोप्टु। रागी कामी आंइ कली वारच पाइबा कों, दे कोव्रशा बाक्तक। तन्न मेकोमी आंइ कली प्रॉइने मचब।

18 मुरपुकीमी आंइ नोले खोइक्तेक्म। मोपतीके गो आंइ लांमी गाक्ने मचाप्क। आंइ बेक्तीक नाक्ती जाक्त। आंइ नाक्त नुपुशो बाक्तेक्म। गो बेक्चा चिक्तक।

19 आंइ कली खेदा पाइबपुकी सरीडम बेरब ककाकुली क्येडा यो रीब पा जाक्तेक्म। मेकोपुकीमी आंइ कली पहाडम खेदा पाम्तेक्म। गोरशो रागीमी बाप्शा बाक्तेक्म।

20 मेकोपुकीमी परमप्रभु यावे आ तेल लुक्शो, आंइ कली ब्रॉइचा गेब कली ग्याइक्ताक्म। मेको आ पर्बम गोपुकीमी “मेको आ वांकुम रागी रागी डा मुर आन दातेम बाक्नीकी” दे मिम्शो नकी।

21 एदोम आ तमी ग्येरसो। गे ऊज रागीम बाक्नेवे। तन्न गे यो मेको श्येत डा कचौरा तूचा माल्नेवे। गे दुक्नेवे। मिनु शिन्ना सेल्सीनेवे। येरमीया ३:६४; भजन संग्रह १३७:७; येरमीया २५:१५,२१

22 सियोन आ तमी इ हेंथे गाक्शो डा सजाइ नुप्त। मेकोमी इ कली ग्याइश्शा लाइश्शो रागी रे गुंडब। तन्न एदोम आ तमी, इ हेंथे गाक्शो डा सजाइ ताइनेवे। मेकोमी इ पाप कोंइब। यसैया ४०:२; यसैया ३४:८-१०; इजीकीएल ३५:१४-१५

## 5

शिशी पन, दे प्रार्थना पशो

1 मिनु “परमप्रभु यावे, गो आंइ कली मार दुम्शो बाक्बा, मेको मिम्तीन। आंइ कली मरिम्शो पशो कोव्रडीन।

2 आंइ थेरशो रू अर्को रागी डा मुर आन के दुम्त। आंइ खिं यो अर्को रागी डा मुर आन के दुम्तेक्म।

3 गोपुकी रोम रोइक्च दुम्तक। आंइ ममा वोंइश बेक्शो मीश मुर खोदेशो दुम्तेक्म।

4 गोपुकीमी तूचा ब्वाक्कु यो ग्याप्चा माल्नीकी। शी यो ग्याप्चा माल्नीकी।

5 गोपुकी जुवा लाप्शो खोदेशो पा आंइ कली खेदा पाइनीम। गोपुकी दशो बाक्नीकी। तन्न नाइक्चा मताइनीकी। प्रस्थान २०:५; येरमीया ३१:२९

6 गो इजीप्त नु अस्सुर रागी नु जचा थोव्रक तचा कली सल्ला पाइतक।

7 आंइ किकी पिपीमी पाप पाम्तेक्म। मिनु बेक्तेक्म। गोपुकी मेको आन हेंथे पशो राइतक।

8 वाइलपुकीमी आंइ कली हुकुम पाइनीम। आंइ कली मेको आन गुइ रे पा प्रॉइब सुइ मबाक्नीम।

9 गोपुकीमी आंइ जचा थोव्रक बेक्चा डा गोरशो रागीम लशा, चाक्चा माल्नीकी।

10 गो शोव्रलु बेक्तीके आंइ कुशुल चुप्लु खोदेशो पा होश दुम्त।

11 सियोनम मीश मुर आन कली बिथोलो पाइनीम। यहूदा सहरम कन्ने मीश आल आन कली बिथोलो पाइनीम।

12 मेकोपुकीमी सासन पाइब आन कली क्युक्शा साइक्तेक्म। खाल्पा आन कली मान मपामे। २राजा २५:१९-२१

13 ठिटापुकीमी श्येत पा यात हिल्चा माल्नीम। वोंइश आलपुकीमी शी कुरशा गोल्चा चिक्शा गाक्नीम।

14 खाल्पापुकी सहर डा ठेयब लाप्चोमी गुम्शा बाक्चा प्रॉइतेक्म। मिनु ठिटापुकीमी बाजा ताप्चा प्रॉइतेक्म।

15 आंइ थुं रे पा ग्येरशा बाक्तीक जाम्त। गो आंइ सिल पतीक नेल्ल रोंका पतीके दुम्त।

16 सिरपेच आंइ पिया रे दोक्त। आबी, गो पाप पाइतक। येरमीया १३:१८

17 मोपतीके आंइ थुं खाइक्त। मिनु आंइ मिक्च ब्रा ब्रा दुम्त।

18 सियोन डांडाम श्येत दुम्त। मेको सिवार आन बाक्तीके दुम्त।

19 तन्न गे, परमप्रभु यावे गेना हना यो सासन पाइनीनी। इन सासन पतीके नेल्ल पाला सम्म लीब।

20 गे मारदे आंइ कली प्रेंदीनी? गे मारदे आंइ कली इश डा नाक्त सम्म प्रॉइनी?

21 परमप्रभु यावे, आंइ कली इन गे लेप्पाइक्की। मिनु गो थमा पा इन गे लेत्तीकी। आंइ नाक्त डोंइती डा खोदेशो सेलीन। भजन संग्रह १२६:

22 गे आंइ कली थमा पा मप्रोंइशो बाक्तीनी हना नु आंइ तशा शुश मगाइशो बाक्तीनी हना, मोदेशो दुम्ल” दे पुंडतक ।

## इजीकीएल

**ब्रेक्ब मुर:** साइ रे एको किताब इजीकीएल आ ब्रेक्शो बाक्ब देंनीम।

**गोना ब्रेक्शो:** ६२० रे ६०० बि. सी. आस दातेम ब्रेक्शो बाक्ब।

**मार ब्रेक्शो:**

१. परमप्रभुमी यरूसलेम खतम दुम्या क्येडा डोंइती लोत्र पशो इजीकीएल १:- २४:-
२. परमप्रभुमी यरूसलेम आ नेक्था डा रागी आन पर्बम लोत्र पशो इजीकीएल २५:- ३२:-
३. परमप्रभुमी यरूसलेम खतम दुम नोले लेमशा लोत्र पशो इजीकीएल ३३:- ४८:-

इजीकीएलम छेडछेड तशो

इजीकीएल १०:-

1 मिनु ३० बर्स डा ४ महिना डा ५ नाक्ती ग्याइशशा लाइक्चा पुंडसीशोपुकी नु गो केबार खोला आ नेक्था बाक्शो नड। मिनु मेना सरीड रोक्साक्व। मिनु गो परमप्रभु आ कोंइशो तातामी। इजीकीएल १:३; इजीकीएल ३:२३; इजीकीएल १०:१५, २०, २२; इजीकीएल ४३:३

2 मेको महिना डा ५ नाक्ती पिप येहो-याकीन ग्याइशशा लाइक्चा पुंडसीशो ५ बर्स दुमशो बाक्त। २राजा २४:१५

3 मिनु परमप्रभु यावेमी बूजी आ तौ चढ़ेब इजीकीएल, आं कली लोत्र पाप्तु। मेना गो कल्दी आन रागी, केबार खोला आ नेक्थाम बाक्ती। मेना परमप्रभु यावेमी आं कली थिती। इजीकीएल ३:२२-२३; इजीकीएल ८:१; इजीकीएल ३३:२२; इजीकीएल ३७:१; इजीकीएल ४०:१

4 मिनु गो कोब्रडुनु, उत्तर रे फश गिवार यिशो ताता। ठेयब छेडछेड पाइशशो गोस्स ताता। मेको आ दाते रे चिला दाप्शो खोदेशो पा आ एर ओंथ नेल्ल छेडछेड दुमशो बाक्त। मिनु चिला खोदेशो पा एर ओंथ दोरत। मिनु मेको मी आगा रे कांसा खोदेशो जिल जिल पा ब्रशो तांडसाक्व। प्रकाश ४:-

5 मिनु मेको आ दातेमी ४ ओटा सोक्त पाइशशोपुकी तांडसाक्म। मेको मार खोदेशो तांडसाक्म देंशा हना,

6 मेको आन के ४, ४ ओटा कुल नु ४, ४ ओटा फ्रां बाक्तेक्म।

7 मेको आन खोइल दिंसीशो बाक्तेक्म। बाछा आन गेंच खोदेशो बाक्तेक्म। मेको आन खोइल खुइशशो कांसा खोदेशो पा टल्केशो बाक्तेक्म।

8 मेको आन फ्रां आगा एर ओंथ नेल्ल मुर आन गुइ खोदेशो बाक्तेक्म। मेको ४ ओटा सोक्त पाइशशो आन कुल नु आन फ्रां दोदेशो बाक्तेक्म देंशा हना,

9 मेको आन फ्रां थिमुरो बाक्तेक्म। मेकोपुकी तेइ लमानु डोंइती गे पा गाक्बाक्तेक्म। आन कुल एर ओंथ महिरथु ग्येत्थ गाक्बाक्तेक्म।

10 मेको आन कुल दोदेशो बाक्तेक्म देंशा हना, मेको नेल्ल का का पा ४ ओटा कुल बाक्तेक्म। डोंइती डा कुल मुर आ कुल खोदेशो बाक्त। आ ग्युरा गे डा कुल गुप्स आ कुल खोदेशो बाक्त। पेरा गे डा कुल ब्यफ के खोदेशो बाक्त। मिनु आन नोले गे डा कुल ककाकुली के खोदेशो बाक्त।

11 मेको आन कुल मोदेशो बाक्तेक्म। मेको आन फ्रां इर गे प्राक्शो बाक्तेक्म। मेको आन फ्रां निक्शीमी अर्को आन फ्रांम थिमुरो बाक्तेक्म। मिनु फ्रां निक्शीमी आन आन रां सुम्सीशो बाक्तेक्म।

12 मेको नेल्ल ग्येत्थ डोंइती गे गाक्बाक्तेक्म। सोक्त ते ते लमे, मेक मेक लाइबाक्तेक्म। मेको आन कुल महिरथु गाक्बाक्तेक्म।

13 मेको सोक्त पाइशशो आन दातेमी ब्रशो कोइला खोदेशो बाक्त। मेको एर ओंथ गाक्शो तोव्रशी खोदेशो तांडसीबाक्त। मेको मी थम छेडछेड पा ब्रशो बाक्त। मिनु मेको रे चिला दाप्बाक्त।

14 मेको सोक्त पाइशशोपुकी चिला आप्शो खोदेशो पा एर ओंथ बेरबाक्तेक्म।

15 मिनु गो मेको सोक्त पाइशशोपुकी कोब्रडुनु, मेको ४ ओटा सोक्त पाइशशो आन नेक्था खपीम गुगील तातामी। मेको नेल्ल आन गुगील का का बाक्त।

16 मेको गुगील दोदेशो बाक्तेकम देशा हना, मेको जिल जिल पाइब पीत मनी माइशो हीरा खोदेशो बाक्तेकम। मेको गुगील आगाम अर्को गुगील बाक्तेकम।

17 मेकोपुकी गाकमानु, तेइ महिरथु गाकबाक्तेकम। मेको सोक्त ते ते गाकमे, मेको गुगील मेक मेक गाकबाक्तेकम।

18 मेको गुगील लाइशो नु हिंचा डा बाक्तेकम। मिनु मेको कली कोव्रडुनु, नेल्ल मिक्ची मिक्च पाइशो बाक्तेकम।

19 मिनु मेको सोक्त पाइशोपुकी गाकमानु, मेको ग्येथ क्युकसीमानु, मेको गुगील यो ग्येथ क्युकसीबाक्तेकम।

20 मिनु सोक्त ते ते गाकमे, मेको सोक्त पाइशोपुकी यो मेक मेक गाकबाक्तेकम। मिनु मेको गुगील मेकोपुकी नु बोक्बाक्तेकम। मारदे हना मेको सोक्त पाइशो आन सोक्त मेको गुगीलम बाक्त।

21 मेको सोक्त पाइशोपुकी गाकमानु, मेकोपुकी यो गाकबाक्तेकम। मेको दिक्मानु, मेकोपुकी यो दिक्बाक्तेकम। मेको रागी रे क्युकसमानु, मेको गुगील क्युकसीबाक्तेकम। मारदे हना मेको सोक्त पाइशो आन सोक्त मेको गुगीलम बाक्त।

22 मेको सोक्त पाइशो आन पिया इर गे जिल जिल सिसा खोदेशो बाक्तीक बाक्त।

23 मेको बाक्तीके आ दी गे आन फ्रां हाम्शो बाक्तेकम। मेकोपुकी थिमुशो बाक्तेकम। मेको सोक्त पाइशो आन फ्रां निक्शीम आन रां सुम्शो बाक्तेकम।

24 मेको गाकमानु, गो मेको आन फ्रां आन रेयके, ठेयब समुन्द्र आ रेयके खोदेशो नेता। मेको रेयके नेल्ल क्येडा सक्ति पाइशो बुंबु पाइब नु लडाइ पाइब आन ग्रांये माग्ये पोक्शो रेयके खोदेशो नेता। मेको सोक्त पाइशोपुकी राम्मानु, आन फ्रां लुकच तोक्बाक्तेकम।

25 मेको आन फ्रां लुकच तोक्शा दिक्मानु, मेको आन पिया इर गे बाक्तीके रे सेंदा का यूत। मेको सोक्त पाइशोपुकी राम्मानु, आन फ्रां लुकच तोक्बाक्तेकम।

26 मेको आन पिया इर गे बाक्तीकेमी ठेयब नित्तीक का खोदेशो बाक्त। मेको कोव्रडुनु नीर हीरा खोदेशो तांइसाक्व। मिनु मेको ठेयब नित्तीकेम निप्ब आ रां मुर आ खोदेशो बाक्त। प्रस्थान २४:१०; प्रकाश ४:२-३; यसेया ६:१

27 मिनु मेको आ क्रातो डा ग्येथ ब्रशो जिलजिल पाइशो कांसा चुप्लुम ब्रशो मी खोदेशो ताता। आ क्रातो डा लुकचु मी खोदेशो पा ब्रशा शुश छेडछेड बाक्त।

28 रेउ यिमेनु, गोस्सुम वाक्श दाप्शो खोदेशो पा, मेको आ एर ओंथ नेल्ल छेडछेड बाक्त। मेको परमप्रभु यावे आ छेडछेड बाक्त। मिनु गो मेको तशा, खुम्की पा बाप्ती। मिनु मुर ब्वाक्शो खोदेशो सेंदा नेता। इजीकीएल ३:२३; इजीकीएल ८:४; इजीकीएल ९:३; इजीकीएल १०:४,१८; इजीकीएल ११:२३; इजीकीएल ४३:४; इजीकीएल ४४:४

## 2

### इजीकीएल कली ब्रेशो

1 मिनु मेकोमी आं कली “ए मुर, बोक्शा रपो। मिनु गो गे नु लोव्र पाइनुड” देंत।

2 मिनु आं कली लोव्र पवानु, परमप्रभु यावे आ सोक्त आं आगाम ओव्रशा, आं कली राप्पाइक्ती। मिनु आं कली लोव्र पशो नेता।

3 मिनु मेकोमी आं कली “ए मुर, गो इ कली इस्राएल जात डा मुर आन बाक्तीक सोइक्नन। मटीब रागी डा मुर आन बाक्तीक सोइक्नन। मेकोपुकीम आं कली मटिशो बाक्नीम। मेको आन किकी पिपी नु मेकोपुकीम मुल सम्म हेंथे पा आं कली मटिशो बाक्नीम।

4 मेको आन चच युइ आं कली मटीब नु खकटा थुं पाइशो बाक्नीम। गो इ कली मेको आन बाक्तीक सोइक्नन। मिनु गे मेको आन कली “परमप्रभु, परमप्रभु यावेमी इन कली लोव्र पाइब” देंत।

5 मेकोपुकीम नेन्मेक्ल कि मनेन्मेक्ल, मेकोपुकी नु लोव्र पावो। मारदे हना मेको मटीब आन खिं डा मुर बाक्नीम। मिनु मेको आन दातेम परमप्रभु यावे आ लोव्र पाइब मुर का बाक्माक्त, दे तुइक्नीम। इजीकीएल २:७; इजीकीएल ५:११, २७

6 मिनु गे मेकोपुकी नु मेको आन लोव्र नेशा महिनो। गे इ एर ओंथ चू नु चोंक बाक्तेक्म नु गे बिच्छी आन दातेम बाक्ते हना यो, महिनो। मेकोपुकीम मार देंतेक्म हना यो, मेको आन लोव्र क्येडा महिनो। मेको आन कोव्रशोम ग्येत्थ लुकच मदुमो। मारदे हना मेको मटीब आन खिं डा मुर बाक्नीम। येरमीया १:८

7 गे मेको आन कली आं लोव्र पचा माल्नेवे। मेकोपुकीम नेन्मेक्ल कि मनेन्मेक्ल। मारदे हना मेकोपुकी मटीब आन खिं डा मुर बाक्नीम।

8 तन्न गे आं लोव्र नेनो। गे मेको मटीब आन खिं डा मुर खोदेशो मदुमो। इ शोव्र पाक्को। मिनु गो मार गेना, मेको जावो” देंत।

9 मिनु गो कोव्रडनु, गुइ का आं गे दिंशो ताता। मेकेर ब्रेक्शा ओल्शो कागज का बाक्त। प्रकाश १०:८

10 मिनु मेकोम, मेको आं डोंइती प्राक्शा कोंइताक्यी। मेको आ डोंइती नु नोले, निम्फा पटटी ब्रेक्शो बाक्त। मेकेर हिशेक पतीके, रोंका पतीके नु आबी आबी, दे हिंतीके लोव्र ब्रेक्शो बाक्त।

### 3

#### इजीकीएलमी कागज जशो

1 मिनु मेकोमी आं कली “ए मुर, मेको इ डोंइती बाक्शो ओल्शो कागज जावो। मिनु लशा इस्राएल आ खिं डा मुर आन कली लोव्र पावो” देंत। येरमीया १५:१६; येरमीया १:९; प्रकाश १०:९-११

2 मोपतीके गो आं शोव्र पाक्ता। मिनु मेकोमी मेको ओल्शो कागज आं कली जचा गेती।

3 मिनु मेकोमी आं कली “ए मुर, आं गेशो ओल्शो कागज जावो। मिनु इ कोव्रज प्रिंदो” देंत। मोपतीके गो मेको जाता। मिनु मेको आं शोव्रम खुदो खोदेशो पा जिज दुम्त। भजन संग्रह ११९:१०३

4 मिनु मेकोमी आं कली “ए मुर, इस्राएली आन खिं लावो। मिनु मेको आन कली आं देंशो लोव्र नेल्ल नेंपाइक्मी।

5 मारदे हना गो इ कली मतुइक्चा डा नु मरुप्चा डा लोव्र ब्वाक्ब मुर आन बाक्तीक मसोइक्तन। तन्न इस्राएली आन खिं डा मुर आन बाक्तीक सोइक्ताक्न।

6 गो इ कली मतुइक्चा डा नु मरुप्चा डा लोव्र ब्वाक्ब मुर आन दातेमी, मरुप्ब लोव्र पाइब मुर आन बाक्तीक मसोइक्तन। गो इ कली मोदेशो मुर आन बाक्तीके सोइश्शो नड हना, मेकोपुकीम इ लोव्र नेनेम वा।

7 तन्न इस्राएली आन खिं डा मुरुम इ लोव्र मनेनीम। मारदे हना मेकोपुकीम आं लोव्र नेंचा मदाक्नीम। इस्राएली आन खिं डा मुर नेल्ले काइ मटीब नु खकटा थुं पाइश्शो बाक्नीम।

8 गो इ कुल मेको आन कुल क्येडा बोल्यो सेल्ला। इ थुं मेको आन थुं क्येडा बोल्यो सेल्ला। यसैया ५०:७; येरमीया १:१८

9 गो इ थुं बोल्यो फुल्लु क्येडा बोल्यो चकमक खोदेशो सेल्ला। गे मेको आन क्येडा महिनो। मेको आन कोव्रशोम ग्येत्थ लुकच मदुमो। मारदे हना मेको मटीब आन खिं डा मुर बाक्नीम” देंत।

10 मिनु मेकोम आं कली “ए मुर, गो इ कली देशो लोव्र नेल्ल इ थुंम वोतो। मिनु नेनो।

11 मिनु मेको ग्याइश्शा लाइक्चा पुंइसीशो इ मुर आन बाक्तीक लावो। मिनु मेको आन कली लोव्र पावो। ‘परमप्रभु यावेमी इन कली लोव्र पाप्तु’ देनो। मेकोपुकीम नेन्मेक्ल कि मनेन्मेक्ल” देंत। इजीकीएल २:५, ७

#### इजीकीएल खाल पाइब दुम्शो

#### इजीकीएल ३३:१-९

12 मिनु परमप्रभु यावे आ सोक्तीम आं कली इर क्युक्ती। मिनु गो “परमप्रभु यावे आ छेडछेड ठेयब बाक्ब” देशो नेता। मिनु गो आं नोले गे ठेयब रेयके पशो नेता। इजीकीएल १:२८



13 मेको रेयके सोक्त पाइशो आन फ्रां थिमुशो रेयके मेको आन नेक्था डा गुगील रे यूशो रेयके नु खिनु कुशो रेयके बाक्त।

14 मिनु सोक्तीम आं कली क्युक्शा लाइक्ती। मिनु गो कशो थुं दुम्शा, गाइशशा लती। मेना परमप्रभु यावे आ बोल्यो गुडम आं कली दिप्ती।

15 मिनु गो मेको केबार खोला आ नेक्था बाक्ब रागी रे ग्याइशशा लाइक्चा पुंइसीशो आन बाक्तीक तेल-अबीब सहरम जाक्ती। मिनु गो ७ नाक्ती सम्म मेको आन दातेम ब्रिथ्री बाक्ती।

16 मिनु ७ नाक्त नोले परमप्रभु यावेमी आं कली लोव्र पाप्नु।

17 मार लोव्र पाप्नु देशा हना “ए मुर, गो इ कली इस्त्राएली आन खिं डा मुर आन कली खाल पाइब सेल्लन। गे आं देशो लोव्र नेतीवी हना, मेको आन कली आं लोव्र रे पा हिंच कोंइदीमी। इजीकीएल ३३:७; यसेया ५२:८; हिब्रू १३:१७

18 मिनु गो आं अरेशो लोव्र मटीब मुर का कली ‘गे थमा पा इ मटितीके आ पबंम बेक्नेवे’ दे माइक्नुड। मिनु गे मेको कली ब्रोंइचा कली हिंच मकोंइताक्वी हना, मेको आं अरेशो मटीब आ मरिम्शो पशो आ पबंम बेक्ब। मेको मुर आ हुश आ क्येक्क इ रे पा ताक्नुड। इजीकीएल १४:१०

19 तन्न गे मेको आं अरेशो लोव्र मटीब मुर कली हिंच कोंइताक्वी हना, नु मेको मुर आं अरेशो लोव्र मपतीक रे मलेत्त हना, मेको आं अरेशो मटिशो नु आ मरिम्शो पशो आ पबंम बेक्ब। तन्न गे ब्रोंइनेवे।

20 मिनु ठीक पाइब मुर काम आ ठीक पतीक रे लेशशा मरिम्शो पाप्नु हना, गो मेको आ डोंइती दाइल पाइक्तीक फुल्लु वोइक्ता हना, मेको बेक्ब। गे मेको कली हिंच मकोंइतीके, मेको आ पापम पतीके बेक्ब। मेको आ डोंइती ठीक पशो मारेइ ममिम्सीब। मिनु गो मेको आ हुश आ क्येक्क इ रे पा ताक्नुड। इजीकीएल १८:२४

21 तन्न गे मेको ठीक पाइब मुर कली ‘पाप मपावो’ दे हिंच कोंइताक्वी हना नु मेकोमी पाप मपाप्नु हना, मेको थमा पा ब्रोंइब। मारदे हना मेकोम हिंच कोंइशो टिशो बाक्ब। मिनु गे ब्रोंइनेवे” दैत।

22 मेना परमप्रभु यावे आ गुडम आं कली थिती। मेकोमी आं कली “बोक्को, बेसीम लावो। मिनु गो मेकेर गे नु लोव्र पाइनुड” दैत। इजीकीएल १:३

23 मोपतीके गो बोक्शा बेसीम लती। मिनु गो केबार खोला आ नेक्थाम तशो परमप्रभु यावे आ छेडछेड मेकेर यो बाक्त। मिनु गो खुम्की पा बाप्ती। इजीकीएल १:२८

24 मिनु सोक्त आं थुंम ओव्रत। मिनु मेकोम आं कली राप्पाइक्ती। मिनु आं कली लोव्र पा “लावो, इ खिं लशा, लाप्यो चोक्शा बाक्को। इजीकीएल २:२

25 ए मुर, मेकोपुकीम इ कली डोरीम फ्रेंनीम। मिनु गे फ्रेंचा पुंइसीशा, मुर आन दातेम लचा मताइनेवे।

26 मिनु गो इ ले इ कुकुम खोक्पाइक्नुड। मिनु गे मब्वाक्ब दुम्शा, मेको आन कली हुइक्ने मचानेवे। मारदे हना मेकोपुकी मटीब आन खिं डा मुर बाक्नीम।

27 तन्न गो, गे नु लोव्र पडानु, इ कली ब्वाक्ने चाप्ब सेल्लन। मिनु गे मेको आन कली ‘परमप्रभु, परमप्रभु यावेमी इन कली लोव्र पाइब। नेंने दाक्बम नेन्मेक्ल। नेंने मदाक्बमी मनेन्मेक्ल’ देनो। मारदे हना मेकोपुकी मटीब मुर आन खिं डा मुर बाक्नीम” दैत।

## 4

### यरूसलेम आ पबंम लोव्र

1 मिनु परमप्रभु यावेमी “ए मुर, गे इंटा का चाक्शा इ डोंइती वोतो। मिनु मेको तारी यरूसलेम सहर आ नकसा सेलो।

2 मिनु मेको कली पुम्शो कोंइदो। मेको आ एर ओंथ लडाइ पचा कली लाइशो खिं सेलो। मिनु मेको आ गारो डोंइक्चा कली खप तेलो। एर ओंथ लडाइ पाइब आन बाक्तीक सेलो। मिनु आ एर ओंथ मेको गारो प्रेत्चा कली मुडा ठीक सेलो।

3 मिनू नोले फलाम के ग्योब का चाक्शा, सहर नु इ दातेम फलाम के गारो खोदेशो पा वोतो। मिनू गे सहर गे कोव्रडो। मिनू मेको सहर कली पुम्शो सेल्शा कोइदो। शुश पुम्शो कोइदो। मेको इस्राएली आन खिं डा मुर आन कली चिन्ड का दुम्ब।

4 मिनू नोले गे पेरा गे हिरशा इपो। मिनू इस्राएली आन खिं डा मुर आन सजाइ ततीक इ तार वोतो। गे गिश नाक्ती सम्म मेक गे हिरशा बाक्नेवे, मिश नाक्ती सम्म मेको आन सजाइ ततीक कुरचा माल्नेवे।

5 मारदे हना गो इ कली गिश नाक्त मोपा बाक्चा माल्नेवे, मेको देंनुड। मेको सहे सां ९० नाक्त दुम्चा माल्ब। नाक्त का के बर्स का बाक्ब। मोपा गे इस्राएली आन खिं डा मुर आन सजाइ कुरचा माल्नेवे।

6 मिनू मेको नाक्त नेल्ल नुम नोले, लेंशा ग्युरा गे हिरशा इपो। मिनू मेना यहूदा आ खिं डा मुर आन सजाइ कुरचा माल्नेवे। मिनू मेको आ पबर्म गो इ कली ४० नाक्त बाक्पाइक्नुड। नाक्त का के बर्स का बाक्ब।

7 मिनू गे पुम्शो यरूसलेम गे कोव्रशा, इ गुइ डा वा तिल्शा, मेको सहर आ पबर्म नोले दुम्तीक लोव्र पावो।

8 कोव्रडो, गो इ कली डोरीम फ्रेंशा वोइक्नन। मोपा गे एको पुम्तीक नाक्ती नुप्चा क्येडा डोंइती एर ओंथ लोकसीने मचाप्नेवे।

9 मिनू मेको चेरब, क्योव्रज, सिबी, दाल, चिरस नु उवा चाक्शा ग्योब काम कुर पा इ कली शोब्ले चोंइसो। गे मेको सहे सां ९० नाक्त सम्म मलोक्सीथु बाक्डेनु, मेको जचा माल्नेवे।

10 इ नाक्ती डा जचा थोव्रक नाक्शा २० शेकेल डा दुम्चा माल्ब। गे गेना हना यो गो देंडा ना जचा माल्नेवे। शेकेल का ११.५ ग्राम चांदी के क्येट बाक्ब।

11 गे तूचा कली ब्वाक्कु यो पुक्चा माल्नेवे। हिन का ६ भाग डा भाग का तूचा माल्नेवे। मेको गेना तूचा माल्नेवे, इ कली देंनुड। हिन का ४ लिटर खोदेशो बाक्ब।

12 गे क्योव्रज के बटुक खोदेशो सेल्शा जावो। गे मुर आन डोंइती मुर आन ख्री चोशा, मेको चोचा माल्नेवे” देंत।

13 मिनू परमप्रभु यावेमी “मोपा इस्राएल डा मुर आन शोब्ले जचा माल्नीम। गो मेको आन कली रागी रागी डा मुर आन बाक्तीक खेरनुडमी। मेको आन दातेम मोदेशो ग्रान्रा दिशो शोब्ले जचा माल्नीम” देंत। होसे ९:३

14 मिनू गो “परमप्रभु, परमप्रभु यावे, गो आल रेन मोदेशो ग्रान्रा दिशो मदुम्शो नड। गो गेनायो आंमा बेक्शो नु ब्वाकी डा जन्तुम साइश्शो श्ये मब्वड। ग्रान्रा दिशो गेनायो मजड” देंती। प्रस्थान २२:३०; प्रेरित १०:१४

15 मिनू मेकोम आं कली “दुम्ब, गो इ कली मुर आन ख्री आ पा डा, इ शोब्ले चोचा कली गोबर गेनुड” देंत।

16 मिनू मेकोमी आं कली “ए मुर, गो यरूसलेम रे अन्न तेक्नुड। मेकोपुकीम हिंशा शोब्ले नाक्ना नाक्न जाइनीम। मिनू पुक्ना पुक्न सुर्ता पन पन ब्वाक्कु तूनीम। इजीकीएल ५:१६; लेवी २६:२६

17 मेकोपुकीम शोब्ले नु ब्वाक्कु मताइनीम। मुर काम अर्को कली तवानु ग्रीचोक पा हिंनीम। मिनू मेकोपुकी सजाइ ततीके सोव्रना सोव्रन लाइनीम” देंत।

## 5

यरूसलेमम सजाइ तशो

1 मिनू मेकोमी “ए मुर, हेश्शो तरवार का शेवो। मिनू मेकोम चां प्रेक्ब आन छूरा खोदेशो पा इ चां नु इ गल शोक्ले प्रेक्को। मिनू मेको नाक्चा कली नाक्तीक चाक्को। मिनू मेको चां आन कली भाग सां पा योक्को।

2 मिनू मेको चां के भाग का सहर पुम्चा नुप्ची ना सहरम चोवो। मिनू अर्को भाग तरवारम सहर आ एर ओंथ फ्रावो। मिनू नोले डा भाग फशेम बेरपतो। मारदे हना गो मेको आन कली तरवारम खेदा पाइनुडमी। इजीकीएल ५:२

3 तन्न गे मेको चां इच्का इ वाम तोल्शा वोइक्मी।

4 मिनु मेको रे यो इच्का गुंडशा मीम चोवो। मेको रे पा इस्राएल डा खिं नेल्लेम मी का ब्रशा यूब”  
देत।

5 मिनु परमप्रभु यावेमी “यरूसलेम एको बाक्ब। गो मेको कली रागी रागी आन दातेम वोइक्ता।  
मेको आ एर ओंथ नेल्ल रागी बाक्नीम।

6 तन्न मेकोम आं निसाफ पतीक लोत्र नु आं फुल्लुम मुशा ब्रेक्शो लोत्र मटीव। आ एर ओंथ बाक्शो  
रागी रागी नु जात जात डा मुर आन क्येडा यो आं निसाफ पतीक लोत्र नु आं फुल्लुम मुशा ब्रेक्शो लोत्र  
मटीब बाक्ब” देत।

7 मोपतीके परमप्रभु यावेमी “गे इ एर ओंथ रागी रागी डा मुर आन क्येडा मरिम्शो पाइब बाक्नेवे।  
गे आं फुल्लुम मुशा ब्रेक्शो लोत्र नु आं निसाफ पतीके लोत्र मेको आन क्येडा मटीब बाक्नेवे। तन्न इ  
एर ओंथ डा मुर आ निसाफ पतीक लोत्र पाइनेवे।

8 गो इ कली आंमा सजाइ गेनुड। गो रागी रागी डा मुर आन डोंइती इ कली निसाफ पाइनुड।

9 गो इ ग्रॉरा दिशो मूर्ति आन कली पूजा पतीके गो इ कली डोंइती गेनायो मगेशो सजाइ गेनन। मिनु  
नोले मोदेशो सजाइ मगेनन।

10 थमा पा, इ दातेमी आम आफोम आन आल आन कली ब्वाइनीम। मिनु आलम यो आन आंम  
आफ आन कली ब्वाइनीम। गो इ कली सजाइ गेनन। मिनु इ लीशो मुर आन कली फशेम एर ओंथ  
बेरपाइक्नुडमी। ब्यवस्था २८:५३-५५

11 मोपतीके परमप्रभु, परमप्रभु यावेमी ‘गो ब्रोंइशा बाक्शो खोदेशो पा, मो पाइनुड। मारदे हना इ  
मूर्ति नु इ ग्रॉरा दिशो गेयम आं बाक्तीक ग्रॉरा दिशो सेलतीके, गो इ कली खतम सेल्लुड। गो इ कली  
शिशी मपथु सुइ आन कली ब्रोंइचा मगेनुड। इजीकीएल ७:४; इजीकीएल ८:७-१८

12 इ दातेमी, भाग सांम भाग का मुर बेक्तीक रोइम नु अन्कालम बेक्नीम। मिनु अर्को भाग तरवारम  
बेक्नीम। मिनु नोले डा भाग फशेम ते ते फ्राइनुडमी। मिनु गो मेको आन कली तरवारम खेदा पाइनुडमी।  
इजीकीएल ५:२

13 मिनु गो गाइक्ना गाइक्न, मेको आन कली आं चुरशो कोंइशा, आं थुं नाइक्पाइक्नुड। मिनु गो,  
परमप्रभु यावेमी आं रुश पतीकेमी मेको आन कली लोत्र पाता, दे तुइक्नीम। इजीकीएल १६:४२

14 गो इ कली श्येन्थ सेल्लुड। गे रागी रागी डा मुर आन दातेम नु इ नेक्था रे पा लाइब नेल्ल आन  
डोंइती इ कली शुक्शी पाइक्चा पुंडसीब सेल्लन। ब्यवस्था २८:३७; येरमीया २४:९

15 गो आं गाइक्तीक नु चुरतीकेम इ कली निसाफ पाइनुड। मिनु गे शुक्शी पाइक्चा पुंडसीतीके, मुने  
दोक्तीके नु हिंच कोंइतीके नु शुश हिंचा डा दुम्नेवे। गो परमप्रभु यावेमी, एको लोत्र देती।

16 मिनु गो इ कली साइक्ब अन्काल नु खतम दुम्तीके ब्रा खोदेशो पा सोइक्नुड, साइक्ब नु खतम  
दुम्तीक चाक्नुड। मिनु मेको क्येडा अन्काल दुम्पाइक्नुड। गो इ अन्न नेल्ल तेक्शा, ब्यवस्था ३२:२३-  
२४; इजीकीएल ४:१६

17 गो इ दातेमी अन्काल नु ब्वाकी डा जन्तुपुकी सोइक्ताक्ड हना, मेकोपुकीम इ आल रोइक्नीम।  
इ दातेम मुर बेक्तीक रोइ नु हुश ख्वाक्श पोक्तीक दुम्शा बाक्ब। मिनु गो इ कली तरवारम साइक्नुड’  
गो परमप्रभु यावेमी, एको देती” देत।

## 6

इस्राएली आन थान खतम सेल्लो

1 मिनु परमप्रभु यावेमी आं कली लोत्र पाप्तु।

2 मार लोत्र पाप्तु देशा हना “ए मुर, गे इस्राएल डा पहाड गे कोव्रशा, मेको आन पबंम नोले दुम्ब  
लोत्र पावो। इजीकीएल ३६:१; मीका ६:१

3 गे 'ए इस्राएल डा पहाड परमप्रभु, परमप्रभु यावे आ लोत्र नेनीन। पहाड नु डांडा खोल्सा नु बेंसी आन कली परमप्रभु यावेमी, गो इन तार तरवार का चाक्नुड। मिनु गो इन डांडा डा थान आन कली खतम पोक्नुडमी।

4 इन थान श्येत्थ दुम्नीम। मिनु इन धूप चोतीक ब्रोल्नीम। मिनु गो इन साइशो मुर आन कली आन मूर्ति आन डोंइती ताइक्नुडमी। लेवी २६:३०

5 गो इस्राएल डा मुर आन बेक्शो रां मेको आन मूर्ति आन डोंइती वोइक्नुड। मिनु इन रुश इन चढेतीक आन डोंइती एर ओंथ फ्राइनुडमी। २राजा २३:२४

6 गेपुकी ते बाक्तीनी हना यो, इन सहर श्येत्थ दुम्नीम। इन डांडा डा थान नेल्ल खतम दुम्नीम। मोपा इन चढेतीक श्येत्थ दुम्शा नु इन मूर्ति ब्रोल्शा खतम दुम्नीम। इन धूप चोतीक जिक्नीम नु इन गेय जाम्शा लाइब।

7 इन दातेमी मुर साइक्चा पुंडसीशा गोल्नीम। मिनु गेपुकीमी गो परमप्रभु यावे नड, दे तुइक्नीनी।

8 तन्न गो गे इन दाते डा का निक्शी आन कली ब्रोंइचा गेनुडमी। रागी रागी आन दाते डा का निक्शी साइक्चा मपुंडसीनीम। मेकोपुकी रागी रागीम ब्रशा लाइनीम। यसेया ६:१३

9 मिनु मोदेशो रागी रागीम ब्रोंइशा लीशोपुकी ग्याइशशा लाइक्चा पुंडसीशो रागीम आं कली मिम्नीम। मिनु मेकोपुकीम आन दला दाक्स पशा, आं रे दिलशा लशा, आन मूर्ति आन नोले खोइक्नीम। मेको आन पशो मरिम्शो नु ग्रंथा दिशो गेयम आंमा मुने दोक्नीम।

10 मिनु मेकोपुकीम गो परमप्रभु यावे नड, दे तुइक्नीम' देंचा माल्नेवे। गो मेको आन कली मोदेशो श्येत मोशा मगेडमी" देंत।

11 मिनु परमप्रभु, परमप्रभु यावेमी "इन गुइ पोक्कीन। मिनु इन खोइल थाइक्तीन। इस्राएल आ खिं डा मुर आन ग्रंथा दिशो गेय आ पर्वम 'आबी आबी' देनीन। मारदे हना मेकोपुकी तरवार, अन्काल नु मुर बेक्तीक रोइम बेक्नीम।

12 मेको डोन बाक्बपुकी मुर बेक्तीक रोइम बेक्नीम। मिनु मेको आन नेक्था बाक्बपुकी तरवारम साइक्चा पुंडसीनीम। मिनु लीशो प्रोंइचा पुंडसीशोपुकी अन्कालम बेक्नीम। मोपा गो आं गाइशो मेको आन तार मोइक्नुड।

13 मेको आन साइशो मुर आन मूर्ति आन दाते आन चढेतीक आन एर ओंथ बाक्नीम। नेल्ल डांडा डा थानम, नेल्ले पहाडम, नेल्ल रवा आन पुंम, शुश गिग रवा आन पुंम, नु मूर्ति आन कली धूप चोतीके नेल्लेम मोदेशो बाक्ब। १राजा १४:२३

14 गो आं गुइ मेको आन पर्वम क्युक्नुड। मिनु आन रागी रे श्येत्थ नु मुर मबाक्तीक सेल्लुड। मेको गोरशो रागी रे रिब्ला सम्म मोदेशो पाइनुड। मेना मेकोपुकीमी गो परमप्रभु यावे नड, दे तुइक्नीम" देंत। २राजा २५:२१

## 7

### इस्राएल आ खतम दुम्तीक जाक्ब

1 मिनु परमप्रभु यावेमी आं कली लोत्र पाप्तु।

2 मार लोत्र पाप्तु देंशा हना "ए मुर, परमप्रभु यावेमी इस्राएल रागी कली मार देंब देंशा हना 'रागी नुप्तीके, एर ओंथ डा सुर नेल्लेम जाक्ब।

3 मुल गे नुप्नेवे। गो इ कली तशा गाइक्ताकड। गो इ पशो खोदेशो पा इ कली निसाफ पाइक्नुड। गो इ कली इ मूर्ति पूजा पशो आन पर्वम सजाइ गेनुड।

4 गो इ कली शिशो मपथु, सुइ आन कली ब्रोंइचा मगेनुड। गो इ कली इ गेय आ पर्वम नु इ मूर्ति पूजा आ पर्वम सजाइ गेनुड। मिनु गे, गो परमप्रभु यावे नड, दे तुइक्नेवे" देंत। इजीकीएल ५:११; इजीकीएल ८:१८; इजीकीएल ९:१०

5 परमप्रभु, परमप्रभु यावेमी "हिंचा डा श्येत, आ तार हिंचा डा श्येत दुम्ब। कोत्रडो, मेको जाक्ब।

6 नुप्तीक नाक्ती जाक्ब। मेको इन पर्वम बोक्शा जाक्ब।

7 गे रागीम बाक्ब इन खतम दुम्तीके जाक्ब। नुप्तीक नाक्ती जाक्शा, इन नेक्था बाक्ब। डांडापुकीम कुम्सो पतीके ममाइ, ग्रांग्ये माग्ये दुम्शो बाक्ब।

8 मुल गो रीब पा गाइक्नुड। मिनु आं चुरशो इ तार मोइक्नुड। गो इ पशो खोदेशो पा इ कली निसाफ पाइनुड। मिनु इ मूर्ति पूजा पशो नेल्ल आन पर्वम सजाइ गेनन।

9 गो इ कली शिशी मपथु, सुइ आन कली ब्रोंइचा मगेनुड। गो इ कली इ पशो खोदेशो पा सजाइ गेनुड। इ मूर्ति पूजा पशो इ दातेम बाक्ब। मिनु गो इ कली तुप्ब, परमप्रभु यावे नड, दे तुइक्नेवे।

10 मेको नाक्ती मुल बाक्ब। इ खतम दुम्तीके जाक्ना जाक्न बाक्ब। कोक्के आ कोच्चा दाप्त। ठेयब लेत्तीक फू खोदेशो पा बोइक्त। यसैया २:१२

11 हुश खाक्श पोक्तीके परमप्रभु यावे आ अरेशो मटीब आन कोक्के दुम्त। मेको आन दाते डा मारेइ मलीब। मेको आन बाक्शो मारेइ मारेइ, आन शोंप नु आन ठेयब दुम्तीके मारेइ मलीब।

12 मेको खतम दुम्तीके जाक्चा चिक्शो बाक्ब। ग्याप्बपुकी मग्येरसमल। लेयबपुकी रोंका मपामेक्ल। मारदे हना मेको नेल्लेम परमप्रभु आ गाइश्शो ताइनीम।

13 मारदे हना मेको ब्रोंइम सम्म लेयचा मताइब। मारदे हना मेको तशो नेल्ल आन कली दुम्ब। मिनु आन मरिम्शो पतीके नेल्ल बेक्नीम।

14 मेकोपुकीम ग्रांवा ताप्शा, मारेइ मारेइ ठीक पाप्तेक्म हना यो, का यो लडाइ पथ मलाइनीम। मारदे हना आं गाइश्शो मेको नेल्ल आन तार जुक्शो बाक्ब।

15 लाडगाम तरवारम साइक्ब। आगाम मुर बेक्तीक रोइ नु अन्कालम बेक्नीम। मिनु रूम बाक्ब आन कली तरवारम साइक्ब। सहरम बाक्ब अन्काल नु मुर बेक्तीक रोइम साइक्चा पुंडसीनीम।

16 मिनु ब्रोंइशा प्रोक्शो नेल्ल बेसी डा ढुकुर खोदेशो पा पहाडम बाक्नीम। मेको आन मरिम्शो पशो आ पर्वम रोंका पा बाक्नीम।

17 मुर आन गुड नेल्ल सक्ति मपाइश्शो दुम्नीम। आन पोक्च बोल मपाइश्शो दुम्नीम। यसैया १३:७

18 मेकोपुकीम अरन्डी फेक्चा माल्नीम। शुश हिंतीकेमी मेको आन कली सुम्ब। मेको नेल्ल आन कुल मुनेम सुम्सीचा माल्नीम। मेको नेल्ल आन पिया प्रेक्सीचा माल्नीम। येरमीया ४८:३७

19 मेकोपुकीम आन चांदी लाम ताइक्चा माल्नीम। मिनु आन सुन ग्रांवा दिशो थोत्रक खोदेशो दुम्चा माल्ब। मेको आन सुन चांदीम परमप्रभु यावे आ गाइश्शो नाक्ती मेको आन कली प्रोंइने मचाप्ब। मेको आन सुन चांदीम आन शोत्रलु साइक्ने मचाप्ब। मेकोमी आन कोत्रज प्रिने मचाप्नीम। मारदे हना मेको आन कली मरिम्शो पपाइक्ब मेकोन बाक्त। हितोपदेस ११:४; सेफन्याह १:१८

20 मारदे हना आन दारशो गहनामी ठेयब लेश्शा, आन ग्रांवा दिशो मूर्ति सेल्लेक्म। मोपतीके गो मेको आन सुन चांदी मेको आन कली ग्रांवा दिशो सेल्लुड।

21 गो मेको नेल्ल अर्को रागी डा मुर आन कली रोइक्पाइक्नुडमी। गो रागीम बाक्ब परमप्रभु यावे आ अरेशो मटीब आन कली रोइक्पाइक्नुड। मिनु मेकोपुकीम मेको ग्रांवा दिशो सेल्लनीम।

22 गो आं कुल मेको आन रे खुइक्नुड। मिनु मेकोपुकीम आं दाक्शो बाक्तीके ग्रांवा दिशो सेल्लनीम। हुश खाक्श पोक्बपुकी मेकेर ओत्रशा, ग्रांवा दिशो सेल्लनीम।

23 साडलो का सेलीन। मारदे हना रागी हुश खाक्शेम ब्रीशो बाक्ब। मिनु सहर हुश खाक्श पोक्बपुकीम ब्रीशो बाक्ब।

24 गो रागी रागी डा नेल्ल आन क्येडा मरिम्शो पाइब मुर आन कली मेको आन खिं रोइक्पाइक्नुड। गो बोल्यो मुर आन ठेयब लेत्तीक नुप्पाइक्नुड। मिनु मेको आन चोत्रखो बाक्तीके ग्रांवा दिशो दुम्नीम।

25 शुश श्येत जाक्मेनु, मेकोपुकीम थुं नाइश्शा बाक्चा माल्नीम। तन्न मथित्तीम।

26 हिंचा डा श्येत क्येडा हिंचा डा श्येत जाक्ब। हिंचा डा लोत्र क्येडा हिंचा डा लोत्र नेंसीब। मेकोपुकीम परमप्रभु यावे आ लोत्र पाइबपुकी रे 'मुल मार दुम्बा' दे तुइक्चा माल्नीम। चढेबपुकीमी मुर आन कली मशेंनीम। खाल्पा आन अर्ती गेतीक जाम्शा लने थुम्शो बाक्ब।

27 पिपम रोंका पाइब। पिप आ तौ आन थु लुकच लाइब। रागी डा मुर आन गुड खिंखि पाइनीम। मेको आन पशो खोदेशो पन, गो मेकोपुकी नु पाइनुड। गो मेको आन पशो कोवशा, मेको आन कली निसाफ पाइनुड। गो मेको आन आंम कानुन आ पबंम निसाफ पाइनुड। मिनु मेकोपुकीमी गो परमप्रभु यावे नड, दे तुइक्नीम” दैत।

## 8

### परमप्रभु आ खिंम मूर्ति पूजा पशो

1 मिनु ग्याइशशा लाइक्चा पुंडसीशो ६ बर्स डा ६ महिना डा ५ नाक्त गो आं खिंम बाक्शो नड। मेना यहूदा डा खाल्पापुकी आं डोंइती बाक्शो बाक्तेक्म। मिनु मेकेर बाक्शोनु, परमप्रभु, परमप्रभु यावेमी आं कली थिती। इजीकीएल १४:१

2 मिनु गो कोवडुनु, मुर खोदेशो का ताता। मिनु मेको आ क्रातो डा लुकचु ब्रशो मी खोदेशो नु आ क्रातो डा ग्येथ जिलजिल पा टल्केशो कांसा खोदेशो बाक्त। इजीकीएल १:२७; इजीकीएल १:४

3 मेकोम आ गुड दिंशा आं चांम ग्याइशशा छुल पोक्ती। मिनु सोक्तीम आं कली सरीड नु रागी आस दातेम लाइक्ती। मिनु परमप्रभु यावे आ सोक्तीम आं कली यरूसलेमम लाइक्ती। मेकोमी आं कली परमप्रभु यावे आ खिं डा उत्तर गे डा आगा डा लाडगा आ ओव्रतीकेम चाक्ती। मेकेर रुश पपाइक्ब मूर्ति आन बाक्तीके बाक्त। मेकोमी रुश पपाइक्बाक्त। इजीकीएल ३:१२

4 मिनु इस्राएली आन परमप्रभु यावे आ छेडछेड मेकेर बाक्त। गो मेको मोदेशो छेडछेड डोंइती बेसीम कोंइतीकेम ताता।

5 मिनु परमप्रभु यावेमी आं कली “ए मुर, मुल गे उत्तर गे कोवडो” दैत। मिनु गो उत्तर गे कोवडुनु, चढेतीक आ उत्तर गे डा लाच्योम मेको रुश पपाइक्ब आ मूर्ति ताता।

6 मिनु मेकोमी आं कली “ए मुर, मेको आन पशो तवी? मार पन पन बाक्मा, गे मेको तवी? इस्राएली आन खिं डा मुरपुकीम आं कली आं बाक्तीक रे खेरचा कली मेको ग्रांघा दिशो गेय पना पन बाक्नीम। तन्न गे मेको क्येडा यो शुश ग्रांघा दिशो गेय ताइनेवे” दैत।

7 मिनु मेकोम आं कली लाडगा डा ओव्रतीकेम चाक्दीत्ती। मिनु गो मेकेर डा गारोम पोवला का ताता।

8 मिनु मेकोम आं कली “ए मुर, मेको गारो डा पोवला प्रेतो” दे माइक्ती। मिनु गो मेको गारो डा पोवला प्रेत्ता। मिनु मेकेर ओव्रतीक का बाक्त।

9 मिनु मेकोम आं कली “आगा ओव्रशा, मेकोपुकीम पशो थम मरिम्शो नु ग्रांघा दिशो गेय कोवडो” दैत।

10 मोपतीके गो आगा ओव्रशा कोव्रता। मिनु एर ओंथ नेल्ल गारोमी नेल्ल खाल डा ग्रेशा गाक्ब जन्तु, ग्रांघा दिशो जन्तु, इस्राएली आन खिं डा मूर्ति नेल्ल मेकेर ब्रेक्स पा सेल्लो ताता। रोमी १:२३

11 मिनु मेको आन डोंइती इस्राएल डा ७० जना खाल्पा राण्शो बाक्तेक्म। मिनु शाफान आ तौ याजन्याह मेको आन दातेम राण्शो बाक्त। मेको नेल्ल आन गुडम आन आन थनीरो बाक्तेक्म। मिनु धूप चोशो आ ब्रोव्रशो रिना इर गे बोक्शो बाक्त। प्रस्थान २४:१; गन्ती ११:१६; लूका १०:१७; यसैया ६६:१७

12 नोले मेकोमी आं कली “ए मुर, इस्राएल आ खिं डा खाल्पा छिडछिडम मार पाइनीमी, मेको आन आन मूर्ति कोठाम मार पना पन बाक्मा, तवी? मेकोपुकीम ‘परमप्रभु यावेमी आंइ कली मताइब। परमप्रभु यावेमी एको रागी प्रोंइने थुम्शो बाक्ब’ देशो बाक्नीम” दैत। इजीकीएल ९:९

13 मिनु लेंशा मेकोम आं कली “गे मेको क्येडा यो शुश ग्रांघा दिशो गेय पना पन बाक्शो ताइनेवे” दैत।

14 नोले मेकोमी आं कली परमप्रभु यावे आ खिं डा उत्तर गे डा ओव्रतीकेम चाक्दीत्ती। मिनु गो मेकेर तम्मुज देवता आ पबंम डाक्शो मीश मुरपुकी तातामी।

15 मिनु परमप्रभुमी आं कली “ए मुर, गे मेको तवी? गे मेको क्येडा यो शुश ग्रांघा दिशो गेय ताइनेवे” दैत।

16 मिनु मेकोम आं कली परमप्रभु यावे आ खिं डा आगा डा लाडगा चाकदीत्ती। मिनु मेकेर परमप्रभु यावे आ खिं नु चढ़ेतीक आस दातेम २५ जना खोइ वोंइश मुर बाक्तेकम। मेकोपुकीम आन ची परमप्रभु यावे आ खिं गे हिरशो बाक्तेकम। आन कुल चहिं पूर्ब गे कोव्रशा नां आ डोंइती बाप्शो बाक्तेकम। ब्यवस्था ४:१९; ब्यवस्था १७:३; २राजा २३:५,११; येरमीया ८:२

17 मिनु मेकोम आं कली “ए मुर, गे मेको तवी? मार, यहूदा आ खिं डा मुर आन ग्रॉग्रा दिशो गेय एकेर पचा माल्नीमी? मार, मेकोपुकीम रागी कली हुश खाक्श पोक्तीकेम प्रिंशा, आं कली मेको क्येडा गाइक्पाइक्चा माल्नीमी? कोव्रडो, मेको आन नेम राशी वोइक्नीम। आन नेम राशी वोइक्तीके थम मरिम्शो पतीके बाक्ब।

18 मोपतीके गो मेको आन कली आं गाइक्तीकेम गेय पाइनुड। गो मेको आन कली शिशी मपथु, सुइ आन कली ब्रोंडचा मगेनुड। मेकोपुकीम ठेयब सेंदा पा पुंइशा ग्रीतेकम हना यो, मेको आन लोव्र मनंनुड” देंत। इजीकीएल ७:४; यसैया १:१५

## 9

### यरूसलेम खतम दुम्शो

1 मिनु परमप्रभुमी ठेयब सेंदा पा “सहर डा सजाइ गेब मुर आन नेक्था जाक्कीन। इन साइक्तीक या कुरशा जाक्कीन” दे ग्रीत।

2 मिनु गो ६ जना वोंइश मुर आइक्था डा उत्तर गे डा लाप्चो रे जाक्शो ताता। मेको नेल्लेमी साइक्चा कली या कुरशो बाक्तेकम। मेको आन दातेमी बुश सुती वा फेक्शो ब्रेक्तीक कुरशो मुर का बाक्त। मेकोपुकी आगा ओव्रशा कांसा के चढ़ेतीक आ नेक्था राप्तेकम। इजीकीएल १०:२; दानीएल १०:५

3 मेना इस्राएली आन परमप्रभु आ छेडछेड करूब आन दाते रे इर गे याक्सीशा परमप्रभु यावे आ खिं आ लाप्चोम जाक्दीन्ने थुम्शो बाक्त। मिनु मेकोमी मेको सुती के वा फेक्शो ब्रेक्तीक कुरशो मुर कली

4 “यरूसलेम सहर आ एर ओंथ नेल्ल हिरशा मेकेर पशो मूर्ति पूजा नेल्ल आन पर्बम सुर्ता नु रोंका पाइब मुर नेल्ल आन कुप्फीम चिन्ड का वोतो” दे माइक्तु। प्रकाश ७:३

5 मिनु मेकोमी आं नेंचा डा पा अरु आन कली “गेपुकी मेको आ नोले लशा, सहर एर ओंथ गाक्शा मुर आन कली सतीन। मेको आन कली शिशी मपथु, सुइ आन कली ब्रोंडचा मगेने।

6 खुशो, ठिटा ठिटी, मीश मुर नु आल ब्रेप्च नेल्ल आन कली सतीन। तन्न आन कुप्फीम मेको चिन्ड पाइशो आन कली मथिने। आं बाक्तीक रे मेको मो पचा गोने” दे माइक्तीमी। मिनु मेकोपुकीम मेको परमप्रभु यावे आ खिं आ डोंइती बाक्शो खाल्पा आन रेन मो पचा गोम्तेकम। येरमीया २५:२९

7 मिनु मेकोमी मेको आन कली “आं खिं ग्रॉग्रा दिशो सेलीन। साइशो मुर आन कली लाडगाम प्रिंदिने, लने” दे माइक्तीमी। मोपतीके मेकोपुकी सहरम लशा, मुर आन कली साइक्तेकम।

8 मेकोपुकीम साइक्ना साइक्न लाम्तेकम। गो चहिं आं का ला बाक्ती। मिनु गो खुम्की पा बाप्शा ठेयब सेंदा पा “परमप्रभु, परमप्रभु यावे, इन गाइशो यरूसलेम कली मोइक्नीनु, इस्राएल डा लीशो नेल्ल आन कली यो साइक्नीनी?” देंती। इजीकीएल ११:१३

9 मिनु मेकोमी आं कली “इस्राएल नु यहूदा डा मुर आन खिं डा मुर आन दोस थम ठेयब बाक्ब। रागी नेल्ल हुश खाक्शेम ब्रीशो बाक्ब। मिनु सहर दूली पतीकेम ब्रीशो बाक्ब। मारदे हना मेकोपुकीम ‘परमप्रभु यावेमी एको रागी प्रोंइशो बाक्ब। मिनु परमप्रभु यावेमी मारेइ मताइब’ देंनीम। इजीकीएल ८:१२

10 मोपतीके गो मेको आन कली शिशी मपथु सुइ आन कली ब्रोंडचा मगेनुड। मेको आन पशो खोदेशो पा सजाइ गेनुडमी” देंत। इजीकीएल ७:४

11 मिनु मेको सुती वा फेक्शो ब्रेक्तीक कुरशो मुरुम “गो इन अरेशो खोदेशो पाता” देंत।

## 10

## परमप्रभु आ छेडछेड

## इजीकीएल १:४-२८

1 मिनु कोव्रडुनु, मेको करूब आन पिया आन तारी डा बाक्तीके आ इर नीर माइशो हीरा खोदेशो बाक्त। मेको टेयब नित्तीक का खोदेशो बाक्त।

2 मिनु परमप्रभु यावेमी मेको सुती के वा फेक्शो मुर कली “करूब आन दी गे बाक्शो गुगील आन दातेम लावो। मिनु मेको करूब आन दातेम बाक्शो मी आ कोइला हुइशशा, सहर आन तार फ्रावो” दे माइक्तु। मिनु आं कोव्रना कोव्रन, मेको आगा ओव्रत। इजीकीएल ९:२; प्रकाश ८:५

3 मिनु मेको मुर आगा ओव्रमेनु, करूब परमप्रभु यावे आ खिं आ दक्खिन गे बाक्तेकम। मिनु गोस्स काम परमप्रभु यावे आ खिं डा आगा डा लाडगा ब्रीत।

4 मिनु परमप्रभु यावे आ छेडछेड करूब आन रे परमप्रभु यावे आ खिं आ लाप्यो गे लत। मिनु गोस्सुम खिं ब्रीत। मिनु आ लाडगा परमप्रभु यावे आ छेडछेड डा हाम्सोम ब्रीत। इजीकीएल १:२८; प्रस्थान ४०:३४; यसेया ६:४

5 मेको करूब आन फ्रां आन रेयके लाडगा सम्म नेंसी बाक्त। मेको परमप्रभु यावे ब्वाक्शो खोदेशो पा नेंसी बाक्त।

6 मिनु परमप्रभु यावेमी मेको सुती के वा फेक्शो मुर कली “मेको गुगील आन दातेम लशा करूब आन दाते डा मी पितो” दे अरेवानु, मेको गुगील आ नेक्था राप्त।

7 मिनु करूब काम आ गुइ करूब आन बाक्तीक डा मी गे दिताक्व। मिनु मेकोमी मी आ कोइला हुइशशा, मेको सुती के वा फेक्सीशो मुर आ गुइम कुर पाप्तु। मिनु मेको मी कुरशा लाडगा ग्रूत।

## परमप्रभु आ छेडछेड लशो

8 मेको करूब आन फ्रां आगाम मुर आन गुइ खोदेशो तांडसाक्व।

9 मिनु कोव्रडुनु, मेकेर ४ ओटा गुगील करूब आन नेक्था बाक्तेकम। करूब का आ नेक्था गुगील का बाक्त। मेको गुगीलपुकी टल्केशो पित मनी माइशो हीरा खोदेशो बाक्तेकम।

10 मिनु मेको गुगील नेल्ल खाल का डा बाक्तेकम। गुगील का आगाम अर्को गुगील बाक्शो खोदेशो तांडसाक्म।

11 मेकोपुकी गाक्मानु, तेइ महिरथु ग्येत्थ गे उत्तर, दक्खिन, पूर्ब नु पच्छिम गे गाक्बाक्तेकम। मेको डोंइती डा गुगील ते ते लमे, अर्को यो मेक मेक गे लाइबाक्तेकम।

12 मेको आन रां नेल्ल, मेको आन चीं, मेको आन गुइ, फ्रां नु मेको ४ ओटा करूब आन गुगील नेल्ल मिक्ची मिक्च पाइशो बाक्तेकम।

13 गो मेको आन कली “गेय पाइब गुगील” देशो नेता।

14 मेको करूब नेल्ल आन के ४ ओटा कुल बाक्तेकम। डोंइती डा कुल करूब के, मेको आ नोले डा कुल मुर के, मेको आ नोले डा कुल गुप्स के नु नेल्ल क्येडा नोले डा कुल ककाकुली के खोदेशो बाक्तेकम। इजीकीएल १:१०

15 मिनु मेको करूबपुकी इर गे लाम्तेकम। मेको डोंइती डा सोक्त पाइशोपुकी बाक्तेकम। डोंइती गो मेको आन कली केबार खोला आ नेक्था तशो नडमी। इजीकीएल १:१

16 मिनु मेको करूब गाक्मानु, मेको गुगील आन नेक्था गाक्बाक्तेकम। करूब इर लचा कली आन फ्रां ग्येत्थ क्युकगमेनु, मेको आन नेक्था बाक्शो गुगील महिरथु, गाक्बाक्तेकम। इजीकीएल १:१९

17 मिनु मेको करूब दिक्मानु, मेको गुगील यो दिक्बाक्तेकम। मेको करूब इर गे बोक्मानु मेको गुगील यो मेको नु बोक्बाक्तेकम। मारदे हना मेको सोक्त पाइशो आन सोक्त मेको गुगीलमीन बाक्त।

18 मिनु परमप्रभु यावे आ छेडछेड आ खिं डा लाप्यो रे गूशा, करूब आन तार गे दिक्त। इजीकीएल १:२८



19 मिनु मेको करूबम आन आन फ्रां क्युक्तेकम। मिनु आं डोंइती खप रे इर गे लाम्तेकम। मिनु मेको लमानु, मेको गुगील यो मेको नु इर गे लाम्तेकम। मिनु मेकोपुकी परमप्रभु यावे आ खिं आ पूबं गे डा लाप्यो आ नेक्था दिक्तेकम। मिनु इस्राएल डा परमप्रभु आ छेडछेड मेको आन तार गे बाक्त।

20 मेको केबार खोला आ नेक्था इस्राएली आन परमप्रभु आ आगाम बाक्शो आं तशो सोक्त पाइश्शो बाक्तेकम। मिनु गो मेको करूब बाक्मा बाक्त, दे तुइक्ताकड।

21 मेको नेल्ल आन के ४ ओटा कुल नु ४ ओटा फ्रां बाक्तेकम। मिनु मेको आन फ्रां आगाम मुर आन गुड खोदेशो बाक्तेकम।

22 मेको आन कुल केबार खोला आ नेक्था आं तशो सोक्त पाइश्शो आन कुल खोदेशो बाक्तेकम। मेकोपुकी तेइ लमानु, डोंइती गे पा गाक्बाक्तेकम।

## 11

### ठेयब मुर आन कली सजाड

1 मिनु सोक्तीम आं कली क्युक्शा, परमप्रभु यावे आ खिं डा पूबं गे डा लाप्योम चाक्ती। मेको पूबं गे कोव्रशो बाक्त। मिनु मेको आगा ओव्रतीकेमी २५ जना मुर बाक्तेकम। गो मेको आन दातेम इस्राएल डा ठेयब मुर अज्जुर आ तौ याजन्त्याह नु बेनायाह आ तौ पेलात्याह आस कली यो तातासी। इजीकीएल ३:१२

2 मिनु परमप्रभु यावेमी आं कली “ए मुर, मेकोपुकीम एको सहरम मरिम्शो पचा कली नु परमप्रभु यावे आ अरेशो लोव्र मटिचा कली अर्ती गेशा शेंशो बाक्तेकम।

3 मेकोपुकीम ‘खिं सेलतीक नाक्ती रीब पा मजाक्बा को? एको सहर कराइ खोदेशो बाक्ब। मिनु गो चहिं श्ये बाक्नय’ देनीम। इजीकीएल २४:३-१४

4 मोपतीके ए मुर, मेको आन पबंम नोले दुम्ब लोव्र पावो। आं देशो लोव्र पावो” देत।

5 मिनु परमप्रभु यावे आ सोक्त आं तार जाक्त। मिनु मेकोम आं कली “परमप्रभु यावेमी ‘ए इस्राएल आ खिं डा मुर, गे मार मिम्शो बाक्नीनी, गो मेको नेल्ल तुइक्नुड।

6 गेपुकीम एको सहरम शुश मुर आन कली साइश्शा, आ लां नेल्ल बेक्शो मुरुम प्रिंपाइक्तीनी’ देत।

7 मोपतीके परमप्रभु, परमप्रभु यावेमी ‘गे सहरम साइश्शा इन ताइश्शो मुर श्ये बाक्नीम। मिनु एको सहर कराइ बाक्ब। तन्न गो इन कली सहर रे गुंइनुड।

8 गेपुकी तरवार तशा हिंतीनी। तन्न गो इन पबंम तरवार चाक्शा साइक्पाइक्नन्नी।

9 गो इन कली सहर रे गुंइनन्नी। मिनु अर्को रागी डा मुर आन गुडम गेनन्नी। मिनु इन कली निसाफ पाइक्नुड।

10 गेपुकी तरवारम साइक्चा पुंडसीशा गोल्नीनी। गो इन कली इस्राएल आ सांदम निसाफ पाइनुड। मिनु गेपुकीम गोन परमप्रभु यावे नड, दे तुइक्नीनी। २राजा २५:२०-२१

11 एको सहर इन कली कराइ म्दुम्ब। मिनु गे मेको कराइ डा श्ये म्दुम्नीनी। गो इन कली इस्राएल आ सांदम निसाफ पाइनुड।

12 मेना गेपुकीम गो परमप्रभु यावे नड, दे तुइक्नीनी। गेपुकीम आं फुल्लु मुशा ब्रेक्शो लोव्र मटिनी। आं निसाफ पतीक लोव्र यो मटिनी। तन्न गे इन एर ओंथ बाक्ब रागी रागी डा मुर आन पतीक लोव्र पाइतीनी” दे परमप्रभु यावेमी देत।

13 गो परमप्रभु यावे आ लोव्र पना पन बाक्डानु, बेनायाह आ तौ पेलात्याह बेक्त। मिनु गो खुम्की पा बाप्शा ठेयब सेंदा पा “परमप्रभु, परमप्रभु यावे, मार, गे इस्राएल डा लीशो नेल्ल आन कली साइक्नीनी?” देती। इजीकीएल ९:८

### ग्याइक्चा पुंडसीशो आन कली लोव्र

14 मिनु परमप्रभु यावेमी आं कली लोव्र पाप्नु।

15 मार लोव्र पाप्तु देशा हना “ए मुर, इ लोकबपुकी, इ खिं डा मुर, ग्याइशशा लाइक्चा पुंडसीशो इ लोकबपुकी, इस्राएल आ खिं डा मुर नेल्ल आन पबंम यरूसलेमम बाक्ब मुरपुकीमी ‘मेकोपुकी परमप्रभु यावे रे डोन लाम्तेक्म। मोपा एको रागी इ कली अधिकार पचा कली गेशो बाक्त’ देशो बाक्तेक्म” दैत।

16 मोपतीके परमप्रभु, परमप्रभु यावेमी “गो मेको आन कली डोन रागी रागी डा मुर आन दातेम सोइक्ताक्डमी। गो मेको आन कली राज्य राज्य आन दातेमी फ्रात हना यो, इच्का नाक्ती सम्म मेको आन परमप्रभु दुम्ती। इजीकीएल ६:८-१०

17 मोपतीके गो मेको आन कली ‘गो इन कली जात जात डा मुर आन दाते रे खुप्ननी। मिनु ब्रशा लशो रागी नेल्ले रे पा खुप्ननी। मिनु गो इन कली इस्राएल रागी गेननी। येरमीया २४:५-६; येरमीया २९:२४

18 मिनु मेकोपुकी लेशशा जाक्शा, मेकेर डा ग्रान्रा दिशो थोव्रक नु मूर्ति नेल्ल गुंडशा ताइक्नीम।

19 मिनु गो मेको आन कली थुं का डा दुम्पाइक्नुडमी। मिनु मेको आन आगामी नक सोक्त का कुरपाइनुड। मिनु गो मेको आन फुल्लु खोदेशो थुं गुंडशा, श्ये के थुं कुरपाइनुडमी। इजीकीएल ३६:२६; येरमीया २४:७

20 मिनु मेकोपुकीमी आं फुल्लुम मुशा ब्रेक्शो लोव्र पशा, आं निसाफ पतीक लोव्र टीनीम। मिनु मेकोपुकी आं मुर दुम्नीम। मिनु गो मेको आन परमप्रभु दुम्नुड। इजीकीएल १४:११; येरमीया ७:२३

21 तन्न मेको आन ग्रान्रा दिशो मारेड मारेड मूर्ति आन नोले खोइक्ब आन कली आन पशो नेल्ल आन पियामीन मोइक्नुडमी, दे परमप्रभु, परमप्रभु यावेमी दैत’ दे मतो” दैत।

### परमप्रभु आ छेडछेड इर गे लशो

22 मिनु नोले आ नेक्था गुगील बाक्शो करूबमी आन फ्रां प्राक्तेक्म। मेना इस्राएली आन परमप्रभु आ छेडछेड मेको आन तार बाक्त। इजीकीएल १:२८

23 मिनु परमप्रभु यावे आ छेडछेड सहर आ दाते रे क्युकसीशा इर गे लत। मिनु सहर डा पूबं गे बाक्शो पहाड तार दिक्त।

24 मिनु परमप्रभु यावे आ सोक्तीम आं कली इर क्युक्ती। मिनु कोंइतीके कोंइशीमी आं कली कल्दी रागीम ग्याइशशा लाइक्चा पुंडसीशो आन बाक्तीकेम चाक्दीत्ती। मिनु नोले मेको कोंइतीके आं रे इर गे लाक्तु। इजीकीएल ३:१२

25 मिनु गो ग्याइशशा लाइक्चा पुंडसीशो आन कली परमप्रभु यावे आ लोव्र नेल्ल शेंताक्डमी।

## 12

### ग्याइशशा लाइक्चा पुंडसीशो लेशशो

1 परमप्रभु यावेमी आं कली लोव्र पाप्तु।

2 मार लोव्र पाप्तु देशा हना “ए मुर, गो काइ मटीब खिं डा मुर आन दातेम बाक्शो बाक्नेवे। मेको आन के मिक्च बाक्त हना यो, मताइनीम। मेको आन के नोफा बाक्त हना यो, मनेनीम। येरमीया ५:२१

3 मारदे हना मेकोपुकी मटीब मुर आन खिं डा बाक्नीम। मोपतीके गो रागी रे ग्याइशशा लाइक्चा पुंडसीशो मुर खोदेशो पा इ कुम्लो खिक्सो। मिनु नाक्तीन मेको आन डोंइती इ बाक्तीक रे ग्याइशशा लाइक्चा पुंडसीशो खोदेशो पा अर्को ठांउ लावो। मेकोपुकी मटीब खिं डा मुर बाक्तेक्म हना यो, रुप्नीमी कौं?

4 गो ग्याइशशा लाइक्चा पुंडसीशो दुम्चा कली, मेको आन डोंइती नाक्तीन इ मार मार फ्रेंदो। मिनु मेको आन डोंइती रे ग्याइशशा लाइक्चा पुंडसीशो मुर खोदेशो पा नाक्दो लावो।

5 मेकोपुकीम तचा डा पा गारोम पोव्रला खितो। मिनु इ कुम्लो मेकेर रे पा खीडो।

6 मेकोपुकीम कोव्रन कोव्रना गे इ कुम्लो इ बलाम कुरो। मिनु नां रिक्मेनु कुरशा गाक्को। रागी मतचा डा पा इ कुल सुम्सो। मारदे हना गो इ कली इस्राएल आ खिं डा मुर आन पबंम चिन्ड का सेल्शो बाक्नुड” दैत। इजीकीएल २४:२४,२७

7 गो मेको आ अरेशो खेदेशो पाता। मिनु ग्याइशशा लाइक्चा पुंडसीशो दुम्चा कली नाक्तीन आं कुम्लो फ्रेंशा गुंडताकड। मिनु नाक्दो गारोम पोत्रला खिल्ला। मिनु मेको आन तन तना आं कुम्लो बलाम कुरशा नाक्दो गाक्ती।

8 मिनु आ सुनी परमप्रभु यावेमी आं कली लोत्र पाप्तु।

9 मार लोत्र पाप्तु देशा हना “ए मुर, मार, मेको इस्राएल डा मटीब खिं डा मुरपुकीम ‘गे मार पवी’ दे इ कली हिल्लो मपामे?” दैत।

10 मेको आन कली “परमप्रभु, परमप्रभु यावेमी मार दैत देशा हना ‘एको लोत्र यरूसलेम डा सासन पाइब नु इस्राएल डा मुर नेल्ल आन परबम बाक्ब’ दे माइक्मी।

11 मेको आन कली ‘गो गे इन कली चिन्ड का दुम्ती। गो मार पडा, मेको आन कली पाइनीमी। मेकोपुकी रागी रे ग्याइशशा लाइक्चा पुंडसीनीम’ दैत।

12 मेको आन दातेम बाक्शो सासन पाइबमी नाक्दो आ बलाम मार मार कुरशा गाक्ब। मिनु लाडगा यूचा कली गारोम पोत्रला खिण्व। मिनु मेकोम आ रागी मकोत्रचा कली आ कुल सुम्ब। २राजा २५:४

13 गो मेको आ तार आं ग्याइल आप्नुड। मिनु मेको आं ग्याइलीम बिक्ब। मिनु गो मेको कली कल्दी आन रागी बेबीलोनम चाक्नुड। तन्न मेकोम, मेको रागी मताइब। मिनु मेकेरन बेक्ब। इजीकीएल १७:२०; येरमीया ३९:७

14 मेको आ एर ओंथ बाक्ब आ गेय पाइबपुकी नु आ लडाइ पाइब नेल्ल आन कली फशेम एर ओंथ ब्रपाइक्नुडमी। मिनु तरवार शोइशशा खेदा पाइनुडमी।

15 मिनु गो मेको आन कली रागी रागी डा मुर आन दातेम फ्राइनुडमी। राज्य राज्यम एर ओंथ ब्रपाइक्नुडमी। मिनु मेकोपुकीम गोन परमप्रभु यावे नड, दे तुडक्नीम।

16 तन्न गो मेको आन दाते डा का निक्शी आन कली तरवार, अन्काल नु मुर बेक्तीक रोइ रे प्रोइनुडमी। मिनु मेकोपुकी ते ते बाक्नीमी, मेक मेक डा रागी रागी डा मुर आन दातेम आन ग्रांरा दिशो गेय पशो आ परबम बिन्चीम ला मो पका बाक्त देंमल। मिनु मेकोपुकीम गोन परमप्रभु यावे नड, दे तुडक्नीम” दे परमप्रभुम दैत। इजीकीएल ६:८

### इजीकीएल चिन्ड दुम्शो

17 मिनु लेंशा परमप्रभु यावेम आं कली लोत्र पाप्तु।

18 मार लोत्र पाप्तु देशा हना “ए मुर, गे इ जचा थोत्रक जवीनु खिंखि पा जावो। मिनु ब्वाक्कु तूडीनु, हिंशा गिक गिक पा खिंखि पा तूडो।

19 मिनु रागी डा मुर नु यरूसलेम नु इस्राएल रागीम बाक्ब मुर आन कली परमप्रभु, परमप्रभु यावेमी ‘मेको आन जचा थोत्रक हिंशा जाइनीम। मिनु सुर्ता पा ब्वाक्कु तूनीम। मारदे हना मेकेर बाक्ब आन मरिम्शो पतीके, मेको रागी नु मेकेर बाक्शो मारेइ मारेइ गोरशो सेल्लुड।

20 मुर बाक्शो सहर नेल्ल श्येत्थ दुम्नीम। मिनु रागी नुण्व। मिनु गेपुकीम गो परमप्रभु यावे नड, दे तुडक्नीमी’ देशो बाक्ब” दैत।

21 मिनु लेंशा परमप्रभु यावेमी आं कली लोत्र पाप्तु।

22 “ए मुर, इस्राएल रागी आ परबम मार लोत्र बाक्बा? नाक्ती लाक्ना लाक्न बाक्नीम। मिनु परमप्रभु यावे आ कौइतीके मखाप्नीम। २पत्रुस ३:४

23 मोपतीके मेको आन कली ‘परमप्रभु, परमप्रभु यावेमी, गो मेको मो देंतीक लोत्र आ अर्थ साम्नुड। मिनु मेकोपुकीम इस्राएलम मेको देंतीक लोत्र गेनायो मदेनीम’ दे माइक्मी। मेको आन कली ‘नाक्त नेक्थान जाक्शो बाक्नीम। कौइतीक नेल्ल गाण्व। हबकुक् २:३

24 मारदे हना मुल लेंशा गेनायो इस्राएली आन दातेम जोल पा कौइतीके नु लेम्शा लिंक्यु कोत्रब म्दुम्नीम।

25 मारदे हना गो, परमप्रभु यावे आं देशो लोत्र पशा, खान्नुड। मेको देश मपाइब रीब पा दुम्ब। ए मटीब खिं डा मुर, इन पालामीन गो आं देशो लोत्र खान्नुड' दे परमप्रभु, परमप्रभु यावेमी देशो बाक्ब" देंत।

26 मिनु लेंशा परमप्रभु यावेमी आं कली लोत्र पाप्तु।

27 मेकोमी "ए मुर, इस्राएल आ खिं डा मुरपुकी, मेको आ कोइतीकेमी कोइशो लोत्र शुश बर्स नोले ला दुम्ब। मेको नोले दुम्ब लोत्र बाक्ब।

28 मोपतीके मेको आन कली 'परमप्रभु, परमप्रभु यावेमी आ देशो लोत्र खाव्ब। लोत्र का यो मजाम्ब। मार देबा, मेको पाइब' दे माइक्मी, दे परमप्रभु, परमप्रभु यावेमी" देंत।

## 13

जोल पा परमप्रभु आ लोत्र पाइब

1 परमप्रभु यावेमी आं कली लोत्र पाप्तु।

2 मार, लोत्र पाप्तु देशा हना "ए मुर, इस्राएल डा आं लोत्र पाइब आन कली नु आंम आन मिम्शो लोत्र पाइब आन कली 'परमप्रभु यावे आ लोत्र नेनीन' देनो।

3 मेको निप्स मपाइशो आं लोत्र पाइब आन कली 'आबी, मेको आंमा आन थुं डा लोत्र, आं कोइतीके मतथु, लोत्र पाइनीम। येरमीया १४:१४

4 ए इस्राएल, जोल पा आं लोत्र पाइब ब्रेशो खिंम बाक्ब सिवार खोदेशो बाक्नीम।

5 गे ब्रेशो गारो लेंशा मसेली। गे इस्राएल कली वारच मपनी। मोपतीके परमप्रभु यावे, आं नाक्त मेको बुइनीम' देंत। यसैया २:१२

6 मेको आन तशो लोत्र जोल बाक्शा, आन लिंक्यु कोव्रतीक जोल बाक्ब। मेकोपुकीम 'परमप्रभु यावेमी देशो बाक्ब' देंनीम। तन्न मेको परमप्रभु यावेमी सोइशो मनम। मो हना यो मेकोम आन लोत्र गाप्ल, दे आस पाइनीम। इजीकीएल २२:२८; येरमीया ५:३१

7 गेपुकीम जोल पा कोइतीके तशा, लिंक्यु कोव्रशा, जोल लोत्र ला पाइब दुम्तीनी। तन्न गो इन कली काइ लोत्र मपथु, गेपुकीमी 'परमप्रभु यावे आ लोत्र बाक्ब देंतीनी' दे माइक्मी" देंत।

8 मोपतीके परमप्रभु, परमप्रभु यावेमी "गेपुकीम फश लोत्र पा, जोल पा कोइतीक आ परबंम लोत्र पतीके, गो इन कली मरिम्शो पाइनुड।

9 'मेको दूली पा कोइतीक लोत्र पाइब आन परबंम नु जोल पा लिंक्यु कोव्रब आन परबंम, गो आं गुड इन गे क्युक्नुड। मेकोपुकी आं मुर आन दातेमी बाक्चा मताइनीम। मेको आन नें इस्राएली आन खिं डा मुर आन नें ब्रेक्तीकेम ब्रेक्चा मताइनीम। मेकोपुकी इस्राएल रागीम ओव्रचा मताइनीम। मिनु गेपुकीम गोन परमप्रभु यावे नड, दे तुइक्नीनी, देशो बाक्ब' दे माइक्मी" देंत। इजीकीएल १४:९

10 थमा पा, मेकोपुकीम आं मुर आन कली दूली लां खोइक्पाइशशा, थुं नाइक्तीके मबाक्थु, यो "थुं नाइशशा बाक्कीन" देंनीम। मिनु मुरपुकीम ब्रेत्चा चिक्शो गारो प्रोव्रनीमी, मेको जोल पा लोत्र पाइबम बुलु बुइशशा सुम्नीम। येरमीया ६:१४

11 गे मेको बुलु बुइक्ब आन कली "थाम्पा ठेयब रेउ यीब। मिनु ठेयब मुप्स यीनीम। मिनु फश गिवार जाक्ब।

12 मिनु मेको गारो ब्रेव्ब। मार, मुरपुकीम इन कली 'गे इन बुइशशो बुलु ते लाक्गा, दे हिल्लो मपाइनीमी? देशो बाक्ब' दे माइक्मी" देंत।

13 मोपतीके परमप्रभु, परमप्रभु यावेमी "गो आं गाइशशोम थम हिंचा डा फश गिवार पपाइक्नुड। मिनु आं चुरशोम खतम पोक्चा कली रेउ नु मुप्स जाक्ब।

14 मिनु मेकोमी इन बुलु बुइशशो गारो नेल्ल ब्रेप्पाइक्ब। आ जग यो तांइसीब। मेको प्रेदुनु, गे गारो आगाम बेक्नीनी। मिनु गेपुकीम 'गोन परमप्रभु यावे नड' दे तुइक्नीनी।

15 मोपा गो आं गाइशशो मेको गारो नु मेको बुलु बुइक्ब आन तारी मोइक्नुड। मिनु गो इन कली 'मुल मेको गारो मबा, मेको आन कली बुलु बुइक्ब यो मबाक्म' देंनुड।

16 इस्राएल डा मेको जोल पा परमप्रभु यावे आ लोव्र पाइबपुकीम यरूसलेम आ परबम लोव्र पांमेक्म। मिनु मेकेर थुं नाइश्शा बाक्तीक मदुमथुं यो 'थुं नाइश्शा बाक्तीक ताइतक' देंतेक्म।

17 मेकोमी 'मुल ए मुर, इ मुर आन तमी आन कली हुइक्तो। मेकोपुकीम आन थुंम मिम्शा लोव्र पाइनीम। गे परमप्रभु यावे आ लोव्र मेको आन कली पावो' देंत।

18 'आबी आबी, गुड कली फ्रेंतीक सेल्ब मीश मुर आन कली श्येत बाक्ब। मुर आन कली साइक्चा कली लाइश्शो कोव्रशा, कुल सुम्तीक वा सेल्ब मीश मुर आन परबम आबी आबी। मार, गेपुकीम आं मुर आन कली साइक्नीनी? मिनु गे ब्रोंइचा ताइनीनी डा? मताइनीनी।

19 मुठी का निक्शी क्योव्रज, नु टुक्रा का निक्शी शोब्ले आ परबम साइक्चा ममाल्शो मुर आन कली साइक्तीनी। मिनु ब्रोंइचा मगेचा माल्शो मुर आन कली ब्रोंइचा गेतीनी। मिनु आं मुर आन कली जोल पा मोदेशो पाइतीनी' दे परमप्रभु, परमप्रभु यावेमी मेको आन कली माइक्मी" देंत।

20 मोपतीके परमप्रभु, परमप्रभु यावेमी "गो इन फ्रेंतीक आ परबम इन कली मरिम्शो पाइनुड। गो इन गुइ रे चिकब खोदेशो पा साइक्चा चिकशो मुर आन कली इन गुइ रे प्रोंइनुड।

21 गो मेको आन कुल सुम्तीक वा शोल्शा, आं मुर आन कली प्रोंइनुडमी। मेकोपुकी मुल रे इन गुइ डा सिखार मदुम्नीम। मिनु गेपुकीम गोन परमप्रभु यावे नड, दे तुइक्नीनी।

22 मारदे हना गे जोल पा दोस गेशा ठीक पाइब मुर आन कली आन थुं लुकच लपाइक्तीनी। गो मोदेशो मपड। मिनु आं अरेशो लोव्र मटीब आन कली टीब मदुमीन, देशा ब्रोंइचा मगेनी। येरमीया २३:१४

23 मोपतीके गेपुकीम मुल रे जोल पा कोंइतीक मताइनीनी। गे लिंक्यु मकोव्रनीनी। गो आं मुर आन कली इन गुइ रे प्रोंइनुडमी। मिनु गेपुकीम गोन परमप्रभु यावे नड, दे तुइक्नीनी" दे परमप्रभुम देंत।

## 14

### मूर्ति पूजा पाइब आन कली दोस

1 इस्राएल डा खाल्पा का निक्शी जाक्शा, आं डोंइती निस्साक्म। इजीकीएल २०:१

2 मिनु मेना परमप्रभु यावेमी आं कली लोव्र पाप्टु।

3 मार लोव्र पाप्टु देशा हना "ए मुर, एको खाल्पापुकीम आन मूर्ति आन आन थुंम वोइश्शो बाक्तेक्म। मिनु मरिम्शो पा दाइल पांइसीतीक फुल्लु यो आन डोंइती वोइश्शो बाक्नीम। मार, आन हिल्लो पशो लोव्र गो लेत्चा माल्नुडा, डा?

4 मोपतीके गे मेको आन कली 'परमप्रभु, परमप्रभु यावेमी इस्राएल आ खिं डा मुर सुइमी मूर्ति आन थुंम वोइश्शा, आन मरिम्शो पा दाइल पांइसीतीक फुल्लु, आन डोंइती वोइश्शा, आं लोव्र पाइब आन बाक्तीक जाक्तेक्म हना, गो, परमप्रभु यावेमी, मेको आन थुंम मूर्ति वोइश्शा जाक्शो मुर आन कली लोव्र लेत्नुडमी।

5 मिनु मेको मूर्तिम पतीके इस्राएल आ खिं डा मुरपुकीम आं कली प्रोंइतेक्म। मो हना यो आन थुं फाइश्शा, आं गे लेत्चे चाप्टुडा, को?'

6 मोपतीके इस्राएल आ खिं डा मुर आन कली 'परमप्रभु, परमप्रभु यावेमी इन ग्रांरा दिशो गेय नेल्ल प्रोंइशा, इन मूर्ति रे पा लेश्शा आं गे जाक्कीन' देशो बाक्ब, दे माइक्मी।

7 इस्राएल आ खिं डा मुर सुइ नु मेकेर बाक्ब अर्को रागी डा मुर सुइमी आं कली प्रोंइशा, मूर्ति आन थुंम वोइश्शा, आन मरिम्शो पा दाइल पांइसीतीक फुल्लु आन डोंइती वोइश्शा, आं लोव्र पाइब आन बाक्तीक जाक्तेक्म हना, गो, परमप्रभु यावेमी, मेको आन थुंम मूर्ति वोइश्शा जाक्शो मुर आन कली लोव्र लेत्नुडमी।

8 गो मेको आन कली सजाइ गेनुडमी। मिनु गो मेको मुर कली कोंइतीक नु शुक्शी पाइक्तीक सेल्नुड। गो मेको कली आं मुर आन दाते रे तिल्लुड। मिनु गोन परमप्रभु यावे नड, दे तुइक्चा माल्नीनी।

9 मिनु सुइ परमप्रभु यावे आ लोव्र पाइबम आ लोव्र मार बाक्बा, दे हिल्लो पाइब आन कली आंमा थुंम मिम्शा लोव्र पाप्तु हना, गो मेको कली मोदेशो पपाइक्ता। मिनु गो मेको कली आं गुइ दिंशा, सजाइ गेशा आं मुर इस्राएली आन दाते रे क्याम्नुड। १राजा २२:२०-२३

10 मेको निम्फाम आस मरिम्शो पशो आ परबंम सजाइ ताइनीस। आं लोव्र पाइब नु आं लोव्र हिल्लो पाइब, निम्फा आस सजाइ उइक्थ उइक्थ दुम्ब। इजीकीएल ३:१७-२०

11 मिनु इस्राएल आ खिं डा मुर गेनायो आं रे पा बरलेशा मलाइनीम। मिनु मेकोपुकीम गेनायो हेंथे पा आंम कली ग्रॉग्रा दिशो मसेल्सीनीम। मिनु मेकोपुकी आं मुर दुन्नीम। गो मेको आन परमप्रभु दुम्नुड, दे परमप्रभु, परमप्रभु यावेमी देशो बाक्ब” देंत। इजीकीएल ११:२०

### परमप्रभुम गेशो सजाइ ठीक बाक्ब

12 मिनु परमप्रभु यावेमी आं कली लोव्र पाप्तु।

13 मार लोव्र पाप्तु देशा हना “ए मुर, तेकोइ रागी डा मुर आन थुं फाइशशा आं कली प्रॉइशा अर्को आ नोले खोइक्तेकम हना, गो मेको आन परबंम आं गुइ दिंशा आन जचा थोव्रक खतम पोक्नुड। अन्काल चाक्शा, मेकेर डा मुर नु बी ब्यफ, क्यारश भेडा नेल्ल आन कली साइक्नुडमी। इजीकीएल ४:१६

14 मेकेर नोआह, दानीएल नु अय्युब सांफा बाक्तेकम हना यो, मेकोम आन ठीक पतीकेम आंमा ला ब्रॉइचा ताम वा, दे परमप्रभु, परमप्रभु यावेमी देशो बाक्ब” देंत। येरमीया १५:१

15 गो मोदेशो रागी कली खतम सेल्चा कली ब्वाकी डा जन्तु सोइक्ताक्डमी हना, जन्तुपुकीम पतीके मेको रागी रे सुइ एर ओंथ पने मचाप्तेकम हना,

16 मिनु मेको मुर सां मेकेर बाक्तेकम हना, गो आं ब्रॉइशा बाक्शो खोदेशो पा, मेकोम आन तमी तौ आन कली प्रॉइने मचबेम वा। मेकोपुकी आंमा ला ब्रॉइम वा। मिनु मेको रागी गोरशो रागी दुम वा।

17 मिनु परमप्रभु, परमप्रभु यावेमी “गो रागी आ परबंम तरवार सोइशशा, मेको तरवार कली ‘मुर नु बी ब्यफ, क्यारश भेडा नेल्ल साइक्मी” देंती हना,

18 मिनु मेको मुर सां मेकेर बाक्तेकम हना यो, गो आं ब्रॉइशा बाक्शो खोदेशो पा मेकोम आन तमी तौ आन कली प्रॉइने मचबेम वा। मेकोपुकी आंमा ला ब्रॉइम वा।

19 मिनु गो मेको रागीम मुर बेक्तीक रोइ सोइशशा, हुश खाक्श पोक्शा, मेकेर डा मुर नु बी ब्यफ, क्यारश भेडा साइशशा आं गाइशशा मोइक्ता हना,

20 मिनु मेकेर नोआह, दानीएल नु अय्युब बाक्तेकम हना यो, गो आं ब्रॉइशा बाक्शो खोदेशो पा मेकोम आन तमी तौ आन कली प्रॉइने मचबेम वा। मेको आन ठीक पतीकेम आंमा ला ब्रॉइम वा” देंत।

21 परमप्रभु, परमप्रभु यावेमी “गो यरूसलेमम आं ४ ओटा हिंचा डा श्येत तरवार, अन्काल, ब्वाकी डा जन्तुपुकी नु मुर बेक्तीक रोइ सोइशशा मेकेर डा मुर नु बी ब्यफ, क्यारश भेडा आन कली साइक्तामी हना, सुइ मब्रॉइम वा। इजीकीएल ५:१७; लेवी २६:१६-२५; येरमीया १५:३; प्रकाश ६:८

22 मो हना यो मुर आन दाते डा का निक्शी ब्रॉइशा बाक्नीम। मेको आं तमी तौ गूशा इ बाक्तीक जाक्नीम। मिनु गे मेको आन मिम्शो नु आन पशो ताइनेवे। मिनु गो यरूसलेम कली श्येत गेशो नु क्याम्शो आ परबंम इ थुं नाइक्नेवे।

23 मेको आन मिम्शो नु आन पशो तशा, मेकोपुकीम इ थुं नाइक्पाइक्नीम। मिनु गो मेकेर मार मार पडा, मेको नेल्ल मोशीन मपड, दे तुइक्नेवे” दे परमप्रभु, परमप्रभु यावेमी देंत।

## 15

### शोर गाक्शो अडगुर बोट

1 मिनु परमप्रभु यावेमी आं कली लोव्र पाप्तु।

2 मार लोव्र पाप्तु देशा हना “ए मुर, मार, ब्वाकीम बाक्ब अडगुर बोट आ शी ब्वाकी डा अरु तेकोइ रवा आन शी क्येडा रिम्शो बाक्बा डा? येरमीया २:२१

3 मेको रे मारेइ थोत्रक सेल्चा दुम्बा डा? मुरपुकीम मार मार क्युकचा कली मेको के कोडग सेल्नीमी डा?

4 मेको मीम चोइनीम। मेको मीम आ सुर निक्शी नेक्शा, आ दाते डा कोइला दुम्शा लीमेनु, मार दुम्बा डा? यूहन्ना १५:६

5 मेको सेसीन बाकमेनु ला यो मारेइ मदुम्त हना, मीम नेक्शा क्येर दुम्मेनु, मारेइ दुम्बा, डा?" देशो बाक्ब।

6 मोपतीके परमप्रभु, परमप्रभु यावेमी "दोपा ब्वाकी डा रवा आन दाते डा अडगुर बोट कली मीम चोचा कली गेडा, मोपा गो यरूसलेम डा मुर आन कली यो पाइक्नुडमी।

7 गो मेको आन कली सजाइ गेनुड। मेकोपुकी मी रे ब्रोंइतेकम हना यो, मीम मेको आन कली दाक्ब। गो मेको आन कली सजाइ गेडानु, गोन परमप्रभु यावे नड, दे तुइक्चा माल्नीनी।

8 मिनु आन थुं फाइशशो अरु आन नोले खोइक्तीके मेको आन रागी मुर मबाक्तीके सेल्नुड" दे परमप्रभु, परमप्रभु यावेमी देंत।

## 16

यरूसलेम तेल्लेम खोदेशो दुम्शो

इजीकीएल २३:-

1 परमप्रभु यावेमी आं कली लोत्र पाप्तु।

2 मार लोत्र पाप्तु देशा हना "ए मुर, यरूसलेम कली मूर्ति पूजा पचा मदुम्ब, दे तुइक्पतो।

3 मिनु मेको कली परमप्रभु, परमप्रभु यावेमी यरूसलेम कली 'इ गोतीके नु इ जरमेतीक रागी कनानी आन रागी बाक्ब। इ आफ एमोरी का बाक्त। इ ममा हिती बाक्त।

4 गे जरमेसेनु सुइम इ सपु मखोदेम। इ कली ब्वाक्कुम मचिक्तेम। सुइम इ रांम हिक्सी मखेक्तेम। इ कली सुइम वाम मगिलेम।

5 सुइम मेको नेल्ल पचा कली इ कली शिशी मकोइदेम। तन्न गे जरमेसेनु, इ कली रूम ताइक्ताक्म। मारदे हना इ कली ग्रॉग्रा दित्ताक्म।

6 मिनु गो इ नेक्था रे पा लडानु, इ कली हुश लुम्सीशा बाक्शो ताइतन। मिनु गे मोपा लुम्सीशा बाक्डेनु, गो इ कली रू डा बोट खोदेशो पा कोल्शा, ब्रोंइशा, बाक्को' देंती।

7 मिनु गे कोल्शा ठेयब दुम्ते। मिनु इ कुचु कोल्शा इ चां लाइशशो दुम्त। तन्न गे वा मफेक्शो शिश्रा बाक्ते।

8 गो लेंशा इ नेक्था रे पा लडानु, गे ग्युबे पची ना दुम्शो बाक्ते। मिनु गो आं वा आ सुरमी इ शिश्रा रां सुम्ता। गो गे नु कबल का पाता। मिनु गे आं के दुम्ते। रूथ ३:९; प्रस्थान १९:५

9 नोले गो इ कली ब्वाक्कुम चिक्शा इ हुश नेल्ले चिक्ताक्न। मिनु इ कली तेल खेक्ताक्न।

10 नोले गो इ कली बुटा आप्शो वाम ग्योम्ताक्न। मिनु इ खोइलीम रिम्शो कुशुल के जुत्ता लिक्ताक्न। गो इ कली रिम्शो पा किरशो सुती श्येले के वा फेक्ताक्न। मिनु शुश क्येट लाइब वाम इ कली ग्योम्ताक्न।

11 गो इ कली गहना पांइताक्न। इ गुइम चुरा लिक्ताक्न। इ शुरम सुन के माला रेल्ताक्न।

12 गो इ नेंम मुन्द्री लिक्ताक्न। मिनु इ नोफाम माडवडी क्युक्ताक्न। इ पियाम दारशो सुन फू चुइक्ताक्न।

13 मोपा गे सुन चांदीम ग्योम्साक्वे। इ वा रिम्शो पा किरशो सुती श्येले के वा, शुश क्येट लाइब वा नु बुटा आप्शो दारशो वा दुम्तेक्म। इ जचा थोत्रक रिम्शो फस, खुदो नु रिम्शो तेल बाक्तेक्म। गे थम दारशो दुम्शा कोल्ते। मिनु गे पिपीम दुम्चा शिरते।

14 गे दारशो दुम्तीके इ नें रागी रागी डा मुर आन दातेम ब्रत। मारदे हना इ दारस मारेइ मदुम्शो रिम्शो बाक्त। मेको नेल्ल आं इ कली गेशो ग्योम्तीके रे मोदेशो दुम्त, दे परमप्रभु, परमप्रभु यावेमी देशो बाक्ब" देंत।

15 मिनु परमप्रभुमी “तन्न गे इ दारसम थमा सुइक्तीवी। मिनु गे इ नें चेम्शा तेल्लेम का दुम्ते। इ नेक्थारे पा लाइब सु बाक्तेकम हना यो, गे मेको नु तेल्लेम पाप्तीवी। येरमीया २:२०

16 गे इ वारे लाइशशा, इ कली दारशो थान सेलतीवी। मिनु मेकेर गे तेल्लेम पाप्तीवी। मेको मोदेशो डोंइती गेनायो मदुम्शो बाक्त। मिनु नोले यो गेनायो मदुम्ब।

17 गो इ कली गेशो दारशो गहना लाइशशा, मेको आं सुन चांदी के बाक्तेकम। मिनु मेको रे वोंइश मुर मूर्ति सेल्साक्वे। मिनु मेको नु तेल्लेम पाप्तीवी। होसे ८:४

18 गे इ बुटा आप्शो वा लाइशशा, मेको आन कली सुम्तीवी। मिनु गे आं तेल नु धूप मेको आन डोंइती चढ़ेप्तीवी।

19 गो इ कली जचा थोव्रक यो गेतन। गो इ कली रिम्शो फस, खुदो नु रिम्शो तेल जचा गेतन। तन्न गे मेको जचा थोव्रक मेको आन डोंइती ब्रोव्रशो रिना पपाइक्चा कली चढ़ेप्तीवी। मोदेशो दुम्त।

20 मिनु गे आं कली थिशो तमी तौ आन कली लाइशशा, मूर्ति आन कली जचा थोव्रक सेल्शा क्योरशा चढ़ेप्तीवी। मार इ तेल्लेम पशोमीन मगाम डा? इजीकीएल २०:२६; इजीकीएल २३:३७; ब्यवस्था १२:३१; २राजा १६:३; येरमीया ७:३१

21 गे आं आल आन कली क्योरशा, मूर्ति आन कली चढ़ेप्तीवी।

22 मिनु इ मूर्ति पूजा नु इ तेल्लेम पशो नेल्लेम ठिटी दुम्शो डा नाक्त ममिम्ती। मेना गे वा मफेक्सीशो शिश्रा नु हुश लुम्सीशो बाक्ते।

23 इ आं अरेशो मटिशो आ पर्वम परमप्रभु, परमप्रभु यावेमी इ पर्वम ‘आबी आबी’ दैत। येरमीया ११:१३

24 गे इ कली चोक चोकम मूर्ति पूजा पतीके सेल्साक्वे।

25 मिनु गे लां गुम्तीक नेल्लेम इ कली लाइशशा बाक्तीके सेल्शा, इ दारसम तेल्लेम पाप्तीवी। मिनु मेको रे पा लाइब नेल्ल आन कली गे इ रां गेशा इ तेल्लेम पतीक बारपाइक्तीवी।

26 गे इ माल्शो, इ नेक्था बाक्ब इजीप्त डा मुर नु तेल्लेम पाप्तीवी। मोपा इ तेल्लेम पतीक बारपाइशशा, आं कली थाम्पा गाइक्पाइक्ती।

27 मोपतीके गो इ कली सजाइ गेतन। गो इ कली शुश जचा थोव्रक मगेथु, इ जोरी सत्रु आन गुडम गेतन। गो इ कली पलिस्ती आन दाक्शो सिखार दुम्पाइक्चा कली गेतामी। पलिस्ती आन तमीपुकी इ मरिम्शो पशो तशा मुने पाम्तेकम।

28 गे अस्सुर डा मुर नु यो तेल्लेम पाप्तीवी। मारदे हना गे मोपा मरूशो बाक्ते। तेल्लेम पशा नोले यो मरूडे। इजीकीएल २३:१२

29 गे मार मार ग्याप्ब लेयब रागी कल्दी नु यो इ तेल्लेम पतीक बारपाइक्तीवी। मेको मो पशा यो मरूडे” दैत।

30 मिनु परमप्रभु, परमप्रभु यावेमी “गे मोदेशो पचा कली इ थुंम दोदेशो पा रोइ पचा माल्दा? गे एको गेय नेल्ल मुने मपाइशशा तेल्लेममी खोदेशो पा पाप्तीवी।

31 गे गुम्तीक लां नेल्ल नु इ चोक चोकम इ लाइशशा बाक्तीके सेलतीवी। तन्न गे तेल्लेम खोदेशो मदुमे। मारदे हना गे इ गाल्च मताक्गी।

32 गे हेंथे पाइब मीश, इ वोंइश आ पा डा अर्को नु बाक्नेवे।

33 मुरपुकीम तेल्लेम नेल्ल आन कली गाल्च गेनीम। तन्न गे चहिं दूली पा इ कली दाक्ब आन कली कका गाल्च गेप्तीवी। गे मेको आन कली एर ओंथ नेल्ल रे चाक्शा, गे नु इप्पाइक्चा कली घूस गेप्तीवी।

34 मोपा गे इ तेल्लेम पतीकेम अरु मीश मुर खोदेशो मदुमे। इ कली सुइम मयोव्रडेम। मोपतीके गे गाल्च गेप्तीवी। गे इ गाल्च मतगी। मोपा गे अरु तेल्लेम खोदेशो मदुमे” दैत।

35 मोपतीके ए तेल्लेम, परमप्रभु यावे आ लोव्र नेनो।



36 परमप्रभु, परमप्रभु यावेमी “मारदे हना माल्तीके थम ठेयब बाक्त, इ तेल्लेम पचा कली इ कली माल्शो मुर आन कली इ शिन्ना रां कोइताक्वी। मेको नेल्ल इ ग्रांरा दिशो मूर्ति नु इ आल आन हुश जारशो आ पर्वम बाक्ब।

37 मोपतीके गो इ तेल्लेम पशो नु ग्येरसीशा बाक्शो इ दाक्शो मुर नेल्ल आन कली इ एर ओंथ रे खुप्नुडमी। इ कली दाक्ब नु मदाक्ब नेल्ल आन कली खुप्नुडमी। गो मेको नेल्ल एर ओं रे खुप्नुडमी। मिनु गो मेको आन डोंइती इ कली शिन्ना सेल्लन। येरमीया १३:२२

38 गो इ कली हेंथे गाक्ब हुश खाक्श पोक्ब मीश मुर खोंदेशो पा आं निसाफ पतीक लोव्र कोव्रशा निसाफ पाइनुड। गो आं गाइशो नु रुश पशोमी सजाइ गेनुड। लेवी २:१०

39 मिनु गो इ कली इ मदाक्शो मुर आन गुडम जिम्मा गेनुड। मिनु मेकोपुकीम इ लाइशो बाक्तीके नु लां डा बाक्तीके प्रेन्नीम। मेकोपुकीमी इ वा प्रुइश इ दारशो थोव्रक रोइशशा, इ कली शिन्ना सेल्ला प्रॉइनीम।

40 मेकोपुकीम इ कली ग्रांगे माग्ये पोक्ब मुरपुकी चाक्नीम। मिनु फुल्लु आपनीम। मिनु इ कली आन तरवारम चेक्शा चोकटा लाम्टा सेल्लनीम। ब्यवस्था २२:२३-२४

41 मेकोपुकीम इ खिम मी सुइक्नीम। मिनु शुश मीश मुर आन डोंइती इ कली सजाइ गेनीम। गो इ तेल्लेम पतीक तेक्नुड। मिनु इ मुर आन कली गाल्च गेतीक तेक्नुड। २राजा २५:९

42 मिनु आं गाइशो नु आं रुश पशो, इ रे डोन नाइक्पाइक्नुड। मिनु गो सिक्सी पा बाक्शा मगाइक्नुड।

43 मारदे हना गे इ ठिटी बाक्डे ना डा नाक्त ममिम्ती। तन्न एको गेय नेल्लेमी आं कली गाइक्पाइक्ती। मोपतीके गो इ पशो इ पियामीन मोइक्ता। गे इ अरु ग्रांरा दिशो गेय नेल्ल प्रॉइशा यो इ पतीक नेल्ल मरिम्शो सेल्ला, इ गेय मतेम्दी डा? गे मूर्ति पूजा पाइब क्येडा मरिम्शो पाइब मनवे डा?” दैत।

44 मेकोम “कथा पाइब नेल्लेम इ पर्वम कथा पा ‘दोंदेशो ममा मोदेशो तमी’ दैनीम।

45 गे इ ममा आ तमी बाक्नेवे। मेकोम आ वोंइश नु आ आल आन कली प्रॉइतु। मिनु गे इ दिदी आ लोकब यो बाक्नेवे। मेकोम आ वोंइश नु आ आल आन कली प्रॉइतु। इ ममा हिती का बाक्ब। इ आफ एमोरी का बाक्ब। इजीकीएल १६:३

46 मिनु इ दिदी सामरीया बाक्ब। मेको इ उत्तर गे आ तमीपुकी नु बाक्शो बाक्त। इ लोकब नु आ तमी चहिं दक्खिन गे सोदोम सहरम बाक्नीम। मेको आ तमीपुकी नु बाक्शो बाक्ब।

47 गे मेको आन गाक्शो लाम ला मगाक्डे। मिनु मेको आन मूर्ति पूजा पशो आ नोले यो खोइक्तीवी। मिनु इच्का नाक्तीमीन इ पतीक नेल्लेम मेको आन क्येडा यो शुश मरिम्शो पाप्तीवी” दैत।

48 परमप्रभु, परमप्रभु यावेमी “गो आं ब्रोंइशा बाक्शो खोंदेशो पा, इ लोकब सोदोम नु मेको आ तमीपुकीम इ मरिम्शो पशो खोंदेशो गेनायो मपाम। मती १०:१५

49 इ लोकब सोदोम आ दोस मार बाक्त देशा हना, मेको नु आ तमीपुकी ठेयब लेशशा, शुश जशा ब्वशा, शोंप पाइशो दुम्शा बाक्तेक्म। मेकोपुकीम प्रुडग नु मारेइ मथीब आन कली वारच मपदेम।

50 मेकोपुकी ठेयब लेशशा, आं डोंइती ग्रांरा दिशो गेय पाम्तेक्म। मोपतीके गो मोदेशो तशा मेको आन कली तिल्लामी। उत्पत्ती १९:२४

51 सामरीयामी इ पशो पाप क्येडा उइक्थ यो मपावो। गे मेको आन क्येडा शुश मूर्ति पूजा पाप्तीवी। मिनु गे इ पशो गेय नेल्ल रे पा, इ लोकब आस कली ठीक पाइब तांइसीब खोंदेशो सेल्लो बाक्नेवे। येरमीया ३:११

52 गे इ मरिम्शो पशो रावो। मारदे हना गे इ लोकब आस कली इ क्येडा आइक्च सजाइ ताइब सेल्लतीवी। मारदे हना गे मेको आस पाप पशो क्येडा इ पशो मूर्ति पूजा शुश बाक्त। गे इ क्येडा मेको आस कली ठीक पाइब खोंदेशो सेल्लतीवी। मोपतीके मुने पावो, इ मरिम्शो पशो राव। मारदे हना गे इ लोकब आस कली ठीक पाइब खोंदेशो सेल्लो बाक्ते।

**परमप्रभुमी आ मुर आन कली दाक्ब**

53 मिनु गो सोदोम नु आ तमी आन कली रिम्शो दुम्तीक नाक्ती लेशशा गेनुडमी। मिनु सामरीया नु आ तमी आन कली यो मोदेशो पाइनुड। मिनु इ रिम्शो दुम्तीके नाक्ती यो लेशशा गेनन। ब्यवस्था ३०:३

54 मोपा गे इ मरिश्शो पशो राइनेवे। मिनु इ पशो नेल्ल आन परबम गे मुने दोक्चा माल्नेवे। मिनु मेको आस कली थुं नाइक्तीके दुम्नेवे।

55 इ लोकब सोदोम नु आ तमीपुकी डोंइती डा खोदेशो पा रिश्शो दुम्नीम। मिनु सामरीया नु आ तमीपुकी यो डोंइती डा खोदेशो पा रिश्शो दुम्नीम। मिनु गे नु इ तमीपुकी यो डोंइती डा खोदेशो पा रिश्शो दुम्नीनी।

56 डोंइती इ ठेयब लेत्तीक नाक्ती गे इ लोकब सोदोम आ परबम शुक्शी मपवी डा?

57 मेना मेकोपुकीम इ परमप्रभु यावे आ अरेशो मटिशो मतुइश्शो बाक्तेक्म। मुल अराम डा तमीपुकीमी इ कली शुक्शी पाइनीम। मेको आ नेक्था डा मुर, पलिस्ती आ तमीपुकीमी नु एर ओंथ डा मुर नेल्लेमी शुक्शी पा आइक्च मिन्नीम। अराम आ तमी एदोम यो बाक्ब।

58 गे इ मुने दोक्चा डा गेय नु इ मूर्ति पूजा पशो डा सजाइ तचा माल्नेवे” दे परमप्रभु यावेमी देंत।

गेना हना यो लीब कबल

59 परमप्रभु, परमप्रभु यावेमी “गे इ पशो खोदेशो पा गो इ कली पाइनुड। गे आं कसम जशो ममिम्ती। इस पशो कबल यो क्याम्ताक्वी।

60 मो हना यो गो इ ठिटी बाकडे नाक्त डा गे नु पशो कबल मिन्नुड। गो गे नु गेना हना यो लीब कबल पाइनुड। लेवी २६:४५; होसे २:१७; इजीकीएल ३७:२६; येरमीया ३१:३१-३४

61 मेना गे इ पशो नेल्ल मिम्शा, मुने दोक्शा, इ लोकब आस कली ब्राइनेवे। गो मेको आस कली इ तमी खोदेशो पा गेनन। तन्न मेको गे नु पशो कबलम पतीके पशो ममाइ। इजीकीएल २०:४३

62 मिनु गो गे नु ग्येत्थ लुकच मपाइब कबल पाइनुड। मिनु गे गोन परमप्रभु यावे नड, दे तुइक्नेवे।

63 मिनु गे इ डोंइती पशो मिम्शा मुने दोक्नेवे। गो इ पशो गेय नेल्ल आन परबम माफ गेनन। मिनु गे इ मुने आ परबम गे ठेयब लेशो लोत्र पने मचाप्नेवे” दे परमप्रभु, परमप्रभु यावेमी देंत। इजीकीएल ३६:३१-३२

## 17

अडगुर बोट नु ककाकुली आस कथा

1 मिनु परमप्रभु यावेमी आं कली लोत्र पाप्तु।

2 मार लोत्र पाप्तु हना “ए मुर, कथा का देनो। गे इस्राएल आ खिं डा मुर आन कली लोत्र पावो।

3 मिनु परमप्रभु यावेमी मेको आन कली ‘लाइश्शो, ठेयब फ्रां पाइश्शो ठेयब ककाकुली का बाक्त। मेको आ शुश ओफला शुश रड डा बाक्तेक्म। मेको लेबानोनम जाक्शा, लाइश्शो रवा आ डर प्रोइक्तु।

4 मेकोमी मेको रवा आ डर लाइश्शा, ग्याप्तीक लेयतीक रागीम चाक्दीत्तु। मिनु मेको ग्याप्ब लेयब आन सहर काम खुम्तु। इजीकीएल १६:२९

5 मिनु नोले मेकोमी रागी डा वांचेर लाइश्शा, रिश्शो खपीम खुम्तु। मेकोम मेको वांचेर शुश ब्वाक्कु बाक्तीकेम खुम्तु।

6 मिनु मेको वाशा एर ओंथ नेल्ल गे ब्राइब लहारा का दुम्त। मिनु मेको आ राशी मेको ककाकुली गे लेत्तेक्म। तन्न मेको आ शाक्श चहिं आगामीन लीतेक्म। मोपा मेको लहारा का दुम्त। मिनु मेको आ राशी दाप्तेक्म। मिनु मेकेर रे शुश सफा यूतेक्म। इजीकीएल १९:१०

7 मिनु मेकेर अर्को ठेयब फ्रां पाइश्शो नु शुश ओफला पाइश्शो ठेयब ककाकुली का बाक्त। मिनु मेको लहाराम आ शाक्श मेको गे ब्रपाइक्तु। ब्वाक्कु तचा कली मेको आ राशी यो मेको ककाकुली गे ब्रपाइक्तु। मेको डोंइती डा खुम्तीके रे याक्शो बाक्त।

8 मेको के राशी दाम्मल। फल सिम्मल। मिनु मेको रिश्शो लहारा का दुम्ल, दे शुश ब्वाक्कु बाक्शो नु रिश्शो खपीम खुम्शो बाक्त’ देशो बाक्ब।

9 मिनू परमप्रभु, परमप्रभु यावेमी 'मार, मेको ग्रेल्बा डा? मार, मेको आ शाकश तुल्चा मपुंडसीबा डा? मिनू मेको आ फल मसोत्रनीमी डा? मिनू मेको मबेक्बा डा? मेको आ नक वाशो कोच्वा नेल्ल बेक्नीम। मेको आ शाकश तुल्चा कली शुश बोल्यो गुड नु शुश मुर ममाल्नीम।

10 मेको कली याक्शा ला हना यो मेको ग्रेल्बा डा? पूर्ब डा फशेम आबानु मेको नेल्ल मसोत्रबा डा? रिम्शो खपीम खुम्शो बाक्त हना यो, फशेम आबानु मेको मसोत्रबा?' दे मेको आन कली देंचा माल्नेवे" देत।

### कथा आ अर्थ शेंशो

11 मिनू परमप्रभु यावेमी आं कली लोत्र पाप्तु।

12 मार लोत्र पाप्तु देशा हना "एको मटीब खिं डा मुर आन कली 'एको लोत्र आ अर्थ मार बाक्बा, मेको मतुइक्नीनी?' दे हिल्लो पामी। मेको आन कली 'बेबीलोन डा पिप यरूसलेमम जाक्त। मिनू मेकोमी यरूसलेम डा पिप नु आ ठेयब गेय पाइब आन कली बेबीलोनम लाइक्तीमी। २राजा २४:१०, १५, १६

13 मिनू मेकोम पिप आ खिं डा मुर का कली लाइश्शा, कसम जपाइश्शा, मेको नु कबल का पाप्तु। मिनू मेकोमी मेको रागी डा ठेयब मुर आन कली लाइक्तु। २राजा २४:१७; २इतिहास ३६:१३

14 मेको रागी बोल्यो मदुम्ल। लेंशा बोक्ने मचबल नु मेकोम आ पशो कबल ला खाप्ने चाप्शा बाक्ल, दे मोदेशो पाप्तु' देत।

15 तन्न यरूसलेम डा पिपमी मेको बेबीलोन डा पिप कली मटिथु, इजीप्त रागीम शारा नु ठेयब हुल का लडाइ पाइब गेयीनी, दे मुर सोइक्ताक्व। मार, मेको कली रिम्शो दुम्बा डा? मार मोदेशो गेय पाइब मुर ब्रोइने चाप्बा डा? कबल पशो प्रोइशा यो, मेको ब्रोइने चाप्बा डा?" देत।

16 परमप्रभु, परमप्रभु यावेमी "गो आं ब्रोइशा बाक्शो खोदेशो पा, मेकोमी मेको कली पिप सेल्ब पिप नु जशो कसम प्रेंशा, आ पशो कबल प्रोइशा, बेबीलोन डा पिप आ बाक्तीक सहरम बेक्ब।

17 फाराओ आ सक्ति पाइश्शो लडाइ पाइब नु मेको आ मार मारमी मेको कली वारच पने मचाप्नीम। यरूसलेम कली पुम्ची ना नु गारो डोइक्तीक सेल्शा शुश मुर साइक्ची ना वारच मपाइब।

18 मारदे हना मेकोम आ जशो कसम ममिम्थु, आ पशो कबल प्रोइशा, सल्ला पा यो, मोदेशो मरिम्शो पतीके मेको ब्रोइने मचाप्ब" देशो बाक्ब।

19 मोपतीके परमप्रभु, परमप्रभु यावेमी "गो आं ब्रोइशा बाक्शो खोदेशो पा, मेकोम आ कसम जशो प्रेंशा, आं कबल प्रोइशो नेल्ल मेको आ पियामीन मोइक्नुड।

20 गो आं ग्याइल मेको तार ब्वारनुड। मिनू मेको आं ग्याइलीम रेप्ब। मिनू गो मेको कली बेबीलोनम चाक्नुड। मिनू मेकोम आं थुं फाइक्तीके गो मेको कली निसाफ पाइनुड। इजीकीएल १२:१३

21 मेको आ प्रोक्शा लशो लडाइ पाइब नेल्ल तरवारम साइक्चा पुंडसीनीम। मिनू ब्रोइशो नेल्ल एर ओथ ब्राइनीम। मिनू गो परमप्रभु यावेमीन एको लोत्र पशो नड, दे तुइक्नीनी" देशो बाक्ब।

22 परमप्रभु, परमप्रभु यावेमी "गो लेबानोन डा लाइश्शो रवा आ डर डा आइक्च राशी का प्रोइश्शा लाइक्नुड। मिनू गो मेको कली नेल्ल क्येडा लाइश्शो डांडाम खुम्नुड। यसैया ११:१

23 गो मेको इस्त्राएल डा लाइश्शो पहाड मेर खुम्नुड। मिनू मेकोम शुश राशी दाप्पाइश्शा फल सिप्पाइश्शा, थम दारशो लेबानोन डा लाइश्शो रवा का दुम्ब। मिनू नेल्ल खाल डा चिक्ब आ राशीम बाक्नीम। मिनू मेकेर ठेयब चिक्बपुकीम ग्योत्र सेल्शा, मेको आ वांकुम बाक्नीम। इजीकीएल २०:४०; १सामुएल २:७०८

24 मिनू रू डा रवा नेल्लेम गो, परमप्रभु यावे नड, दे तुइक्चा माल्नीम। गो लाइश्शो रवा आन कली आइक्च सेल्नुड। आइक्च रवा आन कली लाइश्शो सेल्नुड। गो गिगी रवा आन कली सोत्रपाइक्नुड। मिनू सोत्रशो रवा आन कली गिगी दुम्पाइक्नुड। गो, परमप्रभु यावेमी एको लोत्र पाता। मिनू गो एको थमा पा पाइनुड" देत।

## 18

बेक्चा नु ब्रोंइचा आंम गुडम बाक्ब

1 परमप्रभु यावेमी आं कली लोव्र पाप्तु।

2 मार लोव्र पाप्तु देंशा हना “इसाएल रागी आ पर्वम लेंशा पशो कथा आ अर्थ मार बाक्बा, दे मिन्मीनी? ‘आम आफोम ग्युरशो अडगुर ब्वाम्तेकम हना, आन आल आन खुइ ग्रिम्बा डा?’ ” दे हिल्लो पाप्तु। येरमीया ३१:२९

3 लेंशा परमप्रभु, परमप्रभु यावेमी “गो आं ब्रोंइशा बाक्शो खोदेशो पा, मुल रे गेपुकीम एको कथा इसाएलम लेंशा काइ मदेनीन।

4 मारदे हना ब्रोंइशा बाक्ब नेल्ल आं केन नम, दे तुडक्चा माल्नीनी। आम आफ नु आल नेल्ल आं केन नम। सुम पाप पाइबा, मेको ला बेक्ब।

5 ठीक पाइब मुर का बाक्ब हना, आं अरेशो टीब नु रिम्शो पाइब।

6 मेको डांडा मेर मजाइब नु इसाएल आ खिं डा मुर आन मूर्ति आन कली पूजा मपाइब, मेको आ नेक्था डा मुर आन मीश नु मइप्ब, रां ब्रोंल्लो मीश मुर नु मइप्ब। लेवी १८:१९; लेवी १८:२०

7 मेकोम सुड आन कली मदिप्ब, जाकटी वोइश्शो मार मार लेशशा गेब, मेकोम खुइ मपाइब, शोव्रलु बेक्शो आन कली आ जचा थोव्रक गेब। मिनु शिप्रा बाक्शो आन कली वा फेक्पाइक्ब। ब्यवस्था २४:१०-१३; यसैया ५८:७

8 मेकोम जेर गेशा चाइक्ब मताक्ब, मेको मरिम्शो पतीक रे डोन बाक्ब नु मुर आन दातेम कुल मकोव्रथु ठीक निसाफ पाइब। प्रस्थान २२:२४; भजन संग्रह १५:५

9 मेकोम आं फुल्लुम मुशा ब्रेक्शो लोव्र नु आं निसाफ पतीके लोव्र थुं मफाइक्थु पाइब। मोदेशो मुर ठीक पाइब मुर बाक्ब। मिनु मेको थमा पा ब्रोंइचा माल्ब” दे परमप्रभु, परमप्रभु यावेमी देंशो बाक्ब।

10 मिनु “मेको मुर के तौ का बाक्ब। मेकोम हुश खाक्श पोक्ब नु मुर आन कली साइक्ब,

11 मेको आ आफोम मपशो गेय नेल्ले मेकोम पाइब, मेकोमी डांडा मेर जाइब, मेको आ नेक्था डा मुर आन मीश नु इप्ब।

12 पडुग नु मारेइ मथीब आन कली दिप्ब, मुर आन मार मार रोइक्ब। जाकटी वोइश्शो थोव्रक मलेप्ब, मूर्ति आन कली पूजा पाइब नु ग्रांरा दिशो गेय पाइब।

13 मेकोम आ चाइक्ब ताक्शा ला जेर गेब, मार मोदेशो मुर ब्रोंइचा ताइबा डा? मेको ब्रोंइचा मताइब। मोदेशो ग्रांरा दिशो गेय नेल्ल पतीके, मेको थमा पा बेक्चान माल्ब। मेको आ हुश आ दोस मेको आंमा राइब।

14 तन्न मेको मुर आ तौमी आ आफोम पशो पाप नेल्ल ताइब। मेको नेल्ल तशा, मोदेशो गेय मपाइब। ब्यवस्था २४:१६

15 मेकोम डांडा मेर मजाइब। इसाएल आ खिं डा मुर आन मूर्ति आन कली पूजा मपाइब, मेको आ नेक्था डा मुर आन मीश नु मइप्ब।

16 मेकोम सुड आन कली मरिम्शो मपाइब, मेकोमी जाकटी मताक्ब। मेकोम सुड के मारेइ मरोइक्ब। तन्न शोव्रलु बेक्शो आन कली आ जचा थोव्रक गेब। शिप्रा बाक्शो आन कली वा फेक्पाइक्ब।

17 मेको मरिम्शो पतीक रे डोन बाक्ब, जेर गेशा आ चाइक्ब मताक्ब। मेकोम आं निसाफ पतीक लोव्र नेल्ल पाइब। मिनु आं फुल्लुम मुशा ब्रेक्शो लोव्र नेल्ल खाप्ब। मेको मुर आ आफ आ मरिम्शो पशो आ पर्वम बेक्चा ममाल्ब। मेको थमा पा ब्रोंइब।

18 तन्न मेको आ आफोम चहिं आ दला दाक्स पशा, आ लोकब आन कली रोइक्ताक्ब। आ मुर आन दातेम मरिम्शो पाप्तु। मेको आ मरिम्शो पशो आ पर्वम बेक्ब।

19 मो हना यो गेपुकीम मारदे आ आफ आ मरिम्शो पशो आ तौम कुरचा ममाल्दा? देंनीनी। आ तौम आं अरेशो टिशा, ठीक गेय पशो बाक्ब, मेकोम आं फुल्लुम मुशा ब्रेक्शो लोव्र होस पा टिशो बाक्ब। मोपतीके मेको थमा पा ब्रोंइब। प्रस्थान २०:५

20 सुम पाप पाइबा, मेको ला बेक्ब। आलमी आ आम आफ आस मरिम्शो पशो आ पर्वम श्येत जचा ममाल्ब। आ आम आफोम यो आस आल आन मरिम्शो पशो आ पर्वम श्येत जचा ममाल्नीस। ठीक पाइब आ ठीक पशो आ कली दुम्ब। मिनु परमप्रभु यावे आ अरेशो मटीबमी आ मटिशो आ कलीन दुम्ब। २राजा १४:६

21 तन्न परमप्रभु यावे आ अरेशो लोव्र मटीब मुर कामी आ पशो पाप नेल्ल प्रॉइशा, आं फुल्लुम मुशा ब्रेक्शो लोव्र नेल्ल पाप्तु हना, आं अरेशो नु ठीक गेय पाप्तु हना, मेको थमा पा ब्रॉइब। मेको मबेक्ब। इजीकीएल ३३:१०-२०

22 मेको आ हेंथे पशो आ पर्वम लेंशा ममिम्सीब। मेको आ ठीक पतीकेम ब्रॉइब। यसैया ४३:२५

23 मार, गो आं अरेशो लोव्र मटीब मुर बेक्मेनु ग्येरनुडा डा? मेको क्येडा यो गो मेको आन मरिम्शो पशो प्रॉइशा ब्रॉइशा बाक्शो तचा मदाक्नुडा डा? १तिमोथी २:४

24 तन्न ठीक पाइब मुरुम आ ठीक पतीक प्रॉइशा, मरिम्शो पाप्तु हना, आं अरेशो लोव्र मटीबपुकीम खोदेशो पा ग्रॉग्रा दिशो गेय पाप्तु हना, मार मेको ब्रॉइबा डा? मेको आ डोंइती पशो ठीक गेय मारेइ ममिम्सीब। मेको आ मरिम्शो पशो नु आ पाप आ पर्वम बेक्चा माल्ब। इजीकीएल ३:२०

25 मो हना यो गेपुकीम 'परमप्रभु आ पशो ठीक मबाक्ब' देंनीनी। इस्राएल आ खिं डा मुर नेनीन, मार, आं पशो ठीक मबाक्बा डा? मार, इन पशो कका ठीक बाक्बा डा?

26 ठीक पाइब मुरुम आ ठीक पतीक प्रॉइशा मरिम्शो पाप्तु हना, मेको आ ठीक मपतीकेम बेक्ब। मेको आ मरिम्शो पशो आ पर्वम बेक्चा माल्ब।

27 तन्न परमप्रभु यावे आ अरेशो मटीब मुरुम आ मटितीके प्रॉइशा, आं अरेशो ठीक गेय पाप्तु हना, मेको ब्रॉइब।

28 मारदे हना मेकोम मिम्शा, आ पशो मरिम्शो नेल्ल रे लेत्त हना, मेको थमा पा ब्रॉइब। मेको बेक्चा ममाल्ब।

29 मो हना यो इस्राएल आ खिं डा मुरपुकीमी 'परमप्रभु यावे आ पशो ठीक मबाक्ब' देंनीम। ए इस्राएल आ खिं डा मुर, मार, आं पशो ठीक मबाक्बा डा? मार, इन पशो कका ठीक बाक्बा डा?

30 मोपतीके ए इस्राएल आ खिं डा मुर, गो नेल्ल इन कली इन पशो कोव्रशा निसाफ पाइनुडा। मिनु इन हेंथे पशो नेल्ल रे लेतीन। मो मपाइतीनी हना, इन मरिम्शो पशोम इन कली साइक्ब।

31 गे इन आं कली हेंथे पशो नेल्ल प्रॉइशा, गे नक थुं नु नक सोक्ती ताक्कीन। ए इस्राएल आ खिं डा मुर, गे मारदे बेक्चा दाक्नीनी? इजीकीएल ११:१९

32 मारदे हना गो सुइ मुर बेक्शोम मग्येरसीनुडा। मरिम्शो पतीक रे लेशशा, ब्रॉइशा बाक्कीन" दे परमप्रभु, परमप्रभु यावेमी देंत।

## 19

### रोंका पतीक कुम्सो

1 गे इस्राएल डा पिप आ खिं डा मुर आन पर्वम रोंका पने।

2 इ ममा गुप्स आन दातेम ठेयब छाउरी गुप्स दुम्शा बाक्त। मेको आ चाइक्ब आन कली कोल्पाइक्ना पाइक्न ठिटा गुप्स आन दातेम गोल्शा बाक्बाक्त। उत्पत्ती ४९:९

3 मिनु मेकोम आ चाइक्ब आन दाते डा का कली कोल्पाइशशा, ठेयब सेल्लु। मिनु मेको ठेयब बोल्यो ठिटा गुप्स का दुम्त। मेकोम सिखार पचा शेंसाक्व। मिनु मुर आन कली ब्वाप्तु।

4 मिनु रागी रागी डा मुरपुकीम मेको आ पर्वम लोव्र नेंतेक्म। मिनु मेकोपुकीम मेको कली बिक्तीकेम पिक्शा ग्याइक्ताक्म। मिनु मुरपुकीम मेको कली कोंडगुम कीशा, इजीप्त रागी लाइक्तेक्म। २राजा २३:३१-३३; येरमीया २२:११-१२

5 मिनु मेको छाउरी गुप्सम आ देशो मदुम्शो नु आ मिम्शो मगाप्शो तशा, आ चाइक्ब आन दाते डा का कली योव्रतु। मिनु मेको कली बोल्यो ठिटा गुप्स का सेल्लु। २राजा २४:६,८,९

6 मिनु मेको गुप्स आन दातेम एर ओथ पचा गोप्तु। मारदे हना मेको ठेयब नु बोल्यो ठिटा गुप्स दुम्शो बाक्त। मिनु मेकोम सिखार पचा शेंसाक्व। मिनु मुर आन कली ब्वाप्तु।

7 मेकोम मुर आन बोल्यो दरवार प्रेतु। मिनु मेको आन सहर खतम सेल्लु। मेको आ डोरशो नेशा, रागी नु मेकेर बाक्ब नेल्ल हितेकम।

8 मिनु आ एर ओंथ डा रागी रागी रे मुरपुकी जाक्तेकम। मिनु मेको कली ब्वारद दाइक्ताकम। मेको कली बिक्तीकेम पिक्शा ग्याइक्ताकम।

9 मिनु मेकोपुकीम मेको कली कोंडगुम कीशा ग्याइश्शा खोरम चोक्तेकम। मिनु बेबीलोन डा पिप आ बाक्तीकेम लाइक्तेकम। मेकोपुकीम इस्राएल डा डांडा मेर आ सेंदा गेनायो मनेंसेक्ल, दे मेको कली चोक्शा वोइक्तेकम। २राजा २४:१५

10 इ ममा ब्वाक्कु आ नेक्था खुम्शो अडगुर बोट खोदेशो बाक्त। शुश ब्वाक्कु बाक्तीके, मेको शुश राशी पाइश्शा शुश गेडा सिश्शो बाक्त। इजीकीएल १७:६

11 मेको आ बोल्यो राशी का पिप आन हुकुम पतीक कोक्के दुम्चा डा बाक्त। मेको शुश राशी आन दातेमी लाइश्शो नु कोल्शो दुम्शा, शुश राशी दाप्पाइश्शा लत।

12 तन्न मेको गाइश्शा चुरशा तुल्चा पुंडसाक्व। मिनु खपीम ताइक्चा पुंडसाक्व। मिनु पूर्व डा फशेम मेको कली सोव्रपाइक्व। मिनु मेको आ गेडा नेल्ल हेम्तेकम। आ बोल्यो राशी सोव्रशा, मेको कली मीम नेक्तु।

13 मिनु मुल मेको सोव्रशो ब्वाक्कु मबाक्शो गोरशो रागीम खुम्चा पुंडसाक्व।

14 मिनु मेको आ ठेयब राशी रे मी यूत। मिनु मेको आ फल नु आ आइक्च राशी नेल्ल नेक्तु। मोपा मेकेर हुकुम पतीक कोक्के दुम्चा डा बोल्यो राशी का यो मली। मिनु एको रोंका पतीक कुम्सो नेल्लेम तुइश्शा, पना पन बाक्तेकम।

## 20

### इस्राएली हेंथे गाक्शो

1 मिनु ७ बर्स डा ५ महिना डा १० नाक्ती इस्राएल डा खाल्पापुकी परमप्रभु यावे कली हिल्लो पचा कली जाक्शा आं डोंडती बाक्तेकम। इजीकीएल १४:१

2 मेना परमप्रभु यावेमी आं कली लोव्र पाप्तु।

3 मेकोमी “ए मुर, इस्राएल डा खाल्पा आन कली लोव्र पावो। गो, परमप्रभु, परमप्रभु यावेमी, मारदे गेपुकी आं कली हिल्लो पथ जाक्नी? गो आं ब्रोंइशा बाक्शो खोदेशो पा, इन कली लोव्र मलेत्नुड। इजीकीएल १४:३

4 ए मुर, गे मेको आन कली निसाफ पाइनेवे? गे मेको आन कली निसाफ पाइनेवे? मो हना मेको आन किकी पिपी आन ग्रांरा दिशो गेय आन परबम मेको आन कली तुइक्पतो। इजीकीएल २२:२; इजीकीएल २३:३६

5 गो इस्राएल कली योव्रडु नाक्ती याकूब आ खिं डा आ चच युइ नु कसम जाता। इजीप्त रागीमी गो मेको आन दातेम तुइक्पांइसाक्यी। मेको आन कली गो परमप्रभु यावे, इन परमप्रभु नड, दे कसम जाता। प्रस्थान ६:१७-८

6 गो मेको नाक्ती मेको आन कली इजीप्त रे गुंइशा, आन माल्शो रागीम चाक्नुडमी। मेको रागीम दूध नु खुदो शाइश्शो बाक्ब। मिनु मेको रागी, रागी नेल्ल आन क्येडा रिम्शो बाक्ब, दे कसम जशा देशो नड। प्रस्थान ३:८

7 मिनु गो मेको आन कली इन कोव्रत दाक्शो ग्रांरा दित्चा डा थोव्रक ताइक्तीन। गे आंम कली इजीप्त डा मूर्तिपुकीम ग्रांरा दिशो मसेल्सीन। गो परमप्रभु यावे, इन परमप्रभु नड। यहोसु २४:१४,२३

8 तन्न मेकोपुकीमी आं कली मटिथु, आं लोव्र मनेनेम। सुइम आन कोव्रत दाक्शो ग्रांरा दित्चा डा थोव्रक मताइक्तेकम। सुइमी इजीप्त डा मूर्तिपुकी यो मप्रोनेम। मिनु गे इजीप्त रागीम बाक्नीनु, आं गाइश्शो नेल्ले इन तारी मोइक्नुड, दे मिम्ताक्ड।

9 तन्न गो आं नें रागी रागी डा मुर आन डोंइती मरिम्शो मदुम्ल, दे गो इन कली इजीप्त रागी रे गुंडताकड। इन बाक्शो रागी डा मुर आन कली यो आं नें तुइकपाइक्ताक्मी। इजीकीएल २०:१४; इजीकीएल ३६:२१-२२; प्रस्थान ३२:१२

10 मोपतीके गो मेको आन कली इजीप्त रागी रे गुंडशा गोरशो रागीम चाक्तामी।

11 गो मेको आन कली आं फुल्लुम मुशा ब्रेक्शो लोव्र तुइकपाइक्तामी। मिनु आं निसाफ पतीक लोव्र कोइताकडमी। सुम मेको टिशा पाइबा, मेको ब्रोंइब। लेवी १८:५; लूका १०:२८

12 मेको प्रोंइशा मेको आन कली नाइक्तीक नाक्त गेतामी। मेको गो नु मेको आन दातेमी चिन्ड का बाक्ब। मिनु गो, परमप्रभु यावेमी मेको आन कली आं मुर सेल्लाक्मी, दे तुइक्तमेक्ल। प्रस्थान ३१:१३-१७

13 तन्न इसाएल आ खिं डा मुरपुकीमी गोरशो रागीम आं कली मटीयीमी। मेकोपुकीम आं फुल्लुम मुशा ब्रेक्शो लोव्र नु आं निसाफ पतीक लोव्र मपामे। मेको टिशा पाइब मुर मेको रे ब्रोंइनीम। मेकोपुकीमी आं नाइक्तीक नाक्त ग्रांरा दिशो सेल्लेक्म। मिनु गो एको गोरशो रागीमीन आं चुरशो मोइश्शा मेको आन कली साइक्नुडमी, दे मिम्ताकड। प्रस्थान ३२:१०-१२

14 मिनु गो रागी डा मुर आन डोंइती मेको आन कली इजीप्त रागी रे गुंडताकड। गो आं नें मेको रागी रागी डा मुर आन डोंइती मरिम्शो मदुम्ल, दे मोदेंशो पाता।

15 मिनु गो मेको आन कली गोरशो रागीमी गो इन कली गेशो, दूध नु खुदो शुश बाक्शो नेल्ल क्येडा दारशो रागीमी मलाइक्नुड, दे कसम जाता। गन्ती १४:३०

16 मारदे हना मेकोपुकीम आं निसाफ पतीक लोव्र होस पा मपाम। मिनु फुल्लुम मुशा ब्रेक्शो लोव्र मटीम। मिनु आं नाइक्तीक नाक्ती ग्रांरा दिशो सेल्लेक्म। मारदे हना मेको आन थुं आन मूर्तिं गे हिरशो बाक्तेक्म।

17 मो हना यो गो मेको आन कली शिशी पा, गोरशो रागीम मसदुमी। मेको आन कली मक्यामदुमी।

18 गो गोरशो रागीम मेको आन आल आन कली 'गे इन आम आफ आन शेंशो फुल्लुम मुशा ब्रेक्शो लोव्र मटिने। मेको आन निसाफ पतीक मपने। मेको आन मूर्तिम आंम इन कली ग्रांरा दिशो मसेल्सीन।

19 गो परमप्रभु यावे, इन परमप्रभु नड। गेपुकीम आं फुल्लुम मुशा ब्रेक्शो लोव्र टिशा, आं निसाफ पतीक लोव्र होस पा पने।

20 आं नाइक्तीक नाक्ती गेय मपने। मिनु मेको गे नु गो इं दातेम चिन्ड दुम्ल। मिनु गेपुकीम गो परमप्रभु यावे, इन परमप्रभु नड, दे तुइक्नीनी' देंती।

21 तन्न मेको आलपुकी आं कली मटीब दुम्तेक्म। मेकोपुकीम आं फुल्लुम मुशा ब्रेक्शो लोव्रम मटीम। मिनु आं निसाफ पतीक लोव्र होस पा मपाम। मेको टिशा पाइब मुर मेको रे ब्रोंइनीम। मेकोपुकीम आं नाइक्तीक नाक्ती ग्रांरा दिशो सेल्लेक्म। मिनु एको गोरशो रागीमीन आं चुरशो आन तारी मोइश्शा, मेको आं गाइश्शा पशो गेय कोइनुड।

22 तन्न गो आं गुइ तेक्ता। मिनु गो रागी डा मुर आन डोंइती मेको आन कली इजीप्त रागी रे गुंडताकड। गो आं नें मेको रागी रागी डा मुर आन डोंइती मरिम्शो मदुम्ल, दे मोदेंशो पाता।

23 मेको प्रोंइशा यो, गो गोरशो रागीम मेको आन कली गो इन कली रागी रागी डा मुर आन दातेम एर ओंथ ब्रपाइक्नुडमी। मिनु राज्य राज्यम एर ओंथ ब्रपाइक्नुडमी, दे कसम जाता। लेवी २६:३३

24 मारदे हना मेकोपुकीम आं निसाफ पतीक लोव्र मपामे। मिनु आं फुल्लुम मुशा ब्रेक्शो लोव्र मटीम। आं नाइक्तीक नाक्त ग्रांरा दिशो सेल्लेक्म। मिनु मेकोम आन किकी पिप आन मूर्तिं पूजा पाम्तेक्म।

25 गो मेको आन कली फुल्लुम मुशा ब्रेक्शो मरिम्शो लोव्र यो गेतामी। मिनु आं निसाफ पतीक लोव्रम यो मेकोपुकी ब्रोंइने मचाप्बाक्तेक्म।

26 गो मेको आन कली आन चढेशो रे पा ग्रांरा दिशो दुम्चा गेतामी। आन डोंइती जरमेशो मारेइ मारेइ आन रे आं कली चढेचा आ परबंम मेको आन कली ग्रांरा दिशो दुम्पाइक्तामी। मेकोपुकी हिंशा ग्येत्य लुकच दुम्मल, दे मो पाता। मिनु मेकोपुकीम गो परमप्रभु यावे नड, दे तुइक्तमेक्ल, दे मो पाता" देंत। इजीकीएल १६:२०; प्रस्थान १३:२,१३; प्रस्थान २२:२८

27 मोपतीके ए मुर, इस्राएल आ खिं डा मुरपुकी नु लोत्र पावो। मिनु मेको आन कली “परमप्रभु, परमप्रभु यावेमी इन कली मार दंत देशा हना, इन किकी पिपीम आं कली जोल पा शुक्शी पाइक्तीमी।

28 गो कसम जशा मेको आन कली गेनुड देशो रागीम चाक्तामी। मेकोपुकीम मेकेर लाइशशो डांडा नु शुश सफा पाइशशो रवा ताप्तेक्म। मेकेर आन मार मार चढेप्तेक्म। आं कली गाइक्पाइक्चा कली आन पोक्शो मार मार चढेप्तेक्म। मेकेर आन ब्रोव्रशो रिना पाइशशो धूप चोशा, आन तूचा थोत्रक चढेतीक चढेप्तेक्म।

29 मिनु गो मेको आन कली गे इन लशो लाइशशो डांडा मार बाक्वा? दे हिल्लो पातामी। मुल सम्म यो मेको ठाउं आ नें बामाह देसीब” दे परमप्रभु यावेमी दंत। बामाह देशो लाइशशो डांडा डा थान रुम्सीब।

### परमप्रभु आ मुर आन कली पतीके

30 मोपतीके परमप्रभु, परमप्रभु यावेमी इस्राएल आ खिं डा मुर आन कली “गे यो इन किकी पिपी आन खोदेशो पा इन कली ग्रान्रा दिशो सेल्सीनीनी? मिनु मेको आन ग्रान्रा दिशो मूर्ति आन नोले खोइक्नीनी?

31 गेपुकीम मेको आन कली चढेनीनी। गे इन आल आन कली चोशा चढेनीनी। मिनु मुलाक्ती सम्म यो गे इन मूर्ति पूजा पतीकेम आंम इन कली ग्रान्रा दिशो सेल्सीशो बाक्नीनी। ए इस्राएल आ खिं डा मुरपुकी, गो ब्रोइशा बाक्शो खोदेशो पा, गे आं कली हिल्लो पचा मताइनीनी” दे परमप्रभु, परमप्रभु यावेमी दंत।

32 मिनु परमप्रभुमी “इन थुंम ‘गोपुकी अर्को रागी डा मुर नु अर्को जात डा मुर खोदेशो दुम्चा दाक्नीक’ देतीनी। गेपुकीमी ‘रागी डा जात जात डा मुर खोदेशो पा शी नु फुल्लु आन कली पूजा पाइब बाक्नीकी’ देतीनी। तन्न इन मिम्शो गेनायो मजाक्दीप्ब” दंत। प्रस्थान २३:२४

33 परमप्रभु, परमप्रभु यावेमी “गो ब्रोइशा बाक्शो खोदेशो पा, सक्ति पाइशशो गुड दिंशा चुरशा गो इन कली सासन पाइनुड।

34 गो इन कली सक्ति पाइशशो गुड दिंशा चुरशा इन ब्रशा बाक्शो रागी रागी डा मुर आन दाते रे गुंइशा चाक्नन्नी। मिनु गे इन ब्रशो रागी रे इन कली ग्रुम्पाइक्नन्नी।

35 गो इन कली रागी रागी डा मुर आन गोरशो रागीम चाक्नन्नी। मिनु मेकेर इन कली निसाफ पाइनुड। होसे २:१६

36 डोंइती गो दोपा इजीप्त डा गोरशो रागीम इन किकी पिपी आन कली निसाफ पडा, मोपा इन कली यो निसाफ पाइनुड। गन्ती १४:२२-२३

37 गो इन कली हिक्शा आं कबल पपाइक्नन्नी। लेवी २७:३२; येरमीया ३३:१३

38 इन दाते डा आं कली मटीब नु मरिम्शो पाइब आन कली तिल्लुडमी। गो मेको आन कली अर्को रागी डा मुर दुम्शा बाक्शो रागी रे गुंइनुडमी। तन्न मेको इस्राएल रागी ओव्रचा मताइनीम। मिनु गेपुकीम गो परमप्रभु यावे नड, दे तुइक्नीनी।

39 ए इस्राएल आ खिं डा मुरपुकी, परमप्रभु यावेमी इन कली ‘लन। गे आं देशो टिचा मदाक्नीनी हना, मुल रे गे नेल्लेम इन इन मूर्ति आन कली पूजा पने। तन्न इन मूर्ति पूजा पतीकेमी आं नें कली गेनायो ग्रान्रा दिशो मसेलीन।

40 मारदे हना आं डांडा, इस्राएल डा डांडामी इस्राएल आ खिं डा मुर नेल्लेम आं कली ठेयब सेल्नीम। मिनु गो मेकेर मेको आन कली ब्राइनुडमी। गो मेकेर इन गेशो, इन गेशो नेल्ल क्येडा रिम्शो थोत्रक नु इन चढेशो नेल्ल ताक्नुड। इजीकीएल १७:२३

41 गो इन कली रागी रागी डा मुर आन दाते रे गुंइशा नु इन कली इन ब्रशो रागी रे खुप्शा, ब्रोव्रशो रिना पाइशशो धूप खोदेशो पा ब्राइनन्नी। मिनु रागी रागी डा मुर आन डोंइती आं कली तुइक्पाइसीनुड।

42 मिनु गो इन किकी पिपी आन कली गेनुड देशो इस्राएल रागीम इन कली चाक्नन्नी। मेना गेपुकीम गो परमप्रभु यावे नड, दे तुइक्नीनी।



43 मेकेर गे इन कली ग्रांग्रा दिशो सेल्ब थोत्रक नु मरिम्शो गेय नेल्ल मिम्नीनी। मिनु इन पशो मरिम्शो गेय नेल्ल आन परबम मिम्शा आंम इन कली ग्रांग्रा दीनीनी। इजीकीएल ३६:३१-३२

44 ए इस्राएल आ खिं डा मुरपुकी, गे इन मरिम्शो पतीक नु इन हेंथे पशोम ममाइ, तन्न आं नें आ परबम गो इन कली रिम्शो पाइनुड। मिनु गेपुकीम गोन परमप्रभु यावे नड, दे तुइक्नीनी' देनो" दे परमप्रभु, परमप्रभु यावेमी देंत।

### दक्खिन आ परबम लोत्र

45 परमप्रभु यावेमी आं कली लोत्र पाप्तु।

46 मार लोत्र पाप्तु देशा हना "ए मुर, दक्खिन गे कोत्रशा दक्खिन आ परबम आं लोत्र पावो। मेको दक्खिन नेगेब डा ब्वाकी आ परबम आं लोत्र पावो।

47 नेगेब डा ब्वाकी कली 'परमप्रभु यावे आ लोत्र नेनो। परमप्रभु, परमप्रभु यावेमी गो इ कली मी सुइक्चा चिक्शो बाक्नुड। मिनु इ गिगी रवा नु सोत्रशो रवा आन कली मेकोम नेक्ब। मेको आ ब्रशो मकाप्ब। मिनु मेकोम पतीके दक्खिन रे उत्तर सम्म डा नेल्ल आन कुल किक्ब।

48 मिनु मुर नेल्लेमी गो, परमप्रभु यावेमी मेको जेत्ताक्ड, दे तुइक्नीम। मेको काप्चा मदुम्ब' देनो" देंत।

49 मिनु गो "परमप्रभु, परमप्रभु यावे, मेकोपुकीम आं परबम 'मेकोमी कथा ला देंशो बाक्ब, ममाइ डा?' देंनीम" देंती।

## 21

### परमप्रभुम आ तरवार हेश्शो सेल्शो

1 परमप्रभु यावेमी आं कली लोत्र पाप्तु।

2 मार लोत्र पाप्तु देशा हना "ए मुर, यरूसलेम गे कोत्रशा, आं बाक्तीक आ परबम आं लोत्र पावो। इस्राएल रागी आ परबम आं लोत्र पावो।

3 मिनु इस्राएल डा खाल्पा आन कली परमप्रभु यावेमी मार लोत्र पाप्तु देशा हना 'गो बारशा, आं तरवार खोत रे शोइश्शा, इन दाते डा ठीक पाइब नु आं अरेशो लोत्र मटीब नेल्ल आन कली साइक्नुडमी।

4 मिनु गो इन दाते डा ठीक पाइब नु आं अरेशो लोत्र मटीब नेल्ल आन कली साइक्नुडमी। मोपतीके दक्खिन रे उत्तर सम्म डा मुर नेल्ल आन परबम आं तरवार खोत रे गूशो बाक्ब।

5 मिनु मुर नेल्लेम गो, परमप्रभु यावेमीन आं तरवार शोइश्शो बाक्नुड' दे तुइक्नीम। मेको लेंशा मपिम्सीब।

6 मोपतीके ए मुर, हुकयी पावो। जिक्शो थुंम थम श्येत जशा, मेको आन डोंइती हुकयी पावो।

7 मिनु मेकोपुकीम इ कली 'गे मारदे हुकयी पवी' देंतेक्म हना, मेको आन कली 'लोत्र नेंतीके हुकयी पाता। मुर नेल्ल आन थुं बेक्शा लाइब। आन गुइ योक्ब। आन थुं ग्येत्थ लुक्च दुम्ब। मिनु मुर नेल्ल आन पोक्च बोल मपाइश्शो दुम्ब। मेको नाक्ती जाक्ना जाक्न बाक्ब। मेको थमा पा दुम्ब, दे परमप्रभु यावेमी देंशो बाक्ब' दे माइक्मी" दे परमप्रभु यावेमी देंत। इजीकीएल ७:१७

8 परमप्रभु यावेमी आं कली लोत्र पाप्तु।

9 मार लोत्र पाप्तु देशा हना "ए मुर, परमप्रभु यावे आ लोत्र पा, परमप्रभु यावेमी 'तरवार का, तरवार का शेप्शा, हेश्शो सेल्शो बाक्ब। मेको टल्केशो बाक्ब।

10 मेको मुर साइक्चा कली शेप्शो बाक्ब। चिला दाप्शो खोदेंशो पा टल्केपपाइक्चा कली शेप्शो बाक्ब। दोपा ग्येरसीने चाप्नीनी? आं मुरपुकीम आं सजाइ गेतीके ममिन्तेक्म।

11 तरवार टल्केपपाइक्चा कली गेशो बाक्ब। मिनु गुइम शेशा, मेको शेप्शा टल्केपपाइश्शो बाक्ब। मेको साइक्ब कली गेशो बाक्ब।

12 ए मुर, डाकशा रोंका पावो। मारदे हना मेकोम आं मुर आन कली साइकब। मेकोम इस्राएल डा पिप आ खिं डा मुर नेल्ल आन कली साइकब। मेको नु आं मुरपुकी यो तरवारम साइकचा पुंडसीनीम। मोपतीके गे इ कुचु तुपो।

13 गे आं गेशो सजाइ ममिश्थु, मेको श्येत मजाकब, दे मिम्नीनी' देने" दे परमप्रभु यावेमी देंत। यसैया १:५

14 मिनु परमप्रभुमी "ए मुर, आं लोत्र पावो। तरवारम खेयप निक्शी खेयप सां सम्म क्योरब। मेको तरवार मारेइ मारेइ आन कली साइकचा कली बाकब। मेको बोल्यो पा क्योरचा कली बाकब। मेकोम एर ओंथ नेल्ल रे क्योरब।

15 मोपतीके थुं लुकच लाइनीम। मिनु शुश गोल्नीम। मेको आन ठेयब लापचो नेल्लेमी हुश खाकश पोक्चा कली तरवार वोइश्शो बाक्ती। मेको चिला दाप्शो खोदेशो पा साइकचा कली शेष्शो बाकब।

16 तरवार, परा गे क्योरो। ग्युरा गे क्योरो। तेइ तेइ लावो।

17 मिनु गो यो साइकना साइकन लाइनुड। मिनु आं चुरशो नाइक्नुड। गो, परमप्रभु यावेमीन लोत्र पाता" देंत।

18 परमप्रभु यावेमी आं कली लोत्र पाप्तु।

19 मार लोत्र पाप्तु देशा हना "ए मुर, बेबीलोन डा पिप आ तरवार चाकचा कली लां निक्शी योवडो। मेको लां निक्शी रागी का रे जाकचा माल्नीस। सहर गे लतीक लां आस डोंइती लां कोंइतीक का वोतो।

20 मेको तरवार जाकचा कली अम्मोनी आन रब्बाह सहर, यहूदा नु गारो हिरशो यरूसलेम कली लां सेलीन।

21 मारदे हना बेबीलोन डा पिप मेको लां निक्शी गुम्तीकेम राप्ब। तेको लां लचा, दे मेकोमी लिंक्यु कोव्रब, ब्रा कली हिम्पाइकब। आ खिं डा मूर्ति आन कली हिल्लो पा आ आइदी कोव्रब।

22 मेको आ ग्युरा गुडम यरूसलेम कली बाजी दुम्त। मेकेर गारो डोइकचा कली शी फुल्लु तेलशा, लडाइ पचा कली, ग्रीचा कली ठेयब लापचो गे शी फुल्लु तेलशा सहर पुम्चा कली, लाइश्शो खिं सेल्चा माल्नीम। इजीकीएल ४:२

23 तन्न यरूसलेम डा मुर आन कली मेको लिंक्यु कोव्रतीक दूली बाक्त, दे मिम्नीम। मारदे हना मोदेशो मदुम्ब, दे कसम जशो लोत्र नेशो बाक्तेकम। तन्न परमप्रभुम मेको आन मरिश्शो पशो मिम्पाइकब। मिनु मेको आन कली ग्याइकपाइकब।

24 मोपतीके परमप्रभु, परमप्रभु यावेमी मारदे हना इन मरिश्शो पशो मिम्पाइक्तीनी। इन हेंथे पशो नेल्ल तुइक्नीम। इन पशो पाप नेल्ल तांइसीब। गे ग्याइश्शा लाइकचा पुंडसीनीनी।

25 गे काइ मरिश्शो नु आं अरेशो लोत्र मटीब इस्राएल डा सासन पाइब इ नाक्त जाक्त। इ नोले डा सजाइ ततीक नाक्त जाक्त।

26 मेको आ पिया रे गुप्तीक पुतीन। मेको आ सिरपेच पुतीन। मुल दुम्शो खोदेशो पा, लेंशा मदुम्ब। आइकच आन कली ठेयब सेलीन। मिनु ठेयब आन कली आइकच सेलीन। प्रस्थान २८:४; लूका १८:१४

27 मारेइ मारेइ ब्रेश्शो बाकब। मेको गो पाता। मेको मोदेशो गेनायो मदुम्शो बाक्त। मेको सासन पचा कली शिरशो दुम्शा जाक्त हना, मेको कली गेनुड" देंत। उत्पत्ती ४९:१०

28 ए मुर, गे चहिं आं लोत्र पावो। गो, परमप्रभु, परमप्रभु यावेमी अम्मोनी नु मेको आन शुक्शी पशो आ पर्बम मार देंनुड देशा हना "साइकचा कली तरवार शोइश्शो बाकब। साइकचा कली शेष्शा टल्केशो बाकब। मेको चिला खोदेशो पा दाप्ब बाकब। इजीकीएल २५:२-७

29 इन पर्बम जोल पा कोंइतीके ताम्तेकम। इन पर्बम दूली पा लिंक्यु कोव्रतेकम। मेको मरिश्शो पाइब नु परमप्रभु यावे आ अरेशो लोत्र मटीब नु साइकचा पुंडसीनीम। मेको आन नाक्त जाकशो मुर आन कली मोदेशो पशो बाकब। मेको आन नोले डा सजाइ ततीक नाक्त जाकशो बाकब।

30 मेको तरवार आ खोतम पिप्तीन। गो इन कली इन जर्मेशो रागीम निसाफ पाइनुड।

31 गो आं गाइश्शो इन तार मोइक्नुड। आं चुरशो मी मुइश्शो खोदेशो पा गो इन तारी मोइक्नुड। गो इन कली साइकचा कली हुश खाकश पोक्ब नु साइस जोकब आन गुडम जिम्मा गेनन्नी।

32 गे मी कली शी दुम्नीनी। इन हुश खपीम शाइक्ब। इन कली लेशा गेनायो ममिम्नीम। मारदे हना गो, परमप्रभु यावेमी एको लोत्र पाता” देंत।

## 22

यरूसलेम आ पाप नु सजाइ

1 परमप्रभु यावेमी आं कली लोत्र पाप्तु।

2 मार लोत्र पाप्तु देशा हना “ए मुर, मार गे मेको निसाफ पाइनेवे? गे मेको हुश खाक्श पोक्ब सहर कली निसाफ पाइनेवे? मो हना मेको आ ग्रांघ्रा दिशो गेय नेल्ल आन परबम मेको कली शेंदो। इजीकीएल २४:६; इजीकीएल २०:४

3 गे मेको कली ‘परमप्रभु, परमप्रभु यावेमी इ परबम मार देंत देशा हना “ए सहर, गे इ दातेमी हुश खाक्श पोक्तीवी। इ खतम दुम्तीक नाक्त जाक्त। गे मूर्ति सेल्सीशा, ग्रांघ्रा दिशो दुम्ते।

4 गे हुश शाइक्पाइश्शा, दोस तशो बाक्नेवे। गे इ सेल्शो देवी देवता रे पा ग्रांघ्रा दिशो दुम्नेवे। इ निसाफ नाक्त जाक्त। मिनु इ बर्स नुप्शो बाक्नीम। मोपतीके गो इ कली रागी रागी डा मुर आन दातेम शिशी मताइब नु शुक्शी पाइक्तीक मुर सेल्लतन। २राजा २१:१६; इजीकीएल ५:१५

5 ए, हिकचा मपुंडसीशो नु ग्रांघ्ये माग्येम ब्रीशो सहर, इ नेक्था नु डोन बाक्ब मुरपुकीम इ कली शुक्शी पाइनीम।

6 मेकेर बाक्शो इस्राएल डा पिप आ तौ नेल्लेम आन सक्तिम हुश खाक्श पोक्शो बाक्तेकम।

7 मिनु मेकेरन आल आन आम आफ तशा महिक्नीम। मेकेरन अर्को रागी डा मुर आन कली दिप्नीम। मिनु रोम रोइक्च नु आन वोंइश बेक्शो मीश मुर आन कली मरिम्शो पाइनीम। प्रस्थान २२:२०-२१

8 गे आं थोत्रक आन कली आइक्च मिम्शा, आं नाइक्तीक नाक्त कली ग्रांघ्रा दिशो सेल्लतीवी।

9 मेकेर मुर आन परबम जोल लोत्र पा साइक्पाइक्ब मुर बाक्नीम। मिनु डांडा डा थानम चढ़ेशो मार मार जाइब मुर यो बाक्नीम। मेकोपुकीम थम मरिम्शो गेय पाइनीम।

10 मेकेर मुरपुकी आन आफ आन मीश नु इप्नीम। मेकेर मुरपुकी रां ब्रोल्लो मीश मुर नु इप्नीम। लेवी १८:७-८; लेवी १८:१९

11 मेकेर मुरुम आन नेक्था डा मुर आन मीश नु इप्शा ग्रांघ्रा दिशो गेय पाइनीम। मिनु का निक्शीमी आन चाइमी कली बिथोलो पाइनीम। का निक्शीमी आंम आफ आ तमी कली बिथोलो पाइनीम। लेवी १८:२०; लेवी १८:१५; लेवी १८:९

12 मेकेर मुरपुकीम मुर साइक्चा कली घूस ताक्नीम। गे मुर आन कली जेर गेशा आ चाइक्ब के यो चाइक्ब ताक्नेवे। आंम नेक्था डा मुर आन कली दिप्शा आंम कली रिम्शो दुम्तीक गेय पाइनेवे। गे आं कली प्रेंताक्यी” ’ दे परमप्रभु, परमप्रभु यावेमी” देंत। प्रस्थान २२:२४

13 मिनु मेकोमी “गे जोल पा मरिम्शो पा क्येट चेम्शो तशा नु इ दातेम मुर साइश्शा हुश खाक्श पोक्शो आ परबम गो छक लाक्शा थाम्पा ग्रांघ्रा दीती।

14 गो तेको नाक्ती इ कली निसाफ पाइनुडा, मेको नाक्ती गे इ सक्ति महिक्सीथु बाक्बा डा? मार इ गुइ बोल्यो लीनीमी डा? गो, परमप्रभु यावेमी मेको लोत्र पाता। गो मेको पाइनुड।

15 गो इ कली रागी रागी डा मुर आन दातेम एर ओंथ फ्राइनन। मिनु राज्य राज्यम ब्रपाइक्नन। मिनु गो इ आगाम दुम्शो ग्रांघ्रा दिशो गेय नेल्ल क्याम्नुड।

16 मिनु गे रागी रागी डा मुर आन डोंइती महिक्सीशो दुम्नेवे। मिनु गोन परमप्रभु यावे नड, दे तुइक्नेवे” दे परमप्रभु यावेमी देंत।

परमप्रभुमी यपाइक्ब

17 परमप्रभु यावेमी आं कली लोत्र पाप्तु।

18 मार लोव्र पाप्तु देशा हना “ए मुर, इस्राएल आ खिं डा मुरपुकी आं पबर्म कस खोदेशो दुम्शो बाक्नीम। मेको नेल्ल मार मार यपाइक्तीकेम बाक्शो तांबा, टिन, फलाम नु सिसा रे गूशो कस खोदेशो दुम्शो बाक्नीम। मेकोपुकी कस खोदेशो ला बाक्नीम। यसैया १:२२-२५; येरमीया ६:२८

19 मोपतीके परमप्रभु, परमप्रभु यावेमी ‘गे नेल्ल कस खोदेशो दुम्तीके गो इन कली यरूसलेममी पुक्नन्नी।

20 मिनु मुरपुकीम मी फ्रशा यपाइक्चा कली दोपा चांदी, तांबा, फलाम सिसा नु टिन यपाइक्तीकेम कुर पाइनीमी, मोपा गो यो आं गाइश्शो नु चुरशोम इन कली पुक्नन्नी। मिनु कुर पा यपाइक्नन्नी।

21 गो इन कली पुक्शा, आं चुरशो मी खोदेशो पा इन तार मोइक्नुड। मिनु गे मेकेर याइनीनी।

22 दोपा चांदी यपाइक्तीकेम यपाइक्नीमी, मोपा गो इन कली यपाइक्नुड। मिनु गेपुकीम गो परमप्रभु यावेमीन आं चुरशो इन तार मोइक्ता, दे तुइक्नीनी’ देनो” देंत।

इस्राएल डा ठेयब मुर आन पाप

23 मिनु परमप्रभु यावेमी आं कली लोव्र पाप्तु।

24 मार लोव्र पाप्तु देशा हना “ए मुर, एको रागी कली गे आं गाइक्तीक नाक्त रेउम मशेक्शो, ग्रांग्रा दिशो रागी बाक्नेवे।

25 मेकेर बाक्ब पिप आ तौ आन सिखार ग्याइश्शो डरर डरर पाइब गुप्स खोदेशो बाक्नीम। मेकोपुकीम मुर आन कली नेक्तेक्म। शॉप नु शुश क्येट लाइब, मार मार रोइक्ताक्म। मिनु मेको आन दाते डा शुश मीश मुर आन कली वोइश बेक्शो मीश मुर सेल्लेक्म। इजीकीएल ३४:३,८; सेफन्याह ३:३; भजन संग्रह १४:४

26 मेको आ चढेबपुकीम आं शेंशो लोव्र प्रॉइतेक्म। आं थोव्रकपुकी ग्रांग्रा दिशो सेल्लेक्म। मेकोपुकीम आं मार मार मुर आन थोव्रक खोदेशो सेल्लेक्म। मेकोपुकीमी मार ग्रांग्रा दिशो नु मार ग्रांग्रा मदिशो बाक्नीमी, मेको मशेंदेम। मेकोपुकीम आं नाइक्तीक नाक्त प्रेंताक्म। मोपा गो मेको आन दातेम महिक्सीशो दुम्शो बाक्नुड। सेफन्याह ३:४; इजीकीएल ४४:२३; मती २३:२५; लेवी १०:१०

27 मेकेर बाक्ब आन ठेयब मुर नेल्ल फर खोदेशो बाक्नीम। मेकोपुकीम सिखार ग्यारनीम। मुर आन कली साइक्नीम नु क्येट तचा कली मुर आन कली खतम सेल्लनीम।

28 मेको आं लोव्र पाइबपुकीम ‘गो कोंइतीक ताता’ देखु पा, जोल पा शेंनीम। मेको आन पशो मरिम्शो नेल्ल बुलु ब्रुइश्शो खोदेशो पा सुम्नीम। मेकोपुकीम गो मारेइ मदेंथु ‘परमप्रभु, परमप्रभु यावेमी ओं देंत’ दे फश लोव्र पाइनीम।

29 मिनु मेको रागी डा मुरपुकीम गेन कि गेन, दे क्येट लाइक्नीम। मेकोपुकीमी मार मार रोइक्नीम। मेकोपुकीम पुडग नु मारेइ मथीब आन कली दिप्नीम। मिनु अर्को रागी डा मुर आन कली दला दाक्स पाइनीम।

30 मिनु गो मेको आन दातेम गारो प्रोव्रशा गेब नु रागी मक्यामदुल, दे रागी आ पबर्म आं डोंइती राक्ब मुर का माल्ता, तन्न मथिदु। इजीकीएल १३:५

31 मोपतीके गो आ गाइश्शो मेको आन तार मोइक्नुड। आं चुरशो मीमी मेको आन कली खतम सेल्लुडमी” दे परमप्रभु, परमप्रभु यावेमी देंत। इजीकीएल २१:३६

## 23

मरिम्शो पाइब वोबु निक्शी

1 परमप्रभु यावेमी आं कली लोव्र पाप्तु।

2 मार लोव्र पाप्तु देशा हना “ए मुर, रागी काम मीश मुर निक्शी बाक्ताक्स। मेको ममा का आ तमी बाक्ताक्स।

3 मेको निक्शी इजीप्त रागीम तेल्लेम दुम्ताक्स। मेको निक्शी ठिटी दुम्सानु, तेल्लेम पचा गोम्ताक्स। मेको रागीम मेको आस कुचु थिम्तेक्म। मिनु मेको निक्शी कन्ने बाक्सानु, आस दूध थिचा पुंडसाक्स।

4 मिनु दिदी आ नें ओहोला नु आ लोक्ब आ नें ओहोलीबा बाक्त। मेको निक्शी आं के दुम्शो बाक्ताक्स। मिनु मेको निक्शीमी तमी तौ थिम्ताक्स। मेको आस नें आ अर्थ मार बाक्त देशा हना, ओहोला सामरीया नु ओहोलीबा यरूसलेम बाक्त।

5 मिनु ओहोला आं के दुम्शा, यो तेल्लेम पाप्तु। मेकोमी अस्सुर डा लडाइ पाइब आन कली खोइक्तु।

6 मेको नीलो वा फेक्शो लडाइ पाइबपुकी, हुकुम पाइबपुकी, लडाइ पाइब आन कप्तानपुकी, मेको नेल्ल दारशो ठिटा शारा डोइश्शा गाक्बपुकी बाक्तेक्म।

7 मेकोमी मेको आन कली दाक्शा, मेकोपुकी नु तेल्लेम पाप्तु। मेको अस्सुर डा योव्रशो नु दारशो मुर बाक्तेक्म। मिनु मेकोपुकी नु इप्शा, मेको आ माल्शो वोंइश मुर आन मूर्ति नेल्लेम आंम कली ग्रांया दिशो सेल्साक्व।

8 मेकोम इजीप्त रागीम पशो तेल्लेम गेय मप्रोन। मारदे हना मेको ठिटी बाक्मेनु, मुरपुकी मेको नु इप्तेक्म। मिनु मेकोपुकीमी आ कुचु थिम्तेक्म। मिनु आन दाक्शो मेको नु पाम्तेक्म। २राजा १७:४

9 मोपतीके गो मेको कली आ दाक्शो अस्सुर डा मुर आन गुइम गेता। मेको, मेकोपुकी नु दाक्मुशो बाक्त।

10 मिनु मेकोपुकीमी मेको कली शिप्रा सेल्तेक्म। मिनु मेको आ तमी तौ आन कली ग्याइक्ताक्म। मिनु मेको कली तरवारम साइक्तेक्म। मेकोम सजाइ ताप्तु। मेको मीश मुर आन दातेम शुक्शी पाइक्चा पुंइसीब दुम्त।

11 मिनु मेको आ लोक्ब ओहोलीबामी मेको ताप्तु। तन्न मेकोम आ तेल्लेम पतीक नु खोइक्तीकेम आ दिदी क्येडा यो लाक्तु।

12 मेको यो अस्सुर डा मुर आन कली हुकुम पाइब, कप्तान, या कुरशा लडाइ पाइब नु शारा डोइक्ब बाक्तेक्म। मेको दारशो ठिटा आन नोले खोइक्तु।

13 मिनु गो मेको यो ग्रांया दिशो दुम्शो ताता। मेको निम्फा लां कामीन गाक्ताक्स।

14 तन्न मेकोम आ तेल्लेम पतीक डोंइती क्येडा शुश बारपाइक्तु। मेकोम गारोम मुशा सेल्शो वोंइश मुर आन नकसा ताप्तु। मेको लल रडम सेल्शो कल्दी आन नकसा बाक्तेक्म।

15 आन क्रातोम किप्शुर क्विप्शो नु आन पियाम रोम्सीशो फेटा रुक्शो, नेल्ल ठेयब मुर खोदेशो तांइसीशो बाक्तेक्म। मेको बेबीलोनम बाक्शो कल्दी डा मुर बाक्तेक्म।

16 मिनु मेकोम मेको आन कली तशा, मेको आन कली दाक्शा कल्दी रागीम लोत्र कुरब मुर सोइक्ताक्व।

17 मिनु बेबीलोन डा मुरपुकी मेको आ बाक्तीकेम मेको नु इप्थ जाक्तेक्म। मिनु आन दाक्तीकेम मेको कली ग्रांया दिशो सेल्तेक्म। मिनु मेकोपुकी रे ग्रांया दिशो दुम नोले, मेको आन क्येडा रूशा, आ थुं लेत्ताक्व।

18 मोपा मेकोम नेल्लेम तचा डा पा तेल्लेम पा, आ शिप्रा रां नेल्ल आन कली कोंइताक्व। मिनु गो मेको आ दिदी कली खोदेशो पा, मेको कली यो ग्रांया दिशा प्रोंइता।

19 मो हना यो मेकोम इजीप्त रागीम ठिटी बाक्म ना डा तेल्लेम पशो मिम्शा आ तेल्लेम पतीके शुश बारपाइक्तु।

20 मेको मेकेर डा आ माल्शो मुर आन कली दाक्ताक्मी। मेको आन माल्शो मुरपुकी गधा नु शारा खोदेशो बाक्तेक्म।

21 मो हना यो गे इजीप्त रागीम इ कुचु थिश्शो इ ठिटी ना डा मरिम्शो पशो नाक्ती मिम्ताक्वी” देत।

### ओहोलीबामी सजाइ तशो

22 मोपतीके ए ओहोलीबा, परमप्रभु, परमप्रभु यावेमी “डोंइती गो इ कली सजाइ गेनुड। मिनु इ कली दाक्शा, ब्रीशो मुर आन कली सजाइ गेनुड। मिनु मेको मुर आन कली इ पर्बम एर ओथ रे पोक्नुड।

23 मेको बेबीलोन डा मुर नु कल्दी डा मुर नेल्ले, पेकोद, शोआ नु कोआ डा मुर, अस्सुर डा मुर नेल्ल, मेको नु बाक्शो दारशो ठिटा, हुकुम पाइब, कप्तान नु लडाइ पाइब, मेको नेल्ल नु शारा डोइक्ब नेल्ल आन कली इ पर्बम पोक्नुडमी।

24 मेकोपुकी गे नु लडाइ पचा कली उत्तर रे पा बग्गी नु शुश लडाइ पाइब नु जाकनीम। मेकोपुकीमी टैयब नु आइक्च तेक्तीक कुरशा, फलाम के गुक्तीक गुक्शा, इ कली पुन्नीम। मिनु गो इ कली सजाइ गेपाइक्चा कली मेको आन गुइम गेनन। मिनु मेकोम आन कानुन कोत्रशा इ कली सजाइ गेनीम।

25 गो आं गाइशोमी इ कली सजाइ गेपाइक्नुड। मिनु मेकोपुकी गे नु गाइशशा चुरशा इ कली खतम पोक्नीम। मिनु मेकोपुकीम इ नें नु इ नोफा खोइक्नीम। मिनु इ लीशो मुर तरवारम साइक्चा पुंडसीनीम। मेकोपुकीम इ तमी तौ आन कली ग्याइशशा लाइक्नीम। इ लीशो मुर मीम दुप्शा बेक्नीम।

26 मेकोपुकीम इ वा पुइशशा शिश्रा सेल्नीम। मिनु इ दारशो गहनापुकी रोइशशा लाइक्नीम।

27 मोपा गो इ इजीप्त रागीम गोशो तेल्लेम पतीक थुम्पाइक्नुड। गे मेको आन कली ममाल्थु, इजीप्त रागी कली ममिन्नेवे” दे परमप्रभु यावेमी देंत।

28 मिनु परमप्रभु, परमप्रभु यावेमी “गो इ कली इ काइ मदाक्शो मुर आन गुइमी गेनुड। गे डोंइती मेको आन क्येडा रूशा, इ थुं लेशो बाक्ते।

29 मिनु मेकोपुकीमी इ काइ मदाक्शो गेय पाइनीम। इ गेय पा तशो मारेइ मारेइ योल्शा, इ कली शिश्रा सेल्शा प्रॉइनीम। मिनु शिश्रा दुम्तीके इ तेल्लेम पशो नेल्ल तुंडसीब। इ ग्रान्रा दिशो पशा, तेल्लेम पतीके गे मोदेशो दुम्नेवे।

30 मारदे हना गे रागी रागी नु तेल्लेम पा, गे मेको आन मूर्ति रे पा ग्रान्रा दिशो सेल्साक्वे।

31 गे इ लोक्ब खोदेशो पाप्तीवी। मोपतीके गो मेको कली गेशो श्येत इ कली गेनन” दे परमप्रभु यावेमी देंत

32 परमप्रभु, परमप्रभु यावेमी “गे इ लोक्ब आ कचौरा तूचा माल्नेवे। मेको टैयब श्येत जतीक बाक्ब। गे फाल्ने मचाप्चा डा शुक्शी पाइक्चा पुंडसीब दुम्नेवे। मारदे हना इ श्येत टैयब दुम्ब।

33 गे दुक्शो दुम्शा सुर्ता पतीकेमी ब्रीनेवे। मेको इ लोक्ब सामरीया आ कचौरा शुश हितीक नु मुर मबाक्तीक बाक्ब। यसैया ५१:१७

34 मिनु इ लोक्ब खोदेशो दुम्नेवे, गे मेको श्येतथ मदुम सम्म तूनेवे। मिनु मेको कचौरा आ टुक्रा नाक्नेवे। मिनु गे इ दूध रत्नेवे। मारदे हना गो एको लोत्र पाता” दे परमप्रभु, परमप्रभु यावेम देंत।

35 मोपतीके परमप्रभु, परमप्रभु यावेमी “गे आं कली प्रेताक्वी। मिनु आं कली प्रॉइती। मोपतीके गे इ ग्रान्रा दिशो गेय नु तेल्लेम पशो आ पर्बम सजाइ ताइक्नेवे” देंत। येरमीया २:३२

### वोबु निम्फामी सजाइ तशो

36 मिनु परमप्रभु यावेमी आं कली “ए मुर, गे ओहोला नु ओहोलीबा आस कली निसाफ पाइनेवे? मो हना मेको निक्शी आस पशो ग्रान्रा दिशो गेय आन पर्बम मेको आस कली तुइक्पतो। इजीकीएल २०:४इजीकीएल २०:४

37 मारदे हना मेको निक्शीम हेंथे पाम्ताक्स। मिनु मेको आस गुइम हुश खाक्श पोक्ताक्स। मेकोमी आस मूर्ति नु हेंथे पाम्ताक्स। मेको निक्शीम आं कली जरमेशो आस तमी तौ आन कली, मूर्ति आन कली ब्वचा गेचा कली क्योरशा चढेम्ताक्स। इजीकीएल १६:२०

38 मेको निक्शीम आं कली मार पाम्ताक्स देंशा हना, आं बाक्तीक ग्रान्रा दिशो सेल्ताक्स। मिनु आं नाइक्तीक नाक्त कली अर्को नाक्त खोदेशो पा सेल्ताक्स। इजीकीएल ८:५-१८

39 तेको नाक्ती मेको आस आल आन कली मूर्ति आन कली क्योरशा चढेम्से, मेको नाक्तीन आं बाक्तीकेम ओव्रताक्स। मिनु ग्रान्रा दिशो सेल्ताक्स। मेको निक्शीम आं ख्विम मोदेशो गेय पाम्ताक्स।

40 मेको निक्शीम डोन डा मुर आन कली लोत्र कुरब मुर सोइशशा, ब्रेत्ताक्से। मिनु मेकोपुकी जाक्तेकम। मिनु गे मेको आन पर्बम चिक्शा शोप्शा इ मिक्चीम गाजल खेक्साक्वे। मिनु गहना पांइशा आंम कली ग्योम्साक्वे।

41 गे आंम दारशो खाटम बाक्ते। मिनु मेको आ डोंइती आं धूप नु तेल वोइक्तीवी।

42 मिनु सह्रम टैयब ग्येरसीशो रेयके दुम्त। मिनु गोरशो रागी रे चाक्शो दुक्शो मुरपुकीमी मेकेर डा मीश मुर आन कली चुरा लिक्ताकम। मिनु आन पियाम दारशो सुन फू चुइक्ताकम।

- 43 मिनु गोरशो रागी रे जाक्शो मुरपुकी मेको तेल्लेम पचा रूशो मीश मुर नु इप्तेक्म।
- 44 मारदे हना मेकोपुकी तेल्लेम का नु इप्शो खोदेशो पा इप्तेक्म। ओहोला नु ओहोलीबा नु इप्शो मुर खोदेशो पा जाक्तेक्म।
- 45 तन्न ठीक निसाफ पाइबम मेको आस कली 'नाता खोइक्ब, हुश खाक्श पोक्शो आ पबर्म दोस ताइनीस' मारदे हना मेकोम हेंथे पा आस गुडम मुर साइशो हुश बाक्ब" देंत। इजीकीएल १६:३८,४०
- 46 मिनु परमप्रभु, परमप्रभु यावेमी "मेको आस पबर्म ग्रांग्ये माग्ये पोक्ब हुल का पोक्कीन। मिनु मेको आस कली शुश हिंपाइशशा मारेइ मारेइ रोइशशा लतीन।
- 47 मिनु मेको ग्रांग्ये माग्ये पोक्ब हुलपुकीम मेको आस कली फुल्लु आप्नीम। मिनु तरवारम क्योरशा साइक्नीम। मिनु मेकोपुकीम मेको आस तमी तौ आन कली साइक्नीम। मिनु मेको आन खिंम मी सुइक्नीम।
- 48 मोपा गो रागीम मेको ग्रांग्रा दिशो गेय थुम्पाइक्नुड। एको इ खोदेशो मपामेक्ल। मीश मुर नेल्ल आन कली हिंच कोंइतीक दुम्ब।
- 49 गे इ ग्रांग्रा दिशो गेय आ पबर्म सजाइ ताइनेवे। मिनु इ मूर्ति पूजा पशो पाप राइनेवे। मिनु गोन परमप्रभु यावे नड, दे तुइक्नेवे" देंत।

## 24

यरूसलेम खिया जोशो ग्योब दुम्शो

- 1 मिनु ग्याइशशा लाइक्चा पुंडसीशो आ ९ बर्स डा १० महिना डा १० नाक्ती परमप्रभु यावेमी आं कली लोत्र पाप्नु। २राजा २५:१
- 2 मार लोत्र पाप्नु देशा हना "ए मुर, मुलाक्ती तेको बर्स नु तेको नाक्ती बाक्बा, मेको ब्रेक्शा वोतो। मारदे हना मुलाक्ती बेबीलोन डा पिपम यरूसलेम कली पुम्शो बाक्ब।
- 3 एको मटीब खिं डा मुर आन कली, एको कथा नेंपाइक्मी। परमप्रभु, परमप्रभु यावेमी मार देंब देशा हना 'मी तार ग्योब कादीन। मिनु मेकेर ब्वाक्कु लुक्तीन। इजीकीएल ११:३
- 4 मिनु मेकेर श्ये कुर पने। रिम्शो रिम्शो श्ये, आ फिला डा नु कुथु डा श्ये कुर पने। रिम्शो रुशेम प्रिदीने।
- 5 बगाल डा नेल्ल क्येडा रिम्शो क्यारश भेडा योत्रशा चाक्कीन। मेको आ आगाम शी प्रोव्रडीन। मिनु मेकेर बुइक्पाइशशा रुश क्येने" देंत।
- 6 मोपतीके 'आबी आबी, एको हुश खाक्श पोक्ब सहर, मेको आ खिया ग्योब आगाम बाक्ब। मेको आ खिया मेकेर रे मलशो बाक्ब। मेको कली फेन्टे मआप्थु, श्येत्थ पोक्कीन। इजीकीएल २२:२; नहुम ३:१
- 7 मारदे हना मेको आ हुश शाइक्पाइशशो मेको आ दातेमीन बाक्ब। मेकोम मेको हुश श्येत्थ फुल्लु तार शाइक्पाइशशो बाक्त। मिनु खपीम मसुम्शो बाक्त।
- 8 गो चुरशा क्येक्क लेत्त्या कली, मेको आ शाइक्पाइशशो हुश मसुमल, दे श्येत्थ फुल्लु तार शाइक्पाइक्ता' दे परमप्रभु, परमप्रभु यावेमी देंत।
- 9 मिनु 'आबी आबी, मेको हुश खाक्श पोक्ब सहर, गो यो शी शुश तेल्लुड।
- 10 मोपतीके शी तेल्ला मी सुइक्तीन। मस्ला सुप्शा रिम्शो पा बुइक्पाइशशा श्ये क्येने। मिनु रुश नेल्ल किक्मल।
- 11 मेको नोले मेको ग्योब श्येत्थ सेल्शा मी तार कादीन। मिनु मेको होल। मिनु मेको आ तांबा लल दुम्ल। मेको आ आगा डा ग्रांग्रा दिशो नु खिया यशा लल। मिनु मीम नेक्गल।
- 12 आं सुर्ता पशो नेल्ल मोशीन दुम्त। मेको आ थांइशो खिया मीम यो मला।
- 13 मिनु गो इ कली इ ग्रांग्रा दिशो गेय रे गुंइशा ग्रांग्रा मदिशो सेल्चा माल्ला। तन्न गे ग्रांग्रा मदिशो म्दुमे। मोपतीके गो गेना सम्म आं गाइशशो नेल्ल इ तार मोइशशा, आं थुं मनाइक्पाइक्नुडा, मेना सम्म गे ग्रांग्रा मदिशो सेल्चा म्पुंडसीनेवे। इजीकीएल ५:१३

14 गो, परमप्रभु यावेमी एको लोव्र पाता। गो आं गेय पतीक नाक्ती जाक्शो बाक्ब। गो नोले मशोंइसीनुड। गो इ कली सुरता मपथु, शिशी मपाइक्नुड। इ पशो खोदेशो पा इ कली निसाफ पाइनुड” दे परमप्रभु, परमप्रभु यावेमी देंत। येरमीया १३:१४

### इजीकीएल आ मीश बेक्शो

15 परमप्रभु यावेमी आं कली लोव्र पाप्तु।

16 मार लोव्र पाप्तु देशा हना “ए मुर, गो याम काम इ नेल्ल क्येडा दाक्शो मुर लाइक्चा चिक्शो बाक्नुड। मो हना यो गे रोंका मपावो। मडाक्को। मिनु इ मिक्च रे प्रेक्कु यो मतोकको।

17 सिक्सी पा बाक्शा हुकयी पावो। बेक्शो मुर आ पर्वम रोंका मपावो। इ पियाम फेटा रुक्सो। खोइलीम जुता लिक्सो। इ कुल मसुम्सो। मलामी आन जचा थोव्रक मजावो” देंत। मीका ३:७; होसे ९:४

18 मोपतीके गो मेको लोव्र सुनी कना मुर आन कली माइक्तामी। मिनु मेको नाक्दो आं मीश बेक्त। मिनु आ दीसा सुनी गो मार माइक्चा पुंडसीशो बाक्डा, मेकोन पाता।

19 मिनु मुरपुकीम आं कली “एको आ अर्थ मार बाक्बा? मार गे आंइ कली मशेंनीनी?” देंतेक्म।

20 मिनु गो मेको आन कली “परमप्रभु यावेमी आं कली लोव्र पाप्तु।

21 मार लोव्र पाप्तु देशा हना ‘इस्त्राएल आ खिं डा मुर आन नेल्ल क्येडा दाक्शो, इन सक्ति, इन कोव्रत दाक्शो नु थुम दाक्शो आं बाक्तीक गो ग्राना दिशो सेल्लुड। मिनु इन प्रोइशा वोइश्शो इन तमी तौ तरवारम साइक्चा पुंडसीनीम

22 मिनु आं पशो खोदेशो पा गेपुकीम यो पचा माल्नीनी। गे इन कुल मसुमीन। मिनु मलामी आन जचा थोव्रक मजने।

23 गे इन फेटा रुक्चा माल्नीनी। मिनु इन जुता लिक्चा माल्नीनी। गेपुकीम रोंका मपने। मडाक्कीने, तन्न इन मरिम्शो पतीकेम इन रां सोव्रशा लाइनीम। मिनु इन दातेम हुकयी पचा माल्नीनी। ब्यवस्था २६:३९-४०

24 मोपा इजीकीएल गे इन कली चिन्ड का दुम्ब। मेकोम पशो खोदेशो पा गे यो पचा माल्नीनी। मिनु एको लोव्र गाम्मेनु, गोन परमप्रभु, परमप्रभु यावे नड, दे तुइक्नीनी’ देशो बाक्ब” देंत। इजीकीएल १२:६, ११

25 मिनु “ए मुर, मेको नाक्ती गो मेको आन खुइश्शा बाक्तीक, आन नेल्ल क्येडा दाक्शो, आन सक्ति, आन कोव्रत दाक्शो नु आन थुम दाक्शो नु आन तमी तौ नेल्ल आन कली लाइनुडमी।

26 मेको नाक्ती प्रोक्शो मुर का इ बाक्तीक जाक्शा इ कली एको लोव्र नेल्ल नेंपाइक्ब। इजीकीएल ३३:२१

27 मेना गे ब्वाक्ने चाप्नेवे। मिनु गे मेको नु लोव्र पाइनेवे। मिनु गे सिक्सी पा मबाक्नेवे। मोपा गे मेको आन कली चिन्ड का दुम्नेवे। मिनु मेकोपुकीम गोन परमप्रभु यावे नड, दे तुइक्नीम” देंत।

## 25

### अम्मोनी आन कली लोव्र पशो

1 परमप्रभु यावेमी आं कली लोव्र पाप्तु।

2 मार लोव्र पाप्तु देशा हना “ए मुर, अम्मोनी गे कोव्रशा, मेको आन पर्वम आं लोव्र पावो।

3 अम्मोनी आन कली ‘परमप्रभु यावे आ लोव्र नेनीन। परमप्रभु, परमप्रभु यावेमी इन कली मार देंब देशा हना, आं बाक्तीक ग्राना दिशो सेल्लेनु, इस्त्राएल रागी मुर मबाक्तीके सेल्लेनु नु यहूदा आ खिं डा मुर ग्याइश्शा लाइक्चा पुंडसमानु, गेपुकी ग्येरसाक्नी। इजीकीएल ३६:२; बिलाप २:१६

4 मोपतीके गो इन कली पूर्ब डा मुर आन कली गेनन्नी। मिनु मेकोपुकीम इन दातेम आन लडाइ पाइब आन बाक्तीक सेल्लनीम। मिनु इन दातेमीन आन ताम्बु कीनीम। मेकोपुकीम इन फल फुल जाइनीम। मिनु इन दूध तूनीम।

5 गो रब्बाह सहर कली दलऑठ जोतीक नु अम्मोन कली क्यारश भेडा आन गोठ सेल्लुड। मेना गेपुकीम गोन परमप्रभु यावे नड, दे तुइक्नीनी’ ” देंत।



6 मारदे हना परमप्रभु यावेमी “गेपुकी इस्राएल रागी आ परबम इन गुड फ़ोकशा, खोडल थाइशशो बाक्तीनी। मिनु इन थुंम ईख कुरशो नेल्ल गुंडशा ग्येरसाक्नी।

7 मोपतीके गो आं गुड गे इन परबम क्युकनुड। मिनु गो इन कली रागी रागी डा मुर आन गुडम गेनुड। मिनु गो जात जात डा मुर आन दाते रे इन नें क्याम्नुड। मिनु गो इन कली रागी नेल्ल रे क्याम्नुड। गो इन कली खतम पोक्ननी। मेना गेपुकीम गोन परमप्रभु यावे नड, दे तुडक्नीनी” दैत।

मोआबी आन कली लोत्र पशो

8 मिनु परमप्रभु, परमप्रभु यावेमी “मारदे हना मोआब रागीम ‘यहूदा आ खिं दा अर्को जात डा मुर आन खिं खोदेशो दुम्शो बाक्ब। यसैया १५:-; १६:-; येरमीया ४८:-

9 मोपतीके गो मोआब रागी डा सांद डा सहर रे गोशा बेथ-येशीमोथ, बाल-मेओन नु किरयथ-थाइम रागी रोक्सीशो सेल्लुड।

10 गो मोआबी, अम्मोनी नु पूर्व डा मुर आन गुडम गेनुडमी। मिनु रागी रागी डा मुर आन दातेम अम्मोन कली सुडम ममिन्नीम।

11 मिनु गो मोआब कली निसाफ पा सजाइ गेनुड। मेना मेकोपुकीम गोन परमप्रभु यावे नड, दे तुडक्नीम’ देशो बाक्ब” दैत।

एदोमी आन कली लोत्र पशो

12 परमप्रभु, परमप्रभु यावेमी “एदोम रागीम यहूदा आ खिं डा मुर आन कली क्येक्क लेत्ताक्व। मोपतीके मेको थाप्पा दोस ताडब दुम्त। इजीकीएल ३५:-; येरमीया ४९:७-२२; आमोस १:११-१२; ओबदिया १:-; भजन संग्रह १३७:७

13 गो आं गुड एदोम आ परबम क्युकनुड। मिनु मेकेर डा मुर नु बी ब्यफ, क्यारश भेडा नेल्ल आन कली साइक्नुडमी। मिनु गो मेको कली मुर मबाक्तीके सेल्लुड। मिनु तेमान रे देदान सम्म डा मुर नेल्ल तरवारम साइक्चा पुंडसीनीम।

14 गो आं मुर इस्राएल रे पा एदोम कली क्येक्क लेत्नुड। मिनु मेकोपुकीम आं गाइशशो नु आं चुरशो खोदेशो पा एदोम कली पाइक्नीम। मिनु मेकोपुकीम आं गाइशशो नु चुरशो खोदेशो पा क्येक्क लेत्नीम। मिनु मेकोपुकीमी परमप्रभु, परमप्रभु यावेमी क्येक्क लेशशो बाक्ब, दे तुडक्नीम” दैत।

पलिस्ती आन कली लोत्र पशो

15 परमप्रभु, परमप्रभु, यावेमी “मारदे हना पलिस्तीपुकीम गेना हना यो जोरी सत्रु दुम्शा, क्येक्क लेत्ताक्म। आन थुंम ईख कुरशा, क्येक्क लेशशा खतम सेल्लेक्म। यसैया १४:२९-३२; येरमीया ४७:-; आमोस १:६-८; सेफन्याह २:४-५

16 मोपतीके गो पलिस्ती आन परबम आं गुड क्युकनुड। मिनु गो केरेथी आन कली साइक्नुडमी। मिनु समुन्द्र आ नेक्था डा बाक्तीक नेल्ल खतम सेल्लुड।

17 गो मेको आन कली आं चुरशोम टेयब सजाइ गोशा थाप्पा क्येक्क लेत्नुडमी। मिनु गो मेको आन कली क्येक्क लेत्तुनु, मेकोपुकीम गोन परमप्रभु यावे नड, दे तुडक्नीम, देशो बाक्ब” दैत।

## 26

टायर सहर कली निसाफ पशो

आमोस १:९-१०; यसैया २३:-

1 मिनु ग्याइशशा लाइक्चा पुंडसीशो ११ बर्स डा महिना डा डोइती डा नाक्ती परमप्रभु यावेमी आं कली लोत्र पात्तु।

2 मार लोत्र पात्तु देशा हना “ए मुर, यरूसलेम श्येत जशो तशा, टायर सहर ग्येरसीशो बाक्त। मेकोमी ‘आं डोइती टेयब लाप्चो ब्रेशो बाक्ब। मेको लाप्चो आं कली रोक्सीशो बाक्ब। मुल मेको जाम्शा लत। मुल आं कली रिम्शो दुम्ब” दैत। इजीकीएल २५:३

3 मोपतीके परमप्रभु, परमप्रभु यावेमी “कोव्रडो, ए टायर सहर गो इ कली सजाइ गेनुड। इ कली समुन्द्रम आ छाल पोक्शो खोदेशो पा गो शुश रागी डा मुर इ परबम पोक्नुडमी।

4 मेकोपुकीम टायर डा गारो प्रेत्नीम। मिनु मेको आ लाइशो खिं खोल्नीम। गो मेको आ खप खोरशा श्येत्थ फुल्लु खोदेशो सेल्लुड।

5 टायर सहर समुन्द्र आ दातेम ग्याइल आप्तीक दुम्चा माल्ब, दे गो, परमप्रभु, परमप्रभु यावेमी एको लोत्र पाता। मेको सहर रागी रागी डा मुर आन रोइक्तीक दुम्ब।

6 मिनु मेको आ एर ओंथ डा सहर डा मुर तरवारम साइक्चा पुंडसीनीम। मेना मेकोपुकीम गोन परमप्रभु यावे नड, दे तुइक्नीम” दैत।

7 मिनु परमप्रभु, परमप्रभु यावेमी “गो उत्तर रे बेबीलोन डा पिप नेबुकदरेसर कली शारा, बग्गी, शारा डोइक्ब लडाइ पाइब नु ठेयब हुल बोल्यो लडाइ पाइब, टायर नु लडाइ पपाइक्थ चाक्नुड। येरमीया २७:६; दानीएल २:३७

8 मिनु एर ओंथ डा सहर डा मुर नेल्ल तरवारम साइक्चा पुंडसीनीम। मेको बेबीलोन डा लडाइ पाइबपुकीमी सहर कली पुम्नीम। गारो डोइक्तीक सेल्नीम। मिनु तेक्तीक कुरशो शुश लडाइ पाइब इ गो बारनीम।

9 मिनु पिप नेबुकदनेसरमी मुडाम गारो ब्रेप्ब आन कली अरेब। मिनु इ लाइशो खिं आ खापुकीम प्रेत्नीम।

10 मेको आन शुश शाराम पोक्शो फुरकुम इ कली सुम्ब। शारा डोइक्ब नु बग्गी आन गुगील आन रेयकेम इ गारो हिम्पाइक्ब। नेबुकदनेसर इ लाप्चो रे ओव्रमेनु, प्रेशो गारोम हिरशो सहर खोदेशो पा ओव्रब।

11 मेको आ शारा आन गेंचम इ सहर डा लां नेल्ल दिम्शा ताइशशा पाइनीम। मिनु मेकोमी इ मुर आन कली तरवारम साइक्ब। मिनु इ बोल्यो थाम खपीम गोल्नीम।

12 मेकोपुकीम इ शोंप रोइशशा योल्नीम। इ लेयचा कली वोइशशा थोत्रक रोइशशा लाइक्नीम। मेकोपुकीम इ गारो नु इ दारदारशो खिं प्रेशशा खतम पोक्नीम। मिनु इ फुल्लु, खिं सेल्तीक शी नु खप समुन्द्रम ताइक्नीम।

13 गो इ कुम्सो थुम्पाइक्नुड। इ बीना ताप्शो लेंशा मनेंसीब। आमोस ५:२३

14 गो इ कली श्येत्थ फुल्लु सेल्लुड। गे ग्याइल आप्तीक दुम्चेवे। इ कली लेंशा गेनायो मसेल्नीम। मारदे हना गो, परमप्रभु यावेमी एको लोत्र पाता” दे परमप्रभु, परमप्रभु यावेमी दैत।

15 परमप्रभु, परमप्रभु यावेमी टायर सहर कली “लडाइ पा, गार दुम्शो आन हुकयी पशो इ गोल्लो रेयकेम समुन्द्र आ नेक्था डा सहर आन कली हिम्पाइक्ब।

16 मेना समुन्द्र आ नेक्था डा सहर आन कली सासन पाइब आन ठेयब नित्तीक रे बोक्शा तोइशशा, बुटा आप्शो वा पुइक्नीम। मेकोपुकी हिंशा खिंखिं पशा, खपीम निरशा, हिम्सीनीम। मिनु इ कली तशा हिंनीम।

17 मिनु मेकोपुकीम सहर आ परबम रोंका पाइनीम। मिनु सहर कली “गे समुन्द्र रे क्याम्चा पुंडसाक्वे। ए दारशो सहर, गे नु इ मुरपुकी समुन्द्र डा सक्ति पाइशशा बाक्तीनी। मेकेर बाक्ब नेल्ल आन कली गे हिंपाइशशा थिर थिर पपाइशशा बाक्ते।

18 मुल गे जाम्शा लवे नाक्ती समुन्द्र आ नेक्था डा रागी डा मुरपुकी खिंखिं पाइनीम। इ गोल्लो लशो खतम दुम्शो तशा समुन्द्र आ नेक्था डा रागी हिंनीम” दैत।

19 मिनु परमप्रभु, परमप्रभु यावेमी “गो इ कली श्येत्थ सहर का सेल्लुड। गो इ कली मुर मबाक्शो सहर खोदेशो दुम्पाइक्नुड। मिनु गो इ कली समुन्द्र डा ब्वाक्कुम सुम्पाइक्नुड।

20 गे इ कली बेक्शा लशो मुर नु साइ डोइती बेक्शो मुर आन बाक्तीके उइ तोक्नन। गो इ कली उइ डा रागीम साइ नेसी ब्रेशो खिं आन दातेमी बाक्पाइक्नुड। गे नरक लाइब नु बाक्नेवे। मिनु गे ब्रोइशा बाक्ब आन बाक्तीकेम बाक्चा मताइनेवे। यसैया १४:११,१५; एफिसी ४:९; १पत्रुस ३:१९

21 गो इ जाम्तीक हिंचा डा सेलनुड। मिनु गे जाम्शा लाइनेवे। इ कली माल्नीम, तन्न सुइम मथिल्नीम” दे परमप्रभु यावेमी देंत।

## 27

टायर सहर आ परबम रोंका पशो

यसैया २३:-

1 परमप्रभु यावेमी आं कली लोव्र पाप्तु।

2 मार लोव्र पाप्तु देशा हना “ए मुर, टायर सहर आ परबम रोंका पावो।

3 मेको समुन्द्र आ ओव्रतीक बाक्ब। मेको टायर सहर शुश मुर आन ग्याप्तीक लेयतीक बाक्ब। मिनु परमप्रभु, परमप्रभु यावेमी ए टायर, गे ‘गो नेल्ल क्येडा दारशो बाक्नुड’ देंत। होसे ९:१३

4 इ सांद समुन्द्र आ आगाम बाक्त। इ कली सेल्वपुकीमी नेल्ल आन क्येडा दारशो पा सेल्लेमी।

5 मेकोपुकीम इ डोंगा नेल्ल सेनीर डा शी के सेल्लेक्म। आ दाते डा थाम लेबानोन डा लाइशो रवा आ शी के सेल्लेक्म। ब्यवस्था ३:८-९

6 मेकोपुकीम इ ब्वाक्क शाक्तीके बाशान डा बोल्यो शी के सेल्लेक्म। इ थेक्शा गाक्तीक साइप्रस डा समुन्द्र आ शुंडच रे चाक्शो तोव्रशी रवा आ शी के सेल्शा हात्ती आ दारा के बुटा आप्शा सेल्लेक्म।

7 इ जहाज डा वापुकी इजीप्त रागी डा दारशो बुटा आप्शा सेल्शो रिम्शो किरशो सुती वा के बाक्तेक्म। मेको इ छेदर दुम्शो बाक्तेक्म। मेको एलीशाह रागी डा समुन्द्र आ शुंडच डा नीलो नु प्याजी रड डा चाक्शो बाक्त। उत्पत्ती १०:४

8 सीदोन नु अरवाद डा मुरपुकी इ जहाजम गेय पाइब बाक्तेक्म। टायर, इन जोक्ब तुइक्ब मेकेर बाक्तेक्म। सेमेर सहर डा मुर इ जहाज चलेब बाक्तेक्म।

9 गेबाल डा खाल्पा नु दारशो थोव्रक सेल्स जोक्ब तुइक्ब इ आगाम बाक्तेक्म। मेकोपुकी जहाज डा बिग्रेशो मार मार सेल्व बाक्तेक्म। जहाज नु आ गेय पाइब नेल्ल इ आगाम बाक्तेक्म। मेकोपुकीमी लेयतीक नु ग्याप्तीक गेय यो पाम्तेक्म। यहोसु १३:५; १राजा ५:३२

10 पारसी, लूद नु पूत रागी डा मुरपुकी इ लडाइ पाइब बाक्तेक्म। मेकोपुकी बोल्यो लडाइ पाइब बाक्तेक्म। मेको आन तेक्तीक नु ताकी इ आगामीन क्युक्शा इ दारस बारपाइक्तेक्म।

11 अरवाद नु हेलेक डा मुरपुकी इ गारो आ एर ओंथ खाल पाइब बाक्तेक्म। गमाद डा मुरपुकी इ लाइशो खिं खाल पाइब बाक्तेक्म। मेकोपुकीम आन तेक्तीक नु ब्रा कुरतीक इ एर ओंथ डा गारोम क्युक्बाक्तेक्म। मिनु मोपा इ दारस बारपाइक्तेक्म।

12 गे नु शुश शोंप नु शुश मार मार बाक्तीके टारशीश डा मुरपुकीम गे नु ग्याप्तीक लेयतीक गेय पा चांदी, फलाम, टिन नु सिसा चाक्शा फाइक्तेक्म।

13 यावान तूबल नु मेशेक डा मुरपुकीम गे नु ग्याप्तीक लेयतीक गेय पाम्तेक्म। मेकोपुकीम वाइलीम वाइल नु कांसा के ग्योंब चाक्शा इ मार मार नु फाइक्तेक्म। इजीकीएल ३८:२

14 मिनु बेथ-तोगारमाह डा मुरपुकीम शारा, लडाइ पाइब शारा नु खचर चाक्शा इ मार मार नु फाइक्तेक्म।

15 रोडोस डा मुरपुकीम गे नु ग्याप्तीक लेयतीक गेय पाम्तेक्म। मिनु समुन्द्र आ नेक्था डा शुश रागी इ मार मार ग्याप्ब लेयब दुम्तेक्म। मेकोपुकीम इ कली हात्ती आ दारा नु शुश क्येट लाइब क्येर शी चाक्शा इ मार मार नु फाइक्तेक्म।

16 इ शुश मार मार बाक्तीके एदोम डा मुरपुकीमी गे नु ग्याप्तीक लेयतीक गेय पाम्तेक्म। मेकोपुकीम फिरोजा माइशो हीरा, प्याजी रड नुप्या प्रोव्रशो वा, बुटा आप्शो वा, रिम्शो किरशो सुती वा, लल मूगा नु हीरा चाक्शा इ मार मार नु फाइक्तेक्म।

17 यहूदा नु इस्राएल डा मुरपुकीम गे नु ग्याप्तीक लेयतीक गेय पाम्तेक्म। मेकोपुकीम मिन्नीथ डा चेरब, फोव्रशी रवा आन फल, खुदो, तेल नु खेक्तीक चाक्शा इ मार मार नु फाइक्तेक्म।

18 मिनु इ शुश मार मार बाक्तीके नु इ शुश शोप बाक्तीके दमस्कस डा मुरपुकीम गे नु मार मार ग्याप्तीक लेयतीक गेय पाम्तेकम। मेकोपुकीम हेल्बोन डा अडगुर शांबु नु बुश ऊन चाक्शा इ मार मार नु फाइक्तेकम।

19 उजाल डा वेदान नु यावान डा मुरपुकीम गे नु ग्याप्तीक लेयतीक गेय पाम्तेकम। मेकोपुकीम चेम्शो फलाम, सिन्कौली नु बच चाक्शा इ मार मार नु फाइक्तेकम।

20 देदान डा मुरपुकीम शारा आ लगम कली जीन वा चाक्शा इ मार मार नु फाइक्तेकम।

21 अराब रागी नु केदार डा पिप आन तौ नेल्ल इ मार मार ग्याप्ब मुर बाक्तेकम। मेकोपुकीम भेडा पाठा, सांड, क्यारश चाक्शा इ मार मार नु फाइक्तेकम।

22 शेबा नु रामाह डा ग्याप्ब लेयब मुरपुकीम गे नु ग्याप्तीक लेयतीक गेय पाम्तेकम। मेकोपुकीम सुप्तीक, नेल्ल खाल डा हीरा नु सुन चाक्शा इ मार मार नु फाइक्तेकम। उत्पत्ती १०:७

23 हारान, कन्नेह, एदेन, शेबा, अश्शुर नु किल्मद डा ग्याप्ब लेयबपुकीम गे नु ग्याप्तीक लेयतीक गेय पाम्तेकम।

24 मेकोपुकीमी दारशो वा, नीलो श्येलेम प्रोव्रशो वा, बुटा आप्शो वा, शुश रड पाइश्शो गलैचा चाक्शा, इ मार मार नु फाइक्तेकम।

25 टारसीस डा जहाजपुकीम इ ग्याप्तीक लेयतीक गेय पाम्तेकम। गे हेल्शो ग्याप्तीक लेयतीक मार मारमी ब्रीशो समुन्द्रम बाक्ते।

26 मिनु इ कली शाक्बपुकीमी इ कली समुन्द्र आ दातेम लाइक्तेकम। तन्न पूर्व डा फशेम इ कली समुन्द्र आ दातेमीन खतम पोक्तु।

27 मिनु इ खतम दुम्तीक नाक्ती इ शोप, इ ग्याप्तीक लेयतीक मार मार, इ गेय पाइब, इ कली चलेब, इ जहाज कली सेल्ब, इ ग्याप्ब लेयब, इ लडाइ पाइब नु गे नु बाक्ब मुर नेल्ले समुन्द्र आ दातेमी गुम्शा खतम दुम्नीम।

28 मेको इ जहाज चलेब आन वाइ ब्रेश्शोम रागी खिंखि पाइब।

29 मिनु ब्वाक्कु शाक्ब नेल्ले आन जहाज प्रोइशा प्रोक्नीम। मिनु जहाजम गेय पाइब नु चलेबपुकी समुन्द्र आ नेक्थाम राप्नीम।

30 मिनु मेकोपुकी इ पर्वम ठेयब सेंदा पा रोंका पा डाक्नीम। आन पियाम फुरक फुइसीनीम। मिनु पुलुम लोकसीनीम।

31 गे इ पतीके मेकोपुकीम आन पिया डा चां प्रेक्नीम। मिनु अरन्डी फेक्सीनीम। मिनु इ पर्वम आन थुं कशो दुम्शा डाक्नीम। शुश रोंका पाइनीम।

32 मेकोपुकीम इ पर्वम रोंका पा बिलाना पतीक कुम्सो पाइनीम 'समुन्द्र आ दातेमी टायर खोदेशो पा अर्को तेको सहर खतम दुम्शो बाक्मे' दे रोंका पाइनीम।

33 समुन्द्रम इ ग्याप्तीक लेयतीक मार मार चाक्गमेनु, गे शुश मुर आन कली आन थुं ग्येरपाइक्तीवी। गे इ शुश शोप नु इ ग्याप्तीक लेयतीक मार मारम रागी डा पिप आन कली शोप पाइश्शो सेलतीवी।

34 मिनु समुन्द्रम खुम्चा पुंइसाक्वे। इ ग्याप्तीक लेयतीक मार मार नु इ मुर नेल्ल गे नु गुम्तेकम।

35 मिनु समुन्द्र आ नेक्थाम बाक्ब नेल्ल इ कली तशा हिंशो बाक्नीम। मेको आन पिप थाम्पा हिंशा खिंखि पाइनीम। मेको आन कुल हिंशा किक्पाइश्शो बाक्नीम।

36 मिनु रागी रागी डा ग्याप्तीक लेयतीक गेय पाइबपुकीम इ कली शुक्शी पाइनीम। इ हिंचा डा नुप्तीक नाक्त जाक्शो बाक्त" देंत। इजीकीएल २८:१९

## 28

टायर डा पिप कली निसाफ पशो

1 परमप्रभु यावेमी आं कली लोव्र पाप्तु।

2 मार लोव्र पाप्तु देशा हना "ए मुर, टायर डा पिप आ तौ कली परमप्रभु, परमप्रभु यावेमी 'गे इ थुं डा ठेयब लेत्तीकेम, गो परमप्रभु नड। गो समुन्द्र आ दातेम देवी देवता आन बाक्तीकेम बाक्नुड'

देंते। तन्न गे मुर ला बाक्नेवे। परमप्रभु मनवे। गे ठेयब लेशशा, इ थुंम 'परमप्रभु खोदेशो जोक्ब तुइक्ब बाक्नुड' दे मिम्साक्वे। यसैया ३१:३; दानीएल ५:२०; प्रेरित १२:२३

3 गे दानीएल क्येडा यो जोक्ब तुइक्ब बाक्नेवे। मारेइ खुइक्तीक लोव्व इ रे मखुंडसीशो बाक्ब। इजीकीएल १४:१४; दानीएल १:१७

4 गे इ रुप्तीक थुं नु मिम्तीकेम शुश शोंप चेम्शो बाक्नेवे। मिनु गे इ मार मार वोइक्तीकेम सुन नु चांदी तेल्लो बाक्नेवे।

5 गे इ रुप्तीक थुंम ग्याप्तीक लेयतीक गेय पा इ शोंप बारपाइशो बाक्नेवे। मिनु इ शोंपोम पतीके गे बोरशा ठेयब लेशशा बाक्नेवे, देशो बाक्ब" देंत।

6 मोपतीके परमप्रभु, परमप्रभु यावेमी "गे आंम इ कली परमप्रभु खोदेशो सुंडसीनेवे।

7 मोपतीके गो रागी रागी डा नेल्ल क्येडा मरिम्शो पाइब मुर आन कली चाक्नुड। मिनु मेकोमी आन तरवार इ दारस नु इ जोक्ब तुइक्ब थुं आ परबंम शोइक्नीम। मिनु इ दारस ग्रांया दिशो सेलनीम।

8 मेकोपुकीम इ कली तुरसुम चाक्दीत्नीम। मिनु गे समुन्द्र आ दातेम हिंचा डा दुम्शा बेक्नेवे। इजीकीएल २६:२०

9 मिनु मार, इ कली साइक्ब आन डोंइती गे मुर दुम्शा यो 'गो देवता का नड' देनेवे डा? 'इ कली साइक्ब आन गुइमी बाक्शा यो मोदेशो लोव्व पाइनेवे?

10 गे अर्को रागी डा मुर आन गुइम खोइक्तीक चिनु मखोइशो मुर खोदेशो पा बेक्चा माल्नेवे' दे गो, परमप्रभु, परमप्रभु यावेमी लोव्व पाता" देंत।

11 परमप्रभु यावेमी लेंशा आं कली लोव्व पाप्तु।

12 मार लोव्व पाप्तु देशा हना "ए मुर, टायर डा पिप आ परबंम रोंका पावो। मिनु मेको कली परमप्रभु, परमप्रभु यावेमी इ कली 'गे रिम्शो पा थोक्शो छाप खोदेशो बाक्ते। मिनु रुप्तीक थुंम ब्रीशो नु थम दारशो बाक्ते। इजीकीएल २७:२

13 गे परमप्रभु आ रू एदेनम खोदेशो बाक्ते। गे हीराम ग्योम्सीशो बाक्ते। लल मानीक, हाव पुशपराज, बुश नु नीलो पन्ना, पीतमनी, लल रड डा ओनीक्स, नीलो बिलौरा, बुश नीर, लल फिरोजा नु गिगी बेरूज माइशो हीराम ग्योम्सीशो बाक्ते। मिनु मेको हीरा ग्याइक्तीके नु आप्तीके सुन के बाक्तेक्म। गे दुमे नाक्तीन मेको नेल्ल ठीक पशो बाक्तेक्म। प्रस्थान २८:१७-२०; इजीकीएल ३१:८-९; उत्पत्ती २:८

14 गो तेल लुक्शो करूब इ कली खाल पाइब सेल्ला। गे आं डांडाम बाक्शो नवे। गे मी ब्रशो फुल्लु आन दातेम गाक्बाक्ते।

15 गे सेल्चा पुंडसे नाक्तर रे दोस मताइब बाक्ते। तन्न नोले मरिम्शो पाइब दुम्शो, बाक्ते।

16 मिनु इ एर ओंथ नेल्ल डा ग्याप्तीक लेयतीक आ परबंम हुश खाक्श पोक्शा, पाप पाप्तीवी। मोपतीके गो इ कली ताइक्तीक थोव्वक खोदेशो पा आं डांडा रे ताइक्ताक्ड। मिनु इ कली खाल पाइब करूबम इ कली मी ब्रशो फुल्लु आन दाते रे खेरते।

17 गे इ दारसम पतीके इ थुं ठेयब लेशशा बोरत। इ शुश शोंप दुम्तीके इ जोक्ब तुइक्ब थुं मरिम्शो सेलतीवी। मोपतीके गो इ कली खपीम ताइक्ताक्न। मिनु इ कली पिप आन डोंइती शुक्शी पतीक सेल्लतन।

18 गे इ शुश मरिम्शो पशो नु इ जोल पा ग्याप्तीक लेयतीकेम इ आं कली ठेयब सेलतीके ग्रांया दिशो सेलतीवी। मोपतीके गो इ आगा रे मी का गुंडताक्ड। मिनु मेकोमी इ कली नेक्तु। मिनु गो इ कली मुर आन डोंइती पुलु सेल्लतन।

19 मिनु इ कली तुइक्ब मुर नेल्ल इ कली तशा हितेक्म। गे हिंचा डा दुम्शा बेक्ते। मिनु गे गेना हना यो बेक्शा लाइनेवे' देनो" देंत। इजीकीएल २७:३६

सीदोन सहर कली निसाफ पशो

20 परमप्रभु यावेमी आं कली लोव्व पाप्तु।

21 मार लोव्व पाप्तु देशा हना "ए मुर, सीदोन गे कोवडो। मिनु मेको आ परबंम आं लोव्व पावो। यसैया २३:२-४

22 परमप्रभु, परमप्रभु यावेमी 'ए सीदोन, गो इ कली सजाइ गेनुड। गो इ दातेमी आं सक्ति कौंडनुड। गो इ दातेमी आं सक्ति कौंडशा, निसाफ पाता हना, मेकोपुकीमी गोन परमप्रभु यावे नड' दे तुइक्नीम

23 गो मेको आ आगाम मुर बेक्तीक रोड का सोइक्नुड। मिनु मेको आ लां मेर हुश शाइक्पाइक्नुड। मेको आन दाते डा मुर तेइ तेइ तरवारम साइक्चा पुंडसीनीम। मिनु मेकोपुकीमी 'गोन परमप्रभु यावे नड' दे तुइक्नीम।

### इसाएली आन रागी लेत्नीम

24 इस्राएल आ खिं डा मुर नु मेको आन नेक्था डा मुर आन दातेमी मुल श्येत गेब मुर मुल मबाक्नीम। मेकोपुकीमी 'गोन परमप्रभु, परमप्रभु यावे नड' दे तुइक्नीम" देशो बाक्ब।

25 परमप्रभु, परमप्रभु यावेमी "गो इस्राएल आ खिं डा मुर आन कली मेको आन ब्रशा बाक्शो रागी रागी डा मुर आन दाते रे गुम्पाइक्नुडमी। मिनु गो परमप्रभु यावे नड, दे रागी रागी डा मुर आन डौंइती तुइक्पांडसीनुड। मेना मेकोपुकी आं गेय पाइब याक्ब कली गेशो रागीम बाक्चा ताइनीम।

26 मेकोपुकी मेकेर मारेइ मदुम्थु बाक्नीम। मेकोपुकीम खिं सेल्नीम। मिनु अडगुर खुम्नीम। मिनु गो मेको आन कली तशा, ग्रांया दीब नेल्ल आन कली सजाइ गेनुडमी। गो मेको आन नेक्था बाक्ब मेको आन कली मदाक्ब आन कली निसाफ पडानु, मेकोपुकी रिम्शो पा बाक्नीम। मिनु मेकोपुकीमी 'गोन परमप्रभु यावे, आन परमप्रभु नड' दे तुइक्नीम" देत।

## 29

### इजीप्त कली निसाफ पशो

यसैया १९:-; यसैया २०:-; येरमीया ४६:-

1 मिनु ग्याइशशा लाइक्चा पुंडसीशो १० बर्स डा १० महिना डा १२ नाक्त परमप्रभु यावेमी आं कली लोत्र पाप्तु।

2 मार लोत्र पाप्तु देशो हना "ए मुर, गे इजीप्त डा पिप फाराओ गे कोव्रडो। मेको आ पर्वम नु इजीप्त रागी नेल्ल आन पर्वम आं लोत्र पावो।

3 मिनु परमप्रभु, परमप्रभु यावेमी मेको कली 'ए इजीप्त डा पिप फाराओ, गो इ कली सजाइ गेनुड। गे खोला आन दातेम बाक्ब समुन्द्र डा टेयब जन्तु खोदेशो बाक्नेवे। मिनु नील खोला आं केन बाक्ब। मेको आं सेल्शो बाक्ब' देते। इजीकीएल ३२:२

4 गो इ शांपेम बोल्सी ब्वेक्नुड। मिनु गो इ खोला डा डांइ इ कत्लापुकीमीन क्येप्पाइक्नुडमी। गो खोला डा डांइ इ कत्लाम क्येप्पाइशशा, इ कली खोला रे कीशा गुंडनन।

5 मिनु गो इ कली नु इ खोला डा डांइ नेल्ल आन कली गोरशो रागीम ताइक्नन्नी। मिनु गे दिमम गोल्नेवे। इन कली सुइम खुप्शा मथिन्नीम। गो इ कली रागी डा जन्तु नु सरीड डा चिक्ब आन कली ब्वचा कली गेनुड।

6 मेना इजीप्त रागीम बाक्ब नेल्लेम गोन परमप्रभु यावे नड, दे तुइक्नीम। गे इस्राएल आ खिं डा मुर आन कली बुदी मीलु के कोक्के खोदेशो दुम्शो बाक्नेवे। २राजा १८:२१

7 मिनु मेकोपुकीमी इ कली गुइम ग्याइक्तमेनु, गे जिक्बाक्ते। मिनु मेकोपुकीमी इ कली तिकसीमानु, गे जिक्शा, मेको आन खोइल रोप्पाइक्बाक्ते" देत।

8 मोपतीके परमप्रभु, परमप्रभु यावेमी "गो इ पर्वम तरवार सोइक्नुड। गो इ मुर नु इ बी ब्यफ, क्यारश भेडा नेल्ल आन कली साइक्नुडमी।

9 मिनु इजीप्त रागी मुर मबाक्तीके नु गोरशो रागी दुम्ब। मेना मेकोपुकीमी गोन परमप्रभु यावे नड, दे तुइक्नीम। गे 'नील खोला आं केन बाक्ब। गो मेको सेल्ला' देते।

10 मोपतीके गो इ पर्वम नु इ खोला आन पर्वम बोक्नुड। मिनु गो मिगदोल रे स्येने सम्म नु एथीयोपीया रागी आ सांद सम्म इजीप्त रागी कली गोरशो नु मुर मबाक्तीके सेल्लुड। इजीकीएल ३०:६

11 मेकेर सुइ मुर नु जन्तु मगाक्नीम। मेकेर ४० बर्स सम्म सुइ मबाक्नीम। गन्ती १४:३३-३४

12 गो इजीप्त रागी कली मुर मबाकशो रागी आन दातेमी मेको क्येडा मुर मबाकशो रागी सेल्लुड। मिनु मेको आ सहरपुकीम ४० बर्स सम्म मुर मबाकनीम। मिनु गो इजीप्त रागी डा मुर आन कली रागी रागी नु राज्य राज्य डा मुर आन दातेम ब्रपाइक्नुडमी” देंत।

13 मो हना यो परमप्रभु, परमप्रभु यावेमी “मेको ४० बर्स नोले गो इजीप्त डा मुर आन कली मेको आन ब्रशा बाक्तीक रागी रागी डा मुर आन दाते रे खुप्नुडमी।

14 गो मेको आन कली लेंशा रिम्शो पाइनुड। मिनु मेको आन कली आन किकी पिपी आन रागी पथ्रोसम चाक्नुडमी। मिनु मेको मेकेर महिक्सीशो आइक्च राज्य का दुम्शा बाक्ब। पथ्रोस रागी इजीप्त डा दक्खिन बाक्त।

15 मेको राज्य नेल्ल आन दातेमी नेल्ल क्येडा आइक्च राज्य दुम्ब। मेको अर्को रागी आन क्येडा गेनायो ठेयब मदुम्ब। गो मेको कली थम आइक्च सेल्लुड। मिनु मेकोम गेनायो अर्को रागी रागी आन कली सासन मपाइब।

16 मिनु इस्राएल आ खिं डा मुरपुकीमी इजीप्त रागी कली लेंशा गेनायो थमा मसुडक्नीम। तन्न इस्राएलम इजीप्त कली ‘वारच पाइक्की’ दे पुंडथ लशा आन पाप मिम्पाइक्नीम। मेना मेकोपुकीम गोन परमप्रभु, परमप्रभु यावे नड, दे तुइक्नीम” देंशो बाक्ब।

### इजीप्त रागी नेबुकदनेसर के दुम्शो

17 मिनु ग्याइश्शा लाइक्चा पुंडसीशो २७ बर्स डा डोंइती डा महिना डा डोंइती डा नाक्ती परमप्रभु यावेमी आं कली लोत्र पाप्तु।

18 मार लोत्र पाप्तु देंशा हना “ए मुर, बेबीलोन डा पिप नेबुकदरेसरम टायर कली लडाइ पाइब आन कली शुश श्येत पपाइक्तु। मिनु मुर नेल्ल आन पिया डा चां दुल्लत। आन बला खोरसीशा, गार दुम्त। मो हना यो टायर आ पर्वम पशो गेय आ पर्वम मेको नु मेको आ लडाइ पाइबम मारेड मतामे।

19 मोपतीके परमप्रभु, परमप्रभु यावेमी ‘गो इजीप्त रागी कली बेबीलोन डा पिप नेबुकदरेसर आ गुडम गेनुड’ देंत। मिनु मेकोम मेको आ शोंप नेल्ल लाइक्ब। मेकोम मारेड मारेड रोइश्शा, मेको रागी कली श्येतथ पोक्ब। मिनु मेको आ रोइश्शो शोंप मेको आ लडाइ पाइब आन गाल्च दुम्ब।

20 गो मेको आ पशो गेय आ पर्वम इजीप्त रागी कली मेको आ गाल्च सेल्लशा गेता। मारदे हना मेकोपुकीम आं पर्वम शुश गेय पांम्तेक्म। इजीकीएल ३०:२४

21 मेको नाक्ती गो इस्राएल आ खिं डा मुर रे ग्रोव का वापाइक्नुड। मिनु गो इ कली मेको आन दातेमी ब्वाक्पाइक्नन। मेना मेकोपुकीम गोन परमप्रभु यावे नड, दे तुइक्नीम” देंत।

## 30

### इजीप्त रागीम सजाइ तशो

1 परमप्रभु यावेमी आं कली लोत्र पाप्तु।

2 परमप्रभु, परमप्रभु यावेमी मार लोत्र पाप्तु देंशा हना “ए मुर, आं लोत्र पावो। मेको नाक्त आ पर्वम रोंका पावो।

3 मारदे हना मेको नाक्त नेक्थान जाक्ना जाक्न बाक्ब। परमप्रभु यावे आ नाक्त नेक्थान जाक्शो बाक्ब। मेको गोस्सुम सुम्थो नाक्त बाक्ब। मेको रागी रागी डा मुर आन कली हिंचा डा नाक्त दुम्ब। योएल १:१५; सेफन्याह १:१४

4 इजीप्त रागी तार तरवार का जाक्ब। मिनु एथीयोपीया रागीम यो श्येत दुम्ब। इजीप्त रागीम साइक्चा पुंडसीशो मुरपुकी खपीम गोलनीम। मिनु मेको रागी डा शोंप लाइक्नीम। मिनु मेको आ जग प्रेलनीम।

5 एथीयोपीया, पूत, लूद नु अराब रागी नेल्ल नु लिबीया नु अर्को आ नेक्था डा रागी डा मुर तरवारम साइक्चा पुंडसीनीम” देंत। येरमीया ४६:९

6 मिनु परमप्रभु यावेमी “मेको इजीप्त रागी कली वारच पतीके क्याम्चा पुंडसीनीम। मेको आ ठेयब लेशशो जाम्ब। मिग्दोल रे स्येने सम्म बाक्ब मुर नेल्ल तरवारम साइक्चा पुंडसीनीम। इजीकीएल २९:१०

7 मेकोपुकी मुर मबाक्शो रागी आन दातेम मुर मबाक्तीके दुम्नीम। मिनु मेको आन सहर ब्रेशशा, मुर मबाक्तीक सहर आन दातेम ब्रेशशा सहर दुम्नीम।

8 गो इजीप्त रागीम मी सुइशशा, मेको आ वारच नेल्ल फस सेल्लुड। मेना मेकोपुकीम गोन परमप्रभु यावे नड, दे तुडक्नीम।

9 मेको नाक्ती लोत्र कुरब मुर जहाजम डोइक्पा सोइक्नुड। मेको आन थुं नाइशशा बाक्शो एथीयोपीया डा मुर आन कली हिंच कोंइचा कली लोत्र सोइक्नुड। इजीप्त रागी आ नुप्ची नाक्ती मेकोपुकी शुश हिंनीम। मेको नाक्त थमा पा जाक्ब” देंत। यसैया २०:३-४

10 परमप्रभु, परमप्रभु यावेमी “गो बेबीलोन डा पिप नेबुकदरेसर आ गुइ रे पा इजीप्त रागी डा लडाइ पाइब आन कली साइक्नुडमी।

11 नेबुकदनेसर नु आ लडाइ पाइब रागी डा नेल्ल क्येडा मरिम्शो पाइब बाक्नीम। मेको आन कली खतम सेल्चा कली चाक्नुडमी। मेकोम आन तरवार इजीप्त रागी आ परबम शोइक्नीम। मिनु साइशशा मुरपुकीम रागी ब्रीनीम। इजीकीएल २८:७

12 गो नील खोला डा ब्राशो ब्वाक्कु सोत्रपाइक्नुड। मेको रागी कली मरिम्शो पाइब आन गुइम लेयनुड। गो मेको रागी नु मेकेर बाक्शो मारेइ मारेइ आन कली अर्को रागी डा मुर आन गुइ रे खतम पोक्नुड। गो, परमप्रभु यावेमी एको लोत्र पाता” देंत। यसैया १९:५

13 मिनु परमप्रभु, परमप्रभु यावेमी “गो देवी देवता आन कली खतम पोक्नुडमी। मिनु मेम्फीसम बाक्शो देवी देवता आन कली खतम पोक्नुडमी। इजीप्त रागीम गेनायो सासन पाइब मदुम्नीम। मोपा गो इजीप्त रागी डा मुर आन कली हिंतीक थुं गेनुडमी। मेम्फीस सहर कली नोफ यो देंनीम

14 गो पथ्रोस कली मुर मबाक्तीके सेल्लुड। सोआन सहरम मी सुइक्नुड। गो थेबेस सहर कली निसाफ पा सजाइ गेनुड। नहुम ३:८-९

15 गो इजीप्त रागी डा बोल्यो दरवार पेलुसीयम तार आं गाइशशा मोइक्नुड। मिनु थेबेस सहर डा शोंप नेल्ल खतम पोक्नुड।

16 गो इजीप्त रागी कली मी सुइक्नुड। मिनु पेलुसीयम श्येत जशा ग्येतथ लुक्च दुम्ब। थेबेस सहर डा गारो ब्रेत्नीम। मेम्फीस सहरम चहिं नाक्ती लडाइ दुम्ब।

17 ओन नु पी-बेसेथ डा ठिटापुकी तरवारम साइक्चा पुंइसीनीम। मिनु मेको सहर डा मुर ग्याइशशा लाइक्चा पुंइसीनीम।

18 मेको नाक्त तेहाफ-नेहेस सहर छिडछिड दुम्ब। गो मेकेर इजीप्त रागी आ जुवा जिक्नुड। मिनु मेको आ टेयब लेशशा क्याम्नुड। गोस्सुमी मेको सहर कली सुम्ब। मिनु मेको आ एर ओंथ डा सहर डा मुर ग्याइशशा लाइक्चा पुंइसीनीम। येरमीया ४३:९

19 मोपा गो इजीप्त रागी कली निसाफ पा सजाइ गेनुड। मिनु मेकोपुकीम गोन परमप्रभु यावे नड, दे तुडक्नीम” देंत।

### इजीप्त डा पिप आ सक्ति जाम्शो

20 मिनु ग्याइशशा लाइक्चा पुंइसीशो ११ बर्स डा डोंइती डा महिना डा ७ नाक्ती परमप्रभु यावेमी आं कली लोत्र पाप्तु।

21 मार लोत्र पाप्तु देंशा हना “ए मुर, गो इजीप्त रागी डा पिप फाराओ आ गुइ जिक्शा गेता। मेको साचा कली मारेइ मफ्रेंसीशो बाक्ब। मोपा बोल्यो मदुम्ब। तरवार चलने मचाप्ब।

22 मोपतीके परमप्रभु, परमप्रभु यावेमी गो इजीप्त रागी डा पिप फाराओ कली लोत्र का पाइनुड। गो मेको आ गुइ निम्फा जिक्नुड। आ बोल्यो गुइ नु आ डोंइती जिक्शो गुइ जिक्नुड। आ गुइ रे तरवार तोक्नुड।

23 गो इजीप्त डा मुर आन कली रागी रागी डा मुर आन दातेम फ्राइनुडमी। मिनु मेको आन कली रागी रागीम ब्रपाइक्नुडमी।



24 गो बेबीलोन डा पिप आ गुड सक्ति पाइश्शो सेल्लुड। मिनु आं तरवार मेको कली गेनुड। तन्न गो फाराओ आ गुड जिक्नुड। मिनु मेको, मेको आ डोंइती बेक्चा डा पा गार दुम्शो मुर खोदेशो पा, नक्सुर पाइब। इजीकीएल २९:२०

25 गो बेबीलोन डा पिप आ गुड सक्ति पाइश्शो सेल्लुड। तन्न फाराओ आ गुड सक्ति मपाइश्शो दुम्ब। गो बेबीलोन डा पिप कली आं तरवार गेनुड। मिनु मेकोमी इजीप्त रागी आ पबंम हिरब। मेना मेकोपुकीम गोन परमप्रभु यावे नड, दे तुइक्नीम।

26 गो इजीप्ती आन कली रागी रागी डा मुर आन दातेम फ्राइनुडमी। मिनु मेको आन कली रागी रागीम ब्रपाइक्नुडमी। मेना मेकोपुकीम गोन परमप्रभु यावे नड, दे तुइक्नीम” दैत।

## 31

### लाइश्शो रवा आ चिन्ड

1 मिनु ग्याइश्शा लाइक्चा पुंइसीशो ११ बर्स डा महिना सां डा डोंइती डा नाक्ती, परमप्रभु यावेमी आं कली लोत्र पाप्तु।

2 मार लोत्र पाप्तु देशा हना “ए मुर, इजीप्त डा पिप फाराओ नु मेको आ लडाइ पाइब आन कली ‘इन ठेयब दुम्तीक सु नु थाप्ने चाम्सीबा?

3 अस्सुर रागी कली मिम्तीन। मेको लेबानोन डा लाइश्शो रवा खोदेशो बाक्त। मेको आ दारशो राशीम ब्वाकी आन कली सुम्शो बाक्त। मेको आ डर लाइश्शो दुम्शा गोस्स सम्म जाक्दीशो बाक्त।

4 मिनु मेको कली ब्वाक्कुम जिश्शा कोल्पाइक्तु। ब्वाक्कुम मेको कली लाइश्शो सेल्लु। मेको आ एर ओंथ डा खोलापुकीम मेको कली जिप्पाइक्तेक्म। मिनु मेको खोलाम दिंम डा रवा नेल्ल आन कली जिप्पाइक्तु।

5 मोपा मेको दिंम डा रवा नेल्ल आन क्येडा लाइश्शो दुम्त। शुश ब्वाक्कु बाक्तीके मेको आ राशी शुश दुम्तेक्म। मिनु शुश ब्वाक्कु रे मेको कोल्लत।

6 सरीड डा चिक्बपुकीम मेको आ राशीम आन ग्योत्र सेल्लेक्म। मेको आ राशी आगाम ब्वाकी डा जन्तु नेल्लेम आन चाइक्ब जरमेक्तेक्म। मिनु मेको आ वांकु आगाम रागी रागी डा मुर जाक्शा बाक्तेक्म।

7 मेको एर ओंथ ब्रशा लाइश्शो राशी पाइश्शो दारशो रवा का दुम्त। मारदे हना मेको आ शाक्श शुश ब्वाक्कु बाक्तीकेम बाक्तेक्म।

8 परमप्रभु आ रू डा लाइश्शो रवापुकीम यो मेको कली ग्राने मचबेम। तेकोइ तोव्रशी रवापुकीम यो मेको आन राशी कली ग्राने मचबेम। परमप्रभु आ रू डा तेकोइ रवा मेको खोइ दारशो मबाक्म।

9 गो मेको कली एर ओंथ लशो राशीपुकीम ग्योम्शा, दारशो सेल्लता। मिनु परमप्रभु आ रू एदेन डा रवा नेल्लेम मेको कली गेहे पाम्तेक्म” देनो” दैत।

10 मोपतीके परमप्रभु, परमप्रभु यावेमी “मेको मिश लाइश्शो दुम्तीके नु मेको आ डरम आ राशी आन कली गोस्स आन दाते रे खिश्शा लपाइक्तीके आ लाइश्शोम मेको ठेयब लेल्लत।

11 मोपतीके गो मेको कली रागी रागी डा सासन पाइब आ गुडम गेता। मिनु मेको लाइश्शो रवाम दोपा आं अरेशो मटिवा, मोपा सजाइ ताप्तु। गो मेको कली तिल्लता।

12 मिनु अर्को रागी डा थम मरिम्शो मुरपुकीम मेको कली तिम्शा प्रोंइतेक्म। मेको आ राशीपुकी बेंसी नेल्ल नु पहाड मेर गोल्शा बाक्तेक्म। मिनु मेको आ ठेयब राशी रागी डा खोला नेल्लेम जिक्शा लीतेक्म। मिनु रागी डा मुर नेल्ले मेको आ वांकु रे गूशा मेको कली प्रोंइतेक्म।

13 मिनु मेको दिम्शो रवाम सरीड डा चिक्ब नेल्ल बाक्तेक्म। मिनु मेको आ राशी आगाम ब्वाकी डा जन्तु नेल्ल जाक्शा बाक्तेक्म।

14 मोदेशो दुम्तीके ब्वाक्कु आ नेक्था वाशो रवा मेको मिश लाइश्शो पा मकोल्नीम। मिनु आन डर गोस्स सम्म मजाक्दील्नीम। मारदे हना मेको नेल्ल बेक्चा माल्नीम। नेल्ल मुर खोदेशो पा बेक्चा माल्नीम। बेक्शो मुर आन बाक्तीके तुरसुम लाइनीम” दैत।

15 परमप्रभु, परमप्रभु यावेमी “गो मेको लेबानोन डा ठेयब रवा कली बेक्शो मुर आन बाक्तीकेम तोक्नुड। मेको नाक्ती समुन्द्र रोंका पा खोला मशाइक्नीम। ब्वाक्कु बुक्तीके सोत्रनीम। मिनु गो लेबानोन डा रवा आन कली रोंका पपाइक्नुड। मिनु ब्वाकी डा रवा नेल्ल खिंखि पा हिम्पाइक्नुडमी।

16 गो मेको कली तुरस नु बेक्शो मुर आ बाक्तीके सोइश्शा, रागी रागी आन कली आ गोल्लो रेयकेमी हिम्पाइक्नुड। मिनु एदेन डा रवा नेल्ले, लेबानोन डा नेल्ल क्येडा दारशो रवा नु शुश ब्वाक्कु तशो रवा नेल्लेमी रागी आगाम आन थुं नाइक्ताक्म। इजीकीएल २८:८

17 मेको तरवारम साइक्चा पुंइसीशो नु मेको रागी कली वारच पा अर्को रागी डा मुर आ वांकुम बाक्ब नेल्ल बेक्शो मुर आन बाक्तीक लाम्तेक्म।

18 एदेन डा रवा आन दाते डा तेको रवा इ खोदेशो पा सक्ति पाइश्शो नु ठेयब बाक्बा डा? मो हना यो गे यो एदेन डा रवापुकी नुन रागी आगा तोक्चा पुंइसीनेवे। गे खोइक्तीक चिनु मखोइश्शो तरवारम साइक्चा पुंइसीशो आन दातेमी बाक्नेवे। मेकोपुकी फाराओ नु मेको आ लडाइ पाइब बाक्नीम, देनो” दे परमप्रभु, परमप्रभु यावेमी दैत।

## 32

फाराओ आ परबम रोंका पशो

1 मिनु ग्याइश्शा लाइक्चा पुंइसीशो १२ बर्स डा १२ महिना डा डोंइती डा नाक्त परमप्रभु यावेमी आं कली लोत्र पाप्तु।

2 मार लोत्र पाप्तु देशा हना “ए मुर, इजीप्त डा पिप फाराओ आ परबम रोंका पावो। मिनु मेको कली ‘गे रागी रागी डा मुर आन दातेम गुप्स का खोदेशो मिम्साक्वे। गे समुन्द्र डा ठेयब जन्तु का खोदेशो बाक्ते। गे खोला डा ब्वाक्कुम एर ओंथ पवीनु ब्वाक्कु कली पोक्ना पोक्न नु खोइलीम ब्वाक्कु कली खाक्ना खाक्न गाक्बाक्ते। मिनु खोला कली ग्रॉग्रा दिशो सेल्बाक्ते’ देनो” दैत। इजीकीएल २९:३

3 मिनु परमप्रभु यावेमी “गो मुर आन ठेयब हुल चाक्नुड। मिनु आं ग्याइल इ तार ब्वारनुड। मेकोपुकीम आं ग्याइलीम इ कली कीशा रागीम गुंइनीम। इजीकीएल १२:१३

4 मिनु गो इ कली खपीम ताइक्नन। गो इ कली रागीम नेप्शा सोइक्नन। गो सरीड डा चिक्ब नेल्ल आन कली इ तार जुक्पाइक्नुडमी। मिनु गो रागी डा जन्तु नेल्ल आन कली इ श्ये प्रोइक्पाइक्नुडमी। इजीकीएल २९:५

5 गो इ श्ये डांडा मेर फ्राइनुड। मिनु इ बेक्शो रांम बेसी नेल्ल प्रिनुड।

6 मिनु गो इ हुशेम रागी जिप्पाइक्नुड। डांडा सम्म जिप्पाइक्नुड। मिनु खोल्ला नेल्ल इ श्येम प्रिनुड।

7 गो इ कली क्याम्दुनु, सरीड नेल्ल सुम्नुड। मिनु सोरुल आन कली छिडछिड सेल्लुडमी। गो नां कली गोस्सुम सुम्नुड। मिनु तास्लाम हाम्सो मगेब। यसैया १३:१०

8 गो सरीड डा छेडछेड नेल्ल आन कली इ तार छिडछिड सेल्लुडमी। मिनु गो इ रागी छिडछिड सेल्लुड” दे परमप्रभु यावेमी दैत।

9 मिनु “गो इ कली रागी रागी डा मुर आन दाते, इ मतुइश्शो रागीम ग्याइश्शा लाइक्पाइक्नन। गो शुश मुर आन थुं ग्येत्थ लुकच पपाइक्नुड।

10 गो शुश मुर आन कली इ कली तशा हिंभ सेल्लुडमी। मेको आन पिप इ कली तशा शुश हिंनीम। गो आं तरवार मेको आन डोंइती हिरदुनु, मेको पिपपुकी बेक्चा कली हिंशा खिंखि पस डा पस बाक्नीम। इ बेक्तीक नाक्ती मेको नेल्ल बेक्चा कली खिंखि पना पन बाक्नीम” दैत।

11 मारदे हना परमप्रभु, परमप्रभु यावेमी “बेबीलोन डा पिप आ तरवारम इ तार जाक्ब।

12 गो थम सक्ति पाइश्शो मुर आन तरवार रे इ लडाइ पाइब आन कली साइक्पाइक्नुडमी। मेको सक्ति पाइश्शो मुर रागी नेल्ल डा मुर आन क्येडा मरिम्शो पाइब बाक्नीम। मेकोपुकीम इजीप्त रागी आ ठेयब लेशशो खतम पोक्नीम। मिनु मेको आ लडाइ पाइब नेल्ल आन कली साइक्नीम।

13 गो मेको आ शुश ब्वाक्कु बाक्तीक आ नेक्था योत्रशो बी ब्यफ, क्यारश भेडा नेल्ल आन कली साइक्नुडमी। मिनु मुर नु बी ब्यफोम, मेको ब्वाक्कु मदिम्नीम।

14 मिनू नोले गो मेको ब्वाक्कु रिम्शो सेल्लुड। मिनू मेको आ खोलापुकी तेल खोदेशो पा शाइक्पाइक्नुडमी” दे परमप्रभु, परमप्रभु यावेमी देंत।

15 मेकोम “गो इजीप्त रागी कली मुर मबाक्शो रागी सेल्लुनु, मेको रागी श्येतथ दुम्मेनु, मेकेर बाक्ब नेल्ल आन कली सटुमीनु, मेकोपुकीम गोन परमप्रभु यावे नड, दे तुडक्नीम।

16 मेको रोंका पतीक कुम्सो का बाक्ब। मेकोन पचा माल्नीम। रागी रागी डा मीश मुरपुकीम एको कुम्सो पचा माल्नीम। मेकोपुकीम इजीप्त रागी नु मेको आ लडाइ पाइब नेल्ल आन पबंम एको कुम्सो पचा माल्नीम” दे परमप्रभु, परमप्रभु यावेमी देंत।

### बेक्शो मुर आन बाक्तीक

17 मिनू ग्याइश्शा लाइक्चा पुंडसीशो १२ बर्स डा डोंइती डा महिना डा १५ नाक्त परमप्रभु यावेमी आं कली लोत्र पाप्तु।

18 मार लोत्र पाप्तु देशा हना “ए मुर, इजीप्त रागी डा लडाइ पाइब आन पबंम रोंका पावो। मिनू मेको आन कली तुरसुम सोइक्तो। मिनू इजीप्त नु सक्ति पाइश्शो रागी रागी डा मुर आन तमी आन कली बेक्शो मुर आन बाक्तीक सोइक्तो। तुरसुम लाइबपुकी नु सोइक्तो। इजीकीएल ३१:१६

19 मार, गे अर्को जात आन क्येडा शुश शिशी ताइब बाक्नेवे डा? उइ लावो। मिनू खोइक्तीक चिनु मखोइश्शोपुकी नु गोल्शा बाक्को। यसैया १४:११,१५

20 मेकोपुकी तरवारम साइश्शो आन दातेम गोल्नीम। इजीप्त तरवारम साइक्चा पुंडसीचा कली गेशो बाक्ब। आ लडाइ पाइब नु आ शोंप निम्फा लतीन।

21 मिनू ठेयब सक्ति पाइश्शोपुकी नु आन वारच पाइबपुकीमी बेक्शो मुर आन बाक्तीकेम ‘मेकोपुकी उइ यिशो बाक्नीम। मेको गोल्शो बाक्नीम। खोइक्तीक चिनु मखोइश्शोपुकी तरवारम साइक्चा पुंडसीशो बाक्नीम’ देंनीम।

22 अस्सुर नु आ मुर नेल्ल मेकेर बाक्नीम। आ लडाइ पाइब नेल्ल आ तुरस आ एर ओंथ बाक्नीम। मेको नेल्ल तरवारम साइक्चा पुंडसीशो बाक्नीम।

23 मेको आन तुरस बेक्शो मुर आन बाक्तीके क्येडा दी गे वोइश्शो बाक्ब। मेको आ लडाइ पाइबपुकी मेको आ तुरस आ एर ओंथ बाक्नीम। मेको नेल्ल तरवारम साइक्चा पुंडसीशो बाक्नीम। मेकोम ब्रोंइशा बाक्ब आन रागीम मुर आन कली शुश हिंपाइश्शो बाक्तेक्म।

24 एलाम मेकेर बाक्ब। आ लडाइ पाइब नेल्ल आ तुरस आ एर ओंथ बाक्नीम। मेको नेल्ल तरवारम क्योरशा साइक्चा पुंडसीशो बाक्नीम। मेकोपुकी खोइक्तीक चिनु मखोइक्थु, उइ बेक्शो मुर आन बाक्तीक लाम्तेक्म। मेकोम ब्रोंइशा बाक्ब आन रागीम मुर आन कली शुश हिंपाइश्शो बाक्तेक्म। मेकोपुकी बेक्शो मुर आन बाक्तीकेम लशो खोदेशो पा मुने दोक्नीम। येरमीया ४९:३७

25 मेकोपुकीमी एलाम कली आ साइश्शो लडाइ पाइब आन दातेमी तुरस सेल्लो बाक्नीम। आ लडाइ पाइब आन तुरस मेको आ एर ओंथ बाक्नीम। मेको नेल्ल खोइक्तीक चिनु मखोइक्थु तरवारम साइक्चा पुंडसीशो बाक्नीम। मारदे हना मेकोम ब्रोंइशा बाक्ब आन रागीम मुर आन कली शुश हिंपाइश्शो बाक्तेक्म। मेकोपुकी बेक्शो मुर आन बाक्तीके लाइब खोदेशो पा मुने दोक्नीम। मेको साइक्चा पुंडसीशो मुर आन दातेमी बाक्नीम।

26 मेशेक, तूबल नु आस शुश मुर मेकेर बाक्नीम। आस मुर आस तुरस आस एर ओंथ बाक्नीम। मेको नेल्ल खोइक्तीक चिनु मखोइक्थु तरवारम साइक्चा पुंडसीशो बाक्नीम। मारदे हना मेकोम ब्रोंइशा बाक्ब आन रागीम मुर आन कली शुश हिंपाइश्शो बाक्तेक्म। इजीकीएल २७:१३; इजीकीएल ३८:२

27 मेकोपुकी साइ डोंइती साइश्शो अरु लडाइ पाइब नु मबाक्नीम। मिनू मेको आन या सुन्दा बेक्शो मुर आन बाक्तीकेम लशो बाक्नीम। मेको आन तरवार आन पिया आगाम वोइश्शो बाक्ब। मिनू आन तेक्तीके आन रुश तार वोइश्शो बाक्नीम। मारदे हना मेको लडाइ पाइबम ब्रोंइशा बाक्ब आन रागी डा मुर आन कली शुश हिंपाइक्तेक्म।

28 इजीप्त गे यो खतम दुप्शा खोइक्तीक चिनु मखोइक्थु तरवारम साइक्चा पुंडसीशा गोल्शा माल्नेवे।

29 एदोम मेकेर बाकब। मेको आ पिप नु आ तौ नेल्ल मेकेर बाकशो बाक्नीम। मेको आन के सक्ति बाक्त हना यो, मेको तरवारम साइक्चा पुंडसीशा गोल्शा बाकशो बाक्नीम। मेकोपुकी खोइक्तीक चिनु मख्रोइश्शो नु तुरसुम गोल्शा बाक्नीम। इजीकीएल २५:१२-१४

30 उत्तर रागी डा सासन पाइब नु सीदोन डा मुर नेल्ल मेकेर बाक्नीम। मेको आन सक्तिम मुर नेल्ल आन कली शुश हिंपाइक्तेकम। मोपतीके मेकोपुकी तरवारम साइक्चा पुंडसीशो मुरपुकी नु मुने दोक्शा उड लाम्तेकम। मेकोपुकी खोइक्तीक चिनु मख्रोइक्थु तरवारम साइक्चा पुंडसीशो नु मुने दोक्शा तुरसुम बाक्शो बाक्नीम। इजीकीएल २८:२१-२३

31 फाराओमी मेको कली तशा, आ लडाइ पाइब नेल्ल तरवारम साइक्चा पुंडसीशो तुडश्शा, आ थुं नाइक्ब।

32 मारदे हना मेकोमी ब्रोंइशा बाकब आन रागी डा मुर आन कली शुश हिंपाइक्तु। मोपतीके फाराओ खोइक्तीक चिनु मख्रोइक्थु तरवारम साइश्शो मुर आन दातेमी बाकब” दे परमप्रभु, परमप्रभु यावेमी देंत।

## 33

इजीकीएल खाल पाइब दुम्शो

इजीकीएल ३:१६-२१

1 परमप्रभु यावेमी आं कली लोव पाप्तु।

2 मार लोव पाप्तु देंशा हना “ए मुर, इ मुर आन कली ‘गो रागी का कली तरवार चाक्ता हना, मेको रागी डा मुरपुकीम आन रागी डा मुर का कली आन कली खाल पाइब का योव्रशा वोइक्नीम,

3 मिनु मेकोम आ रागीम तरवार कुरशा आ जोरी सत्रु जाक्शो तशा, आ मुर आन कली तुइक्पाइक्चा कली तुराही ताप्ब।

4 मिनु सुम मेको तुराही ताप्शो नेंशा मटीबा, मेको तरवारम साइक्चा पुंडसाक्व हना, मेको आ हुश आ दोस आंमा राइब।

5 मेकोम तुराही ताप्शो नेंशा यो, मटितीके, मेको आ हुश आ दोस आंमा राइब। तन्न मेकोम टिशो हना, ब्रोंइ वा।

6 तन्न मेको खाल पाइबम तरवार कुरशा लडाइ पाइब जाक्शो तशा यो, मुर आन कली नेंपाइक्चा कली तुराही मताप्तु नु तरवार जाक्शा सुइ मुर का कली साइक्तु हना, मेको मुर आ मरिम्शो पशो आ पबंम बेक्ब। तन्न गो मेको खाल पाइब कली मेको आ हुश आ क्येक्क ताक्नुड।

7 ए मुर, गो इ कली इस्राएल आ खिं डा मुर आन कली खाल पाइब सेल्लतान। मोपतीके गेना इ कली लोव पडा, मेना गे मेको आन कली मेको आं लोव नेंशा, होस पा बाक्कीन’ देंचा माल्नेवे। हिबू १३:१७

8 मिनु गो आं अरेशो मटीब मुर आन कली ‘ए आं अरेशो मटीब मुरपुकी गे थमा पा बेक्नीनी’ देंनुड, मिनु गे मेको आं अरेशो लोव मटीब मुर आन कली ‘इन मरिम्शो पशो प्रोनीन’ दे महिंपाइक्तीवी हना, मेको मरिम्शो पाइब मुर आन मरिम्शो पशो आ पबंम बेक्नीम। तन्न गो मेको आन हुश आ क्येक्क इ रे पा ताक्नुड।

9 तन्न गे मेको परमप्रभु यावे आं अरेशो लोव मटीब आन कली इन मटितीके प्रोनीन, दे हिंच कोंइताक्वी हना, मिनु मेकोपुकीम आं अरेशो लोव मटिम्तेकम हना, मेको आन मटिशो आ पबंम बेक्नीम। मिनु गे आंम कली प्रॉइनेवे” देंत।

परमप्रभुम निसाफ पाइब

इजीकीएल १८:२१-३२

10 मेकोम “ए मुर, गे इस्राएल आ खिं डा मुर आन कली ‘गेपुकीम आंइ हेंथे पशो नु पाप पशोम दिप्चा पुंडसीशो बाक्नीकी। मिनु मेको आ पबंम आंइ बोल नुम्ना नुम्न लशो बाक्ब। गो दोपा ब्रोंइनीकी?’ देंनीनी” देनो।

11 मोपतीके गे मेको आन कली परमप्रभु, परमप्रभु यावेमी “गो आ ब्रोंइशा बाकशो खोदेशो पा आं अरेशो लोत्र मटीब मुर बेकमानु मग्येरसीनुड। तन्न मेकोपुकीम आं अरेशो लोत्र टिशा ब्रोंइमल। गे इन मरिम्शो लां रे लेतीन। ए इस्राएल आ खिं डा मुरपुकी, गे मारदे बेक्चा दाकनीनी? ब्यवस्था ३२:४०; यसैया ५५:७; योएल २:१२-१३

12 मिनु ए मुर, गे इ मुर आन कली ठीक पाइब मुर हेंथे गाक्त हना, आ डोंइती ठीक पशोमी मेको कली प्रोंइने मचापब। डोंइती आं अरेशो मटीब मुर, ठीक पाइब दुम्त हना, आं डोंइती मटिशो आ पबर्म मबेक्ब। मिनु ठीक पाइब मुरुम पाप पाप्तु हना, मेको आ डोंइती ठीक पशो आ पबर्म ब्रोंइचा मताइब। इजीकीएल ३:२०

13 गो मेको ठीक पाइब मुर कली ‘गे थमा पा ब्रोंइनेवे’ देडानु, मेकोम आ ठीक पतीकेम थमा सुइश्शा, मरिम्शो पाप्तु हना, मेको आ डोंइती ठीक पशो मारेइ ममिम्सीब। मेको आ मरिम्शो पशो आ पबर्म बेक्ब।

14 तन्न गो मेको आं अरेशो लोत्र मटीब मुर कली ‘गे थमा पा बेक्नेवे’ देंती हना, मेकोम आ पाप पतीक प्रोंइशा आं अरेशो नु ठीक पाप्तु हना,

15 मिनु मेकोम आ जाकटी वोइश्शो थोत्रक लेत्ताक्व हना, आ रोइश्शो थोत्रक लेश्शा गेप्तु हना, ब्रोंइचा कली आं फुल्लुम मुशा ब्रेक्शो लोत्र पशा, मरिम्शो मपाप्तु हना, मेको थमा पा ब्रोंइब। मेको मबेक्ब। ब्यवस्था २४:१०-१३; इजीकीएल १८:७; लूका १९:८

16 मेको आ पशो तेकोइ पाप ममिम्सीब। मेकोमी आं अरेशो लोत्र नु ठीक गेय पाप्तु। मेको थमा पा ब्रोंइब।

17 मो हना यो इ मुरपुकीम ‘परमप्रभु आ पशो ठीक मबाक्ब’ देंनीम। तन्न थमा पा, मेको आन पशो कका ठीक मबाक्ब।

18 सुइ ठीक पाइब मुरुम मेको आ ठीक पतीके प्रोंइशा, मरिम्शो पाप्तु हना, मेको आ मरिम्शो पशो आ पबर्म बेक्ब।

19 मिनु सुइ आं अरेशो लोत्र मटीब मुरुम आं अरेशो लोत्र मटितीक प्रोंइशा, आं अरेशो नु ठीक पाप्तु हना, मेको मो पशो आ पबर्म ब्रोंइब।

20 मो हना यो गे ‘परमप्रभु आ पशो ठीक मबाक्ब’ देंनीनी। ए इस्राएल आ खिं डा मुर, गो इन कली इन पशो खोदेशो पा निसाफ पाडनुड” देंत।

### यरूसलेम ब्रुशो

21 गो आंइ ग्याइश्शा लाइक्चा पुंडसीशो १२ बर्स डा १० महिना ५ नाक्त दुम्मेनु, यरूसलेम रे प्रोकशा जाक्शो मुर का आं बाक्तीकेम जाक्शा “आंइ सहर ब्रुत” देंत। इजीकीएल १:२; इजीकीएल २४:२६; २राजा २५:२-४

22 मेको मुर जाक्चा क्येडा डोंइती नाक्दो परमप्रभु यावे आ गुडम आं कली थिशो बाक्त। मिनु सुनी मेको मुर जाक्चा क्येडा डोंइती आं कली ब्वाक्ब सेल्ने थुम्शो बाक्त। मोपा गो ब्वाक्ब दुम्ती।

### लीशो मुर आन पाप

23 मिनु परमप्रभु यावेमी आं कली लोत्र पाप्तु।

24 मार लोत्र पाप्तु देशा हना “ए मुर, इस्राएल रागीम बाक्शो मेको ब्रेश्शो खिंम बाक्ब मुरपुकीम ‘अब्राहाम दा मुर का ला बाक्त। मो हना यो मेको रागी मेको के दुम्त। तन्न गो शुश बाक्नय। मेको रागी थमा पा इ कली गेशो बाक्ब’ देंनीम। यसैया ५१:२

25 मोपतीके गे मेको आन कली ‘परमप्रभु, परमप्रभु यावेमी इन कली गेपुकी हुश सुन्दा श्ये ब्वाइनीनी। गे इन मूर्ति पूजा पाइनीनी। गेपुकीम हुश खाक्श पोक्नीनी। मिनु मार, एको रागी इन के दुम्बा डा? १सामुएल १४:३२-३४

26 गे इन तरवार कली थमा सुइक्नीनी। गेपुकीम मूर्ति पूजा पाइनीनी। गे नेल्लेम इन नेक्था डा मुर आन मीश कली ग्रॉग्रा दिशो सेल्नीनी। मिनु मार, एको रागी इन के दुम्बा डा?’ देनो” देंत। इजीकीएल ११:१४-२१

27 मिनु गे मेको आन कली “परमप्रभु, परमप्रभु यावेमी ‘गो आं ब्रोंइशा बाकशो खोदेशो पा ब्रेशशो खिंम बाकबपुकी तरवारम साइकचा पुंडसीनीम। मिनु गो दिंमम बाकब आन कली ब्वाकी डा जन्तु आन कली ब्वचा गेनुडमी। बोल्यो दरवार नु पुक्खीम बाकबपुकी मुर बेक्तीक रोइम बेक्नीम।

28 गो मेको रागी कली मुर मबाकशो नु श्येत्थ सेल्लुड। मिनु मेको आ ठेयब लेत्तीक जाम्ब। मिनु इस्राएल डा डांडाम सुइ एर ओंथ पने मचाप्चा डा पा मुर मबाक्तीके दुम्ब।

29 गो मेको आन मूर्ति पूजा पशो आन पर्वम मेको रागी कली मुर मबाकशो नु श्येत्थ सेल्लुड। मेना मेकोपुकीम गोन परमप्रभु यावे नड, दे तुइक्नीम’ देशो बाकब” देंत।

30 मेकोम “ए मुर, इ पर्वम बुक्शो मुरपुकी काथा बुक्शा, गारो नु खिं डा लाप्चोम राप्शा ‘जाक्कीन परमप्रभु यावे आ लोत्र मार बाकमे नैय’ देमुइनीम।

31 मेकोपुकीम आं मुर खोदेशो पा इ बाक्तीक जाक्शा इ डोंइती नित्तीम। मिनु इ लोत्र नोफा दाइशशा नैनीम। तन्न मेकोम इ लोत्र मटीनीम। मेकोम रिम्शो लोत्र पखु पा, आन थुंम चहिं दोपा क्येट चेम्चा, दे मिन्मीम। यसैया ५३:१

32 मेकोपुकीम इ कली तशा रिम्शो ताप्तीक ताप्शा, रिम्शो सेंदामी रिम्शो कुम्सो पाइब मुर का बाकब, दे मिन्मीम। इ देशो नैनीम, तन्न मपाइनीम।

33 मेको नेल्ल थमा दुम्ब। मेको थमा पा थमा दुम्ब। मेना मेकोपुकीम आन दातेम परमप्रभु यावे आ लोत्र पाइब का जाक्शो बाक्माक्त, दे तुइक्नीम” देंत। इजीकीएल २:५

## 34

इस्राएली आन मरिम्शो गोठलापुकी

इजीकीएल ३७:२४-२८

1 परमप्रभु यावेमी आं कली लोत्र पाप्तु।

2 मार लोत्र पाप्तु देशा हना “ए मुर, इस्राएल डा गोठला आन कली आं लोत्र पावो। परमप्रभु, परमप्रभु यावेमी इन कली मार देब देशा हना ‘इस्राएल डा गोठलापुकी गे आंमा जशा ब्वशा बाक्तीनी। मार, गोठलापुकीम भेडा आन कली रिम्शो पा कोव्रचा ममाल्नीमी डा? येरमीया २३:१-४

3 गे दोम्शो बोसो ब्वाइनीनी। मिनु ऊन के वा फेक्नीनी। मिनु दोम्शो भेडा आन कली क्योरनीनी। तन्न गे भेडा आन कली रिम्शो पा मकोव्रनीनी।

4 गोपुकीम मचाप्शो आन कली बोल्यो मसेल्नी। रोइ पशो आन कली मसापाइक्नी। गार दुम्शो आन कली आन गारमी ओरुत्ती मखेक्तीनी। गोपुकीम लां जाम्शो आन कली माल्थ लशा मलेत्तीनी। गे जाम्शो आन कली ममाल्थ, मरिम्शो पा सासन पशो बाक्तीनी। जकरिया ११:१५-१६; यूहन्ना १०:११

5 मोपतीके मेकोपुकी ब्राम्तेक्म। मारदे हना मेको आन के गोठला मबाक्म। मेको मोपा ब्रशा ब्वाकी डा जन्तु आन जचा थोव्रक दुम्तेक्म’ दे

6 आं भेडा लां प्रेशा, पहाड मेर नु लाइशशो डांडा मेर हिरसाक्म। आं भेडा रागी नेल्लेम ब्राम्तेक्म। मिनु सुइम मेको आन कली ममलेम। मेको आन पर्वम हिल्लो यो मपाम” देशो बाकब। मती ९:३६

7 मोपतीके ए गोठलापुकी परमप्रभु यावे आ लोत्र नेनीन।

8 परमप्रभु, परमप्रभु यावेमी “गो आं ब्रोंइशा बाकशो खोदेशो पा, आं भेडा सिखार दुम्तेक्म। गोठला मबाक्तीके ब्वाकी डा जन्तु आन जचा थोव्रक दुम्तेक्म। मिनु आं गोठलापुकीम आं भेडा आन कली ममलेम। तन्न आंम कली ला कोव्रसाक्म। आं भेडा आन कली चहिं मकोव्रडेम।

9 मोपतीके गे गोठलापुकी परमप्रभु यावे आ लोत्र नेनीन।

10 परमप्रभु, परमप्रभु यावेमी इन कली ‘गो गोठला आन पर्वम लोत्र का पाइनुड। गो आं भेडा मेको आन गुइ रे गुंइनुड। मेको आन कली आं भेडा योव्रतीक रे गुंइनुड। मिनु मेकोपुकीम जशा ब्वशा दोम्चा मताइनीम। गो आं भेडा मेको गोठला आन शोव्र रे प्रोंइनुडमी। मोपा आं भेडापुकी मेको आन ब्वचा थोव्रक मदुम्नीम’ ” देंत। येरमीया २३:२

### इस्त्राएली आन रिश्शो गोठला

11 मिनु परमप्रभु, परमप्रभु यावेमी “मुल गो आंमान आं भेडा आन कली माल्थ लाइनुड। गो मेको आन कली कोव्रनुड। येरमीया २३:२

12 दोपा गोठलापुकीमी एर ओंथ ब्रशो क्यारश भेडा आन दातेमी आंम क्यारश भेडा माल्दीनीमी, मोपान गो आं भेडा आन कली माल्थ लाइनुड। क्येर गोस्सुम सुश्शो नाक्त ते ते ब्रशो आं भेडा आन कली श्येत रे प्रॉइनुडमी। लूका १५:४

13 गो मेको आन कली रागी रागी डा मुर आन दाते रे गुंइशा, आंम आन रागीम चाक्नुडमी। गो मेको आन कली इस्त्राएल डा पहाड मेर, मेको आ खोला आ नेक्था नु मुर बाक्शो रागी मेर योव्रनुडमी।

14 गो मेको आन कली रिश्शो पा योव्रनुडमी। मिनु इस्त्राएल डा पहाड मेको आन योव्रतीके दुम्ब। मेकोपुकी रिश्शो घांस बाक्तीकेम गोल्शा बाक्नीम। मिनु इस्त्राएल डा पहाड मेको आन रिश्शो पा जोतीक दुम्ब। भजन संग्रह २३:२

15 गो आंमान आं भेडा आन कली कोव्रनुड। मिनु मेको आन कली नाइक्चा गेनुडमी।

16 गो जाम्शो आन कली माल्नुडमी। हेथे गाक्शो आन कली माल्शा थिश्शा चाक्नुडमी। गो गार दुश्शो आन कली ओख्ती खेक्नुडमी। मचाप्शो आन कली बोल्यो सेल्नुडमी। तन्न गो दोम्शो नु सक्ति पाइश्शो आन कली साइक्नुडमी। गो मेको आन कली ठीक पा योव्रनुडमी” दैत।

17 मिनु परमप्रभु, परमप्रभु यावेमी “ए गे आं क्यारश भेडा, गो भेडा नु भेडा आन दातेमी निसाफ पाइनुड। गो सांड नु क्यारश आन दातेम निसाफ पाइनुड। मत्ती २५:३२

18 मार, रिश्शो जोतीकेम जोशा यो, गे इन कली मगाम्मे? गे मारदे लीशो जोतीक कली इन खोइलीम दिम्नीनी? मार, रिश्शो सिक्स ब्वाक्कु तूशा यो, लीशो कली इन खोइलीम हिलो सेल्चा माल्नीनी?

19 मार, आं भेडा, इन दिम्शो जोतीकेम जोचा माल्नीमी? इन खोइलीम हिलो सेल्शो ब्वाक्कु तूचा माल्नीमी?” दैत।

20 मोपतीके परमप्रभु, परमप्रभु यावेमी मेको आन कली “गो आंमान दोम्शो नु ग्येंशो भेडा आन दातेम निसाफ पाइनुड।

21 मारदे हना गेपुकीम दा ग्येंशो आन कली इन फिलाम नु बलाम नेम्ना नेम्न नु मचाप्शो आन कली खुना खुन एर ओंथ ब्रपाइक्नीनी।

22 गो आं क्यारश भेडा नेल्ल आन कली प्रॉइनुडमी। मिनु मेको मुल रे रोइक्चा मपुंडसीनीम। मिनु गो भेडा आन दातेम निसाफ पाइनुड।

23 गो मेको आन कली गोठला का वोइक्नुड। आं गेय पाइब दाऊद कली वोइक्नुड। मिनु मेकोम मेको आन कली कोव्रब। मेको आन कली योव्रशा मेको आन गोठला दुम्ब। इजीकीएल ३७:२४; येरमीया ३०:९; होसे ३:५; यूहन्ना १०:१४-१६

24 मिनु गो, परमप्रभु यावे मेको आन परमप्रभु दुम्नुड। मिनु आं गेय पाइब दाऊद चहिं मेको आन दातेम सासन पाइब दुम्ब। गो, परमप्रभु यावेमी एको लोव्र पाता” दैत।

25 मेकोमी “गो मेकोपुकी नु थुं नाइश्शा बाक्तीक कबल का पाइनुड। मिनु गो रागी कली ब्वाकी डा जन्तु रे प्रॉइनुड। मिनु मेकोपुकी महिंथु थुं नाइश्शा गोरशो रागी नु ब्वाकीम इप्चा ताइनीम। इजीकीएल ३७:२६; लेवी २६:६; होसे २:२०

26 गो मेको आन कली नु आं डांडा आ एर ओंथ नेल्ल डा रागी कली अरु आन कली आसीक गेब सेल्नुडमी। गो रेउ यिची ना मेको आन कली रेउ यिपाइक्नुड। मेको रेउ आसीक खोदेशो पा यीब। लेवी २६:४

27 मिनु रूम बाक्शो रवाम फल सिल्नीम। खपीम मारेड मारेड ग्रेल्नीम। मिनु मुरपुकी आंम रूमी रिश्शो बाक्ने चान्नीम। गो मेको आन जुवा जिक्शा, मेको आन कली वाइल सेल्ब आन गुइ रे प्रॉइनुडमी। मेना गोन परमप्रभु यावे नड, दे तुइक्नीम।

28 मिनु रागी रागी डा मुरपुकीमी मेको आन कली रोइक्ने मचाप्नीम। ब्वाकी डा जन्तुपुकीम यो मेको आन कली मब्वाइनीम। मेकोपुकी रिम्शो बाक्नीमी। मिनु सुइम मेको आन कली महिंपाइक्नीम। येरमीया ३०:१०

29 गो मेको आन कली शुश अन्न ग्रेल्टीक रू गेनुडमी। मोपा मेकोपुकी रागीम लेंशा गेनायो शोव्रलु मबेक्नीम। मिनु रागी रागी डा मुर आन शुक्शी पाइशो फाल्चा ममाल्नीम। इजीकीएल ३६:३०

30 मिनु मुरपुकीमी गो, परमप्रभु यावे मेको आन परमप्रभु नड, दे तुइक्नीम। गो मेकोपुकी नु बाक्नुड, दे तुइक्नीम। मिनु मेकोपुकीम इस्राएल आ खिं डा मुर आं मुर नम, दे तुइक्नीम। इजीकीएल ११:२०

31 गे आं भेडा खोदेशो ननी। आं योव्रतीके डा भेडा बाक्नीनी। मिनु गो इन परमप्रभु नड” दे परमप्रभु, परमप्रभु यावेमी दैत। भजन संग्रह १००:३

## 35

### एदोम गोरशो रागी दुम्चशो

1 मिनु परमप्रभु यावेमी आं कली लोव्र पाप्तु।

2 मार लोव्र पाप्तु देशा हना “ए मुर, गे सेइर पहाड गे कोव्रडो। मिनु मेको कली आं लोव्र पावो। इजीकीएल २५:१२-१४

3 परमप्रभु, परमप्रभु यावेमी ‘ए सेइर पहाड, गो इ कली लोव्र का पचा माल्नुड। आं गुइ इ गे क्युकनुड। मिनु इ कली मुर मबाक्तीके नु श्येत्थ सेलनन।

4 गो इ सहर प्रेतनुड। मिनु गे मुर मबाक्तीक दुम्नेवे। मिनु गोन परमप्रभु यावे नड, दे तुइक्नेवे।

5 गे साइ इस्राएल कली ईख कुरतीवी। मिनु इस्राएली आन श्येत जची ना नु आन नोले डा सजाइ तची ना तरवारम क्योरचा कली जिम्मा गेप्तीवी। भजन संग्रह १३७:७

6 मोपतीके परमप्रभु, परमप्रभु यावेमी, गो आं ब्रोंइशा बाक्शो खोदेशो पा, गो इ कली हुश खाक्श पोक्ब आन गुइमी जिम्मा गेनन। मारदे हना गे हुश खाक्श पोक्चा दाक्तावी। हुश खाक्श पोक्तीकेम इ कली खेदा पाइब।

7 गो सेइर पहाड कली श्येत्थ नु मुर मबाक्शो पहाड सेलनुड। मेको रे पा एर ओंथ पाइब नेल्ल आन कली खतम सेलनुडमी।

8 गो इ पहाड नेल्ल साइशो मुरपुकीम प्रिनुड। तरवारम साइशोपुकी इ डांडा मेर, इ बेसी मेर नु इ खोल्सा मेर गोल्नीम।

9 गो इ कली गेना हना यो कली श्येत्थ सेलनन। इ सहर मुर मबाक्तीक दुम्नीम। मिनु गोन परमप्रभु यावे नड, दे तुइक्नेवे’।

10 गो परमप्रभु यावे मेक बाक्ती हना यो, गे ‘मेको रागी निक्शी नु राज्य निक्शी आं के दुम्ब। मिनु गो मेको आन कली हुकुम पाइनुड’ दैते।

11 मोपतीके परमप्रभु, परमप्रभु यावेमी गो आं ब्रोंइशा बाक्शो खोदेशो पा गे इ गाइशो नु गेहे पतीक कोइताक्यी। मारदे हना गे इस्राएल कली काइ मदाक्ती। गो इ कली मोदेशोन पाइनुड। गो इ कली निसाफ पडानु, इन दातेमी आं कली तुइक्पाइक्नुड।

12 मिनु गे गो परमप्रभु यावे नड, दे तुइक्नेवे। मिनु गो इस्राएल डा पहाड आन पर्वम इ शुक्शी पा पशो लोव्र नेल्ल नेंता। गे मार दैते देशा हना ‘इस्राएल डा पहाड नेल्ल मुर मबाक्तीके दुम्शो बाक्नीम। मिनु मेको आं कली गेशो बाक्ब’ दैते।

13 गे आं कली ठेयब लेशशा कोइताक्यी। मिनु गे आं पर्वम शुश मरिम्शो लोव्र पाप्तीवी। गो मेको नेल्ल नेंता।

14 रागी नेल्ल ग्येरसीशा बाक्मानु, गो इ कली चहिं मुर मबाक्तीक रागी सेलनुड।

15 मारदे हना गे इस्राएल मुर मबाक्तीके दुम्मेनु, आं के दुम्त, दे ग्येरसीशो बाक्ते। मोपतीके, गो यो इ कली मोदेशोन पाइनुड। गे सेइर पहाड नु एदोम नेल्ल मुर मबाक्तीके दुम्नीनी। मिनु गोन परमप्रभु यावे नड, दे तुइक्नीनी” दैत।



## 36

इस्त्राएली आन रागी लेत्नीम

1 परमप्रभु यावेमी “ए मुर, इस्त्राएल डा पहाड आन कली आं लोत्र पावो। मेको आन कली ए इस्त्राएल डा पहाड, परमप्रभु यावे आ लोत्र नेनीन। इजीकीएल ६:२

2 मिनु परमप्रभु, परमप्रभु यावेमी इन जोरी सत्रुपुकीमी ‘मुल मेको माइत पहाड नेल्ल इं के दुम्तेकम’ देतेकम। इजीकीएल २५:३

3 मोपतीके आं लोत्र पावो, परमप्रभु, परमप्रभु यावेमी ‘मारदे हना मेकोपुकीम इन कली नेल्ल मुर मबाक्तीके सेल्शा, एर ओंथ रे श्येत गोम्तेकम। मिनु गे रागी रागी डा लीशो मुर आन रागी दुम्तीनी। मिनु गे मुर आन दातेम शुक्शी पाइक्तीक दुम्शो बाक्तीनी।

4 मोपतीके गे इस्त्राएल डा पहाडपुकी, परमप्रभु, परमप्रभु यावे आ लोत्र नेनीन। परमप्रभु यावेमी डांडा, पहाड, खोल्ला, बेंसी, ब्रेशो सहर नु मुर मबाक्शो सहर गे इन कली इन एर ओंथ बाक्शो मुरपुकीमी रोइक्ताकम। मिनु रिशशा इन कली आइक्च सेल्लेकम।

5 मोपतीके परमप्रभु, परमप्रभु यावे आं लोत्र नेनीन। गो थाम्पा रुश पा, अर्को रागी नु एदोम रागी नेल्ल आन कली लोत्र पाइनुड। मारदे हना मेकोपुकीम आन थुं नेल्लेम ग्येरसीशा आं रागी आन के सेल्लेकम। मारदे हना रिम्शो योव्रतीक जोतीक बाक्शा, मेको आंम कली रॉइसाकम’ देंत। इजीकीएल ३५:१५

6 मोपतीके इस्त्राएल रागी आ पर्वम आं लोत्र पावो। मिनु डांडा, पहाड, खोल्ला नु बेंसी आन कली परमप्रभु, परमप्रभु यावेमी ‘गो रुश पा शुश चुरशा लोत्र पाइनुड। गेपुकीम रागी रागी डा मुर आन शुक्शी पशो फाल्चा माल्तीनी’ देंत।

7 मोपतीके परमप्रभु, परमप्रभु यावेमी ‘गो गे इन एर ओंथ बाक्ब रागी रागी डा मुरपुकीम यो शुक्शी पाइक्चा पुंइसीनीम’ दे कसम जाइनुड।

8 तन्न गे इस्त्राएल डा डांडापुकी, गेपुकीम चहिं इन राशी डोन सम्म हाम्शा, आं मुर इस्त्राएली आन कली फल सिप्पाइक्नीनी। मारदे हना मेकोपुकी रीब पा आन खिं लेत्नीम।

9 कोव्रडनीन मुल गो इन कली कोव्रनुड। गो इन गे लेशशा, इन कली दोपाइशशा, वांचेर शोकपाइक्नुड।

10 गो इ मुर आन कली सोपाइशशा बोपाइशशा शुश सेल्लुड। इस्त्राएल आ खिं डा मुर नेल्ल आन कली मोदेशो पाइनुड। मिनु सहरम लेंशा मुर बाक्नीम। मिनु ब्रेशो खिं नेल्ल लेंशा सेल्लसीब।

11 गो इन मुर नु इन बी ब्यफ, क्यारश भेडा शुश सेल्लुडमी। मिनु मेको शुश दुम्शा, शुश गिकनीम। गो डोंइती डा खोदेशो पा इन बाक्तीकेम मुर बाक्पाइक्नुडमी। मिनु गो इन कली डोंइती डा क्येडा रिम्शो पाइनुड। मिनु गोन परमप्रभु यावे नड, दे तुइक्नीनी। लेवी २६:९

12 गो आं मुर इस्त्राएली आन कली इ तार गाक्पाइक्नुड। गे मेको आन के दुम्नीनी। मिनु गे मेको आन शोंप दुम्नीनी। गेपुकीम गेनायो मेको आन तमी तौ रोइशशा मलाइक्नीनी” देंत।

13 मिनु परमप्रभु, परमप्रभु यावेमी “मुरपुकीम इन पर्वम ‘गे मुर ब्वाइनीनी। मिनु आंम इन रागी डा आल आन कली साइक्नीनी’ देशो बाक्नीम” देंत।

14 मोपतीके परमप्रभु, परमप्रभु यावेमी “गेपुकीम मुल रे लेंशा गेनायो मुर मब्वाइनीनी। मिनु आंम रागी डा तमी तौ मसाइक्नीनी।

15 गो रागी रागी डा मुरपुकीम इन कली शुक्शी पचा मगेनन्नी। मिनु मुरपुकीम इन कली दिप्शो फाल्चा ममाल्नीनी। मिनु इन रागी डा मुर आन कली दाइल मपपाइक्नीनी” दे परमप्रभु, परमप्रभु यावेमी देंत।

मुरुम परमप्रभु आ सोक्त ताइनीम

16 मिनु लेंशा परमप्रभु यावेमी आं कली लोत्र पाप्नु।

17 मार लोत्र पाप्नु देशा हना “ए मुर, इस्त्राएली आंम आन रागीमी बाक्शो बाक्मानु, मेकोपुकीम मेको रागी कली आन पतीक नु आन गेयम ग्रॉग्रा दिशो सेल्लेकम। मेको आन मरिम्शो पशो मीश मुर आ रॉं ब्रोल्लो ग्रॉग्रा खोदेशो बाक्त। मेकोपुकीम रागीम हुश शाइक्पाइक्तीके नु आन मूर्तिम मेको रागी

ग्रांघ्रा दिशो सेल्लेक्म। मेको आन पतीके आं डोंइती रां ब्रोल्शो मीश मुर खोदेशो ग्रांघ्रा बाक्त। लेवी १८:२४-२५

18 मारदे हना मेकोपुकी हुश खाक्श पोक्तीके नु मूर्ति रे पा मेको रागी ग्रांघ्रा दिशो सेल्लतीके गो आं चुरशो मेको आन तारी मोडक्ता।

19 गो मेको आन कली रागी रागी डा मुर आन दातेम ब्रापाइक्तामी। मिनु मेकोपुकी राज्य राज्यम एर ओंथ दुम्शा ब्रान्तेक्म। गो मेको आन पतीक नु मेको आन गेय खोदेशो पा निसाफ पाता।

20 मिनु मेकोपुकी रागी रागी डा मुर आन दातेम जाक्शा, आं नें मरिम्शो सेल्लेक्म। मारदे हना मेको आन पर्वम 'एकोपुकी दा परमप्रभु यावे आ मुर नम। मो हना यो आन रागी प्रोंइचा माल्लेक्म' देतेक्म। यसैया ५२:५

21 तन्न गो आं का ला बाक्शो नें आ पर्वम मिम्ताक्ड। मेको आं नें रागी रागी डा मुर आन दातेम मरिम्शो सेल्लो बाक्तेक्म" देत। इजीकीएल २०:९

22 परमप्रभु, परमप्रभु यावेमी "मोपतीके इस्त्राएल आ खिं डा मुर आन कली 'ए इस्त्राएल आ खिं डा मुर, गो इन पर्वम एको गेय मपाइनुड। तन्न गो आं नें आ पर्वम गेय पाइनुड। गे इन लतीक रागी रागी डा मुर आन दातेम आं नें मरिम्शो सेल्लतीनी। यसैया ४८:११; येरमीया १४:७

23 गो आं ठेयब नें लेंशा रिम्शो सेल्लनुड। मेको रागी डा मुर आन दातेम मरिम्शो सेल्लो बाक्त। मिनु रागी रागी डा मुरपुकीम गोन परमप्रभु, परमप्रभु यावे नड, दे तुडक्नीम। मत्ती ६:९; इजीकीएल ३७:२८

24 गो इन कली रागी रागी डा मुर आन दाते रे गुंइनुड। मिनु राज्य नेल्ल रे इन कली खुप्शा, इन आंम रागीम चाक्नुड।

25 गो इन तार रिम्शो ब्वाक्कु बुडक्नुड। मिनु गे इन ग्रांघ्रा दिशो गेय नु इन मूर्ति पूजा पतीक ताइश्शा रिम्शो दुम्नीनी। इन ग्रांघ्रा दिशो दुम्शो नेल्ल रे ग्रांघ्रा मदिशो सेल्लन्नी। जकरिया १३:१; हिबू १०:२२

26 गो इन कली नक थुं का गेनुड। मिनु गो इन थुंम नक सोक्त का कुर पाइनुड। गो इन आगा रे फुल्लु के थुं गुंइशा, मेको आ पा डा श्ये के थुं कुर पाइनुड। इजीकीएल ११:१९-२०; येरमीया ३१:३३

27 गो आं सोक्ती इन आगाम वोइक्नुड। मिनु आं फुल्लुम मुशा ब्रेक्शो लोत्र नु आं निसाफ पतीक लोत्र होस पा पाइब सेल्लनुड। इजीकीएल ३९:२९; यसैया ४४:३; इजीकीएल ३७:२४

28 मेना गेपुकी गो इन किक्की पिपी आन कली गेशो रागीम बाक्नीनी। मिनु गे आं मुर दुम्नीनी। मिनु गो इन परमप्रभु दुम्नुड। इजीकीएल ११:२०

29 गो गे इन कली ग्रांघ्रा दितीक रे प्रोंइन्नी। गो शुश अन्न ग्रेल्पाइक्नुड। मिनु गो गे इन कली अन्काल मपपाइक्नुड।

30 गो रवा आन फल नु रू डा मारेइ मारेइ आन कली शुश सेल्लनुड। मोपा गेपुकी गेनायो रागी रागी डा मुर आन दातेम अन्काल पा मुने मदोक्नीनी। इजीकीएल ३४:२९; योएल २:१९

31 मेना गे इन मरिम्शो पशो गेय नु मरिम्शो पशो आ पर्वम मिम्नीनी। मिनु गे इन मरिम्शो पशो नु मूर्ति पूजा पतीके आन आन पर्वम आंमान ग्रांघ्रा दीसीनीनी। इजीकीएल २०:४३

32 गो इन पर्वम एको गेय पशो मनड। मेको तुडक्चा माल्लीनी। ए इस्त्राएल आ खिं डा मुर इन पशो गेयम पतीके मुने दोक्शा सुर्ता पन' " देत।

33 परमप्रभु, परमप्रभु यावेमी "मेको नाक्ती गो इन कली इन मरिम्शो पशो नेल्ल रे लेंशा रिम्शो सेल्लनुड। गो इन सहर आन कली लेंशा मुर बाक्तीक सेल्लनुड। मिनु ब्रेश्शो नेल्ल लेंशा सेल्पाइक्नुड।

34 लां गाक्ब मुरपुकीमी इन मशोक्शो रू तचा क्येडा डोंइती मेकेर मार मार शोक्चा कली लेंशा दोइनीम।

35 मिनु मेकोपुकीम 'एको श्येत्थ रू पदेन आ फल फुल रू खोदेशो दुम्शो बाक्ब। एको श्येत्थ दुम्शो मुर मबाक्शो नु ब्रेश्शो सहर मुल मुरपुकीम ब्रीशा गारो हिरशो बाक्नीम' देनीम।

36 मेना इन एर ओंथ लीशो रागी डा मुरपुकीम परमप्रभु यावेमी मेको ब्रेश्शो सहर कली लेंशा सेल्लु। मिनु श्येत्थ दुम्शो रागीम लेंशा मार मार वापाइक्नु, दे तुडक्नीम। गो परमप्रभु यावेमी मेको पाता। गो मेको यो पाइनुड" देत। इजीकीएल १७:२४; येरमीया १:१०; येरमीया १८:७-८

37 मिनु परमप्रभु, परमप्रभु यावेमी “गो इस्राएल आ खिं डा मुर आन पुंडशो नेंशा, मेको आन मुर आन कली क्यारश भेडा खोदेशो पा शुश सेलनुडमी। मीका २:१२

38 गो मेको आन कली यरूसलेम डा चाडम चढेतीक भेडा खोदेशो पा शुश सेलनुडमी। मोपा सहर लेंशा शुश मुरपुकीम ब्रीनीम। मिनु मेकोपुकीम गोन परमप्रभु यावे नड, दे तुडक्नीम” दैत।

## 37

### सोत्रशो रुश बाक्शो बेंसी

1 परमप्रभु यावेमी आं कली थिती। मिनु परमप्रभु यावे आ सोक्तीम आं कली बेंसी आ दातेमी चाक्ती। मेको बेंसी रुशेइ रुशेम ब्रीशो बाक्त। इजीकीएल १:३

2 मेकोम आं कली मेको रुश बाक्तीकेम एर ओंथ पपाइक्ती। मेको बेंसीम शुश रुश बाक्तेकम। मेको थाम्पा सोत्रशो बाक्तेकम।

3 मिनु मेकोम आं कली “ए मुर, मार, एको रुश लेंशा ब्रॉइने चाप्नीमी डा?” दैत। मिनु गो “परमप्रभु, परमप्रभु यावे, गे ला मेको तुडक्नीनी” दैती।

4 मिनु मेकोम आं कली “एको रुश आन कली आं लोत्र पा ‘ए सोत्रशो रुश परमप्रभु यावे आ लोत्र नेनीन’ देनो” दैत।

5 मिनु परमप्रभु, परमप्रभु यावेमी “मेको रुश आन कली ‘गो इन आगाम सोक्त ओत्रपाइक्नुड। मिनु गे ब्रॉइनीनी। भजन संग्रह १०४:३०

6 गो इन कली नारीम बोइक्नन्नी। इन श्ये वापाइक्नुड, कुशुलम गिल्लन्नी। मिनु गो इन आगाम सोक्त कुर पाइक्नुड। मिनु गे ब्रॉइनीनी। मिनु गेपुकीम गोन परमप्रभु यावे नड, दे तुडक्नीनी” दैत। यसेया २६:१९

7 मोपतीके गो मेकोमी देशो खोदेशो पा परमप्रभु यावे आ लोत्र पाता। मिनु गो मेको परमप्रभु यावे आ लोत्र पन पन बाक्डानु, मेकेर करक कुरूक पशो नेंता। मिनु मेको रुशपुकी का नु अर्को बोइसीचा गोमतेकम।

8 मिनु गो आं कोव्रन कोव्रना मेको आन नारी बोइसीशा, श्ये गूत। मिनु मेको कुशुलम गिल्लाकम। तन्न मेकोपुकी नु सोक्त मबा।

9 मिनु मेकोमी आं कली “ए मुर, सोक्त कली आं लोत्र पावो। गे मुर, आं लोत्र पावो। मेको आन कली परमप्रभु, परमप्रभु यावेमी ‘ए सोक्त, पूर्ब, पच्छिम, उत्तर दक्खिन रे जाक्कीन। मिनु एको बेक्शो आन कली मुडक्तीन। मिनु ब्रॉइमल’ देनो” दैत।

10 मिनु गो परमप्रभु यावे आ अरेशो पाता। मिनु मेको ब्रॉइतीक सोक्त मेको आन आगाम ओव्रत। मिनु मेकोपुकी ब्रॉइशा राप्तेकम। मिनु थम ठेयब हुल का दुम्त।

11 मिनु मेकोम आं कली “ए मुर, एको रुश नेल्ल इस्राएल आ खिं डा मुर बाक्नीम। मेकोपुकीम ‘आंइ रुश नेल्ल सोत्रने थुम्तेकम। मिनु आंइ आस नेल्ल जाम्त। गो थमा पा ताइक्चा पुंडसाक्क’ दैतेकम। इजीकीएल ३७:१

12 मोपतीके मेको नेल्ल आन कली आं लोत्र पा ‘गो, परमप्रभु, परमप्रभु यावेमी तुरस रोक्शा, इन कली गुंडनुड। आं मुरपुकी, गो इन कली लेंशा इस्राएल रागीम चाक्नन्नी।

13 ए आं मुरपुकी, गो इन तुरस रोक्शा गुंडनुड, गेपुकीम गोन परमप्रभु यावे नड, दे तुडक्नीनी।

14 गो आं सोक्त इन कली कुर पाइक्नन्नी। मिनु गे ब्रॉइनीनी। मिनु गो इन कली आंम इन रूम बाक्पाइक्नुड। मिनु गेपुकीम गो परमप्रभु यावेमीन एको लोत्र पाता। मिनु मेको पाइनुड, दे तुडक्नीनी’ देनो” दे परमप्रभु, यावेमी दैत।

### यहूदा नु इस्राएल रागी का दुम्शो

15 परमप्रभु यावेमी आं कली लोत्र पाप्तु।

16 मार लोत्र पाप्तु देशा हना “ए मुर, कोक्के का चाक्शा ‘यहूदा नु इस्राएल डा मुर’ दे ब्रेक्तो। मिनु नोले अर्को कोक्के का चाक्शा ‘योसेफ, एफ्राइम नु मेको नु बाक्ब इस्राएल आ खिं नेल्ल’ दे ब्रेक्तो।

17 मिनु मेको निम्फा फ्रिशा कान सेल्सी। मोपा मेको इ गुडम कोक्के कान दुम्ब।

18 मिनु इ मुरपुकीम इ कली 'मेको आ अर्थ मार बाक्बा गे आंड कली मशेनीनी?' दे हिल्लो पाइनीम।

19 गे मेको आन कली परमप्रभु, परमप्रभु यावेमी गो एफ्राडम आ गुडम बाक्शो योसेफ आ कोक्के, इस्राएली आन थर डा यहूदा आ कोक्के नु फ्रिनुड। मोपा गो मेको आस कली कोक्के कान सेल्नुड। मिनु मेको आं गुडम कान दुम्नीस।

20 मिनु मेको इन ब्रेक्शो कोक्के इन डोंइती इन गुडम ग्याइशशा बाक्नीस" देंत।

21 मेना परमप्रभु, परमप्रभु यावेमी मेको आन कली "इस्राएल डा मुर तेको तेको रागीम लमा, गो मेको आन कली रागी नेल्ल रे खुण्डमी। मिनु मेको आन कली आंम आन रागीम चाक्नुडमी। यसैया ११:१२-१३

22 गो मेको आन कली इस्राएल रागी डा पहाडम रागी कान सेल्नुडमी। मिनु मेको नेल्ल आन के पिप कान दुम्ब। मिनु गेनायो रागी निकशी मदुम्नीस। मिनु राज्य निकशी मदुम्नीस। इजीकीएल ३४:२३; येरमीया ३:१८; होसे २:२

23 मिनु मेकोपुकीम लेंशा गेनायो आन मूर्ति नु अरु ग्रांया दिशो थोत्रक नु हेंथे मपाइनीम। मारदे हना गो मेको आन कली नेल्ल आन हेंथे पतीक रे प्रॉइनुडमी। मिनु मेको आन कली आं मुर सेल्नुडमी। मिनु मेकोपुकी आं मुर दुम्नीम। मिनु गो मेको आन परमप्रभु दुम्नुड। इजीकीएल ११:२०

24 आं गेय पाइब दाऊद मेको आन पिप दुम्ब। मिनु मेको आन गोठला कान दुम्ब। मिनु मेकोपुकीम आं निसाफ पतीक लोत्र टीनीम। मिनु मेकोपुकीम आं फुल्लुम मुशा ब्रेक्शो लोत्र होस पा पाइनीम। इजीकीएल ३४:२३; इजीकीएल ३६:२७

25 मिनु मेकोपुकी आं गेय पाइब याकूब कली गेशो रागीम बाक्नीम। मेकेर आन किकी पिपी बाक्शो बाक्तेकम। मिनु मेकेर मेको आन आल, चच युड गेना हना यो बाक्नीम। मिनु आं गेय पाइब दाऊद गेना हना यो मेको आन कली सासन पाइब दुम्ब। लूका १:३२-३३

26 गो मेकोपुकी नु थुं नाइशशा बाक्तीक कबल का पाइनुड। मेको गेना हना यो लीब कबल बाक्ब। गो मेको आन कली आसीक गेशा शुश दुम्पाइक्नुडमी। मिनु गो मेको आन दातेम गेना हना यो कली आं बाक्तीक सेल्नुड। प्रस्थान २५:८; इजीकीएल ३४:२५; यसैया ५४:३०

27 आं बाक्तीक मेकोपुकी नुन दुम्ब। मिनु गो मेको आन परमप्रभु दुम्नुड। मिनु मेकोपुकी आं मुर दुम्नीम। इजीकीएल ११:२०

28 मेना रागी रागी डा मुरपुकीम गो, परमप्रभु यावेमीन इस्राएली आन कली आं मुर सेल्ला। मिनु आं बाक्तीके मेको आन दातेम गेना हना यो बाक्ब, दे यो तुडक्नीम" दे परमप्रभु यावेमी देंत। इजीकीएल ३६:२३

## 38

### गोग आ पबंम लोत्र पशो

1 परमप्रभु यावेमी आं कली लोत्र पाप्तु।

2 मार लोत्र पाप्तु देश हना "ए मुर, मागोग रागी डा ठेयब मुर, गोग आ बाक्तीक लावो। मेशेक नु तूबल डा सासन पाइब कली आं लोत्र पावो। इजीकीएल ३९:६; इजीकीएल २७:१३; इजीकीएल ३२:२६; उत्पत्ती १०:२

3 मिनु परमप्रभु, परमप्रभु यावेमी मेको कली 'ए मेशेक नु तूबल डा सासन पाइब गोग, गो इ कली लोत्र का पाइनुड।

4 गो इ कली हिरनुड। गो इ शांपेम बोल्सी ब्वेक्नुड। गो इ कली, इ लडाइ पाइब नेल्ल, इ शारा नु इ शारा डोइक्ब, या कुरब नेल्ल आन गुंडनुड। ठेयब नु आइक्च तेक्तीक कुरब, आन तरवार शेशा बाक्नीम।

5 पारसी, एथीयोपीया नु पूत डा मुरपुकी, मेकोपुकी नु बाक्नीम। मिनु मेको नेल्लेम आन तेक्तीक शेशा, लडाइ डा ताकी गुक्शो बाक्नीम।

6 गोमेर नु आ लडाइ पाइब नेल्ल, उत्तर डा बेथ-तोगारमाह नु आ लडाइ पाइब नेल्ले शुश मुरपुकी गे नु बाक्शो बाक्नीम। इजीकीएल २७:१४

7 गे सासीशा बाक्को। मिनु गे नु गारशा लडाइ पचा कली जाक्शो लडाइ पाइब नेल्ल आन कली सासीशा बाक्पतो। मिनु गे मेको नेल्ल आन ठेयब मुर दुम्शा, सासीशा बाक्को।

8 शुश नाक्त नोले लडाइ पचा कली इन कली ब्रेनीम। गेपुकीम लडाइम श्येत्थ दुम्शा लेंशा सेल्शो रागी कली लडाइ तोइनीनी। मेको मुर शुश रागी रे खुप्शा, इस्राएल डा पहाडम चाक्शो बाक्नीम। मेकेर शुश बर्स रे मुर मबाक्म। मेकोपुकी रागी रागी रे चाक्शो बाक्तेक्म। मिनु मुल मेको नेल्ल मारेड मदुम्थु रिम्शो पा बाक्शो बाक्नीम।

9 गे फश गिवार खोदेशो पा बारचा माल्नेवे। गे गोस्स खोदेशो पा मेको रागी कली सुम्चा माल्नेवे। गे नु इ लडाइ पाइब नेल्ल नु गे नु बाक्ब नेल्लेम मोदेशो पचा माल्नीनी' देनो" दैत।

10 परमप्रभु, परमप्रभु यावेमी "मेको नाक्ती इ थुम मार मार मिन्नेवे। मिनु गे थम मरिम्शो पचा मिन्नेवे।

11 मिनु गेम 'गो गारो महिरशो सहर कली लडाइ तोइनुड। गो सिक्सी पा रिम्शो पा गारो महिरशो, ठेयब लाप्चो मपाइशो नु आग्लो मपाइशो सहरम बाक्ब मुर आन रागी कली लडाइ तोइनुड।

12 मुल गो मेको रागी डा मार मार रोइशशा लाइक्चा कली लडाइ पाइनुड। मेकोपुकी श्येत्थ दुम्शो रागीम लेंशा खुम्सीशा बाक्शो बाक्तेक्म। मेकोपुकीम शुश बी ब्यफ, क्यारश भेडा थुल्शा शॉप चेम्शा रागी आ दातेम बाक्शो बाक्नीम' दैत। न्यायाधीस ९:३७

13 शेबा नु देदान, टारशीश डा ग्याप्ब लेयबपुकी नु मेको आन ठिटा लडाइ पाइब नेल्लेम इ कली 'मार, गे रोइक्थ जाक्शो नवे? मार गे रोइशशो मार मार तचा कली, सुन चांदी लाइक्चा कली, बी ब्यफ, क्यारश भेडा नु शुश मार मार रोइक्चा कली, जाक्नी?' " दैशो बाक्नीम।

14 मोपतीके "ए मुर, गोग कली आं लोत्र पावो। मेको कली 'परमप्रभु, परमप्रभु यावेमी इ कली आं मुर इस्राएली मारेड मदुम्थु रिम्शो पा बाक्मानु, गे मेक मलाइनेवे?

15 डोन इ बाक्तीक उत्तर रागी रे ठेयब हुल, सक्ति पाइशशो लडाइ पाइब नु शुश जात डा मुर शारा डोइशशा, गो नु जाक्नीम।

16 गे आं मुर इस्राएली नु लडाइ पचा कली रागी कली सुम्ब गोस्स खोदेशो पा जाक्नेवे। ए गोग, नोले डा नाक्ती गो इ कली आं रागी नु लडाइ पपाइक्नुड। रागी रागी डा मुरुम आं कली तुइक्तेमेक्ल, दे मोदेशो पाइनुड। मेको रागी रागी डा मुर आन डोंइती गो का ला परमप्रभु यावे नड' दे कोंइनुड" दैत।

17 मिनु परमप्रभु, परमप्रभु यावेमी "साइ आं गेय पाइब, इस्राएल डा आं लोत्र पाइबम इ पबर्म लोत्र मपामे डा? मेना मेकोपुकीम शुश बर्स सम्म 'गो इ कली इस्राएली नु लडाइ पथ सोइक्नुड' दे आं लोत्र पाप्तेक्म" दैत। सेफन्याह ३:८

### गोग कली सजाइ गेशो

18 परमप्रभु यावेमी "मेको नाक्त मार दुम्ब दैशा हना, गोगम इस्राएल कली लडाइ तोइब। मिनु गो थाप्पा चुरनुड'।

19 मेको नाक्ती गो आं जोंब बोक्शा, गाइशशो चुरशोम इस्राएल रागीम ठेयब खिनु कुइब।

20 मेको नाक्ती समुन्द्र डा डोंइ, सरीड डा चिक्ब, रागी डा जन्तु, खपीम ग्रेशा गाक्ब जन्तु नेल्ल नु रागी डा मुर नेल्ल आं डोंइती खिखि पाइनीम। पहाड नेल्ल ब्रेनीम, रोगु नेल्ल दोक्नीम। मिनु गारो नेल्ल गोल्नीम।

21 गो आं पहाड नेल्लेम गोग आ पबर्म तरवार का क्युकनुड। मिनु मेको आ मुर नेल्लेम आन तरवार आन लोक्ब आन पबर्म शोइक्नीम। प्रकाश २०:८-९

22 गो मुर बेक्तीक रोइम नु हुश खाक्श पोक्तीकेम मेको कली निसाफ पाइनुड। गो मेको आ लडाइ पाइब आन तार, मेको नु बाक्शो जात जात डा मुर आन हुल तार थम हिंचा डा रेड, मुप्स, मी नु गन्धक यिपाइक्नुड।

23 मोपा गो आं ठेयब दुम्तीक नु गो आं बाक्शो परमप्रभु बाक्नुड, दे कोंइनुडमी। मिनु शुश रागी डा मुर आन डोंइती आं कली तुइक्पाइसीनुड। मेना मेकोपुकीम गोन परमप्रभु यावे नड, दे तुइक्नीम" दैत।

## 39

गोग नु आ लडाइ पाइबपुकी बुशो

1 मिनु परमप्रभु यावेमी आं कली “ए मुर, गोग आ मुर आन कली आं लोत्र पावो। मिनु परमप्रभु, परमप्रभु यावेमी इ कली ‘गो इ कली लोत्र का पचा माल्नुड। गे मेशेक नु तूबल डा सासन पाइब बाक्नेवे। इजीकीएल ३८:२

2 गो इ कली हिरशा, ग्येत्थ गे सोइक्नन। गो इ कली डोन उत्तर रे इस्राएल डा पहाड गे सोइक्नन।

3 गो इ पेरा गुडम बाक्शो लिब्रा तुप्शा तोक्नुड। मिनु इ ग्युरा गुडम बाक्शो ब्रा तोक्नुड।

4 गो इस्राएल डा पहाडमीन साइक्चा पुंडसीनेवे। इ लडाइ पाइब नेल्ल नु गे नु बाक्शो मुर नेल्ल मेकेर साइक्चा पुंडसीनीम। गो इ कली चिक्ब नु ब्वाकी डा जन्तु आन ब्वतीक सेल्लुड।

5 गे दिमम गोल्नेवे। मारदे हना गो एको लोत्र पाता’ देंत।

6 गो मागोग डा मुर नु समुन्द्र आ नेक्था रिम्शो पा बाक्शो आन तार मी सोइक्नुड। मिनु मेकोपुकीम गोन परमप्रभु यावे नड, दे तुइक्नीम।

7 गो आं नें आं मुर इस्राएली आन दातेम तुइक्पाइक्नुडमी। मिनु आं नें कली मरिम्शो सेल्चा मगेनुड। मिनु रागी रागी डा मुरपुकीम गोन परमप्रभु यावे, इस्राएली आन बाक्शो परमप्रभु नड, दे तुइक्नीम।

8 मेको थमा पा दुम्ब। मेको थमा पा जाक्ब। आं देशो नाक्ती मेकोन बाक्ब” दे परमप्रभु, परमप्रभु यावेमी देंत।

9 मिनु परमप्रभु यावेमी “ले इस्राएल डा सहरम बाक्ब मुरपुकीमी या, आइक्च नु ठेयब तेक्तीके, लिब्रा नु ब्रा, कोक्के नु तूतीके नेल्ल खुप्शा चोइनीम। मेकोपुकीमी मेको ७ बर्स सम्म चोइनीम। यसैया ९:४

10 मेकोपुकीम रू रे शी खुप्चा ममाल्नीम। ब्वाकी डा रवा तिम्चा ममाल्नीम। मारदे हना मेकोपुकीम मेको यामीन आन मी मुइक्नीम। मेकोपुकीम आन मार मार गुंइशा लाइक्ब आन के मार मार गुंइशा चाक्नीम। आन कली रोइक्ब आन कली रोइक्नीम” दे परमप्रभु, परमप्रभु यावेमी देंत। येरमीया ३०:१६

गोग कली थिम्शो

11 मिनु परमप्रभु यावेमी “मेको नाक्ती गो गोग आ मुर आन कली इस्राएल रागीम तुरस का गेनुड। मेको इस्राएल डा समुन्द्र आ पूर्व गे मुर आन लतीक बेंसी डा लांम बाक्ब। मेकेर गोग आ लडाइ पाइब नु मेको आन कली वारच पाइब हुल नेल्ल थिम्चा पुंडसीनीम। मोपतीके मेको बाक्तीक कली हामोन-गोग आ बेंसी देंनीम।

12 इस्राएल आ खिं डा मुरपुकीम मेको आन कली ७ महिना सम्मन थिम्चा थिम्न बाक्नीम। मिनु मोपा रागी कली ग्रांघ्रा मदिशो सेल्नीम।

13 मिनु रागी डा मुर नेल्लेमी मेको आन कली थिम्नीम। गो आं सक्ति कोइन्दु नाक्ती मेको आन कली ठेयब मिम्तीक का दुम्ब।

14 मेको रागी ग्रांघ्रा मदिशो सेल्चा कली मुर वोइक्नीम। मेकोपुकीम नाक्त किंत किंत कोत्रशा माल्शा, थिश्शा थिम्नीम। मिनु आन माल्तीक गेय ७ महिना सम्म पचा माल्नीम।

15 मेकोपुकी रागी आ एर ओंथ नेल्ल लमानु, सुइमी मुर आन रुश का थित्तेक्म हना, मेकेर चिन्ड वोइक्चा माल्बाक्तेक्म। मिनु तुरस दोइबपुकीम मेको कली हामोन-गोग डा बेंसीम लाइश्शा, थिम्बाक्तेक्म।

16 मेकेर हामोनाह देशो सहर का यो बाक्ब। मोपा मेकोपुकीम रागी कली ग्रांघ्रा मदिशो सेल्नीम” दे परमप्रभु यावेम देंत। हामोनाह आ अर्थ “ठेयब हुल” देशो बाक्ब।

17 मिनु परमप्रभु, परमप्रभु यावेमी “ए मुर, नेल्ल खाल डा चिक्ब नु ब्वाकी डा जन्तु नेल्ल आन कली ‘एर ओंथ नेल्ल रे जाक्कीन। गो इस्राएल डा पहाडम इन कली ठेयब चढ़ेतीक भोज का सेल्लुड। गेपुकीम मेकेर श्ये ब्वाइनीनी। मिनु हुश तूनीनी। प्रकाश १९:१७-१८

18 गेपुकीम शुश सक्ति पाइश्शो मुर आन श्ये ब्वाइनीनी। मिनु रागी डा पिप आन सासन पाइब, बाशान डा सांड, पाठा, बोका नु ब्यफ आन हुश तूनीनी।

19 गो इन कली चढ़ेतीक भोज का गेडानु, गे रूथ्री बोंसो ब्वने चापनीनी। गे मदुक्नी सम्म हुश तूने चापनीनी।

20 गेपुकी आं भोजम शारा, बग्गी डोइक्ब, सक्ति पाइश्शो मुर नु नेल्ल खाल डा लडाइ पाइब ब्वशा रूनीनी' " दे परमप्रभु, परमप्रभु यावेमी दैत।

इस्त्राएल लेशा रागी का दुम्शो

21 मिनु परमप्रभु, परमप्रभु यावेमी "गो रागी रागी डा मुर आन डोंइती आं सक्ति कोंइनुड। मिनु रागी रागी नेल्लेम आं निसाफ पशो ताइनीम। आं सजाइ गेशो ताइनीम।

22 मिनु मेको नाक्त रे इस्त्राएल आ खिं डा मुरपुकीम गोन परमप्रभु यावे, मेको आन परमप्रभु नड, दे तुइक्नीम।

23 मिनु रागी रागी डा मुरपुकीम इस्त्राएल आ खिं डा मुर आन मरिम्शो पतीके ग्याइश्शा लाइक्चा पुंडसीशो बाक्तेक्म, दे तुइक्नीम। मारदे हना मेकोपुकीम आं कली मरिम्शो पाम्तेक्म। मोपतीके गो आं कुल मेको आन रे खुइक्ताक्ड। मिनु मेको आन कली आन जोरी सत्रु आन गुडम गेतामी। मिनु मेको नेल्ल तरवारम साइक्चा पुंडसाक्म। यसेया ५४:८

24 मेको आन ग्रंग्रा दिशो नु आन हेंथे पशो आ परबंम गो मेको आन कली सजाइ गेतामी। मिनु गो आं कुल मेको आन रे खुइक्ताक्ड" दैत।

25 मोपतीके परमप्रभु, परमप्रभु यावेमी "गो याकूब आ खिं डा मुर आन कली डोंइती डा खोदेशो पा रिम्शो सेल्लुड। मिनु इस्त्राएल आ खिं डा मुर नेल्ल आन कली शिशी पाइक्नुडमी। गो आं का ला बाक्शो नें आ परबंम रुश पाइनुड।

26 मेकोपुकी रिम्शो पा महिंथु आन रागीम बाक्ची ना, आन मुने नु आं कली मरिम्शो पशो नेल्ल प्रेनीम।

27 मिनु गो मेको आन कली रागी रागी डा मुर आन दाते रे चाक्नुडमी। मिनु मेको आन कली आन जोरी सत्रु आन रागी रे खुनुडमी। मिनु गो शुश रागी डा मुर आन डोंइती मेको आन रे पा गो का ला परमप्रभु नड, दे कोंइनुडमी।

28 मेना मेकोपुकीम गोन परमप्रभु यावे, आन परमप्रभु नड, दे तुइक्नीम। मारदे हना गो मेको आन कली रागी रागी डा मुर आन दातेम ग्याइश्शा लाइक्पाइक्तामी। मिनु का यो मजाम्चा डा पा खुष्शा आन रागीम चाक्नुडमी।

29 मुल रे गो आं कुल मेको आन डोंइती रे गेनायो मखुइक्नुड। मारदे हना गो आं सोक्त इस्त्राएल आ खिं डा मुर आन तार मोइक्नुड" दे परमप्रभु, परमप्रभु यावेमी दैत। इजीकीएल ३६:२६-२७; योएल ३:१

## 40

परमप्रभु आ खिं कली कोंइशो

1 गोपुकी ग्याइश्शा लाइक्चा पुंडसीशो २५ बर्स दुम्मेनु, डोंइती डा महिना डा १० नाक्त बाक्त। मेना यरूसलेम सहर फ्रुचा पुंडसीशो १४ बर्स दुम्शो बाक्त। मेको नाक्तीन परमप्रभु यावेमी आं कली थिती। मिनु मेकोम आं कली मेकेर लाइक्ती। इजीकीएल १:३

2 परमप्रभुमी आ कोंइतीकेम आं कली इस्त्राएल रागी लाइक्ती। मिनु आं कली थम ठेयब लाइश्शो डांडा काम वोइक्ती। मेको आ दक्खिन गे सहर का खोदेशो तांइसीशो बाक्त। जकरिया १४:१०

3 मिनु मेकोम आं कली मेकेर लदानु, गो मेकेर मुर का ताता। मेकेर कांसा खोदेशो टल्केशो मुर का बाक्त। मेको आ गुडम सुती के डोरी नु पुक्तीक कोक्के का बाक्त। मेको ठेयब लाप्चो आ नेक्था राप्शो बाक्त। इजीकीएल ४७:३; जकरिया २:५ प्रकाश २१:१५

4 मिनु मेकोम आं कली "ए मुर, कोव्रडो। मिनु नोफा दाइश्शा नेनो। गो इ कली मार मार कोंइक्नुडा, मेको रिम्शो पा कोव्रशा, इ थुंम वोतो। मारदे हना गे मो पचा कली एक चाक्शो बाक्ते। मिनु गे मार ताइक्नेवे, मेको नेल्ल इस्त्राएल आ खिं डा मुर आन कली शेंदीमी" दैत।

### पूर्ब डा ठेयब लाप्चो

5 मिनु गो मेकेर परमप्रभु यावे आ खिं आ एर ओंथ नेल्ल हिरशो गारो का ताता। मिनु मेको मुर आ गुडम बाकशो पुक्तीक कोक्के ६ ठेयब कुबीत लाइशो बाक्त। मिनु मेकोम गारो पुक्गानु, ३ कुबीत ग्येत्थ नु ६ कुबीत थांइशो बाक्त। ठेयब कुबीत ०.५ मिटर बाक्ब। १।राजा ६:-

6 मिनु मेको नोले लेंशा पूर्ब गे डा ठेयब लाप्चोम लत। मिनु मेको आ थेंका रे पा डोइशशा लाप्चो ओव्रतीक पिंडी पुक्तु। मिनु मेको पुक्तीक कोक्के का लाइशो बाक्त। पुक्तीक कोक्के ३.२५ मिटर लाइशो बाक्ब।

7 मेकेर बाक्तीके कोठा बाक्तेक्म। मेको नेल्ल पुक्तीक कोक्के का ब्रेम्शो नु पुक्तीक कोक्के का लाइशो बाक्तेक्म। मेको कोठा आन दातेम गेय पतीक कोठा बाक्तेक्म। मिनु आन दाते डा बाक्तीके ५ कुबीत ब्रेम्शो बाक्त। मिनु परमप्रभु यावे आ खिं डा पिंडी डा लाप्चो लतीक लां पुक्तीक कोक्के का ब्रेम्शो बाक्त। कुबीत का आधा मिटर बाक्ब।

8 मिनु मेकोमी ठेयब लाप्चो आ आगा डा पिंडी पुक्गानु, मेको पुक्तीक कोक्के का लाइशो बाक्त।

9 मिनु मेको लतीक लां डा पिंडी पुक्गानु, ८ कुबीत लाइशो बाक्त। मेको आ थाम कुबीत निक्शी थांइशो बाक्तेक्म। मेको लाप्चो आ पिंडी चहिं परमप्रभु यावे आ खिं गे बाक्त।

10 मिनु पूर्ब डा लाप्चो आ एर गे नु ओंथ गे सां सां गेय पतीक कोठा बाक्तेक्म। मेको सांफान उइक्थ उइक्थ बाक्तेक्म। मेको एर नु ओंथ बाकशो थाम उइक्थ उइक्थ बाक्तेक्म।

11 मिनु नोले मेकोमी लाप्चो ओव्रतीक आ ब्रेम्शो पुक्तु। मेको १० कुबीत ब्रेम्शो बाक्त। मेको लाप्चो नेल्ल १३ कुबीत लाइशो बाक्त।

12 गेय पतीक कोठा आन डोंइती आ दी गे कुबीत का डा आइक्च गारो बाक्तेक्म। कोठा नेल्ल ६ कुबीत लाइशो नु ६ कुबीत ब्रेम्शो बाक्तेक्म।

13 मिनु नोले मेकोमी गेय पतीक कोठा का डा लाप्चो रे अर्को गेय पतीक कोठा सम्म पुक्गानु, गारो का रे अर्को गारो सम्म २५ कुबीत बाक्त।

14 मिनु साप्शो लतीक लां २० कुबीत ब्रेम्शो बाक्त। थाम आ नेक्था रे लाडगा लतीक लां यो बाक्त।

15 मिनु ओव्रतीक लाप्चो डा खिं नेल्ल लाप्चो रे लाडगा लतीक लां डा पिंडी सम्म ५० कुबीत लाइशो बाक्त।

16 गेय पतीक कोठा थाम आ नेक्था डा झेल डा गारो आ आइक्थ मेरे थरपु हिरशो बाक्तेक्म। एर ओंथ हिरशो साप्शो लतीक लां नेल्ल झेल बाक्तेक्म। मिनु पिंडीम यो मोदेशो झेल बाक्तेक्म। मेको थामपुकीम खजूर रवा आ बुटा आप्शो बाक्तेक्म।

### लाडगा गे डा अर्को लाडगा

17 मिनु मेकोमी आं कली परमप्रभु यावे आ खिं डा लाडगा गे डा अर्को लाडगाम चाक्ती। मेकेर कोठा बाक्तेक्म। लाडगा आ एर ओंथ फुल्लु ब्रशो बाक्तेक्म। मिनु मेको फुल्लु ब्रशो खपीम ३० ओटा कोठा बाक्तेक्म।

18 मेको फुल्लु ब्रशो लां ओव्रतीक लाप्चो आ नेक्था बाक्त। मिनु मेको लाप्चो सम्म बाक्त। मेको उइ डा फुल्लु ब्रशो लां बाक्त।

19 मिनु मेकोम आइदी डा लाप्चो आ आगा गे लाडगा डा ब्रेम्शो पुक्गानु, मेको सहे का कुबीत बाक्त।

### उत्तर गे डा ठेयब लाप्चो

20 मिनु मेकोम उत्तर गे डा परमप्रभु यावे आ खिं डा लाडगा गे डा लाडगा आ लाइशो नु आ ब्रेम्शो पुक्तु।

21 मिनु मेकेर अर्को ठेयब लाप्चो खोदेशो एर ओंथ कोठा सां सां बाक्तेक्म। मेको आ थाम नु आ पिंडी डोंइती डा लाप्चो खोदेशो बाक्तेक्म। मेको आ लाइशो ५० कुबीत नु आ ब्रेम्शो २५ कुबीत बाक्त। कुबीत का ०.५ मिटर बाक्ब।



22 मेको आ झेल, आ पिंडी नु मेको खजूर रवा आ बुटा आप्शो थाम नु पूर्व गे कोव्रशो लापचो नेल्ल अर्को खोदेशो बाक्तेक्म। मेकेर लचा कली ७ ओटा थेंका बाक्तेक्म। मिनु मेको पिंडी आगाम बाक्त।

23 पूर्व डा ठेयब लापचो आ डोंइती गे परमप्रभु यावे आ खिं डा लाडगाम लापचो का बाक्त। उत्तर डा ठेयब लापचो आ डोंइती गे यो परमप्रभु यावे आ खिं डा लाडगाम लापचो का बाक्त। मेको लापचो रे अर्को लापचो सम्म पुक्गानु, सहे का कुबीत लाइशो बाक्त। कुबीत का ०.५ मिटर बाक्ब।

#### दक्खिन गे डा ठेयब लापचो

24 मिनु मेकोम आं कली दक्खिन गे लाइक्ती। मिनु मेकेर ठेयब लापचो का बाक्त। मिनु मेकोम आ थामपुकी नु आ पिंडी पुक्तु। मिनु मेकोपुकी यो अर्को ठेयब लापचो खोदेशो पा उइक्थ उइक्थ बाक्तेक्म।

25 मिनु मेकेर एर ओंथ नेल्ल नु पिंडीम झेल बाक्तेक्म। मेको अर्को ठेयब लापचो खोदेशो बाक्तेक्म। मेकोपुकी ५० कुबीत लाइशो नु २५ कुबीत ब्रेमशो बाक्तेक्म।

26 मेकेर लतीक ७ ओटा थेंका बाक्तेक्म। मेको आ पिंडी आगा गे बाक्त। निम्फा पटटी थाम बाक्तेक्म। मिनु थाम खजूर रवा आ बुटा आप्शो बाक्तेक्म।

27 मेको आ आगा डा लाडगाम यो दक्खिन गे लापचो का बाक्त। मेकोम मेको लापचो रे ठेयब लापचो सम्म पुक्गानु, मेको सहे का कुबीत बाक्त।

#### आगा डा लाडगा डा लापचो

28 मिनु मेकोम आं कली दक्खिन गे डा ठेयब लापचो रे पा आगा डा लाडगाम चाक्ती। मिनु मेकोम दक्खिन डा लापचो पुक्तु। मिनु मेको ठेयब लापचो यो अर्को ठेयब लापचो खोदेशो बाक्त।

29 मेको आ कोटा, आ थाम नु आ पिंडी अर्को खोदेशो बाक्तेक्म। मेको आ पिंडी आ एर ओंथ नेल्ल झेल बाक्तेक्म। मेको ५० कुबीत लाइशो नु २५ कुबीत ब्रेमशो बाक्त।

30 मेकेर एर ओंथ नेल्ल पिंडी बाक्तेक्म। मेको २५ कुबीत लाइशो नु २५ कुबीत ब्रेमशो बाक्तेक्म। कुबीत का ०.५ मिटर बाक्ब।

31 मेको आ पिंडी लाडगा गे कोव्रशो बाक्त। मिनु मेको आ थामपुकीम खजूर रवा आ बुटा आप्शो बाक्तेक्म। मिनु मेकेर लचा कली ८ ओटा थेंका बाक्तेक्म।

#### आगा लाडगा डा पूर्व डा लापचो

32 मिनु मेकोम आं कली पूर्व गे डा आगा डा लाडगाम चाक्ती। मिनु मेको आ ओव्रतीक लापचो पुक्तु। मिनु मेको अर्को ठेयब लापचो खोदेशो बाक्त।

33 मेको आ कोटा, आ थाम नु आ पिंडी अर्को खोदेशो बाक्तेक्म। मेको आ पिंडी आ एर ओंथ नेल्ल झेल बाक्तेक्म। मेको ५० कुबीत लाइशो नु २५ कुबीत ब्रेमशो बाक्त।

34 मेको आ पिंडी लाडगा गे कोव्रशो बाक्त। मिनु मेको आ थामपुकीम खजूर रवा आ बुटा आप्शो बाक्तेक्म। मिनु मेकेर लचा कली ८ ओटा थेंका बाक्तेक्म।

#### आगा लाडगा डा उत्तर डा लापचो

35 मिनु मेकोम आं कली उत्तर गे डा ठेयब लापचो रे पा आगा डा लाडगाम चाक्ती। मिनु मेको ठेयब लापचो यो अर्को ठेयब लापचो खोदेशो बाक्त।

36 मेको आ कोटा, आ थाम नु आ पिंडी अरु खोदेशो बाक्तेक्म। मेको आ पिंडी आ एर ओंथ नेल्ल झेल बाक्तेक्म। मेको ५० कुबीत लाइशो नु २५ कुबीत ब्रेमशो बाक्त।

37 मेको आ पिंडी लाडगा गे कोव्रशो बाक्त। मिनु मेको आ थामपुकीम खजूर रवा आ बुटा आप्शो बाक्तेक्म। मिनु मेकेर लचा कली ८ ओटा थेंका बाक्तेक्म।

#### चोशा चढ़ेतीक श्ये क्येतीक कोटा

38 पिंडी आ नेक्था लापचो पाइशो कोटा का बाक्त। मेकेर चोशा चढ़ेतीक ब्वाक्कुम मुरबाक्तेक्म।

39 आगा ओव्रतीक लाप्यो आ पिंडीम का पटटी गे टेबल निक्शी बाक्ताक्स। अर्को पटटी गे यो टेबल निक्शी बाक्ताक्स। मेकेर चोशा चढ़ेतीके, पाप आ पबंम चढ़ेतीके नु दोस आ पबंम चढ़ेतीके क्योरचा माल्बाक्तेकम।

40 पूबं डा ओव्रतीक लां डा पिंडी आ डोंइती टेबल निक्शी बाक्ताक्स। मिनु अर्को पटटी डा पिंडी आ डोंइती यो टेबल निक्शी बाक्ताक्स।

41 मोपा आगा ओव्रतीक का पटटी ४ ओटा टेबल नु अर्को पटटी ४ ओटा टेबल बाक्तेकम। मिनु नेल्ल पा ८ ओटा टेबल बाक्तेकम। मेको टेबल तार चढ़ेतीक क्योरचा माल्तेकम।

42 मेकेर यो चोशा चढ़ेतीक कली चेशो फुल्लु के ४ ओटा टेबल बाक्तेकम। मेको कुबीत का नु आधा लाइशो नु कुबीत का नु आधा ब्रेमशो बाक्तेकम। मेको कुबीत का ग्येत्थ लाइशो बाक्तेकम। मेको आन तारी चोशा चढ़ेतीक नु अरु चढ़ेतीक क्योरचा कली मार मार माल्मा, मेको नेल्ल बाक्त। कुबीत का आधा मिटर खोदेंशो बाक्ब।

43 मिनु श्ये क्युक्तीक अडगुल का ब्रेमशो ओव्रतीक आ एर ओथ क्युकशो बाक्तेकम। मेकेर चढ़ेतीक श्ये वोइक्चा कली टेबल बाक्तेकम।

### चढ़ेब आन कोठा

44 मिनु आगा डा ठेयब लाप्यो आ लाडगा गे कोठा निक्शी बाक्ताक्स। कोठा का उत्तर गे डा ठेयब लाप्यो आ लाडगाम बाक्त। मेको दक्खिन गे कोव्रशो बाक्त। अर्को कोठा दक्खिन डा ठेयब लाप्यो आ लाडगा गे बाक्त। मेको उत्तर गे कोव्रशो बाक्त।

45 मिनु मेकोम आं कली “एको दक्खिन गे कोव्रशो कोठा चढ़ेब आन कली बाक्ब। मेको परमप्रभु यावे आ खिंम गेय पाइब आन के बाक्ब।

46 मिनु मेको उत्तर गे कोव्रशो कोठा चहिं मेको चढ़ेतीकेम गेय पाइब आन कली बाक्ब। मेकेर सादोक आ चच युइ बाक्नीम। मेको लेवी आन दाते डा मेकोपुकी ला परमप्रभु यावे आ डोंइती जाक्ने चाप्नीम” दैत। इजीकीएल ४३:१९; इजीकीएल ४४:१५; इजीकीएल ४८:११; १राजा १:८,३९; १इतिहास ५:३४-४१

47 मिनु मेकोम मेको लाडगा पुक्तु। मेको सहे का कुबीत लाइशो नु सहे का कुबीत ब्रेमशो बाक्त। मेको ४ पाटे बाक्त। मिनु मेको चढ़ेतीक परमप्रभु यावे आ खिं आ डोंइती बाक्त। इजीकीएल ४३:१३

### परमप्रभु यावे आ खिं

48 मिनु मेकोम आं कली परमप्रभु यावे आ खिं डा पिंडीम चाक्ती। मिनु मेकोम पिंडी डा थामपुकी पुक्तु। मेको निम्फा गे ५ कुबीत ब्रेमशो बाक्तेकम। आगा ओव्रतीक ठेयब लाप्यो ३ कुबीत ब्रेमशो बाक्त। मिनु मेको आ आगा डा गारो ३ कुबीत ब्रेमशो बाक्ताक्स।

49 मेको पिंडी २० कुबीत लाइशो नु १२ कुबीत ब्रेमशो बाक्त। मेकेर लचा कली १० ओटा थेंका बाक्तेकम। मिनु निम्फा गे थाम का का बाक्त। १राजा ७:२१

## 41

### परमप्रभु आ खिं पुक्शो

1 मिनु नोले मेकोम आं कली परमप्रभु यावे आ खिं आ नेक्था चाक्ती। मिनु मेको आ लाप्यो निक्शी पटटी डा थाम पुक्तु। मेको ६ कुबीत ब्रेमशो बाक्तेकम। कुबीत का ०.५ मिटर बाक्ब।

2 आगा ओव्रतीक १० कुबीत ब्रेमशो बाक्त। मिनु मेको आ एर ओथ गे डा गारो निक्शी ५ कुबीत ब्रेमशो बाक्ताक्से। मिनु मेकोम परमप्रभु यावे आ खिं पुक्गानु, मेको ४० कुबीत लाइशो नु २० कुबीत ब्रेमशो बाक्त।

3 मिनु मेको आगा डा कोठा ओव्रत। मिनु मेको आ आगा ओव्रतीक लाप्यो डा थाम पुक्गानु, मेको कुबीत निक्शी ब्रेमशो बाक्ताक्स। मेको आगा ओव्रतीक ६ कुबीत ब्रेमशो बाक्त। मेको आगा ओव्रतीक आ एर ओथ डा गारो निम्फा ७ कुबीत ब्रेमशो बाक्ताक्स।

4 मिनु मेकोम आगा डा कोठा पुक्गानु, आ लाइशो २० कुबीत नु आ ब्रेमशो २० कुबीत बाक्त। मिनु मेकोमी आं कली “एको चहिं नेल्ल क्येडा चोव्रखो बाक्तीके बाक्ब” दैत।

### गारोम सेल्शो कोठापुकी

5 मिनु नोले मेकोम परमप्रभु यावे आ खिं डा गारो पुक्तु। मेको ६ कुबीत थांडशो बाक्त। मिनु मेको खिं आ लाडगा डा कोठा ४ कुबीत ब्रेम्शो बाक्तेकम। मेको खिं आ एर ओंथ नेल्ल मोदेशो पा सेल्शो बाक्तेकम।

6 मेको लाडगा डा कोठा तला सां पा सेल्शो बाक्तेकम। का आ तारी अर्को पा सेल्शो बाक्त। मिनु मेको तला नेल्लेमी ३०, ३० कोठा बाक्तेकम। मिनु मेको परमप्रभु यावे आ खिं आ एर ओंथ नेल्ल डा गारोम कोठा तिक्चा कली तिक्तीक सेल्शो बाक्तेकम। मेको तिक्शोपुकी परमप्रभु यावे आ खिं आ आगा मओव्रचा डा पा सेल्शो बाक्तेकम।

7 मिनु परमप्रभु यावे आ खिं आ एर ओंथ डा कोठा ओव्रतीक लां आगा डा तला क्येडा आ तार डा तला ठेयब बाक्त। मुरपुकी उड रे इर सम्म लचा कली दाते डा लतीक रे लचा मालबाक्तेकम। मेकेर एर ओंथ क्रेसी सेल्शो बाक्तेकम।

8 मेको नोले गो परमप्रभु यावे आ खिं आ एर ओंथ नेल्ल रे पा पेटी सेल्शो बाक्त। मेको लाडगा डा कोठा आन जग ६ कुबीत ग्येथ लाइशो बाक्तेकम।

9 मेको कोठा आन लाडगा गे डा गारो ५ कुबीत ब्रेम्शो बाक्त। मेको परमप्रभु यावे आ खिं डा कोठा इजीकीएल ४२:१-३

10 नु गारो डा कोठा आन दातेमी २० कुबीत ब्रेम्शो लां बाक्त। मेको खिं नेल्ल एर ओंथ मोदेशो बाक्त।

11 मेको कोठा आन ओव्रतीक ब्रेम्शो लां आगाम लाम्तेकम। लाप्यो का उत्तर गे बाक्त, अर्को दक्खिन गे बाक्त। मेको आन दाते डा श्येथ लां ५ कुबीत ब्रेम्शो बाक्त। जग आ एर ओंथ नेल्ल ५ कुबीत ब्रेम्शो बाक्तेकम।

12 मेको परमप्रभु यावे आ खिं आ लाडगा गे हिरशो पच्छिम गे डा खिं ७० कुबीत ब्रेम्शो बाक्त। मेको खिं आ एर ओंथ डा गारो ५ कुबीत थांडशो बाक्त। मिनु मेको आ लाइशो ९० कुबीत बाक्त। कुबीत का ०.५ मिटर बाक्ब।

13 मिनु परमप्रभु यावे आ खिं पुकगानु, मेको सहे का कुबीत लाइशो नु सहे का कुबीत ब्रेम्शो बाक्त। आ आगा डा लाडगा नु खिं आ गारो नु मेको आ गारो सहे का कुबीत ब्रेम्शो बाक्त।

14 परमप्रभु यावे आ खिं आ पूर्व गे डा लाडगा यो सहे का कुबीत बाक्त।

15 मिनु नोले मेकोमी परमप्रभु यावे आ खिं डा लाडगा पच्छिम गे पुकगानु, निम्फा पट्टी डा लतीक लां सहे का कुबीत बाक्त। मिनु परमप्रभु यावे आ खिं, आ चोव्रखो बाक्तीके नु आ डोंइती डा पिंडी डा गारो नेल्ल शीम क्येप्यो बाक्तेकम।

16 मिनु मेको सांफा आन एर ओंथ नेल्ल गे झेल बाक्तेकम। लाप्यो गे कोव्रचा कली नेल्ल शीम क्येप्यो बाक्त। उड खप रे झेल सम्म शीम क्येप्यो बाक्तेकम।

17 लाप्यो आ इर गे, चोव्रखो बाक्तीके नु परमप्रभु यावे आ बाक्तीके आगाम लतीक लाप्योम फारतीक वा बाक्तेकम। मिनु खिं आ एर ओंथ डा गारो, चोव्रखो बाक्तीके नु खिं डा ठेयब कोठा नेल्ल बुटा आप्यो बाक्तेकम।

18 मेकेर करूब नु खजूर रवा आन बुटा आप्यो बाक्तेकम। मेको करूब का खजूर रवा का नु करूब का पा आप्यो बाक्त। मेको करूब नेल्ल आन के कुल निकशी बाक्तेकम।

19 मेको करूब आ मुर आ कुल खजूर रवा का गे कोव्रशो, नु अर्को ठिटा गुप्स आ कुल खोदेशो अर्को खजूर रवा गे कोव्रशो बाक्त। मेको परमप्रभु यावे आ खिं डा गारो नेल्लेम मुशा बुटा आप्यो बाक्तेकम।

20 उड खप रे लाप्यो इर सम्म करूब नु खजूर रवा आन बुटा मुशा आप्यो बाक्तेकम।

21 परमप्रभु यावे आ खिं डा ओव्रतीक डा लाप्यो डा शी दारपाइक्चा कली ४ ओटा खोप्यो बाक्त। मिनु चोव्रखो बाक्तीके आ डोंइती यो मेको खोदेशो पा बाक्त। मिनु लाडगा डा चोव्रखो बाक्तीके ओव्रतीक लाप्यो डा शी नेल्ल उडक्थ उडक्थ पा ४ पाटे बाक्तेकम। मिनु थम चोव्रखो बाक्तीके आ डोंइती गे डा लाप्यो डा शी यो मोदेशो बाक्तेकम। प्रस्थान २५:२३-३०; प्रस्थान ४०:२२-२३

22 मेकेर शी के चढ़ेतीक का बाकत। मेको कुबीत सां ग्येत्थ लाइशशो, कुबीत निकशी पित्थ लाइशशो नु कुबीत निकशी ब्रेमशो बाकत। मेको आ सुर, मेको आ तार नु आ एर ओंथ नेल्ल शी के बाकत। मिनु मेकोमी आं कली “एको टेबल परमप्रभु यावे आ डोंइती बाकब” देंत।

23 परमप्रभु यावे आ खिं नु आ चोत्रखो बाकतीक निकशी के लापचो निकशी बाक्तेकम।

24 मेको लापचो आन के चोक्तीक निकशी पाइशशो बाक्तेकम।

25 मिनु परमप्रभु यावे आ खिं डा लापचोम गारो डा खोदेशो पा करूब नु खजूर रवा आन बुटा मुशो बाक्तेकम। पिंडी आ डोंइतीम शी के खाट बाकशो बाकत।

26 पिंडी डा गारो आ निम्फा पटटी खजूर रवा आ बुटा मुशा आप्शो बाक्तेकम।

## 42

### चढ़ेब आन कोठा

1 मिनु मेकोमी आं कली लाडगा गे डा लाडगा उत्तर गे चाक्ती। मिनु मेकोमी आं कली परमप्रभु यावे आ खिं नु उत्तर गे डा खिं आ आइक्ची डा कोठा गे लाइक्ती। इजीकीएल ४०:१७; इजीकीएल ४१:९,१०,१३

2 मेको खिं उत्तर गे सहे का कुबीत लाइशशो नु ५० कुबीत ब्रेमशो बाकत। कुबीत का ०.५ मिटर बाकब।

3 आगा डा लाडगा २० कुबीत बाकत। लाडगा गे डा लाडगा डा फुल्लु ब्रशो लां गे कोत्रशो कोठा तारी अर्को तला सां बाक्तेकम।

4 कोठा आन डोंइती आन आगा गे १० कुबीत ब्रेमशो नु सहे का कुबीत लाइशशो लां का बाकत। मेको आन लापचो उत्तर गे कोत्रशो बाक्तेकम। कुबीत का ०.५ मिटर बाकब।

5 आ तार डा कोठा ठेयब लां बाक्तीके आगा नु दाते डा कोठा आन क्येडा आइक्च बाक्तेकम।

6 मारदे हना मेको तला सां बाक्तेकम। मेको आन के लाडगा डा थाम खोदेशो पा थाम मबाकम। मोपतीके आइदी डा नु दाते डा कोठा आन क्येडा, मेको आ तार डा कोठा आइक्च बाक्तेकम।

7 मेकेर कोठा आन डोंइती गारो का बाकत। मेको गारो ५० कुबीत लाइशशो बाकत।

8 लाडगा गे डा लाडगा डा कोठा आन लहर ५० कुबीत लाइशशो बाकत। तन्न परमप्रभु यावे आ खिं आ आइक्था डा सहे का कुबीत लाइशशो बाकत।

9 पूर्व रे आगा डा कोठापुकी ओत्रचा कली लां का बाकत। मोपा लाडगा गे डा लाडगा ओत्रने चाप्यो बाक्तेकम।

10 मेको लां आ ब्रेमशो गारो सम्म थिशो बाकत। परमप्रभु यावे आ खिं आ आइक्ची दक्खिन गे यो कोठा बाक्तेकम।

11 मेको आन डोंइती गाक्तीक लां का बाकत। मेको कोठा उत्तर डा खोदेशो बाक्तेकम। मेको आन खोदेशो लाइशशो नु ब्रेमशो बाक्तेकम। लाडगा लतीके लापचो नु मेको आ एर ओंथ नेल्ल खाल का डा बाक्तेकम।

12 दक्खिन डा कोठा ओत्रतीक लां आ डोंइती अर्को लां ब्राशो बाकत। मेको लां पूर्व गे लत।

13 मिनु मेकोमी आं कली “परमप्रभु यावे आ खिं डा श्येत्थ बाक्तीके आइक्ची उत्तर गे नु दक्खिन गे डा कोठापुकी चढ़ेब आन कोठा बाक्तीम। मेकेर परमप्रभु यावे आ डोंइती बाकशो चढ़ेबपुकीमी नेल्ल क्येडा चोत्रखो चढ़ेशो ब्वाइनीम। मेकेर नेल्ल क्येडा चोत्रखो चढ़ेशो, अन्न चढ़ेशो, पाप आ पर्बम चढ़ेशो नु दोस आ पर्बम चढ़ेशो वोइक्नीम। मारदे हना मेको चोत्रखो बाक्तीके बाकब।

14 मिनु चढ़ेबपुकी चोत्रखो बाक्तीकेम ओत्रमानु, आन फेकशो गेय पतीक वा मप्रुइक्थु, लाडगा गूचा मडुनीम। मारदे हना मेको चोत्रखो वा बाक्तीम। मेकोपुकी मुर आन दातेम लचा क्येडा डोंइती अर्को वा फेक्चा मालनीम” देंत। इजीकीएल ४४:१९

### परमप्रभु आ खिं पुक्शो

15 मिनु मेकोम परमप्रभु यावे आ खिं आगा पुक्ने थुम्तु। मिनु आं कली पूर्व डा लापचो रे पा लाडगा गुंइताक्ची। मिनु परमप्रभु यावे आ खिं आ एर ओंथ लाडगा गे डा लाडगा नेल्ल पुक्तु।

16 मेकोमी आ पुक्तीकेम पूर्व गे पुक्तु। मेको ५ सहे कुबीत बाकत।

- 17 मिनु मेकोम आ पुक्तीकेमी उत्तर गे पुक्तु। मेको यो ५ सहे कुबीत बाक्त।  
 18 मिनु मेकोम आ पुक्तीकेमी दक्खिन गे पुक्तु। मेको यो ५ सहे कुबीत बाक्त।  
 19 मिनु मेकोम आ पुक्तीकेमी पच्छिम गे पुक्तु। मेको यो ५ सहे कुबीत बाक्त।  
 20 मोपा मेकोमी पूब, उत्तर, दक्खिन नु पच्छिम नेल्ल पुक्तु। मेको आ एर ओंथ गारो का बाक्त।  
 मेको ५ सहे कुबीत लाइशो नु ५ सहे कुबीत ब्रेमशो बाक्त। परमप्रभु यावे आ बाक्तीके नु मुर आन बाक्तीके तिल्चा कली मोदेशो पशो बाक्त।

## 43

### परमप्रभु आ छेडछेड लेशो

- 1 मिनु मेकोमी आं कली पूब डा लाप्चो आ नेक्था चाक्ती।  
 2 मिनु इस्राएली आन परमप्रभु आ छेडछेड पूब रे जाक्त। मेको आ रेयके ठेयब समुन्द्र आ रेयके खोदेशो नेंसाक्व। मिनु रागी नेल्ल मेको आ छेडछेडम हाम्सो दुम्त। इजीकीएल १:२८  
 3 मेको आं डोंइती तशो परमप्रभु यावेमी सहर कली खतम सेल्ची ना जाक्मेनु, कोंइतीक खोदेशो बाक्त। मेको केबार खोला आ नेक्थाम तशो कोंइतीके खोदेशो बाक्त। मिनु गो खुम्की पा बाप्ती। इजीकीएल ८:-११:-; इजीकीएल १:-  
 4 मिनु परमप्रभु यावे आ छेडछेड मेको पूब डा लाप्चो रे पा आ खिं ओव्रत। इजीकीएल १०:१९  
 5 मिनु सोक्तीम आं कली क्युक्शा, आगा डा लाडगाम ओइताक्यी। मिनु परमप्रभु यावे आ खिं छेडछेडम ब्रीत। इजीकीएल १:२८; प्रस्थान ४०:३४; १राजा ८:१०-११  
 6 मिनु मेको मुर आं नेक्था राप्शा बाक्मेनु, गो परमप्रभु यावे आ खिं रे आं कली लोव्र पशो नेता।  
 7 मार लोव्र पाप्तु देशा हना "ए मुर, एको दा आं ठेयब नित्तीक बाक्ब। मिनु एको आं खोइल नाइक्तीक यो बाक्ब। गो इस्राएल डा मुर आन दातेम गेना हना यो बाक्नुड। मुल रे इस्राएल आ खिं डा मुरुम आं नें कली मरिम्शो मसेल्नीम। मेको नु आन पिपम आन मूर्ति पूजा नु आन बेक्शो पिप आन परबम पतीके आं नें मरिम्शो मसेल्नीम। भजन संग्रह १३२:७-८  
 8 मेकोपुकीम आं खिं आ नेक्था आन खिं सेल्लेक्म। आं लाप्चो आ डोंइती आन लाप्चो सेल्लेक्म। मिनु गो नु मेको आन दातेमी गारो का ला लीत। मिनु मेको आन ग्रांग्रा दिशो गेयम, आं नें ग्रांग्रा दिशो सेल्लेक्म। मोपतीके गो गाइशो मेको आन कली साइक्तामी। इजीकीएल ८:७-१८  
 9 मुल मेकोपुकीम आन मूर्ति पूजा पतीक प्रोन्मेक्ल। मेको आन बेक्शो पिप आन परबम पतीके प्रोन्मेक्ल। मिनु गो मेको आन दातेमी गेना हना यो बाक्नुड।  
 10 ए मुर, इस्राएल आ खिं डा मुर आन कली आं खिं आ परबम शेंदीमी। मिनु मेको दोपा सेल्सीशो बाक्मे, मेको पुक्पतो। मिनु मेको आन मरिम्शो पशो आ परबम मुने दोक्मल। इजीकीएल ३६:३२  
 11 मिनु मेकोपुकीम आन पशो आ परबम मुने पाम्तेक्म हना, मेको आन कली आं खिं दोपा सेल्सीशो बाक्मे, मेको तुडक्पतो। मेको आ लाडगा लतीके, खिंडगा ओव्रतीके, मेको दोदेशो तांइसीबा, आं देशो पतीक लोव्र, आं अरेशो लोव्र नु शेंतीक नेल्ले मेको आन डोंइती ब्रेक्तो। मोपा मेको नेल्ले अरेशो होस पा टीब दुम्मल।  
 12 परमप्रभु यावे आ खिं आ परबम आ अरेशो लोव्र मार बाक्त देशा हना, मेको डांडा आ एर ओंथ नेल्ल आं के बाक्तीक बाक्ब। मेको परमप्रभु यावे आ खिं आ परबम आ अरेशो लोव्र बाक्ब" देंत।

### चढ़ेतीक

- 13 चढ़ेतीके गिश ठेयब बाक्त देशा हना, मेको नेल्ल पा कुबीतम पुक्शोनु, कुबीत का नु गुड का ब्रेमशो बाक्त। मेको आ एर ओंथ दोशो जग कुबीत का लुक्य नु कुबीत का ब्रेमशो बाक्त। मिनु आ एर ओंथ नेल्ल डा सुर बिक्ता का ब्रेमशो बाक्त। मिनु मेको चढ़ेतीक आ राप्तीके दोदेशो बाक्त देशा हना, कुबीत का ०.५ मिटर बाक्ब। इजीकीएल ४०:४७; प्रस्थान ४७:१-८

14 मेको चढेतीक खपीम बाक्शो जग रे आइदी डा सुर सम्म कुबीत निक्शी लाइशो नु कुबीत का ब्रेम्शो बाक्त। मेको आ आइक्च सुर रे टेयब सुर सम्म ४ कुबीत लाइशो नु कुबीत का ब्रेम्शो बाक्त।

15 मिनु मेको चढेशो चोतीक ४ कुबीत ग्येत्थ लाइशो बाक्त। मेकेर रे मेको आ ४ सुर रे ४ ओटा ग्रोव सेल्शो बाक्तेक्म।

16 मेको चढेशो थोव्रक चोतीक १२ कुबीत लाइशो नु १२ कुबीत ब्रेम्शो, ४ पाटे बाक्त।

17 मेको चढेतीक आ टेयब सुर १४ कुबीत लाइशो नु १४ कुबीत ब्रेम्शो बाक्त। मेको ४ पाटे बाक्त। मेको आ सुर एर ओंथ आधा कुबीत बाक्त। मिनु आ एर ओंथ दोशो जग कुबीत का ब्रेम्शो बाक्त। मेको चढेतीक आ क्रेसी पूर्व गे कोव्रशो बाक्त।

### चढेतीक गेय पचा गोशो

18 मिनु मेकोम आं कली “ए मुर, परमप्रभु, परमप्रभु यावेमी ‘मेको चढेतीके सेल्ने थुम्शो नाक्ती चोशा चढेतीके चढेचा नु हुश ब्रुइक्चा कली मेको चढेतीके आ पर्वम पचा माल्लो गेय मार बाक्त देंशा हना,

19 गेपुकीम आं कली चढेब सादोक आ खिं डा लेवी आन कली पाप आ पर्वम चढेचा कली बोहोर का गेचा माल्लीनी। मेकोपुकी आं गेय पचा कली आं नेक्था जाक्नीम’ दे परमप्रभु, परमप्रभु यावेमी देंशो बाक्ब। इजीकीएल ४०:४६; लेवी ४:१-१२

20 मेकोपुकीमी मेको आ हुश इच्का चाक्शा चढेतीक आ ४ ओटा ग्रोव नु आइक्था डा सुर आन ४ कुना नेल्लेम खेक्तमेक्ल। मोपा गे चढेतीक ग्रांया मदिशो सेल्शा पाप क्याम्तीक गेय पचा माल्लीनी।

21 मिनु नोले गेपुकीम मेको पाप आ पर्वम चढेशो बोहोर चाक्शा, परमप्रभु यावे आ खिं डा देंशो बाक्तीकेम चोने।

22 मिनु गेपुकीम आ दीसा नाक्ती मारेइ मदुम्शो बोका का पाप आ पर्वम चढेने। गेपुकीम बोहोर चढेशोम चढेतीक ग्रांया मदिशो सेल्शो खोदेंशो पा मेकोम यो चढेतीक कली ग्रांया मदिशो सेलल।

23 मिनु गेपुकीम चढेतीक नेल्ल ग्रांया मदिशो सेल्ने थुम्तीनी हना, मारेइ मदुम्शो बोहोर का नु बगाल रे मारेइ मदुम्शो सांड का चढेने।

24 गेपुकीम मेको आस कली परमप्रभु यावे आ डोंइती वोइक्चा माल्लीनी। मिनु चढेबपुकीम मेको तारी हिकसी वोइशर, परमप्रभु यावे आ डोंइती चोशा चढेतीक सेल्शा चढेचा माल्लीम।

25 गेपुकीम पाप आ पर्वम चढेचा कली ७ नाक्त सम्म नाक्त किंत किंत क्यारश का, बोहोर का नु बगाल रे मारेइ मदुम्शो सांड का चाक्चा माल्लीनी।

26 मिनु मेकोपुकी ७ नाक्त सम्म चढेतीक कली पाप क्याम्तीक गेय पचा नु ग्रांया मदिशो सेल्चा माल्लीम। मो पशा मेको चढेतीके चढेचा कली जिम्मा गेचा माल्लीम।

27 मिनु मेको नाक्त नुम्मेनु, ८ नाक्त रे चढेबपुकीम इन चोशा चढेतीक नु दुशा बाक्चा आ पर्वम चढेतीक चढेचा माल्लीम। मिनु गो इन कली ब्राइनुड” दे परमप्रभु, परमप्रभु यावेमी देंत।

## 44

### चोक्शो पूर्व डा टेयब लाप्चो

1 मिनु नोले मेकोमी आं कली परमप्रभु यावे आ खिं डा पूर्व गे कोव्रशो लाइगा गे डा लाप्चोम चाक्ती। मिनु मेको चोक्शो बाक्त। इजीकीएल ४३:४

2 मिनु परमप्रभु यावेमी आं कली “एको लाप्चो चोक्स डा चोक्स बाक्चा माल्लब। एको रोक्या मदुम्ब। मेकेर रे सुइ ओव्रचा मताइनीम। मारदे हना परमप्रभु यावे, इस्राएली आन परमप्रभु एकेर रे ओव्रशो बाक्ब। मोपतीके एको चोक्स डा चोक्स बाक्चा माल्लब। इजीकीएल ४६:२

3 सासन पाइब ला एको लाप्चो आगा डा बाक्तीक परमप्रभु यावे आ डोंइती जचा कली लने चाप्ब। मेको एको लाप्चो आ पिंडी रे ओव्रचा माल्लब। मिनु मेको खाल का डा लां रे लेत्चा माल्लब” देंत।

### सासन पाइब, लेवी नु चढेब

4 मिनु नोले मेकोमी आं कली उत्तर गे डा ठेयब लाप्चो रे पा परमप्रभु यावे आ खिं आ डोंइती चाक्ती। मिनु मेको कोव्रडुनु, परमप्रभु यावे आ छेडछेडम मेको आ खिं ब्रीशो बाक्त। मिनु गो खुम्की पा बाप्ती।

5 मिनु परमप्रभु यावेम आं कली “ए मुर, आं नेक्था जाक्शा, कोव्रडो। आं खिं आ परबंम पचा माल्शो गेय नु मेको आ परबंम अरेशो लोव्र नेल्ल इ नोफा दाइशशा रिम्शो पा नेनो। सु सु आं खिं ओव्रचा ताइनीमी नु सु सु मताइनीम, दे रिम्शो पा कोव्रशा अरेवो।

6 मेको मटीब मुर, इस्राएल आ खिं डा मुर आन कली परमप्रभु, परमप्रभु यावेमी इन कली ‘ए इस्राएल आ खिं डा मुरपुकी, गे इन ग्रांग्रा दिशो गेय नेल्ल प्रोनीन।

7 गेपुकी आं कली आं जचा थोव्रक बोसो नु हुश चढ़ेची ना आन थुं नु रांम खोइक्तीक चिनु मखोइशशो अर्को रागी डा मुर आन कली आं बाक्तीकेम ओव्रचा गेतीनी। मोपा गे आं खिं, मुर आ खिं खोदेशो सेलतीनी। मिनु इन ग्रांग्रा दिशो गेयम आं कबल प्रोंइतीनी। यसैया ५२:१; येरमीया ९:२५

8 गेपुकीम आं कली चढ़ेशो आ परबंम होस मपनी। आं बाक्तीकेम इन गेय पचा कली गे अर्को रागी डा मुर आन कली वोइशशा आं खिं कोव्रब सेलतीनी” देंत।

9 मिनु परमप्रभु, परमप्रभु यावेमी “इस्राएली आन दातेम बाक्शो अर्को रागी डा आन थुं नु रांम खोइक्तीक चिनु मखोइशशो मुर आं बाक्तीकेम ओव्रचा मताइनीम।

10 तन्न इस्राएली हेंथे गाक्मानु, लेवीपुकी हेंथे गाक्शा, आं कली प्रोंइशा, आन मूर्ति कली पूजा पशो बाक्तेक्म। मेकोपुकीम आन पाप आ सजाइ तचा माल्नीम।

11 मिनु मेको लेवीपुकी आं बाक्तीकेम गेय पचा माल्नीम। मिनु आं खिं डा लाप्चो खाल पाइब दुम्चा माल्नीम। मिनु आं खिंम गेय पचा माल्नीम। मेकोपुकीम मुर आन परबंम चोशा चढ़ेतीक क्योरचा माल्नीम। मेकोपुकीम मुर आन कली वारच पा गेय पचा माल्नीम।

12 तन्न लेवीपुकीम मुर आन कली आन मूर्ति पूजा पतीकेम वारच पाप्तेक्म। मोपा मेकोपुकी इस्राएल आ खिं डा मुर आन कली मरिम्शो पपाइक्तेक्म। मोपतीके मेकोपुकी सजाइ तचा माल्नीम, दे कसम जाता।

13 मेकोपुकी चढ़ेब आ गेय पचा कली आं नेक्था जाक्चा मताइनीम। मेकोपुकी तेकोइ आं कली चढ़ेशो आ नेक्था जाक्चा मताइनीम। मारदे हना मेको चढ़ेशो नेल्ल क्येडा चोव्रखो बाक्ब। तन्न मेको मुने दोक्चा माल्नीम। मिनु मेकोपुकीम आन मूर्ति पूजा पशो डा सजाइ तचा माल्नीम।

14 मो हना यो गो मेको आन कली आं खिं कली कोव्रशा नु मार मार पचा माल्शो गेय पपाइक्नुड।

### चढ़ेब आन गेय

15 तन्न चढ़ेब लेवी आ थर डा सादोक आ चच युड, इस्राएली आं रे हेंथे गाक्तेक्म हना यो, मेकोपुकीम आं खिं डा पचा माल्शो गेय रिम्शो पा कोव्रतेक्म। मेकोपुकी आं गेय पचा कली आं नेक्था जाक्चा ताइनीम। मेकोपुकी आं डोंइती बोसो नु हुश चढ़ेथ जाक्चा ताइनीम। इजीकीएल ४०:४६

16 मेकोपुकी ला आं बाक्तीकेम ओव्रने चान्पीम। मिनु आं टेबल आ नेक्था जाक्शा, आं गेय पचा ताइनीम।

17 मेकोपुकी आगा डा लाडगा डा लाप्चो रे ओव्रमानु, सुती के वा फेक्शो बाक्चा माल्नीम। मेकोपुकीम आगा डा लाडगा डा लाप्चो नु आं खिं आगाम गेय पामेनु, ऊन के मारेइ वा फेक्चा मडुम्नीम। लेवी १६:४

18 मेकोपुकीम पियाम सुती के गुप्तीक गुप्चा माल्नीम। मिनु सुती के आगाम फेक्तीक वा फेक्चा माल्नीम। मेकोपुकीम गल शाइक्ब तेकोइ वा फेक्चा मडुम्नीम।

19 मेकोपुकी लाडगा गे डा लाडगा, मुर आन बाक्तीक लमानु, आगाम गेय पामेनु, फेक्शो वा पुइक्चा माल्नीम। मिनु मेको चोव्रखो कोठाम वोइशशा, अर्को वा फेक्चा माल्नीम। मोपा परमप्रभु आ थोव्रक नु मुर आ थोव्रक मखाल्दमेक्ल। इजीकीएल ४२:१४

20 मेकोपुकीम आन चां प्रेक्चा मदुम्मीम। मेको शुश लाइशो दुम्चा गेचा यो मदुम्ब। मेकोपुकीम आन चां खोइक्चा ला दुम्मीम। लेवी १९:२७

21 चढेबपुकीम आगा डा लाडगा लमानु, अडगुर शांबू तूचा मदुम्मीम। लेवी १०:९

22 मेको चढेबपुकीमी आन वोंइश बेक्शो नु प्रोंइचा पुंडसीशो मीश मुर ग्युंवे पचा मदुम्मीम। मेकोपुकीम इस्राएल आ खिं मुर रे जरमेशो कन्ने मीश आल नु आन वोंइश बेक्शो चढेब आन मीश कली ला ग्युंवे पने चाप्नीम।

23 मेकोपुकीम आं मुर आन कली आं मार मार नु मुर आन मार मार खाल का डा मबाक्नीम, दे शेंचा माल्नीम। मिनु मेको आन कली ग्रॉग्रा दिशो नु मदिशो थोत्रक खाल का डा मबाक्नीम, दे कोंइचा माल्नीम। इजीकीएल २२:२६; लेवी १०:१०

24 मारेइ जितीक खेतीक दुम्मेनु, चढेबपुकीमीन निसाफ पाइब आन गेय पचा माल्नीम। मिनु आं निसाफ पतीक लोत्र खोदेशो पा मेकोपुकीम निसाफ पचा माल्नीम। मेकोपुकीम चाड मानेचा आ पर्वम आं अरेशो नु आं फुल्लुम मुशा ब्रेक्शो लोत्र खोदेशो पा पचा माल्नीम। मेकोपुकीम आं नाइक्तीक नाक्ती मानेचा माल्नीम। ब्यवस्था १७:८-९

25 मेकोपुकीम बेक्शो मुर आ नेक्था लशा, आंम कली ग्रॉग्रा दिशो सेल्सीचा मदुम्मीम। मो हना यो आन आम आफ, तमी तौ, आन लोकब नु ग्युंवे मपशो आंम समी आन बेक्शो रं आ नेक्था लशा ग्रॉग्रा दिशो दुम्ने चाप्नीम। गन्ती १९:११; लेवी २१:१-४

26 मिनु मेको ग्रॉग्रा मदिशो दुम्मा नोले, ७ नाक्त सम्म रिम्चा माल्नीम।

27 मेकोपुकी आं खिं डा आगा डा लाडगाम गेय पचा कली ओव्रतीक नाक्त मेकोपुकीमी पाप आ पर्वम चढेचा माल्नीम” दे परमप्रभु, परमप्रभु यावेमी देंत।

28 मिनु परमप्रभुमी “चढेब आन शोंप गो नड। मेको आन कली इस्राएलम रू गेचा मदुम्ब। गो मेको आन शोंप नड। गन्ती १८:२०

29 मेकोपुकीम अन्न चढेशो, पाप आ पर्वम चढेशो नु दोस आ पर्वम चढेशो जचा माल्नीम। इस्राएलम परमप्रभु यावे कली गेचा माल्शो थोत्रक नेल्ल मेको आन के दुम्ब। गन्ती १८:१४

30 डोंइती मीशो फल आन नेल्ल क्येडा रिम्शो फल नु इन चढेशो मारेइ मारेइ नेल्ल चढेब आन केन दुम्ब। गे इन खिंम आसीक तचा कली इन निशो फस नेल्ल क्येडा डोंइती डा डल्ला यो चढेब आन कली गेचा माल्नीनी। प्रस्थान २५:२; गन्ती १५:२०; नेहेम्याह १०:३८

31 चढेबपुकीम आंमा बेक्शो चिक्ब नु बी ब्यफ, क्यारश भेडा कि जन्तुपुकीम साइशो, मारेइ ब्वचा मदुम्मीम” दे परमप्रभु यावेमी देंत। लेवी २२:८

## 45

### परमप्रभु कली रू गेशो

1 मिनु गेपुकीम आंम इन शोंप सेल्चा कली रागी योक्शा गेनीनु, मेको रे परमप्रभु यावे कली १५ हजार कुबीत लाइशो नु २० हजार कुबीत ब्रेम्शो रू का तिल्चा माल्नीनी। मिनु मेको रू नेल्ल परमप्रभु यावे केन दुम्ब। कुबीत का ०.५ मिटर बाक्ब।

2 मेको रे पा ५ हजार कुबीत लाइशो नु ५ हजार कुबीत ब्रेम्शो रू का परमप्रभु यावे आ बाक्तीके दुम्ब। मेको आ एर ओथ नेल्ल ५० कुबीत ब्रेम्शो श्येत्य लां बाक्चा माल्ब।

3 मिनु मेको परमप्रभु यावे आ बाक्तीकेम २५ हजार कुबीत लाइशो नु १० हजार कुबीत ब्रेम्शो पुक्चा माल्नीनी। मेकेर परमप्रभु यावे आ खिं डा नेल्ल क्येडा चोत्रखो बाक्तीक दुम्चा माल्ब।

4 मेको बाक्तीक चहिं परमप्रभु यावे के बाक्ब। मेको परमप्रभु यावे आ खिंम गेय पाइब नु परमप्रभु आ नेक्था जाक्ब आन खिं कली नु परमप्रभु यावे आ खिं कली दुम्ब।

5 मेको अर्को २५ हजार कुबीत लाइशो नु १० हजार कुबीत ब्रेम्शो रू का परमप्रभु यावे आ खिंम गेय पाइब लेवी आन के दुम्ब। मेको आन बाक्तीक सहर कली दुम्ब।



6 गेपुकीम परमप्रभु आ रू प्रोइशा अर्को ५ हजार कुबीत ब्रेमशो नु २५ हजार कुबीत लाइशो रू का सहर कली वोइक्चा माल्नीनी। मेको इस्राएल डा मुर नेल्ल आन कली दुम्ब। इजीकीएल ४८:१५-२०

### सासन पाइब आन भाग

7 मेको परमप्रभु यावे आ रू आ निम्फा पटटी सासन पाइब आन के दुम्ब। मेको आ नेक्था डा सहर डा रू आन पूर्व गे नु पच्छिम गे सासन पाइब आन के दुम्ब। मेको थर का डा रू खोदेशो पा लाइशो दुम्ब। मेको पच्छिम डा सांद रे पूर्व डा सांद सम्म दुम्ब। इजीकीएल ४८:२१-२२

8 मेको रू चहिं इस्राएलम सासन पाइब आन रू दुम्ब। मिनु मुल रे आं सासन पाइबपुकीम आं मुर आन कली दिप्चा मदुम्नीम। तन्न मेकोपुकीम इस्राएल आ खिं डा मुर आन कली, मेको आन थर थर खोदेशो पा आन रू आन के दुम्ब, दे रोइक्चा मताइनीम। इजीकीएल ४६:१८

9 मिनु परमप्रभु, परमप्रभु यावेमी “ए इस्राएल डा सासन पाइबपुकी। गेपुकीम हुश खाक्श पोक्तीनी। दिप्चा प्रोनीन। गेपुकीम थम रिमशो नु ठीक गेय पने। आं मुर आन कली आन खिं रू रे मखेरीन। १राजा १२:४, ११; १राजा २१; येरमीया २१:११-१२; मीका ३:१-३

10 गेपुकीम ठीक नाक्तीक नु पुक्तीकपुकी चलेचा माल्नीनी। लेवी १९:३६; ब्यवस्था २५:१५

11 एफाह नु बाथ माइशो पुक्तीक खाल का डा दुम्चा माल्नीम। होमेर का १० बाथ दुम्चा माल्ब। मिनु १० एफाह यो होमेर का बाक्ब। होमेर चहिं थाप्तीक दुम्चा माल्ब। एफाह का २२ लिटर रिक्ब टेयब अन्न पुक्तीक बोस बाक्ब। बाथ का २२ लिटर रिक्ब बोस बाक्ब। होमेर का २२० लिटर रिक्ब बोस ताप्तीक बाक्ब।

12 शेकेल का २० गेराह दुम्चा माल्ब। २० शेकेल, २५ शेकेल नु १५ शेकेल नेल्ल पा मीना का दुम्चा माल्ब” दैत। शेकेल का ११.५ ग्राम बाक्ब। गेराह का ०.६ ग्राम बाक्ब। मीना का ६०० ग्राम खोदेशो बाक्ब।

### सासन पाइब आन चढ़ेचा माल्शो

13 मिनु परमप्रभु यावेमी “गेपुकीम चढ़ेचा माल्शो अन्न गिश बाक्ब दैशा हना, होमेर का का चेरब रे एफाह डा भाग डा भाग का चढ़ेचा माल्नीनी। होमेर का का क्योत्रज रे एफाह डा ६ भाग डा भाग का चढ़ेचा माल्नीनी।

14 गेपुकीम चढ़ेचा माल्शो तेल कोर का बाथ डा १० भाग डा भाग का बाक्ब। मेको ४ माना खोदेशो बाक्ब। कोर नु होमेर उइक्थ उइक्थ बाक्नीम। मिनु होमेर का के १० बाथ बाक्नीम। कोर नु होमेर खाल का डा २२० लिटर बाक्ब। बाथ का एफाह का खोदेशो बाक्ब, मेको २२ लिटर बाक्ब।

15 गेपुकीम सहे निक्शी भेडा रे का चढ़ेचा माल्नीनी। मेको इस्राएली आन योत्रतीके रे चाक्चा माल्नीनी। मेको अन्न चढ़ेशो, चोशा चढ़ेशो नु दुशा बाक्चा आ पबंम चढ़ेशो बाक्ब। मेको पाप क्याम्चा कली बाक्ब” दे परमप्रभु यावेमी दैत।

16 मिनु मेकोमी लेशा “इस्राएल डा मुर नेल्लेमी मेको सासन पाइब कली मोदेशो गेचा माल्नीम।

17 तन्न सासन पाइबमी मेको चोशा चढ़ेतीक, अन्न चढ़ेतीक नु तूचा थोत्रक चढ़ेतीक आं देशो चाडम चढ़ेचा माल्ब। मेकोमी औसी, नाइक्तीक नाक्ती नु इस्राएल आ खिं डा मुर आन चाड नेल्लेमी चढ़ेचा माल्ब। मेकोमी पाप आ पबंम चढ़ेतीक, अन्न चढ़ेतीक, चोशा चढ़ेतीक नु दुशा बाक्चा आ पबंम चढ़ेतीक इस्राएली आन पाप क्याम्चा कली चाक्चा माल्ब” दे परमप्रभु यावेमी दैत। २सामुएल ६:१७-१८

### परमप्रभु आ चाडपुकी

18 मिनु परमप्रभु, परमप्रभु यावेमी “डोंइती डा महिना नु डोंइती डा नाक्त, गेपुकीम मारेइ मदुम्शो बोहोर का चाक्शा, परमप्रभु यावे आ बाक्तीक ग्रान्ग्रा मदिशो सेल्चा माल्नीनी।

19 मिनु चढ़ेबमी पाप आ पबंम चढ़ेशो आ हुश इक्का लाइशो, परमप्रभु यावे आ खिं डा लाप्चो डा शीमी, चढ़ेतीक आ ४ कुना नु आ सुर नेल्लेम नु आगा लाडगा डा लाप्चो डा शीमी ब्रुइक्चा माल्ब।

20 मिनू सुडम ममिश्थु मतुडक्थु पाप पशो बाक्त हना, महिना डा ७ नाक्त गेपुकीम मो पचा मालनीनी। मोपा गे परमप्रभु यावे आ खिं कली यो पाप क्याम्तीक गेय पचा मालनीनी। लेवी ४:२२; लेवी ५:१७-१८

21 मिनू डोंइती डा महिना डा १४ नाक्ती गेपुकीम पास्सा चाड मानेचा मालनीनी। मेना गे ७ नाक्त सम्म बोरब ओरुती मसुप्शो शोब्ले जचा मालनीनी।

22 मेको नाक्त सासन पाइबमी आंम कली नु रागी डा मुर नेल्ल आन कली पाप आ परबम बोहोर का चढेचा मालब।

23 मिनू मेकोमी मेको चाड डा ७ नाक्त नेल्लेम मारेइ मदुम्शो ७ ओटा बोहोर नु ७ ओटा सांड नाक्त कित कित चोशा चढेचा मालब। मिनू चाड डा नाक्त कित कित पाप आ परबम बोका का का यो चढेचा मालब। गन्ती २८:१७-२५

24 मेको बोहोर का नु एफाह का अन्न चढेचा मालब। सांड का नु एफाह का अन्न चढेचा मालब। मिनू मेको का का पा, एफाह का कली हिन का तेल चढेचा मालब। एफाह का २२ लिटर पुक्तीके बाक्ब। हिन का ४ लिटर बाक्ब। इजीकीएल ४६:५; गन्ती १५:४-१२

25 मेकोम ७ महिना डा १५ नाक्त रे मेको ७ नाक्त डा चाड सम्म मेको मोदेशो चढेचा मालब। मेको पाप आ परबम चढेतीके, चोशा चढेतीके नु अन्न चढेतीके बाक्ब। मेको नु तेल यो चढेचा मालब” देंत। लेवी २३:३४

## 46

### नाक्त कित कित डा चढेतीक

1 मिनू परमप्रभु, परमप्रभु यावेमी “मेको आगा लाडगा डा पूर्व गे कोत्रशो ठेयब लाप्चो मेको गेय पतीक ६ नाक्त चौकशा वोइक्चा मालनीम। तन्न नाइक्तीक नाक्त नु औसी नाक्त रोकचा मालनीम।

2 सासन पाइब मेको पिंडी रे लाडगा डा लाप्चो रे पा ओत्रचा मालब। मिनू लाप्चो आ नेक्था राप्शा बाक्चा मालब। मिनू चढेबपुकीम सासन पाइब आ चोशा चढेतीक नु दुशा बाक्तीक आ परबम चढेतीक चढेचा मालनीम। मिनू सासन पाइबमी लाप्चो आ नेक्था राप्शा, खुम्की पा परमप्रभु यावे कली ठेयब सेल्चा मालब। मिनू नोले मेको लाडगा रे गूचा मालब। तन्न मेको लाप्चो नां मरिक्म सम्म रोकस डा रोकस बाक्चा मालब। इजीकीएल ४४:३

3 मिनू रागी डा मुरपुकीम मेको ठेयब लाप्चो आ नेक्था नाइक्तीक नाक्ती नु औसी नाक्ती खुम्की पा बाप्चा मालनीम।

4 मेको सासन पाइबमी परमप्रभु यावे कली नाइक्तीक नाक्ती मार चढेचा मालब देशा हना, चोशा चढेचा कली मारेइ मदुम्शो ६ ओटा पाठा नु सांड का चढेचा मालब। गन्ती २८:९-१०

5 मेको जचा थोत्रक चढेचा कली सांड नु एफाह का अन्न चढेचा मालब। मिनू पाठा नु अन्न गिश चढेचा दाक्बा, मिश चढेने चाप्ब। मिनू एफाह का का अन्न कली तेल चढेचा मालब। एफाह का २२ लिटर पुक्तीक बाक्ब। हिन का ४ लिटर खोदेशो बाक्ब। इजीकीएल ४५:२४

6 मिनू मेकोम औसी नाक्त कली मार चढेचा मालब देशा हना, मारेइ मदुम्शो बोहोर का ६ ओटा पाठा नु सांड का चढेचा मालब।

7 मिनू जचा थोत्रक चढेचा कली बोहोर नु एफाह का अन्न नु सांड नु एफाह का अन्न चढेचा मालब। मिनू पाठा नु अन्न गिश चढेचा दाक्बा, मिश चढेने चाप्ब। मिनू एफाह का का अन्न कली हिन का का तेल चढेचा मालब।

8 मिनू सासन पाइब ओत्रमेनु, मेको ठेयब लाप्चो डा पिंडी रे पा ओत्रचा मालब। नोले मेको आ ओत्रशो लां रेन लाडगा गूचा मालब।

### सासन पाइब आन चढेशो

9 मिनू रागी डा मुरपुकी देशो नाक्त डा चाडम परमप्रभु यावे कली ठेयब सेल्चा कली आ डोंइती जाक्तेक्म हना, मेको उत्तर डा ठेयब लाप्चो रे ओत्रचा मालनीम। नोले दक्खिन डा ठेयब लाप्चो रे पा गूचा मालनीम। सु चिहं दक्खिन डा ठेयब लाप्चो रे ओत्रनीमी, मेकोपुकी उत्तर डा ठेयब लाप्चो रे गूचा

माल्नीम। मेकोपुकी आगा ओव्रशो ठेयब लाप्चो रे लाडगा गूचा मदुम्नीम। आन ओव्रशो लाप्चो रे गूचा मदुम्नीम। ग्येत्थ पा अर्को ठेयब लाप्चो रे पा गूचा माल्नीम।

10 मेकोपुकी ओव्रमानु, सासन पाइब मेको नु ओव्रचा माल्ब। मिनु मेकोपुकी लाडगा गूमानु, मेको यो गूचा माल्ब।

11 मिनु चाडपुकी नु देशो नाक्त कली जचा थोव्रक चढ़ेचा कली बोहोर नु एफाह का अन्न नु सांड नु एफाह का अन्न चढ़ेचा माल्ब। मिनु पाठा नु अन्न गिश चढ़ेचा दाक्बा, मिश चढ़ेने चाप्ब। मिनु एफाह का का अन्न कली हिन का का तेल चढ़ेचा माल्ब। एफाह का २२ लिटर पुक्तीक बाक्ब। मेको ५ पाथी आधा खोदेशो बाक्ब।

12 मिनु सासन पाइबमी परमप्रभु यावे कली आ थुंम ग्येरशा चढ़ेतीक चढ़ेचा दाक्ताक्ब हना, चोशा चढ़ेतीक कि दुशा बाक्तीक आ पर्वम चढ़ेतीक चढ़ेचा दाक्ताक्ब हना, मेको ओव्रचा कली पूर्व डा ठेयब लाप्चो रोकशा गेचा माल्नीम। मिनु मेकोमी आ चोशा चढ़ेतीक नु दुशा बाक्चा आ पर्वम चढ़ेतीक, नाइक्तीक नाक्ती चढ़ेशो खोदेशो पा चढ़ेचा माल्ब। मिनु नोले मेको लाडगा लचा माल्ब। मिनु लम नोले मेको ठेयब लाप्चो चोक्चा माल्नीम।

13 मेकोमी परमप्रभु यावे कली नाक्त किंत किंत मारेइ मदुम्शो बर्स का गाप्शो पाठा का का सुनी कुस कुस चोशा चढ़ेचा कली गेचा माल्ब। प्रस्थान २८:३८-४२; गन्ती २८:३

14 मेको नु सुनी कुस कुस चढ़ेतीक नु एफाह डा ६ भाग डा भाग का अन्न, हिन का डा ३ भाग डा भाग का तेल रिम्शो फस ब्वाइक्चा कली चढ़ेचा माल्ब। एको परमप्रभु यावे कली अन्न चढ़ेतीक बाक्ब। मिनु मेको गेना हना यो परमप्रभु यावे कली अन्न चढ़ेतीक बाक्ब। एफाह का २२ लिटर पुक्तीक बाक्ब। हिन का ४ लिटर खोदेशो बाक्ब।

15 मिनु मेको पाठा, अन्न चढ़ेतीक नु तेल सुनी कुस कुस चाक्शा, चोशा चढ़ेचा माल्ब” देशो बाक्ब।

### सासन पाइब आ थेरशो रू

16 मिनु परमप्रभु, परमप्रभु यावेमी “सासन पाइबमी आ तौ का कली आ शोप रे रू गेप्टु हना, मेको आ तौ चच युइ आन के दुम्ल।

17 तन्न मेकोम आ थेरशो रू रे आ गेय पाइब कली गेप्टु हना, मेको प्रोइतीक बर्स सम्म ला मेको गेय पाइब आ शोप दुम्ब। नोले मेको लेंशा सासन पाइब केन दुम्ब। आ तौ कली गेशो रू चहिं मेको केन दुम्शा लीब। लेवी २५:१०; येरमीया ३४:८

18 सासन पाइबमी मुर आन थेरशो रू रे गुंइशा आ शोप सेल्ने मचाप्ब। मेकोम आ तौ आन कली रू गेचा दाक्ब हना, आ शोप रे गेचा माल्ब। मोपा सुइ आं मुर रू रोइक्चा मपुंइसीनीम” देंत। इजीकीएल ४५:८-९

### चढ़ेशो श्ये क्येतीक कोठा

19 मिनु नोले मेकोमी आं कली उत्तर गे डा ठेयब लाप्चो डा ओव्रतीक आ नेक्था रे पा, चढ़ेब आन कली तिल्शा वोइश्शो कोठाम लाइक्ती। मिनु मेकेर बाक्तीक आ पच्छिम गे बाक्तीक का ताता।

20 मिनु मेकोम आं कली “एकेर चढ़ेबपुकीम दोस आ पर्वम चढ़ेतीक नु पाप आ पर्वम चढ़ेतीक आन श्ये लोप्नीम। मिनु चढ़ेशो अन्न के मार मार चोइनीम। मोपा मेकोपुकीम चढ़ेशो थोव्रक लाडगा गे डा लाडगाम मयुंइनीम। मारदे हना मुर आन कली मरिम्शो मदुम्ल” देंत।

21 मिनु नोले मेकोमी आं कली लाडगा गे डा लाडगा डा ४ सुर कौइताक्यी।

22 मेको लाडगा गे डा लाडगा डा ४ सुरम ४ ओटा आइक्च लाडगा बाक्तेक्म। मेको नेल्ल खाल का डा ४० कुबीत लाइश्शो नु ३० कुबीत ब्रेम्शो बाक्तेक्म।

23 मेको नेल्ल आन एर ओथ गारो हिरशो बाक्तेक्म। मेको ४ ओटा लाडगामी आन सुर सुरम लहर पा चुप्लु बाक्तेक्म।

24 मिनु मेकोमी आं कली “एको क्येतीक बाक्नीम। एकेर परमप्रभु यावे आ ख्विम गेय पाइबपुकीमी मुर आन चढ़ेशो मार मार लोप्नीम” देंत।

## 47

परमप्रभु आ खिं रे यूशो खोला

1 मिनु नोले मेकोमी आं कली परमप्रभु यावे आ खिं आ ओव्रतीक लाप्योम लेशशा चाक्ती। मिनु गो मेको लाप्यो आ थेंकारे ब्वाक्कु यिशा, पूर्व गे शाइश्शो ताता। मारदे हना मेको परमप्रभु यावे आ खिं पूर्व गे कोव्रशो बाक्त। मिनु मेको ब्वाक्कु परमप्रभु यावे आ खिं आ दक्खिन चढ्हेतीक आ दक्खिन रे शाइश्शो बाक्त। उत्पत्ती २:१०-१४; योएल ४:१८; प्रकाश २२:१

2 नोले मेकोमी आं कली उत्तर गे डा ठेयब लाप्यो रे पा लाडगा गुंडताकयी। मिनु पूर्व गे लेशशो लाडगा डा लाप्यो रे पा हिरशा चाक्ती। मेको ब्वाक्कु दक्खिन गे शाइश्शो बाक्त।

3 मिनु मेको पुक्तीक डोरी का शेशा पूर्व गे लत। मिनु मेकोम हजार का कुबीत पुक्तु। मिनु नोले मेकोमी आं कली ब्वाक्कु शोकपाइक्ती। मेको ब्वाक्कु दिम्ला सम्म जाक्शो बाक्त। कुबीत का ०.५ मिटर बाक्ब। इजीकीएल ४०:३

4 मिनु लेंशा अर्को हजार का कुबीत पुक्तु। मिनु मेको ब्वाक्कुम शोकपाइक्ती। मेको ब्वाक्कु पोक्च सम्म जाक्शो बाक्त। मिनु मेकोम लेंशा अर्को हजार का कुबीत पुक्तु। मिनु मेकोमी आं कली मेको ब्वाक्कुम शोकपाइक्ती। मेको ब्वाक्कु क्रातो सम्म जाक्शो बाक्त।

5 मिनु मेकोम लेंशा अर्को हजार का कुबीत पुक्तु। मिनु गो मेको खोला शोक्ने मचबु। मारदे हना ब्वाक्कु बारशो बाक्त। मेको दोम्ली ग्यारचा डा दुम्लो बाक्त हना यो, शोक्ने मचाप्या डा बाक्त।

6 मिनु मेकोम आं कली “ए मुर, गे एको तवी” देंत। मिनु लेंशा खोला आ नेक्था लेप्पाइक्ती।

7 मिनु गो मेकेर जाक्डानु, मेको समुन्द्र आ ओंथ हांबु नु आइक्ची हांबु नेल्ल शुश रवा तातामी।

8 मिनु मेकोम आं कली “एको ब्वाक्कु पूर्व रागी गे लशा, उइ अराबाह गे लशो बाक्ब। मिनु मेको हिकसी समुन्द्रम ब्वाइसीब। मिनु मेकेर डा ब्वाक्कु रिम्लो दुम्ब।

9 मेको ब्वाक्कु शाइक्तीकेमी शुश खाल डा जन्तु बाक्नीम। मेकेर हिकने मचाप्या डा पा, डाइ बाक्नीम। मारदे हना मेको ब्वाक्कु मेकेर जाक्दीश्शो बाक्ब। मेको ब्वाक्कु रिम्लो दुम्लीके मेकेर मारेइ मारेइ ब्रॉइनीम। प्रस्थान १५:२३

10 मेको आ एर ओंथ नेल्लेम ग्याइल आप्बपुकी राप्नीम। एन-गेदी रे एन-एग्लै सम्म ग्याइल आप्तीक दुम्नीम। मेकेर ठेयब समुन्द्र खोदेशो पा शुश खाल डा डाइ बाक्नीम।

11 तन्न मेको समुन्द्र आ सिम नु हिलो बाक्तीके डा ब्वाक्कु रिम्लो मदुम्ब। मेको हिकसी गुंडचा कली बाक्नीम।

12 मेको समुन्द्र आ एर ओंथ नेल्ल शुश खाल डा फल फुल रवा वानीम। मेको आन सफा मसोव्रनीम। मेको आन फल गेनायो मनुप्नीम। मेको महिना महिनाम सित्नीम। मारदे हना मेको आन कली माल्लो ब्वाक्कु परमप्रभु यावे आ बाक्तीक रे लशो बाक्ब। मेको आन फल रूचा कली नु मेको आन सफा सापाइक्चा कली दुम्नीम” देंत। यसैया ३२:१५; प्रकाश २२:२

इस्त्राएल रागी डा सांद

13 मिनु परमप्रभु, परमप्रभु यावेमी “इस्त्राएल डा सांद आगा डा १२ थर आन थेशो रू दोपा योक्चा माल्नीनी देशा हना, योसेफ कली भाग निक्शी गेचा माल्नीनी। उत्पत्ती ४८:५; यहोसु १७:१७

14 मेको लीशो रागी इन दातेम उइक्थ उइक्थ पा योक्चा माल्नीनी। मिनु गो इन किकी पिपी आन कली गेनुड, दे कसम जतीके मेको रागी इन शोंप दुम्ब। उत्पत्ती १२:७

15 मेको रागी आ सांद ते बाक्चा माल्नीम देशा हना, उत्तर गे डा सांद ठेयब समुन्द्र रे हेथ्लोन डा लां, लेबो-हमाथ रे सेदाद सम्म दुम्ल्या माल्ब। गन्ती ३४:२-१२

16 मेको सांद बेरोथाह नु सिन्नैम सम्म दुम्ल्या माल्ब। मेको दमस्कस नु हमाथ आस दातेम बाक्शो बाक्नीस। मेको सांद हासेर-हात्तीकोन सम्म जाक्दीप्ब। मेको हौरान डा सांद आ नेक्था बाक्ब।

17 मिनु ठेयब समुन्द्र रे हासर-एनोन सम्म बाक्ब। मेको दमस्कस आ उत्तर गे बाक्ब। मेको आ उत्तर गे हमाथ आ सांद बाक्ब। मेको उत्तर डा सांद बाक्ब।

18 पूर्व गे डा सांद हौरान नु दमस्कस आस दातेम, यर्दन खोला आ नेक्था गिलाद नु इस्राएल रागी आस दातेमी बाकब। मेको पूर्व डा समुन्द्र नु तामार सम्म बाकब। मेको पूर्व डा सांद बाकब।

19 दक्खिन गे डा सांद तामार रे मेरीबाथ-कादेश डा ब्वाक्कु बाक्तीके सम्म दुम्चा माल्ब। मिनु मेकेर रे इजीप्त डा खोल्सा रे ठेयब समुन्द्र सम्म जाक्दीण्ब। मेको दक्खिन डा सांद बाकब। गन्ती २०:१३; गन्ती ३४:५

20 पच्छिम गे डा सांद ठेयब समुन्द्र लेबो-हमाथ आ डोंइती सम्म दुम्चा माल्ब। मेको पच्छिम डा सांद बाकब।

21 गे मेको रागी इन दातेम इस्राएल आ थर डा मुर आन कली योक्शा गेचा माल्नीनी।

22 गेपुकीम आंम इन थेरशो रू वोइक्चा माल्नीनी। इन दातेमी बाकब तमी तौ थिशो अर्को रागी डा मुर आन कली यो आन भाग योक्शा, गेचा माल्नीनी। गेपुकीम मेको आन कली इस्राएल रागीम जरमेशो आंम रागी डा मुर खोदेशो मिम्चा माल्नीनी। मिनु गेपुकी नु इस्राएल आ थर आन दातेम मेकोपुकीम आन थेरशो रू तचा माल्नीम। लेवी १९:३३-३४

23 मेको अर्को रागी डा मुरपुकी तेको थर डा बाक्तीकेम बाक्नीमी, मेकेर मेको आन कली आन थेरशो रू गेचा माल्नीनी” दे परमप्रभु, परमप्रभु यावेम देंत।

## 48

### इस्राएली आन कली रागी योक्शो

1 मिनु “मेको आन थर आन नें मार बाक्नीम देंशा हना, उत्तर गे डा सांद हेथ्लोन डा लां रे पा लेबो-हमाथ रे हासर-एनोन सम्म बाकब। हासर-एनान दमस्कस आ सांदम बाकब। मिनु हमाथ मेको आ उत्तर गे बाकब। मिनु मेको पूर्व रे पच्छिम सम्म बाकब। मेको दान आ थेरशो रू दुम्ब। इजीकीएल ४७:१५-१७

2 मिनु पूर्व रे पच्छिम दान आ सांद थिशो रू आशेर आ थेरशो रू दुम्ब।

3 मिनु पूर्व रे पच्छिम आशेर आ सांद थिशो रू नाप्ताली आ थेरशो रू दुम्ब।

4 मिनु पूर्व रे पच्छिम नाप्ताली आ सांद थिशो रू मनस्से आ थेरशो रू दुम्ब।

5 मिनु पूर्व रे पच्छिम मनस्से आ सांद थिशो रू एफ्राइम आ थेरशो रू दुम्ब।

6 मिनु पूर्व रे पच्छिम एफ्राइम आ सांद थिशो रू रूबेन आ थेरशो रू दुम्ब।

7 मिनु पूर्व रे पच्छिम रूबेन आ सांद थिशो रू यहूदा आ थेरशो रू दुम्ब।

8 मिनु पूर्व रे पच्छिम गे यहूदा आ सांद सम्म थिशो भाग का तिल्चा माल्नीनी। मेको २५ हजार कुबीत ब्रेम्शो नु आ लाइशशो पूर्व रे पच्छिम सम्म थर थर आन कली गेशो थेरशो रू खोदेशो लाइशशो दुम्चा माल्ब। मिनु परमप्रभु यावे आ बाक्तीक मेको आ दातेम दुम्चा माल्ब। कुबीत का ०.५ मिटर बाकब। इजीकीएल ४५:१-८

9 परमप्रभु यावे कली गेशो तिल्शो भाग चहिं २५ हजार कुबीत लाइशशो नु २० हजार कुबीत ब्रेम्शो दुम्चा माल्ब।

10 मिनु मेको परमप्रभु यावे कली गेशो तिल्शो भाग चढ़ेब आन कली दुम्ब। मेको भाग उत्तर गे २५ हजार कुबीत लाइशशो, पच्छिम गे १० हजार कुबीत ब्रेम्शो, पूर्व गे १० हजार कुबीत ब्रेम्शो नु दक्खिन गे २५ हजार कुबीत लाइशशो दुम्चा माल्ब। मिनु परमप्रभु यावे आ बाक्तीक मेको आ दातेम दुम्चा माल्ब।

11 मिनु मेको परमप्रभु यावे कली चढ़ेब आन भाग दुम्चा माल्ब। आं गेय पाइब सादोक आ चच युइ आन के दुम्ब। मेकोपुकी इस्राएली नु लेवीपुकी हेंथे गाक्तेकम हना यो, मेकोपुकी हेंथे मगाक्थु, आं गेय पांमतेकम। इजीकीएल ४०:४६

12 मिनु मेको आन कली परमप्रभु यावे कली तिल्शो रागी रे आन भाग दुम्ब। मेको आन नेल्ल क्येडा चोव्रखो बाक्तीक भाग, लेवी आन थेरशो रू थिशो बाकब।

13 चढेब आन थेरशो रू आ नेक्था लेवी आन थेरशो रू दुम्चा माल्ब। मेको २५ हजार कुबीत लाइशो नु २० हजार कुबीत ब्रेम्शो दुम्चा माल्ब। मेको आ लाइशो नेल्ल २५ हजार कुबीत नु आ ब्रेम्शो नेल्ल १० हजार कुबीत दुम्चा माल्ब।

14 मिनु मेकोपुकीमी मेको थेरशो रू लेयचा नु फाइक्या मदुम्नीम। मेको रू नेल्ल क्येडा रिम्शो बाक्ब। मिनु मेको सुइ आन कली गेने मचाप्नीम। मारदे हना मेको परमप्रभु यावे आ रू बाक्ब।

15 मिनु मेको लीशो ५ हजार कुबीत ब्रेम्शो नु २५ हजार कुबीत लाइशो रू सहर कली बाक्ब। मेको मुर बाक्तीके नु सहर आ दाते डा रू दुम्चा माल्ब।

16 मेको लीशो रू उत्तर गे ४ हजार ५ सहे कुबीत, दक्खिन गे ४ हजार ५ सहे कुबीत, पूर्व गे ४ हजार ५ सहे कुबीत नु पच्छिम गे ४ हजार ५ सहे कुबीत दुम्चा माल्ब। प्रकाश २१:१६

17 मिनु मेको सहर डा रू दुम्चा माल्ब। मिनु मेको लीशो सहर डा रू उत्तर गे सहे निकशी ५० कुबीत, दक्खिन गे सहे निकशी ५० कुबीत, पूर्व गे सहे निकशी ५० कुबीत नु पच्छिम गे सहे निकशी ५० कुबीत दुम्चा माल्ब।

18 मेको परमप्रभु यावे आ बाक्तीक आ सांद थिशा लीशो रू पूर्व गे १० हजार कुबीत नु पच्छिम गे १० हजार कुबीत दुम्चा माल्ब। मेको परमप्रभु यावे आ खिं आ का पटटी गे बाक्चा माल्ब। मेकेर सहरम गेय पाइब आन कली जचा थोत्रक लेयतीक दुम्चा माल्ब।

19 सहरम गेय पाइब इस्त्राएल आ थर डा मुर नेल्लेमी मेकेर बाक्शा, गेय पाइनीम।

20 गेपुकीमी तिल्लो बाक्तीक रू नेल्ल २५ हजार कुबीत ब्रेम्शो नु २५ हजार कुबीत लाइशो दुम्चा माल्ब। मेको ४ पाटे दुम्ब। मेको परमप्रभु आ भाग नु सहर डा बाक्तीके बाक्ब।

21 मेको परमप्रभु यावे आ भाग नु सहर डा का पटटी गे लीत हना, सासन पाइब के दुम्चा माल्ब। मेको पूर्व गे परमप्रभु यावे कली तिल्लो २५ हजार कुबीत पूर्व डा सांद गे नु पच्छिम गे बाक्शो २५ हजार कुबीत पच्छिम डा सांद गे बाक्ब। मेको आ लाइशो थर थर आन रू रू गे लाइब। मेको सासन पाइब के दुम्ब। मिनु परमप्रभु यावे आ खिं मेको आ दातेम बाक्ब। इजीकीएल ४५:७

22 मिनु लेवी आन रू नु सहर डा रू आन दातेमी मेको सासन पाइब आन रू बाक्ब। यहूदा नु बेन्यामीन आस दातेमी बाक्शो रू यो सासन पाइब आन के बाक्ब।

अरु थर आन थेरशो रू

23 मिनु लीशो थर आन कली पूर्व रे पच्छिम सम्म बेन्यामीन आ थेरशो रू,

24 पूर्व रे पच्छिम सम्म बेन्यामीन आ सांद थिशा सिमियोन आ थेरशो रू,

25 पूर्व रे पच्छिम सम्म सिमियोन आ सांद थिशा इस्साकार आ थेरशो रू,

26 पूर्व रे पच्छिम सम्म इस्साकार आ सांद थिशा जबूलून आ थेरशो रू,

27 पूर्व रे पच्छिम सम्म जबूलून आ सांद थिशा गाद आ थेरशो रू,

28 मिनु दक्खिन गे गाद आ थेरशो रू डा सांद तामार रे मेरीबाथ-कादेश डा ब्वाक्कु बाक्तीक सम्म नु इजीप्त डा खोल्सा आ नेक्था रे पा ठेयब समुन्द्र सम्म दुम्चा माल्ब। इजीकीएल ४७:१९

29 गेपुकीम मेको रागी डा रू इस्त्राएल आ थर डा मुर आन कली आन थेरशो रू दुम्पाइशा योक्शा गेचा माल्नीनी। मिनु मेकोन मेको आन भाग दुम्ब” दे परमप्रभु, परमप्रभु यावेमी दैत।

यरूसलेम सहर डा ठेयब लाप्चो

30 परमप्रभु यावेमी “सहर डा गारो रे लाडगा ग्यूतीक ते दुम्चा माल्नीम दैशा हना, उत्तर गे डा गारो पुक्शा ४ हजार ५ सहे कुबीत लाइशो दुम्चा माल्ब। कुबीत का ०.५ मिटर बाक्ब।

31 ठेयब लाप्चो आन नें इस्त्राएल आ थर आन नें खोदेशो दुम्चा माल्नीम। उत्तर गे डा गारो डा ठेयब लाप्चो सां, रूबेन आ लाप्चो, यहूदा आ लाप्चो नु लेवी आ लाप्चो दुम्नीम।

32 मिनु पूर्व गे डा गारो ४ हजार ५ सहे कुबीत लाइशो दुम्चा माल्ब। पूर्व गे डा गारो डा ठेयब लाप्चो सां, योसेफ आ लाप्चो, बेन्यामीन आ लाप्चो नु दान आ लाप्चो दुम्नीम।

33 मेको दक्खिन गे डा गारो ४ हजार ५ सहे कुबीत लाइशो दुम्चा माल्ब। दक्खिन गे डा गारो डा टेयब लाप्चो सां, सिमियोन आ लाप्चो, इस्साकार आ लाप्चो नु जबूलून आ लाप्चो दुम्नीम।

34 मेको पच्छिम गे डा गारो ४ हजार ५ सहे कुबीत लाइशो दुम्चा माल्ब। पच्छिम गे डा गारो डा टेयब लाप्चो सां, गाद आ लाप्चो, आशेर आ लाप्चो नु नाप्ताली आ लाप्चो दुम्नीम।

35 मिनु सहर आ एर ओंथ हिरशो गारो १८ हजार कुबीत दुम्ब। मेना रे मेको सहर आ नें 'परमप्रभु यावे मेकेर बाक्ब' देशो नें वोइक्चा माल्ब" दे परमप्रभु यावेमी देंत। इजीकीएल ४३:७; यसेया ६०:१४; प्रकाश २१:३

## दानीएल

**ब्रेकब मुर:** दानीएल यरूसलेम सहरम जरमेशो बाक्त। मेको रिमशो पिप योसीयाहम सासन पवा ना कोलत। दानीएलमी परमप्रभु यावे आ लोव्र पाइब येरमीया नु सेफन्याह आस लोव्र नेशो बाक्त। मेको २० बर्स खोदेशो दुम्मेनु, आ वारच नु ग्याइशशा बेबीलोन रागी लाइक्चा पुंडसीशो बाक्त। माइत किताबपुकीमी एको किताब ब्रेकब दानीएल बाक्ब, दे नेल्लेम ब्रेकशो बाक्नीम। एको किताब डा लोव्र कोइ हिब्रू नु कोइ आरामेइक लोव्रमी ब्रेकशो बाक्ब। दानीएलमी मुर कली ब्रेकपाइशशो बाक्म कों आंमा ब्रेकशो बाक्म मेको मतुंडसीब।

**गेना ब्रेकशो:** दानीएल नेबुकदनेसर पिप दुमशो ६०४-५६१ बि. सी. रे कोरेस पिप दुमशो बर्स सां सम्म बाक्शो बाक्त। मेको बेबीलोनम बाक्ची ना ७० बर्स खोदेशो दुमशो बाक्त। एको किताब ६०६-५३५ बि. सी.म ब्रेकशो बाक्त।

**मार ब्रेकशो:** दानीएलमी पिप आन राज्य नु परमप्रभु यावे आ राज्य कोंइचा कली ब्रेकशो बाक्त।

परमप्रभु यावेमी सु सु कली रागी कली सासन पाइब सेल्चा दाक्बा, मेको पाइब।

१. दानीएल नु आ वारच आन परबम लोव्र बाक्ब। दानीएल १:-६:-

२. दानीएल कली कोंइशो आ परबम लोव्र बाक्ब। दानीएल ७:-१२:-

### दानीएल बेबीलोनम बाक्शो

१ यहूदा रागीमी येहो-याकीम पिप दुमशो बर्स सां दुमशो बाक्माक्त। मेना बेबीलोन डा पिप नेबुकदनेसर जाक्शा, यरूसलेम सहर कली पुम्ताक्मे। २राजा २४:१-२

२ मिनू परमप्रभुमी यहूदा डा पिप येहो-याकीम कली बुपाइक्तु। मिनू परमप्रभुमी आ खिं डा बोस का निक्शी यो मेको कली गेप्टु। मिनू नेबुकदनेसरमी मेको बोसपुकी शिनार रागीमी लाइशशा, आ देवता आ खिं डा मार मार शोंप वोइक्तीके कोठाम वोइक्तु। शिनार रागी बेबीलोन रागी बाक्ब। उत्पत्ती ११:२

३ मिनू पिपमी आ दरवार डा ठेयब गेय पाइब अशपेनास कली “ग्याइशशा लाइक्चा पुंडसीशो इस्माली, पिप आ खिं डा नु ठेयब मुर आन खिं डा मुर आन कली योव्रशा एक चाक्को। २राजा २०:१८

४ गे ठिटा वोंइश मुर, मारेइ मदुमशो रिमशो रं पाइशशो, दारशो, शुश निप्स पाइशशो, जोक्ब तुइक्ब, रुप्तीके थुं पाइशशो नु पिप आ दरवारमी गेय पने चाप्ब आन कली योव्रडी” दे अरेवा बाक्त। मिनू मेको आन कली कल्दी आन ब्रेक्स नु लोव्र शेंचा माल्बाक्माक्त।

५ मिनू पिपमी “मेको आन कली पिप आ खिं डा जचा थोव्रक नु अडगुर शांबु गेचा माल्ब” दे अरेशो बाक्माक्त। मिनू मेको आन कली बर्स सां सम्म शेंशा, पिप आ खिंम गेय पपाइक्चा कली चाक्चा माल्बाक्माक्त।

६ मिनू मेको योव्रचा पुंडसीशो आन दातेमी यहूदा आ थर डा दानीएल, हनान्याह, मीशाएल नु अजारयाह बाक्तेक्म।

७ मिनू दरवार डा ठेयब गेय पाइबमी मेको आन नें फाइशशा, दानीएल कली बेल्ल-शजर, हनान्याह कली शद्रक, मीशाएल कली मेशक नु अजारयाह कली अबेद-नेगो वोदा बाक्त।

८ मिनू दानीएलमी पिप आ गेशो जचा नु तूचा थोव्रक जशा तूशा आंम कली ग्रान्रा दिशो मसेल्सीनुड, दे मिम्ता बाक्त। मोपतीके दानीएलमी पिप आ ठेयब गेय पाइब कली “आं कली मोदेशो जचा तूचा गेशा, ग्रान्रा दिशो दुम्चा मंगेयीनी” दे पुंडतु। लेवी ११:-

९ मिनू परमप्रभुमी पिप आ ठेयब गेय पाइब आ थुंमी दानीएल कली शिशी पा दाक्तीकेमी प्रिंदा बाक्त। उत्पत्ती ३९:२१



10 मिनु पिप आ ठेयब गेय पाइबमी दानीएल कली “गो आं प्रभु, आं पिप नु शुश हिंनुड। मेकोमी इन कली मार मार जचा तूचा थोवक गेचा, दे अरेशो बाक्त। मेकोमी इन वारच क्येडा इन कली गेयशो ताप्टु हना, आं कली साइकब” दैत।

11 मिनु नोले दानीएलमी पिपमी आ दरवार डा ठेयब गेय पाइब आन कली कोव्रब मुर कली, आंम आ पर्वम नु हनान्याह, मीशाएल नु अजारयाह आन पर्वम लोव्र पाप्टु।

12 मिनु दानीएलमी “गे इन गेय पाइब आंइ कली १० नाक्त सम्म कोव्रडीन। जचा कली गिग खाड नु तूचा कली ब्वाक्कु ला गेकी।

13 मिनु नोले गो आंइ कली पिप आ गेशो, आ खिं डा जचा थोवक जाडब तूबपुकी नु थाप्शा कोव्रकी। मिनु दोदेशो ताइनीनी मोदेशो पाइक्की” दे माइक्कु।

14 मिनु कोव्रबमी मेको लोव्र बिश्शा, १० नाक्त सम्म आन देशो खोदेशो पाप्टु।

15 मिनु १० नाक्त जाक्दीम्मेनु, पिप आ गेशो जचा थोवक जाडब टिटा नेल्ल आन क्येडा दानीएल नु आ वारच रिम्शो नु दोम्शो तांइसाक्म।

16 मोपतीके मेको कोव्रबमी मेको आन कली गेचा देशो पिप आ जचा तूचा थोवक प्रोइशा, गिग खाड ला गेम्तीमी।

17 मिनु परमप्रभुमी मेको ४ जना आन कली नेल्ल ब्रेक्तीकेमी नु तुइक्तीकेमी जोक्ब तुइक्ब सेला बाक्त। मिनु दानीएल कली मार पचा, दे ततीके नु डोमु रुप्तीक थुं यो गेप्टु। इजीकीएल २८:३

### दानीएल नु आ वारच योव्रसीशो

18 मिनु पिप आ देशो नाक्ती आ दरवार डा ठेयब गेय पाइबमी मेको टिटा नेल्ल आन कली पिप नेबुकदनेसर आ डोंइती राप्पाइक्तीमी।

19 मिनु पिपमी मेकोपुकी नु लोव्र पाप्टु। मिनु दानीएल, हनान्याह, मीशाएल नु अजारयाह खोदेशो जोक्ब तुइक्ब आ रागीमी अरु सुइ मथिद। मोपतीके मेको ४ जना पिप आ दरवारम गेय पचा कली योव्रचा पुंइसाक्म।

20 मिनु पिपमी आ मालशो रुप्तीके नु तुइक्तीके आ पर्वम हिल्लो पवानु, आ रागी डा जादू नु मन्तर तन्तर पाइब नेल्ल आन क्येडा मेको ४ जना आन कली १० खेयप शुश जोक्ब तुइक्ब ताप्टु।

21 मिनु दानीएलमी पिप कोरेस आ सासन पशो आ डोंइती डा बर्स सम्म मेकेर गेय पाप्टु। एज्रा १:१

## 2

### पिप नेबुकदनेसरमी डोमु तशो

1 मिनु पिप नेबुकदनेसर आ सासन पशो बर्स निकशी जाक्दीम्मेनु, मेको पिपमी डोमु का तवा बाक्त। मिनु डोमु तशा नोले मेको मार पड, दो पड दुम्शा, आं थुं ग्येथ लुकच दुम्शा, लेंशा इप्ने मचबा बाक्त।

2 मिनु मेको पिपमी आ डोमु मार बाक्मे, दे तुइक्चा कली “जादू, मन्तर तन्तर पाइब, टुना मुना पाइब नु सोरुल कोव्रब कल्दी आन कली चाक्चा माल्नीनी” दे हुकुम पाप्टु। मिनु मेकोपुकी पिप आ डोंइती जाक्शा राप्तेक्म। यसैया ४७:१२-१३

3 मिनु पिपमी मेको आन कली “गो डोमु का ताता। मेको तशा, आं थुं ग्येथ लुकच दुम्त” दैत।

4 मिनु सोरुल कोव्रब कल्दीपुकीमी आरामेइक लोव्र पा पिप कली “पिप, शुश ब्रोंइशा बाक्कीन। इन वाइल आन कली इन तशो डोमु शोव्रडीन। मिनु गो, इन वाइलपुकीमी, मेको रे मार रुम्सीबा मेको शेंनीकी” दैतेक्म।

5 मिनु पिपमी सोरुल कोव्रब कल्दी आन कली “गो मेको आ पर्वम हुकुम पाता। गेपुकीमी आं डोमु नु मेको रे मार रुम्सीबा, मेको शोव्रने मचाप्तीनी हना, इन गुइ खोइल खोइश्शा, साइक्नन्नी। मिनु इन खिं प्रेशा गेनन्नी।

6 तन्न आं तशो डोमु नु मेको रे मार रुम्सीबा, मेको शोव्रतीनी हना, गो इन कली मार मार रिम्शो थोव्रक, इनाम नु ठेयब मान गेनुड। मोपतीके आं तशो डोमु शोव्रशा, मेको रे मार रुम्सीबा, शेंदीनी” दे माइक्तीमी।

7 मिनु मेकोपुकीमी लेंशा पिप कली “पिपमी इन वाइल, आंड कली डोंडती इन तशो डोमु शोव्रडीने। मिनु नोले गोपुकीमी मेको रे मार रुम्सीबा इन कली शेंनीकी” देतेकम।

8 मिनु पिपमी “गो थमा पा तुइक्नुड, गेपुकीमी आं कली क्योल्नीनी। मारदे हना इन कली साइक्तीक हुकुम थमा बाक्ब।

9 गेपुकीमी आं कली आं तशो डोमु शोव्रने मचाप्तीनी हना, गे साइक्चा पुंडसीनीनी। गे आं कली जोल पा, शेंखु पतीक आ पबंम गारशो बाक्नीनी। मोपतीके आं कली आं तशो डोमु मशोव्रतीनी हना, आ अर्थ मार बाक्बा, दे शेंने मचाप्तीनी, दे तुइक्नुड” दे माइक्तीमी।

10 मिनु सोरुल कोव्रक कल्दीपुकीमी पिप कली “एको रागी नेल्लेमी पिप आ हिल्लो पशो लोव्र शोव्रने चाप्व सुइ मबाक्नीम। ठेयब नु सक्ति पाइशशो पिपमी जादू, मन्तर तन्तर पाइब नु सोरुल कोव्रक कल्दी आन कली सुइम मोदेशो लोव्र गेनायो हिल्लो मपाम।

11 पिपमी हिल्लो पशो लोव्र सुइमी शोव्रने मचाप्चा डा बाक्ब। देवी देवतामी ला तुइक्पाइक्ने चाप्तीम। तन्न मेको देवी देवता मुर आन दातेमी मबाक्नीम” देतेकम।

12 मिनु मेको लोव्र नेंशा, पिप शुश गाइशशा, बेबीलोन रागीम बाक्ब जोक्ब तुइक्ब नेल्ल आन कली साइक्चा नम, दे हुकुम पाप्तु।

13 मिनु पिपमी जोक्ब तुइक्ब मुर नेल्ल आन कली साइक्चा माल्ब देंशो लोव्र ब्रेक्शा गुंडताक्व। मिनु मेको देंशो खोदेंशो पा दानीएल नु आ वारच आन कली यो साइक्चा कली माल्तेकम।

### दानीएल नु आ वारच साइक्चशो

14 मिनु दानीएलमी मेको नेंशा, शुश मिम्शा, पिप आ साइक्तीक गेय पाइब अरयोक नु लोव्र पाप्तु। मेको बेबीलोन डा जोक्ब तुइक्ब मुर आन कली साइक्चा कली लशो बाक्त। दानीएल १:२०

15 मिनु दानीएलमी मेको पिप आ गेय पाइब कली “मारदे पिप आ हुकुम मोदेशो रीब पा पचा माल्नीमी? दे हिल्लो पाप्तु। मिनु अरयोकमी दानीएल कली नेल्ल शेंताक्व।

16 मिनु मेको तुइक्ता नोले दानीएल पिप आ बाक्तीकम लशा ‘इच्का नाक्त रिम्दीन। मिनु गो मेको डोमु नु मेको आ अर्थ इन कली शोव्रनन्नी” दे पुंडतु।

### दानीएल नु आ वारचपुकी

17 मिनु नोले दानीएल आ खिं लशा, आ वारच हनान्याह, मीशाएल नु अजारयाह आन कली मेको लोव्र नेंपाइक्तु।

18 दानीएलमी मेको आन कली “गोपुकी नु बेबीलोन डा जोक्ब तुइक्ब नेल्ल साइक्चा मपुंडसीचा कली स्वर्ग डा परमप्रभु कली मेको खुइशशो डोमु तुइक्पाइसीचा कली आ शिशी पुंडय” देंत।

19 मिनु मेको नाक्दो परमप्रभुमी दानीएल कली कोंडतीकेमी मेको खुइशशो डोमु नु आ अर्थ कोंडताक्व। मिनु दानीएलमी स्वर्ग डा परमप्रभु कली

20 “परमप्रभु, इन नें गेना हना यो ठेयब बाक्ब। मारदे हना सक्ति नु जोक्ब तुइक्ब थुं इन केन बाक्ब।

21 गे हिउंद नु बर्खा फाइक्ब, पिप आन कली वोइक्ब नु तिल्ल बाक्नीनी। गे जोक्ब तुइक्ब आन कली तुइक्तीक थुं गेनीनी। मिनु रुप्व थुं पाइशशो मुर आन कली जोक्तीक थुं गेनीनी। दानीएल ४:१४, २२, २९

22 गे ठेयब नु खुइशशो लोव्र तुइक्पाइक्नीनी। छिडछिडम बाक्शो मारेइ मारेइ नेल्ल तुइक्नीनी। मारदे हना गे छेडछेडम बाक्नीनी।

23 आं किकी पिपी आन परमप्रभु, गो इन कली ‘गे रिम्शो पाइब बाक्नीनी। गे नेल्ल क्येडा ठेयब बाक्नीनी। मारदे हना गे आं कली तुइक्तीक थुं नु सक्ति गेतीनी। मिनु आंड पुंडशो नेल्ल गेतीनी। पिप आ तुइक्चा माल्शो नेल्ल आंड कली तुइक्पाइक्तीनी” दे परमप्रभु कली ठेयब सेल्शा, देंत।

### दानीएल पिप आ बाक्तीक लशो

24 मिनु दानीएल बेबीलोन रागी डा जोक्ब तुइक्ब मुर नेल्ल आन कली साइक्चा, दे योत्रचा पुंडसीशो मुर अरयोक् आ बाक्तीकमी लशा, मेको कली “बेबीलोन रागी डा जोक्ब तुइक्ब मुर आन कली मसतीन। आं कली पिप आ डोंइती चाक्दीय्यीनी। मिनु गो पिप कली आ डोमु शोत्रनुड। मिनु मेको रे मार रुम्सीबा नेल्ल शेंनुड” देंत।

25 मिनु अरयोक्मी दानीएल कली दोरोर पा पिप आ डोंइती चाक्दीशशा, पिप कली “गो यहूदा रागी रे ग्याइशशा चाक्चा पुंडसीशो मुर आन दातेमी इन डोमु आ अर्थ शोत्रने चाप्ब मुर का थित्ता” देंत।

26 मिनु पिपमी बेल्ल-शजर नें वोइशशो दानीएल कली “गे आं तशो डोमु शोत्रशा, मेको आ अर्थ मार बाक्बा मेको शेंने चाप्नेवे?” दे हिल्लो पाप्तु।

27 मिनु दानीएलमी पिप कली “पिप, इन हिल्लो पशो खुइशशो लोत्र जोक्ब तुइक्ब, मन्तर तन्तर पाइब जादू नु चिन्ड आ अर्थ तुइक्ब सुइमी यो देंने मचाप्नीम।

28 तन्न स्वर्गमी परमप्रभु का बाक्ब। मेकोमी खुइशशो लोत्र कोंइब। मिनु मेकोमी पिप नेबुकदनेसर, इन कली रागी नुप्ची ना मार दुम्बा, दे कोंइशो बाक्ब। मिनु इन इप्ची ना तशो डोमु मार बाक्त देशा हना, उत्पत्ती ४१:१६

29 गे इन इप्ची ना नोले ‘मार दुम्बा?’ दे मिम्ताक्नी। मिनु नोले मार दुम्बा, दे कोंइबमी मेको इन कली तुइक्पाइक्तु।

30 गो मुर नेल्ल आन क्येडा शुश रुप्ने मचाप्नुड। तन्न इन डोमु आ अर्थ तुइक्पाइक्चा नु इन थुं डा लोत्र रुप्पाइक्चा कली परमप्रभुमी मेको आं कली तुइक्पाइशशो बाक्त। उत्पत्ती ४१:३९

### पिप आ तशो डोमु

31 हजुर, गे कोत्रशा बाक्नीनु, इन डोंइती ठेयब मूर्ति का राप्शो ताइतीनी। मेको मूर्ति थम ठेयब नु थाम्पान टल्केशो बाक्त। मिनु इन डोंइती शुश हिंचा डा मूर्ति का राप्शो ताइतीनी।

32 मेको आ पिया क्येख सुन के बाक्त। आ कुचु नु गुड चांदी के नु आ कोत्रज नु फिला कांसा के बाक्तेक्म।

33 मेको आ पोक्च फलाम के बाक्त। मिनु आ खोइली फलाम नु खप ब्वाइसीशो बाक्त।

34 गे मेको कली कोत्रशा बाक्नीनु, फुल्लु का यित। तन्न मेको फुल्लु मुर आन गुइम मख्रोइशशो बाक्त। मेकोमी मूर्ति आ फलाम नु खप ब्वाइसीशो खोइलीमी खाप्तु। मिनु मेको मूर्ति कली प्रोल्शा, रोब चिब सेल्लु

35 मिनु मेको फलाम, खप, कांसा, चांदी नु सुन नेल्ल ब्रोल चिल दुम्तेक्म। मिनु फशेमी खला डा भूस हरशा लाइशशो खोदेशो पा मारेइ मवोइक्थु, ग्यौ फिक्शा योल्लाक्व। मिनु मेको मूर्ति कली खशो फुल्लु बारना बारन लशा, ठेयब डांडा दुम्शा, रागी नेल्ल ब्रीत।

### डोमु आ अर्थ

36 इन तशो डोमु एकोन बाक्त। मुल पिप इन कली मेको डोमु आ अर्थ शेंनुड।

37 हजुर, गे पिप आन पिप बाक्नीनी। स्वर्ग डा परमप्रभुमी इन कली राज्य, सक्ति, अधिकार नु शुश मान गेशो बाक्ब। इजीकीएल २६:७

38 मिनु मेकोमी तेइ तेइ बाक्ब मुर, ब्वाकी डा जन्तु नु सरीडम बेरब चिक्ब नेल्ल आन कली इन कली गेशो बाक्ब। मिनु गे मेको नेल्ल आन कली सासन पाइनीनी। गे मेको मूर्ति आ सुन के पिया बाक्नीनी। येरमीया २७:६; येरमीया २८:१४

39 मिनु इन नोले इन क्येडा ग्युम्शो राज्य का जाक्ब। मिनु मेको आ नोले डा अरु कांसा के खोदेशो राज्य का जाक्ब। मिनु मेकोमी रागी नेल्ल आन कली अधिकार पाइब।

40 मिनु मेको आ नोले फलाम खोदेशो बोल्यो अर्को राज्य का जाक्ब। दोपा फलाममी मारेइ मारेइ रोबल चिबल सेल्बा, मोपान मेको राज्यमी अर्को राज्य नेल्ल आन कली ब्रोले चीले पा तेइ तेइ फ्राइब।

41 मिनु इन तशो फलाम नु खप ब्वांडसीशो खोइली नु ब्रेप्चोपुकी खोदेशो पा ब्राशो राज्य का यो जाक्ब। तन्न मेको राज्य फलाम खोदेशो इच्का बोल्यो बाक्ब। मेको फलाम खप ब्वांडसीशो बाक्त हना यो, मेको फलाम खोदेशो पा इच्का बोल्यो बाक्ब।

42 मिनु खोइली डा ब्रेप्चोपुकी फलाम नु खप ब्वांडसीशो बुद पा मेको राज्य सक्ति पाइशो बोल्यो नु सक्ति मपाइशो बाक्ब।

43 इन तशो फलाम नु खप ब्वांडसीशो खोदेशो पा मेको राज्य डा मुरपुकी ग्युंवे पा ब्वांडसीनीम। मिनु फलाम नु खप मगारशो बुद पा मेको राज्य यो का दुम्शा, लीने मचाप्ब।

44 मेको पिप आन पालामी स्वर्ग डा परमप्रभुमी अर्को राज्य का सेल्ब। मेको राज्य गेनायो ब्रोल चिल मदुम्ब। मेको राज्य डा मुर खाल का डा बाक्नीम। मेकोमी अरु राज्य नेल्ल आन कली रोब चिब पा थुम्पाइक्ब। तन्न मेको आ राज्य गेना हना यो लीब। दानीएल १४:२७; यसैया ९:६; १कोरिन्थी १५:२४; प्रकाश ११:१५

45 मिनु गे दोदेशो पा मुरुमी मखोइक्थु डांडा रे फुल्लु का यिशो ताइतीनी। मिनु मेकोम फलाम, कांसा, खप चांदी नु सुन नेल्ल कली रोबल चिबल पोक्गा, मोदेशो पा ठेयब परमप्रभुमी 'नोले मार दुम्बा' दे पिप, इन कली कोइशो बाक्ब। एको डोमु नु आ अर्थ यो थमा बाक्ब" देत।

### दानीएलमी मान तशो

46 मिनु पिप नेबुकदनेसरमी खुम्की पा दानीएल आ डोंइती बाप्शा, मेको कली ठेयब सेल्लु। मिनु "दानीएल कली अन्न नु धूप चढेचा" दे हुकुम पाप्तु।

47 मिनु पिपमी दानीएल कली "थमान, इन परमप्रभु देवी देवता आन परमप्रभु नु पिप आन परमप्रभु बाक्ब। मिनु खुइशो लोत्र तुइक्पाइक्ब बाक्ब। मोपतीके गे एको खुइशो लोत्र रुप्पाइक्ने चाप्तीनी" देत। दानीएल ३:२९; यहोसु २:११; भजन संग्रह ८६:८; यसैया ४२:८

48 मिनु पिपमी दानीएल आ मान बारपाइक्तु। मिनु शुश शोप गेप्तु। मिनु बेबीलोन रागी नेल्ल कली हुकुम पाइब नु जोक्ब तुइक्ब मुर नेल्ल आन ठेयब मुर सेल्लु।

49 मिनु दानीएलमी "शद्रक, मेशक नु अबेद-नेगो आन कली बेबीलोन रागी डा सासन पतीक गेय गेचा" दे पिप नु लोत्र पा पुंइतु। दानीएल चहिं पिप आ दरवारमीन बाक्त। दानीएल ३:१२

## 3

### नेबुकदनेसर आ सुन के मूर्ति

1 मिनु पिप नेबुकदनेसरमी सुन के मूर्ति का सेल्लु। मेको मूर्ति ६० कुबीत ग्येल्थ लाइशो नु ६ कुबीत पित्थ ब्रेम्शो बाक्त। मिनु मेको कली बेबीलोन डा दुरा माइशो दिंममी राप्पाइशो वोइक्तु। कुबीत का आधा मिटर खोदेशो बाक्ब।

2 मिनु पिप नेबुकदनेसरमी मेको मूर्ति सेल्ले थुम्शा, पूजा गोतीके नाक्त मानेचा कली पारसी रागी डा हुकुम पाइब नेल्ल, अर्ती गेब, क्येट कोत्रशा हिक्ब, निसाफ पाइब, लल पिया आन ठेयब मुर नु सरकार डा अधिकार ताइब नेल्ल आन कली ब्रेल्लाक्व।

3 मिनु मेको पारसी रागी डा हुकुम पाइब नेल्ल, अर्ती गेब, क्येट कोत्रशा हिक्ब, निसाफ पाइब, लल पिया आन ठेयब मुर नु सरकार डा अधिकार ताइब नेल्ल पिप नेबुकदनेसर आ राप्पाइशो मूर्ति कली पूजा गोतीके नाक्ती बुक्तेक्म। मिनु मेकोपुकी मेको मूर्ति आ डोंइती राप्शा बाक्मानु,

4 लोत्र पाइब मुर कामी ठेयब सेंदा पा "नेनीन, जात जात डा, रागी रागी डा नु आम आम लोत्र पाइब मुर नेल्ल, इन कली अरेतीके लोत्र का बाक्ब।

5 गे गोत्र, मुराली, ठेयब नु आइक्च तार पाइशो नु मार मार ताप्तीक ताप्शो नेनीनु, पिप नेबुकदनेसरमी राप्पाइशो सुन के मूर्ति आ डोंइती खुम्की पा बाप्शा, सेउ पचा मालनीनी।

6 मिनु सु सुमी मोदेशो मपाइनीमी, मेको ठेयब मी ब्रतीकेमी हुम्शा पुंइसीनीम" दे ठेयब सेंदामी तुइक्पाइशो देत।

7 मोपतीके मुर नेल्लेमी ग्रोव, मुराली, तार पाइश्शो ठेयब, आइक्च नु मार मार ताप्तीके ताप्शो नेन्मे चोटीन नेबुकदनेसर आ राप्पाइश्शो सुन के मूर्ति आ डोंइती जात जात डा, रागी रागी डा नु आंम आंम लोत्र पाइब मुर नेल्लेमी खुम्की पा बाप्शा सेउ पाम्तेक्म।

यहूदी आन कली दोस गेशो

8 मिनु मेना कल्दी का निक्शी पिप आ बाक्तीकेमी जाक्शा, यहूदी आन पर्वम लोत्र पा मेको आन कली दोस गेम्तेक्म।

9 मिनु मेकोपुकीमी पिप नेबुकदनेसर कली “पिप, गे गेना हना यो ब्रोंइशा बाक्कीन।

10 हजुर, गे डोंइती ‘सुइ सुइमी ग्रोव, मुराली, ठेयब नु आइक्च तार पाइश्शो नु मार मार ताप्तीक ताप्शो नेनीनु, सुन के मूर्ति आ डोंइती खुम्की पा बाप्शा, सेउ पचा माल्नीम। दानीएल ६:१३

11 मिनु सु सुमी खुम्की पा सेउ मपाइनीम, मेको ठेयब मी ब्रतीकेमी हुम्चा पुंइसीनीम’ दे हुकुम पाइतीनी।

12 मिनु इन वोइश्शो बेबीलोन रागी कली सासन पाइब का निक्शी यहूदी बाक्नीमी। मेको आन नें शद्रक, मेशक नु अबेद-नेगो बाक्ब। मेकोपुकी इन कली काइ मटीब बाक्नीम। मिनु इन देवी देवता आन कली पूजा मपाइनीम। मिनु इन राप्पाइश्शो सुन के मूर्ति आ डोंइती यो खुम्की पा बाप्शा सेउ मपामे” दैतेक्म।

13 मिनु मेको नेंशा, पिप नेबुकदनेसर शुश गाइश्शा, चुरशा “शद्रक, मेशक नु अबेद-नेगो आन कली आं डोंइती चाक्कीन” दे हुकुम पाप्तु। मिनु मेको आन कली चाक्शा, पिप आ डोंइती राप्पाइक्तेक्म।

14 मिनु नेबुकदनेसरमी मेको आन कली “शद्रक, मेशक, नु अबेद-नेगो, गेपुकीमी आं देवी देवता आन कली सेउ मपाइनीनी? मिनु आं सेल्शो सुन के मूर्ति कली यो सेउ मपनी देंशो लोत्र थमा बाक्बा?

15 गेपुकीमी मुल ग्रोव, मुराली, ठेयब नु आइक्च तार पाइश्शो नु मार मार ताप्तीक ताप्शो नेनीनु, आं सेल्शो मूर्ति आ डोंइती खुम्की पा बाप्शा, सेउ पाइतीनी हना, मेको इन कली रिम्शो दुम्ब। तन्न खुम्की पा बाप्शा, सेउ मपाइतीनी हना, इन कली ठेयब मी ब्रतीकेमी बो हुम्चा पुंइसीनीनी। मिनु इन कली आं गुइ रे तेको परमप्रभुम प्रॉइबाक्म?” दे माइक्तीमी। प्रस्थान ५:२; २राजा १८:३५

16 मिनु शद्रक, मेशक नु अबेद-नेगोमी पिप कली “हजुर, पिप नेबुकदनेसर, गो मेको आ पर्वम इन कली मारेइ लोत्र पचा ममाल्नीकी।

17 गो आंइ परमप्रभु कली ठेयब सेल्नीकी। मेकोमी आंइ कली मेको ठेयब मी ब्रतीके रे प्रॉइने चाप्बा कों, मचाप्बा। तन्न इन गुइ रे प्रोनल। ब्यवस्था ४:२०; भजन संग्रह ६६:१२

18 तन्न आंइ कली मप्रॉइतु हना यो, हजुर, इन कली एको लोत्र तुइक्पाइक्चा दाक्नीकी ‘गेपुकी इन देवी देवता आन कली सेउ मपाइनीकी। मिनु इन राप्पाइश्शो सुन के मूर्ति आ डोंइती खुम्की पा मबाप्नीकी’ दैतेक्म” दे पिप कली माइक्तेक्म। प्रस्थान २०:३-५

दानीएल आ वारच मीम हुम्शो

19 मिनु मेको नेंशा नेबुकदनेसर शद्रक, मेशक नु अबेद-नेगो आन कली तशा, थाम्पान गाइश्शा, आ कुल राव किक्पाइक्तु। मिनु मेकोमी “ब्रशो मी कली डोंइती क्येडा ७ खेयप नाप्शो सेल्चा माल्ब” दे हुकुम पाप्तु।

20 मिनु मेकोमी आ लडाइ पाइब आन नेल्ल क्येडा बोल्यो मुर आन कली “शद्रक, मेशक नु अबेद-नेगो आन कली फ्रेंशा, मेको ठेयब मी ब्रतीकेमी हुम्चा” दे हुकुम पाप्तु।

21 मिनु मेकोपुकीमी मेको आन कली आन फेक्शो वा नु ताकी सुन्दा फ्रेंशा, ठेयब मी ब्रतीकेमी हुम्ताक्म।

22 मारदे हना पिपमी “रीब पा पने” दे हुकुम पाप्तु। मिनु मेको मीम शद्रक, मेशक नु अबेद-नेगो आन कली हुम्थ लाइक्ब आन कली गु दाक्तु।

23 मिनु मेको शद्रक, मेशक नु अबेद-नेगो सांफा फ्रेंसीशा, ठेयब मी ब्रतीकेमी दोक्तेक्म।

परमप्रभु नु मीम काथा बाक्शो

24 मिनू पिप नेबुकदनेसर थाम्पान छक लाक्शा, छुल बोक्शा, आ अर्ती गेब आन कली “गोपुकीमी मुर सां आन कली फ्रेंशा, मीम हुम्शो मनकी डा?” दे हिल्लो पाप्तु। मिनू मेकोपुकीमी “हुम्ताक्क, हजुर” देश, लोत्र लेत्ताक्म।

25 मिनू पिपमी मेको आन कली “तन्न कोव्रडीन, मफ्रेंसीशो ४ जना मुर मी ब्रतीकेमी एर ओंथ हिरना हिरन बाक्नीम। मीम मेको आन कली मटुप्शो तांडसीनीम। मिनू का आ कुल देवी देवता आस तौ आ कुल खोदेशो तांडसाक्व” देत। यसैया ४३:२

26 मिनू पिप नेबुकदनेसर मेको ठेयब मी ब्रतीके आ लाप्चो आ नेक्था लशा, मेकोमी “शद्रक, मेशक नु अबेद-नेगो नेल्ल क्येडा ठेयब परमप्रभु आ मुर गूशा, एक पिन” दे ब्रेत्ताक्मी। मिनू शद्रक, मेशक नु अबेद-नेगो मेको मी रे गूतेक्म।

27 मिनू मेको पारसी रागी डा हुकुम पाइब नेल्ल नु पिप कली अर्ती गेब नेल्ल बुक्शा “मीम एको सां आन कली मारेड मपव। आन चां यो मग्रोंडशो बाक्त। मिनू आन वा यो मग्रोंडक्थु, मी आ रिना यो मबाक्शो बाक्त” देतेक्म। हिब्रू ११:३३-३४

28 मिनू नेबुकदनेसरमी “शद्रक, मेशक नु अबेद-नेगो आन परमप्रभु नेल्ल क्येडा ठेयब बाक्ब। मेकोमी आ स्वर्ग डा गेय पाइब सोडशशा, आ कली थमा सुइक्ब आन कली प्रोंडतु। मारदे हना मेकोपुकीमी पिप, आं देशो मबिल्थु, साइक्चा पुंडसीब दुम्शा यो, आंम परमप्रभु कली डा लाक्शा, अर्को तेकोड देवी देवता आन डोंइती बाप्शा सेउ मपामे। दानीएल ६:२३

29 मोपतीके गो “जात जात डा, रागी रागी डा नु आंम आंम लोत्र पाइब मुर नेल्ल, सु सुमी शद्रक, मेशक नु अबेद-नेगो आन परमप्रभु आ पर्वम मरिम्शो लोत्र पा शुक्शी पाइनीमी, मेको आन गुड खोइल खोइशशा साइक्चा पुंडसीनीम। मिनू मेको आन खिं यो प्रेशशा गेचा पुंडसीनीम’ दे हुकुम पाइनुड। मारदे हना मेको आन परमप्रभु का ला बाक्ब। देवी देवताम मोदेशो पा प्रोंइने मचाप्नीम” देत। दानीएल २:४७

30 मिनू पिपमी शद्रक, मेशक नु अबेद-नेगो आन कली बेबीलोन रागी डा डोंइती क्येडा ठेयब मुर सेल्लु।

## 4

### पिपमी लेंशा डोमु तशो

1 मिनू पिप नेबुकदनेसरमी जात जात नु रागी रागी डा आंम आंम लोत्र पाइब नेल्ल आन कली “गे थुं नाइशशा बाक्कीन। दानीएल ६:२५

2 नेल्ल क्येडा ठेयब परमप्रभुमी आं कली चिन्ड नु छक लाक्चा डा गेय कोइताक्यी। मिनू मेको लोत्र इन कली शेंचा रिम्शो लाक्ती।

3 मेको आ कोइशो चिन्ड गिश ठेयब बाक्नीमी। मिनू आ छक लाक्चा डा गेय गिश सक्ति पाइशशो बाक्नीमी। आ राज्य गेना हना यो लीब। मिनू आ अधिकार यो गेना हना यो लीब। दानीएल २:४४; दानीएल ४:३१; दानीएल ६:२७; दानीएल ७:१४,२७; भजन संग्रह १४५:१३

4 गो, नेबुकदनेसर, आं खिंमी मारेड मारेडमी गाप्शा, आं दरवारमी थुं नाइशशा बाक्शो नड।

5 मिनू गो आं दरवारम बाक्डानु, डोमु का ताता। मेको तशा, थाम्पा हिंती। आं थुंमी मार मार मिम्शा, मेको कोइतीके तशा, खिंखि पाता।

6 मिनू गो बेबीलोन रागी डा जोक्ब तुइक्ब मुर नेल्ल आन कली ‘आं डोमु रे मार रुम्सीबा?’ मेको तुइक्पांडसीचा कली आं बाक्तीकेमी ब्रेत्ताक्डमी।

7 मिनू जादू, मन्तर तन्तर पाइब, सोरुल कोव्रब कल्दी नु चिन्ड आ अर्थ तुइक्ब जाक्तेक्म। मिनू गो मेको आन कली ‘गो डोमु का ताता’ दे शोव्रता। तन्न मेकोपुकीमी आं कली आं डोमु रे मार रुम्सीबा, मेको शेने मचबेम।

8 मिनू नेल्ल क्येडा नोले दानीएल आं डोंइती जाक्त। मेको आ नें आं देवता आ नें खोदेशो पा बेल्ल-शजर बाक्त। मिनू मेको आ आगाम नेल्ल क्येडा ठेयब देवता आ सोक्त बाक्त। मिनू मेको कली गो डोमु का ताता” दे शोव्रता। दानीएल ५:११,१४

9 मिनू गो मेको कली “बेलत-शजर, जादू पाइब आन ठेयब मुर, इ आगाम नेल्ल क्येडा ठेयब देवी देवता आन सोक्त बाक्त। मिनू खुदशशो लोव्र मारेड मारेड शेने चापब बाक्नेवे। मोपतीके आं तशो डोमु आ कौइतीक देनो। मिनू मेको रे मार रुम्सीबा शेंदी” दे माइकता।

10 गो इप्शा बाकडानु, डोमु का ताता। मेको दोदेशो बाक्त देशा हना, रागी आ दातेमी सरीड थिचशो थम लाइशशो रवा का बाक्त।

11 मिनू मेको रवा थम लाइशशो बाक्त। मेको रवा ठेयब नु बोल्यो दुम्त। आ डरीमी सरीड थिप्टु। मिनू मेको रवा रागी रागी रे तांडसीबाक्त।

12 मेको आ सफा थम दारशो बाक्तेकम। मिनू मेको रवाम शुश फल सिरशो बाक्त। मिनू मेको रे नेल्लेमी जाइबाक्तेकम। मिनू जन्तु मेको रवा आ पुंमी बाक्बाक्तेकम। मिनू चिक्ब आ राशीम ग्योव्र सेल्बाक्तेकम। मिनू ब्रोंइशा बाक्ब नेल्लेमी मेकेर रे जचा ताइबाक्तेकम।

13 मिनू कौइतीके कोव्रना कोव्रन बाकडानु, स्वर्ग डा कोव्रब इर रे यिशो ताता।

14 मेकोमी ठेयब शेंदा पा “एको रवा कली तिमीन। आ राशी नेल्ल क्योरीन, आ सफा हेमीन। मिनू आ फल फ्रशा गेने। मिनू जन्तु आन कली आ पुं रे प्रोक्पतीन। मिनू चिक्ब आन कली मेको आ राशी रे खेरीन।

15 तन्न मेको आ टुटा नु शाकश खपीम लीचा माल्नीम। मेको फलाम नु कांसा के पातामी फ्रेंशा, खपीमी लीचा माल्नीम। मिनू नाकदो यिशो सीतमी जिशशा बाक्ल। मिनू मेको जन्तुपुकी नु बाक्ल। जन्तु खोदेशो पा घांसम बाक्चा माल्दल।

16 मेको ७ बर्स मोदेशो दुम्चा माल्ब। मिनू मेको मुर आ थुं फांडसीशा, जन्तु आन थुं खोदेशो दुम्ब।

17 स्वर्ग डा कोव्रबपुकीमी ‘नेल्ल क्येडा ठेयब परमप्रभुमी राज्य नेल्ल कली सासन पाइब। मेकोमी आ दाकशो मुर कली सासन पतीक गेय गेब। मेको नेल्ल क्येडा ब्रेम्शो मुर आ गुडमी गेब। मेको मुर नेल्लेमी तुइक्चा माल्नीम’ दे लोव्र पाम्तेकम। दानीएल २:२१

### दानीएलमी डोमु आ अर्थ शेंशो

18 मोपा गो पिप, नेबुकदनेसरमी डोमु का ताता। मुल बेलत-शजर, गे एको डोमु रे मार रुम्सीबा, मेको शेंदी। आं राज्यम बाक्ब जोक्ब तुइक्ब नेल्लेमी मेको शेंने मचबेम। गे चहिं मेको शेंने चाप्नेवे। मारदे हना इ आगाम ठेयब देवता आ सोक्त बाक्ब” दे माइकता।

19 मिनू मेको नेंशा, बेलत-शजर माइशशो दानीएल आ थुं लुकच लत। आ मिम्तीकेमी मेको कली शुश हिंपाइकतु। मिनू गो, पिपमी मेको कली “बेलत-शजर, आं डोमु नु मेको आ रुप्तीकेमी इ कली हिंपाइक्चा मगेवो” देंती। मिनू दानीएलमी “हजुर, आं पिप, एको डोमु इन जोरी सत्रु आन कली दुम्ल। मिनू मेको आ रुप्तीक लोव्र इन जोरी सत्रुम राम हना, दुम वा।

20 इन डोमुम तशो रवा ठेयब नु बोल्यो दुम्शा, आ डरीमी सरीड थिप्टु। मिनू मेको रवा कली रागी रागी रे तांडसीबाक्त। इजीकीएल ३१:३-१४

21 मेको आ सफा थम दारशो बाक्तेकम। मेको रवाम शुश फल सिरशो बाक्त। मिनू मेको रे नेल्लेमी जाइबाक्तेकम। मिनू जन्तुपुकी मेको रवा आ पुंमी बाक्बाक्तेकम। मिनू चिक्ब आ राशीम बास बाक्बाक्तेकम।

22 हजुर, पिप, गे मेको रवा बाक्नीनी। गे ठेयब नु सक्ति पाइशशो दुम्तीनी। इन सक्ति बारशा, सरीड सम्म जाकदीशो बाक्त। मिनू इन अधिकार बारशा, रागी नेल्ल आन कली हुकुम पाइतीनी।

23 हजुर, पिप, गे स्वर्ग डा कोव्रब यिशो ताइतीनी। मिनू मेकोमी ‘एको रवा कली तिमीन। खतम पोक्कीन। तन्न मेको आ टुटा नु शाकश खपीम लीचा माल्नीम। मेको फलाम नु कांसा के पातामी फ्रेंशा, खपीमी लीचा माल्नीनी। मिनू नाकदो यिशो सीतमी जिशशा बाक्ल। मिनू मेको जन्तुपुकी नु बाक्ल। ७ बर्स मलाक्पा सम्म मोदेशो दुम्चा माल्ब’ देंत।

24 मिनू हजुर, पिप, मेको डोमु डा रुप्तीक नु इन पबर्म नेल्ल क्येडा ठेयब परमप्रभु आ हुकुम मार बाक्त देशा हना,

25 गे मुर आन बाक्तीके रे खेरचा पुंडसीनीनी। मिनु गे जन्तुपुकी नु बाक्नीनी। बी ब्यफोमी खोदेशो पा घांस ब्वाइनीनी। मिनु नाकदो डा सीतम जिल्लीनी। मिनु ७ बर्स सम्म मोदेशो दुम्नीनी। नेल्ल क्येडा ठेयब परमप्रभुमी मुर आन राज्यम सासन पाइब। मिनु परमप्रभुमी मेको राज्य आ दाकशो मुर आ गुडमी गेब, दे इन कली तुइक्पाइक्चा कली मोदेशो पाप्तु।

26 मिनु रवा आ टुटा नु शाकश खप उइ प्रोंइचा देशो हुकुम दुम्त। मिनु मेको रे मार रुम्सीब देशा हना, स्वर्ग डा परमप्रभु नेल्ल आन कली सासन पाइब बाक्ब, दे रुम्नी नोले इन राज्य लेंशा ताइनीनी।

27 हजुर पिप, मोपतीके आं गेशो अर्ती इन कली दुम्ल। इन पाप कली ठीक पतीकेमी क्याम्दीन। मिनु इन मरिम्शो पशो, श्येत जाइब आन कली शिशी पतीकेमी क्याम्दीन। मो पाइतीनी हना, इन रिम्शो बाक्तीक शुश नाक्त सम्म लीब” देंत। हितोपदेस १९:१७; मत्ती ५:७

### पिप आ डोमु गाप्शो

28 मिनु पिप नेबुकदनेसरमी दोदेशो डोमु तवा, मोदेशोन दुम्त।

29 मिनु १२ महिना नोले मेको पिप बेबीलोन आ दरवार आ कौसीमी हिरना हिरन बाक्शा,

30 मेकोमी “मार, एको बेबीलोन थम रिम्शो मबाक्बा डा? गो एको आं ठेयब सक्तिमी आं शुश शोंप वोइशशा, बाक्चा कली सेल्ला” देंत। हितोपदेस १६:१८

31 मिनु पिपमी मेको लोत्र देंमेनु, स्वर्ग रे सेंदा कामी “पिप नेबुकदनेसर इ कली मार लोत्र देशो बाक्त देशा हना, एको राज्य इ गुड रे रोइक्ने थुम्शो बाक्ब।

32 गे मुर आन बाक्तीके रे खेरचा पुंडसीनेवे। मिनु गे जन्तुपुकी नु बाक्नेवे। बी ब्यफोमी खोदेशो पा घांस ब्वाइनेवे। मिनु नाकदो डा सीतम जित्नेवे। मिनु ७ बर्स सम्म मोदेशो दुम्नेवे। नेल्ल क्येडा ठेयब परमप्रभुमी मुर आन राज्य कली सासन पाइब। मिनु परमप्रभुमी मेको राज्य आ दाकशो मुर आ गुडमी गेब, दे इन कली तुइक्पाइक्चा कली मोदेशो पाइब” देंत। दानीएल ५:२१

33 मिनु मेको लोत्र पशो नेना चोटीन नेबुकदनेसर थमा पा मोदेशो दुम्त। मेको मुर आन दाते रे खेरचा पुंडसाक्व। मिनु बी ब्यफोम खोदेशो पा घांस ब्वचा गोप्तु। मिनु मेको आं रां नाकदो डा सीतमी जित्त। मिनु मेको आ चां ककाकुली आ ओपला खोदेशो पा लाइशशो नु आ गेय चिक्ब आ नडग्रा खोदेशो दुम्त।

### पिपमी परमप्रभु कली मान पशो

34 मिनु पिपमी “मेको देशो नेल्ल जाकदीम नोले, गो आं पिया पोक्शा सरीड गे कोव्रता। मिनु आं निप्स लेंशा रिम्शो दुम्त। मिनु गो नेल्ल क्येडा ठेयब नु गेना हना यो ब्रोंइशा बाक्ब परमप्रभु कली ठेयब सेल्ला, मान पाता। मेको आ सासन पतीके गेना हना यो लीब। मेको आ राज्य पाला पाला सम्म लीब। दानीएल ३:३३

35 रागी डा मुरपुकी नेल्ल मेको आ डोंइती मारेइ मबाक्नीम। मेकोमी स्वर्ग डा गेय पाइब नु रागी डा मुर आन कली मार पचा दाक्बा, मेकोन पने चाप्ब। सुइमी मेको कली तेक्ने मचाप्नीम। मिनु सुइमी ‘गे मार पनी?’ देंने मचाप्नीम। यसैया ४०:१७; अय्युब ९:१२

36 मेना आं निप्स लेंशा रिम्शो दुम्त। मिनु आं राज्य डा छेडछेड आं कली लेत्ताकयी। आं कली अर्ती गेब नु आं ठेयब गेय पाइबपुकी आं कली ग्रुम्थ जाक्तेक्म। मिनु गो लेंशा पिप दुम्ती। मिनु गो डोंइती क्येडा शुश सक्ति नु मान ताता।

37 मुल गो, नेबुकदनेसरमी ‘स्वर्ग डा पिप ठेयब बाक्ब’ दे मान पाइनुड। मारदे हना आ पशो नेल्ल थमा बाक्ब। आ पतीके नेल्ल ठीक बाक्नीम। मेकोमी ठेयब लेशशो मुर आन कली ब्रेम्शो सेल्ने चाप्ब” दे पिपमी देंत। लूका १:५१; लूका १८:१४



1 मिनू पिप बेल-शजरमी आ राज्य डा ठेयब अधिकार ताइब हजार का मुर आन कली भोज का सेल्लु। मिनू मेकोमी मेको आन डोंइती अडगुर शांबु तूतु।

2 मिनू मेको पिप शांबुमी दुक्शा “आं आफ नेबुकदनेसरमी यरूसलेम सहर डा परमप्रभु आ खिं रे चाक्शो सुन नु चांदी के बोसपुकी एक चाक्कीन। गो, आं राज्य डा ठेयब अधिकार ताइबपुकी, आं ग्युंवे पशो मीशपुकी नु आं अरु चाक्शो मीशपुकी गारशा, मेको बोसम तूनीकी” देंत। दानीएल १:२; २इतिहास ३६:१०; एज्रा १:७-११

3 मिनू परमप्रभु आ खिं यरूसलेम रे चाक्शो सुन नु चांदी के बोसपुकी मेकेर चाक्तेकम। मिनू पिप, आ राज्य डा ठेयब अधिकार ताइबपुकी, आ ग्युंवे पशो मीशपुकी नु आं अरु चाक्शो मीशपुकी गारशा, मेको बोसम तूतेकम।

4 मिनू मेकोपुकीमी अडगुर शांबु तूशा, सुन, चांदी, कांसा, फलाम, शी नु फुल्लु के सेल्लो देवी देवता आन कली सेउ पाक्तेकम।

5 मिनू मेना मुर आ गुड का फो गूशा, बत्ती आ नेक्था दरवार डा सिल्लो गारोमी ब्रेक्ताकव। मिनू पिपमी मेको गुडमी ब्रेक्ना ब्रेक्न पशो ताप्तु।

6 मिनू मेको तशा, पिप आ कुल लल गिग दुम्शा, शुश हिंत। आ खोइल खिंखि पा आ पोक्च थोक्सीशा, खोइल ललाक लुलुक दुम्त।

7 मिनू पिपमी “बेबीलोन रागी डा मन्तर तन्तर पाइब, सोरुल कोव्रब कल्दी नु चिन्ड आ अर्थ जोक्ब चाक्कीन” दे हुकुम पाप्तु। मिनू पिपम मेको बेबीलोन रागी डा जोक्ब तुइक्ब आन कली “सुमी एको ब्रेक्शो पडेशा, आं अर्थ आं कली शेंने चाप्बा, मेको प्याजी रड डा वा फेक्पाइशशा, सुन के माला रेल्चा पुंडसीब। मिनू गो नु आं राज्य डा ठेयब गेय पाइब आ नोले डा हुकुम पाइब सेल्लुड” देंत।

8 मिनू पिप आ जोक्ब तुइक्ब मुर नेल्ल दरवारम जाक्तेकम। तन्न मेकोपुकीमी मेको ब्रेक्स पडेने मचबेम। मिनू मार रुम्सीबा, मेको यो देंने मचबेम।

9 मिनू पिप बेल-शजर शुश हिंशा, आ कुल लल गिगी जीत। मिनू आ राज्य डा ठेयब अधिकार ताइबपुकी मार पचा ना, मार पचा दुम्तेकम।

10 मिनू पिपीममी पिप नु आ राज्य डा ठेयब अधिकार ताइबपुकी लोव्र पशो नेंशा, भोज जतीक कोठामी ओव्रत। मिनू मेकोमी “पिप, गे गेना हना यो ब्रोंइशा बाक्कीन। गे हिंशा इन थुं ग्येत्थ लुकच मपने। इन कुल लल गिगी मदुम्पतीन।

11 इन राज्यमी ठेयब देवता आन सोक्त पाइशशो मुर का बाक्ब। इन आफ आ पालामी मेको नु देवी देवता के खोदेशो पा सोक्त आ मिम्शो रुप्तीके तुइक्तीके नु जोक्ब तुइक्ब थुं बाक्त। मोपतीके इन आफ पिप नेबुकदनेसर मी मेको कली जादू, मन्तर तन्तर पाइब, सोरुल कोव्रब कल्दी नु चिन्ड आ अर्थ जोक्ब आन ठेयब मुर सेल्लो बाक्त। दानीएल ४:५; दानीएल २:४८

12 मिनू पिपमी मेको कली बेल्ल-शजर, दे नें वोइशशो बाक्त। मारदे हना मेको बेल्ल-शजर माइशशो दानीएल तुइक्तीक नु डोमु आ अर्थ शेंतीक, खुइशशो लोव्र तुइक्ब नु मारेइ मारेइ ठेयब श्येत रे गुंइने चाप्ब बाक्ब। मिनू मुल मेको दानीएल कली ब्रथ सोइक्तीन। मिनू मेकोमी मेको ब्रेक्स पडेशा, रूप्पाइक्ने चाप्ब” देंत। दानीएल १:१७

13 मिनू नोले दानीएल कली पिप आ डोंइती चाक्तेकम। मिनू पिपमी दानीएल कली “गे दानीएल नवे? आं आफोमी इ कली चाक्डे? गे यहूदा रागी रे ग्याइशशा चाक्चा पुंडसीशो नवे?

14 गो इ आगाम ठेयब देवता आन मिम्शो तुइक्तीक, रुप्तीक नु शुश जोक्ब तुइक्ब थुं बाक्ब, देशो लोव्र नेंता।

15 गो एको ब्रेक्स पडेशा मार रुम्सीबा, आं कली देंमल, दे शुश जोक्ब तुइक्ब नु मन्तर तन्तर पाइब आन कली एक चाक्पाइक्ता, तन्न मेकोपुकीमी एको ब्रेक्स आ अर्थ शेंने मचबेम।

16 मिनू गो एको चिन्ड आ अर्थ मार रुम्सीबा, दे शेंने चाप्ब नु मारेइ मारेइ श्येत रे गुंइने चाप्ब बाक्नेवे, देशो लोव्र नेंता। मिनू मुल एको ब्रेक्स पडेशा, मार रुम्सीबा मेको आं कली शेंने चाप्तीवी हना, गे प्याजी

रड डा वा फेक्पाइशशा, सुन के माला रेल्ला पुंडसीनेवे। मिनु गे आं राज्य डा आं क्येडा नु आं ठेयब गेय पाइब आ नोले डा ठेयब हुकुम पाइब दुम्नेवे” देंत।

### ब्रेक्स आ अर्थ शेशो

17 मिनु दानीएलमी पिप कली “इन कोसेली आंमान वोंडसीन। मिनु अरु सुइ आन कली गेने। तन्न गो एको ब्रेक्स पढेशा, मार रुम्सीबा इन कली शेंननी।

18 हजुर, नेल्ल क्येडा ठेयब परमप्रभुमी इन आफ पिप नेबुकदनेसर कली राज्य, ठेयब दुम्तीके, मान ततीके नु शुश शोंप गेशो बाक्त। दानीएल २:३७

19 मोपा परमप्रभुमी मेको कली ठेयब दुम्तीके गेतीके जात जात नु रागी रागी डा आंम आंम लोव्र पाइब मुर नेल्ल मेको क्येडा हिंशा, खिंखि पाम्तेक्म। मिनु मेकोमी सु कली साइक्चा दाक्ता, मेको कली साइक्तु। सु कली ब्रोंडचा गेचा दाक्ता, मेको कली ब्रोंडचा गेप्टु। मिनु मान बारपाइक्चा दाक्शो कली मान बारपाइक्तु। सु कली दिप्चा दाक्ता, मेको कली दिप्तु।

20 तन्न मेको ठेयब लेत्तीके नु आ थुं खकटा दुम्पाइक्तीके पिप आ नित्तीक रे खेरचा नु आ छेडछेड रोइक्चा पुंडसाक्व।

21 मिनु मुर आन बाक्तीके रे खेरचा पुंडसीशा, आ थुं जन्तु आन थुं खोदेशो दुम्त। मेको ब्वाकी डा गधा नु बाक्शा, ब्यफोम खोदेशो पा घांस ब्वशो बाक्त। मिनु मेको नाक्दो डा सीतमी जित्त। नेल्ल क्येडा ठेयब परमप्रभु मुर आन राज्य कली सासन पाइब बाक्ब नु मेको राज्य आ दाक्शो मुर आन गुइमी गेब, दे तुइक्पाइक्चा कली मोदेशो दुम्शो बाक्त। दानीएल ४:२९

22 मिनु गे, मेको आ तौ, बेल-शजरमी, मेको लोव्र नेल्ल तुइशशा यो, इन थुं मब्रेम्पाइक्नी।

23 ‘गो स्वर्ग डा परमप्रभु क्येडा ठेयब नड’ दे आंम कली ठेयब सेलतीनी। मिनु गे परमप्रभु आ खिं डा बोसपुकी चाक्पाइशशा, गे नु इन राज्यम अधिकार ताइब, इन ग्युबे पशो मीशपुकी नु इन अरु चाक्शो मीशपुकीमी मेको बोसम अडगुर शांबु तूतीनी। मिनु सुन, चांदी, कांसा, फलाम, शी नु फुल्लु के सेल्शो मिक्च मताइब, मनंभ, मरुप्ब देवी देवता आन कली सेउ पाइतीनी। तन्न इन कली ब्रोंडतीक सोक्त गेब नु इन लां कोंडब परमप्रभु कली मान मपनी।

24 मोपतीके मेकोमी मेको गुइ सोइशशा, मेको ब्रेक्स ब्रेक्पाइक्तु।

25 मिनु मेको ब्रेक्शो मार बाक्ब देशा हना ‘मेने मेने टेकेल पेरस’ दे ब्रेक्शो बाक्ब। यसैया ४७:११

26 मेको आ अर्थ मार बाक्ब देशा हना, मेने आ अर्थ ‘परमप्रभुमी इन सासन पतीक नाक्त हिक्शा, थुम्तु’ देशो बाक्ब।

27 टेकेल आ अर्थ ‘गे नाक्तीकेम नाक्चा पुंडसीशा, सोपी दुम्तीनी’ देशो बाक्ब।

28 पेरस आ अर्थ, इन राज्य निकशी दुम्शा, मादी नु पारसी आन कली गेशो बाक्ब, देशो रुम्सीब। मेको आ अर्थ एको बाक्ब” दे दानीएलमी देंत।

29 मिनु पिप बेल-शजरमी “दानीएल कली प्याजी वा फेक्तीन। सुन के माला रेलदीन। मिनु मुर नेल्ल आन कली ‘मेको राज्य डा पिप, आं क्येडा नु आं ठेयब गेय पाइब क्येडा नोले डा हुकुम पाइब बाक्ब’ दे मुर नेल्ल आन कली शेंदीन” देंत। दानीएल २:२८; उत्पत्ती ४१:४२-४३

30 मिनु मेको नाक्दोन कल्दी आन पिप बेल-शजर साइक्चा पुंडसाक्व।

31 मिनु मादी रागी डा पिप दारामी राज्य ताप्टु। मेना पिप दारा ६२ बर्स दुम्शो बाक्माक्त। दानीएल ९:१; यसैया १३:१७

## 6

### दानीएल रिम्शो पाइब दुम्शो

1 पिप दारामी आ राज्य कली सहे का २० जना हुकुम पाइब मुर वोइशशा बाक्त। मेको पारसी रागीमी ब्राशा बाक्शो बाक्तेक्म। दानीएल ५:१२

2 मिनु पिप दाराम मारेइ मजाम्ल, दे मेको नेल्ल आन कली ठेयब कोव्रब मुर सां वोइश्शो बाक्त। मिनु मेको सां आन दातेमी का दानीएल बाक्त। मेको हुकुम पाइबपुकीमी ठेयब कोव्रब मुर सां आन कली रागीम मार दुम्मे, मेको शोव्रचा माल्शो बाक्तेकम।

3 मिनु दानीएल अरु ठेयब कोव्रब मुर नु पारसी रागी डा सहे का २० जना हुकुम पाइब नेल्ल आन दातेमी नेल्ल आन क्येडा निप्स पाइश्शो नु रिम्शो थुं पाइश्शो बाक्त। मोपतीके पिपमी “गो मेको कली रागी नेल्ल कली हुकुम पाइब सेल्लुड” दे मिम्ता बाक्त।

4 मिनु मेको ठेयब कोव्रब मुर नु सहे का २० जना पारसी रागी कली हुकुम पाइबपुकीमी गेहे पा दानीएल कली दोस गेचा, दे क्यारी पचा गोव्रमे बाक्त। तन्न मरिम्शो नु दोस गेतीक मारेइ मथिदमे बाक्त। मारदे हना दानीएल रिम्शो, मारेइ दोस मपाइश्शो गेय पाइब मुर बाक्त।

5 मिनु मेकोपुकीमी “दानीएल कली आ परमप्रभु आ अरेशो लोव्र थमा सुइक्तीक क्येडा लाक्शा, अरु मारेइमी यो दोस गेने मचाप्नय” देंमुमा बाक्त।

6 मिनु मेको ठेयब कोव्रब निक्शी नु पारसी रागी कली हुकुम पाइब नेल्ल लोव्रसी पा गारशा, पिप आ दरवारमी जाक्शा पिप कली “हजुर, पिप दारा, गे गेना हना यो ब्रोंइशा बाक्कीन।

7 गो इन राज्य डा ठेयब कोव्रब, आइक्च नु ठेयब हुकुम पाइब, अर्ती गेब नु इन रागी डा ठेयब मुर नेल्ल नु गारशा, गे पिपमी, कानुन का सेल्चा माल्नीनी। मार कानुन सेल्चा माल्नीनी देशा हना, मुल ३० नाक्त सम्म इन क्येडा लाक्शा, सुइ मुरपुकीम आंम देवी देवता नु मुर आन कली मारेइ पुंइने मचाप्नीम। इन क्येडा लाक्शा अरु सुइ कली पुंइतेकम हना, मेको मुर गुप्स वोइक्तीकेमी ताइक्चा पुंइसीब, दे ब्रेक्शा छाप थोक्शा वोतीन।

8 हजुर पिप, मोपा कानुन का सेलीन। मिनु छाप थोक्तीन। मादी नु पारसी आन कानुन मफांडसीब” देंमा बाक्त। एस्तर १:१९; एस्तर ८:८

9 मिनु पिप दारामी मेको कानुन ब्रेक्पा छाप थोक्शा गुंइताकव।

### दानीएल ग्याइक्चा पुंइसीशो

10 मिनु दानीएलमी पिप दारामी मोपा ब्रेक्शा छाप थोक्शा गुंइशो तुइश्शा, यरूसलेम गे कोव्रशा सेल्शो खिं आ तला तारी लशा, पोक्च थेक्शा आ परमप्रभु कली प्रार्थना पाप्तु। मोपा नाक्त कित कित सां खेयप पार्थना पाप्तु। मिनु डोंइती खोदेंशो पा परमप्रभु कली ठेयब सेल्लु। १रजा ८:४८

11 मिनु दानीएल कली गेहे पाइबपुकी मेकेर जाक्शा, दानीएलमी प्रार्थना पा आ परमप्रभु कली ठेयब सेल्शा पुंइशो थित्तेकम।

12 मिनु नोले मेकोपुकी पिप आ दरवार लशा, मेको ब्रेक्शो कानुन आ पर्बम “हजुर पिप, गे ३० नाक्त सम्म सुइमी इन क्येडा लाक्शा, अरु देवी देवता नु मुर आन कली मारेइ यो मपुंइचा, मो पाम्तेकम हना, मेको आन कली गुप्स वोइक्तीकेमी पिक्चा, दे कानुन सेल्नी ममाइ?” देंतेकम। मिनु पिपमी “एको लोव्र थमा बाक्ब। मादी नु पारसी आन कानुन गेनायो मफांडसीब” दे लोव्र पाप्तु। दानीएल ३:१०

13 मिनु मेकोपुकीमी पिप कली “आ रागी रे ग्याइश्शा चाक्चा पुंइसीशो यहूदी दानीएलमी इन लोव्र लाक्शा, इन गुंइशो कानुन मटीव। मेकोमी नाक्त कित कित खेयप सां प्रार्थना पा पुंइब” देंतेकम।

14 मिनु पिपमी मेको लोव्र नेंशा, आ थुं शुश लुक्च लत। मिनु दानीएल कली “दोपा प्रोंइनुडा?” दे नां मलाक्गा सम्म शुश मिम्शा बाक्माक्त।

15 मेको दानीएल कली गेहे पाइबपुकी पिप आ डोंइती जाक्शा “हजुर पिप, मादी नु पारसी आन पिपमी हुकुम पशो नु छाप थोक्शो कानुन मफांडसीब, दे एको लोव्र तुइक्नीनी” देंतेकम।

### दानीएल कली गुप्स खोरम तोक्शो

16 मिनु नोले पिपमी “दानीएल कली चाक्कीन। मिनु गुप्स आन कली वोइक्तीकेमी तोक्कीन” दे हुकुम पाप्तु। मिनु मेकोपुकीमी दानीएल कली गुप्स आन बाक्तीकेम तोक्तेकम। मिनु पिपमी दानीएल कली “इ मप्रोंइथु, ठेयब सेल्शो परमप्रभुमी इ कली प्रोनल” देंत। दानीएल ३:१५

17 मिनु नोले गेय पाइबपुकीमी फुल्लु का चाक्शा, मेको गुप्स बाक्तीक आ ओव्रतीक चोक्तेकम। सुइमी दानीएल कली मारेइ पने मचाप्मेकल, दे पिपमी आ छाप पाइशो औंठीम थोक्शा, आ राज्य डा ठेयब अधिकार ताइब आन छाप यो थोक्पाइवतु।

18 मिनु पिप आ दरवारम लेशशा लशा, मेको नाकदो माइजा बाक्शा, मारेइ जचा थोवक आ बाक्तीकेम मचाक्पद। मिनु मइप्थु, नां सोंइताक्व।

### परमप्रभुम दानीएल कली प्रोंइशो

19 मिनु पिप नां मसोथु, सुनी कना बोक्शा, मेको गुप्स आन कली वोइक्तीकेम दोरशा लत।

20 मिनु गुप्स आन बाक्तीके आ नेक्था जाक्दीशशा, शुश हिंशा दानीएल कली “दानीएल, ब्रोंइशा बाक्ब परमप्रभु आ गेय पाइब, इ गेना हना यो ठेयब सेल्ना सेल्न बाक्शो परमप्रभुमी इ कली गुप्स रे प्रोना?” दे हिल्लो पा ब्रेत्ताक्व। दानीएल ३:१७

21 मिनु दानीएलमी पिप कली “हजुर पिप, गे गेना हना यो ब्रोंइशा बाक्कीन।

22 आं परमप्रभुमी आ स्वर्ग डा गेय पाइब सोइशशा, आं कली मारेइ मपाइक्पाइक्चा कली गुप्स आन शोव चोक्पाइवतु। मारदे हना आं दोस मबा। हजुर पिप, इन डोंइती यो मारेइ मरिम्शो मपड” देत। दानीएल ३:२८; भजन संग्रह २२:२२; हिब्रू ११:३३

23 मिनु पिप थाम्पा ग्येरसीशा “दानीएल कली गुप्स वोइक्तीके रे गुंडदीन” दे हुकुम पाप्तु। मिनु दानीएल कली कीशा गुंडताक्म। मिनु मेको मारेइ मदुम्शो बाक्त। मारदे हना मेकोमी आ परमप्रभु कली थमा सुइशो बाक्त।

24 मिनु पिपमी “दानीएल कली दोस गेब, आन मीश नु आन तमी तौ नेल्ल आन कली गुप्स वोइक्तीकेमी तोक्कीन” दे हुकुम पाप्तु। मिनु मेको आन कली मेकेर तोक्तेकम। मिनु मेकोपुकी गुप्स आन बाक्तीके मजाक्दीत्थु, गुप्सपुकी प्रेक्शा ग्राम्शा मेको आन रुश का यो मवोइक्थु नेक्तेकम।

### पिपम परमप्रभु कली मान पशो

25 मिनु नोले पिप दारामी जात जात नु रागी रागी डा आंम आंम लोव्र पाइब नेल्ल आन कली “गे थुं नाइशशा बाक्कीन। दानीएल ४:१

26 आं राज्य डा मुर नेल्लेमी दानीएल आ परमप्रभु कली मान पा हिंचा माल्नीम। मारदे हना मेको गेना हना यो ब्रोंइशा बाक्ब परमप्रभु बाक्ब। मेको आ राज्य गेना हना यो लीब। मिनु आ अधिकार गेनायो मनुप्ब।

27 मेकोमी आ मुर आन कली प्रोंइशा, श्येत रे गुंइने चाप्ब। मेको सरीड नु रागीमी चिन्ड नु छक लाक्चा डा गेय पाइब बाक्ब। मेकोमी दानीएल कली गुप्स आन सक्ति रे प्रोंइतु” दे हुकुम पा ब्रेक्ताक्व।

28 मिनु दानीएल पिप दारा नु पारसी आन पिप कोरेस आस पालामी शुश मान तशा, सक्ति पाइशो दुम्त।

## 7

### दानीएलमी कोंइतीके तशो

#### दानीएल २:-

1 मिनु बेबीलोन डा बेल-शजर पिप दुम्शो डोंइती डा बर्समी दानीएल इम्मेनु, डोमु पा, कोंइतीके का ताप्तु। मिनु मेकोमी आ तशो डोमु ब्रेक्ताक्व। दानीएल ५:१

2 मिनु दानीएलमी गो, दानीएल, इप्शा डोमु पा, कोंइतीक का ताता, सरीड पूर्व, पच्छिम, उत्तर, दक्खिन रे फश पा ठेयब समुन्द्र कली छाल पोक्पाइशो ताता।

3 मिनु समुन्द्र रे ४ ओटा ठेयब जन्तु यूतेकम। मेको दोदेशो तांइसाकम देंशा हना, प्रकाश १३:१-२

4 मेको डोंइती डा जन्तु गुप्स खोंदेशो बाक्शा, ककाकुली आ फ्रां खोंदेशो फ्रां पाइशो बाक्त। मिनु गो कोव्रशा बाक्डानु, मेको आ फ्रां तुल्चा पुंइसाक्व। मिनु मेको खप रे बोक्पाइशशा, मुर खोंदेशो पा आ खोइल निक्शीमी राप्पाइक्चा पुंइसाक्व। मिनु मेकोमी मुर आ थुं ताप्तु।

5 मिनु मेको आ नोले अर्को जन्तु का घृत। मेको वां खोदेशो बाक्त। मेकोमी का पटटी रे बोक्शा, जेरी सां आ शोत्रम काम्शो बाक्त। मिनु मेको कली “बोक्को, श्ये शुश ब्वावो” देशो नेंता।

6 मिनु गो कोव्रशा बाक्डानु, नोले अर्को जन्तु का घृत। मेको जोड़ खोदेशो बाक्त। मेको आ चीमी ४ ओटा चिक्व आ फ्रां खोदेशो फ्रां बाक्तेक्म। मिनु मेको के ४ ओटा पिया बाक्तेक्म। मिनु मेकोमी सासन पतीक अधिकार ताप्तु।

7 मिनु नोले गो नाक्दो डा कोइतीकेमी नेल्ल क्येडा नोले डा जन्तु घृशो ताता। मेको शुश हिंचा डा, अर्को आन क्येडा बोल्यो बाक्त। मेको के फलाम के ठेयब खुइ बाक्तेक्म। मिनु श्ये ब्वना ब्वन बाक्शा, लीशो श्ये आ खोइलीमी दिम्ताक्व। मेको डोंइती डा जन्तु आन खोदेशो मबा। मारदे हना मेको के १० ओटा ग्रोत्र बाक्तेक्म।

8 मिनु गो मेको ग्रोत्र आन कली रिम्शो पा कोव्रडुनु, मेको आन दातेमी अर्को आइक्च ग्रोत्र का घृशो ताता। मेको आइक्च ग्रोत्र कली बाक्तीक गेचा कली डोंइती डा ग्रोत्र सां आन शाक्श सुन्दा एत्तेक्म। मेको नक घृशो ग्रोत्रमी मिक्च बाक्तेक्म। मेको मुर आ मिक्च खोदेशो बाक्तेक्म। मिनु मेको के ठेयब लेशशा लोत्र पाइब शोत्र का बाक्त। दानीएल ११:३६

9 मिनु गो कोव्रना कोव्रन बाक्डानु, पिप आन शुश नित्तीक वोइशशो ताता। मिनु मेको शुश बर्स दुम्शो का ठेयब नित्तीकेमी निस्साक्व। मेको आ वा फुं खोदेशो बुश बाक्त। मिनु आ पिया डा चां रिम्शो ऊन खोदेशो पा बुश बाक्त। मिनु मेको आ ठेयब नित्तीके ठेयब ब्रशो मी खोदेशो बाक्त। मेको ठेयब नित्तीक आ गुगीलपुकी बाक्तेक्म। मेको के यो थम ठेयब मी खोदेशो बाक्तेक्म। इजीकीएल १:२६; प्रकाश ४:२; भजन संग्रह ९०:२

10 मिनु मेको शुश बर्स दुम्शो का आ डोंइती रे मी के खोला खोदेशो पा घृत। मिनु हजार हजार आ स्वर्ग डा गेय पाइबमी मेको कली गेय पाम्तेक्म। मिनु १०, १० हजार मेको आ डोंइती बाक्तेक्म। मिनु मेको निसाफ पचा कली निस्साक्म। मिनु किताबपुकी प्राक्शा वोइक्तेक्म। प्रकाश ५:११; भजन संग्रह ६९:२९; प्रकाश २०:१२

11 मिनु गो मेको ठेयब लेशशो लोत्र पाइब ग्रोत्र कली कोव्रना कोव्रन बाक्ती। मिनु गो कोव्रना कोव्रन बाक्डानु, मेको जन्तु कली साइक्तेक्म। मिनु मेको आ रां खतम सेल्शा, ठेयब मीमी हुम्ताक्म। प्रकाश १९:२०

12 मिनु लीशो जन्तु आन सासन पतीक अधिकार रोइक्चा पुंडिसाक्म। तन्न मेको आन कली इक्का नोले सम्म ब्रोंडचा गेम्तेक्म। दानीएल २:२१

13 मिनु नोले गो नाक्दो डा कोइतीकेमी मुर खोदेशो का ताता। मेको गोस्सुम गिल्सीशा पिना पिन पशो ताता। मिनु मेको कली शुश बर्स दुम्शो का आ डोंइती राप्पाइशशो ताता। लूका २१:२७; प्रकाश १:१३; प्रकाश १४:१४

14 मिनु मेको कली सासन पतीक अधिकार, मान ततीक नु पिप सेल्शा राज्य गेशो ताता। मिनु जात जात नु रागी रागी डा आंम आंम लोत्र पाइब मुर नेल्लेमी मेको कली गेय पशो ताता। आ सासन पतीके अधिकार गेना हना यो लीबाक्त। आ पिप दुम्शो राज्य गेनायो खतम मदुम्बाक्त।

15 मिनु गो, दानीएल, मेको कोइतीके तशा, आं थुं लुक्च लत। मिनु गो हिंती।

16 मिनु गो मेकेर राप्शा बाक्ब का कली “एको लोत्र रे मार रुम्सीबा?” दे हिल्लो पाता। मिनु मेकोमी “गो इ कली नेल्ल रुप्पाइक्नुड।

17 मेको ४ ओटा ठेयब जन्तु रागी डा ४ जना पिप बाक्नीम।

18 तन्न मेको नेल्ल क्येडा ठेयब आ मुरपुकीम मेको राज्य ताक्शा, गेनायो मनुप्या डा पा, गेना हना यो सासन पाइनीम” दैत।

19 मिनु गो मेको नेल्ल आन क्येडा नोले डा जन्तु रे मार रुम्सीबा, दे रुप्या थुं पाता। मेको अरु जन्तु खोदेशो मबा। मेको थम हिंचा डा बाक्त। मेको आ खुइ फलाम के नु नडग्रा कांसा के बाक्तेक्म। मेकोमी मारेइ मारेइ ब्वशा नाक्शा, लीशो श्ये चहिं आ खोइलीम दिम्ताक्व। दानीएल ७:७

20 मिनू मेको आ पियामी बाक्शो १० ओटा ग्रोत्र नु अर्को ग्रोत्र का आ पर्वम रुप्या थुं पाता। मेको ग्रोत्र का गूमेनु, डोंइती डा ग्रोत्र सां एत्तेकम। मेको गूशो ग्रोत्र के मिक्च नु ठेयब लेशशो लोत्र पतीक शोत्र बाक्त। मिनू मेको अरु ग्रोत्र आन क्येडा ठेयब बाक्त। मेको आ पर्वम यो रुप्या थुं पाता।

21 मिनू गो कोत्रना कोत्रन बाक्डानु, मेको ग्रोत्रमी नेल्ल क्येडा ठेयब आ मुर नु लडाइ पा ग्रात। प्रकाश १३:१७

22 मिनू मेको शुश बर्स दुमशो का मजाकम सम्म लडाइ ग्राना ग्रान बाक्त। मिनू नेल्ल क्येडा ठेयबमी आ मुर आन कली निसाफ पतीक अधिकार गेप्टु। मेना नेल्ल क्येडा ठेयब आ मुरुम मेको राज्य आंम के सेल्लेकम।

23 मिनू आं कली रुप्याइक्बमी नेल्ल आन क्येडा नोले डा जन्तु “रागीमी मेको नेल्ल आन क्येडा नोले डा जन्तु राज्य का बाक्ब। मेको अरु राज्य खोदेशो मबाक्ब। मिनू मेकोमी रागी नेल्ल आन कली गु दाक्ब। आ खोइलीमी दिमशा नेल्ल आन कली रोबल चिबल पोक्ब।

24 मिनू मेको १० ओटा ग्रोत्र आ अर्थ मार बाक्ब देशा हना, मेको राज्य रे १० जना पिप गूनीम। मिनू मेको आन नोले अर्को पिप का गूब। मेको डोंइती डा पिप खोदेशो मदुम्ब। मिनू मेकोमी पिप सां आन कली फुडक्ब। प्रकाश १७:१२

25 मिनू मेकोमी नेल्ल क्येडा ठेयब आ पर्वम मरिमशो लोत्र पा, नेल्ल क्येडा ठेयब आ मुर आन कली यो खतम सेल्ल। मिनू मेकोमी परमप्रभु आ देशो चाड नु आ अरेशो लोत्र कली फाइक्चा दाक्ब। मिनू परमप्रभु आ मुर आन पाला का, पाला निक्शी नु आधा पाला मेको आ अधिकारमी गेचा पुंइसीनीमी। प्रकाश १३:५-६; दानीएल १२:१७

26 मिनू नोले निसाफ पची ना जाक्ब। मेको आ सासन पतीक अधिकार लेशा गेनायो मतचा डा पा आ गुड रे रोइक्नीम। मिनू मेको कली साइशशा खतम पोक्नीम।

27 मिनू राज्य, सासन पतीक अधिकार नु राज्य नेल्ल आन ठेयब दुमतीके नेल्ल क्येडा ठेयब आ मुर आन कली गेचा पुंइसीनीम। मेको आन राज्य गेना हना यो लीब राज्य दुम्ब। मिनू सक्ति पाइशशो नेल्लेमी मेको आ गेय पा, मेको कली टीनीम” दैत।

28 मेको आं डोमु तशो आ लोत्र बाक्ब। गो दानीएल, एको मिमशा थाम्पा हिंती। मिनू आं कुल क्येर दुम्त। मिनू गो एको लोत्र नेल्ल आं थुंम वोइक्ता। दानीएल ८:१८; दानीएल १०:८,१६-१८

## 8

### सांड नु बोका कोंइशो

1 मिनू बेल-शजर पिप दुमशो बर्स सां जाक्दीमेनु, गो, दानीएलमी लेशा कोंइतीके ताता। दानीएल ७:१

2 मिनू मेको कोंइतीकेमी गो एलाम रागी डा सुसा माइशशो ठेयब सहर डा उलाइ खोला आ नेक्था बाक्शो बाक्ती।

3 मिनू गो कोत्रशा बाक्डानु, ग्रोत्र निक्शी पाइशशो सांड का ताता। मेको आ ग्रोत्र निम्फा दुइशशो बाक्ताक्स। का चहिं अर्को क्येडा दुइशशो बाक्त। मेको दुइशशो ग्रोत्र नोले गूशो बाक्त।

4 मिनू गो मेको सांडम पच्छिम, उत्तर नु दक्खिन गे खुना खुन पशो ताता। अरु जन्तु नेल्ल मेको आ डोंइती राप्ने मचाप्बाक्तेकम। मिनू सुइमी मेको आ सक्ति रे प्रॉइने मचाप्बाक्तेकम। मेकोमी आ दाक्शो पशा, आ सक्ति बारत। दानीएल ८:४

5 मिनू गो मेको कोत्रशा बाक्डानु, पच्छिम रे बोका का फो गूत। मेकोमी आ खोइल खप मथिथु, रागी नेल्ल लाक्तु। मिनू मेको बोका आ मिक्च आस दातेमी ग्रोत्र का बाक्त। दानीएल ८:२१

6 मिनू मेको बोका मेको खोला आ नेक्था बाक्शो ग्रोत्र निक्शी पाइशशो सांड आ बाक्तीक जाक्त। मिनू मेको सांड कली खुचा, दे शुश बोल पा दोरत।

7 मिनू गो मेको सांड गे दोरशो ताता। मेको थाम्पा गाइशशा, मेको सांड कली खुशा, आ ग्रोत्र निम्फा जिव्ताक्व। मेको सांड बोल मपाइशशो दुमशा, मेको बोका कली मारेइ पने मचब। मेको बोकामी मेको

सांड कली खपीम तोक्शा, आ खोइलीमी दिम्ताक्व। मिनु सुइमी मेको सांड कली बोका आ सक्ति रे प्रॉइने मचबेम।

8 मिनु नोले मेको बोकामी ठेयब सक्ति ताप्तु। मिनु मेको नेल्ल क्येडा सक्ति पाइश्शो दुम्तीके मेको आ दुइश्शो ग्रोव्र जिक्त। मिनु मेको जिक्शो ग्रोव्र आ पा डा अर्को ४ ओटा ग्रोव्र रागी आ पूर्व, पच्छिम, उत्तर, दक्खिन गे हिरशा यूतेक्म। दानीएल ११:४

9 मिनु मेको ४ ओटा ग्रोव्र आन दाते डा का रे अर्को इम्चीली ग्रोव्र का यूत। मिनु मेको नक यूशो ग्रोव्र दक्खिन, पूर्व गे नु दारशो रागी गे कोव्रशा थाम्पा ठेयब दुम्शा कोलत। दानीएल ७:८

10 मिनु मेको कोल्शा, स्वर्ग डा लडाइ पाइब आन हुल बाक्तीक सम्म जाक्दीश्शा, लडाइ पाइब का निक्शी नु सोरुल का निक्शी आन कली तोक्शा खोइलीमी दिम्ताक्व।

11 मेकोमी लडाइ पाइब आन नेल्ल क्येडा ठेयब कली यो ठेयब लेश्शो लोव्र पा, नाक्त किंत किंत डा चोशा चढेतीक रोइश्शा, परमप्रभु यावे आ बाक्तीके खिं प्रेशा गेप्तु। दानीएल ९:२७

12 मिनु आ परमप्रभु कली काइ मटितीकेमी नाक्त किंत किंत डा चढेतीक मचढेचा डा पा गेय पाइब वोइक्तु। मिनु मेकोमी थमा पा शेंतीक कली खतम पोक्शा, आ मरिम्शो पतीक चहिं बारना बारन लपाइक्तु।

13 मिनु नोले गो स्वर्गम बाक्ब कामी लोव्र पशो नेंता। मिनु अरु स्वर्गम बाक्बमी मेको कली “नाक्त किंत किंत डा चोशा चढेतीक रोइक्तीके, आ मरिम्शो पतीकेमी परमप्रभु आ खिं श्येत्थ नु खतम सेल्टीक नु परमप्रभु आ लडाइ पाइब आन कली खोइलीमी दिप्शा, कौइतीके गेना नुप्वा?” दे हिल्लो पशो नेंता।

14 मिनु अर्कोमी आं कली “हजार निक्शी सहे सां नाक्दो नाक्त सम्म मोदेशो दुम्ब। मिनु नोले परमप्रभु आ खिं लेंशा सेल्नीम” देंत।

### परमप्रभुमी कौइशो आ अर्थ शेंशो

15 गो, दानीएलमी, एको कौइतीके रे मार रुम्सीबा, दे तुइक्चा मालता। मिनु वोंइश मुर खोदेशो का आं डौइती यूशा, दोक राप्शो ताता।

16 मिनु गो उलाइ खोला रे “गाब्रीएल, एको मुर कली एको कौइतीके रे मार रुम्सीबा, मेको शेंदो” देशो मुर आ सेंदा का नेंता। दानीएल ८:२; दानीएल ९:२१; लूका १:१९,२६

17 मिनु मेको परमप्रभु यावे आ स्वर्ग डा गेय पाइब आं राप्शा बाक्तीके आं नेक्था जाक्त। मिनु गो थाम्पा हिशा खुम्की पा बाप्ती। मिनु मेकोमी आं कली “ए मुर, एको कौइतीके नेल्ल क्येडा नोले डा नाक्त आ पर्बम बाक्ब, दे रूपो” देंत। प्रकाश १०:६

18 मिनु मेकोमी आं कली लोव्र पवानु, गो खपीमी दिड गोल्शा बाप्शा, थशो खोदेशो दुम्ती। मिनु मेकोमी आं कली थिशा, पोक्शा राप्पाइक्ती।

19 मिनु मेकोमी “गो इ कली नोले डा गाइक्तीक नाक्ती मार दुम्बा, तुइक्पाइक्कन। मारदे हना एको कौइतीके नेल्ल क्येडा नोले डा नाक्त कली बाक्ब।

20 इ तशो ग्रोव्र निक्शी पाइश्शो सांड मादी नु पारसी रागी डा पिप बाक्नीस।

21 मिनु मेको बोका चहिं ग्रीस रागी डा पिप बाक्ब। मेको आ मिक्च आन दाते डा ठेयब ग्रोव्र, मेकेर डा नेल्ल क्येडा डौइती डा पिप बाक्ब। दानीएल ११:३

22 मिनु गे मेको ग्रोव्र जिक्शा मेको आ पा डा ४ ओटा ग्रोव्र यूशो ताप्तीवी। मेको आ रागी ४ ओटा राज्य दुम्नीम। तन्न मेकोपुकी डौइती डा राज्य खोदेशो सक्ति पाइश्शो मदुम्नीम।

23 मिनु मेको आन सासन पतीक अधिकार नुप्ची ना मेको आन मरिम्शो पतीकेम ब्रीतीके खकटा थुं पाइश्शो, शुश मरिम्शो पाइब पिप का जाक्ब। दानीएल ११:२१

24 मेको शुश बोल्यो दुम्ब। मिनु मेकोमी मारेइ मारेइ खतम पोक्ब। आ पतीक मारेइ मारेइमी ग्राब। मिनु मेकोमी सक्ति पाइश्शो मुर नु थमा सुइक्ब आन कली खतम पोक्ब।

25 मेको आ निप्समी मरुम मतुइक्चा डा पा जोल पतीकेमी ग्राब। मिनु आंम थुंमी 'गो नेल्ल क्येडा टेयब नड' दे मिग्शा, शुश मुर आन कली साइक्ब। मिनु मेकोमी पिप आन पिप कली यो मरिग्शो पा बोक्ब। मिनु मेको खतम सेल्चा पुंडसीब। तन्न मुर आन गुड रे ममाड।

26 मिनु मेको इ कली कोंइशो नाक्दो नाक्त आ पर्बम कोंइतीके कोंइशो थमा बाक्ब। तन्न गे एको कोंइतीके कली इ थुंमी खुइश्शा वोइक्चा माल्नेवे। मारदे हना एको शुश नोले दुम्ब लोत्र बाक्ब" दे माइक्ती। दानीएल ८:१४; दानीएल १२:४

27 मिनु नोले गो, दानीएल, काइ सोक्त मपाइश्शो खोंदेशो दुम्ती। मिनु का निक्शी नाक्त रोइ पा बाक्ती। मिनु नोले बोक्शा, पिप आ गेय पथ लती। मिनु मेको आं तशो कोंइतीके आ पर्बम हिंती। मारदे हना मेको कोंइतीके रुब्ब सुइ मबाक्ब।

## 9

### दानीएलम परमप्रभु कली पुंडशो

1 मिनु पिप अहामूरस आ तौ दारा डोंइती डा बर्समी कल्दी रागी डा पिप दुम्त। पिप दारा मादी जात डा बाक्माक्त। दानीएल ६:१

2 मिनु पिप दारा आ सासन पशो डोंइती डा बर्समी गो, दानीएलमी परमप्रभु यावेमी आ लोत्र पाइब येरमीया कली ब्रेक्पाइश्शो लोत्र डा किताब पढेशा, यरूसलेम खतम दुम्चा कली ७० बर्स लीनीम, दे रुप्ता। येरमीया २५:११-१२; येरमीया २९:१०

3 मिनु गो माइजा बाक्शा, अरन्डी फेक्शा नु पुलु मोइसीशा परमप्रभु, आं होत्रप कली लोत्र पा पुंडशा, मार लोत्र लेप्बा, दे रिग्शा बाक्ती।

4 मिनु गो परमप्रभु यावे, आं परमप्रभु कली लोत्र पा, गो मार मार मरिग्शो पडा, मेको नेल्ल शोत्रशा "परमप्रभु, गे टेयब नु हिंचा डा परमप्रभु बाक्नीनी। गे इन कली दाक्ब नु इन शेंशो लोत्र टीब आन कली गेना हना यो दाक्नीनी। मिनु इन कबल मप्रोंइनीनी। येरमीया १४:७; ब्यवस्था ७:९; नेहेम्याह १:५

5 गोपुकीमी पाप पशा, मरिग्शो पाइतक। मिनु इन अरेशो मटिथु नु इन कली गन गन पा, इन शेंशो नु निसाफ पतीके लोत्र प्रोंइतक।

6 गोपुकीमी इन गेय पाइब, इन लोत्र पाइब आन लोत्र मनैक। मेकोपुकीमी इन नेंमी आंइ पिप, आंइ टेयब मुर, आंइ किकी पिपी नु आंइ रागी डा मुर नेल्ल आन कली लोत्र पांतेक्म।

7 परमप्रभु, गे ठीक पाइब बाक्नीनी। गो चहिं मुने दोक्शो बाक्नीकी। मुलाक्ती यहूदा डा मुर, यरूसलेममी बाक्ब, इसाएली नेल्ल आन नेक्था नु डोन रागीम खेरचा पुंडसीशो मुर नेल्ल इन कली प्रोंइशो आ पर्बम दोस ताइब दुम्तेक्म।

8 परमप्रभु यावे, आंइ पिपपुकी, आंइ टेयब मुरपुकी, आंइ किकी पिपी नु गो नेल्लेमी इन डोंइती पाप पाइतक। एजा ९:७; यूसैया ४३:२७

9 गोपुकी इन देशो गन गन पा मटीतक हना यो, परमप्रभु, आंइ होत्रप, गे शिशी पाइब नु पाप क्याम्ब बाक्नीनी। भजन संग्रह १३०:४

10 गोपुकीमी परमप्रभु यावे, आंइ परमप्रभु कली मटीब बाक्तक। इन लोत्र पाइबपुकीमी इन अरेशो लोत्र आंइ कली नेंपाइश्शो बाक्तेक्म। तन्न गो मपक।

11 इसाएली नेल्लेमी इन क्येडा डोन लशा, इन अरेशो मटिथु, इन देशो मपामे। मोपतीके गो इन गेय पाइब मोसामी ब्रेक्शो इन अरेशो लोत्रमी सराप नु कसम आंइ तारी मोइक्चा पुंडसीशो बाक्नीक। मारदे हना गोपुकीमी इन कली पाप पाइतक। लेवी २६:१४-३९; ब्यवस्था २८:१५-६८

12 मिनु गे आंइ पर्बम नु आंइ निसाफ पाइब आन पर्बम इन देशो लोत्र खाप्तीनी। यरूसलेम कली गेशो खोंदेशो श्येत रागी नेल्ल आन कली गेनायो मदुग्शो बाक्त।

13 मोसामी इन अरेशो लोत्रम 'मेको कली मटीब श्येत जाइनीम' दे ब्रेक्शो खोंदेशो पा, मेको श्येत नेल्ल आंइ कली दुम्त। मिनु गोपुकीमी परमप्रभु यावे, आंइ परमप्रभु कली 'इन थमा लोत्र कली रुप्तीक थुं गेकी' दे मपुंडक। मिनु आंइ मरिग्शो पशो मप्रोंइक। इन कली दाक्शा मप्रोंइतीके ममिम्तक।



14 मोपतीके परमप्रभु यावेमी आंइ कली गेतीक, मेको ठेयब श्येत तेक्तु। थमा पा परमप्रभु यावे, आंइ परमप्रभु आ पशो नेल्ल ठीक बाक्ब। मारदे हना गोपुकीमी आ देशो मपक।

15 मिनु परमप्रभु यावे, आंइ परमप्रभु गे इन मुर आन कली इजीप्त रागी रे गुंडशा चाक्तीनी। मेको इन सक्ति नु इन ठेयब नें आ पबंम मोदेशो पाइतीनी। गोपुकी पाप पा, इन अरेशो लोव्र मटीब दुम्तक।

16 परमप्रभु, इन ठीक पतीकेमी इन सहर यरूसलेम नु इन योव्रशो डांडा आ पबंम मगाइक्तीन, मचुरीन। आंइ पशो पाप नु आंइ किकी पिप आन मरिम्शो पशो आ पबंम यरूसलेम नु इन योव्रशो मुर आन नेक्था बाक्ब मुर रे पा शुक्शी पाइक्चा पुंडसीब दुम्तेक्म।

17 मोपतीके आंइ परमप्रभु, इन गेय पाइब, आं देशो नु पुंडशो लोव्र नेनीने। मिनु इन नें आ पबंम इन ब्रेशो बाक्तीके कली लेंशा शिशी पा कोव्रडीन।

18 आं परमप्रभु इन नोफा दाइशशा नेनीन। मिनु आंइ कली दुम्शो श्येत नु इन नेम सेल्शो सहर यरूसलेम कली कोव्रडीन। आंइ ठीक पतीके आ पबंम ममाइ, तन्न इन शुश शिशी पतीके आ पबंम पुंडनीकी।

19 आं परमप्रभु, नेनीन। परमप्रभु, आंइ पाप क्याम्दीन। परमप्रभु, नेनीन। मिनु इन नें आ पबंम मरिम्शु गेय पने। मारदे हना इन सहर नु इन मुर इन नें रे ब्रेत्चा पुंडसीशो बाक्नीम” दे गो दानीएलमी परमप्रभु कली देती। येरमीया १४:९

### गाब्रीएल शेंथ जाक्शो

20 मिनु गो मो देशा परमप्रभु यावे, आं परमप्रभु आ डोंइती लोव्र पना पन, प्रार्थना पा, आं पाप नु आं मुर इस्त्राएली आन पशो पाप नेल्ल शोव्रशा, आं परमप्रभु आ डांडा, आ मुर आन पबंम पुंडना पुंडन, बाक्डानु,

21 प्रार्थना पना पन, गो आं डोंइती आं कोइतीकेमी तशो मुर गाब्रीएल बेरशा आं नेक्था जाक्त। मेना नाक्दो डा चढेची ना जाक्शो बाक्त। दानीएल ८:१६

22 मिनु मेकोमी आं कली “दानीएल, मुल गो इ कली जोक्तीक तुइक्तीक नु रुप्तीक थुं गेथ जाक्ती।

23 मिनु गे गेना पुंडचा गोवी, मेना गो लोव्र का नेंता। मिनु गो इ कली मेको लोव्र शेंथ जाक्ती। मारदे हना गे शुश दाक्चा पुंडसीशो मुर बाक्नेवे। मेको लोव्र मिम्शा, मेको कोइतीक रुपो।

24 इ मुर नु परमप्रभु आ सहर ७० हप्ता सम्म श्येत जचा मालनीम। मिनु मे नोले मरिम्शो नु पाप पतीके नुपब। मेना अरेशो मटितीके क्याम्तीके गेय पशो बाक्ब। मिनु ठीक पतीके गेना हना यो लीब। मिनु मेको कोइतीक नु परमप्रभु यावे आ लोव्र पाइब कली छाप थोक्शा नोले परमप्रभु आ बाक्तीक लेंशा सेल्शा तेल खेक्नीम।

25 मोपतीके यरूसलेम लेंशा सेल्तीक लोव्र तेल लुक्शो पिप मजाक्म सम्म ७ हप्ता बाक्नीम। मिनु ६२ हप्ता लां नु खिं आ एर ओंथ लेंशा सेल्चा कली मालब, दे रुप्शा तुइक्तो। मेना श्येत जतीक ना बाक्ब।

26 मिनु ६२ हप्ता नोले मेको तेल लुक्शो का मारेइ मदुम्शु यो तिल्ला पुंडसीब। मिनु मेको जाक्चा चिक्शो पिप आ लडाइ पाइब नु जाक्शा, मेको सहर नु परमप्रभु यावे आ बाक्तीक खतम पोक्ब। मिनु मेको आ नुप्ची ना ठेयब भोल यिशा, नोले सम्म लडाइ दुम्ब। डोंइती मोदेशो खतम दुम्तीक श्येत आ पबंम देशो बाक्ब। यसैया २८:२२; लूका २१:२३-२४

27 मेकोमी हप्ता का सम्म शुश मुर नु कबल पाइब। मिनु आधा हप्तामी चढेतीक नेल्ल तेक्ब। मिनु मेकोमी चढेतीक आ पा डा शुश ग्रंथा दिचा डा गेय पाइब। मेको कली खतम सेल्तीक लोव्र मपूम सम्म मोदेशो पाइब” देत। दानीएल ८:११; दानीएल ११:३१; दानीएल १२:११; मती २४:१५; यसैया १०:२२-२३

1 मिनू पारसी रागी डा कोरेस पिप दुम्शो बर्स सां दुम्मेनु, परमप्रभुमी बेल्ल-शजर माइशशो दानीएल कली लोत्र का तुइक्पाइक्तु। मेको लोत्र थमा बाक्त। ठेयब श्येत आ पर्वम बाक्त। मेको दानीएलमी मेको कोइतीक तशा, रुप्तीक थुं यो ताप्तु। दानीएल १:२१; दानीएल १:७

2 मेना गो, दानीएल, हप्ता सां सम्म रोंका पाता।

3 मेको हप्ता सां सम्म गो ब्रोत्रशो मारेइ जचा थोत्रक मजड। श्ये मब्बड। अडगुर शांबु यो मत्तूड। मिनू तेल यो मखेक्सीड।

4 मिनू डोंइती डा महिना डा २४ नाक्त टाइग्रीस माइशशो ठेयब खोला आ नेक्था राप्शो बाक्ती।

5 मिनू गो इर गे कोव्रडुनु, सुती वा फेक्शो मुर का ताता। मेकोमी थम रिम्शो ओफीर डा सुन के किप्शुर किप्शो बाक्त। दानीएल ८:१५; दानीएल १२:६; इजीकीएल ९:२; प्रकाश १:१३-१५

6 मिनू मेको आ रां बेरील माइशशो हीरा खोदेशो बाक्त। आ कुल चिला खोदेशो बाक्त। आ मिक्च ब्रशो तोत्रशी खोदेशो बाक्त। मेको आ गुड खोइली थाम्पा खुइशशो कांसा खोदेशो पा टल्केशो बाक्तेक्म। मेको आ सेंदा शुश मुर आन लोत्र पशो खोदेशो नेंसाक्ब। इजीकीएल १:२७-२८

7 गो, दानीएलमी मेको कोइतीक ताता। गो नु बाक्ब मुर सुइमी मतामे। तन्न मेकोपुकी हिंशा ख्रिंखि पा प्रोक्शा खुइसाक्म।

8 मिनू मेको ठेयब कोइतीक तचा कली गो का ला बाक्ती। मिनू मारेइ पने मचाप्ब दुम्ती। मिनू आं कुल बेक्चा चिक्शो मुर के खोदेशो दुम्शा, मारेइ बोल मपाइशशो दुम्ती।

9 मिनू नोले मेकोमी लोत्र पशो नेंता। मिनू मेको लोत्र नेंनु चोटीन, गो खपीमी दिड गोल्शा, थती।

10 मिनू गुड काम आं कली थिती। मिनू गो गुड नु पोक्च थेक्शा, बोक्ती।

11 मिनू मेकोमी आं कली “दानीएल, गे शुश दाक्चा पुंडसीशो मुर बाक्नेवे। आं देशो लोत्र नोफा दाइशशा नेनो। बोक्शा बाक्को। मारदे हना गो इ बाक्तीकेमी सोइक्चा पुंडसीशो बाक्नुड” दे माइक्ती। मिनू मेकोमी लोत्र पवानु, गो आ डोंइती ख्रिंखि पा राप्ती।

12 मिनू मेकोमी आं कली “दानीएल, महिनो, गे रुप्चा माल्शा डोंइती डा नाक्ती रे इ परमप्रभु आ डोंइती आंम कली ब्रेम्शो सेल्साक्वे, इ पुंडशो नेंतीके गो एक जाक्ती।

13 तन्न पारसी राज्य कली कोव्रब सैतान आ गेय पाइबमी गो नु २१ नाक्त सम्म लडाइ पा तेक्ती। मिनू परमप्रभु यावे आ स्वर्ग डा ठेयब गेय पाइब मिकाएल जाक्शा, आं कली वारच पाइक्ती। मिनू गो जाक्चा ताता। यसेया २४:२१

14 नोले डा नाक्त इ मुर आन कली मार दुम्बा, दे गो इ कली रुप्पाइक्थ जाक्ती। मारदे हना इ तशो कोइतीक क्येडा नोले डा नाक्त कली अर्को कोइतीक का यो बाक्ब” दे माइक्ती।

15 मिनू मेकोमी आं कली लोत्र पवानु, गो आं पिया खुक्शा मारेइ लोत्र पने मचाप्ब दुम्शा बाक्ती।

16 मो दुम्मेनु, मुर खोदेशो काम आं शोत्र थिप्तु। मिनू गो लोत्र पने चाप्ता। मिनू गो आं डोंइती राप्शा बाक्ब कली “आं प्रभु, एको कोइतीके आ पर्वम खाइक्ती। मिनू आं के मारेइ बोल मली। यसेया ६:७; येरमीया १:९

17 गो, इन वाइलम, गे नु दोपा लोत्र पने चाप्नुडा? मारदे हना गो ख्रिंखि पा, आं बोल नेल्ल लशा, आ सोक्त हेररा मली” देंती।

18 मिनू मेको मुर खोदेशोमी आं कली लेंशा थिशा, बोल्यो सेल्लती। दानीएल ८:१८

19 मिनू मेकोमी आं कली “नेल्ल क्येडा दाक्चा पुंडसीशो, महिनो। इ कली मारेइ मडुम्ब। बोल्यो नु महिब दुमो” दे माइक्ती। मेकोमी गो नु लोत्र पवा नोले, गो बोल्यो दुम्ती। मिनू गो “आं प्रभु, लोत्र पने। मारदे हना गे आं कली बोल्यो सेल्लतीनी” देंती। प्रकाश १:१७

20 मिनू मेकोमी “गो इ बाक्तीकेम मारदे जाक्डा, तुइक्नेवे? गो पारसी राज्य कली कोव्रब सैतान आ गेय पाइब नु लडाइ पचा कली लेत्या माल्नुड। गो ग्राडा नोले ग्रीस रागी डा सैतान आ गेय पाइब जाक्ब।

21 मिनु गो थमा लोत्र डा किताबमी मार ब्रेक्शो बाक्मे, मेको इ कली शोत्रथ जाक्ती। मेकेर मिकाएल क्येडा लाक्शा, अरु वारच पाइब सैतान आ गेय पाइब नु लडाइ पचा कली सुइ मबाक्नीम। परमप्रभु यावे आ स्वर्ग डा गेय पाइब, मिकाएल चहिं इस्राएली इन कली कोत्रब बाक्ब।

## 11

1 गो दारा मादी डा पिप दुम्शो डोंइती डा बर्समी मिकाएल कली वारच पाइक्चा नु अरु रे पा प्रोंइचा कली बाक्ती” दैत।

लडाइ आ पर्वम नोले दुम्ब लोत्र

2 मेकोमी लेंशा परमप्रभु यावे आ स्वर्ग डा गेय पाइबमी “मुल गो इ कली मेको थमा लोत्र पाइनुड। पिप दारा आ नोले पारसी रागीमी पिप सां दुम्नीम। मिनु मेको सांमी नोले जाक्ब पिप मेको डोंइती डा सां आन क्येडा शुश शोंप पाइश्शो दुम्ब। मिनु मेको पिपमी आ शोंपोमी आ सक्ति बारपाइक्ना पाइक्न लशा, रागी नेल्ल आन कली ग्रीस राज्य नु लडाइ पचा कली पोक्ब। दानीएल १०:२१

3 मिनु नोले शुश लडाइ पाइब पिप का जाक्ब। मेकोमी शुश रागी कली सासन पाइब। मिनु मेकोमी मार दाक्बा, मेको पाइब। दानीएल ८:२१

4 मिनु आ सक्ति बारना बारन लमेनु, आ राज्य पूर्व पच्छिम, उत्तर दक्खिन गे योक्सीब। मोपा योक्सीशा, आ तौ चचपुकीम मारेइ मताइनीम। मिनु मेको खोदेंशो पा सुइमी लेंशा सासन मपाइनीम। मारदे हना मेको आ राज्य नेल्ल खतम दुम्मेनु, अरु आन कली दुम्ब। दानीएल ८:८,२२

5 मिनु नोले दक्खिन डा पिप शुश सक्ति पाइश्शो दुम्ब। तन्न आ कप्तान आन दाते डा का मेको पिप क्येडा बोल्यो दुम्ब। मिनु मेकोमी पिप आ शुश रागी रोइश्शा, हुकुम पाइब।

6 मिनु बर्स का निक्शी नोले मेको निक्शी गारशा, दक्खिन डा पिपम आ तमी मेको उत्तर डा पिप कली ग्युंवे पा गेब। तन्न मेको आ सक्ति मलीब। मिनु मेको आ तौ चच यो मलीनीम। मेको पिप आ तमी, आ गेय पाइब, आ आल नु मेको कली दाक्ब नेल्ल खतम पोक्चा पुंइसीनीम।

7 मिनु नोले मेको पिप आ तमी आ खिं डा मुर का यूब। मेकोमी उत्तर डा पिप नु मेको आ मुर नु लडाइ पा, आ गारो हिरशो सहर नु दरवार ओत्रनीम। मिनु मेकेर लडाइ पा ग्रानीम।

8 मेकोमी मेको आन देवी देवता आन मूर्तिपुकी नु सुन चांदी के बोसपुकी रोइश्शा, इजीप्त रागीमी लाइक्ब। मिनु मे नोले उत्तर डा पिप नु बर्स का निक्शी सम्म लडाइ मपाइब।

9 मिनु नोले उत्तर डा पिपमी दक्खिन डा पिप कली लडाइ तोइब। तन्न मेको आंम आ रागीमी लेश्शा लाइब।

10 मिनु मेको उत्तर डा पिप आ तौपुकीमी शुश लडाइ पाइब मुर खुप्नीम। मिनु मेको तेक्ने मचाप्चा डा भोल बुद पा ग्राना ग्रान लाइनीम। मेको लेंशा गारो हिरशो सहर डा दरवार सम्म लाइनीम।

11 मिनु दक्खिन डा पिप गाइश्शा, उत्तर डा पिप नु लडाइ पचा कली बोक्ब। उत्तर डा पिपमी चहिं लडाइ पचा कली शुश लडाइ पाइब आन कली खुप्ब। तन्न मेको आन जोरी सत्रु रे पा बुइनीम।

12 मिनु उत्तर डा लडाइ पाइब ग्याइक्चा पुंइसीमानु, दक्खिन डा पिप ठेयब लेश्शा हजार हजार मुर आन कली साइक्ब। तन्न मोदेंशो पशा यो, बुना बुन लाइब।

13 मिनु उत्तर डा पिपमी डोंइती क्येडा शुश लडाइ पाइब खुप्ब। मिनु बर्स का निक्शी नोले लडाइ पचा कली शुश या कुरशा शुश लडाइ पाइब नु बारब।

14 मेना शुश रागी डा मुरपुकी यो दक्खिन डा पिप नु लडाइ पचा कली बोक्नीम। मिनु आ मुर आन दाते डा रोइक्ब नु साइक्ब यो बोक्नीम, दे कोंइतीके कोंइशो गाप्चा कली बाक्ब। तन्न मेकोपुकी मग्रानीम।

15 मिनु नोले उत्तर डा पिप जाक्शा, दक्खिन डा राज्य इन गारो हिरशो सहर पुम्शा, आंम के सेल्ल। दक्खिन डा लडाइ पाइब बुइनीम। मिनु मेको आन नेल्ल क्येडा बोल्यो लडाइ पाइब आन सक्ति यो जाम्शा लाइब।

16 मिनू उत्तर डा पिपम मार पचा दाक्बा, मेको पाइब। मिनू सुइमी मेको कली तेक्ने मचापनीम। मिनू मेकोम नेल्ल क्येडा दारशो रागी आंम के सेल्शा, मारेड मारेड खतम सेल्ब। दानीएल ८:९

17 मेकोमी कबल पा 'गो दक्खिन डा पिप आ राज्य नेल्ल आंम के सेल्लुडमी' दे मिम्ब। मिनू मेको कली खतम सेल्चा कली गारचा देखु पा, आ तमी कली ग्युंवे पा गेब। तन्न मेको आ मिम्शो खोदेशो मदुम्ब।

18 मिनू नोले मेकोमी समुन्द्र आ नेक्था बाक्शो रागी नु लडाइ पा, शुश रागी आंम के सेल्ब। तन्न आ लडाइ पाइब आन ठेयब मुर कामी मेको आ ठेयब लेशो थुं थमा पा खतम पोक्शा गेब।

19 मिनू नोले मेको पिप आ रागी डा दरवारम लेत्वा थुं पाइब, तन्न साइक्चा पुंडसीब।

20 मिनू मेको आ नोले अर्को मुर का पिप दुम्ब। मेकोमी आ राज्य कली शोंप तेल्चा कली ठेयब मुर का कली तिरो पोक्थ सोइक्ब। तन्न इक्का नाक्त नोले मेको पिप यो गाइक्चा मपुंडसीथु, लडाइ मपथु, बेक्ब।

21 मिनू मेको पिप आ नोले मारेड मान मपाइश्शो मुर का जाक्शा, सुइमी मतुइक्चा डा पा, रिम्शो लोव्र पखु पा मेको राज्य आंम के सेल्ब। दानीएल ८:२३-२४

22 मिनू मेको आ सक्ति बारना बारन लशा, नेल्ल आन कली ग्राब। मेकोमी परमप्रभु यावे आ कबल पशो का कली यो खतम पोक्ब।

23 मिनू मेकोमी लोव्र गारपाइश्शा दुशा बाक्शो देखु पा, जोल पाइब। मिनू आ मुर का निक्शी ला बाक्तेक्म हना यो, मेको सक्ति पाइश्शो दुम्ब।

24 मिनू सुइमी मारेड मतुइक्थु, मेको नेल्ल क्येडा शोंप पाइश्शो रागी लशा, लडाइ तोइब। मेकोम आ किकी पिपीपुकीम गेनायो मपशो गेय पाइब। आ नोले खोइक्ब आन कली आ रोइश्शो शोंप नु रू योव्रशा गेब। मेकोमी अरु गारो हिरशो सहर आन कली दोपा ग्राचा, दे मिम्शा बाक्ब। तन्न मोदेशो मिम्शो नाक्त का निक्शी कली ला दुम्ब।

25 मिनू उत्तर डा पिपमी आ बोल्यो लडाइ पाइब आन कली लाइश्शा, आ सक्ति नेल्लेमी दक्खिन डा पिप नु लडाइ पाइब। मिनू दक्खिन डा पिपमी यो ठेयब हिकने मचाप्या डा लडाइ पाइब लाइश्शा, मेको नु लडाइ पाइब। तन्न मेको पिप बुइब। मारदे हना आ मुरुमी मेको कली जोल पा मग्रापाइक्नीम।

26 मोदेशो पाइब आ नु जाइब बाक्नीम। मिनू मेको आ लडाइ पाइब ब्राशा, शुश साइक्चा पुंडसीनीम।

27 मेको पिप निक्शी मरिम्शो थुं पाइश्शो बाक्नीस। काथा जाम्ताक्स हना यो, जोल पमुइनीस। तन्न मेको रे मारेड रिम्शो मदुम्ब। मारदे हना नोले डा नाक्त मजाक्शो बाक्ब।

28 मिनू उत्तर डा पिप शुश शोंप लाइश्शा, आ रागी लेशशा लाइब। तन्न मेकोमी परमप्रभु यावे आ कबल पशो आ पर्वम शुश गाइश्शो बाक्ब। मिनू मेको पिपमी मार दाक्ता, मेको पाइब। मिनू आ रागीम लेशशा लाइब।

29 मिनू डोंइती देशो नाक्त गाम्मेनु, मेको उत्तर डा पिप लेशा दक्खिन डा पिप नु लडाइ पथ लाइब। तन्न डोंइती डा खोदेशो पा ग्राने मचाप्यब।

30 कित्तीम रे पा मेको नु लडाइ पचा कली जहाजपुकी जाक्नीम। मिनू मेको पिप आ थुं लुकच लशा, आ रागी लेप्यब। मेकोमी परमप्रभु यावे आ कबल पशो आ पर्वम गाइश्शा, थमा सुइक्ब आन कली खेदा पाइब। मिनू परमप्रभु यावे आ कबल प्रोंइशो मुर नु गारब।

31 मिनू मेको पिप आ सोइश्शो लडाइ पाइबपुकीमी परमप्रभु यावे आ खिं नु दरवार कली ग्रांग्रा दिशो सेल्नीम। मिनू मेकोपुकीमी नाक्त कित कित चोशा चढेतीक गेय तेक्नीम। मिनू मेकेर ग्रांग्रा दिचा डा मार मार थोव्रक वोइक्नीम। दानीएल ९:२७

32 मिनू मेको पिपमी परमप्रभु यावे आ कबल पशो मटीब मुर आन कली जोल पा आ नोले खोइक्ब सेल्ब। तन्न आन परमप्रभु कली तुइक्ब मुरपुकी बोल्यो दुम्शा, मेको कबल काइ मप्रोंइनीम।

33 मिनू मेको आन दाते डा जोक्ब तुइक्बपुकीमी शुश मुर आन कली रूप्ब सेल्नीम। मोपतीके नाक्त का निक्शी सम्म मेको तरवारम क्योरचा, मीम हुम्चा, ग्याइश्शा चोक्चा नु आन मार मार रोइक्चा पुंडसीनीम।

34 मिनु मोदेशो दुम्मेनु, इच्छा वारच पाइक्का पुंइसीनीम। मिनु शुश मुर मेको आन नोले खोइक्नीम। तन्न थुं पाइइशो मुर ला मेको आन नोले खोइक्नीम।

35 मिनु मुरुम जोक्ब तुइक्ब आन कली मोदेशो खेदा पतीके रागीम नोले डा नाक्ती सम्म मेको आन कली सुन खोदेशो पा यपाइक्का, नाक्का नु रिम्शो दुम्पाइक्का कली बाक्ब। मेको मुल सम्म मजाक्शो बाक्ब।

### ठेयब लेशो पिप

36 पिपमी मार दाक्बा, मेको पाइब। मिनु मेकोमी 'देवी देवता नेल्ल आन क्येडा ठेयब नड' देब। मिनु परमप्रभु नेल्ल आन क्येडा ठेयब परमप्रभु आ पर्वम गेनायो मनेसीशो मरिम्शो लोव्र पाइब। मेको आ नोले डा नाक्त मजाक्म सम्म आ माल्लो ताइब। परमप्रभुमी मेको कली सजाइ मगेवा सम्म मोदेशो दुम्ब। मारदे हना परमप्रभुमी मार पचा मिम्बा, मेको पाइब। रथिस्सलोनिकी २:४; दानीएल ७:८, २५; प्रकाश १३:५-६

37 मिनु मेको पिपमी आ किकी पिपी आन देवी देवता आन कली सेउ मपाइब। मिनु मीश मुर आन दाक्शो देवी देवता आन कली यो सेउ मपाइब। मारदे हना 'गो देवी देवता नेल्ल आन क्येडा ठेयब नड' दे मिम्सीब। इजीकीएल ८:१४

38 तन्न बोल्यो दरवार डा देवता कली सेउ पाइब। आ किकी पिपीमी मेको कली मतुइइशो बाक्तेक्म। मेको आन कली सुन, चांदी, हीरा नु शुश क्येट लाइब थोव्रक गेशा ठेयब सेल्ब।

39 मेकोमी अर्को रागी डा देवी देवता आन कली सेउ पशा, नेल्ल क्येडा बोल्यो दरवार कली ग्राब। सुमी मेको कली मान पाइबा, मेको शुश शोप पाइइशो दुम्ब। मिनु मेको आन कली रू शुश गेशा, शुश मुर आन कली हुकुम पाइब सेल्ब।

40 मिनु नोले डा नाक्ती दक्खिन डा पिपमी मेको कली लडाइ तोइब। मिनु उत्तर डा पिपमी फश गिवार खोदेशो पा मेको नु लडाइ पाइब। मेकोमी बग्गी, शारा डोइक्ब नु लडाइ पाइब जहाज शुश चाक्शा लडाइ पाइब।

41 मिनु मेको रागी रागी नु लडाइ पा, ठेयब खोला खोदेशो पा बारब। मिनु मेको दारशो रागी ओव्रशा, हजार हजार मुर आन कली साइक्ब। तन्न एदोम, मोआब रागी नु अम्मोनी आन रागी डा नेल्ल क्येडा ठेयब बाक्तीके मेको आ गुइमी मदुम्नीम। दानीएल ११:१६

42 मेकोमी रागी रागी आन कली ग्राना ग्रान लाइब। मिनु इजीप्त रागी कली यो ग्राब।

43 मिनु मेकोमी इजीप्त डा सुन चांदी नु शोप नेल्ल आंम के सेल्ब। लिबीया नु एथीयोपीया डा मुर आ गेय पाइब दुम्नीम।

44 मिनु मेकोमी पूर्व नु उत्तर रे जाक्शो लडाइ पतीक लोव्र नेशा, मेको शुश गाइइशा, मुर आन कली शुश साइइशा, रागी नेल्ल रोबल चिबल पोक्ब।

45 मिनु मेकोमी ठेयब समुन्द्र नु नेल्ल क्येडा दारशो परमप्रभु आ सहर डा डांडा आस दातेमी आ बाक्तीक ताम्बु कीब। मो पाप्तु हना यो, मेको बेक्ब। सुइमी मेको कली वारच मपाइनीम" दे स्वर्ग डा गेय पाइबम देत।

## 12

### बेक्शो मुर सेंसीशो

1 मिनु परमप्रभु यावे आ स्वर्ग डा गेय पाइबमी "मेना नेल्ल क्येडा ठेयब स्वर्ग डा गेय पाइब मिकाएल जाक्ब। मिनु मेकोमी इ रागी डा मुर आन कली कोव्रब। मेना रागी दुम नोले गेनायो मदुम्शो श्येत जाक्ब। तन्न इ मुर श्येत रे प्रोइचा पुंइसीनीम। सु सु आन नें किताबम ब्रेक्शो बाक्मे, मेको ब्रोंइचा ताइनीम। दानीएल १०:१३; प्रकाश १२:७; मत्ती २४:२१; दानीएल ७:१०

2 मिनु खपीमी बेक्शा इप्शो नेल्ल बोक्नीम। का निक्शी गेना हना यो ब्रोंइचा कली बोक्नीम। का निक्शी चहिं गेना हना यो शुश मुने दोक्का कली बोक्नीम। यूहन्ना ५:२९

3 मिनू जोक्ब तुडक्बपुकी सरीड डा छेडछेड खोदेशो दुम्नीम। मिनू सु सुमी मुर आन कली ठीक लांमी गाक्पदमे, मेकोपुकी गेना हना यो सोरुल आ छेडछेड खोदेशो दुम्नीम। दानीएल ११:३३; हितोपदेस ४:१८; मत्ती १३:४३

4 तन्न गे दानीएलमी, एको लोव्र सुइ आन कली मदनेो। एको नोले डा नाक्त कली ब्रेक्शो किताब मप्राक्थु, छाप थोक्शा वोतो। नोले डा नाक्तीम शुश मुर आन थुं मनाइक्थु, थमा लोव्र माल्शा शुश तुडक्ब दुम्नीम” देंत। प्रकाश १०:४

नोले डा नाक्त

5 मिनू गो, दानीएलमी, अर्को मुर निक्शी तातासी। का खोला आ ओंथ हांबु नु अर्को खोला आ आइक्ची हांबुम बाक्ताक्स।

6 मिनू कामी सुती वा फेक्शा आइक्ची हांबुम बाक्ब कली “एको लोव्र गाप्चा कली गिश नाक्त बाक्नीमी?” दे हिल्लो पाप्तु।

7 मिनू मेको आइक्ची हांबु बाक्ब बुश सुती वा फेक्शोमी आ गुइ निम्फा सरीड गे पोक्तु। मिनू गेना हना यो ब्रोंडशा बाक्ब आ नें थिशा कसम जशो नेंता। मिनू मेकोमी “एको पाला का बाक्शो ना, पाला निक्शी बाक्शो ना नु आधा पाला बाक्शो ना कली दुम्ब। मिनू परमप्रभु यावे आ मुर आन कली श्येत जची ना नुम्मेनु, मेको देशो लोव्र नेल्ल गाप्ब” दे गेना हना यो ब्रोंडशा बाक्ब आ नेंमी कसम जाप्तु। दानीएल ७:२५; प्रकाश १०:५-६

8 गो मेको लोव्र नेंता, तन्न मरुबु। मोपतीके गो “आं प्रभु, एको नेल्ल रे मार दुम्बा?” दे हिल्लो पाता।

9 मिनू मेकोमी “दानीएल, गे इ लां खोतो। मारदे हना एको लोव्र नोले डा नाक्त सम्म खुइशशा छाप थोक्शा वोइक्चा माल्ब।

10 मिनू शुश मुर नाक्चा, रिम्शो सेल्चा नु सुन यपाइशशो खोदेशो पा रिम्शो सेल्चा पुंडसीनीम। तन्न परमप्रभु कली मटीब, मटिना टिन बाक्शा, मारेइ मरुप्नीम। तन्न जोक्ब तुडक्बपुकीमी एको लोव्र रुप्नीम।

11 मिनू नाक्त कित कित डा चोशा चढेतीक चढेचा नाइक्तमे नोले नु ग्रांरा दिशो थोव्रक चढेमे सम्म हजार का, सहे निक्शी ९० नाक्त दुम्नीम। दानीएल ९:२७

12 सु सु हजार का सहे सां ३५ नाक्त सम्म फाल्शा बाक्नीमी, मेको ग्येरसीशो मुर बाक्नीम।

13 तन्न गे, दानीएल, इ लां लशा, थुं नांडसो। मिनू नोले डा नाक्ती इ इनाम तचा कली बेक्चा रे सेंचा पुंडसीनेवे” देंत।

## होसे

**ब्रेक्ब मुर:** एको किताब होसेमी ब्रेक्शो बाक्ब। होसे आ अर्थ “परमप्रभु, वारच पाइय्यीनी” देशो बाक्ब।

**गेना ब्रेक्शो:** होसेमी परमप्रभु यावे आ लोत्र इस्राएल डा उत्तर रागी डा पिप योआश आ तौ येरोबोआम आ सासन ७८२-७५३ बि. सी. रे हिज्कीयाह आ सासन ७२९/७१६-६८६ बि. सी. सम्म पशो बाक्त। मेना परमप्रभु यावे आ लोत्र पाइब आमोस, यसैया नु मीका यो बाक्मा बाक्त। गोत्ये माइशो ठेयब जोक्ब तुडक्ब मुर कामी “मेको किताब ८०० बि. सी.म हिब्रू लोत्र रे पा ब्रेक्शो बाक्ब” दे ब्रेक्शो बाक्ब।

### मार ब्रेक्शो:

१. होसे आ ग्युबे इस्राएली आन परमप्रभु यावे कली प्रोइशो कोंइचा कली बाक्ब।
२. परमप्रभुमी इस्राएली आन कली दाक्शा, मप्रोंइतीके आ कोंइतीक यो बाक्ब। होसे १:-३:-
३. चढेब नु पिप आन कली मरिम्शो पचा कली दोस गेतीके यो बाक्ब। होसे ४:-१०:-
४. नोले परमप्रभु आ शिशी कोंइतीके बाक्ब। होसे ११:-१४:-

### डोंइती डा लोत्र

१ परमप्रभु यावेमी बेयरी आ तौ होसे नु लोत्र पाप्तु। मेना यहूदा डा पिप उज्जीयाह, योथाम, आहाज नु हिज्कीयाह बाक्तेक्म। मिनु इस्राएल डा पिप योआश आ तौ येरोबाम बाक्त। यसैया १:१; २राजा १४:२३; आमोस १:१

### नोले शोंइसीतीके आ चिन्ड

२ मिनु परमप्रभु यावेमी होसे नु लोत्र पचा गोप्तु। मेकोमी होसे कली “लावो, मिनु तेल्लेम मीश मुर कली ग्युबे पावो। मिनु मेको नु आल थिवो। मारदे हना एको रागी परमप्रभु यावे कली प्रोइशा, तेल्लेम खोंदेशो दुम्शो बाक्ब” दैत। होसे ३:१; ब्यवस्था २३:१८

३ मिनु होसे लशा दिब्लैम आ तमी गोमेर कली ग्युबे पाप्तु। मिनु मेको मीशेमी आल कुरशा, तौ का थिप्तु।

४ मिनु परमप्रभु यावेमी होसे कली “मेको तौ आ नें येज्जेल वोतो। मारदे हना गो रीब पा येहू आ खिं कली येज्जेलमी पशो हुश ख्राक्श आ पर्वम क्येक्क लेत्नुड। मिनु इस्राएल राज्य खतम पोक्नुड। २राजा १०:१-१४

५ गो मेको नाक्ती इस्राएल कली येज्जेल डा दिंममी खतम सेल्नुड” दैत।

६ मिनु गोमेरमी लेंशा आल कुरशा, तमी का थिप्तु। मिनु परमप्रभुमी होसे कली “मेको आ नें लो-रूहामा वोतो। मारदे हना गो इस्राएल कली लेंशा शिशी मपाइनुड। मिनु मेको आन पाप मक्याम्नुड। होसे २:३, २५

७ मिनु गो यहूदा आ खिं कली शिशी कोंइनुड। मिनु मेको आन कली जोरी सत्रु आन गुड रे पा प्रोंइनुड। लिब्रा, तरवार नु लडाइ पाइब शारा नु शारा डोइक्बपुकी रे ममाड, तन्न गो मेको आन कली आंमान प्रोंइनुडमी” दे परमप्रभु यावे, आन परमप्रभुमी दैत। लो-रूहामा आ अर्थ “मदाक्नुड” देशो बाक्ब।

८ मिनु गोमेरमी लो-रूहामा कली दूध तुंइचा प्रोना नोले, आल कुरशा, अर्को तौ का थिप्तु।

९ मिनु परमप्रभुमी होसे कली “मेको आ नें लो-अम्मी वोतो। मारदे हना गेपुकी आं मुर मननी। गो इन परमप्रभु मनड। लो-अम्मी आ अर्थ ‘गे आं मुर मनवे नु गो इ परमप्रभु मनड’ देशो बाक्ब।

१० इस्राएलीपुकी समुन्द्र डा बाल्वा खोंदेशो पा शुश दुम्नीम। मिनु सुइमी मेको आन कली पुक्ने नु हिक्ने मचाप्नीम। ते मेको आन कली ‘गेपुकी आं मुर मननी’ देशो बाक्मे मेकेर मेको आन कली ‘गेना हना यो ब्रोंइशा बाक्ब परमप्रभु आ मुर’ देनीम। उत्पत्ती २२:१७; रोमी ९:२६

11 मिनु यहूदा आ मुर नु इस्राएल आ मुर लेंशा गारशा का दुम्नीम। मिनु मेकोपुकीमी मुर का कली सासन पाइब सेल्नीम। मिनु मेको रागी रे यूनीम। मारदे हना येज़ेल आ नाक्त ठेयब दुम्ब” दैत। यसैया ११:११-१३; येरमीया ३:१८; इजीकीएल ३७:२२

## 2

### लेंशा रिम्शो पशो

1 मिनु परमप्रभुमी “गेपुकी आंम लोकब आन कली ‘गे आं मुर बाक्नीनी’ देनीन। मिनु इन समी आन कली ‘आं दाक्शो समी’ देनीन। होसे १:१९; होसे १:६

2 इन ममा कली हुइक्तीन। मेको कली शुश हुइक्तीन। मारदे हना मेको आं मीश मबाक्ब। मिनु गो मेको आ वोंइश मनड। मेकोमी आ मिक्च वोंइश मुर गे हिरचा प्रोनल। मिनु आ दूध आस दाते डा नाता खोइश्शा, ग्रॉग्रा दिशो गेय प्रोनल। इजीकीएल १६:२३;

3 गो मपापु हना, गो मेको आ वा प्रुइश्शा, मेको जरमेशो नाक्ती खोदेशो पा शिन्ना पोक्नुड। गो मेको कली गोरशो रागी खोदेशो सेल्नुड। सोत्रशो रागी खोदेशो पा ब्वाक्कु मबाक्शो सेल्नुड।

### परमप्रभु रे नोले शोंइसीशो

4 गो मेको आ तमी तौ आन कली आं दाक्स मकोइक्नुड। मारदे हना मेकोपुकी तेल्लेम पा थिशो आल बाक्नीम।

5 मेको आन ममा जोल पा अर्को मुर नु गाक्त। मेको आन कली मुने पा थिशो बाक्त। मेकोमी ‘गो आं कली दाक्ब वोंइश खोइक्नुड। मिनु मेकोमी आं कली जचा तूचा, ऊन नु सुती वा, तेल नु अडगुर शांबु गेब’ दैत। येरमीया ४४:१७

6 मोपतीके गो मेको आ लां चूमी तेक्नुड। मेको आ लांम गारो सेल्शा, आ लां तेक्शा वोइक्नुड। मिनु मेकोमी तेइ लां मताइब।

7 मेकोमी आ दाक्शो मुर आन कली माल्थ लाइब। तन्न मेको आन कली ग्याइक्ने मचाप्ब। मेकोमी आ दाक्शो मुर आन कली कोत्रब। तन्न मथिप्ब। मिनु मेकोमी ‘मुल गो डोंइती डा खोदेशो पा आं वोंइश आ बाक्तीक लाइनुड। मारदे हना गो मुल क्येडा मेना ठीक बाक्ती’ दैब।

8 गो मेको कली अन्न, नक अडगुर शांबु नु तेल गेता हना यो मेकोमी मतुइक्त। गोम मेको कली सुन चांदीम ग्योम्ताकड। तन्न मेकोमी आं गेशो नेल्ल बाल देवता कली गेपु। ब्यवस्था ७:१२-१३

9 मोपतीके बाली मीमेनु नु नक अडगुर शांबु बोक्मेनु, मेको गो लांइसीनुड। मिनु मेकोमी फेक्शो आं ऊन नु सुती वा यो लांइसीनुड।

10 गो मेको आ दाक्शो मुर आन डोंइती मेको कली शिन्ना पा आ मुने कोइक्नुड। मिनु सुइमी यो मेको कली आं गुइ रे मलाइक्नीम। येरमीया १३:२२

11 गो मेको आ चाड नेल्ले मानेचा मगेनुड। मेको आ बर्स बर्स डा चाडपुकी नु औसी डा चाड, मेको आ नाइक्तीक नाक्तपुकी नु मेको आ अरु चाड नेल्ल मानेचा मगेनुड।

12 गो मेको आ अडगुर बोटपुकी नु फोत्रशी रवापुकी खतम सेल्नुड। मेको आ परबम मेकोमी ‘एको आं तेल्लेम पशो डा गाल्च नमी’ देशो बाक्त। गो मेको रवा रे ठेयब ब्वाकी सेल्नुड। मिनु ब्वाकी डा जन्तुपुकीमी मेको ब्वाइनीम।

13 गो मेको कली बाल देवता कली धूप चोशो नाक्ती सजाइ गेनुड। मेको नाक्त मेको ग्योम्सीशा वोंइश खोइक्तु। आं कली चहिं प्रेंताक्यी।

14 मोपतीके मुल गो मेको कली लेम्शा, गोरशो रागीमी लाइक्नुड। मिनु मेको नु आ दाक्शो लोत्र पाइनुड। यसैया ४०:२

15 मेकेर गो मेको कली आ अडगुर रू लेशशा गेनुड। गो आकोर माइश्शो दिंम कली चहिं आस पतीक रागी सेल्नुड। मेकेर मेकोमी आ ठिटी बाक्ची ना डा खोदेशो नु इजीप्त रागी रे जाक्शो खोदेशो पा कुम्सो पाइब” दैत। यहोसु ७:२४-२६



### परमप्रभुमी लेंशा दाक्ब

16 मिनु परमप्रभु यावेमी “मेको नाक्त गे आं कली ‘आं वोंइश’ देनेवे। मिनु ‘आं बाल देवता’ मदेनेवे। यसेया ५४:५

17 गो बाल देवता आन नें यो मेको आ शोत्र रे गुंडनुड। मिनु लेंशा मेकोमी मेको आन नें गेनायो मथोइब।

18 गो मेको नाक्त मेकोपुकी, ब्वाकी डा जन्तुपुकी, सरीड डा चिक्बपुकी नु खपीम गेशा गाक्ब जन्तुपुकी नु कबल का पाडनुड। मिनु मेको रागी डा मुरपुकीमी मेना रे लिब्रा, तरवार नु लडाइ मताइनीम। मिनु मुर नेल्ल हेम्म पा बाक्चा ताइनीम। उत्पत्ती ९:९-१०; इजीकीएल ३४:२५

19 गो इ कली गेना हना यो आं मीश सेल्लन। गो इ कली थमा पा दाक्शा शिशी पा नु ठीक पा आं मीश सेल्लन। प्रकाश १९:७

20 गो इ कली मप्रोंइथु आं मीश सेल्लन। मिनु परमप्रभु यावे कली रिमशो पा तुडक्नेवे” दे परमप्रभु यावेमी देंत। येरमीया ३१:३४

21 परमप्रभु यावेमी “मेको नाक्त गो सरीड कली लोत्र लेतनुड। सरीडमी रागी कली लोत्र लेप्ब।

22 मिनु रागीमी अन्न, नक अडगुर शांबु नु तेलमी येजेल कली लोत्र लेत्नीम।

23 गो मेको कली आं पबर्म आं रागीमी बाक्पाइक्नुड। गो मेको कली ‘मदाक्नुड’ देशो कली आं शिशी कोंडनुड। मिनु गो ‘गेपुकी आं मुर मननी’ देशो नड। मुल गो ‘आं मुर ननी’ देनुड। मिनु मेकोपुकीमी आं कली ‘गे आंइ परमप्रभु बाक्नीनी’ देंनीम” दे परमप्रभुमी देंत। होसे १:६; होसे १:९; रोमी ९:२५; १पत्रुस २:१०

## 3

### इसाएलम शिशी तशो

1 मिनु परमप्रभु यावेमी आं कली “इ मीशेमी अर्को वोंइश खोइशशा, इ कली प्रोंइतु हना यो, मुल लशा, इ मीश कली लेंशा इ दाक्तीक कोंइदो। इस्राएलीपुकीमी अर्को देवी देवता आन कली दाक्शा आन चदेशो थोत्रक जचा दाक्ताक्म हना यो, परमप्रभु यावेमी इस्राएली आन कली दाक्ब” देंत। होसे १:२

2 मोपतीके गो मेको मुर कली १५ शेकेल चांदी, होमेर का नु लेतेक का क्योत्रज गेशा आं मीश लेंशा ग्याप्ता। शेकेल का ११.५ ग्राम चांदी के क्येट बाक्ब। होमेर का २२० लिटर बाक्ब। लेतेक का ११० लिटर बाक्ब।

3 मिनु गोमी आं मीश कली “गे मुल शुश नाक्त सम्म गो नु बाक्चा माल्लेवे। गे मुल तेल्लेम मपावो। अरु वोंइश मखोतो। गो गे नु बाक्नुड” देंती।

4 मारदे हना इस्राएलीपुकी शुश नाक्त सम्म पिप नु सासन पाइब मबाक्थु, बाक्चा माल्लीम। मेकोपुकीमी चढ़ेचा कली मिम्तीक फुल्लु, एफोद माइशो चढ़ेब आ पांइतीक वा नु आन खिं डा मूर्ति यो मताइनीम। २इतिहास १५:३

5 मिनु नोले डा नाक्तीमी इस्राएलीपुकी लेशशा, परमप्रभु यावे, आन परमप्रभु कली नु आन पिप दाऊद कली माल्लीम। मेकोपुकी खिंखि पा आन परमप्रभु यावे गे लेशशा, आसीक ताइनीम। येरमीया ३०:९; इजीकीएल ३४:२३-२४

## 4

### चढ़ेबपुकीमी मरिमशो पशो

1 गे इस्राएली, परमप्रभु यावे आ लोत्र नेनीन। मारदे हना परमप्रभु यावेमी रागीम बाक्ब इन कली दोस गेब। मार दोस गेब देशा हना “एको रागी डा मुरुमी आं कली प्रोंइतीमी, आं कली मदाक्थु, आं कली मटीनीम।

2 एकर कसम जचा, जोल पचा, मुर साइक्चा, खुइ पचा नु तेल्लेम पचा डा लाक्शा, अर्को मारेइ मबाक्ब। नेल्लेमी मरिमशो ला पाइनीम। मेकोपुकीम मुर साइशशा, हुश खाक्श पोक्नीम।

3 मोपतीके एको रागीमी रोंका पाइब। एकेर बाक्ब नेल्ले ओंखां पा जाम्शा लाइनीम। बस्तु भाव, चिक्ब नु समुन्द्र डा डांड बेक्शा, जाम्शा लाइनीम।

4 तन्न सुइमी सुइ कली दोस मगेमेक्ल। मुरुमी मुर आन कली 'मरिम्शो पाइतीनी' मदेंमल। मारदे हना गो गे चढेबपुकी नु लोत्र का पचा माल्नुड।

5 गेपुकी काबु नाक्ती खतम दुम्नीनी। मिनु आं लोत्र पाइबपुकी यो गेपुकी नु काथा खतम दुम्नीम। मोपतीके गो इन खिं डा मुर नेल्ल गे नु खतम सेल्लुडमी।

6 आं मुर मारेड मतुइक्तीके खतम दुम्नीम। मारदे हना गेपुकीमी तुइक्तीक कली ताइक्ताक्नी। मोपतीके गो यो इन कली आं कली चढेब दुम्तीक रे ताइक्नन्नी। मारदे हना गेपुकीमी इन परमप्रभु, आं अरेशो लोत्र कली क्यारी मपनी। मोपतीके गो यो इन आल आन कली क्यारी मपाइनुड।

7 चढेबपुकी दोशो बारमा, मोशोन आं कली मरिम्शो पाम्तेक्म। मेको आन ठेयब दुम्तीके ताइश्शा, मुने दोक्तीक गेय पाम्तेक्म।

8 मेकोपुकी आं मुर आन पाप आ पर्वम चढेशो ब्वशा दोम्नीम। मिनु मुरपुकीम पाप पशो दाक्नीम। लेवी ४:१३-२१, २७-३५; लेवी ६:१९

9 मिनु मुरपुकी दोदेशो बाक्मा, मोदेशो चढेबपुकी बाक्नीम। गो मुरपुकी नु चढेब नेल्ल आन कली सजाइ गेनुड। मेकोपुकीमी दोदेशो पामे, मोदेशोन सजाइ गेनुड।

10 मेकोपुकीमी जाइनीम ब्वाइनीम, तन्न मरूनीम। मेकोपुकीमी तेल्लेम पशा, सोशा बोशा मलाइनीम। मारदे हना मेकोपुकीमी तेल्लेम पचा कली परमप्रभु यावे कली प्रॉइतेक्म।

### इस्राएली आन मूर्ति पूजा

11 माइत अडगुर शांबु नु नक अडगुर शांबुम मुर आन रुप्तीके कली साम्ब।

12 आं मुरपुकीमी शी के मूर्ति कली हिल्लो पाइनीम। मिनु मेकोपुकीमी कोक्केमी साहीत कोल्लनीम। मारदे हना तेल्लेम पतीक थुमी मेको आन कली हेंथे गाक्पाइश्शो बाक्ब। मेकोपुकीमी तेल्लेम पचा कली परमप्रभु कली प्रॉइतेक्म। येरमीया २:२७; होसे ५:४

13 मेकोपुकीमी डांडामी चढेनीम। मिनु पहाडमी तुल्च, पिपल नु सेक्ल रवा आन वांकुम धूप चोइनीम। मोपतीके इन तमी तेल्लेम दुम्नीम। मिनु इन चाइमीपुकी अरु आन वोंइश नु बाक्नीम। इजीकीएल ६:१३

14 गो इन तमी आन तेल्लेम पशो नु इन चाइमी अरु आन वोंइश नु बाक्शो आ पर्वम सजाइ मगेनुड। मारदे हना मेको वोंइश मुर यो सुइ मबाक्तीकेमी तेल्लेम नु लशा देवी देवता आन कली चढेनीम। मोदेशो मरुप्ब मुरपुकी जाम्शा लाइनीम। होसे १:२

15 गे इस्राएलीपुकी, तेल्लेम पाइतीनी हना यो, यहूदा डा मुर आन कली हेंथे मगाक्पतीन। गेपुकी गिल्यालमी नु बेथ-आवेनमी मलन। मिनु 'परमप्रभु यावे ब्रोंइशा बाक्शो खोदेशो पा' दे कसम मजने" दे परमप्रभुमी दंत। आमोस ५:५; होसे १०:५; आमोस ८:१४

16 इस्राएलीपुकी मटीब बी खोदेशो बाक्नीम। दोपा परमप्रभु यावेमी भेडा कली योत्रशो खोदेशो पा योत्रने चाक्बा?

17 एफ्राइम मूर्ति आन वारच दुम्शो बाक्ब। मोपतीके मेको कली प्रोनीन।

18 मेकोपुकीमी शांबु थुम्शा यो तेल्लेम पना पन बाक्नीम। मेको आन सासन पाइब यो मुने दोक्नीम।

19 ठेयब फश गिवार पशा, मेको आन कली योल्ब। मिनु मेको आन चढेशो आ पर्वम मुने दोक्नीम।

## 5

### चढेब आन कली सजाइ

1 मिनु परमप्रभुमी "चढेबपुकी, एको लोत्र नेनीन। इस्राएलीपुकी इन नोफा दाइश्शा नेनीन। पिप आ खिं डा मुरपुकी, नेनीन। एको निसाफ इन मरिम्शो पशो आ पर्वम बाक्ब। गेपुकी मिरुपा सहरमी दाइश्शो ब्वारद नु ताबोर सहरमी ब्रशो ग्याइल खोदेशो दुम्शो बाक्नीनी।

2 मेकोपुकीमी शित्तीममी मुर बिक्शा बेक्तीक सेल्लेक्म। गो मेको नेल्ल आन कली सजाइ गेनुड।

इसाएलीपुकीमी सजाइ तशो

3 गो एफ्राइम आ परबम नेल्ल तुडक्नुड। मिनु इसाएल यो गो नु खुडक्ने मचाप्ब। एफ्राइम, गे तेल्लेम पतीकेमी ग्रुमशो बाक्नेवे। इसाएल ग्रंथा दिचा डा दुमशो बाक्ब। होसे १:२; होसे ६:१०

4 मेको आन गेय आ परबम आन परमप्रभु गे लेले मचाप्नीम। तेल्लेम पचा मेको आन थुंमी बाक्ब। मिनु मेकोपुकीमी परमप्रभु यावे कली मतुडक्नीम। होसे ४:१२

5 इसाएली आन ठेयब लेत्तीकेमी मरिमशो पाइब बाक्नीम, दे आन सांकछी बाक्ब। एफ्राइम डा मुरपुकी आंम पाप पतीकेमी खतम दुम्नीम। यहूदा डा मुरपुकी यो मेकोपुकी नु खतम दुम्नीम।

6 मिनु मेको आन क्यारश भेडा नु बी ब्यफ लाइशशा, परमप्रभु यावे कली माल्थ लाइनीमी। तन्न मेकोपुकीमी मेको कली मथिल्लीम। मारदे हना मेको आन क्येडा डोन लत। यसैया १:११-१५

7 मेकोपुकी परमप्रभु यावे रे नोले शोंडसीशो बाक्नीम। मेकोपुकीमी हेंथे पा आल थिशो बाक्नीम। मेको आन औंसी डा चाडमी आन बाली नाली नु मेको आन कली खतम सेल्लब। होसे २:१३

थर निक्शी आस कली सजाइ

8 गिबामी तुराही नु रामाह सहरमी प्रोव ताप्पीन। बेथ-आवेनमी लडाइ डा तुराही ताप्पीन। बेन्यामीन डा मुरपुकी डोंडती बारीन। २राजा १५:३७; यसैया ७:१-९; होसे ४:१५

9 सजाइ डा नाक्ती एफ्राइम गोरशो रागी खोदेशो दुम्ब। मुल मार मार दुम्बा, मेको इसाएली आन कली देने थुम्ता।

10 यहूदा थर डा ठेयब मुरपुकी सांद डा फुल्लु याक्ब खोदेशो दुम्तेक्म। गो आं गाइक्तीक मेको आन तारी ब्वाक्कु खोदेशो पा मोडक्नुडमी। ब्यवस्था १९:१४

11 एफ्राइम डा मुरपुकी सजाइ तशा, आन थुं लुक्च लत। मारदे हना मेकोपुकी जाम्शा लाइब मूर्ति आन नोले खोडक्तेक्म।

12 मिनु गो एफ्राइम डा मुर आन कली तुम्ब नु यहूदा डा मुर आन कली राक्शो खोदेशो दुमशो बाक्नुड।

13 एफ्राइम नु यहूदामी आस श्येत तुडक्तसे नोले, एफ्राइममी अस्सुर डा ठेयब पिप कली 'वारच पने' दे पुंडथ मुर सोडक्ताक्व। तन्न मेकोमी इ कली वारच पने मचाप्ब। होसे ७:११; होसे १०:६; होसे १२:२

14 मारदे हना गो एफ्राइम कली गुप्स खोदेशो नु यहूदा कली ठिटा गुप्स खोदेशो दुमशो बाक्नुड। गो मेको आन कली खतम सेल्ला, आं लां खोडक्नुड। गो मेको आन कली कुरशा लाइक्नुड। मिनु मेको आन कली आं रे रोडक्ने मचाप्नीम। होसे १३:७; होसे ६:१

15 मिनु गो आं बाक्तीकेमी लेशशा बाक्नुड। मेकोपुकीमी आन मरिमशो पशो तुडशशा, आं कली ममाल्मे सम्म बाक्नुड। मिनु मेकोपुकीमी शुश श्येत जशा, आं कली माल्नीम" दे परमप्रभुमी देत। यसैया २६:१६

## 6

परमप्रभु गे लेशशा, कुम्सो पशो

1 मिनु मार लोत्र पाइनीम देशा हना "पिन, गोपुकी परमप्रभु यावे गे लेय्य। मेकोमी आंड कली टुक्रा टुक्रा पशो बाक्त। मिनु आंड कली सापाइक्ब। मेकोमी आंड कली तुप्तु। मिनु मेकोमी आंड कली ओरुत्ती पाइक्ब। होसे ५:१४

2 नाक्त निक्शी नोले परमप्रभुमी आंड कली लेंशा ब्रोंडचा गेब। मिनु नाक्त सां नोले आंड कली आ डोंडती राप्पाइक्ब। मिनु मोपा गोपुकी मेको आ डोंडती ब्रोंडनीकी। ब्यवस्था ३२:३९

3 गोपुकी परमप्रभु यावे कली तुइश्शा, ठेयब सेल्य। मेको कली शुश तुइश्शा मान पय। मेको नां दाप्शो बुद पा जाकब। हिंउद डा रेउ खोदेशो पा जाकब। बर्खा डा रू कली रिम्शो पा जिप्ब रेउ खोदेशो पा जाकब” दे लोत्र पाम्तेक्म।

4 मिनु परमप्रभुमी “एफ्राइम, गो इ कली मार पड? यहूदा इ कली मार पड? इस दाक्चा सुनी डा गोस्स खोदेशो नु रीब पा जाम्शा लाइब सीत खोदेशो बाकब। होसे ७:१६

5 मोपतीके गो इस कली आं लोत्र पाइब रे पा टुक्रा टुक्रा पाता। आं लोत्रमी इस कली साइक्ता। आं निसाफ इस तारी चिला आप्शो खोदेशो बाकब। येरमीया २३:२९

6 मारदे हना गो क्योरशा चदेशो क्येडा दाक्मुतीक दाक्नुड। मिनु चोशा चदेशो क्येडा आं कली तुइश्शा ठेयब सेल्लो दाक्नुड। १ सामुएल १५:२२; हितोपदेस २१:३; मत्ती ९:१३; १२:७

### रागीम मरिम्शो पशो

7 मेकोपुकीमी आदम सहर डा मुर खोदेशो पा गो नु पशो कबल प्रोइतेक्म। मेकोपुकीमी आं कली थमा मसुइक्थु प्रोइतेक्म। यहोसु ३:१६

8 गिलाद मरिम्शो मुर आन सहर बाकब। मेको सहर डा लां हुशेम खुम्शो खोइल आ छापम ब्रीशो बाक्त।

9 दोपा रोइक्बपुकी बाप्शा बाक्नीमी, मोपा चदेबपुकी यो बुक्शा बाक्शो बाक्नीम। मेकोपुकीमी शेकेम लतीक लांमी मुर साइक्नीम। मेकोपुकीमी ठेयब मुने डा गेय पाइनीम।

10 गो इस्राएली आन खिंमी हिंचा डा गेय का ताता। एफ्राइममी तेल्लेम पना पन नु इस्राएल ग्रान्रा दित्चा डा दुम्शो बाक्त। होसे ५:३

11 यहूदा, इ कली यो सजाइ गेतीक नाक्त जाकब” दे परमप्रभुमी देंत।

## 7

1 “गो इस्राएल डा मुर आन कली सापाइक्चा मिम्ताकड हना, एफ्राइम आ मरिम्शो पशो नु सामरीया आ पाप तांइसीब। मेकोपुकी जोल पना पन बाक्नीम। खुइपुकी खिं ओत्रशा खुइ पाइनीम। रोइक्बपुकीम लांमी मुर आन कली रोइक्नीम। योएल ४:१

2 गो मेको आन मरिम्शो पशो नेल्ल तुइश्शा मिम्नुड। मेकोपुकीम मतुइक्नीम। मेकोपुकीमी मरिम्शो ला पाइनीम। मिनु मेको आन पाप गेना हना यो आं डोंइती बाक्नीम” देंत।

### नक पिप साइश्शो

3 परमप्रभुमी “मेको आन मरिम्शो पशोमी पिप कली ग्येरपाइक्नीम। मिनु आन जोल पतीकेमी सासन पाइब आन कली ग्येरपाइक्नीम।

4 मेको नेल्ल तेल्लेम बाक्नीम। मेकोपुकी शोब्ले चोचा कली होइश्शो चुप्लु खोदेशो बाक्नीम। मेको शोब्ले चोइबमी फस निवा रे मबोरम सम्म मी थुक्चा ममाल्ब।

5 आंइ पिप आ भोजम आ सासन पाइब अडगुर शांबु तूशा दुक्नीम। मिनु पिपमी शुक्शी पाइबपुकी नु गुड गारपाइक्ब।

6 मेको शुक्शी पाइब आन थुं मी खोदेशो पा ब्रशो बाकब। मेकोपुकी नमो सिमो पा पिप आ नेक्था जाक्नीम। मेको आन थुंम बाक्शो पतीक नेल्ल नाक्दो मी पुम्शो खोदेशो पा बाकब। मिनु मेको सुनी ठेयब मी खोदेशो पा ब्राइब।

7 मेको नेल्ले मी खोदेशो पा ब्रशो बाक्नीम। मिनु आन सासन पाइब आन कली साइक्नीम। मेको आन पिप नेल्ल आन कली साइक्तेक्म। मिनु मेकेर डा सुइमी यो आं कली मथोइनीम” देंत।

### इजीप्त कली ब्रेशो

8 “एफ्राइम थर डा मुरपुकी रागी डा मुर नु ब्वांइसीनीम। एफ्राइम मलोक्शो शोब्ले खोदेशो बाकब।

9 अर्को रागी डा मुरपुकीमी मेको आ बोल नुप्पाइक्नीम। तन्न मेकोमी मतुइक्ब। मेको आ चां का निक्शी बोइश्शो बाकब। तन्न मेकोमी मतुइक्ब।

10 इस्राएल आ ठेयब लेत्तीकेमी ‘मरिम्शो पाइब बाकब’ दे आन सांक्छी बाकब। तन्न मेकोपुकी परमप्रभु यावे, आन परमप्रभु गे मलेत्तीम। मिनु मेको कली ममाल्नीम” देंत।

11 “एफ्राइम निप्स मपाइशो हुकुर खोदेशो बाक्ब। मेको कली निप्स मपाइशो आन कली खोदेशो पा जोल पने चाम्सीब। मुल मेकोपुकीमी इजीप्त रागी कली ‘वारच पने’ दे ब्रेत्नीम। इच्का नोले मेकोपुकीमी अस्सुर रागी कली ब्रेत्नीम। होसे ५:१३

12 मिनु मेकोपुकी लची ना, गो मेको आन तारी आं ग्याइल ब्वारनुड। गो मेको आन कली सरीड डा चिक्ब आन कली खोदेशो पा उड तोक्नुडमी। गो मेको आन मरिम्शो पतीके कली सजाइ गेनुड।

13 आबी आबी, मेकोपुकी गो रे पा डोन लाम्तेक्म। मेकोपुकी खतम दुम्मल। मारदे हना मेकोपुकी आं कली मटीब दुम्शो बाक्नीम। गो मेको आन कली श्येत रे प्रॉइचा दाक्नुड। तन्न मेकोपुकीमी आं पर्वम जोल पाइनीम। भजन संग्रह ८१:१४-१५

14 मेकोपुकीमी आन थुं नेल्लेमी आं कली मब्रेत्नीम। तन्न आन ब्राख्येमी रोंका पाइनीम। अन्न नु नक अडगुर शांबु आ पर्वम बुक्नीम। तन्न आं रे पा आन कुल हिरनीम।

15 गो मेको आन कली शेंशा, बोल्यो सेल्ला। तन्न मेकोपुकीमी आं कली मरिम्शो पचा मिन्मीम।

16 मेको नेल्ल क्येडा ठेयब गे मलेत्नीम। मेकोपुकी जिक्शो लिब्रा खोदेशो बाक्नीम। मेको आन ठेयब मुर आन मरिम्शो पशो लोव्र आ पर्वम तरवारमी साइक्चा पुंडसीनीम। इजीप्त रागीमी मेको आन पर्वम शुक्शी पाइनीम” देंत। भजन संग्रह ७८:५७

## 8

### इसाएलीपुकीम सजाइ तशो

1 मिनु “तुराही तापो। ककाकुली का परमप्रभु यावे आ खिं तारी बेरना बेरन बाक्ब। मारदे हना मुरपुकीमी आं पशो कबल प्रॉइतेक्म। आं अरेशो लोव्र मटीम। यसैया ५८:१; ब्यवस्था २८:४९; होसे ६:१७

2 मिनु इसाएलमी आं कली ‘आंइ परमप्रभु, गो इन कली तुइक्नीकी’ दे देंनीम।

3 तन्न इसाएलीपुकीमी रिम्शो पचा प्रॉइतेक्म। मिनु जोरी सत्रु काम मेको कली खेदा पाइब।

4 मेकोपुकीमी आं कली हिल्लो मपथु पिप योव्रनीम। मेकोपुकीमी गो आं मदेंथु सासन पाइबपुकी योव्रनीम। मेकोपुकीमी खतम दुम्चा कली आन सुन चांदी रे पा आंम कली मूर्ति सेल्लनीम। २राजा १५:१०, १४, २५, ३०

5 सामरीया डा मुरपुकी, इन बाछा आ मूर्ति ताइक्तीन। गो मेकोपुकी नु गाइशो बाक्नुड। गेना सम्म मेकोपुकी आं मुर दुम्चा मदाक्नीमी? प्रस्थान ३२:२०; १राजा १२:२८

6 मेको बाछा इसाएल रागी रे चाक्शो बाक्त। मूर्ति सेल्लम मेको कली सेल्लु। मेको परमप्रभु मबाक्ब। काबु नाक्ती मेको सामरीया डा बाछा टुक्रा टुक्रा दुम्ब।

7 मेकोपुकीमी फश शोक्नीम। मिनु ठेयब फश गिवार खुप्नीम। मेको आन चेरब बोटमी बाला मबाक्नीम। मिनु मेकोपुकीमी फस सेल्ले मचाप्नीम। आन बाला बाक्तेक्म हना यो, रागी रागी डा मुरपुकीमी मेको खुप्शा जाइनीम। येरमीया १२:१३

8 इसाएल खतम पोक्चा पुंडसाक्व। मुल मेकोपुकी रागी रागी डा मुर आन दातेमी शोर गाक्शो मुर खोदेशो दुम्शो बाक्नीम। येरमीया २२:२८

9 ब्वाकी डा गधा हेंथे गाक्शो खोदेशो पा मेकोपुकी अस्सुरमी लाम्तेक्म। एफ्राइम डा मुरपुकी आंम कली दाक्बपुकी कली लेयसीशो बाक्नीम। होसे ५:१३

10 मेकोपुकी आंम कली लेयसाक्म हना यो, मुल गो मेको आन कली खुप्नुडमी। मिनु मेकोपुकी सक्ति पाइशो पिप आ गुड रे क्याम्चा पुंडसीनीम।

11 एफ्राइममी आ पाप पतीके चढ़ेतीक शुश सेल्लु। मेको चढ़ेतीके शुश सेल्लतीके मेको कली पाप दुम्शो बाक्ब।

12 मिनु गो मेको आन कली आ अरेशो शुश ब्रेक्ताक्ड। तन्न मेकोपुकीमी आं लोव्र थमा मसुदेम।

13 मेकोपुकीमी आं कली चढेनीम। मिनु श्ये ब्वाइनीम। तन्न परमप्रभु यावे मेकोपुकी नु मग्येरसीशो बाक्ब। मुल परमप्रभु यावेमी मेको आन मरिम्शो पशो मिम्शा, मेको आन कली सजाइ गेब। मिनु मेकोपुकी इजीप्त रागीमी लेशशा लाइनीम।

14 इस्राएलीपुकीमी आंम कली सेल्ब कली प्रेंशा, टेयब दरवार सेल्शो बाक्नीम। यहूदा डा मुरपुकीमी शुश सहर एर ओंथ गारो सेल्शो बाक्नीम। तन्न गो मेको आन सहरमी मी सुइशशा दरवार नेल्ल क्रोइक्नुड” दे परमप्रभुम देंत। येरमीया १७:२७; आमोस २:५

## 9

### होसेमी लोत्र पशो

1 इस्राएली, मग्येरसीन। अर्को रागी रागी डा मुर खोदेशो पा, सोम्शा मग्येरसीन। मारदे हना गे इन परमप्रभु क्येडा नोले शोइसाक्नी। गे अन्न ओइतीक चाडमी तेल्लेम पशो आ पबंम क्येट ताक्चा दाक्नीनी। होसे १:२

2 मुल अन्न आ खला डा अन्नम नु अडगुर कोल डा अडगुर शांबुम मुर आन कली मरूपाइक्ब। नक अडगुर शांबु मेको आन कली मजाक्दीप्ब।

3 मेकोपुकी परमप्रभु यावे आ रागीमी बाक्चा मताइनीम। एफ्राइम इजीप्त रागीमी लेशशा लाइब। मिनु मेकोपुकीमी अस्सुरमी ग्रान्रा दिचा डा थोवकी जाइनीम। होसे ८:१३

4 मेकोपुकीमी परमप्रभु यावे कली अडगुर शांबु चढेनीम। क्योरशा चढेतीक मचढेनीम। आन जचा थोवक मोन खमे खोदेशो पा जाइनीम। मेको जाइब नेल्ल ग्रान्रा दिशो दुम्नीम। मेको आन जचा थोवकीमी मेको आन शोत्रलु साइक्चा ला दुम्ब। परमप्रभु यावे आ खिंमी चाक्ने मचाप्नीम।

5 गेपुकी इन टेयब चाड नु परमप्रभु आ चाडमी मार पाइनीनी?

6 मेकोपुकी खतम दुम्चा कली प्रोक्तेक्म हना यो, इजीप्त रागीमी मेको आन कली खुप्ब। मिनु मेम्फीस डा मुरपुकीमी मेको आन कली थिम्नीम। मेको आन चांदी के सेल्शो थोवकपुकी चू नु चोक्म सुम्ब। मिनु आन ताम्बुमी चू वानीम। होसे १०:८

7 मिनु सजाइ गेतीक नाक्त जाक्शो बाक्ब। क्येक्क लेत्तीक नाक्त यो जाक्शो बाक्ब। इस्राएल डा मुरपुकीमी मेको तुइक्नीम। परमप्रभु यावे आ लोत्र पाइब गुक्शो खोदेशो पा बाक्नीम। मेकोपुकी गशो दुम्तेक्म। मारदे हना इन मरिम्शो पचा नु मदाक्चा आ पबंम मोदेशो दुम्त।

8 परमप्रभु यावेमी आ लोत्र पाइब कली एफ्राइम कली कोत्रब सेल्लु। मेको आ लां नेल्लेमी चिक्ब रेत्तीक ब्वारद खोदेशो बाक्नीम। आ परमप्रभु आ खिंमी यो मेको कली काइ मदाक्नीम।

9 गिबा डा नाक्त खोदेशो पा मेकोपुकी काइ मरिम्शो गेय पाम्तेक्म। परमप्रभु यावेमी मेको आन मरिम्शो पशो मिम्शा सजाइ गेब। होसे १०:९; न्यायाधीस १९:२२-३०; न्यायाधीस २०:१३

### डोइती नु नोले डा इस्राएल

10 दोदेशो पा गोरशो रागीमी अडगुर थिन्नीमी, मोदेशो पा गो इस्राएल कली थित्ता। फोवशी रवामी नेल्ल क्येडा डोइती डा फोवशी फल सिशशो खोदेशो पा गो इन किकी पिपी आन कली थित्तामी। तन्न मेकोपुकी बाल-पेओर गे लाम्तेक्म। मिनु मेकोपुकी आंम कली बाल कली जिम्मा गेसाक्म। मिनु मेको आन दाक्शो मूर्ति खोदेशो पा ग्रान्रा दिक्चा डा दुम्तेक्म। ब्यवस्था ३२:१०; गन्ती २५:३

11 एफ्राइम आ सक्ति चिक्ब खोदेशो पा बेरशा लाइब। मेको आन दातेमी सुइ यो आल थीब मदुम्नीम।

12 मेकोपुकीमी आल थिशा कोल्पाइक्तेक्म हना यो, गो का सम्म यो मप्रोइथु लाइक्नुड। मिनु गो मेको आन कली प्रोइशा डोन लाइक्नुड। मिनु मेको आन कली टेयब श्येत दुम्ब।

13 एफ्राइम आ तौपुकी साइक्चा पुंडसीनीम। एफ्राइममी आ तौ आन कली क्योरचा कली लाइक्चा माल्ब। इजीकीएल २७:३

14 परमप्रभु यावे, गे मेको आन कली मार गेनीनी? मेको आन आल शाम्सेक्ल। मिनु मेको आन दूध सोव्रल।

15 मेको आन मरिम्शो पतीके नेल्ल गिल्गालम पाम्तेक्म। मेक रे गो मेको आन कली तशा ग्रांग्रा दिचा गोव्रता। मेको आन काइ मरिम्शो पतीके, गो आं खिं रे खेरनुडमी। मेको आन ठेयब मुर नेल्ल मटीब बाक्नीम।

16 एफ्राइम आप्चा पुंडसीशो बाक्ब। मेको आन शाक्श सोव्रशो बाक्ब। मेकोपुकी मसिल्लीम। मेकोपुकीमी आल थिम्तेक्म हना यो, गो मेको आन दाक्शो आल आन कली साइक्नुड।

17 आं परमप्रभुमी मेको आन कली प्रोंडब। मारदे हना मेकोपुकीमी आ देंशो मटीम। मोपतीके मेकोपुकी रागी रागी डा मुर आन दातेमी हिरशा गाक्ब दुम्नीम।

## 10

### चढेनीम तन्न दूली पाइनीम

1 डोंइती इस्राएल बाक्शो नु शुश फल सिप्ब अङ्गुर बोट का बाक्त। मिनु इस्राएल डा मुरपुकी शुश क्येट थीब दुम्तेक्म। मिनु मोपा मेकोपुकीमी फुल्लु के चढेतीक यो शुश सेल्लेक्म। मिनु मेको रागीमी दोशो क्येट चेम्मे, मोशोन मे कोपुकीमी आन थाम डा मूर्ति दारपाइक्तेक्म। येरमीया २:२१; लेवी २६:१

2 मेको आन थुं दूली बाक्ब। मुल मेकोपुकीमी आन मरिम्शो पशो आ सजाइ तचा माल्लीम। परमप्रभुमी मेको आन चढेतीक नु आन खुक्शो फुल्लु प्रेक्ब। मेको आन थाम डा मूर्ति यो खतम सेल्लब।

### श्येत जशा, थुं लेशो

3 मिनु मुल मेकोपुकीमी “गो परमप्रभु यावे कली मान पा महितीके गो आंइ के पिप मबाक्ब। मिनु पिप बाक्त हना यो मेकोमी आंइ कली मार पने चाप्बा डा?” देंनीम।

4 मेकोपुकीमी शुश फश लोत्र पाइनीम। मार फश लोत्र पाइनीम देंशा हना, जोल पा कसम जशा कबल पाइनीम। मोपतीके वाक्शो रूमी ओशेर पाइशो सुवा वाशो खोदेंशो पा मुददा बारनीम।

### मूर्ति पूजा पचा थुम्शो

5 सामरीयामी बाक्ब मुरपुकी बेथ-आवेन डा बाछा आ मूर्ति आ पर्वम हिंनीम। डोंइती मेको मूर्ति आ दारस तशा, ग्येरसीशो मुरपुकी मेको आ पर्वम रोंका पाइनीम। चढेबपुकी यो मेको आ पर्वम रोंका पाइनीम। मारदे हना मेको मूर्ति डोन लाइक्सीशो बाक्ब। होसे ४:१५

6 मेको मूर्ति कली अस्सुर लाइक्नीम। मिनु ठेयब पिप कली सोइक्नीम। एफ्राइम मुने दोक्ब, इस्राएल चहिं आ मिम्शो आ पर्वम मुने दोक्ब। होसे ५:१३

7 सामरीया डा पिप ब्वाक्कुम बाक्शो जिक्शो राशी खोदेंशो पा योल्सीब।

8 मिनु आन मरिम्शो पतीक मूर्ति बाक्शो आवेन डांडा खतम पोक्नीम। मेको इस्राएल डा मुर आन पाप पशो बाक्ब। मेको आन फुल्लु के चढेतीकेमी चुं नु चोंक वाशा सुम्नीम। मिनु मेकोपुकीमी पहाड कली “आंइ कली सुम्की” दे डांडा कली “आंइ तारी दोक्कीन” देंनीम। होसे ९:६; लूका २३:३०; प्रकाश ६:१६

9 गे इस्राएलीपुकीमी गिबा आ नाक्तर रे पाप पाइतीनी। मिनु मुल सम्म पाप पना पन बाक्नीनी। गिबा डा मरिम्शो पाइब मुर आन कली मार, लडाइमी मसदमे डा? होसे ९:९

10 गो गेना दाक्नुडा, मेना मेको आन कली सजाइ गेनुड। मेको आन साप्पा मरिम्शो पशो आ पर्वम रागी रागी डा मुर आन हुलमी मेको आन कली फ्रेंशा लाइक्नीम।

### आन दला दाक्स पशो

11 मिनु एफ्राइम मगिक्शो बी का खोदेंशो बाक्ब। मिनु दांइ पशोन, मेको ग्येरसीब। मोपतीके मेको आ दारशो बलामी गो जुवा लाप्नुड। गो एफ्राइम कली दारपाइक्नुड। यहूदामी ब्यफ वाक्चा माल्लब। मिनु याक्बमी डल्ला प्रोल्चा माल्लब।

12 ठीक पतीक शोक्कीन। मिनु मप्रोंइचा डा दाक्तीक अन्न खोदेशो पा खुपतीन। गे इन मवाकशो रू वाक्तीन। मारदे हना इन परमप्रभु यावे कली माल्ची नाक्त जाक्त। मिनु मेको जाक्शा, गे इन कली पाप रे प्रोंइब। येरमीया ४:३; यसैया ५५:६

13 तन्न गेपुकी परमप्रभु यावेमी अरेशो मटितीकेम गुम्शा बाक्तीनी। मिनु ठीक मदुम्तीके खुप्शा बाक्तीनी। गेपुकी जोल आ फल जाइब बाक्तीनी। मारदे हना गे आंम बोल नु इन लडाइ पाइब आन कली थमा सुइक्तीनी। अय्युब ४:८

14 मोपतीके इन मुर आन कली लडाइ तोइनीम। मिनु शाल्मनमी बेथ-आरबेल कली खतम पोक्शो खोदेशो पा इन दरवार नेल्ल खतम पोक्शा गेनीम। मेना आल नु आ ममा कली यो साइक्नीम।

15 मारदे हना इन मरिम्शो पतीके मोदेशो ठेयब बाक्ब। मोपतीके मोदेशो दुम्ब। मेको नाक्त सुनी नां दाम चोटीन इस्राएल डा पिप आन कली खतम पोक्नीम।

## 11

### परमप्रभुमी इस्राएल कली दाक्शो

1 मिनु परमप्रभुमी “इस्राएल आल बाक्मेनु, गो मेको कली दाक्ताक्ड। मिनु गो आं तौ कली इजीप्त रागी रे ब्रेत्ताक्ड। ब्यवस्था ७:८; प्रस्थान ४:२२-२३; मत्ती २:१५

2 मिनु गो दोशो इस्राएली आन कली ब्रेत्तु, मोशोन आं क्येडा डोन लाम्तेक्म। मेकोपुकीमी बाल देवता कली चढेम्तेक्म। मिनु मूर्ति आन कली धूप चोम्तेक्म।

3 एफ्राइम कली गुइ ग्याइश्शा गाक्चा शेंब गो नड। गो मेको आन कली आल आन कली खोदेशो पा कुरता। तन्न गो मेको आन कली सापाइक्ता हना यो, मेकोपुकीमी मतुइक्तेम।

4 गोमी मेको आन कली मुर आन शिशी पशो खोदेशो पा खुल्ताक्मी। गो मेको आन कली शुश दाक्ताक्ड। गो मेको आन बलामी लाम्सीशो जुवा गुंइशा गेतामी। गो मेको आन डोंइती बाप्शा, मेको आन कली थुलतामी।

5 मार, मेकोपुकी इजीप्त रागी लेत्चा माल्नीमी? मिनु अस्सुर मेको आन पिप दुम्चा माल्ब। मारदे हना मेकोपुकी आं गे लेत्चा मबिस्सम।

6 मेको आन सहरपुकीमी लडाइ दुम्नीम। मिनु मेको आन लाप्चो डा थाम मीम दुप्नीम। मेको आन मिम्शो नेल्ल खतम दुम्नीम।

7 आं मुरपुकी गेना हना यो, आं क्येडा डोन लाइनीम। मोपतीके मेकोपुकीमी जुवा कुरशो खोदेशो पा श्येत जचा माल्नीम। मिनु सुइमी मेको आन कली आन श्येत रे मप्रोंइब।

8 एफ्राइम, गो इ कली दोपा प्रोंइने चानुडा? इस्राएल, गो इ कली दोपा इ जोरी सत्रु आन गुइमी गेने चानुडा डा? गो इ कली दोपा अदमाह कली पाइश्शो खोदेशो पाइनुडा डा? गो इ कली दोपा सेबोयीम खोदेशो सेल्लुडा डा? मुल आं थुं फांइसाक्व। गो गाइक्चा रे लेशशा, शिशी पाइब दुम्ती। ब्यवस्था २९:२२; येरमीया ३१:२०

9 गो आं ग्याइश्शो कुरशा मगाक्नुड। गो एफ्राइम कली लेशा खतम मपाइनुड। मारदे हना गो परमप्रभु नड। गो मुर मनड। गो इन दातेमी नेल्ल क्येडा सक्ति पाइश्शो दुम्शा, गाइश्शा मजाक्नुड।

10 मेकोपुकी परमप्रभु यावे आ नोले खोइक्नीम। मेको चहिं गुप्स खोदेशो पा ग्रीब। मिनु मोपा ग्रीमेनु, आ आलपुकी पच्छिम रे पा खिंखि पना पन जाक्नीम। येरमीया २५:३०; होसे २:१

11 मेकोपुकी इजीप्त रागी रे चिक्ब खोदेशो पा बेरशा जाक्नीम। अस्सुर रे पा ढुकुर खोदेशो पा खिंखि पना पन जाक्नीम। गो मेको आन कली आन खिंमी बाक्चा गेनुड” दे परमप्रभु यावेमी देत।

12 एफ्राइममी आं कली जोल पना पन बाक्ब। मिनु इस्राएलीमी यो खाल का डा पा आं कली जोल पाइनीम। मिनु यहूदा आ का ला परमप्रभु आ नोले खोइक्चा कली थुं निकशी पशो बाक्ब। तन्न मेकोमी मेको आन कली दाक्शा मप्रोंइब।



## 12

### इसाएलीम पाप पशो

1 एफ्राइममी आं कली लोत्र पाइब। मेकोमी नेल्ल नाक्त पूब डा फश कली खेदा पाइब। मेकोमी जोल नु हुश खाक्श पोक्चा बारपाइक्ब। मेको अस्सुर नु गारब। मिनु इजीप्त रागी कली तेल सोइक्ब। होसे ५:१३

2 परमप्रभु यावेमी यहूदा आ मरिम्शो पशो डा सजाइ गेप्टु। मेकोमी याकूब आ मरिम्शो पशो आ परबम सजाइ गेब। मेकोपुकीमी दोदेशो पामे, मोदेशो पा सजाइ गेब।

3 मेकोमी आ ममा आ कोंवजीम आ लोकब आ गेंग्रे ग्याइक्ताक्व। मिनु ठेयब दुम्शा, परमप्रभु यावे नु राम्शी पाप्टु। उत्पत्ती २५:२२, २६; उत्पत्ती ३२:२५-२९

4 मेको परमप्रभु आ स्वर्ग डा गेय पाइब नु राम्शी पा ग्रात। मेकोमी डाक्शा “शिशु पाइय्यी” दे पुंडतु। मेकोमी परमप्रभु कली बेथेल सहरमी ग्रामानु, परमप्रभुमी मेको नु लोत्र पाप्टु। उत्पत्ती ३५:१५

5 मिनु परमप्रभु यावे, मुर नेल्ल आन परमप्रभु आ नें यावे बाक्ब। भजन संग्रह ८३:१९

6 मिनु मेकोमी “गे परमप्रभु गे लेत्चा माल्नेवे। गे दाक्चा नु ठीक पचा मप्रोनीन। परमप्रभु यावे कली रिम्शा बाक्कीन” देंत।

7 मिनु जौल पा नाक्तीक चलेब ग्याप्ब लेयब मुरुमी जौल पचा दाक्नीम।

8 एफ्राइममी “गो शुश क्येट थीब दुम्ती। गो शोंप पाइशो बाक्नुड। आं शुश क्येट चेम्तीके ‘गे पाप पाप्तीवी’ दे दोस गेने मचाप्नीम” देंत। प्रकाश ३:१७

9 मिनु “गो परमप्रभु यावे, इन परमप्रभु नड। गो इन कली इजीप्त रागी रे चाक्शो नड। गो डोंइती डा चाड नाक्ती खोदेशो पा इन कली लेंशा इन ताम्बुमी बाक्चा गेनुड” देंत। होसे १३:४

10 मिनु मेकोमी “गो नोले दुम्ब लोत्र पाइबपुकी नु लोत्र पाता। गो मेको आन कली कोंइतीके कोंइताक्ड। गो मेको आन कली कथा शेंपाइक्ता।

11 गिलाद मरिम्शो पाइब बाक्ब। मेको आ मुरपुकी शोर गाक्शो बाक्नीम। मेकोपुकीमी गिल्यालमी ब्यफ चढेम्तेक्म हना, आन फुल्लु के चढेतीक ब्रेशशा, फुल्लु देल्शो खोदेशो दुम्ब। होसे ६:८; होसे ९:१५

12 मिनु याकूब प्रोक्शा, अराम रागीमी लत। मेकेर इस्राएलमी मीश चाक्चा आ परबम गेय पाप्टु। मेकोम मेकेर भेडा योवतु। उत्पत्ती २७:४३; उत्पत्ती २८:५; उत्पत्ती २९:२०

13 मिनु परमप्रभु यावेमी आ लोत्र पाइब आ पतीके इस्राएली आन कली इजीप्त रागी रे गुंडताक्व। मिनु आ लोत्र पाइब रे पा मेको आन कली कोवतु। प्रस्थान ३:१०

14 तन्न एफ्राइममी परमप्रभु कली चुरपाइशो बाक्ब। मोपतीके परमप्रभुमी आ पशो हुश खाक्श पोक्तीके आ परबम सजाइ गेब। मेकोमी दोदेशो पवा, मोदेशो पा क्येक्क लेत्चा पुंडसीब” दे परमप्रभुम देंत।

## 13

### परमप्रभु इस्राएल नु गाइशो

1 मिनु परमप्रभुमी “एफ्राइममी लोत्र पवानु, मुरपुकी खिंखि पाम्तेक्म। इस्राएलमी मेको कली मान पाम्तेक्म। तन्न मेको बाल देवता कली पूजा पतीके बेक्त।

2 मिनु मुल मेको क्येडा शुश पाप पाइनीम। मेकोपुकीमी आंम कली चांदी के मूर्ति सेल्नीम। मेको मूर्ति नेल्ल मुरुमी सेल्शो बाक्नीम। मिनु मुरुमी ‘मेको आन कली चढेन। बाछा कली पुक्पु पने’ देंनीम। यसेया ४४:१०

3 मोपतीके मेकोपुकी सुनी डा गोस्स, सुनी डा जाम्शा लाइब सीत, फशेमी योल्ब खला डा भूस नु झेल रे पा यूब कुन खोदेशो दुम्नीम” देंत। होसे ६:४; भजन संग्रह १:४

4 मिनु “गो परमप्रभु यावे, इन परमप्रभु नड। गो इन कली इजीप्त रागी रे गुंडताक्ड। गे गो आं डा लाक्शा अरु परमप्रभु मतुइक्नीनी। मिनु गो आं डा लाक्शा अरुमी पाप रे प्रोंइने मचाप्नीम।

- 5 मिनू गो गोरशो रागी नु शुश सोव्रशो रागीमी इन कली कोव्रता। होसे ९:१०
- 6 गो मेको आन कली रूपाइक्ता। मिनू मेकोपुकी ठेयब लेशशा, आं कली प्रेंताक्म। ब्यवस्था ३२:१५
- 7 मोपतीके गो मेको आन कली गुप्स खोदेशो पा नु जोड खोदेशो पा आन लाम बाप्शा बाक्नुड। होसे ५:१४
- 8 चाइक्ब रोंडसीशो वां खोदेशो पा मेको आन कली ग्याइशशा आन रां चेतनुड। मिनू गुप्सुमी खोदेशो पा मेको आन कली ब्वाइनुड। मिनू ब्वाकी डा जन्तुमी साइशशो खोदेशो पा साइक्नुड।
- 9 इस्राएलीपुकी, गो इन कली खतम सेल्लुड। इन कली सुम वारच पाइबा? येरमीया २:१७
- 10 इन कली प्रॉइने चापब ते बाक्मा? इन कली वारच पाइब सासन पाइब, ते लाक्गमे? मेको आ परबम गेपुकीमी 'गो आंइ कली पिप नु सासन पाइब गेकी' देंतीनी। १सामुएल ८:५-९
- 11 मोपतीके गो गाइशशा इन कली पिप का गेता। मिनू गो चुरशा मेको कली पोक्शा लाइक्ता।
- 12 एफ्राइम आ पाप खुइशशा वोइशशो बाक्ब। मेको आ पापपुकी ब्रेक्शा वोइशशो बाक्नीम।
- 13 मीश मुर आल थितीक रोइ पशो खोदेशो पा मेको कली श्येत दुम्ब। तन्न मेको मारेइ यो मतुइक्ब आल खोदेशो बाक्ब। मेको दूली पा जरमेशो बाक्ब।
- 14 गो मेको आन कली तुरस रे प्रॉइनुडा डा? गो मेको आन कली बेक्चारे पा प्रॉइनुडा डा? साइक्ब, इ साइक्तीक ते बाक्बा? तुरस, इ खतम सेल्लीक ते बाक्बा? गो शिशी मपाइनुड। २तिमोथी १:१०; प्रकाश २०:१४; १कोरिन्थी १५:५४-५५
- 15 मेको आ लोकब आन दातेमी रिम्शो दुम्शा सोशा बोशा लत हना यो, गो मेको कली शिशी मपाइनुड। परमप्रभु यावे रे पा पूब डा फश गोरशो रागी रे पा जाक्ब। मिनू आ ब्वाक्कु बुक्तीक सोव्रब। मेको आ इनार यो सोव्रनीम। मोपा मेको आ शुश क्येट लाइब मारेइ मारेइ नेल्ल नुप्नीम।
- 16 सामरीया डा मुरपुकीमी आन पाप पशो डा श्येत जचा मालनीम। मारदे हना मेकोपुकीम आंम परमप्रभु कली मटीम। मेकोपुकी तरवारमी साइक्चा पुंडसीनीम। मेको आन आलपुकी खपीमी ताइशशा साइक्चा पुंडसीनीम। मेको आन कोव्रज कुरशो मीश मुर आन कोव्रज चेत्या पुंडसीनीम" देंत। २राजा १५:१६

## 14

### परमप्रभु गे लेत्तीन, दे ब्रेशो

- 1 गे इस्राएली, परमप्रभु यावे, इन परमप्रभु गे लेशशा जाक्कीन। मारदे हना गे इन मरिम्शो पतीके रे खतम दुम्तीनी।
- 2 परमप्रभु आ लोव्र मेको कली देंशा, परमप्रभु यावे गे लेतीन। मिनू गेपुकीमी मेको कली "आंइ पाप नेल्ल क्याम्दीने! आंइ कली शिशी पा ब्रने। गो इन नें ठेयब सेल्लनीकी। हिब्रू १३:१५
- 3 अस्सुर डा मुरपुकीमी आंइ कली प्रॉइने मचाप्नीम। गोपुकी लडाइ पथ शारा डोइशशा मगाक्नीकी। मिनू गो आंम सेल्लो थोव्रक कली 'इं परमप्रभु' दे गेनायो मदेनीकी। मारदे हना रोम रोइक्चपुकीमी इन शिशी ताइनीम" दे परमप्रभु कली देंनीन।
- 4 मिनू परमप्रभुमी "गो इन नोले शॉइसीशो माफ गेनुड। गो इन कली शुश शिशी पा दाक्नुड। मारदे हना मुल इन कली तशा मगाइक्नुड।
- 5 गो इस्राएल कली सीत खोदेशो दुम्नुड। मेको लिली फू खोदेशो पा बोइक्ब। लेबानोन डा लाइशशो रवा खोदेशो पा मेकोमी शाक्श थोक्ब।
- 6 मेको आ राशी लाइशशो दुम्नीम। मेको आ दारस तेल रवा खोदेशो दुम्ब। मेको आ ब्रोव्रशो रिना लेबानोन डा लाइशशो रवा खोदेशो दुम्ब।
- 7 मुरपुकी लेशा मेको आं वांकुमी बाक्नीम। मेकोपुकीमी लेशा अन्न खुम्नीम। मिनू अडगुर खोदेशो पा बोइक्नीम। मिनू मेको आन नें लेबानोन डा अडगुर शांबु खोदेशो पा ठेयब दुम्ब।
- 8 एफ्राइम डा मुरपुकी, मूर्तिपुकी नु गो आं के मार गेय बाक्बा डा? गो इन कली लोव्र लेत्नुड। मिनू इन कली कोव्रनुड। गो तोव्रशी रवा खोदेशो पा गिग बाक्नुड। इ फल फुल सित्या आं सक्ति रे जाक्ब।

9 सु जोक्ब तुइक्ब बाक्बा, मेकोमी एको लोत्र तुइक्तल। सु के रुपब थुं बाक्मे, मेकोमी एको लोत्र रुबल। परमप्रभु यावे आ लां ठीक बाक्नीम। मिनु ठीक पाइबपुकी मेको आ लांमी गाक्नीम। तन्न आ देशो मटीबपुकी मेको आ लांमी दाइल पाइसीनीम” दे परमप्रभुम देंत।

## योएल

**ब्रेक्ब मुर:** योएल आ नें आ अर्थ “परमप्रभु यावे, परमप्रभु बाक्ब” देशो बाक्ब। मेको आ आफ पेशुएल आ परबम मारेड मतुंडसीब। योएलम यहूदा राज्यमी परमप्रभु आ लोव्र पशो बाक्त।

**गेना ब्रेक्शो:** मुर काम अथाल्याहम आंम कली पिपीम सेल्सेनु, पिप आ तौ योआश चढेब येहो-यादाम परमप्रभु आ खिंम खुइश्शा वोइश्शो ना, ८०० बि. सी.म खोदेशो एको किताब ब्रेक्शो बाक्ब, दे मिन्मीम।

**मार ब्रेक्शो:** मालेपुकीमी इस्राएल रागी कली निकशी खेयप रागी नेल्ल खतम सेल्लेक्म। रेउ मयितीके परमप्रभु यावे आ गेशो सजाइ बाक्त। मोपतीके योएलम मुर आन कली परमप्रभु यावे गे लेतीन। परमप्रभु यावेम आ गे लेशो मुर आन कली माफ गेब। योएल २:१३ आन साम्शो नेल्ल लेप्ब। योएल २:२५ योएलमी “इस्राएली ला ममाइ, अर्को रागी डा मुरपुकीमी यो, परमप्रभु यावे आ श्येत रे प्रॉइशो तने चाप्नीम” देशो बाक्ब।

सल्हा मालेमी श्येत गेशो

1 परमप्रभु यावेमी पेशुएल आ तौ योएल कली देशो लोव्र एको बाक्ब।

2 मिनु मेको लोव्र मार बाक्त देशा हना “गे खाल्पापुकी, एको लोव्र नेनीन। रागीम बाक्ब मुर नेल्ल इन नोफा दाइश्शा नेनीन। मार, इन ब्रॉइतीक नाक्ती नु इन किंकी पिपी आन ब्रॉइतीक नाक्तीम ओदेशो दुम्शो बाक्मे?”

3 गे एको लोव्र इन तमी तौ आन कली देनीन। मिनु इन तमी तौपुकीमी आन तमी तौ आन कली देपतीन। मिनु मेकोपुकीमी आन चच युइ आन कली देंमल।

4 घांस खोइश्शा ब्वाइब मालेपुकीमी मार मार प्रोन्मे, मेको लेस्वा मालेपुकीमी नेक्तेक्म। मिनु लेस्वा मालेपुकीमी मार मार प्रोन्मे, मेको तोडले मालेपुकीमी नेक्तेक्म। मिनु तोडले मालेपुकीमी मार मार प्रोन्मे, मेको सल्हा मालेपुकीमी नेक्तेक्म। योएल २:२५

5 मिनु गे दुक्शा बाक्बपुकी सेंसीशा, डाक्कीन। मिनु अडगुर शांबू तूशा दुक्ब नेल्ल नक अडगुर शांबू आ परबम रोंका पने। मारदे हना मेको इन शोव्र रे रॉइसीशो बाक्ब।

6 टेयब रागी डा मुरपुकी आं रागीम ओव्रतेक्म। मेको सक्ति पाइश्शो नु हिकने मचाप्चा डा पा शुश बाक्नीम। मेको आ खुइ गुप्स आन खुइ खोदेशो बाक्नीम। मिनु मेको आन लाइश्शो खुइ, छाउरी गुप्स आ खुइ खोदेशो बाक्नीम। योएल २:२

7 मेकोपुकीमी आं अडगुर रू खतम पोक्शा, आं फोव्रशी रवा नेल्ल तिम्शा चेल्लेक्म। मेकोपुकीमी मेको आन कोक्ते नेल्ल थुरशा, ताइक्ताक्म। मेको आन राशी नेल्ल बुश दुम्तेक्म।

8 मिनु कन्ने मीश आलमी अरन्डी फेक्शा, आ ग्युंभे पचशो वॉइश आल आ परबम दोपा रोंका पाइबा, मोपा रोंका पने।

9 अन्न चढेतीके नु तूचा थोव्रक चढेतीके परमप्रभु यावे आ खिंमी चढेचा देक्शो बाक्ब। परमप्रभु यावे आ डोंइती गेय पाइब चढेबपुकी रोंका पाइनीम। योएल २:१४

10 मिनु रू नेल्ल श्येत्थ दुम्शो बाक्नीम। खप रोंका पाइब। मारदे हना अन्न नेल्ल खतम दुम्शो बाक्ब। अडगुर आ रस सोव्रत। तेल रवा आन फल सोव्रतेक्म।

11 गे रूम गेय पाइबपुकी सुर्ता पने। अडगुर खुम्बपुकी रोंका पने। क्योव्रज चेरब आ परबम यो रोंका पने। मारदे हना बाली नाली खतम दुम्शो बाक्नीम।

12 अडगुर बोट सोल सुल बेक्तेक्म। फोव्रशी रवा यो सोव्रतेक्म। अनार, खजूर, स्याउ रवा नु रू डा रवा नेल्ल सोव्रतेक्म। थमा पा, मुर आन दातेमी मुर आन ग्येरतीक थुं यो मेको खोदेशो पा नुप्शो बाक्ब।

13 चढेबपुकी, सुर्ता पा अरन्डी फेक्शा रोंका पने। चढेतीकेमी गेय पाइबपुकी रोंका पने। आं परमप्रभु आ गेय पाइबपुकी, नाकदो यो सुर्ता पा अरन्डी फेक्शा बाक्कीन। मारदे हना इन परमप्रभु आ खिंमी अन्न चढेतीके नु तूचा थोवक चढेतीके देखो बाक्ब।

14 मिनु माइजा बाक्चा कली मुर आन कली खुप्तीन। परमप्रभु यावे आ खिंम रागीम बाक्ब मुर नेल्ल बुक्शा, खाल्पा आन कली ब्रेत्तीन। गे खाल्पा नु मुर आन कली परमप्रभु यावे, इन परमप्रभु आ खिंम पुक्कीन। मिनु परमप्रभु यावे कली ठेयब सेंदा पा 'वारच पाइक्की' दे पुनीन" देंत। भजन संग्रह १०४:१०,११; योएल २:१५

### योएलमी रोंका पशो

15 मिनु योएलमी "परमप्रभु यावे आ जाक्चा चिक्शो नाक्त आ पर्वम आबी आबी, मारदे हना मुल मेको नाक्त जाक्ब। नेल्ल क्येडा सक्ति पाइश्शो खतम पोक्तीके जाक्ब। योएल २:१; यसैया १३:६

16 मार, इ जचा थोवक इ डोंइती रे मरोइक्से डा? मार, ग्येरशा सोम्शा बाक्तीके आइ परमप्रभु आ खिं रे मयोल्म डा? ब्यवस्था १६:३१

17 वांचेर नेल्ल खप आगाम सोव्रशा रोम्शा लीतेक्म। अन्न वोइक्तीक खिं ब्रेश्शो बाक्नीम। अन्न वोइक्तीक श्येत्थ दुम्तेक्म। मारदे हना अन्न मदुम।

18 मिनु बस्तु भाव रोंका पाइनीमी। बी ब्यफ जोतीक मबाक्तीके हिरना हिरन बाक्नीम। क्यारश भेडा आन हुल यो श्येत जशो बाक्नीम।

19 परमप्रभु यावे, गो इन कली वाइ ब्रेश्शा थोइनुड। मारदे हना बी ब्यफ नु क्यारश भेडा आन जोतीके मीम नेक्शो बाक्ब। मिनु मीम रू डा रवा नेल्ल नेक्शो बाक्ब। योएल २:३

20 मिनु ब्वाकी डा जन्तुपुकीमी यो इन कली थोशो बाक्नीम। मारदे हना खोला सोव्रशो बाक्नीम। मिनु मीम गोरशो रागी डा बस्तु भाव योवतीक डा घांस नेल्ल नेक्शो बाक्ब" देंत। भजन संग्रह १०४:१०-११

## 2

### परमप्रभुम निसाफ पचा चिक्शो

1 सियोनमी तुराही ताप्पीन। आं डांडामी शुश ग्रीब ताप्तीक थोव ताप्पीन। रागीम बाक्ब मुर नेल्ल गिक गिक पा खिंखिं पामेक्ल। मारदे हना परमप्रभु यावे आ जाक्शो नाक्त नेक्था जाक्शो बाक्ब। मेको जाक्चा चिक्शो बाक्ब। योएल १:१५

2 मेको नाक्ती छिडछिड नु हिंचा डा बाक्ब। मेको थम ठेयब गोस्स नु छिडछिडमी सुम्शो बाक्ब। मिनु ठेयब सक्ति पाइश्शो लडाइ पाइब आन हुलमी डांडा आन कली क्येर गोस्सुम सुम्शो खोदेशो पा सुम्शो बाक्नीम। मेको मोदेशो डोंइती गेनायो मदुम्शो बाक्त। मिनु नोले डा मुर आन पालाम यो मोदेशो गेनायो मदुम्ब। योएल १:६; प्रस्थान १०:१३-१५

3 मेको आन डोंइडोंइती मीम मारेइ मारेइ नेक्ब। मिनु मेको आन नोनोले मी ब्राइब। मेको आन डोंइती रूपुकी एदेन डा फल फुल रू खोदेशो बाक्नीम। मेको आन नोले गोरशो रागी खोदेशो दुम्नीम। मेकोपुकी रे मारेइ मब्रोंइनीम। योएल १:१९

4 मेको आन कुल शारा आन कुल खोदेशो बाक्नीम। लडाइ पाइब शारा डोइक्ब खोदेशो पा बारनीम।

5 मेकोपुकी बग्गी दोरशो रेयके खोदेशो पा पहाड तार दोरनीम। मीम आइक्च शी दाक्शो खोदेशो पा रेयके पाइनीम। मेकोपुकी सक्ति पाइश्शो लडाइ पाइब आन हुलमी लडाइ पचा चिक्शो खोदेशो बाक्नीम।

6 मिनु जात जात डा मुर मेको आन कली तशा हिंशा, आन कुल राव किकपाइक्नीम।

7 मेकोपुकी लडाइ पाइबपुकी खोदेशो पा बारशा, गारो डोंइसीनीम। मेको का का पा आन गाक्शो लां मप्रोइथु, आन लांम गाक्नीम।

8 मेकोपुकी मचुमुथु गाक्शा, लां का खोइक्नीम। मिनु या कुरशो आन जोरी सत्रु आन हुलम ओवनीम। मिनु सुइमी मेको आन कली तेक्ने मचाप्नीम।

९ मेकोपुकी सहर कली लडाइ तोचा कली गारो तार दोरनीम। मेकोपुकी खिं डा झेल रे खुड खोदेशो पा ओवनीम।

१० मिनु मेको आन डोंइती रागीम खिनु कुडब। सरीड हिम्सीब। नां नु तास्ला छिडछिड दुम्नीस। मिनु सोरुलमी आन हाम्सो मकोंइनीम। योएल ३:४; यसैया १३:१०

११ मिनु परमप्रभु यावे आ लडाइ पाइब आन डोंइती ठेयब सेंदा पा लोव्र पाइब। मेको आ लडाइ पाइब सक्ति पाइशो नु शुश बाक्नीम। मिनु मेको आ देशो टीब हिकने मचाप्या डा बाक्नीम। परमप्रभु यावे आ निसाफ पतीक नाक्ती ठेयब नु थम हिंचा डा बाक्ब। मेको सुम फाल्ने चान्नीमी डा?

### परमप्रभुमी “आं गे लेतीन” देशो

१२ परमप्रभु यावेमी “इन थुं नेल्लेमी आं गे लेतीन। गे माइजा बाक्शा, डाक्शा नु रोंका पा आं गे लेतीन। इजीकीएल ३३:११

१३ गे रोंका पा इन वा मखाक्कीन। इन थुं खाक्कीन। गेपुकी परमप्रभु यावे, इन परमप्रभु गे लेतीन। मारदे हना मेकोमी शिशी पा दाक्ब। मेको रीब पा मगाइक्ब। गेना हना यो दाक्ब नु रीब पा सजाइ मगेब बाक्ब। प्रस्थान ३४:६

१४ मिनु परमप्रभु यावेमी आ थुं लेशशा, सजाइ मगेथु, आसीक गेबा कों? मेको सुम तुडक्बा डा? मिनु गेपुकीम परमप्रभु यावे, इन परमप्रभु कली अन्न चढेतीक नु तूचा थोव्रक चढेतीके चढेने। योना ३:९

१५ सियोनमी तुराही ताप्पीन। माइजा बाक्चा कली मुर आन कली खुप्तीन। मिनु चाड मानेचा कली मुर आन कली ब्रेत्तीन। योएल १:१४

१६ मुर नेल्ल आन कली खुप्तीन। बुक्शो मुर नेल्ल आन कली परमप्रभु यावे आ डोंइती ठीक सेलीन। खाल्पा आन कली खुप्तीन। आल आन कली खुप्तीन। दूध तूब आल आन कली यो खुप्तीन। ग्युम्ले आ कोठा रे यूल। मिनु ग्युम्ली आ बाक्तीक रे जाक्ब।

१७ परमप्रभु यावे आ डोंइती गेय पाइब चढेबपुकी परमप्रभु यावे आ खिं डा पिंडी नु चढेतीक आ दातेम डाक्मल” देंत। मेकोपुकीमी “परमप्रभु यावे इन मुर आन कली सजाइ मगेने। रागी रागी डा मुर आन डोंइती इन मुर आन कली शुक्शी नु तोक्शा लोव्र पाइक्तीक दुम्चा मगेने। मिनु जात जात डा मुरपुकीमी ‘मार, मेको आन परमप्रभु ते बाक्म?’ देंचा मतामेक्ल” देंतेक्म। भजन संग्रह ७९:१०

### परमप्रभुमी लोव्र लेशशो

१८ मिनु परमप्रभु यावेमी आ रागी आ पबंम रुश पा, आ मुर आन कली शिशी पाप्तु।

१९ मिनु परमप्रभु यावेमी आ मुर आन कली मिम्शा “गो इन कली अन्न, अडगुर शांबु नु तेल सोडक्नन्नी। मिनु गे रूनीनी। मिनु गो इन कली रागी रागी डा मुर आन दातेमी गेनायो शुक्शी पाइक्तीक दुम्चा मगेनन्नी। योएल २६:२७

२० गो उत्तर रे जाक्शो लडाइ पाइब आन कली इन क्येडा डोन खेरनुडमी। गो मेको आन कली कोक्त। मुल गोरशो रागीमी खेरनुडमी। मेको आन डोंइती डा हुल आन कली पूब डा समुन्द्र गे नु मेको आन नोले डा हुल आन कली पच्छिम डा समुन्द्र गे खेरनुडमी। मिनु मेको आन राक्शो रिना इर गे लाइब” दे परमप्रभुमी देंत। मेकोमी थमा पा ठेयब गेय पशो बाक्ब।

२१ रागी डा मुर महिनीन। गे ग्येरशा सोम्सीशा बाक्कीन। परमप्रभु यावेमी ठेयब गेय पशो बाक्ब।

२२ गे ब्वाकी डा जन्तु महिनीन। मारदे हना गोरशो रागी डा योव्रतीक गिगी दुम्शो बाक्ब। रवाम फल सित्नीम। फोव्रशी रवा नु अडगुर आ बोटीमी शुश फल सित्नीम।

२३ गे सियोन डा मुरपुकी ग्येरसीन। गेपुकी परमप्रभु यावे, इन परमप्रभु आ पबंम शुश ग्येरसीन। मारदे हना मेकोमी आ ठीक पतीकेम इन कली डोंइती डा रेउ गेशो बाक्त। मेकोमी इन कली शुश रेउ गेशो बाक्त। डोंइती नु नोले डा रेउ डोंइती खोदेशो पा गेशो बाक्त। येरमीया ५:२४

२४ मिनु खलापुकी अन्नमी ब्रीनीम। गरपुकी नक अडगुर शांबु नु तेलम ब्रीशा क्युप्नीम।

25 परमप्रभु यावेमी “गो इन कली लेस्वा माले, तोडले माले, सल्हा माले नु घांस खोइशशा ब्वाइब माले आन नेकशो नेल्ल लेशशा गेनन्नी। मेको आं सोइशशो लडाइ पाइबपुकी बाक्तेकम। गो मेको आन कली इन दातेमी सोइक्ताकडमी। योएल १:४

26 मिनु गे शुश जचा तशा रूनीनी। मिनु इन पर्वम छक लाक्या डा गेय पाइब परमप्रभु यावे, इन परमप्रभु आ नें ठेयब सेल्चा माल्नीनी। मिनु आं मुरपुकी लेंशा गेनायो मुने मदोक्नीम। ब्यवस्था ८:१०

27 गो इस्राएली आन दातेमी बाकशो बाक्नुड। गो परमप्रभु यावे, इन परमप्रभु नड। आं क्येडा लाकशा, अर्को परमप्रभु मबाक्ब, दे गे तुइक्चा माल्नीनी। मिनु आं मुरपुकी लेंशा गेनायो मुने मदोक्नीम।

परमप्रभु आ सोक्त मोइक्तीके

प्रेरित २:१६-२१

28 मिनु नोले गो आं सोक्त मुर नेल्ल आन तार मोइक्नुड। मिनु इन तमी तौपुकीमी आं लोत्र पाइनीम। इन खाल्पापुकीमी डोमु ताइनीम। मिनु इन वोंइश आलपुकीमी आं कोंइशो ताइनीम। गन्ती ११:२९; यसैया ४४:३; इजीकीएल ३९:२९; तीतस ३:५-६

29 मेको नाक्ती गो वाइलीम वाइल आन तारी यो आं सोक्त मोइक्नुड।

30 गो सरीड नु रागीम चिन्ड कोंइनुडमी। हुश, मी नु कुन के थाम कोंइनुडमी। होसे ७:१

31 परमप्रभु यावे आ ठेयब हिंचा डा नाक्त जाक्चा क्येडा डोंइती नां छिडछिड दुम्ब। मिनु तास्ला हुश दुम्ब” देशो बाक्ब। योएल २:२,१०,११; मती २४:२९; प्रकाश ६:१२

32 मेना परमप्रभु यावे आ नें थोइब नेल्ल ब्रोंइचा ताइनीम। मारदे हना परमप्रभु यावेमी देशो खोदेशो पा सियोन डांडा नु यरूसलेममी परमप्रभु यावेमी ब्रेशशोपुकी ब्रोंइचा ताइनीम। मिनु मेको प्रोंइशो आन दातेमी परमप्रभु यावे आ योत्रशो मुर बाक्नीम। रोमी १०:१३; ओबदिया १७

### 3

मुर आन कली निसाफ पशो

1 परमप्रभु यावेमी “मेको नाक्ती गो यहूदा नु यरूसलेम आस रिम्शो दुम्तीक नाक्ती लेशशा चाक्नुड। होसे ७:१

2 मिनु गो रागी रागी डा मुर नेल्ल आन कली खुप्शा, येहो-शाफात आ दिममी चाक्नुडमी। मिनु मेकेर मेको आन कली निसाफ पाइनुड। मारदे हना मेकोपुकीमी आं मुर आन कली रागी रागी डा मुर आन दातेमी ब्रपाइक्तेकम। मिनु आं रागी भाग भाग सेल्लेकम।

3 मेकोपुकीमी आं मुर आन पर्वम फेन्टे ग्यारतेकम। मिनु वोंइश आल लेयशा, तेल्लेम नु लाम्तेकम। मीश आल आन कली लेयशा, अडगुर शांबु तूतेकम।

4 टायर, सीदोन नु पलिस्ती आन रागी डा मुरपुकी आं कली मार पाइनीनी डा? मार, आं पशो आ पर्वम आं कली क्येक्क लेत्नीनी? गेपुकीमी आं कली क्येक्क लेत्ताक्नी हना, गो मेको रीब पा इन पिया तार मोइक्नुड।

5 मारदे हना गे आं सुन, चांदी नु थम रिम्शो थोत्रक नेल्ल इन दरवारम लाइक्तीनी।

6 मिनु गे यहूदा नु यरूसलेम डा मुर आन कली मेको आन रागी रे लाइशशा, ग्रीस डा मुर आन कली लेयतीनी।

7 मुल गो मेको आन कली लेयशो रागी रे ग्रुंइशा, चाक्नुडमी। मिनु गो इन श्येत गेशो लेंशा इन पिया तार मोइक्नुड।

8 मुल गो इन तमी तौ आन कली यहूदा डा मुर आन कली लेयनुडमी। मिनु मेकोपुकीमी मेको आन कली डोन साबा रागी डा मुर आन कली लेयनीम” दे परमप्रभु यावेमी देशो बाक्ब।

9 मिनु परमप्रभुमी “एको लोत्र रागी रागी डा मुर आन दातेम नेंपतीन। लडाइ पचा कली ठीक दुमीन। लडाइ पाइब आन कली ब्रेत्तीन। बुक्तीक आ नेक्था जाक्चा माल्नीम।

10 गे इन फाली शोल्शा, तुप्शा तरवार सेलीन। मिनु इन गुये तुप्शा, तूतीक भाला सेलीन। मिनु गे हिंब मुरपुकीमी 'गो बोल्यो लडाइ पाइब नकी' देनीन। यसैया २:४

11 एर ओंथ बाक्शो रागी रागी डा मुर नेल्ल रीब पा जाक्कीन। गे नेल्ल मेकेर खुम्सीन। परमप्रभु यावे, इन बोल्यो लडाइ पाइब आन कली उइ यितीन।

12 मिनु रागी रागी डा मुर नेल्ल जोंब बोक्शा, खुम्सीशा येहो-शाफात आ दिंममी लमल। मारदे हना गो एर ओंथ डा रागी डा मुर नेल्ल आन कली निसाफ पाइनुड।

13 मिनु इन गुयेमी रिक्चा ठीक दुमीन। मारदे हना बाली नाली खुप्ची जाक्शो बाक्ब। मिनु ओव्रशा अडगुर खाक्कीन। मारदे हना कोल ब्रीशो बाक्त। गर ब्रीशा क्युप्शो बाक्नीम। मेको खोदेशो पा आन मरिम्शो पशो शुश दुम्त। प्रकाश १४:१५; यसैया ६३:३, ६; प्रकाश १४:१८

14 मिनु निसाफ पतीक दिंममी शुश मुर जाक्स डा जाक्स बाक्नीम। मारदे हना मेको दिंममी परमप्रभु यावे आ निसाफ पतीक नाक्ती जाक्चा चिक्शो बाक्ब।

15 नां नु तास्ला छिडछिड दुम्नीस। मिनु सोरूलपुकीमी आन छेडछेड मकोइनीम" देत। योएल २:१०; योएल ३:४

16 परमप्रभु यावेम सियोन रे ठेयब सेंदा पा लोत्र पाइब। यरूसलेम रे पा आ सेंदा नेंपाइक्ब। सरीड नु रागी खिंखि पाइनीस। तन्न परमप्रभु यावे आ मुर आन कली खुइशशा बाक्तीक नु इस्त्राएल डा मुर आन कली बोल्यो ब्रोंइशा बाक्तीक दरवार दुम्ब। आमोस १:२

#### परमप्रभु सियोनम बाक्ब

17 "गो, परमप्रभु यावे, इन परमप्रभु आं डांडा सियोनम बाक्नुड, दे गे तुइक्नीनी। मिनु यरूसलेम आं के दुम्ब। मिनु रागी रागी डा मुर मेको सहर डा लां रे पा मलाक्नीम। इजीकीएल ३४:३०

18 मेको नाक्ती डांडाम शुश अडगुर सित्नीम। मिनु पहाडम दूध शुश बाक्ब। यहूदा डा खोला नेल्लेमी ब्वाक्कु शाइक्नीम। मिनु परमप्रभु यावे आ खिं रे पा ब्वाक्कु बुक्तीके शितीम डा दिंम जिप्पाइक्ब। आमोस १:१३; इजीकीएल ४७:१

19 मिनु यहूदा डा दोस मताइब मुर आन कली मरिम्शो पतीके नु हुश खाक्श पोक्तीके इजीप्त रागी मुर मबाक्तीके दुम्ब। मिनु एदोम चहिं कोक्त रागी दुम्ब।

20 तन्न यहूदा रागीम गेना हना यो मुर बाक्नीम। मिनु यरूसलेम नेल्ल पाला डा मुर आन कली दुम्ब। ओबदिया १०:-

21 गो मेको आन हुश खाक्श पोक्शो क्येक्क लेत्नुडमी। मिनु आन पाप मक्याम्नुड" दे परमप्रभुमी देत। परमप्रभु यावे सियोनम बाक्ब। ब्यवस्था ३२:४३; इजीकीएल ४८:३५



## आमोस

**ब्रेकब मुर:** आमोस आ नें आ अर्थ “कुरब मुर” बाकब। एको किताब मेकोमीन ब्रेकशो बाकब। आमोस ७:८; आमोस ८:१-२

**गेना ब्रेकशो:** आमोस यहूदा रागी डा बाकत हना यो, उत्तर रागी, इस्राएल डा मुर आन कली “होस पा बाककीन” देंत। परमप्रभु यावेमी मेको कली सोइशो बाकत। मेकोमी यहूदा डा पिप उज्जीयाह ७९२-७४० बि. सी. नु इस्राएल, उत्तर रागी डा पिप येरोबाम ७९३-७५३ बि. सी. क्येडा डोंइती ब्रेकशो बाकत। मेको उत्तर रागी रे खेरचा पुंडसे नोले ब्रेकशो बाकब, देंनीम।

**मारदे ब्रेकशो:** आमोसमी मुर आन मरिम्शो पतीके आ पर्वम ब्रेकशो बाकब। मेना शोंप पाइशो वोंइश मुर नु मीश मुर आन शुश जचा तूचा, दूली निसाफ पचा नु पुडग आन कली दिप्चा आ पर्वम ब्रेकशो बाकब। आमोसमी मेको आन कली हिंचा डा सजाइ ताइनीम, दे ब्रेकशो बाकब। मिनु मेको सजाइ मार बाकब, दे यो ब्रेकशो बाकब। तन्न नोले श्येत रे प्रोंइतीक आ पर्वम यो ब्रेकशो बाकब। आमोस ४:१; ६:४-६ आमोस ७:१-९; आमोस ८:१-१४; आमोस ९:१-६; आमोस ९:७-१५

### सजाइ ताइब रागी

1 एको आमोस आ लोत्र बाकब। आमोस तेकोहा सहरमी बाकब गोठला आन दाते डा का बाकत। परमप्रभु यावेमी मेको कली इस्राएल आ पर्वम लोत्र कोंइताकव। मेना यहूदा डा पिप उज्जीयाह नु इस्राएल डा पिप योआश आ तौ येरोबाम बाकताकस। एको खिनु कुचा क्येडा बर्स निकशी डोंइती डा लोत्र बाकब। आमोस ७:१४; २राजा १५:१; जकरिया १४:५; २राजा १४:२३

2 मिनु मेकोमी “परमप्रभु यावे सियोन रे ठेयब सेंदा पा ग्रीब। मेकोम यरूसलेम रे पा ठेयब सेंदाम लोत्र पाइब। गोठला आन बी ब्यफ आन जोतीक रू नेल्ल सोत्रब। मिनु कारमेल डांडा आ डर यो सोत्रब” देंत। येरमीया २५:३०; योएल ४:१६

### दमस्कस कली सजाइ गेशो

3 मिनु परमप्रभु यावेमी मार देंत देशा हना “गो दमस्कस आ ३ खेयप नु ४ खेयप मरिम्शो पशो आ पर्वम ततीके सजाइ मतेक्नुड। मारदे हना मेकोपुकीमी गिलाद डा मुर आन कली फलाम के खुड पाइशो दांदेमी दांड पाम्तेक्म। यसैया १७:१-३

4 मोपतीके गो हजाएल आ खिंमी मी सुइक्नुड। मेकोमी बेन-हादाद आ बोल्यो दरवार नेल्ल खतम पोक्ब।

5 गो दमस्कस डा ठेयब लाप्यो डा आगलो जिक्नुड। मिनु आवेन माइशो दिंमम बाकब मुर नेल्ल आन कली नु बेथ-एदेन डा पिप कली क्याम्नुडमी। अराम डा मुर आन कली ग्याइक्पाइशशा कीर सहरमी लाइक्पाइक्नुडमी” दे परमप्रभु यावेमी देंत। २राजा १६:९

### गाजा कली सजाइ गेशो

6 मिनु परमप्रभु यावेमी “गो गाजा आ ३ खेयप नु ४ खेयप मरिम्शो पशो आ पर्वम ततीके सजाइ मतेक्नुड। मारदे हना मेकोमी शुश मुर आन कली ग्याइशशा लाइशशा एदोम आ गुइमी लेयतु। २इतिहास २१:१६-१७; २इतिहास २८:१८; येरमीया ४७:१

7 मोपतीके गो गाजा डा गारोम मी सुइक्नुड। मेकोमी मेको आ बोल्यो दरवार खतम पोक्ब।

8 गो अशदोद सहरम बाकब मुर आन कली नु अशकलोन डा पिप कली क्याम्नुडमी। गो एक्रोन कली युक्नुड। मिनु लीशो पलिस्ती नेल्ल जाम्शा लाइनीम” दे परमप्रभु यावेमी देंत।

### टायर कली सजाइ गेशो

9 मिनु परमप्रभु यावेमी “गो टायर आ ३ खेयप नु ४ खेयप मरिम्शो पशो आ पर्वम ततीके सजाइ मतेक्नुड। मारदे हना मेकोमी शुश मुर आन कली एदोम आ गुइमी गेपु। मिनु आंम लोक्ब आन दातेम पशो कबल प्रेंताकव। यसैया २३:-; योएल ४:४; १राजा ५:२६

10 मोपतीके गो टायर डा गारोम मी सुइक्नुड। मिनु मेकोमी मेको आ बोल्यो दरवार खतम पोक्ब” दे परमप्रभु यावेमी देंत।

### एदोम कली सजाइ गेशो

11 मिनु परमप्रभु यावेमी “गो एदोम आ ३ खेयप नु ४ खेयप मरिम्शो पशो आ परबम ततीके सजाइ मतेक्नुड। मारदे हना मेकोमी शिशो मपथु, आ लोक्ब आन कली तरवार शेशा, खेदा पाप्तु। मेको आ गाइश्शो गेना हना यो लीशा, ईख कुरशा बाक्त। ओबदिया १०:-; ब्यवस्था २३:८; येरमीया ४९:७

12 मोपतीके गो तेमानम मी सुइक्नुड। मेकोमी बोझा डा बोल्यो दरवार खतम पोक्ब” दे परमप्रभु यावेमी देंत।

### अम्मोन कली सजाइ गेशो

13 मिनु परमप्रभु यावेमी “गो अम्मोन आ ३ खेयप नु ४ खेयप मरिम्शो पशो आ परबम ततीके सजाइ मतेक्नुड। मारदे हना मेकोपुकीम गिलाद डा आल कुरशो मीश मुर आन कोव्रज तरवारम चेतकेम। मेको आन रागी ठेयब सेल्चा कली मो पांम्तेक्म। येरमीया ४९:१-६

14 मोपतीके गो रब्बाह डा गारोम मी सुइक्नुड। मेकोम आन बोल्यो दरवार खतम पोक्ब। मिनु लडाइ पाइबपुकी शुश रेयके पा, फश गिवार खोदेशो पा जाक्शा, मेको आन कली खतम पोक्नीम।

15 मेकेर डा पिप नु मेको आ ठेयब गेय पाइब मुर नेल्ल ग्याइश्शा लाइक्चा पुंडसीनीम” दे परमप्रभु यावेमी देंत।

## 2

### मोआब कली सजाइ गेशो

1 परमप्रभु यावेमी “गो मोआब आ ३ खेयप नु ४ खेयप मरिम्शो पशो आ परबम ततीके सजाइ मतेक्नुड। मारदे हना मेकोमी एदोम डा पिप आन रुश चोप्तु। यसेया १५:-; येरमीया ४८:-

2 मोपतीके गो मोआब रागीम मी सुइक्नुड। मेकोमी गारो हिरशो केरयोथ डा बोल्यो दरवार खतम पोक्ब। मिनु मोआब डा मुर लडाइ, शुश रेयके नु तुराही ग्रीशोम बेक्नीम।

3 गो मेको आ सासन पाइब नु मेको आ ठेयब गेय पाइब नेल्ल आन कली मेको नु काथा साइक्नुडमी” दे परमप्रभु यावेमी देंत। गन्ती २४:१७

### यहूदा कली सजाइ गेशो

4 मिनु परमप्रभु यावेमी “गो यहूदा आ ३ खेयप नु ४ खेयप मरिम्शो पशो आ परबम ततीके सजाइ मतेक्नुड। मारदे हना मेकोपुकीमी परमप्रभु यावे आ अरेशो लोत्र मटीम। आ फुल्लुम मुशा ब्रेक्शो लोत्र मपाम। मेकोपुकीम आन किकी पिपीम खोदेशो पा जोल लोत्र थमा सुइश्शा हेंथे गाक्तेक्म।

5 मोपतीके गो यहूदा रागीम मी सुइक्नुड। मेकोमी यरूसलेम डा बोल्यो दरवार खतम पोक्ब” दे परमप्रभु यावेमी देंत। होसे ८:१४

### इस्राएल कली सजाइ गेशो

6 मिनु परमप्रभु यावेमी “गो इस्राएल आ ३ खेयप नु ४ खेयप मरिम्शो पशो आ परबम ततीके सजाइ मतेक्नुड। मारदे हना मेकोपुकीमी ठीक पाइब आन कली चांदी के क्येटीम नु मारेइ मथीब आन कली जोर का चेपल ताक्शा लेयतेक्म। आमोस ८:६

7 मिनु पुडग आन पिया फुरकुम खोल्शा दिम्नीम। श्येत जाइब आन कली नेप्शा गुंडनीम। पोबु निम्फा मीश आल का नु बाक्शा, आं नें ग्रांघ्रा दिशो सेल्नीम। आमोस ८:४

8 मेको आन देवता थानम जाकटी वोइश्शो वा तार बाक्शा, सजाइ आ पा डा थाप्शो क्येटीम, अडगुर शांबु ग्याप्शा तूनीम। प्रस्थान २२:२५

9 गो मेको आन डोंइती रे एमोरी आन कली साइक्तामी। मेकोपुकी लेबानोन डा लाइश्शो रवा खोदेशो लाइश्शो नु बोल्यो बाक्तेक्म। गो मेको आन इर डा फल नु उइ आगा डा शाक्श नेल्ल खतम सेल्ता। गन्ती २१:२१-२८

10 मिनू गो इन कली एमोरी आन रागी गेचा कली इजीप्त रागी रे गुंडशा ४० बर्स सम्म गोरशो रागीमी लां कोंडशा गाकपाइवतन्नी।

11 गो इन वोंडश आल आन दाते डा का निक्शी आन कली आं लोव्र पाइब सेल्चा कली कोल्पाइक्तामी। इन तौ आन दाते डा का निक्शी आन कली नाजिरी दुम्पाइक्चा कली कोल्पाइक्तामी। ए इस्राएल डा मुरपुकी, मार एको लोव्र थमा ममाइ डा?” दे परमप्रभु यावेमी देंत। गन्ती ६:२-१३

12 मिनू परमप्रभु यावेमी “तन्न गे मेको नाजिरी दुम्शो मुर आन कली अडगुर शांबु तूपाइक्तीनी। आं लोव्र पाइब आन कली ‘परमप्रभु यावे आ लोव्र मपने’ दे माइक्तीनी। आमोस ७:१३, १६; येरमीया ११:२१

13 मोपतीके गे इन बाक्तीकेमी बाक्शा, इन कली बाला सुन्दा नलम ब्रीशो बग्गी दोपा हिम्बा, मोपा हिम्पाइक्वन्नी।

14 थाम्पा दोरबपुकी प्रोक्चा मताइनीम। मिनू बोल्यो मुर आन बोल जाम्शा लाइब। सक्ति पाइशोपुकीम यो आंम कली प्रोंइने मचाप्नीम।

15 लिब्रा आप्बपुकी राप्ने मचाप्नीम। फेरेर पा दोरबपुकीमी यो आंम कली प्रोंइने मचाप्नीम। मिनू शारा डोइक्बपुकीम यो आंम कली प्रोंइने मचाप्नीम।

16 मेको नाक्त नेल्ल क्येडा सक्ति पाइशो आन दाते डा ठेयब थुं पाइशोपुकी शिन्ना प्रोक्नीम” दे परमप्रभु यावेमी देंत।

### 3

#### इस्राएल कली सजाइ

1 इस्राएल डा मुरपुकी, परमप्रभु यावेमी इन परबम लोव्र का पाप्तु। मेको लोव्र नेनीन। मेकोमी “एको लोव्र इजीप्त रागी रे आं चाक्शो खिं डा मुर नेल्ल आन परबम बाक्ब।

2 रागी डा खिं खिं डा मुर नेल्ल रे गो इन कली ला योव्रतन्नी। मोपतीके गो इन मरिम्शो पशो आ परबम सजाइ गेनुड। ब्यवस्था ४:३४

3 मार, मुर निक्शी मगारसा सम्म काथ काथा गाक्नीसी डा?

4 मार, सिखार मथित्तु हना, ब्वाकीम गुप्स ग्रीबा डा? मार, गुप्स आ चाइक्वम मारेइ मथित्तु मेको आ पुक्खीमी डरर डरर पाइबा डा?

5 मार, खपीम ब्वारद मदाइक्थु, चिक्ब रेप्बा डा? मार, ग्याइक्चा कली मारेइ मबाक्थु, थेम्लु खप रे ग्येत्थ बोक्नीमी डा?

6 मार, तेकोइ सहरमी तुराही ताप्शोनु, मुर महिनीमी डा? मार, सहरम श्येत दुम्मेनु, मेको परमप्रभु यावे आ सोइशशो ममाइ डा? यसैया ४५:७; बिलाप ३:३७

7 थमा पा, परमप्रभु यावेमी आ लोव्र पाइब आन कली मदेंथु, मारेइ मपाइब। उत्पत्ती १८:१७

8 गुप्स ग्रीशो नेंशा, सु महिंबा? परमप्रभु यावे ब्वाक्मेनु, सुम आ लोव्र मपाइबा डा?

#### सामरीया कली सजाइ

9 ‘अशदोद डा बोल्यो दरवार नु इजीप्त रागी डा बोल्यो दरवार डा मुर आन कली गेपुकी सामरीया डा पहाडमी बुक्कीन। मिनू मेको सहरम दुम्शो ठेयब रेयके नु मुर आन कली श्येत गेशा, दिप्शो कोव्रडीन’ दे मुर आन कली देनीन।

10 मेकोपुकी ठीक गेय पस मजोक्नीम। हुश ख्राक्श पोक्शा नु मार मार रोइशशा खुइ पशो आन बोल्यो दरवारम खेक्शा वोइक्नीम” दे परमप्रभु यावेमी देंत।

11 मोपतीके परमप्रभु यावेमी “इ जोरी सत्रुमी इ रागी पुम्नीम। मेकोपुकीमी लडाइ तोव्रमेनु, गे बुइनीनी। मेकोमी इ बोल्यो दरवार नेल्ल रोइक्नीम” दे परमप्रभु यावेमी देंत।

12 मिनु परमप्रभु यावेमी “दोपा गोठलामी गुप्स आ शोव रे भेडा आ खोइल निक्शी कि नोफा आ टुक्रा का ला हना यो रोइक्बा, मोपा सामरीयाम नित्तीक आ कुना नु खाटम बाक्शा यो इस्राएल डा मुर प्रोइचा पुंडसीनीम” देंत।

13 मुर नेल्ल आन परमप्रभु यावेमी “नेनीन, याकूब आ खिं डा मुर आन परबम सांकछी गेन।

14 गो तेको नाक्त इस्राएल कली आ मरिम्शो पशो आ परबम सजाइ गेनुडा, मेको नाक्त गो बेथेल डा चढ़ेतीक कली यो सजाइ गेनुडा। मिनु चढ़ेतीक डा ग्रोवपुकी बेलशा खपीम दोक्नीम।

15 गो हिउदमी बाक्तीक खिं नु हुप्शोमी बाक्तीक खिं निम्फा प्रेतनुड। मिनु हात्ती आ दाराम दारशो सेल्शो खिं ब्रेत्नीम। मिनु टेयब खिंपुकी यो खतम सेल्नुड” दे परमप्रभु यावेमी देंत। १राजा २२:३९; भजन संग्रह ४५:९

## 4

### परमप्रभु गे मलेशशो

1 सामरीया डा डांडाम बाक्ब, बाशान डा बी खोदेशो दोम्शो मीश मुर, गे प्रुडग आन कली दिप्नीनी। मारेइ मथीब आन कली फस पोक्नीनी। मिनु इन वोइश आन कली “आंइ कली तूचा कली मार मार चाक्कीन” देनीनी।

2 परमप्रभु यावेमी आ नेम कसम जशो बाक्ब। मेकोमी “नेनीन, इन कली कोंडगुम कीशा लाइक्नीम। इन लीशो आन कली बोल्सीमी ब्वेक्शा लाइक्तीक नाक्त जाक्ब।

3 गे नेल्ल का का पा एर ओंथ मकोवथु, गारो आ पोवला रे पा लाइनीनी। मिनु गे हारमोन मेर ताइक्चा पुंडसीनीनी” दे परमप्रभु यावेमी देंत। हारमोन हिबू लोव मार बाक्ब, दे मतुइक्नीम।

4 मिनु परमप्रभु यावेमी “बेथेल सहरम लशा, मरिम्शो पने। गिलगालमी लशा, मेको क्येडा यो शुश मरिम्शो पने। सुनी कुस कुस इन चढ़ेतीक चाक्कीन। नाक्त सां सांमी इन १० भाग डा भाग का चाक्कीन। होसे १२:१२; ब्यवस्था १४:२८

5 आं कली ‘गे इस्राएल डा मुर, रिम्शो पाइब बाक्नीनी’ दे बोरब ओरूती सुप्शो शोब्ले चढ़ेपने। मिनु थुंम ग्येरशा चढ़ेतीक आ परबम टेयब लोव पना पन गाक्कीन। मारदे हना गे मोदेशो पचा दाक्नीनी” दे परमप्रभु यावेमी देंत। लेवी २:११

6 मिनु परमप्रभु यावेमी “इन कली, सहर नेल्लेमी श्येत्थ कोव्रज नु शोब्ले जचा मतशो सेलत्नीनी। मो हना यो गेपुकी आं गे मलेन्नी” दे परमप्रभु यावेमी देंत।

7 मिनु “गो इन अन्न खुप्चा क्येडा महिना सां डोंइती रेउ मयिपदु। गो सहर का कली रेउ यिपाइक्ता, अर्को सहर कली मयिपदु। मिनु रू कामी रेउ यिपाइक्ता, अर्को रूम मयिपदु। मिनु मेको सोव्रत। १राजा १७:१

8 मोपतीके मुरपुकी सहर सहर रे ब्वाक्कु तूचा कली सहर काम जाक्तेक्म। तन्न रूथ्री तूचा मताम। मो हना यो गेपुकी आं गे मलेन्नी” दे परमप्रभु यावेमी देंत।

9 मिनु परमप्रभु यावेमी “गो इन फल फुल रू नु अडगुर रूम सोव्रतीक नु बुक्खी डाइक्तीक रोइ सोइक्ताकड। सलहा मालेमी इन फोव्रशी रवा नु तेल रवा आन कली नेक्पाइक्तामी। मो हना यो गेपुकी आं गे मलेन्नी। हागै १:११; योएल १:४

10 गो इन दातेम इजीप्त रागी कली खोदेशो पा बेक्चा डा रोइ सोइक्ताकड। गो इन ठिट्टा आन कली तरवारमी क्योरशा साइक्पाइक्तामी। इन शारा रोइक्पाइक्तामी। इन बाक्तीक डा मरिम्शो रिना इन नें आगाम प्रिंताकड। मो हना यो गेपुकी आं गे मलेन्नी” दे परमप्रभु यावेमी देंत। प्रस्थान ९:३

11 मिनु परमप्रभु यावेमी “गो इन दाते डा का निक्शी आन कली सोदोम नु गोमोररा कली खोदेशो पा खतम सेलत्ता। गे ब्रशो मी रे पा गुंइशो बुल्सी खोदेशो बाक्तीनी। मो हना यो गेपुकी आं गे मलेन्नी” दे परमप्रभु यावेमी देंत। उत्पत्ती १९:२४-२५; जकरिया ३:२

12 मोपतीके परमप्रभु यावेमी “ए इस्राएल डा मुरपुकी, गो इन कली मार पाइनुड देश हना, गे इन परमप्रभु, आं कली गुम्चा माल्नीनी।

13 सुमी डांडा आन कली सेला, मेकोमी फश यो सेल्लो बाकब। मेकोमी मुर आन कली आ मिम्शो तुडक्पाइकब। मेकोमी सुनी कली छिडछिड सेल्लब। मिनु रागी डा लाइशो डांडा मेर गाकब। मेको आ नें मुर नेल्ल आन परमप्रभु यावे बाकब” देंत। मीका १:३

## 5

इसाएली आन परबम रोंका पशो

1 मिनु आमोसमी “ए इसाएल आ खिं डा मुरपुकी, इन परबम आं रोंका पशो नेनीन।

2 आं मीश आल इसाएल लेंशा गेनायो मबोक्या डा पा गोलत। मेको आ रागीमीन प्रोंडचा पुंडसीशो बाकब। मेको कली पोक्ब सुइ मबाकनीम” देंत।

3 मिनु परमप्रभु यावेमी “तेकोइ सहर रे इसाएल आ परबम हजार का जना मुर यूतेकम हना, सहे का जना ला लीनीम। सहे का जना यूतेकम हना, १० जना मुर ला लीनीम” देंत।

दिप्ब आन परबम लोत्र पशो

4 मिनु परमप्रभु यावेमी इसाएल आ खिं डा मुर आन कली “आं कली मालीन। मिनु ब्रोनीन।

5 बेथेल कली ममालीन। मिनु गिलगाल मलने। बेयर-शेबामी मगाक्कीन। मारदे हना गिलगाल डा मुर थमा पा ग्याइशशा लाइक्चा पुंडसीनीम। मिनु बेथेल खतम दुम्ब। आमोस ४:४; होसे ४:१५

6 परमप्रभु यावे कली मालीने। मिनु ब्रोंडचा ताइनीनी। मो मपाइतीनी हना, मेको मी खोदेशो पा गाइशशा योसेफ आ खिं मी सुइक्ब। बेथेल कली खतम पोक्ब। मेको मी कली काप्ब सुइ मबाकनीम। आमोस ६:१२; यसेया ५:२०

7 गेपुकी ठीक निसाफ कली दूली सेलनीनी। ठीक पतीक कली खतम सेलनीनी।

8 सोरुल आन कली सेल्लब, हिंचा डा छिडछिड रे सुनी डा हाम्सो सेल्लब, नाक्ती कली छिडछिड सेल्लब नु समुन्द्र डा ब्वाक्कु कली ब्रेशशा रागीमी मोइक्ब। आं नें परमप्रभु यावे बाकब। अय्युब ३८:३१; आमोस ९:६

9 मेकोमी बोल्यो आन कली रीब पा खतम सेल्लब। मिनु आन बोल्यो दरवार खतम दुम्नीम।

10 मेकोपुकीम निसाफ पतीके लाप्चोम निरशा अरेब कली काइ मदाकनीम। मिनु थमा लोत्र पाइब आन कली ग्रान्ग्रा दिल्तीम। यसेया २९:२१

11 मारदे हना गे पुडग आन कली दिम्नीनी। मेको आन कली गेन कि गेन, दे शुश अन्न थाप्पाइक्नीनी। गे खोइशशो फुल्लु के खिं सेलतीनी। तन्न मेकेर बाक्चा मताइनीनी। रिम्शो अडगुर रू सेलतीनी। तन्न अडगुर शांबु तूचा मताइनीनी। सेफन्याह १:१३

12 मारदे हना गो इन शुश मरिम्शो पशो तुडक्नुड। गो इन पाप गिश टेयब बाक्बा, मेको तुडक्नुड। गे ठीक पाइब आन कली श्येत गेनीनी। धूस ताकनीनी। निसाफ पतीकेमी मारेइ मथीब आन कली नेप्शा गुंडनीनी।

13 मोपतीके निप्स पाइशशो मुर सिकसी पा बाकनीम। मारदे हना इसाएलम काइ मरिम्शो दुम्शो बाकब।

14 गे ब्रोंडशा बाक्चा कली रिम्शो पचा मालीन। मरिम्शो पचा ममालीन। मिनु मुर नेल्ल आन परमप्रभु यावे गे नु बाकब।

15 मरिम्शो पतीक कली काइ मदाक्तीन। रिम्शो पतीक कली दाक्तीन। टेयब लाप्चोमी ठीक निसाफ पने। मिनु मुर नेल्ल आन परमप्रभु यावेमी योसेफ आ लीशो मुर आन कली शिशी पाइबा कों?” दे परमप्रभु यावेमी देंत। भजन संग्रह ३४:१५; रोमी १२:९

16 मोपतीके मुर नेल्ल आन परमप्रभु यावेमी “लां डा मुर नेल्ल डाक्शा, रोंका पचा मालीनीम। आबी आबी, देंचा मालीनीम। रूम गेय पाइब आन कली रोंका पचा कली ब्रेत्तीन। रोंका पस जोक्ब आन कली यो ब्रेत्तीन।

17 अडगुर रू नेल्लेमी रोंका पचा मालीनीम। मारदे हना गो इन दाते रे पा गाक्शा लाइनुड” दे परमप्रभु यावेमी देंत।

परमप्रभु आ निसाफ पतीके नाक्त

18 मिनू परमप्रभु यावेमी “मारदे गे परमप्रभु यावे आ नाक्त जाकशो दाकनीनी? मारदे परमप्रभु यावे आ निसाफ पतीक नाक्त मालनीनी? मेको नाक्त छिडछिड दुम्ब, छेडछेड मदुम्ब। योएल २:११

19 मेको नाक्ती मुर का गुप्स रे प्रोकशा, वां कली गुम्शो खोदेशो बाकब। खिं लशा बाकचा कली आ गुड गारोम वोदानु, बुस्सुम कोकशो खोदेशो दुम्ब।

20 परमप्रभु यावे आ नाक्त छिडछिड दुम्ब। छेडछेड मदुम्ब। मेको छिडछिडमी छेडछेड काड मबाकब।

21 गो इन चाड नु इन गुम्तीक आन कली काइ मदाकनुड। यसैया १:११-१५

22 गे आं कली चोशा चढेतीक नु अन्न चढेतीक चढेतीनी हना यो, गो मेको मब्राइनड। मिनू इन नेल्ल क्येडा दोम्शो बस्तु दुशा बाकचा आ परबम चढेशो यो मकोव्रनुड। मीका ६:६-७

23 इन कुम्सो आन रेयके आं क्येडा डोन वोतीन। इन तार पाइशो ठेयब ताप्तीके ताप्शो नेंचा मदाकनुड।

24 तन्न ठीक निसाफ पतीक ब्वाकक खोदेशो पा शाइकपतीन। ठीक पतीक गेनायो मसोब्रब खोला खोदेशो पा शाइकपतीन।

25 गे इस्राएल आ खिं डा मुरपुकी गोरशो रागीम ४० बर्स गाकनीनु, आं कली चढेनी डा? येरमीया ७:२२-२४; प्रेरित ७:४२-४३

26 गेपुकीमी इन पिप देवता साकुथ नु इन सोरुल देवता काइवान आस कली कुरशा लतीन। मेको आंमा इन कली सेल्शो मूर्ति बाकनीसी।

27 मोपतीके गो इन कली ग्याइशशा, दमस्कस क्येडा डोन लाइकपाइकननी” दे परमप्रभु यावेम देंत। मेको आ नें मुर नेल्ल आन परमप्रभु यावे बाकब।

## 6

ठेयब लेशो आन कली हुइशो

1 मिनू “आबी, सियोन डा ठेयब मुर, मेकोपुकीमी सामरीया डा डांडामी ‘गो रिम्शो बाकनीकी’ दे मिम्नीम। इस्राएल डा मुरपुकीमी मेको आन कली थमा सुइशशा, जाकनीम।

2 गे आइक्ची हांबु काल्नेह सहर लशा, कोव्रडीन। मिनू मेकेर रे ठेयब हमाथ रागी लन। मेको नोले पलिस्ती आन गाथ सहरमी लने। इन राज्य मेको आन राज्य क्येडा रिम्शो बाकबा डा? मार, मेको इन रागी मेको आन रागी क्येडा ठेयब बाकबा डा? उत्पत्ती १०:१०

3 गे ‘श्येत जतीक नाक्त मजाकब’ दे मिम्नीनी। मिनू गे हुश खाकश पोक्ब सासन पाइब चाकनीनी। भजन संग्रह १०:५

4 आबी, मेको हात्ती आ दारा के सेल्शो खाटमी इप्नीमी। आन इप्तीकेमी गोल्शा बाकनीमी। मेकोपुकीम क्यारश भेडा आन पाठा नु गोठ डा बाछा ब्वाइनीमी।

5 मेकोपुकीम हेथे कुम्सो पा तार पाइशो ठेयब ताप्तीक ताप्नीमी। मिनू ‘गो दाऊद खोदेशो पा ताप्तीक सेल्लुड’ दे मिम्नीम। यसैया ५:१२

6 मेकोपुकीम डाप्काम अडगुर शांबु तूनीमी। नेल्ल क्येडा रिम्शो तेल खेकसीनीमी। तन्न योसेफ आ खिं डा मुरुम श्येत जामेनु, सुर्ता मपाइनीम।

7 मोपतीके मेको नेल्ल क्येडा डोंइती ग्याइशशा लाइकचा पुंडसीनीम। मोपा मेको आन चाड पतीके, ग्येरशा बाकतीक नाक्त नुपब” देंत।

इस्राएल डा मुर आन ठेयब लेशो

8 परमप्रभु यावेमी आ नेमी कसम जशो बाकब। मिनू मुर नेल्ल आन परमप्रभु यावेमी “गो याकूब आ ठेयब लेशो तशा ग्रांग्रा दीनुड। मेको आ बोल्यो दरवार आन कली काइ मदाकनुड। गो एको सहर नु आ मार मार नेल्ल आन जोरी सत्रु आन गुइमी गेनुडमी” देशो बाकब।

9 खिं काम १० जना मुर लीतेकम हना यो, मेको नेल्ल बेकनीम।

10 मिनू खिं डा मुर कामी मेको आन बेकशो रां चोइब, खिं आगा रे बेकशो मुर गुंड्या कली जाकशा, मेकेर खुइकब का कली “गेपुकी नु अरु सुइ बाकनीमी?” दे हिल्लो पाइब। मिनू मेकोमी “मबाकब” देंब। मिनू खिं डा मुरुमी “सिक्सी पावो। गोपुकीमी परमप्रभु यावे आ नें थिचा मदुम्ब” देंब। आमोस ८:३

11 मारदे हना परमप्रभु यावेमी हुकुम पाइब। मिनू ठेयब खिं कली प्रेपब। मिनू आइकच खिं यो प्रेपब।

12 मेकोमी “मार, शारा रोगुम दोरनीमी डा? मार, मेकेर ब्यफ वाकनीमी डा? तन्न गेपुकीमी ठीक निसाफ कली दूली सेल्लतीनी। ठीक पतीक कली कशो सेल्लतीनी। आमोस ५:७

13 गेपुकी लो-देबार सहर आ पबंम ग्येरसाकनी। मिनू ‘मार, गोपुकीमी इं सक्तिम कारनाइम सहर मगासे डा?’ देंनीनी।

14 ए इस्राएल आ खिं डा मुरपुकी, गो इन पबंम रागी का डा मुर आन कली पोक्नुडमी। मिनू मेकोपुकीमी इन कली लेबो-हेमाथ रे अराबाह डा खोला सम्म श्येत गेशा खेदा पाइनीम” दे मुर नेल्ल आन परमप्रभु यावेमी देंत।

## 7

### सल्हा माले कौंइशो

1 परमप्रभु यावेमी आं कली मार कौंइताक्यी देशा हना, पिप आ बाली नाली खुप्ने थुम्शा, अर्को बाली वामानु, मेकोम मारेइ मारेइ नेकब सल्हा माले आन कली ठीक पशो ताता।

2 मिनू मेकोपुकीमी रू डा घांस नेल्ल नेकगमे नोले गो “परमप्रभु यावे माफ गेयीनी। याकूब आ रागी दोपा ब्रॉइने चापबा डा? मारदे हना मेको थम आइकच बाकब” देंती।

3 मिनू परमप्रभु यावेमी “मेको मोदेशो मदुम्ब” देंत।

### मी कौंइशो

4 मिनू परमप्रभु यावेमी आं कली मार कौंइताक्यी देशा हना परमप्रभु यावेमी आं कली ब्रशो मी का कौंइताक्यी। मिनू मेको मीम ठेयब समुन्द्र कली सोव्रपाइक्तु। मिनू रागी कली यो नेक्तु। उत्पत्ती ७:११

5 मिनू गो “परमप्रभु यावे नाइक्तीन, दे गो इन कली पुंडनुड। याकूब आ रागी दोपा ब्रॉइने चापबा डा? मारदे हना मेको थम आइकच बाकब” देंती।

6 मिनू परमप्रभु यावेमी “मोदेशो यो मदुम्ब” देंत।

### गारो प्रोव्रतीक घन्टी कौंइशो

7 मिनू परमप्रभु यावेमी आं कली मार कौंइताक्यी देशा हना, परमप्रभु यावे गारो काम गारो प्रोव्रतीक घन्टी शेशा, राप्शो बाक्त।

8 मिनू परमप्रभु यावेमी आं कली “आमोस गे मार तवी?” दे हिल्लो पाप्तु। मिनू गो “गारो प्रोव्रतीक घन्टी का ताता” देंती। मिनू परमप्रभुमी “कोव्रडो, गो आं मुर इस्राएली आन दातेमी गारो प्रोव्रतीक घन्टी का क्युकनुड। मिनू मुल गो मेको आन नेकथा बाकशा, मार पाइकबाकमा, कोव्रनुडमी। यसैया ३४:११; आमोस ८:२

9 इसहाक आ डांडा डा थान खतम दुम्नीम। मिनू इस्राएल डा थान नेल्ल ब्रेशा जाम्शा लाइनीम। मिनू गो तरवार शेशा येरोबाम आ खिं डा मुर साइक्या कली बोक्शा लाइनुड” देंत।

### आमोस नु अमस्याह

10 मिनू बेथेल डा चढेब अमस्याहमी इस्राएल डा पिप येरोबाम कली “इस्राएल आ खिं डा मुर आन दातेमी इस्राएलम बाकब आमोसमी इन पबंम मरिम्शो पाइब। एको रागीमी मेको आ लोव्र फाल्ने मचापब।

11 आमोसमी ‘येरोबाम तरवारम साइक्या पुंडसीब। मिनू इस्राएल डा मुर आन रागी रे ग्याइश्शा लाइक्या पुंडसीनीम’ देशो बाकब” दे आमोसमी देंत।

12 मिनू अमस्याहमी आमोस कली “ए, परमप्रभु यावे आ लोव्र पाइब, गे एके रे प्रोक्शा यहूदा रागी लावो। मिनू मेकेर क्येट चेम्शा शोब्ले ग्याप्शा जशा, परमप्रभु यावे आ लोव्र पावो। १सामुएल ९:९

13 बथेलमी लेंशा गेनायो परमप्रभु यावे आ लोत्र मपावो। मारदे हना मेको पिप आ देवी देवता थान नु राज्य डा पूजा पतीके बाकब” देंत। १राजा १२:२८-२९

14 मिनु आमोसमी अमस्याह कली “गो परमप्रभु यावे आ लोत्र पाइब मनड। मिनु परमप्रभु यावे आ लोत्र पाइब आ तौ यो मनड। गो दा गोठला का नु फोव्रशी रवा कोव्रब मुर नड।

15 मिनु परमप्रभु यावेमी आं कली क्यारश भेडा योव्रतीक रे ब्रेत्ताक्यी। मिनु मेकोमी आं कली ‘लावो। आं मुर इस्राएली आन कली आं लोत्र शेंदीमी’ दे माइक्ती।

16 मोपतीके मुल परमप्रभु यावे आ लोत्र नेनीन। गे आं कली ‘इस्राएल आ पर्बम परमप्रभु यावे आ लोत्र मपावो। मिनु इसहाक आ खिं डा मुर आन पर्बम लोत्र मपावो’ देंतीनी। आमोस २:१२

17 मोपतीके परमप्रभु यावेमी इ कली ‘इ मीश सहरम तेल्लेम का दुम्ब। इ तमी तौ नेल्ल तरवारमी क्योरचा पुंडसीनीम। मिनु इ रागी पुक्शा योक्सीनीम। गे चहिं ग्रान्रा दिशो रागी काम बेक्नेवे। मिनु इस्राएल थमा पा आ रागी रे ग्याइश्शा लाइक्चा पुंडसीब’ ” दे आमोसमी अमस्याह कली देंत।

## 8

### मीशो फोव्रशीम ब्रीशो डालो

1 मिनु परमप्रभु यावेमी आं कली मीशो फोव्रशीम ब्रीशो डालो का कोंइताक्यी।

2 मिनु मेकोमी आं कली “आमोस, गे मार तवी?” दे हिल्लो पती। मिनु गो “मीशो फोव्रशीम ब्रीशो डालो का ताता” देंती। मिनु परमप्रभु यावेमी आं कली “आं मुर, इस्राएली आन नाक्त गाप्त। मुल गो मेको आन नेक्था बाक्शा, मार मार पाइनीमी, मेको कोव्रनुडमी। आमोस ७:८

3 मेको नाक्ती दरवारम कुम्सो पाइब आन कुम्सो रोंका पतीके दुम्नीम” दे परमप्रभु यावेमी देंत। मिनु मेकोमी “बेक्शो मुर शुश बाक्नीम। लाडगाम गुंडशा ताइक्नीम। गे सिक्सी पावो” देंत। आमोस ६:१०

### इस्राएल खतम दुम्शो

4 मिनु परमप्रभु यावेमी “गे मारेइ मथीब आन कली दिम्बपुकी नु रागी डा पुडग आन कली खतम सेल्बपुकी, नेनीन। आमोस २:७

5 गेपुकीमी ‘औंसी गेना लाक्बा डा? गो अन्न लेयचा ताइनीकी। नाइक्तीक नाक्त गेना लाक्बा डा? गो चेरब लेयचा ताइनीकी। गो एफाह आइक्च सेल्शा, शेकेल कली हेल्लो सेल्शा नु दूली पा नाक्शा, शुश क्येट चेम्नीकी’ देंतीनी। एफाह का २२ लिटर लाइब पुक्तीक बाक्ब। शेकेल का ११.५ ग्राम डा क्येट बाक्ब।नेहेम्याह १३:१५

6 गेपुकीम ‘पुडग आन कली चांदीम ग्याप्नीकी। मारेइ मथीब आन कली जोर का चेपलमी ग्याप्नीकी। मिनु मक्राप्शो चेरब लेयनीकी’ देंतीनी” देंत। आमोस २:६

7 परमप्रभु यावेमी याक्ब आ सोशो बोशो मिम्शा, कसम जाप्तु। मार कसम जाप्तु देश हना “गो मेको आन पशो गेनायो मप्रनुड।

8 मार, मेको आ पतीके रागी खिंखि मपाइबा डा? मेकेर बाक्ब नेल्लेमी रोंका मपाइनीमी डा? रागी नेल्ल नील खोला खोदेशो पा बारनीम। इजीप्त रागी डा नील खोला बारशा ग्युम्शो खोदेशो पा नुप्शा लाइनीम। आमोस ९:५

9 गो मेको नाक्ती नां कली नाक्ती उइक्थ दुम्मेनु, लाक्पाइक्नुड। मिनु नाक्त बाक्ना बाक्न नां रिक्पाइक्नुड। येरमीया १५:९

10 गो इन चाड कली रोंका पतीक सेल्लुड। इन कुम्सो नेल्ल आन कली डाक्तीक सेल्लुड। गो नेल्ल इन कली अरन्डी फेक्पाइश्शा चां प्रेक्पाइक्नुड। गो आंम का ला बाक्शो तौ आ पर्बम रोंका पशो खोदेशो दुम्पाइक्नुड। मेको चाड नुप्पतीक नाक्त कशो नाक्त दुम्ब” देशो बाक्ब। येरमीया ६:२६

11 मिनु परमप्रभु यावेमी “गोम अन्काल सोइक्ची ना, थमा पा श्येत जतीक नाक्त जाक्ब। मेको अन्काल जचा नु तूचा के अन्काल ममाइ, तन्न परमप्रभु यावे आ लोत्र नेंतीक अन्काल बाक्ब। १सामुएल ३:१



- 12 मुरपुकी परमप्रभु यावे आ लोत्र मालशा, समुन्द्र का रे अर्को समुन्द्र सम्म लाइनीम। उत्तर रे पूब सम्म लाइनीम। मेकोपुकी एर ओथ गाक्शा, परमप्रभु यावे आ लोत्र माल्नीमी। तन्न मथिल्तीम।
- 13 मेको नाक्ती दारशो मीश आल नु बोल्यो वोंइश आल ब्वाक्कु तूचा मतथु, थाइनीम।
- 14 सु सु सामरीया डा देवता अशीमाह आ नेंमी कसम जशा 'ए दान, इ देवता ब्रोंइशा बाक्शो खोदेशो पा' नु 'बेयर-शेबा डा देवता ब्रोंइशा बाक्शो खोदेशो पा' देंशा कसम जाइब नेल्ल गेनायो मबोक्चा डा पा गोल्नीम" दे परमप्रभु यावेमी देंत। न्यायाधीस १८:३०

## 9

### नोले डा दुम्तीक कोंइशो

1 गो परमप्रभु कली चढेतीक आ नेक्था राप्शो ताता। मिनु मेकोमी आं कली "लाप्चो डा शी शुश हिम्पाइक्चा कली थाम आन डर तुपो। मिनु ब्रेशरा मुर नेल्ल आन पिया तार दोक्नीम। मिनु ब्रोंइशा लीशो आन कली तरवारमी क्योरनुडमी। मेको आन दाते डा का यो प्रोक्चा मताइनीम। का यो ब्रोंइचा मताइनीम।

2 मेकोपुकी बेक्शो मुर आन बाक्तीक लाम्तेक्म हना यो, मेकेर रे कीशा गुंडनुड। मिनु मेकोपुकी इर सरीड गे डोंइशा लाम्तेक्म हना यो, गो मेको आन कली ग्याइशा लुक्च फ्रुप्नुडमी। अय्युब २६:६; भजन संग्रह १३९:८

3 मेकोपुकी कारमेल डांडामी खुंडसाक्म हना यो, गो मेको आन कली मालशा, ग्याइशा चाक्नुडमी। मेकोपुकी आं क्येडा खुइशा समुन्द्र आगाम लाम्तेक्म हना यो, समुन्द्रम बाक्ब बुस्स कली 'मेको आन कली कोक्मी' दे अरेनुड। मिनु मेकोमी मेको आन कली कोक्ब।

4 मेको आन जोरी सनु आन डोंइती ग्याइशा लाइक्चा पुंडसाक्म हना यो, गो मेको आन कली क्योरशा साइक्चा कली तरवार कली अरेनुड। मिनु मेकोमी साइक्ब। गो मेको आन कली रिम्शो पचा कली ममाइ, तन्न मरिम्शो पचा कली कोव्रनुडमी" देंत।

5 मिनु मुर नेल्ल आन परमप्रभु यावेमी रागी कली थिप्नु हना, रागी याइब। मिनु मेकेर बाक्ब नेल्ल रोंका पाइनीम। मिनु रागी नेल्ल नील खोला खोदेशो पा बारब। मिनु इजीप्त डा नील खोला खोदेशो पा सोत्रब। आमोस ८:८

6 मेकोमी स्वर्गम आ बाक्तीक सेल्लब। मिनु रागीमी मेको आ जग वोइक्ब। समुन्द्र डा ब्वाक्कु कली ब्रेशरा, रागीम मोइक्ब। मेको आ नें परमप्रभु यावे बाक्ब। भजन संग्रह १०४:३; आमोस ५:८

7 मिनु परमप्रभु यावेमी इस्राएल डा मुर आन कली "गे आं कली एथीयोपीया डा मुर खोदेशो बाक्नीनी। गो इस्राएली आन कली इजीप्त रागी रे, पलिस्ती आन कली काफतोर रागी रे नु अरामी आन कली कीर रागी रे गुंडशा चाक्शो मनडमी डा?" देंशो बाक्ब। ब्यवस्था ७:७; येरमीया ४७:४

8 परमप्रभु यावेमी शुश पाप पाइब राज्य कली कोव्रना कोव्रन बाक्ब। मेकोमी "गो मेको आन कली रागी रे क्याम्नुड। मो हना यो गो याक्ब आ खिं कली चहिं नेल्ल मक्याम्नुड" दे परमप्रभु यावेमी देंत।

9 परमप्रभु यावेमी "गो मार हुकुम पाइनुडमी देंशा हना, इस्राएल आ खिं डा मुर आन कली जात नेल्ल डा मुर आन दातेमी ग्योलोमी मार मार क्राप्शो खोदेशो पा, क्राप्नुडमी। मिनु इम्चीली फुल्लु का यो खपीम मदोक्ब।

10 मेकोपुकीम "हिंचा डा श्येत आंइ तारी मजाक्ब। इ कली मेकोम मथिप्ब" दे पाप पाइब, आं मुर नेल्ल तरवारमी साइक्चा पुंडसीनीम" देंत। आमोस ६:३

### इस्राएल कली लेंशा सेल्शो

11 परमप्रभु यावे, इन परमप्रभुमी "गो मेको नाक्त दाऊद आ ब्रेशशो खिं आन कली लेंशा सेल्नुड। मिनु मेको आ ब्रेशशो गारो आ पोत्रला सुइनुड। मिनु मोपा नेल्ल साइ डोंइती डा खोदेशो सेल्नुड। १ राजा १२:१९; प्रेरित १५:१६-१७

12 मिनु मेकोपुकीम एदोम डा लीशो नु आं नें पाइशो जात जात डा मुर नेल्ल आन के दुम्नीम" दे मोदेशो पाइब परमप्रभु यावेमी देंत।

13 मिनु परमप्रभु यावेमी “मेको नाक्त थमा पा जाक्ब। बाली नाली खुप्बमी ब्यफ वाक्ब कली गुम्ब। मिनु वांचेर ब्वारबमी अडगुर खुम्ब कली गुम्ब। डांडा रे पा नक अडगुर रस याप्ब। मिनु डांडा नेल्ल अन्न बाला सिल्लीम। लेवी २६:५; योएल ४:१८

14 गो आं मुर इस्राएली आन कली आन मार मार लेशशा गेनुडमी। मिनु मेको आन ब्रेशो सहर कली लेशा सेल्शा, मेकेर बाक्नीम। मेकोपुकीम अडगुर खुम्शा, अडगुर शांबु तूनीम। मेकोपुकीम फल फुल खुम्शा, मेको आन फल जाइनीम। ब्यवस्था ३०:३; यसैया ६५:२१

15 गो मेको आन कली गेनायो मखेरपांडसीचा डा पा आन रागीमी वोइक्नुड। आं गेशो रागी रे मेको आन कली सुइमी गुंइने मचाप्नीम, दे इन परमप्रभु यावेमी देशो बाक्ब” दैत।

## ओबदिया

**ब्रेक्ब मुर:** ओबदिया आ अर्थ “परमप्रभु यावे आ गेय पाइब” बाक्ब। एको किताब सुम ब्रेक्बो मेको मतुंडसाक्व हना यो, जोक्ब तुइक्ब शुशेमी एको किताब ओबदिया आंमा ब्रेक्बो बाक्ब, दे मिन्मी।

**गेना ब्रेक्बो:** बेबीलोन डा पिप नेबुकदनेसरम ५८७ बि. सी. यरूसलेम सहर कली ग्राशा खतम सेल्शा, पिप दाऊद आ सासनमी दिप्शो एसाव आ चच युइमी एदोममी बेबीलोन डा लडाइ पाइब आन कली ग्येरशा वारच पशो बाक्तेक्म।

**मारदे ब्रेक्बो:** साइ नेसी रे एदोम डा मुर यहूदी आन जोरी सत्रु बाक्बो बाक्तेक्म। गन्ती २०:१४-२१ ओबदियामी एदोम डा मुर नेल्ल क्याम्चा पुंडसीनीम, दे लोत्र पशो बाक्त। तन्न परमप्रभुमी शुश खेयप मटीब इस्राएली आन कली शिशी पा दाक्ब, दे यो ब्रेक्बो बाक्ब। एको किताबम परमप्रभु यावे आ निसाफ पतीक नाक्त आ पर्वम ब्रेक्बो बाक्ब।

परमप्रभुम ओबदिया कली कौंइशो

येरमीया ४९:७-२२

1 परमप्रभु यावेमी ओबदिया कली कौंइशो लोत्र मार बाक्त देशा हना, परमप्रभु, परमप्रभु यावेमी एदोम आ पर्वम लोत्र पाप्तु। गोपुकीमी परमप्रभु यावे रे लोत्र का नेतक। मेकोम रागी रागीम लोत्र कुरब मुर का सोइक्ताक्व। मेकोमी “बोक्कीन। गो मेको नु लडाइ पथ लय।

2 गो इ कली रागी रागी डा मुर आन दातेम नेल्ल क्येडा आइक्च सेल्लुड। मिनु गे महिक्सीशो दुम्नेवे।

3 इ थुं डा ठेयब लेत्तीकेमी इ कली जोल पाइश्शो बाक्ब। इ सहर ठेयब फुल्लु तार सेल्शो बाक्ब। गे डांडा तार बाक्नेवे। गे इ थुंमी ‘आं कली सुम उइ तोक्ने चाप्बा डा?’ दे मिन्नेवे। गन्ती २४:२१

4 तन्न गे ककाकुली खोदेशो पा इर सरीड मेर बेरते हना यो, सोरुल आन दातेम इ ग्योत्र सेल्लेतीवी हना यो, गो इ कली मेक रे तोक्नन” दे परमप्रभु यावेम देत।

5 मिनु खुइपुकी इ बाक्तीक जाक्तेक्म हना, नाक्दो रोइक्बपुकी इ बाक्तीक जाक्तेक्म हना, गे दोदेशो पा खतम दुम्नेवे? मेकोपुकीम आन कली माल्लो खोइ ला रोइश्शा मलाइक्नीमी डा? अडगुर सेक्बपुकी इ बाक्तीक जाक्शा सेक्तेक्म हना, मेकोपुकीमी इक्कका अडगुर मप्रौंइनीमी डा?

6 तन्न एसाव आ शोप दोपा रौंइसीबा? मेको आ खुइश्शा वोइश्शो शोप दोपा माल्ला गुंइनीमी?

7 इ नेक्था डा रागी डा मुरपुकीमी इ कली जोल पाप्तेक्म। मेकोपुकीम इ कली खेदा पा खेरशा इ सांद सम्म चाक्तेक्म। इ वारचपुकीमी इ कली दिप्शा श्येत गेनीम। इ थुल्लो मुरपुकीमी इ कली ब्वारद दाइक्नीम। तन्न गे मारिड मतुइक्नेवे।

8 परमप्रभु यावेमी “गो मेको नाक्त एदोम डा जोक्ब तुइक्ब मुर आन कली खतम सेल्लुड। एसाव आ डांडाम बाक्ब रुप्ब मुर आन कली साइक्नुडमी।

9 गे तेमान, इ लडाइ पाइबपुकी फ्राचा पुंडसीनीम। एसाव आ डांडाम बाक्ब मुर नेल्ल क्योरशा साइक्चा पुंडसीनीम। आमोस १:१२

10 गे इ लोक्ब याक्ब कली हुश खाक्श पोक्शो आ पर्वम इ कली मुनेम सुम्ब। मिनु गे गेना हना यो कली जाम्शा लाइनेवे। योएल ४:१९

11 मेको नाक्त गे डोन राप्शा बाक्ते। मेको नाक्त अर्को रागी डा मुरपुकीमी मेको आ शोप नेल्ल रोइश्शा लाइक्तेक्म। अर्को रागी डा मुर मेको आ लाप्चो रे ओव्रतेक्म। मिनु यरूसलेम आ पर्वम फेन्टे आप्तेक्म। गे यो मेकोपुकी खोदेशो का बाक्ते। भजन संग्रह १३७:७

12 तन्न गे इ लोक्ब श्येत जवानु, मेको कली मदिप्चा माल्लो नवे। यहूदा डा मुर खतम दुम्मा नाक्त गे मायेरसीचा माल्लो नवे। मेकोपुकी श्येत जामे नाक्ती गे ठेयब लेशो लोत्र मपचा माल्लो नवे।

13 आं मुर हिंचा डा श्येत जामे नाक्त, गे मेको आन लाप्चो रे मओव्रचा माल्शो नवे। यहूदा डा मुर खतम दुम्मा नाक्ती, गे मेको मरिम्शो पाइबपुकी नु मगारचा माल्शो नवे। मेको हिंचा डा श्येत जामे नाक्ती गे मेको आन शोंप रोइश्शा मलाइक्चा माल्शो नवे।

14 मेको आ प्रोक्शा लशो मुर आन कली साइक्चा कली लां गुम्तीकेमी बाप्शा बाक्चा मदुम्शो नवे। मेको ब्रोंइशा प्रोक्शो आन कली मग्याइक्चा माल्शो नवे।

15 परमप्रभु यावे आ निसाफ पतीक नाक्त रागी रागी डा मुर नेल्ल आन नेक्था जाक्शो बाक्ब। गे दोदेशो पशो नवे, इ कली मोदेशोन पांडसीब। इ पशो गेय नेल्ल इ पियामीन मोंडसीब। योएल १:१५; येरमीया ५०:१५, २९

16 गे दोपा आं डांडाम तूडी, मोपा इ एर ओथ बाक्ब रागी रागी डा मुरुम गेना हना यो तूनीम। मिनु गेनायो मबाक्शो खोदेशो दुम्नीम। येरमीया २५:१५

17 तन्न सियोन डांडाम चहिं प्रोक्शो मुरपुकी जाक्नीम। मेको परमप्रभु यावे आ डांडा बाक्ब। मिनु याक्ब आ खिंमी डोंइती आंम कली अधिकार पाइब आन कली अधिकार पाइनीम। योएल ३:५; योएल ४:१७

18 याक्ब आ खिं मी दुम्ब। योसेफ आ खिं ब्रशो मी दुम्ब। एसाव आ खिं चहिं नल खोदेशो दुम्ब। मेकोपुकीमी मेको कली मीम हुम्शा, खतम पोक्नीम। मिनु एसाव आ खिं डा मुर सुइ मब्रोंइनीम” दे परमप्रभु यावेमी देंत। जकरिया १२:६

19 नेगेब डा मुरपुकीमी एसाव आ डांडा आन के सेल्नीम। शेफेलाह डा मुरपुकीम पलिस्ती आन रागी आन के सेल्नीम। मेकोपुकीमी एफ्राइम नु सामरीया डा रू आन के सेल्नीम। मिनु बेन्यामीनम चहिं गिलाद आंम के सेल्ब। १ राजा १६:२४

20 मिनु ग्याइश्शा लाइक्चा पुंडसीशो हालाहम बाक्शो इस्राएलीपुकीमी फोनीचीआ रे चारेफाथ सम्म डा रागी आन के सेल्नीम। मिनु यरूसलेम रे ग्याइश्शा लाइक्चा पुंडसीशो सेफाराद सहरम बाक्शो मुरपुकीम नेगेब डा सहर आन के सेल्नीम।

21 ब्रोंइशोपुकी सियोन डांडा डोइश्शा कुइनीम। मिनु एसाव आ डांडा कली सासन पाइनीम। मिनु मेको राज्य परमप्रभु यावे के दुम्ब।

## योना

**ब्रेक्ब मुर:** एको किताब सुम ब्रेक्शो बाक्बा, मेको आ पर्वम तेइ मब्रेक्शो बाक्ब। तन्न योना आ शेंसीबपुकीमी योना आ ब्रेक्शा वोइश्शो रे एको किताब गुंइशो बाक्ब, दे मिन्नीम।

**गेना ब्रेक्शो:** इस्राएल डा पिप येरोबाम ८२५-७८४ बि. सी. आ पालाम योना बाक्त। २राजा १४:२५ मेना आमोस नु होसेमी यो परमप्रभु यावे आ लोत्र पशो बाक्ताक्स। एको किताब योना बेक्म नोले ब्रेक्शो बाक्ब।

**मार ब्रेक्शो:** परमप्रभु यावेमी इस्राएली मडुम्शो, अर्को रागी डा मुर आन कली इस्राएली आन कली खोदेशो पा दाक्ब। येसुमी यो योना आ सांकछी गेब। मत्ती १२:३८-४१; लूका ११:२९-३२

### परमप्रभुमी योना कली सोइश्शो

1 परमप्रभु यावेमी अमीतै आ तौ योना कली मार लोत्र पवा बाक्त देशा हना, २राजा १४:२५

2 “गे छुल बोक्शा, निनवे माइश्शो ठेयब सहरम लावो। मिनु मेकेर डा मुर आन मरिम्शो पशो आ पर्वम शेंदीमी। मारदे हना गो मेको आन मरिम्शो पशो नेल्ल ताता” दे मदा बाक्त।

### योना परमप्रभु रे प्रोक्शो

3 तन्न योना परमप्रभु यावे आ डोंइती रे लशा, निनवे मलथु, टारशीश गे प्रोक्चा गोवा बाक्त। मिनु योप्पा सहरम यिशा, टारशीश लाइब डोंगा का थिश्शा, क्येट थाप्शा, परमप्रभु यावे आ डोंइती रे प्रोक्शा, डोंगाम डोंइसे बाक्त। भजन संग्रह १३९:७,९,१०

4 मिनु परमप्रभु यावेमी समुन्द्रमी ठेयब फश पपदा बाक्त। मोंगा ठेयब फश गिवारम पतीके मेको डोंगा जिक्चा चिक्ता बाक्त।

5 मिनु डोंगाम गेय पाइबपुकीमी हिंशा, आन देवी देवता आन नें थिशा, ब्रेम्मा बाक्त। मिनु डोंगा सोपी पचा कली मेको आन बाक्शो मारेइ मारेइ समुन्द्रमी ताइक्तमे बाक्त। योना चहिं डोंगा आ आइदी तला लशा, इप्शो बाक्माक्त।

6 मिनु डोंगा चलेबमी योना आ इप्तीकेम लशा “गिश डा इमे। बोक्को, इ परमप्रभु कली थोवो। मेको परमप्रभु इ कली खतम दुम्चा रे प्रोंइबा, को” देमाक्त।

7 मिनु डोंगाम गेय पाइबपुकीमी “सुम पतीके ओदेंब श्येत दुम्माइ, तुइक्चा कली चिडगा कोत्रचा” देमुशा, चिडगा कोत्रडमे बाक्त। चिडगा कोत्रडमेनु, योना आ नेंम गूमक्ता। हितोपदेस १६:३३

8 मिनु डोंगाम गेय पाइबपुकीमी योना कली “गो मारदे ओदेंब श्येत जया? इ गेय मार में? गे ते रे पिवे? तेको रागी डा नवे? मार थर डा मुर नवे?” दे हिल्लो पामे बाक्त।

9 मिनु योनामी “गो हिबू नड। रागी नु समुन्द्र सेल्ब, सरीड डा परमप्रभु यावे कली थमा सुइक्ब नड” देमाक्त। उत्पत्ती १:९-१०

10 मिनु मेको मुरपुकी डोंइती क्येडा हिंशा योना कली “गे मारदे ओपा प्रोक्डे?” दे हिल्लो पामे बाक्त। मारदे हना योनामी मेको आन कली “गो परमप्रभु यावे आ डोंइती रे प्रोक्ती” देशो बाक्माक्त।

11 मिनु मेकोपुकीमी योना कली “फश गिवार नाइक्पाइक्चा कली मार पचा माल्नीकी?” दे हिल्लो पामे बाक्त। मारदे हना फश गिवार पतीके ब्वाक्कु बारना बारन लमाक्त।

12 मिनु योनामी “आं कली समुन्द्रमी ताइक्ताक्यीनी हना, फश गिवार नाइक्ब। एको फश गिवार आं पतीके पशो बाक्ब, दे गो तुइक्नुड” देमाक्त।

13 मिनु मेको मुरपुकीमी लेंशा डोंगा रागीम चाक्चा कली शुश खीयेमे बाक्त। तन्न मचाप्मे बाक्त। मारदे हना फश गिवार शुश बारशो बाक्माक्त।

14 मिनु मेकोपुकीमी परमप्रभु यावे कली “परमप्रभु यावे, एको मुर आ पर्वम गोपुकी बेक्चा ममाल्कल। एको मुर आ दोस मतकल। मारदे हना परमप्रभु यावे, इन दाक्शो यो मोदेशो बाक्त” देमा बाक्त।

- 15 मिनु योना कली समुन्द्रमी ताइक्तमे बाक्त। मिनु फश गिवार नु ब्वाक्कु खा दिम्शा, नांइसे बाक्त।  
 16 मिनु मेको मुरपुकी परमप्रभु यावे कली मान पा हिंशा, मेको कली चढ़ेशा “आ देशो नेल्ल टीनीकी” दे परमप्रभु यावे कली कसम जामे बाक्त।  
 17 मिनु परमप्रभु यावेमी योना कली दाक्पाइक्चा कली ठेयब डांड का सोइक्ता बाक्त। मेको डांडमी योना कली गु दाक्गानु, योना सां नाक्दो नाक्ती आ कोव्रजीम बाक्माक्त। मत्ती १२:४०; मत्ती १६:४

## 2

### योनाम परमप्रभु कली लोव्र पशो

- 1 मिनु योनामी डांड आ कोव्रज रे पा परमप्रभु यावे कली लोव्र पवा बाक्त।  
 2 मिनु मेकोमी परमप्रभु यावे, आ परमप्रभु कली “गो आं श्येत जतीके रे लोव्र पाता। मिनु आं कली लोव्र लेत्ताक्यीनी। गो बेक्शो मुर आन बाक्तीके रे ब्रेत्ती। मिनु गे आं सेंदा नेतीनी। भजन संग्रह १२०:१  
 3 गे आं कली समुन्द्र आगाम ताइक्ताक्यीनी। आं एर ओंथ ब्वाक्कु ला बाक्शो बाक्त। ब्वाक्कुमी आं कली गिल्शा, आ छाल आं तारी रे लाम्तेक्म। भजन संग्रह ४२:८  
 4 गोमी ‘इन क्येडा डोन दुम्शा, इन योव्रशो खिं मुल गेनायो मताइनुड’ दे मिम्ताक्ड। भजन संग्रह ३१:२२  
 5 आं एर ओंथ ब्वाक्कु बाक्तीके, हेरा बेक्ती। गो ब्वाक्कु आगाम बाक्डानु, आं पिया लेउम सुम्शो बाक्त। भजन संग्रह १८:५; भजन संग्रह ६९:२  
 6 मिनु गो समुन्द्र आगा क्येडा यो लुक्च ग्रुम्ती। गो गेनायो मयूचा डा पा ग्रुम्ती। तन्न परमप्रभु यावे, आं परमप्रभु गे आं कली बेक्चा रे प्रोइतीनी। भजन संग्रह १०३:४  
 7 आं थुं लुक्च लशा, गो परमप्रभु यावे, इन कली मिम्शा, इन कली लोव्र पाता। मिनु इन बाक्तीके रे आं लोव्र नेतीनी। भजन संग्रह १४२:२-४  
 8 जाम्शा लाइब मूर्ति कली थमा सुइक्बपुकीमी इन शिशो मताइनीम। भजन संग्रह ३१:७  
 9 गो चहिं ‘गे रिम्शो पाइब बाक्नीनी’ देशा, इन कली ठेयब सेल्लुड। गो इन कली देशो लोव्र खान्पुड। परमप्रभु यावे, गे मुर आन कली श्येत रे प्रोइब बाक्नीनी” दे लोव्र पवा बाक्त। भजन संग्रह ५०:१४; भजन संग्रह ११६:१७-१८  
 10 मिनु परमप्रभु यावेमी डांड कली “योना कली ब्वाक्कु रे गुंडशा रागीम तेवो” दे अरेवा बाक्त। मिनु डांडमी मेको कली ब्वाक्कु रे गुंडशा, रागीमी तेवा बाक्त।

## 3

### लेशा योना कली शेंथ सोइश्शो

- 1 मिनु परमप्रभु यावेमी लेशा योना कली लोव्र पवा बाक्त। योना १:२  
 2 मिनु मेकोमी “गे बोक्को, निनवे माइश्शो ठेयब सहर लावो। गो इ कली मार शेंनुडा, मेको मेकेर डा मुर आन कली शेंदीमी” दे मदा बाक्त।  
 3 मिनु परमप्रभु यावे आ लोव्र टिशा, योना निनवे गे लचा गोवा बाक्त। निनवे थम ठेयब सहर बाक्माक्त। मेको निनवे सहर सुर कारे अर्को सुर जाक्दीत्या कली नाक्त सां माल्बाक्माक्त। योना ४:११  
 4 मिनु योनामी निनवे सहर ओव्रशा, नाक्त का गाक्शा, मुर आन कली “४० नाक्त नोले एको सहर खतम दुम्ब” दे ठेयब सेंदामी शेंदा बाक्त।  
 5 मिनु मेको नेशा निनवे डा मुरपुकीमी परमप्रभु आ लोव्र थमा बाक्ब, दे थमा सुदमे बाक्त। मेकोपुकीमी “निनवे सहर डा आइक्च नु ठेयब मुर आन मरिम्शो पतीके रे लेत्तेक्म, दे कौइचा कली नेल्ल माइजा बाक्शा, अरन्डी फेक्सीन” दे नेल्ल आन कली नेंपदमे बाक्त। मत्ती १२:४१; योएल १:१४  
 6 मिनु निनवे डा पिपमी यो मेको लोव्र नेना बाक्त। मेको आ ठेयब नित्तीके रे बोक्शा, पिप आ फेक्तीके वा पुइश्शा, अरन्डी फेक्शा, पुलु तारी निस्से बाक्त।

7 मिनु पिप नु आ मुरपुकीमी निनवे डा मुर आन कली “मुरपुकी नु बस्तु भावमी मारेड मजामेक्ल, मतुडमेक्ल। बी ब्यफ, क्यारश भेडा आन कली यो मयोत्रडमेक्ल, ब्वाक्कु मतुंडदमेक्ल।

8 मुरपुकीम अरन्डी सुम्सीशा, बी ब्यफ, क्यारश भेडा यो सुम्चा माल्नीम। मिनु मेकोपुकीमी परमप्रभु कली ठेयब सेंदाम पुंडचा माल्नीम। मिनु नेल्ल आन मरिम्शो लां नु आन मरिम्शो पशो रे लेत्चा माल्नीम।

9 परमप्रभु आ शुश गाइक्तीक रे लेप्बा, कों? मेकोमी आंड कली मसाइक्बा, कों? सुम तुडक्बा, डा?” देंमा बाक्त। योएल २:१४

10 मिनु परमप्रभुमी मेको मुर आन पशो नु आन मरिम्शो लां रे लेशशो तशा “आं डोंइती पाइनुड देंशो, मुल मपाइनुड” दे मिम्ता बाक्त। मिनु परमप्रभुमी आ डोंइती मिम्शो मपवा बाक्त। येरमीया १८:७-८

## 4

### योना परमप्रभु नु गाइश्शो

1 मिनु परमप्रभुमी मुर आन कली खतम मपशो तशा, योना चुरशा, शुश गाइक्ता बाक्त। मिनु परमप्रभु यावे कली

2 “परमप्रभु यावे, आं रागीम बाक्डानु, गो एको तुडश्शो नड। मोपतीके गो टारशीश गे प्रोक्शो नड। गे नेल्ल कली शिशी पाइब नु दाक्ब परमप्रभु ननी। इन गाइक्चा रीब पा मबोक्ब। इन शिशी ठेयब बाक्ब। इन थुं श्येत गेचा बाक्त हना यो, इन थुं लेशशा, मेको आन कली मारेड मपाइनीनी, दे गो तुडश्शो नड। प्रस्थान ३४:६

3 मुल परमप्रभु यावे, आं कली साइय्नीनी। मारदे हना गो ब्रोंइचा क्येडा बेक्चा दाक्नुड” दे परमप्रभु यावे नु लोत्र पवा बाक्त। १राजा १९:४

4 मिनु परमप्रभु यावेमी “इ गाइश्शो ठीक ममाइ” दे मदा बाक्त।

5 मिनु योना सहर रे लशा, पूर्व गे डा डांडामी निस्से बाक्त। मेकेर गोठ का सेल्शा बाक्शो बाक्माक्त। मेकेर फाम्सीशा निश्शा “मेको सहरमी मार दुम्बा” दे कोत्रशा, रिम्दा बाक्त।

6 मिनु परमप्रभु, परमप्रभु यावेमी योना कली नां फाम्सीशा बाक्ल, श्येत मजवल, दे छक लाक्चा डा पा आइक्च रवा का आ बाक्तीकेमी वापदा बाक्त। मिनु योना मेको रवा तशा, शुश ग्येरसे बाक्त।

7 तन्न आ दीसा सुनी कना परमप्रभुमी खोंकला का सोइक्ता बाक्त। मेकोमी मेको आइक्च रवा आ शाक्श खोदा बाक्त। मिनु रवा सोल बेक्माक्त।

8 मिनु नां दाम्मेनु, परमप्रभुमी योना आ बाक्तीकेम पूर्व रे होश फश सोइक्ता बाक्त। मिनु नांमी योना आ पिया नाप्शा, योना ओले पेटे दुम्शा, गोल्माक्त। मिनु योनामी “ब्रोंइचा क्येडा बेक्चा दाक्नुड” देंमाक्त।

### परमप्रभु आ शिशी

9 मिनु परमप्रभुमी योना कली “गे मेको रवा आ पर्वम गाइक्चा, ठीक दुम्बा डा?” दे लोत्र पवानु, मेकोमी “गो मबेक्डा सम्म गाइक्नुड” दे लोत्र लेत्ता बाक्त।

10 मिनु परमप्रभु यावेमी “गे इ मखुम्शो, मकोल्पाइश्शो, नाक्दो कामी वाशा, आ दीसा नाक्दो सोल बेक्शो रवा कली शिशी पाइनेवे।

11 मिनु गो मेको ठेयब सहर निनवे आ पर्वम शिशी मपाइनुडा डा? मेकेर आन ग्युरा पेरा गुड मतुडक्ब लाख का २० हजार क्येडा शुश मुर नु बी ब्यफ, क्यारश भेडा यो बाक्नीमी। गो मेको आन कली शिशी पाइनुड” देंमाक्त।

## मीका

**ब्रेक्ब मुर:** मीका इस्राएल डा दक्खिन हेब्रोन नु गाजा सहर आस दाते मोरेशेथ डा मुर बाक्त। मेको आ नें आ अर्थ “परमप्रभु यावे खोदेशो सुड मबाक्ब” देशो बाक्ब। मीका आमोस खोदेशो पा रू डा गेय पाइब बाक्त। मेको अस्सुर डा लडाइ पाइब आन डोंइती रे प्रोक्शा, यरूसलेम सहरम परमप्रभु यावे आ लोव्र पशो बाक्त। एको किताब मीकामी ब्रेक्शो बाक्त।

**गेना ब्रेक्शो:** मीकामी ७५०-७२३ बि. सी.म परमप्रभु यावे आ लोव्र पशो बाक्त। मेकोमी सामरीया खतम दुम्चा क्येडा डोंइती मेको आ परबंम परमप्रभु आ लोव्र पशो बाक्त। मीका १:६ हिज्कीयाह पिप दुम्शो ६ बर्स दुम्ची ना ७२२ बि. सी. सामरीया खतम दुम्शो आ परबंम चहिं मीकामी मारेड मब्रेक्शो बाक्त। मोपतीके मेकोमी एको किताब ७२२ बि. सी. क्येडा डोंइती ब्रेक्शो बाक्त।

**मार ब्रेक्शो:** परमप्रभुमी थुं नाइक्चा गेब। इस्राएल नु रागी रागी डा मुर नेल्ल आन कली मस्सीह सोइक्ब। मेकोमी आ गे जाक्ब मुर आन कली श्येत रे प्रोंइब।

### सामरीया नु यरूसलेम कली निसाफ

1 परमप्रभु यावेमी मोरेशेथ डा मीकाह कली लोव्र पाप्टु। मेना यहूदा रागीमी योथाम पिप बाक्त। मेको आ नोले आहाज नु मेको आ नोले हिज्कीयाह पिप दुम्ताक्स। मिनु मेको परमप्रभु यावे आ लोव्र नु आ कोइतीके सामरीया नु यरूसलेम आस परबंम बाक्त। येरमीया २६:१८; यसैया १:१

2 मिनु परमप्रभु यावेमी मार कोइशो नु देशो बाक्त देशा हना “जात जात डा मुर, गे नेल्लेमी नोफा दाइक्तीन। रागी नु मेकेर बाक्ब नेल्लेमी नेनीन। परमप्रभु, परमप्रभु यावे आ बाक्तीके रे पा इन मरिम्शो पशो आ परबंम सांकछी दुम्ब।

3 लो कोव्रडीन, परमप्रभु यावे आ बाक्तीक रे जाक्ना जाक्न बाक्ब। मेको यीब नु रागी डा लाइशो डांडाम गाक्ब। आमोस ४:१३

4 मी आ नेक्था मयीन यशो खोदेशो पा, लुक्च लतीकेमी ब्वाक्कु शाइशो खोदेशो पा, मेको आ थेक्शो डांडापुकी याइनीम। मिनु दिंमपुकी ब्रोलीनीम।

5 मेको नेल्ल याकूब आ मरिम्शो पशो नु इस्राएल डा मुर आन पाप आ परबंम दुम्शो बाक्ब। याकूब आ मरिम्शो पशो मार बाक्बा? मेको सामरीया ममाइ डा? यहूदा डा लाइशो डांडा मार बाक्बा? मार, मेको यरूसलेम ममाइ डा? येरमीया २३:१३-१४

6 मोपतीके गो सामरीया कली फुल्लु तेल्लीक सेल्लुड। मेको अडगुर खुम्तीक रू दुम्ने चाप्ब। गो मेकेर डा फुल्लु दिंम ताइक्नुड। मिनु मेको आ खिं प्रेशा, आ जग ग्रुंडनुड। १राजा १६:२४; होसे १४:१

7 मिनु मेको आ मूर्ति नेल्ल प्रोल्चा पुंडसीनीम। मेको आ गेय पा चेम्शो क्येट नेल्ल मीम हुम्चा पुंडसीब। गो मेको आ मूर्ति नेल्ल खतम पोक्नुड। मारदे हना मेको नेल्ल तेल्लेम पा चेम्शो क्येट खोदेशो पा खुप्शो बाक्नीम। मोपतीके मेको तेल्लेम पा चेम्शो क्येट खोदेशो पा जाम्शा लाइनीम” दैत। होसे २:७,१४

### यहूदा सहर कली श्येत दुम्ब

8 मिनु गो मेको आ परबंम रोंका पा डाक्ना डाक्न बाक्नुड। श्येत्थ खोइल नु भेत्रे गाक्नुड। गो सिवार खोदेशो पा ग्रीनुड। मिनु बुक्स खोदेशो पा ग्रीनुड।

9 मारदे हना मेको आ गार मसाब। मेको यहूदा सम्म जाक्शो बाक्ब। मेको आं मुर आन बाक्तीक यरूसलेम सहर डा ठेयब लाप्चो सम्म जाक्दीशो बाक्ब।

10 एको लोव्र गाथ सहरम मनंपतीन। मिनु डाक्सीन मडाक्कीन। बेथ-लेआफ्रामी इन पियाम फुरक फुंडसीन। २सामुएल १:२०



11 शाफीर सहर डा मुरपुकी, भेत्रे दुम्शा, मुने दोक्शा इन लां लने। सानान सहर डा मुरपुकी लाडगा मयूनीम। बेथ-एचेलम डा मुर रोंका पाइनीम। मुल रे इ कली वारच पाइब मबाक्नीम।

12 मिनु मारोथ सहर डा मुरपुकीम हिंन हिंन रिम्शो दुम्तीके रिम्ना रिम्न बाक्नीम। परमप्रभु यावे रे हिंचा डा श्येत यित। मिनु मेको यरूसलेम डा ठेयब लाप्चो सम्म जाक्शो बाक्त।

13 लाकीश सहर डा मुरपुकी, शारा आन कली बग्गीम फ्रेंशा लने। गे सियोन सहर डा मुर आन कली पाप पपाइक्तीनी। मिनु मेको कली पाप पपाइक्ब, गे बाक्नीनी। इस्राएल आ मरिम्शो पतीके इन दातेम थीसीब।

14 मोपतीके गे मोरेशेथ-गाथ सहर कली आ गाक्ची ना डा कोसेली गेचा माल्नीनी। अकजीब सहर डा मुर इस्राएली आन पिप आन कली ब्वाक्कु मबाक्तीकेम ब्वाक्कु बुक्शो खोदेशो बाक्नीम।

15 मिनु मारेशा सहर डा मुरपुकी, गो इन कली ग्रापाइक्चा कली मुर का चाक्नुड। मेको इस्राएल डा मान ततीके अदुल्लाम सम्म जाक्ब।

16 मिनु इन दाक्शो आल आन पबर्म इन चां प्रेक्कीन। चां नेल्ल प्रेक्शा, गिदद खोदेशो दुमीन। मारदे हना इन आल नेल्ल ग्याइश्शा, मुर आन रागीम लाइक्चा पुंडसाक्म।

## 2

### मरिम्शो ठेयब मुर आन पबर्म लोव्र

1 आबी आबी, सु सुम आन ब्राव्ल्येम गोल्शा पाप नु मरिम्शो पचा ला मिम्नीमी। मिनु नां सोव्रम चोटीन मेको आन मिम्शो पाइनीम। मारदे हना मेको पने चाप्ब बाक्नीम।

2 मेकोपुकीम रिम्शो रू तशा वाल्शा, रोइक्नीम। रिम्शो खिं रोइक्नीम। मोपा मेकोपुकीमी मुर आन खिं नु आन थेरशो रू आंम के सेल्नीम। ब्यवस्था ५:२१; हितोपदेस २४:१५; यसैया ५:८

3 मोपतीके परमप्रभु यावेमी मार दंत देशा हना “गो मेको आन खिं डा मुर आन कली श्येत गेनुड। मेको रे आंम कली प्रोइने मचाप्नीम। ठेयब लेशशा गाक्ने मचाप्नीम। मारदे हना मेको थम श्येत जतीक नाक्त बाक्ब। आमोस ५:१३

4 मेको नाक्ती मुरपुकीमी इन पबर्म शुक्शी पा कुम्सो पाइनीम। मिनु इन पबर्म रोंका पा डाक्नीम। मिनु मुरपुकीमी ‘गोपुकी थमा पा खतम दुम्तक। आंइ मुर आन थेरशो रू अर्को मुरुम लाइक्नीम। आंइ रू आंइ जोरी सत्रु आन दातेमी योक्सीनीम’ देंनीम” दंत।

5 मोपतीके गेपुकी परमप्रभु यावे आ मुर आन योक्शो रू रोइक्चा मताइनीनी।

6 मेकोपुकीम “परमप्रभु यावे आ लोव्र मनपने” देंनीम। तन्न लोव्र पाइनीम। मिनु मेकोपुकीमी “मोदेशो श्येत आंइ कली मडुम्ब” देंनीम। आमोस ७:१६

7 याक्ब आ खिं डा मुरपुकी, मोदेशो देंचा दुम्बा? मार, परमप्रभु यावे आ फाल्तीक सक्ति नुम्मे डा? मेकोमी मोदेशो पाइबा डा? परमप्रभु यावेमी रिम्शो पाइब आन कली रिम्शो लोव्र मपाइबा डा? आमोस ६:३

8 तन्न गे आं मुर आन डोंइती जोरी सत्रु खोदेशो दुम्शा बाक्नीनी। रिम्शो पाइब मुर आन फेक्तीक रोइश्शा लाइक्नीनी। लडाइ मडुम्शो बाक्ब, दे इन कली थमा सुइश्शा गाक्ब आन कली मोदेशो पाइनीनी।

9 गेपुकीम आं मुर आन मीश आन कली आन दारशो खिं रे गुंइनीनी। मेको आन आलपुकी रे आं गेशो आसीक गेना हना यो कली रोइश्शा लाइक्नीनी।

10 बोक्शा लने। मारदे हना एकेर इन नाइक्तीक ममाइ। मारदे हना एको ग्रांघा दितीकेमी मुर आन कली मरिम्शो सेल्ब। मेको मारेइ पने मचाप्चा डा पा खतम सेल्शो बाक्ब।

11 तेकोइ मुरुमी जोल पा दूली लोव्र पशा “गो इ कली अडगुर शांबु तूचा नु रकसी तूचा आ पबर्म लोव्र पाइनुड” दंत हना, मेको मुर मेको आन कली गारचा डा लोव्र पाइब बाक्ब।

### श्येत रे प्रोइशो

12 परमप्रभुमी “याकूब गो थमा पा नेल्ल इन कली खुप्ला पुक्नन्नी। गो इस्राएलम लीशो आन कली थमा पा खुप्लुडमी। गो मेको आन कली भेडा बगालम वोइश्शो खोदेशो पा नु योव्रतीकेम योव्रशो खोदेशो पा वोइक्नुड। मिनु मेकेर शुश मुर दुम्नीम। येरमीया ३१:१०; इजीकीएल ३६:३७; यसैया ५२:१२

13 लां कोइब मेको आन डोंइती गाक्ब। मेकोपुकी लाप्चो रे पा गूशा गाक्नीम। मेको आन पिप मेको आन डोंइती गाक्ब। परमप्रभु यावे मेको आन डोंइडोंइती बाक्ब” दैत।

### 3

#### ठेयब मुर आन कली हुइश्शो

1 मिनु गो “गे, याकूब आ ठेयब मुरपुकी नु इस्राएली आन खिं डा हुकुम पाइबपुकी, इन नोफा दाइश्शा नेनीन। गे ठीक निसाफ तुइक्वा ममाल्नीनी डा? येरमीया ५:५

2 गेपुकी रिम्शो पचा काइ मदाक्नीनी। मिनु मरिम्शो पतीक दाक्नीनी। गेपुकीमी आं मुर आन कुशुल उक्नीनी। मिनु मेको आन रुश रे आन श्ये रिक्नीनी।

3 गेपुकीमी आं मुर आन श्ये ब्वाइतीनी। मेको आन कुशुल उक्तीनी। मिनु रुश टुक्रा टुक्रा पा जिकतीनी। मिनु बोसुम क्येतीक श्ये खोदेशो पा मेको आन कली टुक्रा टुक्रा पा चेक्तीनी” दैती। भजन संग्रह १४:४

4 मिनु मेकोपुकीमी परमप्रभु यावे कली पुंइनीम। तन्न मेकोमी मेको आन पुंइशो लोव्र मलेप्ब। आ अरेशो मटितीके मेकोमी मेको आन क्येडा आ कुल खुइक्ब। हितोपदेस १:२८; इजीकीएल ८:१८

5 मिनु परमप्रभु यावेमी आ लोव्र पाइब आन परबम मार दैत देशा हना “सुम आं मुर आन कली दूली लांम गाक्पाइक्बा? आं लोव्र पाइबपुकीमी, सुमी मेको आन कली जचा गेमेनु ‘रिम्शो दुम्ब’ दैनीम। तन्न मेको आन कली जचा मगेमेनु, मेको आन कली लडाइ तोचा कली ठीक दुम्नीम।

6 मोपतीके इन कली मारेइ मततीक नाक्दो दुम्ब। परमप्रभु रे मारेइ मतुइक्वा डा पा छिडछिड दुम्नीनी। आं लोव्र पाइब आन कली नां रिक्ब। मिनु नाक्त मेको आन कली छिडछिड दुम्ब।

7 कोंइतीक ताइबपुकी शिशी मताइनीम। टुना मुना पाइबपुकी मुने दोक्नीम। मेको आन शोव्र सुम्सीचा माल्नीम। मारदे हना परमप्रभुमी मेको आन कली लोव्र मलेप्ब। आमोस ८:१२

8 तन्न गो सक्ति पाइश्शो बाक्नुड। गो परमप्रभु यावे आ सोक्ती, ठीक निसाफ पतीके नु आ सक्तिम ब्रीशो बाक्नुड। गो याकूब आ हेंथे पशो नु इस्राएल डा मुर आन पाप शेंचा कली मोदेशो दुम्शो बाक्नुड। यसैया ५८:१

9 याकूब आ खिं डा ठेयब मुरपुकी नु इस्राएल डा खिं खिं डा हुकुम पाइबपुकी एको लोव्र नेनीन। गेपुकीमी ठीक निसाफ पतीक कली ग्रांग्रा दीनीनी। मिनु ठीक लोव्र नेल्ल दूली सेल्नीनी।

10 गेपुकीमी हुश शाइक्वाइश्शा सियोन कली सेल्नीनी। मिनु यरूसलेम कली मरिम्शो पतीकेम सेल्नीनी। हबकुक २:१२

11 मेकेर डा ठेयब मुरपुकीमी घूस जशा निसाफ पाइनीम। मेकेर डा चढेबपुकीम शेंशो डा क्येट ताक्नीम। परमप्रभु यावे आ लोव्र पाइबपुकी क्येट तचा कली नोले दुम्ब लोव्र पाइनीम। मो हना यो मेकोपुकीमी ‘परमप्रभु यावे आंइ दातेमी बाक्ब। गो श्येत मजाइनीकी’ दैनीम। येरमीया ७:४

12 मोपा इन पतीके सियोन वाक्शो रू दुम्ब। यरूसलेम ब्रेश्शो खिं डा फुल्लु देल्लतीके दुम्ब। परमप्रभु यावे आ खिं डा डांडा ब्वाकी दुम्शो बाक्ब” दैत। भजन संग्रह ७९:१; येरमीया ९:१०; येरमीया २६:१८

### 4

#### परमप्रभु आ डांडा

1 मिनु नोले डांडा नेल्ल आन क्येडा परमप्रभु यावे आ खिं बाक्शो डांडा लाइश्शो दुम्ब। मिनु मेको नेल्ल आन क्येडा ग्येतथ लाइब बाक्ब। मिनु शुश मुर मेकेर लाइनीम। यसैया २:२-४

2 मिनू रागी रागी डा मुरपुकी मेकेर जाकशा, मेकोपुकीमी “जाक्कीन। गोपुकी परमप्रभु यावे आ डांडा लय। याकूब आ परमप्रभु आ खिं लय। मेकोम इं कली आ लां कोइब। मिनू गोपुकी मेको आ लांम गाक्ने चाप्यल। मारदे हना शेंतीके सियोन रे नु परमप्रभु यावे आ लोत्र यरूसलेम रे गूब” दैत। लूका २४:४७

3 मेकोमी शुश जात डा मुर आन दातेमी निसाफ पाइब। मिनू डोन बाकशो बोल्यो रागी रागी डा मुर आन कली निसाफ पाइब। मिनू मेकोपुकीमी आन तरवार चेम्शा, फाली सेल्नीम। आन तूतीक भाला चेम्शा गुये सेल्नीम। मिनू रागी रागी डा मुर आन दातेमी लडाइ मपाइनीम। मेकोपुकीमी गेनायो लडाइ मशेंसीनीम।

4 तन्न मुर नेल्ल आन अडगुर नु फोत्रशी रवा आन पुंम निल्लीम। मिनू मेको आन कली सुइमी हिंच मकोइनीम। मारदे हना मुर नेल्ल आन परमप्रभु यावेमी लोत्र पशो बाक्ब। १राजा ५:५; जकरिया ३:३०

5 मिनू “जात जात डा मुर नेल्ल आन देवी देवता आन नेम गाक्नीम। तन्न गोपुकी चहिं गेना हना यो परमप्रभु यावे, इं परमप्रभु आ नेम गाक्नय” दैतेक्म।

### परमप्रभु आ मुरपुकीम शिशी ताइनीम

6 परमप्रभु यावेमी मार दैत देशा हना “मेको नाक्ती गो खोइल मदुकब आन कली खुण्डमी। मिनू गो खेरशो नु श्येत जशो आन कली खुण्डमी। येरमीया ३१:८; ब्यवस्था ३०:४

7 मिनू खोइल मदुकब आन कली लीशो मुर आन दातेम चोइक्नुड। खेरचा पुंइसीशो आन कली बोल्यो रागी डा मुर सेल्लुडमी। मिनू परमप्रभु यावेमी मेको आन कली सियोन डांडा रे गेना हना यो कली सासन पाइब।

8 आं बगाल बाक्तीक डांडा, सियोन आ तमी इ सांद मिगदाल-एदेर सहर सम्म जाक्दीपब। गे डोंइती डा राज्य लेंशा ताइनेवे। यरूसलेम डा तमीम आ राज्य लेंशा ताइब।

9 मुल गे मारदे वाइ ब्रेशा ग्रीनेवे? मार इ पिप मबाक्बा डा? इ अर्ती गेब जाम्शा लमा? मिनू मारदे आल थितीक रोइ पशो मीश मुर खोदेशो पा वाइ ब्रेत्नेवे? येरमीया ८:१९

10 सियोन आ तमी, आल थितीक रोइ पशो मीश मुर खोदेशो पा वाइ ब्रेशा ग्रीडो। मारदे हना मुल गे एको सहर प्रोंइचा माल्नेवे। मिनू खिं मबाक्तीकेमी बाक्तीक सेल्चा माल्नेवे। गे बेबीलोनम लचा माल्नेवे। मिनू मेकेर रे प्रोंइचा पुंइसीनेवे। मेकेर परमप्रभु यावेमी इ कली इ जोरी सत्रु आन गुइ रे प्रोंइब।

11 मुल शुश रागी रागी डा मुर इ पर्वम दूली पा बोक्शा ‘सियोन ग्रंघ्रा दिशो दुम्ल। गो मेको कली कोव्रना कोव्रन बाक्चा तांइसेक्ल’ दैनीम” दैत।

12 तन्न मेकोपुकीमी परमप्रभु यावे आ मिम्शो मतुडक्नीम। मेकोपुकीमी आ पचा चिकशो मतुडक्नीम। परमप्रभुमी मेको आन कली खला डा अन्न खुण्डो खोदेशो पा खुप्ताक्व।

13 सियोन आ तमी बोक्शा, अन्न तुपो। मारदे हना गो इ ग्रोत्र फलाम के सेल्लुड। गो इ गेग्रे कांसा के सेल्लुड। मिनू गे शुश जात जात डा मुर आन कली फस पोक्नेवे। मेको आन रोंइशो परमप्रभु यावे कली गेनेवे। मिनू मेको आन शोंप रागी नेल्ल डा परमप्रभु यावे कली चढेनेवे।

## 5

### बेथलेहेम रे सासन पाइब का जाक्ब

1 गे गारो हिरशो सहर बाक्नेवे। लडाइ पाइबपुकीमी इ कली पुम्नीम। मिनू इस्राएल कली सासन पाइब कली कोक्केम चोत्रचोम तुप्नीम। उत्पती ३५:१९; मती २:५-६; यूहन्ना १:१-२

2 तन्न गे बेथलेहेम एफ्राथाह, गे यहूदा डा सहर आन दाते डा आइक्च बाक्ते हना यो, इ रे पा आं पा डा इस्राएल कली हुकुम पाइब का जाक्ब। मेको साइ डोंइती रेन बाक्शो बाक्त। यसेया ४:१७; यसेया ११:१२

3 मिनू परमप्रभु यावेमी इस्राएली आन कली काइ मकोव्रब। मिनू मीश मुरुमी आल थिवा नोले ला कोव्रब। मेना लीशो मुरपुकी इस्राएल डा मुर नु गारशा, लेत्वा पुंइसीनीम। इजीकीएल ३४:२३

4 मिनू मेकोमी परमप्रभु यावे आ सक्तिमी आ बगाल आन कली योवब। मिनू मेकोमी आ परमप्रभु यावे आ ठेयब नेमी आ गेय पाइब। मिनू मेकोपुकी रिम्शो पा बाक्नीम। मारदे हना मेको रागी डा सुर सम्म नेल्ल क्येडा ठेयब दुम्ब। यसैया ९:५; एफिसी २:१४

5 मिनू मेकोमी थुं नाइक्वा गेब। मिनू अस्सुर डा मुर इं रागी ओव्रशा लडाइ पचा गोम्तेक्म हना, गोपुकीमी ७ जना गोठला नु ८ जना हुकुम पाइब वोइक्नीकी।

6 मेकोपुकीमी अस्सुर रागी कली तरवारम हुकुम पाइनीम। निम्नोद रागी कली शोइश्शो तरवारमी हुकुम पाइनीम। मिनू मेकोपुकीमी इं कली “अस्सुरी इं रागी ओव्रतेक्म हना यो, इं कली प्रॉइनीम। इ रागी डा सांदम जाक्तेक्म हना यो, इं कली प्रॉइनीम” देंनीम। भजन संग्रह ११०:३

7 याकूब आ लीशो मुर शुश आन दातेम परमप्रभु यावे रे जाक्शो सीत नु घांस तार जुक्शो रेउ खोदेशो दुम्नीम। मेकोमी “सुइ मुरुम वारच पाइनीमी कौं” दे मकोव्रनीम। मिनू मुर आन आस मपाइनीम।

8 याकूब आ लीशो मुर शुश आन दातेमी ब्वाकी डा गुप्स खोदेशो दुम्नीम। मेकोपुकी भेडा गोठम बाक्शो गुप्स आ चाइक्व खोदेशो दुम्नीम। गुप्स मेकेर लाम्तेक्म हना, साइश्शा ब्वाइनीम। मिनू सुइमी मेको आन कली प्रॉइने मचाप्नीम।

9 मिनू परमप्रभु यावेमी “गे इन गुइ इन जोरी सनु क्येडा बोल्यो दुम्शा ग्रानीनी। मिनू इन जोरी सनु नेल्ल खतम दुम्नीम। जकरिया ९:१०

10 मेको नाक्ती गो इन शारा इन दाते रे खतम पोक्नुड। इन बग्गी प्रेशशा गेनुड।

11 गो इन रागी डा सहर नेल्ल खतम पोक्नुड। गो इन बोल्यो दरवार नेल्ल प्रेतनुड।

12 गो इन टुना मुना पशो आ पर्बम इन कली खतम पोक्नुड। मिनू इन दातेमी साहीत कोव्रब आन कली बाक्चा मगेनुड। जकरिया १३:२

13 गो इन दाते डा मूर्ति नेल्ल खतम पोक्नुड। इन पूजा पचा कली खुक्शो फुल्लु खतम पोक्नुड। मिनू इन गुइमी सेल्शो थोव्रक आन डोंइती मबाप्नीनी।

14 गो इन दाते डा मूर्ति पाइश्शो थाम तुल्शा बेरपाइक्नुड। मिनू इन सहर आन कली प्रेतनुड।

15 गो गाइश्शा चुरशा रागी रागी डा मटीब मुर आन कली क्येक्क लेत्नुडमी” देंत।

## 6

### परमप्रभु पाप आ पर्बम गाइश्शो

1 परमप्रभु यावेमी मार देंबा, इन नोफा दाइश्शा नेनीन “बोक्कीन। मिनू पहाड आन डोंइती इन देंचा माल्शो लोव्र शोव्रडीन। मिनू डांडापुकीमी इन लोव्र नेन्मेक्ल। इजीकीएल ६:२

2 गे डांडापुकी नु गेना हना यो लीब रागी डा जग, परमप्रभु यावेमी दोपा निसाफ पाइबा, मेको नेनीन। मारदे हना मेकोमी आ मुर आन कली निसाफ पचा चिक्शो बाक्ब। आ दोस गेशो नोफा दाइश्शा नेनीन। मारदे हना आ मुर आन कली मेको के लोव्र बाक्ब। मेकोम इसाएल कली निसाफ पाइब।

3 आं मुरपुकी गो इन कली मार पडा? गो इन कली मार श्येत गेडा? आं कली देनीन। येरमीया २:५

4 गो इन कली इजीप्तर रे एक चाक्तन्नी। मिनू इन वाइलीम वाइल दुम्शो रागी रे प्रॉइतन्नी। इन कली लां कोंइचा कली मोसा, हारून नु मिरयाम आन कली सोइक्ताक्डमी। प्रस्थान १५:२०

5 आं मुरपुकी, मोआब डा पिप बालाकम मार सल्ला पशो बाक्मे, मेको मिम्तीन। बेओर आ तौ बालाममी मेको कली मार लोव्र लेत्ता, मेको मिम्तीन। शितीम रे गिल्लाल सम्म डा लांमी गाक्शोनु, मार मार दुम्मे, मेको मिम्तीन। मिनू परमप्रभु यावेमी इन कली दोपा प्रॉइशो बाक्मे, मेको तुइक्नीनी” देंत। गन्ती २२:-२४:-; यहोसु २:१; यहोसु ४:१९

6 गो मार कुरशा परमप्रभु यावे आ डोंइती जाक्डा? मार चाक्शा, इर डा परमप्रभु आ डोंइती बाम्डा? मार चोशा चढेतीक चाक्शा, आ डोंइती जाक्डा? मेको आ डोंइती बर्स का दुम्शो ब्यफ चाक्शा, जाक्डा? भजन संग्रह ५०:८-१३; आमोस ५:२२

7 परमप्रभु यावे हजार हजार सांड तशा ग्येरबा? मार १० हजार तेल के खोला तशा ग्येरबा डा? गो आं पाप आ पबर्म आं डोंइती जरमेशो तौ गेचा माल्नुडा? मिनु आं थुं डा पाप आ पबर्म आं आल गेचा माल्नुडा?

8 परमप्रभु यावेमी इन कली, गे बेकशा लाइब मुर, इन कली मार रिम्शो बाक्मे नु मार पचा माल्नीनी, मेको देशो बाक्ब। मार देशो बाक्ब देशा हना, गे ठीक निसाफ पने, शिशी पतीक कली दाक्तीन। मिनु इन परमप्रभु आ डोंइती ब्रेम्शो दुम्शा गाक्कीन। ब्यवस्था १०:१२; १सामुएल १५:२२

यरूसलेम कली दोस गेशो

9 परमप्रभु यावेमी सहर कली “आं कली मान पा हिंचा इन कली श्येत रे प्रोंइतीक दुम्ब। गे थर डा मुर नु सहर डा ग्रुम्तीक डा मुर आन लोव्र नेनीन।

10 गो मेको आ अरेशो मटीब आ खिं डा मरिम्शो पा चेम्शो शोंप प्रेंदु? इन आइक्च सेल्शो सराप रशो पुक्तीक प्रेंदु? लेवी १९:३५

11 मार गो इन मरिम्शो नाक्तीक नु जोल पा नाक्तीक ढक के थैलो वोइक्ब कली दोस मताइब सेलु? हितोपदेस २०:१०

12 मेको आ शोंप पाइशो मुरपुकी हुश खाक्श पोक्तीकेम ब्रीशो बाक्नीम। मेको सहर डा मुरपुकी जोल पाइनीम। मेको आन शोव्र जोल पतीकेमी ब्रीशो बाक्ब।

13 मोपतीके गो इ कली खतम पोक्चा गोशो बाक्नुड। गो इ कली इ पाप आ पबर्म श्येत्थ पोक्नुड।

14 गे जचा थोव्रक जाइनेवे, तन्न मरूनेवे। मिनु इ कोव्रज शोव्रलु बेक्शोन बाक्ब। गे खेक्चा दा खेक्नेवे, तन्न उप्शा वोइक्ने मचाप्नेवे। गे मार खेक्नेवे, मेको नेल्ल लडाइम खतम दुम्ब।

15 गे मार मार शोक्चा दा शोक्नेवे। तन्न खुप्चा मताइनेवे। तेल रवा आ फल खाक्चा दा खाक्नेवे, तन्न इ रांम तेल खेक्चा मताइनेवे। गे अडगुर खाक्चा दा खाक्नेवे, तन्न अडगुर शांबु तूचा मताइनेवे। ब्यवस्था २८:३८-४०; आमोस ५:११

16 गे ओम्नी आ अरेशो लोव्र पाप्तीवी। मिनु आहाब आ खिं डा मुर आन पशो नेल्ल पाप्तीवी। मिनु मेको आन गेशो अर्ती टिप्तीवी। मोपतीके गो इ कली खतम पोक्नुड। मिनु इ मुर आन कली शुक्शी पतीक सेल्लुड। गे आं मुर आन गाइशो ताइनेवे” दे ब्रेन्न ब्रेन्न बाक्ब। १राजा १६:२९-३३

## 7

इस्त्राएल कली श्येत दुम्शो

1 गो दोदेशो पा श्येत जशो बाक्नुडा? गो फल सिशशा नोले, अडगुर रू डा सिला माल्ची नोले मारेइ जचा मताइनुड। आं माल्शो डोंइती मीशो फोव्रशी यो मबाक्ब। भजन संग्रह १२:२; यसैया ५७:१

2 थमा सुइक्चा पुंडसीब मुर रागी रे जाम्शा लाम्तेक्म। मिनु गेना हना यो रिम्शो पाइब मुर मलीशो बाक्नीम। मुर नेल्ल मुर साइक्चा कली बाप्शा बाक्शो बाक्नीम। मुर नेल्लेमी ब्वारद दाइशशा आंम लोकब कली साइक्चा माल्शो बाक्नीम।

3 मेकोपुकी मरिम्शो पचा कली जोक्ब बाक्नीम। आन टेयब मुर नु निसाफ पाइबपुकीमी घूस जाइनीम। सक्ति पाइशोपुकीमी मार मिम्तमे मेकोन पाइनीम। मोपा ठीक पतीके कली दूली सेल्लीम।

4 मेको आन दाते डा नेल्ल क्येडा रिम्शो मुर चू रवा खोदेशो बाक्ब। मेको आन दाते डा गेना हना यो रिम्शो पाइब थरपु हिरशो चू खोदेशो बाक्ब। इन खाल पाइब आन नाक्त जाक्शो बाक्ब। मेको नाक्ती इन कली कोव्रबमी इन कली गुम्थ जाक्ब। मुल मेको आन कली खतम सेल्लीक नाक्त जाक्ब।

5 इन वारच कली थमा मसुतीन। इन दाक्शो मुर कली थमा मसुतीन। गे नु काथा इप्शो मीश नु यो होस पा लोव्र पने। येरमीया ९:३-४

6 मारदे हना तौमी आ आफ कली मरिम्शो पाइब। तमी आ ममा आ पबर्म दूली पाइब दुम्ब। चाइमीम आ शिमी आ पबर्म मरिम्शो पाइब। आंम खिं डा मुर इन जोरी सत्रु दुम्नीम। मत्ती १०:३५-३६

7 तन्न गो परमप्रभु यावे गे कोन्ननुड। गो आं कली श्येत रे प्रोंडब परमप्रभु कली रिम्नुड। आं परमप्रभुमी आं पुंडशो नेंब।

**परमप्रभुमी श्येत रे प्रोंडब**

8 मिनु “आं जोरी सत्रु आं कली शुक्शी पा मग्येरसीन। गो गोल्ती हना यो, बोक्नुड। गो छिडछिडम बाक्ती हना यो, परमप्रभु यावे आं छेडछेड बाक्ब। ओबदिया १:१२; भजन संग्रह २७:१

9 आं कली निसाफ पा वारच मपवा सम्म गो परमप्रभु यावे आ गाइशो फाल्चा माल्लुड। मारदे हना गो मेको कली पाप पाता। मेकोमी आं कली आ शिशी तपाइक्चा कली छेडछेडम गुंडब। येरमीया १४:७

10 मेना आं जोरी सत्रुम मेको ताइनीम। मिनु मुने दोक्नीम। मारदे हना मेकोपुकीमी डोंइती ‘परमप्रभु यावे, इ परमप्रभु ते बाक्म?’ देशो बाक्तेकम। गो मेको आन खतम दुम्शो ताइनुड। मुल यो मेकोपुकी लां डा हिलो खोदेशो पा दिम्चा पुंडसीशो बाक्नीम। भजन संग्रह ७९:१०

11 गे इन गारो लेंशा सेल्लिक नाक्त नु इन सांदपुकी डोन डोन सम्म चाक्दील्लिक नाक्त जाक्शो बाक्ब।

12 मेको नाक्त अस्सुर नु इजीप्त रे शुश मुर जाक्नीम। इजीप्त रे युफ्रेटीस सम्म, समुन्द्र रे समुन्द्र सम्म नु पहाड रे पहाड सम्म डा शुश मुर इन बाक्तीक जाक्नीम।

13 तन्न रागी रागी नेल्ल श्येत्थ दुम्नीम। मुर आन मरिम्शो पशो आ पर्वम मोदेशो दुम्ब” दैत।

**परमप्रभुम इस्राएल कली शिशी पाइब**

14 गे इन मुर आन कली कोक्केम योवडीन। मेको ब्वाकीम बाक्शो बगाल इन के बाक्ब। मेको रिम्शो बाक्तीकम बाक्नीम। मेको आन कली डोंइती डा खोदेशो पा बाशान नु गिलादमी जोचा गेन।

मीका ५:३; येरमीया ५०:१९

15 गेपुकी इजीप्त रे गूशो नाक्त खोदेशो पा गो इन कली छक लाक्चा डा गेय कोंडनुड।

16 मेको रागी रागी डा मुरपुकी शुश सक्ति पाइशो बाक्तेकम हना यो, मेको तशा, मुने दोक्नीम। मेकोपुकीम आन गुडम आन कुल सुम्सीनीम। मिनु मेको आन नोफा लाटा दुम्ब।

17 मेकोपुकीम बुस्स खोदेशो नु खपीम ग्रेशा गाक्ब जन्तु खोदेशो पा, खप तुक्नीम। मेको आन बोल्यो दरवार रे हिंशा खिंखि पा गूनीम। मेकोपुकी हिंशा परमप्रभु यावे, आंइ परमप्रभु गे लेत्नीम। मिनु मेकोपुकीमी इन कली मान पा हिंनीम। भजन संग्रह ७२:९

18 इन खोदेशो परमप्रभु अर्को सु बाक्बा डा? गे ठीक मपशो क्याम्ब बाक्नीनी। इन लीशो मुर आन मरिम्शो पतीके माफ गेनीनी। गे गेना हना यो गाइक्स डा गाइक्स मबाक्नीनी। तन्न शिशी पचा कली ग्येरशा बाक्नीनी। भजन संग्रह १०३:३,८-१३

19 मेकोमी आंइ कली लेंशा शिशी पाइब। मेकोमी आंइ पाप कली दिम्ब। गे आंइ पाप शुश लुक्च लशो समुन्द्रमी ताइक्नीनी।

20 गे याक्ब कली इन थमा सुइक्तीके कोंडनीनी। मिनु अब्राहाम कली दाक्शा मप्रोंइतीके कोंइताक्नी। गे साइ डोंइती आंइ किकी पिप आन कली कसम जशा लोव गेशो बाक्तीनी। उत्पत्ती २८:१३-१५; उत्पत्ती २२:१६-१८; लूका १:७३

## नहुम

**ब्रेक्ब मुर:** एको किताब परमप्रभु यावे आ लोत्र पाइब नहुममी ब्रेक्शो बाक्ब।

**गेना ब्रेक्शो:** ६६३-६०६ वि. सी. मेर नहुम आ बाक्ची ना ब्रेक्शो बाक्ब।

**मारदे ब्रेक्शो:** एको किताब योना आ ब्रेक्शो किताब खोदेशो पा निनवे सहर आ परबम ला परमप्रभु यावे आ लोत्र बाक्ब।

१. निनवे सहर निसाफ पाइक्चा पुंडसीब
२. निनवे सहर लडाइम फुचा नु नेल्ल रोइक्चा पुंडसीब
३. निनवे सहर डा मुर आन मरिम्शो पशो

**परमप्रभु निनवे सहर तशा गाइश्शो**

1 एको निनवे सहर आ परबम परमप्रभु यावे आ पशो लोत्र बाक्ब। एको एल्कोश डा नहुममी तशा ब्रेक्शो लोत्र बाक्ब। मेकोमी मार ब्रेक्शो बाक्ब देशा हना,

2 परमप्रभु यावे रुश पाइब नु क्येक्क लेप्ब परमप्रभु बाक्ब। परमप्रभु यावेमी आ जोरी सत्रु आन कली क्येक्क लेप्ब। मेको आन कली तशा गाइक्ब। परमप्रभु यावेमी आ जोरी सत्रु आन कली क्येक्क लेशशा, मेको आन कली तशा शुश चुरब। प्रस्थान २०:५; ब्यवस्था ४:२४

3 परमप्रभु यावे ओंखां ओंखां पा गाइक्ब। तन्न मेको ठेयब सक्ति पाइश्शो बाक्ब। मिनु परमप्रभु यावेमी दोस ताइब आन कली सजाइ मगेथु मप्रोंइब। मेको आ लां फश गिवारम बाक्ब। मिनु गोस्स मेको आ खोइल डा फुरक बाक्नीम। प्रस्थान ३४:६-७

4 मेकोमी ठेयब समुन्द्र कली हुइक्तानु, सोत्रब। मेकोमी खोला नेल्ल आन कली सोत्रपाइक्ब। बाशान डा बी ब्यफ योत्रतीके नु कारमेल पहाड डा मारेइ मारेइ सोल सुल बेक्नीम। लेबानोन डा फू यो सोल सुल बेक्नीम।

5 मेको आ डोंइती डांडा नेल्ल खिखि पाइनीम। मिनु पहाड दिंम दुम्नीम। रागी नु रागीम बाक्ब नेल्ल हिम्सीनीम। भजन संग्रह १७:५

6 परमप्रभु यावे गाइक्तानु, मेको आ डोंइती सु राप्ने चाप्बा डा? मेको आ चुरशो सुम फाल्ने चाप्बा डा? मेको आ गाइश्शो मी खोदेशो पा ब्राइब। मिनु मेकोमी सेरथे फुल्लु आन कली प्रोल्ब।

7 परमप्रभु यावे रिम्शो पाइब बाक्ब। मेको श्येत जशो नाक्ती खुइश्शा ब्रोंइशा बाक्तीक बाक्ब। सु मेकेर प्रोक्शा लाइबा, मेको खुइश्शा बाक्चा ताइब। ब्यवस्था ४:३१; भजन संग्रह १:६

8 मेकोमी बारशो ब्वाक्कुमी निनवे कली खतम सेल्ब। मेकोमी आ जोरी सत्रु आन कली खेरशा छिडछिडमी सोइक्ब।

9 गे मारदे परमप्रभु यावे कली मरिम्शो पचा कली लोत्र गारपाइक्नीनी? मेकोमी इन कली खतम पोक्ब। गे मेको आ परबम मरिम्शो पचा कली निक्शी खेयप बोक्ने मचाप्नीनी।

10 आ जोरी सत्रु चूम रेशो खोदेशो पा रेशो बाक्नीम। मिनु दुक्शो मुर खोदेशो पा दुक्नीम। मिनु सोत्रशो नल खोदेशो पा मीम नेक्चा पुंडसीनीम।

11 निनवे, परमप्रभु यावे कली मरिम्शो पचा कली लोत्र गारपाइक्ब नु काइ मरिम्शो सल्ला पाइब इ दाते रे मूशो बाक्नीम।

12 परमप्रभु यावे आ लोत्र मार बाक्ब देशा हना “मेको थम सक्ति पाइश्शो नु शुश मुर बाक्तेकम हना यो, साइश्शा क्याम्चा पुंडसीनीम। यहूदा, गो इ कली श्येत गेतन हना यो, मुल इ कली श्येत मगेनन।

13 मिनु मुल गो इ कली श्येत गेबपुकी रे प्रोंइनुड। मिनु इ कली फ्रेशो डोरी प्रोइक्नुड” दे परमप्रभु यावेमी देशो बाक्ब।

14 निनवे, परमप्रभु यावेमी इ परबम लोत्र का अरेशो बाक्ब। मेकोमी मार अरेशो बाक्ब देशा हना “मुल रे इ नें वोइक्ब मुर सुइ मलीनीम। गो इ परमप्रभु आ खिं रे इ मुशा सेल्शो मूर्ति नु चेम्शा सेल्शो

मूर्ति गुंडनुड। गो इ कली तुरस ठीक सेल्लुड। मारदे हना गे काइ मरिम्शो पाइब बाक्नेवे” दे अरेशो बाक्ब।

15 कोवडीन, रिम्शो लोव्र पाइब का पहाडम गाक्ब। मेकोम थुं नाइक्तीक लोव्र शेंब। यहूदा डा मुरपुकी, इन चाड मानेन। इन कसम जशो खपीन। मारदे हना काइ मरिम्शो पाइब इन बाक्तीकेमी लेंशा मजाक्नीम। मेको नेल्ल क्याम्चा पुंडसाकम।

## 2

### निनवे जाम्शा लाइब

1 निनवे, इ कली खतम सेल्ल बाक्शो बाक्ब। इ बोल्यो दरवार खाल पावो। इ लां रिम्शो पा कोवडो। इ किप्शुर किम्सो। इ बोल नेल्ल गुंडदो। यसैया ५२:७; नहुम १:११

2 मारदे हना परमप्रभु यावेमी याक्ब आ मान ततीके लेशशा गेब। मिनु इस्त्राएल आ मान ततीके यो लेशशा गेब। मरिम्शो पाइबपुकी इ रागी लेंशा मओवनीम। मेकोपुकी खतम सेल्ला पुंडसीशो बाक्नीम।

3 मेको आ लडाइ पाइब आन तेक्तीक लल बाक्नीम। मिनु मेकोपुकीम लल वा फेक्शो बाक्नीम। मेको लडाइ पथ लची नाक्ती, आन बग्गी डा फलाम टल्केसीब। मेको आन तूतीके शेशा हिरनीम।

4 मेको आन बग्गीपुकी शुश दोरनीम। मेको सहर आ एर ओंथ शुश हिरशा गाक्नीम। मेको तोव्रशी खोदेशो तांडसीनीम। चिला दाप्शो खोदेशो पा ग्रूनीम।

5 मेकोमी आ लडाइ पाइब आन कप्तान आन कली ब्रेप्ब। मेकोपुकी दाइल पा आ डोंइती जाक्नीम। मिनु रीब पा सहर डा गारो गे दोरनीम। मेकेर आन फाम्सीतीके सेल्लो बाक्ब।

6 ब्वाक्कु बारशा यीब। मिनु दरवार ख्रिंख्रि पाइब।

7 मेको सहर डा पिपीम कली ग्याइशशा, आ वा पुइशशा लाइक्नीम। मेको आ वाइलीम नेल्ल ग्याइशशा डोन लाइक्चा पुंडसीनीम। मिनु मेकोपुकी कुचु तुप्शा डुकुर खोदेशो पा रोंका पा डाक्नीम।

8 निनवे ब्वाक्कु शाइक्ना शाइक्न लाइब दोम्ली खोदेशो बाक्ब। मिनु “रिम्दो रिम्दो” दे ब्रेशोनो यो, सुइमी लेशशा मकोवनीम।

9 मेको आ सुन नु चांदी रोइक्तीन। आ शोंप हिकने मचाप्चा डा पा शुश बाक्नीम। शुश क्येट लाइब मारेइ मारेइ बाक्ब।

10 मेको सहर मारेइ मारेइ रोइशशा श्येल्थ नु खतम पोक्चा पुंडसीशो बाक्ब। मिनु मुर आन थुं लुक्च लाइब, आन पोक्च ख्रिंख्रि पाइनीम। मिनु आन ची यो ख्रिंख्रि पशो बाक्नीम। मेको आन कुल बेक्शो मुर आन कुल खोदेशो दुम्नीम।

11 निनवे सहर डा गुप्स खोदेशो ठेयब मुर आ दरवार मार दुम्मे? मेको आ गाक्तीक नु आ तमी तौ आन बाक्तीके मार दुम्मे? आ आल मेकेर बाक्शो बाक्तेक्म। मिनु सुइमी मेको आन कली श्येत मगेम। यसैया १३:७-८

12 गुप्स खोदेशो ठेयब मुरुमी आ तमी तौ आन कली शुश मार मार खुप्शो बाक्त। आ मीश कली मारेइ मारेइ चाक्शो बाक्त। आ दरवार शोंपोम प्रिंशो बाक्त। आ पुक्खी मार मार साइशशा चाक्शा प्रिंशो बाक्ब।

13 मिनु मुर नेल्ल आन परमप्रभु यावेमी “गो इ कली काइ मदाक्थु, इ पर्वम बोक्ती। गो इ बग्गी चोशा गेनन। मिनु गुप्स आ चाइक्ब खोदेशो इ तमी तौ तरवारमी साइक्चा पुंडसीनीम। इ रोइशशो, इ साइशशो रागी रे गुंडनुड। मिनु इ लोव्र कुरब मुर आन सेंदा मनेंसीब” देशो बाक्ब।

## 3

### निनवे कली सजाइ

1 मिनु निनवे, गे हुश खाक्श पोक्ब सहर बाक्नेवे। इ दातेम शुश जोल पतीके बाक्ब। गे रोइशशो थोव्रकीम ब्रीशो बाक्नेवे। इ दातेमी रोइक्तीक गेनायो मनुप्ब। इजीकीएल ६:२,९

2 मेकेर युक्शो रेयके, गुगील आन रेयके, शारा आन प्रेक्शो रेयके नु बग्गी आन दोरशो रेयके नेंसीशो बाक्ब।



3 शारा डोइक्व दरोर पा गाक्नीम। आन टल्केशो तरवार शेशा, आन तूतीक झिल्लील पा कोंडनीम। बेक्शो मुर शुश बाक्नीम। हिक्ने मचाप्चा डा पा साइशशो मुर बाक्नीम। मुर शोल्लो पा साइशशो बाक्नीम। मुरपुकी बेक्शो मुर तार दाइल पांडसीन सीन गाक्नीम।

4 मेको तेल्लेम खोदेशो सहरम हिक्ने मचाप्चा डा पा मरिम्शो पतीकेमी रागी रागी डा मुर आन कली आ खोदेशो पपाइक्तीमी। रिम्शो मीश मुर नड, देखु पा, आ टुना मुना पतीकेमी जात जात डा मुर आन कली दूली लां खोइक्पाइक्तीमी।

5 मिनु मुर नेल्ल आन परमप्रभु यावेमी “गो इ कली काइ मदाक्थु, इ पर्वम बोक्ती। गो इ गुने इ कुल सम्म क्युकुनुड। मिनु रागी रागी डा मुर आन कली इ भेत्रे रां कोंडनुडमी। राज्य राज्य डा मुर आन कली इ मुने दोक्तीक कोंडनुडमी। यसैया ४७:३

6 गो ग्रांरा दिशो थोत्रक इ तारी ताइशशा, इ कली थम मरिम्शो पाइनड। मिनु इ कली तशा मुर हिंतीक सेल्लुड।

7 मिनु इ कली ताइब नेल्ल इ क्येडा हिंशा, नोले शोंडसीनीम। मिनु मेकोपुकीम ‘निनवे खतम दुम्त। मेको आ पर्वम सु रोंका पाइबा डा? गो इ कली लेम्ब मुर ते थिन्ने चाप्नया डा?’ देंनीम।

### निनवे आ खतम दुम्तीके

8 मार, गे थेंबेस सहर क्येडा यो रिम्शो बाक्नेवे? मेको सहर नील खोला आ नेक्था बाक्शो बाक्ब। आ एर ओथ नेल्ल ब्वाक्कु बाक्ब। मिनु मेको ब्वाक्कुमी मेको कली खाल पशो बाक्ब। मेको ब्वाक्कु गारो खोदेशो बाक्ब। येरमीया ४६:२५

9 एथीयोपीया रागी मेको आ सक्ति बाक्त। इजीप्त गेना हना यो आ सक्ति बाक्त। पूत नु लिबीया डा मुर मेको कली वारच पाइब बाक्तेक्म।

10 मो हना यो मेको ग्याइशशा गुंडचा पुंडसाक्व। मेको आ आलपुकी लांम ताइशशा साइक्चा पुंडसाक्म। आ ठेयब मुर आन कली बाजी आप्शा लाइक्तेक्म। मिनु मेको आन नेल्ल क्येडा ठेयब मुर नेल्ल साडलोमी फ्रेंचा पुंडसाक्म। योएल ४:३

11 गे यो दुक्शो दुम्नेवे। मिनु खुइक्थ लाइनेवे। मिनु इ जोरी सत्रु रे पा ब्रोंडचा कली खुंडसीतीक माल्नेवे। येरमीया २५:१५

12 इ बोल्यो दरवार नेल्ल फोव्रशी रवा आ डोंडती मीशो गेडा खोदेशो बाक्नीम। मेको रवा हिम्शोनु, मेको ब्वाइब आन शोव्रमी दोक्नीम।

13 इ लडाइ पाइब आन कली कोव्रडो। मेको मीश मुर खोदेशो बाक्नीम। इ रागी डा ठेयब लाप्चो इ जोरी सत्रु आन कली रोकसीशो बाक्नीम। लाप्चो आन आग्लो नेल्ल मीम नेक्शो बाक्नीम।

14 गे पुम्चा पुंडसीनेवे। मेको नाक्ती कली ब्वाक्कु प्रिंशा वोतो। इ गारो बोल्यो सेलो। हिलो निशा, इंटा सेलो।

15 मेकर इ कली मीम दाक्ब। तरवारमी इ कली साइक्ब। मिनु मालेपुकीम मार मार नेक्शो खोदेशो पा इ कली नेक्ब। गे माले खोदेशो पा सोशो बोशो दुमीन। मिनु घांस ब्वाइब माले खोदेशो पा सोशा बोशा शुश दुमीन। योएल १:४

16 गे सरीड डा सोरुल क्येडा इ ग्याप्ब लेयब मुर शुश सेल्टीवी। मेको माले खोदेशो पा आन कुशुल ताइशशा बेरनीम।

17 इ कली खाल पाइब घांस ब्वाइब माले खोदेशो बाक्नीम। मिनु इ सरकार डा ठेयब मुर माले आन हुल खोदेशो बाक्नीम। मेको ग्यू दुम्मेनु, गारो तार बाक्नीम। मिनु नां पवानु, मेको नेल्ल बेरशा लाइनीम। मेको ते लाइनीमी, सुइमी मतुइक्नीम।

18 अस्सुर डा पिप, इ गोठलापुकी इप्शो बाक्नीम। इ ठेयब मुरपुकी नाइशशा गोल्ला बाक्शो बाक्नीम। इ मुर नेल्ल डांडाम ब्रशो बाक्नीम। मिनु मेको आन कली खुप्ब सुइ मबाक्नीम।

19 इ गार कली मारेइम यो सापाइक्ने मजाप्ब। इ गार बेक्चा डा बाक्ब। मिनु इ पर्वम लोव्र नेंब मुर नेल्ल शुश हिंनीमी। मारदे हना इ गेनायो मनुप्ब मरिम्शो पतीकेमी सुइ ब्रोंडने मचाप्शो बाक्तेक्म” देंत।

## हबकुक

**ब्रेक्ब मुर:** एको किताब हबकुकमी ब्रेक्शो बाक्ब। हबकुक आ अर्थ “मुप्ब मुर”, “शुश दाक्ब मुर” बाक्ब। मेको परमप्रभु यावे आ लोत्र पाइब बाक्त।

**गेना ब्रेक्शो:** कल्दी आन लडाइ पाइबपुकी ६०५ बि. सी.म निनवे ग्राशा, बारना बारन लशो बाक्तेक्म। हबकुक १:६ हबकुकम एको किताब यहूदा डा पिप योसीयाह आ पाला ६३९-६०९ बि. सी.म नु यहूदा डा पिप योयाकीम ६०९-५९८ बि. सी.म आस सासन पचा क्येडा डोंडती ब्रेक्शो बाक्त। हबकुक येरमीया आ लोत्र पची ना यो बाक्शो बाक्त।

**मारदे ब्रेक्शो:** परमप्रभु यावेमी इस्राएली आन कली निसाफ पाइब। इस्राएली आन कली श्येत गेब सजाइ गेचा पुंडसीनीम। ठीक पाइब आन थमा सुइक्तीके ब्रोंडनीम।

मरिम्शो दुम्तीके आ पर्वम लोत्र

- 1 एको परमप्रभु यावे आ लोत्र पाइब हबकुकमी परमप्रभु यावे रे पा नोले दुम्ब ततीक तशो बाक्ब।
- 2 मिनु हबकुकमी “परमप्रभु यावे, गो गेना सम्म इन कली ‘वारच पन’ दे पुंडनुडा? गे काइ मनेनीनी? ‘हुश खाक्श पोक्नीम’ दे थोडनुड। तन्न गे काइ मप्रोंडनीनी।
- 3 गे मारदे आं कली मरिम्शो पशो तपाइक्नीनी? गे मारदे आं कली श्येत जशो तपाइक्नीनी? खतम सेलतीके नु जिचा पोक्तीक आं डोंडती बाक्नीस। तेइ तेइ राम्शी पचा नु जिचा ला पोक्नीम।
- 4 मिनु इन अरेशो मपाइनीम। ठीक पाइबपुकीमी ग्राने मचाप्नीम। इन अरेशो मटीबपुकीमी ठीक पाइब आन कली पुम्नीम। मिनु निसाफ पतीके दूली दुम्ब” देती।

कल्दी आन पर्वम लोत्र पशो

- 5 मिनु परमप्रभुमी आं कली “रागी रागी डा मुर आन कली कोत्रडो। मेको आन कली कोत्रशा, गे छक लाक्नेवे। मारदे हना इन ब्रोंडतीक नाक्तीमी गेय का पशो बाक्ब। मेको इ कली देतेक्म हना यो, गे मेको थमा मसुइक्नेवे। प्रेरित १३:४१
- 6 गो कल्दी डा मुर आन कली पोक्नुडमी। मेको हिंचा डा नु शिशी मपाइक्ब बाक्नीम। मेकोपुकीमी रागी नेल्ल कली ग्राशा, मुर आन खिं नु बाक्तीके रोइक्नीम।
- 7 मेकोपुकी श्येत गेब नु शुश हिंचा डा बाक्नीम। मिनु ‘मार ठीक निसाफ पतीके बाक्बा? सु मान ताइब बाक्बा’ दे आंमान देनीम।
- 8 मेको आन शारा जोइ आन क्येडा रीब पा दोरब बाक्नीम। मिनु नाक्दो यूब फर खोदेशो पा साइक्ब बाक्नीम। मेको आन शारा बारनीम। मेको आन शारा डोइक्ब डोन रागी रे जाक्नीम। ककाकुली खोदेशो पा बेरशा, रीब पा सिखार ग्याइक्नीम। सेफन्याह ३:३
- 9 मेकोपुकी डोंडती बारशा, हुश खाक्श पोक्चा कली जाक्नीम। मिनु मुर आन कली बाल्वा खोदेशो हिक्ने मचाप्चा डा पा शुश ग्याइश्शा, खुप्नीम।
- 10 मिनु पिप आन पर्वम शुक्शी पाइनीम। हुकुम पाइब आन पर्वम तोक्शो लोत्र पा रितीम। मेकोपुकीमी बोल्यो दरवार आन पर्वम ‘गो ग्रानय’ दे खप तेल्शा डोइश्शा लशा, आंम के सेलनीम।
- 11 मेको फश खोदेशो पा गाक्नीम। मिनु पाप पा दोस ताइब दुम्नीम। मेकोपुकीमी आंम सक्ति कली ला थमा सुइक्नीम” देत।

हबकुकम परमप्रभु कली पुंडशो

- 12 मिनु हबकुकमी “परमप्रभु यावे, आं परमप्रभु, गे का ला आं परमप्रभु बाक्नीनी। गो मबेक्नीकी। परमप्रभु यावे, गे मेको आन कली निसाफ पचा कली योत्रतीनी। गे, आं सेरथे फुल्लु, गे मेको आन कली सजाइ गेचा कली वोइक्तीनी। येरमीया १०:२४

13 गे मरिम्शो पशो काइ तने मचाप्नीनी। मरिम्शो पशो फाल्ने मचाप्नीनी। मोदेशो बाक्त हना यो, थम मरिम्शो पाइब आन कली तशा, मारदे मारेइ मदेनीनी? इन अरेशो मटीबपुकीमी आंम क्येडा ठीक पाइब मुर आन कली सदमेनु, गे मारदे सिक्सी पा बाक्नीनी?

14 गे मुर आन कली समुन्द्र डा डांड खोदेशो सेलतीनी। सासन पाइब मबाक्शो ग्रेशा गाक्ब आइक्च जन्तु खोदेशो सेलतीनी।

15 मिनु आन जोरी सत्रुमी नेल्ल आन कली बोल्सीमी खोदेशो पा रेलनीम। मेको आन कली ग्याइलीम पिक्शा, गुंडनीम। आन ग्याइक्तीकेमी खुनीम। मिनु डांड रेशो खोदेशो पा ग्येरशो बाक्नीम।

16 मोपतीके मेकोपुकीमी आन ग्याइल कली क्योरशा चढेनीम। आन ग्याइक्तीके कली चोशा चढेनीम। मारदे हना मेको ग्याइल नु ग्याइक्तीके रे पा शुश तशा, ब्रोव्रशो जाइनीम।

17 मार, मेकोपुकीमी आन ग्याइलीम रेन्ना रेन्न, रागी रागी डा मुर आन कली शिशी मपथु, खतम सेल्ना सेल्न बाक्चा गेनीनी?” दे हबकुकमी परमप्रभु कली दैत।

## 2

### परमप्रभुमी लोव्र लेशो

1 गो नेल्ल तचा डा पा राप्शा बाक्नुड। गो गारो डोइशशा कोव्रनुड। मिनु परमप्रभु यावेमी आं कली मार देबा, मेको नेल्ल तशा नेशा बाक्नुड। आं कली मारेइ लोव्र लेप्बा को, दे रिम्नुड। यसैया २१:८

2 मिनु नोले परमप्रभु यावेमी आं कली “गे इ तशो नेशो ब्रेक्तो। रिम्शो पा रुप्चा डा पा फुल्लु तार ब्रेक्तो। मिनु सु मेकेर लाइबा, मेकोम रीब पा पढेने चाप्ब। यसैया ३०:८; प्रकाश १:११,१९

3 मारदे हना इ तशो आं देशो नाक्ती जाक्ब। मेको दीसा निल्थी मडुम्त हना यो, मेको कली रिम्शा बाक्को। मेको थमा पा दुम्ब। देश मपाइब। इजीकीएल १२:२३; २ पत्रुस ३:९

4 गे ठेयब लेशो कली कोव्रडो। मेको आ थुं मरिम्शो बाक्ब। तन्न ठीक पाइब आं कली थमा सुइशशा ब्रोइब।

5 मिनु शुश शोप कली थमा सुइक्चा दूली बाक्ब। ठेयब लेशो मुर मलीब। मेको आ शोव तुरस खोदेशो पा पाक्शा बाक्ब। बेक्पाइक्ब खोदेशो पा गेनायो मरूब। रागी रागी डा मुर नेल्ल आन कली खुप्शा आंम के सेल्ब” दैत।

### मुर आन कली दिप्ब कली हुइशो

6 मिनु “मुर नेल्लेमी मोदेशो मुर आ पबंम मुने तोक्चा डा लोव्र पाइनीम। मेको आ पबंम शुक्शी लोव्र पा, आबी आबी, गे अरु मुर आन शोप आंम कली तेलतीवी। गे गेना सम्म अरु मुरुमी इ कली गेशो क्येट आंम कली वोइक्नेवे?

7 मार, इ कली जेर गेबपुकी कालेमीन मबोक्नीमी डा? मेकोपुकी संसीशा इ कली महिंपाइक्नीमी डा? मेना गे श्येत जाइब दुम्नेवे।

8 मारदे हना गे रागी रागी डा शुश मुर आन शोप रोइक्ताक्नी। मुल चहिं इ साइक्तीक रे ब्रोइशोपुकीमी इ के बाक्शो नेल्ल रोइक्नीम। गे मुर आन कली हुश खाक्श पोक्तीवी। गे रागी, सहरपुकी नु मेकेर बाक्ब मुर नेल्ल आन कली खतम सेलतीवी” दैत। हबकुक २:१७

9 “आबी आबी, गे मरिम्शो पा क्येट चेम्नेवे। मोपा इ खिं डा मुर आन कली खतम सेल्नेवे। तन्न गे ‘श्येत मजाइनुड’ दे इ खिं इर सेलतीवी।

10 गेम शुश जात जात डा मुर साइक्तीके, इ खिं डा मुर आन कली मुने तोक्शा, साइक्चा पुंडसीनेवे।

11 गारो डा फुल्लुमी इ पबंम ‘वारच पने’ दे ग्रीनीम। मिनु थाम आ तार डा शीमी मेको कली लोव्र लेप्ब” दैत। लूका १९:४०

12 “आबी आबी, गे हुश खाक्श पोक्तीकेमी, सहर का सेलतीवी। गे ठीक मपतीकेमी सहर आ जग वोइक्ब बाक्नेवे। येरमीया २२:१३; मीका ३:१०

13 जात जात डा मुर आन गेय नेल्ल मी कली ला दुम्ब। रागी रागी डा मुरपुकी मलीचा डा गेय पचा कली सोम्सीनीमी, दे मुर नेल्ल आन परमप्रभु यावे आ देशो मबाक्बा डा? येरमीया ५१:५८

14 तन्न रागी नेल्ल परमप्रभु यावे आ सक्ति डा तुडक्तीकेम ब्रीशो बाक्ब। ब्वाक्कुमी समुन्द्र ब्रीशो खोदेशो पा ब्रीशो बाक्ब” दैत। यसैया ११:९

15 “आबी आबी, गे इ नेक्था बाक्ब मुर आन कली मुने तोक्चा कली इ दुक्तीक थोव्रक तुंडशा दुक्पाइक्नेवे।

16 गे ठेयब दुम्चा क्येडा शुश मुने दोक्नेवे। मुल इ पालो जाक्त। गे यो तूशा, दुक्शा दाइल पांडसो। परमप्रभु यावेमी आ ग्युरा गुइ डा कचौरा इ कली गेब। मिनु इ ठेयब दुम्तीके मुने दोक्ब। येरमीया २५:१५, २६

17 गे लेबानोन डा ठेयब रवा नेल्ल तिम्तीवी। मेकेर डा ब्वाकी डा जन्तु नेल्ल आन कली मरिम्शो पाप्तीवी। मेको इ मरिम्शो पतीके क्येक्क लेत्चा पुंडसीब दुम्नेवे। मारदे हना गे मुर आन कली हुश खाक्श पोक्तीवी। मिनु रागी, सहरपुकी नु मेकेर बाक्ब मुर नेल्ल आन कली खतम सेलतीवी” दैत।

### मूर्तिम मारेइ पने मचाप्नीम

18 मिनु “मूर्तिम मार गेय पने चाप्बा डा? मुर आ चेम्शो मूर्ति जोल ला बाक्ब। मारदे हना मेको चेम्बमी आंम चेम्शो मूर्ति कली थमा सुडक्ब। तन्न मेको मूर्ति ब्वाक्ने मचाप्ब। यसैया ४४:१०-२०

19 आबी आबी, गे शी कली ‘सैंसो’ दे ब्वाक्ने मचाप्ब फुल्लु कली ‘बोक्को’ देंनेवे। मार, मेकोमी मुर कली शेंने चाप्बा? मेको सुन चांदीमी गिल्लो बाक्त। तन्न मेको नु काइ ब्रोंडतीक सोक्त मबाक्ब। भजन संग्रह ११५:४-८

20 मिनु परमप्रभु यावे आंम आ बाक्तीकेमी बाक्ब। रागी नेल्ल मेको आ डोंडती मान पा सिक्सी पवल” दैत। भजन संग्रह ११:११; भजन संग्रह ७६:९; जकरिया २:१७; प्रेरित ८:३

## 3

### हबकुक ग्येरसीशो

1 परमप्रभु यावे आ लोव्र पाइब हबकुकमी परमप्रभु यावे कली लोव्र पा कुम्सो पा ठेयब सेल्लु।

2 “परमप्रभु यावे, गो इन पशो नेल्ल नेंता। परमप्रभु यावे, गो इन पशो तशा, इन कली ठेयब सेल्लुड। आंइ ब्रोंडतीक नाक्तीमी मेको लेंशा कोंइदीन। मेको तुडक्पतीन। गे गाइक्ताक्नी हना, यो इन शिशी मिम्तीन।

3 परमप्रभु तेमान रे पा जाक्त। मेको का ला परमप्रभु पारान डांडा रे जाक्त। ठेयब सेंदा पा आ ठेयब दुम्तीकेमी सरीड सुम्शो बाक्त। आ मान ततीकेम रागी नेल्ल ब्रीशो बाक्त। ब्यवस्था ३३:२

4 मेको आ छेडछेड नां दाप्शो खोदेशो बाक्त। आ गुइ रे पा चेयेर यूशो बाक्त। मेकेर आ सक्ति खुड्शो बाक्ब।

5 आ डोंडती मुर आन कली साइक्तीक रोइ लत। आ नोले मुर बेक्तीक रोइम खोइक्तु।

6 मेको गाक्शा नाइशशा, रागी हिम्पाइक्तु। मेकोमी कोव्रडानु, रागी रागी डा मुर आन कली खिंखि पपाइक्तु। गेना हना यो बाक्ब डांडा ब्रेल्नीम। मेको गेना हना यो लीब पहाड नेल्ल यशो खोदेशो पा दिम दुम्तेक्म। मेकोमी साइ डोंडती रे मोदेशो पशो बाक्त। भजन संग्रह १०४:३२

7 गो कुशन रागी डा ताम्बुमी बाक्ब आन कली श्येत जशो ताता। मिदयान डा ताम्बु आन सुम्तीके हिम्साक्म।

8 परमप्रभु यावे, गे खोलापुकी नु गाइक्तीनी? गे ठेयब समुन्द्र आ पर्वम चुरनी? इन शारा नु बग्गी आन कली लां कोंइशा ग्रातीनी।

9 गे इन लिब्रा गुंडताक्नी। गे इन ब्रा ते देंनी मेक लत। गे खोला शाइक्तीकेमी रागी कली चेलतीनी।

10 मिनु डांडापुकी इन कली तशा रोम्सीनीम। ठेयब रेउ यित। ठेयब समुन्द्र आ रेयके नेंसाक्ब। भजन संग्रह ७७:१७

11 इन आप्शो ब्रा जिल पा ब्रशा बेरमेनु, इन तूतीक जिल्मील पवानु, नां मसोव्र। मिनु तास्ला सरीडम नांडसाक्व। यहोसु १०:१३

12 गे गाइश्शा रागी तार गाक्तीनी। चुरशा रागी रागी डा मुर आन कली दिप्शा साइक्तीनी।

13 गे इन आंम योव्रशो मुर आन कली प्रोंइचा, दे जाक्तीनी। इन तेल लुकशो मुर कली प्रोंइथ जाक्तीनी। तन्न गे इन अरेशो मटीब रागी डा ठेयब मुर आ खिं तला तारी रे जग सम्म प्रेत्तीनी। भजन संग्रह १८:८,१६

14 मिनु गे मेको आ लडाइ पाइब आन ब्राम आन पिया खिन्तीनी। मेकोपुकी खुइश्शा बाक्ब पुडग मुर आन कली साइक्चा थुं पा फश गिवार खोदेशो पा जाक्शो बाक्तेक्म।

15 गे ठेयब समुन्द्रमी आन शारा ओव्रपाइश्शा, ठेयब ब्वाक्कु नेल्ल शाक्पाइक्तीनी। प्रस्थान १४:२६-२९

16 गो इन सेंदा नेंनुनु, खिंखि पाता। आं शोव्र यो खिंखि पाप्तु। आं रुश आगा नेल्ल मुक्ताक्मे। खोइल खिंखि पाप्तु। मो हना यो आंइ कली मरिम्शो पाइब मुर आन कली श्येत दुम नाक्ती कली रिम्शा बाक्ती।

17 फोव्रशी रवा मबोइक्ब। अङ्गुर बोट मसिप्ब। तेल रवाम फल काइ मसिप्ब। रूमी अन्न मसिप्ब। गोटीम बी ब्यफ नु क्यारश भेडा मबाक्त हना यो,

18 गो परमप्रभु यावे कली तुइश्शा ग्येरसीनुड। मिनु आं कली श्येत रे प्रोंइब परमप्रभु कली ठेयब सेल्शा ग्येरसीनुड। यसैया ६१:१०

19 परमप्रभु यावे, आं परमप्रभु आं सक्ति बाक्ब। मेकोमी आं खोइल किश्श आ खोइल खोदेशो सेल्ब। मेकोमी आं कली ठेयब लाइश्शो डांडामी लतीक सक्ति गेब” दे कुम्सो पाप्तु।

मेको कुम्सो शेंब कली तार पाइश्शो ताप्तीके ताप्शा, मेको कुम्सो पपाइक्चा माल्ब। भजन संग्रह १८:३४

## सेफन्याह

**ब्रेक्ब मुर:** एको किताब सेफन्याहमी ब्रेक्शो बाक्ब। मेको मुर आ पर्वम शुश मतुंडसीब। मेको हिज्कीयाह आ युड बाक्ब। मेको हिज्कीयाह पिप हिज्कीयाह यो दुम्ने चापब। एको किताब आइक्च बाक्त हना यो, खीस्त आ पर्वम शुश लोत्र बाक्ब।

**गेना ब्रेक्शो:** पिप योसीयाहम सासन पची ना ६४१-६१० बि. सी. मेर सेफन्याहमी एको किताब ब्रेक्शो बाक्त। अरेशो किताब थित्या क्येडा डोंइती एको किताब ब्रेक्शो बाक्त, दे मिन्मीम।

### मार ब्रेक्शो:

१. परमप्रभु यावे आ निसाफ पतीक नाक्त जाक्ब। सेफन्याह १:१-४
२. निसाफ पशो मार कली बाक्बा? सेफन्याह १:५-१८
३. अर्को रागीम यो निसाफ ताइनीम। सेफन्याह २:१-३:८
४. नोले डा रिम्शो दुम्तीके जाक्ब। सेफन्याह २:-३:-

### डोंइती डा लोत्र

१ यहूदा डा पिप आमोन आ तौ योसीयाहमी सासन पवा ना परमप्रभु यावेमी सेफन्याह कली लोत्र पाप्तु। सेफन्याह आ आफ कूशी बाक्माक्त। कूशी आ आफ गेदाल्याह बाक्माक्त। गेदाल्याह आ आफ अमारयाह बाक्माक्त। मिनु अमारयाह आ आफ हिज्कीयाह बाक्माक्त। येरमीया १:२

### नेल्ल खतम दुम्तीक नाक्त जाक्ब

२ परमप्रभु यावेमी मार लोत्र पाप्तु देशा हना “गो रागी नेल्ल डा मारेइ मारेइ खतम सेल्लुड।  
३ मुर नु बी ब्यफ, क्यारश भेडा, जन्तु नेल्ल आन कली खतम सेल्लुड। सरीड डा चिक्ब, समुन्द्र डा डांड नेल्ल आन कली साइक्नुडमी। रागी डा मुर नेल्ल आन कली खतम सेल्लुड। परमप्रभु यावे आ अरेशो मटीब आन कली दाइल पपाइक्नुड। गो मुर नेल्ल आन कली रागी नेल्ल रे क्याम्नुड। मती १३:४१

### यहूदा डा मुर आन कली हुइशो

४ गो यहूदा रागी नु यरूसलेममी बाक्ब मुर नेल्ल आन पर्वम आं गुइ क्युक्नुड। मिनु मेकेर बाल देवता कली पूजा पतीके नु मेको कली चढेब आन नें मलीचा डा पा क्याम्नुड। २राजा २३:५; होसे १०:५

५ खिं तार बाक्शा, नां तास्ला नु सोरुल आन डोंइती बापब, परमप्रभु यावे आ डोंइती बाप्शा आ नें थिशा कसम जाइब। मोलेक आ नें यो थिशा कसम जाइब। येरमीया १९:१३; येरमीया ४९:१

६ गो, परमप्रभु यावे, आं कली ममाल्थु, मपुंडथु आं नोले खोइक्चा प्रोंइशा, नोले शोंइसीब आन कली खतम पोक्नुडमी।

७ परमप्रभु, परमप्रभु यावे आ डोंइती सिक्सी पने। मारदे हना परमप्रभु यावे आ नाक्त जाक्चा चिक्शो बाक्ब। परमप्रभु यावेमी चढेतीक चाड का ठीक पाप्तु। परमप्रभु यावेमी आ ब्रेशो मुर आन कली ठीक सेल्लतीमी। हबकुक् २:२०

८ परमप्रभु यावे आ चढेतीक नाक्त गो सरकार आ ठेयब मुर, पिप आ तौपुकी नु अर्को रागी डा मुर आन वा फेक्ब नेल्ल आन कली सजाइ गेनुडमी। हबकुक् २:२०

९ मेको नाक्त सु सु लाप्यो रे ओव्रनीमी, मेको आन कली सजाइ गेनुड। मारदे हना मेकोपुकीमी आन होत्रप आ खिं तुम्मुचा, जिचा खेचा नु जोल पतीकेमी प्रिनीम” दैत।

१० मिनु परमप्रभु यावेमी “मेको नाक्त डांड लाप्यो रे ठेयब सेंदा पा डाक्शो, नक सहर रे रोंका पशो नु डांडा रे पा ठेयब रेयके पशो नेंसीब।

११ गे माकतेशम बाक्बपुकी रोंका पने। मारदे हना ग्यापब लेयब नेल्ल खतम दुम्तेकम। चांदी नाक्ब नेल्ल क्याम्चा पुंडसाक्म। माकतेश यरूसलेम सहर डा बजार का बाक्त।

12 मेना गो यरूसलेममी बत्ती दाशा मुर आन कली माल्शा, सजाइ गेनुड। मारदे हना मेकोपुकीमी अल्सी पा आन थुंमी 'परमप्रभु यावेमी रिम्शो नु मरिम्शो मारेड यो मपाइब' दे मिन्मीम।

13 मेको आन शोंप नेल्ल रोइक्चा पुंडसीनीम। मेको आन खिं ब्रेत्नीम। मेकोपुकीमी खिं सेल्लेक्म हना यो, मेकेर बाक्चा मताइनीम। मेकोपुकीम अडगुर खुम्तेक्म हना यो, अडगुर शांबु तूचा मताइनीम। ब्यवस्था २८:३०,३९; आमोस ५:११

### परमप्रभु आ ठेयब नाक्त

14 परमप्रभु यावे आ ठेयब नाक्त जाक्चा चिक्शो बाक्ब। मेको रीब पा जाक्ब। नोफा दाइश्शा नेनीन। परमप्रभु यावे आ ठेयब नाक्त, श्येत डा नाक्त बाक्ब। लडाइ पाइबपुकी थम ठेयब सेंदा पा ग्रीनीम। योएल १:१५

15 मेको नाक्त गाइक्चा डा नाक्त दुम्ब। श्येत नु हिंचा डा नाक्त दुम्ब। नेल्ल ब्रेत्तीक नु खतम दुम्तीक नाक्त दुम्ब। मेको नाक्त छिडछिड नु हिंचा डा दुम्ब। गोस्सुम गिल्शो नु शुश छिडछिड डा नाक्त दुम्ब।

16 गारोम हिरशो सहरपुकी नु गारो डा कुनाम बाक्शो लाइश्शो खिं आन कली लडाइ तोचा कली तुराही ताप्शो नु लडाइ डा रेयके पशो नेंसीब। येरमीया ३०:७

17 गो मुर आन कली शुश श्येत गेनुड। मिनु मेको मिक्च मताइब खोदेशो पा गाक्नीम। मारदे हना मेकोपुकीम परमप्रभु यावे आ डोंइती पाप पाम्तेक्म। मेको आन हुश फुरक खोदेशो नु श्ये खी खोदेशो पा ताइक्नीम।

18 परमप्रभु यावे गाइक्ची नाक्ती मेको आन चांदीमी मप्रोंडब। मेको आन सुनमी यो मेको आन कली प्रोंडे मचाप्ब। मेको आ मी खोदेशो पा गाइक्तीकेमी रागी नेल्ल क्रोइक्ब। मेकोमी रागीम बाक्ब नेल्ल आन कली थम मरिम्शो पा साइश्शा क्याम्ब” दे परमप्रभु यावेमी देंत। इजीकीएल ७:१९

## 2

### पलिस्ती आन कली लोव्र

1 मिनु मेकोमी “गे मुने मपाइश्शो रागी डा मुर, गे नेल्ल काथा बुक्कीन।

2 इन नाक्त फशेम बेरशो भूस खोदेशो पा लाक्नीम। आ योव्रशो नाक्त जाक्चा, परमप्रभु यावे आ शुश गाइश्शो इन तार जुक्चा नु परमप्रभु यावे आ गाइश्शो नाक्त जाक्चा क्येडा डोंइती,

3 गे रागी डा परमप्रभु यावे आ डोंइती ठीक पाइब नु ब्रेम्शो मुरपुकी परमप्रभु यावे कली मालीन। गे ठीक पाइब नु ब्रेम्शो थुं पाइश्शो दुम्चा मालीन। मिनु परमप्रभु यावेमी आ गाइश्शो नाक्त इन कली खुइक्बा को? आमोस ५:१५

4 गाजा मुर मबाक्थु, श्येतथ दुम्ब। अश्कलोन नेल्ल ब्रेश्शा खतम दुम्शा प्रोंइसीब। नाक्ती उइक्थ दुम्मेनु अश्दोद डा मुर खेरचा पुंडसीनीम। एक्रोन चहिं तुल्चा पुंडसीब।

5 आबी आबी, समुन्द्र आ शुंगीम बाक्ब केरेथी जात डा मुर परमप्रभु यावे आ लोव्र इन कली ‘गे पलिस्ती आन रागी बाक्ब, कनानी, इ कली सुइ मुर मबाक्चा डा पा खतम सेल्लुड’ देंत। १सामुएल ३०:१४; येरमीया ४७:-

6 केरेथी आन बाक्तीक समुन्द्र आ शुंगी डा रागी बी ब्यफ, क्यारश भेडा योव्रतीके दुम्ब। भेडा गोठला आन बाक्तीक दुम्ब। मेको आन भेडा मेकेर वोइक्नीम।

7 मेको समुन्द्र आ शुंगी डा रागी यहूदा आ खिं डा लीशो मुर आन के दुम्ब। मेकोपुकीमी मेकेर आन बी ब्यफ, क्यारश भेडा योव्रनीम। नाक्दो मेकोपुकी अश्कलोन आ खिंपुकीम इप्नीम। मारदे हना परमप्रभु यावे, आन परमप्रभुमी मेको आन कली कोव्रब। मिनु मेको आन कली डोंइती खोदेशो पा रिम्शो पा बाक्चा गेब” देंत। सेफन्याह ३:२०

### मोआबी नु अम्मोनी आन लोव्र

8 मिनू “गो मोआब नु अम्मोनी आन शुक्शी पशो नेता। मेकोपुकीमी आं मुर आन कली मरिम्शो पांतेक्म। मेको आन रागी कली ‘खतम पोक्नीक’ दे हिंच कोंडताक्म। येरमीया ४८:-; येरमीया ४९:१-६

9 मोपतीके मुर नेल्ल आन परमप्रभु यावे, इस्राएली आन परमप्रभुमी ‘गो ब्रोंडशा बाक्शो खोदेशो पा, मोआब सोदोम खोदेशो नु अम्मोन गोमोरा खोदेशो दुम्ब। मेको आन बाक्तीके चूले वाशो नु हिक्सी खाल्टा बाक्शो रागी दुम्ब। मेको गेना हना यो मुर मबाक्तीक रागी दुम्ब। आं लीशो मुरपुकीमी मेको आन मार मार रोडक्नीम। मिनु आं रागी डा ब्रोंडशो मुरपुकीमी मेकेर हुकुम पाइनीम। उत्पत्ती १९:२४-२५

10 मेको आन ठेयब लेशो आ पा डा मोदेशो ताइनीम। मारदे हना मेकोपुकीमी मुर नेल्ल आन परमप्रभु यावे आ मुर आन कली शुक्शी पा आंम कली ठेयब सेल्शो बाक्नीम।

11 परमप्रभु यावेमी मेको आन कली थम मरिम्शो पाइब। रागी डा देवी देवता नेल्ल आन कली खतम पोक्ब। नेल्ल आन बाक्तीकेमी बाक्शा, मेको आ डोंइती बाप्चा माल्नीम। रागी रागी समुन्द्र आ सुगी नु टापु डा मुर नेल्ल परमप्रभु यावे आ डोंइती बाप्नीम’ दैत।

### एथीयोपीया नु अस्सुर कली लोत्र

12 गे एथीयोपीया डा मुर यो आं तरवारमी साइक्चा पुंडसीनीनी” दे परमप्रभु यावेमी दैत। इजीकीएल ३०:९

13 मेकोमी उत्तर गे आ गुड दिंशा अस्सुर कली खतम पोक्ब। निनवे कली कोक्त नु गोरशो रागी खोदेशो सेल्ब। नहुम १:१

14 मेकेर बी ब्यफ नु ब्वाकी डा जन्तु नेल्ल इप्नीम। गोरशो रागी डा बुक्स नु ग्रीब बुक्सपुकीम मेको आन थाम तारी ग्योत्र सेल्नीम। बुक्स झेल रे पा ग्रीनीम। खदपुकी लाप्चोम ग्रीनीम। मिनु दारपाइक्चा कली क्येप्शो शी नेल्ल लां रे तांडसीब। यसैया १३:२१; यसैया ३४:११

15 मेको महिंथु थुं नाइशशा बाक्ब सहर मबाक्बा डा? मेकोमी आंम कली “गो गोन नड। आं क्येडा लाक्शा अरु सुइ मबाक्नीम” दैत। मेको मुल दोदेशो पा ब्रेशो दुम्मे? मेको ब्वाकी डा जन्तु आन बाक्तीके दुम्त। मेको लां रे पा गाक्ब नेल्ल मेको तशा आबी, दे हिंशा खिंखि पाइनीम। यसैया ४७:८

## 3

### यरूसलेम आ नोले डा नाक्त

1 मेकोमी “आं देशो गेनायो मटीब, ग्रांरा दिचा डा नु मुर आन कली दिप्ब सहर बाक्ब।

2 मेकोमी सुइ आन देशो मटीब। रिम्शो पचा कली हुइशो लोत्र मनैब। मेकोमी परमप्रभु यावे कली थमा मसुइक्थु, आ परमप्रभु आ नेक्था मजाक्ब।

3 मेको सहर डा सरकार डा ठेयब मुर ग्रीब गुप्स खोदेशो बाक्नीम। मेको आ निसाफ पाइब नाक्दो गाक्शा, सुनी सम्म मारेइ महेंब फर नम। इजीकीएल २२:२७

4 मेको आ परमप्रभु यावे आ लोत्र पाइबपुकी हेंथे पाइब नु थमा मसुइक्चा डा मुर बाक्नीम। मेको आ चढेबपुकीमी परमप्रभु यावे आ खिं ग्रांरा दिशो सेल्नीम। मेकोपुकीम परमप्रभु यावे आ अरेशो लोत्र हेंथे सेल्तेक्म। मीका ३:११

5 मेको आन दातेम बाक्ब परमप्रभु यावे ठीक पाइब बाक्ब। मेकोमी मारेइ मरिम्शो मपाइब। मेकोमी सुनी कुस कुस निसाफ पाइब। तेकोइ सुनी मप्रोंडब। तन्न ठीक मपाइबपुकी मुने दोक्शा लल मजिनीम।

6 गो रागी रागी डा मुर आन कली खतम पोक्ता। मेको आन ब्रोंडशा बाक्तीक खिं प्रेशा गेता। मेको आन लां नेल्ल श्येत्थ सेल्ता। मेकेर रे सुइ मगाक्नीम। मेको आन सहरपुकी श्येत्थ बाक्नीम। मेकेर सुइ मुर मबाक्नीम।

7 मो पडा नोले मेको सहर डा मुरपुकी आं कली तशा मान पा हिंनीम। आं देशो पाइनीम, दे मिम्ताड। तन्न मेकोपुकीमी डोंइती क्येडा मरिम्शो गेय पांतेक्म” दैत।

8 परमप्रभु यावेमी “मोपतीके लोत्र पचा कली गो मजाक्डा सम्म आं कली रिम्शा बाक्कीन। गो रागी रागी डा मुर आन कली खुप्नुड। गो राज्य राज्य डा मुर आन कली ग्रुम्पाइक्नुड। मेको आन तारी आं



गाइश्शो मोइक्नुड। मारदे हना आं मी खोदेशो पा गाइश्शोमी रागी रागी नेल्ल ग्रोइश्शा खतम दुम्नीम। योएल ४:२; भजन संग्रह ७९:६

९ मेना जात जात डा मुर आन कली रिम्शो लोत्र पाइब सेल्लुड। मिनु मेको नेल्लेमी परमप्रभु यावे कली पुंडशा ठेयब सेल्लेक्ल। मेको नेल्ल गारशा आ गेय पामेक्ल।

१० मिनु आं नें ठेयब सेल्ल एथीयोपीया डा खोला आइक्वी हांम डा ब्रशा बाक्शो आं मुरपुकीमी आं कली चढ्देतीक थोत्रक चाक्नीम। भजन संग्रह ६८:३२; यसैया १८:१; प्रेरित ८:२७

११ मेको नाक्त आं कली मटिशो आ पबंम गे मुने दोक्चा ममालनीनी। मेना इ दाते डा ठेयब लेशशो मुर आन कली गुंडनुडमी। आं डांडामी गे लेंशा ठेयब लेशशो मदुम्नेवे।

१२ गो इ दातेमी ब्रेम्शो नु पुडग मुर लीचा गेनुडमी। मेकोपुकीम 'परमप्रभु यावे आंइ कली वारच पाइब बाक्ब' दे थमा सुडक्नीम। इर्जीकीएल ६:८

१३ इस्राएल डा लीशोपुकीमी लेंशा दूली मपाइनीम। मेकोपुकीमी जोल मपाइनीम। हेंथे लोत्र मपाइनीम। मेकोपुकी जशा तूशा गोल्शा बाक्नीम। सुडम मेको आन कली हिंच मकोइनीम।

१४ सियोन आ तमी, ठेयब सेंदा पा कुम्सो पावो। इस्राएल, ठेयब सेंदा पा ग्रीडो। यरूसलेम आ तमी इ थुं नेल्लेम ग्येरशा सोम्शा बाक्को।

१५ परमप्रभु यावेमी इ सजाइ क्याम्शा गेशो बाक्ब। मेकोमी इ जोरी सत्रु आन कली सोइश्शो बाक्ब। इस्राएली आन पिप, परमप्रभु यावे गे नु बाक्ब। मुल डा मेरे गे तेकोइ श्येत रे हिंचा ममालनेवे। जकरिया ९:९

१६ मेको नाक्त यरूसलेम कली सियोन डा मुर महिनीन। गे शुश गेय पने।

१७ परमप्रभु यावे, इन परमप्रभु इन दातेमी बाक्ब। मेको बोल्यो बाक्शा, श्येत रे प्रॉइब बाक्ब। मेको इन कली तशा, शुश ग्येरशो बाक्ब। मेकोमी आ दाक्तीकेमी इन कली नक मुर सेल्लब। मेकोमी इन कली तशा ग्येरशा कुम्सो पाइब। यसैया ६२:५

१८ चाडमी ग्येरशो खोदेशो पा कुम्सो पाइब। आन क्येडा डोन बाक्ब आन कली खुप्नुड। मेको इन मुर नम। आं पबंम शुक्शी पाइक्चा पुंडसीनीम।

१९ मेना गो इन कली दिप्ब आन कली सजाइ गेनुड। गो खोइल मदुक्ब आन कली श्येत रे प्रॉइनुड। मिनु ब्रशा बाक्शो आन कली खुप्नुडमी। मेको आन कली मुने तोक्शो रागीम आं पा डा मान ताइब सेल्लुडमी। मीका ४:७

२० मेना गो इन कली खुप्शा चाक्नन्नी। मारदे हना गो इन कली रागी नेल्ल डा मुर आन दातेमी ठेयब सेल्शा, मान ताइब सेल्लन्नी। मिनु गो नेल्ल आन तचा डा पा इन कली डोंइती खोदेशो पा रिम्शो पा बाक्चा गेनन्नी” दे परमप्रभु यावेमी देंत। सेफन्याह २:७; येरमीया २९:१४

## हाग्वै

**ब्रेक्ब मुर:** एको किताब हाग्वैमी ब्रेक्शो बाक्ब। मेकोमी यहूदीपुकी ग्याइशशा लाइशशो, यरूसलेम लेशशो जकरिया नु परमप्रभु यावे आ खिं लेंशा सेल्चा गेय पशो बाक्त।

**गेना ब्रेक्शो:** यहूदी ग्याइशशा लाइशशा यरूसलेम लेशशो १६ बर्स नोले ५२० बि. सी.मी परमप्रभु यावे आ खिं सेल्चा कली जग वोइशशो बाक्तेक्म। मेको आ डोंइती नु सेल्ची ना हाग्वैमी एको लोत्र पा ब्रेक्शो बाक्त।

**मारदे ब्रेक्शो:** परमप्रभु यावे आ खिं लेंशा सेल्चा मालनीम। मोपतीके हाग्वै आ शेंचा माल्लो लोत्र “गो श्येत जाइनीकी। मोपतीके परमप्रभु यावे आ खिं सेल्चा कली मारेइ गेने मचाप्नीकी” देंनीनी। तन्न “मारदे मगेनीनी, मोपतीके श्येत जाइनीनी” देंब।

परमप्रभु आं खिं सेलीन, दे अरेशो

1 पिप दाराम सासन पशो बर्स निक्शी, ६ महिना डा डोंइती डा नाक्त परमप्रभु यावेमी आ लोत्र पाइब हाग्वै कली लोत्र पाप्तु। मेको लोत्र यहूदा रागीम हुकुम पाइब जेरूब-बाबेल नु नेल्ल क्येडा ठेयब चढेब यहोसु आस कली बाक्त। जेरूब-बाबेल शाल्तीएल आ तौ बाक्त। यहोसु चहिं यहो-सादाक आ तौ बाक्त। एज्जा ४:२४; एज्जा ५:१; एज्जा ५:२

2 मिनु हाग्वैमी “मुर नेल्ल आन परमप्रभु यावेमी मार देंत देशा हना ‘एको मुरपुकीमी परमप्रभु यावे आ खिं मुल लेंशा सेल्ची मजाक्शो बाक्ब देंनीम’ ” देंत।

3 मिनु हाग्वैमी परमप्रभु यावे आ लोत्र पा “परमप्रभु यावेमी मार देंब देशा हना

4 ‘आं खिं ब्रेशशा खतम दुश्शो बाक्ब। गे चहिं दारशो शी क्येप्शो खिंम बाक्चा रिम्शो दुम्बा डा?’ देशो बाक्ब” देंत। २सामुएल ७:२

5 मिनु मुर नेल्ल आन परमप्रभु यावेमी “गे दोदेशो बाक्नीनी, मिम्तीन।

6 गे शुश शोक्तीनी, तन्न इच्का ला खुप्ताक्नी। गे जाइनीनी, तन्न मरूनीनी। गे तूनीनी, तन्न इन तूतू दाक्तीके मबेक्ब। गे फेक्नीनी, तन्न इन रां महोइब। गे शुश गेय पा क्येट चेम्नीनी, तन्न होइशशो थैलीत कुर पा वोइक्नीनी” देंत। ब्यवस्था २८:३८

7 मिनु मुर नेल्ल आन परमप्रभु यावेमी मार देंत देशा हना “गे दोदेशो बाक्नी, मिम्तीन।

8 डांडा मेर डोइशशा शी यितीन। मिनु आं खिं सेलीन। मिनु गो मेको तशा, ग्येरशा बाक्ने चबुल। मोपा मुरपुकीम आं कली ठेयब सेल्चीमील।

9 गे शुश आस पाइतीनी, तन्न इच्का ला ताइतीनी। मिनु गे खिंमी मार चाक्नी, गो मेको कली मुइशशा बेरपाइक्ता। गो मारदे मोदेशो पाता देशा हना, आं खिं ब्रेन्ने थुश्शो बाक्ब। गे चहिं आंम खिं कली ला मिम्तीनी।

10 मोपतीके सरीड रे सीत यिचा प्रोंइतु। मिनु रूमी मारेइ मारेइ वाचा प्रोंइशो बाक्ब। १राजा १७:१

11 मिनु गो रू नु डांडा तार रेउ मयिपदु। अन्न, अडगुर, तेल नु रूम सिप्ब मारेइ मारेइ मसिप्पदु। मुर नु रागीम ब्रोंइशो नेल्ल आन कली श्येत जपाइक्ता। मुर आन गेय नेल्ल शोर गाक्शो सेल्ता” देंत। हाग्वै २:१७; आमोस ४:९

12 मिनु शाल्तीएल आ तौ जेरूब-बाबेल नु यहो-सादाक आ तौ, नेल्ल क्येडा ठेयब चढेब यहोसु नु लीशो मुर नेल्लेमी परमप्रभु यावे आन परमप्रभु आ लोत्र टिम्तेक्म। मिनु परमप्रभु यावे आन परमप्रभु आ देशो नु आ लोत्र पाइब हाग्वै आ देशो लोत्र टिम्तेक्म। मिनु मुरपुकी परमप्रभु यावे कली मान पा हितेक्म।

13 मिनु परमप्रभु यावे आ सोइशशो लोत्र पाइब हाग्वैमी “परमप्रभु यावेमी मुर आन कली ‘गो गेपुकी नु बाक्नुड’ देशो बाक्ब” देंत। मलाकी २:७

14 मिनु परमप्रभु यावेमी शाल्तीएल आ तौ, यहूदा रागीम हुकुम पाइब, जेरूब-बाबेल नु यहो-सादाक आ तौ, नेल्ल क्येडा ठेयब चढ़ेब, यहोसु नु लीशो मुर आन थु कली जोंब पोक्ताकव। मिनु मेकोपुकीमी मुर नेल्ल आन परमप्रभु यावे, आ खिं सेल्चा गोमतेकम।

15 मिनु मेकोपुकीमी पिप दाराम सासन पशो बर्स निकशी, ६ महिना, २४ नाक्तीमी परमप्रभु यावे आ खिं सेल्चा गोमतेकम।

## 2

### परमप्रभु आ खिं लेंशा सेल्शो

1 पिप दारामी सासन पशो बर्स निकशी, ७ महिना २१ नाक्तीम परमप्रभु यावे आन परमप्रभुमी हागै कली लोत्र पाप्तु। मार लोत्र पाप्तु देंशा हना,

2 “गे शाल्तीएल आ तौ यहूदा रागीम हुकुम पाइब, जेरूब-बाबेल नु यहो-सादाक आ तौ नेल्ल क्येडा ठेयब चढ़ेब यहोसु नु लीशो मुर आन कली

3 “इन दाते डा सु सुमी परमप्रभु यावे आ डोंइती डा खिं आ दारस तनी? मुल एको खिं दोदेंशो तांइसीबा? मार, एको मदारशो तांइसीबा? दे हिल्लो पावो” देंत। एजा ३:१२

4 मिनु मुर नेल्ल आन परमप्रभु यावेमी “जेरूब-बाबेल, महिनो। यहो-सादाक आ तौ नेल्ल क्येडा ठेयब चढ़ेब यहोसु गे यो महिनो। मिनु मेकेर डा मुर नेल्ल महिनीन। गेय पचा गोने। मारदे हना गो गेपुकी नु बाकनुड।

5 गेपुकी इजीप्त रागी रे पा यूशा पिनीनु, गेपुकी नु कबल का पाता। आं सोक्त गेपुकी नु बाकब, दे कबल पाता। मोपतीके महिनीन” दे मुर नेल्ल आन परमप्रभु यावेमी देंत। प्रस्थान १९:५; जकरिया ४:६

6 मिनु मुर नेल्ल आन परमप्रभु यावेमी “मुल इच्का नोले गो लेंशा सरीड, रागी, समुन्द्र नु गोरशो रागी कली हिम्नुड। हिबू १२:२६

7 गो रागी रागी डा मुर आन कली हिम्नुड। मिनु रागी रागी डा शोंप नेल्ल एकेर चाक्नीम। मिनु गो एको खिं कली आं दारसीम प्रिनुड।

8 सुन चांदी नेल्ल आं के बाकब।

9 मोपतीके एको खिं आ मुल डा दारस क्येडा नोले डा दारस शुश रिम्शो दुम्ब। मिनु एकेर आसीक शुश गेनुडमी” दे मुर नेल्ल आन परमप्रभु यावेमी देंत।

### परमप्रभुम आसीक गेशो

10 पिप दारामी सासन पशो बर्स निकशी ९ महिना २४ नाक्तीमी परमप्रभु यावेमी आ लोत्र पाइब हागै कली लोत्र पाप्तु।

11 मिनु हागैमी “मुर नेल्ल आन परमप्रभु यावेमी मार देंत देंशा हना ‘चढ़ेबपुकीम मार देंबाक्मा, दे हिल्लो पावो” देंत।

12 मिनु हग्गाइम “सुइ मुरुमी किप्शुरम पोल्टो पा चढ़ेशो श्ये कुरशो बाक्त हना नु मेको आ किप्शुर आ सुरमी शोब्ले, खाड, अङ्गुर शांब, तेल नु अरु मारेइ जचा थोत्रक थिप्तु हना, मेको चोत्रखो दुम्नीमी?” दे हिल्लो पाप्तु। मिनु चढ़ेबपुकीम “मदुम्नीम” देंतेकम।

13 मिनु हागैमी “बेक्शो मुर थिशा, ग्रांरा दिशो दुम्शो मुरुम मारेइ थोत्रक थिप्तु हना, मेको थोत्रक ग्रांरा दिशो दुम्बा?” दे हिल्लो पाप्तु। मिनु चढ़ेबपुकीमी “मेको ग्रांरा दिशो दुम्ब” देंतेकम। लेवी ५:२; गन्ती १९:२२

14 मिनु हागैमी “परमप्रभु यावेमी मार देंब देंशा हना ‘आं डोंइती बाक्शो एको रागी डा मुरपुकी मोदेंशोन बाक्नीम। मेकोपुकीम मार मार पाइनीमी, मार मार चढ़ेनीमी मेको नेल्ल ग्रांरा दिशो बाकब’ देंशो बाकब” देंत। एजा ४:१-३

### मुर आन थु बारपाइश्शो

15 मिनु परमप्रभुमी “गे मुलाक्त डा मेरे मार दुम्बा, मेको रिम्शो पा मिम्तीन। परमप्रभु यावे आ खिं सेल्शोनु, फुल्लु तार फुल्लु वोइशशा गारो प्रोव्रचा क्येडा डोंडती दोदेशो बाक्मे, मेको मिम्तीन।

16 गे दोदेशो बाक्नी? गे २० सेआह बाक्ब, दे मिम्ताक्नी हना, मेकेर १० सेआह ला बाक्ब। अडगुर खाक्शा, ५० गर रस ताप्नुड, दे मिम्ताक्नी हना, २० गर ला दुम्ब। सेआह का ७ लिटर खोदेशो बाक्ब। गर कली हिन यो देंनीम। हिन का ६,५ लिटर बाक्ब। हागै १:१६

17 गो इन कली नु इन रूम खुम्शो मारेड मारेड खतम सेल्ता। मेको सोवपाइक्ब रोड, बुंखी डाइक्तीक रोड नु मुप्सीम खतम सेल्ता। मो हना यो गे आं गे मलेन्नी। हागै १:११

18 मुल ९ महिना २४ नाक्ती, परमप्रभु यावे आ खिं डा जग वोइशशो नाक्त रे मार दुम्बा, मेको कोव्रडीन।

19 मार, गे नु वांचेर बाक्मे? अडगुर बोट, फोव्रशी रवा, अनार नु तेल रवामी मुल सम्म फल मसिश्शो बाक्मा? मुलाक्त डा मेरे गो इन कली आसीक गेनन्नी” दे परमप्रभु यावेमी देंत।

### परमप्रभु आ लोव्र

20 मिनु ९ महिना डा २४ नाक्ती परमप्रभु यावेमी लेंशा हागै कली लोव्र पाप्नु।

21 मार लोव्र पाप्नु देंशा हना “गे यहूदा रागीम हुकुम पाइब जेरूब-बाबेल कली ‘गो सरीड नु रागी हिम्चा चिक्शो बाक्नुड।

22 गो पिप आन राज्य खतम पोक्नुड। गो रागी रागी डा राज्य थुम्पाइक्चा चिक्शो बाक्नुड। गो बग्गी नु बग्गी डोइक्ब आन कली थिप्पाइक्नुडमी। शारा नु शारा डोइक्बपुकी आंम लोक्ब आन तरवारम क्योरचा पुंइसीनीम’ देनो” देंत।

23 मिनु मुर नेल्ल आन परमप्रभु यावेमी “मेको नाक्त शाल्तीएल आ तौ, आं गेय पाइब, जेरूब-बाबेल गो इ कली छाप पाइशशो औंठी खोदेशो सेल्नन। मारदे हना गो इ कली योव्रशो बाक्नुड” दे मुर नेल्ल आन परमप्रभु यावेमी देंत। जकरिया ४:६-७

## जकरिया

**ब्रेक्ब मुर:** जकरिया बेरेक्याह आ तौ, इददो आ चच बाक्त। इददो चढेब आ खिं डा ठेयब मुर बाक्त। जकरिया यहूदीपुकी ग्याइश्शा लाइक्चा पुंडसीमानु, बेबीलोनम जरमेशो बाक्त। डोंइती यरूसलेम लेप्ब चढेब आन दातेमी मेको यो बाक्त। एको किताब ब्रेक्ब परमप्रभु यावे आ लोत्र पाइब जकरिया बाक्ब।

**गेना ब्रेक्शो:** ५२०-५१८ बि. सी. पिप दाराम सासन पशो बर्स निक्शी दुम्मेनु, परमप्रभु यावे आ लोत्र पाइब जकरियामी गेय पशो बाक्त। मेना परमप्रभु यावे आ लोत्र पाइब हाग्गेम यो लोत्र पशो बाक्त।

**मार ब्रेक्शो:** जकरियामी मुर आन शुश श्येत जची ना मेको आन कली थुं बारपाइक्तीक लोत्र पवा बाक्त। मेकोमी मस्सीह जाक्ब, दे परमप्रभु यावे आ लोत्र ब्रेक्शो बाक्ब। मस्सीह आ परबम:

१. मस्सीह गधा आ चाइक्ब डोइश्शा यरूसलेम ओत्रब जकरिया ९:९; मत्ती २१:५
२. मस्सीह ३० ओटा चांदी के शेकेलम लेयचा पुंडसीब जकरिया ११:१२; मत्ती २६:१५
३. मेको क्येटीमी मार पाइनीम जकरिया ११:१३; मत्ती २७:९-१०
४. मस्सीह बेक्शो जकरिया ११:-; १३:७; यूहन्ना १०:११-१८
५. थमा सुइक्ब ब्रशो जकरिया १३:७; मत्ती २६:३१; जकरिया १२:१०; यूहन्ना १९:३७

परमप्रभु गे लेतीन, दे अरेशो

१ पिप दारामी सासन पशो बर्स का ८ महिना दुम्मेनु, परमप्रभु यावेमी इददो आ चच, बेरेक्याह आ तौ परमप्रभु यावे आ लोत्र पाइब जकरिया कली लोत्र पाप्नु। परमप्रभु यावेमी मार लोत्र पाप्नु देश हना, एज्रा ५:१

२ “परमप्रभु यावे इन किकी पिपी आन परबम शुश गाइक्ताक्व।

३ मोपतीके मुर नेल्ल आन परमप्रभु यावेमी मुर आन कली मार दैत देश हना ‘आं गे लेतीन। मिनु गो इन कली कोत्रनुड। मलाकी ३:७; याकूब ४:८

४ साइ डा आं लोत्र पाइबपुकीमी इन किकी पिपी आन कली लोत्र पाप्तेक्म। मेकोपुकीमी मुर नेल्ल आन परमप्रभु यावेमी इन कली मार लोत्र पाप्नु देश हना इन मरिम्शो लां रे नु इन मरिम्शो पतीके रे परमप्रभु आ लां गे लेतीन, दे लोत्र पाप्तेक्म। तन्न इन किकी पिपीमी आं लोत्र मनेंथु मटीम। गेपुकी मेको आन खोदेशो मपने। येरमीया ३:१२; इजीकीएल ३३:११

५ इन किकी पिपी ते बाक्नीमी? आं लोत्र पाइबपुकी गेना हना यो ब्रोंइशा बाक्नीमी डा?

६ तन्न गो आं गेय पाइब, आं लोत्र पाइब आन कली पशो लोत्र नु आं फुल्लुम मुशा ब्रेक्शो लोत्र इन किकी पिपी आन पाला रे मुल सम्म मबाक्म डा?’ मिनु मेकोपुकी परमप्रभु यावे गे लेत्चा माल्शा, मेकोपुकीमी ‘मुर नेल्ल आन परमप्रभु यावेमी आंइ मरिम्शो लां नु आंइ मरिम्शो पशो आ परबम आ देशो खोदेशो पा पाप्नु’ दैतेक्म” दे मुर नेल्ल आन परमप्रभु यावेमी दैत।

लल शारा डोइक्ब

७ मिनु पिप दारामी सासन पशो बर्स निक्शी, शेबात माइश्शो ११ महिना डा २४ नाक्ती इददो आ चच, बेरेक्याह आ तौ जकरिया, परमप्रभु यावे आ लोत्र पाइब आ बाक्तीकेमी परमप्रभु यावे आ लोत्र जाक्त।

८ मिनु जकरियामी “गो नाक्दो लल शारा डोइक्ब का गाक्शो ताता। मेको दिंममी बाक्शो मूरे रवा आन दातेमी दिक्शा राप्शा बाक्शो बाक्त। मिनु मेको आ नोले अरु लल, खाइरो नु बुश शारापुकी राप्शो बाक्तेक्म। जकरिया ६:१-८

९ मिनु गो नु लोत्र पाइब, परमप्रभु यावे आ स्वर्ग डा गेय पाइब कली ‘आं प्रभु, मेको मार कली नमी?’ दे हिल्लो पाता। मिनु मेकोमी ‘एको मार कली नमी, दे गो इ कली कोइनन’ दैत।

१० मिनु नोले मूरे रवा आन दातेमी राप्शा बाक्ब मुरुमी लोत्र लेशशा ‘परमप्रभु यावेमी एको आन कली रागी नेल्ल हिरशा कोत्रचा कली सोइक्ताक्व’ दैत।

11 मिनू नोले शारा डोइक्बपुकीमी मूरे रवा आन दातेमी बाक्ब परमप्रभु यावे आ स्वर्ग डा गेय पाइब कली 'गो रागी नेल्ल हिरशा कोव्रतक। मिनू रागी नेल्ल डा मुर सिक्सी पा नाइश्शा बाक्शो बाक्तेक्म' देंतेक्म।

12 मिनू परमप्रभु यावे आ स्वर्ग डा गेय पाइबमी 'मुर नेल्ल आन परमप्रभु यावे, गे गेना सम्म यरूसलेम नु यहूदा सहर डा मुर आन कली शिशी मपाइनीनी? गे मेको आन कली मुल रे ७० बर्स सम्म गाइक्ना गाइक्न बाक्शो बाक्तीनी' ” देंत। भजन संग्रह १०२:१४; दानीएल ६:२

13 मिनू परमप्रभु यावेमी गो नु लोव्र पाइब, आ स्वर्ग डा गेय पाइब कली रिम्शो नु थुं बारपाइक्तीक लोव्र पाप्नु।

14 मिनू स्वर्ग डा गेय पाइबमी आं कली “परमप्रभु आ लोव्र नेल्ल आन कली नेंपतो। मिनू मुर नेल्ल आन परमप्रभु यावेमी 'गो यरूसलेम नु सियोन कली शुश रुश पशो बाक्नुड।

15 रिम्शो पा बाक्ब रागी रागी डा मुर आन कली तथा शुश गाइश्शो बाक्नुड। गो डोंइती इच्का ला गाइक्ताक्ड। मिनू मुरपुकीमी तेम्शा मरिम्शो पचा गोम्तेक्म' देंत। येरमीया ४७:६

16 मोपतीके परमप्रभु यावेमी मार देंत, देशा हना 'गो शिशी पा यरूसलेम लेत्ती। मेकेर आं खिं लेंशा सेल्चा माल्नीम। मिनू यरूसलेम नेल्लेमी पुक्तीक डोरी कीचा माल्नीम' दे मुर नेल्ल आन परमप्रभु यावेमी देंत। जकरिया ८:३

17 मिनू मुर नेल्ल आन परमप्रभु यावेमी मार देंत, देशा हना 'आं सहरपुकी लेंशा शुश सोशो बोशो दुम्चा माल्नीम। परमप्रभु यावेमी सियोन कली लेम्शा शिशी पाइब। मिनू यरूसलेम कली योव्रब' ” देंत। यसैया ४०:१-२; यसैया १४:१

#### ४ ओटा ग्रोव्र नु ४ जना तुप्तील

18 मिनू इर गे कोव्रडुनु, ४ ओटा ग्रोव्र ताता।

19 मिनू गो नु लोव्र पाइब, स्वर्ग डा गेय पाइब कली “एको मार में?” दे हिल्लो पाता। मिनू मेकोमी “एको ग्रोव्रपुकीमी यहूदा, इस्राएल नु यरूसलेम डा मुर आन कली एर ओंथ फ्राम्तेक्म” देंत।

20 मिनू नोले परमप्रभु यावेमी आं कली ४ जना तुप्तील कोंइताक्यी।

21 मिनू गो “एको मार पचा कली जाक्मा?” दे हिल्लो पाता। मिनू मेकोमी “मेको ग्रोव्रपुकीमी यहूदा कली मबोक्चा डा पा खोल्लो बाक्तेक्म। मिनू मेको तुप्तीलपुकी रागी रागी डा मुर आन कली ब्रपाइक्ब ग्रोव्र खोदेशो टेयब हुकुम पाइब मुर आन कली श्येत गेशा साइक्चा कली जाक्शो बाक्तेक्म। मारदे हना मेकोपुकीमी यहूदा डा मुर आन कली फ्रना फ्रन बाक्तेक्म” देंत।

## 2

### पुक्तीक डोरी

1 मिनू गो इर कोव्रडुनु, पुक्तीक डोरी शेशो मुर का आं डोंइती राप्शो ताता। इजीकीएल ४०:३

2 मिनू गो मेको कली “गे ते गाक्नी?” दे हिल्लो पाता। मिनू मेकोमी आं कली “यरूसलेम पुक्शा, मेको दोशो दुइश्शो नु दोशो ब्रेम्शो बाक्मे, मेको कोव्रथ लती” दे माइक्ती।

3 मिनू मेको गो नु लोव्र पाइब, स्वर्ग डा गेय पाइब जाक्त। मिनू अर्को स्वर्ग डा गेय पाइब मेको कली गुम्थ जाक्त। इजीकीएल ३८:११

4 मिनू मेकोमी “दोरशा लशा मेको ठिटा कली 'यरूसलेममी लेंशा शुश मुर बाक्चा माल्नीम। मुर नु बी ब्यक्, क्यारश भेडा शुश दुम्तीके यरूसलेम गारो मपाइश्शो गाउं खोदेशो दुम्ब।

5 मिनू गो मेको आ एर ओंथ मी के गारो दुम्नुड। मिनू गो मेको आ आगा डा छेड्छेड दुम्नुड' दे परमप्रभु यावेमी देंत, देनो” देंत। जकरिया ९:८

### इस्राएली लेशशा जाक्चा माल्लो

6 परमप्रभु यावेमी “जाक्कीन जाक्कीन, उत्तर डा रागी रे प्रोक्शा जाक्कीन। मारदे हना गो इन कली एर ओंथ डा फशेमी खोदेशो पा फ्राता” दे परमप्रभु यावेमी देंत।

7 मेकोमी आं कली “आबी, सियोन, गे बेबीलोन डा मुर आन दाते रे बोक्शा, प्रोक्कीन।

8 मारदे हना मुर नेल्ल आन परमप्रभु यावेमी इन कली रोइक्व रागी रागी डा मुर आन परबम मार दैत देशा हना ‘सुमी इन कली थीबा, मेकोमी आं मिक्च आ क्रिक्बील थीब’ दैत। ब्यवस्था ३२:१०

9 मुल नेनीन, गो आं गुड मेको आन परबम क्युकनुड। मिनु मेको आन वाइलमी मेको आन कली रोइक्नीम। मिनु गेपुकीमी मुर नेल्ल आन परमप्रभु यावेमी आं कली सोइश्शो बाक्व, दे तुइक्नीनी। ब्यवस्था ३२:१०

10 सियोन आ तमी, ग्येरशा सोम्शा कुम्सो पावो। मारदे हना गो इन दातेमी बाक्थ जाक्नुड।

11 मेको नाक्त शुश रागी डा मुरपुकी परमप्रभु यावे नु गारचा कली जाक्नीम। मेको नाक्ती मेको आं मुर दुम्नीम। मिनु गो गे इन दातेमी बाक्नुड। मिनु गेपुकीमी मुर नेल्ल आन परमप्रभु यावेमी आं कली इन कली लोत्र पथ सोइश्शो बाक्व, दे तुइक्नीनी” दे परमप्रभु यावेमी दैत। यसैया ११:१०

12 परमप्रभु यावेमी यहूदा रागी कली आ के सेल्ब। मिनु यरूसलेम कली लेंशा योत्रब। जकरिया १:१७

13 रागी डा मुर नेल्ल परमप्रभु यावे आ डोंइती सिकसी पा बाक्कीन। मारदे हना मेको आ बाक्तीक रे पा गूशा जाक्शो बाक्व। हबकुक् २:२०

### 3

#### नेल्ल क्येडा ठेयब चढेब यहोसु

1 मिनु परमप्रभु यावे आ स्वर्ग डा गेय पाइबमी नेल्ल क्येडा ठेयब चढेब यहोसु कोंइताक्यी। मेको परमप्रभु यावे आ स्वर्ग डा गेय पाइब आ डोंइती राष्शो बाक्त। मिनु सैतान मेको कली दोस गेचा कली आ ग्युरा गे राष्शो बाक्त। हागै १:१; अय्युब १:९; प्रकाश १२:१०

2 मिनु परमप्रभु यावेमी सैतान कली “सैतान, परमप्रभु यावेमी इ कली हुइक्व। यरूसलेम कली योत्रब परमप्रभु यावेमी इ कली हुइक्व। मार, एको मुर मी रे पा गुंइशो बुल्ली खोदेशो ममाइ डा?” दैत। यहूदा :९

3 यहोसु ग्रांरा दिशो लुम्सीशो वा फेक्शा, स्वर्ग डा गेय पाइब आ डोंइती राष्शो बाक्त।

4 मिनु मेको स्वर्ग डा गेय पाइबमी आ डोंइती बाक्व आन कली “मेको आ ग्रांरा दिशो लुम्सीशो वा पुइक्तीन” दैत। मिनु मेकोमी यहोसु कली “गो इ मरिष्शो पशो नेल्ल क्याम्ताक्व। गो इ कली रिष्शो वा फेक्वन” दैत। यसैया ६:७; यसैया ६१:३

5 मिनु गो “मेको आ पियामी रिष्शो गुप्तीक का गुप्तीन” दैती। मिनु मेकोपुकीमी मेको कली रिष्शो गुप्तीके गुप्शा, रिष्शो वा फेक्ताक्म। मिनु परमप्रभु यावे आ स्वर्ग डा गेय पाइब आ नेक्था राष्शा बाक्त। प्रस्थान २८:३९

6 मिनु नोले परमप्रभु यावे आ स्वर्ग डा गेय पाइबमी यहोसु कली

7 “मुर नेल्ल आन परमप्रभु यावेमी मार दैत देशा हना ‘गे आं लांमी गाक्ते नु इ कली देशो लोत्र टिप्तीवी हना, गे आं खिं नु आं लाडुगा नेल्ल कोत्रब दुम्नेवे। मिनु एकेर राष्शा बाक्व आन दातेमी आं डोंइती जाक्ने चाप्नेवे।

8 यहोसु, नेल्ल क्येडा ठेयब चढेब नु इ नेक्था बाक्व इ खोदेशो गेय पाइबपुकी नोफा दाइश्शा नेनीन। गो नोले आं गेय पाइब, राशी माइश्शो चाक्नुड, मेकोपुकी मेको आ परबम चिन्ड बाक्नीम। यसैया ८:१८; जकरिया ६:१२; येरमीया २३:५; येरमीया ३३:१५

9 मारदे हना गो यहोसु आ डोंइती फुल्लु का वोइक्ता। मेको आ तारी ७ ओटा मिक्च बाक्नीम। मिनु गो फुल्लु तारी मेको आ ब्रेक्स मुशा ब्रेक्नुड। मिनु गो काबुमीन मेको रागी डा मुर आन दोस नेल्ल क्याम्नुड। प्रस्थान ३९:६-७; जकरिया ४:१०; प्रकाश ५:६

10 मेको नाक्ती गे नेल्लेमी आंम आंमा ब्रेम्मुशा अडगुर नु फोत्रशी आ पुंमी ग्येरशा गुम्नीनी’ दे मुर नेल्ल आन परमप्रभु यावेमी दैत” दैत। १राजा ५:५; मीका ४:४

## 4

## सुन के बत्ती दातीक

1 मिनु गो नु लोत्र पाइब, स्वर्ग डा गेय पाइब लेंशा जाकत। मेकोमी आं कली मुर कली निन्द्रा रे पा पोक्शो खोदेशो पा सेपाइक्ती।

2 मिनु मेकोमी आं कली “गे मार तवी?” दे हिल्लो पती। मिनु गो “सुन के बत्ती दातीक ताता। मेको आ तारी बोस का बाकत। मेको तारी ७ ओटा बत्ती बाक्तेकम। मेको बत्ती नेल्लेमी दातीक सल्दो वोइश्शो बाक्तेकम। येरमीया १:११-१३; आमोस ८:२; प्रस्थान २५:३१-४०

3 मिनु मेको आ नेक्था तेल रवा निक्शी, का ग्युरा गे नु का पेरा गे बाक्ताक्स” देती।

4 मिनु गो नु लोत्र पाइब, परमप्रभु यावे आ स्वर्ग डा गेय पाइब कली “आं प्रभु, मेको मार नसी?” दे हिल्लो पाता।

5 मिनु मेको गो नु लोत्र पाइब, परमप्रभु यावे आ स्वर्ग डा गेय पाइबमी “मेको मार नसी, गे मतुइक्नेवे?” दैत। मिनु गो “आं प्रभु, मतुइक्नुड” देती।

6 मिनु मेकोमी आं कली “एको परमप्रभु यावेमी जेरूब-बाबेल कली पशो लोत्र बाक्ब। ‘बोलम ममाइ, सक्तिमी यो ममाइ, तन्न आं सोक्तीमी पाइनुड” दे मुर नेल्ल आन परमप्रभु यावेमी दैत।

7 ठेयब डांडा गे मार नवे डा? जेरूब-बाबेल आ डोंइती गे दिंम दुग्चा माल्नेवे। मेकोमी परमप्रभु यावे आ खिं डा नोले डा फुल्लु वोदानु, मुर नेल्लेमी ठेयब सेंदा पा ‘रिम्शो दुम्त, रिम्शो दुम्त’ दे ठेयब सेंदा पा देनीम” दैत। भजन संग्रह १२२:६

8 मिनु परमप्रभु यावेमी आं कली लोत्र पाप्तु। मार लोत्र पाप्तु देशा हना

9 “जेरूब-बाबेलमी एको परमप्रभु यावे आ खिं डा जग फुल्लु वोइश्शो बाक्ब। मिनु मेकोमीन मेको खिं सेलने थुम्ब। मिनु मुर नेल्ल आन परमप्रभु यावेमी आं कली इन कली लोत्र पथ सोइश्शो बाक्ब, दे तुइक्नीनी” देती। एज्रा ३:८; एज्रा ६:१४-१६; जकरिया २:१३, १५

10 मिनु “सु आइक्च गेय गोशो नाक्ती आइक्च सेल्बा? नोले मेकोपुकीमी जेरूब-बाबेल आ गुइमी गारो थाप्तीक श्येले तशा, ग्येरसीनीम। हागै २:३; जकरिया ४:७ मेको फुल्लु डा ७ ओटा मिक्च परमप्रभु यावे आ मिक्च बाक्नीम। मेको मिक्चीमी रागी नेल्ल कोइश्शो बाक्नीम” दे परमप्रभु आ लोत्र बाक्ब।

## तेल रवा निक्शी

11 मिनु नोले गो मेको कली “एको बत्ती दातीक आ ग्युरा नु पेरा गे बाक्शो तेल रवा निक्शी मार में?” दे हिल्लो पाता।

12 मिनु लेंशा मेको कली “मेको सुन के तेल लुक्तीके निक्शीमी तेल लुक्ना लुक्न पशो, एको तेल रवा निक्शी आस राशी मार में?” दे हिल्लो पाता।

13 मिनु मेकोमी “एको मार बाक्बा, दे मतुइक्नेवे?” दे हिल्लो पती। मिनु गो “आं प्रभु, मतुइक्नुड” देती।

14 मिनु मेकोमी “मेको रागी नेल्ल डा परमप्रभु यावे आ डोंइती राप्चा कली तेल लुक्चा पुंडसीशो बाक्नीसी” दैत। जकरिया ६:५; प्रकाश ११:४

## 5

## तोल्शा प्राक्शो ब्रेक्स

1 मिनु गो इर गे कोत्रडुनु, प्राक्सीशो ब्रेक्स का बेरशो ताता।

2 मिनु मेकोमी आं कली “गे मार तवी?” दे हिल्लो पती। मिनु गो “२० कुबीत लाइश्शो नु १० कुबीत ब्रेम्शो तोल्शो प्राक्सीशो ब्रेक्स बेरशो ताता” देती। कुबीत का ०.५ मिटर बाक्ब।

3 मिनु नोले मेकोमी आं कली “एको रागी नेल्ल कली जाक्चशो सराप बाक्ब। मेको तोल्शा प्राक्शो ब्रेक्स निम्फा गे ब्रेक्सीशो बाक्ब। का गे खुइ आन परबम ब्रेक्सीशो बाक्ब। मारदे हना मेको मुल सम्म सजाइ मतशो बाक्तेकम। अर्को गे जोल पा कसम जाइब आन परबम ब्रेक्सीशो बाक्ब। मारदे हना मेको यो मुल सम्म सजाइ मतशो बाक्तेकम” दैत।



4 मिनु मुर नेल्ल आन परमप्रभु यावेमी “गो मेको ब्रेक्स सोडक्ताकड। मिनु मेको खुड नु आं नेंमी जोल पा सांकछी बाकब आन खिंमी ओव्रब। मेकेर बाकशा, खिं खतम सेल्शा, शी फुल्लु का यो मलीपाडकब” देंत।

### डालोम निश्शो मीश मुर

5 मिनु गो नु लोव्र पाडब, स्वर्ग डा गेय पाडबमी आं नेक्था जाकशा “हरी इर कोव्रडो। मार ग्रूमे?” देंत।

6 मिनु गो “मिरी मार में?” दे हिल्लो पाता। मिनु मेकोमी “मेकेर डालो का गूत” देंत। मिनु मेकोमी “एको रागी नेल्ल डा मुर आन दोस बाकब” देंत।

7 नोले हेल्शो सिसा के सुम्तीक रोक्साकव। मिनु मेको डालोम मीश मुर का निश्शा बाकशो ताता।

8 मिनु मेकोमी “परमप्रभु यावे आ अरेशो मटितीके एकोन बाकब” देंत। मिनु मेकोमी मेको मीश मुर कली डालो आगा नेप्शा, हेल्शो सिसा के सुम्तीकेमी सुम्तु।

9 मिनु इर कोव्रडुनु, मीश मुर निक्शी पिशो तातासी। मेको आस फ्रांमी फश बाकत। मेको आस फ्रां सारस के खोदेशो बाकत। मेको निक्शीमी मेको डालो कली सरीड नु रागी आस दातेमी क्युकशा लाइक्ताक्स।

10 मिनु गो नु लोव्र पाडब, स्वर्ग डा गेय पाडब कली “मेको निक्शीमी मेको डालो ते लत्से?” दे हिल्लो पाता। उत्पत्ती ११:२

11 मिनु मेकोमी “बेबीलोन डा शिनार माइक्तीकेमी मेको कली खिं का सेल्चा चिकशो बाकब। मिनु सेल्ने थुम्मे नोले मेको डालो कली मेकेर आ बाक्तीकेम वोडक्नीम” दे माइक्ती।

## 6

### ४ ओटा बग्गी

1 मिनु गो लेंशा इर गे कोव्रडुनु आं डोंइती डांडा आस दाते रे ४ ओटा बग्गी यिशो तातामी। मेको डांडा कांसा के बाक्ताक्स। प्रकाश ६:१-८; जकरिया १:८

2 डोंइती डा बग्गी लल शारापुकीमी कीशो बाक्तेक्म। मेको आ नोले डा बग्गी क्येर शारापुकीमी कीशो बाक्तेक्म।

3 मेको आ नोले डा बग्गी बुश शारापुकीमी कीशो बाक्तेक्म। मिनु नेल्ल क्येडा नोले डा बग्गी पाडग्रे शारापुकीमी कीशो बाक्तेक्म। प्रकाश ६:१-८; जकरिया १:८

4 मिनु गो नु लोव्र पाडब, स्वर्ग डा गेय पाडब कली “आं प्रभु, एको मार नमी?” दे हिल्लो पाता।

5 मिनु मेको परमप्रभु यावे आ स्वर्ग डा गेय पाडबमी आं कली “एको स्वर्ग डा ४ ओटा फश नम। एको गूशा लचा कली रागी नेल्ल डा परमप्रभु यावे आ डोंइती जाक्तेक्म। जकरिया ४:१४

6 क्येर शारा पाइश्शो बग्गी उत्तर रागी गे लाइब। बुश शारा पाइश्शो बग्गी पच्छिम रागी गे लाइब। पाडग्रे शारा पाइश्शो बग्गी दक्खिन रागी गे लाइब” देंत।

7 मेको शारा गूशा रागी कोव्रथ लचा कली चुइश्शो बाक्तेक्म। मिनु मेकोमी “रागी नेल्ल कोव्रथ लने” दे अरेप्टु। मिनु मेकोपुकी रागी कोव्रथ लाम्तेक्म। जकरिया १:१०

8 मिनु नोले मेकोमी टेयब सेंदा पा आं कली “कोव्रडो, मेको उत्तर रागी गे लाइबमी आं सोक्त नाइक्पाइक्तेक्म” देंत।

### यहोसु आ सिरपेच

9 मिनु परमप्रभु यावेमी आं कली लोव्र पाप्टु।

10 मार लोव्र पाप्टु देशा हना “ग्याइश्शा लाइक्का पुंडसीशो बेबीलोन रे जाकशो हेल्दाइ तोबीयाह नु येदायाह रे सुन चांदी पोक्को। मिनु मेको नाक्ती सेफन्याह आ तौ योसीयाह आ खिं लावो।

11 मेको सुन नु चांदी रे पा सिरपेच का सेलो। मिनु मेको सिरपेच लाइश्शा, यहो-सादाक आ तौ नेल्ल क्येडा टेयब चढेब यहोसु आ पियामी गुप्टो। जकरिया ३:८

12 मिनु मेको कली मुर नेल्ल आन परमप्रभु यावेमी मार दंत देशा हना 'मेकेर मुर का बाक्ब। मेको आ नें राशी बाक्ब। मेको राशी आ बाक्तीकेमी बारशा, परमप्रभु यावे आ खिं सेल्चा माल्ब।

13 मेकोमीन परमप्रभु यावे आ खिं सेल्चा माल्ब। मेको पिप आ मान तशा, शुश ग्योम्सीशो बाक्ब। मेको आ ठेयब नित्तीकेमी निशशा सासन पाडब। मेको आ नित्तीकेमी आ ग्युरा गे चढेब का बाक्ब। मेको निक्शी दुशा गारशा गेय पाइनीसी। भजन संग्रह ११०:४

14 मिनु मेको सिरपेच हेल्लेदाइ, तोबीयाह, येदायाह नु सेफन्याह आ तौ योसीयाह मिम्शा, परमप्रभु यावे आ खिंमी वोइक्चा माल्नीम।

15 शुश डोन बाक्ब मुरपुकी यो परमप्रभु यावे आ खिं सेल्चा कली वारच पथ जाक्नीम। मिनु गेपुकीमी मुर नेल्ल आन परमप्रभु यावेमी आं कली इन कली लोत्र पथ सोइशशो बाक्ब, दे तुइक्नीनी। गे इन थुं नेल्लेमी परमप्रभु यावे, इन परमप्रभु आ देशो टीतीनी हना, मोदेशो दुम्ब” दंत। यसैया ६०:१०

## 7

### माइजा बाक्चा आ पबर्म लोत्र

1 पिप दारामी सासन पशो ४ बर्स, किस्लेव माइशशो ९ महिना ४ नाक्त परमप्रभु यावेमी जकरिया कली लोत्र पाप्तु।

2 मार लोत्र पाप्तु देशा हना “बथेल डा मुरपुकीमी शरेशेर, रेगेम-मेलेक नु मेकेर डा मुर आन कली परमप्रभु यावे आ शिशी पुंड्या कली सोइशशो बाक्तेक्म।

3 मिनु मुर नेल्ल आन परमप्रभु यावे आ खिंमी चढेब नु परमप्रभु यावे आ लोत्र पाइब आन कली ‘गेपुकी मुल सम्म शुश बर्स डोंइती रे पशो खोदेशो पा ५ महिनामी रोंका पा माइजा बाक्चा माल्नीकी डा?’ दे हिल्लो पचा कली सोइशशो बाक्तेक्म” दंत। जकरिया ८:१९; २राजा २५:८-९; येरमीया ५२:१२-१३

4 मिनु मुर नेल्ल आन परमप्रभु यावेमी मार दंत देशा हना

5 “रागी डा मुर नेल्ल नु चढेब आन कली ‘गेपुकीमी मेको ७० बर्स डा ५ नु ७ महिनामी रोंका पा माइजा बाक्तीनी। मार गे मेको आं पबर्म पनी डा? यसैया ५८:५

6 मिनु गे जशा, ब्वशा तूतीनी हना, गे आंम इन पबर्म मपाइनीनी डा?’ देनो” दंत।

### इस्राएली आन कली निसाफ

7 परमप्रभुमी “यरूसलेममी शुश मुर बाक्शा, एर ओंथ डा सहर नेल्ल रिम्शो नु सोशो बोशो बाक्मेनु, नेगेब नु पच्छिम डा शेफेलाह नेल्ल रिम्शो पा बाक्मानु, डोंइती डा आं लोत्र पाइबपुकीमी मुर आन कली देशो परमप्रभु यावे आ पशो लोत्र एकोन ममाइ डा?” दंत।

8 मिनु परमप्रभु यावेमी लेंशा जकरिया कली लोत्र पाप्तु।

9 मिनु मुर नेल्ल आन परमप्रभु यावेमी मार लोत्र पाप्तु देशा हना “ठीक पा निसाफ पने, दाक्मुने नु शिशी पमुने, मीका ६:८

10 वोंइश बेक्शो मीश मुर, रोम रोइक्च, अर्को रागी डा मुर नु पुडुग आन कली मदिपीन। मरिम्शो पमुचा ममिम्तीन। प्रस्थान २२:२०-२१

11 तन्न मेकोपुकीमी एको लोत्र मनेनेम। काइ मटीब दुम्शा, आन नोफा सुम्तेक्म।

12 मेकोपुकीमी परमप्रभु यावे आ अरेशो नु आ लोत्र मनेंचा डा पा आन थुं खकटा सेल्तेक्म। डोंइती मुर नेल्ल आन परमप्रभु यावेमी आ सोक्त रे पा आ अरेशो लोत्र नु मुर आन कली पतीक लोत्र पथ आ लोत्र पाइब आन कली सोइशशो बाक्त। मोपतीके मुर नेल्ल आन परमप्रभु यावे शुश गाइशशो बाक्ब। यसैया ४८:४

13 दोपा मेकोपुकीमी आं लोत्र मनेन्मे, मोपा गो यो मेको आन पुंड्यो लोत्र मनेनुड।

14 मिनु गो मेको आन कली फश गिवारमी खोदेशो पा आन मतुइशशो रागी रागीम फ्रातामी। मोपतीके आन प्रोइशो रागी मुर मबाक्शो दुम्त। मेकेर सुइ मलम। मोदेशो पा रिम्शो रागी खतम दुम्त” दे मुर नेल्ल आन परमप्रभु यावेमी दंत।

## 8

## परमप्रभुमी आ मुर खुषो

- 1 मिनु मुर नेल्ल आन परमप्रभु यावेमी आं कली लोत्र पाप्तु।
- 2 मेकोमी मार लोत्र पाप्तु देशा हना “गो सियोन आ पबर्म शुश रुश पाइनुड। गो मेको आ पबर्म थाम्पा रुश पा गाइशो बाक्नुड” दे परमप्रभु यावेमी देंत। जकरिया १:१४
- 3 परमप्रभु यावेमी “गो सियोनमी जाक्शा, यरूसलेम आ दातेमी बाक्नुड। मिनु यरूसलेम थमा सुइक्चा पुंडसीब सहर दुम्ब। मिनु मुर नेल्ल आन परमप्रभु यावे आ डांडा आंम आ बाक्तीक डांडा दुम्ब” देंत। जकरिया १:१६; यसैया १:२१, २६; भजन संग्रह २:६
- 4 मिनु मुर नेल्ल आन परमप्रभु यावेमी “खूशो खूशोम यरूसलेम डा लांम नित्नीम। शुश बर्स दुम्तीके कोक्के तिकशा बाक्नीम। यसैया ६५:२०
- 5 सहर डा लांमी ग्यारब मीश आल नु वोंडश आलम ब्रीशो बाक्नीम” देंत।
- 6 मुर नेल्ल आन परमप्रभु यावेमी “मेको लीशो मुरपुकीमी मेको थमा सुइक्ने मचाप्तेक्म हना यो, गो मोदेशो पने मचाप्नुडा डा?” देंत। लूका १:३७
- 7 मुर नेल्ल आन परमप्रभु यावेमी मार देंत देशा हना “गो आं मुर आन कली पूर्व डा रागी नु पच्छिम डा रागी रे पा प्रोंडनुडमी।
- 8 मिनु गो मेको आन कली यरूसलेममी बाक्पाइक्चा कली चाक्नुडमी। मेकोपुकी आं मुर दुम्नीम। मिनु गो मेको आन परमप्रभु दुम्नुड। गो मेको आन कली दाक्चा मप्रोंडथु, ठीक पाइनुड” देंत। येरमीया २४:७
- 9 मुर नेल्ल आन परमप्रभु यावेमी मार देंत देशा हना “गेपुकी शुश गेय पने। डोंइती गे आं लोत्र पाइबपुकीम लोत्र पशो नेंतीनी। मेकोपुकी मुर नेल्ल आन परमप्रभु यावे आं खिं लेंशा सेल्ची ना डा जग वोइक्ची ना बाक्तेक्म। यसैया ३५:३
- 10 मेको क्येडा डोंइती मुर आन कली गाल्च मगेमे। बी ब्यफ, क्यारश भेडा आन कली क्येट यो मगेमे। मेको आन जोरी सत्रुमी पतीके आन गेय पथ लने मचाप्शो बाक्तेक्म। मारदे हना गो मुर आन कली साइक्मुपाइक्तामी।
- 11 तन्न मुल रे एको लीशो आन कली डोंइती डा खोदेशो मपाइक्नुडमी” दे मुर नेल्ल आन परमप्रभु यावेमी देंत।
- 12 मेकोमी “मुल थुं नाइक्तीक दुम्शो बाक्ब। अडगुर आ बोटमी रिम्शो फल सिप्ब। रूमी अन्न खेल्ब। सरीड रे सीत यीब। गो मेको नेल्ल लीशो आं मुर आन कली गेनुडमी।
- 13 यहूदा नु इस्त्राएल डा मुरपुकी गे रागी रागी डा मुर आन दातेमी सराप रशो बाक्तीनी। दोपा गेपुकी सराप रनी, मोपा आसीक ताइब दुम्नीनी। महिनीन, बोल्यो दुमीन” देंत। उत्पती १२:२
- 14 मिनु मुर नेल्ल आन परमप्रभु यावेमी “गो मोपा इन किकी पिपी आन कली आं कली गाइक्पाइक्तीके श्येत गेतामी। मिनु गो शिशी मपड।
- 15 गो मुल यरूसलेम नु यहूदा डा मुर आन कली रिम्शो पाइनुड। गेपुकी महिनीन।
- 16 गेपुकीमी मार पचा माल्नीनी देशा हना, गे इन दातेमी थमा लोत्र ला पमुने। इन ठेयब लाप्चोमी जिचा मबोक्चा डा पा थमा नु ठीक निसाफ पने। एफिसी ४:२५
- 17 इन दातेमी थुंम मिम्शा, मरिम्शो मपमुने। जोल पा कसम मजने। मारदे हना मेको नेल्ल गो ग्रान्रा दीनुड” दे परमप्रभु यावेमी देंत। जकरिया ७:१०
- 18 मुर नेल्ल आन परमप्रभु यावेमी आं कली लोत्र पाप्तु।
- 19 मिनु मेकोमी मार देंत देशा हना “४ महिना डा माइजा बाक्तीक, ५, ७ नु १० महिना डा माइजा बाक्तीके, मुल रे यहूदा डा मुर ग्येरशा सोम्शा पतीक नाक्त दुम्चा माल्नीम। मेको ग्येरशा बाक्तीक चाड दुम्चा माल्नीम। मोपतीके गे थमा लोत्र पचा नु थुं नाइक्चा दाक्तीन” दे मुर नेल्ल आन परमप्रभु यावेमी देंत। जकरिया ७:३, ५

### परमप्रभुम श्येत रे प्रोडब

20 मुर नेल्ल आन परमप्रभु यावेमी “शुश सहर डा मुर तेम्शा जाक्नीम।

21 सहर का डा मुरपुकीम अर्को सहर डा मुर आन कली ‘परमप्रभु यावे आ शिशी पुंडथ नु मुर नेल्ल आन परमप्रभु यावे कली माल्थ लने। गो आंमा यो लाइक्नीकी’ देंनीम।

22 शुश मुर नु बोल्यो रागी डा मुरपुकी मुर नेल्ल आन परमप्रभु यावे कली माल्थ, यरूसलेम सहरम जाक्नीम। मेकोपुकीमी परमप्रभु यावे आ शिशी पुंडनीम” देंत।

23 मुर नेल्ल आन परमप्रभु यावेमी मार देंत देंशा हना “मेको नाक्ती रागी रागी डा आन आन लोत्र ब्वाक्ब १० जना मुरपुकीमी यहूदी का आ वा ग्याइशशा ‘गो गे नु लाइनीकी। मारदे हना परमप्रभु यावे गेपुकी नु बाक्ब देंशो नेंशो बाक्नीक’ देंनीम” दे परमप्रभुमी देंत।

## 9

### परमप्रभु आ लोत्र

1 परमप्रभु यावेम हद्राक रागी नु दमस्कस सहर आस पबर्म लोत्र का पशो बाक्त। मारदे हना इस्राएल डा थर नेल्ल नु अर्को रागी डा मुर यो परमप्रभु यावे केन बाक्नीम। यसैया १७:-

2 शुश जोक्ब तुइक्ब बाक्तेकम हना यो, हमार्थ, टायर नु सीदोन सहर आन पबर्म परमप्रभु यावेमी लोत्र पशो बाक्ब। यसैया २३:-; येरमीया ४७:४; इजीकीएल २६:-; इजीकीएल २८:-

3 टायरमी आंम पबर्म बोल्यो दरवार का सेल्शो बाक्ब। मेकोमी फुरक खोदेंशो पा चांदी नु लां मेर डा हिलो खोदेंशो पा सुन तेल्लो बाक्ब।

4 तन्न परमप्रभुमी मेको आ बाक्शो मारेइ मारेइ रोइक्ब। मेको आ शोंप नेल्ल समुन्द्रमी ताइशशा गेब। मिनु मेको मीम ग्रोइशशा, खतम दुम्नीम।

5 मिनु अश्कलोन मेको तशा हिंब। गाजा हिंशा खिंखि पाइब, एक्रोन शुश सुर्ता पा आ आस पशो जाम्शा लाइब। गाजा डा पिप जाम्शा लाइब। अश्कलोनमी मुर मबाक्तीक दुम्ब। येरमीया ४७:-

6 अश्दोद सहरमी खालसीशो मुरपुकी बाक्नीम। मिनु गो पलिस्ती आन ठेयब लेत्तीक खतम पा गेनुड। ब्यवस्था २३:३

7 गो मेको आन शोत्र रे पा हुश नु मेको आन खुइ रे ग्रांग्रा दिचा डा थोत्रक गुंडनुड। लीशो मुरपुकी आंइ परमप्रभु आ मुर दुम्नीम। मेकोपुकी यहूदा आ थर डा मुर खोदेंशो दुम्नीम। एक्रोन डा मुर चहिं यबुसी खोदेंशो दुम्नीम। उत्पत्ती १:४; यहोसु १५:६३; २सामुएल २४:१८

8 मिनु नोले गो आं खिं कली आंमा खाल पाइब खोदेंशो बाक्नुड। मोपा सुइ मुर एर ओंथ गाक्ने मचाणीम। सुइमी आं मुर आन कली लडाइ मतोइनीम। मारदे हना मुल गो आंमान मेको आन कली कोत्रनुड। जकरिया २:९

### सियोन डा पिप जाक्शो

9 सियोन आ तमी, साप्पा ग्येरसो। यरूसलेम आ तमी ग्येरशा ठेयब सेंदा पा ग्रीडो। मारदे हना इ पिप इ बाक्तीकेमी जाक्ना जाक्न बाक्ब। मेको ग्राशा ग्येरसीशा जाक्ब। मेको ब्रेम्शो बाक्ब। मेको गधा तार डोइशशा जाक्ब। गधा आ चाइक्ब तार डोइशशा जाक्ब। सेफन्याह ३:१४; मत्ती २१:९

10 गो एफ्राइम रे पा बग्गीपुकी नु यरूसलेम रे पा लडाइ पाइब शारा लाइक्नुड। लडाइ पाइब आन लिब्रा जिक्ब। मेकोमी रागी रागी डा मुर आन कली थुं नाइशशा बाक्चा गेब। मेकोमी समुन्द्र का रे अर्को समुन्द्र सम्म नु युफ्रेटीस खोला रे रागी डा मुर सम्म सासन पाइब। मीका ५:९

11 गे नु पशो आं हुश आ कबलम पतीके इ चोक्चा पुंडसीशो मुर आन कली ब्वाक्कु मबाक्शो खाल्टा रे गुंडनुडमी। प्रस्थान २४:८; उत्पत्ती ३७:२४

12 आस पा बाक्शो चोक्चा पुंडसीशो मुरपुकी इन बोल्यो ब्रोंइशा बाक्तीके लेशशा लने। गो इन कली इन साम्शो क्येडा निकशी खेयप खोइ शुश गेनुड। जकरिया १०:९; यसैया ६१:७

13 गो यहूदा कली आं लिब्रा खुक्शो खोदेशो पा खुक्नुड। गो एफ्राइम कली मेको आ ब्रा खोदेशो सेल्लुड। सियोन, इ तौ आन कली गो ग्रीस रागी आ तौ आन परबम क्युक्नुड। मिनु गो इ कली बोल्यो लडाइ पाइब आ तरवार खोदेशो सेल्लुड।

14 मिनु नोले परमप्रभु यावे इन क्येडा इर गूब। मेको आ ब्रा चिला आप्शो खोदेशो पा बेरनीम। परमप्रभु, परमप्रभु यावेमी तुराही ताप्ब। मिनु दक्खिन डा फश गिवारम गाक्शा लाइब।

15 मुर नेल्ल आन परमप्रभु यावेमी मेको आन कली राइशशा प्रॉइब। मेकोमी आन जोरी सत्रु आन कली खतम पोक्ब। मेकोपुकीमी आन हुश अडगुर शांबु खोदेशो पा तूनीम। मेकोपुकी चढेतीक डा हुश कुर पतीक बोस खोदेशो पा ब्रीशो बाक्नीम। चढेतीक आ एर ओंथ कुना कुना मेर फ्रशो हुश खोदेशो बाक्नीम।

16 मेको नाक्ती परमप्रभु यावे, आन परमप्रभुमी मेको आन कली श्येत रे प्रॉइब। मारदे हना मेकोपुकी आ बगाल खोदेशो बाक्नीम। मेको सिरपेच डा हीरा खोदेशो पा ब्राइनीम। मेकोपुकी परमप्रभु यावे, आन परमप्रभु आ रागीम हीरा खोदेशो पा ब्राइनीम।

17 मेको आ दाक्तीके नु आ शिशी पतीके थम ठेयब बाक्ब। वॉइश आल ग्रेल्लो अन्न खोदेशो पा शुश दुम्नीम। मीश आल नक अडगुर शांबु खोदेशो पा दारशो दुम्नीम।

## 10

### परमप्रभु यावे कली पुनीन

1 परमप्रभु यावे कली नोले डा रेउ पुनीन। परमप्रभु यावे गोस्स नु फश सेल्ब बाक्ब। मिनु इन कली नु रू नेल्ल आन कली रेउ यिपाइक्ब।

2 खिं डा देवी देवतामी फश लोत्र पाइनीम। लिंक्यु कोव्रबपुकीमी जोल तशा, डोमु डोशा, हेंथे लोत्र पाइनीम। मिनु मुर आन कली फश लोत्र पा लेम्नीम। मोपतीके मुरपुकी गोठला मबाक्शो भेडा खोदेशो पा श्येत जशा प्रोक्नीम। मती ९:३७

### परमप्रभुम आ मुर बोल्यो सेल्ब

3 मिनु परमप्रभु यावेमी “गो गोठला आन कली तशा शुश गाइशशो बाक्नुड। मारदे हना मुर नेल्ल आन परमप्रभु यावेमी आ बगाल, यहूदा आ मुर आन कली कोव्रब। मेकोमी आ मुर आन कली लडाइ पा गेनायो मरूब शारा खोदेशो सेल्ब। जकरिया ११:५

4 मिनु यहूदा रे सुर डा फुल्लु, ताम्बु कीतीक किला, लडाइ पाइब आन लिब्रा नु कप्तान नेल्ल गूनीम। येरमीया ३०:२१

5 मिनु मेको नेल्ल लडाइम बाक्शो लडाइ पाइब खोदेशो बाक्नीम। मेकोपुकीमी आन जोरी सत्रु लां डा हिलोम खोल्ला दिम्नीम। परमप्रभु यावे मेकोपुकी नु बाक्तीके मेकोपुकीमी लडाइ पाइनीम। शारा डोइक्ब आन कली मुने तोक्नीम।

6 गो यहूदा आ खिं डा मुर आन कली बोल्यो सेल्लुड। योसेफ आ खिं डा मुर आन कली श्येत रे प्रॉइनुड। मेको आन कली डोइती डा खोदेशो सेल्लुड। मारदे हना गो मेको आन कली शिशी पाइनुड। मेकोपुकी गेनायो मतिल्लो खोदेशो दुम्नीम। मारदे हना गो परमप्रभु यावे, मेको आन परमप्रभु नड। गो मेको आन कली लोत्र लेत्तुडमी।

7 मिनु एफ्राइम आ खिं डा मुर लडाइ पाइब खोदेशो पा बोल्यो दुम्नीम। अडगुर शांबु तूशो खोदेशो पा ग्येरसीनीम। आन आलपुकीम मेको तशा शुश ग्येरसीनीम। मेकोपुकीमी ‘गो परमप्रभु यावे आ मुर नय’ दे शुश ग्येरसीनीम।

8 गो आं मुर आन कली ब्रेशशा, खुप्नुड। मारदे हना गो मेको आन कली श्येत रे प्रॉइता। मिनु मेकोपुकी डोइती डा खोदेशो पा सोशा बोशा, शुश दुम्नीम।

9 गो मेको आन कली रागी रागीम फ्राता हना यो, मेकोपुकीमी डोन रागीम बाक्शा, आं कली मिम्नीम। मिनु मेको आन आल कोल्पाइशशा आन रागीम लेत्नीम। यसेया ६६:१९; येरमीया ५१:५०

10 गो मेको आन कली इजीप्त रागी रे आन आंम रागीम लेप्पाइक्नुड। गो मेको आन कली अस्सुर रे गुंडशा, गिलाद नु लेबानोनम चाक्नुड। नोले मेकेर शुश मुर दुम्टीके बाक्तीके मबाक्ब।

11 मेकोपुकी समुन्द्र डा ठेयब ब्वाक्कु खोदेशो श्येत जाइनीम। तन्न गो समुन्द्र डा छाल थुम्पाइक्नुड। मिनु नील खोला सोवपाइक्नुड। अस्सुर आ ठेयब लेशो जाम्ब। मिनु इजीप्त डा राज्य थुम्सीब।

12 गो मेको आन कली परमप्रभु यावे कली थमा सुइक्तीकेम बोल्यो सेल्लुड। मिनु मेकोपुकी मेको आं नेम गाक्नीम” दे परमप्रभु यावेमी देंत।

## 11

इस्त्राएली आन मरिम्शो गोठला

- 1 लेबानोन, मीम इ लाइशो रवा आन कली नेक्पाइक्चा कली इ लाप्चोपुकी रोक्को।
- 2 तोवशी रवा रोंका पने। मारदे हना लेबानोन डा लाइशो रवा गोल्तेक्म। मेको दारशो रवा खतम दुम्तेक्म। बाशान डा बोल्यो शी के रवा रोंका पने। मारदे हना ठेयब ब्वाकी नेल्ल क्योवशो बाक्ब।
- 3 गोठला आन रोंका पशो नेनीन। मेको आन रिम्शो योव्रतीके खतम दुम्शो बाक्ब। गुप्स आन ग्रीशो नेनीन। यर्दन डा ब्वाकी नेल्ल खतम दुम्शो बाक्ब।

रिम्शो नु मरिम्शो गोठला

- 4 परमप्रभु यावे, आं परमप्रभुमी “क्योरचा पुंडसीब भेडा आन कली योव्रडो।
- 5 मेको ग्याप्बपुकीमी भेडा क्योरशा सजाइ मतथु ब्रोंइशा लाइनीम। मिनु मेको आन कली लेयबपुकीमी “परमप्रभु ठेयब बाक्ब। मारदे हना गो शोंप पाइशो दुम्तक” देंनीम। मिनु मेको भेडा आन गोठलामी मेको आन कली शिशी मपाइनीम। येरमीया २३:-; इजीकीएल १३:-; इजीकीएल ३४:-
- 6 मुल रे गो रागी डा मुर आन कली शिशी मपाइनुड” दे परमप्रभु यावेमी देंत। मिनु परमप्रभुमी “गो नेल्ल आन कली आन नेक्था डा मुर आन गुइमी नु आन पिप आन गुइमी गेनुड। मिनु मेकोपुकीमी रागी कली खतम सेल्लनीम। मेको आन गुइ रे सुइ आन कली मप्रोंइनुडमी।
- 7 मोपतीके क्योरचा चिक्शो भेडा लेयब आन पा डा गो गोठला दुम्टी। गो कोक्के निक्शी ग्याइक्ताक्ड। मिनु गो का कली शिशी पतीक नु अर्को कली थुं का दुम्टीक नें वोइक्ता। मिनु गो भेडा आन कली योव्रतामी।
- 8 गो महिना कामी गोठला सां आन कली खेरतामी। गो मेको आन गेय तशा ब्रीशा, फाल्ने मचाप्शो बाक्ती।
- 9 मिनु गो मेको आन कली ‘गो इन गोठला दुम्ने मचाप्नुड। बेक्शा लाइबपुकी बेक्मल। खतम दुम्शा लाइबपुकी खतम दुम्मल। लीशोपुकीम आन श्ये ब्वमुमल’ ” देंती। येरमीया १५:२
- 10 मिनु गो आं शिशी नें पाइशो कोक्के जिक्ता। मिनु गो मुर नु पशो कबल क्याम्ताक्ड। जात जात नेल्ल डा मुरपुकी नु फ्रेंशो कबल क्याम्ताक्ड, दे मेको कोक्के जिक्ता।
- 11 मेको कबल मेको नाक्ती क्याम्ताक्ड। भेडा लेयबपुकीमी आं कली कोव्रना कोव्रन बाक्तेक्म। मेकोपुकीमी एको परमप्रभु यावे आ लोव्र बाक्माक्त, दे तुइक्ताक्म। जकरिया ११:७
- 12 मिनु गो मेको आन कली “गे ठीक लाक्तीनी हना, आं गाल्च गेयीनी। ममाइ हना वोंइसीन” देंती। मिनु मेकोपुकीमी आं कली ३० चांदी के शेकेल गेम्तेक्म। शेकेल का ११.५ ग्राम चांदी के क्येट बाक्ब। मत्ती २६:१५
- 13 मिनु परमप्रभु यावेमी आं कली “मेको क्येट लाइशशा, खप के ग्योब सेल्ब आ डोंइती ब्वारदो। मेको मिश डा क्येट आं पर्वम कुर पाम्तेक्म” देंत। मिनु गो मेको ३० चांदी के शेकेल लाइशशा, परमप्रभु यावे आ शोंप वोइक्तीकेमी यपाइक्ब आ डोंइती ब्वारताक्ड। मत्ती २७:५-१०
- 14 मिनु नोले गो थुं का दुम्टीक नें वोइशो कोक्के जिक्ता। मो पा गो यहूदा नु इस्त्राएल आस कली खिं का डा दुम्टीक रे फ्राताक्ड। इजीकीएल ३७:२२
- 15 मिनु परमप्रभु यावेमी आं कली “गे लेशा शोर गाक्शो गोठला खोदेशो दुमो।

16 मारदे हना मुल गो मेको रागीमी गोठला का सेलनुड। मेकोमी बेकशा लाइब आन कली मकोव्रब। ब्रशा गाकशो आन कली मखुपब। रोइ पशो आन कली मसापाइकब नु रिमशो भेडा आन कली मयोव्रब। तन्न मेकोमी दोमशो भेडा आन श्ये ब्वशा, आन गेंग्रे यो चेशशा ब्वाइब।

17 आबी आबी, शोर गाकशो गोठला। मेकोमी बगाल प्रॉइब। तरवारमी आ ग्युरा गुइ नु आ ग्युरा मिक्च कली आबल। मिनु मेको आ ग्युरा गुइ नेल्ल सोव्रल। आ ग्युरा मिक्च बुकशा मताइब दुम्ल” दैत।

## 12

### इस्त्राएल आ पर्वम लोव्र पशो

1 परमप्रभु यावेमी इस्त्राएल आ पर्वम पशो लोव्र एको बाकब। सरीड नु रागी सेलब नु मुर आन कली सोक्त गेब परमप्रभु यावेमी मार दैत देशा हना

2 “गो यरूसलेम कली आ एर ओंथ रागी डा मुर आन गाइक्तीके सेल्चा चिकशो बाकनुड। मुरपुकीमी यरूसलेम पुन्नीम। यहूदा यो श्येत जाइब। यसैया ५१:१७; येरमीया २५:१५-२९

3 मेको नाक्ती गो रागी डा मुर नेल्ल आन कली यरूसलेम हेल्शो फुल्लु सेलनुड। तेको रागी डा मुरुमी क्युक्चा लोक्या माल्नीमी, मेकोपुकी शुश खाइक्पांडसीनीम। मिनु रागी रागी डा मुर नेल्ल खुम्सीशा यरूसलेममी लडाइ पथ जाक्नीम। जकरिया १४:३; योएल ४:१२

4 मेको नाक्ती गो शारा नेल्ल आन कली शुश हिंपाइक्नुड। मिनु शारा डोइक्ब आन कली निप्स ग्यशो सेलनुड। गो यहूदा आ खिं डा मुर आन कली कोव्रनुड। मिनु आन जोरी सत्रु आन शारा मिक्च मताइब सेलनुड।

5 मिनु यहूदा आ खिं खिं डा मुरपुकीमी आंम आंम थुंमी ‘यरूसलेम डा मुरपुकी बोल्यो बाक्नीम। मारदे हना मुर नेल्ल आन परमप्रभु यावे, मेको आन परमप्रभुमी मेको आन कली सक्ति पाइशो सेलब’ दैनीम।

6 मेको नाक्ती गो यहूदा आ खिं खिं डा मुर आन कली शी तारी वोइशो बुइशो बोस नु शी आन दातेमी ब्रशो तोव्रशी खोदेशो सेलनुड। मिनु मेकोपुकीमी ग्युरा नु पेरा गे बाकब नु पुम्ब मुर नेल्ल आन कली साइक्नीम। तन्न यरूसलेम आ बाक्तीके उइ बाक्शा, लेशा मेकेर मुर बाक्नीम। ओबदिया १८:-

7 मिनु परमप्रभु यावेमी डोंइती यहूदा डा मुर आन कली श्येत रे प्रॉइब। मोपा दाऊद आ खिं डा मान ततीके नु यरूसलेममी बाकब मुर आन मान ततीके यहूदा आन क्येडा शुश मदुम्ल” दैत।

8 मेको नाक्ती परमप्रभु यावेमी यरूसलेममी बाकब मुर आन कली वारच पाइब। मेकेर बाकब नेल्ल क्येडा मचापब दाऊद खोदेशो बाक्नीम। मिनु दाऊद आ खिं डा मुर परमप्रभु खोदेशो बाक्नीम। मिनु परमप्रभु यावे आ स्वर्ग डा गेय पाइब मेको आन डोंइती गाकब। यसैया ३३:२४

9 मिनु “मेको नाक्ती गो यरूसलेम कली लडाइ तोथ जाकब रागी रागी डा मुर आन कली खतम सेलनुड” दैत।

### साइशो आ पर्वम रोंका पशो

#### प्रकाश २०:९

10 मिनु परमप्रभुमी “गो दाऊद आ खिं डा मुर नु यरूसलेममी बाकब मुर आन तारी शिशी पतीक नु पुंडतीक लोव्र पतीके सोक्त मोइक्नुड। मो दुम्मेनु, आ साइशो आन कली तशा, मेको आन पर्वम आन का ला तौ आन पर्वम रोंका पशो खोदेशो पा, रोंका पाइनीम। मेको आन पर्वम, आन डोंइती जरमेशो तौ आन पर्वम खोदेशो पा डाक्नीम। योएल ३:१; यूहन्ना १९:३७; प्रकाश १:७

11 मेको नाक्ती मेगीददो डा बेसीमी हदाद-रिम्मोनमी रोंका पशो खोदेशो पा यरूसलेममी ठेयब रोंका पाइनीम। २राजा ५:१८

12 रागी नेल्ल डा मुरपुकी रोंका पचा माल्नीम। खिं खिं डा मुरपुकीमी रोंका पचा माल्नीम। दाऊद आ खिं डा वोंइश मुरपुकीमी रोंका पचा माल्नीम। मिनु मेको आन मीश आन दातेमी रोंका पचा माल्नीम।

नाथान आ खिं डा वोंइश मुरपुकीमी रोंका पचा माल्नीम। मिनु मेको आन मीश आन दातेमी रोंका पचा माल्नीम।

13 लेवी आ खिं डा वोंइश मुरपुकीमी रोंका पचा माल्नीम। मिनु मेको आन मीश आन दातेमी रोंका पचा माल्नीम। शिमेइ आ खिं डा वोंइश मुरपुकीमी रोंका पचा माल्नीम। मिनु मेको आन मीश आन दातेमी रोंका पचा माल्नीम।

14 लीशो खिं डा वोंइश मुर नेल्लेमी रोंका पचा माल्नीम। मिनु मेको आन मीश आन दातेमी रोंका पचा माल्नीम” दैत।

## 13

### मूर्ति नु जोल पाइब

1 मेको नाक्ती दाऊद आ खिं नु यरूसलेममी बाक्ब मुर आन पाप नु आन मरिम्शो पशो क्याम्चा कली ब्वाक्कु बुक्तीके का बुक्शा यूब। यसैया १२:३; यसैया ५५:१

2 मुर नेल्ल आन परमप्रभु यावेमी मार दैत देशा हना मेको नाक्ती “गो रागी रे मूर्ति आन नें क्याम्नुड। मिनु सुइमी मेको आन कली मम्मिनीम। मिनु गो मेको रागी रे जोल पा नोले दुम्ब लोत्र पाइब नु ग्रॉण दिशो वोल आन कली गुंइशा खेरनुड। मीका ५:१२; येरमीया २९:८-९

3 मिनु लेंशा सुइमी जोल पा नोले दुम्तीक लोत्र पाप्तु हना, मेको कली थीब आ आम आफोमी मेको कली ‘गे बेक्चा माल्नेवे। मारदे हना गे परमप्रभु यावे आ नेमी जोल लोत्र पाप्तीवी’ देंनीस। मिनु मेकोमी जोल पा नोले दुम्ब लोत्र पवानु, आ आम आफोमी मेको कली साइक्नीस। ब्यवस्था १३:६

4 मेको नाक्ती नोले दुम्ब लोत्र पाइब नेल्ल आंम तशो नु आंम लोत्र आ पबंम मुने पाइनीम। मेकोपुकीमी दलओंठ आ चां के प्रोत्रशो वा मफेक्नीम।

5 तन्न मेकोपुकीमी ‘गो दा नोले दुम्ब लोत्र पाइब मनड। गो रू डा गेय पाइब बाक्नुड। मारदे हना गो ठिटा बाक्डा रेन रू डा गेय पा जशा ब्रोंइती’ देंनीम।

6 सुइमी मेको कली ‘इ रं डा गार मार नमी? दे हिल्लो पाम्तेक्म हना, एको आं वारच आ खिंमी दुम्शो गार नम’ दैब।

### नाक्शा लीशो परमप्रभु आ मुर

7 मिनु मुर नेल्ल आन परमप्रभु यावेमी मार दैत देशा हना ‘तरवार, आं गोठला आ पबंम बोक्को। नेल्ल क्येडा आं नेक्था डा मुर आन पबंम बोक्को। गोठला कली तुपो। मिनु भेडापुकी ब्रमल। मिनु गो आं गुड आइक्च गोठला आन पबंम क्युक्नुड। मत्ती २६:३१

8 एको रागी डा मुर भाग सांमी भाग निक्शी साइक्चा पुंइसीनीम। मिनु भाग का ब्रोंइचा ताइनीम। यसैया ६:१३

9 मिनु मेको लीशो भाग आन कली गो मीम कुरपाइनुडमी। चांदी याप्पाइश्शो खोदेशो पा याप्पाइक्नुडमी। मिनु सुन नाक्शो खोदेशो पा नाक्नुडमी। मिनु मेकोपुकीमी आं कली थोइनीम। मिनु गो मेको आन कली लोत्र लेत्नुडमी। मेकोपुकी आं मुर नम’ देंनुड। मिनु मेकोपुकीमी ‘परमप्रभु यावे, आंइ परमप्रभु बाक्ब’ देंनीम” दे परमप्रभु यावेमी दैत। होसे २:२५

## 14

### परमप्रभु यावे आ नाक्ती

1 परमप्रभु यावे आ नाक्त का जाक्ब। मेना इन के रोइश्शा लाइश्शो थोत्रक इन दातेमीन योक्सीनीनी। यसैया ३९:६

2 गो रागी रागी डा मुर नेल्ल आन कली यरूसलेम नु लडाइ पपाइक्चा कली पुक्नुडमी। मिनु सहर मेको आन के दुम्ब। मेको आन खिं डा मारेइ मारेइ रोइक्नीम। मिनु मीश मुर आन कली बिथोलो पाइनीम। सहर डा उइक्थ मुर ग्याइश्शा लाइक्चा पुंइसीनीम। लीशो मेको सहर उइ बाक्नीम।



3 मिनु नोले परमप्रभु यावेमी मेको रागी रागी डा मुर नु लडाइ पाइब। मुरुमी लडाइ पशो खोदेशो पा लडाइ पाइब। जकरिया १२:३; यसैया ४२:१३; प्रकाश १९:१९

4 मेको नाक्त आ खोइलीमी यरूसलेम आ डोंइती पूर्व गे बाक्शो जैतून डांडा कली थेक्ब। मिनु जैतून डांडा आ पूर्व रे पच्छिम सम्म ठेयब पा जेप्ब। मिनु डांडा उइक्थ उत्तर गे नु उइक्थ दक्खिन गे दुम्शा बाक्ब। मिनु दातेमी ठेयब बेंसी का दुम्ब।

5 गेपुकी परमप्रभु यावे आ डांडा डा बेंसी रे पा प्रोकचा माल्नीनी। मेको आस दाते डा बेंसी आसाल सम्म जाकदीशो बाक्ब। गेपुकी यहूदा डा पिप उज्जीयाह आ पालामी कुशो खिनुमी मुरपुकी प्रोकशो खोदेशो पा प्रोकनीनी। मिनु नोले परमप्रभु यावे, आं परमप्रभु आ मुर नेल्ल नु यीब। आमोस १:१

6 मेको नाक्त नां नु तास्लाम छेडछेड मगेनीस। ग्यू यो मदुम्ब।

7 मिनु गेना हना यो नाक्त बाक्ब। मारदे हना नाक्दो दुम्ची ना छेडछेड बाक्ब। परमप्रभु यावेमी मेको नेल्ल तुइक्ब। मर्कूस १३:३२

8 मेको नाक्त यरूसलेम रे पा ब्रोंइचा गेब ब्वाक्कु शाइशशा यीब। मिनु मेको उइक्थ पूर्व डा समुन्द्र गे नु उइक्थ पच्छिम डा समुन्द्र गे शाइक्ब। मेको होशो नु सिक्शो नेल्ल नाक्त शाइक्ब। इजीकीएल ४७:१-८

9 परमप्रभु यावे रागी नेल्ल डा पिप दुम्ब। मेको नाक्त परमप्रभु यावे का ला बाक्ब। आ नें यो का ला बाक्ब। भजन संग्रह ९७:१; प्रकाश ११:१५

10 मिनु रागी नेल्ल दिंम दुम्ब। मेको गेबा रे पा यरूसलेम आ दक्खिन डा रिम्मोन सम्म दिंम दुम्ब। तन्न यरूसलेम बेन्यामीन लाप्यो रे, माइत लाप्यो लाक्शा, सुर डा लाप्यो सम्म नु हानानेल माइशो लाइशो खिं रे पिप आ अडगुर स्राक्तीक सम्म बाक्ब। मिनु यरूसलेम आ इर डा बाक्तीकेम बाक्ब। यहोसु १५:३२; येरमीया ३१:३८

11 मिनु यरूसलेममी मुरपुकी बाक्नीमी। मिनु मेको गेनायो लेंशा खतम मसेल्नीम। यरूसलेम मारेड मदुम्थु बाक्ब। प्रकाश २२:३; येरमीया ३३:१६

12 परमप्रभु यावेमी यरूसलेम कली लडाइ तोइब आन कली मार बेक्तीक रोइ पपाइक्ब देशा हना, मुर गाक्ना गाक्ना आन श्ये राक्तीके, आन मिक्च आन बाक्तीकेम राक्तीके नु आन लें आन शोत्रमी राक्तीके रोइ पपाइक्ब।

13 मेको नाक्ती परमप्रभु यावे रे पा मुर शुश हिंनीम। मेको नेल्लेमी आन नेक्था डा मुर आन गुड ग्याइक्नीम। मिनु नोले राम्शी पोक्नीम।

14 यहूदा आ मुरपुकीमी यो यरूसलेममी लडाइ पाइनीम। मिनु रागी रागी डा मुर आन शोप खुप्नीम। मार खुप्नीम देशा हना, सुन चांदी नु वासी शुश खुप्शा तेल्लीम।

15 मेको आन बाक्तीकेम बाक्शो शारा, खच्चर, दलओठ, गधा नु मेकेर मार मार बी ब्यफ क्यारश भेडा बाक्मा, मेको नेल्ल मुर कली साइक्ब रोइ पाइनीम।

16 मिनु यरूसलेम कली लडाइ तोइब रागी रागी डा मुर आन दाते डा सु सु ब्रोंइशा लीमा, मेकोपुकी बर्स बर्समी यरूसलेम लशा पिप नु मुर नेल्ल आन परमप्रभु यावे कली मान पा ठेयब सेल्चा माल्नीम। मेकोपुकीमी गोठ सेल्शा मानेतीक चाड मानेचा कली यरूसलेम लचा माल्नीम। जकरिया १४:९

17 मिनु तेको रागी नु खिं डा मुर नु पिप, मुर नेल्ल आन परमप्रभु यावे कली मान पा ठेयब सेल्चा कली यरूसलेम मलाम्तेक्म हना, मेको आन कली रेउ मयीब।

18 मिनु इजीप्त रागी डा मुरपुकी गोठ सेल्शा मानेतीक चाड मानेचा कली यरूसलेम मलाम्तेक्म हना, मेकोपुकी यो अर्को रागी डा मुर खोदेशो पा परमप्रभु यावेमी गेशो श्येत जाइनीम।

19 इजीप्त रागी नु रागी नेल्ल डा मुर सु मेको गोठ सेल्शा मानेतीक चाड मानेथ मलाइनीमी, मेको मोदेशो सजाइ ताइनीम।

20 मेको नाक्ती शारा आन किडगोम यो “परमप्रभु यावे कली ला बाक्नीम” दे मुशा ब्रेक्शो बाक्ब। मिनु परमप्रभु यावे आ खिं डा क्येतीक ग्योबपुकी, चढ़ेतीक आ डोंइती बाक्शो ग्योब खोदेशो पा “परमप्रभु यावे केन बाक्नीम” दे ब्रेक्शो बाक्ब। प्रस्थान २८:३६

21 मिनु यरूसलेम नु यहूदामी बाक्शो क्येतीक ग्योब नेल्ल मुर नेल्ल आन परमप्रभु यावे कली ला बाक्नीम। सु सुमी चढेनीमी, मेकोपुकीम मेको ग्योबुम आन चढेशो श्ये लोप्ने चाप्नीम। मिनु मेको नाक्त रे मुर नेल्ल आन परमप्रभु यावे आ खिंमी ग्यापब लेयब मुर का यो मबाक्नीम। प्रकाश २१:२६-२७; मत्ती २१:१२

## मलाकी

**ब्रेक्ब मुर:** हिब्रू लोत्रमी मलाकी आ अर्थ “आं लोत्र कुरब” बाक्ब। साइ डोंइती डा थमा सुइक्ब हिरोनिमुस शुश ब्रेक्ब मुर का बाक्त। मेकोमी “आं लोत्र कुरब” नें पाइश्शो, परमप्रभु यावे आ खिं लेंशा सेल्ब, जोक्ब तुइक्ब एज्रा आ खुइश्शो नें बाक्ब, देंब। मुरपुकीम चहिं मेको दुम्ने मचाप्व देशो बाक्तेक्म।

**गेना ब्रेक्शो:** नेहेम्याहमी इस्राएली आन परबम ब्रेक्शो नु मलाकी किताबम ब्रेक्शो लोत्र शुश गारब। इस्राएली ग्याइश्शा लाइक्चा पुंडसीमा नोले लेशशा यरूसलेमम बाक्शो बाक्तेक्म। शुश मुरुमी अर्को रागी डा मीश चाक्शो बाक्तेक्म। मेना ४३२ बि. सी. बाक्शो बाक्त।

### मार ब्रेक्शो:

१. मुर आन थमा सुइक्चा गाम्त। मलाकी २:८; नेहेम्याह १३:२९

२. अर्को रागी डा मीश आल कली चाक्शो बाक्तेक्म। मलाकी २:११-१२; नेहेम्याह १३:२३-२५

३. १० भाग मगेब दुश्शो बाक्तेक्म। मलाकी ३:८-१०; नेहेम्याह १३:१० मेको नेल्ल तशा यो, परमप्रभु यावेमी “गो इन कली दाक्नुड। आं गे लेत्तीन। गो इन कली आसीक गेनुड” दे लोत्र कुरब का सोइश्शो बाक्त।

### परमप्रभुम इस्राएली आन कली दाक्शो

1 मलाकीमी इस्राएली आन कली परमप्रभु यावे आ पशो लोत्र देंत।

2 परमप्रभु यावेमी “गो इन कली दाक्ताक्ड। गेपुकीमी चहिं ‘दोपा आंइ कली दाक्तीनी डा? मार, एसाव याकूब आ लोक्ब ममाइ डा?’ देंनीनी। मिनु परमप्रभु यावेमी गो याकूब कली शुश दाक्ताक्ड। उत्पत्ती २५:२३; रोमी ९:१३

3 तन्न एसाव कली काइ मदाक्तु। मोपतीके मेको आ बाक्तीक पहाड कली गोरशो रागी सेल्ता। आ थेशरो रू सिवार आन बाक्तीक दुम्पाइक्ता” देंत। यसैया ३४:१३

4 मिनु एदोम डा मुरपुकीमी “गेपुकी ब्रुंडसाक्व हना यो, गो लेंशा मेको ब्रेश्शो नेल्ल सेल्नीकी” देंतेक्म। मुर नेल्ल आन परमप्रभु यावेमी “मेकोपुकीमी सेल्तेक्म हना यो, गो प्रेतनुड। मिनु अरु मुरपुकीमी मेको आ परबम “एको ठीक मपाइब रागी का बाक्ब। परमप्रभु यावे मेको रागी तशा, गेना हना यो गाइक्ब” देंनीम।

5 गेपुकीमी मेको नेल्ल तशा “तेइ तेइ रागी डा मुरपुकीमी परमप्रभु यावे कली ठेयब सेल्नीम” दे लोत्र पाइनीनी।

### ग्रांरा दिचा डा थोत्रक चढ़ेशो

6 मिनु मुर नेल्ल आन परमप्रभु यावेमी आ नें आइक्च सेल्ब चढ़ेब आन कली “तौपुकीमी आन आफ कली मान पाइनीम। मिनु गेय पाइबपुकीमी आन होत्रप कली यो मान पाइनीम। गो इन आफ नड हना, मारदे आं कली मान मपाइनीनी? गो इन होत्रप नड हना, मारदे आं कली मान पा महिनीनी?” देंत। मिनु गेपुकीमी “गो दोपा इन नें आइक्च सेल्का?” देंतीनी। प्रस्थान २०:१२

7 परमप्रभुमी “गेपुकी आं कली ग्रांरा दिचा डा थोत्रक आं चढ़ेतीकेमी चढ़ेनीनी। मिनु गेपुकीमी “दोपा इन कली ग्रांरा दिपाइक्का?” दे लोत्र पाइनीनी। परमप्रभु यावे आ टेबल कली मारेइ खोइ मलाक्नीनी।

8 गेपुकीमी मिक्च मताइब बस्तु चढ़ेथ चाक्नीनी। मिनु मेको दूली मबाक्ब देंनीनी। खोइल मदुक्ब नु रोइ पशो बस्तु चढ़ेचा दूली मबाक्ब देंनीनी। मिनु इन रागी डा ठेयब मुर कली मोदेशो गेनीनु, मार, मेको ग्येरशा ताक्शा, इन कली दाक्बा डा?” दे मुर नेल्ल आन परमप्रभु यावेमी देंत। लेवी २२:२०, २३

9 मिनु “परमप्रभु आंइ कली शिशी पन” दे पुनीन। “गेपुकीमी मोदेशो मरिम्शो थोत्रक चढ़ेशा मरिम्शो पाइतीनी। मिनु इन कली दोपा शिशी पाइनुडा?” दे मुर नेल्ल आन परमप्रभु यावेमी देंत।

10 मिनू लेंशा “गेपुकीमी आं चढेतीकेमी मो मी मुडक्चा क्येडा का लशा लाप्यो चोक्नी हना, रिम्शो दुम वा। गो इन कली तशा मग्येरसीशो बाक्नुड। मिनू इन चढेशो यो मताक्नुड” दे मुर नेल्ल आन परमप्रभु यावेमी देंत। मलाकी २:१३; यसेया १:१३

11 “नां दाप्तीक रे नां पेरतीक सम्म रागी रागी डा मुर आन दातेमी आं नें ठेयब बाक्ब। रागी नेल्ल डा मुरपुकीमी आं कली धूप चोशा, रिम्शो थोवक चढेनीम। मारदे हना रागी रागी डा मुर आन दातेमी आं नें ठेयब बाक्ब” दे मुर नेल्ल आन परमप्रभु यावेमी देंत। यसेया ६०:१-७

12 मिनू “गेपुकीमी ‘परमप्रभु आ टेबल ग्रांरा दिचा डा बाक्ब, मेक बाक्शो थोवक यो ठीक दुम्या ममालब’ दे आं नें कली आइक्च सेल्नीनी।

13 मिनू गेपुकीमी ‘एको गिश श्येत बाक्बा’ दे आं कली चढेतीक आ परबम इन नें कुप्नीनी। गेपुकीमी रोइशो बस्तु चाक्नीनी। खोइल मदुक्ब नु रोइ पशो बस्तु चढेथ चाक्नीनी। मार, गो इन चढेशो ग्येरशा ताक्चा माल्नुडा डा?” दे परमप्रभु यावेमी देंत।

14 “सु सुमी आंम बस्तु आन बगाल रे पा ‘रिम्शो बस्तु चढेनुड’ देंनीमी, तन्न नोले मरिम्शो चढेनीमी, मेको जोल पाइब सराप राइनीम। मारदे हना गो ठेयब पिप नड। आं नें रागी रागी नेल्ल डा मुर आन दातेमी हिंचा डा बाक्ब” दे मुर नेल्ल आन परमप्रभु यावेमी देंत। लेवी २२:१९

## 2

### चढेब आन कली अरेशो

1 मिनू मुर नेल्ल आन परमप्रभु यावेमी “गे चढेबपुकी, एको शेंशो लोत्र इन कली बाक्ब।

2 गे इन नोफा मदाइक्ताक्नी नु आं नें कली मान पचा कली ममिम्ताक्नी हना, गो इन कली सराप पाइनन्नी। इन कली गेशो आसीक सराप दुम्ब। मारदे हना गो काइ मटीब बाक्नीनी। गो थमा पा इन आसीक कली सराप सेल्नुड। ब्यवस्था २८:१५

3 गो इन पतीके इन आल आन कली हुडक्नुड। इन चढेशो बस्तु आन गा क्यी डा ग्रांरा इन कुलम देप्नुड। मिनू इन कली आं डोंइती रे तिल्लुड।

4 गो लेवी नु पशो कबल गेना हना यो लील, दे इन कली मेको शेंतीक सोइक्ताक्ड।

5 आं पशो कबल ब्रोंइतीक नु थुं नाइक्तीक कबल बाक्ब। गो मेको कबल आं कली मान पा हिल, दे गेता। मेकोमी आं कली मान पा आं नें थिंचा शुश हित।

6 मेकोमी रिम्शो शेंतीक लोत्र पाप्तु। गेनायो दूली मशेंद। थम रिम्शो नु ठीक पतीकेमी गो नु गाक्त। मिनू मेकोमी ठीक मपाइब शुश मुर आन कली आन मरिम्शो पतीके रे लेप्पाइक्तु।

7 चढेबपुकीमी तुडक्तीक लोत्र होस पा पचा माल्नीम। मिनू मुरपुकीमी मेको आन शेंशो नेंचा माल्नीम। मारदे हना चढेबपुकी मुर नेल्ल आन परमप्रभु यावे आ सोइशो लोत्र पाइब बाक्नीम। ब्यवस्था ३३:१०; हाग्यै १:१३

8 गेपुकी चहिं आं लां प्रोंइशा, हेंथे गाक्तीनी। इन दूली शेंतीकेमी गे शुश मुर आन कली हेंथे गाक्ब सेल्तीनी। गेपुकीमी लेवी नु पशो कबल खतम सेल्तीनी” दे मुर नेल्ल आन परमप्रभु यावेमी देंत।

9 परमप्रभुमी “मोपतीके गो इन कली मुर नेल्ल आन डोंइती आइक्च नु महिक्सीशो सेल्ला। मारदे हना गेपुकीमी आं लां प्रोंइतीनी। आं शेंशो लोत्र मटिथु, कुल कोत्रमुशा हुकुम पाइतीनी” देत।

### यहूदा आ मरिम्शो पशो

10 मार, गो नेल्ल ई आफ कान ममाड डा? मार, परमप्रभु कामीन ई कली मसेला डा? मारदे गोपुकीमी कामी अर्को कली थमा मसुइक्थु, ई किकी पिपी आन कली गेशो कबल खोइक्नया? मलाकी १:६; अय्युब ३१:१५; एफिसी ४:६

11 यहूदामी आं कली प्रोंइती। मिनू इस्राएल नु यरूसलेममी ग्रांरा दित्वा डा गेय दुम्शो बाक्ब। मारदे हना यहूदामी परमप्रभु यावे आ दाक्शो बाक्तीके ग्रांरा दिशो सेल्लु। दोपा मोदेशो सेल्लु देशा हना, आंम तौ आन कली देवी देवता आन कली ठेयब सेल्ब मुर आन तमी चाक्तु। एज्रा ९:२

12 परमप्रभु यावेमी मोदेशो पाइब मुर आन कली याकूब आ मुर आन बाक्तीक ताम्बु रे तिल्व। मिनु मेकोपुकीम मुर नेल्ल आन परमप्रभु यावे कली गेनायो चढेचा मताइनीम।

13 गेपुकीमी अर्को मार पाइनीनी देशा हना, परमप्रभु यावे आ चढेतीके आ नेक्था डाक्शा, रोंका पा इन प्रेक्कुमी जिल्तीनी। मारदे हना इन चढेशो ग्येरशा मब्राइब। मलाकी १:१०

14 मिनु गेपुकीमी “मारदे मब्राइबा”? दे हिल्लो पाइनीनी। मारदे हना गे इन ठिटा बाक्ची ना डा मीश प्रोंइतीनी। मेको आ पबर्म परमप्रभु यावे सांकछी बाक्ब। मेको इ वारच इ मीश बाक्ब, इ कबल पा चाक्शो मीश बाक्ब।

15 परमप्रभुम मेको निक्शी आस कली कान मसेला डा? मेको आस सोक्त नु गिंग परमप्रभु यावे के बाक्नीस। मारदे मेको निक्शी आस कली कान सेल्लु देशा हना, आस आल परमप्रभु आ मुर दुम्मल, दे कान सेल्लु। मोपतीके गेपुकी आंम थुं आ पबर्म होस पा, सुइमी आंम ठिटा बाक्ची ना डा मीश कली मप्रोनीन।

16 मारदे हना परमप्रभु यावे, इस्राएली आन परमप्रभुमी गो मीश, वोंइश कली प्रोंइब मुर काइ मदाक्नुड। आन जिशो मदाक्नुड। मोपतीके इन थुं फ्रेंदीन। इन मीश मप्रोंइब दुमीन। ब्यवस्था २४:१

### परमप्रभु आ निसाफ पतीक नाक्त

17 गे इन लोत्रमी परमप्रभु यावे कली ब्रीपाइक्तीनी। मोपा यो गेपुकीमी “गेपुकीमी मार लोत्रमी इन कली ब्रीपाइक्का?” देंतीनी। गेपुकीमी “दूली लोत्र पा मरिम्शो गेय पाइब नेल्ल परमप्रभु यावे आ डोंइती ठीक बाक्नीम। मिनु मेको, मेको आन कली तशा ग्येरसीशो बाक्ब” दे “निसाफ पाइब परमप्रभु ते बाक्बा डा?” दे यो देंनीनी। मलाकी ३:१३-१४

## 3

1 परमप्रभुमी “नेनीन, गो आं लोत्र पाइब आं डोंइती सोइक्नुड। मेकोमी आं डोंइती आं लां सेल्ल्या माल्लब। इन माल्लो प्रभु रीब पा आ खिम जाक्ब। मेको इन माल्लो कबल डा लोत्र चोक्ब बाक्ब। गे मेको कली शुश दाक्नीनी” दे मुर नेल्ल आन परमप्रभु यावेमी देंत। मत्ती ११:१०; मर्कूस १:२; लूका १:१७

2 मिनु मेकोमी “तन्न आ जाक्ची नाक्त सु फाल्ने चाप्बा डा? आ गूची ना सु राप्शा बाक्ने चाप्बा डा? मारदे हना मेको तुप्तीलमी मुइश्शो मी नु वा मुरब आ वा बुश सेल्ल्तीक खोदेशो बाक्ब। यसेया १:२५

3 मेको चांदी यपाइश्शा रिम्शो सेल्लब खोदेशो पा निसाफ पाइब बाक्ब। लेवी आ चच युइ आन कली सुन चांदी खोदेशो पा यपाइश्शा रिम्शो सेल्लब। नोले मेकोपुकीमी परमप्रभु यावे कली ठीक पा चढेनीम। जकरिया १३:९

4 मेना परमप्रभु यावेमी यहूदा नु यरूसलेममी चढेशो साइ डोंइती डा खोदेशो पा ब्राइब” देंत।

5 तन्न मेको क्येडा डोंइती “गो निसाफ पचा कली इन बाक्तीकेमी जाक्नुड। गो टुना मुना पाइबपुकी, मुर आन मीश वोंइश नु इप्बपुकी, जोल पा कसम जाइबपुकी, गेय पाइब आन कली गाल्ल मगेबपुकी, वोंइश बेक्शो मीश मुर, रोम रोइक्च, नु अर्को रागी डा मुर आन कली निसाफ पा मगेबपुकी नु आं क्येडा महिब नेल्ल आन कली निसाफ पथ जाक्नुड” दे मुर नेल्ल आन परमप्रभु यावेमी देंत।

### गेचा माल्लो १० भाग

6 मिनु मेकोमी “गो, परमप्रभु यावे, गेनायो मफांडसीनुड। मोपतीके गे याकूब आ चच युइ मुल सम्म ब्रोंइशो बाक्नीनी।

7 इन किकी पिपी आन बाक्ची ना रे आं फुल्लुम मुशा ब्रेक्शो लोत्र मटिथु, हेंथे लां खोइक्तीनी। आं गे लेतीन। मिनु गो इन गे लेत्नुड” दे मुर नेल्ल आन परमप्रभु यावेमी देंत। तन्न गेपुकीमी “गो दोपा लेत्त्या?” देंतीनी। जकरिया १:३

8 परमप्रभुमी “मार, मुरपुकीमी परमप्रभु आ मार मार खुइ पने चाप्नीमी डा? तन्न गेपुकीम आं के खुइ पशो बाक्नीनी। मो हना यो गेपुकीमी ‘गेपुकीमी इन के मार खुइ पका डा?’ देंनीनी। इन १० भाग डा भाग का नु मार मार चढेतीकेमी खुइ पशो बाक्नीनी। प्रस्थान २५:२

9 गे सराप रशो दुम्तीनी। मारदे हना गे आं मार मार खुइ पाइब बाक्नीनी। गे इस्राएल नु मुर नेल्लेमी आं कली रोइक्ताक्यीनी। हागै १:५-६

10 गे नेल्लेमी इन १० भाग डा भाग का वोइक्तीकेमी चाक्कीन। मिनु आं खिंमी जचा थोव्रक बाक्ल। मोपा आं कली नाक्शा, कोव्रडीन। गो स्वर्ग डा लाप्चो रोकशा, इन कली शुश आसीक गेबाक्डा, कों, मगेबाक्डा” दे मुर नेल्ल आन परमप्रभु यावेमी देंत।

11 मिनु “गो इन रू डा बाली नाली खतम मसेल्चा डा पा माले आन कली हुइक्नुडमी। इन रूम बाक्शो अङ्गुर सिश्शा ग्रेल्नीम” दे मुर नेल्ल आन परमप्रभु यावेमी देंत। योएल १:४

### परमप्रभुमी शिशी पाइब देशो

12 मिनु “रागी रागी डा मुर नेल्लेमी इन परबम ‘आसीक रशा, ग्येरशो मुर बाक्नीमी’ देंनीम। मारदे हना इन रागी थम आसीक रशो रागी दुम्ब” दे मुर नेल्ल आन परमप्रभु यावेमी देंत।

13 मिनु परमप्रभु यावेमी “गे आं परबम मरिम्शो लोव्र पाइतीनी हना यो ‘इन कली मार मरिम्शो लोव्र पका डा?’ देंतीनी।

14 गेपुकीमी “परमप्रभु आ गेय पचा, मोशीन बाक्ब। आ शेंशो लोव्र पचा नु बेक्शो मुर आ परबम रोंका पशो खोदेशो पा मुर नेल्ल आन परमप्रभु यावे आ डोंइती रोंका पचा, मोशा बाक्ब। भजन संग्रह ७३:१३-१४; जकरिया ७:३,५

15 मुल गो ठेयब लेशो मुर आन कली रिम्शो मुर बाक्नीम, देंनीकी। मारदे हना मरिम्शो पाइबपुकी दारनीम। परमप्रभु कली मरिम्शो पाइब ब्रोंइशा बाक्नीम” देंनीनी” देंत।

16 मिनु परमप्रभु यावे क्येडा हिंब आन दातेमी लोव्र पांतेक्म। मिनु परमप्रभु यावेमी नोफा दाइश्शा, मेको आन लोव्र नेंतु। मिनु आ डोंइती आ कली मान पा हिंब, आ नें ठेयब सेल्ब आन परबम मिम्तीक किताब ब्रेक्शो बाक्त।

17 मिनु मुर नेल्ल आन परमप्रभु यावेमी “मेको आं मुर दुम्नीम। आं निसाफ पतीक नाक्त आं नेक्था डा मुर दुम्नीम। दोपा मुरुमी आंम कली गेय पाइब तौ कली शिशी पा वोइक्बा, मोपा गो मेको आन कली शिशी पा वोइक्नुड। प्रस्थान १९:५

18 मेको नाक्त ठीक पाइब नु परमप्रभु आ अरेशो मटीब खाल का डा मदुम्नीम। मेको ताइनीनी। परमप्रभु कली गेय पाइब नु गेय मपाइब खाल का डा मदुम्नीम। मेको यो ताइनीनी” देंत।

## 4

### परमप्रभु यावे आ नाक्त

1 मुर नेल्ल आन परमप्रभु यावेमी “आं निसाफ पतीक नाक्ती जाक्ब। मेको ठेयब मी खोदेशो पा ब्रशो बाक्ब। मेना ठेयब लेशो नु मरिम्शो पाइब नेल्ल सोव्रशो ठुटा खोदेशो बाक्नीम। मेको नाक्ती मीम मेको आन कली नेक्ब। मिनु मेको आन शाक्श नु राशी यो मलीब।

2 तन्न गे आं नें कली मान पाइब, इन डोंइती आं ठीक पतीके नां खोदेशो पा दाप्ब। इन रोइ यो सानीनी। गे गोठ रे पा मूशो बाछा खोदेशो पा प्रेक्ना प्रेक्न दोरनीनी। लूका १:७८

3 मिनु गेपुकीमी आं अरेशो लोव्र मटीब आन कली इन खोइलीमी दिम्नीनी। आं निसाफ पतीक नाक्ती मेको इन खोइलीम दिम्शा, पुलु खोदेशो सेल्चा पुंडसीनीमी” दे मुर नेल्ल आन परमप्रभु यावेमी देंत।

4 परमप्रभुमी “आं वाइल मोसामी इन कली गेशो आं अरेशो लोव्र मिम्तीन। गो मेको फुल्लुम मुशा ब्रेक्शो लोव्र नु आं देशो ठीक पतीक लोव्र होरेब डांडामी इस्राएली नेल्ल आन कली अरेचा कली गेता।

5 नेनीन, आं ठेयब नु हिंचा डा नाक्त जाक्चा क्येडा डोंडती आं लोव्र पाइब एलीया कली इन बाक्तीकेम सोडक्नुड। मत्ती ११:१४; १७:११-१३; योएल ३:४

6 मिनु मेकोमी आम आफ आस थुं आस आल गे नु आल आन थुं आम आफ गे लेप्पाइक्ब। मोदेशो मदुम्त हना, गो रागी कली सराप पाइक्नुड” दे परमप्रभु यावेमी देंत। लूका १:१७

## मती

**ब्रेक्ब मुर:** एको किताब मती आ ब्रेक्शो बाक्ब। मती शेंसीब आन दाते डा का बाक्त। मेको कली अल्फयस आ तौ लेवी यो देंतेक्म। तन्न थमा सुदा नोले मती नें वोंडक्तु।

**गेना ब्रेक्शो:** मती आ ब्रेक्शो ग्येरपाइक्ब लोत्र यरूसलेम खतम सेल्चा क्येडा डोंइती ब्रेकने थुम्शो बाक्त। एको ५८ ए. डी. हिब्रू लोत्रमी ब्रेक्शो बाक्त। नोले यहूदी नेल्ल ब्रातेक्म। मिनु मती मेको आन कली शेंचा कली लत। मेना ग्रीक लोत्र पाइबमी यो एको लोत्र रुच्या दाक्शो बाक्तेक्म। मोपतीके मेकोमी आ ब्रेक्शो ग्येरपाइक्ब लोत्र लेंशा ग्रीक लोत्रम ब्रेक्शो बाक्त, दे मिन्मीम। मती आ ब्रेक्शो ग्येरपाइक्ब लोत्रम डोंइती नु नोले दुम्शो लोत्र इच्छा खाल्ला ब्रेक्शो बाक्ब।

**मारदे ब्रेक्शो:** येसु ख्रीस्त पिप बाक्ब। परमप्रभु यावे आ राज्य आ पर्वम लोत्र पाइब।

येसु आ किकी पिपी  
लूका ३:२३-२८

1 अब्राहाम आ तौ, पिप दाऊद आ तौ, येसु ख्रीस्त आ किकी पिपी आन नें एको बाक्नीम। १इतिहास १७:११; उत्पत्ती २२:१८

2 येसु ख्रीस्त आ किकी पिपी सु सु बाक्मा बाक्त देंशा हना, डोंइती अब्राहाम बाक्माक्त। अब्राहाममी इसहाक थिमाक्त। इसहाकमी याकूब थिमाक्त। याकूबमी यहूदा नु आ वोबु थीमी बाक्त। उत्पत्ती २१:३,१२; उत्पत्ती २५:२६; उत्पत्ती २९:३५; उत्पत्ती ४९:१०

3 यहूदामी तामार रे परेस नु जेरह तौ निकशी थिम्सी बाक्त। परेसमी हेसोन थिमाक्त। हेसोनमी अराम थिमाक्त। रूथ ४:१८-२२; उत्पत्ती ३८:२९-३०

4 अराममी अम्मीनादाब थिमाक्त। अम्मीनादाबमी नहशोन थिमाक्त। नहशोनमी सालमोन थिमाक्त। 5 सालमोनमी राहाब माइशो मीश रे बोआज थिमाक्त। बोआजमी रूथ माइशो मीश रे ओबेद थिमाक्त। ओबेदमी येस्से थिमाक्त। येस्सेमी दाऊद थिमाक्त। दाऊद चहिं पिप दुम्माक्त। यहाँसु २:१; रूथ ४:१३-१७

6 पिप दाऊदमी उरीयाह आ मीश चाक्शा, सोलोमन थिमाक्त। २सामुएल १२:२४

7 सोलोमनमी रेहोबाम थिमाक्त। रेहोबाममी अबीयाह थिमाक्त। अबीयाहमी आसा थिमाक्त। १इतिहास ३:१०-१६

8 आसामी येहो-शाफात थिमाक्त। येहो-शाफातमी योराम थिमाक्त। मिनु योराममी उज्जीयाह थिमाक्त।

9 उज्जीयाहमी योथाम थिमाक्त। योथाममी आहाज थिमाक्त। आहाजमी हिज्कीयाह थिमाक्त।

10 हिज्कीयाहमी मनस्से थिमाक्त। मनस्सेमी आमोन थिमाक्त। आमोनमी योसीयाह थिमाक्त।

11 योसीयाहमी येकोन्याह नु आ लोकब थीमी बाक्त। येकोन्याह आ पालामी बेबीलोन डा मुरपुकीमी यहूदी आन कली लडाइ पा ग्याइशशा बेबीलोन चाक्दीत्मे बाक्त। २राजा २५:७,११,२१

12 बेबीलोन चाक्दीत्मे आ नोले येकोन्याहमी शाल्तीएल थिम्माक्त। शाल्तीएलमी जेरूब-बाबेल थिमाक्त।

13 जेरूब-बाबेलमी अबीउद थिमाक्त। अबीउदमी एल्याकीम थिमाक्त। एल्याकीममी आजोर थिमाक्त।

14 आजोरमी सादोक थिमाक्त। सादोकमी अकीम थिमाक्त। अकीममी एलीउद थिमाक्त।

15 एलीउदमी एलाजर थिमाक्त। एलाजरमी मात्थान थिमाक्त। मात्थानमी याकूब थिमाक्त।

16 मिनु याकूबमी योसेफ थिमाक्त। योसेफ मरीयम आ वोंइश बाक्माक्त। मरीयममी येसु थिमाक्त। येसु कली ख्रीस्त देंमा बाक्त। लूका १:२७

17 अब्राहाम रे पा दाऊद सम्म १४ पाला दुम्मा बाक्त। मिनु दाऊद पिप रे पा बेबीलोन चाक्दीत्ची सम्म १४ पाला दुम्मा बाक्त। बेबीलोन चाक्दीशो रे ख्रीस्त जरमेसेनु १४ पाला दुम्मा बाक्त।

येसु जरमेशो



18 येसु ख्रीस्त जरमेचा कली दोदेशो दुम्माक्त देशा हना, मरीयम योसेफ कली गेशा लोत्र खोडक्ने थुम्शो बाक्माक्त। मिनु योसेफमी मरीयम कली ग्युंवे पा आ खिं लाडक्चा क्येडा डोंडती मरीयम आल कुरशो बाक्माक्त। मेको आल चहिं मुर आ आल ममाड। परमप्रभु यावे आ सोक्त रे पा दुम्शो बाक्माक्त। लूका १:३५

19 मिनु योसेफमी “मरीयम आल कुरशो बाक्माक्त” दे तुडशशा “मुल प्रोंइचा दुम्ती” दे मिम्ता बाक्त। योसेफ रिम्शो मुर बाक्माक्त। मोपतीके “मरीयम कली मुने मतोक्चा” दे मिम्शो बाक्माक्त।

20 मिनु “गो प्रोंइचा दुम्ती” दे मिम्ना मिम्न बाक्मेनु, काबु डोमु तवा बाक्त। मिनु डोमु तवानु, परमप्रभु यावे आ स्वर्ग डा गेय पाडबमी “दारुद आ तौ योसेफ नेनो। मरीयम कली प्रोंइनुड, दे ममिम्तो। महिंथु इ खिं लाडशशा वोडसो। आ कोत्रजम बाक्शो चहिं परमप्रभु यावे आ सोक्त के बाक्त।

21 नोले तौ का थीब। मेको कली येसु नें वोतो। मारदे हना मेकोमी आ मुर आन कली पाप रे प्रोंइब” दे तुडक्पदा बाक्त। लूका २:२१; प्रेरित ४:१२; भजन संग्रह १३०:८

22 मेको मो दुम्शोमी परमप्रभु यावेमी साड नेसी आ लोत्र पाडब पपाडशशो लोत्र खाप्ताक्व। साड नेसी परमप्रभु यावे आ लोत्र पाडबमी

23 “नेनीने, कन्ने मीश आलमी कोत्रज कुरशा, तौ का थीब। मेको आल आ नें इम्मानुएल वोडक्नीम। इम्मानुएल देशो ‘परमप्रभु यावे गोपुकी नु बाक्शो बाक्ब’ दे रुम्सीब” दे ब्रेक्शो बाक्ब। यसैया ७:१४

24 योसेफ निन्द्रा रे सेंसीशा बोक्शा, परमप्रभु यावे आ स्वर्ग डा गेय पाडब आ लोत्र टिशा, मरीयम कली आ खिं लदा बाक्त।

25 मरीयम नु मड्पथु, तौ का थिमाक्त। मिनु मेको कली येसु नें वोदा बाक्त।

## 2

### सोरुल कोत्रशा, जोक्ब तुडक्ब जाक्शो

1 येसु यहूदीया रागी डा बेथलेहेम सहरमी जरमेसे बाक्त। मेना मेकेर हेरोद पिप बाक्माक्त। मिनु येसु जरमेसेनु, सोरुल कोत्रशा, जोक्ब तुडक्ब नां दाप्तीके रे यरूसलेममी जाक्मा बाक्त। लूका २:१-७

2 मिनु यरूसलेममी जाक्शा “यहूदी आन पिप ते जरमेसे? मारदे हना गोपुकीमी पूर्व डा रागीम आ सोरुल ताडतक। मिनु गो मेको कली टेयब सेल्थ जाक्तक। ते बाक्मा?” देमा बाक्त। गन्ती २४:१७

3 मिनु पिप हेरोद नु यरूसलेममी बाक्बपुकीमी मेको आन लोत्र नेशा, आन थुं ग्येत्थ लुक्च दुम्मा बाक्त।

4 मिनु हेरोदमी टेयब चढेब नु सास्त्री आन कली खुप्शा “ख्रीस्त ते जरमेसीबा?” दे हिल्लो पामी बाक्त। सास्त्री यहूदी आन कली परमप्रभु यावे आ अरेशो लोत्र शेंब बाक्शो बाक्तेकम।

5 मिनु मेकोपुकीमी “यहूदीया डा बेथलेहेम सहरमी जरमेसीब। मारदे हना परमप्रभु यावे आ लोत्र पाडबमी मीका ५:१; यूहन्ना ७:४२

6 ‘ए यहूदीया डा बेथलेहेम सहर, यहूदीया डा सहर नेल्ल क्येडा आडक्च महिक्सीशो सहर मनवे। मारदे हना इं इस्राएली आन कली सासन पाडब बेथलेहेममी जरमेसीब’ दे ब्रेक्शो बाक्ब” दे शेंदमे बाक्त। मीका ५:२

7 मिनु हेरोदमी मेको आन लोत्र नेशा सुडमी मतुडक्थु, नां दाप्तीके रे जाक्शो सोरुल कोत्रब आन कली ब्रेक्तीमी बाक्त। मिनु मेको सोरुल गेना ग्रूमे, दे रुबा बाक्त।

8 मिनु “लो, मुल बेथलेहेम सहर लने। मेकेर जाक्दीशशा, मेको आल मालीन। मिनु थिरशा आं कली यो शेंदीन। गो यो लशा टेयब सेल्नुड” दे सोडक्तीमी बाक्त।

9 मिनु मेकोपुकीमी पिप आ लोत्र नेशा, आन लां खोदमे बाक्त। मिनु नां दाप्तीकेमी तशो सोरुलमी आन कली लां कोंडदीमी बाक्त। लां कोंडना कोंडन नक थिशो आल बाक्तीके आ सोरुल खा दिक्माक्त।

10 सोरुल खा दिक्शो तशा, शुश ग्येरशा आल आ बाक्तीकेमी ओव्रमा बाक्त।

11 मिनु ओव्रशा, आल नु आल आ ममा मरीयम कली तामे बाक्त। मिनु आन पोक्च थेक्शा आल कली टेयब सेल्मे बाक्त। मिनु आन कुरशो थैलो प्राक्शा, सुन धूप नु ब्रोवशो रिना पाइब थोव्रक गुंडशा खेत्तमे बाक्त। भजन संग्रह ७२:१०,१५; यसेया ६०:६

12 आल कली गुम्ने थुम्शा, आन रागी लेत्ची ना परमप्रभु यावेमी डोमुमी “पिप हेरोद कली लेंशा मयुमीने” दे तुडक्पाइक्मी बाक्त। मिनु यरूसलेम लतीक लां हेरशा, आन रागी लेम्मा बाक्त।

### इजीप्त रागी लशो

13 मेकोपुकी लमा नोले काबु योसेफमी डोमुमी परमप्रभु यावे आ स्वर्ग डा गेय पाइब का फो गूशो तवा बाक्त। मेकोमी “मोबु आस कली लाइशशा, एकेर रे प्रोक्शा, इजीप्त रागी जाकदीशशा, लेत्तीन मदेड सम्म बाक्कीन। मारदे हना पिप हेरोदमी आल कली साइक्चा, दे माल्चा चिक्ताक्व” दे मदा बाक्त।

14 मिनु योसेफमी निन्द्रा रे सेसीशा छुल बोक्शा, मोबु आस कली लाइशशा मेको, नाक्दोन इजीप्त प्रोक्मा बाक्त।

15 मिनु इजीप्त रागीमी जाकदीशशा, पिप हेरोद मबेक्म सम्म मेकेर बाक्मा बाक्त। मो दुम्शोमी परमप्रभु यावे आ लोव्र थमा दुम्माक्त। साइ नेसी परमप्रभु यावेमी आ लोव्र पाइब रे पा “इजीप्त रे लेत्तो, दे आं तौ कली ब्रेत्ताक्ड” दे देंशो बाक्माक्त। होसे ११:१

### पिपमी आल आन कली साइक्पाइशशो

16 पिप हेरोदमी मार पवा बाक्त देशा हना “मेको सोरुल कोव्रशा जोक्ब तुडक्बपुकीमी जोल पाइयीमी बाक्त” दे तुडशशा चुरमाक्त। मिनु आन देंशो लोव्रमी “पिप मेना जरमेसीब” दे मिम्शा, मेको पिप दुम्ब आल कली थिन्ने मचाप्तीके बेथलेहेम सहर एर ओथ गाउं डा बर्स निकशी मलाक्शो वोंडश आल नेल्ल आन कली माल्ना माल्न साइक्पाइक्मी बाक्त।

17 मो पवानु, परमप्रभु यावे आ लोव्र थमा दुम्माक्त। साइ नेसी परमप्रभु यावेमी आ लोव्र पाइब येरमीया रे पा

18 “रामाह सहरमी रेंका पा डाक्शो नेंसीब। राहेलमी डाक्ना डाक्न बाक्ब। सुइमी लेम्ने मचाप्तीम। मारदे हना आ आल साइक्चा पुंडसाक्म” देंमाक्त। येरमीया ३१:१५; उत्पत्ती ३५:१९

### इजीप्त लां लेशशो

19 मिनु नोले पिप हेरोद बेक्माक्त। मिनु काबु इजीप्त रागीम बाक्शो योसेफ डोमु तवानु, परमप्रभु यावे आ स्वर्ग डा गेय पाइबमी

20 “मोबु आस कली लाइशशा, इस्राएल लेशशा लावो। आल कली साइक्चा माल्बपुकी बेक्तेक्म” देंमाक्त। प्रस्थान ४:१९

21 मिनु योसेफमी मोबु आस कली इस्राएल लेत्ता बाक्त।

22 मिनु लेशशा जाकदीशशा, यहूदीया रागीमी हेरोद आ तौ अरकीलाउस पिप दुम्शो बाक्त देंशो नेंशा, यहूदीया रागीमी बाक्चा हिंमाक्त। मिनु लेंशा डोमुमी “यहूदीयामी मबाक्कीन। गालील रागी लशा बाक्कीन” दे माइक्चा पुंडसे बाक्त। मिनु गालील रागी लमा बाक्त।

23 मिनु गालील डा नासरथ सहरमी जाकदीशशा बाक्मा बाक्त। मारदे हना साइ नेसी परमप्रभु यावे आ लोव्र पाइब आन लोव्र थमा दुम्चा माल्बाक्माक्त। मेकोपुकीमी “मेको कली नासरी देंनीम” देंशो बाक्मा बाक्ब। लूका २:३९; यूहन्ना १:४६

## 3

### ब्वाक्कुमी खुम्शा गुंडब यूहन्ना

मर्कूस १:२-८; लूका ३:१-८

1 मेना ब्वाक्कुमी खुम्शा गुंडब यूहन्ना यहूदीया डा गोरशो रागीम बाक्शा लूका १:१३

2 “इन थुं परमप्रभु यावे गे लेत्तीने। मारदे हना स्वर्ग डा राज्य जाक्चशो बाक्ब” दे मुर आन कली शेंना शेंन बाक्माक्त। मती ४:१७; रोमी १२:२

3 साइ नेसी परमप्रभु यावे आ लोव पाइब यसैयामी “गोरशो रागीमी सेंदा कामी ओदेंशो नेंसीब ‘प्रभु आ लां सेलीने। आ गाक्तीके फुल्लु ग्रोक्शा थेलीने’ देंशो नेंसीब” देंशो बाक्माक्त। मेको लोव पाइब यूहन्ना बाक्माक्त। यसैया ४०:३; यूहन्ना १:२३

4 यूहन्नामी दलओंठ आ चां के प्रोवशो वा फेक्बाक्माक्त, कुशुल के पेटी किप्बाक्माक्त। मिनु सल्ला ब्वशा, रोका खुदो जशा बाक्बाक्माक्त। २राजा १:८

5 मिनु गोरशो रागीम बाक्मेनु, यरूसलेम सहर नु यहूदीया रागी डा गांउ सहर डा मुर नेल्ल जाक्शा देल्मा बाक्त। यर्दन खोला आ नेक्था डा मुरपुकी यो शुश जाक्शा देल्मा बाक्त।

6 यूहन्ना आ लोव नेंशा, शुश मुरुमी आन मरिम्शो पशो शोवडमे बाक्त। मो पा शोवब आन कली यूहन्नामी यर्दन खोलामी खुम्शा गुंडदीमी बाक्त।

7 मिनु यूहन्नामी फरिसी नु सदुकी शुश जाक्शो तशा, मेको आन कली “गे बुस्स आ खलकपुकी, सुमी परमप्रभु यावे आ सजाइ रे ब्रोंडचा तांडसीब, दे शेंदीनी?फरिसी रिति थीती सेल्शा, रिम्शो पचा कली कोवब यो बाक्शो बाक्तेक्म। सदुकी यहूदी आन सरकार डा हुल ‘मुर मसेंसीनीम’ दे थमा सुइक्ब बाक्शो बाक्तेक्म। मती २३:३३

8 परमप्रभु यावे गे इन थुं लेशशो तचा डा पा फल सिप्पा कोइदीने।

9 अब्राहाम इं आफ बाक्ब, दे शोर गाक्शा मबाक्कीन। मारदे हना परमप्रभु यावेमी एको फुल्लु रे अब्राहाम कली आल सेल्ने चापब, दे तुइक्तीन। यूहन्ना ८:३३, ३९; रोमी २:२८:२९; रोमी ४:१२

10 तिम्चा, दे रवा आ पुंमी खा वोइश्शो बाक्ब। फल मसिपब रवा का का पा तिम्शा मीमी चोचा पुंडसीनीम, दे तुइक्तीन। लूका १३:६-९

11 इन थुं लेत्चा कली इन कली ब्वाक्कुम खुम्शा गुंडनन्नी। गो ब्वाक्कुम खुम्शा गुंडब ला नड। आं नोले जाक्ब चहिं आं क्येडा शुश सक्ति पाइश्शो टेयब बाक्ब। गो मेको आ जुत्ता गुप्शा कुरचा लायो मशिरनुड। मेकोमी इन कली परमप्रभु यावे आ सोक्तीमी खुम्ब, मीमी यो हुम्ब। यूहन्ना १:२६, २७, ३३; प्रेरित १:५; प्रेरित २:३-४

12 आ गुडमी ग्योल बाक्ब। मेकोमी लाडगामी हाम्शो चेरब हुरशा, भूस नु गेडा तिल्लब। गेडा कोठोमी कुर पा वोइक्ब। भूस चहिं गेनायो मकापब मीमी चोइब” दे माइक्मी बाक्त। मती १३:३०

येसु ब्वाक्कुम खुम्शा गुंडशो

मर्कूस १:९-११; लूका ३:२१-२२; यूहन्ना १:३२-३४

13 मिनु काबु येसु गालील रागी रे यूहन्ना नु ब्वाक्कुम खुम्शा गुंडसीथ यर्दन खोला यूहन्ना आ बाक्तीकेमी जाक्माक्त।

14 मिनु यूहन्नामी “गेमी आं कली कका ब्वाक्कुम खुम्शा गुंडचा गरब। मिनु मार आं गे पीनीनी?” देंमाक्त। यूहन्ना १३:६

15 मिनु येसुमी “मुल ओन पय। मारदे हना रिम्शो पतीके नेल्ल पचा माल्नय” देंमाक्त। मिनु यूहन्नामी “लो, मो हना” देंशा, येसु कली ब्वाक्कुम खुम्शा गुंडदा बाक्त।

16 मिनु ब्वाक्कु रे गूशा, खोला रे कुसानु, मार दुम्माक्त देंशा हना, येसुमी स्वर्ग रोक्सीशा, परमप्रभु यावे आ सोक्ती परवा खोदेंशो दुम्शा, यिशा आ रांमी जुक्चशो तवा बाक्त। यसैया ११:२

17 मिनु सरीड रे “एको आं दाक्शो तौ बाक्ब। एको कली तशा थाम्पा ग्येरसीनुड” देंशो सेंदा गूमाक्त। मती १७:५; यसैया ४२:१

## 4

येसु थाम्चा पुंडसीशो

मर्कूस १:१२-१३; लूका ४:१-१३

1 मिनु नोले सैतान रे पा थुं थाम्चा पुंडसीचा कली परमप्रभु यावे आ सोक्तीमी येसु कली गोरशो रागीमी चाक्दीदा बाक्त। हिबू ४:१५;

2 मिनू येसु ४० नाक्टो नाक्त मजथु बाक्माक्त। मिनू ४० नाक्त जाक्दीम्मेनु, शोव्लु बेक्माक्त। प्रस्थान ३४:२८; १राजा १९:८

3 मिनू सैतानमी येसु कली “मार, गे परमप्रभु यावे आ तौ नवे हना, एको फुल्लु आन कली शोब्ले दुमीन देशा शोब्ले सेलो” देमाक्त। उत्पत्ती ३:१-७

4 मिनू येसुमी “परमप्रभु यावे आ लोव्रमी ‘मुर जशा ला मब्रोंडनीम, परमप्रभु यावे आ देशो लोव्रमी यो ब्रोंडनीम’ दे ब्रेकशो बाक्त” दे लोव्र लेत्ता बाक्त। ब्यवस्था ८:३

5 मिनू नोले सैतानमी येसु कली यरूसलेम सहर लाइशशा, परमप्रभु यावे आ खिं डा नेल्ल क्येडा तारी लदा बाक्त।

6 मेकेर बाक्सानु, सैतानमी “मार, गे परमप्रभु यावे आ तौ नवे हना, एकेर रे प्रेक्को। मारदे हना परमप्रभु यावे आ ब्रेक्पाइशशो लोव्रमी ‘परमप्रभु यावेमी आ स्वर्ग डा गेय पाइब आन कली सोइशशा, इ कली आन गुडम ताक्शा खपीम नाइक्पाइक्ब। इ खोइल फुल्लु कामी यो मथोक्ब’ ब्रेक्शो बाक्ब” देमाक्त। भजन संग्रह ९१:११,१२

7 मिनू येसुमी “परमप्रभु यावेमी ब्रेक्पाइशशो लोव्रमी ‘परमप्रभु यावे कली थुं मथाम्चा’ दे यो ब्रेक्शो” देमाक्त। ब्यवस्था ६:१६

8 मिनू नोले सैतानमी येसु कली ठेयब लाइशशो डांडा तारी लदा बाक्त। मेकेर चाक्दीशशा, रागी डा नेल्ल राज्यपुकी नु आन दारस कोइदा बाक्त।

9 मिनू “गे पोक्च थेक्शा, आं कली सेउ पाप्तीवी हना, एको नेल्ल गेनन” देमाक्त। मती १६:२६

10 मिनू येसुमी “लावो, सैतान। मारदे हना ‘परमप्रभु यावे कली ला सेउ पावो। मिनू ठेयब सेलो’ देशा ब्रेक्शो बाक्ब” देमाक्त। ब्यवस्था ६:१३

11 मिनू सैतानमी येसु कली प्रोंइशा लमाक्त। मिनू मार दुम्माक्त देशा हना, परमप्रभु यावे आ स्वर्ग डा गेय पाइबपुकी जाक्शा, येसु कली गेय पामे बाक्त। यूहन्ना १:५१; हिब्रू १:६,१४

### येसुमी शेंचा गोशो

मर्कूस १:१४-१५; लूका ४:१४-१५

12 मिनू नोले येसुमी “यूहन्ना कली ग्याइशशा चोक्तेक्म” देशो लोव्र नेंशा, यहूदीया रागी रे लशा, गालील रागी जाक्दीम्माक्त। मती १४:३

13 मिनू नासरथ रे लशा डा मिन, जबूलून नु नाप्ताली रागी डा समुन्द्र आ नेक्था डा कापेरनाउम सहरम जाक्दीशशा बाक्माक्त।

14 मोदेशो पा साइ नेसी परमप्रभु यावे आ लोव्र पाइब यसैया आ लोव्र थमा दुम्माक्त। यसैयामी

15 “जबूलून, नाप्ताली रागी, समुन्द्र आ एर ओंथ रागी, यर्दन खोला आइक्वी हांबु नु अर्को जात डा गालील रागीमी बाक्बपुकी,

16 डोंइती छिडछिडम बाक्बपुकीमी मुल ठेयब छेडछेड ताम्तेक्म। बेक्चा डा रागी नु हिंशा बेक्चा डा रागीम बाक्ब आन कली छेडछेड दुम्त” दे ब्रेक्शो बाक्त। यसैया ८:२३; यसैया ९:१; यूहन्ना ८:१२

17 येसुमी मुर आन कली “इन थुं परमप्रभु यावे गे लेत्तीन। मारदे हना स्वर्ग डा राज्य जाक्चशो बाक्ब” दे शेंचा गोवा बाक्त। मती ३:२

### येसुम शेंसीबपुकी योव्रशो

मर्कूस १:१६-२०; लूका ५:१-११; यूहन्ना १:३५-५१

18 मिनू काबु गालील डा समुन्द्र आ नेक्था गाक्मेनु, माझी वोबु निक्शीम एर ओंथ ग्याइल आप्शा, डांड रेन्ना रेन्न बाक्शो ताम्सी बाक्त। मेको निक्शी आस नें का पत्रुस माइशशो सिमोन बाक्माक्त, का अन्द्रीयास बाक्माक्त।

19 मिनू येसुमी “आं नोले खोइय्यीसी। मिनू मुर आन कली रेप्ब सेल्नन्सी” दे ब्रेत्तीम्सी बाक्त। मती २८:१९-२०

20 मिनू ग्याइल थु था प्रोंइशा, येसु आ नोले खोदसे बाक्त। मती १९:२७

11 मिनू मेकेर रे लशा हिरसमानु, येसुमी जब्दी नु आ तौ याकूब नु यूहन्ना पोबु आन कली तामी बाक्त। मेको सांफा डोंगाम बाकशा गाकशो, ग्याइल प्रोव्रना प्रोव्रन बाक्मा बाक्त। मिनू येसुमी वोबु आस कली ब्रेत्तीम्सी बाक्त।

12 मिनू आस गेय प्रॉइशा, येसु आ नोले खोदसे बाक्त।

येसुम रोइ पाइब सापाइश्शो

मर्कूस १:३९; मर्कूस ३:७-१२; लूका ४:४४; लूका ६:१७-१९

13 मिनू गालील रागी तेइ तेइ हिरना हिरन लमानु, येसुमी ग्रुम्तीक खिंमी स्वर्ग डा राज्य डा ग्येरपाइक्व लोत्र शेंना शेंन नु रोइ पशो नु रोइमी गुरशो मुर नेल्ल आन कली सापाइक्ना पाइक्न गाक्बाक्माक्त।

14 मिनू सिरिया रागी नेल्ल मेको आ पबर्म लोत्र ब्रम्माक्त। मिनू रोइ पशो मुर नेल्ल आन कली येसु आ बाक्तीकेमी चाक्स डा चाक्स पाइबाक्मा बाक्त। वोलमी तशो, वोलमी सुम्शो नु गुइ खोइल मदुक्व मुर चाक्गमे बाक्त। मिनू येसुमी मेको नेल्ल आन कली सापाइक्मी बाक्त। मर्कूस ६:५५

15 मिनू गालील, डेकापोलीस, यरूसलेम, यहूदीया रागी नु यर्दन खोला आइक्ची हांबु डा शुश मुरुमी येसु आ नोले खोदमे बाक्त।

## 5

डांडाम शेंशो लोत्र

लूका ६:२०-४९

1 मिनू येसुमी शुश मुर आ नोले खोइश्शो तशा, डांडा डोइश्शा निस्से बाक्त। मिनू मेकेर आ शेंसीबपुकी यो जाक्मा बाक्त।

2 मिनू मेकेर जाकशो आन कली ठेयब सेंदा पा शेंना शेंन बाक्माक्त।

आसीक राइब सु बाक्नीम?

मिनू येसुमी

3 “महिकसीशो मुरपुकी आसीक राइनीम। मारदे हना स्वर्ग डा राज्य मेको आन केन बाक्ब। यसैया ५७:१५

4 आन थुं खाइश्शोपुकी आसीक राइनीम। मारदे हना आन थुं नाइक्चा ताइनीम। भजन संग्रह १२६:५; प्रकाश ७:१७

5 ब्रेम्शोपुकी आसीक राइनीम। मारदे हना रागी आन केन दुम्ब। मती ११:२९; भजन संग्रह ३७:११

6 ठीक पशो तचा दाक्बपुकी आसीक राइनीम। मारदे हना आन दाक्शो ताइनीम। लूका १८:९-१४; यूहन्ना ६:३५

7 शिशी पाइबपुकी आसीक राइनीम। मारदे हना आं यो शिशी ताइनीम। मती २५:३५-४६; याकूब २:१३

8 आन पाप क्याम्चा पुंइसीशा, रिम्शो थुं दुम्शोपुकी आसीक राइनीम। मारदे हना परमप्रभु यावे कली ताइनीम। भजन संग्रह २४:३-५; भजन संग्रह ५१:१२-१३; १यूहन्ना २:२-३

9 दुशा गारशा बाक्बपुकी आसीक राइनीम। मारदे हना परमप्रभु यावे आ तमी तौ देंचा पुंइसीनीम। हिब्रू १२:१४

10 ठीक पशा यो खेदा पचा पुंइसीबपुकी आसीक राइनीम। मारदे हना स्वर्ग डा राज्य मेको आन केन बाक्ब। १पत्रुस ३:१४

11 आं पबर्म मुरपुकीमी इन कली हेला पा, खेदा पा, जोल पा, मरिम्शो लोत्र पाम्तेक्म हना यो, आसीक राइनीनी। मती १०:२२; प्रेरित ५:४१; १पत्रुस ४:१४

12 ग्येरसीने। मारदे हना स्वर्गमी इन कली ठेयब इनाम वोइश्शो बाक्ब। साइ नेसी रे मुल सम्म परमप्रभु यावे आ लोत्र पाइब आन कली खेदा पा श्येत गेस डा गेस पाम्तेक्म। हिब्रू ११:३३-३८; याकूब ५:१०

रागी डा हिक्सी

13 गे रागी डा हिक्सी ननी। हिक्सी आ डांम्या जाम्त हना, मारेड काम मलाप्व। लांमी ताडशशा मुर गाकमानु, दिम्शा खाक्चा पुंडसीब। मर्कूस ९:५०; लूका १४:३४-३५

### रागी डा छेडछेड

14 गे रागी डा छेडछेड ननी। डांडामी सेल्शो सहर मारेडमी मफारसीब। यूहन्ना ८:१२

15 सुडमी बत्ती दाशा, पाथीम गुप्शा मवोडक्नीम। खिं आगा नेल्ल छेडछेड पा तचा डा पा वोडक्नीम। मर्कूस ४:२१; लूका ८:१६

16 मेको ब्रशो बत्ती खोदेशो पा गेमी इन रिम्शो गेय रे पा इन छेडछेड मुर आन कली कोइदीने। मिनु इन रिम्शो पशो तशा, स्वर्गमी बाक्ब इन आफ कली ठेयब सुडशशा मान पाइनीम। फिलिप्पी २:१४-१५; यूहन्ना १५:८; एफिसी ५:८-९

### येसुमी नु अरेशो लोव

17 परमप्रभु यावे आ अरेशो लोव नु परमप्रभु यावे आ लोव पाइबपुकीमी ब्रेक्शो लोव क्याम्ब, दे ममिम्तीने। क्याम्चा कली ममाड, नेल्ल पचा कली जाक्ती। मती ३:१५; रोमी ३:३१; रोमी १०:४; १यूहन्ना २:७

18 नोफा दाडशशा नेनीने, सरीड नु रागी मग्याम्म सम्म परमप्रभु यावे आ लोव का यो मग्याम्ब। नेल्ल थमा दुम्ब। लूका १६:१७

19 सुमी परमप्रभु यावे आ अरेशो लोव के लोव का मपाइबा, मुर आन कली मो पचा शेंबा, मेको मुर स्वर्ग डा राज्यमी नेल्ल क्येडा आइक्च दुम्ब। सुमी लोव का यो मप्रोइथु, नेल्ल पशा डा मिन, मुर आन कली शेंबा, मेको चहिं स्वर्ग डा राज्यमी ठेयब दुम्ब। याकूब २:१०

20 सास्त्री नु फरिसी आन पशो क्येडा गे रिम्शो ठीक गेय मपाइतीनी हना, गेपुकी यो स्वर्ग डा राज्य ओवचा मताडनीनी, दे इन कली देंनुड। मती २३:२-३३

### साइक्चा मदुम्ब, दे शेंशो

21 साड नेसी इ किकी पिपी आन कली 'मुर कली मसाइक्चा। सुडमी अरु कली साइक्तु हना, मेको सजाड गेचा पुंडसीब' दे देशो लोव बाक्ब, दे तुडक्नीनी। प्रस्थान २०:१३, प्रस्थान २१:१२

22 गोमी चहिं इन कली मार देंनुड देशा हना, सु मुर नु ईख पा ब्राशा बाक्बा, मेको सजाड गेचा पुंडसीब। सुमी अर्को कली मरिम्शो लोव पाइबा, मेको कछडी पचा पुंडसीब। सुमी अर्को कली 'ए मूर्ख' देंबा, मेको नरक डा मीम हुम्चा पुंडसीब। १यूहन्ना ३:१५

23 मोपतीके गे परमप्रभु यावे कली मार मार चढेचा सादीनीनु, सुड गेपुकी नु गाडशशो, चुरशो फुकतीनी हना,

24 चढेचा क्येडा डोइती मेको आन कली गुम्शा, दुशा गारशा ला चढेने। मर्कूस ११:२५

25 इन कली मरिम्शो पाइब नु लांमी बाक्नीनुन, गारीने। मारदे हना मेकोमी इन कली अडडाम लाडशशा, निसाफ पाइब आ डोइती चाक्दीप्व। मिनु निसाफ पाइबमी पुलीस आन गुडमी गेब। मिनु पुलीसम जेल्खानम चोक्नीम। मती १८:२३-३५; लूका १२:५८-५९

26 नोफा दाडशशा नेनीने, इन कली नोले डा क्वद्रन्स मथाप्पाइक्थु मप्रोइनीम। क्वद्रन्स नेल्ल क्येडा आइक्च क्येट बाक्त।

### मीश वोंडश आस नाता मखोडक्चा

27 ग्युंवे पशोपुकी आन मीश वोंडश नाता ब्राचा मदुम्ब देशो बाक्ब, दे तुडक्नीनी। प्रस्थान २०:१४

28 गो मार देंनुड देशा हना, ग्युंवे पशो मुरुमी अर्को मीश मुर तशा वाल्त हना, आ थुंमी मीश वोंडश आस नाता खोडक्ब। २सामुएल ११:२; अय्युब ३१:१; २पत्रुस २:१४

29 इ ग्युरा मिक्चीमी इ कली पाप पपाइक्तु हना, फेशशा ताडक्तो। मारदे हना रां नेल्ल नरकम खुम्चा पुंडसीचा क्येडा रां डा मिक्च का जाम्शा लशो रिम्शो दुम्ब। मती १८:८-९; मर्कूस ९:४७; कलस्सी ३:५

30 इ ग्युरा गुडमी इ कली पाप पपाइक्तु हना, खोइशशा ताइक्तो। मारदे हना रां नेल्ल नरकम खुम्बा पुंडसीचा क्येडा रां डा गुड का जाम्शा लशो रिम्शो दुम्ब।

31 सु आ मीश नु ब्राबा, मेकोमी छोड पत्र ब्रेक्शा गेचा माल्ब, दे यो देंशो बाक्ब। ब्यवस्था २४:१; मती १९:३-९; मर्कुस १०:४-१२

32 गोमी मार देंनुड देशा हना, सुमी आ मीश आं नु फ्राशा सोइक्बा, मेकोमी आ मीश कली मीश वोंइश आस नाता खोइक्पाइक्ब। मीश मुरुमी आ वोंइश बाक्ना बाक्न अर्को वोंइश मुर नु मरिम्शो गेय पाप्तु हना, मोदेंशो मीश मुर कली प्रोंइचा दुम्ब। सुमी छोड पत्र गेचा पुंडसीशो मीश मुर ग्युबे पाइबा, मेकोमी यो मीश वोंइश आस नाता खोइक्ब। लूका १६:१८; १कोरिन्थी ७:१०-११

#### कसम मजचा

33 साइ नेसी इ किंकी पिपी आन कली 'जोल पा कसम मजचा। परमप्रभु यावे कली मार मार गेनुड, पाइनुड, दे कसम जाइतीनी हना, मेकोन गेचा पचा माल्नीनी' देंशो बाक्ब, दे यो तुइक्नीनी। लेवी १९:१२; गन्ती ३०:३

34 गोमी मार देंनुड देशा हना, कसम का यो मजने। सरीड आ नेमी कसम मजने। मारदे हना सरीड परमप्रभु यावे आ नित्तीके बाक्ब। मती २३:१६-२३२; यसेया ६६:१

35 रागी आ नेमी यो कसम मजने। मारदे हना रागी परमप्रभु यावे आ खोइल थेक्तीक बाक्ब। यरूसलेम सहर आ नेमी यो कसम मजने। मारदे हना यरूसलेम नेल्ल क्येडा ठेयब पिप आ सहर बाक्ब। भजन संग्रह ४८:३

36 इन पिया थिशा यो कसम मजने। मारदे हना चां का यो बुश के क्येर, क्येर के बुश सेल्ले मचाप्नीनी।

37 इन देंशो लोव्र चहिं 'दुम्ब हना दुम्ब, मदुम्ब हना मदुम्ब' देनीने। मेको क्येडा लाक्शो लोव्र चहिं मरिम्शो लां रे पीब। याकूब ५:१२

#### क्येक्क मलेत्चा

38 'सुडमी इन मिक्च पुक्ताक्म हना, मेको आन कली यो मिक्च पुक्तीने। सुडमी इन खुड जिक्ताक्म हना, मेको आन कली यो खुड जिक्तीने' देंशो बाक्ब, दे तुइक्नीनी। प्रस्थान २१:२४

39 गो मार देंनुड देशा हना, सुडमी इन कली मरिम्शो पाम्तेक्म हना यो, मेको आन कली आन क्येक्क मलेत्तीने। इन ग्युरा चोव्रचो राप्तेक्म हना, पेरा यो राप्चा गेने। बिलाप ३:३०; यूहन्ना १८:२२-२३; रोमी १२:१९,२१; १पत्रुस २:२०-२३

40 इन कली मुददान कोप्शा, अडडाम लाइशशा, इन फेक्शो वा लाइक्चा माल्तेक्म हना, इन बरखी यो गेशा सोइक्तीने। १कोरिन्थी ६:७; हिबू १०:३४

41 इन कली आधा कोस सम्म लचा, दे डिपी पाम्तेक्म हना, कोस का सम्म यो लने।

42 इन के मारेइ थोव्रक पुंडतेक्म हना, आन पुंडशो गेने, जेर पुंडतेक्म हना यो, मगेनीकी, दे श्येत्थी मसोइक्तीने।

#### जोरी सत्रु आन कली यो दाक्चा

43 'गेपुकी नु बाक्ब मुर आन कली दाक्तीने। जोरी सत्रु आन कली चहिं मदाक्तीने' देंशो बाक्ब, दे तुइक्नीनी। लेवी १९:१८

44 गोमी इन कली मार देंनुड देशा हना, जोरी सत्रु आन कली दाक्तीने। इन कली हेला पा खेदा पाइब आन परबम परमप्रभु यावे कली पुनीने। प्रस्थान २३:४-५; लूका ६:२७-२८; रोमी १२:१४,२०; लूका २३:३४; प्रेरित ७:५९; लूका ६:२७-२८

45 मो पाइतीनी हना, इन स्वर्ग डा आफ आ तमी तौ नकी, दे कोंइनीनी। स्वर्गम बाक्ब आफोमी रिम्शो मरिम्शो पाइब नेल्ल आन कली नां दाप्पाइक्ब। नेल्ल आन कली रेड यिपाइक्ब। एफिसी ५:१

46 इन कली दाक्ब आन कली ला दाक्ताक्नी हना, मार इनाम ताइनीनी डा? तिरो पोक्बपुकीमी यो मो मपाइनीम डा?

47 इन जात, थर डा मुर आन कली ला मान पा सेत्ताक्नी हना, मार इनाम ताइनीनी डा? परमप्रभु कली मतुइक्बपुकीमी मसम्मुइनीमी डा?

48 मोपतीके दोपा इन स्वर्ग डा आफोमी रिम्शो पाइबा, मोपा गे यो रिम्शो पने। लेवी १९:२

## 6

### मथीब आन कली शिशी पचा

1 होस पांडसीने, मुर आन डोंइती कोंइचा कली प्रुडग आन कली शिशी मपने। मारदे हना मोदेशो पाइब आन कली स्वर्गम बाकब इन आफोमी इनाम मगेब।

2 श्येत जाइब, मथीब आन कली मारेइ गेनीनु, इन डोंइती तुराही मतापीने। कपटीपुकीमी गुम्तीक खिंमी, लांमी मुर आन कली आन रिम्शो पतीके कोंइशा ठेयब सेल्पांडसीनीम। नोफा दाइश्शा नेनीने, मेको आन तचा डा इनाम मारेइ मलीब। १कोरिन्थी १३:३

3 श्येत जाइब, मथीब आन कली मारेइ गेनीनु, इन ग्युरा गुइमी गेशो, पेरा गुइ कली यो मतुइकपाइकथु गेने। मती २५:३७-४०; रोमी १२:८

4 मोदेशो पा इन गेशो खुइश्शोम बाकब। मिनु खुइश्शो यो नेल्ल तुइकब इन आफोमी इन कली इनाम गेब।

### प्रार्थना पचा शेंशो

5 परमप्रभु यावे कली प्रार्थना पनीनु, कपटीपुकीमी पशो खोदेशो पा मपने। मेकोपुकीमी गुम्तीक खिंमी, लांमी मुर आन कुल राष्शा कोव्रपांडसीशा, प्रार्थना पाइनीम। नोफा दाइश्शा नेनीने, मेको आन तचा डा इनाम मारेइ मबाकब।

6 गे चहिं परमप्रभु यावे कली प्रार्थना पनीनु, इन खिं ओव्रशा, लाप्चो चोकशा, सुइ आन मतुइकथु, खुइश्शोमी बाकब इन आफ कली प्रार्थना पने। मिनु खुइश्शो यो नेल्ल तुइकब इन आफोमी इन कली इनाम गेब।

7 परमप्रभु यावे कली प्रार्थना पनीनु, अर्को रागी डा मुरपुकीमी खोदेशो पा हेंथे शुश लोव्र मपने। मारदे हना शुश लोव्र पशोमी आन पुंइशो ताइनीम, दे मिन्मीम। यसैया १:१५

8 मेको आन पशो खोदेशो मपने। मारदे हना पुंइचा क्येडा डोंइती इन आफोमी इन माल्शो तुइश्शो बाकब।

9 ओदें प्रार्थना पने 'स्वर्गम बाकब आंइ आफ, इन नें ठेयब बाकल। लूका ११:२-४; इजीकीएल ३६:२३

10 इन राज्य जाकल। स्वर्गमी इन दाकशो खोदेशो पा रागीमी यो मोदेशोन दुम्ला। लूका २२:४२

11 काबु नाक्त डा जचा थोव्रक मुलाक्ती आंइ कली गेने।

12 आंइ मरिम्शो पशो क्याम्शा गेने। मारदे हना गो यो आंइ कली मरिम्शो पाइब आन कली माफ गेतक। मती १८:२१-३५

13 सैतानमी आंइ थुं हिरपाइक्या मगेने। आंइ कली सैतान रे प्रोनीने। मारदे हना राज्य, सक्ति नु छेडछेड गेना हना यो इन के नम' आमन। यूहन्ना १७:१५; १कोरिन्थी १०:१३; १इतिहास २९:११-१३

14 इन कली मरिम्शो पाइब आन कली माफ गेतीनी हना, स्वर्गमी बाकब इन आफोमी यो इन कली माफ गेब। मर्कूस ११:२५

15 माफ मगेतीनी हना, इन आफोमी यो इन कली माफ मगेब।

### बर्त बाक्या शेंशो

16 बर्त बाक्नीनु, राव कीशो कुल मसेलीने। कपटीपुकीमी आंइ बर्त बाकशो तांइसेकल, दे आन कुल राव कीपा कोंइनीम। नोफा दाइश्शा नेनीने, मेको आन तचा डा इनाम मारेइ मबाकब। यसैया ५८:५-६

17 गेपुकी चहिं बर्त बाक्नीनु, चांमी तेल खेकशा, कुल चिकशा, इन बुं जिप्शा बाक्कीन।

18 मो पाइतीनी हना, इन बर्त बाकशो खुइश्शोमी बाकब। मिनु खुइश्शो यो नेल्ल तुइकब इन आफोमी इन कली इनाम गेब।

### इन थुं शोंप गे महिरदीने

19 एको रागीमी शोंप खुप्शा, खेकशा मवोतीने। मारदे हना बुस्सुम खोइकब, खिया जोइब, खुइपुकीमी खुइ पाइनीम।



20 स्वर्गमी इन शोप वोतीने। मेकेर बुस्सुम मखोडकब, खिया मजोडक, खुडपुकीमी यो खुड मपाइनीम। मती १९:२१; लूका १२:३३-३४; कलस्सी ३:१-२

21 तेकेर इन शोप बाकबा, मेकेरन इन थुं यो लीशो बाकब।

22 इन मिक्च रां डा छेडछेड बाकब। मिक्च ब्राब्रा मदुम्शो बाक्त हना, इन रां नेल्ल छेडछेड बाकब। लूका ११:३४-३६

23 मिक्च ब्राब्रा दुम्शो बाक्त हना, इन रां नेल्ल छिडछिड दुम्ब। इन रां डा छेडछेड नेल्ल छिडछिड दुम्त हना, शुश छिडछिड दुम्ब। यूहन्ना ११:१०

24 सुइमी होत्रप निक्शी आस गेय पने मचापब। मारदे हना का कली मदाकब, का कली दाकब। का कली मान पा टीब, का कली मान मपथु मटीब। परमप्रभु यावे नु शोप निम्फा आस कली गेय पने मचाप्नीनी। लूका १६:१३; याकूब ४:४

25 मोपतीके गो 'मार जचा, मार तूचा, मार फेक्चा' दे ममिम्तीने। मारदे हना जचा तूचा क्येडा ब्रोंडचा ठेयब बाकब। फेक्तीक क्येडा रां ठेयब बाकब। लूका १२:२२-३१; फिलिप्पी ४:६; १पत्रुस ५:७

26 सरीडमी बेरब चिकब आन कली कोव्रशा मिम्तीने। मेकोपुकीमी वांचेर मशोक्नीम, अन्न मखुप्नीम, भकारीमी मवोडक्नीम। स्वर्गम बाकब इन आफोमी मेको आन कली थुल्शो बाकब। मेको आन क्येडा शुश ठेयब मननी डा? मती १०:२९-३१; लूका १२:६-७

27 गेपुकीमी सुतां पा, इन रां हात का लाइशो सेल्ने चाप्नीनी डा?

28 मार फेक्चा, दे मारदे मिम्तीनी? लिली फू कली कोव्रशा मिम्तीने। गिश बोइशशा रिम्शो तांडसीनीमी। श्येत पा गेय मपाइनीम। पांडतो मपाइनीम।

29 पिप सोलोमन आ दारस नेल्ल कोंडताकव हना यो, लिली फू खोदेशो रिम्शो ग्योम्सीशो मबाकब। १राजा १०:-

30 परमप्रभु यावेमी चीबेर बोइशशा, हेम्शा चोचा पुंडसीब फू, घांस आन कली लायो मिश रिम्शो ग्योम्ताकव हना, गे थमा पा थमा सुइक्ने मचापबपुकी इन कली मफेक्पाइक्बा डा?

31 मोपतीके मार जचा, मार तूचा, मार फेक्चा, दे ममिम्तीने।

32 मारदे हना अर्को रागी डा मुरपुकीमी ला मोदेशो मिम्तीम। इन स्वर्ग डा आफोमी इन माल्शो नेल्ल तुडक्ब।

33 डोंइती परमप्रभु यावे आ राज्य नु आ ठीक पतीके मिम्शा मालीने। मिनु जचा तूचा फेक्चा यो ताइनीनी। रोमी १४:१७; १राजा ३:१३-१४; भजन संग्रह ३७:४,२५

34 मोपतीके दीसा मार दुम्बा, दे सुतां मपने। मारदे हना दीसा डा श्येत दीसान दुम्ब। मुलाक्ती डा श्येतम दीसा डा श्येत मतेम्दीने। प्रस्थान १६:१९

## 7

### नाक्मुचा आ पबर्म शेंशो

1 मुर आन कली मनाक्तीने। मुर आन कली नाक्ताक्नी हना, इन कली यो नाक्नीम। रोमी २:१; १कोरिन्थी ४:५

2 दोपा नाक्तीनी, मोपा नाक्चा पुंडसीनीनी। दोपा पुक्शा गेनीनी, मोपान पुक्शा ताइनीनी। यसैया ३३:१; मर्कूस ४:२४

3 मारदे इन लोकब आ मिक्चीम बाक्शो कसीडगर ताइनीनी। मिनु इन मिक्चीम बाक्शो मुढा चहिं मताइनीनी?

4 इन मिक्चीम मुढा बाक्त हना, दोपा इन लोकब कली 'इ मिक्चीम बाक्शो कसीडगर फेत्नुड' देने चाप्नीनी डा?

5 कपटी, डोंइती इन मिक्चीम बाक्शो मुढा फेत्तीने। मिनु ला मिक्च ठीक ताइब दुम्शा, इन लोकब आ मिक्चीम बाक्शो कसीडगर फेत्तीने।

6 हेथे थिपाइक्चा मदुम्शो थोव्रक कुचुम कली मगेने, पोव्र आन डोंइती इन मोती मब्बारदीने। मारदे हना दिम्नीम। मिनु बिर लेशशा इन कली ग्राम्थ पीनीम। मती १०:११; लूका २३:९

परमप्रभुमी इन पुंडशो नेंब  
लूका ११:९-१३

7 परमप्रभु यावे कली पुनीने। मिनु इन पुंडशो ताइनीनी। मालीने, मिनु इन माल्शो थित्नीनी। बाक्नी? दे लाच्यो खोकोल पने। मिनु गे ओव्रचा ताइनीनी। मर्कूस ११:२४; यूहन्ना १४:१३; येरमीया २९:१३-१४

8 मोपतीके सुम पुंडबा, मेकोमी आ पुंडशो ताइब। सुम माल्बा, मेकोमी आ माल्शो थिचब। सुम ओव्रडा? दे लाच्यो खोकोल पाइबा, मेको ओव्रचा ताइब।

9 गे नु बाक्ब सुइ इन तीमी 'शोब्ले जाइनुड' दे पुंडतु हना, शोब्ले आ पा डा फुल्लु जचा गेनीनी डा?

10 'डाइ ब्वाइनुड' दे पुंडतु हना, डाइ आ पा डा बुस्स ब्वचा गेनीनी डा?

11 गेपुकी मरिम्शो बाक्तीनी हना यो, इन तमी तौ आन कली रिम्शो थोव्रक गेस जोक्नीनी। इन पशो क्येडा स्वर्गमी बाक्ब इन आफोमी आ कली पुंडब आन कली रिम्शो थोव्रक मगेब डा?

परमप्रभु आ दाक्शो पचा

12 गेमी दोदेशो पपांडसीचा दाक्नीनी, गे यो मुर आन कली मोदेशो पने। मारदे हना परमप्रभु यावे आ अरेशो लोव्र नु परमप्रभु यावे आ लोव्र पाइब आन शेंतीक लोव्र मेकोन बाक्ब। मती २२:३६-४०; रोमी १३:८-१०; गलाती ५:१४

13 आइक्च लाच्यो रे ओव्रडीन। मारदे हना जाम्शा लतीक लाच्यो ठेयब नु लां ब्रेम्शो नु ग्युप्शो बाक्ब। मोपतीके शुश मुर मेकेर गाक्नीम। लूका १३:२४

14 गेना हना यो ब्रोइतीक लतीक डा लाच्यो आइक्च नु आ लां गाक्चा श्येत बाक्ब। मेको लां थिचबपुकी का निक्शी ला बाक्नीम। मती १९:२४; प्रेरित १४:२२

15 हास पांडसीने। मारदे हना परमप्रभु यावे आ लोव्र दूली शेंबपुकी बोक्नीम। मेकोपुकी भेडा खोदेशो तांडसीनीमी। मेको आन थुं चहिं फर के खोदेशो बाक्नीम। मती २४:४,५,२४; २कोरिन्थी ११:१३-१५

16 मेको आन पशो गेय तशा, रिम्शो नम, दे मरिम्शो नम रुम्सीब। चू रवामी अडगुर सिचबा डा? सिंडी आ बोटमी फोव्रशी सिचबा डा?

17 रिम्शो फल रवामी ब्रोव्रशो फल सिचब, मरिम्शो फल रवामी मब्रोव्रशो फल सिचब। मती १२:३३

18 रिम्शो फल रवामी मब्रोव्रशो फल मसिचब। मरिम्शो फल रवामी यो ब्रोव्रशो फल मसिचब।

19 मरिम्शो फल सिचब रवा कली तिम्शा शी चोइनीम। मती ३:१०; यूहन्ना १५:२,६

20 मोपतीके मेको आन सिशो फल तशा, रिम्शो नमी, दे मरिम्शो नमी तुइक्नीनी।

21 आं कली प्रभु, प्रभु देशा ला स्वर्ग डा राज्य ओव्रचा मताइनीम। स्वर्गमी बाक्ब आं आफ आ दाक्शो पाइबपुकी ला ओव्रचा ताइनीम। रोमी २:१३; याकूब १:२२

22 मेको नाक्त शुशेमी आं कली 'हे प्रभु, हे प्रभु, गोपुकीमी इन नेमी नोले दुम्ब लोव्र मपका डा? इन नेमी वोल आन कली मखेरका डा? चिन्ड नु छक लाक्चा डा गेय मपका डा?' देनीम। लूका १३:२५-२७; येरमीया २७:१५

23 मोदेब आन कली 'गो इन कली गेनायो मतुइक्तन्नी। ए मरिम्शो पाइबपुकी, डोन लने' दे हुइक्नुडमी। मती २५:१२; रतिमोथी २:१९

नेंशो लोव्र पचान माल्ब

24 सुमी आं लोव्र नेंशा, आं देशो पवा, मेको निप्स खाप्शा, खिं सेल्ब खोदेशो बाक्त। मेकोमी आ खिं सेरथे फुल्लु तारी सेल्लु।

25 मिनु ठेयब रेड यिशा, भोल यिशा, फशेमी हुरदानु, मेको खिं मब्रे। मारदे हना सेरथे फुल्लु तारी सेल्शो बाक्त।

26 सुमी आं लोव्र नेंशा, आं देशो मपवा, मेको शोर गाक्शो मुर खोदेशो बाक्त। मेकोमी आ खिं बाल्वामी सेल्लु।

27 मिनु ठेयब रेड यिशा, भोल यिशा, फश पवानु, मेको खिं ब्रेशशा योल्लत। मिनु मेको के ठेयब खती दुम्त" दे येसुमी शेंदीमी बाक्त।

- 28 येसुमी शेने थुमानु, मेकेर देल्शो शुश मुरुमी आ शेंशो आ परबम छक लाकमा बाक्त। प्रेरित २:१२  
 29 मारदे हना सास्त्रीपुकीमी शेंशो खोदेशो ममाड, तन्न सक्ति पाइशो मुर बुदी शेंदा बाक्त। यूहन्ना  
 ७:१६-४६

## 8

कोर पाइब कली सापाइशो  
 मर्कूस १:४०-४४; लूका ५:१२-१४

- 1 मिनु येसु डांडा रे लेशशा यिमेनु, शुश मुरुमी आ नोले खोदमे बाक्त।  
 2 मिनु मार दुम्माक्त देंशा हना, कोर पाइब का जाकशा, येसु आ डोंइती आ पोक्च थेक्शा “प्रभु, सापाइकचा दाक्ताकनी हना, आं कली सापाइकचे चाप्नीनी” देंमाक्त।  
 3 मिनु येसुमी आ गुड दिंशा, कोर पाइब कली थिशा “गो सापाइकचा दाक्नुड” देंमेनु, ब्रा सामाक्त।  
 4 मिनु येसुमी “सुड कली मशोत्रचा, चढेब आ डोंइती लशा, इ साशो रां कोइदो। मिनु मोसामी मार चढेचा माल्ब देंशो बाक्मे, मेको चढेशा, सामाक्त, दे तुडक्पतो” दे मदा बाक्त। मर्कूस ८:३०; लेवी १४:२-३२

कप्तान आ गेय पाइब सापाइशो  
 लूका ७:१-१०; यूहन्ना ४:४६-५३

- 5 मिनु कापेरनाउम सहर लेशशा जाक्मेनु, कप्तान का येसु कली युग्थ पिमाक्त।  
 6 मिनु “प्रभु, आं गेय पाइब रोइमी गुरशा, आ गुड खोइल मदुक्ब दुम्शा, गोल्शा बाक्शो बाक्ब” दे शोत्रडा बाक्त।  
 7 मिनु येसुमी “इन खिंमीन पिशा सापाइक्नुड” दे मदानु  
 8 “प्रभु, श्येत मपने, गो इन कली आं खिं ओइंचा मशिरनुड। लोत्र ला देनीने। मिनु आं गेय पाइब साब।  
 9 मारदे हना अधिकार तचा दा गो यो अधिकार तशो नड, अधिकार पाइनुड, अधिकारमीन बाक्नुड। गोमी सिपाही का कली ‘लावो’ दे सोइक्तनु, लाइब। का कली ‘पिवो’ दे ब्रेत्तनु, पीब। आं वाइल कली ‘एको गेय पावो’ दे मदनु, पाइब” देंमाक्त।  
 10 येसुमी मोदेशो नेंशा, आ नोले खोइक्ब आन कली “ओहो, नोफा दाइशशा नेनीने, एको कप्तान खोदेशो थमा सुइक्ब इं इस्त्राएल जात डा मुर सुइ मतडमी। मर्कूस ६:६; लूका १८:३  
 11 गो मार देंनुड देंशा हना, नां दाप्तीके नु नां पेरतीके रे शुश मुर जाक्नीम। मिनु स्वर्ग डा राज्यमी ओत्रशा, इं किकी पिपी अब्राहाम, इसहाक नु याकूब नु काथा बाक्नीम। लूका १३:२८-२९  
 12 एको राज्य डा मुरपुकी चहिं तिल्शा, छिडछिडमी सोइकचा पुंइसीनीम। मेकेर मुरपुकी आन खुड शेप्शा डाक्नीम” देंमाक्त।  
 13 मिनु येसुमी कप्तान कली “इन खिं लने, इन थमा सुइशो खोदेशो दुम्ल” दे सोइक्ता बाक्त। मो देंमे रे आ गेय पाइब यो सामाक्त। मती ९:२९; मती १५:२८

पत्रुस आ खिंमी

मर्कूस १:२९-३४; लूका ४:३८-४१

- 14 मिनु येसु पत्रुस आ खिं जाक्दीशशा ओत्रमेनु, पत्रुस आ शिमी जरो पा गोल्शो तवा बाक्त। १कोरिन्थी ९:५  
 15 मिनु आ गुड थिवानु, जरोम थु प्रोना बाक्त। मिनु छुल बोक्शा, येसु कली जचा तूचा गेवा बाक्त।  
 16 में नाक्दो वोलमी सुम्शो शुश मुर आन कली चाक्गमे बाक्त। मिनु वोल आन कली लोत्र रे खेरमी बाक्त। रोड पाइब नेल्ल आन कली सापाइक्मी बाक्त।  
 17 मो पवानु, साड नेसी यसेयामी देशो लोत्र “मेकोमी आंइ गुरपाइक्ब रोड लाइक्तु। आंइ रोड नेल्ल कुरतु” देशो लोत्र थमा दुम्माक्त। यसेया ५३:४

निकशी थुं मपथु, येसु कली खोइक्का  
लूका ९:५७-६०

18 मिनु येसुमी शुश मुर देल्लो तशा “एकेर रे लशा, समुन्द्र शोक्शा आइक्की हांबु लय” देमाक्त।

19 मिनु सास्त्री कामी येसु कली “शेंब, तेक तेक लनी, मेक मेक गो यो लाइनुड” देमाक्त।

20 मिनु येसुमी “फ्याउरे आन बाक्तीके ढोडोडगा बाक्ब। चिक्ब आन बाक्तीके ग्योत्र बाक्ब। रागीम जरमेशो के बाक्तीक मबाक्ब” देमाक्त। २कोरिन्थी ८:९

21 मिनु येसु आ नोले खोइक्ब मुर कामी “प्रभु, डोंडती लशा, आं आफ कली थिम्का गेयीनी” देमाक्त।  
मत्ती १०:३७

22 मिनु येसुमी “आं नोले खोइय्यी। बेक्शो मुरुमी बेक्शो कली थिम्मेकल” दे मदा बाक्त।

फश गिवार तेक्शो

मर्कूस ४:३५-४१; लूका ८:२२-२५

23 मिनु समुन्द्र शोक्सीचा कली डोंगाम डोंडसेनु, आ शेंसीबपुकीमी आ नोले खोदमे बाक्त।

24 मिनु शोक्समानु, टेयब फश गिवार पतीके डोंगाम ब्वाक्कु ओव्रशा गुन्चामे बाक्त। येसु चहिं इप्शो बाक्माक्त।

25 मिनु शेंसीबपुकीमी हिंशा येसु कल पोक्शा “प्रभु, गो नेल्ल गुम्शा बेक्चांडतय, है” दे वाइ ब्रेम्मा बाक्त।

26 मिनु येसुमी “मारदे हिंनि? गे थमा पा थमा सुइक्ने मचाप्बपुकी” देशा बोक्शा, फश नु समुन्द्र आस कली हुइक्ता बाक्त। मिनु सिक्सी पाम्से बाक्त। भजन संग्रह ८९:१०; प्रेरित २७:२२, ३४

27 मोदेंब पशो तशा “ओहो, एको मुर सु बाक्म माइ? फश नु समुन्द्रमी यो आ लोत्र टीबाक्ताक्से” देमुमा बाक्त।

वोल आन कली खेरशो

मर्कूस ५:१-१७; लूका ८:३६-३७

28 मिनु आइक्की हांबु शोक्सीशा, गदरीनी आन रागी जाक्दीम्मा बाक्त। मेकेर लांम गाक्मानु, वोलम गपाइशो मुर निकशी गुम्मे बाक्त। मेको निकशी चहिं बेक्शो मुर वोइक्तीके पुक्खीम बाक्शा, लां गाक्ब आन कली बाप्शा, श्येत गेशा सुइ आन कली लचा मगेबाक्सा बाक्त।

29 मिनु मार दुम्माक्त देशा हना, मेको निकशीमी “परमप्रभु यावे आ तौ, गे नु गोपुकी मार पमुइया डा? आंइ कली श्येत गेची मजाक्थु, मुल कना श्येत गेथ जाक्नी?” दे ग्रीसा बाक्त। लूका ४:४१; २पत्रुस २:४; याक्ब २:१९

30 मेकेर आ नेक्था डा डांडामी शुश पोत्र जोन जोन बाक्शो बाक्मा बाक्त।

31 मिनु वोलपुकीमी “आंइ कली खेरनीनी हना, मेरे पोत्र आन रांमी ओव्रचा गेकी” दे पुन्मे बाक्त।

32 मिनु येसुमी “लने” दे सोइक्तीमी बाक्त। मिनु मुर रे गूशा, पोत्रमी ओव्रदीम्मा बाक्त। मिनु पोत्र नेल्ल गशा, डांडा रे यिना यिन समुन्द्रम प्रेक्ना प्रेक्न गुम्शा बेक्मा बाक्त।

33 पोत्र योत्रबपुकीमी मो दुम्शो तशा, प्रोक्शा सहरम जाक्दीशशा, मेको वोलम सुम्शो आस कली मार दुम्मे, मेको नेल्ल शोत्रडमे बाक्त।

34 मिनु सहर डा मुर नेल्ल येसु कली कोत्रथ जाक्मा बाक्त। मिनु “आंइ रागी रे लने” दे पुन्मे बाक्त।

## 9

गुइ खोइल मदुक्ब कली सापाइशो

मर्कूस २:१-१२; लूका ५:१७-२६

1 मिनु येसु मेकेर रे लशा, डोंगामी डोइशशा समुन्द्र शोक्शा, आ सहरमी जाक्माक्त। मत्ती ४:१३

2 मिनु मार दुम्माक्त देशा हना, आ गुइ खोइल मदुक्ब मुर का कली आ ब्राख्येमी कुरशा चाक्ममे बाक्त। मिनु येसुमी “मेको मुर कली चाक्बपुकीमी थमा सुइक्कीमी बाक्त” दे तुइशशा, मेको गुइ खोइल

मदुक्ब कली “आं तौ, इ पाप क्याम्साक्व। मिनु इ थुं बारपतो” दे मदा बाक्त। प्रस्थान ३४:६-७; भजन संग्रह १०३:३

3 सास्त्री का निकशीमी “इ पाप क्याम्साक्व” देशो नेशा “मेकोमी परमप्रभु यावे कली शुक्शी पाइबाक्माक्त” दे मिन्तमे बाक्त। मती २६:६५

4 मिनु येसुमी मेको आन मिम्शो तुइशशा, मेको आन कली “मारदे मरिम्शो मिम्तीनी? यूहन्ना २:२५

5 “इ पाप क्याम्साक्व” देंचा देय “छुल बोक्शा एर ओंथ हिरशा कोंइदो” देंचा तेको सज्जलो बाक्बा?

6 रागीमी जरमेशोमी पाप क्याम्चा अधिकार तशो बाक्माक्त, दे गेपुकीमी यो तुइक्तीनील” देशा, गुड खोइल मदुक्ब कली “छुल बोक्शा, इ ब्राख्ये कुरशा खिं लेत्तो” दे मदा बाक्त। यूहन्ना १७:२

7 मिनु मेको छुल बोक्शा, आ खिं लेम्माक्त।

8 मोदेंब दुम्शो तशा, मेकेर देल्शोपुकी हिंमा बाक्त। मिनु मुर आन कली मोदेशो अधिकार गेब परमप्रभु कली ठेयब सुइशशा मान पांमे बाक्त।

मती कली गुम्शो

मर्कूस २:१३-१७; लूका ५:२७-३२

9 मिनु येसु मेकेर रे लमेनु, मती माइशशो तिरो पोक्ब मुर का आ अडडाम बाक्शो ताप्तु। मिनु येसुमी “आं नोले खोइय्यी” दे मदानु, मेको छुल बोक्शा, येसु आ नोले खोइक्तु। मती १०:३

10 मिनु येसु नु आ शेंसीबपुकी खिंमी जना जन बाक्मानु, तिरो पोक्ब नु पापीपुकी शुश यो मेकोपुकी नु काथा जाम्तेक्म।

11 मिनु फरिसीपुकीमी मेको नेल्ल आन कली काथा बाक्शा जशो तशा, येसु आ शेंसीब आन कली “मारदे इन शेंबमी तिरो पोक्ब नु पापीपुकी नु काथा बाक्शा जाइबा?” देंतेक्म।

12 येसुमी मेको आन देशो नेशा “रोइ मपशो मुर सापाइक्ब ममाल्नीम। रोइ पशो मुर चहिं सापाइक्ब माल्नीम। इजीकीएल ३४:१६

13 चढेतीक ममाइ, तन्न शिशी पशो तचा दाक्नुड, दे देशो आ अर्थ मार बाक्म, दे शेंसीने। ठीक पाइब आन कली ब्रेत्थ जाक्शो मनड। पापी आन कली ब्रेत्थ जाक्शो नड” दे माइक्तीमी। होसे ६:६; मती १२:७; १सामुएल १५:२२; मती १८:११

माइत नु नक मगारब

मर्कूस २:१८-२२; लूका ५:३३-३८

14 मिनु यूहन्ना आ शेंसीबपुकी जाक्शा, येसु कली “मारदे गो नु फरिसीपुकी शुश बर्त बाक्नीकी, इन शेंसीबपुकी चहिं बर्त मबाक्नीमी?” दे हिल्लो पाम्तेक्म। लूका १८:१२

15 मिनु येसुमी “जन्तीपुकी ग्युम्ले नु काथा बाक्मानु, हिशेक पा डाक्नीमी डा? काबु ग्युम्ले नु फ्राचा पुंडसीनीम। मिनु मेना बर्त बाक्नीम। यूहन्ना ३:२९

16 सुइमी माइत वामी नक वा केप्शा मफेरनीम। फेरतेक्म हना, नक वा चुप्शा, माइत वा कली खाक्शा, डोंइती डा गाक्शो क्येडा ठेयब सेल्ब। रोमी ७:६

17 सुइमी माइत कुशुल के थैलोमी नक अङ्गुर शांबु कुर मपाइनीम। कुर पाम्तेक्म हना, शांबु बोरशा, थैलो खाक्शा, क्युप्ब। नक शांबु कली नक थैलोमी कुर पचा माल्ब। मोपा कुर पशोनु, थैलो मगाक्बा, शांबु यो मक्युप्ब” दे शेंताक्मी।

बेक्शो आल कली सेंपाइशशो

मर्कूस ५:२१-४३; लूका ८:४०-५६

18 मोदेशो शेंना शेंन बाक्मेनु, मेकेर डा गुम्तीक खिं डा ठेयब मुर का जाक्शा, पोक्च थेक्शा बाप्शा “आं तमी बेक्त। गे आं तमी तारी इन गुड वोइक्तीनी हना, ब्रोंइब” दे सेउ पाप्तु।

19 मिनु येसु नु आ शेंसीबपुकी मेको आ खिं लाम्तेक्म।

20 मिनु मार दुम्त देशा हना, लना लन बाक्मानु, १२ बर्स डोंइती रे हुश याप्शा रोइ पशो मीश मुर कामी मेको आन नोले खोइशशा, येसु आ फेक्शो वा थिवा बाक्त।

- 21 मारदे हना “आ फेकशो वा थिचा ताता हना, सानुड” दे थमा सुइशो बाक्माक्त। मती १४:३६
- 22 मिनू येसुमी फिर लेशशा कोव्रशा, मेको मीश मुर कली तशा “आं तमी, इ थुं बारपतो। इ थमा सुइशोमी साते” दे माइक्तु। मो देंमेनु, आ रोइ ब्रा सामाक्त।
- 23 मिनू ठेयब मुर आ खिं जाकदीम्मानु, येसुमी शुश मुर देल्शा बाजा ताप्शा, रोंका पा डाकना डाकन बाक्शो ताप्तु।
- 24 मिनू मेको आन कली “कतीने। एको आल बेक्शो ममाइ, इप्शो बाक्ब” दे माइक्तीमी। मेकोपुकीमी “मबाक्शो लोव्र पाइबाक्त” दे शुक्शी पांतेक्म। यूहन्ना ११:११,१४,२५
- 25 मेको आन कली सोइशशा, खिं ओव्रत। मिनू आल आ गुइ ग्याइक्तानु, छुल बोक्त।
- 26 मिनू मेको लोव्र मेको रागी नेल्लेम ब्रम्माक्त।

### मिक्च मताइब आस कली सापाइशो

- 27 मिनू येसु मेकेर रे लमेनु, मिक्च मताइब निक्शीमी “ए दाऊद पिप आ तौ, आंस कली शिशी पाइस्की” दे रेयके पा वाइ ब्रेशशा, आ नोले खोइक्ताक्स। मती २०:३०
- 28 मिनू खिं ओव्रमेनु, मेको निक्शी यो ओव्रताक्स। मिनू येसुमी “गो इस कली सापाइक्ने चापनन्सी, दे थमा सुइक्नीसी?” देंमेनु “थमा सुइक्नस्कु, प्रभु” देंताक्स। प्रेरित १४:९
- 29 मिनू येसुमी आस मिक्च थिशा “इस थमा सुइशो बुदी दुम्ल” देंत। मती ८:१३
- 30 मिनू मिक्च ताइब दुम्लाक्स। मिनू “एको लोव्र सुइ कली मशोव्रडीसे” दे सोइक्ताक्मी। मती ८:४
- 31 तन्न मेको निक्शीमी चहिं आस रागी डा मुर नेल्ल आन कली येसु आ पशो तुइक्पदसे बाक्त।

### वोलम सुम्शो लाटा कली सापाइशो

- 32 मिनू येसु नु आ शेंसीबपुकी मेको खिं रे यूशा लमानु, मार दुम्ल देशा हना, वोलमी सुम्शो लाटा का चाक्तेक्म।
- 33 मिनू येसुमी वोल कली ग्रुइताक्व। मिनू मेको मुरुमी लोव्र पाप्तु। मिनू मेकेर बाक्बपुकीमी छक लाक्शा “इ इस्त्राएलमी ओदेशो दुम्शो गेनायो मतशो नय” देंमुतेक्म।
- 34 फरिसीपुकीमी चहिं “वोल आन पिप आ नें थिशा, वोल आन कली ग्रुइबाक्त” देंतेक्म। मती १२:२४-३२

### बाली नाली रुप्बपुकी माल्शो

- 35 येसु गालील रागी डा सहर गाउं नेल्ल हिरना हिरन युमतीक खिंमी मुर आन कली स्वर्ग डा राज्य डा लोव्र शेंना शेंन, रोइमी गुरशो नु रोइ पशो मुर नेल्ल आन कली सापाइक्ना पाइक्न गाक्त।
- 36 शुश मुर आन कली तशा, शिशी पाइक्तीमी। मारदे हना गोठला मबाक्शो भेडापुकी खोदेशो पा दशो बाक्मा बाक्त। १राजा २२:१७; इजीकीएल ३४:५; मर्कूस ६:३४
- 37 मिनू आ शेंसीब आन कली “बाली नाली रुप्चा माल्शो शुश बाक्ब। रुप्ब मुर चहिं का निक्शी ला बाक्नीम।
- 38 मोपतीके ‘रुप्चा कली मुर योव्रशा सोइक्तीने’ दे बाली नाली आ परमप्रभु कली पुनीने” दे माइक्तीमी। लूका १०:२

## 10

### शेंसीब आन कली ब्रेशो

मर्कूस ६:७; मर्कूस ३:१३-१९; लूका ९:१; लूका ६:१२-१६

- 1 मिनू आ शेंसीब १२ जना आन कली खुप्शा, वोल आन कली ग्रुइशा, खेरतीक, रोइमी गुरशो नु रोइ पाइब आन कली सापाइक्तीक अधिकार गेम्तीमी।
- 2 मोदेशो अधिकार ताइब आन कली “सोइशोपुकी” दे यो देंसीब। मेकोपुकी सु सु बाक्तेक्म देशा हना, पत्रुस माइशो सिमोन नु आ दाग्यु अन्द्रीयास, जब्दी आ तौ याकूब नु यूहन्ना, मर्कूस ३:१६-१९; लूका ६:१४-१६; प्रेरित १:१३

3 फिलीप नु बारथोलोमाइ, थोमास, तिरो पोक्ब मत्ती, अल्फयस आ तौ याकूब, थदेयस,

4 कनानी सिमोन नु इस्कारीयोत डा यहूदा बाक्तेक्म। मेको यहूदा नोले येसु कली साइक्चा, दे माल्ब आन कली वारच पाइब दुम्बाक्माक्त।

शेंसीब आन कली सोइशशो

मर्कूस ६:७-१३; लूका ९:२-६

5 येसुमी आ १२ जना शेंसीब आन कली सोइशशा, मेको आन कली “अर्को जात डा मुर आन रागी मलने। सामरीया डा मुरपुकी आन रागी यो मलने।

6 तन्न गोठला मबाक्शो, लां जाम्शो भेडा खोदेंशो, इं इस्राएली आन बाक्तीके लने। मत्ती १५:२४; प्रेरित १३:४६

7 ‘स्वर्ग डा राज्य जाक्चशो बाक्त’ दे शेंदीने। लूका १०:१-१२; मत्ती ४:१७

8 रोइ पाइब आन कली सापतीन। बेक्शो मुर आन कली सेंपतीन। कोर पाइब आन कली सापतीन। वोल आन कली गुंइशा खेरीन। मेको नेल्ल मोशा ताइतीनी। मिनु मोशा गेने। मर्कूस १६:१७

9 सुन चांदी तांबा का यो मकुरीन। प्रेरित २०:३३

10 लां कली फेक्तीक वा, जुत्ता जोड निक्शी, झोला नु कोक्के मकुरीन। मारदे हना गेय पाइबपुकीमी जचा गेचा पुंइसीनीम। गन्ती १८:३१; १कोरिन्थी ९:१४; १तिमोथी ५:१८

11 सहर गांउं तेइ जाक्दीन्नीनु, रिम्शो थुं पाइशशो मुर आ खिं हिल्लो पा बाक्थ लने। मिनु बास गेम्तेक्म हना, गाक्ची मजाक्म सम्म बाक्कीन।

12 मिनु खिं ओवनीनु ‘परमप्रभु यावेमी इन कली रिम्शो पवल’ दे आसीक गेने।

13 मेको खिंमी रिम्शो थुं पाइशशो मुर बाक्तेक्म हना, आसीक रशा, आन थुं नाइक्चा ताइनीमी। मोदेंशो मुर मबाक्तेक्म हना चहिं मेको आन रचा डा आसीक गे राइनीनी।

14 मुरपुकीमी इन लोत्र मनेंथु, बास मगेम्तेक्म हना, इन खोइल डा फुरक थुर थुर पाइशशा गाक्कीन। प्रेरित १३:५१

15 नोफा दाइशशा नेनीने, निसाफ पची नाक्त सोदोम नु गोमोररा सहर निक्शीमी बाक्ब मुर आन क्येडा इन लोत्र मनेंब मटीबपुकीमी शुश सजाइ ताइनीम। उत्पत्ती १९:१-२९

थमा सुइक्बपुकी खेदा पचा पुंइसीनीम

मर्कूस १३:९-१३; लूका २१:१२-१७

16 भेडा आन कली फर आन दातेम सोइशशो खोदेंशो पा सोइक्नन्नी। बुस्स खोदेंशो पा निप्स पाइशशो दुमीने। मिनु परवा खोदेंशो दुम्शा, सुइ कली मरिम्शो मपने। लूका १०:३; रोमी १६:१९; एफिसी ५:१५

17 होस पा गाक्कीन। मारदे हना मेको फरपुकीमी इन कली सभा कछडीम वोइक्नीम। गुम्तीक खिंमी लाइशशा युक्नीम। प्रेरित ५:४०; २कोरिन्थी ११:२४

18 इन कली श्येत गेबपुकी नु अर्को रागी डा मुर आन डोंइती सांक्छी दुम्चा कली टेयब मुर नु पिप आन डोंइती राप्पाइक्नीम। प्रेरित २५:२३; प्रेरित २७:२४

19 इन कली मोपा राप्पदमेनु, मार लोत्र पका? मार देंका? दे सुर्ता मपने। मार देंचा माल्बा, मेको लोत्र तुइक्पाइक्चा पुंइसीनीनी। प्रस्थान ४:१२; लूका १२:११-१२; प्रेरित ४:८

20 मारदे हना गे इन थुं रे पिशो लोत्र मपाइनीनी, तन्न इन आफ आ सोक्तीमी इन शोत्र रे पा लोत्र पाइब। १कोरिन्थी २:४

21 लोकबमी आ लोकब कली साइक्पाइक्चा गेब। आफोमी तमी तौ आन कली नु तमी तौपुकीमी यो आम आफ कली मरिम्शो पा साइक्पाइक्नीम। मीका ७:६

22 आं नें आ परबम नेल्लेमी इन कली मदाक्नीम। तन्न सु सुमी चहिं नोले सम्म फाल्शा बाक्नीमी, मेकोपुकी परमप्रभु यावे नु ब्रोइशा बाक्चा ताइनीमी। २तिमोथी २:१२; मत्ती २४:९-१३

23 सहर कामी खेदा पान्तेक्म हना, प्रोक्शा अर्को सहरमी जाक्दीशशा बाक्कीन। नोफा दाइशशा नेनीने, रागीम जरमेशो मजाक्म सम्म इस्राएल डा सहर नेल्ल हिरशा मयुम्नीनी। प्रेरित ८:१; मत्ती १६:२८

श्येत गेब आन कली तशा महिंचा

24 शेंब क्येडा शेंसीब नु होत्रप क्येडा गेय पाइब ठेयब मनमी। लूका ६:४०; यूहन्ना १३:१६; यूहन्ना १५:२०

25 शेंब नु शेंसीब, होत्रप नु आ गेय पाइब कांडचीक दुम्ने चाप्नीम। खिं डा ठेयब मुर कली बेलजीबुल, दे शुक्शी पाइक्तेकम हना, आ खिं डा मुर आन कली शुक्शी मपाइनीमी डा? मती १२:२४

26 मोपतीके मेको आन कली तशा महिनीन। मुल सम्म सुम्शा वोइश्शो नोले नेल्ल हाक्सीशा तांडसीब। मुल खुइश्शा वोइश्शो नोले तुंडसीब। लूका १२:२-९; मर्कूस ४:२२; लूका ८:१७

27 गोमी इन कली छिडछिडमी माइश्शो लोव्र छेडछेडमी मतीने। इन कली नोफाम देशो लोव्र नोले ठेयब सेंदा पा नेंपतीने।

28 इन रां कली साइक्ने चापब। तन्न इन सोक्ती कली साइक्ने मचापबपुकी आन कली तशा महिनीन। रां नु सोक्त निम्फा नरकमी खतम पने चापब कली तशा चहिं हिनीन। हिबू १०:३१; याकूब ४:१२

29 अस्सारीयोन कामी भंगेरा निक्शी मग्याम्सीबा डा? मो हना यो इन आफोमी मदेंथु, का यो खपीम मदोक्ब।

30 इन पिया डा चां का का पा हिक्शा, गिश बाक्मा, दे तुइश्शो बाक्ब। अस्सारीयोन का आइक्च तांबा के क्येट बाक्त। प्रेरित २७:३४

31 मोपतीके महिनीन। गे भंगेरा क्येडा शुश हिक्सीशो बाक्नीनी। मती ६:२६

32 सुमी मुर आन कली 'येसु आ मुर नड' देंबा, गो यो स्वर्गम बाक्ब आं आफ कली 'एको आं मुर बाक्ब' देंनुड। प्रकाश ३:५

33 सुमी चहिं मुर आन कली 'येसु सु में? मतुइक्नुड' देंबा, गो यो स्वर्गम बाक्ब आं आफ कली 'मेको कली मतुइक्नुड' देंनुड। मर्कूस ८:३८; लूका ९:२६; रतिमोथी २:१२

येसु आ पबर्म मुर ब्रानीम, दे शेंशो

34 रागीमी नेल्ल आन कली गारपाइक्थ जाक्शो बाक्ब, दे आं पबर्म ममिम्तीने। तुपाइक्चा कली ममाइ, तन्न तरवार ग्यारपाइक्थ जाक्ती। लूका १२:५१-५३; मीका ७:६

35 मारदे हना आ पबर्म तौ नु आफ, तमी नु ममा, चाइमी नु शिमी जिमुशा ब्रानीम।

36 मोदेशो पा आंम खिं डा मुर जोरी सत्रु दुम्नीम।

37 आं क्येडा आन आम आफ कली दाक्बपुकी आं नोले खोइक्चा मशिरनीम। आं क्येडा आन तमी तौ आन कली दाक्बपुकी यो आं नोले खोइक्चा मशिरनीम। ब्यवस्था १३:७-१२; ब्यवस्था ३३:९; लूका १४:२६-२७

38 सुमी आं नोले खोइश्शा, श्येत फाल्ने मचापबा, मेको आं नोले खोइक्चा मशिरब। मती १६:२४-२५

39 आंम कली प्रोंइचा दाक्ब जाम्शा लाइब। आं पबर्म जाम्शा लाइब चहिं ब्रोंइचा ताइब। लूका ९:२४; यूहन्ना १३:२०; गलाती ४:१४

रिम्शो पाइबमी इनाम ताइब

40 इन कली ब्राइबमी आं कली ब्राइब। मिनु आं कली ब्राइबमी आं कली सोइक्ब कली यो ब्राइब।

41 परमप्रभु यावे आ लोव्र पाइब बाक्माक्त, दे मिम्शा, परमप्रभु यावे आ लोव्र पाइब कली ब्राप्तु हना, परमप्रभु यावे आ लोव्र पाइब आ तचा डा इनाम मेकोम ताइब। ठीक पाइब मुर बाक्माक्त, दे मिम्शा, ठीक पाइब मुर कली ब्राप्तु हना, ठीक पाइब आ तचा डा इनाम मेकोम ताइब। १राजा १७:८-२४

42 नोफा दाइश्शा नेनीने, सुमी महिक्सीशो मुर का कली 'एको यो शेंसीब का बाक्माक्त' दे मिम्शा, लोटा का ब्वाक्कु तूचा गेबा, मेकोमी दोपा यो आ तचा डा इनाम मसाम्ब" दे शेंताक्मी। मती २५:४०; मर्कूस ९:४१

## 11

शेंसीब आन कली शेंथ सोइश्शो

लूका ७:१८-२३



1 आ १२ जना शेंसीब आन कली मेको लोव्र शेंने थुम्शा, येसु मेकेर रे लशा, सहर सहरम हिरशा, शेंना शेंन गाक्त।

2 मिनु येसु शेंना शेंन गाकमेनु, यूहन्ना जेल्खानमी बाक्माक्त। मिनु ख्रीस्तमी पशो गेय आ पर्वम नेंशा, आ शेंसीब आन कली मती १४:३

3 “गे जाक्चा माल्शो बाक्नीनी देय अर्को कली लां कोव्रका?” दे हिल्लो पथ सोइक्तीमी बाक्त। मती ३:११; मलाकी ३:१

4 मिनु मेकोपुकी जाक्शा, हिल्लो पामेनु, येसुमी “गे मार मार नेंनी, मार मार तनी, यूहन्ना कली मतीने

5 ‘मिक्च मताइबपुकीमी मिक्च ताइबाक्तेक्म, खोइल मदुक्बपुकी गाक्बाक्तेक्म, कोर पाइब साबाक्तेक्म, नोफा मनंबपुकी नेंबाक्तेक्म, बेक्शो मुर बेक्शो रे सेंसीशा ब्रोंइबाक्तेक्म। महिक्सीशो मुरपुकीम ग्येरपाइक्ब लोव्र नेंबाक्तेक्म’ यसैया ३५:५-६; यसैया ६१:१

6 सु सुमी आं कली तशा थुं मखाइक्पाइक्नीम, मेकोपुकी ग्येरसमल, दे मतीन” दे लेशशा सोइक्ताक्मी। मती १३:५७; मती २६:३१

### यूहन्ना आ पर्वम शेंशो

लूका ७:२४-३५

7 मिनु मेकोपुकी लमा नोले, येसुमी मुर आन कली यूहन्ना आ पर्वम “साइ गोरशो रागीमी मार कोव्रथ लनी? फशेम हिम्शो किन्दा कोव्रथ लनी? मती ३:१,५

8 मिनु मार कोव्रथ लनी? दारशो वा फेक्शो मुर तांइसीबा कों, दे कोव्रथ लनी? नेनीने, दारशो वा फेक्ब पिप आन खिंमी बाक्नीम।

9 गेपुकी मार कोव्रथ लनी, मिनु? परमप्रभु यावे आ लोव्र पाइब तांइसीबा कों, दे कोव्रथ लनी? गे नेल्ल आन क्येडा ठेयब परमप्रभु यावे आ लोव्र पाइब ताइतीनी, दे इन कली देंनुड। लूका १:७६; लूका २०:६

10 परमप्रभु यावेमी ब्रेक्पाइश्शो लोव्रमी मेको आ पर्वम मार ब्रेक्शो बाक्ब देंशा हना ‘गो आं लोव्र कुरब इ डोंइडोंइती सोइक्नुड। मेकोमी इ लां ठीक सेल्व’ दे ब्रेक्शो बाक्ब। मलाकी ३:१

11 नोफा दाइश्शा नेनीने, रागी नेल्लेमी ब्वाक्कुम खुम्शा गुंडब यूहन्ना खोदेशो ठेयब सुइ मबाक्ब। स्वर्ग डा राज्यमी चहिं नेल्ल क्येडा यो आइक्च यूहन्ना क्येडा ठेयब बाक्ब। मती १३:१७

12 यूहन्नामी मुर आन कली शेंशा, ब्वाक्कुम खुम्शा गुंडदा रे मुल सम्म स्वर्ग डा राज्य ओव्रशा, आन के सेल्चा, दे दाम पा मुना मुन बाक्नीम। लूका १६:१६

13 साइ नेसी परमप्रभु यावे आ लोव्र पाइब नेल्लेमी नोले दुम्ब लोव्र पा यूहन्ना आ पर्वम ब्रेक्शो बाक्तेक्म।

14 जाक्चा माल्शो एलीया सु बाक्बा, दे तुइक्चा दाक्ताक्नी हना, मेको यूहन्नान बाक्ब। मती १७:१०-३०; मलाकी ३:२३

15 सु नोफा पाइश्शो बाक्मे, मेकोमी नेंनल।

16 सिनाक्त मुलाक्त डा मुर दोदेशो बाक्नीम देंशा हना, बजारमी ग्यारब आलपुकीम

17 ‘ताप्तीक ताप्कानु, गे सिल मपनी, रोंका पा डाक्कानु, गे मडाक्नी’ दे ब्रेम्मुशो खोदेशो बाक्नीम। यूहन्ना ५:३५

18 मारदे हना यूहन्नामी बर्त बाक्शा, शांबु राकसी मतूडानु, वोलम सुष्शो मुर बाक्माक्त देंनीम। मती ३:४

19 रागीम जरमेशोमी चहिं जचा तूचा थोव्रक नेल्ल जाइब तूब। मेको कली तशा ‘धोक्त्रे, शांबु राकसीमी दुक्ब, तिरो पोक्ब नु पापी आन वारच बाक्माक्त’ देंनीम। मेको के दोशो तुइक्तीक बाक्मे, मेको आ गेय रे पा तुंइसीब” दे येसुमी मुर आन कली शेंताक्मी। मती ९:१०-१५; यूहन्ना २:२; १कोरिन्थी १:२४-३०

### गालील डा सहर सजाइ ताइनीम

लूका १०:१३-१५

20 येसुमी शुश छक लाक्का डा गेय नु चिन्ड कौंइशा यो सहर डा मुरपुकी आन थुं परमप्रभु यावे गे मलेत्तेम। मोपतीके ओदें हुइक्ताकमी

21 “ए खोराजीन, ए बेथसैदा, गेमी तशो छक लाक्का डा गेय नु चिन्ड टायर नु सीदोन डा मुरपुकीमी तशो नम हना, साइ कना भाडरा फेक्शा, पुलु खेक्सीशा, आन थुं परमप्रभु यावे गे लेत्तेम वा। जोना ३:६

22 निसाफ पची नाक्त गेपुकी टायर नु सीदोन डा मुर आन क्येडा शुश सजाइ ताइनीनी, दे इन कली देंनुड।।

23 ए कापेरनाउम, मार गे स्वर्ग सम्म क्युकसीनेवे डा? नरकम तोक्का पुंडसीनेवे। मारदे हना गेमी तशो छक लाक्का डा गेय नु चिन्ड सोदोम डा मुरपुकीमी तशो नम हना, आन थुं परमप्रभु यावे गे लेशशा सजाइ रे ब्रोंइचा ताम वा, मिनु सहर मुल सम्म ली वा। मती ४:१३; मती ८:५; मती ९:१; यसैया १४:१३, १५

24 निसाफ पची नाक्त सोदोम डा मुर आन क्येडा कापेरनाउम सहर डा मुरपुकीमी शुश सजाइ ताइनीम, दे इन कली देंनुड” दे हुइक्ताकमी। मती १०:१५

### येसुमी मुर आन कली ब्रेशो

25 काबु येसुमी “आं आफ, सरीड नु रागी डा परमप्रभु, गे नेल्ल क्येडा ठेयब ननी। गे शुश रिम्शो पाइतीनी। जोक्ब तुइक्ब नड, दे मिम्ब आन कली इन लोव्र मरुप्तीक थुं गेतीनी। मजोक्ब मतुइक्ब आन कली रुप्तीक थुं गेतीनी। यसैया २९:१४; लूका १०:२१-२२; यूहन्ना १७:२५; १कोरिन्थी १:२८-२९

26 आं आफ, गे मोदेशो पचा दाक्ताकनी।

27 आं आफोमी मारेइ मारेइ तुइक्पाइक्ती। सुइमी आं कली, आ तौ कली मतुइक्नीम। आं आफोमी ला तुइक्ब। सुइमी आं आफ कली मतुइक्नीम। आ तौमी ला तुइक्ब। मिनु तौमी सु सु आन कली योव्रडमी, मेको आन कली आ आफ आ परबम तुइक्पाइक्ब। मती २८:१८; यूहन्ना ३:३५; यूहन्ना १७:२; फिलिप्पी २:९

28 गे श्येत जशो नु भारीम चिप्चा पुंडसीशोपुकी, आं गे जाक्कीन। मिनु नाइक्का गेनन्नी। मती १२:२०; मती २३:४; येरमीया ३१:२५

29 आं जवा लाम्सीशा, गो नु शेंसीने। मारदे हना गो शिशी पाइब नु ब्रेशो थुं डा नड। मिनु गे इन थुं नाइक्का ताइनीनी। यसैया २८:१२; येरमीया ६:१६

30 आं जवा ग्युप्चा डा बाक्ब। आं भारी कुरने चाप्चा डा बाक्ब” देंत। लूका ११:४६; १यूहन्ना ५:३

## 12

### नाइक्तीक नाक्त डा लोव्र

मर्कूस २:२३-२८; लूका ६:१-५

1 काबु नाइक्तीक नाक्त येसु नु आ शेंसीबपुकी चेरब रू डा लां लना लन बाक्मानु, शेंसीबपुकी शोव्रलु बेक्शा, चेरब बाला शोइशशा नोक्शा जाम्तेक्म। ब्यवस्था २३:२६

2 फरिसीपुकीमी मेको आन मो पशो तशा, येसु कली “कोव्रडीने, इन शेंसीबपुकीमी नाइक्तीक नाक्तीम पचा मदुम्शो गेय पाम्तेक्म” देंतेक्म। प्रस्थान २०:१०

3 मिनु येसुमी मो देंब आन कली “दाऊद नु आ वारचपुकी शोव्रलु बेक्मानु, मार पामे, दे परमप्रभु यावेमी ब्रेक्पाइशो लोव्र मपढेनी? १सामुएल २१:७

4 दोपा दाऊदमी परमप्रभु यावे आ खिंमी ओव्रशा, परमप्रभु यावे कली चढेशो शोब्ले शोल्शा योक्शा जामे? मेको चढेशो शोब्ले चढेबपुकीमी ला जचा दुम्बाक्माक्त। अरु मुरपुकीमी जचा मदुम्ब बाक्माक्त। लेवी २४:९

5 नाइक्तीक नाक्त चढेबपुकीमी परमप्रभु यावे आ खिंमी चढेनीम। मेकोपुकीमी गेय पाइनीम। मेकोपुकी चहिं दोस गेचा मपुंडसीनीम। परमप्रभु यावेमी ब्रेक्पाइशो एको लोव्र यो मपढेनी?

6 एकेर परमप्रभु यावे आ खिं क्येडा ठेयब मुर का बाक्ब, दे इन कली देंनुड।।

7 'चढ्हेतीक ममाइ, शिशी पशो तचा दाक्नुड' देशो परमप्रभु यावे आ लोव्र आ अर्थ रुप्तीनी हना, दोस गेचा मपुंडसीब आन कली दोस मगेनी वा। होसे ६:६; मती ९:१३

8 रागीमी जरमेशो चहिं नाइक्तीक नाक्त मार पचा, मार मपचा अधिकार पाइब बाक्ब" दे माइक्तीमी।

नाइक्तीक नाक्त सापाइशो

मर्कूस ३:१-६; लूका ६:६-११

9 मिनु येसु मेकेर रे लशा, मेको आन गुम्टीक खिंमी जाक्दीशशा ओव्रत।

10 मिनु मेकेर गुइ सोव्रशो मुर का बाक्त। मेकोपुकीमी येसु कली दोस गेचा माल्शो बाक्मा बाक्त। मोपतीके "नाइक्तीक नाक्त सापाइक्तीक गेय पचा दुम्बा?" दे हिल्लो परखु पा योव्रकी पांम्तेक्म।

11 मिनु येसुमी "सुइ इन के कांइचीक भेडा नाइक्तीक नाक्त खाल्टाम बिक्त हना, मेको कली कीशा मयुइनीनी डा? लूका १४:३-५

12 भेडा का क्येडा मुर ठेयब ममाइ डा? मोपतीके नाइक्तीक नाक्त मुर आन कली शिशी पा रिम्शो पचा इ कानुन डा लोव्र नु गारब" दे माइक्तीमी।

13 मिनु गुइ सोव्रशो मुर कली "इ गुइ दिंदो" दे माइक्तु। मिनु मेकोमी गुइ दिंसेनु, ब्रा साशा, अर्को गुइ खोदेशो दुम्त।

14 मिनु फरिसीपुकीमी मेकेर रे गूशा खुम्सीशा "मेको कली दोपा साइक्चा ताइनया?" दे लोव्रसी पांम्तेक्म। यूहन्ना ५:१६

परमप्रभु आ गेय पाइब

मर्कूस ३:७-१२; लूका ६:१७-१९

15 मिनु येसुमी मेको आन लोव्र पशो तुइशशा, मेकेर रे गाक्त। मिनु शुश मुरुमी आ नोले खोइक्तेक्म। मेकोपुकी रोइ पाइबपुकी यो बाक्तेक्म। मेको नेल्ल आन कली सापाइक्तीमी।

16 सापाइशशा "सुइ कली मतुइक्पाइय्यीनी" दे माइशशा सोइक्ताक्मी। मती ८:४

17 मोदेशो पा साइ नेसी परमप्रभु यावे आ लोव्र पाइब यसैयामी देशो लोव्र थमा दुम्पाइक्तु।

18 यसैयामी मार देशो बाक्त देशा हना "आं गेय पाइब कली कोव्रडीन। एको कली योव्रता। मिनु एको कली दाक्नुड। एको कली तशा शुश ग्येरसीनुड। आं सोक्तीम प्रिंशा, अर्को रागी डा मुर आन कली दोपा ठीक दुम्चा, दे तुइक्पपाइक्ब। प्रेरित ३:१३,२६; मती ३:१७

19 मेकोमी जिचा मपोक्ब। शुश रेयके मपाइब। लां पित्थ आ सेंदा मनेंसीब।

20 जिक्चशो किन्दा मजिक्ब, काप्चशो मी मकाप्ब। ठीक पतीकेमी मग्राम सम्म मोदेशो पना पन बाक्त।

21 अर्को रागी डा मुरपुकीमी मेको आ नेमी आस पा बाक्नीम" दे ब्रेक्शो बाक्ब। यसैया ४२:१-४

वोल गुंडतीक अधिकार कोइशो

मर्कूस ३:२२-२७; लूका ११:१४-२३

22 मिनु मिक्च मताइब, नोफा मनेंब, मब्वाक्ब वोलम तशो मुर का चाक्तेक्म। मिनु येसुमी मेको कली सापाइक्तु। मिनु मिक्च ताप्टु, लोव्र यो पाप्टु।

23 मेकेर देल्शोपुकीमी "ओहो, एकोन दाऊद आ तौ बाक्म कोर में?" देंमुम्तेक्म। मती २१:९; यूहन्ना ७:४२

24 फरिसीपुकीमी चहिं मेको आन देशो नेंशा "वोल आन पिप बेल्जीबुल आ सक्तिम कका वोल आन कली गुंइशा खेरबाक्माक्त" दे मिम्शा लोव्र पामे बाक्त।

25 मिनु येसुमी मेको आन मिम्शा लोव्र पशो तुइशशा, मेको आन कली "राज्य का डा मुरपुकी जिशा ब्राशा गाक्तेक्म हना, राज्य जाम्शा लाइब। सहर का डा मुरपुकी जिशा ब्राशा गाक्तेक्म हना, सहर नुम्ब। खिं का डा मुरपुकी यो जिम्तेक्म हना, मेको खिं मलीब। मती ९:३४

26 सैतानमी सैतान कली खेरतु हना, मेकोपुकी ब्रानीम। मिनु आ राज्य दोपा लीबा डा?

27 गो बेलजीबुल आ सक्तिम वोल आन कली खेरतामी हना, इन तौपुकीमी सु आ सक्तिम खेरमे? मेकोपुकीमी गे इन कली निसाफ पाइनीम।

28 गोमी परमप्रभु आ सोक्तीमी वोल आन कली खेरनुड हना, परमप्रभु यावे आ राज्य जाकशो बाक्माक्त, दे तुडक्तीन। १यूहन्ना ३:८

29 नेनीने, बोल्यो मुर आ खिं खुड पाइबमी डोंडती मेको खिं डा मुर कली ग्याइश्शा फ्रेंशा मवोडक्तु हना, आ खिं डा मारेड मारेड दोपा लाइक्ने चाप्वा डा? पाइश्शा नोले ला मेको आ खिं डा मारेड मारेड लाइक्ने चाप्ब। मती ४:१-११; यसेया ४९:२४

30 गो नु मगारब आं जोरी सत्रु दुम्मीम। गो नु गारशा मखुप्बमी आं खुप्शो यो फ्रशा ताइक्ब। मर्कूस ९:४०

31 मोपतीके गो इन कली मार देनुड देश हना, मुरपुकीमी पाप पा, परमप्रभु यावे कली शुक्शी लोत्र पाम्तेक्म हना, माफ गेचा पुंडसीनीम। परमप्रभु यावे आ सोक्त आ पबंम शुक्शी लोत्र पशो पाप चहिं मक्याम्सीब, दे इन कली देनुड। मर्कूस ३:२८-३०; लूका १२:१०; १यूहन्ना ५:१६; हिबू ६:४-६; हिबू १०:२६

32 रागीम जरमेशो आ पबंम शुक्शी लोत्र पाम्तेक्म हना, माफ ताइनीम। तन्न सुमी परमप्रभु यावे आ सोक्त आ पबंम शुक्शी लोत्र पाइबा, मेको आ पाप मुल मक्याम्सीब, बेक्शा लशा नोले यो मक्याम्सीब, गेना हना यो लीब। १तिमोथी १:१३

ब्रोत्रशो नु मब्रोत्रशो फल रवा

लूका ६:४३-४५

33 ब्रोत्रशो फल सिप्ब रवा खुम्तीनी हना, ब्रोत्रशो फल सिप्ब। मब्रोत्रशो फल सिप्ब रवा खुम्तीनी हना, मब्रोत्रशो फल सिप्ब। फल थाम्शा रिम्शो रवा बाक्म, दे मरिम्शो रवा बाक्म मेको तुंडसीब। मती ७:१६-१८

34 ए बुस्स आ खलकपुकी, गे मरिम्शो थुं पाइश्शो ननी। मिनु इन शोत्र रे दोपा रिम्शो लोत्र गूबा डा? थुं मारम ब्रीशो बाक्मे, मेकोन लोत्र पा गूब। मती ३:७

35 रिम्शो थुं पाइश्शो मुरुमी रिम्शो लोत्र पाइब। मरिम्शो थुं पाइश्शो मुरुमी मरिम्शो लोत्र पाइब।

36 निसाफ पची नाक्त मुर नेल्लेमी आन हेंथे पशो लोत्र का का पा शोत्रचा मालनीम, दे इन कली देनुड। याकूब ३:६; यहूदा १५

37 मोपतीके होस पा बाक्कीन। मारदे हना इन पशो लोत्रमीन दोस गेचा नु ठीक सुइक्चा पुंडसीनीनी” दे माइक्तीमी।

चिन्ड कोत्रकोत्र दाकशो

मर्कूस ८:११-१२; लूका ११:२९-३२

38 मिनु सास्त्री नु फरिसी का निक्शीमी “शेंब हजुर, चिन्ड का कोंडदीकी” देंतेक्म।

39 मिनु येसुमी “मरिम्शो थुं पाइश्शो नु थमा मसुइक्बपुकीमी चिन्ड कोत्रकोत्र दाक्नीम। मेको आन कली परमप्रभु यावे आ लोत्र पाइब योना आ चिन्ड डा लाक्शा मारेड चिन्ड मकोंडनुडमी।

40 योना नाक्त सां सम्म डांड आ कोत्रजम बाक्शो खोदेशो पा, रागीम जरमेशो यो नाक्त सां सम्म रागी आ कोत्रजम बाक्ब। योना २:१; एफिसी ४:९; १पत्रुस ३:१९

41 निसाफ पची नाक्तीम निनवे सहर डा मुरपुकी बोक्शा, एको पाला डा आन कली दोसी सुइक्नीम। मारदे हना मेकोपुकीमी योना आ लोत्र नेशा, आन थुं परमप्रभु यावे गे लेत्ताक्म। नेनीने, एकेर का योना क्येडा ठेयब बाक्ब। जोना ३:५

42 निसाफ पची नाक्त लुक्च रागी डा पिपीम बोक्शा, एको पाला डा मुर आन कली दोसी सुइक्ब। मारदे हना मेकोमी डोन रे कुशा, पिप सोलोमनमी दोदेशो निप्स पा हुकुम पवा, दे कोत्रथ जाक्माक्त। नेनीने, एकेर सोलोमन क्येडा ठेयब का बाक्ब। १राजा १०:१-१०

वोल गृशा लशा यो लेन्ने चाप्ब

लूका ११:२४-२६

43 मुर रे वोल कली गुंडशा खेरमेनु, ग्रांरा दिचा डा वोल गूशा लशा, ब्वाक्कु मबाक्तीकेमी नाइक्तीके माल्थ गाक्ब। माल्शा यो नाइक्तीके मथीब।

44 मिनु 'डोंइती आ बाक्तीकेमीन लेत्नुड' दे लेशशा जाक्ब। मिनु लेशशा जाक्मेनु, बाक्तीके फिक्शा, सिल्शा श्येत्थ वोइश्शो थिप्ब।

45 मिनु आ क्येडा ग्रांरा दिचा डा ७ ओटा वोल आन कली माल्थ लशा चाक्ब। मिनु ओव्रशा बाक्नीम। मिनु डोंइती क्येडा मेको मुर शुश मरिम्शो दुम्ब। एको मरिम्शो पाला कली मोदेशो दुम्ब" दे माइक्तीमी। २पत्रुस २:२०

येसु आ खिं डा मुर

मकूस ३:३१-३५; लूका ८:१९-२१

46 येसुमी मेको लोव्र पना पन बाक्मेनु, आ ममा नु आ लोकबपुकी गुम्थ जाक्मा बाक्त। मती १३:५६

47 मिनु मुर कामी "इन ममा नु लोकबपुकी गुम्थ जाक्तेक्म" दैत।

48 मिनु येसुमी मो दैब कली "आं ममा नु आं लोकबपुकी सु नमी?" मती १०:३७; लूका २:४९

49 देशा, आ गुइ आ शेंसीबपुकी गे शुक्शा "कोव्रडीने, एकोपुकी आं ममा नु आं लोकबपुकी नम।

हिब्रू २:११

50 मारदे हना स्वर्गम बाक्ब आं आफ आ दाक्शो पाइबपुकीन आं ममा नु लोकबपुकी नम" दैत। रोमी ८:२९

## 13

वांचेर शोक्शो कथा

मकूस ४:१-९; लूका ८:४-८

1 मेको नाक्त येसु खिं रे गाक्शा, समुन्द्र आ नेक्था लशा निस्साक्व।

2 मिनु शुश मुर जाक्शा देल्लेक्म। मिनु येसुमी शुश मुर आन कली देल्लो तशा, डोंगा डोइश्शा निस्साक्व। मुरपुकी चहिं समुन्द्र आ नेक्था बाक्तेक्म।

3 मिनु कथा सेल्शा, शुश लोव्र शेंताक्मी। कथा का ओं दैत "मुर कामी वांचेर शोक्थ लमाक्त।

4 मिनु ब्वारानु, गेडा का निक्शी लांमी जुक्तमे बाक्त। मिनु चिक्बीम गुप्शा जामे बाक्त।

5 का निक्शी ग्याडग्रो ठाउंमी जुक्तमे बाक्त। मिनु शुश खप मबाक्तीके जिव जाव वामा बाक्त।

6 तन्न नां पवानु, सोल सुल बेक्मा बाक्त। मारदे हना शाक्श मपाइश्शो बाक्मा बाक्त।

7 का निक्शी चू घारीमी जुक्तमे बाक्त। मिनु चूम सुम्शा, वाचा मगेवा बाक्त।

8 मिनु का निक्शी रिम्शो खपीम जुक्तमे बाक्त। मिनु वाशा शुश ग्रेल्शा, गेडा का के सहे का, ६०,

३० सिम्मा बाक्त।

9 सु नोफा पाइश्शो बाक्मे, मेकोमी नैनल" दैत।

कथा सेल्शा शेंशो आ पर्वम

मकूस ४:१०-१२; लूका ८:९-१०

10 मिनु शेंसीबपुकीमी येसु कली "मारदे कथा सेल्शा, मुर आन कली शेंनीनी?" दे हिल्लो पाम्तेक्म।

11 मिनु येसुमी "इन कली स्वर्ग डा राज्य आ पर्वम खुइश्शो लोव्र रुप्तीक थुं गेशो बाक्त। तन्न मेको आन कली मगेमी बाक्त। १कोरिन्थी २:१०

12 थीबमी तेम्शा गेचा पुंडसीब, मिनु शुश दुम्ब। मथीब चहिं बाक्शो यो रोइक्चा पुंडसीब। हितोपदेस ९:९; मती २५:२८-२९; मकूस ४:२४; लूका ८:१८

13 कथा सेल्शा शेंनुडमी। मारदे हना कोव्रशा यो मताइनीम। नेशा यो मरुप्नीम। यूहन्ना १६:२५; ब्यवस्था २९:३

14 साइ नेसी यसैयामी देशो नोले दुम्ब लोव्र मुल थमा दुम्त। मार ब्रेक्शो बाक्त देशा हना 'नेचा दा नैनीनी, तन्न दोपा यो मरुप्नीनी। कोव्रचा दा कोव्रनीनी, तन्न दोपा यो मताइनीनी।

15 मेको मुर आन थुं ग्याम्शो बाक्नीम। आन नोफा थांइशो बाक्नीम। आन मिक्च क्रिप्शो बाक्नीम। मोदेशो मपशो नम हना, आन मिक्चीम ताम वा, नोफाम नेनेम वा, थुंमी रुबेम वा, मिनु आं गे लेम्म वा, मिनु गो सापदुमी वा' दे ब्रेक्शो बाक्त। यसैया ६:९-१०; यूहन्ना ९:३९

16 गेपुकी चहिं ग्येरसीने। इन मिक्च नु नोफा मेको आन के खोदेशो ममाइ। मिक्चीम ताइनीनी, नोफाम नेनीनी। लूका १०:२३-२४

17 नोफा दाइश्शा नेनीने, गेमी मुल तशो नेंशो साइ नेसी रे परमप्रभु यावे आ लोत्र पाइबपुकीमी तचा नेंचा दाक्बाक्मा बाक्त। तन्न तचा नेंचा मतामे बाक्त। १पत्रुस १:१०

वांचेर शोक्शो कथा आ अर्थ शेंशो

मर्कूस ४:१३-२०; लूका ८:११-१५

18 वांचेर ब्वारशो कथा आ अर्थ शेंनन्नी,

19 सुमी परमप्रभु यावे आ राज्य डा लोत्र नेंशा मरुबा, मेको लांमी जुक्शो वांचेर खोदेशो बाक्ब। सैतानमी आ रुप्शो क्याम्शा गेब।

20 ग्याडग्रो खपीम शोक्शो खोदेशो बाक्त हना, देशो चोटी बिश्शा ग्येरसीब।

21 तन्न शाक्श थोक्चा मतथु शुश मलीब। परमप्रभु यावे आ लोत्र आ पर्वम श्येत जापुतु हना, थु प्रोइशा गाक्ब।

22 चू घारीम जुक्शा सुम्शो खोदेशो बाक्त हना, लोत्र नेंब। तन्न दोपा ठेयब दुम्नुडा? दोपा क्येट चेमु? दे मिम्शा, आ थमा सुइक्तीके देक्ब। मिनु नेंशो लोत्रमी फल मसिप्ब। मती ६:१९-३४; १तिमोथी ६:९

23 सुमी नेंशा रुब्बा, मेको चहिं रिम्शो खपीम जुक्शो वांचेर खोदेशो शुश ग्रेल्शा, गेडा का के सहे का, ६०, ३० सम्म सिप्ब” दे शेंताक्मी।

सुवा नु चेरब शोक्शो कथा

24 मिनु अर्को कथा ओदें शेंताक्मी “स्वर्ग डा राज्य ओदेशो बाक्ब, मुर कामी आ रूमी रिम्शो वांचेर शोक्गा बाक्त।

25 मिनु नाकदो इम्मेनु, आ जोरी सत्रुमी मेको तारी सुवा ब्वारशा गेवा बाक्त।

26 मिनु वांचेर वामेनु, सुवा यो वामाक्त।

27 मिनु गेय पाइबपुकीमी सुवा वाशो तशा, रू आ धनी कली ‘रिम्शो वांचेर शोक्नी ममाइ? मिनु सुवा दोपा वामा?’ देंमा बाक्त।

28 मिनु रू धनीमी ‘आं जोरी सत्रुमी ब्वारा बाक्त’ देंमाक्त। ‘मो हना मेको सुवा तुल्शा ताइक्तका? मार देंनीनी?’ देंमानु

29 ‘तुल्चा मदुम्ब। सुवा तुल्तीनी हना, चेरब यो दुल्ब।

30 मोपतीके रिक्ची मजाक्म सम्म बाक्ल। रूप्ची जाक्मेनु, आं गेय पाइब आन कली डोंइती सुवा रिक्शा फ्रेंशा चोचा कली तिल्शा वोतीने। मिनु चेरब रिक्शा तुप्शा आं भकारीम कुर पा वोतीने, दे माइक्नुडमी’ देंमाक्त” दे शेंताक्मी। मती ३:१२; मती १५:३; प्रकाश १४:१५

तोरी शोक्शो कथा

मर्कूस ४:३०-३२; लूका १३:१८-१९

31 येसुमी “स्वर्ग डा राज्य ओदेशो यो बाक्ब, मुर कामी आ रूमी तोरी शोक्गा बाक्त।

32 वांचेर नेल्ल क्येडा आइक्च गेडा तोरी गेडा बाक्माक्त हना यो, वाशा ठेयब रवा दुम्माक्त। मेको रवामी चिक्बीम ग्योत्र सेल्शा बाक्मा बाक्त” दे अर्को कथा का शेंताक्मी।

बोरपाइक्ब ओरुखी कथा

33 मिनु येसुमी “स्वर्ग डा राज्य ओदेशो बाक्ब, मीश मुर कामी पाथी सां फसमी बोरपाइक्ब ओरुखी सुप्शा, फस नेल्ल मबोरम सम्म सुम्शा वोदा बाक्त” दे अर्को कथा का शेंताक्मी। लूका १३:२०-२१

34 येसुमी मेको लोत्र नेल्ल कथा सेल्शा शेंताक्मी। कथा मसेल्थु मारेइ लोत्र मशेंदीमी। मर्कूस ४:३३-३४

35 मारदे हना साइ नेसी परमप्रभु यावे आ लोत्र पाइबमी देशो लोत्र मुल थमा दुम्ल, दे कथा रे पा शेंताकमी। मेको साइ ब्रेकशो लोत्र चहिं मार बाकब देशा हना “सरीड नु रागी सेल्शो रे मुल सम्म खुइइशो लोत्र कथा सेल्शा नेंपाइकनुडमी” दे ब्रेकशो बाकत। भजन संग्रह ७८:२

चेरब शोक्शो कथा आ अर्थ शेंशो

36 मिनू येसु मुर आन कली प्रोइशा, खिं लेलत। मिनू आ शेंसीबपुकीमी “रूमी वाशो सुवा आ कथा आ अर्थ शेंदीकी” देंतेकम।

37 मिनू येसुमी “रिम्शो वांचेर शोक्ब देशो रागीम जरमेशो बाकब।

38 रू देशो रागी बाकब। रिम्शो वांचेर देशो राज्य डा सन्तान नमी। सुवा देशो सैतान आ सन्तान नम। १कोरिन्थी ३:९; यूहन्ना ८:४४

39 सुवा ब्वारब सैतान बाकब। रूप्ची नाक्त चहिं निसाफ पची नाक्त बाकब। गेय पाइबपुकी परमप्रभु यावे आ गेय पाइब नम।

40 सुवा खुप्शा, मीम चोशो खोदेशो पा निसाफ पची नाक्त मार दुम्ब देशा हना, मोदेशोन दुम्ब।

41 रागीम जरमेशोमी परमप्रभु यावे आ गेय पाइब आन कली सोइक्ब। मिनू मेकोपुकीमी आ राज्य रे पाप पपाइक्ब नु पाप पाइब नेल्ल आन कली खुप्शा, मती २४:३१

42 ठेयब मीम हुम्नीम। मेकेर मुरपुकी आन खुइ शेप्शा डाकनीम।

43 परमप्रभु यावे आ डोंइती ठीक दुम्शोपुकी चहिं आं आफ आ राज्यमी नां खोदेशो छेडछेडम ग्येरशा बाकचा ताइनीम। सु नोफा पाइइशो बाकमे, मेकोमी नैनल। दानीएल १२:३

रूमी थिम्शो शोंप

44 स्वर्ग डा राज्य ओदेशो यो बाकब, रू कामी शोंप थिम्शा वोइइशो बाकमाकत। मिनू काबु मुर कामी मेको शोंप थिदा बाकत। मिनू थम ग्येरसीशा, लेंशा थिम्शा वोइइशा, आइक्के बाकशो नेल्ल लेशशा, मेको रू ग्यबा बाकत। मती १९:२९; लूका १४:३३; फिलिप्पी ३:७

शुश क्येट लाइब मोती

45 स्वर्ग डा राज्य ओदेशो यो बाकब, मोती ग्याप्ब लेयब कामी रिम्शो मोती ग्याप्नुड, दे मिम्शा, माल्ना माल्न गाकमाकत।

46 मिनू काबु शुश क्येट लाइब मोती तवा बाकत। मिनू आइक्के बाकशो नेल्ल लेयशा, मेको ग्यबा बाकत।

डांड रेशो कथा

47 स्वर्ग डा राज्य ओदेशो यो बाकब, समुन्द्रमी डांड रेट्वा कली ग्याइल आप्शो बाकमाकत। मेको आप्शो ग्याइलीम शुश थरी डा डांड ओव्रमा बाकत। मती २२:९-१०

48 मिनू ब्रीमेनु, माझीपुकीमी ग्याइल कीशा समुन्द्र रे गुंडदमे बाकत। गुंडशा ब्वचा डा डांड वोदमे बाकत, मव्वचा डा डांड ताइकतमे बाकत।

49 निसाफ पची नाक्त मोदेशोन दुम्ब। परमप्रभु यावे आ गेय पाइबपुकी जाकशा, ठीक पाइब आन दाते रे पापी आन कली योत्रशा गुंडशा, मती २५:३२

50 ठेयब मीम हुम्नीम। मेकेर मुरपुकी आन खुइ शेप्शा डाकनीम।

51 आं शेंतीक लोत्र नेल्ल रुम्नी?” दे हिल्लो पवानु “रुप्तक” देंतेकम।

52 मिनू येसुमी “स्वर्ग डा राज्य आ परबम शेंसीशो जोक्ब तुइक्ब दुम्शो मुर खिं डा होव्रप खोदेशो बाकब। मेकोमी आ भकारी रे माइत नु नक थोत्रक शोल्ने चाप्ब” देंत।

नासरथ सहरम येसु कली मन्नशो

मर्कूस ६:१-६; लूका ४:१६-३०

53 मिनू येसुमी मेको लोत्र शेंने थुम्शा, मेकेर रे लत।

54 मिनू लशा, आ बाकशो सहरम जाकदीशशा, गुम्तीक खिंमी शेंताकव। शेंदानु, आ लोत्र नेंबपुकीमी छक लाकशा “आमाइ, एकोमी ओदेशो लोत्र दोपा जोकगा? सु आ सक्तिमी छक लाकचा डा गेय पवा?

55 शी के सेल्ब आ तौ ममाइ डा? आ ममा मरीयम ममाइ डा? आ लोकब याकूब, योसेफ, सिमोन, यहूदा मनमी डा?

56 आ समीपुकी गोपुकी नु बाक्ब मनमी डा? मिनु मोदेशो आन तौमी दोपा जोक्शा ठेयब दुम्मे?" दे आन थु मनुशो लोत्र पमुमा बाक्त। यूहन्ना ६:४२; यूहन्ना ७:१५, ५२

57 मिनु येसुमी मेको आन थु मनुशो तुइश्शा, मेको आन कली "तेइ तेइ परमप्रभु यावे आ लोत्र पाइब आन कली ठेयब सुइश्शा मान पाइनीम। आंम रागी, आंम खिंमी चहिं महिक्नीम" दे माइक्तीमी। यूहन्ना ४:४४

58 मेकेर छक लाक्चा डा गेय का निकशी ला पाप्तु। मारदे हना मेकोपुकीमी थमा मसुदेम।

## 14

### यूहन्ना कली साइश्शो

1 येसुमी छक लाक्चा डा गेय पा शेना शेन गाक्मेनु, आ पशो नु आ शेशो पिप हेरोदमी नैना बाक्त। मेको पिप हेरोद चहिं मेको रागी डा ४ भागमी भाग का डा पिप बाक्माक्त। मोपतीके भाग का डा आन पिप, दे नें वोइश्शो बाक्माक्त।

2 मिनु पिप हेरोदमी येसु आ पशो नु शेशो नैशा, आ गेय पाइब आन कली "मेको ब्वाक्कुम खुम्शा गुंडब यूहन्ना बेक्शो रे सेंसे बाक्त। मिनु शुश सक्ति पाइश्शा, छक लाक्चा डा गेय पाइबाक्माक्त" देमाक्त।

3 यूहन्ना बेक्शो रे सेंसे बाक्त, देशो दोपा देशा हना, हेरोदमी आ लोकब फिलीप आ मीश आ पर्वम यूहन्ना कली जेल्खानमी चोक्शो बाक्माक्त। मती ११:२

4 मारदे हना यूहन्नामी हेरोद कली "इन लोकब आ मीश चाक्चा मदुम्ब" दे माइश्शो बाक्माक्त। प्रस्थान २०:१४

5 मो देंतीके यूहन्ना कली साइक्चा माल्शो बाक्माक्त। तन्न मुर आन कली तशा हिंमाक्त। मारदे हना मुरपुकीमी यूहन्ना परमप्रभु यावे आ लोत्र पाइब बाक्ब, दे थमा सुइश्शो बाक्मा बाक्त। मती २१:२६

6 मिनु पिप हेरोद आ जरमेशो नाक्त जाक्माक्त। मिनु हेरोदनी आ तमीमी हेरोद आ भोजमी जाक्ब आन दातेमी सिल पशा, हेरोद कली ग्येरपदा बाक्त।

7 मेको कली सिल पशो तशा, हेरोद थाम्पा ग्येरशा, कसम जशा "मार पुंडतीवी हना यो, गो गेनन" दे मदा बाक्त।

8 मिनु मीश आल आ ममामी "ब्वाक्कुम खुम्शा गुंडब यूहन्ना आ पिया क्योरशा, थालम कुर पा गेयीनी" दे पुंडपदा बाक्त।

9 मिनु हेरोदमी मेको लोत्र नैशा, आ थु मनुमाक्त। तन्न भोजमी जाक्ब आन कुल कसम जशा लोत्र गेतीके मगेनन देने मचबा बाक्त।

10 मिनु आ सिपाही आन कली जेल्खानमी सोइश्शा, यूहन्ना कली क्योरपा,

11 आ पिया थालम कुर पा चाक्पा गेपदा बाक्त। मिनु मीश आलम मेको थाल ताक्शा लाइश्शा, आ आम्मा कली गेवा बाक्त।

12 मिनु यूहन्ना आ शेंसीबपुकीमी जेल्खानमी लशा, आ लास लाइश्शा, थिम्मे बाक्त। मिनु येसु आ बाक्तीके जाक्शा, मो दुम्शो नेल्ल शोत्रतेक्म।

### ५ हजार मुर आन कली थुल्शो

मर्कुस ६:३१-४४; लूका ९:१०-१७; यूहन्ना ६:१-१३

13 मिनु येसुमी मेको लोत्र नैशा डोंगा डोइश्शा, सुइ मबाक्तीकेम लत। मिनु सहर डा शुश मुरुमी येसु लाम्माक्त देशो नैशा, समुन्द्र हिरशा, आइक्ची हांबु जाक्दीम्मा बाक्त।

14 मिनु येसु डोंगा रे तोइश्शा, शुश मुर देल्शो तशा, मेको आन कली शिशी पा रोइ पाइब आन कली सापाइक्तीमी।

15 मिनु नां रिक्चावानु, आ शेंसीबपुकीमी "एको मारेइ मबाक्तीकेम मार जाइनीमी? देल्शो मुर आन कली लचा गेने। गाउं गाउं लशा, ग्याप्शा जामेक्ल" देतेक्म।



- 16 मिनू येसुमी “लचा ममाल्नीम। गेपुकीमी एको आन कली जचा गेने” देंत।  
 17 “गोपुकी नु ५ ओटा शोब्ले नु डांड निकशी डा लाक्शा मारेड मबा” देंमानु  
 18 “लो, मेको शोब्ले नु डांड गेयीनी” देंत।  
 19 मिनू मुर आन कली “निस्सीने” दे माइश्शा, मेको शोब्ले नु डांड शेशा, सरीड गे कोव्रशा “गे रिम्शो पाइब बाक्नीनी” देंशा शोब्ले नु डांड आ शेंसीब आन कली योक्शा गेपाइक्तीमी।  
 20 मिनू नेल्लेमी रूथी जाम्तेक्म। जशा हेंशो १२ डालो खुप्ताक्म। २राजा ४:४४  
 21 जाइबपुकी चहिं आलपुकी नु मीश मुर आन कली प्रोइशा, वोंइश मुर ला ५ हजार खोइ बाक्तेक्म।

### येसु ब्वाक्कु तारी गाक्शो

- 22 मिनू येसुमी शेंसीब आन कली “आं डोंइती लने, गो मुर आन कली सोइश्शा पीनुड” दे डोंगामी डोइक्पा सोइक्ताक्मी।  
 23 मिनू मुर आन कली सोइश्शा, प्रार्थना पथ डांडाम डोंइसे बाक्त। नां रिक्मेनु यो मेकेरन आ कांडचीक बाक्माक्त। लूका ६:१२; लूका ९:१८  
 24 शेंसीबपुकी चहिं समुन्द्र आ दातेम जाक्दीश्शा, फश नु छालमी तेक्शा, श्येत जाम्तेक्म।  
 25 मिनू नां सोइचवावानु, येसु ब्वाक्कु तारी गाक्ना गाक्न पिशो ताम्तेक्म।  
 26 मोपा पिशो तशा “आमाइ, वोल् पित” दे हिंशा वाइ ब्रेम्मानु,  
 27 येसुमी “थुं बारपतीने। गो नड, महिनीन” देंत। लूका २४:३७  
 28 मिनू पत्रुसमी “प्रभु, गेन ननी हना, आं कली यो ब्वाक्कु तारी गाक्शा, इन गे पिचा कली ब्रेत्तीनी” देंत।  
 29 मिनू येसुमी “पिवो” दे ब्रेत्तानु, पत्रुस डोंगा रे तोइश्शा, ब्वाक्कु तारी गाक्शा येसु गे लत।  
 30 मिनू फश गिवार पशो तशा हिंशा, युम्चा माल्तु। मिनू “प्रभु प्रोइयीनी” दे वाइ ब्रेत्त।  
 31 मिनू येसुमी फि ग्याइश्शा कीशा “ए, गे थमा पा थमा सुइक्ने मचाप्ब, मार दल्गीर पवी?” दे माइश्शा,  
 32 डोंगा डोंइसाक्स। मिनू फश यो दिक्त।  
 33 डोंगाम बाक्बपुकीम येसु आ डोंइती बाप्शा “थमान, परमप्रभु यावे आ तौ बाक्नी बाक्त” देंशा सेउ पाम्तेक्म। मती १६:१६; यूहन्ना १:४९

### मुर आन कली सापाइश्शो

मर्कूस ६:५३-५६

- 34 मिनू समुन्द्र शोक्शा, गेनेसरेथ रागीम जाक्दीत्तेक्म।  
 35 मेकेर जाक्दीम्मानु, मुरपुकीमी येसु जाक्माक्त, दे तुइश्शा “रोइ पाइब आन कली चाक्कीन, है” देंशा डा मीन आन रागीम नेंपाइक्मुमा बाक्त।  
 36 मिनू रोइ पाइब आन कली चाक्गमेनु, मेकोपुकीमी “प्रभु, इन फेक्शो वा थिचा गेकी” दे पुंडतेक्म।  
 मिनू सु सुमी थीमे, मेकोपुकी सातेक्म। मती ९:२१; लूका ६:१९

## 15

### ग्रान्ना दिचा आ पर्वम शेंशो

मर्कूस ७:१-१३

- 1 मिनू फरिसी नु सास्त्रीपुकी यरूसलेम रे येसु कली गुम्थ जाक्शा  
 2 “इन शेंसीबपुकीमी जोक्ब तुइक्ब खाल्पा आन रिती थिती मारदे मपाइनीमी? जचा डोंइती गुइ चिकचा माल्लो। मारदे मचिकनीमी” देंमानु, लूका ११:३८  
 3 येसुमी “गेपुकीमी मारदे इन पतीके पाइनीनी? परमप्रभु यावेमी अरेशो लोइ चहिं मपाइनीनी।

4 परमप्रभु यावेमी अरेशो लोत्र का 'आम आफ आस कली मान पचा' मिनु 'सु सुमी आम आफ आस कली सराप पाइनीमी, मेकोपुकी साइक्चा पुंडसीनीम' दे ब्रेक्शो बाक्ब। प्रस्थान २०:१२; प्रस्थान २१:१७

5 गेपुकीमी चहिं 'सु सुमी आम आफ कली गेचा माल्शो थोत्रक परमप्रभु यावे आ खिं लाइश्शा गेने थुम्तक' देंनीम। मेकोपुकीमी आम आफ कली मान पचा ममाल्नीम, दे शनीनी। हितोपदेस २६:२४; १तिमोथी ५:८

6 मोदेशो पा इन रिती थिती सेल्शा, परमप्रभु यावेमी अरेशो लोत्र क्याम्नीनी।

7 ए कपटीपुकी, यसैयामी इन कली गारचा डा लोत्र पा

8 'मेकोपुकीमी शोत्र नु लोत्रम ठेयब सेल्नीमी। आन थुमी चहिं आं कली मदाक्नीम।

9 आं कली मान पखु पशो खोदेशो पा आन सेल्शो शेंतीक लोत्र परमप्रभु यावेमी अरेशो लोत्र बाक्ब, दे मुर आन कली शेंनीम' दे ब्रेक्शो बाक्त" दे माइक्तीमी। यसैया २९:१३

10 मिनु येसुमी मुर आन कली ब्रेश्शा "नेशा रूपीने,

11 शोत्र आगा ओत्रब थोत्रकीमी मुर कली ग्रॉग्रा मसेल्ब। शोत्र रे गूशोमी चहिं मुर कली ग्रॉग्रा सेल्ब" दे शेंताक्मी। प्रेरित १०:१५; १तिमोथी ४:४; तीतस १:१५

12 मिनु शेंसीबपुकीमी येसु कली "शंब, इन देंशो नेशा, फरिसीपुकी आन थुं मनुम दे तुइक्तीनी?" देंतेक्म।

13 मिनु येसुमी "स्वर्ग डा आं आफोमी मखुम्शोपुकी तुल्शा ताइक्चा पुंडसीनीम। प्रेरित ५:३८

14 मेकोपुकीमी मारेइ पामेक्ल। मिक्च मताइब लां कोंइब नम। मिक्च मताइबमी मिक्च मताइब कली कीशा लां कोंइताक्व हना, निम्फा खाल्टाम बिक्नीस" देंत। मती २३:२४; लूका ६:३९; रोमी २:१९

15 मिनु पत्रुसमी "थमा, इच्छी ना मुर आन कली पशो लोत्र आ अर्थ मार मे?" दे हिल्लो पवानु

16 "ए, गेपुकी यो आं लोत्र मरुप्ब बाक्नीनी?"

17 शोत्र आगा ओत्रब थोत्रक कोत्रज जाक्दीश्शा, खी दुम्शा लाइब, दे मतुइक्नीनी?"

18 शोत्र रे गूशो चहिं थुं रे गूशो बाक्ब। मेकोमी मुर कली ग्रॉग्रा सेल्ब।

19 मुर आन थुमी मार मरिम्शो मिन्नीम देंशा हना, मुर साइक्चा, मुर आन मीश लाइक्चा, तेल्लेम पचा, खुइ पचा, जोल पा सांकछी बाक्चा, मुर आन पबंम मरिम्शो लोत्र पचा, दे मिन्नीम। मेको चहिं शोत्र रे गूशा, उत्पत्ती ८:२१

20 मुर आन कली ग्रॉग्रा सेल्ब। गुइ मचिक्थु जशोमी चहिं मारेइ मपाइब" दे शेंताक्मी।

कनानी रागी डा मीश मुर

मर्कूस ७:२४-३०

21 मिनु येसु मेकेर रे लशा, टायर नु सीदोन सहर आ नेक्था जाक्दीत।

22 मिनु मार दुम्त देंशा हना, कनानी रागी डा मीश मुर का जाक्शा "दाऊद आ तौ, प्रभु, शिशी पाइय्यीनी। आं तमी कली वोल्म सुम्शा शुश श्येत गेप्टु। वोल् कली खेरशा सापतीने" दे डाक्न डाक्न पुंडतु।

23 मिनु येसु सिक्सी पा बाक्त। मिनु शेंसीबपुकीमी "एको मीश मुरुम रेयके पना पन इं नोले खोइश्शा पिन पिन बाक्ब। एको कली सोइक्तीने" देंतेक्म।

24 मिनु येसुमी "लां जाम्शो भेडा खोदेशो दुम्शो इं इस्त्राएल डा मुर आन कली ला वारच पथ, सोइसीशो नड" देंत। मती १०:५-६; रोमी १५:८

25 मीश मुरुम चहिं येसु आ डोंइती पोक्च थेक्शा "प्रभु, आं कली वारच पयीनी" दे सेउ पाप्टु।

26 मिनु येसुमी "आल आन कली वोइश्शो शोब्ले लाइश्शा, कुचुम कली गेचा मडुम" देमेनु

27 "प्रभु, मेको थमा बाक्त हना, होत्रपमी हेंशा ताइश्शो थोत्रक कुचुममी जचा ताइनीम" देंत।

28 मिनु येसुमी "ओहो, मेकोमी थमा पा थमा सुइय्यी बाक्त। मोपतीके इ पुइशो जाक्दील" दे माइक्तु। मो देमेनु, आ तमी ब्रा सामाक्त। मती ८:११-१३

रोड पाइब आन कली सापाइशशो

29 मिनु येसु मेकेर रे लशा, गालील समुन्द्र आ नेक्था जाकदीशशा, डांडा का डोइशशा निस्साक्व।

30 मिनु शुश मुरुमी गुइ खोइल मदुकब, कूजी कुजे, मिक्च मताइब, नोफा मनेब, लोत्र मपाइब नु मार मार रोड पाइबपुकी चाक्शा, आ डोइती तेल्लेक्म। मिनु मेको नेल्ल आन कली सापाइक्तीमी।

31 मिनु शुश मुर आन कली साशो तशा “लाटापुकी लोत्र पाइबाक्तेक्म, कूजी कुजे साबाक्तेक्म, खोइल मदुकब गाक्बाक्तेक्म, मिक्च मताइब मुल मिक्च ताइब दुम्बाक्तेक्म” दे छक लाक्शा, इस्राएली आन परमप्रभु यावे कली ठेयब सेल्शा मान पाम्तेक्म। मर्कूस ७:३७

४ हजार मुर आन कली थुल्शो

मर्कूस ८:१-१०

32 मिनु येसुमी आ शेंसीब आन कली ब्रेशशा “एको शुश मुर आन कली शिशी पाइनुडमी। मारदे हना नाक्त सां सम्म गो नु काथा बाक्तेक्मे। मिनु आन के जचा मारेइ मबा। जचा मगेथु, आन खिं सोइक्चा मदाक्नुड। सोइक्ताक्डमी हना, लांमी बेक्नीम” दे माइक्तीमी। मती १४:१३-२१

33 मिनु मेकोपुकीमी “गोरशो रागी मारेइ मबाक्तीकेमी इशका मुर आन कली मार जचा गेचा नमी डा?” देतेक्म।

34 मिनु येसुमी “शोब्ले दोशो कुरनी?” देत। मिनु “शोब्ले ७ ओटा नु आइक्च डांड का निक्शी” देतेक्म।

35 मिनु मुर आन कली निप्पाइशशा,

36 मेको ७ ओटा शोब्ले नु डांड शेशा “गे रिम्शो पाइब बाक्नीनी” दे शोब्ले जिक्शा, शेंसीब आन कली गेशा योक्पाइक्तीमी।

37 मिनु नेल्लेमी रूथी जाम्तेक्म। जशा हेंशो ७ डालो खुप्ताक्म।

38 जाइबपुकी चहिं मीश मुर नु आलपुकी प्रोइशा, ४ हजार बाक्तेक्म।

39 मिनु मुर नेल्ल आन कली सोइशशा, आ शेंसीबपुकी नु काथा डोंगा डोइशशा समुन्द्र शोक्शा, मागदाला रागीमी जाकदीत्तेक्म।

## 16

चिन्ड कोव्रकोव्र दाक्शो

मर्कूस ८:११-१२; लूका १२:५४-५६

1 मिनु फरिसी नु सदुकीपुकी जाक्शा, येसु आ थुं थाम्चा कली “स्वर्ग डा चिन्ड का कोइदीकी” देतेक्म। मती १२:३८

2 मिनु येसुमी मेको आन कली “नां पेरचावानु ‘दीसा हाक्ब। मारदे हना सरीड लल जिशो बाक्ब’ देनीनी।

3 मिनु नां दाम्मेनु ‘मुलाक्त फश गिवार पाइब। मारदे हना गोस्सुम सुम्शा, सरीड लल जिशो बाक्ब’ देनीनी। सरीड कोव्रशा हाक्बा, दे रेउ यीबा देंने चाप्नीनी। तन्न मुल मार दुम्चशो बाक्बा मेको आ चिन्ड मरुप्नीनी। मती ११:४

4 मरिम्शो पाइब नु देवी देवता नु परमप्रभु यावे खाल्ब पालाम चिन्ड कोव्रकोव्र दाक्नीम। मेको आन कली योना आ चिन्ड डा लाक्शा मारेइ चिन्ड मकोइनुडमी” देंशा, मेको आन कली प्रोइशा गाक्त। मती १२:३९-४०

लोत्र नेंशा होस पांडसीने

मर्कूस ८:१४-२१

5 मिनु समुन्द्र शोक्शा, आइक्ची हांबु जाकदीम्मानु, शेंसीबपुकीमी “ला, शोब्ले कुरचा प्रेसे बाक्त” दे ति फुक्शा देमुम्तेक्म।

6 मिनु येसुमी “फरिसी नु सदुकी आन शोब्लेमी सुप्शो बोरपाइक्ब ओख्ती रे होस पांडसीने” दे माइक्तीमी। लूका १२:१

7 मिनू “शोब्ले कुरचा प्रेंदया बाक्त, दे तुइश्शा, मो देंम कों” देंमुन्तेक्म।

8 मिनू येसुमी मेको आन लोत्र तुइश्शा “ए, गे थमा पा थमा सुइक्ने मचाप्वपुकी, शोब्ले मबा, दे मारदे शुश लोत्र पमुनी?

9 मुल यो मारेइ मरुप्नीनी? ५ ओटा शोब्लेमी ५ हजार मुर आन कली रूथ्री जचा गेशा, गिश डालो हेंम? मती १४:१७-२१

10 मिनू ७ ओटा शोब्लेमी ४ हजार मुर आन कली जचा गेशा, दोशो हेंम, दे ममिम्नीनी? मती १५:३४-३५

11 फरिसी नु सदुकी आन शोब्लेमी सुप्शो बोरपाइक्व ओरुत्ती रे होस पांडसीने देशो चहिं शोब्ले आ पर्वम शेंशो ममाइ। मुल यो मरुप्नीनी?” दे माइक्मीनु,

12 “गे फरिसी नु सदुकी आन शेंतीक लोत्र नेंशा, होस पांडसीन, दे शेंशो बाक्माक्त” दे रुप्तेक्म।

पत्रुसम “ख्रीस्त ननी” देशो

मकूस ८:२७-३०; लूका ९:१८-२१

13 मिनू सिजरिया फिलिप्पी रागीम जाक्दीश्शा, येसुमी आ शेंसीब आन कली “मुरपुकीमी रागीम जरमेशो आ पर्वम मार देंनीमी?” दे हिल्लो पवानु

14 “का निक्शीमी ‘ब्वाक्कुम खुम्शा गुंडब यूहन्ना बाक्माक्त’ देंनीम। का निक्शीमी ‘एलीया बाक्माक्त’ का निक्शीमी ‘येरमीया बाक्म कों, परमप्रभु यावे आ लोत्र पाइब अर्को का बाक्म कों’ देंनीम” देंतेक्म। मती १४:२; मती १७:१०; लूका ७:१६

15 मिनू येसुमी “गेपुकी चहिं आं कली सु सुइक्यीनी?” देंमेनु,

16 सिमोन पत्रुसमी “ब्रोंइशा बाक्ब परमप्रभु यावे आ तौ ख्रीस्त बाक्नीनी” देंत। यूहन्ना ६:६९

17 मिनू येसुमी पत्रुस कली “योना आ तौ सिमोन, ग्येरसो। मारदे हना इ देशो लोत्र मुरुमी शेंशो ममाइ। स्वर्गम बाक्ब आं आफोमी इ कली रुप्पाइक्तु। मती ११:२७; गलाती १:१५-१६

18 गे पत्रुस नवे, एको सेरथे फुल्लु तारी आं खिं सेल्लुड। नरकमी मेको कली ग्राने मचाप्व। यूहन्ना १:४२; एफिसी २:२०

19 गो स्वर्ग डा राज्य आ सांचो गेनन। एको रागीम मार कली फ्रेंनेवे, स्वर्गमी यो फ्रेंशो बाक्नीम। एको रागीमी मार कली प्रोंइनेवे, स्वर्गमी यो प्रोंइशो बाक्नीम” दे माइक्तु। मती १८:१८

20 मिनू आ शेंसीब आन कली “ख्रीस्त एकोन बाक्माक्त दे सुइ आन कली मशोव्रडीने” दे माइक्तीमी। मती १७:९

येसु श्येत जचा माल्ब, दे शेंशो

मकूस ८:३१-३३; लूका ९:२२

21 मेना रे येसुमी आ शेंसीब आन कली “यरूसलेम लशा, जोक्ब तुइक्ब खाल्पा, ठेयब चढेब नु सास्त्रीपुकी रे पा शुश श्येत जशा साइक्चा पुंडसीनुड। मिनू बेक्शा आ नित्थ नाक्त सेंसीनुड” दे शेंचा गोप्नु। मती १२:४०; यूहन्ना २:१९

22 मिनू काबु लेंशा शेंदानु, पत्रुसमी येसु कली आइक्ची ब्रेशशा लाइश्शा “परमप्रभु यावेमी इन कली शिशो पवल। प्रभु, इन देशो खोदेशो गेनायो मदुम्ल” देंमाक्त।

23 मिनू येसुमी नोले हिरशा पत्रुस कली कोव्रशा “ए सैतान, इ कुल मर्कोइदी। मारदे हना आं लां तेक्ब बाक्डे बाक्त। गे परमप्रभु यावे आ मिम्शो मपथु, मुरुमी मिम्शो लोत्र कका पाप्तीवी” दे हुइक्ताक्व।

येसु आ नोले खोइक्बपुकी

मकूस ८:३४-९:१; लूका ९:२३-२७

24 मिनू येसुमी आ शेंसीब आन कली “सुमी आं नोले खोइक्चा थुं पाइबा, मेकोमी आंम दला दाक्स पचा प्रोंइशा, श्येत जचा महिंथु, आ नोले खोइय्यील। मती १०:३८-३९; १पत्रुस २:२१

25 आ गिम प्रोंइचा दाक्बमी मेको साम्ब। आं पर्वम आ गिम साम्बमी आ गिम प्रोंइब। प्रकाश १२:११

26 रागी नेल्ल आम के सेल्शा, आ गिंग चहिं खतम दुम्त हना, मार रिम्शो दुम्म डा? खतम दुम्शो गिंग मार गेशा लेन्ने चाप्बा डा? लूका १२:२०; भजन संग्रह ४९:९

27 रागीम जरमेशो आ आफ आ दारसमी परमप्रभु यावे आ स्वर्ग डा गेय पाइबपुकी नु जाकब। मिनु मुर आन गेशो पशो कोव्रशा, आन गेशो का का पा लेशशा गेब। रोमी २:६

28 नोफा दाइशशा नेनीने, मुल गो नु काथा बाकब का निकशीमी रागीम जरमेशो आ राज्य जाकशो मतथु मबेक्नीम” दे शेंताकमी। मती १०:२३

## 17

येसुमी रां फाइशशा कोइशो

मर्कूस ९:२-१३; लूका ९:२८-३६

1 मिनु ६ नाक्त नोले येसुमी पत्रुस, याकूब नु आ लोक्ब यूहन्ना सां आन कली सुइ मबाक्तीके लाइशशो डांडामी लदा बाक्त। मती २६:३७; मर्कूस ५:३७; मर्कूस १३:३; मर्कूस १४:३३; लूका ८:५१

2 मिनु मेको आन डोंइती येसु फांडसेनु, मेकोपुकीमी आ कुल नां खोदेशो नु आ फेक्शो वा बुबु पा जिलील पा बुश दुम्शो तामे बाक्त। २पत्रुस १:१६-१८; प्रकाश १:१६

3 मिनु मोसा नु एलीया जाक्शा, येसु नु लोव्रसी पशो तामे बाक्त।

4 मिनु पत्रुसमी येसु कली “हे प्रभु, ई कली एकेर बाक्चा रिम्शो दुम्ब। गे दाक्नीनी हना, बाक्तीके सां सेल्लुड। इन कली का, मोसा कली का नु एलीया कली का सेल्लुड” देंमाक्त।

5 मोदेशो लोव्र पना पन बाक्मेनु, जिलील पा बुश तांडसीशो गोस्सुमी नेल्ल आन कली गिल्ली बाक्त। मिनु गोस्स आगा रे “एको आं दाक्शो तौ बाक्ब। एको कली तशा ग्येरसाक्यी। आ लोव्र नेनीने” देशो सेंदा नेन्मे बाक्त। मती १:१७

6 मोदेशो नेंशा, शेंसीबपुकी हिंशा खुम्की पा बाम्मा बाक्त।

7 मिनु येसुमी मेको आन कली गुइमी थिशा “बोक्कीन, महिनीन” दे माइकमी बाक्त।

8 मिनु बोक्शा कोव्रडमेनु, येसु कली ला तामे बाक्त।

9 मिनु डांडा रे ब्रुम्मानु, येसुमी “रागीम जरमेशो बेक्शो रे मसेंसे सम्म इन तशो सुइ आन कली मशेंदीने” दे माइकमी बाक्त। मती १६:२०

10 मिनु शेंसीबपुकीमी “सास्त्रीपुकीमी ‘डोंइती एलीया जाक्चा माल्ब’ दे शेंनीम ममाइ? मारदे मोदें शेंनीमी?” दे हिल्लो पामेनु मती ११:१४

11 “थमान, एलीया डोंइती जाक्शा, नेल्ल ठीक सेल्ब।

12 तन्न एलीया डोंइती जाक्त। आ जाक्मेनु, सास्त्रीपुकीमी तुइक्तेम। मिनु मेको कली मार पचा दाक्तेम, मेकोन पाम्तेकम। मोदेशो पा रागीम जरमेशोमी यो आन गुइ रे पा श्येत गेचा पुंडसीब, दे गो इन कली देंनुड” देंमाक्त। मती १४:९-१०

13 मिनु “ब्वाक्कुम खुम्शा थुंडब यूहन्ना आ पर्वम लोव्र देशो बाक्माक्त” दे रुप्मे बाक्त। लूका १:१७

येसुमी वोल कली खेरशो

मर्कूस ९:१४-२९; लूका ९:३७-४२

14 मिनु येसु नु आ शेंसीब सां शुश मुर देल्शा बाक्तीकेमी जाक्मानु, मुर का येसु आ डोंइती जाक्शा, पोक्च थेक्शा सेउ पा

15 “हे प्रभु, आं तौ कली शिशी पा सापतीने। आं तौ छारे रोइ पा मीम दुप्पांडसीशा ब्वाक्कुम गुम्पांडसीशा, शुश श्येत जना जन बाक्ब।

16 इन शेंसीब आन कली सापतीने देंडानु, सापाइक्ने मचबेम” दे माइक्तु।

17 मिनु येसुमी “गे थमा पा थमा मसुइक्ब नु मटीबपुकी, गेना सम्म गेपुकी नु बाक्नुडा? ओदेशो इन पशो गेना सम्म फाल्शा बाक्नुडा डा? रोइ पाइब कली चाक्कीन” देंत।

18 मिनु चाक्गामेनु, येसुमी वोल कली हुइशशा खेरतु। मिनु आल ब्रा सात।

19 मिनू मुर गाकमा नोले शेंसीबपुकीमी येसु कली “मारदे गो मेको वोल कली खेरने मचाप्का?” दे हिल्लो पामेनु,

20 येसुमी “थमा पा थमा सुइकने मचाप्बपुकी, नोफा दाइशशा नेनीने, रायो गेडा खोइ ला थमा सुइकतीनी हना, इन पने मचाप्चा डा मारेइ मलीब। एको डांडा याक्सो देंनीनु, एको डांडा यो याक्सीशा लाइब। मती २१:२१; लूका १७:६; १कोरिन्थी १३:२

21 ओदेशो वोल खेरचा कली चहिं बर्त बाक्शा, प्रार्थना पा ला गुंडने चाम्सीब” दे माइक्तीमी।

येसु श्येत जचा माल्ब, दे लेंशा शेंशो

मर्कुस ९:३०-३२; लूका ९:४३-४५

22 मिनू गालील रागीम बाक्मानु, येसुमी “रागीम जरमेशोमी मुर आन गुइमी गेशा साइकचा पुंडसीब। मती १६:२१; मती २०:१८-१९

23 मिनू बेक्शो आ नित्थ नाक्त बेक्शो रे सेंसीब” देंमेनु, शेंसीब आन थुं थाम्पान खाइकमा बाक्त।

गुम्तीक खिं डा तिमो

24 मिनू नोले कापेरनाउम सहर जाक्दीम्मानु, गुम्तीक खिं डा तिमो पोक्बपुकीमी पत्रुस कली “इन कली शेंबमी तिमो मथाप्बा?” देंमानु प्रस्थान ३०:३३; २राजा १२:५-६

25 “थाप्ब” देंमाक्त। मिनू खिं लेशशा जाक्मेनु, येसुमी पत्रुस कली “ए सिमोन, पिपपुकीमी तिमो पोक्पदमेनु, आन तौ आन के यो पोक्नीमी देय अर्को रागी डा मुर आन के ला पोक्नीमी, मार देनेवे?” दे हिल्लो पाप्तु।

26 पत्रुसम “अर्को रागी डा मुर आन के ला पोक्नीम” देंत। “लो, मो हना तौपुकीमी तिमो थाप्चा ममाल्बाक्मा बाक्त।

27 मोदेशो बाक्त हना यो, मेको आन थुं नुपाइकचा कली तिमो थाप्तस। गे समुन्द्रमी लशा, बोल्सी ग्यारशा, नेल्ल क्येडा डोंइती रेशशो डांड आ शोत्र पाक्को। आ शोत्र आगामी स्तातेर का थित्नेवे। मेको लाइशशा, इस तिमो थाप्तो” दे माइशशा सोइक्ताक्व। स्तातेर का ४ देनार बाक्ब। ग्रीक क्येट बाक्ब।

## 18

नेल्ल क्येडा ठेयब सु बाक्ब

मर्कुस ९:३३-३७; लूका ९:४६-४८

1 मिनू काबु शेंसीबपुकीमी येसु कली “स्वर्ग डा राज्यमी नेल्ल क्येडा ठेयब सु बाक्बा?” दे हिल्लो पाप्तेक्म।

2 मिनू येसुमी आल का कली ब्रेशशा, आन दातेमी राप्पाइशशा

3 “नोफा दाइशशा नेनीने, गेपुकीमी दोपा ठेयब दुम्चा, दे मिम्चा प्रोइशा, आल खोदेशो मदुम्तीनी हना, स्वर्ग डा राज्य दोपा यो ओत्रचा मताइनीनी। मती १९:१४

4 एको आल खोदेशो ब्रेम्शोपुकी स्वर्ग डा राज्यमी नेल्ल क्येडा ठेयब बाक्नीम।

5 सुमी आं नैम ओदेशो आल कली ब्राइबा, मेकोमी आं कली ब्राइब। मती १०:४०

पाप पपाइकचा आ पबर्म शेंशो

मर्कुस ९:४२-४७; लूका १७:१-२

6 सुमी आं कली थमा सुइकब आल कली पाप पपाइक्बा, मेको आ शुरम यात क्युकशा, समुन्द्रमी खुम्शा साइकचा अरु सजाइ क्येडा रिम्शो बाक्ब। लूका १७:१-२

7 पाप पपाइक्ब आन पबर्म, आबी आबी। एको रागीमी पाप पपाइक्ब शुश जाक्नीम। तन्न सुमी अरु आन कली पाप पपाइक्बा, मेको आन कली आबी आबी।

8 इ गुइ खोइलीमी इ कली पाप पपाइक्तु हना, खोइशशा ताइक्तो। मारदे हना गुइ खोइल निम्फा बाक्शा, नरकम खुम्चा पुंडसीचा क्येडा डुंडे खोरन्डे दुम्शा, स्वर्ग डा राज्यम ओत्रचा तचा रिम्शो दुम्ब। मती ५:२९-३०

9 इ मिक्चीमी इ कली पाप पपाइक्तु हना, मिक्च फेशशा ताइक्तो। मारदे हना मिक्च निम्फा पाइश्शा, नरकम खुम्चा पुंडसीचा क्येडा काना दुम्शा, स्वर्ग डा राज्यमी ओत्रचा तचा रिम्शो दुम्ब।

जाम्शो भेडा माल्थ लशो  
लूका १५:४-७

10 होस पांडसीने, आल आन कली आइक्च मसेलीने। नोफा दाइश्शा नेनीने, आल आन कली कोत्रब परमप्रभु यावे आ स्वर्ग डा गेय पाइबपुकी स्वर्गम बाक्ब आं आफ आ डोंइती बाक्नीम।

11 रागीम जरमेशो जाम्शो आन कली माल्थ जाक्शो बाक्ब। हिबू १:१४

12 मुर का के सहे का भेडामी का जाम्त हना, मेकोमी ९९ भेडा आन कली प्रोंइशा वोइश्शा, जाम्शो का कली मथिदा सम्म माल्ना माल्न मगाक्बा डा?

13 नोफा दाइश्शा नेनीने, थिदानु, मजाम्शो ९९ भेडा क्येडा मेको थिशो का आ पर्बम शुश ग्येरसीब।

14 मेको बुदी स्वर्ग डा इन आफोमी आइक्च का यो मजाम्मल, दे मिम्ब।

माफ गेचा

15 इ लोकबमी इ कली मरिम्शो पाप्तु हना, गे निक्शी बाक्सीनु, एको ओदेशो मरिम्शो पाप्तीवी, दे तुइक्पतो। इ लोत्र बीसाक्व हना, मेको कली आम के सेल्लेवे। लेवी १९:१७; लूका १७:३; गलाती ६:१

16 इ लोत्र मबिस्साक्व हना चहिं, मुर निक्शी सां दुम्शा लशा, सांक्छी वोइश्शा लोत्र पावो। ब्यवस्था १९:१५

17 मेको आन लोत्र यो मबिस्साक्व हना, मुर पुक्शा लोत्र पावो। मिनु मेको आन लोत्र यो मबिस्साक्व हना, अर्को रागी डा मुर खोदेशो बाक्माक्त, दे तिल्शा सोइक्तो। १ कोरिन्थी ५:१३; २ थिस्सलोनिकी ३:६; तीतस ३:१०

18 नोफा दाइश्शा नेनीने, रागीमी मार पाइश्शा वोइक्नीनी, मेको स्वर्गम यो पाइश्शो बाक्ब। रागीमी मार प्रोंइनीनी, मेको स्वर्गम यो प्रोंइशो बाक्ब। मती १६:१९; यूहन्ना २०:२३

19 मिनु रागीमी मुर निक्शी गारशा, थुं का पा मारेइ पुंडताक्स हना, स्वर्गमी बाक्ब आं आफ रे पा आस पुंडशो ताइनीस, दे इन कली देंनुड। मर्कुस ११:२४; मती २८:२०

20 मारदे हना तेकेर आं नेमी निक्शी सां खुम्सीनीमी, मेकेर गो यो बाक्नुड” दे येसुमी देंत।

21 मिनु पनुसमी “प्रभु, आं लोकबमी आं कली मरिम्शो पना पन बाक्त हना, गिश खेयप सम्म माफ गेचा माल्नुडा? मार ७ खेयप सम्म गेचा माल्नुडा?” देंमेनु,

22 येसुमी “गो माइक्नन, ७ खेयप ला ममाइ। ७ कली ७० खेयप हिक्शो क्येडा यो शुश माफ गेचा माल्लेवे। उत्पत्ती ४:२४; लूका १७:४; एफिसी ४:३२

23 मोपतीके स्वर्ग डा राज्य ओदेशो बाक्ब, पिप कामी आं जेर लाइब आन के हिसाब ताक्चा, दे मिम्ता बाक्त।

24 मिनु हिसाब ताक्गानु, मुर कामी १० हजार टलेन्ट शुश जेर थुइश्शो बाक्माक्त। टालेन्ट का ६ हजार द्राक्मे कि ३४ किलो खोदेशो बाक्त।

25 मिनु मेको जेर थाम्ने मचबानु, पिपीमी ‘गे, गे नु बाक्शो थोत्रकी, इ खिं रू, इ मीश तमी तौ, लेयशा, जेर थाप्ती’ दे मदा बाक्त। नेहेम्याह ५:५

26 मो देंमेनु ‘हे पिप, गो इच्छीन थाम्ने मचाप्नुड। दीसा नित्थी दोपा हना यो थाप्नुड’ दे खुम्की पा बाप्शा सेउ पवा बाक्त।

27 मिनु पिपमी शिशी पा ‘इ लाइश्शो जेर मुलाक्त डा मेरे थाप्चा ममाल्लेवे। एको हिसाब नेल्ल क्याम्शा गनन’ दे आ जेर नेल्ल क्याम्दा बाक्त।

28 मेको जेर क्याम्चा पुंडसीब मेकेर रे लशा, आ वारच का कली गुमा बाक्त। मेको आ वारचमी मेको के सहे का देनार जेर लाइश्शो बाक्माक्त। मिनु गुम्सानु, ग्याइश्शा आ क्रोक्क्रो निप्शा ‘साइ लाइश्शो क्येट मुलन थाप्ती’ दे मप्रोना बाक्त। देनार का रोमी आन चांदी के क्येट बाक्त। ग्रीक लोत्रमी द्राक्मे देशो बाक्त।

29 मिनु मेकोमी 'ए वारच, मुल मचाप्नुड, दीसा नित्थी दोपा हना यो, थाप्नुड' दे खुम्की पा बाप्शा सेउ पवानु

30 'मुलाक्त मथाप्ताकयी हना, इ कली प्रॉइसीन मप्रॉइनन' दे लाइश्शा, जेर नेल्ल थाम्ने मथुमा सम्म जेल्खानम चोकपा वोदा बाक्त।

31 मोपा चोकपाइश्शो तशा, आ वारचपुकीमी आन थुं खाइश्शा, पिप कली मेको लोत्र नेल्ल तुइक्पदमे बाक्त।

32 मिनु पिपीमी चोकपाइक्ब कली ब्रेश्शा 'हिंचा डा बाक्डे बाक्त। गेम आं कली खुम्की पा बाप्शा सेउ पाप्तीवी। मिनु गो इ जेर नेल्ल क्याम्शा गेतन। लूका ६:३६

33 दोपा इ कली शिशी पाइना, मोपा गेमी यो इ वारच कली पचा ममाल्नेवे डा?' दे गाइश्शा मदा बाक्त। १यूहन्ना ४:११

34 मिनु मेको आ जेर नेल्ल मथाप्ता सम्म जेल्खान डा पुलीस आन गुइमी जिम्मा गेवा बाक्त। मती ५:२६

35 मोपतीके होस पाइसीने। मारदे हना इन लोकब कली इन थुं गा रे पा माफ मगेतीनी हना, स्वर्गम बाक्ब आं आफोमी यो इन कली मोदेशोन पाइब" दे शेंताकमी। मती ६:१४-१५; याकूब २:१३

## 19

1 मिनु येसुमी मोदें शेंने थुम्शा, गालील रागी प्रॉइशा, यर्दन खोला शोकशा, यहूदीया रागीम जाकदीत्त।

2 मिनु शुश मुर आ नोले खोइश्शा लाम्तेक्म। मिनु येसुमी रोइ पाइब आन कली सापाइकना पाइक्न गाक्त।

मीश वॉइश आस पबर्म शेंशो

मकूस १०:१-१२

3 काबु फरिसीपुकी जाक्शा, येसु आ थुं थाम्चा कली "आन मीश आन कली मारेइ दोस गेशा प्रॉइचा तांडसीबा?" दे हिल्लो पाम्तेक्म।

4 मिनु येसुमी "नेल्ल क्येडा डोंइती परमप्रभु यावेमी वॉइश मुर नु मीश मुर सेल्लिम्सी। उत्पत्ती १:२७

5 मेको लोत्र मपढेनी? 'मुरुमी आम आफ प्रॉइशा, आ मीश नु गारशा बाक्ब। मिनु मेको निक्शी रां का दुम्नीस' दे ब्रेक्शो बाक्ब। उत्पत्ती २:२४

6 मोपतीके वॉइश मीश निक्शी मनसी। निम्फा का नस, दे ब्रेक्शो बाक्ब। परमप्रभु यावेमी कांडचीक सेल्शो मुरुमी मफ्रादमेक्ल" दे माइक्तीमी। १कोरिन्थी ७:१०-११; उत्पत्ती २:२४

7 मिनु फरिसीपुकीमी "मो हना मारदे मोसामी 'छोड पत्र गेशा, मीश प्रॉइने चाम्सीब' दे मुर आन कली शेंदा?" देंमानु, मती ५:३१

8 येसुमी "मुरपुकीमी शिशी मपाइनीम, दे तुइश्शा, परमप्रभु यावेमी मोदेशो पा इन मीश प्रॉइचा गेप्तु। तन्न डोंइती रे मोदेशो मबाक्शो बाक्त।

9 सुमी आ मीश प्रॉइशा, अर्को चाक्बा, मेकोमी वॉइश मीश आस नाता फ्राब। मीश मुर आ वॉइश बाक्ना बाक्न अर्को वॉइश खोइक्तु हना चहिं, मोदेशो मीश कली प्रॉइचा दुम्ब। सुमी छोड पत्र गेचा पुंडीशी मीश मुर कली ग्युबे पाइबा, मेकोमी यो वॉइश मीश आस नाता फ्राब, दे इन कली देंनुड" दे माइक्तीमी। मती ५:३२; लूका १६:१८

10 मिनु येसु आ शेंसीबपुकीमी आ लोत्र नेशा "मोदेशो बाक्त हना, ग्युबे मपचा रिम्शो बाक्माक्त" देंतेक्म।

11 मिनु येसुमी "का निक्शी आन कली ला एको लोत्र रुप्तीक थुं गेशो बाक्ब। शुशेमी मरुप्नीम। १कोरिन्थी ७:७

12 मुरपुकी मारदे ग्युबे मपाइनीम देशा हना, का निक्शी जरमेसे रे ग्युबे पा, आल थिंचा मगारचा डा बाक्नीम। का निक्शी आन कली मुरुमी आल मथीब सेल्शो बाक्नीम। का निक्शी चहिं स्वर्ग डा राज्य आ पबर्म ग्युबे मपथु बाक्नीम। मोपतीके सु सु आन कली रुप्तीक थुं गेशो बाक्मे, मेकोपुकीमी रुप्मेक्ल" दे शेंताकमी।



आल आन कली आसीक गेशो  
मर्कूस १०:१३-१६; लूका १९:१५-१७

13 मिनू मुरपुकीमी आल आन तारी आ गुड चाकशा प्रार्थना पवल, दे आल चाकगमेनु, शेंसीबपुकीमी “आल मचाक्कीन” दे हुडक्ताकम।

14 मिनू येसुमी “आल आन कली आं बाक्तीके जाक्या गेन। मारदे हना स्वर्ग डा राज्य मेको आन केन बाक्ब” देंत। मती १८:२-३

15 मिनू आल आन तारी आ गुड वोइशशा प्रार्थना पाइक्तीमी। मिनू मेकेर रे गाक्त।

शोंप पाइशो आन पर्वम शेंशो  
मर्कूस १०:१७-२७; लूका १८:१८-२७

16 मिनू मुर का जाकशा, मेकोमी येसु कली “शेंब, गेना हना यो परमप्रभु यावे नु बाक्चा तचा कली रिम्शो पा मार पचा माल्नुडा?” देंमेनु,

17 येसुमी “रिम्शो पचा आ पर्वम मारदे हिल्लो पवी? रिम्शो पाइब का ला बाक्ब। गेना हना यो मेको नु ब्रोंइशा बाक्चा थुं पाप्तीवी हना, मेको रिम्शो पाइब आ देशो लोव्र टिचा माल्नेवे” देंमेनु

18 “लोव्र शुश बाक्नीम। तेक तेको लोव्र टिचा माल्नुडा?” देंत। मिनू येसुमी “मसाइक्चा, मीश वोंइश आस नाता मफ्राचा, खुइ मपचा, जोल मपथु सांकछी बाक्चा।

19 आम आफ आस कली मान पा आस लोव्र टिचा। मिनू इ कली दाक्शो खोदेंशो पा इ नेक्था बाक्ब आन कली दाक्तो” देंत। प्रस्थान २०:१२-१६, लेवी १९:१८

20 मिनू मेको ठिटामी “इन देशो नेल्ल पना पन बाक्ती। में डा लाकशा मार पचा माल्नुडा?” देंमेनु,

21 येसुमी “मेको डा लाकशा पचा दाक्तावी हना, लशा इ शोंप नेल्ल लेयशा, जचा फेक्चा मताइब आन कली योक्शा गेमी। मिनू लेशशा, आं नोले खोइय्यी। मो पाप्तीवी हना, इ कली स्वर्गम शोंप वोइशशा बाक्ब” देंत। मती ६:२०; लूका १२:३३

22 मिनू मेको ठिटामी एको लोव्र नेंशा, आ कुल राव कीपाइशशा गाक्त। मारदे हना शुश शोंप पाइशशा मुर बाक्माक्त। भजन संग्रह ६२:११

23 मिनू येसुमी आ शेंसीब आन कली “नोफा दाइशशा नेनीने, शुश शोंप पाइशशा मुर स्वर्ग डा राज्य हेरा ओव्रचा मताइनीम।

24 मिनू शोंप पाइशशा मुर परमप्रभु यावे आ राज्यमी ओव्रने चाप्चा क्येडा दलओंठ लूजे आ पोलामी ग्रीने चाप्ब, दे लेंशा इन कली देंनुड” देंत।

25 मिनू आ शेंसीबपुकीमी छक लाकशा “मो हना सु ओव्रचा ताइनीमी डा?” देंतेकम।

26 मिनू येसुमी मेको आन कुल गे कोव्रशा “मुरपुकीमी पने मचाप्नीम। तन्न परमप्रभु यावेमी पने चाप्ब। मारदे हना परमप्रभु यावेमी मारेइ मारेइ पने चाप्ब” दे माइक्तीमी। अय्युब ४२:२

येसु कली खोइक्ब आन तशो  
मर्कूस १०:२८-३१; लूका १८:२८-३०

27 मिनू पत्रुसमी “गोपुकीमी मारेइ मारेइ प्रोंइशा, इन नोले खोइक्तक। मिनू गो मार ताइनीकी” देंमेनु, मती ४:२०-२२

28 येसुमी “नोफा दाइशशा नेनीने, मार ताइनीनी देशा हना, परमप्रभु यावेमी सेल्लो नक सरीड नु रागीमी दुम्शा, रागीम जरमेशो पिप दुम्मेनु, आं कली खोइक्बपुकी १२ ओटा ठेयब नित्तीकेम निशशा, इ इसाएल डा १२ थर आन कली निसाफ पाइब दुम्नीनी। लूका २२:३०; प्रकाश ३:२१; १कोरिन्थी ६:२

29 सुमी आं नें आ पर्वम आ खिं, आ लोकब, दिदी बहिनी, आम आफ, तमी तौ, आ नु बाक्शो नेल्ल प्रोंइबा, मेकोमी आ प्रोंइशो क्येडा शुश ताइब। मिनू गेना हना यो परमप्रभु यावे नु बाक्चा ताइब।

30 डोंइती दुम्शोपुकी नोले दुम्नीम। नोले दुम्शोपुकी डोंइती दुम्नीम।

## 20

डोंडती नु नोले दुम्शो

1 स्वर्ग डा राज्य ओदेशो बाक्ब, खिं का डा होवप सुनी कना बोक्शा, आ अडगुर रूमी गेय पाइब आन कली ब्रेथ लमाक्त।

2 काबु डा गाल्च देनार का गेनन्नी, दे गारपाइशशा, अडगुर रूमी सोइक्तीमी बाक्त।

3 मिनु सुनी ९ बजे गे बजार लशा डा मिन, गेय मथिण्ब मुर आन कली तशा,

4 मेको आन कली 'गे यो लशा, आं अडगुर रूमी गेय पने। इन गेय पशो डा गाल्च गारपा गेनन्नी' दे सोइक्तीमी बाक्त।

5 मिनु मोपान १२ बजे नु ३ बजे यो अरु आन कली ब्रेशशा, गेय पथ सोइक्तीमी बाक्त।

6 मिनु क्यारश चोक्ची सम्म यो गेय मथिण्ब आन कली तशा 'गे सुनी रे मार गुड फ्रेशा बाक्नी' दे हिल्लो पवा बाक्त।

7 मिनु मेकोपुकीमी 'सुइमी गेय मगेमे। मिनु गो मार पाइनीकी?' देंमानु 'गे यो लशा, आं अडगुर रूमी गेय पने' दे माइक्ती बाक्त।

8 मिनु नां रिक्शा गेय प्रोन्मे नोले, होवपमी आ क्येट योक्ब मुर कली 'गेय पाइब आन कली ब्रेशशा, आन गाल्च योक्शा गेमी। नेल्ल क्येडा नोले जाक्शो आन कली डोंडती योक्शा गेमी' देंमाक्त।

9 मिनु क्यारश चोक्ची ना जाक्शो आन कली डोंडती ब्रेशशा, काबु डा गाल्च देनार का का गेमी बाक्त।

10 मिनु सुनी कना रे गेय पाइबपुकीमी जाक्शा 'एको आन क्येडा शुश ताइनीकी' दे मिन्तमे बाक्त। तन्न नेल्लेमी देनार का का ला तामे बाक्त।

11 मिनु ताक्शा, मेको आन थुं मनुथु, होवप कली

12 'नेल्ल क्येडा नोले जाक्बपुकीमी इच्का ला गेय पान्तेक्म। गोपुकी सुनी रे गेय पा नांम दुप्शा चोशा श्येत पा गेय पाइतक। तन्न आंइ कली उइक्थ उइक्थ गाल्च गेतीनी' दे गाइशशा देंमा बाक्त।

13 मिनु होवपमी मो देंब का कली 'आं वारच, इ कली मार मरिम्शो पडा? काबु डा गाल्च देनार का कली बिस्से ममाइ डा?

14 देनार का ताक्शा लावो। नोले जाक्ब कली यो इ कली गेशो खोदेशो पा गेचा दाक्ताक्ड।

15 आंम आं के बाक्शो आं दाक्शो पा योक्चा मताइनुडा डा? अरु आन कली शिशी पशो तशा, इ कुप्फीम मी ब्रवे?' दे मदा बाक्त। रोमी ९:१६, २१

16 मोदेशो पान, नोले दुम्बपुकी डोंडती दुम्नीम, डोंडती दुम्बपुकी नोले दुम्नीम" दे शेंताक्मी।

येसुमी श्येत जचा माल्ब, दे शेंशो

मर्कूस १०:३२-३४; लूका १८:३१-३३

17 मिनु येसु यरूसलेम डा लां खोइशशा गाक्मेनु, आ शेंसीब १२ जना आन कली सुइ मबाक्तीकेम लाइशशा

18 "मुल यरूसलेम लाइनय। मिनु रागीम जरमेशो ठेयब चढेब नु सास्त्री आन गुइमी जिम्मा गेचा पुंडसीब। मिनु मेकोपुकीमी दोस गेशा, साइक्चा डा सजाइ गेनीम। यूहन्ना २:१३; मती १६:२१; मती १७:२२-२३

19 शुक्शी पा युक्शा, शीम केप्शा कांटी थोक्शा, क्याइशशा साइक्थ अर्को जात डा मुर आन गुइमी गेनीम। बेक्शो आ नित्थ नाक्त बेक्शो रे सेंसीब" दे माइक्तीमी।

ठेयब दुम्चा कली गेय पचा माल्ब

मर्कूस १०:३६-४५

20 मिनु काबु जब्दी तौ आस ममामी आ तौ आस कली चाक्शा, येसु कली सेउ पाप्तु। मती १०:२

21 मिनु येसुमी "मार पुंडनेवे?" देंमेनु "हे शेंब, गे इन राज्यम आं तौ आस कली का इन ग्युरा, का इन पेरा गे बाक्चा गेचा कली मुल हुकुम दुम्ल" दे पुंडतु। मती १९:२८

22 मिनु येसुमी आ तौ आस गे हिरशा "इस पुंडशो मार बाक्मे, दे मरुन्नीसी। गोमी तूचशो कचौरा तूने चाप्नीसी?" देंमेनु "चाप्नस्कु" देंताक्स। मती २६:३९

23 मिनू येसुमी “थमा आं कचौराम तूनीसी। तन्न आं ग्युरा पेरा गे बाक्वा गेचा आं गुडमी ममाइ। आं आफोमी योत्रशो आन कली बाक्ब” दे माइक्तीम्सी। प्रेरित १२:२; प्रकाश १:९

24 मिनू शेंसीब १० जनामी मेको आस कली मो देशो नेशा “एको निकशी दोदेशो बाक्सा, है” दे आन थुं मनुम। लूका २२:२४-२७

25 मिनू येसुमी नेल्ल आन कली खुप्शा “अर्को रागी कली हुकुम पाइबपुकीमी मुर आन कली दिप्शा वोइश्शा, हुकुम पाइनीम, दे तुइक्नीनी।

26 गेपुकी इन दातेमी मोदेशो पचा मदुम्ब। इन दातेमी ठेयब दुम्चा माल्बम नेल्ल आन गेय पाइब दुम्चा माल्ब। मती २३:११; १कोरिन्थी ९:१९

27 इन दातेमी नेल्ल क्येडा डोंइती दुम्चा माल्बम नेल्ल आन वाइल दुम्चा माल्ब। मर्कूस ९:३५

28 रागीम जरमेशो मान पपाइसीचा कली जाक्शो ममाइ। तन्न गेय पथ नु शुश मुर आन कली प्रोंइचा कली आ गिम सोइक्थ जाक्शो बाक्ब” दे माइक्तीमी। फिलिप्पी २:७; १पत्रुस १:१८-१९

मिक्च मताइबम तशो

मर्कूस १०:४६-५२; लूका १८:३५-४३

29 मिनू काबु यरीको सहर रे गाक्मानु, शुश मुरुमी येसु आ नोले खोइक्तेकम।

30 मिनू लांमी बाक्शा, मिक्च मताइब निकशीमी येसु एको लां पित देशो नेशा “हे प्रभु, दाऊद आ तौ, गो आंस कली शिशी पांइस्की” दे वाइ ब्रेत्ताक्स।

31 येसु नु काथा गाक्बपुकीमी “रेयके मपसे” दे हुइक्तेमेनु, डोंइती क्येडा वाइ ब्रेश्शा “प्रभु, दाऊद आ तौ, गो आंस कली शिशी पांइस्की” दे ब्रेत्ताक्स।

32 मिनू येसु खा दिक्शा, मेको आस कली ब्रेश्शा “इस कली मार पडा, मार पुंइसी?” देंमेनु

33 “प्रभु, आंस कली मिक्च ताइब सेलीने” दे पुंइताक्स।

34 मिनू येसुमी मेको आस कली शिशी पा आस मिक्च थिवानु, मिक्च ताइब दुम्शा, येसु आ नोले खोइक्ताक्स।

## 21

येसु मान पचा पुंइसीशो

मर्कूस ११:१-१०; लूका १९:२९-३८; यूहन्ना १२:१२-१९

1 मिनू यरूसलेम आ नेक्था जैतून डांडा डा बेथफागे माइश्शो गाउं जाक्दीत्तेकम।

2 मिनू येसुमी आ शेंसीब निकशी आस कली “मेरे गाउं लसे। मेकेर जाक्दीश्शा, गधा नु आ चाइक्ब पाइश्शा वोइश्शो थिल्नीसी। मेको निकशी प्रोंइशा चाक्कीसे।

3 मुरपुकीमी “एको गधा मारदे लाइक्सी?” दैतेकम हना “प्रभु मेको कली माल्ताक्व” देंसीनु, लाइक्चा गेनीम” दे सोइक्ताक्सी। मती २६:१८

4 मोदेशो दुम्चा माल्ब। मारदे हना साइ नेसी परमप्रभु यावे आ लोत्र पाइबमी

5 “सियोन डा तमी कली ओदें तुइक्पतीन। कोव्रडीन, इन पिप ब्रेम्शो दुम्शा, गधा गधैनी आ चाइक्ब डोइश्शा, इन बाक्तीके गे पिन बाक्ब” दे ब्रेक्शो बाक्ब। जकरिया ९:९

6 मेको निकशी लशा, येसु आ देशो खोदेशो पाम्से बाक्त।

7 मिनू गधा नु आ चाइक्ब चाक्शा, आन वासी गधा तारी ब्राम्तेकम। मिनू येसु डोंइसाक्व।

8 मिनू येसु आ नोले खोइक्बपुकीमी आन फेक्तीक वा लांमी ब्राम्तेकम। खजूर रवा आ राशी जिक्शा, लांमी ब्रशा दारशो सेल्तेकम। २राजा ९:१३

9 मिनू आ डोंइती नोले गाक्बपुकीमी “दाऊद आ तौ कली होसन्ना, परमप्रभु यावे आ नेमी जाक्ब कली जाइ, गे ठेयब बाक्नीनी” दे रेयके पा ठेयब सेल्ना सेल्न गाक्तेकम। भजन संग्रह ११८:२५-२६

10 मिनू यरूसलेम सहर ओत्रमेनु, मेकेर बाक्बपुकीमी “मेको सु बाक्म, माइ” दे लोत्र पमुम्तेकम।

11 मिनू येसु नु काथा गाक्बपुकीमी “गालील रागी डा नासरथ रे जाक्शो परमप्रभु यावे आ लोत्र पाइब येसु एको बाक्ब” दैतेकम।

ग्याप्ब लेयब आन कली खेरशो

मकूस ११:१५-१९; लूका १९:४५-४८; यूहन्ना २:१३-१६

12 मिनु येसु परमप्रभु यावे आ खिं ओव्रत। मेकेर ग्याप्ब लेयब क्येट फाइक्ब आन कली खेरतीमी। क्येट फाइक्ब आन टेबल नु दुकुर लेयब आन नित्तीके खोलशा गेम्तीमी।

13 मिनु “आं खिं आं कली मान पतीके बाक्ब’ दे ब्रेक्शो बाक्ब। गेपुकीमी चहिं खुड आन बाक्तीके पुक्खी सेलतीनी” दे हुडक्ताक्मी। यसैया ५६:७, येरमीया ७:११

आलपुकीम येसु कली मान पशो

14 मिनु मिक्च मताइब नु खोरन्डेपुकी जाक्तेक्म। मिनु येसुमी मेको आन कली सापाइक्तीमी।

15 मिनु ठेयब चढेब नु सास्त्रीपुकीमी येसुमी छक लाक्चा डा गेय पशो नु आलपुकीमी “दाऊद आ तौ कली होसन्ना” दे शुश रेयके पा येसु कली ठेयब सुइश्शा मान पशो तशा, होसन्ना आ देशो “परमप्रभु वारच पने” बाक्ब।

16 येसु कली “मेकोपुकीमी मार देंबाक्मा मनेनीनी?” दे गाइश्शा देंतेक्म। मिनु येसुमी “नेता। ‘आइक्च आल नु बुकलु आलपुकीमी इन कली ठेयब सेल्पांडसाक्नी’ दे ब्रेक्शो लोव्र मपढेनी?” दे माइक्तीमी। भजन संग्रह ८:२

17 मिनु मेको आन कली प्रॉइशा, सहर रे गूशा, बेथानी जाक्दीश्शा बास बाक्त।

सिश्शो फोव्रशी रवा

मकूस ११:१२-१४, २०-२४

18 आ दीसा सुनी यरूसलेम लेम्मेनु, शोव्रलु बेक्माक्त।

19 मिनु लां नेक्थामी फोव्रशी रवा का तशा, फोव्रशी सिश्शो बाक्म कों, दे कोव्रडानु, सफा ला ताप्तु। सफा ला तशा “मुल डा मेरे गेनायो मसिप्ब रवा दुमो” दे माइक्तु। मिनु रवा साव सोव्रत। लूका १३:६

20 मिनु शेंसीबपुकीमी रवा सोव्रशो तशा “रवा दोपा साव सोव्रमे” दे छक लाक्तेक्म।

21 मिनु येसुमी “नोफा दाइश्शा नेनीने, दल्गीर मपथु थमा सुइक्तीनी हना, फोव्रशी रवा कली पशो खोदेशो पचा ला ममाइ, डांडा कली एकेर रे समुन्द्रमी याक्सो देंतीनी हना, मेको डांडा यो याक्सीशा लाइब। मती १७:२०

22 थमा सुइश्शा प्रार्थना पा पुंइतीनी हना, इन पुंइशो ताइनीनी” दे माइक्तीमी।

येसु आ अधिकार ते रे जाक्बा?

मकूस ११:२७-३३; लूका २०:१-८

23 मिनु परमप्रभु यावे आ खिं ओव्रशा, मुर आन कली शेंना शेंन बाक्मेनु, ठेयब चढेब नु जोक्ब तुइक्ब खालपापुकी जाक्शा “तेको अधिकारमी मोदेशो पवी? एको अधिकार सुमी गेवे?” देंतेक्म। यूहन्ना २:१८; प्रेरित ४:७

24 मिनु येसुमी “गो इन कली लोव्र का हिल्लो पाइनुड। गेम आं लोव्र लेत्ताक्नी हना, तेको अधिकारमी एको गेय पडा, दे शेंन्नी।

25 यूहन्नामी मुर आन कली ब्वाक्कुम खुम्शा गुंइतीके अधिकार स्वर्ग रे तवा, दे मुरपुकी रे तवा?” दे हिल्लो पाम्तीमी। मिनु लोव्रसी पमशा “स्वर्ग रे तवा बाक्त देंतय हना, मो हना यूहन्ना आ लोव्र मारदे थमा मसुइक्नी देंब।

26 मुरपुकी रे तवा बाक्त देंयानु, मुरपुकीमी इं लोव्र मनेंथु मटीनीम। मारदे हना मुरपुकीमी यूहन्ना परमप्रभु यावे आ लोव्र पाइब बाक्त, दे थमा सुइश्शो बाक्नीम” देंमुत्तेक्म। मती १४:५

27 मोपतीके “मतुइक्नीकी” देंतेक्म। मिनु येसुमी “मो हना तेको अधिकारमी एको गेय पडा, गो यो मशेंन्नी।

येसु कली ग्येरपाइक्ब

28 अर्को लोव्र का नेशा मिम्तीने। मुर का के तौ निक्शी बाक्सा बाक्त। मिनु काबु आफोमी आ जेठा कली ‘आं तौ, मुलाक्ती अडगुर रूमी गेय पथ लावो’ देंमाक्त।

29 मिनु जेठामी 'गो मलाइनुड' देमाक्त। नोले आ थुं लेशशा लमाक्त।

30 मिनु आफोमी कान्छा कली यो 'आं तौ, मुलाक्ती अडगुर रूमी गेय पथ लावो' देमाक्त। मेकोमी 'दुम्ब, गो लाइनुड' देमाक्त। तन्न मलमाक्त। मती ७:२१

31 आस आफ आ दाक्शो सुमी पवा? जेठामी पवा, दे कान्छामी पवा?" दे माइक्मीनु "जेठामी पवा बाक्त" देतेक्म। मिनु येसुमी मेको आन कली "नोफा दाइशा नेनीने, इन क्येडा डोंइती तिरो पोक्ब नु तेल्लेम पाइबपुकी परमप्रभु यावे आ राज्य ओव्रचा ताइनीम। लूका १८:९-१४

32 मारदे हना यूहन्नामी ठीक लां कोंइशा यो गेपुकीमी थमा सुइशा, इन थुं परमप्रभु यावे गे मलेत्तीनी। मेकोपुकीमी चहिं यूहन्ना कली थमा सुइशा, आन थुं परमप्रभु यावे गे लेत्ताक्म" देत। लूका ७:२९

मरिश्शो बुम्था पाइब

मर्कूस १२:१-२; लूका २०:९-१९

33 मिनु येसुमी "लो, अर्को कथा का नेनीने। मुर कामी अडगुर खुम्शा, थारपु हिरशा, अडगुर खाक्तीक नु वोइक्तीक सेल्शा, बुम्था पाइब माल्शा, मेको आन कली गेशा वोइशा, अर्को रागी लमाक्त। यसेया ५:१-२

34 अडगुर मीशा सेक्ची जाक्मेनु, आ गेय पाइब आन कली आ भाग पोक्थ सोइक्तीमी बाक्त।

35 मिनु गेय पाइबपुकी जाक्दीम्मानु, बुम्था पाइबपुकीमी का कली तुप्मे बाक्त, का कली सदमे बाक्त, का कली फुल्लु आप्शा खेरमे बाक्त।

36 मिनु डोंइती सोइशो क्येडा शुश आन कली सोइक्तीमी बाक्त। मेको आन कली यो में मोदेशो पामे बाक्त।

37 मिनु 'आं तौ कली टीनीम को' दे मिम्शा, आ तौ कली सोइक्ता बाक्त।

38 मिनु बुम्था पाइबपुकीमी आ तौ कली पिशो तशा 'एको अडस ताइब बाक्ब। लो साइक्चा। मिनु रू, अडगुर नेल्ल इं केन दुम्ब' देशा गारमा बाक्त। मती २६:३-५; यूहन्ना १:११

39 मिनु फि ग्याइशा, रू रे गुंइशा, सदमे बाक्त।

40 मो पाइब आन कली रू होव्रप लेशशा जाक्शा, मार पाइबा?" देमेनु

41 "मोदेशो मरिश्शो पाइब आन कली साइक्पाइक्ब। आ रू चहिं सुमी अडगुर मीमेनु, पोक्थ जाक्ब आन कली गेब, मेको आन कली गेब" देतेक्म।

42 मिनु येसुमी "ओदेशो ब्रेक्शो लोव्र मपढेनी? 'खिं सेल्बपुकीमी गारो प्रोडमेनु, एको फुल्लु मगार, दे ताइक्तमे बाक्त। मेको मगारथु ताइशो फुल्लु चहिं सुर डा सुरे फुल्लु दुम्माक्त। परमप्रभु यावेमी मोदेशो पशो बाक्त। मिनु मेको इं दातेमी छक लाक्चा डा बाक्ब' दे ब्रेक्शो बाक्ब। भजन संग्रह ११८:२२-२३; प्रेरित ४:११; १पत्रुस २:४-८

43 मोपतीके परमप्रभु यावे आ राज्य इन गुइ रे रोइक्चा पुंइसीनीनी। मिनु फल सिप्ब अर्को जात डा मुर आन कली गेब, दे माइक्तीमी।

44 सुमी एको फुल्लुम दाल पांइसीशा राम्सीबा, मेको फस दुम्ब। एको फुल्लुमी सु कली चिप्बा, मेको चिम्सीशा बेक्ब" देत।

45 मिनु ठेयब चढेब नु फरिसीपुकीमी येसुमी देशो कथापुकी नेशा "एहे, इं कली कका देशो बाक्माक्त" दे रूपमे बाक्त।

46 मिनु ग्याइक्पाइक्चा माल्मे बाक्त। तन्न येसु कली "परमप्रभु यावे आ लोव्र पाइब बाक्ब" देब आन कली तशा, हिंमा बाक्त।

## 22

पिप आ ग्युंबेम ब्रेशो

लूका १४:१६-२४

1 मिनु येसुमी लेशा कथापुकी सेल्शा, मुर आन कली शेंना शेंन

- 2 “स्वर्ग डा राज्य ओदेशो बाकब, पिप कामी आ तौ आ ग्युंवे पा भोज पचवा बाक्त। यूहन्ना ३:२९
- 3 मिनु आ गेय पाइब आन कली निम्तो ताइब आन कली ब्रेत्थ सोइक्तीमी बाक्त। तन्न निम्तो ताइबपुकी लचा थुं मपामे बाक्त।
- 4 मिनु लेंशा अरु गेय पाइब आन कली ‘नेनीने, गो जचा थोवकी सेल्शा ठीक पाता। लो, जथ जाक्कीन, दे मतीन’ दे ब्रेत्थ सोइक्तीमी बाक्त।
- 5 तन्न ब्रेत्था पुंडसीब नेल्लेमी ग्युंवे जथ लचा थुं मपथु, का आ रूमी गेय पथ लमाक्त, का ग्याप्तीक लेयतीक गेय पथ लमाक्त।
- 6 लीशोपुकीमी ब्रेत्थ जाकब आन कली शुक्शी पा ग्याइश्शा तुप्शा सदमे बाक्त। मती २१:३५
- 7 मिनु पिपमी मोदेशो दुम्लो तुइश्शा चुरशा, आ सिपाही आन कली ‘लने, मुर साइकब आन कली साइश्शा, आन सहर गाउं क्रोइश्शा गेने’ दे सोइक्तीमी बाक्त। मती २४:२
- 8 मिनु आ गेय पाइब आन कली ‘आं तौ आ ग्युंवे भोज ठीक सेल्ला। ब्रेश्शोपुकी चहिं भोजम जाकचा मशिरसीशो बाक्मा बाक्त।
- 9 मोपतीके मुल लां पित्थ लशा, सु सु आन कली थिन्नी, मेको आन कली चाक्कीने’ दे सोइक्तीमी बाक्त। मती १३:४७
- 10 मिनु मेकोपुकीमी लां पित्थ लशा, रिम्लो मरिम्लो दोदेशो मुर थिदमे, मोदेशो नेल्ल आन कली खुप्शा चाक्गामे बाक्त। मिनु ग्युंवे खिं पौनापुकीम ब्रीमाक्त।
- 11 मिनु पिपमी ‘आं पौना दोपा बाक्मा, दोशो जाक्मा’ दे कोव्रथ जाक्मेनु, ग्युंवे भोज डा वा मफेक्शो मुर का तवा बाक्त। प्रकाश १९:८
- 12 मिनु ‘ए वारच, ग्युंवे भोज डा वा मफेक्थु, दोपा एकेर ओवडे?’ देंमेनु, सिक्सी पा मारेड देंने मचबा बाक्त।
- 13 मिनु पिपमी आ गेय पाइब आन कली ‘एको आ गुइ खोइल फ्रेंशा गुंइशा, छिडछिडमी ताइक्तीने। मेकेर मुरपुकी आन खुइ शेप्शा डाक्नीम’
- 14 ब्रेत्था पुंडसीशो मुर शुश बाक्नीम, योव्रशो चहिं का निक्शी ला बाक्नीम” दे येसुमी शेंताक्मी।

तिरो थाप्चा देय मथाप्चा

मकूस १२:१३-१७; लूका २०:२०-२६

- 15 मिनु फरिसीपुकीमी “एको कली दोपा आंम आ लोव्र खाइक्पपाइश्शा दोस गेचा” दे लोव्रसी मुमुमा बाक्त।
- 16 मिनु आन शेंसीब नु हेरोद आ वारच आन कली येसु आ बाक्तीके ओं माइक्थ सोइक्तीमी बाक्त “हे शेंब, गे थमा पाइब ननी। मुर आन कुल मकोव्रथु सुइ नु महिंथु, परमप्रभु यावे आ लोव्र थमा पा शेंनीनी, दे तुइक्नीक। यूहन्ना ३:२
- 17 मिनु लोव्र का शेंदीकी, शेंब हजुर, मार लोव्र देशा हना, सिजर सरकार कली तिरो थाप्चा माल्ब, दे मथाप्थु यो दुम्बा?” दे हिल्लो पखु पा, लोव्र खाइक्पपाइक्चा माल्तेक्म।
- 18 मिनु येसुमी मेको आन मरिम्लो मिम्लो तुइश्शा “ए कपटीपुकी, मारदे आं थुं थाम्नीनी?
- 19 तिरो थाप्तीके क्येट का कोइदीनी” देंमेनु, देनार का कोइताक्म।
- 20 मिनु “एको सु आ नेंमी खोइश्शो बाक्मे?” देंमेनु
- 21 “सिजर आ नेंमी खोइश्शो बाक्त, हजुर” देंतेक्म। मिनु येसुमी “लो मो हना, सिजर आ थोवक सिजर कली गेने। परमप्रभु यावे आ थोवक परमप्रभु यावे कली गेने” देंमेनु, रोमी १३:१,७
- 22 मेकोपुकी छक लाक्शा, फ्रा फ्रु लेश्शा गाक्तेक्म।

बेक्शो रे सेंसीचा आ पर्वम शेंशो

मकूस १२:१८-२७; लूका २०:२७-४०

- 23 मिनु सदुकीपुकी जाक्तेक्म। सदुकीपुकीमी बेक्शो रे मसेसीब, दे शेंनीम। मिनु येसु आ बाक्तीके जाक्शा प्रेरित ४:२; प्रेरित २१:६-८

24 “हे शेंब, मोसामी ब्रेकशो लोत्रमी ‘मुर कामी आल मथिथु बेक्त हना, आ लोकबमी आ भोग्यु वोंडसीशा, आ दाग्यु आ पा डा सन्तान मजाम्मल, तमी तौ थिवल’ दे ब्रेकशो बाकब। ब्यवस्था २५:५-६

25 खिं कामी ७ जना लोकब बाक्तेकम। मिनु डोंडती जरमेशोमी ग्युंवे पाप्तु।

26 मिनु आल मथिथु बेक्त। मिनु माडलामी आ भोग्यु वोंडसाक्व। मिनु मेको यो आल मथिथु बेक्त। मिनु साडलामी आ भोग्यु वोडशशा, मेको यो आल मथिथु बेक्त। मोदेशो पा ६ जनामीन आन भोग्यु वोडशशा, आल मथिथु बेक्तेकम।

27 मिनु नोले मेको मीश मुर यो बेक्त।

28 मुर बेकशो रे सेंसीशा ब्रोंडमानु, मेको ७ जना वोंडशा आन मीश दुम्शो मीश मुर तेको आ मीश दुम्बा?” दे हिल्लो पाप्तेकम।

29 मिनु येसुमी “गे दूली मिन्नीनी। मारदे हना परमप्रभु यावे आ लोत्र मरुप्नीनी, परमप्रभु यावे आ सक्ति यो मतुडकनीनी।

30 बेकशो रे सेंसीशा ब्रोंडमानु, मुरुमी ग्युंवे मपाइनीम। स्वर्गम बाक्ब परमप्रभु यावे आ गेय पाइब खोदेशो बाक्नीम।

31 बेकशो रे सेंशा ब्रोंडचा देशो मार बाक्ब देशा हना,

32 परमप्रभु यावेमी ‘गो अब्राहाम आ परमप्रभु यावे, इसहाक आ परमप्रभु यावे, याकूब आ परमप्रभु यावे नड’ दे ब्रेकशो बाक्ब। मेको लोत्र मपढेनी? परमप्रभु यावे बेकशो मुर आन परमप्रभु यावे ममाइ। ब्रोंडशा आन परमप्रभु यावे बाक्ब” दे माइक्तीमी। प्रस्थान ३:६

33 मिनु मेकेर देल्शोपुकीमी येसु आ लोत्र नेंशा छक लाक्तेकम।

नेल्ल क्येडा ठेयब अरेशो लोत्र

मर्कूस १२:२८-३१; लूका १०:२५-२८

34 मिनु फरिसीपुकीमी “सदुकी आन कली लेन्ने मचाप्या डा लोत्र पाइमी बाक्त” देशो नेंशा, खुम्सीशा जाक्तेकम।

35 आन दाते डा आरेशो लोत्र जोक्ब तुडक्ब कामी येसु कली

36 “हे शेंब, परमप्रभु यावे आ अरेशो लोत्र डा तेको नेल्ल क्येडा तुडक्चा माल्लो बाक्बा?” दे आ थुं थाम्चा कली हिल्लो पाप्तु।

37 मिनु येसुमी “ ‘गेपुकी परमप्रभु यावे, इन परमप्रभु कली इन थुं नेल्लेमी, इन सोक्त नेल्लेमी नु इन बोल नेल्लेमी दाक्चा माल्लीनी’ ब्यवस्था ६:५

38 मेको नेल्ल क्येडा ठेयब नु तुडक्चा माल्लो अरेशो लोत्र बाक्ब।

39 मिनु आ नोले डा लोत्र ‘आंम इ कली दाक्शो खोदेशो पा, इ नेक्था बाक्ब कली यो दाक्तो’ देशो बाक्ब। लेवी १९:१८

40 एको अरेशो लोत्र निक्शीमी परमप्रभु यावे आ अरेशो लोत्र नु आ लोत्र पाइब आन लोत्र नेल्ल खाप्शो बाक्ब” दे येसुमी माइक्तीमी। रोमी १३:९-१०

ख्रीस्त सु आ तौ बाक्बा?

मर्कूस १२:३५-३७; लूका २०:४१-४४

41 काबु फरिसीपुकी खुम्समानु, येसुमी मेको आन कली

42 “ख्रीस्त आ पबंम मार मिन्नीनी? मेको सु आ तौ सुडकनीनी?” दे हिल्लो पाप्तु। मिनु “दाऊद आ तौ” दैतेकम। यसेया ११:१; यूहन्ना ७:४२

43 मिनु येसुमी “मो हना मारदे परमप्रभु यावे आ सोक्त रे पा दाऊदमी मेको कली प्रभु देंबा?

44 ‘परमप्रभु यावेमी आं प्रभु कली “इ जोरी सत्रु आन कली इ खोडल आगाम मवोदुमी सम्म आं ग्युरा गे बाक्को” देशा’ ब्रेकशो बाक्ब। भजन संग्रह ११०:१; मती २६:६४

45 दाऊदमी मेको कली ‘प्रभु’ देंब। मिनु दोपा आ तौ दुम्मे?” दे माइक्तीमी।

46 मिनु सुडमी लोत्र का यो लेन्ने मचबेम। में डा मेरे हिंशा, लोत्र हिल्लो पचा यो प्रोंडतेकम।

## 23

कपटी आन कली हुइशशो

मर्कुस १२:३८-४०; लूका २०:४५-४७; लूका ११:३९-५२

1 मिनु येसुमी मेकेर देल्शो शुश मुर नु आ शेंसीब आन कली शेंना शेंन

2 “सास्त्री नु फरिसीपुकी इं किंकी पिपी मोसा आ पा डा दुम्लो बाक्नीम।

3 मेको आन शेंशो टिने, तन्न आन पशो खोदेशो मपने। मारदे हना मेकोपुकीमी देंनीम, तन्न मपाइनीम।

मलाकी २:७-८; रोमी २:२१-२३

4 हेल्शो भारी सेल्शा, मुर आन कली कुरपाइक्नीम। मेकोपुकीम चहिं ब्रेप्चो कामी यो नेप्शा मगेनीम।

मती ११:२८-३०; प्रेरित १५:१०,२८

5 मार मार पामेनु, मुर आन डोंइती ला पाइनीम। ठेयब टालोमी परमप्रभु यावेमी अरेशो लोव ब्रेक्शा आन फेक्शो वामी केप्नीमी। मिनु आन वामी लाइशशो झुम्का क्युकसीनीम। मती ६:१; गन्ती १५:३८-३९

6 भोजमी नु गुम्तीक खिंमी मान पचा पुंडसीतीकेमी नित्चा दाक्नीम। लूका १४:७

7 लां बजारमी गाक्मानु, मान पा सेउ पा ‘शेंब, हजुर’ देंपाइसीचा दाक्नीम।

8 गे इन कली सुइमी शेंब हजुर मदेमल। मारदे हना इन कली शेंब का ला बाक्ब। गे नेल्ल वोबु ननी।

9 एको रागीमी सुइ आन कली आफ मदेनीने। मारदे हना इन आफ का ला स्वर्गम बाक्ब।

10 गे इन कली सुइमी होवप मदेमल। मारदे हना इन होवप का ला ख्रीस्त बाक्ब।

11 इन दातेमी नेल्ल क्येडा ठेयब सु बाक्मे, मेको इन गेय पाइब दुम्ब। मती २०:२६-२७

12 ठेयब सुइसीब हिक्चा मपुंडसीब। महिक्सीशो चहिं मान पाइक्चा पुंडसीब। अय्युब २२:२९;

हितोपदेस २९:२३; इजीकीएल २१:३१; लूका १८:१४; १पत्रुस ५:५

13 सास्त्री नु फरिसीपुकी, गे कपटी, इन कली तशा थुं खाइक्ती। मारदे हना स्वर्ग डा राज्य ओव्रतीक लां तेक्नीनी। गे मओव्रनीनी, मिनु अरु आन कली यो ओव्रचा मगेनीनी।

14 सास्त्री नु फरिसीपुकी, गे कपटी, इन कली तशा थुं खाइक्ती। मारदे हना दुइशशो प्रार्थना पा कोंइखु पा वोंइश बेक्शो मीश मुर आन शोंप नेल्ल नेक्शा गेनीनी। मोपतीके अरु आन क्येडा शुश सजाइ ताइनीनी।

15 सास्त्री नु फरिसीपुकी, गे कपटी, इन कली तशा थुं खाइक्ती। मारदे हना इन खोदेशो पा यहूदी धर्म पाइब का सेल्चा कली रागी नेल्ल हिरशा गाक्नीनी। मिनु इन लोव्र टीब सेल्शा, इन क्येडा शुश सजाइ तपाइशशा, नरक सोइक्नीनी।

16 मिक्च मताइब दुम्ला यो लां कोंइखु पाइब, इन कली तशा थुं खाइक्ती। मारदे हना परमप्रभु यावे आ खिं थिशा कसम जशोमी मारेइ लोव्र मथोक्सीब, खिं डा सुन थिशा चहिं लोव्र थोक्सीब, दे शेंनीनी। मती ५:३४-३७; मती १५:१४

17 मिक्च मपाइशशो मूर्खपुकी, सुन ठेयब मिम्सीबा, दे सुनमी ग्योम्सीशो खिं ठेयब मिम्सीबा?

18 चढेतीके थिशा, कसम जशोमी लोव्र मथोक्सीब, चढेशो थोव्रकी थिशा कसम जशोमी चहिं लोव्र थोक्सीब, दे यो शेंनीनी।

19 मिक्च मपाइशशोपुकी, चढेशो ठेयब मिम्सीबा, दे चढेतीके ठेयब मिम्सीबा?

20 चढेतीके थिशा कसम जाइबमी चढेतीके नु चढेशो थोव्रकी थिशा कसम जशो बाक्ब।

21 परमप्रभु यावे आ खिं थिशा कसम जाइबमी परमप्रभु यावे आ खिं नु मेकेर बाक्ब परमप्रभु यावे कली थिशा कसम जशो बाक्ब।

22 स्वर्ग कोव्रशा कसम जाइबमी परमप्रभु यावे आ नित्तीके नु मेकेर निब्ब कली कोव्रशा, कसम जशो बाक्ब, दे रूपीने।

23 सास्त्री नु फरिसीपुकी, गे कपटी, इन कली तशा थुं खाइक्ती। मारदे हना मसला खोरसानी डा १० भागमी भाग का परमप्रभु यावे कली चढेनीनी। तन्न परमप्रभु यावे आ अरेशो तुइक्चा माल्लो ठीक निसाफ पतीके, मुर आन कली शिशी पतीके नु परमप्रभु यावे कली थमा सुइक्तीके लोव्र ममिम्नीनी।



एको गेय पचा माल्शो ननी, मिनु इन पशो यो मप्रोंइचा माल्शो ननी। लेवी २७:३०; लूका १८:१२; मीका ६:८

24 मिक्च मताइब दुग्शा यो लां कोइखु पाइबपुकी, तूचा ब्वाक्कुमी रकमिक्च ओव्रशो बाक्त हना, तिल्शा तूनीनी। दलओठ खोदेशो ठेयब जन्तु ओव्रशो बाक्त हना, ग्यु दाक्नीनी।

25 सास्त्री नु फरिसीपुकी, गे कपटी, इन कली तशा थुं खाइक्ती। मारदे हना बोस आ तार ला खुइश्शो खोदेशो पा गेपुकी लाडगा रे रिम्शो तांडसीनीनी। तन्न इन आगामी खुइ नु ग्रांगा दिचा डा गेय पतीकेमी ब्रीशो बाक्नीनी। मर्कूस ७:४,८

26 ए मिक्च मपाइश्शो फरिसीपुकी, डोंइती बोस आगा खुइक्तीने। मिनु आ तारी यो रिम्शो तांडसेक्ल। यूहन्ना ९:४०; तीतस १:१५

27 सास्त्री नु फरिसीपुकी, गे कपटी, इन कली तशा थुं खाइक्ती। मारदे हना बुलु बुइश्शा दारपाइश्शो तुरस खोदेशो ननी। मेको आ तारी दारशो तांडसीब, तन्न आगाम रुश राक्शा, रिना पाइश्शा ग्रांगा दिचा डा बाक्ब।

28 मोदेशो पा गेपुकी यो मुर आन डोंइती धर्मी तांडसीनीनी, तन्न इन थुं कपट नु पापम ब्रीशो बाक्नीनी।

29 सास्त्री नु फरिसीपुकी, गे कपटी, इन कली तशा थुं खाइक्ती। मारदे हना बेक्शा लशो परमप्रभु यावे आ लोत्र पाइब नु ठीक पाइब आन तुरस दारशो सेल्नीनी।

30 मिनु 'इं किकी पिपी आन पालामी गो यो बाक्शो नक हना, मेको आन परमप्रभु यावे आन कली साइक्पाइक्चा मगेक वा' देंनीनी।

31 मो देशोमी 'साइ नेसी परमप्रभु यावे आ लोत्र पाइब आन कली साइक्ब आन चच युइ गो नकी' दे तुइक्पांडसीनीनी। येरमीया २६:२०-२३; मती ५:१२; प्रेरित ७:५२

32 इन किकी पिपीम पचा मजाक्दीश्शो पाप गेपुकीमी खपीने।

33 गे बीख पाइश्शो बुस्स आ खलकपुकी, नरक लतीके सजाइ रे दोपा ब्रोंइनीनी डा?

34 मोपतीके गो इन बाक्तीके परमप्रभु यावे आ लोत्र पाइब, जोक्ब तुइक्ब मुर नु परमप्रभु यावे आ लोत्र शेंब सोइक्नुडमी। का निक्शी आन कली साइक्नीनी, का निक्शी आन कली शीमी क्याइश्शा साइक्नीनी, का निक्शी आन कली गुम्तीक खिंमी लाइश्शा, कोरामी युक्नीनी, मिनु तेइ बाक्चा मगेथु, खेदा पा खेरनीनी।

35 मेको मोपा खेदा पा साइश्शो पाप नेल्ल इन कली राइब। साइ नेसी रिम्शो पाइब हाबील साइश्शो रे बेरेक्याह आ तौ जकरिया साइश्शो सम्म डा आन हुशेमी लां मताइनीनी। जकरिया कली परमप्रभु यावे आ खिंमी चढेतीके आ डोंइती साइश्शो बाक्मा बाक्त। उत्पत्ती ४:८; २इतिहास २४:२०-२१

36 नोफा दाइश्शा नेनीने, मेको पाप एको पाला डा मुर आन कली राइब। लूका १३:३४-३५

37 ए यरूसलेम, यरूसलेम, परमप्रभु यावे आ लोत्र पाइब आन कली साइक्तीवी। इ कली शेंथ सोइश्शो आन कली फुल्लु क्रोन्ताक्वी। पोथीमी आ चितोली आन कली आ फ्रा आगामी पुष्पो खोदेशो पा, गो शुश खेयप इ आल आन कली पुष्चा माल्ता, गे चहिं मबिस्से।

38 मिनु मार दुम्ब देशा हना, इ खिं ब्रेश्शा, मारेड मलीब। येरमीया २२:५; भजन संग्रह ६९:२६; १राजा ९:७-८

39 गो माइक्नन 'परमप्रभु यावे आ नेमी जाक्ब कली आसीक रल' दे मान मपवी सम्म आं कली लेशा मताइनेवे" देंत। मती २१:९; मती २६:६४

## 24

परमप्रभु आ खिं मलीब

मर्कूस १३:१-२; लूका २१:७-१९

1 मिनु येसु परमप्रभु यावे आ खिं रे गूशा लमेनु, आ शेंसीबपुकीमी "एको खिं दोमो कोल्पा गिश दारपाइश्शा सेल्शो बाक्माक्त" देतेक्म।

2 मिनु येसुमी "मुल ओमो ठेयब नु दारपा सेल्शो ताइतीनी। नोफा दाइश्शा नेनीने, नोले ब्रेश्शा, फुल्लु का यो खोप्शा मलीब" देंत। लूका १९:४४

### श्येत दुम्वचशो बाकब

3 मिनू जैतून डांडामी जाकदीशशा बाकमेनु, आ शेंसीबपुकी यो जाकशा “एको इन देशो लोत्र गेना दुम्बा? इन जाकची ना डा चिन्ड मार तांडसीनीमी? मिनू रागी नुपचवा बाकत, दे दोपा तुंडसीबा?” दे हिल्लो पांम्तेकम। प्रेरित १:६-८

4 मिनू येसुमी “सुडमी इन थुं मक्यामेकल, दे होस पा बाककीन।

5 मारदे हना शुश मुरपुकीमी आं नें ब्रशा ‘गो खीस्त नड’ देशा, मुर आन थुं क्यानीम। यूहन्ना ५:४३; १यूहन्ना २:१८

6 लडाइ दुम्शो लडाइ डा लोत्र शुश नेंनीनी। मेको लोत्र नेंशा महिनीन। मोदेशो दुम्चा माल्ब, रागी नुप्या चहिं इच्छी मजा।

7 मारदे हना डांइती जात जात नु राज्य राज्यमी लडाइ पाइनीम। रागी रागीमी अन्काल दुम्ब, एर ओथ खिनु कुडब।

8 मो दुम्मेनु, श्येत दुम्चा गोवा बाकत, दे तुंडसीब।

### आं मुर आइकच सेल्चा पुंडसीनीम

9 इन कली खेदा पा शुश श्येत गेनीम, साइक्नीम। नेल्ल जात डा मुरपुकीमी आं पर्बम इन कली मदाकथु आइकच सेल्नीम। मती १०:२१-२२; यूहन्ना १६:२

10 मिनू शुशेमी थमा सुडक्चा प्रॉइनीम। खेदा पाइब आन कली वारच पाइनीम। वारच आन दातेमी काइ मदाकमुडनीम।

11 परमप्रभु यावे आ लोत्र दूली शेंबपुकी शुश बोक्शा, दूली पा शेंशा, शुश मुर आन थुं क्यशा गेनीम। मिनू परमप्रभु यावे आ राज्य डा लां प्रॉइपाइक्नीम। २पत्रुस २:१; १यूहन्ना ४:१

12 पाप पचा शुश बारतीके शुशेमी वारच पमुचा, दाकमुचा प्रॉइनीम। २तिमोथी ३:१-५

13 सु सु चहिं नेल्ल क्येडा नोले सम्म थमा सुडक्चा मप्रॉइथु बाक्नीमी, मेकोपुकी श्येत जचा रे ब्रॉइशा, गेना हना यो परमप्रभु यावे नु बाक्चा ताइनीम। मती १०:२२; प्रकाश १३:१०

14 परमप्रभु यावे आ राज्य आ पर्बम चहिं नेल्ल रागी डा मुर आन कली तुडक्पांडसीब। मारदे हना नेल्लेमी तुडक्चा माल्नीम। मिनू नोले रागी नुपची जाकब।

### श्येत शुश नाक्त मलीब

मर्कूस १३:१४-२३; लूका २१:२०-२४

15 परमप्रभु यावे आ खिं ग्रांरा सेल्नीम, दे परमप्रभु यावे आ लोत्र पाइब दानीएलमी ब्रेक्शो लोत्र थमा दुम्शो तनीनु ‘पढेबपुकीमी रुप्मेकल’ दानीएल ९:२७, दानीएल ११:३१

16 यहूदीया रागीमी बाकबपुकी डांडा ग्येत्थ प्रोक्मल।

17 बारदलीम बाकबमी ‘खिं ओत्रशा, मारेड लाइक्चा ताइनुड’ दे ममिम्तमेकल, तन्न दिव दाव प्रेक्शा प्रोक्मल। लूका १७:३१

18 रूमी गेय पाइबपुकीमी ‘फेक्तीक का लाइक्नीकी’ दे खिं लेशशा मलमल, तन्न आन गेय थु था प्रॉइशा प्रोक्मल। लूका २३:२९

19 आल कुरशो नु दूध तूब आल पाइशशो मीश मुर अरु क्येडा शुश श्येत जाइनीम।

20 नाइक्तीक नाक्त नु हिउंदमी मोदेशो श्येत मदुम्ल, दे परमप्रभु यावे कली पुनीने।

21 परमप्रभु यावेमी रागी सेला रे मुल सम्म सुडमी मतुडशो श्येत जाइनीम। मोदेशो श्येत जचा लेंशा गेनायो मदुम्ब। दानीएल १२:१

22 मोदेशो श्येत जतीक नाक्त शुश नाक्त दुम्त हना, सुड मब्रॉइनीम वा। तन्न आ योत्रशो आन पर्बम परमप्रभु यावेमी मेको श्येत शुश नाक्त लीचा मगेब।

### ‘खीस्त जाकत’ देंब बोक्नीम

23 मिनू मुरपुकीमी ‘खीस्त एकेर जाकत, मेरेक बाकब, कोत्रथ गाक्कीन’ देतेकम हना, थमा मसुतीने।

24 मारदे हना शुशेमी 'गो ख्रीस्त नड' दे जोल पा गाकनीम। 'परमप्रभु यावे आ लोव पाइब नकी' दे जोल पाइबपुकीमी चिन्ड नु छक लाकचा डा गेय कोइनीम। मो पशोमी परमप्रभु यावे आ योव्रशो आन कली यो लां प्रॉइपाइकचा मालनीम। ब्यवस्था १३:२-४; रथिस्सलोनिकी २:८-९; प्रकाश १३:१३

25 मेको नेल्ल दुग्चा डोंइतीन गो इन कली नेल्ल शेंशा तुइक्पाइकतन्नी।

26 मेकोपुकीमी 'सुइ मबाक्तीके गोरशो रागीमी ख्रीस्त बाक्ब' दैतेक्म हना, थमा सुइश्शा कोव्रथ मलने। 'खिं आगा डा कोठामी ख्रीस्त बाक्ब' दैतेक्म हना, थमा मसुतीन। लूका १७:२३-२४

27 नां दाप्तीकेमी चिला पवानु, छेडछेड पा नां पेरतीकेमी सम्म तांइसीशो खोदेशो पा, रागीम जरमेशो आ जाक्ची ना दुम्ब।

28 सिनु बाक्तीकेमी गिद्ध आंमा बेरशा जाकनीम। लूका १७:३७; प्रकाश १९:१७-१८

येसु लेंशा यीब

मर्कूस १३:२४-२७; लूका २१:२५-२८

29 रागीम मोदेशो श्येत दुम्ने नुम चोटी, सरीडमी चिन्ड तांइसीनीम। नां आ छेडछेड जाम्शा, जिक रिक्शो तांइसीब। तास्ला आ हाम्सो यो जाम्ब, सोरुल खपीम दोक्नीम। सरीड डा सक्ति हिम्सीनीम। यसैया १३:१०; प्रेरित ६:१२-१३; २पत्रुस ३:१०

30 मिनु सरीडमी रागीम जरमेशो आ चिन्ड तांइसीब। मिनु नेल्ल जात डा मुरपुकी डाकनीम। रागीम जरमेशो कली गोस्स तारी बाक्शा, सक्ति नु ठेयब छेडछेडमी यिशो ताइनीम। प्रकाश १:७; मती २६:६४; दानीएल ७:१३-१४; प्रकाश १९:११-१३

31 मिनु रागीम जरमेशोमी परमप्रभु यावे आ स्वर्ग डा गेय पाइब आन कली तुराही ताप्पा, रागी तेइ तेइ रे परमप्रभु यावे आ योव्रशो नेल्ल आन कली खुष्पा चाक्थ सोइक्ब।

32 फोव्रशी रवा कोव्रशा शेंसीने। फोव्रशी रवा आ कोच्वा दाप्शा कुशो तनीनु, बर्सा ओव्रमाक्त, दे तुइक्नीनी।

33 आं देशो लोव थमा दुग्शो तनीनु, आ जाक्ची जाक्माक्त, दे तुइक्नीनी।

34 नोफा दाइश्शा नेनीने, एको जात मनुष्थु, आं देशो थमा दुम्ब।

35 सरीड नु रागी नेल्ल जाम्शा लाइनीम, आं लोव चहिं गेना हना यो लीब। मती ५:१८; यसैया ५१:६

सासीशा बाक्चा माल्ब

36 मोदेशो गेना दुम्बा, सुइमी मतुइक्नीम। परमप्रभु यावे आ स्वर्ग डा गेय पाइबपुकीमी यो मतुइक्नीम। तौमी यो मतुइक्ब। आफोमी ला तुइक्ब। प्रेरित १:७

37 रागीम जरमेशो जाक्मेनु, मुरपुकीमी नोआह आ पालामी पशो खोदेशो पाइनीम। लूका १७:२६-२७; उत्पत्ती ६:९-७, २३

38 नोआह आ ठेयब डोंगा मओव्रम सम्म मुरपुकीमी जना जन, तूना तून, ग्युंवे पना पन नु ग्युंवे पांइसीन सीन बाक्शो बाक्मा बाक्त।

39 नेल्ल आन कली ब्वाक्कुमी मयोल्दा सम्म मारेइ मतुइश्शो बाक्मा बाक्त। रागीमी जरमेशो आ जाक्ची नाक्त यो मोदेशो दुम्ब।

40 वोइश मुर निकशी रूमी बाक्नीसी, का लाइक्चा पुंइसीब, का प्रॉइशा वोइक्चा पुंइसीब।

41 मीश मुर निकशी यात हिल्ला हिल्ल बाक्नीसी, का लाइक्चा पुंइसीब, का प्रॉइशा वोइक्चा पुंइसीब। लूका १७:३५

42 इन प्रभु गेना जाक्बा, दे मतुइक्नीनी। मोपतीके गेना हना यो सासीशा बाक्कीन। मती २५:१३

43 खिं डा मुरुमी 'आपो नाक्दो खुइपुकी खुइ पथ जाक्नीम' दे तुइक्ताक्ब हना, मेको नाक्दो मइष्थु बाक्शा, खुइ पचा मगेन वा। १थिस्सलोनिकी ५:२

44 गेना हना यो सासीशा बाक्कीन। मारदे हना रागीम जरमेशो इन मतुइक्थु जाक्ब।

होव्रप लेशशा जाक्ब

लूका १२:४१-४६

45 होत्रपमी आ खिं कोत्रब कली जची जाकमेनु, जचा गेचा, दे अरेशा वोडक्चा पुंडसीशो खोदेशो रिम्शो थुं पाइश्शो गेय पाइब सु बाकबा?

46 आ होत्रप लेश्शा जाकशा, आ गेय पाइबमी आ देशो टिशा पशो तशा 'रिम्शो' पाप्तीवी देंब।

47 नोफा दाइश्शा नेनीने, होत्रपमी आइक्के बाक्शो नेल्ल मेको आ गुडमी जिम्मा गेब। मती २५:२१-२३

48 मरिम्शो थुं पाइश्शो गेय पाइबमी चहिं आ होत्रप लम नोले 'इच्छी ना मजाकब' दे मिम्शा, २पनुस ३:४

49 अरु गेय पाइब आन कली जिचा पोक्शा, श्येत गेशा तुप्शा, शांबु राकसी दुक्ब नु काथा बाक्शा पाइब।

50 आ ममिम्शो मतुइश्शो नाक्त खिं डा होत्रप लेश्शा जाकब।

51 मिनु मेको कली तुप्शा, फस सेल्शा कपटीपुकी नु काथा वोडक्ब। मेकेर मुरपुकी आन खुइ शेप्शा डाक्नीम।

## 25

### निप्स पाइश्शो मीश आल

1 स्वर्ग डा राज्य ओदेशो दुम्ब, १० जना मीश आलमी तेल बत्ती कुरशा, ग्युम्ले गुमथ लाइनीम। लूका १२:३५-३६; प्रकाश १९:७

2 ५ जना निप्स पाइश्शो बाक्नीम। ५ जना चहिं निप्स मपाइश्शो बाक्नीम।

3 निप्स मपाइश्शोपुकीमी बत्ती कुरशा तेल मकुरनीम।

4 निप्स पाइश्शोपुकीमी चहिं तेल यो कुरनीम।

5 मिनु ग्युम्ले जाक्ची जाक्शा यो मजाकमेनु, नेल्ल मुकु जिशा इप्नीम।

6 मिनु १२ बजे नाकदो 'ग्युम्ले जाक्त, गुमथ लन' देशा ब्रेश्शो नेनीम।

7 मिनु छुल छाल बोक्शा, आन बत्ती का का पा जेलनीम।

8 मिनु निप्स मपाइश्शोपुकीमी निप्स पाइश्शो आन कली 'आंड बत्ती काप्चा चिकताकम, इच्छी खोड तेल आंड कली यो गेचा नकी' दे पुंडनीम।

9 तन्न निप्स पाइश्शोपुकीमी 'गो आंड कुरशो तेलमी गो नेल्ल इ बत्ती आन कली मजाक्दीप्ब। पसल लशा ग्याप्शा, चाक्शा दाडीन' देंनीम।

10 मिनु मेकोपुकी तेल ग्याप्थ लमानु, ग्युम्ले जाकब। मिनु लचा कली सासीशा बाकब आन कली ग्युंबे भोज खिंमी ओइशा, लाप्चो चोक्नीम। लूका १३:२५

11 मिनु नोले तेल ग्याप्थ लाइबपुकी यो जाक्शा 'प्रभु, लाप्चो रोक्शा गेचा नकी' देंनीम।

12 मिनु प्रभुमी 'नोफा दाइश्शा नेनीने, गो इन कली मतुइक्वन्नी। सु ननी?' देंब। मती ७:२३

13 मेको खोदेशो पा इन प्रभु गेना जाकब, दे मतुइक्नीनी। मोपतीके गेना हना यो सासीशा बाक्कीन। मती २४:४२-४४

### होत्रप लेश्शा हिसाब पाइब

लूका १९:१२-२७

14 ओदेशो यो दुम्ब, मुर कामी 'रागी हिरथ लाइनुड' दे थुं पशा, लचा डोंइती आ गेय पाइब आन कली ब्रेश्शा, आ शोंप आन गुडमी गेब।

15 आन पने चाप्चा डा गेय तुइश्शा, का कली ५ टलेन्ट, का कली टलेन्ट निक्शी, का कली टलेन्ट का योक्शा गेशा वोइश्शा लाइब। रोमी १२:६

16 होत्रप गाकम चोटी ५ टलेन्ट ताकबमी ग्याप्तीक लेयतीक पचा गोइब। मिनु मोपा का डा निक्शी सेल्ब।

17 टलेन्ट निक्शी ताकबमी यो में मोपा का डा निक्शी सेल्ब।

18 टलेन्ट का ताकबमी चहिं आ होत्रप आ शोंप लाइश्शा थिम्शा खुइश्शा वोडक्ब। टलेन्ट का नेल्ल क्येडा ठेयब क्येट बाकब।

19 मिनु शुश बर्स नोले होत्रप लेश्शा जाकब। मिनु आ गेय पाइब आन कली ब्रेश्शा 'दोशो दोशो सेल्नी, कोंइदीनी' दे का का पा हिल्लो पाइब।

20 मिनु ५ टलेन्त ताक्बमी आ डोंडती जाक्शा 'हजुर, ५ टलेन्त गेतीनी। मिनु मार मार पा गो अर्को ५ टलेन्ट सेल्ता। मुल १० दुम्त' देंमेनु,

21 आ होव्रपमी 'रिम्शो पाप्तीवी। थमा सुडक्चा पुंडसीशो बाक्ते। इच्ची खोइ तशोमी शुश सेल्शा, रिम्शो गेय पाप्तीवी। मोपतीके शुश अधिकार गेनन। ग्येरसीशा बाक्स' देंब। मती २४:४५-४७

22 मिनु टलेन्ट निक्शी ताक्बमी जाक्शा 'हजुर, टलेन्ट निक्शी गेतीनी। मिनु मार मार पशा, अर्को टलेन्ट निक्शी सेल्ता। मुल ४ दुम्त' देंमेनु,

23 मेको कली यो 'रिम्शो पाप्तीवी। इच्ची खोइ तशोमी शुश सेल्शा, रिम्शो गेय पाप्तीवी। थमा सुडक्चा पुंडसीशो बाक्ते। मोपतीके शुश अधिकार गेनन। ग्येरसीशा बाक्स' देंब।

24 मिनु टलेन्ट का ताक्ब जाक्शा 'हजुर, गे शिशी मपाइनीनी। मशोकशो रिक्नीनी, मक्राप्शो खुप्नीनी, दे तुइशो नड।

25 मोपतीके गो हिंती। मिनु इन टलेन्ट ताक्शा, मारेइ मपथु, थिम्शा खुइशशा वोइक्ता। मुल फेशशा चाक्ता। लतीन' देंब।

26 मिनु आ होव्रपमी 'मरिम्शो थु पाइशो अल्से, गोमी मशोकशो रिक्नुड, मक्राप्शो खुप्नुड, दे तुइशो नवे हना, एको आं गेशो टलेन्ट का लाइशशा, अरु आन कली गेशा, आ चाइक्ब पपाइक्चा ममालनेवे डा?

27 मो पशो नवे हना, आं टलेन्ट क्येडा यो आ चाइक्ब ताक्चा तड वा।

28 एको टलेन्ट ताक्शा, ५ टलेन्टमी १० टलेन्ट सेल्ब कली तेम्शा गेचा'

29 मारदे हना शुश थीब आन कली तेम्शा, शुश बारपा गेचा पुंडसीनीम। इच्ची खोइ थीब आन इच्ची खोइ यो रोइक्चा पुंडसीनीम। मती १३:१२; हितोपदेस ११:२४-२५

30 एको काम मलाप्शो अल्से कली गुंडशा, लाडगा डा छिडछिडमी ताइक्तीने। मेकेर मुरपुकी आन खुइ शेप्शा डाक्नीम।

### नेल्ल निसाफ पचा पुंडसीनीम

31 रागीम जरमेशो परमप्रभु यावे आ स्वर्ग डा गेय पाइबपुकी नु आ छेडछेडमी जाक्शा, आ ठेयब निन्तीकेम निम्सीब। मती १६:२७; प्रकाश २०:११-१३

32 मिनु आ डोंडती नेल्ल रागी डा मुर खुम्सीनीम। गोठलामी भेडा नु क्यारश आन कली ग्युरा नु पेरा गे तिल्लो खोइशो पा रोमी १४:१०; मती १३:४९

33 पिपमी भेडा आन कली ग्युरा गे क्यारश आन कली पेरा गे वोइक्ब। इजीकीएल ३४:१७

34 मिनु पिपमी आ ग्युरा गे राप्शो आन कली 'आं आफ आ आसीक तशोपुकी, आं नेक्थान जाक्कीने। रागी सेल्चा डोंडती एको राज्य इन कली सेल्शा वोइशो बाक्त। मुल बाक्कीने।

35 मारदे हना गेपुकीमी गो जचा मतथु बाक्डानु, जचा गेतीनी। तूतू दाक्डानु, तूचा गेतीनी। इन मतुइशो मुर इन खिं जाक्डानु, बाक्चा गेतीनी। यसेया ५८:७

36 फेक्चा मतडानु, फेक्चा गेतीनी। रोइ पडानु, कोव्रतीनी। जेल्खानमी चोकशा वोइय्यीमीनु, गुम्थ जाक्तीनी' देंब।

37 मिनु मेकोपुकीमी 'प्रभु, इन कली गेना जचा मतनीनु, जचा गेका, तूचा मतनीनु तूचा गेका,

38 मतुइशो बाक्नीनु, बाक्चा गेका, फेक्चा मतनीनु, फेक्चा गेका,

39 गेना इन कली रोइ पशा नु जेल्खानमी चोकसीनीनु, गुम्थ जाक्का डा?' देंनीम।

40 मिनु पिपमी 'नोफा दाइशशा नेनीने, आं लोकब नेल्ल क्येडा महिक्सीशो आन कली मार मार गेतीनी, मेको आं कली गेशो ननी' देंब। मती १०:४२; हितोपदेस १९:१७; हिब्रू २:११

41 मिनु आ पेरा गे राप्शो आन कली हिरशा 'सराप तशोपुकी, गो नु मबाक्कीने। सैतान नु आ गेय पाइब आन कली गेनायो मकाप्ब मी वोइशो बाक्ब। मेकेर लने। प्रकाश २०:१०,१५

42 मारदे हना गो जचा मतडानु, जचा मगेयीनी। तूतू दाक्डानु, तूचा मगेयीनी।

43 इन मतुइशो मुर इन खिंमी जाक्डानु, बाक्चा मगेयीनी। फेक्चा मतडानु, फेक्चा मगेयीनी। रोइ पडानु, जेल्खानमी चोकशा वोइय्यीमीनु, गुम्थ मजाक्नी' देंब।

44 मिनू मेकोपुकीमी यो लोत्र लेशशा 'प्रभु, गेना इन कली जचा मतशो, तूचा मतशो, बास मालशा गाकशो, फेक्चा मतशो, रोड पा बाकशो, जेल्खानमी चोकशा वोडशशो तका नु वारच मपका डा?' देंनीम।

45 मिनू पिपमी मेको आन कली 'नोफा दाडशशा नेनीने, महिकशो आडक्च मुर आन कली मार मार वारच मपनीनु, मेको आं कली यो मपनी' देंब।

46 मिनू मेकोपुकी गेना हना यो सजाड ततीकेमी लाइनीम। परमप्रभु आ डोंडती ठीक दुमशोपुकी चहिं गेना हना यो परमप्रभु यावे नु बाक्चा ततीकेमी लाइनीम" दे शेंताक्मी। यूहन्ना ५:२९; याकूब २:१३

## 26

येसु कली साडक्चा मालशो

मर्कूस १४:- १६:-; लूका २२:- २४:-; यूहन्ना १८:- २१:-

1 मिनू येसुमी लोत्र नेल्ल शेंने थुमशा, आ शेंसीब आन कली

2 "निलथ नाक्त पास्सा चाड बाक्ब, दे तुडक्नीनी। मिनू रागीम जरमेशोमी शीमी केपशा कांटी थोकशा क्याडशशा साडक्चा कली जिम्मा गेचा पुंडसीब" देंत। प्रस्थान १२:१-२०; मती २०:१८

3 मेना नेल्ल क्येडा ठेयब चढेब काडयाफास आ खिंमी ठेयब चढेब नु जोक्ब तुडक्ब खाल्पापुकी खुम्सीमा बाक्त। लूका ३:१-२

4 मेकोपुकीमी "मुर आन मतुडक्थु येसु कली दोपा ग्याडशशा साडक्पाडक्चा" दे सल्ला पामेनु

5 "पास्सा नाक्त साडक्पाडक्चा मतुम्ब। मारदे हना मुरपुकीमी जिचा पोक्नीम" देंमुमा बाक्त।

येसु कली ब्रोत्रशो तेल खेक्शो

लूका ७:३६-५०; यूहन्ना १२:१-८

6 काबु येसु नु आ शेंसीबपुकी बेथानी डा कोर पशो सिमोन आ खिंमी खमे जना जन बाक्मानु,

7 मीश मुर कामी ब्रोत्रशो रिना पाडब शुश क्येट लाडब तेल कुरशा जाक्शा, मेको तेल येसु आ पियामी लुक्ताक्व।

8 मिनू येसु कली तेल लुक्शो तशा, आ शेंसीबपुकीमी "ओदेशो तेल मारदे मो पवा?

9 लेयशा हना, शुश क्येट पी वा। मिनू श्येत जशो आन कली योक्शा, वारच पने जाम वा" दे आन थुं मनुमा बाक्त।

10 मिनू येसुमी मेको आन थुं मनुशो तुडशशा "एको मीश मुर कली मारदे आ थुं खाडक्पाडक्नीनी? आं कली थम रिमशो पाडक्ती।

11 श्येत जशो मुर गेना हना यो थित्नीनी, आं कली चहिं मथित्नीनी। ब्यवस्था १५:११

12 एको तेल लुक्शोमी आं रां थिम्चा कली साशो दुम्त।

13 नोफा दाडशशा नेनीने, रागीमी तेक तेक आं लोत्र नेंपाडक्नीमी, मेक मेक एको मीश मुर आ पशो आ पर्बम यो लोत्र पाइनीम" देंत।

यहूदा आ पशो

14 मिनू इस्कारीयोत डा यहूदा येसु आ शेंसीब का ठेयब चढेब आन कली गुमथ लशा

15 "येसु कली इन गुडमी ग्याडक्पाडक्ता हना, दोशो गेनीनी" देंमेनु, ३० टुक्रा चांदी गेमे बाक्त। यूहन्ना ११:५७; जकरिया ११:१२

16 मिनू मेको चांदी ताक्गा रे "गेना नु दोपा ग्याडक्चा वारच पदुमी" दे योत्रकी पना पन गाक्माक्त।

पास्सा चाड डा भोज

यूहन्ना १३:२१-२६

17 मिनू बोरब ओरुती मसुपशो शोब्ले जची नाक्त येसु आ शेंसीबपुकीमी "पास्सा मानेचा कली ते साचा, मार देंनीनी" दे हिल्लो पाम्तेक्म। प्रस्थान १२:१८-२०

18 येसुमी “सहर लशा, आं कली तुइक्व मुर कली गुम्शा ‘शेंबमी आं कली दुम्चा माल्शो मुल दुम्चापु। मोपतीके इन खिंमी बास गेशा, आं शेंसीब नु काथा बाक्शा, पास्सा मानेचा गेयी, दे पुंडथ सोइक्ताक्की’ दे मतीन” दे सोइक्ताक्की। मती २१:३

19 मिनु शेंसीबपुकीमी येसु आ देशो खोदेशो पा पास्सा मानेचा कली नेल्ल साताकम।

20 मिनु नां रिक्मेनु, येसु आ शेंसीबपुकी नु काथा जचा कली निस्साक्व।

21 मिनु जना जन बाक्मानु, येसुमी “नोफा दाइश्शा नेनीने, मुल एक बाक्ब कामी आं कली ग्याइक्व आन वारच पाइब दुम्ब” देंत।

22 मिनु नेल्लेमी शुश मरिम्शो लाक्शा “हे प्रभु, मेको वारच पाइब गो दुम्नुडा?” दे का का पा हिल्लो पाम्तेकम।

23 मिनु येसुमी “गो नु कालेम शोब्ले शेक्कुम तेप्बमी आं कली ग्याइक्वपाइक्वा वारच पाइब।

24 रागीम जरमेशो आ पर्बमी ब्रेक्शो साइ नेसी डा लोव्र नेल्ल थमा दुम्चा माल्ब। मो दुम्चा माल्शो बाक्त हना यो, ग्याइक्वपाइक्वा वारच पाइब कली थमा मरिम्शो दुम्ब। मोदेशो पाइब मुर मजरमेशो हना, मेको कली रिम्शो दुम्ब वा” देंत। लूका १७:१-२

25 मिनु ग्याइक्वा वारच पाइब यहूदामी यो “शेंब, मेको गो दुम्नुडा?” देंमेनु “आंमा तुइक्नेवे” दे माइक्वतु।

26 मिनु जना जन बाक्मानु, येसुमी आ गुइमी शोब्ले शेशा “गे रिम्शो पाइब बाक्नीनी” दे प्रार्थना पशा जिक्शा, शेंसीब आन कली योक्शा “दांडसीने, ताक्शा जने। एको आं रां बाक्ब” देंत। १कोरिन्थी १०:१६; १कोरिन्थी ११:२३-२५

27 मिनु कचौरा शेशा “गे रिम्शो पाइब बाक्नीनी” दे प्रार्थना पशा, मेको आन कली तूचा गेशा “गे नेल्लेमी तूडीने।

28 एको आं हुश बाक्ब। आं हुशेमी परमप्रभु यावे आ नक कबल खाप्ता। आं हुश जारशोमी शुश मुर आन पाप क्याम्सीब। प्रस्थान २४:८; येरमीया ३१:३१; हिबू ९:१५-१६

29 मुल डा मेरे एको अडगुर रस मतनुड, नोले नेल्ल नक दुम्शा, आं आफ आ राज्यमी गेपुकी नु काथा बाक्शा ला तूनुड, दे इन कली देंनुड” दे माइक्तीमी। भजन संग्रह ११३:-११८:-

नेल्लेमी प्रॉइनीम, दे शेंशो

30 मिनु कुम्सो का पशा डा मीन, मेकेर रे गाक्शा, जैतून डांडा ग्येत्थ लाम्तेकम।

31 मिनु येसुमी “आपो नाक्दो गे नेल्लेमी आं कली तशा, इन थुं ग्याइक्नीनी। मारदे हना साइ नेसी ओदें ब्रेक्शो बाक्ब। ‘गो गोठला कली तुप्शा क्रेक्नुड। मिनु भेडापुकी प्रोक्शा साव सुव ब्राइनीम’ दे ब्रेक्शो लोव्र थमा दुम्ब। जकरिया १३:७; यूहन्ना १६:३२

32 नोले गो बेक्शो रे सेंपाइक्वा पुंडसीशा, इन डोंइती गालील रागीमी जाक्दीत्नुड” देंत। मती २८:७

33 मिनु पत्रुसमी “मेको नेल्लेमी इन कली प्रॉइशा प्रोक्तेकम हना यो, गो मप्रॉइन्नी” देंमेनु,

34 येसुमी “नोफा दाइश्शा नेनो, आपो नाक्दो भाले ग्रीचा डोंइती खेयप सां सम्म ‘मेको कली मतुइक्नुड, सु बाक्मे?’ दे आं पर्बम देंनेवे” देंत। यूहन्ना १३:३८

35 मिनु पत्रुसमी “मप्रॉइन्नी। गे नु काथा बाक्शा, साइक्वा पुंडसाक्ड हना यो, गेनायो मप्रॉइन्नी” दे लोव्र थोक्शा देंत। मिनु शेंसीब नेल्लेमी यो मोन देंतेकम।

गेथ्सेमेनेमी प्रार्थना पशो

36 मिनु गेथ्सेमेनेमी जाक्दीत्तेकम। मिनु येसुमी “लो, एक बाक्कीने, गो इक्का आइक्की लशा, प्रार्थना पशा लेशशा पीनुड” देंत।

37 पत्रुस नु जब्दी आ तौ निकशी, सां आन कली इक्की आइक्की लाइक्वतु। मेना येसु आ थुं शुश खाइश्शो बाक्माक्त। मती १७:१; हिबू ५:७

38 मिनु सां आन कली “आं थुं शुश खाइश्शा, बेक्चा डा दुम्ती। मुल एकेर मइप्थु गो नु काथा बाक्कीन” देंमाक्त। यूहन्ना १२:२७

39 मिनू इच्छा डोंडती लशा, खुम्की पा खपीम बाप्शा “आं आफ, दुम्ब हना, एको कचौरा आं कली मतुपाइक्थु सोइक्तीने। तन्न आं दाकशो मदुम्ल, इन दाकशोन दुम्ल” दे प्रार्थना पशा, लेशशा जाक्माक्त। यूहन्ना १८:११; यूहन्ना ६:३८; हिब्रू ५:८

40 मिनू लेशशा जाक्मेनु, सांफा आन कली इप्शो तामी बाक्त। मिनू पत्रुस कली “छिन का यो मइप्थु, बाक्ने मचाप्नी? लो, सेंसीने।

41 थुं थाम्चा पुंडसीनीनु, पाप मपय, दे प्रार्थना पने। थुंमी पाइनुड चाप्नुड देंब, तन्न रांमी फाल्ने मचाप्ब” देंमाक्त। एफिसी ६:१८; हिब्रू २:१८

42 मिनू लेंशा इच्छा आइक्की लशा “आं आफ, गोमी एको मतूथु सोइक्का मदुम्बाक्त हना, इन दाकशो दुम्ल” दे प्रार्थना पवा बाक्त।

43 मिनू लेशशा जाक्मेनु, निन्द्रामी दुक्शा बाकशो तामी बाक्त।

44 मिनू मेको आन कली निन्द्रामी दुक्शो तशा, लेंशा लशा डोंडती डा पशो खोदेंब पा प्रार्थना पवा बाक्त। २कोरिन्थी १३:८

45 मिनू लेशशा, शेंसीब आन बाक्तीकेमी जाक्शा, मेको आन कली “इन दशो सानी, दे मुल यो इप्शो बाक्नी? तुइक्तीन, रागीम जरमेशो पापी आन गुइमी गेचा पुंडसीचा चिक्ताक्व।

46 बोक्कीन, लय। आं कली ग्याइक्पाइक्का कली वारच पाइब जाक्चाप्तु” देंत।

येसु ग्याइक्का पुंडसीशो

47 मो देंमेनु, आ शेंसीब यहूदामी ठेयब चढ़ेब नु जोक्ब तुइक्ब खालपापुकीमी सोइश्शो हुलमी तरवार कोक्के कुरशा, येसु कली ग्याइक्थ चाक्तीमी।

48 यहूदामी “सु कली पुक्पु पदु, मेको कली ग्याइक्का” दे ग्याइक्थ जाक्ब आन कली तुइक्पाइश्शो बाक्माक्त।

49 मिनू यहूदामी जाक्शा, येसु कली “रब्बी” दे बे मुप्शा पुक्पु पाइक्तु।

50 मिनू येसुमी “आं वारच, मार पथ जाक्डे लो पावो” देंत। मिनू ग्याइक्थ जाक्बपुकीमी येसु कली ग्याइक्ताक्म।

51 मिनू येसु नु काथा बाक्ब कामी तरवार ग्रि शोइश्शा, ठेयब चढ़ेब आ गेय पाइब का आ नोफा दि खोइक्तु।

52 मिनू येसुमी “इ तरवार पिप्तो। मारदे हना तरवारम साइक्ब, तरवारमी साइक्का पुंडसीब। उत्पत्ती ९:६

53 आं आफ कली ‘आफ, इन स्वर्ग डा गेय पाइब हजार हजार आन कली सोइश्शा, आं कली वारच पा प्रोंडपाइय्नी’ दे पुंडता हना, गिश हना यो सोइश्शा, आं कली प्रोंडपाइक्ब, दे मतुइक्कीनी? १२ खेयप ६ हजार स्वर्ग डा गेय पाइब ब्रेक्शो बाक्ब। मती ४:११

54 मोदें पुंडता हना, साइ नेसी डा लोत्र दोपा थमा दुम्ने चाप्पा डा?” दे माइक्तु।

55 मिनू येसुमी हुल आन कली “तरवार कोक्के कुरशा, खुइ पाइब कली ग्याइक्थ जाक्शो खोदेंब पा आं कली ग्याइक्थ जाक्नी? नाक्त किंत किंत परमप्रभु यावे आ खिंमी मुर आन दातेमी शेंना शेंन बाक्डानु, मग्याइक्तीनी।

56 परमप्रभु यावे आ लोत्र पाइब आन ब्रेक्शो लोत्र नेल्ल थमा दुम्चा माल्ब, मोपतीके आं कली ओदेशो दुम्चा माल्ब” दे माइक्तीमी। मिनू आ शेंसीबपुकी येसु कली प्रोंडशा, साव सुव ब्राशा प्रोक्तेक्म।

येसु ठेयब चढ़ेब आ डोंडती

57 मिनू येसु कली ग्याइक्बपुकीमी मेकेर रे लाइश्शा, नेल्ल क्येडा ठेयब चढ़ेब काइयाफास आ खिंमी चाक्दीत्मे बाक्त। मेकेर सास्त्री नु जोक्ब तुइक्ब खाल्पा नेल्ल खुम्सीशा बाकशो बाक्मा बाक्त।

58 पत्रुस यो आन नोनोले खोइश्शा, मेकेर जाक्दीम्माक्त। मिनू लाडगा ओत्रशा, नेल्ल क्येडा ठेयब चढ़ेब आ गेय पाइबपुकी नु काथा बाक्शा, मिनू गेपुकी परमप्रभु यावे, इन परमप्रभु कली इन थुं नेल्लेमी, इन सोक्त नेल्लेमी नु इन बोल नेल्लेमी दाक्का माल्नीनी। कली मार पाइनीमी, मार देंनीमी, दे कोत्रशा बाक्माक्त।



59 मिनू ठेयब चढेब नु जोकब तुइकब खालपापुकी मार पामे बाक्त देशा हना, कछडी वोइशशा, जोल पा दोस गेचा माल्मे बाक्त। मारदे हना येसु कली साइकपाइक्या माल्शो बाक्मा बाक्त।

60 मिनू सांकछीपुकी शुश चाकशा यो, मेको आन लोत्र मगारमाक्त। मोपंतीके दोसी सेल्ले मचापबमे बाक्त। नोले सांकछी निकशी आस लोत्र

61 “एको ग्याइशशां मुरुमी साबेर मार देंत देशा हना ‘परमप्रभु यावे आ खिं प्रेशशा, नाक्त सांमी नक सेल्लुड’ देंत” देंसा बाक्त। प्रेरित ६:१४; यूहन्ना २:१९-२१

62 मिनू नेल्ल क्येडा ठेयब चढेबमी बोक्शा, येसु आ डोंइती राप्शा “मेको निकशीमी इ पबंम देशो लोत्र नेंशा, मार देंनेवे?” देंमेनु, येसुमी मारेड मदेमाक्त।

63 मिनू नेल्ल क्येडा ठेयब चढेबमी “ब्रोंइशा बाकब परमप्रभु यावे आ नेमी हिल्लो पाइनन, गे परमप्रभु यावे आ तौ खीस्त नवे, दे मनवे?” देंमेनु, मती २७:१२; यूहन्ना १०:२४

64 येसुमी “गे आंमा देतीनी। मुल डा मेरे रागीम जरमेशो कली नेल्ल सक्ति पाइशशा आ ग्युरामी बाकशो ताइनीनी। गोस्स तारी बाकशा, यिना यिन पशो ताइनीनी, दे गो इन कली देंनुड” दे मदा बाक्त। भजन संग्रह ११०:१; मती १६:२७; मती २४:३०; दानीएल ७:१३

65 मिनू नेल्ल क्येडा ठेयब चढेबमी आ फेकशो वा खाकशा “ये, परमप्रभु यावे कली शुक्शी लोत्र पाइबाक्त। मार सांकछी लोत्र माल्दा डा? आ शुक्शी पशो लोत्र गे नेल्लेमी नेंशा, सांकछी दुम्तीनी। लेवी २४:१६; यूहन्ना १०:३३; यूहन्ना १९:७

66 मार पय, मिनू?” देंमेनु “साइक्या पुंइसीब” देंमा बाक्त।

67 मिनू साइक्या पुंइसीब देंमानु, का निकशीमी आ कुल तोक्तमे बाक्त, का निकशीमी तुप्मे बाक्त, का निकशीमी चोत्रचो राप्शा यसैया ५०:६

68 “ए खीस्त, सुमी राम्मे, लो देन” दे शुक्शी पा मरिम्शो पदमे बाक्त।

### पत्रुसमी “मतुइकुनुड” देशो

69 मेना पत्रुस लाडगामी बाक्माक्त। मिनू गेय पाइब मीश मुर कामी “गे यो गालील डा येसु नु काथा गाकब का नवे” देंमेनु,

70 मेकेर बाकब नेल्लेमी नेंचा डा पा “इ देशो मरुबु। मार लोत्र पवी?” देंमाक्त।

71 मिनू लाडगामी यूमेनु, मेकेर गेय पाइब मीश मुर कामी “नासरथ डा येसु नु काथा गाकब का एको यो बाक्माक्त” दे मेकेर बाकब आन कली देंमाक्त।

72 मिनू पत्रुसमी “मेको मुर कली मतुइकुनुड” दे कसम जशा आ लोत्र थोकशा देंमाक्त।

73 मिनू मेको एर ओथ बाकबपुकी जाकशा, पत्रुस कली “गे यो काथा गाकब का बाकडे बाक्त। इ ब्वाक्स नेंशा, गालील डा बाकडे बाक्त, दे तुइसीब” दे मदमे बाक्त।

74 मिनू पत्रुसमी “जोल पाता हना, परमप्रभु यावेमी सजाइ गेयील, एको मुर कली तुइसीन मतुइकुनुड” दे कसम जशा, आ लोत्र थोकशा देंमाक्त। मो देंमेनु, भाले ग्रीमाक्त।

75 मिनू पत्रुसमी “भाले ग्रीचा डोंइतीन सां खेयप सम्म मेको मुर कली मतुइकुनुड, देंनेवे” दे येसुमी देशो ति फ्रुकगा बाक्त। मिनू गूशा शुश डाक्माक्त।

## 27

1 मिनू नां सोत्रमेनु, ठेयब चढेब नु जोकब तुइकब खालपापुकीमी येसु कली साइकपाइक्यान, दे सल्ला पामे बाक्त।

2 मिनू फ्रेंशा लाइशशा, पिलातस, सरकार डा ठेयब मुर आ गुडमी जिम्मा गेमे बाक्त।

### यहूदा ग्युकशा बेक्शो

3 ग्याइकपाइक्या वारच पाइब यहूदामी येसु कली साइक्या, दे उजुर पाम्तेकम देशो नेंशा “मरिम्शो पडा बाक्त। मार पचा डा मुल” दे ठेयब चढेब नु जोकब तुइकब खाल्पा आन कली परमप्रभु यावे आ खिमी गुम्थ लशा मती २६:१५

4 “रिम्शो मुर कली ग्याइक्पाइक्चा वारच पा पाप पाता” देमेनु “गोपुकीमी मार पाइनीकी? गे आंमा तुइक्तो” देंमा बाक्त।

5 मिनु चांदी मेको आन डोंइती ताइश्शा, मेकेर रे फो गूशा लशा, ग्युक्शा बेक्माक्त। प्रेरित १:१८-१९

हुशेम ग्याप्शो रू

6 ठेयब चढेबपुकीमी मेको ताइश्शो चांदी गुप्शा “परमप्रभु यावे कली चढेशो क्येट नु काथा वोइक्चा म्दुम्ब। मारदे हना हुश के दाम बाक्ब” देब्यवस्था २३:१९

7 सल्ला पशा, खप के ग्योंब सेल्ब आ रू का ग्याप्मे बाक्त। मेको रू यहूदी धर्म मपाइब यरूसलेममी बेक्शो मुर आन कली थिम्तीके पामे बाक्त।

8 मेको रू कली मुल सम्म “हुश रू” देंसीब।

9 मोदेशो आन पशोमी साइ नेसी परमप्रभु यावे आ लोत्र पाइब येरमीयामी ब्रेक्शो लोत्र थमा दुम्त। आ ब्रेक्शो लोत्र चहिं ओदेशो बाक्ब “इसाएल आ खिं डा मुरपुकीमी एको मुर आ मोल ३० टुक्रा चांदी डा बाक्ल देंतेक्म।

10 मिनु ३० टुक्रा चांदी लाइश्शा, खप के ग्योंब सेल्ब आ रू ग्याप्तेक्म, दे परमप्रभु यावेमी लोत्र पपाइक्ती” दे ब्रेक्शो बाक्ब। येरमीया ३२:९, जकरिया ११:१२-१३

येसु पिलातस आ डोंइती राप्शो

11 येसु सरकार डा ठेयब मुर आ डोंइती राम्मेनु, मेकोमी “यहूदी आन पिप नवे?” दे हिल्लो पवानु “गे आंमा देंतीनी” देंमाक्त।

12 मिनु ठेयब चढेब नु जोक्ब तुइक्ब खालपापुकीमी शुश दोस गेमेनु, ब्वालेड पा बाक्माक्त। मती २६:६३; यसैया ५३:७

13 मिनु पिलातसमी येसु कली “एकोपुकीमी इ कली शुश दोस गेशा, लोत्र पशो मनेनी?” देंमेनु,

14 लोत्र का यो मलेत्ता बाक्त। मिनु सरकार डा ठेयब मुर आ छक लाक्माक्त। यूहन्ना १९:९

15 पास्सा नाक्त सरकार डा ठेयब मुर आन दाक्शो मुर का कली जेल्खान रे प्रोंइतीके पशो बाक्माक्त।

16 बारब्बा माइश्शो मरिम्शो पाइब मुर का चोक्सीशो बाक्माक्त।

17 मिनु सरकार डा ठेयब मुरुमी “बारब्बा कली प्रोंइचा, दे ख्रीस्त देंशो येसु कली प्रोंइचा? तेको कली प्रोंइचा?” दे हिल्लो पामी बाक्त।

18 मारदे हना आन थुं चोशा, येसु कली ग्याइक्पदमे बाक्त, दे तुइक्ता बाक्त, मोपतीके येसु कली प्रोंइचा माला बाक्त। यूहन्ना १२:१९

19 मिनु निसाफ पचा कली बाक्मेनु, आ मीशेमी “मेको सुइ कली मरिम्शो मपाइब कली मारेड मपतीने। मारदे हना मुलाक्दो इम्डानु, मेको आ पर्बम गो शुश श्येत जचा डा डोमु ताता” दे शोत्रथ सोइक्ता बाक्त।

20 तन्न ठेयब चढेब नु जोक्ब तुइक्ब खालपापुकीमी मुर आन कली हुल पोक्शा “बारब्बा कली प्रोंइचा, येसु कली साइक्चा” दे रेयके पा पुंइपदमे बाक्त।

21 मिनु पिलातसमी “मुल सु कली प्रोंइचा?” देंमेनु “बारब्बा कली प्रोंइचा, सरकार” देंमा बाक्त।

22 मिनु पिलातसमी “ख्रीस्त देंशो येसु कली मार पदु, मिनु?” देंमेनु “शीमी केप्शा कांटी थोक्शा क्याइश्शा साइक्चा माल्ब, सरकार” देंमा बाक्त।

23 मिनु “मार मरिम्शो पवा, मार दोस गेचा” देंमेनु “शीमी केप्शा कांटी थोक्शा क्याइश्शा साइक्चा माल्ब” दे रेयके पामे बाक्त।

24 मुरपुकीमी मोदेशो रेयके पा प्रेक्शो तशा “मुल येसु कली प्रोंइने मचबु” दे मिम्शा “एको सुइ कली मरिम्शो मपाइब आ हुश इन गुइमी ला लुम्सेक्ल, आं गुइमी मलुम्सेक्ल” देंशा, नेल्ल आन कुल आ गुइ चिक्शा कोइदीमी बाक्त। ब्यवस्था २१:६

25 मिनु हुलपुकीमी “आंइ कली नु आंइ चच युइ आन कली लुम्सेक्ल” दे रेयके पामे बाक्त। प्रेरित ५:२८

26 मिनू बारब्बा कली प्रोंइशा सोइक्ता बाक्त। येसु कली कोर्राम युक्पाइश्शा शीमी केप्शा कांटी थोकशा क्याइश्शा साइक्चा कली आ सिपाही आन गुडमी जिम्मा गेमी बाक्त।

येसु कली क्याइश्शा साइश्शो

27 मिनू सिपाहीपुकीमी येसु कली हेरोद आ दरवार डा सिपाही बाक्तीकेमी चाक्दीश्शा, आन पल्टन नेल्ल खुप्शा, शुक्शी पदमे बाक्त।

28 आ फेक्शो वा पुइश्शा, लल वा फेक्पा

29 चू के सिरपेच सेल्शा, आ पियामी गुप्पा, सुन के कोक्के, दे किन्दा आ ग्युरा गुडमी शेपदमे बाक्त। मिनू आ डोंइती आन पोक्च थेक्शा “हे यहूदी आन पिप, सेउ ताक्कीन” दे शुक्शी पा सेउ पदमे बाक्त।

30 मिनू आ कुलम तोक्तमे बाक्त। मेको किन्दा रोइश्शा, आ पियामी तेत्मे बाक्त। यसैया ५०:६

31 मिनू शुक्शी पने थुम्शा, लल वा पुइश्शा, आंमा आ वा फेक्पा शीमी केप्शा कांटी थोकशा क्याइश्शा साइक्चा कली लदमे बाक्त।

32 मिनू लना लन पामेनु, साइरेनी डा सिमोन नें पाइश्शो मुर का युम्मे बाक्त। मिनू मेको कली येसु कली क्याइक्तीक शी “लो, कुर कि कुर” दे कुरपदमे बाक्त।

33 मिनू गोल्यथा माइक्तीकेमी चाक्दीत्मे बाक्त। गोल्यथा कली खप्परे यो देंसीब।

34 मिनू ग्युरशो अडगुर शांबु खाइल ब्वाइश्शा तूतीके सेल्शा, तूचा गेमेनु, येसुमी थाम्शा डा मिन, तूने मबिस्से बाक्त। भजन संग्रह ६९:२२

35 मिनू शीमी केप्शा कांटी थोकशा क्याइश्शा, फेन्टे ग्यारशा आ वासी योक्सीशा, यूहन्ना १९:२४

36 खाल पा बाक्मा बाक्त।

37 “यहूदी आन पिप येसु” दे आ कली दोस गेशा ब्रेक्शो आ पिया तार एरे शीमी केप्तमे बाक्त।

38 मिनू खुइ निक्शी आस कली यो आ कली खोदेशो पा आ ग्युरा नु पेरा गे क्युकामे बाक्त।

39 मिनू कोत्रब मुर शुश जाक्शा, आन पिया हिम्शा भजन संग्रह २२:८

40 “परमप्रभु यावे आ खिं प्रेशशा, सां नाक्तीमी नक सेल्नुड देंते। खोइ मिनू, सेल्ने चबी? थमान परमप्रभु यावे आ तौ नवे हना, शीमी केप्शा कांटी थोकशा क्याइश्शो रे ब्रोंइशा यीवो” दे शुक्शी पामे बाक्त। मती २६:६१; यूहन्ना २:१९

41 ठेयब चढेब, सास्त्री नु जोक्ब तुडक्ब खाल्पापुकीमी यो

42 “शुश आन कली श्येत रे प्रोंइना प्रोंइन गाक्बाक्माक्त। आंमा आ कली चहिं प्रोंइने मचाप्बाक्माक्त। इं इस्राएल डा पिप बाक्ब, मोपतीके शीमी केप्शा कांटी थोकशा क्याइश्शो रे ब्रोंइल। ब्रोंइने चाप्तु हना, गो आ लोत्र नेल्ल थमा सुइक्नय।

43 परमप्रभु यावे कली थमा सुइक्बाक्माक्त। मोपतीके परमप्रभु यावेमी एको कली दाक्ताक्व हना, एको श्येत रे प्रोनल। ‘परमप्रभु यावे आ तौ नड’ देंत, मोपतीके परमप्रभु यावे आ दाक्शो बाक्माक्त” दे शुक्शी पामे बाक्त। भजन संग्रह २२:९

44 आ ग्युरा नु पेरा गे क्युकशो खुइ निक्शीमी यो मोदेशो पान शुक्शी पदसे बाक्त।

येसु बेक्शो

45 मिनू नाक्ती १२ बजे रे ३ बजे सम्म नेल्ल रागीमी नां रिक्शो खोदेशो पा छिडछिड दुम्त।

46 ३ बजे गे येसुमी “एली, एली, लामा आसबथानी” दे वाइ ब्रेम्माक्त। आ देंशो मार रुम्सीब देशा हना “परमप्रभु यावे, आं परमप्रभु, आं कली मारदे प्रोंइयीनी” देंशो रुम्सीब। भजन संग्रह २२:२

47 एर ओथ बाक्बपुकीमी मो देशा वाइ ब्रेश्शो नेंशा “एलीया कली ब्रेत्ताक्व” देंमुमा बाक्त।

48 मिनू कामी रुवामी ग्युरशो तूतीके नुप्शा, कोक्केम फ्रेशा, युप्चा गेचवा बाक्त। भजन संग्रह ६९:२२

49 मिनू मेकेर बाक्बपुकीमी “कते, वारच पाइक्थ एलीया जाक्बा कौ, कोत्रय” देंमा बाक्त।

50 मिनू येसुमी लेंशा वाइ ब्रेश्शा, आ सोक्त प्रोना बाक्त।

येसु बेक्मे नोले चिन्ड यूशो

51 मिनु बेकम चोटी मार दुम्माक्त देशा हना, परमप्रभु यावे आ खिं डा आगा डा कोठामी बारेशो वा इर रे उड सम्म उडक्थ पा जेर गाकमाक्त। खिनु कुशा, प्रस्थान २६:३१-३३; २इतिहास ३:१४

52 सेरथे फुल्लु नेल्ल एशशा ब्रोल्मा बाक्त। लास थिम्तीके यो एशशा ब्रोल्मा बाक्त। मिनु परमप्रभु यावे कली थमा सुइशशा बेकशोपुकी सेंसमा बाक्त।

53 येसु सेंसीशो नोले मेकोपुकी लास वोइक्तीके रे गूशा, सहर जाकदीशशा, शुश मुर आन कली तपांडसाकम।

54 येसु कली खाल पाइब कप्तान नु सिपाहीपुकीमी खिनु कुशा नु मोपा हिंचा डा गेय दुम्शो तशा, शुश हिंशा “एको परमप्रभु यावे आ तौ बाकमाक्त” देमुमा बाक्त।

55 गालील रे यरूसलेम सम्म येसु कली वारच पना पन काथा गाकब मीश मुरपुकीमी डोन रे कोव्रशा बाकमा बाक्त। लूका ८:२-३

56 मोपा कोव्रब का माग्दाला डा मरीयम बाकमाक्त। का याकूब नु योसेफ आस ममा मरीयम बाकमाक्त। का जब्दी आ तौ निक्शी आस ममा बाकमाक्त।

### येसु आ लास पुक्खीमी वोइशशा

57 मिनु नां रिक्मेनु, येसु आ नोले खोइक्ब अरीमाथीया डा योसेफ माइशशा शोंप पाइशशा मुर कामी पिलातस कली गुम्थ लशा, ब्यवस्था २१:२२,२३

58 “येसु आ बेकशो रां लाइक्चा गेयीनी” दे पुना बाक्त। मिनु पिलातसमी लाइक्चा गेवा बाक्त।

59 मिनु योसेफमी लास बुश नक वामी गिल्शा,

60 आंम आ लास वोइक्तीके सेल्शो रेंगु डा पुक्खीम ओंइशा वोदा बाक्त। मिनु पुक्खी कली ठेयब फुल्लुमी सुशा वोइशशा गाकमाक्त।

61 माग्दाला डा मरीयम नु अर्को मरीयममी योसेफ आ नोले खोइशशा लशा, लास वोइक्तीके पुक्खी आ डोंइती बाकसा बाक्त।

### फुल्लुम लाहा छाप थोक्शो

62 मेको नेल्ल दुम्शो आ दीसा ठेयब चढेब नु फरिसीपुकीमी पिलातस कली गुम्थ लशा मर्कूस १५:४२

63 “सरकार, एको नेल्ल आन थुं क्याल्पाइक्ब मबेक्थु बाकमेनु, मार देंत देशा हना ‘आं बेकशो निन्थ नाक्त बेकशो रे सेंपांडसीचा पुंडसीनुड’ देशो फुक्तक। मती २०:१९

64 मोपतीके मेको आ लास वोइक्तीकेमी सां नाक्त सम्म खाल पाइब वोइक्चा माल्ब। मारदे हना मेको आ नोले खोइक्बपुकीमी आ लास खुइ पा लाइशशा, मुर आन कली ‘बेकशो रे सेंसाक्व’ दे शेंना शेंन गाक्तेकम हना, डोंइती रे पशो क्येडा शुश जोल गूब” दे पुन्मे बाक्त।

65 मिनु पिलातसमी “लो, सिपाही आन कली सोइक्नुडमी। गेपुकी यो चान्नी सम्म कोव्रडीन” देशा, आन देशो बिशशा सोइक्तीमी बाक्त।

66 मिनु सिपाहीपुकी नु लशा, मेक जाकदीशशा, सुशो फुल्लुमी लाहा छाप थोक्शा, खाल पा बाकमा बाक्त।

## 28

### येसु बेकशो रे सेंसीशा तपांडसीशो

मर्कूस १६:३-१०; लूका २४:१-१०; यूहन्ना २०:१-१८

1 मिनु नाइक्तीक नाक्त सां लाक्शा, हप्ता डा डोंइती नाक्त नां सोव्रसोव्रमी माग्दाला डा मरीयम नु अर्को मरीयम येसु आ लास वोइक्तीके कोव्रथ लसा बाक्त। प्रेरित २०:७; १कोरिन्थी १६:२; प्रकाश १:१०

2 मिनु जाकदीस्सानु, ठेयब खिनु कुमाक्त। मारदे हना परमप्रभु यावे आ स्वर्ग डा गेय पाइब का यिशा, सुशो ठेयब फुल्लु तिल्शा, मेको आ तारी निस्से बाक्त।

3 मेको आ कुल चिला पशो खोदेशो नु आ वा बुबु पा छेडछेड तांडसे बाक्त। मती १७:२; प्रेरित १:१०

4 मेको कली तशा, मेकेर खाल पाइब सिपाहीपुकी हिंशा खिंखि पा थशा गोल्मा बाक्त।

5 मिनु परमप्रभु यावे आ स्वर्ग डा गेय पाइबमी मीश मुर आस कली “महिनीसे। गे शीमी क्याइशशा साइशो येसु कली माल्थ पिंसी ममाइ?

6 मुल एके मबा। मारदे हना डोंडती देशो खोदेशो पा बेकशो रे सेंचा पुंडसाक्व। प्रभु कली वोइक्तीके कोवडीसे। मती १२:४०; मती १६:२१; मती १७:२३; मती २०:१९

7 मुल एके रे फ्रा लेशशा लशा, आ शेंसीब आन कली ‘प्रभु बेकशो रे सेंचा पुंडसे बाक्त। इन डोंडती लशा, गालील जाकदीपब। मिनु गे मेकेर गुम्या ताइनीनी’ दे शोव्रथ लसे। इस कली तुइक्पाइक्तन्सी, मिनु मप्रेदीसे” दे सोइक्तीम्सी बाक्त। मती २६:३२

8 मिनु मेकेर रे गूशा, हिंसा यो बाक्त, ग्येरसीसा यो बाक्त। मिनु गुरुर पा दोरशा, मेको लोव्र शेंचा, दे आ शेंसीब आन कली गुम्य लसा बाक्त।

9 मिनु दोरना दोरन लसानु, मार दुम्माक्त देशा हना, येसुमी मेको आस कली गुम्सी बाक्त। मिनु “आसीक रसील” दे सेलतीम्सीनु, आ नेक्था जाक्शा बाप्शा, आ खोइल थिशा मान पदसे बाक्त।

10 मिनु येसुमी “महिनीसे। येसु कली गुम्य गालील लने, दे आं लोकब आन कली शोव्रथ लसे” दे सोइक्तीम्सी बाक्त। हिब्रू २:११

खाल पाइबपुकीम घूस जशो

11 मेको निक्शी दोरना दोरन लसानु, सिपाही का निक्शी सहरमी जाकदीशशा, ठेयब चढेब आन कली मेकेर मार दुम्मे, मेको नेल्ल शोव्रडमे बाक्त।

12 मिनु ठेयब चढेब नु जोक्ब तुइक्ब खाल्पापुकी खुम्सीशा “मुल मार पय?” दे लोव्रसी पमुमा बाक्त। मिनु सिपाही आन कली शुश क्येट गेशा

13 “लो, मुर आन कली मार देंचा देशा हना, नाकदो इप्कानु, आ शेंसीबपुकी जाक्शा, लास खुइ पामे बाक्त, दे लोव्र फ्रने। मती २७:६४

14 सरकार डा ठेयब मुरुमी नेंतु हना, नेल्ल गारपाइक्नीकी, इन कली मारेइ मदुम्ब” देंमा बाक्त।

15 मिनु सिपाहीपुकीमी क्येट ताक्शा लशा, मेको मोदेशो लोव्र तेइ तेइ फ्रामे बाक्त। मुल सम्म यहूदी आन दातेमी एको लोव्र लीशो बाक्ब।

येसु आ लोव्र नेल्ल कली शेंदीन

16 येसु आ शेंसीब ११ जना चहिं येसुमी तुइक्पाइशशा गालील डा डांडामी जाकदीत्तेकम।

17 मिनु येसु कली तामेनु, मान पाम्तेक्म। का निक्शीमी चहिं दल्गीर पामे बाक्त।

18 मिनु येसु नेल्ल आन नेक्था जाक्शा “स्वर्ग नु रागी डा अधिकार नेल्ल आं कली गेशो बाक्ब। मती ११:२७; एफिसी १:२०-२२

19 मोपतीके रागीम नेल्ल हिरशा, नेल्ल जात, थर डा मुर आन कली आं पबर्मी शेंशा, आं नोले खोइक्ब शेंसीब सेलीने। आं आफ, परमप्रभु यावे, आ तौ नु परमप्रभु यावे आ सोक्त आन नेमी मेको आन कली ब्वाक्कुम खुम्शा गुंडदीने। मती २४:१४; मर्कूस १६:१५-१६; २कोरिन्थी ५:२०

20 मिनु गोमी इन कली मार मार शेंदन्नी, मेको नेल्ल मेको आन कली शेंशा पपतीने। नेनीने, रागी मनुप्ची सम्म गो गेनायो गेपुक नु बाक्नुड” देंत। मती १६:२०

## मर्कूस

**ब्रेक्ब मुर:** एको किताब ब्रेक्ब मुर मर्कूस बाक्ब। मेकोमी आंम आ पबर्म मर्कूस १४:५१-५२ ब्रेक्शो बाक्ब। मेको आ यहूदी नें यूहन्ना बाक्त, मेको आ रोमी नें चहिं मर्कूस बाक्त। मर्कूस बारनाबास आ याच बाक्त। मेको पावल नु बारनाबास काथा लमा बाक्त। तन्न मेको आस कली प्रोइशशा, यरूसलेम लेम्माक्त। प्रेरित १३:५, १३ नोले पवलम मेको आ पबर्म रिम्शो लोत्र पवा बाक्त। मेको कली लेंशा, रोम सहरम वारच पचा कली ब्रेक्शो बाक्त। रतिमोथी ४:११ मर्कूसमी पत्रुस कली वारच पा, आ शेंतीक लोत्र रोमी लोत्रम सेला बाक्त। मिनु मेको लोत्र मसाम्चा कली नेल्ल ब्रेक्ता बाक्त।

**गेना ब्रेक्शो:** मर्कूस ६३-६४ ए. डी. रोम सहर जाक्माक्त। मेना थमा सुइक्ब आन कली रोम डा सिजर नेरो आ पतीकेमी खेदा पचा गोत्रमे बाक्त। मिनु मेको किताब ६४-६५ ए. डी. मेर खोदेशो ब्रेक्शो बाक्ब। तन्न ७० ए. डी. क्येडा डोंइती दुम्चा माल्ताक्व। मारदे हना यरूसलेम सहर कली खतम सेल्ल्तिके आ पबर्म मारेड मब्रेक्शो बाक्त।

**मारदे ब्रेक्शो:** मर्कूसमी आ किताबम येसु आ पशो छक लाक्चा डा गेय आ पबर्म शुश ब्रेक्ताक्व। मेको पत्रुस आ शेंतीक लोत्र रे बाक्ब। येसु आ गेय डा नेल्ल क्येडा ठेयब लोत्र बाक्नीम। येसु परमप्रभु यावे आ गेय पाइब दुम्तीके किताब नेल्लेम कोंइशो बाक्ब, देशो बाक्ब। मर्कूस १०:४५

ब्वाक्कुम खुम्शा गुंडब यूहन्ना

मती ३:१-१२; लूका ३:१-१८; यूहन्ना १:१९-२७

1 एको परमप्रभु यावे आ तौ येसु ख्रीस्त आ पबर्म ब्रेक्शो ग्येरपाइक्ब लोत्र बाक्ब। मेको लोत्र दोदेशो पा गोइब देशा हना,

2 परमप्रभु यावे आ लोत्र पाइब यसैयामी ब्रेक्शो लोत्रमी मार ब्रेक्शो बाक्त देशा हना “नेनो, इ डोंइती आं लोत्र पाइब सोइक्नुड। मेकोमी इ लां थेल्लब। मती ११:१०

3 गोरशो रागीमी सेंदा कामी ‘प्रभु आ लां थेलीने। आ गाक्तीके लां फुल्लु ग्रोक्शा थेलीने’ देशो नेंसीब” दे ब्रेक्शो बाक्ब। मलाकी ३:१; यसैया ४०:३

4 ब्वाक्कुम खुम्शा गुंडब यूहन्ना गोरशो रागीम गूशा, मुर आन कली “इन पाप क्याम्चा कली इन थुं परमप्रभु यावे गे लेत्तीने। आंइ थुं लेत्ताक्क दे कोंइचा कली ब्वाक्कुम खुम्शा गुंडपांइसीने” दे लोत्र पाइक्बाक्माक्त।

5 मिनु यहूदीया रागी नु यरूसलेम सहर डा मुर नेल्ल मेकेर जाक्शा, आन पाप शोत्रशा, यूहन्ना रे पा यर्दन खोलाम खुम्शा गुंडचा पुंडसमा बाक्त।

6 यूहन्नामी दलओंठ आ चां के प्रोत्रशो वा फेक्बाक्माक्त। कुशल के किप्शुर किप्बाक्माक्त। मिनु सल्ला माले ब्वशा नु रोका खुदो जशा बाक्बाक्माक्त।

7 मिनु मुर आन कली “आं नोले जाक्ब आं क्येडा सक्ति पाइशो बाक्ब। गो मेको आ डोंइती बाप्शा, आ जुत्ता पुइक्चा लायो मशिरनुड।

8 गो इन कली ब्वाक्कुम खुम्शा गुंडताक्नी। मेकोमी चहिं इन कली परमप्रभु यावे आ सोक्तीमी खुम्ब” दे मुर आन कली शेंना शेंन बाक्बाक्माक्त।

येसु ब्वाक्कुम खुम्शा गुंडचा पुंडसीशो

मती ३:१३-४:११; लूका ३:२१-२२; लूका ४:१-१३; यूहन्ना १:३२-३४

9 मेना येसु गालील रागी डा नासरथ सहर रे गाक्शा, यूहन्ना आ बाक्तीकेमी जाक्माक्त। मिनु यूहन्ना रे पा यर्दन खोलामी ब्वाक्कुम खुम्शा गुंडपांइसे बाक्त। लूका २:५१

10 मिनु ब्वाक्कुमी गुम्शा गूमेनु, सरीड रोक्सीशा, परमप्रभु यावे आ सोक्त परवा खोदेशो पा यिशा, आ तारी जुक्शो तवा बाक्त।

11 मिनू सरीड रे “आं दाकशो तौ नवे। इ कली तशा थाम्पा ग्येरसीनुड” देशो सेंदा नेंसे बाक्त। मर्कूस ९:७

येसु थुं थाम्चा पुंडसीशो

12 मिनू नोले परमप्रभु यावे आ सोकतीमी येसु कली गोरशो रागीम लदा बाक्त।

13 मिनू गोरशो रागीम ४० नाक्त सम्म बाक्माक्त। मेकेर बाक्मेनु, सैतान रे पा थुं थाम्चा पुंडसे बाक्त। मेको गोरशो रागी डा जन्तुपुकी नु बाक्माक्त। परमप्रभु यावे आ स्वर्ग डा गेय पाडबपुकीमी मेको कली वारच पामे बाक्त।

येसुम परमप्रभु आ लोव्र नेंपाइशो

14 यूहन्ना जेल्खानमी चोकचा पुंडसे नोले, येसुमी गालील रागीमी परमप्रभु यावे आ ग्येरपाइक्ब लोव्र नेंपाइक्ना पाइक्न गाक्माक्त।

15 मेकोमी “परमप्रभु यावे आ देशो नाक्त जाक्त। आ राज्य इन नेक्था जाकशो बाक्ब। इन थुं परमप्रभु यावे गे लेशशा, आ ग्येरपाइक्ब लोव्र थमा सुतीने” दे नेंपाइक्ना पाइक्न गाक्माक्त। गलाती ४:४

येसुमी शेंसीब आन कली ब्रेशशो

मत्ती ४:१८-२२; लूका ५:१-११; यूहन्ना १:३५-५१

16 मिनू येसु गालील समुन्द्र आ नेक्था हिरसेनु, सिमोन नु आ लोकब अन्द्रीयास ग्याइल आप्शा, डांड रेन्ना रेन्न बाकशो तवा बाक्त। मेको निकशी डांड रेण्व बाक्सा बाक्त।

17 मिनू येसुमी मेको आस कली “आं नोले खोइय्यीसी। मिनू मुर आन कली रेण्व सेलनन्सी” दे माइक्सी बाक्त।

18 मिनू ग्याइल थु था प्रोइशा, आ नोले खोइशशा गाक्सा बाक्त।

19 मिनू इच्छी आइक्वी लशा, जब्दी आ तौ निकशी याकूब नु यूहन्ना वोबु आस कली डोंगाम बाक्शा, गाक्शो ग्याइल प्रोव्रना प्रोव्रन पशो ताम्सी बाक्त।

20 मिनू मेको आस कली यो ब्रेत्तीम्सी बाक्त। मिनू आस आफ जब्दी नु गेय पाइब आन कली प्रोइशा, आ नोले खोदसे बाक्त।

वोल कली गुंडशो

मत्ती ८:१४-१७; लूका ४:३१-४४

21 मिनू कापेरनाउम सहरम जाकदीम्मा बाक्त। मिनू नाइक्तीक नाक्त येसुमी गुम्तीक खिं लशा, मुर आन कली शेंदीमी बाक्त।

22 मेको आ शेंशो नेंशा, नेल्ल छक लाक्मा बाक्त। मारदे हना सास्त्री आन लोव्र खोदेशो ममाइ। अधिकार पाइशो लोव्र पा शेंदीमी बाक्त। सास्त्री यहूदी आन कली परमप्रभु यावे आ अरेशो लोव्र शेंब बाकशो बाक्तेक्म। मत्ती ७:२८-२९

23 मिनू मेको गुम्तीक खिंमी ग्रांग्रा दिचा डा वोलमी सुम्शो मुर का बाक्माक्त।

24 मिनू मेको वाइ ब्रेशशा “ए नासरथ डा येसु, मार पमुया डा? आंइ कली खतम पोक्थ जाक्नी? गो इन कली तुइक्नीकी। गे परमप्रभु यावे आ योव्रशो ननी” देंमा बाक्त। मर्कूस ५:७

25 मिनू येसुमी वोल कली “सिक्सी पावो। मिनू घूडो” दे हुइक्ता बाक्त। मर्कूस ९:२६

26 मिनू ग्रांग्रा दिचा डा वोलमी मुर कली दिड खोल्शा, वाइ ब्रेशशा घूमाक्त।

27 मोदुम्शो तशा, मुरपुकी छक लाक्शा “मार बाक्म माइ? नक शेंतीक लोव्र बाक्म कोर में? अधिकार पाइशो लोव्र पवानु, ग्रांग्रा दिचा डा वोलम लायो टीबाक्तेक्म” देंमुमा बाक्त।

28 मिनू गालील रागीमी तेइ तेइ येसु आ पर्बम लोव्र ब्रना ब्रन लमाक्त।

रोइ पाइब आन कली सापाइशो

29 मिनू वोल कली गुंडशा, येसु गुम्तीक खिं रे सिमोन नु अन्द्रीयास वोबु आस खिंम जाकदीम्माक्त। मिनू याकूब नु यूहन्ना यो येसु नु काथा बाक्सा बाक्त।

30 मिनू जाकदीम्मानु, सिमोन आ शिमी जरो पा गोल्लो बाक्माक्त। मिनू येसु कली तुइक्पदमे बाक्त।

31 मिनू येसु मेको आ नेक्था लशा, आ गुड ग्याइशशा पोकगा बाक्त। मोपा पोकगानु, जरो जाम्माक्त। मिनू सेस दुम्शा, मेको आन कली मान पा थुल्मी बाक्त।

32 मिनू नां रिक्मेनु, मेको सहर डा मुरपुकीमी रोइ पशो नु वोल्म सुम्शो मुर नेल्ल आन कली चाक्मे बाक्त।

33 सहर डा मुर नेल्ल खिं डा लाप्चो आ डोंइती खुम्समा बाक्त।

34 मिनू येसुमी रोइ पशो शुश मुर आन कली सापदा बाक्त। मिनू शुश वोल् आन कली हुइशशा खेरमी बाक्त। वोल् आन कली लोत्र पचा मगेवा बाक्त। मारदे हना वोल्पुकीमी येसु कली तुइशशो बाक्तेक्म। प्रेरित १६:१७-१८

35 आ दीसा सुनी नां मसोव्रथु, येसु बोक्शा मेकेर रे गाक्शा, सुइ मबाक्तीकेमी जाक्दीशशा, प्रार्थना पवा बाक्त। मत्ती १४:२३; मत्ती २६:३६; लूका ५:१६; लूका ११:१

36 मिनू सिमोन नु मेको नु बाक्बपुकीमी येसु कली माल्मे बाक्त।

37 मिनू ग्रुम्शा, येसु कली “मुर नेल्लेमी इन कली माल्शो बाक्नीम” दे मदमे बाक्त।

38 मिनू येसुमी “मेकेर रे लशा, एर ओंथ गाउं सहर हिरशा लय। मारदे हना मेकेर यो शेंथ जाक्ती” देंमाक्त।

39 मिनू गालील रागी नेल्ल हिरशा, ग्रुम्तीक खिंमी शेंबाक्माक्त। वोल् आन कली खेरबाक्माक्त।

कोर पाइब कली सापाइशशो

मत्ती ८:२-४; लूका ५:१२-१६

40 मिनू कोर पाइब का जाक्शा, येसु आ डोंइती आ पोकच थेक्शा “सापाइक्चा दाक्ताक्नी हना, आं कली सापाइक्ने चाप्नीनी” दे सेउ पशा पुना बाक्त।

41 मिनू येसुमी शिशी पा आ गुड दिंशा, कोर पाइब कली थिशा “गो सापाइक्चा दाक्नुड। साडो” देंमाक्त।

42 मो देंमेनु, कोर सामाक्त।

43 मिनू येसुमी “सुइ कली मशेंदो। मर्कूस ३:१२

44 चढ़ेब आ डोंइती लशा, इ साशो रां कोंइदो। मिनू मुर नेल्ल आन कली “गो साती” दे तुइक्पाइक्चा कली मोसाम देशो खोदेशो पा चढ़ेवो” दे माइशशा सोइक्ता बाक्त। मर्कूस ७:३६; लेवी १४:२-३२

45 मिनू साशो मुर मेकेर लशा, दोपा सामे, मेको लोत्र तेइ तेइ ब्रपदा बाक्त। मोदेशो लोत्र ब्रतीके येसु सहर सहरमी गाक्ने मचबा बाक्त। मोपतीके शुश मुर मबाक्तीकेमी बाक्माक्त। तन्न मुरपुकी तेइ तेइ रे जाक्बाक्मा बाक्त।

## 2

गुड खोइली मदुक्ब कली सापाइशशो

मत्ती ९:१-८; लूका ५:१७-२६; यूहन्ना १:१९-२७

1 नाक्त का निक्शी नोले कापेरनाउम लेम्माक्त। मिनू मुरपुकीमी “येसु खिंमी बाक्ब” दे तुइक्तमे बाक्त।

2 मिनू मेकेर शुश मुर खुम्सीशा, लाप्चोमी यो मुरपुकी देल्मा बाक्त। मिनू येसुमी मेको आन कली परमप्रभु यावे आ लोत्र शेंदीमी बाक्त।

3 मिनू ४ जना मुरपुकीमी गुड खोइल मदुक्ब मुर का कुरशा चाक्मे बाक्त।

4 शुश मुर देल्तीके येसु आ डोंइती चाक्दीन्ने मचाप्मे बाक्त। मिनू खिं डोइशशा, फुल्लु याक्शा, ओंइतीके सेल्मे बाक्त। मिनू गुड खोइल मदुक्ब कली कुरशो ब्राख्ये एर ओंथ डोरीम पाइशशा, ओंखां पा येसु आ डोंइती तोक्गमे बाक्त।

5 मिनू येसुमी मेको आन कली मो पशो तशा, थमा सुइय्यीमी बाक्त, दे तुइक्ता बाक्त। मिनू गुड खोइली मदुक्ब कली “आं तौ, इ पाप क्याम्साक्व” देंमाक्त।

6 मेकेर सास्त्रीपुकी यो बाक्शो बाक्मा बाक्त।



7 मेकोपुकीमी येसु आ लोत्र नेंशा, आन थुंमी “दोदेशो लोत्र पवा? परमप्रभु यावे कली शुक्शी पाइबाकत। सुमी पाप क्याम्ने चाप्बा डा?” दे मिम्तमे बाकत। भजन संग्रह १३०:४; यसैया ४:३, २५

8 मिनु येसुमी आन मिम्शो तुइशशा, मेको आन कली “मारदे मोदेशो मिम्तीनी?

9 गुइ खोइल मदुक्ब कली ‘इ पाप क्याम्साक्व’ देंचा देय ‘छुल बोक्शा, इ ब्राख्ये कुरशा, एर ओंथ हिरशा कोइदो’ देंचा, तेको सक्ति कोइतीक लोत्र बाक्बा?

10 रागीमी जरमेशोमी पाप क्याम्चा अधिकार तशो बाक्ब, दे गेपुकीमी यो तुइक्ताक्नी” देंमाकत। मिनु गुइ खोइली मदुक्ब कली

11 “छुल बोक्शा, इ ब्राख्ये कुरशा, इ खिं लेतो” दे मदा बाकत।

12 मिनु नेल्ल आन डोंइती मेको बोक्शा, आ ब्राख्ये जो गुप्शा कुरशा, गाक्माकत। मिनु नेल्लेमी छक लाक्शा “ओदेशो छक लाक्चा डा गेय मुल सम्म गेनायो मतशो नय” देंशा, परमप्रभु यावे कली ठेयब सेल्मे बाकत।

लेवी कली ब्रेशो

मती ९:९-१३; लूका ५:२७-३२

13 मिनु येसु मेकेर रे लशा, लेशा समुन्द्र आ नेक्था बाक्माकत। मिनु मेकेर शुश मुर देल्मा बाकत। मिनु येसुमी मेको आन कली शेंदीमी बाकत।

14 मिनु मेकेर रे लशा, तिरो पोक्ब अल्फयस आ तौ लेवी कली तिरो पोक्तीकेमी बाक्शो तशा “आं नोले खोइय्मी” दे ब्रेत्ता बाकत। मिनु मेको बोक्शा, आ नोले खोदा बाकत।

15 मिनु लेवी आ खिंमी जना जन बाक्मानु, तिरो पोक्ब नु पापी शुश नु काथा जामे बाकत। मारदे हना शुशेमी येसु आ नोले खोदमे बाकत।

16 मिनु फरिसी आन दाते डा सास्त्रीपुकीमी येसु कली पापी नु तिरो पोक्बपुकी नु काथा बाक्शा जशो तशा, येसु आ शेंसीब आन कली “मारदे तिरो पोक्बपुकी, पापीपुकी नु काथा बाक्शा जाइबा?” देंमा बाकत।

17 मिनु येसुमी मेको आन लोत्र नेंशा, मो देंब आन कली “रोइ मपशो मुर डाक्टर ममाल्नीम। रोइ पशो मुर ला डाक्टर माल्नीम। ठीक पाइब कली ममाइ, पापी आन कली ब्रेत्थ जाक्शो नड” दे माइक्मी बाकत।

माइजा बाक्चा

मती ९:१४-१७; लूका ५:३३-३८

18 यूहन्ना आ शेंसीबपुकी नु फरिसीपुकी माइजा बाक्बाक्मा बाकत। मिनु मुरपुकीमी येसु आ नेक्था जाक्शा “यूहन्ना आ शेंसीबपुकी नु फरिसी आन शेंसीबपुकी माइजा बाक्नीम। इन शेंसीबपुकी चहिं माइजा मबाक्नीम। मारदे मो पशो नमी?” दे हिल्लो पामे बाकत। फरिसी रिती थिती सेल्शा, रिम्शो पचा कली कोइब यो बाक्शो बाक्तेक्म।

19 मिनु मोदे हिल्लो पाइब आन कली येसुमी “जन्तीपुकी ग्युम्ले नु बाक्मानु, माइजा बाक्ने मचान्नीम।

20 काबु चहिं ग्युम्ले नु फ्राचा पुंडसीनीम। मिनु माइजा बाक्नीम।

21 सुइमी माइत वामी नक वा क्येप्शा मफेरनीम। फेरतेक्म हना, नक वा चुप्शा, माइत वा कली खाक्शा, डोंइती डा गाक्शो क्येडा ठेयब सेल्ब। मारदे हना माइत नु नक मगारब।

22 सुइमी माइत कुशुल के थैलोमी नक अडगुर शांबु कुर मपाइनीम। कुर पाम्तेक्म हना, नक अडगुर शांबु बोरशा, थैलो खाक्शा क्युप्ब। थैलो यो गाक्ब। नक शांबु नक थैलोमी ला गारब” दे शेंदीमी बाकत।

नाइक्तीक नाक्त आ पर्बम लोत्र

मती १२:१-८; लूका ६:१-५

23 मिनु काबु नाइक्तीक नाक्त येसु नु आ शेंसीबपुकी चेरब रू लां गाक्मा बाकत। मिनु गाक्मानु, शेंसीबपुकीमी चेरब बाला शोइक्चा गोत्रमे बाकत।

24 मिनु फरिसीपुकीमी येसु कली “कोइडीन, नाइक्तीक नाक्तीमी पचा मदुम्ब गेय मारदे पाइनीमी?” दे मदमे बाकत।

25 मिनू येसुमी “दाऊद नु आ वारचपुकी शोत्रलु बेक्मानु, दाऊदमी मार पवा, मेको ब्रेक्शो लोत्र गेनायो मपढेनी?

26 टेयब चढेब अबीयाथार आ पालामी दाऊद परमप्रभु यावे आ खिं ओत्रशा, परमप्रभु यावे कली चढेशो शोब्ले शोल्शा जशा, आ वारच आन कली यो जचा गेवा बाक्त, दे मपढेनी? मेको शोब्ले चढेबपुकीमी ला जाइबाक्मा बाक्त। अर्को मुरपुकीमी जचा मदुम्ब बाक्माक्त। १सामुएल २१:७; लेवी २४:९

27 नाइक्तीक नाक्त मुर आन कली वोइश्शो बाक्ब। मुरपुकी नाइक्तीक नाक्त कली ममाइ। प्रस्थान २०:१०

28 मोपतीके रागीमेशो दा नाइक्तीक नाक्त मार पचा, मार मपचा मेको अधिकार पाइब बाक्ब” दे शेंदीमी बाक्त।

### 3

नाइक्तीक नाक्त आ पर्वम लोत्र  
मत्ती १२:९-१४; लूका ६:६-११

1 मिनू येसु गुम्तीक खिं लेंशा ओत्रमाक्त। मेकेर गुइ सोत्रशो मुर का बाक्माक्त।

2 मिनू फरिसी नु सास्त्रीपुकीमी “नाइक्तीक नाक्ती सापाइक्तीक गेय पाइबा कों” दे योत्रकी पा कोत्रडमे बाक्त, मारदे हना दोस गेचा माल्शो बाक्मा बाक्त।

3 मिनू येसुमी गुइ सोत्रशो मुर कली “एक पिवो” दे मदा बाक्त।

4 मिनू योत्रकी पा कोत्रब आन कली “नाइक्तीक नाक्त शिशी पचा देय मरिम्शो गेय पचा? ब्रोंइचा गेचा देय साइक्चा? तेको लोत्र अरेतीक लोत्र नु गारबा?” दे हिल्लो पवानु, सिक्सी पामे बाक्त।

5 मिनू सिक्सी पा बाक्शो तशा, आ थुं खाइश्शा गाइश्शा, मेको आन कली का का पा कोत्रशा, गुइ सोत्रशो कली “इ गुइ दिंदो” दे मदा बाक्त। मिनू मेकोमी गुइ दिंसेनु सामाक्त।

6 मिनू फरिसीपुकी गूशा, हेरोदी आन कली शो शु खुष्शा “मेको कली दोपा साइक्चा ताइनय” दे लोत्रसी पामे बाक्त।

मुर आन कली सापाइश्शो

मत्ती १२:१५-१६; लूका ६:१७-१९

7 मिनू नोले येसु नु आ शेंसीबपुकी सहर रे गाक्शा, गालील डा समुन्द्र आ नेक्था जाक्दीम्मा बाक्त। शुश मुरुमी आन नोले खोदमे बाक्त। मेको खोइक्बपुकी ते ते डा बाक्मा बाक्त देंशा हना, गालील नु यहूदीया रागी डा, मत्ती ४:२५

8 यरूसलेम सहर डा, इदुमेआ रागी डा, यर्दन खोला आइक्ची हांबु डा टायर नु सीदोन सहर डा बाक्मा बाक्त। मेकोपुकीमी येसु आ पशो गेय आ पर्वम शुश लोत्र नेंशा जाक्मा बाक्त।

9 मिनू येसुमी आ शेंसीब आन कली “डोंगा का चाक्शा वोतीन” देंमाक्त। मारदे हना शुश मुरपुकीमी नेष्शा चुशा, येसु आ नेक्था जाक्चा बोल पामे बाक्त।

10 येसुमी रोइ पाइब शुश आन कली सापदा बाक्त। रोइ पाइबपुकीमी “थिचा तडल” दे आ नेक्था जाक्मा बाक्त।

11 प्रांग्रा दिचा डा वोलपुकीमी येसु कली तशा, पोक्च थेक्शा “परमप्रभु यावे आ तौ ननी” दे वाइ ब्रेम्मा बाक्त। लूका ४:४१

12 मिनू येसुमी “एको लोत्र मब्रपाइक्चा” दे माइक्मी बाक्त। मर्कूस १:४३-४४

१२ जना शेंसीबपुकी वोइश्शो

मत्ती १०:१-४; लूका ६:१२-१६

13 काबु येसु डांडा डाइसे बाक्त। मिनू सु सु आन कली योत्रडा, मेको आन कली आ नेक्था ब्रेत्ता बाक्त। मिनू मेको ब्रेश्शोपुकी जाक्मा बाक्त।

14 आं नु काथा बाक्चा कली नु शेंथ सोइक्चा कली

15 वोल खेरतीक अधिकार तशा बाक्मल, दे १२ जना आन कली वोइक्मी बाक्त।

16 मेको १२ जना आन नें सिमोन आ याइनी नें पत्रुस वोदा बाक्त।

17 जब्दी आ तौ याकूब नु आ लोकब यूहन्ना, मेको आस कली बोअनेरगेस नें वोदा बाक्त। बोअनेरगेस देशो “बुंबु आ तौ नस” दे रुम्सीब। लूका ९:५४

18 मिनु अन्द्रीयास, फिलीप, बारथोलोमाइ, मत्ती, थोमास, अल्फयस आ तौ याकूब, थदेयस, सिमोन कनानी

19 नु यहूदा इस्कारीयोती बाक्मा बाक्त। यहूदा चहिं नोले येसु कली साइक्ब आन कली लां कोईब दुम्माक्त।

येसु नु आ खिं डा मुर

20 मिनु लेशा शुश मुर खुम्समानु, येसु नु आ शेंसीबपुकी जचा कली यो नाइक्चा मतामे बाक्त।

21 मिनु येसु आ खिं डा मुरपुकीमी मेको नेशा “आ निप्स ग्यशो दुम्माक्त, दोपा यो खिं लाइक्चा” दे ब्रथ लमा बाक्त। मर्कूस ६:४; यूहन्ना ७:५; यूहन्ना ८:८४

येसु नु वोलपुकी

मत्ती १२:२४-३२; लूका ११:१४-२३

22 यरूसलेम रे यिशो सास्त्रीपुकीमी “बेल्जीबुलमी सुम्शो बाक्माक्त। वोल आन पिप आ सक्तिमी वोल आन कली खेरबाक्माक्त” देमा बाक्त। मत्ती ९:३४

23 मिनु येसुमी मेको आन कली आ नेक्था ब्रेशा, कथा सेल्शा “सैतानमी सैतान कली खेरने चाप्बा डा?

24 राज्य का डा मुरपुकी जिशा ब्राशा गाक्तेक्म हना, मेको राज्य जाम्शा लाइब।

25 खिं का डा मुरपुकी जिम्तेक्म हना, मेको खिं मलीब।

26 सैतान आ राज्यम जिशा ब्रातेक्म हना, आ राज्य नुष्शा लाइब।

27 बोल्यो मुर आ खिंम सुइ खुइ पथ ओव्रने मचाप्नीम। बोल्यो मुर कली फ्रेशा पाइशशा वोइशशा ला, आ मारेइ मारेइ खुइ पने चाम्सीब।

28 नोफा दाइशशा नेनीन, मुरपुकीमी पाप पाम्तेक्म हना यो, आन पशो पाप क्याम्चा ताइनीम। मरिम्शो लोत्र पाम्तेक्म हना यो, मेको पाप यो क्याम्चा ताइनीम।

29 तन्न परमप्रभु यावे आ सोक्त आ पर्वम मरिम्शो लोत्र पशो पाप चहिं मक्याम्सीब। मोदेशो लोत्र पाइब आ पाप गेना हना यो लीब” देमाक्त। हिबू ६:४-६

30 मारदे हना मेकोपुकीमी येसु आ पर्वम “येसु ग्रांघा दिचा डा वोलम सुम्शो बाक्माक्त” देशो बाक्मा बाक्त। यूहन्ना १०:२०

येसु आ खिं डा मुर जाक्शो

मत्ती १२:४६-५०; लूका ८:१९-२१

31 मिनु येसु आ ममा नु आ लोकबपुकी आ बाक्तीक लाङगामी जाक्मा बाक्त। मिनु “गो गुम्थ जाक्तक” दे तुइक्पाइक्थ मुर सोइक्तामे बाक्त।

32 मेकोपुकी जाक्मानु, शुश मुर खुम्सीशा, येसु आ नेक्था बाक्शो बाक्मा बाक्त। मिनु मेको नेक्था बाक्बपुकीमी “इन ममा नु इन लोकबम लोकब लाङगाम जाक्शा, इन कली ब्रेत्ताक्मे” दे मदमे बाक्त।

33 मिनु येसुमी “आं ममा नु आं लोकबपुकी सु नमी?” देशा,

34 आ नेक्था निशशा बाक्ब आन कली कोत्रशा “एकेर बाक्ब आं ममा नु आ लोकबपुकी नम।

35 परमप्रभु यावे आ दाक्शो पाइबपुकी आं लोकब नु आं ममा नम” देमाक्त।

## 4

वांचेर शोक्शो कथा

मत्ती १३:१-९; लूका ८:४-८

1 मिनु समुन्द्र आ नेक्था लशा, मेकेर बाक्शा, लेंशा शेंचा गोवा बाक्त। मेकेर शुश मुर खुम्सीशो बाक्मा बाक्त। आं चहिं डोंगा काम डोइश्शा बाक्शो बाक्माक्त। आ लोत्र नेंबपुकी समुन्द्र आ नेक्था बाक्मा बाक्त।

2 मिनु कथा सेल्शा, शुश लोत्र शेंदा बाक्त।

3 मिनु शेंना शेंन “नेनीने, मुर का वांचेर शोक्थ लमाक्त।

4 मिनु ब्वारानु, गेडा का निक्शी लांमी जुक्तमे बाक्त। मिनु चिक्बीमी गुप्शा जामे बाक्त।

5 गेडा का निक्शी ग्याडग्रो खपीमी जुक्तमे बाक्त। मिनु शुश खप मबाक्तीके थे थु बुक्शा, जिव जाव वामा बाक्त।

6 तन्न नां पवानु, सोल सुल बेक्मा बाक्त, मारदे हना शाक्श थोक्चा मतथु सोत्रमा बाक्त।

7 का निक्शी चू आ दातेमी जुक्तमे बाक्त। मिनु चूमी सुम्शा, बारचा मगेवा बाक्त। मिनु मसिम्माक्त।

8 का निक्शी चहिं रिम्शो खपीमी जुक्तमे बाक्त। मिनु वाशा बारशा, शुश ग्रेल्शा, गेडा का के ३०, ६०, सहे का सम्म सिम्मा बाक्त” दे शेंदीमी बाक्त।

9 मिनु “सु के नेंब नोफा बाक्मे, मेकोमी नेंनल” देमाक्त।

वांचेर शोक्शो कथा आ अर्थ

मती १३:१०-१७; लूका ८:९-१०

10 मिनु आ लोत्र नेंबपुकी गाक्मा नोले, येसु नु गाक्ब नु आ १२ जना शेंसीबपुकीमी कथा सेल्शा शेंशो लोत्र आ पर्बम हिल्लो पामे बाक्त।

11 मिनु येसुमी “परमप्रभु यावे आ राज्य दोदेशो बाक्ब दे इन कली रुप्तीक थुं गेशो बाक्त। लाडगाम बाक्ब आन कली चहिं कथा सेल्शा शेंनुडमी।

12 मारदे हना आन मिक्चीमी कोत्रनीम, तन्न मताइनीम। आन नोफामी नेंनीम तन्न मरुप्नीम। कोत्रशा रुप्तेक्म हना, आन थुं लेश्शा, आन पाप क्याम्चा ताम वा” देमाक्त। यसैया ६:९-१०

वांचेर शोक्ब आ पर्बम शेंशो

मती १३:१८-२३; लूका ८:११-१५

13 मिनु येसुमी “मेको कथा आ अर्थ मरुप्नी? मेको लायो मरुप्नी हना, अरु कथा डा शेंतीक दोपा रुप्ने चाप्नीनी?

14 वांचेर शोक्बमी परमप्रभु यावे आ लोत्र शोक्ब।

15 लांमी शोक्शो दोदेशो बाक्नीम देशा हना, लोत्र नेन्मेनु, सैतानमी आन थुंमी रुप्शो लोत्र योल्ब।

16 ग्याडग्रो खपीम शोक्शो खोदेशोपुकीमी लोत्र नेंशा, बिश्शा ग्येरसीनीम।

17 तन्न शाक्श थोक्चा मतथु, शुश मलीनीम। लोत्र आ पर्बम श्येत गेचा पुंइसाक्म हना, थु प्रोइशा गाक्नीम।

18 चू आ दातेमी जुक्शो खोदेशोपुकीमी लोत्र नेंनीम।

19 तन्न दोपा ठेयब दुम्नुडा? दोपा क्येत चेमु? दोपा मारेइ मारेइ ताइनुडा? दे मिम्शा, आ थुंमी तेक्ब। मिनु आ नेंशो लोत्रमी फल मसिप्ब।

20 रिम्शो खपीम शोक्शो खोदेशोपुकीमी चहिं परमप्रभु यावे आ लोत्र नेंशा, आन थुंमी वोइक्नीम। मिनु गेडा का के ३०, ६० सहे का गेडा सम्म सिश्शा ग्रेल्नीम” दे शेंदीमी बाक्त।

परमप्रभु आ राज्य आ पर्बम शेंशो

लूका ८:१६-१८

21 मिनु येसुमी “मार, बती पाथीमी गुप्शा वोइक्चा कली, खाट आगामी वोइक्चा कली दानीमी डा? मफारथु वोइक्नीमी, ममाइ डा? मती ५:१५

22 खुइश्शो मखुइक्सीब, सुम्शा वोइश्शो यो हाक्सीब। मती १०:२६-२७; लूका १२:२

23 सुइ के नेंब नोफा बाक्त हना, नेंनल” देमाक्त।

24 मिनु येसुमी “गे मार नेंनी, मेको नोफा दाइश्शा नेनीने। दोपा नाक्शा गेनीनी, मोपा नाक्चा पुंइसीनीनी। मती ७:२

- 25 मारदे हना थीब तेम्शा गेचा पुंडसीब, मथीबमी चहिं आइक्के बाकशो यो रोइक्का पुंडसीब” दे शेंदीमी बाक्त। मत्ती १३:१२-१३
- 26 मिनु “परमप्रभु यावे आ राज्य ओदेशो बाकब, मुर कामी आ रूमी वांचेर शोकब।
- 27 मिनु नाकदो इप्ब, सुनी बोक्ब। शोकशो वांचेर दोपा वाबा, दे मारेइ मतुइक्ब। याकूब ५:७
- 28 रू आंमा मेको वापाइक्ब। वाशा, बाला गूशा, आख सिप्ब।
- 29 तन्न मीमेनु, रिक्ब। मारदे हना रिक्ची जाकशो बाक्ब” देंमाक्त।

तोरी वांचेर

मत्ती १३:३१-३२; लूका १३:१८-१९

- 30 मिनु “परमप्रभु यावे आ राज्य मार नु गारबा? दोदेशो कथा सेल्शा रूप्पाइक्नन्नी?
- 31 वांचेर नेल्ल आन क्येडा आइक्च तोरी गेडा बाक्ब।
- 32 तोरी गेडा वाशा, शुश राशी पाइशशा गिग घांस आन क्येडा टेयब रवा दुम्ब। मेको रवामी चिकबीमी गेवोत्र सेल्शा, फाम्सीशा बाक्ने चाप्नीम। परमप्रभु यावे आ राज्य मेको खोदेशोन बाक्ब” दे शेंदीमी बाक्त।
- 33 मुरपुकीमी रूप्ने चाप्मेक्ल, दे शुश कथा सेल्शा, परमप्रभु यावे आ लोत्र शेंना शेंन बाक्माक्त।
- 34 कथा मसेल्थु, लोत्र मपाइक्बाक्माक्त। आ शेंसीब आन कली मेको कथा आन अर्थ यो नेल्ल रूप्पाइक्बाक्माक्त।

फश गिवार तेक्शो

मत्ती ८:२३-२७; लूका ८:२२-२५

- 35 मोपा शेंन थुम्शा डा मिन, नां रिक्मेनु, येसुमी आ शेंसीब आन कली “समुन्द्र शोकशा, आइक्ची हांबु जाक्दीय्य” देंमाक्त।
- 36 मिनु देल्शो मुरपुकी नु ब्राशा, डोंगा का डोइशशा, लमा बाक्त। अरु डोंगा का निक्शी यो लमा बाक्त।
- 37 मिनु लमानु, टेयब फश गिवार पचा गोवा बाक्त। फश गिवार पवानु, ब्वाक्कु डोंगामी ओव्रशा, गुम्चवा बाक्त।
- 38 येसु चहिं पिया थांइसीशा इप्शा निन्द्रा पवा बाक्त। शेंसीबपुकीमी “ए शेंब, गो नेल्ल ब्वाक्कुमी गुम्शा बेक्चांइतय दे ममिम्तीनी?” देंशा सेंदमे बाक्त।
- 39 मिनु येसु बोक्शा, फश गिवार कली हुइशशा, समुन्द्र कली “ब्वालेइ पावो, मदुक्को” देंमेनु, फश गिवार खा दिक्माक्त। मिनु सिक्सी दुम्माक्त।
- 40 मिनु शेंसीब आन कली “मारदे हिंनी? आं कली थमा मसुइक्नीनी?” देंमाक्त।
- 41 मेकोपुकी चहिं छक लाकशा, शुश हिंशा “फश नु ब्वाक्कुमी यो आ लोत्र टीबाक्ताक्से। एको सु बाक्म माइ?” दे लोत्र पमुमा बाक्त।

## 5

वोल आन कली पोत्रम ओव्रचा गेशो

मत्ती ८:२८-३४; लूका ८:२६-३९

- 1 मिनु आइक्ची हांबु गेरासीनी आन रागी जाक्दीम्मा बाक्त।
- 2 मिनु डोंगा रे तोंइसीशा, येसुमी बेक्शो मुर थिम्तीके रे पिशो ग्रांग्रा दिचा डा वोलमी ब्रीशो मुर का कली गुमा बाक्त।
- 3 मेको मुर बेक्शो मुर थिम्तीकेमी बाक्बाक्माक्त। सुइमी मेको कली खिंमी वोइक्ने मचाप्मे बाक्त।
- 4 आ गुइ खोइली फ्रेंशा, साडलोमी पाइशशा वोदमेनु यो, साडलो प्रोइशशा प्रोक्बाक्माक्त। सुइमी मेको कली ग्राशा तेक्ने मचाप्बाक्मा बाक्त।
- 5 नाकदो नाक्ती बेक्शो मुर थिम्तीके नु डांडामी हिरशा, वाइ ब्रेशशा, फुल्लुमी थोक्सीशा, तेस्सीशा, गार सेल्सी बाक्माक्त।
- 6 मेको मुरुमी येसु कली डोन रे तशा, दोरशा पिशा, सेउ पवा बाक्त।

7 मिनू ठेयब सेंदामी ग्रीशा “परमप्रभु यावे, नेल्ल क्येडा ठेयब आ तौ, गो निकशी मार पमुसा डा? परमप्रभु आ नें थिशा, श्येत मगेयीनी दे पुंडननी” देंमाक्त। मर्कूस १:२४

8 मारदे हना येसुमी वोल कली “ए ग्रॉग्रा दिचा डा वोल, एको मुर रे गूडो” दे माइशो बाक्माक्त।

9 मिनू “श्येत मगेयीनी, दे पुंडननी” देंमेनु, येसुमी “इ नें मार में?” दे हिल्लो पवा बाक्त। मिनू मेकोमी “आं नें फौज बाक्ब, मारदे हना गो शुश बाक्नीकी” देंमाक्त।

10 मिनू “आंड कली एको रागी रे मखेरचा नकी” दे पुना बाक्त।

11 मेको डांडामी शुश पोत्र जोन जोन बाक्शो बाक्मा बाक्त।

12 मोपतीके वोलपुकीमी “मेको पोत्र गे लशा, आन रांमी ओत्रचा गेकी” दे पुन्मे बाक्त।

13 मिनू येसुमी लशा, ओत्रचा गेमी बाक्त। मिनू ग्रॉग्रा दिचा डा वोलपुकी मुर रे गूशा लशा, पोत्र आन रांमी ओत्रमा बाक्त। मिनू मेको हजार निकशी पोत्रपुकी रोंगु रे यिना यिन, समुन्द्रमी गूश्मा बेक्मा बाक्त।

14 पोत्र योत्रबपुकीमी मो दुम्शो तशा, प्रोक्शा, सहर नु मेको रागीमी लोत्र ब्रपदमे बाक्त। मिनू मुरपुकीमी “मार दुम्मे? दो दुम्मे?” दे तुइक्थ जाक्मा बाक्त।

15 मिनू येसु आ नेक्था जाक्शा, डोंइती वोलमी ब्रीशो मुर वा फेक्शा, साशा, येसु नु निशो तामे बाक्त। मेको कली साशो तशा, हिंमा बाक्त।

16 मिनू आन मिक्चीमी तशो तुइक्बपुकीमी नक जाक्शो मुर आन कली मार मार दुम्मे, मेको नेल्ल शोत्रडमे बाक्त।

17 मिनू मुरपुकीमी येसु कली “आंड रागी रे गूशा लने” देंमा बाक्त।

18 मिनू येसु डोंगामी डोंइसेनु, डोंइती वोलम ब्रीशो मुरुमी “गे नु बाक्चा गेयीनी” दे पुना बाक्त।

19 मिनू येसुमी चहिं बाक्चा मगेथु “इ खिं लेशशा लशा, इ मुर आन कली प्रभुमी इ कली दोदेशो रिम्शो पवा, गिश शिशी कोंइदा तुइक्पतो” दे आ खिं सोइक्ता बाक्त।

20 मिनू लशा, आ खिंमी ला ममाड, डेकापोलीस रागी नेल्ल हिरशा, येसुमी दोदेशो रिम्शो पवा शुश मुर आन कली तुइक्पदा बाक्त। मिनू नेंबपुकीमी “गिश रिम्शो दुम्माक्त” दे छक लाक्मा बाक्त। मर्कूस ७:३१

याइरस आ तमी

मत्ती ९:१८-२६; लूका ८:४०-५६

21 मिनू येसु डोंगा डोंइशशा, समुन्द्र शोक्शा, आइक्ची हांबु जाक्दीशशा, समुन्द्र आ नेक्था बाक्माक्त। मिनू शुश मुर देल्मा बाक्त।

22 मिनू याइरस नें पाइशशो गुम्तीक खिं डा ठेयब मुर का जाक्शा, येसु कली तशा, आ डोंइती बाप्शा, आ पोक्च थेक्शा

23 “आं तमी बेक्चा चिक्ताक्व। आं खिं लशा, इन गुइ आं आल आ तार वोतीने। मिनू आ रोइ साशा ब्रोंइब” दे पुना बाक्त।

24 मिनू येसु मेको नु लमाक्त।

मिनू शुश मुर मेको आ नोले खोइशशा, हुल पा क्राक्शा लमा बाक्त।

25 मेको शुश मुर आन दातेमी १२ बर्स डोंइती रे हुश याप्शो रोइ पाइब मीश मुर का यो बाक्माक्त।

26 शुश डाक्टर आन कली कोंइशा यो, आ रोइ मसाशो बाक्माक्त। डाक्टर आन गुइ रे पा शुश श्येत जशो बाक्माक्त। आ रोइ चहिं मसाथु, डोंइती क्येडा सारो दुम्शो बाक्माक्त। आ बाक्शो मारेइ मारेइ यो नुप्शो बाक्माक्त।

27 मेको मीश मुरुमी “मेको येसु माइशशो मुरुमी रोइ पशो आन कली सापाइक्ने चाप्ब” देशो लोत्र नेशो बाक्माक्त। मिनू शुश मुर आन दातेमी ओत्रशा, नोले रे पा येसु आ फेक्शो वा थिवा बाक्त।

28 मारदे हना “आ फेक्शो वा थिचा ला ताता हना यो, सानुड” दे मिम्शो बाक्माक्त।

29 मिनू थिवानु, आ हुश याप्चा देक्माक्त। मिनू साडा बाक्त दे तुइक्ता बाक्त।

- 30 येसुमी आइक्के सापाइक्तीक सक्ति यूशो तुइशशा, फिर लेशशा कोव्रशा “सुम आं फेक्शो वा थिवा?” दे हिल्लो पवा बाक्त। लूका ६:१९
- 31 मिनु शेंसीबपुकीमी “मिश डा मुरुमी इन कली नेप्नीम। मिनु गे ‘सुम थियी’ देंनीनी?” देंमा बाक्त।
- 32 येसुमी चहिं एर ओंथ नेल्ल मिक्च हिरशा, सुम थियी दे तुइक्चा मला बाक्त।
- 33 मिनु मीश मुरुमी हिंशा खिंखि पा पिशा, येसु आ डोंइती बाप्शा, पोक्च थेक्शा, लोव्र नेल्ल शोव्रडा बाक्त।
- 34 मिनु येसुमी “आं तमी, गे थमा सुइक्तीवी, मिनु इ रोइ साते। इ थुं नाइशशा बाक्को। मुल सास डा सास बाक्को” देंशा डा मिन सोइक्ता बाक्त।
- 35 मोपा येसुमी मीश मुर नु लोव्र पवानु, याइरस आ खिं रे जाक्शो मुरपुकीमी याइरस कली “इ तमी बेक्त। शेंब कली मारदे श्येत गेचा” दे मदमे बाक्त।
- 36 येसुमी मेको आन देंशो मनैखु पा, याइरस कली “महिनो। थमा सुइक्ना सुइक्न बाक्को” देंमाक्त।
- 37 मिनु आ नोले खोइक्ब आन कली लचा मगेथु, पत्रुस, याकूब नु आ लोक्ब यूहन्ना आन कली ला काथा लदा बाक्त। मत्ती १७:१
- 38 मिनु जाक्दीशशा, रोंका पा डाक्ब मुर शुश तवा बाक्त।
- 39 मिनु खिं ओव्रशा, डाक्ब आन कली “मारदे रोंका पा डाक्नीनी? मेको आल बेक्शो ममाइ, इप्शा बाक्शो बाक्ब” देंमाक्त। यूहन्ना ११:११
- 40 मिनु मेकोपुकीमी आ देंशो थमा मसुदमे बाक्त। “हल्लै, दोदेंशो लोव्र पवा” देंमानु, येसुमी मेको आन कली गुंइदीमी बाक्त। मिनु आल आ आंम आफ नु आ शेंसीब आन कली आल आ बाक्तीके ओइंदा बाक्त।
- 41 मिनु आल आ गुइ ग्याइशशा “तालीता कूमी” देंमाक्त। मेको लोव्र आ अर्थ “ए आल, बोक्को” देंशो रुम्सीब। लूका ७:१४; प्रेरित ९:४०
- 42 मिनु आल छुल बोक्शा, एर ओंथ हिरसे बाक्त। मेको आल १२ बर्स डा बाक्माक्त। मिनु मेकेर बाक्बपुकी मोदेंशो दुम्शो तशा, थाम्पा छक लाक्मा बाक्त।
- 43 मिनु येसुमी “सुइ आन कली मशेंचा। आल कली जचा गेसे” दे आम आफ आस कली देंमाक्त।

## 6

मुरपुकीम येसु कली थमा मसुइशशो

मत्ती १३:५३-५८; लूका ४:१६-३०

- 1 मिनु मेकेर रे लशा, आ बाक्तीके सहरमी जाक्दीम्माक्त। आ शेंसीबपुकी यो खोइशशा लमा बाक्त।
- 2 मिनु नाइक्तीक नाक्त गुम्तीक खिं लशा, मुर आन कली शेंचा गोवा बाक्त। मिनु आ शेंशो नेंब शुशेमी छक लाक्शा “मेकोमी ओदेंशो शेंचा ते रे शेंसे माइ? ओदेंशो निप्स पाइशशो लोव्र पचा दोपा जोक्गा? मेको आ गुइ रे दोदेंशो सक्ति पाइशशो गेय दुम्मे? यूहन्ना ७:१५
- 3 शी मुइब ममाइ डा? मरीयम आ तौ ममाइ डा? याकूब, योसेस, यहूदा नु सिमोन आन लोक्ब ममाइ डा? आ लोक्बपुकी गोपुकी नु मबाक्नीमी डा?” दे आन थुं मनुशो लोव्र पमुमा बाक्त। यूहन्ना ६:४२
- 4 मिनु येसुम मो देंब आन कली “तेइ तेइ परमप्रभु यावे आ लोव्र पाइब आन कली ठेयब सेल्शा मान पाइनीम। आंम रागी डा नु आंम जात डा, आंम खिं डा मुरपुकीमी चहिं महिक्नीम” दे माइक्मी बाक्त।
- 5 मिनु का निकशी रोइ पशो मुर आन कली आ गुइम थिशा सापाइक्चा डा लाक्शा, अरु सक्ति पाइशशो गेय कौंइने मचबा बाक्त।
- 6 मिनु “थमा मसुइय्यीमी बाक्त” दे तुइशशा, छक लाक्माक्त। मिनु एर ओंथ डा गाउं गाउंमी हिरशा, शेंना शेंन गाक्माक्त।

शेंसीब आन कली सोइशशो

मत्ती १०:१, ५; लूका ९:१-६

7 मिनु काबु आ १२ जना शेंसीब आन कली ब्रेशशा, निनिक्शी पा शेंथ सोइक्चा गोवा बाक्त। शेंसीब आन कली वोल खेरतीक सक्ति गेवा बाक्त। लूका १०:१

8 मिनु “जचा थोव्रक, क्येट, झोला मारेइ मलाइक्चा। कोक्के कुरशा,

9 जुत्ता लिक्शा, फेक्तीक वा का ला फेक्शा गाक्कीन।

10 गाउं सहर जाक्दीशशा, खिं कामी ओव्रशा, बास बाक्कीन। मेको गाउं सहर रे गाक्की मजाक्म सम्म बाक्कीन। खिं खिं याक्शा मबाक्कीन।

11 इन कली बाक्चा मगेथु इन शेंशां लोव्र यो मनंतेक्म हना, इन खोइली डा फुरक थुर थुर पाइशशा गाक्कीन। इन मो पशोमी मेको आन कली चिन्ड दुम्ब” दे माइशशा सोइक्तीमी बाक्त।

12 मिनु शेंसीबपुकी लशा, मुर आन कली “इन थुं परमप्रभु यावे गे लेत्तीन” दे नेंपाइक्ना पाइक्न गाक्मा बाक्त।

13 मिनु वोल आन कली गुंडशा खेरबाक्मा बाक्त। रोइ पशो मुर आन कली तेल खेक्शा, प्रार्थना पा सापाइक्बाक्मा बाक्त। याकूब ५:१४-१४

यूहन्ना कली साइशशो

मत्ती १४:१-१२; लूका ९:७-९; लूका ३:१९-२०

14 मिनु हेरोद पिपमी मेको लोव्र नेंना बाक्त। मारदे हना येसु आ नें तेइ तेइ ब्रशो बाक्माक्त। का निकशी मुरपुकीमी “ब्वाक्कुमी खुम्शा गुंडब यूहन्ना बेक्शो रे सेंचा पुंडसे बाक्त। मोपतीके सक्ति पाइशशो गेय पाइबाक्माक्त” देंबाक्मा बाक्त।

15 का निकशीमी “एलीया बाक्माक्त” देंबाक्मा बाक्त। का निकशीमी “साइ डा परमप्रभु यावे आ लोव्र पाइब आन दाते डा का, माइ” देंबाक्मा बाक्त।

16 हेरोद पिपमी मोदेशो लोव्र नेंशा “गो आ पिया क्योरपाइशशो यूहन्ना बेक्शो रे सेंचा पुंडसे बाक्त” देंमाक्त।

17 हेरोदमी हरोदनी कली ग्येरपाइशशा, यूहन्ना कली ग्याइक्पाइशशा, जेल्खानमी चोक्पाइशशा वोइशशो बाक्माक्त। मारदे हना हेरोदमी आ लोक्ब फिलीप आ मीश लाइशशा बाक्माक्त।

18 मिनु यूहन्नामी हेरोद कली “इन लोक्ब आ मीश लाइक्चा मदुम्ब” दे माइशशा बाक्माक्त। प्रस्थान २०:१४; लेवी १८:१६

19 मोदेशो आ परबम हेरोद आ मीशेमी चुरशा, यूहन्ना कली साइक्पाइक्चा माल्शो बाक्माक्त।

20 तन्न साइक्पाइक्ने मचाप्शो बाक्माक्त। मारदे हना हेरोद पिपमी “यूहन्ना ठीक पाइब नु रिम्शो थुं पाइशशो मुर बाक्ब” दे तुइशशा, यूहन्ना क्येडा हिंबाक्माक्त। मोपतीके साइक्चा मगेथु वोइशशो बाक्माक्त। मिनु यूहन्ना आ लोव्र नेंनं दाक्शा, आ थुं ग्येत्थ लुक्च दुम्शा, नोफा दाइशशा नेंबाक्माक्त।

21 काबु मार दुम्माक्त देशा हना, पिप आ जरमेशो नाक्ती मिम्चा कली हेरोद पिपमी आ दरवार डा गेय पाइब, सरकार डा गेय पाइब नु गालील डा टेयब मुर नेल्ल आन कली ब्रेशशा, टेयब भोज का गेवा बाक्त।

22 मिनु हेरोदनी आ तमीमी सिल कोइदा बाक्त। मिनु हेरोद नु मेकेर खुम्सीशा बाक्बमी मेको सिल पशो तशा, शुश दाक्शा, नेल्ल ग्येरसमा बाक्त। मिनु पिपमी मेको मीश आल कली “इ दाक्शो पुनो। गो मेको गेनन” देंमाक्त।

23 मिनु लोव्र थोक्शा “मार पुंडतीवी हना यो, इ पुंडशो नेल्ल गेनन। राज्य उइक्थ उइक्थ पा योक्शा यो गेनन” दे कसम जशा, लोव्र गेवा बाक्त। एस्तर ५:३-६

24 मिनु मीश आल यूशा, आ ममा कली “मार पुन माइ” दे हिल्लो पवानु, आ ममामी “ब्वाक्कुम खुम्शा गुंडब यूहन्ना आ पिया गेचा नड, दे पुनो” देंमाक्त।

25 मिनु मीश आल फ्रा लेशशा, ओव्रशा पिप कली “ब्वाक्कुम खुम्शा गुंडब यूहन्ना आ पिया थालमी कुर पा गेयीनी” दे पुना बाक्त।

26 मेको आ पुंडशो नेंशा, पिप आ थुं शुश खाइक्माक्त। तन्न मेकेर बाक्ब आन कुल कसम जशा डा मिन “इ पुंडशो गेनन” देंतीके “मगेनन” देंने मचबा बाक्त।

27 मोपतीके सिपाइ का कली “लशा, यूहन्ना आ पिया क्योरशा चाक्को” दे सोइक्ता बाक्त।



28 मिनु आ पिया थालम कुर पा चाकशा, मीश आल कली गेवा बाक्त। मिनु मीश आलमी आ ममा कली गेवा बाक्त।

29 मिनु यूहन्ना आ शेंसीबपुकीमी “यूहन्ना साइक्चा पुंडसे बाक्त” देशो नेंशा, जेल्खानमी लशा, आ बेक्शो रां लाइश्शा, थिम्मे बाक्त।

शुश मुर आन कली रूथ्री थुल्शो

मत्ती १४:१३-२१; लूका ९:१०-१७; यूहन्ना ६:१-१३

30 येसु आ सोइश्शोपुकी लशा शेंशा, लेश्शा जाक्मा बाक्त। मिनु मार पामे, मार शेंदमे, मेको लोव्र येसु कली शोव्रडमे बाक्त। लूका ९:१०; लूका १०:१७

31 मिनु येसुमी “मुर मबाक्तीके लशा नाइसय” देमाक्त, मारदे हना शुश मुर गुम्थ जाक्बाक्मा बाक्त। मिनु येसु नु आ शेंसीबपुकीमी जचा कली यो नाइक्चा मतामे बाक्त।

32 मिनु डोंगा डोइश्शा, समुन्द्र शोक्शा लमा बाक्त। मुर मबाक्तीके जाक्दीश्शा, नाइक्चा, दे थुं पामे बाक्त।

33 तन्न शुश मुरुमी येसु नु आ शेंसीब आन कली लशो तुइश्शा, डोंगाम डोइश्शो तशा, आइक्ची हांबु गे लमा बाक्त दे तुइश्शा, समुन्द्र हिरशा, दोरशा जाक्दीम्मा बाक्त।

34 मिनु येसु डोंगा रे तोंडसीशा, शुश मुर देल्शा बाक्शो तशा, शिशी पवा बाक्त। मारदे हना मेको आन कली गोठला मपाइश्शो भेडा खोदेशो दुम्शो तामी बाक्त। मिनु शुश लोव्र शेंचा गोवा बाक्त। मत्ती ९:३६

35 मिनु शेंस डा शेंस पवानु, नां रिक्चवा बाक्त। मिनु शेंसीबपुकीमी येसु कली “मुर मबाक्तीके बाक्ब, नां रिक्चाप्तु।

36 एको देल्शो मुर आन कली सोइक्चा। मारदे हना गाउं सहर लशा, आंम कली जचा थोव्रक ग्याप्मेक्ल” दे मदमेनु, मर्कूस ८:१-९

37 येसुमी “गेपुकीमी एको आन कली जचा गेने” दे माइक्मी बाक्त। मिनु शेंसीबपुकीमी “गोपुकी लशा, सहे निक्शी देनार खोइ डा शोब्ले ग्याप्शा, चाक्शा, थुल्चा देंनी?” दे हिल्लो पामेनु, देनार का नाक्त का डा गाल्च बाक्त। मेको रोम डा चांदी के क्येट बाक्त।

38 “शोब्ले दोशो कुरनी? कोव्रथ लने” देमाक्त। मिनु कोव्रशा “शोब्ले ५ ओटा नु डांड निक्शी बाक्त” देमा बाक्त।

39 मिनु येसुमी मुर आन कली गिग घांस बाक्तीके दिंममी “लस्कर पा निप्पतीन” दे माइक्मी बाक्त।

40 मिनु सहे, सहे नु ५०, ५० डा लस्कर पा निस्समा बाक्त।

41 मिनु येसुमी शोब्ले नु डांड शेशा, सरीड गे कोव्रशा “परमप्रभु गे रिम्शो पाइब बाक्नीनी” देशा, शोब्ले जिक्शा, निप्पाइश्शो मुर आन कली “योक्शा गेने” दे आ शेंसीब आन कली गेवा बाक्त। डांड यो योक्पाइक्मी बाक्त। मर्कूस ७:३४

42 मिनु नेल्लेमी रूथ्री जामे बाक्त।

43 मिनु जशा, हेंशो शोब्ले नु डांड गुप्मेनु, १२ डालो ब्रीमाक्त।

44 जाइबपुकी वोंइश मुर ला ५ हजार बाक्मा बाक्त।

येसु ब्वाक्कु तार गाक्शो

मत्ती १४:२२-३३; यूहन्ना ६:१५-२१

45 मिनु येसुमी आ शेंसीब आन कली “आं डोंइती लशा, समुन्द्र शोक्शा, बेथसैदा सहरमी जाक्दीतीन” दे डोंगामी डोइक्पाइश्शा, सोइक्तीमी बाक्त।

46 मिनु नोले प्रार्थना पथ डांडा डोंइसे बाक्त।

47 मिनु नां रिक्मेनु, डोंगा समुन्द्रमी बाक्माक्त। येसु चहिं डांडाम बाक्माक्त।

48 मिनु येसुमी आ शेंसीबपुकीमी श्येत जामे बाक्त, दे तुइक्ता बाक्त। मारदे हना फशेमी डोंगा तेक्गा बाक्त। मिनु नां सोव्रचावानु, येसु ब्वाक्कु तारी गाक्शा पिमाक्त।

49 “मेको आन कली दाम पाइकुनुड” दे मिग्शा, पेट्यावानु, शेंसीबपुकीमी येसु कली ब्वाक्कु तारी गाक्शो तशा, वोल दाप्शा, हिंशा वाइ ब्रेम्मा बाक्त।

50 मारदे हना नेल्लेमी तामे बाक्त। मिनु शुश हिंमा बाक्त। मिनु येसुमी मेको आन कली सेशशा “महिनीन, गो नड, इन थुं बारपतीन” देंमाक्त।

51 मिनु डोंगा डोंडसे बाक्त। मिनु फश गिवार दिक्माक्त। मिनु शेंसीबपुकी थाम्पा छक लाक्मा बाक्त। मर्कूस ४:३९

52 दोपा शोब्ले बारपदा, दे मारेइ ममिग्शो बाक्मा बाक्त। मारदे हना रुप्चा थुं मपाइबाक्मा बाक्त। मर्कूस ८:१७

रोइ पाइब आन कली सापाइशो  
मती १४:३४-३६

53 मिनु समुन्द्र शोक्शा, गेनेसरेथ जाक्दीम्मा बाक्त।

54 मिनु डोंगा रे तोंडसामानु, मुरपुकीमी येसु बाक्ब दे तुइक्तमे बाक्त।

55 मिनु येसु ते ते लमे, मेक मेक दोरशा लशा, रोइ पशो आन कली कुरशा, आ नेक्था चाक्मे बाक्त।

56 येसु गाउं सहर ते ते लमे, मेक मेक रोइ पशो आन कली चाक्बाक्मा बाक्त। मिनु येसु कली “इन फेक्शो वा थिचा गेयीनी” दे पुंडबाक्मा बाक्त। मिनु सु सुमी आ फेक्शो वा थीमे, मेकोपुकी साबाक्मा बाक्त। मर्कूस ५:२७-२८; प्रेरित ५:१५; प्रेरित १९:११-१२

## 7

साइ डा पतीके आ पर्वम शेंशो

मती १५:१-२०

1 फरिसीपुकी नु सास्त्री का निक्शी यरूसलेम रे यिशा, येसु आ बाक्तीकेम जाक्मा बाक्त।

2 मिनु काथा बाक्मानु, येसु आ शेंसीबपुकीमी गुइ मचिक्थु जशो तामे बाक्त।

3 फरिसी नु यहूदी नेल्लेमी गुइ मचिक्थु मजाइनीम। आन जोक्ब तुइक्ब खाल्पापुकीमी वोइशशो पतीके नेल्ल पाइनीम।

4 बजार लशा लेशशा, खिं जाक्शा, चोव्रखेसीशा ला जाइनीम। कचौरा, लोटा, गाग्री, नित्तीके नेल्ल चोव्रखेचा माल्ब। मेको मोदेशो पतीके शुश पाइनीम। मती २३:२५

5 मोपतीके येसु आ शेंसीबपुकीमी गुइ मचिक्थु जशो तशा, येसु कली “इन शेंसीबपुकीमी किकी पिपीमी वोइशशो रिती थिती मारदे मपाइनीमी? मचोव्रखेसीथु गुइ मचिक्थु जाइबाक्तेकम” दे मदमे बाक्त।

6 मिनु येसुमी मेको आन कली “गे कपटीपुकी, यसैयामी पशो नोले दुम्ब लोव्र इन कली गारमाक्त। मार ब्रेक्शो बाक्त देशा हना ‘मेकोपुकीमी शोव रे पा ला आं कली मान पाइनीम। आन थुमी चहिं मदाक्नीम, आं देशो यो मपाइनीम। यसैया २९:१३

7 आं कली सेउ पखु पा, परमप्रभु यावे आ लोव्र बाक्त, दे शेंनीमी, तन्न मुरुमी मिग्शो ला शेंनीम’ दे ब्रेक्शो बाक्त। यसैया २९:१३

8 परमप्रभु यावे आ अरेशो लोव्र प्रोंडशा, मुरुमी वोइशशो पतीके पाइनीमी” दे माइक्मी बाक्त।

9 मिनु लोव्र बोइशशा “गिश जोक्ब तुइक्ब ननी। परमप्रभु यावे आ देशो शेंचा प्रोंडशा, आंम सेल्शो इन पतीके ला शेंनीनी।

10 मोसामी ब्रेक्शो लोव्र का ‘आम आफ आस कली मान पचा’ मिनु लोव्र का ‘सु सुमी आम आफ आस कली मरिग्शो लोव्र पामे, मेकोपुकी साइक्चा पुंडसमल’ दे ब्रेक्शो बाक्त। प्रस्थान २०:१२; प्रस्थान २१:१७

11 गेपुकीमी चहिं सुमी आम आफ आस कली ‘इन कली गेचा माल्शो थोव्रक लाइशशा, कुरबन कली गेता’ दे माइक्बा, मेकोमी आम आफ आस कली मारेइ गेचा ममाल्ब दे शेंनीनी। ‘कुरबन गेता’ देशो चहिं ‘परमप्रभु कली गेता’ देशो रुम्सीब।

12 मोपा इन शेतीक लोव्रमी आम आफ आस कली वारच पचा तेक्नीनी।

13 इन वोइशो रिती थितीमी परमप्रभु यावे आ देशो टिचा प्रॉइपाइक्नीनी। मिनु मोदेशो कपटी गेय शुश पाइनीनी” दे हुइक्तीमी बाक्त।

ग्रांग्रा दिशो सेल्ब थोव्रक

14 मिनु येसुमी मुर आन कली लेशा ब्रेशशा “गे नेल्लेमी नोफा दाइशशा नेशा रुपीने।

15 लाडगा रे ओव्रशो थोव्रकीमी मुर कली ग्रांग्रा दिशो सेल्ने मचाप्ब। मुर रे यूशो थोव्रकीमी चहिं मुर कली ग्रांग्रा दिशो सेल्ब। प्रेरित १०:१४-१५

16 सु के नेंब नोफा बाक्मे, मेकोमी नेंनल” दे शेंदीमी बाक्त। मर्कूस ४:२३

17 मिनु मुर आन कली प्रॉइशा, खिं ओव्रमेनु, आ शेंसीबपुकीमी “इन शेंशो लोव्र थमा पा मार रुमीबा?” दे हिल्लो पामे बाक्त।

18 मिनु येसुमी “मार, गे यो एको लोव्र मरुनी? लाडगा रे ओव्रशो थोव्रकीमी मुर कली ग्रांग्रा दिशो सेल्ने मचाप्ब,

19 मारदे हना मुर आ थुमी मओव्रब। आ कोव्रजीम ओव्रशा ग्रिम्शा, कयी लां पा यूब, दे मतुइक्नीनी?” दे शेंदीमी बाक्त। मो देशोमी जचा थोव्रक नेल्ल ग्रांग्रा मबाक्नीम, दे शेंदा बाक्त।

20 मिनु मेकोमी “मुर रे मार यूबा, मेकोमी मुर कली ग्रांग्रा दिशो सेल्ब।

21 मुर आ थुं रे दोदेशो ग्रांग्रा दितीके यूब देशा हना, तेल्लेम पचा, खुइ पचा, साइक्चा,

22 च्युंवे पशो मुर अर्को नु इप्चा, शिम पचा, जोल पचा, गेहे पचा, नें तोक्चा, ठेयब लेत्चा, ममिम्थु गेय पचा।

23 मोदेशो पतीके मुर आ थुंम बाक्ब। मेको यूशा, मुर कली ग्रांग्रा दिशो सेल्ब” दे शेंदीमी बाक्त।

सुरोफोनीसीया डा मीश मुर

मत्ती १५:२१-२८

24 मिनु बोक्शा, मेकेर रे टायर नु सीदोन गे लशा, खिं का ओव्रमाक्त। सुइमी मतुइक्तमेक्ल देंत हना यो, खुइशशा बाक्ने मचबा बाक्त।

25 मिनु ग्रांग्रा दिचा डा वोलम सुम्शो आइक्च आल आ ममामी “येसु जाक्माक्त” देशो नेशा, येसु आ बाक्तीके जाक्दीम्माक्त।

26 मेको मीश मुर अर्को रागी डा, सुरोफोनीसीयामी जरमेशो डा बाक्माक्त। मिनु मेको जाक्शा, येसु आ डोंइती खुम्की पा बाप्शा “आं तमी रे वोल गुंडदीने” दे पुना बाक्त।

27 मिनु येसुमी “डोंइती आल आन कली थुल्चा माल्ब। आल आन कली गेचा माल्शो शोब्ले कुचुम आन कली गेचा मदुम्ब” दे मदा बाक्त।

28 मिनु मेको मीश मुरुमी “मदुम्ब, प्रभु, तन्न कुचुमपुकीमी यो आलपुकीमी तोक्शो शोब्ले जचा ताइनीम” देमाक्त।

29 मिनु येसुमी “इ मो देंतीके इ पुंडशो गेतन। वोल इ तमी रे यूत” दे मदा बाक्त।

30 मिनु आ खिं लेशशा जाक्मेनु, वोल यूशा, आल सेस दुम्शा इप्शो बाक्माक्त।

नोफा मनेंब कली सापाइशो

31 मिनु टायर रे लेशशा, सीदोन नु डेकापोलीस सहर दाते लां पा लशा, गालील डा समुन्द्र जाक्दीम्माक्त। मत्ती १५:२९-३१; मर्कूस ५:२०

32 मिनु नोफा मनेंब मुर का चाक्शा “एको तार इन गुइ वोतीने” दे पुन्मे बाक्त।

33 मिनु येसुमी मेको नोफा मनेंब कली हुल रे फ्राशा लदा बाक्त। मिनु आ ब्रेप्चो मुर आ नोफामी ओइशा, थुथु पा तोक्शा, नाक्चुकमी आ लें थिशा,

34 सरीड गे कोव्रशा, लाइशो सोक्त कीशा “हेफाता” दे मदा बाक्त। मेको चहिं “रोक्सो” देशो रुमीब।

35 मिनु आ नोफा रोक्सीशा, नोफा नेंब दुम्माक्त। आ लें लोक्सीशा, लोव्र पाइब दुम्माक्त।

36 मिनु “सुइ आन कली मशेंदीने” दे माइक्मी बाक्त। मशेंदीने माइक्मी बाक्त हना यो, मेकोपुकीमी तेइ तेइ शेंना शेंन गाक्मा बाक्त। मर्कूस १:४३-४५

37 मिनु आ लोव्र नेंबपुकी थाम्पा छक लाक्शा “मेकोमी नेल्ल रिम्शो सेल्बाक्त। नोफा मनेब आन कली नोफा नेंब सेल्बाक्त। लोव्र पस मजोक्ब आन कली लोव्र पाइब सेल्बाक्त” देंमा बाक्त।

## 8

४ हजार मुर आन कली थुल्शो

मती १५:३२-३९

1 मिनु लेंशा शुश मुर देल्शा बाक्शो बाक्मा बाक्त। मेकोपुकी नु मारेड जचा थोव्रक मबाक्माक्त। मिनु येसुमी आ शेंसीब आन कली ब्रेशा

2 “एको आन कली शिशी पातामी। मारदे हना साबेर नाक्त रे मुल सम्म गो नु काथा बाक्शा, मारेड जचा मतामे। मर्कूस ६:३४-४४

3 जचा मगेथु आन खिं खिं सोइक्ताक्डमी हना, लांमी गाकना गाकन थाइनीम। का निक्शी शुश डोन रे जाक्शो बाक्नीम” देंमाक्त।

4 मिनु शेंसीबपुकीमी “ओदेशो गोरशो रागीमी इश डा मुर आन कली शोब्ले गेशा, दोपा रूपाइक्चा डा?” देंमा बाक्त।

5 मिनु येसुमी “शोब्ले दोशो कुरनी?” दे हिल्लो पवानु “७ ओटा” देंमा बाक्त।

6 मिनु मुर आन कली “निस्सीन” दे दिममी निप्पपाइक्मी बाक्त। मिनु मेको ७ ओटा शोब्ले शेशा, परमप्रभु कली “गे रिम्शो पाइब बाक्नीनी” देंशा, शोब्ले जिक्शा, शेंसीब आन कली गेशा, योक्पदा बाक्त। मिनु मेकोपुकीमी मुर आन कली गेमे बाक्त।

7 आइक्चु डांड का निक्शी यो बाक्माक्त। मेको डांड यो शेशा “गे रिम्शो पाइब बाक्नीनी” देंशा “योक्कीन” दे गेमी बाक्त।

8 मिनु मुरपुकीमी रूथ्री जामे बाक्त। जशा लीशो गुप्शा, ७ डालो प्रिंडमे बाक्त।

9 जाइबपुकी ४ हजार खोड बाक्मा बाक्त। मिनु येसुमी मुर आन कली आन खिं खिं सोइक्ता बाक्त।

10 मिनु छुल छाल बोक्शा, आ शेंसीबपुकी नु डोंगा डोइश्शा, दल्मानुथा रागी जाक्दीम्मा बाक्त।

फरिसीमी चिन्ड कोव्रचा माल्शो

मती १६:१-४

11 मिनु फरिसी जाक्शा, येसु आ थुं थाम्चा कली “सरीड डा चिन्ड का कोइदीकी” देंमा बाक्त। यूहन्ना ६:३०

12 मिनु येसुमी लाइश्शो सोक्त कीशा “सिनाक्त मुलाक्त डा मुरपुकीमी मारदे चिन्ड कोव्रचा माल्नीमी? नोफा दाइश्शा नेनीन, चिन्ड का यो मकोइनन्नी” देंमाक्त।

13 मिनु मेको आन कली प्रोइशा, डोंगा डोइश्शा, समुन्द्र शोक्शा, आइक्ची हांबु जाक्दीम्मा बाक्त।

फरिसी आन बोरब ओरुली

मती १६:५-१२

14 शेंसीबपुकीमी शोब्ले लाइक्चा प्रेशो बाक्मा बाक्त। डोंगाम शोब्ले का ला लीशो बाक्माक्त।

15 मिनु येसुमी आ शेंसीब आन कली “नेनीने, फरिसीपुकी नु पिप हेरोद आन बोरपाइक्ब ओरुली क्येडा होस पांडसीन” दे माइक्मी बाक्त। लुका १२:१; मर्कूस ३:६

16 मिनु “शोब्ले कुरचा प्रेंदमे बाक्त, दे तुइश्शा, मो देंम को?” देंमुमा बाक्त।

17 मिनु येसुमी आन लोव्र तुइश्शा “शोब्ले मबा दे मारदे शुश लोव्र पाइनीनी? गे मुल यो मारेड मरुनीनी? ममिन्नीनी? तुइक्चा यो ममाल्नीनी? मर्कूस ६:५२

18 मिक्च पाइश्शो बाक्तीनी हना यो, मताइनीनी? नोफा पाइश्शो बाक्तीनी हना यो, मनेनीनी? मुल यो मारेड मिन्ने मचाप्नीनी? मती ११:१३, १६

19 गोम ५ ओटा शोब्ले जिक्शा योक्शा, ५ हजार मुर आन कली थुलुनु, जशा लीशो गिश डालो प्रिदीनी?” देंमेनु “१२ डालो” देंमा बाक्त। मर्कूस ६:४१-४४

20 “मिनु ७ ओटा शोब्लेमी ४ हजार मुर आन कली थुलुनु, जशा लीशो गिश डालो प्रिदीनी?” देंमेनु “७ डालो” देंमा बाक्त। मर्कूस ८:८-९

21 मिनु “मुल यो मारेइ मरुन्नी?” देंमाक्त।

मिक्च मताइब कली सापाइशशो

22 येसु नु आ शेंसीबपुकी बेथसैदा जाकदीम्मा बाक्त। मिनु मुरपुकीमी मिक्च मताइब का चाक्शा “मेको कली थिने” दे पुन्मे बाक्त। मर्कूस ६:५६

23 मिनु येसुमी मिक्च मताइब कली गुइमी ग्याइशशा डा मिन, कीशा गाउं रे गुंइशा लदा बाक्त। मिनु आ मिक्चीम थुथु पा तोक्शा, आ गुइ आ तारी वोइशशा “मुल मार मार तवी?” दे हिल्लो पवा बाक्त। यूहन्ना ९:६

24 मिनु मेकोमी इर गे कोव्रशा “मुरपुकी गाक्शो ताता, तन्न मेको मुरपुकी रवा खोदेशो तांइसाक्म” देंमाक्त।

25 मिनु लेंशा आ गुइ आ मिक्च तारी वोदा बाक्त। मिनु मेकोमी कोव्रस डा कोव्रस पा तवा बाक्त।

26 मिनु येसुमी “गाउं हेरशा, इ खिं लावो” दे सोइक्ता बाक्त।

ख्रीस्तमी श्येत जचा माल्ब, दे शेंशो

मत्ती १६:१३-२०; लूका ९:१८-२१; यूहन्ना ६:६७-६९

27 येसु नु आ शेंसीबपुकी सिजरिया फिलिप्पी गे लमा बाक्त। मिनु लांमी गाक्मानु, येसुमी “मुरपुकीमी आं पबंम मार देंनीमी?” दे हिल्लो पवानु,

28 “का निक्शीमी ‘ब्वाक्कुम खुम्शा गुंइब यूहन्ना बाक्माक्त’ देंनीम। का निक्शीमी ‘एलीया बाक्माक्त’ देंनीम। का निक्शीमी ‘परमप्रभु यावे आ लोत्र पाइब का बाक्माक्त’ देंनीम” दे मदमे बाक्त। मर्कूस ६:१५

29 मिनु येसुमी “गेपुकी चहिं आं कली सु सुइय्यीनी?” दे हिल्लो पवानु, पत्रुसमी “गे ख्रीस्त बाक्नीनी” देंमाक्त।

30 मिनु आ शेंसीब आन कली “एको ख्रीस्त बाक्ब, दे सुइ आन कली मशेंदीन” दे माइक्मी बाक्त। मर्कूस ९:९

साइक्चा पुंइसीचा आ पबंम शेंशो

मत्ती १६:२१-२३; लूका ९:२२

31 मिनु येसुमी आ शेंसीब आन कली “रागीम जरमेशोमी शुश श्येत जचा माल्ब। जोक्ब तुइक्ब खाल्पा, टेयब चढेब नु सास्त्रीपुकीमी मेको कली मब्राइनीम, साइक्पाइक्नीम। मिनु बेक्शो आ नित्थ नाक्ती सेंसीब” दे लोत्र मखुइक्थु शेंदीमी बाक्त। मर्कूस ४:३१; मर्कूस १०:३२-३४

32 मिनु पत्रुसमी येसु कली एर आइक्ची लाइशशा, हुइक्ता बाक्त।

33 मिनु येसु हिरशा, अर्को शेंसीबपुकी गे कोव्रशा “ए सैतान, इ कुल मकोइदी। परमप्रभु यावे आ मिम्शो ममाइ, मुर आन देंशो नेंबाक्ते” दे पत्रुस कली हुइक्ता बाक्त।

दोपा ख्रीस्त आ नोले खोइक्चा

मत्ती १६:२४-२६; लूका ९:२३-२७

34 मिनु आ शेंसीबपुकी नु मेकेर देल्शो आन कली ब्रेशशा “सुमी आं नोले खोइक्चा थुं पाइबा, मेकोमी आंम दला दाक्स पचा प्रोइशा, श्येत जचा महिंथु, आं नोले खोइय्यील।

35 सुमी आंम कली प्रोइचा माल्बा, मेको जाम्शा लाइब। सुमी आं पबंम नु परमप्रभु यावे आ लोत्र आ पबंम आंम कली जिम्मा गेबा, मेको ब्रोइब। मत्ती १०:१९

36 रागी नेल्ल आंम के सेल्ने चाप्ब, तन्न बेक्त हना, मेको मार रिम्शो दुम्बा डा?

37 मारदे हना गे मार गेशा ब्रोइने चाप्नीनी डा?

38 सुमी हेंथे गाक्ब नु पाप पाइब आन पालामी आं पबंम नु आं लोत्र आ पबंम मुर आन कली देंचा मुने पाइबा, मेको आ पबंम रागीम जरमेशोमी यो आ आफ आ छेडछेड नु आ स्वर्ग डा गेय पाइबपुकी नु जाक्मेनु मेको कली तशा मुने पाइब” दे माइक्मी बाक्त। मत्ती १०:३३

## 9

1 मिनु “नोफा दाइशशा नेनीने, मुल गो नु काथा बाक्शो का निक्शीमी परमप्रभु यावे आ राज्य सक्ति पाइशशा जाक्शो मतामे सम्म मबेक्नीम” देमाक्त।

येसु आ रां फाइशशो

मत्ती १७:१-१३; लूका ९:२८-३६

2 मिनु ६ नाक्त नोले येसुमी पत्रुस, याकूब नु यूहन्ना, सां आन कली सुइ मबाक्तीके डांडामी लदा बाक्त। मिनु मेको आन डोंइती येसु फांडसे बाक्त।

3 दोपा फांडसे बाक्त देशा हना, आ फेक्शो वा बुबु पा जिलील बुश दुम्शो तामे बाक्त। मोदेशो बुश सुइमी सेल्ले मचाप्नीम।

4 मिनु एलीया नु मोसा यूशो तामे बाक्त। मेको निक्शीमी येसु नु लोत्रसी पाम्से बाक्त।

5 मिनु पत्रुसमी येसु कली “ए शेंब, इं कली एकेर बाक्चा रिम्शो दुम्ब। बाक्तीके सां सेल्य। इन कली का, मोसा कली का नु एलीया कली का सेल्य” देमाक्त।

6 मारदे हना मार देंचा दे मतुइक्ता बाक्त। मिनु शुश हिंमा बाक्त।

7 मिनु गोस्सुमी नेल्ल आन कली गिल्मी बाक्त। गोस्स आगा रे सेंदा का यूशा “एको आं दाक्शो तौ बाक्ब। आ लोत्र नेनीने” देशो नेन्मे बाक्त। मर्कूस १:११; २पत्रुस १:१७

8 मिनु एर ओंथ कोत्रडमेनु, येसु ला तामे बाक्त।

9 मिनु डांडा रे बुम्मानु, येसुमी “रागीम जरमेशो बेक्शो रे सेंचा मपुंडसे सम्म इन तशो सुइ आन कली मशेंदीने” दे माइक्मी बाक्त। मर्कूस ८:३०

10 मिनु मोदेशो दुम्शो सुइ आन कली मशेंदमे बाक्त। “बेक्शो रे सेंचा पुंडसीचा देशो मार बाक्म माइ” दे हिल्लो पमुमा बाक्त।

11 मिनु आ शेंसीबपुकीमी येसु कली “डोंइती एलीया जाक्चा माल्ब, दे सास्त्रीपुकीम शेंनीम। मारदे मोदें शेंनीमी?” दे हिल्लो पामेनु,

12 येसुमी “एलीया डोंइती जाक्शा, नेल्ल ठीक सेल्ब। मिनु रागीम जरमेशो श्येत जाइब नु महिक्सीशो दुम्ब, दे ब्रेक्शो बाक्बा, ममाइ डा? मलाकी ३:१३; यसैया ५३:३-५

13 एलीया डोंइती जाक्त। मिनु आ पर्वम डोंइती ब्रेक्शो खोदेशो दुम्शा, मेको कली मार पचा दाक्तमे, मेको पाम्तेक्म” दे शेंदीमी बाक्त। मत्ती ११:१४; १राजा १९:२-१०

वोलम तशो आल सापाइशशो

मत्ती १७:१४-२०; लूका ९:३७-४२

14 मिनु अरु शेंसीब आन बाक्तीकेमी लेशशा जाक्शा, शुश मुर देल्लो नु सास्त्रीपुकीमी लीशो शेंसीब आन कली लोत्र हिल्लो पशो तामे बाक्त।

15 मिनु देल्लो मुरपुकीमी येसु कली तशा, छक लाक्शा, दोरशा पिशा, येसु कली सेउ पदमे बाक्त।

16 मिनु येसुमी “मेकोपुकी नु मार लोत्रसी पनी” दे हिल्लो पवानु,

17 देल्लो मुर आन दाते डा कामी “ए शेंब, आं तौ एक चाक्ता, मारदे हना वोलमी तशा, लाटा दुम्शो बाक्ब।

18 वोलमी सुमानु, गोल्ब। आ शोत्र रे बोग्यो गुंडब। आ खुइ शेप्ब। मिनु आ रां मदुक्ब दुम्ब। इन शेंसीब आन कली ‘वोल गुंडदीन’ दे पुंडता, तन्न वोल गुंडने मचबेम” देमाक्त।

19 मिनु येसुमी “गे थमा पा थमा मसुइक्बपुकी, गेना सम्म गेपुकी नु बाक्नुडा डा? ओदेशो इन पशो गेना सम्म फाल्शा बाक्नुडा डा? रोइ पाइब कली चाक्कीन” दे माइक्मी बाक्त।

20 मिनु वोंइश आल कली येसु आ डोंइती चाक्मे बाक्त। मिनु वोलमी येसु कली तवानु, आल तिड गोल्शा, रोम्सीशा, आ शोत्र रे बोग्यो गुंडदा बाक्त।

21 मिनु येसुमी आ आफ कली “गेना रे ओदेशो दुम्शो?” दे हिल्लो पवानु, आ आफोमी “आइक्च रेन,

22 एको वोलमी साइक्चा कली मीमी दुप्पदानु, ब्वाक्कुमी ग्रुम्पदानु, शुश खेयप हेर हेरा बेक्त। गे मारेड पने चाप्नीनी हना, शिशी पा एको श्येत जचा रे प्रॉइयीकी” देंमाक्त।

23 मिनु येसुमी “गे मारेड पने चाप्नीनी कों देंनीनी। तन्न सु सुमी गेन चाप्नीनी देंशा, थमा सुइक्नीमी, मेकोपुकीमी आन पुंडशो ताइनीम” देंमाक्त।

24 मिनु आल आ आफोमी “थमा सुइक्ता, आं थमा मसुइक्ब थुं कली थमा सुइक्पतीने” दे थुं खाइशशा, डाक्शा देंमाक्त।

25 मिनु येसुमी शुश मुर आन कली एर ओंथ रे जाक्शो तशा, ग्रॉग्रा दिचा डा वोल कली “गे लाटा नु नोफा मनेंब वोल, गेनायो लेशा मओव्रचा डा पा यूशा लावो” दे हुइशशा, खेरा बाक्त।

26 मिनु वोल वाइ ब्रेशशा, आल कली रोप्पाइशशा गूमाक्त। मिनु आल बेक्शो खोदेंशो दुम्माक्त। मुरपुकीमी “बेक्त” देंमा बाक्त। मर्कूस १:२६

27 मिनु येसुमी आल आ गुइ ग्याइशशा पोक्गानु, राम्माक्त।

28 मिनु येसु नु आ शेंसीबपुकी खिं लमा बाक्त। मिनु शेंसीबपुकीमी “मारदे मेको वोल कली गुंडने मचाप्का?” दे हिल्लो पामे बाक्त।

29 मिनु येसुमी “ओदेंशो वोल कली प्रार्थना पशा ला गुंडने चाम्सीब” दे माइक्मी बाक्त।

रागीम जरमेशो श्येत जचा माल्लो

मत्ती १७:२२-२७; लूका ९:४३-४५

30 मिनु मेकोपुकीमी “इं गाक्शो सुइम मतुइक्तमेक्ल” दे गालील लां पा गाक्मा बाक्त।

31 मारदे हना आ शेंसीब आन कली “रागीम जरमेशो दा मुर आन गुइमी गेशा, साइक्चा पुंडसीशा, आ नित्थ नाक्ती बेक्शो रे सेंसीब” दे शेंचा दाक्ता बाक्त। मर्कूस ८:३१; मर्कूस १०:३२-३४

32 शेंसीबपुकीमी चहिं आ शेंशो मरुप्मे बाक्त। मिनु हिल्लो पचा यो हिमा बाक्त। लूका १८:३-४

नेल्ल क्येडा ठेयब सु बाक्बा

मत्ती १८:१-५; लूका ९:४६-४८

33 मिनु कापेरनाउम जाक्दीम्मा बाक्त। मिनु खिं का ओव्रशा, येसुमी आ शेंसीब आन कली “लांमी गाक्यानु, मार लोव्रसी पनी?” दे हिल्लो पवा बाक्त।

34 तन्न मेकोपुकी सिक्सी पामे बाक्त, मारदे हना लांमी गाक्मानु “नेल्ल क्येडा ठेयब सु बाक्या माइ?” दे लोव्र पशो बाक्मा बाक्त।

35 मिनु निशशा, शेंसीब आन कली आ नेक्था ब्रेशशा “नेल्ल क्येडा डोंइती दुम्चा कली नेल्ल क्येडा नोले दुम्शा, नेल्ल आन गेय पाइब दुम्चा माल्लब” देंमाक्त। मर्कूस १०:४३-४४; मत्ती २९:११; लूका २२:२६-२७

36 मिनु आल का आन दातेमी चाक्शा, आल कली मुप्शा

37 “सुमी आं नेमी ओदेंशो आल कली ब्राइबा, मेकोमी आं कली ब्राइब। आं कली ब्राइबमी आं कली ममाइ, तन्न आं कली सोइक्ब कली यो ब्राइब” दे माइक्मी बाक्त। मत्ती १०:४०

रिम्शो पचा मतेक्चा

लूका ९:४९-५०

38 यूहन्नामी येसु कली “ए शेंब, गोपुकी नु मगाक्ब मुर कामी इन नें थिशा, वोल आन कली खेरशो ताइतक। मिनु मो पचा मदुम्ब, दे माइक्तक” देंमाक्त। गन्ती १०:२७-२८

39 मिनु येसुमी “मदुम्ब, दे मदेंचा, मारदे हना आं नें थिशा, ठेयब गेय पाइबमी आं पर्बम लोव्र मक्याल्लब।

40 इं कली मरिम्शो मपाइब मेको इं मुरुन बाक्ब। मत्ती १२:३०; लूका ११:२३

41 नोफा दाइशशा नेनीने, सुमी आं नें थिशा, ख्रीस्त आ मुर नम देंशा, इन कली लोटा का ब्वाक्कु तूचा गेबा, मेकोमी दोपा यो आ इनाम ताइब। मत्ती १०:४२

थमा सुडक्चा मतेक्चा

मती १८:६-९; लूका १७:१-२

42 सुमी आं कली थमा सुडक्ब आइक्च आल आ थमा सुडक्तीक क्याल्बा, मेको कली आ शुरम यात क्युक्शा, समुन्द्रमी ताइश्शा साइक्चा रिम्शो बाक्ब।

43 इ गुइमी तेक्तु हना, मेको गुइ खोतो। मारदे हना निम्फा गुइ पाइश्शो दुम्शा, गेनायो मकाप्ब नरक डा मीम ओव्रचा क्येडा, दुंडे दुम्शा, परमप्रभु यावे आ राज्यमी ओव्रचा तचा रिम्शो बाक्ब। मती ५:३०

44 नरकमी बाक्ब आन लुस्पु मबेक्नीम, मी यो मकाप्ब।

45 इ खोइलीमी तेक्तु हना, मेको खोतो। मारदे हना खोइली निम्फा पाइश्शो दुम्शा नरकम ओव्रचा क्येडा, खोरन्डे दुम्शा, परमप्रभु यावे आ राज्यमी ओव्रचा तचा रिम्शो बाक्ब।

46 नरकमी बाक्ब आन लुस्पु मबेक्नीम, मी यो मकाप्ब।

47 इ मिक्चीमी तेक्तु हना, मेको मिक्च फेशशा ताइक्तो। मारदे हना मिक्च निम्फा पाइश्शो दुम्शा, नरकम ओव्रचा क्येडा, काना दुम्शा, परमप्रभु यावे आ राज्यमी ओव्रचा तचा रिम्शो बाक्ब। मती ५:२९

48 नरकमी बाक्ब आन लुस्पु मबेक्नीम, मी यो मकाप्ब। यसैया ६६:२४

49 नेल्ल मीम याक्पाइक्चा पुंडसीनीम। मारदे चढेमेनु, हिक्सी सुष्पो चढेनीम। लेवी २:१३; गन्ती १८:१९

50 हिक्सी डाम्ताक्व हना, ब्रोव्रब। हिक्सी आ डाम्तीक जाम्त हना, मारम डाम्पाइक्चा डा? हिक्सी डाम्शो दुमीन। मिनु दुशा बाक्कीन” दे शेंदीमी बाक्त। मती ५:१३; लूका १४:१४; कलस्सी ४:६

## 10

1 मिनु मेकेर रे लशा, यहूदीया रागी नु यर्दन खोला आइक्ची हांबु जाक्दीम्मा बाक्त। मिनु लेंशा शुश मुर देल्मा बाक्त। मिनु तेइ तेइ गाक्शा, दोपा शेंदा, मोपा मेको आन कली यो शेंदा बाक्त।

वोंइश मीश आस नाता

मती १९:१-९

2 मिनु फरिसीपुकी जाक्शा, आ थुं थाम्चा कली “मीश कली प्रोंइचा दुम्बा देय मदुम्बा?” दे हिल्लो पामे बाक्त।

3 मिनु येसुमी “मोसामी इन कली मार पन देंमे?” देंमेनु

4 “छोड पत्र ब्रेक्शा, सोइक्चा दुम्ब देंत” देंमा बाक्त। ब्यवस्था २४:१; मती ५:३१-३२

5 मिनु येसुमी “मुरपुकीमी शिशी मपाइनीम, दे तुइश्शा, मोदेशो पचा गेवा बाक्त।

6 नेल्ल क्येडा डोंइती परमप्रभु यावेमी वोंइश मुर नु मीश मुर सेल्लीम्सी। उत्पत्ती १:२७

7 मोपतीके मुरुमी आम आफ प्रोंइशा, आ मीश नु गारशा बाक्ब। उत्पत्ती २:२४

8 मिनु मेको निक्शी रां का दुम्नीस। मोपतीके वोंइश मीश निक्शी मनसी, निम्फा का नस।

9 परमप्रभु यावेमी कांइचीक सेल्लो आस कली मुरुमी मफ्रादमेक्ल” दे माइक्मी बाक्त।

10 मिनु खिंमी बाक्मेनु, आ शेंसीबपुकीमी “इन शेंशो मार रुम्सीबा” दे हिल्लो पामे बाक्त।

11 मिनु येसुमी “सुमी आ मीश प्रोंइशा, अर्को चाक्बा, मेकोमी वोंइश मीश आस नाता खोइक्ब। लूका १६:१८; १कोरिन्थी ७:८-११

12 मीश मुरुमी आ वोंइश प्रोंइशा, अर्को खोइक्तु हना, मेकोमी यो वोंइश मीश आस नाता खोइक्ब” देंमाक्त।

येसु नु आलपुकी

मती १९:१३-१५; लूका १८:१५-१७

13 मिनु येसुमी आ गुइ आल आन तारी वोदल दे आलपुकी चाक्मे बाक्त। मिनु शेंसीबपुकीमी आल चाक्ब आन कली “मचाक्कीन” दे हुइक्तमे बाक्त।

14 मिनु येसुमी मेको तशा, आ थुं मनुथु, हुइक्ब आन कली “आल आन कली आं बाक्तीके जाक्चा गेने, मतेक्कीन। मारदे हना परमप्रभु यावे आ राज्य आल आन केन बाक्ब।



15 नोफा दाइश्शा नेनीने, मुरपुकीमी आल आन थुं डा मिम्शो खोदेशो पा ममिम्ताकम हना, परमप्रभु यावे आ राज्यमी ओव्रचा मताइनीम” दे माइक्मी बाक्त।

16 मिनु आल आन कली मुप्शा, आ गुइ आन तारी वोइश्शा, आसीक गेमी बाक्त।

शोप आ पर्वम लोव्र  
मती १९:१-९

17 मिनु मेकेर रे लमेनु, मुर का दोरशा पिशा, येसु आ डोंइती पोक्च थेक्शा बाप्शा “शेंब, गे रिम्शो ननी। गेना हना यो ब्रोंइशा बाक्चा कली मार पचा माल्नुडा?” दे हिल्लो पचा बाक्त।

18 मिनु येसुमी “मारदे आं कली रिम्शो मुर दे माइय्यी? सुइ रिम्शो मनमी। परमप्रभु यावे ला रिम्शो बाक्ब।

19 परमप्रभु यावे आ अरेशो लोव्र तुइक्नेवे। मसाइक्चा, वोंइश मीश आस नाता मखोइक्चा, खुइ मपचा, सांकछी बाक्शोनु, जोल मपचा, हिंच कोंइशा मारेइ मरोइक्चा, आम आफ आस कली मान पचा, दे ब्रेक्शो बाक्ब” दे मदा बाक्त। प्रस्थान २०:१२-१७

20 मिनु मेकोमी “गो आल रेन मेको नेल्ल पन पन बाक्ती” देंमेनु,

21 येसुमी मेको आ कुल शिरशा कोव्रशा, मेको कली दाक्शा “का चहिं मपवी। लशा, इ शोप नेल्ल लेयशा, जचा फेक्चा मताइब आन कली योक्शा गेमी। मिनु लेश्शा, आं नोले खोइय्यी। मिनु इ शोप स्वर्गमी बाक्ब” देमाक्त। मर्कूस ८:३४; मती १०:३८

22 मेको लोव्र नेंशा, आ कुल राव किक्पाइश्शा, आ थुं खाइश्शा, गाक्माक्त। मारदे हना मेको शुश शोप पाइश्शो मुर बाक्माक्त।

23 मिनु येसुमी एर ओंथ कोव्रशा, आ शेंसीब आन कली “शुश शोप पाइश्शो मुर परमप्रभु यावे आ राज्य ओव्रचा गिश श्येत बाक्बा” देमाक्त।

24 मेको लोव्र नेंशा, शेंसीबपुकी छक लाक्मा बाक्त। मिनु येसुमी लोव्र थोक्शा “आलपुकी, आन शोपोम थमा सुइक्ब आन कली परमप्रभु यावे आ राज्य ओव्रचा शुश श्येत दुम्ब।

25 शोप पाइश्शो मुर परमप्रभु यावे आ राज्य ओव्रने चाप्चा क्येडा, दलओंठ लूजे आ पोलांम ग्रीने चाप्ब” देमाक्त।

26 मिनु शेंसीबपुकी थाप्पा छक लाक्शा “मो हना, सु ओव्रचा ताइबा डा?” देंमुमा बाक्त।

27 मिनु येसुमी आन कुल गे कोव्रशा “मुरपुकीमी पने मचाप्नीम। तन्न परमप्रभु यावेमी पने चाप्ब, मारदे हना परमप्रभु यावेमी मारेइ मारेइ पने चाप्ब” दे माइक्मी बाक्त।

येसु आ नोले खोइक्ब आन इनाम

मती १९:२७-३०; लूका १८:२८-३०

28 पत्रुसमी येसु कली “गो मारेइ मारेइ प्रोंइशा, इन नोले खोइक्कत” देंमेनु,

29 येसुमी “नोफा दाइश्शा नेनीन, सुमी आं पर्वम नु ग्येरपाइक्ब लोव्र आ पर्वम आ खिं, लोकबम लोकब, आम आफ, तमी तौ नु रू प्रोंइबा,

30 मेकोमी खेदा पा श्येत जचा पुंइसाक्ब हना यो, मुल आ प्रोंइशो क्येडा शुश खिं, लोकबम लोकब, आम आफ, तमी तौ नु रू ताइब। मिनु नोले गेना हना यो परमप्रभु यावे नु बाक्चा ताइब।

31 डोंइती दुम्शोपुकी नोले दुम्नीम। नोले दुम्शोपुकी डोंइती दुम्नीम” दे शेंदीमी बाक्त।

रागीम जरमेशो साइक्चा पुंइसीब देशो

मती २१:१७-१९; लूका १८:३१-३४

32 मिनु यरूसलेम डा लां खोइश्शा गाक्मानु, येसु नेल्ल आन डोंइती गाक्माक्त। आ नोले खोइक्बपुकी छक लाक्शा हिमा बाक्त। मिनु १२ जना शेंसीब आन कली लेंशा आ नेक्था ब्रेश्शा, आ कली मार दुम्बा दे तुइक्पाइक्चा गोवा बाक्त। मर्कूस ९:११

33 मिनु “मुल यरूसलेम लाइनय। मिनु रागीम जरमेशो ठेयब चढेब नु सास्त्री आन गुइमी गेचा पुंइसीब। मिनु मेकोपुकीमी दोस गेशा, साइक्चा माल्ब, दे अर्को जात डा मुर आन गुइमी गेनीम।

34 मिनू मेकोपुकीमी शुक्शी पशा, आ कुलमी तोक्शा युक्नीम। मिनू साइक्नीम। मिनू बेक्शो आ नित्थ नाक्ती बेक्शो रे सेंसीब” दे तुइक्पाइक्मी बाक्त।

ठेयब सु बाक्बा?

मती २०:२०-२८

35 मिनू जब्दी आ तौ याक्ब नु यूहन्ना येसु आ नेक्था जाक्शा “ए शेंब, मार पुंडस्कु, मेको तस्कुल” दे पुन्से बाक्त।

36 मिनू येसुमी “मार पुंडनीसी?” दे हिल्लो पवानु,

37 मेको निक्शीमी “गे सक्ति पाइश्शो दुम्शा, हुकुम पाइब दुम्नीनु, का इन ग्युरा, का इन पेरा गे बाक्चा गेचा नस्कु” दे पुन्से बाक्त।

38 तन्न येसुमी “गे मार पुंडसी, मेको मरुप्नीसी। आं तूचा माल्शो कचौरा तूने चाप्नीसी? आं बुद पा श्येतम खुम्चा पुंडसीने चाप्नीसी?” देंमिनु मर्कूस १४:३६; लूका १२:५०

39 “चाप्नस्कु” देंसा बाक्त। मिनू येसुमी “आं तूचा माल्शो कचौरा यो तूनीसी। आं बुद पा श्येतम खुम्चा यो पुंडसीनीसी। प्रेरित १२:२

40 तन्न आं ग्युरा पेरा गे बाक्चा गेचा चहिं आं गुडमी ममाइ। परमप्रभु यावेमी योत्रचा पुंडसीशो मुर ला मेकेर बाक्चा ताइनीम” दे माइक्सी बाक्त।

41 मिनू शेंसीब १० जनामी मेको आस कली मोदेशो पुंडशो तशा “याक्ब नु यूहन्ना दोदेशो बाक्सा” दे आन थुं मनुथु, लोत्र पमुमा बाक्त। लूका २२:२५-२७

42 मिनू येसुमी नेल्ल आन कली खुप्शा “अर्को जात डा मुर आन कली हुकुम पाइनुड, दे मिम्बपुकीमी मुर आन कली दिप्शा वोइश्शा, हुकुम पाइनीम, दे तुइक्नीनी।

43 तन्न इन दातेमी मोदेशो पचा मदुम्ब। सुमी ठेयब दुम्चा दाक्बा, मेको नेल्ल आन गेय पाइब दुम्चा माल्ब।

44 सु नेल्ल क्येडा डोंइती दुम्चा दाक्बा, मेको नेल्ल आन वाइल दुम्चा माल्ब। मर्कूस ९:३५; १पत्रुस ५:३

45 मारदे हना रागीम जरमेशो यो मान पपांइसीचा कली ममाइ, तन्न वारच पथ नु शुश मुर आन कली प्रोंइचा कली आ गिंम गेथ जाक्शो बाक्त” दे माइक्मी बाक्त।

मिक्च मताइब बारतीमै

मती २०:२९-३४; लूका १८:३५-४३

46 मिनू यरीको सहरमी जाक्दीम्मा बाक्त। मिनू यरीको रे लशा, येसु नु आ शेंसीब आन नोले खोइश्शा, शुश मुर गाक्मानु, तिमै आ तौ मिक्च मताइब पुंडब बारतीमै मेको लां उइ बाक्शो बाक्माक्त।

47 मिनू बारतीमैमी नासरथ डा येसु एको लां पिना पिन बाक्त देंशो नेंशा “ए येसु, दाऊद आ तौ, शिशी पाइय्यीनी” दे वाइ ब्रेत्चा गोवा बाक्त।

48 मिनू शुशेमी “सिक्सी पावो” दे हुइक्तमे बाक्त। आं चहिं डोंइती क्येडा शुश वाइ ब्रेश्शा “दाऊद आ तौ, शिशी पाइय्यीनी” दे ब्रेम्माक्त।

49 मिनू येसु खा दिक्शा “मेको कली एके ब्रेत्तीने” देंमाक्त। मिनू मिक्च मताइब कली “ठेयब थुं पावो। मिनू बोक्को। मारदे हना इ कली ब्रेत्ताक्व” दे मदमे बाक्त।

50 मिनू आ बरखी ताइश्शा, छुल बोक्शा, येसु आ डोंइती जाक्माक्त।

51 मिनू येसुमी “इ कली मार पड, मार पुंडनेवे?” दे हिल्लो पवा बाक्त। मिनू मिक्च मताइबमी “ए शेंब, मिक्च ताइब सेल्यीनी” दे पुना बाक्त।

52 मिनू येसुमी “साशा लावो। इ थमा सुइश्शोमी साते” दे मदानु, ब्रा साशा मिक्च ताइब दुम्शा, येसु आ नोले खोदा बाक्त।

## 11

येसु यरूसलेमम जाकदीशशो

मत्ती २१:१-११; लूका १९:२९-४०; यूहन्ना १२:१२-१९

- 1 मिनू यरूसलेम आ नेकथा जैतून डांडा बेथफागे नु बेथानी जाकदीम्मा बाक्त।
- 2 मिनू येसुमी आ शेंसीब निकशी आस कली “मेरे गाउं लसे। मिनू गाउं ओव्रसीनु, सुइ मडोइशशो गधा आ चाइक्व पाइशशा, वोइशशो थित्नीसी।
- 3 मेको चाककीसे। मुरपुकीमी ‘मारदे लाइक्सी?’ दैतेकम हना ‘प्रभु कली माल्ताक्व। नोले लेशशा सोइक्व’ देंसीनु, लाइक्चा गोनीम” दे सोइक्तीम्सी बाक्त।
- 4 मिनू मेको निकशी लशा, मेक जाकदीशशा, लांमी लाप्यो आ डोंइती पाइशशो गधा आ चाइक्व थित्से बाक्त। मिनू प्रोन्से बाक्त।
- 5 मेकेर बाक्व मुरपुकीमी “मारदे प्रोंइसी?” देंमा बाक्त।
- 6 मिनू येसुमी देशो खोदेशो पा, लोत्र लेत्से बाक्त। मिनू लाइक्चा गेमे बाक्त।
- 7 मिनू गधा आ चाइक्व चाकसे बाक्त। मिनू आन वासी ब्रामे बाक्त। मिनू येसु डोंइसे बाक्त।
- 8 मिनू शुशेमी आन बरखी लांमी ब्रामे बाक्त। अरुमी एर ओंथ डा राशी जिक्शा, लांमी ब्रामे बाक्त।
- 9 डोंइती नोले गाकबपुकीमी “होसन्ना, प्रभु आ नैमी जाकब ठेयब दुम्ल। होसन्ना आ देशो ‘परमप्रभु वारच पने’ बाक्व। भजन संग्रह ११८:२५-२६
- 10 मुल जाक्वशो ई किकी पिपी दाऊद आ राज्य कली जाइ। परमप्रभु कली होसन्ना” दे रेयके पा ठेयब सेल्ना सेल्न गाक्मा बाक्त।
- 11 मिनू यरूसलेम जाकदीशा, परमप्रभु यावे आ खिं ओव्रमाक्त। मिनू एर ओंथ मारेइ मारेइ कोव्रशा, आ शेंसीब १२ जना नु बेथानी लेम्माक्त। मारदे हना नां रिक्चशो बाक्माक्त।

फल मसिशशो फोव्रशी रवा

मत्ती २१:१२-२२; लूका १९:४५-४८; यूहन्ना २:१३-१६

- 12 आ दीसा बेथानी रे पिशा, लांमी गाक्मानु, येसु शोव्रलु बेक्माक्त।
- 13 मिनू इच्ची आइक्था सफा पाइशशो फोव्रशी रवा तशा, फोव्रशी सिशशो बाक्म कों दे कोव्रथ लमाक्त। मिनू जाकदीशशा कोव्रडानु, सफा ला तवा बाक्त। मारदे हना सित्ची मजाकशो बाक्माक्त।
- 14 मिनू “मुल डा मेरे सुइमी इ फल जचा मतामेक्ल” दे मदा बाक्त। आ शेंसीबपुकीमी मो देशो नेन्मे बाक्त।

ग्याप्ब लेयब आन कली खेरशो

- 15 मिनू यरूसलेम जाकदीम्मा बाक्त। जाकदीशशा येसु परमप्रभु यावे आ खिं ओव्रशा, मेकेर ग्याप्ब लेयब आन कली खेरचा गोवा बाक्त। क्येट फाइक्व आन क्येट वोइक्तीके नु ढुकुर लेयब आन नित्तीके खोलशा गेमी बाक्त।
- 16 मिनू सुइ कली मारेइ यो चाकशा लेयचा मगेथु,
- 17 “जात जात डा मुरपुकीमी एकेर प्रार्थना पामेक्ल दे आं खिं वोइशशो बाक्त दे ब्रेकशो बाक्वा, ममाइ डा? गेपुकीमी चहिं खुइपुकीमी खुइ पा चाकशा आन बाक्तीके पुक्खी सेल्तीनी” दे ढुइक्तीमी बाक्त। यसैया ५६:७; येरमीया ७:११
- 18 मिनू फरिसी नु सास्त्रीपुकीमी मेको नेंशा, दोपा साइक्चा दे लां कोव्रडमे बाक्त। तन्न येसु कली तशा, हिंमा बाक्त। मारदे हना मुर नेल्लेमी आ शेंशो नेंशा, छक लाक्बाक्मा बाक्त।
- 19 मिनू नां रिक्चावानु, येसु नु आ शेंसीबपुकीी सहर रे लेम्मा बाक्त।

दल्गीर मपथु, प्रार्थना पचा

- 20 मिनू सुनी लां गाक्मानु, फोव्रशी रवा आ डर रे पुं सम्म सोव्रशो तामे बाक्त।
- 21 मिनू पत्रुसमी ति फुकशा, येसु कली “ए शेंब, कोव्रडीन, इन सराप पशो फोव्रशी रवा सोव्रमाक्त” देंमाक्त।

22 मिनू येसुमी मेको आन कली “परमप्रभु यावे कली थमा सुतीने।

23 नोफा दाइशशा नेनीने, सुमी आं देशो थमा दुम्ब, दे दल्गीर मपथु, मेको डांडा कली ‘एकेर रे समुन्द्रमी याक्सो’ दैत हना, मेको आ थमा सुइशशोमी डांडा याकसीशा लाइब। मर्कूस ९:२३; मती १७:२०

24 मोपतीके ‘आं पुंडशो ताइनुड’ दे थमा सुइशशा, प्रार्थना पा पुंडतीनी हना, इन पुंडशो ताइनीनी। मती ७:७; यूहन्ना १४:१३; १यूहन्ना ५:१४-१५

25 प्रार्थना पा बाक्तीनु, सुइ नु चुरशो बाक्तीनी हना, मेको कली माफ गेने। मिनू स्वर्गम बाक्ब इन आफोमी यो इन मरिम्शो पशो क्याम्शा माफ गेब।

26 माफ मगेतीनी हना, स्वर्गम बाक्ब इन आफोमी यो इन कली माफ मगेब” दे शेंदीमी बाक्त।

अधिकार आ पर्वम हिल्लो पशो  
मती २१:२३-२७; लूका २०:१-८

27 मिनू यरूसलेममी जाक्दीम्मा बाक्त। मिनू येसु परमप्रभु यावे आ खिंमी हिरसेनु, टेयब चढेब, सास्त्री नु जोक्ब तुइक्ब खाल्पापुकी जाक्शा

28 “तेको अधिकारमी मोदेशो पवी? मो पचा, दे सुमी अधिकार गेवे?” देमा बाक्त।

29 मिनू येसुमी “गो इन कली लोत्र का हिल्लो पाइनुड, मेको लोत्र लेत्तीने। मिनू तेको अधिकारमी एको गेय पडा शेंनन्नी।

30 यूहन्नामी मुर आन कली ब्वाक्कुमी खुम्शा गुंडतीके अधिकार स्वर्ग रे तवा देय मुर रे तवा? लो देनीन” दे माइक्मीनु,

31 मेकोपुकीमी “स्वर्ग रे तवा बाक्त दैतय हना, मो हना यूहन्ना आ लोत्र मारदे थमा मसुइक्नी देंब।

32 मुर रे तवा बाक्त देंचा यो दोपा देंय” दे लोत्रसी पमुमा बाक्त। मोदेशो देंचा हिंमा बाक्त। मारदे हना मुर नेल्लेमी यूहन्ना थमान परमप्रभु यावे आ लोत्र पाइब बाक्ब, दे थमा सुइशशो बाक्मा बाक्त। लूका ७:२९-३०

33 मोपतीके “मतुइक्नीकी” देमानु, येसुमी “मो हना तेको अधिकारमी एको गेय पडा दे गो यो मशेंनन्नी” दे माइक्मी बाक्त।

## 12

मरिम्शो बुम्था पाइब आन कथा

मती २१:३३-४६; लूका २०:९-१९

1 मिनू येसुमी कथा सेल्शा, शेंचा गोवा बाक्त। मिनू “मुर कामी अडगुर खुम्शा, थारपु हिरशा, अडगुर खाक्तीक खाल्टा दोशा, धनसार सेल्शा, बुम्था पाइब माल्शा, मेको आन कली गेशा वोइशशा, अर्का रागी लमाक्त। यसैया ५:१-२

2 मिनू अडगुर मीशा, सेक्ची जाक्मेनु, आ गेय पाइब का कली आ भाग पोक्थ सोइक्ता बाक्त।

3 मिनू मेको जाक्दीम्मेनु, बुम्था पाइबपुकीमी मेको कली तुप्शा, श्येत्थ गुइ सोइक्तमे बाक्त।

4 मिनू लेंशा गेय पाइब का कली सोइक्ता बाक्त। मेको कली यो जिचा तोशा, पिया प्रोल्शा, गार सेल्शा सोइक्तमे बाक्त। २इतिहास ३६:१६

5 मिनू लेंशा का कली सोइक्तानु, मेको कली सदमे बाक्त। मोदें शुश खेयप गेय पाइब आन कली सोइक्तानु, का निक्शी आन कली तुप्मे बाक्त। का निक्शी आन कली सदमे बाक्त।

6 मिनू सोइक्ने चाप्चा डा का ला लीमाक्त। मेको आ दाक्शो तौ बाक्माक्त। मिनू ‘आं तौ आ देशो टीनीम’ दे मिम्शा, आ तौ कली सोइक्ता बाक्त।

7 मिनू बुम्था पाइबपुकीमी ‘एको दा अडस ताइब बाक्त। लो साइक्चा। मिनू आ अडस नेल्ल इ केन दुम्ब’ देमुशा गारमा बाक्त।

8 मिनू ग्याइशशा, साइशशा, रू रे लाइशशा ताइक्तमे बाक्त। हिब्रू १३:१२

9 मोदेशो दुम्त हना, रू आ होत्रपम मार पाइबा? जाक्शा, मेको बुम्था पाइब आन कली साइकब। मिनु आ रू अरु आन कली गेब।

10 'खिं सेलबपुकीमी गारो प्रोत्रडमेनु, एको फुल्लु मगार, दे ताइकतमे बाक्त। मेको मगारथु ताइशशो फुल्लु चहिं सुर डा सुरे फुल्लु दुम्माक्त' दे ब्रेक्शो लोत्र मपढेनी?

11 मेको नेल्ल प्रभुमी पशो बाक्त। मिनु 'ओहो, गिश रिम्शो दुम्मे। एको छक लाकचा डा बाकब' दे ब्रेक्शो बाकब" दे माइकमी बाक्त। भजन संग्रह ११८:२२-२३

12 मिनु "एको कथा इं कली कका देंमाक्त" दे रूप्शा, ग्याइक्पाइक्चा माल्मे बाक्त। तन्न शुश मुर देल्लशो तशा हिंशा, ब्राशा लमा बाक्त।

तिरो थाप्चा देय मथाप्चा?

मत्ती २२:१५-२२; लूका २०:२०-२६

13 मिनु येसु कली लोत्र खाइक्पाइक्चा दे फरिसी नु हेरोदी का निक्शी येसु आ बाक्तीके सोइकतमे बाक्त।

14 मिनु मेको सोइशशोपुकी जाक्शा, येसु कली "शेंब, गे थमा पाइब ननी। मुर आन कुल मकोत्रथु सुइ तशा महिंथु, परमप्रभु यावे आ लोत्र थमा पा शेंनीनी, दे तुइक्नीकी। सिजर सरकार कली तिरो थाप्चान माल्ब देय मथाप्थु यो दुम्बा?

15 गोपुकीमी थाप्चा देय मथाप्चा? मार देंनीनी" दे हिल्लो पसु पा लोत्र खाइक्पाइक्चा माल्मे बाक्त। मिनु येसुमी मेको आन पचा माल्लो तुइशशा, मेको आन कली "मारदे आं थुं थाम्नीनी? देनार का कोइदीनी" देंमाक्त। देनार का नाक्त का डा गाल्च बाक्त। मेको रोम डा चांदी के क्येट बाक्त।

16 मिनु देनार का कोइदमे बाक्त। मिनु येसुमी "एको सु आ नैमी खोइशशो बाक्मे?" देंमेनु "सिजर आ नैमी खोइशशो बाक्त" देंमा बाक्त।

17 मिनु येसुमी "सिजर आ मार मार बाक्मा, मेको सिजर कली गेने। परमप्रभु यावे आ मार मार बाक्मा, मेको परमप्रभु यावे कली गेने" दे माइकमी बाक्त। मिनु नेल्ल छक लाक्मा बाक्त। रोमी १३:१७

बेक्शो रे सेंसीचा आ पबंम शेंशो

मत्ती २२:२३-३३; लूका २०:२७-३८

18 मिनु सदुकीपुकी जाक्मा बाक्त। सदुकीपुकीमी बेक्शो रे मसेंसीब दे शेंनीम। मिनु येसु आ बाक्तीके जाक्शा

19 "ए शेंब, मोसामी ब्रेक्शो लोत्रमी 'सुइ आ लोकब आल मथिथु बेक्त हना, मेकोमी आ भोग्यु वोंइसीशा, आ लोकब आ खिं डा मुर मजाम्मल, दे तमी तौ थिवल' दे ब्रेक्शो बाक्त। ब्यवस्था २५:५-६

20 मिनु खिं कामी ७ जना लोकब बाक्मा बाक्त। डोंइती जेठामी मीश चाक्गा बाक्त। मिनु आल मथिथु बेक्माक्त।

21 मिनु माइलामी आ भोग्यु वोंइसे बाक्त। मिनु आ यो आल मथिथु बेक्माक्त। मिनु साइलामी वोंइसे बाक्त। मेको यो आल मथिथु बेक्माक्त।

22 मोदेशो पा ७ जनान आल मथिथु, बेक्मा बाक्त। मिनु नोले मेको मीश मुर यो बेक्माक्त।

23 मुर बेक्शो रे सेंसीशा ब्रोंइमानु, मेको ७ जना वोंइश आन मीश दुम्शो मीश मुर तेको आ मीश दुम्बा?" दे हिल्लो पामे बाक्त।

24 मिनु येसुमी "गे परमप्रभु यावे आ लोत्र मरुप्नीनी। परमप्रभु यावे आ सक्ति यो मतुइक्नीनी। मोपतीके दूली मिम्नीनी, ममाइ?

25 बेक्शो रे सेंसीशा ब्रोंइमानु, मुरपुकीमी ग्युंवे मपाइनीम, स्वर्गम बाक्ब परमप्रभु यावे आ गेय पाइबपुकी खोदेशो दुम्नीम।

26 बेक्शो रे सेंसीचा आ पबंम परमप्रभु यावेमी मोसा कली मी ब्रशो रवा आ नेक्था गुम्शा 'अब्राहाम आ परमप्रभु यावे, इसहाक आ परमप्रभु यावे नु याकूब आ परमप्रभु यावे गो नड' दे मदा बाक्त दे मोसामी ब्रेक्शो किताबमी ब्रेक्शो बाक्ब। मेको लोत्र मपढेनी? प्रस्थान ३:६

27 परमप्रभु यावे बेकशो मुर आन परमप्रभु ममाड, ब्रोंडशो आन परमप्रभु यावे बाकब। गे दूली मिम्बाकनी बाक्त” दे माइकमी बाक्त।

नेल्ल क्येडा तुइकचा मालशो लोत्र

मत्ती २२:३५-४०; लूका १०:२५-२८

28 मिनु सास्त्री कामी सदुकीपुकीमी येसु नु लोत्र पशो नेंशा, येसुमी मेको आन लोत्र लेन्ने चाप्बाक्त, दे रुष्पा डा मिन, येसु आ नेकथा जाकशा “ए शेंब, परमप्रभु यावे आ अरेशो लोत्र तेको नेल्ल क्येडा डोंइती डा बाकबा?” दे हिल्लो पवा बाक्त।

29 मिनु येसुमी “नेल्ल क्येडा डोंइती डा लोत्र एकोन बाकब ‘ए इस्राएल नेनो, इ परमप्रभु यावे का बाकब।

30 थुं का पा, सोक्त का पा, मिम्तीके नु सक्ति नेल्लेमी परमप्रभु यावे, इ परमप्रभु कली दाक्तो’ देंशो एको लोत्र नेल्ल क्येडा डोंइती डा बाकब। ब्यवस्था ६:४-५

31 मिनु आ नोले डा ठेयब लोत्र ‘आंम इ कली दाकशो खोदेशो पा इ नेकथा बाकब आन कली यो दाक्तो’ देंशो बाकब। एको लोत्र निक्शी क्येडा ठेयब लोत्र मबाकब” देंमाक्त। लेवी १९:१८

32 मिनु सास्त्रीमी “शेंब, गे थमान ठीक लोत्र पाइतीनी। परमप्रभु यावे कानाइ बाकब। आ डा लाकशा सुइ मबाकब। लूका २०:३९-४०

33 मिनु थुं का पा, रुप्तीक नु सक्ति नेल्लेमी परमप्रभु यावे कली दाकचा, आंम कली दाकशो खोदेशो पा इ नेकथा बाकब आन कली दाकचा, देंशो लोत्र नेल्ल क्येडा ठेयब बाक्त। मारेइ मारेइ क्योरशा चढ़ेशो क्येडा मेको लोत्र टिशा पचा रिम्शो बाकब” देंमाक्त। १सामुएल १५:२२; होसे ६:६; मत्ती ९:१३

34 मिनु येसुमी “एकोमी निप्स खाप्शो लोत्र पाइबाक्त” दे रुष्पा “गे परमप्रभु यावे आ राज्य रे डोन मबाकनी बाक्त” दे मदा बाक्त। में डा मेरे हिंशा, सुइमी लोत्र हिल्लो मपामे बाक्त। प्रेरित २६:२७-२९

ख्रीस्त सु का आ तौ बाकबा?

मत्ती २२:४१-४६; लूका २०:४१-४४

35 मिनु येसुमी परमप्रभु यावे आ खिंमी शेंना शेंन बाकमेनु “ख्रीस्त दाऊद आ तौ बाकमाक्त, दे सास्त्रीपुकीमी दोपा शेंने चाप्नीमी डा? यसेया ११:१; यूहन्ना ७:४२; रोमी १:३

36 दाऊदमी परमप्रभु यावे आ सोक्त रे पा ‘प्रभुमी आं प्रभु कली इ जोरी सत्रु आन कली इ खोइली आगाम मवोदुमी सम्म आं ग्युरा गे बाकको’ देंत। भजन संग्रह ११०:१; २सामुएल २३:२

37 दाऊदमी मेको कली प्रभु देंब। मिनु दोपा आ तौ दुम्ने चाप्बा डा?” दे शेंदा बाक्त। शुश मुरुमी आ शेंशो लोत्र नेंचा दाक्तमे बाक्त।

सास्त्री आन कली हुइश्शो

मत्ती २५:५-१४; लूका २०:४५-४७

38 मिनु शेंना शेंन “सास्त्री आन लोत्र क्येडा होस पांइसीने। मेकोपुकीमी लाइश्शो कोट फेकशा गाक्चा दाक्नीम। बजारमी हिरशा, मान पपांइसीचा दाक्नीम।

39 गुम्तीक खिंमी ठेयब नित्तीकेमी नित्चा दाक्नीम। भोजमी मान पपांइसीचा डा नित्तीकेमी नित्चा दाक्नीम।

40 वोंइश बेकशो मीश मुर आन शोंप नेल्ल नेकशा गेशा, दुइश्शो दुइश्शो प्रार्थना पा कोंइखु पाइनीम। मोदेशो पाइबपुकीमी अरु आन क्येडा शुश सजाइ ताइनीम” देंमाक्त। याकूब १:२७

पुडग मीश मुरु आ चढ़ेशो क्येट

लूका २१:१-४

41 मिनु येसुमी क्येट चढ़ेतीक एरे निश्शा, शुश मुरुमी क्येट चढ़ेशो कोत्रना कोत्रन बाकमाक्त। क्येट थीब शुशेमी शुश क्येट चढ़ेमे बाक्त। २राजा १२:१०

42 मिनु आ वोंइश बेकशो मारेइ मथीब पुडग मीश मुर का जाकशा, लेप्तोन निक्शी चढ़ेवा बाक्त। लेप्तोन का नेल्ल क्येडा आइकच तांबा के क्येट बाक्त।

43 मिनु येसुमी आ शेंसीब आन कली ब्रेशशा “नोफा दाइशशा नेनीने, नेल्लेमी चढेशो क्येडा मेको पुडग मीश मुरुमी शुश चढेपुत।

44 आ जशा ब्रॉइतीक क्येट नेल्ल गेपुत। अरुमी चहिं आन गाप्शो रे गेम्तेक्म” देंमाकत।

## 13

“परमप्रभु आ खिं मलीब” देशो

मती २४:-; लूका २१:५-३६; लूका १७:२३-३७

1 मिनु येसु परमप्रभु यावे आ खिं रे गूमेनु, आ शेंसीब कामी “ए शेंब, कोव्रडीन, एको खिं ठेयब फुल्लु के सेल्शा, दोमो कोल्शो गिश दारशो तांडसाक्व” देंमाकत।

2 मिनु येसुमी “मुल ओमो ठेयब दारशो सेल्शो खिं ताप्तीवी। तन्न नोले ब्रेशशा, फुल्लु का यो ख्रोप्शा मलीब” देंमाकत।

श्येत दुम्चा गोइब

3 मिनु परमप्रभु यावे आ खिं तांडसीचा डा पा जैतून डांडामी निस्सेनु, पत्रुस, याकूब, यूहन्ना नु अन्द्रीयास जाक्शा, मती १७:१

4 येसु कली “एको इन देशो लोव्र गेना दुम्बा? एको नेल्ल दुम्चापुत, दे तुडक्पाइक्चा डा चिन्ड दोपा तांडसीनीमी? शेंदीकी” देंमा बाकत।

5 मिनु येसुमी “सुइमी इं थुं मक्यामेक्ल, दे होस पा बाक्कीन।

6 शुश मुरुमी आं नें ब्रशा ‘गो एको नड’ देशा, मुर आन थुं क्याइक्नीम। यूहन्ना ८:४९

7 शुश लडाइ दुम्शो लोव्र नेनीनु, महिनीन। मोदेशो दुम्चान माल्ब। रागी नुप्ची चहिं मजा।

8 रागी नुप्चा क्येडा डोंइती जात जात नु राज्य राज्यमी लडाइ पमुइनीम। रागी रागीमी खिनु कुइब। अन्काल दुम्ब। मो दुम्मेनु, श्येत दुम्चा गोवा बाकत, दे तुंडसीब।

थमा सुइक्ब ग्याइक्चा पुंडसीनीम

9 आंम इन कली मिम्शा होस पा बाक्कीन। कछडी वोइक्चा पुंडसीनीनी। युम्तीक खिंमी तुप्चा पुंडसीनीनी। आं नें आ पर्वम हुकुम पाइब नु पिप आन डोंइती राप्पाइक्चा पुंडसीशा, सांकछी दुम्चा माल्नीनी।

10 मोदेशो दुम्चा क्येडा डोंइती रागी नेल्ल डा मुर आन कली ग्येरपाइक्ब लोव्र नेंपाइक्ने थुम्शो दुम्चा माल्ब। मर्कुस १६:१५

11 मिनु इन कली ठेयब मुर आन डोंइती राप्पदमेनु, मार लोव्र पय, मार देंय? दे हिंशा, मिम्स डा मिम्स मबाक्कीन। इन कली दोदेशो लोव्र पचा गेशो बाक्मे, मोदेशो लोव्र पने। मारदे हना गे लोव्र मपाइनीनी, परमप्रभु यावे आ सोक्तीम इन कली लोव्र पपाइक्ब।

12 लोक्बमी आ लोक्ब कली साइक्पाइक्चा गेब। आफोमी तौ कली साइक्पाइक्ब। मिनु तमी तौपुकीमी आम आफ आस कली ग्याइक्पाइशशा साइक्पाइक्नीम।

13 आं नें आ पर्वम सुइम इन कली मदाक्नीम। सु सु चहिं नेल्ल क्येडा नोले सम्म थमा सुइक्चा मप्रोंडथु बाक्नीमी, मेकोपुकी श्येत जचा रे ब्रॉइशा, गेना हना यो परमप्रभु यावे नु बाक्चा ताइनीम। यूहन्ना १५:१८, २१

मुल सम्म मदुम्शो श्येत दुम्ब

14 परमप्रभु यावे आ खिं गेनायो मदुम्चा डा पा बिथोलो दुम्मेनु, मेको मुल पढेबपुकीमी रुप्मेक्ल, यहूदीया रागीम बाक्बपुकी डांडा ग्येत्थ प्रोक्मल। दानीएल ९:२७; दानीएल ११:३१; दानीएल ११:३१

15 बारदालीम बाक्बपुकीमी ‘तोइशशा, खिं ओव्रशा मारेइ लाइक्चा ताइनुड’ दे ममिम्तमेक्ल, दिव दाव प्रेक्शा प्रोक्मल।

16 रूमी गेय पाइबपुकीमी ‘फेक्तीक का लाइक्नुड’ देशा, खिं मलेम्मल। तन्न आन गेय थु था प्रोंइशा प्रोक्मल।

- 17 कोव्रज कुरशो नु दूध तूब आल पाइशशो मीश मुर अरु क्येडा शुश श्येत जाइनीम।  
 18 हिउंदमी मोदेशो श्येत मदुम्ल, दे परमप्रभु यावे कली पुनीने।  
 19 परमप्रभु यावेमी रागी सेला रे मुल सम्म सुइमी मतुइशशो श्येत दुम्ब। मोदेशो श्येत लेशा गेनायो मपीब। दानीएल १२:१  
 20 प्रभुमी मोदेशो श्येत जतीक नाक्त शुश वोइशशो हना, सुइ ब्रोइने मचाप्नीम। तन्न आ योव्रशो आन परबम प्रभुमी मेको श्येत शुश नाक्ती लीचा मगेब।  
 21 मिनु मुरपुकीमी 'खीस्त एकेर जाक्त, मेरेक बाक्ब, लो कोव्रडीन' देतेकम हना, थमा मसुतीन।  
 22 शुशेमी 'गो खीस्त नड' दे जोल पा गाक्नीम। 'परमप्रभु यावे आ लोव्र पाइब नकी' दे जोल पाइबपुकीमी चिन्ड नु छक लाक्चा डा गेय पा कौइनीम। मेकोपुकीमी परमप्रभु यावे आ योव्रशो आन कली यो लां प्रॉइपाइक्चा माल्नीम।  
 23 मेको दुम्चा डोइतीन नेल्ल शंशा तुइक्पाइक्तन्नी। एको लोव्र मिम्शा मप्रेंथु बाक्कीन।

### रागीम जरमेशो जाक्ब

- 24 रागीमी मोदेशो टेयब श्येत नुम्मेनु, सरीडमी चिन्ड तांडसीनीम। नां आ छेडछेड जाम्शा, जिक रिक्शो दुम्ब। तास्ला आ हाम्सो यो जाम्ब।  
 25 सोरुल खपीम दोक्नीम। सरीडमी बाक्शो सक्तिपुकी हिम्सीनीम। हिबू १२:२६  
 26 मिनु मुरपुकीमी रागीम जरमेशो कली गोस्सुमी गिल्सीशा, शुश सक्ति पाइशशा, यिना यिन पशो ताइनीम। दानीएल ७:१३  
 27 मिनु रागीम जरमेशोमी परमप्रभु यावे आ गेय पाइब आन कली रागी तेइ तेइ रे परमप्रभु यावे आ योव्रशो नेल्ल आन कली खुष्शा चाक्थ सोइक्ब। मती १३:४१  
 28 फोव्रशी रवा कोच्वा दाप्शा कुशो तनीनु, बर्सा जाक्माक्त दे तुइक्नीनी।  
 29 आं देशो लोव्र थमा दुम्शो तनीनु, आं जाक्ची जाक्माक्त दे तुइक्नीनी।  
 30 नोफा दाइशशा नेनीने, एको जात डा मुर मनुप्थु, आं देशो थमा दुम्ब।  
 31 सरीड नु रागी नेल्ल जाम्शा लाइनीम, आं लोव्र चहिं गेना हना यो मजाम्थु लीब।  
 32 मोदेशो गेना दुम्ब, दे सुइमी मतुइक्नीम। परमप्रभु यावे आ स्वर्ग डा गेय पाइबपुकीमी यो मतुइक्नीम। तौमी लायो मतुइक्ब। आं आफोमी ला तुइक्ब।

### सासीशा बाक्चा माल्ब

- 33 मोदेशो गेना दुम्बा मतुइक्नीनी। मोपतीके सासीशा बाक्कीन। लूका १२:३५-४०; लूका २१:३६  
 34 दोदेशो दुम्ब देशा हना, मुर का तेइ तेइ हिरथ लमेनु, लचा डोइती आ गेय पाइब आन कली का का पा आन गेय योक्शा, लाप्चो खाल पाइब कली 'गेना हना यो लां कोव्रशा बाक्को' दे माइशशा लाइब।  
 35 आं खिं डा प्रभु गेना लेशशा जाक्बा, दे मतुइक्नीनी। नां रिक्शा जाक्बा कौं? नाक्दो जाक्बा कौं? भाले ग्रीची ना जाक्बा कौं? सुनी जाक्बा कौं दे मारेइ मतुइक्नीनी। मेको इन मतुइक्थु जाक्ब। लूका १२:३८  
 36 इन मतुइक्थु जाक्मेनु, इन कली इप्शो मथिदल।  
 37 मोपतीके लां कोव्रशा सासीशा बाक्कीन दे माइक्तन्नी। मोदेशो नेल्ल आन कली माइक्नुडमी" दे शेंदीमी बाक्त।

## 14

### येसु कली साइक्चा माल्शो

मती २६: - २८:-; लूका २२: - २४:-; यूहन्ना १८: - २१:-

- 1 मिनु बोरब ओरुत्ती मसुप्शो शोब्ले जतीक पास्सा चाड आ निकशी नाक्ती डोइती टेयब चढेब नु सास्त्रीपुकीमी "येसु कली दोपा मुर आन मतुइक्थु ग्याइशशा, साइक्पाइक्चा" दे लोव्रसी पमुमानु  
 2 "चाड नाक्ती मदुम्ब, मुरपुकीमी मरिम्शो पाइनीम" देमुमा बाक्त।



### येसु तेल खेक्चा पुंडसीशो

3 येसु बेथानीमी कोर पाइब सिमोन आ खिंमी खमे जना जन बाक्मेनु, मीश मुर कामी शुश क्येट लाइब ब्रोव्रशो रिना पाइशशो तेल कुरशा जाक्शा, मेको तेल येसु आ पियामी लुक्ता बाक्त।

4 मिनु मेकेर बाक्ब का निक्शीमी “ओदेशो तेल मारदे एकोमी ओपा ताइक्ता?”

5 लेयड हना, सहे सां देनार क्येडा शुश ताक्शा, श्येत जाइब आन कली योक्शा, वारच पने चाम्स वा” दे आन थुं मनुथु, मीश मुर कली हुइक्तमे बाक्त। देनार का नाक्त का डा गाल्च बाक्त। मेको रोम डा चांदी के क्येट बाक्त।

6 मिनु येसुमी “महुइक्तीने, मारदे आ थुं खाइक्पाइक्नी? आं कली रिम्शो पाइक्ती।

7 श्येत जशो मुर गेना हना यो थित्नीनी, मिनु शिशी पाइक्चा दाक्ताक्नी हना, गेना हना यो पाइक्ने चाप्नीनी। आं कली चहिं नोले मथित्नीनी। ब्यवस्था १५:११

8 आ चाप्शो पाप्तु। बेक्चा क्येडा डोंइती आं रां थिम्चा कली तेल खेक्ताक्व।

9 नोफा दाइशशा नेनीने, रागीम ते ते आं लोव्र नेंपाइक्नीमी, मेक मेक एको आ पशो आ पर्बम यो लोव्र पाइनीम” देमाक्त।

### इस्कारीयोत डा यहूदा आ पशो

10 इस्कारीयोत डा यहूदा येसु आ शेंसीब कामी ठेयब चढेब आन कली “येसु कली ग्याइक्चा वारच पाइननी” दे लोव्र पथ लमाक्त। मिनु मेकोपुकीमी आ देशो नेंशा, ग्येरशा “लो, रिम्शोन दुम्त। क्येट गेनीकी” देमा बाक्त।

11 में डा मेरे “गेना नु दोपा ग्याइक्चा वारच पदुमी” दे योव्रकी पना पन गाक्माक्त।

### पास्सा चाड डा भोज

12 बोरब ओख्ती मसुप्शो शोब्ले जतीक चाड आ डोंइती डा नाक्ती पास्सा डा पाठा क्योरशा ब्वाइनीम। मिनु येसु आ शेंसीबपुकीमी “पास्सा मानेचा कली ते लशा साचा? मार देंनीनी?” दे हिल्लो पामे बाक्त।

13 मिनु येसुमी शेंसीब निक्शी आस कली “सहर लसे। मिनु गाग्री कुरशो मुर का कली ग्रुम्नीसी। मेको आ नोले खोतीसे।

14 मिनु मेको तेको खिं ओव्रबा, गे यो ओव्रडीसे। मिनु खिं डा मुर कली ‘शेंबमी सोइशशो नस्कु। शेंबमी आ शेंसीबपुकी नु काथा बाक्शा, पास्सा ते मानेचा? दे हिल्लो पथ सोइक्ताक्सकी’ दे मतीसे। मर्कुस ११:३

15 मो माइक्सीनु, मेकोमी इस कली तला तारी ठेयब कोठा का कोइब। मेको कोठामी गुन्द्री पीरा ब्रशा वोइशशो थित्नीसी। मिनु मेकेरन साचा” दे सोइक्तीम्सी बाक्त।

16 मिनु मेको निक्शी लशा, सहर जाक्दीशशा, येसुमी दोदेशो देमे, मोदेशो थित्से बाक्त। मिनु पास्सा चाड डा भोज सादसे बाक्त।

17 मिनु नां रिक्मेनु, येसु नु आ १२ जना शेंसीब खुम्समा बाक्त।

18 मिनु जना जन बाक्मानु, येसुमी “नोफा दाइशशा नेनीन। मुल एक बाक्ब काम आं कली ग्याइक्ब आन कली वारच पाइब। मुल गो नु काथा जना जन बाक्ब” देमाक्त। यूहन्ना १३:२१-२६

19 मिनु नेल्लेमी शुश मरिम्शो लाक्शा “ए प्रभु, मेको वारच पाइब गो दुम्नुडा कौ?” दे का का पा हिल्लो पामे बाक्त।

20 मिनु येसुमी “१२ जना शेंसीब इन दाते डा का बाक्ब। गो नु काथा शोब्ले शेक्कुम तेप्बमी आं कली ग्याइक्पाइक्चा वारच पाइब।

21 मारदे हना रागीम जरमेशो आ पर्बम ब्रेक्शो लोव्र नेल्ल थमा दुम्चा माल्ब। मेको बेक्चा माल्ब। मो हना यो रागीम जरमेशो कली ग्याइक्पाइक्चा वारच पाइब कली शुश मरिम्शो दुम्ब। मो देशो पाइब मुर मजरमेस हना, मेको कली रिम्शो दुम्ब वा” दे माइक्मी बाक्त।

22 मिनु जना जन बाक्मानु, शोब्ले शेशा “गे रिम्शो पाइब बाक्नीनी” दे प्रार्थना पशा जिक्शा, आ शेंसीब आन कली योक्शा “दांडसीने, एको आं रां बाक्ब” देमाक्त। १कोरिन्थी ११:२३-२५

23 मिनू कचौरा शेशा “गे रिम्शो पाइब बाकनीनी” दे प्रार्थना पा, मेको आन कली तूचा गेमी बाक्त। मिनू नेल्लेमी तूडमे बाक्त।

24 मिनू “एको आं हुश बाक्ब। आं हुशेमी परमप्रभु यावे आ गेशो नक लोत्र खाप्ता। आं हुश जांरशोमी शुश मुर आन पाप क्याम्सीब। प्रस्थान २४:८; हिब्रू ९:१५-१६

25 नोफा दाइशशा नेनीन, मुल डा मेरे एको अडगुर रे सेल्शो तूतीके मतूनुड। नोले नेल्ल नक दुम्शा, परमप्रभु यावे आ राज्यमी बाक्शा तूनुड” दे माइकमी बाक्त।

26 मिनू कुम्सो पा बोक्शा, जैतून डांडा ग्येत्थ लमा बाक्त। भजन संग्रह ११३:- ११८:-

### पत्रुसमी “गेनायो मप्रॉइनन्नी” देशो

27 मिनू लना लन बाक्मानु, येसुमी “गे नेल्लेमी इन थुं ग्यशा, आं कली प्रॉइनीनी। मारदे हना ओदें ब्रेकशो लोत्र थमा दुम्ब ‘गो गोटला कली तुप्शा खेरनुड। मिनू भेडापुकी प्रोकशा, साव सुव ब्राइनीम’ देशो बाक्ब। जकरिया १३:७; यूहन्ना १६:३२

28 नोले गो बेक्शो रे सेंचा पुंडसीशा, इन डोंइती गालील रागी जाकदीत्नुड” देंमाक्त। मर्कूस १६:७

29 मिनू पत्रुसमी “मेको नेल्लेमी इन कली प्रॉइशा प्रोक्तेकम हना यो, गो मप्रॉइनन्नी” देंमेनु, यूहन्ना १३:३८

30 येसुमी “नोफा दाइशशा नेनो, में नाकदोन भाले खेयप निक्शी मप्रौथु, खेयप सां सम्म ‘मेको कली मतुइक्नुड, सु बाक्म’ दे आं पर्बम देंनेवे” दे मदा बाक्त।

31 मिनू पत्रुसमी “मदेंनुड, गे नु काथा बाक्शा, साइक्चा पुंडसाकयी हना यो, मोदेशो गेनायो मदेंनुड” दे लोत्र थोकशा देंमाक्त। आ शेंसीब नेल्लेमी यो मो देंमा बाक्त।

### गेथ्सेमनेमी प्रार्थना पशो

32 मिनू गेथ्सेमने जाकदीम्मा बाक्त। मिनू येसुमी “लो, एक बाक्कीन। गो इच्ची आइक्था लशा, प्रार्थना पाइनुड” देशो,

33 पत्रुस, याकूब नु यूहन्ना सां आन कली आइक्था लाइशशा लमाक्त। येसु आ थुं शुश खाइक्माक्त। मत्ती १७:१

34 मिनू सां आन कली “आं थुं शुश खाइशशा, बेक्चा डा दुम्ती। मड्पथु गो नु काथा बाक्कीन” दे माइकमी बाक्त। यूहन्ना १२:२७

35 मिनू इच्का डोंइती लशा, खपीम बाप्शा “दुम्त हना, मुल दुम्चशो श्येत मदुम्ल” दे प्रार्थना पवा बाक्त।

36 मिनू “आब्बा, आं आफ, गे मारेइ मारेइ पने चाप्नीनी। एको कचौरा आं कली मतूपाइक्थु लतीने। तन्न आं दाक्शो मदुम्ल। इन दाक्शोन दुम्ल” दे प्रार्थना पशा, लेशशा जाक्माक्त। येसुमी आइक्च आल खोदेशो पा आ आफ कली आब्बा देंत।

37 लेशशा जाकमेनु, सांफा आन कली इप्शो तामी बाक्त। मिनू पत्रुस कली “ए सिमोन, इमे? छिन का यो मड्पथु बाक्ने मचबी? मर्कूस १०:३८

38 थुं थाम्चा पुंडसेनु, पाप मपड, दे मड्पथु बाक्शा प्रार्थना पावो। थुंमी पाइनुड, चान्पुड देंब, तन्न रांमी फाल्ने मचाप्ब” दे मदा बाक्त।

39 मिनू लेशा इच्का आइक्था लशा, डोंइती प्रार्थना पशो खोदेशो पा, प्रार्थना पवा बाक्त।

40 मिनू लेशा लेशशा जाक्शा, निन्द्रामी दुक्शा बाक्शो तामी बाक्त। मेकोपुकीमी मार देंचा, दे मारेइ मतुइक्तमे बाक्त।

41 मिनू लेशा प्रार्थना पथ लशा, लेशशा जाक्शा, मेको आन कली “गे मुल सम्म इप्शा बाक्नीनी? मुल गाप्त। रागीम जरमेशो पापी आन गुडमी गेचा पुंडसीचा चिकताक्व।

42 लो बोक्कीन, लय। आं कली ग्याइक्चा वारच पाइब जाक्चाप्तु” दे माइकमी बाक्त।

### येसु ग्याइक्चा पुंडसीशो

43 मो माडकमीनु, आ शेंसीब यहूदामी ठेयब चढेब, सास्त्री नु जोकब तुडकब खालपापुकीमी सोडशो तरवार कोकके कुरब हुल, येसु कली ग्याइकथ चाकगा बाक्त।

44 यहूदामी “सु कली पुकपु पदु, मेको कली ग्याइशशा लतीने” दे ग्याइकथ जाकब आन कली तुडकपाइशो बाकमाक्त।

45 मिनु जाकमानु, यहूदा येसु आ नेकथा लशा “रब्बी” दे बे मुप्शा, पुकपु पवा बाक्त। हिबू लोव्रमी ठेयब शेंब कली रब्बी देनीम।

46 मिनु ग्याइकथ जाकबपुकीमी येसु कली ग्याइकतमे बाक्त।

47 मिनु येसु नु काथा बाकब कामी तरवार ग्रि शोडशशा, ठेयब चढेब आ वाइल का आ नोफा दि खोदा बाक्त।

48 मिनु येसुमी आ कली ग्याइकब हुल आन कली “तरवार कोकके कुरशा, खुड पाइब कली ग्याइकथ जाकशो खोदेशो पा आं कली ग्याइकथ जाकनी?

49 नाक्त कित कित परमप्रभु यावे आ खिंमी गेपुकी नु काथा बाकशा, शेंना शेंन बाकडानु, मग्याइकतीनी। तन्न परमप्रभु यावेमी ब्रेकपाइशो लोव्र थमा दुम्या कली ओदेशो दुम्त” दे माडकमी बाक्त।

50 मिनु आ शेंसीबपुकी येसु कली थु था प्रोडशा, साव सुव ब्रशा प्रोकमा बाक्त।

51 मिनु येसु कली ग्याइशशा फ्रेंशा लदमेनु, टिटा का आन नोले खोदा बाक्त। मेको टिटांम वा का ला गिल्सीशो बाकमाक्त।

52 मारदे हना मेको कली ग्याइकतमेनु, आ फेकशो वा प्रोडशा, शिश्रा प्रोकशो बाकमाक्त। आमोस २:१६

### येसु कली चढेब आ डोंडती चाकशो

53 मिनु येसु कली नेल्ल क्येडा ठेयब चढेब आ डोंडती चाकदीत्मे बाक्त। मेकेर ठेयब चढेब, जोकब तुडकब खालपा नु सास्त्रीपुकी खुम्सीशा बाकशो बाकमा बाक्त।

54 पत्रुस मेको आन नोनोले खोडशशा लशा, नेल्ल क्येडा ठेयब चढेब आ लाडगा जाकदीम्माक्त। मेकेर सिपाइपुकी नु काथा मी थेरशा बाकमाक्त।

55 ठेयब चढेब नु मेकेर बाकब नेल्लेमी मार पामे बाक्त देंशा हना, जोल पा दोस गेशा, येसु कली साइकपाइक्या माल्मे बाक्त। तन्न दोस गेने मचाप्मे बाक्त।

56 शुश मुरुमी जोल पा सांकछी गेमे बाक्त, तन्न आन लोव्र मगारमाक्त।

57 सांकछी का निक्शी बोक्शा “एको ग्याइशशो मुरुमी साबेर मार देंशो नेंतक देंशा हना

58 ‘एको गुडमी सेल्शो परमप्रभु यावे आ खिं प्रेशशा, नाक्त सांमी अर्को सेल्नुड। मेको चहिं गुडमी सेल्शो ममाइ’ देंशो नेंतक” देंमा बाक्त। यूहन्ना २:१९-२१

59 मो देंमा बाक्त हना यो, आन लोव्र मगारमाक्त।

60 मिनु नेल्ल क्येडा ठेयब चढेब बोक्शा, आन दातेमी राप्शा, येसु कली “एकोपुकीमी देंशो लोव्र नेंशा, मार देंनेवे?” दे हिल्लो पवा बाक्त। मर्कूस १५:५; यसैया ५३:७

61 मिनु येसु सिक्सी पा बाकशा, लोव्र का यो मलेत्ता बाक्त। मिनु नेल्ल क्येडा ठेयब चढेबमी “गे नेल्ल क्येडा मान ताइब परमप्रभु यावे आ तौ खीस्त नवे?” दे हिल्लो पवानु,

62 येसुमी “गो नड। गे रागीम जरमेशो कली नेल्ल सक्ति पाइशशो आ ग्युरा गे बाकशो ताइनीनी। गोस्सुमी गिल्सीशा जाकना जाकन पशो ताइनीनी” दे मदा बाक्त। भजन संग्रह ११०:१; दानीएल ७:१३-१४

63 मिनु नेल्ल क्येडा ठेयब चढेबमी आंम आ फेकशो वा खाकशा “परमप्रभु यावे कली शुक्शी लोव्र पाइबाक्त।

64 मार सांकछी माल्दा डा? आ शुक्शी पशो लोव्र गे नेल्लेमी नेंशा, सांकछी दुम्तीनी। एको कली मार पाइकचा? मार देंनीनी?” दे माडकमीनु, नेल्लेमी “साइकचा माल्ब” देंमा बाक्त। यूहन्ना १९:७

65 मिनु साइक्चा माल्ब देशा डा मिन, का निक्शीमी आ कुलम तोक्तमे बाक्त। का निक्शीमी आ मिक्च सुम्शा, तुप्शा “सुमी तुमे? लो देन” दे शुक्शी पामे बाक्त। मिनु सिपाइ आन गुडमी गेमे बाक्त। मेकोपुकीमी तुप्ना तुप्न लदमे बाक्त।

पत्रुसम “मेको कली मतुइक्नुड” देशो

- 66 आगाम मोदेशो दुम्मेनु, पत्रुस लाडगामी बाक्माक्त। मिनु गेय पाइब मीश मुर कामी जाक्शा,  
 67 पत्रुस कली मी थेरशो तशा, शिरशा कोव्रशा “गे यो मेको नासरथ डा येसु नु काथा गाक्ब का बाक्डे बाक्त” देमाक्त।  
 68 मिनु पत्रुसमी “इ देशो मरुबु। मारेइ मतुइक्नु” देमाक्त। मिनु गूशा, ठेयब लाप्यो डा लां जाक्दीम्माक्त।  
 69 मिनु मेको गेय पाइब मीश मुरुमी पत्रुस कली लेंशा तशा, मेकेर बाक्ब आन कली “मेरे यो मेको नु गाक्ब का बाक्त” देमेनु,  
 70 पत्रुसमी “गो मनड, मेको कली मतुइक्नुड” देमाक्त। मिनु छिन का नोले मेकेर बाक्बपुकीमी यो “गे मेको नु काथा गाक्ब का बाक्डे बाक्त, मारदे हना गालील डा बाक्डे बाक्त, दे तुंडसीब” देमानु,  
 71 पत्रुसमी “जोल पाता हना, यावेमी सजाइ गेयील, इन देशो मुर कली तुंडसीन मतुइक्नुड” दे कसम जशा, आ लोत्र थोक्शा देमाक्त।  
 72 मो देंम चोटी भाले खेयप निक्शी ग्रीमाक्त। मिनु पत्रुसमी “भाले खेयप निक्शी मग्रीथु, खेयप सां सम्म मेको कली मतुइक्नुड, सु बाक्म? देंनेवे” दे येसुमी देशो लोत्र ति फ्रुक्गा बाक्त। मिनु आ पशो मिम्शा डाक्माक्त।

## 15

पिलातस आ डोंइती राप्पाइश्शो

- 1 मिनु नां सोव्रमेनु, ठेयब चढेब, जोक्ब तुइक्बखाल्पा नु सास्त्रीपुकी, सभाम बाक्ब नेल्ल खुम्सीशा, सल्ला पामे बाक्त। मिनु येसु कली फ्रेंशा लाइश्शा, पिलातस आ गुडमी गेमे बाक्त।  
 2 मिनु पिलातसमी येसु कली “गे यहूदी आन पिप नवे?” दे हिल्लो पवानु “गे आंमा देंतीनी” दे लोत्र लेत्ता बाक्त।  
 3 ठेयब चढेबपुकीमी शुश दोस गेमे बाक्त।  
 4 मिनु पिलातसमी येसु कली “इ कली शुश दोस गेम्तेक्मे। गे मेको आन कली मारेइ लोत्र मलेत्नेवे?” दे हिल्लो पवा बाक्त।  
 5 मिनु येसुमी लोत्र का यो मलेत्ता बाक्त। मिनु पिलातस छक लाक्माक्त। मर्कूस १४:६१; यसैया ५३:१७  
 6 पास्सा नाक्ती पिलातसमी मुरपुकीमी प्रोंइचा, दे पुंडशो जेल्खानमी चोक्सीशो मुर का कली प्रोंइबाक्माक्त।  
 7 सरकार कली मरिम्शो पा जेल्खानमी चोक्चा पुंडसीशो मुर आन दाते डा बारब्बा माइश्शो का बाक्माक्त। मेकोमी मुर साइश्शो बाक्माक्त।  
 8 मिनु मुरपुकीमी पिलातस कली “साइ रे डा पशो खोदेशो पा मुर का कली प्रोनीन” दे पुन्मे बाक्त।  
 9 मिनु पिलातसमी “यहूदी, इन पिप प्रोंइचा दे पुंडनी?” दे हिल्लो पवा बाक्त।  
 10 मारदे हना ठेयब चढेबपुकीमी थुं चोशा, येसु कली ग्याइक्पदमे बाक्त दे रुप्शा, प्रोंइचा माल्शो बाक्माक्त। यूहन्ना ११:४८  
 11 तन्न ठेयब चढेबपुकीमी मुर आन कली हुल पोक्शा “मेको कली मप्रोंइचा, बारब्बा कली प्रोंइचा, सरकार” दे पुंडपदमे बाक्त।  
 12 मिनु पिलातसमी “गेपुकीमी यहूदी आन पिप देशो मुर कली मार पदु मिनु?” दे हिल्लो पवानु  
 13 “मेको कली शीमी क्येप्शा कांटी थोक्शा क्याइक्चा माल्ब” दे रेयके पचा गोत्रमे बाक्त।  
 14 मिनु पिलातसमी “मार मरिम्शो पवा, मार दोस गेचा” देमेनु “शीमी क्येप्शा कांटी थोक्शा क्याइक्चा माल्ब” दे शुश रेयके पामे बाक्त।

15 मिनु पिलातसमी “हुल आन दाकशो पचा” दे मिम्शा, बारब्बा कली प्रॉइपदा बाक्त। येसु कली चहिं युक्पाइश्शा, शीमी क्येप्शा कांटी थोकशा क्याइक्चा कली सिपाइ आन गुइमी गेवा बाक्त।

येसु कली शीमी क्येप्शा क्याइश्शो

16 मिनु सिपाइपुकीमी येसु कली दरवार डा सिपाइ आन बाक्तीके चाकदीश्शा, आन पलटन नेल्ल खुप्शा डा मिन,

17 आ फेक्शो वा पुइश्शा, पिप आन फेक्तीक रड पाइश्शो वा फेक्पाइश्शा, चू के सिरपेच सेल्शा, आ पियाम गुप्तमे बाक्त।

18 मिनु “यहूदी आन पिप, सेउ ताक्कीन” दे सेउ पखु पामे बाक्त।

19 मिनु रेक्के के कोक्केमी आ पिया तेत्मे बाक्त। आ कुल तोक्तमे बाक्त। मिनु आ डोंइती पोक्च थेक्शा बाप्शा, टेयब सेल्लखु पामे बाक्त।

20 मिनु शुक्शी पचा रूशा, वा पुइश्शा, आंम आ वा फेक्पाइश्शा, गुंइशा, शीमी क्येप्शा कांटी थोकशा क्याइक्चा कली लदमे बाक्त।

21 मिनु लना लन बाक्मानु, आ गाउं रे पिशो साइरेनी डा सिमोन गुम्मे बाक्त। मेको सिमोन अलेकजन्डर नु रुफुस आस आफ बाक्माक्त। मेको कली गुम्शा, येसु कली क्येप्तीक शी “लो, कुर कि कुर” दे कुरपदमे बाक्त। रोमी १६:१३

22 मिनु येसु कली गोल्यथामी चाकदीत्मे बाक्त। गोल्यथा कली खप्परे यो देंसीब।

23 मिनु अङ्गुर शांबुमी मूरे माइश्शो तेल कुर पशो तूतीके गेमेनु, येसुमी तूने मबिस्से बाक्त।

24 मिनु शीमी क्येप्शा कांटी थोकशा क्यदमे बाक्त। क्याइश्शा डा मिन, सुमी ताइबा, दे तुइक्चा कली वा वोइश्शा फेन्टे आप्मे बाक्त। भजन संग्रह २२:१८

25 शीमी क्यदमेनु, सुनी डा ९ बजेशो बाक्माक्त।

26 “यहूदी आन पिप” दे दोस गेशा, ब्रेक्शो ब्रेक्स यो क्येप्शो बाक्माक्त।

27 खुइ निक्शी आस कली यो का आ ग्युरा गे, का आ पेरा गे क्याइश्शा वोदमे बाक्त।

28 मो पशोमी “मरिम्शो पाइब सुइश्शा, मरिम्शो पाइब नु काथा वोइक्चा पुंइसीब” दे परमप्रभु यावेमी ब्रेक्पाइश्शो लोव थमा दुम्माक्त। यसैया ५३:१२

29 मेकेर कोव्रब शुश मुर बाक्मा बाक्त। मेकोपुकीम आन पिया हिम्शा “परमप्रभु यावे आ खिं प्रेशा, नाक्त सांमी नक सेल्लुड, देंते। खोइ मिनु, सेल्ले चबी? मर्कूस १४:५८

30 शीमी क्येप्शो रे प्रॉइसीशा तोंइसो” दे शुक्शी पामे बाक्त।

31 टेयब चढेब नु सास्त्रीपुकीमी यो शुक्शी पा “शुश मुर आन कली श्येत रे प्रॉइना प्रॉइन गाक्बाक्त, आंम कली चहिं प्रॉइसीने मचाप्बाक्त।

32 इम्नाएल डा पिप, खीस्तमी शीमी क्येप्शो रे प्रॉइसेकल। प्रॉइसीशो ताइतय हना, थमा सुइक्नय” देंमुमा बाक्त। आ ग्युरा नु पेरा गे वोइश्शो निक्शीमी यो शुक्शी पदसे बाक्त। मत्ती १६:१४

33 मिनु नाक्त १२ बजे नां जिक रिक्शा, ३ बजे सम्म रागी नेल्ल छिडछिड दुम्माक्त।

34 मिनु ३ बजे गे येसुमी “एली, एली, लामा असाब्थानी” दे वाइ ब्रेम्माक्त। आ देंशो मार रुम्सीब देंशा हना “आं परमप्रभु, आं परमप्रभु, मारदे प्रॉइयीनी?” देंशो रुम्सीब। भजन संग्रह २२:२

35 एर ओंथ बाक्बपुकीमी मो देंशा वाइ ब्रेशो नेंशा “नेनीने, एलीया कली ब्रेत्ताक्व” देंमुमा बाक्त।

36 मिनु का दोरशा लशा, रुवामी ग्युरशो तूचा थोव्रक नुप्शा, कोक्केमी लिक्शा युप्चा गेशा “एलीया जाक्शा, प्रॉइबा कों? लो, कोव्रय” देंमाक्त।

37 मिनु येसु लेंशा काले वाइ ब्रेशो, नोले सोक्त कीशा बेक्माक्त। प्रस्थान २६:३१-३३; २इतिहास ३:१४

38 मिनु बेक्म नोले मार दुम्माक्त देंशा हना, परमप्रभु यावे आ खिं आगा डा कोठामी बारेशो वा इर रे उड सम्म उइक्थ पा जेर गाक्माक्त।

39 मिनु येसु आ डोंइती राप्शा बाक्शो कप्तानमी येसु वाइ ब्रेशो, नोले सोक्त कीशा बेक्शो तशा “थमा पा, एको मुर परमप्रभु यावे आ तौ बाक्माक्त” देंमाक्त।

40 येसु बेकमेनु, शुश मीश मुरपुकीमी डोन रे कोवशो बाक्मा बाक्त। मोदेशो कोवब का माग्दाला डा मरीयम बाक्माक्त। का याकूब नु योसेस आस ममा मरीयम बाक्माक्त। का सालोमे बाक्माक्त।

41 मेकोपुकी गालील रे यरूसलेम सम्म काथा गाक्शा, येसु कली वारच पना पन बाक्शो बाक्मा बाक्त। अरु यो काथा गाक्शा, यरूसलेम जाक्दीशो बाक्मा बाक्त। लूका ८:२-३

येसु आ रां पुक्खीमी वोइशो

42 येसु बेक्ची नाक्त चहिं नाइक्तीक नाक्त आ डोंइती नाक्त बाक्माक्त। मिनु नां रिक्मेनु, मार दुम्माक्त देंशा हना,

43 अरीमाथीया डा योसेफ माइशो, सभामी बाक्ब आन दाते डा हिक्सीशो मुर का बाक्माक्त। मेको परमप्रभु यावे आ राज्य तांडसेक्ल, दे आस पा बाक्शो बाक्माक्त। मेको मुरुमी महिंथु, पिलातस कली गुमथ लशा “येसु आ बेक्शो रां लाइक्चा गेयीनी” दे पुना बाक्त।

44 मिनु पिलातसमी बेकम को? मबेकम दे मारेड मतुइक्थु कप्तान कली ब्रेशशा “मेको येसु माइशो बेकमे?” दे हिल्लो पवा बाक्त।

45 मिनु कप्तानमी “बेकत” देंमेनु, लाइक्चा गेवा बाक्त।

46 मिनु योसेफमी बुश वा ग्याप्शा चाक्शा, येसु आ बेक्शो रां रे कांटी उइशशा शोल्ला, बुश वामी गिल्ला लाइशशा, पुक्खी कामी ओइशा वोदा बाक्त। मेको पुक्खी बेक्शो मुर वोइक्चा कली फुल्लु मुशा, लाप्चो पाइशशा सेल्शा वोइशशा बाक्माक्त। मिनु बेक्शो मुर ओइशा वोइशशा, फुल्लुमी चोक्शा वोदा बाक्त।

47 मोपा वोइशशा माग्दाला डा मरीयम नु योसेस आ ममा मरीयममी ताम्से बाक्त।

## 16

येसु बेक्शो रे सेंसाक्व, दे नेंपाइशो

मती २८:१-१०; लूका २४:१-१२; यूहन्ना २०:१-१०

1 मिनु नाइक्तीक नाक्त नोले माग्दाला डा मरीयम, याकूब आ ममा मरीयम नु सालोमेमी बेक्शो मुर आ रांम खेक्चा कली खेक्तीक ग्याप्मे बाक्त।

2 मिनु हप्ता डा डोंइती नाक्त सुनी कना बोक्शा, नां सोवमेनु, पुक्खी गे लमा बाक्त।

3 मिनु लमा लमा “फुल्लु सुमी याक्शा गेबा?” देंमुमा बाक्त।

4 मिनु जाक्दीशशा कोवडमेनु, फुल्लु याक्ने थुमशो तामे बाक्त। मेको फुल्लु शुश ठेयब बाक्माक्त।

5 मिनु पुक्खी ओव्रशा कोवडमेनु, बुश वा फेक्शो ठिटा का ग्युरा गे निशशो तशा छक लाक्मा बाक्त।

6 मिनु मेको ठिटामी “मार छक लाक्नी? शीमी क्येप्शा कांटी थोक्शा कयाइशशा नासरथ डा येसु कली माल्थ जाक्नी ममाइ? आ बेक्शो रां वोइक्तीके कोवडीन, मबाक्ब। बेक्शो रे सेंसाक्व।

7 मुल लशा, पत्रुस, शेंसीब नेल्ल आन कली नु इन डोंइती तुइक्पाइशशा खोदेशो पा, इन डोंइती गालील जाक्दीप्बा। मेकेर गुमचा ताइनीनी, दे शोव्रथ लने” दे माइक्मी बाक्त। मर्कूस १४:२८

8 मिनु मीश मुरपुकी छक लाक्शा, हिंशा खिंखि पा फो फु गूशा प्रोक्मा बाक्त। मिनु सुइ कली मारेड मदेंमा बाक्त। मारदे हना क्युल हिंशो बाक्मा बाक्त।

येसुमी आंम कली तपांडसीशो

लूका २४:३६-४९; यूहन्ना २०:१९-२३

9 हप्ता डा डोंइती नाक्ती सुनी कना येसु बेक्शो रे सेंसीशा, ७ ओटा वोल ग्रुंइचा पुंडसीशो माग्दाला डा मरीयम कली तपांडसे बाक्त। लूका ८:२; यूहन्ना २०:१-१८

10 मरीयममी येसु कली तशा, लशा, डोंइती येसु नु काथा गाक्ब मुल आन थुं खाइशशा बाक्ब आन कली “गो येसु कली बेक्शो रे सेंसीशा ब्रोंइशो ताता” दे शोव्रडा बाक्त।

11 मेकोपुकीमी मरीयम आ लोव्र थमा मसुदमे बाक्त।

12 नोले येसु कली थमा सुइक्ब निक्शी आस गाउं लसानु, लांमी येसुमी तपांडसे बाक्त। लूका २४:१३-३५

13 मेको निक्शी फ्रा फु लेशशा जाक्शा, अरु आन कली “येसु कली ताइतस्कु” देसा बाक्त। मिनु मेको आस लोत्र यो थमा मसुदमे बाक्त।

14 मिनु नोले आ शेंसीब ११ जनामी खमे जना जन बाक्मानु, येसुमी मेको आन कली तपांडसे बाक्त। मिनु “मुल सम्म रुप्चा थुं मपनी? मुल यो थमा मसुइय्यीनी?” दे हुइक्तीमी बाक्त। मारदे हना “बेक्शो रे सेंसीशा ब्रोंडशो आंड मिक्चीमी ताइतक” देंब आन लोत्र थमा मसुइशो बाक्मा बाक्त। १कोरिन्थी १५:५

### येसु आ नोले डा लोत्र

15 मिनु येसुमी आ शेंसीब ११ जना आन कली “रागी नेल्ल हिरशा, ग्येरपाइक्ब लोत्र नेल्ल आन कली नेंपतीने। मर्कूस १३:१०; मत्ती २८:१६-२०

16 सुमी थमा सुइशशा, ब्वाक्कुमी खुम्शा गुंडचा पुंडसीबा, मेको ब्रोंडचा ताइब। सुमी चहिं थमा मसुइक्बा, मेको सजाइ गेचा पुंडसीब। प्रेरित २:३८; प्रेरित १६:३१-३३

17 थमा सुइक्बपुकी दोदेशो सक्ति पाइशो दुम्नीम देंशा हना, आं नें थिशा वोल आन कली गुंडशा खेरनीम। परमप्रभु यावे आ सोक्तीमी पपाइशो लोत्र ब्वाक्नीम। प्रेरित १६:१८; प्रेरित १०:४६; प्रेरित १९:६

18 बुस्स ग्याइक्ताक्म हना यो, ओशयेर तूतेक्म हना यो, मेको आन कली मारेइ मदुम्ब। रोइ पाइब आन तारी गुइ चाक्शा प्रार्थना पामेनु, सानीम” दे माइक्मी बाक्त। लूका १०:१९; प्रेरित २८:३-६; याकूब ५:१४-१५

19 मेको लोत्र नेल्ल थुम्शा नोले प्रभु येसु स्वर्ग लाइक्चा पुंडसे बाक्त। मिनु परमप्रभु यावे आ ग्युरा गे निस्से बाक्त। प्रेरित १:२; भजन संग्रह ११०:१; प्रेरित ७:५५

20 मिनु येसु कली थमा सुइक्बपुकी लशा, ग्येरपाइक्ब लोत्र तेइ तेइ नेंपाइक्ना पाइक्न गाक्मा बाक्त। प्रभु यो मेकोपुकी नु काथा बाक्शा, चिन्ड कौइना कौइन मेको आन लोत्र थमा बाक्ब देंबाक्माक्त। प्रेरित १४:३; हिब्रू २:४

## लूका

**ब्रेक्ब मुर:** नेल्ल क्येडा डोंइती डा थमा सुइक्ब नु नोले थमा सुइक्ब आन इतिहास ब्रेक्ब येरोम नु यूसेबियसमी एको किताब लूकाम ब्रेक्शो बाक्ब, दे तुइक्तसे बाक्त। लूकामी प्रेरित किताब यो ब्रेक्शो बाक्ब। परमप्रभु यावे आ लोव्रमी लूका आ पर्वम सां खेयप लोव्र पशो बाक्ब। कलस्सी ४:१४; फिलेमोन:२४; तिमोथी ४:११ लूकामी, इस्राएली मटुम्शो, पावल नु गेय पवा बाक्त। मेको शुश शेंसीशो मुर बाक्माक्त।

**गेना ब्रेक्शो:** एको किताब गेना ब्रेक्शो बाक्ब ठीक पा मटुइक्नीम। तन्न ६०-८५ ए. डी. मेर दुम्चा माल्ब। लूका आ ब्रेक्शो क्येडा डोंइती अर्को ग्येरपाइक्तीक लोव्र ब्रेक्ने थुम्शो बाक्तेक्म। लूका १:१

**मारदे ब्रेक्शो:** लूकामी थियोफीलस माइश्शो ठेयब मुर कली येसु ख्रीस्त आ इतिहास नु आ शेंशो नेल्ल ब्रेक्शो बाक्ब। येसु आ किकी पिपी आदम सम्म डा लोव्र ब्रेक्शो बाक्ब। एको किताब यहूदी आन कली ला ममाइ, रागी नेल्ल डा मुर आन कली ग्येरपाइक्ब लोव्र बाक्ब। येसु नेल्ल मुर, पुडग नु श्येत जाइब आन कली यो पाप रे प्रोंइब बाक्ब।

### डोंइती डा लोव्र

- माननीय थियोफीलस, इ रागीम मार मार दुम्मे, मेको आ पर्वम शुश लोव्र ब्रशो बाक्माक्त।
- डोंइती रे मेको ताइब नु तुइक्बपुकीमी मेको आन तशो, तुइश्शो लोव्र तेइ तेइ नेंपाइश्शो बाक्मा बाक्त। १यूहन्ना १:१-४
- गोमी ताइब तुइक्ब आन देंशो नेशा, ब्रेक्ब आन ब्रेक्शो पदेशा “थमान बाक्माक्त” देंती। मिनु गो यो ब्रेक्तु देंशा, एको लोव्र का का पा इन कली ब्रेक्ताक्नी। प्रेरित १:१; कलस्सी ४:१४
- लोव्र का निक्शी डोंइती नेंनी माइ। एको आं ब्रेक्शो यो पढेतीनी हना, गेमी यो “थमा बाक्माक्त” दे थमा सुइक्नीनी।

### जकरिया योव्रसीशो

- यहूदीया रागीम हेरोद पिप आ पालामी अबीयाह आ हुल डा जकरिया नें पाइश्शो चढेब का बाक्माक्त। आ मीश हारून आ खिं डा चढेब आ तमी बाक्माक्त। आ नें एलीशीबा बाक्माक्त। १इतिहास २४:१०,१९
- मेको निक्शी परमप्रभु यावे आ डोंइती ठीक पाइब बाक्सा बाक्त। परमप्रभु यावे आ अरेशो लोव्र नु पतीके लोव्र नेल्ल टिशा, दोस मताइब दुम्शा बाक्शो बाक्सा बाक्त।
- मेको निक्शी खाल्पी खाल्पा दुम्शो बाक्ताक्स हना यो, आल मथिशो बाक्सा बाक्त। मारदे हना एलीशीबा आल मथीब मीश मुर बाक्माक्त।
- मिनु मार दुम्माक्त देशा हना, चढेब आ गेय पचा कली अबीयाह आ हुल आन पालो जाक्माक्त। मिनु जकरिया यरूसलेम लमाक्त। मिनु मेकेर जाक्दीश्शा, परमप्रभु यावे आ खिंमी गेय पवा बाक्त।
- मिनु धूप चोचा कली चढेब योव्रचा माल्बाक्माक्त। मिनु चढेबपुकीमी यहूदी आन पतीके धूप चोइब मुर योव्रचा कली भोट तोक्गमे बाक्त। मिनु भोट तोक्गमेनु, जकरिया योव्रसे बाक्त। मिनु जकरियाम परमप्रभु यावे आ खिंमी धूप चोचा माल्दा बाक्त। प्रस्थान ३०:७
- मिनु धूप चोची ना मुर नेल्ल लाडगाम रिम्शा, परमप्रभु यावे कली पुंइना पुंइन बाक्मा बाक्त।

### “तौ का थीनेवे” देंशो

- मिनु आगामी चहिं मार दुम्माक्त देशा हना, परमप्रभु आ स्वर्ग डा गेय पाइब का फो गूशा, धूप चोतीके आ ग्युरा गे राप्शा, जकरिया कली तपांइसे बाक्त।
- मिनु जकरियामी मेको कली तशा, थाम्पा हिंमाक्त।
- मिनु परमप्रभु यावे आ स्वर्ग डा गेय पाइबमी “जकरिया महिनो। परमप्रभु यावेमी इ पुंइशो गेब। इ मीश एलीशीबाम तौ का थीब। मिनु गे मेको आ नें यूहन्ना वोतो।



- 14 मेको आल थिशो तशा, गे ग्येरसीनेवे। शुश मुर मेको आल आ पर्वम ग्येरसीनीम।
- 15 मारदे हना मेको परमप्रभु आ डोंडती ठेयब दुम्ब। मेकोमी शांबु राकसी मतूब। मेको कोव्रजम बाक्मेनुन, परमप्रभु यावे आ सोकतीम ब्रीशो बाक्ब। न्यायाधीस १३:४-५
- 16 मेकोमी शुश इस्राएली आन थुं परमप्रभु, आन परमप्रभु यावे गे लेप्पाइक्ब।
- 17 मिनु मेकोमी एलीया आ सोक्त नु सक्ति तशा, आम आफ आ थुं आन तमी तौ गे लेप्पाइक्ब। मिनु मटीब आन कली ठीक पतीक लां जोक्ब तुइक्ब सेल्ब। मिनु मोपा मुर आन कली प्रभु नु युम्पाइक्चा कली ठीक सेल्ब” देंमाक्त। मलाकी ३:१,२३,२४; मत्ती १७:११-१३
- 18 मिनु जकरियाम परमप्रभु यावे आ स्वर्ग डा गेय पाइब कली “गो खाल्पा दुम्ती, आं मीश खाल्पी दुम्त। आल थीनस्कु, दे दोपा थमा सुइक्चा डा?” देंमाक्त। उत्पत्ती १८:११
- 19 मिनु “गो परमप्रभु यावे आ स्वर्ग डा गेय पाइब गाब्रीएल नड। गो परमप्रभु यावे आ डोंडती बाक्नुड। परमप्रभु यावेमी इ कली ग्येरपाइक्ब लोत्र नेंपाइक्थ सोइक्ताकयी। दानीएल ८:१६
- 20 तन्न गे आं देंशो लोत्र थमा मसुदी। मोपतीके आं देंशो लोत्र नेल्ल मदुम सम्म गे इ सेंदा सोव्रशा ब्वाक्ने मचाप्ब दुम्नेवे” देंमाक्त।
- 21 जकरिया आगाम बाक्मेनु, शुश मुर लाडगाम देल्शा “ना रेन आगा ओव्रशो मार पवा माड, काइ मग्रू” देंशा रिम्दमे बाक्त।
- 22 मिनु नोले जकरिया गूशा “लोत्र पड” देंमेनु, काइ लोत्र पने मचबा बाक्त। मिनु गुड चाल पवा बाक्त। मिनु लाडगाम बाक्बपुकीमी “मेकोम परमप्रभु यावे कली गुमा बाक्त” दे तुइक्तमे बाक्त।
- 23 मिनु अबीयाह आ हुल डा पालो नुप्शा, जकरिया आ खिं लेम्माक्त।
- 24 मिनु आ मीशेम कोव्रज कुरा बाक्त। मिनु ५ महिना सम्म सुइ आन कली मतुइक्पाइक्थ, खिं डा खिं बाक्माक्त।
- 25 मिनु “मुरपुकीमी आं कली आल मथीब, दे महिक्गोम। मुल परमप्रभुमी आं कली हिक्पाइक्चा कली शिशी पतीकेमी आल थीब दुम्पाइक्ती” देंमाक्त। उत्पत्ती ३०:२३

### येसु जरमेसीब, दे तुइक्पाइश्शो

- 26 एलीशीबामी आल कुरशो ६ महिना दुम्मेनु, परमप्रभु यावे आ स्वर्ग डा गेय पाइब गाब्रीएल गालील रागी डा नासरथ सहर सोइक्चा पुंडसे बाक्त।
- 27 मेकेर मरीयम नें पाइश्शो मीश आल का बाक्माक्त। मरीयम दाऊद आ थर डा योसेफ माइश्शो वोंइश मुर नु ग्युंवे पचशो बाक्माक्त। मत्ती १:१६-१८
- 28 गाब्रीएल मरीयम आ बाक्तीके जाक्शा, मरीयम कली “परमप्रभु गे नु बाक्ब। इ कली दाक्शा, आसीक गेते” दे सेउ पवा बाक्त।
- 29 मिनु मरीयममी परमप्रभु यावे आ स्वर्ग डा गेय पाइब कली तशा, आ लोत्र नेंशा छक लाक्शा “मार लोत्र माइ” दे मिम्ता बाक्त।
- 30 मिनु गाब्रीएलमी “ए मरीयम, महिनो। परमप्रभु यावेमी इ कली दाक्शा योव्रते।
- 31 गे मुल कोव्रज कुरशा, तौ का थीनेवे। मिनु इ तौ कली येसु नें वोतो। यसैया ७:१४; मत्ती १:२१-२३
- 32 मेको ठेयब दुम्ब। मेको कली नेल्ल क्येडा ठेयब आ तौ देंनीम। मिनु परमप्रभु, परमप्रभु यावेमी मेको कली आ किकी पिपी दाऊद आ ठेयब नित्तीके गेब। यसैया ९:६
- 33 मिनु मेको याक्ब आ खिं डा मुर, यहूदी आन पिप दुम्शा, हुकुम पाइब। मिनु आ राज्य गेनायो मनुप्ब” देंमाक्त।
- 34 मरीयममी मेको लोत्र नेंशा “गो मुल सम्म ग्युंवे मपशो बाक्नुड। गो वोंइश मुर नु मइम्ड। इन देंशो दोपा दुम्ने चाप्बा डा?” दे हिल्लो पवानु
- 35 “परमप्रभु यावे आ सोकतीमी इ कली सुम्ब। मिनु नेल्ल क्येडा ठेयब आ सक्ति ताइनेवे। मोपतीके इ आल परमप्रभु यावे के बाक्ब। मेको कली परमप्रभु यावे आ तौ देंनीम। मत्ती १:१८-२०

36 इ थर डा एलीशीबा कली यो मार दुम्त देशा हना, आल मथीब खाल्पी बाक्त हना यो, मुल कोव्रज कुरशो ६ महिना दुम्त।

37 मारदे हना परमप्रभु यावेमी पने मचाप्शो मारेड मबाक्ब” देमाक्त। उत्पत्ती १८:१४

38 मिनु मरीयममी “गो परमप्रभु आ वाइलीम दुमती। मिनु इन देशो बुद पा आ दाक्शो पपाइय्यील” देमाक्त। मिनु परमप्रभु यावे आ स्वर्ग डा गेय पाइब लेशशा लमाक्त।

### मरीयम एलीशीबा गुम्लो

39 मिनु नोले मरीयम यहूदीया रागी डा पहाडी सहर कामी बाक्शो एलीशीबा कली गुम्ल लमाक्त।

40 मिनु जकरिया आ खिं ओव्रशा, एलीशीबा कली सेउ पवा बाक्त।

41 मरीयम आ सेउ ताक्गानु, एलीशीबा आ कोव्रज डा आल प्रेक्माक्त। मिनु परमप्रभु यावे आ सोक्तीमी एलीशीबा कली प्रिंदा बाक्त।

42 मिनु ठेयब सेंदा पा मरीयम कली “मीश मुर नेल्ल आन दातेमी गे आसीक ताइब बाक्नेवे। इ कोव्रज डा आल आसीक ताइब बाक्ब।

43 आं प्रभु आ ममा दोपा आं खिंमी आं कली गुम्ल जाक्नी?

44 गो इ सेउ ताक्गानु, आं कोव्रज डा आल ग्येरशा प्रेक्त।

45 गे परमप्रभु आ लोव्र नेंशा, आ देशो गेना हना यो जाक्दीप्ब, दे थमा सुइक्तीनी। परमप्रभु यावेम इन कली आसीक गोवल” देमाक्त। लूका ११:२७-२८

### परमप्रभु कली ठेयब सेल्लो

46 मिनु मरीयममी “आं थुमी परमप्रभु कली ठेयब सेल्लुड। १सामुएल २:१-१०

47 मारदे हना मेको आं कली श्येत रे प्रोइब, परमप्रभु बाक्ब। गो ग्येरसीनुड।

48 गो महिक्सीशो आइक्च नड। तन्न परमप्रभु यावेमी आं कली हिक्ती। मुल डा मेरे जात नेल्ल डा मुरपुक्कीमी आं कली आसीक गेनीम।

49 मारदे हना सक्ति पाइशशोमी आं कली थम रिम्लो पाइक्ती। परमप्रभु यावे आ नें का ला बाक्ब।

50 सु सुम मेको कली मान पा हिंनीमी, मेको आन कली शिशी पाइब। भजन संग्रह १०३:१३, १७

51 मेकोमी सक्ति कोंडताक्व। मिनु ठेयब लेशशो आन कली आन मिम्ला हिंतीके मेको आन कली गेब। उत्पत्ती ११:८

52 हुकुम पाइब आन सासन पशो रोइशशा, महिक्सीशो आन कली ठेयब सेल्लु। भजन संग्रह १४७:६

53 शोव्रलु बेक्शो आन कली जचा गेब। शोप पाइशशो आन कली श्येत्थ गुइ सोइक्ब। भजन संग्रह ३४:११; भजन संग्रह १०७:९

54 मेकोमी आ शिशी कोंडशा, आ वाइल इस्त्राएल कली वारच पाप्तु।

55 मेकोमी इं किकी पिपी, अब्राहाम नु आ चच युइ आन कली गेना हना यो शिशी पचा कली मिम्लाक्व” दे मरीयममी परमप्रभु यावे कली मान पा देमाक्त। उत्पत्ती १७:७; उत्पत्ती १८:१८

56 मिनु मरीयम एलीशीबा आ खिंमी महिना सां सम्म बाक्शा, आ खिं लेम्लाक्त।

### यूहन्ना जरमेशो

57 मिनु डोंइती देशो बुद पा एलीशीबामी तौ का थिमाक्त।

58 आ एर ओंथ बाक्ब नु आ खिं डा मुर नेल्लेमी “परमप्रभुमी मेको कली शिशी पा, तौ थीब सेल्लु” देशो नेंशा, नेल्ल मेको नु ग्येरसमा बाक्त।

59 मिनु आल ८ नाक्त दुम्लेनु, जकरिया आ खिंमी मुर देल्ला, खोइक्तीक चिनु खोइशशा, आल आ नें वोइक्चामेनु, नेल्लेमी “आ आफ आ नें खोदेशोन वोइक्चा” देमा बाक्त। उत्पत्ती १७:१२

60 तन्न आल आ ममामी “मदुम्ब, एको आ नें यूहन्ना वोइक्चा माल्ब” देमाक्त।

61 मिनु मुरपुक्कीमी “मुल सम्म इन खिं डा सुइ मुरुमी मोदेशो नें मवोदेम” देमा बाक्त।

62 मिनु नोले “आ आफ कली हिल्लो पय” दे जकरिया कली हिल्लो पामेनु,

63 जकरियाम ब्रेक्तीक का पितीन, दे चाल पा “आं तौ आ नें यूहन्ना वोतीने” दे ब्रेक्ता बाक्त। मिनु नेल्ले छक लाक्मा बाक्त।

64 मेना जकरिया आ सेंदा ग्रिशशा, ब्वाक्ने चाप्ब दुम्शा, परमप्रभु यावे कली ठेयब सेला बाक्त।

65 मिनु लोत्र पाइब दुम्त देशो नेंशा, मुर नेल्ल छक लाक्शा हिंमा बाक्त। मिनु मेको लोत्र यहूदीया डा पहाड नेल्ल ब्रमाक्त।

66 नैबपुकीमी मेको लोत्र आन थुमी वोइश्शा “मेको आल नोले दोदेशो दुम्बा?” देंमुमा बाक्त। मारदे हना परमप्रभु मेको आल नु बाक्माक्त।

जकरियाम परमप्रभु कली ठेयब सेल्शो

67 आल आ आफ जकरियामी परमप्रभु यावे आ सोक्तीम ब्रीशा, परमप्रभु यावे आ लोत्र पवा बाक्त।

68 मेकोमी “परमप्रभु, इस्राएली आन परमप्रभु यावे ठेयब बाक्ब। मारदे हना इस्राएल डा मुर इं कली शिशी पा पाप रे प्रॉइब सोइक्चाप्तु। लूका ७:१६

69 मेकोमी आ गेय पाइब दाऊद आ खिं डा मुर रे इं कली सक्ति पाइश्शो पाप रे प्रॉइब सोइक्ताक्व।

70 साइ नेसी परमप्रभु यावेमी आ लोत्र पाइब आन कली मेको इस्राएल कली पाप रे प्रॉइब आ परबंम लोत्र पपदा बाक्त। मिनु मेको लोत्र पाइबपुकीमी मार देंमा बाक्त देंशा हना

71 ‘परमप्रभु यावेमी गो इस्राएल डा मुर आंइ कली आंइ जोरी सत्रु आन गुइ रे नु आंइ कली काइ मदाक्ब रे प्रॉइब’ देंमा बाक्त।

72 ‘परमप्रभु यावेमी आंइ किकी पिपी आन कली शिशी पाइनुड’ दे आ पशो कबल मिम्ताक्व। उत्पत्ती १७:७

73 मोदेशो पा शिशी पाइनुड, दे इं किकी पिपी अब्राहाम नु कसम जशा लोत्र थोक्ता बाक्त। मार लोत्र थोक्शो बाक्त देंशा हना उत्पत्ती २२:१६-१८; मीका ७:२०

74 ‘गो इं जोरी सत्रु आन गुइ रे प्रॉइचा पुंइसीनय। मिनु गो महिंथु परमप्रभु यावे कली ठेयब सेल्ने चाप्नय।

75 आ मुर दुम्शा, ब्रॉइका सम्म ठीक गेय पा बाक्ने चाप्यल’ दे परमप्रभु यावे आ लोत्र पाइबमी देंमा बाक्त। तीतस २:१२-१४

76 मिनु जकरियामी आ तौ कली ‘गे नेल्ल क्येडा ठेयब आ लोत्र पाइब’ देंनीमी। मारदे हना गे प्रभु आ डोंइती गाक्शा, मेको आ लां सेल्नेवे। मलाकी ३:१

77 गे मेको आ मुर आन कली आन पाप क्याम्सीशा, पाप रे ब्रॉइशो मुर दुमीन, दे शेनेवे। येरमीया ३१:३४

78 आंइ परमप्रभु यावेमी इं कली दाक्शा, शिशी पा, रुप्तीक थुं सुनी डा छेडछेड खोदेशो पा इं तार मोइक्ताक्व। यसैया ६०:१-२

79 मिनु मेको बेक्पाइक्ब आ छिडछिडम बाक्ब आन कली हाम्सो दुम्ब। मिनु मेकोमी आंइ कली थुं नाइश्शा बाक्तीकेम खुल्ब” देंमाक्त। यसैया ९:१

80 मिनु यूहन्ना कोल्शा, परमप्रभु यावे आ सोक्तीम बोल्यो दुम्शा, खिं रे गाक्शा, मुर मबाक्तीके गोरशो रागीमी जाक्दीश्शा, इस्राएल डा मुर आन कली परमप्रभु यावे आ लोत्र मशेंदीमी सम्म मेकेर बाक्माक्त। मत्ती ३:१

## 2

येसु जरमेशो

1 मिनु मेना सिजर अगस्टसमी “रागी नेल्ल डा मुर आन नें ब्रेक्शा हिक्चा नमी” दे हुकुम पवा बाक्त।

2 मोदेशो नें ब्रेक्तीके डोंइती गेनायो मपशो बाक्मा बाक्त। मुल पामेनु, सिरीया रागीम क्वीरीनीयसम सासन पशो बाक्माक्त।

3 मिनु मुर नेल्ल आन नें ब्रेक्पाइक्का कली आन थर डा सोतीक बोतीक गाउं गाउं सहर सहरम जाक्दीम्मा बाक्त।

4 योसेफ पिप दाऊद आ खिं डा बाक्माक्त। पिप दाऊद आ खिं डा मुर आन सोतीक बोतीक बेथलेहेम सहर बाक्माक्त। मोपतीके योसेफ आ मीश मरीयम कली लाइशशा, गालील रागी डा नासरथ सहर रे यहूदीया रागी डा बेथलेहेम सहर लमाक्त।

5 मोपा आस नें ब्रेकपाइक्थ लसानु, मरीयम कोव्रज कुरशो बाक्माक्त।

6 मिनु बेथलेहेम सहरम जाक्दीस्सा नोले मरीयम आल थितीक रोइ पवा बाक्त।

7 मेकेर बास बाक्तीक खिं मथित्थु, गोठ कामी बास बाक्सा बाक्त। मिनु गोठम बाक्सानु, मरीयममी तो का थिशा, वाम गिल्शा, शुंगुम इप्पदा बाक्त। मती १:२५

### गोठलापुकी जाक्शो

8 मेकेर गोठलापुकी बाक्मा बाक्त। मेकोपुकी नाकदो रूम बाक्शा, आन भेडा खाल पशो बाक्मा बाक्त।

9 मिनु परमप्रभु यावे आ स्वर्ग डा गेय पाइब का गोठला आन बाक्तीकेम फो यूमाक्त। मिनु परमप्रभु आ छेडछेडमी मेको गोठला आन एर ओंथ ठेयब हाम्सो सेला बाक्त। मेको तशा गोठलापुकी शुश हिंमा बाक्त।

10 तन्न परमप्रभु यावे आ स्वर्ग डा गेय पाइबमी “महिनीने। गो इन कली नु मुर नेल्ल आन कली ग्येरपाइक्ब लोव्र नेंपाइक्थ जाक्ती।

11 एको ग्येरपाइक्ब लोव्र दोदेशो बाक्ब देंशा हना, मुलाकदो पिप दाऊद आ सहरम आल का जरमेसाक्व। मेको नक जरमेशो आल पाप रे प्रॉइब, प्रभु येसु ख्रीस्त बाक्ब।

12 आं लोव्र थमा बाक्ब, दे दोपा तुडक्नीनी देंशा हना, गे मेको नक जरमेशो आल कली वाम गिल्शा, शुंगुम इप्पाइशो थिल्लीनी” देंमाक्त।

13 मिनु सरीड रे परमप्रभु यावे आ स्वर्ग डा गेय पाइब शुश फो फु गूशा, परमप्रभु यावे कली ठेयब सेल्शा भजन संग्रह १०३:२०-२१

14 “नेल्ल क्येडा इर डा परमप्रभु यावे नेल्ल क्येडा ठेयब बाक्ब। आ दाक्शो मुर आन कली थुं नाइशशा बाक्चा गेब” दे कुम्सो पामे बाक्त। लूका १९:३८; गन्ती ६:२६; एफिसी २:१४,१७

15 मिनु परमप्रभु यावे आ स्वर्ग डा गेय पाइब सरीड गे लेशशा लमा बाक्त। मिनु गोठलापुकीमी “बेथलेहेम सहर लय। एको परमप्रभुमी तुडक्पाइशो लोव्र कोव्रथ लय” देंमुमा बाक्त।

16 मिनु दोरशा जाक्दीशशा कोव्रडमेनु, मरीयम नु योसेफ थित्मे बाक्त। मेकेर नक थिशो आल यो शुंगुम इप्पाइशो तामे बाक्त।

17 मेको नेल्ल तशा, आल आ पर्वम नेशो लोव्र शुश मुर आन कली तुडक्पदमे बाक्त।

18 मिनु आन लोव्र नेंब नेल्ल छक लाक्मा बाक्त।

19 तन्न मरीयममी गोठला आन लोव्र नेशा, आ थुंमी वोदा बाक्त।

20 गोठलापुकीमी आन तशो नु आन नेशो आ पर्वम परमप्रभु यावे कली ठेयब सेल्ना सेल्न लेम्मा बाक्त।

### येसु नें वोइशशो

21 मिनु आल जरमेसे आ ८ नाक्ती खोइक्तीक चिनु खोदमे बाक्त। मिनु आ नें येसु वोदमे बाक्त। मारदे हना परमप्रभु यावे आ स्वर्ग डा गेय पाइबमी “मेको आ नें येसु वोइक्चा” दे आ कोव्रज कुरचा क्येडा डोंइती मरीयम कली देंशो बाक्माक्त। लूका १:५९; उत्पती १७:१२; लूका १:३१

### येसु परमप्रभु आ खिं लाइशशो

22 मिनु चोव्रखेतीक नाक्त जाक्मेनु, मोसामी ब्रेक्शो लोव्र टिशा, यरूसलेम सहर जाक्दीशशा, आल कली परमप्रभु यावे आ खिं लाइशशा “परमप्रभु यावे केन दुम्ल” देंशा, परवा आ चाइक्ब निक्शी चढ्ढेसे बाक्त। लेवी १२:१-४; गन्ती १८:१५

23 मारदे हना परमप्रभुम अरेशो लोव्रमी “डोंइती थिशो वोइश आल परमप्रभु यावे के बाक्ब” दे ब्रेक्शो बाक्ब। प्रस्थान १३:२,१५

24 परमप्रभु आ अरेशो लोव्नी आम्मा चोवखेचा कली “परवा आ चाडकब निकशी चढेचा मालब” दे ब्रेकशो बाकब। लेवी १२:६-८

25 यरूसलेममी सिमियोन माइशो मुर का बाक्माक्त। मेको ठीक पाडब नु परमप्रभु यावे कली मान पा हिंब बाक्माक्त। परमप्रभु यावे आ सोक्तीम ब्रीशा “परमप्रभु यावेमी इस्राएल डा मुर आन कली पाप रे प्रोंडब का सोडकब” दे लां कोव्रशा बाकशो बाक्माक्त। उत्पती ४९:१८

26 परमप्रभु यावे आ सोक्तीमी मेको कली “इ मबेक्थु, प्रभु, पाप रे प्रोंडब ख्रीस्त गुम्पाइक्नन” देशो बाक्माक्त।

27 मिनू परमप्रभु यावे आ सोक्तीमी मेको कली “मुल परमप्रभु यावे आ खिं लावो” देंतीके लशा, परमप्रभु यावे आ खिं जाकदीम्माक्त। मिनू मरीयम नु योसेफमी आल कली परमप्रभु यावे आ ब्रेक्पाइशो लोव्नी मार पचा देशो बाक्मे, मेको पचा कली चाकशो तवा बाक्त।

28 मिनू सिमियोनमी आल कली लाइशशा, परमप्रभु यावे कली ठेयब सेल्शा

29 “परमप्रभु, इन देशो जाकदीत्त। मुल इन वाइल थुं नाइशशा बेक्ने चापब।

30 मारदे हना इन सोइशशो पाप रे प्रोंडब कली आं मिक्चीम ताता।

31 मेको कली रागी रागी डा मुर नेल्ल आन पर्बम सोइक्ताक्नी।

32 अर्को जात डा मुर आन कली छेडछेड दुम्शा, मेको आन कली रुप्तीक थुं गेचा कली सोइक्ताक्नी। गो इस्राएली आंड कली थम रिम्शो दुम्त” देंमाक्त। यसैया ४९:६

33 मिनू आल आ आम आफोमी “मार, मिश रिम्शो लोव्र पवा” दे छक लाक्सा बाक्त।

34 मिनू सिमियोनमेको आस कली आसीक गेशा, मरीयम कली “एको आल इस्राएली आन दातेमी लां कोंडशा मुर आन कली फ्राब। का निकशी खतम दुम्नीम, का निकशी रिम्शो दुम्नीम। मिनू शुश मुरुमी एको कली मदाक्नीम। लूका २०:१७-१८; प्रेरित २८:२२; १कोरिन्थी १:२३

35 मोपा मुर आन थुंम मिम्शो तुंडसीब। मिनू तरवार कामी इ थुं थोक्ब” देंमाक्त। यूहन्ना १९:२५

36 यरूसलेममी आन्ना माइशो परमप्रभु यावे आ लोव्र पाडब खाल्पी का बाक्माक्त। मेको आशेर आ थर डा फनुएल आ तमी बाक्माक्त। मेको ग्युंबे पशो आ ७ बर्सम आ वोंडश बेक्शो बाक्माक्त।

37 मिनू आ वोंडश बेक्म नोले शुश बर्स ब्रोंडशा, ८४ बर्स दुम्माक्त। मेकोमी परमप्रभु यावे आ खिं मप्रोंडथु, नाक्दो नाक्ती मेकेर माइजा बाक्शा प्रार्थना पा, परमप्रभु यावे कली ठेयब सेल्ना सेल्न बाक्बाक्माक्त। १तिमोथी ५:५

38 मिनू मरीयम नु योसेफमी आल मेकेर लदसेनु, मेको खाल्पी गुम्से बाक्त। मिनू खाल्पीमी आल कली तशा, परमप्रभु यावे कली ठेयब सेला बाक्त। मिनू “परमप्रभु यावेमी पाप रे प्रोंडब सोइकब” दे आस पा बाक्ब यरूसलेम डा मुर आन कली मेको आल आ पर्बम लोव्र पा नेंपाइक्मी बाक्त।

39 मिनू परमप्रभु आ अरेशो पचा माल्शो गेय नेल्ल थुम्शा, आल कली लाइशशा, गालील रागी डा नासरथ सहरम लेस्सा बाक्त।

40 मिनू नोले आल कोल्शा, जोक्ब तुडक्ब दुम्माक्त। मारदे हना परमप्रभु यावेमी दाक्शा मेको कली आसीक गेवा बाक्त।

### येसु परमप्रभु आ खिंमी बाकशो

41 येसु आ आम आफ बर्स बर्समी पास्सा चाड मानेथ यरूसलेम लाइबाक्सा बाक्त। ब्यवस्था १६:१-८

42 मिनू येसु १२ बर्स जाकदीम नोले पास्सा मानेथ लमानु, मार दुम्माक्त देशा हना,

43 पास्सा थुम्शा खिं लेम्मानु, आम आफोम मतुडक्थु, येसु मेकेरन लीमाक्त। तन्न आ आम आफोमी मतुंडसे बाक्त। प्रस्थान १२:१८

44 मेको नाक्त का डा लां गाक्सानु, येसु आ वारच नु लत, दे मिम्तसे बाक्त। मिनू वारच नु बाक्शो मतथु, येसु कली माल्चा गोम्से बाक्त। नाक्त का डा लां ३०-४० किलो मिटर बाक्ब।

45 मिनू माल्से माल्से तेड मथित्से बाक्त। मिनू लेशशा माल्ना माल्न यरूसलेम जाक्शा यो मथित्से बाक्त।

46 नाकदो नाक्ती सां सम्म माल्ना माल्न गाक्सा नोले परमप्रभु यावे आ खिंम थित्से बाक्त। मेको परमप्रभु यावे आ लोत्र शेंबपुकी नु बाक्शा, आन लोत्र नेंशा, मेको आन कली लोत्र हिल्लो पना पन बाक्शो ताम्से बाक्त।

47 मेको आ लोत्र नेंब नेल्लेमी “शुश जोक्ब तुइक्ब आल बाक्माक्त” दे छक लाक्मा बाक्त।

48 आ आम आफोम मेको कली तशा, थाम्पा छक लाक्सा बाक्त। मिनु आ ममामी “आं तौ, गे मारदे आंस कली मोदेंशो श्येत गेस्की? इ आफ नु गो इ कली ‘ते लाक्गा?’ दे शुश हिंशा माल्तास्कु” देंमाक्त।

49 मिनु येसुमी “मारदे माल्यीसी? गो आं आफ आ खिंमी बाक्चा माल्नुड, दे मतुइक्तीसी?” देंमाक्त। यूहन्ना २:१६

50 तन्न मेको आ लोत्र मरुप्से बाक्त।

51 मिनु येसु आ आम आफ नु लेशशा, नासरथ आ खिं लमाक्त। में डा मेरे आ आम आफ आस लोत्र टिशा बाक्माक्त। आ ममामी मेको मोदेंशो दुम्शो नेल्ल शुश मिम्शा थुंम वोदा बाक्त।

52 येसु कोल्शा बारशा, शुश जोक्ब तुइक्ब दुम्माक्त। परमप्रभु यावेमी मेको कली दाक्ता बाक्त। मुरपुकीमी यो दाक्तमे बाक्त। १सामुएल २:२६

### 3

ब्वाक्कुम खुम्शा गुंडब यूहन्ना

मत्ती ३:१-१२; मर्कुस १:१-८

1 सिजर तिबेरीयुस आ हुकुम पशो १५ बर्स दुम्मेनु, इस्राएल रागीम सासन पाइब सु सु बाक्मा बाक्त देशा हना, यहूदीया रागीम पन्तीयस पिलातस, गालील रागीम हेरोद, इतुरीया नु त्राकोनीतीस रागीम हेरोद आ लोक्ब फिलीप नु अबीलेने रागीम लुसानीयस बाक्मा बाक्त।

2 यरूसलेममी नेल्ल क्येडा ठेयब चढेब हन्नास नु काइयाफास बाक्सा बाक्त। जकरिया आ तौ यूहन्ना गोरशो रागी मुर मबाक्तीकेमी बाक्शो बाक्माक्त। मिनु परमप्रभु यावेमी यूहन्ना कली लोत्र पवा बाक्त। इजीकीएल १:३; होसे १:१

3 मिनु यूहन्ना यर्दन खोला आ नेक्था जाक्दीशशा, एर ओंथ परमप्रभु यावे आ लोत्र शेंना शेंन गाक्माक्त। मिनु शेंना शेंन मुर आन कली “इन थुं परमप्रभु यावे गे लेशशा, ब्वाक्कुम खुम्शा गुंडचा पुंडसीन। मिनु परमप्रभु यावेमी इन पाप क्याम्शा गेब” दे शेंदीमी बाक्त।

4 साइ नेसी परमप्रभु यावे आ लोत्र पाइब यसैयामी “गोरशो रागीमी सेंदा का नेंसीब। मेकोमी मार देंब देशा हना, प्रभु आ लां सेलीने। आ गाक्तीकेम फुल्लु ग्रीक्शा थेलीने। यसैया ४०:३-५

5 बेंसी नेल्ल प्रिंचा पुंडसीनीम। डांडा नेल्ल दिंम सेल्चा पुंडसीनीम। हिरशो लां नेल्ले सोत्रजो सेल्चा पुंडसीनीम। मरिम्शो लां नेल्ले रिम्शो सेल्चा पुंडसीनीम।

6 मिनु मुर नेल्लेमी परमप्रभु यावेमी दोपा पाप रे प्रोंडबा मेको तुइक्नीम” दे ब्रेक्शो बाक्माक्त। यसैया ४०:३-५

7 मिनु शुश मुर यूहन्ना आ बाक्तीकेमी ब्वाक्कुम खुम्शा गुंडपांडसीचा कली जाक्मा बाक्त। मिनु यूहन्नामी मेको आन कली “गे बुस्स आ खलकपुकी, परमप्रभु यावे आ सजाइ रे ब्रोंडचा ताइनीनी, दे सुम शेंदा?

8 इन थुं परमप्रभु यावे गे लेशशा, रिम्शो फल सिश्शो खोदेंशो गेय कोंडदीने। गे ‘इं किकी पिपी अब्राहाम बाक्ब’ दे मिम्शा, देश पा मबाक्कीन। मारदे हना गो इन कली ‘परमप्रभु यावेमी एको फुल्लु रे अब्राहाम आ चच युइ सेल्ने चाप्ब’ देंनुड।

9 तिम्चा, दे रवा आन पुंमी खा वोइश्शो बाक्ब। रिम्शो फल मसिप्ब रवा का का पा तिम्शा, मीम चोचा पुंडसीनीम, दे तुइक्तीन” दे माइक्मी बाक्त।

10 मिनु मुरपुकीमी “मुल मार पक?” दे हिल्लो पामे बाक्त।

- 11 मिनू यूहन्नामी “सु के फेक्तीक वा निकशी बाकमे, मेकोमी फेक्तीक का मबाकशो कली गेचा माल्ब। सु के जचा थोव्रक बाकमे, मेकोमी जचा मताइब कली गेचा माल्ब” देंमाक्त।
- 12 तिरो पोक्बपुकी यो जाक्शा यूहन्ना कली “शेंब, गो मार पक?” दे हिल्लो पामे बाक्त।
- 13 मिनू मेकोमी “सरकारम ताक्चा देशो क्येडा शुश मताक्चा” देंमाक्त।
- 14 का निकशी सिपाइपुकी यो जाक्शा “मिनू गो मार पक?” दे हिल्लो पामे बाक्त। मिनू मेको आन कली “सुइ आन कली हिंम हिंम पा जोल पा दोस गेशा आन मारेइ मारेइ मरोइक्तीन। इन गेय रे पा तशो क्येटम इन थुं नुशा बाक्कीन” दे माइक्मी बाक्त।
- 15 मिनू यूहन्ना आ लोत्र नेंबपुकीमी “एको मुर सु माइ? ख्रीस्त कोर में?” दे शुश मिम्तमे बाक्त।
- 16 यूहन्नामी मेको नेल्ल आन कली “गो इन कली ब्वाक्कुम खुम्शा गुंडनन्नी। आं नोले जाक्ब चहिं आं क्येडा ठेयब बाक्ब। गो मेको आ डोंइती बाप्शा, आ जुत्ता प्रुइक्चा लायो मशिरनुड। मेकोमी इन कली परमप्रभु यावे आ सोक्ती नु मीम खुम्ब।
- 17 लाडगाम हाम्शो चेरब हुरशा, भूस नु गेडा तिल्चा कली मेको आ गुडमी ग्योल बाक्ब। गेडा कोठोम कुर पा वोइक्ब। भूस चहिं गेनायो मकाप्ब मीम हुम्ब” दे माइक्मी बाक्त।
- 18 मोदेशो लोत्र पा अर्ती गेशा, रिम्शो लोत्र शेंदीमी बाक्त।
- 19 मेकोमी सासन पाइब हेरोद आ लोक्ब आ मीश चाक्चा आ पर्बम दोस गेवा बाक्त। मोपतीके मेकोमी यूहन्ना कली जेल्खानमी चोक्पदा बाक्त। मत्ती १४:३-४; मर्कूस ६:१७-१८
- 20 हेरोद कली मार दोस गेवा बाक्त देशा हना “इन लोक्ब आ मीश चाक्शा, पात्के पाइतीनी। अरु पाप यो शुश पाइतीनी” दे हुइश्शो बाक्माक्त।

येसु ब्वाक्कुम खुम्पांडसीशो

मत्ती ३:१३-१७; मर्कूस १:९-११

- 21 मिनू यूहन्ना चोक्सीचा क्येडा डोंइती शुश मुर आन कली ब्वाक्कुम खुम्शा गुंडदा बाक्त। काबु येसु यो जाक्शा, ब्वाक्कुम खुम्शा गुंडचा पुंडसे बाक्त। मिनू ब्वाक्कु रे ग्रूशा, प्रार्थना पना पन बाक्मेनु, सरीड रोक्से बाक्त।
- 22 मिनू सरीड रे परमप्रभु यावे आ सोक्त परवा खोदेशो पा यिशा, येसु आ तारी जुक्ता बाक्त। मिनू सरीड रे “आं दाक्शो तौ नवे। इ कली तशा थाम्पा ग्येरसीनुड” देशो सेंदा नेंसे बाक्त। यूहन्ना १:३२; लूका ९:३५

येसु आ किकी पिपी

मत्ती १:१-१७

- 23 मिनू येसुमी मुर आन कली परमप्रभु यावे आ लोत्र शेंचा गोवानु, ३० बर्स दुम्शो बाक्माक्त। मुरपुकीमी आ आफ योसेफ बाक्ब, दे मिम्तमे बाक्त। योसेफ हेली आ तौ बाक्माक्त। लूका ४:२२
- 24 हेली मात्थात आ तौ बाक्माक्त। मात्थात लेवी आ तौ बाक्माक्त। लेवी मेल्ली आ तौ बाक्माक्त। मेल्ली यान्नाइ आ तौ बाक्माक्त। यान्नाइ योसेफ आ तौ बाक्माक्त।
- 25 योसेफ मत्थाथीयास आ तौ बाक्माक्त। मत्थाथीयास आमोस आ तौ बाक्माक्त। आमोस नाहुम आ तौ बाक्माक्त। नाहुम एस्ली आ तौ बाक्माक्त। एस्ली नगै आ तौ बाक्माक्त।
- 26 नगै माथ आ तौ बाक्माक्त। माथ मत्थाथीयास आ तौ बाक्माक्त। मत्थाथीयास सेमेइन आ तौ बाक्माक्त। सेमेइन योसेफ आ तौ बाक्माक्त। योसेफ योदा आ तौ बाक्माक्त।
- 27 योदा योआनान आ तौ बाक्माक्त। योआनान रेसा आ तौ बाक्माक्त। रेसा जेरूब-बाबेल आ तौ बाक्माक्त। जेरूब-बाबेल शाल्तीएल आ तौ बाक्माक्त। शाल्तीएल नेरी आ तौ बाक्माक्त।
- 28 नेरी मेल्ली आ तौ बाक्माक्त। मेल्ली अददी आ तौ बाक्माक्त। अददी कोसाम आ तौ बाक्माक्त। कोसाम एल्मादम आ तौ बाक्माक्त। एल्मादम एर आ तौ बाक्माक्त।
- 29 एर यहोसु आ तौ बाक्माक्त। यहोसु एलीएजर आ तौ बाक्माक्त। एलीएजर योरीम आ तौ बाक्माक्त। योरीम मात्थात आ तौ बाक्माक्त। मात्थात लेवी आ तौ बाक्माक्त।

30 लेवी सिमियोन आ तौ बाक्माक्त। सिमियोन यहूदा आ तौ बाक्माक्त। यहूदा योसेफ आ तौ बाक्माक्त। योसेफ योनाम आ तौ बाक्माक्त। योनाम एल्याकीम आ तौ बाक्माक्त।

31 एल्याकीम मेलेया आ तौ बाक्माक्त। मेलेया मेन्ना आ तौ बाक्माक्त। मेन्ना मात्ताथा आ तौ बाक्माक्त। मात्ताथा नाथान आ तौ बाक्माक्त। नाथान दाऊद आ तौ बाक्माक्त। २सामुएल ५:१४

32 दाऊद येस्से आ तौ बाक्माक्त। येस्से ओबेद आ तौ बाक्माक्त। ओबेद बोआज आ तौ बाक्माक्त। बोआज साल्मोन आ तौ बाक्माक्त। साल्मोन नहशोन आ तौ बाक्माक्त। रूथ ४:१७-२२

33 नहशोन अम्मीनादाब आ तौ बाक्माक्त। अम्मीनादाब आदमीन आ तौ बाक्माक्त। आदमीन अरनी आ तौ बाक्माक्त। अरनी हेस्रोन आ तौ बाक्माक्त। हेस्रोन पेरस आ तौ बाक्माक्त। पेरस यहूदा आ तौ बाक्माक्त। उत्पत्ती ५:१-३२; उत्पत्ती ११:१०-२६; उत्पत्ती २१:२-३; उत्पत्ती २९:३५

34 यहूदा याकूब आ तौ बाक्माक्त। याकूब इसहाक आ तौ बाक्माक्त। इसहाक अब्राहाम आ तौ बाक्माक्त। अब्राहाम तेराह आ तौ बाक्माक्त। तेराह नाहोर आ तौ बाक्माक्त।

35 नाहोर सेरूग आ तौ बाक्माक्त। सेरूग रेऊ आ तौ बाक्माक्त। रेऊ पेलेग आ तौ बाक्माक्त। पेलेग एबेर आ तौ बाक्माक्त। एबेर शेलाह आ तौ बाक्माक्त।

36 शेलाह केनान आ तौ बाक्माक्त। केनान अरपक्शाद आ तौ बाक्माक्त। अरपक्शाद शेम आ तौ बाक्माक्त। शेम नोआह आ तौ बाक्माक्त। नोआह लमेक आ तौ बाक्माक्त।

37 लमेक मेथुसेलाह आ तौ बाक्माक्त। मेथुसेलाह हनोक आ तौ बाक्माक्त। हनोक यरेद आ तौ बाक्माक्त। यरेद मा-हालालेल आ तौ बाक्माक्त। मा-हालालेल केनान आ तौ बाक्माक्त।

38 केनान एनोश आ तौ बाक्माक्त। एनोश सेथ आ तौ बाक्माक्त। सेथ आदम आ तौ बाक्माक्त। आदम चहिं परमप्रभु यावे आ सेलशो बाक्माक्त।

## 4

### येसु नाक्चा पुंडसीशो

1 येसु परमप्रभु यावे आ सोक्तीम ब्रीशा, यर्दन खोला रे लशा, परमप्रभु यावे आ सोक्तीमी गोरशो रागीमी चाक्दीत्या पुंडसे बाक्त।

2 मिनु ४० नाक्ती गोरशो रागीम सैतान रे पा थुं नाक्चा पुंडसे बाक्त। मेको ४० नाक्त सम्म मारेड मजथु बाक्शो बाक्माक्त। मिनु नोले शुश शोव्रलु बेक्माक्त।

3 मिनु सैतानमी “मार, गे परमप्रभु आ तौ नवे हना, एको फुल्लु कली ‘शोब्ले दुमो’ देन” देमाक्त।

4 मिनु येसुमी “परमप्रभु यावेम ब्रेक्पाइशो लोव्रमी ‘मुर् जशा ला मब्रॉइनीम’ दे ब्रेक्शो बाक्ब” देमाक्त। ब्यवस्था ८:३

5 मिनु नोले सैतानमी येसु कली इर लाइशशा, याम कामीन रागी नेल्ल कोइशा

6 “रागी, रागीमी बाक्शो नेल्ल शोप आं के नम। रागी नेल्ल आन कली हुकुम पाइब यो गो नड। गो मेको इ कली गेनुड। मारदे हना सु कली गेचा दाक्तु, मेको कली गेने चाप्नुड।

7 गे आं डोंडती बाप्शा, आं कली टेयब सेलतीवी हना, मेको नेल्ल इ कली गेनन” देमाक्त।

8 मिनु येसुमी “परमप्रभु यावे आ लोव्रमी ‘परमप्रभु यावे कली ला टेयब सेलो। मेको कली ला गेय पावो’ दे ब्रेक्शो बाक्ब” देमाक्त। ब्यवस्था ६:१३

9 मिनु नोले सैतानमी येसु कली यरूसलेम लाइशशा, परमप्रभु यावे आ खिं डा नेल्ल क्येडा तारी लदा बाक्त। मिनु “मार, गे परमप्रभु यावे आ तौ नवे हना, एकेर रे प्रेक्को।

10 मारदे हना ‘इ कली कोव्रचा कली आ स्वर्ग डा गेय पाइब आन कली सोइक्ब।

11 मिनु मेकोपुकीमी इ कली आन गुडम ताक्शा, खपीम नाइक्पाइक्नीम। इ खोइल फुल्लु कामी यो मथोक्ब’ दे ब्रेक्शो बाक्ब” देमाक्त। भजन संग्रह ९१:११,१२

12 मिनु येसुमी “परमप्रभु, इन परमप्रभु यावे कली थुं मनाक्चा, दे यो देशो बाक्ब” देमाक्त। ब्यवस्था ६:१६

13 मिनु सैतानमी नेल्ल नाक्ने थुमा नोले, मुल अर्को खेयप नाक्नुड, दे मिम्शा येसु कली प्रोंइशा मेक रे गाक्माक्त। हिब्रू ४:१५



येसुमी गालील रागीम शेंशो

मत्ती ४:१२-१७; मर्कूस १:१४-१५

14 मिनू नोले, येसु परमप्रभु यावे आ सोक्त आ सक्तिम गालील रागी लेम्माक्त। मेकेर एर ओंथ येसु आ परबम शुश लोत्र ब्रशो बाक्माक्त।

15 मेकोमी आन युम्तीक खिं खिंमी शेंना शेंन गाक्मेनु, आ लोत्र नेंब नेल्लेमी “रिम्शो लोत्र पाइक्बाक्त” दे ठेयब सेल्मे बाक्त।

येसुमी नासरथ सहरम लोत्र पशो

मत्ती १३:५३-५८; मर्कूस ६:१-६

16 मोपा हिरना हिरन गाक्मेनु, काबु आ कोलतीक नासरथ सहरम जाक्दीम्माक्त। आल रेन नाइक्तीक नाक्ती युम्तीक खिं लशो खोदेशो पा, युम्तीक खिं लशा, परमप्रभु यावे आ लोत्र पढेचा कली राम्माक्त।

17 मिनू युम्तीक खिं डा गेय पाइबमी मेको कली यसैया आ ब्रेक्शो किताब गेवा बाक्त। मिनू किताब प्राक्शा कोत्रशा यसैया ६१:१-२

18 “परमप्रभु यावे आ सोक्त आं तार बाक्ब। मारदे हना परमप्रभु यावेमी तेल लुक्ताक्यी। मेकोमी आं कली दिप्शो पुडग मुर आन कली ग्येरपाइक्ब लोत्र नेंपाइक्चा कली, ग्याइशशा चोक्चा पुंडसीशो मुर आन कली प्रोंड्या कली, मिक्च मताइब आन कली तपाइक्चा नु श्येत जाइब आन कली श्येत रे प्रोंड्या, रिम्शो पा बाक्चा गेचा कली सोइक्ताक्यी। यसैया ४२:७

19 परमप्रभु यावे आ शिशी पतीक बर्स आ परबम शेंचा कली सोइक्ताक्यी” दे पढेशा नेंपाइक्मी बाक्त। लेवी २५:१०

20 मिनू किताब गिल्शा, युम्तीक खिं डा गेय पाइब कली गेशा, निस्से बाक्त। मिनू नेल्लेमी येसु कली मिक्च मयाक्थु कोत्रस डा कोत्रस पामे बाक्त।

21 मिनू येसुमी “एको इन नेंशो लोत्र मुलाक्त गाप्त” देंमाक्त।

22 नेंबपुकीमी मेको आ परबम रिम्शो लोत्र पामे बाक्त। येसु आ रिम्शो लोत्र नेंशा छक लाक्शा “एको योसेफ आ तौ ममाइ डा?” देंमुमा बाक्त। लूका ३:२३

23 मिनू येसुमी मेको आन कली “गे इच्छी ना आं कली ‘मुर आन कली सापाइक्ब, गे इ कली यो सापतो’ देतीक लोत्र देंनीनी। मिनू ‘गो कापेरनाउम सहरम चिन्ड नु छक लाक्चा डा गेय पशो नेंतक। मुल इ कोलतीक सहरम, एकेर यो मोदेशो पावो’ दे आं कली देंनीनी” देंमाक्त।

24 मिनू येसुमी “थमा पा, मुरपुकीमी परमप्रभु यावे आ लोत्र पाइब आन कली आंम आन बाक्तीक सहरम काइ महिक्नीम। यूहन्ना ४:४४

25 थमा लोत्र मार बाक्त देंशा हना, एलीया आ पालाम इस्त्राएल रागीम शुश वोंडश बेक्शो मीश मुर बाक्शो बाक्तेक्म। मेना बर्स सां ६ महिना सम्म रेउ मयिमाक्त। मिनू रागी नेल्ल डा मुरपुकीमी जचा मतामे बाक्त। १राजा १७:१,९-२४

26 तन्न परमप्रभु यावेमी एलीया कली मेको आन बाक्तीक मसोइक्त। तन्न सीदोन रागी डा सारेप्ता सहरम बाक्ब वोंडश बेक्शो मीश मुर का कली ला श्येत रे प्रोंड्य सोइक्ता बाक्त। सारेप्ता सहर कली हिब्रू लोत्रमी चारेफाथ देंनीम।

27 एलीशा आ पालामी यो इस्त्राएल रागीमी शुश कोत्रर पाइब मुर बाक्मा बाक्त। सुइ मसामा बाक्त। सिरीया डा नामान माइशशो मुर ला सापाइक्चा पुंडसे बाक्त” दे येसुमी माइक्मी बाक्त। २राजा ५:१-१४

28 युम्तीक खिंम बाक्शो मुर नेल्लेम मेको लोत्र नेंशा चुरमा बाक्त।

29 मिनू छुल छाल बोक्शा, येसु कली आन युम्तीक खिं नु सहर रे गुंडशा, डांडा तार सेल्शो सहर डा रोंगु रे तोक्चा, दे लदमे बाक्त।

30 तन्न येसु मेको आन दाते रे यूशा गाक्माक्त।

येसु कापेरनाउम जाक्दीशशो

मत्ती ८:१४-१७; मर्कूस १:२१-३९

31 मिनू नोले गालील रागी डा कापेरनाउम सहर ब्रुम्माक्त। मिनू नाइक्तीक नाक्ती गुम्तीक खिं लशा, मुर आन कली शेंदा बाक्त।

32 मिनू आ शेंशो नेंशा छक लाकमा बाक्त। मारदे हना आ लोव्र अधिकार पाइशो बाक्माक्त। मत्ती ७:२८-२९; यूहन्ना ७:४६

33 मेको गुम्तीक खिंमी ग्रांघ्रा दिचा डा वोल आ सोक्तीम सुम्शो मुर का बाक्माक्त। मेकोमी वाइ ब्रेश्रा

34 “ओहो, नासरथ डा येसु, मार पमुया डा? आंइ कली साइक्थ जाक्नी? इन कली तुडक्ताक्क। गे परमप्रभु यावे आ योव्रशो ननी” देंमाक्त।

35 मिनू येसुमी वोल कली “रियके मपथु, यूडो” दे हुडक्ता बाक्त। मिनू वोलमी मुर कली श्येत मगेथु, दिड खोलशा वोइश्रा गूमाक्त।

36 मो दुम्शो तशा, मुरपुकी छक लाकशा “मार लोव्र बाक्म माइ? मारदे हना अधिकार नु सक्ति पाइशो लोव्र पवानु, वोलपुकी गूबाक्तेक्म” देंमुमा बाक्त।

37 मिनू मेको रागी नेल्ल येसु आ परबम लोव्र ब्रना ब्रन लमाक्त।

38 मिनू येसु गुम्तीक खिं रे गाक्शा, सिमोन आ खिं जाक्दीम्माक्त। सिमोन आ शिमी शुश जरो पा रोइ पा गोल्लो बाक्माक्त। मिनू खिं डा मुरुमी येसु कली “सापतीन” दे पुन्मे बाक्त।

39 मिनू येसु मेको आ नेक्था राप्शा, जरो कली हुडक्ता बाक्त। मिनू हुडक्तानु, जरो जाम्माक्त। मिनू साशा छुल बोक्शा, येसु नु आ वारच आन कली जचा गेमी बाक्त।

40 मिनू नां रिक्मेनु, शुश रोइ पाइब आन कली चाक्मे बाक्त। मिनू येसुमी रोइ पाइब आन कली आ गुइ आन तारी चाक्शा, नेल्ल आन कली सापाइक्मी बाक्त।

41 शुश मुर रे वोल गुंडदा बाक्त। वोल आन कली गुंडदानु, मेकोपुकीमी “परमप्रभु यावे आ तौ ननी” दे ग्रीमा बाक्त। तन्न येसुमी मेको आन कली लोव्र पचा मगेथु, हुडक्तीमी बाक्त। मारदे हना मेकोपुकीम “ख्रीस्त बाक्ब” दे डोंइती रे तुइशो बाक्मा बाक्त। मत्ती ८:२९; मर्कूस ३:११-१२

42 मिनू आ दीसा सुनी येसु मेकेर रे गाक्शा, मुर मबाक्तीकेम जाक्दीम्माक्त। मिनू मुरपुकीमी “ते लमे?” दे माल्शा, आ बाक्तीकेम जाक्दीम्मा बाक्त। मिनू “आंइ कली प्रोंइशा मगाक्कीन। आंइ सहरम बाक्कीन” देंमा बाक्त।

43 मिनू येसुमी “अर्को सहर लचा माल्नुइ। मारदे हना गो मेकेर डा मुर आन कली यो परमप्रभु यावे आ राज्य डा लोव्र पचा माल्नुइ। गो मेको गेय पचा कली सोइशो नड” देंमाक्त।

44 मिनू रागी नेल्ल हिरना हिरन यहूदीया डा गुम्तीक खिं खिंमी शेंना शेंन गाक्माक्त। मत्ती ४:२३

## 5

डोंइती डा शेंसीब योव्रशो

मत्ती ४:१८-२२; मर्कूस १:१६-२०

1 मिनू काबु येसुमी गेनेसरेथ समुन्द्र आ नेक्था जाक्दीश्रा, मुर आन कली परमप्रभु यावे आ लोव्र शेंदीमी बाक्त। मुरपुकीमी येसु कली डी डा चूमे बाक्त।

2 मिनू समुन्द्र आ शुइचम डोंगा निक्शी तवा बाक्त। डांइ रेप्बपुकी डोंगा रे तोइश्रा आन ग्याइली मुरना मुरेन बाक्मा बाक्त।

3 मिनू डोंगा का डोंइसे बाक्त। मेको डोंगा सिमोन के बाक्माक्त। मिनू येसुमी सिमोन कली “डोंगा इक्का आइक्ची लतो” दे मदा बाक्त। मिनू मोपा डोंगाम बाक्शा मुर आन कली शेंदीमी बाक्त।

4 मिनू शेंने थुप्शा, सिमोन कली “ब्वाक्कु आ दातेम जाक्दीश्रा, डांइ रेत्चा कली ग्याइली आपो” देंमाक्त। यूहन्ना २१:६

5 मिनू सिमोनमी “शेंब, नाक्दो रे श्येत पा ग्याइली आप्ना आप्न बाक्तक। डांइ का यो मरे। मुल ‘गे आपो’ देंतीनी हना, गो आप्नुइ” देंमाक्त।

6 मिनू ग्याइली आबानु, शुश डांइ रेश्रा, ग्याइल गाक्चा गोवा बाक्त।

7 मिनू ग्याइली गाकशी पा डांड रेशो तशा, आ वारच आस कली “ए, एक जाकशा, वारच पसे” दे ब्रेशशा, डोंगा निम्फा डांडम प्रिंदमे बाक्त। मिनू डोंगा हेल्शा, ब्वाक्कुम युम्चा चिक्ता बाक्त।

8 मिनू सिमोन पत्रुसमी मो दुम्शो तशा, येसु आ डोंइती पोक्च थेक्शा बाप्शा “प्रभु, गो पापी मुर नड। गे नु काथा बाक्चा मशिरनुड” देंमाक्त। लूका १८:१३

9 मारदे हना सिमोन नु मेको नु बाक्ब नेल्ले मिश डा डांड रेशो तशा, छक लाक्मा बाक्त।

10 जब्दी आ तौ याकूब नु यूहन्ना यो छक लाक्सा बाक्त। मिनू येसुमी सिमोन कली “महिने। मुल डा मेरे मुर रेप्व दुम्नेवे” दे मदा बाक्त।

11 मिनू डोंगा गुंडशा, तोइशशा, सिमोन, याकूब नु यूहन्ना सांफामी आन गेय नेल्ल प्रोंइशा, येसु आ नोले खोइशशा, आ शेंसीब दुम्मा बाक्त।

कोव्र पाइब कली सापाइशो

मती ८:१-४; मर्कूस १:४०-४५

12 मिनू काबु येसु आ शेंसीबपुकी नु सहर कामी बाक्मेनु, कोव्र पाइब मुर का कली गुमा बाक्त। मिनू मेको कोव्र पाइबमी येसु कली तशा, आ डोंइती बाप्शा “प्रभु, सापाइक्चा दाक्ताक्नी हना, आं कली सापाइक्चे चाप्नीनी” देंमाक्त।

13 मिनू येसुमी कोव्र पाइब कली थिशा “गो सापाइक्चा दाक्नुड” देंमेनु, मेको कोव्र पशो मुर सामाक्त।

14 मिनू येसुमी “एको लोव्र सुइ कली मदेंचा। चढेब आ डोंइती लशा, इ साशो रां कोंइदो। मिनू मोसामी मार चढेचा मालब देशो बाक्मे, मेको चढेशा, साती, दे तुइक्पतो” दे माइशशा, सोइक्ता बाक्त। लेवी १४:२-३२

15 सुइ कली मदेंचा देशो बाक्त हना यो, शुश मुरुमी येसु आ पर्बम लोव्र पामे बाक्त। रागी नेल्लेम मेको लोव्र ब्रमाक्त। येसु आ लोव्र नेंचा कली नु रोइ रे साचा कली शुश मुर येसु आ बाक्तीकेम जाक्मा बाक्त।

16 तन्न येसु मेकोपुकी नु ब्राशा, सुइ मबाक्तीकेम लशा, परमप्रभु यावे कली प्रार्थना पवा बाक्त। मर्कूस १:३५

गुइ खोइल मदुक्ब कली सापाइशो

मती ९:१-८; मर्कूस २:१-१२

17 काबु येसुमी शेंना शेंन बाक्मेनु, गालील रागी, यहूदीया रागी, नु यरूसलेम सहर रे जाकशो फरिसी नु अरेशो लोव्र शेंबपुकी देल्शा, येसु आ नेक्था निस्समा बाक्त। परमप्रभु आ सापाइक्तीक सक्ति येसु नु बाक्माक्त।

18 मेना मुरपुकीमी आ गुइ खोइल मदुक्ब मुर का कली ब्राख्येम कुरशा चाक्मे बाक्त। चाक्बपुकीम मेको कली येसु आ डोंइती चाक्दीत्वा, दे मिम्तमे बाक्त।

19 तन्न शुश मुर देल्तीके येसु आ नेक्था चाक्दीन्ने मचाप्मे बाक्त। मिनू खिं डोइशशा, साप्शो फुल्लु याक्शा, रोइ पाइब आ ब्राख्ये आ एर ओंथ डोरीम फ्रेंशा, मेको कली ओंखां पा तोक्शा, येसु आ डोंइती वोदमे बाक्त।

20 मिनू येसुमी मेको आन थमा सुइक्शो तुइशशा, मेको कली “आं वारच, इ पाप क्याम्शा गेतन” दे मदा बाक्त।

21 मिनू फरिसी नु सास्त्रीपुकीमी “ओदेशो शुक्शी लोव्र पाइब सु बाक्म? परमप्रभु यावेमी ला पाप क्याम्ने चाप्ब” दे मिम्तमे बाक्त। फरिसी रिती थिती सेल्शा, रिम्शो पचा कली कोव्रब यो बाक्शो बाक्तेक्म। सास्त्री यहूदी आन कली परमप्रभु यावे आ अरेशो लोव्र शेंब बाक्शो बाक्तेक्म। लूका ७:४९; भजन संग्रह १३०:४; यसैया ४३:२५

22 मिनू येसुमी मेको आन मिम्शो तुइशशा, मेको आन कली “मारदे इन थुंम मोदेशो मिम्तीनी?

23 इ पाप क्याम्शा गेतन देंचा देय छुल बोक्शा, एर ओंथ हिरशा कोंइदो देंचा तेको रिम्शो बाक्बा?

24 रागीम जरमेशोमी, पाप क्याम्चा कली अधिकार तशो बाकब, दे गेपुकीमी यो तुडक्तीन” दे गुड खोडल मदुक्ब कली “छुल बोक्शा, इ ब्राख्ये कुरशा, इ खिं लावो” दे मदा बाक्त। यूहन्ना ५:३६

25 मो देंमेनु, मेको मुर छुल बोक्शा, आ ब्राख्ये कुरशा, परमप्रभु यावे कली ठेयब सेल्ना सेल्न आ खिं लमाक्त।

26 मेको चिन्ड तशा, मुर नेल्ले छक लाक्शा, परमप्रभु यावे कली ठेयब सेल्शा, मान पा हिंशा “डोंइती गेनायो मतशो ताइतय” देमुमा बाक्त।

लेवी कली ब्रेशशो

मत्ती ९:९-१३; मर्कुस २:१३-१७

27 मिनु मेकेर रे लशा, येसुमी तिरो पोक्ब लेवी नें पाइश्शो मुर का आ गेय पतीकेमी बाक्शो तशा “आं नोले खोइय्यी” दे मदा बाक्त।

28 मिनु मेकोमी आ गेय प्रोइशा, येसु आ नोले खोदा बाक्त।

29 मिनु लेवीमी येसु कली मान पा थुल्चा, दे जचा तूचा सेला बाक्त। मिनु मेको नु तिरो पोक्ब, आ वारच नु अरु मुर यो जथ बाक्मा बाक्त। लूका १५:१

30 मिनु फरिसी नु सास्त्रीपुकीमी मेको आन कली काथा बाक्शो तशा, आन थुं मनुथु येसु आ शेंसीब आन कली “मारदे गे तिरो पोक्ब नु पापीपुकी नु काथा बाक्शा जाइनीम?” देंमा बाक्त।

31 मिनु येसुमी मेको आन लोत्र तुइश्शा “रोइ मपाइब आन कली डाक्टर ममाल्नीम। तन्न रोइ पाइब आन कली डाक्टर माल्नीम।

32 ठीक पाइब आन कली ब्रेत्थ जाक्शो मनड। तन्न पापी आन कली ‘इन थुं परमप्रभु यावे गे लेत्तीन’ दे ब्रेत्थ जाक्शो नड” दे माइक्मी बाक्त।

माइजा बाक्चा आ परबम शेंशो

मत्ती ९:१४-१७; मर्कुस २:१८-२२

33 मिनु मेकोपुकीमी “यूहन्ना आ शेंसीबपुकी नु फरिसी आन शेंसीबपुकी शुश माइजा बाक्शा, प्रार्थना पाइनीम। तन्न इन शेंसीबपुकी माइजा मबाक्थु, जाइनीम तूनीम” देंमा बाक्त।

34 मिनु येसुमी मेको आन कली “ग्युम्ले नु काथा बाक्मानु, जन्ती आन कली माइजा बाक्पाइक्ने चाप्नीनी डा?

35 काबु ग्युम्ले लाइक्चा पुंइसीब। मेना माइजा बाक्नीम” दे माइक्मी बाक्त।

36 मिनु येसुमी मेको आन कली “सुइमी नक वा खाक्शा, माइत वाम मक्येप्नीम। मो पाम्तेकम हना, नक वा मरिम्शो दुम्बा ममाइ? नक वा माइत वा तार क्येप्चा मगारब।

37 सुइमी माइत कुशुल के थैलोमी नक अडगुर शांबु कुर मपाइनीम। कुर पाम्तेकम हना, नक अडगुर शांबु बोरशा थैलो बुक्ब। मिनु अडगुर शांबु क्युप्ब। मेको थैलो यो खतम दुम्ब।

38 नक शांबु नक थैलोमी कुर पचा माल्ब।

39 कशो शांबु तूशा बानी दुम्शोमी जीजी शांबु मदाक्नीम, मेकोमी ‘कशो ला ब्रोवब’ देंब” दे कथा का देंमाक्त।

## 6

नाइक्तीक नाक्ती

मत्ती १२:१-८; मर्कुस २:२३-२८

1 मिनु काबु नाइक्तीक नाक्ती येसु नु आ शेंसीबपुकी चेरब रू लां रे पा गाक्मानु, शेंसीबपुकीमी चेरब बाला शोइश्शा, नोक्शा जामे बाक्त। लूका १३:१०-१७; लूका १४:१-६

2 मिनु फरिसीपुकीमी मेको आन कली चेरब जशो तशा “नाइक्तीक नाक्ती पचा मदुम्ब गेय, मारदे पाइनीमी?” दे आन थुं मनुथु लोत्र पामे बाक्त।

3 मिनु येसुमी “दाऊद नु आ वारचपुकी शोत्रलु बेक्मानु, मार पामे, परमप्रभु यावेमी ब्रेक्पाइश्शो लोत्र मपढेनी? १ सामुएल २१:७

4 दोपा दाऊदमी परमप्रभु यावे आ खिंमी ओव्रशा, परमप्रभु यावे आ डोंइती कोंइतीक शोब्ले शोल्शा योक्शा जामे? मेको शोब्ले च्हेबपुकीम ला जाइनीमी, ममाइ? अरु मुरपुकीमी जचा मडुम्बा, ममाइ डा?" दे माइक्मी बाक्त। लेवी २४:९

5 मिनु येसुमी "रागीम जरमेशो दा नाइक्तीक नाक्ती मार पचा, मार मपचा मेको नेल्ल देंब बाक्ब" देंमाक्त।

गुइ सोव्रशो कली सापाइश्शो

मत्ती १२:९-१४; मर्कूस ३:१-६

6 मिनु अर्को नाइक्तीक नाक्ती येसुम गुम्तीक खिंमी शेंदानु, मेकेर आ ग्युरा गुइ सोव्रशो मुर का बाक्माक्त।

7 मिनु सास्त्री नु फरिसीपुकीमी "नाइक्तीक नाक्ती सापाइक्चा गेय पाइबा कों?" दे योव्रकी पा कोव्रडमे बाक्त। मारदे हना येसु कली दोस गेचा माल्शो बाक्मा बाक्त।

8 मिनु येसुमी मेको आन मिम्शो तुइश्शा, आ गुइ सोव्रशो मुर कली "एक पिशा, राप्शा बाक्को" दे मदा बाक्त। मिनु मेको छुल बोक्शा राम्माक्त।

9 मिनु येसुमी योव्रकी पाइब आन कली "लोव्र का हिल्लो पाइनन्नी, नाइक्तीक नाक्ती शिशी पचा देय मरिम्शो गेय पचा? ब्रोंइचा गेचा देय बेक्चा गेचा? अरेशो लोव्रम मार देंबा?" दे हिल्लो पवा बाक्त।

10 मिनु मेकेर बाक्ब आन कली मिक्च मयाक्थु, कोव्रशा, गुइ सोव्रशो कली "इ गुइ दिंदो" दे मदा बाक्त। मिनु मेकोमी गुइ दिंसेनु, सामाक्त।

11 मिनु योव्रकी पाइबपुकी चुरशा "मेको कली मार पय?" दे लोव्र पमुमा बाक्त।

येसुमी आ १२ जना शेंसीब योव्रशो

मत्ती १०:१-४; मर्कूस ३:१३-१९

12 काबु येसु डांडा का डोइश्शा, नाक्दो रे परमप्रभु यावे कली प्रार्थना पवा बाक्त। मर्कूस १:३५

13 मिनु आ दीसा नां सोव्रशा, आ नोले खोइक्ब आन कली गुम्शा, १२ जना आन कली योव्रमी बाक्त। योव्रशो आन कली "सोइश्शो" दे नें वोदा बाक्त। मत्ती १०:२-४; प्रेरित १:१३

14 मेको १२ जना सु सु बाक्मा बाक्त देश हना, सिमोन, मेको कली पत्रुस यो देंनीम। सिमोन आ लोकब अन्दीयास, याकूब, यूहन्ना, फिलीप, बारथोलोमाइ,

15 मत्ती, थोमास, अल्फयस आ तौ याकूब, सिमोन, मेको कली कनानी यो देंनीम,

16 याकूब आ तौ यहूदा नु इस्कारीयोत डा यहूदा बाक्मा बाक्त। इस्कारीयोत डा यहूदा चहिं नोले येसु कली साइक्चा, दे माल्ब आन कली वारच पाइब दुम्बाक्माक्त।

दिंमम शुश मुर सापाइश्शो

17 मेको मुर आन कली योव्रशा, डांडा रे यिमा बाक्त। मिनु ठेयब दिंमम जाक्दीश्शा बाक्मानु, येसु आ लोव्र नेंथ एर ओंथ रे शुश मुर खुम्सीशा देल्मा बाक्त। मेकोपुकी यहूदीया रागी, यरूसलेम सहर, टायर नु सीदोन सहर एर ओंथ रे जाक्शो बाक्मा बाक्त।

18 का निक्शी येसु आ लोव्र नेंथ जाक्मा बाक्त। का निक्शी आन रोइ सापांडसीथ जाक्मा बाक्त। मिनु वोलम तशो मुरपुकी यो जाक्शा, सामा बाक्त।

19 रोइ पाइबपुकीमी येसु कली थिचा माल्मे बाक्त। मारदे हना येसु आ सक्तिम मेको नेल्ल आन रोइ साबाक्मा बाक्त।

ग्येरसीने, दे शेंशो

मर्कूस ५:३-१२

20 मिनु येसुमी शेंसीब आन कली कोव्रशा "गे पुडग मुर, ग्येरसीने। मारदे हना परमप्रभु यावे आ राज्य इन के बाक्ब। याकूब २:५

21 मुल जचा मतथु बाकबपुकी, ग्येरसीने, मारदे हना परमप्रभु यावेमी इन कली रूथ्री जचा गेब। मुल श्येत जशा, डाकन डाकन बाकशोपुकी, ग्येरसीने। मारदे हना नोले ग्येरसीशा बाकचा ताइनीनी। प्रकाश ७:१६-१७

22 मुरुमी इन कली आं पबर्म काइ मदाकथु, खेरशा हेला पामेनु, रागीम जरमेशो आ पबर्म इन कली दिप्मेनु, गे शुश ग्येरसीन। यूहन्ना १५:१८-१९

23 मेको नाक्ती थाम्पा ग्येरसीने। मारदे हना परमप्रभु यावेमी इन कली स्वर्गम इनाम गेब। इन कली श्येत गेब आन किकी पिपीमी साइ रे परमप्रभु यावे आ लोत्र पाइब आन कली यो खेदा पा श्येत गेशो बाक्तेकम।

### हिनीन, दे शेंशो

24 गे शुश शोंप पाइशशोपुकी, हिनीन। मारदे हना इन तशो रिम्शो नेल्ल थुम्तीनी। मत्ती १९:२३; याकूब ५:१

25 मुल शुश जचा ताइबपुकी, हिनीन। मारदे हना नोले जचा मतथु शोव्रलु बेक्नीनी। मुल रिशशा बाकबपुकी, हिनीन। मारदे हना नोले डाकशा रोंका पचा माल्नीनी।

26 मुल मुरपुकी रे पा मान पाइकचा पुंडसीशोपुकी, हिनीन। मारदे हना इन किकी पिपीमी यो जोल पा परमप्रभु यावे आ लोत्र पाइब आन कली मो पाइक्बाक्तेकम” देंत।

### इन कली मदाकब कली दाक्तीन

मत्ती ५:३९-४८

27 मिनु “आं लोत्र नेंबपुकी, नोफा दाइशशा नेनीन, इन जोरी सत्रु आन कली दाक्तीने। इन कली काइ मदाकब आन कली दाक्तीने।

28 इन कली सराप चीले पाइब आन कली आसीक गेने। इन कली शुक्शी पाइब आन पबर्म परमप्रभु यावे कली पुंडदीने। १कोरिन्थी ४:१२

29 इन चोवचो का राण्व आन कली अर्को चोवचो यो राण्चा गेने। इन दौरा लाइकब आन कली भोटो यो पुइशशा गेने।

30 सुइमी गे नु बाकशो थोव्रकी पुंडतु हना, गेने। सुइमी गे नु बाकशो थोव्रकी लाइक्तु हना, पितो, दे मपुनीन।

31 गेमी दोदेशो पचा पुंडसीचा दाक्तीनी, गे यो मुर आन कली मोदेशो पने। मत्ती ७:१२

32 इन कली दाकब आन कली ला दाक्ताक्नी हना, मार रिम्शो पनी डा? पापीपुकीमी यो आंम कली दाकब कली दाक्नीम।

33 इन कली रिम्शो पाइब आन कली ला रिम्शो पाइतीनी हना, मार रिम्शो पनी डा? पापीपुकीमी यो रिम्शो पाइब कली रिम्शो पाइनीम।

34 इन कली थाम्ने चाण्व आन कली ला जेर गेतीनी हना, मार रिम्शो पनी डा? पापीपुकीमी यो लेंशा ताकचा कली मोदेशो पाइनीम। ब्यवस्था १५:५-८

35 इन जोरी सत्रु आन कली दाक्तीन। वारच पने। लेंशा ताकचा ममिम्थु जेर गेने। मो पाइतीनी हना, गे ठेयब इनाम ताइनीनी। मिनु नेल्ल क्येडा ठेयब आ मुर दुम्नीनी। मारदे हना ‘रिम्शो पाइतीनी’ मदेब नु आ अरेशो मटीब आन कली रिम्शो पाइब।

36 दोपा इन आफोमी शिशी पवा, मोपा गोपुकीमी यो शिशी पने” देंमाक्त।

### मुर आन कली मनाकचा

मत्ती ७:१-५

37 मिनु येसुमी “मुर आन कली मनाक्तीने। मिनु इन कली मनाक्नीम। दोस मगेने। मिनु गे यो दोस मताइनीनी। माफ गेने, मिनु गे यो माफ गेचा पुंडसीनीनी। मत्ती ६:१४

38 अरु आन कली मार मार माल्मा, मेको गेने। हाइशशो दुम्शा गेतीनी हना, गे यो क्युप्या डा पा प्रिशा ताइनीनी। दोपा पुक्शा गेनी, मोपा पुक्शा ताइनीनी” दे शेंदीमी बाक्त। मर्कूस ४:२४

39 मिनु येसुमी कथा सेल्शा “मिक्च मताइबमी मिक्च मताइब कली लां कोइने चाप्ब डा? लांमी खाल्टा बाक्त हना, निम्फा खाल्टाम मबिक्नीसी डा? मत्ती १५:१४

40 शेंब क्येडा शेंसीब ठेयब मनम। तन्न शेंसीबमी शुश शेंसीशा आ शेंब खोदेशो दुम्ब। मत्ती १०:२४-२५; यूहन्ना १५:२०

41 मारदे इन लोकब आ मिक्चीम बाक्शो कसीडगर ताइनीनी। मिनु इन मिक्चीम बाक्शो मुढा चहिं मताइनीनी?

42 इन मिक्चीम मुढा बाक्त हना, दोपा इन लोकब कली ‘आं लोकब, इ मिक्चीम बाक्शो कसीडगर फेत्तुड’ देंने चाप्नीनी डा? गे कपटी, डोंइती इन मिक्चीम बाक्शो मुढा फेत्तीने। मिनु मिक्च ठीक ताइब दुम्शा ला, इन लोकब आ मिक्चीम बाक्शो कसीडगर फेन्ने चाप्नीनी।

रिम्शो रवाम रिम्शो फल सिप्ब

मत्ती १२:३३-३५

43 रिम्शो फल रवाम मरिम्शो फल मसिप्ब। मरिम्शो रवामी यो रिम्शो फल मसिप्ब। मत्ती ७:१६-१८

44 फल थाम्शा, रिम्शो रवा नु मरिम्शो रवा तुंडसीब। चू बोटमी फोव्रशी मसिप्ब। खुमीच आ बोटमी अडगुर मसिप्ब।

45 रिम्शो थुं पाइश्शो मुरुमी रिम्शो पाइब। पापम ब्रीशो थुं पाइश्शो मुरुमी चहिं मरिम्शो पाइब। मुर आन थुमी मार बाक्मे, मेको आन लोव्र नेंशा रिम्शो देय मरिम्शो मेको तुंडसीब। मारदे हना थुम मार बाक्मे, मेको शोव्र रे गूब।

खिं रे पा शेंतीक

46 मारदे आं कली प्रभु, प्रभु, देंनीनी। तन्न आं देशो मटीनीनी? मलाकी १:६; मत्ती ७:२१

47 सुम आं लोव्र नेंशा टीबा, मेको दोदेशो मुर दुम्बा, मेको गो इन कली माइक्नन्ती।

48 मेकोमी खिं सेलानु, जग दोशा, सेरथे फुल्लु तारी सेल्ब। मिनु रेउ यिशा भोल यिमेनु, मेको खिं मब्रेप्ब। मारदे हना जग बोल्यो पा सेल्शो बाक्ब।

49 सुमी आं लोव्र नेंशा मपाइबा, मेकोमी खिं सेलानु, जग मदोथु सेल्ब। मिनु रेउ यिमेनु, मेको खिं नेल्ल ब्रेशशा भोलम योल्ब” दे शेंदीमी बाक्त।

## 7

कप्तान आ गेय पाइब सापाइश्शो

मत्ती ८:५-१३; यूहन्ना ४:४६-५३

1 मिनु लोव्र शेंने थुम्शा, मेकेर रे लशा, कापेरनाउम सहरम जाक्दीम्माक्त।

2 मेकेर रोमी कप्तान का बाक्माक्त। मेको आ दाक्शो वाइल का रोइ पा बेक्चशो बाक्माक्त।

3 मिनु मेको कप्तानमी येसु आ पबंम लोव्र पशो नेंशा, यहूदी आन जोक्ब तुइक्ब खाल्पा आन कली येसु ब्रथ सोइक्तीमी बाक्त। मेको आन कली “येसु एक पिशा, ‘आं वाइल कली सापतीन’ दे पुनीने” देंमाक्त।

4 मिनु मेकोपुकी येसु आ बाक्तीकेम जाक्शा, येसु कली “मेको कप्तान कली वारच पचा कली शिरशो बाक्ब।

5 मारदे हना मेकोमी यहूदी इं कली दाक्ब। मिनु इं गुम्तीक खिं यो सेल्पाइक्तु” दे येसु कली देंमा बाक्त।

6 मिनु येसु मेकोपुकी नु लमाक्त। मिनु कप्तान आ खिं आ नेक्था जाक्दीम्मेनु, कप्तानमी आ वारच आन कली येसु कली लोव्र पथ सोइक्ता बाक्त। मेकोपुकीमी येसु कली “प्रभु, श्येत मपने। गो इन कली आं खिंम ओइचा मशिरनुड।

7 मोपतीके गो इन कली गुम्थ मपिड। गे सापाइक्तीक लोव्र का ला पने। मिनु आं वाइल साब।

8 गो यो अधिकार पाइश्शो मुर बाक्नुड। लडाइ पाइबपुकीम आं कली टीनीम। गो का कली ‘लावो’ देंती हना, मेको लाइब। मिनु अर्को कली ‘पिवो’ देंती हना, पीब। आं वाइल कली ‘मेको गेय पावो’ देंती हना, मेकोमी पाइब” दे माइक्थ सोइक्ता बाक्त।

9 मिनु येसुमी मेको लोत्र नेंशा छक लाक्माक्त। मिनु आ नोले खोइक्ब आन कली हिरशा कोत्रशा “गो इसाएली आन दातेमी मेको कप्तान खोदेशो थमा सुइक्ब मुर सुइ मतडमी” देंमाक्त।

10 मिनु मेको सोइश्शो मुर खिं लेशशा जाक्मानु, वाइल साने थुम्शो तामे बाक्त।

### बेक्शो मुर कली सेंपाइश्शो

11 इच्का नाक्त नोले येसु नाइन सहर गे लमाक्त। आ शेंसीबपुकी नु शुश मुर यो मेको नु लमा बाक्त।

12 मिनु सहर डा ठेयब लाप्चो आ नेक्था जाक्दीम्मानु, मुरपुकीमी बेक्शो मुर का कुरशा पिशो तामे बाक्त। मेको वोंइश बेक्शो मीश मुर आ कांइचीक तौ बाक्माक्त। मेको मीश मुर नु सहर डा शुश मुर मलामी लशो बाक्मा बाक्त।

13 मिनु येसुमी मेको कली तशा, शिशी पा “मडाक्को” देंमाक्त।

14 मिनु बेक्शो मुर कुरशो पला थिवानु, कुरबपुकी खा दिक्मा बाक्त। मिनु मेकोमी “ए ठिटा, गो इ कली सेंसीशा बोक्को देंनुड” देंमाक्त। मर्कूस ५:४१

15 मिनु बेक्शो मुर बोक्शा निश्शा, लोत्र पचा गोवा बाक्त। मोपा सेंपाइश्शा, आ ममा कली गोवा बाक्त। १राजा १७:२३; २राजा ४:३६

16 मिनु मुरपुकी मोदेशो दुम्शो तशा, हिंमा बाक्त। मिनु मेकोपुकीमी परमप्रभु यावे कली ठेयब सेल्शा “इं दातेमी परमप्रभु यावे आ लोत्र पा छक लाक्का डा गेय पाइब का यूमाक्त। परमप्रभु यावेम इं कली थमा पा शिशी पाइक्बाक्त” देंमा बाक्त। मती १६:१४; लूका १:६८

17 मिनु यहूदीया नु एर ओंथ डा रागी नेल्लेमी मेको लोत्र ब्रमाक्त।

### यूहन्नामी दल्गीर पशो

मती ११:२-६

18 मिनु यूहन्ना आ शेंसीबपुकीमी यो मेको लोत्र नेंशा, यूहन्ना कली शेंदमे बाक्त। मिनु यूहन्नामी आ शेंसीब निक्शी आस कली ब्रेशशा

19 “जाक्का माल्शो गेन ननी देय अर्को आ लां कोत्रक? दे प्रभु कली हिल्लो पथ लसे” दे सोइक्तीम्सी बाक्त।

20 मिनु मेको निक्शी येसु आ बाक्तीके जाक्शा “ब्वाक्कुम खुम्शा गुंइब यूहन्नामी सोइश्शो मुर नस्कु। जाक्का माल्शो गेन ननी देय अर्को आ लां कोत्रक? दे हिल्लो पथ सोइक्ताक्स्की” देंसा बाक्त।

21 मेको निक्शी जाक्सानु, येसुमी शुश रोड पाइब मुर आन कली सापाइक्ना पाइक्न बाक्शो बाक्माक्त। बेक्चा डा रोड पशो, वोल्म सुम्शो मुर आन वोल् खेरना खेरन बाक्माक्त। मिक्च मताइब आन कली मिक्च तपाइक्ना पाइक्न बाक्माक्त।

22 मिनु येसुमी यूहन्ना आ शेंसीब आस कली “मार मार तसी, मार मार नेंसी, मेको नेल्ल यूहन्ना कली मतीसे। मिक्च मताइब मिक्च ताइबाक्तेक्म। खोइल मदुक्ब गाक्बाक्तेक्म। कोत्रर पाइब साबाक्तेक्म। नोफा मनेंबम नेंबाक्तेक्म। बेक्शो मुर बेक्शो रे सेंसीशा ब्रोंइबाक्तेक्म। मिनु महिक्सीशो मुरपुकी ग्येरपाइक्ब लोत्र नेंपाइसीबाक्तेक्म।

23 सु सुमी आं कली तशा, आन थुं मखाइक्पाइक्नीमी, दल्गीर मपाइनीमी, मेको ग्येरसमल, दे मतीसे” दे सोइक्तीम्सी बाक्त।

### यूहन्ना आ पर्वम शेंशो

मती ११:७-१९

24 मिनु यूहन्नामी सोइश्शो मुर गाक्सा नोले, येसुमी मुर आन कली यूहन्ना आ पर्वम “साइ गोरशो रागीमी मार कोत्रथ लनी? फशेम हिम्शो किन्दा कोत्रथ लनी?

25 दारशो वा फेक्शो मुर तांइसीबा कों, दे कोत्रथ लनी? दारदारशो वा फेक्शो नु शोंप पाइश्शो मुर पिप आन बाक्तीकेमी बाक्नीम।

26 मार कोत्रथ लनी, मिनु? परमप्रभु यावे आ लोत्र पाइब तांइसीबा कों, दे कोत्रथ लनी? गे परमप्रभु यावे आ लोत्र पाइब नेल्ल आन क्येडा ठेयब मुर ताइतीनी। लूका १:७६



27 परमप्रभु यावेमी ब्रेकपाइश्शो लोत्रमी मेको आ पर्वम 'गो आं लोत्र कुरब इ डोंडडोंडती सोडकुनुड। मेकोमी इ लां ठीक सेल्ल' दे ब्रेकशो बाकब। मलाकी ३:१

28 रागी नेल्लेम यूहन्ना खोदेशो ठेयब सुइ मबाकब। परमप्रभु यावे आ राज्यमी नेल्ल क्येडा आइकच चहिं यूहन्ना क्येडा ठेयब बाकब" दे शेंदीमी बाकत। लूका १:१५

29 आ लोत्र नेंबपुकी नु तिरो पोक्ब का निक्शीमी डोंडती यूहन्ना आ लोत्र नेंशा "परमप्रभु यावे आ देशो ठीक बाक्माकत" दे मिन्तमे बाकत। मारदे हना मेको ब्वाक्कुम खुम्शा गुंडपांडसीशो बाक्मा बाकत। लूका ३:७,१२; मत्ती २१:३२

30 फरिसी नु सास्त्रीपुकीमी चहिं यूहन्ना आ लोत्र नेंशा "ब्वाक्कुम मखुम्पांडसीनीकी" दे परमप्रभु यावे कली थमा मसुइकथु बाक्मा बाकत। मेकोपुकीमी परमप्रभु आ पावो, दे देशो लोत्र मपामे बाकत। प्रेरित १३:४६

31 मेको आन कली येसुमी "एको पाला डा मुर दोदेशो नु सु खोदेशो नमी?

32 मेकोपुकी बजारम बाकब आलपुकी खोदेशो बाक्नीमी। हुल कामी अर्को हुल कली 'गो बासुरी ताप्कानु, गे सिल मपनी। गो हिशेक पा डाककानु, गे मडाक्नी' दे ब्रेम्मुडनीम।

33 यूहन्नामी माइजा बाक्शा, शांबु राकसी मतूडानु "वोलम सुम्शो बाक्माकत" दे मरिम्शो सुइक्तीनी। मत्ती ३:४

34 रागीम जरमेशोमी चहिं जचा तूचा थोत्रकी नेल्ल जाइब तूब। मेको कली तशा 'धोत्रे, शांबु राकसीमी दुक्ब, क्येट पोक्ब नु पापी आन वारच बाक्माकत' देशो, मरिम्शो सुइक्तीनी। लूका १५:२

35 परमप्रभु यावे आ तुइक्तीके आ नोले खोइक्बम ला तुइक्ने चाप्नीम" दे माइक्मी बाकत। १कोरिन्थी १:२४-३०

### येसुमी फरिसी आ खिंम जशो

36 काबु फरिसी कामी येसु कली खमे जथ ब्रेत्ता बाकत। मिनु येसु मेको आ खिंम लशा, खमे जचा कली निस्से बाकत। लूका ११:३

37 मिनु सहर डा मीश मुर का यो बाक्माकत। मेको तेल्लेम बाक्माकत। मेकोमी येसु मेको फरिसी आ खिंमी जाक्शो बाकब, दे नेंशा, ब्रोत्रशो रिना पाइश्शो तेल कुरशा, जाक्माकत। मर्कूस १४:३

38 मेको येसु आ खोइलीम बाक्शा डाक्माकत। मिनु आ प्रेक्कुम येसु आ खोइल जिप्पाइश्शा, आ चांमी फिक्गा बाकत। मिनु आ खोइल पुक्पु पा मेको तेल खेक्ता बाकत।

39 मिनु फरिसीमी मो पशो तशा "येसु परमप्रभु यावे आ लोत्र पाइब बाकत हना, आ कली थीब मीश मुर दोदेशो बाक्म, दे तुइक्त वा। मारदे हना पापी बाकब" दे मिन्ता बाकत।

40 मिनु येसुमी फरिसी कली "ए सिमोन, गो इ कली लोत्र का पाइनुड" देमाकत। मिनु मेकोमी "शेंब, मार देंनीनी?" देमेनु

41 येसुमी "साइ होत्रप का के जेर लाइक्ब मुर निक्शी बाक्सा बाकत। कामी ५ सहे देनार जेर थुइश्शो बाक्माकत। कामी ५० देनार जेर थुइश्शो बाक्माकत। इस्राएल डा क्येट देनार का नाकत का डा गाल्च बाकत।

42 मिनु निम्फामी थाप्ने मचाप्सेनु, होत्रपमी निम्फा आस कली प्रोंडदीम्सी बाकत। मुल तेकोमी होत्रप कली शुश दाक्बा?" दे हिल्लो पवा बाकत।

43 मिनु सिमोनमी "शुश जेर थुइश्शोमी शुश दाक्ब, दे मिन्ताकड" देमाकत। मिनु येसुमी "ठीक देते" देश,

44 मीश मुर कली कोत्रशा, सिमोन कली "एको मीश मुर कली तवी? गो इ खिंमी जाक्डानु, आं खोइल चिक्चा कली ब्वाक्कु मगेयी। एकोमी दा आं खोइल आ प्रेक्कुम जिप्पाइश्शा, आ चांमी फिक्तु। उत्पत्ती १८:४

45 गो जाक्डानु, आं कली मुप्शा पुक्पु मपाइय्यी। एकोमी दा इ खिंम बाक्डा रे आं खोइल पुक्पु पना पन बाकब। रोमी १६:१६

46 गेमी आं पियाम तेल मखेक्ती। एकोमी दा आं खोइलीम तेल खेक्ताक्यी।

47 मोपतीके एको के शुश पाप नेल्ल क्याम्साक्व। मारदे हना एकोमी शुश आ दाक्तीके कोइताक्व। सु के पाप इक्का ला क्याम्से, मेकोमी इक्का ला दाक्ब” दे मदा बाक्त।

48 मिनु मीश मुर कली “इ पाप क्याम्साक्व” दे मदा बाक्त।

49 मिनु येसु नु काथा जाइबपुकीमी “पाप क्याम्ने चाप्ब, एको सु बाक्म माइ?” देंमुमा बाक्त। लूका ५:२१

50 मिनु येसुमी मीश मुर कली “इ थमा सुइश्शोमी पाप रे ब्रोंइते। इ थुं नाइश्शा ग्येरशा बाक्को” देंशा सोइक्ता बाक्त। लूका ८:४८; लूका १७:१९; लूका १८:४२

## 8

### येसु नु गाक्शा, वारच पाइबपुकी

1 मिनु नाक्त का निकशी नोले येसु सहर सहर, गाउं गाउं हिरशा, परमप्रभु यावे आ राज्य डा ग्येरपाइक्ब लोत्र शेंना शेंन गाक्माक्त। मेको नु आ १२ जना शेंसीब यो बाक्मा बाक्त।

2 मेको नु मीश मुर का निकशी यो बाक्मा बाक्त। मेको वोल गुंइशो नु रोइ रे साशो बाक्मा बाक्त। मेको आन दातेमी माग्दाला डा मरीयम बाक्माक्त। येसुमी मेको रे पा ७ ओटा वोल गुंइशो बाक्माक्त। यूहन्ना २०:१, ११-१८

3 का हेरोद आ गेय पाइब कूजा आ मीश योअन्ना बाक्माक्त। का सुसन्ना बाक्माक्त। मिनु अरु मीश मुरपुकी यो बाक्मा बाक्त। मेको मीश मुरपुकीमी आन बाक्शो थोत्रक रे येसु नु आ शेंसीब आन कली मार मार माल्मा, मेको गेशा, वारच पाइक्बाक्मा बाक्त। मर्कूस १५:४०-४१

### वांचेर शोक्शो कथा

मती १३:१-९; मर्कूस ४:१-९

4 मिनु सहर सहर, गाउं गाउं रे शुश मुर जाक्शा, येसु आ बाक्तीकेम देल्मानु, मेकोमी कथा सेल्शा शेंदीमी बाक्त

5 “मुर का वांचेर शोक्थ लमाक्त। मिनु ब्वारानु, गेडा का निकशी लांमी जुक्तमे बाक्त। मिनु मुर गाक्मानु, दिम्दमे बाक्त। मिनु चिक्बीम गुप्शा जामे बाक्त।

6 का निकशी ग्याडग्रो खपम जुक्तमे बाक्त। मिनु वामा चोटी सिक्शो नु खप मतथु सोव्रशा बेक्मा बाक्त।

7 का निकशी चू धारीम जुक्तमे बाक्त। मिनु चूम सुम्शा, कोल्चा मगेवा बाक्त।

8 मिनु का निकशी रिम्शो खपीम जुक्शा वामा बाक्त। मिनु शुश ग्रेल्शा, गेडा का के सहे का गेडा सिम्मा बाक्त” दे शेंशा टेयब सेंदा पा “सु के नोफा बाक्मे, मेकोमी नेनल” देंमाक्त।

### कथा आ अर्थ हिल्लो पशो

मती १३:१०-१७; मर्कूस ४:१०-१२

9 मिनु नोले आ शेंसीबपुकीमी “एको कथा आ अर्थ मार बाक्बा?” दे हिल्लो पामेनु,

10 येसुमी “इन कली परमप्रभु यावे आ राज्य आ पबंम खुइश्शो लोत्र रुप्तीक थुं गेशो बाक्ब। अरु आन कली चहिं कथा सेल्शा शेंनुडमी। मिनु कोव्रशा यो मतामेक्ल, नेंशा यो मरुप्मेक्ल। यसैया ६:९-१०

### कथा आ अर्थ शेंशो

मती १३:१८-२३; मर्कूस ४:१३-२०

11 आं देंशो कथा आ अर्थ मार बाक्ब देंशा हना, मेको वांचेर परमप्रभु यावे आ लोत्र बाक्ब।

12 लांमी जुक्शो गेडा देंशो मुरपुकीमी परमप्रभु यावे आ लोत्र नेंनीम। तन्न सैतानमी मेको लोत्र प्रेपाइक्ब। मोपा थमा मसुइक्नीम। मिनु पाप रे ब्रोंइचा मताइनीम।

13 ग्याडग्रो खपीम जुक्शो देंशो मुरपुकीमी परमप्रभु यावे आ लोत्र नेंशा, बिश्शा ग्येरसीनीम। तन्न शाक्श थोक्चा मतथु शुश मलीथु, थुं थाम्चा पुंइसमानु, थमा सुइक्चा प्रोंइनीम।

14 चू घारीम जुक्शो देशो मुरपुकीमी परमप्रभु यावे आ लोत्र नेंशा, थुंम वोइक्नीम। तन्न नोले 'मार जचा, मार फेक्चा, दोपा शोप पाइश्शो दुम्चा? दोपा गेय मपथु ग्येरशा बाक्चा तचा' दे मिम्शा, परमप्रभु यावे आ लोत्र कली सित्चा मगेनीम।

15 रिम्शो खपीम जुक्शो देशो मुरपुकीमी परमप्रभु यावे आ लोत्र नेंशा, आन रिम्शो थुंमी वोइश्शा, मिम्शा बाक्मानु, मेको लोत्र आन थुंमी सिम्ब। प्रेरित १६:१४

बत्ती आ पर्बम शेंशो  
मर्कूस ४:२१-२५

16 सुइमी बत्ती दाशा सुम्शा मवोइक्नीम। खाट आगाम यो मखुइक्नीम। खिं ओत्रब आन कली हाम्सो दुम्ल, दे नेल्लेम ततीकेम वोइक्नीम। मत्ती ५:१५

17 मुल खुइश्शो मारेइ मारेइ नेल्ल नोले तांडसीब। खुइश्शो लोत्र बाक्त हना यो, नोले नेल्लेम तुइक्नीम। मत्ती १०:२६; १कोरिन्थी ४:५

18 होस पा, रिम्शो पा नेनीन। मारदे हना रुप्वमी तेम्शा रुप्पाइक्चा पुंडसीब, मरुप्वम चहिं इक्का खोइ रुप्शो यो, रोइश्शा लाइक्चा पुंडसीब" दे शेंदीमी बाक्त। मत्ती २५:२९

येसु आ खिं डा मुर

मत्ती १२:४६-५०; मर्कूस ३:३१-३५

19 काबु येसु आ ममा नु आ लोकब जाक्मा बाक्त। तन्न शुश मुर देलतीके येसु कली ग्रुम्चा मतामे बाक्त।

20 मिनु मुर कामी "इन ममा नु इन लोकब इन कली ग्रुम्थ जाक्शा, लाडगाम रिम्शा बाक्नीम" देमाक्त।

21 मिनु येसुमी "परमप्रभु यावे आ लोत्र नेंशा, टीबपुकी कका थमा डा आं ममा नु लोकब नम" दे माइक्मी बाक्त।

फश गिवार तेक्शो

मत्ती ८:२३-२७; मर्कूस ४:३५-४१

22 काबु येसु नु आ शेंसीबपुकी डोंगाम डोइश्शा "समुन्द्र शोक्शा, आइक्ची हांबु लय" दे लचा गोव्रमे बाक्त।

23 मिनु मोपा लमानु, येसु निन्द्रा पवा बाक्त। मिनु फश गिवार पचा गोवा बाक्त। मिनु डोंगामी ब्वाक्कु ओत्रशा, डोंगा ग्रुम्चवा बाक्त।

24 मोपतीके शेंसीबपुकीम येसु कली पोक्शा "शेंब, शेंब! मुल बेक्चांडतय, है" दे हिंशा खिंखि पा देमा बाक्त। मिनु येसु बोक्शा, फश गिवार नु छाल कली हुइक्ता बाक्त। मिनु फश गिवार नाइश्शा ब्वाक्कु यो खा दिक्माक्त। मिनु सिकसी दुम्माक्त।

25 मिनु शेंसीब आन कली "इन थमा सुइक्तीक ते लम?" देमाक्त। मेकोपुकी चहिं हिंशा, छक लाक्शा "फश गिवार नु ब्वाक्कुमी यो आ लोत्र टीबाक्तेकम, एको सु बाक्म माइ?" दे लोत्र पमुमा बाक्त।

फौज माइश्शो चोल कली गुंडशो

मत्ती ८:२८-३४; मर्कूस ५:१-२०

26 मिनु समुन्द्र शोक्शा, गेरासीनी आन रागी जाक्दीम्मा बाक्त। गेरासीनी आन रागी चहिं गालील रागी क्येडा आइक्ची हांबुम बाक्माक्त।

27 मिनु जाक्दीश्शा, डोंगा रे तोंडसामानु, वोलम सुम्शो मुर का सहर रे पिशा, येसु आ डोंइती जाक्माक्त। मेको मुर वोलम सुमा रे शिन्ना गाक्शा, खिंमी मबाक्थु, बेक्शो मुर वोइक्तीकेमी बाक्शो बाक्माक्त। मोपा बाक्शो शुश बर्स दुम्शो बाक्माक्त।

28 मेकोमी येसु कली तशा, वाइ ब्रेश्शा, आ डोंइती बाप्शा, ठेयब सेंदा पा "येसु, नेल्ल क्येडा ठेयब, आ तौ, गो मार पमुया डा? श्येत मगेयीनी, दे सेउ पाइनन्नी" देमाक्त।

29 मारदे हना येसुमी यांग्रा दिचा डा वोल कली “ग्रूडो” दे माइशशो बाक्माक्त। डोंइती शुश खेयप वोलम मेको मुर कली सुमानु, मुरपुकीमी साडलोम पाइशशा चोक्शा वोइशशो बाक्मा बाक्त। तन्न वोलम साडलो प्रुइक्पाइशशा, गोरशो रागीम चाक्दीशशो बाक्माक्त।

30 मिनु मेको येसु आ डोंइती बाप्शा बाक्मेनु, येसुमी वोल कली “इ नें मारम?” दे हिल्लो पवानु, मेकोमी “फौज” देंमाक्त। मारदे हना मेको मुर आ रांमी शुश वोल ओव्रशो बाक्मा बाक्त।

31 मिनु वोलपुकीम “आंइ कली नरकम मसोइक्तीकी” दे पुन्मे बाक्त।

32 मेको डांडामी शुश पोत्र जोना जोन बाक्शो बाक्मा बाक्त। मिनु वोलपुकीमी “मेको पोत्र आन रांम ओव्रचा गेकी” दे पुन्मे बाक्त। मिनु येसुमी ओव्रचा गेमी बाक्त।

33 मिनु वोलपुकी मुर रे गूशा, पोत्रमी ओव्रमानु, पोत्र नेल्ल गशा रोंगु रे दोरशा थिशशा समुन्द्रम प्रेक्ना प्रेक्न बेक्मा बाक्त।

34 मिनु पोत्र योव्रबपुकीमी मो दुम्शो तशा प्रोक्शा, सहर नु सहर आ एर ओंथ नेल्ल मेको लोव्र शोव्रडमे बाक्त।

35 मिनु मुरपुकी मार दुम्मे, दे कोव्रथ जाक्मा बाक्त। मिनु येसु आ नेक्था वोल गूशो मुर वा फेक्शा, आ गशो थुं साशा, येसु नु निशशो तशा, हिंमा बाक्त।

36 वोलम सुम्शो मुर दोपा सामे, मेको ताइबपुकीमी जाक्ब आन कली मार मार दुम्मे, मेको नेल्ल शेंदमे बाक्त।

37 मिनु गेरासीन रागीम बाक्बपुकीमी येसु कली “आंइ रागीम मबाक्कीन, लने” दे पुन्मे बाक्त। मारदे हना थाम्पा हिंमा बाक्त। मिनु येसु डोंगा डोइशशा लेम्माक्त।

38 मिनु डोंगा डोइशशा लचावानु, वोल ग्रुंइचा पुंइसीशो मुरुमी “गे नु लचा गेयीनी” दे पुना बाक्त।

39 तन्न येसुमी “इ खिंम लशा, इ मुर आन कली परमप्रभु यावेमी इ कली दोदेशो रिम्शो पवा, मेको तुइक्पतो” दे सोइक्ता बाक्त। मिनु मेको लशा, आ खिंमी ला ममाइ, सहर डा मुर नेल्ल आन कली येसुमी दोदेशो रिम्शो पवा, मेको तुइक्पदा बाक्त।

### याइरस आ तमी साशो

मती ९:१८-२६; मर्कूस ५:२१-४३

40 मिनु येसु लेशशा जाक्मेनु, शुश मुरुमी येसु कली रिम्शा बाक्शो बाक्मा बाक्त।

41 मिनु मेकेर याइरस माइशशो गुन्तीक खिं डा ठेयब मुर का येसु आ डोंइती पोक्च थेक्शा बाप्शा “आं तमी बेक्चा चिक्ताक्व। आं खिं लय” दे सेउ पा पुना बाक्त।

42 मेको के १२ बर्स जाक्दीशशो तमी का ला बाक्माक्त। मिनु मेको रोइ पा बेक्चशो बाक्माक्त। मिनु येसु लमेनु, हुल डा मुरपुकीमी येसु कली डी डा चूमे बाक्त।

43 मेको हुलमी १२ बर्स रे हुश याप्शा रोइ पशो मीश मुर का बाक्माक्त। मेकोमी ओरुली पा आ बाक्शो नेल्ल थुम्शो बाक्माक्त। तन्न सुइमी मेको कली आ रोइ सापाइक्ने मचाप्शो बाक्मा बाक्त।

44 मिनु मेकोमी येसु आ नोले जाक्शा, येसु आ फेक्शो वा थिवा बाक्त। मिनु आ हुश याप्चा दिक्माक्त।

45 मिनु येसुमी “सुमी थियी?” दे हिल्लो पवानु, नेल्लेमी “गो मथिड, गो मथिड” देंमा बाक्त। मिनु पत्रुसमी “शेंब, मुरपुकीमी हुल पा नेम्मुइनीम, चुमुइनीम। मिनु मार पचा?” देंमाक्त।

46 येसुमी चहिं “मुर कामी आं कली थिती। मारदे हना आं सक्ति लशो तुइक्ताक्ड” देंमाक्त।

47 मिनु मेको मीश मुरुमी खुइक्ने मचाप्नुड, दे मिम्शा हिंशा खिंखि पना पन येसु आ डोंइती बाम्माक्त। मिनु मेकोमी येसु कली मारदे थिवा चोटीन दोपा सामे, मेको लोव्र नेल्ल मुर आन डोंइती शोव्रडा बाक्त।

48 मिनु येसुमी “आं तमी, इ थमा सुइशशोमी साते। इ थुं नाइशशा लावो” दे सोइक्ता बाक्त। लूका ७:५०

49 येसुमी मेको मीश मुर नु लोव्र पवानु, याइरस आ खिं डा मुर का जाक्शा, याइरस कली “शेंब कली श्येत मगेने। इन तमी बेक्त” देंमाक्त।

50 येसुमी मेको मुर आ लोत्र नेशा, याइरस कली “महिनो। थमा सुइक्ना सुइक्न बाक्को। इ तमी साब” देंमाक्त।

51 मिनु खिमी जाक्दीशशा, येसुमी पत्रुस, याकूब, यूहन्ना नु आल आ आम आफ आन कली ला लाइशशा आगा ओत्रमा बाक्त। मत्ती १७:१

52 मेकेर बाक्ब नेल्ल हिशेक पा डाक्शो बाक्मा बाक्त। मिनु येसुमी मेको आन कली “मडाक्कीन, आल मबेक्शो बाक्ब। मेको इप्शो बाक्ब” देंमाक्त। लूका ७:१३

53 मेकेर बाक्बपुकीमी आल बेक्ने थुम्शो बाक्ब, दे तुइशशा “एको मार लोत्र पवा?” दे शुक्शी पामे बाक्त।

54 मिनु येसुमी आल कली गुइम ग्याइशशा “ए आल, सेंसो” देंमाक्त।

55 मो मदानु आ सोक्त लेशशा छुल बोक्माक्त। मिनु येसुमी “मेको आल कली इच्का जचा गेने” दे माइक्मी बाक्त।

56 मेको तशा, आल आ आम आफ छक लाक्सा बाक्त। मिनु येसुमी “एको लोत्र सुइ आन कली मशेंदीसे” दे माइक्सी बाक्त। लूका ५:१४; मर्कूस ७:३६

## 9

शेंसीब आन कली सोइशशा

मत्ती १०:१, ५-१४; मर्कूस ६:७-१३

1 मिनु काबु येसुमी आ १२ जना शेंसीब आन कली खुप्शा, वोल आन कली गुंडीतीक नु रोइ पशो मुर आन कली सापाइक्ती सक्ति नु अधिकार गेमी बाक्त। लूका १०:१-१२

2 मिनु मेको आन कली परमप्रभु यावे आ राज्य डा लोत्र शेंथ नु रोइ पाइब आन कली सापाइक्थ सोइक्तीमी बाक्त।

3 मिनु लचामेनु, येसुमी मेको आन कली “कोक्के, झोला, जचा थोवक, क्येट मारेइ मलाइक्चा। फेक्तीक यो मकुरसीचा।

4 मिनु तेको खिमी ओत्रनी, मेको खिमी गाक्ची मजाक्म सम्म बाक्कीन।

5 दोकका पा मुरपुकीमी इन कली बाक्चा मगेम्तेक्म हना, मेको सहर रे गाक्ची ना इन खोइल डा फुरकु थुर थुर पा ताइशशा गाक्कीन। मेको, मेको आन पर्बम चिन्ड दुम्ब” दे माइशशा सोइक्तीमी बाक्त।

6 मिनु लशा, गाउं गाउं, सहर सहरम परमप्रभु यावे आ राज्य आ पर्बम शेंना शेंन, रोइ पाइब आन कली सापाइक्ना पाइक्न हिरसमा बाक्त।

हेरोदमी येसु कली युम्चा दाक्शो

मत्ती १४:१-२; मर्कूस ६:१४-१६

7 मिनु सासन पाइब हेरोदमी मेको लोत्र नेल्ल नेशा, छक लाक्माक्त। मारदे हना मुर का निक्शीमी “व्वाक्कुम खुम्शा गुंडब यूहन्ना बेक्शो रे सेंसे बाक्त” देंबाक्मा बाक्त।

8 का निक्शीमी “एको एलीया बाक्माक्त थां का” देंबाक्मा बाक्त। का निक्शीमी “साइ डा परमप्रभु यावे आ लोत्र पाइब का बेक्शो रे सेंसे बाक्त” देंमा बाक्त।

9 मिनु हेरोदमी “गो यूहन्ना आ पिया क्योरपाइक्ता। तन्न एको सु का आ पर्बम लोत्र नेंनु?” दे मेको कली युम्चा दाक्ता बाक्त। लूका २१:८

येसुम ५ हजार आन कली थुल्शो

मत्ती १४:१३-२१; मर्कूस ६:३१-४४; यूहन्ना ६:१-१३

10 मिनु येसु आ सोइशशोपुकी येसु आ बाक्तीके लेम्मा बाक्त। मिनु मार मार पामे, दो दो पामे, मेको नेल्ल शोत्रडमे बाक्त। मिनु येसुमी मेको आन कली बेथसैदा सहरम लाइक्मी बाक्त।

11 मिनू मुरपुकीम “येसु नु आ शेंसीब मेक लाम्तेकम” दे तुइश्शा, आन नोले खोइश्शा लशा थित्मे बाक्त। मिनू येसुमी मेको आन कली बाक्चा गेशा, परमप्रभु यावे आ राज्य डा लोत्र शेंशा, रोड पाइब आन कली सापाइक्मी बाक्त।

12 मिनू नां रिक्चावानु, आ १२ जना शेंसीबपुकीम “मुर आन कली सोइक्तीन। मिनू मेकोपुकी गांउ मेर लशा, जचा तूचा ताइनीम, बास यो थित्नीम। मारदे हना एकेर सुइ मुर मबाक्नीम” दे मदमे बाक्त।

13 मिनू येसुमी “गेपुकीमी एको आन कली जचा गेने” दे माइक्मी बाक्त। मिनू शेंसीबपुकीमी “इं के ५ ओटा शोब्ले नु डांइ निक्शी ला बाक्ब। सहर लशा, जचा थोत्रक ग्याप्शा नेल्ल आन कली थुल्चा देंनी?” देमा बाक्त।

14 मेकेर देल्शो वोंइश मुर ला ५ हजार बाक्मा बाक्त। मिनू येसुमी शेंसीब आन कली “मुर आन कली ५०, ५० जना पा निप्पतीन” देमाक्त।

15 मिनू मेकोपुकीमी निप्पदमे बाक्त।

16 मिनू येसुमी ५ ओटा शोब्ले नु डांइ निक्शी शेशा, सरीड गे कोत्रशा “गे रिम्शो पाइब बाक्नीनी” दे आसीक गेशा जिक्शा, शेंसीब आन कली योक्चा गेमी बाक्त।

17 मिनू नेल्लेमी रूथ्री जामे बाक्त। जशा हेंशो खुप्तमेनु, १२ डालो दुम्माक्त।

पत्रुसमी “ख्रीस्त ननी” देशो

मत्ती १६:१३-१९; मर्कूस ८:२७-२९; यूहन्ना ६:६७-६९

18 मिनू काबु आ शेंसीबपुकी नु बाक्शा प्रार्थना पा, येसुमी “मुरपुकीमी आं पर्वम मार देंनीमी?” दे हिल्लो पवा बाक्त।

19 मिनू मेकोपुकीमी “का निक्शीमी ब्वाक्कुम खुम्शा गुंडब यूहन्ना, का निक्शीमी एलीया, का निक्शीमी साइ नेसी डा परमप्रभु यावे आ लोत्र पाइब का बेक्शो रे सेंसे बाक्त देंनीम” देमा बाक्त। लूका ९:-८

20 मिनू येसुमी “गेपुकी चहिं आं कली सु मिम्नीनी?” देमेनु, पत्रुसमी “गे परमप्रभु यावे आ सोइश्शो ख्रीस्त ननी” देमाक्त।

21 मिनू येसुमी “एको लोत्र सुइ आन कली मशेंदीने” दे अरेमी बाक्त।

ख्रीस्तम “श्येत जचा माल्नुड” देशो

मत्ती १६:२०-२१; मर्कूस ८:३०-३१

22 येसुमी “रागीम जरमेशोमी शुश श्येत जचा माल्ब। जोक्ब तुइक्ब खाल्पापुकी, ठेयब चढेबपुकी नु सास्त्रीपुकीमी मेको कली मब्रथु साइक्पाइक्नीम। मिनू बेक्शो आ नित्थ नाक्ती सेंसीब” दे शेंदीमी बाक्त। लूका ९:४४-४५; लूका १८:३१-३४

आ नोले खोइक्ब “श्येत जाइनीम” देशो

मत्ती १६:२४-२८; मर्कूस ८:३४-९:१

23 मिनू येसुमी मेको आन कली “सुमी आं नोले खोइक्चा थुं पाइबा, मेकोमी आंम दला दाक्स पचा प्रोइशा, नाक्त कित कित श्येत जचा महिंथु, आं नोले खोइय्यील।

24 सुमी आंम गिंम प्रोइचा माल्बा, मेको आ गिंम योल्ब। आं पर्वम आ गिंम सोइक्बमी आ गिंम प्रोइब। लूका १७:२३; मत्ती १०:३९; यूहन्ना १२:२५

25 रागी नेल्ल आंम के सेल्शा, आ थुं खतम दुम्त हना, मार रिम्शो दुम्बा डा?

26 सुमी आं पर्वम नु आं लोत्र आं पर्वम देंचा कली मुने पाइबा, मेको आ पर्वम रागीम जरमेशोमी, आ आफ आ छेडछेडमी, परमप्रभु यावे आ स्वर्ग डा गेय पाइबपुकी नु जाक्मेनु “मेको कली मतुइक्नुड, सु बाक्मे?” देंब। मत्ती १०:३३; रतिमोथी १:८

27 गो इन कली थमा लोत्र पाइनुड मुल गो नु काथा बाक्ब का निक्शीमी परमप्रभु यावे आ राज्य मतथु मबेक्नीम” दे माइक्मी बाक्त।

येसुमी आ रां फाइशशा तपांडसीशो

मत्ती १७:१-८; मर्कूस ९:२-८

28 मेको लोव्र पशो हप्ता का नोले, येसुमी पत्रुस, यूहन्ना नु याकूब सां आन कली प्रार्थना पथ डांडाम लाइक्मी बाक्त।

29 मिनू येसुमी प्रार्थना पवानु, फांडसीशा आ कुल बुबु देशो नु आ फेक्शो वा यो बुबु पा तांडसे बाक्त।

30 मिनू मुर निक्शी, मोसा नु एलीया गूशा, येसु नु लोव्र पशो तामे बाक्त।

31 मेको यो छेडछेडम गिल्सीशा येसु नु लोव्रसी पामे बाक्त। मेकोपुकीम यरूसलेमम दोपा श्येत जशा, बेक्चा मेको आ परबम लोव्र पामे बाक्त।

32 मेको सांफा मोदेशो लोव्र पामेनु, पत्रुस, यूहन्ना नु याकूब मारेड मतुडक्चा डा पा निन्द्रा पामे बाक्त। तन्न मेको आ डोंडती येसु नु मुर निक्शी राप्शो तामे बाक्त। येसु आ छेडछेडम मेको निक्शी नु बाक्शो तामे बाक्त।

33 मिनू मोसा नु एलीया गाक्चाम्सेनु, पत्रुसमी येसु कली “शेंब, इं कली एकेर बाक्चा रिम्शो दुम्ब। बाक्तीके सां सेल्नीकी। का इन कली, का मोसा कली, का एलीया कली” देंमाक्त। मोपा ब्वाक्शो आंमान मतुडक्ता बाक्त।

34 मिनू पत्रुसमी लोव्र पवानु, सरीड रे गोस्स यिशा, मेको आन कली सुम्मी बाक्त। मेको गोस्सुम गिल्मीनु, हिंमा बाक्त।

35 मिनू गोस्स आगा रे सेंदा का “एको आं योव्रशो तौ बाक्ब। मेको आ लोव्र नेनीन” देशो नेन्मे बाक्त। लूका ३:२२; भजन संग्रह २:७; ब्यवस्था १८:१५

36 मिनू मेको लोव्र नेन्मेनु, येसु का ला तामे बाक्त। मिनू मेको आन तशो नु नेंशो शुश नाक्ती सम्म सुइ आन कली मशेंथु, सिकसी पा थुंमी वोदमे बाक्त।

वोलमी सुम्शो आल कली सापाइशशो

मत्ती १७:१४-२१; मर्कूस ९:१४-२९

37 मो दुम्मे आ दीसा डांडा रे यिशा, शुश मुर नु गुम्शा देल्मा बाक्त।

38 मेकेर मुर का जाक्शा ठेयब सेंदा पा “हे शेंब, आं तौ कली वारच पने। मारदे हना आं तौ का ला बाक्ब।

39 मेको कली वोलम हो हु सुमानु, वाइ ब्रेशशा, शोव्र रे बोग्यो गुंडशा, ख्रिंख्रि पना पन मोल मोल थाइब।

40 गो इन शेंसीब आन कली ‘वोल गुंडदीने’ दे पुंडता। तन्न गुंडने मचबेम” देंमाक्त।

41 मिनू येसुमी “गे थमा पा थमा मसुइक्ब नु दूली पाइब, गेना सम्म इन पशो फाल्शा बाक्नुडा डा? इ तौ एक चाक्को” दे मदा बाक्त।

42 मिनू चाक्गानु, वोलम मेको वोंडश आल कली खोल्शा रोप्से पा, शोव्र रे बोग्यो गुंडपदा बाक्त। मिनू येसुमी ग्रान्रा दिचा डा वोल कली हुइशशा, वोंडश आल कली सापाइशशा, आ आफ कली गेवा बाक्त। लूका ७:१५

रागीम जरमेशो श्येत जचा माल्ब देशो

मत्ती १:२२-२३; मर्कूस ९:३०-३२

43 मिनू मुर नेल्लेमी परमप्रभु यावे आ गेय तशा छक लाक्शा “परमप्रभु यावे ठेयब बाक्ब” दे लोव्र पामे बाक्त। मिनू मुर नेल्लेमी येसु आ पशो तशा छक लाक्मानु, येसुमी आ शेंसीब आन कली

44 “नोफा दाइशशा नेनीन। आं देशो लोव्र थुंमी वोतीन। रागीम जरमेशो दा मुर आन गुडमी गेशा साइक्चा पुंडसीब” देंमाक्त। लूका ९:२२; लूका १८:३१-३४

45 तन्न मेकोपुकीमी मेको लोव्र काइ मरुप्मे बाक्त। मारदे हना मेको आन कली मेको लोव्र रुप्चा कली थुं मगेशो बाक्माक्त। येसु कली “एको लोव्र मार में?” दे हिल्लो पचा यो हिंमा बाक्त। लूका २४:४५

“ठेयब सु बाक्या माइ?” देशो

मती १८:१-५; मर्कूस ९:३३-३७

46 काबु शेंसीबपुकीमी “गो इं १२ जनामी नेल्ल क्येडा ठेयब सु बाक्या माइ?” दे लोव्र पमुमा बाक्त।

47 येसुमी मेको आन मिशो तुइशशा, आल का कली आ नेकथा वोइशशा

48 “सुमी एको आल कली आं नेमी ब्राइबा, मेकोमी आं कली ब्राइब। मिनु सुमी आं कली ब्राइबा, मेकोमी आं कली सोइक्ब कली यो ब्राइब। गो इन दातेमी सु नेल्ल क्येडा आइक्च सुइसीबा, मेको नेल्ल क्येडा ठेयब दुम्ब” दे शेंदीमी बाक्त। मती १०:४०

छक लाक्या गेय पाइब का

मर्कूस ९:३८-४०

49 मिनु यूहन्नामी “शेंब, इं नोले मखोइक्ब मुरुमी इन नें थिशा, वोल आन कली खेरशो ताइतक। मिनु मो पचा मदुम्ब, दे माइक्तक। मारदे हना मेको इं नोले खोइशशा मगाक्ब” दे मदा बाक्त।

50 मिनु येसुमी “मोदेंचा मदुम्ब, मारदे हना इं कली मरिश्शो मपाइब इं मुरुन बाक्ब” दे शेंदा बाक्त। लूका ११:२३; फिलिप्पी १:१८

बास मगेचा पुंइसीशो

51 मिनु येसुमी परमप्रभु यावे आ बाक्तीके लची नाक्त आं नेकथा जाक्शो तुइशशा, यरूसलेम लचा थुं पवा बाक्त। मर्कूस १०:३२

52 मिनु सामरीया रागी डा गाउं आ नेकथा जाक्दीशशा, मुर का निकशी आन कली “आं डोंइती लशा, नेल्ल ठीक पने” दे सोइक्तीमी बाक्त। मिनु मेको सामरीया डा मुर आन गाउंमी ओव्रमा बाक्त।

53 तन्न मुरपुकीम बाक्चा गेने मबिस्समा बाक्त। मारदे हना येसुमी “यरूसलेम लाइनुड” देशो बाक्माक्त। मिनु सोइशशो मुरपुकी लेशशा जाक्शा “बास मगेनीकी, देंतेक्म” दे येसु कली मदमे बाक्त। यूहन्ना ४:९

54 मिनु आ शेंसीब याकूब नु यूहन्नामी मेको लोव्र नेंशा, येसु कली “प्रभु, मेको गाउं डा मुर आन कली परमप्रभु यावे कली पुंइशा, सरीड रे मी तोक्पाइशशा, खतम पपाइय्य?” दे हिल्लो पाम्से बाक्त। २राजा १:१०-१२

55 तन्न येसुमी मेको आस गे हिरशा हुइक्तीम्सी बाक्त।

56 मिनु बास बाक्थ अर्को गाउं लमा बाक्त।

आ नोले खोइक्चा कली सु शिरबा?

मती ८:१९-२२

57 मिनु लामी गाक्मानु, मुर कामी येसु कली “प्रभु, गो इन नोले खोइक्चा दाक्नुड” देंमाक्त।

58 मिनु येसुमी “सिवार आन बाक्तीके ढोडोडगा बाक्ब, चिक्ब आन बाक्तीके ग्योव्र बाक्ब। तन्न रागीम जरमेशो के आ बाक्तीके खिं मबाक्ब” देंमाक्त।

59 नोले येसुमी अर्को मुर का कली “आं नोले खोइय्यी” दे मदानु, मेकोमी “डोंइती लशा, आं आफ कली थिम्चा गेयीनी” देंमाक्त।

60 मिनु येसुमी मेको कली “बेक्शो मुरुमी बेक्शो कली थिम्मेक्ल। गे चहिं परमप्रभु यावे आ राज्य डा लोव्र नेंपाइक्थ लावो” दे मदा बाक्त।

61 अर्को मुरुमी “प्रभु, गो इन नोले खोइक्चा दुम्ती, तन्न डोंइती आं खिं डा मुर आन कली तुइक्पाइक्थ लचा गेयीनी” देंमेनु, १राजा १९:२०

62 येसुमी “ब्यफ वाक्बमी वाक्तानु, आ नोले हिरशा मवाक्ब। नोले हिरशा कोव्रना कोव्रन वाक्ब मुर चहिं परमप्रभु यावे आ राज्य डा गेय पचा मशिरब” देंमाक्त। फिलिप्पी ३:१३



## 10

शेंसीब आन कली शेंथ सोइश्शो

मत्ती १०:७-१६

1 मिनु नोले प्रभुमी ७० जना अरु शेंसीब आन कली योव्रशा, डोंइती आ लशो सहर गाउमी निक्निक्शी पा सोइक्तीमी बाक्त। का निक्शी किताबम ७२ देंनीम। लूका ६:१३-१६; लूका ९:१; मर्कूस ६:७

2 मिनु गाक्चामेनु, मेको आन कली “बाली नाली रुप्चा शुश बाक्ब। रुप्ब मुर चहिं का निक्शी ला बाक्नीम। मोपतीके ‘बाली रुप्चा कली मुर योव्रशा सोइक्तीने’ दे बाली नाली आ परमप्रभु कली पुनीने। मत्ती ९:३७-३८; यूहन्ना ४:३५

3 मिनु गे लने। भेडा पाठा आन कली फर आन दातेमी सोइश्शो खोदेशो पा सोइक्तान्नी।

4 लनीनु, क्येट, झोला, जुता मकुरथु लने। लांमी मुर आन कली युम्तीनी हना, लोत्र मपने। लूका ९:३-५; रराजा ४:२९

5 मुर आन खिंमी जाक्दीश्शा ओव्रनीनु, मेको खिं डा मुर आन कली ‘थुं नाइश्शा बाक्कीन’ दे आसीक गेने। यूहन्ना २०:१९

6 मेको खिंमी थुं नाइक्चा ताइब का बाक्त हना, इन थुं नाइक्तीक आसीक मेकोम राइब। तन्न मबाक्ब हना, मेको थुं नाइक्तीक आसीक गे राइनीनी।

7 मुरपुकीम बास गेम्तेक्म हना, गाक्ची मजाक्म सम्म मेकेरन बाक्कीन। खिं खिं याक्शा मबाक्कीन। इन कली मार जचा तूचा गेमे, मेको जने तूडीन। मारदे हना गेय पाइबपुकीमी आन गाल्च तचा माल्नीम।

8 सहरम जाक्दीन्नीनु, मुरपुकीम इन कली ब्रशा, बास गेशा थुल्लेक्म हना, मार जचा गेमे, मेको जने।

9 रोइ पाइब आन कली सापतीन। मिनु मुर आन कली ‘परमप्रभु यावे आ राज्य इन नेक्था जाक्शो बाक्ब’ दे नेंपतीन।

10 तन्न मुरपुकीमी इन कली मब्राम्तेक्म हना, सहर डा लांमी गाक्नीनु,

11 ‘आंइ खोइलीम क्येप्शो इन सहर डा फुरक यो फिक्नीकी। मो हना यो परमप्रभु यावे आ राज्य इन नेक्था जाक्शो बाक्ब, दे तुइक्तीन।

12 परमप्रभु यावे आ ठेयब निसाफ पची ना गे इन क्येडा सोदोम सहरम शिशो ताइब, देनीन।’ उत्पत्ती १९:१-२९

गालील डा सहर आ पबंम लोत्र

मत्ती ११:२०-२४

13 ए खोराजीन, ए बेथसैदा, इन तशो चिन्ड नु छक लाक्चा डा गेय टायर नु सीदोन डा मुरपुकीमी तशो नम हना, भाडरा फेक्शा, पुलुम निश्शा आन थुं परमप्रभु यावे गे लेत्तेम वा।

14 ठेयब निसाफ पची नाक्ती टायर नु सीदोन डा मुर आन क्येडा गे शुश सजाइ ताइनीनी।

15 ए कापेरनाउम, मार गे स्वर्ग सम्म क्युकसीनेवे डा? ममाइ, बेक्शो आन बाक्तीक तोक्चा पुंडसीनेवे।

16 सुमी इन शेंशो नेंना, मेकोमी आं शेंशो नेंब। सुमी इन कली मब्राइबा, मेकोमी आं कली मब्राइब। आं कली मब्राइबमी आं कली सोइक्ब कली यो मब्राइब” दे माइश्शा सोइक्तीमी बाक्त। मत्ती १०:४०; यूहन्ना ५:२३

येसुमी ग्येरसीन देशो

मत्ती ११:२५-२७

17 मिनु मेको ७० जना लशा शेने थुम्शा, येसु आ बाक्तीके लेशशा जाक्मा बाक्त। मिनु जाक्शा, येसु कली “प्रभु, इन नें थिशा, हुइश्शोनो वोळम यो टिशा प्रोक्बाक्तेक्म” दे थाम्पा ग्येरसीशा मदमे बाक्त। ७२ जना शेंसीब यो देंनीम।

18 मिनु येसुमी “सरीड रे चिला आप्शो खोदेशो पा गो सैतान कली दोक्शो ताता। यूहन्ना १२:३१; प्रकाश १२:८-९

19 गे बुस्स नु बिच्छी दिम्ताकनी हना यो, इन कली मकोकनीम। मारेइ पने मचाप्प। मोदेशो पा सैतानमी इन कली मारेइ पने मचाप्प। सुइमी यो इन कली मारेइ पने मचाप्प। भजन संग्रह ११:१३; मर्कूस १६:१८

20 वोलम इन देशो टीनीम, दे तुइकनीनी। मेको आ परबम मग्येरसीन। तन्न “परमप्रभु यावे आ मुर दुम्शा, इं नें परमप्रभु यावे नु ब्रोंइचा ताइब आन किताबम ब्रेकसाक्व” दे तुइरशा थाम्पा ग्येरसीने” दे माइकमी बाक्त। प्रस्थान ३२:३२; यसैया ४:३; फिलिप्पी ४:३; प्रकाश ३:५

21 मिनु येसु परमप्रभु यावे आ सोक्तीम पतीके ग्येरशा “आं आफ, सरीडनु रागी डा परमप्रभु, गे नेल्ल क्येडा ठेयब ननी। गे शुश रिम्शो पाइतीनी। जोक्ब तुइक्ब नड, दे मिम्ब आन कली इन लोत्र रुप्तीक थुं मगेनी। मजोक्ब मतुइक्ब आन कली रुप्तीक थुं गेतीनी। गे मोदेशो पचा दाक्ताकनी। १कोरिन्थी २:७

22 आं आफोमी आं कली नेल्ल कली अधिकार पतीक सक्ति गेती। तन्न सुइमी आ तौ सु बाक्वा, मतुइकनीम, आं आफोमी ला तुइक्ब। सुइमी आं आफ कली मतुइकनीम। आ तौमी ला तुइक्ब। मिनु तौमी सु सु आन थुंम तुइक्तीक वोइक्वा, मेकोपुकीमी यो तुइकनीम” देमाक्त।

23 मिनु आ शेंसीब गे हिरशा, मेको आन कली “सुम इन खोदेशो पा ताइनीमी, मेकोपुकी ग्येरसीमल। मती १३:१६-१७

24 मारदे हना इन तशो नेंशो साइ नेसी रे परमप्रभु यावे आ लोत्र पाइब नु पिपीपुकीमी तचा नेंचा दाक्ताकमे। तन्न तचा नेंचा मतामे” दे माइकमी बाक्त। १पत्रुस १:१०

### इ नेक्था डा मुर सु बाक्वा, दे शेंशो

25 मिनु येसुमी मुर आन कली शेंदानु, सास्त्री का बोक्शा, येसु आ थुं थाम्शा “हे शेंब, गो गेना हना यो ब्रोंइशा बाक्वा कली मार पचा माल्नुडा?” दे हिल्लो पवा बाक्त। मती २२:३५-४०; मर्कूस १२:२८-३४; लूका १८:१८-२०

26 मिनु येसुमी “परमप्रभु यावे आ अरेशो लोत्रमी मार ब्रेक्शो बाक्मे? मेको मपढेनी?” देमेनु,

27 मेकोमी “इ थुं नेल्लेमी, इ रां नेल्लेमी नु इ सक्ति नेल्लेमी परमप्रभु, इ परमप्रभु यावे कली दाक्तो। मिनु आंम कली दाक्शो खोदेशो पा इ नेक्था बाक्ब आन कली यो दाक्तो, दे ब्रेक्शो बाक्ब” देमाक्त। ब्यवस्था ६:५; लेवी १९:१८

28 मिनु येसुमी “ठीक देंते। मेको इ देशो खोदेशो पाप्तीवी हना, गेना हना यो ब्रोंइशा बाक्वा ताइनेवे” देमाक्त। लेवी १८:५; मती १९:१७

29 मिनु आंम कली ठीक सेल्शा, मेकोमी “आं नेक्था डा मुर सु बाक्नीमी, गो मतुइक्नुड” देमाक्त।

30 मिनु येसुमी “मुर का यरूसलेम रे यिशा, यरीको सहर डा लां खोदा बाक्त। मिनु लमेनु, खुइपुकीमी लांम बाप्शा, मेको कली तुप्शा, थपाइरशा, आ बाक्शो मारेइ मारेइ नेल्ल रोइरशा, प्रोक्मा बाक्त।

31 इच्का नोले मेको लां पा चढेब का पिशा, मेको तुप्शा बेक्चशो मुर कली तशा, हेरशा लाक्गा बाक्त।

32 मिनु इच्का नोले लेवी आ थर डा मुर का यो मेको लां रे पिमाक्त। मेकोमी यो मेको बेक्चशो मुर कली तशा, हेरशा लाक्गा बाक्त।

33 मिनु नोले सामरीया रागी डा मुर का पिमाक्त। मेकोमी बेक्चशो मुर कली तशा शिशी पवा बाक्त।

34 तुप्शो मुर आ गारमी तेल नु ओरुत्ती खेक्शा वाम फ्रेशा, आ गधा तारी डोइक्पाइरशा, होटेल सम्म लाइरशा, बास पुंइशा, जचा बाक्वा गेवा बाक्त।

35 आ दीसा नाक्ती गाक्वा क्येडा डोंइती निम्फा आस जशो नु बास डा नेल्ल थाप्शा, होटेल दाइक्ब कली क्येट गेशा वोइरशा ‘मेको तुप्चा पुंइसीशो मुर कली रिम्शो पा कोवडीने। मसाम सम्म वारच पने। गो लेइडानु, मजाकदीरशो क्येट नेल्ल थाप्ननी’ दे लोत्र गार पा लमाक्त।

36 मेको लां गाक्ब सांमी सु चहिं तुप्शा रोइक्वा पुंइसीशो मुर आ नेक्था डा मुर दुम्मे?” दे हिल्लो पवा बाक्त।

37 मिनु सास्त्रीमी “शिशी पाइब मुर थमा पा आ नेक्था डा मुर बाक्त” देमाक्त। मिनु येसुमी “मेको आ खोदेशो पावो” दे माइरशा सोइक्ता बाक्त। यूहन्ना १३:१७

मरीयम नु मारथा आस खिम बाकशो

38 मिनू येसु नु आ शेंसीबपुकी यरूसलेम डा लां रे गाकमानु, गाउं कामी जाकदीम्मा बाकत। मेकेर मारथा नें पाइशो मीश मुर कामी येसु कली मान पा बास गेवा बाकत। यूहन्ना ११:१

39 मारथा आ लोकब मरीयम येसु आ खोइल आ नेकथा बाकशा आ शेंशो नेंना बाकत।

40 मारथामी शुश गेय पा श्येत पशा “प्रभु, आं लोकबमी आं कली काइ वारच मपाइब। गे मोदेशो तशा यो मारेइ मदेनी? मेको कली ‘बोकशा, इ लोकब कली वारच पतो’ दे मतीन” देमाकत।

41 मिनू येसुमी मारथा कली “मारथा, आं लोत्र नेनो। इ थुंमी ग्येत्थ लुकच मिम्शा, पीर पाइबाकते।

42 तन्न थोत्रक का ला माल्ब। मरीयममी रिम्शो थोत्रक योत्रतु। मेको सुइम लाइक्ने मचाप्नीम” दे मदा बाकत। मरीयम६:३३

## 11

प्रार्थना पचा आ पर्वम शेंशो

मती ६:९-१३

1 काबु येसुमी प्रार्थना पचा बाकत। मिनू प्रार्थना पने थुमानु, आ शेंसीब कामी “हे प्रभु, यूहन्नामी दोपा आ शेंसीब आन कली प्रार्थना पचा शेंदा, मोपा आंइ कली यो शेंदीकी” देमाकत।

2 मिनू येसुम “परमप्रभु यावे कली प्रार्थना पनीनु ‘आं आफ, इन नें का ला ठेयब बाकल। इन राज्य जाकल।

3 नाकत कित कित डा आंइ जचा थोत्रक गेकी।

4 आंइ मरिम्शो पशो क्याम्शा गेकी। मारदे हना गो यो आंइ कली मरिम्शो पाइब आन कली का का पा माफ गेनीकी। सैतानमी आंइ थुं थाम्चा मगेने’ दे प्रार्थना पने” दे शेंदीमी बाकत।

परमप्रभुम शिशी पाइब, दे शेंशो

मती ७:७-११

5 मिनू येसुमी “सुइमी नाकदो इप्शो वारच कली पोकशा ‘ए वारचै, शोब्ले सां गेयी।

6 वारच का डोन रे जाकत। मेको कली थुलु देंडानु, गो नु मारेइ जचा थोत्रक मबा।

7 मोपतीके जचा थोत्रक गेचा नड’ दे पुंइतु हना, वारचम लाप्यो मरोक्थु, खिं आगा रे रियके मपावो। लाप्यो चोक्ता। आल इप्तेक्म। सेंसीनीम। बोकशा, इ पुंइशो गेने मचापुड’ देंत हना,

8 तन्न मेकोमी पुंइस डा पुंइस बाकत हना, मेको मगेनुड देंब मुरुमी वारच, दे ला ममाइ डिपी पतीके मेको कली आ पुंइशो गेब।

9 परमप्रभु यावे कली पुनीने। मिनू इन पुंइशो ताइनीनी। मालीने। मिनू इन माल्शो थित्नीनी। ‘बाक्नी?’ दे लाप्यो खोकोल पने। मो पाइतीनी हना ओव्रचा ताइनीनी।

10 मोपतीके सुम पुंइबा, मेकोमी आ पुंइशो ताइब। सुम माल्बा, मेकोमी आ माल्शो थिप्ब। सुम ओव्रनुड, दे लाप्यो खोकोल पाइबा, मेको ओव्रचा ताइब। लूका १३:२५

11 तौमी आ आफ कली ‘डांइ ब्वाइनुड’ दे पुंइतु हना, मार, आ आफोमी डांइ, दे बुस्स ब्वचा गेबा डा? मती ७:९

12 ‘ब्वोफु जाइनुड’ दे पुंइतु हना, ब्वोफु, दे बिच्छी ब्वचा गेबा डा?

13 गे, मरिम्शो पाइब बाक्तीनी हना यो, इन आल आन कली रिम्शो थोत्रक गेने चाप्नीनी, इन पशो क्येडा स्वर्गम बाक्ब इन आफोमी आ तमी तौ आन कली आन पुंइशो गेब। मेकोपुकीमी ‘इन सोक्त गेकी’ दे पुंइतेक्म हना, आ सोक्त यो गेब” दे शेंदीमी बाकत।

वोल गुंइचा आ पर्वम शेंशो

मती १२:२२-३०; मर्कूस ३:२२-२७

14 मिनू काबु येसुमी लाटा वोलम थिशो मुर का कली ग्रुमा बाकत। मिनू लाटा वोल कली गुंइशा खेरा बाकत। वोल ग्रूम नोले मेकोमी लोत्र पने चबा बाकत। मेकोमी लोत्र पशो नेंशा, मुर नेल्ले छक लाकमा बाकत।

15 मिनू का निक्शीमी चहिं “वोल आन पिप बेल्जीबुल आ सक्तिम वोल आन कली गुंडशा खेरबाक्माक्त” देमा बाक्त।

16 का निक्शीमी येसु कली थुं कोव्रचा कली चिन्ड कोंडपाइक्चा माल्मे बाक्त। मर्कूस ८:११

17 येसुमी मुर आन थुं डा लोव्र नेल्ल तुइश्शा, मेको आन कली “राज्य का डा मुर जिशा ब्राशा गाक्तेकम हना, राज्य जाप्शा लाइब। खिं का डा मुरपुकी जिशा ब्राशा गाक्तेकम हना, मेको खिं मलीब।

18 सैतान आ राज्य डा सक्ति ब्रात हना, रीब पा आ राज्य जाप्शा मलाइबा डा? ‘बेल्जीबुल आ सक्तिम वोल आन कली खेरबाक्माक्त’ देतीनी।

19 गो बेल्जीबुल आ सक्तिम वोल आन कली खेरतामी हना, इन तौपुकीमी सुका आ सक्तिम खेरनीमी? इन तौपुकीमी इन कली निसाफ पाइनीम।

20 गोमी परमप्रभु यावे आ सक्तिम वोल आन कली खेरता हना, परमप्रभु यावे आ राज्य जाक्शो बाक्माक्त, दे तुइक्तीन। प्रस्थान ८:१५

21 बोल्यो मुर कामी या शेशा आ दरवार खाल पाप्तु हना, आ शोंप सुइमी खुइ पने मचाप्नीम।

22 तन्न मेको क्येडा यो बोल्यो अर्को का जाक्त हना ला, मेको आ या नेल्ल रोइश्शा, ग्राशा, शोंप नेल्ल आंम के सेल्ब। कलस्सी २:१५; १यूहन्ना ४:४

23 गो नु मगारब आं जोरी सत्रु दुम्नीम। गो नु मखुप्बपुकीमी आं खुप्शो यो फ्राइनीम। लूका ९:५०

वोल लेशशा जाक्ब, दे शेशो

मती १२:४३-४५

24 ग्रांया दिचा डा वोल मुर रे गूशा लशा, ब्वाक्कु मबाक्तीकेम नाइक्तीके माल्ब। मिनू नाइक्तीके मथित्तु हना ‘डोंइती आं बाक्तीकेमीन लेत्नुड’ दे लेप्ब।

25 मिनू लेशशा जाक्मेनु, आ डोंइती बाक्तीके फिक्शा सिल्शा वोइश्शो ताइब। मिनू आ क्येडा ग्रांया दिचा डा ७ ओटा वोल आन कली माल्थ लशा चाक्ब। मिनू ओव्रशा बाक्नीम।

26 मिनू डोंइती क्येडा मेको मुर शुश मरिम्शो दुम्ब” दे शेदीमी बाक्त। यूहन्ना ५:१४

परमप्रभु कली टीब आसीक राइब।

27 येसुमी मेको लोव्र पवानु, मीश मुर कामी ठेयब सेंदा पा “इन कली थिशा थुल्शा कोल्पाइक्ब ममा आसीक रशो मुर बाक्माक्त” दे येसु कली ठेयब सेला बाक्त। लूका १:२८:४८

28 मिनू येसुमी “आं ममा क्येडा परमप्रभु यावे आ लोव्र नेशा, थुंमी वोइश्शा पाइबपुकी आसीक राइब नम” देमाक्त। लूका ८:१५:२१

चिन्ड कोव्रकोव्र दाक्बपुकी

मती १२:३८-४२

29 येसु आ लोव्र नैबपुकी बारना बारन लशा, शुश दुम्मा नोले येसुमी “सिनाक्त मुलाक्त डा मुर थम मरिम्शो बाक्नीम। मारदे हना चिन्ड ला कोव्रकोव्र दाक्नीम। मेको आन कली योना आ चिन्ड डा लाक्शा, मारिइ चिन्ड मकोइनुडमी। लूका ११:१६

30 निनवे सहर डा मुर आन कली योना आ चिन्ड खोदेंशो पा, रागीम जरमेशो सिनाक्त मुलाक्त डा मुर आन कली चिन्ड दुम्ब।

31 निसाफ पची नाक्त दक्खिन रागी डा पिपीममी बोक्शा, एको पाला डा मुर आन कली दोस ताइब सेल्ब। मारदे हना मेकोमी डोन रागी रे पिप सोलोमन आ जोक्तीक तुइक्तीक नेंचा कली जाक्त। नेनीन, एकेर सोलोमन क्येडा यो ठेयब का बाक्ब। १राजा १०:१

32 निसाफ पची नाक्ती निनवे सहर डा मुरपुकी बोक्शा, एको पाला डा मुर आन कली दोस ताइब सेल्नीम। मारदे हना मेकोपुकीमी योना आ लोव्र नेशा, आन थुं परमप्रभु यावे गे लेत्ताकम। नेनीन, एकेर योना क्येडा यो ठेयब का बाक्ब। योना ३:५

इन रां छेडछेड दुम्चा माल्ब

मती ५:१५; मती ६:२२-२३

33 बत्ती दाशा, सुइमी खुइइशा सुम्शा मवोइक्नीम। खिं ओवब आन कली हाम्सो दुम्ल, दे नेल्लेम ततीकेम वोइक्नीम। लूका ८:१६

34 इन मिक्च इन रां डा छेडछेड बाक्ब। गे हेंथे मकोव्रतीनी हना, इन रां नेल्ल छेडछेड दुम्ब। गे मरिम्शो कोव्रचा दाक्ताक्नी हना, इन रां नेल्ल छिडछिड बाक्ब।

35 मोपतीके होस पांडसीने, इन रां डा छेडछेड छिडछिड मदुम्ल।

36 मिनु इन रां छिडछिड मदुम्थु, छेडछेडम ब्रीशो बाक्त हना, बत्ती दाशो खोदेशो पा तांडसीनीनी” दे शेंदीमी बाक्त।

फरिसी नु सास्त्री कली हुइइशो

मत्ती २३:१-३६

37 काबु येसु फरिसी आ खिंमी खमे जथ लमेनु, आ गुइ मचिक्सीथु निस्से बाक्त। लूका ७:३६; लूका १४:१

38 मिनु फरिसीमी येसु कली गुइ मचिक्थु जचशो तशा छक लाक्माक्त। मत्ती १५:२

39 मिनु प्रभु येसुमी मेको कली “गे फरिसीपुकी बोस शेक्तीनीनु, आ तार ला शेक्नीनी। आगा मशेक्नीनी। मेको खोदेशो पा इन थुंमी रोइक्तीके नु परमप्रभु कली मटितीकेमी ब्रीशो बाक्ब।

40 गे मूर्खपुकी, सुमी आ लाडगा डा सेला, आगा डा यो मेकोम सेल्शो ममाइ डा?

41 गे आगा डा थोव्रक मथीब आन कली गेने। मिनु इन कली नेल्ल रिम्शो दुम्ब।

42 तन्न आबी, फरिसीपुकी, गे खतम बाक्नीनी। मारदे हना सुप्तीके के १० भाग डा भाग का परमप्रभु यावे कली गेनीनी। तन्न गे मुर आन कली ठीक निसाफ मपथु, परमप्रभु यावे कली मदाक्नीनी। गे डोंइती नु नोले डा निम्फा पचा माल्नीनी। यूहन्ना ५:४२

43 आबी, फरिसीपुकी, गे खतम बाक्नीनी। मारदे हना युम्तीक खिंमी मान तशो ठेयब मुर आन नित्तीकेमी नित्या दाक्नीनी। बजारमी गाक्नीनु, मुरपुकीमी मान पा सेउ पशो ताक्चा दाक्नीनी। लूका १४:७

44 आबी, फरिसीपुकी, गे खतम बाक्नीनी। मारदे हना गे मततीक तुरस खोदेशो बाक्नीनी। मुरपुकीमी मेको कली मतुइक्थु, दिम्शा गाक्नीमी” दैत।

45 मिनु सास्त्री कामी “शेंब हजुर, इन हुइइशो फरिसी आन कली ला ममाइ। आंइ कली यो हुइक्ताक्नी” दैमेनु,

46 येसुमी “आबी, सास्त्रीपुकी गे यो खतम बाक्नीनी। मारदे हना हेल्शो भारी सेल्शा, मुर आन कली कुरपाइक्नीनी। गे चहिं ब्रेप्चो कामी यो नेप्शा वारच मपाइनीनी।

47 आबी, गे खतम बाक्नीनी। मारदे हना इन किकी पिपीपुकीमी परमप्रभु यावे आ लोव्र पाइब आन कली साइक्तेक्म। मिनु गे मेको आन तुरस सेल्तीनी। प्रेरित ७:५२

48 मोपा इन किकी पिपी नु गारशो दुम्तीनी। मेको आन पशो ठीक बाक्माक्त, दे आन पशो खोदेशो पाइब दुम्तीनी। मारदे हना इन किकी पिपीपुकीमी परमप्रभु यावे आ लोव्र पाइब आन कली साइक्ना साइक्न बाक्तेक्मे। गेपुकीमी चहिं तुरस सेल्ना सेल्न बाक्तीनी।

49 साइ नेसी परमप्रभु यावे आ तुइक्तीक पाइइशोमी ‘गो आं लोव्र शेंब मुर सोइक्नुडमी। मेको आं सोइइशो मुर का निक्शी आन कली खेदा पा श्येत गेनीम, का निक्शी आन कली साइक्नीम’ देशो बाक्त।

50 साइ डोंइती रे मुल सम्म परमप्रभु यावे आ लोव्र पाइब शुश आन कली साइइशो क्येक्क एको पाला डा मुर आन रे ताक्सीब।

51 डोंइती साइइशो हाबील बाक्त। नेल्ल क्येडा नोले साइइशो जकरिया बाक्त। मेको कली परमप्रभु यावे कली चढेतीक नु आ खिं आस दातेम साइइशो बाक्त। मेको नेल्ल आन कली मोपा साइक्तीके सिनाक्ती मुलाक्ती डा मुर दोस गेने पुंडसीशा सजाइ ताइनीम।

52 आबी, सास्त्रीपुकी, गे खतम बाक्नीनी। मारदे हना गे जोक्तीक तुइक्तीक सांचो ताक्तीनी, तन्न मेकेर मओव्रनी। मिनु ओव्रचा दाक्ब आन कली यो ओव्रचा मगेनी” दे हुइक्तीमी बाक्त।

53 मिनू येसु फरिसी आ खिं रे गाकचवानु, सास्त्री नु फरिसीपुकी गाइशशा, शुश लोव हिल्लो पा आ थुं थाम्मे बाक्त।

54 मारदे हना आ लोव खाइक्पाइशशा, दोस गेचा माल्मे बाक्त। लूका २०:२०

## 12

परमप्रभु कली थमा सुइक्चा माल्ब

मती १०:२६-३३

1 मिनू हजार, हजार मुर खुम्सीशा, नेम्मुशा, चुमुशा, येसु आ लोव नेंथ जाक्मा बाक्त। मिनू येसुमी आ शेसीब आन कली “फरिसी आन बोरपाइक्तीक ओरूती रे होस पा बाक्कीन। मेको आन जोल पा शेतीक बाक्ब। मती १६:६; मर्कूस ८:१५

2 सुम्शा वोइशशो नोले नेल्ल हाक्सीशा तांडसीब। खुइशशा वोइशशो लोव नेल्ल नोले तुंडसीब। लूका ८:१७

3 मोपतीके इन छिडछिडम बाक्शा पशो लोव नोले छेडछेडम नेंसीब। मुल इन खिंमी बाक्शा, नोफाम मुइक्मुशा पशो लोव नोले ठेयब सेंदा पा देंनीम।

4 आं वारचपुकी, इन रां कली साइक्ने चाप्वपुकी तशा महिनीन। मारदे हना साइक्ने थुम्शा, नोले मारेइ पने मचाप्नीम।

5 तन्न परमप्रभु यावे कली मान पा हिनीन। मारदे हना मुर आन कली साइशशा, नाराक सोइक्तीक सक्ति मेको नु बाक्ब। मोपतीके मेको कली तशा मान पा हिनीन। हिब्रू १२:२९

6 आस्सारीयोन निक्शीम ५ ओटा भंगेरा मग्याम्सीबा डा? मो हना यो परमप्रभु यावेमी मेको आन कली कोव्रशो बाक्ब। आस्सारीयोन का नेल्ल क्येडा आइक्च तांबा के क्येट बाक्त।

7 मेको आन कली ला ममाइ। इन पिया डा चां का का पा हिक्शा, गिश बाक्मा, दे तुइशशो बाक्ब। मोपतीके महिनीन। गे भंगेरा क्येडा शुश हिक्सीशो बाक्नीनी। लूका २१:१८

8 सुमी मुर आन कली ‘गो येसु आ मुर नड’ देंबा, रागीम जरमेशोमी यो मेको आ परबम परमप्रभु यावे आ स्वर्ग डा गेय पाइब आन डोंइती ‘मेको आं मुर बाक्ब’ देंब।

9 सुमी चहिं मुर आन कली ‘येसु सु बाक्मे? मतुइक्नुड’ देंबा, मेको आ परबम परमप्रभु यावे आ स्वर्ग डा गेय पाइब आन डोंइती ‘मेको कली मतुइक्नुड’ देंब। लूका ९:२६; १सांमुएल २:३०

10 सु सुमी रागीम जरमेशो आ परबम शुक्शी पामे, मेको का का पा माफ ताडनीम। सु सुमी चहिं परमप्रभु यावे आ सोक्त आ परबम शुक्शी लोव पामे, मेको आन पाप गेनायो मक्याम्सीब। मती १२:३२; मर्कूस ३:२८-२९

11 इन कली आन गुम्तीक खिं डा ठेयब मुर नु हुकुम पाइब आन डोंइती लाइशशा राप्पदमेनु ‘मुल मार देंचा, मार लोव लेत्चा’ दे सुर्ता मपने।

12 मोपा राप्पदमेनु, परमप्रभु यावे आ सोक्तीमी इन कली मार देंचा दो देंचा तुइक्पाइशशा देंपाइक्ब” दे शेदीमी बाक्त।

शोंप गे थुं महिरचा, दे शेंशो

13 मिनू काबु आ लोव नेंथ शुश मुर खुम्समानु, मुर कामी “शेंब, आं लोकब कली आं तचा डा अडस योक्शा गेवो, दे मतीन” दे पुना बाक्त।

14 मिनू येसुमी “मार गो इस अडस योक्ब नडा डा? मनड” देंमाक्त।

15 मिनू नोले मुर आन कली “नेनीन, होस पा बाक्कीन। शिंम मदुमीन। मारदे हना शुश शोंप बाक्शा ला ब्रोंइशा बाक्चा मतांडसीब” देंमाक्त। उपदेसक ५:९; १तिमोथी ६:९-१०

शोंप पाइशशो मूर्ख

16 मिनू कथा सेल्शा “शोंप पाइशशो मुर का आ बाली नाली शुश ग्रेल्माक्त।

17 मिनू मेकोमी शुश ग्रेल्शो तशा ‘मुल अन्न वोइक्तीके खिं मजाक्दीपब।

18 मोपतीके खिं प्रेशा अन्न वोइक्तीक ठेयब खिं सेल्शा, बाक्शो अन्न नेल्ल मेकेर उप्नुड’।

19 मिनू मेकोमी 'शुश बर्स कली जाकदीपब। शुश शोंप गे नु बाकब। मोपतीके जशा तूशा ग्येरशा बाकको' दे आंम थुं कली देंमाकत। भजन संग्रह ४९:१-२०

20 मिनू परमप्रभु यावेमी मेको कली 'गे मूर्ख नवे। मारदे हना मुलाकदो बेक्नेवे। मिनू इ खुप्शा उप्शो शोंप सुम जाइबा?' दे मदा बाकत।

21 परमप्रभु यावे कली ममिथु, शोंप ला मिम्ब मुर नेल्ल मोदेंशो दुम्नीम" दे शेंदीमी बाकत। मती ६:२०

सुर्ता मपचा, दे शेंशो

मती ६:२५-३३

22 मिनू आ शेंसीब आन कली "मार जचा, मार फेक्चा, दे सुर्ता मपने।

23 मारदे हना जचा क्येडा ब्रोंइचा ठेयब बाकब। फेक्चा क्येडा इन रां ठेयब मिम्तीने।

24 खद आन कली कोव्रडीने। मेकोपुकीमी मशोक्नीम, मारेइ मरुप्नीम मखुप्नीम। आन अन्न वोइक्तीक खिं यो मबाकब। तन्न परमप्रभु यावेमी मेको आन कली कोव्रशा थुल्ब। मिनू गे मेको चिकब आन क्येडा हिकसीशो मबाक्नीनी डा?

25 मार, गेपुकीमी सुर्ता पा इन ब्रोंइतीक नाकत बारपाइक्ने चाप्नीनी डा?

26 मोदेंशो लायो मचाप्तीनी हना, मारदे अरु थोव्रक आन कली सुर्ता पाइनीनी?

27 लिली फू कली कोव्रशा मिम्तीने। गिश रिम्शो तांडसीनीमी। श्येत पा गेय मपाइनीम। पांडतो मपांडनीम। पिप सोलोमन गिश ग्योम्साकव हना यो, मेको लिली फू खोइ दारशो मदुम्माकत।

28 परमप्रभु यावेमी मेको घांस रिम्शो पा ग्योम्ताकव बाकत हना यो, याम का बाकचा गेब। नोले मेको घांस मीम हुम्चा पुंडसीब। घांस कली लायो मिश रिम्शो पा ग्योम्ताकव हना, गे रिम्शो पा थमा सुइक्ने मचापब इन कली मग्योम्बा डा?

29 मार जचा मार तूचा, दे थुंमी सुर्ता मपने।

30 रागी रागी डा मुर नेल्लेमी मोदेंशो मिम्नीम। इन आफ, परमप्रभु यावेमी इन माल्लो नेल्ल तुडकब।

31 मोपतीके मोदेंशो मिम्चा प्रोंइशा, परमप्रभु यावे आ राज्य मालीने। मिनू मारेइ मारेइ यो ताइनीनी।

32 गे आइक्च बगाल, महिनीन। मारदे हना इन आफोमी इन कली आ राज्यम वोइक्चा दाकब। लूका २२:२९

33 इन के बाकशो लेयशा, मथीब आन कली योक्शा गेने। मो पनीनु, स्वर्गम इन शोंप लीब। मिनू मेको मोपा वोइश्शो शोंप खुइमी खुइ पने मचाप्नीम, खिया मजोइब मराकब, गेनायो मजाम्ब। लूका १८:२२

34 तेकेर इन शोंप बाकबा, मेकेरन इन थुं यो लीशो बाकब।

सासीशा बाक्कीन, दे शेंशो

मती २४:४३-५१

35 बती दाशा वा फेक्शा सासीशा बाक्कीन। प्रस्थान १२:११; १पत्रुस १:१३; मती २५:१-१३

36 होव्रप ग्युंवे भोज जथ लमेनु, आ गेय पाइबपुकीमी 'इं होव्रप लेशशा जाकब। मोपतीके लेशशा मजाकम सम्म मइप्थु बाक्य, दे रिम्नीम। मिनू होव्रप जाकशा, लाप्चो खोकोल पदानु, गु रोक्शा ओव्रचा गेनीम। प्रकाश ३:२०

37 मोदेंशो गेय पाइब आसीक ताइब बाक्नीम। होव्रप लेशशा जाक्मेनु, आ गेय पाइब आन कली मइप्थु रिम्शा बाकशो थित्तु हना, आ होव्रप थाम्पा ग्येरसीशा, मेको आन कली निप्पाइश्शा थुल्ब।

38 होव्रप नाकदो नाक्ती गेना हना यो लेशशा जाक्मेनु, आ गेय पाइब मइप्थु बाक्तेकम हना, मेको मुर रिम्शो दुम्शा आसीक ताइनीम'।

39 नेनीने, खिं डा मुरुमी 'मुल खुइ जाक्नीम' दे तुइश्शो नम हना, मेकोम खिं मप्रोंइथु मइप्थु बाकशा, खुइ पचा मगेम वा। १थिस्सलोनिकी ५:२

40 मोदेंशो पा गे यो मइप्थु सासीशा बाक्कीन। मारदे हना रागीम जरमेशो इन मतुइक्थु जाकब" दे शेंदीमी बाकत।

41 मिनू पत्रुसमी “प्रभु, एको लोत्र गो आंड कली ला शेंदीनी देय मुर नेल्ल आन कली शेंदीनी?” दे हिल्लो पवानु,

42 प्रभुमी “होत्रपमी आ खिं कोत्रब कली जची जाकमेनु जचा गेचा, दे अरेशा वोडकचा पुंडसीब। मेको खोदेंशो निप्स पाइशशो थमा सुइकचा पुंडसीशो गेय पाइब सु बाकबा?

43 आ होत्रप लेशशा जाकमेनु, आ गेय पाइबमी आ अरेशो गेय पना पन बाकशो थित्तु हना, मेको गेय पाइब आसीक राइब दुम्ब।

44 नोफा दाइशशा नेनीने, मेको होत्रपमी आ बाकशो मारेइ मारेइ मेको गेय पाइब कली जिम्मा गेब।

45 तन्न मेको गेय पाइबमी ‘आं होत्रप इच्छा नोले जाकब’ दे मिम्शा, मेकोमी गेय पाइब वोंइश मुर, मीश मुर आन कली तुप्शा श्येत गेशा, जशा तूशा, दुक्शा पाप्तु हना,

46 आ ममिम्शो मतुइशशो नाक्त आ होत्रप लेशशा जाकब। मिनू मेकोमी मेको गेय पाइब कली सजाइ गेशा, मरिम्शो गेय पाइबपुकी नु काथा वोइकब।

47 मिनू होत्रप आ देंशो रुप्शा यो मतुइशशो खोदेंशो पा मेको आ देंशो मटीब गेय पाइब शुश तुप्चा पुंडसीब। याकूब ४:१७

48 होत्रप आ देंशो मतुइकथु, मरिम्शो पाप्तु हना, इच्छा ला तुप्चा पुंडसीब। सुमी शुश रुप्शा तुइशशो बाकमे, मेकोम शुश जिम्मा ब्राइबा। मिनू सुमी शुश जिम्मा ब्राइबा, मेको शुश जिम्मा वारी दुम्ब” दे शेंदीमी बाक्त।

फ्राचा कली जाक्ती

मती १०:३४-३६

49 मिनू येसुमी शेंना शेंन “गो एको रागीम मी जेत्य जाकशो नड। एको मी आं क्येडा डोंइती जेशशो हना, रिम्शो दुम वा।

50 गो श्येत का जचा माल्लुड। मेको बेकचा डा श्येत मजडा सम्म परमप्रभु यावेम गेशो गेय पाइनुड। लूका १८:३१; मती २०:२२; मती २६:३८

51 गो रागीमी नेल्ल आन कली गारपाइकथ जाकशो बाक्नुड, दे मिम्नीनी? तन्न गो इन कली फ्राथ कका जाक्ती।

52 खिं कामी ५ जना मुर बाक्तेकम हना, मेको ५ जना ब्रानीम। सांमी थमा सुइक्नीम, निक्शीमी थमा मसुइक्नीसी। निक्शीम थमा सुइक्नीसी, सांमी थमा मसुइक्नीम।

53 आफोमी थमा सुइकब, आ तौमी थमा मसुइकब। मिनू आफ कली आइकच सेल्ब। तौमी थमा सुइकब, आ आफोम थमा मसुइकब। मिनू आ तौ कली आइकच सेल्ब। ममामी थमा सुइकब, तमीमी थमा मसुइकब। तमीमी थमा सुइकब, ममामी थमा मसुइकब। शिमीमी थमा सुइकब, चाइमीमी थमा मसुइकब। चाइमीमी थमा सुइकब, शिमीमी थमा मसुइकब। मोपा थुं का पा बाकने मचाप्नीम” दे शेंदीमी बाक्त।

54 मिनू मेकेर खुम्सीशो शुश मुर आन कली “नां पेरतीकेम गोस्स गूमेनु, ‘इच्छी ना रेउ यीब’ देंनीनी। मिनू रेउ यीब। मती १६:२-३

55 दक्खिन रागी रे फश पवानु ‘मुलाक्ती हुब्ब’ देंनीनी। मिनू हुब्ब।

56 गे कपटीपुकी, सरीड, रागी कोत्रशा, मुल मार दुम्बा, दे तुइक्नीनी। मुल मार दुम्चशो बाकमे, मेको चहिं मारदे मरुप्नीनी?

57 तेको गेय पशोमी रिम्शो दुम्बा, तेको गेय पशोमी मरिम्शो दुम्बा, मेको मिम्ने मचाप्नीनी?

58 इन कली दोस गेमेनु, दुशा बाक्कीन। मारदे हना इन कली दोस गेशा, निसाफ पाइब आ डोंइती लाइक्तेकम हना, मेकोमी इन कली लल पिया आन गुइमी जिम्मा गेशा, जेल्खानम चोकपाइक्नीम। मती ५:२५-२६

59 नोफा दाइशशा नेनीने, मेकोम इन कली नोले डा लेप्तोन सम्म मथाप्पाइकथु मप्रॉइनीम” दे माइक्मी बाक्त। लेप्तोन का नेल्ल क्येडा आइकच रोमी आन तांबा के क्येत बाकब।



## 13

इन थुं परमप्रभु गे लेत्तीन, दे शेंशो

1 मोपा शेंदीमीनु, आ लोत्र नेंब का निकशीमी “साड गालील रागी डा मुरपुकीमी मारेड मारेड क्योरशा जारदमेनु, पिलातसमी सिपाइ सोइशशा, मेको जारब आन कली क्योरपाइशशा, मेको आन जारशो हुश नु ब्वाइक्ताक्व” देंमा बाक्त।

2 मिनु येसुमी मेको आन कली “मोपा साइक्चा पुंइसीब आन कली रागी डा मुर क्येडा मरिम्शो बाक्मा बाक्त, दे मिम्नीनी? ममाइ, मेको इन खोदेंशोन नम। यूहन्ना ९:२

3 इन थुं परमप्रभु यावे गे मलेत्ताकनी हना, गे यो मोदेंशो पा बेकनीनी।

4 सिलोआमी नेल्ल क्येडा लाइशशो खिं ब्रेम्मेनु, १८ जना चिप्शा बेक्मा बाक्त। मोपा बेक्शोपुकी यरूसलेम सहरम बाक्ब नेल्ल आन क्येडा मरिम्शो बाक्मा बाक्त, दे मिम्नीनी? ममाइ, मेको इन खोदेंशोन नम।

5 इन थुं परमप्रभु यावे गे मलेत्ताकनी हना, गे यो मोदेंशो पा बेकनीनी” दे माइक्मी बाक्त।

6 मिनु कथा सेल्शा “मुर कामी पोत्रशी रवा का खुमा बाक्त। मिनु फल सित्ची ना, सिदा कों, दे कोव्रथ लमाक्त। मिनु कोव्रडानु दा, काइ मसिश्शो बाक्माक्त। मत्ती २१:१९

7 मोपा मसिश्शो तशा, आ गेय पाइब कली ‘एको रवा फल मसिप्ब। गो बर्स बर्सम खेयप सां कोव्रथ जाक्डानु, काइ मसिश्शो बाक्त। एको रवामी रू ला नेक्तु। मोपतीके एको कली तिम्शा ताइक्तो’ दे मदा बाक्त।

8 आ गेय पाइबमी चहिं ‘आं होवप, मुल बाक्ल। बर्स का सम्म आ पुं मेर दोशा, मोल कुर पाइनुड। २पत्रुस ३:९, १५

9 मिनु सित्त हना, बाक्ल। मसित्त हना, तिम्शा ताइक्चा’ देंमाक्त” दे शेंदीमी बाक्त। लूका ३:९

कूजी कली सापाइशशो

10 काबु नाइक्तीक नाक्ती गुम्तीक खिंमी मुर आन कली शेंदीमी बाक्त। लूका ६:६-११

11 मेकेर वोलम तशा, १८ बर्स कूजी दुम्शो मीश का मुर बाक्माक्त। मेको गुर ब्वेशो बाक्माक्त। रिम्शो पा राप्ने मचाप्बाक्माक्त।

12 मिनु येसुमी मेको मीश मुर कली तशा “एक पिवो” दे ब्रेत्ता बाक्त। मिनु पिमेनु “आं तमी, कूजी दुम्शो रे प्रॉइतन” देंशा आ गुड मेको तारी वोदा बाक्त।

13 मोपा वोदानु, साशा राम्माक्त। मिनु ग्येरशा परमप्रभु यावे कली ठेयब सेला बाक्त।

14 मिनु गुम्तीक खिं डा ठेयब मुरुमी नाइक्तीक नाक्ती सापाइशशो तशा, आ थुं मनुमाक्त। मिनु आ थुं मनुथु, मेकेर बाक्ब आन कली “साता कामी ६ नाक्त गेय पचा माल्ब। काबु नाइक्चा माल्ब। मिनु नाइक्तीक नाक्ती गेय पचा मदुम्ब। मोपतीके इन रोइ सापाइक्चा कली नाइक्तीक नाक्ती गेनायो मजाक्कीन। अरु नाक्त जाक्कीन” दे हुइक्तीमी बाक्त। प्रस्थान २०:९-१०

15 मिनु प्रभुमी हुइक्ब मुर कली “ए कपटी, गे नाइक्तीक नाक्ती इन ब्यफ नु गधा आन कली प्रॉइशा, ब्वाक्कु मत्पाइक्नीनी डा? लूका १४:५

16 एको मीश मुर अब्राहाम आ तमी बाक्ब। सैतानमी एको कली १८ बर्स सम्म रोइम गुरपाइशशा वोइशशो बाक्त। मिनु एको कली नाइक्तीक नाक्ती मप्रॉइचा? मसापाइक्चा?” दे हुइक्ता बाक्त। लूका १९:९

17 मोदेंशो लोत्र पवानु, आ कली मरिम्शो देंब मुर मुने दोक्माक्त। मेकेर बाक्ब मुर नेल्ल येसु आ पशो रिम्शो गेय तशा, थाम्पा ग्येरसमा बाक्त।

परमप्रभु आ राज्य आ पर्बम शेंशो

मत्ती १३:३१-३३; मर्कूस ४:३०-३२

18 मिनु मेकोमी “परमप्रभु यावे आ राज्य दोदेंशो बाक्ब देंशा हना,

19 मुर कामी आ रूमी तोरी शोकगा बाक्त। मिनू वाशा ठेयब रवा दुम्माक्त। मेको रवाम चिक्कबपुकीमी ग्योत्र सेलमे बाक्त।

20 मिनू परमप्रभु यावे आ राज्य दोदेशो बाक्ब देशा हना,

21 मीश मुर कामी सेआह सां फसीम बोरपाइक्ब ओरूती सुप्ताक्व। मिनू मेको फस नेल्ल बोरत” दे शेंदीमी बाक्त। सेआह का १३ लिटर गारचा डा पुक्तीके बाक्ब। अरु ब्रेक्तीकेमी चहिं ७ लिटर पुक्तीके बाक्ब, दे ब्रेक्शो बाक्त। सेआह सां ३९ लिटर कि २१ लिटर पुक्तीके बाक्ब।

आइक्च लाप्यो आ पबर्म शेंशो

22 येसु गाउं सहर ते ते जाक्दीम्मे, मेक मेक शेंना शेंन यरूसलेम गे लमाक्त।

23 मिनू मुर कामी “शेंब हजुर, परमप्रभु यावे आ राज्य ओत्रचा ताइबपुकी का निक्शी ला बाक्नीमी?” दे हिल्लो पवा बाक्त

24 मिनू येसुमी “आइक्च लाप्यो रे ओत्रचा मालो। मेकेर रे शुश मुर ओत्रचा दाक्नीम, तन्न ओत्रने मचाप्नीम। मती ७:१३-१४

25 मारदे हना खिं डा मुरुमी लाप्यो चोक्ब। मिनू जाक्शोपुकी लाडगाम राप्शा ‘ओत्रचा गेकी, प्रभु’ दे ब्रेत्नीनी। तन्न खिं डा मुरुमी ‘इन कली मतुइक्नन्नी, ते रे जाक्शो ननी?’ देब। मती २५:११-१२

26 मिनू गेपुकीमी ‘हजुर, गे नु काथा खमे जाइब नकी। आंइ गाउं सहर सहरमी शेंदीनीनु, गो इन लोत्र नेंतक’ देंनीनी। मती ७:२२-२३

27 तन्न मेकोमी इन कली ओत्रचा मगेथु ‘ते रे जाक्नी मतुइक्नुड। मरिम्शो पाइबपुकी आं रे पा डोन लने’ दे खेरब।

28 मोदेशो पा खेरचा पुंडसीशा, डाक्शा इन खुइ शेप्नीनी। मारदे हना इं किकी पिपी अब्राहाम, इसहाक, याक्ब नु परमप्रभु यावे आ लोत्र पाइब नेल्ल आन कली परमप्रभु यावे आ राज्यम ओत्रशा, बाक्शो ताइनीनी। गे चहिं खेरचा पुंडसीनीनी। मती ८:११-१२

29 मुरपुकी पूर्व पच्छिम उत्तर दक्खिन रे जाक्शा, परमप्रभु यावे आ राज्यम ओत्रशा भोज जशा बाक्शो ताइनीनी। लूका १४:१५

30 नेल्ल आन क्येडा नोले दुम्शोपुकी डोंइती दुम्नीम। मिनू नेल्ल आन क्येडा डोंइती दुम्शोपुकी नोले दुम्नीम” दे शेंदीमी बाक्त।

हेरोदम येसु कली साइक्चा माल्शो

31 येसुमी शेंना शेंन बाक्मेनु, फरिसीपुकी जाक्शा, येसु कली “पिप हेरोदम इन कली ग्याइश्शा साइक्चा माल्शो बाक्ब। मोपतीके एक रे रीब पा लने” देथ जाक्मा बाक्त।

32 मिनू येसुमी “लशा, मेको फ्याउरे कली ‘मुलाक्ती नु दीसा वोल आन कली खेरनुडमी। रोइ पशो मुर आन कली सापाइक्नुडमी। मिनू नित्थ नाक्ती आं गेय थुम्नुड।

33 मुलाक्ती, दीसा नु नित्थ नाक्ती यरूसलेम मेर गाक्नुड। मारदे हना परमप्रभु यावे आ लोत्र पाइबपुकी साइ रेन यरूसलेम सहरम ला खतम दुम्नीम’ देनीन” दे सोइक्तीमी बाक्त।

यरूसलेम मिम्शा, येसु आ थुं खाइश्शो

मती २३:३७-३९

34 मिनू यरूसलेम कली “ए यरूसलेम, यरूसलेम, परमप्रभु यावे आ लोत्र पाइब आन कली साइक्तीवी। इ कली शेंथ सोइश्शो आन कली फुल्लु क्रोम्ताक्वी। पोत्रथीमी आ चितोली आन कली पुप्शो खोदेशो पा, गो शुश खेयप इ आल आन कली पुप्चा माल्ती, गे चहिं मबिस्से। मती २३:३७-३९; लूका १९:४१-४४

35 मुल इ खिं ब्रेश्शा मारेइ मलीब। ‘प्रभु आ नेंमी जाक्ब ठेयब बाक्ब’ मदेने सम्म गे आं कली मताइनेवे” देमाक्त। येरमीया २२:५, भजन संग्रह ६९:२७; भजन संग्रह ११८:२६

- 1 मिनू काबु नाइक्तीक नाक्ती मार दुम्माक्त देंशा हना, येसु फरिसी आ खिंमी खमे जथ लमाक्त। मिनू फरिसीपुकीम “मार पाइबा, मार शेंबा” दे योत्रकी पा बाक्मा बाक्त। लूका ६:६-११; लूका ११:३७
- 2 मिनू मेकेर शुश ब्वाक्कुम ब्रीशा होम्शो रोइ पशो मुर का बाक्माक्त।
- 3 मिनू मेको रोइ पशो मुर येसु आ डोंइती बाक्मेनु, येसुमी सास्त्री नु फरिसी आन कली “नाइक्तीक नाक्ती सापाइक्चा दुम्बा, दे मदुम्बा?” दे हिल्लो पामी बाक्त।
- 4 मेकोपुकीमी आ लोत्र मलेत्थु ब्वालैइ पा बाक्मा बाक्त। मिनू येसुमी रोइ पाइब कली थिशा, सापाइशशा, आ खिं सोइक्ता बाक्त।
- 5 मिनू मेको योत्रकी पाइब आन कली “नाइक्तीक नाक्ती इन ब्यफ, इन गधा का इनारम बिक्त हना, मगुंइनीनी डा?” दे हुइक्तीमी बाक्त। लूका १३:१५; मत्ती १२:११
- 6 मिनू मारेइ लोत्र लेन्ने मचाप्मे बाक्त।

### लोत्र खाइक्पाइशशा

- 7 मिनू मेकेर खमे जथ जाक्शो शुशेमी ठेयब लेशशा, ठेयब मुर आन नित्तीकेमी नित्या मालशो तशा मत्ती २३:६
- 8 “जन्ती लनीनु, सम्दी नित्तीकेमी मनिस्सीन। हितोपदेस २५:६-७
- 9 मारदे हना सम्दी जाक्मेनु, खिं डा मुरुमी इन कली पोक्शा याक्पाइक्ब। मिनू सम्दी नित्तीकेमी सम्दी कली निप्पाइक्ब। इन कली चहिं वाइलपुकी नु निप्पाइक्ब। मिनू मुने दोक्नीनी।
- 10 जन्ती लनीनु, वाइल आन नित्तीकेम निस्सीने। मिनू खिं डा मुरुमी इन कली वाइल नु निशशा तशा ‘ए जन्तीपुकी, एक पिने’ दे ब्रेशशा, इन कली मान पा ठेयब मुर नु निप्पाइक्ब। मिनू मेकेर बाक्बपुकीमी यो इन कली मान पाइनीम।
- 11 मारदे हना ठेयब सुंडसीब कली मुरपुकीमी महिक्थु मान मपाइनीमी। ठेयब मसुंडसीब कली चहिं मुरपुकीमी ठेयब सेल्शा, मान पाइनीम” दे शेंदीमी बाक्त। लूका १८:१४; मत्ती २३:१२; याक्ब ४:६, १०
- 12 मिनू खमे जथ ब्रेप्ब कली “गे जचा तूचा सेल्शा मान पा गेवीनु, आंम मुर वारचपुकी नु शोप पाइशशा मुर आन कली मब्रेत्तीमी। मारदे हना इ कली यो लेंशा ब्रेशशा मान पा जचा गेशा, इ देदेड लेत्तीमी।
- 13 भोज पवीनु, पुडग आन कली कूंजी कुंजे, नु मिक्च मताइब आन कली ब्रेत्तीमी। ब्यवस्था १४:२९
- 14 मिनू मेकोपुकीमी इ देदेड लेन्ने मचाप्नीम। तन्न परमप्रभु यावेमी निसाफ पची ना इ पशो नेल्ले ताइनेवे” देंमाक्त। १कोरिन्थी १५:२३; प्रेरित २४:१५

### ठेयब भोज

#### मत्ती २२:१-१०

- 15 मिनू मेकेर बाक्ब कामी येसु आ लोत्र नेंशा “सु परमप्रभु यावे आ राज्यम ओव्रशा, जचा खेत्चा पुंडसीबा, मेको ग्येरसेक्ल” देंमाक्त। लूका १३:२९
- 16 मो देंब कली येसुमी “मुर कामी ठेयब भोज का गेचा कली, शुश मुर आन कली ब्रेत्ता बाक्त।
- 17 मिनू जचा तूचा सेल्शा, आ गेय पाइब का कली ‘जचा तूचा ठीक पाता। मुल जथ पिन’ दे ब्रेत्थ सोइक्ता बाक्त।
- 18 मिनू गेय पाइब लशा, खिं कामी जाक्दीशशा ‘लो जथ पिने’ देंमेनु ‘गो रू ग्याप्ता। मुलाक्ती कोव्रथ लड देंती। मिनू पिचा मताइनुड, देंत, देनो’ देंमाक्त।
- 19 मिनू अर्को आ खिंमी जाक्दीम्मेनु ‘गो ५ हाल ब्यफ ग्याप्ता। मिनू मुलाक्त ब्वाक्शा, कोव्रथ लाइनुड। मोपतीके गो पिचा मताइनुड, देंत, देनो’ देंमाक्त।
- 20 मिनू अर्को खिं लमेनु, मेकोमी ‘गो ग्युंवे पाता। मिनू गो पिचा मताइनुड’ देंमाक्त। का का पा ‘पिचा मताइनुड’ दे मेको गेय पाइब कली लोत्र लेत्मे बाक्त। १कोरिन्थी ७:३३

21 मिनू गेय पाइबमी मेको लोव नेल्ल आ होवप कली शेंदा बाक्त। मिनू मेको गाइशशा 'मो हना गे सहर मेर हिरशा लावो। मिनू पुडग, कूजी कुंजे, मिक्च मताइब नु गुइ खोइल मदुक्ब आन कली खुप्शा चाक्मी' दे सोइक्ता बाक्त।

22 मिनू ब्रेथ लशा चाक्शा, आ होवप कली 'इन देशो नेल्ल पाता, चिनु नित्तीकेम मुर मब्रीम' देमाक्त।

23 मिनू होवपमी 'नित्तीके मब्रीम सम्म मुर आन कली "जाक्कीन है, जाक्कीन" दे ब्रेशशा चाक्मी। मिनू आं खिं ब्रील।

24 डोंइती आं ब्रेशशो सुइमी मारेइ यो जचा थोवक थाम्चा मतामेक्ल' " देमाक्त।

**येसु आ नोले दोपा खोइक्चा**

25 येसु गाक्मेनु, शुश मुरुमी आ नोले खोदमे बाक्त। मिनू येसुमी मेको आन कली कोवशा

26 "सु सु गो नु बाक्चा दाक्नीमी, मेकोपुकीमी आम आफ, आंम मीश, आंम वोइश, तमी तौ, लोक्बपुकी नु आंम कली यो ममिम्थु, आं नोले खोइय्यीमील। मारदे हना मेको मिम्बपुकीमी आं नोले खोइक्ने मचाप्नीम। लूका १८:२९-३०; ब्यवस्था ३३:९; १कोरिन्थी ७:२९

27 सु सुमी आन श्येत कुरशा, आं कली मखोइक्नीमी, मेको आं शेंसीब दुम्ने मचाप्नीम। लूका ९:२३

28 मार, गेपुकीमी लाइशशो खिं सेल्चा क्येडा डोंइती, सेल्ने थुम्चा कली क्येट जाक्दीप्बा देय मजाक्दीप्बा, दे हिसाब मपाइनीनी डा?

29 हिसाब मपथु सेल्चा गोशा, खिं सेल्ने मथुम्थु क्येट नुप्त हना

30 'आ क्येट मजाक्दीत्थु, मार सेल्चा गोवा?' दे शुक्शी पाइक्चा पुंइसीशा मुने दोक्सीब।

31 पिप काम आ बाक्शो १० हजार लडाइ पाइब लाइशशा, २० हजार लडाइ पाइब बाक्शो पिप नु लडाइ पचा थुं पाप्तु हना, मेकोमी ग्राने चाप्नुडा देय मचाप्नुडा, दे ममिम्बा डा?

32 ग्राने मचाप्नुड, दे मिम्ताक्व हना, डोन बाक्मानु 'दुशा बाक्च' दे लोवसी पचा कली आ मुर सोइक्ब।

33 मोदेशो पा गे यो आं नोले खोइक्चा क्येडा डोंइती 'खोइक्ने चाप्नुडा देय मचाप्नुडा' दे मिम्तीने। गे नु बाक्शो मारेइ ममिम्थु, आं नोले खोइय्यीनी। ममिम्थु मचाप्नीनी हना, आं शेंसीब दुम्ने मचाप्नीनी। लूका ९:६२

34 हिक्सीम ब्रोवपाइक्ब। तन्न आ डाम्चा जाम्त हना, मारम मेको कली डाम्पाइक्चा। मत्ती ५:१३; मर्कूस ९:५०

35 मेको ना रू कली दुम्बा, ना मुर कली दुम्बा। मोपतीके मुरुम मेको कली ताइक्नीम। सु के नोफा बाक्मे, मेकोमी नेनल" दे शेंदीमी बाक्त।

## 15

**"जाम्शो थिरशा ग्येरसमल" दे शेंशो**

1 मिनू शुश तिरो पोक्ब नु पापीपुकी येसु आ लोव नेंथ जाक्मा बाक्त।

2 मिनू फरिसी नु सास्त्रीपुकीमी तिरो पोक्ब नु पापी शुश येसु नु काथा बाक्शा जशो तशा "मेको मुरुमी पापी आन कली ब्राइब। पापीपुकी नु काथा बाक्शा, खमे जाइब" दे आन थुं मनुथु, लोव पामे बाक्त। लूका ५:३०; लूका १९:७

3 मिनू येसुमी मेको आन थुं मनुशो तुइक्ता बाक्त।

**जाम्शो भेडा आ कथा**

4 मिनू "मुर कामी सहे का भेडा थुल्शा, मेको आन कली योवडानु, भेडा का जाम्त हना, मार, मेकोमी लीशो ९९ भेडा आन कली प्रॉइशा, जाम्शो कली माल्थ मलाइबा डा? मथिदा सम्म माल्ना माल्न गाक्ब। मत्ती १८:१२-१४; लूका १९:१०; इजीकीएल ३४:१२; यूहन्ना १०:११-१२

5 मिनू मेको जाम्शो भेडा का कली थिरशा, ग्येरसीशा, बलाम लाप्शा, आ खिं चाक्ब।

6 मिनू आ वारच आन कली 'आं जाम्शो भेडा थिरशा चाक्ता। मोपतीके नेल्ल ग्येरसय' देंब।

7 मारदे हना ९९ परमप्रभु यावे गे लेत्चा ममाल्शो रिम्शो पाइब आन क्येडा पापी कामी पाप पचा प्रोंडशो तशा, स्वर्गम बाक्बपुकी ग्येरसीनीम” दे शेंताकमी।

### जाम्शो क्येट आ कथा

8 मिनु “मार, मीश मुर कामी १० ओटा द्राकमे वोइश्शोमी का जाम्त हना, बती दाशा, खिं गा, कुना लाडगा नेल्ल हिरशा, मथिदा सम्म ममाल्बा डा? द्राकमे ग्रीक लोत्र बाक्ब। मेको देनार का खोंदशो नाक्त का डा गाल्च बाक्त। देनार चहिं रोमी लोत्र बाक्ब।

9 मिनु थिश्शा आ वारच आन कली नु आ नेक्था डा मुर आन कली ब्रेश्शा ‘आं के जाम्शो द्राकमे का माल्शा थित्ता। मुल ग्येरसाक्यी’ देंब।

10 मोपा पापी मुर कामी पाप पचा प्रोंडशा, आ थुं परमप्रभु यावे गे लेत्ताक्व हना, परमप्रभु यावे आ स्वर्ग डा गेय पाइबपुकी ग्येरसीनीम” दे माइकमी बाक्त।

### जाम्शो तौ आ कथा

11 मिनु लोत्र बोइश्शा “मुर का के तौ निक्शी बाक्सा बाक्त।

12 मिनु काबु कान्छा तौमी ‘आं आफ अडस योक्शा गेयी’ देंमाक्त। मिनु आफोमी जेठा नु कान्छा आस कली अडस योक्शा, गेम्सी बाक्त।

13 मिनु कान्छामी इच्का नाक्त नोले आ अडस नेल्ल खुप्शा, क्येट नेल्ल कुरशा गाक्माक्त। मिनु जशा, तूशा, तेल्लेम पा, जवा ग्यारशा, क्येट नेल्ल थुमा बाक्त। हितोपदेस २९:३

14 मिनु मेको रागीमी अन्काल दुम्माक्त। मिनु कान्छामी श्येत जवा बाक्त।

15 मिनु मेको रागी डा मुर का आ खिंमी गेय पवा बाक्त। मिनु मेको मुरुमी कान्छा कली पोत्र योत्रब सेला बाक्त।

16 मिनु जचा मतथु, शोत्रलु बेक्शा, पोत्र कली जचा गेशो थोत्रकी यो जड खोंदशो दुम्माक्त। तन्न सुइमी मारेइ जचा मगेमे बाक्त। हितोपदेस २३:२१

17 मिनु शुश श्येत जशा ‘आं आफ आ खिंमी गेय पाइबपुकीमी रूथी जाइनीम। हेंथ्री दुम्ब। गो चहिं शोत्रलुम बेक्चता।

18 मुल गो आं आफ आ खिं लेत्नुड। मिनु आं आफ कली “गो परमप्रभु यावे आ देंशो मटिड। इन देंशो यो मटिड। भजन संग्रह ५१:६; येरमीया ३:१२-१३

19 मुल इन तौ देंचा मशिरनुड। मोपतीके इन गेय पाइब का सेल्यीनी” दे माइक्नुड’ दे मिम्ता बाक्त।

20 मिनु आ आफ आ खिं लेम्माक्त। मिनु आ आफ आ खिं जाक्दीत्चावानु, आ आफोमी कान्छा कली पिशो तशा, शिशी पा दोरशा लशा मुप्शा पुक्पु पदा बाक्त।

21 मिनु मेकोमी ‘आं आफ, गो परमप्रभु यावे आ देंशो मटिड। इन देंशो यो मटिड। मोपा मटितीके पापम गुम्ती। इन तौ देंचा मशिरनुड’ देंमाक्त।

22 मिनु आफोमी गेय पाइब आन कली ‘नेल्ल क्येडा दारशो फेक्तीक वा गुंइशा, आं तौ कली फेक्तीने। आ गुंइमी औंठी लिक्तीने। जुत्ता मुइक्पतीने।

23 मिनु दोम्शो बाछा क्योरशा, क्येशा जचा तूचा सेल्शा, नेल्ल ग्येरसय।

24 मारदे हना आं बेक्शो तौ सेस दुम्त। आं जाम्शो तौ थित्ता’ देंमाक्त। मिनु जशा तूशा नेल्ले ग्येरसमा बाक्त। एफिसी २:५

25 मेकोपुकी ग्येरसीशा बाक्मानु, जेठा तौ रूमी गेय पथ लशो बाक्माक्त। मिनु लेश्शा खिं आ नेक्था जाक्मेनु, शुश मुर खुम्सीशा सिल पा, जशा तूशा ग्येरसीशा बाक्शो तवा बाक्त।

26 मिनु गेय पाइब का कली ‘इं खिंमी मार दुम्मे?’ दे हिल्लो पवानु,

27 मेकोमी ‘इन लोक्ब जाक्त। मिनु इन आफोमी जाक्शो तशा, ग्येरसीशा, दोम्शो बाछा क्योरपाइक्नु’ देंमाक्त।

28 मिनु मेको नेल्ल नेंशा ‘खिं मओत्रनुड’ दे चुरशा बाक्माक्त। मती २०:१५

29 मिनू आफोमी लेम्शा 'ओव्रडो, गे यो ग्येरसो' दैमेनु 'मार ग्येरसीनुडा, गो शुश बर्स एको खिं डा गेय पना पन बाक्ती। इन लोव्र नेल्ल टिशा बाक्ती। गेना हना यो रिम्शो ला पाता। तन्न आं वारचपुकी नु बाक्शा ग्येरसीचा कली बोका का यो मगेनी।

30 इन तौ कान्छामी इं खिं डा बाक्शो नेल्ल लाइशशा, तेल्लेम पा थुम्तु। मोदेशो मुर लेशशा जाक्मेनु, दोम्शो बाछा क्योरतीनी। मिनू मचुरनुडा डा?' दैमाक्त।

31 मिनू आफोमी 'आं तौ, गे गो नु काथा बाक्ते। आं मार मार बाक्मा, मेको नेल्ल इ के नमी।

32 इ लोक्व चहिं बेक्शा रे ब्रोंडत। जाम्शो रे थिस्साक्व। मोपतीके गो नेल्ल ग्येरसय' दैमाक्त" दे येसुमी शेंदीमी बाक्त।

## 16

थुं का पा परमप्रभु कली ठेयब सेल्लीन

1 काबु येसुमी आ शेंसीब आन कली "क्येट थीब मुर कामी आ मार मार बाक्मा, मेको नेल्ल हिसाब पाइब का कली जिम्मा गेशा वोइशशा बाक्माक्त। मिनू काबु मुरपुकीमी 'हजुर, इन हिसाब पाइबमी क्येट मारेइ मारेइ हेंथे पा थुम्तु' दे शेंदमे बाक्त।

2 मिनू क्येट थीबमी आ हिसाब पाइब कली ब्रेशशा 'गेमी आं क्येट थुम्शा गेयी बाक्त। डोंइती रे डा दोशो चेमी दोशो थुमी, लो, नेल्ल कोंइदी। मुल डा मेरे इ कली मवोइक्नन' दे मदा बाक्त।

3 मिनू मेकोमी 'आं गेय रोइशशा सोइक्ताक्यी। मुल गेय मताइनुड। कोदाली दोने यो मचाप्नुड। पुंइशा जचा कली यो मुने पाइनुड।

4 मुल मार पचा माल्नुडा। गो मेको तुइक्नुड। मुर आन खिं लडानु आं कली दोपा लोव्र पाइनीमी, मेको यो तुइक्नुड' दे मिम्ता बाक्त।

5 मिनू मेकोमी आ होव्रप आ जेर लाइब आन कली का का पा ब्रेशशा, डोंइती जाक्व कली 'गे दोशो, मार लदी?' दे हिल्लो पवा बाक्त।

6 मिनू मेकोमी 'सहे का बाथ जचा तेल लाइशशा नड' दैमेनु 'लो, नक कागज का सेल्स। मिनू जोल पा ५० बाथ ला ब्रेक्ताक्स' दैमाक्त। बाथ का २२ लिटर खोदेशो बाक्ब।

7 मिनू अर्को कली 'गे दोशो मार लदी' दे हिल्लो पवानु, 'सहे का कोर चेरब लाइशशा नड' दैमेनु 'लो, नक कागज सेल्शा, जोल पा ८० कोर ब्रेक्तास' दे नक कागज का सेल्से बाक्त। कोर का २२० लिटर बाक्ब।

8 मिनू जेर लाइक्व नेल्ल आन के नक कागज सेल्शा, होव्रप कली कोंइदा बाक्त। मिनू मेकोमी कोव्रशा 'गे मेको आन कली वारच सेल्शा, निप्स पाइशशा गेय पा कोंइताक्यी' दैमाक्त। रागीमी थमा सुइक्व क्येडा थमा मसुइक्वपुकीमी निप्स पाइशशा गेय पाइनीम। एफिसी ५:८-९

9 मोपतीके गे यो निप्स पाइशशा गेय पा वारचपुकी सेलीने। इन शोंप क्येट मारेइ मारेइ यो मथीब आन कली शिशी पा गेतीनी हना, परमप्रभु यावेमी इन पशो खोदेशो पा गेब' दैमाक्त। लूका १४:१४; मत्ती ६:२०; मत्ती १९:२१

थुं निक्शी पाइशशा मुदुमीन

10 मिनू लेंशा "सुमी थम आइक्च गेय कली रिम्शो पा पाइबा, मेकोमी ठेयब गेय यो रिम्शो पा पाइब। सुम आइक्च गेय, दे मरिम्शो पा पाइबा, मेकोमी ठेयब गेय यो मरिम्शो पा पाइब। लूका १९:१७

11 मोपतीके गे रागी डा क्येट आ पर्वम जोल पाइब दुम्तीनी हना, स्वर्ग डा शोंप दोपा ताइब दुम्ने चाप्नीनी?

12 गे अर्को मुर आन थोव्रक आ पर्वम जोल पाइतीनी हना, आंमा इन शोंप इन कली सुम गेबा डा?

13 गेय पाइब कामी होव्रप निक्शी आस गेय पने मचाप्ब। मारदे हना का आ देशो टिप्तु हना, अर्को कली मटीब दुम्ब। का कली दाक्ताक्व हना, अर्को कली चहिं काइ मदाक्व। मोपतीके गे यो परमप्रभु यावे नु शोंप निक्शी आस नोले खोइक्ने मचाप्नीनी" दे येसुमी शेंदीमी बाक्त। मत्ती ६:२४

फरिसी आन कली हुइशशा

14 फरिसीपुकीमी क्येट नु शोप दाकबाकमा बाक्त। मिनु येसु आ लोव नेशा गाइशशा, शुक्शी पामे बाक्त।

15 मिनु येसुमी “मुर आन कली ‘गो ठीक नकी’ देखु पा कोंइनीनी। मिनु मुरपुकीमी इन कली ठेयब सेल्नीम। परमप्रभु यावेमी चहिं इन मिम्शो नेल्ल तुइक्ब। मुर आन दातेमी हिक्सीशो नेल्ले परमप्रभु यावे आ डोंइती थम आइक्च दुम्नीम। लूका १८:९-१४

### साइ ब्रेक्शो लोव आ पर्वम शेंशो

16 साइ डोंइती रे परमप्रभु यावे आ अरेशो लोव नु आ लोव पाइब आन ब्रेक्शो यूहन्ना आ पाला मम्म शेंताकम। यूहन्ना जाकम रे परमप्रभु यावे आ राज्य डा लोव नेंपाइक्नीम। मिनु शुश मुरुमी मेको लोव नेशा, थमा सुइशशा, परमप्रभु यावे आ राज्यम ओव्रचा बोल पाइनीम। मती ११:१२-१३

17 परमप्रभु यावेमी ब्रेक्पाइशो लोव का यो मग्याम्ब। मेको ग्याम्चा क्येडा सरीड नु रागी ग्याम्ब। मती ५:१८; मती १९:९

18 सुमी आ मीश कली प्रोंइशा, अर्को मीश चाक्बा, मेकोमी मीश वोंइशा आस नाता खोइशशा, हेंथे पाइब। सुमी आ वोंइशा नु ब्राशा गाक्शो मीश चाक्बा, मेकोमी यो वोंइशा मीश आस नाता खोइशशा, हेंथे पाइब।

### शोप पाइशो मुर नु लाजरस

19 शुश शोप पाइशो मुर का बाक्माक्त। मेको रिम्शो रिम्शो फेक्शा, ब्रोवब्रोवशो जशा बाक्बाक्माक्त।

20 आ खिं डा लाङगाम चहिं जचा मतथु, श्येत जशो लाजरस माइशशो मुर का गोल्शा बाक्बाक्माक्त। मेको रोड पा आ रां नेल्ल गार ग्रूशा राक्शो बाक्माक्त।

21 मेको शोप पाइशो मुरुम आ जशो रे खपीम दोक्शो जचा ताइनुडा कों, दे आस पा कोव्रशा बाक्बाक्माक्त। आ गार कुचुमपुकीमी तुक्बाक्मा बाक्त।

22 मिनु लाजरस शुश श्येत जशा बेक्माक्त। मिनु परमप्रभु यावे आ स्वर्ग डा गेय पाइबमी अब्राहाम आ थुकुमी वोदमे बाक्त। मेको नोले शोप पाइशो मुर यो बेक्शा थिम्चा पुंइसे बाक्त।

23 मेको शोप पाइशो मुर बेक्शो मुर आन बाक्तीक जाक्दीम्माक्त। मिनु शुश श्येत जशा, डोन रे कोव्रडानु, लाजरस कली अब्राहाम आ थुकुम बाक्शो तवा बाक्त।

24 मिनु ठेयब सेंदा पा ‘ए, आं आफ अब्राहाम, शिशी पाइय्थीनी। मारदे हना गो मीम दुप्शा, आं शोव्र सोव्रशा बेक्चता। लाजरस कली आ ब्रेप्चो ब्वाक्कु खुम्शा, ब्वाक्कु तोक्पाइक्थ सोइक्तीने’ दे ब्रेम्माक्त।

25 तन्न अब्राहाममी ‘डोंइती थम रिम्शो पा बाक्ते। लाजरस चहिं शुश श्येत जशा बाक्त। मुल चहिं लाजरस आ थुं नाइक्चा ताप्तु, गे चहिं श्येत जशा बाक्नेवे। लूका ६:२४

26 मोशो ला ममाइ। परमप्रभु यावे आ राज्य डा मुर नरक मलाइनीम। मिनु नरक डा मुर यो परमप्रभु यावे आ राज्यम ओव्रचा मताइनीम’ देंमाक्त।

27 मिनु मेकोमी ‘आं आफ, सेउ पाइनन्नी, खिंमी आं के ५ जना लोकब बाक्नीम।

28 मेको आन कली “इन लोकब बेक्शा, नरक लशा श्येत जशा बाक्त। आ पशो खोदेंशो मपने। मो पाइतीनी हना, आ खोदेंशो दुम्नी” दे माइक्थ, लाजरस कली सोइक्तीने’ दे सेउ पवा बाक्त।

29 मिनु अब्राहाममी ‘परमप्रभु यावेमी मोसा कली ब्रेक्पाइशो लोव नु परमप्रभु यावे आ लोव पाइब आन ब्रेक्पाइशो लोव मेकोपुकी नु बाक्नीम। मेको पदेशा नेन्मेकल’ देंमेनु, २तिमोथी ३:१६

30 ‘ममाइ, आ आफ, बेक्शो रे सेंसीशो मुर सोइक्ताक्नी हना ला, मेको आ लोव नेशा टिशा, पाप पचा प्रोंइशा, आन थुं परमप्रभु यावे गे लेत्नीम’ दे सेउ पवा बाक्त।

31 मिनु अब्राहाममी ‘ममाइ, परमप्रभु यावे आ ब्रेक्पाइशो लोव मटिम्तेकम हना, बेक्शो रे सेंसीशो मुर तशा यो थमा मसुइक्नीम’ देंमाक्त” दे येसुमी शेंदीमी बाक्त।

## 17

पाप पपाइक्व बोक्नीम, दे शेंशो

मत्ती १८:६-७; मत्ती १५:२१-२२; मर्कूस ९:४२

1 काबु येसुमी आ शेंसीब आन कली “मुरपुकीमी पाप पपाइश्शा दाइल पाइक्वा गोइनीम। तन्न सुइमी अरु आन कली दाइल मपपदल, मारदे हना दाइल पपाइक्व कली शुश मरिम्शो दुम्ब। मत्ती १८:६-७

2 मेको आ शुरमी यात क्युकशा, समुन्द्रमी खुम्शा साइक्वा अरु सजाइ क्येडा रिम्शो दुम्ब।

3 इन कली का का पा शेंननी। मिनु नेनीने। इ लोकबमी पाप पाप्तु हना, मेको कली ‘मो मपचा’ दे अर्ती गेवो। इ अर्ती नेंशा माफ पुंडतु हना, माफ गेवो। मत्ती १८:१५

4 काबुम ७ खेयप पाप पशा, ७ खेयप माफ पुंडथ जाक्त हना यो, ७ खेयप माफ गेवो” दे शेंदीमी बाक्त। मत्ती १८:२१-२२

थमा सुइक्तीक बारपाइक्वा, दे पुंडशो

5 मिनु शेंसीबपुकीमी येसु कली “प्रभु, आंइ थमा सुइक्तीक थुं बारपा गेकी” दे पुन्मे बाक्त।

6 मिनु प्रभुमी “रायो गोडा खोइ ला थमा सुइक्तीनी हना, इन पने मचाप्चा डा मारेइ मलीब। एको रवा कली ‘शाक्श सुन्दा दुल्शा समुन्द्रम याक्सो’ देंनीनु, एको रवा यो याक्सीब।

गेय पाइबम गाल्च ला ताइब, दे शेंशो

7 नेनीने, मिनु मिम्तीने। इन गेय पाइब कामी ब्यफ वाक्शा, कि बी योव्रशा, खिं लेशशा जाक्मेनु, खमे खेल्टीनी डा? ममाइ।

8 गेमी ‘लो, मी मुइश्शा, खमे क्येशा थुल्यी। मिनु गे यो जावो’ देंनीनी।

9 गेय पाइबमी अरेशो गेय पवानु, आ ठेयब मुरुमी सेवासी गेबा डा?

10 गेपुकी गेय पाइब ननी। परमप्रभु यावेम इन कली आ गेय पाइब सेल्शा, गेय पपाइक्तु। मिनु एको गेय पशा ‘परमप्रभु यावे आ देशो पाइतय। तन्न सेवासी गेने मपुंडसय। मारदे हना आ वोइश्शो मुर नय’ दे मिम्तीने” दे शेंदीमी बाक्त। १कोरिन्थी ९:१६

कोव्रर पाइब आन कली सापाइश्शो

11 मिनु यरूसलेम डा लां खोइश्शा, गालील नु सामरीया रागी आन दाते डा लां लमा बाक्त। लूका ९:५१; लूका १३:२२

12 मिनु काबु गाउ का जाक्दीम्मानु, १० जना कोव्रर पशो मुरपुकीमी “येसु पीब” देशो नेंशा, लां कोव्रशा बाक्मा बाक्त। लेवी १३:४५-४६

13 मिनु मेकोपुकीमी “येसु, शेंब, आंइ कली शिशी पाइक्की” दे सेउ पा ब्रेम्मा बाक्त।

14 मिनु येसुमी मेको आन कली तशा “गेपुकी, चढेब आ डोंइती लशा, इन साशो रां कोंइदीने” दे सोइक्तीमी बाक्त। मिनु लना लन लांमीन आन कोव्रर सामा बाक्त। लूका ५:१४

15 कामी आ रां साशो तशा, फ्रा लेशशा परमप्रभु यावे कली ठेयब सेला बाक्त।

16 मिनु दोरशा पिशा, येसु आ डोंइती बाप्शा खुम्की पा “प्रभु, गे आं कली रिम्शो पाइतीनी” दे सेउ पवा बाक्त। मेको सामरीया डा मुर बाक्माक्त।

17 मिनु येसुमी “१० जना आन कली सापदुमी ममाइ डा? अरु ९ जना ते लागमे?”

18 मेको सामरीया डा मुर ला परमप्रभु यावे कली ठेयब सेल्शा ‘गे रिम्शो पाइब बाक्नीनी’ देंथ जाक्मे?” देंमाक्त।

19 मिनु “गे रिम्शो पाइब बाक्नीनी” देंथ जाक्ब कली “इ पिया पोक्को। आं कली थमा सुइक्तीवी। मोपतीके साते” देशा सोइक्ता बाक्त। लूका ७:५०

परमप्रभु आ राज्य आ पर्वम शेंशो

मत्ती २४:-; मर्कूस १३:-



20 मिनू फरिसीपुकीमी येसु कली “परमप्रभु यावे आ राज्य जाक्चशो गेना तांडसीबा, दोपा तांडसीबा?” दे हिल्लो पामे बाकत। मिनू येसुमी “परमप्रभु यावे आ राज्य मिक्चीम तचा डा पा मतपांडसीब। यूहन्ना १८:३६

21 एक जाकत, मेरेक जाकत, दे मदेनीम। नेनीन, परमप्रभु यावे आ राज्य जाक्ने थुम्शा, गेपुकी नु बाकत” दे शेंदीमी बाकत।

22 मिनू आ शेंसीब आन कली नोले दुम्ब लोव्र पा “दोपा मुल रागीम जरमेशो नु काथा बाक्चा तनी, मोपा नोले चिनु काथा बाक्चा दाक्नीनी। तन्न काथा बाक्चा मताइनीनी।

23 मिनू मुरपुकीमी ‘परमप्रभु यावे आ सोइशो हुकुम पाइब एक जाकत, मेरेक जाकत, इरी जाकत, उयु जाकत, कोव्रथ लय’ देमानु, मेको थमा मसुइक्थु, मेको आन नोले मखेतीन। लूका २१:८

24 रागीम जरमेशोमी चिन्ड कोइशा तपांडसेनु, चिला पवानु, चिलाम नां दाप्तीक रे नां पेरतीक सम्म थिशो तांडसीशो बाक्ब।

25 मोपा तपांडसीचा क्येडा डोंइती शुश श्येत जचा माल्ब। मारदे हना एको पाला डा मुरपुकीमी आं कली मब्रथु, आं लोव्र मनेनीम, थमा मसुइक्नीम। लूका ९:२२

26 रागीम जरमेशो जाक्मेनु, मुरपुकीमी नोआह आ पालामी पशो खोदेशो पाइनीम।

27 नोआह ठेयब डोंगाम मओव्रम सम्म मुरपुकी जशा तूशा, ग्युबे पशा, ग्युबे पांडसीशा बाक्मा बाकत। मिनू रेउ यिशा मुर नेल्ल बेक्मा बाकत।

28 लोत आ पालामी यो मोदेशो दुम्माकत। मुरपुकीमी जचा फेक्चा, ग्याप्या लेयचा, खुम्शा मीमेनु रिक्चा नु मार मार सेल्चा मिन्तमे बाकत। उत्पत्ती १९:१५, २४-२५

29 काबु चहिं लोत सोदोम प्रोंइशा प्रोक्मेनु, परमप्रभु यावेमी सरीड रे मी नु बारुक तोक्पदा बाकत। मिनू सोदोम सहरम बाक्ब नेल्ल बेक्मा बाकत।

30 रागीम जरमेशो जाक्शा तपांडसेनु, नोआह नु लोत आस पालाम दुम्शो खोदेशो दुम्ब।

31 में नाक्ती बारदलीम बाक्बमी खिं गाम मार मार बाक्मा, मेको ब्रदीचा ममालीन। रूमी गेय पाइब खिं मलेतीन।

32 लोत आ मीश दोपा बेक्मे, मेको मिन्तीने। उत्पत्ती १९:२६

33 आ गिंम प्रोंइचा माल्ब के आ गिंम योल्ब। आ गिंम सोइक्बमी आ गिंम प्रोंइब। लूका ९:२४

34 मिनू मुर निक्शी ब्राख्ये कामी इप्शो बाक्नीस। का लाइक्चा पुंडसीब, का प्रोंइशा वोइक्चा पुंडसीब।

35 मीश मुर निक्शी यात हिल्शा बाक्नीस। का लाइक्चा पुंडसीब, का प्रोंइशा वोइक्चा पुंडसीब।

36 वोइश मुर निक्शी रूम गेय पा बाक्नीस। का लाइक्चा पुंडसीब, का प्रोंइशा वोइक्चा पुंडसीब, दे इन कली देनुड” दे शेंदीमी बाकत। मत्ती २४:४०

37 मिनू आ शेंसीबपुकीमी “प्रभु, इन देशो तेकेर दुम्बा?” दे हिल्लो पामेनु “तेकेर सिनु बाक्मे, मेकेरन गिद हिरसीनीम” देमाकत।

## 18

### पुंडचा मप्रोंइचा, दे शेंशो

1 मिनू येसुमी आ शेंसीब आन कली “परमप्रभु यावे कली पुंडचा नु ‘गे रिम्शो पाइब बाक्नीनी’ देंचा गेनायो मप्रोंइचा” दे रुप्पाइक्चा कली कथा सेला बाकत। १थिस्सलोनिकी ५:१७

2 मिनू मेकोमी “सहर कामी निसाफ पाइब का बाक्माकत। मेको सुइ नु महिंब बाक्माकत। परमप्रभु यावे कली ममिम्थु, मुर आन लोव्र यो मनेंथु, आ थुमी मार पिमे में ला पाइबाक्माकत।

3 मेको सहरमी आ वोंइश बेक्शो मीश मुर का बाक्माकत। मेको मीश मुर मेको निसाफ पाइब आ बाक्तीके जाक्ना जाक्न ‘आं कली दोस गेब आन कली सजाइ गेशा, आं कली ग्रापाइय्यीनी’ देबाक्माकत।

4 शुश नाक्ती सम्म निसाफ पाइबमी मेको कली आ पुंडशो मगेवा बाकत।

5 काबु चहिं ‘परमप्रभु यावे कली मान पा महिंथु, मुर आन लोव्र यो मनेंथु, आं थुमी मार पिमे में ला पा बाक्ती। तन्न मेको मीश मुरुम नाकत कित कित जाक्शा, श्येत गेती। मुल आ लोव्र नेंचा ब्रीताक्ड, नेने

यो मदाकड। आ देंशो मपाता हना, जाक्स डा जाक्स पाइब। मोपतीके मेको आ देंशो मपथु मप्रॉइनुड' दे मिम्ता बाक्त। लूका ११:७-८

6 मेको निसाफ पाइब आ मिम्शो मिम्तीने।

7 मारदे हना निसाफ पाइब आ पशो खोदेंशो पा परमप्रभु यावेमी आ योव्रशो आन कली आन पुंइशो मगेबा डा? मेकोपुकीमी नाक्त कित कित पुंइचा मप्रॉइथु बाक्नीम। मुल मगेपुतु हना, काबु डा काबु गेब। मिनु ग्रापाइक्ब।

8 रागीम जर्मेशो तपांइसेनु, थमा सुइश्शा, परमप्रभु यावे कली पुंइशा 'गे रिम्शो पाइब बाक्नीनी' देंस डा देंस बाक्शोपुकी ताइबा कों?' दे येसुमी देंमाक्त।

**ठेयब मसुंइसीचा, दे शेंशो**

9 काबु येसुमी अरु आन कली महिंथु, ठेयब सुंइसीशो आन कली लोव्र पवा बाक्त। मेकोपुकीमी "गो आम पचा माल्शो पा ठीक दुम्तक" दे मिम्शो बाक्मा बाक्त। रोमी १०:३

10 मोदेंशो ठेयब सुंइसीब आन कली "मुर निक्शी परमप्रभु यावे आ खिंमी परमप्रभु यावे कली प्रार्थना पथ लसा बाक्त। का फरिसी बाक्माक्त, का तिरो पोक्ब बाक्माक्त।

11 फरिसीमी मुर नेल्ल आन कली तपांइसीशा, चढेतीक आ नेक्था राष्शा 'परमप्रभु यावे, गे रिम्शो पाइब बाक्नीनी। मारदे हना गो अरु मुर खोदेंशो पा मुर आन मार मार रोइक्ब मनड। गो जोल पाइब यो मनड। मीश वोंइश आस नाता खोइक्ब मनड। मेरे तिरो पोक्ब खोदेंशो पापी मनड। यसैया ५८:२-३

12 साता कामी खेयप निक्शी माइजा बाक्नुड। क्येट ताक्गुनु, १० भाग डा भाग का योक्शा गेनुड' दे प्रार्थना पवा बाक्त। मती २३:२३

13 तिरो पोक्ब चहिं हारे बाक्शा, शुर खुक्शा 'परमप्रभु यावे, गो पापी नड। शिशी पाइयीनी' दे प्रार्थना पवा बाक्त। भजन संग्रह ५१:१३, १९

14 परमप्रभु यावेमी मेको कली आ पाप क्याम्शा, ठीक दुम्पाइक्तु। मिनु ठीक दुम्शा, आ खिं लेत्त। फरिसी चहिं पाप क्याम्चा मतव। मारदे हना सुमी ठेयब सुंइसीबा, मेको महिक्शो दुम्ब। ठेयब मसुंइसीब कली चहिं परमप्रभु यावेमी ठेयब सेल्ब" दे येसुमी माइक्मी बाक्त। मती २१:३१; लूका १४:११; मती २३:१२

**आल आन कली आसीक गेशो**

15 मिनु मुरपुकीमी येसुमी आल आन कली थिवल, दे चाक्मेनु, शेंसीबपुकीमी आल चाक्ब आन कली हुइक्तमे बाक्त।

16 तन्न येसुमी मेको आन कली ब्रेश्शा "आल आन कली आं बाक्तीके चाक्चा मतेक्कीन। मारदे हना परमप्रभु यावे आ राज्य आल आन केन बाक्ब।

17 नोफा दाइश्शा नेनीने, मुरपुकीमी आल आन थुं डा मिम्शो खोदेंशो पा ममिम्ताक्म हना, परमप्रभु यावे आ राज्यम ओव्रचा मताइनीम" दे माइक्मी बाक्त।

**शोंप आ पर्वम लोव्र**

मती १९:१६-२६; मर्कूस १०:१७-२७

18 मिनु ठेयब मुर कामी येसु कली "गे रिम्शो शेंब बाक्नीनी। गेना हना यो ब्रोंइशा बाक्चा कली मार पचा माल्नुडा?" दे हिल्लो पवानु, लूका १०:२५-२८

19 येसुमी "मारदे आं कली रिम्शो मुर, दे माइय्यीनी? सुइ रिम्शो मनमी। परमप्रभु यावे ला रिम्शो बाक्ब।

20 परमप्रभु यावेम ब्रेक्पाइश्शो लोव्र तुइक्नीनी 'वोंइश मीश आस नाता मखोइक्चा, मसाइक्चा, खुइ मपचा, सांकछी बाक्शोनु जोल मपचा, आम आफ आस कली मान पचा" दे मदा बाक्त। प्रस्थान २०:१२-१६

21 मिनु मेकोमी "आल रेन मोदेंशो पा पिशो नड" देंमाक्त।

22 मिनु येसुमी "नेल्ल पाप्तीवी, का चहिं मपवी। इ शोंप नेल्ल लेयशा, क्येट मथीब आन कली योक्शा गेमी। मिनु आं नोले खोइय्यी। मिनु इ शोंप स्वर्गम बाक्ब" देंमाक्त। मती ६:२०

- 23 मिनू येसु आ लोत्र नेंशा, आ थुं खाइकमाक्त। मारदे हना मेको शुश शोंप पाइशो मुर बाकमाक्त।  
 24 येसुमी मेको आ थुं खाइशो तुइशशा, मिक्च मयाक्थु कोत्रशा “शुश शोंप पाइशो मुर परमप्रभु यावे आ राज्य ओत्रचा गिश श्येत बाकमे। लूका १९:९  
 25 शोंप पाइशो मुर परमप्रभु यावे आ राज्य ओत्रने चाप्चा क्येडा दालओठ लूजे आ पोलाम ग्रीने चाप्च” देंमाक्त।  
 26 येसु आ लोत्र नेंबपुकीमी “मो हना सु ओत्रचा ताइबा डा?” देंमा बाक्त।  
 27 मिनू येसुमी “मुर आन पने मचाप्शो परमप्रभु यावेमी पने चाप्च” दे माइकमी बाक्त।

नेल्ल प्रोइबम मार ताइनीमी

मती १९:२७-३०; मर्कूस १०:२८-३१

- 28 मिनू पत्रुसमी “गोपुकी आंइ खिं प्रोइशा, इन नोले खोइकतक” देंमाक्त।  
 29 मिनू येसुमी “नोफा दाइशशा नेनीने, सुमी आ खिं, आ मीश, आ वोंइश, आ लोकबपुकी, आम आफ, तमी तौ नु मारेइ मारेइ नेल्ल परमप्रभु यावे आ राज्य आ पर्वम प्रोइबा, मेकोमी मुल एको रागीम बाकमेनुन आ प्रोइशो क्येडा शुश ताइब।  
 30 मोशो ला ममाइ, नोले गेना हना यो परमप्रभु यावे नु बाकचा ताइब” देंमाक्त।

रागीम जरमेशोम साइक्चा पुंडसीब

मती २०:१७-१९; मर्कूस १०:३२-३४

- 31 मिनू येसुमी आ १२ जना शेंसीब आन कली “नेनीने, मुल यरूसलेम लाइनय। मेकेर जाकदीशो नोले रागीम जरमेशो आ पर्वम साइ परमप्रभु यावे आ लोत्र पाइबपुकीम ब्रेकशो लोत्र नेल्ल थमा दुम्ब।  
 32 रागीम जरमेशो अर्को जात डा मुर आन गुडमी गेचा पुंडसीब। मिनू मेकोपुकीमी शुक्शी पा, मेको आ कुलुम तोक्नीम।  
 33 मिनू युक्शा, हुश यिपाइक्नीम। मिनू नोले साइक्नीम। साइशो आ नित्थ नाक्त बेकशो रे सेंसीब” दे शेंदीमी बाक्त।  
 34 आ लोत्र नेंशा, मारेइ मरुप्मे बाक्त। मारदे हना खुइशो लोत्र बाकमाक्त।

मिक्च मताइब कली सापाइशो

मती २०:२९-३४; मर्कूस १०:४६-५२

- 35 मिनू यरीको सहर आ नेक्था जाकदीम्मानु, लांमी मिक्च मताइब पुंडब मुर का बाकमाक्त।  
 36 मेको मिक्च मताइबमी शुश मुर लोत्रसी पा पिशो नेंशा “सु ननी? ते लनी? मार मालनी?” दे हिल्लो पवानु  
 37 “नासरथ डा येसु एको लां पित” देंमा बाक्त।  
 38 मिनू मिक्च मताइबमी “हे येसु, दाऊद आ तौ, शिशी पाइय्यी” दे ब्रेम्माक्त।  
 39 मिनू येसु आ डोंइती गाक्बपुकीमी “सिक्सी पावो” दे हुइकतमे बाक्त। आं चहिं वाइ ब्रेशशा “दाऊद आ तौ, शिशी पाइय्यी” देंमाक्त।  
 40 मिनू येसु खा दिक्शा “मेरे मिक्च मताइब कली एक चाक्कीन” देंमाक्त। मिनू चाक्मेनु  
 41 “इ कली मार पड? मार पुंडनेवे?” दे हिल्लो पवानु “प्रभु, मिक्च ताइब सेल्यीनी” दे पुना बाक्त।  
 42 मिनू “इ मिक्च साल। इ थमा सुइशशोमी साते” दे मदा बाक्त।  
 43 मो मदानु, आ मिक्च ब्रा साशा, मिक्च ताइब दुम्शा, येसु आ नोले खोइशशा, परमप्रभु यावे कली मान पवा बाक्त। मेको कली मिक्च ताइब दुम्शो तशा, मुर नेल्लेमी यो परमप्रभु यावे कली ठेयब सेल्मे बाक्त।

तिरो पोक्ब जकै

1 मिनू यरीको सहरम जाकदीशशा, बास मबाक्चा, दे गाक्मा बाक्त।

2 मेको सहरमी जककै नें पाइशशो शुश शोप पाइशशो तिरो पोक्ब ठेयब मुर का बाक्माक्त।

3 मेकोमी “इं सहरम येसु जाकब” देंशो नेंशा “गो कोव्रथ लाइनुड” दे मिम्ता बाक्त। सहर डा मुरपुकी यो “येसु कली कोव्रचा” दे लामी रिम्शा, आ लां कोव्रशा बाक्मा बाक्त।

4 जककै अरु आन क्येडा आइक्च बाक्माक्त। मिनु शुश मुरुमी लामी रिम्शा फारशो तशा, मेको आन डोंइती लशा, रवा का डोइशशा कोव्रडा बाक्त।

5 मिनु येसु मेको लां पिमेनु, जककै कली रवाम डोइशशा बाक्शो तशा “ए जककै, फु तोंइसो। मारदे हना मुलाक्दो इ खिंमी बास बाक्नुड” देंमाक्त।

6 मिनु जककै फु तोंइसीशा, ग्येरसीशा आ खिं लाइशशा, बास बाक्चा गेवा बाक्त।

7 मेकोमी मोदेशो पशो तशा, मेकेर बाक्बपुकीमी “मेको पापी आ खिंम ओव्रशा बास बाक्त” दे आन थुं मनुथु, लोव्र पामे बाक्त। लूका १५:२

8 मिनु जककैमी प्रभु कली खिंम ओइशा “हे प्रभु, आं शोप क्येट नेल्ल उइक्थ पा योक्शा, मथीब आन कली गेनुडमी। सु सु कली हिम हिम पा मार मार ताक्गु, मेको आन कली ४ खेयप तेम्शा लेशशा गेनुडमी” देंमाक्त। प्रस्थान २१:३७; इजीकीएल ३३:१४-१६

9 मिनु येसुमी “थमा पा इ खिंमी बास बाक्शो रिम्शो दुम्त। मारदे हना गे पाप रे ब्रोंइते। इ किंकी पिपी अब्राहाम आ तौ बाक्डे बाक्त। लूका १३:१६

10 रागीम जरमेशो लां साम्शो आन कली लां कोंइथ जाक्त” देंमाक्त। लूका ५:३२; इजीकीएल ३४:१६; १तिमोथी १:१५

ठेयब मुर लेशशा जाकब, दे शेंशो

मती २५:१४-३०

11 मिनु यरूसलेम आ नेक्था जाक्दीम्मा बाक्त। मिनु शुश मुरुमी “यरूसलेम जाक्दीशशा नोले येसु पिप दुम्ब। मिनु परमप्रभु यावे आ राज्य पशो तांइसीब” दे मिम्शो बाक्मा बाक्त। येसुमी मेको आन मिम्शो तुइशशा कथा सेल्शा

12 “खेयप का ठेयब मुर का पिप रे सासन पतीक ताक्चा कली डोन रागी लचा चिक्शो बाक्माक्त।

13 मिनु मेकोमी ‘गो शुश नाक्ती खिंम मबाक्नुड’ दे तुइशशा, लचा डोंइती आ गेय पाइब १० जना मुर आन कली ब्रेशशा, का का पा मीना का का गेशा ‘एको क्येटम खेलो पने। नोले जाक्डानु, लेशशा गेयीनी’ दे गाक्माक्त। मीना का १०० देनार बाक्ब। देनार का नाक्त का डा गाल्च बाक्माक्त। देनार रोमी आन चांदी के क्येट बाक्माक्त। मती २०:२

14 मेको मुर गाक्म नोले मेको रागी डा मुरपुकीमी ‘मेको मुर आंइ कली सासन पाइब मदुम्ल’ दे लोव्र कुरब मुर मेको पिप आ बाक्तीक सोइक्तमे बाक्त। मारदे हना मेको कली मदाक्बाक्मा बाक्त। यूहन्ना १:११

15 मो हना यो मेकोमी सासन पतीक अधिकार ताक्शा, खिं लेम्माक्त। मिनु जाक्शा, आ गेय पाइब आन कली ब्रेशशा, आ डोंइती राप्पाइशशा ‘आं गेशो क्येटमी मार पनी? गिश सेल्नी?’ दे हिल्लो पवा बाक्त।

16 मिनु डोंइती डा जाक्शा ‘आं होव्रप, इन गेशो क्येटमी, मार मार ग्याप्शा लेयशा, अर्को १० मीना चेम्ता’ देंमाक्त।

17 ‘गे रिम्शो गेय पाइब बाक्ते, आइक्च गेयमी रिम्शो पाप्तीवी। मोपतीके १० ओटा सहर कली अधिकार पाइब सेल्नन’ देंमाक्त। लूका १६:१०

18 मिनु मेको नोले अर्को जाक्शा ‘आं होव्रप, इन गेशो क्येटमी ग्याप्शा लेयशा, अर्को ५ मीना चेम्ता’ देंमाक्त।

19 मिनु मेकोमी ‘इ कली यो ५ ओटा सहर कली अधिकार पाइब सेल्नन’ देंमाक्त।

20 मिनु मेको आ नोले अर्को जाक्शा ‘आं होव्रप, इन क्येट एकेर बाक्त। गो मेको वाम गिल्शा खुइशशा चोइक्ता।

21 गो इन क्येडा हिंती। मारदे हना गे हिंचा डा होव्रप बाक्नीनी। इन मगेशो थोव्रक ताक्नीनी। इन मशोक्शो खुप्नीनी’ देंमाक्त।

- 22 मिनू ठेयब मुरुमी 'गो इ लोव्रम इ कली निसाफ पाइनुड। आं देशो मटीब गेय पाइब बाक्नेवे। मार मगेडा, मेको ताक्नुड। मार मशोक्नु, मेको खुप्नुड। गो मरिम्शो मुर नडा दे गे तुइश्शोन नवे?'  
 23 गे मारदे मेको क्येट वोइक्तीक खिंमी मवोदी? गो मेको आ चाइक्ब तड वा' देमाक्त।  
 24 मिनू मेकेर बाक्ब आन कली 'मेको आ क्येट रोइश्शा १० मीना चेम्ब कली गेने' देमाक्त।  
 25 मिनू मुरपुकीमी 'हजुर, मेको नु १० मीना सुन बाक्ब' देमा बाक्त।  
 26 मिनू मेकोमी 'सु नु बाक्मे, मेको तेम्शा गेचा पुंडसीब। सु नु मबाक्मे, मेको के बाक्शो यो रोइक्चा पुंडसीब। लूका ८:१८; मती १३:१२  
 27 तन्न आं कली मटीब आं जोरी सत्रु आन कली चहिं ग्याइश्शा चाक्शा आं डोंइती क्योरशा सतीन' देमाक्त" दे शेंदीमी बाक्त।

येसु यरूसलेम जाक्दीश्शो

मती २१:१-११; मर्कूस ११:१-१०; यूहन्ना १२:१२-१६

- 28 मिनू मेको लोव्र नेल्ल शेंने थुम्शा, यरूसलेम मेर लमा बाक्त।  
 29 मिनू जैतून डांडा जाक्दीम्मा बाक्त। मेको डांडा आ आइदी बेथफागे नु बेथानी गाउं निक्शी बाक्सा बाक्त।  
 30 मेको गाउं आ नेक्था जाक्दीश्शा, येसुमी आ शेंसीब निक्शी आस कली "मेरे गाउं लसे। मिनू गाउं ओव्रसीनु, सुइमी मडोइश्शो गधा आ चाइक्ब का पाइश्शो थित्नीसी। मेको कली प्रोंइशा चाक्कीसे।  
 31 मुरपुकीमी 'मारदे प्रोंइशा लाइक्सी?' दे हिल्लो पाम्तेक्म हना 'प्रभु कली माल्ताक्व' दे मतीसे" दे माइश्शा, सोइक्तीम्सी बाक्त।  
 32 मिनू लसानु, येसुमी देशो खोदेशो पा गधा पाइश्शा वोइश्शो थित्से बाक्त।  
 33 मिनू प्रोन्सेनु, गधा आ होव्रपमी "गधा मारदे प्रोंइसी?" दे हिल्लो पवा बाक्त।  
 34 मिनू मेको निक्शीमी "प्रभु कली माल्ताक्व" देसा बाक्त।  
 35 मिनू लाइश्शा येसु आ बाक्तीकेम चाक्दीत्से बाक्त। मिनू येसु आ शेंसीबपुकीमी गधा तारी आन वा ब्रशा, येसु कली डोइक्पदमे बाक्त।  
 36 मिनू गाक्मा बाक्त। मिनू मुरपुकीमी आन फेक्शो वा लांमी ब्रामे बाक्त।  
 37 मेको जैतून डांडा लाक्शा बुम्मा बाक्त। येसुमी शुश छक लाक्चा डा गेय पतीके मुर नेल्ल थाम्पा ग्येरशा, कुम्सो पा परमप्रभु यावे कली ठेयब सेल्ना सेल्न,  
 38 "परमप्रभु यावे आ नेंमी जाक्ब पिप ठेयब बाक्ब। सरीडम यो ग्येरसमल। इर डा नेल्ल रिम्शो दुम्ल" दे रेयके पामे बाक्त। भजन संग्रह ११८:२६; लूका २:१४  
 39 मेकेर फरिसी का निक्शी यो बाक्मा बाक्त। मेकोपुकीमी येसु कली "इन शेंसीब आन कली हुइक्तीन" देमा बाक्त।  
 40 तन्न येसुमी "एकोपुकीमी सिक्सी पाम्तेक्म हना, फुल्लुमी यो रेयके पचा गोइनीम" देमाक्त।  
 41 मिनू यरूसलेम सहर आ नेक्था जाक्शा, सहर तांइसेनु, येसु मेको सहर आ परबम डाक्शा  
 42 "शुं नाइक्तीक ते रे जाक्बा, दे तुइक्ती हना दुम वा। तन्न मुल मेको इ डोंइती रे खुइश्शो बाक्ब। लूका १३:३४; मती १३:१३, १४  
 43 नोले इ जोरी सत्रु बोक्शा, इ कली एर ओंथ रे पुम्शा, तेइ लचा मगेथु, गारो डोइक्नीम।  
 44 मेकोपुकीमी इ कली नु इ आल आन कली खपीम राप्नीम। मेकेर फुल्लु का सम्म खोप्शा मलीनीम। मारदे हना गे इ कली ग्रुम्थ जाक्ब कली मतुइक्ती" देमाक्त। लूका २१:६  
 यरूसलेम सहरम बाक्शा, शेंशो  
 मती २१:१२-१६; मर्कूस ११:१५-१८; यूहन्ना २:१३-१६  
 45 मिनू येसु सहरम जाक्दीश्शा, परमप्रभु यावे आ खिं लमाक्त। मिनू मार मार लेयब आन कली खेरा बाक्त।

46 मिनू येसुमी मेको आन कली “परमप्रभु यावे आ लोवमी ‘आं खिं आं कली प्रार्थना पचा कली बाक्ब’ दे ब्रेक्शो बाक्ब। तन्न गेपुकीमी चहिं खुइ आन बाक्तीक पुक्खी सेल्लतीनी” दे हुइशशा खेरमी बाक्त। यसैया ५६:७; येरमीया ७:११

47 मिनू येसुमी परमप्रभु यावे आ खिंमी बाक्शा, नाक्त किंत किंत मुर आन कली शेंदीमी बाक्त। ठेयब चढेब, सास्त्री नु ठेयब मुरपुकीमी येसु कली साइक्चा माल्मे बाक्त।

48 तन्न मेकोपुकीमी येसु कली मारेइ दोस गेने मचाप्मे बाक्त। मारदे हना मुर नेल्लेमी येसु आ शेंशो थाम्पा नोफा दाइशशा नेन्मे बाक्त।

## 20

“इ कली सुम अधिकार गेवे?”

मती २१:२३-२७; मर्कूस ११:२७-३३

1 मिनू काबु येसुमी परमप्रभु यावे आ खिंमी बाक्शा, मुर आन कली ग्येरपाइक्तीक लोव्र शेंना शेंन बाक्मेनु,

2 ठेयब चढेब, सास्त्री नु जोक्ब तुइक्ब खाल्पापुकीमी “तेको अधिकारमी मोदेशो पवी? इ कली अधिकार गेब सु बाक्बा, लो देन” देमा बाक्त।

3 मिनू येसुमी “गो इन कली लोव्र का हिल्लो पाइनुड। मिनू आं हिल्लो पशो लोव्र लेत्तीने।

4 यूहन्नामी मुर आन कली ब्वाक्कुम खुम्शा गुंडतीक अधिकार स्वर्ग रे तवा देय मुरपुकी रे तवा?” दे हिल्लो पामी बाक्त।

5 मिनू मेकोपुकीमी “स्वर्ग रे तवा बाक्त देंतय हना, मो हना यूहन्ना आ लोव्र मारदे थमा मसुइक्नी? देंब। लूका ७:२९-३०

6 मुरपुकी रे तवा बाक्त देंतय हना, एकेर बाक्बपुकीमी इ कली फुल्लु आप्शा साइक्नीम। मारदे हना यूहन्ना परमप्रभु यावे आ लोव्र पाइब बाक्त, दे थमा सुइक्ब बाक्नीम” दे शुश मिम्शा लोव्रसी पामे बाक्ती।

7 मिनू शुश मिम्शा “यूहन्ना कली अधिकार सुमी गेवा सुम? गो मतुइक्नीकी” देमा बाक्त।

8 मिनू येसुमी “मो हना तेको अधिकारमी एको गेय पडा, गो यो मशेंनन्नी” दे माइक्मी बाक्त।

मरिम्शो बुम्था पाइबपुकी

मती २१:३३-४६; मर्कूस १२:१-१२

9 मिनू मुर आन कली कथा सेल्शा “मुर कामी ठेयब रूमी अडगुर खुमा बाक्त। मिनू नोले ‘गो रागी हिरथ लाइनुड’ दे मिम्शा, आ रू बुम्था पाइब आन कली गेशा वोदा बाक्त। मिनू लशा, शुश नाक्त मलेम्माक्त।

10 अडगुर मीशा सेक्की जाक्मेनु, होव्रपमी आ गेय पाइब का कली ‘अडगुर योक्शा चाक्को’ दे ब्रथ सोइक्ता बाक्त। मिनू गेय पाइब जाक्दीम्मेनु, बुम्था पाइबपुकीमी तुप्शा, श्येत्थ सोइक्तमे बाक्त। २इतिहास ३६:१५-१६

11 मिनू लेंशा अर्को गेय पाइब का कली सोइक्ता बाक्त। मेको कली तुप्शा मुने तोक्शा, श्येत्थ सोइक्तमे बाक्त।

12 मोपा यो लेंशा गेय पाइब का कली सोइक्ता बाक्त। मेको कली यो हुश यिथ्री तुप्शा खेरमे बाक्त।

13 मिनू नोले ‘मार पड? मुल आं दाक्शो तौ कली सोइक्नुड। मेको कली तशा मान पाइनीमी को?’ दे मिम्ता बाक्त। मिनू आ तौ कली सोइक्ता बाक्त।

14 मिनू बुम्था पाइबपुकीमी आ तौ कली पिशो तशा ‘एको हक ताइब बाक्ब। लो, साइय्य। मिनू रू, अडगुर नेल्ल इ केन दुम्ब’ देश गारमा बाक्त।

15 मिनू रू रे गुंडशा सदमे बाक्त। रू आ होव्रपमी मोदेशो पाइब आन कली मार पाइबा?

16 जाक्शा मेको बुम्था पाइब आन कली साइक्ब। मिनू आ रू अरु आन कली गेब” दे शेंदीमी बाक्त। आ लोव्र नेबपुकीमी मेको कथा नेंशा “मोदेशो मदुम्ल” देमा बाक्त।

17 मिनु येसुमी आ लोत्र नेंब आन कली मिक्च मयाक्थु कोत्रशा “परमप्रभु यावेमी ब्रेक्पाइशो एको लोत्र रे मार रुम्सीबा, लो देनीन ‘खिं सेल्बपुकीमी गारो प्रोवडमेनु, एको फुल्लु मगार’ दे ताइकतमे बाक्त। मेको मगारथु ताइशो फुल्लु चहिं सुर डा सुरे फुल्लु दुम्माक्त। भजन संग्रह ११८:२२

18 सु मेको फुल्लु तारी थिप्बा, मेको खतम दुम्ब। मेको फुल्लु सु कली चिप्ता, मेको फस दुम्ब” दे शेंदीमी बाक्त। दानीएल २:३४,३५,४४,४५

19 मिनु टेयब चढेब नु सास्त्रीपुकीमी “इं कली कका एको कथा देंमाक्त” दे रूप्शा चुरशा, येसु कली ग्याइक्पाइक्चा माल्मे बाक्त। तन्न शुश मुरुमी आ लोत्र नेंशो तशा हिंमा बाक्त। लूका १९:४८

तिरो आ पर्बम लोत्र पशो

मत्ती २२:१५-२२; मर्कूस १२:१३-१७

20 सास्त्री नु टेयब चढेबपुकीमी मुर योत्रशा, येसु आ थुं नाक्शा, आ लोत्र खुइ पथ सोइकतमे बाक्त। मारदे हना दोस गेशा हुकुम पाइब आ गुडमी गेचा माल्शो बाक्मा बाक्त। मेको सोइशोपुकीमी येसु आ लोत्र नेंशा, थमा सुइशो खोदेशो पखु पामे बाक्त। लूका ११:५४; लूका २३:२

21 मिनु मिलो शिलो पा “शेंब, गे रिम्शो शेंनीनी। सुइ कली तशा महिंथु, मुर आन कुल मकोत्रथु, परमप्रभु यावे आ लोत्र थमा पा शेंनीनी। मुल लोत्र का शेंदीकी,

22 मार लोत्र देंशा हना, पिप सिजर कली तिरो थाप्चा माल्बा देय मथाप्थु यो दुम्बा?” दे हिल्लो पखु पा, लोत्र ख्राइक्पाइक्चा माल्मे बाक्त।

23 मिनु येसुमी मेको आन थुं डा लोत्र तुइशशा

24 “देनार का कोइदीनी। एको सु का आ नेंमी खोइशो बाक्मे?” देंमेनु “सिजर आ नेंमी खोइशो बाक्त, हजुर” देंमा बाक्त। देनार का चांदी के क्येट बाक्त। मेको नाक्त का डा गाल्च बाक्त।

25 मिनु प्रभु येसुमी “मो हना पिप सिजर आ मार मार बाक्मे, मेको सिजर कली गेने। परमप्रभु यावे आ मार मार बाक्मे, मेको परमप्रभु यावे कली गेने” देंमाक्त। रोमी १३:१,७

26 मिनु मेकेर देल्शो मुर आन डोंइती आ लोत्र ख्राइक्पाइशशा मारेइ दोस गेने मचाप्मे बाक्त। आ लोत्र लेशो नेंशा छक लाक्शा सिक्सी पामे बाक्त।

बेक्शो रे सेंसीचा आ पर्बम शेंशो

मत्ती २२:२३-३३,४६; मर्कूस १२:१८-२७,३४

27 मिनु सदुकीपुकी जाक्मा बाक्त। सदुकीपुकीमी “मुर बेक्शो रे मसेंसीनीम” दे शेंबाक्मा बाक्त।

28 मेको जाक्बपुकीमी येसु कली “शेंब, मोसामी ब्रेक्शो लोत्रमी ‘मुर का आल मथिथु बेक्त हना, आ लोकबमी आ भोग्यु वोंइसीशा, आ दाग्यु आ पा डा खिं डा मुर मजाम्मल, दे तमी तौ थिल’ दे ब्रेक्शो बाक्ब। ब्यवस्था २५:५-६

29 साइ ७ जना लोकब बाक्मा बाक्त। मिनु जेठाम ग्युंवे पवा बाक्त। मिनु आल मथिथु बेक्माक्त।

30 मिनु माइलामी आ भोग्यु वोंइसे बाक्त। मिनु मेको यो आल मथिथु बेक्माक्त।

31 मिनु साइलाम आ भोग्यु वोंइसे बाक्त। मेको यो आल मथिथु बेक्माक्त। मोदेशो पा ६ जनामी आन भोग्यु वोंइसीशा, आल मथिथु बेक्मा बाक्त।

32 नोले मेको मीश मुर यो बेक्माक्त।

33 मुर बेक्शो रे सेंसीशा ब्रोंइमानु, मेको ७ जना वोंइश आन मीश दुम्शो मीश मुर तेको आ मीश दुम्बा?” दे हिल्लो पामे बाक्त।

34 मिनु येसुमी मेको आन कली “एको रागीमी बाक्मानु, मुरपुकीमी ग्युंवे पांइसीनीम। ग्युंवे पा गेनीम।

35 तन्न बेक्शो रे सेंसीशा परमप्रभु यावे नु बाक्चा शिरशोपुकी ग्युंवे मपांइसीनीम, ग्युंवे पा यो मगेनीम।

36 मेकोपुकी गेनायो मबेक्ब दुम्शो बाक्नीम। बेक्शो रे सेंसीशा, परमप्रभु यावे आ स्वर्ग डा गेय पाइबपुकी खोदेशो दुम्नीम। मेकोपुकी परमप्रभु यावे आ तमी तौ बाक्नीम। १यूहन्ना ३:१-२

37 बेकशो रे सेंसीशा ब्रोंडचा तांडसीब, दे इं किकी पिपी मोसामी अरु आन कली तुइक्पदा बाक्त। दोपा तुइक्पदा बाक्त देंशा हना, परमप्रभुमी मोसा कली मी ब्रशो बुटा रे तपांडसेनु, मोसामी परमप्रभु यावे कली 'गे अब्राहाम, इसहाक नु याकूब आ परमप्रभु यावे ननी' दे ब्रेत्ता बाक्त। प्रस्थान ३:६

38 परमप्रभु यावे बेकशो मुर आन परमप्रभु ममाइ। ब्रोंडशो आन परमप्रभु यावे बाक्ब। मारदे हना परमप्रभु यावे आ डोंइती नेल्ल ब्रोंडशो बाक्नीम" देंमाक्त। रोमी १४:८

39 मिनु सास्त्री का निक्शीमी "शेंब, गे रिम्शो शेंताक्नी" देंमा बाक्त।

40 मारदे हना सदुकीपुकीमी लेंशा हिल्लो पचा हिंशा सिक्सी पामे बाक्त।

ख्रीस्त सुका आ तौ बाक्बा?

मती २२:४१-४४; मर्कूस १२:३५-३७

41 मिनु येसुमी मेकेर बाक्ब आन कली "ख्रीस्त दाऊद आ तौ बाक्ब, दे दोपा देनीमी?

42 मारदे हना दाऊद आ ब्रेकशो भजन संग्रह माइशो कुम्सो किताबम

43 'प्रभुमी आ प्रभु कली इ जोरी सत्रु आन कली इ खोइल थैक्तीके मसेलु सम्म आं ग्युरा गे बाक्को' दे ब्रेक्ताक्ब। भजन संग्रह ११०:१

44 दाऊदमी मेको कली 'प्रभु' देंब। मिनु दोपा आ तौ दुम्मे? लो, देनीन" देंमाक्त।

"सास्त्री खोदेशो मपने" दे शेंशो

मती २३:५-५

45 मेकेर बाक्ब शुश मुरुमी येसु आ लोत्र नेन्मे बाक्त। मिनु येसुमी आ शेंसीब आन कली

46 "लाइशो वा फेक्शा एर ओथ गाक्ब, बजार मेर गाक्मानु, सेउ ताक्चा दाक्ब, युम्तीक खिं लशा, ठेयब नित्तीकेम नित्चा दाक्ब नु भोजमी लशा, मान ताइब आन नित्तीकेम नित्चा माल्ब, सास्त्री आन कली तशा होस पा बाक्कीन। लूका ११:४३

47 मेकोपुकीमी वोंइश बेकशो मीश मुर आन खिं रोइक्नीमी, दुइशो प्रार्थना पा कोंइखु पाइनीम। मोदेशो पाइबपुकी अरु आन क्येडा शुश सजाइ ताइनीम" देंमाक्त।

## 21

भेटी चढेचा आ पर्बम शेंशो

मर्कूस १२:४१-४४

1 मिनु नोले येसुमी शोंप पाइशो मुरपुकीमी भेटी चढेशो तवा बाक्त।

2 आ वोंइश बेकशो मारेइ मथीब पुडग मीश मुरुमी जाक्शा, लेप्तोन निक्शी चढेशो यो तवा बाक्त। लेप्तोन (ग्रीक लोत्र) नेल्ल क्येडा आइक्च तांबा के क्येट बाक्त।

3 मिनु येसुमी "नोफा दाइशशा नेनीने, नेल्लेमी चढेशो क्येडा एको पुडग मीश मुरुमी शुश चढेपु।

4 मारदे हना आ बाक्शो नेल्ल गेपु। अरुमी चहिं आन गाप्शो रे गेम्तेकम" देंमाक्त। २कोरिन्थी ८:१२

परमप्रभु आ खिं मलीब

मती २४:१-३६; मर्कूस १३:१-३२

5 काबु मुरपुकीमी "परमप्रभु यावे आ खिं ठेयब नु दारशो सेल्शो बाक्त" देंमा बाक्त।

6 मिनु येसुमी "एको खिं मुल ठेयब नु दारशो सेल्शो ताइतीनी। नोले नेल्ल ब्रेशशा, फुल्लु का यो खोप्शा मलीब" देंमाक्त। लूका १९:४४

श्येत डा चिन्ड

7 मिनु मुरपुकीमी "शेंब, इन देशो लोत्र गेना दुम्बा? मेको दुम्चशो चिन्ड दोपा तांडसीबा?" दे हिल्लो पामे बाक्त।

8 मिनु येसुमी "सुइमी इन थुं मक्याल्मेक्ल, दे होस पा बाक्कीन। मारदे हना शुश मुरपुकीमी आं नें ब्रशा 'गो मेको नड। गो मेको नड देंतीक नाक्त नेक्था जाक्शो बाक्ब' दे शेंनीम। मो देंब आन लोत्र थमा मसुइक्थु, आन नोले मखोतीन।



9 लडाइ दुम्शो, जुलुस बोक्शो लोत्र शुश नेंनीनी। मेको लोत्र नेशा महिनीन। मोदेशो दुम्चा माल्ब। मिनु इच्का नोले ला रागी नुप्ची नाक्त जाक्ब” देंमाक्त।

10 मिनु लोत्र बोइशशा “जात जात नु राज्य राज्य लडाइ पाइनीम।

11 ठेयब खिनु कुइब। रागी रागीमी ठेयब अन्काल दुम्ब। शुश मुर रोइ पा बेक्नीम। हिंचा डा श्येत जाक्नीम। सरीडम ठेयब चिन्ड तांडसीनीम।

थमा सुइक्ब श्येत जाइनीम

12 मो दुम्चा क्येडा डोंइती थमा सुइक्ब इन कली खेदा पा ग्याइक्नीमी। मिनु ग्याइशशा, आन गुम्तीक खिंम लाइशशा दोस गेशा, जेल्खानमी चोक्नीम। आं नें आ पर्वम ठेयब मुर नु पिप आन डोंइती चाक्दीशशा, राप्पाइक्चा पुंडसीनीनी। मत्ती १०:१८-२२,३०

13 मोपा राप्पाइक्चा पुंडसीनीनु, सांकळी का दुम्नीनी।

14 ‘ठेयब मुर आन डोंइती मार देंचा?’ दे गेनायो पीर मपाइनुड, दे इन थुं फ्रेंशा बाक्कीन। लूका १२:११

15 मारदे हना मोपा राप्पदमेनु, इन जोरी सत्रुमी लेन्ने मचाप्चा डा लोत्र इन शोत्र रे पपाइक्ननी। इन कली ठीक लोत्र पपाइक्नुड। मिनु मेकोपुकीमी इन लोत्र खोइक्ने मचाप्नीम। प्रेरित ६:१०

16 इन आम आफ, लोकबपुकीमी, इन जात डा मुर, इन वारचपुकीमी इन कली दोस गेशा, खेदा पा ग्याइक्पाइशशा, चोक्पाइक्नीम। का निकशी आन कली साइक्पाइक्नीम।

17 मुरपुकी नेल्लेमी आं नें आ पर्वम इन कली काइ मदाक्नीम।

18 तन्न इन पिया डा चां का यो महम्ब। लूका १२:७

19 मोपतीके थमा सुइक्चा मप्रोनीन। मिनु ला गे ब्रोंइचा ताइनीनी। हिब्रू १०:३६

‘यरूसलेम जाम्शा लाइब’ देशो

20 यरूसलेम सहर आ एर ओथ लडाइ पाइबपुकीमी पुम्शो ताइतीनी हना ‘मुल सहर खतम दुम्ची नाक्त जाक्माक्त’ दे तुइक्तीन।

21 मोपतीके यहूदीया रागीम बाक्बपुकी डांडा ग्येत्थ प्रोक्मल। सहरम बाक्बपुकी सहर प्रोंइशा प्रोक्मल। सहर एर ओथ रू मेर बाक्बपुकी सहर मओत्रमल।

22 परमप्रभु यावे आ लोत्रमी एको ओदेशो दुम्ब, दे ब्रेक्शो बाक्ब। एको ब्रेक्शो नेल्ल थमा दुम्शा, सहर खतम दुम्ब। ब्यवस्था ३२:३५

23 मेना आल कुरशो नु दूध तूब आल पाइशशो मीश मुर आन कली श्येत दुम्ब। मारदे हना रागीमी शुश श्येत दुम्शा, मेको मुरपुकीमी परमप्रभु यावे आ गाइशशो ताइनीम।

24 कोइ तरवारम बेक्नीमी। कोइ ग्याइशशा अर्को रागीम लाइक्चा पुंडसीनीम। मिनु आन नाक्त मजाक्दीम सम्म अर्को जात डा मुरपुकीमी यरूसलेम कली दिप्शा वोइक्नीम। यसैया ६३:१८; प्रकाश ११:२; रोमी ११:२५

चिन्ड तांडसीब, दे शेंशो

25 मिनु सरीड नु रागीमी चिन्ड तांडसीनीम। सरीडमी नां, तास्ला नु सोरूल मार मार तांडसीब। रागीम समुन्द्रमी ठेयब ब्वाक्कु बुइशशा, मुर नेल्ल आन कली हिंपाइक्ब। प्रकाश ६:१२-१३

26 मुरपुकी सरीड नु रागी कोत्रशा, हिंशा थाइनीम। मारदे हना सरीड डा सक्ति हिंसीनीम।

27 मिनु रागीम जरमेशो कली गोस्स तारी बाक्शा, सक्ति नु ठेयब छेडछेडमी यिशो ताइनीम। दानीएल ७:१३

28 मेको चिन्डपुकी दुम्शो तनीनु, इन पिया पोक्शा, ठेयब थुं पा ग्येरसीने। मारदे हना श्येत रे प्रोंइब इन नेक्था जाक्शो बाक्ब” दे शेंदीमी बाक्त। फिलिप्पी ४:४,५

29 मिनु कथा सेल्शा “फोत्रशी रवा नु अरु रवा कोत्रडीन।

30 कोच्वा दाप्शा कुशो तशा, रेउ यिची ना जाक्चा चिक्शो बाक्त, दे तुइक्नीनी।

31 आं देशो लोत्र थमा दुम्शो तनीनु, परमप्रभु यावे आ राज्य इन नेक्था जाक्माक्त, दे तुइक्नीनी।

- 32 नोफा दाइशशा नेनीने, एको मुरपुकी मनुप्यु, आं देशो नेल्ल थमा दुम्ब।  
 33 सरीड नु रागी नेल्ल जाम्शा लाइनीम। तन्न आं लोव्र चहिं गेनायो मजाम्ब।  
 34 आं देशो मप्रेथु होस पा बाक्कीन। शांबु राकसी दुक्शा मबाक्कीन। मार जचा मार फेक्चा, दो पचा, दे शुश ममिस्तीने। मारदे हना आं देशो लोव्र इन मतुडक्थु दुम्ब। मर्कूस ४:१९; १थिस्सलोनिकी ५:३  
 35 मेको मोदेशो श्येत नेल्ल रागीम दुम्ब।  
 36 मोपतीके आं देशो मिम्शा बाक्कीन। परमप्रभु यावे कली 'श्येत नेल्ल फाल्शा, थमा सुइक्तीक सक्ति गेकी। मिनु रागीम जरमेशो जाक्मेनु, सासीशा ग्रुम्चा तकल' दे पुंडना पुंडन बाक्कीन" दे अर्ती गेमी बाक्त।

नाक्त कित कित शेंशो

- 37 मिनु येसुमी नाक्त मुर आन कली शेंना शेंन नाक्दो चहिं जैतून डांडाम लशा इम्बाक्माक्त।  
 38 शुश मुरुमी नाक्त किंत किंत सुनी कना बोक्शा, परमप्रभु यावे आ खिं लशा, येसु आ लोव्र नेंबाक्मा बाक्त।

## 22

येसु कली साइक्चा, दे लोव्र पशो

मती २६:- २८:-; मर्कूस १४:- १६:-; यूहन्ना १८:- २१:-

- 1 मिनु बोरेब ओख्ती मसुप्शो शोब्ले जतीक पास्सा चाड जाक्चशो बाक्माक्त।  
 2 मिनु ठेयब चढेब नु सास्त्रीपुकीमी "येसु कली दोपा ग्याइशशा साइक्चा?" दे लोव्र पमुशा, साइक्चा माल्मे बाक्त। तन्न शुश मुरुमी येसु आ लोव्र नेशो तशा, हिंमा बाक्त। लूका २०:१९  
 3 मिनु सैतान इस्कारीयोत डा यहूदा आ थुंम ओव्रमाक्त। मेको शेंसीब आन दाते डा का बाक्माक्त। यूहन्ना १३:२, २७  
 4 मिनु मेको ठेयब चढेब नु ठेयब मुर आन कली ग्रुमथ लशा "येसु ग्याइक्पाइक्चा कली वारच पाइनन्नी" दे माइक्मी बाक्त।  
 5 मिनु मेकोपुकीमी ग्येरशा "दुम्ब, ग्याइक्चा वारच पाप्तीवी हना, क्येट गेनीकी" देंमा बाक्त।  
 6 में डा मेरे यहूदामी "सुइमी मतुडक्थु, दोपा ग्याइक्पदु?" दे मिम्शा बाक्माक्त।

पास्सा चाड डा भोज

- 7 मिनु बोरेब ओख्ती मसुप्शो शोब्ले जची चाड जाक्माक्त। मेको नाक्ती पाठा का क्योरचा माल्बाक्माक्त। प्रस्थान १२:१८-२०  
 8 मिनु येसुमी पत्रुस नु यूहन्ना आस कली "पास्सा चाड डा भोज साथ लसे" दे माइक्सी बाक्त।  
 9 मिनु मेको निक्शीमी "ते लशा साचा?" दे हिल्लो पास्से बाक्त।  
 10 मिनु येसुमी "नेनीसे, मुल सहर लसे। सहरम जाक्दीस्सीनु, गाग्री कुरशा ब्वाक्कु दिथ पिशो मुर का गुम्नीसी।  
 11 मेको आ नोले खोइशशा, तेको खिं ओव्रबा, मेको खिं ओव्रडीसे। मिनु खिं डा मुर कली 'शेंबमी सोइशशो नस्कु। शेंबमी, आ शेंसीबपुकी नु काथा बाक्शा, पास्सा ते मानेचा? दे हिल्लो पथ सोइक्ताक्की' दे मतीसे।  
 12 मो माइक्सीनु, मेकोमी इस कली तला तारी ठेयब कोठा का कोइब। मेको कोठामी गुन्दी पीरा ब्रशा वोइशशो थित्नीसी। मिनु मेकेरन साचा" दे सोइक्तीम्सी बाक्त।  
 13 मिनु लसानु, येसुमी दोदेशो देंमे, मोदेशो थित्से बाक्त। मिनु पास्सा चाड डा भोज सादसे बाक्त। लूका १९:३२  
 14 मिनु भोज जचा कली येसु नु आ शेंसीबपुकी जथ निस्समा बाक्त।  
 15 मिनु जचामेनु, येसुमी "गो श्येत गेचा पुंडसीचा क्येडा डोंइती गेपुकी नु काथा बाक्शा, एको पास्सा मानेशा जत दाक्ती।

16 मारदे हना परमप्रभु यावे आ राज्य पशो मतांडसे सम्म लेंशा गेपुकी नु काथा बाक्शा, पास्सा मानेचा मताडनुड” देंमाक्त। लूका १३:२९

17 मिनु कचौरा शेशा “गे रिम्शो पाइब बाक्नीनी” दे प्रार्थना पशा “ताक्शा, का का पा तूडीन।

18 मुल डा मेरे एको अडगुर रस मतनुड। परमप्रभु यावेमी राज्य पशो तांडसे नोले ला तूनुड, दे इन कली देंनुड” देंमाक्त।

19 मिनु शोब्ले शेशा “गे रिम्शो पाइब बाक्नीनी” दे प्रार्थना पा, जिक्शा योक्शा “एको आं रां बाक्ब। इन कली गेतन्नी। आं कली मिम्शा जने” दे शोब्ले जपाइक्मी बाक्त। १कोरिन्थी ११:२३-२५

20 मिनु जशा, कचौरा शेशा “एको तूनीनु, आं हुश चढेशो मिम्तीने। आं हुशेमी परमप्रभु यावे आ गेशो नक कबल खाप्ता। आं हुश जारशोमी शुश मुर आन पाप क्याम्सीब।

21 नेनीने, आं कली ग्याइक्ब आन कली वारच पाइब का गोपुकी नु काथा बाक्शो बाक्ब। यूहन्ना १३:२१-२२

22 रागीम जरमेशो कली साइ मोदेशो दुम्चा माल्ब देशो लोत्र नेल्ल थमा दुम्चा माल्त हना यो, ग्याइक्ब आन कली वारच पाइब कली शुश मरिम्शो दुम्ब” देंमाक्त।

23 मिनु शेंसीबपुकीमी येसु आ लोत्र नेंशा “मोदेशो पाइब सु बाक्म माड?” दे लोत्रसी पमुचा गोत्रमे बाक्त।

नेल्ल क्येडा ठेयब सु बाक्या माड?

24 मिनु लोत्रसी पस डा पस बाक्मानु “गो इं दातेम नेल्ल क्येडा ठेयब सु बाक्या माड?” दे जिचा पोक्मे बाक्त। मती २०:२५-२८; मर्कूस १०:४२-४५; लूका ९:४६

25 मिनु येसुमी “अर्को रागी डा पिपपुकीमी इन कली हुकुम पाइनीम। मिनु मुरपुकीमी मेको आन कली मान पा ठेयब सेल्नीम।

26 गेपुकी चहिं मेको आन पशो खोदेशो पा ठेयब दुम्चा ममालीने। नेल्ल क्येडा ठेयबमी आइक्ब सुंडसीशा, नेल्ल आन कली वारच पवल।

27 मान पा खमे योक्गमेनु, जाइब मुर आन कली मान पा ठेयब सेल्नीम। खेप्व मुर चहिं आइक्ब दुम्ब। गो इन कली खेप्व मुर खोदेशो दुम्शा गेय पाता। यूहन्ना १३:४-१४

28 आं कली थुं थाम्मेनु, वारच पाइब गे ननी। यूहन्ना ६:६७-६८

29 आं आफोमी आ राज्यमी हुकुम पाइब सेलती। मिनु गो इन कली काथा वोइशशा, हुकुम पाइब सेलन्ती।

30 आं राज्यमी गो नु काथा बाक्शा, जचा तूचा ताइनीनी। मिनु इं इसाएल डा १२ थर आन कली निसाफ पाइनीनी” दे माइक्मी बाक्त। मती १९:२८

पत्रुस कली लोत्र पशो

31 मिनु प्रभुमी सिमोन पत्रुस कली “ए सिमोन, नेनो। सैतानमी गे इ कली चेरब खोदेशो पा क्राप्चा गेयीनी, दे पुंडशो बाक्ब। २कोरिन्थी २:११

32 गो चहिं इ पबंम परमप्रभु यावे कली ‘पत्रुस कली थमा सुइक्चा प्रोइपाइक्चा मगेने’ दे पुंडता। गे नोले थमा पा इ थुं परमप्रभु यावे गे लेशशा थमा सुइक्नेवे। मिनु थमा सुइक्ब आन कली ‘थमा सुइक्चा मप्रोनीन’ दे आन थुं बारपतो” दे अर्ती गेवा बाक्त। यूहन्ना १७:११,१५

33 मिनु पत्रुसमी “प्रभु, इन कली जेल्खानम चोक्तेकम हना, गो यो चोक्सीनुड। इन कली साइक्तेकम हना, इन कली मप्रोइथु, गो यो साइक्चा पुंडसीनुड” देंमाक्त।

34 मिनु येसुमी “पत्रुस, दीसा सुनी भाले ग्रीचा क्येडा डोंइती खेयप सां ‘गो मेको कली मतुइक्नुड, सु बाक्मे?’ देंनेवे” देंमाक्त।

“होस पांडसीने” देशो

35 मिनू शेंसीब नेल्ल आन कली “गोमी इन कली क्येट, झोला, जुत्ता, मारेड मकुरथु, परमप्रभु यावे आ राज्य डा लोत्र शेंथ सोइकतनीनु, जचा फेक्चा मतनी डा?” देंमेनु “मार मालका, मेको नेल्ल थित्तक, ताइतक” देंमा बाक्त। लूका ९:३; लूका १०:४

36 मिनू येसुमी “मुल क्येट बाक्त हना, क्येट कुरीन। झोला बाक्त हना, झोला कुरीन। तरवार मबाक्त हना, फेक्शो वा लेयशा यो ग्याप्शा कुरचा माल्ब।

37 आं पर्वम ब्रेक्पाइशो लोत्र नेल्ल थमा दुम्चाप्टु। मार ब्रेक्शो बाक्ब देंशा हना ‘भरिम्शो पाइब सुइशशा, दोस गेनीम’ दे ब्रेक्शो बाक्ब। आं पर्वम ब्रेक्शो लोत्र नेल्ल थमा दुम्चा माल्ब” देंमाक्त। यसैया ५३:१२

38 मिनू शेंसीबपुकीमी “प्रभु, गोपुकी नु तरवार निक्शी बाक्त” देंमानु “मोशो बाक्त हना दुम्त, लो गाक्य” देंमाक्त।

### येसुमी प्रार्थना पशो

39 मिनू मेकेर रे गाक्शा, डोंइती डा खोदेशो पा जैतून डांडा जाक्दीम्माक्त। आ शेंसीबपुकीमी आ नोले खोदमे बाक्त।

40 मिनू मेकेर जाक्दीम्मानु, येसुमी आ शेंसीब आन कली “थुं थाम्चा पुंडसीनीनु, पाप मपय, दे प्रार्थना पने” दे माइक्मी बाक्त।

41 मिनू आन बाक्तीक आ ता एरे लशा, पोक्च थेक्शा

42 “आं आफ, इन दाक्शो बाक्त हना, एको कचौरा आं कली मतूपाइक्थु लतीने। तन्न आं पुंडशो मदुम्ल, इन दाक्शो दुम्ल” दे पुना बाक्त। मत्ती ६:१०

43 मिनू परमप्रभु यावे आ स्वर्ग डा गेय पाइब का यूशा, येसु कली बोल गेवा बाक्त।

44 मिनू लेंशा आ थुं खाइशशा पुना बाक्त। आ थुं खाइशशा पुनानु, आ पस्ना हुश खोदेशो दुम्शा खपीम दोक्माक्त।

45 मिनू लेंशशा शेंसीब आन बाक्तीकेम जाक्मेनु, मेको आन कली यो आन थुं खाइशशा इप्शा बाक्शो थिम्मी बाक्त।

46 मिनू “मारदे इम्नी? बोक्कीन, थुं थाम्चा पुंडसीनीनु, पाप मपय, दे प्रार्थना पने” दे पोक्मी बाक्त।

### येसु ग्याइक्चा पुंडसीशो

47 मिनू शुश मुर फो फु गूमा बाक्त। मेको आन कली येसु आ शेंसीब यहूदामी लां कोंइशा चाक्शो बाक्माक्त। मिनू जाक्शा, यहूदामी येसु कली पुक्पु पचा कली आ डोंइती जाक्माक्त।

48 तन्न येसुमी “यहूदा, गे रागीम जरमेशो कली वारच दुम्खु पा पुक्पु पा ग्याइक्पाइक्नेवे?” देंमाक्त।

49 मिनू शेंसीबपुकीमी “ग्याइक्थ जाक्मा बाक्त” दे तुइशशा “प्रभु, एको आन कली तरवारम क्योरशा खेदा पचा?” देंमानु

50 कामी तरवार गि शोइशशा, ठेयब चढेब आ गेय पाइब आ ग्युरा नोफा खोदा बाक्त।

51 येसुमी मेको खोइशशो तशा “दुम्त मपने” दे नोफा सेस सेला बाक्त।

52 मिनू येसुमी मेकेर जाक्शो ठेयब चढेब, परमप्रभु यावे आ खिं डा ठेयब मुर नु जोक्ब तुइक्ब खाल्पा आन कली “तरवार कोक्के कुरशा, खुइ पाइब कली ग्याइक्थ जाक्शो खोदेशो पा आं कली ग्याइक्थ जाक्नी?

53 नाक्त कित कित परमप्रभु यावे आ खिंमी गेपुकी नु काथा बाक्डानु, मग्याइक्तीनी। मुल चहिं छिडछिड डा सक्ति नु इन पालो जाक्त” दे माइक्मी बाक्त। यूहन्ना ७:३०; यूहन्ना ८:२०

### पत्रुसमी “मतुइक्नुड” देंशो

54 मिनू येसु कली ग्याइशशा लाइशशा, नेल्ल क्येडा ठेयब चढेब आ खिंमी ओंइदमे बाक्त। पत्रुस यो डोन रे कोवना कोवन्न लमाक्त।

55 मेको खिं डा लाडगाम मुर खुम्सीशा, मी थेरशा बाक्मा बाक्त। पत्रुस जाक्दीशशा, मेकोपुकी नु मी थेरशा बाक्माक्त।

56 मिनु मेकेर गेय पाइब मीश मुर कामी पत्रुस कली मी थेरशो तशा, मिक्च मयाक्थु कोव्रशा “एको मुर मेरे नु काथा गाक्ब का बाक्त, है” देंमेनु

57 “मार लोव्र पवी? गो येसु कली मतुइक्नुड, सु बाक्मे?” देंमाक्त।

58 मिनु याम का नोले मेकेर बाक्ब कामी “मेरे नु काथा गाक्ब का गे नवे” देंमेनु “हलै गो मनड” देंमाक्त।

59 मिनु घन्टा का नोले अर्कोमी यो “मेरे नु काथा गाक्ब का एकोन बाक्ब। मारदे हना एको यो गालील डा बाक्ब” देंमाक्त।

60 मिनु पत्रुसमी “गो इ देंशो मरुबु” देंमाक्त। मो देंमेनुन, भाले ग्रीमाक्त।

61 मिनु प्रभुमी पत्रुस गे हिरशा, मिक्च मयाक्थु कोव्रडा बाक्त। मिनु पत्रुसमी “सुनी कना भाले ग्रीचा डोंइती खेयप सां ‘मेको कली मतुइक्नुड, सु बाक्मे’ देंनेवे” देंशो प्रभु आ लोव्र ति फ्रुक्गा बाक्त।

62 मिनु गूशा शुश डाक्माक्त। भजन संग्रह ५१:१९

येसु शुक्शी पाइक्चा पुंइसीशो

63 चढ़ेब आ खिंमी चहिं मार पामे बाक्त देंशा हना, येसु कली आ मिक्चीम वाम फ्रेंशा तुप्शा

64 “इ कली सुमी तुप्मे? लो देन” दे तुप्स डा तुप्स पामे बाक्त।

65 तुप्स डा तुप्स पा, तोक्शा लोव्र पा शुश श्येत गेमे बाक्त।

येसु कली राप्पाइशो

66 मिनु सुनी जोक्ब तुइक्ब खाल्पापुकीमी ठेयब चढ़ेब नु सास्त्री आन कली खुप्शा कछडी बाक्मा बाक्त। मिनु येसु कली मेकेर चाक्शा राप्पदमे बाक्त।

67 मिनु “गे ख्रीस्त नवे हना, ख्रीस्त नड देनो” देंमा बाक्त। यूहन्ना ३:१२

68 मिनु येसुमी “गो ख्रीस्त नड देंती हना, गे थमा मसुइक्नीनी। इन कली लोव्र का हिल्लो पाता हना, आं लोव्र मलेत्नीनी।

69 तन्न लोव्र का ‘मुल रागीम जरमेशो परमप्रभु यावे आ ग्युरा गे बाक्चा ताइब’ ” दे माइक्मी बाक्त। भजन संग्रह १००:१

70 मिनु मेकोपुकीमी “मो हना गे परमप्रभु यावे आ तौ नवे?” देंमानु “परमप्रभु यावे आ तौ नवे, दे गेन देंतीनी” देंमाक्त।

71 मिनु मेकोपुकीमी “मार सांकछी माल्दा डा? आ देंशो नेंतय। आंम आ देंशोमी दोस ताइब दुम्त” देंमुमा बाक्त।

## 23

पिलातस आ डोंइती राप्पाइशो

1 मिनु मेकेर रे येसु कली पिलातस आ डोंइती चाक्दीत्मे बाक्त।

2 मिनु पिलातस आ डोंइती राप्पाइशशा “हजुर, एको मुरुमी मुर आन थुं क्याल्ब। ‘सिजर कली ममानेचा। तिरो थाप्चा ममाल्ब। गो ख्रीस्त नड। मिनु गोन पिप नड’ दे शेंना शेंन गाक्त” दे दोस गेमे बाक्त। प्रेरित २४:५; लूका २०:२५

3 मिनु पिलातसमी येसु कली “यहूदी आन पिप नवे?” दे हिल्लो पवानु “गे आंमा देंतीनी” दे लोव्र लेत्ता बाक्त।

4 मिनु पिलातसमी ठेयब चढ़ेब नु येसु कली चाक्ब आन कली “एको दोस तचा डा मुर मतड, रिम्शो मुर ताता” देंमाक्त।

5 मिनु मेकोपुकीमी “एकोमी गालील रागी नु यहूदीया रागी नेल्ल हिरशा, एक यो जाक्शा, मुर आन कली ‘पिप कली ममानेन। आं कली मानेन’ दे आन थुं क्याल्तीमी। मिनु गाउं सहरमी पिप आ पर्बम दूली लोव्र पचा गोम्तेक्मे” दे दोस गेशा लोव्र थोक्शा देंमा बाक्त।

6 मिनु पिलातसमी येसु गालील डा बाक्माक्त, दे तुइक्ता बाक्त।

7 गालील डा हुकुम पाडब हेरोद बाक्माक्त। मेना हेरोद नाक्त का निक्शी कली यरूसलेम जाक्शो बाक्माक्त। मोपतीके मेकेर सोइक्ता बाक्त। लूका ३:१

8 मिनु हेरोदमी येसु कली तशा, ग्येरसे बाक्त। मारदे हना शुश नाक्त रे ग्रुम ग्रुम दाक्शो बाक्माक्त। मुर आन कली सापाइशो, चिन्ड कोइशो शुश लोत्र नेंशा “मारिइ छक लाक्चा डा गेय कोइबा को” दे मिम्शो बाक्माक्त। लूका ९:९

9 मिनु हेरोदमी शुश लोत्र हिल्लो पवा बाक्त। तन्न येसुमी लोत्र का यो मलेत्ता बाक्त।

10 ठेयब चढेब नु सास्त्रीपुकीमी शुश दोस गेमे बाक्त।

11 मिनु हेरोद नु आ सिपाइपुकीमी येसु कली शुक्शी पा पिपी आ वा फेक्पा “लो, मुल पिप दुम्ते” दे पिलातस आ बाक्तीकेमी लेशशा सोइक्तमे बाक्त।

12 डोंइती हेरोद नु पिलातस जोरी सत्रु खोंदेशो दुम्शो बाक्सा बाक्त। मेको नाक्त रे वारचबु दुम्सा बाक्त।

13 मिनु पिलातसमी येसु कली पिप आ वा फेक्पा लेशशा चाक्शो तशा, ठेयब चढेब, ठेयब मुर नु शुश मुर आन कली खुप्शा

14 “एको मुरुमी ‘पिप ममानेचा’ दे शेंना शेंन गाक्ब दे दोस गेतीनी। गो चहिं दोस गुंइने मचबु।

15 हेरोदमी यो आ दोस थिन्ने मचाप्यु, लेशशा सोइक्ताक्व। साइक्चा पुंइसीब मारिइ दोस मथिदु।

16 मोपतीके इक्का सजाइ गेशा, सोइक्चा दुम्ती” देमाक्त।

17 पास्सा नाक्ती जेल्खानमी चोक्सीशो मुर का प्रोंइचा माल्बाक्माक्त।

18 मिनु पिलातसमी येसु कली प्रोंइशा सोइक्चा देमेनु, मेकेर बाक्बपुकीमी “प्रोंइचा मदुम्ब। मुर का प्रोंइचा देंतीनी हना, बारब्बा कली प्रोंइशा सोइक्तीने। एको कली चहिं साइक्चान माल्ब” दे गुइ मुठी पा पोक्शा, रेयके पामे बाक्त।

19 बारब्बा चहिं डोंइती मरिम्शो गेय पा, सहरम हुल पोक्शा, मुर का कली साइशशा, जेल्खानमी चोक्सीशो बाक्माक्त।

20 पिलातसमी खुम्सीशो मुर आन कली लेंशा लोत्र पशा, येसु कली प्रोंइचा बोल पवा बाक्त।

21 तन्न मेकोपुकीमी शुश रेयके पा “शीम केप्शा कांटी थोक्शा क्याइशशा सतीने” दे वाइ ब्रेशशा, रेयके पामे बाक्त।

22 मिनु पिलातसमी लेंशा “मार मरिम्शो पवा? मार दोस गेचा? साइक्चा डा दोस मारिइ मतड। तुप्पाइशशा, प्रोंइशा सोइक्नुड” देमाक्त।

23 मिनु मेकोपुकीमी “ब्रोंइचा मगेचा, सरकार, ब्रोंइचा मगेचा। शीम केप्शा कांटी थोक्शा क्याइशशा साइक्चा माल्ब” दे वाइ ब्रेस्स डा ब्रेस्स बाक्मा बाक्त।

24 मिनु पिलातसमी मेको आन कली सिक्सी पपाइक्ने मचाप्तीके “मो हना, लो, सतीन” दे आन पुंइशो पचा गेमी बाक्त।

25 डोंइती मरिम्शो गेय पा, मुर साइशशा चोक्सीशो बारब्बा कली प्रोंइपाइशशा सोइक्ता बाक्त। येसु कली आन पुंइशो खोंदेशो पा शीम केप्शा कांटी थोक्शा क्याइशशा साइक्चा कली गेवा बाक्त।

### येसु साइक्चा पुंइसीशो

26 मिनु सिपाइपुकीमी येसु कली लदमे बाक्त। सहर रे गुंइदमेनु, आ रू रे पिशो साइरेनी डा सिमोन कली ग्याइशशा, येसु कली क्याइक्तीक शी कुरपा, येसु आ नोनोले खोइक्पाइशशा लदमे बाक्त।

27 शुश मुरुमी मेको आन नोले खोदमे बाक्त। मीश मुरपुकी डाक्शा रोंका पना पन गाक्मा बाक्त।

28 मोपा डाक्शा खोदमेनु, येसुमी आ नोले लेशशा कोत्रशा, डाक्ब मीश मुर आन कली “ए यरूसलेम डा तमीपुकी, आं कली तशा, मडाक्कीन। तन्न इन तमी तौ नु आंमा इन कली मिम्शा डाक्कीन।

29 मारदे हना काबु एको सहर डा मुर शुश श्येत जाइनीम। मोपा श्येत जाक्मेनु, आल मथीब नु दूध मतुंइब मीश मुर ग्येरसीनीम। मारदे हना शुश श्येत दुम्ब। लूका २१:२३

30 मिनु मेकोमी रोंगु कली ‘ब्रेशशा चिप्शा, आंइ कली सुम्शा खुइक्तीकी’ दे पुंइनीम। होसे १०:८; प्रकाश ६:१६; प्रकाश ९:६

31 क्येख शी लाइ यो चोवमेनु, सोव्रशो शी मार लीबा डा?" दे माइक्मी बाक्त। भजन संग्रह २२:१९; १पत्रुस ४:१७

32 येसु कली लदमेनु, खुइ निक्शी आस कली यो साइक्थ लदमे बाक्त।

33 मिनु खप्परे माइक्तीकेमी चाक्दीशशा, मेको सांफा आन कली शी का का तारी इप्पा गुइ खोइलीम कांटी थोक्शा, शी पोक्शा, येसु आ ग्युरा गे का, आ पेरा गे का क्याइशशा वोदमे बाक्त।

34 मिनु क्यदमेनु, येसुमी "आं आफ, एको आन कली माफ गेने। मारदे हना एकोपुकीम मारेइ मतुइशशो बाक्नीम" दे पुना बाक्त। सिपाइपुकीमी फेन्टे ग्यारशा, आ वा योक्समा बाक्त। यसेया ५३:१२; प्रेरित ७:१६; प्रेरित ३:१७; भजन संग्रह २२:१९

35 मुर शुश मेकेर कोव्रना कोव्रन बाक्शो बाक्मा बाक्त। ठेयब मुरपुकीमी "एकोमी शुश मुर आन कली श्येत रे प्रौडना प्रौडन गाक्बाक्माक्त। परमप्रभु यावे आ योव्रशो ख्रीस्त बाक्त हना, मुल आंमा प्रौडसेक्ल" दे शुक्शी पामे बाक्त।

36 सिपाइपुकीमी ग्युरशो थोव्रक तुंडशा

37 "गे यहूदी आन पिप नवे हना, मेकेर ब्रौइशा लावो" दे शुक्शी पामे बाक्त।

38 येसु कली क्याइशशो शीमी "यहूदी आन पिप बाक्ब" दे ब्रेक्शा वोदमे बाक्त।

39 येसु नु काथा क्याइशशो खुइ कामी यो शुक्शी पा "ख्रीस्त मनवे डा? लो, मुल ब्रोनो। मिनु आंस कली यो प्रौडस्की" देमाक्त।

40 मो देमेनु, अर्कोमी "गे यो परमप्रभु यावे कली तशा महिनेवे? गो सांफा कांडचीक सजाइ ताइतय।

41 गो सजाइ जचा माल्शो नस। मारदे हना खुइ पाइतस। एको मुरुमी चहिं मारेइ मरिम्शो मपावो" दे हुइक्ता बाक्त।

42 मिनु मेकोमी "येसु, गे परमप्रभु यावे आ राज्यमी हुकुम पचा गोनीनु, आं कली यो मिम्तीन" देमेनु, मती २०:२१

43 येसुमी "नोफा दाइशशा नेनो, मुलाक्ती गे गो नु काथा दुम्शा, परमप्रभु यावे नु बाक्चा ताइनेवे" दे मदा बाक्त। २कोरिन्थी १२:४

44 मिनु नाक्ती १२ बजेसे बाक्त। मिनु घन्टा सां सम्म रागी नेल्ल छिडछिड दुम्माक्त।

45 मारदे हना नां आ छेडछेड जाम्माक्त। मिनु परमप्रभु यावे आ खिं आगा डा कोठामी फारशो वा उइक्थ पा जेरर गाक्माक्त। प्रस्थान २६:३१-३३; २इतिहास ३:१४

46 मिनु येसुमी "आं आफ, आं सोक्त इन गुइमी गेतन्नी" दे वाइ ब्रेशशा, आ सोक्त प्रोना बाक्त। भजन संग्रह ३१:६; प्रेरित ७:५८

47 मेकेर बाक्ब कप्तानमी मो दुम्शो तशा "थमा पा, एको मुरुमी मरिम्शो गेय मपशो बाक्माक्त" देश, परमप्रभु यावे कली ठेयब सेला बाक्त।

48 मेकेर कोव्रथ जाक्बपुकीमी मो दुम्शो तशा "ओहो, गो मरिम्शो गेय पया बाक्त" दे रूपशा, आन कुचु तुप्शा, डाक्शा आन खिं खिं लेम्मा बाक्त।

49 गालील रागी रे यरूसलेम सम्म येसु नु काथा गाक्शो मीश मुर नु आ वारचपुकीमी डोन रे कोव्रशा, मोदेशो दुम्शो नेल्ल तामे बाक्त। लूका ८:२-३

येसु आ बेक्शो रां पुक्खीम वोइशशो

50 यहूदीया रागी अरीमाथीया सहर डा योसेफ नें पाइशशो ठेयब मुर का बाक्माक्त। मेको मुर यरूसलेम "येसु कली साइक्चा" दे लोव्रसी पामेनु, मबिश्शो बाक्माक्त।

51 मेको रिम्शो थुं पाइशशो बाक्माक्त। मेकोमी "परमप्रभु यावे आ राज्य पशो तांइसेक्ल" दे थमा सुइशशा, आस पा बाक्शो बाक्माक्त। लूका २:२५,३८

52 मिनु मेको लशा, पिलातस कली "येसु आ रां लाइक्चा गेयीनी" दे पुंडदा बाक्त।

53 मिनु पिलातसमी "लो, लतो" देमेनु, शी रे शोल्शा, बुश वाम गिल्शा लाइशशा, पुक्खी कामी ओइशा वोदा बाक्त। डौइती मेको पुक्खीमी सुइ मवोइशशो बाक्माक्त।

54 सुक्रवार नाकनाकदो ६ बजे क्येडा डोंडती मेकेर चाकदीशशा वोदा बाक्त। मारदे हना ६ बजे रे नाइक्तीक नाक्त गोइबाक्माक्त।

55 गालील रे येसु नु काथा गाकब मीश मुरपुकीमी योसेफमी येसु आ रां लाइशशो तशा “ते वोइक्बा?” दे कोव्रशो बाक्मा बाक्त।

56 मिनु वोइक्तीके तुइशशा, सहर लेशशा लशा, रां मराकब ओरुक्ती ग्याप्शा चाक्शा, साशा खिंम वोदमे बाक्त। मिनु आ दीसा नाइक्तीक नाक्त दुन्तीक गेय मपथु, नाइशशा बाक्मा बाक्त। प्रस्थान २०:१०

## 24

पुक्खी श्येत्थ तशा, छक लाक्शो

मत्ती २८:१-१०; मर्कूस १६:१-८; यूहन्ना २०:१-१०

1 मिनु आ दीसा सुनी कना बोक्शा, मराकब ओरुक्ती लाइशशा, पुक्खीमी जाकदीम्मा बाक्त।

2 मिनु पुक्खी सुशो फुल्लु रोकशो तशा,

3 ओव्रशा कोव्रडमेनु, येसु आ रां मबाक्माक्त।

4 मिनु मबाक्शो तशा “ओदेशो मार दुम्मे?” दे छक लाक्मानु, झिल झिल पाइशशो वा फेक्शो मुर निक्खी फो फु यूशो तामे बाक्त।

5 मेको आस कली तशा, हिंशा कोव्रने मचापथु, खुम्की पा बाक्मा बाक्त।

6 मिनु मेको निक्खीमी “मारदे सेस मुर कली बेक्शो मुर वोइक्तीकेमी माल्नीनी? एकेर मबा, सेसीचा पुंडसाक्व। गालील रागीम काथा बाक्नीनु, इन कली मार शेंदा, मेको ममिम्तीनी?

7 ‘रागीम जरमेशो पापी आन गुडमी जिम्मा गेने पुंडसीशा, शीम क्याइशशा कांटी थोकशा साइक्चा पुंडसीब। मिनु बेक्शो आ नित्थ नाक्ती बेक्शो रे सेसीब’ दे शेशो प्रेंदीनी डा?” देसा बाक्त। लूका ९:२२

8 मिनु येसु आ लोव्र ति फ्रुकमे बाक्त।

9 मिनु मेकेर रे लशा, येसु आ शेंसीब ११ जना नु आ वारच नेल्ल आन कली तुइक्पदमे बाक्त।

10 मेको मो दुम्शो ताइब मीश मुर सु सु बाक्मा बाक्त देशा हना, माग्दाला डा मरीयम, योअन्ना नु याकूब आ ममा मरीयम बाक्मा बाक्त। मेको आन वारच का निक्खी यो बाक्मा बाक्त। लूका ८:२-३

11 येसु आ शेंसीबपुकीमी मीश मुर आन लोव्र नेशा “एको मीश मुर आन लोव्र बाक्ब” दे थमा मसुदमे बाक्त।

12 पत्रुस चहिं दोरशा, कोव्रथ जाकदीम्माक्त। जाकदीशशा बाप्शा कोव्रडानु, बुश वा डा लाक्शा मारदे मतवा बाक्त। मिनु छक लाक्शा आ खिं लेम्माक्त। यूहन्ना २०:६-१०

येसु कली एम्माउस डा लांम तशो

मर्कूस १६:१२-१३

13 मेको नाक्ती येसु आ वारच निक्खी यरूसलेम रे गाक्शा, एम्माउस माइशशो गाउं डा लां खोदसे बाक्त। एम्माउस गाउं यरूसलेम रे ६० स्तादीयोन डोन बाक्माक्त। स्तादीयोन का १८५ मिटर खोदेशो बाक्व।

14 मिनु गाक्ना गाक्न बाक्सानु, ओदेशो मार दुम्मे, दे लोव्रसी पमुसा बाक्त।

15 मिनु गाक्स डा गाक्स लोव्र पाम्सेनु, येसु पिशा, गुम्शा, काथा गाक्मा बाक्त।

16 काथा गाक्शा यो, येसु, दे मतुइक्तसे बाक्त। मारदे हना येसुमी आस कली मतुइक्पांइसे बाक्त।

17 मिनु येसुमी “नाप्खे मार लोव्र पसी?” दे हिल्लो पवा बाक्त।

18 मिनु ख्रा दिक्शा आस थुं खाइक्सा बाक्त। मिनु क्लेओपास माइशशोमी “यरूसलेममी मार दुम्मे, दे गेमी ला मतुइक्तीनी?” देंमेनु,

19 येसुमी “मार दुम” देंमाक्त। मिनु मेको निक्खीमी “मार दुम्त देशा हना, नासरथ डा येसुमी परमप्रभु यावे आ लोव्र पवानु, शुश चिन्ड कोंइताक्व। परमप्रभु यावे नु मुर नेल्ल आन डोंडती मोदेशो पाप्टु।

मत्ती २१:११



20 तन्न इं ठेयब चढेब नु ठेयब मुरपुकीमी दोस गेशा 'साइक्चा पुंडसीब' दे शीम क्येपशा कांटी थोकशा क्याइशशा साइक्पाइक्तेकम।

21 मेको 'परमप्रभु यावे आ सोइशशो इं इस्राएली कली प्रॉइब बाकब' दे थमा सुइशशा, आस पा बाक्तस्कु। आ बेकशो नाक्त सां दुम्त। प्रेरित १:१६

22 मुल सुनी गोपुकी नु बाकशो मीश मुरपुकीमी आंस वारच नु गो नेल्ल आंड थुं क्यालतीकी।

23 मारदे हना सुनी कना येसु आ रां वोइक्तीक पुक्खीम लमानु, येसु आ रां मथिकक। तन्न परमप्रभु यावे आ स्वर्ग डा गेय पाइब निकशी गूशा 'येसु ब्रोइत, देंताक्स' दे लेशशा पिशा लोत्र पाम्तेकम।

24 मिनु आंस वारच का निकशी यो लशा, कोत्रशा लेशशा जाक्शा 'मीश मुर आन लोत्र थमा बाक्त' देंतेकमे। तन्न मुल सम्म सुइमी येसु कली मतामे" देंसा बाक्त।

25 मिनु येसुमी "गे मरुपब नसी। साइ नेसी परमप्रभु यावे आ लोत्र पाइब आन देशो लोत्र रुप्शा थमा सुइक्ने मचाप्नीसी? लूका ९:२२

26 ख्रीस्त रयेत जशा, सक्ति पाइशशो दुम्शा, राज्य पचा ताइब देशो लोत्र मुल यो मरुप्नीसी?" देंमाक्त।

27 साइ नेसी मोसा नु परमप्रभु यावे आ लोत्र पाइबपुकीमी ख्रीस्त आ पबंम मार मार ब्रेकशो बाक्मा, मेको नेल्ल शेंदीम्सी बाक्त। ब्यवस्था १८:१५; भजन संग्रह २२:-; यसैया ५२:१३-५३

28 मिनु आस गांउ जाक्दीशशा, येसुमी "लो, बाक्कीसे, गो लाइनुड" देंमाक्त। उत्पत्ती १९:१५, २४, २५

29 मेको निकशीमी "मुल नां रिक्शा ते लाइनीनी? मुलाक्दो काथा बाक्य" देंसा बाक्त। मिनु येसुमी "मो हना दुम्ब, नां यो रिक्त" देंमाक्त। न्यायाधीस १९:९

30 मिनु खमे क्येशा, शोब्ले चोने थुम्शा जचामेनु, येसुमी शोब्ले शेशा, परमप्रभु यावे कली "गे रिम्शो पाइब बाक्नीनी" देंशा, जिक्शा योक्गा बाक्त। लूका ९:१६; लूका २२:१९

31 मिनु मो पा तुइक्पांडसेनु "येसु कका बाक्माक्त" दे तुइक्तसे बाक्त। तुइक्तसे चोटी येसु यो जाम्माक्त।

32 मिनु मेको निकशीमी "मेकोमी लांम गो निकशी नु लोत्र पवानु, परमप्रभु यावे आ लोत्र शेंदानु, इस थुं रांमी नांम तशो खोदेशो मदुम्सा डा?" देंमुसा बाक्त। उत्पत्ती १९:२६

33 मिनु मेको रीब पा लेशशा, यरूसलेम लसा बाक्त। यरूसलेमम जाक्दीशशा, येसु आ शेंसीब ११ जना नु मेको नु काथा बाक्बपुकी खुम्सीशा बाक्शो गुम्से बाक्त। लूका ९:२४

34 मेकोपुकीमी यो "प्रभु, थमा पा बेकशो रे सेंसाक्व। मिनु सिमोन पत्रुस कली तपांडसाक्व" देंमा बाक्त। १कोरिन्थी १५:४-५

35 मिनु मेको निकशीमी लां गाक्सानु, मार मार दुम्मे, आस खिं जाक्दीशशा मार दुम्मे, मेको नेल्ल तुइक्पदसे बाक्त। मिनु "शोब्ले योक्शा जचशोनु कका येसु बाक्माक्त, दे तुइक्तस्कु" देंसा बाक्त।

### येसुमी तपांडसीशो

36 मिनु मोपा लोत्रसी पामेनु, येसुमी आंम कली तपांडसे बाक्त। मर्कूस १६:१४-१९; यूहन्ना २०:१९-२३; प्रेरित १:१-१४; १कोरिन्थी १५:५

37 मिनु "वोल कोर में" दे थाम्पा हिंमा बाक्त। मत्ती १४:२६

38 मिनु येसुमी "मारदे आं कली तशा 'वोल कोर में?' दे हिंनी? वोल मनडा। वोल के श्ये रुश मबाक्ब।

39 आं कली थिशा कोत्रयीनी।

40 आं गुड खोइलीमी कांटी थोकशो गार कोत्रडीने" देंमेनु, कोत्रडमे बाक्त। यूहन्ना २०:२०

41 मिनु छक लाक्शा "येसु बाक्म कों, मबाक्म" दे दल्गीर पामे बाक्त। हिंमा यो बाक्त। ग्येरसमा यो बाक्त। मिनु येसुमी मेको आन कली दल्गीर पशो तशा "एक मारेइ जचा थोत्रकी बाक्म कों" दे पुना बाक्त।

42 मिनु वाल्शो डांड का गेमे बाक्त। यूहन्ना २१:५, १०; प्रेरित १०:४१

43 मिनु मेको डांड ताक्शा, नेल्ल आन तचा डा पा ब्ववा बाक्त।

“साइ ब्रेकशो लोव्र थमा दुम्ब” दे शेंशो

44 मिनु येसुमी आ शेंसीब आन कली “गो गे नु बाक्ची ना आ देंशो मोसा आ अरेशो लोव्र, परमप्रभु यावे आ लोव्र पाइब आन ब्रेकशो नु भजन संग्रह आं पर्बम ब्रेकशो लोव्र नेल्ल गाप्चा माल्ब, दे इन कली लोव्र पाता” देंमाक्त। लूका १८:३१-३३; लूका २४:२६-२७; लूका १८:३१

45 मिनु नोले येसुमी परमप्रभु यावे आ ब्रेकपाइशो लोव्र रुप्चा कली रुप्तीक थुं गेमी बाक्त। लूका ९:४५; यूहन्ना १२:१६

46 मिनु मार ब्रेकपाइकमी बाक्त देंशा हना “ख्रीस्त श्येत जशा, साइक्चा पुंडसीशा आ नित्थ नाक्ती बेकशो रे सेंसीचा माल्ब। होसे ६:२

47 मिनु यरूसलेम रे पा रागी नेल्ल डा मुर आन कली ‘गे इन थुं परमप्रभु यावे गे लेत्चा माल्नीनी। मिनु येसु ख्रीस्त आ नेमी पाप क्याम्चा तांडसीब’ दे नेंपाइक्चा माल्ब” देंमाक्त। प्रेरित २:३८ प्रेरित १७:३०

48 मिनु मेकोमी “गे मेको नेल्ल तशा, सांकछी दुम्तीनी।

49 नेनीने, गो आं आफोम ‘सक्ति गेनुड’ देंशो सक्ति इन कली सोइक्नुड। तन्न इर डा सक्ति मतनी सम्म यरूसलेममी रिम्शा बाक्कीन” दे माइकमी बाक्त। यूहन्ना १५:२६; यूहन्ना १६:७; प्रेरित २:१-४

येसु परमप्रभु आ बाक्तीके लशो

50 मिनु नोले मेको आन कली यरूसलेम रे लाइशशा, बेथानी गाउं चाक्दीशशा, आ गुड पोक्शा मेको आन कली आसीक गेमी बाक्त।

51 आसीक गेना गेन बाक्मेनु, सरीड गे लाइक्चा पुंडसे बाक्त।

52 मिनु शेंसीबपुकीमी आन पोक्च थेक्शा, येसु कली ठेयब सेल्शा, थाम्पा ग्येरसीशा यरूसलेम लेम्मा बाक्त।

53 मिनु परमप्रभु यावे आ खिंम बाक्ना बाक्न परमप्रभु यावे कली मान पा ठेयब सेल्मे बाक्त।

## यूहन्ना

**ब्रेक्ब मुर:** एको किताब येसु आ शेंसीब यूहन्नामी ब्रेक्शो बाक्ब। मेको जब्दी आ तौ याकूब आ लोकब बाक्ब। यूहन्नामी एको किताब आं नें मब्रेक्शो बाक्त हना यो “येसु आ दाक्शो शेंसीब” दे आंम आ पर्वम ब्रेक्शो बाक्ब, दे नेल्लेम तुइश्शो बाक्नीम। यूहन्नामी “येसुमी दाक्शो शेंसीब” दे आंम कली खुइश्शो नें वोइश्शो बाक्ब। यूहन्ना १३:२३; यूहन्ना १९:२६; यूहन्ना २०:२; यूहन्ना २१:७,२०,२४

**गेना ब्रेक्शो:** यूहन्ना खाल्पा दुम्शा एफिसस सहरम बाक्शो बाक्त। मेना ८५-९८ ए. डी. मेर एको किताब ब्रेक्शो बाक्ब।

### मार ब्रेक्शो:

१. येसु मुर दुम्शो यूहन्ना १:-
२. येसु रागीम बाक्शो यूहन्ना २:- १२:-
३. येसु नु आ शेंसीब यूहन्ना १३:- १७:-
४. येसु श्येत जशो यूहन्ना १८:- १९:-
५. येसु बेक्शा सेंसीशो यूहन्ना २०:- २१:- २२:- २३:-

### यसु ख्रीस्त रागीम जाक्शो

१ नेल्ल क्येडा डोंइती लोत्र माइश्शो का बाक्त। मेको लोत्र माइश्शो परमप्रभु यावे नु बाक्शा, मेको नु उइक्थी बाक्त। यूहन्ना १७:५; उत्पत्ती १:१; १यूहन्ना १:१२; प्रकाश १९:१३

२ मिनु मेको रागी सेल्चा क्येडा डोंइती रे परमप्रभु यावे नु काथा बाक्शो बाक्त।

३ परमप्रभु यावेमी मेको कली नेल्ल सेल्पाइश्शो बाक्त। मार मार सेल्शो बाक्मे, मेको नेल्ल आ सेल्शो बाक्त। १कोरिन्थी ८:६; कलस्सी १:१६; हिब्रू १:२

४ मेको नु ब्रोंइतीक सोक्त बाक्शो बाक्त। मिनु मेको ब्रोंइतीक सोक्ती मुर आन कली छेडछेड बाक्त। यूहन्ना ८:१२

५ मेको छेडछेड छिडछिडमी ब्राइब। मिनु छिडछिडमी छेडछेड कली काप्ने मचाप्ब। यूहन्ना ३:१९

६ मिनु परमप्रभु यावे आ सोइश्शो मुर का बाक्त। मेको आ नें यूहन्ना बाक्त। मत्ती ३:१; मर्कूस १:४

७ यूहन्नामी छेडछेड माइश्शो सु बाक्म, दे शेंथ जाक्त। यूहन्नामी “मुर नेल्लेमी लोत्र माइश्शो कली थमा सुइक्ब दुम्मल” दे शेंताक्ब। प्रेरित १९:४

८ यूहन्ना छेडछेड माइश्शो ममाइ, छेडछेड आ पर्वम शेंब ला बाक्त।

९ मिनु छेडछेड माइश्शोमी रागीमी बाक्शो मुर नेल्ल आन कली रूप्थुं गेचा कली रागीमी जाक्त।

१० मिनु रागीमी जाक्मेनु, आ सेल्शो मुरपुकीमी मेको कली “आंइ कली सेल्ब बाक्ब” दे मतुइक्तेम।

११ आंम रागी जाक्मेनु, आंम सेल्शो मुरपुकीमी मेको कली मब्राम। भजन संग्रह २४:१

१२ मु सुमी चहिं ब्रामे नु थमा सुदमे, मेको आन कली परमप्रभु यावे आ तमी तौ दुम्चा गेप्तु। गलाती ३:२६

१३ ठेयब जातमी जरमेतीके, मुर आन दाक्शोमी जरमेतीके नु मुर आन थुंमी मिम्शोमी ममाइ तन्न परमप्रभु यावे आ पतीके ला आ तमी तौ दुम्ने चाप्नीम। यूहन्ना ३:५-६

१४ मिनु लोत्र माइश्शो मुर दुम्शा, गोपुकी नु बाक्शो बाक्त। मेको शिशी पाइब नु परमप्रभु यावे आ लां कोंइब बाक्त। गोपुकीमी “परमप्रभु यावे आ कांइचीक तौ बाक्ब” दे तुइश्शा, मेको कली परमप्रभु यावे आ छेडछेड, आ शिशी नु आ थमा पतीकेमी ब्रीशो ताइतक। १तिमोथी ३:१६; प्रस्थान ३३:१८; यसैया ६०:१; २पत्रुस १:१६-१७

१५ यूहन्नामी मेको आ पर्वम “मेको आं नोले जाक्त हना यो, आं क्येडा ठेयब बाक्ब। मिनु आं क्येडा डोंइती यो बाक्शो बाक्त” देंत।

१६ आ शिशी पतीक गो शुश शिशी तना तन बाक्तक। यूहन्ना ३:३४; कलस्सी १:१९

17 मोसामी परमप्रभु यावे आ अरेशो लोव्र गेप्टु। तन्न शिशी पाइब नु परमप्रभु यावे आ थमा लां कोंडब येसु ख्रीस्त रे बाक्ब। रोमी १०:४

18 मुरपुकीमी परमप्रभु यावे कली गेनायो मतामे। तन्न परमप्रभु यावे नु बाक्ब आ कांडचीक तौमी मुर आन कली परमप्रभु यावे कली तुडक्पाइक्तु। यूहन्ना ६:४६; मत्ती ११:२७

यूहन्नामी येसु ख्रीस्त आ पर्वम शेंशो

मत्ती ३:१-१२; मर्कूस १:१-८; लूका ३:१-१८

19 मिनु यरूसलेम सहर डा यहूदीपुकीमी चढेब नु लेवी आ थर डा मुर आन कली यूहन्ना नु ग्रुमथ सोडक्ताकम। मिनु मेकोपुकीमी यूहन्ना कली “गे सु ननी?” दे हिल्लो पांमतेकम।

20 यूहन्नामी जोल मपथु, ठीक लोव्र पशा “गो परमप्रभु यावे आ सोइशो ख्रीस्त मनड” दैत।

21 मेकोपुकीमी “मिनु, गे एलीया ननी?” दे हिल्लो पांमतेकम। मिनु यूहन्नामी “गो मेको यो मनड” दैत। मिनु मेकोपुकीमी लेशा “गे परमप्रभु यावे आ लोव्र पाइब ननी?” दे हिल्लो पांमतेकम। मिनु मेकोमी “गो मेको यो मनड” दैत। मलाकी ३:२३; मत्ती १७:१०-१३; ब्यवस्था १८:१५

22 मिनु नोले मेकोपुकीमी “मिनु, गे सु ननी? आंड कली सोइक्ब आन कली मार माइक्चा, गे इन पर्वम मार देंनीनी?” दे हिल्लो पांमतेकम।

23 मिनु यूहन्नामी “परमप्रभु यावे आ लोव्र पाइब यसैया आ देंशो खोदेंशो पा ‘गो गोरशो रागीमी बाक्शा, प्रभु आ लां रिमशो ग्रोक्शा थेलीने’ दे लोव्र पाइब नड” दैत। यसैया ४०:३

24 मिनु हिल्लो पाइब का निकशी फरिसी आन सोइशो बाक्तेकम। फरिसी रिती थिती सेल्शा, रिमशो पचा कली कोव्रब यो बाक्शो बाक्तेकम।

25 मिनु यूहन्ना कली “गे ख्रीस्त मननी हना, एलीया मननी हना, परमप्रभु यावे आ लोव्र पाइब यो मननी हना, मारदे मुर आन कली ब्वाक्कुमी खुमशा गुंडतीक गेय पाइनीनी?” दे हिल्लो पांमतेकम।

26 मिनु यूहन्नामी “इन दातेमी मुर का बाक्शो बाक्ब, मेको कली गे मतुडक्नीनी। लूका १७:२१

27 आं नोले जाक्शो बाक्त हना यो, गो मेको आ जुत्ता प्रुडक्चा यो मशिरनुड” दैत।

28 मेना यूहन्नामी यर्दन खोला आइक्ची हांबु बेथानी गाउंमी मुर आन कली ब्वाक्कुमी खुमशा गुंडतीक गेय पना पन बाक्त।

ब्वाक्कुम खुम्ब यूहन्ना आ पर्वम लोव्र

मत्ती ३:१३-१७; मर्कूस १:९-११; लूका ३:२१-२२

29 आ दीसा यूहन्नामी येसु कली आ बाक्तीक गे पिना पिन पशो तशा “परमप्रभु यावे आ पाठा मेकोन बाक्ब। मेकोमी रागी नेल्ल डा मुर आन मरिमशो पशो क्याम्ब। यसैया ५३:७

30 गो मेको आ पर्वम मार लोव्र पाता देंशा हना, मेको मुर आं क्येडा नोले जाक्त हना यो, आं क्येडा टैयब बाक्ब। मिनु आं क्येडा डोंइती यो बाक्शो बाक्त।

31 डोंइती गो यो मेको कली मतुडक्ब बाक्ती। तन्न गो मुल इस्राएल डा मुर आन कली मेको आ पर्वम तुडक्पाइक्चा कली ब्वाक्कुमी खुमशा गुंडतीक गेय पथ जाक्ती” दे यूहन्नामी मुर आन कली दैत।

32 यूहन्नामी “गो परमप्रभु यावे आ सोक्त कली परवा बुदी सरीड रे बेरशा, येसु आ तारी जुक्शो ताता।

33 डोंइती गो यो मेको कली मतुडक्ब बाक्ती। मिनु आं कली ब्वाक्कुमी खुमशा गुंडतीक गेय पथ सोइक्बमी ‘तेको मुर तारी गेमी आं सोक्त जुक्शो ताइनेवे, मेको आं सोक्तीम खुम्ब बाक्ब’ दे परमप्रभु यावेमी माइक्ती।

34 मिनु गो मेको नेल्ल ताता। परमप्रभु यावे आ तौ मेकोन बाक्ब, दे तुइशशा, इन कली तुडक्पाइक्तन्नी” दे यूहन्नामी दैत।

येसु ख्रीस्त आ शेंसीबपुकी

35 मिनु आ नित्थ नाक्त यूहन्ना आ शेंसीब निकशी नु बाक्माक्त।

36 मिनू यूहन्नामी येसु कली हिरशा गाकशो तशा “कोवडीसे, मेरेन परमप्रभु यावे आ पाठा बाकब” दैत।

37 मिनू मेको शेंसीब निक्शीमी यूहन्ना आ लोव्र नेंशा, येसु आ नोले खोइक्ताक्स।

38 मिनू येसुमी लेशशा कोव्रडानु, मेको आस कली खोइश्शो तशा “गे मार माल्सी?” दे हिल्लो पाप्तु। मिनू मेको निक्शीमी “शेंब, गे ते बाक्नीनी?” दे हिल्लो पाम्ताक्स।

39 मिनू येसुमी “गो नु पिशा, कोव्रडीस” दैत। मिनू मेको निक्शी आ बाक्तीक कोव्रथ लाम्ताक्स। मिनू मेको नाक्त येसु नु बाक्ताक्स। मारदे हना मेना ४ बजे खोदेशो दुम्शो बाक्त।

40 यूहन्ना आ लोव्र नेंशा, येसु आ नोले खोइक्ब का अन्द्रीयास बाक्त। अन्द्रीयास सिमोन पत्रुस आ लोक्ब बाक्त। मत्ती ४:१८-२०

41 मिनू मेकेर रे लशा, अन्द्रीयासमी सिमोन कली ग्रुम्शा “गो निक्शीमी मस्सीह कली ग्रुम्तस्कु” दैत। मस्सीह चहिं खीस्त, दे रुम्सीब। मस्सीह आ देशो “परमप्रभु यावेमी मेको कली तेल लुक्शो बाकब” बाकब।

42 मिनू अन्द्रीयासमी सिमोन पत्रुस कली येसु नु ग्रुम्पाइव्तु। येसुमी मेको कली तशा “गे योआन्नेस आ तौ सिमोन नवे। इ नें केफास देंचा माल्ब” दैत। केफास देशो फुल्लु बाकब। ग्रीक लोव्रमी पत्रुस बाकब।

43 मिनू आ सांबु नाक्ती येसुमी “गालील रागी लाइनुड” दैत। मिनू मेकेर लशा फिलीप कली ग्रुम्तु। मिनू फिलीप कली “आं नोले खोइय्यी” दैत।

44 मेको फिलीप अन्द्रीयास नु पत्रुस खोदेशो पा बेथसैदा सहर डा बाक्माक्त।

45 मिनू फिलीपमी नथानेल माइश्शो मुर कली ग्रुम्शा, मेको कली “मोसामी नु परमप्रभु यावे आ लोव्र पाइबपुकीमी यो परमप्रभु यावे आ सोइश्शो का आ परबम ब्रेक्शो बाक्तेक्म। मिनू गोपुकीमी मेको कली ग्रुम्तक। मेको नासरथ सहर डा योसेफ आ तौ येसु बाक्माक्त” दे नथानेल कली दैत। यसैया ५३:२; ब्यवस्था १८:१८; येरमीया २३:५; इजीकीएल ३४:२३

46 मिनू नथानेलमी चहिं “नासरथ सहर रे सु रिम्शो मुर जाक्ने चाप्बा डा?” दे फिलीप कली दैत। मिनू फिलीपमी “लो, कोव्रडो” दैत। यूहन्ना ७:४१

47 मिनू येसुमी नथानेल कली आ बाक्तीक जाक्शो तशा, नथानेल आ परबम “काइ जोल मपाइब नु रिम्शो गेय पाइब इस्राएली का बाकब” दैत।

48 मिनू नथानेलमी येसु कली “गे आं कली दोपा तुइक्नीनी?” दे हिल्लो पाप्तु। येसुमी “फिलीपमी इ कली ग्रुम्चा डोंइती गो इ कली फोव्रशी रवा आ पुंमी निश्शो ताता” दैत।

49 मिनू नथानेलमी “शेंब, गे परमप्रभु यावे आ तौ ननी। गे इस्राएल डा मुर आन पिप ननी” दैत। यूहन्ना ६:६९; भजन संग्रह २:७; येरमीया २३:५; मत्ती १४:३३; मत्ती १६:१६

50 मिनू येसुमी लेशा “गो फोव्रशी रवा आ पुंमी इ कली ताता देशो आ परबम गे थमा सुइक्तीवी। गे मेको क्येडा ठेयब गेय पशो ताइनेवे” दे माइव्तु।

51 मिनू लोव्र बोइश्शा “नोफा दाइश्शा नेनीने, गेपुकीमी सरीड रोक्शो ताइनीनी। मिनू परमप्रभु यावे आ स्वर्ग डा गेय पाइबपुकी रागीमी जरमेशो आ तार जुक्शो नु स्वर्ग गे लेशशा लशो ताइनीनी” दे माइक्तीमी। उत्पत्ती २८:१२; मत्ती ४:११

## 2

डोंइती डा छक लाक्चा डा गेय

1 आ सांबु नाक्ती गालील रागी डा काना सहरमी ग्युंबे का बाक्शो बाक्त। मिनू येसु आ ममा यो मेकेर लशो बाक्त।

2 येसु नु आ शेंसीब आन कली यो ब्रेश्शो बाक्तेक्म।

3 मिनू अडगुर शांबु नुम्मेनु, येसु आ ममामी येसु कली “अडगुर शांबु नुप्त” दैत।

4 मिनू येसुमी आ ममा कली “गो मार पचा माल्नुडा, आं कली मदेनीन। मुल सम्म आं पची मजा” दे माइव्तु।

5 मिनु आ ममामी गेय पाइब आन कली “एकोमी मार देंमे, मोदेंशो पने” दे माइक्तीमी।

6 मिनु मेकेर फुल्लु के मुशो ६ ओटा गर वोइश्शो बाक्तेक्म। यहूदी आन रिती थितीमी मुर आन कली चिक्चा, दे वोइश्शो बाक्तेक्म। मेको गर कामी २, ३ ठेयब पुक्तीक खोदेंशो ब्वाक्कु रिक्ब। मेत्रेतस माइश्शो ठेयब पुक्तीक का ३९ लिटर खोदेंशो बाक्ब। मर्कूस ७:३-४

7 मिनु येसुमी गेय पाइब आन कली “गर नेल्ल ब्वाक्कुमी प्रिदीन” देंत। मिनु मेकोपुकीमी गर नेल्ल ब्वाक्कुमी प्रिंताक्म।

8 मिनु “जचा योक्ब आन ठेयब मुर कली एको थाम्चा गेने” दे माइक्तीमी। मिनु मेकोपुकीमी आ देंशो खोदेंशो पाम्तेक्म।

9 मेको ठेयब मुरुमी मेको अडगुर शांबु दुम्शो ब्वाक्कु थाम्शा कोवडानु, जिजी कका पा ब्रोव्रशो बाक्माक्त। मेकोमी मेको अडगुर शांबु ते रे चाक्शो मतुइक्त। गेय पाइबपुकीमी ला तुइश्शो बाक्तेक्म। मिनु मेको ठेयब मुरुमी ग्युम्ले कली ब्रेशा

10 “मुर नेल्लेमी डोंइती ब्रोव्रशो अडगुर शांबु योक्नीम। तूशा रांडमे नोले मब्रोव्रशो योक्नीम। गे चहिं मुल सम्म ब्रोव्रशो अडगुर शांबु खेक्शा वोइश्शो बाक्ते” दे माइक्तु।

11 मेको येसु आ डोंइती डा छक लाक्चा डा गेय बाक्त। मेको डोंइती पशो छक लाक्चा डा गेय गालील रागी डा काना माइश्शो सहरमी पशो बाक्त। मोपा मुर आन कली आ सक्ति कोंइशो बाक्त। मेको तशा आ शेंसीबपुकीमी येसु कली परमप्रभु यावे आ तौ बाक्त, दे थमा सुदमे बाक्त। यूहन्ना १:१४

12 मिनु नोले येसु, आ ममा, आ लोकबपुकी नु आ शेंसीबपुकी नु कापेरनाउम सहरमी यिशा, मेकेर इक्का नाक्त सम्म बाक्मा बाक्त। यूहन्ना ७:३; मत्ती १३:५५

येसु परमप्रभु आ खिं लशो

मत्ती २१:१२-१७; मर्कूस ११:१५-१९; लूका १९:४५-४८

13 मिनु यहूदी आन पास्सा चाड जाक्चशो बाक्त। मोपतीके येसु यरूसलेम सहर लत। यूहन्ना ५:१; यूहन्ना ७:१०; मत्ती २०:१८; मर्कूस ११:१; लूका १९:२८

14 परमप्रभु यावे आ खिं जाक्दीम्मनु, मेकेर ब्यफ लेयबपुकी, भेडा लेयबपुकी, परवा लेयबपुकी नु क्येट फाइक्ब नेल्लेमी आन गेय पना पन बाक्शो ताप्तु।

15 मिनु येसुमी पले डोरी के युक्तीक सेल्शा, भेडा, ब्यफ लेयबपुकी नु क्येट फाइक्ब आन कली परमप्रभु यावे आ खिं रे खेरतीमी। क्येट फाइक्ब आन क्येट वोइक्तीक खोल्शा, क्येट नेल्ल फ्राम्तीमी।

16 मिनु येसुमी परवा लेयब आन कली “एको नेल्ल लतीन। आं आफ आ खिं कली ग्याप्तीक लेयतीक खिं मसेलीन” दे माइक्तीमी।

17 मिनु परमप्रभु यावे आ लोव्रमी “इन खिं कली थमा पा दाक्नुड। मेको दाक्तीक मी खोदेंशो पा आं थुम चोइब” दे ब्रेक्शो बाक्ब, दे आ शेंसीबपुकीमी फ्रुक्तेक्म। भजन संग्रह ६९:९

18 मिनु यहूदीपुकीमी येसु कली “इके मो पचा डा अधिकार बाक्ब, दे आंइ कली मार चिन्ड कोंइने चाप्नेवे?” देंमानु, मत्ती २१:२३

19 येसुमी “परमप्रभु यावे आ खिं प्रेतीन। गो नाक्त सांमी लेंशा सेल्ने थुम्नुड” दे माइक्तीमी। मत्ती २६:६१; मत्ती २७:४०

20 मिनु यहूदीपुकीमी “परमप्रभु यावे आ खिं सेल्चा कली ४६ बर्स माल्शो बाक्त। दोपा नाक्त सांमी सेल्ने चाप्नेवे डा?” देंतेक्म।

21 येसुमी आ रां आ पर्वम लोव्र पाप्तु। आ रां परमप्रभु यावे आ खिं बाक्ब। १कोरिन्थी ६:१९

22 मिनु नोले परमप्रभु यावेमी येसु कली बेक्शो रे सेंदानु, आ शेंसीबपुकीमी डोंइती आ रां आ पर्वम पशो लोव्र फ्रुक्तेक्म। मिनु परमप्रभु यावेमी ब्रेक्पाइश्शो लोव्र नु येसु आ देंशो लोव्र थमा सुइक्तेक्म। होसे ६:२

23 मिनु येसु पास्सा चाडम यरूसलेममी बाक्शा, छक लाक्चा डा गेय पवानु, मेको तशा, शुश मुरपुकीमी “परमप्रभु यावे आ तौ बाक्त” दे थमा सुइक्तेक्म।

24 येसुमी चहिं मेको आन कली थमा मसुद।

25 मारदे हना मुर नेल्ल आन कली तुइशशा, आन पबर्म लोत्र नेंचा ममाल्द। आन थुंमी मार बाकमे, मेको नेल्ल तुइशशो बाक्त। मर्कूस २:८

### 3

परमप्रभु आ राज्य आ पबर्म शेंशो

1 मिनु फरिसी आन हुल डा यहूदी आन ठेयब मुर का बाक्त। मेको आ नें निकोदेमस बाक्त। यूहन्ना ७:५०; यूहन्ना १९:३९

2 मिनु नाकदो मेको मुर येसु आ बाक्तीक जाक्शा, येसु कली “शेंब, गे परमप्रभु यावे आ सोइशशो शेंब ननी, दे तुइक्नीकी। मारदे हना परमप्रभु यावे आ सोइशशोमी ला गे इन खोदेशो पा छक लाक्चा डा गेय पने चापब” देंत।

3 मिनु येसुमी “नोफा दाइशशा थमा लोत्र नेनीन, मुर लेंशा, इर रे नक पा मजरमेसाक्व हना, परमप्रभु यावे आ राज्य तने मचापब” देंत। १पत्रुस १:२३

4 मिनु निकोदेमसमी “कोल्शो मुर दोपा लेंशा जरमेने चापबा डा? मेको लेंशा, आ ममा आ कोव्रज ओव्रशा, जरमेने चापबा डा?” दे हिल्लो पाप्टु।

5 मिनु येसुमी “नोफा दाइशशा थमा लोत्र नेनीन, ब्वाक्कु रे नु परमप्रभु यावे आ सोक्त रे जरमेशो मुरपुकी ला परमप्रभु यावे आ राज्य ओव्रने चाप्नीम। इजीकीएल ३६:२५-२७; मती ३:११; तीतस ३:५

6 मुर आ रां रे जरमेशो मुरपुकी रागी कली ला गारनीम। परमप्रभु यावे आ सोक्त रे जरमेशो मुरपुकी चहिं परमप्रभु यावे आ राज्य कली गारनीम। यूहन्ना १:१३; रोमी ८:५-९

7 मुर लेंशा जरमेचा माल्ब, दे आं लोत्र नेंशा छक मलाक्कीन।

8 फश ते रे जाक्ब, ते लाइबा मतुइसीब। आ रेयके नेंशा यो ते रे गूबा, ते ते लाइबा, मतुइसीब। परमप्रभु यावे आ सोक्त रे जरमेशो मुर मेको खोदेशो बाक्नीम” देंत।

9 मिनु निकोदेमसमी “इन देशो दोपा दुम्ने चापबा डा?” दे हिल्लो पाप्टु।

10 मिनु येसुमी “गे इस्राएली आन कली शेंब दुम्शा यो, एको लोत्र मतुइक्नीनी?

11 नोफा दाइशशा थमा लोत्र नेनीन, गो आंइ तुइशशो लोत्र पाइनीकी। आंइ तशो यो शेंनीकी। गे चहिं आंइ शेंशो थमा मसुइक्नीनी।

12 गो इन कली रागी डा लोत्र पडानु, गे थमा मसुइक्नीनी। मिनु गो स्वर्ग डा लोत्र पाता हना, गे दोपा थमा सुइक्ने चाप्नीनी?

13 मुर परमप्रभु यावे आ बाक्तीकेम मलम। स्वर्ग रे जाक्शो रागीमी जरमेशो ला परमप्रभु यावे आ बाक्तीकेमी बाक्शो बाक्त।

14 मोसा गोरशो रागीम बाक्मेनु, कांसा के बुस्स सेल्शा, मेको कली क्युक्शा वोदा बाक्त। मोपा रागीम जरमेशो यो क्युक्चा पुंइसीब। गन्ती २१:८-९

15 मारदे क्युक्चा पुंइसीब देश हना, सुमी मेको कली थमा सुइक्बा, मेको गेना हना यो ब्रोंइशा बाक्चा ताइब” देंत।

16 परमप्रभु यावेमी रागी डा मुर आन कली शुश दाक्ताक्व। मोपतीके आ कांइचीक तौ रागीमी सोइक्ताक्व। सु सुमी मेको कली थमा सुइक्नीमी, मेकोपुकी नरक मलाइनीम। तन्न गेना हना यो परमप्रभु यावे नु बाक्चा ताइनीम। रोमी ५:८; रोमी ८:३२; १यूहन्ना ४:९

17 परमप्रभु यावेमी रागी डा मुर आन कली निसाफ पा नरकमी वोइक्चा, दे आ तौ मसोइक्त। तन्न रागी डा मुर आन कली नरक रे प्रोंइचा कली सोइक्ताक्व। लूका १९:१०

18 सुमी परमप्रभु यावे आ तौ कली थमा सुइक्बा, मेको स्वर्गमी निसाफ पचा मपुंइसीब। सुमी चहिं थमा मसुइक्बा, मेको डोंइती रेन निसाफ पा सजाइ तचा पुंइसीब दुम्शो बाक्ब। मारदे हना मेकोमी परमप्रभु यावे आ कांइचीक तौमी पाप रे प्रोंइब, दे थमा मसुइशशो बाक्ब। यूहन्ना ५:२४

19 मिनू निसाफ दोदेंशो बाकब देंशा हना, छेडछेड माइशो रागीम जाकत। मुरपुकीमी छेडछेड क्येडा छिडछिड कली शुश दाकताकम। मारदे हना आन पशो गेय मरिम्शो बाकत। यूहन्ना १:५,९-११

20 सुमी मरिम्शो गेय पाइबा, मेकोम छेडछेड कली काइ मदाकब। आ गेय मतांडसेकल, दे छेडछेडमी मलाइब। एफिसी ५:१३

21 सुमी चहिं थमा पा रिम्शो गेय पाइबा, मेको छेडछेडमी लाइब। मारदे हना आ रिम्शो गेय परमप्रभु यावे कली टिशो नेल्ल तांडसेकल, दे छेडछेडमी लाइब। १यूहन्ना १:६-७

### यूहन्नामी येसु आ पर्वम शेंशो

22 मिनू नोले येसु नु आ शेंसीबपुकी यहूदीया रागी लाम्तेकम। मेकेर आ शेंसीबपुकी नु बाकशा, ब्वाक्कुमी खुम्शा गुंडतीक गेय पाम्तेकम। यूहन्ना ४:१-२

23 यूहन्नामी यो सालीम सहर आ नेक्था एनोन बाकतीक डा शुश ब्वाक्कु बाकतीकेमी ब्वाक्कुमी खुम्शा गुंडतीक गेय पशो बाकत। शुश मुर जाकशा, ब्वाक्कुम खुम्शा गुंडचा पुंडसाकम।

24 मेना यूहन्ना जेल्खानम चोकचा मपुंडसीशो बाकत। मर्कूस १:१४

25 मिनू यूहन्ना आ शेंसीबपुकीमी “दोपा पाप क्याम्सीबा?” दे यहूदी का नु लोत्र पाम्तेकम।

26 मिनू यूहन्ना कली गुम्शा “शेंब, मेको यर्दन खोला आइकची हांबुम गे नु बाकब, इन तुइकपाइशो परमप्रभु यावे आ तौम ब्वाक्कुमी खुम्शा गुंडतीक गेय पाइब। मिनू मुर नेल्ल मेकेर लाइनीम” दे यूहन्ना कली देतेकम। यूहन्ना १:२६-३४

27 मिनू यूहन्नामी “परमप्रभु यावेमी गेशो गेय डा लाकशा, सुइमी मारेइ गेय पने मचाप्नीम। हिब्रू ५:४

28 गे आं कली तुइकनीनी। गो ख्रीस्त मनड। तन्न गो ख्रीस्त आ डोंइती शेंचा कली सोंइसीशो नड, दे आं शेंशो लोत्र तुइकनीनी। यूहन्ना १:२०, २३, २७

29 ग्युम्लेमी ग्युम्ली कली चाकशो तशा, आ लोत्र नेंशा, आ वारच ग्येरसीब। मोपतीके गो थमा पा ग्येरसीनुड। मत्ती ९:१५

30 मेको ठेयब दुम्चा माल्ब। गो चहिं आइकच दुम्चा माल्नुड।

31 मेको स्वर्ग रे जाकब नेल्ल क्येडा ठेयब बाकब। रागी रे दुम्शो चहिं रागी डा मुर बाकब। रागी डा मुर आन पर्वम ला तुइशशा लोत्र पाइब। स्वर्ग रे जाकशो चहिं नेल्ल आन क्येडा ठेयब बाकब। यूहन्ना ८:२३

32 मिनू आ तशो नु आ नेंशो आ पर्वम लोत्र पाइब। तन्न सुइमी आ देंशो लोत्र थमा मसुइकनीम।

33 सु सुमी आ देंशो थमा सुइकनीम, मेकोपुकीमी ‘परमप्रभु यावेमी डोंइती देंशो लोत्र थमा बाकब’ दे तुइशशा गेय पाइनीम।

34 परमप्रभु यावे आ सोइशशोमी परमप्रभु यावे आ लोत्र पाइब। मेकोमी परमप्रभु यावे आ सोकतीमी ब्रीतीके आ लोत्र पाइब। यूहन्ना १:१६

35 आफोमी आ तौ कली दाकशा, मेको कली नेल्ल क्येडा ठेयब अधिकार गेप्टु। यूहन्ना ५:२०; मत्ती ११:२७

36 सुमी आ तौ आ देंशो थमा सुइकबा, मेको गेना हना यो ब्रोंइशा बाकचा ताइब। सुम चहिं आ देंशो मटीबा, मेको गेना हना यो ब्रोंइशा बाकचा मतथु, परमप्रभु यावे आ गाइशो ताइब” दे यूहन्नामी शेंताकव।

## 4

### येसुमी सामरी आन कली शेंशो

1 फरिसीपुकीमी “प्रभु येसुमी यूहन्ना क्येडा शुश शेंसीब सेल्शा नु ब्वाक्कुमी खुम्शा गुंडतीक गेय पाइब” दे तुइशशो बाकतेकम। मेकोन येसुमी तुइकताकव। यूहन्ना ३:२२-२६

2 मेको गेय येसुमी आंमा मपथु, आ डोंइती डा शेंशो १२ जना शेंसीब आन कली पपाइकतु।

3 मिनू आ शेंसीबपुकी नु यहूदीया रागी रे पा, गालील रागी गे लाम्तेकम।



4 मिनु लमानु, सामरीया रागी जाकदीत्तेकम।

5 सामरीया रागीमी गाकशा, सीकार सहर जाकदीत्तेकम। सीकार सहर आ नेक्था याकूब आ रू बाक्त। मेको रू आ तौ योसेफ आ थेरशो रू बाक्त। उत्पती ४८:२२; यहोसु २४:३३

6 मेकेर याकूब आ दोशो इनार यो बाक्त। मिनु येसु मेकेर जाकदीशशा, दशा, इनार तारी नांइसाक्व। मेना १२ बजे खोदेशो दुम्शो बाक्त।

7 मेना सामरीया डा मीश मुर का ब्वाक्कु दिथ जाक्त। मिनु येसुमी मेको मीश मुर कली “ब्वाक्कु तूचा गेयी” दे पुंइतु।

8 मेना आ शेंसीबपुकी जचा थोत्रक ग्यापथ सहर लशो बाक्तेकम।

9 मिनु मीश मुरुमी “गे यहूदी ननी। गो चहिं सामरीया डा नड। मिनु आं गुड रे दोपा ब्वाक्कु तूचा पुंइनीनी?” दे येसु कली मदा बाक्त। मारदे हना सामरी डा मुर आन थिशो ब्वाक्कु यहूदीपुकीमी मतूबाक्मा बाक्त। सामरीया डा मुरपुकी आइक्च जात डा मुर नम। लूका ९:५२-५३

10 मिनु येसुमी मेको मीश मुर कली “परमप्रभु यावेमी इ कली मार गेचा दाक्ब, दे तुइक्ताक्वी हना, नु ब्वाक्कु पुंइब, आं कली, सु बाक्नुड, दे तुइक्ताक्वी हना, आं कली ‘ब्वाक्कु गेयी’ दे पुंइदी वा। मिनु ब्रोंइचा गेब ब्वाक्कु गेन वा” दे मदा बाक्त। यूहन्ना ७:३८-३९

11 मिनु मीश मुरुमी “प्रभु, एको इनार दुइशो बाक्ब। इन के ब्वाक्कु गुंइतीक मबा। ते रे ब्रोंइचा गेब ब्वाक्कु गेनीनी?

12 आंइ किकी पिप याकूब क्येडा गे ठेयब ननी डा? याकूबमी आंइ कली एको इनार गेशो बाक्माक्त। एकेर डा ब्वाक्कु आंमा यो तूडा बाक्त। आ तौपुकी नु आ बी ब्यफपुकीमी यो एको ब्वाक्कु तूडमे बाक्त, दे मतुइक्नीनी?” दैत।

13 मिनु येसुमी “सुमी एको ब्वाक्कु तूबा, मेकोमी लेंशा तूतू दाक्ब। यूहन्ना ६:५८

14 तन्न सुमी आं गेशो ब्वाक्कु तूबा, मेकोमी लेंशा तूतू मदाक्ब। आं गेशो ब्वाक्कु मुर आगामी बुक्शो खोदेशो पा बारशा, गेना हना यो ब्रोंइशा बाक्चा गेब” दैत। यूहन्ना ६:३५; यूहन्ना ७:३८-३९; भजन संग्रह ३६:१०

15 मिनु मीश मुरुमी “प्रभु, मेको ब्वाक्कु गेयीनी। मिनु तूतू मदाक्डल। ब्वाक्कु दिथ पिचा यो ममाल्डल” दैत।

16 मिनु येसुमी “इ वोंइश ब्रेशशा चाक्को” दैत।

17 मिनु मीश मुरुमी “आं वोंइश मबाक्ब” दैत। येसुमी “गे इ के वोंइश मबाक्ब, दे थमा लोत्र पाप्तीवी।

18 इ के ५ जना वोंइश बाक्तेकम। मुल गे नु बाक्ब चहिं इ वोंइश ममाइ। इ लोत्र थमा बाक्ब” दैत।

19 मिनु “प्रभु, गे परमप्रभु यावे आ लोत्र पाइब का बाक्नी बाक्त। मोपतीके आं मारेइ मारेइ तुइक्ताक्नी।

20 आंइ किकी पिपीमी मेको डांडामी परमप्रभु यावे कली ठेयब सेल्शो बाक्तेकम। गे यहूदीपुकीमी चहिं ‘यरूसलेम सहरमी परमप्रभु यावे कली ठेयब सेल्चा माल्ब’ दे देंनीनी” दैत। ब्यवस्था १२:५; भजन संग्रह १२२:-

21 मिनु येसुमी मेको मीश मुर कली “इच्का नोले गे इं आफ कली मेको डांडामी नु यरूसलेममी ठेयब मसेल्नीनी। गे आं देशो लोत्र थमा सुतो।

22 गे परमप्रभु यावे कली मतुइक्थु ठेयब सेल्नीनी। गो चहिं परमप्रभु यावे कली तुइशशा ठेयब सेल्नीकी। मारदे हना पाप रे प्रोंइब यहूदी आन दाते रे जाक्ब। २राजा १७:२९-४१; यसैया २:३

23 मिनु मुल नु नोले थमा पा आं आफ कली ठेयब सेल्बपुकीमी आ सोक्त आ पतीकेमी थमा पा ठेयब सेल्नीमी। आं आफोमी मोदेशो मुर माल्ब।

24 परमप्रभु यावे सोक्त बाक्ब। मिनु सुम मेको कली ठेयब सेल्नीमी, मेकोपुकीमी आ सोक्त पतीकेमी थमा पा ठेयब सेल्चा माल्नीम” दैत। २कोरिन्थी ३:१७; रोमी १२:१

25 मिनु मीश मुरुमी “मस्सीह जाक्ब, दे तुडक्नुड। मेको कली खीस्त यो देंनीमी। मेको जाक्शा, आंड कली नेल्ल शेंब” देंत। यूहन्ना १:४१

26 मिनु येसुमी “गे नु लोव्र पाइब, गो मेको नड” देंत।

27 मेना येसु आ शेंसीब जाक्तेक्म। मेकोपुकीमी मेको कली सामरीया डा मीश मुर नु लोव्र पशो तशा, छक लाक्तेक्म। तन्न सुइमी “मारदे गे मेको नु लोव्र पाइनीनी? मार मालनीनी?” दे हिल्लो मपाम।

28 मिनु मीश मुरुमी आ गर प्रोंइशा, सहर लत। मिनु सहर जाक्दीशशा, सहर डा मुर आन कली

29 “मुर का कली कोव्रथ पिने। मेकोमी आं पशो नेल्ल तुइशशा गो नु लोव्र पाप्तु। मेको खीस्त बाक्म, कौ?” दे मुर आन कली माइक्मी बाक्त।

30 मिनु सहर डा मुर नेल्ल येसु कली कोव्रथ जाक्तेक्म।

31 मिनु आ शेंसीबपुकीमी “शेंब, लो जने” देंतेक्म।

32 तन्न येसुमी “इन मतुइशशो जचा थोव्रक गो नु बाक्ब” देंत।

33 मिनु शेंसीबपुकीमी “सुइमी जचा थोव्रक चाक्शा, गेमे को” देंमुतेक्म।

34 येसुमी मेको आन कली “आं जचा थोव्रक मार बाक्ब देंशा हना, आं कली सोइक्ब आ दाक्शो पचा नु आ देंशो गेय थुम्चा। मेको आं के जचा थोव्रक बाक्ब। यूहन्ना ६:३८; यूहन्ना १७:४

35 गेपुकीमी ‘४ महिना नोले बाली नाली रुप्ची जाक्ब’ देंनीनी। गो चहिं रू कोव्रडीन, हो हो पा मीशा, रुप्ची जाक्शो बाक्ब। मती ९:३७

36 रुप्बमी गाल्च ताइब। मेकोमी गेना हना यो ब्रोंइशा बाक्चा कली मुर आन कली चाक्ब। मिनु शोक्ब नु रिक्ब नेल्ल कालेम ग्येरसीनीम।

37 मारदे हना “का निक्शीमी शोक्नीम, का निक्शीमी रुप्नीम” देंशो लोव्र थमा बाक्ब, दे तुंडसीब।

38 मिनु गो इन कली इन मशोक्शो रुप्थ सोइक्नन्नी। अर्कोमी शोक्तीक गेय पाप्तेक्म। गे चहिं मेको आन शोक्शो रुप्नीनी” देंत।

39 मेको मीश मुरुमी सामरीया डा सीकार सहर डा मुर आन कली “आं पशो गेय नेल्ल माइक्ती” देंशो नेंशा, सामरीया डा मुर शुशेमी “मेकोन परमप्रभु यावे आ सोइशशो खीस्त बाक्त” दे थमा सुदमे बाक्त।

40 मिनु सामरीया डा मुरपुकीमी येसु आ बाक्तीक जाक्शा “गो नु काथा बाक्कीन” दे पुंडतेक्म। मोपतीके येसु नाक्त निक्शी सम्म मेको नु बाक्त।

41 मिनु येसु आ शेंतीक लोव्र नेंशा, डोंइती क्येडा शुश मुरपुकीमी थमा सुइक्तेक्म।

42 मेकोपुकीमी मीश मुर कली “इ देंतीक गो थमा मसुइक्नीकी। तन्न आ शेंशो आंमा नेंतक। रागी डा मुर आन कली पाप रे प्रोंइब एकोन बाक्त, दे रुप्शा तुइक्ताक्क” देंतेक्म। प्रेरित ८:५-८

येसुमी आल कली सापाइशो

मती ८:५-१३; लूका ७:१-१०

43 मिनु नाक्त निक्शी बाक्शा, येसु मेकेर रे गालील रागी गे लत। मती ४:१२

44 येसुमी “आंम रागी डा मुरपुकीमी परमप्रभु यावे आ लोव्र पाइब कली काइ महिक्नीम” देंत। मती १३:५७

45 मिनु गालील रागी जाक्मेनु, गालील डा मुरपुकीमी मेको कली ब्राम्तेक्म। मारदे हना मेकोपुकीमी यो पास्सा नाक्त यरूसलेममी बाक्शा, येसु आ पशो नेल्ल तशो बाक्तेक्म। यूहन्ना २:२३

46 मिनु येसु डोंइती ब्वाक्कुरे रे अडगुर शांबु सेल्लतीक गालील रागी डा काना सहरमी जाक्शो बाक्त। मिनु कापेरनाउम सहरमी पिप आ गेय पाइब कप्तान का बाक्शो बाक्त। मेको आ तौ रोड पशो बाक्माक्त। यूहन्ना २:१,९

47 मेको कप्तानमी “येसु यहूदीया रे गालील रागीमी जाक्त” दे नेंशा, येसु कली गुम्थ जाक्त। मिनु मेकोमी येसु कली “आं तौ बेक्चा चिक्ताक्ब, सापतीने” देंत।

48 मिनु येसुमी “गे चिन्ड नु छक लाक्चा डा गेय मताइतीनी हना, आं कली थमा मसुइक्नीनी” देंत। यूहन्ना २:१८; १कोरिन्थी १:२२

49 कप्तानमी “प्रभु, आं तौ मबेक्थु, आं खिं जाक्कीन” दे पुंडुत।

50 मिनु येसुमी “इन खिं लने, मारदे हना इन तौ साशा ब्रोंडब” देंशा सोइक्ताक्व। मिनु येसु आ देंशो थमा सुइशशा, आ खिं लेशशा लत।

51 मिनु लना लन बाक्मेनु, आ गेय पाइबपुकीमी लांमी गुम्शा “इन तौ सात” दे शोवडमे बाक्त।

52 मिनु “गेना रे आं तौ साचा गोवा?” दे हिल्लो पवानु “सिनाक्त छकाल रे जरो शिक उइक्ताक्व” देंमा बाक्त।

53 मेको आल आ आफोमी “इन तौ साशा ब्रोंडब” दे येसुमी देंमेनु, सामाक्त, दे तुइक्ता बाक्त। मिनु मेको नु आ खिं डा मुर नेल्लेमी थमा सुदमे बाक्त।

54 येसुमी यहूदीया रे गालील रागी जाक्शा, खेयप निकशी डा आ पशो छक लाक्चा डा गेय एको बाक्व। यूहन्ना २:११

## 5

### येसुमी खोइल मदुक्व सापाइशो

1 यरूसलेममी यहूदी आन के चाड का बाक्त। मिनु येसु यरूसलेम लत। यूहन्ना २:१३

2 यरूसलेम सहर कली गारोमी हिरशो बाक्व। मेको गारोमी लाप्चोपुकी बाक्नीम। मेको गारो डा ठेयब लाप्चो का कली भेडा लाप्चो देंनीम। मेको आ नेक्थामी हिबू लोव्रमी बेथेस्दा माइशो दोम्ली का बाक्व। मेको दोम्ली बाक्तीकेमी ५ ओटा पाटी खिं बाक्नीम। नेहम्याह ३:१

3 मेको खिं आगामी शुश रोइ पाइब, मिक्च मताइब, गुइ खोइल मदुक्व, रां सोव्रशो रोइ पाइबपुकी बाक्शो बाक्तेक्म। मेको मुरपुकी दोम्ली डा ब्वाक्कु गेना हिम्सीब, दे कोव्रचा कली बाक्शो बाक्मा बाक्त।

4 मारदे हना परमप्रभु यावे आ स्वर्ग डा गेय पाइबमी यिशा, दोम्ली डा ब्वाक्कु कली हिम्बाक्माक्त। मिनु ब्वाक्कु हिम्सेनु, नेल्ल क्येडा डोंइती दोम्लीम गुम्ब आ रोइ साबाक्माक्त।

5 मिनु मेकेर ३८ बर्स सम्म रोइ पशो मुर का बाक्त।

6 मिनु येसुमी मेको कली तशा “मेको मुर शुश बर्स रोइ पशो बाक्त” दे तुइशशा “गे साचा दाक्नेवे?” दे हिल्लो पाप्तु।

7 मेको रोइ पाइबमी “प्रभु, ब्वाक्कु हिम्सेनु, आं कली दोम्लीमी खुम्ब मुर सुइ मपिदु। मिनु गो हना यो ‘लड’ देंडानु, मुर का आं डोंइती ब्वाक्कुमी गुम्ब” देंत।

8 मिनु येसुमी “बोक्को, इ ब्राख्ये कुरशा गाक्को” दे माइक्तु।

9 मो देंशोनु, मेको मुर आ रोइ साशा, छुल बोक्त। मिनु आ ब्राख्ये कुरशा गाक्त। मिनु मेको सापाइशो नाक्त च्हिं नाइक्तीक नाक्त बाक्त।

10 मोपतीके यहूदीपुकीमी साशो मुर कली “मुलाक्त नाइक्तीक नाक्त बाक्व। इ ब्राख्ये कुरचा मदुम्ब, दे मतुइक्ती?” देंतेक्म। प्रस्थान २०:१०; येरमीया १७:२१-२२

11 मिनु मेकोमी “आं कली सापाइक्व मुरुमी ‘इ ब्राख्ये कुरशा गाक्को’ दे माइक्ती” देंत।

12 मेकोपुकीमी “इ ब्राख्ये कुरशा गाक्को देंब मुर सु बाक्मे?” दे हिल्लो पाप्तेक्म।

13 मिनु मेकोमी “मतुइक्नुड” देंत। मारदे हना दोम्ली बाक्तीकेमी मुरपुकीमी पुम्दमेनु, येसु मेकेर रे गाक्ने थुम्शो बाक्त।

14 मिनु नोले येसुमी मेको साशो मुर कली परमप्रभु यावे आ खिंमी गुम्तु। मिनु “गे साते। मेको क्येडा ठेयब रोइ मपचा कली गे लेंशा पाप मपावो” दे माइक्तु। यूहन्ना ८:११

15 मिनु साशो मुरुमी यहूदी आन कली गुम्थ लशा “आं कली सापाइक्व दा येसु बाक्माक्त” दे माइक्ती बाक्त।

16 सापाइक्ची गेय नाइक्तीक नाक्ती पतीक यहूदीपुकीमी येसु कली श्येत गेचा गोम्तेक्म। मत्ती १२:१४

17 मिनु येसुमी मेको आन कली “आं आफ मुल सम्म गेय पना पन बाक्व। गो यो गेय पाइनुड” देंत। यूहन्ना ९:४

18 आ लोत्र नेंशा, यहूदीपुकीमी येसु कली साइक्चा माल्तेक्म। मारदे हना नाइक्तीक नाक्ती गेय मपतीके क्याम्चा ला ममाइ “परमप्रभु यावे नु उइक्थ बाक्नुड। परमप्रभु यावे आं आफ बाक्ब” दे देशोमी, मेकोपुकीमी येसु कली साइक्चा माल्तेक्म। यूहन्ना ७:३०; यूहन्ना १०:३३

### येसुमी यहूदी आन कली शेंशो

19 मिनु येसुमी यहूदी आन कली “नोफा दाइशशा नेनीन, आं आफोमी मार पाइबा, आ तौमी मेको मतवा सम्म मारेड पने मचाप्ब। मिनु आफोमी दोदेशो पाइबा, तौमी मोदेशोन पाइब। यूहन्ना ३:११, ३२

20 मारदे हना आं आफोमी आ तौ कली दाक्ब। मिनु आ पशो गेय नेल्ल आ तौ कली कोंडब। मिनु आं आफोमी मुल सम्म पपाइशशो गेय क्येडा नोले ठेयब गेय कोंडपाइक्ब। मेको गेय तशा गेपुकी छक लाक्नीनी। ३:३५

21 मिनु आं आफोमी बेक्शो आन कली दोपा सेंबा, मोपा आ तौमी यो सु कली बेक्शो रे सेंचा दाक्बा, मेको कली सेंपाइक्ब। दानीएल ७:१३-१४; प्रेरित १०:४२

22 आं आफोमी मुर आन कली निसाफ मपाइब। तन्न नेल्ल निसाफ पचा डा गेय आ तौ कली पपाइक्ब।

23 मो दुम्मेनु, आं आफ कली मान पाइबपुकीमी आ तौ कली यो आफ कली खोदेशो पा मान पाइनीम। सुमी तौ कली मान मपाइबा, मेकोमी तौ कली सोइक्ब आं आफ कली यो मान मपाइब। फिलिप्पी २:१०-११; १यूहन्ना २:२३

24 नोफा दाइशशा नेनीन, सुमी आं लोत्र नेंबा नु आं कली सोइक्ब आं आफ परमप्रभु यावे कली थमा सुइक्बा, मेको गेना हना यो ब्रोंडशा बाक्चा ताइब। सजाइ मताइब। मारदे हना बेक्शो रे गेना हना यो ब्रोंडशा बाक्चा ताइब। यूहन्ना ३:१६-१८

25 नोफा दाइशशा नेनीन, बेक्शो मुरपुकीमी मुल परमप्रभु यावे आ तौ आ सेंदा नेनीम। सुमी नेंबा, मेको गेना हना यो ब्रोंडशा बाक्चा ताइब। एफिसी २:५-६

26 परमप्रभु यावे नु ब्रोंडतीक सोक्त बाक्ब। मिनु आ तौ कली यो मोदेशो ब्रोंडतीक सोक्ती गेशो बाक्त। यूहन्ना १:१-४

27 मिनु आ तौ कली निसाफ पतीक अधिकार गेपु। मारदे हना आ तौ रागीमी जरमेसीशो बाक्ब। दानीएल ७:१३-१४

28 आं देशो आ पबंम छक मलाक्कीन। मारदे हना इक्का नोले तुरसुमी बाक्शो बेक्शो मुर नेल्लेमी रागीमी जरमेशो आ सेंदा नेनीम।

29 डोंडती रिम्शो पाइबपुकी गेना हना यो ब्रोंडशा बाक्चा कली सेंसीनीम। मरिम्शो पाइबपुकी चहिं सजाइ तचा कली सेंसीनीम। दानीएल १२:२; मत्ती २५:४६; २कोरिन्थी ५:१०

30 मिनु गो आंम अधिकारमी मारेड पने मचाप्नुड। गो दोदेशो नेंनुड, मोदेशो पा निसाफ पाइनुड। आं निसाफ चहिं ठीक बाक्ब। मारदे हना आं दाक्शो मपथु, आं कली सोइक्ब आ देशो पाइनुड। यूहन्ना ६:३८

### येसु सु बाक्म, देशो सांक्छी

31 गो आं पबंम लोत्र पाता हना, मेको लोत्र थमा बाक्ब, दे थमा मसुइक्नीनी।

32 आं पबंम अर्कोमी लोत्र पाइब, गो मेको तुइक्नुड।

33 मेको लोत्र देंब चहिं यूहन्ना बाक्ब। गे मेको कली ‘गे सु ननी?’ दे हिल्लो पथ सोइक्ताक्नी। मिनु यूहन्नामी आं पबंम थमा पा शेंताक्व।

34 आं पबंम शेंशो चहिं मुरुमी शेंतीक ममाइ। पाप पशो आ पबंम सजाइ रे ब्रोनीन, दे इन कली देंनुड।

35 यूहन्ना छेडछेड पा ब्रशो बत्ती खोदेशो बाक्त। गे मेको आ हाम्सोमी ग्येरशा बाक्चा दाक्ताक्नी।

36 मिनु यूहन्नामी आं पबंम शेंशो ठेयब बाक्त हना यो, आं पबंम मेको क्येडा ठेयब सांक्छी का बाक्ब। आं सांक्छी मार बाक्ब देशो हना, आं आफोमी आं कली पपाइशशो गेय बाक्ब। मेको आं पशो गेयमी ‘परमप्रभु यावेमी आं कली सोइक्ताक्व’ दे इन कली शेंब। यूहन्ना ३:२; यूहन्ना १०:२५:३८

37 आं कली सोइक्ब आं आफ आं सांकछी बाक्ब। गेपुकीमी आं आफ आ सेंदा गेनायो मनेनी। मेको कली गेनायो मतनी। मती ३:१७

38 आं आफ आ लोव्र इन थुमी मबा। मोपतीके गेपुकीमी आं आफोमी सोइश्शो कली थमा मसुइक्नीनी।

39 गे परमप्रभु यावे आ लोव्र शेंसीन सीन बाक्नीनी। मारदे हना मो पशोनू, ब्रोंइशा बाक्चा तांडसीब, दे मिन्नीनी। मिनु परमप्रभु यावे आ लोव्रमी आं पर्वम ब्रेक्शो बाक्त। लूका २४:२७,४४; २तिमोथी ३:१५-१७

40 गे चहिं ब्रोंइचा तकल, दे आं गे मपीनीनी।

41 गो मुर आन ठेयब सेल्तीके मब्राइनुड।

42 मिनु परमप्रभु यावेमी गेशो दाक्तीके गेपुकी नु मबाक्ब, दे गो तुइक्नुड।

43 गो आं आफ आ नेंमी जाक्ती। तन्न गेपुकीमी आं कली मब्रनी। सुइ मुर आंम आ नेंमी जाक्त हना, मेको कली चहिं ब्राइनीनी। मती २४:५

44 मोपा गे ठेयब सेल्मुइनीनी। तन्न का ला परमप्रभु यावेमी इन कली 'रिम्शो ननी' देंचा मपुंडसीनीनी। आं कली दोपा थमा सुइक्ने चाप्नीनी डा? यूहन्ना १२:४२-४३; १थिस्सलोनिकी २:६

45 गो परमप्रभु यावे आ डोंइती इन कली दोस गेनन्नी, दे ममिम्तीन। गे मोसामी ब्रेक्शो लोव्रमी आस पाइनीनी। तन्न मेको मोसा आ ब्रेक्शो लोव्रमी इन कली दोस गेब। ब्यवस्था ३१:२४-२७

46 गे मोसा आ लोव्र थमा सुइक्नी हना, आं कली यो थमा सुइक्नी वा। मारदे हना आं पर्वम ब्रेक्शो बाक्त। उत्पत्ती ३:१५; उत्पत्ती ४९:१०; ब्यवस्था १८:१५

47 तन्न गे मोसा आ ब्रेक्शो लोव्र ठीक पा थमा मसुइक्नीनी। मिनु आं लोव्र दोपा थमा सुइक्ने चाप्नीनी डा?" दे येसुमी यहूदी आन कली देंत। लूका १६:३१

## 6

शुश मुर आन कली थुल्शो

मती १४:१३-२१; मर्कूस ६:३०-४४; लूका ९:१०-१७

1 मिनु नोले येसु गालील डा समुन्द्र आइक्ची हांबु लत। गालील डा समुन्द्र कली तिबेरीयास समुन्द्र यो देंनीम।

2 मिनु शुश मुरपुकीमी येसु आ नोले खोइक्तेक्म। मारदे हना येसुमी छक लाक्चा डा गेय पा, रोइ पाइब आन कली सापाइश्शो तशो बाक्तेक्म।

3 मिनु येसु आ शेंसीबपुकी नु आइक्था डांडा गे डोइश्शा, तशो बाक्तेक्म।

4 मेना यहूदी आन पास्सा चाड जाक्चशो बाक्त। मोपतीके शुश मुर लॉम गाक्शो बाक्तीक येसु आ नेक्था जाक्तेक्म। यूहन्ना २:१८; यूहन्ना ११:५५

5 येसुमी शुश मुर जाक्शो तशा, फिलीप कली "शोब्ले ग्याप्शा, नेल्ल आन कली दोपा थुल्चा?" दे हिल्लो पाप्तु।

6 येसुमी चहिं "आं कली थमा सुइक्बा कों, मसुइक्बा" दे फिलीप आ थुं कोल्रचा कली मोदेशो देंत। येसुमी "गो छक लाक्चा डा गेय पाइनुड" दे तुइक्ताक्व।

7 मिनु फिलीपमी "मेको मुरपुकीमी इक्कका ला जाम्तेक्म हना, सहे निक्शी देनारमी यो मेको आन कली शोब्ले ग्याप्चा कली मजाक्दीप्ब" देंत। मेना देनार का काबु डा गेय आ गाल्च बाक्त।

8 मिनु सिमोन पत्रुस आ लोक्ब अन्दीयासमी येसु कली

9 "एकेर वोंइश आल का बाक्ब। मेको नु ५ ओटा क्योव्रज के शोब्ले नु डांड निक्शी बाक्ब। एको इश डा मुर आन कली ओशोमी मार गाप्बा डा?" देंत।

10 मिनु येसुमी "मुर आन कली निप्पतीन" देंत। मेकेर रिम्शो दिंम का बाक्त। मिनु मुरपुकी नेल्ल निस्साक्म। आल नु मीश मुर प्रोंइशा, ५ हजार खोइ वोंइश मुर बाक्तेक्म।

11 येसुमी मेको शोब्ले ताकशा “गे रिम्शो पाइब बाकनीनी” दे परमप्रभु यावे कली ठेयब सेल्शा, मुर आन कली शोब्ले योक्पाइक्तीमी। मोदेशो पा डांड यो योक्पाइक्तीमी। मिनु मुरपुकीमी दोशो जचा ब्वचा दाक्मा, मोशोन गेपाइक्तीमी।

12 मिनु मुर नेल्लेमी रूथ्री जामे नोले, येसुमी आ शेंसीब आन कली “एर ओंथ दोशो शोब्ले लीशो बाक्मे, मेको नेल्ल खुप्तीन” देंत।

13 मिनु गुप्शा, १२ डालो प्रिताक्म। मेको लीशा गुप्शो शोब्ले डोंडती डा ५ ओटा रे दुम्शो बाक्तेक्म।

14 मिनु मुरपुकीमी येसु आ पशो छक लाक्चा डा गेय तशा “रागीमी जाक्ब परमप्रभु यावे आ लोत्र पाइब एकोन बाक्त” देंतेक्म। ब्यवस्था १८:१५

15 मिनु येसुमी “आं कली ग्याइश्शा, पिप सेल्नीमी” दे तुइश्शा, आ का ला डांडा डोंडसाक्व। यूहन्ना १८:३६

येसु ब्वाक्कु तार गाक्शो

मत्ती १४:२२-२३; मर्कूस ६:४५-५२

16 मिनु नां रिक्चवानु, येसु आ शेंसीबपुकी गालील डा समुन्द्र आ नेक्था जाक्शा,

17 डोंगामी डोइश्शा, समुन्द्र शोक्शा, कापेरनाउम सहर गे लचा गोम्तेक्मे। मेना नां रिक्शो बाक्त। येसु चहिं लेशशा मजाक्शो बाक्त।

18 मिनु ठेयब फश गिवार पा समुन्द्र डा ब्वाक्कु शुश मुइश्शा, डोंगा कली हिम्पाइक्तु।

19 मिनु येसु आ शेंसीबपुकी डोंगा डोइश्शा, २५ कि ३० स्तादीयोन खोदेशो जाक्दीम्मानु, येसु कली समुन्द्र डा ब्वाक्कु तार गाक्ना गाक्न आन डोंगा गे पिशो ताम्तेक्म। मिनु मेको कली तशा “सु बाक्म” दे हिंतेक्म। स्तादीयोन का १८५ मिटर खोदेशो बाक्ब।

20 मिनु येसुमी “गो नड, महिनीन” दे माइक्तीमी।

21 मिनु ग्येरसीशा, येसु कली डोंगामी डोइक्पाइक्तेक्म। मिनु डोंगामी डोइक्पाइश्शा, कापेरनाउम जाक्दीत्तेक्म।

येसु ब्रोंडचा गेब शोब्ले बाक्ब

22 मिनु आ दीसा नाक्त शोब्ले जाइब मुरपुकी मेक उइ बाक्शो बाक्तेक्म। सिनाक्ती समुन्द्र आ नेक्था डोंगा का ला बाक्त। मिनु येसु आ शेंसीबपुकीमी मेको डोंगा लाइश्शा, कापेरनाउम गे लाम्तेक्म, दे तुइक्ताक्म। येसु चहिं आ शेंसीबपुकी नु डोंगामी मला, दे यो तुइक्ताक्म।

23 तिबेरीयास सहर रे डोंगापुकी प्रभुमी परमप्रभु यावे कली “गे रिम्शो पाइब बाकनीनी” देंशा शोब्ले योक्तीक दिंम आ नेक्था जाक्तेक्म।

24 मिनु मुरपुकीमी येसु नु आ शेंसीबपुकी मेकेर मबाक्शो तशा, डोंगा डोइश्शा, कापेरनाउम गे लशा, येसु कली माल्तेक्म।

25 मिनु मेकेर जाक्दीश्शा, येसु कली थित्तेक्म। मिनु मेकोपुकीमी “शेंब, एकेर गेना जाक्नी?” दे हिल्लो पाम्तेक्म।

26 येसुमी “नोफा दाइश्शा नेनीन, आं छक लाक्चा डा गेय आ पर्वम ममाइ, तन्न शोब्ले जशा रूतीके आं कली माल्तीनी।

27 राक्चा डा जचा थोव्रक कली श्येत मपने। मराक्चा डा जचा थोव्रक कली चहिं गेय पने। मराक्चा डा जचा थोव्रक मार बाक्मे देशा हना, गेना हना यो ब्रोंडशा बाक्चा बाक्ब। रागीमी जरमेशोमी इन कली मेको जचा थोव्रक गेब। मारदे हना आ आफोमी रागीम जरमेशो कली आ छाप थोक्ताक्व” दे येसुमी शेंताक्व। यूहन्ना ५:३६

28 मिनु येसु कली “परमप्रभु यावे आ देशो पचा कली मार गेय पचा माल्नीकी?” दे हिल्लो पाम्तेक्म।

29 मिनु येसुमी “मेको परमप्रभु यावे आ गेय बाक्ब। गेपुकी परमप्रभु यावे आ सोइश्शो कली थमा सुइक्चा, परमप्रभु यावे आ गेय बाक्ब” दे माइक्तीमी।

30 मिनु मेकोपुकीमी लेंशा येसु कली “गे परमप्रभु यावे आ तौ ननी, दे कोंडचा कली मार छक लाक्चा डा गेय पाइनीनी?”

31 आइ किकी पिपीमी गोरशो रागीमी मन्ना शोब्ले जशो बाक्तेकम। ‘मेको आन कली सरीड रे शोब्ले गेम्तीमी’ दे ब्रेकशो बाक्त” देतेकम। भजन संग्रह ७८:२४; प्रस्थान १६:१३-१५

32 मिनु येसुमी “नोफा दाइशशा नेनीन, मोसामी इन कली स्वर्ग रे शोब्ले गेशो ममाइ, तन्न आं आफोमी इन कली थमा पा स्वर्ग रे शोब्ले गेब।

33 मारदे हना परमप्रभु यावेमी गेशो शोब्ले स्वर्ग रे यीब। मेकोमी रागी डा मुर आन कली गेना हना यो परमप्रभु यावे नु ब्रोंइचा गेब” दे माइक्तीमी।

34 मिनु मेकोपुकीमी “प्रभु, मेको शोब्ले गेना हना यो गेकी” दे पुंइतेकम।

35 मिनु येसुमी “गेना हना यो परमप्रभु यावे नु ब्रोंइचा गेब शोब्ले गो नड। सु सु आं गे पीनीमी, मेको शोवलु मबेक्नीम। मिनु आं कली थमा सुइक्बपुकी गेनायो तूत मदाक्नीम। यूहन्ना ४:१४; यूहन्ना ७:३७

36 गेपुकीमी चहिं आं कली तशो बाक्तीनी हना यो, थमा मसुइक्नीनी।

37 मिनु आं आफोमी आं कली गेशो मुरपुकी आं गे पीनीम। आं गे पीब आन कली गेनायो मतिन्नुडमी। मती ११:२८

38 मारदे हना गो आं दाक्शो गेय पथ ममाइ, तन्न आं कली सोइक्ब आ दाक्शो गेय पचा कली स्वर्ग रे जाक्शो नड। यूहन्ना ४:३४

39 मिनु आं कली सोइक्ब आ दाक्शो मार बाक्ब देशा हना, आं कली गेशो मुर का यो मसाम्चा, नु नोले डा नाक्तीमी मेको आन कली सेंपाइक्चा बाक्ब। यूहन्ना १०:२८-२९; यूहन्ना १७:१२

40 मिनु सु सुमी परमप्रभु यावे आ तौ, दे आं कली तुइक्नीमी नु थमा सुइक्नीम। मेको आन कली नोले डा नाक्तीमी सेंपाइशशा, गेना हना यो ब्रोंइशा बाक्चा गेनुडमी। आं आफ आ दाक्शो गेय मेकोन बाक्त” दे यहूदी आन कली शेंताक्व। यूहन्ना ५:२९; यूहन्ना ११:२४

41 मिनु यहूदीपुकीमी येसु आ लोत्र नेंशा गन गन पांतेकम। मारदे हना येसुमी “गो स्वर्ग रे यिशो शोब्ले नड” देशो बाक्त।

42 मिनु मेकोपुकीमी “मार, एको योसेफ आ तौ येसु ममाइ? मेको आ आम आफ कली गो तुइक्नीकी” देतेकम। मिनु मेकोमी “ ‘गो स्वर्ग रे जाक्शो नड’ दे दोपा देने चाप्बा डा?” दे गन गन पांतेकम। लुका ४:२२

43 मिनु येसुमी मेको आन कली “गन गन मपने।

44 आं कली सोइक्ब आं आफोमी आं कली गेशो मुर ला आं गे पिने चाप्नीम। अरु चहिं मचाप्नीम। आं कली गेशो मुर आन कली नोले डा नाक्ती सेंनुडमी।

45 मिनु परमप्रभु यावे आ लोत्र पाइब आन किताबमी ‘परमप्रभु यावेमी नेल्ल आन कली शेंब’ दे ब्रेकशो बाक्त। तेकोमी आं आफ आ लोत्र नेंशा शेंसीबा, मेको आं गे पीब। यसेया ५४:१३

46 सुइमी आं आफ कली मतामे। परमप्रभु यावे रे यीबमी ला आफ कली तशो बाक्त। यूहन्ना १:१८

47 मिनु नोफा दाइशशा नेनीन, सुमी थमा सुइक्बा, मेको गेना हना यो ब्रोंइशा बाक्चा ताइब। यूहन्ना ३:१६

48 मिनु गो ब्रोंइचा गेब शोब्ले नड। यूहन्ना ६:३५

49 इन किकी पिपीमी गोरशो रागीमी मन्ना शोब्ले जचा तांतेकम हना यो, बेक्तेकम। १कोरिन्थी १०:३-५

50 तन्न मुरपुकीमी स्वर्ग रे यिशो शोब्ले कली जांतेकम हना, मबेक्थु ब्रोंइशा बाक्नीम।

51 गो स्वर्ग रे यिशो ब्रोंइतीक शोब्ले नड। सुमी मेको शोब्ले जाइबा, मेको गेना हना यो परमप्रभु यावे नु बाक्शा ब्रोंइब। मिनु रागी डा मुर आन कली ब्रोंइपाइक्चा, दे मार शोब्ले गेनुड देशा हना, आं गेशो शोब्ले आं रां बाक्ब” दे शेंताक्व। मर्कुस १४:२२

52 मिनु यहूदीपुकीमी “एको मुरुमी आइ कली दोपा आ रां ब्वचा गेने चाप्बा?” दे लोत्र पा जिंतेकम।

53 मिनु येसुमी “नोफा दाइशशा नेनीन, गे रागीमी जरमेशो आं रां मब्वाइतीनी हना, नु आं हुश मतूतीनी हना, गेना हना यो परमप्रभु नु ब्रोंइशा बाक्चा गेब सोक्त गे नु मबाक्ब।

54 सु सुमी आं रां ब्वाइनीमी नु आं हुश तूनीमी, मेको गेना हना यो ब्रोंइशा बाक्चा ताइनीम। मारदे हना गो मेको कली नोले डा नाक्ती सेंपाइक्नुडमी। मत्ती २६:२६-२८

55 आं रां थमा जचा थोत्रक बाक्ब। आं हुश यो थम तूचा थोत्रक बाक्ब।

56 सुमी आं रां ब्वाइबा नु आं हुश तूबा, मेको आं आगाम बाक्ब। मिनु गो मेको आ आगाम बाक्नुड। यूहन्ना १५:४; १यूहन्ना ३:२४

57 दोपा ब्रोंइशा बाक्ब आं आफोमी आं कली सोइश्शा ब्रोंइपाइय्यी, मोपा आं रां ब्वाइब यो गो रे पा ब्रोंइचा ताइब।

58 मेको स्वर्ग रे यिशो शोब्ले बाक्ब। इन किकी पिपीमी शोब्ले जशा बेक्तेक्म। गो मेको खोदेशो शोब्ले मगनुड। सुमी चहिं आं शोब्ले जाइबा, मेको गेना हना यो ब्रोंइशा बाक्ब” दैत।

59 मेको लोत्र येसुमी कापेरनाउम सहर डा गुम्तीक खिंमी यहूदी आन कली शेंताक्ब।

गेना हना यो ब्रोंइचा गेब लोत्र

60 मिनु मेको लोत्र नेंशा, येसु आ शेंसीबपुकी शुशेमी “एको आं शेंशो कका पा कशो लोत्र बाक्त। सु नेंने चाप्बा डा?” दैमुम्तेक्म।

61 येसुमी चहिं “आं शेंसीबपुकीमी आं लोत्र आ पबंम गन गन पाम्तेक्म” दे तुइश्शा, मेको आन कली “मार, आं पशो लोत्र नेंशा, चुरशा आं कली प्रोंइनीनी?”

62 मिनु रागीमी जरमेशो आ डोंइती डा बाक्तीकेमी लेशो ताइतीनी हना, मार मिन्नीनी? लूका २४:५०-५१

63 परमप्रभु यावे आ सोक्त ब्रोंइचा गेब बाक्ब। मुरुम चहिं मारेइ पने मचाप्नीम। आं देशो लोत्र परमप्रभु यावे आ सोक्ती डा ब्रोंइचा गेब लोत्र बाक्ब।

64 तन्न गे का निकशी आं कली थमा मसुइक्ब बाक्नीनी” दैत। मारदे हना येसुमी डोंइती रे आ कली थमा मसुइक्ब सु सु नमी, दे तुइश्शो बाक्त। मिनु येसु आ शेंसीब का येसु कली साइक्ब आन कली वारच पाइब दुम्ब, दे यो तुइश्शो बाक्त।

65 मिनु येसुमी “आं आफोमी आं कली गेशो मुर ला आं गे पिने चाप्नीम, दे डोंइती रे माइक्तन्नी” दैत।

66 मिनु मोदेशो शेंशो आ पबंम शुशेमी येसु आ नोले खोइक्चा प्रोंइतेक्म।

67 मिनु येसुमी आ १२ जना शेंसीब आन कली “गेपुकी यो लाइनीनी?” दे हिल्लो पाप्तीमी।

68 मिनु सिमोन पत्रुसमी “प्रभु, गो सु का आ नोले खोइक्नीकी? गे गेना हना यो ब्रोंइशा बाक्चा डा लोत्र पाइनीनी।

69 गे परमप्रभु यावेमी योत्रशा सोइश्शो ननी, दे तुइश्शा थमा सुइक्नीकी” दैत। मत्ती १६:१६

70 मिनु येसुमी “गो गे १२ जना इन कली योत्रतन्नी। तन्न इन दातेमी सैतान का बाक्ब” दैत।

71 येसुमी मेको लोत्र इस्कारीयोत डा सिमोन आ तौ यहूदा आ पबंम देशो बाक्त। मारदे हना यहूदा मेको १२ जना आन दाते डा का दुम्शा यो येसु कली साइक्ब आन कली वारच पाइब दुम्त।

## 7

बाली ओंइतीक चाडम लशो

1 मिनु नोले येसु गालील रागीमी हिरना हिरन बाक्त। मारदे हना यहूदीपुकीमी येसु कली साइक्चा माल्तीके यहूदीया रागीमी लचा मदाकशो बाक्माक्त। यूहन्ना ४:४३

2 मिनु यहूदी आन बाली ओंइतीक चाड जाक्चशो बाक्त। लेवी २३:३४-३६

3 मिनु आ लोकबपुकीमी येसु कली “इ शेंसीब आन कली इ गेय कोंइचा कली यहूदीया रागी लावो। यूहन्ना २:१२; मत्ती १२:४६; प्रेरित १:१४

4 मुरपुकीमी इ कली तुइक्पांडसीचा दाक्नेवे हना, खुइश्शा गेय मपावो। इ पशो गेय मुर आन कली कोंइदीमी” दैतेक्म।

5 मारदे हना आ लोकबपुकीमी यो येसु कली थमा मसुइक्बाक्तेक्म।



- 6 मिनू येसुमी आ लोकब आन कली “मुल सम्म आं लची मजा। गेपुकी लने चाप्नीनी। यूहन्ना २:४  
 7 रागी डा मुरपुकीमी इन कली श्येत मगेनीम। आं कली चहिं श्येत गेनीम। मारदे हना गो मेको आन कली ‘आन पशो गेय मरिम्शो बाक्ब’ दे कोइनुडमी। यूहन्ना १५:१८  
 8 गे लने, गो मुल मलाइनुड। मुल आं लची मजा” दे माइक्तीमी।  
 9 मो देंशा येसु गालील रागीमी बाक्त।  
 10 मिनू येसु आ लोकबपुकी चाड मानेथ लाम्तेक्म। मिनू नोले येसु यो मुर आन मतचा डा पा यरूसलेम लत। यूहन्ना २:१३  
 11 मिनू चाडमी यहूदीपुकीमी येसु कली माल्शा “मेको ते बाक्मे” दे हिल्लो पाम्तेक्म।  
 12 मिनू मुरपुकीमी येसु आ पर्वम शुश खुडशशा लोत्र पमुम्तेक्म। का निक्शीमी “रिम्शो मुर बाक्ब” देंतेक्म। का निक्शीमी चहिं “ममाइ, मुर आन कली हेंथे गाक्पाइक्ब बाक्ब” देंतेक्म।  
 13 नेल्लेमी यहूदी आन क्येडा हिंशा, खुडशशो लोत्र पाम्तेक्म। यूहन्ना ९:२२; यूहन्ना १२:४२; यूहन्ना १९:३८

### येसु चाडम बाक्शो

- 14 मिनू बाली ओइतीक चाड डा नाक्त का येसुमी परमप्रभु यावे आ खिंमी लशा, मुर आन कली शेंताक्ब।  
 15 मिनू यहूदीपुकीमी छक लाक्शा “मेको गेनायो मशेंसीशो मुरुम यो दोपा इश डा जोक्गा?” देंमुम्तेक्म। मत्ती १३:५६  
 16 मिनू येसुमी मेको आन कली “आं शेंतीक आं के ममाइ, तन्न आं कली सोइक्ब के बाक्ब।  
 17 सु मुरुमी परमप्रभु यावे आ दाक्शो पाइबा, मेकोमी आं शेंतीके लोत्र परमप्रभु यावे के बाक्बा कों, आंम के बाक्बा, दे तुइक्ब।  
 18 सुम चहिं आंम लोत्र शेंबा, मेकोमी आंम कली ठेयब सेल्चा दाक्ब। आं कली सोइक्ब परमप्रभु यावे कली ठेयब सेल्चा दाक्ब चहिं थमा पा काइ पाप मपाइब बाक्ब। यूहन्ना ५:४१,४५  
 19 मोसामी इन कली परमप्रभु यावे आ अरेशो लोत्र गेशो बाक्त। मिनू गेपुकी मारदे मेको मपाइनीनी? मारदे आं कली साइक्चा माल्नीनी?” देंत। रोमी २:१७-२४; यूहन्ना ५:१६-१८  
 20 मिनू मुरपुकीमी “सुमी इन कली साइक्चा माल्बा? वोलमी इन कली सुम्शो बाक्तीके ‘गे आं कली साइक्चा माल्तीनी’ दे देनीनी” देंतेक्म। यूहन्ना १०:२०  
 21 येसुमी “गो गेय का पाता। गे मेको तशा, छक लाक्तीनी। यूहन्ना ५:१६  
 22 मोसामी इन कली ‘खोइक्तीक चिनु खोइक्चा माल्ब’ दे अरेशो लोत्र गेशो बाक्त। मेको मोसा आ अरेशो ममाइ, इं किकी पिपी आन अरेशो बाक्त। मिनू गेपुकीमी नाइक्तीक नाक्त खोइक्तीक चिनु खोइक्तीनी। उत्पत्ती १७:१०-१२; लेवी १२:३  
 23 मोसा आ गेशो अरेशो लोत्र टिचा कली नाइक्तीक नाक्त यो खोइक्तीक चिनु खोइक्तीनी। गो चहिं मुर का आ रां नेल्ल सापदुनु, गेपुकी मारदे गाइक्तीनी?  
 24 कुल कोव्रशा, निसाफ मपने। तन्न कुल मकोव्रथु निसाफ पने” दे माइक्तीमी।  
 25 मिनू यरूसलेम डा मुर का निक्शीमी “मुरुमी मेको कली साइक्चा माल्शो ममाइ?  
 26 मिनू एकेर बाक्शा, मुर नेल्ल आन कली शेंब। मेको कली मारेइ मदेनीमी। मिनू ठेयब मुरपुकीमी ‘एको ख्रीस्त बाक्त’ दे थमा पा तुइक्ताक्मे?  
 27 गोपुकीमी चहिं मेको मुर ते रे जाक्मे, दे तुइक्तीकी। तन्न ख्रीस्त जाक्त हना, ते रे जाक्बा, दे सुइमी मतुइक्तीम” दे देंमुम्तेक्म। हिब्रू ७:३  
 28 मोपतीके येसुमी परमप्रभु यावे आ खिंमी मुर आन कली ठेयब सेंदा पा “गेपुकीमी आं कली तुइक्तीनी। मिनू गो ते डा नड, मेको यो तुइक्तीनी? आंमा मिम्शा मजाक्ड। तन्न आं कली सोइक्ब थमा पा परमप्रभु यावे बाक्ब। मिनू गेपुकीमी मेको कली मतुइक्तीनी।

29 गो चहिं मेको कली तुडकुनुड। मारदे हना गो मेको आ बाक्तीक रे जाक्शो नड। मेकोम आं कली सोइक्ताक्यी” दे शेंताकमी। मत्ती ११:२७

30 मिनू यहूदीपुकीमी येसु कली ग्याइक्चा माल्तेकम। तन्न सुइमी मग्याइक्तेम। मारदे हना येसु कली ग्याइक्ची ना मजाक्शो बाक्त। यूहन्ना ८:२०; लूका २३:५२

31 मिनू शुश मुरपुकीमी मेको कली थमा सुइक्तेकम। मेकोपुकीमी “खीस्त अर्को बाक्त हना, मेकोमी एको क्येडा शुश छक लाक्चा डा गेय पने चाप्बा डा?” दैतेकम।

32 मिनू फरिसीपुकीमी मुर आन पशो लोत्र नेंशा, ठेयब चढेब नु फरिसीपुकीमी “येसु कली ग्याइक्चा” दे पिप आ गेय पाइब ठेयब मुर आन कली सोइक्ताकम।

33 मिनू येसुमी “गो गेपुकी नु इक्का नाक्ती सम्म बाक्नुड। मिनू नोले आं कली सोइक्ब आ बाक्तीकेमी लाइनुड। यूहन्ना १३:३३

34 मेना गेपुकीमी आं कली माल्नीनी। तन्न मथित्नीनी। गे आं बाक्तीकेमी जाक्ने मचाप्नीनी” दे माइक्तीमी। यूहन्ना ८:२१

35 मिनू यहूदीपुकीमी “एको ते लचा चिक्शो बाक्मे? मिनू गोपुकीमी एको कली मथित्नीकी? ग्रीस डा मुर आन बाक्तीक लशा, मेकेर ब्रशा बाक्शो यहूदी आन कली ममाइ, तन्न ग्रीस डा मुर आन कली शेंचा दाक्बा, को?”

36 आ देंशो ‘गेपुकीमी आं कली माल्नीनी, तन्न मथित्नीनी’ मिनू ‘आं बाक्तीकेमी जाक्ने मचाप्नीनी’ दे एको दोदेशो लोत्र पवा?” देंमुक्तेकम।

### यहूदीपुकी येसु आ पर्वम ब्राशो

37 मिनू बाली ओइतीक चाड नुप्ची नाक्त नेल्ल क्येडा ठेयब नाक्ती बाक्त। मेना येसुमी मुर आन कली “सु सुमी तूतू दाक्नीमी, मेको आं गे पिशा तूडमेकल। लेवी २३:३६; यूहन्ना ४:१०; यसैया ५५:१; प्रकाश २२:१७

38 सु सुमी आं कली थमा सुइक्नीमी, मेको आन रां रे ब्रोइचा गेब व्वाक्कु बुक्ब, दे परमप्रभु यावे आ लोत्रमी ब्रेक्शो बाक्ब” दे शेंताकमी। यसैया ५८:११; येरमीया ३१:१२

39 मेको आ शेंशो दोदेशो रुम्सीब देंशा हना, येसुमी परमप्रभु यावे आ सोक्त आ पर्वम शेंशो बाक्त। येसु कली थमा सुइक्बपुकीमी मेको सोक्त कली तचशो बाक्तेकम। तन्न मेना सम्म परमप्रभु यावे आ सोक्त थमा सुइक्ब आन कली मगेशो बाक्त। मारदे हना येसु आ आफ आ छेडछेडम लाइक्चा मपुंडसीशो बाक्त। यूहन्ना १६:१७

40 मिनू येसु आ शेंशो नेंशा, मुर का निक्शीमी “एकोन थमा परमप्रभु यावे आ लोत्र पाइब बाक्ब” दैतेकम। यूहन्ना ६:१४

41 का निक्शीमी “एकोन खीस्त बाक्त” दैतेकम। का निक्शीमी “खीस्त गालील रागी रे जाक्बा डा? यूहन्ना १:४६

42 परमप्रभु यावे आ लोत्रमी ‘खीस्त दाऊद आ खिं डा मुर रे नु दाऊद आ गाउं बेथलेहेम रे जाक्ब’ मदेंम डा?” दैतेकम। मत्ती २२:४२; मीका ५:१; मत्ती २:५-६

43 मोदुम्तीके मुरपुकी येसु आ पर्वम ब्रातेकम। यूहन्ना ९:१६

44 मिनू का निक्शीमी येसु कली ग्याइक्चा माल्तेकम। तन्न सुइमी मेको कली मग्याइक्तेम।

45 मिनू मेको पिप आ गेय पाइब ठेयब मुरपुकी ठेयब चढेब नु फरिसी आन बाक्तीक लेम्मा बाक्त। मिनू मेको आन कली “मारदे मेको कली मचाक्नी?” दे हिल्लो पामेनु,

46 “मेको मुरुम शेंशो खोदेशो पा सुइमी गेनायो मशेंदेम” देंमा बाक्त। मत्ती ७:२८-२९

47 मिनू फरिसीपुकीमी “इन कली यो हेंथे खोइक्पदा?”

48 ठेयब मुरपुकी नु फरिसीपुकीमी यो मेको कली थमा सुदमे?

49 तन्न परमप्रभु यावे आ अरेशो लोत्र मजोक्बपुकी सराप रशो बाक्नीम” दे हुइक्तेमे बाक्त।

50 मिनु डोंइती येसु आ बाक्तीक जाक्शो फरिसी आन हुल डा निकोदेमस माइशो मुरुमी यूहन्ना ३:१-२

51 “आंइ ऐन कानुनमी मुर आ पशो नेशा ला निसाफ पाइनीम, ममाइ?” दैत। ब्यवस्था १:१६

52 मेकोपुकीमी “गे यो गालील रागी डा नवे? परमप्रभु यावे आ लोत्र ब्रेक्शो किताब पडेशा कोत्रडो। गालील रे सुइ परमप्रभु यावे आ लोत्र पाइब मग्रूब, दे मतुइक्नेवे?” दैमा बाक्त।

53 मिनु नेल्ल छुल छाल बोक्शा, खिं लमा बाक्त।

## 8

### फरिसीपुकीमी येसु आ थुं थाम्शो

1 मिनु मेको नेल्ल खिं लमानु, येसु चहिं जैतून डांडा डोंइसाक्व।

2 आ दीसा सुनी कना यिशा, परमप्रभु यावे आ खिं लत। मिनु मुर नेल्ल येसु आ नेक्था जाक्तेकम। मिनु येसुमी निशशा, मुर आन कली शेंताकमी।

3 मिनु सास्त्री नु फरिसीपुकीमी येसु आ बाक्तीकेमी मीश मुर का चाक्तेकम। मेको मीश मुर ग्युंवे पशा यो अरु वोंइश नु इप्शो बाक्माक्त। मेको कली मुर आन दातेमी राप्पाइक्तेकम। सास्त्री यहूदी आन कली परमप्रभु यावे आ अरेशो लोत्र शेंब बाक्शो बाक्तेकम।

4 मिनु येसु कली “शेंब, एको मीश मुर ग्युंवे पशो बाक्त हना यो, अरु आ वोंइश नु इप्शा बाक्शो थित्चा पुंइसाक्व

5 मिनु परमप्रभु यावे आ अरेशो लोत्रमी मोसामी ‘मोदेशो पाइब कली फुल्लु आप्शा साइक्चा’ दे आंइ कली अरेशो बाक्त। गे मार देंनीनी?” दे हिल्लो पांमतेकम। लेवी २०:१०

6 मेकोपुकीमी येसु आ थुं थाम्शा, दोस गेचा कली मो दैतेकम। मिनु येसुमी बाप्शा, फुरक शाक्शा ब्रेक्ताक्व।

7 मेकोपुकीमी “एको मीश मुर कली मार पचा?” दे हिल्लो पना पन बाक्तेकम। येसुमी चहिं राप्शा, मेको आन कली “गेनायो पाप मपाइबमी डोंइती फुल्लु आबल” दैत। रोमी २:१

8 मिनु लेंशा बाप्शा, फुरक शाक्शा ब्रेक्ताक्व।

9 मिनु येसु आ लोत्र नेशा, दोस गेब मुर जोक्ब तुइक्ब खाल्पा रे का का पा नेल्ल लाम्तेकम। मिनु येसु नु मेको मीश मुर ला लीताक्स।

10 येसुमी नेल्ल लशो तशा, मीश मुर कली “इ कली चाक्बपुकी ते लमा? इ कली साइक्ब सुइ मलीमा?” दे हिल्लो पवानु

11 “प्रभु, सुइ मलीम” दैत। मिनु येसुमी “गे यो इ कली मसाइक्नुड। लावो, मिनु लेंशा पाप मपावो” देशा सोइक्ताक्व। यूहन्ना ५:१४

### येसु रागी डा छेडछेड

12 मिनु येसुमी लेंशा फरिसी आन कली “गे रागी कली छेडछेड नड। आं नोले खोइक्बपुकी गेनायो छिडछिडमी मगाक्नीम। ब्रोंइतीक छेडछेड ताइनीम” दैत। यूहन्ना १:५,९; यसेया ४९:६; यसेया ६०:२०; मत्ती ५:१४-१६

13 मिनु फरिसीपुकीमी येसु कली “गे इ पबंम आंमा लोत्र पाइनेवे। मोपतीके इ लोत्र थमा ममाइ” दैतेकम।

14 मिनु येसुमी मेको आन कली “गे आं पबंम आंमा लोत्र पाता हना यो, आं लोत्र थमा बाक्ब। मारदे हना ते रे जाक्डा, ते लाइनुडा, मेको तुइक्नुड। गेपुकी चहिं गो ते रे जाक्डा, ते लाइनुडा मतुइक्नीनी। यूहन्ना ५:३१; यूहन्ना ७:२८

15 मिनु गेपुकी मुर आन कुल कोत्रशा निसाफ पाइनीनी। गो चहिं सुइ आन कली निसाफ मपाइनुड। यूहन्ना ३:१७

16 गो निसाफ पाता हना यो, आं निसाफ ठीक बाक्ब। मारदे हना गो का ला दुम्शा निसाफ मपाइनुड। गो नु आं कली सोइक्ब आं आफोमी निसाफ पाइब।

17 इन ऐन कानुनमी यो 'मुर निक्शी आस देशो नेंशो लोत्र थमा दुम्ब' दे ब्रेकसीशो बाक्ब। ब्यवस्था १९:१५

18 गो आं पर्वम लोत्र पाइनुड। मिनु आं कली सोइक्ब आं आफोमी आं पर्वम लोत्र पाइब” दे माइक्तीमी।

19 मिनु मेकोपुकीमी येसु कली “इ आफ ते बाक्बा?” दे हिल्लो पाम्तेक्म। येसुमी “गेपुकीमी आं कली मतुइक्नीनी। आं आफ कली यो मतुइक्नीनी। आं कली तुइक्तीनी हना, आं आफ कली यो तुइक्तीनी वा” दे माइक्तीमी। यूहन्ना १४:७

20 येसुमी परमप्रभु यावे आ खिं डा शोप वोइक्तीक कोठा आ डोंइती बाक्शा, मोदेशो शेंशो बाक्त। परमप्रभु यावे आ खिंमी बाक्शा शेंशा यो, सुइमी मग्याइक्तेम। मारदे हना मेको कली ग्याइक्ची ना मजाक्शो बाक्त। यूहन्ना ७:३०

### आ आफोमी येसु कली सोइश्शो

21 मिनु येसुमी लेंशा यहूदी आन कली “गो लाइनुड, गे चहिं आं कली माल्नीनी। मिनु मरिम्शो पतीकेमी ग्रुम्शा बेक्नीनी। गे आं लतीकेमी जाक्ने मचाप्नीनी” देंत। यूहन्ना ७:३४-३५; यूहन्ना १३:३३

22 मिनु यहूदीपुकीमी “एकोमी आंम कली सांडसीबा, को? मारदे ‘आं लतीकेमी जाक्ने मचाप्नीनी’ देंबा” देंमुक्तेक्म।

23 मिनु येसुमी मेको आन कली “गेपुकी उइ डा ननी। गो चहिं इर डा नड। गेपुकी रागी डा ननी। गो चहिं रागी डा मनड। यूहन्ना ३:३१

24 मोपतीके गो इन कली ‘गे इन मरिम्शो पतीकेमी ग्रुम्शा बेक्नीनी’ देंती। गेपुकीमी ‘गो मरिम्शो गेय रे प्रोंइब ननी’ दे आं कली थमा मसुइक्तीनी हना, इन मरिम्शो पतीकेमी ग्रुम्शा बेक्नीनी” देंत। यसैया ४३:१०

25 मिनु यहूदीपुकीमी “गे सु नवे” दे हिल्लो पाम्तेक्म। येसुमी मेको आन कली “गो इन कली डोंइती रे मार देंडा? मारदे गो गेपुकी नु लोत्र पडा?

26 गो इन पर्वम शुश लोत्र पचा नु शुश निसाफ पचा माल्नुड। आं कली सोइक्ब आं आफ आ लोत्र थमा लोत्र बाक्ब। मेको आ लोत्र नेंशा, रागी डा मुर आन कली शेंनुड” देंत।

27 मिनु येसुमी आ आफ आ पर्वम लोत्र पाप्तु, दे मेकोपुकीमी मरुबेम।

28 येसुमी “गेपुकी रागीमी जरमेशो कली क्युक्नीनु, गो सु नडा, दे तुइक्नीनी। मिनु गो आंमा मिम्शो मारेइ मपाइनुड। तन्न आं आफोमी आं कली दोदेशो शेंदा, मोदेशो लोत्र इन कली शेंनुड। यूहन्ना ३:१४; यूहन्ना १२:३२

29 मिनु आं कली सोइक्ब गो नु बाक्ब। आं कली गेनायो मप्रोंइब। मारदे हना गो आ दाक्शो गेय ला पाइनुड” दे मुर आन कली देंत।

### थमा पा प्रोंइशो मुर

30 एको लोत्र नेंशा, शुश मुरुमी येसु कली थमा सुइक्तेक्म।

31 मिनु येसुमी आ कली थमा सुइक्ब यहूदी आन कली “गेपुकी आं देशो पना पन बाक्तीनी हना, थमा पा आं शेंसीब ननी। यूहन्ना १५:७

32 थमा माइश्शो सु बाक्मे, दे तुइक्नीनी। मिनु थमा माइश्शोमी इन कली प्रोंइब” दे येसुमी देंत।

33 मेकोपुकीमी “गो अब्राहाम आ चच युइ नकी। मुल सम्म गो सुइ आन वाइलीम वाइल मदुम्शो बाक्तक। मारदे ‘थमा माइश्शोमी इन कली प्रोंइब’ देंनीनी?” दे हिल्लो पाम्तेक्म। मत्ती ३:९

34 येसुमी “नोफा दाइश्शा नेनीन, सु सुमी पाप पाइनीमी, मेको पाप आ वाइलीम वाइल बाक्नीम।

35 वाइलीम वाइल खिं डा मुर मबाक्नीम, तौ चहिं खिं डा मुर बाक्ब।

36 मिनु तौमी इन कली प्रोंइतु हना, गेपुकी थमा पा प्रोंइसीशो मुर दुम्नीनी” देंत। रोमी ६:१६,१८,२२

### अब्राहाम आ आल नु सैतान आ आल

37 मिनू येसुमी “गेपुकी अब्राहाम आ चच युड ननी, दे गो तुडक्नुड। मोपा यो गे आं कली साडक्चा माल्नीनी। मारदे हना आं लोत्र नेंशा यो, थमा मसुडक्नीनी।

38 गो आं आफ आ पशो तशा, शेंनुड। गेपुकीमी चहिं इन आफ आ देशो नेंशा, मार मार पाइनीनी” दे माडक्तीमी।

39 मेकोपुकीमी “गो आंड आफ अब्राहाम बाक्ब” देंमानु, येसुमी “गेपुकी अब्राहाम आ चच युड ननी हना, अब्राहाम आ पशो गेय खोदेशो पनी वा।

40 गो परमप्रभु यावेमी देशो नेंशा, इन कली शेंथ जाक्शो बाक्ती हना यो, गेपुकीमी आं कली साडक्चा माल्नीनी। अब्राहाममी इन खोदेशो गेय गेनायो मपव।

41 गेपुकीमी चहिं इन आफ आ पशो गेय खोदेशो पाइनीनी” दे माडक्तीमी। मेकोपुकीमी “गेपुकी मुर आन तौ मनकी। गोपुकी आंड के आफ का बाक्ब। मेको चहिं परमप्रभु यावे बाक्ब” देंतेक्म।

42 मिनू येसुमी “परमप्रभु यावे इन आफ बाक्त हना, गेपुकी आं कली दाक्तीनी वा। मारदे हना गो परमप्रभु यावे रे रागीमी जाक्ती। गो आंमा जाक्शो मनड। तन्न आं आफोमी सोडक्ताक्यी।

43 आं देशो लोत्र मारदे मरुप्नीनी? गे आं लोत्र नेंशा, फाल्ने मचाप्नीनी। १कोरिन्थी २:१४

44 इन आफ सैतान बाक्ब। मिनू गे इन आफ आ दाक्शो पचा दाक्नीनी। मेको चहिं डोंडती रे मुर आन कली साडक्ब नु जोल पाइब बाक्त। मारदे हना मेको नु थमा देशो बाक्सीन मबा। मोपतीके जोल ला पाइब। मेको जोल पना पन बाक्ब। जोल आ आफ बाक्त। १यूहन्ना ३८-१०; उत्पत्ती ३:४,१९

45 गे आं कली थमा मसुडक्नीनी। मारदे हना गो थमा लोत्र पाइनुड।

46 गेपुकीमी आं कली ‘गे मरिम्शो पाइब नवे’ दे दोसी सेल्ने चाप्नीनी डा? गो थमा लोत्र पाता हना, मारदे आं कली थमा मसुडक्नीनी? २कोरिन्थी ५:२१; १पत्रुस २:२२; १यूहन्ना ३:५; हिलू ४:१५

47 सु चहिं परमप्रभु यावे रे जाक्बा, मेको परमप्रभु यावे आ लोत्र नेंब। गेपुकी परमप्रभु यावे रे मजाक्नी। मोपतीके परमप्रभु यावे आ लोत्र नेंने मचाप्नीनी” दे माडक्तीमी। यूहन्ना १८:३७

48 मिनू यहूदीपुकीमी “गे सामरीया डा बाक्ते। गे वोल्मी सुम्शो बाक्ते, दे थमा लोत्र मपका डा?” देंतेक्म। यूहन्ना ७:२०

49 येसुमी “आं कली वोल्मी मसुम्यी। गो आं आफ कली मान पाइनुड। गे चहिं आं कली मान मपथु आडक्च सेल्नीनी।

50 गो आंम कली ठेयब मसेल्सीनुड। आं कली ठेयब सेल्ब का बाक्ब। मेको ठीक निसाफ पाइब यो बाक्ब” देंत।

51 मिनू येसुमी “नोफा दाइशशा नेनीन, सुमी आं देशो लोत्र टीबा, मेको गेनायो मबेक्ब” देंत। यूहन्ना ६:४०,४७

52 मिनू यहूदीपुकीमी “गे वोल्मी सुम्शो बाक्ते, दे गो मुल तुडक्ताक्क। अब्राहाम नु परमप्रभु यावे आ लोत्र पाइबपुकी बेक्तेक्म। गे चहिं ‘सुमी आं देशो टीबा, मेको गेनायो मबेक्ब’ देंते।

53 आंड किकी पिपी अब्राहाम बेक्माक्त। गे मेको क्येडा ठेयब नवे? मिनू परमप्रभु यावे आ लोत्र पाइब यो बेक्मा बाक्त। गे सु नवे डा?” देंतेक्म।

54 येसुमी “गो ठेयब सेल्साक्यी हना, गो ठेयब मदुम्नुड। आं आफोमी चहिं आं कली ठेयब सेल्ब। गे आं आफ कली ‘आंड परमप्रभु यावे’ देंनीनी। यसेया ६३:१६

55 गेपुकीमी मेको कली मतुडक्नीनी। तन्न गो तुडक्नुड। गो ‘मेको कली मतुडक्नुड’ देंती हना, इन खोदेशो जोल पाइब दुम्नुड। तन्न गो मेको कली तुडक्नुड। मिनू आ शेंशो पाइनुड। यूहन्ना ७:२८-२९

56 इन किकी पिपी अब्राहाममी आं नाक्त जाक्शो तचा दाक्शो बाक्माक्त। मिनू आं जाक्शो तशा ग्येरसाक्व” दे येसुमी देंत।

57 मिनू यहूदीपुकीमी “गे मुल सम्म ५० बर्स मजाक्दीशशो बाक्ते। मिनू अब्राहाम कली तशो बाक्नेवे डा?” देंतेक्म।

58 मिनू येसुमी “नोफा दाइशशा नेनीन, गो अब्राहाम क्येडा डोंडती रे बाक्शो नड” देंत। यूहन्ना १:१२

59 मिनू यहूदीपुकीमी “फुल्लु आप्शा साइक्चा” दे फुल्लु गुप्तेकम। तन्न येसु खुंडसाक्व। मिनू परमप्रभु यावे आ खि रे ग्रूशा गाक्त। यूहन्ना १०:३१

## 9

मिक्च मताइब कली सापाइश्शो

- 1 मिनू येसु लना लन बाकमेनु, जरमेशो रेन मिक्च मताइब मुर का ग्रुम्तु।
- 2 मिनू आ शेंसीबपुकीमी येसु कली “शेंब, मारदे मेको मिक्च मताइब जरमेशो बाकमे? मेकोमी पाप पवा देय आ आम आफोमी पाप पाम्से?” दे हिल्लो पाम्तेकम। लूका १३:२
- 3 मिनू येसुमी “एको मुरुमी पाप पशो ममाइ, आ आम आफोमी यो मपाम्से। तन्न परमप्रभु यावे आ गेय कौइचा कली एको मिक्च मताइब दुम्शो जरमेशो बाक्त। यूहन्ना ११:४
- 4 मिनू गोपुकीमी आं कली सोइक्ब आ गेय नाक्ती पचा मालनय। नां रिक्मेनु, सुइमी गेय पने मचाप्नीम। यूहन्ना ५:१७; येरमीया १३:१६
- 5 गो रागीमी बाक्डानु, रागी कली छेडछेड नड” देंत। यूहन्ना ८:१२; यूहन्ना १२:१५
- 6 मो देंशा येसुमी खपीमी तोक्शा, नाक्चुक नु खप निशा, मेको मुर आ मिक्चीमी खेक्ताक्व। मर्कूस ८:३३
- 7 मिनू मिक्च मताइब कली “सिलो आ डा दोम्लीम लशा चिक्सो” दे माइक्तु। सिलोआ देशो चहिं सोइश्शो, दे रुम्सीब। मिनू मेको लशा चिक्से बाक्त। मिनू मिक्च ताइब दुम्शा, लेशशा जाक्त।

सापाइश्शो मुर नु यहूदीपुकी

- 8 मिनू आ गाउं डा मुर नु मिक्च मताइब पुंडब मुर दे तुइक्बपुकीमी “मिक्च मताइब पुंडब एको ममाइ डा?” देंतेकम।
- 9 का निक्शीमी “मेकोन बाक्त” देंतेकम। का निक्शीमी चहिं “ममाइ, मेको खोदेशो बाक्त” देंतेकम। आ चहिं “गो मेकोन नड, शां” देंत।
- 10 मुरपुकीमी “दोपा मिक्च ताइब दुमे, मिनू?” दे हिल्लो पाम्तेकम।
- 11 मेकोमी “येसु माइश्शोमी खप निशा, आं मिक्चीम खेक्ताक्यी। मिनू ‘सिलोआ डा दोम्लीम लशा चिक्सो’ दे माइक्ती। मिनू गो दोम्ली लशा चिक्सीडानु, मिक्च ताइब दुम्ती” दे माइक्तीमी।
- 12 मिनू “येसु माइश्शो ते बाकमे” दे हिल्लो पामेनु “डाद, ते लमे, गो मतुइक्नुड” दे माइक्तीमी।
- 13 मिनू आ मिक्च साशो मुर कली फरिसी आन बाक्तीक चाक्दीत्तेकम।
- 14 येसुमी खप निशा, आ मिक्चीमी खेक्शा सापाइश्शो नाक्त चहिं नाइक्तीक नाक्त बाक्त।
- 15 मोपतीके फरिसीपुकीमी यो लेंशा मेको कली “दोपा मिक्च ताइब दुमे?” दे हिल्लो पाम्तेकम। मिनू “खप निशा, आं मिक्चीमी खेक्ताक्यी। मिनू गो चिक्शा, मुल मिक्च ताइब दुम्ती” दे माइक्तीमी।
- 16 फरिसी का निक्शीमी “परमप्रभु यावे आ सोइश्शो ममाइ। मारदे हना नाइक्तीक नाक्त ममानेब” देंतेकम। का निक्शीमी चहिं “पापी मुरुमी दोपा ओदेशो छक लाक्चा डा गेय पने चाप्बा डा?” देंतेकम। मिनू मेकोपुकी ब्रातेकम।
- 17 मिनू फरिसीपुकीमी लेंशा आ मिक्च साशो कली “मिनू इ कली मिक्च ताइब सेल्ब आ पर्बम मार देंनेवे?” दे हिल्लो पाम्तेकम। मिनू मेकोमी “परमप्रभु यावे आ लोत्र पाइब बाक्त” देंत।
- 18 यहूदीपुकीमी “मेको मुर डौंइती मिक्च मताइब बाक्त” दे थमा मसुदेम। मोपतीके मेको आ आम आफ आस कली ब्रेत्ताकम।
- 19 मिनू मेको आस कली “एको इस तौ ममाइ? डौंइती मिक्च मताइब जरमेसाक्व देंतीसी? मुल दोपा तने चबा?” दे हिल्लो पाम्तेकम।
- 20 मिनू आम आफोमी “आंस तौ बाक्ब। मिनू मिक्च मताइब जरमेसाक्व।
- 21 मुल दोपा मिक्च ताइब दुम्मे, गो मतुइक्नस्कु। सुम ताइब सेला, मेको यो मतुइक्नस्कु। आ कली हिल्लो पने। आल ममाइ, आमान देंने चाप्ब” देंताकस।

22 आ आम आफोमी यहूदी आन क्येडा हिंशा मो देंताक्स। मारदे हिंसा देंशा हना, यहूदीपुकीमी “सुम सापाइक्व कली ख्रीस्त दे थमा सुइक्वा, मेको कली यहूदी आन गुम्टीक खिं रे तिल्चा” दे सल्ला पशो बाक्तेकम। यूहन्ना ७:१३; यूहन्ना १२:४२

23 मोपतीके “आल ममाइ। आ कली हिल्लो पने” देंशो बाक्ताक्स।

24 मिनु मिक्च ताइब दुम्लो कली लेंशा ब्रेशा “परमप्रभु यावे कली मान पावो। इ कली मिक्च तपाइक्व पापी बाक्माकत, दे तुइक्नीकी” देंतेकम।

25 आ मिक्च साशो मुरुमी “मेको पापी बाक्म कों, मबाक्म, गो मतुइक्नुड। डोंइती मिक्च मताइब बाक्ती, मुल ताइब दुम्टी, मेको ला तुइक्नुड” दे माइक्तीमी।

26 मिनु मेकोपुकीमी “मेकोमी इ कली मार पवा? दोपा इ मिक्च ताइब सेला?” दे हिल्लो पामेनु

27 “गो ना कना माइक्तन्नी। गेपुकी चहिं मनेनीनी। मारदे लेंशा नेंचा दाक्नीनी? गेपुकी यो मेको आ शेंसीब दुम्ला दाक्नीनी?” दे माइक्तीमी।

28 मिनु “गे मेको आ शेंसीब नवे। गोपुकी चहिं मोसा आ शेंसीब नकी।

29 परमप्रभु यावेमी मोसा कली लोव्र पशो बाक्त, दे तुइक्नीकी। तन्न मेको मुर ते रे जाक्मे, दे गो मतुइक्नीकी” दे हुइक्ताकम।

30 मिनु आ मिक्च साशो मुरुमी “गो इन कली तशा, छक लाक्ती। आं मिक्च सापाइक्वु हना यो, मेको ते रे जाक्मे, दे गेपुकीमी मतुइक्नीनी?

31 परमप्रभु यावेमी पापी आन लोव्र मनेब, दे गोपुकीमी तुइक्नय। तन्न सुमी परमप्रभु यावे कली मान पशा, आ दाक्शो पाइबा, परमप्रभु यावेमी मेको कली आ पुंइशो गेब। भजन संग्रह ६६:१८; यसेया १:१५; हितोपदेस १५:२९

32 मिनु रागी सेल्चा गोशो रे जरमेशो रे मिक्च मताइब मुर मिक्च ताइब सेल्शो, दे गेनायो मनेंय।

33 मेको परमप्रभु यावे आ सोइश्शो मबाक्त हना, छक लाक्चा डा गेय पने मचाप्ब वा” देंत।

34 मिनु “गे पापी जरमेशो बाक्ते। आंइ कली मार शेंनेवे?” दे हुइश्शा, मेको कली गुंइताकम।

### सापाइश्शो मुर नु येसु

35 मिनु येसुमी मेको कली यहूदी आन गुम्टीक खिं रे तिल्लेकम देंशो नेंशा, मेको कली गुम्टा “गे रागीमी जरमेशो कली थमा सुइक्नेवे?” दे हिल्लो पाप्नु।

36 मेकोमी “प्रभु, मेको सु बाक्मे, गो मेको कली थमा सुइक्नुड” देंत।

37 मिनु येसुमी “गे मेको कली तशो बाक्ते। गे नु लोव्र पाइब मेकोन बाक्त” देंमेनु, यूहन्ना ४:२६

38 “प्रभु, गो थमा सुइक्नुड” देंशा, पोक्च थेक्शा, येसु कली ठेयब सेल्लु।

39 येसुमी “गो निसाफ पचा कली रागीमी जाक्ती। मिक्च मताइबपुकीमी तामेक्ल। मिक्च ताइब चहिं मताइब दुम्मल” देंत। मती १३:११-१५

40 येसु आ नेक्था बाक्ब फरिसी का निकशीमी आ लोव्र नेंशा, येसु कली “गोपुकी मिक्च मताइब दुम्टीकी?” देंमानु,

41 येसुमी “गेपुकी मिक्च मताइब नकी देंतीनी हना, पाप मरनी वा। तन्न गोपुकी मिक्च ताइब नकी देंतीनी। मोपतीके पाप राइनीनी” दे माइक्तीमी। यूहन्ना १५:२२

## 10

### रिम्शो भेडा गोठला

1 मिनु येसुमी लेंशा मेको आन कली “नोफा दाइश्शा नेनीन, सु सु भेडा गोठ आ लाप्यो रे मओवनीमी। बार रे डोइश्शा ओवनीमी, मेकोपुकी खुइ नु रोइक्ब नम।

2 सु लाप्यो रे ओव्रबा, मेको भेडा गोठला बाक्ब।

3 गोठला जाक्मेनु, लाप्यो खाल पाइबमी मेको कली लाप्यो रोक्ब। भेडापुकीमी गोठला आ सेंदा नेंनीम। गोठलामी आंम भेडा आन नें थिशा ब्रेशा, गोठ रे गुंइब।

4 मिनू नेल्ल आन कली गुंडशा, भेडा आन डोंडती गाकब। भेडापुकीमी गोठला आ नोले खोडकनीम। मारदे हना आ सेंदा तुडकनीम।

5 सेंदा मतुडशो मुर आ नोले मखोडकनीम। मेको कली तशा प्रोकनीम। मारदे हना आ सेंदा मतुडकनीम” दे येसुमी शेंताकमी।

6 येसुमी मुर आन कली मेको कथा शेंशो बाकत। तन्न मार लोव्र शेंशो बाकमे, मेकोपुकीमी मरुप्शो बाकतेकम।

7 येसुमी लेंशा मेको आन कली “नोफा दाइशशा नेनीन, गो भेडा गोठ डा लापचो नड।

8 सु सु आं डोंडती जाकमा, मेको नेल्ल खुड नु रोडकब नम। मिनू भेडापुकीमी मेको आन लोव्र मटीनीमी।

9 गो लापचो नड। सु सु मेको लापचो रे ओव्रनीमी, मेकोपुकी श्येत रे ब्रोंडनीम। मिनू रिम्शो घांस बाक्तीकेमी लशा, जोचा ताडनीम। यूहन्ना १४:६

10 खुडमी दा खुड पथ, साडकथ नु प्रेत्य ला जाकब। गो चहिं भेडा आन कली ब्रोंडचा गेशा, ग्येरसीशा बाकमल, दे जाक्ती” दे शेंताकव।

11 मिनू येसुमी “गो रिम्शो गोठला नड। रिम्शो गोठला भेडा आन पा डा साडकचा पुंडसीब। भजन संग्रह २३:-; यसैया ४०:११; इजीकीएल ३४:११-२३; यूहन्ना १५:१३; हिब्रू १३:२०

12 मिनू खिं डा गोठला मबाकथु, वोइशशो गोठला बाकत हना, मेकोमी भेडापुकी रिम्शो पा मकोव्रब। मारदे हना मेको आ भेडा मनमी। फर पिशो तशा, भेडा आन कली प्रोंडशा, प्रोकब। फरमी चहिं भेडा आन कली ग्याइशशा साव सुव ब्रपाडकब।

13 मिनू मेको वोइशशो गोठला प्रोकब। मारदे हना भेडा आडकके मनम, मोपतीके रिम्शो पा मकोव्रब।

14 गो रिम्शो गोठला नड। दोपा गो आं भेडा आन कली तुडकनुडमी, मोपा मेकोपुकीमी आं कली तुडकनीम। रतिमोथी २:१९

15 दोपा आं आफोमी आं कली तुडकबा, मोपा गो आं आफ कली तुडकनुड। मिनू भेडा आन पा डा गो साडकचा पुंडसीनुड।

16 मेको गोठ डा ला ममाइ, अरु गोठ डा भेडा यो आं के बाक्नीमी। गो मेको आन कली यो चाकचा मालनुड। मेकोपुकीमी आं सेंदा नेंशा, आं कली टीनीमी। मोपा गोठला का नु बगाल का दुम्ब। यूहन्ना ११:५२; प्रेरित १०:३४-३५

17 मेको आन साडकचा पुंडसीचा डा गो साडकचा पुंडसीनुड। मोपतीके आं आफोमी आं कली दाकब, मिनू आं कली बेकशो रे सेंब।

18 गो साडकचा मपुंडसाक्यी हना, सुडमी आं कली साडकने मचाप्नीम। गो आं के साडकचा पुंडसीतीके अधिकार बाकब। मिनू बेकशो रे सेंसीचा अधिकार यो बाकब। मेको अधिकार निम्फा आं आफोमी गेती” दे शेंताकव। यूहन्ना ५:२६

19 येसु आ लोव्र नेंशा, यहूदीपुकी लेंशा ब्रातेकम। यूहन्ना ७:४३; यूहन्ना ९:१६

20 शुश यहूदीपुकीमी “एको वोलमी सुम्शा गशो बाकत। मारदे आ लोव्र नेंनीनी?” दैतेकम। यूहन्ना ७:२०; मर्कूस ३:२१

21 का निक्शीमी चहिं “एको आ लोव्र वोलमी सुम्शो मुर आ पशो खोदेंशो मनेंसीब। वोलमी मिक्च मताइब मुर आ मिक्च तपाडकने चाप्बा डा?” दैतेकम।

यहूदीपुकीम येसु कली खेदा पशो

22 मिनू यरूसलेममी परमप्रभु यावे आ खिं डा डोंडती ओव्रतीक चाड जाकशो बाकत।

23 मिनू मेको हिउंदम बाकत। मिनू येसु परमप्रभु यावे आ खिं डा पिप सोलोमन आ सेल्शो लाडगामी हिरना हिरन बाकत। प्रेरित ३:११

24 यहूदीपुकी येसु आ एर ओथ देल्शा “गेना आंड कली ठीक लोव्र पाडनीनी? गे ख्रीस्त ननी हना, लोव्र महिरथु, थमा पा देनीन” दैतेकम।



25 येसुमी “गो इन कली देंती। तन्न गेपुकीमी थमा मसुइक्नी। गो आं आफ आ गेय पाइनुड। मेको गेयमी ‘गो परमप्रभु यावे आ सोइश्शो नड’ दे इन कली तुइक्पाइक्ब। यूहन्ना ५:३६

26 गेपुकीमी चहिं आं कली थमा मसुइक्नीनी। मारदे हना गे आं गोठ डा भेडा मननी। यूहन्ना ८:४५-४७

27 गो आं भेडा आन कली तुइक्नुडमी। मिनु मेकोपुकीमी आं सेंदा नेंशा आं नोले खोइक्नीमी। भजन संग्रह ९:५:१७

28 गो मेको आन कली परमप्रभु यावे नु गेना हना यो ब्रोंइशा बाक्चा गेनुडमी। मेको नरकम मलाइनीम। सुइमी आं गुइ रे रोइश्शा, लाइक्ने मचाप्नीम।

29 आं आफोमी मेको आन कली गेती। आं आफ नेल्ल क्येडा ठेयब सक्ति पाइश्शो बाक्ब। मोपतीके आं आफ आ गुइ रे सुइमी रोइक्ने मचाप्नीम।

30 गो नु आं आफ उइक्थ उइक्थ नस्कु” देंत।

### येसु कली दोस गेशो

31 मिनु यहूदीपुकीमी लेंशा येसु कली साइक्चा, दे फुल्लु गुप्तेक्म। यूहन्ना ८:४९

32 मिनु येसुमी “गो इन कली आं आफोमी पशो रिम्शो गेय कौइताक्नी। तेको गेय आ पर्वम आं कली फुल्लु आप्शा साइक्चा मालनी?” देंत।

33 यहूदीपुकीमी “रिम्शो गेय पतीक आ पर्वम इ कली फुल्लु मआप्नीकी। तन्न परमप्रभु यावे आ पर्वम मरिम्शो लोव्र पतीके इ कली फुल्लु आप्चाइतक। गे मुर दुम्शा यो, परमप्रभु यावे नु उइक्थ नड देंनेवे” देंतेक्म। मत्ती ९:३; मत्ती २६:६५; यूहन्ना ५:१८

34 येसुमी “परमप्रभु यावे आ लोव्र ब्रेक्शो किताबमी ‘गे नेल्ल परमप्रभु यावे आ तमी तौ ननी’ मदेबा डा? भजन संग्रह ८२:६

35 परमप्रभु यावेमी आ लोव्र नेंब आन कली आ तमी तौ देंब। मिनु मेको किताब डा लोव्र मक्याम्सीब। मत्ती ५:१७

36 परमप्रभु यावेमी आं कली रागीमी सोइक्चा कली ठीक सेल्लु। गेपुकीमी चहिं “परमप्रभु यावे आ पर्वम मरिम्शो लोव्र देंनेवे” देंनीनी। मारदे हना ‘गो परमप्रभु यावे आ तौ नड’ देंती। यूहन्ना ५:१७-२०

37 गो आं आफ आ गेय मपाता हना, आं कली थमा मसुतीन।

38 तन्न गो आं आफ आ गेय पाइनुड हना, गेपुकी आं कली थमा मसुइक्नीनी। आं पशो गेय परमप्रभु यावे के बाक्त, दे थमा सुतीन। मिनु गो आं आफ नु बाक्नुड। आं आफ गो नु बाक्ब, दे रुपीन” दे येसुमी यहूदी आन कली माइक्तीमी।

39 मेकोपुकीमी येसु कली ग्याइक्चा माल्लेक्म। तन्न मेको आन दाते रे गूशा गाक्त। यूहन्ना ८:५९; लूका ४:३०

40 येसु लेंशा यर्दन खोला आइक्ची हांबु लशा बाक्माक्त। डोंइती मेकेर यूहन्नामी ब्वाक्कुमी खुम्शा गुंडतीक गेय पशो बाक्माक्त। यूहन्ना १:२८

41 आ नेक्था जाक्शा, शुश मुरपुकीमी “यूहन्नामी छक लाक्चा डा गेय मपव। तन्न मेको मुर आ पर्वम मार मार देंमे, मेको नेल्ल थमा बाक्माक्त” देंमुक्तेक्म।

42 मिनु शुश मुरुमी येसु कली थमा सुइक्तेक्म।

## 11

### येसुमी लाजरस कली सेंशो

1 बेथानी गाउंमी लाजरस माइश्शो रोइ पशो मुर का बाक्त। मेको के समी निकशी बाक्शो बाक्ताक्स। मेको आस नें मरीयम नु मारथा बाक्ताक्स। लूका १०:३८-३९

2 मरीयम सु बाक्त देंशा हना, येसु आ खोइलीमी ब्रोंवशो रिना पाइश्शो तेल खेक्शा, आ चांमी फिक्ब बाक्त। मेको आस लोक्ब लाजरस रोइ पशो बाक्त। यूहन्ना १२:३

- 3 मिनु मेको समी निक्शीमी मुर का कली येसु आ बाक्तीक सोइश्शा “प्रभु, इन दाक्शो वारच रोइ पाप्तु” दे येसु कली ब्रेप्पत्से बाक्त।
- 4 मिनु येसुमी “मेको रोइ बेक्चा डा रोइ ममाइ, तन्न परमप्रभु यावे आ सक्ति कोंइचा कली बाक्ब। मिनु मुरपुकीमी मेको रोइ आ परबम परमप्रभु यावे आ तौ कली ठेयब सेल्नीमी” देत। यूहन्ना ९:३
- 5 येसुमी मारथा नु मरीयम वोबु नु आस लोकब लाजरस आन कली दाक्शो बाक्माक्त।
- 6 मोपतीके लाजरस रोइ पाप्तु देशो नेंशा, आन बाक्तीक लचा, नाक्त निक्शी सम्म रिम्ताक्व।
- 7 मिनु नोले येसुमी आ शेंसीब आन कली “लो, लेंशा यहूदीया रागी लय” देत।
- 8 आ शेंसीबपुकीमी “शेंब, यहूदीपुकीमी इन कली फुल्लु आप्शा हेरा साइक्तेक्मे। मिनु गे मुल लेंशा मेकेर लचा दाक्नीनी?” दे हिल्लो पाम्तेक्म। यूहन्ना १०:३१
- 9 मिनु येसुमी “काबु नाक्तीम १२ घन्टा बाक्बा, ममाइ? सु सु चहिं नाक्ती गाक्नीमी, मेको दाइल मपांडसीनीम, मारदे हना छेडछेडमी लां ताइनीम। यूहन्ना ९:४-५
- 10 सु सु चहिं नाक्दो गाक्नीमी, मेकोपुकी दाइल पांडसीनीम, मारदे हना मेको छेडछेडमी मबाक्नीम” देत। यूहन्ना १२:३५
- 11 मो देशा आ शेंसीब आन कली “इं वारच लाजरस इप्त। गो चहिं मेको कली सेनुड” देत। मती ९:२४
- 12 आ शेंसीबपुकीमी “प्रभु, इप्त हना, आ रोइ साब” देतेक्म।
- 13 येसुमी चहिं लाजरस आ बेक्चा आ परबम लोत्र पशो बाक्त। आ शेंसीबपुकीमी “नाइक्चा कली इप्त” दे मिम्ताक्म।
- 14 मिनु येसुमी लोत्र महिरथु “लाजरस बेक्ने थुम्तु।
- 15 गो मेकेर मबाक्ड। मोपतीके गो ग्येरसीनुड। मारदे हना गेपुकीमी थमा सुइक्ने चाप्नीनी। मुल गोपुकी बेथानी लय” देत।
- 16 आ याइनी नें जौले, थोमास माइश्शो शेंसीब का बाक्त। मेकोमी अरु शेंसीब आन कली “गोपुकी यो मेको नु बेक्थ लय” देत। यूहन्ना २०:२४-२८

### लाजरस कली सेंपाइश्शो

- 17 मिनु येसु बेथानी जाक्दीम्मेनु, मेकेर डा मुरपुकीमी “लाजरस बेक्शो ४ नाक्त दुम्त। मेको कली बेक्शो मुर वोइक्तीक कोठामी वोइक्तेक्म” दे येसु कली देतेक्म।
- 18 बेथानी गाउं यरूसलेम आ नेक्था बाक्शो बाक्ब। बेथानी रे यरूसलेम सम्म १५ स्तादीयोन डा लां बाक्ब। स्तादीयोन का १८५ मिटर बाक्ब।
- 19 मिनु यरूसलेम डा शुश यहूदीपुकीमी मारथा नु मरीयम आस लोकब बेक्शो आ परबमी “सुर्ता मपाम्सेक्ल” दे लेम्चा कली जाक्मा बाक्त।
- 20 मिनु मारथामी “येसु पिन पिन बाक्ब” देशो नेंशा, येसु कली गुम्थ जाक्त। मरीयम चहिं खिंमीन बाक्माक्त।
- 21 मिनु मारथामी येसु कली “प्रभु, एक बाक्शो ननी हना, आंस लोकब मबे वा।
- 22 तन्न मुल यो परमप्रभु यावे कली पुंडतीनी हना, परमप्रभु यावेमी इन पुंडशो गेब, दे तुइक्नुड” दे माइक्तु।
- 23 मिनु येसुमी “इ लोकब सेंसीब” देत। यूहन्ना ५:२८-२९; यूहन्ना ६:४०; मती २२:२३-३३
- 24 मिनु मारथामी “नोले डा नाक्ती आंस लोकब सेंसीब दे गो तुइक्नुड” देत।
- 25 मिनु येसुमी “गो सेंपाइक्ब नु ब्रोंइपाइक्ब नड। आं कली थमा सुइक्ब बेक्तेक्म हना यो, सेंसीनीम।
- 26 सु ब्रोंइबा, मिनु आं कली थमा सुइक्बा, मेको गेनायो मबेक्ब। एको लोत्र थमा सुइक्नेवे?” दे हिल्लो पाप्तु। यूहन्ना ८:५१
- 27 मिनु मारथामी “प्रभु, गे रागीमी जाक्शो परमप्रभु यावे आ तौ, ख्रीस्त ननी, दे गो थमा सुइक्नुड” देत। मती १६:१६

28 मोदेशा मारथा खिं लेशशा, मरीयम कली “शेंब जाकशो बाकत। मिनु इ कली ब्रेत्ताकव” दे मुर आन मनेंचा डा पा मदा बाकत।

29 मिनु मरीयम मेको नेशा, छुल बोक्शा, येसु कली गुमथ लमाकत।

30 मेना येसु मारथा गुमतीक उड बाकशो बाकत। आस गाउं मजाकदीशशो बाकमाकत।

31 मिनु मरीयम आ खिंम लेमथ जाकब यहूदीपुकीमी मरीयम कली छुल बोक्शा लशो तशा, आ नोले खोदमे बाकत। मारदे हना मेकोपुकीमी “मरीयम तुरसुम डाकथ लाडबा, को” दे मिमशो बाकमा बाकत।

32 मिनु मरीयम येसु आ बाकतीक जाकदीशशा, येसु आ खोइलीम बाप्शा “प्रभु, एक बाकशो ननी हना, आंस लोकब मबे वा” देत।

33 मिनु येसुमी मेको कली नु में नु जाकशो यहूदी आन कली डाकशो तशा, येसु आ थुं खाडकत। यूहन्ना १३:२१

34 मिनु “गे मेको कली ते चोडकनी?” दे हिल्लो पवानु “प्रभु, कोव्रथ पिने” देतेकम।

35 मिनु येसु यो डाकत।

36 यहूदीपुकीमी येसु कली डाकशो तशा “कोव्रडीन, येसुमी मेको कली यो शुश दाकशो बाकमाकत” देतेकम।

37 का निकशीमी “मिक्च मताडब मुर सापाडकबमी मेको कली बेक्चा मगेथु, सापाडकने मारदे मचाप्बा?” देमुम्तेकम। यूहन्ना ९:७

38 मिनु येसु आ थुं लेशा खाडशशा, बेक्शो मुर वोडकतीक कोठा आ नेक्था जाकदीत। मेको पुक्खी खोदेशो बाकत। मेको पुक्खी चोक्चा, दे आ डोंइती फुल्लु का थारशो बाकत। मती २७:६०

39 मिनु येसुमी “फुल्लु तिलीन” देत। मिनु बेक्शो मुर आ समी मारथामी “प्रभु, मुल दा एको रिना पाडब। मारदे हना आ बेक्शो ४ नाक्ती दुम्त” देत।

40 मिनु येसुमी “गे थमा सुडकतीवी हना, गे परमप्रभु यावे आ सक्ति ताइनेवे, दे इ कली ममाडकना डा?” देत।

41 मिनु मुरपुकीमी पुक्खी आ डोंइती थारशो फुल्लु तिल्लेकम। मिनु येसुमी सरीड गे कोव्रशा “आं आफ, गे आं लोव्र नेतीनी, गो ग्येरसाक्यी।

42 गे आं देशो गेना हना यो नेनीनी, दे तुडकनुड। मिनु आं एर ओंथ बाकशो मुरपुकीमी गेमी आं कली सोडशशो ननी, दे थमा सुडकपाडकचा कली एको लोव्र पाता” देत। यूहन्ना १२:३०

43 मिनु मो देशा, ठेयब सेंदा पा येसुमी “ए, लाजरस, गूडो” दे ब्रेत्ताकव।

44 मिनु मेको डोंइती बेक्शो मुर येसु आ ब्रेशो नेशा, आ गुड खोडल आ रां नेल्ल वामी गिल्लीशा गूत। आ कुल यो रुमालमी फ्रेशो तशा, येसुमी “गिल्लो वासी पुडशशा, लचा गेने” दे मुर आन कली माडकतीमी।

### येसु कली साडकचा माल्शो

45 मरीयम कली लेमथ जाकशो शुश यहूदीमी मो दुमशो तशा, येसु कली थमा सुडकतेकम।

46 का निकशी चहिं फरिसी आन कली गुमथ लशा, येसु आ पशो शोव्रडमे बाकत।

47 मो दुमशा ठेयब चढेब नु फरिसीपुकी बुक्शा “मुल मार पय? मारदे हना मेको मुरुमी शुश छक लाकचा डा गेय पाडबाकत। मती २६:३-४

48 मेको कली मो पचा गेथय हना, नेल्लेमी मेको कली थमा सुडकनीम। मिनु रोमीपुकीमी परमप्रभु यावे आ खिं नु इस्त्राएल रागी निम्फा खतम सेलनीम” दे लोव्र पामे बाकत।

49 मेकोपुकी नु काइयाफास माडशशो मुर का बाकमाकत। मेको बर्स डा नेल्ल क्येडा ठेयब चढेब बाकमाकत।

50 मिनु मेकोमी “गे मारेड मतुडकनीनी। गो नेल्ल रागी खतम दुमचा क्येडा, मुर का कली साडकचा रिमशो बाकब” देमाकत। यूहन्ना १८:१४

51 काइयाफासमी आंम मिमशो मदे, तन्न मेको बर्स डा नेल्ल क्येडा ठेयब चढेब दुमशा “इस्त्राएल रागी डा मुर आन पा डा येसु साडकचा पुंडसीब” दे नोले दुम्ब लोव्र पशो बाकत।

52 इस्राएल रागी डा मुर आन कली ला ममाइ, तन्न ब्रशा बाक्शो परमप्रभु यावे आ तमी तौ नेल्ल आन कली काथा दुम्पाइक्चा, दे येसु साइक्चा पुंडसीब दुम्त। यूहन्ना ७:३५; यूहन्ना १०:१६; १यूहन्ना २:२

53 मिनु मेको नाक्त रे येसु कली दोपा साइक्चा, दे सल्ला पामे बाक्त।

54 मोपतीके येसु यहूदीपुकी नु मबाक्थु, गोरशो रागी आ नेक्थान एफ्राइम सहर लत। मिनु मेकेर आ शेंसीबपुकी नु बाक्त। २सामुएल १३:२३

55 मिनु यहूदी आन पास्सा चाड जाक्चशो बाक्त। पहाड डा शुश मुरपुकी आंम कली ठीक सेल्चा, दे पास्सा चाड आ डोंइती यरूसलेम लाइबाक्मा बाक्त। २इतिहास ३०:१७-१८

56 मेकेर जाक्दीशशा, परमप्रभु यावे आ खिंमी बाक्शा “गे मार मिन्नीनी? येसु पास्सा चाडम जाक्बा देय मजाक्बा” दे हिल्लो पमुशा, येसु कली माल्मे बाक्त।

57 मिनु ठेयब चढेब नु फरिसीपुकीमी “सुमी येसु ते बाक्बा, दे तुइक्ता, मेकोमी आंइ कली यो तुइक्पदल” दे मुर आन कली देंशो बाक्मा बाक्त। मोपा येसु कली ग्याइक्चा माल्मे बाक्त।

## 12

### मरीयममी येसु कली तेल खेक्शो

1 यहूदी आन पास्सा चाड जाक्चा ६ नाक्त डोंइती येसु बेथानी गाउं जाक्दीत्त। मेकेर येसुमी लाजरस कली बेक्शो रे सेंपाइशो बाक्त। यूहन्ना ११:१,४३

2 लाजरस आ खिंमी येसु नु आ शेंसीब आन कली थुल्चा ठीक पशो बाक्तेक्म। मारथामी जचा थोव्रक योक्तु। लाजरस येसु नु काथा बाक्शो बाक्त।

3 मिनु मरीयममी मार पाप्तु देंशा हना, लित्रा का शुश क्येट लाइक्ब ब्रोव्रशो रिना पाइशो तेल येसु आ खोइलीमी खेक्ताक्व। मिनु आ चांमी फिक्ताक्व। मो पशा खिं गा नेल्ल ब्रोव्रशो रिना पपाइक्तु। लित्रा का ३२७ ग्राम खोदेंशो बाक्ब। लूका ७:३८

4 मेकेर येसु आ शेंसीब इस्कारीयोत डा यहूदा यो बाक्त। मेको नोले येसु कली साइक्ब आन कली वारच पाइब दुम्बाक्माक्त।

5 मेकोमी “मारदे सहे सां देनारमी मेको तेल लेयशा, पुडग आन कली मयोक्गा?” दे लोव्र पाप्तु। देनार का नाक्त का डा गाल्च बाक्त।

6 यहूदामी पुडग आन कली शिशी पा मिम्शा ममाइ, तन्न क्येट कुरशा, क्येट खुइ पना पन बाक्बाक्माक्त। यूहन्ना १३:२९

7 मिनु येसुमी यहूदा कली “मरीयममी आं बेक्चा डोंइती तेल खेक्ताक्यी। एको कली श्येत मगेवो।

8 पुडगपुकी दा गेपुकी नु गेना हना यो बाक्नीम। गो चहिं गेपुकी नु शुश नाक्त मबाक्नुड” दे माइक्तु।

9 मिनु शुश यहूदीपुकीमी येसु मेकेर बाक्त, दे तुइशशा, येसु आ पर्बम ला ममाइ, येसुमी बेक्शो रे सेंपाइशो लाजरस कली यो कोव्रचा, दे जाक्तेक्म।

10 ठेयब चढेबपुकीमी “लाजरस कली यो साइक्चा” दे सल्ला पामे बाक्त।

11 मारदे हना मेको आ पर्बम शुशेमी यहूदी आन शेंतीक प्रोंइशा, येसु कली थमा सुइक्तेक्म।

### येसु यरूसलेम सहर ओव्रशो

मत्ती २१:१-११; मर्कूस ११:१-१०; लूका १९:२९-४०

12 मिनु आ दीसा शुश मुरुमी “येसु पास्सा नाक्त यरूसलेममी जाक्ब” देंशो नेन्मे बाक्त।

13 मिनु खजूर रवा आ सफा शेशा, येसु कली गुम्थ जाक्तेक्म। मेकोपुकीमी “होसन्ना, परमप्रभु आ नेमी जाक्ब इस्राएली आन पिप आसीक रशो बाक्ब” दे ग्येरशा, ग्रीना ग्रीन येसु कली गुम्थ जाक्तेक्म। होसन्ना आ देंशो “परमप्रभु वारच पने” बाक्ब। भजन संग्रह ११८:२५-२६

14 मिनु येसुमी गधा आ चाइक्ब का डोंइसाक्व। परमप्रभु यावे आ ब्रेक्पाइशो किताबमी

15 “सियोन डा मुर, महिनीन। कोव्रडीन, इन पिप गधा डोइशशा पिना पिन बाक्ब” दे ब्रेक्शो बाक्त। जकरिया ९:९

16 येसु आ शेंसीबपुकीमी डोंइती मेको लोत्र मरुप्शो बाक्तेकम। तन्न येसु स्वर्ग लशा नोले ला “मेको लोत्र येसु आ परबम ब्रेकशो बाक्ताकत। दोदेशो ब्रेकशो बाक्मे, मोदेशो दुम्त” दे रुप्शो बाक्तेकम।

17 मेको “होसन्ना” दे ग्रीबपुकी सु बाक्मा बाक्त देंशा हना, येसुमी लाजरस बेकशो रे सेंपाइश्शो ताइब बाक्मा बाक्त। मिनु मेकोपुकीमी मुर आन कली लाजरस सेंसीशो आ परबमी तुइक्पाइक्तेकम।

18 मोपतीके मेकोपुकी येसु कली गुम्थ जाक्तेकम।

19 मिनु फरिसीपुकीमी “गोपुकी मारेइ पने मचाप्नय। कोत्रडीन, मुर नेल्ल मेको आ नोले खोइक्नीम” देंमुतेकम। यूहन्ना ११:४८

ग्रीस डा मुर येसु कली गुम्थ जाक्शो

20 मिनु पास्सा नाक्ती परमप्रभु यावे कली मान पचा कली का निकशी ग्रीस रागी डा मुर यो जाक्शो बाक्तेकम।

21 मेकोपुकी फिलीप माइश्शो शेंसीब नु लोत्र पचा कली जाक्तेकम। फिलीप चहिं गालील रागी डा बेथसैदा सहर डा बाक्त। मिनु मेको ग्रीस रागी डा मुरपुकीमी “प्रभु, गोपुकी येसु कली गुम्था दाक्नीकी” देंतेकम। यूहन्ना १:४४

22 फिलीपमी मेको आन लोत्र नेंशा, अन्द्रीयास कली माइक्तु। मिनु अन्द्रीयास नु फिलीपमी येसु कली “ग्रीस रागी डा मुरपुकी इन कली गुम्थ जाक्तेकम” दे माइक्ताकस।

23 मिनु येसुमी “मुल रागीमी जरमेशो परमप्रभु यावे आ बाक्तीक लाइब। मिनु ठेयब सेल्चा पुंडसीब।

24 नोफा दाइश्शा नेनीन, चेरब गेडा खपीमी शोक्शा मराक्त हना, मेको मोशा लीब। तन्न शोक्शा राक्त हना, शुश ग्रेल्ब। रोमी १४:९; १कोरिन्थी १५:३६

25 सुमी आंम दला दाक्स पाइबा, मेको गेना हना यो ब्रोंइशा बाक्चा मताइब। सुमी चहिं रागीमी बाक्शा, आंम कली ममिम्थु, परमप्रभु यावे आ देशो टीबा, मेको गेना हना यो ब्रोंइशा बाक्चा ताइब। मत्ती १०:३९; मत्ती १६:२५; लूका १७:३३

26 सुमी आं गेय पाइबा, आं देशो यो पचा माल्बा, मेको आं बाक्तीकेमी बाक्चा ताइब। आं आफोमी आं गेय पाइब आन कली ठेयब सेल्ब” देंत। यूहन्ना १७:२४

येसुम आ बेक्चा आ परबम शेंशो

27 मिनु येसुमी “मुल आं थुं खाइक्ती। गो मार देंनुडा, आफ, आं कली मोपा साइक्चा रे प्रोंइयी, दे पुंडनुडा डा? गो साइक्चा पुंडसीचा कली रागीमी जाक्ती। मत्ती २६:३८

28 आं आफ, इन सक्ति कोइदीन” दे येसुमी देंत। मिनु सरीड रे “गो आं सक्ति कोइताकड। लेंशा चिनु कोइनुड” देशो सेंदा का नेंसाक्व। यूहन्ना १३:३१; मत्ती ३:१७; मत्ती १७:५

29 मिनु मेकेर बाक्शो मुरपुकीमी मेको सेंदा नेंशा “बुंबु पाप्तु” देंतेकम। का निकशीमी “परमप्रभु यावे आ स्वर्ग डा गेय पाइब कामी मेको कली लोत्र पाप्तु” देंतेकम।

30 मिनु येसुमी “मेको लोत्र आं कली देशो ममाइ, इन कली देशो बाक्ब। यूहन्ना ११:४२

31 मुल रागी नेल्ल डा मुर आन कली निसाफ पची नाक्त जाक्त। मुल रागी कली हुकुम पाइब कली तिल्लीम। यूहन्ना १४:३०; यूहन्ना १६:११; लूका १०:१८

32 गो क्युक्शा साइक्चा पुंडसीशा, मुर नेल्ल आन कली आं गे कीनुडमी” देंत। यूहन्ना ८:२८

33 येसुमी दोपा साइक्चा पुंडसीचा चिक्शो बाक्नुड, दे तुइक्पाइक्चा कली मो देंत।

34 मिनु मुरपुकीमी येसु कली “परमप्रभु यावे आ लोत्र ब्रेकशो किताबमी ‘ख्रीस्त गेनायो मबेक्थु बाक्ब’ देशो नेंतक। गे चहिं ‘रागीमी जरमेशो क्युक्शा साइक्चा पुंडसीब’ देंनीनी। मिनु मेको रागीमी जरमेशो चहिं सु बाक्म?” दे हिल्लो पाम्तेकम। भजन संग्रह ११०:४; दानीएल ७:१४

35 मिनु येसुमी मेको मुर आन कली “मेको छेडछेड माइश्शो का गेपुकी नु इक्का नाक्त सम्म बाक्ब। छेडछेड बाक्म सम्म गाक्कीन। छेडछेडमी मगाक्तीनी हना, छिडछिडमी गाक्चा माल्लीनी। सु छिडछिडमी गाक्बा, मेको ते लाइबा मतुइक्ब।

36 छेडछेड माइशो का बाक्म सम्म मेको कली थमा सुतीन। मो पाइतीनी हना, छेडछेड माइशो आ तमी तौ दुम्नीनी” देत। मिनू येसुमी मेको लोव पशा, मेकेर रे गाक्शा खुंडसाक्व। एफिसी ५:८

यसैयाम यहूदी आन पर्वम ब्रेक्शो

37 मिनू येसुमी मुर आन डोंइती शुश छक लाक्चा डा गेय पाप्तु हना यो, मेकोपुकीम येसु कली थमा मसुदेम।

38 मोपा यसैया माइशो परमप्रभु यावे आ लोव पाइब आ ब्रेक्शो लोव थमा दुम्त। मार ब्रेक्शो बाक्त देशा हना “प्रभु, आंइ देशो लोव सुम थमा सुदा डा? इन पशो गेय सुम तुइक्ता डा?” दे ब्रेक्शो बाक्त यसैया ५३:१

39 मोपतीके सुडमी थमा सुइक्ने मचबेम। यसैया ६:९, १०

40 मिनू यसैयामी “परमप्रभु यावेमी मेको आन कली मिक्च मताइब सेलतीमी। मोपा परमप्रभु यावे कली मतुइक्नीम। मेको आन कली मटीब सेलतीमी। मोपा मेकोपुकीमी परमप्रभु यावे आ लोव रुम्ने मचबेम। मिनू परमप्रभु यावे कली ‘आं कली सापतीन’ दे मपुंडनीम” दे यो यसैयामी ब्रेक्शो बाक्त। मती १३:१४-१५

41 मारदे हना यसैयामी येसु ख्रीस्त आ छेडछेड डा सक्ति ततीके येसु आ पर्वम लोव पशा ब्रेक्शो बाक्त। यसैया ६:१

42 ठेयब मुर शुशेमी येसु कली थमा सुइक्तेक्म। मेकोपुकीमी “फरिसीपुकीमी आंइ कली यहूदी आन गुम्तीक खिं रे तिल्लीम” दे हिंशा, अरु आन कली “गो थमा सुइक्ब दुम्तक” दे मंदेम। यूहन्ना ९:२२

43 मारदे हना मेकोपुकीमी “आंइ पर्वमी मुरपुकीमी मार देंनीमी” दे परमप्रभु यावे क्येडा मुरपुकी तशा हिंतेक्म। यूहन्ना ५:४४

येसुम परमप्रभु आ शेंशो ला पाइब

44 मिनू येसुमी ठेयब सेंदा पशा “आं कली थमा सुइक्बमी आन थमा सुइशो आं कली ला ममाइ, तन्न आं कली सोइक्ब कली यो थमा सुइशो नम।

45 मिनू सुम आं कली ताइबा, मेकोमी आं कली सोइक्ब कली यो ताइब। यूहन्ना १४:९

46 रागी डा मुर आन कली परमप्रभु यावे आ पर्वम तुइक्पाइक्चा कली गो रागी कली छेडछेड दुम्शा जाक्ती। मोपतीके सुम आं कली थमा सुइक्बा, मेको छिडछिडमी मबाक्ब।

47 मिनू सु सुमी आं देशो लोव नेंशा यो मपाइनीमी, गो मेको आन कली निसाफ मपाइनुड। मारदे हना गो रागी डा मुर आन कली निसाफ पचा कली जाक्शो मनड। तन्न रागी डा मुर आन कली पाप रे प्रोंइचा कली जाक्शो नड। यूहन्ना ३:१७; लूका ९:५६

48 सुम आं कली मब्रथु, आं देशो लोव मपाइबा, मेको कली निसाफ पाइब का बाक्ब। मेको निसाफ पाइब सु बाक्ब देशा हना, आं देशो लोव बाक्ब। एको लोवमी मेको कली नोले डा नाक्ती निसाफ पाइब।

49 आं कली सोइक्ब आं आफोमी गो मार देंचा नु शेंचा माल्नुडा, मेको नेल्ल माइक्ती। मोपतीके मेको आं लोव ममाइ। आं आफ आ लोव बाक्ब।

50 मेको आ देशो लोव मार बाक्ब देशा हना, गेना हना यो ब्रोंइशा बाक्चा गेब लोव बाक्ब। मेको आं आफोमी आं कली देशो लोव बाक्ब। मोपतीके आं पशो लोव आं आफोमी आं कली डोंइती देशो लोव बाक्ब” दे येसुमी मुर आन कली माइक्तीमी।

## 13

येसुम आ शेंसीब आन खोइल चिक्शो

1 येसुमी पाससा चाड डोंइती “मुल रागी रे आं आफ आ बाक्तीक लची नाक्त जाक्त” दे तुइक्ताक्व। मिनू येसुमी नेल्ल क्येडा नोले डा नाक्त सम्म रागीमी बाक्शो आ मुर आन कली दाक्शो बाक्त। यूहन्ना ७:३०; यूहन्ना १७:१

2 मिनू येसु नु आ शेंसीबपुकी नाकदो डा खमे जना जन बाकशो बाकतेकम। आ शेंसीब सिमोन आ तौ इस्कारीयोती डा यहूदा यो बाकशो बाकत। सैतानमी “येसु कली साइकचा मालब आन कली वारच पावो” दे यहूदा कली मिम्पाइशो बाकत। लूका २२:३

3 मिनू येसुमी “आं आफोमी आं कली नेल्ल सक्ति गेती। गो परमप्रभु यावे रे जाकशो नड। मिनू परमप्रभु यावे आ बाक्तीके लेत्नुड” दे तुइशशा, यूहन्ना ३:२५; यूहन्ना १६:२८

4 येसु बोक्शा, आ तार फेक्शो रिम्शो वा पुइशशा, वा कामी गिल्साकव।

5 मिनू चिक्तीकेमी ब्वाक्कु कुर पा, आ शेंसीब आन खोइल चिक्ताकमी। चिक्शा डा मिन आ गिल्सीशो वाम् फिक्ताकमी।

6 मिनू सिमोन पत्रुस आ पालो जाकमेनु, मेकोमी येसु कली “प्रभु, गेमी आं खोइल चिक्चा दुम्बा डा?” देंत।

7 मिनू येसुमी “मुल आं पशो मरुप्नेवे। गे नोले ला रुप्नेवे” देंत।

8 पत्रुसमी “गो आं खोइल चिक्चा काइ मगेनुड” देंत। मिनू येसुमी “गो इ खोइल मचिक्ताकन हना, गे आं मुर मनवे” दे माइक्तु।

9 मिनू सिमोन पत्रुसमी “प्रभु, आं खोइल ला ममाइ, आं गुइ पिया यो चिक्तीनी” देंत।

10 येसुमी “चिक्शो मुर आन कली लेंशा चिक्चा ममाल्ब। खोइल ला चिक्चा माल्ब। खोइल चिक्शोनु, नेल्ल रिम्शो दुम्ब। गेपुकी चिक्सीशो दुम्तीनी। काइ मचिक्सीशो गेपुकी नु का बाकब” देंत। यूहन्ना १५:३

11 येसुमी आ कली साइकब आन कली वारच पाइब कली तुइशशा मो देंत।

12 मिनू येसुमी आन खोइल चिक्चे थुम्शा, आ डोंइती पुइशशो फेक्तीक फेक्शा, आ बाक्तीक लत। मिनू शेंसीब आन कली “इन कली पशो गेय आ अर्थ मार बाक्बा, गे तुइक्नीनी?”

13 गेपुकीमी आं कली शेंब नु प्रभु देंनीनी। मेको ठीक देंतीनी। मारदे हना गो मेकोन नड। मत्ती २८:८, १०

14 गो प्रभु नु शेंब दुम्शा यो इन खोइल चिक्ताकन्नी। गेपुकीमी यो इन खोइल चिक्मुचा माल्नीनी। लूका २२:२७

15 गो इन खोइल चिक्ताकन्नी। मिनू गेपुकी आं खोदेशो पने। फिलिप्पी; १पत्रुस २:२१

16 मिनू नोफा दाइशशा नेनीन, खिं डा होव्रप क्येडा वाइल टेयब ममाइ। मिनू सोइशशो मुर सोइकब क्येडा टेयब यो ममाइ।

17 गेपुकी आं देशो लोत्र तुइशशा पाइतीनी हना, गे आसीक रशा ग्येरसीशो मुर दुम्नीनी” दे येसुमी देंत। मत्ती ७:२४

यहूदा आ पर्वम लोत्र पशो

मत्ती २६:२१-२५; मर्कूस १४:१८-२१; लूका २२:२१-२३

18 मिनू येसुमी “गो नेल्ल इन पर्वम लोत्र मपाइनुड। आं योत्रशो आन कली तुइक्नुड। परमप्रभु यावे आ ब्रेक्पाइशशो लोत्रमी मार ब्रेक्शो बाक्ब देशा हना ‘आं शोब्ले जाइबमी आं कली साइकचा कली आ खोइल क्युक्तु’ दे ब्रेक्शो बाक्ब। मुल मोदेशो दुम्चा चिक्ताकव। भजन संग्रह ४१:९

19 मोदेशो दुम्चा डोंइती तुइक्पाइक्तन्नी। मिनू मो दुम्मेनु, गो मेकोन बाक्डा बाकत, दे तुइक्नीनी। मिनू आं कली थमा सुइक्नीनी।

20 नोफा दाइशशा नेनीन। सुमी आं सोइशशो कली ब्राइबा, मेकोमी आं कली ब्राइब। मिनू सुमी आं कली ब्राइबा, मेकोमी आं कली सोइकब कली यो ब्राइब” देंत। मत्ती १०:४०

21 मिनू येसुमी मेको लोत्र पशा आ थुं खाइक्त। मिनू “नोफा दाइशशा नेनीन। गेपुकी नु का बाक्ब। मेकोमी आं कली साइकब आन कली वारच पाइब” दे आ थुं खाइशशा देंत। यूहन्ना १२:२७

22 मिनू येसु आ शेंसीबपुकीमी “सु आ पर्वम देशो बाक्मे?” दे मतुइक्थ कोत्रमुम्तेकम।

23 येसु आ नेल्ल क्येडा दाक्शो शेंसीब येसु आ नेक्था बाकत। यूहन्ना १९:२६; यूहन्ना २०:२; यूहन्ना २१:२०

24 मिनु सिमोन पत्रुसमी मेको कली “सु आ परबम लोत्र पवा, हिल्लो पावो। मिनु आंइ कली देनो” देंत।

25 मिनु येसु आ नेक्था बाक्शो शेंसीबमी “प्रभु, मेको सु बाक्मे?” दे येसु कली हिल्लो पाप्तु।

26 मिनु येसुमी “गो एको शोब्ले शेक्कुमी तेप्शा सु कली जचा गेडा, मेकोन बाक्ब” देंशा, येसुमी शोब्ले शेक्कुमी तेप्शा, सिमोन आ तौ इस्कारीयोत डा यहूदा कली गेप्तु।

27 यहूदामी शोब्ले ताक्तु। मेना सैतान आ थुमी ओव्रत। मिनु येसुमी यहूदा कली “इ मिम्शो पावो” देंत।

28 शेंसीबपुकीमी येसुमी यहूदा कली मारदे मोदेशो देंमे, दे मतुइक्तेम।

29 का निक्शीमी “यहूदामी क्येट आ थैली कुरशो बाक्ब। मिनु येसुमी मेको कली पास्सा नाक्त कली ‘मार मार मालनया, मेको ग्यापथ लावो, दे मदा कौ, प्रुडग आन कली क्येट योक्शा गेवो’ दे मदा कौ?” दे मिम्ताकम।

30 यहूदा शोब्ले ताक्शा, छुल बोक्शा लत। मेना छिडछिड दुम्शो बाक्त।

येसुम नक अरेशो लोत्र शेंशो

यूहन्ना १३:३१-१६:३३

31 मिनु यहूदा लम नोले येसुमी “मुल रागीमी जरमेशोमी सक्ति ताप्तु। मिनु मुरपुकीमी रागीमी जरमेशो आ पतीक तशा, परमप्रभु यावे कली ठेयब सेल्नीमी। यूहन्ना १२:२३,२८

32 मिनु परमप्रभु यावेमी रागीमी जरमेशो कली आंम आ सक्ति गेशा, ठेयब सेल्ब। एको मुल दुम्चा चिक्शो बाक्त। यूहन्ना १७:१-५

33 आं आइक्च आलपुकी, गो इन कली शुश दाक्ताक्ड हना यो, गो गेपुकी नु शुश बाक्चा मताइनुड। गेपुकी आं कली मालनीनी। मिनु गो यहूदी आन कली ‘आं लतीकेमी गेपुकी जाक्ने मचाप्नीनी’ देंशो खोदेशो, गो इन कली यो मो देंनुड। यूहन्ना ८:२१

34 मिनु इन कली नक अरेशो लोत्र का पाइनुड। मार लोत्र पाइनुड देंशा हना, गेपुकी दाक्मुने। गोम इन कली दाक्शो खोदेशो पा गेपुकी यो दाक्मुने। यूहन्ना १५:१२,१३,१७

35 दाक्मुशो तशा, मुर नेल्लेमी ‘गेपुकी आं शेंसीब ननी’ दे तुइक्नीम” दे येसुमी देंत।

येसुम पत्रुस कली लोत्र पशो

मत्ती २६:३३-३५; मर्कूस १४:२९-३१; लूका २२:३१-३४

36 मिनु सिमोन पत्रुसमी येसु कली “प्रभु, ते लाइनीनी?” दे हिल्लो पाप्तु। येसुमी “गो ते लाइनुडा, मुल गे आं नोले खोइक्ने मचाप्नेवे। तन्न नोले खोइक्नेवे” देंत। यूहन्ना २१:१८-१९

37 मिनु पत्रुसमी “प्रभु, मारदे इन कली मुल नोले खोइक्ने मचाप्नुडा डा? इन साइक्चा पुंइसीचा डा साइक्चा पुंइसाक्ड हना यो, गो बेक्नुड” देंत।

38 मिनु येसुमी “मार आं साइक्चा पुंइसीचा डा साइक्चा पुंइसीनेवे? इ नोफा दाइशशा नेनो, भाले ग्रीचा क्येडा डॉइती गेमी खेयप सां आं कली मतुइक्नुड, दे देंनेवे” दे माइक्तु।

## 14

येसु परमप्रभु नु गुम्पाइक्ब लां बाक्ब

1 मिनु येसुमी आ शेंसीब आन कली “इन थुं ग्येत्थ लुक्च मपने। परमप्रभु यावे कली थमा सुतीन। आं कली यो थमा सुइय्यीनी।

2 आं आफ बाक्तीकेम शुश मुर आन कली बाक्तीक सेल्शो बाक्नीम। मोपतीके इन बाक्तीक ठीक पथ लाइनुड।

3 मिनु इन बाक्तीक ठीक पशा, लेंशा जाक्शा आं बाक्तीक लाइक्नन्नी। मिनु गो नु काथा बाक्नीनी। यूहन्ना १२:२६; यूहन्ना १७:२४

4 मिनु आं लतीक लां तुइक्नीनी” देंत।



5 मिनु थोमासमी येसु कली “प्रभु, गे ते लाइनीनी? गो मतुइक्नीकी। मिनु लां दोपा तुइक्नीकी?” दैत।

6 मिनु येसुमी “गो थमा नु ब्रोंइचा गेब लां नड। सुइ आन पतीक गेना हना यो आं आफ नु बाक्चा मताइनीम। तन्न आं पतीके रे ला गेना हना यो परमप्रभु यावे नु बाक्चा ताइनीम। यूहन्ना १०:९; मत्ती ११:२७; रोमी ५:१-२; हिब्रू १०:२०

7 गेपुकी आं कली तुइक्ताक्नी हना, आं आफ कली यो तुइक्नीनी। मुल रे गेपुकी आं आफ कली तुइश्शा ताइनीनी” दैत।

8 मिनु फिलीपमी “प्रभु, इन आफ आंइ कली कोंइदीन। मिनु ग्येरनीकी” दैत।

9 मिनु येसुमी “गो नु शुश बाक्शा यो, गे आं कली मतुइक्नेवे, फिलीप? सुमी आं कली तयी, मेकोमी आं आफ कली यो ताप्तु। मारदे ‘इन आफ कोंइदीन’ देनेवे? यूहन्ना १२:४५; हिब्रू १:३

10 गो आं आफ आगामी बाक्नुड। मिनु आं आफ आं आगामी बाक्ब, दे थमा मसुइक्नेवे? आं देशो लोत्र आं के ममाइ, आं आफ आ लोत्र बाक्ब। आं आगामी बाक्शो आं आफोमी गेय पाइब। यूहन्ना १२:४९

11 गो आं आफ आ आगामी बाक्नुड। आं आफ आं आगामी बाक्ब, दे थमा सुतीन। आं लोत्र नेंशा, थमा सुइक्ने मचाप्नीनी हना, आं पशो तशा थमा सुतीन। यूहन्ना १०:२५,३८

12 मिनु नोफा दाइश्शा नेनीन, सुमी आं कली थमा सुइक्बा, मेकोमी आं पशो गेय यो पाइब। मिनु आं क्येडा ठेयब गेय पाइब। मारदे हना गो आं आफ आ बाक्तीक लाइनुड। मत्ती २८:१९

13 मिनु गेपुकी आं नेंमी मार मार पुंइनीनु, गो गेनन्नी। गो इन पुंइशो गेशा, गो, आं पतीके आं आफ आ सक्ति कोंइनुड। यूहन्ना १५:७; यूहन्ना १६:२४; मर्कूस ११:२४; १यूहन्ना ५:१४-१५

14 आं नेंमी मार मार पुंइनीनी, गो मेको गेनन्नी।

### परमप्रभु आ सोक्त आ पबर्म शेंशो

15 गेपुकी आं कली दाक्ताक्नी हना, आं अरेशो पाइनीनी। यूहन्ना १५:१०; १यूहन्ना ५:३

16 गेपुकी नु काथा बाक्शा, वारच पाइब का सोइक्चा, दे आं आफ कली पुंइनुड। मेको गेपुकी नु गेना हना यो मप्रोंइथु बाक्ब। यूहन्ना १५:२६; यूहन्ना १६:७

17 मेको वारच पाइब थमा डा सोक्त बाक्ब। आं कली थमा मसुइक्बपुकीमी मेको सोक्त ताक्ने मचाप्नीम। मारदे हना मेकोपुकीमी मेको सोक्त कली मतुइक्नीम। गेपुकी चहिं मेको कली तुइक्नीनी। मारदे हना मेको गेपुकी नु बाक्ब। मिनु इन आगामी बाक्ब। यूहन्ना १६:२३

18 गो इन कली रोम रोइक्च खोदेशो पा मवोइक्नन्नी। इन बाक्तीके जाक्नुड।

19 इच्छा नोले थमा मसुइक्बपुकीमी आं कली लेंशा मताइनीम। गेपुकीमी चहिं आं कली ताइनीनी। मारदे हना गो ब्रोंइनुड। मिनु गेपुकी यो ब्रोंइनीनी। यूहन्ना २०:२०

20 मिनु आं आफ आ आगाम बाक्नुड। गेपुकी आं आगामी बाक्नीनी। मिनु गो इन आगामी बाक्नुड, दे मेना रुप्शा तुइक्नीनी।

21 सुमी आं अरेशो तुइश्शा पाइबा, मेकोमी आं कली दाक्ब। सुमी आं कली दाक्बा, आं आफोमी मेको कली यो दाक्ब। मिनु गो मेको कली दाक्शा, आं कली तुइक्पांडसीनुड” दे येसुमी दैत। १यूहन्ना ५:३; यूहन्ना १६:२७

22 मिनु यहूदामी, इस्कारीयोत डा यहूदा चहिं ममाइ, येसु कली “प्रभु, गे आंइ कली तुइक्पांडसीनीनी। थमा मसुइक्ब आन कली चहिं मतुइक्पांडसीनीनी, दोपा रुम्सीबा डा?” दे हिल्लो पाप्तु।

23 मिनु येसुमी “सुमी आं कली दाक्बा, मेकोम आं देशो लोत्र पाइब। आं आफोमी मेको कली दाक्ब। मिनु गो नु आं आफ मेको नु बाक्नस्कु। हितोपदेस ८:१७; एफिसी ३:१७

24 आं कली मदाक्बमी चहिं आं देशो लोत्र यो मपाइब। आं देशो लोत्र आं के ममाइ, आं कली सोइक्ब आं आफ के बाक्ब। यूहन्ना ७:१६-१७

25 गेपुकी नु बाक्शा, एको लोत्र पाता।

26 आं नेमी आं आफोमी इन कली वारच पाइब आ सोक्त सोइक्ब। मेको सोक्तीमी इन कली मारेइ मारेइ शेंब नु आं देशो लोत्र नेल्ल फुकपाइक्ब।

येसु आ गेशो थुं नाइक्तीके

27 गो आं थुं नाइश्शो खोदेशो पा इन थुं नाइक्पाइक्बन्नी। मुरुमी पशो खोदेशो ममाइ, इन थुं ग्येत्थ लुकच मपने। महिनीने। यूहन्ना १६:३३; फिलिप्पी ४:७

28 'गो लाइनुड। मिनु लेंशा जाक्नुड' दे आं देशो नेतीनी। गेपुकी आं कली दाक्ताक्वीनी हना, ग्येरसीनी वा। मारदे हना गो आं आफ आ बाक्तीक लाइनुड। आं आफ चहिं आं क्येडा ठेयब बाक्ब।

29 नेल्ल दुम्चा क्येडा डोंइती शेंताक्न्नी। मेको दुम्मेनु, गेपुकी थमा सुइक्ब दुम्नीनी।

30 मुल डा मेरे शुश मशेंनन्नी। मारदे हना रागी डा मुर आन कली हुकुम पाइब जाक्ब। मेकोमी आं कली ग्राने मचाप्ब। यूहन्ना १२:३१; एफिसी २:२

31 गो आं आफ आ देशो पाइनुड। मो पडानु, गो आं आफ कली दाक्नुड, दे रागी रागी डा मुरपुकीमी तुइक्तमेक्ल। लो बोक्कीन, गाक्य" देंत। यूहन्ना १०:१८

## 15

थमा डा अडगुर बोट

1 मिनु येसुमी "गो थमा डा अडगुर बोट नड। आं आफ चहिं अडगुर कली कोत्रब बाक्ब। भजन संग्रह ८०:१-१२; यसेया ५:१-७; येरमीया २:२१

2 आं आफोमी फल सिप्ब राशी आन कली खोइश्शा ताइक्ब। फल सिप्ब राशी कली मेको क्येडा शुश फल सिप्पाइक्चा, दे मुंइशा वोइक्ब। यूहन्ना १३:१०; १पत्रुस १:२३

3 गेपुकी आं देशो लोत्र टितीके मुंइसीशो राशी खोदेशो दुम्तीनी।

4 गेपुकी आं आगामी बाक्कीन। मिनु गो इन आगामी बाक्नुड। राशी बोटमी मबाक्त हना, मेको राशी फल सिन्ने मचाप्ब। मोपतीके गेपुकी यो आं आगामी मबाक्तीनी हना, फल सिन्ने मचाप्पीनी।

5 गो अडगुर बोट नड। गेपुकी चहिं राशी ननी। सु आं आगाम बाक्बा, गो मेको आ आगामी बाक्नुड। मिनु मेकोमी शुश फल सिप्ब। तन्न गो रे डोन बाक्तीनी हना, मारेइ पने मचाप्पीनी। २कोरिन्थी २:५-६

6 सु चहिं आं आगामी मबाक्बा, मेको खोइश्शा ताइश्शो राशी खोदेशो पा सोत्रब। मिनु मुरपुकीमी मोदेशो राशी कली खुप्शा मीम चोइनीम।

7 गेपुकी आं आगामी बाक्शा नु आं लोत्र इन आगामी बाक्त हना, इन दाक्शो पुनीन। मिनु इन पुंइशो ताइनीनी। मर्कूस ११:२४

8 गेपुकी आं शेंसीब दुम्शा, शुश फल सिप्ब दुम्तीनी हना, आं आफ आ सक्ति कोंइनीनी। मोपा गेपुकी आं शेंसीब दुम्तीनी। मत्ती ५:१६

दाक्मुचा माल्ब, दे शेंशो

9 आं आफोमी आं कली दाक्ब। मिनु आं आफोमी आं कली दाक्शो खोदेब पा, गो इन कली दाक्ताक्न्नी। गेपुकी यो 'गो इन कली दाक्नुड' दे तुइश्शा बाक्कीन।

10 दोपा गो आं आफोमी देशो लोत्र टिशा, आं आफ नु दाक्मुइनस्कु, मोपा गेपुकी यो आं देशो लोत्र टितीनी हना, गो नु दाक्मुशा बाक्नय।

11 इन कली एको लोत्र मारदे पाता देशा हना, आं ग्येरशो थुं इन थुंमी लील। मिनु इन थुं ग्येरसीशा बाक्ल, दे एको लोत्र पाता। यूहन्ना १७:१३

12 गो इन कली दाक्शो खोदेशो पा गेपुकी यो दाक्मुने, दे आं अरेशो बाक्ब। यूहन्ना १३:३४

13 सु आ वारच आ पर्वम साइक्चा पुंइसीबा, मेको नेल्ल क्येडा ठेयब दाक्ब वारच बाक्ब। यूहन्ना १०:११; १यूहन्ना ३:१६

14 गेपुकी आं देशो पना पन बाक्तीनी हना, आं वारच ननी। यूहन्ना ८:३१; मत्ती १२:५०

15 मुल रे गो इन कली वाइल मदेनुड। मारदे हना वाइल आ ठेयब मुरुमी मार गेय पचशो बाक्मे, मेको वाइलम मतुडक्ब। गो चहिं इन कली आं आफ आ देशो नेल्ल शेंताक्न्नी। मोपतीके इन कली वारच देनुड।

16 गेपुकीमी आं कली मयोव्रयीनी। तन्न गेपुकी लशा फल सिरशा, इन सिरशो फल लील, दे गो इन कली योव्रतन्नी। मिनु गेपुकीमी आं आफ कली आं नेमी इन दाक्शो पुंडीनु, आं आफोमी इन कली गेवल, दे वोडक्तन्नी।

17 गो इन कली 'दाक्मुने' दे माइक्तन्नी" देत।

**थमा सुडक्ब श्येत जाइनीम**

18 मिनु "रागी डा मुरपुकीमी इन कली मदाक्नीमी। इन कली मदाक्चा क्येडा डोंइती आं कली मदाक्नीम, दे तुडक्नीनी। यूहन्ना ७:७

19 गेपुकी रागी डा मुर खोदेशो बाक्तीनी हना, रागी डा मुरपुकीमी इन कली दाक्नीमी। तन्न गे रागी डा मुर मननी। गो इन कली रागी डा मुरपुकी रे योव्रतन्नी। मोपतीके रागी डा मुरपुकीमी इन कली मदाक्नीम। यूहन्ना १७:१४; १यूहन्ना ४:४-५

20 मिनु डोंइती गो इन कली 'होव्रप क्येडा वाइली ठेयब ममाइ' देती। मिनु आं देशो मिम्तीन। मुरपुकीमी आं कली श्येत गेतीमी हना, इन कली यो श्येत गेनीमी। मुरपुकीमी दोपा आं देशो लोव्र नेशा टीमे, मोपा इन देशो लोव्र यो टीनीम। यूहन्ना १३:१६; मती १०:२४-२५

21 मुरपुकीमी आं नोले खोडक्ब इन कली श्येत गेनीम। मारदे हना आं कली सोडक्ब कली मतुडक्नीम। यूहन्ना १६:३

22 गो रागीमी जाक्शा, मेको मुर आन कली शेंताक्डमी। आं लोव्र तुड्रशा यो मटीमे। मोपतीके मेकोपुकी पाप राइनीमी। यूहन्ना ९:४१

23 सुमी आं कली मदाक्बा, मेकोमी आं आफ कली यो मदाक्ब। लूका १०:३६

24 गो मुर आन कली छक लाक्चा डा गेय कोंइताक्डमी। आं क्येडा डोंइती सुइमी आं खोदेशो गेय मकोइदे। मेको गेय कोंइशा यो मुरपुकीमी आं आफ नु गो निम्फा आंस कली मदाक्नीम।

25 परमप्रभु यावेमी ब्रेक्पाइशो लोव्र थमा दुम्चा कली आं कली मदाक्नीम। मार ब्रेक्पाइशो बाक्त देशा हना 'मेकोपुकीमी आं कली मोशा यो मदाक्नीम' दे ब्रेक्शो बाक्त। भजन संग्रह ६९:४

26 मिनु वारच पाइब का जाक्ब। गो मेको कली आफ आ बाक्तीक रे सोडक्नुड। मेको परमप्रभु यावे रे जाक्शो थमा डा सोक्त बाक्ब। मेकोमी आं पबर्म शेंब। यूहन्ना १४:१६, २६; लूका २४:४९

27 मिनु गेपुकी यो आं सांकछी दुम्शा, मुर आन कली आं पबर्म शेंनीनी। मारदे हना गेपुकी डोंइती रे गो नु बाक्शो ननी" देत। प्रेरित १:८, २१-२२; प्रेरित ५:३२

## 16

1 मिनु येसुमी "गो एको लोव्र नेल्ल मारदे शेंताक्न्नी देशा हना, थमा सुडक्तीक रे नोले मशोंइसीन, दे शेंताक्न्नी।

2 मुरपुकीमी इन कली गुम्तीक खिं रे तिल्लीम। थमा, इक्चा नोले इन कली साडक्बपुकीमी 'गो परमप्रभु यावे आ दाक्शो पना पन बाक्ती' दे मिम्नीम। मती १०:१७, २२; मती २४:९

3 मोदेशो पाइनीम। मारदे हना आं आफ नु आं कली मतुडक्नीम। यूहन्ना १५:२३

4 मिनु गो मेको नेल्ल इन कली शेंताक्न्नी। आं देशो दुम्मेनु, गो इन कली डोंइती देशो मिम्तीन। डोंइती गो एको लोव्र इन कली मनैपाइक्न्नी। मारदे हना गेपुकी नु काथा बाक्ती।

**परमप्रभु आ सोक्त आ गेय**

5 मुल चहिं आं कली रागीमी सोडक्ब आ बाक्तीकेमी लाइनुड। गो लती हना यो, गेपुकी सुइमी 'ते लाइनीनी?' दे हिल्लो मपाइनीनी।

6 तन्न आं देशो नेशा, इन थुं खाडक्ब।

7 नोफा दाइश्शा नेनीन, आं लशो इन कली रिम्शो दुम्ब। गो मलती हना, थमा सुइक्ब आन कली वारच पाइब मजाक्ब। गो लती हना, मेको कली सोइक्नुड। यूहन्ना १४:१६, २६

8 मिनु मेको जाक्शा, रागी डा मुर आन कली पाप आ पर्वम नु परमप्रभु यावे आ डोंइती मार ठीक बाक्ब नु परमप्रभु यावे आ निसाफ पतीक दोदेशो बाक्बा, दे शेंब।

9 मेको आन पाप मार बाक्त देशा हना, आं कली थमा मसुइश्शो बाक्नीम। यूहन्ना १५:२२, २४

10 परमप्रभु यावे आ डोंइती ठीक दुम्शा बाक्वा आ पर्वम मार शेंब देशा हना, गो आं आफ आ बाक्तीक लाइनुड। मो दुम्तीके गेपुकीमी आं कली मताइनीनी, दे शेंब। प्रेरित ५:३१; रोमी ४:२५

11 मिनु निसाफ पचा आ पर्वम मार शेंब देशा हना, परमप्रभु यावेमी रागी डा मुर आन कली हुकुम पाइब सैतान कली निसाफ पने थुम्तु, दे शेंब। यूहन्ना १२:३१

12 मिनु इन कली शेंतीक लोत्र शुश लीब। तन्न मुल फाल्ने मचाप्नीनी। १कोरिन्थी ३:१

13 मिनु थमा डा सोक्त जाक्शा, इन कली थमा लां कोंइशा शेंब। मेकोमी आंम मिम्शो मशेंब। तन्न मार मार नेंबा, मेकोन शेंब। नोले मार मार दुम्बा, मेको यो शेंब। यूहन्ना १४:२६; १यूहन्ना २:२७

14 आं सक्ति कोंइब। गो मार देंनुडा, मेको इन कली शेंब।

15 आं आफ आ सक्ति नु आं सक्ति कान बाक्ब। आं आफ नु मार मार बाक्मे, मेको आं के नम। मिनु परमप्रभु यावे आ सोक्तीमी आं लोत्र नेंशा, इन कली शेंब। यूहन्ना ३:३५; यूहन्ना १७:१०

### ‘परमप्रभु आ बाक्तीक लाइनुड’ देशो

16 इच्का नाक्त नोले आं कली मताइनीनी। मिनु इच्का नोले ताइनीनी” दे येसुमी आ शेंसीब आन कली माइक्तीमी। यूहन्ना १४:१९

17 आ शेंसीब का निक्शीमी “इच्का नाक्त नोले आं कली मताइनीनी। मिनु लेंशा इच्का नाक्त नोले ताइनीनी। मिनु गो आं आफ आ बाक्तीक लाइनुड देंत। एको लोत्र मार में” देंमुन्तेकम।

18 मिनु “इच्का नोले नाक्त देशो लोत्र, मार में, आ देशो लोत्र मरुबय” देंमुन्तेकम।

19 मिनु येसुमी आ कली हिल्लो पाइनीमी, दे तुइक्ताक्व। मिनु मेको आन कली “इच्का नाक्त नोले आं कली मताइनीनी। मिनु लेंशा इच्का नाक्त नोले ताइनीनी देशो लोत्र आ पर्वम मार लोत्र पमुनी?

20 नोफा दाइश्शा नेनीन, गेपुकी डाक्शा, हिशेक पाइनीनी। रागी डा मुरपुकी चहिं ग्येरसीनीम। इन थुं खाइश्शो बाक्नीनी। तन्न थुं खाइश्शो साशा ग्येरनीनी। मर्कूस १६:१०

21 मीश मुरुमी आल थिचावानु ‘आं थिची जाक्त’ दे हिशा, श्येत जाइब। तन्न आल थिशा ‘आल का जरमेसाक्व’ दे ग्येरसीब। आ डोंइती डा हिंशो नु श्येत ममिम्ब। यसैया २६:१७

22 मिनु मेको खोदेशो पा गेपुकी मुल थुं खाइश्शो बाक्नीनी। तन्न गो इन कली लेंशा तडानु, गेपुकी थमा पा ग्येरसीनीनी। मिनु इन ग्येरसीशो सुइमी क्याम्ने मचाप्नीम।

23 मेना गेपुकी आं कली मारेड हिल्लो मपाइनीनी। नोफा दाइश्शा नेनीन, गे आं नेमी आं आफ कली मार मार पुंइनीनु, आं आफोमी इन कली गेब। यूहन्ना १४:१३-१४

24 मुल सम्म गेपुकीमी आं नेमी मारेड मपुंइनी। पुनीन, मिनु इन पुंइशो ताइनीनी। मेको तशा, गेपुकी थमा पा ग्येरसीनीनी।

25 गो इन कली कथा खोदेशो पा शेंताक्नीनी। नोले कथा पा मशेंननी। मेना आं आफ आ पर्वम मारेड मखुइक्थु शेंननी। यूहन्ना १५:११

26 आं नेमी पुंइनीनी। मिनु गो ‘आं आफ कली इन पर्वम पुंइनुड’ दे इन कली मदेनुड।

27 आं आफोमी इन कली दाक्ब। मारदे हना आं कली दाक्ताक्नीनी। गो आं परमप्रभु यावे रे जाक्शो नड, दे थमा सुइक्तीनी। यूहन्ना १४:२१

28 गो आं आफ रे रागीमी जाक्ती। लेंशा रागी रे पा, आं आफ आ बाक्तीक लाइनुड” देंत।

29 मिनु आ शेंसीबपुकीमी येसु कली “मुल गे कथा पा मशेंथु, मारेड मखुइक्थु शेंनीनी।

30 गे नेल्ल तुइक्नीनी, दे गोपुकी मुल तुइक्ताक्व। मोपतीके इन कली शेंब ममाल्ब। गे परमप्रभु यावे आ बाक्तीक रे यिशो ननी, दे थमा सुइक्ताक” देंतेकम।

31 मिनू येसुमी “मार, गे मुल थमा सुइक्नीनी, मिनू?

32 नोले नेल्ल ब्राशा, इन खिं खिं लशा, आं कली प्रोइनीनी। मिनू गो का ला बाक्नुड। तन्न गो का ला मदुनुड। मारदे हना आं आफ गो नु बाक्ब। जकरिया १३:७; मत्ती २६:३१

33 आं कली मिशा इन थुं नाइश्शा बाक्कीन, दे एको लोत्र शेंताक्नी। गेपुकी रागीम बाक्शा, श्येत जाइनीनी। तन्न थुं बारपाइश्शा ग्येरसीने। गो रागी कली ग्राती” देंत। यूहन्ना १४:२७; रोमी ५:१; १यूहन्ना ५:४

## 17

येसुम आ आफ कली पुंइशो लोत्र

1 मिनू येसुमी मेको लोत्र पने थुम्शा, सरीड गे कोव्रशा “आं आफ, आं लची जाक्त, इन सक्ति गेयीनी। मिनू गो इन सक्ति कौंइनुड।

2 गे आं कली मुर नेल्ल आन कली अधिकार पचा गेतीनी। मिनू आं कली गेशो मुर नेल्ल आन कली गेना हना यो ब्रौइशा बाक्चा गेनुडमी। मत्ती ११:२७

3 गेना हना यो गे नु ब्रौइशा बाक्चा मार बाक्ब देंशा हना, सुमी इन कली गे ला थमा परमप्रभु यावे बाक्नीनी नु गो, इन सोइश्शो येसु खीस्त नड, दे तुइक्नीमी, मेको ला गेना हना यो गे नु ब्रौइशा बाक्चा ताइनीम। १यूहन्ना ५:२०

4 रागीम बाक्शा, इन पपाइश्शो गेय थुम्शा, इन सक्ति कौंइताक्डमी।

5 आं आफ, रागी सेल्चा क्येडा डौइती गे नु इन छेडछेडमी बाक्ती। मुल लेशा इन बाक्तीक जाक्चा चिकताक्ड। डौइती डा खोदेशो पा गे नु इन छेडछेडमी बाक्चा गेयीनी। यूहन्ना १:१; फिलिप्पी २:६

6 गेमी रागी रे प्रोइशो मुरपुकी गेतीनी। मेको आन कली इन नें तुइक्पाइक्तामी। मेको मुरपुकी इन के बाक्तेक्म। मिनू गे आं कली गेतीनी। मेकोपुकीमी इन लोत्र टिना टिन बाक्नीम।

7 गे आं कली मार मार गेनी, मेको नेल्ल इन के बाक्ब, दे मेकोपुकीमी मुल तुइक्नीम।

8 गे आं कली शेंताक्यीनी। मिनू इन शेंशो लोत्र मेको आन कली शेंताक्डमी। मिनू थमा सुइक्तेक्म। गो इन बाक्तीक रे जाक्शो नड, दे थमा पा तुइक्नीम। मेकोपुकीमी आं कली सोइक्ब, गे ननी, दे थमा सुइक्तेक्म। यूहन्ना १६:३०

9 मिनू गो मेको आन पर्वमी इन कली पुंइनुड। रागी डा मुर आन पर्वम मपुंइनुड। आं कली गेशो मुर आन पर्वम पुंइनुड। मारदे हना मेकोपुकी इन के नम। यूहन्ना ६:३७,४४

10 आं मुर नेल्ल इन के नम। इन के आं के नम। मेकोपुकीमी आं सक्ति कौंइनीम। यूहन्ना १६:१५

11 मुल गो रागीमी शुश नाक्त मबाक्नुड। गे का ला बाक्शो आं आफ, इन बाक्तीक जाक्चशो बाक्नुड। तन्न मेकोपुकी रागीमी बाक्नीम। आं आफ, आं कली गेशो मुर इन नें डा सक्तिमी रिम्शो कोव्रशा वोतीन। दोपा गो गे नु थुं का डा बाक्डा, मोपा मेकोपुकी यो थुं का दुम्शा बाक्मल, दे सक्ति गेने।

12 गो आं कली गेशो मुरपुकी नु बाक्डानु, इन नें डा सक्तिमी रिम्शो कोव्रशा वोइक्तामी। सुइ मजाम्म। इन ब्रेक्पाइश्शो लोत्र थमा दुम्चा, दे का चहिं जाम्शा, नरक लाइब दुम्त। यूहन्ना ६:३९; भजन संग्रह ४१:१०

13 मुल गो इन बाक्तीक जाक्चशो बाक्नुड। इन लोत्र रागीमी शेंताक्डमी। मारदे शेंताक्डमी देंशा हना, आं ग्येरशो खोदेशो पा मेको यो ग्येरसीशा बाक्मल, दे शेंताक्डमी। यूहन्ना १५:११

14 गो मेको आन कली इन देशो लोत्र शेंताक्डमी। मिनू रागी डा मुरपुकीमी मेको आन कली श्येत गेम्तेक्म। मारदे हना रागी डा मनम। गो यो रागी डा मनड। यूहन्ना १५:१९

15 मेको आन कली रागी रे प्रोनीन, दे इन कली मपुंइनुड। तन्न मेको आन कली सैतान रे प्रोनीन, दे पुंइनुड। मत्ती ६:१३; २थिस्सलोनिकी ३:३

16 गो रागी डा मनड। मिनू आं खोदेशो पा मेकोपुकी यो रागी डा मनम।

17 मेको आन कली इन थमा पतीकेमी खुमीन। इन थमा पतीक चहिं इन लोत्र बाक्ब। भजन संग्रह ११०:१६०

18 गेमी आं कली रागीमी सोइश्शो खोदेशो पा, गो यो मेको आन कली रागी रागीम सोइक्ताक्डमी। यूहन्ना २०:२१

19 मेको आन परबम गो इन कली जिम्मा गेसीनुड। मेकोपुकी यो थमा पतीकेमी खुम्शो मुर दुम्शा बाक्मल। हिब्रू १०:१०

20 गो मेको आन परबम ला इन कली मपुंडनुड। तन्न मेको आन शेंशो लोत्र रे आं कली थमा सुइक्ब दुम्ब आन परबम यो पुंडनुड। रोमी १०:१७

21 मार पुंडनुड देशा हना, मेको नेल्ल थुं का डा दुम्मल। आं आफ, गे आं आगामी बाक्शो नु गो इन आगामी बाक्शो खोदेशो पा मेकोपुकी इस आगामी बाक्मल, दे पुंडनुड। मो दुम्त हना, रागी डा मुरपुकीमी गेमी आं कली सोइक्ताक्नी, दे थमा सुइक्नीम। गलाती ३:२८

22 गेमी आं कली गेशो सक्ति मेको आन कली गेतामी। मारदे गेतामी देशा हना, गो निक्शी थुं का डा दुम्शो खोदेशो पा, मेकोपुकी यो गे नु थुं का डा दुम्मल, दे मेको सक्ति गेतामी। प्रेरित ४:३२

23 गो मेको आन आगामी बाक्नुड। गे आं आगामी बाक्नीनी। मो पा बाक्शोनु, मेकोपुकी गे नु गो खोदेशो पा का दुम्नीम। मो दुम्शो तशा, रागी डा मुरपुकीमी गे आं कली सोइक्ताक्नी। मिनु गेमी आं कली दाक्ताक्वीनी। मोपा गेमी आं कली दाक्शो बुदी मेको आन कली यो दाक्ताक्नी, दे तुइक्तमेक्ल। १कोरिन्थी ६:१७

24 आं आफ, आं कली गेशो मुरपुकी गो नु काथा बाक्मल, दे पुंडनुड। गे रागी सेल्चा डोंइती आं कली दाक्शा, इन सक्ति आं कली गेतीनी। मिनु मेकोपुकीमी यो आं सक्ति तामेक्ल। यूहन्ना १२:२६; हितोपदेश ८:२२-३१

25 आं आफ, गे नेल्ल रिम्शो नु ठीक पाइब बाक्नीनी। रागी डा मुरपुकीमी इन कली मतुइक्नीम। गो चहिं इन कली तुइक्नुड। मिनु आं शेंसीबपुकीमी गे आं कली सोइक्ताक्वीनी, दे तुइक्नीम।

26 गो मेको आन कली इन नें तुइक्पाइक्तामी। मिनु लेंशा तुइक्पाइक्नुडमी। मारदे इन नें तुइक्पाइक्नुडमी देशा हना, गेमी आं कली दाक्शो खोदेशो पा इन दाक्तीके मेको आन आगामी बाक्ल। मिनु गो मेको नु आन आगाम बाक्डल” दे येसुमी परमप्रभु यावे कली पुंडतु।

## 18

यहूदीपुकीमी येसु कली ग्याइश्शो

यूहन्ना १३:-; मत्ती २६:-२८:-; मर्कूस १४:-१६:-; लूका २२:-२४:-

1 मिनु येसुमी परमप्रभु यावे नु मेको लोत्र पने थुम्शा, आ शेंसीबपुकी नु किद्रोन खोल्सा आइक्वी हांबु लाम्तेक्म। मेकेर फल फुल रवा बाक्शो रिम्शो बाक्तीक बाक्त। मिनु येसु आ शेंसीबपुकी नु मेकेर ओत्रतेक्म।

2 डोंइती मेकेर येसु आ शेंसीबपुकी नु शुश युम्तीके बाक्त। मोपतीके येसु कली ग्याइक्ब आन कली वारच पाइब यहूदामी यो “मेकेर लाइनीम” दे तुइश्शो बाक्त। लूका २१:३७

3 मिनु यहूदामी ठेयब चढेब नु फरिसी आन सोइश्शो सिपाहीपुकी नु सिपाही आन ठेयब मुर आन कली येसु नु आ शेंसीब आन बाक्तीक चाक्तु। मेकोपुकी तोव्रशी नु लालटिन दाशा, या कुरशा जाक्तेक्म।

4 मिनु येसुमी “आं कली ग्याइक्थ जाक्तेक्म” दे तुइश्शा, मेको आन नेक्था लशा “सु कली माल्नी?” दे हिल्लो पाप्तु।

5 मिनु मेकोपुकीमी “नासरथ डा येसु कली माल्तक” देंतेक्म। मिनु येसुमी “गो नड” दे माइक्तीमी। येसु कली साइक्ब आन कली वारच पाइब यहूदा येसु कली ग्याइक्थ जाक्ब नु बाक्त।

6 मिनु येसुमी “गो नड” देंमेनु, मेको नेल्ल नोले गे दिल्ला गोल्तेक्म।

7 मिनु येसुमी लेंशा “सु कली माल्नी?” दे हिल्लो पवानु “नासरथ डा येसु कली माल्तक” देंतेक्म।

8 मिनू येसुमी “गो नड, देंती। आं कली माल्तीनी हना, अरू आन कली लचा गेने” दे माइक्तीमी।

9 डोंइती येसुमी परमप्रभु यावेमी गेशो मुर आन परबम “गो इन गेशो मुर सुइ मसाम्नुडमी” देशो लोत्र थमा दुमचा कली मेको लोत्र पाप्तु। यूहन्ना १७:१२

10 सिमोन पत्रुसमी तरवार कुरशो बाक्त। मिनु मेकोमी तरवार ग्रि शोइशशा, ठेयब चढेब आ वाइल आ नोफा दी खोइक्तु। मेको वाइली आ नें माल्कस बाक्त।

11 येसुमी “इ या खोतीमी पिप्तो। गो आं आफोमी देशो श्येत मजडल, दे मिम्नीनी? गो मेको श्येत जचा माल्नुड” देंत।

येसु हन्नास नु काइयाफास आस डोंइती

12 मिनु सिपाहीपुकी, आन कप्तान नु यहूदी आन ठेयब मुरपुकीमी येसु कली ग्याइशशा फ्रेताक्म।

13 मेको बर्स डा नेल्ल क्येडा ठेयब चढेब काइयाफास माइशशो बाक्माक्त। मेको आ शिउ हन्नास माइशशो बाक्माक्त। मिनु ग्याइक्बपुकीमी येसु कली डोंइती हन्नास आ बाक्तीकेम लाइक्तेक्म।

14 डोंइती काइयाफासमी यहूदी आन कली “मुर नेल्ल आन साइक्चा डा मुर का कली साइक्चा रिम्शो दुम्ब” देशो बाक्माक्त। लूका ३:१-२; यूहन्ना ११:४९-५०

येसुम पत्रुस आ परबम देशो थमा दुम्शो

15 मिनु सिमोन पत्रुस येसु आ नोले खोइक्तु। अर्को शेंसीब कामी यो नोले खोइक्तु। नेल्ल क्येडा ठेयब चढेबमी मेको अर्को शेंसीब कली तुइशशो बाक्त। मोपतीके मेको शेंसीब यो येसु नु नेल्ल क्येडा ठेयब चढेब आ खिं डा लाडगामी ओव्रत।

16 पत्रुस चहिं लाप्यो उइ बाक्माक्त। नेल्ल क्येडा ठेयब चढेब कली तुइक्ब अर्को शेंसीबमी लाप्यो कोव्रब मीश मुर कली लोत्र पशा गृत। पत्रुस कली खिं डा लाडगामी ओइताक्व।

17 लाप्यो कोव्रब मीश मुरुमी पत्रुस कली तशा “गे यो मेको मुर आ शेंसीब का मनवे डा?” देंमेनु, पत्रुसमी “गो मनड” देंत

18 ग्यू पशो बाक्त। मोपतीके वाइलपुकी नु मेकेर बाक्ब मुरपुकीमी मी मुइशशा, एर ओंथ बाक्शा, मी थेरना थेरन बाक्तेक्म। पत्रुस यो मी थेरशो बाक्त।

19 मेना नेल्ल क्येडा ठेयब चढेबमी येसु कली “इ शेंसीब आन कली मार शेंनेवे?” दे हिल्लो पाप्तु।

20 मिनु येसुमी “गो मुर नेल्ल आन कली लोत्र पाता। गुम्तीक खिंमी नु परमप्रभु यावे आ खिंमी शुश यहूदी गुम्तीकेमी शेंताक्डमी। खुइशशा मारेइ लोत्र मपड। यूहन्ना ७:१४,२६

21 मारदे हिल्लो पयीनी? आं शेंशो लोत्र नेंब आन कली हिल्लो पने। मेकोपुकीमी आं शेंशो लोत्र तुइक्नीम” देंत।

22 मिनु मो देंमेनु, येसु आ नेक्था बाक्ब मुरुमी येसु कली चोत्रचो राप्शा “गे नेल्ल क्येडा ठेयब चढेब कली मोदेशो लोत्र पाइनेवे?” दे हुइक्ताक्व।

23 येसुमी “गो मरिम्शो लोत्र पाता हना, आं कली देनो। तन्न गो ठीक लोत्र पाता हना, मारदे राप्यी?” देंत।

24 मिनु हन्नासमी येसु कली फ्रेशो मप्रुइक्थु, नेल्ल क्येडा ठेयब चढेब काइयाफास आ बाक्तीकेमी सोइक्ताक्व।

25 मेना सिमोन पत्रुसमी थेरना थेरन बाक्शो बाक्त। मिनु मेकेर बाक्बपुकीमी पत्रुस कली “गे यो मेको मुर आ शेंसीब का मनवे डा?” देंमानु “गो मनड” देंत।

26 मेकेर नेल्ल क्येडा ठेयब चढेब आ वाइल का यो बाक्त। पत्रुसमी नोफा क्योरशो मुर आ खिं डा मुर का बाक्त। मेकोमी पत्रुस कली “गो इ कली मेको मुर नु फल फुल रूमी ताइतन, शां” देंत।

27 मिनु पत्रुसमी लेंशा “गो मनड” देंत। मो देंमेनु, भाले ग्रीत।

येसुम पिलातस नु लोत्र पशो

28 मिनु नोले मेको ग्याइक्वपुकीमी येसु कली काइयाफास आ बाक्तीक रे पिलातस आ खिं गे लाइक्तेक्म। मेना नां सोव्रचशो बाक्माक्त। मिनु मेकोपुकी पाससा चाड डा भोज जचा कली ठीक दुम्शा बाक्शो बाक्तेक्म। मोपतीके मेकोपुकी पिलातस रोमी दुम्शो आ पबर्म मथिचा डा बाक्त, दे आ खिं आगा मओव्रम।

29 मो दुम्तीके पिलातस लाडगा गूशा, मेको आन कली “एको मुर कली मार दोस गेनीनी?” दे हिल्लो पाप्तु।

30 मिनु मेकोपुकीमी “एको मुर मरिम्शो मबाक्शो हना, गोपुकीमी एको कली ग्याइश्शा, इन बाक्तीकेमी मारदे चाक्नीकी डा?” देतेक्म।

31 मिनु पिलातसमी “एको कली लतीन। मिनु इन ऐन कानुनमी ब्रेक्शो कोव्रशा, निसाफ पने” दे माइक्तीमी। मिनु मेको यहूदीपुकीमी पिलातस कली “गो आंड कली सुइ मुर साइक्वा मगारब” देतेक्म। यूहन्ना १९:६-७

32 येसुमी आ डोंइती देशो लोव्र “दोपा बेक्चा माल्नुडा” देशो, थमा दुम्चा कली मोदेशो दुम्त। यूहन्ना १२:३२-३३; मत्ती २०:१९

33 मिनु पिलातस आ खिं ओव्रशा, येसु कली आगामी ब्रेश्शा “गे यहूदी आन पिप ननी?” दे हिल्लो पाप्तु।

34 येसुमी “गे आंमा मिम्शा मो देंनी देय मुरुमी देंमा?” दे हिल्लो पाप्तु।

35 मिनु पिलातसमी “गो यहूदी मनड। इन रागी डा मुरपुकी नु ठेयब चढेबपुकीमी इन कली निसाफ पचा कली आं कली जिम्मा गेतीमी। गे मार पनी?” दे हिल्लो पाप्तु।

36 येसुमी “गो एको रागी डा पिप मनड। गो रागी डा पिप नड हना, आं वारचपुकीमी राम्शी तोशा, ओपा यहूदीपुकीमी आं कली मग्याइक्वीमी वा। तन्न गो एको रागी डा पिप मनड” दे येसुमी देंत।

37 पिलातसमी “मिनु गे पिपन ननी?” दे हिल्लो पाप्तु। मिनु येसुमी “गो पिप नड, दे गे आंमा देंतीनी। मिनु थमा मार बाक्बा, दे कोंइचा कली रागीम जरमेशा जाक्ती। सु थमामी बाक्बा, मेकोमी आं सेंदा नेंब” देंत। १तिमोथी ६:१३

38 मिनु पिलातसमी “थमा मार में?” देंत। मिनु मेको देंम नोले पिलातस लेशा लाडगा गूशा, यहूदी आन कली “एको मुर मरिम्शो पाइब, दे मसुइक्नुड।

39 मिनु पाससा चाडमी मुर का प्रोंइतीकेमी गो एको यहूदी आन पिप प्रोंइशा सोइक्नुड। गेपुकी मार देंनीनी?” दे हिल्लो पाप्तीमी।

40 मेकोपुकीमी चहिं “एको कली मप्रोंइचा। तन्न बारब्बा कली प्रोंइचा” दे ग्रीतेक्म। बारब्बा चहिं खुइ बाक्माक्त।

## 19

“येसु कली साइक्वा” दे ग्रीशो

1 मिनु पिलातसमी येसु कली युक्पाइक्तु।

2 आ सिपाहीपुकीमी चू के सिरपेच सेल्शा, येसु आ पियामी गुप्ताक्म। मिनु येसु कली पिप आ फेक्तीक वा फेक्ताक्म।

3 मिनु आ नेक्था जाक्शा “जय, यहूदी आन पिप” देशा, आ चोव्रवो राप्तेक्म।

4 मिनु पिलातस लेंशा, खिं रे गूशा, लाडगामी रिम्शा बाक्शो आन कली “कोव्रडीन, गो एको कली गुंइशा, गेपुकी नु गुम्पाइक्नुड। मारदे हना मरिम्शो पाइब मसुइक्नुड, दे तुइक्तीन” दे माइक्तीमी।

5 मिनु येसु चू के सिरपेच गुप्शा, पिप आ फेक्तीक वा फेक्शा यूत। पिलातसमी “लो, एको मुर कली कोव्रडीन” देंत।

6 मिनु ठेयब चढेब नु यहूदी आन ठेयब मुरपुकीमी “शीमी कांटी थोक्शा क्याइश्शा सतीन। शीमी कांटी थोक्शा क्याइश्शा सतीन” देंना देंन ग्रीतेक्म। मिनु पिलातसमी “गो एको कली मरिम्शो पाइब मसुइक्नुड। मोपतीके गेपुकी एको कली लाइश्शा, शीमी कांटी थोक्शा क्याइश्शा सतीन” दे माइक्तीमी।



7 यहूदीपुकीमी “आंड ऐन कानुन बाकब। मिनु मेको ऐन कानुनमी ब्रेकशो खोदेशो पा एको मुर बेकचा माल्ब। मारदे हना एकोमी आंमा कली परमप्रभु यावे आ तौ सेल्सीशो बाकत” दैतेकम। यूहन्ना १०:३३; लेवी २४:१६

8 मिनु पिलातसमी मोदेशो नेशा, डोंडती क्येडा हित।

9 मिनु येसु कली लेंशा खिं ओंडशा “गे ते रे जाकशो ननी?” दे हिल्लो पाप्तु। मिनु येसुमी मारेड लोत्र मलेत्त।

10 मोपतीके पिलातसमी “गे आं कली लोत्र मपाइनीनी? इन कली प्रॉइशा सोइक्चा नु शीमी कांटी थोकशा क्याइश्शा साइक्चा गो नु निम्फा अधिकार बाकब, दे मतुइक्नीनी?” दे माइक्तु।

11 मिनु येसुमी “इन के अधिकार बाकब। इन कली गेशो अधिकार चहिं इर रे गेशो बाकब। मोपतीके इन मरिम्शो पशो क्येडा आं कली साइक्चा कली वारच पाइब आ मरिम्शो पशो ठेयब बाकब” दैत।

12 मिनु येसु आ लोत्र नेशा नोले पिलातसमी येसु कली प्रॉइशा सोइक्चा माल्तु। तन्न मेको यहूदीपुकीमी पिलातस कली “गे एको कली प्रॉइशा सोइक्ताकनी हना, गे रोमी आन पिप सिजर आ वारच मननी। मिनु सुमी ‘गो पिप नड’ दैबा, मेको सिजर आ जोरी सत्रु दुम्ब” दैतेकम। प्रेरित १७:७

### येसु कली यहूदी आन गुडमी गेशो

13 मिनु यहूदी आन लोत्र नेशा, पिलातसमी येसु कली खिं रे ग्रुंडताकब। मिनु पिलातस निसाफ पाइब आ नित्तीकेमी निस्साकब। मेको निसाफ नित्तीक आ खपीमी फुल्लु ब्रशो बाक्तेकम। मेको कली हिबू लोत्रमी गाब्बाथा देनीम।

14 मेना नां सोक्चा चिक्शो बाकत। मेको नाक्ती चहिं पास्सा चाड डा भोज सातीक नाक्ती बाकत। मिनु पिलातसमी यहूदी आन कली “इन पिप कली कोवडीन” दैत।

15 मिनु यहूदीपुकीमी “सतीन, सतीन, एको कली शीमी क्येप्शा कांटी थोक्तीन” दे ग्रीतेकम। पिलातसमी “गो इन पिप कली शीमी क्येप्शा कांटी थोक्नुडा डा?” दे माइक्तीमी। मिनु ठेयब चढ़ेबपुकीमी “गो आंड के सिजर का ला पिप बाकब” दैतेकम। यूहन्ना १८:३७

16 पिलातसमी “येसु कली शीमी क्येप्शा कांटी थोक्तीन” दे मेको आन कली जिम्मा गेप्तु।

### येसु कली शीम केप्शा कांटी थोक्शो

17 मिनु नोले यहूदीपुकीमी येसु कली लाइक्तेकम। मिनु आ कली कांटी थोकशा क्याइश्शा साइक्तीक शी आंमा कुरपाइश्शा, खप्परे माइक्तीकेमी लाइक्तेकम। हिबू लोत्रमी मेको कली गोलगथा देनीम।

18 मेकेर जाकदीश्शा, येसु कली शीमी केप्शा कांटी थोक्ताकम। मोदेशो पा मुर निकशी आस कली यो शीमी केप्शा कांटी थोक्ताकम। मिनु येसु कली कांटी थोक्शो शी मेको आस दातेमी खुक्तेकम।

19 मिनु पिलातसमी “नासरथ डा येसु, यहूदी आन पिप” दे ब्रेक्स ब्रेकशा, येसु आ शीमी केप्शा वोइक्तु।

20 येसु कली साइक्तीक ठाउ यरूसलेम सहर आ नेक्था बाकत। मिनु शुश यहूदीपुकीमी मेको ब्रेकशो ब्रेक्स पढेम्तेकम। मेको ब्रेक्स चहिं हिबू, रोमी नु ग्रीक लोत्रमी ब्रेकशो बाकत।

21 मिनु यहूदी आन ठेयब चढ़ेबपुकीमी पिलातस कली “यहूदी आन पिप ममाइ, तन्न ‘गो यहूदी आन पिप नड’ दैत, दे ब्रेक्तीन” दे माइक्तेकम।

22 मिनु पिलातसमी “गो मार ब्रेक्तु, मेकोन ठीक ब्रेक्ताकड” दे माइक्तीमी।

23 सिपाहीपुकीमी येसु कली कांटी थोक्शो शी खुक्ने थुम्शा, येसु आ वासी ४ जना सिपाहीपुकीमी उइक्थ उइक्थ पा योक्साकम। येसु आ तारी फेक्तीक वा उइ रे इर सम्म प्रोत्रशो मफेरशो थम रिम्शो वा का बाकत।

24 मोपतीके मेकोपुकीमी “एको चहिं मखाक्य। तन्न बाजी ग्यारय। मिनु सुम ग्राबा, मेकोमी ताइब” देमुम्तेकम। मो पामेनु “आं वासी योक्सीनीम। आं तारी फेक्तीक वा कली ‘सुम ताइबा?’ दे बाजी ग्यारनीम” दे ब्रेकशो लोत्र थमा दुम्त। भजन संग्रह २२:१८

25 मिनू सिपाहीपुकीमी मो पामेनु, येसु आ ममा येसु आ शी आ नेक्था बाक्त। क्लोपास आ मीश मरीयम नु माग्दाला डा मरीयम यो मेकेर बाक्ताक्स। मिनू येसु आ नेल्ल क्येडा दाक्शो शेंसीब यो मेकेर बाक्त।

26 मिनू येसुमी आ ममा कली “आं ममा, मेको कली इ तौ मिम्तो” दे माइक्तु। यूहन्ना १३:२३

27 मिनू आ शेंसीब कली “गेमी यो इम्मा खोदेशो मिम्तो” दे माइक्तु। मेना रे मेको शेंसीबमी येसु आ ममा कली आ ममा मिम्शा, आ खिंम वोइक्तु।

येसु बेक्चा आ पर्वम ब्रेक्शो लोव्र

28 मिनू नोले येसुमी “आं गेय पचा नुप्त” दे तुइक्ताक्व। मिनू परमप्रभु यावे आ ब्रेक्पाइश्शो लोव्र थमा दुम्चा कली येसुमी “गो तूतू दाक्ती” देंत। भजन संग्रह २२:१५

29 मिनू मेकेर गर का ग्युरशो तूचा थोव्रक वोइश्शो बाक्त। मेकोपुकीमी कोक्केमी वा खोदेशो फ्रेशा, मेको ग्युरशो तूचा थोव्रकीमी खुम्शा, येसु कली युप्पाइक्तेक्म। भजन संग्रह ६९:२१

30 मिनू येसुमी युप्शा “मुल थुम्ता” देंत। मिनू आ पिया खुक्शा बेक्त।

31 मेको पास्सा चाड मानेचा कली सातीक नाक्त बाक्त। मोपतीके बेक्शो रां शीमी मबाक्मल, दे यहूदीपुकीमी पिलातस कली “मेको आन खोइल जिक्शा साइश्शा, शी रे शोल्शा लदमेक्ल” देंतेक्म। मारदे हना मेको पास्सा आ डोंइती डा टेयब नाक्त बाक्त। ब्यवस्था २१:२३

32 मोदुम्तीके सिपाहीपुकीमी कांटी थोक्शो येसु आ ग्युरा नु पेरा गो डा निम्फा आस कली खोइल जिक्ताक्म।

33 मिनू येसु आ क्युक्तीकेमी जाक्मानु, येसु कली बेक्शो ताम्तेक्म। मिनू येसु आ खोइल मजिकोम।

34 सिपाही कामी येसु आ कोव्रखामी भालामी तूताक्व। मिनू तूदानु, हुश नु ब्वाक्कु यित।

35 मेको नेल्ल ताइबमी मेको दुम्शो आ पर्वम सांकळी बाक्शा, थमा लोव्र पाइब। गेपुकी यो थमा सुतीन दे मेकोमी थमा लोव्र पाइब।

36 परमप्रभु यावे आ ब्रेक्पाइश्शो लोव्र थमा दुम्चा कली मोदेशो दुम्त। लोव्र कामी “मेको आ रुश का यो मजिकनीम” दे ब्रेक्पाइश्शो बाक्त। प्रस्थान १२:४६

37 मिनू लोव्र कामी “मेको तूबपुकीमी आंम तूशो मुर कली कोव्रनीम” दे ब्रेक्पाइश्शो बाक्त। जकरिया १२:१०; प्रकाश १:७

येसु आ बेक्शो रां वोइश्शो

38 अरीमाथीया गाउं डा योसेफ माइश्शो मुर का बाक्त। मेको यहूदी आन कली तशा हिंशा खुइश्शा, येसु आ शेंसीब दुम्शो बाक्त। मेकोमी पिलातस कली “येसु आ बेक्शो रां लाइक्चा गेयीनी” दे पुना बाक्त। मिनू पिलातसमी लाइक्चा गेवा बाक्त। मिनू योसेफ येसु आ बेक्शो रां ब्रथ जाक्त। यूहन्ना ७:१३

39 डोंइती येसु नु लोव्र पचा कली नाक्दो जाक्शो निकोदेमसमी येसु आ बेक्शो रां गिल्ला, दे सहे का लित्रा मुरे नु एलोव्र माइश्शो के सेल्शो ब्रोव्रशो रिना पाइब थोव्रक चाक्शा जाक्त। लित्रा का ३२७ ग्राम बाक्ब। यूहन्ना ३:२

40 मिनू येसु आ बेक्शो रां लाइश्शा, ब्रोव्रशो रिना पाइब थोव्रक नु वामी गिल्लेक्म। मेकोन यहूदी आन के बेक्शो मुर आन कली पतीक बाक्ब।

41 येसु कली शीमी कांटी थोक्तीक आ नेक्था फल फल रू का बाक्त। मेको रूमी बेक्शो मुर कली वोइक्तीक नक पुक्खी का सेल्शो बाक्त। मेकेर सुइ मवोइश्शो बाक्त।

42 मेको नाक्त यहूदी आन पास्सा मानेचा कली सातीक नाक्त बाक्त। मोपतीके येसु कली नेल्ल क्येडा नेक्था डा पुक्खीमी वोइक्तेक्म।

1 मिनू साता डा डोंइती नाक्त नां मसोव्रथु, माग्दाला डा मरीयम बेक्शो मुर वोइक्तीक पुक्खी जाक्दीम्मेनु, पुक्खी कली सुशो ठेयब फुल्लु तिल्लो तवा बाक्त।

2 मिनू फुल्लु तिल्लो तशा, दोरशा लशा, सिमोन पत्रुस नु येसु आ दाक्शो शेंसीब आस बाक्तीक जाक्त। मिनू “प्रभु कली बेक्शो मुर वोइक्तीक पुक्खी रे लदमे बाक्त। ते वोदमे?” दे हिल्लो पाप्तु। यूहन्ना १३:२३

3 मिनू पत्रुस नु अर्को शेंसीब बेक्शो मुर वोइक्तीक पुक्खी कोव्रथ लाम्ताक्से।

4 निम्फा दोरताक्स। मिनू अर्को शेंसीबमी पत्रुस कली दाम पाप्तु। दाम पशा, डोंइती बेक्शो मुर वोइक्तीक पुक्खी जाक्दीत।

5 मिनू खुम बाप्शा पुक्खी आगा कोव्रतु। मेकेर येसु कली गिल्लो वा ला तशा, आगा मओव्र।

6 सिमोन पत्रुस जाक्शा, पुक्खी ग्रु ओव्रशा कोव्रडानु, येसु कली गिल्लो वा ताप्तु।

7 मिनू पियामी फ्रेंशो रूमाल मुक्शा, तिल्ला वोइश्शो ताप्तु। यूहन्ना ११:४४

8 नोले डोंइती जाक्ब अर्को शेंसीब यो ओव्रत। मिनू मेको वा तशा थमा सुइक्तु।

9 मारदे हना मुल सम्म मेकोपुकीमी येसु बेक्शो रे सेंसीचा माल्ब, दे ब्रेक्पाइश्शो लोव्र मतुइश्शो बाक्तेक्म। भजन संग्रह १६:१०; लूका २४:२५-२७; प्रेरित २: २४-३२; १कोरिन्थी १५:४

10 मिनू नोले मेको शेंसीब निक्शी खिं लेत्ताक्स।

### येसुमी तपांडसीशो

11 मरीयम डाक्ना डाक्न पुक्खी आ नेक्था बाक्शो बाक्माक्त। डाक्ना डाक्न खुम बाप्शा, पुक्खी आगामी कोव्रडानु,

12 बुश वा फेक्शो परमप्रभु यावे आ स्वर्ग डा गेय पाइब निक्शी आस कली तवा बाक्त। मेको निक्शी येसु आ बेक्शो रां वोइक्तीकेमी का पिया गे का खोइल गे निश्शो ताम्सी बाक्त।

13 मिनू मेको निक्शीमी मरीयम कली “गे मारदे डाक्नेवे?” दे हिल्लो पाम्से बाक्त। मिनू मरीयममी “मेकोपुकीमी आं प्रभु कली लदमे बाक्त। मिनू ते वोदमे मतुइक्नुड” दे माइक्सी बाक्त।

14 मो देशा मरीयममी फिर लेश्शा कोव्रडानु, येसु कली राप्शा बाक्शो तवा बाक्त। मेको येसु बाक्ब, दे मतुइक्ता बाक्त।

15 मिनू येसुमी “गे मारदे डाक्नेवे? सु कली मली?” दे हिल्लो पवा बाक्त। मरीयममी “मेको फल फुल रूमी गेय पाइब मुर बाक्माक्त” दाप्शा, मेको कली “हजुर, गे मेको बेक्शो रां कली एक रे लाइक्तीनी हना, ते वोइक्नी, आं कली देनीने। गो मेको कली लाइक्नुड” दे मदा बाक्त।

16 मिनू येसुमी मरीयम कली “मरीयम” देमेनु, मरीयममी फिर लेश्शा, हिबू लोव्रमी “राब्बोनी” देमाक्त। हिबू लोव्रमी राब्बोनी देशो “शेंब” बाक्ब।

17 मिनू येसुमी “मग्याइक्ती। मारदे हना मुल सम्म आं आफ आ बाक्तीक मलड। आं लोकब आन बाक्तीक लशा, मेको आन कली ‘गो इं आफ, परमप्रभु यावे आ बाक्तीक लाइनुड’ गे मेको आन कली शेंदो” दे माइक्तु। हिबू २:११-१२

18 मिनू माग्दाला डा मरीयम शेंसीब आन बाक्तीकेमी लशा “गो प्रभु कली ताता” देत। येसु आ देशो लोव्र यो तुइक्पाइक्तीमी।

### येसुम शेंसीब आन कली तपांडसीशो

मर्कूस १६:१४-१८; लूका २४:३६-४९

19 मेको साता डा डोंइती नाक्त नां रिक्चावानु, येसु आ शेंसीबपुकी यहूदी आन क्येडा हिंशा, लाप्चो चोक्शा, खिं गाम बाक्तेक्म। मिनू येसु मेको आन बाक्तीकेमी जाक्शा “थुं नाइश्शा बाक्कीन” देत।

20 मो देशा मेको आन कली आ गुइ नु आ कोव्रखा कोइदानु, आ शेंसीबपुकी प्रभु कली तशा येरसाक्म। यूहन्ना १:३

- 21 मिनू लेंशा येसुमी मेको आन कली “इन थुं नाइश्शा बाक्कीन। आं आफोमी दोपा सोइक्ती, मोपा गो इन कली यो सोइक्ताक्नन्नी” दे माइक्तीमी। यूहन्ना १७:१८
- 22 मो देंशा येसुमी मेको आन कली मुइश्शा “परमप्रभु यावे आ सोक्त ताक्कीन।
- 23 गेपुकीमी सु सु कली माफ गेनीनी, मेकोम माफ ताइनीम। सु सु कली माफ मगेनीनी, मेको आन पाप लीब” देंत। मत्ती १८:१८

### थोमास कली थमा सुइक्पाइश्शो

24 मिनू येसु आ शेंसीब १२ जना आन दाते डा का जौले माइश्शो थोमास येसु जाक्मेनु, मेकेर मबाक्शो बाक्त। यूहन्ना ११:१६; यूहन्ना १४:५

25 अरु शेंसीबपुकीमी “प्रभु कली ताइतक” दे थोमास कली देंमानु “येसु आ गुइमी कांटी थोक्शो गार मतडा सम्म, मेको गारमी आं ब्रेच्यो मलिकथु नु आ कोत्रखा डा गारमी मथिडा सम्म, गो थमा मसुइक्नुड” देंत। यूहन्ना १९:३४

26 मिनू मेको मो दुश्शो साता का नोले येसु आ शेंसीबपुकी लेंशा खिं आगाम बाक्तेकम। मेना थोमास यो मेकोपुकी नु काथा बाक्शो बाक्त। लाप्यो चोक्शा, आगाम बाक्मानु, येसु मेको आन बाक्तीकेमी जाक्शा “थुं नाइश्शा बाक्कीन” देंत।

27 मिनू येसुमी थोमास कली “आं गुइ डा गारमी इ ब्रेच्यो लिक्शा, कोत्रडो। मिनू इ गुइमी आं कोत्रखा डा गार थिवो। गे थमा मसुइक्ब मदुमो। तन्न थमा सुइक्ब दुमो” दे माइक्ती।

28 थोमासमी “आं प्रभु, आं परमप्रभु यावे” देंत। यूहन्ना १:१

29 मिनू येसुमी “गे आं कली तशा थमा सुइक्तीवी। सुमी आं कली मतथु, थमा सुइक्बा, मेको शुश ग्येरसीशो मुर बाक्ब” देंत। १पत्रुस १:८; हिब्रू ११:३

### एको किताब मारदे ब्रेक्शो बाक्मे

30 मिनू येसुमी आ शेंसीब नु बाक्शा, शुश अरु छक लाक्चा डा गेय पाप्तु। मेको गेयपुकी एको किताबमी मब्रेक्शो बाक्नीम।

31 मिनू मेको ब्रेक्शो छक लाक्चा डा गेयपुकी मारदे ब्रेक्शो बाक्नीम देंशा हना, गेपुकीमी “येसु ख्रीस्त, परमप्रभु यावे आ तौ बाक्ब” दे थमा सुइक्ने चापीन। मिनू थमा सुइश्शा, आ नेमी गेना हना यो ब्रोंडशा बाक्चा ताइनीनी, दे ब्रेक्शो बाक्ब। १यूहन्ना ५:१३

## 21

### येसुम गालील रागीम तपांडसीशो

1 मिनू नोले येसु तिबेरीयास डा समुन्द्र आ नेक्थामी आ शेंसीब आन कली लेंशा तपांडसाक्व। दोपा तपांडसाक्व देंशा हना,

2 सिमोन पत्रुस, जौले माइश्शो थोमास, गालील डा काना सहर डा नथानेल, जब्दी आ तौ निक्शी नु येसु आ शेंसीब अर्को निक्शी काथा बाक्तेकम। यूहन्ना १४:५

3 मिनू सिमोन पत्रुसमी मेको आन कली “गो डांइ रेट्थ लाइनुड” देंत। मिनू “गो यो गे नु लाइनीकी” देंतेकम। मिनू लशा, डोंगा डोइश्शा, डांइ रेट्थ लाम्तेकम। तन्न मेको नाक्दो डांइ का यो मरम्म।

4 मिनू सुनी नां सोत्रची ना येसु समुन्द्र आ नेक्थामी बाक्शो बाक्त। आ शेंसीबपुकीमी येसु बाक्माक्त, दे मतुइक्तेम। यूहन्ना २०:१४; लूका २४:१६

5 मिनू येसुमी “ए आलपुकी, डांइ बाक्म को?” दे ब्रेश्शा, हिल्लो पाप्तु। मिनू “मबा” दे लोत्र लेत्ताकम। लूका २४:४१

6 मिनू येसुमी “इन ग्याइल डोंगा आ ग्युरा गे आपीन। मेकेर रत्नीनी” दे माइक्तीमी। मिनू आ देंशो खोदेंशो पा ग्याइल आप्तेकम। मिनू आन ग्याइली गुंडने मचाप्या डा पा शुश डांइ रेट्तेकम। लूका ५:४-७

7 मोदेशो तशा, येसु आ नेल्ल क्येडा दाकशो शेंसीबमी पत्रुस कली “प्रभु बाकब” दे माइक्तु। मिनु सिमोन पत्रुसमी “प्रभु बाकब” देशो नेंशा, आ डोंइती पुइश्शो वा लेंशा फेकसाक्व। मिनु ब्वाक्कुमी प्रेक्त। यूहन्ना १३:२३

8 मिनु अरु शेंसीबपुकीमी डोंगामी बाक्शा, ग्याइल कीना कीन पिन्तेक्म। ग्याइल ब्रीशो बाक्त। मेकोपुकी समुन्द्रमी सहें निक्शी गज खोदेशो डोन जाक्दीश्शो बाक्तेक्म।

9 मिनु मेकोपुकीमी डोंगा रे ग्रूशा, डांड नु शोब्ले मीमी चोशा, वोइश्शो ताम्तेक्म।

10 मिनु येसुमी “इन रेशो डांड का निक्शी पीतीन” दे माइक्तीमी।

11 येसु आ देशो टिशा, सिमोन पत्रुस डोंगामी डोइश्शा, ग्याइल कली कीशा, ब्वाक्कु रे गुंडताक्व। मेको ग्याइलीमी सहें का ५३ ओटा ठेयब ठेयब डांड बाक्तेक्म। मिशा डा डांड बाक्शा यो मेको ग्याइली मगाक्माक्त।

12 मिनु येसुमी “निस्सीन जने ब्वने” दे माइक्तीमी। मिनु शेंसीबपुकीमी “गे सु ननी?” दे हिल्लो मपाम। “प्रभु बाकब” दे तुइक्ताक्म।

13 मिनु येसुमी शोब्ले लाइश्शा, आ शेंसीब आन कली शोब्ले नु डांड योक्शा गेम्तीमी। यूहन्ना ६:११

14 मो दुम्मेनु, येसु सेंसीशो नोले आ शेंसीब आन कली खेयप सां तपाइसाक्व।

### येसुमी पत्रुस कली लोत्र पशो

15 मिनु जने थुम्शा, येसुमी सिमोन पत्रुस कली “योआन्नेस आ तौ सिमोन, गे आं कली एको आन क्येडा दाक्नेवे?” दे हिल्लो पाप्तु। मिनु पत्रुसमी “दाक्नन्नी, प्रभु, गे तुइक्नीनी” दे माइक्तु। मिनु येसुमी “आं पाठा आन कली थुल्मी” देंत। यूहन्ना १:४२

16 मिनु येसुमी लेंशा पत्रुस कली “योआन्नेस आ तौ सिमोन, गे आं कली दाक्नेवे” दे हिल्लो पाप्तु। मिनु पत्रुसमी “दाक्नन्नी, प्रभु, गे तुइक्नीनी” दे माइक्तु। मिनु येसुमी “आं भेडा आन कली कोव्वमी” देंत। १पत्रुस ५:२,४

17 लेंशा येसुमी “योआन्नेस आ तौ सिमोन, गे आं कली दाक्नेवे?” दे हिल्लो पाप्तु। मिनु येसुमी खेयप सां “आं कली दाक्नेवे?” दे हिल्लो पशो नेंशा, पत्रुस आ थुं खाइक्त। मिनु “प्रभु, गे नेल्ल तुइक्नीनी। गो इन कली दाक्नन्नी, दे तुइक्नीनी” दे माइक्तु। मिनु येसुमी “आं भेडा आन कली योव्वमी। यूहन्ना १३:३८; यूहन्ना १६:३०

18 नोफा दाइश्शा नेनो, गे टिटा बाक्डेनु, किप्शुर किम्सीशा, इ दाक्शो लां खोइक्तीवी। खाल्पा दुमेनु, इ गुइ हाम्नेवे। मिनु अर्कोमी इ कली किप्शुर किप्शा, इ मदाक्शो लां लाइक्व” दे माइक्तु।

19 येसुमी पत्रुस दोपा परमप्रभु यावे आ सक्ति कोंइशा, साइक्चा पुंडसीबा, दे मोदेशो देंत। मिनु येसुमी “आं नोले खोइय्यी” देंत। यूहन्ना १३:३६

20 मिनु पत्रुसमी येसु आ नोले खोइश्शा, फिर लेशशा कोव्वडानु, येसु आ दाक्शो शेंसीब आस नोले खोइश्शो ताप्तु। मेको शेंसीब सु बाक्त देशा हना, डोंइती नाक्दो डा खमे जची ना येसु नु बाक्शो बाक्त। मेको “प्रभु, इन कली साइक्ब आन कली वारच पाइब सु में?” दे हिल्लो पाइब बाक्त। यूहन्ना १३:२३-२५

21 मिनु पत्रुसमी मेको कली तशा “प्रभु, मेको कली मार दुम्बा?” दे हिल्लो पाप्तु।

22 मिनु येसुमी “गो लेंशा मजाक्डा सम्म मेकोमी रिम्शा बाक्चा माल्ब, दे मिम्ताक्ड हना यो, इ कली मार दुम्बा डा? गे आं नोले खोइय्यी” दे माइक्तु।

23 मिनु थमा सुइक्बपुकीमी मेको येसु आ दाक्शो शेंसीब आ पर्बम “मेको शेंसीब मबेक्ब” दे लोत्र पमुम्तेक्म। तन्न येसुमी “मेको मबेक्ब” देशो ममाइ, तन्न “गो मजाक्डा सम्म मेको रिम्शा बाक्ल कों मबाक्ल, इ कली मार दुम्बा डा” दे माइश्शो बाक्त।

24 येसुमी “एको मबेक्ब” देशो शेंसीब सु बाक्त देशा हना, एको किताब ब्रेक्ब बाक्त। मिनु मेको आ ब्रेक्शो नेल्ल थमा बाक्ब, दे तुइक्नीकी। यूहन्ना १५:२७

25 येसुमी मेको किताबमी ब्रेक्शो पशो गेय ला ममाइ, तन्न अरु शुश गेय यो पाइबाक्त। आ पशो गेय नेल्ल ब्रेक्ताक्व हना, मेको किताबपुकी वोइक्का कली रागीमी यो मरिक्व, दे मिम्नुड। यूहन्ना २०:३०; भजन संग्रह १०६:२

## प्रेरित

**ब्रेक्ब मुर:** एको किताब लूकाम ब्रेक्शो बाक्ब। लूका यहूदी मबाक्थु यो, पावल नु गेय पवा बाक्त। प्रेरित १६:१०-१७; प्रेरित २०:५-१५; प्रेरित २१:१-१८ नु प्रेरित २७:१-२८:१६ एको किताबमी शुश खेयप “गोपुकी” ब्रेक्शो बाक्ब। मोपतीके लूका पावल नु काथा बाक्शो तुंडसीब। लूका डक्टर बाक्त। कलस्सी ४:१४

**गेना ब्रेक्शो:** एको किताब गेना ब्रेक्शो बाक्मे, मेको रिम्शो पा मतुंडसीब। तन्न पावल रोम सहरम चोकचा पुंडसीशो बर्स निक्शी दुम्शो नोले ६३-६४ ए. डी. एको किताब ब्रेक्शो बाक्चा माल्ब। एको किताब मथुम्शो किताब का बाक्त। मारदे हना लूका ते लमे, सुइमी मतुइक्नीम। ६४ ए. डी.मी रोम सहरम ठेयब मी सुइक्तीके नु थमा सुइक्ब आन कली खेदा पतीके लूका बेक्म कों, प्रोक्म कों मारेड मतुंडसीब।

**मार ब्रेक्शो:** लूका, यहूदी मुर मबाक्ब। आ ब्रेक्शो “लूका ग्येरपाइक्तीक” लोव्रमी अर्को रागी डा मुर येसु ख्रीस्त आ पतीकेमी पाप रे ब्रोंडचा ताइनीम, दे शुश ब्रेक्शो बाक्ब। येसु ख्रीस्त आ सोइश्शो आन पशो गेय नु परमप्रभु यावे आ सोक्त आ गेय आ परबम शुश ब्रेक्शो बाक्ब।

### येसु स्वर्ग लाइक्चा पुंडसीशो

1 आं दाक्शो थियोफीलस, गो डोंइती डा किताबमी परमप्रभु यावे आ बाक्तीक लाइक्चा मपुंडसे सम्म येसुमी मार पवा, मार शेंदा, मेको नेल्ल ब्रेक्शा, तुइक्पाइक्ने थुम्तन्नी। लूका १:३

2 येसुमी शेंसीब आन कली योव्रशा, मेको योव्रशो आन कली सोइश्शोपुकी नें वोइश्शो बाक्माक्त। मेको सोइश्शो आन कली परमप्रभु यावे आ सोक्त रे पा मार शेंचा, मार पचा, नेल्ल शेंना शेंन वोइक्मी बाक्त। मत्ती २८:१-२०

3 मेको आन कली शेंशो मार बाक्माक्त देंशा हना, येसु श्येत जशा साइक्चा पुंडसीशा, बेक्शा, बेक्शो रे सेंपाइक्चा पुंडसीशा, ४० नाक्त सम्म आ सोइश्शो आन कली तपांडसीन सीन परमप्रभु यावे आ राज्य डा लोव्र शेंना शेंन बाक्माक्त।

4 मोदेशो पा काथा बाक्शा, मेको आन कली “परमप्रभु यावेमी आ देशो लोव्र मखबा सम्म यरूसलेम सहरमीन बाक्कीन। लूका २४:४९; यूहन्ना १५:२६

5 इन कली डोंइती मार मार देंडा, मेको लेंशा देनुड यूहन्नामी मुर आन कली ब्वाक्कुम खुम्शा गुंडताक्व। इन कली चहिं परमप्रभु यावेमी आ सोक्तीम खुम्ब। मेको दुम्चा कली शुश नाक्त मलीशो बाक्ब” दे शेंदीमी बाक्त। मत्ती ३:११

6 मिनु येसु नु आ सोइश्शोपुकी बुक्शा बाक्मानु, मेकोपुकीमी येसु कली “प्रभु, गे इस्राएल कली मुल लेंशा आम राज्य सेल्नीनी?” दे हिल्लो पामे बाक्त। लूका १९:११; लूका २४:२१

7 मिनु येसुमी “राज्य सेल्चा आं आफ आ गुइमी बाक्ब। मिनु गेना सेल्चा दाक्वा, मेना सेल्ब। मेको तुइक्चा यो ममाल्नीनी। मत्ती २४:३६

8 मार चहिं तुइक्चा माल्नीनी देशा हना, परमप्रभु यावे आ सोक्त आ सक्ति ताइनीनी। सक्ति तशा यरूसलेम, यहूदीया, सामरीया नु रागी नेल्लेमी हिरशा, आं लोव्र शेंशा, आं सांक्छी दुम्नीनी” दे माइक्मी बाक्त। लूका २४:४८; प्रेरित ८:१

9 मिनु मोदेशो लोव्र पा, मेको आन तना तन ग्येत्थ ग्युक्शा, गोस्सुमी गिल्सीशा सरीड ग्येत्थ लमाक्त। मिनु नोले मेकोपुकीमी मतामे बाक्त। मर्कूस १६:१९; लूका २४:५१

10 मोपा यो सरीड गे कोव्रना कोव्रन बाक्मानु, बुश वा फेक्शो मुर निक्शी फो फु गूशा, आन डोंइती राप्शो तामे बाक्त। लूका २४:४

11 मिनु मेको निक्शीमी “ए गालील डा मुर, मार सरीड गे कोव्रना कोव्रन बाक्नी? येसु इन बाक्तीके रे परमप्रभु यावे आ बाक्तीके लाइक्चा पुंडसाक्व। दोपा लशो तनी, मोपा काबु लेशशा यीब, दे तुइक्तीने” देंसा बाक्त। लूका २१:२७

12 मिनु मेकोपुकी जैतून डांडा रे यरूसलेम लेम्मा बाक्त। मेको लां चहिं नाइक्तीक नाक्त गाक्चा दुम्तीक लां बाक्माक्त।

13 मिनु यरूसलेम सहरम जाक्शा डा मीन, खिं का डा तला तारी ओव्रशा बाक्मा बाक्त। मोपा बाक्बपुकी सु सु बाक्मा बाक्त देंशा हना, पत्रुस, यूहन्ना, याकूब, अन्द्रीयास, फिलीप, थोमास, बारथोलोमाइ, मत्ती, अल्फयस आ तौ याकूब, सिमोन, मेको कली कनानी यो देंसीब नु याकूब आ तौ यहूदा बाक्मा बाक्त। लूका ६:१३-१६

14 मेकोपुकी नु मीश मुरपुकी, येसु आ ममा मरीयम नु येसु आ लोकबपुकी यो बाक्मा बाक्त। मेको नेल्ल थुं का डा दुम्शा, नाक्त किंत किंत परमप्रभु यावे कली ठेयब सेल्ला सेल्ल, पुइना पुंडन बाक्बाक्मा बाक्त। यूहन्ना ७:३

### सोइश्शो का तेम्शो

15 मिनु काबु नाक्त पत्रुस थमा सुइक्ब सहे का २० जना मुर आन दातेमी बाक्मा बाक्त। यूहन्ना ११:१५-१९

16 मिनु पत्रुस मेको आन दातेमी राप्शा, मेको आन कली “आं लोकबपुकी, नेनीने, येसु कली ग्याइक्ब आन कली लां कौइब यहूदा आ पर्बम लोव्र का निक्शी पाइनुड। साइ परमप्रभु यावे आ सोक्तीमी पिप दाऊद कली मार ब्रेक्पाइश्शो बाक्मे, मेको नेल्ल थमा दुम्चा माल्ब। मिनु मुल थमा दुम्त। भजन संग्रह ४१:१०

17 यहूदा १२ जना शेंसीब आंइ दाते डा वारच का बाक्त। मेको कली यो प्रभुमी गेय का पपाइक्चा कली योव्रशो बाक्त।

18 मेकोमी येसु कली ग्याइक्ब आन कली लां कौइशा, वारच पा क्येट ताक्गा बाक्त। मिनु मेको क्येटमी रू ग्यबा बाक्त। मोपा मरिम्शो गेय पतीके क्यूली पा दोक्शा, आ कोव्रज ब्रोल्शा आ क्यी गूशा बेक्माक्त। मत्ती २७:३-१०

19 मेको आ मरिम्शो पशो यरूसलेम सहरमी बाक्ब नेल्लेमी तुइक्ताक्म। मिनु मेको रू कली आन लोव्र रे पा आखेल्दामा, दे नें वोइक्तेक्म। आखेल्दामा देंशो “हुश आ रू” रुम्सीब।

20 साइ पिप दाऊदमी ब्रेक्शो लोव्रमी मार ब्रेक्शो बाक्ब देंशा हना ‘मेको आ खिं ब्रेश्शा बाक्ल, मेकेर सुइ बाक्चा मतामेक्ल, आ पशो गेय अर्को मुरुमी पवल’ दे ब्रेक्शो बाक्ब। भजन संग्रह ६९:२५-२६; भजन संग्रह १०९:८

21 मुल यहूदा आ पा डा मुर का योव्रचा माल्ब। दोदेशो मुर माल्ब देंशा हना, यूहन्नामी मुर आन कली ब्वाक्कुमी खुम्शा गुंइशो नाक्त रे येसु परमप्रभु यावे आ बाक्तीक लाइक्चा मपुंडसे सम्म, प्रभु येसु नु काथा बाक्ब, काथा गाक्ब, काथा जाइब मुर का माल्ब। यूहन्ना १५:२७

22 मेको मुरुम ‘येसु बेक्शा, सेंसीशो ताता’ देने चाप्चा माल्ब” दे माइक्मी बाक्त।

23 मिनु आ लोव्र नेंशा बिश्शा, आन दाते रे योव्रशा, मुर निक्शी आस कली नेल्ल आन डौंइती राप्पदमे बाक्त। मेको आस नें का के योसेफ बारसाबास, आ याइनी नें चहिं युस्तस बाक्माक्त। का के चहिं मत्तीयस बाक्माक्त।

24 मिनु मेकोपुकीमी “परमप्रभु, गे मुर नेल्ल आन थुं तुइक्नीनी। मोपतीके एको निक्शीमी तेको कली योव्रनीनी, आंइ कली तुइक्पतीने। प्रेरित ६:६

25 मिनु मेको यहूदा आ पा डा सोइश्शो का दुम्ल” दे प्रार्थना पामे बाक्त।

26 मिनु भोट तोक्गमे बाक्त। भोट तोक्गमेनु, मत्तीयस ग्रामाक्त। मोपा मत्तीयस यो सोइश्शो का दुम्शा तेम्सीशा, १२ जना सोइश्शो दुम्मा बाक्त। हितोपदेस १६:३३; निसाफ पाइब २१:१७

## 2



- 1 मिनू पेन्तीकोस नाक्त थमा सुइक्ब आन ग्रुन्तीकेमी देल्मा बाक्त। लेवी २३:१५-२१
- 2 मिनू सरीड रे हुरुर पा फश खोदेशो फो ग्रूशा, आन बाक्तीक प्रिंशा थुरशा रेयके पवा बाक्त।
- 3 मिनू ब्रशो मी खोदेशो तांडसीशो परमप्रभु यावे आ सोक्त का का पा आन तारी जुक्ता बाक्त। मत्ती ३:११
- 4 मिनू परमप्रभु यावे आ सोक्तीमी सोइश्शो आन कली प्रिंशा, मेको आन कली आन मतुइश्शो लोत्र पपाइक्मी बाक्त। प्रेरित ४:३१; प्रेरित १०:४४-४६
- 5 यरूसलेममी परमप्रभु यावे कली मान पा हिंब, रागी नेल्ल रे जाक्शो यहूदी बाक्मा बाक्त। प्रेरित १३:२६
- 6 मिनू मेकोपुकीमी मेको रेयके नेशा, खुम्सीमा बाक्त। मिनू मेकेर आन लोत्र कका ब्वाक्शो नेशा छक लाक्मा बाक्त।
- 7 मिनू छक लाक्शा “मेकोपुकी गालील डा मुर मनमी डा? तन्न इं लोत्र कका ब्वाक्तेक्म।
- 8 गालील डा मुरपुकीमी दोपा इं लोत्र नेल्ल ब्वाक्स जोक्मे माइ?” देंमुमा बाक्त।
- 9 मो दुम्शो ताइबपुकी ते ते डा बाक्मा बाक्त देशा हना, पारथेस, मेदी, एलाम, मेसोपोटामीया, यहूदीया, कापाडोसीया, पोन्टस, एसीया,
- 10 फ्रिगीया, पाम्फलीया, इजीप्त, लिबीया नु साइरेनी एर ओंथ, रोम, क्रेट नु अरब रागी रे जाक्शो यहूदी नु यहूदी दुम्शोपुकी बाक्मा बाक्त।
- 11 मेकोपुकीमी “गो नेल्लेमी परमप्रभु यावे आ पशो छक लाक्का डा गेय आ पर्वम आंइ लोत्र पशो नेंतय।
- 12 मोपा मेको नेबपुकीमी ‘मार बाक्म माइ, मार दुम्बा’ देंमुमा बाक्त।
- 13 का निकशीमी चहिं ‘शांबु दुक्शो बाक्तेक्म’ ” दे शुक्शी पामे बाक्त।

### साइ डा लोत्र थमा दुम्शो

- 14 मिनू पत्रुसमी सोइश्शोपुकी नु राप्शा, मुर आन कली “इं यहूदी नु यरूसलेममी बाक्बपुकी, आं लोत्र रुप्चा कली नोफा दाइश्शा नेनीने।
- 15 इन मिम्शो खोदेब पा एकोपुकी दुक्शो मनमी। मुल सुनी डा ९ बजेशो बाक्ब, दे तुइक्तीने। भजन संग्रह १६:८-११
- 16 मार रूपीन देशा हना, साइ परमप्रभु यावे आ लोत्र पाइब योएलमी ब्रेक्शो लोत्र मुल थमा दुम्त, दे रूपीने। साइ डा लोत्रम मार ब्रेक्शो बाक्त, देशा हना योएल ३:१-५
- 17 ‘परमप्रभु यावेमी रागी नुप्ची नाक्त मुर नेल्ल आन कली आं सोक्तीम प्रिनुडमी। मिनू इन तमी तौपुकीमी आं लोत्र पाइनीम। ठिटापुकीमी आं कोंइशो ताइनीमी, खाल्पापुकीमी डोमु ताइनीम।
- 18 आं वाइलीम वाइल आन कली यो आं सोक्तीम प्रिनुडमी। मिनू मेकोपुकीमी यो आं लोत्र पाइनीम।
- 19 मेको ठेयब नाक्त जाक्का क्येडा डोंइती गो सरीड नु रागीमी चिन्ड नु छक लाक्का डा गेय कोइनुड। हुश यिपाइक्नुड, मी ब्रपाइक्नुड नु ठेयब कुन ग्रूशो तपाइक्नुड।
- 20 नां छिडछिड दुम्ब। तास्ला हुश खोदेशो लल दुम्शो ताइसीब। मेको प्रभु आ ठेयब नाक्त आ क्येडा डोंइती मोदेशो दुम्ब।
- 21 मिनू सु सुमी प्रभु आ नें थिशा प्रोंइयीकी, दे ब्रेम्मा, मेकोपुकी पाप रे प्रोंइचा पुंइसीनीम’ दे परमप्रभु यावेम देशो बाक्ब। योएल २:२७-३२
- 22 मोपतीके इस्त्राएल डा लोकबपुकी, आं लोत्र नेनीने। परमप्रभुमी नासरथ डा येसु कली योव्रशा, सक्ति पाइश्शो गेय, चिन्ड नु छक लाक्का डा गेय इन दातेमी कोइपाइक्तु। मेको गे यो तशो तुइश्शो बाक्नीनी।
- 23 गेपुकीमी येसु कली अरेशो मटीब आन गुडम गेशा, शीम केप्शा कांटी थोक्शा क्याइश्शा साइक्पाइक्तीनी। डोंइती रे परमप्रभु यावेमी मोदेशो दुम्चा माल्ब, दे मिम्शा, इन कली मो पचा गेशो बाक्माक्त, दे रूपीन। प्रेरित ४:२८
- 24 गेपुकीमी साइक्पाइक्तीनी हना यो, परमप्रभुमी येसु कली बेक्शो रे सेंताक्व। मारदे हना आ गेना हना यो ब्रोंइशा बाक्ब परमप्रभु बाक्ब।

25 मिनु पिप दाऊदमी येसु आ पर्वम 'प्रभु गेना हना यो आं ग्युरा गे बाक्ब, दे तुइश्शा महिनुड। भजन संग्रह १६:८-११

26 गो ग्येरसीशा प्रभु कली ठेयब सेल्शा कुम्सो पाइनुड। मारदे हना प्रभु नु काथा बाक्शा, गेना हना यो ब्रोइचा ताइनुड।

27 बेक्शा आं रां राक्शा लचा मगेब, दे तुइक्नुड।

28 परमप्रभुमी ब्रोइतीक लां कौइताक्यी। मिनु गेना हना यो प्रभु नु ग्येरसीशा बाक्नुड' दे येसु आ पर्वम ब्रेक्शो बाक्त। भजन संग्रह १६:८-१०

29 आं लोकबपुकी, इं किकी पिपी दाऊद आ पर्वम का का पा देने चाप्नुड। दाऊद बेक्माक्त। मिनु लाइश्शा थिम्ने थुम्मे बाक्त। तेकेर थिम्ने गोपुकीमी मुल यो तुइक्नय। १राजा २:१०

30 परमप्रभु यावेमी आ लोत्र पाइब दाऊद कली 'इ चच युइ रे पिप का सेल्नुड' दे लोत्र गेशो तुइश्शो बाक्त।

31 मिनु दाऊदमी परमप्रभु यावे आ लोत्र पाइब दुम्तीके, मेको येसु, मस्सीह आ पर्वम लोत्र पाप्नु, दे तुइश्शो बाक्माक्त। मिनु मेकोमी 'मेको बेक्शो मुर आन बाक्तीकेम मलीब। आ रां मराक्बा' देशो बाक्माक्त। २सामुएल ७:१२-१३; भजन संग्रह ८९:४-५

32 परमप्रभु यावेमी येसु कली बेक्शो रे सेंताक्व। मेको गो आंइ मिक्चीमी ताइतक।

33 मिनु येसु परमप्रभु यावे आ ग्युरा गे बाक्शा, आ आफ रे परमप्रभु यावे आ सोक्त ताक्शा, आंइ तारी मोइक्तु। मिनु मार मार नेंनी, मार मार तनी, मेको नेल्ल परमप्रभु यावे आ सोक्तीम पपाइश्शो बाक्माक्त, दे तुइक्तीने। यूहन्ना १५:२६

34 पिप दाऊद सरीड ग्येत्थ क्युकचा मतवा। तन्न दाऊदमी 'प्रभुमी आं प्रभु कली, आं ग्युरा गे बाक्को। भजन संग्रह ११०:१

35 इ जोरी सत्रु आन कली इ खोइल आगाम मवोदुमी सम्म आं ग्युरा गे बाक्को' दे ब्रेक्शो बाक्त। मेको लोत्र दाऊद आ पर्वम ममाइ। येसु आ पर्वम ब्रेक्शो बाक्ब, दे रुपीन।

36 मोपतीके इस्साली नेल्लेमी मार तुइक्चा माल्नीनी देशा हना, गेपुकीमी शीम केष्शा कांटी थोक्शा साइक्पाइश्शो येसु कली परमप्रभु यावेमी प्रभु नु ख्रीस्त सेल्लु" दे माइक्मी बाक्त। ख्रीस्त आ देशो मस्सीह बाक्ब। प्रेरित ५:३१

37 मिनु आ लोत्र नेंब आन थुं खाइक्माक्त। मिनु पत्रुस नु सोइश्शो आन कली "गो मार पक मिनु?" दे हिल्लो पामेनु, प्रेरित १६:३०; लूका ३:१०

38 पत्रुसमी "इन थुं परमप्रभु यावे गे लेश्शा, येसु कली थमा सुइश्शा, आ नेंमी ब्वाक्कुम खुम्शा गुंइपांइसीने। मिनु इन पाप क्याम्चा पुंइसीनीनी। परमप्रभु यावे आ सोक्तीम प्रिंचा यो पुंइसीनीनी। प्रेरित ३:१७-१९; लूका २४:४७

39 मारदे हना परमप्रभु यावे आ गेशो लोत्र इन कली, इन तमी तौ चच युइ आन कली नु डोन रागीम बाक्ब आन कली गेशो बाक्त। मिनु परमप्रभु आंइ परमप्रभु यावेमी सु सु कली ब्रेश्शो बाक्मे, मेको आन कली गेशो बाक्त" दे शेंदीमी बाक्त। योएल ३:५

40 मिनु पत्रुसमी शुश शेंशा "थमा मसुइक्ब मदुमीने। मरिम्शो पाइब रे डोन बाक्कीने" दे शुश अर्ती गेशा माइक्मी बाक्त। मती १७:१७; फिलिप्पी २:१५

41 मिनु शुश मुरुमी पत्रुस आ देशो बिश्शा, ख्रीस्त कली थमा सुइश्शा, ब्वाक्कुम खुम्शा गुंइचा पुंइसमा बाक्त। मोपा ब्वाक्कुम खुम्शा गुंइचा पुंइसीबपुकी हजार सां खोइ दुम्मा बाक्त। मोपा थमा सुइक्ब नु तेम्समा बाक्त।

42 मिनु नेल्ल काथा बाक्शा, सोइश्शोपुकीमी शेंशो लोत्र शेंसीशा, प्रभु भोज जशा, प्रार्थना पना पन बाक्बाक्मा बाक्त। प्रेरित २०:७

थुं का डा दुम्शा बाक्शो

43 मिनु सोइश्शोपुकीमी परमप्रभु यावे आ सोक्त रे पा शुश चिन्ड नु छक लाक्चा डा गेय कौइना कौइन बाक्बाक्मा बाक्त। मुरपुकीमी मेको आन कली मोदेशो पशो तथा छक लाक्शा हिंबाक्मा बाक्त।

44 थमा सुइक्व नेल्ल थुं का दुम्शा, आन के बाक्शो मारेइ मारेइ नेल्ल इं के बाक्ब, दे मिम्बाक्मा बाक्त। प्रेरित ४:३२-३५

45 रू, मारेइ लेयडमेनु, सु सु आन कली माल्मा, मेको आन कली योक्शा क्येट गेशा वारच पाइबाक्मा बाक्त।

46 मिनु नाक्त कित कित परमप्रभु यावे आ खिंमी गुम्शा शेंसीबाक्मा बाक्त। खिं खिं हिरशा, प्रभु भोज जाइबाक्मा बाक्त। हाइशो थुं डा दुम्शा, जचा तूचा योक्शा, ग्येरसीशो दुम्शा,

47 परमप्रभु यावे कली ठेयब सेल्ना सेल्न बाक्बाक्मा बाक्त। मुरपुकीमी मेको आन कली मोदेशो पशो तशा, रिम्शो मिम्बाक्मा बाक्त। प्रभुमी नाक्त कित कित येसु कली थमा सुइक्व तेम्ना तेम्न बारपाइक्मी बाक्त। प्रेरित ४:४; प्रेरित ५:१४; प्रेरित ६:७; प्रेरित ११:२१; प्रेरित १४:१

### 3

#### खोइली मदुक्ब कली सापाइशो

1 मिनु काबु पत्रुस नु यूहन्ना ३ बजे डा प्रार्थना पची ना परमप्रभु यावे आ खिंमी जाक्सा बाक्त।

2 मेकेर जरमेसे रेन खोइल मदुक्ब मुर का बाक्माक्त। मेको कली नाक्त कित कित कुरशा चाक्शा, खिं ओव्रब आन कली पुंडदीमील, दे “रिम्शो लाप्चो” नें पाइशो लाप्चो आ डोंइती वोइक्बाक्मा बाक्त।

3 मिनु मेको पुंडब मुरुमी पत्रुस नु यूहन्ना आस कली ओव्रचशो तशा, मारेइ गेनीसी कों, दे पुना बाक्त।

4 मिनु पत्रुस नु यूहन्नामी पुंडब कली कोव्रशा, पत्रुसमी “ओथ कोव्रस्की” देंमाक्त।

5 मिनु पुंडबमी मार गेयीसी, दे आस पा कोव्रसी बाक्त।

6 मिनु पत्रुसमी “गो नु सुन चांदी मबा। मार बाक्मे, मेकोन गेनन। तन्न आं के मार मेकोन गेनन। नासरथ डा येसु खीस्त आ नेंमी बोक्शा एर ओथ हिरसो” देंशा,

7 पुंडब आ ग्युरा गुइ ग्याइशशा कीशा छुल पोक्शा राप्पदा बाक्त। राप्पदानु, आ खोइल डा बोंइसे नेल्ल दुक्ब दुम्शा,

8 दिव दाव प्रेक्शा, एर ओथ गाक्ब दुम्माक्त। गाक्ब दुम्शा परमप्रभु यावे कली ठेयब सेल्शा, कुम्सो पना पन, प्रेक्ना प्रेक्न पत्रुस नु यूहन्ना नु काथा गाक्शा, परमप्रभु यावे आ खिं ओव्रमाक्त।

9 मिनु मेकेर बाक्बपुकीमी मेको पुंडब कली साशा, परमप्रभु यावे कली ठेयब सेल्शा गाक्शो तशा,

10 “रिम्शो लाप्चो आ डोंइती बाक्ब खोइल मदुक्ब दोपा साशा ओं पा गाक्मे” दे छक लाक्मा बाक्त।

11 पुंडबमी पत्रुस नु यूहन्ना कली काइ मप्रोंइथु काथा गाक्शा, पिप सोलोमन नें वोइशो थाम पाइशो बाक्तीके जाक्दीम्मा बाक्त। मिनु एर ओथ डा मुर दोरशा जाक्शा पुम्दमे बाक्त। प्रेरित ५:१२; यूहन्ना १०:२३

12 मिनु मोपा पुम्शो तशा, पत्रुसमी “इ इस्माएलीपुकी, एको मुर साशो तशा छक लाक्तीनी। मिनु गो आंस सक्तिम सापाइशो बाक्माक्त, फेस्तस दे मिम्तीनी? आंस सक्तिम सापाइशो ममाइ।

13 इ किकी पिपी अब्राहाम, इसहाक नु याकूब आन परमप्रभु यावेमी आ गेय पाइब येसु कली ठेयब सेल्लु। गेपुकी चहिं मेको कली ग्याइक्पाइक्तीनी। पिलातसमी मेको कली प्रोंइचा थुं पवानु यो, गे मबिस्सीनी।

14 तन्न गेपुकीमी परमप्रभु यावे आ योव्रशो नु ठीक पाइब कली तिल्लीनी। मुर साइक्ब कली प्रोंइशा सोइक्चा कली पुंडतीनी। मत्ती २७:२०-२१

15 मिनु गे ब्रोंइचा गेब कली साइक्तीनी। परमप्रभु यावेमी चहिं बेक्शो रे सेंताक्व। गो मेको तशा, सांक्छी दुम्ताक्व।

16 परमप्रभु आ सक्ति येसु नु बाक्ब। मिनु येसु आ नें थिशा थमा सुइशशा, सक्ति पाइशो गेय पचा तांइसीब, दे थमा सुइक्कीनी। मिनु आंइ कली थमा सुइशशा तशा, परमप्रभुमी एको मुर कली सापाइशशा कोंइताक्व। मिनु साशा सेस दुम्शो ताइतीनी।

17 आं लोकबपुकी, इन ठेयब मुरपुकी नु गे नेल्लेमी येसु कली मतुइक्थु, साइक्पाइक्तीनी, दे तुइक्नुड। लूका २३:३४

18 साइ डोंइती रे परमप्रभुमी यावे आ लोत्र पाइबपुकी रे 'ख्रीस्त श्येत जशा साइक्चा पुंडसीब' दे लोत्र पाइक्बाक्माक्त। परमप्रभु यावेमी मेको लोत्र खाप्शो बाक्त। लूका २४:४४

19 मुल चहिं इन थुं परमप्रभु यावे गे लेशशा, ख्रीस्त कली थमा सुतीन। मिनु मेकोमी इन पाप क्याम्ब। प्रेरित २:३८

20 मिनु मेकोमी इन कली रिम्शो बाक्चा गेब। मिनु परमप्रभु यावेमी पाप रे प्रोंइब, येसु ख्रीस्त इन बाक्तीक सोइक्ब। मिनु इन थुं नाइक्पाइक्ब।

21 तन्न परमप्रभु यावे आ लोत्र पाइबपुकीमी साइ रे मार मार देंमा, मेको लोत्र थमा मदुम सम्म येसु ख्रीस्त परमप्रभु यावे नु स्वर्गम बाक्ब।

22 साइ नेसी परमप्रभु यावे आ लोत्र पाइब मोसामी 'परमप्रभु, इन परमप्रभु यावेमी आं कली योत्रशो खोदेशो पा आ लोत्र पाइब इन मुर आन दाते रे योत्रशा, इन कली वारच पाइब नु लां कोंइब सेल्ब। मोपा योत्रशोमी इन कली मार मार शेंबा, मेको आ लोत्र नेंशा टिने। ब्यवस्था १८:१५,१९

23 सु सुमी आ लोत्र मटीमे, मेकोपुकी जाम्शा लाइनीम' दे देंशो बाक्त।

24 मोसामी देंशो लोत्र ला ममाइ। परमप्रभु यावे आ लोत्र पाइब सामुएल नु अरु शुशेमी मोसामी देंशो खोदेशो लोत्र पामे बाक्त।

25 इन किकी पिपी अब्राहाम आ खिं डा मुर नमी। परमप्रभु यावेमी अब्राहाम कली 'गे इ खिं डा मुर रे पा रागी डा मुर नेल्लेमी आसीक राइनीम' दे कबल पशो बाक्माक्त। उत्पत्ती २२:१८

26 मोपतीके परमप्रभु यावेमी आ गेय पाइब येसु कली डोंइती इन बाक्तीकेम सोइक्ताक्ब। मारदे हना इन कली आसीक गेशा, इन मरिम्शो गेय रे लेत्चा, दे मोदेशो पाप्तु, दे रुपीने" दे शेंदीमी बाक्त। प्रेरित १३:४६

## 4

### कछडीम राप्पाइक्चा पुंडसीशो

1 मिनु पत्रुस नु यूहन्नामी मोदेशो शेंना शेंन बाक्सानु, चढ़ेबपुकी, परमप्रभु यावे आ खिं डा ठेयब मुर नु सदुकीपुकी जाक्मा बाक्त। लूका २७:४:५२

2 मिनु "येसु बेक्शो रे सेंसाक्व। मिनु मुर नेल्ले यो बेक्शो रे सेंसीनीम" दे शेंशो नेंशा, थुं मनुमा बाक्त। प्रेरित २३:८

3 मिनु पत्रुस नु यूहन्ना आस कली ग्याइक्पाइशशा "मुल नां रिक्त। मोपतीके कछडीम दीसा बाक्चा" दे मेको नाक्दो जेल्खानमी चोक्पदमे बाक्त।

4 पत्रुस नु यूहन्ना आस शेंशो लोत्र नेंशा, थमा सुइक्ब ५ हजार जना जाक्दीशो बाक्मा बाक्त। प्रेरित २:४७

5 मिनु आ दीसा कछडीम बाक्चा कली यरूसलेम डा हुकुम पाइब, जोक्ब तुइक्ब खाल्पापुकी नु सास्त्री नेल्ल बुक्मा बाक्त।

6 मेना ठेयब चढ़ेब हन्नास बाक्माक्त। डोंइती डा ठेयब चढ़ेब काइयाफास, यूहन्ना नु अलेकजन्डर बाक्मा बाक्त। ठेयब चढ़ेब आन खिं डा मुर यो शुश जाक्शो बाक्मा बाक्त। लूका ३:१-२

7 मेको नेल्ल खुम्सीशा बाक्मानु, पत्रुस नु यूहन्ना आस कली जेल्खान रे गुंडपाइशशा, आन बाक्तीके चाक्पाइशशा आन डोंइती राप्पदमे बाक्त। मिनु "मेको खोइल मदुक्ब मुर कली सु आ सक्तिमी, सु आ नें ब्रशा सापांडसी, लो देनीस" दे हिल्लो पामे बाक्त। मती २१:२३

8 मिनु पत्रुस परमप्रभु यावे आ सोक्तीमी ब्रीशा, मेको आन कली "इ इस्राएल डा हुकुम पाइब नु खाल्पापुकी, आं लोत्र नेनीने। मती १०:१९-२०

9 मेको खोइल मदुक्ब कली खोइल सापाइशशा, रिम्शो गेय पाइतस्कु। दोपा सापांडस्कु, दे तुइक्चा दाक्नीनी हना, शेंनन्नी।

10 गे ला ममाइ, तन्न इं इसाएल डा मुर नेल्लेमी रुप्या माल्नीम। मेको खोइल मदुक्ब मुर नासरथ डा येसु ख्रीस्त आ नें ब्रशा साशा गाकने चाप्व दुम्माक्त, दे रुपीने। मेको नासरथ डा येसु ख्रीस्त कली गेपुकीमी शीमी केप्शा कांटी थोकशा क्याइक्पाइश्शा साइक्पाइक्तीनी। तन्न परमप्रभु यावेमी मेको कली बेक्शो रे सेंताक्व। प्रेरित ३:६, १३-१६

11 खिं सेल्बपुकीमी गारो प्रोव्रडमेनु, एको फुल्लु मगार, दे ताइक्तमे बाक्त। मेको मगारथु, ताइश्शो फुल्लु चहिं सुर डा जग फुल्लु दुम्माक्त, दे ब्रेक्शो लोव्र, मेको येसु आ पबर्म ब्रेक्शो बाक्ब, दे रुपीन। मत्ती २१:४२; भजन संग्रह ११८:२२

12 मुर आन कली श्येत नु पाप रे प्रोइब येसु ख्रीस्त का ला बाक्ब। परमप्रभुमी येसु ख्रीस्त कली अधिकार गेशा, मुर नेल्ल आन क्येडा ठेयब सेल्लु। मिनु आ नेंमी ला ब्रोइचा तांडसीब, दे तुइक्तीने” दे माइक्मी बाक्त। प्रेरित १०:४३; मत्ती १:२१

13 पत्रुस नु यूहन्ना शुश मशेंसीशो बाक्ताक्स हना यो, जोक्ब तुइक्ब खोदेशो पा महिंथु, ठेयब थुं पा लोव्र पाम्से बाक्त। मेको लोव्र नेंशा, कछडी पाइबपुकी छक लाक्मा बाक्त। मिनु मेको निक्शी थमा पा येसु नु काथा गाक्ब काथा बाक्ब बाक्सा बाक्त, दे तुइक्तमे बाक्त।

14 सापाइक्चा पुंडसीशो मुर पत्रुस नु यूहन्ना नु काथा राप्शा बाक्शो तशा, जोल पाम्से बाक्त देंशा, आस लोव्र जोल सेल्ने मचाप्यु, मारेइ देंने मचाप्मे बाक्त। प्रेरित ३:८-९

15 मिनु पत्रुस, यूहन्ना नु साशो मुर सांफा आन कली गुंडशा वोइश्शा “मुल मार पया” दे लोव्रसी पचा गोव्रमे बाक्त।

16 मिनु लोव्रसी पा “खोइल मदुक्ब कली सापाइश्शा मेको निक्शीमी ठेयब छक लाक्चा डा गेय कोंइताक्स। इं यरूसलेममी बाक्बपुकीमी थमा लोव्र बाक्माक्त, दे नेल्लेमी तुइक्नीमी। मिनु गोपुकीमी थमा ममाइ देंने मचाप्यनय। यूहन्ना ११:४७

17 तन्न मोदेशो लेंशा मदुम्ल, दे मेको आस कली मार पचा देंशा हना, मुल डा मेरे येसु आ नें सुइ कली मतुइक्पाइक्चा नमी, आ नें ब्रशा सुइ कली मसापाइक्चा नम, दे माइक्चा नसी” दे सेल्ला पामे बाक्त।

18 मिनु पत्रुस नु यूहन्ना आस कली खिंम ओइशा “हेरकादे, मुल डा मेरे येसु आ नें मब्रचा। सुइ मुर आन कली मशेंचा। मतुइक्पाइक्चा नम” देंमा बाक्त।

19 मिनु पत्रुस नु यूहन्नामी “परमप्रभु यावे आ देंशो टिचा देय इन देंशो टिचा? एको निक्शीमी परमप्रभु यावेमी तेको पचा देंबा, दे आंमा मिन्तीने। प्रेरित ५:२८-२९

20 गो निक्शी चहिं आंस मिक्चीम तशो नु आंस नोफामी नेंशो लोव्र मदेंथु मचाप्यन्स्कु। मेको रुपीन” देंसा बाक्त।

21 मिनु मेको आस दोस थिन्ने मचाप्यतीके मेकोपुकीमी “हेरकादे, मुल डा मेरे मोदेशो गेय मपसे” दे हिंच कोंइशा, लोव्र थोकशा, सोइक्तमे बाक्त। शुश मुरुमी आस पशो छक लाक्चा डा गेय तशा, परमप्रभु कली ठेयब सेल्ना सेल्न बाक्बाक्मा बाक्त।

22 साशो मुर चहिं ४० बर्स लाक्शो बाक्माक्त। मोपतीके मेको कली साशो तशा, नेल्ल छक लाक्मा बाक्त।

### परमप्रभु कली ठेयब सेल्शो

23 मिनु पत्रुस नु यूहन्ना प्रोइचा पुंडसीशा, वारच आन कली ग्रुथ लसा बाक्त। मिनु सु सुमी मार मार पवा, मार मार देंमा, मेको नेल्ल शोव्रडसे बाक्त।

24 मिनु आस लोव्र नेंशा, नेल्ल थुं का पा परमप्रभु यावे कली ठेयब सेल्शा “परमप्रभु यावे, नेल्ल आन कली सासन पाइब, गे सरीड, रागी, समुन्द्र नेल्ल सेल्लतीनी। मिनु मेकेर बाक्शो मारेइ मारेइ सेल्लतीनी। मिनु मेको आन कली कोव्रनीनी।

25 साइ इन लोव्र पाइब किकी पिपी, आंइ आफ दाऊद कली इन सोक्त रे पा ‘अर्को रागी डा मुरपुकी मारदे गाइक्नीमी, मारदे चुरनीमी? मुरपुकीमी मारदे शोर गाक्शो दूली मिन्मीमी?

26 परमप्रभु यावे नु आ तेल लुकशो, खीस्त आस जोरी सत्रु दुम्शा, रागी डा पिपपुकी नु हुकुम पाइबपुकी थुं का दुम्शा बुक्नीम' देपाइक्तीनी। भजन संग्रह २:१-२

27 मोपा साइ इन पपाइश्शो लोत्र सिनाक्त मुलाक्त गाम्ना गाम्न पित। मारदे हना इन सोइश्शो, इन गेय पाइब येसु, आ जोरी सत्रु आंड मिक्चीमी ताइतक। पिप हेरोद का, पन्तीयस पिलातस का, अर्को रागी डा मुर नु इस्राएल डा मुर नेल्ल गारशा, आंड सहरमी बुक्शो ताइतक। लूका २३:१२

28 मेकोपुकीमी इन देशो डा लाकशा मारेइ पने मचबेम। इन देशो ला पने चाप्तेक्म। प्रेरित २:२३

29 परमप्रभु, मेकोपुकीमी हिंच कोइताक्म हना यो, महिंथुं ठेयब थुं पा इन लोत्र शेंतीक सक्ति तकल, दे पुंडनीकी। एफिसी ६:१९

30 परमप्रभु यावे, इन गेय पाइब येसु आ नें ब्रशा, सापाइक्तीक गेय, छक लाक्वा डा गेय नु चिन्ड कोइने चाप्कल, दे पुंडनीकी” दे प्रभु कली ठेयब सेल्शा पुन्मे बाक्त।

31 मोदेशो प्रार्थना पने थुम्मे चोटीन खिनु कुशो खोदेशो पा आन बुक्शा बाक्तीके एर ओंथ नेल्ल हिम्से बाक्त। मिनु नेल्ले परमप्रभु यावे आ सोक्तीम प्रिंचा पुंडसमा बाक्त। मिनु महिंथुं ठेयब थुं पा परमप्रभु आ लोत्र शेंना शेंन गाक्बाक्मा बाक्त।

थमा सुइक्ब नेल्ल थुं का डा दुम्शो

32 मिनु थमा सुइक्ब आन थुं नेल्ल कांडचीक दुम्शा, मेकोपुकी नु बाक्शो मारेइ मारेइ नेल्ल इं के मिम्बाक्मा बाक्त। सुइमी यो आं के, इं के मदेबाक्मा बाक्त। प्रेरित २:४४

33 मिनु येसु आ सोइश्शोपुकीमी सक्ति पाइश्शो लोत्र पा प्रभु येसु बेक्शो रे सेंचा पुंडसाक्व, दे नेंपाइक्बाक्मा बाक्त। मेको नेल्ल शुश आसीक तामे बाक्त। प्रेरित २:४७

34 मोपतीके श्येत जाइब का यो मबाक्मा बाक्त। मारदे हना रू खिं थीबपुकीमी रू खिं का निकशी लेयशा, क्येत चाक्शा, प्रेरित २:४५

35 मेको १२ जना सोइश्शो आन कली गेशा, सु सु कली माल्मा, मेको आन कली योक्शा गेचा नमी, दे गेबाक्मा बाक्त। मिनु मेकोपुकीमी योक्बाक्मा बाक्त।

36 मोदेशो गेब का चहिं योसेफ माइश्शो मुर का बाक्माक्त। मेको योसेफ साइप्रस रागीमी जरमेशो लेवी आ थर डा बाक्माक्त। सोइश्शोपुकीमी योसेफ आ याइनी नें बारनाबास वोइश्शो बाक्मा बाक्त। बारनाबास देशो “आन थुं ग्येतथ लुकच दुम्शो मुर आन कली आन थुं नाइक्पाइक्ब” दे रुम्सीब। प्रेरित ११:२२-२६; प्रेरित १२:२५; प्रेरित १५:२; गलाती २:१कलस्सी ४:१०

37 मेको बारनाबासमी रू का लेयशा क्येत चाक्शा, सोइश्शो आन गुइमी गेवा बाक्त।

## 5

हनानीया नु सफीरा

1 मिनु हनानीया नु आ मीश सफीरामी यो आस रू का लेयडसे बाक्त।

2 मिनु क्येत ताक्शा, इच्का गो वोंइसीस, लीशो चहिं नेल्ल ओशो ला, दे सोइश्शो आन कली गेचा, दे लोत्रसी गारपदसे बाक्त। मिनु मोपा मेको लीशो क्येत हनानीयामी चोव्रदीम्माक्त। प्रेरित ६:३४-३७

3 मिनु सोइश्शो आन बाक्तीके जाक्दीश्शा, क्येत गेवानु, पत्रुसमी “हनानीया, मारदे गे इ थुंम सैतान ओव्रचा गेशा, परमप्रभु यावे आ सोक्त कली जोल पवी? रू लेयशो क्येत नेल्ल ओशो ला बाक्ब, दे मारदे इच्का खुइश्शा वोदी?

4 मेको रू मलेयसी नु इस केन बाक्त। लेयसी नोले मेक रे जाक्शो क्येत यो इस केन बाक्त। मिनु मारदे जोल पसी? गे आंड कली जोल मपसी, तन्न परमप्रभु यावे कली जोल पाइतीसी” दे मदा बाक्त।

5 मिनु हनानीयामी पत्रुस आ देशो नेंशा, दिड गोल्शा बेक्माक्त। मिनु मुरपुकीमी मेको लोत्र नेंशा, शुश हिंमा बाक्त।

6 मेकेर खुम्सीशो ठिटापुकीमी आ बेक्शो रां लाइश्शा थिम्मे बाक्त।

7 मिनु हेररा घन्टा सां नोले हनानीया आ मीशेमी आ वोंइश बेक्त, दे मतुइक्थु, मेकेर जाक्माक्त।

8 मिनु पत्रुसमी “इस रू ओशोमीन लेयसी? लो, देनो” देंमेनु “ओशोमीन लेयतस्कु” देंमाक्त।

9 मिनु पत्रुसमी “गे निक्की गारशा, मोदेशो पा परमप्रभु यावे आ सोक्त कली जोल पचा दुम्बा? इ वोंडश कली थिम्थ लाइबपुकी लेशशा जाक्चाम्तेक्म। इच्ची ना इ कली यो लाइशशा थिम्मीम” देंमेनु, मीश मुर यो दिङ्ग गोल्शा बेक्माक्त।

10 मिनु ठिटापुकी जाक्शा कोव्रडमेनु, सफीरा यो बेक्शो तामे बाक्त। मिनु लाइशशा आ वोंडश थिम्तीके आ नेक्था थिम्मे बाक्त।

11 मिनु थमा सुइशशा बुक्बपुकी नु मेको लोव्र नेंब नेल्लेमी “मो देशो हेंथे पा जोल पचा मद्मुबाक्माक्त” दे तुइशशा, शुश हिमा बाक्त।

### सोइशशोपुकीमी गेय पशो

12 मिनु सोइशशोपुकीमी मुर आन दातेमी शुश चिन्ड नु छक लाक्चा डा गेय पाप्तेक्म। मेको नेल्ल सोलोमन नें वोंडशशो थाम पाइशशो ठेयब कोठाम बाक्बाक्मा बाक्त। प्रेरित ३:११

13 थमा मसुइक्बपुकी मेकोपुकी नु काथा गाक्चा बाक्चा हिंशा, मेको आन कली ठेयब सेल्शा, आन पर्वम रिम्शो लोव्र ला पाइबाक्मा बाक्त।

14 मिनु वोंडश मुर नु मीश मुर शुशेमी प्रभु कली थमा सुइक्ब दुम्शा, तेम्सीन सीन शुश बारना बारन लमा बाक्त। प्रेरित २:४७

15 सोइशशोपुकीमी शुश छक लाक्चा डा गेय पशो तशा, मुरपुकीमी रोइ पाइब आन कली चाक्शा, लां पित्थ इप्पाइशशा, वोंडक्बाक्मा बाक्त। मारदे हना पत्रुस मेको लां गाक्मेनु, आ वांकुम योइशशा साब, दे मिम्शा मो पाइबाक्मा बाक्त। प्रेरित १९:११-१२

16 यरूसलेम एर ओथ सहर डा रोइ पशो नु वोलम तशो मुर शुश आन कली चाक्बाक्मा बाक्त। मेकोपुकी यो नेल्ल साशा लाइबाक्मा बाक्त।

### सोइशशोपुकी खेदा पचा पुंडसीशो

17 सोइशशोपुकीमी मोदेशो छक लाक्चा डा गेय पशो तशा, ठेयब चढ़ेब नु सदुकी आन थुम गेहे पामे बाक्त। प्रेरित ४:१, ६

18 मिनु सोइशशो आन कली ग्याइक्पा लाइशशा, जेल्खानमी चोक्पदमे बाक्त।

19 मिनु मेको नाक्दो परमप्रभु यावे आ स्वर्ग डा गेय पाइब कामी लाप्चो रोकशा, मेको आन कली गुंडदीमी बाक्त। प्रेरित १२:७

20 मिनु गुंडशा “परमप्रभु यावे आ खिं लशा, मुर आन कली येसु आ नेंमी ब्रोंइतीक लां आ पर्वम शेंदीने” दे सोइक्तीमी बाक्त।

21 मेको लोव्र टिशा, सुनी कना परमप्रभु यावे आ खिं जाक्दीशशा, ओव्रशा शेंचा गोव्रमे बाक्त।

### कछडीमी राप्पाइक्चा पुंडसीशो

मेको लोव्र टिशा, सुनी कना परमप्रभु यावे आ खिं जाक्दीशशा, ओव्रशा शेंचा गोव्रमे बाक्त। मिनु ठेयब चढ़ेब, मेको नु बाक्बपुकी, इस्पाएली आन जोक्ब तुइक्ब खाल्पापुकी खुम्सीशा “सिनाक्त चोक्पाइशशा आन कली चाक्चा” दे जेल्खान सोइक्तमे बाक्त।

22 मिनु गेय पाइबपुकी लशा कोव्रडमेनु, मेको चोक्चा पुंडसीशोपुकी मथिदमे बाक्त। मिनु लेशशा जाक्शा, देंमा बाक्त।

23 मेकोपुकीमी “जेल्खानमी जाक्दीकानु, खाल पाइब बाक्तेक्म। लाप्चो नेल्ल चोक्स डा चोक्स बाक्तेक्म। मिनु आगा कोव्रशोनु, इन माल्शो मुरपुकी चहिं मबाक्म” देंमा बाक्त।

24 मिनु परमप्रभु यावे आ खिं डा कप्तान नु ठेयब चढ़ेबपुकीमी मेको लोव्र नेंशा “ते लमा, दोपा ओदेशो दुम्मे?” दे छक लाक्शा, मुल मार पचा, दे मिम्मे मचाप्मे बाक्त।

25 मिनु मुर का जाक्शा “सिनाक्त गेपुकीमी जेल्खानमी चोक्पाइशशा मुरपुकीमी परमप्रभु यावे आ खिंमी मुर आन कली शेंना शेंन बाक्नीम” देंमाक्त।

26 मिनू कप्तान नु गेय पाइबपुकी परमप्रभु यावे आ खिं लशा, सोइशशो आन कली मारेइ मपथु, चाकमे बाक्त। “मारदे हना मरिम्शो पाइतय हना, मुरपुकीमी इं कली फुल्लु आप्शा साइक्नीम” दे हिंमा बाक्त।

27 मिनू कछडीम चाकशा, आन डोंइती राप्पाइक्मी बाक्त।

28 मिनू ठेयब चढेबमी “येसु आ नें मशेंचा, मुर आन कली मतुइक्पाइक्चा देंतक। गेपुकीमी चहिं यरूसलेम नेल्ल मेको लोव्र फ्रनी बाक्त। लोव्र फ्रशो ला ममाइ। मेको येसु कली गोपुकीमी साइशशो, दे आंइ कली दोस गेनी बाक्त” दे हुइक्तीमी बाक्त। प्रेरित ४:१८; मत्ती २७:२५

29 मिनू पत्रुस नु येसु आ सोइशशो नेल्लेमी “गोपुकीमी मुर आन लोव्र क्येडा परमप्रभु यावे आ लोव्र टिचा, दे थुं फ्रेंताक्क। प्रेरित ४:१९; दानीएल ३:१७-१८

30 इं किकी पिपी आन परमप्रभु यावेमी गेपुकीमी शीम केप्शा, कांटी थोकशा क्याइशशा साइक्पाइशशो येसु कली बेक्शो रे सेंताक्क। प्रेरित ३:१५

31 परमप्रभु यावेमी इस्राएली आन थुं आ गे लेप्पाइक्क, लां कोंडब कली नु पाप रे प्रोंडब सेल्शा, आ ग्युरा गे निप्पाइक्कु। प्रेरित २:३३

32 मेको नेल्ल आंइ मिक्चीमी ताइतक। आ देंशो टीब आन कली परमप्रभु यावेमी आ सोक्त गेब। मिनू परमप्रभु यावे आ सोक्तीमी ‘मेको लोव्र नेल्ल थमा बाक्ब’ दे तुइक्पाइक्क, दे तुइक्तीने” देंमा बाक्त। लूका २४:४८; यूहन्ना १५:२६-२७

33 मोदेशो लोव्र पशो नेंशा, गाइशशा “मेको आन कली मसाइक्थु मप्रोंइचा नमी” देंमा बाक्त।

### गमालीएल आ देंशो पशो

34 मिनू मेको आन दातेमी गमालीएल माइशशो फरिसी का बाक्माक्त। मेको निसाफ पतीक आ पर्बम शेंब बाक्माक्त। मुर नेल्लेमी मेको कली मान पाइबाक्मा बाक्त। मिनू गमालीएलमी मेकेर बाक्ब आन कली मोपा गाइशशो तशा, सोइशशो आन कली लाडगा गुंइशा वोइक्मी बाक्त। प्रेरित २२:३

35 मिनू कछडीम बाक्ब आन दातेमी राप्शा, मेको आन कली “आं लोक्ब इस्राएलीपुकी, मेको मुर आन कली मार पचा चिक्तीनी, मेको होस पा पने। मोपतीके आं लोव्र का निक्शी नेनीने।

36 साइ थुदास माइशशो आ पर्बम गो नेल्लेमी तुइक्ताक्य। मेकोमी ठेयब सेल्सीशा, ४ सहे मुर आन कली आ नोले खोइक्ब सेल्लु। मिनू थुदास साइक्चा पुंडसाक्क। मिनू आ नोले खोइक्ब नेल्ल ब्राशा गाक्तेक्क। मिनू मेको आन लोव्रसी जाम्शा लत।

37 मेको नोले मुर आन कली हिक्तीक बर्समी गालील डा यहूदा माइशशो मुर का बोक्माक्त। मेकोमी यो आ नोले खोइक्ब मुर सेला बाक्त। मेको यो जाम्शा लमाक्त। मिनू आ नोले खोइक्ब नेल्ल ब्राशा गाक्मा बाक्त।

38 मोपतीके मेको येसु माइशशो आ नोले खोइक्ब आन कली मारेइ मपाइय्य। मो प्रोंइशा सोइक्तय। मेको आन लोव्र मुरुमी मिम्शो लोव्र बाक्त हना, मारेइ मदुम्थु जाम्शा लाइब। मत्ती १५:३३

39 परमप्रभु यावे आ पशो बाक्त हना चहिं, गेपुकीमी तैक्शा यो मतेक्सीब। मेको ला ममाइ। गेपुकी परमप्रभु यावे कली मरिम्शो पाइब दुम्नीनी” दे माइक्मी बाक्त।

40 मिनू गमालीएल आ लोव्र नेंशा, बिस्समा बाक्त। मिनू लाडगाम सोइशशो आन कली खिं गा ब्रेशशा, का का पा युक्पदमे बाक्त। मिनू “मुल डा मेरे येसु आ नेंमी शेंशा मगाक्कीने” दे प्रोंइशा सोइक्तमे बाक्त। मत्ती १०:१७

41 मिनू सोइशशोपुकी ग्येरसीशा, मेकेर रे लमा बाक्त। मारदे हना “येसु आ नेंमी श्येत जचा रिम्शो दुम्ब” देंमा बाक्त। मत्ती ५:१०-१२; १पत्रुस ४:१३

42 मिनू नाक्त किंत किंत परमप्रभु यावे आ खिंमी, आंम आन खिं खिंमी खुम्सीशा “येसु परमप्रभु यावे आ सोइशशो ख्रीस्त बाक्ब” दे शेंना शेंन बाक्बाक्मा बाक्त।

## 6



1 मेना थमा सुइक्बपुकी शुश बारना बारन लमा बाक्त। ग्रीक लोत्र नु हिब्रू लोत्र पाइबपुकीमी गन गन पाप्तेक्म। मारदे हना नाक्त किंत किंत योक्तीक जचा थोत्रक मेको आन वोइश बेक्शो मीश मुरपुकीमी ठीक पा मताइबाक्तेक्म। ग्रीक लोत्र नु हिब्रू लोत्र पाइबपुकी यहूदी बाक्तेक्म। प्रेरित ४:३८

2 मेको लोत्र नेंशा सोइश्शोपुकीमी थमा सुइक्ब नेल्ल आन कली ब्रेश्शा “आंइ लोकबपुकी, गो परमप्रभु यावे आ लोत्र शेंचा प्रोइशा, जचा फेक्चा योक्शा गाक्चा आंइ गेय ममाइ।

3 मोपतीके मेको योक्चा कली मुरपुकी वोइक्चा मालनय। दोदेशो मुर मालनय देशा हना, मुरपुकीमी हिक्शो, परमप्रभु यावे आ सोक्तीमी ब्रीशो नु जोक्ब तुइक्ब ७ जना गेय पाइब मुर योत्रचा मालनय। १तिमोथी ३:८-१०

4 गो चहिं परमप्रभु कली प्रार्थना पना पन शेंथ गाक्चा मालनय” देमा बाक्त।

5 सोइश्शो आन लोत्र नेंशा नेल्ल आन थुं नुशा, ७ जना मुर आन कली योत्रचा बिस्समा बाक्त। मिनु सु सु आन कली योत्रडमे बाक्त देशा हना, रिम्शो थमा सुइक्ब परमप्रभु यावे आ सोक्तीमी ब्रीशो स्तीफानस, फिलीप, प्रोकोरस, निकानोर, तीमोन, परमीनास नु एन्टीओक डा निकोलाउस आन कली योत्रडमे बाक्त। निकोलाउस चहिं अर्को रागी डा मुर बाक्शा यो यहूदी दुम्शो बाक्माक्त। प्रेरित ८:५

6 मिनु योत्रशो आन कली सोइश्शो आन डोंइती राप्पदमे बाक्त। मिनु सोइश्शोपुकीमी योत्रशो आन तारी आन गुइ वोइश्शा, मेको आन परबंम परमप्रभु कली पुन्मे बाक्त। प्रेरित १:२४; प्रेरित १३:३; प्रेरित १४:२३

7 मिनु परमप्रभु यावे आ लोत्र तेइ तेइ बारना बारन लमाक्त। यरूसलेममी शुश मुर येसु ख्रीस्त कली थमा सुइक्ब दुम्शा, तेम्सीन सीन बारना बारन लमा बाक्त। चढेब शुश यो थमा सुइक्ब दुम्मा बाक्त। प्रेरित २:४७; प्रेरित १९:२०

### स्तीफासमी लोत्र पशो

8 मिनु स्तीफानस चहिं परमप्रभुमी शुश शिशो नु सक्ति गेचा पुंइसीशो बाक्माक्त। मोपतीके मुर आन कली शुश चिन्ड नु छक लाक्चा डा गेय नु चिनु कोंइशा बाक्बाक्माक्त।

9 मिनु लिबेरती माइश्शो ग्रुम्तीक सिं नु साइरनी, अलेकजेन्दीया, सिलीसीया नु एसीया रे जाक्शो शेंबपुकीमी स्तीफानस नु जिशो बाक्तेक्म।

10 तन्न स्तीफानस परमप्रभु यावे आ सोक्तीमी ब्रीशा जोक्शो तुइश्शो ब्वाक्मेनु, सुइमी ग्राने मचाप्मे बाक्त। लूका २१:१५

11 मोपा ग्राने मचाप्तीके सुइ आन मतुइक्थु, मुर आन कली पोक्शा “मेकोमी इ किकी पिपी मोसा नु परमप्रभु यावे आ परबंम हेंथे नु ग्रॉग्रा दिशो लोत्र पशो नेंतक” दे जोल पा लोत्र ब्रपदमे बाक्त। मती २६:६०-६६

12 मोदेशो जोल लोत्र पाइब मुर, यहूदी आन जोक्ब तुइक्ब खाल्पा नु सास्त्री आन कली पोक्गमे बाक्त। मेको लोत्र पा ब्रुइबपुकीमी स्तीफानस कली ग्याइश्शा, कछरीम राप्पदमे बाक्त।

13 मिनु जोल पा सांक्छी वोइश्शा, मेको आन कली “एको मुरुमी परमप्रभु यावे आ सिं नु परमप्रभु यावे आ अरेशो लोत्र आ परबंम शुक्शी पा हेंथे लोत्र पाइब। येरमीया २६:९, ११

14 मेको नासरथ डा येसुमी परमप्रभु यावे आ सिं प्रेप्ब। मोसामी गेशो पतीके लोत्र प्रोइशा, नक पतीक वोइक्ब, देशो आंइ नोफामी नेंतक” दे ब्वाक्पदमे बाक्त। यूहन्ना २:१९

15 कछडीम बाक्बपुकीमी स्तीफानस गे कोत्रडमेनु, आ कुल परमप्रभु यावे आ स्वर्ग डा गेय पाइब आन कुल खोदेशो पा महिंथु बाक्शो तामे बाक्त। मिनु कोत्रस डा कोत्रस दुम्मा बाक्त।

## 7

### स्तीफानस आ लोत्र

1 मिनु ठेयब चढेबमी “एको आन देशो लोत्र थमा देय जोल, लो देनो” देमेनु,

2 स्तीफानसमी “आं आफ, बाजे नु आं लोकबपुकी, गो लोत्र का निक्शी पाइनुड। दोपा छेडछेड नु सक्ति पाइशो परमप्रभु यावेमी इं किकी पिपी अब्राहाम कली तपांडसे, गो मेको नेल्लेमी तुइकनय। उत्पत्ती ११:- ५०:-; यहोसु २४:३२

3 हारान जाकदीत्चा क्येडा डोंइती अब्राहाम मेसोपोटामीया रागीम बाकशो बाक्माक्त। मेकेर बाक्मेनु, परमप्रभु यावेमी ‘इ रागी नु इ खिं डा मुर प्रोंइशा लावो। ते लशा बाक्चा माल्नेवे, नोले तुइक्पाइकनन’ दे माइशो बाक्माक्त।

4 मिनु अब्राहाम कल्दी आन रागी प्रोंइशा, हारान सहर जाकदीशशा बाक्माक्त। मिनु आ आफ बेकम नोले परमप्रभुमी अब्राहाम कली हारान रे मुल इं बाकशो रागीमी चाक्का बाक्त।

5 मेना परमप्रभु यावेमी अब्राहाम कली खोइल थेक्तीक रागी यो मगेशो बाक्माक्त। तन्न ‘एको रागी इ चच युइ आन कली गेनुडमी’ दे लोत्र पशो बाक्माक्त। मेना अब्राहाममी तमी तौ काइ यो मथिशो बाक्माक्त।

6 मिनु परमप्रभु यावेमी ‘नोले इ चच युइ मुर आन रागीमी लाइनीमी। मेको रागी डा मुरपुकीमी इ मुर आन कली वाइलीम वाइल सेल्शा, ४ सहे बर्स सम्म श्येत गेशा वोइक्नीम। उत्पत्ती १५:१३-१४; प्रस्थान १२:४०

7 तन्न गो मेको श्येत गेब आन कली सजाइ गेनुडमी। इ चच युइ चहिं मेको रागी प्रोंइशा एक लेशशा जाक्शा, आं कली ठेयब सेल्शा मानेनीम’ दे परमप्रभुमी अब्राहाम कली नोले दुम्ब लोत्र तुइक्पदा बाक्त।

8 मिनु नोले परमप्रभुमी अब्राहाम कली खोइक्तीक चिनु डा कबल गेवा बाक्त। मिनु अब्राहाममी आ तौ इसहाक थिशो, ८ नाक्त दुम्मेनु, मेको कली खोइक्तीक चिनु खोदा बाक्त। इसहाक याकूब आ आफ दुम्माक्त। मिनु याकूब आ १२ जना तौ आन आफ दुम्माक्त। मिनु मेको १२ जना तौ इं यहूदी १२ थर दुम्मा बाक्त।

9 मिनु याकूब आ तौ आन लोकब योसेफ कली गेहे पा, मेको कली इजीप्त रागी डा मुर आन कली लेयडमे बाक्त। तन्न परमप्रभु यावेमी मेको कली कोत्रशो बाक्माक्त।

10 मिनु आ श्येत रे प्रोंइबाक्माक्त। मिनु योसेफ इजीप्त रागी डा पिप फाराओ आं डोंइती जाक्मेनु, मेकोमी आ जोक्तीक तुइक्तीक थुं तशा, योसेफ कली शुश दाक्शो बाक्माक्त। मिनु पिप फाराओम योसेफ कली आ रागी डा ठेयब मुर सेला बाक्त।

11 मिनु इजीप्त नु कनान रागीमी ठेयब अन्काल दुम्तीके, मुरपुकीमी जचा मतामे बाक्त। इं किकी पिपीमी यो जचा मतामे बाक्त।

12 इजीप्तमी अन्न ग्याप्चा तांइसीब देशो नेंशा, याकूबमी आ तौ आन कली इजीप्त सोइक्तीमी बाक्त।

13 मिनु ग्याप्शा चाक्मेनु, मजाक्दीत्थु, लेंशा सोइक्तीमी बाक्त। मोपा लमानु, योसेफमी आ लोकब आन कली ‘गो इन लोकब योसेफ नड’ दे तुइक्पपांडसे बाक्त। में डा मेरे फाराओमी मेकोपुकी योसेफ आ मुर बाक्मा बाक्त, दे तुइक्ता बाक्त।

14 मिनु योसेफमी आ आफ, आ लोकबपुकी आ खिं डा मुर नेल्ल आन कली इजीप्त रागी जाक्शा बाक्कीन, दे ब्रथ सोइक्तीमी बाक्त। मेको नेल्ल ७५ जना बाक्मा बाक्त।

15 मिनु याकूब इजीप्त जाक्दीशशा, शुश बर्स बाक्शा, मेकेर उइ बेक्माक्त। नोले इं किकी पिपी याकूब आ तौ यो मेकेर बेक्मा बाक्त।

16 इजीप्तमी बेक्तेकम हना यो, आन बेक्शो रां शेकेम सहर लाइशशा थिम्मे बाक्त। अब्राहाममी शेकेम सह्रम मेको थिम्तीके रू हमोर आ तौपुकी रे चांदी गेशा, ग्याप्शो बाक्माक्त।

17 मिनु परमप्रभु यावेमी अब्राहाम कली गेशो लोत्र जाक्दीम्माक्त। मोपतीके इजीप्त रागीमी इं मुर बारना बारन लशा, शुश दुम्मा बाक्त। प्रस्थान १:-३:-

18 मिनु इजीप्त रागीमी अर्को पिप दुम्माक्त। मेको योसेफ नु आ खिं डा मुर आन कली मतुइक्ब बाक्माक्त।

19 मेको पिपीमी इं मुर आन कली शिशी मपथु, शुश श्येत गेवा बाक्त। आल थीब आन कली यो आन आल थुल्चा मगेशु ताइक्पदा बाक्त।

20 मेना मोसा जरमेसे बाक्त। मेको परमप्रभु यावे आ डोंइती थम दारशो आल बाक्त। मोपतीके आम आफोमी मेको कली महिना सां सम्म आस खिंमी खुइइशा थुल्से बाक्त।

21 महिना सां नोले आल कली प्रोन्से बाक्त। मिनु फाराओ आ तमीमी मेको आल कली थिरशा लाइइशा, आ तौ सेला बाक्त।

22 मिनु पिप बाक्तीक खिंमी बाक्मेनु, इजीप्त रागी डा ठेयब मुर आन जोकशो तुइइशा आं यो नेल्ल जोकब तुइकब दुम्माक्त। मिनु मोसा आ लोत्र नु आ गेय नेल्ल सक्ति पाइइशा दुम्माक्त।

23 मिनु मोसा ४० बर्स दुम्मेनु, आ लोकब इस्राएली आन कली गुम्चा थुं पवा बाक्त।

24 मिनु काबु गुम्थ लमेनु, इजीप्त डा मुरुमी इस्राएली कली तुप्शो तशा, मोसामी इस्राएली कली प्रोंइशा, इजीप्ती कली तुप्शा सदा बाक्त।

25 मोसामी 'परमप्रभुमी आं कली आं लोकब आन कली श्येत रे प्रोंइब सेलती' आं लोकबपुकीमी एको आंइ कली श्येत रे प्रोंइब बाक्माक्त, दे रुप्शा, आं कली ब्राइनीम, दे मिम्शो बाक्माक्त। आ लोकबपुकीमी चहिं मेको काइ मरुप्शो बाक्मा बाक्त।

26 मिनु आ दीसा मोसा लेंशा मेक जाक्दीम्मेनु, इस्राएली निक्शी आस कली जिशो तवा बाक्त। मिनु मेको आस कली 'गे निक्शी, वोबु दुम्शा यो जिनीसी?' देंमाक्त।

27 मिनु मरिम्शो पाइबमी गाइइशा मोसा कली 'गो आंस कली हुकुम नु निसाफ पाइब सुम सेले? प्रस्थान २:१४

28 सिनाक्त एकेर इजीप्ती कली साइइशो खोंदेशो पा आं कली सदु, देने?' दे नेप्ता बाक्त।

29 मेको लोत्र नेंशा, मोसा इजीप्त रागी रे प्रोकशा, मिदयान रागीम जाक्दीम्माक्त। मेकेर जाक्दीइशा बाक्मेनु, तौ निक्शी थिमाक्त। प्रस्थान १८:३-४

30 मिदयान जाक्दीइशा, बाकशो ४० बर्स दुम्माक्त। मिनु काबु सीनै डांडा डा गोरशो रागीमी बाक्मेनु, परमप्रभु यावे आ स्वर्ग डा गेय पाइब कामी ब्रशो बुटा कोंइदा बाक्त।

31 मोसामी मोपा ब्रशो तशा छक लाकशा, ओदेशो मार ब्रमे, दे आ नेक्था लशा कोत्रडा बाक्त। मिनु नेक्था जाक्दीइशा कोत्रडानु, परमप्रभु आ लोत्र नेंना बाक्त। प्रस्थान ३:५-१०

32 'गो इन किकी पिपी आन परमप्रभु यावे नड। गो अब्राहाम, इसहाक नु याकूब आन परमप्रभु यावे नड' देशो नेंशा हिंशा, खिंखि पा बुटा गे यो कोत्रने मचबा बाक्त।

33 मिनु परमप्रभु यावेमी 'इ थेक्शा राप्शा बाक्तीके आं बाक्तीक बाक्ब। मोपतीके इ जुता पुइइशा, आं लोत्र नेनो।

34 इजीप्त रागीम बाक्ब आं मुरपुकीमी शुश श्येत जाम्नेकम, दे तुइक्ताकड। आन श्येत ताता। मिनु आन डाकशो यो नेंता। मिनु आं मुर आन कली मोदेशो श्येत रे प्रोंइपाइकचा दुम्ती, दे इ कली इजीप्त सोइक्नन' देशो नेना बाक्त।

35 'इ कली हुकुम पाइब नु निसाफ पाइब सुम सेले?' दे खेरचा पुंडसीशो मोसा कली परमप्रभु यावेमी हुकुम पाइब नु प्रोंइब सेल्शा, आ स्वर्ग डा गेय पाइब रे बुटाम तपांडसीशा इजीप्त सोइक्ता बाक्त।

36 मिनु शुश चिन्ड नु छक लाक्चा डा गेय कोंइशा, इस्राएली आन कली इजीप्त रे गुंइशा, लल समुन्द्र चाक्दीम्मी बाक्त। मेकेर यो शुश छक लाक्चा डा गेय कोंइदीमी बाक्त। मिनु लल समुन्द्र शोकशा ४० बर्स सम्म गोरशो रागीमी हिरशा गाक्मानु, शुश छक लाक्चा डा गेय पाइबाक्माक्त। प्रस्थान ७:१०; प्रस्थान १४:२१

37 मेको मोसामी इस्राएली आन कली 'आं खोंदेशो, परमप्रभु यावेमी आ लोत्र पाइब इन दाते रे का योत्रशा, आ लोत्र नेंपाइकब का सेलब' दे तुइक्पाइक्मी बाक्त। ब्यवस्था १८:१५

38 इस्राएलीपुकी गोरशो रागीमी बाक्मानु, आन कली लां कोंइब मेको मोसा बाक्माक्त। सीनै डांडामी परमप्रभु आ सोइइशा आ गेय पाइबमी इ किकी पिपी आन कली लोत्र पवानु, मेको मोसा रे पा नेंपाइक्मी बाक्त। मेको लोत्र चहिं मजाम्थु गेना हना यो लीब लोत्र बाक्ब। मुल सम्म गो इ कली गारशो लोत्र बाक्ब, दे तुइक्तीने। प्रस्थान १९:५; ब्यवस्था ९:१०

39 इं किकी पिपीमी मोसा आ लोत्र मटिथु मनेंथु, मोसा कली प्रॉइशा आन थुं इजीप्ट रागी गे हिरदमे बाक्त।

40 मिनु हारून कली 'इं कली इजीप्ट रागी रे एक चाक्ब मोसा ते लाक्गा? बेक्म कों प्रोक्म कों? मतुंडसे। मुल लां कोंइब का माल्ताक्व। मोपतीके देवता सेल्चा गेकी। मिनु मेको इं कली लां कोंइब दुम्ल' दे पुन्मे बाक्त। प्रस्थान ३२:१

41 मिनु सुन के बाछा आ मूर्ति सेल्शा, मार मार क्योरशा जारदमे बाक्त। आंम आन गुडमी सेल्शो मूर्ति तशा ग्येरसीशा, जचा तूचा सेल्शा डा मिन बुक्शा जामे तूडमे बाक्त।

42 मेकोपुकीमी मो पशो तशा, परमप्रभु यावे गाइश्शा 'मेकोपुकी नां नु तास्ला कली सेउ पाइब दुम्ल' दे प्रॉइमी बाक्त। परमप्रभु यावे आ लोत्र पाइबमी 'गे इस्राएलीपुकी, गोरशो रागीम ४० बर्स सम्म हिरशा गाकनीनु, मार मार क्योरशा जारशा, आं कली चढ़ेनी डा?

43 मो मपनी। गे मोलोको देवता आ ताम्बु कुरशा लाइक्तीनी। रिफन सोरुल आ मूर्ति सेल्शा लाइक्तीनी। मोपतीके इन रागी रे बेबीलोन लाइक्नन्नी' दे ब्रेक्शो बाक्त। आमोस ५:२५-२७

44 इं किकी पिपी गोरशो रागीमी हिरसमानु, परमप्रभु यावे आ ताम्बु यो कुरशा गाक्मा बाक्त। परमप्रभु यावे आ ताम्बु चहिं दोपा सेल्चा, दे परमप्रभु यावेमी मोसा कली कोंइशो खोदेंशो पा मोसामी सेल्पाइश्शो बाक्माक्त। प्रस्थान २५:९

45 मिनु नोले इं किकी पिपी यहोसु मेको आन लां कोंइब दुम्ला, मेको ताम्बु कुरशा गाक्मा बाक्त। मिनु कनान रागीमी जाक्दीम्मानु, मेको ताम्बु आन डोंइती कुरशा गाक्शो बाक्तेक्म। परमप्रभु यावेमी मेकेर बाक्ब मुर आन कली ग्राशा खेरशा, मेको रागी आन के सेल्शा, मेको ताम्बु मेकेन वोदमे बाक्त। मिनु पिप दाऊद आ पाला सम्म मेको ताम्बु मोदेंशोन लीमाक्त। यहोसु ३:१४; यहोसु १६:१

46 पिप दाऊद परमप्रभु यावे आ दाक्शो मुर बाक्माक्त। पिप दाऊदमी परमप्रभु यावे कली दाक्शा 'याक्ब आ परमप्रभु यावे कली खिं सेलनुड' दे थुं पवा बाक्त। ३सामुएल ७:१-१६; भजन संग्रह १३३:३-५

47 तन्न आ तौ सोलोमनमी परमप्रभु यावे आ खिं सेला बाक्त। १राजा ६:-

48 मिनु नेल्ल क्येडा ठेयब मुरुम सेल्शो खिंमी मबाक्ब। साइ नेसी परमप्रभु यावे आ लोत्र पाइबमी परमप्रभु यावेमी

49 'सरीड आं निल्तीके बाक्ब। रागीम आं खोइल थेक्तीक बाक्ब। मोपतीके आं कली दोदेंशो खिं सेल्ने चाप्नीनी? गो आं नाइक्चा कली बाक्तीक मार सेल्ने चाप्नीनी?

50 सरीड नु रागी नेल्ल आं सेल्शो ममाइ डा?' दे परमप्रभुमी देंमाक्त" दे लोत्र पवा बाक्त। यसैया ६६:१-२

51 "ए, गे परमप्रभु यावे आ लोत्र मनेंथु मटीब फुल्लु खोदेंशो थुं पाइश्शोपुकी, गे परमप्रभु यावे कली मतुडक्ब मुर खोदेंशो पाइनीनी। इन किकी पिपीमी पशो खोदेंशो पा गे यो परमप्रभु यावे आ सोक्त आ देंशो मटिथु दूली पाइनीनी। प्रस्थान १२:९; लेवी २६:४; रोमी २:२८-२९

52 इन किकी पिपीमी मार पामे? परमप्रभु आ लोत्र पाइब सु कली श्येत मगमे डा? नेल्ल आन कली श्येत गेन्तेक्म। श्येत गेशा ला ममाइ। इन कली पाप रे प्रॉइब ख्रीस्त जाक्ब, दे लोत्र नेंपा गाक्ब आन कली साइक्पाइक्ना पाइक्न बाक्तेक्म। इन कली पाप रे प्रॉइब ख्रीस्त जाक्त। मिनु गेपुकीमी मेको कली यो साइक्पाइक्तीनी। २इतिहास ३६:१६; मत्ती २३:३१

53 परमप्रभु यावे आ स्वर्ग डा गेय पाइबपुकीमी मार पचा मार मपचा, दे परमप्रभु यावे आ अरेशो लोत्र शेंसीशा योत्रसीशो दुम्ला यो मटिनी" दे स्तीफानसमी हुइक्तीमी बाक्त। प्रस्थान २०:१-२१; गलाती ३:१९; हिब्रू २:२

54 स्तीफानसमी मोदें हुइक्तीमीनु, नेल्ल गाइश्शा, लल गोगों जिशा, खुइ शेप्शा प्रेक्मा बाक्त।

55 स्तीफानस चहिं परमप्रभु यावे आ सोक्तीम ब्रीशा, सरीड गे कोव्रडा बाक्त। सरीड गे कोव्रडानु, ठेयब सक्ति पाइश्शो नु छेडछेड पा तांडसीशो परमप्रभु यावे कली तवा बाक्त। परमप्रभु आ ग्युरा गे रागीम जरमेशो, येसु कली यो राप्शा बाक्शो तवा बाक्त।

56 मिनु “लो कोव्रडीन, गो स्वर्ग रोकसीशा, परमप्रभु आ ग्युरा गे रागीमी जरमेशो कली राप्शा बाक्शो ताता” दे माइक्मी बाक्त। लूका २२:६९

57 मो देंमेनु “एको आ लोव्र मनेंचा” दे शुश रेयके पा, गुड पोक्शा प्रेक्शा ग्राम्शा ग्याइक्तमे बाक्त।

58 मिनु कीशा लाइशशा, सहर रे गुंडशा, फुल्लु क्रोम्चा गोव्रमे बाक्त। सांक्छीपुकीमी आन वा पुडशशा, सावल नें पाइशशा ठिटा का आ डोंइती वोदमे बाक्त। लेवी २४:१६; प्रेरित २२:२०

59 मेको हुलमी स्तीफानस कली फुल्लु क्रोम्स डा क्रोम्स पामेनु, स्तीफानसमी “प्रभु येसु, आं सोक्त ताक्कीन” दे पुंडदा बाक्त। लूका २३:४६

60 मिनु आ पोक्च थैक्शा ठेयब सेंदा पा “प्रभु, एको पाप एको आन कली मरल” देंशा, बेक्माक्त। लूका २३:३४

## 8

### थमा सुइक्बपुकी खेदा पचा पुंडसीशो

1 स्तीफानस कली साइशशा तशा, सावलमी “एको कली साइक्चा माल्शो। मिनु साइशशा ठीक पाइतीनी” देंमाक्त। स्तीफानस कली सादमे नाक्त रे यरूसलेम सहरम बाक्ब थमा सुइक्ब नेल्ल आन कली खेदा पा श्येत गेचा गोव्रमे बाक्त। मिनु श्येत गेशा प्रोक्पदमेनु, मेकोपुकी ब्रशा गाक्शा, यहूदीया नु सामरीया रागीमी जाक्दीशशा बाक्मा बाक्त। १२ जना येसु आ सोइशशोपुकी ला यरूसलेम उइ बाक्मा बाक्त। प्रेरित १:८; प्रेरित ११:१९

2 परमप्रभु यावे कली मान पा हिंबपुकीमी स्तीफानस आ बेक्शो रां लाइशशा, थिम्मे बाक्त। स्तीफानस कली साइशशा तशा, थमा सुइक्ब नेल्ल शुश डाक्मा बाक्त।

3 सावलमी चहिं “मेको आन थमा सुइशशा क्याम्चा” दे खिं खिं हिरशा ओव्रशा, थमा सुइक्ब वोंइश मुर, मीश मुर नेल्ल आन कली ग्याइक्पाइशशा, फ्रेंशा लाइशशा जेल्खानमी चोक्पाइक्बाक्माक्त। प्रेरित ९:१; प्रेरित २२:४; १कोरिन्थी १५:९

### येसु आ लोव्र ब्रपाइशशा

4 प्रोक्शा ब्राशा गाक्बपुकीमी येसु आ लोव्र तेइ तेइ शेंना शेंन गाक्बाक्मा बाक्त।

5 फिलीप सामरीया सहरमी जाक्दीशशा, मेकेर बाक्ब मुर आन कली “परमप्रभु यावे आ सोइशशा ख्रीस्त येसु बाक्ब” दे शेंदीमी बाक्त। प्रेरित ६:५

6 फिलीप आ शेंशो लोव्र नेंशा, आ पशो छक लाक्चा डा गेय तशा, नेल्लेमी थम नोफा दाइशशा नेन्मे बाक्त।

7 छक लाक्चा डा गेय चहिं मार कोंइबाक्माक्त देंशा हना, वोलम तशो मुर आन कली वोल खेरशा सापाइक्बाक्माक्त। वोल खेरानु, वोलम तशो मुर वाइ ब्रेशशा, वोल प्रोक्बाक्माक्त। गुड खोइल मडुक्ब मुर शुश आन कली गुड खोइल दुक्ब गाक्ब सेल्बाक्माक्त। मर्कूस १६:१७

8 मोपतीके मेको सहरमी सापाइक्चा पुंडसीब मुर नेल्ले ग्येरसीबाक्मा बाक्त।

### चटक कोंइब सिमोन

9 मेको सहरमी सिमोन नें पाइशशा मुर का बाक्माक्त। मेको डोंइती रे सामरीया रागी डा मुर आन कली चटक कोंइशा, ठेयब सुंडसीशो बाक्माक्त।

10 सहर डा मुर नेल्लेमी एको मुर परमप्रभु आ सक्ति तशो बाक्माक्त, दे ठेयब सेल्शा, मान पशो बाक्मा बाक्त।

11 शुश बर्स सम्म सिमोनमी चटक पा छक लाक्पाइक्तीके मुर नेल्लेमी सिमोन आ देंशो नोफा दाइशशा आ पशो कोव्रशा बाक्शो बाक्मा बाक्त।

12 मिनु फिलीप जाक्शा, मुर आन कली येसु ख्रीस्तमी इं कली पाप रे प्रोंइब, दे परमप्रभु यावे आ राज्य डा लोव्र नु येसु ख्रीस्त आ पर्वम नेंपाइक्ना पाइक्न, शेंना शेंन गाक्मेनु, मीश मुर नु वोंइश मुर शुशेमी थमा सुइशशा, ब्वाक्कुम खुम्शा गुंडचा पुंडसमा बाक्त।

१३ शुशेमी थमा सुइश्शो तशा, मेको चटक पा गाकब सिमोन यो थमा सुइक्ब दुम्शा, ब्वाक्कुम खुम्शा गुंइचा पुंइसे बाक्त। मिनु फिलीप कली मप्रोंइथु, काथा गाकबा दुम्माक्त। फिलीपमी चिन्ड नु छक लाक्चा डा गेय कोंइदानु, सिमोन यो छक लाक्बाक्माक्त।

१४ मिनु नोले यरूसलेममी बाकब सोइश्शोपुकीमी “सामरीया डा मुरपुकीमी परमप्रभु यावे आ लोत्र थमा सुइक्ब दुम्तेक्म” देशो नेंशा, पत्रुस नु यूहन्ना आस कली सामरीया सोइक्तमे बाक्त।

१५ मिनु मेको निक्शीमी “परमप्रभु यावे आ सोक्त थमा सुइक्बपुकी नु लील” दे प्रार्थना पथ जाक्दीस्सा बाक्त।

१६ मारदे हना सामरीया डा मुर सुइ आन कली परमप्रभु यावे आ सोक्त मगेशो बाक्माक्त। प्रभु येसु आ नेंमी ब्वाक्कुम खुम्शा गुंइचा ला पुंइसीशो बाक्मा बाक्त।

१७ मिनु पत्रुस नु यूहन्नामी आस गुइ थमा सुइक्ब आन तारी वोइश्शा, मेकोपुकी परमप्रभु यावे आ सोक्त तामे बाक्त।

१८ मिनु सिमोनमी मेको सोइश्शो आस गुइ थमा सुइक्ब आन तारी वोइश्शा, परमप्रभु यावे आ सोक्त गेशो तशा, मेको आस कली “क्येट गेनुड।

१९ मोदेशो सक्ति गेयी। गो गुइ वोइश्शा, पुनुनु, परमप्रभु यावे आ सोक्त मुरपुकीम तामेक्ल” दे पुंइदा बाक्त।

२० मिनु पत्रुसमी “इ क्येट गे नुन जाम्शा लल। मारदे हना गे परमप्रभु यावे आ गेशो सक्ति क्येट थाप्शा, ग्याप्चा तांइसीब, दे मिम्ताक्वी।

२१ गे मेको गेय पने मचाप्नेवे। मारदे हना इ थुं परमप्रभु यावे आ डोंइती मरिम्शो बाकब।

२२ गे ओदेशो मरिम्शो थुं पचा प्रोंइशा, इ थुं परमप्रभु यावे गे लेत्तो। मिनु परमप्रभुमी इ पाप क्याम्शा गेबा कों? दे पुनो।

२३ मुल इ थुं चोशा पापमी ब्रीशो मरिम्शो बाकडे बाक्त, दे तुइक्ताक्ड” दे पत्रुसमी मदानु,

२४ सिमोनमी “इन देशो खोदेशो मदुल्म, दे आं पर्वम प्रभु कली प्रार्थना पने, हजुर” दे सेउ पवा बाक्त।

२५ मिनु पत्रुस नु यूहन्नामी प्रभु आ लोत्र नेंपाइक्ने थुम्शा, यरूसलेम लेस्सानु, सामरीया डा गाउं लांमी शुश मुर आन कली ग्येरपाइक्ब लोत्र शेंना शेंन लेस्सा बाक्त।

### एथीयोपीया डा मुर कली शेंशो

२६ काबु परमप्रभु यावे आ स्वर्ग डा गेय पाइब कामी फिलीप कली “छुल बोक्शा यरूसलेम रे गाक्शा, गाजा लतीक लां लावो” दे माइश्शा, मेको लां सोइक्ता बाक्त। मेको लां गोरशो रागी लतीक लां बाक्माक्त।

२७ परमप्रभु यावे आ स्वर्ग डा गेय पाइब आ लोत्र नेंशा, फिलीप छुल बोक्शा, गाजा सहर लतीक लां लमाक्त। मिनु मेको लां गाकमेनु, एथीयोपीया रागी डा मुर का यो मेको लां लना लन बाक्माक्त। मेको एथीयोपीया डा पिपीम कान्दाके रे शुश अधिकार तशो, ठेयब मुर बाक्माक्त। यरूसलेममी परमप्रभु यावे कली मार मार चढेने थुम्शा, आ रागी लेशो बाक्माक्त।

२८ मेको बग्गीम बाक्शा, परमप्रभु यावे आ लोत्र पाइब यसैयामी ब्रेक्शो पढेना पढेन बाक्माक्त।

२९ मिनु परमप्रभु यावे आ सोक्तीमी फिलीप कली “मिरी लन लन पाइश्शो बग्गी आ नेक्था लावो” दे माइक्तीके फिलीप दोरशा, मेक जाक्दीम्माक्त।

३० जाक्दीश्शा, ठेयब मुर कली परमप्रभु यावे आ लोत्र पाइब यसैयामी आ ब्रेक्शो लोत्र पढेशो नेंशा “इन पढेशो लोत्र नेल्ल रुप्नी?” दे हिल्लो पवा बाक्त।

३१ मिनु ठेयब मुरुमी “सुइमी मशेंथु, दोपा रुप्ने चाप्नुडा डा?” देशा, फिलीप कली बग्गीम डोइक्पाइश्शा निप्पाइश्शा, किताब कोंइदा बाक्त।

३२ ठेयब मुरुम पढेना पढेन बाक्शो लोत्र चहिं “भेडा कली क्योरपाइक्थ लाइश्शो खोदेंब पा मेको कली लाइक्तेक्म। भेडा पाठा आ ऊन प्रेक्गमेनु, ब्वालेइ पा बाक्शो खोदेशो पा मेको ब्वालेइ पा बाक्त।

33 महिक्सीशो सेल्लेक्म। दोस गेशा ठीक निसाफ मपथु, दोसी सेल्लेक्म। आ खिं डा मुर सु लीबा डा? आल मथिथु साइक्चा पुंडसाक्व। मोपतीके आ खिं डा मुर सुइ मली” दे ब्रेक्शो लोत्र बाक्माक्त। यसैया ५३:७-८

34 मिनु ठेयब मुरुमी फिलीप कली “परमप्रभु यावे आ लोत्र पाइबमी आंम आ परबंम मोदेशो देंमे देय अरु आन परबंम मोदेशो देंमे?” दे हिल्लो पवा बाक्त।

35 मिनु फिलीपमी मेको पदेशो लोत्र रे शेंचा गोशा, परमप्रभु यावे आ ब्रेक्पाइशो लोत्र शुश शेंशा, येसु आ परबंम नेल्ल रुप्पदा बाक्त।

36 मोपा लसा लसा ब्वाक्कु बाक्तीकेमी जाक्दीस्सा बाक्त। मिनु ठेयब मुरुमी “एकेर ब्वाक्कु बाक्त, एको ब्वाक्कुम खुम्शा गुंडचा पुंडसीनुड, दुम्बा?” देमाक्त।

37 मिनु फिलीपमी “गे येसु कली थमा सुइक्तीनी हना, ब्वाक्कुम खुम्शा गुंडचा शिरनीनी” देमेनु “गो येसु ख्रीस्त परमप्रभु आ तौ बाक्ब, दे थमा सुइक्ता” देमाक्त।

38 मिनु बग्गी तिक्शा तोइशशा, फिलीपमी ठेयब मुर कली ब्वाक्कुम खुम्शा गुंडदा बाक्त।

39 मिनु ब्वाक्कु रे गूशा कुसानु, परमप्रभु यावे आ सोक्तीमी फिलीप कली लदा बाक्त। मिनु ठेयब मुरुमी मेको मतवा बाक्त। मो हना यो थाम्पा ग्येरसीशा, आ लां खोइशशा गाक्माक्त।

40 नोले फिलीप अस्टोद सहरमी गूदीम्माक्त। मिनु मेकेर रे गांउ गांउ सहर सहरम येसु आ लोत्र नेंपाइक्ना पाइक्न गाक्शा, सिजरिया सहर जाक्दीम्माक्त। प्रेरित २१:८-९

## 9

### सावल दमस्कस लशो

1 सावल मुल यो थमा सुइक्ब आन कली खेदा पा श्येत गेशा साइक्नुडमी देंना देंन गाक्बाक्माक्त। प्रेरित २२:३-१६; प्रेरित २६:९-१८; प्रेरित ८:३

2 मिनु काबु यरूसलेममी बाक्ब ठेयब चढेब आन कली गुम्शा, दमस्कस सहर डा गुम्तीक खिं खिं डा ठेयब मुर आन कली कागज ब्रेक्शा गेचा नड देंशा पुना बाक्त। सावल आ पुंडशो लोत्र मार बाक्त देंशा हना “दमस्कसमी बाक्ब येसु आ लां खोइक्ब मीश मुर वोंइश मुर सु सु थिदुमी, मेको नेल्ल आन कली ग्याइशशा फ्रेंशा, यरूसलेम चाक्नुडमी” दे पुंडशो बाक्माक्त।

3 मिनु मोदेशो कागज ताक्शा, दमस्कस सहर लशा जाक्दीत्वावानु, मार दुम्माक्त देंशा हना, सरीड रे छेडछेड फो गूशा, आ एर ओंथ नेल्ल कोंइदा बाक्त। १कोरिन्थी १५:८

4 मोपा छेडछेड तवानु, दिड गोल्माक्त। मिनु “सावल, सावल, गे मारदे आं कली खेदा पयी?” देंशो लोत्र नेंना बाक्त।

5 मोदेशो नेंशा “प्रभु, गे सु ननी?” दे हिल्लो पवानु “इ खेदा पशो येसु गो नड।

6 मुल छुल बोक्शा दमस्कस सहर लावो। मिनु मेकेर जाक्दीशशा, गे मार गेय पचा मालनेवे तुइक्पाइक्चा पुंडसीनेवे” देंशो लोत्र नेंना बाक्त।

7 सावल नु काथा गाक्बपुकीमी मारेइ मतथु, लोत्र पशो ला नेंशा, वाम ग्याम दुम्मा बाक्त।

8 मिनु सावल बोक्शा मिक्च पाक्शा कोइडानु, मिक्च मताइब दुम्शो बाक्माक्त। मिनु आ वारचपुकीमी आ गुइ रे कीशा दमस्कसमी चाक्दीत्मे बाक्त।

9 दमस्कसमी जाक्दीशशा यो नाक्त सां सम्म मिक्च मतवा बाक्त। जचा तूचा यो, प्रोना बाक्त।

### सावलमी येसु कली थमा सुइशशो

10 दमस्कसमी हनानीया नें पाइशशो थमा सुइक्ब मुर का बाक्माक्त। प्रभुमी मेको मुर कली कोंइतीक कोंइशा “हनानीया” दे ब्रेत्ता बाक्त। मिनु “मार देंनी, प्रभु?” देमेनु

11 “छुल बोक्शा ग्येत्थ माइशशो लां लावो। मेकेर जाक्दीशशा, यहूदा आ खिं लशा, टारसस डा सावल माइशशो मुर कली मालो। मेकोमी प्रार्थना पाइब।

12 मिनू मेकोमी कोइतीकेमी हनानीया माइशशो मुर ओव्रशा, मिक्च तपाइक्चा कली आ तारी गुड वोइशशो तशो बाक्ब” देशो लोव्र नेंना बाक्त।

13 मिनू हनानीयामी “आमाइ, प्रभु, गो शुश मुर आन शोव रे मेको मुर आ पर्वम शुश मरिम्शो लोव्र नेंता। मेकोमी यरूसलेममी बाक्ब थमा सुइक्ब आन कली शुश श्येत गेशा, खेदा पना पन बाक्ब देशो नेंता।

14 थमा सुइक्ब आन कली ग्याइशशा फ्रेंशा लाइक्चा कली ठेयब चढेबपुकी रे अधिकार तशो बाक्माक्त, दे तुइक्ताक्ड” देंमाक्त।

15 प्रभुमी “मोदेशो तुइक्ताक्वी हना यो, मुल छुल बोक्शा लावो। मारदे हना अर्को रागी डा मुर, पिपपुकी नु इस्त्राएली आन कली आं नें तुइक्पाइक्चा, दे गो मेको कली योव्रने थुम्ता। प्रेरित १३:४६; प्रेरित २६:२; प्रेरित २७:२४

16 आं नेमी शुश श्येत जचा माल्नेवे देशा गो मेको कली आंमान तुइक्पाइक्नुड” दे प्रभुमी हनानीया कली माइशशा सोइक्ता बाक्त। २कोरिन्थी ११:२१-२८

17 मिनू हनानीया लशा, यहूदा आ खिं जाक्दीशशा ओव्रशा, सावल तारी आ गुड चाक्शा “आं लोक्ब सावल, गो यरूसलेम रे पिवेनु, लांमी इ तशो प्रभु येसुम सोइक्ताक्वी। मिनू मिक्च ताइब दुमो, परमप्रभु यावे आ सोक्तीम ब्रीशो दुमो” देंमेनु,

18 सावल आ मिक्च मारम फारशो बाक्मे, मेको दोक्शा, मिक्च ताइब दुम्माक्त। मिनू छुल बोक्शा, ब्वाक्कुम खुम्शा गुंइचा पुंइसे बाक्त।

19 मिनू जशा तूशा बोल तेम्सीशा, इक्का नाक्त दमस्कस डा थमा सुइक्बपुकी नु काथा बाक्माक्त।

### सावलमी येसु आ लोव्र शेंशो

20 मिनू सावल गुम्तीक खिं खिं लशा “येसु परमप्रभु यावे आ तौ बाक्ब” दे शेंना शेंन यहूदी आन कली येसु आ पर्वम शुश लोव्र तुइक्पाइक्मी बाक्त।

21 मोदेशो मेको आ शेंशो नेंशा “आमाइ, यरूसलेममी येसु कली थमा सुइक्ब आन कली का यो मवोइक्नुडमी देंब मेको ममाइ डा? ई सहर डा येसु कली थमा सुइक्ब आन कली यो ग्याइशशा लाइशशा, ठेयब चढेब आन डोंइती राप्पाइक्नुडमी, दे एक जाक्शो ममाइ डा?” दे छक लाक्शा देंमुमा बाक्त। प्रेरित ८:१; प्रेरित २६:१०

22 सावलमी शेंना शेंन आ शेंचा सक्ति बारपाइक्ना पाइक्न “येसु परमप्रभु यावे आ सोइशशो ख्रीस्त बाक्ब” दे दमस्कसम बाक्ब यहूदी आन कली शेंदीमी बाक्त। मिनू सुइमी लोव्र लेन्ने मचाप्मे बाक्त। प्रेरित १८:२८

23 मिनू शुश नाक्त मोपा शेंना शेंन गाक्मेनु, यहूदीपुकी गारशा सावल कली साइक्चा माल्मे बाक्त।

24 मिनू सावलमी “आं कली साइक्चा माल्तीमी” दे तुइक्ता बाक्त। नाक्दो नाक्त यहूदीपुकीमी सहर डा ओव्रतीक ग्रीतीक लां मेर मेको कली बाप्बाक्मा बाक्त।

25 मोपतीके काबु नाक्दो थमा सुइक्बपुकीमी सावल कली डोकोमी कुर पशा, डोरीमी क्युक्शा, सहर डा गारो आ ची लुकच तोइक्पा प्रोक्पदमे बाक्त। २कोरिन्थी ११:२२-२३

### सावल यरूसलेम लेशशो

26 सावल दमस्कस रे प्रोक्शा, यरूसलेम लेशशा जाक्दीम्माक्त। मिनू थमा सुइक्ब नु गारशा, काथा बाक्चा मला बाक्त। तन्न मेकोपुकीमी मेको येसु आ नोले खोइक्ब दुम्त, दे थमा मसुइक्थु, हिंशा मब्रामे बाक्त। गलाती १:१७-१९

27 बारनाबासमी चहिं सावल नु सोइशशो आन कली गुम्पदा बाक्त। मिनू लांमी गाक्मेनु, प्रभु कली तशो, प्रभुमी लोव्र पशो, दमस्कसमी महिंथु, येसु आ नेमी शेंशा गाक्शो, मेको लोव्र नेल्ल बारनाबासमी रुप्पाइक्मी बाक्त।

28 मिनू सावल कली ब्रामे बाक्त। मिनू सावलमी यरूसलेम सहरमी सुइ सुइ आन कली तशा महिंथु, येसु आ नेमी शेंना शेंन गाक्माक्त।



29 शेंना शेंन गाकमेनु, ग्रीक लोव्र पाइब यहूदीपुकी यो ग्रुम्मी बाकत। मिनु हिल्लो हिकसी पमुमानु, जिचा बोक्माकत। मोदेशो दुम्मेनु, सावल कली साइक्चा माल्मे बाकत।

30 मिनु थमा सुइक्ब लोकबपुकीमी साइक्चा माल्तेकम, दे तुइश्शा, सिजरिया सम्म चोव्रदीशा, टारसस सोइक्तमे बाकत। गलाती १:२१

31 मिनु यहूदीया, गालील नु सामरीया रागीमी बाक्ब थमा सुइक्बपुकी खेदा पचा मपुंडसीथु, बाक्चा तामे बाकत। थमा सुइक्बपुकीमी प्रभु कली मान पा हिंशा, परमप्रभु यावे आ सोक्ते रे पा वारच पचा पुंडसीशा, आन थुं बारना बारन लमाकत। मिनु थमा सुइक्ब यो तेम्सीन सीन लमा बाकत।

### पत्रुस लिडडा जाकदीश्शो

32 पत्रुस शेंना शेंन गाक्शा, लिडडा सहर जाक्दीम्माकत। मिनु मेकेर बाक्ब प्रभु आ योव्रशो आन कली गुमा बाकत।

33 मिनु काबु एनीयास माइश्शो मुर कली तवा बाकत। एनीयास चहिं आ गुइ खोइल मदुक्ब रोइ पशा, ब्राख्ये रे बोक्ने मचाप्शो ८ बसं दुम्शो बाक्माकत।

34 मिनु पत्रुसमी “एनीयास, येसु खीस्तमी इ कली सापाइक्ब। मोपतीके बोक्शा, इ ब्राख्ये पोक्शा वोतो” देमेनु, एनीयास छुल बोक्माकत।

35 मिनु लिडडा सहरम नु शारोन रागीमी बाक्ब नेल्लेमी एनीयास कली मोपा साशो तशा, आन थुं प्रभु गे लेत्मे बाकत।

### तबीता कली बेक्शो रे सेंपाइश्शो

36 योप्पा सहरमी तबीता नें पाइश्शो थमा सुइक्ब मीश मुर का बाक्माकत। ग्रीक लोव्रमी मेको आ नें दोरकास, किश्श रुम्सीब। तबीता गेना हना यो सुइ सुइ आन कली रिम्शो पाइबाक्माकत। मथीब आन कली शुश वारच पाइबाक्माकत।

37 मेको तबीता रोइ पा बेक्माकत। मिनु आ मुरपुकीमी आ बेक्शो रां चिक्शा, खिं डा तला तार डा कोठा लाइश्शा वोदमे बाकत।

38 लिडडा नु योप्पा नेक्नेक्था बाक्नीसी। मोपतीके थमा सुइक्बपुकीमी पत्रुस लिडडा जाक्शो बाक्ब, दे यो नेंशो बाक्मा बाकत। मिनु आन मुर निक्शी योव्रशा, पत्रुस कली “आंइ बाक्तीक रीब जाक्शा, वारच पाइक्चा न्की” दे ब्रथ सोइक्तमे बाकत।

39 मिनु पत्रुस मेको आस लोव्र नेंशा मेको नु काथा लमाकत। मिनु जाक्मेनु, तला तारी लदमे बाकत। तला तारी आन वोइश बेक्शो मारेइ मथीब मीश मुर खुम्सीशा डाक्ना डाक्न बाक्शो बाक्मा बाकत। मिनु पत्रुस कली “तबीतामी शुश वारच पाइक्तीकी, ओदेशो वा फेरशा गेतीकी” दे तबीतामी फेरशा गेशो वापुकी कोंइदमे बाकत।

40 मिनु पत्रुसमी मेकेर डाक्शा बाक्ब नेल्ल आन कली लाडगा सोइक्तीमी बाकत। मिनु आ पोक्च थेक्शा, प्रार्थना पवा बाकत। मिनु तबीता आ बेक्शो रां गे हिरशा कोव्रशा “ए तबीता, छुल बोक्को” देमेनु, तबीतामी आ मिक्च पाक्शा कोव्रडानु, पत्रुस कली तवा बाकत। मर्कूस ५:४१

41 मिनु पत्रुसमी आ गुइ कीशा पोक्गा बाकत। मिनु लाडगा सोइश्शो नु प्रभु आ योव्रशो नेल्ल आन कली खिं गा ब्रेश्शा, तबीता कली बेक्शो रे सेंपाइश्शो कोंइदा बाकत।

42 मोदेशो दुम्त देशो लोव्र योप्पा सहरमी बाक्ब नेल्लेमी नेन्मे बाकत। मिनु शुशेमी प्रभु कली थमा सुदमे बाकत।

43 मिनु पत्रुस योप्पा डा कुशुल नोक्ब सिमोन आ खिंमी शुश नाक्त बाक्माकत।

## 10

### कोरनेलीयस आ तशो

1 सिजरिया सहरमी कोरनेलीयस नें पाइश्शो इटाली पल्टन डा कप्तान का बाक्माकत।

2 मेको कप्तान परमप्रभु यावे कली मान पा हिंब मुर बाक्माक्त। आ खिं डा मुर नेल्लेमी यो आ खोदेशो पा प्रभु कली मान पा टीबाक्मा बाक्त। मेको कप्तानमी मारेड मथीब आन कली शिशो पा शुश वारच पाडबाक्माक्त। परमप्रभु कली प्रार्थना पना पन बाक्बाक्माक्त।

3 मिनु काबु ३ बजे डा प्रार्थना पची ना कोइतीक का तवा बाक्त। मेको कोइतीकेमी परमप्रभु यावे आ स्वर्ग डा गेय पाडब का आ बाक्तीकेमी जाक्शा “ए कोरनेलीयस” देमेनु,

4 कोरनेलीयसमी हिंशा, कोवस डा कोवस पा “मार देनी, प्रभु” देमेनु “इ प्रार्थना पशो, प्रभु कली मान पा टिशो, इ शिशो पा वारच पशो नेल्ल परमप्रभु यावेमी तुइश्शो बाक्ब।

5 मुल गे योप्पा सहरमी बाक्शो सिमोन पत्रुस नें पाइश्शो मुर कली ब्रथ सोइक्तो।

6 मेको सिमोन पत्रुस कुशुल नोक्ब सिमोन आ खिंमी बाक्ब। मेको आ खिं चहिं समुन्द्र आ नेक्था बाक्ब” देशा लशो नेना बाक्त। प्रेरित ९:४३

7 मोदेशो लोव्र देशो नेशा, आ गेय पाडब निकशी नु सिपाही का कली ब्रेत्ता बाक्त। सिपाही यो प्रभु कली मान पा टीब का बाक्माक्त।

8 मिनु मेको मुर सां आन कली मार दुम्मे, दोदेशो लोव्र नेना, मेको लोव्र नेल्ल शेंशा, पत्रुस कली माल्शा, चाक्चा, दे योप्पा सहर सोइक्तीमी बाक्त। प्रेरित ११:५-१७

### परमप्रभुम सेल्शो कली ग्रांघ्रा मदिचा

9 मिनु आ दीसा नाक्त मेकोपुकी लमा लमा योप्पा सहर आ नेक्था जाक्दीम्मानु, पत्रुस प्रार्थना पथ खिं तारी डोइसे बाक्त।

10 मिनु डोइश्शा बाक्मेनु, शोव्रलु बेक्शा जज दाक्माक्त। खिं डा मुरपुकी चहिं क्येना क्येन बाक्मा बाक्त। मिनु पत्रुसमी प्रभुमी कोइश्शो कोइतीक तवा बाक्त।

11 दोदेशो तवा बाक्त देशा हना, सरीड रोकसीशा ठेयब वा का हाम्सीशा क्युकसीशो खोदेशो पा खप गे यिशो तवा बाक्त।

12 मेको वामी मब्बचा डा, ग्रांघ्रा दिचा डा जन्तु बुस्स चिक्ब बाक्मा बाक्त।

13 मिनु “ए पत्रुस, एको आन कली साइश्शा ब्वामी” देशो नेना बाक्त।

14 मिनु पत्रुसमी “हत्तेरी ओदेशो ग्रांघ्रा दिचा डा दोपा ब्वचा नमी डा, प्रभु? ओदेशो ग्रांघ्रा दिचा डा गो गेनायो मब्बशो नड” देमाक्त। लेवी ११:५; इजीकीएल ४:१४

15 मिनु लेंशा “परमप्रभु यावे आ चोव्रखो सेल्शो कली ग्रांघ्रा मदित्तो” देशो नेना बाक्त। रोमी १४:१४

16 खेयप सां मोदेशो दुम्शा, मेको ठेयब वा सरीड गे लशो तवा बाक्त।

### पत्रुस कोरनेलीयस आ खिं लशो

17 मिनु पत्रुसमी छक लाक्शा एको मार बाक्म माड, दे मिम्ना मिम्न बाक्माक्त। पत्रुस मोदेशो मिम्स डा मिम्स बाक्मेनु, कोरनेलीयसमी सोइश्शो मुरपुकी कुशुल नोक्ब सिमोन आ खिंमी जाक्दीश्शा, लाप्चो आ डोइती राप्शा कोव्रशा

18 “एको खिंमी सिमोन पत्रुस बाक्मे?” दे हिल्लो पामे बाक्त।

19 पत्रुसमी मुल यो आ तशो मार बाक्म माड, दे मिम्न मिम्न बाक्मेनु, परमप्रभु यावे आ सोक्तीमी मेको कली “इ कली ब्रथ मुर सां जाक्तेक्मे।

20 तोइश्शा मेको आन कली गुमथ लावो। मिनु लचा, दे मलचा, दे थुं निकशी मपथु, मेकोपुकी नु लावो। मारदे हना मेकोपुकी आं सोइश्शो नम” देशो नेना बाक्त।

21 मिनु पत्रुस फ्रु तोइश्शा “इन माल्शो मुर गो नड, आं कली मारदे माल्यीनी?” दे हिल्लो पवा बाक्त।

22 मिनु मेकोपुकीमी “कोरनेलीयस आ सोइश्शो नकी। कोरनेलीयस कप्तान बाक्ब। परमप्रभु कली मान पा हिंब, रिम्शो मुर बाक्ब। यहूदीपुकीमी यो रिम्शो मुर बाक्ब, दे मिन्नीम। परमप्रभु आ स्वर्ग डा गेय पाडब कामी कोरनेलीयस कली ‘योप्पा सहरमी सिमोन पत्रुस माइश्शो कली माल्शा चाक्शा आ लोव्र नेचा’ देतीके इन कली ब्रथ जाक्तक” देमा बाक्त।

23 मिनू पत्रुस नु खिं डा मुरपुकीमी मेको आन कली खिं गा ओइशा जचा तूचा गेशा, बास गेमे बाक्त। मिनू आ दीसा पत्रुस मेकोपुकी नु सिजरिया गे लमाक्त। योप्पा सहर डा थमा सुइक्ब लोकब का निक्शी यो लमा बाक्त।

### कोरनेलीयस आ खिंमी

24 आ दीसा सिजरियामी जाकदीम्मा बाक्त। कोरनेलीयसमी आ मुर, आ वारच आन कली ब्रेशा, पत्रुस आ लां कोत्रशा बाक्शो बाक्मा बाक्त।

25 मिनू पत्रुस कोरनेलीयस आ खिं ओवचवानु, कोरनेलीयसमी पत्रुस आ डोंइती बाप्शा आ खोइल गुप्शा सेउ पवा बाक्त।

26 मिनू पत्रुसमी कोरनेलीयस आ पिया पोक्शा “गो यो इन खोदेशो मुर ला नड” देशा राप्पदा बाक्त। प्रेरित १४:१५; प्रकाश १९:१०

27 मिनू लोत्र पना पन खिं गा ओवसा बाक्त। खिं गामी शुश मुर खुम्सीशा देल्शो बाक्मा बाक्त।

28 मिनू पत्रुसमी मेको देल्शा बाक्ब आन कली “गो आंइ यहूदी अर्को रागी डा मुरपुकी नु काथा बाक्चा, जचा, आन खिं ओवचा मडुम्ब, दे नेल्लेमी तुइक्नीनी। मोदेशो बाक्त हना यो, परमप्रभु यावेमी आं कली सुइ आन कली आइक्च ममिम्चा, दे शेंताक्यी।

29 मोपतीके गेपुकीमी आं कली ब्रेत्तीनीनु, लचा, दे मलचा, दे थुं निक्शी मपथु, गिरिककै जाक्ती। मारदे ब्रेत्तीनी?” देंमाक्त।

30 मिनू कोरनेलीयसमी “गाबेर नाक्त आं खिंमी ३ बजे डा प्रार्थना पना पन बाक्डानु, जील्माक्श देशो वा फेक्सीशो मुर का फो यूशा, आं डोंइती राप्शो ताता।

31 मेकोमी आं नें थिशा ‘ए कोरनेलीयस, परमप्रभुमी इ प्रार्थना पशो नेंशो बाक्ब। इ शिशी पा मथीब आन कली मार मार गेशो तशो बाक्ब।

32 मोपतीके योप्पा सहरमी जाक्शा बाक्शो सिमोन पत्रुस नें पाइश्शो मुर कली ब्रथ सोइक्तो। मेको कुशुल नोक्ब सिमोन आ खिंमी बाक्शो बाक्ब। मेको खिं समुन्द्र आ नेक्था बाक्ब’ देंत।

33 मोपतीके ब्रथ सोइक्ताक्नी। गे बिश्शा गिरिककै जाक्शा, आंइ कली रिम्शो पाइतीनी। परमप्रभु गे नु बाक्ब। मिनू परमप्रभु यावेमी इन कली मार शेंपाइक्बा, मेको लोत्र नेल्ले नेंचा कली खुम्सीशा बाक्तक” देंमाक्त।

34 मिनू पत्रुसमी “परमप्रभु यावेमी सुइ आन कली मतिल्थु, उइक्थ उइक्थ मिम्ब। ब्यवस्था १०:१७; १सामुएल १६:७; रोमी २:११

35 मुर आन के जात रागी मारेइ मकोव्रथु, आ कली मान पा हिंशा, आ लोत्र टिशा, रिम्शो पाइब आन कली दाक्शा, नेल्ल आन कली ब्राइब, दे मुल रुप्ता। यूहन्ना १०:१६

36 परमप्रभु यावेमी येसु खीस्त आ पतीकेम आंइ इस्त्राएल डा मुर आन कली ग्येरपाइक्ब लोत्र नेंपाइक्तु। मिनू येसु खीस्त नेल्ल आन प्रभु बाक्ब। एफिसी २:१७

37 यूहन्नामी मुर आन कली शेंशा, ब्वाक्कुम खुम्शा गुंडदा नोले येसु खीस्तमी गालील रे गोशा यहूदीया रागीम हिरशा, मुर आन कली शेंना शेंन गाक्त। मत्ती ४:१२-१७

38 परमप्रभु यावेमी मेको नास्रथ डा येसु कली आ सोक्तीम प्रिशा, आ सक्ति पाइश्शो सेल्लु। मिनू परमप्रभु यावे आ सक्ति पाइश्शो दुम्शा, तेइ तेइ गाक्शा मुर आन कली रिम्शो पाप्तु। वोलम तशो आन कली वोल खेरशा सापाइक्तु। सैतानमी दिप्शा वोइश्शा श्येत गेशो आन कली श्येत रे प्रोंइतीमी। मारदे हना परमप्रभु यावे मेको नु बाक्त। मत्ती ३:१६

39 यहूदीया रागी यरूसलेम सहरमी येसुमी मार मार पवा, मार मार दुम्मे, मेको नेल्ल गो नु आं वारचपुकीमी आंम आंइ मिक्चीम ताइतक। येसु शीमी केप्शा कांटी थोक्शा क्याइश्शा साइक्चा पुंडसाक्व।

40 साइक्चा पुंडसीशा यो आ बेक्शो आ नित्थ नाक्ती परमप्रभुमी बेक्शो रे सेंपाइश्शा कोंइताक्व। १कोरिन्थी १५:४-७

41 हना यो मुर नेल्लेमी मताम। गोपुकीमी चहिं ताइतक। मारदे हना डोंइती रे गोपुकी सांकछी दुम्चा कली योत्रशो नकी। येसु बेकशो रे सेंसीशा, गोपुकी नु बाकशा काथा जाइतक, काथा तूतक। यूहन्ना १४:१९, २२; लूका २४:३०, ४३

42 मिनु मोदेशो पा काथा बाककानु, येसुमी आंड कली 'मुर आन कली आं पर्वम शेंदीने। मार शेंचा देशा हना, परमप्रभु यावेमी येसु कली ब्रॉइशा बाकब नु बेकशो मुर नेल्ल आन कली निसाफ पाइब सेल्लु, दे शेंशा गाक्कीन' दे माइक्तीकी। यूहन्ना ५:२२

43 सु सुमी येसु कली थमा सुदमे, मेकोपुकी येसु आ नेमी आन पाप क्याम्चा पुंडसीनीम। साइ डोंइती रे परमप्रभु यावे आ लोत्र पाइबपुकीमी मोदेशो देशो बाक्नीम" दे शेंदीमी बाक्त। यसेया ५३:५-६; येरमीया ३१:३४

### मुरपुकी परमप्रभु आ सोक्तीम ब्रीशो

44 पत्रुसमी शेंना शेंन पवानु, परमप्रभु यावेमी आ लोत्र नेंब नेल्ल आन कली आ सोक्तीमी प्रिंशो बाक्त।

45 पत्रुस नु काथा जाक्शो खोइक्तीक चिनु खोइश्शो थमा सुइक्ब यहूदीपुकीम अर्को रागी डा मुर यो परमप्रभु यावे आ सोक्तीम ब्रीशो तशा छक लाक्मा बाक्त।

46 मेकोपुकीमी परमप्रभु यावे आ सोक्तीमी पपाइश्शो लोत्र पा परमप्रभु यावे कली ठेयब सेल्लो तशा तुइक्तमे बाक्त। प्रेरित २:४

47 मिनु पत्रुसमी "मेकोपुकी आंड खोदेशो पा परमप्रभु यावे आ सोक्तीम प्रिंचा पुंडसाक्म। मोपतीके एको आन कली ब्वाक्कुम खुम्शा गुंडचा मदुम्ब, दे सुम देंने चाप्वा डा?" देंमाक्त।

48 मिनु मेको आन कली येसु ख्रीस्त आ नेमी ब्वाक्कुम खुम्शा गुंडपदा बाक्त। मिनु मेको नक थमा सुइक्बपुकीमी पत्रुस कली "नाक्त का निक्शी गोपुकी नु बाक्कीन" दे तेक्गमे बाक्त।

## 11

### अर्को रागी डा मुर

1 मिनु यरूसलेममी बाक्ब सोइश्शोपुकी नु यहूदीया रागी तेइ तेइ बाक्ब थमा सुइक्ब लोकबपुकीमी "अर्को रागी डा मुरपुकीमी यो परमप्रभु यावे आ लोत्र नेंशा, थमा सुइक्ब दुम्मा बाक्त" देशो नेन्मे बाक्त।

2 मिनु पत्रुस यरूसलेम लेशशा जाक्मेनु, खोइक्तीक चिनु खोइश्शो थमा सुइक्बपुकीमी पत्रुस कली

3 "मारदे खोइक्तीक चिनु मखोइश्शोपुकी नु काथा बाकशा जवी" दे लोत्र पोक्मे बाक्त। गलाती २:१२

4 मिनु पत्रुसमी मेको लोत्र पोक्ब आन कली खुप्शा, दोपा मोदेशो दुम्मे, मेको नेल्ल रुप्पाइक्चा कली

5 "गो योप्पा सहरमी बाक्ती। मिनु काबु मार दुम्त देशा हना, प्रार्थना पना पन बाक्डानु, प्रभुमी कोंइतीक कोंइताक्की। सरीड रोक्सीशा ठेयब वा का हाम्सीशा क्युकसीशो खोदेशो पा खप गे यिशो ताता। मिनु आं नेक्था जाक्शा दिक्त। प्रेरित १०:९-४८

6 मिनु गो गीशा कोव्रडुनु, मब्वचा डा, ग्रांग्रा दिचा डा, जन्तु, खोते नु चिक्ब तातामी।

7 मिनु 'ए पत्रुस, मेको साइश्शा ब्वामी' देशो नेंता।

8 मिनु गोमी 'हत्तेरी, ओदेशो ग्रांग्रा दिचा डा दोपा ब्वचा नमी डा, प्रभु, ओदेशो ग्रांग्रा दिशो गेनायो मब्वशो नड' देंती।

9 मिनु 'परमप्रभु यावेमी चोव्रखो सेल्लो कली गे ग्रांग्रा मदित्तो' दे सरीड रे देशो नेंता।

10 खेयप सां मोदेशो दुम्शा, मेको ठेयब वा सरीड गे लेशशा लत।

11 मोदेशो दुमे चोटीन सिजरिया रे आं कली ब्रथ सोइश्शो मुर सां आं बाक्शो खिंमी जाक्तेक्म।

12 मिनु परमप्रभु यावे आ सोक्तीमी 'मेको आन जात मार नमी? दे ममिम्थु मेकोपुकी नु काथा लावो' देंतीके गो मेकोपुकी नु लती। मुल एकेर गो नु बाक्ब थमा सुइक्ब ६ जना लोकब गो नु लाम्तेक्म। गो काथा गाक्शा, कारनेलीयस आ खिं जाक्दीश्शा ओव्रतक।

13 आ खिं ओव्रशा बाक्कानु, कोरनेलीयसमी आंड कली 'परमप्रभु यावे आ स्वर्ग डा गेय पाइब का आं डोंडती राष्णा, मेकोमी योप्पा सहरमी जाक्शा बाक्शो सिमोन पत्रुस कली ब्रथ सोइक्तो।

14 मेकोमी जाक्शा, गे नु इ खिं डा मुर नेल्ले आन कली गेना हना यो ब्रोंडशा बाक्तीक लोव्र शेंब, दे माइक्ती' देंत।

15 मिनु गो मेकेर खुम्सीशा बाक्ब आन कली ख्रीस्त आ लोव्र शेंदुनु, साइ गोपुकी खोदेशो पा मेकोपुकी यो परमप्रभु यावे आ सोक्तीम पिंचा पुंडसाक्म। प्रेरित २:१-४

16 परमप्रभु यावे आ सोक्तीम ब्रीचा पुंडसीशो तशा, गो इं प्रभु आ देशो लोव्र ति फ्रुक्ता। प्रभुमी मार देंत देशा हना 'यूहन्नामी मुर आन कली व्वाक्कुमी खुम्शा गुंडताक्व। गे चहिं परमप्रभु यावे आ सोक्तीमी खुम्चा पुंडसीनीनी' देंत। प्रेरित १:५

17 गोपुकीमी प्रभु येसु ख्रीस्त कली थमा सुइक्तीके परमप्रभु यावे आ सोक्तीम पिंचा पुंडसाक्म। मिनु अर्को रागी डा मुरपुकीमी यो येसु ख्रीस्त कली थमा सुइक्तीके आ सोक्तीम पिंचा पुंडसाक्म। मोदेशो दुम्शो तशा, मार पाइनुडा? गो परमप्रभु आ पशो गेय तेक्ने चाप्नडा?" दे रूप्पाइक्मी बाक्त।

18 पत्रुसम मो देशो नेंशा, मेको आन पोक्शो लोव्र साम्शा "मोदेशो बाक्त हना, परमप्रभु यावेमी इं कली गेशो खोदेशो पा अर्को रागी डा मुर आन कली यो आन थुं लेप्पा आन पाप क्याम्बाक्माक्त" दे परमप्रभु यावे कली ठेयब सेल्मे बाक्त।

### अर्को रागीम येसु आ लोव्र शेंशो

19 स्तीफानस साइक्चा पुंडसे नोले खेदा पचा पुंडसीशा, प्रोक्शा गाक्शो थमा सुइक्ब का निक्शी फोनीसीया, का निक्शी साइप्रस, का निक्शी एन्टीओक जाक्दीशो बाक्मा बाक्त। मिनु मेकोपुकीमी येसु आ लोव्र यहूदी आन कली ला शेंदमे बाक्त। प्रेरित ८:१-४

20 साइप्रस नु साइनेरी रे एन्टीओक सहर जाक्दीशो थमा सुइक्ब का निक्शीमी चहिं अरु ग्रीस रागी डा मुर आन कली यो प्रभु येसु आ पब्रम शेंदमे बाक्त।

21 मोदेशो शेंब आन कली प्रभुमी सक्ति गेवा बाक्त। मिनु मेको आन लोव्र नेंशा, शुश मुरुमी थमा सुइशशा, आन थुं प्रभु गे हिरदमे बाक्त। प्रेरित २:४७

22 एन्टीओक सहरमी शुश मुर थमा सुइक्ब दुम्तेक्म, दे यरूसलेममी बाक्ब थमा सुइक्बपुकीमी यो नेन्मे बाक्त। मिनु बारनाबास कली रूथ सोइक्तमे बाक्त। प्रेरित ४:३६

23 बारनाबास एन्टीओकम जाक्दीशशा, परमप्रभु यावेमी शुश मुर आन कली शिशो पा आन थुं लेप्पाइशो तशा थाम्पा ग्येरसे बाक्त। मिनु मेको आन कली "मार दुम्त हना यो, प्रभु कली मप्रोंडचा, है" दे आन थमा सुइक्तीक थुं बारपाइक्मी बाक्त।

24 बारनाबास रिम्शो मुर बाक्माक्त। परमप्रभु यावे आ सोक्तीमी ब्रीशा, खोइल थेक्शो खोदेशो पा थमा सुइक्बाक्माक्त। आ पशो तशा, आ लोव्र नेंशा, शुश मुरुमी प्रभु कली थमा सुइक्ब दुम्मा बाक्त। प्रेरित ५:१४

### ख्रीस्तीयन नें वोइक्चा पुंडसीशो

25 मिनु नोले बारनाबास सावल माल्थ टारसस सहर लमाक्त। प्रेरित ९:३०

26 मिनु थिशशा एन्टीओकम जाक्शा बाक्सा बाक्त। मिनु बर्स का सम्म थमा सुइक्बपुकी नु काथा बाक्शा, शुश मुर आन कली प्रभु आ लोव्र शेंना शेंन बाक्सा बाक्त। एन्टीओक सहरमीन येसु आ लां खोइक्ब नेल्ल क्येडा डोंडती "ख्रीस्तीयन" दे नें वोइक्चा पुंडसमा बाक्त। मेना रे मेको नें लीमाक्त। गलाती २:११

### श्येत जाइब आन कली क्येट सोइशशो

27 मिनु काबु परमप्रभु यावे आ लोव्र पाइबपुकी यरूसलेम रे यिशा, एन्टीओकम जाक्मा बाक्त। प्रेरित १३:१; प्रेरित १५:३२

28 मेको आन दातेमी अगाबस नें पाइशशो मुर का बाक्माक्त। मिनु काबु थमा सुइक्बपुकी खुम्सीशा बाक्मानु, अगाबसमी परमप्रभु यावे आ सोक्त रे पा “रागी नेल्लेमी अन्काल दुम्शा, जचा मतांडसीब” दे लोत्र पवा बाक्त। मेको लोत्र पिप क्लौदीयस आ सासनम थमा दुम्माक्त। प्रेरित २१:१०

29 अन्काल दुम्ब देशो तुइशशा, एन्टीओक डा थमा सुइक्बपुकीमी “यहूदीया रागीमी बाक्ब थमा सुइक्ब आन कली वारच पाइक्चा माल्ब, मोपतीके क्येट पोक्क्य” देंमा बाक्त।

30 मिनु नेल्लेमी दो दोशो चाप्मे, मो मोशो क्येट पोक्का, यरूसलेममी बाक्ब थमा सुइक्ब आन शेंब खाल्पा आन कली गेचा नमी, दे बारनाबास नु सावल आस कली चोत्रथ सोइक्तमे बाक्त। प्रेरित १२:२५; १कोरिन्थी १६:१-४

## 12

### पत्रुस जेल्खान रे प्रॉइचा पुंडसीशो

1 मेको बर्समी पिप हेरोदमी यरूसलेम सहरम बाक्ब थमा सुइक्ब का निकशी आन कली खेदा पा ग्याइशशा, शुश श्येत गेमी बाक्त।

2 यूहन्ना आ लोकब याकूब कली तरवारमी क्योरपा साइक्पदा बाक्त। मत्ती २०:२०-२३

3 हेरोदमी “आं पशो तशा यहूदीपुकी ग्येरसीनीम” दे तुइशशा, मोदेशो खेदा पना पन लमाक्त। मिनु पत्रुस कली यो ग्याइक्पदा बाक्त। पत्रुस कली ग्याइक्पदानु, बोरब ओरुती मसुप्शो शोब्ले जतीक चाड जाक्शो बाक्माक्त।

4 मोपतीके पास्सा चाड थुम्शा, मुर आन डोंइती राप्पाइक्चा, दे जेल्खानमी चोक्का, ४, ४ जना पालो पालो पा बाक्कीन, दे १६ जना सिपाही वोइक्पदा बाक्त।

5 पत्रुस जेल्खानमी चोक्सीशा बाक्मेनु, थमा सुइक्ब नेल्ल थुं का दुम्शा “पत्रुस कली कोव्रडीने, प्रॉइशा सोइक्तीने” दे प्रार्थना पा बाक्मा बाक्त।

6 हेरोदमी पत्रुस कली मुर आन डोंइती राप्पाइक्चा देशो नाक्त आ डोंइती नाकदो पत्रुस साडलो निकशीमी पाइशशा, सिपाही निकशी आस दातेम इप्पाइशशो बाक्माक्त। लाप्चो आ डोंइती यो खाल पाइबपुकी बाक्मा बाक्त।

7 मिनु मार दुम्माक्त देशा हना, परमप्रभु यावे आ स्वर्ग डा गेय पाइब का फो गूशा, पत्रुस आ डोंइती राम्माक्त। मिनु कोठा छेडछेड तांडसे बाक्त। मिनु परमप्रभु यावे आ स्वर्ग डा गेय पाइबमी पत्रुस कली “छुल बोक्को” दे चुशा पोक्का बाक्त। मिनु बोक्मेनु, आ गुडमी पाइशशो साडलो बुइशशा खपीमी देल्माक्त। प्रेरित ५:१९

8 मिनु “किप्शुर किम्सो, इ जुत्ता मुंडसो” देंमेनु, पत्रुसमी किप्शुर किप्शा, जुत्ता मुंडसे बाक्त। मिनु “इ किप्शुर किप्शा रुक्शा, आं नोले खोइय्थी” देंमाक्त।

9 मिनु पत्रुस मेको आ नोनोले खोइशशा, कोठा रे गूसा बाक्त। पत्रुसमी चहिं एको नेल्ल गो कोइतीक तना तन बाक्नुड, दे मिम्ता बाक्त। थमा कोठा रे गूडा बाक्त, दे मतुइशशो बाक्माक्त।

10 मिनु कोठा रे गूशा, डोंइती बाक्ब खाल पाइब कली लाक्शा, नोले बाक्ब कली यो लाक्शा, फलाम के सेल्शो ठेयब लाप्चो जाक्दीस्सा बाक्त। मेकेर जाक्दीस्सानु, लाप्चो रोकसे बाक्त। मिनु गूशा गाक्सा बाक्त। मिनु लां का लाग्सेनु, परमप्रभु यावे आ स्वर्ग डा गेय पाइबमी पत्रुस कली प्रॉइशा गाक्माक्त।

11 मेना ब्रड सेंसीशा “परमप्रभुमी पिप हेरोद नु आं कली खेदा पाइब यहूदी आन गुड रे प्रॉइथ, आ गेय पाइब सोइशशा प्रॉइथी बाक्त” दे तुइक्ता बाक्त।

12 मेको तुइशशा मर्कूस, यूहन्ना नें यो वोइशशो, आ ममा मरीयम आ खिं गे लमाक्त। मरीयम आ खिंमी थमा सुइक्ब शुश खुम्सीशा, प्रार्थना पना पन बाक्शो बाक्मा बाक्त। प्रेरित १२:२५; प्रेरित १३:५, १३; प्रेरित १५:३७

13 मिनु पत्रुस जाक्शा, लाडगा डा लाप्चो खोकोल पदा बाक्त। मिनु रोदा माइशशो गेय पाइब मीश मुरुम सु जाक्मे, दे कोव्रथ गूमाक्त।

14 मिनु पत्रुस आ सेंदा नेंशा, पत्रुस जाकमाक्त, दे तुइश्शा, लाप्चो मरोक्थु फ्रा लेशशा, खिं गामी बाक्शो आन कली “आमाइ, लाप्चो डोंइती राप्शा बाक्ब दा पत्रुस कका बाक्त” दे माइक्मी बाक्त।

15 मोदेशो नेंशा “गे मार निप्स ग्यशो लोत्र पवी?” दे आ देशो थमा मसुदमे बाक्त। रोदामी चहिं लोत्र थोकशा, “थमान पत्रुस जाक्त” देमेनु “मो हना पत्रुस ममाइ। पत्रुस कली कोत्रब परमप्रभु यावे आ स्वर्ग डा गेय पाइब बाक्म माइ?” देमा बाक्त।

16 मोपा लोत्र पना पन बाक्मानु, पत्रुसमी लाप्चो खोकोल पाइक्स डा पाइक्स बाक्माक्त। मिनु नोले लाप्चो रोक्शा कोत्रडमेनु, पत्रुस कली तशा “आल्लेइ” दे छक लाक्मा बाक्त।

17 मिनु पत्रुस ओत्रशा आ गुइ हिकशा, आ शोत्र थीप थीप पा सिक्सी पा नेनीन देशा, दोपा प्रभुमी जेल्खान रे प्रॉइशा सोइक्ता, मेको नेल्ल तुइक्पाइक्मी बाक्त। मिनु “याकूब नु इं थमा सुइक्ब लोकब नेल्ल आन कली एको लोत्र नेंपतीन, है” देशा, मेकेर रे गाक्माक्त।

18 जेल्खानमी चहिं मार दुम्माक्त देशा हना, सुनी कना सिपाही नु खाल पाइबपुकीमी पत्रुस कली मतामे बाक्त। मिनु शुश हिंशा, मार दुम्मे, ते लाक्गा, दे वाइ की ब्रेम्मा बाक्त। प्रेरित ५:२१-२२

19 मिनु पिप हेरोदमी पत्रुस कली माल्थ सोइक्तीमी बाक्त। माल्ना माल्न गाक्मानु, यो तेइ मथिदमे बाक्त। मिनु थिन्ने मचाप्शो तशा, पिपमी खाल पाइब आन कली ब्रेशशा हिल्लो हिकसी पशा यो मारेइ तुइक्ने मचाप्तीके खाल पाइब सिपाही आन कली साइक्पाइक्मी बाक्त। मिनु यहूदीया रागी रे सिजरिया सहर याक्सीशा बाक्माक्त।

### पिप हेरोदमी सजाइ तशो

20 पिप हेरोद मेकेर बाक्मेनु, टायर नु सीदोन सहर डा मुर आन कली तशा चुरमाक्त। मोपतीके मेकोपुकीमी मुर निक्शी का योत्रशा, ब्लास्तस नें पाइश्शो पिप आ ठेयब गेय पाइब मुर नु गारशा, पिप कली युम्थ जाक्मा बाक्त। मिनु मेकोपुकीमी “दुशा गारशा बाक्य, सरकार” दे सेउ पदमे बाक्त। मारदे हना पिप हेरोद आ रागी रे मचाक्थु जचा मजाक्दीम्माक्त। इजीकीएल २७:१७

21 मिनु काबु पिप हेरोदमी रकारी वा फेक्शा, आ ठेयब नित्तीकेमी निश्शा, मेको आन कली आ लोत्र नेंपाइक्मी बाक्त।

22 मिनु आ लोत्र नेंशा “मुर आ लोत्र ममाइ, देवता आ लोत्र बाक्माक्त” देशा, रेयके पा पिप कली ठेयब सेल्मे बाक्त। इजीकीएल २८:२

23 पिप हेरोदमी परमप्रभु यावे कली मान मपथु, आंमान ठेयब सेल्सीतीके परमप्रभु यावे आ स्वर्ग डा गेय पाइबमी मेको कली रोइ पपदा बाक्त। मिनु मेको हेरोद लुस्पु जोल्शा बेक्माक्त। दानीएल ५:२०

24 परमप्रभु यावे आ लोत्र तेइ तेइ ब्रशा, शुश मुर थमा सुइक्ब दुम्मा बाक्त। प्रेरित ६:७

25 बारनाबास नु सावल यरूसलेममी क्येट चोत्रने थुम्शा, एन्टीओक लेस्सा बाक्त। लेस्सानु, मर्कूस कली यो लदसे बाक्त। मर्कूस कली यहून्ना नें यो वोइश्शो बाक्त। प्रेरित ११:२९-३०; प्रेरित १३:५

## 13

### शेंब आस कली सोइश्शो

1 एन्टीओक सहर डा थमा सुइक्ब आन दातेमी परमप्रभु यावे आ लोत्र पाइब नु शेंब का निक्शी यो बाक्मा बाक्त। मोदेशो मुर सु सु बाक्मा बाक्त देशा हना, बारनाबास, क्येर माइश्शो सिमियोन, साइरेनी डा लुसीयस, पिप हेरोद आ गेय पाइब मानाएन नु सावल बाक्मा बाक्त। प्रेरित ११:२७; १कोरिन्थी १२:२८

2 मिनु काबु थमा सुइक्बपुकी खुम्सीशा माइजा बाक्शा, प्रार्थना पना पन प्रभु कली ठेयब सेल्ना सेल्न बाक्मानु, परमप्रभु यावे आ सोक्तीमी “बारनाबास नु सावल आस कली आं गेय पथ योत्रतासी। मोपतीके मेको आस कली आं गेय पचा कली सोइक्तीने” दे तुइक्पाइक्मी बाक्त। प्रेरित ९:१५

3 मिनु माइजा बाक्शा, प्रार्थना पा आसीक गेशा, प्रभु आ गेय पथ सोइक्तमे बाक्त। प्रेरित ६:६

4 मिनु मेको निक्शी परमप्रभु यावे आ सोक्तीमी योत्रशा सोइक्तीके एन्टीओक सहर रे बुप्शा, सिलुसीया सहरमी जाक्दीस्सा बाक्त। मेकेर जहाज डोइश्शा समुन्द्र शोकशा, साइप्रस टापु जाक्दीस्सा बाक्त।

5 मिनु सलामीस सहर जाक्दीश्शा, यहूदी आन गुम्तीक खिं लशा, परमप्रभु यावे आ लोत्र शेंदसे बाक्त। एन्टीओक रे काथा गाक्शा, यहून्ना मर्कूसमी मेको आस कली वारच पस डा पस बाक्माक्त।  
प्रेरित १२:१२,२५

### चटक कोंइब कली हुइश्शो

6 मिनु साइप्रस टापु नेल्ल हिरशा, गाक्मा गाक्मा पाफोस सहरमी जाक्दीम्मा बाक्त। मेकेर जाक्दीश्शा बाक्मानु, बार-येसु माइश्शो चटक कोंइब, यहूदी मुर का गुम्मे बाक्त। मेको “परमप्रभु यावे आ लोत्र पाइब नड” देखु पा गाक्बाक्माक्त।

7 मेको चटक कोंइब सेरगीयस-पावल नें पाइश्शो हुकुम पाइब आ खिंमी बाक्बाक्माक्त। मेको हुकुम पाइब जोक्ब तुइक्ब मुर बाक्माक्त। मिनु काबु बारनाबास नु सावल आस कली ब्रेश्शा “परमप्रभु यावे आ लोत्र गो यो नेंनुड” दे माइक्सी बाक्त।

8 मेको चटक कोंइब बार-येसु कली ग्रीक लोत्रमी एलुमास यो देंबाक्मा बाक्त। मिनु मेकोमी हुकुम पाइब कली बारनाबास नु सावल आस शेंशो लोत्र थमा सुइक्चशो तशा “मेको आस शेंशो थमा मसुतीन” दे हुकुम पाइब आ थुं हिरपाइक्चा मला बाक्त।

9 सावल कली पावल यो देंनीमी। मिनु पावलमी चटक कोंइबमी हुकुम पाइब आ थुं हिरपाइक्चा माल्शो तुइश्शा, परमप्रभु यावे आ सोक्तीमी ब्रीशा सक्ति पाइश्शो दुम्शा, चटक कोंइब कली मिक्च मयाक्थु कोव्रस डा कोव्रस पा

10 “गे सैतान आ तौ नवे। रिम्शो मदाक्थु, मरिम्शो ला दाक्नेवे। प्रभुमी सेल्शो रिम्शो लां कली मरिम्शो सेल्चा थुं पवी? मरिम्शो थुं पाइश्शो बाक्ते। मोपतीके प्रभुमी इ कली मुल सजाइ गेब।

11 गे मिक्च मताइब दुम्शा, शुश नाक्त सम्म छेडछेड मताइनेवे” दे हुइक्ता बाक्त। मो देंम चोटीन मेको चटक कोंइब मिक्च मताइब दुम्शा, आ गुड कीशा लां कोंइब मुर माल्दा बाक्त।

12 मिनु हुकुम पाइबमी चटक कोंइब कली मिक्च मताइब दुम्शो तशा छक लाक्माक्त। मिनु “मेको आस लोत्र प्रभु आ सक्ति पाइश्शो लोत्र बाक्माक्त” दे रुप्शा, प्रभु कली थमा सुइक्ब दुम्माक्त।

### पिसीदीया डा एन्टीओकम शेंशो

13 मिनु पावल नु आ वारचपुकी पाफोस सहरमी जहाज डोइश्शा समुन्द्र शोकशा, पाम्फिलीया रागी डा पेरगा सहरमी जाक्दीम्मा बाक्त। यहून्ना मर्कूस चहिं पावल नु बारनाबास आस कली प्रोंइशा, यरूसलेम लेम्माक्त। प्रेरित १५:३८

14 पावल नु बारनाबास पेरगा रे गाक्शा, पिसीदीया रागी डा एन्टीओक सहरमी जाक्दीस्सा बाक्त। मिनु नाइक्तीक नाक्ती गुम्तीक खिं लशा, मेकेर देल्शो मुरपुकी नु निश्शा बाक्सा बाक्त।

15 मिनु गुम्तीक खिं डा ठेयब मुरपुकीमी मोसा नु परमप्रभु यावे आ लोत्र पाइबमी ब्रेक्शो लोत्र पढेपा नेंपाइक्ने थुम्शा, पावल नु बारनाबास आस कली ब्रेश्शा “आंइ लोक्ब निक्शी, मुर आन कली शेंशा, आन थुं बारपाइक्चा डा लोत्र बाक्त हना, शेंदीसे” दे आस कली लोत्र पचा गेमे बाक्त। प्रेरित १५:२१

16 मिनु पावल राप्शा “इस्त्राएली नु परमप्रभु यावे कली मान पा हिबपुकी, इन नोफा दाइश्शा, नेनीन।

17 इस्त्राएली आन परमप्रभु यावेमी आंइ किकी पिपी आन कली योत्रशा, इजीप्त रागीमी बाक्मानु, शुश सोशा बोशा ठेयब जात दुम्पाइक्मी बाक्त। मिनु शुश सक्ति पाइश्शो गेय कोंइशा, मेको आन कली श्येत रे प्रोंइशा गुंडीमी बाक्त। प्रस्थान १२:३७,४०,४१; प्रस्थान १४:८

18 मिनु ४० बर्स सम्म गोरशो रागीमी लां कोंइना कोंइन लाइक्मीनु, मेकोपुकीमी आ लोत्र मटिम्तेक्म हना यो, फाल्शा रिम्शो पाइक्मी बाक्त। भजन संग्रह १०६:१३-३३



19 कनान रागीमी बाकब ७ रागी डा मुर नेल्ल आन कली साइशशा, मेको आन रागी आंड किकी पिपी आन कली गेवा बाकत। ब्यवस्था ७:१; यहोसु १४:२

20 मोपा ४ सहे ५० बर्स बाकशा नोले निसाफ पाइब योत्रशा वोदा बाकत। नोले परमप्रभु यावे आ लोत्र पाइब सामुएल कली अधिकार गेवा बाकत। न्यायाधीस २:१६; १सामुएल ३:२०

21 सामुएल आ पालामी आंड किकी पिपीमी 'आंड कली सासन पाइब पिप का गेचा नकी' दे पुन्मे बाकत। मिनु परमप्रभु यावेमी बेन्यामीन थर डा कीश आ तौ सावल कली योत्रशा, आन पिप सेला बाकत। मिनु सावल ४० बर्स सम्म पिप दुम्माकत। १सामुएल ८:५; १सामुएल १०:२१-१४

22 मिनु परमप्रभु यावेमी सावल नु आ खिं डा मुर आन कली पिप दुम्चा रे तिल्शा, दाऊद कली पिप सेला बाकत। दाऊद आ पर्वम परमप्रभु यावेमी 'येस्से आ तौ दाऊद आं मिम्शो खोदेशो पा आं यो मिम्ब। मिनु गो नु गारब। आं दाकशो पाइब, दे तुइक्नुड' देशो बाकत। १सामुएल १३:१४

23 परमप्रभु यावेमी इस्राएली आन कली पाप रे प्रोंडब का सोइक्नुड, दे लोत्र गेशो बाकमाकत। मेको पाप रे प्रोंडब दाऊद आ खिं डा येसु बाकब। यसैया ११:१

24 येसुम शेंचा क्येडा डोंइती ब्वाक्कुम खुम्शा गुंडब यूहन्नामी इस्राएली आन कली 'पाप पचा प्रोंडशा, इन थुं परमप्रभु यावे गे लेत्तीन' दे शेंशो बाकमाकत। लूका ३:३

25 मोपा शेंदानु, मुर आन कली 'आं कली तथा, पाप रे प्रोंडब एको बाकम कोर मे? मदेनीन। गो मनड। तन्न मुल जाकचशो बाकब। गो मेको आ डोंइती बाप्शा, आ जुत्ता पृइक्चा यो मशिरनुड' दे शेंशो बाकमाकत। लूका ३:१५; यूहन्ना १:२०; मर्कूस १:७; लूका ३:१६; यूहन्ना १:२७

26 आं लोकबपुकी, अब्राहाम आ खिं डा मुर बाकतीनी हना यो, परमप्रभु यावे कली मान पा हिंब अर्को रागी डा मुर बाकतीनी हना यो, गो नेल्ल ई कली परमप्रभुमी पाप रे ब्रोंडतीक लोत्र नेपाइक्ब।

27 यरूसलेममी बाकबपुकी नु आन टेयब मुरपुकीमी येसु पाप रे प्रोंडब बाकब, दे मरुबेम। नाइक्तीक नाकत किंत किंत परमप्रभु यावेमी ब्रेक्पाइशो लोत्र पढेशा नेंशा यो रुप्ने मचबेम। मोपा मारेड रुप्ने मचाप्तीके येसु कली दोस गेम्तेकम। आन मो पशोमी साइ डा ब्रेक्शो लोत्र नेल्ल थमा सेल्लेकम। यूहन्ना १६:३

28 साइक्चा पुंडसीचा डा दोस गुंडेन मचाप्तेकम हना यो, हुकुम पाइब पिलातस कली मेको मुर साइक्चा पुंडसीब बाकब, दे साइक्पाइक्तेकम। मत्ती २७:२२-२३

29 मिनु साइ डा ब्रेक्शो लोत्र नेल्ल थमा दुम्पाइक्तेकम। येसु शीम क्येप्शा कांटी थोक्शा क्याइशशा साइशशा खपीम फुप्शा, आ बेक्शो रां थिम्तेकम। मत्ती २७:५९-६०

30 तन्न परमप्रभु यावेमी मेको कली बेक्शो रे सेंताक्व। प्रेरित ३:१५

31 मिनु गालील रे यरूसलेम सम्म येसु नु काथा गाक्ब आन कली बेक्शो रे सेंसीशा शुश नाकत तपांडसाक्व। मोदेशो पा येसु कली सेंसीशो ताइबपुकीमी 'येसु बेक्शो रे सेंचा पुंडसाक्व। मुल यो ब्रोंडशो बाकब। आंड मिक्चीमी ताइतक' दे शेंना शेंन गाक्नीम।

32 परमप्रभु यावेमी ई किकी पिपी आन कली डोंइती पशो लोत्र पाप रे प्रोंडब का सोइशशा खाप्शो, ग्येरपाइक्तीक लोत्र इन कली शेंनीकी।

33 मेको लोत्र साइ परमप्रभु यावेमी ब्रेक्पाइशो लोत्र नु गारब। मारदे हना भजन संग्रह कामी 'गे आं तौ नवे। मुलाक्ती गो इ कली थीतन' दे ब्रेक्शो बाकब। भजन संग्रह २:७

34 लेंशा मबेक्चा डा नु मराक्चा डा पा बेक्शो रे सेंसीशो आ पर्वम परमप्रभुमी 'दाऊद कली गेशो खोदेशो पा गो इ कली आसीक गेनन' दे ब्रेक्पाइशो बाकब। यसैया ५५:३

35 मोपतीके दाऊदमी भजन संग्रह कामी 'परमप्रभु यावे, इन योत्रशो तौ कली बेक्शा लशा यो, राक्चा मगेनीनी' दे ब्रेक्शो बाकत। भजन संग्रह १६:१०; प्रेरित २:२७

36 दाऊदमी मेको लोत्र ब्रेक्शो बाकत हना यो, आंम पर्वम ममाइ। मारदे हना दाऊदमी परमप्रभु यावेमी गेशो सासन पने थुम्शा बेक्शा, आ किकी पिपी आन कली थिम्तीकेमी थिम्चा पुंडसीशा राक्शा लमाक्त।

37 येसु चहिं बेक्शा मरा। मारदे हना परमप्रभु यावेमी मेको कली बेक्शो रे सेंताक्व।

38 मोपतीके आं लोकबपुकी, आं लोव्र रुपीने। मेको येसुमी मुर आन पाप क्याम्शा गोब, दे इन कली शेंनीकी। रोमी ८:३-४

39 येसु कली थमा सुइक्ब नेल्ल आन पाप क्याम्चा पुंडसीनीम। मिनु आन पाप क्याम्चा पुंडसीशा, परमप्रभु आ डोंइती पाप मपथु बाकशो तांडसीनीम। मोसामी ब्रेकशो लोव्रमी इन पाप क्याम्ने मचाप्व। मारदे हना मेको लोव्र नेल्ल टिने मचाप्टीके पापी दुम्तीनी। रोमी १०:४

40 मोपतीके होस पांडसीने। साइ परमप्रभु यावे आ लोव्र पाइबमी

41 'ए, गे शुक्शी पाइबपुकी, छक लाकचा डा पा पुलु दुम्शा लने। मारदे हना गो इन पालामीन गेय का पाइनुड। तन्न गे थमा मसुइक्नीनी। मिनु सुइमी इन कली शेंताक्म हना यो गे थमा मसुइक्नीनी' ” दे पावलमी शेंदीमी बाक्त। हबकुक १:५

42 मिनु गुम्तीक खिं रे यूशा गाक्याम्सेनु, आस लोव्र नेंबपुकीमी “मुल जाकशो नाइक्तीक नाक्ती लेंशा शेंचा नकी” दे पुन्मे बाक्त।

43 मिनु गाक्सानु, यहूदी नु यहूदी धर्म मानेब शुशेमी मेको आस नोले खोदमे बाक्त। मेको निक्शीमी “परमप्रभु यावेमी इन कली शिशी पा ख्रीस्त कली थमा सुइक्ब सेल्लु। मुल डा मेरे मेको थमा सुइक्तीक मप्रोनीन” दे मदसे बाक्त।

### खेरचा पुंडसीशो

44 मिनु नाइक्तीक नाक्त जाक्मेनु, सहर डा मुर नेल्ल जाकशा, परमप्रभु यावे आ लोव्र शेंशो नेंथ देल्मा बाक्त।

45 मोपा शुश मुर देल्लो तशा, यहूदी आन थुं चोव्रमे बाक्त। मिनु पावलमी लोव्र शेंदानु, मेकोपुकीमी आ लोव्र खोइश्शा, जिचा पोक्ममे बाक्त।

46 मिनु पावल नु बारनाबासमी यो महिंथु ठेयब थुं पा “अरु आन क्येडा डोंइती इन कली परमप्रभु यावे आ लोव्र नेंपाइक्चा माल्लो। गेपुकीमी चहिं मनेनीनी, नोफा मदाइक्नीनी, थमा मसुइक्नीनी। इन मोदेशो पशोमी गेना हना यो ब्रोंइशा बाक्चा मताइनीनी। जाम्शा लाइनीकी, दे तुइक्तीने। मुल डा मेरे इन कली शेंचा प्रोंइशा, अर्को रागी डा मुर आन कली शेंथ गाकनस्कु। प्रेरित ३:२५-२६; मती १०:५-६

47 आंमा शेंब दुम्शा, गाक्शो मनस्कु। परमप्रभु यावेमी आंस कली आ लोव्र शेंब सेल्लु। मिनु मेकोमी ‘गो इ कली नेल्ल रागी डा, नेल्ल जात डा मुर आन कली लां कोंइशा, छेडछेड दुम्शा रुप्पाइक्चा कली सोइक्ताक्ड’ दे ब्रेकशो बाक्ब” देसा बाक्त। यसैया ४९:६

48 मिनु अर्को रागी डा मुरपुकीमी “मुल गो यो पाप रे ब्रोंइचा ताइबाक्तक” दे रुष्शा थाम्पा ग्येरसीशा, परमप्रभु यावे कली ठेयब सेल्मे बाक्त। परमप्रभु यावेमी डोंइती रे योव्रशोपुकीमी ख्रीस्त कली थमा सुइश्शा, गेना हना यो ब्रोंइशा बाक्चा ताइब दुम्मा बाक्त। रोमी ८:२९-३०

49 मिनु ख्रीस्त आ पर्वम शेंशो लोव्र मेको रागीमी तेइ तेइ ब्रमाक्त।

50 ख्रीस्त कली थमा मसुइक्ब यहूदीपुकीमी यहूदी धर्म मानेब ठेयब मीश मुर नु सहर डा सरकार डा ठेयब मुर आन कली पोक्शा, पावल नु बारनाबास आस कली मेको रागी रे गुंडदमे बाक्त।

51 मेको निक्शी चहिं आस खोइल डा फुरकु थुर थुर पा ताइश्शा, गाक्शा आइकोनीयम सहरमी जाक्दीस्सा बाक्त। प्रेरित १६:८; मती १०:१४

52 एन्टीओक सहरम बाक्ब थमा सुइक्बपुकी चहिं ग्येरसीशा, परमप्रभु यावे आ सोक्तीम प्रिंचा पुंडसमा बाक्त।

## 14

### आइकोनीयम सहरमी शेंशो

1 पावल नु बारनाबास आइकोनीयम सहरमी जाक्दीश्शा, यहूदी आन गुम्तीक खिं लशा, मेकेर खुम्सीशा बाक्शो आन कली ख्रीस्त आ लोव्र शेंना शेंन बाक्सा बाक्त। मिनु ख्रीस्त आ लोव्र नेंशा, यहूदी नु ग्रीक शुशेमी थमा सुदमे बाक्त।

2 मिनु थमा मसुइक्ब यहूदीपुकीमी अर्को रागी डा मुर आन कली पोकशा “मेको आस शेंशो लोत्र ननेचा” दे आन थुं हिरपा मरिम्शो पचा गोत्रमे बाक्त।

3 मो दुम्शा यो पावल नु बारनाबास शुश नाक्त सम्म मेकेर शेंना शेंन बाक्सा बाक्त। टेयब थुं पा सुइ आन कली तशा महिंथु, ख्रीस्त आ लोत्र शेंदसेनु, प्रभुमी चिन्ड नु छक लाक्चा डा गेय पचा कली सक्ति गेशा, आस शेंशो लोत्र थमा सेला बाक्त। प्रेरित १९:११; हिब्रू २:४

4 आस लोत्र नेंशा, चिन्ड नु छक लाक्चा डा गेय पशो तशा, सहर डा मुरपुकी ब्राशा, का निकशी थमा मसुइक्ब यहूदीपुकी नु गारमा बाक्त, का निकशी ख्रीस्त आ सोइशशो नु गारमा बाक्त।

5 मिनु अर्को रागी डा मुर, यहूदी नु आन हुकुम पाइब गारशा “शेंब आस कली फुल्लु आप्शा मसाइक्थु मप्रोंइचा नसी” दे साइक्चा माल्मे बाक्त। २तिमोथी ३:११

6 मिनु पावल नु बारनाबासमी मेको आन मो पशो तुइशशा, सहर रे प्रोकशा, लाइकाओनीया रागी डा लिस्त्रा नु डेरबे सहर लसा बाक्त।

7 मिनु मेकेर एर ओंथ डा गाउं गाउं हिरना हिरन ख्रीस्त आ लोत्र शेंना शेंन गाक्सा बाक्त।

### लिस्त्रा सहरम शेंशो

8 मिनु लिस्त्रा सहरमी जरमेसे रे गाकने मचापब आ खोइल मदुक्ब मुर का बाक्माक्त।

9 काबु मेको खोइल मदुक्ब मुरुमी पावल आ शेंशो लोत्र थाम्पा नोफा दाइशशा नेंना बाक्त। मिनु पावलमी मोपा नोफा दाइशशा नेंशो तशा, मेकोमी साबाक्ती, दे थमा सुदा बाक्त, दे तुइशशा, मती ९:२८

10 मेको कली मिक्च मयाक्थु कोत्रशा, टेयब सेंदा पा “इ खोइल दिंशा बोक्शा रपो” दे मदा बाक्त। मो मदानु, मेको छुल बोक्शा राप्शा एर ओंथ गाक्माक्त।

11 मिनु मोपा सापाइशशो तशा, छक लाक्शा, मेकेर देल्लोपुकीमी आन लाइकाओनीया डा लोत्र पा “इ देवता मुर खोदेंशो दुम्शा यिशा, गोपुकी नु काथा बाक्सा बाक्त” देंमुमा बाक्त। प्रेरित २८:६

12 मिनु बारनाबास कली जिउस नु पावल कली हेरमेस, दे देवता आस नें वोदमे बाक्त। मारदे हना पावल चहिं लोत्र पस जोक्बाक्माक्त।

13 सहर ओत्रतीक आ नेक्था जिउस देवता आ थान सेल्लो बाक्माक्त। मिनु जिउस कली चढ़ेबमी चढ़ेचा कली ब्यफ नु फू माला चाक्पाइक्मी बाक्त।

14 मिनु बारनाबास नु पावलमी मेकोपुकीमी गो इंस कली देवता मानेशा हुश जारशा चढ़ेचशो बाक्नीमी, दे तुइशशा, आस वा खाक्शा दोरशा लशा, मुर आन दातेमी जाक्दीस्सा बाक्त।

15 मिनु टेयब सेंदा पा “ए गेपुकी, मार पचानी? गो देवता मनस्कु, इन खोदेंशो मुर कका नस्कु। इन कली ग्येरपाइक्ब लोत्र शेंथ जाक्शो नस्कु। मूर्ति पूजा पचा प्रोंइशा, गेना हना यो ब्रोंइशा बाक्ब परमप्रभु यावे गे इन थुं हिरदीने। मेकोमी सरीड, रागी, समुन्द्र नु मेकेर मार मार बाक्मा, मेको नेल्ल सेल्लो बाक्ब, दे तुइक्तीने। प्रेरित १०:२६

16 साइ डोंइती रे मुल सम्म परमप्रभु यावेमी रागी नेल्ल आन कली आन दला दाक्स पचा गेशो बाक्त। प्रेरित १७:३०

17 आन दला दाक्स पा बाक्तेकम हना यो, परमप्रभुमी मेको आन कली तुइक्पांइसीन सीन बाक्त। दोपा तुइक्पांइसीन सीन बाक्त देंशा हना, रेउ यिपा मार मार वापा इन कली जाक्दीत्त्या डा पा जचा नु फेक्चा गेशा, ग्येरशा बाक्चा गेशो बाक्त” देंसा बाक्त।

18 मिनु देवता मानेशा हुश जारशा चढ़ेचा ममाल्ब देंसानु यो, हेरर हेररा चढ़ेमे बाक्त।

19 मिनु नोले एन्टीओक नु आइकोनीयम सहर रे थमा मसुइक्ब यहूदीपुकी जाक्मा बाक्त। मेकोपुकीमी सहर डा मुर आन कली पोकशा, पावल कली साइक्चा कली फुल्लु क्रोम्पदमे बाक्त। मिनु बेक्त, दे आ रां लाइशशा, सहर रे गुंइशा ताइक्तमे बाक्त। २कोरिन्थी ११:२५; २तिमोथी ३:११

20 मिनु थमा सुइक्बपुकी कोत्रथ लशा, पावल आ एर ओंथ राम्मानु, सेंसीशा बोक्शा सहर लेम्माक्त। मिनु आ दीसा बारनाबास नु गाक्शा, डेरबे सहर जाक्दीस्सा बाक्त।

### एन्टीओक लेशशो

21 मिनु डेरबे सहरमी शुश मुर आन कली येसु आ ग्येरपाडकब लोत्र शेंशा रूपदसेनु, शुश मुरुमी थमा सुदमे बाक्त। मिनु मेकेर रे लशा लेंशा लिस्त्रा, आडकोनीयम नु पिसीदीया डा एन्टीओकमी जाकदीस्सा बाक्त।

22 मेको सांफा सहर डा थमा सुडकब आन कली “मार दुम्त हना यो, थमा सुडकचा मप्रोनीन। इन खोइल थेंकशा बाककीने। ख्रीस्त आ नेंमी शुश श्येत जचा पुंडसीशा ला परमप्रभु यावे आ राज्य ओव्रचा ताइनय, दे रूपीने” दे आन थुं बारपदसे बाक्त। रोमी ५:३-५; १थिस्सलोनिकी ३:३

23 मिनु ते ते थमा सुडकबपुकी गुम्शा बाक्मा, मेक मेक शेंब खाल्पापुकी वोडकना वोडकन, माइजा बाक्शा, प्रार्थना पना पन, प्रभु कली थमा सुडशशा, थमा सुडकब आन कली प्रभु आ गुडमी जिम्मा गेना गेन गाक्सा बाक्त। प्रेरित ६:६

24 मिनु पिसीदीया रागी रे गाक्शा, पाम्फिलीया रागी जाकदीस्सा बाक्त।

25 मिनु पेरगा सहरमी ख्रीस्त आ लोत्र शेंशा, मेकेर रे ब्रुप्शा अतलीया जाकदीस्सा बाक्त।

26 अत्तालीया सहरमी जहाज डोइशशा, समुन्द्र शोकशा, एन्टीओक सहरम जाकदीस्सा बाक्त। डोंइती एन्टीओकम बाक्सानु, परमप्रभु यावेमी मेको आस कली ख्रीस्त आ लोत्र शेंथ योव्रशो बाक्माक्त। मिनु थमा सुडकबपुकीमी मेको आस कली प्रभु कली जिम्मा गेशा, शेंथ सोइशशो बाक्मा बाक्त। मिनु मुल शेंने थुम्शा लेशशा जाक्सा बाक्त। प्रेरित १३:१-२

27 मिनु जाक्शा थमा सुडकब आन कली खुप्शा, दोपा परमप्रभु यावेमी आं नु बाक्शा गेय पपाइशशा आसीक गेवा, दोपा अर्को रागी डा मुर आन कली थमा सुडकपा, पाप रे ब्रोंइतीक लां कोंइशा, आ मुर सेला, मेको लोत्र नेल्ल तुडकपदसे बाक्त। १कोरिन्थी १६:९

28 मिनु शुश नाक्त सम्म थमा सुडकबपुकी नु काथा बाक्सा बाक्त।

## 15

### खोइक्तीक चिनु आ पर्वम लोत्र

1 मिनु नोले यहूदीया रागी रे मुरपुकी यिशा, एन्टीओकमी जाक्मा बाक्त। मेकोपुकीमी “साइ मोसामी देशो खोइक्तीक चिनु खोइकचा माल्ब। मपाइतीनी हना, पाप रे ब्रोंइचा मताइनीनी” दे शेंबाक्मा बाक्त। गलाती ५:२

2 मिनु पावल नु बारनाबासमी मोदें शेंशो नेंशा, मेको आन शेंशो लोत्र मबिस्सा बाक्त। मेकोपुकीमी खोइक्तीक चिनु खोइकचा माल्ब देंमा बाक्त। पावल नु बारनाबासमी चहिं खोइकचा ममाल्ब, देंसा बाक्त। मिनु लोत्र निकशी दुम्तीके थमा सुडकब आन थुं ग्याल्माक्त। मिनु पावल, बारनाबास नु का निकशी आन कली योव्रशा, यरूसलेममी बाकब सोइशशोपुकी नु गुम्तीके डा शेंब खाल्पा आन कली हिल्लो पथ सोइकतमे बाक्त। गलाती २:१

3 मिनु योव्रशा सोइकचा पुंडसीशोपुकी एन्टीओक रे गाक्शा, यरूसलेम डा लां खोइशशा डोंइती फोनीसीया, नोले सामरीया रागीमी जाकदीम्मा बाक्त। मिनु ते ते जाकदीम्मा, मेक मेक डा थमा सुडकब आन कली गुम्शा “अर्को रागी डा मुरपुकीमी यो ख्रीस्त कली थमा सुडशशा, पाप रे ब्रोंइचा ताम्तेक्म” दे तुडकपाइकना पाइकन गाक्मा बाक्त। मिनु नेंबपुकी शुश ग्येरसमा बाक्त।

### अर्को रागी डा मुर आन पर्वम सल्ला पशो

4 मिनु यरूसलेममी जाकदीम्मानु, थमा सुडकबपुकी, ख्रीस्त आ सोइशशो, थमा सुडकब आन शेंब खाल्पा नेल्लेमी मान पा ब्रांमे बाक्त। मिनु परमप्रभु यावेमी पपाइशशो गेय दोपा पामे, मार दुम्मे, मेको लोत्र नेल्ल देंमा बाक्त।

5 थमा सुडकब का निकशी फरिसी बाक्मा बाक्त। मेकोपुकीमी बोक्शा “अर्को रागी डा मुरपुकीमी ख्रीस्त कली थमा सुडकब दुम्मानु, इं यहूदी धर्म डा खोइक्तीक चिनु खोइकचा माल्नीम, मोसामी अरेशो नेल्ल पचा माल्नीम” देंमा बाक्त।

6 मिनू ख्रीस्त आ सोइश्शोपुकी नु थमा सुइक्ब शेंब खाल्पापुकी खुम्सीशा “मेको लोत्र निक्शीमी तेको लोत्र टिशा पचा?” दे लोत्रसी पमुमा बाक्त।

7 मिनू शुश लोत्र पमुमानु, पत्रुस बोक्शा “आं लोकबपुकी, नोफा दाइश्शा नेनीने, ख्रीस्त आ लोत्र ब्रचा गोवानु, परमप्रभु यावेमी अर्को रागी डा मुर आन कली शेंशा, ग्येरपाइक्ब लोत्र थमा सुइक्पाइक्थ, आं कली योत्रती, दे तुइश्शो ननी। प्रेरित १०:४४; प्रेरित ११:१५

8 मुर नेल्ल आन थुं तुइक्ब परमप्रभु यावेमी यहूदी इं कली गेशो खोदेंशो पा अर्को रागी डा मुर आन कली यो आन थुंमी आ सोक्त गेप्टु।

9 मेकोपुकीमी येसु ख्रीस्त कली थमा सुइक्तीकेमी माफ तशा, गो नेल्ल का दुम्लो बाक्नीकी।

10 परमप्रभु यावेमी मेको आन कली रिम्लो सेल्लु, दे तुइश्शा, इं किकी पिपीमी लाइ यो कुरने मचाप्चा डा भारी मेको आन कली कुरपाइक्चा दुम्बा डा? परमप्रभु क्येडा लाक्शा जोक्ब तुइक्ब दुम्ल्या शिरबा डा? मती २३:४; गलाती ५:१

11 मारदे हना प्रभु येसुमी इं कली शिशी पतीके पाप रे ब्रोंइचा ताइतय, दे थमा सुइक्तय। मेकोपुकीमी इं खोदेंशो पा प्रभु आ शिशी तशा थमा सुइक्ब दुम्लेक्म” दे पत्रुसमी माइक्मी बाक्त। मिनू नेल्ल ब्वालेइ पामे बाक्त। गलाती २:१६; एफिसी ४:२-१०

12 मिनू बारनाबास नु पावल आस पालो लोत्र पचा गोम्ले बाक्त। अर्को रागी डा मुरपुकी नु बाक्सानु, दोपा परमप्रभु यावेमी चिन्ड नु छक लाक्चा डा गेय पपदा, मेको लोत्र नेल्ल तुइक्पदसे बाक्त।

13 मेको लोत्र पने थुम्ले नोले याकूबमी “आं लोकबपुकी, इन नोफा दाइश्शा, आं लोत्र नेनीने। प्रेरित २१:१८; गलाती २:९

14 परमप्रभु यावेमी अर्को रागी डा मुर आन कली यो योत्रशा, आ मुर सेल्लु, दे सिमोनमी तुइक्पाइक्त्तु। नेल्ल क्येडा डोंइती दोदेंशो दुम्ले, मार दुम्ले, मेको लोत्र शेंताक्व।

15 अर्को रागी डा मुर आन कली योत्रशा, आ मुर सेल्लु, दे साइ नेसी परमप्रभु यावे आ लोत्र पाइक्पुकीमी ब्रेक्शो आन लोत्र नु गारब।

16 ‘मेको नेल्ल दुम्ल्या नोले गो लेशशा जाक्नुड। मिनू साइ दाऊदमी सेल्पाइश्शो ब्रेश्शो खिं लेंशा सेल्लुड। मार मार ब्रेश्शो बाक्मा, मेको नेल्ल गो नक सेल्शा वोइक्नुड।

17 मारदे हना योत्रचा पुंडसीशो अर्को रागी डा मुरपुकीमी आं कली तुइश्शा, आं मुर दुम्लल, दे मो पाइक्नुड।

18 साइ रे गो मोदेंशो लोत्र तुइक्पाइक्ना पाइक्न पिती’ दे ब्रेक्शो बाक्ब। आमोस ९:११-१२

19 मोपतीके परमप्रभु यावे आ देशो तुइश्शा, दोदेंशो मिम्ल्या मालन्य देंशा हना, अर्को रागी डा थमा सुइक्ब आन कली श्येत मगेचा।

20 मेको आन कली ‘मूर्ति कली चढ़ेशो मजचा, तेल्लेम मपचा, हुश मचुइक्थु साइश्शो श्ये मब्वचा, हुश मब्वचा’ दे चिठी ब्रेक्शो बाक्त। लेवी १९:४; लेवी १९:२९; लेवी ३:१७

21 परमप्रभुमी मोसा कली ब्रेक्पाइश्शो लोत्र चहिं तुइक्नीम। मारदे हना साइ रे नाइक्तीक नाक्त इं गुम्लतीक खिंमी नेंशा तुइक्नीम” दे माइक्मी बाक्त। प्रेरित १३:१५

### अर्को रागी डा मुर आन कली चिठी

22 मिनू याकूब आ लोत्र नेंशा, नेल्ल थुं का दुम्ल्या, आ देशो बिस्समा बाक्त। मिनू चिठी ब्रेक्शा, मेको चिठी चोत्रथ मुर योत्रशा, पावल नु बारनाबास, नु काथा एन्टीओक सोइक्चा, दे सल्ला पामे बाक्त। मेको योत्रशा का यहूदा नु का सिलास बाक्सा बाक्त। यहूदा आ याइनी नें बारसाबास बाक्माक्त्त। यहूदा नु सिलास थमा सुइक्ब आन कली शेंब खाल्पा बाक्सा बाक्त।

23 मेको चिठीम चहिं “एन्टीओक, सिरीया नु सिलीसीया डा अर्को रागी डा येसु ख्रीस्त कली थमा सुइक्ब आइ लोकबपुकी, गो यरूसलेम सहरम बाक्ब ख्रीस्त आ सोइश्शो, आइ गुम्लतीक डा शेंब खाल्पा नु थमा सुइक्ब लोकब नेल्लेमी इन कली ‘रिम्लो बाक्कीन’ देंशा ब्रेक्शा सोइक्ताक्क।

24 गोपुकी नु बाकब का निक्शी इन बाक्तीकेमी जाक्शा, इन थुं क्वाल्लेक्म देंशो लोव्र नेंतक। मेको आंइ सोइश्शो मबाक्नीम।

25 मोपतीके गो नेल्ल थुं का दुम्शा, मुल इन थुं नाइक्पाइक्चा कली ई दाक्शो बारनाबास नु पावल नु काथा लोव्र कुरब मुर इन बाक्तीक सोइश्शो बाक्नीकी।

26 बारनाबास नु पावल ई प्रभु येसु ख्रीस्त आ नेंमी बेक्चा यो महिब बाक्नीसी।

27 आंइ मिम्शो नु आंइ देंशो नेल्ल मेको आंइ सोइश्शो यहूदा नु सिलास निक्शीमी इन कली तुइक्पाइक्नीसी। मिनु गे लोव्र नेल्ल तुइक्नीनी।

28 इन कली रुप्पाइक्चा माल्लो लोव्र चहिं परमप्रभु यावे आ सोक्तीमी आंइ कली रुप्पाइश्शो लोव्र बाक्ब। मिनु मेको लोव्र इन कली शेंनीकी। इन कली हेल्शो भारी कुरपा गाक्पाइश्शो खोदेंशो लोव्र ममाइ।

29 मेको लोव्र मार बाक्ब देंशा हना 'मूर्ति कली चढेशो मजचा, हुश मब्वचा, हुश मचुइक्थु साइश्शो श्ये मब्वचा, तेल्लेम मपचा' एको लोव्र टीतीनी हना, गे रिम्शो दुम्नीनी। आंइ लोव्र ओशोन बाक्ब" दे ब्रेक्शो बाक्माक्त।

30 मिनु यरूसलेम रे ब्रुप्शा एन्टीओक जाक्दीश्शा, थमा सुइक्ब आन कली ब्रेश्शा, मेको चिठी गेम्से बाक्त।

31 मिनु मेकोपुकीमी चिठी प्राक्शा पढेशा, ग्येरसमा बाक्त।

32 यहूदा नु सिलास परमप्रभु यावे आ लोव्र पाइब यो बाक्सा बाक्त। मिनु मेको निक्शीमी शुश लोव्र पा लोक्ब आन थुं बारपदसे बाक्त। प्रेरित ११:२७; प्रेरित १३:१

33 मिनु शुश नाक्ती एन्टीओकम शेंना शेंन बाक्शा, यरूसलेम लेत्ची ना यहूदा ला लेम्माक्त।

34 सिलास चहिं एक उइ बाक्नुड, दे बाक्माक्त।

35 पावल नु बारनाबास एन्टीओकम बाक्शा अरु नु गारशा, प्रभु आ लोव्र तुइक्पाइक्ना पाइक्न शेंना शेंन बाक्सा बाक्त।

### पावल नु बारनाबास ब्राशो

36 मिनु काबु पावलमी बारनाबास कली "डोंइती ते ते प्रभु आ लोव्र शेंथ हिरससा, मेक मेक डा थमा सुइक्बपुकी दो पामे, मार पामे, कोव्रथ लस" देंमाक्त।

37 मिनु बारनाबासमी "यूहन्ना, आ याइनी नें मर्कूस कली यो काथा लाइश्शा लस" देंमाक्त। प्रेरित १२:१२, २५

38 पावलम चहिं मलाइक्चा, दे मबिस्से बाक्त। मारदे हना डोंइती काथा गाक्शा, पाम्फीलीया रागीमी बाक्मानु, गेय प्रॉइशा आ का ला लेशो बाक्माक्त। प्रेरित १३:१३

39 मिनु बारनाबास लाइक्चा, पावलमी मलाइक्चा देंतीके मेको आस लोव्र मगारथु, जिशा ब्रासा बाक्त। मिनु बारनाबासमी मर्कूस कली लाइश्शा, जहाज डोइश्शा साइप्रस लमाक्त।

40 पावलम चहिं सिलास कली योव्रडा बाक्त। मिनु थमा सुइक्बपुकीमी परमप्रभु यावेमी पावल नु सिलास आस कली रिम्शो कोव्रडल, आसीक गेवल, दे प्रार्थना पशा सोइक्वमे बाक्त।

41 मिनु मेकेर रे लशा, सिरीया नु सिलीसीया रागीमी जाक्दीश्शा, थमा सुइक्ब आन थुं बारपदसे बाक्त।

## 16

### तिमोथी कली योव्रशो

1 मिनु डेरबे सहरमी जाक्दीश्शा, मेकेर रे लशा, लिस्त्रा सहरमी जाक्दीस्सा बाक्त। मिनु लिस्त्रामी तिमोथी नें पाइश्शो थमा सुइक्ब का गुम्से बाक्त। तिमोथी आ ममा ख्रीस्त कली थमा सुइक्ब यहूदी जात डा बाक्माक्त। आ आफ चहिं ग्रीक बाक्माक्त। प्रेरित १७:१४; प्रेरित १९:२२; प्रेरित २०:४; फिलिप्पी २:१९-२२; १थिस्सलोनिकी ३:२, ६; २तिमोथी १:५

2 लिस्त्रा नु आइकोनीयम सहरमी बाक्ब थमा सुइक्ब नेल्लेमी तिमोथी रिम्शो मुर बाक्ब देंबाक्मा बाक्त।

3 मिनू पावलमी तिमोथी कली गेय पाइब वारच सेल्शा, काथा लाइक्का देंमाक्त। मिनू यहूदीपुकीमी तिलशा मवोदमेक्ल, दे खोइक्तीक चिनु खोइक्पदा बाक्त। मारदे हना तिमोथी आ आफ ग्रीक बाक्ब, दे नेल्लेमी तुइश्शो बाक्मा बाक्त। गलाती २:३

4 मिनू काथा लाइश्शा, गाउं सहर हिरना हिरन गाक्शा, थमा सुइक्ब आन कली गुम्शा, यरूसलेमम बाक्ब ख्रीस्त आ सोइश्शोपुकी नु गुम्तीक डा शेंब खाल्पा आन देंशो लोत्र नेंपदमे बाक्त। प्रेरित १५:२३-२९

5 मोदेशो नेंपा गाक्मानु, थमा सुइक्ब आन थुं बारपदमे बाक्त। मिनू नाक्त कित कित थमा सुइक्बपुकी तेम्सीशा, शुश दुम्मा बाक्त।

### परमप्रभु आ सोक्तीमी लां कोइशो

6 मिनू परमप्रभु यावे आ सोक्तीमी पावल नु आ वारच आस कली एसीयामी शेंचा मगेतीके फ्रिगीया नु गलातीया रागी लमा बाक्त। प्रेरित १८:२३

7 मिनू माइसीया आ नेक्था जाक्दीश्शा, मुल बिथीनीया रागी ओव्रचा, दे थुं पामे बाक्त। तन्न येसु आ सोक्तीमी लचा मगेमी बाक्त।

8 मोपतीके माइसीया लां रे पा बुप्शा, त्रोआस सहरम जाक्दीम्मा बाक्त।

### मासीडोनीया लशो

9 मिनू त्रोआस सहरमी बाक्मानु, काबु नाक्दो प्रभुमी पावल कली कोइतीक कोइदा बाक्त। मार कोइदा बाक्त देंशा हना, मासीडोनीया रागी डा मुर का पावल आ डोइती राप्शा “आंइ मासीडोनीया रागी पिशा, आंइ कली वारच पाइक्का नकी, हजुर” दे पुंइशो तवा बाक्त।

10 मेको कोइतीक तथा, पावल छुल बोक्शा “मासीडोनीया लय” देत। मोपतीके गो यो सासाक्क। प्रभुमी मासीडोनीया डा मुर आन कली ग्येरपाइक्तीक लोत्र शेंथ सोइक्ता बाक्त, दे नेल्लेमी रुप्तक।

11 मिनू त्रोआस सहरमी जहाज डोइश्शा तेइ महिरथु, सामोथ्रेस टापु लां पा आ दीसा नाक्ती निआपोलीस सहरमी जाक्दीत्तक।

12 मेकेर जाक्दीश्शा जहाज रे तोंइसाक्क। मिनू गाक्शा फिलिप्पी सहरमी जाक्दीत्तक। फिलिप्पी मासीडोनीया रागी डा ठेयब सहर का बाक्ब। मेको रागी रोमी आन गुइमी बाक्माक्त। गोपुकी फिलिप्पी सहरमी इक्का नाक्ती बाक्तक।

13 मिनू नाइक्तीक नाक्त सहर रे गूशा, खोला आ नेक्था लाइतक। मारदे हना खोला आ नेक्थामी यहूदी आन प्रार्थना पथ बुक्तीक बाक्म कों, दे मिम्शा, मेक जाक्दीत्तक। मिनू जाक्दीकवानु, मीश मुरपुकी खुम्सीशा बाक्शो थित्तक।

14 मिनू मेको आन कली लोत्रसी पना पन येसु आं लोत्र शेंताक्क। आंइ लोत्र नेंब का चहिं थिआटीरा सहर रे जाक्शो वा पसल दाइक्ब लिडीया नें पाइश्शो मीश मुर का बाक्त। मेको लिडीया परमप्रभु यावे कली मान पा ठेयब सेल्ब बाक्बाक्माक्त। मेकोमी पावल आ लोत्र थम नोफा दाइश्शा नेंतु। मिनू प्रभुमी रुप्चा थुं गेत्तु।

15 मिनू थमा सुइक्ब दुम्शा, ब्वाक्कुम खुम्शा गुंइचा पुंइसाक्क। आ खिं डा मुर नेल्ले यो थमा सुइक्ब दुम्शा, ब्वाक्कुम खुम्शा गुंइचा पुंइसाक्क। ब्वाक्कुम खुम्शा गुंइचा पुंइसीशा नोले लिडीयामी “गेपुकीमी प्रभु कली थमा सुइक्ब बाक्माक्त, दे मिम्ताक्यीनी हना, आं खिंमी बास बाक्थ जाक्कीन। आं खिंमी मजाक्थु मदुम्ब” दे माइक्तीकी। मिनू लिडीया आ खिं लशा बाक्तक।

### येसु आ नें थिशा वोल खेरशो

16 मेकेर बाक्शा गो प्रार्थना पथ खोला आ नेक्था लना लन पकानु, काबु वाइलीम मीश आल का लामि गुम्तक। मेको मीश आल वोलम गेशो सक्ति तथा, मुर आन कली नोले दुम्ब लोत्र नेल्ल तुइक्पाइक्बाक्माक्त। मोपा आ होत्रप आन कली शुश क्येट चेम्शा गेबाक्माक्त।

17 मिनु लामी गुम्शा, आंड नोले खोइशशा “एको मुर नेल्ल क्येडा ठेयब परमप्रभु यावे आ गेय पाइब नमी। पाप रे दोपा ब्रोंइचा, दे शेंशा गाकब नमी, इन कली लां कोंइब नमी” दे रेयके पना पन पित। मर्कूस १:२४,३४

18 नाक्त किंत किंत मेकोमी मोदेंशा, रेयके पवानु, पावल ब्रीताकव। मिनु काबु पावल नोले हिरशा, कोव्रशा वोल कली “गो येसु ख्रीस्त आ नें थिशा गूशा लावो, देंनुड” दे हुइशशा खेरतु। मर्कूस १६:१७

19 मिनु वोल गूशा, लम डा मेरे नोले दुम्ब लोत्र तुइक्तीक सक्ति जाम्त। मिनु आ होत्रपपुकीमी क्येट का यो मतामे। मिनु चुरशा, पावल नु सिलास आस कली ग्याइशशा कीशा, सहर डा दिंम कामी चाकशा, ठेयब मुर निसाफ पाइब आन डोंइती राप्पाइक्तेकम।

20 मिनु “एको मुर यहूदी नसी। इं सहरमी जाकशा, मुर आन थुं ग्याल्पाइशशा शुश श्येत गेम्ताकसे। प्रेरित १७:६

21 इं रोमी ऐन कानुनम मगारचा डा दूली शेंशा, आस पतीके पपाइक्या बोल पाम्ताकस” दे दोस गेम्तेकम।

22 एर ओंथ जाकशा देल्शोपुकीमी यो “एको आस कली तुप्चा माल्ब” दे रेयके पाम्तेकम। मिनु निसाफ पाइबपुकीमी पावल नु सिलास आस कली आस फेकशो वा पुइशशा, कोक्केम तुप्पाइक्तेकम। २कोरिन्थी ११:२५; फिलिप्पी १:३०; १थिस्सलोनिकी २:२

### जेल्लखानम चोक्चा पुंडसीशो

23 मिनु तुप्शा जेल्लखानमी चोक्चा देंतेकम। मिनु जेल्लखान डा ठेयब मुर कली “प्रोक्ने मचाप्चा डा पा चोक्पाइशशा वोतो” दे माइक्तेकम।

24 मिनु मेकोमी मेको आस कली नेल्ल क्येडा आगा डा कोठा लाइशशा, ठेंडरो थोकशा वोइक्पदा बाक्त।

25 नाकदो पावल नु सिलासमी प्रार्थना पा कुम्सो पा परमप्रभु यावे कली ठेयब सेल्से बाक्त। आस प्रार्थना नु कुम्सो पशो जेल्लखानमी चोक्सीशो नेल्लेमी नेन्मे बाक्त।

26 मिनु प्रार्थना नु कुम्सो पना पन बाकसानु, ठेयब खिनु कुशा, जेल्लखान डा जग यो हिम्पदा बाक्त। खिनुमी हिम्दानु, लाप्चो नेल्ल रोकसमा बाक्त। जेल्लखानमी चोक्सीशो आन साडलो, ठेंडरो नेल्ल बुइकमा बाक्त।

27 मो दुम्मेनु, जेल्लखान डा ठेयब मुर ग्रीचोक पा सेंसीशा छुल बोक्माक्त। मिनु लाप्चो नेल्ल रोकसीशो तशा “आमाइ, चोक्शो नेल्ल प्रोकशा गाकमा बाक्त। मार पडा” दे आ तरवार प्रि शोइशशा, क्योरसीशा बेक्नुड, दे क्योरसीचा मला बाक्त।

28 मिनु पावलमी क्योरसीचशो तशा “ए मपावो, मपावो, सुइ मप्रोक्क। नेल्ल बाक्तक” दे ब्रेम्माक्त।

29 मिनु बत्ती दाशा गेयीनी देशा, चोक्शो आन बाक्तीके पावल नु सिलास आस डोंइती लशा, खिंखि पा बाम्माक्त।

30 मिनु मेको आस कली गुंडशा “हजुर, आं पशो पाप मार पा क्याम्सीबा?” दे हिल्लो पवा बाक्त। प्रेरित २:३७

31 मिनु पावल नु सिलासमी “प्रभु येसु कली थमा सुतो। मिनु गे नु इ खिं डा मुर नेल्लेमी पाप क्याम्चा पुंडसीशा गेना हना यो ब्रोंइशा बाक्चा ताइनीनी” देंसा बाक्त।

32 मिनु मेको ठेयब मुर नु आ खिं डा मुर नेल्ल आन कली प्रभु आ लोत्र तुइक्पदसे बाक्त।

33 मिनु ठेयब मुर नु आ खिं डा मुर नेल्लेमी थमा सुइशशा ब्वाक्कुमी खुम्शा गुंडचा पुंडसमा बाक्त। पावल नु सिलास आस तुप्शो गार नेल्ल चिक्तमे बाक्त।

34 मिनु आ खिं लाइशशा, जचा तूचा सेल्शा थुल्मे बाक्त। मिनु नेल्लेमी “परमप्रभु यावे कली थमा सुइक्ब दुम्तय” दे थाम्पा ग्येरसमा बाक्त।

35 आ दीसा सुनी ठेयब मुर निसाफ पाइबपुकीमी “मेको आस कली प्रोंइचा नसी” दे सिपाही आन कली जेल्लखानमी सोइक्तेमे बाक्त।

36 मिनु जेल्लखान डा ठेयब मुरुमी पावल कली “गे इस कली प्रोंइचा नसी, दे निसाफ पाइबपुकीम सिपाही कली सोइक्ताकमे। सुइमी इस कली दोस गेने मचाप्नीम। रिम्शो पा लसे” देमाक्त।



37 मिनु पावलमी सिपाही आन कली “गो मोशा मलाइनस्कु। मारदे हना सिनाक्त आंस कली मारेड मरुप्यु दोस का यो मयुंडथु मुर नेल्ल आन कुल तुप्तीस्कीमी। तुप्शा ला ममाड, जेल्खानमी यो चोक्तीस्कीमी। गो रोमी यो नस्कु। मिनु मो पचा मदुम्ब। आंस कली सुड आन मतुडक्थु खुडशशा प्रोंडशा सोडक्चा मगारब। गो लसीन मलाइनस्कु। सिनाक्त आंस कली चोक्पाइक्बपुकी जाक्शा गुंडदीस्कीमील” देशा सिपाही आन कली लेशशा सोडक्ता बाक्त। प्रेरित २२:२५

38 मिनु सिपहीपुकी लशा, पावल आ देशो लोत्र मेको चोक्पाइक्ब आन कली देंमा बाक्त। मिनु मेको निक्शी रोमी यो बाक्सा बाक्त देशो नेंशा हिंमा बाक्त।

39 मिनु हिंशा “लो, प्रोंडथ लचा माल्ब” देशा जेल्खानमी जाक्मा बाक्त। मिनु पावल नु सिलास आस कली “गो इस कली मतुडक्थु चोक्पाइशशा, मगाइक्तीसे, आंड सहर प्रोंडशा, रिम्शो पा लसे” दे मिलो शिलो पा गुंडशा सोडक्तमे बाक्त।

40 मिनु जेल्खान रे यूशा, लिडीया आ खिं जाक्ताक्स। मिनु पावल नु आ वारचपुकीमी थमा सुडक्ब आन कली ग्रुम्शा, आन थुं बारपाइशशा वोडशशा गाक्तेकम।

## 17

### थिस्सलोनीकी सहरम शेंशो

1 मिनु मेकेर रे लशा, अम्फी-पोलीस नु आपोल्लोनीया सहरमी हिरशा, थिस्सलोनीकी सहरमी जाक्दीम्मा बाक्त। मेकेर यहूदी आन गुम्तीक खिं का बाक्माक्त। १थिस्सलोनीकी २:२

2 पावल हिरशा गाक्मेनु, सहर सहर डा यहूदी आन गुम्तीक खिं खिं ओत्रशा शेंबाक्माक्त। मोपा थिस्सलोनीकी सहरमी यो गुम्तीक खिं लशा, शेंचा गोवा बाक्त।

3 नाइक्तीक नाक्ती सां सम्म परमप्रभु यावे आ लोत्र रे पा यहूदी आन कली “पाप रे प्रोंडब ख्रीस्त शुश श्येत जशा बेक्चा माल्ब। मिनु बेक्शो रे सेंसीचा माल्ब, दे ब्रेक्शो बाक्ब। मेको मोदेशो श्येत जशा बेक्शा, बेक्शो रे सेंसीशो ख्रीस्त चहिं येसु बाक्त, दे रूपीने” दे शेंदीमी बाक्त। लूका २४:२६-२७, ४५-४६

4 पावल आ लोत्र नेंशा “आ देशो थमा बाक्माक्त” दे यहूदी का निक्शी थमा सुडक्ब दुम्शा, पावल नु सिलास नु गारमा बाक्त। परमप्रभु यावे कली मान पाइब ग्रीकपुकी नु टेयब नें चलेशो मीश मुरपुकी शुशेमी यो पावल आ शेंशो नेंशा थमा सुदमे बाक्त। १थिस्सलोनीकी १:१; २थिस्सलोनीकी १:१

5 शुश मुर आन कली थमा सुडशशा तशा, थमा मसुडक्ब यहूदी आन थुं चोत्रमी बाक्त। मिनु हेंथे गाक्ब गेय मपाइशशा मुर आन कली खुप्शा, सहरमी मरिम्शो मुर आन कली पोक्पाइशशा, टेयब रेयके पपदमे बाक्त। मिनु पावल नु सिलास यासोन आ खिंमी बाक्सा बाक्त, दाप्शा, यासोन आ खिं लशा “मेको आस कली गुंडशा, आंड गुडमी गेचा नकी” दे रेयके पामे बाक्त।

6 तन्न पावल नु सिलास मेको खिंमी मबाक्शो बाक्सा बाक्त। मिनु मेको आस कली मथित्थु, यासोन नु थमा सुडक्ब आन कली ग्याइशशा कीशा लाइशशा, टेयब मुर आन डोंडती चाक्दीत्मे बाक्त। मेकोपुकीमी “नेल्ल रागी डा मुर आन कली आन थुं ग्याल्पाइशशा, दूली पपाइक्बपुकी इं सहरमी यो जाक्तेकम। प्रेरित १६:२०

7 मिनु एको यासोनमी मेको आन कली बास गेशा थुल्शा वोइक्तीमी। मेकोपुकीमी इं रोमी पिप सिजर कली ममानेचा। येसु कका पिप बाक्ब, दे शेंना शेंन गाक्नीम” दे दोस गेमे बाक्त। लूका २३:२

8 मेको लोत्र नेंशा टेयब मुर नु अरु नेल्ल आन थुं ग्याल्मा बाक्त।

9 मिनु यासोन नु आ वारच आन कली क्येट थाप्पाइशशा प्रोंडशा सोडक्तमे बाक्त।

10 मिनु थमा सुडक्बपुकीमी पावल, सिलास नु तिमोथी आन कली में नाक्दोन छुल छाल पोक्शा, बेरोइया सहर गे सोडक्तमे बाक्त। मिनु बेरोइया सहरमी जाक्दीशशा, यहूदी आन गुम्तीक खिं लशा, शेंचा गोत्रमे बाक्त।

### बेरोइया सहरमी शेंशो

11 बेरोइया सहर डा यहूदीपुकीमी थिस्सलोनीकी डा मुर आन पशो खोदेशो मपामे बाक्त। तन्न नोफा दाइशा पावल नु सिलास आस लोत्र नेंशा परमप्रभुमी ब्रेकपाइशो लोत्र नु मेको आस शेंशो लोत्र गारबा देय मगारबा कोत्रचा कली नाक्त कित कित जाक्मा बाक्त। यहून्ना ५:३९

12 मिनु शुश मुरुमी थमा सुदमे बाक्त। ग्रीक रागी डा नें चलेशो मीश मुर वोंइश मुर यो शुश थमा सुइक्ब दुम्मा बाक्त।

13 मिनु थिस्सलोनीकी सहरमी बाक्ब यहूदीपुकीमी “पावलमी बेरोइया सहरमी परमप्रभु यावे आ लोत्र शेंबाक्माक्त” देशो नेंशा जाक्शा, मुर आन कली पोक्शा दूली पपाइशा, पावल कली खेदा पचा गोपदमे बाक्त।

14 मिनु थमा सुइक्बपुकीमी पावल कली समुन्द्र आ नेक्था गे सोइक्तमे बाक्त। सिलास नु तिमोथी चहिं मेक उइ बाक्सा बाक्त। प्रेरित १६:१

### एथेन्स सहरमी शेंशो

15 पावल कली चोत्रदीबपुकीमी एथेन्स सहर सम्म चोत्रदीमा बाक्त। मिनु लेत्चामेनु, पावलमी मेको आन कली “सिलास नु तिमोथी आस कली आं बाक्तीके रीब पा सोइक्चा नसी” दे सोइक्तीमी बाक्त।

16 मिनु पावल एथेन्स सहरम मेको आस कली रिम्शा बाक्मेनु, सहरमी हिरशा गाक्माक्त। मिनु सहरमी गाक्मेनु, तेइ तेइ शुश मूर्ति सेल्शा वोइशो तशा, आ थुं मनुमाक्त।

17 मिनु यहूदी आन ग्रुम्तीक खिं लशा, यहूदी नु परमप्रभु कली मान पाइब अर्को रागी डा मुर आन कली येसु आ पर्वम लोत्रसी पना पन बाक्माक्त। नाक्त कित कित सहरमी हिरशा, लामी सु सु आन कली ग्रुम्मी, मेको नेल्ल आन कली येसु आ पर्वम शेंना शेंन गाक्माक्त।

18 मोपा मुर आन कली ग्रुमानु, इपीक्युरीपुकी, स्तोइकीपुकी नु यो ग्रुम्शा लोत्र पवा बाक्त। मेकोपुकीमी पावल आ शेंशो नेंशा का निक्शीमी “एकोमी मार हेंथे फश लोत्र पना पन गाक्बाक्मे” देमा बाक्त। का निक्शीमी चहिं “फश लोत्र ममाइ। मुल सम्म इं मतुइशो देवता आ पर्वम शेंबाक्त” देमा बाक्त। देवता आ पर्वम शेंबाक्त, दे मारदे देमा बाक्त देशा हना, पावलमी “येसु आ ग्येरपाइक्ब लोत्र नु बेक्शो रे सेंसीशा ब्रोंइत” दे शेंबाक्माक्त। १कोरिन्थी ४:१२

19 मिनु मेकोपुकी पावल कली अरीयोपागस माइशो आन देल्शा बाक्तीकेमी लोत्र पथ चाक्दीत्मे बाक्त।

20 मिनु मेकोपुकीमी “गो मारेइ मतुइक्नीकी। गो आंइ कली शेंदीने, रुप्पतीने। इन शेंशो लोत्र मार में, दे रुप्पा दाक्नीकी” देमा बाक्त

21 एथेन्स डा मुर नु एथेन्स सहरमी बाक्ब नेल्लेमी नक नक लोत्र पचा नु नेंचा कली नाक्त कित कित हिरशा माल्शा बाक्बाक्मा बाक्त।

22 मिनु पावल अरीयोपागसमी राप्शा “एथेन्स सहरम बाक्बपुकी, गो इन सहरमी हिरशा गाक्डानु, तेइ तेइ मूर्ति सेल्शा वोइशो ताता। मोपतीके गे मूर्ति आन कली सेउ पाइबाक्तीनी, पूजा पाइबाक्तीनी, दे रुप्पा।

23 इन पूजा पशो मूर्ति कोत्रना कोत्रन गाक्डानु, मूर्ति कामी ‘मतुइशो देवता’ दे मुशा ब्रेक्शा वोइशो ताता। मुल सम्म इन मतुइक्थु मानेशो परमप्रभु आ पर्वम गो इन कली शेंथ जाक्ती।

24 सरीड रागीमी मार मार बाक्मा मेको नेल्ल परमप्रभुमी सेल्शो नम। मोपतीके सरीड रागी सेल्ब परमप्रभु मुरुमी सेल्शो थान मन्दीरमी मबाक्ब। १कोरिन्थी ८:२७

25 मुरपुकीमी परमप्रभु कली मारेइ गेचा ममाल्नीमी। आं कका रागीमी बाक्ब नेल्ल आन कली ब्रोंइतीक सोक्त नु आन माल्शो नेल्ल गेशो बाक्ब। भजन संग्रह ५०:९-१२

26 डोंइती मुर का सेल्शा, मेको मुर रे पा नेल्ल रागी डा मुर सेलतीमी। दोशो ब्रोंइचा, ते बाक्चा, मेको नेल्ल परमप्रभुमी पने थुम्शो बाक्ब। ब्यवस्था ३२:८

27 मुरपुकीमी परमप्रभु यावे कली माल्शा थिश्शा, मुर आन कली सेल्शा रागीमी वोइक्तीमी। मेको मुर आन क्येडा डोन मबाक्ब, इं नेक्थान बाक्शो बाक्ब। यसैया ५५:६

28 मारदे हना परमप्रभु नु काथा बाक्शा ब्रोंडनय, दे तुडक्नय। गेपुकी नु बाक्ब ब्रेक्ब मुर कामी 'गो नेल्ल परमप्रभु आ तमी तौ नय' दे ब्रेक्शो बाक्त।

29 गोपुकी परमप्रभु यावे आ तमी तौ दुम्शा, मुर आन मिम्शो आन गुडमी सेल्शो सुन चांदी फुल्लु मार मार के मूर्ति तशा, परमप्रभु मोदेशो बाक्ब, दे मिम्चा मदुम्ब। उत्पत्ती १:२७; यसेया ४०:१८

30 मुल सम्म गे मतुडक्तीनी। मिनु मतुडक्थु देवता आन कली सेउ पाइबाक्तीनी। मतुडक्थु मो पशो तुडशशा, परमप्रभु यावेमी इन कली दोस मगेब। मुल चहिं परमप्रभुमी मुर नेल्ल आन कली 'इन थुं आं गे लेत्तीन' दे ब्रेप्ब। प्रेरित १४:१६; लूका २४:४७

31 मारदे हना काबु नेल्ल आन कली ठीक पा निसाफ पाइब। मेको निसाफ पची नाक्त परमप्रभुमी योत्रशा वोडशशो बाक्ब। निसाफ पाइब यो योत्रशा वोडशशो बाक्ब। मेको निसाफ पाइब कली 'आं योत्रशा बाक्ब' दे कोइचा कली बेक्शो रे सेंताक्व" दे पावलमी शेंदीमी बाक्त। प्रेरित १०:४२; मत्ती २५:३१-३३

32 मिनु बेक्शो रे सेंचा पुंडसाक्व, मुर नेल्ल बेक्शो रे सेंचा पुंडसीनीम, दे शेंशो नेंशा, का निक्शीमी "एको फश लोत्र पाइक्बाक्त, है" दे रिस्समा बाक्त। का निक्शीमी चहिं "इन शेंशो रिम्शो लाक्तक, लेंशा नेंनीकी" दे गाक्मा बाक्त।

33 मिनु पावल मेकेर रे लमाक्त।

34 का निक्शीमी आ लोत्र थमा सुइशशा, पावल नु गारमा बाक्त। मोदेशो आ नु गारब का डियोनीसीयस नें पाइशशो अरीयोपागस डा मुर बाक्माक्त। का डामारीस नें पाइशशो मीश मुर बाक्माक्त। अरु यो बाक्मा बाक्त।

## 18

### कोरिन्थ सहरम शेंशो

1 मिनु नोले पावल एथेन्स रे लशा, कोरिन्थ सहरमी जाक्दीम्माक्त।

2 मिनु कोरिन्थ सहरम बाक्मेनु, नक इटाली रे जाक्शो अक्वीला नें पाइशशो यहूदी नु आ मीश प्रिस्कीला आस कली गुम्सी बाक्त। अक्वीला पोन्टसमी जरमेशो बाक्माक्त। मेको निक्शी डोंइती रोम सहरमी बाक्शो बाक्सा बाक्त। तन्न क्लौदीयस माइशशो रोमी पिपमी यहूदी नेल्ल आन कली रोम सहरम बाक्चा मगेथु, गुंडशा सोइक्तीके गाक्शा, कोरिन्थ सहरम जाक्शो बाक्सा बाक्त। रोमी १६:३

3 मिनु पावल अक्वीला नु प्रिस्कीला गुम्शा, मेको नु काथा बाक्माक्त। मारदे हना डोंइती पावल मेको आस खोदेशो पा ताम्बु सेल्ब बाक्माक्त। मिनु सांफा दुम्शा गारशा, गेय पामे बाक्त। प्रेरित २०:३४; १कोरिन्थी ४:१२

4 नाइक्तीक नाक्ती पावल यहूदी आन गुम्तीक खिं लशा, यहूदी नु ग्रीक नेल्ल आन कली ख्रीस्त आ पर्वम रूप्पदुमी, दे शेंबाक्माक्त।

5 मिनु नोले सिलास नु तिमोथी मासीडोनीया रे जाक्शा, मेक जाक्सा बाक्त। मिनु पावलमी "शेंचा गेय ला पाडनुड" देशा, यहूदी आन कली "येसु मेको ख्रीस्त बाक्ब, दे रुपीन" दे शेंना शेंन गाक्बाक्माक्त। प्रेरित १७:१४-१५; २कोरिन्थी १:१९

6 मिनु यहूदीपुकीमी आ शेंशो थमा मसुइक्थु शुक्शी पामेनु, पावलमी आ फेक्शो वा डा फुरकु थुर थुर पा मेको आन कली "गे बेक्शा जाम्शा लाइतीनी हना, आं कली मारेड देंचा मताइनीनी। मुल डा मेरे यहूदी इन कली शेंचा प्रोंइशा, अर्को रागी डा मुर आन कली शेंथ गाक्नुड" दे मेको आन कली प्रोंइशा गाक्माक्त। प्रेरित १३:५१; नेहेम्याह ५:१५; प्रेरित २०:२६

7 मिनु परमप्रभु यावे कली मान पाइब तीतीयस-युस्तस नें पाइशशो मुर आ खिं लशा, मेकेर शेंचा गोवा बाक्त। मेको आ खिं गुम्तीक खिं आ नेक्थान बाक्माक्त।

8 गुम्तीक खिं डा क्रिस्पस माइशशो टेयब मुर नु आ खिं डा मुर नेल्ल प्रभु कली थमा सुइक्ब दुम्मा बाक्त। कोरिन्थी शुशेमी यो पावल आ शेंशो नेंशा, थमा सुइशशा ब्वाक्कुम खुम्शा गुंडचा पुंडसमा बाक्त। १कोरिन्थी १:१४

9 मिनू काबु नाक्टो प्रभुमी पावल कली कोंइतीक कोंइदानु “सुइ कली तशा महिनो। शेंस डा शेंस बाक्को। येरमीया १:८; १कोरिन्थी २:३

10 मारदे हना गे नु काथा बाक्शा, इ कली कोव्रनन। मिनू सुइमी इ कली मरिम्शो पने मचाप्नीम। मेको सहरमी बाक्ब शुश मुर आन कली योवने थुन्ता” देशो नेंना बाक्त। यूहन्ना १०:१६

11 मिनू पावल बर्स का ६ महिना सम्म कोरिन्थ सहरमी परमप्रभु यावे आ लोव्र शेंना शेंन बाक्माक्त।

### हुकुम पाइब आ डोंइती रूप्पाइशो

12 आकाया रागीमी गाल्लीयो माइशो हुकुम पाइब बाक्मेनु, यहूदीपुकी खुम्सीशा, पावल कली ग्याइशशा, हुकुम पाइब आ डोंइती चाक्दीत्मे बाक्त।

13 मिनू मेकोपुकीमी “एको मुरुम ‘परमप्रभु यावे आ अरेशो लोव्र मगारचा डा पा परमप्रभु कली ठेयब सेल्चा माल्ब’ दे मुर आन कली शेंब” दे दोस गेमे बाक्त।

14 मिनू पावलमी एको गेशो दोस आ परबम लोव्र लेत्चा चिक्शो, गाल्लीयोमी लोव्र पचा मगेथु, दोस गेब यहूदी आन कली “एको मुर मरिम्शो पशा, खुइ पा मुर आन कली साइशशा हना, इन लोव्र नेंशा गो निसाफ पड वा। प्रेरित २५:१८-२०

15 तन्न लोव्र, नें नु इन परमप्रभु यावे आ अरेशो लोव्र आ परबम बाक्त हना, गो मेको निसाफ पचा मदाकुण्ड। गे आंमा गारीने” दे हुइशशा सोइक्तीमी बाक्त। यूहन्ना १८:३१

16 मिनू मेको आन कली सोइक्ता बाक्त।

17 यहूदीपुकीमी गुम्तीक खिं डा ठेयब मुर सोस्थेनेस कली ग्याइशशा, हुकुम पाइब आ डोंइती तुप्मे बाक्त। मोपा तुम्मुमानु यो, गाल्लीयोमी मारेइ मपवा बाक्त।

### थमा सुइक्ब आन थुं बारपाइशो

18 मोदेशो दुम्शा नोले पावल शुश नाक्ती सम्म कोरिन्थ सहरम बाक्माक्त। मिनू अक्वीला नु नोले थमा सुइक्ब लोक्ब आन कली “लो, मुल लची जाक्ती” देशा, जहाज डोइशशा, सिरीया गे लमाक्त। अक्वीला नु प्रिस्कीला यो पावल नु सिरीया गे लसा बाक्त। केन्क्रेया सहरमी जाक्दीशशा, पावलमी आ चां प्रेक्गा बाक्त। मारदे हना कसम जशो बाक्माक्त। प्रेरित २१:२४-२६

19 मिनू एफिसस सहरमी जाक्दीशशा, प्रिस्कीला नु अक्वीला आस कली “लो, गे एके बाक्कीसे” दे प्रोंइशा वोइक्सी बाक्त। मिनू पावल चहिं गुम्तीक खिं लशा, यहूदीपुकी नु लोव्रसी पचा गोवा बाक्त।

20 मिनू यहूदीपुकीमी “इच्का नाक्त बाक्शा शेंदीकी” देंमानु “गो बाक्ने मचाप्नुड।

21 परमप्रभु यावेमी लेशशा सोइक्ताक्यी हना, लेशशा जाक्शा शेंनन्नी” दे एफिसस रे लशा जहाज डोंइसे बाक्त। याकूब ४:१५

22 मिनू सिजरियामी जाक्दीशशा, यरूसलेम ग्येत्थ लशा, थमा सुइक्ब आन कली गुम्शा, एन्टीओकमी जाक्दीम्माक्त। प्रेरित २१:१५

23 मिनू इच्का नाक्त एन्टीओकमी बाक्शा, मेकेर रे लशा, गलातीया नु फ्रिगीया रागीमी जाक्दीशशा, तेइ तेइ हिरशा, थमा सुइक्ब आन कली गुम्शा, आन थुं बारपाइक्तीक लोव्र पना पन गाक्माक्त।

### आपोल्लोसमी एफिससम शेंशो

24 मिनू एफिसस सहरमी मार दुम्माक्त देशा हना, अलेकजेन्दीया रागीमी जरमेशो आपोल्लोस माइशो यहूदी मुर का जाक्माक्त। मेको शुश पढेशा, परमप्रभु यावे आ लोव्र रूप्शा, अरु आन कली यो रूप्पाइक्ने चाप्ब बाक्माक्त। १कोरिन्थी ३:५-६

25 प्रभु येसु आ परबम शेंसीशा जोक्शो बाक्माक्त। सक्ति पाइशो लोव्र पने चाप्ब बाक्माक्त। मिनू येसु आ लोव्र दोदेशो बाक्मे, मोदेशोन शेंबाक्माक्त। ब्वाक्कुम खुम्शा गुंइचा आ परबम चहिं यूहन्नामी दोदेशो पशो बाक्मे, मेको ला तुइशशा बाक्माक्त। प्रेरित १९:३

26 मिनु मेको एफिससमी जाकदीम रे यहूदी आन गुम्तीक खिंमी शेंचा गोवा बाक्त। सुइ कली तशा महिंथु, येसु आ पर्वम शेंदा बाक्त। मिनु प्रिस्कीला नु अक्वीलामी आपोल्लोस आ शेंशो नेंशा, आस खिं लाइशशा, परमप्रभु यावे आ पर्वम शुश लोत्र तेम्शा रूपदसे बाक्त।

27 मिनु काबु आपोल्लोसमी “आकाया रागीमी हिरशा, शेंथ लाइनुड” देंमेनु, थमा सुइक्व लोकबपुकीमी “दुम्ब” देमा बाक्त। मिनु आकाया रागीमी बाक्ब थमा सुइक्व आन कली चिठी ब्रेक्शा “आपोल्लोस इन बाक्तीके जाक्मेनु, मान पा ब्रने, आ लोत्र नेनीने” दे ब्रेक्शा सोइक्वते बाक्त। मिनु मेकेर जाकदीशशा, थमा सुइक्व आन कली गुम्शा, आन थुं बारपाइक्मी बाक्त।

28 थमा मसुइक्व यहूदी नु लोत्र पवानु, परमप्रभु यावे आ लोत्र रे पा शेंशा, येसु मेको खीस्त बाक्ब, दे लोत्र शेंदा बाक्त। मिनु यहूदीपुकीमी मारेइ देंने मचाप्मे बाक्त। प्रेरित ९:२२; प्रेरित १७:३

## 19

### परमप्रभु आ सोक्त आ पर्वम शेंशो

1 आपोल्लोस मोपा शेंना शेंन गाक्शा, कोरिन्थ सहरमी जाकदीम्माक्त। पावल चहिं एफिससमी जाकदीम्माक्त। मिनु प्रभु आ लां खोइक्व आन कली गुमा बाक्त।

2 मिनु पावलमी मेको आन कली “गोपुकीमी थमा सुइक्व दुम्नीनु, परमप्रभु यावे आ सोक्तीम प्रिंचा पुंडसीनी?” दे हिल्लो पवानु “ममाइ, गो परमप्रभु यावे आ सोक्त मतुइक्वीकी। मेको आ पर्वम मनेशो यो बाक्नीक” देमा बाक्त। प्रेरित २:३८

3 मिनु पावलमी “मो हना सु आ नेंमी ब्वाक्कुम खुम्शा गुंडचा पुंडसीनी?” दे हिल्लो पवानु “यूहन्नामी देशो टिशा, ब्वाक्कुमी खुम्शा गुंडचा पुंडसाक्क” देमा बाक्त।

4 मिनु पावलमी “यूहन्नामी मुर आन कली ‘पाप पचा प्रोइशा इन थुं परमप्रभु यावे गे लेत्तीने। मिनु आं नोले जाक्ब कली थमा सुतीने’ दे ब्वाक्कुम खुम्शा गुंडदीमी बाक्त। यूहन्ना आ नोले जाक्बो चहिं येसु बाक्ब” दे शेंदीमी बाक्त। मती ३:११

5 पावल आ लोत्र नेंशा, मेकोपुकीमी “लो दुम्ब” दे येसु आ नेंमी ब्वाक्कुमी खुम्शा गुंडचा पुंडसमा बाक्त।

6 मिनु पावलमी आ गुइ आन पिया तारी वोदानु, परमप्रभु यावे आ सोक्तीम ब्रीमा बाक्त। मिनु आन मतुइशो लोत्र पा प्रभु कली टेयब सेल्मे बाक्त। मिनु परमप्रभु यावे आ सोक्तीम गेशो लोत्र पामे बाक्त। प्रेरित ८:१७; प्रेरित १०:४४,४६

7 मोदेशो दुम्शोपुकी १२ जना खोइ बाक्मा बाक्त।

### पावल एफिससम बाक्शो

8 मिनु पावल महिना सां सम्म यहूदी गुम्तीक खिंमी परमप्रभु यावे आ राज्य डा लोत्र शेंना शेंन बाक्माक्त। सुइ तशा महिंथु, टेयब थुं पा “थमा सुइशशा परमप्रभु यावे आ राज्य ओवडीन” दे शेंना शेंन बाक्माक्त।

9 मिनु आ लोत्र नेंबपुकीमी थमा मसुइक्व, नक लां आ पर्वम गुम्तीक खिंमी शुक्शी लोत्र पतीके मेको मेकेर शेंचा प्रोना बाक्त। मिनु शेंसीचा दाक्ब आन कली चहिं काथा लाइशशा, टिरान्नस आ इस्कुलमी नेंचा दाक्ब आन कली खुप्शा, नाक्त कित कित शेंना शेंन बाक्माक्त।

10 मिनु बर्स निकशी सम्म मोपा शेंना शेंन बाक्माक्त। मोपतीके एसीया डा यहूदी नु ग्रीक नेल्लेमी परमप्रभु यावे आ लोत्र नेंचा तामे बाक्त।

### पावलमी छक लाक्चा डा गेय पशो

11 मिनु परमप्रभु यावेमी शुश छक लाक्चा डा गेय पावल आ गुइ रे पा कोंडदा बाक्त। प्रेरित १४:३; २कोरिन्थी १२:१२

12 मुरपुकीमी आन फेक्शो वा, रूमाल लाइशशा, पावल कली थीबाक्मा बाक्त। मिनु लेशशा चाक्शा रोइ पाइब आन कली थीपदमेनु, साबाक्मा बाक्त। वोलमी तशो आन वोल यूशा प्रोक्बाक्मा बाक्त। प्रेरित ५:१५

13 मिनु बोल आन कली खेरशा गाकब यहूदी का निक्शीमी पावल आ तस खोइश्शा, प्रभु येसु आ नें थिशा, बोल गुंडशा खेरचा गोत्रमे बाकत। मेकोपुकीमी “पावलमी शेंशो येसु आ नेमी गूडो” दे बोल आन कली खेरचा बोल पाइबाकमा बाकत। लूका ९:४९

14 यहूदी डा ठेयब चढेब स्केवा माइश्शो मुर आ ७ जना तौपुकीमी मोदेशो पाइबाकमा बाकत।

15 मिनु काबु बोलमी मेको आन कली “येसु कली तुइक्नुड। पावल कली यो तुइक्नुड, गेपुकी चहिं सु ननी?” देमाकत।

16 मिनु बोलम थिशो मुरुमी प्रेक्शा, ग्राम्शा, ग्याइश्शा खोल्ला तुप्स डा तुप्स पा हुश चुइश्शा, मेको आन वा खाक्शा, शिश्रा सेल्मी बाकत। मिनु नेल्ल प्रोकमा बाकत।

17 मेको लोत्र तेइ तेइ ब्रशा, एफिससमी बाकब यहूदी नु ग्रीक नेल्लेमी नेन्मे बाकत। मिनु “येसु आ नेमी हेंथे मबवाकचा बाकमाकत” दे रूप्शा हिंशा, प्रभु येसु आ नें कली मान पा ठेयब सेल्मे बाकत।

18 मिनु येसु कली थमा सुइक्चा क्येडा डोंइती आन मन्तर तन्तर पशो आ पर्बम “मुल डा मेरे मपाइनीकी” दे थमा सुइक्ब नेल्ल आन कली नेंपदमे बाकत।

19 मिनु शुश मन्तर तन्तर पाइब आन मन्तर तन्तर डा किताब चाक्शा, मेको मुर आन डोंइती चोत्रमे बाकत। मेको किताब कली ५० हजार चांदी के द्राकमे थाप्शो बाकमाकत। द्राकमे का देनार यो देशो बाकत। मेको नाकत का डा गाल्च चांदी के क्येट बाकब।

### परमप्रभु आ लोत्र बारशा लशो

20 मिनु परमप्रभु यावे आ लोत्र तेइ तेइ ब्रशा सक्ति पाइश्शो दुम्शा बारना बारन लमाकत। प्रेरित १२:२४

21 मेको नोले पावलमी “गो मासीडोनीया नु आकाया लां पा यरूसलेममी जाकदीत्नुड। मेकेर काबु निक्बु बाक्शा, रोम सहर मजाकदीत्थु मप्रोंइनुड” दे थुं पवा बाकत। प्रेरित २३:११

22 मोदेशो थुं पशा, तिमोथी नु इरास्तस आस कली मासीडोनीया सोइक्तीम्सी बाकत। आं चहिं एसीया उड बाकमाकत। २तिमोथी ४:२०

### मूर्ति सेल्बपुकी गाइश्शो

23 एफिससमी बाकमेनु, मार दुम्माकत देश हना, प्रभु आ नक लां खोइक्चा आ पर्बम राम्शी पोक्चा गोत्रमे बाकत। २कोरिन्थी १:८-९

24 मारदे हना देमेत्रीयस माइश्शो सुन चांदी चेम्ब मुर कामी सुन के आरतेमीस देवी आ मूर्ति सेल्शा लेयशा, शुश क्येट चेम्बाकमाकत। मूर्ति चेम्ब शुश बाकमा बाकत। मेकोमी शुश मुर आन कली गेय गेशो बाकमाकत। आरतेमीस लतीन लोवमी दिआना बाकब।

25 मिनु काबु मेको आन कली ब्रेश्शा, खुप्शा “आं वारचपुकी, आं लोत्र का निक्शी नेनीने। मूर्ति चेम्शा लेयशा क्येट चेम्शो नय, दे गो नेल्लेमी तुइक्नय।

26 मुल चहिं एको पावल नें पाइश्शो मुरुमी एसीया नेल्ल हिरने थुम्शा, इ एफिससमी जाक्शा, मुर नेल्ल आन कली ‘मुर आन गुड रे सेल्शो मूर्ति देवी ममाइ’ देश शुश मुर आन थुंमी मूर्ति पूजा पचा प्रोंइपाइक्तीमी। मेको इं मिक्चीम ताइतय।

27 मोदेशो दुम्शा, इं गेय ला जाम्शो ममाइ, इं मानेशो आरतेमीस ठेयब देवी आ मन्दीर आ नें यो जाम्शा लचा चिक्ताक्ब। मुरपुकीमी मेको कली सेउ पचा प्रोंइचाम्तेक्मे। साइ एसीयामी बाकब नेल्लेमी ठेयब सेल्शा, मान पना पन बाक्शो नमी, मुल मारेइ मान मलीब” दे आन थुं खुरपाइक्मी बाकत।

28 मिनु मेकोपुकीमी “इं एफिसस डा आरतेमीस देवी नेल्ल क्येडा ठेयब देवी बाकब” दे शुश रेयके पचा गोत्रमे बाकत।

29 मिनु मोदेशो पा सहर नेल्ल ठेयब रेयके दुम्माकत। मुरपुकी दोरशा जाक्शा, सहर डा दिंममी खुम्समा बाकत। मासीडोनीया रे जाक्शो पावल नु काथा गाकब गायस नु अरीस्तारकस आस कली ग्याइश्शा, मेको दिंममी चाक्मे बाकत। प्रेरित २०:४

30 मिनु पावलमी मोदेशो दुम्शो तशा, गो यो देल्लिकेमी लाइनुड देमेनु, थमा सुइक्बपुकीमी लचा मगेमे बाकत।

31 एसीया रागी डा सरकार आ गेय पाइब डोंइती डा आ वारचपुकीमी यो “मेक लचा मदुम्ब, है” दे लोत्र नेंपाइकथ मुर सोइकतमे बाक्त।

32 दिंममी देल्शोपुकीमी कामी लोत्र का, अर्कोमी अर्को लोत्र पा रेयके ला पामे बाक्त। तन्न मारदे देल्शो, मारदे रेयके पशो, मेको लोत्र हुलपुकीमी मारेड मतुइकतमे बाक्त।

33 मिनु यहूदीपुकीमी पोक्शो अलेकजन्दर कली हुल आन डोंइती राप्पाइश्शा “लो, लोत्र पावो” दे मदमेनु, मेकोमी आ गुइ हिम्शा “सिकसी पा आं लोत्र नेनीने, नेल्ल रुप्पाइकनन्नी” देंमाक्त।

34 तन्न आ लोत्र पशो रे “एको यहूदी कका बाक्माक्त” दे तुइश्शा “इं एफिसस डा आरतेमीस देवी नेल्ल क्येडा ठेयब देवी बाक्ब, जाइ आरतेमीस, जाइ आरतेमीस” दे घन्टा निकशी सम्म रेयके पस डा पस ग्रीमे बाक्त।

35 मिनु नोले सहर डा ठेयब मुरुमी मेको आन कली रेयके पचा नाइक्पाइक्मी बाक्त। मिनु “इं एफिसीपुकी, आं लोत्र नेनीने। इं एफिसस सहरमी बाक्ब आरतेमीस देवी आ मन्दिर, आ नें यो नेल्ल क्येडा ठेयब बाक्ब, दे मुर नेल्लेमी ममिन्नीमी डा? सरीड रे दोक्शो मूर्ति कली मान पा ठेयब मसेल्नीमी डा?

36 रागी रागीम बाक्ब मुर नेल्लेमी मानेशा ठेयब सेल्नीमी। मिनु गेपुकीमी मार रेयके पनी? मोदेशो रेयके पचा मदुम्ब।

37 गेपुकीमी ग्याइश्शा चाक्शो मुर निकशीमी आरतेमीस देवी आ मन्दिर आ नें मक्याम्देस, देवी कली शुक्शी लोत्र यो मपाम्स, मारेड मरिम्शो मपाम्स।

38 देमेत्रीयस नु आ वारचपुकीमी सुइ कली मुददा पचा थुं पाम्तेकम हना, निसाफ पाइब आ डोंइती लशा, उजुर पचा माल्शो। निसाफ पाइब आ डोंइती चाक्शा, दोस गुंइचा माल्शो।

39 निसाफ पाइबमी गारपाइक्ने मचापुतु हना, गो सहर डा ठेयब जोक्ब तुइक्ब नेल्ल बुक्शा, लोत्र पा गेनीकी।

40 तन्न मुलाक्ती खोदेशो रेयके पचा मदुम्ब। मोदेशो पाइतय हना, गो नेल्ल मरिम्शो पा दोसी दुम्नय, दे रुपीने। मारदे हना एको रेयके मारदे दुम्मे, मेको देंने मचान्य” दे माइक्मी बाक्त।

41 मो देंने थुम्शा, मुर आन कली आन खिं खिं सोइक्तीमी बाक्त।

## 20

### मासीडोनीया नु ग्रीसमी शेंशा

1 मिनु मेको रेयके नाइकतमे नोले पावलमी थमा सुइक्ब आन कली ब्रेश्शा खुप्शा “थमा सुइक्चा मप्रोंइथु, इन थुं बारपा बाक्कीन” देश आन कली मेक उइ प्रोंइशा मासीडोनीया लमाक्त। २कोरिन्थी २:१३

2 मासीडोनीयामी हिरना हिरन थमा सुइक्ब आन कली गुम्शा शेंशा, आन थुं बारपाइक्ना पाइकन गाक्शा, ग्रीस रागी जाक्दीम्माक्त।

3 मिनु ग्रीस रागीमी महिना सां सम्म बाक्शा “मुल जहाज डोइश्शा, सिरीया गे लाइनुड” दे लचावानु “यहूदीपुकीमी आं कली ग्याइक्चा कली लां बाप्शो बाक्नीम” दे तुइश्शा, जहाज डोइश्शा मलथु, गाक्शा मासीडोनीया लमाक्त।

4 पावल नु काथा गाक्ब सु सु बाक्मा बाक्त देशा हना, बेरोइया डा पुरोस आ तौ सोपाटेर, थिस्सलोनीकी सहर डा अरीस्तारकस नु सेकुन्दस, डेरबे डा गायस, तिमोथी, एसीया डा तिखीकस नु त्रोफीमस बाक्मा बाक्त। प्रेरित १७:१०; प्रेरित १९:२०; प्रेरित १६:३; एफिसी ६:२१; प्रेरित २१:२९

5 मेकोपुकी गो आंइ क्येडा डोंइती लशा, त्रोआस सहरमी रिम्शा बाक्मा बाक्त।

6 बोरब ओस्ती मसुप्शो शोब्ले जची नाक्त लाक्शा, फिलिप्पी सहर रे जहाज डोइश्शा, ५ नाक्त नोले त्रोआस सहरमी जाक्दीत्तक। मेकेर आंइ वारच आन कली गुम्शा, ७ नाक्त मेक उइ बाक्तक।

### त्रोआसमी बाक्शो

7 आइतबार नाक्त प्रभु भोज जथ खुम्साक्क। मिनु पावलमी दीसा लचा माल्ब देशा, नाक्दो उडक्थ दुम सम्म शुश लोत्र पाप्तु। मत्ती २८:१; प्रेरित २:४२,४६

8 आंइ बाक्शो तला तारी डा कोठा शुश बत्ती दाशो बाक्त।

9 मेकेर युतीकस नें पाइशशो ठिटा मुर का झेलमी निशशो बाक्त। मिनु पावलमी शेंना शेंन शुश लाइशशो लोत्र पवानु, युतीकस मुकु जिशा निन्द्रा पाप्तु। मिनु तला सां तार रे दोक्त। मिनु मुरपुकी कोत्रथ लमानु, बेक्ने थुम्शो थित्तेक्म।

10 मिनु पावल यो यिशा बाप्शा आ रां मुप्शा, एर ओंथ बाक्ब आन कली “मबेक्शो बाक्त। मोपतीके महिनीन” दे माइक्तीमी। १राजा १७:२१

11 मिनु लेशशा कुशा, प्रभु भोज जने थुम्शा नां दाप्ची सम्म शेंना शेंन बाक्त। मिनु गो आंइ लची जाक्मेनु,

12 मेको ठिटा कली सेस तशा, नेल्ल आंइ थुं नाइशशा ग्येरसाक्क।

### मिलेटस जाक्दीशशो

13 मिनु पावलमी “गे जहाज डोइशशा, अस्सोस सहर लने। गो चहिं गाक्शा इन कली युम्ननी” देशा आंइ कली जहाजमी डोइक्पाइशशा सोइक्ताक्की। मिनु अस्सोसमी जाक्दीत्तक।

14 मिनु अस्सोस सहरमी गुम्शा, पावल यो जहाजमी डोइशशा गो नेल्ल मितीलेनेमी सहर जाक्दीत्तक।

15 आ दीसा नाक्त खिओस हांबु जाक्दीत्तक। आ नित्थ नाक्त सामोसमी जाक्दीत्तक। मिनु आ सांबु नाक्त मिलेटस जाक्दीत्तक।

16 पावलमी “पेन्तीकोस चाड मानेचा कली यरूसलेम जाक्दीत्ता माल्ब। मोपतीके लांमी मग्योल्चा, एसीयामी मनाइक्चा। एफिससमी यो मनाइक्चा” देंतीके मनाइक्थु गाक्तक। प्रेरित १८:२१

### एफिसी आन कली लोत्र पशो

17 मिलेटसमी जाक्दीशशा, पावलमी एफिससमी बाक्ब थमा सुइक्ब आन शेंब खाल्पा आन कली “मिलेटसमी गुम्थ जाक्कीने” दे ब्रथ सोइक्ताक्क।

18 मिनु मेकोपुकी जाक्मानु, पावलमी मेको आन कली “नेल्ल क्येडा डोंइती इन एसीया रागी जाक्डा रे मुल सम्म गेपुकी नु बाक्शा, गो मार शेंदन्नी दोपा लां कोइदन्नी, दोपा गेपुकी नु बाक्डा, मेको नेल्ल तुइक्नीनी। प्रेरित १८:१९; प्रेरित १९:१०

19 गो प्रभु आ वाइल दुम्शा, ठेयब मलेत्थु प्रभु आ गेय पना पन गाक्ती। मोपा गाक्डानु, यहूदीपुकीमी खेदा पा शुश श्येत गेशा, आं थुं खाइक्पा डाक्पाइक्तीमी।

20 मो पाम्तेक्म हना यो, गो इन खिं खिं हिरशा, इन कली गुम्शा, का का पा शेंशा, इन कली रिम्शो दुम्ल, दे तुइक्पाइक्तन्नी। खिं खिं हिरशा ला ममाइ। गाउं सहरमी यो हिरशा, मुर आन बुक्तीकेमी जाक्दीशशा, शेंना शेंन गाक्ती।

21 मोदेशो शेंशा गाक्शा यहूदी, ग्रीक नु नेल्ल रागी डा मुर आन कली ‘पाप पचा प्रोंइशा, परमप्रभु यावे गे लेशशा, इं प्रभु येसु खीस्त कली थमा सुइक्क’ दे शेंना शेंन गाक्ती।

22 मिनु मुल परमप्रभु यावे आ सोक्तीमी देशो टिशा, यरूसलेम गे डा लां खोइशशा गाक्शो बाक्नुड। यरूसलेममी जाक्दीशशा, आं कली मार दुम्बा, दे मतुइक्नुड। प्रेरित १९:२१

23 लोत्र का ला तुइक्नुड। मारदे हना सहर गाउं तेइ तेइ हिरशा गाक्डानु, परमप्रभु यावे आ सोक्त रे पा लोत्र पाइबमी ‘यरूसलेम जाक्दीशशा, शुश श्येत जाइनेवे। जेल्खानमी चोक्चा पुंइसीनेवे’ दे नेंपाइक्तीमी। प्रेरित ९:१६; प्रेरित २१:४,११

24 गो साइक्चा पुंइसाक्ड हना यो, एको आं गिंम मारेइ ममिम्नुड। प्रभु येसुमी आं कली पपाइशशो लोत्र ‘परमप्रभु यावेमी मुर आन कली शिशी पाइब’ आ ग्येरपाइक्ब लोत्र कली तुइक्पाइक्नुड। प्रेरित २१:१३; रतिमोथी ४:७

25 गो इन कली परमप्रभु यावे आ राज्य डा लोत्र नेल्ल तुइक्पाइक्ने थुम्तन्नी। मुल डा मेरे मगुम्नय, दे तुइक्नुड।



26 बेकशा जाम्शा लाइतीनी हना यो, आं के मारेइ दोस मदुम्ब, इन कली थमा पा देनुड। इजीकीएल ३:१७-१९; प्रेरित १८:६

27 मारदे हना परमप्रभु यावेमी शेंपाइश्शो लोव्र का यो मखुइक्थु नेल्ल शेंताक्नी।

28 गे आंम कली कोव्रडीने। परमप्रभु यावे आ सोक्तीमी इन कली थमा सुइक्ब आन कली कोव्रब सेल्लु। गे परमप्रभु यावे आ मुर आन कली मुर आन कली कोव्रब रिम्शो गोठला दुमीन। मारदे हना मेकोपुकी आ तौ आ हुशेम ग्याप्शो बाक्नीमी। १तिमोथी ४:१६; १पत्रुस ५:२-४

29 गो इन कली प्रॉइशा वोइश्शा, गाक्डा नोले फरमी बी क्यारश आन कली खेदा पशो खोदेशो पा खेदा पचा पुंडसीनीनी। मत्ती ७:१५

30 गेपुकी नु काथा गाक्ब थमा सुइक्बपुकी यो मोदेशो खेदा पाइब फर खोदेशो दुम्नीम। मेकोपुकीमी दूली लोव्र शेंशा, थमा सुइक्ब आन थुं ग्येत्थ लुक्च क्याल्पाइश्शा, आन नोले खोइक्ब सेल्लुमी, दे तुइक्नुड। १यूहन्ना २:१८-१९

31 मोपतीके होस पांडसीने। बर्स सां सम्म श्येत पा डाक्थ्री दुम्शा, गोमी इन कली शेंशो, वारच पशो काइ मप्रेदीने।

32 मुल गो इन कली परमप्रभु यावे आ गुइमी जिम्मा गेनुड। प्रभुमी इन कली शिशी पा आ लोव्र नेल्ल रुप्चा गेशा, इन थुं बारना बारन लपाइश्शा, आ मुर नेल्ल आन कली गेतीक आसीक गेब, दे तुइक्नुड।

33 गेपुकी नु बाक्डानु, इन बाक्शो सुन चांदी वा नेल्ल तशा मवाल्लड। मारेइ मताक्गु।

34 गो आंम आं गुइमी गेय पना पन जाता। गो नु काथा गाक्ब आन कली यो गोन थुल्लतामी। प्रेरित १८:३; १कोरिन्थी ४:१२; १थिस्सलोनिकी २:९

35 गो मार पाता हना यो, मचाप्ब आन कली वारच पाइक्चा नमी, दे गेय पा कोइताक्न। प्रभु येसु आ शेंशो लोव्रमी 'ताक्चा क्येडा गेचा रिम्शो बाक्ब' देत।

36 मेको लोव्र पने थुम्शा, आ पोक्च थेक्शा मेकोपुकी नु प्रार्थना पाप्तु। प्रेरित २१:५

37 पावलमी "मुल डा मेरे मगुम्नय" देशो लोव्रमी नेल्ल डाक्तेक्म।

38 मिनु पावल कली "लेंशा मतांडसीब" दे मुप्शा पुक्पु पशा, जहाज सम्म चोव्रतेक्म।

## 21

### टायर सहरमी जाक्दीश्शो

1 मिनु गो पावल नु गाक्ब नेल्ले जहाजमी डोइश्शा, मिलेटस रे लशा, कोस टापुमी जाक्दीत्तक। आ दीसा नाक्ती रोदोस लाक्शा, पतारा सहर जाक्दीत्तक।

2 पतारामी जहाज रे तोइश्शा, फोनीसीया लाइब जहाज डोइश्शा लाइतक।

3 साइप्रस टापु तांडसीतीक जाक्दीश्शा, साइप्रस गे मलथु, आइदी रे पा ग्रीशा लशा, सिरीया रागी डा टायर सहरमी जाक्दीश्शा तोंडसाक्क। मारदे हना मेको जहाजमी कुरशो भारी शोल्चा माल्शो बाक्त।

4 मिनु सहर लशा, थमा सुइक्ब आन बाक्तीके माल्शा, ७ नाक्त सम्म मेकोपुकी नु बाक्तक। मिनु थमा सुइक्बपुकीमी परमप्रभु यावे आ सोक्त रे पा लोव्र पा पावल कली "यरूसलेम मलावो" दे माइक्तेक्म। प्रेरित २०:२३

5 साता का नोले "गो आंइ लां खोइक्नीकी" देंकानु, मीश मुर वोंइश मुर, आल ब्रेप्च नेल्लेमी चोव्रथ सहर लाक्शा समुन्द्र आ नेक्था सम्म चाक्तेक्म। मिनु पोक्च थेक्शा प्रार्थना पशा ब्राशा, प्रेरित २०:३६

6 गोपुकी जहाज डोंडसाक्का, मेकोपुकी चहिं आन खिं खिं लेश्शा लाम्तेक्म।

### पावल सिजरियाम बाक्शो

7 मिनु टायर रे लशा, तोलेमाइस जाक्दीश्शा तोंडसाक्क। मिनु थमा सुइक्ब आन कली ग्रुम्थ लशा, काबु कांथा बाक्तक।

8 मिनु आ दीसा नाक्ती सिजरिया जाक्दीश्शा तोंडसाक्क। मिनु ग्येरपाइक्ब लोव्र शेंब फिलीप आ खिं लशा बाक्तक। योव्रशो गेय पाइब ७ जना डा फिलीप का बाक्शो बाक्त। प्रेरित ६:५; प्रेरित ८:४०

9 फिलीप के ४ जना ग्युंवे मपशो तमी बाक्तेक्म। मेकोपुकी परमप्रभु यावे आ लोव्र पाइब बाक्तेक्म।

10 मोपा फिलीप आ खिंमी बाक्कानु, काबु अगाबस माइशशो परमप्रभु यावे आ लोत्र पाइब मुर का यहूदीया रागी रे यिशा, आंड बाक्तीकेमी जाक्त। प्रेरित ११:२८

11 मिनु गोपुकी नु बाक्शा, पावल आ किप्शुरम आंम गुड खोइल फ्रेंसीशा, “परमप्रभु यावे आ सोक्तीमी ‘एको किप्शुर किप्ब मुर कली यरूसलेमम जाक्दीशशा बाक्मेनु, यहूदीपुकीमी एको ओं पा फ्रेंनीमी। मिनु अर्को रागी डा मुर आन गुइमी जिम्मा गेनीमी” दे नोले दुम्ब लोत्र पात्तु। प्रेरित २०:२३

12 अगाबस आ मोदेशो लोत्र नेंशा, गो नेल्लेमी पावल कली “यरूसलेम मलावो, लचा मदुम्ब” दे माइक्कतक। मत्ती १६:२२

13 पावलमी चहिं “मारदे डाक्शा ब्रेशशा, आं थुं खाइक्पाइक्नीनी? मलथु मप्रॉइनुड। यरूसलेम जाक्दीशशा, प्रभु येसु आ नेंमी फ्रेंसीचा ला ममाइ, बेक्चा माल्ती हना यो, बेक्नुड” देंत। प्रेरित २०:२४

14 मिनु मलथु मप्रॉइबाक्माक्त, दे रुप्शा, गोपुकीमी “लो, मो हना प्रभु आ दाक्शो दुम्ल” देंतक। लूका २२:४२

### पावल यरूसलेमम जाक्दीशशो

15 मिनु नोले यरूसलेम लाइतक।

16 सिजरिया डा थमा सुइक्बपुकी यो गो नु गाक्तेक्म। यरूसलेममी जाक्दीशशा, मेको गो नु गाक्बपुकीमी मनासोन आ खिंमी बास बाक्चा, दे चाक्दीत्तेक्म। मनासोन चहिं साइप्रस टापु डा बाक्माक्त। साइ डोंइती रे ख्रीस्त कली थमा सुइक्ब बाक्माक्त।

17 यरूसलेममी जाक्दीक्कानु, मेकेर बाक्ब थमा सुइक्बपुकीमी आंड कली तशा ग्येरशा ब्राइतीकी।

18 जाक्दीशशो आ दीसा पावलमी आंड कली याक्ब आ खिं लाइशशा, थमा सुइक्ब आन कली शेंब खाल्पा नु ग्रुम्पाइक्तु। प्रेरित १५:१३

19 मिनु ग्रुम्शा सेउ पमुशा, पावलमी अर्को रागी डा मुर आन कली ख्रीस्त आ परबंम शेंना शेंन गाक्मेनु, परमप्रभु यावेमी दोपा ठेयब गेय पपाइशशो बाक्मे, मेको लोत्र नेल्ल का का पा रुप्पाइक्तीमी।

20 आ लोत्र नेंशा, परमप्रभु यावे कली ठेयब सेल्लेक्म। मिनु मेकोपुकीमी पावल कली “आंड लोकब, इ देशो नेल्ल रिम्शो बाक्ब। तन्न गो इ कली लोत्र का निक्शी देंनीकी। इ यहूदीपुकी हजार हजार जना ख्रीस्त कली थमा सुइक्ब दुम्तेक्म, दे तुइक्नेवे। मेकोपुकीमी थमा सुइशशा यो इ यहूदी अरेशो लोत्र काइ मप्रॉइथु पचा माल्ब देंनीमी। प्रेरित १५:१

21 मेकोपुकीमी ‘पावलमी अर्को रागी डा मुर नु बाक्ब यहूदी आन कली मोसामी अरेशो लोत्र पचा प्रोनीने, इन आल आन कली खोइक्तीक चिनु मखोतीन’ दे शेंना शेंन गाक्ब, देशो नेंशो बाक्नीमी। प्रेरित १६:३

22 पावल यरूसलेम जाक्माक्त, दे तुइक्नीम।

23 आंड देशो पावो। मिनु मेको लोत्र जाम्ब। गो नु बाक्ब ४ जना मुर कसम पशो बाक्तेक्म। प्रेरित १८:१८

24 मोपतीके मेकोपुकी नु गारशा आन कसम जशो खाप्चा कली लावो। मिनु चोवखो दुम्शा, नेल्लेमी इन चां प्रेक्सीने। चां प्रेक्शो डा चहिं गे क्येट थाप्तीन। मो पाइतीनी हना, सुइमी मारेइ दोस गेने मचाप्नीमी। इ यहूदी अरेशो नेल्ल पशो बाक्ब, दे नेल्लेमी तुइक्नीमी।

25 अर्को रागी डा ख्रीस्त कली थमा सुइक्ब कली चहिं दोदेशो शेंचा, दे डोंइती कना ब्रेक्शा सोइक्ने थुम्तक। मेको आन कली ‘भूर्ति कली चढेशो मजचा, हुश मब्वचा, हुश मचुइक्थु साइशशो श्ये मब्वचा, तेल्लेम मपचा’ दे नेंपाइक्ने थुम्तक” दे माइक्तेक्म। प्रेरित १५:२१, २९

26 मिनु पावलमी मेको आन लोत्र नेंशा, आ दीसा मेको ४ जना नु काथा लशा चोवखेचा पुंडसीशा, परमप्रभु यावे आ खिं ओव्रशा, चोवखेतीक नाक्त गेना नुप्बा नु नोले चढेचा, दे चढेब आन कली तुइक्पदमे बाक्त। गन्ती ६:१३-२१; १कोरिन्थी ९:२०

### पावल कली ग्याइशशो

27 मेको चोत्रखेतीक ७ नाक्त दुम्या चिकतानु, यहूदीपुकी एसीया रे जाकशा पावल कली ग्याइक्तमे बाक्त। मेकोपुकीमी पावल कली परमप्रभु यावे आ खिंमी बाकशो तशो बाक्मा बाक्त।

28 मिनु पावल कली ग्याइश्शा, मेकेर बाकब मुर आन कली “इं इस्राएली, नेल्ल कोव्रथ पिन, है। गो आंइ ग्याइश्शो मुर तेइ तेइ हिरशा, नेल्ल मुर आन कली इं यहूदी आ परबम मरिम्शो लोत्र पशो बाक्त। इं अरेशो मपचा, दे दूली शेंबाक्त। परमप्रभु यावे आ खिं आ परबम शुक्शी लोत्र पाइक्बाक्त। मोशो ला ममाइ, अर्को रागी डा ग्रीक आन कली परमप्रभु यावे आ खिंमी लाइश्शा ओंइशा, ग्रांघ्रा दिशो सेल्शो आंइ मिक्चीमी ताइतक” दे शुश रेयके पा दोस गेमे बाक्त। प्रेरित ६:१३; इजीकीएल ४४:७

29 परमप्रभु यावे आ खिं ग्रांघ्रा दिशो सेल्शो बाक्माक्त, दे मारदे देंमा देशा हना, एफिसस सहर डा त्रोफीमस कली सहरमी पावल नु काथा गाकशो तशा, परमप्रभु यावे आ खिं लाइश्शा, ओंइने थुमा बाक्त, दे मिम्शो बाक्मा बाक्त। प्रेरित २०:४; २तिमोथी ४:२०

30 पावल कली दोस गेशो लोत्र सहर नेल्ल ब्रीमाक्त। मिनु सहर डा मुरपुकी दोरशा जाकशा, शुश रेयके पामे बाक्त। पावल कली ग्याइश्शा कीशा परमप्रभु यावे आ खिं रे गुंइशा लदमे बाक्त। मिनु परमप्रभु यावे आ खिं डा खाल पाइबपुकीमी ठेयब लाप्चो नेल्ल गु ग्रा चोक्गमे बाक्त।

31 मिनु मेको रेयके पाइबपुकीमी पावल कली साइक्चा चिकतमेनु, यरूसलेमम बाकब रोमी लडाइ पाइब आन ठेयब मुरुमी “सहरम क्योरमुशा साइक्मुचा चिकताक्म” देंशो नेंशा,

32 आ सिपाही आन कली लाइश्शा दोरशा जाक्दीम्माक्त। मिनु मेकोपुकी जाकशो तशा, पावल कली तुप्चा प्रोन्मे बाक्त।

33 मिनु लडाइ पाइब आन ठेयब मुरुम पावल कली ग्याइक्पाइश्शा, साडलो निक्शी लिक्तीने देशा लिक्पाइश्शा आ डोंइती राप्पदा बाक्त। मिनु “एको मुर ते डा बाक्मे? मार पवा?” दे मुर आन कली हिल्लो पचा गोवा बाक्त। प्रेरित २०:२३

34 मिनु नेल्लेमी रेयके पामेनु, लडाइ पाइब आन ठेयब मुरुमी मारेइ रुप्ने मचबा बाक्त। मोपतीके सिपाही आन बाक्तीकेम लाइक्चा माल्ब, दे लदमे बाक्त।

35 मिनु सिपाही आन बाक्तीके जाक्दीश्शा, पावल कली कुरशा, तला तारी लदमे बाक्त।

36 मारदे हना मुरपुकीमी “मेको कली मसाइक्थु मप्रोंइनीकी” दे रेयके पा कोक्के शेशा, मेको आन नोले खोइश्शा लमा बाक्त। प्रेरित २२:२२; लूका २३:१८

37 मिनु तला तारी कुरशा ओंइदमेनु, पावलमी लडाइ पाइब आन ठेयब मुर कली ग्रीक लोत्र रे पा “हजुर, गो लोत्र का निक्शी पचा ताइनडा कौ?” देंमेनु, मेको छक लाक्शा “ओहो, ग्रीक लोत्र यो ब्वाक्स जोक्बाक्ते।

38 इजीप्त रागी डा ४ हजार खुइ आन कली गोरशो रागीमी लां कौइब मुर दा मनवे” देंमाक्त।

39 मिनु पावलमी “गो इजीप्ती मनड। सिलीसीया डा टारसस सहरमी जरमेशो यहूदी का नड। टारसस सहर तेइ तेइ नेल्लेमी आं नें तुइक्नीमी। गे यो तुइक्नीनी माइ। मेको मुर आन कली लोत्र का निक्शी पचा गेयीनी” देंमाक्त।

40 मिनु लडाइ पाइब आन ठेयब मुरुमी “लो, लोत्र पचा गेनन” देंमाक्त। मिनु पावल गूशा तला तारी डा लाडगाम राप्शा “लो, सिक्सी पा आं लोत्र नेनीने” दे गुइ हिकता बाक्त। मिनु पावलमी हिबू लोत्र पा, मुर नेल्ल सिक्सी पामे बाक्त।

## 22

पावलमी सांकछी गेशो

1 मिनु पावलमी हिबू लोत्र पा “आं आफ नु लोकबपुकी, लोत्र का निक्शी नेनीने” देंमेनु, मेकोपुकी थम सिक्सी पा नोफा दाइश्शा बाक्मा बाक्त।

2 मारदे हना पावलमी हिबू लोत्र पवानु, मेकोपुकी क्येडा सिक्सी पामे बाक्त। प्रेरित २१:४०

3 मिनु मेकोमी “गो सिलीसीया डा टारसस सहरमी जरमेशो यहूदी नड। आल रे इं यरूसलेममी बाकशो नड। आं कली शेंब गमालीएल बाक्ब। मेको ठेयब शेंबमी आं कली इं किकी पिपी आन

अरेशो लोत्र नेल्ल शेंताकयी। मिनु गो मेको नेल्ल पना पन बाकती। इन पशो खोदेंशो पा गो यो थुं का पा परमप्रभु यावे कली मान पा बोल पाता। प्रेरित ९:१-२९; प्रेरित २६:९-२०; प्रेरित ५:५४

4 मोपा बाकडानु, ख्रीस्त आ लां खोइकब आन कली साइक्या सम्म डा श्येत नेतामी। मीश मुर वोंडश मुर आन कली खेदा पा ग्याइकपाइशशा, जेल्खानमी चोकपाइकतामी। प्रेरित ८:३

5 एको आं देंशो थमा बाकब, दे ठेयब चढेब नु जोकब तुइकब खाल्पा नेल्लेम तुइकनीमी। मेकोपुकीमी दमस्कसमी बाकब यहूदी गुम्तीक खिं डा ठेयब मुर आन कली चिठी ब्रेकशा, ख्रीस्त कली थमा सुइकब आन कली ग्याइशशा यरूसलेम चाक्या, दे अधिकार गेतीमी। मिनु थमा सुइकब आन कली ग्याइकथ दमस्कस लती।

6 दमस्कस सहर जाकदीत्वाडानु, १२ बजे खोइ दुम्शो बाकत। मिनु मार दुम्त देशा हना, सरीड रे जेव हाकसीशा यिशा, एर ओंथ नेल्ल थम छेडछेड दुम्त।

7 मिनु गो दिड गोल्ती। मिनु 'सावल, सावल मारदे आं कली खेदा पा श्येत गेयी?' देंशो नेता।

8 मिनु गो 'प्रभु सु ननी?' दे हिल्लो पडानु 'गेमी खेदा पशो नासरथ डा येसु नड' देंशो नेता।

9 गो नु काथा गाकबपुकीमी छेडछेड दुम्शो ताम्तेकमे। लोत्र पशो चहिं मारिड मनेनेम।

10 मिनु गो 'प्रभु, मुल गो मार पाइनुडा?' देंडानु, प्रभुमी 'मुल छुल बोक्शा दमस्कस लावो। मेकेर जाकदीनेनु, मार पचा माल्नेवे, मेको नेल्ल तुइकपाइक्या पुंडसीनेवे' देंशो नेता।

11 मेको छेडछेडम पतीके गो मिक्च मताइब दुम्ती। मिनु गो नु काथा गाकब वारचपुकीमी आं गुड ग्याइशशा कीशा, दमस्कस सहरमी चाकदीत्तीमी।

12 दमस्कसमी हनानीया नें पाइशशो मुर का बाकमाकत। परमप्रभु यावे आ अरेशो नेल्ल टिशा, रिम्शो पाइब बाकमाकत। मेकेर बाकब यहूदी नेल्लेमी मेको आ पबर्म 'रिम्शो पाइब बाकब' देंमा बाकत।

13 मेको मुर आं कली गुम्थ जाकत। मिनु आं डोंइती राप्शा 'आं लोकब सावल, मिक्च ताइब दुमो' देंमेनु, गो मिक्च ताइब दुम्शा, आं डोंइती राप्शो ताता।

14 मिनु हनानीयामी 'इं किकी पिपीमी आन परमप्रभु यावेमी इ कली योत्रशा, आ दाकशो पचा, दे तुइकपाइकते। मेको ठीक पाइब कली तशा, आ लोत्र नेंतीवी।

15 दोदेंशो पा गुमी, मार लोत्र नेंनी, मेको नेल्ल शुश मुर आन कली तुइकपाइकनेवे।

16 मुल कोत्रशा मबाकको, छुल बोक्शा प्रार्थना पा, हे प्रभु येसु, आं पशो पाप क्याम्शा गेयीनी, दे पुंडशा, ब्वाक्कुमी खुम्शा गुंडने पुंडसो' दे माइकती।

17 मिनु नोले यरूसलेम लेत्ती। मिनु काबु परमप्रभु यावे आ खिंमी प्रार्थना पा बाकडानु, प्रभुमी कोंइतीक कोंइदीनु,

18 गो प्रभु कली ताता। मिनु प्रभुमी 'यरूसलेम थु प्रोनो। मारदे हना एकेर बाकबपुकीमी गेमी आं पबर्म शेंशो लोत्र मनेनीम' देंत।

19 मिनु गो 'प्रभु, गो थमा सुइकब आन कली जेल्खानमी चोकपाइकतामी। गुम्तीक खिं खिं हिरशा, थमा सुइकब आन कली माल्शा तुप्पाइकतामी, दे तुइकनीमी।

20 इन पबर्म लोत्र पाइब स्तीफानस कली फुल्लु क्रोम्शा सदमेनु, रिम्शो पाइतीनी, दे माइकतामी। साइकब आन पुइशशा वोइशशो वा खाल पा बाकशो नड। मेको लोत्र नेल्लेम तुइशशो बाकनीम' देंडानु, प्रेरित ७:५८; प्रेरित ८:१

21 प्रभुमी 'मेकेर रे लावो। मारदे हना डोन डोन बाकब अर्को रागी डा मुर आन कली आं पबर्म शेंथ सोइकनन' देंत' दे पावलमी देंमाकत। प्रेरित १३:२

22 डोन डोन बाकब अर्को रागी डा मुर आन कली ख्रीस्त आ पबर्म शेंथ सोइशशो नड देंमे चोटीन आ लोत्र थुम्चा मगेथु "एको कली मसाइकथु मप्रोंइय। ओं देंशो मुर कली ब्रोंइचा गेचा मदुम्ब" दे शुश रेयके पामे बाकत। प्रेरित २१:३६

23 मिनु आन जोब बोक्शा, आन फेकशो वा बेरपा फुरक फ्रशा, राम्शी पोक्शा, मरिम्शो पामे बाकत।

24 मिनू लडाइ पाइब आन ठेयब मुरुमी मेकोपुकीमी मोदेशो मरिम्शो पशो तशा, पावल कली आगा ओंइपदा बाक्त। मिनू मुरपुकीमी एको मुर कली तशा, मारदे आन जोंब बोक्मा, एकोमी मार मरिम्शो पवा, दे तुइक्चा कली कोरामी युक्शा, हिल्लो पने, दे आ सिपाही आन गुइमी गेमी बाक्त।

25 मिनू सिपाहीपुकीमी पावल कली फ्रेंशा कोरामी युक्चा चिक्तमेनु, पावलमी मेकेर आ नेक्था राप्शा बाक्ब कप्तान कली “इं रोमी ऐन कानुनमी रोमी नागरिक आन कली मारेइ दोस मयुंइथु, गे कोरामी युक्चा ताइनीनी?” देमाक्त। प्रेरित १६:३७; प्रेरित २३:२७

26 मिनू कप्तानमी मुल मार पचा, दे सिपाही आन ठेयब मुर कली हिल्लो पथ लमाक्त। मिनू “कोरामी युक्चा पुंइसीचा डा मुर ममाइ बाक्त। आं यो रोमी नागरिक बाक्त” दे तुइक्पदा बाक्त।

27 मिनू लडाइ पाइब आन ठेयब मुर पिशा “गे थमान रोमी नागरिक नवे? लो देंनो” देंमेनु “नइ, हजुर” देमाक्त।

28 मिनू लडाइ पाइब आन ठेयब मुर “गो शुश क्येट थाप्शा, रोमी नागरिक दुम्शो नइ” देंमेनु, पावलमी “गो दा जरमेशो रेन रोमी नइ, हजुर” देमाक्त।

29 मेको लोत्र नेंशा, कोरामी युक्शा हिल्लो पचा चिक्बपुकीमी “हेत्त, मो पचा मदुम्शो बाक्माक्त” देमा बाक्त। मेको मुर रोमी नागरिक बाक्माक्त, दे तुइक्तमे डा मेरे लडाइ पाइब आन ठेयब मुर यो हिंमाक्त। मारदे हना रोमी नागरिक आन कली फ्रेंपाइक्चा लायो मदुम्बाक्माक्त।

30 मिनू मेको लडाइ पाइब आन ठेयब मुर “मेको मुर आ दोस मार बाक्म?” दे रुप्चा माला बाक्त। मोपतीके आ दीसा नाक्ती ठेयब चढेब नु कछडी बाक्ब मुर आन कली खुप्पाइश्शा, पावल कली आ गुइ डा साडलो पुइश्शा लाइश्शा, खुम्सीशो मुर आन डोंइती राप्पदा बाक्त।

## 23

### पावल कली कछडी राप्पाइश्शो

1 मिनू पावल मेको आन डोंइती राप्शा, आन कली मिक्च मयाक्थु कोत्रशा, “आं लोकबपुकी, गो साइ रे मुल सम्म आं तुइश्शो जोक्शो रिम्शो ला पाता। एको लोत्र थमा बाक्ब, दे परमप्रभुमी तुइक्ब” देंमेनु, प्रेरित २४:१६

2 हनानीया माइश्शो ठेयब चढेबमी पावल आ नेक्था बाक्ब आन कली “मेरे आ शोत्र रोप्तीने” देमाक्त।

3 मिनू पावलमी “परमप्रभु यावेमी इ कली कका इ शोत्र रोप्तेक्ल। ब्रेत्यशो गारोमी, बुलु बुइश्शा, बुबु पा तांइसीशो खोदेशो नवे। अरेशो लोत्रमी दोदेशो पा ब्रेक्शो बाक्मे, मोदेशो पा आं कली निसाफ पचा माल्शो नवे। गे अरेशो लोत्र क्येडा दूली पा आं कली तुप्चा माल्ब, देंते” देमाक्त। मती २३:२७

4 मिनू एर ओंथ बाक्बपुकीमी पावल कली “परमप्रभु यावेमी योत्रशा वोइश्शो ठेयब चढेब कली मोदेशो लोत्र पचा दुम्बा?” देमा बाक्त।

5 पावलमी “मेको मोदेशो ठेयब चढेब, दे मतुइक्तु, आं लोकबपुकी। तुइश्शो नइ हना, मोदेशो लोत्र मदेइ वा। मारदे हना परमप्रभु यावे आ ब्रेक्पाइश्शो लोत्रमी ‘इन कली अधिकार पचा, दे वोइश्शो आन कली मरिम्शो लोत्र मपचा’ दे ब्रेक्शो बाक्ब” देमाक्त। प्रस्थान २२:२८

6 मिनू पावलमी कछडीम बाक्बपुकी का निकशी सदुकी, का निकशी फरिसी बाक्नीम, दे तुइश्शा, ठेयब सेंदा पा “आं लोकबपुकी, गो फरिसी नइ। गो फरिसी आ तौ नइ। बेक्शो रे सेंसीशा ब्रोंइचा तांइसीब, दे थमा सुइश्शो लोत्रमी आं कली दोस गेशा, मुददा कोप्ताक्यीमी” देमाक्त। प्रेरित २२:३; प्रेरित २६:५; गलाती १:१४

7 मो देंमेनु, फरिसी नु सदुकी ब्राशा, जिचा गोत्रमे बाक्त।

8 मारदे हना सदुकीपुकीमी बेक्शो रे मसेसीनीम, स्वर्ग डा गेय पाइबपुकी मबाक्नीम नु परमप्रभु यावे आ सोक्त मबाक्ब देंनीम। तन्न फरिसीपुकीमी चहिं मेको नेल्ल बाक्ब देंनीम। मती २२:२३

9 मोपतीके आन जिचा बारना बारन लशा, शुश रेयके पामे बाक्त। मिनू फरिसी डा शेंब का निकशीमी वोक्शा “एको मुर के मारेइ दोस मबाक्ब, दे मिम्नीकी। मुर आ मिक्चीम मतांइसीब का नु लोत्र पवा

कों? परमप्रभु यावे आ स्वर्ग जा गेय पाइब नु लोव्र पवा कों? मोदेशो यो दुम्ने चाप्ब” देमा बाक्त।  
प्रेरित २५:२५

10 मिनु आन जिचा बारना बारन लशा, तुम्मुचा गोव्रमे बाक्त। मिनु लडाइ पाइब आन ठेयब मुर “पावल कली साइक्नीमी कोर में” दे हिंशा, सिपाही आन कली ब्रेशा, पावल कली गुंडशा, सिपाही आन बाक्तीके लेशा चाक्पदा बाक्त।

11 मिनु मेको नाकदो प्रभुमी पावल आ नेक्था जाक्शा “दोपा यरूसलेममी आं पर्बम शेंदीमी, मोपा रोम सहरमी यो आं पर्बम शेंशा सांक्छी दुम्नेवे। मोपतीके महिंथु, ठेयब थुं पा बाक्को” देमाक्त। प्रेरित १:८; प्रेरित २५:११-१२; प्रेरित २७:२३-२४

### पावल कली साइक्चा माल्शो

12 मिनु आ दीसा सुनी यहूदीपुकीमी “पावल कली साइश्शो मतया सम्म मारेइ मजय, मतूय” दे कसम जशा, पावल कली साइक्चा सल्ला पामे बाक्त।

13 मोदेशो पा कसम जाइब ४० जना क्येडा शुश बाक्मा बाक्त।

14 मेकोपुकीमी ठेयब चढ़ेब नु यहूदी आन जोक्ब तुइक्ब खाल्पा आन कली गुम्थ लशा “पावल कली साइश्शो मतका सम्म गो मारेइ मजाइनीकी मतूनीकी, दे कसम जाइतक।

15 मोपतीके गे ठेयब मुर नेल्लेमी गारशा, लडाइ पाइब आन ठेयब मुर कली ‘पावल कली मारेइ मारेइ हिल्लो पाइनीकी। मिनु एकेर सोइक्तीन’ दे मतीन। मिनु एर लां रे गुंडशा पिदमेनु, लां उइ साइक्नीकी” देमा बाक्त।

16 मेको लोव्र पावल आ भानीजमी नेंना बाक्त। मिनु सिपाही बाक्तीके लशा, पावल कली माल्शा गुम्था तुइक्पदा बाक्त।

17 मिनु पावलमी कप्तान का ब्रेशा “एको ठिटा कली लडाइ पाइब आन ठेयब मुर नु गुम्पतीने। मारदे हना लोव्र का निक्शी तुइक्पाइक्चा माल्ताक्व” देमाक्त।

18 मिनु कप्तानमी ठिटा कली लडाइ पाइब आन ठेयब मुर आ बाक्तीके चाक्दीश्शा “हजुर, चोक्सीशो पावलमी आं कली ब्रेशा, एको ठिटा कली इन बाक्तीके चाक्दीत्चा। मारदे हना इन कली लोव्र का निक्शी तुइक्पाइक्चा माल्ताक्व देंशा, हजुर, इन बाक्तीक चोव्रथ सोइक्ताक्यी” देमाक्त।

19 मिनु लडाइ पाइब आन ठेयब मुरुमी पावल आ भानीज कली गुंडमी ग्याइश्शा, सुइ मबाक्तीक कोठामी लाइश्शा “मार देंचा दाक्नेवे, लो देनो” दे हिल्लो पवानु,

20 पावल आ भानीजमी “हजुर, यहूदीपुकीमी गारशा, पावल कली गुंडशा, आंइ बाक्तीके सोइक्तीने। लोव्र का निक्शी हिल्लो पचा माल्ताक्व देखु पा इन कली पुंडनीम।

21 मेको आन लोव्र मनेंचा। मारदे हना ४० जना क्येडा शुश मुरुमी पावल कली साइक्चा, दे लांम बाप्शा बाक्नीम। मेकोपुकीमी ‘पावल कली साइश्शो मतका सम्म मारेइ मजाइनीकी, मतूनीकी’ दे कसम जने थुम्नेक्म। मिनु हजुरमी पावल कली गेना सोइक्बा, तेको लां रे सोइक्बा, दे योव्रकी पा बाक्शो बाक्नीम” देमाक्त।

22 मिनु लडाइ पाइब आन ठेयब मुर “एको लोव्र सुइ कली मशेंदो” देंशा सोइक्ता बाक्त।

### पावल कली सिजरिया सोइश्शो

23 मिनु लडाइ पाइब आन ठेयब मुरुमी कप्तान निक्शी आस कली ब्रेशा “एको चोक्सीशो पावल कली सिजरिया सहर चोव्रदीचा माल्ताक्व। मोपतीके गे निक्शीमी आपो नाक्दो ९ बजे सहे निक्शी सिपाही, ७० जना शारा डोइक्ब नु सहे निक्शी भाला शेयब आन कली साशा वोतीसे।

24 पावल कली यो शारा का साशा वोतीसे। लांमी पावल कली सुइमी मारेइ पाइक्ने मचाप्मेक्ल, दे रिम्शो पा हुकुम पाइब फेलीक्स आ डोंइती चाक्दीत्तीसे” दे माइक्सी बाक्त।

25 मिनु हुकुम पाइब कली चिठी ब्रेक्ता बाक्त।

26 मेको चिठीमी “हुकुम पाइब फेलीक्स हजुर, गो क्लौदीयस लिसीयस आं के नमस्ते। हजुर, आं के लोव्र का निक्शी नेनीने।

27 एको मुर कली यहूदीपुकीमी ग्याइशशा, हेरर हेररा साइक्तेक्म। साइक्चाम्तेक्म देशो नेंशा, गो सिपाही आन कली लाइशशा, आन गुड रे प्रॉइता। रोमी नागरिक बाक्माक्त, दे यो तुइक्ताक्ड। प्रेरित २१:३३; प्रेरित २२:२५

28 एको के मार दोस बाक्मे? दे हिल्लो पथ यहूदी आन कछडमी लाइक्पाइक्ता। प्रेरित २२:३०

29 हिल्लो हिक्सी पामेनु, यहूदी आन अरेतीक लोत्र आ पबंम दोस गेमे बाक्त। जेल्खानमी चोक्चा, साइक्चा पुंडसीचा डा गेय मारेइ मपशो बाक्त, दे रुप्ता।

30 मिनु यहूदीपुकीमी 'मेको कली साइक्चा, दे गारशो बाक्नीम' देशो नेंशा, हजुर, इन बाक्तीक सोइक्ताक्ड। एको कली दोस गेब आन कली 'सिजरिया डा हुकुम पाइब आ बाक्तीक लने' दे माइक्नुडमी" दे ब्रेक्ता बाक्त।

31 मिनु लडाइ पाइब आन ठेयब मुरुमी दोदेशो देंमे, मोदेशो पा कप्तान नु सिपाहीपुकीमी पावल कली लाइशशा गाक्मा बाक्त। मिनु नाक्दो रे गाक्शा, एन्तीपात्रीसमी जाक्दीम्मा बाक्त।

32 मिनु आ दीसा खोइलीमी गाक्बपुकी यरूसलेम लेम्मा बाक्त। शारा डोइक्बपुकीमी पावल कली सिजरिया चाक्दीत्मे बाक्त।

33 मिनु चाक्दीशशा, पावल नु चिठी मेको हुकुम पाइब कली जिम्मा गेमे बाक्त।

34 मिनु मेकोमी चिठी पढेशा, पावल कली "इ खिं ते में? तेको रागी डा नवे?" दे हिल्लो पवानु "सिलीसीया रागी डा नड, हजुर" देमाक्त। प्रेरित २२:३

35 मिनु हुकुम पाइबमी "लो मो हना इ कली दोस गेबपुकी जाक्मल। मिनु इ मुददा कोव्रनुड" देशो हेरोद आ दरवारमी लाइशशा, खाल पाइब आन दातेमी वोइक्पदा बाक्त।

## 24

### हुकुम पाइब आ डोंइती राप्पाइशशो

1 मिनु ५ नाक्त नोले ठेयब चढेब हनानीया, यहूदी आन जोक्ब तुइक्ब खाल्पा का निक्शी नु तेरतुल्लस नें पाइशशो निसाफ पाइब का सिजरियामी जाक्मा बाक्त। मिनु हुकुम पाइब आ डोंइती पावल कली दोस गेमे बाक्त।

2 मिनु कछडी बाक्मा नाक्ती पावल कली हुकुम पाइब आ डोंइती राप्पदमेनु, तेरतुल्लस निसाफ पाइबमी दोस गेशा "माननीय फेलीक्स सरकार, हजुर, इन रिम्शो पा हुकुम पशोमी गो यहूदी नेल्ल थुं नाइशशा बाक्चा ताइतक। आंइ रागी रिम्शो सेल्चा कली नक लां कोंइताक्नी। मिनु नेल्ल आंइ कली थम रिम्शो दुम्त।

3 इन पशो मारेइ मारेइ रिम्शो बाक्ब, दे गो नेल्लेमी तुइक्नीकी।

4 हजुर, कली शुश मक्योल्चा, दे मिम्नुड। तन्न लोत्र का चहिं पचा गेयीनी।

5 मेको इन डोंइती राप्पा वोइशशो मुर कली गो रिम्शो पा तुइक्नीकी। मेको मुर थम हिंचा डा रोइ खोदेशो बाक्ब। रागी रागी हिरशा गाक्मेनु, यहूदी आन कली पोक्शा मरिम्शो पपाइक्बाक्त। एको नासरथ डा दूली थमा सुइक्ब आन ठेयब मुर बाक्ब। प्रेरित १७:६

6 मोशो ला ममाइ, काबु परमप्रभु यावे आ खिं ग्रांघा पचशो बाक्त। मिनु गोपुकीमी ग्याइशशा, मो पचा मगेक। गो आंइ धर्म डा अरेतीक लोत्र कोत्रशा, सजाइ पाइक्चा देशो नकी। प्रेरित २१:२८-२९

7 तन्न लिसीयस लडाइ पाइब आन ठेयब मुरुम लोत्र पचा मगेथु, आ सिपाहीपुकी चाक्शा, आंइ कली हिंम हिंम पा आंइ गुड रे रोइशशा लाइक्तु।

8 मेकोमी आंइ कली 'मेको मुर आ दोस मार बाक्मे, मेको लोत्र हुकुम पाइब फेलीक्स कली मतीन' दे हजुर, इन बाक्तीके सोइक्ताक्की। मुल एको मुर कली गे आंमान हिल्लो पना पन आ दोस नेल्ल गुंइने चाप्नीनी। मिनु आंइ गेशो दोस थमा बाक्माक्त, दे तुइक्नीनी" देमाक्त।

9 मेकेर बाक्ब यहूदीपुकीमी यो "एको लोत्र थमा बाक्ब" दे निसाफ पाइब आ देशो लोत्र थोक्शा देमा बाक्त।

10 मिन हुकुम पाइबमी पावल कली लोत्र पचा गेवा बाक्त। मिन पावलमी “हुकुम पाइब, हजुर, एको रागीम शुश बर्स डोंइती रे निसाफ पाइब बाक्नीनी, दे तुइशशा, गो ग्येरसीशा ठेयब थुं पा आन गेशो दोस नेंशा लोत्र लेत्नुड। मार लोत्र बाक्मे, मेको लोत्र नेल्ल देंनुड।

11 परमप्रभु कली मान पथ, गो एसीया रे यरूसलेममी जाक्शो १२ नाक्त लाइ यो लाक्शो मबाक्ब। आं देंशो थमा मदाप्तीनी हना, सु कली हिल्लो पाइतीनी हना यो, नेल्लेमी देंनीम। प्रेरित २१:१७

12 गो यरूसलेममी बाक्डानु, परमप्रभु यावे आ खिंमी, गुम्तीक खिंमी, सहर तेइ तेइ हिरशा, सुइ कली जिचा पोक्चा डा लोत्र मपड। मुर आन कली पोक्शा मरिम्शो यो मपपदुमी। सुइमी मोदेंशो मरिम्शो पशो ताइतक देंने मचाप्नीम।

13 आं कली शुश अरु दोस यो गेतीमी। तन्न थमा पा गुंइशा कोंइने मचबेम।

14 लोत्र का चहिं हजुर, इन कली रूप्पाइक्नन्नी, गो येसु ख्रीस्त आ लां खोइशशा गाक्नुड। मेकोपुकीमी मेको लां दूली बाक्ब, दे मिम्शो बाक्नीम। ख्रीस्त आ लां खोइशशा, साइ आं किकी पिपी आन परमप्रभु यावे कली ठेयब सेल्नुड। गो मोसा आ अरेशो लोत्र नु परमप्रभु यावे आ लोत्र पाइबपुकीमी ब्रेक्शो लोत्र नेल्ल थमा सुइक्नुड।

15 गो नु अर्को यो ठीक पाइब नु ठीक मपाइब बेक्शो रे सेंसीचा पुंइसीनीम, दे थमा सुइक्नीकी। दानीएल १२:२; यूहन्ना ५:२८-२९

16 मोपतीके गो परमप्रभु यावे नु मुर आन डोंइती रिम्शो पाइनुड, दे आं थुं फ्रेंशा बाक्नुड। प्रेरित २३:१

17 मिन मुल मार देंनुड देशा हना, गो शुश बर्स मुर आन रागीमी हिरथ लशा, साबेर गाबेर यरूसलेम लेशशा जाक्ती। आंम आंइ यहूदी मारेइ मथीब आन कली मार मार गेथ नु परमप्रभु यावे कली मार मार चढ्थे लेशशा जाक्ती। रोमी १५:२५-२६; गलाती २:१०

18 गो चोत्रखो दुम्शा, परमप्रभु कली मार मार चढ्ढेडानु, मेकोपुकीमी परमप्रभु यावे आ खिंमी ततीमी। मेना गो आं का ला बाक्शो नड। मुर आन कली पोक्शा, मरिम्शो यो मपड। मोदेंशो एकोपुकीमी यो मतशो बाक्नीम। प्रेरित २१:२७

19 एसीया रे जाक्शो यहूदीपुकी यो परमप्रभु यावे आ खिंमी बाक्तेक्म। मेकोपुकीमी आं कली दोस गेचा गोम्तेक्म। गो दोस गेचा पुंइसीब मुर नड हना, मेकोपुकी एकेर जाक्शा, हजुर इन डोंइती देंचा माल्शो नमी।

20 साबेर यरूसलेममी कछडी पामेनु, मुल इन डोंइती जाक्शोपुकी यो बाक्शो नम। आं कली मार दोस गुंइदमे, मेको लोत्र हजुर, इन कली तुइक्पाइक्चा माल्शो नमी।

21 आं देंशो लोत्र का आ पबर्म दोस गेतीमी, दे तुइक्नुड। मेको आं देंशो लोत्र मार बाक्ब देशा हना ‘मुर बेक्शो रे सेंसीनीम’ दे थमा सुइक्नुड। मेको आ पबर्म आं कली मुददा कोप्ताकयीमी। मिन इन डोंइती राप्पाइय्यीनी, दे माइक्तामी। मिन मुल इन डोंइती राप्पाइक्तीमी” दे पावलमी देंमाक्त। प्रेरित २३:६

22 मिन फेलीक्स, हुकुम पाइबमी, ख्रीस्त आ लां खोइक्चा आ पबर्म शुश लोत्र तुइशशो बाक्माक्त। मोपतीके “लिसीयस, लडाइ पाइब आन ठेयब मुर, जाक्शा नोले ला इन लोत्र नेंशा, निसाफ कोत्रशा खोइशशा गेनन्नी” दे बैठक पोक्शा सोइक्तीमी बाक्त। प्रेरित २३:२६

23 पावल कली कप्तान आ गुइमी जिम्मा गेशा “सिपाहीपुकीमी कोत्रशा, एर ओंथ गाक्चा गेचा। आ वारच जाक्तेक्म हना, गुम्चा गेचा” दे वोइक्पदा बाक्त। प्रेरित २७:३

### पावल सांकछी दुम्शो

24 इक्का नाक्त नोले हुकुम पाइब फेलीक्स नु आ मीश दुसील्ला जाक्सा बाक्त। आ मीश यहूदी तमी बाक्माक्त। मिन पावल कली चाक्पाइशशा, ख्रीस्त कली थमा सुइक्चा आ पबर्म लोत्र पपदसे बाक्त।



25 मिनु पावलमी “ठीक पशो नु ठीक मपशो मार बाकबा, इं थुं नु रां कली दोपा अरेचा नु परमप्रभुमी मुर नेल्ल आन कली निसाफ पाइब” दे शेंदानु, फेलीक्स हिंशा “लो मोकल, मुलाकती ओशो ला लोत्र पय। इ लोत्र दीसा नित्थ लेंशा नेंनुड” दे सोइक्ता बाक्त।

26 फेलीक्समी “पावलमी क्येट सुइक्बा को” दे यो आस पशो बाक्माक्त। मिनु लेंशा ब्रेप्बाक्माक्त।

27 मोपा ब्रेत्ता ब्रेत्ता बर्स निकशी योल्माक्त। मिनु फेलीक्स अर्को रागीमी याक्से बाक्त। आ पा डा हुकुम पाइब पोरसीयस फेस्तस जाक्माक्त। फेलीक्समी यहूदी आन कली ग्येरपाइक्चा, दे पावल आ मुददा मखोइक्थु, चोक्स डा चोक्स वोइश्शा गाक्माक्त।

## 25

फेस्तस आ डोंइती राप्पाइश्शो

1 फेस्तस हुकुम पाइब दुम्शा, आ सांबु नाक्ती सिजरिया रे गाक्शा, यरूसलेम ग्येतथ लमाक्त।

2 मिनु यरूसलेममी बाक्मेनु, ठेयब चढेबपुकी यहूदी आन ठेयब मुरपुकीमी गुम्थ जाक्शा, फेस्तस कली पावल आ पबंम लोत्र पामे बाक्त।

3 मार देंमा बाक्त देंशा हना “पावल कली यरूसलेम लेशशा सोइश्शा, आ मुददा कोव्रचा माल्ताक्व” दे शुश लोत्र पा पुन्मे बाक्त। मारदे हना, लांमी बाप्शा, साइक्चा, दे लोत्र पशो बाक्मा बाक्त। प्रेरित २३:१५

4 मिनु हुकुम पाइब फेस्तसमी मेको आन लोत्र नेंशा, आन पुंइशो मगेथु “पावल कली सिजरियामी चोक्स डा चोक्स वोइश्शा पिती। मुल शुश नाक्त मबाक्थु, मेरेन लेशशा लाइनुड।

5 मोपतीके अधिकार तशो इन मुर का निकशी योव्रशा, गो नु सोइक्तीने। मिनु सिजरियामी जाक्दीश्शा, मुददा कोव्रनुड। मेको मुरुमी मरिम्शो पशो बाक्त हना, दोस गुंइने चाम्सीब” दे माइक्मी बाक्त।

6 मिनु ८, १० नाक्त बाक्शा, सिजरिया लेशशा यिमाक्त। मिनु आ दीसा नाक्ती कछडी वोइश्शा, पावल कली चाक्पाइश्शा, आ डोंइती राप्पदा बाक्त।

7 मिनु आ डोंइती राप्पदानु, यरूसलेम रे जाक्शो यहूदीपुकीमी शुश दोस गेमे बाक्त। तन्न लोत्र का यो थमा बाक्ब, दे कोइने मचाप्मे बाक्त।

8 मिनु पावलमी “आंइ यहूदी आन अरेशो लोत्र का यो दूली मपड। परमप्रभु यावे खिं ग्रांया मपड। रोमी पिप सिजर कली यो मरिम्शो मदेंड” देंमाक्त।

9 फेस्तसमी यहूदी आन कली ग्येरपाइक्चा दाक्ता बाक्त। मोपतीके पावल कली “गे यरूसलेम लचा दाक्नेवे? इ मुददा मेरेन कोव्रशा गेनन, दुम्बा?” दे हिल्लो पवा बाक्त।

10 मिनु पावलमी “मदुम्ब हजुर, मारदे हना सिजर आ निसाफ पाइबपुकीमी कका आं मुददा कोव्रचा माल्नीम। यहूदी आन कली मरिम्शो मारेइ मपड, दे हजुर, गे यो तुइक्नीनी।

11 गो दूली पाइब दुम्शा, साइक्चा पुंइसीचा डा बाक्ती हना, सजाइ जाइनुड। बेक्चा यो महिंनुड। आं कली दोस गेबपुकीमी दोस गुंइने मचाप्तेक्म हना, आन गुइमी दोपा गेचा पुंइसीनुडा? सिजर पिपी कली आं मुददा कोव्रचा गेने, देंनुड” दे मदा बाक्त। प्रेरित २३:११; प्रेरित २८:१९

12 मिनु फेस्तसमी आ मुरपुकी नु पावल आ मुददा मार पचा, दो पचा, दे लोव्रसी पने थुम्शा, पावल कली “गे सिजर पिप कली इ मुददा कोव्रचा गेचा देंते। मोपतीके सिजर पिप आ बाक्तीके सोइक्वन” दे माइश्शा, कछडी पोक्शा सोइक्तीमी बाक्त।

अग्रीप्पा नु फेस्तस लोत्र पशो

13 मिनु इक्का नाक्त नोले पिप अग्रीप्पा नु बेरनीस हुकुम पाइब फेस्तस कली गुम्थ सिजरिया जाक्सा बाक्त।

14 मिनु शुश नाक्त बाक्सानु, फेस्तसमी पिप कली पावल आ पबंम “एक फेलीक्समी मुददा मखोइक्थु चोक्शा वोइश्शो मुर का बाक्ब। प्रेरित २४:२७

15 मिनु यरूसलेम लडानु, ठेयब चढेब नु यहूदी आन शेंब खाल्पापुकीमी एको मुर आ पबंम नेल्ल तुइक्पाइक्तीमी। शुश दोस गेम्तेक्म। मिनु मेको कली सजाइ गेचा, दे पुंइतेक्म।

16 गो मेको आन कली 'कछडी वोइशशा, दोस गेबपुकी नु दोस गेचा पुंडसीब कली मग्युमपाइक्थु, दोस मगुंडथु, सजाइ गेचा आंड रोमी ऐन कानुनम मगारब। दोस गेचा पुंडसीबमी एको आन देंशो थमा बाक्ब, दे मदेंम सम्म सजाइ गेचा मदुम' दे माइक्तामी। प्रेरित २२:२५

17 मिनु दोस गेबपुकी एक जाक्मा आ दीसा नाक्त कछडी वोइशशा गुम्पदुमीनु,

18 एको मुरुमी मुर साइशशो बाक्मे कों, दे मिम्शो नड। तन्न दोस गेमेनु, दोस मारेड मबा।

19 आन जिमुशो दा आन धर्म आ पर्वम कका बाक्माक्त। लोत्र का दोपा परमप्रभु कली मान पचा आ पर्वम, लोत्र का येसु माइशशो मुर आ पर्वम बाक्माक्त। यहूदीपुकीमी मेको मुर बेक्त देंबाक्तेक्म। तन्न पावलमी चहिं बेक्शो रे सेंसीशा ब्रोंडशो बाक्ब देंबाक्त।

20 मिनु गो मार पड, दो पड दुम्ती। मोपतीके गो पावल कली 'यरूसलेम लशा, मेरेन इ मुददा कोव्रचा दुम्बा?' दे हिल्लो पाता।

21 मो देंडानु, पावलमी 'अगस्टस कली आं मुददा कोव्रचा गेने। सिजर आ बाक्तीकेमी मसोइक्तीनी सम्म चोक्शा वोइय्थीनी' दे पुंडतु। मिनु गो रिम्शो पा वोइक्पाइक्ता। मिनु गेना सोइक्तु, दे लां कोव्रना कोव्रन बाक्ती" देंमाक्त।

22 मिनु अग्रीप्पामी फेस्तस कली "गो मेको मुर आ लोत्र नेंचा दाक्नुड" देंमेनु "सरकार, दीसान इन डोंइती राप्पाइक्नुड" देंमाक्त। लूका २२:८

### अग्रीप्पा आ डोंइती राप्पाइशशो

23 मिनु आ दीसा अग्रीप्पा नु बेरनीस नु सहर डा सरकार आ ठेयब मुरपुकीमी सरकारी वा फेक्शा जाक्शा, दरवारमी देल्मा बाक्त। मिनु फेस्तसमी पावल कली चाक्पाइशशा, नेल्ल आन डोंइती राप्पदा बाक्त।

24 मिनु फेस्तसमी "सरकार अग्रीप्पा, एकेर देल्शो हजुरपुकी, आं लोत्र का निक्शी नेनीने। एको इन डोंइती राप्पाइशशो मुर कोव्रडीने। यहूदी नेल्लेमी एको कली मरिम्शो मुर, दे दोस गेनीमी। यरूसलेम नु एकेर कछडी वोदमेनु 'मेको कली साइक्चा माल्ब' देंन देंन रेयके पाम्तेक्म। प्रेरित २२:२२

25 गो चहिं मो देंशो साइक्चा पुंडसीब मुर मतड। मिनु एकोमी यो रोमी पिप सिजर अगस्टस कली आं मुददा कोव्रचा गेने, दे पुंडतु। मिनु सिजर आ बाक्तीके सोइक्तु देंती।

26 तन्न सिजर कली एको मुर आ पर्वम मार लोत्र ब्रेक्चा डा? आ दोस गुंडेने मचबु। मोपतीके मुलाक्ती अग्रीप्पा सरकार नु हजुर नेल्ल इन डोंइती राप्पाइक्ता। गो नेल्लेमी हिल्लो हिक्सी पा दोस गुंडताक्य हना, सिजर पिप कली ब्रेक्शा सोइक्ने चाप्नुड।

27 मारदे हना ओं पा ग्याइशशा फ्रेंशो मुर कली दोस का यो मगुंडथु, सिजर पिप बाक्तीके सोइक्ताक्ड हना, मुने दोक्सीब, दे मिम्ताक्ड" देंमाक्त।

## 26

### पावलमी सांकछी गेशो

1 मिनु पिप अग्रीप्पामी पावल कली "इ लोत्र मार बाक्मे, मेको देनो" दे लोत्र पचा गेवा बाक्त। मिनु पावलमी गुड का पोक्शा,

2 "अग्रीप्पा सरकार, यहूदीपुकीमी शुश दोस गेतीमी। मिनु मेको दोस आ पर्वम हजुर नु लोत्र पचा तडानु, गो ग्येरसाक्यी।

3 मारदे हना यहूदी आन पतीके नु गारचा डा मगारचा डा लोत्र नेल्ल हजुरमी, रिम्शो पा तुइशशो बाक्नीनी। लोत्र शुश बाक्ब। मोपतीके मन्नीथु, हजुरमी, नेंशा गेचा नड।

4 गो आल रे यरूसलेममी बाक्शा, यहूदी नेल्लेमी आं कली तुइशशो बाक्नीमी।

5 मेकोपुकी गो शुश धर्म पाइब फरिसी का बाक्ती, दे डोंइती रे तुइक्नीमी। मेकोपुकीमी गो फरिसी का बाक्ती, दे सांकछी दुम्ने चाप्नीम। प्रेरित २३:६; फिलिप्पी ३:५

6 परमप्रभु यावेमी आंड किकी पिपी आन कली लोत्र गेशो बाक्माक्त। मिनु मेको लोत्र आ पर्वम दोस ताइब दुम्ती। प्रेरित २८:२०

7 मिनु मेको लोत्र नेल्ल खाप्ब, दे आंइ १२ थर डा यहूदी नेल्लेमी थमा सुइशशा, परमप्रभु यावे कली नाकदो नाक्त ठेयब सेल्शा बाक्नीकी। मेको आन थमा सुइशशा खोदेशो पा गो यो थमा सुइक्ब का नड। मेको थमा सुइशशा आ पबंम आं कली दोस गेतीमी, अग्रीप्पा सरकार। प्रेरित २४:१५

8 परमप्रभु यावेमी बेक्शा लशो आन कली सेंपाइशशा गेना हना यो ब्रोंइशा बाक्चा गेब देशो लोत्र थमा सुइक्तीक लोत्र ममाइ डा? हजुरपुकी, एको लोत्र मारदे थमा सुइक्ने मचाप्नीनी? प्रेरित २३:८

9 साइ गो दोपा यो मेको नासरथ डा येसु आ नें क्याम्चा, दे मिश्शो नड। प्रेरित ९:१-२९; प्रेरित २२:३-२१

10 यरूसलेममी मेको आ नें क्याम्तीक गेय पा गाक्ती। ठेयब चढेबपुकी रे अधिकार तशा, थमा सुइक्ब शुश आन कली जेल्खानमी चोक्पाइक्तामी। मोशो ला ममाइ, थमा सुइक्ब आन कली सदमेनु, गोमी 'रिश्शो पाइतीनी' देंती।

11 थमा सुइक्ब आन कली आंइ ग्रुम्तीक खिं खिंमी कीशा चाक्शा तुप्शा, येसु आ नें मरिश्शो सेल्पाइशशा, मुल डा मेरे मेको लां मखोइक्नीकी देंपाइक्तामी। नेल्ल आन कली साइक्पाइक्नुडमी, दे जोंब बोक्शा गाक्ती। यरूसलेममी ला ममाइ, डोन डोन रागी लशा, खेदा पा श्येत गेतामी।

12 मोपा श्येत गेना गेन गाक्डानु, काबु ठेयब चढेब आन अधिकार तशा, वारच नु गारशा, दमस्कस शहर गे लाइतक।

13 अग्रीप्पा सरकार हजुर, मुल नोफा दाइशशा नेनीन। नाक्ती उडक्थ दुम्मेनु गाक्कानु, मार दुम्त देशा हना, नां पशो क्येडा छेडछेड सरीड रे यिशा, आंइ एर ऑथ कोंइताक्व।

14 मोदेशो छेडछेड दुम्शो तशा, गो नेल्ल दिड दाड गोल्लक। मिनु हिबू लोत्र पा आं नें थिशा 'सावल, सावल आं कली मारदे खेदा पा श्येत गेयी? गे आंमा श्येत जाइनेवे' दे लोत्र पशो नेता।

15 मिनु गोमी 'प्रभु, सु ननी' दे हिल्लो पडानु 'इ खेदा पशो येसु नड।

16 मुल छुल बोक्को। इ कली योत्रशा आं लोत्र नेंपाइक्ब सेल्लन। मुलाक्त इ कली तपांइसाक्यी। मुल डा मेरे इ कली तपांइसीन सीन बाक्नुड। मिनु मुलाक्ती तशो नेंशो खोदेशो पा नोले यो नेंनेवे, ताइनेवे। मेको लोत्र नेल्ल नेंपाइक्ब सेल्लन।

17 आं लोत्र शेंथ सोइक्नन। आं लोत्र नेंपा गाक्डेनु, यहूदी नु अर्को रागी डा मुर आन गुइ रे प्रोंइनुड।

18 मारदे हना मेकोपुकी मिक्च ताइब दुम्मल। छिडछिडमी बाक्शोपुकी छेडछेडमी बाक्चा तामेक्ल। सैतान आ अधिकारमी बाक्शोपुकी परमप्रभु यावे आ अधिकारमी बाक्ब दुम्मल। मेको आन पाप क्याम्चा पुंडसीशा, आं कली थमा सुइशशोमी आं मुरपुकी नु काथा दुम्शा, आं मुर दुम्मल' देशो नेता। प्रेरित २०:३२

19 अग्रीप्पा सरकार, परमप्रभुमी कोंइशो कोंइतीक तशा, आ लोत्र नेंशा, मेको लोत्र टीब दुम्ती। गलाती १:१६

20 दमस्कसमी जाक्दीशशा, लोत्र शेंचा गोत्रता। मिनु यरूसलेममी, यहूदीया रागी हिरशा गाक्ती। अर्को रागी डा मुर आन रागी रागी हिरशा गाक्ती। मोपा गाक्डानु, मुर आन कली 'पाप पचा प्रोंइशा, इन थुं परमप्रभु यावे गे हिरदीने। मिनु परमप्रभु कली शिरशो गेय पा इन थुं थमा पा हिरशो बाक्त, दे कोंइदीने' दे शेंना शेंन गाक्ती।

21 मोदेशो शेंशो आ पबंम यहूदीपुकीमी परमप्रभु यावे आ खिंमी ग्याइशशा दोस गेशा, साइक्चा पुंडसीब, दे साइक्चा माल्तीमी। प्रेरित २१:३०-३१

22 खेदा पा शुश श्येत गेयीमीनु, परमप्रभु यावेमी श्येत फाल्तीक सक्ति गेती। मोपतीके गो ठेयब थुं पा इन डोंइती राप्शा, ठेयब मुर आइक्च मुर नेल्ल इन कली आं लोत्र मोसा नु परमप्रभु यावे आ लोत्र पाइब आन लोत्र नु गारब, दे रूपीन। लूका २४:४४-४७

23 मेकोपुकीमी 'ख्रीस्तम श्येत जचा माल्ब' दे ब्रेक्शो बाक्शो बाक्तेक्म। मिनु बेक्शो रे सेंसीशा ब्रोंइशा बाक्ब। बेक्शो रे सेंचा पुंडसीबपुकीमी नेल्ल आन क्येडा डोंइती मेको येसु ख्रीस्त बेक्शो रे सेंसाक्व। मिनु मोपा यहूदी नु अर्को रागी डा मुर नेल्ल आन कली छेडछेड दुम्शो खोदेशो पा आन लां कोंइब दुम्त" दे पावलमी सांकछी गेशा शेंदीमी बाक्त। १कोरिन्थी १५:२०

24 मोपा लोत्र पना पन लदानु, हुकुम पाइब फेस्तसमी आ लोत्र खोइशशा “पावल, गे बौला, शुश शेंसीशा जोक्ब तुइक्ब दुम्शा, निप्स ग्यशो कका दुमे बाक्त” दे ठेयब सेंदा पा देंमेनु,

25 पावलमी “माननीय फेस्तस हजुर, गो बौला मनड। गो थमा पा आं तुइशशो रिम्शो लोत्र पाता।

26 अग्रीप्पा सरकारमी आं देशो लोत्र नेल्ल रुप्शो बाक्ब, दे तुइक्ताक्ड। मोपतीके आं ग्राकी लोकशा लोत्र पाता। सरकारमी ख्रीस्त आ पबर्म ब्रशो शुश लोत्र नेंशा रुप्शो बाक्माक्त। ख्रीस्त आ पबर्म दुम्शो चहिं का निक्शीमी ला तुइशशो मनमी। शुशेमी तुइशशो बाक्नीमी। यूहन्ना १८:२०

27 अग्रीप्पा सरकार, परमप्रभु यावे आ लोत्र पाइब आन लोत्र थमा सुइक्नुड मदेतीनी हना यो, इन थुंमी थमा सुइक्नीनी, दे तुइक्ताक्ड” देंमाक्त।

28 मिनु पिप अग्रीप्पामी “लोत्र का निक्शीमी गो ख्रीस्त कली थमा सुइक्ब दुम्ती” देंमेनु,

29 पावलमी “लोत्र का निक्शी पशा हना यो, शुश पशा हना यो, दोपा यो आं खोदेशो दुमीन, दे मिन्नुड। सरकार ला ममाइ, एकेर खुम्सीशा बाक्ब नेल्ल आं खोदेशो दुम्मल। तन्न ग्याइशशा साडलोम पाइशशा जेल्खानमी चोक्चा चहिं मपुंडसमल, दे पुंडनुड” देंमाक्त।

30 मो देंमेनु, पिप छुल बोक्शा गाक्माक्त। मिनु हुकुम पाइब, बेरनीस नु मेकेर बाक्ब नेल्ल छुल छाल बोक्शा गाक्मा बाक्त।

31 मिनु गाक्मानु “एको मुर रिम्शो बाक्माक्त, जेल्खानमी चोक्चा डा, साइक्चा पुंडसीचा डा मबा” देंमुशा गाक्मा बाक्त।

32 मिनु पिप अग्रीप्पामी हुकुम पाइब फेस्तस कली “एको मुरुमी सिजर कली आं मुददा कोत्रचा गेने, दे मपुंडशो हना, प्रोइशा सोइक्ने चाप्स वा” देंमाक्त। प्रेरित २५:११

## 27

### पावल कली रोम सोइशशो

1 मिनु पावल कली सिजर बाक्तीके इटाली सोइक्ची जाक्माक्त। मिनु पावल नु अरु चोक्चा पुंडसीशो का निक्शी आन कली अगस्टस पल्टन डा युलीयस नें पाइशशो कप्तान आ गुडमी जिम्मा गेमे बाक्त। मिनु गो पावल आ वारच का निक्शी यो सासाक्क। प्रेरित २५:१२

2 सिजरिया रे लशा, अद्रामीत्तीयम जाक्दीशशा, एसीया लाइब जहाज डोइशशा लाइतक। मासीडोनीया डा थिस्सलोनीकी रे जाक्शो अरीस्तारकस पावल आ वारच का यो गोपुकी नु लत। प्रेरित २०:४

3 मेकेर रे लशा, आ दीसा नाक्त सीदोन जाक्दीत्तक। मेकेर जाक्दीक्कानु, कप्तान युलीयसमी पावल कली रिम्शो पा आ वारच आन कली ग्रुम्थ लचा गेप्तु। मिनु मेकोपुकीमी पावल कली रिम्शो पाप्तेक्म। प्रेरित २४:२३; प्रेरित २८:१६

4 मिनु लेशशा जाक्शा, जहाज डोइशशा, लाइतक। मिनु साइप्रस आ नेक्नेक्था जाक्दीत्तक। मारदे हना फश गिवारमी आइदी लां लचा मगेव।

5 मिनु सिलीसीया नु पाम्फीलीया रागी आस दी डा लां पा लिसीया रागी डा मिरा सहरमी जाक्दीशशा तौइसाक्क।

6 मिनु कप्तानमी अलेकजेन्ट्रीया रे जाक्शो इटाली लाइब जहाज थिशशा, नेल्ल आंइ कली मेकोमी डोइक्पाइक्तीकी।

7 मिनु लकानु, शुश फश गिवार पा तेक्तीके श्येत पा ओंखां ओंखां लशा, वनीदोस रागी आ नेक्था जाक्दीत्तक। फश गिवार मलीथु, आइक्था रे पा साल्मोने नु क्रेट टापु आस नेक्नेक्था लां रे पा लाइतक।

8 मिनु श्येत पा क्रेट टापु डा जहाज नाइक्तीके जाक्दीत्तक। मेको जहाज नाइक्तीके दारशो जहाज नाइक्तीके नें वोइशशो बाक्त। मेको लासेया सहर आ नेक्था सेल्शो बाक्त।

9 फश गिवारमी तेक्तीके क्रेटमी जाक्दीत्तया यो शुश नाक्त लाक्शा, माइजा बाक्तीक लाइ यो लाक्तु। में डा मेरे जहाज चलेचा हिंचा पाइब। २कोरिन्थी ११:२५-२६; लेवी १६:२९

10 मोपतीके पावलमी जहाज चलेब आन कली “हजुरपुकी, एक डा लाक्शा लाइतय हना, फश गिवारमी योल्ब। जहाज नु जहाजमी कुर पशो थोवक नेल्ल जाम्ब, गोपुकी यो ब्रोंडचा मताइनय दे तुइशो बाक्नुड। मोपतीके मलचा” दैत।

11 कप्तानमी चहिं पावल आ देशो लोव्र थमा मसुइक्थु, जहाज आ होवप नु चलेब आन लोव्र नेंतु।

12 मेकोपुकीमी “हिउंदमी एकेर बाक्चा मदुम्ब” दैतेक्म। मो देंमानु, अरुमी यो “मो हना फोनीकस गे लचा” दैतेक्म। फोनीकसमी जाक्दीन्ने चाप्नय। मिनु मेकेरेन हिउंद लाक्चा रिम्शो दुम्ब दैतीके लाइतक। फोनीकस चहिं क्रेट टापु डा नेल्ल क्येडा पच्छिममी बाक्ब।

13 मिनु लना लन बाक्कानु, दक्खिन रे इचीची फश पवानु, मुल रिम्शो चलेसीब देशा, जहाज तिकतीके क्युक्शा वोइशशा, क्रेट आ नेक्था लां लाइतक।

14 मिनु में चोटीन टापु रे फश गिवार यिशा सुम्तु। मोदेशो फश गिवार कली उत्तर पूर्व डा फश, दे नें वोइशशो बाक्ब।

15 मोपा सुम्कीनु, जहाज लतीक लां लाइक्ने मचबेम। मोपतीके फश गिवारमी तेइ योल्दल, दे चलेचा प्रोंइतेक्म।

16 मिनु कौदा माइशशो टापु आ ता जाक्दीशशा, टापुमी फश गिवार इचीची फारताक्व। मिनु शुश श्येत पा इम्ची डोंगा ब्वाक्कुम तोक्शा, मेको डोंगा रे गेय पा जहाज कली ठेयब ठेयब डोरीम फ्रेंशा बोल्यो सेल्लेक्म।

17 मिनु सिरतीस माइशशो बाल्वा बाक्तीकेमी जहाज मओव्रदील, दे जहाज कीब वा फ्रुप्शा, ओंखां ओंखां पा जहाज लचा गेम्तेक्म।

18 फश गिवार काइ यो मनाइक्थु पना पन बाक्त। मिनु आ दीसा जहाज सोपी दुम्ल, दे जहाजमी कुर पशो भारी शोल्ला ताइक्ताक्मे।

19 मिनु आ नित्थ नाक्ती जहाज कली माल्लो थोवक यो ताइक्ताक्मे। मिनु शुश नाक्ती सम्म फश गिवार पना पन नां तास्ला सोरुल मारेइ मतांइसे।

20 मिनु गोपुकीमी ब्रोंडचा मतांइसीबाक्त, बेक्सीबाक्त दैतक।

21 गो शुश नाक्ती सम्म मारेइ मजथु बाक्तक। मिनु पावलमी जहाज चलेब आन डोंइती राप्शा “हजुरपुकी, साबेर आं देशो लोव्र टिचा माल्लो ननी। गोमी क्रेट मलचा दैती। गेपुकीमी आं देशो टिशो ननी हना, जहाजमी कुर पशो नु जहाज डा थोवक मारेइ ताइक्चा ममाल्द वा। गो यो ओदेशो श्येत मजय वा।

22 मुल मोदेशो दुम्त हना यो, इन थुं बारपा बाक्कीने। मारदे हना सुइ यो मबेक्नय। जहाज ला जाम्शा लाइब, दे तुइक्ताक्ड।

23 दोपा तुइक्ताक्ड देशा हना, गो परमप्रभु यावे कली ठेयब सेल्लुड, मेको आ मुर नड। परमप्रभु यावेमी आ स्वर्ग डा गेय पाइब का कली सोइशशा, सिनाक्दो आं डोंइती राप्शो ताता।

24 मेकोमी ‘पावल, महिनो। गे सिसर पिप आ डोंइती राप्चा माल्लेवे। ब्वाक्कुम गुम्शा मबेक्नेवे। परमप्रभु यावेमी गे नु बाक्ब नेल्ल यो मबेक्थु, इन कली गेप्टु’ दे माइक्ती। प्रेरित २३:११

25 मोपतीके इन थुं बार पा बाक्कीन, हजुरपुकी। परमप्रभुमी आ देशो का यो मप्रोंइथु, नेल्ल खाप्ब, दे थमा सुइक्नुड। प्रेरित २८:१

26 मुल जहाज टापु जाक्दीशशा, खा दिक्ब, दे तुइक्नुड” दे माइक्तीमी।

27 मिनु १४ नाक्त मोपा योल्स डा योल्स पा अद्रीया समुन्द्र लाक्शा, काबु नाक्दो जहाज चलेबपुकीमी तेक कका डा रागी तांइसीशो खोदेशो ताम्तेक्म।

28 मिनु ब्वाक्कु पुक्तीके खुम्शा पुक्गमेनु, २० ओरग्या बाक्त। मिनु इच्ची नोले बारशा लशा लेंशा पुक्गमेनु, १५ ओरग्या बाक्त। ओरग्या का १,८५ मिटर बाक्ब।

29 मिनु सेरथे फुल्लुम थोक्सीशा, जहाज बिग्रेसीब देशा जहाज तिकतीके ४ ओटा तोक्शा, जहाज कली तिकशा नाइक्पाइक्तेक्म। मिनु गेना नां सोव्रबा, दे रिम्शा बाक्तक।

30 नां मसोव्रथु जहाजम गेय पाइबपुकीमी जहाज तिकतीके तोक्खु पा आइक्च डोंगा तोक्शा, जहाज प्रोंइशा प्रोक्चा माल्ले बाक्त।

- 31 मिनु पावलमी मेको आन मो पचशो तुइशशा, कप्तान कली “मेकोपुकी प्रोक्शा गाक्तेकम हना, गो नेल्ल गुम्शा बेक्नय” दे माइक्तु।
- 32 मिनु सिपाहीपुकीमी डोंगा डा डोरी खोइशशा तोक्शा, मेको आन कली प्रोक्चा मगेम।
- 33 मिनु नां सोव्रमेनु पावलमी नेल्ल आन कली “मजशो, मइप्शो मुलाक्त १४ नाक्त दुम्त।
- 34 मोपतीके मुल इच्ची खोइ जय। मिनु बोल ताइनय। महिनीन। मारदे हना सुइ के चां का यो महेम्ब” दे नेल्ल आंइ थुं बारपाइक्तु। मती १०:३०
- 35 मिनु शोब्ले आ गुइमी शेशा, प्रभु कली “गे रिम्शो पाइब बाक्नीनी” देंशा, जिक्शा नेल्ल आंइ कली योक्तु।
- 36 मिनु नेल्ल आंइ थुं बारशा जाइतक।
- 37 मेको जहाजमी २७६ जना मुर बाक्शो नकी।
- 38 मिनु रूथ्री जशा, जहाजमी कुर पशो चेरब ताइक्ताकम।
- 39 मिनु नां सोव्रमेनु, मेको डोंइती तांइसीशो रागी मार रागी बाक्मे, दे मतुइक्तक। बाल्वा ला तांइसाक्व।
- 40 मेको बाल्वा बाक्तीके चाक्दीशशा, जहाज तिक्तीके खोइशशा, ब्वाक्कुमी प्रोंइतेकम। मिनु चलेतीके आ डोरी प्राक्शा, वा क्युकशा वोइशशा, फशेमी जहाज कली गाक्पा बाल्वा गे लाइक्तेकम।
- 41 मो पामेनु, जहाज बाल्वामी ओव्रदीशशा, आ शोव्र युक्साक्व। आ मीलु चहिं ब्वाक्कुम आप्शा जिक्त।
- 42 एको चोक्सीशा लाइशशोपुकी प्रोक्नीमी कोर में, दे हिंशा, सिपाहीपुकीमी मेको आन कली प्रोक्चा मगेथु साइक्चा, दे मिम्शो बाक्मा बाक्त।
- 43 कप्तानमी चहिं “पावल कली मसाइक्थु ब्रोंइचा गेचा” दे आ थुं फ्रेंशो बाक्माक्त। मोपतीके सुइ कली साइक्चा मगेव। दोम्ली ग्यारस जोक्ब आन कली दोम्ली ग्यारशा रागीमी यूडीन, दे सोइक्ताक्मी।
- 44 दोम्ली ग्यारस मजोक्बपुकीमी चहिं जहाज डा शी फलेक ग्याइशशा डोइशशा रागीमी गूमल देंत। मोपा सुइ मगुम्थु नेल्ल ब्रोंइशा रागीमी गूतक। प्रेरित २७:२२-२५

## 28

### माल्टाम बाक्शो

- 1 मेको रागीमी यूकानु, माल्टा नें पाइशशो टापु बाक्माक्त, दे तुइक्ताक्क।
- 2 मेको टापुमी बाक्बपुकीमी आंइ कली तशा, शिशो पा शुश रिम्शो पा वारच पाम्तेकम। मेकेर थम ग्यू पा रेड यित। मोपतीके मेकोपुकीमी मी मुइशशा थेरपाइक्तीकी। २कोरिन्थी ११:२७
- 3 मी थेरना थेरन बाक्कानु, पावलमी एर ओंथ डा शी खुप्शा चाक्शा चोवानु, मीम होशा यूशो बुस्स कामी आ गुइमी गिल्शा कोक्तु।
- 4 टापुमी बाक्बपुकीमी पावल आ गुइ बुस्सुम गिल्शो तशा “एको मुर मुर साइक्ब बाक्माक्त। समुन्द्रमी फश गिवार पा गुम्शा हेररा बेक्शा यो ब्रोंइशा, रागीमी यूशा यो बुस्सुमी कोक्शा बेक्ब दुम्त” देंमुन्तेकम।
- 5 पावलमी आ गुइ थुर थुर पा बुस्स कली मीम हुम्ताक्व। मिनु आ कली मारेइ मदुम। मर्कूस १६:१८
- 6 मुरपुकीमी पावल कली कोव्रस डा कोव्रस पाम्तेकम। मारदे हना बुस्सुमी कोक्शो मुर इच्ची होम्शा बेक्ब, दे मिम्शो बाक्मा बाक्म। मिनु कोव्रस डा कोव्रस बाक्मानु, मारेइ मदुम। मोपतीके आन थुं हिरशा “मुर साइक्ब मुर ममाइ, देवता कका बाक्माक्त, है” देंमुन्तेकम। प्रेरित १४:११

### ठेयब मुर आ आफ सापाइशशो

- 7 मेको टापु डा ठेयब मुर आ नें पुब्लीयस बाक्माक्त। आंइ जाक्दीत्तीके आ नेक्था पुब्लीयस आ रू, खिं बाक्त। मिनु पुब्लीयसमी आंइ कली गुम्शा, आ खिं लाइशशा, नाक्त सां सम्म बास जचा तूचा गेशा रिम्शो पाइक्तीकी।

8 पुब्लीयस आ खिंमी बास बाक्कानु, आ आफ ख्युर पा जरो पा रोइ पशो बाक्त। मिनु पावलमी रोइ पाइब कली गुमथ लशा, आ गुइ मेको तारी वोइशशा, प्रार्थना पा सापाइक्तु।

9 मोपा सापाइशो तशा, टापु डा रोइ पशो मुरपुकी जाक्शा, आन रोइ सापाइसाक्म।

10 मिनु टापु डा मुर नेल्लेमी ग्येरसीशा, आंइ कली मार मार चाक्शा गेम्तेक्म। गाक्कानु लांमी जचा कली लाम्जी कुम्ज सेल्शा कुरपा सोइक्ताक्म।

### रोम जाक्दीशो

11 मेको टापुमी महिना सां सम्म बाक्तक। अलेकजेन्द्रीया रे जाक्शो कस्तोर नु पोल्लुक्स माइशो जौले आस नें पाइशो जहाज माल्टामी हिउंदमी बाक्बाक्माक्त। मिनु हिउंद लाक्शा, मेको जहाज डोइशशा गे लाइतक।

12 मिनु सिराकुसमी जाक्दीशशा, नाक्त सां सम्म बाक्तक।

13 मेकेर रे लशा इच्छी हेरशा, रेगीयम जाक्दीत्तक। मिनु आ दीसा दक्खिन रे फश पशोमी नाक्त निक्शीमी पुटेओलीमी जाक्दीत्तक।

14 मेकेर जाक्दीशशा, जहाज रे तोइशशा, सहर लाइतक। मिनु थमा सुइक्ब लोकब आन कली गुम्कानु, मेकोपुकीमी “बाक्कीन, बाक्कीन” देंतीके ७ नाक्त सम्म बाक्तक। मिनु रोम सहर गे लाइतक।

15 रोम सहरमी बाक्ब थमा सुइक्ब लोकब ते गुमथ जाक्चाक्तेक्म देशो नेंशा, सां-पाटी नु अप्पीयस बजारमी गुमथ जाक्तेक्म। पावलमी मेको थमा सुइक्ब आन कली तशा, आ थुं बारशा, परमप्रभु यावे कली “गे रिम्शो पाइब बाक्नीनी” दे ठेयब सेल्लु।

16 मिनु रोम सहरमी जाक्दीत्तक। जाक्दीशशो रे पावल ते ते बाक्चा दाक्ता, मेक मेक बाक्चा गेम्तेक्म। आ कली कोव्रब सिपाही का वोइक्तेक्म। प्रेरित २७:३

### रोममी यहूदी आन कली गुम्शो

17 रोम सहरम जाक्दीशशो आ सांबु नाक्ती पावलमी रोममी बाक्ब यहूदी आन ठेयब मुर ब्रेशशा खुप्ताक्मी। मिनु मेको आन कली “आं लोकबपुकी, आं लोव्र का निक्शी नेनीन। इं यहूदी नु इं किकी पिपी आन पतीके पना पन बाक्ती हना यो, यरूसलेममी बाक्ब लोकबपुकीमी आं कली दोस गेशा ग्याइशशा, रोमी सरकार आन गुइमी गेतीमी। प्रेरित २३:१

18 मिनु रोमी निसाफ पाइबपुकीमी हिल्लो हिकसी पशा डा मिन, आं कली प्रोइचा देंतेक्म। मारदे हना साइक्चा डा सजाइ गेचा पुंइसीब मारेइ दोस गुंइने मचबेम।

19 यहूदी लोकबपुकीमी प्रोइचा मदुम्ब देंना देंन बाक्मानु, गोमी सिजर कली आं मुददा कोव्रचा गेने, दे पुंइता। पिप आ डोइती इं यहूदी सुइ आन कली मारेइ दोस मगेनुडमी। प्रेरित २५:११

20 इन कली एको लोव्र नेल्ल रूपपाइक्थ ब्रेशशा खुप्ताक्नीं। आं दोस चहिं मार बाक्ब देशा हना, इं इस्राएलीपुकीमी परमप्रभु यावेमी पाप रे प्रोइब ख्रीस्त कली रागीमी सोइशशो देशो लोव्र थमा सुइशशो आ पर्बम साडलो पाइक्चा पुंइसाक्ड” दे माइक्तीमी। प्रेरित २६:६-७

21 मिनु मेकोपुकीमी पावल आ लोव्र नेंशा “इ पर्बम यहूदीया रे लोव्र, चिठी का यो मजा। मेक रे एक जाक्शो लोकब सुइमी इ पर्बम मरिम्शो लोव्र पा दोस मगेम।

22 गोपुकीमी एको नक थमा सुइक्तीके आ पर्बम चहिं लोव्र नेंतक। मेको लोव्र तेक तेक ब्रामे, मेक मेक जिचा पोक्मे बाक्त, दे तुइशशो नकी। मोदेशो दुम्त हना यो, गो इ मिम्शो तुइक्चा दाक्नीकी, लेंशा गुम्चा” दे लोव्रसी थुम्शा गाक्तेक्म। प्रेरित २४:१४; लूका २:३४

### यहूदीपुकीमी ख्रीस्त आ लोव्र नेंशो

23 मिनु गुम्ची नाक्ती पावल आ बाक्तीकेमी शुश मुर खुम्साक्म। मिनु सुनी रे नाक्दो सम्म पावलमी मेको आन कली एको लोव्र नेल्ल रूपपाइक्तीमी। मोसा आ अरेशो नु परमप्रभु यावे आ लोव्र पाइब आन ब्रेक्शो लोव्र रे शेंशा, परमप्रभु यावे आ सोइशशो ख्रीस्त चहिं येसु बाक्ब देशा, परमप्रभु यावे आ राज्य डा लोव्र शेंताक्व।

24 आ लोत्र नेंबपुकी का निक्शीमी आ देंशो थमा बाक्त, दे थमा सुइक्तेकम। का निक्शीमी चहिं थमा मसुदेम।

25 थमा सुइक्ब नु थमा मसुइक्ब दुम्शा ब्रातेकम। मिनु गाक्चामेनु, पावलमी थमा मसुइक्ब आन कली “परमप्रभु यावे आ सोक्तीम परमप्रभु यावे आ लोत्र पाइब यसैया इन किकी पिपी आन पर्वम ठीक लोत्र पशो बाक्त।

26 मेकोमी ‘मेको मुर आन कली गुम्थ लावो। मेको आन कली “नेंचा दा नेंनीन। तन्न गे यो मरुप्नीनी। कोव्रचा दा कोव्रनीन। तन्न म्ताइनीनी।

27 मेको मुर आन थुं ग्याम्शो बाक्नीम। आन नोफा थांइशो बाक्नीम। आन मिक्च क्रिप्शो बाक्नीम। मोदेंशो मपशो नम हना, आन मिक्चीमी ताम वा, आन नोफाम नेंनेम वा, थुंमी रुबेम वा, आं गे लेम वा, गो सापदुमी वा” दे ब्रेक्शो बाक्त’। यसैया ६:९-१०

28 परमप्रभु यावेमी अर्को रागी डा मुर आन, कली आ लोत्र नेंपाइक्ब। मेकोपुकीमी नोफा दाइशशा नेंशा टीनीम, दे तुइक्तीन” दे माइक्तीमी।

29 पावलमी मेको आन कली मोदेंशो लोत्र पवानु, यहूदी लाम्तेकम। का निक्शीमी “आ लोत्र थमा बाक्ब” देंतेकम, का निक्शीमी “थमा ममाइ” देंतेकम। मिनु हेरर हेररा जिशा बोक्तेकम। प्रेरित १३:४६

### पावलमी सांकछी गेचा तशो

30 मिनु पावल बर्स निक्शी सम्म मुर आ खिंमी क्येट थाप्शा बाक्मेनु, शुश मुर पावल कली गुम्थ जाक्मा बाक्त। मेको गुम्थ जाक्ब आन कली “निस्सीने, बाक्कीने, लोत्रसी पय” दे शुश लोत्र शेंबाक्माक्त।

31 शेंचा मदुम्ब, दे सुइमी मदेबाक्मा बाक्त। मिनु ठेयब थुं पा परमप्रभु यावे आ राज्य नु प्रभु येसु ख्रीस्त आ पर्वम शेंना शेंन बाक्माक्त। एफिसी ६:२०



## रोमी

**ब्रेक्ब मुर:** एको चिठी पावलम रोम सहर डा थमा सुइक्ब आन कली ब्रेक्शो बाक्ब।

**गेना ब्रेक्शो:** पावलम रोम सहर डा थमा सुइक्ब आन कली गुम्या दाक्शो बाक्त। कोरिन्थ सहरम बाक्शा, एको चिठी ब्रेक्शो बाक्त। मेको यरूसलेमम ग्याइक्चा पुंडसीशो ५८ ए. डी.म पेन्तीकोस क्येडा डोंइती दुम्लो बाक्त।

**मार ब्रेक्शो:**

१. डोंइती डा लोव्र रोमी १:१-१७
२. मुर नेल्लेम मरिम्शो पशो बाक्तेक्म। रोमी १:१८ - रोमी ३:२०
३. येसु ख्रीस्तमी थमा सुइक्ब आन कली परमप्रभु आ डोंइती ठीक सेल्ब। रोमी ३:२१ - रोमी ५:२१
४. थमा सुइक्तीकेम ग्राशो। रोमी ६:- ८:-
५. यहूदी नु रागी रागी डा मुर। रोमी ९:- ११:-
६. ठीक पाइब थमा सुइक्ब। रोमी १२:१ - १५:१३
७. नोले डा लोव्र। रोमी १५:१४ - १६:२७

**डोंइती डा लोव्र**

1 गो ख्रीस्त येसु आ वाइल पावल नड। आ सोइश्शो दुम्लो, परमप्रभु यावेमी आ ग्येरपाइक्ब लोव्र तुइक्पाइक्चा कली योव्रचा पुंडसाक्यी। प्रेरित ९:१५; प्रेरित १३:२; गलाती १:१५

2 मेको लोव्र साइ नेसी रे परमप्रभु यावे आ लोव्र पाइबपुकीमी ब्रेक्शो बाक्मा बाक्त। रोमी १६:२५-२६; लूका १:७०; तीतस १:२

3 येसु ख्रीस्त पिप दाऊद आ थरमी मुर दुम्लो, जरमेशो बाक्माक्त। रोमी ९:५; २सामुएल ७:१२; मती २२:४२

4 तन्न मुर ला ममाइ। परमप्रभु यावे आ तौ यो बाक्ब। “आं तौ बाक्ब” दे तुइक्पाइक्चा कली परमप्रभु यावेमी आ सोक्त आ सक्ति येसु ख्रीस्त कली बेक्शो रे सेंताक्व। मती २८:१८; प्रेरित १३:३३

5 मिनु येसु ख्रीस्तमी नेल्ल अर्को रागी डा मुर आन कली आ लोव्र तुइक्पाइक्चा कली शिशी पा योव्रती। मुरपुकीमी येसु ख्रीस्त आ लोव्र टीमेक्ल देंशा, शेंथ सोइक्ताक्यी। रोमी १५:१८; प्रेरित २६:१६-१८; गलाती २,७,९

6 इन कली यो येसु ख्रीस्तमी “आं मुर दुम्लल” दे योव्रतु।

7 गे योव्रचा पुंडसीशा, परमप्रभु यावे आ दाक्शो रोम सहरम बाक्बपुकी इन कली एको लोव्र ब्रेक्ताक्ड। इं आफ परमप्रभु यावे नु प्रभु येसु ख्रीस्तम इन कली शिशी पा इन थुं नाइश्शा बाक्चा गेम्सेक्ल। १कोरिन्थी १:२; २कोरिन्थी १:१-२; एफिसी १:१; गन्ती ६:२४-२६

**रोमी आन कली गुम्या दाक्शो**

8 गेपुकीमी येसु ख्रीस्त कली थमा सुइश्शो नेल्लेमी तुइक्नीम। मिनु गो आं परमप्रभु यावे कली “रोम सहरम बाक्ब आन कली रिम्शो पाइतीनी” दे ठेयब सेल्लुड। रोमी १६:१९

9 मिनु गो परमप्रभु यावे आ सांक्छी बाक्ब। गो गेय पना पान नु आ तौ आ ग्येरपाइक्ब लोव्र शेंना शेंन बाक्नड। गो इन पर्वम परमप्रभु यावे कली पुंडना पुंडन बाक्नुड, मेको थमा बाक्ब। एफिसी १:१६

10 मिनु परमप्रभु यावे आ दाक्तीकेमी “गो रोम सहरम बाक्ब थमा सुइक्ब आन कली रीब पा गुम्पाइय्थीनी” दे यो पुंडना पुंडन बाक्नुड। रोमी १५:२३,३२; प्रेरित १९:२१

11 मारदे हना इन थमा सुइक्तीक थुं बारपा बोल्यो सेलु, दे इन कली गुम गुम दाक्ती। रोमी १५:२९

12 मिनु मोपा आं थमा सुइश्शोमी इन कली नु इन थमा सुइश्शोमी आं कली नेल्ल इं थुं बारपदल, दे मिन्ताक्ड। २पत्रुस १:१

13 आं लोकबपुकी, गो शुश खेयप “रोम सहर पिड” देंती, तन्न मुल सम्म पिने मचबु। अर्को रागी डा मुर आन कली येसु खीस्त आ लोत्र शेंना शेंन गाक्ती। मेको लोत्र शेंदुनु, शुशेम थमा सुडक्तेकम। गेपुकी नु यो बाक्शा, येसु खीस्त आ लोत्र पचा दाक्नुड। मो पडानु, का निक्शी थमा मसुडक्बमी यो थमा सुदमेकल, थमा सुडक्ब आन थुं बारल, दे मिन्नुड।

14 मारदे हना ग्रीक नु अर्को रागी डा, जोक्ब नु मजोक्ब, पढेशो मपढेशो, नेल्ल आन कली येसु खीस्त आ लोत्र शेंचान माल्नुड।

15 मोपतीके रोमम बाक्ब इन कली यो ग्येरपाडक्ब लोत्र शेंचा माल्ती।

### ग्येरपाडक्तीक लोत्र आ सक्ति

16 ग्येरपाडक्तीक लोत्र शेंना शेंन गाक्डानु, मुने मपथु, शेंनुड। मारदे हना मेको लोत्रमी परमप्रभु यावे पाप रे प्रॉडतीक सक्ति बाक्ब। मेको लोत्र डोंडती यहूदी आन कली तुडक्पाइशो बाक्माक्त। नोले ग्रीक आन कली यो तुडक्पाइशो बाक्माक्त। भजन संग्रह ११९:४६; २तिमोथी १:८; १कोरिन्थी १:१८, २४

17 परमप्रभु यावेमी मुर आन कली दोपा ठीक दुम्पाइक्बा, मेको आ लोत्र रे पा तुंडसीब। मिनु “ठीक पाइब आं कली थमा सुइशशा ब्रोंडब” दे ब्रेक्शो बाक्ब। हबकुक् २:४; रोमी ३:२१-२२; गलाती ३:११

### मुर आन मरिम्शो पतीके

18 मुरपुकीमी “थमा माइशो सु बाक्मे?” दे तुडक्चा मदाक्थु, मरिम्शो थुं पाइशो दुम्शा, मरिम्शो गेय पाम्तेकम। मुर आन कली मोदेशो पशो तशा, परमप्रभु यावेम आ गाइशो कोंडताक्ब।

19 मारदे हना परमप्रभु यावे आ पर्वम मार तुडक्ने चान्नीमी, मेको परमप्रभु यावेमी कोंडशो बाक्त। प्रेरित १४:१५-१७; प्रेरित १७:२४-२८

20 मिनु रागी सेल्चा रे मतांडसीशो नु गेना हना यो सक्ति पाइशो परमप्रभु यावे आ सरीड नु रागीमी सेल्शो मार मार रे तुंडसीब। मोपतीके मेकोपुकीम मतुडक्तक देशा, माफ पुंडने मचान्नीम। भजन संग्रह १९:२; हिब्रू ११:३

21 परमप्रभु यावे नेल्ल क्येडा ठेयब बाक्ब, दे तुडक्शा यो ठेयब मसेलेम। परमप्रभु यावे कली “गे रिम्शो पाइतीनी” दे यो मदेंम। तन्न आन मिम्तीकेमी दूली पना पन बाक्तेकम। मिनु आन मरुप्ब थुं क्येडा मरुप्ब दुम्त। एफिसी ४:१८

22 मजोक्थु यो ठेयब लेशशा बोरशा “गो शुश जोक्ब ठेयब नकी” देंतेकम। मोपा मूर्ख दुम्तेकम। १कोरिन्थी १:२०

23 मेकोपुकीम गेना हना यो बाक्ब परमप्रभु यावे आ छेडछेड कली बेक्शा लाइब मुर, चिक्ब, जन्तु नु ग्रेशा गाक्ब जन्तु आन मूर्ति नु फाइक्तेकम। प्रस्थान २०:४; ब्यवस्था ४:१५-१९; भजन संग्रह १०६; येरमीया २:११

24 मिनु परमप्रभु यावेमी मो पशो तशा, मेको आन कली प्रॉडतु। मिनु आन थुंमी मरिम्शो मिम्शा, ग्रॉग्रा दिचा डा गेय पशा बिग्रेपमुम्तेकम। प्रेरित १४:१६

25 मेकोपुकीमी परमप्रभु यावे आ थमा लोत्र कली जोल सेल्तेकम। नेल्ल सेल्ब परमप्रभु यावे क्येडा आ सेल्शो मुर आन कली ठेयब सेल्तेकम। गोपुकीमी मारेड मारेड सेल्ब परमप्रभु यावे कली गेना हना यो ठेयब सेल्च, आमैन।

26 मोपतीके परमप्रभु यावेमी मेको आन कली आन मिम्शो ग्रॉग्रा दिचा डा गेय पपाइक्चा कली प्रॉडतु। मेको आन मीशेमी यो मगारचा डा ग्रॉग्रा दिचा डा गेय पाम्तेकम।

27 मेकोपुकी वोंडश मुर नु मीश मुर ब्वांडसीचा प्रॉडशा, वोंडश मुर नु वोंडश मुर ब्वांडसाकम। मोदेशो मरिम्शो गेय पतीके आन सजाड ताम्तेकम। लेवी १८:२२; लेवी २०:१३; १कोरिन्थी ६:९

28 आन थुंमी “परमप्रभु यावे कली तुडक्चा ममाल्ब” दे मिम्ताकम। मोपतीके परमप्रभु यावेमी मेको आन कली आन मरिम्शो मिम्शो पचा गेशा, प्रॉडतु।

29 मिनु आन थुं पापम ब्रीशो दुम्तेकम। मिनु मार पाम्तेकम देशा हना, मारेइ मारेइ मरिम्शो ला पमुम्तेकम, शिम दुम्तेकम, थुं चोमुम्तेकमे, रुश पमुम्तेकमे, मुर साइक्तेकमे, जिम्तेकमे, जोल पाम्तेकमे, खुइश्शा मुर आन लोव्र पाम्तेकम।

30 मुर आन कली शुक्शी पाम्तेकमे, परमप्रभु यावे कली काइ मदाक्थु, आइक्च सेल्लेकमे, शुश तुम्मुम्तेकमे, ठेयब लेल्लेकमे, बोरतेकमे। मारेइ मारेइ मरिम्शो पचा ला मिम्ताकमे, आम आफ कली मटीमे,

31 बी व्यफ खोदेशो दुम्तेकमे, देशो लोव्र मखबेमे, अरु आन कली वारच मपामे, सुइ आन कली मदाक्तमे, शिशी यो मपामे।

32 परमप्रभु यावे आ निसाफ पतीक लोव्र तुइश्शा यो मोदेशो मरिम्शो पना पन गाक्तेकम। अरु आन कली आन खोदेशो मरिम्शो पशो तशा “रिम्शो दुम्त” दे ग्येरसाकम।

## 2

### दोस गेब दोसी बाक्नीम

1 गे अरु आन कली दोस गेचा दाक्बपुकी, नेनीने, सु बाक्तीनी हना यो, दोस गेचा मदुम्ब, दे तुइक्तीन। दोस गेतीनी हना, दोसी दुम्नीनी, मारदे हना दोस दाक्बपुकी दोस ताइब आन पशो गेय खोदेशोन पशो बाक्नीम, दे रूपीन। मत्ती ७:२; यूहन्ना ८:७; याकूब ४:१२

2 परमप्रभु यावेमी मरिम्शो गेय पाइब आन कली ठीक निसाफ पशा, सजाइ गेब, दे तुइक्नय।

3 गे अरु आन कली दोस गेशा, गे चहिं खाल का डा पाइतीनी हना “गो परमप्रभु यावे आ सजाइ रे ब्रोंइचा ताइनीकी” दे मिम्नीनी?

4 मिनु गे परमप्रभु यावेमी मुर आन कली दाक्तीके, फाल्तीके नु आ गे लेत्तीनी कों, दे रिम्तीके कली आइक्च मिम्नीनी? परमप्रभु यावेमी “आन थुं आं गे लेत्तीमी कों” दे रिम्शो मतुइक्नीनी? २पत्रुस ३:९, १५

5 इन थुं परमप्रभु यावे गे मलेत्तीके परमप्रभु यावे आ गाइश्शो तेम्नीनी। मिनु आ ठीक निसाफ पची नाक्त शुश सजाइ ताइनीनी।

6 परमप्रभु यावेमी मुर आन पशो कोव्रशा, दोदेशो पामे मोदेशो पाइब। येरमीया ३२:१९; मत्ती १६:२७; २कोरिन्थी ५:१०

7 सुमी परमप्रभु यावे आ राज्य माल्शा, रिम्शो गेय पना पन बाक्नीमी नु गेना हना यो ब्रोंइचा माल्नीमी, मेको गेना हना यो परमप्रभु यावे नु बाक्चा ताइनीम।

8 तन्न आंम कली ला मिम्बपुकी, थमा लोव्र मटीबपुकी, जोल लोव्र थमा सुइक्बपुकी परमप्रभु यावे आ गाइश्शो चुरशो ताइनीम। २थिस्सलोनिकी १:८

9 मरिम्शो पाइबपुकी हिंशा बाक्शा, शुश श्येत जाइनीम। नेल्ल आन क्येडा डोंइती यहूदी सजाइ ताइनीम। मिनु ग्रीक यो सजाइ ताइनीम।

10 रिम्शो पाइबपुकी परमप्रभु यावे आ राज्य जाक्शा, मान तशा, आन थुं नाइश्शा बाक्चा ताइनीम। डोंइती यहूदी आन कली मोदेशो दुम्ब। मिनु ग्रीक आन कली यो मोदेशो दुम्ब।

11 मारदे हना परमप्रभु यावेमी मुर आन कली आइक्च जात, ठेयब जात मतिल्थु ठीक निसाफ पाइब। २इतिहास १९:७; प्रेरित १०:३४; कलस्सी ३:२५; १पत्रुस १:१७

12 परमप्रभु यावे आ अरेशो लोव्र मतुइक्थु, पाप पाइबपुकी मेको आन मतुइश्शोमीन जाम्शा लाइनीम। परमप्रभु यावे आ अरेशो लोव्र तुइश्शा यो पाप पाइबपुकी मेको लोव्रमीन निसाफ पचा पुंडसीनीम।

13 परमप्रभु यावे आ अरेशो लोव्र नेशा ला मुर ठीक मदुम्नीम। आ देशो पशा ला ठीक दुम्नीम। व्यवस्था ६:२५; मत्ती ७:२१; याकूब १:२२

14 मोपतीके अर्को रागी डा मुरपुकीमी परमप्रभु यावे आ अरेशो लोत्र मतुइक्ताकम हना यो, मार पचा दुम्बा, मार पचा मदुम्बा, दे तुइश्शा, गेय पाइनीमी, मेको आन आगामी अरेशो लोत्र बाक्ब। प्रेरित १०:३५

15 मेको मुर आन थुमी अरेशो लोत्र ब्रेक्सीशो बाक्ब, दे कोइनीम। मेको आन थुमी आन पशो आ परबम रिम्शो बाक्ब देय मरिम्शो बाक्बा सांकछी गेब। रोमी १:३२

16 मिनु परमप्रभु यावे आ निसाफ पची नाक्त मुर आन खुइश्शा पशो कली निसाफ पाइब। आं शेंशो ग्येरपाइक्तीक लोत्र परमप्रभु यावेमी येसु खीस्त आ पतीकेमी निसाफ पाइब। लूका ८:१७

### यहूदीम यो पाप पशो

17 मिनु गे “गो यहूदी ठेयब जात नकी। परमप्रभु यावे आ अरेशो ताइतक, आ योत्रशो मुर नकी” दे मिम्नीनी।

18 परमप्रभु यावे आ दाक्शो तुइक्नीनी, मार पचा दुम्बा, मार पचा मदुम्बा तुइक्नीनी। मारदे हना गे अरेशो लोत्र शेंसीशो बाक्नीनी,

19 इन थुमी “गो जोक्ब नड, गो मिक्च मताइब आन कली लां कोइब नड। छिडछिडम बाक्ब आन कली बत्ती दाब नड। मती १५:१४

20 हेंथे गाक्ब आन कली रिम्शो लां कोइब नड। मशेंसीशो आन कली शेंब नड, गो अरेशो लोत्र जोक्ब तुइक्ब बाक्नुड” दे मिम्नीनी।

21 तन्न अर्को आन कली शेंशो, आंम कली मशेंसीनीनी। खुइ मपचा दे शेंनीनी। तन्न गे खुइ पाइनीनी। भजन संग्रह ५०:१६-२१; मती २३:२,४

22 मुर आन मीश मलाइक्चा, दे शेंनीनी, तन्न लाइक्नीनी। मूर्ति कली तशा, ग्रांग्रा दीनीनी, तन्न मन्दिर रे मूर्ति खुइ पा लाइक्नीनी।

23 परमप्रभु यावे आ अरेशो लोत्र रिम्शो बाक्ब देंनीनी, तन्न इन मटितीकेमी परमप्रभु यावे कली आइक्च सेल्नीनी।

24 इन मोदेशो पशो आ परबम “अर्को रागी डा मुरपुकीमी परमप्रभु यावे आ नें आ परबम शुक्शी पाइनीम” दे ब्रेक्शो बाक्ब। यसेया ५२:५

25 गे खोइक्तीक चिनु खोइश्शा, परमप्रभु यावे आ आ अरेशो लोत्र टीतीनी हना, रिम्शो दुम्ब। तन्न खोइक्तीक चिनु खोइश्शा आ अरेशो मटीतीनी हना, गे खोइक्तीक चिनु मखोइश्शो खोदेशो दुम्नीनी।

26 खोइक्तीक चिनु मखोइश्शो, तन्न परमप्रभु यावे आ ठीक पतीक नेल्ल पाइब हना, मेको खोइक्तीक चिनु खोइश्शो खोदेशो बाक्ब। गलाती ५:६

27 मेको अर्को रागी डा खोइक्तीक चिनु मखोइश्शो मुरपुकीमी यहूदी आन क्येडा आंमा आन थुं रे ठीक पाइनीम। मिनु निसाफ दुम्ची ना परमप्रभु यावे कली मटीब यहूदी आन कली दोस गेनीम।

28 रांमी खोइक्तीक चिनु ला बाक्शा, परमप्रभु यावेमी योत्रशो यहूदी मदुम्नीम। येरमीया ४:४

29 मार पा यहूदी दुम्नीम देशा हना, मार पचा दुम्बा, मार पचा मदुम्बा, मेको तुइश्शा, परमप्रभु यावे आ सोक्तीम थुंम खोइक्तीक चिनु खोइश्शा ला परमप्रभु यावे आ मुर दुम्नीम। मेको आन कली मुरपुकीमी ठेयब मसेल्नीम। तन्न परमप्रभु यावेमी नेल्ल तुइश्शा “रिम्शो पाइतीनी” देंब। ब्यवस्था ३०:६; फिलिप्पी ३:३; कलस्सी २:११

## 3

### परमप्रभु आ निसाफ

1 मोदेशो बाक्त हना, यहूदीपुकीमी अरु आन क्येडा मार ताइनीमी? खोइक्तीक चिनु खोइश्शो मार दुम्बाक्डा?

2 अरु आन क्येडा शुश तशो बाक्तेकम। डोंइती परमप्रभु यावेमी मेको आन कली आ लोत्र तुइक्पाइक्चा कली योत्रतु। रोमी ९:४; ब्यवस्था ४:७-८; भजन संग्रह १४७:१९-२०

3 का निक्शीमी परमप्रभु यावे आ अरेशो लोत्र मटीमे। मो पाप्तेक्म हना यो, परमप्रभु यावे आ लोत्र जोल मदुम्ब। रोमी ९:६; रोमी ११:२९; रतिमोथी २:१३

4 मुर आन देशो लोत्र मजाकदीप्ब। परमप्रभु यावे आ देशो चहिं गेना हना यो थमा दुम्ब। “इन लोत्र ठीक बाक्ब। इन मुर आन कली निसाफ पतीक यो ठीक बाक्ब” दे ब्रेकशो बाक्ब। भजन संग्रह ५१:६; भजन संग्रह ११६:११

5 गो इं मरिम्शो पशो परमप्रभु यावे कली रिम्शो देशा कोइताक्य हना, गो मार दैनय डा? परमप्रभु यावेमी मो देंब आन कली सजाइ गेशो मरिम्शो बाक्बा डा? शुश मुरपुकीमी मोदेशो मिन्मी।

6 तन्न परमप्रभु यावेमी मेको आन कली सजाइ गेशो मरिम्शो ममाइ। परमप्रभु यावेमी निसाफ मपशो हना, मुर आन कली दोपा दोस गेशा, सजाइ पाइबा?

7 आं मरिम्शो पशोमी परमप्रभु यावे आ रिम्शो पतीके तपाइश्शा, परमप्रभु यावे कली ठेयब सेल्ला हना, मारदे पापी सुइक्का पुंडसीनुडा?

8 मुरपुकीमी आं लोत्र नेशा “पापमी परमप्रभु यावे कली ठेयब सेल्ब, दे शेंब” दे आं देशो लोत्र कली दूली सेल्लेक्म। गो दूली मशेंदुमी। मारदे हना पाप पशोमी परमप्रभु यावे कली ठेयब मसेल्ब। मोदेब आन कली परमप्रभु यावेमी सजाइ गेप्तु हना, ठीक दुम्ब। रोमी ६:३

### मुर नेल्लेमी मरिम्शो पशो

9 मिन मार देंचा देशा हना, अर्को जात क्येडा गो यहूदी रिम्शो मुर नया? मनय। मारदे हना गो यहूदीपुकी यो अर्को जात डा मुर खोदेशो पा पापी बाक्नय। रोमी १:१८; रोमी २:२४

10 मिन “रिम्शो पाइब सुइ मबाक्नीम। रिम्शो पाइब का यो मबाक्ब। अय्युब ४:१७

11 परमप्रभु यावे कली तुइक्ब सुइ मबाक्नीम। मेको कली ममाल्ब यो मबाक्नीम।

12 नेल्लेमी रिम्शो लां प्रोइशा हेंथे गाक्नीम। रिम्शो पाइब का यो मबाक्नीम” दे ब्रेकशो बाक्ब। भजन संग्रह १४:१-३

13 “ग्रान्रा दिचा डा लोत्र ला पाइनीम। जोल पाइनीम। शुक्शी पा थुं खाइक्का डा लोत्र पाइनीम। भजन संग्रह ५:१०; भजन संग्रह १४०:४

14 मेको आन शोत्र सराप नु कशो लोत्रमी ब्रीशो बाक्ब।” भजन संग्रह १०:७

15 “मेकोपुकीमी मारेइ ममिम्थु मुर साइक्नीम।

16 ते ते गाक्मा, मेक मेक मारेइ महेंथु खतम पाइनीम।

17 दुशा गारशा बाक्चा नु वारच पचा मतुइक्नीम।” यसैया ५९:७-८; लूका १:७९

18 “परमप्रभु यावे कली मान पा महिनीम” दे ब्रेकशो बाक्ब। भजन संग्रह ३६:२

19 अरेशो लोत्र अरेशो टीब आन कली ब्रेकशो बाक्ब। मेको लोत्र मटिन्तेक्म हना, सिक्सी पचा माल्नीम। यहूदी नु रागी डा मुर नेल्ल पापी दुम्तेक्म। मोपतीके परमप्रभु यावेमी मुर नेल्ल आन कली निसाफ पाइब। रोमी २:१२; गलाती ३:२२

20 मिन अरेशो लोत्र पशा, सुइ ठीक मदुम्मीम। मारदे हना आ अरेशो लोत्र तुइश्शा, गो मरिम्शो पाइब बाक्नय, दे तुइक्नय। भजन संग्रह १४३:२; गलाती २:१६; रोमी ७:७

### दोपा ठीक सेल्लो

21 तन्न मुल रे अरेशो लोत्र मबाक्थुन, परमप्रभु यावे रे मुर आन कली ठीक पतीक जाक्शो बाक्ब। परमप्रभु यावेम ब्रेकपाइश्शो लोत्र नु आ लोत्र पाइब आन देशो गारब। रोमी १:१७; प्रेरित १०:४३

22 परमप्रभु यावे आ ठीक पतीके येसु खीस्त कली थमा सुइक्ब नेल्ल आन कली बाक्ब। यहूदी बाक्तेक्म हना यो, अर्को रागी डा मुर बाक्तेक्म हना यो, नेल्ल कान बाक्नीम। फिलिप्पी ३:९

23 मारदे हना नेल्लेमी पाप पाप्तेक्म। मोपतीके परमप्रभु यावे आ छेडछेडम जाक्दीन्ने मचाप्नीम। उत्पत्ती ८:२१

24 सु सुमी चहिं खीस्त येसु कली थमा सुदमे, मेको आन कली परमप्रभु यावेमी आन थुं ठीक दुम्पाइक्ब। रोमी ५:१; २कोरिन्थी ५:१९; एफिसी २:८

25 डोंडती परमप्रभु यावेमी रिम्शा, पापी आन कली सजाइ मगेवा बाक्त। नोले मेको आन जचा डा सजाइ येसु खीस्त कली जपाइश्शा बेक्चा गेशा, मेको आन पाप क्याम्ताक्व।

26 मोपा परमप्रभु यावेमी “ठीक निसाफ पाइनुड” दे कोइताक्व। मिनु येसु कली थमा सुइक्व आन कली “इन पाप ग्याम्शा, ठीक दुम्तीनी” देंब। लेवी १६:१५-१६; हिब्रू ४:१६

27 नेल्ल परमप्रभु यावेमी पशो बाक्व। सुइमी ठेयब सेल्सीशा “गो गेय नेल्ल रिम्शो पा ठीक दुम्ती” देंने मचाप्नीम। ठीक दुम्तीके मुर आन गेय रे मपीब। तन्न थमा सुइक्तीके रे पीब। १कोरिन्थी १:२९, ३१

28 गोपुकीम “परमप्रभु यावे आ अरेशो लोत्र डा गेयम मुर आन कली ठीक मसेल्ब” दे शेंनीकी। थमा सुइश्शोमी ला मुर आन कली ठीक सेल्ब। गलाती २:१६

29 परमप्रभु यावे यहूदी आन परमप्रभु यावे ला बाक्वा डा? नेल्ल अर्को रागी डा मुर आन परमप्रभु यावे बाक्व। रोमी १०:१२

30 मारदे हना परमप्रभु यावे का ला बाक्व। मिनु मेकोमी खोइक्तीक चिनु खोइश्शो नु मखोइश्शो आन थमा सुइक्तीके कोत्रशा, मुर आन कली ठीक दुम्पाइक्व। रोमी ४:११-१२

31 मो देंतय हना, परमप्रभु यावे आ अरेशो लोत्र क्याम्नीकी? ममाइ, येसु खीस्त कली थमा सुइश्शोमी परमप्रभु यावे आ अरेशो लोत्र टीतय, दे रुब्य। मती ५:१७

## 4

### अब्राहाम मिम्शा शेंशो

1 इं किकी अब्राहाममी रिती थिती धर्म पशो तशा, परमप्रभु यावेमी ठीक दुम्पदा डा? ममाइ।

2 गेय पशा, ठीक दुम्शो हना, मुर आन कली “गो रिम्शो पाइब नड” देंने चाप्ब वा। तन्न परमप्रभु यावे कली चहिं मो देंने मचबा बाक्त।

3 मार ब्रेक्शो बाक्व देंशा हना “अब्राहाममी परमप्रभु यावे कली थमा सुइक्तु। मिनु परमप्रभु यावेमी ठीक दुम्पाइक्तु” दे ब्रेक्शो बाक्व। उत्पती १५:६; गलाती ३:६

4 गेय पाइबपुकीमी गेय पशो डा गाल्च ताइनीम। तन्न शिशी पा गेशो ममाइ। रोमी ११:६

5 तन्न सुमी गेय मपाइब, डोंडती मटीब मुर आन कली ठीक पाइब कली थमा सुइक्वा, मेको आ थमा सुइक्तीके ठीक बाक्व। रोमी ३:२६

6 इं किकी दाऊदमी “मुरुमी गेय मपथु, ठीक दुम्शा, मेको ग्येरसीशो मुर बाक्नीम, दे परमप्रभु यावे आ देंशो बाक्व” देंशो बाक्त।

7 परमप्रभु यावे आ अरेशो मटितीके नु आन पाप क्याम्चा पुंइसीशो मुर ग्येरसीशो मुर बाक्नीम।

8 प्रभुमी पाप क्याम्चा पुंइसीशो मुर कली दोस मगेब। मेको ग्येरसीशो मुर बाक्व। भजन संग्रह ३२:१-२

9 मिनु मुल मार देंचा? ग्येरसीशो मुर खोइक्तीक चिनु खोइश्शो बाक्नीम देय मबाक्नीमी? मारदे हना अब्राहाममी थमा सुइक्तु। मिनु परमप्रभु यावेमी मेको कली ठीक दुम्पाइक्तु।

10 खोइक्तीक चिनु खोइक्चा क्येडा डोंडती अब्राहाममी परमप्रभु यावे कली थमा सुइक्तु। मिनु परमप्रभु यावेमी आ कली थमा सुइश्शोमी अब्राहाम कली ठीक दुम्पाइक्तु।

11 आ थमा सुइश्शोमी ठीक दुम्पाइक्चा कली खोइक्तीक चिनु छाप खोदेंशो पा ताप्तु। मारदे हना मेको डोंडतीन थमा सुइक्व बाक्त। मोपतीके मेको खोइक्तीक चिनु मखोइश्शो थमा सुइक्व, ठीक दुम्शो नेल्ल आन आफ दुम्त। उत्पती १७:१०-११

12 अब्राहामम खोइक्तीक चिनु खोइक्व आन आफ ला ममाइ, खोइक्तीके चिनु मखोइक्थु थमा सुइक्व आन लां गाक्व आन आफ यो दुम्त। मती ३:९

13 परमप्रभु यावेमी अब्राहाम कली अरेशो लोत्र टितीके लोत्र मगेशो बाक्त। तन्न थमा सुइश्शो तशा “इ चच युइ शुश दुम्शा, रागी नेल्ल ब्रीनीम” दे लोत्र गेशो बाक्त। उत्पती २२:१७-१८

14 अरेशो लोत्र टीब ला परमप्रभु यावे आ मुर दुम्नीम हना, थमा सुइक्तीके नु थोकशो लोत्र जाम्शा लाइब।

15 मारदे हना परमप्रभु यावे आ अरेशो लोत्रमी आ गाइक्तीक पोक्ब। मेको लोत्र मबाक्शो हना, पाप मतुंडस वा। रोमी ३:२०; रोमी ५:१३; रोमी ७:८,१०

16 थमा सुइक्तेकम हना, शिशी ताइनीम। अरेशो टीबपुकीम यो शिशी ताइनीम। सु सुमी अब्राहामम खोदेशो पा, परमप्रभु यावे कली थमा सुदमे, मेको आ थोक्शो लोत्र डा मुर नु अब्राहाम आ आल दुम्नीम।

17 अब्राहाम आ पर्वम “गो इ कली शुश रागी डा मुर आन किकी सेल्टन” दे ब्रेक्शो बाक्ब। अब्राहाममी “परमप्रभु यावे बेक्शो रे सेंब नु मारेइ मबाक्शो कली बाक्शो खोदेशो पा ब्रेशशा सेल्ब” दे थमा सुइश्शो बाक्ब। उत्पत्ती १७:५; २कोरिन्थी १:९; हिब्रू ११:१९

18 “शुश रागी डा मुर आन किकी सेल्टन” दे परमप्रभु यावे आ गेशो लोत्र थमा सुइश्शा, आस पचा डा मबाक्माक्त हना यो, आस पा बाक्माक्त। उत्पत्ती १५:५

19 मेको सहे का बर्स दुम्शा, आल मथिथु, आ रां बेक्शो खोदेशो दुम्शा, आ मीश सारा शुश बर्स दुम्शो बाक्ब, दे तुइश्शा यो थमा सुइक्ना सुइक्न बाक्माक्त। उत्पत्ती १७:१७

20 दालगीर मपथु, आ थमा सुइक्चा बारना बारन लशा, परमप्रभु यावे कली ठेयब सेला बाक्त।

21 परमप्रभु यावेमी आ गेशो लोत्र दोपा यो खाप्ने चाप्ब, दे थमा पा तुइश्शो बाक्माक्त। हिब्रू ११:११

22 मोपा थमा सुइश्शोमी परमप्रभु यावेमी अब्राहाम कली ठीक दुम्पाइक्तु। उत्पत्ती १५:६

23 मेको कली ठीक दुम्पाइक्तु, दे ब्रेक्शो लोत्र अब्राहाम कली ला ब्रेक्शो ममाइ।

24 गो नेल्ल इं कली यो ब्रेक्शो बाक्ब। मारदे हना सु सुमी इं प्रभु येसु कली बेक्शो रे सेंपाइक्ब परमप्रभु यावे कली थमा सुइक्नीमी, मेको आन कली ठीक दुम्पाइक्ब।

25 येसु ख्रीस्त इं पाप क्याम्चा कली साइक्चा पुंडसाक्व। मिनु इं कली ठीक दुम्पाइक्चा कलीन बेक्शो रे सेंचा पुंडसाक्व। रोमी ८:३२-३४; यसैया ५३:४-६

## 5

### परमप्रभु आ गाइश्शो रे ब्रोइशो

1 मिनु गो थमा सुइश्शोमीन ठीक दुम्पाइक्चा पुंडसीशा, इं प्रभु येसु ख्रीस्त रे पा परमप्रभु यावे नु दुशा बाक्तीक दुम्शो बाक्त। रोमी ३:२४,२८; यसैया ५३:५

2 येसु ख्रीस्त आ पतीके गो परमप्रभु यावे आ शिशी ताइतय। मिनु परमप्रभु यावे नु बाक्चा ताइनीकी, दे आस पशा, ग्येरशा बाक्तय। यूहन्ना १४:६; एफिसी ३:१२

3 मेको ला ममाइ। श्येत जयानु, ग्येरनय। मारदे हना श्येत जशोमी फाल्तीक सक्ति बारपाइक्ब। याकूब १:२-३

4 मिनु श्येत फाल्बपुकी रिम्शो थुं पाइश्शो दुम्नीम। रिम्शो थुं पाइश्शोपुकी आस पाइब दुम्नीम, दे तुइक्ताक्य। याकूब १:१२

5 मिनु मोदेशो आस पतीकेम मुर आन कली बोल्यो सेल्ब। मारदे हना परमप्रभु यावे आ सोक्त आ पतीकेमी परमप्रभु यावे आ दाक्तीके इं थुंम मोइश्शो बाक्त। भजन संग्रह २२:६; भजन संग्रह २५:३,२०; हिब्रू ६:१८-१९

6 डोंडती मचाप्ब बाक्यानु, ख्रीस्त परमप्रभु यावे कली मटीब आन पर्वम बेक्त।

7 ठीक पाइब आन बेक्चा आ पा डा सुइ बेक्बा को? रिम्शो पाइब आ पा डा सुइ बेक्बे चाप्बा को?

8 तन्न परमप्रभु यावेमी इं कली शुश दाक्शा, गो पापी, इं बेक्चा आ पा डा ख्रीस्त कली बेक्चा गेत्तु। यूहन्ना ३:१६; १यूहन्ना ४:१०

9 मोपतीके ख्रीस्त आ हुशेमी इं पाप क्याम्शा, ठीक सेल्चा पुंडसाक्य। मोशो ला ममाइ। गोपुकी येसु ख्रीस्त आ पतीकेमी परमप्रभु यावे आ गाइश्शो रे ब्रोइचा ताइनय, दे तुइक्ताक्य। रोमी १:१८; रोमी २:५,८

10 डोंइती गोपुकी परमप्रभु यावे आ जोरी सत्रु दुम्शा बाक्यानु, आ तौ आ बेकशोमीन परमप्रभु यावेमी इं कली आ दाक्शो मुर सेल्लु। आ दाक्शो मुर दुम्शा, येसु आ ब्रोंइशोमीन सजाइ जचा रे मब्रोंइया डा? ब्रोंइतय। २कोरिन्थी ५:१८; रोमी ८:७; कलस्सी १:२१

11 मेको ला ममाइ, इं प्रभु येसु ख्रीस्तम इं पशो पाप रे प्रोंइतीके आ पर्बम परमप्रभु यावे आ मुर दुम्शा ग्येरनय।

### आदम नु येसु ख्रीस्त

12 मिनु डोंइती मुर कामी परमप्रभु यावे आ देशो लोत्र मटितीके मुर बेकब दुम्मा बाक्त। मिनु मेको आ तमी तौ चच युइ नेल्ले यो बेकब दुम्मा बाक्त। मारदे हना मेकोपुकीमी यो पाप पामे बाक्त। उत्पत्ती ३:१९; रोमी ६:२३; उत्पत्ती २:१७

13 मेना परमप्रभु यावे आ अरेशो लोत्र मब्रेकपाइशो बाक्माक्त। मोपतीके पाप मप्रूशो बाक्माक्त। अरेशो लोत्र मबाक्थु, मुर दोस मताइब दुम्शो बाक्तेक्म। रोमी ४:१५

14 तन्न आदम आ पाला रे मोसा आ पाला सम्म मुरपुकी बेकना बेकन लमा बाक्त। आदम खोदेशो मरिम्शो मपामे बाक्त हना यो, बेकमा बाक्त। आदम चहिं नोले डा पाला कली कोंइतीक दुम्शो बाक्त।

15 आदम आ मटिशो परमप्रभु यावे आ शिशी पशो खोदेशो ममाइ। मुर का आ मटितीकेम मुर नेल्ल कली बेकब सेल्लतीमी। मेको क्येडा परमप्रभु यावे नु मुर का दुम्शो येसु ख्रीस्त आस गेशो शिशी ठेयब बाक्ब।

16 येसु ख्रीस्त आ गेशो आदम आ पशो खोदेशो ममाइ। मारदे हना आदम आ पशोमी मुर नेल्ल खतम दुम्तेक्म। येसु ख्रीस्त आ गेशो शिशीमी पाप पशो शुश मुर आन कली ठीक दुम्पाइक्तु।

17 दोपा आदम आ पशोमी बेक्तीकेम मुर आन कली हुकुम पवा, मोपा मेको आन क्येडा येसु ख्रीस्त आ गेशो शिशी नु आ ठीक सेल्लतीकेमी मुर आन कली ब्रोंइचा गेशा हुकुम पाइब।

मेको पपाइक्ब नेल्ल येसु ख्रीस्त बाक्ब।

18 दोपा मुर कामी पाप पतीके मुर नेल्ल जाम्शा लाइब दुम्मा, मोपा का आ ठीक पतीकेम मुर नेल्ल आन पाप क्याम्शा, ठीक सेल्ला पुंइसीशा, ब्रोंइचा ताइनीम। १कोरिन्थी १५:२१-२२

19 परमप्रभु यावे आ देशो मटीव मुर का आ पतीके दोपा पापी शुश दुम्मा, मोपा परमप्रभु यावे आ देशो टीब कामी चहिं शुश मुर आन पाप क्याम्शा, ठीक सेल्लतीमी। रोमी ३:२६; यसेया ५३:११

20 परमप्रभु यावेमी आ अरेशो लोत्र ब्रेकपदा रे पाप तुइक्ना तुइक्न लाम्तेक्म। मिनु पाप ठेयब दुम्मेनु, परमप्रभु यावे आ शिशी मेको क्येडा ठेयब दुम्त। रोमी ७:८,१३; गलाती ३:१९

21 दोपा पापमी मुर आन कली बेक्पाइक्ब सेल्लती, मोपा येसु ख्रीस्त आ शिशी नु ठीक पतीकेमी मुर आन कली परमप्रभु यावे नु गेना हना ब्रोंइशा बाक्ब सेल्लब। मेको नेल्ल इं प्रभु येसु ख्रीस्तम पशो बाक्ब। रोमी ६:२३

## 6

### पापम बेक्शा, ख्रीस्तम सेंसीशो

1 मिनु मो हना, मार देंचा? परमप्रभु यावेमी गो इं कली शुश शिशी पवल, दे गोपुकीमी पाप पस डा पस बाक्चा डा? रोमी ३:५-८

2 मो पचा मडुम्ब। बेक्शो मुरपुकीम खांखा दोपा पाप पस डा पस बाक्ने चाप्नीमी डा? गो इं के पाप पतीक थुं बेक्त।

3 ख्रीस्त येसु कली थमा सुइशशा, आ नें नु आ बेक्तीकेमी ब्वाक्कुम खुम्शा, गुंइपांइसाक्य, दे गो मतुइक्नीनी? गलाती ३:२७

4 मिनु ब्वाक्कुम गुम्यानु, गो येसु बेक्शा थिम्शो खोदेशो दुम्तय। मिनु परमप्रभु यावे आ सक्तिमी ख्रीस्त कली बेक्शो रे सेंपाइशो खोदेशो पा गो यो सेंसीशा, नक लांम गाक्तय। कलस्सी २:१२; १पत्रुस ३:२१

5 गो दोपा मेको आ बेक्शो नु कान दुम्या, मोपा आ सेंसीशो नु यो कान दुम्तय।



6 येसु ख्रीस्त कली शीम केप्शा कांटी थोकशा साइक्तीके इं पापम ब्रीशो थुं आ सक्ति जाम्त। मोपतीके मुल गो पाप आ वाइल मबाकनय। गो मेको लोव्र तुइक्चा मालनय। गलाती ५:२४

7 बेक्शो मुर पाप रे ब्रोंइशो बाक्नीम।

8 गो येसु ख्रीस्त नु बेक्तय हना, मेको नुन ब्रोंइनय, दे थमा सुइकनय।

9 मारदे हना येसु यो बेक्शो रे सेंसीशा, मुल गेनायो मबेक्चा डा पा ब्रोंइत। मुल मेको गेनायो मबेक्ब।

10 पाप क्यामचा कली काले बेक्त। नोले सेंसीशा, मुल परमप्रभु यावे नु ब्रोंइशो बाक्ब। हिब्रू ९:२६-२८

11 मोपतीके गेपुकीमी यो आंम कली पाप आ पबंम बेक्शो नु ख्रीस्त येसु आ पतीकेमी परमप्रभु यावे कली ब्रोंइनय, दे मिम्तीन। २कोरिन्थी ५:१५; १पत्रुस २:२४

12 इन बेक्शा लाइब रां कली पापम हुकुम पचा मगेने। उत्पती ४:७

13 इन गुइ खोइली, मिक्च, शोव्र, रां नेल्ल कली मरिम्शो मपपतीन। तन्न बेक्शो रे सेंसीशो मुर खोदेशो पा, परमप्रभु यावे कली जिम्मा गेंसीशा, आ रिम्शो गेय पने। रोमी १२:१

14 पापमी इन कली मारेइ पपाइक्ने मचापब, मारदे हना परमप्रभु यावे आ अरेशो लोव्रमी इन कली दोसी मसेल्थु, परमप्रभु यावेमी शिशी पाइक्चा पुंडसाक्नी। रोमी ७:४-६; १यूहन्ना ३:६; रोमी ५:१७, २१

15 परमप्रभु यावे आ अरेशो लोव्रमी इं कली दोसी मसेल्थु, परमप्रभु यावे आ शिशी ताइतय हना, पाप पचा दुम्ब, दे मिम्चा डा? मोदेशो मिम्चा मदुम्ब।

16 तेको होव्रप आ वाइली दुम्या, मेको होव्रप कली टिचा मालनय, दे मतुइक्नीनी? “पाप पना पन बाक्य” देंतीनी हना, पाप आ वाइली दुम्या, बेक्नीनी। “परमप्रभु यावे आ देंशो टिय” देंतीनी हना, परमप्रभु यावे आ वाइली दुम्या, ठीक पाइब दुम्नीनी। यूहन्ना ८:३४

17 इन पबंम परमप्रभु यावे कली “मेको आन कली रिम्शो पाइतीनी” दे ठेयब सेलनुइ। मारदे हना डोंइती गेपुकी पाप आ वाइल बाक्तीनी। मुल चहिं इन थुं रे पा परमप्रभु यावे आ शेंशो दाक्शा टीतीनी।

18 गेपुकी पाप रे ब्रोंइशा, ठीक पतीके आ वाइल दुम्तीनी। यूहन्ना ८३२

19 इन कली रुप्पाइक्चा कली चिनु लेंशा शेंनन्नी। दोपा गेपुकीमी इन गुइ खोइल, मिक्च, शोव्र, रां नेल्लेमी ग्रांरा दिशो गेय पशा, अरेशो लोव्र मटिनी, मोपा मुल इन थुं, रां नेल्ल ठीक पतीक आ वाइल दुम्चा कली परमप्रभु यावे आ गेय पाइब मुर दुमीन।

20 डोंइती पाप आ वाइली बाक्नीनु, ठीक पतीक रे डोन बाक्तीनी।

21 इन पशो मिम्शा, मुल यो मुने पाइनीनी। मारदे हना इन मरिम्शो पशो बेक्पाइक्ब बाक्त, दे तुइक्ताक्नी। रोमी ८:६, १३

22 मुल गेपुकी मरिम्शो पचा रे प्रोंइचा पुंडसीशा, गे परमप्रभु यावे आ वाइल दुम्तीनी। मुल इन रिम्शो पतीके रे गे परमप्रभु यावे आ मुर दुम्या, गेना हना यो मेको नु ब्रोंइशा बाक्चा ताइनीनी।

23 मरिम्शो पशो आ गाल्च बेक्चा बाक्ब। परमप्रभु यावे आ गेशो शिशी चहिं इं प्रभु येसु ख्रीस्त रे पा गेना हना यो ब्रोंइशा बाक्चा बाक्ब। रोमी ५:१२; उत्पती २:१७; याकूब १:१५

## 7

### अरेशो लोव्र प्रोंइशो

1 आं लोक्बपुकी, मुल गो अरेशो लोव्र तुइक्ब इन कली शेंचा दाक्ती। मबेक्या सम्म ला अरेशो लोव्र कली टिचा मालनय।

2 ग्युंवे पशो मीश मुर आ वोंइश मबेक्म सम्म कानुनमी आस नाता लीब। आ वोंइश बेक्त हना, आस नाता मलीब। १कोरिन्थी ७:३९

3 आ वोंइश मबेक्थु, अर्को वोंइश खोइश्शा लत हना, मेकोम आस नाता खोइक्ब। तन्न आ वोंइश बेक्शा नोले अर्को वोंइश खोइक्तु हना, मेको मीश अरेशो लोव्र रे मारेइ दोस गेचा मपुंडसीब, मारदे हना मेको आ वोंइश बेक्ने थुम्शो बाक्ब।

4 आं लोकबपुकी, येसु खीस्त बेक्शोमी परमप्रभु यावे आ अरेशो लोव्र टिने मचाम्सीब देंतीक थुं बेक्त, दे रूपीन। मुल बेक्शो रे सेंचा पुंडसीशो खीस्त नु काथा दुम्शा, इन पशो रे पा परमप्रभु यावे कली गेय पाइनय।

5 गो येसु खीस्त रे डोन बाकयानु, परमप्रभु यावे आ अरेशो लोव्र रे पा पाप तुइश्शा यो पाप आ ग्रांग दिशोमी ब्रीशा शुश मरिम्शो पाइतय। मेको आ गाल्च बेक्तीक बाक्ब। रोमी ६:२१

6 तन्न मुल गो अरेशो लोव्र रे ब्रोंइशा बाकनय। मारदे हना गो मरिम्शो पतीक आ ग्याइश्शो रे बेक्तय। मुल गो येसु खीस्त आ सोक्त रे पा नक गेय पाइनय। अरेशो ब्रेक्शो लोव्र प्रॉइने थुम्तय। रोमी ८:१-२; रोमी ६:२-४

### अरेशो लोव्र नु पाप

7 मिनु मुल मार देंय देशा हना, परमप्रभु यावे आ अरेशो लोव्रमी पाप बाक्बा? मो देशो ममिम्चा। परमप्रभु यावे आ अरेशो लोव्र मपढेडा सम्म गो पाप मतुइक्तु। परमप्रभु यावे आ अरेशो लोव्रमी “मुअर मार मार तशा मवलो” दे मब्रेक्शो हना, वाल्चा आ पबर्म गो मारेइ मतुइक्तु वा। प्रस्थान २०:१७

8 मिनु पापम ब्रीशो आं थुंमी शुश वाल्पाइक्ती। परमप्रभु यावे आ अरेशो लोव्र मबाक्शो हना, पाप मगू वा, मेको बेक्त। रोमी ५:१३; १कोरिन्थी १५:५६

9 अरेशो लोव्र मपदेशो नड हना यो, पाप मतुइक्तु वा। तन्न मेको लोव्र तुइक्तु रे आं थुंमी पाप बोक्त। मिनु बेक्ती।

10 परमप्रभु यावे आ अरेशो लोव्र ब्रोंइचा कली बाक्त हना यो, मेको लोव्रमीन बेक्ब सेलती। लेवी १८:५; याकूब १:१५

11 मारदे हना मेको अरेशो लोव्र टिने मचापतीके पापम खुम्शा साइक्ती। हिबू ३:१३

12 मिनु परमप्रभु यावे आ अरेशो लोव्र ठीक नु रिम्शो बाक्ब। १तिमोथी १:८

13 मिनु मार? ठीक नु रिम्शो लोव्रमी आं कली साइय्यी डा? ममाइ। पापम कका साइक्ती। परमप्रभु यावे आ देशो लोव्र रे पाप शुश मरिम्शो बाक्ब, दे तुइसीब। रोमी ५:२०

14 गोपुकीमी परमप्रभु यावे आ अरेशो लोव्र सोक्त पाइश्शो बाक्ब, दे तुइक्नय। गो चहिं राम बाक्शा पाप आ वाइल बाक्ती। यूहन्ना ३:६

15 गो आं पशो आंमा मरुण्ड। मारदे हना आं दाक्शो मपाइनुड, आं काइ मदाक्शो पाइनुड।

16 तन्न आं मदाक्शो पाता हना यो, परमप्रभु यावे आ अरेशो लोव्र रिम्शो सुइक्नुड।

17 आं मदाक्शो पशो चहिं गो आं पशो ममाइ। आ आगाम बाक्शो पापम पपाइक्ती।

18 रिम्शो पतीके गो नु मबा, दे रूप्ता। रिम्शो पपदाक्ती हना यो, रिम्शो पने मचबु। उत्पत्ती ६:५; उत्पत्ती ८:२१

19 मारदे हना रिम्शो गेय पड देंती, तन्न पने मचबु। मरिम्शो मपड देंडानु यो मरिम्शोन पाता।

20 आं मदाक्शो पाता हना, गो आं पशो ममाइ। गो आ आगाम बाक्शो पापमी मोदेशो पपाइक्ती।

21 तन्न आ थुंमी गो रिम्शो पचा दाक्ती हना यो, मरिम्शो ला दुम्त।

22 गो आं थुंमी परमप्रभु यावे आ अरेशो लोव्र दाक्शा ग्येरसीनुड।

23 तन्न आं राम अर्को अरेतीक का बाक्ब। मेको आं थुं डा दाक्शो अरेतीक नु जीब। मिनु आं राम बाक्शो अरेतीकेमी आं कली ग्याइश्शा, पाप पपाइक्ब। गलाती ५:१७

24 मोपतीके थुं खाइश्शा “मार मुर नडा? एको बेक्शा लाइब पाप पाइब रां रे सुम प्रॉइबा?” दे डाक्शा बाक्नुड।

25 गो परमप्रभु यावे कली इ प्रभु येसु खीस्तम आ पतीके “गे रिम्शो पाइब बाक्नीनी” दे ठेयब सेलनुड। परमप्रभु यावे आ सोक्तीम ब्रीशो थुं आ देशो टीनुड। येसु खीस्त नु मबेक्शो आं थुं नु रां चहिं पाप आ वाइली बाक्ब, दे तुइक्ताकड। १कोरिन्थी १५:५७

1 येसु ख्रीस्तमी बाक्ब आन कली सजाइ मबाक्ब। रोमी ३३:३४

2 मारदे हना येसु ख्रीस्त आ ब्रोंडचा गेब सोक्त आ अरेशो लोत्रमी इन कली पाप पचा नु बेक्चा आ अरेशो लोत्र रे प्रोंडतु।

3 परमप्रभु यावेमी अरेशो लोत्र टिने मचाप्नीम, दे तुइश्शा, आ तौ कली पापी बुद पा रागीम सोइक्ताक्व। मोपा मेको कली मुर आन पाप आ पर्बम सजाइ गेप्तु। प्रेरित १८:३८; प्रेरित १५:१०; हिब्रू २:१७

4 मिनु परमप्रभु यावे आ ठीक पतीक लोत्र काप्चा कली ख्रीस्त सजाइ जपाइश्शा, बेक्चा गेप्तु। मोपा येसु आ पशोमी गो निसाफ ताइतय। परमप्रभु यावे आ सोक्त रे पा ब्रोंडशा बाक्नय। गो रागी डा मुर खोदेशो मबाक्नय। गलाती ५:१६, २५

5 सु सुमी रागी डा मुर आन थुं डा लोत्र ला मिन्नीमी, मेकोपुकीमी मुरुम पशो खोदेशो पाइनीम। सु सुमी परमप्रभु यावे आ सोक्तीम गेशो थुं डा लोत्र मिन्नीमी, मेकोपुकीमी चहिं परमप्रभु यावे आ सोक्त आ दाक्शो पाइनीम।

6 मारदे हना मुर आ थुंमी मिम्शो पाइबपुकी जाम्शा लाइनीम। परमप्रभु यावे आ सोक्तीम गेशो थुंमी मिम्शा पाइबपुकी परमप्रभु यावे नु ब्रोंडशा थुं नाइश्शा बाक्चा ताइनीम। रोमी ६:२१; गलाती ६:८

7 मुर आ थुंमी परमप्रभु यावे कली मदाक्ब आ जोरी सत्रु दुम्शा, आ देशो मटीब। मारदे हना परमप्रभु यावे आ अरेशो लोत्र थमा पा टिने मचाप्ब। याकूब ४:४

8 रागी डा मुर आन थुंमी मिम्बपुकीमी परमप्रभु यावे कली ग्येरपाइक्ने मचाप्नीम।

9 इन थुंमी परमप्रभु यावे आ सोक्त थमा पा बाक्त हना, मुर आ थुंमी मिम्शो प्रोंडशा, परमप्रभु यावे आ सोक्त रे पा मिम्ब दुम्नीनी। ख्रीस्त आ सोक्त मुर आन थुंमी मबाक्त हना, मेको मुर येसु ख्रीस्त आ मुर मनम।

10 गे चहिं येसु ख्रीस्त आ मुर दुम्तीनी। बेक्चा दा बेक्नीनी। पाप पशोमी मुर बेक्ब दुम्तेक्म। तन्न ख्रीस्त आ ठीक पतीकेमी ब्रोंडनीनी। गलाती २:२०

11 परमप्रभु यावे आ सोक्तीमी दोपा ख्रीस्त येसु कली बेक्शो रे सेंदा, मोपान इं कली यो सेंशा ब्रोंडचा गेब। मारदे हना मुल मेको सोक्त इं आगाम बाक्शा, इं कली ब्रोंडचा गेब।

12 आं लोकबपुकी “परमप्रभु यावे आ सोक्त इन आगामी बाक्ब” दे तुइक्ताक्नी हना, मुर आन थुंमी मिम्शो पचा ममाल्नीनी। रोमी ६:७, १८

13 मो पाइतीनी हना, जाम्शा लाइनीनी। तन्न गे परमप्रभु यावे आ सोक्त रे पा इन रां डा दला दाक्ब पतीक कली साइक्तीनी हना, ब्रोंडनीनी। रोमी ७:२४; गलाती ६:८; एफिसी ४:२२-२४

14 सु परमप्रभु यावे आ सोक्तीम खुल्चा पुंइसीशो बाक्मे, मेको परमप्रभु यावे आ तमी तौ बाक्नीम।

15 मारदे हना गोपुकी परमप्रभु यावे कली हिंब थुं ताक्शा, वाइल मबाक्नीनी। गोपुकी आ तमी तौ दुम्तीके मेको कली “आब्बा, आं दाक्शो आफ” दे ब्रेत्नय। गलाती ४:५-६; २तिमोथी १:७

16 गोपुकीमी “आफ” देंयानु, इं थुंमी बाक्शो परमप्रभु यावे आ सोक्तीमी इं थुं कली “परमप्रभु यावे आ तमी तौ ननी” दे सांकछी गेब। २कोरिन्थी १:२२

17 परमप्रभु यावे आ तमी तौ दुम्शा, येसु ख्रीस्त नु काथा बाक्शा, अडस ताइब दुम्तय। मेको अडस तचा डोंडती येसु ख्रीस्त आ नेमी श्येत जाइनय। नोले आ राज्य तांइसेनु, येसु ख्रीस्त नु काथा बाक्शा अडस ताइनय। गलाती ४:१७; प्रकाश २१:७

### आस पा बाक्शो

18 मुल येसु ख्रीस्त आ नेमी श्येत जाइतय। तन्न नोले परमप्रभु यावे आ बाक्तीक डा छेडछेडमी बाक्शा, मेको श्येत थम आइक्च मिन्नीनी। २कोरिन्थी ४:१७

19 परमप्रभु यावे आ सेल्शो नेल्लेमी “परमप्रभु यावे आ तमी तौ दोदेशो बाक्नीमी” दे कोत्रचा दाक्नीम। कलस्सी ३:४; १यूहन्ना ३:२

20 डोंडती रे सेल्शो नेल्ल बेक्शा राक्ब दुम्शो बाक्मा बाक्त। तन्न परमप्रभु यावेमी “काबु नाक्त प्रोंडनन्नी” दे आस गेशो बाक्माक्त। उपदेसक १:४

21 नोले परमप्रभु यावेमी आ तमी तौ आन कली बेक्शा राक्चारे प्रोंइशो खोदेशो पा आ सेल्शो नेल्ल आन कली यो आ छेडछेडमी प्रोनानु, शुश रिम्शो दुम्ब। २पत्रुस ३:१३

22 मुल सम्म आ सेल्शो मारेइ मारेइमी हिंमा क्येम्स पा परमप्रभु यावे कली “इन देशो रीब दुम्ल” दे पुंडना पुंडन बाक्नीम।

23 मेको सेल्शोमी ला ममाइ। गो नेल्ल क्येडा डोंइती परमप्रभु यावे आ सोक्त ताइबपुकीमी यो हिंमा क्येम्स पा “आंइ रां बेक्चारे प्रोनीन” दे पुंडना पुंडन आस पा बाक्नय। २कोरिन्थी ५:२

24 मेको थमा मदुम सम्म आस पा बाक्नय। थमा दुम्शा नोले आस पा बाक्चा ममाल्नय। सुमी आ तने थुम्शो कली आस पाइबा डा? २कोरिन्थी ५:७

25 तन्न गो इं मतशो मदुम सम्म “गेना दुम्बा?” दे लां कोत्रशा फाल्शा रिम्ब मुर बाक्नय। गलाती ५:५

26 गोपुकीमी परमप्रभु यावे कली आस पा बाक्यानु, परमप्रभु यावे आ सोक्तीमी इं मतुइशो तुइक्ब। मिनु गो मार पुंड्या, दे मतुइक्ताक्क हना यो, इं पर्वम हिंमा क्येम्स पा पुंडब।

27 मारदे हना परमप्रभु यावे आ सोक्तीम इं थुं डा लोत्र नेल्ल तुइक्ब, परमप्रभु यावेमी मार दाक्बा, मेको यो तुइशशा, थाम सुइक्ब आन पर्वम पुंडब।

### गो परमप्रभु आ दाक्शो बाक्नय

28 गो परमप्रभु यावे आ योत्रशो, मेको कली दाक्बपुकीमी दोदेशो श्येत जाम्तेक्म हना यो, दोदेशो ग्येरसाक्म हना यो, मार दुम्त हना यो, इं कली रिम्शो दुम्ब, दे तुइशशो बाक्नय। एफिसी १:११

29 मारदे हना आ डोंइती तुइशशो मुर कली “आं तौ खोदेशो दुम्मल” दे योत्रतु। आ तौ मेको योत्रशो लोक्ब आन क्येडा डोंइती जरमेशो बाक्ब। कलस्सी १:१८; हिब्रू १:६

30 आ तौ खोदेशो दुम्मल, दे योत्रचा पुंडसीब आन कली ब्रेत्ताक्व। मिनु ब्रेशो आन कली ठीक सेल्लु। मिनु ठीक दुम्शो आन कली बेक्चारे प्रोंइशा, आ नु काथा बाक्चा गेब। १थिस्सलोनिकी २:१३,१४; रोमी ३:२६

31 मुल मार देंनुड देंशा हना, परमप्रभु यावे गोपुकी नु बाक्त हना, सुइमी इं कली मारेइ पने चाप्नीमी डा? सुइमी मारेइ पने मचाप्नीम। भजन संग्रह ११८:६

32 परमप्रभु यावेमी इं कली दाक्शा, आ दाक्शो तौ कली इं पाप क्याम्चा कली बेक्चा गेप्लु। मोपा आ दाक्शो तौ लाइ गेवानु, इं कली मार मार माल्या, मेको मगेबा डा? गेब।

33 परमप्रभु यावे आ योत्रशो आन कली सुमी दोस गेने चाप्बा डा? सुइमी मचाप्नीम। मारदे हना परमप्रभु यावेमी मेको आन कली ठीक दुम्पाइक्तु। यसैया ५०:८

34 सुमी मेको आन कली सजाइ गेने चाप्बा डा? सुइमी मचाप्नीम। मारदे हना मेको आन बेक्चा डा बेक्शा, बेक्शो रे सेंसीशा, परमप्रभु यावे आ ग्युरा गे बाक्चा तशो ख्रीस्त येसुमी मेको आन पर्वम मपुंडबा डा? पुंडब। १यूहन्ना २:१; हिब्रू ७:२५

35 ख्रीस्तमी इं कली शुश दाक्ब। मिनु सुमी इं कली ख्रीस्त आ दाक्तीके रे फ्राने चाप्बा डा? सुइमी मचाप्नीम। श्येतमी, हिंतीकेमी, खेदा पतीकेमी, जचा मततीकेमी, फेक्चा मततीकेमी, मुर साइक्तीकेमी नु लडाइमी काइ फ्राने मचाप्नीम। भजन संग्रह ७३:२३-२६

36 श्येत जचा आ पर्वम “इन ने आ पर्वम साइक्चा पुंडसीन सीन बाक्नीकी। क्योरचा चिकशो भेडा खोदेशो दुम्तक” दे ब्रेक्शो बाक्ब। भजन संग्रह ४४:२२; २कोरिन्थी ४:११

37 मो दुम्त हना यो, मारेइ पने मचाप्नीम, मारदे हना येसु ख्रीस्तमी इं कली दाक्शा, गेनायो मप्रोंइब। मोपतीके सिक्सी पा ग्रानय। १यूहन्ना ५:४

38 “बेक्चामी, ब्रोंइचामी, परमप्रभु यावे आ स्वर्ग डा गेय पाइबपुकीमी, अधिकार पाइबपुकीमी, मुल दुम्तीकेमी, नोले दुम्तीकेमी, एफिसी ६:१२

39 इर डामी, उइ डामी नु रागीम बाक्शो मारेइ मारेइमी इं कली इं प्रभु ख्रीस्त येसुम बाक्शो परमप्रभु यावे आ दाक्शो रे फ्राने मचाप्नीम” दे यो तुइक्ताक्ड।

## 9

## यहूदीपुकीमी थमा मसुइशशो

1 ख्रीस्त आ नें ब्रशा, जोल मपथु, एको लोत्र पाइनुड। परमप्रभु यावे आ सोक्तमी आं थुंमी थमा लोत्र बाकब, दे सांकछी गेब।

2 गो इं यहूदी लोकब आन कली तशा, आं थुं शुश खाइक्ती। मेको आन कली दो पड, मार पड देशा आं थुं खुरसाक्यी।

3 आं लोकब, आ खिं डा मुर आन पा डा गो सराप रशा, ख्रीस्त रे तिल्चा पुंइसीचा यो बिस्सीड वा। प्रस्थान ३२:३२

4 मेकोपुकी इस्राएली नम। मेको परमप्रभु यावे आ तमी तौ बाकनीम। आ छेडछेडम बाकचा कली योत्रशो मुर नम, मेको आन कली कबल पशो बाकत, आ अरेशो लोत्र तुइक्पाइशशो बाकत, परमप्रभु यावे कली दोपा मान पचा, दे तुइक्पाइशशो बाकत। परमप्रभु यावेमी मेको आन कली थोकशो लोत्र पशो बाकत। प्रस्थान ४:२२; ब्यवस्था ७:६; प्रस्थान ४०:३४; उत्पत्ती १७:७; प्रस्थान २०:-

5 नेल्लेम तुइशशो किकी पिपी एको जात डा बाकमा बाकत। मिनु मेको आन दाते रे मेको नेल्ल आन क्येडा ठेयब दुम्शा ख्रीस्त जरमेसे बाकत। गोपुकीम परमप्रभु यावे कली गेना हना यो मान पय, आमेन। रोमी १:३; मत्ती १:-; लूका ३:२३-३४

## सु सु थमा इस्राएली बाकनीम

6 परमप्रभु यावे आ लोत्र मदुमथु मलीब। मारदे हना इस्राएल रागी डा मुर नेल्ल इस्राएली मदुम्नीम। गन्ती २३:१९; रोमी २:२८

7 अब्राहाम आ चच युइ शुश बाक्तेकम हना यो, मेको नेल्ल परमप्रभु यावे आ मुर मबाकमा बाकत। मेकोमी “इसहाक रे पा इ चच युइ लील” दे गेशो लोत्र खाप्शा, इसहाक कली ला योत्रडा बाकत। उत्पत्ती २१:१२

8 मोपा अब्राहाम आ खिंम जरमेशा लायो, परमप्रभु यावे आ तमी तौ, दे ब्रेत्चा मपुंइसम। तन्न परमप्रभु यावे आ लोत्र गेशोमी जरमेशोपुकीन अब्राहाम आ थमा चच युइ बाकनीम। गलाती ४:२३

9 परमप्रभु यावे आ गेशो लोत्र चहिं “बर्स का नोले लेशशा जाकुनुडानु, सारामी तौ थीब” देशो बाकब। उत्पत्ती १८:१०

10 सारा कली ला लोत्र गेशो ममाइ। इं किकी इसहाक रे पा आ मीश रेबेकामी कोत्रज कुरशा, जौले आल थिवानु,

11 मेको आल निम्फामी रिम्शो मरिम्शो मारेइ मतुइक्थु, आस जरमेचा डोंइती परमप्रभु यावेमी का कली योत्रडा बाकत। आल आ पशो तशा, योत्रशो ममाइ। परमप्रभु यावे आ दाकशो पा ब्रेशशो बाकत।

12 मेको आल आस गेय आ परबंम ममाइ, परमप्रभु यावे आ दाकशो पा आस ममा कली “आ दाग्युमी आ लोकब आ गेय पाइब” दे तुइक्पदा बाकत। उत्पत्ती २५:२३

13 मेको आल आस परबंम “याकूब कली दाक्ताकड। एसाव कली काइ मदाक्तु” दे ब्रेक्शो बाकब। मलाकी १:२-३

## परमप्रभुम आ दाकशो कली योत्रब

14 मोदेशो बाकत हना, गो मार देंचा? परमप्रभु यावेमी ठीक गेय मपवा डा? ममाइ।

15 परमप्रभु यावेमी मोसा कली “सु कली शिशी पचा दाकडा, मेको कली शिशी पाइनुड। सु कली आ श्येत रे प्रोंइचा दाकडा, मेको कली आ श्येत रे प्रोंइनुड” देशो बाकत। प्रस्थान ३३:१९

16 मारेइ मारेइ पशोमी परमप्रभु यावे आ शिशी पाइक्चा मपुंइसीब। परमप्रभु यावेमी शिशी पचा दाक्ताकव हना, शिशी पाइब। एफिसी २:८

17 परमप्रभु यावेमी फाराओ कली “नेल्ल रागी डा मुरपुकीमी आं सक्ति तशा, आं नें तुइक्तमेकल, दे इ कली वोइक्ता” देशो बाकत। प्रस्थान ९:१६

18 मोपतीके परमप्रभु यावेमी सु कली शिशी पचा दाक्ता, मेको कली शिशी पाइब। सु कली आ लोत्र मटिपाइक्चा दाक्ता, मेको कली मटिपाइक्ब। प्रस्थान ४:२१; १पत्रुस २:८

19 परमप्रभु यावेमी मो पाप्तु हना, मार, मुर आन कली दोस गेचा दुम्बा डा? आ पशो सुमी तेक्ने चाप्नीमी डा? देंनी माड।

20 गे मुर दुम्शा परमप्रभु यावे कली दोस गेचा दुम्बा डा? सेल्चा पुंडसीबमी सेल्ब कली “मारदे ओपा सेल्यी” देबा डा? यसैया ४५:९

21 खप के ग्योब सेल्बामी आ दाक्शो पा खप कांडचीक के गर, नाक्चुक तोक्तीके सेल्ने मचाप्बा डा? येरमीया १८:४-६

22 परमप्रभु यावेमी आ गाइश्शो कोंइताक्व हना, मरिम्शो पाइब आन कली शुश फाल्शो बाक्त हना यो, नोले ला खतम दुम्पाइक्ब। रोमी २:४; हितोपदेस १६:४

23 मेकोमी आ ठेयब गेय कोंइचा कली का निक्शी आन कली शिशी पशा, गेना हना यो काथा बाक्शा, आ छेडछेड कोंइचा कली योत्रतीमी। एफिसी १:३-१२

24 इं यहूदी कली ला ब्रेशो योत्रशो ममाड। अर्को रागी डा मुर आन कली यो ब्रेशा, आ मुर सेल्शा, आ नु बाक्चा ताइब सेल्तीमी।

25 होसेमी “साइ आं कली मतुइक्ब आन कली आं मुर सुइक्नुडमी। डोंइती मदाक्शो कली मुल आं दाक्शो, दे ब्रेत्तुड।

26 डोंइती मेको रागीमी परमप्रभु यावे आ मुर मबाक्म। नोले चहिं ब्रोंइशा बाक्ब परमप्रभु यावे आ तमी तौ ब्रेत्चा पुंडसीनीम” दे ब्रेक्शो बाक्त। होसे २:२५; होसे २:१

27 यसैयामी इस्राएली आन पर्वम “इस्राएल डा मुरपुकी समुन्द्र डा बाल्वा खोदेशो पा शुश दुम्तेक्म हना यो, मेको आन लीशो का निक्शी ला ब्रोंइचा ताइनीम। रोमी ११:५

28 मारदे हना प्रभुमी आ देशो खाप्शा रीब पा पाइब” दे ब्रेक्शो बाक्ब। यसैया १०:२२-२३

29 मिनु डोंइती यसैयामी “मुर नेल्ल आन परमप्रभु यावेमी आ तमी तौ सेल्चा कली का निक्शी मयोत्रशो हना, सोदोम नु गोमोररा सहर डा मुर खोदेशो दुम्शा, नेल्ल बेक्शा नुब्य वा” देशो बाक्त। यसैया १:९

### थमा ठीक पतीके

30 मिनु मुल गो मार देंचा डा? अर्को रागी डा मुरपुकीमी ठीक दुम्चा ममाल्थु, ठीक दुम्तेक्म। तन्न आन ठीक दुम्तीके मेको आन परमप्रभु यावे कली थमा सुइक्तीक रे जाक्त। रोमी १०:२०

31 तन्न इस्राएलीपुकीमी चहिं ठीक दुम्चा कली परमप्रभु यावे आ अरेशो लोत्र टिचा माल्तेक्म हना यो, ठीक दुम्ने मचबेम। रोमी १०:२-३

32 मारदे ठीक दुम्ने मचबेम देशा हना, थमा सुइश्शोमी ठीक दुम्चा ममालेम, रिती थिती डा गेय रे ठीक दुम्चा माल्तेक्म। मोपतीके दाइल पाइब फुल्लुमी राम्साक्म। मती २१:४१,४४; १पत्रुस २:८

33 मिनु “गो सियोनम फुल्लु का वोइक्नुड। मेको फुल्लुमी मुर आन कली दाइल पपाइक्ब। मिनु शुश मुर मेको फुल्लुम थोक्सीशा राम्सीनीम। सुमी मेको कली थमा सुइक्बा, मेको खतम मदुम्ब” दे ब्रेक्शो बाक्ब। यसैया ८:१४; यसैया २८:१६

## 10

1 आं लोकबपुकी, गो थमा मसुइक्ब इस्राएली आन पर्वम परमप्रभु यावे कली “थमा सुइक्पतीन” दे पुंडना पुंडन बाक्नुड।

2 परमप्रभु यावे कली तुइक्चा माल्नीम, दे तुइक्नुड। तन्न मेको आन के रुप्तीक थुं मबा।

3 परमप्रभु यावे आ डोंइती दोपा ठीक दुम्चा, मेको मरुबेम। मिनु आंमा गेय पतीकेमी ठीक दुम्चा माल्तेक्म। मोपा परमप्रभु यावे कली थमा सुइक्तीके रे ठीक दुम्तीक मपामे। रोमी १:१७

### थमा सुइक्तीक रे ठीक दुम्तीक

4 येसु ख्रीस्तमी परमप्रभु यावे आ अरेशो लोत्र खाप्ने थुम्तु। मिनु येसु ख्रीस्त कली थमा सुडक्बपुकी ठीक दुम्शो बाक्नीम। मती ५:१७; हिब्रू ८:१३; यूहन्ना ३:१८; गलाती ३:२४-२५

5 मिनु मोसामी परमप्रभु यावे आ अरेशो लोत्र पतीक रे ठीक दुम्तीके ब्रेक्शो बाक्ब। “परमप्रभु यावे आ अरेशो लोत्र टीबपुकी मेको लोत्र टितीकेन ब्रॉइनीम” दे ब्रेक्शो बाक्त देंनीम। लेवी १८:५

6 थमा सुइशशा, ठीक दुम्शोपुकीमी चहिं मार देंनीम देंशा हना, स्वर्ग सु लाइबा डा? सुइ मलाइनीम मारदे हना येसु ख्रीस्त कली ब्रथ लचा ममाल्ब। ब्यवस्था ३०:११-१४

7 बेक्शो मुर आन बाक्तीके सु लाइबा डा? सुइ मलाइनीम। मारदे हना येसु ख्रीस्त कली कुइक्थ लचा ममाल्ब।

8 तन्न मार देंशो बाक्त हना “मेको लोत्र इं नेक्था, इ थुं नु इ शोत्रमी बाक्ब” देंशो बाक्त। मेको थमा सुइक्तीक लोत्र कली शेंनीकी।

9 मिनु गेपुकीमी “येसु प्रभु बाक्ब” देंशा इन थुंमी “परमप्रभु यावेमी मेको कली बेक्शो रे सेंताक्व” दे थमा सुइक्तीनी हना, गे ब्रॉइचा ताइनीनी। मती १०:३२; २कोरिन्थी ४:५

10 मुरुमी मेको थमा सुइशशा, ठीक दुम्नीम। मिनु सु सुमी “येसु आं प्रभु बाक्ब” दे मुर आन डोंइती देंबा, मेको ब्रॉइचा ताइनीम, दे तुइक्नय।

11 मिनु परमप्रभु यावे आ लोत्रमी “सु सुमी मेको कली थमा सुइक्नीमी, मेको मुने मदोक्नीम” दे ब्रेक्शो बाक्ब। यसैया २८:१६

#### यहूदीमी “मतुइक्तक” देने मचाप्नीम

12 परमप्रभु यावेम नेल्ल आन कली कोत्रब। यहूदी नु अर्को रागी डा मुर नेल्ल आन कली कांइचीक मिम्ब। मेको आन कली प्रभु का बाक्ब। मेको कली प्रभु देंब आन कली आसीक गेशा, रिम्शो पाइब। प्रेरित १०:३४-३५; प्रेरित १५:९

13 सु सुमी प्रभु आ ने थिशा “प्रॉइयीनी” दे पुंडबा, मेको कली प्रॉइब दे ब्रेक्शो बाक्ब। योएल ३:५

14 मेको कली थमा मसुइक्बपुकीमी “प्रॉइयीनी” दे पुंडने चाप्नीमी डा? आ पर्वम मनेशो कली थमा सुइक्ने चाप्नीमी डा? सुइ शेंब मबाक्त हना, मेको लोत्र नेने चाप्नीमी डा?

15 शेंथ सोइशशो मनम हना, शेंथ लाइनीमी डा? शेंथ सोइक्चा पुंडसीब आन पर्वम ओदेंशो ब्रेक्शो बाक्ब “ग्येरपाइक्ब नु रिम्शो लोत्र शेंथ गाक्ब आन खोइल गिश रिम्शो बाक्ब” दे ब्रेक्शो बाक्ब। यसैया ५२:७

16 मेको आन लोत्र नेंशा कोइमी थमा मसुदेम। मेको आन पर्वम यसैयामी “हे प्रभु, आंइ शेंशो लोत्र सुम थमा सुदा डा?” दे ब्रेक्शो बाक्त। यसैया ५३:१; यूहन्ना १७:२०

17 डोंइती ख्रीस्त आ लोत्र नेंशा तुइक्पाइक्चा मालनीम। मेको लोत्र नेंशा ला थमा सुइक्ने चाप्नीम।

18 मार, येसु ख्रीस्त आ लोत्र यहूदीपुकीम मनन्मे डा? नेतेक्म। “एको लोत्र तेइ तेइ रागी नेल्लेमी ब्रशो बाक्त” दे ब्रेक्शो बाक्ब। भजन संग्रह १९:४

19 मोपा यो इस्राएलीमी एको लोत्र मरुप्मे डा? मोसामी यहूदी आन पर्वम ओदेंशो ब्रेक्शो बाक्त “अर्को रागी डा मुरपुकीमी आं कली थमा सुइक्चा गेनुडमी। मिनु गेपुकीमी अरु आन कली आं गे पिशो तशा, रुश पा थमा सुइक्नीनी, दे परमप्रभु यावेम देंत” दे ब्रेक्शो बाक्त। ब्यवस्था ३२:२१

20 मिनु यसैयामी एको लोत्र तेम्शा “परमप्रभु यावेमी ‘आं कली ममाल्ब मुरपुकीमी आं कली थित्तीमी। आं कली ममिम्ब आन कली आं पर्वम तुइक्पाइक्तामी’ दे ब्रेक्शो बाक्त” देंत। यसैया ६५:१

21 इस्राएल डा मुर आन कली चहिं परमप्रभु यावेमी “गो नेल्ल नाक्त मटीब नु जोप पाइब आन कली रिम्शो दुम्मल, दे आं गुइ दिस डा दिस बाक्नुड। तन्न मेकोपुकीमी आं देंशो मटीम। आं कली मरिम्शो ला सुइक्तीमी” दे ब्रेक्शो बाक्त। यसैया ६५:२

1 मिनू मो दुम्मेनु, परमप्रभु यावेमी यहूदी नेल्ल आन कली प्रोंडमी डा? मप्रोंडमी। गो यो अब्राहाम आ चच युड बेन्यामीन थर डा इस्राएली का नड। भजन संग्रह १४:१४; येरमीया ३१:३७; फिलिप्पी ३:५

2 डोंडती रे परमप्रभु यावेमी आ योत्रशो मुर आन कली मप्रोंडमी। एलीयामी इस्राएली आन पशो आ पर्वम परमप्रभु यावे कली देशो लोत्र मिम्तीन।

3 एलीयामी परमप्रभु यावे कली “परमप्रभु यावे, इन लोत्र पाइब आन कली साइक्तेकम। इन कली चढ्हेतीक नेल्ल प्रेशशा गम्तेकम। इन नोले खोइक्ब गो का ला लीती। आं कली यो साइक्चा कली माल्शा गाकनीम” दे ब्रेकशो बाक्त। १राजा १९:१०

4 परमप्रभु यावेमी एलीया कली मार लोत्र लेत्ता बाक्त देशा हना “आं नोले खोइक्ब, ७ हजार मुर योत्रतामी। मेकोपुकीमी बाल देवता आ डोंडती आन पोक्च मथेक्नीम” दे लोत्र लेशशो ममाइ डा? १राजा १९:१८

5 मुल यो परमप्रभु यावेमी शिशी पा योत्रशो का निक्शी लीशो बाक्नीम। रोमी ९:२७

6 मेको आन पशोमी ममाइ, परमप्रभु यावेमी मोशा शिशी पा आ मुर सेल्लतीमी। आन गेय आ पर्वम पशो हना, शिशी मली वा।

7 मिनू मार देंचा डा? इस्राएलम माल्शा यो आ माल्शो मथित्थु, परमप्रभु यावे आ योत्रशो का निक्शी ला ठीक दुम्तेकम। अरु नेल्ल परमप्रभु यावे आ लोत्र मटीब दुम्तेकम। रोमी ९:३१

8 मेको आन पर्वम यसैयामी “परमप्रभु यावेमी मेको आन कली मरुब्ब थुं गेत्तु। मेकोपुकी मिक्च मताइब नु नोफा मनैब दुम्शा बाक्शो बाक्नीम। मुल सम्म मोदेशो दुम्शा बाक्नीम” दे ब्रेकशो बाक्त। यसैया २९:१०; ब्यवस्था २९:४

9 दाऊदमी “मेको आन भोज आन कली ग्याइली खोदेशो दुम्ल। मेको आन कली बेक्तीक नु क्येक्क लेत्तीक दुम्ल।

10 मेको मिक्च मताइब दुम्मल। मिनू वाइलीम वाइल खोदेशो दुम्शा, श्येत जामेक्ल” दे ब्रेकशो बाक्त। भजन संग्रह ६९:२१-२३

### अर्को रागी डा मुर

11 मिनू मुल मार देनुडा? मेकोपुकी गेनायो मबोक्चा डा पा राम्समा डा? ममाइ। इस्राएली आन मरिम्शो पतीके अर्को रागी डा मुरपुकीम शिशी तशो बाक्नीम। मेकोपुकीम रुश पामेक्ल, दे मोदेशो दुम्शो बाक्ब। प्रेरित १३:४६; रोमी १०:१९

12 तन्न इस्राएली आन राम्सीतीके रागी नेल्ल आन कली रिम्शो नु अर्को रागी डा मुर आन कली शोंप दुम्त हना, मेको नेल्लेम थमा सुदेम हना, चिनु गिश रिम्शो दुम वा।

13 मिनू गो अर्को रागी डा मुर, इन कली “गो अर्को रागी डा मुर आन कली लोत्र शेंथ सोइक्चा पुंइसाक्यी। एको शेंतीक गेय शुश रिम्शो लाक्ती।

14 मारदे हना अर्को रागी डा मुर आन कली थमा सुइशो तशा, आं जात डा मुर का निक्शीमी यो रुश पा थमा सुइक्नीमी कों, दे आस पा बाक्ती।” १कोरिन्थी ९:२०-२२; १तिमोथी ४:१६

15 परमप्रभु यावेमी मुल इस्राएली आन कली मकोव्रथु, अर्को रागी डा मुर आन कली शिशी पा ब्रशा, नोले यहूदी आन कली यो ब्रवानु, शुश रिम्शो मदुम्बा डा? एको दा बेक्शो रे सेंसीशो खोदेशो ठेयब दुम्ब।

16 निशो फस रे डोंडती डा शोब्ले परमप्रभु यावे के दुम्त हना, नेल्ल निशो फस रिम्शो दुम्ब। शाक्श रिम्शो बाक्त हना, राशी नेल्ल यो रिम्शो दुम्नीम। गन्ती १५:२०

17 रिम्शो तेल रवा खोदेशो इस्राएल रे राशी का निक्शी क्योरशा गुंइशो बाक्तेकम हना, गे रागी रागी डा मुर ब्वाकी डा तेल रवा खोदेशो पा, मेको रवामी इन राशी क्येप्या पुंइसाक्नी हना, गे मेको रवा आ शाक्श रे ताइनीनी। मेको मप्रेंदीन। एफिसी २:११-१४



18 मो हना यो क्योरशा ताइश्शो राशी, दे मेको आन कली “गो इन क्येडा ठेयब दुम्तक” दे ठेयब लेशो लोत्र मपने। मारदे हना गेपुकी यो राशीन ननी। राशीमी शाकश कली मतिकब। शाकशम राशी कली तिकब, दे तुइक्तीने। यूहन्ना ४:२२

19 गेपुकीमी “मेको क्योरशा ताइश्शो राशी आ पा डा गो दुम्तय” देंतीनी।

20 इन देशो ठीक बाकब। मेकोपुकीमी थमा मसुदेम। मिनु परमप्रभु यावेमी मेको आन कली क्योरशा ताइक्ताकव। इन थमा सुइश्शो तशा इन कली चहिं रिम्शो फल रवाम केप्शो खोदेशो पा आ मुर सेल्लतु। काइ ठेयब मलेत्थु, परमप्रभु यावे कली मान पा हिंशा बाक्कीन। १कोरिन्थी १०:१२

21 परमप्रभु यावेमी डोंइती डा राशी आन कली क्योरशा ताइक्ताकव हना, मार, गे नोले केप्शो राशी इन कली मताइक्बा डा?

22 परमप्रभु यावेमी दोदेशो शिशी पाइबा, दोदेशो सजाइ गेबा, दे रुपीन। साइ डोंइती रे डा आ लोत्र थमा मसुइक्थु मटीब आन कली खोइश्शा ताइक्ताकव। आ लोत्र मटिथु, थमा सुइक्चा प्रोंइतीनी हना, इन कली यो खोइश्शा ताइक्ब, दे तुइक्तीन। गे परमप्रभु यावे कली दाक्शा, थमा सुइक्चा मप्रोंइतीनी हना ला, इन कली यो दाक्चा मप्रोंइब। यूहन्ना १५:२-४; हिब्रू ३:१४

23 मेको क्योरशा ताइश्शो राशी खोदेशो दुम्शो यहूदीपुकीमी आन थुं परमप्रभु यावे गे लेशशा, थमा सुइक्तेकम हना, रिम्शो फल रवाम लेशा केप्शो खोदेशो पा आ मुर सेल्ले चाप्ब।

24 डोंइती क्योरशा ताइश्शो राशी बोइक्चा कली श्येत मदुम्ब। तन्न अर्को ब्वाकी डा तेल रवा आ राशी माल्शा चाक्शा, केप्चा कली शुश श्येत बाकब। परमप्रभु यावेमी इन कली केप्ताकव। मिनु इन कली केप्चा क्येडा यहूदी आन कली केप्चा श्येत मबाकब।

### यहूदीपुकी यो ब्रोंइनीम

25 आं लोक्बपुकी, आं शेंशो खुइश्शो लोत्र रिम्शो पा रुपतीनी हना, गे ठेयब मलेत्तीनी। योत्रसीचा पुंडसीशो अर्को रागी डा मुर आन कली आ मुर सेल्ले मथुमा सम्म परमप्रभु यावेमी इस्राएली आन कली येसु ख्रीस्त आ पर्वम मरुप्ब सेल्लतीमी। यूहन्ना १०:१६

26 योत्रसीचा पुंडसीशो अर्को रागी डा मुरपुकीमी थमा सुदमे डा मेरे इस्राएली नेल्लेमी रुप्शा, थमा सुइश्शा, ब्रोंइचा ताइनीम। “सियोनमी पाप रे प्रोंइब का गूब। मेकोमी याकूब कली आ मरिम्शो पतीके रे प्रोंइब। मती २९:३९; भजन संग्रह १४:७

27 मेको आन पाप क्याम्नुड। मिनु मेको आन कली गेशो कबल खान्नुड” दे ब्रेक्शो बाकब। यसैया ५९:२०, येरमीया ३१:३३

28 मुल सम्म इस्राएलीपुकीमी ख्रीस्त परमप्रभु यावे आ सोइश्शो पाप रे प्रोंइब बाकब, दे थमा मसुइक्नीम। मोपतीके परमप्रभु यावे आ जोरी सत्रु दुम्तेकम। आन थमा मसुइश्शोमी इन कली चहिं रिम्शो दुम्त। परमप्रभु यावेमी आन किकी पिपी आन पर्वम मेको आन कली योत्रशा, दाक्ब।

29 परमप्रभु यावेमी गेशो नु आ योत्रतीक गेनायो मजाम्ब। गन्ती २९:१३

30 गेपुकीमी यो परमप्रभु यावे आ लोत्र मटिनी। यहूदीपुकीम मटितीके परमप्रभु यावेमी इन कली शिशी पा थमा सुइक्चा गेप्तु। मिनु मुल गे परमप्रभु यावे आ शिशी ताइब दुम्तीनी।

31 यहूदीपुकीमी मुल सम्म परमप्रभु यावे आ लोत्र मटीमे। नोले परमप्रभु यावेमी मेको आन कली यो शिशी पाइब।

32 मारदे हना परमप्रभु यावेमी इस्राएली नु अर्को रागी डा मुर नेल्ल आन कली आ लोत्र मटिशा तशा, खाल का डा पा वोइक्तीमी। मिनु नोले नेल्ल आन कली शिशी पाइब। गलाती ३:२२; १तिमोथी २:४

### परमप्रभु कली ठेयब सेल्य

33 परमप्रभु यावेमी नेल्ल तुइक्ब। परमप्रभु यावे सक्ति पाइश्शो नेल्ल क्येडा ठेयब बाकब। मुरपुकीमी परमप्रभु यावे आ निसाफ पशो, मुर आन कली पाइश्शो, सुइमी रुन्ने मचाप्नीम। यसैया ४५:१५; यसैया ५५:८-९

34 मिनू “सुमी प्रभु आ थुं तुइक्ने चाप्नीमी डा? सुमी मेको कली अर्ती गेने चाप्नीमी डा?” दे ब्रेक्शो बाक्ब। १कोरिन्थी २:१६; येरमीया २३:१८; यसैया ४०:१३

35 “सुमी परमप्रभु यावे कली मार मार गेशा, परमप्रभु यावेमी मार मार गेचा माल्ब, देने चाप्बा डा?” दे ब्रेक्शो बाक्ब। अय्युब ४१:३

36 परमप्रभु यावेमी मार बाक्त हना यो, आंमान सेल्लु। मिनू मारेइ मारेइ आइक्के नम। मिनू आ गोशो गेय आंमान थुब्ब, दे तुइक्तय। मोपतीके “परमप्रभु यावे नेल्ल क्येडा ठेयब बाक्ब” दे ठेयब सेल्लतीक गेना हना यो लील। आमेन।

## 12

### परमप्रभु आ दाक्शो पने

1 आं लोक्बपुकी, इन कली मुल यो शुश शेंचा दाक्ताक्ड। परमप्रभु यावेमी इन कली शिशी पा आ मुर सेल्लु। मोपतीके आ मुर दुग्शा, इन रां, थुं, गिंम नेल्ल, सेसीन परमप्रभु यावे आ दाक्शो चढ्देतीक खोदेशो पा जिम्मा गेंसीन। मेको इन परमप्रभु यावे कली रिग्शो पशो गेय बाक्ब। रोमी ६:१३

2 परमप्रभु यावे कली मटीब आन पशो खोदेशो मपने। तन्न परमप्रभु यावे कली इन थुं कली फाइक्चा गेन। मो पाइतीनी हना, परमप्रभु यावे आ मिग्शो मार में, रिग्शो मार में, आ दाक्शो मार में नु नेल्लेम ठीक दुग्शो तुइक्नीनी। एफिसी ४:२३; एफिसी ५:१०,१७

3 परमप्रभु यावेमी आं कली शिशी गेशा, शेंब सेल्लती। इन दातेमी सुइ आंम कली ठेयब मसेल्सीन। परमप्रभु यावेमी इन कली दोदेशो थमा सुइक्तीक गेवा, मेको मिग्शा ब्रेग्शो दुग्शा बाक्कीन। मती २०:२६; १कोरिन्थी ४:६; १कोरिन्थी

4 रां कामी गुइ, खोइल, मिक्च, नोफा, शोत्र बाक्नीमी। मेको नेल्ल आन के आन आन गेय बाक्ब। १कोरिन्थी १२:१२

5 मोपा गोपुकी नेल्ल ख्रीस्तम रां का बाक्नय। गेय का का गेचा पुंडसाक्च। १कोरिन्थी १२:२७; एफिसी ४:४,२५

6 गोपुकीमी परमप्रभु यावे आ शिशी पा गेशो गेय का का पय। परमप्रभु यावेमी इ कली आ लोत्र तुइक्पाइग्शा नेंपाइक्ब योत्रतु हना, थमा सुइग्शा मेको लोत्र नेंपतो। १कोरिन्थी ४:७; १कोरिन्थी १२:४; १पत्रुस ४:१०

7 मुर आन कली वारच पचा कली योत्रने पुंडसाक्वे हना, वारच पावो। शेंब सेल्चा पुंडसाक्वे हना, शेंब दुमो। १पत्रुस ४:११

8 अर्ती गेब योत्रने पुंडसाक्वे हना, अर्ती गेचा मब्रीदो। मुर आन कली मार गेप्तीवी हना यो, ठेयब सेल्सीचा कली मगेवो। थमा सुइक्ब आन लां कौंडब दुम्ते हना, होस पा गेय पावो। शिशी पवीनु, ग्येरशा पावो। मती ६:३; २कोरिन्थी ८:२; २कोरिन्थी ९:७

### दाक्चा आ पर्वम

9 थमा पा दाक्मुशा बाक्कीन। मरिग्शो गेय रे डोन बाक्कीन। रिग्शो पने। १तिमोथी १:५; आमोस ५:१५

10 लोक्बपुकीमी दाक्मुशो खोदेशो पा दाक्मुशा बाक्कीन। आंम कली मान पचा मपुंडसीथु, अरु आन कली मान पने। यूहन्ना १३:४-१५; फिलिप्पी २:३

11 पचा माल्शो गेय अल्सी मपथु पने। परमप्रभु यावे आ सोक्तीम इन थुंम मी ब्रशो खोदेशो आ प्रभु कली गेय पने। प्रकाश ३:१५; प्रेरित १८:२५; कलस्सी ३:२३

12 आस पा ग्येरसीशा बाक्कीन। श्येत जनीनु, फाल्शा बाक्कीन। प्रार्थना पना पन बाक्कीन। लूका १८:१-८; कलस्सी ४:२; १थिस्सलोनिकी ५:१७

13 थमा सुइक्ब आन कली आन माल्शो गेशा, वारच पने। इन खिंमी जाक्ब आन कली बास गेशा थुलीन। ३यूहन्ना ५-८; हिब्रू १३:२

14 सराप चीले मपने। इन कली सराप चीले पाइब आन कली आसीक गेने। मत्ती ५:४४; प्रेरित ७:५९; १कोरिन्थी ४:१२

15 ग्येरसीशोपुकी नु ग्येरसीने, डाकशोपुकी नु डाककीन। भजन संग्रह ३५:१३-१४; २कोरिन्थी ११:२९

16 थुं का डा दुग्शा, दुशा गारशा बाककीन। जोकब तुइकब नड, दे ठेयब मलेत्तीने। आंम महिक्सीशो सुंइसीन। जोकब तुइकब ममिम्सीने। रोमी १५:५; फिलिप्पी २:२; यसैया ५:२१

17 इन कली मरिम्शो पाइब आन कली मरिम्शो मपने। मुर आन कली मार रिम्शो बाकबा, मेको मिम्तीन। हितोपदेस २०:२२; १थिस्सलोनिकी ५:१५; २कोरिन्थी ८:२१

18 चाप्बी सम्म मुर आन कली जिचा मतोने। मुर नेल्ल नु दुशा गारशा बाककीन। मर्कूस ९:५०; हिब्रू १२:१४

19 आं दाकशो लोकबपुकी, इन कली श्येत गेब आन कली आंमा क्येक्क मलेत्तीन। परमप्रभु यावेमी गाइशशा, मेको आन कली मारेइ पवल, दे सिक्सी पा बाककीन। मारदे हना “क्येक्क लेत्तीक गेय आं केन बाकब। मिनु गोन पाइनुड, दे परमप्रभु यावेमी देंब” दे ब्रेकशो बाकब। ब्यवस्था ३२:३५; लेवी १९:१८; मत्ती ५:३८-४४

20 क्येक्क मलेत्त्या ला ममाइ। “इ जोरी सत्रु शोत्रलु बेक्तेकम हना, जचा गेवो। तूतू दाक्तेकम हना, तूचा गेवो। मो पाप्तीवी हना, मेको आन पियामी मी मोइशशो खोदेशो पा, मुने तोक्नेवे” दे ब्रेकशो बाकब। हितोपदेस २५:२१-२२

21 मरिम्शोमी रिम्शो कली लाक्या मगेव। रिम्शोमी मरिम्शो कली ग्रापतो।

## 13

सरकार आ पबंम शेशो

1 गो नेल्लेमी सरकार आ हुकुम टिचा मालन्य। मारदे हना रागी डा नेल्ल सासन पाइब आन कली परमप्रभु यावेमी योत्रशा, अधिकार गेशा वोइशशो बाक्नीम। तीतस ३:१; हितोपदेस ८:१५; यूहन्ना १९:११

2 सरकार आ हुकुम मटिथु, गेय पांम्तेकम हना, सरकार कली मटिशो ला ममाइ, परमप्रभु यावे कली यो मटिशो खोदेशो दुम्ब। मिनु सजाइ गेचा पुंइसीनीम।

3 रिम्शो पाइबपुकी सरकार आ हुकुम तशा महिनीम “रिम्शो पाइतीनी” देनीम। मरिम्शो पाइबपुकी चहिं हिनीम। १पत्रुस २:१३-१४

4 मुर आन कली रिम्शो पपाइक्चा कली परमप्रभु यावेमी सरकार वोइक्तु। गे मरिम्शो पाइतीनी हना, सरकार क्येडा हिनीन। मारदे हना सरकारमी सजाइ गेचा कली परमप्रभु यावे रे अधिकार तशो बाकब। मिनु मरिम्शो पाइब आन कली सजाइ गेब। २इतिहास १९:६-७

5 “सरकारमी सजाइ गेब” दे मिम्चा ला ममाइ। रिम्शो पय, दे इ थुं फ्रेशा बाक्य।

6 मोपतीके परमप्रभु यावेमी सरकार कली योत्रशा, गेय पपाइक्तु, दे तुइशशा, गेपुकीमी तिरो थाप्नीनी।

7 तिरो, भन्सार थाप्तीने। हिक्चा पुंइसीशो कली हिक्कीने, मान पचा पुंइसीशो कली मान पने। मत्ती २७:२१

दाक्तीकेम अरेशो लोत्र खाप्शो

8 मारेइ मारेइम दाकमुशा बाककीन। दाक्ताक्नी हना, परमप्रभु यावे आ अरेशो लोत्र खाप्नीनी। गलाती ५:१४; १तिमोथी १:५

9 मेको लोत्रमी मार ब्रेकशो बाकब देशा हना “मीश वोइश आस नाता मखोइक्चा, मुर मसाइक्चा, खुइ मपचा, मवाल्चा” अरु मपचा डा गेय यो बाक्नीम। मिनु मार पा मेको लोत्र खाप्सीब देशा हना, आंम कली दाकशो खोदेशो पा आंम नेक्था डा आन कली दाक्शा, खाप्सीब। प्रस्थान २०:१३-१७; लेवी १९:१८

10 मोपा दाक्ताक्नी हना, मुर आन कली मरिम्शो मपाइनीनी। दाकशोमीन परमप्रभु यावे आ अरेशो लोत्र खाप्शो बाकब। १कोरिन्थी १३:४; मत्ती २२:४०

### छेडछेडम बाक्ब मुर दुम्य

11 आं देशो टिशा रिम्शो पने। सेंसीशा बोक्शो खोदेशो दुम्य। मारदे हना साइ थमा सुइक्ब दुम्शो नाक्त क्येडा मुल परमप्रभु यावे नु बाक्ची नाक्ती इ नेक्था जाक्त, दे तुइक्तय। १थिस्सलोनिकी ५:६-८; एफिसी ५:१४

12 नाक्दो लाक्शा नां सोक्शा, छेडछेडम बाक्शो खोदेशो दुम्शा, होस पा बाक्कीन। छिडछिड डा गेय ताइश्शा, छेडछेड डा या पिम्सीन। १यूहन्ना २:८; एफिसी ५:११

13 नाक्ती छेडछेड दुम्शो खोदेशो पा रिम्शो गेय पय। छिडछिड डा गेय मार बाक्नीम देशा हना, शुश जचा ब्वचा, दुक्शा हेंथे गाक्चा, तेल्लेम पा, ग्राम्रा दिचा डा गेय पचा, जिचा खेचा नु रुश पचा बाक्नीम। लूका २१:३४; एफिसी ५:१८

14 नक वा फेक्शो खोदेशो पा प्रभु येसु ख्रीस्त नु रां का दुम्शा, इन रां कली मरिम्शो पचा मगेने। गलाती ३:२७; १कोरिन्थी ९:२७; कलस्सी २:२३

## 14

### दाल्गीर मपथु गेय पचा

1 मिनु का निक्शी आन थमा सुइक्तीके बोल्यो मदुम्शो बाक्त हना यो, इन गुम्तीकेमी जाक्चा गेन। तन्न मेको नु आन मिम्तीक आ परबम लोत्र मपने। रोमी १५:१; १कोरिन्थी ८:९

2 मुर कामी नेल्ल जचा दुम्बा, दे मिम्बा, आ थमा सुइक्तीकेम बोल्यो मदुम्शो मुरुम चहिं गिग खाइ ला ब्वाइब। उत्पती १:२९; उत्पती ९:३

3 मिनु श्ये ब्वाइबमी श्ये मब्वाइब आन कली आइक्च मसेलीन। मिनु श्ये मब्वाइबमी श्ये ब्वाइब आन कली यो दोस मगेन। मारदे हना जचा ब्वचामी मारेइ मपाइब। परमप्रभु यावेमी मुर आन कली कांडचीक पा दाक्शा, आ मुर सेल्लतीमी। कलस्सी २:१६

4 मुर आन गेय पाइब कली निसाफ पाइब गे सु बाक्ने? आ होत्रपमी ला मेको कली निसाफ पाइब। मेको ठीक दुम्ने चाप्व, मारदे हना परमप्रभु यावेमी मेको कली ठीक सेल्ले चाप्व। मती ७:१; याकूब ४:११-१२

5 का निक्शी मुरुमी नेल्ल नाक्त कांडचीक मिम्नीम। का निक्शीम चहिं नाक्त का कली ठेयब मिम्नीम। तन्न मार रिम्शो बाक्बा, मेको आंमा तुइक्चा माल्नीम। गलाती ४:१०

6 थमा सुइक्बपुकीमी नाक्त का कली ठेयब मिम्तमेनु, परमप्रभु यावे कली मिम्शा ठेयब मिम्नीम। श्ये ब्वामेनु, परमप्रभु यावे कली मिम्शा ब्वाइनीम। श्ये मब्वाइबपुकीमी यो परमप्रभु यावे कली “गे रिम्शो पाइब बाक्नीनी” दे मिम्शा मब्वाइनीम।

7 गो नेल्ल आम कली मब्रॉइनय, आम कली मबेक्नय।

8 ब्रॉइतय हना यो, परमप्रभु यावे आ नें ठेयब सेल्ला कली ब्रॉइय। बेक्तय हना यो, परमप्रभु यावे आ नें ठेयब सेल्ला कली बेक्य। ब्रॉइतय हना यो, बेक्तय हना यो, परमप्रभु यावे आ मुर नय। २कोरिन्थी ५:१५; गलाती २:२०

9 मारदे हना ख्रीस्त बेक्शा, बेक्शो रे सेंसीशा, नेल्ल आन कली कोत्रब दुम्त। बेक्शो, ब्रॉइशो मुर नेल्ल आन प्रभु बाक्ब।

10 मिनु मार, इं लोकब आन कली नाक्चा दुम्बा डा? आइक्च सेल्ला दुम्बा डा? काबु नाक्ती परमप्रभु यावेमी नेल्ल इं कली आ ठेयब नित्तीक आ डोंइती खुप्शा, का का पा निसाफ पाइब। मती २५:३१-३२; प्रेरित १७:३१; २कोरिन्थी ५:१०

11 मारदे हना “प्रभुमी गो ब्रॉइशा बाक्शो खोदेशो पा, मुर नेल्लेमी आं डोंइती आन पोक्च थक्नीम। मिनु नेल्लेमी परमप्रभु यावे कली ठेयब सेल्लनीम” दे ब्रेक्शो बाक्ब। यसैया ४५:२३; फिलिप्पी २:१०-११

12 गो नेल्लेमी परमप्रभु यावे आ डोंइती मार पशो बाक्चा, मेको का का पा शोत्रचा माल्नय।

13 मोपतीके आम आंमा मनाक्मुय। थमा सुइक्ब लोकब आन थुं खाइक्पाइक्चा डा गेय मपमुय। १कोरिन्थी १०:३३

- 14 गो प्रभु येसु आ मुर दुम्शा, मारेड मारेड जचा थोत्रक रिम्शो बाकब, दे शेंसाकड। तन्न सुमी ग्रांगा दिशो मिम्बा, मेको कली ग्रांगा दिशोन दुम्ब। मती १५:११; प्रेरित १०:१५; तीतस १:१५
- 15 गे मार मार जशा ब्वशा, इ लोकब आ थुं खाइकपाइकनेवे हना, इ मदाकतीके कोइनेवे। इ जचा थोत्रकम पतीके इ ख्रीस्त बेकशो लोकब कली खतम मसेलो। १कोरिन्थी ८:११-१३
- 16 मोपतीके गे मार दाक्नीनी, मेको कली मुरुम ग्रांगा दिचा मगेने।
- 17 परमप्रभु यावे आ राज्य जचा तूचा आ पबंम ममाइ। परमप्रभु यावे आ सोक्त रे पा थमा सुइकबपुकीमी रिम्शो गेय पशा, दुशा ग्येरशा बाकचा आ पबंम बाकब। १कोरिन्थी ८:८; हिब्रू १३:९
- 18 गे मोपा ख्रीस्त आ गेय पाइतीनी हना, परमप्रभु यावे आ दाकशो नु मुर आन डोंइती मान ततीक दुम्ब।
- 19 मोपतीके दुशा गारशा नु थमा सुइकतीक थुं बारपाइकमुशा बाक्य। रोमी १२:१८; रोमी १५:२
- 20 गे जचा थोत्रक आ पबंम परमप्रभु यावे आ गेय मक्याम्दीने। मारेड मारेड जचा ठीक बाकब। तन्न होस पने। मारदे हना इन जचा ब्वचामी इन लोकब आन थुं खाइकपाइकतीनी हना, मरिम्शो दुम्ब।
- 21 मोपतीके श्ये मब्वथु, अडगुर शांबु मतूथु, इन लोकब आन कली थुं मखाइकपाइकथु, बाकचा रिम्शो दुम्ब। रोमी १४:२; १कोरिन्थी १०:२५-२७
- 22 इ थमा सुइकतीके परमप्रभु यावे आ डोंइती बाकब। इन जचा थोत्रक आ पबंम दालगीर मपाइतीनी हना, गे ग्येरसीशो मुर दुम्नीनी।
- 23 दालगीर पा जाइब चहिं दोस ताइब दुम्ब। मारदे हना आ थमा सुइकतीक रे मपाइब। मोपा थमा मसुइकतीक रे पशो गेय नेल्ल पाप बाकब।

## 15

- 1 गो थमा सुइकचामी बोल्यो दुम्शोपुकीमी, आंम कली ठेयब मसेलथु, बोल्यो मदुम्शो थमा सुइकब आन कली वारच पय। रोमी १४:१
- 2 इं दातेम नेल्लेमी अरु आन कली रिम्शो पा आन थमा सुइकतीक थुं बारपाइकब दुम्चा मालनय। १कोरिन्थी ९:१९; १कोरिन्थी १०:२४,३३
- 3 ख्रीस्तमी यो आंमा दाकशो मपव “इन कली पशो शुकशी, आं तार मोंइसाकव” दे ब्रेकशो बाकब। भजन संग्रह ६९:९
- 4 डोंइती ब्रेकशो नेल्ल इं कली शेंचा कली ब्रेकशो बाकत। मेको लोत्र पडेशा, फालशा इं थुं बारपा, आस पा बाक्य। १कोरिन्थी १०:११
- 5 फालतीक सक्ति गेब नु थुं बारपाइकब परमप्रभु यावेमी इन कली थुं का दुम्शा, दुशा गारशा बाकचा गेवल। दुशा गारशा बाकतीनी हना, ख्रीस्त येसु आ गेय पाइब दुम्नीनी। फिलिप्पी २:२
- 6 मिनु गे थुं का नु लोत्र का पा इं प्रभु येसु ख्रीस्त आ आफ परमप्रभु यावे कली ठेयब सेल्ल दुम्नीनी।
- 7 दोपा येसु ख्रीस्तमी इन कली दाकशा ब्रवा। मोपान गेपुकी यो दाकमुशा ब्रमुने। मो पनीनु, परमप्रभु यावे कली ठेयब सेलीनी।
- 8 इं किकी पिपी आन कली गेशो लोत्र खाप्चा कली ख्रीस्त यहूदी आन कली पाप रे प्रोंडब दुम्त। मोपा परमप्रभु यावे आ देशो थमा बाकब, दे कोइचा कली मोदेशो दुम्त। मती १५:२४; प्रेरित ३:२५
- 9 अर्को रागी डा मुरपुकीमी परमप्रभु यावे आ शिशी आ पबंम मेको कली ठेयब सेल्लेकल। मोपतीके “अर्को रागी डा मुर आन दातेमी इन नें तुइकपा कुम्सो पाइनुड” दे ब्रेकशो बाकब। भजन संग्रह १८:४९
- 10 मिनु लेंशा “अर्को रागी डा मुर आं योत्रशो मुरपुकी नु थुं का दुम्शा, ग्येरसीन” दे ब्रेकशो बाकब। ब्यवस्था ३२:४३
- 11 चिनु “ए, अर्को रागी डा मुर नेल्लेमी परमप्रभु यावे कली ठेयब सेलीन, जात नेल्लेमी मेको कली मान पचा मालनीम” दे ब्रेकशो बाकब। भजन संग्रह ११७:१
- 12 यसैयामी “येस्से आ बडस रे का गूशा, ठेयब दुम्शा, अर्को रागी डा मुर आन कली सासन पाइब। मिनु मेको कली सासन पशो तशा, नेल्लेमी ‘इं कली श्येत रे प्रोंडब’ दे ग्येरशा, आस पा बाक्नीम” दे ब्रेकशो बाकत। यसैया ११:१०; प्रकाश ५:५

13 आस गेब परमप्रभु यावे आ सोक्तीमी इन कली शुश ग्येरपा, थुं नाइक्पा बाक्चा गेवल। मोपा इन थमा सुइक्तीकेमी ठेयब आस पा बाक्कीन।

### पावल आ गेय

14 आं लोकबपुकी, गे इन दातेमी दाक्मुशा, रिम्शो पा जोक्ब तुइक्ब दुम्शा नु शंमुने चापब दुम्शो बाक्नीनी, दे तुइक्ताक्ड।

15 परमप्रभु यावेमी आं कली शिशी पा शेंब सेलती। मोपतीके गो एको चिठीमी इक्का ठेयब लोव्र पा ब्रेक्ताक्ड। रोमी १:५; रोमी १२:३

16 गो रागी रागी डा मुर आन कली ख्रीस्त येसु आ गेय पाइब दुम्ती। गो चढेब खोदेशो पा परमप्रभु यावे आ गेय पाइनुड। परमप्रभु यावे आ सोक्त आ पतीकेमी रागी डा मुर नेल्ल आ दाक्शो चढेतीक खोदेशो दुम्मल। रोमी ११:३३

17 मेको शेंतीक गेय पचा कली ख्रीस्त येसुमी बोल नु सक्ति गेती। मिनु परमप्रभु यावे आ डोंइती “गो ठेयब गेय पाता” देंती।

18 ख्रीस्तमी पपाइश्शो गेय आ पबंम ला लोव्र पाइनुड। गो आंमा गेय पा अर्को रागी डा मुर टीब दुम्मल, दे मेको आन कली शेंतीक गेय यो पना पन बाक्ती। २कोरिन्थी ३:५; रोमी १:५

19 परमप्रभु यावे आ सोक्तीम गेशो सक्तिमी चिन्ड नु छक लाक्चा डा गेय कोंइताक्डमी। यरूसलेम सहर रे लशा, इल्लीरीकुम रागी सम्म जाक्दीश्शा, सहर सहर, गाउं गाउंमी ख्रीस्त आ ग्येरपाइक्ब लोव्र नेल्ल शेंना शेंन गाक्ती। मर्कूस १६:१७; २कोरिन्थी १२:१२

20 डोंइतीन ख्रीस्त आ लोव्र नेने थुम्शो आन बाक्तीकेम, मलड। मुल सम्म ख्रीस्त आ नें मनेशो आन कली शेंनुडमी देंशा, शेंना शेंन गाक्ती। २कोरिन्थी १०:१५-१६

21 मिनु “आं लोव्र तुइक्पाइक्चा मपुंडसीशोपुकीमी तुइक्चा ताइनीम। मिनु मनेशोपुकीमी रूपनीम” दे ब्रेक्शो बाक्ब। यसैया ५२:१५

### रोम लचा चिक्शो

22 गो मोदेशो शेंना शेंन गाक्डानु रोममी बाक्ब थमा सुइक्ब आन कली गुम्थ लाइनुड, दे डोंइती रे देंती, तन्न मुल सम्म इन कली गुम्चा मतड। रोमी १:१३

23 शुश बर्स रे इन कली गुम्तीक थुं पा बाक्ती। मुल एकेर डा गेय थुम्शा,

24 गो दीसा नित्थी एकेर रे गाक्शा, स्पेन रागी लाइनुड। मिनु इन बाक्तीके यो ओव्रशा गुम्नन्नी। गुम्पानु, ग्येरसीशा, आं थुं नाइक्चा तडल देंती। मिनु नोले आं कली स्पेन सम्म चोव्रदीनीनी कों, दे आस यो पाता।

25 स्पेन लचा डोंइती थमा सुइक्ब आन कली वारच पथ यरूसलेम लाइनुड। प्रेरित १८:२१; प्रेरित १९:२१; प्रेरित २०:२२; प्रेरित २४:१७

26 मासीडोनीया नु आकाया रागीमी बाक्ब थमा सुइक्बपुकीमी “यरूसलेमम बाक्ब थमा सुइक्बपुकीमी जचा मतामे” देशो नेशा, क्येत पोक्शा गेतीमी। मोपतीके मेको आन कली क्येत चोव्रथ लाइनुड। १कोरिन्थी १६:१; २कोरिन्थी ८:१-४

27 मारदे हना डोंइती यरूसलेमम बाक्ब थमा सुइक्बपुकीमी मेको आन कली येसु ख्रीस्त आ लोव्र शेंशो बाक्तेकम। मोपतीके मुल मेको आन कली श्येत दुम्तीके, क्येत पोक्शा, चोव्रथ सोइक्ताक्कीमी। १कोरिन्थी ९:११; गलाती ६:६

28 मेको आन कली सोइश्शो क्येत चोव्रशा, स्पेन लाइनुड। लडानु, इन बाक्तीके यो ओव्रनुड।

29 इन बाक्तीके जाक्डानु, ख्रीस्त आ आसीकम जाक्नुड, दे तुइक्ताक्ड।

30 आं लोकबपुकी, इं प्रभु येसु ख्रीस्तमी इं कली थुं का सेल्लु। परमप्रभु यावे आ सोक्तीमी दाक्मुपाइक्तु। मिनु थमा पा वोबु दुम्त्य। मोपतीके आं पबंम परमप्रभु यावे कली पुंडना पुंडन बाक्कीन। २कोरिन्थी १:११; २थिस्सलोनिकी ३:१

- 31 मार पुनीन देंनुड देंशा हना “पावल कली यहूदीया रागीम बाकब थमा मसुइकब आन गुड रे प्रोनीन। मिनु यरूसलेम जाकदीशशा, मेकेर बाकब थमा सुइकब आन कली वारच पचा गेने।
- 32 परमप्रभु यावे आ दाकशो पा ग्येरसीशा यरूसलेम रे पिशा, आंइ कली गुम्पतीने। इन नेंमी थुं का दुम्शा, ग्येरपाइकमुशा बाकचा तकल” दे पुनीन। १थिस्सलोनिकी २:१५
- 33 नेल्ल इं थुं नाइकपाइकब परमप्रभु यावे गेपुकी नु बाकल। आमेन।

## 16

### रिम्शो बाक्कीन, दे माइश्शो

- 1 केन्ऱेया डा थमा सुइकब आन गुम्तीक खिंमी गेय पाइब फिबी दिदी आ परबम ब्रेकशो बाक्नुड।
- 2 फिबी दिदीमी थमा सुइकब शुश आन कली वारच पापु। आं कली यो शुश वारच पाइक्ती। मोपतीके फिबी दिदी कली प्रभु आ नेंमी मान पतीने। मार मार माल्दा, मेको गेशा वारच पतीने।
- 3 अक्वीला नु प्रिस्कीला साइ गो नु गारशा, खीस्त येसु आ गेय पाम्ताक्से। मेको आस कली “रिम्शो बाक्कीस” देनीन। प्रेरित १८:२; प्रेरित १८:२६
- 4 मिनु थमा मसुइकबपुकीमी आं कली खेदा पामेनु, आं कली प्रोंइचा, दे वारच पय्यीसीनु, हेरा साइक्चा पुंडसाक्स। मेको निक्शीमी आं कली प्रोंइशो आ परबम परमप्रभु यावे कली “गे रिम्शो पाइब बाक्नीनी” देंनुड। गो ला ममाइ, नेल्ल रागी रागी डा थमा सुइकबपुकीमी यो मेको निक्शी आस पशो मिम्शा, परमप्रभु यावे कली “गे रिम्शो पाइब बाक्नीनी” देंनीम। मोपतीके मेको आस कली “रिम्शो बाक्कीसे” दे मतीने।
- 5 आस खिंमी देल्ल थमा सुइकब नेल्ल आन कली यो “रिम्शो बाक्कीन” दे माइक्चा। आं दाकशो एपेनेतस कली “रिम्शो बाक्को” दे माइक्चा। एपेनेतस एसीया रागी डा नेल्ल क्येडा डोंइती खीस्त कली थमा सुइकब बाकब।
- 6 इन कली शुश वारच पाइब मरीयम कली यो “रिम्शो बाक्को” दे माइक्चा।
- 7 इं यहूदी जात डा अन्ड्रोनीकस नु युनीयस साइ येसु आ नेंमी गो नु जेल्खानम बाक्शो नसी। आं क्येडा डोंइती मेको निक्शीमी खीस्त कली थमा सुइक्ताक्से। खीस्त आ सोइश्शो आन दातेमी शुश जोकब दुम्ताक्से। मेको आस कली “रिम्शो बाक्कीसे” दे माइक्चा।
- 8 प्रभु आ नेंम आं दाकशो अमप्लीआतस कली “रिम्शो बाक्को” दे माइक्चा।
- 9 गोपुकी नु खीस्त आ गेय पा उरवानस कली “रिम्शो बाक्को” दे माइक्चा। आं दाकशो स्ताकीस कली “रिम्शो बाक्को” दे माइक्चा।
- 10 खीस्त कली रिम्शो पा थमा सुइकब अपेल्लेस कली “रिम्शो बाक्को” दे माइक्चा। अरीस्तोबलस आ खिं डा मुर नेल्ल आन कली यो “रिम्शो बाक्कीन” दे माइक्चा।
- 11 इं यहूदी जात डा हेरोदीयन कली “रिम्शो बाक्को” दे माइक्चा। नारसीसस आ खिं डा प्रभु कली थमा सुइकब नेल्ल आन कली यो “रिम्शो बाक्कीन” ने माइक्चा।
- 12 प्रभु आ गेय पाइब त्रिफेना नु त्रिफोसा दिदी आस कली यो “रिम्शो बाक्कीसे” दे माइक्चा। प्रभु आ शुश गेय पाइब आं दाकशो पेरसीस दिदी कली यो “रिम्शो बाक्को” दे माइक्चा।
- 13 प्रभुम योव्रशो थमा सुइकब रुफुस कली “रिम्शो बाक्को” दे माइक्चा। साइ रुफुस आ ममामी आं कली आ तौ खोदेंशो पती। मेको कली यो “रिम्शो बाक्को” दे माइक्चा। मर्कूस १५:२१
- 14 असीनक्रीतस, फ्लेगन, हेरमेस, पत्रोबास, हेरमेस नु मेकोपुकी नु बाकब थमा सुइकब लोकब नेल्ल आन कली यो “रिम्शो बाक्कीन” दे माइक्चा।
- 15 फिलोलोगस, युलीया, नेरीयस, नेरीयस आ दिदी, ओलीम्पास नु मेको नेल्ल आन खिंम बाकब थमा सुइकब आन कली यो “रिम्शो बाक्कीन” दे मतीने।
- 16 येसु आ नेंमी मुम्मुशा, आसीक गेमुने। एक डा थमा सुइकब नेल्लेमी इन कली “रिम्शो बाक्कीन” देंतेक्म। १कोरिन्थी १६:२०

दूली शेंब आन लोव्र मनेंचा

17 आं लोकबपुकी, एको नेल्ल क्येडा नोले डा लोव्र पशा, अर्ती गेनन्नी। कोड मुरुमी खीस्त आ लोव्र नेंशा, दूली मिम्ताकम। मेको मुरपुकीमी मुल सम्म दुशा गारशा बाक्शो थमा सुइक्ब लोकब इन कली फ्राचा माल्नीम। मेको आन क्येडा होस पा बाक्कीन। मत्ती ७:१५; २थिस्सलोनिकी ३:६; तीतस ३:१०

18 मेकोपुकीमी येसु खीस्त आ गेय मपाइनीम। आन कोव्रज प्रिंचा ला मिम्शा, गेय पाइनीम। मिलो शिलो लोव्र पा रिम्शो लोव्र नेंब आन थुं क्याल्नीम। मोदेशो मुर आन क्येडा होस पा बाक्कीन। फिलिप्पी ३:१९; कलस्सी २:४

19 गे शेंतीक लोव्र नेंशा, टीब मुर ननी, दे नेल्लेमी तुइक्ताकमे। एको नेंशा, गो ग्येरसाक्यी। तन्न रिम्शो गेय मरिम्शो गेय, थमा शेंतीक दूली शेंतीक, थमा नु जोल तुइक्ब दुमीने, देंनुड। मोपतीके ब्रेक्शा, शुश शेंताक्न्नी। रोमी १:८; १कोरिन्थी १४:२०

20 थुं नाइक्चा गेब परमप्रभु यावेमी रीब पा सैतान कली इन खोइल आगाम वोइक्ब। इं प्रभु येसु खीस्तमी इन कली शिशी पवल।

### “रिम्शो बाक्कीन” देशो

21 गो नु गेय पाइब तिमोथीमी इन कली “रिम्शो बाक्कीन” देंत। यहूदी जात डा लुसीयस, यासोन, सोसीपाटर सांफामी यो इन कली “रिम्शो बाक्कीन” देंतेकम। प्रेरित १६:१-३; प्रेरित १९:२२; फिलिप्पी २:१९-२२; प्रेरित १७:६; प्रेरित २०:४

22 पावलमी अरेशा ब्रेक्पाइश्शो एको चिठी ब्रेक्ब गो तेरतीयस नड। मिनु प्रभु आ नेंमी गो यो इन कली “रिम्शो बाक्कीन” दे ब्रेक्ताकड।

23 गोम चिठी ब्रेक्पदुनु, गायस आं खिमी बाक्तक। मिनु गायस नु आ खिमी देल्ब थमा सुइक्बपुकीमी यो इन कली “रिम्शो बाक्कीन” दे माइक्चा देंतेकम। इरास्तस माइश्शो सरकार आ गेय पाइबमी यो इन कली “रिम्शो बाक्कीन” देंत। थमा सुइक्ब इं लोकब क्वारटसमी यो इन कली “रिम्शो बाक्कीन” देंत। १कोरिन्थी १:१४

24 इं प्रभु येसु खीस्त आ शिशी गेपुकी नेल्ल नु बाक्ल। आमेन।

### नोले डा लोव्र

25 परमप्रभु यावेमी इन कली आ ग्येरपाइक्तीक लोव्र नु येसु खीस्त आ पर्वम शेंतीक नेंशा, बोल्यो पा थमा सुइक्ब सेल्ले चाप्ब, दे तुइक्ताकड। मोपा साइ डा खुइश्शो लोव्र नेल्ल तुइक्पाइश्शो बाक्ब। १कोरिन्थी २:७; एफिसी १:९; एफिसी ३:४-९

26 परमप्रभु यावे आ लोव्र पाइबपुकीम मेको खुइश्शो लोव्र ब्रेक्शो बाक्तेकम। मेको गेना हना यो बाक्ब परमप्रभु यावे आ दाक्शो बाक्ब। मेको लोव्र रागी रागी डा मुर आन कली तुइक्पाइश्शा थमा सुइक्ब सेल्चा कली बाक्त।

27 आ का ला बाक्शो मारेइ मारेइ तुइक्ब परमप्रभु यावे कली येसु खीस्त रे पा गेना हना यो नेल्ल सक्ति नु ठेयब दुम्तीके बाक्ल। आमेन। रोमी १:५



## १ कोरिन्थी

**ब्रेक्ब मुर:** एको चिठी ब्रेक्ब पावल बाक्ब। मेकोमी आ नें नेल्ल क्येडा डोंडती ब्रेक्बो बाक्त। पावलमी कोरिन्थ सहर कली थमा सुइक्ब आन गुम्तीक सेल्लु। मिनु पावल कली आफ, दे नें वोइक्तेक्म। १कोरिन्थी १:१; १कोरिन्थी ३:१०; १कोरिन्थी ४:१५

**गेना ब्रेक्बो:** पावल, बर्स निकशी महिना सां एफिसस सहरम बाक्शा, मेकेर रे कोरिन्थ सहर डा थमा सुइक्ब आन कली चिठी ब्रेक्बो बाक्त। मेको ५७ ए. डी. डा डोंडती डा महिनाम ब्रेक्बो बाक्ब।

**मार ब्रेक्बो:** पावलमी मेको थमा सुइक्ब आन गुम्तीक खिं ५२ ए. डी. मेर आंमान सेल्शा, बर्स निकशी मेकेर शेंशो बाक्त। मिनु मेको थमा सुइक्ब आन दातेम मार मार मरिम्शो दुम्मे, मेको र्लोए आ खिं डा मुरुम पावल कली शेंथ जाक्बो बाक्तेक्म।

१. थमा सुइक्ब आन गुम्तीकेमी मीश मुर दोदेशो दुम्चा माल्नीमी।

२. मेकोपुकी हुल हुल दुम्शो बाक्तेक्म १कोरिन्थी १:१-१६

३. मुर आन हेंथे पा मरिम्शो पशो १कोरिन्थी ५:- १०:-

४. गुम्तीक डा मुरुम तुइक्का माल्शो लोव्र:

मीश मुर आन पर्वम

प्रभु भोज आ पर्वम

परमप्रभु यावे आ सोक्तीम मार गेय पाइब

परमप्रभु यावे आ सोक्त आ नेल्ल क्येडा ठेयब गेय

परमप्रभु यावे आ सोक्त आ लोव्र पचा आ पर्वम

मुर बेक्शा, सेंचा आ पर्वम १कोरिन्थी ११:- १५:-

डोंडती डा लोव्र

१ परमप्रभु यावे आ दाक्बो पा ख्रीस्त येसु आ सोइश्शो ब्रेत्चा पुंडसीशो, गो पावल नड। इं लोकब सोस्थेनेस नु गोमी कोरिन्थ सहरम बाक्ब परमप्रभु यावे आ मुर दुम्शा देल्ब इन कली एको चिठी ब्रेक्बो सोइक्ताक्कु।

२ गे कोरिन्थ सहर डा ख्रीस्त येसुमी योव्रचा पुंडसाक्नी। मोपतीके योव्रशोपुकी दे ब्रेत्चा पुंडसीनीनी। गेपुकी ला ममाइ, ते ते इं प्रभु येसु ख्रीस्त आ नेमी खुम्सीनीमी, मेक मेक डा मुरपुकी यो इन खोदेशो पा योव्रशा, योव्रशोपुकी दे ब्रेत्चा पुंडसीनीम। येसु ख्रीस्त आंइ प्रभु, इं प्रभु, थमा सुइक्ब नेल्ल आन प्रभु बाक्ब। मिनु आ नेमी गो नेल्ल का दुम्तय। १कोरिन्थी ६:११; प्रेरित ९:१६; प्रेरित १८:१-१७

३ इं आफ परमप्रभु यावे नु प्रभु येसु ख्रीस्तमी इन कली शिशी पा इन थुं नाइश्शा बाक्चा गेम्सेक्ल।

प्रार्थना पशो

४ गो इन पर्वम परमप्रभु यावे कली “गे रिम्शो पाइब ननी” दे ठेयब सेल्लुड, मारदे हना इन कली शिशी पा येसु ख्रीस्तमी तुइक्पाइक्तु।

५ मिनु तुइक्तीक नु रुपतीक थुं शुश गेशा, अरु आन कली शेंब नु रुप्पाइक्ब सेल्लु।

६ मिनु इन पतीके मुरपुकीमी ख्रीस्त आ सक्ति ताइनीम। तीतस २:१३; २पत्रुस ३:१३-१४

७ गेपुकी परमप्रभु यावे आ सोक्तीमी पपाइश्शो गेय नेल्ल पचा ताइतीनी। मारेइ मारेइम गाप्शा बाक्नीनी। इं प्रभु येसु ख्रीस्तमी तपांइसेक्ल, दे रिम्शा बाक्नीनी।

८ इं प्रभु येसु ख्रीस्त जाक्म नाक्ती आ डोंडती ठीक दुम्शा, इन कली सक्ति पाइश्शो गेय पना पन थिप्ब, दे तुइक्ताक्ड। मारदे हना इन कली नेल्ल क्येडा नोले सम्म थमा सुइक्का मप्रोंइथु रिम्शा बाक्तीक सक्ति गेब। फिलिप्पी १:६; १थिस्सलोनिकी ३:१३

9 परमप्रभु यावेमी इन कली आ तौ ई प्रभु येसु ख्रीस्त नु गेना हना यो काथा बाक्चा कली योवतु। मिनु आ देशो लोत्र नेल्ल खाप्ब। १थिस्सलोनिकी ५:२४

### थुं का दुम्शा बाक्कीन

10 आं लोकबपुकी, ई प्रभु येसु ख्रीस्त आ नेमी, इन कली अर्ती गेनन्नी। लोत्र का, शोत्र का नु थुं का दुम्शा बाक्चा मप्रोनीन। १कोरिन्थी ११:१८; रोमी १५:५; फिलिप्पी २:२

11 “कोरिन्थीपुकी जिशा बाक्नीम” दे इन पर्वम रूलोए आ खिं डा मुरपुकीमी तुइक्पाइक्तीमी।

12 इन जिशो मार बाक्ब देशा हना, का निकशीमी “पावल आ नोले खोइक्ब नकी” का निकशीमी “आपोल्लोस आ नोले खोइक्ब नकी” का निकशीमी “केफास आ नोले खोइक्ब नकी” नु का निकशीमी “ख्रीस्त आ नोले खोइक्ब नकी” देंतीनी। १कोरिन्थी ३:४; प्रेरित १८:२४-२७; यूहन्ना १:४२

13 मार ख्रीस्त देशो शुश बाक्नीमी डा? पावलमी इन पाप क्याम्चा कली शीमी केप्शा कांटी थोक्शा क्याइश्शा साइक्चा पुंडसे डा? पावल आ नेमी ब्वाक्कुम खुम्शा गुंडचा पुंडसीनी डा?

14 गो परमप्रभु कली “गे रिम्शो पाइब ननी” देंनुड। मारदे हना गो क्रिस्पस नु गायस डा लाक्शा सुड कली ब्वाक्कुम खुम्शा मगुंडदुमी। प्रेरित १८:८; रोमी १६:२३

15 मुर आन कली ब्वाक्कुम खुम्शा गुंडतीक गेय पशो नड हना, मेकोपुकीमी “पावल आ नेमी ब्वाक्कुम खुम्शा गुंडचा पुंडसाक्क” देंम वा।

16 स्तीफानस आ खिं डा मुर आन कली ब्वाक्कुम खुम्शा गुंडताक्डमी। मेको डा लाक्शा, सुड आन कली ब्वाक्कुम खुम्शा गुंडदुमी कौं मगुंडदुमी, मारेड मतुइक्नुड। १कोरिन्थी १६:१५

17 ख्रीस्तमी मुर आन कली ब्वाक्कुम खुम्शा गुंडतीक गेय पथ मसोइक्ती। आ लोत्र नेंपाइक्चा कली सोइक्ताक्यी। लोत्रमी फू चुइश्शो खोदेशो पा ममाइ। गो फू चुइश्शो लोत्र पाता हना, ख्रीस्त बेक्शो सक्ति क्याम्सीशा लाइब।

### रागी डा जोक्ब तुइक्ब आन पर्वम

18 “ख्रीस्त पाप क्याम्चा कली साइक्चा पुंडसाक्क” देशो लोत्र नेंशा, नरक लाइबपुकीमी “मूर्ख लोत्र बाक्ब” देंनीम। गो पाप रे ब्रोंइशोपुकीमी चहिं “एको लोत्रम परमप्रभु यावे आ सक्ति बाक्ब” दे तुइक्नय। २कोरिन्थी ४:३; रोमी १:१६

19 मिनु “जोक्ब आन कली आन जोक्शो क्याम्शा, तुइक्ब आन कली आन तुइश्शो साम्शा गेनुडमी” दे ब्रेक्शो बाक्ब। यसैया २९:१४

20 जोक्ब तुइक्ब सु सु नमी? पढेस जोक्ब सु सु नमी? सिनाक्त मुलाक्त शुश लोत्र पा ग्राब सु नमी? लो, मिन्तीने। एको रागी डा जोक्ब तुइक्ब लोत्र कली परमप्रभु यावेमी फश लोत्र मसेला डा? मत्ती ११:२५; रोमी १:२२

21 परमप्रभु यावेमी मुर आन जोक्तीक तुइक्तीक रे आंम कली मतुइक्पाइसे। परमप्रभु यावेम आ दाक्शो पा, आंइ मूर्ख लोत्र नेंपाइक्ब। मिनु मेको लोत्रम थमा सुइक्ब आन कली पाप रे ब्रोंइचा गेब।

22 यहूदीपुकी चिन्ड नु छक लाक्चा डा गेय कोत्रकोत्र दाक्नीम। ग्रीकपुकीमी मुर आन जोक्तीक तुइक्तीक लोत्र माल्शा, नेंथ गाक्नीम। मत्ती १२:३८; यूहन्ना ४:४८; प्रेरित १७:१८-२१

23 मेको आन दाक्शो, आन माल्शा गाक्शो नेल्ल तुइश्शा यो गोमी चहिं “ख्रीस्त पाप क्याम्चा कली साइक्चा पुंडसाक्क” दे आन कली नेंपाइक्नीकी। मोदेशो नेंपाइक्कानु, ख्रीस्त लांमी वोइश्शो फुल्लु खोदेशो दुम्शा, यहूदी आन कली दाइल पाइक्ब। मिनु राम्सीनीम। अर्को रागी डा मुरपुकीमी “मूर्ख लोत्र बाक्माक्क” दे काइ नेंचा मदाक्नीम। प्रेरित १७:३२; गलाती ५:११; १कोरिन्थी २:१४

24 परमप्रभु यावेमी योवत्रशो यहूदी नु ग्रीकपुकीमी चहिं मार देंनीम देशा हना “परमप्रभु यावे आ सक्ति नु जोक्तीक तुइक्तीक नेल्ल ख्रीस्त नु थिंसीब” देंनीम। कलस्सी २:३

25 परमप्रभु यावे आ मूर्ख लोत्र मुर आन जोक्तीक तुइक्तीक क्येडा ठेयब जोक्तीक तुइक्तीक लोत्र बाक्ब। परमप्रभु यावे आ आइक्च सक्ति यो मुर आन ठेयब सक्ति क्येडा ठेयब बाक्ब।

26 आं लोकबपुकी, परमप्रभु यावेमी इन कली मारदे योवडा? इन पढेशो तशा देय, इन जोक्शो तुइशो तशा? गे शुश सक्ति पाइशो यो मननी। ठेयब खिं डा मुर यो मबाक्नी। लो, मेको मिम्तीन। यूहन्ना ७:४८; याकूब २:१-५

27 तन्न परमप्रभु यावेमी जोक्ब तुइक्ब आन कली मुने तोक्चा कली मजोक्ब मतुइक्ब मूर्ख आन कली योवतीमी। परमप्रभु यावेमी अधिकार सक्ति पाइशो आन कली मुने तोक्चा कली अधिकार सक्ति मपाइशो आन कली योवतीमी।

28 परमप्रभु यावेमी रागी डा महिक्सीशो आइक्च आन कली योवतु। मारदे हना हिक्सीशो नु ठेयब आन कली मुने तोक्चा कली मो पाप्तु।

29 मोपतीके सुइ मुर परमप्रभु यावे आ डोंइती ठेयब दुम्ने मचाप्नीम। रोमी ३:२७; एफिसी २:९

30 मेकोमी येसु खीस्त आ नैमी इन कली ब्रोंइचा गेब। मेको इन जोक्तीक तुइक्तीक, इन ठीक पतीके, परमप्रभु यावे आ मुर दुम्तीके नु पाप रे प्रोंइतीके बाक्ब। येरमीया २३:५-६; २कोरिन्थी ५:२१; यूहन्ना १७:३९; मत्ती २०:२८

31 मोपतीके “प्रभु आ पतीके इं नें बोरपाइय्य” दे साइ नेसी देंशो लोव्र मिम्शा, परमप्रभु कली ठेयब सेल्य। येरमीया ९:२२-२३; २कोरिन्थी १०:१७

## 2

येसु खीस्त आ परबम शेंशो

1 आं लोकबपुकी, गो गेपुकी नु बाक्डानु, परमप्रभु यावे आ लोव्र नेंपदुनु, मुर आन जोक्तीक तुइक्तीक रे नु फू चुइशो लोव्र पा मशेंदन्नी।

2 मारदे हना येसु खीस्त कली शीम केप्शा कांटी थोक्शा क्याइशो साइक्चा पुंइसीशो लोव्र डा लाक्शा अरु मशेंनुडमी, दे आं थुं फ्रेंशा जाक्शो नड। गलाती ६:१४

3 मिनु इन कली शेंदन्नीनु, आं रांमी बल मबाक्थु, हिंन हिंन, खिंखि पा शेंताक्नी। गलाती ४:१३; प्रेरित १८:९; २कोरिन्थी १०:३

4 मुर आन कली जोक्तीक तुइक्तीक कोइशा, ठेयब लोव्र मपड। तन्न परमप्रभु यावे आ सोक्तीम कोइशो सक्ति रे पा शेंताक्नी। मत्ती १०:२०

5 तन्न इन थमा सुइक्तीके मुर आन जोक्तीक तुइक्तीकेम मबाक्थु, परमप्रभु यावे आ सक्तिम बाक्ब। १थिस्सलोनिकी १:५

परमप्रभु आ जोक्तीक तुइक्तीक

6 मो हना यो गो जोक्तीक तुइक्तीक लोव्र रुपब आन कली लोव्र पाइनीकी। तन्न रागी डा नु सासन पाइब आन जोक्तीक तुइक्तीक डा लोव्र चहिं ममाइ। मारदे हना मेको बेक्शा लाइनीम।

7 तन्न गो दोदेंशो जोक्तीक तुइक्तीक डा लोव्र शेंनीकी देंशा हना, परमप्रभु यावे आ जोक्तीक तुइक्तीक डा लोव्र शेंनीकी। मेको लोव्र डोंइती खुइशो वोइशो बाक्त। मुल इन कली रिम्शो दुम्मल, दे शेंनीकी। मत्ती ११:२५; कलस्सी १:२६

8 मेको लोव्र रागी डा ठेयब मुरपुकीमी मरुबेम। रुप्तेक्म हना, सक्ति पाइशो प्रभु कली शीम केप्शा कांटी थोक्शा क्याइशो मसदेम वा।

9 मिनु “मिक्चीम मतशो, नोफाम मनेंशो, मुर आन थुंमी ममिम्शो लोव्र परमप्रभु यावेमी आ कली दाक्ब आन कली तुइक्पाइशो, रुप्चा गेम्तीमी” दे ब्रेक्शो बाक्ब। यसैया ६४:४

10 मेको लोव्र परमप्रभु यावेमी आ सोक्त रे पा इं कली तुइक्पाइशो रुप्पाइक्तु। मारदे हना परमप्रभु यावे आ सोक्तीम नेल्ल तुइक्ब। खुइशो लोव्र यो माल्शा गुंडब। परमप्रभु यावे आ सोक्तीम परमप्रभु यावे आ थुं डा लोव्र यो नेल्ल तुइक्ब।

11 मुर आन थुंमी मार बाक्बा, सुमी तुइक्नीमी डा? आंम आन थुं डा लोव्र आंमा ला तुइक्नीम। परमप्रभु यावे आ सोक्त डा लाक्शा सुइमी परमप्रभु यावे आ थुं डा लोव्र मतुइक्नीम, आ सोक्तीम ला तुइक्ब।

12 गोपुकीम रागी डा सोक्त मतशो बाकनय, परमप्रभु यावे आ सोक्त कली ताइतय। मोपतीके गो परमप्रभु यावे आ गेशो नेल्ल रुण्य। यूहन्ना १४:१६-१७

13 मोपतीके गो शेंदकानु, मुर आन जोक्तीक तुइक्तीक लोत्रम मशेंनीकी। परमप्रभु यावे आ सोक्तीम गेशो लोत्र पा शेंनीकी। मिनु परमप्रभु यावे आ सोक्तीम ब्रीशो मुर आन कली शेंशा रूपाइक्तीकी।

14 परमप्रभु यावे कली थमा मसुइक्क मुरुम परमप्रभु यावे आ सोक्त डा गेय मताइनीम। मेको नेल्ल मेको आन कली मूर्ख गेय खोदेशो पा रुप्ने मचाप्नीम। मारदे हना मेको सोक्त डा लोत्र बाक्क। यूहन्ना ८:४७; १कोरिन्थी १:२३

15 परमप्रभु यावे आ सोक्त पाइश्शो मुरपुकीमी मारेइ मारेइ नाक्ने नु रुप्ने चाप्नीम। तन्न मेको आन कली नाक्क सुइ मबाक्नीम।

16 मार ब्रेक्शो बाक्क देशा हना “सुमी प्रभु आ थुं नाक्ने नु रुप्ने चाप्ना डा? सुमी प्रभु कली शेंने चाप्ना डा?” दे ब्रेक्शो बाक्क। तन्न गोपुकी नु ख्रीस्त आ थुं बाक्क। यसैया ४०:१३

### 3

आलम खोदेशो पाइतीनी, दे हुइश्शो

1 आं लोकबपुकी, इन कली शेंदुनु, परमप्रभु यावे आ सोक्तीम ब्रीशो मुर खोदेशो पा शेंने मचबु। मारदे हना रागी डा मुर खोदेशो पा, ख्रीस्त कली थमा सुइक्तीकेमी आल खोदेशो बाक्नीनी। यूहन्ना १६:१२

2 गो इन कली खमे मगेथु, दूध तुंडताक्नी। मिनु मुल सम्म यो दूध तुंडना तुंडन वोइक्तन्नी। १पत्रुस २:२

3 गो मुल सम्म रागी डा मुर खोदेशो बाक्नीनी। गे जीनीनी, रुश पाइनीनी। मिनु रागी डा मुर खोदेशो मडुम्नी डा? १कोरिन्थी १:१०-११; १कोरिन्थी ११:१८

4 का निक्शीमी “गो पावल आ नोले खोइक्क नकी” का निक्शीमी चहिं “गो आपोल्लोस आ नोले खोइक्क नकी” दे जिना जिन बाक्तीनी। मोपतीके रागी डा मुर खोदेशो मडुम्नी डा? १कोरिन्थी १:१२

गे परमप्रभु आ खिं बाक्नीनी

5 आपोल्लोस माइश्शो सु में? गो पावल माइश्शो सु नडा? प्रभुमी आंस कली आ लोत्र शेंथ योत्रशो नस्कु। गोपुकीमी आंस लोत्र नेंशा थमा सुइक्तीनी।

6 गो खुम्ता आपोल्लोसमी ब्वाक्कु लुक्ताक्क। मिनु परमप्रभु यावेमी कोल्पाइक्कु। प्रेरित १८:२४-२८

7 मोपतीके खुम्ब ठेयब ममाइ, ब्वाक्कु लुक्क यो ठेयब ममाइ। कोल्पाइक्क, बारपाइक्क परमप्रभु यावे ठेयब बाक्क।

8 खुम्ब नु ब्वाक्कु लुक्क कांडचीक बाक्नीस। मिनु आंड कली पपाइश्शो गेय दोदेशो पा पका, मोदेशो पा गाल्च ताइनीकी। १कोरिन्थी ४:५

9 गो परमप्रभु यावे आ रू नु आ खिं ननी। गोपुकी चहिं मेको रूमी गेय पाइब नु मेको खिं सेल्ब नकी। मत्ती १३:२-९; एफिसी २:२०

10 परमप्रभु यावेमी आं कली रिम्शो दारशो खिं सेल्ब सेल्ती। मिनु आ देशो टिशा, खिं डा जग दोशा, बोल्यो पा वोइक्ता। मेको जग तारी अरुमी प्रोव्रना प्रोव्रन लाइक्नीम। मेको प्रोव्रबपुकीमी दोपा रिम्शो दुम्बा, मेको मिम्शा गेय पामेक्क।

11 थमा जग येसु ख्रीस्त ला बाक्क। आ क्येडा लाक्शा अरु मारेइ जग मबाक्क। मिनु सुइमी अरु जग वोइक्ने मचाप्नीम। १पत्रुस २:४-६

12 मेको जग तारी मार मार के खिं सेल्नीम देशा हना, सुन, चांदी, हीरा मोती, शी, खिंवा नु नल के खिं सेल्नीम। मुल मार के सेल्शो बाक्का मताइसीब।

13 ख्रीस्तम निसाफ पची नाक्क मार के सेल्तेक्क हना यो, मीम हुम्शा कोव्रब। मारदे हना मेना ख्रीस्तमी आ लोत्र शेंब आन गेय दोदेशो बाक्के, मीम हुम्शा नाक्क। १कोरिन्थी ४:५

14 मेको जग तारी सेल्शो खिं लीत हना, सेल्बमी इनाम ताइब।

15 गेय मीम ग्रोइशशा, पुलु दुम्शा लत हना, मेको मुर गेना हना यो ब्रोंइचा ताइब। तन्न इनाम मतथु, मारेइ मपाइशशो दुम्शा बाक्चा माल्ब।

16 गे परमप्रभु यावे आ खिं ननी, दे मतुइक्नीनी? मिनु परमप्रभु यावे आ सोक्त इन आगाम बाक्ब, दे मतुइक्नीनी? १कोरिन्थी ६:१९; २कोरिन्थी ६:१६

17 मिनु सुमी परमप्रभु यावे आ खिं ग्रांरा दिशो सेल्बा, परमप्रभु यावेमी मेको कली यो ग्रांरा दिशो सेल्ब। मारदे हना परमप्रभु यावे आ खिं परमप्रभु यावे के ला बाक्ब। मिनु मेको गे बाक्नीनी।

### सुइ ठेयब मसुंडसमल

18 सुइमी आंम कली जोल मपांडसेकल। इन दातेमी सुइमी आंम कली जोक्ब तुइक्ब मिम्साक्व हना, मेको मूर्ख दुम्ल। मोपा ला जोक्ब तुइक्ब दुम्ने चाप्ब। प्रकाश ३:१७-१८

19 एको रागी डा जोक्तीक तुइक्तीक परमप्रभु यावे आ डोंइती मूर्ख लोत्र बाक्ब। मार ब्रेक्शो बाक्ब देशा हना “जोक्ब तुइक्बपुकी आंम आन जोक्तीक तुइक्तीक गेयमी आंम कली ग्याइक्पांडसीनीम” दे ब्रेक्शो बाक्ब। अय्युब ५:१३

20 लेंशा “प्रभुमी एको रागी डा जोक्ब तुइक्ब आन मिम्शो जाम्शा लाइब, दे तुइक्ब” दे यो ब्रेक्शो बाक्ब। भजन संग्रह १४:११

21 मोपतीके सुइमी मुर आन नें आ पर्वम ठेयब मलेम्मल। मारदे हना नेल्ल इन के बाक्नीम।

22 इन कली शेंब, गो पावल, आपोल्लोस, केफास नु रागी, ब्रोंइचा नु बेक्चा, मुल मार दुम्शो बाक्बा नु नोले मार दुम्बा, नेल्ल इन के बाक्नीम।

23 तन्न गे ख्रीस्त आ मुर बाक्नीनी। मिनु ख्रीस्त परमप्रभु यावे आ तौ बाक्ब। १कोरिन्थी ११:३

## 4

### मुर आन कली मनाक्चा

1 मिनु मुरपुकीमी गो शेंब, आंइ पर्वम मार मिम्चा माल्नीम देशा हना, गो ख्रीस्त आ गेय पाइब नु परमप्रभु यावे आ खुइशशो लोत्र तुइक्पाइक्चा कली शेंब नकी। तीतस १:७

2 मोदेशो पा शेंबपुकी थमा सुइक्चा माल्शो मुर दुम्चा माल्नीम। लूका १२:४२

3 गे नु अरु निसाफ पतीकेम आं कली नाक्तीनीनु, मेको नाक्शो मारेइ खोदेशो ममिम्नुड। गो आंमा यो मनाक्सीनुड।

4 गो मारेइ मरिम्शो मपड, दे मिम्नुड। तन्न मतुइक्थु, पडा को? आं कली निसाफ पाइब प्रभु बाक्ब।

5 मोपतीके प्रभु आ निसाफ पतीक नाक्त मजाक्म सम्म मुर आन कली मनाक्तीन। आ निसाफ नाक्ती जाक्मेनु, खुइशशा वोइशशो लोत्र नेल्ल तुइक्पाइक्ब। छिडछिडम खुइशशो थुं डा थोत्रक नेल्ल छेडछेडम तांडसीनीम। मिनु परमप्रभु यावेमी मुर आन कली “गे रिम्शो पाइतीनी” देंब। १कोरिन्थी ३:८

### मुर आन नें ब्रशा ठेयब मलेत्चा

6 आं लोक्बपुकी, गे परमप्रभु यावे आ लोत्र रिम्शो पा टिने चाप्नीनी, दे गो मेको नेल्ल पाइतक। गे “गो पावल आ शेंशो शेंसीब नड” अरुमी “गो आपोल्लोस आ शेंशो शेंसीब नड” दे ठेयब लेशशा, इन नें मबोरपतीने। रोमी १२:३

7 सुमी इन कली ठेयब सेल्नी? इन पशोमी ठेयब दुम्नी डा? परमप्रभु यावे आ शिशी पशोमी कका ठेयब दुम्शो ननी। मिनु परमप्रभु यावे आ गेशोमी ठेयब लेत्चा दुम्बा डा?

8 मुल गे इन माल्शो नेल्ल ताइतीनी। शुश क्येट थीब दुम्तीनी। शेंब, आंइ कली हिल्लो मपथु, मुर आन कली हुकुम पाइतीनी। गे रिम्शो हुकुम पाइतीनी हना, गो यो गे नु गेय पाइब दुम्शो, रिम्शो दुम वा। प्रकाश ३:१७; प्रकाश ३:२१

9 परमप्रभु यावेमी आ सोइशशो, आंइ कली मुर नेल्ल आन क्येडा आइक्च सेल्शा साइक्चा पुंडसीचा कली वोइक्तु, दे मिम्नुड। मारदे हना रागी रागी डा मुर नेल्ल नु परमप्रभु यावे आ स्वर्ग डा गेय पाइबम आंइ कली कोवना कोवना बाक्नीमी। रोमी ८:३६; हिब्रू १०:३३

10 गो खीस्त आ परबम मूर्ख दुम्तक। तन्न गे खीस्त आ पतीकेमी जोक्ब तुडक्ब बाक्नीनी। गोपुकी मचाप्ब दुम्तक। गेपुकी चहिं बोल्यो बाक्नीनी। मुरपुकीमी इन कली मान पा ठेयब सेल्नीम। आंड कली चहिं महिक्नीम। १कोरिन्थी ३:१८

11 मुल यो जचा तूचा मतथु, मरिम्शो फेक्सीशा, श्येत जशा, आंड बाक्तीक खिं यो मबाक्ब। २कोरिन्थी ११:२३-२७

12 गो आंम गुडमी श्येत पा गेय पा बाक्तक। मुरपुकीमी आंड कली शुक्शी लोत्र पामेनु, मेको आन कली आसीक गेतक। गिश खेदा पाम्तेक्म हना यो, फाल्शा बाक्तक। १कोरिन्थी ९:१५; प्रेरित १८:३; मत्ती ५:४४; रोमी १२:१४

13 जिचा पोक्शा, गाइशशा मरिम्शो पामेनु, गो मेको आन कली रिम्शो लोत्र पा, गारपाइक्नीकी। गोपुकी रागी डा ग्रांया दिचा डा थोत्रक खोदेशो दुम्शा, नेल्ल क्येडा आइक्च महिक्सीशो मुर दुम्तक।

### थमा सुडक्ब आन आफ मिम्सीशो

14 गो इन कली मुने तोक्चा कली एको मब्रेक्तु। गे आं दाक्शो तमी तौ इन कली रिम्शो अरेचा कली एको ब्रेक्ताक्ड।

15 खीस्त आ परबम अर्ती गेब शेंब मुर शुश बाक्मा माइ। तन्न इन आफ खोदेशो मुर शुश मबाक्नीम। मारदे हना गो इन कली येसु खीस्त आ ग्येरपाइक्ब लोत्र शेंशा, इन आफ दुम्ती। १कोरिन्थी ९:२; गलाती ४:१९

16 मोपतीके गो इन कली अर्ती का गेनन्नी। आं पशो खोदेशो पने। १कोरिन्थी ११:१

17 मोपतीके गो प्रभु आ पशोमी, आ रिम्शो नु दाक्शो तौ तिमोथी इन बाक्तीके सोइक्ताक्ड। मेकोमी गो ते ते मार मार लोत्र शेंदु, गो दोपा येसु खीस्त आ लां खोदु, मेको नेल्ल इन कली शेंदल। प्रेरित १६:१-३

18 मिनु इन दाते डा का निक्शीमी “पावल मजाक्ब” दे ठेयब लेशशो लोत्र पाम्तेक्म, दे लोत्र पशो नेंता।

19 तन्न प्रभुम इन कली गुम्चा गेती हना, गो रीब पा जाक्नुड। मेको ठेयब लेशशो मजाक्ब देंब आन लोत्र ममाइ, मेको आन सक्ति बाक्म कों मबाक्म दे ला कोव्रनुड।

20 मारदे हना परमप्रभु यावे आ राज्य फू चुइशशो ठेयब लोत्र रे पा मतांडसीब। सक्ति पाइशशो गेय रे पा तांडसीब। १कोरिन्थी २:४

21 गो मार पांडसीचा दाक्नीनी? कोक्केम हिंच कोइशो खोदेशो पा शेंदन्नी देय आं दाक्शो आल आन कली लेम्शो खोदेशो ब्रोव्रशो लोत्र पा शेंदन्नी? आमा मिम्शा देनीन। २कोरिन्थी १०:२

## 5

### मरिम्शो आन कली तिल्चा माल्शो

1 गे नु बाक्ब कामी हेंथे पाप्तु देशो लोत्र नेंता। मोदेशो पाक्के अर्को रागी डा मुर आन दातेमी यो मबाक्ब। मुर कामी आ आफ आ मीश वोंइसाक्व, देशो लोत्र नेंता। लेवी १८:८

2 मिनु मुल सम्म ठेयब लेशशा बाक्नीनी? मोदेशो पशो तशा, इन थुं मखाइक्नीनी? मोदेशो पाइब कली तिल्चा माल्नीनी। १कोरिन्थी ४:६-८

3 इन दातेम मबाक्ती हना यो, आं थुं गेपुकी नु काथा बाक्शो खोदेशो पा, मेको मुर कली येसु खीस्त आ नेंमी निसाफ पने थुम्ता। कलस्सी २:५

4 गे नेल्ल प्रभु येसु आ नेंम गुम्शो बाक्तीनी हना, आं थुं गे नु बाक्त हना, इं प्रभु येसु खीस्त आ सक्ति मत्ती १६:१९; मत्ती १८:१८; २कोरिन्थी १३:३०

5 मेको मुर कली सैतान आ गुडम गेचा माल्नीनी। मेको आ रां खतम दुम्त हना यो, प्रभु आ निसाफ नाक्तीमी ब्रोइचा तवल। १तिमोथी १:२०

6 इन ठेयब लेशशो रिम्शो ममाइ। इम्चीली डल्ला का बोरपाइक्ब ओरुत्तीमी फस नेल्ल डाम्शा, बोरब दे मतुडक्नीनी? गलाती ५:९

7 मेको माइत बोरपाइकब ओख्ती ताइक्तीने। गे मारेइ मसुप्शो फस खोदेशो दुम्शा, नक दुम्शो बाक्नीनी। मारदे हना आंइ पास्सा चाड डा क्योरशो पाठा ख्रीस्त बाक्ब। प्रस्थान १२:३-२०; प्रस्थान १३:७; यसेया ५३:७; १पत्रुस १:१९

8 मोपतीके माइत बोरब ओख्ती मसुप्शो फस खोदेशो दुम्शा, मरिम्शो थुं पाइश्शो गेय पचा प्रोंइशा, नक मुर दुम्शा, पास्सा मानेय।

9 इन कली डोंइती ब्रेकशो चिठीमी “पात्के पाइब नु काथा बाक्चा मदुम्ब” दे ब्रेकताक्नी।

10 आं देशो मार बाक्त देशा हना, रागी डा पात्के नु तेल्लेम पाइब, शिम पाइब, खुइ पा रोइश्शा गाक्ब, मूर्ति कली पूजा पाइब नु काथा बाक्चा मदुम्ब, दे मशेंदनी। मोदेशोपुकी नु काथा बाक्चा मदुम्ब हना दा, रागीमी ते बाक्चा डा?

11 तन्न थमा सुइश्शा प्रभु आ मुर दुम्ती देंब लोकबम पात्के पा तेल्लेम पा, शिम दुम्शा, मूर्ति पूजा पा, शुक्शी पा गाक्ब नु शांबु राकसीमी दुक्शा, खुइ पा गाक्ब दुम्तेकम हना, मेकोपुकी नु काथा बाक्शा जचा यो मदुम्ब। २थिस्सलोनिकी ३:६

12 प्रभु आ मुर मदुम्शो आन कली मार निसाफ पाइनुडा डा? प्रभु आ मुर दुम्शो इन दाते डा आन कली चहिं गेपुकीमीन नाक्शा, सजाइ गेचा ममाल्नीनी डा?

13 परमप्रभु यावेमी रागी डा मुर आन कली निसाफ पाइब। गेपुकी नु बाक्शो पात्के पाइब कली गुंइशा सोइक्तीने। ब्यवस्था ११:६; मत्ती १८:१७

## 6

### निसाफ पचा आ पर्वम

1 इन दाते डा का निक्शी जिम्तेकम। मिनु मारदे निसाफ पाइब आन डोंइती लाइश्शा मुददा कोप्शा, थमा मसुइकब निसाफ पाइब आन गुइमी गेनीनी? आंमा इन दातेम गारपाइक्या माल्लो ननी।

2 थमा सुइक्बपुकीमी नेल्ल रागी डा मुर आन कली निसाफ पाइनीम देशो लोत्र मतुइक्नीनी डा? गे रागी डा मुर आन कली निसाफ पाइतीनी हना, इन दाते डा आइक्च लोत्र गारपाइकने मचाप्नीनी डा? मत्ती १९:२८

3 गोपुकीमी परमप्रभु यावे आ स्वर्ग डा गेय पाइब आन कली लाइ यो निसाफ पाइनीकी देशो लोत्र यो प्रेदीनी? आंइ नाक्त किंत किंत डा पतीक मार बाक्बा डा?

4 इन दातेमी मोदेशो जीब खेब बाक्त हना, मारदे थमा मसुइक्ब, महिक्सीशो मुर आन गुइमी निसाफ पचा कली गेनीनी।

5 मोदेशो पशामी गे मुने दोक्तीनी। इन दातेमी मोदेशो मुर कली निसाफ पाइब जोक्ब तुइक्ब लोकब का मबाक्बा डा?

6 तन्न लोकबमी लोकब कली मुददा कोप्शा, थमा मसुइकब आन डोंइती चाक्दीश्शो तशा, गो थम मरिम्शो लाक्ती।

7 इन जिशो ठीक मलाक्नुड। इन के मार लाइक्तेकम हना यो, मार पाप्तेकम हना यो, मुददा मकोप्थु, फाल्शा बाक्ने मचाप्नीनी? मत्ती ५:३८-४८; १थिस्सलोनिकी ५:१५; १पत्रुस ३:९

8 तन्न गे आंमा इन लोकब आन कली मरिम्शो पाइनीनी, रोइक्नीनी।

9 ठीक मपाइबपुकी परमप्रभु यावे आ राज्य ओत्रचा मताइनीम दे मतुइक्नीनी? दूली ममिम्तीने। मरिम्शो पाइबपुकीमी दोदेशो पाइनीम देशा हना, पात्के, तेल्लेम पाइनीमी, मूर्ति कली पूजा पाइनीमी, मुर आन मीश लाइक्नीमी, वोंइश मुर वोंइश मुर ब्वांइसीनीमी, १तिमोथी १:९-११; गलाती ५:१९-२१

10 खुइ पाइनीमी, शिम पाइनीमी, शांबु राकसीमी दुक्शा गाक्नीमी, शुक्शी लोत्र पा गाक्नीमी, मुर आन के बाक्शो थोत्रक रोइश्शा, श्येत गेनीमी। मोदेशो पाइबपुकी परमप्रभु यावे आ राज्यम ओत्रचा मताइनीम।

11 इन दातेमी का निक्शी मोदेशो बाक्मा बाक्त। तन्न मुल गे चिक्शो खोदेशो पा, परमप्रभु यावे आ मुर दुम्शा, प्रभु येसु ख्रीस्त आ नेमी नु इं परमप्रभु यावे आ सोक्तीम पतीके ठीक मुर सेल्चा पुंइसाक्नी। तीतस ३:३-७; १कोरिन्थी १:२; रोमी ३:२६

### थमा सुडकब आन रां

12 गो मार गेय पचा दाक्टु, मेको पने चाप्नुड। तन्न गेय का निक्शी आं कली रिम्शो मदुम्ब। गो मारेड पने चाप्ता हना यो, मरिम्शो पतीक आ वाइल मदुम्नुड। १कोरिन्थी १०:२३

13 जचा थोव्रक कोव्रज कली बाकब, कोव्रज जचा थोव्रक कली बाकब। मिनु परमप्रभु यावेमी निम्फा आस कली जाम्शा लाइब सेल्शो बाकब। मुर आ रां ग्रांघ्रा दिशो तेल्लेम पचा कली मसेल्शो बाकब। तन्न रां प्रभु कली सेल्शो बाकब। मिनु प्रभु यो रां कली सेल्शो बाकब। १थिस्सलोनिकी ४:३-५

14 परमप्रभु यावेमी प्रभु कली बेक्शो रे सेंताकव। मिनु आ सक्तिम इं कली यो सेंब। १कोरिन्थी १५:२०; २कोरिन्थी ४:१४

15 इन रां खीस्त आ रां बाकब दे मतुइक्नीनी? मिनु खीस्त आ रां लाइशशा, तेल्लेम आ रां सेल्चा डा? मोदेंशो मपने।

16 तेल्लेम नु ब्वांडसीशोनु, रां कांडचीक दुम्सीब दे मतुइक्नीनी? मार ब्रेक्शो बाक्त देंशा हना “मेको निक्शी रां का दुम्नीस” दे ब्रेक्शो बाकब। उत्पत्ती २:२४

17 तन्न प्रभु आ मुर दुम्यानु, प्रभु आ सोक्त नु इं सोक्त का दुम्नीस। यूहन्ना १७:२१-२२

18 ग्रांघ्रा दिशो तेल्लेम पतीक रे डोन बाक्कीन। मारदे हना मारेड मारेड पाप पनीनु, रां आगामी मपाइनीनी। तेल्लेम पनीनु चहिं आंम रां कली पाप पाइनीनी।

19 इन रां परमप्रभु यावे आ सोक्त आ खिं बाकब दे मतुइक्नीनी? परमप्रभु यावेमी आ सोक्त इन रांमी वोइक्तु। मिनु इन रां इन के ममाइ। १कोरिन्थी ३:१६

20 गे ग्याप्शो मुर बाक्नीनी। मोपतीके इन रांमी परमप्रभु यावे कली ठेयब सेलीने। १कोरिन्थी ७:२३; १पत्रुस १:१८-१९; फिलिप्पी १:२८

## 7

### ग्युंबे आ परबम लोव्र

1 साइ आं कली इन ब्रेक्शो चिठीमी गेपुकीमी “ग्युंबे पचा नु मपचा, तेको रिम्शो बाक्बा?” दे हिल्लो पशो बाक्तीनी। मिनु मुल मार देंनुड देंशा हना, वोंइश मुरुमी मीश मुर कली मथिथु बाक्चा रिम्शो दुम्ब।

2 मो हना यो हेंथे मगाकमल देंशा, ग्युंबे पा वोंइश मुर मीश का नु मीश मुर वोंइश का नु बाक्चा रिम्शो दुम्ब।

3 ग्युंबे पशा, वोंइश मीश दाक्मुशा टिमुशा बाक्सल।

4 मीश मुर आ रां आ वोंइश आ अधिकारम बाकब। आ वोंइश आ रां आ मीश आ अधिकारम बाकब।

5 वोंइश मीश गारशा, नाक्त का निक्शी काथा मइप्थु, प्रार्थना पना पन बाक्स, दे लोव्रसी गारपाइशशा बाक्चा यो रिम्शो दुम्ब। मेको डा लाक्शा चहिं ब्राशा बास मबाक्कीने। मारदे हना सैतानमी शुश नाक्त सम्म ब्राशा बाक्ने मचाप्नीम दे तुइशशा, इन कली तेल्लेम पपाइक्ने चाप्ब।

6 एको आं पशो लोव्र बिच्चान माल्नीनी दे मदेनुड। तन्न आं देंशो लोव्र बिस्साक्नी हना, इन कली रिम्शो दुम्ब।

7 मुर नेल्ले आं खोदेंशो दुम्मल दे मिम्नुड। मो हना यो परमप्रभु यावेमी आ दाक्शो पा का निक्शी आन कली ग्युंबे पशा बाक्चा, का निक्शी आन कली चहिं ग्युंबे मपथु बाक्चा गेशो बाक्त। मती १९:१२

### कान बाक्शो आन परबम लोव्र

8 मुल सम्म ग्युंबे मपथु बाक्ब, आन वोंइश बेक्शो मीश मुर नु आन मीश बेक्शो वोंइश मुर आन कली “आं खोदेंशो पा कान बाक्तेकम हना, मेको इन कली रिम्शो दुम्ब” देनुड।

9 सु सु चहिं आन का ला बाक्ने मचाप्नीमी, मेकोपुकी ग्युंबे पांडिसमल। मारदे हना वोंइश नु मीश माल्शा, हेंथे गाक्चा क्येडा ग्युंबे पचा रिम्शो दुम्ब। १तिमोथी ५:१४

### ग्युंबे पशो आन कली शेंशो



10 मेको आं लोत्र ममाड, ग्युंवे पशो आन कली, प्रभु आ देशो लोत्र मिम्पाडकुनुडमी। मीश मुरुमी आ वोंडश प्रोंडचा मदुम्ब। मती ५:१२

11 प्रोंडशा गाक्त हना, अर्को वोंडश खोडक्या मदुम्ब। आ वोंडश नु बाक्या दाकब हना, आ वोंडश नुन दुशा बाक्सल। वोंडश मुरुमी आ मीश कली मप्रोनल। मती ५:३२

12 एको लोत्र डा लाकशा, प्रभु आ लोत्र ममाड, आं मिम्शो लोत्र मार देनुड देशा हना, थमा सुडक्ब लोकब आ मीश थमा मसुडक्ब बाक्त हना, तन्न आ वोंडश नु बाक्या दाकब हना, आ वोंडशेमी मेको कली मप्रोनल।

13 थमा सुडक्ब मीश मुर आ वोंडश थमा मसुडक्ब बाक्त हना, तन्न आ मीश नु बाक्या दाकब हना, आ मीशेमी यो मेको कली मप्रोनल।

14 मारदे हना थमा मसुडक्ब वोंडश आ मीश आ थमा सुडक्तीकेमी आसीक ताडब। मिनु थमा मसुडक्ब मीश मुर आ वोंडश आ थमा सुडक्तीकेमी आसीक ताडब। मोदेशो मदुम्त हना, आन आल प्रभु के मदुम्नीम। तन्न मोदेशो दुम्त हना, मेको आल परमप्रभु यावे के दुम्नीम। रोमी ११:१६

15 थमा मसुडक्ब वोंडश मुर नु मीश मुरुमी थमा सुडक्ब आन वोंडश मीश आन कली प्रोंडशा ब्राशा बाक्या दाकताकम हना, लचा गेमेक्ल। काथा बाक्यान माल्ब देशो मबाकब। परमप्रभु यावेमी आ मुर आन कली दुशा बाकशो तचा दाकब। रोमी १४:१९

16 थमा सुडक्ब मीश मुर, गे इ वोंडश कली “थमा सुडक्ब सेल्ले चाप्नुड” दे दोपा तुडक्नेवे? थमा सुडक्ब वोंडश मुर, गे इ मीश कली “थमा सुडक्ब सेल्ले चाप्नुड” दे दोपा तुडक्नेवे? १पत्रुस ३:१

### दोपा योत्रशा, मोपा बाक्कीन

17 प्रभुमी इन कली दोपा योत्रशा वोदा मोपान बाक्कीन। परमप्रभु यावेमी इन कली दोपा ब्रेत्ता मोपा बाक्कीन। मेको आं शेंतीक नेल्ल ग्युम्तीक सिं आन कली बाक्ब।

18 गे ब्रेत्ता पुंडसीचा क्येडा डोंडती खोडक्तीक चिनु खोडक्चा पुंडसीशो बाक्तीनी हना, मखोंडसीशो दुम्चा बल मपने। मखोंडसीशो बाक्तीनी हना, खोंडसीचा बल मपने।

19 मारदे हना खोडक्तीक चिनु खोडक्शो नु मखोडक्शो आन पबंम मारेड ममिम्सीब। तन्न परमप्रभु यावे आ अरेशो टिचा, ठेयब बाक्ब। गलाती ५:६; गलाती ६:१५

20 मुर नेल्ल इन कली दोदेशो पा ब्रेत्ता, मोदेशोन बाक्कीन।

21 मेना वाइलीम वाइल बाक्तीनी हना, वस्ता मपने। प्रोंडचा पुंडसाक्नी हना, ग्येरशा लने। फिलेमोन १६; एफिसी ६:६

22 मारदे हना प्रभुमी ब्रेत्ची ना वाइलीम वाइल बाक्तीनी, प्रभु आ डोंडती प्रोंडचा पुंडसीशो मुर दुम्तीनी। ब्रेत्ची ना प्रोंडचा पुंडसीशो मुर बाक्तीनी हना, मुल ख्रीस्त आ वाइलीम वाइल दुम्तीनी।

23 गे थाप्सा, प्रोंडचा पुंडसीशो बाक्तीनी। मुल मुर आन वाइलीम वाइल मदुमीन। १कोरिन्थी ६:२०

24 आं लोकबपुकी, परमप्रभु यावेमी इन कली दोपा योत्रशा ब्रेशशा वोदा, मोपान परमप्रभु यावे नु बाक्कीन।

### ग्युंवे मपथु बाक्शो आन पबंम

25 ग्युंवे मपथु बाक्ब आन पबंम प्रभुमी आं कली मारेड मअरेव। तन्न गो प्रभु आ शिशी पतीकेमी थमा सुडक्ब मुर दुम्ती, गो आं मिम्शो देनुड।

26 श्येत जचाइतय। मोपतीके मुल दोदेशो बाक्या, मोदेशोन बाक्तय हना, रिम्शो दुम्ब, दे मिम्नुड। १कोरिन्थी १०:११

27 मीश बाक्शो मुरुमी मेको कली प्रोंडशा बाक्या ममालीन। मीश मपाडक्शो बाक्तीनी हना, ग्युंवे पचा ममालीन।

28 तन्न ग्युंवे पनीनु, मरिम्शो मपाडनीनी। मीश आलम ग्युंवे पाप्तु हना, मेकोमी मारेड यो मरिम्शो मपाडब। तन्न ग्युंवे पशोपुकीमी श्येत जाइनीम। मोपतीके मेकोपुकीम रागी डा श्येत मजामेक्ल, दे अर्ती गेत्नी।

29 आं लोकबपुकी, प्रभु जाक्का चिक्शो बाक्ब। मुल रे मीश बाक्शो मुर, मीश मबाक्शो खोदेशो पा बाक्कीन। रोमी १३:११; लूका १४:२६

30 रोंका पाइबपुकी रोंका मपाइब खोदेशो पा बाक्कीन। मिनु ग्येरशा बाक्बपुकी मग्येरसीशो खोदेशो पा बाक्कीन। मारेइ मारेइ ग्याप्शा वोइक्बपुकीमी मारेइ मवोइश्शो खोदेशो मिम्नमेक्ल।

31 मुरपुकीम रागी डा गेय पाइनीम हना यो, रागी डा गेय मपशो खोदेशो पा बाक्मल। मारदे हना रागी जाम्शा लचा चिक्शो बाक्ब। १यूहन्ना २:१५-१७

32 गे सुर्ता मपथु, थुं नाइश्शा बाक्शो तचा दाक्नुड। ग्युंवे मपशो वोंइश मुरपुकीमी दोपा प्रभु आ दाक्शो पचा, दे मिम्नीम।

33 तन्न ग्युंवे पशो वोंइश मुरपुकीमी चहिं दोपा मीश कली ग्येरपाइक्का? दे मिम्शा बाक्नीम। लूका १४:२०

34 मोपा गे निक्शी मिम्शो बाक्नीनी। ग्युंवे मपशो मीश मुर नु मीश आलपुकीमी प्रभु आ दाक्शो पा थुं नु रां नेल्ले प्रभु कली जिम्मा गेचा कली मिम्नीम। तन्न ग्युंवे पशो मीश मुरपुकीम चहिं रागी डा गेय पा, दोपा आंम वोंइश कली ग्येरपाइक्का, दे मिम्शा बाक्नीम।

35 इन कली रिम्शो दुम्ल, दे मोदेशो पाता। तन्न श्येत गेचा कली ममाइ। इन गुम्तीकेमी नेल्ल रिम्शो दुम्ल नु इन थुं नेल्लेमी प्रभु कली खोइश्शा, रिम्शो बाक्ने चापीन, दे मोदेशो लोव पाता।

36 सुइ मुरुमी ग्युंवे पचा कली मीश आल पुंइने थुम्शा, मेको मीश आल कली प्रोंइचा मरिम्शो बाक्ब, दे मिम्ब नु मेको कली दाक्ब हना, ग्युंवे पवल। मेको पाप मबाक्ब।

37 तन्न सुमी ग्युंवे मपाइनुड देशा, आ रां कली चलेब नु आ मीश आल कली मो वोइक्नुड, दे आ थुंम मिम्ब हना, मेको रिम्शो दुम्ब।

38 मोपतीके सुमी आ मीश आल कली ग्युंवे पाइबा, मेकोमी रिम्शो पाइब। सुमी मपाइबा, मेकोमी मेको क्येडा रिम्शो पाइब।

### वोंइश बेक्शो मीश मुर आन पर्वम

39 आन वोंइश बाक्ना बाक्न मीश मुरुमी अर्को वोंइश मुर नु ग्युंवे पचा मताइनीम। आन वोंइश बेक्म नोले आन दाक्शो मुर कली ग्युंवे पने चाप्नीम। तन्न प्रभु कली थमा सुइक्ब दुम्चा माल्नीम। रोमी ७:२

40 गो परमप्रभु यावे आ सोक्तीम ब्रीशो मुर नड। गो मार मिम्नुड देशा हना, लेंशा ग्युंवे पचा क्येडा ग्युंवे मपथु बाक्का रिम्शो दुम्ब। मिनु ग्येरशा बाक्का तांइसीब दे मिम्नुड।

## 8

### मूर्ति कली चढ़ेशो श्ये

1 मूर्ति कली चढ़ेशो श्ये ब्वचा आ पर्वम गो नेल्लेमी तुइक्नय। गो शुश तुइक्ब नकी, दे तुइश्शोमी मुर आन कली बोरशा ठेयब लेप्पाइक्ब। दाक्मुशा बाक्शोमी चहिं नेल्ल आन कली रिम्शो दुम्ब, नेल्ल आन थुं बारपाइक्ब। प्रेरित १५:२९

2 मारेइ मारेइ जोक्ब तुइक्ब नड देंबमी आ माल्शो मतुइश्शो बाक्ब। गलाती ६:३

3 तन्न सु सुमी परमप्रभु यावे कली दाक्नीमी, मेको आन कली परमप्रभु यावेमी तुइश्शो बाक्ब। १कोरिन्थी १३:१२

4 मूर्ति कली चढ़ेशो श्ये ब्वचा आ पर्वम मार देंनुड देशा हना, मूर्तिपुकी सोक्त पाइश्शो मनम। मेकोपुकी नु मारेइ मबाक्ब। परमप्रभु यावे डा लाक्शा सुइ मबाक्ब दे तुइक्ताक्क। ब्यवस्था ६:४

5 सरीड नु रागीमी शुश देवी देवता नु प्रभु माइश्शो बाक्नीम हना यो, १कोरिन्थी १९:२०; भजन संग्रह १३६:२-३; रोमी ८:३८-३९

6 इं कली परमप्रभु यावे का ला बाक्ब। मेको मारेइ मारेइ सेल्ब इं आफ बाक्ब। मिनु गोपुकी यो मेको आ सेल्शो बाक्नय। मिनु इं प्रभु का ला बाक्ब, मेको प्रभु येसु ख्रीस्त बाक्ब। मेको आ पतीकेम

मारैड मारैड दुम्शा, गो ब्रोंडचा ताइनीकी। १कोरिन्थी १२:५-६; प्रस्थान २०:३; मलाकी २:१०; एफिसी ४:५-६; यूहन्ना १:३; कलस्सी १:१६

7 गोपुकी नु बाक्ब का निक्शीमी इं मिम्शो लोत्र मरुबेम। मेकोपुकीमी “देवी देवता बाक्नीम” दे डोंइती रे डा आन मिम्शो प्रोंइने मचबेम। मिनु मुल मूर्ति कली चढ़ेशो श्ये ब्वामेनु “पाप राइसीबा, कोर में?” दे मिम्शा, आन थुं क्याल्नीम। १कोरिन्थी १०:२८

8 जचा थोत्रक जशा ब्वशा, परमप्रभु यावे आ डोंइती मारैड मपाइब। जशोमी टेयब मदुम्सीब, मजशोमी आइक्च यो मदुम्सीब, दे तुइक्नय। रोमी १४:१७

9 मोदेशो तुइक्ताक्नी हना यो, होंस पांइसीने। मारदे हना का निक्शीमी इन कली तशा, आन थुं क्याल्तेक्म। गलाती ५:१३

10 मारदे हना सुइमी इ कली, जोक्ब तुइक्ब दुम्शा, मन्दीरम बाक्शा, मूर्ति कली चढ़ेशो श्ये ब्वशो ताप्तु हना, मेको मजोक्ब मुरुमी मूर्ति कली चढ़ेशो श्ये मब्वाइबा डा?

11 मिनु इन जोक्तीके तुइक्तीकेमी इन मजोक्ब लोक्ब आन कली पाप पपाइक्नीनी। मेको आ पबर्म ख्रीस्त साइक्चा पुंइसाक्व। रोमी १४:१५

12 गे इन लोक्ब आन थुं क्याल्पाइक्तीनी हना, गे ख्रीस्त कली मरिम्शो पशो बाक्नीनी।

13 मोपतीके मार देंनुड देशा हना, आं कली श्ये ब्वशो तशा, आं लोक्बपुकीमी आन थुं क्याल्नीम दे तुइक्ताक्ड। मिनु मेको आन थुं मक्याल्मेक्ल देशा, मुल डा मेरे गो गेनायो श्ये मब्वाइनुड दे आं थुं फ्रेंशा, श्ये ब्वचा प्रोंइता। रोमी १४:२१

## 9

### शेंबम आन माल्शो गेचा पुंइसीनीम

1 गो आं दाक्शो, आं मिम्शो पने मचाप्नुडा डा? गो ख्रीस्त आ सोइश्शो मनडा डा? आं मिक्चीमी इं प्रभु येसु ख्रीस्त कली मतशो नडा डा? गो प्रभु आ गेय पडा रे गेपुकी यो प्रभु आ मुर मदुम्नी डा? १कोरिन्थी १५:८; प्रेरित ९:३-५, १५

2 शुश मुरुमी आं पबर्म “आं कली ख्रीस्त आ लोत्र शेंथ सोइश्शो ममाइ” दे मिम्ताक्म हना यो, इन कली शेंथ सोइश्शो नड। मारदे हना प्रभु आ मुर दुम्तीनी। गे आं सोइश्शो दुम्तीके आ छाप बाक्नीनी। १कोरिन्थी ४:१५; २कोरिन्थी ३:२-३

3 आं शेंशो आ पबर्म हिल्लो पाइब आन कली कोरिन्थीपुकी दोपा थमा सुइक्ब दुम्मा? लो, मिम्तीन, दे माइक्नुडमी।

4 मिनु आंइ कली माल्शो जचा तूचा थोत्रक “गेन” दे पुंइने मचाप्नीनी डा? लूका १०:८

5 केफास, प्रभु आ लोक्ब नु सोइश्शो नेल्लेमी शेंना शेंन गाक्मानु, आन मीश काथा लाइश्शा गाक्तेक्म। मिनु गोपुकी मेको आन बुद पा आंइ मीश लाइश्शा गाक्चा मताइनीकी डा?

6 शेंबपुकीम शेंशा जाइनीम। बारनाबास नु गो चहिं शेंशा गाक्स्कुनु, जचा मतथु, गेय पचा माल्नस्कु डा? प्रेरित ४:३६; २थिस्सलोनिकी ३:७-९

7 लडाइ पाइब आन खिं डा जशा बाक्नीमी डा? अडगुर रू थीबपुकीमी श्येत पा खुम्शा, अडगुर मीमेनु, ब्वचा मताइनीमी डा? गोठलापुकीमी चिम्शो बी कली योत्रशा कोत्रशा, घांस लाप्शा, श्येत पा गेय पशा, दूध चिम्शा तूचा मताइनीमी डा?

8 आं देशो लोत्र मुरुम देशो लोत्र ला बाक्बा डा? परमप्रभु यावे आ अरेशो लोत्र नु मगारबा डा?

9 मोसामी “ब्यफ कली दांइ पपाइश्शोनु, फुडला मपाइक्चा” दे ब्रेक्शो बाक्त। परमप्रभु यावेमी ब्यफ आन पबर्म ला मोदेशो पचा दे ब्रेक्पदा डा? ब्यवस्था २५:४; १तिमोथी ५:१८

10 इं पबर्म यो ब्रेक्शो बाक्त दे रूपीन। अर्को लोत्र का निक्शी ब्रेक्शो बाक्ब “ब्यफ वाक्बपुकीमी बाली नाली मीमेनु, इक्का अन्न ताइनुड दे वाक्नीमी। चेरब तुप्बमी यो, इक्का चेरब ताइनुड, दे तुप्ब” दे ब्रेक्शो बाक्ब।

11 गोपुकीमी इन कली परमप्रभु यावे आ लोव्र शेंदकानु, इन जचा तूचा थोव्रक तचा, ठीक मदुम्बा डा? रोमी १५:२७

12 अरु शेंबपुकीमी मेको ताम्तेकम हना, मार, गो मेको आन क्येडा मताइनीकी डा? मो हना यो गो मोदेशो लोव्र मपाइनीकी। ख्रीस्त आ ग्येरपाइक्व लोव्र शेंशोनु, श्येत मदुम्ल, दे मोदेशो लोव्र मपाइनीकी। प्रेरित २०:३३-३५ २कोरिन्थी ११:९

13 परमप्रभु यावे आ खिंमी गेय पाइबपुकीमी मेक रे जाइनीम। चढ्ढेतीकेम गेय पाइबपुकीमी मेक रे ब्वाइनीम, दे मतुइक्नीनी? गन्ती १८:१८-१९, ३१; ब्यवस्था १८:१-३

14 प्रभुमी “आं ग्येरपाइक्व लोव्र शेंबपुकी शेंशा गाकमानु, मेकोपुकी मार मार माल्मा, मेको आं ग्येरपाइक्व लोव्र शेंतीके रे तचा माल्नीम” देशो बाक्त। लूका १०:७; गलाती ६:६

15 मिनु मोदेशो बाक्त हना यो, गो मारेड मपुनु, मारेड मताक्गु। आं कली गेचा माल्नीनी दे यो मदेंनुड। थमा सुइक्व आन शोंप मलाइक्चा, दे बोरनुड। अरु आन थोव्रक तचा क्येडा बेक्चान रिम्शो, दे मिम्नुड। प्रेरित १८:३

16 गो शेंशा गाक्ती, आं ठेयब लेत्चा डा मारेड मबाक्व। मारेदे हना लोव्र शेंथ सोइशो नड, दे तुइशशा, गो प्रभु आ ग्येरपाइक्व लोव्र मशेंथु बाक्ती हना, आं कली काइ मरिम्शो दुम्ब। येरमीया २०:९

17 आं दाक्शो पा शेंथ गाक्शो नड हना, गाल्च ताक्गु वा। तन्न आं दाक्शो पा शेंशा गाक्शो मनड। “शेंथ गाक्को” दे माइक्चा पुंइसीतीके शेंशा गाक्ती। १कोरिन्थी ४:१

18 मिनु आं शेंशा गाक्शो डा मार ताक्गु डा? गो प्रभु आ ग्येरपाइक्व लोव्र मारेड मताक्थु शेंनुड। ग्येरपाइक्व लोव्र शेंब आन तचा डा, ताक्चा मदाक्नुड।

### नेब मुर नु गारशा शेंशो

19 गो आं दाक्शो पने चान्नुड, मो हना यो शुश मुरुमी ख्रीस्त आ लोव्र रुप्शा, आ मुर दुम्मल, दे आन वाइल खोदेशो दुम्शा, शेंना शेंन गाक्ती। मत्ती २०:२७; रोमी १५:२

20 गो यहूदी आन कली शेंदुनु, ख्रीस्त आ लोव्र रुप्पाइशशा, आ मुर दुम्मल, दे गो यहूदी दुम्ती। गो परमप्रभु यावे आ डोंइती डा पतीके पाइब आन कली शेंना शेंन, मेको ख्रीस्त आ मुर दुम्मल, दे गो परमप्रभु यावे आ डोंइती डा पतीके पाइब खोदेशो दुम्ती। तन्न गो मेको डोंइती डा पतीके पाइब मनड। १कोरिन्थी १०:३३; प्रेरित १६:३; प्रेरित २१:२०-२६

21 गो परमप्रभु यावे आ अरेशो लोव्र मतुइक्व आन कली शेंदुनु, ख्रीस्त आ लोव्र रुप्पाइशशा, आ मुर दुम्मल, दे गो परमप्रभु यावे आ अरेशो मपाइब खोदेशो दुम्ती। गो परमप्रभु यावे आ अरेशो मपाइब दुम्शा यो, मेको आ डोंइती ख्रीस्त आ अरेशो पाइब दुम्ती। गलाती २:३

22 गो बोल मपाइशशो मुर आन कली शेंशा, ख्रीस्त आ लोव्र रुप्पाइशशा, आ मुर दुम्मल, दे गो बोल मपाइशशो खोदेशो दुम्ती। का निकशी ख्रीस्त आ लोव्र रुप्शा, आ मुर दुम्मल, दे गो मेको नेल्ल आन खोदेशो दुम्ती। रोमी ११:१४

23 प्रभु आ ग्येरपाइक्व लोव्र रागीम ब्रचा आ पर्बम मेको गेय पाइनुड। मिनु शुश मुरपुकीमी एको लोव्र रुप्शो तशा, आसीक तशा ग्येरसाक्यी।

### इनाम तांइसीब, दे मिम्शा गेय पशो

24 इनाम तांइसीब, दे दोरबपुकी “डोंइती जाक्दीत्नुड” दे मिम्शा दोरनीम। दोरमानु, नेल्ल क्येडा डोंइती जाक्दीप्बम ला इनाम ताइब दे मतुइक्नीनी? मोपतीके गे यो इनाम तकल दे मिम्शा दोरीने। रतिमोथी ४:७; फिलिप्पी ३:१४

25 मोपा दोरबपुकीमी दोरने चबुल, दे हेंथे मजाइनीम मतूनीम। आन रां नेल्ल चलेस जोक्नीम। मोदेशो पाइबपुकीमी जाम्शा लाइब इनाम ला ताइनीम। गोपुकीमी चहिं गेनायो जाम्शा मलाइब इनाम ताइनय, दे तुइशशा, मेको आन क्येडा रिम्शो पचा ममाल्नया डा? रतिमोथी २:४-५; १पत्रुस ५:४

26 गो ते जाक्दीत्त्या माल्बा, मेको मतुइक्थु हेंथे पा मदोरनुड। गो हेंथे पा फशीम मुडकी मआप्नुड।

27 तन्न आं रां कली हेंथे पचा मगेशु, गेय पाइब वाइल खोदेशो सेल्लुड। मारदे हना अरु आन कली मोदेशो शेंताकडमी। मिनु गो आंम आं देशो मपाता हना, आं कली सुइमी महिकनीम। रोमी १३:१४

## 10

### इसाएली आन पशो मिम्तीन

1 आं लोकबपुकी, गो आंइ इसाएली किकी पिपी आन पशो आ पर्वम लोत्र का निकशी शेंनन्नी। आंइ किकी पिपी नेल्ल गोस्स आगाग बाक्शा, समुन्द्र शोकशीशा लमा बाक्त। प्रस्थान १३:२१; प्रस्थान १४:२२

2 मिनु नेल्ल गोस्स आगा गाक्शा, समुन्द्र शोकशा, मोसा आ नेंम ब्वाक्कुम खुम्शा गुंडुचा पुंडसाकमा बाक्त।

3 नेल्लेमी परमप्रभु यावेम गेशो जचा थोत्रक जामे बाक्त। प्रस्थान १६:४,३५; ब्यवस्था ८:३

4 नेल्लेमी परमप्रभु यावेम गेशो सोक्त डा ब्वाक्कु तूडमे बाक्त। मिनु मेको आन नोले खोइक्कम सेरथे फुल्लु रे ब्वाक्कु तूडमे बाक्त। मिनु मेको सेरथे फुल्लु खीस्त बाक्माक्त। प्रस्थान १७:६

5 मो हना यो मेको का निकशी आन कली तशा, परमप्रभु यावे गाइक्ता बाक्त। मिनु गोरशो रागीमी प्रोना बाक्त। गन्ती १४:२२-३२

6 मोदेशो मरिम्शो थुं पाइशो मुर मदुमीन, होस पा बाक्कीन।

7 मेको आन दाते डा मूर्ति पूजा पाइब खोदेशो मदुमीन। मार ब्रेक्शो बाक्ब देशा हना “मुरपुकी जचा तूचा कली निस्साकम। मिनु सिल पचा कली बोक्तेकम” दे ब्रेक्शो बाक्ब। मेको आन पशो खोदेशो मपने। प्रस्थान ३२:६

8 गोपुकीम तेल्लेम पचा मदुम्ब। मेको आन दाते डा का निकशीमी ग्रांग्रा दिचा डा गेय पामे बाक्त। मिनु नाक्त कामीन २३ हजार मुर साइक्चा पुंडसाकमा बाक्त। गन्ती २५:१९

9 गोपुकीम प्रभु कली नाक्चा मदुम्ब। मेको आन दाते डा का निकशीमी मो पाम्तेकम। मिनु बुस्स रे पा साइक्चा पुंडसमा बाक्त। गन्ती २१:४-६

10 गोपुकीम गन गन पचा मदुम्ब। मेको आन दाते डा का निकशीम मोदेशो पामे बाक्त। मिनु खतम पाइबमी मेको आन कली खतम पोक्गा बाक्त। गन्ती १४:२,३५-३६; हिबू ३:११,१७

11 मेको आन मोदेशो दुम्शो तुइशशा, गोपुकीमी रुब्यल, दे एको लोत्र नेल्ल ब्रेक्शो बाक्त। एको रागी नेल्ल जाम्शा लचा चिकशो बाक्त। १पत्रुस ४:१७

12 “गो ठीक बाक्नुड” देब होस पा बाक्मल। मारदे हना पाप पने चाप्नीम।

13 मुल सम्म गे फाल्ने मचाप्या डा पा थुं नाक्चा मपुंडसीनी। परमप्रभु यावे थमा सुइक्चा माल्शो बाक्ब। इन फाल्ने चाप्तीक सक्ति कोत्रशा, इन फाल्ने मचाप्या डा पा थुं थाम्चा मगेब। तन्न गेपु हना यो, इन फाल्ने चाप्तीक सक्ति बारपाइक्ब दे तुइक्तीने। भजन संग्रह ६८:२०; २पत्रुस २:९

### मूर्ति पूजा नु प्रभु भोज मगारब

14 आं दाक्शो लोकबपुकी, मूर्ति पूजा पचा प्रोनीन। १यूहन्ना ५:२१

15 गो लोत्र रुपब मुर आन कली लोत्र पाइनुड। मोपतीके आं देशो ठीक बाक्बा कों, ठीक मबाक्बा, मिम्ने चाप्नीनी।

16 गो कचौरा कली आसीक गेनीकी। मेको आसीक डा कचौरा रे तूयानु, खीस्त आ हुश मिम्शा, आ मुर दुम्शा, मेको नु काथा बाक्शो दुम्नय। गोपुकीमी शोब्ले जिक्शा योक्शा जयानु, खीस्त आ रां मिम्शा, आ मुर दुम्शा, काथा बाक्शो दुम्नय। १कोरिन्थी ११:२३-२६; मत्ती २६:२७; प्रेरित २:४२

17 गो शुश बाक्यानु, रां का खोदेशो दुम्शा बाक्य। मोपतीके शोब्ले का बाक्ब। मिनु गो नेल्लेम मेको शोब्ले का रे जाइनय। १कोरिन्थी १२:२७; रोमी १२:५

18 आंइ इसाएल डा चढेबपुकीमी चढेशो गेय मिम्तीने। चढेबपुकीमी मारेइ मारेइ क्योरशा, मेको चढेशो जाइनीम ब्वाइनीम। मो पामेनु, चढेतीके नु काथा बाक्शो खोदेशो दुम्नीम। लेवी ७:६

19 मिनू आं देशो लोत्र मार रुम्सीब देशा हना, मूर्ति कली चढेशो ठेयब बाक्बा कों? मूर्तिपुकी ठेयब नमी कों? १कोरिन्थी ८:६

20 अर्को रागी डा मुर आन चढेशो परमप्रभु यावे कली ममाइ, वोल आन कली चढेनीम। मोपा मेकोपुकी वोल नु काथा बाक्ब दुम्नीम। मिनू गो इन कली वोल नु काथा बाक्शो तचा मदाक्नुड।

21 गे प्रभु आ कचौरा रे तूतीनी हना, वोल आन कली चढेशो रे तूने मचाप्नीनी। गे प्रभु आ भोज नु वोल आन कली चढेशा जने मचाप्नीनी। मती ६:२४; २कोरिन्थी ६:१५-१६

22 गोपुकीम प्रभु कली रुश पपाइक्चा दुम्बा डा? गो प्रभु क्येडा ठेयब नया डा?

गेय नेल्लेम परमप्रभु कली मान पने

23 मारेइ मारेइ ठीक बाक्ब। तन्न गेय का निक्शी चहिं इन कली रिम्शो मदुम्ब। मारेइ मारेइ ठीक बाक्तेक्म हना यो, का निक्शीम इन थमा सुइक्तीक मबारपाइक्नीम। १कोरिन्थी ६:१२

24 होस पांडसीने, आंम इन कली ला मिम्चा प्रोंइशा, अरु आन कली यो रिम्शो दुम्ल दे मिम्शा गेय पने। रोमी १५:२; फिलिप्पी २:४

25 श्ये ब्वचा आ पर्वम “श्ये ग्याप्य लनीनु ‘चढेशो श्ये कों’ दे हिल्लो मपने। मारेइ ममिम्थु ग्यापीन” दे शेंननी। रोमी १४:२-१०,२२

26 रागी नु रागीमी मार मार बाक्मा, मेको नेल्ल प्रभु के बाक्ब दे रूपीने। भजन संग्रह २४:१

27 मिनू ख्रीस्त कली थमा मसुइक्बपुकीमी इन कली खमे जथ ब्रेम्मानु, गे लचा थुं पा लाइतीनी हना, मारेइ हिल्लो मपथु, ममिम्थु ग्येरसीशा जने ब्वने।

28 गे नु काथा बाक्शा जाइबपुकीमी “एको चढेशो बाक्ब” दे तुइक्पाइक्तेक्म हना, मेको मुर आ पर्वम नु थुं ग्येरसीशो दुम्चा आ पर्वम मेको मजने मब्वने। १कोरिन्थी ८:७

29 थमा सुइक्बपुकीमी चढेशो मजाइनीम मब्वाइनीम, दे तुइक्नीम। मिनू इन कली जशो ब्वशो तशा, मेको आन थुं क्यालनीम। आं जचा ब्वचा आ पर्वम आं अधिकार बाक्ब। मारेदे अरुम शेंचा माल्नीमी?

30 गो प्रभु कली “गे रिम्शो पाइब बाक्नीनी” देशा, मारेइ मारेइ जाइनुड ब्वाइनुड। तन्न आं जशो ब्वशो सुइमी मरिम्शो मलाक्मल, दे यो मिम्नुड। १तिमोथी ४:४

31 मोपतीके मार जाइतीनी ब्वाइतीनी हना यो, तूतीनी हना यो, मार पाइतीनी हना यो परमप्रभु यावे कली ठेयब सेल्चा कली पने। कलस्सी ३:१७

32 यहूदी नु ग्रीक आन कुल, परमप्रभु यावे कली थमा सुइक्ब आन कुल, मुर नेल्ल आन कुल, गेना हना यो रिम्शो गेय पने। रोमी १४:१३

33 गो मोदेशो पा नेल्ल आन कली ग्येरपाइक्चा डा गेय पचा दाक्नुड। आंम आं कली ममिम्सीथु, मेको आन कली रिम्शो दुम्ल, दे मिम्शा, गेय पाइनुड। “शुशेमी ख्रीस्त कली थमा सुइश्शा, आ मुर दुम्मल” दे मिम्शा बाक्ती। १कोरिन्थी ९:२०-२२

## 11

पिया सुम्सीचा आ पर्वम शेंशो

1 गो दोपा ख्रीस्त आ पशो खोदेशो पडा, मोपा गे यो आं पशो खोदेशो पाइब दुमीन।

2 इन कली शेंशो लोत्र का यो मप्रेंथु, टिशा बाक्तीनी दे तुइक्ताक्ड। मिनू गे आ शेंशो नेल्ल पाइतीनी।

3 वोंइश मुर नेल्ल आन पिया ख्रीस्त बाक्ब, मेको रूपीन। मीश मुर आन पिया मेको आन वोंइश बाक्ब। ख्रीस्त आ पिया परमप्रभु यावे बाक्ब दे रूपीन। उत्पत्ती ३:१६; एफिसी ५:२३; १कोरिन्थी ३:२३

4 खुम्सीशा, प्रार्थना पनीनु, परमप्रभु यावेमी तुइक्पाइश्शो लोत्र पनीनु, वोंइश मुरपुकीमी पियामी मारेइ मसुम्सीचा। सुम्साक्नी हना, ख्रीस्त कली आइक्च सेल्शो खोदेशो दुम्ब।

5 मीश मुरपुकी चहिं आन पिया सुम्सीचा माल्नीम। मसुम्सीशो बाक्तेक्म हना, आन वोंइश आन कली आइक्च सेल्शो खोदेशो दुम्ब। मसुम्सीथु बाक्ब आन कली चां प्रेक्शो खोदेशो मिम्सीब।

६ पिया मसुम्नुड देंबम चहिं आन चां प्रेक्समल। चां प्रेक्शो आन कली मुरपुकीम मरिम्शो मिम्नीम, दे गो नेल्लेमी तुडकनय। मोपतीके मीश मुरपुकीमी आन पिया सुम्समल।

७ वोंडश मुरुम पिया सुम्चा मदुम्ब। मारदे हना मेको परमप्रभु यावे खोदेशो पा सेल्सीशो नु आ दारस पाइशो बाक्नीम। मीश मुरपुकी चहिं आन वोंडश आन दारस पाइशो बाक्नीम। मोपतीके सुम्सीचा माल्नीम।

८ वोंडश मुर मीश मुर आ रां रे सेल्शो मबाक्ब। तन्न मीश मुर वोंडश मुर आ रां रे सेल्शो बाक्ब। उत्पत्ती २:२१:३

९ वोंडश मुर मीश मुर कली वारच पचा कली सेल्शो ममाइ। तन्न मीश मुर आ वोंडश कली वारच पचा कली सेल्शो बाक्ब। उत्पत्ती २:१८

१० मीश मुरुमी आन पिया सुम्सीचा माल्नीम। मारदे हना परमप्रभु यावे आ स्वर्ग डा गेय पाइबपुकीमी कोव्रशो बाक्नीम।

११ मोदेशो दुम्त हना यो, प्रभुमी “वोंडश मुर कली मीश मुर माल्ब। मीश मुर कली वोंडश मुर माल्ब। मबाक्थु मदुम्ब दे सेल्शो बाक्त” देंत।

१२ मीश मुर वोंडश मुर आ रां रे सेल्शो बाक्त हना यो, मुल वोंडश मुर मीश मुर रे थिशो बाक्नीम। मेको मोदेशो परमप्रभु यावे आ पशो बाक्ब।

१३ लो आंमा मिम्तीन मीश मुरपुकीमी आन पिया मसुम्थु परमप्रभु यावे कली प्रार्थना पचा दुम्बा?

१४ वोंडश मुरपुकीमी लाइशो चां थुल्चा मुने दुम्ब, दे आंमा मतुडक्नीनी?

१५ तन्न मीश मुरपुकीमी लाइशो चां थुल्शो चहिं आन मान ततीक बाक्ब। आन रां सुम्चा कली लाइशो चां गेशो बाक्ब। साइ डोंडती रे डा मोदेशो लोव्र बाक्ब दे मतुडक्नीनी डा?

१६ गे नु बाक्ब आं शेंशो आ पर्वम जिचा पोक्ब आन कली मार देंनुड देशा हना, तेइ तेइ शेंथ गाक्कानु, मोदेशो शेंनीकी। परमप्रभु यावे आ गुम्तीक खिमी यो मोदेशो शेंनीकी।

### प्रभु भोज आ पर्वम शेंशो

१७ मुल इन कली शेंशो लोव्रम गे रिम्शो दुम्नीनी देंने मचाप्नुड। मारदे हना युम्नीनु, इन कली रिम्शो ममाइ, मरिम्शो दुम्ब।

१८ खुम्सीशा बाक्नीनु, थुं का दुम्शा मबाक्नीनी। एर ओंथ ब्राशा बाक्नीनी देशो नेंता। एको लोव्र नेंशा, इचका थमा सुडक्ता। १ कोरिन्थी १:१२; १ कोरिन्थी ३:३

१९ एर ओंथ ब्राशा बाक्चा चहिं दुम्चा माल्ब। मारदे हना लोव्र रुपब नु मरुपुकी दिल्लीम। मत्ती १८:७; १यूहन्ना २:१९

२० गे खुम्सीशा बाक्नीनु। मार मार जाइनीनी, मेको प्रभु भोज ममाइ।

२१ मारदे हना आंम आंमा चाक्शो जचा थोव्रक जाइनीनी। मिनु मोपान का निकशी जचा मतथु, शोवलु बेक्शो बाक्नीनी, का निकशी दुक्शा बाक्नीनी। यहूदा १२

२२ मार, मोदेशो पा जचा तूचा कली इन खिं मबाक्बा डा? मार, गे परमप्रभु यावे आ गुम्तीक खिं कली आइक्च मिम्नीनी? जचा तूचा मताइब आन कली मुने तोक्नीनी? मिनु मुल इन कली मार देंनुडा? रिम्शो पाइतीनी देंनुडा डा? गो मदेनुड। याकूब २:५-६

२३ मारदे हना प्रभुमी आं कली मार शेंदा, मेको इन कली शेंताक्ड। मेको ग्याइक्चा पुंडसीशो नाक्दो प्रभु येसुम शोब्ले शेशा, मत्ती २६:२६-२८; मर्कूस १४:२२-२४; लूका २२:१९-२०

२४ “परमप्रभु गे रिम्शो पाइब बाक्नीनी” दे मेको शोब्ले जिक्शा “एको आ रां बाक्ब। एको इन कली बाक्ब। एको ओदेशो आं कली मिम्चा कली पने” देंत।

२५ मिनु मोपान जने थुम्शा, कचौरा शेशा “एको कचौरा आं हुश डा नक कबल बाक्ब। गे गेना एको तूनीनी, मेना आं कली मिम्शा तूडीन” देंत।

२६ गे गेना एको शोब्ले जाइनीनी नु कचौरा रे तूनीनी, मेना प्रभु लेशा मजाक्म सम्म मेको आ बेक्शो आ पर्वम शेंनीनी। मत्ती २६:२९

27 सु सुमी हेंशे पा प्रभु भोज डा शोब्ले रे जाइबा नु कचौरा रे तूबा, मेकोमी पाप पा प्रभु आ रां नु आ हुश कली मरिम्शो सेल्ब। १कोरिन्थी १२:२१-२२

28 तन्न गे नेल्लेमी आंम कली नाक्तीन। मिनु ला मेको शोब्ले जन नु कचौरा रे तूडीन। मती २६:२२

29 मारदे हना सु सुमी जशा तूशा, प्रभु आ रां बाक्ब, दे ममिन्मी, मेको सजाइ गेचा पुंडसीनीम। १कोरिन्थी १०:१६-१७

30 मोपतीके इन दातेमी शुश मचाप्ब दुम्शो बाक्नीनी। शुश रोइ पशो बाक्नीनी। का निकशी बेक्शा यो लाम्तेक्म।

31 तन्न गोपुकीमी आंम कली ठीक पा नाक्शा, प्रभु भोज जाइतय हना, सजाइ गेचा मपुंडसीनीय।

32 तन्न प्रभुमी आंइ कली नाक्शा सजाइ गेब। मेको शेंचा कली बाक्ब। मोपा रागी डा मुर नु काथा बाक्शा, जाम्शा मलाइनीकी। हितोपदेस ३:११-१२

33 मोपतीके आं लोकबपुकी, गे जचा कली खुम्सीनीनु, नेल्ल जाक्ने थुम्मे नोले ला जने।

34 शोत्रलु फाल्ने मचाप्बपुकीमी आन खिंम जशा जाक्मल। मो मपाइतीनी हना, प्रभु भोज मरिम्शो सेल्शा नु दोसी दुम्नीनी। अरु थोत्रक आन पबंम गो इन कली नोले जाक्ची ना शेंनुड।

## 12

परमप्रभु आ सोक्त आ पबंम शेंशो

1 आं लोकबपुकी, इन कली परमप्रभु यावे आ सोक्तीम पपाइश्शो गेय मजोक्थु बाक्शो तशा, आं थुं मनुड। मोपतीके एको गेय आ पबंम शेंननी।

2 ख्रीस्त कली थमा सुइक्चा क्येडा डोंइती गे मूर्ति पूजा पाइब बाक्तीनी। मिनु मेको मारेइ पने मचाप्ब मूर्ति गे इन थुं हिरशो बाक्तीनी। अय्युब २:१८-१९

3 मिनु परमप्रभु यावे आ सोक्तीम पपाइश्शो लोत्र पा “येसु सराप रल” देने मचाम्सीब। परमप्रभु यावे आ सोक्तीम पतीके ला “येसु इं प्रभु बाक्ब” देने चाम्सीब, दे रुप्पाइक्ननी। मर्कूस ९:३९; १यूहन्ना ४:२-३

4 परमप्रभु यावे आ सोक्त का बाक्ब। आ पपाइश्शो गेय चहिं शुश बाक्नीम। एफिसी ४:४-६, ११; रोमी १२:६

5 आ पपाइश्शो गेय शुश बाक्शा यो, प्रभु चहिं का बाक्ब। १कोरिन्थी १२:२८

6 मेकेर शुश गेयपुकी बाक्नीमी। मिनु परमप्रभु यावेमी मुर नेल्ल आन कली का का पा मेको गेय पतीके थुं गेब।

7 परमप्रभु यावे आ सोक्तीमी पपाइश्शो गेय नेल्ल आन कली रिम्शो दुम्ल, दे पपाइश्शो बाक्ब। १कोरिन्थी १४:२६

8 परमप्रभु यावे आ सोक्तीमी का कली जोक्तीक तुइक्तीक लोत्र पपाइक्ब। अर्को कली मेकोन सोक्तीमी शेंतीक सक्ति गेब।

9 का कली आ सोक्तीम पतीके थमा सुइक्तीक सक्ति गेब। अर्को कली सापाइक्तीक सक्ति गेब।

10 का कली छक लाक्चा डा गेय पतीक सक्ति गेब। का कली परमप्रभु यावे आ लोत्र पतीक सक्ति गेब। का कली परमप्रभु यावे आ सोक्त देय वोल आन सोक्त बाक्बा, दे तुइक्तीक सक्ति गेब। का कली परमप्रभु यावे आ सोक्त आ लोत्र पतीक सक्ति गेब। का कली मेको लोत्र आ अर्थ शेंतीक सक्ति गेब। १कोरिन्थी १४:५; प्रेरित २:४

11 मोदेशो सक्ति पाइश्शो गेय नेल्ले परमप्रभु यावे आ सोक्तीमी पपाइश्शो बाक्ब। मिनु परमप्रभु यावे आ सोक्तीमी आ दाक्स पा सु सु आन कली गेचा दाक्बा, मेको आन कली गेब। रोमी १२:३; एफिसी ४:७

मुर आ रां

12 दोपा मुर आ रांम गुड, खोइली, नोफा, मिक्च नु अरु मार बाक्तेक्म हना यो, रां का दुम्ब, मोपान ख्रीस्त आ मुर शुश बाक्तेक्म हना यो, रां का खोदेशो बाक्नीम, दे मिम्सीब।



13 परमप्रभु यावे आ सोक्तीम पतीके यहूदी, ग्रीक, वाइलीम वाइल, होत्रप नु गो नेल्ल परमप्रभु यावे आ सोक्त डा दुम्तय। गलाती ३:२८

14 मारदे हना रां कांडचीक बाक्त हना यो, मेकेर शुश अरु मार मार बाक्नीम।

15 खोइलीमी “गो गुड मनड। मोपतीके गो रां डा मनड” दैत हना, मार, मेको रां डा मदुम्बा डा?

16 नोफामी “गो मिक्ची मनड। मोपतीके गो रां डा मनड” दैत हना, मार मेको रां डा मदुम्बा डा?

17 मिनू रांमी मिक्च ला बाक्त हना, दोपा नेंचा डा? रांमी नोफा ला बाक्त हना, दोपा नाम्चा डा?

18 तन्न परमप्रभु यावेमी आ दाक्स पा नेंतीके, नाम्तीके, ततीके नु मारेइ मारेइ पतीके गारपाइशशा वोइक्तु।

19 मिक्च ला बाक्त हना, दोपा रां दुम्बा डा?

20 मेको मारेइ मारेइ शुश बाक्तेक्म हना यो, रां चहिं कांडचीक बाक्ब।

21 मिक्चीमी गुड कली “इ कली ममाल्नुड” दैने मचाप्ब। पियामी खोइली कली “इ कली ममाल्नुड” दैने मचाप्ब।

22 रां डा आइक्च मिम्सीशोपुकी मबाक्थु मदुम्शो बाक्नीम। मेको रां कली शुश माल्शो बाक्नीम।

23 रां डा महिकसीशो आन कली गो मान पाइक्नय, मदारशो मिम्सीशो आन कली दारपाइक्नय।

24 रां दारशो आन कली दारपाइक्चा ममाल्नय। आइक्च मिम्शो आन कली चहिं परमप्रभु यावेमी नेल्ल क्येडा मान पपाइशशा बाक्ब।

25 मोपा रां का दुम्शोपुकी मब्रामल, कांडचीक दुम्शा बाक्मल नु काम अर्को कली कोत्रमुमल।

26 मोदेशो पा कांडचीक दुम्शोपुकी, काम श्येत जाप्तु हना, नेल्ल श्येत जाइनीम। काम मान ताप्तु हना, नेल्ल गारशा ग्येरसीनीम।

**गे ख्रीस्त आ रां बाक्नीनी**

27 गे ख्रीस्त आ रां बाक्नीनी। मिनू का का पा मिक्ची, नोफा, शोत्र, गुड, खोइली नु मार मार बाक्नीनी। रोमी १२:५

28 परमप्रभु यावेमी थमा सुइक्ब आन गुम्तीकेमी डोंडती ख्रीस्त आ सोइशशोपुकी, मेको आन नोले आ लोत्र पाइबपुकी, मेको आन नोले शेंबपुकी, मेको आन नोले छक लाक्चा डा गेय पाइबपुकी, मेको आन नोले सापाइक्बपुकी, मेको आन नोले वारच पाइबपुकी, मेको आन नोले कोत्रबपुकी नु मेको आन नोले सोक्त आ लोत्र पाइबपुकी वोइक्तीमी। एफिसी ४:११-१२

29 मार, मेको नेल्ल ख्रीस्त आ सोइशशोपुकी नमी? मार, मेको नेल्ल परमप्रभु यावे आन लोत्र पाइब बाक्नीमी? मार, मेको नेल्ल शेंब बाक्नीमी? मार, मेको नेल्ल छक लाक्चा डा गेय पाइब बाक्नीमी?

30 मार, मेको नेल्ल सापाइक्ब बाक्नीमी? मार मेको नेल्लेम परमप्रभु यावे आ सोक्त आ लोत्र पाइनीमी? मार, मेको नेल्लेम लोत्र आ अर्थ शेनीमी?

31 गो मार देंनुड देशा हना, परमप्रभु यावे आ सोक्तीमी पपाइशशा गेय पनीनु, नेल्ल क्येडा ठेयब गेय पने। मिनू गो इन कली नेल्ल क्येडा रिम्शो लां कोंइनन्नी। १कोरिन्थी १४:१, १२

## 13

**दाक्ब मुर दुम्चा आ पबर्म शेंशो**

1 गो मुर आन लोत्र पाता हना नु परमप्रभु यावे आ स्वर्ग डा गेय पाइब आन लोत्र यो पाता हना, तन्न मुर आन कली मदाक्ताकड हना, गो हेंथे पा ताप्शो किडगो नु रेयके पाइब बुप्केल खोदेशो दुम्नुड।

2 गो नु परमप्रभु यावे आ लोत्र पतीक सक्ति, खुइशशा लोत्र नेल्ल रुपतीक सक्ति, नेल्ल जोक्तीक तुइक्तीक सक्ति नु डांडा याक्पाइक्तीक थमा सुइक्तीके बाक्त हना, तन्न गो नु दाक्तीक मबाक्त हना, गो मारेइ मनड। मत्ती ७:२२; मत्ती १७:२०

3 आं के बाक्शो थोत्रक नेल्ल योक्शा गेशा, आंम आं रां प्रोइशशा बेक्चा कली गेता हना यो, दाक्ब मुर चहिं मदुम्ती हना, मार रिम्शो दुम्नुडा डा? गो शोर गाक्शो मदुम्नुडा डा? मत्ती ६:२

4 दाक्तीकेमी श्येत फाल्ने नु शिशी पने चाप्ब। दाक्तीकेमी गेहे मपाइब मबोरब।

- 5 दाक्तीकेमी ठेयब मलेप्व नु मुने दोक्चा डा लोव्र मपाइब। दाक्तीकेमी आं के ला ठीक मदेब। दाक्तीकेमी रीब पा मचुरब, ईख मकुरब। फिलिप्पी २:४
- 6 मरिम्शो पशो तशा मग्येरसीब। ठीक पशो तशा ग्येरसीब। रोमी १२:९
- 7 दाक्तीकेमी मारेइ मारेइ सुम्ब, मारेइ मारेइ थमा सुइक्ब, मारेइ मारेइ आस पाइब नु नेल्ल फाल्ने चाप्व। हितोपदेस १०:११; मती १८:२१-२२; रोमी १५:१
- 8 दाक्तीक गेनायो मक्व्याम्सीब। परमप्रभु यावे आ लोव्र पतीक जाम्शा लाइब। परमप्रभु यावे आ सोक्त आ लोव्र यो नुप्व। तुइक्तीक सक्ति नुष्ठा लाइब।
- 9 मारदे हना आंइ जोक्तीक तुइक्तीक आइक्च बाक्ब। आंइ परमप्रभु यावे आ लोव्र पतीक यो नेल्ल रुप्या डा मबाक्ब।
- 10 नोले चहिं गोपुकीमी नेल्ले तुइश्शा रुपनय। मिनु मरुप्शो नु मतुइश्शो मारेइ मलीब।
- 11 गो आल बाक्डानु, आलम ब्वाक्स पा ब्वाक्ती। आलम मिम्स पा मिम्ताक्ड। आलम पस पा पाता। मिनु कोल्शा ठेयब दुम्शा, आलम खोदेशो मपड।
- 12 मुल गोपुकीमी ब्राब्रा पा ताइतय। मेना रिम्शो पा ताइनय। मुल गो इच्का ला रुप्नुड। मेना नेल्ल रिम्शो पा रुप्नुड। परमप्रभु यावेमी आं कली तुइश्शो बुद पा, गो मेना नेल्ल तुइक्नुड। गन्ती १२:८; २कोरिन्थी ५:७; १कोरिन्थी ८:३
- 13 थमा सुइक्चा, परमप्रभु यावेमी आ देशो नेल्ल खाप्व, दे आस पा बाक्चा नु दाक्तीक सांफा बाक्नीम। मेको सांफामी दाक्तीक चहिं नेल्ल क्येडा ठेयब बाक्ब। १थिस्सलोनिकी १:३; १यूहन्ना ४:१६

## 14

### मतुइश्शो नु रुप्शो लोव्र पचा

- 1 दाक्तीक पाइश्शो मुर दुमीने। परमप्रभु यावे आ सोक्तीम पपाइश्शो गेय शुश मालीन। परमप्रभु यावे आ लोव्र पतीक शुश मालीन।
- 2 परमप्रभु यावे आ सोक्त आ लोव्र पाइबमी मुर कली लोव्र मपाइब। तन्न परमप्रभु यावे कली लोव्र पाइब। सुइमी मेको आ लोव्र मरुप्नीम। मेकोमी परमप्रभु यावे आ सोक्त आ पतीकेमी खुइश्शो लोव्र पाइब। प्रेरित २:४; प्रेरित १०:४६
- 3 परमप्रभु यावे आ लोव्र पामेनु, मुर आन थुं बारपाइक्ब। रिम्शो गेय पपाइक्ब, नु थुं खाइश्शो आन कली सापाइक्ब।
- 4 परमप्रभु यावे आ सोक्त आ लोव्र पाइबमी आंम थुं कली ला बारपाइक्ब। तन्न परमप्रभु यावे आ लोव्र पाइबमी गुम्तीक खिं डा मुर आन थमा सुइक्तीके बारपाइक्ब।
- 5 गे नेल्लेम परमप्रभु यावे आ सोक्त आ लोव्र पशो दाक्नुड। तन्न मेको क्येडा परमप्रभु यावे आ लोव्र पशो तचा दाक्नुड। परमप्रभु यावे आ सोक्त आ लोव्र पाइब क्येडा, परमप्रभु यावे आ लोव्र पाइब ठेयब बाक्ब। तन्न सोक्त आ लोव्र आ अर्थ शेंब बाक्त हना, गुम्तीक खिं डा मुर आन कली रिम्शो दुम्ब। १कोरिन्थी १२:१०
- 6 आं लोकबपुकी, गो परमप्रभु यावे आ सोक्त आ लोव्र पा, इन गुम्तीकेमी जाक्ती हना, इन कली मरुप्चा डा बाक्त। गो इन कली नोले दुम्तीक लोव्र, जोक्तीक तुइक्तीक लोव्र, परमप्रभु यावे आ लोव्र नु आ शेंतीक लोव्र पाता हना चहिं इन कली रिम्शो दुम्ब। १कोरिन्थी १२:८
- 7 ताप्तीके मुराली, तार पाइश्शो ठेयब ताप्तीके ताप्मेनु, हेथे पा ताप्तेक्म हना, मार ताप्शो बाक्बा, दोपा तुइक्नीमी?
- 8 लडाइ पची ना तुराही ताप्वमी मरुप्चा डा पा ताप्तु हना, लडाइ पाइब लाइनीमी डा?
- 9 मिनु गोपुकीमी सोक्त आ लोव्र पनीनु, इन देशो लोव्र सुमी रुपनीमी डा? इन मोदेशो पशो लोव्र नेल्ल फशेम योल्शो खोदेशो दुम्ब।
- 10 रागीमी लोव्र शुश बाक्नीमी। मेको लोव्र नेल्ल रुप्या डा बाक्नीमी।

11 तन्न गो मेको लोव्र रुप्ने मचाप्ता हना, गो अर्को रागी डा मुर दुम्नुड। मिनु मेको लोव्र पाइब आं कली यो अर्को रागी डा मुर दुम्ब।

12 गे इन दातेमी मोदेशो बाक्ब। परमप्रभु यावे आ सोक्तीम पपाइश्शो गेय पचा दाक्ताक्नी हना, गे इन युम्तीक खिं डा मुर आन थमा सुइक्तीक बोल्यो दुम्चा कली गेय पने।

13 मोपतीके सुमी परमप्रभु यावे आ सोक्त आ लोव्र पाइबा, मेकोमी आ अर्थ शेंचा कली पुनल। १कोरिन्थी १२:१०

14 गो सोक्त आ लोव्र पा प्रार्थना पडानु, आं थुंमी मारेइ मरुप्नुड।

15 गो मुल मार पाइनुड देशा हना, गो सोक्त आ लोव्रमी प्रार्थना पडानु, आ थुंमी यो प्रार्थना पाइनुड। परमप्रभु यावे आ सोक्तीम कुम्सो पडानु, आं थुंमी यो कुम्सो पाइनुड। एफिसी ५:१९

16 मिनु गेपुकी खुम्सीशा बाक्नीनु, सोक्त आ लोव्रम आसीक गेशा, परमप्रभु यावे कली “गे रिम्शो पाइब बाक्नीनी” देंतीनी हना, दोपा मरुप्ब मुरुमी “आमेन” देने चाप्बा डा?

17 इन लोव्र रिम्शो बाक्त हना यो, अर्को मुर आ थुं मबारपाइश्शो बाक्त।

18 गो परमप्रभु यावे कली “गे रिम्शो पाइब बाक्नीनी” देंनुड। मारदे हना गो सोक्त आ लोव्र नेल्ल इन क्येडा शुश पाइनुड।

19 तन्न थमा सुइक्ब आन युम्तीकेमी बाक्शा, मुर आन कली शेंचा नु रुप्पाइक्चा कली गो १० हजार सोक्त आ पशो लोव्र क्येडा रुप्चा डा ५ ओटा लोव्र पचा रिम्शो लाक्ती।

20 आं लोकबपुकी, आलमी मिम्शो खोदेशो पा ममिम्तीने। मरिम्शो गेय पचा कली मजोक्ब आल खोदेशो दुम्शा बाक्कीने। तन्न इन मिम्तीकेमी निप्स पाइश्शो मुरुम मिम्शो खोदेशो पा मिम्तीन। एफिसी ४:१४; यसैया २८:११-१२

21 मिनु परमप्रभु यावेमी आ अरेशा ब्रेक्पाइश्शो लोव्रमी “गो डोन रागी डा मुर आन मतुइश्शो लोव्र पतीकेमी नु रागी डा मुर आन लोव्रमी मेको नु लोव्र पाइक्नुड। मो हना यो मेकोपुकीम आं लोव्र मनेंनीम” दे प्रभुमी देंत, दे ब्रेक्शो बाक्ब। यसैया २८:११,१२

22 परमप्रभु यावे आ सोक्त आ लोव्र पतीके थमा सुइक्ब आन कली ममाइ, थमा मसुइक्ब आन कली चिन्ड दुम्ब। परमप्रभु यावे आ लोव्र चहिं थमा मसुइक्ब आन कली ममाइ, थमा सुइक्ब आन कली बाक्ब।

23 मिनु थमा सुइक्ब नेल्ल खुम्सीशा बाक्मानु, मुर नेल्लेमी परमप्रभु यावे आ सोक्तीमी पपाइश्शो मतुइश्शो लोव्र पना पन बाक्तेक्म हना, अरु मुर, थमा मसुइक्ब ओव्रशा, इन मोदेशो लोव्र पशो नेंशा “गशो बाक्तेक्म” दे मदेनीमी डा?

24 तन्न गे नेल्ल परमप्रभु यावे आ लोव्र पना पन बाक्नीनु, थमा मसुइक्ब, अरु मुर ओव्रशा, इन मोदेशो नेंशा, आ थुंमी मिम्शा, आ मरिम्शो पशो नेल्ल फ्रुकब।

25 आ थुं डा खुइश्शो नेल्ल तुइश्शा, बाप्शा “परमप्रभु यावे टेयब बाक्ब” देंशा, परमप्रभु यावे थमा पा, इन दातेमी बाक्ब, दे तुइक्ब। यूहन्ना १६:८

26 आं लोकबपुकी, मुल मार देंनुड देंशा हना, गे खुम्सीशा बाक्नीनु, नेल्ल इन के गेय का का बाक्ब। कामी परमप्रभु यावे कली कुम्सो पाइब, कामी लोव्र शेंबा, कामी नोले दुम्तीक लोव्र पाइब, कामी परमप्रभु यावे आ सोक्त आ लोव्र पाइब नु अर्कोमी मेको लोव्र आ अर्थ शेंब। मेको गेय नेल्ल थुं बारपाइक्चा कली दुम्ल। १कोरिन्थी १२:८-१०; एफिसी ४:१२

27 परमप्रभु यावे आ सोक्त आ लोव्र पामेनु, निक्शीमी कि सांमी पामेक्ल। मिनु का का पा पचा माल्नीम। मिनु मुर कामी आ अर्थ शेंचा माल्ब।

28 तन्न मेको लोव्र आ अर्थ शेंब मबाक्त हना, सिक्सी पा बाक्चा माल्नीम। सोक्त आ लोव्र पाइबमी आम थुं बारपाइक्चा कली, परमप्रभु यावे कली लोव्र पवल।

29 परमप्रभु यावे आ लोव्र पामेनु, निक्शीमी कि सांमी पामेक्ल। मिनु नेंबपुकीमी “मेको लोव्र परमप्रभु यावे आ लोव्र नु गारबा देय मगारबा?” दे नाक्चा माल्नीमी। प्रेरित १७:११; १थिस्सलोनिकी ५:२१

30 तन्न मेकेर बाकब कामी परमप्रभु यावे आ नोले दुम्ब लोत्र तुइक्ताक्व हना, डोंइती डा लोत्र पाइब सिक्सी पा बाक्ल।

31 गे नेल्लेमी का का पा परमप्रभु यावे आ लोत्र पने चाप्नीनी। मो पाइतीनी हना नेल्लेमी शेंसीने चाप्नीनी। गे नेल्ल इन थुं बारब।

32 परमप्रभु यावे आ लोत्र पाइब आन सोक्त मेको आन गुडम बाकब।

33 मारदे हना परमप्रभु यावे खल बल डा परमप्रभु मबाकब। मेको थुं नाइश्शा बाक्तीक परमप्रभु बाकब।

### थमा सुइक्व आन गुम्तीकेमी

34 मीश मुरपुकी लोत्रसी मपथु, सिक्सी पा बाक्मल। मेकोपुकी ब्वाक्चा मताइनीम। मारदे हना अरेशो लोत्रमी मोदेशो ब्रेक्शो बाकब। मिनु मेको लोत्र मेकोपुकीम टिचा माल्नीम। १तिमोथी २:११-१२; उत्पत्ती ३:१६

35 लोत्र मरुप्तेक्म हना, आन खिं लमा नोले आन वोंइश आन कली हिल्लो पामेक्ल। थमा सुइक्व आन गुम्तीकेमी चहिं लोत्र मपामेक्ल, मारदे हना मुने दुम्ब।

36 मार, परमप्रभु यावे आ लोत्र इन रे पा जाक्म डा देय इन कली ला जाक्म?

37 इन दातेमी परमप्रभु यावे आ लोत्र पाइब नु आ सोक्तीम ब्रीशो मिम्ब मुरुमी आं ब्रेक्शो लोत्र प्रभु आ देशो लोत्र बाकब दे तुइक्तमेक्ल १यूहन्ना ४:६

38 तन्न सुइमी “पावल आ शेंशो प्रभु आ लोत्र मबाकब” दैत हना, मेको आ लोत्र यो थमा मसुतीन।

39 मोपतीके आं लोकबपुकी, परमप्रभु यावे आ लोत्र पचा कली शुश बोल पने। मिनु परमप्रभु यावे आ सोक्त आ लोत्र पाइब आन कली मतेक्कीन।

40 खुम्सीशा बाक्नीनु, खल बल मपथु, नेल्ल रिम्शो दुम्चा माल्ब। १कोरिन्थी १४:३३; कलस्सी २:५

## 15

### येसु बेक्शो रे सेंसीशो

1 आं लोकबपुकी, इन कली डोंइती येसु ख्रीस्त आ परबम शेंशो ग्येरपाइक्तीक लोत्र मिम्पाइक्नुड। गेपुकीमी एको लोत्र नेशा थमा सुइक्तीनी। मिनु मुल यो थमा सुइक्ना सुइक्न बाक्तीनी।

2 एको लोत्र दोपा शेंदनी, मोपा थमा सुइक्ना सुइक्न बोल्यो दुम्तीनी हना, परमप्रभु यावे नु बाक्चा ताइनीनी।

3 मारदे हना आं ख्रीस्त रे तशो ठेयब लोत्र इन कली शेंताक्नीनी। दोदेशो लोत्र बाकब देशा हना, परमप्रभु यावे आ लोत्रमी ब्रेक्शो खोदेशो पा ख्रीस्त इं पाप आ परबम साइक्चा पुंडसाक्व। यसैया ५३:१२

4 मेको थिम्चा पुंडसाक्व। मिनु परमप्रभु यावे आ लोत्रम ब्रेक्शो खोदेशो पा आ नित्थ नाक्ती सेंचा पुंडसाक्व। होसे ६:२; लूका २४:२७,४४,४६

5 मिनु सेंसीशा, डोंइती केफास कली तपांडसाक्व। मिनु नोले १२ जना शेंसीब आन कली तपांडसाक्व। लूका २४:३४; यूहन्ना २०:२६

6 नोले कालेमी ५ सहे क्येडा शुश थमा सुइक्व आन कली तपांडसाक्व। का निक्शी मुल बेक्शा लाम्तेक्म। शुश चहिं मुल यो बाक्नीम।

7 नोले याक्ब कली तपांडसाक्व। मिनु आ सोइश्शो शेंसीब नेल्ल आन कली यो तपांडसाक्व। लूका २४:५०

8 मिनु नेल्ल क्येडा नोले गो महिना मजाक्दीत्थु जरमेशो आल खोदेशो आं कली तपांडसाक्व। १कोरिन्थी ९:१; प्रेरित ९:३-६

9 मारदे हना गो सोइश्शो आन दातेमी नेल्ल क्येडा आइक्च बाक्नुड। आं कली सोइश्शो देंचा मशिरचा डा बाक्नुड। मारदे हना गो परमप्रभु यावे कली थमा सुइक्व आन कली खेदा पाता। एफिसी ३:८; प्रेरित ८:३

10 तन्न परमप्रभु यावेमी शिशी पा आ सोइश्शो नु आ लोत्र शेंब सेल्लती। आ शिशी पशो यो मो मबाक्ब। मिनू गो नेल्ल आन क्येडा शुश गेय पाता। मेको नेल्ल आं पशो ममाड, तन्न परमप्रभु यावे आ पपाइश्शो बाक्ब। २कोरिन्थी ११:५, २३

11 मोपतीके गोम शेंताक्नी हना यो, मेकोपुकीम शेंताक्म हना यो, गेपुकीमी थमा सुइक्तीनी।

येसु बेक्शो रे मसेंस दे लोत्र ब्रशो

12 मिनू ख्रीस्त बेक्शो रे सेंसाक्व, दे शेंशो बाक्त। तन्न इन दाते डा का निक्शीमी “बेक्शो मुर बेक्शो रे मसेंसीनीम” देंशा दोपा देंने चाप्नीमी?

13 बेक्शो रे सेंचा मपुइसीनीम हना, ख्रीस्त यो बेक्शो रे मसेंसीशो बाक्ब।

14 ख्रीस्त बेक्शो रे मसेंसीशो बाक्त हना, आंइ शेंशो फश लोत्र खोदेशो दुम्त। इन थमा सुइश्शो यो मोशीन दुम्त।

15 गो आंइ परमप्रभु यावे आ पबंम शेंशो यो जोल दुम्बाक्त। मारदे हना गोमी परमप्रभु यावेमी ख्रीस्त कली बेक्शो रे सेंसाक्व दे शेंशो बाक्तक। तन्न मेकोम मपव। “बेक्शो रे मसेंसीनीम” देंशो लोत्र थमा बाक्त हना, आंइ शेंशो जोल दुम्ब। प्रेरित १:२२

16 मारदे हना मुर बेक्शो रे मसेंसीनीम हना, ख्रीस्त यो बेक्शो रे मसेंस।

17 मिनू ख्रीस्त बेक्शो रे मसेंसाक्व हना, इन थमा सुइश्शो मोशीन दुम्त। इन पाप यो मक्याम्सीथु लीशो बाक्ब।

18 ख्रीस्त कली थमा सुइश्शा बेक्शोपुकी यो जाम्शा लाम्तेक्म।

19 एको रागीम ब्रोइचा कली ला ख्रीस्त कली थमा सुइश्शो बाक्तक हना, गो मुर नेल्ल आन क्येडा शिशी पाइक्चा पुंइसीब नकी।

येसु रे नेल्ल ब्रोइब दुम्नीम

20 तन्न ख्रीस्त बेक्शो रे सेंसीशो बाक्ब। बेक्शो आन दातेमी नेल्ल क्येडा डोंइती सेंसीब ख्रीस्त बाक्त। १कोरिन्थी ६:१४; कलस्सी १:१८

21 दोपा मुर कामी नेल्ल मुर आन कली बेक्शा लाइब सेला, मोपा मुर कामीन मुर नेल्ल आन कली बेक्शो रे सेंचा पुंइसीब सेल्लु। उत्पत्ती ३:१७-१९; रोमी ५:१८

22 दोपा आदम रे नेल्ल बेक्ब दुम्मा, मोपा ख्रीस्त रे पा नेल्ल ब्रोइब दुम्तेक्म।

23 मिनू नेल्ल का का पा सेंसीनीम। डोंइती ख्रीस्त सेंसाक्व। मिनू नोले आ जाक्ची ना मेको कली थमा सुइक्बपुकी सेंसीनीम। १थिस्सलोनिकी ४:१६-१७

24 मिनू नोले रागी नुच्ची ना जाक्ब। मिनू मेकोमी नेल्ल सासन, नेल्ल अधिकार नु नेल्ल सक्ति खतम सेल्शा, आ आफ परमप्रभु यावे कली आ राज्य गेब। रोमी ८:३८

25 मारदे हना ख्रीस्तमी आ जोरी सत्रु आन कली आ खोइलीम मदिम्दा सम्म सासन पचा माल्ब। भजन संग्रह ११०:१; मत्ती २२:४४

26 नेल्ल क्येडा नोले साइक्तीक चहिं जोरी सत्रु बेक्तीक बाक्ब।

27 मारदे हना परमप्रभु यावेमी रागी डा सक्ति नेल्ल कली आ खोइलीम दिप्शा वोइक्तु। रागी डा सक्ति नेल्ल आ खोइलीम दिप्शा वोइक्तु, आ चहिं दिम्सीशा मबा, दे रुम्सीब। भजन संग्रह ८:६

28 मिनू सक्ति नेल्ल परमप्रभु यावे आ गुइम बाक्त हना, तौ यो आ गुइम बाक्ब। मारदे हना परमप्रभु यावे नेल्ल आन कली का ला परमप्रभु यावे बाक्ब।

29 बेक्शो रे मसेंसीब देंशो लोत्र थमा बाक्त हना, बेक्शो मुर आन पा डा अरु थमा सुइक्ब मुर ब्वाक्कुम खुम्शा गुंइपांइसीचा, मार मिन्नीमी? बेक्शो मुर थमा पा मसेंसीनीम हना, मारदे अरु मेको आन पा डा ब्वाक्कुम खुम्शा गुंइचा पुंइसीनीमी?

30 मारदे गो शुश श्येत फाल्शा, एको लोत्र शेंना शेंन गाक्नुडा? रोमी ८:३६; गलाती ५:११

31 आं लोक्बपुकी, येसु ख्रीस्त, इं प्रभु आ मुर दुम्तीनी। मिनू इन कली तथा, आं नें बोरपाइक्नुड। तन्न शेंना शेंन गाक्शा, नाक्त कित कित बेक्चा डा खोदेशो दुम्नुड। २कोरिन्थी ४:१०

- 32 एफिसस सहरम शेना शेन बाकडानु, मेकेर डा मुरपुकीमी जोड वां खोदेशो पा खेदा पतीमी। मुर बेकशो रे मसेसीनीम हना, जय तूय मारदे हना दीसा बेकनय। यसैया २२:१३
- 33 सुइमी जोल थमा मसुतीन। मारदे हना मरिम्शो मुर नु बाकबम, मुर कली मरिम्शो सेलब।
- 34 दूली मिम्चा प्रोनीन। लेंशा पाप मपने। इन दाते डा का निक्शीमी परमप्रभु यावे आ पबर्म मारेड मतुइक्ब बाक्नीम। मेको इन कली मुने दोक्चा डा बाक्ब। १थिस्सलोनिकी ५:८

### बेकशो रे सेसीशो आन रां

- 35 मिनु मुर कामी “मुर बेकशो रे दोपा सेसीनीमी? आन रां दोदेशो बाक्बा डा?” दे हिल्लो पाइनीम।
- 36 गे मूर्खपुकी, वांचेर शोक्नीनु, वांचेर मबेक्थु, कोच्वा मदापब। यूहन्ना १२:२४
- 37 मिनु इन शोक्शो, वाशो खोदेशो मबाक्ब। मेको गेडा ला बाक्ब। मेको चेरब बाक्त हना यो अरु वांचेर बाक्त हना यो मोदेशो बाक्ब।
- 38 तन्न परमप्रभु यावेमी नेल्ल आन कली आ योत्रशो रां गेब। मिनु वांचेरमी आंम आंम कोच्वा दाप्शो खोदेशो बाक्ब।
- 39 मारदे हना ब्रॉइशो नेल्ल खाल का डा मबाक्नीम। मुर खाल का डा बाक्नीम, जन्तु अर्को खाल डा बाक्नीम, बस्तु भाव अर्को खाल डा बाक्नीम, चिक्ब अर्को खाल डा बाक्नीम नु डांइ अर्को खाल डा बाक्नीम।
- 40 मिनु स्वर्ग डा रां बाक्नीम नु रागी डा रां बाक्नीम। स्वर्ग डा रां आन दारस का बाक्ब नु रागी डा रां आन दारस अर्को बाक्ब।
- 41 नां आ छेडछेड का बाक्ब नु तास्ला आ छेडछेड अर्को बाक्ब। मिनु सोरुल आन छेडछेड लेंशा अर्को बाक्ब। सोरुल का आइक्च नु अर्को ठेयब छेडछेड पाइशो बाक्ब।
- 42 मोदेशो मुर आन बेकशो रे सेसीचा यो बाक्ब। शोक्शो रां, वांचेर खोदेशो पा, जाम्शा लाइब। सेसीशो रां चहिं गेना हना यो लीब रां बाक्ब।
- 43 शोक्शो रां मरिम्शो बाक्ब। सेसीशो रां चहिं थम दारशो बाक्ब। शोक्शो रां मारेड पने मचापब दुम्शो बाक्ब। सेसीशो रां चहिं सक्ति पाइशो बाक्ब। फिलिप्पी ३:२१; कलस्सी ३:४
- 44 बेक्चा माल्शो रां शोक्शो बाक्ब, परमप्रभु यावे आ सोक्तीम गेशो रां सेसीशो रां बाक्ब। बेक्चा माल्शो रां बाक्त हना, परमप्रभु यावे आ सोक्तीम गेशो रां यो बाक्ब।
- 45 मार ब्रेक्शो बाक्ब देशा हना “नेल्ल क्येडा डोंइती डा मुर, आदम, ब्रॉइब दुम्माक्त” दे ब्रेक्शो बाक्ब। नेल्ल क्येडा नोले डा आदम चहिं ब्रॉइतीक सोक्त गेब दुम्त। उत्पत्ती २:७; २कोरिन्थी ३:१७
- 46 तन्न परमप्रभु यावे आ सोक्तीम गेशो रां डोंइती डा ममाइ। डोंइती बेक्चा माल्शो रां बाक्ब। नोले ला सोक्तीम गेशो रां बाक्ब।
- 47 डोंइती डा मुर रागी डा खप के सेल्शो बाक्त। नोले डा मुर स्वर्ग रे बाक्ब।
- 48 डोंइती डा मुर खप के सेल्शो खोदेशो पा, खप के सेल्शो बाक्तेकम। डोंइती स्वर्ग रे जाक्शो मुर खोदेशो पा, स्वर्ग डा मुर बाक्नीम।
- 49 दोपा गो खप के सेल्शो मुर खोदेशो बाक्नया, मोपा गो स्वर्ग डा मुर खोदेशो यो दुम्नय। उत्पत्ती ५:३

### फाइक्चा पुंडसीनय दे शेंशो

- 50 आं लोकबपुकी, मुल हुश नु रुश पाइशो मुर परमप्रभु यावे आ राज्य ओवने मचाप्नीम। बेक्शा जाम्शा लाइब रां, गेना हना यो लीब रां दुम्ने मचापब।
- 51 मुल इन कली खुइशो लोत्र का शेनन्नी। गो का निक्शी बेक्शा लाइनय, का निक्शी ब्रॉइशा बाक्नय। गो बेक्शा लशो नु ब्रॉइशा बाक्शो नेल्ल फाइक्चा पुंडसीनय। १थिस्सलोनिकी ४:१५-१७
- 52 मेको छिन काम दुम्ब। याम काम दुम्ब। नोले डा नाक्त डा तुराही ताप्नी ना मेको दुम्ब। मारदे हना मेको तुराही नेसीब। बेक्शो मुर, मबेक्चा डा पा सेसीनीम। मिनु गो फाइक्चा पुंडसीनय। मत्ती २४:३१
- 53 मारदे हना मेको जाम्शा लाइब रां, मजाम्चा डा रां दुम्चा माल्ब। मेको बेक्शा लाइब रां, मबेक्चा डा रां दुम्चा माल्ब। २कोरिन्थी ५:४

54 मिनु जाम्शा लाइब रां, गेना हना यो लीब रां दुम्चा माल्ब। बेक्ब रां, गेनायो मबेक्चा डा रां दुम्चा माल्ब। मेना मेको ब्रेक्शो लोत्र थमा दुम्ब “ब्रोंडतीक सक्तिमी बेक्चा कली ग्रात।

55 ए बेक्चा, इ ग्रातीक ते लमे? ए बेक्चा, इ हिंपाइक्तीक ते लमे?” दे ब्रेक्शो बाक्ब। यसैया २५:८; होसे १३:१४

56 पाप पशोमी बेक्चा कली हिंपाइक्ब। परमप्रभु यावे आ अरेशो लोत्र तुइक्बमी पाप पशो यो तुइक्ब। मेको आ अरेशो आ सक्ति बाक्ब। रोमी ७:८; रोमी ११:१३

57 तन्न गो परमप्रभु यावे कली “गे रिम्शो पाइब बाक्नीनी” देंनय। मारदे हना मेकोमी इं प्रभु येसु ख्रीस्त आ पशोमी ग्राचा गेप्टु।

58 मोपतीके आं दाक्शो लोकबपुकी, इन खोइली थेक्शा, दल्गीर मपथु, प्रभु आ गेय पना पन बाक्कीन। प्रभु आ नेमी पशो गेय गेनायो मोशीन मलाइब, दे तुइक्तीन।

## 16

क्येट पोक्चा आ पबर्म लोत्र

1 क्येट पोक्चा आ पबर्म गलातीया रागी डा थमा सुइक्ब आन कली शेंशो इन कली यो शेंनन्नी। २कोरिन्थी ८:९; गलाती २:१०

2 हप्ता डा डोंडती नाक्ती गे नेल्लेमी आंम के बाक्शो रे हेंशा, गो ओशो गेने चाप्नुड, दे वोतीने। मो पाइतीनी हना, गो जाक्डानु, क्येट मबा दे खिं खिं हिरशा पुंइशा गाक्चा ममालनीनी। प्रेरित २०:७

3 मिनु आं जाक्ची ना मेको क्येट चोत्रदीचा कली सु सु कली सोइक्चा दाक्नीनी, मेको आन कली योत्रशा वोतीने। मिनु गो चिठी ब्रेक्शा, मेको क्येट नु चिठी इन योत्रशो मुर कली यरूसलेम चोत्रथ सोइक्नुड।

4 गो यो लचा माल्ताक्यी हना, मेको गो नु लाइनीमी।

पावल आ बाक्चा नु गाक्चा आ पबर्म

5 गो मासीडोनीया रागी लाक्शा, इन कली गुम्थ जाक्नुड। प्रेरित १९:२१

6 मिनु महिना का निक्शी हिउंद मलाक्गा सम्म गे नु बाक्नुडा कों? मिनु ते ते लाइनुडा, आं कली वारच पाइनीनी कों, दे मिम्शा बाक्ती।

7 मुल गुम्थ जाक्ती हना, काबु निक्बु ला बाक्चा ताइनुड। तन्न प्रभुमी गेपुकी नु शुश बाक्चा गेयील दे आस पा बाक्ती। प्रेरित २०:२

8 पेन्तीकोस नाक्त सम्म गो एफिसस सहरमी बाक्नुड। प्रेरित १९:१,१०

9 मारदे हना शुश मुर आन कली ख्रीस्त आ पबर्म शेंचा नु नेंपाइक्चा ताइनुडमी। आं शेंशो लोत्र मदाक्बपुकी यो शुश बाक्नीम। २कोरिन्थी २:१२; कलस्सी ४:३

10 तिमोथीमी एको चिठी कुरशा जाक्मेनु, मेको कली रिम्शो पतीने। आ लोत्र नेनीने। मारदे हना गो नु बाक्शा, आं यो प्रभु आ गेय पना पन बाक्ब। १कोरिन्थी ४:१७; फिलिप्पी २:१९-२२

11 सुइमी महिक्शो मुर खोदेशो मपने। मान पा रिम्शो पा लेशशा आं बाक्तीक सोइक्तीने। मारदे हना गो मेको नु लोकब आन कली रिम्शा बाक्नुड।

12 डोंडती इं लोकब आपोल्लोस कली लोकबपुकी नु गारशा “कोरिन्थी आन कली गुम्थ लावो” दे शुश लोत्र पाता। आ चहिं “मुल लचा थुं मपड” दे लने मबिस्से। आ गेय गारत हना, इन कली गुम्थ पीब। १कोरिन्थी १:३२

नोले डा लोत्र

13 होस पा बाक्कीने। पोक्च थेक्शा थमा सुइश्शा बाक्कीन। ठेयब थुं पा बाक्कीने। सक्ति पाइश्शो गेय पना पन बाक्कीन। एफिसी ६:१०

14 मार पाइतीनी हना यो, दाक्मुशा पने।

15 आं लोक्बपुकी, आकाया रागीम नेल्ल क्येडा डोंइती थमा सुइक्बपुकी स्तीफानस नु आ खिं डा मुर बाक्तेक्म दे तुइक्नीनी। मेकोपुकीमी थमा सुइक्ब आन कली वारच पा रिम्शो गेय पा शेना शेंन गाक्नीम। १कोरिन्थी १:१६

16 मेको आन पशो खोदेशो पा शेना शेंन गाक्ब नेल्ल आन कली मान पा आन लोत्र नेंशा दिने।

17 स्तीफानस, फोरटुनातस नु अकाइकस एक जाक्मानु, गो ग्येरसाक्यी। मेको आन कली ग्रुम्शा, इन कली ग्रुम्शो खोदेशो पा, आं थुं नाइक्ताक्ड।

18 मारदे हना मेकोपुकीमी ग्येरपाइक्तीमी, आं थुं बारपाइक्तीमी। गे नु बाक्मानु, इन कली यो ग्येरपाइशशा, इन थुं बारपदमे बाक्त दे तुइक्ताक्ड। मोदेशो मुर आन कली मान पतीने। १थिस्सलोनिकी ५:१२; फिलिप्पी २:२९

19 एसीयाम बाक्ब थमा सुइक्बपुकीमी इन कली “रिम्शो बाक्कीन” देंतेक्म। अक्वीला, प्रिस्कीला नु आस खिंमी ग्रुम्ब थमा सुइक्बपुकीमी प्रभु आ नेमी “रिम्शो बाक्कीन” देंतेक्म। प्रेरित १८:२; रोमी १६:३,६

20 लोक्ब नेल्लेमी इन कली “रिम्शो बाक्कीन” देंतेक्म। प्रभु आ नेमी मुम्मुशा आसीक गेमुने।

21 गो पावलमी “रिम्शो बाक्कीन” दे आंम गुइमी ब्रेक्ताक्ड। गलाती ६:११; कलस्सी ४:१८; २थिस्सलोनिकी ३:१७

22 प्रभु कली मदाक्बपुकी सराप रमल। इं प्रभु जाक्कीन। प्रकाश २२:२०

23 प्रभु येसुमी इन कली शिशी पा कोव्रडल।

24 ख्रीस्त येसु आ नेमी गो नेल्ल इन कली दाक्शा बाक्नुड। आमन।



## २ कोरिन्थी

**ब्रेकब मुर:** एको चिठी ब्रेकब आ नें चिठी आ डोंइती “पावल नड” दैत।

**गेना ब्रेकशो:** पावल मासीडोनीया रागीम बाकशा, ५७ ए. डी. नोले डा महिना मेर ब्रेकशो बाक्त।

**मार ब्रेकशो:**

१. पावल थमा सुडकब आन दातेमी रिम्शो दुम्त, दे शुश ग्येरसीशो लोत्र। २कोरिन्थी १:१२-२:४
२. थमा सुडकबपुकी हाइशो दुम्चा माल्नीम। २कोरिन्थी ८:१- ९:१५
३. पावल नु यहूदी आन पतीके। २कोरिन्थी १०:१-१२:१८

**डोंइती डा लोत्र**

1 परमप्रभु यावे आ दाकशो पा ख्रीस्त येसु आ सोइशो गो पावल नड। इं लोकब तिमोथी नु गोमी कोरिन्थ सहर डा परमप्रभु यावे कली थमा सुइशो युम्ब इन कली नु आकाया रागीम बाकब थमा सुडकब नेल्ल आन कली एको चिठी ब्रेकशा सोइक्ताक्स्कु। १कोरिन्थी १:१

2 इं आफ परमप्रभु यावे नु प्रभु येसु ख्रीस्तमी इन कली शिशी पा इन थुं नाइशशा बाकचा गेम्सेक्ल।

**परमप्रभु कली ठेयब सेल्शो**

3 इं प्रभु येसु ख्रीस्त आ आफ परमप्रभु यावे कली “गे रिम्शो पाइब ननी” दंशा ठेयब सेल्नीकी। मारदे हना मेको शिशी पाइब आफ, थुं नाइक्पाइक्ब नु थुं बारपाइक्ब परमप्रभु यावे बाक्ब, दे तुडक्नीकी। रोमी १५:५

4 गो शुश श्येत जकानु, परमप्रभु यावेमी आंइ थुं नाइक्पाइशशा बारपाइक्ब। मिनु आंइ थुं नाइसीशा, गोपुकीमी थुं श्येत जाइब आन कली आन थुं नाइक्पाइशशा, बारपाइक्बे चाप्नीकी।

5 ख्रीस्त आ नेंमी गिश श्येत जाइनीकी, मिश ख्रीस्त आ नेंमी थुं नाइक्पाइक्चा पुंइसीनीकी। भजन संग्रह ३४:२०; रोमी ८:१७; भजन संग्रह ९४:१९

6 आंइ श्येत जशोमी इन थुं नाइक्पाइक्ब। मिनु रिम्शो दुम्ब। गो आंइ थुं नाइक्पाइक्चा पुंइसीशोमी गे इन थुं नाइक्पाइक्चा पुंइसाक्नी। गे आंइ खोदेशो दुम्शा, श्येत फाल्शा बाक्तीनी हना, गे आंइ खोदेशो पा थुं नाइक्पाइक्चा पुंइसीनीनी। २कोरिन्थी ४:८-११, १५

7 आंइ जशो श्येत गे यो जाइनीनी। मिनु आंइ खोदेशो पा थुं नाइक्पाइक्चा पुंइसीनीनी। आंइ खोदेशो पा, थुं नाइक्पाइक्चा पुंइसीनीनी, दे तुइशशा, आस पचा मप्रॉइथु बाक्नीकी।

8 आंइ दाकशो लोकबपुकी, एसीया रागीमी बाक्कानु, शुश श्येत जाइतक। श्येत जचा आ पबर्म लोत्र मखुइक्थु, तुइक्पाइक्बन्नी। आंइ जशो श्येत मार बाक्ब दंशा हना, बेक्चा डा सम्म दुम्शो नकी। प्रेरित १९:२३-४०; १कोरिन्थी १५:३२

9 साइक्चा पुंइसीशो खोदेशो दुम्तक। मो दुम्तक हना यो “परमप्रभु यावेम बेक्शो मुर आन कली सेंब। मोपतीके मेको कली थमा सुडय्य। मेको क्येडा लाक्शा सुइमी इं कली प्रॉइने मचाप्नीम” दे मिम्शा बाक्तक।

10 मिनु परमप्रभु यावेमी मोदेशो बेक्चा डा दुम्शो रे प्रॉइतीकी। मिनु मुल नोले यो आंइ कली श्येत रे प्रॉइब, दे तुडक्नीकी।

11 मोपतीके परमप्रभु कली “श्येत रे प्रॉइयीकी” दे पुंइना पुंइन बाक्नीकी। मिनु गेपुकीमी यो “पावल नु आ वारच आन कली श्येत रे प्रोनीन” दे पुनीने। नोले आंइ कली श्येत रे प्रॉइशो तशा, शुश मुरुमी “गे रिम्शो पाइब ननी, आंइ पुंइशो गेतीकी, रिम्शो पाइतीनी” दे परमप्रभु कली ठेयब सेल्नीम, दे तुडक्नीकी। फिलिप्पी १:१९

**रिम्शो पाइतक, दे लोत्र थोक्शो**

12 गो आंइ नें बोरपा बाक्नीकी। मारदे हना परमप्रभु यावेमी सक्ति गेतीकी। मिनु मेको आन मुर दुम्शा, मुर नेल्ल आन कुल, इन कुल यो रिम्शो थुं रे पा गेय कोंइताक्क। आंम आंइ रागी डा जोक्तीक

तुइक्तीक रे ममाइ। तन्न परमप्रभु यावे आ शिशीम पतीके बाक्ब। २कोरिन्थी २:१७; हिब्रू १३:१८; १कोरिन्थी १:१७

13 मिनु गो इन कली नेल्ल रुप्चा डा नु पढेचा डा लोत्र ब्रेक्नीकी। मुल गे नेल्ल रुप्तीनी, दे गो आस पाडनुड।

14 गे दोपा आंड पबंम इन नें बोरपाइक्ने चाप्नीनी, मोपान इं प्रभु येसु आ नाक्ती जाक्मेनु, गोपुकीमी इन कली तशा, आंड नें बोरपाइक्ने चाप्नीकी। २कोरिन्थी ५:१२; फिलिप्पी २:१६

15 मारदे हना गो मेको नेल्ल तुइक्ताकड। गे शुश ग्येरसीशा बाक्कीन, दे डोंडती इन बाक्तीके जाक्चा मिम्ताकड।

16 गो मासीडोनीया लडानु, इन कली गुम्नुड। मिनु मासीडोनीया रे लेडडानु, इन बाक्तीके जाक्नुड। मिनु गोपुकीमी आं कली यहूदीया रागी सम्म चोक्नीनी, दे आस पाता। १कोरिन्थी १६:५-६

17 मोदेशो आस पा, मरिम्शो पडा डा? मार, मोदेशो मिम्शा, रागी डा मुर खोदेशो पडा डा? मार मेको आन खोदेशो काइले ना दुम्बा, काइले ना मदुम्बा देंन डा?

18 परमप्रभु यावेमी आ देशो खाप्ब, दे नेल्लेम तुइक्नीम। गोपुकीमी इन कली देशो लोत्र थमान बाक्ब। दुम्बा कों, मदुम्बा कों, मार तुइक्चा देशो लोत्र दुम्सीन मदुम्बा।

19 सिल्वानस, तिमोथी नु गो सांफामी इन कली परमप्रभु यावेमी आ तौ येसु ख्रीस्त आ लोत्र नेंपाइक्तक। मेको लोत्र थमा दुम्बा कों मदुम्बा, मार तुइक्चा देशो लोत्र ममाइ। येसु ख्रीस्त थमा बाक्ब। प्रेरित १८:५

20 परमप्रभु यावे आ गेशो लोत्र नेल्ल येसु ख्रीस्तमी खाप्नु। मोपतीके गो मेको आ नेंमी आमन देंनीकी। मिनु परमप्रभु यावे कली “ठेयब बाक्नीनी” दे ठेयब सेल्नीकी। प्रकाश ३:१४

21 परमप्रभु यावेमी आंड कली नु इन कली ख्रीस्तमी काथा वोइश्शा, आ मुर दुम्पाइक्तु, आ गेय पाइब सेल्लु। १यूहन्ना २:२७

22 मेकोमी इं कली छाप थोक्ताक्व। मिनु आ सोक्त इं थुमी वोइक्तु। मेको सोक्त बैना खोदेशो पा गेप्तु। एफिसी १:१३; २कोरिन्थी ५:५; रोमी ८:१६

23 परमप्रभु यावे कली सांक्छी वोइश्शा, इन कली थमा पा देंनुड, गो इन कली हुइक्चा कली कोरिन्थ मजाकड।

24 गो इन थमा सुइक्तीके कली हुकुम मपाइनीकी। इन ग्येरसीचा डा पा, गे नु गेय पाइनीकी। मारदे हना इन थमा सुइक्तीके बोल्यो बाक्ब। २कोरिन्थी ४:५; १पत्रुस ५:३

## 2

1 गो इन कली लेशा श्येत गेचा कली कोरिन्थ मपीनुड, दे मिम्ताकड।

2 मारदे हना गो इन कली श्येत गेता हना, आं श्येत गेशो मुर आन क्येडा लाक्शा, सुमी आं कली ग्येरपाइक्ने चाप्बा डा?

3 गो डोंडती मार मिम्शा ब्रेक्ताकड देशा हना, गो जाक्डानु, सु मुरपुकीमी आं कली ग्येरपाइक्चा माल्नीमी, मेको रे पा आं थुं मखाइक्ल, दे ब्रेक्ताकड। मारदे हना गो ग्येरसीडानु, गे नेल्ल ग्येरसीनीनी, दे थमा सुइक्नुड।

4 एको चिठी ब्रेक्तनु, आं थुं खाइश्शा “दोपा अर्ती गेडमी? हुइश्शा रिम्शो दुम्नीमी कों? दोपा रिम्शो दुम्नीमी?” दे इन कली शुश मिम्शा, डाक्थ्री दुम्ती। इन थुं खाइक्पाइक्चा कली ममाइ, इन कली दाक्तीके मोदेशो दुम्त, दे मिम्तीन।

माफ पुंडब आन कली माफ गेचा

5 इन वारच कामी इन थुं खाइक्पदा बाक्त, दे रुप्ता। आं थुं खाइक्पाइश्शो क्येडा नेल्ल इन थुं खाइक्पाइक्तु।

6 मेको कली गे नेल्ल इन मिम्शा गेशो सजाइ ठीक बाक्ब।

7 मुल डा मेरे माफ गेने। आ थुं नाइक्पाइश्शा बारपतीन। मोदेशो मपाइतीनी हना, आ मरिम्शो पशो मिम्शा, आ कांडचीक बाक्शा, बेक्शो खोदेशो दुम्ब।

8 मोपतीके मेको कली ब्रशा, दाक्तीन, दे इन कली पुंडनुड।

9 गे टीनीनी देय मटीनीनी, दे गो इन कली डोंइती डा चिठी सोइश्शो नड।

10 गेपुकीमी सु सु आन कली माफ गेनी, गो यो मेको आन कली माफ गेता। माफ गेडानु, इन पर्बम ख्रीस्त आ डोंइती गेता। यूहन्ना २०:२३

11 सैतानमी इं कली खतम सेल्चा मतवल। मारदे हना मेको आ मिम्शो गो नेल्ल तुडक्नय। लूका २२:३१; १पत्रुस ५:८

**ख्रीस्त आ लोव्रमी ग्राना ग्रान लशो**

12 गो त्रोआस सहरमी ख्रीस्त आ ग्येरपाइक्तीक लोव्र शेंथ जाक्डानु, प्रभुमी आं कली नक लाप्चो का रोक्शा गेती। प्रेरित १४:२७; १कोरिन्थी १६:९

13 तन्न आं दाक्शो लोकब तीतस कली मयुम्थु, आं थुं मनाइक्स। मोपतीके मेको आन कली प्रोंइशा, मासीडोनीया लती। २कोरिन्थी ७:६; प्रेरित २०:१

14 तन्न परमप्रभु यावे कली “गे रिम्शो पाइब बाक्ननी” दे ठेयब सेल्नीकी। मारदे हना ख्रीस्त आ नेमी ग्राना ग्रान लाइनीकी। मोपा शेना शेंन हिरशा गाक्कानु, ब्रोव्रशो रिना पाइश्शो खोदेशो पा नेल्लेमी ख्रीस्त कली तुडक्नीमी।

15 मारदे हना गो पाप रे ब्रोंइशा बाक्ब नु जाम्शा लाइब आन दातेमी गो परमप्रभु यावे आ डोंइती ख्रीस्त आ ब्रोव्रशो नाम्सीशो बाक्नीकी। १कोरिन्थी १:१८

16 गो जाम्शा लाइब आन कली बेक्चा डा रिना नु पाप रे ब्रोंइशा बाक्ब आन कली ब्रोंइचा डा रिना बाक्नीकी। मोदेशो लोव्र शेंचा कली सुम जिम्मा ब्रने चाप्नीमी? लूका २:३४; २कोरिन्थी ३:५

17 तन्न गो परमप्रभु यावे आ लोव्र ग्याप्ब लेयब खोदेशो पा मलेयनीकी। गो ठीक पाइब मुर बाक्नीकी। गो परमप्रभु यावे आ सोइश्शो, परमप्रभु यावे आ डोंइती ख्रीस्त आ नेमी शेंनीकी। २कोरिन्थी १:१२; २कोरिन्थी ४:२; १पत्रुस ४:११

### 3

**नक कबल डा गेय**

1 गो मेकोपुकीमी लोव्र पशो खोदेब पा ठेयब सेल्सीनीकी डा? मेकोपुकीमी सिफारीस कागज गुंडनीमी। मिनु गोपुकी यो मोदेशो कागज कुरशा, शेंना शेंन गाक्चा माल्नीकी डा? २कोरिन्थी ५:१२

2 मोदेशो आंड कागज चहिं गेपुकी दुम्तीनी। गे आंड थुंमी ब्रेक्शो बाक्नीनी। मिनु मुर नेल्लेमी इन पर्बम तुडक्ने चाप्नीम। १कोरिन्थी ९:२

3 गे ख्रीस्तमी ब्रेक्शो चिठी दुम्तीनी। कागज मसीमी ब्रेक्शो ममाइ। फुल्लु मुशा ब्रेक्शो यो ममाइ। ब्रोंइचा गेब परमप्रभु यावे आ सोक्तीमी इन थुंमी ब्रेक्शो बाक्ब। प्रस्थान २४:१२

4 ख्रीस्त आ नेमी परमप्रभु यावे कली थमा सुइक्नीकी।

5 गो शेंदकानु, आंम जोक्तीक तुइक्तीक मकोइनीकी। आंड लोव्र शेंतीके परमप्रभु यावेमी पपाइश्शो बाक्ब, दे तुइक्नीकी। २कोरिन्थी २:१६

6 मेकोमी आंड कली जोक्ब तुइक्ब सेल्शा, आ नक कबल डा लोव्र शेंथ सोइक्ताक्की। ब्रेक्शा ममाइ, तन्न आ सोक्तीमी गेप्टु। ब्रेक्शोमी साइक्ब, तन्न आ सोक्तीमी ब्रोंइचा गेब। येरमीया ३१:३१; १कोरिन्थी ११:२५; रोमी ७:६; यूहन्ना ६:६३

**नक कबल ठेयब बाक्ब**

7 बेक्तीक चाक्ब कबल फुल्लुमी मुशा, ब्रेक्शो बाक्माक्त। मेको आ छेडछेड थम ठेयब बाक्त। मेकोम पतीके इसाएलीपुकीम मोसा आ कुल कोव्रने मचाबेम। तन्न नोले मेको छेडछेड ग्युम्ना ग्युम्न लत। प्रस्थान ३४:२९-३५

8 परमप्रभु यावे आ सोक्त आ कबल मेको क्येडा छेडछेड मदुम्बा डा? गलाती ३:२,५

9 मारदे हना बेक्तीक कबल छेडछेड बाक्त हना, ठीक पतीके आ कबल मेको क्येडा शुश छेडछेड दुम्चा माल्ब। रोमी १:१७; रोमी ३:२१

10 मेको डोंइती छेडछेड पाइशो बाक्त। मुल आ छेडछेड नेल्ल जाम्शा लत। मारदे हना मुल मेको क्येडा शुश छेडछेड पाइशो जाक्त।

11 डोंइती डा जाम्शा लाइब कबल छेडछेड पाइशो बाक्ब। मुल लीशो कबल आ छेडछेड गिश ठेयब बाक्म माइ?

12 मोदेशो आस पतीके गो काइ महिब दुम्शो बाक्नीकी।

13 साइ मोसामी पशो खोदेशो मपाइनीकी। मोसामी इस्राएलीपुकीमी आ कुल डा छेडछेड ग्युम्ना ग्युम्न लशो मतामेक्ल, दे आ कुल वामी गिल्से बाक्त।

14 मोसामी इस्राएली आन कली परमप्रभु यावे आ देशो लोत्र शेंदीमी बाक्त। मेकोपुकी चहिं मारेड मरुब्ब दुम्मा बाक्त। मुल यो मरुब्ब बाक्नीम। साइ डा लोत्र नैपदमेनु, मेको आन थुं वाम गिल्शो खोदेब दुम्शा, लोत्र मरुप्नीम। ख्रीस्तमी ला मेको आन थुंमी गिल्शो वा प्राक्शा रुब्ब सेल्ने चाप्ब। प्रेरित २८:२७; रोमी ११:२५

15 मुल यो मोसाम ब्रेक्शो लोत्र नेन्मेनु, आन थुं गिल्सीशो बाक्ब।

16 तन्न सुमी आ थुं प्रभु गे हिरबा, मेको आ थुंमी गिल्शो वा हुक्सीशा, रुब्ब दुम्ब। रोमी ११:२३, २६; प्रस्थान ३४:३४

17 मारदे हना प्रभु सोक्त बाक्ब। प्रभु आ सोक्ती ते बाक्बा, मेकेर पाप आ सजाइ रे ब्रोंइतीके बाक्ब।

18 गो नेल्ल इं थुं गिल्शो वा हुक्शा, प्रभु आ छेडछेड कोंइशा, प्रभु आ छेडछेड पाइशो खोदेशो दुम्शा फाइक्चा पुंडसाक्य। मेको फाइक्तीके बारना बारन लशा, इं कली छेडछेड कारे अर्को छेडछेडम फाइक्ब। मेको नेल्ल प्रभु रे जाक्ब। मेको सोक्त बाक्ब। २कोरिन्थी ४:६

## 4

### ख्रीस्त आ वाइल दुम्शा, शेंशा गाक्शो

1 गोपुकी नु परमप्रभु यावे आ शिशी बाक्तीके मेको शेंब दुम्तक। मोपतीके गेनायो आइक्च थुं पाइशो मदुम्नीकी। २कोरिन्थी ३:६; १कोरिन्थी ७:२५

2 गोपुकीमी मुने दोक्तीक खुइशशा पतीक गेय प्रोंइशो बाक्नीक। मरिम्शो पा परमप्रभु यावे आ लोत्र फाइक्चा रे डोन बाक्नीकी। तन्न परमप्रभु यावे आ लोत्र तुइक्पाइक्तीकेमी मुर नेल्ल नु परमप्रभु यावे आ डोंइती ब्रचा डा बाक्नीकी। २कोरिन्थी २:१७; १थिस्सलोनिकी २:५

3 आइ शेंशो ग्येरपाइक्तीक लोत्र वाम गिल्सीशो बाक्त हना यो, जाम्शा लाइब मुर कली ला मोपा गिल्सीशो बाक्ब। १कोरिन्थी १:१८

4 मेको आन थुं दोपा मोदेशो दुम्त देशा हना, रागी कली हुकुम पाइब सैतानमी मेको आन कली मिक्च मताइब खोदेशो पा मरुब्ब सेल्शो बाक्त। मोपा ख्रीस्त आ ग्येरपाइक्ब लोत्र आ छेडछेड तने मचाप्नीम। ख्रीस्त परमप्रभु यावे आ कोंइतीके बाक्ब। हिब्रू १:३

5 गो आंम परबंम शेंनीकी। तन्न येसु ख्रीस्त प्रभु बाक्ब, दे शेंनीकी। मिनु येसु आ पतीके गो इन गेय पाइब दुम्तक।

6 परमप्रभु यावेमी “छिडछिड जाम्शा, छेडछेड दुम्ल” देमाक्त। मेकोमी आइ थुंमी छेडछेड ब्रपाइशो बाक्त। गो परमप्रभु यावे आ छेडछेड ख्रीस्त रे पा रुप्नीकी। उत्पत्ती १:३; २कोरिन्थी ३:१८

### खप के गरम शोंप कुरशो

7 मेको ठेयब सक्ति परमप्रभु यावे के बाक्ब, दे कोंइचा कली मेको छेडछेड खप के गर गो आंइ रां आगाम बाक्ब। १कोरिन्थी ४:११-१३; २कोरिन्थी ११:२३-२७

8 गो शुश श्येत जाइतक हना यो, खतम मदुम्क। मारेड पने मचाप्ब दुम्तक हना यो, आइक्च थुं पाइशो मदुम्क।

- 9 गो खेदा पचा पुंडसाक्क हना यो, आंड कली कोव्वब बाक्क। खोल्ला पुंडसाक्क हना यो, मनुप्क।
- 10 येसु आ लोव्व शेना शेन गाक्कानु, येसु बेक्का डा श्येत जशो खोदेशो पा, गो यो बेक्का डा श्येत जाइनीकी। तन्न येसु बेक्को रे सेंचा पुंडसीशो खोदेशो पा, सक्ति पाइशो दुम्नीकी। १कोरिन्थी १५:३१; गलाती ६:१७
- 11 ब्रोंडतक हना यो, येसु आ पर्वम बेक्का डा बाक्नीकी। मोपा आंड बेक्का डा रांमी येसु आ ब्रोंडतीक सक्ति बाक्क। रोमी ८:३६; फिलिप्पी ३:२१
- 12 आंड रांमी बेक्का डा श्येत जशा, इन कली ख्रीस्त आ लोव्व शेंताक्क। आंड गेय रे पा गे ब्रोंडचा ताइतीनी।
- 13 साइ डा लोव्व बेक्क कामी “गो थमा सुइक्नुड। मोपतीके आं थमा सुइशो नेंपाइक्नुडमी” दे बेक्को बाक्क। मोदेशो बेक्क थमा सुइक्तीक सोक्त का दुम्शा, गो यो थमा सुइक्नीकी। मिनु आंड थमा सुइशो मुर आन कली नेंपाइक्नीकी। भजन संग्रह ११६:१०
- 14 मार लोव्व थमा सुइशो, नेंपाइक्नीकी देशा हना “प्रभु येसु कली बेक्को रे सेंबमी आंड कली यो येसु नु सेंब” दे लोव्व बाक्क। मिनु मेकोमी गे, गो नेल्ल इं कली आ डोंडती बाक्का गेब। १कोरिन्थी ६:१४
- 15 मारदे हना मेको नेल्ल इन पर्वम बाक्क। परमप्रभु यावे आ शिशी शुश मुरुम नेंतेक्म हना, मेको क्येडा शुश मुरुम मेको कली ठेयब सेल्नीम। २कोरिन्थी १:६,११
- 16 ठेयब थुं पा शेना शेन गाक्नीकी। आंड रां बेक्कशो तांइसाक्क हना यो, आंड थुं चहिं बारना बारन लशो बाक्क। एफिसी ३:१६
- 17 मारदे हना मुल जशो श्येत इच्छा ला बाक्क। नोले मेकोमी इं कली मरुप्चा डा ठेयब छेडछेडमी बाक्का गेब। रोमी ८:१७-१८; १पत्रुस १:६
- 18 मारदे हना गो मिक्चीमी तशो थोव्वक ममाइ। तन्न मिक्चीम मतशो थोव्वक ला कोव्वनीकी। तशो थोव्वक जाम्शा लाइनीम। मतशो थोव्वक चहिं मजाम्थु, गेना हना यो लीनीम। हिब्रू ११:१

## 5

### प्रभु नु काथा बाक्का दाक्को

- 1 इं रां, रागी डा ताम्बु खोदेशो बाक्क। मेको जाम्शा लाइब बाक्क। मेको जाम्शा लत हना यो, परमप्रभु यावेमी इं कली नक बाक्तीके गेब। मेको खिं गुडम सेल्शो मबाक्क। मेको गेना हना यो लीब स्वर्ग डा खिं बाक्क। २पत्रुस १:१४
- 2 गो एकेर बाक्शा, रोंका पाइनीकी, आंड स्वर्ग डा खिंम बाक्का दाक्नीकी।
- 3 मेको नक बाक्तीके ओव्वचा चहिं माइत वा पुइशो, नक वा फेक्को खोदेशो बाक्क। मोपा शिश्ना मदुम्नीकी।
- 4 मुल सम्म रागी डा रांम बाक्नीकी, सुर्ता पना पन बाक्नीकी। शिश्ना दुम्चा कली ममाइ। तन्न नक फेक्को खोदेशो पा, आंड जाम्शा लाइब रां गेना हना यो ब्रोंडशा बाक्क स्वर्ग डा रां दुम्ल। १कोरिन्थी १५:५१-५३
- 5 मोदेशो दुम्चा कली परमप्रभु यावेमी आंड कली ठीक पा वोइशो बाक्क। मेकोमी आंड कली आ सोक्त बैना खोदेशो पा गेप्तु। २कोरिन्थी १:२२; रोमी ८:१६,२३; एफिसी १:१३-१४
- 6 मोदेशो दुम्मेनु, ठेयब थुं पाइशो दुम्शा बाक्कनय। रांमी बाक्क्यानु, प्रभु रे डोन बाक्नीकी। हिब्रू ११:१३
- 7 मारदे हना गो थमा सुइक्तीकेमी गाक्नीकी। ततीकेमी मगाक्नीकी।
- 8 गो ठेयब थुं पाइशो बाक्नीकी। गो रां रे डोन दुम्शा, प्रभु नु बाक्का दाक्नीकी। फिलिप्पी १:२३
- 9 मोपतीके गो रांम बाक्शा हना यो, मबाक्शा हना यो, प्रभु कली ग्येरपाइक्का दाक्नीकी।
- 10 मारदे हना गो नेल्ल ख्रीस्त आ डोंडती निसाफ पची ना जाक्का माल्नीकी। रांम बाक्क्यानु, इं रांम पशो रिम्शो नु मरिम्शो नेल्ल ताइनीकी। प्रेरित १७:३१; रोमी २:१६; रोमी १४:१०; यूहन्ना ५:२९; एफिसी ६:८

पाप रे प्रोंडब कली ग्येरपाइय्य

11 गोपुकी प्रभु कली मान पा हिंशा तुइक्तीके गो मुर आन कली शेंनीकी। परमप्रभु यावेमी आंइ पशो नेल्ल तुइक्ब। मिनु गे यो तुइक्नीनी, दे आस पाइनीकी।

12 गो आंइ कली इन डोंइती ठेयब मसेल्सीनीकी। तन्न आंइ पबंम बोरशा, आंम आन कली ठेयब सेल्सीबपुकीमी शोव्रमी ला गेय पाइनीम। थुमी मारेइ ममिन्मीम। मोदेशो मुर आन कली लोव लेत्वा कली आंइ देशो लोव्र तुइक्ब दुमीने। २कोरिन्थी ३:१; २कोरिन्थी १०:१२

13 गो मरुप्चा डा बाक्तक हना, गो परमप्रभु यावे कली ठेयब सेल्वा कली मोदेशो दुम्तक। गो रुप्चा डा बाक्तक हना, मेको इन कली दुम्ब।

14 मारदे हना ख्रीस्तमी इं कली दाक्ब, दे शुश मिन्मीकी। मेको नेल्ल मुर आन पबंम बेक्त, दे तुइश्शा, गो नेल्ल बेक्चा डा मुर बाक्नय, दे तुइक्नीकी।

15 मिनु मेको नेल्ल आन पबंम बेक्त। मिनु ब्रोंइशोपुकी मुल रे आंम पबंम मब्रोंडमल। तन्न येसु कली ब्रोंडमल। मारदे हना मेको आन पबंम साइश्शा, सेंसीचा पुंडसाक्ब। रोमी १४:७-८

16 गो मुल रे मुर नेल्ल आन कली रागी डा मुर खोदेशो पा मकोव्रनीकी। खेयप का गो ख्रीस्त कली मुर खोदेशो पा कोव्रतक। मुल मोदेशो ममिन्मीकी।

17 सुइ ख्रीस्त आगाम बाक्त हना, मेको नक सेल्सीशो मुर का दुम्ब। डोंइती डा नेल्ल जाम्शा लत। नेल्ल नक दुम्ने नुप्त। रोमी ८:१०; गलाती २:२०; गलाती ६:१५; प्रकाश २१:५

18 मेको नेल्ल परमप्रभु यावेम पशो बाक्ब। परमप्रभु यावेमी आंइ कली ख्रीस्त रे पा आं नु गारपाइक्तु। मिनु आंइ कली मेको गारपाइक्तीक गेय पपाइक्तु। रोमी ५:१०

19 परमप्रभु यावेमी ख्रीस्त रे पा मुर आन कली आ नु गारपाइक्तु। मेको आन मरिम्शो पशो नेल्ल प्रेंशा, गारपाइक्तीक गेय आंइ कली गेप्तु। रोमी ३:२४-२५; कलस्सी १:१९-२०

20 मिनु गो ख्रीस्त आ पबंम मुर आन कली गेय पाइब बाक्नीकी। परमप्रभु यावेमी आंइ पतीकेमी मुर आन कली ब्रेप्ब। गोपुकी ख्रीस्त आ पबंम मुर नेल्ल आन कली “परमप्रभु यावे नु गारब दुमीने” दे शेंनीकी। लूका १०:१६

21 परमप्रभु यावेमी काइ पाप मतुइश्शो ख्रीस्त कली पापी सेल्लु। मिनु गो ख्रीस्त आगाम बाक्शा, परमप्रभु यावे आ डोंइती ठीक दुम्नीकी। यूहन्ना ८:४६; यसैया ५३:४-६; गलाती ३:१२; रोमी १:१७; १कोरिन्थी १:३०

## 6

पावल आ पशो गेय

1 गो परमप्रभु यावे नु गेय पतीके इन कली “परमप्रभु यावे आ शिशी तशा, मप्रेंदीन” देंनीकी। २कोरिन्थी १:२४

2 मारदे हना मेकोमी “शिशी पची ना इ पुंडशो नेंता। गो पाप रे प्रोंइतीक नाक्तीमी इ कली वारच पाता” दे ब्रेक्शो बाक्ब। नेनीने, मुल शिशी पची ना बाक्ब। नेनीन मुल पाप रे प्रोंइतीक नाक्त बाक्ब। यसैया ४९:८; लूका ४:१९, २१

3 प्रभुमी पपाइश्शो गेयम मारेइ दूली मपाइनीकी। सुइ आन थुं मक्याल्नीकी।

4 तन्न परमप्रभु यावे आ गेय पाइब दुम्शा, आंइ गेय नेल्ल रिम्शो पाइनीकी। गो शुश फाल्नीकी, खेदा पतीकेमी, श्येत जतीकेमी, हिंतीकेमी,

5 तुप्चा पुंडसीनीकी, चोक्चा पुंडसीनीकी, आं पबंम हुल बोक्चा पुंडसीनीकी। बेक्चा डा गेय पा दशा, इप्चा मतथु बाक्नीकी। माइजा बाक्नीकी, २कोरिन्थी ११:२३-२७; १कोरिन्थी ४:११-१३

6 रिम्शो थुं कोइनीकी, जोक्शो तुइश्शो गेय कोइनीकी, मचबु देब मदुम्नीकी, शिशी कोइनीकी, परमप्रभु यावे आ सोक्तीम देशो टीनीकी, मुर आन कली दाक्नीकी। १तिमोथी ४:१२; २कोरिन्थी ४:२; १कोरिन्थी २:४; एफिसी ६:१४-१७

7 थमा लोत्र पाइनीकी, परमप्रभु यावे आ सक्तिमी गेय कोइनीकी, ग्युरा नु पेरा निम्फा रे ठीक पतीके पाइशो बाक्नीकी।

8 आंड नें चुइक्ताक्म हना यो, क्याम्ताक्म हना यो, आंड कली मान पाम्तेक्म हना यो, ग्रांघ्रा दिम्तेक्म हना यो, मेको आन पशो मारेइ मसुइक्नीकी। मुरपुकीमी आंड परबम “जोल पा शेंशा, मुर आन थुं क्याल्शा हेंथे शेंनीम” देतेक्म हना यो, गो थमा लोत्र शेंनीकी।

9 आंड कली मतुइक्नीमी, तन्न तुइशो बाक्नीमी। बेक्चा चिक्शो, तन्न मबेक्शो बाक्नीकी। सजाइ तशो, तन्न साइक्चा मपुंसीशो बाक्नीकी। २कोरिन्थी ४:१०-११; भजन संग्रह ११८:८; प्रेरित १४:१९

10 सुर्ता पशो, तन्न गेना हना यो ग्येरसीशो बाक्नीकी। प्रुडग दुम्शो, तन्न शुश आन कली शोप सेल्नीकी। मारेइ मथीब दुम्शो, तन्न मारेइ मारेइमी गाप्शो बाक्नीकी। फिलिप्पी ४:१२-१३

**प्रभु आ मुर दुम्शो कोइदीने**

11 गो कोरिन्थी इन कली शेंचा, शुश दाक्नीकी।

12 गोपुकीमी इन कली दाक्चा मतेक्नीकी। तन्न इन आंम थुंम आंड कली दाक्चा तेक्ब।

13 मेको आ पा डा, गो आल आन कली लोत्र पशो खोदेशो पा, इन कली लोत्र पाइनुड। इन थुं आंड गे हिरदीन। १कोरिन्थी ४:१४

14 नेनीन, थमा मसुइक्ब आन कली इन थुं मगेने। मारदे हना ठीक पतीके नु परमप्रभु यावे कली मटितीके दोपा गारनीस? छेडछेड नु छिडछिड दोपा गारनीसी? एफिसी ५:११

15 खीस्त नु सैतान बेलीआर दोपा उइक्थ उइक्थ दुम्ने मचाप्नीसी। थमा सुइक्ब नु मसुइक्ब मारम गारनीसी डा?

16 परमप्रभु यावे आ खिं नु मूर्ति दोपा गारनीसी डा? मारदे हना गो गेना हना यो ब्रोंइशा बाक्ब परमप्रभु यावे आ खिं बाक्नीकी। मिनु परमप्रभु यावेमी “आं मुर आगाम बाक्नुड। मेको आन दातेम गाक्नुड। मेको आन परमप्रभु यावे दुम्नुड। मिनु मेकोपुकी आं मुर दुम्नीम” देशो बाक्त। लेवी २६:११-१२; इजीकीएल ३७:२७; १कोरिन्थी ३:१६

17 मोपतीके प्रभुमी “मेको आन दाते रे गूशा, पिने। मेको आन दाते रे ब्राडीने। ग्रांघ्रा दिशो मारेइ मथिने। मिनु गो इन कली ब्राइनुड। प्रकाश १८:४

18 मिनु गो इन आफ दुम्नुड। मिनु गेपुकी आं तमी तौ दुम्नीनी” दे नेल्ल सक्ति पाइशो परमप्रभु यावेमी दैत, दे ब्रेक्शो बाक्ब। यसैया ५२:११; इजीकीएल २०:४१; २सामुएल ७:१४; यसैया ४३:६; होसे २:१

## 7

**पावल ग्येरसीशो**

1 आं दाक्शोपुकी, गो नेल्लेमी परमप्रभु यावे आ गेशो लोत्र तुइशो बाक्नय। मोपतीके इं रां थुं नेल्ल मरिम्शो पतीक रे डोन बाक्नय। मिनु इं परमप्रभु यावे कली ला मान पा हिंशा ठेयब सेल्नय।

2 इन थुं आंड गे हिरदीन। मारदे हना गो सुइ इन कली मरिम्शो मपक। सुइ आन कली मरिम्शो मसेल्क। सुइ रे पा मारेइ यो मताक्क। २कोरिन्थी १२:१७; प्रेरित २०:३२

3 मेको इन कली दोस गेचा कली मदेक। मारदे हना डोंइती देशो आं लोत्र लेंशा देनुड, इन कली दाक्नीकी। बेक्चा माल्तय हना यो, काथा बेक्कय। ब्रोंइचा ताइतय हना यो, काथा ब्रोंइय। २कोरिन्थी ६:११-१३; रोमी ६:८

4 मिनु इन कली तशा, ग्येरसीशा, आं थुं बोरनुड। आं थुं नाइक्सीशा बारना बारन लत। श्येत जाता हना यो, इन कली तशा गो ग्येरस डा ग्येरस बाक्ती।

**कोरिन्थी आन कली मिम्शा ग्येरशो**

5 गो मासीडोनीया रागीम शेंना शेंन गाक्कानु, शुश श्येत जाइतक। मुरपुकीमी गडड मडड पा खेदा पा श्येत गेतीकी। मिनु शुश हिंचा माल्तक। प्रेरित २०:१-२; २कोरिन्थी ४:८

6 तन्न परमप्रभु यावेमी आइक्च थुं पाइइशो आन कली आन थुं बारपाइक्व। मिनु तीतस जाक्शा आंइ थुं बारपाइक्वतु। मिनु आंइ थुं बारत। २कोरिन्थी २:१३

7 तीतस कली तशा ला ममाइ, तीतस आ लोत्र नेंशा, ठेयब थुं पाइइशो दुम्तक। तीतसमी आंइ कली “कोरिन्थीपुकीमी थम रिम्शो पाइक्तीमी। आं कली शुश मान पशा कोंइताय्यीमी। आं थुं बारपाइक्तीमी” देंत। आ देंशो नेंशा गो थाम्पा ग्येरसाक्यी।

8 डोंइती डा चिठीमी इन थुं खाइक्पाइक्तन्नी, दे तुइक्ताक्व। मो हना यो मुल आं थुं मखाइक्व। मारदे हना मेको इन थुं खाइइशो शुश नाक्त मली, दे यो तुइक्ताक्व। २कोरिन्थी २:४

9 इन थुं खाइइशो तुइइशा, गो मग्येरसीड। आं ब्रेक्शो टिशा, इन थुं लेत्ताकनी। गेपुकीमी “परमप्रभु यावेमी इं कली लां कोंइचा नु रिम्शो सेल्चा कली थुं खाइक्पाइक्की बाक्त” दे रुप्तीनी। मोपतीके गो इन थुं लेइशो तशा ग्येरसाक्यी।

10 परमप्रभु यावेमी थुं खाइक्पाइइशो आन कली रिम्शो दुम्मल, दे मो पशो बाक्व। रागी डा थुं खाइक्पाइक्मशोमी चहिं थुं साइक्व। मती २६:७५; लूका १५:१७-२४; मती २७:३-५

11 परमप्रभु यावेमी इन थुं खाइक्पाइइशोमी मार दुम्मे, दे तुइक्तीने। गे रिम्शो दुम्चा कली शुश गेय पाइतीनी। गे सल्ला पा, जिशा, हिंशा, रिम्शो दुम्चा कली शुश बोल पा दोस मताइब दुम्चा कली गे मेको मुर कली सजाइ गेतीनी। मोपा गे दोस मताइब बाकनीनी, दे कोंइताकनी।

12 मुल देंचा लीशो लोत्र नेनीने, इन कली डोंइती ब्रेक्शो चिठी मारदे ब्रेक्ताक्व देंशा हना, गेपुकी नु बाक्व मरिम्शो पाइब नु मरिम्शो पचा पुंइसीब आस कली गारपाइक्वा लोत्र ला ममाइ। परमप्रभु यावेमी पावल कली अधिकार गेशो बाक्व। मोपतीके आ देंशो टिचा माल्ब, दे रुप्शा, गेय कोंइदीने, दे ब्रेक्ताक्व।

13 मोपतीके गो इन कली आं देंशो टिशो तशा, ग्येरसाक्क। मिनु आंइ थुं नाइक्ताक्क। गेपुकीमी तीतस कली आ थुं नाइक्पाइक्तीनी। आ थुं नाइइशो तशा शुश ग्येरसाक्क।

14 मोदेंशो पा तीतस कली यो “कोरिन्थीपुकीमी आं लोत्र टीनीमी, रिम्शो पाइनीम” दे थमा लोत्र पशो नड। मुल तीतसमी इन कली आं लोत्र टिशो तशा, थमा बाक्माक्त, दे तुइक्ताक्व। मोपा आं कली मुने मतोकनी। मोपतीके आं नें बोरपा बाक्ती।

15 तीतसमी इन टिशो तशा, ग्येरसाक्क। गे हिंशा, खिंखि पा मेको कली ब्राइतीनी। मिनु इन कली शुश दाक्ताक्व।

16 गो इन रिम्शो पशो तशा ग्येरसाक्यी। मिनु इन कली थमा सुइक्ता।

## 8

### क्येट पोक्शो

1 आं लोक्वपुकी, परमप्रभु यावेमी मासीडोनीया रागीमी बाक्व थमा सुइक्व आन कली शिशी पशो आ पर्वम इन कली शेंनीकी। रोमी १५:२६

2 मेकोपुकी शुश रयेत जाम्तेक्म हना यो, ग्येरसीशो बाकनीम। पुडग बाक्तेक्म हना यो, अरु आन कली योक्शा गेम्तेक्म।

3 सुइमी गेन की गेन मदेंथु, आंमा आन दाक्शो पा आन चाप्शो क्येडा यो शुश गेम्तेक्म। आन चाप्शो क्येडा शुश गेशो आं मिक्चीमीन ताता।

4 मेकोपुकीमी आं कली “गो यो थमा सुइक्व आन कली क्येट पोक्वा दाक्नीकी” दे पुंइतेक्म। प्रेरित ११:२९

5 मेको आन मोदेंशो चहिं क्येट गेचा लोत्र ला ममाइ। डोंइती मेकोपुकीमी आन थुं प्रभु कली गेम्तेक्म। मिनु परमप्रभु यावे आ दाक्शो पा, गोपुकी नु गारशा बाक्तेक्म।

6 डोंइती तीतसमी इन कली क्येट पोक्पाइक्वतु। मुल गो तीतस कली “इन क्येट पोक्तीके, रिम्शो गेय, थुमीन” दे अरतक।



7 गे मार पाइतीनी हना यो, शुश पाइतीनी। इन थमा सुइक्का, इन लोत्र पस जोक्का, इन तुइक्का, इन रिम्शो गेय पतीके नु इन आंड कली दाक्तीकेमी शुश गेय पाइनीनी। मुल गे मेको दाक्तीक गेयमी यो रिम्शो गेय कौइताक्की। १कोरिन्थी १:५; १कोरिन्थी १६:१-२

8 इन कली अधिकार तशो लोत्र मपाइनुड। थमा पा दाक्का दोपा तांडसीब देशा हना, सुइमी गेन की गेन माइक्का मपुंडसीथु, आम थुमी मिम्शा गेशो रे तांडसीब। शुशेमी मोपा गेम्तेक्म। मिनु गेपुकीमी यो दाक्तीक गेय कौइदीने।

9 मारदे हना गे इं प्रभु येसु ख्रीस्त आ शिशी तुइक्कीनी। मेको शोंप पाइशो बाक्त हना यो इन पर्वम पुडग दुम्त। मेको प्रुडग दुम्तीकेम गे शोंप पाइशो दुमीन, दे मो पापु। मती ८:२०; फिलिप्पी २:७

10 मिनु गो इन कली मार देनुड देशा हना “बर्स का डौइती इन गोशो गेय थुम्चा मालीने” देनुड।

11 इन गेचा दाक्शो नु इन गेने चापचा डा क्येट पोक्शा गारीन।

12 आम के बाक्शो ला गेने जापब, आम के मबाक्शो गेने मजापब। इन चापचा डा पा गेने। हितोपदेस ३:२७-२८; मर्कूस १२:४३

13 इन कली मजाक्दीत्या डा पा वोइशशा, अरु आन कली आन माल्शो क्येडा शुश गेन मदेनुड। इन कली गप्ल, मेको आन कली यो गप्ल देनुड।

14 मुल इन के शुश बाक्मेनु, मथीब आन कली वारच पतीने। मिनु नोले मेको आन के शुश दुम्मेनु, इन कली यो वारच पाइनीम। मोपा वारच पा गेमुशोमी नेल्ल इं के बाक्शो उइक्थ उइक्थ दुम्ल, दे मिम्ताक्क।

15 मार ब्रेक्शो बाक्त देशा हना “सु सुमी शुश खुप्तमे, मेको आन के महें। सु सुमी चहिं इक्का ला खुप्तमे, मेको आन कली यो जाक्दीत्त” दे ब्रेक्शो बाक्ब। प्रस्थान १६:१८

16 गो परमप्रभु यावे कली “गे रिम्शो पाइब बाक्नीनी” दे ठेयब सेल्लुड। मारदे हना तीतसमी कोरिन्थी इन कली शुश मिम्ताक्व।

17 गोपुकीमी तीतस कली “कोरिन्थी आन कली गुम्थ लावो की लावो” दे सोइक्ताक्क। आंड देशो लोत्र टिशा, लशो ला ममाइ। आं यो गुमगुम दाक्शा ग्येरसीशा पित, दे तुइक्नुड। २कोरिन्थी ८:६; २कोरिन्थी ७:७, १५

18 तीतस नु गाक्ब वारच का यो सोइक्ताक्क। थमा सुइक्ब नेल्लेमी मेको कली तुइशो बाक्नीमी। मारदे हना मेको येसु ख्रीस्त आ ग्येरपाइक्ब लोत्र रिम्शो पा शेंब, दे नें चलेशो बाक्ब। २कोरिन्थी १२:१८

19 आ नें चलेशो ला ममाइ। थमा सुइक्बपुकी गारशा मेको कली गो नु क्येट पोक्शा गाक्का कली योवतेक्म। मेको गोपुकी नु शिशी पतीक गेय पाइब। गो मेको वारच पतीके प्रभु कली ठेयब सेल्चा कली पाइनीकी। गलाती २:१०

20 मोपा सांकछी वोइक्कानु, मेको क्येट आ पर्वम मरिम्शो लोत्र पने मचाप्नीम।

21 गो प्रभु आ डौइती रिम्शो पशो ला ममाइ। मुर नेल्ल आन डौइती यो रिम्शो पशा कौइनीकी।

22 मोपतीके मेको निक्शी नु आंड लोकब का यो सोइक्नीकी। डौइती खेयप निक्शी सां सोइक्तकानु, मेको लोकबमी रिम्शो गेय पा कौइताक्व। मोपतीके मुल यो रिम्शो पाइब, दे तुइक्ताक्क। मेकोमी इन कली यो रिम्शो मिम्ब।

23 तीतस गो नु गारशा इन कली गेय पाइब बाक्ब। अर्को लोकब निक्शी थमा सुइक्ब आन सोइशो बाक्नीस। मेको ख्रीस्त आ नें ठेयब सेल्ब बाक्नीस। २कोरिन्थी ७:१३; २कोरिन्थी १२:१८

24 मोपतीके मेको सां इन बाक्तीके जाक्मानु, मेको आन कली दाक्शा, वारच पतीने। मेको आन कली मार माल्दा, मेको गेने, आन लोत्र नेनीने। आं देशो पाइतीनी हना, गोमी इन पर्वम पशो लोत्र थमा दुम्ब। मिनु गो ग्येरसीनुड। थमा सुइक्ब नेल्लेमी यो “कोरिन्थीपुकीमी रिम्शो पामे बाक्त” दे तुइक्नीम। २कोरिन्थी ७:१४

1 मेको क्येट पोक्चा आ पबर्म इन कली लेंशा शेंचा ममाल्नुड।

2 साइ थोचे क्येट पोक्चा माल्ब देंशो नेंशा “पोक्नीकी की पोक्नीकी” दे प्रेक्तीनी। मिनु इन कली मोपा प्रेक्शो तशा, मासीडोनीयाम बाक्ब आन कली “आकाया डा मुरपुकीम ग्येरसीशा क्येट पोक्नीम” दे लोत्र नेंपाइक्तामी। मिनु शुशेमी “गो यो पोक्नीकी” देंतेक्मे। २कोरिन्थी ८:१९

3 साइ थोचे डा बोरशो लोत्र जोल मदुम्ल। मिनु गे ठीक बाक्शा, लोकब सां आन कली क्येट पोक्शा वोतीन, दे इन बाक्तीक सोइक्ताक्क।

4 मारदे हना गो इन बाक्तीके जाक्डानु, मासीडोनीया डा मुर आन डोंइती गे क्येट मपोक्थु बाक्शा मुने मदोक्कीन, दे मेको सां आन कली इन बाक्तीक सोइक्ताक्क।

5 मोपतीके मेको सां आन कली आं क्येडा डोंइती लने, दे सोइक्ताक्कमी। मिनु गो जाक्ची ना “मुल क्येट पोक्कीन” देंशा, ग्रीचा ममाल्नुड। सुइमी आन थुं मखाइक्थु ग्येरशा, आंम आ दाक्स पा, चाप्स पा गेने चाप्मेक्ल, दे लोकब सां आन कली आं क्येडा डोंइती सोइक्ताक्कमी।

6 आंम आन दाक्स पा, चाप्स पा, गेचा चहिं दोदेशो रुम्सीब देंशा हना, वांचेर शोक्वामेनु, इच्का ला शोक्वामी, इच्का ला खुप्चा ताइब। तन्न शुश शोक्वामी शुश खुप्चा ताइब। हितोपदेस ११:२४-२५; हितोपदेस १९:१७

7 क्येट पोक्गु कों मपोक्गु, दे थुं निक्शी मपथु, सुइमी “गेव की गेव” माइक्चा मपुंडसीथु, आंम थुंमी मिम्शा, ग्येरसीशा गेचा माल्ब। ग्येरसीशा गेब कली परमप्रभु यावेमी दाक्ब। रोमी १२:८

8 परमप्रभु यावेमी इन कली माल्शो क्येडा शुश गेने चाप्ब। मिनु मारेइ मारेइम गाप्शा, मारेइ वारच पचा डा गेय बाक्त हना यो, गे पने चाप्नीनी।

9 मार ब्रेक्शो बाक्त, देंशा हना “मेकोमी वांचेर ब्वारब, पुडग आन कली गेब। मेको आ ठीक पशो गेना हना यो लीब” दे ब्रेक्शो बाक्ब। भजन संग्रह ११२:९

10 शोक्ब कली वांचेर गेब। जचा दाक्ब कली जचा थोक्क गेबमी इन के बाक्शो यो बारपाइक्ब। मोपा इन ठीक पतीके डा फल बारना बारन लाइब। इजीकीएल १०:१२

11 मिनु गे शुश थीब दुम्शा, हाइशशा गेशो तशा, गो परमप्रभु यावे कली “गे रिम्शो पाइब बाक्नीनी” दे ठेयब सेल्नीकी।

12 मोदेशो हाइशशा गेशोमी श्येत जशो थमा सुइक्ब आन कली रिम्शो दुम्ब। मोशो ला ममाइ, शुशेमी परमप्रभु यावे कली ठेयब सेल्नीम

13 एको क्येट पोक्तीक गेय पशा इन टितीक नाक्सीशो बाक्ब। मिनु गे परमप्रभु यावे कली ठेयब सेल्शो बाक्नीनी। मिनु इन हाइशशा मेको आन कली नु अरु आन कली गेशोमी गे ख्लीस्त आ ग्येरपाइक्ब लोत्र तुइक्ब बाक्नीनी, दे कोइनीनी।

14 परमप्रभु यावे आ शिशो गे नु बाक्तीके मेकोपुकीम इन कली प्रार्थना पाइनीमी।

15 परमप्रभु यावेमी इन कली देंने मचाप्चा डा ठेयब कोसेली गेपु। मेको आ पबर्म मेको कली “गे रिम्शो पाइब बाक्नीनी” देंचा मप्रोंइनीक।

## 10

### पावल आ गेय

1 गो, ख्लीस्त आ ब्रेम्शो नु रिम्शो पतीकेमी, इन कली शेंना शेंन बाक्नुड। गो इन नेक्था बाक्शा, ब्रेम्शो लोत्र पाइनुड। तन्न गो डोन बाक्ती हना, हुइशशा लोत्र पाइनुड।

2 गो इन बाक्तीके जाक्डानु, चिठीम ब्रेक्शो लोत्र खोदेशो पा हुइशशा लोत्र पचा ममाल्डल, दे मिम्शा ब्रेक्ताक्क। आंइ पबर्मी “रागी डा मुर खोदेशो पा शेंनीम” देंब आन कली हुइशशा खोदेशो पा इन कली हुइक्चा मदाक्नुड। २कोरिन्थी १३:१-२; १कोरिन्थी ४:२१

3 मारदे हना गो रागीम बाक्तक हना यो, रागी डा मुर खोदेशो पा मजीनीकी।

4 आंइ लडाइ पतीक या रागी डा खोदेशो मबाक्नीम। तन्न मेको परमप्रभु यावे आ सक्ति पाइशशो बाक्नीम। मेकोमी मारेइ मारेइ खतम सेल्ने चाप्नीम। एफिसी ६:१३-१७

5 परमप्रभु यावे कली थमा सुइक्व आन कली तेक्बमी पशो लोत्र, ठेयब लेशशा थमा मसुइक्तीक लोत्र खतम सेल्लक। मिनु ख्रीस्त आ लोत्र टीब दुम्पाइक्वा कली मटीब मिम्तीक नेल्ल ग्याइशशा लाइक्व खोदेशो बाक्नीकी।

6 मिनु इन ख्रीस्त कली टिशो रिम्शो दुम्त हना, सु सुमी मटीमे, गो मेको आन कली सजाइ गेनीकी।

7 मिनु इन डोंइती दोपा बाक्नीकी, मेको कोत्रडीन। सु सुमी “गो ख्रीस्त आ मुर दुम्ती” दे आन नें बोरपदमे, मेकोपुकीमी आंइ कली यो ख्रीस्त आ मुर बाक्नीम, दे रुप्मेक्ल।

8 गो आंइ अधिकार आ पर्वम बोरती हना यो, मुने मदोक्नुड। मारदे हना मेको इन कली खतम सेल्चा कली ममाइ। तन्न इन कली रिम्शो सेल्चा कली प्रभुम गेती। २कोरिन्थी १३:१०; १कोरिन्थी ५:४-५

9 आं ब्रेक्शो चिठी इन कली हिंपाइक्वा कली ममाइ, दे मिम्तीन।

10 मारदे हना मेकोपुकीमी “मेको आ ब्रेक्शो चिठी ठेयब नु बोल्यो लोत्रम ब्रीशो बाक्नीम। तन्न आंमान जाक्त हना, मारदे पने मचाप्ब नु ब्वाक्स मजोक्ब बाक्ब” देनीम।

11 मोदेशो मुरपुकीमी मार रुप्चा माल्नीम देशा हना “गो मबाक्ची ना हुइशशा शेंशा ब्रेक्शो लोत्र, आंइ बाक्ची ना मपाइनीकी” दे रुप्मेक्ल। २कोरिन्थी १३:२,१०

**ठेयब मनकी, दे रुप्पाइशशा**

12 आंमान ठेयब सेल्सीबपुकी नु मगारनीकी। आन पशो खोदेशो यो मपाइनीकी। मेकोपुकीमी ठेयब सेल्सीशा, आंम आन जोक्तीक तुइक्तीक कौंडमुइनीम। मोदेशो पशोमी “मारदे मरुप्ब बाक्नीम” दे तुंडसीब। २कोरिन्थी ३:१; २कोरिन्थी ५:१२

13 गो आंइ नें बोरपाइक्नीकी। मारदे हना परमप्रभु यावेमी आंइ कली अधिकार गेशा, इन कली शेंब सेल्लु। आ गेशो अधिकार डा लाक्शा चहिं जोक्ब तुइक्ब नकी, दे बोरशा मगाक्नीकी। रोमी १५:२०; रोमी १२:३

14 आंइ नें बोरपाइक्नीकी। मारदे हना आंइ क्येडा डोंइती इन बाक्तीके ख्रीस्त आ ग्येरपाइक्तीक लोत्र नेंपाइक्थ सुइम मजाक्म, दे तुइक्ताक्क।

15 अरु मुरपुकीमी इन कली शेंशो आ पर्वम गो मबोरनीकी। तन्न इन थमा सुइक्तीके बारना बारन लमेनु, आंइ शेंतीके यो मेको नु बारना बारन लाइब।

16 मिनु इन बाक्तीक क्येडा लाक्शा, एर ओंथ ख्रीस्त आ ग्येरपाइक्तीक लोत्र शेंने चाप्नीकी। मुर आन शेंने थुम्शो गुम्तीके आ पर्वम आंइ नें मबोरपाइक्नीकी।

17 सु बोरनीमी, मेको प्रभु आ पर्वम नें बोरपदमेक्ल। येरमीया ९:२३-२४; १कोरिन्थी १:३१

18 सुमी आंम कली शेंब सेल्बा, मेको कली मब्राइनीम। तन्न प्रभुमी शेंब सेल्शो कली ब्राइनीम। १कोरिन्थी ४:५

## 11

**दूली शेंब आन पर्वम लोत्र**

1 गो इक्का निप्स ग्राइशशो लोत्र पाइनुड, गे आं लोत्र फाल्शा नेंशा गेयीनी।

2 इन कली मिम्शा, गो परमप्रभु यावेमी रुश पशो खोदेशो दुम्ती। मारदे हना रिम्शो ग्युम्ली ग्युंवे पा गेशो खोदेशो पा, इन कली ख्रीस्त कली गेतन्नी। एफिसी ५:२६-२७

3 बुस्सुमी हव्वा कली मिलो शिलो पा जोल पा आ थुं हिरपा, परमप्रभु यावे कली मटीब सेल्शो खोदेशो पा, दूली शेंबपुकीमी इन थुं क्याल्शा, ख्रीस्त कली दाक्चा रे हेंथे लां खोइक्पाइक्नीम। उत्पत्ती ३:४,१३

4 मारदे हना मुर का जाक्शा, मेकोमी इन कली अर्को येसु आ पर्वम शेंब आंइ शेंशो खोदेशो ममाइ, इन डोंइती ताक्शो ममाइ, अर्को सोक्त ताक्पाइक्ब। अर्को ग्येरपाइक्तीक लोत्र नेंपाइक्ब। मिनु गे रीब पा बिन्तीनी। गलाती १:८-९

5 गो मेको शुश जोक्ब तुइक्ब देखु पशो सोइशशा आन क्येडा आइक्च मनड। २कोरिन्थी १२:११

6 ब्वाक्स मजोक्ब बाक्ती हना यो, शुश जोक्ब बाक्नुड। गो आंइ पतीकेमी कोंइताक्क। १कोरिन्थी २:१,२,१३; एफिसी ३:४

7 गो ब्रेम्शो दुम्शा, इन कली ठेयब सेल्चा कली परमप्रभु यावे आ ग्येरपाइक्तीक लोत्र क्येट मताक्थु शेंताक्क। मार, मेको पाप मिन्नीनी? २कोरिन्थी १२:१३; मत्ती १०:८; १कोरिन्थी ९:१२-१८

8 अर्को रागीम बाक्ब थमा सुइक्ब आन गुन्तीके डा आन क्येट रोइश्शो खोदेशो पा ताक्शा, इन कली शेंताक्न्नी। फिलिप्पी ४:१०,१५

9 गेपुकी नु बाक्शा शेंदन्नीनु, मासीडोनीया रागी रे जाक्शो थमा सुइक्ब लोक्बपुकीमी आं कली माल्शो थोत्रक गेशा, वारच पाइक्तीमी। मोपा आन पशोमी गेपुकीमी मोशा शेंसीचा ताइतीनी। मुल यो मारेइ ताक्चा ममाल्डल, दे मिम्ताक्क।

10 ख्रीस्त थमा बाक्ब, देशो लोत्र लीशो खोदेशो पा “कोरिन्थी आन कली आन क्येट मताक्थु, मोशा शेंताक्क” देशो लोत्र आकाया रागीम ब्रशा लील, दे मिम्शा, मारेइ मताक्गु।

11 मो पडानु, इन कली मदाक्ब दुम्नुडा डा? गोमी इन कली दाक्शो मदाक्शो परमप्रभु यावेमी तुइक्ब।

12 मुल सम्म दोपा बाक्डा, मुल यो मोपान बाक्नुड। मारदे हना दूली लोत्र शेंबपुकीमी “पावल नु आ वारचपुकीमी पशो खोदेशो पा गो यो पाइनीकी” दे नें बोरपा गाक्नीम। मेको आन जोल गुंड्या कली गो मारेइ मताक्थु शेंनीकी।

13 मेकोपुकी परमप्रभु यावे आ सोइश्शो मनम। खुइश्शा जोल पा गेय पाइनीम। ख्रीस्त आ सोइश्शो दुम्सु पा शेंथ गाक्नीम। २कोरिन्थी २:१७

14 मोपा गाक्तेक्म हना यो, मेको आन मोदेशो पशो छक लाक्चा डा ममाइ। मारदे हना सैतान यो परमप्रभु यावे आ स्वर्ग डा गेय पाइब खोदेब दुम्सु पा गेय पा गाक्ब।

15 मेकोपुकी रिम्शो गेय पाइब खोदेशो दुम्सु पा गाक्नीम। मेको आन जोल नोले गूब। मिनु आन गेय यो मलीब।

### पावल श्येत जशो

16 गो इन कली लेंशा देंनुड, मार देंती हना यो, आं लोत्र नेंचा मप्रोनीन। गो निप्स ग्राइश्शो लोत्र पाइब खोदेशो पा, आ नें बोरपाइश्शो लोत्र पना पन बाक्ती हना यो, आं लोत्र नेनीने। २कोरिन्थी १२:६

17 मुल इन कली देंशो लोत्र प्रभुम गेशो अधिकार डा लोत्र ममाइ। आं नें बोरपाइक्तीक लोत्र पा, गो निप्स ग्राइश्शो लोत्र पड देंती।

18 मारदे हना शुश मुर रागी डा लोत्रमी ठेयब लेत्नीम। मोपतीके गो यो बोरनुड।

19 गे ग्येरसीशा निप्स ग्राइश्शो आन लोत्र फाल्नीनी। मिनु आंम कली जोक्ब तुइक्ब मिन्नीनी। १कोरिन्थी ४:१०

20 सुइ मुरुमी इन कली वाइलीम वाइल सेल्तेक्म हना, रोइक्ताक्म हना, जोल पाम्तेक्म हना, बोरशा कोंइताक्म हना नु इन चोचो राप्तेक्म हना यो फाल्शा बाक्बाक्तीनी।

21 गो मुने पा देंनुड, मेको आन पशो खोदेशो पने मचाक्क। सुइ मुर मारेइ आ पर्वम ठेयब लेश्शा बोरतेक्म हना, गो यो मेको आ पर्वम ठेयब लेश्शा बोरनुड। गो मूर्ख खोदेशो पा ब्वाक्नुड।

22 मार, मेको हिबू नमी? गो हिबू नड। मार, मेको इस्त्राएली नमी? गो इस्त्राएली नड। मार, मेको अब्राहाम आ चच युइ नमी? गो यो अब्राहाम आ चच युइ नड। फिलिप्पी ३:५

23 मार, मेको ख्रीस्त आ गेय पाइब नमी? गो यो ख्रीस्त आ गेय पाइब नड। गो मेको आन क्येडा रिम्शो गेय पाइब नड। गो गेशो मुरुम खोदेशो लोत्र पाइनुड। गो मेको आन क्येडा शुश गेय पाता। मेको आन क्येडा शुश चोक्चा पुंडिसाक्यी। मेको आन क्येडा तुप्चा पुंडिसाक्यी। हेर हेरा साइक्चा पुंडिसाक्यी। १कोरिन्थी १५:१०; २कोरिन्थी ६:४-५

24 यहूदीपुकीमी आं कली ५ खेयप ३९ कोर्ता आप्तीनी। ब्यवस्था २५:३

25 खेयप सां कोक्केमी तुप्तीमी। काले फुल्लु आप्तीमी। खेयप सां आं डोइश्शो जहाज समुन्द्रम गुम्शा हेरा बेक्ती। मो दुम्मेनु, काब नाक्दो नाक्ती समुन्द्रम बाक्ती। प्रेरित १६:२२; प्रेरित १४:१९

26 रागी रागी हिरशा गाकडानु, खोला शोक्सीडानु, हेर हेरा योल्ताक्यी। लांम बाप्शा बाक्ब खुइपुकीमी हेर हेरा साइक्तीमी। आंम यहूदीपुकीमी यो शुश श्येत गेतीमी। अर्को रागी डा मुरपुकीमी यो हेर हेरा साइक्तीमी। सहर, गोरशो रागी, समुन्द्र ते ते हिरशा गाकडा, मेक मेक हिंन हिंन गाक्चा माल्ताक्यी। आं लोकब दुम्बु पा, थमा सुइक्ब नकी देंब नु गाकडानु, मेकोपुकीमी यो शुश श्येत गेतीमी।

27 येसु आ लोत्र शेंना शेंन गाकडानु, शुश गेय पा, शुश श्येत जशा, शुश नाकदो इप्चा यो मतड। जचा तूचा यो मतड। ग्यूमी फेक्चा यो मतड। २कोरिन्थी ६:५

28 मोदेशो श्येत आं रांमी जशो ला ममाइ। आं थुं यो मनाइक्स। मारदे हना थमा सुइक्ब आन कली दोपा मार पा रिम्शो सेलुमी, दे मिम्स डा मिम्स बाक्ती। प्रेरित २०:१८-२१, ३१

29 मुरुमी “मचाप्नीकी” देंनीम। गो चहिं गेना हना यो चाप्नुडा डा? मुरुम पाप पाप्तेकम हना, गो शुश सुर्ता पाइनुड।

30 गो आं नें बोरपा लोत्र पचा माल्नुड हना, आं मचाप्शो आ पबंम आं नें बोरपाइक्नुड। २कोरिन्थी १२:५

31 गेना हना यो ठेयब सेल्चा पुंडसीब प्रभु येसु आ आफ परमप्रभु यावेमी गो जोल मपाइनुड, दे तुइक्ब।

32 साइ दमस्कस सहरमी बाक्डानु, पिप अरेतस आ हुकुम पाइबमी आं कली ग्याइक्चा, दे सहर आ एर ओंथ आ सिपाहीपुकी वोइक्मी बाक्त।

33 तन्न थमा सुइक्बपुकीमी आं कली डोकोम कुरपा गारो डा झेल रे ओंखां पा तोक्शा प्रोक्पाइक्तीमी। मोपा जोरी सत्रु आन गुइ रे ब्रोइती। प्रेरित ९:२४-२५

## 12

### मचाप्ब सक्ति पाइश्शा दुम्शो

1 नें बोरपाइक्तीक लोत्र शोर गाक्शो बाक्त हना यो, गो आं नें बोरपा लोत्र पचा मप्रॉइनुड। मारदे हना प्रभुमी छेडछेड पा तपांइसीशा तुइक्पाइक्ती, दे मुल सम्म इन मतुइश्शो लोत्र तुइक्पाइक्नन्नी।

2 गो ख्रीस्त आ मुर का कली तुइक्नुड। १४ बसं डोंइती मेको स्वर्गम लाइक्चा पुंडसाक्ब। रांम बाक्म, कों मबाक्म, गो मतुइक्नुड। परमप्रभु यावेमी ला तुइक्ब।

3 मिनु गो मेको मुर परमप्रभु यावे आ बाक्तीके लाइक्चा पुंडसाक्ब, दे तुइक्नुड। रांम बाक्म, कों मबाक्म, गो मतुइक्नुड। परमप्रभु यावेमी ला तुइक्ब।

4 मिनु मेको मुरुमी खुइश्शो लोत्र नेतु। मेको लोत्र मुरुम देंचा मदुम्ब।

5 मेको मुर आ पबंम आं नें बोरपाइक्नुड। आं पबंम चहिं आं नें मबोरपाइक्नुड। तन्न गो आं मचाप्शो आ पबंम आं नें बोरपाइक्नुड। २कोरिन्थी ११:३०

6 मारेइ पने मचाप्ब दुम्तीके आं नें बोरपाइक्नुड देंशोमी निप्स ग्राइश्शो लोत्र पाइब मदुम्नुड। मारदे हना गो थमा लोत्र पाइनुड। मारदे हना मुरपुकीमी आं कली तशा, आं लोत्र नेशा आं पबंम मार मिम्चा माल्बा, दे आंमा तुइक्तमेक्ल, दे मिम्शा बाक्नुड। २कोरिन्थी १०:८

7 गो शुश कोंइतीके तशा, मेको आ पबंम ठेयब लेशशा, नें मबोरपदुल, दे सैतान आ चू आं रांम गेती। मेको आं कली श्येत गेचा कली नु आं ठेयब लेत्तीक तेक्चा कली बाक्ब।

8 खेयप सां गो प्रभु कली “मोदेशो चू रे प्रॉइयीनी” दे पुंडता।

9 तन्न मेकोमी आं कली “आं शिशी इ कली गारब। मारदे हना मचाप्ब मुर आगाम आं सक्ति नेल्ल क्येडा ठीक बाक्ब” देंत। मोपा तुइक्तु रे ख्रीस्त आ सक्ति गो नु बाक्शो तांइसेक्ल, दे गो मारेइ पने मचाप्ब दुम्शोमी, थाम्पा ग्येरसीशा आं नें बोरपाइक्नुड।

10 मोपतीके ख्रीस्त आ सक्ति तांइसेक्ल, दे मारेइ पने मचाप्ब दुम्ती हना यो, शुक्शी लोत्र पाइक्चा पुंडसाक्यी हना यो, जचा फेक्चा मारेइम मजाक्दीत्ती हना यो, खेदा पचा पुंडसाक्यी हना यो नु दोदेंब

श्येत गेचा पुंडसाक्यी हना यो, आं थुं नाइश्शा हेम्म पा बाक्नुड। मारदे हना गो मारेइ पने मचाप्व दुम्डानु, सक्ति पाइश्शो बाक्नुड, दे रूप्ता। फिलिप्पी ४:१३

थमा सुडक्व आन कली शेंशो

11 गो निप्स ग्राइश्शो लोत्र पाइब खोदेशो दुम्ती, दे तुइक्ताक्ड। गेपुकीमी मोदेशो पाइब सेल्तीनी। मारदे हना गेपुकीमी आं कली ठेयब सेल्चा माल्लो, दे तुइक्चा माल्लो ननी। गो मेको शुश जोक्व तुइक्व देखु पशो सोइश्शो आन क्येडा आइक्च मनड। मो हना यो गो आइक्च दुम्ती। २कोरिन्थी ११:५

12 ख्रीस्त आ सोइश्शोन बाक्माक्त, दे कोइचा कली गेपुकी नु बाक्डानु, चिन्ड नु छक लाक्चा डा गेय कोव्रचा ताइतीनी। रोमी १५:१९; हिब्रू २:४

13 तेइ तेइ येसु आ नेमी खुम्सीशा बाक्व आन कली मारेइ मारेइ शेंशा, मारेइ मारेइ पशा कोइशो खोदेशो पा इन कली यो पशा कोइताक्नी। मिनु मार लीम डा? लोत्र का चहिं मार लीत देशा हना, गेपुकी नु गो मारेइ मताक्गु। आं मताक्शोमी माफ गेयीनी। २कोरिन्थी ११:७-९

14 मुल इन कली गुम्थ पिडानु, खेयप सां दुम्ब। गो इन कली श्येत मगेनुड। इन बाक्शो मारेइ मताक्नुड। तन्न इन कली माल्लुड। मारदे हना आलपुकीम आंम आफ कली शोप मउप्नीम। तन्न आम आफोमी आन आल आ पर्वम शोप उप्नीमी।

15 गो दोपा इन कली वारच पा रिम्शो थुं सेल्चा कली ग्येरसीशा, आं थुं गेनन्नी, मोपा इन कली दाक्चा डा गेय पाता। मिनु गो चहिं इक्का ला दाक्चा पुंडसीनुडा डा? फिलिप्पी २:१७

16 इन मुर का निक्शीमी मार दैतेक्म देशा हना “मारेइ मताक्नुड देशा, जोल पा शुश ताक्बाक्त” दैतेक्म।

17 मार, आं सोइश्शो आन गुइ रे गो मारेइ ताक्गु डा? मार ताक्शा, इन कली श्येत गेमे डा?

18 गो तीतस कली कोरिन्थी आन कली गुम्थ लावो, दे सोइक्ताक्ड। तीतस नु लोक्व का यो सोइक्ताक्ड। मिनु तीतसमी गेपुकी नु मारेइ ताक्गा डा? आंस सोक्त का पा गेय मपस्कु डा? २कोरिन्थी ८६,१६-१८

19 “पावल नु आ वारचपुकीमी ब्रोंइचा कली लोत्र पाइबाक्तेक्म” देशो मिम्ताक्नी हना, गे दूली मिम्ताक्नी। आंइ दाक्शो लोक्वपुकी, गो इन कली शेंशा लोत्र पकानु, परमप्रभु यावे आ डोंइती जिम्मा ब्रशा ख्रीस्त आ अधिकार तशा, इन कली रिम्शो दुम्ल, दे मिम्शा शेंताक्क।

20 मुल गुम्थानु, मार दुम्बा, दो दुम्ब, दे थुं ग्येत्थ लुक्च पा बाक्नुड। मारदे हना गुम्थानु, आं दाक्शो खोदेशो मपाइनीनी कों, गो यो इन दाक्शो खोदेशो मपाइनुडा कों? मिनु मगारथु, जिचा बोक्शा, गेहे पमुशा, गाइश्शा, आंम कली ठेयब सेल्मुशा, शुक्शी पमुशा, मुर आन पर्वम मरिम्शो लोत्र पा नोफा मुइक्मुशा, ठेयब लेश्शा, खडड मडड दुम्नया कों? २कोरिन्थी १०:२

21 गो लेश्शा जाक्डानु, परमप्रभु यावेमी आं कली आइक्च सेल्बा कों, दे हिंनुड। मिनु डोंइती पाप पाइब नु परमप्रभु यावे गे मलेप्व आन पर्वम सुर्ता पचा माल्लुडा कों? डोंइती मेकोपुकीमी ग्रांग्रा दिचा डा, तेल्लेम नु हेंथे गेय पाम्तेक्म। २कोरिन्थी १३:२

## 13

हिंच कोइशो

1 मुल गो इन कली गुम्थ पिडानु, सां खेयप दुम्नुड। निसाफ पामेनु, सांकछी निक्शी सां वोइश्शा, मेको आन लोत्रमी दोस गुंडशा, सजाइ गेचा माल्लब। ब्यवस्था १९:१५; मती १८:१६

2 मोपतीके सजाइ गेचा पुंडसीब आन कली सजाइ मगेथु, मप्रोंइनुड। मारदे हना एको क्येडा डोंइती जाक्डानु, मो मपचा, दे शेंशो नन्नी।

3 गेपुकीमी “पावल ख्रीस्त आ सक्ति तशा, अधिकार पाइश्शो बाक्माक्त” दे इन मिक्चीमी तचा माल्बाक्तीनी, दे तुइक्ताक्ड। ख्रीस्त इन दातेमी मचाप्व ममाइ, शुश सक्ति पाइश्शो बाक्व, दे कोइताक्क।

4 मारदे हना मेको मचापब दुम्शा, शीम केप्शा कांटी थोक्शा क्याइश्शा साइक्चा पुंडसाक्व। तन्न परमप्रभु यावे आ सक्तिमी बेक्शो रे सेंचा पुंडसाक्व। मोदेशो पा गो यो मेको नु मारेइ पने मचापब दुम्नीकी। तन्न गेपुकी नु बाक्कानु, बेक्शो रे सेंचा पुंडसीशा, परमप्रभु यावे आ सक्ति तशो सक्ति पाइश्शो गेय कोइनीकी।

5 इन थमा सुइक्तीके ठीक बाक्बा देय मबाक्ब आंमा नाक्शा कोव्रडीने। आंमा नाक्तीन। येसु ख्रीस्त इन आगाम बाक्ब, दे मप्रेदीन। मबाक्त हना इन गेय शोर गाक्शो दुम्ब।

6 गो आंड शेंशोमी इन कली रिम्शो पाइतक, दे तुइक्नीकी। मिनु गे यो मोदेशो मिम्नीनी, दे आस पाइनीकी।

7 गे मारेइ मरिम्शो मपन, दे गो परमप्रभु यावे कली पुंडनीकी। गो ग्राशो मुर खोदेशो दुम्चा ममाइ, तन्न ठीक पाइब दुम्मीन। गो ठीक मपाइब खोदेशो दुम्तक हना यो, गे रिम्शो पाइब दुम्नीकी।

8 गोपुकीमी थमा लोव्र थमा पाइनीकी। दूली नु जोल लोव्र कली थमा देंने मचाप्नीकी।

9 गो मारेइ पने मचापब दुम्शो बाक्तक। तन्न इन कली बोल्यो दुम्शो तशा ग्येरनीकी। गो परमप्रभु यावे कली “कोरिन्थीपुकी रिम्शो दुम्मल” दे पुंडना पुंडन बाक्नीकी।

10 गो इन नेक्था मबाक्डानु, एको चिठी ब्रेक्नुड। मिनु आं जाक्ची ना गो इन कली हुइश्शा, प्रभुमी आं कली गेशो अधिकार कोइचा ममाल्डल। मेको अधिकार सेल्चा कली गेशो बाक्त, प्रेत्या कली ममाइ। २कोरिन्थी १०:११; २कोरिन्थी १०:८

नोले इा लोव्र

11 आं लोकबपुकी, मुल रिम्शो बाक्कीन। रिम्शो पने। आं लोव्र नेंशा टीब दुमीने। इन दातेमी गारमुने। थुं नाइश्शा बाक्कीने। दाक्तीक नु थुं नाइक्तीक गेब परमप्रभु यावे गेपुकी नु बाक्ल। फिलिप्पी ४:४; रोमी १५:३३

12 प्रभु आ नेमी मुम्मुशा, आसीक गेमुने।

13 गो नु बाक्ब थमा सुइक्ब नेल्लेमी इन कली “रिम्शो बाक्कीन” देंतेक्म।

14 इ प्रभु येसु ख्रीस्त आ शिशी, परमप्रभु यावे आ दाक्तीके नु परमप्रभु यावे आ सोक्त गेना हना यो गेपुकी नु लील।

## गलाती

**ब्रेक्ब मुर:** एको चिठी पावलम गलातीया रागीम बाक्ब यहूदी आन कली ब्रेक्बो बाक्त।

**गेना ब्रेक्बो:** एको चिठी ब्रेक्बा क्येडा डोंइती पावलामी निक्शी खेयप गलाती आन कली शेंचा कली मेकेर बाक्बो बाक्त। प्रेरित १६:६; प्रेरित १८:२३ मेको निक्शी खेयप लशा, लेंशा लची ना ब्रेक्बो बाक्त। मेको ५५ ए. डी. बाक्त।

**मार ब्रेक्बो:** गलातीपुकीमी पावल आ शेंशो मुल रे “येसु ख्रीस्त आ पतीक रे ला परमप्रभु यावे आ मुर दुम्ने चाप्नीम” दे शेंशो, दे मगारब मिन्तमे बाक्त। मेकोपुकी लेंशा “यहूदी आन माइत पतीके पचा माल्ब” दे दूली शेंब आन लोव्र नेंचा गोम्तेकम। “येसु ला पाप रे प्रोंइब बाक्ब” देंशो एको चिठी डा ठेयब लोव्र बाक्ब।

### डोंइती डा लोव्र

1 गो सोइश्शो ब्रेक्बा पुंडसीशो पावल नड। आं शेंतीके लोव्र मुर आन लोव्र ममाइ। मुरपुकीम सोइश्शो गो मनड। येसु ख्रीस्त कली बेक्बो रे सेंब इं आफ परमप्रभु यावे नु येसु ख्रीस्त आस सोइश्शो नड। गलाती १:११-१२

2 गो नु काथा बाक्ब थमा सुइक्ब लोकबपुकीमी गलातीया रागीम बाक्ब येसु ख्रीस्त आ नेंमी देल्ब इन कली एको चिठी सोइक्ताक्क।

3 इं आफ परमप्रभु यावे नु प्रभु येसु ख्रीस्तम इन कली शिशी पा इन थुं नाइश्शा बाक्बा गेम्सेक्ल।

4 प्रभु येसु ख्रीस्तमी इं पाप क्याम्चा नु रागीम यूशो मरिम्शो पतीके रे प्रोंइचा कली आ गिम गेप्टु। आ मोदेशो पशो चहिं इं आफ परमप्रभु यावे आ दाक्बो बाक्त। गलाती २:२०; १तिमोथी २:६; तीतस २:१४; १यूहन्ना ५:१९

5 इं आफ परमप्रभु यावे कली ठेयब सेल्चा गेनायो मप्रोंइय। आमेन।

### येसु ख्रीस्त आ लोव्र का ला बाक्ब

6 इन कली तशा, गो छक लाक्ती। मारदे हना इन कली येसु ख्रीस्त रे पा शिशी पा आ गे ब्रेक्ब कली प्रोंइशा, अर्को आन ग्येरपाइक्ब लोव्र नेंतीनी।

7 थमा लोव्र चहिं का ला बाक्ब, दे रुपीन। ख्रीस्त आ ग्येरपाइक्ब लोव्र दूली पा शेंबपुकी जाक्शा, आन दूली शेंशोमी इन थुं क्याल्पाइक्तेकम। प्रेरित १५:१, २४

8 मिनु गोपुकी डोंइती आंइ शेंशो ग्येरपाइक्ब लोव्र क्येडा अर्को ग्येरपाइक्ब लोव्र शेंताक्क हना, गोपुकी सराप रकल। परमप्रभु यावे आ स्वर्ग डा गेय पाइबमी मोपा अर्को ग्येरपाइक्ब लोव्र शेंताक्क हना मेको यो सराप रल।

9 गो इन कली “सु सुमी अर्को ग्येरपाइक्ब लोव्र शेंनीमी, मेको सराप रमल” दे लेंशा देंनुड। १तिमोथी ६:३

10 मार, गो मुर आन थुं नुपाइक्का माल्नुडा डा? गो परमप्रभु यावे आ थुं कका नुपाइक्का माल्नुड। गो मुर आन थुं नुपाइक्कीके लोव्र पाता हना, ख्रीस्त आ गेय पाइब माइक्का मपुंडसीनुड। १थिस्सलोनिकी २:४-६

### पावलम आंम पर्बम लोव्र पशो

11 आं लोकबपुकी, गोमी इन कली शेंशो ग्येरपाइक्कीके लोव्र मुर आन लोव्र मबाक्ब।

12 गो मेको मुरुमी शेंशा नेंपाइश्शो मनड। येसु ख्रीस्तमी तपांइसीशा, शेंताक्की। प्रेरित ९:१-१५

13 साइ गो दोपा यहूदी धर्म ब्रडा, मेको नेंशा तुइश्शो बाक्नीनी। मेना गो येसु ख्रीस्त आ नेंमी देल्ब आन कली खेदा पपाइश्शा ग्याइक्पाइश्शा चोक्पाइश्शा, श्येत गेतामी। मेको आन कली साम्चा, दे शुश गेय पाता।



14 आं पालामी नेल्ल आन क्येडा शुश धर्म पा आंइ यहूदी आन रिती थिती पाता। अरु आन कली यो आंइ किकी पिपीम पशो रिती थिती पपाइक्नुडमी, दे आं थु फ्रेंशा बाकशो नड। प्रेरित २३:६; प्रेरित २६:५

15 परमप्रभु यावेमी चहिं काबु आं मोदेशो पचा तेक्ती। मारदे हना आ दाकशो पा आं जरमेचा डोंइती रे योव्रशा, आ लोव्र शेंब सेल्ले थुमशो बाक्माक्त। येरमीया १:५; रोमी १:१

16 मोपतीके आ तौ येसु खीस्त कली तपाइक्ती। मिनु शुश अर्को रागी डा मुर आन कली आ तौ आ पर्वम शेंथ सोइक्ताक्की। मेको शेंचा आ पर्वम गो सुइ नु लोव्रसी मपड। अर्को मुर आन अर्ती यो मनेनु। मती १६:१७; गलाती २:७

17 गो यरूसलेमम बाक्ब आं डोंइती ब्रेत्चा पुंइसीशा शेंथ सोइश्शो आन कली गुमथ यो मलड। अराब रागी लशा हिरशा, दमस्कस सहर जाक्दीश्शा बाक्ती।

18 मिनु बर्स सां नोले केफास गुमथ यरूसलेम लती। मिनु केफास नु १५ नाक्ती सम्म बाक्ती। यूहन्ना १:४२; प्रेरित ९:२६-२७

19 मेना खीस्त आ सोइश्शो सुइ आन कली मगुमुमी। प्रभु आ लोक्ब याकूब चहिं गुमता। मती १३:५५

20 गोम इन कली ब्रेक्शो लोव्र थमान बाक्ब, देनुड। जोल ममाड, दे परमप्रभु यावेमी तुइक्ब।

21 नोले यरूसलेम रे गाक्शा, सिरीया नु सिलीसीया रागी हिरथ लती। प्रेरित ९:३०

22 यहूदीया रागीम बाक्ब खीस्त कली थमा सुइक्ब आन गुमतीकेमी आं कली गेनायो मतशो बाक्मा बाक्त।

23 मेकोपुकीमी आं पर्वमी “साइ इं कली खेदा पा एको लोव्र साम्चा देंबमी मुल एको लोव्रन शेंना शेंन ब्रपाइक्बाक्त” दे नेंशो बाक्तेक्म ने।

24 मेको नेंशा परमप्रभु यावे कली ठेयब सेल्लेक्म ने।

## 2

### सोइश्शोपुकीमी ब्रशो

1 यरूसलेममी केफास नु याकूब गुमशा, १४ बर्स नोले लेंशा, यरूसलेम लती। गो नु बारनाबास यो लत। तीतस कली यो लाइक्तस्कु। प्रेरित १५:१-२९; प्रेरित ४:३६

2 येसु खीस्तमी यरूसलेमम बाक्ब सोइश्शोपुकी नु लोव्रसी पथ लावो, दे तुइक्पाइक्तीके लशो नड। मिनु जाक्दीश्शा, सोइश्शोपुकी नु अरु आन कली लां कोंइब दुमशो आन कली खुप्शा, अर्को रागी डा मुर आन कली मार मार शेंदुमी, मेको नेंपाइक्तामी। मारदे हना मेकोपुकीमी गोम शेंशो तुइक्चा माल्नीम। मतुइक्ताक्म हना, आं मिमशो नु आन मिमशो मगारब। मिनु आं देशो मनेनीम, दे मिमशो नड। मिनु मेको नेंपदुमीनु, आं देशो ठीक लाक्तेक्म।

3 मारदे हना गो नु लशो ग्रीक डा तीतस कली खोइक्तीक चिनु खोइक्पांइसो मदेंथु, ब्राम्तेक्म। प्रेरित १६:३; १कोरिन्थी ९:२१

4 तन्न मेकेर खुमसीशा बाक्ब आन मतुइक्थु थमा सुइक्ब दुम्बु पा, दूली शेंब ब्वांइसाक्म। मोपा गोपुकी नु ब्वांइसीशा, आंइ थुं कोव्रशा बाक्तेक्म। गोपुकी खीस्त येसुमी यहूदी आन रिती थिती पचा प्रोंइशा बाक्तक। तन्न मेकोपुकीमी यहूदी आन रिती थितीम लेप्पाइक्चा बोल पाम्तेक्म।

5 येसु खीस्त आ लोव्र थमा बाक्ब देशा, मेको दूली शेंब आन लोव्र नेंशा, छिन का यो गु ब्रेश्शा मबाक्क। मिनु मोदेशो पशोमी इन कली शेंशो ग्येरपाइक्ब लोव्र थमा बाक्ब, दे कोंइताक्क। गलाती ३:१

6 परमप्रभु यावेमी मुर आन कली ठेयब आइक्च मसेल्ब। मुर आन थुं नेल्ल तुइक्ब। मुल लां कोंइब दुमशो आन कली मान पाइनुडमी। मेको लां कोंइबपुकीमी अर्को लोव्र शेंचा कली मतेमदेम।

7 मेकोपुकीमी आं कली परमप्रभु यावेमी अर्को रागी डा मुर आन कली शेंथ सोइक्ताक्क, पत्रुस कली चहिं यहूदी आन कली शेंथ सोइक्ताक्क, दे रुप्तेक्म। एफिसी ३:१२

8 पत्रुस कली यहूदी आन कली शेंथ सोइक्व नु आं कली अर्को रागी डा मुर आन कली शेंथ सोइक्व कानाइ बाक्व, दे रूप्तेक्म।

9 गो थमा पा एको शेंतीक गेय कली योत्रशो नड, दे रूप्शा, याकूब, केफास नु यूहन्ना सांफामी बारनाबास नु आं कली “गो इं यहूदी आन कली शेंनीकी। गे निकशी चहिं अर्को रागी डा मुर आन कली शेंथ लसे” देंशा, ग्युरा गुइमी ग्याइश्शा, लोत्रसी गारपाइक्तेक्म। यूहन्ना १:४२

10 मिनु दोपा शेंचा, मार शेंचा, दे मारेड मदेंम। मथीब आन कली शिशी पाइक्वा ला देंतेक्म। मेको आन लोत्र टिशा, शुश आन कली शिशी पाइक्तामी। प्रेरित ११:२९-३०; २कोरिन्थी ८:९

### केफास कली हुइश्शो

11 काबु केफास एन्टीओकमी जाक्त। मिनु ग्रुम्स्कुनु हुइक्ताक्ड। मारदे हना आ पशो तशा आं थु मनुड।

12 डोंइती मेकोमी अर्को रागी डा थमा सुइक्व नु काथा जशा, नोले याकूबमी सोइश्शो वारच का निकशी जाक्मारे यहूदीपुकी नु ला जचा गोप्तु। मारदे हना यहूदी जात डा थमा सुइक्वपुकीमी आ कली मोदेशो पा जशो तशा, मरिम्शो सुइक्नीम, आ लोत्र यो मनेंनीम, दे हिंशा मो पाप्तु। प्रेरित ११:२-३

13 मोदेशो पाइब आ ला ममाइ। यहूदी थमा सुइक्व नेल्लेमी दिल्ला, जखु पा कोंइताक्म। बारनाबासमी यो आन पशो खोदेशो पचा गोप्तु।

14 मिनु मेको आन मोदेशो पशो चहिं ख्रीस्त आ लोत्र नु मगारब देंती। मोपतीके मेको आन कली खुप्शा, केफास कली “गे यहूदी नवे। तन्न इं यहूदी बुद पा आन पतीके पचा प्रोंइशा, अर्को रागी डा मुर खोदेशो दुम्ते। मोपतीके अर्को रागी डा मुर आन कली इं यहूदी रिती थिती पपाइक्वा दुम्बा?

15 गोपुकी यहूदी नय। अर्को रागी डा मुरपुकीमी परमप्रभु यावे कली मतुइक्नीमी। आ अरेशो लोत्र मतुइक्थु, मटीनीम। गो मोदेशो मनय।

16 इं यहूदी रिती थिती पतीके ठीक मदुम्नय। ख्रीस्त येसु कली थमा सुइक्तीके ठीक दुम्नय, दे रूप्तय। मोपतीके इं यहूदी रिती थिती पचा प्रोंइशा, ख्रीस्त येसु कली थमा सुइक्तय। गो लेंशा देंनुड, रिती थिती पतीके सुइ ठीक मदुम्नीम। परमप्रभु यावेमी मुर आन कली येसु ख्रीस्त कली थमा सुइश्शो तशा, ठीक दुम्पाइक्व। रोमी ३:२०,२८; एफिसी २:८

17 गो यहूदी बाक्तय हना यो, येसु ख्रीस्त कली थमा सुइक्तीके ठीक दुम्तय। मोपान अर्को रागी डा मुर खोदेशो दुम्तय। मिनु येसु ख्रीस्तमी मुर आन कली पापी सेल्शा, पाप बारपाइक्व, दे मिम्चा डा? मोदेशो ममिम्चा।

18 गो रिती थिती पचा प्रोंइता। मुल लेंशा रिती थिती पशा, ठीक दुम्चा माल्ला हना, गो थमान परमप्रभु यावे आ लोत्र मटीब दुम्नुड, दे रूप्ता।

19 गो यहूदी आन पतीके आन परबम बेक्शो मुर दुम्ती। ख्रीस्त नु काथा शीम कांटी थोक्शा, क्याइश्शा साइक्वा पुंइसाक्यी। मुल गो परमप्रभु यावे आ दाक्शो पा ब्रोंइनुड।

20 तन्न गो मब्रोंइनुड। ख्रीस्त आं आगामी ब्रोंइब। तन्न आं मुल ब्रोंइतीके गो परमप्रभु यावे आ तौ कली थमा सुइश्शा ब्रोंइनुड। मेकोमी आं कली शुश दाक्शा, आं पशो पाप आ परबम साइक्वा पुंइसाक्व। यूहन्ना १७:२३; प्रेरित १:४

21 परमप्रभु यावेमी मो गेशो शिशी खेर मसोइक्नुड। यहूदी आन पतीके पाप रे ब्रोंइसीब हना, ख्रीस्त साइक्वा पुंइसीशा बेक्शो शोर गाक्शो मदुम्बा डा?” दे केफास नु मेकेर देल्शा बाक्व आन कली माइक्तामी।

## 3

1 ए गलातीपुकी, गे मरुब्ब मुर दुम्नी बाक्त। सुमी मोपा इन थुं हिरदा? येसु खीस्त कली शीम केष्शा कांटी थोकशा क्याइश्शा साइक्तेक्म, दे इन मिक्चीमी तशो खोदेंब पा नेपाइक्तान्नी। मुल मेको लोत्र प्रेदीनी?

2 मुल लोत्र का निक्शी हिल्लो पाइक्नन्नी। परमप्रभु यावे आ सोक्त दोपा तनी? यहूदी आन पतीक पशोमी तनी देय खीस्त आ लोत्र थमा सुइश्शोमी तनी? लो देनीन।

3 मारेइ मरुब्ब मुर दुम्नी? परमप्रभु यावे आ सोक्तीम प्रिंशो थुं गेचा पुंडसीशा, प्रभु आ लां खोइक्चा गोइतीनी। मिनु मुल मुर आ थुंमी मिम्शो पशा, जाक्दीव्य, दे मिम्तीनी?

4 प्रभु आ लां खोइश्शा गाक्नीनु, मारेइ मारेइ ताइतीनी। मुल मेको लां प्रोंइतीनी हना, मेको नेल्ल मसाम्नीनी डा?

5 परमप्रभु यावेमी इन कली आ सोक्त गेशा, छक लाक्चा डा गेय कोंइताक्व। यहूदी आन पतीक पशो तशा, मोदेंशो छक लाक्चा डा गेय कोंइदा डा? खीस्त कली थमा सुइश्शो तशा, कका छक लाक्चा डा गेय कोंइताक्व।

6 अब्राहाम आ परबंम “अब्राहाममी परमप्रभु यावे कली थमा सुइक्तु। मिनु परमप्रभु यावेमी ठीक दुम्पाइक्तु” दे ब्रेक्शो बाक्ब। उत्पत्ती १५:६; रोमी ४:३

7 थमा सुइक्तीके ठीक दुम्शो मुरपुकी अब्राहाम आ आल नम, दे रूपीने।

8 अर्को रागी डा मुरपुकी थमा सुइक्तीकेमी ठीक दुम्पाइक्चा पुंडसीनीम, दे परमप्रभु यावे आ लोत्रम ब्रेक्शो बाक्ब। मारेदे हना अब्राहाम कली “इ लां रे पा नेल्ल रागी डा मुरपुकीमी आसीक ताइनीम” दे ब्रेक्शो बाक्ब। उत्पत्ती १२:३

9 मोपतीके सु सुमी अब्राहाममी थमा सुइश्शो खोदेशो पा थमा सुदमे, मेकोपुकी अब्राहाम आ आसीक यो ताइनीम। रोमी ४:१६

10 सु सुमी चहिं यहूदी आन पतीक पा, ठीक दुम्चा माल्मे, मेकोपुकी सराप राइनीम। मिनु “परमप्रभु यावेमी अरेशो लोत्र नेल्ल टिचा माल्ब। सु सुमी लोत्र नेल्ल टिशा पशा, का चहिं मटीमे, मेकोपुकी सराप राइनीम” दे ब्रेक्शो बाक्ब। ब्यवस्था २७:२६

11 सुइमी यहूदी आन पतीक पशा परमप्रभु यावे आ डोंइती ठीक मदुम्नीन, दे तुंडसीब। “थमा सुइश्शो रे पा ठीक दुम्पाइक्चा पुंडसीब चहिं गेना हना यो ठीक बाक्नीम” दे ब्रेक्शो बाक्ब। हबकुक् २:४; रोमी १:१७; हिब्रू १०:३८

12 परमप्रभु यावे आ अरेशो लोत्र येसु खीस्त कली थमा सुइक्तीके रे मबाक्ब। “सुइम परमप्रभु यावे आ अरेशो पशो हना, मेको रे पा ब्रोंइ वा” दे ब्रेक्शो बाक्ब। लेवी १८:५

13 खीस्तमी सुइमी मेको लोत्र टिने मचाप्नीम, दे तुइश्शा, इ पा डा सराप रशा, मेको सराप रे प्रोंइतु। मिनु “शीम क्याइश्शा साइक्चा पुंडसीबपुकी सराप रशा बाक्नीम” दे ब्रेक्शो बाक्ब। ब्यवस्था २१:२३; २कोरिन्थी ५:२१

14 खीस्त येसु सराप रमेनु, अर्को रागी डा मुरपुकी यो अब्राहाम आ तशो आसीक ताइनीम। मिनु यहूदी आन पशो पतीक रे ममाइ। खीस्त येसु कली थमा सुइश्शो रे पा गोपुकीमी परमप्रभु यावेमी गेनुड देशो आ सोक्त ताइतय, दे रुब्ब।

### परमप्रभु आ गेशो नु अरेशो लोत्र

15 आं लोक्बपुकी, कथा सेल्शा रुप्पाइक्नन्नी, कागज ब्रेक्शा, ब्रेप्चो दिम्ने थुम्शो डा मेरे मेको ब्रेक्शो लोत्र लीब। सुइमी मारेइ लोत्र क्याम्ने तेम्ने मचाप्नीम।

16 परमप्रभु यावेमी अब्राहाम नु अब्राहाम आ युइ का कली “इ लां रे पा रागी नेल्ल डा मुरपुकी आसीक राइनीम” दे आ लोत्र गेशो बाक्त। शुश आन कली ममाइ “इ युइ का कली” दे ब्रेक्शो बाक्ब। मेको लोत्र खाप्ब चहिं खीस्त बाक्ब। उत्पत्ती २२:१८

17 आं देशो रूपीन। परमप्रभु यावेमी अब्राहाम कली गेशो लोत्र कागज ब्रेक्शा, ब्रेप्चो दिप्शो खोदेशो बाक्ब। मेको लोत्र गेशा, ४ सहें ३० बर्स नोले आ अरेशो लोत्र तुइक्पाइश्शो बाक्त। मेको अरेशो लोत्रमी डोंइती गेशो लोत्र खोइक्ने मचाप्ब। प्रस्थान १२:४०

18 अरेशो लोव्र पतीके हक ताइब दुम हना, परमप्रभु यावे आ गेशो लोव्र खोत वा। परमप्रभु यावेमी “हक ताइनेवे” दे अब्राहाम कली आ लोव्र गेशो बाक्त।

19 अरेशो लोव्र शोर गाक्शो मदुम्बा डा? नेनीन, परमप्रभु यावेमी अब्राहाम कली गेशो लोव्र खाप्व, दे तुइक्नय। मेको युइ मजरमेथु, परमप्रभु यावे आ अरेशो लोव्र रे पा पाप माइशशो मार में, दे तुइसीशो बाक्त। मेको लोव्र परमप्रभु यावे आ स्वर्ग डा गेय पाइबमी गारपाइक्ब का आ गुइमी गेशा, मुर आन कली तुइक्पदा बाक्त। रोमी ५:२०; प्रेरित ७:३८, ५३; हिब्रू २:२; ब्यवस्था ५:५

20 गारपाइक्तीक गेय पचा कली मुर का मदुम्ब। तन्न परमप्रभु यावे आ का ला बाक्शा लोव्र गेशो बाक्त।

21 अरेशो लोव्र नु परमप्रभु यावेमी गेशो लोव्र मगराचा डा लोव्र नसी डा? ममाइ। ब्रोंइचा गेचा कली अरेशो लोव्र का गेशो हना, थमा पा ठीक पतीके अरेशो लोव्र रे पा दुम वा। रोमी ८:२-४

22 तन्न परमप्रभु यावेमी ब्रेक्पाइशशो लोव्रमी “मुर नेल्ल पाप आ वाइलीम वाइल दुम्शो बाक्नीम” दे ब्रेक्शो बाक्ब। सु सुमी येसु ख्रीस्त कली थमा सुदमे, मेको आन थमा सुइशमीन “पाप रे ब्रोंइचा ताइनीम” दे गेशो लोव्र खाप्वो ताम्तेक्म। रोमी ३:९-२०; रोमी ११:३२

23 थमा सुइक्तीक जाक्चा क्येडा डोंइती अरेशो लोव्र पना पन बाक्तक। मोपा थमा सुइक्तीक मजाक्म सम्म चोक्सीशो खोदेशो बाक्तक। गलाती ४:३

24 मोपतीके मेको अरेशो लोव्रम आंइ कली हिंच कोंइशा, ख्रीस्त आ लां गाक्पाइक्ब दुम्त। मोदेशो बाक्त हना, थमा सुइक्तीक रे ठीक दुम्नय।

25 तन्न थमा सुइक्तीक जाक्चा नोले हिंच कोंइब ममाल्नय। रोमी १०:४

26 ख्रीस्त येसु कली थमा सुइशशा, गे नेल्ल परमप्रभु यावे आ तमी तौ दुम्तीनी। यूहन्ना १:१२; रोमी ८:१७

27 गे ख्रीस्त आ नेमी ब्वाक्कुम खुम्शा गुंइपांइसीशोपुकी येसु ख्रीस्त फेक्शो खोदेशो पा, ख्रीस्त नु रां का दुम्तीनी। रोमी ६:३; रोमी १३:१४

28 मोपा रां का दुम्शो आन कली यहूदी नु ग्रीक, वाइल नु होव्रप, मीश मुर नु वोइश मुर मतिल्लीब। मेको ख्रीस्त येसुम नेल्ल खाल का डा बाक्नीम। रोमी १०:१२; १कोरिन्थी १२:१३

29 ख्रीस्त नु रां का दुम्शा, अब्राहाम आ चच युइ दुम्तीनी। परमप्रभु यावेमी अब्राहाम कली गेशो लोव्र गाप्या, हक ताइब दुम्तीनी।

## 4

### हक ताइब दुम्तय

1 मारेइ मतुइक्ब आल हक ताइब दुम्त हना यो, मेको खिं डा तौ बाक्त हना यो, गेय पाइब वाइल खोदेशो मिम्सीब।

2 मेको मकोल्म सम्म ठेयब मुर आन गुइमी बाक्ब। आ आफोमी “मुल आ हक गेचा” मदेंम सम्म आ तचा डा हक मताइब।

3 गोपुकी मेको खिं डा आल खोदेशो बाक्तय। कोल्शा इ हक मतशो सम्म गो एको रागी डा सक्ति आन वाइल दुम्शो बाक्तय। गलाती ५:१; कलस्सी २:२०

4 मिन नोले परमप्रभु यावेमी वोइशशो नाक्त आ तौ कली सोइक्ताक्व। मेको आ तौ मीश मुर रे परमप्रभु यावे आ अरेशो लोव्रमी जरमेसाक्व। मकूस १:१५; एफिसी १:१०

5 मेकोमी मुर दुम्शा, यहूदी आन पतीक पाइब आन कली प्रोंइशा, परमप्रभु यावे आ तमी तौ सेलतीमी।

6 गो आ तमी तौ दुम्शोपुकी परमप्रभु यावेमी आ तौ आ सोक्त गेचा पुंइसाक्व। मेको सोक्तीमी “आब्बा, आं दाक्शो आफ” देब। रोमी ८:१५

7 मोपतीके गो वाइलीम वाइल दुम्चा प्रोंइशा, परमप्रभु यावे आ तमी तौ दुम्शा, हक ताइब दुम्तय। रोमी ८:१६-१७

### तमी तौ दुम्शोपुकी

8 डोंइती गे परमप्रभु यावे कली मतुइक्थु, देवी देवता आन कली सेउ पा, मेको आन वाइलीम वाइल दुम्तीनी।

9 मुल चहिं परमप्रभु यावे कली तुइक्ताकनी। मिनु परमप्रभु यावेमी यो इन कली तुइक्ताकव। मिनु मुल लेंशा डोंइती पशो खोदेशो पचा दाकनीनी?

10 गेपुकीमी बार, औसी, पूर्न नु रीतु मानेनीनी। शुश मोदेशो रिती थिती पाइनीनी देशो नेंता। रोमी १४:५; कलस्सी २:१६, २०, २१

11 गो शुश श्येत पा येसु ख्रीस्त आ लोत्र शेंताकनी। इन कली शेंशा श्येत ला जडा कों, दे मिम्ताकड। २यूहन्ना ८

12 आं लोकबपुकी, गो रिती थिती पचा प्रोंइशा, येसु ख्रीस्त कली थमा सुइक्ता। आं खोदेशो पा थमा सुइक्चा मप्रोंइथु बाककीन, दे इन कली देंनुड। साइ गेपुकी नु बाकडानु, गारशा बाक्तय। गेपुकीमी आं कली वारच पशो मिम्शा, मुल यो मप्रेंनुड।

13 मेना गो रोइ पा, मचाप्यु यो येसु ख्रीस्त आ ग्येरपाइक्ब लोत्र शेंताकनी। १कोरिन्थी २:३; प्रेरित १६:६

14 आं कली मोदेशो रोइ पशो तशा ग्रान्ना मदित्तीनी। मरिम्शो लोत्र यो मपाइय्यीनी। श्येत पा वारच पाइतीनी। परमप्रभु यावे आ स्वर्ग डा गेय पाइब कली ब्रशो खोदेशो पा मान पाइतीनी। ख्रीस्त येसु कली ब्रशो खोदेशो पा ब्रतीनी।

15 मेना ग्येरसीशा बाकतीनी। मुल इन ग्येरसीशो ते लाकगा? मेना इन मिक्च फेशशा, आं मिक्चीम केप्या डा दुम्तीनी। आं बेक्चा डा गेपुकी बेक्चा ठीक दुम्तीनी।

16 मुल इन कली हुइशशा, थमा लोत्र शेंदनीनु, आं कली मरिम्शो सुइक्नीनी?

17 नेनीने, दूली शेंबपुकीमी इन कली मिलो शिलो पा, येसु आ लां खोइक्चा प्रोंइपाइक्चा मालनीम। मेकोपुकीमी इन कली मान पखु पा, आंम आन कली मान पपांइसीनीम। गलाती १:७

18 शेंब आन लोत्र नेंचा रिम्शो बाक्ब। गेपुकी नु बाकती हना यो, मबाकती हना यो, शेंब आन लोत्र नेंचा मप्रोनीन। तन्न शेंशो लोत्र थमा बाक्म कों दूली बाक्म, मेको रुप्या मालनीनी।

19 आं दाकशो आलपुकी, मीश मुरुमी आल थिचामेनु, श्येत जाइनीमी। शुश खाइक्ब। आल थिचशो मीश मुरुमी श्येत जशा खाइशो खोदेशो पा, गो इन कली मिम्शा, श्येत जाइनुड। इन थुंमी ख्रीस्त बारल, दे मिम्शा, मोदेशो पा आं थुं खाइक्ती। १कोरिन्थी ४:१५

20 गेपुकी नु काथा बाक्शा लोत्र पचा तड हना, गिश रिम्शो दुम वा। गो इन कली तशा मार पचा दो पचा दुम्शो बाक्नुड।

### अब्राहाम आ तौ निक्शी

21 गे रिती थिती पचा दाकबपुकी, अरेशो लोत्रमी मार ब्रेक्शो बाक्बा, मेको तुइक्नीनी?

22 मार ब्रेक्शो बाक्ब देशा हना, अब्राहाम आ तौ निक्शी बाक्ताकस। का वाइलीम आ तौ बाक्त, का ग्युंबे पशो मीश आ तौ बाक्त, दे ब्रेक्शो बाक्ब। उत्पत्ती १६:१५; उत्पत्ती २१:२

23 वाइलीम आ तौ मुर आ दाकशो पतीकेम जरमेशा ब्रोंइशो बाक्त। ग्युंबे पशो मीश आ तौ चहिं परमप्रभु यावेमी अब्राहाम कली गेशो लोत्र गाप्शा, जरमेशा ब्रोंइशो बाक्त। रोमी ९:७-९

24 अब्राहाम आ ग्युंबे पशो मीश नु आ वाइलीम मीशेमी कबल पशा लां निक्शी कोंइनीसी। लां का सीनै डा लां बाक्ब। मेकोपुकी वाइलीम वाइल बाक्तेक्म। मारदे हना हागार माइशो वाइलीम आ चच युइ बाक्तेक्म। गलाती ५:१; रोमी ८:१५

25 हागार देशो मार रुम्सीब देशा हना, अराब रागी डा सीनै डांडा रुम्सीब। सिनाक्त मुलाक्त यरूसलेममी बाक्बपुकीमी हागार आ लां खोइशशा, रिती थिती पा वाइलीम वाइल दुम्शो बाक्नीम।

26 इर डा यरूसलेम चहिं प्रोंइसीशो बाक्ब। मेको यरूसलेम कली इं ममा मिम्नय। हिब्रू १२:२२; प्रकाश २१:२

27 मारदे हना “ए गेनायो आल मथीब मीश मुर, कुम्सो पा ग्येरसो। गे आल मथिशो मुर बाक्ते हना यो, इ कली ममा देंब शुश दुम्नीम। ग्युंवे पा आल थिशो नेल्ल आन क्येडा गे मान पाइक्चा पुंडसीनेवे” दे ब्रेक्शो बाक्ब। यसैया ५४:१

28 आं लोकबपुकी, इसहाक जरमेशो खोदेशो पा गे परमप्रभु यावे आ गेशो लोत्र गाप्शा, आ तमी तौ दुम्तीनी।

29 मुर रे जरमेशोमी मेको सोक्त रे जरमेशो कली मदाक्थु हेला पा खेदा पाइब। मेको मोदेशो मुल यो बाक्ब।

30 मिनु मार ब्रेक्शो बाक्त देशो हना “वाइलीम आ तौ कली गुंडशा खेरचा। मारदे हना वाइलीम आ तौ ग्युंवे पशो आ तौ नु हक मताइब” दे ब्रेक्शो बाक्ब। उत्पती २१:१०

31 आं लोकबपुकी, वाइलीम आ चच युइ मनय। ग्युंवे पशो मीश आ चच युइ नय, दे रुब्ब।

## 5

### परमप्रभु आ सोक्तीमी ब्रोंइशो

1 ख्रीस्तमी रिती थिती पतीके लां खोइक्चा प्रोंइपा, थमा सुइक्तीके लां कोंइशा, इं थुं हिरताक्ब। मोपतीके जवा लाप्शो खोदेशो पा लेंशा रिती थिती पा वाइलीम वाइल मदुमीने। गलाती ४:५; प्रेरित १५:१०

2 गो पावलमी “खोइक्तीक चिनु रिती थिती पाइतीनी हना, ख्रीस्त इन पा डा बेक्शो, शोर गाक्शो मदुम्बा डा? शोर गाक्शो दुम्ब” देंनुड।

3 लोत्र थोकशा का का पा शेंनन्नी, खोइक्तीक चिनु खोंइसीबपुकीमी अरेशो लोत्र नु रिती थितीम बाक्शो नेल्ल पचा माल्नीम। का यो प्रोंइचा मदुम्ब।

4 सु सुमी रिती थिती पशोमी ठीक दुम्चा माल्मे, मेकोपुकीमी ख्रीस्त आ पशो साम्शा, मेको रे डोन दुम्शा आ शिशी मताइनीम।

5 गोपुकी “ख्रीस्त आ पतीके ठीक दुम्तय” देंशा, परमप्रभु यावे आ सोक्तीमी तुइक्पाइक्चा पुंडसाक्य।

6 ख्रीस्त येसु नु थुं का दुम्शा, खोइक्तीक चिनु खोइश्शो, मखोइश्शो आन कली मतिल्थु, थमा सुइक्तीकेमी दुशा गारशा दाक्मुशा बाक्शोम सक्ति बाक्ब। गलाती ६:१५; रोमी २:२६; १कोरिन्थी ७:१९

7 डोंइती गे रिम्शो पाइतीनी। तन्न सुम इन कली थमा लोत्र मनंथु, दूली शेंब आन लोत्र नेंचा, दे इन थुं हिरदा?

8 इन कली आ तमी तौ सेल्बमी मोदेशो मपाइब।

9 बोरपाइक्ब ओरुली इक्का खोइ सुप्शोमी शोब्ले नेल्ल बोरपाइक्ब, दे रुपीने। १कोरिन्थी ५:६

10 गे आं शेंशो लोत्र थमा सुइक्चा मप्रोंइनीनी, दे प्रभु रे तुइक्ताकड। सु सुमी इन कली दूली लोत्र शेंशा, इन थुं क्याल्पाइश्शा हिरदमे, मेको आन कली परमप्रभु यावेमी सजाइ गेब, दे यो तुइक्ताकड। गलाती १:७

11 आं लोकबपुकी, नेनीन, गो खोइक्तीक चिनु खोइक्चा माल्ब, दे शेंथ गाक्शो नड हना, खेदा पा श्येत गेचा मपुंडसीड वा। गोमी येसु ख्रीस्त ई पा डा बेक्त, दे थमा सुतीन, दे शेंना शेंन गाक्शो नड। मेको शेंतीक आ पर्वम आन थुं मनुथु श्येत गेतीमी। १कोरिन्थी १५:३०; गलाती ६:१२; १कोरिन्थी १:२३

12 इन थुं क्याल्पाइक्बपुकीमी आंम आन रांमी चिनु खोदमेनु, खसी पशो दुम्मल, देंनुड।

### परमप्रभु आ सोक्त नु मुर आ थुं

13 आं लोकबपुकी, प्रभुमी रिती थिती पचा प्रोंइपाइक्तीकी, दे गेनायो मप्रेदीने। मोपा ब्रोंइशा यो इन दला दाक्स मपने। तन्न दाक्मुशा, वारच पमुशा बाक्कीने। १पत्रुस २:१६; २पत्रुस २:१९

14 “आंम इ कली दाकशो खोदेशो पा, इ नेकथा बाकब आन कली यो दाकतो” देशो लोव्रमी परमप्रभु यावे आ अरेशो लोव्र नेल्ल बाकब। लेवी १९:१८

15 गेपुकी कुचुम जिशा क्राइकमुशो खोदेशो पा जीतीनी हना, खतम दुम्नीकी, दे तुडकतीन। याकूब ४:२

16 लोव्र थोकशा, का निक्शी नु तेम्शा शॅनन्नी, परमप्रभु यावे आ सोक्त रे पा ब्रोंडशा गेय पने। मो पाइतीनी हना ला, इन दला दाक्स मपाइनीनी, इन थुंमी मिम्शा मरिम्शो मपाइनीनी।

17 मुर आ थुंमी मिम्शो पचा नु परमप्रभु यावे आ सोक्तीम ब्रीशो थुं आ मिम्शो पचा मगारब। रिम्शो पय देंतीनी हना यो, रिम्शो पने मचाप्नीनी। रोमी ७:१५, २३

18 परमप्रभु यावे आ सोक्तीमी चहिं इन कली गेय पपाइक्तु हना, रिम्शो पाइनीनी, अरेशो लोव्र मटीब यो मदुम्नीनी।

19 आन दला दाक्स पा मुर आ थुंमी मिम्शो पाइबपुकीमी दोदेशो गेय पाइनीम देशा हना, तेल्लेम पाइनीमी, ग्रांरा दिचा डा गेय पाइनीमी, हेंथे गाकनीमी, १कोरिन्थी ६:९-१०

20 मूर्ति पूजा पाइनीमी, मन्तर तन्तर पाइनीमी, जिचा पोक्नीमी, थुं खाइकपाइक्नीमी, रुश पाइनीमी, शुश चुरनीमी, आंम कली ला मिम्नीमी, गाइश्शा बाकनीमी, दुशा गारशा बाकब आन कली फ्रानीमी,

21 गेहे पाइनीमी, तूशा दुक्शा हेंथे पाइनीमी, शुश जाइनीमी। मारेइ मारेइ मरिम्शो पशा गाकनीम। साइ गोमी मोदेशो गेय पाइबपुकी परमप्रभु यावे आ राज्य ओव्रचा मताइनीम, दे शेंताकनीनी। मुल लेंशा मिम्पाइक्तनीनी। एफिसी ५:५; प्रकाश २२:१५

22 परमप्रभु यावे आ सोक्तीमी ब्रीशो थुं पाइश्शोपुकीमी परमप्रभु यावे आ सोक्त रे पा दोदेशो पाइनीम देशा हना, दाकमुइनीमी, ग्येरनीमी, थुं नाइक्नीमी, शुश फाल्नीमी, रिम्शो पाइनीमी, शिशी पाइनीमी, कबल खाप्नीमी,

23 ब्रेम्शो दुम्नीमी नु आंम कली चलेस जोक्नीमी। मोदेशो पाइब मुर कली परमप्रभु यावे आ अरेशो लोव्रमी मारेइ मपाइब। १तिमोथी १:९

24 सु ख्रीस्त येसु आ मुर दुम्शो बाकनीमी, मेकोपुकीमी आंम रां डा दला दाक्स येसु ख्रीस्त खोदेशो पा शीम क्याइक्ने थुम्शो बाकनीमी। रोमी ६:६

25 गो परमप्रभु यावे आ सोक्तीमी ब्रोंडतय हना, इं गेय यो परमप्रभु यावे आ सोक्तीमीन पय। रोमी ८:४

26 मोपतीके टेयब मसेल्सीय, मगाइकमुय अरु आन कली रिम्शो दुम्शो तशा गेहे मपय। फिलिप्पी २:३

## 6

### दाकमुशा, रिम्शो गेय पा बाक्य

1 आं लोकबपुकी, सुमी आ थुंमी मिम्शा, दला दाक्स पा प्रभु आ देशो मटिथु मरिम्शो दुम्मे, गे मेको कली परमप्रभु यावे आ सोक्तीमी ब्रीशो थुं पाइश्शोपुकीमी, टेयब मलेत्थु, रिम्शो लोव्र पा, आ थुं परमप्रभु यावे गे लेप्पतीने। मो पनीनु, थुं थाम्चा मपुंइसेक्ल, दे होस पा बाक्कीन। मती १८:१५; याकूब ५:१९

2 कामी अर्को कली वारच पने। मोपा गे ख्रीस्त आ अरेशो लोव्र खाप्नीनी। २कोरिन्थी ११:२९

3 सुइ टेयब मसुइसेक्ल। मजोक्थु यो जोक्ब तुडक्ब नड, दे टेयब लेप्बमी आंम कली जोल पांइसीब।

4 परमप्रभु यावे आ सोक्तीम गेय पडा कों, आंम दला दाक्स पडा कों, दे का का पा मिम्शा तुडकतीने। मिनु ला गे “गो रिम्शो पाता” देने चाप्नीनी। २कोरिन्थी १३:५

5 मारदे हना नेल्लेमी आंम गेय आंमा पचा माल्ब। रोमी १४:१२

6 ख्रीस्त आ लोव्र शेंचा पुंइसीबमी शेंब कली आ नु बाकशो रिम्शो थोकशा योकशा गेवल। १कोरिन्थी ९:१४

7 परमप्रभु यावे कली कोंइखु पा जोल पचा मदुम्ब। परमप्रभु यावेमी नेल्ल तुइश्शो बाकब। मोपतीके दूली ममिन्तीने। मुरपुकीमी मार शोकगमे, मेको रुप्नीम। येरमीया २१:१४

8 आंम आन थुं डा मिम्शो गेय पाम्तेक्म हना, मेको आन गेय मलीथु जाम्शा लाइब। मिनु आ यो जाम्शा लाइनीम। परमप्रभु यावे आ सोक्तीम गेय पाम्तेक्म हना, परमप्रभु यावे आ सोक्त रे पा गेना हना यो ब्रोंइशा बाक्चा ताइनीम। रोमी ८:१३

9 रिम्शो गेय पचा मदने। मोपा ला गो रूप्ची ना रूप्ने चाप्नीकी। २थिस्सलोनिकी ३:१३

10 सुइ कली रिम्शो पचा ताइतय हना, रिम्शो पय। नेल्ल क्येडा डोंइती थमा सुइक्ब लोकब आन कली वारच पय। २पत्रुस १:७

नोले डा लोव

11 ठेयब ठेयब अच्छेर ब्रेक्शो तशा, पावल आ ब्रेक्शो बाक्त, दे तुइक्नीनी।

12 दूली शेंबपुकीमी खोइक्तीक चिनु खोइक्चा माल्ब देशा, इन कली यहूदी रिती थिती पपाइक्चा माल्नीम। “ख्रीस्त शीम केप्शा कांटी थोकशा साइक्चा पुंइसाक्व” दे शेतीक लोव आ पर्बम खेदा पचा पुंइसीब, दे तुइक्नीम। मोपतीके खेदा पचा मपुंइसेक्ल, दे दूली लोव शेंनीम। गलाती ५:११

13 आंइ यहूदी रिती थिती नेल्ल मपाइनीमी, खोइक्तीक चिनु ला खोइक्नीम। मिनु इन कली खोइक्तीक चिनु खोइश्शो तचा दाक्नीम। मोदेशो पशो तशा “आंइ शेंशो पामे बाक्त” दे आन नें बोरपाइश्शा गाक्चा ताइनीम।

14 नें बोरपाइक्चा दा गो यो आं नें बोरपाइश्शा गाक्ती। तन्न मुर आन पशो तशा ममाइ। इं प्रभु येसु ख्रीस्त इं पा डा शीम केप्शा कांटी थोकशा साइक्चा पुंइसीशा, इं पाप क्याम्ताक्व, दे ख्रीस्त आ पशो मिम्शा, आं नें बोरपाइश्शा गाक्ती। ख्रीस्त आ गेय डा लाक्शा मारेइ ठेयब ममिम्नुड। रागी डा मिम्तीक पतीक नेल्ल बेक्शो खोदेशो मिम्ताक्ड। रागीमी यो आं कली बेक्शो खोदेशो मिम्ताक्व। १कोरिन्थी १:३१; १कोरिन्थी २:२

15 खोइक्तीक चिनु खोइक्चा, मखोइक्चा मेको ममिम्तीने। ख्रीस्त येसु नु थुं का दुम्शा, नक मुर दुम्चा चहिं नेल्ल क्येडा ठेयब बाक्ब, दे रूपीने। गलाती ५:६; १कोरिन्थी ७:१९; २कोरिन्थी ५:१७

16 गे सु सु आं देशो लोव टिशा पाइनीनी, मेको थुं नाइश्शा नु शिशी तशा बाक्चा ताइनीम। मेको ला ममाइ, परमप्रभु यावे कली थमा सुइक्ब, इस्राएली, दे नें वोइक्चा पुंइसीनीम। भजन संग्रह १२५:५

17 मुल डा मेरे सुइमी श्येत मगेयीमील। येसु आ नेमी श्येत जशा, तुप्चा, युक्चा पुंइसीशो चिनु आं रांमी शुश बाक्ब। २कोरिन्थी ४:१०

18 आं लोकबपुकी, इं प्रभु येसु ख्रीस्तमी इन कली शिशी पा, आ सोक्त इन थुंमी लीपदल। आमैन।



## एफिसी

**ब्रेक्ब मुर:** एको चिठी पावलमी ब्रेक्शो बाक्ब।

**गेना ब्रेक्शो:** एको चिठी नु कलस्सी आन कली चिठी कालेमी ब्रेक्शो बाक्ब। मारदे हना तिरखीकसम एको चिठी निक्शी चाक्शो बाक्त। एको चिठी रोम सहर रे ६२ ए. डी. नुप्ची ना कि ६३ ए. डी. गोची ना ब्रेक्शो बाक्त।

**मारदे ब्रेक्शो:** तेइ तेइ थमा सुइक्बपुकी श्येत जशा, आन योव्रचा पुंडसीतीके नु येसु नु बाक्शा परमप्रभु यावे आ डोंइती ठीक दुम्तीके तुइश्शा मिम्चा माल्नीम। एको चिठीम थमा सुइक्ब आन गुम्तीकेम मार पचा नु मार मपचा, दे शेंशो बाक्ब। एको का निक्शी गुम्तीक कली ब्रेक्शो चिठी बाक्त हना यो, अरु क्येडा डोंइती एफिसी डा गुम्तीक डा थमा सुइक्ब कली पढेचा कली चाक्शो बाक्त।

डोंइती डा लोव्र

1 गो पावल नड। ख्रीस्त येसुम आं कली सोइक्ताकयी। मेको परमप्रभु यावे आ दाक्शो बाक्त। मिनु गो एको चिठी एफिसस सहरम बाक्ब येसु ख्रीस्त कली थमा सुइक्ब, परमप्रभु यावे आ मुर इन कली ब्रेक्ताक्नी।

2 इं आफ परमप्रभु यावे नु इं प्रभु येसु ख्रीस्तमी इन कली शिशी पा थुं नाइश्शा बाक्चा गेम्सेक्ल।

परमप्रभु कली ठेयब सेल्शो

3 इं प्रभु येसु ख्रीस्त आ आफ परमप्रभु यावे कली “गे ठेयब बाक्नीनी” देंय। मारदे हना मेकोमी स्वर्गम आ सोक्तीम पतीके इं कली आसीक गेपु। मेको नेल्ल ख्रीस्तम बाक्ब।

4 मोपतीके रागी सेल्चा क्येडा डोंइती परमप्रभु यावेमी इं कली योव्रतु। मार कली योव्रतु देशा हना, गोपुकी परमप्रभु यावे आ मुर दुम्शा, दोस मताइब नु दाक्ब दुम्यल, दे योव्रतु। रोमी ८:२८-३०; एफिसी ५:२७

5 मिनु परमप्रभु यावेमी इं कली दाक्शा “येसु ख्रीस्त कली थमा सुइक्ब दुम्नीम” दे आंम आ तमी तौ सेलु। मेकोन परमप्रभु यावे आ दाक्शो बाक्त।

6 मिनु मेकोमी इं कली आ दाक्शो तौ आ पतीक रे मुरुमी मिम्ने मचाप्चा डा शिशीम ठेयब सेल्चा कली आ तमी तौ सेलु। मती ३:१७

7 मोपा गोपुकी येसु ख्रीस्त आ हुशेम पतीके माफ तशा ब्रोंइशा बाक्नय। इं हेंथे पशो आ पर्बम माफ ताइनय। दोपा माफ तशा ब्रोंइशा बाक्नय देशा हना, मुरुमी मिम्ने मचाप्चा डा आ शिशी रे पा माफ ताइनय। कलस्सी १:१४; एफिसी २:७; एफिसी ३:८,१६

8 मिनु मेको आ जोक्तीक तुइक्तीक नेल्लेमी आ शिशी इं तारी मोइश्शो बाक्त। एफिसी ३:३-६,९; रोमी १६:२५; कलस्सी १:२६-२७

9 परमप्रभु यावेमी इं कली डोंइती ख्रीस्त रे आ थुंमी खुइश्शा वोइश्शो लोव्र तुइक्पाइक्चा दाक्ताक्ब।

10 मिनु मेको नेल्ल ठीक दुम्मेनु, परमप्रभु यावेमी ख्रीस्त कली रागीमी सोइक्ताक्ब। मोपा रागी नु स्वर्गमी बाक्ब, इस्राएली नु अर्को रागी डा मुर नेल्ल आन कली ख्रीस्तमी का सेलु। गलाती ४:४

11 परमप्रभु यावेमी ख्रीस्त रे पा आ आल सेल्शा, इं कली योव्रतु। मारदे हना डोंइती रे योव्रनुडमी, दे मिम्शो बाक्माक्त। मेकोन पापु। कलस्सी १:१२

12 गोपुकी डोंइती “ख्रीस्तमी आंइ कली मरिम्शो रे प्रोंइब” दे आस पाइतक। मोपतीके परमप्रभु यावेमी आंइ कली “आ सक्ति ठेयब बाक्ब” दे ब्रोंइचा गेचा कली योव्रतीकी।

13 मिनु गोपुकीमी यो “येसु ख्रीस्तमी पाप रे प्रोंइब” देशो थमा ग्येरपाइक्ब लोव्र नेंतीनी। ख्रीस्त कली थमा सुइक्तीनी। मिनु परमप्रभु यावेमी डोंइती देशो खोदेशो पा आ सोक्तीमी छाप थोक्सीशो बाक्तीनी। एफिसी ४:३०

14 आ सोक्त चहिं गोपुकी परमप्रभु यावे नु बाक्की मजाकम सम्म कली परमप्रभु यावे आ तमी तौ दुम्ने थुम्शो नय, दे कौइतीक बाक्ब। मोपतीके “परमप्रभु यावे आ सक्ति ठेयब बाक्ब” देंनय।

### पावलम पशो प्रार्थना

15 गोपुकी प्रभु येसु कली थमा सुइक्ब आन कली दाक्ताक्नी, दे गो इन पर्वम लोव्र नेता।

16 मोपतीके गो इन कली मिम्शा, परमप्रभु यावे कली “गे एफिसस डा मुर आन कली रिम्शो पाइतीनी” दे ठेयब सेल्शा, लोव्र पना पन बाक्नुड। कलस्सी १:४,९

17 मार लोव्र पना पन बाक्नुड देशा हना “परमप्रभु यावे, आंइ प्रभु येसु ख्रीस्त आ आफ ननी। गे नेल्ल छेडछेड डा आफ बाक्नीनी। गे एफिसस डा थमा सुइक्ब आन कली येसु ख्रीस्त कली तुइक्तीकेमी रिम्शो गेय पस जोक्तीके नु नोले मार दुम्बा तुइक्तीक सोक्त गेने।

18 गे मेको आन कली मार कली ब्रेशो बाक्नीनी, थमा सुइक्ब आन ततीक मार बाक्बा, इन छेडछेड गिश ठेयब बाक्बा, मेको नेल्ल रुप्तीक थुं गेने।

19 मिनु गो थमा सुइक्ब आंइ कली इन ठेयब सक्तिम मार पाइनीनी नु इन गेशो बोल गिश ठेयब बाक्मे, मेको रुप्तीक थुं यो गेने।

20 मेको सक्तिमी ख्रीस्त कली बेक्शो रे सेंशा, स्वर्ग डा इन बाक्तीकेमी इन ग्युरा गे निप्पाइक्तीनी। भजन संग्रह ११०:१

21 मिनु हुकुम पाइब, अधिकार पाइश्शो, सक्ति पाइश्शो ठेयब दुम्शो नेल्लेमी ख्रीस्त कली प्रभु देंचा माल्नीमी। मेको नेल्ल आन क्येडा ठेयब नें बाक्ब। मुल ला ममाइ, नोले यो मोदेंशोन बाक्ब। रोमी ८:३८-३९; फिलिप्पी २:९; कलस्सी २:१०

22 मिनु गेमी मारेइ मारेइ आन कली येसु ख्रीस्त आ खोइलीमी दिम्पाइक्तीनी। थमा सुइक्बपुकी रां का खोदेंशो सेल्शा, येसु ख्रीस्त कली मेको रां आ पिया सेल्तीनी। भजन संग्रह ८:७; मत्ती २८:१८; एफिसी ४:१५

23 मोपा थमा सुइक्बपुकी येसु ख्रीस्त आ रां दुम्तेकम। मिनु मेको रां आ पिया येसु ख्रीस्त आंमान दुम्शा, मारेइ मारेइ खाप्शो बाक्त” दे लोव्र पाइनुड। एफिसी ३:३०; १कोरिन्थी १२:२७; कलस्सी १:१९

## 2

### बेक्शो रे ब्रोंइशो

1 गोपुकी डोंइती बेक्शो मुर खोदेंशो बाक्तीनी। दोपा मोदेंशो बाक्तीनी देशा हना, मरिम्शो पशा, परमप्रभु यावे कली मटिथु, हेंथे गाक्शो बाक्तीनी। लूका १५:२४,३२; कलस्सी २:१३

2 मिनु रागी डा मुर आन लां खोइक्तीनी। मोपा फशेम हुकुम पाइब, सैतान आ देंशो टीब बाक्तीनी। मेको आ सोक्ती परमप्रभु परमप्रभु यावे कली मटीब आन आगाम बाक्ब। तीतस ३:३; एफिसी ६:१२; यूहन्ना १२:३१

3 मिनु डोंइती गो नेल्ल मोदेंशो रागी डा मुर बाक्तय। गोपुकी यो मार दाक्तय, मेकोन पाइतय। इं रां नु थुंमी मार दाक्ता, मेकोन पाइतय। मोपतीके गोपुकी यो अरु मुर खोदेंशो पा गाइक्ब आ आल दुम्तय। १पत्रुस ४:३; कलस्सी ३:६

4 तन्न परमप्रभु यावे शुश शिशी पाइब दुम्तीके इं कली तशा, शिशी पा दाक्ताक्ब।

5 मेना गोपुकी मटिथु बेक्शो बाक्तय हना यो, मेकोमी इं कली ख्रीस्त नु कालेम सेंताक्ब। मोपा आ शिशी रे गोपुकी ब्रोंइशो बाक्तय।

6 मिनु परमप्रभु यावेमी इं कली ख्रीस्त येसु नु सेंशा, मेको नु स्वर्गमी काथा बाक्पाइश्शा, फिलिप्पी ३:२०

7 मुरुमी मिम्ने मचाप्चा डा ठेयब शिशी आंम आ दाक्तीकेमी ख्रीस्त येसु रे नोले डा मुर आन कली कौइचा कली पाप्तु। एफिसी १:७

8 मिनू गेपुकी परमप्रभु यावे आ शिशी तशा, थमा सुइक्तीके पाप रे ब्रोंइतीनी। मेको इन पतीके ममाइ, परमप्रभु यावेमी मोशा गेशो बाकब। रोमी ३:२३-२४; गलाती २:१६

9 मेको मुरुम पशो ममाइ, मोपतीके सुइ ठेयब लेन्ने मचाप्नीम। रोमी ३:२८; १कोरिन्थी १:२९

10 गोपुकी परमप्रभु यावे रे ख्रीस्त येसु आ पतीकेमी सेल्शो बाकनय। परमप्रभु यावेमी इं कली रिम्शो गेय वोइश्शो बाकत। मेको पचा मालनय। तीतस २:१४

ख्रीस्तमी नेल्ल का बाक्नीम

11 डोंइती गेपुकी परमप्रभु यावे आ देंशो लोव्र मतुइक्ब बाक्तीनी। मुर आन गुइ रे खोइक्तीक चिनु खोइश्शो, इस्राएलीपुकीमी इन कली “खोइक्तीक चिनु मखोइश्शो मुर नम” देंतेक्म। मेको मप्रेदीन। एफिसी ५:८

12 मेना गेपुकी ख्रीस्त रे डोन बाक्तीनी। इस्राएल डा मुरपुकी रे यो डोन बाक्तीनी। मोपा परमप्रभु यावेमी पशो कबल मतुइक्ब, आस मपाइश्शो नु परमप्रभु यावे कली मतुइक्ब मुर बाक्तीनी। रोमी ९:४; १थिस्सलोनिकी ४:१३

13 मुल चहिं गे ख्रीस्त येसु रे डोन बाक्बपुकी ख्रीस्त आ हुशेम पतीके मेको आ नेक्था दुम्तीनी।

14 मेको इं कली दुशा बाक्चा गेब बाकब। मेकोमी इस्राएली नु अर्को रागी डा थमा सुइक्ब आन कली का सेल्लु। मिनू मेको आन दातेमी बाक्शो दुचा मगेब गारो प्रेशा, जितिक खेतीक नेल्ल साम्तु। यसैया ९:५; गलाती ३:२८

15 दोपा साम्तु देंशा हना, यहूदी आन कली अरेशो, शेंशो, फुल्लुम मुशा ब्रेक्शो लोव्र डा गेय नेल्ल आ रां साइक्चा गेशा साम्तु। मिनू मेकोमी जात निक्शी के जात का सेल्शा, नक मुर सेल्लु। मोपा दुशा बाक्चा गेपु। कलस्सी २:१४

16 येसु ख्रीस्तमी इं कली परमप्रभु यावे नु गारपाइक्चा कली शीम कांटी थोक्चा पुंडीशा बेक्त। मोपा इस्राएली नु अर्को रागी डा जिचा खेचा साम्शा, निम्फा आस कली परमप्रभु यावे नु गारपाइक्चु।

17 मिनू येसु ख्रीस्त रागीमी जाक्शा, डोन बाक्ब इन कली नु परमप्रभु यावे आ नेक्था बाक्ब आन कली परमप्रभु यावे नु दोपा दुशा बाक्चा, मेको शेंताक्व। यसैया ५७:१९

18 मोपा गोपुकी परमप्रभु यावे आ सोक्तीम पतीके नेल्ल येसु ख्रीस्त रे पा इं आफ परमप्रभु यावे आ नेक्था जाक्दीलनय। एफिसी ३:१२

19 मोपतीके गेपुकी मुल रे डोन बाक्ब अर्को रागी डा मुर मननी। परमप्रभु यावे आ राज्य डा, अरु थमा सुइक्बपुकी नु आ खिं डा मुर बाक्नीनी। एफिसी ३:६; हिब्रू १२:२२-२३

20 मिनू ख्रीस्त आ सोइश्शो नु साइ डा परमप्रभु यावे आ लोव्र पाइबपुकी जग खोदेंशो दुम्तेक्म। गेपुकी चहिं मेको तारी सेल्शो खिं खोदेंशो ननी। ख्रीस्त येसु मेको खिं डा डोंइती वोइश्शो जग फुल्लु खोदेंशो बाकब। मत्ती १६:१८; यसैया २८:१६; १पत्रुस २:४-६मत्ती १६:१८

21 मेको तारी फुल्लु नेल्ल प्रोव्रशीशा, परमप्रभु यावे आ खिं दुम्चा कली बारना बारन लाइब।

22 मिनू गेपुकी यो परमप्रभु यावे आ सोक्तीम पतीके परमप्रभु यावे आ खिं बाक्नीनी।

### 3

पावलम अरु आन कली पशो गेय

1 मिनू गो पावल अर्को रागी डा मुर इन कली ख्रीस्त येसु आ लोव्र शेंतीके साडलोम पाइक्साक्यी। फिलिप्पी १:७, १३

2 परमप्रभु यावेमी “अर्को मुर आन कली आं शिशी आ परबम शेंदो” दे आं कली गेय पाइब सेल्लती। गेपुकीम एको लोव्र नेंशो बाक्नी माइ, दे मिन्नुड। गलाती २:७

3 दोपा परमप्रभु यावेमी आ खुइश्शो लोव्र आं कली तुइक्पदा, मोपा डोंइतीन इन कली इचइक्का ब्रेक्ने थुम्शो बाक्ती। एफिसी १:९-१०; गलाती १:१२

4 मिनू गेपुकीमी मेको पढेनीनु, ख्रीस्त आ परबम खुइश्शो लोव्र डा गेय दोपा पवा, दे आं तुइश्शो लोव्र रुप्ने चाप्नीनी।

5 मुल परमप्रभु यावे आ सोक्तीमी येसु ख्रीस्त आ सोइशशो नु परमप्रभु यावे आ लोत्र पाइब आन कली परमप्रभु यावे आ खुइशशो मार बाकबा, दे शेंताकडमी। डोंइती डा मुरपुकीमी चहिं मतुइशशो बाक्तेकम। कलस्सी १:२६

6 मिनु मेको खुइशशो लोत्र मार बाकब देशा हना, अर्को रागी डा मुरपुकी यो इस्राएली नु खाल का डा दुम्शा, अडस ताइब बाक्नीम। मेको नेल्ल रां का नम। ग्येरपाइक्ब लोत्रमी मार देंब देशा हना, ख्रीस्त येसु कली थमा सुइशशा, मेकोपुकी यो परमप्रभु यावे आ कबल ताइब बाक्नीम। एफिसी ३:१३, १८-१९; प्रेरित १५:७-९

7 मोपा अर्को रागी डा मुर आन कली ग्येरपाइक्ब लोत्र शेंचा, दे शेंब सेलती। परमप्रभु यावे आ सक्ति पतीके आ शिशी मोशा गेपुतु।

8 गो परमप्रभु यावे आ मुर नेल्ल आन क्येडा आइक्च बाक्नुड। मिनु परमप्रभु यावेमी आ शिशी रे आं कली “अर्को रागी डा मुर आन कली ख्रीस्त आ शिशी गिश ठेयब बाकबा तुइक्पाइक्मी” दे शेंब सेलती। १कोरिन्थी १५:९-१०; गलाती १:१६; एफिसी १:७

9 मिनु मारेड मारेड सेल्ल परमप्रभु यावेमी रागी सेल्लो रे खुइशशा वोइशशो नेल्ल आन कली तपाइक्चा, दे कोइब सेलती। एफिसी १:९-१०; रोमी १६:२५-२६; कलस्सी १:१६

10 मारदे आं कली मोदेशो सेलती देशा हना, येसु ख्रीस्त कली थमा सुइक्बपुकीमी परमप्रभु यावे आ मिम्शो मार बाकबा, मेको स्वर्गम बाक्ब हुकुम नु अधिकार पाइब आन कली तुइक्पदमेक्ल, दे आं कली कोइब सेलती। १पत्रुस १:१२

11 मेको परमप्रभु यावे आ गेना हना यो मिम्शो लोत्र बाक्त। मेको मुल इं प्रभु ख्रीस्त येसु रे खाप्शो बाक्त।

12 मोपा येसु ख्रीस्त कली थमा सुइक्तीकेमी गोपुकी महिंथु, इं कली दाक्ब, दे तुइशशा, परमप्रभु यावे आ नेक्था जाक्दीनय। रोमी ५:२

13 इन पबंम गो श्येत जशो बाक्नुड। मेको इन कली रिम्शो दुम्ब। मोपतीके आं कली श्येत जशो तशा महिनीन। कलस्सी १:२४

14 मोदेशो पा गो इं आफ परमप्रभु यावे आ डोंइती बाप्शा, पोक्च थेक्शा, इन कली मिम्शा पुंइशा बाक्नुड।

15 परमप्रभु यावे सरीड नु रागीम बाक्ब नेल्ल आन आफ बाक्ब।

16 मिनु गोमी परमप्रभु यावे कली “इन शुश छेडछेड नु सक्तिम, एफिसस डा थमा सुइक्ब आन थुं बोल्यो सेलीन। मिनु इन सोक्त आन थुंमी बाक्मेनु, महिंब दुम्नीम। एफिसी १:७; एफिसी ६:१०; २कोरिन्थी ४:१६

17 मोपा थमा सुइक्तीके ख्रीस्त मेको आन थुंमी बाक्ब। मिनु ‘येसु ख्रीस्तमी आं कली दाक्ब’ दे शाक्श युक्शो रवा खोदेशो पा इन दाक्तीकेमी खुम्शो मुरपुकी सेलीन। यूहन्ना १४:२३; कलस्सी २:७

18 मो दुम्मेनु, मेकोपुकी नु नेल्ल थमा सुइक्बपुकीमी येसु ख्रीस्त आ मुर आन कली दाक्तीके गिश ब्रेम्शो, गिश दुइशशो, गिश लाइशशो नु गिश लुक्च लशो बाक्मे, मेको नेल्ल रुप्तीक थुं गेने।

19 ख्रीस्त आ दाक्तीके गिश ठेयब बाक्बा, मेको रुप्ने मचाप्चा डा बाक्त हना यो, मेको आन कली रुप्पतीन। मिनु परमप्रभु यावे, गे दोपा मारेड मारेडमी गाप्शो बाक्नीनी, मोपा मेको आन कली यो इन सक्तिमी प्रिंदीन। कलस्सी २:२-३

20 गे नेल्ल आन क्येडा ठेयब सक्ति पाइशशो बाक्नीनी। मोपतीके इन सक्ति रे आंइ पुंइशो नु मिम्शो क्येडा यो शुश गेने चाप्नीनी।

21 मिनु थमा सुइक्ब आंइ दातेमी येसु ख्रीस्त आ नेमी नेल्ल पाला डा मुरपुकीमी इन कली गेना हना यो ठेयब सेलनीकी, आमेन” दे इन पबंम पुंइनुड।

## 4

1 गो प्रभु आ पबर्म ग्याइक्चा पुंडसीब, इन कली अरेनुड। गेपुकी परमप्रभु यावे आ ब्रेशो दुम्शो बाक्नीनी। मोपतीके परमप्रभु यावे कली शिरशो गेय पने।

2 गेपुकी ब्रेम्शो दुम्शा, सुइ नु मचुरथु, रिम्शो पा बाक्कीन। मुर आन कली फाल्शा, मेकोपुकी नु रिम्शो पा दाक्मुने। कलस्सी ३:१२-१३

3 मिनु दोपा परमप्रभु यावे आ सोक्तीमी थुं का सेल्बा, मोपा थुं का दुम्शा दुशा बाक्कीन। कलस्सी ३:१५; फिलिप्पी २:२

4 दोपा रां नु सोक्त का बाक्नीसी, मोपा थुं का दुमीन। गे नेल्ल इन आस कान बाक्ब। मोपा ब्रेत्चा पुंडसाक्नी। रोमी १२:५

5 मोपा प्रभु का, थमा सुइक्तीक का नु ब्वाक्कुमी खुम्शा गुंडचा यो का ला बाक्ब। १कोरिन्थी ८:६

6 मिनु नेल्ल इं आफ परमप्रभु यावे यो का ला बाक्ब। मेको नेल्ल आन क्येडा ठेयब बाक्ब। नेल्ल पतीकेमी नु नेल्ल आन आगाम बाक्ब। १कोरिन्थी १२:६

7 इं कली नेल्ल शिशी गेशो बाक्ब। मेको ख्रीस्तमी “आं गेय पचा कली गिश माल्बा” दे मो गेशो बाक्ब। रोमी १२:३-६; १कोरिन्थी १२:१

8 मिनु मार ब्रेक्शो बाक्त देशा हना “मेको इर परमप्रभु यावे आ बाक्तीक लमेनु, चोक्सीशो शुश आन कली लाइक्तु। मिनु मुर आन कली गेय पतीक सक्ति गेपु” दे ब्रेक्शो बाक्ब। भजन संग्रह ६८:१९; कलस्सी २:१५

9 मिनु इर लचा देशो, मार रुम्सीब देशा हना, मेको डोंइती रागी आगा तोंइसीशो बाक्ब, दे रुम्सीब। यूहन्ना ३:१३

10 मिनु मेको रागी आगा तोंइसीब सरीड क्येडा ता लाइब यो बाक्ब। मोपा मेकोमी मारेड मारेड खापुतु।

11 मिनु येसु ख्रीस्तम मुर आन कली गेशो गेय मार बाक्ब देशा हना, का निक्शी आ सोइश्शो दुम्नीम, का निक्शी परमप्रभु यावे आ लोत्र पाइब दुम्नीम, का निक्शी ग्येरपाइक्ब लोत्र नेपाइक्ब दुम्नीम, का निक्शी थमा सुइक्ब आन कली कोत्रब नु शेंब दुम्नीम। १कोरिन्थी १२:२८; प्रेरित २१:८

12 मेको गेय मार कली बाक्ब देशा हना, परमप्रभु यावे आ मुर आन थमा सुइक्तीके बारपाइक्चा कली बाक्ब। थमा सुइक्ब आन गुम्तीक, ख्रीस्त आ रां दुम्शा, मेकेर डा मुर बोल्यो सेल्चा कली गेशो गेय बाक्ब। १कोरिन्थी १४:२६; १पत्रुस २:५

13 मोपा गो नेल्ल थमा सुइश्शा, का दुम्तीके परमप्रभु यावे आ तौ कली तुइक्ब दुम्नय। मिनु मोदेशो पा गोपुकी आइक्च आल ममाइ, कोल्शा चोक्शो मुर दुम्शा, ख्रीस्त दोदेशो बाक्मे, मोदेशो दुम्नय।

14 गोपुकीम आल खोदेशो पा मुर आन शेंशो हेंथे लोत्र थमा सुइक्चा मदुम्नय। दूली शेंबपुकीमी निप्स खाप्शा, मुर आन कली जोल पा फश लोत्र शेंशा, दूली लां खोइक्पाइक्नीम। १कोरिन्थी १४:२०; हिब्रू १३:९; याकूब १:६

15 गोपुकी चहिं मुर आन कली दाक्शा, थमा शेंतीक लोत्र शेंशा, मारेड मारेडमी इं पिया ख्रीस्त खोदेशो दुम्नय। एफिसी १:२२; एफिसी ५:२३; कलस्सी १:१८

16 मोपा येसु ख्रीस्त पिया दुम्तीके रां नेल्ल का खोदेशो पा गारपाइक्ब। थमा सुइक्बपुकीमी ठीक गेय पांमेक्म हना, मेको रां बारना बारन लशा, थमा सुइक्बपुकी दाक्मुइनीम। कलस्सी २:१९

### माइत नु नक मुर

17 परमप्रभु यावे कली मतुइक्ब मुरपुकी जाम्शा लाइब गेय ला मिम्शा पाइनीम। मिनु गेपुकी मुल रे मेको आन खोदेशो मपने, दे प्रभु आ नेमी इन कली रिम्शो पा अरेनुड। रोमी १:२१-२४

18 मेको आन थुं फुल्लु खोदेशो पा खकटा दुम्तीके परमप्रभु यावे कली मतुइक्ब बाक्तेक्म। मोपतीके मेकोपुकी छिडछिडमी बाक्शो खोदेशो पा परमप्रभु यावे कली रुम्ने मचाप्नीम। मिनु मोपा परमप्रभु यावे रे डोन बाक्नीम। एफिसी २:१२

19 मेकोपुकी रिम्शो मुर दुम्शा बाक्चा ताइश्शा, आन दला दाक्स पा, ग्रान्रा दिचा डा गेय नेल्ल शुश दाक्नीम।

20 गेपुकी चहिं खीस्त कली तुइशशा, मोदेशो मशेंसीनी।

21 थमा पा येसु खीस्त आ पर्वम लोत्र नेंतीनी। मिनु येसु आ थमा लोत्र तुइशशो बाक्तीनी।

22 मोपतीके इन डोंइती डा ग्रांग्रा दिचा डा दला दाक्स पाइब माइत थुं डा मुर दुम्शा बाक्चा ताइक्तीने। मारदे हना मेकोम इन कली खतम सेल्ब। कलस्सी ३:९-१०; रोमी ८:१३; गलाती ६:८

23 मिनु इन थुंमी बाक्शो माइत सोक्त नक सेल्चा गेने। रोमी १२:२

24 परमप्रभु यावे आ थुं खोदेशो पा थमा पा ठीक पतीकेमी परमप्रभु यावे आ मुर दुम्शा बाक्कीन। उत्पत्ती १:२६-२७

### नक मुरुमी पचा माल्शो गेय

25 मारदे हना गो नेल्ल रां का नय, मुर आन कली जोल पचा ताइक्तीने। थमा लोत्र ला पने। जकरिया ८:१६

26 गाइक्ताक्नी हना, पाप मपने। मिनु नां रिक्चा क्येडा डोंइती इन गाइक्चा थुमीने। भजन संग्रह ४:४; याकूब १:१९-२०

27 मोपा सैतान कली गेय पचा मगेने।

28 खुड पाइबमी लेंशा खुड मपथु, ठीक गेय पचा माल्ब। मिनु मेकोमी रिम्शो गेय पवानु, श्येत जाइब आन कली यो वारच पने चाप्ब। प्रस्थान २०:१५; १थिस्सलोनिकी ४:११

29 गेपुकी नना ओल लोत्र काइ मपने। मुर आन कली रिम्शो दुम्ब नु गारचा डा लोत्र ला पने। मुरपुकीमी इन रिम्शो लोत्र नेन्मेनु, परमप्रभु यावे आ शिशी रुप्मेक्ल। एफिसी ५:४; कलस्सी ४:६

30 परमप्रभु यावे आ सोक्त कली थुं मखाइक्पतीन। मारदे हना गेपुकी परमप्रभु यावे आ बाक्तीके मजाक्दीन्नी सम्म परमप्रभु यावे आ सोक्तीमी छाप थोकसीशो बाक्नीनी। यसैया ६३:१०; एफिसी १:१३-१४

31 मिनु ईख कुरचा, चुरचा, गाइक्चा, ग्रीचा, मरिम्शो लोत्र पचा नु मरिम्शो पचा नेल्ल ताइक्तीने। कलस्सी ३:८

32 मिनु रिम्शो पा कोत्रमुने। दोपा परमप्रभु यावेमी खीस्त मिम्शा, इन कली माफ गेवा, मोपा गेपुकी यो माफ गेमुने। मत्ती ६:१४; मत्ती १८:२२-३५; कलस्सी ३:१३

## 5

### छेडछेडम ब्रोंइशो मुर

1 गेपुकी परमप्रभु यावे आ दाक्शो तमी तौ दुम्तीके मेकोमी दोदेशो पवा, मोदेशो पने। लूका ६:३६

2 मिनु येसु खीस्तमी इं कली दाक्शो खोदेशो पा दाक्मुने। मेकोमी दोपा दाक्ताक्व देंशा हना, आंम कली ममिम्थु, ब्रोवशो रिना पाइशशो धूप नु क्योरशा चढेशो खोदेशो पा, इं पाप क्याम्चा कली बेक्शा, परमप्रभु यावे कली जिम्मा गेंसाक्व।

3 मोपतीके गेपुकी परमप्रभु यावे आ मुर दुम्शा, इन दातेमी तेल्लेम पचा, ग्रांग्रा दिचा डा गेय पचा नु शिंम पचा आ पर्वम लोत्र सम्म यो मपने। मेको परमप्रभु यावे आ मुर आन कली रिम्शो दुम्ब। कलस्सी ३:५

4 गेपुकी मुने दोक्चा डा हेंथे लोत्र नु मूर्ख लोत्र पचा इन कली मगारब। मेको आ पा डा परमप्रभु यावे कली “गे आंइ कली रिम्शो पाइतीनी” देंचा माल्नीनी। एफिसी ४:२९

5 तेल्लेम पाइब, ग्रांग्रा दिचा डा गेय पाइब नु शिंम पाइबपुकी खीस्त नु परमप्रभु यावे आ राज्यमी ओव्रचा मताइनीम, दे रिम्शो पा तुइक्चा माल्नीनी। मेको नेल्ल मूर्ति पूजा पचा खोदेशो बाक्ब। १कोरिन्थी ६:९-१०; प्रकाश २१:८; प्रकाश २२:१५

6 सुइ मुरुमी इन कली फश लोत्र पा, हेंथे लां खोइक्पाइक्चा मगेने। मारदे हना परमप्रभु यावे आ कली मटीब आन कली तशा गाइक्ब। कलस्सी ३:६

7 मिनु गेपुकी मोदेशो मुर नु वारचबु मदुमीन।

8 गेपुकी यो डोंइती छिडछिड डा गेय पाइब बाक्तीनी। मुल चहिं प्रभु कली थमा सुइशशा, छेडछेड डा गेय पाइब दुम्तीनी। मोपतीके गेपुकी छेडछेड डा तमी तौ खोदेशो दुम्शा बाक्कीन। एफिसी २:१; १पत्रुस २:९; मती ५:१४; यूहन्ना १२:३६; १थिस्सलोनिकी ५:५

9 छेडछेड डा फल दोदेशो बाक्ब देशा हना, नेल्ल शिशो पतीकेमी, ठीक पतीकेमी नु थमा पतीकेमी बाक्ब। गलाती ५:२२; फिलिप्पी १:११

10 मिनु गेपुकीमी प्रभु आ दाक्शो मार बाक्बा, मेको तुइक्चा माल्नीनी। रोमी १२:२; फिलिप्पी १:१०

11 छिडछिड डा गेयमी काइ फल मथिसीब। मोदेशो गेय पाइबपुकी नु मबाक्कीन। मेको गेय यो मपने। तन्न मेको गेय मरिम्शो बाक्ब, दे कोंइदीन।

12 मिनु मेको आन खुइशशा पशो आ पर्वम लोत्र पचा यो मुने बाक्ब। रोमी १:२४

13 तन्न मेको खुइशशा पशो गेय छेडछेडमी तांइसीब।

14 मोपतीके “ए निन्द्रा पाइब, बोक्को। मिनु बेक्शो रे सेंसीशा बाक्को। मो पवीनु, खीस्तमी इ कली आ छेडछेड गेब” देशो बाक्ब। यूहन्ना ३:२०-२१; रोमी १३:११; यसैया ६०:१; यूहन्ना ८:१२

15 मोपतीके होस पा बाक्कीन। मतुइक्ब ममाइ, तुइक्ब मुर दुम्शा बाक्कीन। मती १०:१६; कलस्सी ४:५

16 मुरपुकीमी मरिम्शो गेय पना पन बाक्तेक्म हना यो, गेपुकीमी नेल्ल नाक्त् रिम्शो गेय पने।

17 मोपतीके गेपुकी मूर्ख मद्दुमीन, प्रभु आ दाक्शो मार बाक्मे मेको रूपीन।

18 राकसी शांबुमी मद्दुक्कीन। मारदे हना दुक्ब मुरपुकी ग्येत्थ मलाइनीम। तन्न गेपुकी परमप्रभु यावे आ सोक्तीम ब्रीशो दुमीन। लूका २१:२४

19 परमप्रभु यावे आ लोत्र डा कुम्सो, परमप्रभु यावे कली ठेयब सेल्ब कुम्सो नु परमप्रभु यावे आ सोक्तीम इन कली शेंशो कुम्सो पने। मोपा इन थुं बार पमुशा, प्रभु कली कुम्सो पना पन बाक्कीन। भजन संग्रह ३३:२-३; कलस्सी ३:१६

20 मिनु गेपुकीमी मार दुम्त हना यो, गेना हना यो इं आफ परमप्रभु यावे कली “गे रिम्शो पाइतीनी” दे प्रभु येसु खीस्त आ नेंमी देंचा माल्नीनी। थिस्सलोनिकी ५:१८

### थमा सुइक्ब आन कली लोत्र

21 गेपुकी खीस्त कली मान पा हिंशा बिम्मुने। १पत्रुस ५:५

22 गे मीश मुरपुकी, प्रभु कली टिशो खोदेशो पा आंम वोंइश कली यो टिने। उत्पत्ती ३:१६; तिमोथी २:११-१२; तीतस २:५

23 मारदे हना वोंइश मुर मीश मुर आन पिया बाक्नीम। मिनु खीस्त थमा सुइक्ब आन पिया बाक्ब। थमा सुइक्बपुकी खीस्त आ रां बाक्नीम। मिनु येसु खीस्त थमा सुइक्ब आन कली पाप रे प्रॉइब बाक्ब। १कोरिन्थी ११:३; एफिसी १:२२-२३

24 दोपा थमा सुइक्बपुकीमी खीस्त कली टीनीमी, मोपा मीश मुरपुकीमी आंम वोंइश आ देशो नेल्ल टिचा माल्नीमी।

25 गे वोंइश मुरपुकी, आंम मीश कली दाक्तीने। दोपा खीस्तमी थमा सुइक्ब आन कली दाक्शा, मेको आन कली पाप रे प्रॉइचा, दे आंम रां जिम्मा गेवा, मोपा वोंइश मुरुमी आंम मीश कली दाक्चा माल्नीमी।

26 मारदे खीस्तमी मो पाप्तु देशा हना, थमा सुइक्बपुकी परमप्रभु यावे आ डोंइती शिरशो मुर दुम्मल, दे मो पाप्तु। डोंइती खीस्तमी मेको आन कली लोत्र रे पा चिक्शो खोदेशो पाप्तु। तीतस ३:५; हिब्रू १०:२२

27 मोदेशो पा थमा सुइशशा, छेडछेड पाइशशो मुरपुकी आंम कली वोइशशो बाक्त्। मेकोपुकी मारेइ मलुम्सीशो, मरोम्सीशो, थम दारशो नु परमप्रभु यावे आ मुर दुम्शा, दोस मताइब मुरपुकी बाक्नीमी। २कोरिन्थी ११:२; कलस्सी १:२२

28 मेको खोदेशो पा वोंइश मुरपुकीमी आंम मीश कली “आंम रां बाक्ब” दे मेको कली दाक्चा माल्नीमी। सु आंम मीश कली दाक्बा, मेकोमी आंम कली यो दाक्ब।

- 29 सुइमी आंम रां कली खेदा मपाइनीम, थुल्शा रिम्शो पाइनीम। ख्रीस्तमी यो थमा सुइक्ब आन कली मोदेशो पाइब। एफिसी १:२३
- 30 मिनु गोपुकी आ रां डा गुइ खोइल बाकनय।
- 31 मो दुम्तीके वोंइश मुरुमी आ आम आफ आस कली प्रोंइब। मिनु आ मीश नु काथा बाकब। मेको निक्शी रां का दुम्नीसी। उत्पत्ती २:२४
- 32 मेको आ खुइश्शो अर्थं ठेयब बाकब। मिनु मार बाकब देशा हना, गो ख्रीस्त नु थमा सुइक्ब आन परबंम लोत्र पाइनुड।
- 33 मार दुम्त हना यो, गे नेल्लेमी आंम मीश कली आंम कली दाक्शो खोदेशो पा दाक्तीन। मीश मुरपुकीमी चहिं आंम वोंइश कली मान पा हिक्चा माल्नीमी।

## 6

- 1 गे आलपुकी, प्रभु कली मिम्शा, इन आम आफ आन देशो टिने। मारदे हना मेको इन कली रिम्शो बाकब। मर्कूस ७:१-१३
- 2 मिनु गे इन आम आफ कली मान पने। मेको डोंइती डा आसीक पाइश्शो अरेतीक लोत्र बाकब। प्रस्थान २०:१२
- 3 मेको आसीक मार बाकब देशा हना “गे मो पाइतीनी हना, इन कली रिम्शो दुम्ब। मिनु गे शुश बर्स ब्रोंइचा ताइनीनी” दे ब्रेक्शो बाकब। ब्यवस्था ५:१६
- 4 गे आफपुकी, इन आल आन कली मगाइक्पतीन। तन्न मेको आन कली रिम्शो थुल्शा कोल्पतीन। मिनु मेको आन कली शेंशा, प्रभु सु बाकबा मेको तुइक्पतीन। ब्यवस्था ६:२०-२५
- 5 गे वाइलीम वाइलपुकी, इन रागी डा होत्रप कली टिने। दोपा टिचा माल्नीनी देशा हना, गेपुकी ख्रीस्त कली टिशो खोदेशो पा, मेको आन क्येडा हिंशा खिंखि पा, थुं का पा रिम्शो गेय पने। तिमोथी ६:१२; तीतस २:९-१०; १पत्रुस २:१८
- 6 होत्रपमी इन कली गेय पशो कोत्रतेकम हना यो, मकोत्रतेकम हना यो, ठीक पा गेय पने। गेपुकीमी मुर कली ग्येरपाइक्चा ममाइ, ख्रीस्त आ वाइलीम वाइल दुम्शा, इन थुं नेल्लेमी परमप्रभु यावे आ दाक्शो पने।
- 7 मो पनीनु, गेपुकीमी मुर आन कली ममाइ, प्रभु कली रिम्शो थुंमी गेय पाइनीनी।
- 8 मिनु मुरुमी दोपा रिम्शो पाइबा, मेको खोदेशो पा प्रभु रे ताइब, दे तुइक्चा माल्नीनी। प्रभुमी वाइलीम वाइल नु ठेयब मुर आन कली खाल का डा पा कोत्रब। २कोरिन्थी ५:१०
- 9 गे होत्रपपुकी, इन वाइलीम वाइल आन कली प्रभुम पशो खोदेशो पा पने। हिंच कोंइचा प्रोनीन। मारदे हना मेको आन के नु इन के प्रभु स्वर्गमी बाकब। मिनु प्रभुमी मुर नेल्ल आन कली उइक्थ मिम्ब।

### परमप्रभु आ गेशो या

- 10 मिनु आं नोले डा लोत्र, प्रभु कली तुइश्शा सक्ति पाइश्शो मुर दुमीन। मोपा प्रभु आ सक्तिमी बोल्यो दुम्शा बाक्कीन। एफिसी ३:१६; १कोरिन्थी १६:१३; २तिमोथी २:१; १यूहन्ना २:१४
- 11 मिनु परमप्रभु यावे आ गेशो या नेल्ल लतीन। सैतानमी आ मरिम्शो थुंमी इन कली खतम सेल्चा माल्तु हना, गेपुकी परमप्रभु यावे आ गेशो यामी ग्रानीनी।
- 12 गोपुकी मुर नु लडाइ मपाइनय। हुकुम पाइबपुकी, अधिकार पाइबपुकी नु रागी कली मुल छिडछिडमी गेय पाइब वोल नु लडाइ पाइनय। मेको स्वर्गम बाकब सैतान आ गेय पाइबपुकी बाक्नीम। एफिसी २:२; लूका २२:३१
- 13 मोपतीके परमप्रभु यावे आ गेशो या नेल्ल लतीन। मेकोमी ला मरिम्शो नाक्त ग्राशा राप्ने चाप्नीनी।
- 14 गेपुकी थमा शेंतीकेमी किप्शुर किप्शो खोदेशो पा राप्शा बाक्कीन। मिनु ठीक दुम्तीकेमी पीतल के भोटो फेक्शो खोदेशो पा बाक्कीन। लूका १२:३५; १पत्रुस १:१३; १थिस्सलोनिकी ५:८
- 15 परमप्रभु यावे नु दुपाइक्ब ग्येरपाइक्ब लोत्र पा, जुत्ता मुइश्शो खोदेशो पा बाक्कीन।



16 मिनु नेल्ल क्येडा ठेयब या येसु ख्रीस्त कली थमा सुइक्तीके तेक्तीक खोदेशो पा इन डोंइती वोतीन। सैतानमी आप्शो ब्रशो ब्रा कली मेकोमी तेक्ने चाप्नीनी। १पत्रुस ५:९; १यूहन्ना ५:४

17 मिनु येसु ख्रीस्तम इन कली पाप रे प्रोंइशो तुइक्तीक पीतल के ताक्की खोदेशो पा गुम्सीने। मिनु परमप्रभु यावे आ लोत्र लतीन। मेको चहिं परमप्रभु यावे आ सोक्त डा तरवार बाक्ब। १थिस्सलोनिकी ५:८; हिब्रू ४:१२

18 मिनु गोपुकीमी गेना हना यो परमप्रभु यावे आ सोक्तीमी पतीके परमप्रभु यावे नु लोत्र पशा पुनीन। पुंडचा मदथु, परमप्रभु यावे आ मुर नेल्ल आन पर्वम पुनीन।

19 आं पर्वम यो पुनीन। आं कली मिम्शा, मार पुनीन देंशा हना, येसु ख्रीस्त आ पर्वम डोंइती खुइश्शो ग्येरपाइक्ब लोत्र मुल गो महिंथु, शेंने चबुल, दे पुनीन। कलस्सी ४:३; २थिस्सलोनिकी ३:१; प्रेरित ४:२९

20 गो मेको लोत्र शेंचा कली साडलोम फ्रेंशा सोइश्शो मुर दुम्ती। गोपुकीमी आं पर्वम “महिंथु शेंदल” दे परमप्रभु यावे कली पुनीने। मोपा महिंथु, लोत्र पचा परमप्रभु यावे आ दाक्शो बाक्ब। २कोरिन्थी ५:२०; प्रेरित २८:३१

#### नोले डा लोत्र

21 मिनु गो दोपा बाक्डा, मार पडा मेको नेल्ल प्रभु आ रिम्शो गेय पाइब, इं दाक्शो थमा सुइक्ब लोक्ब तिखीकसमी इन कली देंब। प्रेरित २०:४; कलस्सी ४:७-८; २तिमोथी ४:१२; तीतस ३:१२

22 गोपुकी दोपा बाक्का तुइक्पाइक्चा नु इन थुं बारपाइक्चा कली इन बाक्तीके सोइक्ताक्ड।

23 मिनु इं आफ परमप्रभु यावे नु प्रभु येसु ख्रीस्तमी इन कली थुं नाइश्शा बाक्चा गेम्सेक्ल।

24 सु सुमी इं प्रभु येसु ख्रीस्त कली गेना हना यो दाक्नीमी, मेको नेल्लेमी शिशी तामेक्ल।

## फिलिप्पी

**ब्रेक्ब मुर:** पावलमी एको चिठी ब्रेक्शो बाक्ब।

**गेना ब्रेक्शो:** एको चिठी ६३ ए. डी. नुप्ची ना कि ६४ ए. डी. गोची ना ब्रेक्शो मिन्नीम। एको चिठी ब्रेक्ची ना पावलमी “जेलखान रे प्रोंडचा पुंडसीनुड” दे आस पाप्तु।

**मार ब्रेक्शो:** पावलमी जेलखानम यो ग्येरपाइक्ब लोत्र शेंब। थमा सुइक्बपुकीमी श्येत जाम्तेक्म हना यो, येसु ख्रीस्त कली मप्रोंडचा। थमा सुइक्बपुकीमी दूली शेंब आन पबर्म होस पचा मालनीम। प्रभु आ पशो मिम्शा, ग्येरसीचा मालनीम। पावलमी फिलिप्पी आन गुइ रे क्येट ताप्तु। मेको आ पबर्म “रिम्शो पाइब बाक्नीनी” दे ब्रेक्शो बाक्ब।

### डोंडती डा लोत्र

1 पावल नु तिमोथी, गो निक्शी ख्रीस्त येसु आ वाइल नस्कु। फिलिप्पी सहरम बाक्शो ख्रीस्त येसु कली थमा सुइक्ब नेल्ल इन कली, थमा सुइक्ब आन कली कोव्रब नु गुम्तीके डा गेय पाइब इन कली चिठी ब्रेक्ताकड। प्रेरित १६:३

2 इं आफ परमप्रभु यावे नु प्रभु येसु ख्रीस्तमी इन कली शिशो पा थुं नाइक्चा गेम्सेकल।

### पावल आ प्रार्थना

3 गो इन कली मिम्शा, आं परमप्रभु यावे कली “गे रिम्शो पाइतीनी” देंनुड। रोमी १:८; १कोरिन्थी १:४

4 गो परमप्रभु यावे नु लोत्र पडानु, गेना हना यो नेल्ल इन कली मिम्शा, ग्येरशा पाइनुड।

5 डोंडती रे मुल सम्म ग्येरपाइक्ब लोत्र पचा कली आं कली वारच पाइतीनी।

6 इन आगामी रिम्शो गेय गोइबमी येसु ख्रीस्त आ जाक्ची ना सम्म थुम्ब, दे तुइक्नुड। फिलिप्पी २:१३; १कोरिन्थी १:८

7 नेल्ल इन पबर्म मोदेशो मिम्शा ठीक बाक्ब। मारदे हना गो इन कली शुश दाक्नुड। आं जेलखानमी चोक्चा पुंडसीशो, निसाफ पची ना नु ग्येरपाइक्ब लोत्र शेंची ना गो इन कली मिम्नुड। गो नेल्ल खाल का डा शिशो ताइब बाक्नय।

8 ख्रीस्त येसुमी आं कली दाक्पाइक्तीके थुं गेतीके गो इन कली गुम्चा शुश दाक्ताकड, परमप्रभु यावेमी मेको तुइक्ब।

9 आं प्रार्थना मार बाक्ब देंशा हना, इन दाक्चा शुश बारशा, रिम्शो नु मरिम्शो मार बाक्बा से रुप्ने चाप्नील, दे पुंडशा, परमप्रभु यावे नु लोत्र पचा बाक्ब। फिलेमोन ६

10 मोपा गे नेल्ल क्येडा रिम्शो मार में, दे तुइश्शा, ख्रीस्त आ नाक्ती पाप मपाइब नु दोस मताइब दुम्नीनी। रोमी १२:२; एफिसी ५:१०; १थिस्सलोनिकी ५:२३

11 गेपुकी येसु ख्रीस्तमी पपाइश्शो ठीक पतीकेमी ब्रीशो बाक्तीनी हना, परमप्रभु यावे सक्ति पाइश्शो नु ठेयब बाक्ब, दे तुंडसीब। एफिसी ५:९

### पावलमी पशो लोत्र

12 आं लोकबपुकी, आं कली दुम्शो श्येतमी ग्येरपाइक्ब लोत्र ब्रपाइक्तु। १तिमोथी २:९

13 हुकुम पाइब आ खिं डा मुर नु अरु नेल्लेमी गो ख्रीस्त कली थमा सुइश्शो आ पबर्म जेलखानम बाक्ती, दे तुइक्ताक्म। फिलिप्पी ४:२२

14 मिनु प्रभु कली थमा सुइक्ब लोकब शुशेमी आं कली जेलखानमी बाक्शो तशा, प्रभु कली थमा सुइक्तीक बारपा महिंथु, परमप्रभु यावे आ लोत्र पाइनीम।

15 का निक्शीमी गेहे पशा, नेल्ल क्येडा ठेयब नड, दे ख्रीस्त आ पबर्म शेंनीम। का निक्शीमी चहिं रिम्शो थुं पा शेंनीम।

16 मोपा शेंबपुकीमी आं कली दाक्शा, गो परमप्रभु यावे आ ग्येरपाइक्ब लोत्र पतीके एकेर बाक्नुड, दे तुइक्नीम।

17 गेहे पा ख्रीस्त आ लोत्र शेंबपुकीम चहिं “गो नेल्ल क्येडा ठेयब नड” दे रिम्शो थुं मपथु, आं कली जेल्खानम श्येत तेम्चा मिम्नीम।

18 मिनु मार? ठेयब लेशशा हना यो, थमा पा हना यो, ख्रीस्त आ पर्वम लोत्र पांमतेक्म हना, गो शुश ग्येरसीनुड। फिलिप्पी २:१७-१८

19 इन परमप्रभु यावे कली पुंडतीके नु येसु ख्रीस्त आ सोक्तीम आं कली वारच पतीके गो एको श्येत रे ब्रोइनुड, दे तुइक्नुड। २कोरिन्थी १:११

20 गो काइ मुने मदोक्नुड, दे तुइश्शा, आस पाइनुड। मिनु काइ महिब दुम्शा, ब्रोइती हना यो, साइक्तीमी हना यो, मुरपुकीमी गेना हना यो ख्रीस्त कली ठेयब सेल्मेक्ल, देनुड।

21 मारदे हना ब्रोइडानु, ख्रीस्त कली ब्रोइनुड, साइक्तीमी हना यो, ग्रानुड। गलाती २:२०

22 गो ब्रोइती हना, ख्रीस्त आ गेय पाइनुड। तन्न तेको गेय योत्रनुडा मेको मतुइक्नुड।

23 गो निम्फा आस दातेमी बाक्नुड। मेकेर रे लशा, ख्रीस्त नु बाक्चा आं दाक्शो बाक्ब। मारदे हना मेको शुश रिम्शो बाक्ब। २कोरिन्थी ५:८

24 गो ब्रोइती हना, इन कली शुश रिम्शो दुम्ब।

25 मोदेंब दुम्ब, दे तुइश्शा, इन थमा सुइक्चा नु ग्येरपाइक्तीके बारल, दे गो गेपुकी नु बाक्नुड, दे तुइक्नुड। फिलिप्पी २:२४

26 मारदे हना गो इन कली लेंशा गुम्थ जाक्नुड, गेपुकीमी आं जाक्शो आ पर्वम ख्रीस्त येसु कली ठेयब सेल्नीनी।

### थमा सुइक्ब श्येत जाइनीम

27 गे इन नाक्त किंत किंत डा पतीकेमी ख्रीस्त आ ग्येरपाइक्ब लोत्र कली शिरशो दुम्शा बाक्कीन। गो गेपुकी नु बाक्ती हना यो, मबाक्ती हना यो, इन सोक्त का दुम्शा, इन थुं का दुम्शा, ग्येरपाइक्ब लोत्र डा थमा सुइक्तीके गेय पा वारच पमुने।

28 इन कली श्येत गेब आन कली तशा काइ महिनीन। मेकोन मेको आन कली बूतीक चिनु बाक्ब। इन कली चहिं ब्रोइतीक चिनु दुम्ब। मेको परमप्रभु यावे रे दुम्ब। २थिस्सलोनिकी १:५

29 ख्रीस्त कली थमा सुइक्चा ला इन कली गेशो ममाइ, तन्न मेको आ पर्वम श्येत जचा यो गेशो बाक्ब।

30 मुल आं श्येत जशो खोदेशो पा, गेपुकी यो श्येत जाइनीनी। प्रेरित १६:२२

## 2

### ख्रीस्त खोदेशो दुमीन

1 ख्रीस्त आ पर्वम इन दातेमी थुं बारपाइक्तीके, दाक्शा वारच पाइब, दे थुं नाइक्तीके, थमा सुइश्शा थुं का दुम्तीके, दाक्मुतीके नु शिशी पतीके बाक्तेक्म हना,

2 गेपुकी खाल का डा दुम्शा, उइक्थ उइक्थ पा दाक्मुशा, नेल्ल गारशा थुं का दुम्शा, आं कली शुश ग्येरपाइक्नीनी।

3 गेपुकी ठेयब लेशशा “गो ठेयब नड” दे मिम्शा, काइ गेय मपने। ब्रेम्शो थुंमी “मेको मुर आं क्येडा ठेयब बाक्ब” दे मिम्तीन। गलाती ५:२६; रोमी १२:१०

4 गेपुकी का का पा नेल्लेमी आंम दाक्शो ला ममिम्थु, अरु मुर आन दाक्शो “मार बाक्मे” मेको यो मिम्तीन। १कोरिन्थी १०:२४; १कोरिन्थी १३:५

5 ख्रीस्त येसु नु बाक्शो थुं इन दातेमी कोंइदीन।

6 ख्रीस्त येसु परमप्रभु यावे नु उइक्थ दुम्शो बाक्त हना यो “परमप्रभु यावे नु उइक्थ दुम्ती” दे ममिम्थु, यूहन्ना १:१२; यूहन्ना १७:५

7 मेको नेल्ल प्रोइशा, वाइल खोदेशो दुग्शा, मुर दुग्शा जरमेसाक्व। यसैया ५३:३; मत्ती २०:२८; २कोरिन्थी ८:९; हिब्रू २:१४,१७

8 मिनु मुर दुग्शा, साइक्चा पुंडसीचा सम्म परमप्रभु यावे कली टिशा, शीम क्याइग्शा साइक्चा पुंडसीशा, आ ब्रेग्शो थुं कोंइताक्व। लूका १४:११; हिब्रू १२:२; हिब्रू ५:८

9 मोपतीके परमप्रभु यावेमी मेको कली नेल्ल क्येडा ठेयब सेल्शा, आ नें यो अरु आन क्येडा ठेयब सेल्लु। प्रेरित २:३३; एफिसी १:२१; हिब्रू १:३-४

10 येसु आ नें नेंशा, स्वर्गम बाक्ब, रागीम नु रागी आगाम बाक्ब नेल्लेमी बाग्शा, पोक्च थेक्चा माल्नीम। यसैया ४५:२३; यूहन्ना ५:२३; प्रकाश ५:१२-१३

11 मिनु नेल्लेमी “येसु ख्रीस्त प्रभु बाक्ब” दे परमप्रभु यावे, इन आफ कली ठेयब सेल्शा माल्नीम। प्रकाश ५:१३

### परमप्रभु यावे आ आलपुकी

12 आं दाक्शो लोकबपुकी, गेपुकीमी नेल्ल नाक्त आं देशो टीतीनी। गो बाक्डानु ला ममाइ, गो मबाक्डानु यो मेको क्येडा शुश रिग्शो पने। गेपुकी हिंशा ख्रिंख्रि पा इन पाप रे ब्रोंइतीक गेय पने। १पत्रुस १:१७

13 मारदे हना परमप्रभु यावेमी इन थुंमी गेय पाइब। मार गेय पाइब देशा हना, आ दाक्शो पचा, दे इन कली दाक्ब थुं गेशा, गेय पपाइक्ब। फिलिप्पी १:६

14 गेपुकीमी सुंइच मपथु, दाल्गीर मपथु, गेय पने।

15 मोपा दोस गेचा मपुंडसीब, परमप्रभु यावे आ रिग्शो आल दुग्नीनी। मरिग्शो नु दूली पाइब मुर आन दातेमी स्वर्ग डा छेडछेड खोदेशो दुग्नीनी। फिलिप्पी १:१०; मत्ती ५:१४; एफिसी ५:८-९

16 मोपा ब्रोंइचा गेब लोव्र मप्रोंइब दुग्नीनी। मिनु ख्रीस्त आ जाक्ची ना गो मो मगाक्ड, मो गेय यो मपड, दे ग्येरशा बाक्चा तडल। २कोरिन्थी १:१४; १थिस्सलोनिकी २:१९

17 गो इन थमा सुइक्चा आ पर्बम गेय पा, साइक्चा पुंडसाक्ची हना यो, ग्येरसीनुड। गे नेल्ल नु ग्येरशा बाक्नुड। रतिमोथी ४:६

18 मोपा गेपुकी यो ग्येरसीने। मिनु गो नेल्ल ग्येरसय। फिलिप्पी ४:४

### तिमोथी नु इपाफ्रोडीटस

19 प्रभु येसुमी तिमोथी कली इन कली गुग्थ सोइक्चा गेपुतु हना, ब्रा सोइक्नुड। इन पर्बम लोव्र नेंशा, गो यो ग्येरसीनुड।

20 मारदे हना मेको खोदेशो अरु मबाक्नीम। “गेपुकी दोपा बाक्नी माइ” दे थमा पा शुश मिग्शा, सुर्ता पापुतु। १कोरिन्थी १६:१०

21 नेल्लेमी आंम आंम दाक्शो ला मिग्शा, पना पन बाक्नीमी। येसु ख्रीस्त आ दाक्शा मिग्शो चहिं मपाइनीम। रतिमोथी ४:१०,१६

22 गेपुकीमी तिमोथी कली तुइक्नीनी। दोपा तौमी आ आफ नु गेय पाइबा, मोपा मेको गो नु परमप्रभु यावे आ ग्येरपाइक्ब लोव्र शेंथ गाक्त।

23 मोपतीके आं कली मार मार दुग्बा, मेको तुइक्तु नोले गो मेको कली इन बाक्तीक ब्रा सोइक्नुड, दे आस पाता।

24 प्रभुमी आं कली एकेर रे प्रोंइब, दे थमा सुइक्नुड। मिनु गो यो इक्का नाक्त नोले जाक्नुड। फिलिप्पी १:२५

25 इन सोइग्शो आं कली वारच पाइब आं लोकब इपाफ्रोडीटस कली लेग्शा सोइक्नुड। मेकोमी गो नु गेय पापुतु। गो नु काथा गाक्शा, परमप्रभु यावे आ लोव्र शेंताक्व। फिलिप्पी ४:१८

26 मेकोमी नेल्ल इन कली शुश मिग्ताक्व। मारदे हना गेपुकीमी “मेको रोइ पापुतु” देशो नेंतीनी ने। मोपतीके शुश सुर्ता पापुतु।

27 इपाफ्रोडीटस थमा पा बेक्चा डा रोड पाप्तु। तन्न परमप्रभु यावेमी मेको कली शिशी पाडवकु। मेको कली ला ममाइ, आं कली यो शिशी पाइक्ती। मोपतीके गो शुश श्येत मजड।

28 मेको कली इन बाक्तीके सोइक्चा दाक्नुड। गेपुकी मेको कली लेशशा जाक्शो तशा, ग्येरनीनी। मो दुम्मेनु, आं हेल्लो थुं यो सोपी दुम्ब।

29 गेपुकीमी प्रभु आ नेमी मेको कली रिम्शो पने, ग्येरसीने। मोदेशो मुर कली ठेयब सेलीन। १कोरिन्थी १६:१६

30 मेकोमी खीस्त आ गेय पशा, आंम कली ममिम्थु, इन पा डा आं कली वारच पथ जाक्मेनु, रोड पा हेरा बेक्त।

### 3

पावलम आ पबर्म पशो लोव्र

1 आं दाक्शो लोकबपुकी आं नोले डा लोव्र मार बाक्ब देशा हना, प्रभु नु बाक्शा ग्येरसीने। मोदेशो लोव्र गो इन कली ब्रेक्ना ब्रेक्न बाक्ती हना यो, श्येत ममिम्नुड। मेको इन कली बोल्यो दुम्चा कली बाक्ब। फिलिप्पी २:१८; फिलिप्पी ४:४

2 कुचुम खोदेशो मुर आन क्येडा होस पा बाक्कीन। मरिम्शो गेय पाइब आन कली तशा, होस पा बाक्कीन। खोइक्तीक चिनु खोइक्चा माल्ब देब, आन क्येडा यो होस पा बाक्कीन। प्रकाश २२:१५; गलाती ५:१२

3 मारदे हना गोपुकी थमा खोइक्तीक चिनु डा मुर बाक्नय। गोपुकीमी परमप्रभु यावे आ सोक्त आ पतीकेमी खुम्की पा बाप्शा, परमप्रभु यावे कली गेय पशा, खीस्त येसु आ पतीकेमी ग्येरसय। मुर आ पतीकेमी थमा मसुइय्य। रोमी २:२९

4 गो मुर आन पतीके कली थमा सुइक्ने चाप्नुड। मुरपुकीमी आन पतीकेमी थमा सुइक्ने चाप्नीमी, दे मिन्नीमी। मोदेब दुम्त हना, गो यो मेको आन क्येडा शुश चाप्नुड। २कोरिन्थी ११:१८,२२

5 गो ८ नाक्त डा आल बाक्डानु, खोइक्तीक चिनु ताता। गो इस्राएली नड। गो बेन्यामीन आ थर डा मुर नड। हिब्रू मुर रे जरमेशो, हिब्रू नड। परमप्रभु यावे आ अरेशो पशा, फरिसी दुम्ती। रतिमोथी १:३; प्रेरित २६:५

6 गो थमा सुइक्ब आन कली खेदा पाता। परमप्रभु यावे आ अरेशो लोव्र टिशा, ठीक पाता, दे मिष्शा, दोस मताइब दुम्ती, देती। प्रेरित ८:३

7 तन्न गो खीस्त कली तुइशशा, आंम कली ठेयब सेल्सीतीके नेल्ल ग्येरशा प्रॉइता। मत्ती १३:४४-४६

8 थमा पा, गो आं डोंइती डा पशो जाम्शा लाइब बाक्ब, दे तुइक्ताक्ड। मारदे हना आं प्रभु येसु खीस्त कली तुइक्चा नेल्ल क्येडा ठेयब बाक्ब। मोपतीके मेको आ पबर्म आं पशो नेल्ल ताइशशा, ग्रांग्रा दिचा डा बाक्ब, दे तुइक्ताक्ड। मारदे हना गो खीस्त नु बाक्ब मुर दुम्ती।

9 मोपा आ मुर दुम्शा, परमप्रभु यावे आ अरेशो लोव्र डा आंम ठीक पतीके मबाक्थु, खीस्त कली थमा सुइक्तीकेमी ठीक दुम्तीके बाक्ब। मेको ठीक दुम्तीके परमप्रभु यावेमी गेशो थमा सुइक्तीके रे ला बाक्ब। रोमी ३:२२

10 आं दाक्शो मार बाक्त देशा हना, गो येसु खीस्त कली तुइक्ने चबुल। आ सेंतीक सक्ति गो नु बाक्ल। दोपा श्येत जशा, साइक्चा पुंडसीशो बाक्मे, मोपा गो यो मोदेशो दुम्डल। रोमी ६:३-५; रोमी ८:१७; गलाती ६:१७

11 दुम्ने चाप्ब हना, गो यो बेक्शो रे सेंसीने चबुल, देती।

पावल आ माल्लो गेय

12 मुल सम्म गो मेको नेल्ल मतड। मिनु ठीक मदुम्ड। तन्न मेको आं के दुम्ल, दे शुश गेय पाइनुड। मारदे हना खीस्त येसुम आं कली आ मुर सेलती। कलस्सी १:२९; १तिमोथी ६:१२; प्रेरित ९:३-६

13 आं लोकबपुकी, मुल सम्म गो नेल्ल मतड। तन्न गो मुल मार पाइनुड देशा हना, आं डोंइती पशो नेल्ल प्रेशा, मुल पचा माल्लो मार बाक्मे, मेकोन शुश पाइनुड। लूका ९:६२

14 परमप्रभु यावेमी खीस्त येसु आ नेमी आ बाक्तीके रे इनाम गेचा कली मार देमे, मेकोन शुश पाइनुड। १कोरिन्थी ९:२४

15 इं दातेमी सु सु रुम्ने चाण्ब बाक्नी, मेकोमी आं खोदेशो पा मिम्तीन। गेपुकीमी आं खोदेशो पा ममिम्ताक्नी हना, परमप्रभु यावेमी इन कली तुडक्पदल।

16 गोपुकीम मार रुब्या, मेकोन पय।

### स्वर्ग डा मुर

17 आं दाक्शो लोकबपुकी, गेपुकी आं खोदेशो दुमीने। आंइ खोदेशो पा गेय पाइब आन कली कोत्रशा, मेको आन खोदेशो पने। १कोरिन्थी ११:१

18 गो इन कली का निक्शी मुर आन परबम लोत्र पाता। मुल आं थुं खाइशशा, डाक्शा लोत्र पाइनुड। मारदे हना मेकोपुकी खीस्त आ जोरी सत्रु दुम्शा, आ बेक्शो आ परबम मारेइ ममिम्नीम। १कोरिन्थी १:२३; गलाती ६:१२

19 नोले मेकोपुकी जाम्शा लाइनीम। आन कोत्रज कली परमप्रभु यावे क्येडा ठेयब बाक्ब, दे मुने पचा डा गेयमी आंम कली ठेयब सेल्सीशा, आन थुंमी रागी डा माल्शो ला मिम्नीम। रोमी १६:१८

20 तन्न इं बाक्तीक स्वर्गम बाक्ब। मारदे हना गो स्वर्ग डा मुर नय। मेकेर रे इं पाप रे प्रॉडब प्रभु येसु खीस्त जाक्ब, दे रिम्नय। एफिसी २:६; कलस्सी ३:१; हिब्रू १२:२२; तीतस २:१३

21 मेकोमी इं बेक्चशो रां आ सक्ति पाइशशो रां खोदेशो सेल्ब। मेको आ सक्तिमी नेल्ल आन कली आ डोंडती खुम्की पा बाप्पाइक्ब। १कोरिन्थी १५:४९; २कोरिन्थी ५:१; १यूहन्ना २:३

## 4

### थुं का डा दुमीन

1 मोपतीके आं दाक्शो लोकबपुकी, प्रभु कली थमा सुइशशा, खोइल थेक्शा बाक्कीन। गो इन कली दाक्शा शुश मिम्नुड। गेपुकीम आं कली ग्येरपाइशशा, आं ग्रातीक सिरपेच खोदेशो दुम्तीनी। २कोरिन्थी १:१४; १थिस्सलोनिकी २:१९-२०

2 इयोदीया नु सुन्तुके “प्रभु कली थमा सुइशशा थुं का दुमीस” देती।

3 मिनु गो नु गेय पाइब वारच, इ कली “मेको मीश मुर निक्शी आस कली वारच पावो” देती। मारदे हना मेको निक्शीमी गो नु काथ काथा ग्येरपाइक्ब लोत्र शेंतीक गेय पाम्ताक्से। क्लेमेन्त नु अर्को वारच आन कली यो वारच पाम्ताक्से। मेको नेल्ल आन नें ब्रोंडतीक किताबमी ब्रेक्शो बाक्ब। लूका १०:२०

### परमप्रभुमी गेशो थुं नाइक्तीक

4 प्रभु नु बाक्शा गेना हना यो ग्येरसीन। गो लेंशा “ग्येरसीने” देंनुड। फिलिप्पी ३:१; २कोरिन्थी १३:११; १थिस्सलोनिकी ५:१६

5 इन रिम्शो पतीके मुर नेल्ल आन कली कोंइदीने। प्रभु जाक्चशो बाक्ब। तीतस ३:२

6 सुर्ता मपने। परमप्रभु यावे नु लोत्र पा, इन माल्शो पुंइशा “गे रिम्शो पाइब बाक्नीनी” दे परमप्रभु यावे कली देनीन। मत्ती ६:२५-३४; १पत्रुस ५:७

7 परमप्रभु यावे आ गेशो थुं नाइक्तीके रुम्ने मचाप्या डा ठेयब बाक्ब। मेको थुं नाइक्तीके इन थुं नु इन मिम्शो खीस्त येसु नु बाक्ब। यूहन्ना १४:२७; कलस्सी ३:१५

8 आं लोकबपुकी, आं नेल्ल क्येडा नोले डा लोत्र मार बाक्ब देशा हना, तेको थमा बाक्बा, तेको शिरशो बाक्बा, तेको ठीक बाक्बा, तेको ग्रांग्रा मदिशो बाक्बा, तेको दाक्चा डा बाक्बा, तेको रिम्शो लोत्र बाक्बा, तेको नेल्ल क्येडा रिम्शो नु दोस गेचा मपुंडसीब बाक्बा, तेको “रिम्शो पाइब” दे माइक्चा पुंडसीब बाक्बा, मेको आ परबम मिम्तीन।

9 गो इन कली मार शेंदु, गे मार रुम्नी, मार नेनी, आं कली मार पशो तनी, मेकोन पने। मो पाइतीनी हना, इन थुं नाइक्चा गेब परमप्रभु यावे गेपुकी नु बाक्ब।

गेचा नु ताक्चा आ पर्वम

10 गो प्रभु नु बाक्शा शुश ग्येरसीनुड। मारदे हना शुश नाक्त नोले गे आं कली लेंशा मिम्ताक्नी। गेपुकीमी आं कली नेल्ल नाक्त थमा पा मिम्शा बाक्तीनी। तन्न डोंइती मारेइ सोइक्ने मचाप्शो बाक्तीनी। मुल चहिं सोइक्ताक्यीनी।

11 गो श्येत जचा आ पर्वम लोव्र मपाइनुड। मार दुम्त हना यो, ग्येरसीशा बाक्चा, दे शेंसीशो नड। श्तिमोथी ६:६

12 पुडग दुम्चा नु शोप पाइश्शो दुम्चा, दोपा बाक्मे, गो मेको निम्फा तुइक्नुड। गो गेना हना यो रूशा बाक्चा नु शोव्रलु बेक्शा बाक्चा, निम्फा शेंसाक्यी। मोपा शुश बाक्त हना यो, काइ मबाक्त हना यो आं कली ठीक दुम्ब। २कोरिन्थी ६:१०

13 आं कली सक्ति गेब आ नेमी गो नेल्ल पने चाप्नुड। २कोरिन्थी १२:१०

14 दोदेंब दुम्त हना यो, गेपुकीम आं कली वारच पशा रिम्शो पाइतीनी।

15 ग्येरपाइक्ब लोव्र शेंचा डोंइती मासीडोनीया रागी प्रोंइशा लडा नोले, सुइमी आं कली वारच मपामे, गे फिलिप्पीपुकीम ला पाइतीनी। गेपुकीम आं शेंशो ताइतीनी, मिनु इन वारच पशो गो ताता। २कोरिन्थी ११:९

16 थिस्सलोनिकी सहरमी बाक्डानु यो, गे निक्शी खेयप वारच पा क्येट सोइक्ताक्यीनी।

17 इन गेशो क्येट ममिम्नुड, तन्न परमप्रभु यावेमी इन मो पशो तशा, इन कली रिम्शो पाइब। गो मोदेंशो तचा दाक्नुड।

18 गो मार मार माल्डा, आं माल्शो क्येडा शुश ताता। इपाफ्रोडीटसमी इन सोइश्शो क्येट गेती। मेको ब्रोव्रशो रिना पाइश्शो परमप्रभु यावे कली चद्देशो खोदेंशो बाक्ब। परमप्रभु यावे इन मो पशो तशा ग्येरसाक्व। फिलिप्पी २:२५

19 मिनु आं परमप्रभु यावेमी इन माल्शो नेल्ल आ स्वर्ग डा बाक्तीक येसु ख्रीस्त आ पतीक रे शुश गेब।

20 इं आफ परमप्रभु यावे कली गेना हना यो ठेयब सेल्य। आमेन।

नोले डा लोव्र

21 ख्रीस्त येसुमी बाक्शो थमा सुइक्ब नेल्ल आन कली “रिम्शो बाक्कीन” मतीन। गो नु बाक्ब लोकबपुकीमी “रिम्शो बाक्कीन” देंतेक्म।

22 सिजर आ खिं डा नु अरु थमा सुइक्ब नेल्लेमी यो इन कली “रिम्शो बाक्कीन” देंतेक्म। फिलिप्पी १:१३

23 प्रभु येसु ख्रीस्त आ शिशी गेपुकी नु बाक्ल।

## कलस्सी

**ब्रेक्ब मुर:** एको चिठी पावलमी ब्रेक्शो बाक्ब।

**गेना ब्रेक्शो:** पावल रोम सहरम ग्याइक्चा पुंडसीशा ६२ ए. डी. थुम्ची ना कि ६३ ए. डी. गोची ना ब्रेक्शो बाक्ब।

**मारदे ब्रेक्शो:**

१. येसु ख्रीस्त प्रभु बाक्ब। कलस्सी १:१३-२९

२. थमा सुइक्ब आन गुम्तीक खिं दोदेशो दुम्चा माल्ब। कलस्सी २:१-२३

३. थमा सुइक्ब दोपा बाक्चा माल्नीमी नु नोले डा लोत्र। कलस्सी ३:१-४, ६ नु ४:१८ सम्म

**डोंडती डा लोत्र**

१ गो परमप्रभु यावे आ दाक्शो पा, ख्रीस्त येसु आ सोइश्शो पावल नड। इं लोक्ब तिमोथी गो नु बाक्ब।

२ गो कलस्से सहर डा परमप्रभु यावे कली थमा सुइक्ब नु ख्रीस्तमी बाक्शो लोक्ब इन कली चिठी ब्रेक्ताकड। इं आफ परमप्रभु यावेमी इन कली शिशी पा थुं नाइक्चा गेवल।

**कलस्सी आन पबर्म प्रार्थना**

३ गो निक्शीमी इन पबर्म प्रार्थना पस्कुनु, इं प्रभु येसु ख्रीस्त आ आफ परमप्रभु यावे कली “गे रिम्शो पाइतीनी” देंनस्कु।

४ मारदे हना गेपुकी ख्रीस्त येसु कली थमा सुइक्तीनी। मिनु थमा सुइक्ब नेल्ल आन कली दाक्नीनी, देशो नेंतस्कु।

५ स्वर्गमी इन कली रिम्शो दुम्ब, दे तुइक्ताक्नी। गेपुकीमी डोंडती रे थमा लोत्र पशो नेंतीनी। मेकोन ग्येरपाइक्ब लोत्र बाक्ब। १पत्रुस १:३-४

६ इन सहर नु नेल्ल अरु सहर डा मुरपुकीमी यो मेको ग्येरपाइक्ब लोत्र नेंतेक्म। इन दातेमी दोदेशो पा बारशा लमे, मोदेशो पा रागी नेल्लेमी बारना बारन लत। गेपुकीमी मेको लोत्र नेंशा, परमप्रभु यावे आ शिशी थमा पा रुप्नी नाक्त् रेन मेको लोत्र बारना बारन लत।

७ इपाफ्रास आंस दाक्शो लोक्ब, गो निक्शी नु गेय पाइब। मेको रिम्शो पा ख्रीस्त आ लोत्र इन कली शेंब दुम्त। कलस्सी ४:१२; फिलेमोन २३

८ मेकोमी आंस कली गे परमप्रभु यावे आ सोक्तीम पतीके मुर आन कली दाक्नीनी, दे इन पबर्म तुइक्पाइक्ताक्की।

९ मिनु मेको लोत्र नेंस्कु रे इन कली मिम्शा, प्रार्थना पना पन बाक्ताक्कु। मार प्रार्थना पाइतस्कु देशा हना “कलस्सीपुकीमी इन दाक्शो मार बाक्बा, मेको तुइक्ताक्कल। परमप्रभु यावे, इन सोक्त् डा तुइक्तीके नु रुप्तीके शुश तामेक्कल। एफिसी १:१५-१७

१० इन डोंडती शिरशो मुर दुम्मल। आन पशो नेल्लेमी इन कली ग्येरपदमेक्कल। रिम्शो पामेनु, इन कली तुइक्तीके आन थुंमी बारना बारन लल। एफिसी ४:१; फिलिप्पी १:२७

११ इन छेडछेड डा सक्ति खोदेशो पा मेको आन कली सक्ति पाइश्शो, बोल्यो सेलीन। मिनु सक्ति पाइश्शो बोल्यो दुम्शा, मारेइ मारेइ फाल्ने चाप्नीम” दे प्रार्थना पाइतस्कु।

१२ इं आफ, परमप्रभु यावे कली “गे रिम्शो पाइब बाक्नीनी” देनीन। मारदे हना इन कली थमा सुइक्ब आन छेडछेडमी बाक्चा गेप्तु। एफिसी १:११; १पत्रुस १:४

१३ मेकोमी इं कली छिडछिड डा राज्य डा अधिकार रे गुंइशा, आ दाक्शो तौ आ राज्यमी ओंइताक्व। कलस्सी २:१५

१४ मेकोमी इं कली मरिम्शो रे प्रोंइशा, इं पाप क्याम्ताक्व। एफिसी १:७

**येसु डोंडती डा बाक्ब**



15 सुइमी तने मचाप्शो परमप्रभु यावे खोदेशो येसु ख्रीस्त रागी सेल्का डोंइती रेन बाक्त। हिब्रू १:३; प्रकाश ३:१४

16 सरीड नु रागीमी बाक्ब, तांडसीब नु मतांडसीब नेल्ल, पिपपुकी, मान पचा पुंडसीबपुकी, हुकुम पाइबपुकी, अधिकार पाइब नेल्ल नु मार मार सेल्शो बाक्मा, मेको नेल्ल येसु ख्रीस्तमी आंम कली सेल्लु। यूहन्ना १:३,१०; हिब्रू १:२

17 मोपा मेको नेल्ल आन क्येडा डोंइती डा बाक्ब। मिनु नेल्ल आन कली बाक्चा गेब यो बाक्ब।

18 थमा सुइक्बपुकी रां का बाक्तेकम हना, येसु ख्रीस्त मेको रां आ पिया बाक्ब। मेको नेल्ल आन क्येडा डोंइती डा दुम्शा, डोंइती बेक्शो रे सेंसीब यो बाक्ब। मोपा नेल्ल आन क्येडा टेयब बाक्ब। एफिसी १:२२; प्रेरित २६:२३; १कोरिन्थी १५:२०; प्रकाश १:५

19 मिनु परमप्रभु यावेमी “आं सक्ति नेल्ल मेको आगामी बाक्शो दाक्नुड” दे ग्येरसाक्व। २कोरिन्थी ५:१०; कलस्सी २:९; यूहन्ना १:१६; एफिसी १:२३

20 परमप्रभु यावेमी येसु ख्रीस्त रेन मारेड मारेड आन कली आ नु गारपाइक्तु। सरीड नु रागीम बाक्शो नेल्ल आन कली, शीम केप्शा कांटी थोकशा साइक्चा पुंडसीशा, आ हुशेमी आ नु गारपाइक्तु। १यूहन्ना २:२

### परमप्रभु आ नेक्था दुम्पाइश्शो

21 डोंइती गेपुकी परमप्रभु यावे क्येडा डोन दुम्शा, इन थुमी मेको कली ममिम्थु, मरिम्शो पना पन बाक्तीनी। एफिसी २:१२-१३; एफिसी ४:१८; रोमी ५:१०

22 मुल येसु ख्रीस्तमी आ रां साइक्चा गेशा, इन कली परमप्रभु यावे आ मुर दुम्पाइक्तु। मोपा इन कली दोस मताइब, काइ हेंथे मपाइब, परमप्रभु यावे आ मुर सेल्शा, आ डोंइती राप्पाइक्तु। एफिसी ५:२७

23 गेपुकीमी थमा सुइक्ना सुइक्न बाक्शा, नोले मशोंइसीथु खोइल थेक्शा, इन नेशो ग्येरपाइक्ब लोत्र मप्रोंइथु बाक्तीनी हना, मोदेशोन लीनीनी। मुल मेको ग्येरपाइक्ब लोत्र नेल्ल मुर आन कली नेंपाइश्शो बाक्त। गो पावल, मेको लोत्र शेंब दुम्ती।

### पावल आ श्येत नु गेय

24 मुल गो इन पबंम श्येत जाता हना यो, ग्येरसाक्यी। मारदे हना आं रांमी ख्रीस्त आ लीशो श्येत थुम्पाइक्नुड। ख्रीस्त आ लीशो श्येत थमा सुइक्ब आन पबंम बाक्ब। मेकोपुकी ख्रीस्त आ रां बाक्नीम। एफिसी ३:१३; २तिमोथी २:१०

25 परमप्रभु यावे आ पतीकेमी मेको आन कली शेंब दुम्ती। परमप्रभु यावेमी आ लोत्र नेल्ल मेको आन कली शेंतीक गेय गेती। मोपा आ लोत्र खाप्चा कली शेंब सेल्लती।

26 साइ डोंइती रे परमप्रभु यावे आ मिम्शो खुइश्शो बाक्त। मुल चहिं मेको आ मुर आन कली कोंइशो बाक्त। रोमी १६:२५; एफिसी ३:३-६

27 परमप्रभु यावेमी मेको आन कली “आं डोंइती खुइश्शो लोत्र अर्को रागी डा मुर आन कली गिश रिम्शो, गिश टेयब बाक्ब” दे तुइक्पाइक्तु। मेको खुइश्शो लोत्र मार बाक्ब देंशा हना, ख्रीस्त इन आगामी बाक्ब। मिनु इन कली परमप्रभु यावे आ छेडछेडम बाक्चा गेब आस यो ख्रीस्तम बाक्ब। १तिमोथी १:१

28 गोपुकीमी येसु ख्रीस्त सु बाक्बा, मार पाइबा, दे शेंनीकी। मुर नेल्ल आन कली “होस पा बाक्कीन” दे यो शेंनीकी। मोपा गोपुकीमी मुर आन कली का का पा ख्रीस्त कली थमा पा तुइक्ब सेल्शा, परमप्रभु यावे आ डोंइती राप्पाइक्चा दाक्नीकी।

29 मोपतीके गो बोल पा शुश गेय पाइनुड। येसु ख्रीस्तमी आं कली मोदेशो पा आ सक्तिमी गेय पपाइक्ब।

- 1 गो इन पर्वम, लाओडीसीया सहर डा थमा सुइक्व आन पर्वम नु का निक्शी अरु आं कली गेनायो मताइब मुर आन पर्वम गिश श्येत जडा, मेको नेल्ल इन कली तुइक्पाइक्वा दाक्नुड।
- 2 मेकोपुकी दाक्मुशा आन थुं बारपदमेक्ल। थमा पा रुप्तीके गिश ठेयब बाक्बा, परमप्रभु यावेमी ख्रीस्त आ पर्वम खुइश्शो लोत्र मार बाक्बा, मेको नेल्ल रूपेक्ल।
- 3 रुप्तीके तुइक्तीके नेल्ल ख्रीस्त आगाम खुइश्शो बाक्नीम। १कोरिन्थी १:२४,३०
- 4 मारदे इन कली मो देंती देशा हना, जोल पा शेंब जाक्शा, शुश मिलो शिलो लोत्र पशा, दूली शेंने मचाप्मेक्ल, दे मो देंती। रोमी १६:१८
- 5 गो इन नेक्था मबाक्ती हना यो, आं थुंमी गेपुकी नु बाक्नुड। इन रिम्शो पशो नु ख्रीस्त कली बोल्यो पा थमा सुइश्शो तशा ग्येरसाक्यी। १कोरिन्थी १४:४०

### नेल्ल ख्रीस्तम बाक्ब

- 6 गेपुकी दोपा डोंइती प्रभु ख्रीस्त येसु कली ओत्रचा गेनी, मोपा मेको नु बाक्कीन।
- 7 खप आगामी शाक्श थोक्शो रवा खोदेशो पा, ख्रीस्त आगा डा बोल्यो मुर दुम्शा बाक्कीन। दोपा शेंसीनी, मोपा बोल्यो पा थमा सुइश्शा, परमप्रभु यावे कली “गे रिम्शो पाइतीनी” दे शुश देना देन बाक्कीन। एफिसी ३:१७
- 8 मिनु गेपुकी दूली लोत्र शेंब आन नोले मखोतीन। मेकोपुकीमी इन कली मुर आन मिम्तीके नु फश लोत्र पशा, मुर आन रिती थिती ला शेंनीमी। मेको रागी रागी डा मुर आन थुं डा बाक्ब, ख्रीस्त के ममाड।
- 9 मारदे हना परमप्रभु यावे आ सक्ति नेल्ल ख्रीस्तम बाक्ब। यूहन्ना १:१४-१६
- 10 गेपुकी मेको नु बाक्शा, आ ब्रोंइतीक सक्तिम ब्रीशो मुर दुम्तीनी। मेको नेल्ल हुकुम पाइब नु नेल्ल अधिकार पाइब आन पिया बाक्ब। एफिसी १:२१
- 11 मेको आ पशोमी खोइक्तीक चिनु पाइश्शो खोदेशो दुम्तीनी। मेको खोइक्तीक चिनु मुरुमी खोइश्शो ममाड, गेपुकी ख्रीस्त कली थमा सुइश्शा, इन मरिम्शो पशो ताइश्शो इन खोइक्तीक चिनु दुम्त। रोमी २:२९; रोमी ६:५; १पत्रुस ३:२१
- 12 मिनु गेपुकी ब्वाक्कुम खुम्शा गुंइचा पुंइसीनीनु, मेको नु बेक्शा थिम्शो दुम्तीनी। परमप्रभु यावे आ पतीके कली थमा सुइक्तीके मेको नु बेक्शो रे सेंशो यो बाक्नीनी। रोमी ६:४; कलस्सी ३:१
- 13 डोंइती गेपुकी मरिम्शो पाइब दुम्शा, खोइक्तीक चिनु इन रांमी मखोइक्थु, बेक्शो मुर खोदेशो बाक्तीनी। परमप्रभु यावेमी इं मरिम्शो पतीके नेल्ल क्याम्शा, इं कली येसु ख्रीस्त नु ब्रोंइपाइक्तु। एफिसी २:१, ५
- 14 नेल्ल गेचा चिक्शो दोस नु सजाइ ब्रेक्शो कागज लाइश्शा, कांटी थोक्शा साइक्तीक शीम वोइक्तु। एफिसी २:१५
- 15 मेकोमी हुकुम पाइब नु अधिकार पाइब आन कली आन या रोइश्शा फ्रुम्तीमी। मोदेशो पा ग्राशा, नेल्ल आन कली कोंइताक्व। परमप्रभु यावे येसु ख्रीस्त आ पशो तशा शुश ग्येरसाक्व। कलस्सी १:१३; एफिसी ४:८
- 16 मोदेशो दुम्शा इन कली मार मार जचा तूचा दुम्बा, मार मार जचा तूचा मदुम्बा, मार मार चाड मानेचा, तेको औंसी ठेयब सेल्चा, तेक तेको नाइक्तीक नाक्ती ठेयब सेल्चा देंब मुर आन लोत्र मनेनीन। रोमी १४:१-१२
- 17 मेको दुम्चा चिक्शो आ वांकु ला बाक्नीम। थमा सुइक्तीक रां चहिं ख्रीस्त के बाक्ब। हिब्रू ८:५; हिब्रू १०:१
- 18 सुइमी इन कली “मतुइक्ब मुर ननी” देंचा मगेने। मेकोपुकीमी आंम मिम्शो पशो बाक्नीम, स्वर्ग डा गेय पाइब आन कली सेउ पचा माल्नीनी, दे शेंनीमी। “गो डोमु खोदेशो पा ततीके तुइक्ताक्क” देंनीमी। मेको मुरपुकी मो ठेयब लेश्शा बाक्शा, आन मिम्शो ला शेंनीम।
- 19 मेकोपुकी पिया नु मबाक्शो बाक्नीम। मेको पियामी रां कली थुल्ना थुलन बाक्मेनु, नाडी नु रुशेम बोइक्पाइश्शा, परमप्रभु यावेमी मेको रां कली कोल्पाइक्ब। एफिसी ४:१५-१६

20 गेपुकी ख्रीस्त नु बेक्तीनी हना, रागी डा थोत्रक नेल्ल इन कली आइक्क बाक्क। मिनु मारदे गेपुकी रागी डा मुर खोदेशो पा पाइनीनी? मारदे गेपुकी रिती थिती पचा टीनीनी? गलाती ४:९-१०

21 मेकोपुकीमी “मेको थिचा मदुम्ब, थाम्चा मदुम्ब, पचा मदुम्ब” देंनीम।

22 मेको शेंबपुकीमी गेय पना पन जाम्ब थोत्रक आन पर्वम लोत्र पाइनीम। मेको लोत्र मुर आन मिम्शो लोत्र ला ममाइ डा? मती १५:९

23 मिनु मेको रिती थिती पचा, शुश धर्म पचा नु मुर आन माल्शो मपथु, थमा पा जोक्क तुइक्क नु ब्रेम्शो दुम्बु पाइनीम। तन्न मोदेशो पतीकेमी मुर आ मरिम्शो पतीके तेक्ने मचाप्व। १तिमोथी ४:३; रोमी १३:१४

### 3

#### माइत नु नक मुर

1 गेपुकी ख्रीस्त नु सेंसीशो बाक्तीनी हना, स्वर्गमी बाक्क दोपा बाक्का, मेको मालीन। मेकेर ख्रीस्त परमप्रभु यावे आ ग्युरा गे निश्शो बाक्क। कलस्सी २:१२

2 इन थुमी स्वर्गम बाक्क कली मिम्तीन। रागी डा थोत्रक ममिम्तीन। मती ६:३३

3 मारदे हना गे बेक्तीनी। इन थुं ख्रीस्त नु परमप्रभु यावेमी खुइश्शा वोइश्शो बाक्क। रोमी ६:२

4 इं कली ब्रोंइचा गेब ख्रीस्त गूत हना, गे यो मेको नु परमप्रभु यावे आ छेडछेड डा बाक्तीकेमी गूनीनी। १कोरिन्थी १५:४३

5 मोपतीके इन आगामी बाक्कशो माइत रागी डा थुं कली सतीन। रागी डा मुर आन थुमी मार बाक्क देशा हना, हेंथे पचा, मार मार ग्रान्ना दिचा डा गेय पचा, आम दला दाक्क पचा, मरिम्शो मिम्तीके नु शिम दुम्तीके बाक्क। शिम दुम्तीके चहिं मूर्ति पूजा पचा खोदेशो बाक्क। एफिसी ५:३

6 परमप्रभु यावे मोदेशो पाइब मटीब मुर आन पर्वम शुश गाइक्क। एफिसी ५:६

7 गेपुकी यो डोंइती मोदेशो पना पन बाक्तीनी।

8 मुल चहिं मेको नेल्ल ताइक्तीन। गाइक्का, चुरचा, मरिम्शो पचा, अरु आन पर्वम मरिम्शो लोत्र पचा, ओल ओल लोत्र पचा ताइक्तीने। एफिसी ४:२९,३१

9 गेपुकी जोल मपमुने। मारदे हना, गे डोंइती डा पतीक नेल्ल ताइक्ताक्नी। एफिसी ४:२२-२५

10 रिम्शो पाइब नक मुर दुमीन। परमप्रभु यावेमी इन थुं आ थुं खोदेशो पा नक सेल्ना सेल्न बाक्क। मारदे मो पाइब देशा हना, आम कली नेल्ल तुइक्पाइक्का कली मोदेशो पाइब। एफिसी ४:२४; उत्पती १:२६-२७

11 मुल रे ग्रीक नु यहूदी खोइक्तीक चिनु खोइक्पाइसीशो नु मखोइक्पाइसीशो मुरपुकी उइक्थ उइक्थ दुम्तेक्म। रागी रागी डा मरुप्चा डा लोत्र पाइबपुकी, ब्वाकी मुरपुकी, वाइलीम वाइलपुकी नु टेयब मुर उइक्थ उइक्थ दुम्तेक्म। ख्रीस्त नेल्ल क्येडा टेयब बाक्क। मिनु नेल्ल आन आगामी बाक्क। गलाती ३:२८

12 गेपुकी परमप्रभु यावे आ योत्रशो, आम आ दाक्कशो मुर दुम्तीनी। मोपतीके शिशी पचा, रिम्शो पमुचा, ब्रेम्शो थुं पाइश्शो, टेयब मलेत्थु टीब नु फाल्ब मुर दुमीने।

13 का निकशीमी दोस गेचा पुंडसाक्क हना, फाल्मुशा, माफ गेमुशा बाक्कीन। प्रभुमी दोपा इन कली माफ गेवा, मोपा माफ गेमुने। एफिसी ४:२; मती ६:१४; एफिसी ४:३२

14 मेको नेल्ल पा इन नेल्ल क्येडा टेयब गेय दाक्कमुचा बाक्क। मारदे हना मेकोम नेल्ल इन कली थुं का डा सेल्ब। रोमी १३:८,१०

15 ख्रीस्त आ थुं इन थुंम नाइश्शा हुकुम पचा गेने। गेपुकी रां का डा दुम्चा कली योत्रसीशो बाक्नीनी। गेपुकीमी प्रभु कली “गे रिम्शो पाइब बाक्नीनी” दे शुश देनीन। फिलिप्पी ४:७; १कोरिन्थी १२:१३,२७; एफिसी ४:३-४

16 ख्रीस्त आ लोत्र खोत ब्रेक्शा वोतीन। गेपुकीमी शुश तुइश्शा, शेंमुशा थुं बारपमुने। परमप्रभु यावे आ लोत्र डा कुम्सो, परमप्रभु यावे कली “गे टेयब बाक्नीनी” दे पशो कुम्सो नु परमप्रभु यावे आ

सोक्तीमी इन कली शेंशो कुम्सोमी “गे रिम्शो पाइब बाक्नीनी” दे इन थुंमी परमप्रभु यावे कली कुम्सो पने। एफिसी ५:१९

17 मार मार लोव्रपुकी, गेयपुकी, मारेइ मारेइ पनीनु, नेल्ल प्रभु येसु आ नेमी पने। इं आफ परमप्रभु यावे कली “गे रिम्शो पाइतीनी” दे येसु आ नेमी देनीन। १कोरिन्थी १०:३१

थमा सुइक्ब दोपा बाक्चा

18 गे मीश मुरपुकी, आंम वोंइश आ देशो लोव्र टिने। मो पाइतीनी हना, प्रभु नु गारशो मुर दुम्नीनी। १पत्रुस ३:७

19 गे वोंइश मुरपुकी, आंम मीश कली दाक्शा, काइ श्येत मगेने।

20 गे आलपुकी, इन आंम आफ कली नेल्लेम टिने। मो पाइतीनी हना, प्रभु ग्येरब।

21 गे आल आन आफपुकी यो, इन आल आन कली रिम्शो पने। काइ श्येत मगेने। श्येत गेतीनी हना, आन थुं जिकब।

22 वाइलीम वाइलपुकी, इन ठेयब मुरुमी मार मार देंनीमी, मेको नेल्ल टिचा माल्नीनी। इन ठेयब मुरुमी कोव्रतेक्म हना यो, मकोव्रतेक्म हना यो, थुं का पशा, प्रभु कली मान पा हिनीन।

23 इन गेय मार बाक्त हना यो, इन थुं नेल्लेमी मुर आन कली ममाइ, प्रभु कली गेय पने।

24 गे प्रभु आ गुइ रे इनाम ताइब बाक्नीनी, दे तुइक्नीनी। मेकोन मिम्ना मिम्न गेय पने। गेपुकी प्रभु ख्रीस्त कली गेय पाइब बाक्नीनी।

25 मरिम्शो पाइबपुकीम मरिम्शो पतीके कुल मकोव्रथु निसाफ पचा पुंडसीनीम। रोमी २:११

## 4

1 गे ठेयब मुरपुकी, इन के यो ठेयब होव्रप का स्वर्गम बाक्ब, दे तुइश्शा, इन वाइलीम वाइल आन कली ठीक पा आन माल्शो थोव्रक गेने। लेवी २५:४३, ५३

प्रार्थना पचा मप्रोंइचा

2 गेपुकीमी प्रार्थना पचा मप्रोंइथु, पना पन बाक्कीन। परमप्रभु यावे कली “गे रिम्शो पाइब बाक्नीनी” देचा मप्रेंदीन। रोमी १२:१२; १थिस्सलोनिकी ५:१७

3 गेपुकीमी आंइ कली यो मिम्शा प्रार्थना पने। परमप्रभु यावेमी आंइ कली ख्रीस्त आ खुइश्शा लोव्र शुश मुर आन डोंइती शेंने चाप्मेक्ल, दे पुनीन। मेको लोव्र शेंतीके गो ग्याइक्चा पुंडसाक्की। रोमी १५:३०; एफिसी ६:१९; २थिस्सलोनिकी ३:१; १कोरिन्थी १६:९; कलस्सी १:२६-२७

4 रिम्शो रुप्चा डा लोव्र पने चाप्मेक्ल, दे यो पुनीन।

5 गेपुकी थमा मसुइक्ब आन डोंइती रिम्शो जोक्शा तुइश्शा गेय पने। लोव्र पचा तनीनु, रिम्शो पा लोव्र पने। एफिसी ५:१५-१६; १थिस्सलोनिकी ४:१२

6 इन पशो लोव्र हिक्सी डांम्शो खोदेशो दुम्ल। इन कली हिल्लो पाइब नेल्ल आन कली दोपा लोव्र लेत्चा, दे तुइक्चा माल्नीनी। मर्कूस ९:५०; एफिसी ४:२९

नोले डा लोव्र

7 आं पबर्मी मार मार दुम्मे, मेको नेल्ल तिखीकसमी इन कली देंब। मेको इं दाक्शो लोक्ब बाक्ब। दीगो पा गेय पाइब नु आं खोदेशो प्रभु आ वाइल बाक्ब।

8 गोपुकी दोपा बाक्नीकी, दे इन कली शोव्रचा नु इन थुं बारपाइक्चा कली मेको कली इन बाक्तीके सोइक्ताक्ड। एफिसी ६:२१-२२

9 इं दाक्शो नु रिम्शो पाइब लोक्ब, ओनेसीमस मेको नु जाक्ब। मेको इन मुरुन बाक्ब। एक मार मार दुम्मे, मेको निक्शीमी इन कली देंनीसी। फिलेमोन १०

10 गो नु ग्याइक्चा पुंडसीब वारच अरीस्तारकसमी इन कली “रिम्शो बाक्कीन” दे आं कली ब्रेक्पाइक्ती। बारनाबास आ लोक्ब मर्कूसमी यो इन कली “रिम्शो बाक्कीन” देंत। मेको जाक्मेनु, रिम्शो पा बाक्चा गेने। मेको आ पबर्म इन कली डोंइती तुइक्पाइक्तन्नी। प्रेरित १९:२९; प्रेरित २७:२; प्रेरित १२:१२, २५

11 येसु माइश्शो याइनी नें पाइश्शो युस्तसमी यो इन कली “रिम्शो बाक्कीन” देंत। परमप्रभु यावे आ राज्य डा गेय पाइब आं वारचपुकी मेको सां ला खोइक्तीक चिनु पाइश्शो यहूदी बाक्नीम। मेकोपुकीमी आं कली वारच पाइश्शा, आं थुं नाइक्चा गेतीमी।

12 ख्रीस्त येसु आ गेय पाइब इन मुर इपाफ्रासमी इन कली “रिम्शो बाक्कीन” देंत। मेकोमी इन कली मिम्शा, परमप्रभु यावे कली “कलस्सी आन कली रुप्तीक थुं गेशा, इन दाक्शो नेल्ल तुइक्तमेक्ल” दे पुंडना पुंडन बाक्ब। कलस्सी १:७; फिलेमोन २३

13 इन कली, लाओडीसीया नु हिरापोलीस डा थमा सुइक्ब आन कली शुश गेय पाप्तु, दे गो इन कली तुइक्पाइक्ता। प्रकाश ११:१; प्रकाश ३:१४

14 इं दाक्शो डाक्टर लूका नु डेमासमी यो इन कली “रिम्शो बाक्कीन” देंताक्स।

15 लाओडीसीया सहर डा लोकब आन कली नु नुम्फा माइश्शो आ खिंमी गुम्ब थमा सुइक्ब आन कली यो गोमी “रिम्शो बाक्कीन” देंत ने, दे मतीन।

16 मिनु एको चिठी इन गुम्तीकेमी पढेने थुम्शा, लाओडीसीया सहर डा थमा सुइक्ब आन गुम्तीकेमी यो पढेचा गेने। लाओडीसीया डा थमा सुइक्ब आन कली ब्रेक्शो चिठी गेपुकीमी पढेने।

17 गेपुकीमी अरकीप्पस कली “प्रभुमी इ कली गेशो शेंतीक गेय नेल्ल रिम्शो पावो” दे मतीन। फिलेमोन २

18 गो पावलमी इन कली “रिम्शो बाक्कीन” दे आंमा ब्रेक्ताक्ड। गो ग्याइक्चा पुंडसीशो बाक्नुड, दे मप्रेंदीन। परमप्रभु यावे आ शिशी गे नु लील। १कोरिन्थी १६:२१; गलाती ६:११; २थिस्सलोनिकी ३:१७

## १ थिस्सलोनिकी

**ब्रेक्ब मुर:** एको चिठी पावल थिस्सलोनिकी आन कली आ डोंइती ब्रेक्शो चिठी बाक्ब।

**गेना ब्रेक्शो:** पावल निकशी खेयप रागी रागी लशा, कोरिन्थ सहरम बाक्शा, एको चिठी ५३ ए. डी. मेको बर्स डा डोंइती डा महिनाम ब्रेक्शो बाक्ब।

**मार ब्रेक्शो:**

१. पावलमी श्येत जाइब नक थमा सुइक्ब आन थुं बारपाइव्तु।
२. पावलमी थमा सुइक्ब आन कली प्रभु कली शिरशो गेय पचा आ पबर्म अरेब।
३. पावलमी येसु ख्रीस्त दोपा लेशशा जाक्बा, मेको शेंब। मारदे हना दूली शेंब गुम्तीकेम जाक्शा, मुर आन थुं क्याल्लेक्म।

**डोंइती डा लोव**

1 गो पावल नड। सिल्वानस नु तिमोथी यो गो नु बाक्नीस। गो इं आफ परमप्रभु यावे नु इं प्रभु येसु ख्रीस्त कली थमा सुइक्ब थिस्सलोनिकी सहर डा इन कली चिठी ब्रेक्ताक्ड। येसु ख्रीस्तमी इन कली शिशी पा इन थुं नाइक्चा गेवल। प्रेरित १५:४०; प्रेरित १६:१-३, १९; प्रेरित १७:१-९; २थिस्सलोनिकी १:१

**थिस्सलोनिकी डा थमा सुइक्ब**

2 गोपुकी प्रार्थना पकानु, परमप्रभु यावे कली “गे थिस्सलोनिकी सहर डा थमा सुइक्ब नेल्ल आन रिम्शो पाइतीनी” दे गेना हना यो देनीकी।

3 गोपुकी इं आफ परमप्रभु यावे आ डोंइती इन थमा सुइक्तीके डा गेय, दाक्चा डा गेय नु इं प्रभु येसु ख्रीस्त कली आस पतीके मिम्ना मिम्न बाक्नीकी। १कोरिन्थी १३:१३

4 आंइ थमा सुइक्ब लोकबपुकी, परमप्रभु यावेमी इन कली दाक्शा योव्रतु, दे तुइक्नीकी।

5 मारदे हना इन कली शेंशो ग्येरपाइक्ब लोव्र पचा ला मशेंदक, सक्ति यो ताइतीनी। परमप्रभु यावे आ सोक्तीमी आंइ कली शुश तुइक्तीक थुं गेशा प्रिंताक्व। गोपुकी दोदेशो मुर बाक्नीकी, दे गोपुकी नु बाक्शा कोंइताक्क। मिनु गे तुइक्ताक्नी। १कोरिन्थी २:५

6 गोपुकी आंइ खोदेशो नु प्रभु खोदेशो पाइब दुम्तीनी। मारदे हना गोपुकी शुश श्येत जशा, परमप्रभु यावे आ लोव्र नेतीनी। मिनु परमप्रभु यावे आ सोक्तीमी इन थुं ग्येरपाइक्वतु। २थिस्सलोनिकी ३:७

7 मोपा गोपुकी मासीडोनीया नु आकाया रागी डा थमा सुइक्ब आन कली रिम्शो कोंइतीक दुम्तीनी।

8 डोंइती गोपुकी प्रभु आ लोव्र मासीडोनीया नु आकाया रागी डा मुर आन कली शेंताक्नी। मेको आन कली ला ममाइ, नेल्ल अर्को रागी डा मुरपुकीमी यो इन परमप्रभु यावे थमा सुइक्तीके तुइक्ताक्म। मोपतीके गो मेकेर शेंचा ममाल्नीकी। रोमी १:८

9 मेकोपुकीमी इं पबर्म लोव्र पाम्तेक्म। मार लोव्र पाम्तेक्म देंशा हना, थिस्सलोनिकी सहर डा मुरपुकीमी आंइ कली मिश रिम्शो ब्राम्तेक्म। मिनु गोपुकी इन मूर्ति कली प्रॉइशा, परमप्रभु यावे कली थमा सुइक्ब दुम्शा, ब्रॉइशा बाक्ब, थमा परमप्रभु यावे आ गेय पाइब दुम्तीनी। प्रेरित १४:१५; १कोरिन्थी १२:२

10 मिनु बेक्शो रे सेंशो परमप्रभु यावे आ तौ लेंशा सरीड रे यीब, दे रिम्शा बाक्तीनी। येसुमी इं कली परमप्रभु यावे आ गाइक्चा रे प्रॉइब। तीतस २:१३

## 2

**पावल आ गेय**

1 आंइ लोकबपुकी, इन कली गुम्चा मोशा मदुम्शो बाक्त, दे तुइक्नीनी।

2 गोपुकी डोंइती फिलिप्पी सहरमी श्येत जशा, मुरपुकीमी आंड कली शुक्शी पाम्तेक्म, दे तुइक्नीनी। शुश शुक्शी पाम्तेक्म हना यो, परमप्रभु यावेमी आंड कली चारच पाइब, दे थमा सुइश्शा, परमप्रभु यावे आ ग्येरपाइक्ब लोव्र इन कली शेंताक्क। प्रेरित १६:२०-२४; प्रेरित १७:१-५

3 गोपुकीमी इन कली मुरुम पशो जोल रे मशेंदक। टेयब दुम्कल, दे ममिम्तक। २कोरिन्थी ४:२; २कोरिन्थी ११:७; यूहन्ना ५:४४

4 परमप्रभु यावेमी आंड कली ग्येरपाइक्ब लोव्र शेंचा, दे शेंब सेलतीकी। मोपतीके गोपुकी मुर आन दाक्शो लोव्र मशेंथु, परमप्रभु यावे आ दाक्शो लोव्र शेंशा गाक्तक। मेकोमी आंड थुं कली नाक्शा कोव्रब। गलाती १:१०

5 गो इन कली मिलो शिलो मपक, दे तुइक्नीनी। इन क्येट ताइनीकी कों, दे मिम्शा मशेंदक, मेको परमप्रभु यावेमी तुइक्ब। मत्ती १२:४०; प्रेरित २०:३३

6 गे नु अरु मुरपुकीमी आंड कली टेयब सेलीन, दे मशेंदक।

7 गोपुकी ख्रीस्त आ सोइश्शो दुम्शा, इन गुइ रे मार मार ताक्चा ठीक दुम वा। तन्न गो आल कली दूध तुंडब ममा खोदेशो पा, इन कली कोव्रतक।

8 गोपुकीमी इन कली शुश दाक्शा, परमप्रभु यावे आ ग्येरपाइक्ब लोव्र शेंचा ला ममाइ, तन्न शेंचा आ पर्वम बेक्चा माल्तक हना यो, बेक्नीकी। २कोरिन्थी १२:१५

9 आंड लोकबपुकी, गे नु बाक्शा, शुश गेय पाइतक, दे तुइक्नीनी। गोपुकीमी परमप्रभु यावे आ ग्येरपाइक्ब लोव्र शेंदकानु, इन कली श्येत मगेचा, दे नाक्दो नाक्त गेय पाइतक। प्रेरित १८:३; प्रेरित २०:३३-३४; १कोरिन्थी ४:१२; २थिस्सलोनिकी ३:८

10 गो ठीक, रिम्शो नु परमप्रभु यावे आ गेय ला पाइतक। परमप्रभु यावेमी मेको तुइक्ब। मिनु गे थमा सुइक्बमी यो तुइक्नीनी।

11 मिनु गोपुकीमी आल आन कली रिम्शो अरेब आफ खोदेशो पा इन कली अरेतक। इन थुं बारपाइश्शा

12 “परमप्रभु यावे आ मुर दुम्शा, मेको आ डोंइती शिरशो दुम्शा बाक्कीन” दे इन कली पन कि पन, दे शेंशा शुश अरेतक। परमप्रभु यावेमी इन कली आंम राज्य नु आ छेडछेडमी बाक्चा गेचा कली ब्रेप्ब। एफिसी ४:१-२; फिलिप्पी १:२७

### थिस्सलोनिकी आन श्येत

13 गोपुकीमी आंड शेंशो परमप्रभु यावे आ लोव्र नेंशा, मुर आ लोव्र ममाइ, थमा पा परमप्रभु यावे आ लोव्र बाक्ब, दे तुइक्ताक्नी। थमा सुइश्शा मेको लोव्रमी इन थुंमी गेय पना पन बाक्ब। मो दुम्मेनु, गोपुकीमी परमप्रभु यावे कली “गे थिस्सलोनिकी डा मुर आन कली रिम्शो पाइतीनी” देना देन बाक्नीकी। गलाती १:११-१२

14 आंड लोकबपुकी, गे यहूदीया डा परमप्रभु यावे आ गुम्तीक डा ख्रीस्त येसुमी बाक्ब थमा सुइक्ब खोदेशो दुम्तीनी। मारदे हना यहूदीया डा मुरपुकीमी आंम रागी डा थमा सुइक्ब आन कली श्येत गेशो खोदेशो पा, इन रागी डा मुरपुकीमी यो इन कली श्येत गेम्तेक्म। प्रेरित ८:१; प्रेरित १७:५-६

15 यहूदीया डा मुरपुकीमी प्रभु येसु कली नु परमप्रभु यावे आ लोव्र पाइब आन कली साइश्शा, आंड कली खेरतेक्म। मेकोपुकीमी मोपा परमप्रभु यावे कली मग्येरपदेम, मुर नेल्ल आन कली श्येत गेम्तेक्म। प्रेरित २:२३; मत्ती २३:३७; प्रेरित ७:५२

16 दोपा श्येत गेम्तेक्म देशा हना, रागी रागी डा मुर आन कली पाप रे ब्रोंइचा ताइनीम, दे आंड कली लोव्र पचा मगेम। मोदेशो पा यहूदीम आन पाप गेना हना यो तेम्ना तेम्न बाक्नीम। मोपतीके परमप्रभु यावेमी मेको आन कली चुरशा सजाइ गेब। मत्ती २१:३२-३३

17 आंड लोकबपुकी, गोपुकी नु मबाक्थु, गोपुकी रोइक्च खोदेशो दुम्तक। इन बाक्तीकेमी जाक्चा मतथु, इन कली शुश मिम्शा गुम गुम दाक्तक।

18 गो इन कली गुम गुम दाक्बमी गो पावल चहिं शुश पिचा दाक्शो बाक्ती। तन्न सैतानमी आंड कली गुम्थ पिचा मगेव।

19 इं प्रभु येसु आ यिची ना गे आंड आस पतीके, ग्येरतीके नु सिरपेच खोदेशो बाक्नीनी। फिलिप्पी २:१६; फिलिप्पी ४:१

20 इन कली तशा, ग्येरशा आंड नें बोरपाइक्नीकी।

### 3

#### तिमोथी लशा लेशशो

1 मोपतीके गो इन कली श्येत जशो तशा, फाल्ने मचाप्क। गो निक्शी एथेन्स सहरम बाक्स्कु, दे सल्ला पाइतक। प्रेरित १७;१४-१६

2 गो निक्शीमी आंस लोकब, गो नु परमप्रभु यावे आ गेय पाइब, खीस्त आ ग्येरपाइक्ब लोत्र शेंब, तिमोथी कली इन थमा सुइक्तीक बारपाइक्चा नु इन कली अरेचा कली सोइक्ताक्स्कु। प्रेरित १६:१-३

3 सुइमी श्येत जशा थमा सुइक्चा मप्रोन्मेक्ल। मारदे हना गोपुकीमी श्येत जचा मालनय, दे तुइक्नीनी। प्रेरित १४:२२; एफिसी ३:१३; हिब्रू १०:३९; २तिमोथी ३:१२

4 डोंइती रे गो नु बाक्नीनु “श्येत जचा मालनय” दे शेंताक्क। मुल आंड शेंशो दुम्त। मेको यो तुइक्नीनी।

5 गो इन कली श्येत जशो तशा फाल्ने मचबु। मोपतीके तिमोथी कली इन थमा सुइक्तीक दोपा बाक्म, दे तुइक्चा कली कोव्रथ सोइक्ताक्क। मुर आन कली पाप पपाइक्बमी इन कली बिग्रेवा कों, आंड पशो गेय यो मोशा लम कों, दे गो हिंती। फिलिप्पी २:१६

6 मिनु तिमोथी इन कली ग्रुम्थ पिशा, लेशशा जाक्त। मेकोमी इन थमा सुइक्तीके नु इन दाक्तीके रिम्शो बाक्ब। गोपुकी आंड कली गेना हना यो शुश मिम्नीनी, गोपुकी खोदेशो पा आंड कली ग्रुम्चा दाक्नीनी, दे तिमोथीमी आंस कली देंत। प्रेरित १८:५

7 आंड लोकबपुकी, गोपुकी शुश श्येत जाइतक हना यो, इन थमा सुइक्तीक आ परबम लोत्र नेंशा ग्येरसाक्क।

8 मारदे हना गे प्रभु कली मप्रॉइब बाक्नीनी, दे तुइश्शा, गोपुकी डोंइती रोइ पशा, मुल चहिं साशा ब्रॉइशो मुर खोदेशो बाक्नीकी।

9 गो परमप्रभु यावे आ डोंइती “गे थिस्सलोनिकी सहर डा थमा सुइक्ब आन कली रिम्शो पाइतीनी” दे शुश ग्येरशा, परमप्रभु यावे कली टेयब सेल्नीकी।

10 मिनु नाक्दो नाक्त गोपुकी परमप्रभु यावे कली “थिस्सलोनिकी सहर डा थमा सुइक्ब आन कली ग्रुम्थ सोइक्तीन। मुल सम्म मशेंथु लीशो लोत्र शेंथ सोइक्तीन” दे पुंडना पुंडन बाक्नीकी।

11 इं आफ परमप्रभु यावे नु इं प्रभु येसुमी आंड कली गोपुकी नु ग्रुम्चा गेम्सेक्ल।

12 गोपुकीमी इन कली शुश दाक्शो खोदेशो पा प्रभुमी इन दाक्चा शुश बारपाइश्शा, दाक्मुचा नु अरु आन कली यो दाक्ब दुमीन।

13 मोपा प्रभु येसु आ मुर नु जाक्ची ना इन थमा सुइक्तीक थुं बारपाइश्शा, दोस गेचा मपुंडसीब, इं आफ परमप्रभु यावे आ डोंइती रिम्शो सेलल। १कोरिन्थी १:८; फिलिप्पी १:१०

### 4

#### परमप्रभु कली ग्येरपतीन

1 मिनु आंड नोले डा लोत्र, आं लोकबपुकी, प्रभु येसु आ नेंमी इन कली शुश शेंतीक नु अरेतीक लोत्र पाइनीकी। गोपुकी आंड कली दोपा बाक्शो तनी, मोपा बाक्शा, परमप्रभु यावे कली ग्येरपतीन। गोपुकी मेको क्येडा यो शुश रिम्शो पने।

2 गोपुकीमी प्रभु येसु आ नेंमी इन कली मार अरेतीक लोत्र गेका, मेको गे तुइक्नीनी।

3 परमप्रभु यावे आ दाक्शो मार बाक्ब देशा हना, मरिम्शो मपचा नु ग्रॉग्रा दिशो गेय रे डोन बाक्चा बाक्ब।

4 गे नेल्ल आंम मीश नु बाक्शा, हेंथे मगाक्थु, मान तचा कली शिरशो दुम्शा बाक्कीन।

5 अर्को रागी डा परमप्रभु यावे कली मतुइक्ब मुरपुकीमी खोदेशो पा ग्रॉग्रा दिचा डा गेयमी मबाक्कीन।



6 सुइ वोंइश मुरुम आ लोकब कली मोदेशो पा श्येत मगेवल। मारदे हना प्रभुमी मोदेशो पाइब आन कली क्येक्क लेप्ब, दे डोंइती रे इन कली शेंताक्क। लेवी १९:११

7 परमप्रभु यावेमी इं कली ग्रॉग्रा दिचा डा गेय पचा कली मयोंव्रड। पाप रे डोन बाक्चा कली योंव्रतु।

8 मोपतीके सुमी मेको लोत्र मटीबा, मेकोमी मुर आ लोत्र मटीब ममाइ, परमप्रभु यावे कली मटीब बाक्ब। परमप्रभु यावेमी इन कली आ सोक्त गेब। लूका १०:१६

9 थमा सुइक्ब लोकब आन दाक्मुतीके आ पर्वम सुइ मुरुमी इन कली ब्रेक्चा ममाल्ब। मारदे हना परमप्रभु यावेमी इन कली दाक्मुचा माल्नीनी, दे आंमान शेंशो बाक्त। यूहन्ना १३:३४; लेवी १९:१८

10 मिनु गेपुकी थमा पा मासीडोनीया रागी डा लोकब नेल्ल आन कली दाक्नीनी। गोपुकीमी मेको क्येडा यो दाक्तीन, दे इन कली अरेनीकी।

11 गेपुकी दुशा बाक्कीन। आंम खिं डा गेय ला मिन्तीने। आंमान गेय पना पन बाक्कीन। मेको इन कली अरेतीक लोत्र पाइतक। १थिस्सलोनिकी २:९; एफिसी ४:२८; २थिस्सलोनिकी ३:८,१२

12 मो पाइतीनी हना, अरु मुरपुकीमी इन कली ठेयब सेल्नीम। मिनु सुइ के मारेइ ममाल्नीनी। कलस्सी ४:५

### येसु यिचा आ पर्वम

13 आंइ लोकबपुकी, बेक्शो मुर आ पर्वम रागी रागी डा मुरपुकीमी हिशेक शुश पाइनीम। मारदे हना मेको आन के आस मबाक्ब। गेपुकी चहिं मतुइक्ब खोंदेशो पा, बेक्शो इन वारच आन पर्वम थुं खाइक्पाइश्शा मबाक्कीन। १कोरिन्थी १५:२०; एफिसी २:१२

14 गोपुकी येसु बेक्शा सेंसाक्व, दे थमा सुइक्तय हना, परमप्रभु यावेमी येसु आ पतीकेमी बेक्शो मुर आन कली सेंशा चाक्ब। रोमी १४:९; १कोरिन्थी १५:३,९,१२

15 मिनु गोपुकीमी इन कली प्रभु आ लोत्र रे “प्रभु आ यिचा सम्म बाक्बपुकी बेक्शो वारच आन क्येडा डोंइती प्रभु कली युन्चा मताइनय” दे तुइक्पाइक्नीकी। मती १६:२८; मती २४:३०-३१; १कोरिन्थी १५:५१-५२; यूहन्ना १७:२४

16 मारदे हना प्रभुमी आ मुर आन कली “कुन” दे ब्रेत्तानु, नेल्ल क्येडा ठेयब परमप्रभु यावे आ स्वर्ग डा गेय पाइबमी यो ब्रेप्ब। परमप्रभु यावे आ तुराही ताप्शो नेंनीम। मेना प्रभु सरीड रे यीब। ख्रीस्त कली थमा सुइश्शा बेक्शो मुरपुकी डोंइती सेंसीनीम।

17 नोले ब्रोंइशा लीशो गोपुकी मेको नु गोस्सुमी क्युकसीशा, मेकोपुकी नु लाइनय। मेकोपुकी नु सरीडमी देल्शा बाक्शा, प्रभु कली युन्नय। मोदेशो पा गोपुकी गेना हना यो प्रभु नु काथा बाक्चा ताइनय। यूहन्ना १२:२६

18 मोपतीके मेको लोत्र पा थुं बारपाइक्मुने।

## 5

### प्रभु आ नाक्त

1 आंइ लोकबपुकी “गिश बर्स लीबा, गेना सम्म रिन्चा” दे इन कली ब्रेक्चा ममाल्नीकी। मती २४:३६

2 मारदे हना गेपुकी प्रभु आ नाक्त खुइ खोंदेशो पा जाक्ब, दे तुइक्नीनी। मती २४:४२-४४; २पत्रुस ३:१०; प्रकाश ३:३; प्रकाश १६:१५

3 मेना मुरुमी “दुशा बाक्नय, मारेइ मदुम्ब” देतेक्म हना यो, आल कुरशो मीश मुर आल थिचा रोइ गेना पाइबा मतुइक्ब। मोदेशो खोंदेशो पा मुरपुकी मब्रोंइचा डा पा श्येत जाइनीम। येरमीया ६:१४; मती २४:३९

4 गे लोकबपुकी चहिं छिडछिडम मबाक्नीनी। मेको नाक्त खुइ जाक्शो खोंदेशो पा इन कली महिंपाइक्ब।

5 मारदे हना गे नेल्ल छेडछेड नु नाक्त डा मुर बाक्नीनी। गोपुकी नाक्दो नु छिडछिड डा मुर मनय। रोमी १३:१२; एफिसी ५:९

6 मोपतीके अरु खोंदेशो पा गो मइप्य, सासीशा “प्रभु यीब” दे मिन्ना मिन्म बाक्ब। १पत्रुस ५:८

7 इक्बपुकी नाक्दो इन्मीम, दुक्बपुकी नाक्दो दुक्शा बाक्नीम।

8 तन्न गोपुकी नाक्त डा मुर दुम्शा “प्रभु यीब” दे मिम्ना मिम्न बाक्शा, परमप्रभु यावे आ या डा पीतल के भोटो खोदेशो पा, थमा सुइक्तीके नु दाक्तीके फेक्शा बाक्य। पीतल के ताकी गुप्शो खोदेशो पा पाप रे प्रोंडशो बाक्नुड, दे तुडुशशा आस पय। एफिसी ६:१४-१७

9 मारदे हना परमप्रभु यावे इं पबर्म मगाइक्ब। प्रभु येसु ख्रीस्त आ पतीके पाप रे ब्रोंडब सेल्लु।

10 मेको इं पबर्म साइक्चा पुंडसाक्ब। मो दुम्तीके गोपुकी इप्तय हना यो, मइप्तय हना यो, मेको नु ब्रोंडचा ताइनय। रोमी १४:८-९

11 मोपतीके अरेपमुशा, इन थुं बारपमुने। गोपुकी मोदेशो पना पन यो बाक्तीनी। हिब्रू ३:१३

नोले डा लोत्र

12 आंड लोक्बपुकी, इन कली शेंब नु लां कोंडशा, अरेब आन कली रिम्शो पने, दे माइक्नीकी। १कोरिन्थी १६:१८

13 मेकोपुकी नु शुश दाक्मुशा बाक्कीन। मारदे हना प्रभु आ गेय पाइब बाक्नीमी।

14 आंड लोक्बपुकी, गेय मपाइब आन कली अरेपने। हिंब मुर आन थुं बारपतीन। मचापब आन कली वारच पने। नेल्ल आन कली फाल्शा बाक्कीन। २थिस्सलोनिकी ३:१५

15 मुरुमी इन कली मरिम्शो पाम्तेक्म हना, गोपुकी मेको आन कली मरिम्शो मपने। रिम्शो पमुचा माल्नीनी। अरु आन कली यो रिम्शो पने। हितोपदेस २०:२२; रोमी १२:१७,२१; १पत्रुस ३:९

16 मिनु गेना हना यो ग्येरसीन। फिलिप्पी ४:४

17 प्रार्थना पना पन बाक्कीन। लूका १८:१-८; रोमी १२:१२; एफिसी ६:१८; कलस्सी ४:२

18 मार दुम्त हना यो, परमप्रभु यावे कली “गे रिम्शो पाइब बाक्नीनी” देनीन। मारदे हना मेको परमप्रभु यावे आ दाक्शो बाक्ब। ख्रीस्त येसु आ नोले खोइक्ब मेको गेना हना यो देंचा माल्नीम। एफिसी ५:२०

19 परमप्रभु यावे आ सोक्त कली मकाप्तीन। १कोरिन्थी १४:१,३९

20 परमप्रभु यावेमी तुइक्पाइशो लोत्र पचा गेन।

21 तन्न परमप्रभु यावे आ लोत्र नु गारबा देय मगारबा, दे नाक्शा कोत्रडीन। गारत हना, मप्रेदीने।

22 नेल्ल ग्रान्ना दिचा डा गेय क्येडा डोन बाक्कीन।

23 थुं नाइक्पाइक्ब परमप्रभु यावेमी इन कली थम रिम्शो सेलल। इन सोक्त, थुं नु रां इं प्रभु येसु ख्रीस्त मयिम सम्म रिम्शो नु दोस मताइब दुम्शा बाक्मल।

24 इन कली ब्रेपब इन कली देशो पाइब बाक्ब। मेकोमी थमा पाइब। १कोरिन्थी १:९; २थिस्सलोनिकी ३:३

25 आंड लोक्बपुकी, आंड पबर्म परमप्रभु यावे कली पुनीन।

26 लोक्ब नेल्ल आन कली प्रभु आ नेमी मुम्मुशा आसीक गेने।

27 प्रभु आ नेमी एको चिठी लोक्ब नेल्ल आन कली पढेशा नेंपतीन।

28 इं प्रभु येसु ख्रीस्त आ शिशी गोपुकी नु लील।

## २ थिस्सलोनिकी

**ब्रेक्ब मुर:** एको चिठी पावल थिस्सलोनिकी आन कली आ नोले ब्रेक्शो चिठी बाक्ब।

**गेना ब्रेक्शो:** थिस्सलोनिकी डा थमा सुइक्ब आन कली डोंइती ब्रेक्शो चिठीम ब्रेक्शो खोदेशो बाक्तेकम। पावल सिल्वानस नु तिमोथी बाक्शो कोरिन्थ सहरम बाक्शो बाक्त। मोपतीके एको चिठी ५३ ए. डी. डा बर्स डा नोले डा महिनाम ब्रेक्शो बाक्ब, दे मिन्मीम।

**मार ब्रेक्शो:** डोंइती डा चिठीम नोले थिस्सलोनिकी डा थमा सुइक्बम रिम्शो पाम्तेकम हना यो, का निक्शी चहिं हेंथे पाम्तेकम। मुल पावलमी गुम्तीक डा शेंब कली थमा सुइक्ब आन कली गेय रिम्शो पचा कली ठीक सेल्चा माल्ब, दे ब्रेक्शो बाक्ब।

**डोंइती डा लोव**

1 गो पावल नड। सिल्वानस नु तिमोथी यो गो नु बाक्नीस। गो इं आफ परमप्रभु यावे नु प्रभु येसु ख्रीस्त कली थमा सुइक्ब थिस्सलोनिकी सहर डा इन कली चिठी ब्रेक्ताकड। १थिस्सलोनिकी १:१  
2 इं आफ, परमप्रभु यावे नु प्रभु येसु ख्रीस्तमी इन कली शिशी पा, इन थुं नाइशा बाक्चा गेम्सेकल।

**श्येतम खोइल थेक्शा बाक्शो**

3 आंइ लोकबपुकी, इन कली मिम्शा, परमप्रभु यावे कली “गे रिम्शो पाइब बाक्नीनी” देंचा ठीक बाक्ब। मारदे हना इन थमा सुइक्तीके हु बारशा, इन दाक्मुतीक यो बारना बारन लाइब। १थिस्सलोनिकी १:२-३

4 मोदेशो दुम्शा, गेपुकी खेदा पचा पुंइसीशा, श्येत फाल्शोमी खोइल थेक्शा थमा सुइक्ब बाक्नीनी, दे गोपुकीमी परमप्रभु यावे कली थमा सुइक्ब आन गुम्तीकेमी इन पबंम ग्येरशो लोव पाइनीकी। २कोरिन्थी ७:४

5 गेपुकी परमप्रभु यावे आ राज्यम शिरशो मुर दुम्तीनी। मिनु मेको राज्य आ पबंम श्येत जाइनीनी। परमप्रभु यावेमी इन कली श्येत जचा गेप्टु हना यो, ठीक निसाफ पाइब बाक्ब। फिलिप्पी १:२८

**निसाफ पची नाक्त**

6 परमप्रभु यावेमी थमा पा इन कली श्येत गेब आन कली क्येक्क लेप्ब। रोमी १२:१९; प्रकाश १८:६-७

7 गे श्येत जाइब इन कली नु आंइ कली इं थुं नाइक्चा गेब। गेना थुं नाइक्चा गेब देंशा हना, प्रभु येसु नु आ सक्ति पाइशो स्वर्ग डा गेय पाइबपुकी सरीड रे यूची ना इं थुं नाइक्चा गेब। मत्ती १६:२७; मत्ती २५:३१-४६; १थिस्सलोनिकी ४:१६

8 मेको नु हुरुर पा ब्रशो मी सरीड रे यीब। प्रभुमी परमप्रभु यावे कली मतुइक्ब नु आ ग्येरपाइक्ब लोव मटीब आन कली क्येक्क लेप्ब। रोमी २:८

9 मेको मुरपुकी गेना हना यो साम्सीशो दुम्शा, प्रभु आ कुल मताइनीम। आ सक्ति डा छेडछेड यो मताइनीम।

10 थमा सुइक्बपुकी चहिं आ जाक्ची नाक्त आ नें टेयब सेल्शा, थमा सुइक्ब नेल्लेमी आ छेडछेड तशा छक लाक्नीम। मारदे हना गेपुकी आंइ शेंशो लोव थमा सुइक्तीनी।

11 मोपतीके गो इन पबंम प्रार्थना पना पन बाक्नीकी। परमप्रभु यावेमी इन कली ब्रेशशा, आ ब्रेशशो शिरशो सेलल, दे गोपुकीमी गेना हना यो, पुंइना पुंइन बाक्नीकी। इन रिम्शो पतीके नु इन थमा सुइशो डा गेय आ सक्तिमी पपदल।

12 मो दुम्शा, इं प्रभु येसु आ नें इन पबंम टेयब सेल्नीम। गेपुकी आ मुर दुम्शा, मान ताइनीनी। मेको इं परमप्रभु यावे नु प्रभु येसु ख्रीस्त आस शिशी डा गेय बाक्ब।

## 2

येसु ख्रीस्त यिचा आ पबंम

- १ आंड लोकबपुकी, इं प्रभु येसु खीस्त यिशा, गोपुकी नु गुम्चा आ पबर्मी १थिस्सलोनिकी ४:१३-१७
- २ इन थुं मक्यन। सोक्तीमी कोंडताक्व देंसु पाइनीम। आंड ब्रेक्शो चिठी जाक्त, देंसु पाइबमी “प्रभु आ नाक्त जाक्शा नुप्त” दे लोत्र पाम्तेक्म हना यो, थमा मसुतीन। २पत्रुस ३:१५-१६
- ३ इन कली दूली शेंतीके शेंब आन कली थमा मसुतीन। मारदे हना प्रभु येसु खीस्त आ नाक्त जाक्चा क्येडा डोंइती परमप्रभु यावे कली मटिथु नेल्ल क्येडा मरिम्शो पाइब का गूब। मेको कली जाम्शा लाइब आ तौ यो देंनीम। १तिमोथी ४:१; १यूहन्ना २:१८
- ४ मेकोमी “मानेचा डा मारेइ मबा” देंब। परमप्रभु यावे नु मानेचा डा थोत्रक आन क्येडा आम कली ठेयब सेल्शा, परमप्रभु यावे आ खिंमी निश्शा “गो का ला परमप्रभु यावे नड” देंब। दानीएल ११:३६; मत्ती २४:१५
- ५ गोपुकी नु बाकडानु, इन कली मोदेशो लोत्र पाता। गोपुकी आं शेंशो ममिम्नीनी?
- ६ मेको नेल्ल क्येडा मरिम्शो पाइब कली तेक्ब कली तुइक्नीनी। मेको तेक्बमी मेको कली देंशो ना ला गूचा गेब।
- ७ आ मरिम्शो गेय चहिं मुल बाक्ब। तन्न मतांडसीब। तेक्ब मयाक्से सम्म मेको गूने मचाप्ब।
- ८ नेल्ल क्येडा मरिम्शो पाइब गूचा तवा नोले, प्रभु येसुमी आ जाक्शो नु आ मुइश्शोमी साइक्ब। यसैया ११:४; प्रकाश १९:१५, २०
- ९ मेको नेल्ल क्येडा मरिम्शो पाइबम चहिं सैतान आ सक्ति तशा, चिन्ड नु छक लाक्चा डा गेय पखु पाइब। मत्ती २४:२४; प्रकाश १३:११-१४
- १० जाम्शा लाइब आन कली जोल शेंब। मारदे हना मेकोपुकीमी थमा शेंतीक नेचा मदाक्तेम। मिनु पाप रे ब्रोंइतीक ताक्चा मदाक्तेम।
- ११ परमप्रभु यावेमी मेको आन कली दूली शेंतीक थमा सुइक्पाइक्ब। २तिमोथी ४:४
- १२ दूली शेंतीक थमा सुइक्बपुकी जाम्शा लाइनीम। मारदे हना थमा लोत्र थमा मसुइक्थु, मदुम्शो गेय दाक्ताक्मे।

### थमा शेंतीकेमी बाक्चा

- १३ प्रभु आ दाक्शो लोकबपुकी, गोपुकीमी गेना हना यो इन कली मिम्शा, परमप्रभु यावे कली “गे रिम्शो पाइब बाक्नीनी” देंनीकी। मारदे हना परमप्रभु यावेमी इन कली डोंइती रे आ मुर दुम्नीम, दे योत्रतु। दोपा आ मुर दुम्नीनी देशा हना, परमप्रभु यावे आ सोक्तीमी इन कली पाप रे डोन वोइश्शा, थमा शेंतीके थमा सुइक्पाइक्तु। रोमी ८:३०
- १४ गोपुकीमी इन कली ग्येरपाइक्ब लोत्र पकानु, मेकोमी इं प्रभु येसु खीस्त आ छेडछेड पाइश्शो मुर दुम्मल, दे इन कली ब्रेत्ताक्व।
- १५ आंड लोकबपुकी, खोइल थेक्शा बाक्कीन। आंड शेंशो मप्रोनीन। गो शोत्रम शेंशो नु चिठीम ब्रेक्शा शेंशो मप्रोनीन। २थिस्सलोनिकी ३:६
- १६ इं प्रभु येसु खीस्त नु इं आफ परमप्रभु यावे आस शिशीमी इं कली दाक्शा, गेना हना यो थुं बारपाइश्शा, रिम्शो आस गेम्ताक्स।
- १७ इन थुं बारपाइश्शा, इन कली रिम्शो गेय नु रिम्शो लोत्र पचा गेम्सेक्ल।

## 3

### पावलमी प्रार्थना पुंडशो

- १ मिनु आंड लोकबपुकी, आंड कली मिम्शा, प्रार्थना पने। आंड पबर्म परमप्रभु यावे कली मार पुंडचा देशा हना, इन दातेमी खोदेशो पा, प्रभु आ लोत्र तेइ तेइ साव सुव ब्रशा लल। एफिसी ६:१८-१९; कलस्सी ४:३; १थिस्सलोनिकी ५:२५
- २ गोपुकी दूली पाइब नु मरिम्शो मुर रे ब्रोंइचा तकल, दे प्रार्थना पने। मारदे हना मेकोपुकी थमा मसुइक्ब बाक्नीमी।

3 प्रभुमी चहिं इन कली दाक्शा मप्रोंडब। इन थुं बारपाइक्वब। मरिम्शो रे डोन वोइश्शा, इन कली कोव्रब। १थिस्सलोनिकी ५:२४; यूहन्ना १५:१७

4 गोपुकीमी इन कली मार देंका, मेको पना पन बाक्शा, नोले यो पाइनीनी। प्रभुमी इन कली वारच पाइब, दे तुइक्नीकी। २कोरिन्थी ७:१६; गलाती ५:१०

5 प्रभुमी इन कली परमप्रभु यावे आ दाक्तीके नु ख्रीस्त आ फाल्तीक रूपदल।

गेय मपथु मबाक्चा

6 आंइ लोकबपुकी, गोपुकीमी इं प्रभु येसु ख्रीस्त आ नेमी इन कली मार देंनीकी देशा हना, गोपुकी नु बाक्शो लोकब सु सुम गेय पचा मदाक्थु बाक्मा, मोदेशो पा आंइ शेंशो मटीमे, मेको नु काइ मबाक्कीन। २थिस्सलोनिकी २:१५; मत्ती १८:१७; रोमी १६:१७

7 गोपुकी दोपा आंइ खोदेशो दुम्चा माल्नीनी, मेको आंमा तुइक्नीनी। इन दातेमी बाक्कानु, शुश गेय पाइतक। १थिस्सलोनिकी १:६

8 सुइ आन के मोश मजक। गोपुकीमी नाक्दो नाक्त मदेशु, सुइ कली श्येत मगेचा, दे गेय पना पन बाक्तक। १थिस्सलोनिकी २:९

9 मोश जचा अधिकार बाक्त हना यो, दोपा रिम्शो पचा इन कली कोइचा, दे मोदेशो पाइतक। मत्ती १०:१०; प्रेरित २०:३५; फिलिप्पी ३:१७

10 गोपुकीमी “सुमी गेय मपाइबा, मेकोमी जचा मतवल” दे डोंइती रे गोपुकी नु बाक्शा देंतक।

11 इन दातेमी का निक्शीमी काइ गेय मपथु, हिरशा गाक्शा मो बाक्नीम, देशो नेंतक।

12 गोपुकीमी मोदेशो मुर आन कली प्रभु येसु ख्रीस्त आ नेमी “रिम्शो गेय पने। आंम आंम जचा थोव्रक जशा बाक्कीन” दे अरेनीकी। १थिस्सलोनिकी ४:११

13 आंइ लोकबपुकी, रिम्शो गेय पचा कली गेनायो मदने। गलाती ६:९

14 मिनु सु सुमी आंइ ब्रेक्शो लोव्र मटीमे, मेको आन कली तुइश्शा वोतीन। मिनु मेकोपुकी नु मबाक्कीन। मोदेशो पशो तशा, मेको मुरपुकी मुने दोक्नीम।

15 मोदेशो पशा यो, मेको मुर कली जोरी सत्रु खोदेशो पा ममिम्तीन। थमा सुइक्व लोकब कली खोदेशो अर्ती गेने। १थिस्सलोनिकी ५:१४

नोले डा लोव्र

16 थुं नाइक्चा गेब प्रभुमी दोदेशो बाक्तीनी हना यो, इन कली गेना हना यो थुं नाइक्चा गेवल। प्रभु गोपुकी नेल्ल नु बाक्ल। यूहन्ना १४:२७

17 गो पावलमी एको चिठी आंमान ब्रेक्ताक्ड। तेको चिठी ब्रेक्ताक्ड हना यो, ओदेंब ब्रेक्नुड, दे तुइक्नीनी। १कोरिन्थी १६:२१; गलाती ६:११; कलस्सी ४:१८

18 इं प्रभु येसु ख्रीस्त आ शिशी गोपुकी नेल्ल नु लील।

## १ तिमोथी

**ब्रेक्ब मुर:** एको चिठी पावलमी तिमोथी कली डोंइती ब्रेक्शो बाक्त।

**गेना ब्रेक्शो:** तिमोथीम पावल नु गेय पवा बाक्त। मेकोमी थिस्सलोनिकी सहर डा थमा सुइक्ब आन कली शेंशो बाक्त। पावलमी मेको कली अर्को सहरम यो शेंथ सोइक्ता बाक्त। पावलमी एको चिठी गेना ब्रेक्शो बाक्मे, मेको बर्स मदेंशो बाक्त।

**मारदे ब्रेक्शो:** शेंतीक लोत्र तिमोथी १:१-२

१. ठीक शेंतीके मार बाक्ब तिमोथी १:३-२०

२. गुम्तीक खिं डा मुर दोपा बाक्चा माल्नीम तिमोथी २:१ - तिमोथी ३:१६

३. रिम्शो थमा सुइक्तीके मार बाक्ब तिमोथी ४:१-११

४. मुर आन कली मार शेंचा माल्ब तिमोथी ४:१२ - ६:२

५. धर्म पतीके शोर गाक्शो बाक्ब तिमोथी ६:३-२१ नेल्ल जम्मा पा गे येसु ख्रीस्त आ पर्वम ला शेंदो। आंम पतीके होस पावो।

### डोंइती डा लोत्र

१ ख्रीस्त आ सोइश्शो गो पावल नड। इं कली पाप रे प्रोंइब परमप्रभु यावेमी “ख्रीस्त येसु आ सोइश्शो दुमो” दे माइक्ती। इं कली ब्रोंइचा गेनुड, दे कबल पाइब ख्रीस्त येसुमी यो मोन माइक्ती। कलस्सी ४:२७

२ गे थमा सुइक्ब, आं दाक्शो तौ खोदेंशो तिमोथी, इ कली चिठी ब्रेक्ताकड। इं आफ परमप्रभु यावे नु प्रभु येसु ख्रीस्त आस दाक्चा गे नु बाक्ल। आस शिशीमी इ कली थुं नाइश्शा बाक्चा गेम्सेक्ल। प्रेरित १६:१-२; तीतस १:४

### दूली शेंब आन पर्वम ब्रेक्शो

३ गो मासीडोनीया रागी लडानु, गे एफिसस सहरम बाक्को। मेकेर मुर का निक्शीमी दूली लोत्र शेंनीम। मोदेंशो मशेंदीन, दे अरेवो। प्रेरित २०:३

४ मेकोपुकीमी मुरुमी सेल्शो लाइश्शो कथा नु किकी पिपी आन पर्वम शेंना शेंन बाक्नीम। मोदेंशो शेंतीके काम मलाप्चा डा बाक्शा, परमप्रभु यावे आ शेंशो थमा सुइक्तीके मबारपाइक्ब। १तिमोथी ४:१७

५ इं शेंतीके चहिं रिम्शो थुं, रिम्शो थुं डा मिम्तीके नु रिम्शो थमा सुइक्तीके रे जाक्शो शुश दाक्मुचा आ पर्वम बाक्ब। मती २२:३७-४०; रोमी १३:१०; गलाती ५:६

६ का निक्शीमी मेको शेंतीक प्रोंइशा, शोर गाक्शो लोत्र पाइनीम। १तिमोथी ६:४, २०

७ मेकोपुकीमी परमप्रभु यावे आ अरेशो लोत्र शेंब दुम्चा दाक्नीम, तन्न आंम देंशो लोत्र नु आंम शेंशो आंमन मरुप्ब बाक्नीम।

८ परमप्रभु यावे आ अरेशो लोत्र ठीक पाइब आन कली रिम्शो दुम्ब, दे गो तुइक्नय। रोमी ७:१२

९ ठीक पाइब आन कली मब्रेक्शो बाक्ब, दे यो तुइक्नय। तन्न परमप्रभु यावे आ अरेशो लोत्र मपाइब, मटीब, परमप्रभु कली ममिम्ब नु मरिम्शो पाइब आन कली ब्रेक्शो बाक्ब। परमप्रभु यावे रे डोन बाक्ब, रागी कली ला मिम्ब, आम आफ कली साइक्ब, आंम ममा कली साइक्ब नु मुर आन कली साइक्ब आन कली ब्रेक्शो बाक्ब। १कोरिन्थी ६:९-११

१० तेल्लेम पाइब, ग्रॉग्रा दिचा डा गेय पाइब, मुर आन कली खुइ पा लेयब, जोल पाइब, जोल पा कसम जाइब नु आन गेय परमप्रभु यावे आ शेंशो नु मगारब मुर आन कली ब्रेक्शो बाक्ब।

११ मेको थमा शेंतीके नु नेल्ल आसीक पाइश्शो परमप्रभु यावे आ ग्येरपाइक्ब लोत्र शेंब सेल्ती।

परमप्रभु आ दाक्तीक ठेयब बाक्ब

12 एको लोत्र शेंचा कली बोल गेब इं प्रभु खीस्त येसु कली “गे रिम्शो पाइब बाकनीनी” देनुड। मारदे हना खीस्त येसुमी आं पर्वम “थमा सुइक्का डा मुर बाक्ब” दे आ गेय पाइब सेलती। प्रेरित ९:१५; १कोरिन्थी १५:९-१०; गलाती १:१३-१६

13 डोंइती गो मेको कली शुक्शी पाइब, श्येत गेब नु शुश मरिम्शो पाइब बाक्ती। तन्न मतुइक्ब नु थमा मसुइक्ब बाक्तीके परमप्रभु यावे आ शिशी ताता।

14 इं प्रभुमी आ दाक्शो थमा सुइक्तीके नु दाक्तीके थुं ब्रीशा, क्युप्या डा पा गेती। मेको निम्फा खीस्त येसु नु बाक्नीस।

15 मरिम्शो पाइब आन कली नरक रे प्रोंइचा, दे खीस्त येसु रागीम जाक्त। एको लोत्र थमा बाक्ब नु थमा सुइक्का माल्शो बाक्ब। गो नेल्ल क्येडा मरिम्शो पाइब नड। लूका १९:१०

16 गो परमप्रभु यावे आ शिशी मारदे ताता देशा हना, गो नेल्ल क्येडा मरिम्शो पाइब दुम्ती हना यो, येसु खीस्त आ फाल्तीक सक्ति कोंइचा, दे शिशी ताता। मेको कोंइतीके नोले थमा सुइक्ब नु गेना हना यो, परमप्रभु यावे नु बाक्का ताइब आन कली बाक्ब।

17 गेना हना यो मबेक्थु बाक्ब पिप कली सुइमी तने मचाप्नीम। मेको कांडचीक परमप्रभु, परमप्रभु यावे बाक्ब। गेना हना यो मान ताक्का नु छेडछेड मेको केन बाक्ब। आमेन।

18 आं तौ तिमोथी, परमप्रभु यावेमी इ पर्वम पशो लोत्र तुइक्पाइक्ती। मेको लोत्र इ कली मिम्पाइक्नुड। मेको लोत्र मिम्शा ग्राने चाप्नेवे। १तिमोथी ४:१४; १तिमोथी ६:१२; यहूदा ३

19 थमा सुइक्तीके नु इ थुं डा रिम्शो मिम्तीके टिशा बाक्को। आन थुं डा रिम्शो मिम्तीके कली मटीब का निक्शीमी थमा सुइक्का प्रोंइतेक्म। १तिमोथी ३:९; १तिमोथी ६:१०

20 मेको आन दातेमी हीमेनेयस नु अलेक्जन्डर बाक्नीसी। परमप्रभु यावे आ पर्वम मरिम्शो लोत्र मपचा, दे शेंचा कली, गो मेको आस कली सैतान आ गुइमी जिम्मा गेतासी। २तिमोथी २:१७; १कोरिन्थी ५:५

## 2

### थमा सुइक्ब आन पुंडशो

1 आं के नेल्ल क्येडा ठेयब अरेशो लोत्र मार बाक्ब देशा हना, परमप्रभु यावे नु बाक्का, मेको नु लोत्र पचा नु नेल्ल मुर आन पर्वम पुंडना पुंडन बाक्का मालनय। मेको आन पर्वम “गे मेको आन कली रिम्शो पाइतीनी” दे परमप्रभु यावे कली ठेयब सेल्चा मालनय।

2 पिप नु सरकार डा ठेयब अधिकार पाइशो मुर आन पर्वम यो मोदेशो पुंडतीक लोत्र पचा मालनय। मो पा गो रिम्शो, थुं नाइशशा, इं गेयमी परमप्रभु यावे कली मिम्चा, दाक्का नु नेल्ल गेयमी ठीक दुम्शा बाक्क्य।

3 मोदेशो मरिम्शो गेय प्रोंइब परमप्रभु यावे आ डोंइती रिम्शो नु दाक्का डा बाक्ब।

4 परमप्रभु यावेमी नेल्ल मुर आन कली मरिम्शो गेय रे प्रोंइशशा, थमा लोत्र तुइक्पाइक्का दाक्ब। इजीकीएल १८:२३; रोमी ११:३२; २पत्रुस ३:९

5 परमप्रभु यावे का ला बाक्ब। मेको नु मुर आन कली गारपाइक्का कली येसु खीस्त रागीम जाक्का, मुर दुम्शो यो का ला बाक्ब। हिब्रू ९:१५

6 मेकोमी मुर नेल्ल आन कली पाप रे प्रोंइचा, दे आंम कली जिम्मा गेप्टु। एको लोत्र मेना रे शेंचा गोम्तेक्म। गलाती १:४; गलाती २:२०; तीतस २:१४

7 मोपतीके परमप्रभु यावेमी एको लोत्र शेंब नु खीस्त आ सोइशशो सेलती। गो जोल मपथु, थमा लोत्र पाइनुड। इस्त्राएली आन कली ममाइ, तन्न रागी रागी डा मुर आन कली थमा सुइक्तीके आ पर्वम शेंब नु थमा लोत्र शेंब सेलती। २तिमोथी १:११; गलाती २:७-८

### थमा सुइक्ब आन कली शेंशो

8 तेइ तेइ डा वोंइश मुरपुकीमी प्रार्थना पचा मालनीम। परमप्रभु यावे कली थुं नेल्लेम थमा सुइक्ब गे गुइ पोक्का, मगाइक्ब नु मजीब दुम्शा, परमप्रभु यावे नु लोत्र पशो तचा दाक्नुड।

९ मीश मुरपुकी यो ठीक पा फेक्शा, गेय पचा डोंइती मिम्शा, रिम्शो बाक्चा माल्नीम। मोपा चांमी मार मार वोइश्शा लामा प्रोव्रशा, सुन मोती नु शुश क्येट लाइब वामी मग्योम्समल। १पत्रुस ३:३-५

१० परमप्रभु यावे कली मिम्ब मीश मुर रिम्शो पतीकेमी “गो परमप्रभु यावे कली दाक्ब नड” दे कोइनीम। १तिमोथी ५:१०

११ मीश मुरपुकीमी टीब दुम्शा, रिम्शो पा नेंशा शेंसमल। एफिसी ५:२२

१२ वोइश मुर आन कली शेंतीक अधिकार मीश मुर आन कली मगेनुडमी। मेकोपुकी सिक्सी पा बाक्मल। १कोरिन्थी १४:३४; उत्पत्ती ३:१६

१३ डोंइती आदम, नोले हव्वा सेल्शो बाक्त।

१४ आदम डोंइती हेंथे मगाक्शो बाक्त। मीश मुर चहिं मिक्च सिल्चा पुंडसीशा, परमप्रभु यावे कली मटीब दुम्शो बाक्त। उत्पत्ती ३:६

१५ मो हना यो मीश मुरपुकी रागीम आल जरमेसे डा मेरे ब्रोंइचा ताइनीम। तन्न मेकोपुकी थमा सुइक्ब दुम्शा, दाक्मुशा, परमप्रभु यावे आ मुर दुम्शा नु ठेयब मलेत्थु बाक्चा माल्नीम। १तिमोथी ५:१४; तीतस ३:४-५

### ३

थमा सुइक्ब आन कली कोव्रब शेंशो

१ सुमी थमा सुइक्ब आन कली कोव्रब दुम्चा दाक्बा, मेको ठेयब नु रिम्शो गेय माल्ब बाक्ब। एको लोव्र थमा बाक्ब। प्रेरित २०:२८; तीतस १:५-९

२ थमा सुइक्ब आन कली कोव्रब काइ दोस गेचा मपुंडसीशो बाक्चा माल्ब। मीश का के ला वोइश बाक्चा माल्ब। गेय पचा डोंइती मिम्ब, आ गेय नेल्ल कली रिम्शो पाइब, मुर आन कली बास गेब नु रिम्शो शेंब बाक्चा माल्ब।

३ राकसी शांबु तूशा दुक्ब नु तुप्ब मुर थमा सुइक्ब आन कली कोव्रब दुम्ने मचाप्ब। थमा सुइक्ब आन कली कोव्रब रिम्शो थुं पाइश्शो बाक्चा माल्ब। जिचा पोक्ब नु क्येट शुश दाक्बमी एको गेय पने मचाप्ब।

४ आंम खिं डा मुर आन कली रिम्शो कोव्रब बाक्चा माल्ब। आंम आलपुकी टीब नु मुर नु रिम्शो पाइब बाक्चा माल्नीम।

५ मारदे हना आंम खिं डा मुर आन कली रिम्शो कोव्रने मचाप्ब बाक्त हना, दोपा परमप्रभु यावे आ खिं डा मुर आन कली कोव्रने चाप्बा डा?

६ थमा सुइक्चा नक गोशो मुर थमा सुइक्ब आन कली कोव्रब दुम्ने मचाप्ब। मारदे हना मेको बोरशा ठेयब लेशो दुम्ब। मिनु सैतानमी मेको कली रेशशा, खतम सेल्ब।

७ थमा मसुइक्बपुकीमी यो थमा सुइक्ब आन कली कोव्रब आ पर्वम रिम्शो लोव्र पचा माल्नीम। मोदेशो मदुम्त हना, दोस गेचा पुंडसीब। मिनु सैतान आ ग्याइलीम रेप्ब।

ग्रुम्तीकेम गेय पाइब आन कली शेंशो

८ थमा सुइक्ब आन ग्रुम्तीक खिं डा गेय पाइबपुकी यो रिम्शो मुर बाक्चा माल्नीम। लोव्र क्याल्ब, शुश राकसी शांबु तूब नु क्येट ला मिम्बमी मोदेशो गेय पने मचाप्नीम। प्रेरित ६:३; फिलिप्पी १:१

९ मेकोपुकीमी रिम्शो थुंमी थमा सुइश्शा, मेकेर डा खुइश्शो लोव्र मिम्ने चाप्ब दुम्चा माल्नीम। १तिमोथी १:२९

१० डोंइती गे मेको आन थुं कोव्रचा माल्नेवे। मिनु शुश रिम्शो पाइब बाक्ब, दे तुइश्शा ला थमा सुइक्ब आन ग्रुम्तीके खिंमी गेय पचा कली वोइक्ने चाप्नेवे।

११ आ मीश यो रिम्शो बाक्शा, दुलेथ मगाक्थु, गेय पचा डोंइती मिम्ब बाक्चा माल्ब। मेको आ गेय नेल्ले रिम्शो पा पचा माल्ब। तीतस २:३

१२ थमा सुइक्ब आन ग्रुम्तीके खिंमी गेय पाइब मीश का आ वोइश दुम्चा माल्ब। मेकोमी आ आल नु आंम खिं डा मुर नेल्ल आन कली रिम्शो पा कोव्रब दुम्चा माल्ब।



13 मोदेशो पाइबमी थमा सुइक्ब आन गुम्तीकेमी आंम कली रिम्शो नें सेल्नीमी। ख्रीस्त येसु कली आंम थमा सुइक्तीके शुश बारपाइक्नीमी।

थमा सुइक्तीके आ खुइइशो लोत्र

14 गो इ कली रीब पा गुम्नुड, दे आस पाइनुड। मिनु इ कली ओदेशो अरेतीक लोत्र मारदे ब्रेक्ताक्ड देश हना,

15 गो नोले दुम्ती हना, परमप्रभु यावे आ खिं डा मुरपुकी दोपा बाक्चा माल्नीमी, मेको तुइक्तेमक्ल। मेकोपुकी ब्रोंइचा गेब परमप्रभु यावे आ गुम्तीक खिं डा मुर बाक्नीम। मेको थमा लोत्र डा थाम नु बोल्यो हिरशो गारो खोदेशो बाक्नीम। एफिसी २:१९-२२

16 इ परमप्रभु यावे कली थमा सुइक्तीके थम खुइइशो बाक्ब। मेको मार बाक्ब देशा हना “मेको मुर दुम्शा, रागीमी जरमेसाक्व। परमप्रभु यावे आ सोक्तीमी ‘परमप्रभु यावे आ तौ बाक्ब’ दे सांक्छी गेप्तु। परमप्रभु यावे आ स्वर्ग डा गेय पाइबपुकीमी मेको कली ताम्तेक्म। आ नें मार बाक्बा, दे रागी रागी डा मुर आन कली शेंताक्मे। रागी रागी डा मुरपुकीमी मेको कली थमा सुइक्तेक्म। मिनु मेको परमप्रभु यावे आ छेडछेडमी लाइक्चा पुंडसाक्व” देशो बाक्ब। यूहन्ना १:१४; रोमी १:४; प्रेरित २८:२८; मर्कूस १६:१९; एफिसी १:२०-२१

## 4

दूली शेंब आन शेंतीक

1 परमप्रभु यावे आ सोक्तीमी “नोले डा नाक्तीम का निक्शी थमा सुइक्बपुकीमी थमा सुइक्चा प्रोंइनीम। मेको मुरपुकीमी हेंथे लां कोंइब नु जोल पाइब वोल आन शेंशो नेंनीम” देंत। मत्ती २४:२४; २थिस्सलोनिकी २:३; २तिमोथी ३:१; २पत्रुस ३:३; १यूहन्ना २:१८; यहूदा १८

2 मेको मुर आन थुं डा मिम्तीके खतम दुम्ब। मिनु जोल शेंनीम।

3 मेकोमी “ग्युंवे पचा मदुम्ब, का निक्शी थोत्रक जचा मदुम्ब” दे शेंनीमी। परमप्रभु यावेमी थमा सुइक्ब आन कली सेल्शा गेशो मेको जचा थोत्रक “गे रिम्शो पाइब बाक्नीनी” दे जचा ब्वचा दुम्ब। उत्पत्ती ९:३; १कोरिन्थी १०:३०-३१; कलस्सी २:२३

4 तन्न परमप्रभु यावे आ सेल्शो नेल्ल रिम्शो बाक्ब। मुरुमी परमप्रभु यावे कली “गे रिम्शो पाइतीनी” दे नेल्ल जचा ब्वचा दुम्ब। उत्पत्ती १:३१; मत्ती १५:११; प्रेरित १०:१५

5 मारदे हना परमप्रभु यावे आ लोत्र नु प्रार्थनामी मेको नेल्ल परमप्रभु यावे आ गेशोन बाक्ब, दे तुंडसीब।

तिमोथी आ गेय

6 गे एको लोत्र थमा सुइक्ब लोकब आन कली शेंताक्वी हना, ख्रीस्त येसु आ रिम्शो गेय पाइब दुम्नेवे। गे थमा सुइक्तीक डा लोत्र नु रिम्शो शेंतीके तुइक्ना तुइक्न आ नोले खोइक्नेवे। २तिमोथी २:१५

7 तन्न मुरुमी सेल्शो नु मरिम्शो कथापुकी मनेनो। परमप्रभु यावे कली मिम्शा दाक्शा बाक्को। १तिमोथी ६:२०; २तिमोथी २:१६, २३; २तिमोथी ४:४; तीतस १:१४; तीतस ३:९

8 रां कली रिम्शो पतीके इक्का ला रिम्शो बाक्ब। परमप्रभु यावे कली मिम्शा दाक्तीके नेल्ल क्येडा रिम्शो बाक्ब। मारदे हना मुल कली रिम्शो बाक्ब नु गेना हना यो परमप्रभु यावे नु बाक्चा कली नोले यो रिम्शो बाक्ब। १तिमोथी ६:६

9 एको देशो लोत्र थमा बाक्ब नु नेल्ल थमा सुइक्चा माल्शो बाक्ब।

10 एको लोत्र शेंशा श्येत जशा, शेंतीक गेय पाइनय। मारदे हना ब्रोंइचा गेब परमप्रभु यावे कली आस पाइनय। मेको नेल्ल मुर आन कली प्रोंइब बाक्ब। मोपा थमा सुइक्बपुकी पाप रे ब्रोंइचा ताइनीम।

11 एको लोत्र अरेशा शेंदो।

12 गे ठिटा बाक्ते हना यो, लोत्र पतीकेमी, मुर नु गेय पतीकेमी, दाक्तीकेमी, थमा सुइक्तीकेमी नु प्रांग्रा मदिशोमी थमा सुइक्ब नेल्ल आन कली कोंइतीक दुमो। मिनु तोक्शो लोत्र पचा मगेमी। तीतस २:१५; २तिमोथी २:२२

13 गो मजाक्डा सम्म मुर आन कली परमप्रभु यावे आ लोत्र पडेशा, नेंपाइक्ना पाइक्न नु शेंना शेंन बाक्को।

14 थमा सुइक्ब आन शेंब खाल्पापुकीमी इ पिया तारी गुइ वोइश्शा, परमप्रभु यावेमी तुइक्पाइश्शो लोत्र पशा, इ कली गेय पतीके सक्ति गेशो बाक्त। मेको गेय रिम्शो पा पावो। १तिमोथी १:१८; १तिमोथी ५:२२; प्रेरित ६:६; प्रेरित ८:१७; २तिमोथी १:६

15 मोपा बाक्को। मेको इ पशो तशा, नेल्लेमी इ थमा सुइक्तीके बारशो तामेक्ल।

16 आंम कली नु इ शेंतीके कली रिम्शो पा होस पावो। मोदेशो पा, गे आंम इ कली नु इ लोत्र नेंब आन कली श्येत रे प्रोंइनेवे। रोमी ११:१४

## 5

### मुर नेल्ल आन कली रिम्शो पावो

1 शेंब खाल्पा आन कली महुइक्तो, तन्न आंम आफ कली खोदेशो पा लोत्र पावो। ठिटा वोंइश मुर आन कली लोक्ब खोदेशो मिम्तो। लेवी १९:३२; तीतस २:२

2 मीश मुर आन कली इम्मा खोदेशो मिम्तो। ठिटी आन कली समी खोदेशो मिम्तो। मोपा नेल्ले रिम्शो पावो।

### वोंइश बेक्शो मीश मुर आन पर्वम

3 आन वोंइश बेक्शो रिम्शो पाइब मीश मुर आन कली टेयब सेलो।

4 आन वोंइश बेक्शो मीश मुर आ तमी तौ, चच युइ बाक्तेक्म हना, मेकोपुकीम आंम खिं डा मुर आन कली रिम्शो गेय पा कोंइचा माल्नीम। आम आफ आस कली रिम्शो पचा माल्नीम। मेको परमप्रभु यावे आ डोंइती शुश रिम्शो बाक्ब।

5 आ वोंइश बेक्शो मीश मुर रिम्शो बाक्त हना, परमप्रभु यावे कली ला मिम्ब। मेकोमी नाक्दो नाक्त प्रार्थना पा पुंइना पुंइन बाक्ब। लूका २:३७

6 आ दला दाक्स पाइब चहिं सेस बाक्त हना यो, बेक्शो खोदेशो दुम्ब।

7 एको लोत्र शेंदीमी। मेकोपुकी दोस गेचा मपुंइसीब दुम्मल।

8 सुमी आ खिं डा मुर आन कली मकोत्रबा, मेको आ थमा सुइक्तीके जाम्शा लशा, थमा मसुइक्ब आन क्येडा यो मरिम्शो दुम्ब। मत्ती १५:५-६

9 वोंइश बेक्शो मीश मुर ६० बर्स दुम्ने थुम्शा ला, वारच पचा कली आ नें ब्रेक्सीब। मेको वोंइश का आ मीश ला दुम्चा माल्ब।

10 आ तमी तौ रिम्शो पा कोल्पाइश्शा, मुर आन कली बास बाक्चा गेशा, थमा सुइक्ब आन खोइली चिक्शा, श्येत जाइब आन कली वारच पशा, नेल्लेमी रिम्शो पना पन बाक्ब, दे मुरपुकीमी तुइश्शो मीश मुर आ नें ला ब्रेक्सीब। हिब्रू १३:२; यूहन्ना १३:१४

11 वोंइश बेक्शो ठिटी मीश मुर आन कली वारच पचा कली आन नें मब्रेक्चा। मारदे हना आन दला दाक्स पा ख्रीस्त कली प्रेंताक्म हना, ग्युंवे पचा ला मिन्नीम।

12 मिनु आन डोंइती देशो प्रोंइशा, दोस ताइब दुम्नीम।

13 मेकोपुकी मुर आन खिं खिं हिरथ लाइनीम। अल्सी ला ममाइ, मदेंचा डा लोत्र यो शुश पाइनीम।

14 मोपतीके वोंइश बेक्शो ठिटी मीश मुरपुकीमी ग्युंवे पा, आल थिशा, आन खिं डा गेय पामेक्ल। मो पाम्तेक्म हना, मरिम्शो पा गाक्चा मताइनीम। अरुमी यो थमा सुइक्ब आन पर्वम मरिम्शो लोत्र पचा मताइनीम। १तिमोथी २:१५; १कोरिन्थी ७:९

15 का निक्शीमी सैतान कली खोइक्चा गोम्तेक्म।

16 थमा सुइक्ब आन खिंमी वोंइश बेकशो मीश मुरपुकी बाक्तेकम हना, मेको आन कली वारच पामेक्ल। मिनु गुम्तीके कली श्येत मदुम्थु, वोंइश बेकशा, का ला लीशो मीश मुर आन कली वारच पचा ताइब। प्रेरित ६:१

### गुम्तीके डा गेय पाइब

17 गुम्तीके खिंमी श्येत पा लोत्र पाइब नु शेंब खाल्पा आन कली निक्शी खेयप मान पा क्येट गेचा माल्नीम। प्रेरित १४:२३; रोमी १२:८

18 परमप्रभु यावे आ लोत्रमी “ब्यफ कली दांइ पपाइश्शोनु, फुडला मपाइक्चा” मिनु “गेय पाइब आन गाल्च ताइब बाक्नीम” दे ब्रेकशो बाक्ब। ब्यवस्था २५:४; १कोरिन्थी ९:९; लूका १०:७

19 मुर कामी गुम्तीक डा शेंब खाल्पा कली दोस गेप्टु हना, सांकछी निक्शी सां मबाक्थु, थमा मसुतो। ब्यवस्था १९:१५; मत्ती १८:१६

20 सु मरिम्शो पना पन बाक्मे, मेको कली थमा सुइक्ब आन डोंइती हुइक्तो। मिनु मेको नेंब नेल्लेमी मरिम्शो पचा हिंनीम। गलाती २:१४; मत्ती १८:१५-१७

21 परमप्रभु यावे, ख्रीस्त येसु नु योत्रशो परमप्रभु यावे आ स्वर्ग डा गेय पाइब आन डोंइती “मुर आन कुल मकोव्रथु, आं देशो नेल्ल पावो” दे इ कली अरेनुड। मुर आन कुल कोव्रशा, मारेइ मपावो।

22 मुर आन कली ब्रो थिशा, आन तार गुइ वोइश्शा, प्रार्थना मपावो। मुर आन मरिम्शो पतीकेमी मगरो। मरिम्शो रे डोन बाक्को। †तिमोथी ४:१४

23 डोंइती डा खोदेशो पा ब्वाक्कु ला मतूडो। इ कोव्रज रोइ पतीके इक्का अडगुर शांबु ब्वाइश्शा तूडो।

24 मुर का निक्शी आन मरिम्शो पशो तुंडसीब। सजाइ ताइनीम, दे यो तुंडसीब। का निक्शी आन मरिम्शो पशो चहिं नोले ला तुंडसीब।

25 मोपा मुर का निक्शी आन रिम्शो पशो मतुंडसाक्व हना यो, खुइश्शा लीने मचाप्नीम।

## 6

### वाइलीम वाइल आन पर्वम शेंशो

1 वाइलीम वाइल नेल्लेमी आन होत्रप मान ताक्चा शिरशो बाक्नीम, दे मिम्चा माल्नीम। मोपा मुरपुकीमी परमप्रभु यावे आ नें नु आ शेंतीके आइक्च मसेल्नीम। एफिसी ६:५; तीतस २:९-१०

2 सु सु आन होत्रप थमा सुइक्ब बाक्मा, मेको आन पर्वम “थमा सुइक्ब लोक्ब दुम्शा, मान गेचा ममाल्नुड” दे ममिम्तमेक्ल। मेकोपुकीमी डोंइती क्येडा रिम्शो पचा माल्नीमी, दे मतो। मारदे हना मेको आन गेय गेब थमा सुइक्ब नु दाक्शो मुर दुम्त। मोदेशो पचा शुश शेंदो। फिलेमोन १६

### तिमोथी नु थमा सुइक्ब आन कली अरेशो

3 सुमी अरु शेंतीक शेंबा, मेकोमी इ प्रभु येसु ख्रीस्त आ थमा लोत्र नु आ शेंतीके नु मगारचा डा शेंब। मेको आं देशो थमा लोत्र चहिं परमप्रभु यावे कली मिम्ब नु दाक्ब थुं रे बाक्ब। †तिमोथी १:१३

4 मेको अरु लोत्र शेंब ठेयब लेश्शो मारेइ मजोक्ब बाक्नीम। आन लोत्र ला आ तार पशा, जिचा पोक्चा माल्नीम। मेकोपुकीमी गेहे पाइब, जीब, मरिम्शो लोत्र पाइब नु मरिम्शो मिम्ब सेल्नीम। †तिमोथी २:१४; तीतस ३:१०-११

5 मेकोपुकीमी मुर आन दातेमी जिचा पोक्नीम। आन थुं गशो खोदेशो दुम्शा, थमा लोत्र रुपे मचाप्नीम। परमप्रभु यावे कली मिम्चा, दाक्चा क्येट चेम्तीके बाक्ब, दे मिम्नीम।

6 परमप्रभु यावे कली बोल्यो थमा सुइक्चा चहिं थुं नाइक्तीक बाक्ब। †तिमोथी ४:८; मत्ती ६:२५-३४; फिलिप्पी ४:११-१२; हिब्रू १३:५

7 मारदे हना गोपुकीम जरमेशोनु, मारेइ पने मचाक्नय। बेक्शोनु यो मारेइ मलाइक्नय। अय्युब १:२१; भजन संग्रह ४९:१८; उपदेसक ५:१४

8 जचा फेक्चा गाप्त हना, ग्येरसय। हितोपदेस ३०:८

9 तन्न सु सु शुश क्येट थीब दुम्चा दाक्नीमी, मेको आन थु थाम्चा पुंडसीशा, ग्याडलीम रेशशो खोदेशो पा, निप्स मपाइशशो नु श्येत जाइब दुम्नीम। आंम कली खतम सेल्सीशो बाक्नीम। हितोपदेस २८:२२; मत्ती १३:२२

10 क्येट कली दाक्ब मरिम्शो आन क्येडा यो मरिम्शो बाक्ब। मोपा क्येट दाक्ब का निक्शीमी थमा सुइक्तीके प्रोइशा, आंम थु कली तूशो खोदेशो पा शुश खाइक्पाइक्तेकम। एफिसी ५:५; १तिमोथी १:१९

11 मोपतीके गे परमप्रभु यावे आ मुर दुम्शा, मेको नेल्ल रे डोन बाक्को। ठीक पतीके, परमप्रभु यावे कली मिम्शा दाक्चा, थमा सुइक्चा, मुर आन कली दाक्चा, थमा सुइक्चा मप्रोइचा नु ब्रेम्शो दुम्चा ला मिम्तो। २तिमोथी ३:१७; २तिमोथी २:२२

12 थमा सुइशशा ग्राडो। “गेना हना यो परमप्रभु यावे नु बाक्ब दुम्ती” दे मिम्तो। गे शुश मुर आन डोंडती इ थमा सुइशशो आ परबम रिम्शो लोव्र पाप्तीवी। मेना गे गेना हना यो ब्रोंइशा बाक्चा ताइब, दे ब्रेत्चा पुंडसीशो बाक्ते। १तिमोथी १:१८; १कोरिन्थी ९:२५-२६; २तिमोथी ४:७; १तिमोथी ४:१४; हिब्रू ३:१

13 नेल्ल आन कली ब्रोंइचा गेब परमप्रभु यावे नु ख्रीस्त येसु पन्तीयस पिलातस कली रिम्शो सांक्छी गेब बाक्त। गो इ कली परमप्रभु यावे नु ख्रीस्त येसु आस डोंडती अरेनुड। यूहन्ना १८:३६-३७; प्रकाश १:५

14 मार अरेनुड देशा हना, इ प्रभु येसु ख्रीस्त मजाक्म सम्म गे मेको आ शेंशो लोव्र मखाल्थु शेंदीमी। मिनु सुइमी दोस गेचा मतामेक्ल।

15 येसु ख्रीस्त जाक्मेनु, नेल्ल आसीक तशा, नेल्ल सक्ति पाइशशो पिप आन पिप नु प्रभु आन प्रभु दुम्शा जाक्त। ब्यवस्था १०:१७; प्रकाश १७:१४

16 मेको ला गेनायो मबेक्ब। सुइ आन कोवने मचाप्चा डा पा छेडछेडमी बाक्ब। सुइमी मेको कली गेनायो मताम। तने यो मचाप्नीमी। मेको मान तशा नेल्ल क्येडा सक्ति पाइशशो बाक्ब। आमैन। प्रस्थान ३३:२०; यूहन्ना १:१८

### शुश थीब आन कली अरेशो

17 गे मुल शुश क्येट थीब आन कली “ठेयब लेशशो मदुमीन। जाम्शा लाइब शोंप कली आस मपथु, परमप्रभु यावे कली आस पने। मारदे हना परमप्रभु यावेमी इ कली शुश तेम्शा गेब। आ गेशो तशा ग्येरसीन” दे माइक्मी। भजन संग्रह ६२:११; लूका १२:१५-२१

18 मेकोपुक्कीमी रिम्शो गेय पतीकेमी गेनायो मनुप्ब शोंप पाइशशो दुम्मल। हाइशशो दुम्शा, मुर आन कली गेब दुम्चा माल्नीम।

19 मो पाम्तेक्म हना, नोले रिम्शो दुम्नीम। बोल्यो जग खोदेशो पा, गेना हना यो ब्रोंइशा बाक्चा ताइब दुम्नीम। मेको ला थमा ब्रोंइचा बाक्ब। मत्ती ६:२०; लूका १६:९

### नोले डा लोव्र

20 तिमोथी, इ कली शेंशो लोव्र रिम्शो पा पावो। जाम्शा लाइब लोव्र नु जिचा पोक्तीक लोव्र, तुइक्ब थुं रे पीब देंखु पाइनीम। मेको रे डोन बाक्को। २तिमोथी १:१२-१४; १तिमोथी ४:७

21 मारदे हना का निक्शीमी मोदेशो लोव्र मिम्शा पशा, आन थमा सुइक्तीके जाम्शा लत। परमप्रभु यावे आ शिशी गे नु लील। १तिमोथी १:६; २तिमोथी २:१८

## २ तिमोथी

**ब्रेक्ब मुर:** एको चिठी पावलमी तिमोथी कली नोले ब्रेक्शो बाक्ब।

**गेना ब्रेक्शो:** पावलमी रोम सहरम लेंशा चोकचा पुंडसीतीकेमी ब्रेक्शो बाक्ब।

**मारदे ब्रेक्शो:** पावलमी आंम पर्वम शुश ब्रेक्ब। मेकोमी तिमोथी आ थमा सुइक्तीके कली बारपाइशशा नु गुम्तीक डा मुर यो रिम्शो सेल्चा दाक्ब। “दूली शेंब आन पर्वम होस पा बाक्कीन” दे यो लोत्र पाइब। मेको चिठी गुम्तीक कली शेंतीक बाक्ब।

**डोंइती डा लोत्र**

1 गो परमप्रभु यावे आ दाक्शो खीस्त येसु आ सोइशशो पावल नड। डोंइती परमप्रभु यावेमी “खीस्त येसुमी गेना हना यो ब्रोंइशा बाक्तीक बाक्ब” दे आ लोत्र खाप्शो बाक्त।

2 एको चिठी आं दाक्शो तौ तिमोथी, इ कली ब्रेक्ताकड। इं आफ परमप्रभु यावे नु इं प्रभु येसु खीस्त आस दाक्चा गे नु लील। मेको आस शिशीमी इ कली थुं नाइशशा बाक्चा गेम्सेक्ल।

**ग्येरपाइक्ब लोत्र आ पर्वम ब्रेक्शो**

3 गो परमप्रभु यावे कली “गे रिम्शो पाइब बाक्नीनी” दे गेय पाइनुड। आं के किकी पिपी यो मोदेशो पशो बाक्तेक्म। आं प्रार्थनामी इ कली गेना हना यो मिम्नुड। फिलिप्पी ३:५; प्रेरित २३:१; प्रेरित २४:१६

4 गो इ डाक्शो मिम्शा, नाक्दो नाक्ती इ कली गुम्चा दे मिम्नुड। मेकोमी आं कली ग्येरपाइक्ब। रतिमोथी ४:९

5 इ रिम्शो थमा सुइक्तीके मिम्नुड। मोदेशो थमा सुइक्तीके डोंइती इ बगे लोइसमी, नोले इम्मा युनीसमी बाक्शो बाक्त। मुल थमा पा इ आगाम बाक्ब। गो मेको तुइक्नुड। प्रेरित १६:१-३

6 मोपतीके गो इ कली आं गुइ इ तारी वोदुनु, परमप्रभु यावेमी इ कली मार मार गेवा, मेको लेंशा मी खोंदेशो पा ब्रपतो, दे फुकपाइक्बन। १तिमोथी ४:१४

7 मारदे हना परमप्रभु यावेमी इं कली हिंब थुं मगेव। तन्न सक्ति पाइशशो, दाक्पाइक्ब नु गेय पचा डोंइती मिम्पाइक्ब थुं गेपुत। रोमी ८:१५

8 इं प्रभु आ पर्वम लोत्र पचा मुने मपावो। गो प्रभु आ पर्वम जेल्खानम बाक्शो आं पर्वम यो मुने मपावो। तन्न ग्येरपाइक्ब लोत्र आ पर्वम परमप्रभु यावे आ सक्तिमी श्येत फलो। रोमी १:१६; पत्रुस ४:१६

9 परमप्रभु यावेमी सैतान रे प्रोंइशा “आं मुर नम” दे ब्रेत्ताक्ब। इं रिम्शो पतीके कोत्रशा ममाइ, आ माल्लो नु शुश डोंइती रे खीस्त येसुमी इं कली गेशो दाक्तीके आ पर्वम ब्रेत्ताक्ब। तीतस ३:५

10 मुल इं कली पाप रे प्रोंइब येसु खीस्त कली रागीम सोइशशा, मुर नेल्ल आन कली तपाइक्तु। खीस्त येसुमी बेक्तीक कली ग्राशा, ब्रोंइतीके नु गेना हना या ब्रोंइशा बाक्शा, परमप्रभु यावे आ ग्येरपाइक्ब लोत्र आ पतीकेमी छेडछेडमी वोइशशो खोंदेशो पा तुइक्पाइक्तु। १कोरिन्थी १५:५५-५७; हिब्रू २:१४

11 मेको ग्येरपाइक्ब लोत्र तुइक्पाइक्चा, दे गो लोत्र पाइब, खीस्त आ सोइशशो नु शेंब दुम्ती। १तिमोथी २:७

12 मोपतीके गो यो श्येत जाइनुड। तन्न गो मुने मपाइनुड, मारदे हना सु कली थमा सुइक्नुडा मेको तुइक्नुड। मेकोमी आं कली मबेक्डा सम्म कोत्रने चाप्ब, दे यो तुइक्नुड।

13 थमा लोत्र कली खोतो। मेको खीस्त येसुमी बाक्शो थमा सुइक्तीके नु दाक्तीके बाक्ब। गे आं लोत्र रे तुइक्नेवे।

14 इं आगामी बाक्शो परमप्रभु यावे आ सोक्तीमी इ कली तुइक्पाइशशा थमा शेंतीके कली खोतो।

15 नेल्ल एसीया डा मुरपुकीमी आं कली प्रोंइतीमी दे तुइक्नेवे। मेको आन दातेमी फीगेलस नु हेरमोगेनेस बाक्नीसी। रतिमोथी ४:१६

- 16 प्रभुमी ओनेसीफरस आ खिं डा मुर आन कली शिशी पवल। मारदे हना साडलोम पाइशो बाक्डानु, ओनेसीफरस आं पर्वम मुने मपथु, आं कली शुश रिम्शो पाप्तु। रतिमोथी ४:१९
- 17 मेकोमी रोम सहर जाकदीशशा, आं कली शुश माल्शा थित्ती।
- 18 प्रभुमी मेको कली आ निसाफ पतीक नाक्तीमी शिशी पवल। मेकोमी एफिसस सहरमी शुश गेय पाप्तु, दे यो तुडक्नेवे।

## 2

### श्येत फाल्चा माल्नीम

- 1 आं तौ, गे ख्रीस्त येसुमी बाक्शो शिशी मिम्शा, बोल्यो दुम्शा बाक्को। एफिसी ६:१०
- 2 गो शुश मुर आन डोंइती इ कली नेंपाइशो लोत्र रिम्शो थमा सुइक्ब आन कली शेंदीमी। मेकोपुकीमी यो अरु आन कली शेंने चाप्नीम।
- 3 ख्रीस्त येसु आ रिम्शो सिपाही खोदेशो दुम्शा, श्येत फलो। रतिमोथी १:८; रतिमोथी ४:५
- 4 लडाइ पाइब सिपाहीपुकीमी खिं डा गेय मपाइनीम। मारदे हना आन ठेयब मुरपुकीम देशो ला पाइनीमी।
- 5 दोरतीक दोरबमी हेंथे पा दोरत हना, ग्राने मचाप्ब। रतिमोथी ४:८; १कोरिन्थी ९:२४-२७
- 6 सुमी रूम शुश गेय पाइबा, मेको आ बाली नाली आ डोंइती डा जाइब दुम्चा माल्ब।
- 7 आं देशो नेल्ल मिम्तो। मारदे हना प्रभुमी नेल्ल कली रुप्तीक थुं गेब।
- 8 येसु ख्रीस्त कली मिम्तो। मेको दाऊद आ खिं रे जाक्शा, बेक्शो रे सेंसाक्व। आं शेंशो ग्येरपाइक्ब लोत्र मेकोन बाक्ब। १कोरिन्थी १५:४,२०; रोमी १:३
- 9 मेको ग्येरपाइक्ब लोत्र शेंतीके, गो मरिम्शो पाइब खोदेशो पा साडलोम पाइक्चा पुंडसीशा श्येत जाइनुड। तन्न परमप्रभु यावे आ लोत्र दा मपाइसीशो बाक्ब। फिलिप्पी १:१२-१४
- 10 मोपतीके गो योत्रशो मुर आन कली मिम्शा, श्येत नेल्ल फाल्नुड। मोपा मेकोपुकीमी ख्रीस्त येसुमी पाप रे प्रोंइशो दुम्शा, गेना हना यो परमप्रभु यावे आ छेडछेडमी ब्रोंइशा बाक्चा तामेक्ल। कलस्सी १:२४
- 11 मुरुमी मेको लोत्र कली थमा सुइक्ने चाप्नीम “गोपुकी मेको नु बेक्तय हना यो, मेको नु ब्रोंइनय। रकोरिन्थी ४:११
- 12 गोपुकीमी श्येत फाल्तय हना, मेको नु हुकुम पाइनय। गोपुकीमी ‘मेको कली मतुइक्नुड’ दैतय हना, मेकोमी यो ‘मतुइक्नुड’ दैब। मत्ती १०:३३
- 13 गोपुकीमी थमा सुइक्चा प्रोंइतय हना यो, मेकोमी मप्रोंइब। मारदे हना ‘गो परमप्रभु यावे आ तौ मनड’ दैने मचाप्ब” दैत। गन्ती २३:१९; भजन संग्रह ८९:३१-३४; रोमी ३:३-४; तीतस १:२

### मजिचा दे शेंशो

- 14 एको लोत्र मेको आन कली फुक्पाइक्मी। परमप्रभु यावे आ डोंइती मेको आन कली “लोत्र आ पर्वम मजिने” दे माइक्मी। मारदे हना मेको मरिम्शो दुम्ब, नेंबपुकी यो वाम ग्याम दुम्नीम। १तिमोथी ६:४; तीतस ३:९
- 15 गे परमप्रभु यावे आ डोंइती रिम्शो गेय पाइब दुम्चा कली बल पावो। थमा शेंतीके रिम्शो पा शेंचा कली काइ मुने पचा ममाल्नेवे। १तिमोथी ४:६; तीतस २:७-८
- 16 जाम्शा लाइब लोत्र पाइब रे डोन बाक्को। मारदे हना मेकोपुकीमी मुर आन कली परमप्रभु यावे रे डोन दुम्पाइक्नीम। १तिमोथी ४:७
- 17 मेको आन लोत्र राक्शो गार खोदेशो बाक्ब। हीमेनेयस नु फिलेतस मेको आन दातेमी बाक्नीस। १तिमोथी १:२०
- 18 मेको निक्शीमी थमा शेंतीक प्रोंइशा, मुर आन सेंचा नुप्शो बाक्त दे शेंनीस। मोपा का निक्शी आन थमा सुइक्तीके बेक्पाइक्ताक्से।

19 तन्न परमप्रभु यावे आ थमा शेंतीके मब्रेत्चा डा जग खोदेशो बाक्ब। प्रभुमी आ मुर आन कली तुडक्ब। मिनु प्रभु कली तुडक्ब मुरपुकी मरिम्शो पचा रे डोन बाक्चा माल्नीम। मेको थोव्रशो छाप खोदेशो बाक्ब। गन्ती १६:५; मती ७:२२-२३; यूहन्ना १०:१४,२७

20 ठेयब खिंमी सुन नु चांदी के बोसपुकी ला ममाइ, तन्न शी नु खप के यो बाक्नीम। का निकशी रिम्शो गेय कली बाक्नीम, का निकशी मरिम्शो गेय कली बाक्नीम।

21 सु आ मरिम्शो पशो शोव्रशा माफ ताडबा, मेको रिम्शो गेय डा बोस खोदेशो दुम्ब। आ होव्रप कली जिम्मा गेंसीशो नु मेको रिम्शो गेय पचा कली रिम्शो बाक्ब।

22 ठिटी ठिटा आन दला दाक्स रे डोन बाक्को। रिम्शो थुंमी प्रभु कली लोव्र पाइबपुकी नु गारशा, ठीक पचा, थमा सुइक्चा, दाक्चा नु थुं नाइक्चा ला मिम्तो। १तिमोथी ४:१२; १तिमोथी ६:११; हिब्रू १२:१४

23 हिक्सी मडाम्शो लोव्र पाइब नु काम मलाप्या डा लोव्र पा जितीके रे डोन बाक्को। मेको जिचा पोक्ब ला बाक्नीम दे तुडक्नेवे। १तिमोथी ४:७

24 प्रभु आ गेय पाइबमी जिचा मदुम्ब। नेल्ल आन कली रिम्शो पाइब दुम्चा माल्ब। रुप्पाइश्शा शेंबमी मुर आन मरिम्शो पतीके फाल्चा माल्ब। तीतस १:७-९

25 जिचा पोक्ब आन कली रिम्शो लोव्रमी ठीक सेल्चा माल्ब। परमप्रभु यावेमी मेको आन कली आ गे लेप्पाइश्शा, थमा शेंतीके तुडक्पाइक्ब को?

26 सैतानमी मेको आन कली ग्याइश्शा, आ दाक्शो पपदानु, मेको रे प्रोक्मल।

### 3

नोले डा नाक्त दोदेशो बाक्नीम

1 नोले डा नाक्त हिंचा डा श्येत दुम्ब। गे मेको तुडक्चा माल्नेवे। १तिमोथी ४:१

2 मारदे हना मुरपुकीमी आंम कली ला दाक्नीम। क्येट कली शुश दाक्नीम। ठेयब लेशशा, अरु नेल्ल आन कली दिप्नीम। मरिम्शो लोव्र पाइनीम। आम आफ कली मटिथु “गे रिम्शो पाइतीनी” गेनायो मदेंथु, पापम ग्रुम्शा बाक्नीम।

3 आंम खिं डा मुर आन कली मदाक्नीम। ईख कुरनीम, मरिम्शो लोव्र पाइनीम। आंम रां नु शोव्र चलेस मजोक्नीम। जिचा पोक्नीम। रिम्शो मरिइ मदाक्नीम।

4 मुर आन कली श्येतम खुम्नीम। चुइश्शा गेय पाइनीम। “गो जोक्नुड” दे बोरशा, मुर आन लोव्र मनेनीम। आंम दला दाक्स ला पाइनीम। परमप्रभु यावे कली मदाक्नीम।

5 मोदेशो मुरुमी परमप्रभु यावे कली मिम्शा दाक्चा देखु पाइनीम। तन्न आन आगामी सक्ति मबाक्तीके कौंडनीम। मेकोपुकी नु डोन बाक्को। मती ७:१५-२१; तीतस १:१६

6 मेको आन दातेमी का निकशीमी आन दला दाक्स पा पापम ग्रुम्शो नु आंम कली चलेस मजोक्ब मीश मुर आन खिं ओव्रशा, लोव्र नेंपाइक्नीम।

7 मेको मीश मुरपुकीमी सु आन लोव्र नेंतेक्म हना यो, थमा शेंतीक गेनायो रुम्ने मचाप्नीम।

8 दोपा यन्नस नु याम्ब्रेस माइश्शा मुर निकशीमी मोसा कली “इ गेय ठीक मबाक्ब” देंसा, मोपा मेको मुरपुकीमी यो थमा शेंतीके कली “ठीक मबाक्ब” देंनीम। आन थुं मूर्ख गेयम ब्रीशो दुम्शा, थमा सुइक्तीके प्रोंइशो बाक्नीम। प्रस्थान ७:११,२२

9 तन्न मोदेशो दूली शेंबपुकीमी शुश गेय पचा मताइनीम। मारदे हना यन्नस नु यम्ब्रेस आस कली खोदेशो पा, मुरपुकीमी “गशो बाक्नीम” दे तुडक्नीम।

पावल आ श्येत

10 मिनु गे आं शेंतीके, आं गेय पतीके “मार पाइनुड” दे आं मिम्तीके, आं थमा सुइक्तीके, आं फाल्तीके, आं दाक्तीके नु थमा सुइक्तीके मप्रोंइशो ताप्तीवी।

११ आं कली खेदा पशो, आं श्येत जशो यो ताप्तीवी। एन्टीओक, आइकोनीयम नु लिस्त्रा सहरमी गो दोदेशो श्येत जडा, दोपा खेदा पशो नेल्ल फलु, मेको नेल्ल ताप्तीवी। तन्न प्रभुमी मेको नेल्ल रे प्रोइती। प्रेरित १३:१३-१४:२२; भजन संग्रह ३४:२०

१२ सु सु ख्रीस्त येसुमी परमप्रभु यावे कली मिम्शा, दाकशा ब्रोइनीमी, मेकोपुकी खेदा पचा पुंडसीनीम। मत्ती १६:२४; प्रेरित १४:२२; १थिस्सलोनिकी ३:३

१३ मरिम्शो नु ग्रांग्रा दिचा डा मुरपुकीमी “मुर आन मिक्च सिल्लीक” दे मिम्तमेनु, डोइती डा क्येडा मरिम्शो दुम्शा, आंमान आन मिक्च सिल्चा पुंडसीनीम। १तिमोथी ४:१

परमप्रभु यावे आ लोत्र

१४ मिनु गे मार शेंसे, मेको “ठीक बाक्ब” दे थमा सुइशशा, पना पन बाक्को। मारदे हना गे सु नु शेंसे मेको तुइक्नेवे।

१५ गे आल रे ना परमप्रभु यावे आ लोत्र तुइशशा बाक्नेवे। मेको लोत्रमी ख्रीस्त येसु कली थमा सुइशशा “दोपा पाप रे प्रोइचा” दे इ कली शेंने चाप्ब। यूहन्ना ५:३९

१६ परमप्रभु यावेमी मेको लोत्र नेल्ल गेशो बाक्त। मेको शेंचा कली, हुइक्चा कली, रिम्शो सेल्चा कली नु थमा सुइक्तीक ठीक सेल्चा कली बाक्ब। २पत्रुस १:१९-२१

१७ परमप्रभु यावेमी आ मुरपुकीमी नेल्ल गेय रिम्शो पामेक्ल दे एको लोत्र तुइक्पाइशशा बाक्त। १तिमोथी ६:११

## ४

बेक्चा सम्म थमा सुइक्चा मप्रोइचा

१ गो इ कली ख्रीस्त येसु नु परमप्रभु यावे आस डोइती मार देनुड देशा हना, येसु ख्रीस्त आ राज्य जाची ना बेक्शो नु ब्रोइशो मुर आन कली निसाफ पाइब बाक्ब। मेको आ जाक्चा नु राज्य पचा मिम्शा १पत्रुस ४:५

२ “परमप्रभु यावे आ लोत्र पावो। नेंचा दाक्ताक्म हना यो, मदाक्ताक्म हना यो, शेंदीमी। मरिम्शो पाइब आन कली लोत्र पावो। मुर आन कली ‘ठीक पचा’ दे शेंदो। आन थुं बारपतो। नेल्ल आन कली फाल्शा, रिम्शो शेंदो। प्रेरित २०:२०,३१

३ मारदे हना इक्का नोले थमा शेंतीक नेंचा काइ मदाक्नीम। आंम दला दाक्स पा अर्को लोत्र कली नोफा दाइशशा, आंम कली शेंबपुकी तेलनीम। १तोमोथी ४:-

४ मेना थमा शेंतीक प्रोइशा, मुर आन सेल्शो कथा नेंनीम। १तिमोथी ४:७; २थिस्सलोनिकी २:११

५ गे चहिं मार पाप्तीवी हना यो, मिम्ना मिम्न गेय पावो, श्येत फलो, ग्येरपाइक्ब लोत्र शेंदो। इ कली गेशो गेय नेल्ल पावो” दे माइक्नन। २तिमोथी २:३

६ मारदे हना गो चढेशो खोदेशो दुम्शा, आं लची ना जाक्त। फिलिप्पी २:१७

७ गो थमा सुइशशा ग्राती। दाम पशो खोदेशो पा ग्राती। थमा सुइक्चा मप्रोइथु बाक्ती। १कोरिन्थी ९:२५; १तिमोथी ६:१२; प्रेरित २०:२४; फिलिप्पी ३:१४

८ मुल रे ठीक पतीके डा सिरपेच गुप्चा दे आं कली वोइशशा बाक्त। प्रभु ठीक निसाफ पाइब बाक्ब। मेकोमी आं कली आ नाक्तीम सिरपेच गेब। आं कली ला ममाइ, सु सुमी आ जाक्शो दाक्नीमी, मेको आन कली यो गेब। २तिमोथी २:५; १पत्रुस ५:४; याकूब १:१२; प्रकाश २:१०; मत्ती २५:२१

पावल नु आ नु गेय पाइबपुकी

९ आं कली रीब पा गुम्थ जाक्को। २तिमोथी १:४

१० मारदे हना डेमासमी रागी डा गेय दाक्शा, आं कली प्रोइती। मिनु थिस्सलोनिकी सहर लत। क्रेसेन्स गलातीया नु तीतस डाल्मातीया रागी लाम्ताक्स। कलस्सी ४:७,१०,१४

११ लूका ला गो नु बाक्ब। मर्कूस कली गे पिशशा पिवो। मारदे हना मेको आं कली वारच पाइब बाक्ब। प्रेरित १५:३७; कलस्सी ४:१०

१२ तिखीकस कली एफिसस सहरम सोइक्ताक्ड। एफिसी ६:२१



13 त्रोआस सहरमी कारपस आ खिमी फेक्तीक वा का प्रोंइता। मेको चाक्को। किताब नु कागजपुकी यो चाक्मी।

14 अलेक्जन्डर तांबा तुप्तीलमी शुश श्येत गेती। प्रभुमी मेको आ गेय तशा, सजाइ गेब। १तिमोथी १:२०

15 गे यो मेको नु होस पा बाक्को। इं शेंतीके आ पर्वम शुश जिचा पोक्तु।

16 डोंइती डा आं मुददाम सुइमी आं कली वारच मपाम। नेल्लेमी प्रोंइतीमी। परमप्रभु यावेमी मेको आन कली सजाइ मगेवल। २तिमोथी १:१५

17 तन्न प्रभु गो नु बाक्शा, अर्को रागी डा मुर आन कली परमप्रभु यावे आ लोव्र नेल्ल शेंचा सक्ति गेती। मोपा आं कली गुप्स रे प्रोंइती। प्रेरित २३:११; प्रेरित २७:२३

18 प्रभुमी आं कली आ स्वर्ग डा राज्य लचा, दे नेल्ल श्येत रे प्रोंइब। मेको कली गेना हना यो मान पय। आमन।

नोले डा लोव्र

19 प्रिस्कीला, अक्वीला नु ओनेसीफरस आ खिं डा मुर नेल्ल आन कली “रिम्शो बाक्कीन” देनो। प्रेरित १८:२; २तिमोथी १:१६

20 इरास्तस कोरिन्थ सहरम बाक्ब। त्रोफीमस रोइ पवानु, गो मिलेटस सहरमी लाइशशा वोइक्ता। प्रेरित १९:२२; प्रेरित २०:४

21 हिउंद क्येडा डोंइती आं कली युम्थ रीब पा जाक्को। युबुलसमी इ कली “रिम्शो बाक्को” देशो बाक्ब। पुडेन्स, लिनस, क्लौदीया नु थमा सुइक्ब लोक्ब नेल्लेमी यो मो देंतेक्म।

22 प्रभु गे नु बाक्ल। आ शिशी गे नु लील।

## तीतस

**ब्रेक्ब मुर:** एको चिठी पावलमी आ नु गेय पाइब तीतस कली ब्रेक्शो बाक्त।

**गेना ब्रेक्शो:** पावल रोम सहर डा जेल्खान रे प्रॉइचा पुंडसे नोले क्रेट टापु लमाक्त। मेकेर मुर आन कली शेंचा कली तीतस कली वोइश्शो बाक्त। एको चिठी ६५ ए. डी.मी तीतस कली ब्रेक्शो बाक्त।

**मारदे ब्रेक्शो:**

१. थमा सुइक्ब आन शेंब दोदेशो दुम्चा माल्नीमी।

२. थमा सुइक्ब आन कली शेंतीके रिम्शो दुम्चा माल्नीम।

हुकुम पाइब आन कली टिचा माल्नीम।

दूली शेंब आन पर्वम होस पचा माल्नीम।

**डोंइती डा लोव्र**

१ गो परमप्रभु यावे आ वाइल नु येसु ख्रीस्त आ सोइश्शो, थमा सुइक्ब पावल नड। परमप्रभु यावे आ योव्रशो मुर आन कली थमा सुइक्चा आ पर्वम शेंतीक नु मेको तुइश्शो रे रिम्शो गेय पचा माल्ब, दे शेंब दुम्ती।

२ मोदेशो दुम्मेनु, गो नेल्ल गेना हना यो परमप्रभु यावे नु बाक्शा ब्रोंइनय, दे आस पाइनय। २तिमोथी २:१३

३ आ दाक्शो ना मुर आन कली आ लोव्र तुइक्पाइक्तु। दोपा तुइक्पाइक्तु देशा हना, इं मरिम्शो गेय रे प्रॉइब परमप्रभु यावेम “आं लोव्र शेंदीमी” दंत। एफिसी १:९-१०

४ तीतस, एको चिठी इ कली ब्रेक्ताकड। गो निक्शी इस के थमा सुइक्तीक का दुम्शा, गे आं तौ खोदेशो दुम्ते। इं आफ परमप्रभु यावे नु इं पाप रे प्रॉइब येसु ख्रीस्तमी इ कली शिशो नु थुं नाइक्चा गम्सेक्ल। १तिमोथी १:२

**थमा सुइक्ब आन कली कोव्रब**

५ गो इ कली क्रेट टापुमी मारदे वोइक्तन देशा हना “गे थमा सुइक्ब आन दातेमी ठीक मदुम्शो गेय ठीक पपतो। मिनु सहर सहर डा गुम्तीकेमी शेंब खाल्पापुकी वोतो” दे इ कली अरेतन। प्रेरित१४:२३

६ मिनु गुम्तीक खिं डा शेंब खाल्पापुकी सु सु दुम्ने चाप्नीमी देशा हना, काइ दोस गेचा मपुंडसीब नु मीश का ला पाइश्शो वोंइश मुर बाक्चा माल्ब। मेको आ तमी तौ थमा सुइक्ब बाक्चा माल्नीम। हेंथे गाक्ब नु मटीब आल आन आफ गुम्तीक खिं डा शेंब खाल्पा दुम्ने मचाप्नीम। १तिमोथी ३:१-७

७ मोदेशो थमा सुइक्ब आन कली कोव्रब परमप्रभु यावे आ खिं डा गेय पाइब दुम्शा, दोस गेचा मपुंडसीब बाक्चा माल्ब। मिनु टेयब लेशो, शुश गाइक्ब, राकसी शांबू तूशा दुक्ब, चुरशा गुइ प्रॉइब नु शिम मुरुम मेको गेय पने मचाप्नीम। १कोरिन्थी ४:१; २तिमोथी २:२४

८ थमा सुइक्ब आन कली कोव्रब चहिं बास गेब, रिम्शो गेय दाक्ब, रिम्शो नु मरिम्शो तुइक्ब, ठीक गेय पाइब, थमा पा परमप्रभु आ गेय पाइब नु आंम रां चलेस जोक्ब मुर बाक्चा माल्नीम।

९ मोदेशो पाइब मुर परमप्रभु यावे आ लोव्र डा शेंतीक तुइश्शा पचा माल्नीम। मोपा मेकोपुकीमी थमा सुइक्ब आन कली रिम्शो शेंशा, अरेने चाप्नीम। मिनु परमप्रभु यावे आ लोव्र दूली शेंब आन कली यो रिम्शो सेल्ने चाप्नीम।

**दूली शेंब आन पर्वम**

१० परमप्रभु यावे आ शेंशो लोव्र मटीबपुकी शुश बाक्नीमी। शोर गाक्शो लोव्र पाइब नु हेंथे लां शेंब बाक्नीम। मेको शुश खोइक्तीक चिनु पाइश्शो इस्त्राएली बाक्नीम।

११ मोदेशो मुर आन कली ब्वालेइ पपाइक्चा माल्नीम। मारदे हना खिं खिं डा मुर नेल्ल आन कली जिपाइक्नीमी। मिनु क्येट चेम्चा कली शेंनीमी।

12 क्रेट टापु डा शुश जोकब मुरुमी आंम मुर आन पर्वम मार लोत्र पवा बाक्त देशा हना, मेकोमी “क्रेट डा मुरपुकी गेना हना यो जोल पाइब, मरिम्शो पाइब जन्तु, शुश जाइब ब्वाइब नु अल्सी अल्से बाक्नीमी” दे लोत्र पवा बाक्त।

13 मेको आ देशो थमा बाक्ब। मोपतीके गे मेको आन कली शुश अरेवो। मोपा ला आन थमा सुइक्तीके ठीक दुम्ने चाप्ब। रतिमोथी ४:२

14 मिनु थमा सुइक्बपुकीमी यहूदी आन कथा नु मुरुम सेल्शो अरेशो लोत्र नेंचा मदुम्ब। मेको थमा लां प्रॉइब बाक्नीम। रतिमोथी ४:७; रतिमोथी ४:४

15 रिम्शो मुर आन कली मारेइ मारेइ रिम्शो बाक्ब। ग्रांघ्रा दिचा डा मुर नु थमा मसुइक्ब आन कली चहिं मारेइ मारेइ रिम्शो मबाक्ब। मेको आन थुं नु मिम्तीके मरिम्शो बाक्ब। मती १५:११; रोमी १४:२०

16 मिनु मेकोपुकीमी “गो परमप्रभु यावे कली तुइक्नुड” देखु पाइनीमी। तन्न आन पतीकेमी मतुइक्ब बाक्नीम, दे तुंडसीब। मोपा मेकोपुकी ग्रांघ्रा दिचा डा मुर बाक्नीम। मिनु मटीब दुम्शा, रिम्शो गेय यो पने मचाप्नीम। रतिमोथी ३:५

## 2

### गुम्तीकेमी दोपा बाक्चा

1 गे चहिं येसु ख्रीस्त आ ठीक लोत्र रिम्शो पा मुर आन कली शेंदीमी। रतिमोथी १:१३

2 गे खाल्पा आन कली मार शेंचा माल्नेवे देशा हना, रिम्शो मिम्ने चाप्ब, मान पाइक्चा शिरशो मुर, गेय पचा क्येडा डोंइती मिम्ब, आन थमा सुइक्चा, आन दाक्चा नु आन फाल्चा डा सक्ति ठीक दुम्शा बाक्चा माल्नीम, दे शेंचा माल्नेवे। रतिमोथी ५:१

3 मिनु खाल्पी आन कली मार शेंचा माल्नेवे देशा हना, खाल्पीपुकी रिम्शो थमा सुइक्ब दुम्चा माल्नीम। हेंथे लोत्र पचा मदुम्ब। शुश शांबु तूचा मदुम्ब। खाल्पीपुकी रिम्शो गेय शेंब दुम्चा माल्नीमी।

4 मोदेशो पा खाल्पीपुकीमी आन क्येडा आल मीश मुर आन कली आन वोंइश नु आन आल आन कली दाक्चा माल्ब, दे शेंचा माल्नीम।

5 गेय पचा क्येडा डोंइती मिम्चा, आंम वोंइश नु ला बाक्चा, खिं डा गेय रिम्शो पचा, मुर नु रिम्शो दुम्चा, आंम वोंइश कली टिचा, दे शेंचा माल्नीम। मोदेशो पांम्तेक्म हना, मुरपुकीमी परमप्रभु यावे आ लोत्र आ पर्वम मरिम्शो लोत्र मपाइनीमी। एफिसी ५:२२

6 मोदेशो पा गे इ क्येडा आल वोंइश मुर आन कली “गेय पचा क्येडा डोंइती मिम्चा माल्ब” दे शेंचा माल्नेवे।

7 मिनु नेल्ल क्येडा ठेयब मार बाक्ब देशा हना, गे रिम्शो गेय पशा, थमा सुइक्बपुकी दोदेशो मुर बाक्नीमी, दे कोंइचा माल्नेवे। मिनु मुर आन कली शेंदीनु, हेंथे लोत्र मपथु, रिम्शो शेंतीक शेंचा माल्नेवे। रतिमोथी २:१५; १पत्रुस २:१५; रतिमोथी ४:१२; १पत्रुस ५:२

8 गे रिम्शो लोत्र शेंताक्वी हना, सुइमी इ कली दोस गेने मचाप्नीम। मिनु इ कली मदाक्बमी यो इ पर्वम मारेइ मरिम्शो लोत्र पचा मताइनीम। मिनु आन मुने दोक्नीम।

9 मिनु वाइलीम वाइल आन कली मार शेंचा माल्नेवे देशा हना, आंम ठेयब मुर आन लोत्र टिचा माल्नीम। आन गेय रिम्शो पा आन ठेयब मुर आन कली ग्येरपाइक्चा माल्नीम। आन ठेयब मुरुमी लोत्र पांमेनु, मेकोपुकीम जोप पचा मदुम्नीमी। एफिसी ६:५-६१; तिमोथी ६:१-२; १पत्रुस २:१८

10 खुइ पचा मदुम्ब, नेल्ल गेयमी थम रिम्शो पाइब दुम्चा माल्नीम। मोदेशो रिम्शो गेय पा इ कली पाप रे प्रॉइब परमप्रभु यावे आ शेंतीके रिम्शो लोत्र बाक्ब, दे कोंइनीमी। मेको शेंचा माल्नेवे।

### परमप्रभु यावे आ शिशी

11 परमप्रभु यावे आ शिशी मुर नेल्ल आन कली पाप रे प्रॉइचा कली तपांडसाक्ब। तीतस ३:४

12 मोदेशो शिशीमी इ कली परमप्रभु यावे कली मगारचा डा गेय नु रागी रागी डा मुर आन पतीके आ पर्वम मोदेशो मपचा, दे शेंब। मिनु मुल गेय पचा क्येडा डोंइती मिम्चा, ठीक गेय पचा नु रागीम बाक्शा, परमप्रभु यावे कली मान पा हिंचा, दे शेंब।

13 मोदेशो दुम्शा, मान ताडब परमप्रभु यावे नु इं कली पाप रे प्रोंडब येसु खीस्त आ छेडछेड यूब, दे गो आस पशा रिम्नय। १कोरिन्थी १:७; फिलिप्पी ३:२०; १थिस्सलोनिकी १:१०

14 येसु खीस्तम आंम कली काड ममिम्थु, साइक्या पुंडसाकव। मारदे साइक्या पुंडसाकव देंशा हना, इं कली मटितीके रे प्रोंडचा कली साइक्या पुंडसाकव। मिनु इं कली परमप्रभु यावे आ योव्रशो मुर सेल्चा नु इं कली शुश रिम्शो गेय पपाइक्या कली आंम कली साइक्या, दे जिम्मा गेसाकव। गलाती १:४; १तिमोथी २:६; प्रस्थान १९:५; एफिसी २:१०

15 मेको लोव्र शेंदीमी। मिनु गे अधिकार पाइशो दुम्शा, मुर आन कली अरेवो। मिनु मुरपुकीमी “एको टिटामी आंइ कली शेने मचाप्व” देंचा मपुंडसो। १तिमोथी ४:१२

### 3

#### रागीम दोपा बाक्या माल्नीमी

1 मिनु गेमी हुकुम पाइब नु सरकार डा अधिकार पाइशो मुर आन कली टिचा, दे थमा सुइकब आन कली मिम्पतो। थमा सुइकबपुकी टीब मुर दुम्चा माल्नीम। मिनु मार मार रिम्शो गेय बाकमे, मेको पचा माल्नीम। रोमी १३:१; १पत्रुस २:१३

2 मिनु सुइ आन पर्वम काइ शुक्शी मपचा, जिचा मपोक्या, मुर आन कली रिम्शो पा फाल्चा, ठेयब मलेत्थु, मुर आन कली वारच पचा माल्नीम। फिलिप्पी ४:५

3 डोंडिती गो मरुन्ब बाक्तय। परमप्रभु यावे कली मटीब बाक्तय, हेथे गाकब, मार मार दाक्तय, मेको दला दाक्स पाइब बाक्तय। ग्रांग्रा दिचा डा गेय पाइब बाक्तय। गो मरिम्शो पा गेहे पाइतय। मिनु गोपुकी काइ मदाकमुय। १कोरिन्थी ६:११; एफिसी २:२; एफिसी ५:८; १पत्रुस ४:३

4 तन्न पाप रे प्रोंडब परमप्रभु यावे आ रिम्शो पतीके, आ दाक्तीके नु शिशी जाक्त। तीतस २:११

5 मेकोमी इं कली मरिम्शो गेय रे प्रोंडतु। इं पशो ठीक गेय तशा मप्रोन, तन्न आ शिशीमी इं कली प्रोंडतु। दोपा पाप रे प्रोंडतु देंशा हना, इं कली मरिम्शो गेय रे चिक्शो खोदेशो पा, आ सोक्त आ पशोमी नक मुर सेल्लु। योएल ३:१; २तिमोथी १:९; यूहन्ना ३:५; एफिसी ५:२६

6 मिनु परमप्रभु यावेमी आ सोक्त इं तारी मोइक्तु। दोपा मोइक्तु देंशा हना, इं पाप रे प्रोंडब येसु खीस्त आ पतीकेमी मोइक्तु।

7 मोदेशो पा, परमप्रभु यावे आ शिशी आ पतीकेम इं कली ठीक सेल्लु। मिनु परमप्रभु यावे नु बाक्या शिरशो दुम्तय। परमप्रभु यावे नु गेना हना यो बाक्या कली आस पा बाक्तय। रोमी ३:२६

8 एको लोव्र थमा बाकब। मिनु एको लोव्र शुश शेंदो। मोदेशो पा शेंताक्वी हना, परमप्रभु यावे कली थमा सुइकब दुम्शो मुरपुकी रिम्शो गेय पचा कली होस पा बाक्नीम। आं देंशो शेंतीके मुर आन कली रिम्शो नु गारचा डा बाकब।

9 मिनु गे मूर्ख खोदेशो पा हिल्लो पतीके, यहूदी आन बडसावली डा शेंतीके नु अरेतीक लोव्र रे सेल्लो पतीके आ पर्वम गाइकपाइकब नु जिचा पोक्ब रे डोन बाक्को। मारदे हना मेको शोर गाक्शो नु जाग्शा लाइब बाक्नीम। १तिमोथी १:४; १तिमोथी ४:७; २तिमोथी २:१४

10 गे मोदेशो दूली शेंब आन कली खेयप निकशी सम्म लोव्र पावो। मेकोम मटिप्तु हना, मेको रे डोन बाक्को। २यूहन्ना १०; मती १८:१५-१७

11 मोदेशो मुर नेल्ल दूली नु मरिम्शो पाइब दुम्शा, आन मरिम्शो पतीकेमी आंम कली खतम सेल्लब बाक्नीम, दे तुडक्नेवे। १तिमोथी ६:४-५

#### नोले डा लोव्र

12 गो अरतीमास हना यो, तिखीकस हना यो इ कली गुम्चा कली सोइक्ताकड हना, गे आं कली गुम्चा कली निकोपोलीस सहर पिवो। मारदे हना गो हिंडदमी मेकेर बाक्या कली मिम्ताकड। एफिसी ६:२१

13 मिनु गे चीनास माइशो वोकील नु आपोल्लोस आस कली रीब पा सोइक्तीम्सी। मेको निकशीम मार मार माल्नीसी, मेको आस कली गेम्सी। प्रेरित १८:२४; १कोरिन्थी ३:५-६

14 मिनु इं मुरपुकीमी यो रिम्शो गेय पचा कली शेंसीचा माल्नीमी। मोपा शुश श्येत जाइब आन कली वारच पशा, फल सिप्व रवा खोदेशो दुम्नीम। तीतस २:१४; मत्ती ७:१९

15 गो नु बाक्बपुकी नेल्लेमी इ कली “रिम्शो बाक्को” दे ब्रेक्पाइक्तीमी। आंइ कली दाक्ब थमा सुइक्ब नेल्ल आन कली “रिम्शो बाक्कीन” ने माइक्मी। परमप्रभु यावे आ शिशी गे नेल्ल नु लील।

## फिलेमोन

**ब्रेक्ब मुर:** एको चिठी पावलमी फिलेमोन कली ब्रेक्शो बाक्ब।

**गेना ब्रेक्शो:** पावल रोम सहर डा जेल्खानम बाक्शा ६२ ए. डी. नुप्ची ना कि ६३ ए. डी. गोची ना ब्रेक्शो बाक्ब।

**मारदे ब्रेक्शो:** एको चिठीमी टेयब शेंतीके मबाक्ब। फिलेमोन आ वाइल ओनेसीमस प्रोक्शो बाक्त। मेकोमी पावल कली रोम सहरम गुम्शा, थमा सुइक्ब दुम्शा, मुल आ होत्रप आ खिं लेत्चा चिक्शो बाक्त। एफिसी नु कलस्सी कली चिठी कुरबपुकीम एको चिठी यो चाक्शो बाक्तेकम। फिलेमोन आ खिं यो कलस्से सहरम बाक्त।

### डोंइती डा लोत्र

1 ख्रीस्त येसु आ नेमी जेल्खानम चोक्चा पुंडसीशो पावल नु इं लोकब तिमाथी गो निक्शीमी एको चिठी ब्रेक्ताक्स्कु। एको चिठी सु सु इन कली ब्रेक्ताक्स्कु देशा हना, गो नु गारशा गेय पाइब इं दाक्शो फिलेमोन, एफिसी ३:१

2 इं समी आप्पीया, पल्टन कामी बाक्शा गाक्शो खोदेशो दुम्शो अरकीप्पस नु फिलेमोन आ खिंमी देल्ब थमा सुइक्ब नेल्ल इन कली ब्रेक्ताक्स्कु। कलस्सी ४:१७

3 इं आफ, परमप्रभु यावे नु प्रभु येसु ख्रीस्तमी इन कली शिशी पा इन थुं नाइश्शा बाक्चा गेम्सेक्ल।

### प्रार्थना पशो

4 आं दाक्शो लोकब फिलेमोन, गो इ पबंम प्रार्थना पडानु “फिलेमोन कली रिम्शो पपाइक्तीनी” दे परमप्रभु यावे कली टेयब सेल्लुड।

5 मारदे हना गे थमा सुइक्ब नेल्ल आन कली शुश दाक्शो नु इ येसु ख्रीस्त कली थमा सुइश्शो आ पबंम नेंता।

6 इ थमा सुइश्शोमी रिम्शो गेय शुश पाइनेवे। मिनु दोपा रिम्शो गेय पवी, मोपान परमप्रभु यावेमी ख्रीस्त कली तुइक्तीके बारना बारन लपदल, दे प्रार्थना पाइनुड। फिलिप्पी १:९

7 आं लोकब, इ पशोमी थमा सुइक्ब शुश आन थुं नाइक्चा ताम्तेकम। शुश आन थुं बारना बारन लत। इ कली मोदेशो रिम्शो पशो तशा, गो यो आं थुं नाइश्शा ग्येरसाक्यी। २कोरिन्थी ७:४

### इम्चीली लोत्र देशो

8 गो ख्रीस्त आ नें आ पबंम इ कली मारेइ अरेतीक अधिकार तशो नड।

9 तन्न गे मुर आन कली दाक्शा शिशी पाइनेवे, आं देशो यो टीनेवे, दे तुइश्शा, अधिकार कोइचा ममाल्दी। गो ख्रीस्त येसु आ पबंम जेल्खानम चोक्चा पुंडसीशो खाल्पा पावलमी इ कली इम्चीली लोत्र का माइक्नन।

10 जेल्खानम बाक्डानु, ओनेसीमस कली गुम्ता। मेकोमी थमा सुदा रे आं दाक्शो तौ दुम्त। गो थमा पोबु दुम्तस्कु। कलस्सी ४:९; १कोरिन्थी ४:१५; गलाती ४:१९

11 साइ इ खिंमी बाक्मेनु, आ गेय रिम्शो मपथु, शोर गाक्शो बाक्माक्त। मुल आं कली शुश वारच पाइक्ती। मुल डा मेरे इ थुं नुपाइक्चा डा गेय पाइब, दे तुइश्शा, इ खिं लेश्शा सोइक्ताक्ड।

12 मेको कली सोइश्शो ला ममाइ, पावलन जाक्शो मिम्तो।

13 ख्रीस्त आ लोत्र शेंशो आ पबंम जेल्खानम चोक्शीशा बाक्डानु, ओनेसीमस इ पा डा आं वारच सेल्चा थुं पाता। फिलिप्पी २:३०

14 गेमी गेय पपाइश्शा वोतो, दे मदेने सम्म मवोदु देशा, सोइक्ताक्ड। वारच पाइय्यीनी मदेथु, वारच पाइतीनी हना, गो ग्येरसीनुड। २कोरिन्थी ९:७

15 ओनेसीमस इ खिं रे प्रोक्शा, नाक्त का निक्शी गाक्शो रिम्शोन दुम्त। मारदे हना येसु ख्रीस्त आ लोत्र रुप्शा, गेना हना यो इ खिंम बाक्ब दुम्त।

16 मुल डा मेरे मेको कली वाइल ममिम्थु, आंम कयी का डा लोकब मिम्तो। प्रभु आ नेंमी यो लोकब मिम्तो। मिनु मोदेशो लोकब दुम्शोनु, गेनायो मब्रासीब। १तिमोथी ६:२

17 मोपतीके वारच मिम्ताकयी हना, आं कली ब्रशो खोदेशो पा ओनेसीमस कली ब्रावो।

18 साइ इ कली मरिम्शो पशो बाक्त हना यो, इ कली मेकोमी मारेइ थाप्चा माल्शो बाक्त हना यो, मेको नेल्ल गो गारपाइक्नुड।

19 एको लोत्र गो पावलमी आंम आं गुइमी ब्रेक्ताक्ड। लोत्र थोक्शा, मार थाप्चा माल्शो बाक्मे, मेको नेल्ल थाप्नुड। तन्न गोमी साइ इ कली वारच पशो यो मिम्चा माल्नेवे, दे इन कली देनुड।

20 आं दाक्शो लोकब, प्रभु आ नेंमी गो निकशी चोबु दुम्शा बाक्स। ख्रीस्त आ दाक्शो पा आं थुं बारपा ग्येरपाइय्यी।

21 गो आं लोत्र नेंशा टिशा, आं देशो क्येडा यो शुश रिम्शो पाइनेवे, दे तुइश्शा, एको लोत्र ब्रेक्ताक्न।

**नोले डा लोत्र**

22 इ खिमी इप्तीक बाक्तीक बास फिक्शा चोतो, मारदे हना गेपुकीमी “पावल जेल्खान रे गूचा तवल” दे प्रार्थना पाइनीनी, दे तुइश्शा, गूचा ताइनुड, दे आस पा बाक्ती। फिलिप्पी १:२५; फिलिप्पी २:२४

23 ख्रीस्त येसु आ नेंमी जेल्खानमी काथा बाक्ब इपाफ्रासमी इन कली “रिम्शो बाक्कीन” देंत। कलस्सी १:७; कलस्सी ४:१०-१४

24 गो नु काथा गाक्ब येसु आ लोत्र शेंब मर्कूस, अरीस्तारकस, डेमास नु लूकामी यो इन कली “रिम्शो बाक्कीन” देंतेक्म।

25 प्रभु येसु ख्रीस्त आ शिशी इन थुमी लील।

## हिब्रू

**ब्रेक्ब मुर:** एको किताब पावलम ब्रेक्शो बाक्ब, दे शुश मुरुम मिम्नीम। तन्न का निक्शीमी लूका, का निक्शीम बारनाबास, का निक्शीम आपोल्लोस आ ब्रेक्शो बाक्ब, देनीम। साइ डा जोक्ब तुइक्बमी “हिब्रू किताब सुमी ब्रेक्शो बाक्बा, परमप्रभु यावेम ला तुइक्ब” दे ब्रेक्ताकम।

**गेना ब्रेक्शो:** एको किताबमी यरूसलेम सहर खतम दुम्शो आ परबम मारेइ मब्रेक्शो बाक्त। मारदे हना तिमोथी आ परबम लोत्र ब्रेक्शो बाक्ब। मिनु तिमोथी ८१ ए. डी. रोमी सिजर दोमीतीयन आ सासनमी थमा सुइक्चा आ परबम साइक्चा पुंडसीशो बाक्त। मोपतीके ६३ नु ७० ए. डी. रोम रे ब्रेक्शो बाक्ब, देनीम।

### मार ब्रेक्शो:

१. एको किताब डा शेंतीक लोत्र: परमप्रभु यावे आ लोत्र पाइब क्येडा येसु ख्रीस्त ठेयब बाक्ब। परमप्रभु यावे आ स्वर्ग डा गेय पाइब क्येडा येसु ख्रीस्त ठेयब बाक्ब। मोसा क्येडा येसु ख्रीस्त ठेयब बाक्ब। हारून क्येडा येसु ख्रीस्त ठेयब बाक्ब। मेल्लीसेदेक नक खाल डा चढेब बाक्ब।
२. एको किताब डा पतीक लोत्र: मुर नेल्ल नु दुशा बाक्चा। थमा सुइक्ब लोकब आन कली दाक्चा मप्रोनीन।

### डोंइती डा लोत्र

१ साइ नेसी परमप्रभु यावेमी आ लोत्र पाइब आन कली मार मार पपाइशशा नु कोइशा, इं किकी पिपी नु लोत्र पाइबाक्माक्त।

२ नोले डा नाक्ती आ तौ रे पा इं कली लोत्र पाप्तु। आ तौ कली नेल्ल अधिकार गेशो बाक्त। सरीड नु रागी नेल्ल आ तौ रे पा सेला बाक्त। भजन संग्रह २:८; यूहन्ना १:३; कलस्सी १:१६

३ आ तौ आ आफ आ सक्ति नु छेडछेड बाक्ब। मिनु आ सक्ति डा लोत्र पतीकेमी नेल्ल आन कली कोत्रना कोत्रन बाक्ब। मेकोमी पाप क्याम्तीक गेय पने थुम्शा, नेल्ल क्येडा ठेयब मान ताइब आ ग्युरा गे निश्शो बाक्ब।

### स्वर्ग डा गेय पाइब नु येसु

४ परमप्रभु यावे आ स्वर्ग डा गेय पाइब आन क्येडा आ तौ ठेयब बाक्ब। मिनु मेको आन क्येडा ठेयब नें तशो बाक्ब। १पत्रुस ३:२२; फिलिप्पी २:९

५ परमप्रभु यावेमी आ स्वर्ग डा गेय पाइब सु कली चहिं “गो इ कली थितन। मोपतीके गे आं तौ नवे” देंम डा? मिनु “गो मेको आ आफ दुम्नुड, मेको चहिं आं तौ दुम्ब” देंम डा? भजन संग्रह २:७; २सामुएल ७:१४

६ आ डोंइती जरमेशो तौ कली रागीम सोइक्तानु “आं स्वर्ग डा गेय पाइब नेल्लेमी मेको कली मान पा ठेयब सेल्मेक्ल” देंत। भजन संग्रह ९७:७; रोमी ८:२९

७ परमप्रभु यावेमी आ स्वर्ग डा गेय पाइब आन परबम “आं स्वर्ग डा गेय पाइब आन कली फश नु ब्रशो मी सेल्लुड” देंत। भजन संग्रह १०४:४

८ तन्न आ तौ आ परबम “इन राज्य पचा गेना हना यो लीब। इन राज्य डा राज दन्द ठीक निसाफ पतीके राज दन्द बाक्ब।

९ ठीक गेय पतीके दाक्नीनी। मरिम्शो पतीके मदाक्नीनी। मोपतीके परमप्रभु, इन परमप्रभु यावेमी इन पियामी तेल खेक्शा ग्येरपाइक्तु। इन चारच आन क्येडा इन कली ठेयब सेल्लु” देंत। भजन संग्रह ४५:६-७



10 अरु लोव्रमी यो “प्रभु, गे नेल्ल क्येडा डोंडती रागी डा जग वोडक्तीनी। मिनु सरीड इन गुड डा गेय बाकब।

11 मो हना यो मेको नेल्ल मलीनीम। गे चहिं गेना हना यो बाक्नीनी। सेल्शोपुकी माडत वा खोदेशो पा जेक्शा लाइनीम।

12 फेक्तीक वा मुक्शो खोदेशो पा, मेको आन कली मुक्नीनी। वा फाइशो खोदेशो पा, मेकोपुकी फांडसीनीम। गे चहिं गेनायो मफांडसीथु गेना हना यो बाक्नीनी” देत। भजन संग्रह १०२:२५-२७

13 परमप्रभु यावेमी आ स्वर्ग डा गेय पाइब सु कली “इ जोरी सत्रु आन कली इ खोडल आगामी मवोदुमी सम्म आं ग्युरा गे बाक्को, देम डा? भजन संग्रह ११०:१

14 मेको गेय पाइब सोक्त मनमी डा? मिनु आन पाप क्याम्चा पुंडसीब आन कली वारच पथ सोइशो मनमी डा?” देत। भजन संग्रह ३४:८; भजन संग्रह ९१:११-१२

## 2

### नेंशो लोव्र थुंम वोडक्चा मालब

1 इं नेंशो लोव्र थुंमी वोडक्चा मालब। थुंमी मवोडक्तय हना, मेको लोव्र साम्मय।

2 परमप्रभु यावे आ स्वर्ग डा गेय पाइबपुकीम तुडक्पाइशो लोव्र थमा दुम्त। मिनु सु सुमी मेको आन लोव्र मटीमे, मेकोपुकीमी सजाइ ताम्तेक्म। प्रेरित ७:५३; गलाती ३:१९

3 पाप आ सजाइ रे ब्रोंडतीक ठेयब गेय कली ममिम्ताक्य हना, दोपा सजाइ रे ब्रोंडने चाप्नया डा? मेको ठेयब गेय डोंडती प्रभुमी तुडक्पाइशो बाक्त। मिनु आ लोव्र नेंबपुकीमी “थमा बाकब” दे तुडक्पाइशो बाक्तेक्म। हिबू १०:२९; हिबू १२:२५

4 परमप्रभु यावेमी पपाइशो चिन्द नु छक लाक्चा डा गेय, सक्ति पाइशो शुश गेय नु परमप्रभु यावेमी आ दाक्शो पा योव्रशा आ सोक्तीमी मुर आन कली पपाइशो गेय, मेको सांफा सांकछी बाक्नीम। मर्कूस १६:२०; २कोरिन्थी १२:१२; १कोरिन्थी १२:४-११; प्रेरित २:१-१३; प्रेरित १०:४४-४५

### ख्रीस्त सेंसीशा नेल्ल क्येडा ठेयब दुम्शो

5 इं देशो लोव्र मार बाकब देशा हना, पाप रे प्रोंडचा नु नोले जाकब परमप्रभु यावे आ राज्य चहिं परमप्रभु यावेमी आ स्वर्ग डा गेय पाइब आन गुडमी जिम्मा मगेशो बाकब।

6 परमप्रभु यावे आ लोव्र पाइब कामी “मुर आइक्च बाक्त हना यो, मेको कली मिम्नीनी। रागीम जरमेशो मुर आन कली मारदे कोव्रनीनी?

7 मेको कली इन स्वर्ग डा गेय पाइब क्येडा इक्ची आइक्च सेल्शा वोडक्तीनी। नोले मान पाइक्चा पुंडसीतीके सिरपेच गुप्चा गेशा, सक्ति पाइशो सेलतीनी।

8 मिनु मारेड मारेड मेको आ अधिकारम गेतीनी” दे ब्रेक्शो बाक्त। परमप्रभु यावेमी आ गुडमी मारेड मारेड जिम्मा गेशा अधिकार गेप्टु देशो लोव्रमी मार रुम्सीब देशा हना, मेको नेल्ल कोव्रब बाकब, दे रुम्सीब। तन्न गो मुल सम्म मोदेशो अधिकार पाइब बाकब, दे मरुप्नय। भजन संग्रह ८:४-६

9 गोपुकीमी येसु कली मान पाइक्चा पुंडसीतीके, छेडछेड डा सिरपेच गुप्शो नु सक्ति पाइशो दुम्शो ताइतय। रागीम बाक्मेनु, परमप्रभु यावे आ स्वर्ग डा गेय पाइब क्येडा इक्ची आइक्च दुम्शो बाक्त। मारदे हना परमप्रभु यावेमी मुर नेल्ल आन कली शिशी पाडनुड, दे कोइचा कली मुर आन पबर्म श्येत जपाइशो बेक्चा गेप्टु। फिलिप्पी २:८-९

10 नेल्ल सेल्ब नु नेल्ल आन कली ब्रोंडतीक सोक्त गेबमी शुश मुर आन कली आन पाप रे प्रोंडतु। मेको प्रोंडब कली शुश श्येत जपाइशो, पाको सेल्लु। हिबू १२:२

11 पाप रे प्रोंडब नु पाप रे ब्रोंडब नेल्ल खिं का डा मुर दुम्तेक्म। मोपतीके पाप रे प्रोंडबमी पाप रे ब्रोंडब आन कली आ लोकबपुकी देंचा मुने मपाइब। यूहन्ना १७:१९; मर्कूस ३:३४-३५; यूहन्ना २०:१७

12 मेकोमी “गो आं लोकब आन कली इन नें तुडक्पाइक्नुडमी। थमा सुइक्ब आन दातेमी इन कली ठेयब सेल्शा कुम्सो पाडनुड” देत। भजन संग्रह २२:२२

13 मिनू लेंशा “गो मेको कली थमा सुइक्नुड” दे ब्रेकशो बाक्त। मिनू चिनु लेंशा “नेनीन, परमप्रभु यावेमी आं कली गेशो तमी तौ, गो नेल्ल काथा बाक्नीकी” देंत। यसैया ८:१६-१७

14 तमी तौ हुश नु रुश के जोल्शो नम। मोपतीके येसु ख्रीस्त मेकोपुकी नु खाल का डा पा हुश नु रुश के दुम्त। बेक्पाइक्ब सक्ति पाइशशो कली खतम पोक्चा कली आंमन बेक्त। रतिमोथी १:१०; १यूहन्ना ३:८

15 मारदे हना बेक्पाइक्ब सक्ति पाइशशो सैतान कली ग्राचा नु मबेक्म सम्म बेक्चा हिंब मुर आन कली हिंचा रे प्रॉइचा कली मो पाप्तु।

16 परमप्रभु यावे आ स्वर्ग डा गेय पाइब आन कली ममाइ। अब्राहाम आ खिं डा मुर आन पर्वम मोदेशो पशो बाक्त।

17 मोपतीके मेको आ लोकब खोदेशो दुम्चा माल्ताक्व। मोपा परमप्रभु यावे आ गेय पा मुर आन पाप क्याम्चा कली शिशो पाइब नु गेनायो आ दाक्चा मप्रॉइब ठेयब चढेब दुम्त। फिलिप्पी २:७

18 मारदे हना आ यो शुश श्येत जशा, थुं थाम्चा पुंडसाक्व। मोपा आन थुं थाम्चा पुंडसीशा, श्येत जाइब आन कली चारच पने चाप्ब। हिब्रू ४:१५

### 3

#### मोसा क्येडा ख्रीस्त ठेयब बाक्ब

1 मोपतीके परमप्रभु यावे आ मुर, आं लोकबपुकी, गे यो स्वर्ग रे ब्रेत्चा पुंडसीशो बाक्नीनी। सोइशशो, दे नें वोइक्चा पुंडसीशो नु इं थमा सुइक्तीक डा नेल्ल क्येडा ठेयब चढेब येसु कली मिम्तीने। हिब्रू ४:१४

2 दोपा मोसामी परमप्रभु यावे आ खिंमी रिम्शो गेय पवा, मोपा येसुमी यो आंम कली योव्रब आ डोंइती रिम्शो पा आ देशो पाप्तु। गन्ती १२:७

3 दोपा खिं क्येडा खिं सेल्ब शुश मान पाइक्चा पुंडसीबा, मोपा मोसा क्येडा येसु शुश मान पाइक्चा पुंडसीशो बाक्ब।

4 खिं नेल्ल मुरुम सेल्शो बाक्नीम। तन्न मारेइ मारेइ सेल्ब चहिं परमप्रभु यावे बाक्ब।

5 नोले तुइक्पाइक्तीक लोव्र आ पर्वम सांक्छी दुम्चा कली मोसा परमप्रभु यावे आ खिंमी थम रिम्शो गेय पाइब दुम्त।

6 ख्रीस्तम चहिं परमप्रभु यावे आ खिंमी आ तौ दुम्शा, रिम्शो गेय पाप्तु। मिनू गो मेको कली आस पा थमा सुइक्चा मप्रॉइतय हना, गो आ खिं बाक्नय। एफिसी २:१९; १पत्रुस २:५

#### परमप्रभु कली टीब दुमीन

7 परमप्रभु यावे आ सोक्तीमी मार देंत देशा हना “मुलाक्ती आं लोव्र नेंतीनी हना, हिब्रू ४:७

8 साइ नेसी इन किकी पिपी गोरशो रागीम गाक्शा, नाक्चा पुंडसमानु, पशो खोदेशो इन थुं खकटा पा मटीब मदुमीन। प्रस्थान १७:७; गन्ती २०:२-५

9 इन किकी पिपीम ४० बर्स सम्म आं ठेयब गेय तशा यो, आं थुं थाम्ना थाम्न बाक्तेक्म।

10 मोपतीके मेको आन कली तशा, आं थुं जिक्त। मिनू गो ‘मेकोपुकी गेना हना यो हेंथे गाक्नीम। आं लां मतुइक्नीम’ देंती।

11 मिनू गो चुरशा ‘मेकोपुकी गेनायो आं राज्य ओवशा थुं नाइक्चा मताइनीम’ दे कसम जशा देंती” देंत। भजन संग्रह ९५:७-११; हिब्रू ४:३; गन्ती १४:२१-२३

12 आं लोकबपुकी, होस पांडसीने। मारदे हना मरिम्शो नु थमा मसुइक्तीक थुंमी गेना हना यो ब्रोंइशा बाक्ब परमप्रभु यावे रे सुइ इन कली फ्राशा मलदल।

13 पापम इं थुं क्याल्शा मटीब मदुम्यल, दे मुलाक्त रेन नाक्त किंत किंत अर्ती गेमुने। १थिस्सलोनिकी ५:११

14 इं डोंइती नाक्त डा थमा सुइक्तीके नोले सम्म मप्रॉइतय हना, गो ख्रीस्त नु थुं का डा दुम्शा बाक्नय। हिब्रू ६:११

15 डोंडती “मुलाक्ती आं लोव्र नेंतीनी हना, इं किकी पिपीम मटिशो खोदेशो पा इन थुं खकटा पा मटीब मदुमीन” देशो बाक्ब।

16 नेशा यो मटीब सु नमी? मोसाम इजीप्त रे गुंडशा पिशशोपुकी मनमी डा?

17 सु सुमी ४० बर्स सम्म परमप्रभु यावे आ थुं जिक्तमे? मेको पाप पाइबपुकी मनमी डा? मेको गोरशो रागीमी बेक्शो बाक्तेकम। गन्ती १४:२९; १कोरिन्थी १०:१०

18 परमप्रभु यावेमी आ लोव्र मटीब आन पबर्म “मेकोपुकी गेनायो आं राज्य ओव्रशा थुं नाइक्चा मताइनीम” दे कसम जशो म्बाक्बा डा?

19 मोपतीके परमप्रभु यावे आ लोव्र कली थमा मसुइक्तीकेन आ राज्य ओव्रशा नाइक्चा मतामे बाक्त, दे रुप्नय।

## 4

### परमप्रभु आ मुर थुं नाइक्चा ताइनीम

1 मोपतीके होस पाइसय, थुं नाइक्चा ताइनीनी देशो लोव्र मुल यो लीशो बाक्तीके, होस पा बाक्य। मारदे हना सु सुमी आ लोव्र मटीमे, मेको ओव्रचा मताइनीम।

2 थमा पा, इं कली यो मेको आन कली खोदेशो पा परमप्रभु यावे आ लोव्र नेंपाइशो बाक्त। तन्न इं किकी पिपी आन कली नेंपाइशो लोव्र शोर गाक्शो दुम्त। मारदे हना नेंबपुकीमी थमा मसुइक्थु मटिशो बाक्तेकम।

3 गो थमा सुइक्बपुकी चहिं थुं नाइक्चा ताइनय। परमप्रभु यावेमी “गो चुरशा, मेको आन कली गेनायो थुं नाइक्चा मगेनुडमी, दे कसम जाता” देशो बाक्त हना यो, आ राज्यमी नाइशशा बाक्तीके वोइक्ने थुम्शो बाक्त। हिब्रू ३:११

4 परमप्रभु यावेमी रागी मारेइ मारेइ सेल्शा, ७ नाक्त आ पबर्म “परमप्रभु यावेमी नेल्ल सेल्ने थुम्शा, ७ नाक्तीमी नाइक्से बाक्त” दे ब्रेक्शो बाक्ब। उत्पत्ती २:२

5 मिनु लेशा लोव्र का चहिं “मेको आन कली गेनायो आं राज्य ओव्रशा, नाइक्चा मगेनुडमी” दे ब्रेक्शो बाक्ब।

6 मो हना यो का निक्शी ओव्रचा ताइनीम। तन्न आ लोव्र डोंडती डा नेंबपुकीमी मटिथु, ओव्रचा मतामे बाक्त।

7 मोपतीके अर्को नाक्त का वोइक्ब। नाप्खे देशो लोव्र “मुलाक्ती आ लोव्र नेंतीनी हना, इन थुं खकटा पा मटीब मदुमीन” दे शुश बर्स नोले दाऊद कली ब्रेक्पाइशो बाक्माक्त। हिब्रू ३:७

8 यहोसुमी मेको आन कली नाइक्तीकेम चाक्दीन्ने चाप्शो हना, मेकोमी मो देंचा ममाल वा। ब्यवस्था ३१:७; यहोसु २२:४

9 मोपतीके परमप्रभु यावे आ मुर आन कली नाइक्तीक नाक्त का बाक्ब, दे तुइक्नय।

10 मिनु सुमी परमप्रभु यावे आ नाइक्तीके ताइबा, मेको परमप्रभु यावे खोदेशो पा आ गेय रे नाइक्चा ताइब। प्रकाश १४:१३

11 मोपतीके सुइमी परमप्रभु यावे आ लोव्र मटिथु जाम्शा मलमल। गो नेल्ले नाइक्चा ततीकेमी ओव्रचा माल्य। हिब्रू ३:१६-१९

12 मारदे हना परमप्रभु यावे आ लोव्र ब्रोंडतीक सक्ति पाइशो, गेय पाइब नु निम्फा पटटी हेशशो तरवार क्येडा हेशशो बाक्ब। मेकोमी श्ये नु रुश, सोक्त नु थुं तिल्ल। मिनु मिम्तीके नु थुं डा लोव्र नेल्ल नाक्ने चाप्ब। प्रकाश २:१२; येरमीया २३:२९

13 मेको आ डोंडती सुइमी मारेइ खुइक्ने मचाप्नीम। नेल्लेमी पशो नु मिम्शो मेको आ डोंडती तांइसीब।

### ख्रीस्त नेल्ल क्येडा ठेयब चढेब दुम्शो

14 तन्न गो इं के ठेयब चढेब का बाक्ब। मेको स्वर्ग लाक्शा लाइब, परमप्रभु यावे आ तौ, येसु बाक्ब। इं थमा सुइक्तीके बोल्यो सेल्शा, गेनायो मप्रोंडय। हिब्रू ३:१; हिब्रू ९:११, १२; हिब्रू १०:२३

15 मारदे हना इं नेल्ल क्येडा ठेयब चढेबमी इं चाप्तीक नु मचाप्तीक दोदेशो बाकबा, नेल्ल तुडक्व। गोपुकी इं थुं थाम्चा पुंडसीशो खोदेशो पा, आ यो थुं थाम्चा पुंडसाक्व। तन्न थुं थाम्चा पुंडसाक्व हना यो, पाप मपव। हिब्रू २:१८; यूहन्ना ८:४६

16 मोपतीके इं कली मार मार माल्यानु, वारच पपांडसीशा, माफ नु शिशी तचा कली परमप्रभु यावे आ डोंइती महिंथु, थुं बारपा जाकदीय्य। रोमी ३:२५; रोमी ५:२

## 5

### ख्रीस्त नु मेल्कीसेदेक

1 ठेयब चढेबपुकी मुर आन दाते रे योत्रचा पुंडसीशो बाक्नीम। परमप्रभु यावे नु मुर आन कली गारपाइक्चा, दे मेकोपुकीमी मुर आन पाप क्याम्चा कली परमप्रभु यावे कली भेटी नु मार मार चढेनीम।

2 मेकोमी मतुडक्व नु मरिम्शो लां गाक्व आन कली शिशी पने चाप्व। मारदे हना मेको आंमन यो मोदेशो बाक्व।

3 मोपतीके मुर आन पबंम चढेशो खोदेशो पा आंमा आन मरिम्शो पशो क्याम्चा कली आं यो चढेचा माल्नीम। लेवी ९:७

4 मोदेशो चढेब आंमन दुम्ने मचाप्नीम। हारून योत्रचा पुंडसीशो खोदेशो पा परमप्रभु यावेमी मेको आन कली योत्रब। प्रस्थान २८:१

5 मोदेशो पा ख्रीस्त आंमन ठेयब चढेब सेल्सीशो ममाइ “मुलाक्ती गो इ कली थीतन, गे आं तौ नवे” देबमी योत्रतु। भजन संग्रह २:७

6 मिनू लेंशा “गे गेना हना यो मेल्कीसेदेक आ खाल डा चढेब दुम्ते” देंत। भजन संग्रह ११०:४; हिब्रू ६:२०

7 येसु मुर दुम्शा, रागीम बाक्मेनु, प्रेक्कु तोक्शा गोंगों पा डाक्शा आ कली बेक्शो रे सेंब कली पुना बाक्त। परमप्रभु यावे कली मान पा हिंशा, मुर आन पबंम पुना बाक्त। मिनू आ पुंडशो तवा बाक्त। मत्ती २६:३९-४६

8 तौ दुम्शा यो श्येत जतीक रे पा टिचा शेंसे बाक्त। फिलिप्पी २:८

9 मेको पाको दुम नोले आ कली टीब आन कली गेना हना यो श्येत रे प्रोंइशा बाक्चा गेब दुम्माक्त।

10 मिनू परमप्रभु यावेमी मेको कली मेल्कीसेदेक आ खाल डा ठेयब चढेब वोइश्शो बाक्त। हिब्रू ७:-

### लोत्र रूपब दुमीने

11 ठेयब चढेब सेल्शा वोइक्चा पुंडसीशो आ पबंम मुल यो इन कली शुश शेंचा लीशो बाक्व। इन नोफा थांइशो बाक्व। मोपतीके मेको आ अर्थ दोपा रूप्पाइक्चा ननी?

12 मुल गोपुकी अरु आन कली शेंब दुम्चा माल्शो ननी। तन्न इन कली कका परमप्रभु यावे आ डोंइती डा लोत्र लेंशा शेंचा माल्ताक्नी। मुल खमे जाइब खोदेशो दुम्चा माल्शो ननी। तन्न दूध तूब आल खोदेशो बाक्नीनी। १कोरिन्थी ३:१-३; १पत्रुस २:२

13 दूध तूब आल खोदेशो दुम्शा, बाक्वपुकीम परमप्रभु यावे आ ठीक लोत्र शुश रुणे मचाप्नीम। एफिसी ४:१४

14 पाको दुम्शा आन कली चहिं खमे गेंसीब। मेकोपुकीमी परमप्रभु यावे आ गेय पना पन मार रिम्शो बाक्मे, मार मरिम्शो मेको तुडक्नीम।

## 6

### डोंइती शेंशो लोत्र लेंशा मशेंचा

1 मोपतीके ख्रीस्त आ पबंम शेंचा माल्शो लोत्र लेंशा मशेंचा। में क्येडा लाक्शा पाको दुम्प्य। डोंइती शेंचा माल्शो लोत्र चहिं मार बाक्ब देशा हना, मरिम्शो गेय पचा प्रोंइशा, आन थुं परमप्रभु यावे गे लेत्वा, परमप्रभु यावे कली थमा सुडक्चा, ब्वाक्कुम खुम्शा ग्रुंडपांडसीचा,

2 मार मार चिक्या शेंतीके, मुर आन तारी गुड वोडक्चा, बेक्शो रे सेंसीशा ब्रोंडचा नु गेना हना यो निसाफ पचा आ पर्वम लोव्र बाक्ब।

3 परमप्रभु यावेमी आंइ कली मोदेंशो शेंचा गेप्टु हना, गो शेंनीकी।

4 मारदे हना डोंइती शेंतीक लोव्र रुप्शा, परमप्रभु यावे आ छेडछेड तशा, आ सक्ति तशा, परमप्रभु यावे आ सोक्तीम ब्रीशा,

5 परमप्रभु यावे आ लोव्र डा शिशी रुप्शा नु मेको जाक्चशो आ राज्य डा सक्ति आन कली लेंशा शेंचा शोर गाक्शो बाक्ब। मारदे हना सुम मेको नेल्ल तशा यो, हिब्रू १०:२६-२९; २पत्रुस २:२०

6 मुल मेको नेल्ल ताडक्ताक्म हना, मेको आन कली डोंइती खोदेशो पा लेंशा नक पा वोडक्ने मचाम्सीब। मारदे हना आन पशोमी परमप्रभु यावे आ तौ कली लेंशा शीम केप्शा कांटी थोक्शा क्याड्रशा मुने तोक्नीम।

7 माल्शो रेउ यिमेनु, खुम्ब आ माल्शो बाली नाली ताप्टु हना, परमप्रभु यावेमी मेको रू कली आसीक गेब।

8 माल्शो रेउ यिशा यो चू नु सुवा ला वात हना, मेको रू शोर गाक्शा, सराप राडब। मिनु मी सुड्रशा क्रोडक्चा पुंडसीब।

### परमप्रभुमी आ लोव्र खाण्व

9 आंइ दाक्शो लोक्बपुकी, गोपुकीमी ओदेशो लोव्र पाइतक हना यो, इन कली तशा, गे पाप रे ब्रोंडचा तशो ननी, दे थमा सुडक्नीकी।

10 मारदे हना परमप्रभु यावे आ नेमी अरु थमा सुडक्ब आन कली वारच पा रिम्शो पाइतीनी। मुल यो रिम्शो पाइतीनी। मिनु मेकोमी इन रिम्शो पशो गेनायो मप्रेंब। हिब्रू १०:३२-३४

11 गे नेल्लेमी नेल्ल क्येडा नोले सम्म “परमप्रभु यावे आ देशो नेल्ल जाक्दीण्व” दे थमा सुडक्चा मप्रोंइतीक सक्ति तने, दे मिम्नीकी। हिब्रू ३:१४; फिलिप्पी १:६

12 मचाण्डु देब मदुमीने। “आ देशो जाक्दीण्व” दे आ थोक्शा पशो लोव्र थमा सुडक्ब खोदेशो पने। मेकोपुकीमी फाल्शा, थमा सुड्रशा, परमप्रभु यावे आ देशो जाक्दीशो ताइनीम।

13 परमप्रभु यावेमी अब्राहाम कली लोव्र गेवानु, आ क्येडा ठेयब सुड्र मबाक्तीके आंम आ नें थिशा कसम जशा

14 “इ कली थमा पा आसीक गेनन। इ खिं डा मुर सोशा बोशा, शुश दुम्शा नेल्ल रागीम ब्रीपाडक्नुडमी” देशो बाक्त। उत्पत्ती २२:१६-१७

15 मिनु अब्राहाममी शुश बर्स सम्म रिम्शा बाक्शा, परमप्रभु यावे आ देशो नेल्ल लोव्र गाण्शो ताप्टु।

16 मुरपुकीमी यो कसम जामेनु, आन क्येडा ठेयब आ नें थिशा कसम जाइनीम। कसम जशोमी आन लोव्र थमान सेल्नीम। प्रस्थान २२:१०

17 मोपतीके परमप्रभु यावेमी “आं गेशो लोव्र गेनायो मफाइक्नुड” दे आ गेशो लोव्र ताइब आन कली रुप्पाडक्चा, दे कसम जशा, आ लोव्र थोक्ता बाक्त।

18 मिनु परमप्रभु यावेमी गेनायो जोल मपाइब, आ गेशो लोव्र नु आ कसम जशो, एको निक्शी गेनायो मफांडसीनीस दे तुड्रशा, गो सजाइ तचा रे प्रोंडचा पुंडसीबपुकी इं डोंइती वोड्रशा आस तचा कली इं थुं बारपाडक्चा ताइनय।

19 मेको आस चहिं इं थुं ग्येत्थ लुकच पचा मगेब ग्याइक्तीके खोदेशो बाक्ब। मेको आस नेल्ल क्येडा आगा डा चोव्रखो कोटा डा फारतीक वा आगा बाक्ब। लेवी १६:२,१२

20 येसु मेल्कीसेदेक आ खाल डा ठेयब चढेब नु इं कली लां कोडब दुम्शा, नेल्ल क्येडा डोंइती मेकेर ओव्रदीशो बाक्ब। हिब्रू ५:६

1 मेको मेल्लीसेदेक सालेम डा पिप नु नेल्ल क्येडा ठेयब परमप्रभु यावे आ चढेब बाक्माक्त। अब्राहाममी आ जोरी सत्रु दुम्शो पिप आन कली ग्राशा साइरशा डा मिन लेम्मेनु, मेको मेल्लीसेदेकमी अब्राहाम कली युम्थ लशा, आसीक गेवा बाक्त। उत्पत्ती १४:१८-२०

2 मिनु अब्राहाममी मेको कली आ ग्राशा चाकशो थोत्रक १० भागमी भाग का गेवा बाक्त। मेको आ नें मार रुम्सीब देंशा हना, ठीक निसाफ पाइब पिप नु सालेम डा पिप, दे रुम्सीब। सालेम देंशो चहिं थु नाइरशा बाक्तीके बाक्ब।

3 मेको आ आम आफ नु आ किकी पिपी मबाक्नीम। गेना जरमेसे, गेना बेक्मे, दे मतुंडसीब। तन्न परमप्रभु यावे आ तौ खोदेशो बाक्शा, गेना हना यो परमप्रभु यावे कली चढेब दुम्शा बाक्ब। यूहन्ना ७:२७

4 मेको गिश ठेयब बाक्ब, दे मिम्तीन। मारदे हना इं ठेयब किकी अब्राहाममी आ ग्राशा चाकशो रिम्शो थोत्रक १० भागमी भाग का मान पा गेचा पुंडसे बाक्त।

5 लेवी आ खिं डा मुर चढेब दुम्शा, इस्राएली आन लोकब रे पा १० भागमी भाग का का पोक्बाक्तेक्म। मेको आन पतीके बाक्ब। लेवी आ खिं डा नु इस्राएली नेल्ल अब्राहाम आ खिं डा मुर नम। गन्ती १८:२१

6 मेल्लीसेदेक लेवी नु इस्राएली जात डा मबाक्त हना यो, अब्राहाम रे पा १० भागमी भाग का गेचा पुंडसे बाक्त। मिनु परमप्रभु यावे आ गेशो लोत्र ताइब अब्राहाम कली आसीक गेवा बाक्त।

7 ठेयबमी आइक्च कली आसीक गेब, दे नेल्लेमी तुइक्नय।

8 मेको बेक्शा लाइब लेवी आ थर डा चढेबपुकीमी १० भाग डा भाग का ताइब दुम्शो बाक्नीम। तन्न गेना हना यो ब्रोंइशो बाक्ब देंचा पुंडसीबमी यो १० भाग डा भाग का तवा बाक्त।

9 अब्राहाम आ पतीकेमी लेवीपुकी १० भागमी भाग का ताइब दुम्शो बाक्नीम हना यो, डोंइती गेब यो दुम्शो बाक्मा बाक्त।

10 मारदे हना मेल्लीसेदेकमी अब्राहाम कली युमानु, लेवीपुकी अब्राहाम आ रांमी बाक्शो बाक्मा बाक्त। मिनु अब्राहाम रे पा १० भागमी भाग का गेब दुम्मा बाक्त, दे तुइक्नय।

### मेल्लीसेदेक आ खाल डा चढेब

11 लेवी आ खाल डा चढेबपुकीमी परमप्रभु यावे आ अरेशो लोत्र यो ताम्तेक्म। मेको आन पशोमी मुर आन कली पाको सेल्ले चाप्शो नम हना, हारून आ खाल डा ममाइ मेल्लीसेदेक आ खाल डा चढेब का वोइक्चा ममाल वा।

12 चढेब आन खाल फांडसाक्व हना, मेको अरेशो लोत्र यो फांडसीब।

13 सु आ पर्वम मेको लोत्र ब्रेक्शो बाक्मे, मेको गेनायो चढेतीक गेय मपाइब थर डा बाक्माक्त।

14 इं प्रभु यहूदा थर डा बाक्माक्त, दे गो नेल्लेमी तुइक्नय। यहूदा थर डा मुरपुकीम गेनायो चढेतीक गेय मपशो बाक्मा बाक्त। इं किकी पिपी मोसामी यहूदा थर डा मुर चढेब बाक्नीम, दे गेनायो मदमाक्त। उत्पत्ती ४९:१०; मत्ती १:१-३

15 चढेब आन खाल फांडसे बाक्त, दे थमा पा तुइक्नय। मारदे हना मेल्लीसेदेक खोदेशो पा मेको चढेब सेल्ल्या पुंडसाक्व।

16 मेको आ किकी पिपी आन थर रे चढेब मदुम्शो बाक्ब। तन्न गेनायो जाम्शा मलाइब सक्ति रे पा चढेब दुम्शो बाक्ब।

17 मारदे हना मेको आ पर्वम “मेल्लीसेदेक आ खाल डा गेना हना यो चढेब दुम्ते” देंशो बाक्ब। भजन संग्रह ११०:४; हिब्रू ५:६

18 डोंइती अरेशो लोत्रमी पाप क्याम्ने मचाप्ब। मिनु सुइ आन कली पाको सेल्ले मचाप्ब। मोपतीके ताइक्चा माल्ताक्व।

19 मिनु मेको आ पा डा नेल्ल क्येडा रिम्शो नक आस वोइरशो बाक्त। मेको आस रे पा परमप्रभु यावे आ नेक्था जाक्दीन्ने चाप्नय।

20 परमप्रभु यावेमी मेको आस गेवानु, कसम जशा गेशो बाक्त। डोंइती चढेबपुकी कसम मजथु चढेब दुम्शो बाक्मा बाक्त।

21 तन्न मेकोमी कसम जशा “परमप्रभुमी कसम जशो बाक्ब। मिनु आ थुं मफाइक्ब। गे गेना हना यो चढेब दुम्ते” दे माइक्चा पुंडसीशो बाक्त। भजन संग्रह ११०:४

22 मो माइक्चा पुंडसीतीके येसु डोंइती पशो कबल क्येडा, नोले पशो रिम्शो कबल डा लोत्र खाप्ब दुम्शो बाक्त। हिब्रू ८:६; हिब्रू १२:२४

23 डोंइती डा चढेबपुकी गेना हना यो ब्रोंइशा बाक्ने मचाप्तीके, शुश चढेबपुकी दुम्चा माल्मा बाक्त। गिश बेक्मा, मिश योत्रशा वोइक्चा माल्मा बाक्त।

24 येसु चहिं गेना हना यो ब्रोंइशा बाक्तीके गेना हना यो चढेब दुम्शा बाक्शो बाक्ब।

25 मोदुम्तीके येसु रे पा परमप्रभु यावे आ डोंइती जाक्दीशो आन कली येसुमी गेना हना यो वारच पने चाप्ब। मारदे हना मेको आन पर्वम गेना हना यो परमप्रभु यावे आ डोंइती बाक्शा पुंडशो बाक्ब। रोमी ८:३४; १यूहन्ना २:१

26 इं ठेयब चढेब दोदेशो माल्शो बाक्त देंशा हना, पाप रे डोन बाक्शो, दोस मताइब, रिम्शो थुं पाइशो, पापी रे दिल्शा बाक्शो, स्वर्गमी नेल्ल क्येडा ठेयब सेल्चा पुंडसीशो माल्शो बाक्त।

27 अरु चढेबपुकीमी नाक्त किंत किंत डोंइती आन पशो पाप, नोले मुर आन पशो पाप क्याम्चा कली चढेशो खोदेशो पा आं पचा ममाल्द। कालेमीन आ रां चढेशा, मुर नेल्ल आन पाप क्याम्ने थुम्तु। लेवी १:७; लेवी १६:६, १५

28 परमप्रभु यावे आ अरेशो लोत्रमी पाको मदुम्शो मुर आन कली योत्रशा चढेब सेल्बाक्त। परमप्रभु यावे आ अरेशो लोत्र तुइशो शुश बर्स नोले कसम जशो लोत्रमी गेना हना यो पाको बाक्शो आ तो कली ठेयब चढेब सेल्शा वोइशो बाक्त।

## 8

### नक कबल डा चढेब

1 मुल सम्म पशो लोत्रमी नेल्ल क्येडा तुइक्चा माल्शो लोत्र मार बाक्ब देंशा हना, इं के ठेयब चढेब स्वर्गम बाक्ब। मेको नेल्ल क्येडा ठेयब मान पाइक्चा पुंडसीब आ ठेयब नित्तीके आ ग्युरा गे बाक्शो बाक्ब। हिब्रू ४:१४

2 मुरपुकीमी सेल्शो ममाइ, परमप्रभु यावेमी सेल्शो थमा डा ताम्बुमी गेय पाइब दुम्शो बाक्ब।

3 ठेयब चढेब नेल्ले भेटी नु चोशा चढेचा कली योत्रचा पुंडसीशो बाक्नीम। मोपतीके मेको ठेयब चढेबमी यो मारेइ थोत्रक चढेचा माल्ब।

4 रागीम बाक्शो हना, ठेयब चढेब दुम्ने मचाप्ब वा। मारदे हना परमप्रभु यावे आ अरेशो लोत्रमी ब्रेक्शो खोदेशो पा चढेब शुश बाक्नीम।

5 मेकोपुकीमी स्वर्ग डा ताम्बु आ वांकुमी गेय पाइनीम। मोसामी ताम्बु सेल्चा गोवानु “डॉडामी बाक्डेनु, इ कली कोंइशो खोदेशो सेलो” दे परमप्रभु यावे रे माइक्चा पुंडसे बाक्त। प्रस्थान २५:४०; कलस्सी २:१७

6 मेको चढेबपुकीमी पशो गेय क्येडा ख्रीस्त आ पशो गेय रिम्शो कबल डा बाक्ब। मारदे हना डोंइती पशो कबल क्येडा नोले पशो रिम्शो कबल डा लोत्र खाप्ब दुम्शो बाक्त। मेको नोले पशो कबल डोंइती गेशो लोत्र क्येडा रिम्शो लोत्रमी फ्रेंशो बाक्ब। हिब्रू ७:२२

7 डोंइती पशो कबल डा लोत्रमी पाको सेल्शो हना, नक कबल पचा ममाल वा।

8 परमप्रभुम आ थुं मनुथु, इस्राएली आन कली “नेनीने, प्रभुमी ‘काबु इस्राएल आ खिं नु यहूदा आ खिं डा मुरपुकी नु नक कबल का पाइनुड। हिब्रू १०:१६-१७

9 मेको आन किकी पिपी आन कली पशो कबल खोदेशो ममाइ। मेको किकी पिपी आन कली गुड्मी ग्याइशशा, इजीप्त रागी रे गुंडशा लां कोंइडु नु कबल पा नाता सेल्तामी। तन्न मेकोपुकीमी नाता खोइक्तेक्म। मोपतीके गो यो मेको आन कली प्रोंइशा ममिम्तुमी’ दे परमप्रभुमी देंब। प्रस्थान १९:५-६

10 मेको कबल मार बाकब देशा हना, गो आं अरेशो लोत्र मेको आन मिम्तीकेम वोइश्शा, आन थुंम ब्रेकुनुड। मिनु गो मेको आन परमप्रभु यावे दुम्नुड। मिनु मेकोपुकी आं मुर दुम्नीम।

11 सुइमी आ लोकब नु आ वारच कली 'परमप्रभु यावे कली तुइक्तीन' दे शेंमुचा ममाल्नीम। मारदे हना आल रे खुशो सम्म डा नेल्लेमी आं कली तुइक्तीन।

12 मेको आन कली शिशी पा, आन पशो पाप नेल्ल क्याम्शा गेनुडमी। मेको आन मरिम्शो पशो गेनायो ममिम्नुड" देमाक्त। येरमीया ३१:३१-३४

13 नक कबल आ परबम लोत्र पा डोंइती डा कबल कली माइत सेल्लु। मुल डा मेरे ममाल्शो नु माइत दुम्शो नेल्ल जाम्शा लचशो बाकब। रोमी १०:४

## 9

### ख्रीस्त खेयप का चढेशो

1 डोंइती डा कबलमी ठेयब सेल्ल्या कली अरेशो लोत्र नु रागीम परमप्रभु यावे आ बाक्तीक बाक्शो बाक्माक्त। प्रस्थान २५:३१; प्रस्थान २५:२३; प्रस्थान २५:३०

2 मिनु ताम्बु का सेल्लो बाक्माक्त। आगामी कोठा निक्शी पाइश्शा बाक्माक्त। डोंइती डा कोठाम बत्ती दातीक दियारी का, टेबल का नु परमप्रभु यावे आ डोंइती वोइश्शा कोंइतीक शोब्ले बाक्माक्त। मेको आ नोले चोत्रखो कोठा, दे नें वोइश्शा बाक्माक्त।

3 फारतीक वा आ आगा नेल्ल क्येडा चोत्रखो कोठा बाक्शो बाक्माक्त।

4 थम चोत्रखो कोठामी सुन के सेल्लो धूप चोतीक नु परमप्रभु यावे आ कबल पशो सुनमी गिल्लो सन्दोस बाक्माक्त। मेको कबल पशो सन्दोसमी मार वोइश्शा बाक्माक्त देशा हना, मन्ना कुर पशो सुन के बोस, हारून आ कोच्चा दाप्शो कोक्के नु परमप्रभु यावेमी फुल्लुमी मुशा ब्रेक्शा वोइश्शा अरेशो लोत्र मेको आगाम बाक्माक्त। प्रस्थान १६:३३; प्रस्थान २५:१०-२२; गन्ती १७:२३-२५

5 सन्दोस आ तारी करूब निक्शी वोइश्शा बाक्तेकम। मेको निक्शीमी "परमप्रभु यावे एकेर बाकब" दे आ शिशी पतीक कली वांकु गेशा वोइक्तेकम। मेको नेल्ल आन परबम मुल का का पा शेंने मचाप्नुड।

6 मोदेंशो ताम्बुमी चढेबपुकीमी नाक्त कित कित ओत्रशा, परमप्रभु यावे कली आन पचा माल्शो गेय पाम्तेकम। गन्ती १८:३-४

7 थम चोत्रखो कोठामी चहिं बर्समी खेयप का नेल्ल क्येडा ठेयब चढेबमी हुश लाइश्शा चढेथ ओत्रबाक्माक्त। आ पशो नु अरु आन पशो पाप क्याम्चा कली मेको हुश चढेबाक्माक्त। प्रस्थान ३०:३०; लेवी १६:२१४,१५

8 डोंइती डा कोठा बाक्मेनु, मुरपुकी थम चोत्रखो कोठामी ओत्रचा मताइनीम, दे परमप्रभु यावे आ सोक्तीम रूप्पाइक्ब। हिब्रू १०:२०

9 मेको मुल कली कोंइतीक का बाकब। मेकोमी मार कोंइब देशा हना, भेटी नु चोशा चढेशोमी मुर आन कली पाको सेल्ले मचाप्ब। हिब्रू ७:१९; हिब्रू १०:१-२

10 मेको पतीके जचा थोत्रक, तूचा थोत्रक, चिक्चा नु चढेचा आ परबम बाक्नीम। मेको नेल्ल मुर आन मिम्शो शोर गाक्शो गेय बाक्नीम। नक लोत्र मजाकम सम्म मेको माइत लोत्र टिशा पामेक्ल, दे वोइश्शा बाक्माक्त। लेवी ११:-; गन्ती १९:-

### ख्रीस्तमी स्वर्ग डा ताम्बुमी गेय पशो

11 रागी डा ममाइ, मुर आन गुइमी सेल्लो क्येडा ठेयब नु रिम्शो स्वर्ग डा ताम्बुमी ख्रीस्त ठेयब चढेब दुम्शा, गेय पाइब।

12 बाछा, बोका आन हुश चढेशो ममाइ। कालेमीन स्वर्ग डा थम चोत्रखो कोठाम ओत्रदीश्शा, आ हुश चढेन्तु। मो पशोमी पाप रे प्रोंइतीक गेय गेना हना यो कली पने थुम्तु, मारेइ पचा मली।

13 बोका, ब्यफ आन हुश चढेशा, आन श्ये चोशो डा पुलु फ्रशा, मुर आन रां चोत्रखो सेल्ले चाप्ब हना, गन्ती १९:२,९,१७



14 ख्रीस्त आ हुशेमी मेको क्येडा इं पशो जाग्शा लतीक गेय रे चोत्रखो सेल्ने चाप्ब। गेपुकी ब्रोंडशा बाक्ब परमप्रभु यावे आ गेय पचा कली ख्रीस्त गेना हना यो बाक्शो सोक्तीम पतीके मारेड मरिम्शो मपथ, परमप्रभु यावे आ डोंइती आंम कली चढ़ेवा बाक्त। १पत्रुस १:१८-१९; १यूहन्ना १:७; प्रकाश १:५; हिबू १:३

15 मोपतीके मेको नक कबल डा गारपाइक्ब बाक्ब। मोपा ब्रेशोपुकी आन गेना हना यो लीब शोंप तामेक्ल। मारदे हना ख्रीस्त बेक्त। मिनु मेको आन डोंइती डा कबलम पशो पाप यो क्याम्साक्ब। हिबू १२:२४; १तिमोथी २:५

हुश जारशोमी कबल खाप्शो

16 मिनु “गो बेक्डा नोले गेनुड” दे कागज ब्रेक्बमी आ पशो कबल बेक्म नोले ला खाप्ब।

17 ब्रेक्पाइक्ब मबेक्म सम्म आ ब्रेक्पाइशो खाप्ने मचाप्ब। बेक्म नोले ला खाप्ब।

18 डोंइती पशो कबल यो हुश जारशोमी गाप्शो बाक्माक्त।

19 मोसामी मुर आन कली परमप्रभु यावे आ शेंशो अरेशो लोत्र नेंपाइक्ने थुग्शा, बाछा नु बोका आन हुश नु ब्वाक्कु क्याल्शा, हिसोप के सेल्शो ब्राक्सु कली लल ऊनमी फ्रेंशा, परमप्रभु यावे आ अरेशो लोत्र डा किताब नु मुर नेल्ल आन कली बुइक्तीमी बाक्त। गन्ती १९:६

20 मिनु मेकोमी “परमप्रभु यावेमी इन कली पशो कबल एको हुशेमी खाप्तु” दे तुइक्पाइक्मी बाक्त। प्रस्थान २४:८

21 मिनु मोपा थुग्शा, मुर आन कली खोदेशो पा ताम्बु नु ताम्बुमी वोइशो बोसपुकीमी यो बुइक्ता बाक्त। लेवी ८:१५

22 थमा पा परमप्रभु यावे आ अरेशो लोत्र ब्रेक्शो खोदेशो पा मारेड मारेड चोत्रखो सेल्चा कली हुश बुइक्चा माल्दा बाक्त। हुश मजारथ, पाप मक्याम्सीब, दे रुप्नय। लेवी १७:११

ख्रीस्तमी आ हुश चढ़ेशो

23 रागी डा मोदेशो थोत्रक कली चोत्रखो सेल्चा कली मोदेशो माल्ताक्ब हना, स्वर्गम बाक्शो कली चोत्रखो सेल्चा कली मेको क्येडा रिम्शो चढ़ेचा माल्ताक्ब।

24 मारदे हना ख्रीस्त मुरपुकीम सेल्शो ताम्बुमी मओत्र। मेको स्वर्गम बाक्ब ताम्बु आ खोदेशो ला बाक्त। तन्न मेको स्वर्गम ओत्रत। मुल मेकोम परमप्रभु यावे आ डोंइती आंइ पर्बम पुंइब। हिबू ७:२५; १यूहन्ना २:१

25 ख्रीस्तमी आंम कली शुश खेयप चढ़ेचा ममाल्द। नेल्ल क्येडा ठेयब चढ़ेब चहिं बर्स बर्सम आंम हुश ममाइ, मार मार आन हुश कुरशा मेको नेल्ल क्येडा चोत्रखो कोठा ओत्रचा माल्दा बाक्त।

26 ख्रीस्त मोदेशो बाक्शो हना, रागी सेल्चा रे मुल सम्म शुश खेयप श्येत जचा माल्द वा। तन्न मेकोमी रागी नुप्ची ना खेयप का पाप क्याम्चा कली आंम कली चढ़ेवा बाक्त। १कोरिन्थी १०:११; गलाती ४:४; हिबू १:३

27 दोपा मुर खेयप का बेक्चा माल्नीमी नु मेको बेक्शा, निसाफ पचा पुंइसीनीम। उत्पत्ती ३:१९

28 मोपा ख्रीस्त शुश मुर आन पाप क्याम्चा कली खेयप का आ हुश चढ़ेप्नु। मिनु लेंशा जाक्ब। पाप क्याम्थ चहिं मजाक्ब। तन्न मेको कली थमा सुइशशा रिग्शा बाक्ब आन कली श्येत रे प्रोंइचा कली जाक्ब। हिबू १०:११, १२, १४

## 10

1 मेको साइ डा परमप्रभु यावे आ अरेशो लोत्र जाक्चशो रिम्शो लोत्र आ वांकु ला बाक्ब। मेको डोंइती डा लोत्र थमा पा पाप क्याम्तीके मबा। मिनु मेको लोत्र टिशा बर्स बर्समी चढ़ेम्तेक्म हना यो, परमप्रभु यावे आ नेक्था जाक्ब मुर आन कली पाको सेल्ने मचाप्ब। हिबू ८:५

2 मिनु परमप्रभु यावे कली मान पाइबपुकी खेयप का पाको दुम्तेक्म हना, चढ़ेबमी मारदे लेंशा चढ़ेचा माल्बा डा। मुर पाको दुम्तेक्म हना, लेंशा चढ़ेचा माल्बा डा?

3 तन्न मेको चढ़ेशोमी बर्स बर्समी पाप मिम्पाइक्ब, गेनायो मप्रेंसीब। लेवी १६:३४

4 मारदे हना ब्यफ नु बोका आन हुशेम पाप क्याम्ने मजाप्ब, दे तुडक्तय।

5 मोपतीके खीस्त रागीम जाक्मेनु, मेकोमी “गे चढ़ेतीक नु भेटी ममाल्नी। तन्न गे आं कली मुर आ रां का सेल्लतीनी।

6 गे चोशा चढ़ेतीके नु पाप आ पर्वम चढ़ेतीके मदाक्तीनी।

7 मिनु ‘परमप्रभु यावे, गो इन दाक्शो पथ रागीम जाक्ती। आं पर्वम डोंइती ब्रेक्शो लोव्र खाप्ता’ दे ब्रेक्शो बाक्ब” देंत। भजन संग्रह ४०:७-९

8 मिनु मेकोमी “गे मार मार चढ़ेशो, भेटी नु चोशा चढ़ेतीक नु पाप आ पर्वम चढ़ेशो मदाक्तीनी। तन्न मेको आ अरेशो लोव्र टिशा चढ़ेशो ला बाक्नीम” देंत।

9 मेकोमी तेम्शा “रागीमी इन दाक्शो गेय पाडनुड, देंशा, साइ रे डा आन पशो प्रोंइपाइश्शा, नक लां कोंइताक्व।

10 मिनु गोपुकी येसु खीस्त आ रां चढ़ेशोमी गेना हना यो परमप्रभु यावे आ मुर दुम्तय” दे रुब्य। यूहन्ना १७:१९

11 नाक्त कित कित चढ़ेबपुकीमी ताम्बुमी गेय पा चढ़ेना चढ़ेन बाक्तेकम हना यो पाप मक्याम्सीब। प्रस्थान २९:३८

12 तन्न खीस्तमी चहिं आ रां चढ़ेशोमी पाप क्याम्तीक गेय पने थुम्तु। मिनु गेना हना यो परमप्रभु यावे आ ग्युरा गे निश्शो बाक्ब।

13 आ जोरी सनु आन कली खोइल आगाम मवोदा सम्म रिम्शा बाक्शो बाक्ब। भजन संग्रह ११०:१

14 खेयप का आ रां चढ़ेशोमी गेना हना यो परमप्रभु यावे नु काथा बाक्चा ताइब आन कली पाको सेल्लतीमी।

15 परमप्रभु यावे आ सोक्तीमी इं कली “एको लोव्र थमा बाक्ब” दे साइ डा लोव्र मिम्पाइश्शा यो तुइक्पाइक्ब।

16 मेकोमी “नोले मेकोपुकी नु नक कबल का सेल्लुड। आं लोव्र मेको आन कली आन कोव्रजम वोइक्पाइश्शा, आन थुमी ब्रेक्शा गेनायो मप्रेंब सेल्लुडमी। हिब्रू ८:१०

17 गो मेको आन पशो पाप प्रेंशा गेनायो ममिम्नुड” देंशो बाक्ब। येरमीया ३१:३३-३४

18 मोपतीके पाप क्याम्से नोले गेनायो चढ़ेचा ममाल्ब, दे तुडक्नय। हिब्रू ८:१२

### ठेयब थुं पशा आस पा बाक्य

19 आं दाक्शो लोकबपुकी, येसु आ हुशेमी परमप्रभु यावे आ डोंइती जाक्दीत्चा ताइनय, दे तुडक्नय। मत्ती २७:५१; रोमी ५:२

20 मारदे हना आ रां चढ़ेशा, फारशो वा खाक्शा, नक ब्रोंइतीक लां सेल्लु। हिब्रू ९:८

21 मिनु परमप्रभु यावे आ खिं डा ठेयब चढ़ेब दुम्त।

22 मोपतीके रिम्शो थुं पा, रिम्शो थमा सुइक्ब दुम्शा, पाप नेल्ल क्याम्चा पुंइसीशो तुइश्शा नु इं रां रिम्शो ब्वाक्कुम चिकशा ग्येरशा परमप्रभु यावे आ नेक्था जाक्दीय्य। हिब्रू ४:१६; एफिसी ५:२६; १पत्रुस ३:२१

23 ठेयब थुं पशा आस पा बाक्य। मारदे हना लोव्र गेबमी मेको लोव्र दोपा यो खाप्ब, दे तुडक्नय। हिब्रू ४:१४

24 दाक्मुशा, रिम्शो गेय पा वारच पमुशा अरेपमुने।

25 थमा सुइक्ब आन गुम्तीके लशा, लोव्र नेचा मप्रोनीन। का निक्शी लचा मदाक्ब दुम्शो बाक्तेकम। मोपतीके “लचा माल्ब” देंचा मप्रोनीन। येसु खीस्त लेंशा जाक्चशो बाक्ब, दे मप्रेंथु बाक्कीन। हिब्रू ३:१३; रोमी १३:११-१२

### नोले शोंइसीशो मदुम्य

26 मिनु मुल मार देंनुड देंशा हना, खीस्तम सेल्लो नक लां तुइश्शा यो मेको लां मखोइक्नुड देंतय हना, मोदेंशो चहिं नेल्ल क्येडा ठेयब पाप बाक्ब। मेको पाप चहिं मारेइ चढ़ेशोमी मक्याम्सीथु लीशा बाक्ब। हिब्रू ६:४-८; गन्ती १५:३०

27 नक लां मखोइक्व आन कली मारेइ आस मलीब। परमप्रभु यावे कली मटीबपुकी मीम खतम सेल्चा पुंडसीनीम। नक लां मखोइक्वपुकी यो मोपा खतम दुम्नीम।

28 साइ परमप्रभु यावे आ अरेशो लोत्र मटीब आन कली सांकछी निक्शी सां आन लोत्र नेशा, दोस गेशा, काइ शिशी मपथु साइक्वाकमा बाक्त। ब्यवस्था १७:६

29 मिनु परमप्रभु यावे आ तौ कली खोइलीम दिम्ब, शुश सजाइ गेशा साइक्वा पुंडसाकम, दे तुइक्नय। डॉइती आंम कली पाको सेल्शो नक कबल डा हुश आ पबर्म शुक्शी पा “हुश नेल्ल कांडचीक बाक्ब, मार अर्को लोत्र बाक्वा डा?” देनीम। परमप्रभु यावे आ सोक्ती आ पबर्म यो शुक्शी पाइनीम। मोदेशो पाइबपुकी शुश सजाइ गेचा मपुंडसीनीमी डा? हिब्रू २:३; हिब्रू १२:२५

30 मोदेशो पाइब आन कली सजाइ गेब कली तुइश्शो बाक्नय। आं चहिं लोत्र कामी “क्येक्क लेत्तीक गेय आं के बाक्ब। मिनु गो पाइनुड” देंब। मिनु लेंशा “परमप्रभुमी आ मुर आन कली निसाफ पाइब” देंब। ब्यवस्था ३२:३५-३६

31 मोपतीके ब्रॉइशा बाक्ब परमप्रभु यावे आ गुइ रे पा सजाइ गेचा पुंडसीचा चहिं नेल्ल क्येडा हिंचा डा बाक्ब, दे तुइक्नय। हिब्रू १२:२९

32 साइ इन थुमी छेडछेड दुम्शा, थमा सुइक्व दुम्नीनु, मार दुम्मे, मेको मुल यो मिम्तीने। मार दुम्त देशा हना, शुश श्येत जाइतीनी हना यो, फाल्शा बाक्तीनी। हिब्रू ६:४

33 इन कली मुर आन कुल शुक्शी पा श्येत गेमेनु, फाल्तीनी। अरु आन कली श्येत जशो तनीनु, मेकोपुकी नु थुं का दुम्शा, मेको आन श्येत यो फाल्तीनी। १कोरिन्थी ४:९

34 जेल्खानम चोकशा वोइश्शो आन कली शिशी पा गुम्थ लाइतीनी। मिनु गे यो श्येत जाइतीनी। इन बाक्शो शोंप रोइश्शा लदमेनु, गेमी “इं के गेनायो मजाम्ब शोंप बाक्ब” दे तुइश्शा, लाइक्वा गेशा ग्येरसीशा बाक्तीनी। मत्ती ६:२०; मत्ती १९:२१,२६

35 मोपतीके मुल यो आस पचा मप्रोनीन, इनाम ताइनय, दे तुइश्शा, इन थुं बारपतीने।

36 गे फाल्तीक सक्ति माल्तीनी। परमप्रभु यावे आ दाक्शो गेय पना पन बाक्कीन। मिनु आ गेनुड देशो थोत्रक ताइनीनी। लूका २१:१९; याकूब ५:७

37 मार ब्रेक्शो बाक्ब देशा हना, लोत्र कामी “ ‘गो जाक्नुड’ देंबमी मजाक्थु मप्रॉइब, देश पा यो मबाक्ब।

38 आं ठीक पाइब मुरपुकीमी आं कली थमा सुइश्शा, ब्रॉइशा बाक्नीम। नोले शॉइसाकम हना, मेको आन कली तशा मग्येरनुड” दे ब्रेक्शो बाक्ब। हबकुक २:३-४; रोमी १:१७

39 तन्न नोले शॉइसीशा खतम दुम्चा पुंडसीब मदुम्नय। गेना हना यो परमप्रभु यावे नु बाक्चा ताइनय, दे थमा सुइश्शा बाक्नय। १थिससलोनिकी ३:३

## 11

### माइत कबल डा थमा सुइक्तीके

1 थमा सुइक्चा चहिं मार बाक्ब देशा हना, आस पशो थमा दुम्शो तांइसीब नु इं मिक्चीम मतशो थोत्रकी बाक्नीम, दे मिम्चा बाक्ब। मिनु बाक्नीमी यो। मेको मोदेशो मिम्चा कली थमा सुइक्चा देंसीब। २कोरिन्थी ५:१७

2 मोपा थमा सुइश्शोमी इं किकी पिपीपुकी ठीक दुम्मा बाक्त।

3 गोपुकीमी यो मोपा इं थमा सुइश्शोमी सरीड रागी नेल्ल दुम्मेनु, मिक्चीम तशो थोत्रकी के सेल्शो मनम, तन्न परमप्रभु यावेमी “दुमीन” देशो लोत्रमी दुम्शो बाक्नीम, दे तुइक्नय। उत्पत्ती १:१-२,४

### किकी पिपीपुकीमी थमा सुइश्शो

4 काइन नु हाबील निम्फामी परमप्रभु यावे कली भेटी चढ़ेम्सेनु, काइन क्येडा हाबील आ चढ़ेशो रिम्शो बाक्माक्त। मारदे हना हाबीलमी परमप्रभु यावे कली थमा सुइक्बाक्माक्त। मिनु हाबील आ चढ़ेशो ताक्शा, परमप्रभु यावेमी “हाबीलमी थमा सुइक्ती। मोपतीके ठीक दुम्पाइक्ता” दे कोइताक्व।

हाबील बेक्शा लशा, मिश बर्स दुम्शा यो आ थमा सुइश्शो आ पर्बम चहिं मुल सम्म लोव्र पना पन बाक्नय। उत्पत्ती ४:३-४

5 हानोकमी परमप्रभु यावे कली थमा सुइक्बाक्माक्त। मोपतीके आ मबेक्थु सेसीन, परमप्रभु यावे नु लशा बाक्चा तवा बाक्त। हानोक रागीम बाक्मेनु, परमप्रभु यावे आ देशो टिशा, आ थुं नुपाइश्शो बाक्माक्त, दे तुइक्नय। हिब्रू लोव्रमी हानोक कली एनोक बाक्ब। उत्पत्ती ५:२४

6 थमा मसुइक्थु मेको आ थुं नुपाइक्ने मजाप्ब। परमप्रभु यावे आ नेक्था जाक्दीन्ने यो मजाप्ब। मेको बाक्ब, दे थमा सुइक्चा माल्ब। मिनु मेको बाक्ब, दे थमा सुइक्बपुकीम मेको कली माल्नीम। मिनु आ कली माल्ब आन कली तपांइसीब।

7 नोआह यो थमा सुइक्ब बाक्माक्त। यावेमी मेको कली “नोले ओदेशो दुम्ब” मदानु, मेको लोव्र थमा सुइश्शा टिशा, टेयब डोंगा सेल्शा, आ खिं डा मुर आन कली ओंइशा, बेक्चा मगेथु प्रोइमी बाक्त। नोआहमी मो पशो तशा यो अरुमी थमा मसुदमे बाक्त। मिनु आन थमा मसुइक्तीके दोसी दुम्शा, नेल्ल बेक्चा माल्मा बाक्त। नोआह चहिं थमा सुइश्शोमी ब्रोइचा तांइसीब, दे कोंइब दुम्माक्त। उत्पत्ती ६:८-९, १३-२२

8 अब्राहाममी यो परमप्रभु यावे आ लोव्र थमा सुइक्बाक्माक्त। यावेमी “इ कली नोले गेनुड देशो रागी कोंइनन। मोपतीके एकेर रे लावो” देंमेनु, अब्राहाममी परमप्रभु यावे आ देशो टिशा, ते लचा मतुइक्थु, यो मलेत्चा डा पा मेको रागी प्रोइशा गाक्माक्त। उत्पत्ती १२:- २१:-

9 मिनु थमा सुइश्शा कोंइशो रागीम जाक्दीश्शा, परमप्रभु यावे आ गेशो लोव्र ताइब आ तौ इसहाक, आ चच याकूब नु काथा बाक्शा, अर्को रागी डा मुर खोदेशो पा खिं मसेल्थु ताम्बु कीशा बाक्माक्त।

10 सरीड नु रागी कली सेल्ब परमप्रभु यावेमी दुशा ग्येरशा बाक्तीक सहर यो सेल्ब बाक्ब। अब्राहाममी मेको सहर कली रिम्शो बाक्माक्त।

11 थमा सुइश्शोमी अब्राहाम आ मीश सारा आल मथीब थारी बाक्शा यो, आल थीब दुम्माक्त। मारदे हना लोव्र गेब परमप्रभु यावेमी आ लोव्र दोपा यो खाप्ब, दे थमा सुइश्शो बाक्माक्त।

12 मेना अब्राहाम आल मथीब खाल्पा बाक्माक्त हना यो, नोले आ खिं डा मुर सोरुल खोदेशो पा शुश दुम्शा, हिक्ने मचाप्चा डा दुम्मा बाक्त।

13 अब्राहाम नु आ खिं डा मुरपुकीमी परमप्रभु यावेमी गेशो लोव्र थमा सुइश्शा बेक्मा बाक्त। मेको लोव्र गाप्शो मतथु, डोन रे तशा मजाक्दीत्थु, बेक्मा बाक्त। मेकोपुकीमी “इं रागी मजाक्दीत्थु, अर्को आन रागीम बाक्तय” देशो बाक्मा बाक्त। उत्पत्ती २३:४; उत्पत्ती ४७:९; इतिहास २९:१५

14 मो देंमानु “आंइ रागी माल्शा गाक्तक” दे तुइक्पाइक्नीम।

15 मेकोपुकीमी आन गूशा लशो रागी मिम्ताक्म हना, लेशशा लम वा।

16 तन्न गूशा लशो रागी क्येडा रिम्शो बाक्तीके परमप्रभु यावेम गेब, दे तुइश्शा, परमप्रभु यावे गे लमा बाक्त। मिनु परमप्रभु यावे मेको आन परमप्रभु यावे दुम्चा मुने मपाइब। मेको आन कली बाक्तीके सहर का सेल्शा चोइश्शो बाक्ब।

17 अब्राहाममी आ थुं थाम्चा पुंइसीशा थमा सुइश्शा, आ तौ इसहाक कली चढेवा बाक्त। इसहाक अब्राहाम आ कांइचीक तौ बाक्माक्त। मेको रे पा परमप्रभु यावे आ गेशो लोव्र थमा दुम्चा माल्शो बाक्माक्त। उत्पत्ती २२:१-१९; याकूब २:२१

18 मारदे हना परमप्रभु यावेमी अब्राहाम कली “इसहाक रे पा इ चच युइ रागीम लीनीम” दे लोव्र गेशो बाक्माक्त। उत्पत्ती २१:१२

19 अब्राहाममी “आं तौ बेक्त हना यो, परमप्रभु यावेमी बेक्शो रे सेने चाप्ब” दे मिम्ता बाक्त। परमप्रभुमी अब्राहाम आ मिम्शो तुइश्शा, आ तौ कली मसाइक्पाइक्थु लेत्ता बाक्त।

20 इसहाकमी परमप्रभु यावे आ देशो नोले दुम्ब लोव्र थमा सुइश्शा, आ तौ याकूब नु एसाव आस कली आसीक गेम्सी बाक्त। उत्पत्ती २७:१-४०; उत्पत्ती ४८:- ५०:-

21 याकूबमी थमा सुइश्शा, आ बेक्ची ना कोक्केमी आ पिया तिकशा, परमप्रभु यावे कली टेयब सेल्शा, योसेफ आ तौ आस कली आसीक गेम्सी बाक्त। उत्पत्ती ४७:३१

22 मिनु नोले योसेफमी यो आ बेक्ची जाकत, दे तुइश्शा डा मिन “इसाएलीपुकी इजीप्ट रे गूशा गाक्नीम” दे परमप्रभु यावे आ देशो लोत्र मिम्शा, आ मुर आन कली “गे लेन्नीनु, आं रुश यो लाइश्शा लने” दे माइक्मी बाकत। मारदे हना आ यो “परमप्रभु यावे आ देशो जाकदीप्व” दे थमा सुइश्शा बाक्माकत।

23 मोसा जरमेसेनु, आम आफोमी थमा सुइश्शा “परमप्रभु यावेमी एको आल कली ब्रोंडपाइक्ने चाप्व। मोपतीके एको इश दारशो आल कली मसाइक्चा” देशा, पिप आ हुकुम मटिथु महिथु, आस तौ मोसा कली महिना सां सम्म खुइश्शा वोदसे बाकत। प्रस्थान २:१२,१४

24 मिनु मोसा मोपा कोल्शा ठेयब दुम्शा, परमप्रभु यावे कली थमा सुइश्शा, मार पवा बाकत देशा हना “मुल डा मेरे फाराओ आ तमी आ तौ मदुम्नुड, आं मुर नु लाइनुड” दे लमाकत।

25 पापीपुकी नु काथा बाक्शा, सुख जचा क्येडा परमप्रभु यावे आ मुर नु बाक्शा, श्येत जशा बाक्चा योव्रतु।

26 मारदे हना इजीप्ट डा शोप नु मान तशा यो मारेड मसुइक्थु “ख्रीस्तमी श्येत जशो खोदेशो पा श्येत जचा थमा डा शोप नु मान बाक्ब, दे मिम्ताक्व। मिनु नोले इनाम यो तांइसीब” दे तुइश्शा थमा सुइश्शा बाक्माकत।

27 “मतांइसीब परमप्रभु यावे कली मिक्चीम तशो खोदेंब पा आं नेक्थान ताइनुड” दे थमा सुइश्शा, पिपी गाइश्शा तशा यो महिथु, इसाएली आन कली इजीप्ट रे गुंइशा लाइक्मी बाकत।

28 इजीप्ट रे गुंइशा डोंइती पास्सा चाड डा भोज जपाइक्मी बाकत। मारदे हना “तेको खिं डा लाप्यो आ पियामी हुश बुइश्शा बाक्मे, मेकेर परमप्रभु यावे आ स्वर्ग डा गेय पाइबमी जेठा तौ कली मसाइक्ब” दे परमप्रभु यावे आ लोत्र थमा सुइश्शा, हुश बुइक्पाइक्मी बाकत।

29 मिनु थमा सुइश्शोमी लल समुन्द्रम सोत्रशो लां दुम्माकत। मिनु खोइल का यो मजित्थु शोकसमा बाकत। मेको आन नोले खोइश्शा खेदा पाइब इजीप्ट डा मुरपुकी चहिं समुन्द्रमी गुम्शा बेक्मा बाकत।

30 परमप्रभु यावे आ देशो लोत्र थमा सुइश्शा, यरीको सहर ७ नाकत सम्म हिरसमा बाकत। मिनु ७ नाकत गारो नेल्ल ब्रेम्मा बाकत। यहोसु २:-; ६:१-२५

31 डोंइती राहाब तेल्लेममी मोसाम सोइश्शो क्यारी पाइब आन कली जतीक बाक्तीक गेशा मान पशो बाक्माकत। मिनु आन देशो लोत्र थमा सुइक्तीके मटीब नेल्ल नु मबेक्थु, ब्रोंइचा तवा बाकत। याकूब २:२५

32 में डा लाक्शा मार देनुडा? मारदे हना मोदेशो थमा सुइक्ब शुश बाक्नीम। गिदोन, बाराक, साम्सोन, येफता, दाऊद, सामुएल नु परमप्रभु यावे आ लोत्र पाइब नेल्ल आन पशो मिम्पाइक्तन्नी हना, आं लोत्र गेनायो मनुप्व। न्यायाधीस ६:११- ८:३२; न्यायाधीस ४:४-२४; न्यायाधीस १३:१-१६, ३१; न्यायाधीस ११:१-१२, ७; १सामुएल १७:-; दानीएल ६:-

33 मोदेशो थमा सुइक्बपुकीमी मार पामे बाकत देशा हना, कोइमी लडाइ पा ग्राशा, रागी आंम के सेल्मे बाकत। कोइमी श्येत जाइब आन कली वारच पामे बाकत। कोइमी डोंइती देशो लोत्र थमा दुम्शो तामे बाकत। गुप्स आन शोत्र रे यो ब्रोंइमा बाकत।

34 मीम हुम्चा पुंइसीशा यो मबेक्मा बाकत। तरवारमी क्योरचामेनु यो ब्रोंइमा बाकत। मारेड पने मचाप्व बाक्मा बाकत हना यो, पने चाप्व दुम्मा बाकत। लडाइ पामेनु यो ठेयब थुं पाइश्शा दुम्शा, आन जोरी सत्रु आन कली फ्रुशा खेरमे बाकत।

35 मीश मुरपुकीमी आन तौ बेक्शा लशा, बेक्शो रे सेंसीशो तामे बाकत। मिनु मेको आलपुकी एको रागीम ब्रोंइमा बाकत। कोइमी “बेक्शा नोले बेक्शो रे सेंसीशा गेनायो मबेक्सीब, ग्येरशा बाक्चा तांइसीब” दे थमा सुइश्शा, श्येत जशा यो फाल्शा बाक्मा बाकत। शुश श्येत जशा तुप्चा पुंइसमा बाकत हना यो “थमा सुइक्चा प्रोंइनीकी” दे मदेंमा बाकत। “थमा सुइक्चा प्रोंइनीकी” देशो नम हना, प्रोंइशा सोइक्तेम वा। “थमा सुइक्चा मप्रोंइनीकी” देशोमी श्येत जना जन साइक्चा पुंइसमा बाकत। १राजा १७:१७-२४; २राजा ४:८-३७;

36 का निक्शी शुक्शी लोत्र पा कोराम युक्शा, गुड खोडली साडलोम पाडशशा, जेल्खानम चोकशा वोडक्चा पुंडसमा बाक्त। १राजा २२:२७; येरमीया २०:१-३; येरमीया ३७:११-१६

37 फुल्लु आप्शा साडक्चा पुंडसमा बाक्त, आरामी रिक्शा साडक्चा पुंडसमा बाक्त, तरवारम क्योरशा साडक्चा पुंडसमा बाक्त। २इतिहास २४:२१

38 तेड बाक्चा मतथु, जचा फेक्चा मतथु, भेडा नु क्यारश आन कुशुल फेक्चा, एर ओंथ हिरना हिरन गोरशो रागी रोगुमी प्रोकशा, पुक्खीमी खुडक्ना खुडक्न बाक्मा बाक्त। मोपा श्येत जाडब आन कली एको रागीमी बाक्शा ब्रोंडचा मगारब। मारदे हना रिम्शो मुर बाक्नीम। एको रागी चहिं मरिम्शो बाक्ब।

39 मेको नेल्ले थमा सुडशशा, परमप्रभु यावे आ डोंडती ठीक दुम्मा बाक्त। परमप्रभु यावे आ गेशो लोत्र चहिं गाप्शो मतामे बाक्त। हिब्रू ११:४-५

40 मारदे हना परमप्रभु यावेमी इं पर्वम शुश रिम्शो मिम्शो बाक्मा बाक्त। मिनु मेकोपुकी यो गोपुकी नु रिम्शो दुम्मल। मेको नक लां रे पा पाको मसेल। मेको आन कली नु इं कली काथा वोडशशा बाक्ब, दे रुब्य।

## 12

### येसु कली थमा सुडशशा

1 साड थमा सुडक्बपुकी शुश बाक्मा बाक्त। मेकोपुकीमी इं कली कोव्रना कोव्रन बाक्नीम। मोपतीके दोरब मुर खोदेशो पा, इं कली तेक्ब नु खोल्ने चाप्बपुकी तिल्शा, पापमी इं खोडली फ्रेंचा मगेथु, दोरय। १कोरिन्थी ९:२४

2 थमा सुडक्तीक लां कोडशा, पाको सेल्ब येसु कली मिम्तय। मेकोमी शीम केप्शा कांटी थोकशा क्याडशशा साडक्चा पुंडसीचा आ पर्वम, मुने आ पर्वम मारेड ममिम्ता बाक्त। नोले मान पा ग्येरसीशा बाक्चा ताडनुड, दे मिम्ता बाक्त। मिनु मुल परमप्रभु यावे आ ग्युरा गे निशशो बाक्ब। हिब्रू ५:८-९; फिलिप्पी २:८-१०

3 येसु रागीम बाक्मेनु, पापीपुकीमी शुक्शी पा खेदा पा शुश मरिम्शो पाप्तेक्म हना यो, मेको नेल्ल फाल्तु। मेको आ श्येत फालशो मिम्तीने। मेको मिम्ताक्नी हना, इन थुं बारनीनी। लांमी गाक्शा दशो खोदेशो मदुम्नीनी। मत्ती २६:६७; लूका २:३४

4 पाप नु लडाइ पा मुल सम्म हुश जुडक्थ्री मदुम्नी।

### परमप्रभुमी इं कली कोव्रब

5 तमी तौ आन कली अर्ती गेशो खोदेशो पा इन कली डोंडती गेशो अर्ती प्रेदीनी माड, दे मिम्पाडक्नन्नी। ओदे ब्रेक्शो बाक्ब “आं तौ, परमप्रभुमी इं कली शेंदानु, शेंसो। इं कली श्येत जपदानु ‘फाल्ने मचबु’ मदेनो। मेको कली सोपी ममिम्तो।

6 परमप्रभुमी सु कली दाक्बा, मेको कली सजाड गेब। सु कली आ तौ मिम्बा, मेको कली तुप्ब” दे ब्रेक्शो बाक्ब। हितोपदेस ३:११-१२; प्रकाश ३:१९

7 श्येत गेचा पुंडसीनीनु, परमप्रभु यावेमी शेंताक्की, दे मिम्तीने। आफोमी आल कली पशो खोदेशो पा, परमप्रभु यावेमी इन कली पाडब। आफोमी शेंचा मपुंडसीब तौ बाक्बा डा?

8 आल नेल्ले शेंचा पुंडसीनीम। परमप्रभु यावेमी इन कली मशेंताक्ब हना, आ तमी तौ मननी। आफ मपाडशशा बाक्नीनी।

9 एको रागी डा इं आफोमी इं कली तुप्तेक्म हना यो, मेको आन कली मान पा आन लोत्र तीतय। मिनु गेना हना यो आ नु काथा बाक्चा कली स्वर्ग डा आफ आ देशो टिचा ममाल्नया डा?

10 इं आफपुकीमी इं कली आन मिम्स पा नाक्ती का निक्शी सम्म शेंताक्म। स्वर्ग डा आफोमी चहिं इं कली रिम्शो थुं पाडशशा सेल्चा दाक्ब। पाप रे डोन बाक्शो आ खोदेशो दुम्शो तचा दाक्ब। मोपतीके इं कली शेंब।

11 मोदेशो पा शेंचा पुंडसीयानु, मग्येरनय। श्येत जाडनय। श्येत फाल्ने चाप्बपुकी ठीक दुम्नीम, आन थुं नाडक्चा ताडनीम, दे रुब्य। २कोरिन्थी ४:१७-१८

12 मोपतीके श्येत जाइतीनी हना यो, लांमी गाक्शा दशो खोदेशो मदुमीन, इन गुड खोइल सेस दुम्शा गाक्कीन।

13 लां ब्रेम्शो सेल्शा, रिम्शो पा थेक्शा गाक्कीन। सुइ दशा, खोइली खाइशशा, आन पोक्च मबुइक्ल। रिम्शो पा गाक्शा, आन दशो सामल। हितोपदेस ४:२६-२७

14 मुर नेल्ल नु दुशा गारशा बाक्कीने। पाप रे डोन बाक्शा, रिम्शो थुं पशा गेय पा कोइदीने। मो पाइतीनी हना, प्रभु नु काथा बाक्चा ताइनीनी। रोमी १२:१८; रतिमोथी २:२२

15 अर्ती गेमुशा वारच पमुशा बाक्कीने। सुइ परमप्रभु यावे आ शिशी मताइब मदुम्ल। सुइमी थुं चोशा दुशा बाक्ब आन कली फ्राशा, मुर आन कली मरिम्शो मसेलल। ब्यवस्था २९:१७

16 सुइ एसाव खोदेशो मरिम्शो मदुम्ल। एसावमी काले आ कोव्रज प्रिंचा कली डोंइती जरमेशो तौमी तचा डा शोप नु आसीक आ लोक्ब कली प्रोना बाक्त। उत्पत्ती २५:३३-३४

17 नोले आस आफोमी अडस योक्गानु, एसावमी डोंइती जरमेशो तौ आ तचा डा अडस गेयीनी, दे डाक्ना डाकन पुंइशा यो आ आफ आ थुं लेप्पाइक्ने मचबा बाक्त। मिनु परमप्रभु यावे आ डोंइती आ नें मलीमाक्त, दे नेल्लेमी तुइक्नीनी। उत्पत्ती २७:३०-४०

### रिम्शो राज्य ओव्रचा ताइनय

18 साइ इं किकी पिपीपुकीमी परमप्रभु यावे कली ग्रुमशो खोदेशो पा मग्रुमीनी। मेकोपुकीमी गुइमी थिचा डा डांडामी मी ब्रशा तामे बाक्त। मिनु छिडछिड दुम्शा क्येर गोस्स बोक्शा, फश गिवार पा बुंबु पवा बाक्त। गे मेक सम्म मजाक्शो बाक्नीनी। प्रस्थान १९:१२, १६, १८; ब्यवस्था ४:११

19 मिनु तुराही ताप्शो ठेयब रेयके खोदेब पा परमप्रभु यावे आ लोव्र नेन्मे बाक्त। मेको लोव्र नेने मचाप्यु “मुल डा मेरे ओं देब लोव्र मपचा” दे थम हिंशा पुन्मे बाक्त। प्रस्थान २०:१९

20 मेकोपुकीमी नेने मचाप्शो लोव्र “एको डांडा थीब बस्तु जन्तु बाक्त हना यो, मेको कली फुल्लु आप्शा साइक्चा माल्ब” देशो लोव्र बाक्माक्त। प्रस्थान १९:१३

21 मोदेशो हिंचा डा दुम्शो तशा, मोसामी “हिंशा खिंखि पाता” देमाक्त। ब्यवस्था ९:१९

22 तन्न गे सियोन डांडाम ब्रोंइशा बाक्ब परमप्रभु यावेमी स्वर्गम सेल्शो यरूसलेम सहर जाक्दीशशा बाक्चा ताइनीनी। मेकेर परमप्रभु यावे आ स्वर्ग डा गेय पाइब बाक्नीम। गलाती ४:२६; एफिसी २:६; फिलिप्पी ३:२०; प्रकाश २१:२; प्रकाश ५:११

23 आन नें स्वर्गम ब्रेक्चा पुंइसीशा, इन क्येडा डोंइती जाक्दीशशा, पाप रे ब्रोंइशा ग्येरशा बाक्चा ताइबपुकी बाक्नीम। परमप्रभु यावेमी मुर नेल्ल आन कली निसाफ पाइब आ नेक्था बाक्नीम। लूका १०:२०

24 नक कबल खाप्ब येसु बाक्ब। मिनु येसु आ जारशो हुश यो बाक्ब। मेको हुश हाबील आ हुश खोदेशो ममाइ। हाबील आ हुशेमी “आं कली साइक्ब सजाइ गेचा पुंइसमल” देब। येसु आ हुशेम चहिं “मेको आन पाप नेल्ल क्याम्शा, सजाइ जचा रे प्रोंइतामी” देब। हिब्रू ९:१५; उत्पत्ती ४:१०

25 होस पांइसीने। इन कली लोव्र पाइब कली इन ची मकोइदीने। इं किकी पिपीपुकीमी मुर आ देशो मटीमे बाक्त। मिनु सजाइ गेचा पुंइसमा बाक्त। गोपुकी स्वर्ग रे लोव्र पाइब कली इं ची कोइताक्य हना, सजाइ मतथुं ब्रोंइनया डा? हिब्रू २:२; हिब्रू १०:२८-२९

26 परमप्रभु यावेमी लोव्र पवानु, खिनु कुशो खोदेब पा रागी नेल्ले हिम्से बाक्त। मुल इं कली मार लोव्र पाइब देशा हना “मुल यो लेंशा काले रागी ला ममाइ, सरीड यो हिम्नुड” देब। हगै २:६

27 “मुल यो लेंशा काले हिम्नुड” देशो लोव्र रे मार रुम्सीब देशा हना, हिम्सीबपुकी सेल्चा पुंइसीशो बाक्नीम। मिनु फाइक्चा पुंइसीनीम। महिम्सीबपुकी चहिं लीनीम, दे रुम्सीब।

28 मोपतीके गेनायो महिम्सीब राज्य ओव्रचा ताइनय, दे तुइशशा, परमप्रभु यावे कली मान पा ठेयब सेल्ना सेल्न “गे रिम्शो पाइब बाक्नीनी” देशा, ग्येरशा आ दाक्शो गेय पना पन बाक्य।

29 इं परमप्रभु यावे नेल्ल खतम सेल्ब मी खोदेशो बाक्ब। हिब्रू १०:३१; ब्यवस्था ४:२४

## 13

## रिम्शो गेय कोंडदीने

1 लोकब खोंदेशो पा दाकमुशा गारशा बाक्कीन। यूहन्ना १३:३४; २पत्रुस १:७

2 इन ख्विम जाक्ब सुइ आन कली जचा बाक्चा गेचा मप्रोनीन। मोपा गेशोमी आन निकशीमी आन मतुइक्थु परमप्रभु यावे आ स्वर्ग डा गेय पाइब आन कली मान पचा ताम्तेकम। रोमी १२:१३; १पत्रुस ४:९; ३यूहन्ना ५-८; उत्पत्ती १८:२-३; उत्पत्ती १९:२-३

3 जेल्खानम चोकचा पुंडसीशो आन कली काथा बाक्शो मिम्शा वारच पने। श्येत गेचा पुंडसीब आन कली तशा, आम श्येत जशो खोंदेशो मिम्तीने। मत्ती २५:३६

4 गे नेल्लेमी “ग्युबे पशो रिम्शो बाक्ब” दे मिम्तीने। मुर आ मीश नु मुरु आ वोंइश मडम्मल। मीश वोंइश आस नाता खोंडक्ब नु तेल्लेम आन कली परमप्रभु यावेमी निसाफ पाइब।

5 क्येट चेम्चा गे इन थुं महिरदीने। गेपुकी नु मार मार बाक्मा, मेको मोशोमीन इन थुं नाइश्शा बाक्कीन। मारदे हना मेकोमी “गे नु बाक्नुड, मिनु गेनायो मप्रोंडनन” देब। यहोसु १:५; १तिमोथी ६:६

6 प्रभु आ देशो तुइश्शा “प्रभुमी आं कली कोव्रशा, वारच पाइब। मुरपुकीमी मार पने चाप्नीमी डा? मारेइ पने मचाप्नीम। मोपतीके महिथु बाक्ती” दे ठेयब थुं पा बाक्क्य। भजन संग्रह ११८:६

## इन थुं दूली शेंब गे महिरदीने

7 इन कली परमप्रभु यावे आ लोव्र शेंब आन पशो मिम्तीने। मेकोपुकी बेक्ची सम्म थमा सुइक्चा मप्रोनेम। मेको आन पशो खोंदेशो पने।

8 साइ डोंइती, मुल नु गेना हना यो येसु ख्रीस्त मफांडसीथु बाक्ब, दे तुइक्तीन। यसैया ४१:४; १कोरिन्थी ३:११; प्रकाश १:१७-१८; प्रकाश २२:१३

9 मुल सम्म मनेशो नु दूली शेंब लोव्रमी इन थुं क्याल्चा मगेने। परमप्रभु यावे आ शिशीमी रिम्शो थुं पाइश्शो दुम्तय, दे गेनायो मप्रेंदीने। चोव्रखो जशोमी ठीक थुं मसेल्ब, दे रुपीने। एफिसी ४:१४; २कोरिन्थी १:२१; रोमी १४:१७; १तिमोथी ४:८

10 गुडमी सेल्शो ताम्बुम गेय पाइबपुकीमी येसु आ भोज जचा मताइनीम।

11 साइ ठेयब चढेबमी पाप क्याम्चा कली बस्तु भाव क्योरशा, थम चोव्रखो कोठाम ओव्रशा हुश चढेम्तेकम। श्ये चहिं गुंडशा, मुर मबाक्तीकेम लाइश्शा चोम्तेकम। मिनु सुइमी मेको श्ये ब्वचा मताम। लेवी १६:२७

12 मोपतीके मुर आन पाप क्याम्चा कली येसु कली सहर रे गुंडशा, श्येत जपाइक्तेकम। येसुमी मुर आम के सेल्चा कली आ हुश चढेप्टु। मत्ती २१:३९; यूहन्ना १९:१७

13 आ मुर दुम्शा, मेको मेर गूशा, आ नु काथा बाक्शा, आ बुदी शुक्शी पाइक्चा पुंडसाक्क्य। हिब्रू ११:२६; हिब्रू १२:२

14 एको रागीमी गेना हना यो बाक्चा मताइनय। जाक्चशो सहर कली रिम्शा बाक्नीकी। हिब्रू ११:१०; हिब्रू १२:२२

15 येसु रे पा परमप्रभु यावे कली मान पा ठेयब सेल्ना सेल्न बाक्क्य। मेको यो इं शोव्र डा भेटी बाक्ब। भजन संग्रह ५०: १४, २३; होसे १४:३

16 अरु आन कली रिम्शो पने। मथीब मचाप्व आन कली मार माल्दा, मेको गेचा मप्रेंदीने। मिनु परमप्रभु यावेमी इन कली मोदेब रिम्शो पशो तशा ग्येरब।

17 इन कली शेंब आन लोव्र नेंशा टिने। मेकोपुकीमी “परमप्रभु यावे आ डोंइती जिम्मा ब्राइनुड” दे तुइश्शा इन कली शेंनीमी, कोव्रनीम। शेंब आन लोव्र टीतीनी हना, मेकोपुकीमी ग्येरशा शेंनीम। इन कली मटिशो तशा चहिं, आन थुं हेल्लो दुम्शा, शेंचा ब्रीनीम, मिनु इन कली यो मरिम्शो दुम्ब। १थिस्सलोनिकी ५:१२; इजीकीएल ३:१७-१९

## आंइ कली प्रार्थना पने



18 आंइ परबम परमप्रभु यावे कली पुंइना पुंइन बाक्कीने। मारेइ दोस ताइब मदुम्क, दे आंइ थुं नाइशो बाक्कीकी। मारेइ पाइतक हना यो, रिम्शो पय, दे थुं फ्रेंशा बाक्तक। रोमी १५:३०; २कोरिन्थी १:११-१२

19 “गुम्चा तयल” दे परमप्रभु यावे कली पुंइचा मप्रोनीन।

### आसीक गेशो

20 नेल्ल क्येडा ठेयब भेडा गोठला, इं प्रभु येसुमी आ हुशेम गेना हना यो लीब कबल खाप्तु। दुशा बाक्चा गेब परमप्रभु यावेमी मेको कली बेक्शो रे सेंताक्व। यूहन्ना १०:११; १पत्रुस २:२५

21 परमप्रभु यावेमी येसु ख्रीस्त रे पा इन थुं रिम्शो सेलल, आ दाक्शो गेय पपदल, आ कली ग्येरपाइक्व सेलल। येसु ख्रीस्त कली गेना हना यो ठेयब सेल्य। आमेन। आमेन आ अर्थ “गो यो मेकोन मिम्नुड” बाक्व।

### नोले डा लोव्र

22 आं दाक्शो लोकबपुकी, इन कली आं ब्रेक्शो थुं बारपाइक्तीक लोव्र शुश मब्रेक्तु। रिम्शो पा रुप्चा माल्नीनी।

23 नेनीने, इं लोकब तिमोथी कली जेल्खान रे प्रोंइतेक्म। आं गाक्चा क्येडा डोंइती एक जाक्त हना, इन कली गुम्थ पीनस्कु।

24 शेंब नु थमा सुइक्व नेल्ल इन कली “रिम्शो बाक्कीन” देंती। इटाली डा थमा सुइक्व लोकबपुकीमी यो इन कली “रिम्शो बाक्कीन” देंतेक्म।

25 प्रभु आ शिशी गेपुकी नु लील।

## याकूब

**ब्रेक्ब मुर:** एको चिटी ब्रेक्ब याकूब बाक्ब। मेको येसु आ लोकब बाक्त। गलाती १:१९ मेको यरूसलेम डा थमा सुइक्ब आन शेंब दुम्त। गलाती २:१; प्रेरित १५:१३-२१ मेको ६२ ए. डी.म फुल्लु आप्शा साइक्वा पुंडसाक्ब।

**गेना ब्रेक्शो:** एको किताब ४४ ए. डी. रे ५० ए. डी. दातेमी ब्रेक्शो बाक्त।

**मारदे ब्रेक्शो:** येसु खीस्त कली थमा सुइक्तीके मुर आन पशो गेयमी तांडसीब, दे रुप्पाइक्वा कली ब्रेक्शो बाक्ब। थमा सुइक्ब आन पतीके मार बाक्ब, दे शेंतीके बाक्ब।

### डोंइती डा लोत्र

1 गो, याकूब, परमप्रभु यावे नु प्रभु येसु खीस्त आस वाइल नड। गो ब्रशा बाक्शो १२ थर डा यहूदी इन कली नमो पाइनुड। गे रिम्शो बाक्कीन।

### थमा सुइक्तीके दोपा ठीक दुम्बा

2 आं लोकबपुकी, इन थमा सुइक्तीके ठीक बाक्म कों, मबाक्म, दे थुं थाम्चा पुंडसाक्नी हना, ग्येरसीने। रोमी ५:३-५; १पत्रुस ४:१३

3 मारदे हना इन थमा सुइक्चा ठीक बाक्त हना, गेपुकी खोइली थेक्शा शुश फाल्ब दुम्नीनी।

4 येसु खीस्त कली थमा सुइश्शा, खोइली थेक्शा बाक्शोमी परमप्रभु यावे आ डोंइती इन कली ठीक सेल्ब। मोपा परमप्रभु यावे नु बाक्चा कली थम रिम्शो नु ठीक दुम्शा, अरु मारेइ ममाल्नीनी।

5 तुइक्ब थुं माल्तीनी हना, गेपुकीमी परमप्रभु यावे कली “गो तुइक्ब थुं माल्नुड” दे पुनीन। परमप्रभु यावेमी मगाइक्थु, शुश तुइक्ब थुं गेब। याकूब ३:१५; हितोपदेस २:३-६

6 परमप्रभु कली पुंडनीनु “आं पुंडशो गेब” दे थमा सुइश्शा पुनीन। “तुइक्ब थुं गेबा कों, मगेबा” दे थमा मसुइक्ब मुर खोदेशो पा मपुनीन। मोदेशो मुर फशेम नेप्शो समुन्द्र डा ब्वाक्कु खोदेशो बाक्ब। मर्कूस ११:२४; १तिमोथी २:८

7 मोदेशो मुरुम मारेइ मताइब।

8 थुं निक्शी पाइश्शो मुर आ थुं कामी परमप्रभु यावे आ लां खोइक्ब, थुं कामी मुर आन लां खोइक्ब।

### पुड्ग नु क्येट थीब मुर

9 मिनु इन दातेमी सुइ पुड्ग थमा सुइक्ब लोकब बाक्त हना, मेकोमी “परमप्रभु यावेमी आं कली टेयब मुर सेल्ती” दे ग्येरसेक्ल। याकूब २:५

10 मेकेर थमा सुइक्ब क्येट थीब मुर बाक्त हना, मेकोमी “गो परमप्रभु यावे आ डोंइती पुंडब दुम्शा, आं पुंडशो गेब” दे ग्येरसेक्ल। क्येट थीब मुर बोइश्शो फू बेक्शो खोदेशो पा सोल बेक्नीम। १तिमोथी ६:१७; १पत्रुस १:२४

11 नां दाप्शा डा मिन शुश हुप्तानु, घांस नेल्ल सोल सुल बेक्नीम। मिनु आन फू सफा नेल्ल हेम्नीम। मोपा आ दारस जाम्ब। मेको खोदेशो पा क्येट थीब मुर यो आ गेय पस डा पस बेक्नीम। यसैया ४०:६-७

### ब्रोंइतीक सिरपेच

12 सु इन दातेमी आ थमा सुइक्तीके ठीक बाक्म कों, मबाक्म देय थुं थाम्चा पुंडसीशा फाल्ने चाप्बा, मेको मुर ग्येरसेक्ल। मेको थुं थाम्तीके ठीक दुम्त हना, मेको मुरुमी ब्रोंइतीक सिरपेच ताइब। परमप्रभु यावेमी “सुम आं कली दाक्वा, मेकोमी ब्रोंइतीक सिरपेच ताइब” दे लोत्र पशो बाक्ब। २तिमोथी ४:८

13 पाप पचा चिक्शो मुरुमी “परमप्रभु यावेमी आं कली पाप पपाइक्वा चिक्ताक्ब” दे गेनायो देंचा मदम्ब। मारदे हना सुइमी परमप्रभु यावे कली थुं नाक्शा, पाप पपाइक्वे मचाप्ब। आं यो सुइ कली पाप मर्पेपाइक्ब।

14 मुरपुकीमी दोपा पाप पाइनीम देशा हना, आंम दला दाक्स पा पाप पाइनीम। उत्पत्ती ३:६; रोमी ७:७-८

15 मोपा दला दाक्स पामेनु, पाप यूब। मेको पाप बारने थुमानु, मेको मुर नरकम लाइनीम। मेको पाप पतीके बाक्ब। रोमी ७:१०

16 आं दाकशो थमा सुइक्ब लोकबपुकी, दूली लां मखोतीन।

17 हाइशो नु रिम्शो ठीक मिम्तीके थुं नेल्ल परमप्रभु यावे रे जाक्ब। मिनु परमप्रभु यावे छेडछेड कली सेल्ब बाक्ब। मोपतीके परमप्रभु यावे छेडछेडमी बाक्ब। छिडछिड डा गेय काइ मपाइब। आ थुं यो मफांडसीब। मत्ती ७:११; १यूहन्ना १:५

18 परमप्रभु यावेमी इं कली आ थमा लोत्र पतीकेमी नक जरमेशो मुर सेल्लु। मोदेशो पा डोंइती सिशो फल खोदेशो पा आ मुर दुम्यतय। यूहन्ना १:१३; १पत्रुस १:१:२३

**परमप्रभु आ लोत्र नेंशा पचा**

19 आं दाकशो लोकबपुकी, मार तुइक्चा माल्नीनी देशा हना, गेपुकी नेंस डा नेंस बाक्कीन। शुश मब्वाक्कीन। शुश मचुरीन। हितोपदेस २९:२०; उपदेसक ५:१-२; उपदेसक ७:९

20 चुरब मुरुमी परमप्रभु आ ठीक पतीके मपाइब।

21 मोपतीके ग्रांरा दिचा डा गेय नु काइ मरिम्शो पतीके नेल्ल प्रोनीन। गे ठेयब मलेत्थु, इन थुंमी वोइशो परमप्रभु यावे आ अरेशो लोत्र टिने। मोपा गेपुकी परमप्रभु यावे आ अरेशो लोत्र टिनीनु, मेको लोत्रमी इन कली नरक रे प्रोंइने चाप्ब। १पत्रुस २:१

22 गेपुकी परमप्रभु यावे आ लोत्र नेनीन। नेंचा ला ममाइ, मार मार देशो बाक्मे, मेको यो पचा माल्नीनी। गेपुकीमी मेको लोत्र नेंशा मपाइतीनी हना, जोल पांडसीनीनी। मत्ती ७:२१; रोमी २:१३

23 सु परमप्रभु यावेमी देशो लोत्र नेंशा मपाइबा, मेको ऐना कोत्रब मुर खोदेशो बाक्ब।

24 मेको मुरुमी ऐना कोत्रशा, आ कुल दोदेशो तांडसे, मेको यु प्रेंब।

25 सुमी इन कली प्रोंइने चाप्ब परमप्रभु यावे आ ठीक पतीके अरेशो लोत्र नेंनीमी, नेंचा ला ममाइ पना पन यो बाक्नीमी, मेको मुर आन पतीकेमी आसीक ताइनीम। याकूब २:१२; रोमी ८:२; यूहन्ना १३:१७

26 सुमी “गो थमा सुइक्ब नड” दे मिम्बा, तन्न हेंथे ब्वाक्बा, मेको मुर जोल पाइब बाक्ब। मिनु आ थमा सुइक्तीके मोशा दुम्ब। १पत्रुस ३:१०

27 मखाल्थु ठीक पा थमा सुइक्तीके दोदेशो बाक्ब देशा हना, रोम रोइक्च नु वोइश बेक्शो मीश मुर श्येत जामेनु, वारच पचा नु थमा मसुइक्ब पाप पाइब आन खोदेशो पाप काइ मपचा, मेको इं आफ, परमप्रभु यावे आ डोंइती ठीक पा थमा सुइक्तीके बाक्ब।

## 2

**गुम्तीकेमी कुल मकोत्रमुने**

1 आं लोकबपुकी, इं प्रभु येसु ख्रीस्त कली थमा सुइक्नीनी। मेको छेडछेड डा प्रभु बाक्ब। मोपतीके गेपुकी यो मुर आन कुल मकोत्रडीन।

2 थम दारशो वा फेक्शो नु सुन के औंठी पांडशो मुर का नु जेक्शो वा फेक्शो पुडग मुर का इन गुम्तीके खिंमी जाक्ताक्स हना,

3 मेको दारशो वा फेक्शो कली कोत्रशा “हजुर, मेकेर निस्सीने” दे लोत्र पशा, पुडग कली चहिं “हयु उड राष्णा बाक्को। आं खोइल आ नेक्था निस्सो” दे माइक्तीनी हना,

4 गे इन दातेमी आइक्च नु ठेयब तिल्लीनी। मोदेशो पनीनु, मरिम्शो निसाफ मपनी डा?

5 आं लोकबपुकी, नेनीन, परमप्रभु यावेमी रागी डा पुडग आन कली शुश थमा सुदमेक्ल, दे मयोत्रडा डा? मिनु परमप्रभु यावे कली दाक्ब नेल्ल आ राज्य ओत्रचा ताइनीम मदेंम डा? १कोरिन्थी १:२६; १कोरिन्थी ११:२२; लूका १२:२१

6 गे चहिं पुडग आन कली दिप्नीनी। मेको शुश क्येट थीब मुरपुकी इन कली श्येत गेब मुर मनमी डा? मेकोपुकीमी इन कली अडडाम मचाकदीत्नीमी डा?

7 येसु खीस्त आ नें आ पर्बम शुक्शी लोत्र मपाइनीमी डा? १पत्रुस ४:१४

### दाकमुने

8 परमप्रभु यावे आ राज्य डा अरेशो लोत्रम मार ब्रेकशो बाकब देशा हना “अरु आन कली आंम इन कली दाकशो खोदेशो पा दाकतीन” दे ब्रेकशो बाकब। मो पाइतीनी हना, गेपुकी रिम्शो पाइनीनी। लेवी १९:१८

9 तन्न गेपुकीमी थमा सुइक्ब का कली ठेयब सेल्शा, अरु आन कली आइक्च सेलतीनी हना, गे पाप पाइनीनी। मिनु परमप्रभु यावे आ अरेशो लोत्र मटीब दुम्नीनी। ब्यवस्था १:१७

10 मुर कामी परमप्रभु यावे आ अरेशो लोत्र नेल्ल पशा, का चहिं मपाप्तु हना, लोत्र नेल्ल मटीब खोदेशो दुम्ब। मती ५:१९

11 परमप्रभु यावेमी “मीश वोइश आस नाता मखोइक्चा” दे ब्रेकशो बाकब। मिनु “मुर मसाइक्चा” दे यो ब्रेकशो बाकब। तेल्लेम मपथु, तन्न मुर आन कली साइक्तीनी हना, गेपुकी परमप्रभु यावे आ अरेशो लोत्र मटीब पापी दुम्नीनी। प्रस्थान २०:१३-१४

12 परमप्रभु यावेमी इन कली पाप रे ब्रोंइतीक लां कोंइशा, निसाफ पाइब। मेको मिम्शा, गेय पने।

13 शिशी मपाइबपुकीमी निसाफ पची नाक्त शिशी मताइनीम। निसाफ क्येडा शिशी ठेयब बाकब। मती ५:७; मती १८:३०, ३४; मती २५:४०, ४६

### थमा सुइक्चा नु टिचा

रोमी ३:२१-३१; मती ७:२१

14 आं लोकबपुकी, मुर कामी “गो थमा सुइक्नुड” दे परमप्रभु यावे आ अरेशो लोत्र नु गारब गेय मपाप्तु हना, आ थमा सुइश्शोमी मेको कली पाप रे प्रोंइने चाप्बा डा? मती ७:२१

15 मिनु लोकब का के जचा फेक्चा मबाक्त हना,

16 मेको कली “थुं नाइश्शा बाक्को। परमप्रभुमी इ कली फेक्तीक गेवल। जचा गेवल” देशा, गे मेको कली आ माल्शो मारेइ मगेतीनी हना, इन थमा सुइक्तीके शोर गाक्शो बाकब। १यूहन्ना ३:१८

17 इन थमा सुइक्तीकेमी गेय मपाप्तु हना, मेको थमा सुइक्तीके बेक्शो बाकब।

18 मुर का निकशीमी “गे थमा सुइक्ब दुम्तीनी। गो चहिं परमप्रभु यावे आ गेय पाइब दुम्तक। मोपतीके इन थमा सुइश्शो कोंइदीन। इन गेय कोंइचा ममाल्नीनी। गो यो आंइ पशो गेय रे आंइ थमा सुइक्तीके कोंइनीकी” देंने चाप्नीम। गलाती ५:६

19 गेपुकी परमप्रभु यावे का ला बाकब, दे थमा सुइक्नीनी। मोपा रिम्शो पाइनीनी। वोलपुकीमी यो मेको थमा सुइश्शा हिंशा खिंखि पाइनीम।

20 गे दूली पाइबपुकी, गेय मपथु थमा सुइक्तीके शोर गाक्शो बाकब, मेको तुइक्तीन।

### थमा सुइक्चा मार बाक्बा?

21 मिनु इं किकी अब्राहाममी आ तौ इसहाक परमप्रभु यावे कली चढेचा, दे परमप्रभु यावे आ लोंइती ठीक गेय पाइब दुम्माक्त। उत्पती २२:१-१९; हिब्रू ११:१७; रोमी ४:२-३

22 आ थमा सुइक्तीके नु आ गेय काथ काथा पवा बाक्त। मोपा आ थमा सुइक्तीके आ गेयमी ठीक दुम्शो बाक्माक्त।

23 मिनु अब्राहाम आ पर्बम ब्रेकशो लोत्र ठीक दुम्माक्त। मार ब्रेकशो बाक्त देशा हना “अब्राहाममी परमप्रभु यावे कली थमा सुदा बाक्त। मेको थमा सुइश्शोमी अब्राहाम कली ठीक सेला बाक्त” दे ब्रेकशो बाक्त। मिनु मुरपुकीमी अब्राहाम कली “परमप्रभु यावे आ वारच” दे याइनी नें वोदमे बाक्त। उत्पती १५:६; यसेया ४१:८

24 मुरुमी थमा सुइक्चा ला ममाइ, आन गेयमी यो ठीक दुम्नीम, दे गेपुकी रुने मचाप्नीनी डा?

25 अब्राहाम खोदेशो पा राहाब माइशो तेल्लेम मीश मुरुमी यो थमा सुइक्ब दुम्शा, आ पशो गेयमी ठीक दुम्माक्त। दोदेंब गेय पवा बाक्त देंशा हना, इस्राएल डा मुर निक्शी आस कली अरु लां कोंडशा, सोइक्ता बाक्त। हिब्रू ११:३१; यहोसु २:-

26 मिनु दोपा सोक्त मपाइशो मुर बेकशो बाक्बा, मोपा थमा सुइक्बमी थमा सुइशो गेय मपाप्तु हना, आ थमा सुइक्तीके बेकशो बाक्ब।

### 3

#### मुर आ शोव्वमी दोपा पाप पाइबा

1 आं लोकबपुकी, शुश शेंब मुर मदुमीन। मारदे हना परमप्रभुमी मेको शेंसीब आन क्येडा शेंब आन कली शुश कोव्वशा, आन लोव्व नेंशा, निसाफ पाइब।

2 गो नेल्लेमी शुश गलती पाइनय। सुमी लोव्व पवानु, काइ गलती मपाइबा, मेकोमी राम मपचा डा गेय यो मपाइब। मेको मुर थम रिम्शो बाक्ब।

3 गोपुकीमी शारा बिप्पाइक्चा कली लगम पाइक्नय। मोपा मेको शारा आ रां नेल्ल चलने चापनय।

4 जहाज यो मिम्तीन। दोदेशो टेयब बाक्त हना यो, दोदेशो टेयब फशेमी मेको कली गाक्पाइशो बाक्त हना यो, चलेबमी मेको कली इम्चीली थोव्वकमी चलेशो बाक्ब। मिनु ते लाइक्चा दाक्ता, मेकेर लाइक्ने चापब।

5 मेको इम्चीली चलेतीके खोदेशो मुर आ लें बाक्ब। मुर आ लेंमी टेयब लोव्व पाइब। मेको लें आइक्च बाक्त हना यो, टेयब मरिम्शो पने चापब। इम्चीली मीम टेयब ब्वाकी क्रोइक्ने चापब।

6 मुर आ लें मी खोदेशो बाक्ब। मेकोमी रां नेल्ल मरिम्शो सेल्ब। मेकोमी मरिम्शो लोव्व पशा, रां कली पापी सेल्ब। रागी नेल्ल कली क्रोइक्ब। आंमा यो नरकमी ग्रोइक्ब। हितोपदेस १६:२७; मत्ती १२:३६-३७; मत्ती १५:११, १८

7 मुरपुकीमी बस्तु भाव, जन्तु, चिकबी नेल्ल आन कली शेंने चापनीम। मिनु मेको आन कली शेंताक्म हना यो,

8 आंम आन लें कली शेंने मचापनीम। मुरुमी आन लेंमी मरिम्शो पाइनीम। दोपा ओश्येर जशा, मुर बेक्नीमी, मोपान लें यो मुर कली साइक्ने चापचा डा ओश्येरमी व्रीशो बाक्ब।

9 गोपुकीमी प्रभु नु आ आफ कली “गे टेयब नसी” दे लोव्व पाइनय। मिनु परमप्रभु यावेमी आ खोदेशो सेल्शो मुर आन कली सराप पाइनय। भजन संग्रह १४१:३; उत्पत्ती १:२६-२७

10 मोपा शोव्व कामी आसीक लोव्व नु सराप लोव्व पाइनीम। आं लोकबपुकी, मो पचा मदुम्ब। एफिसी ४:२९

11 ब्वाक्कु बुक्तीक का रे कशो नु ब्रोव्वशो ब्वाक्कु कालेमी यीबा डा?

12 आं लोकबपुकी, फोव्वशी रवामी तेल रवा आ फल मसिम्ब। अडगुर रवामी फोव्वशी मसिम्ब। मेको खोदेशो पा हिक्सी डाम्शो ब्वाक्कु रे ब्रोव्वशो ब्वाक्कु गूने मचापब।

#### इन गेय तेको लां रे जाक्बा?

13 मिनु इन दातेमी सु निप्स पाइशो नु रुप्तीक थुं पाइशो मुर बाक्मा, मेकोमी आ गेय रे पा आ ब्रेम्तीके रुप्तीक थुं रे जाक्ब, दे कोंडदल।

14 गे अरु मुर आन थोव्वक वाल्तीक नु आंम कली ला मिम्तीक थुं बाक्त हना, टेयब लेशशा, थमा शेंतीके कली जोल मसेलीन माइ? मबाक्कीन।

15 ओदेशो मिम्तीके परमप्रभु आ गेशो रुप्तीक थुं मबाक्ब। तन्न मुर आन थुं रे नु सैतान रे जाक्ब। याकूब १:५

16 मुरुमी मुर आन के थोव्वक वाल्चा नु आंम कली टेयब सेल्चा ला मिम्ताक्व हना, मेको मुरुमी मरिम्शो गेय नु अरु पाप यो पना पन बाक्ब।

17 परमप्रभुमी गेशो निप्स पाइश्शो थुंमी मुर कली ग्रांग्रा दिचा डा गेय मपपाइक्व। सुइ नु मजिपाइक्व। ब्रेम्शो सेल्ब। गाइश्शो फाल्पाइक्व। शुश शिशि पपाइक्व। रिम्शो गेय पपाइक्व। कुल कोवशा, गेय मपपाइक्व। जोल मपपाइक्व।

18 थुं नाइश्शा बाक्व मुरपुकी ठीक गेय पशा, मुरपुकी नु दुशा गारशा बाक्नीमी। मेको परमप्रभु यावे आ गेशो ठीक पतीकेमी बाक्व। फिलिप्पी १:११; मत्ती ५:९

## 4

### मुर आन दला दाक्स

1 इन दातेमी जिचा खेचा ते रे जाक्वा? गे इन दला दाक्स आ पबर्म जीनीनी, ममाइ?

2 गेपुकी मारेइ मारेइ माल्नीनी, तन्न मताइनीनी। मोपतीके मुर आन थुं जिक्शा, साइक्नीनी। मिनु अरु आन के मार मार तथा वाल्नीनी, तन्न मताइनीनी। मोपतीके जीनीनी। गेपुकी परमप्रभु यावे कली मपुंडनीनी। मोपतीके मताइनीनी। गलाती ५:१५

3 गेपुकीमी पुंडतीनी हना यो, मारेइ मताइनीनी। मारदे हना आंम दला दाक्स पचा कली ला पुंडनीनी। मोपतीके इन पुंडशो मताइनीनी।

4 गे परमप्रभु यावे आ लां प्रोंइशा हेंथे गाक्वपुकी, गे थमा मसुइक्व आन वारच बाक्तीनी हना, परमप्रभु यावे आ जोरी सत्रु दुम्नीनी। सु थमा मसुइक्व आन वारच दुम्चा माल्बा, मेको परमप्रभु यावे नु जोरी सत्रु दुम्ब। लूका ६:२६; रोमी ८:७; १यूहन्ना २:१५

5 परमप्रभु यावेमी ब्रेक्पाइश्शो लोव्रमी “परमप्रभु यावेमी आ सोक्त इं रामी वोइक्तु। तन्न मुरुमी दला दाक्स पशो तथा, मेकोमी शुश रुश पाइब” दे यो ब्रेक्पाइश्शो बाक्व।

6 तन्न परमप्रभु यावेमी मेको क्येडा शुश शिशि पाइब। मिनु “गो ठेयब लेशशो मुर आन कली शिशि मपाइनुड। ब्रेम्शो, ठेयब मलेशशो मुर आन कली ला शिशि पाइनुड” दे ब्रेक्पाइश्शो बाक्व। अय्युब २२:२९; हितोपदेस ३:३४; मत्ती २३:१२; १पत्रुस ५:५

7 गेपुकी परमप्रभु यावेमी देंशो लोव्र दिने। सैतान रे डोन बाक्कीन। मो पाइतीनी हना, सैतानमी इन कली प्रोंइब। मत्ती २३:१२; १पत्रुस ५:८-९

8 परमप्रभु यावे आ नेक्था लने। मो पाइतीनी हना, मेको इन नेक्था जाक्व। गे पापीपुकी “आंइ पाप क्याम्दीने” देंशा, माफ पुनीने। थुं निक्शी पाइश्शो मुरपुकी, इन थुं परमप्रभु यावे गे लेशशा, थुं का दुमीने। जकरिया १:३; यसैया १:१६

9 मिनु सुर्ता पने। रोंका पा डाक्कीने। इन रिन्त्या आ पा डा रोंका पने। इन ग्येरचा आ पा डा सुर्ता पने।

10 प्रभु येसु आ डोंइती आइक्च दुम्शा, ब्रेम्शो दुमीन। मिनु परमप्रभु यावेमी इन कली ठेयब सेल्ब।

### परमप्रभु निसाफ पाइब बाक्व

11 आं लोक्वपुकी, शुक्शी लोव्र मपमुने। सुम लोक्व आ पबर्म शुक्शी लोव्र पाइबा, दोस गेबा, मेकोमी परमप्रभु यावे आ अरेशो लोव्र मटीब। मेकोमी परमप्रभु यावे आ अरेशो लोव्र क्येडा “गो जोक्व तुइक्व नड” दे मिम्शा, निसाफ पाइब खोंदेशो दुम्ब। “परमप्रभु यावे आ अरेशो लोव्र रिम्शो देय मरिम्शो” दे लोव्र पाइब यो दुम्ब। मोपा गे परमप्रभु यावे आ अरेशो लोव्र मपाइब दुम्शा, निसाफ पाइब दुम्तीनी।

12 परमप्रभु यावे अरेशो लोव्र गेब नु निसाफ पाइब बाक्व। परमप्रभु यावेमी ला पाप रे प्रोंइने नु नरकम सोइक्ने चाप्ब। इन नेक्था बाक्व आन कली मोपा नाक्व, सु ननी डा? मत्ती ७:१; रोमी १४:४

13 गेपुकीमी मार लोव्र पाइनीनी देंशा हना “दीसा नित्थी सहरम लशा, बर्स का सम्म बाक्व। मिनु शुश क्येट चेम्प” दे मिम्शा लोव्र पाइनीनी। हितोपदेस २७:१

14 दीसा नित्थी मार दुम्बा, ब्रोंइनीनी कों, बेक्नीनी कों मारेइ मतुइक्नीनी। इन गिंग मार में? मेको गोस्स खोंदेशो बाक्व, इक्का का ला लीशा, जाम्ब। लूका १२:२०

- 15 गे मार देंचा माल्शो ननी देशा हना “गेपुकी ब्रोंडतय हना, प्रभुम आंइ मिम्शो दाक्ताक्व हना, गो आंइ मिम्शो गेय पाइनय” दे लोत्र पचा माल्नीनी। प्रेरित १८:२१; १कोरिन्थी ४:१९
- 16 गेपुकी चहिं ठेयब लेशशा, आंम थुं डा लोत्र पाइतीनी। मोदेशो ठेयब लेशशा बाक्चा मरिम्शो दुम्ब।
- 17 सु रिम्शो गेय पस जोक्बा तुडक्बा, तन्न मपाइबा, मेको कली मरिम्शो दुम्ब। लूका १२:४७

## 5

### क्येट थीब आन कली हुइश्शो

- 1 नेनीन, गे क्येट शुश थीब मुरपुकी, डाक्कीन। रोंका पने। मारदे हना गे नोले श्येत जाइब दुम्नीनी। लूका ६:२४-२५
- 2 इन बाक्शो शोंप नेल्ल राक्शो दुम्तेक्मे। इन वासी नेल्ल तुम्बुम नेक्तेक्म। मत्ती ६:१९
- 3 इन सुन चांदी नेल्ल खिया जोशो बाक्ब। मेको खियामी इन कली “मरिम्शो मुर” दे कोंडब। सुन चांदी कली खिया जोशो खोदेशो पा इन रां कली मीम दाक्ब। गे क्येट शुश हेंताक्नी।
- 4 इन रूम गेय पाइब आन गाल्च मुल सम्म जोल पा मगेनी। मेको खेल्ला आन कली मगेशो गाल्चम आ मुर नेल्ल आन परमप्रभु यावे नु लोत्र पाप्तु। मिनु मेकोमी मेको खेल्ला आन पुंइशो लोत्र नेंने थुम्तु। ब्यवस्था २४:१४-१५
- 5 गेपुकी रागीमी दुक्चा, जचा, ब्वचामी शुश शोंप पाइश्शो दुम्शा, ग्येरशा बाक्तीनी। मिनु क्योरची नाक्त कली थुल्शा दोम्पाइश्शो खोदेशो पा गेपुकी निसाफ पची नाक्ती ठेयब सजाइ ताइब दुम्नीनी। लूका १६:१९-२५
- 6 गेपुकीमी रिम्शो गेय पाइब मुर आन कली दोस गेशा साइक्तीनी। मेकोपुकीम ब्वालेइ पा, मारेइ लोत्र मलेत्तेम। याकूब २:६

### प्रभु जाक्चा चिक्शो बाक्ब

- 7 मिनु आं दाक्शो लोकबपुकी, नेनीने, रूमी गेय पाइब मुरुमी मेको आ खुम्शो बाली नाली मीब, दे आ थुं नाइश्शा, हिंडद नु बर्खा रिम्शो खोदेशो पा प्रभु आ जाक्चा रिम्दीन। लूका २१:१९; हिब्रू १०:३६
- 8 थुं नाइश्शा बाक्कीन। मारदे हना प्रभु जाक्चा चिक्शो बाक्ब। मोपतीके प्रभु कली टिचा मप्रोंइथु बाक्कीन।
- 9 आं दाक्शो लोकबपुकी, गेपुकीमी अरु थमा सुइक्ब आन पर्वम गन गन मपने। मो पाइतीनी हना, निसाफ पचा पुंइसीनी। नेनीन इन निसाफ पाइब जाक्चान चिक्शो बाक्ब।
- 10 आं दाक्शो लोकबपुकी, साइ डा परमप्रभु यावे आ लोत्र पाइबपुकीमी परमप्रभु यावेमी देशो लोत्र पशा, शुश श्येत जशा यो फाल्शा, परमप्रभु यावे कली मप्रोंइथु बाक्शो बाक्तेक्म। मिनु मेको आन खोदेशो पा बाक्कीन। मत्ती ५:१२
- 11 नेनीने, मेको परमप्रभु यावे कली मप्रोंइब आन पर्वम “ग्येरशो मुर दुम्तेक्म” दे लोत्र पाइनीकी। अय्युब माइश्शो मुर का श्येत जशा यो, परमप्रभु यावे कली काइ मप्रोंइथु, बाक्शो बाक्त। गेपुकी मेको आ कथा नेंतीनी। परमप्रभु यावेमी मारदे अय्युब कली मेको शुश श्येत जचा गेवा, तुडक्ताक्नी। परमप्रभु यावेमी गिश लेम्शा शिशी पाइबा, मेको ताइतीनी। इं कली आ लेम्शो नु आ शिशी कोंइताक्व। अय्युब १:२१; अय्युब ४२:१०-१६

### कसम जचा आ पर्वम लोत्र

- 12 आं लोकबपुकी, आं नेल्ल क्येडा ठेयब अरेतीक लोत्र मार बाक्ब देशा हना, कसम मजने। सरीड कोत्रशा, खप थिशा, चुक्ब थिशा कसम मजने। इन देशो लोत्र दुम्ब हना “दुम्ब” मदुम्ब हना “मदुम्ब” देनीन। गे जोल पाइतीनी हना, गे निसाफ पचा पुंइसीनी। मत्ती ५:३४-३७

### रोइ पाइब आन कली लोत्र

- 13 इन दातेमी सु सु श्येत जामे, मेकोमी परमप्रभु यावे नु लोत्र पामेक्ल। सु सु ग्येरशो बाक्मा, मेकोपुकीमी “परमप्रभु यावे नेल्ल क्येडा ठेयब बाक्ब” दे कुम्सो पामेक्ल। भजन संग्रह ५०:१५; कलस्सी ३:१६

14 इन दातेमी सु रोइ पाइबा, मेकोमी गुम्टीके डा शेंब खाल्पा आन कली ब्रेत्चा माल्ब। मेकोपुकीमी रोइ पाइब आन तारी गुइ वोइश्शा, प्रभु आ नेंमी तेल खेक्शा, परमप्रभु यावे कली पुंइचा माल्नीम। मर्कूस ६:१३

15 मोदेशो थमा सुइश्शा पुंइशोमी मेको रोइ पाइब मुर साब। मेको रोइ पाइबमी पाप पशो बाक्त हना, मेको यो क्याम्सीब। मर्कूस १६:१८

16 मोपतीके रोइ सापाइक्चा कली इन पशो पाप शोवमुशा, प्रभु नु लोव्र पमुने। ठीक थमा सुइक्ब आन पुंइशो लोव्रमी ठेयब गेय पाइब। प्रेरित १२:५

17 एलीया इं खोदेशो मुर का बाक्माक्त। मेकोमी परमप्रभु यावे कली “रेउ यिचा मगेने” दे शुश पुना बाक्त। मिनु बर्स सां ६ महिना सम्म रागीम काइ रेउ मयिमाक्त। १राजा १७:१; लूका ४:२५

18 नोले मेकोमी “रेउ यिपतीन” दे पुना बाक्त। मिनु नोले रेउ यिशा, बाली नाली चामा बाक्त। १राजा १८:४१-४५

### नोले डा लोव्र

19 आं दाक्शो लोक्बपुकी, इन दाते डा मुर का थमा लां रे डोन लत हना, अर्को थमा सुइक्बमी मेको कली आ पशो पाप रुप्पाइश्शा, परमप्रभु यावे आ लां गे लेप्पाइक्तु हना, गलाती ६:१

20 मेको मुरुमी मेको मटीब मुर कली बेक्चा रे प्रॉइब। मिनु मेको के शुश पाप बाक्त हना यो, क्याम्सीब, दे मेकोमी तुइक्चा माल्ब। भजन संग्रह ५१:१५; हितोपदेस १०:१२; १पत्रुस ४:८



## १ पत्रुस

**ब्रेक्ब मुर:** एको चिठी येसु आ शेंसीब पत्रुसमी इस्राएली मदुशो मुर आन कली ब्रेक्बो बाक्त।

**गेना ब्रेक्बो:** एको चिठी ६४ ए. डी. नोले ब्रेक्बो बाक्त। मेना रोम सहर डा मुरपुकीमी थमा सुइक्ब आन कली शुश खेदा पा, साइक्चा गोत्रमे बाक्त। रोम सहर कली यो बेबीलोन यो देंनीम। १पत्रुस ५:१३

**मार ब्रेक्बो:** पत्रुसमी थमा सुइक्ब आन कली “बोल्यो दुमीन। थमा सुइक्बपुकीमी श्येत जचा माल्नीम” दे ब्रेक्बो बाक्त।

### डोंइती डा लोव

1 गो येसु ख्रीस्त आ सोइश्शो पत्रुस नड। एको चिठी पोन्टस, गलातीया, कापाडोसीया, एसीया नु बिथीनीया रागीम ब्रशा बाक्बो इस्राएल रागी डा थमा सुइक्ब, इन कली ब्रेक्ताक्नी। हिबू १३:१४

2 इं आफ परमप्रभु यावेमी इन कली योत्रशा, आ मुर दुम्नीम देंत। मिनु आ सोक्तीमी इन कली येसु ख्रीस्त कली टीब सेलतु। आ हुशेमी चोवखो सेलतु। परमप्रभु यावे आ गेशो शिशी नु थुं नाइक्तीके डोंइती क्येडा मुल गे नु शुश बाक्ब। रोमी ८:२९

### ब्रोंइचा आ पर्वम शेंशो

3 इं प्रभु येसु ख्रीस्त आ आफ नेल्ल आसीक पाइश्शो बाक्ब, दे गो मान पय। मेको आ शुश शिशी पतीके नु येसु ख्रीस्त बेक्बो रे सेंसीशोमी इं कली ब्रोंइशा बाक्तीक आस गेशा, नक जरमेशो मुर सेलतु। कलस्सी १:५

4 मिनु इं कली स्वर्गमी जाम्शा मलाइब, काइ मबिग्रेब नु गेना हना यो लीब शोंप वोइश्शो बाक्ब। कलस्सी १:१२

5 परमप्रभु यावे आ सक्तिमी इं कली कोव्रब। गो पाप रे ब्रोंइशो मुर बाक्नय, दे थमा सुइक्नय। मेको नेल्ल नोले डा नाक्तीमी कोइब। यूहन्ना १०:२८

6 गे मेको तुइश्शा, ग्येरनीनी। मुल इक्का नाक्त सम्म थुं थाम्चा कली मार मार श्येत जाइनीनी। १पत्रुस ५:१०; २कोरिन्थी ४:१७

7 मारदे श्येत जाइनीनी देंशा हना, इन थमा सुइश्शो थमा कों, जोल कों, दे नाक्चा कली श्येत जाइनीनी। मोपा श्येत जाइतीनी हना, इन थमा सुइक्तीके मीम याप्पाइश्शो सुन क्येडा शुश क्येट लाइब दुम्ब। मिनु येसु ख्रीस्त आ यिचि ना ठेयब सेलतीक, छेडछेड नु मान पतीक दुम्ब। हितोपदेस १७:३, यसेया ४८:१०

8 गे मेको कली मताइतीनी हना यो, दाक्नीनी। मेको कली मुल सम्म मतथु यो, थमा सुइक्तीनी। गे गिश ग्येरना ग्येरन बाक्बो बाक्नीनी, देंने मचाप्नीनी। यूहन्ना २०:२९; २कोरिन्थी ५:७

9 इन थमा सुइक्तीकेमी पाप रे ब्रोंइचा ताइनीनी।

10 साइ डोंइती परमप्रभु यावे आ लोव पाइबपुकीमी गे शिशी ताइब दुम्नीनी, दे लोव पशो बाक्तेक्म। मिनु पाप रे ब्रोंइतीके तुइक्चा कली शुश माल्शो बाक्तेक्म। लूका १०:२४

11 मेकोपुकीमी आन आगामी बाक्बो ख्रीस्त आ सोक्त कली “पाप रे प्रोंइब सु बाक्मे, गेना जाक्बा?” दे हिल्लो पामे बाक्त। मोदेशो पा माल्ना माल्न् ख्रीस्त आ श्येत जचा नु छेडछेडम लचा आ पर्वमी नोले दुम्ब लोव पामे बाक्त। भजन संग्रह २२:-, यसेया ५२:१३- ५३:१२

12 मेकोपुकीमी आन पाला डा मुर आन कली ला लोव मपामे। नोले डा मुर, इन कली यो लोव पा शेंदमे बाक्त। इन कली दोपा शेंदमे बाक्त देंशा हना, परमप्रभु यावेमी आ सोक्त स्वर्ग रे सोइश्शो बाक्त। मेको आ पतीकेमी शेंबपुकीमी इन कली ग्येरपाइक्ब लोव शेंताक्म। परमप्रभु यावे आ स्वर्ग डा गेय पाइबपुकीम यो मेको तचा तुइक्चा दाक्नीम। एफिसी ३:१०

### परमप्रभु आ मुर दिम्शो

१३ मोपतीके इन थुं फ्रेंदीन। गेय पचा डोंइती मिम्तीन। येसु खीस्त जाक्मेनु, इन कली शिशो पाइब, दे आस पा बाक्कीन। लुका १२:३५-३६

१४ मुल टीब आल खोदेशो पा इन डोंइती मतुडक्थु पशो मरिम्शो पचा क्येडा डोन बाक्कीन। रोमी १२:२

१५ इन कली ब्रेचब, येसु खीस्त दोदेशो बाक्मे, गे यो मोदेशो दुम्शा बाक्कीन।

१६ परमप्रभु यावे आ ब्रेक्पाइशो लोवमी “गेपुकी आं कली ला ठेयब सेलीन। मारदे हना गो का ला इन परमप्रभु नड” दे ब्रेक्शो बाक्ब। लेवी १९:२

१७ गेपुकीमी परमप्रभु यावे कली “इं आफ” दे पुंडना पुंडन बाक्नीनी। मेकोमी मुर आन कुल मकोव्रथु, आन पशो कोव्रशा, निसाफ पाइब। मोपतीके गे रागीमी बाक्नीनु, पाप पचा हिनीन। रोमी २:११; फिलिप्पी २:१२

१८ इन किकी पिपी रे “गो नरक लाइब बाक्नीकी” दे तुडक्नीनी। मुल गे नरक लतीक लां रे प्रोंइचा पुंडसीशो बाक्तीनी। दोपा प्रोंइचा पुंडसीशो बाक्तीनी देशा हना, जाम्शा लाइब सुन नु चांदी थाप्शा ममाइ, १कोरिन्थी ६:२०; १कोरिन्थी ७:२३; १पत्रुस ४:३

१९ येसु खीस्तमी मारिड मतुम्शो पाठा बुद पा आंम हुश शाइक्पाइशो इन कली नरक रे प्रोंइतु। हिब्रू ९:१४; यसैया ५३:७; यूहन्ना १:२९

२० परमप्रभु यावेमी रागी सेल्चा क्येडा डोंइती “येसु खीस्त पाप रे प्रोंइब दुम्ब” दे मिम्शो बाक्माक्त। मेको रागी नुप्ची ना इन परबम तुडक्पाइशो बाक्त। रोमी १६:२५-२६

२१ गे येसु खीस्त आ पतीके परमप्रभु यावे कली थमा सुडक्नीनी। मेकोमी येसु खीस्त कली बेक्शो रे सेंपाइशो, छेडछेडम वोइक्तु। मोपतीके गे “परमप्रभु यावेमी इं कली कोव्रब” दे थमा सुइशो आस पने।

२२ दोपा येसु खीस्त आ देशो टिशा, थमा गेय पा पाप रे डोन बाक्नी, मोपा गे लोकब आन कली यो थमा पा दाक्नीनी। गे थमा सुडक्बपुकी इन थुं नेल्लेमी थमा पा दाक्मेनु।

२३ गे नक जरमेशो खोदेशो बाक्नीनी। जाम्शा लाइब ममाइ। गेनायो मजाम्ब दुम्तीनी। मेकोन ब्रोंइचा गेब नु गेना हना यो लीब परमप्रभु यावे आ लोव बाक्ब। यूहन्ना १:१३; याकूब १:१-१८

२४ परमप्रभु यावे आ देशो लोव मार बाक्त देशा हना, रागी डा मुर नेल्ल घांस खोदेशो बाक्नीम। मेको आन दारस बोइशो फू खोदेशो बाक्ब। आ घांस सोव्रब, मिनु फू यो हेम्ब। याकूब १:१०-११

२५ तन्न परमप्रभु यावे आ देशो लोव गेना हना यो लीब। मेको आ ग्येरपाइक्ब लोव बाक्ब। मिनु शेंबपुकीमी मेको इन कली शेंताक्मे। यसैया ४०:६-८

## २

### परमप्रभु आ योव्रशो मुर

१ मोपतीके गे नेल्ल मरिम्शो पचा, मुर आन कली मरिम्शो लोव पतीक नु गाइक्तीके ताइक्तीन। मिनु जोल पतीके, गेहे पतीके नु मुर आन लोव कुरशा गाक्चा नेल्ल ताइक्तीन। याकूब १:२

२ नक थिशो आलम दूध तूचा माल्शो खोदेशो पा, गे यो परमप्रभु यावे आ लोव तुडक्चा मालीन। गे मोदेशो पाइतीनी हना, इन पाप रे ब्रोंइशो थुं बारना बारन लाइब। हिब्रू ५:१२-१३; मत्ती १८:३

३ मारदे हना गेमी परमप्रभु रिम्शो पाइब बाक्ब, दे तुडक्नीनी। भजन संग्रह ३४:१०

४ येसु खीस्त ब्रोंइचा गेब फुल्लु बाक्ब। मेको आ नेक्था लने। मुरपुकीमी मेको कली ममाल्शो फुल्लु खोदेशो पा ताइक्ताक्म। तन्न परमप्रभु यावेमी “मेको कली योव्रशो नु नेल्ल क्येडा दाक्शो बाक्ब” दे मिम्ब। भजन संग्रह ११८:२२; यसैया ८:१४-१५; मत्ती २१:४२

५ मिनु गे यो ब्रोंइचा गेब फुल्लु खोदेशो बाक्नीनी। मोपतीके परमप्रभु यावे आ सोक्तीम सेल्शो खिं डा फुल्लु दुमीन। परमप्रभु यावे आ डोंइती राब्ब मुर दुमीन। आ सोक्त डा चढेतीक गेय पा बाक्कीन। येसु खीस्त आ पतीके परमप्रभु यावेमी इन पशो ताक्ब। एफिसी २:२१-२२; हिब्रू ३:६; रोमी १२:१

६ मारदे हना परमप्रभु यावे आ लोव्नी मार ब्रेकशो बाकब देशा हना “नेनीन, गो सियोन डांडामी फुल्लु का वोडक्नुड। मेको सुर डा फुल्लु दुग्शा, योव्नीशा नु दाक्सीशा बाकब। सु सुमी मेको कली थमा सुदमे, मेको मुर मुने दोक्चा ममाल्नीम” दे ब्रेकशो बाकब। यसैया २८:१६

७ मोपतीके थमा सुडक्बपुकीमी मेको कली दाक्नीम। तन्न थमा मसुडक्ब खिं सेल्बपुकीमी मेको फुल्लु कली ताड्शो बाक्तेक्म। तन्न मेको सुर डा फुल्लु दुग्त्।

८ मिनू लेंशा “मेको फुल्लुमी मुर आन कली दाइल पपाइक्ब। मेको ठेयब फुल्लुमी मुर आन कली थिप्पाइक्ब” दे ब्रेकशो बाकब। मुरपुकीमी परमप्रभु यावे आ लोव्नी मटितीके दाइल पाइसीनीम, दे डोंइती मेको आ पर्वम देशो बाकब। भजन संग्रह ११८:२२; यसैया ८:१४; रोमी ९:३३; लूका २:३४

९ तन्न गे परमप्रभु यावे आ योव्नीशा मुर दुग्तीके, आ राज्य डा चढेब परमप्रभु यावे आ रागी डा मुर दुग्तीनी। मारदे मोदेशो दुग्तीनी देशा हना, परमप्रभु यावेमी इन कली रिग्शो पशा, छिडछिड रे गुंडशा, आंम आ छक लाक्चा डा छेडछेडमी वोड्शो बाक्त्। मिनू अरु नेल्ल आन कली शेंचा, दे मोदेशो दुग्तीनी। प्रस्थान १९:६; यसैया ४३:२१; प्रकाश १:६; ब्यवस्था ४:२०; ब्यवस्था ७:६; एफिसी ५:८

१० डोंइती गे परमप्रभु यावे आ मुर मबाक्नी। मुल परमप्रभु यावे आ मुर दुग्तीनी। डोंइती गे परमप्रभु यावे आ शिशी मतशो बाक्तीनी। तन्न मुल परमप्रभु यावे आ शिशी ताडब दुग्तीनी। होसे २:२५; रोमी ९:२४-२६

### थमा सुडक्ब दोपा बाक्चा माल्नीमी

११ आं दाक्शो लोकबपुकी, गो इन कली इन थुं बारपाइक्तीक लोव्नी पाइनुड। गो रागीम बाक्चानु, रागी डा पौना खोदेशो बाक्नय। मोपतीके इन दला दाक्स पा रागी डा मुर खोदेशो मपने। ग्रांग्रा दिचा डा गेय रे डोन बाक्कीन। मारदे हना मोदेशो गेय इन थमा सुडक्तीक थुं नु जीब। भजन संग्रह ३९:१३

१२ थमा मसुडक्ब आन दातेमी रिग्शो पने। मेकोपुकीमी इन पर्वम “मरिग्शो पाइब बाक्नीम” दे मरिग्शो लोव्नी पाक्तेक्म हना यो, इन रिग्शो पतीक तशा, परमप्रभु यावे नु गुग्ची ना मेकोपुकीमी परमप्रभु यावे कली ठेयब सेल्मेक्ल। मत्ती ५:१६

१३ प्रभु आ पर्वम सरकारमी अधिकार गेशो मुर आन कली टिने। पिप नेल्ल क्येडा ठेयब बाकब। मोपतीके टिचा माल्नीनी। रोमी १३:१-७; तीतस ३:१

१४ मिनू आ वोड्शो ठेयब मुर आन कली यो टिचा माल्नीनी। मेकोपुकी मरिग्शो पाइब आन कली सजाइ गेचा नु रिग्शो पाइब आन कली “गे रिग्शो पाइतीनी” देचा कली वोड्शो बाक्नीम।

१५ परमप्रभु यावे आ दाक्शो मार बाकब देशा हना, इन रिग्शो पतीकेमी मतुडक्ब नु निप्स मपाड्शो आन कली सिक्सी पपतीन। १पत्रुस ३:१६; तीतस २:८

१६ पाप रे प्रोंइचा पुंड्सीशो मुर दुग्शा बाक्कीन। “पाप रे ब्रोंइचा ताइनुड” दे मिग्शा मरिग्शो मपने। परमप्रभु यावे आ वाइलीम वाइल दुग्शा बाक्कीन। गलाती ५:१३; २पत्रुस २:१९

१७ मुर नेल्ल आन कली मान पने। थमा सुडक्ब आन कली दाक्तीने। परमप्रभु यावे कली मान पा हिनीन, पिप कली मान पने। रोमी १२:१०; हितोपदेस २४:२१

### येसु आ श्येत जशो कोंइतीके

१८ गे खिं डा गेय पाइबपुकी, इन होव्नी क्येडा हिंशा टिने। रिग्शो पाइब होव्नी कली ला ममाड, मरिग्शो होव्नी कली यो टिचा माल्नीनी। एफिसी ६:५; तीतस २:९

१९ इन होव्नीमी इन कली बिन्चीम श्येत गेक्तेक्म हना यो, गे परमप्रभु यावे कली मिग्शा, श्येत फाल्शा बाक्कीन। मेको परमप्रभु यावे आ दाक्शो बाकब।

२० गे मरिग्शो पशा, तुग्चा पुंड्सीनीनु, मेको फाल्शा बाक्तीनी हना, मार रिग्शो पनी डा? रिग्शो पशा यो, श्येत गेचा पुंड्सीशा, फाल्शा बाक्तीनी हना, परमप्रभु यावे आ दाक्शो पाइनीनी। १पत्रुस ३:१४; मत्ती ५:१०

२१ मोदेशो पचा, दे योव्नीशा ननी। ख्रीस्त यो इन पर्वम श्येत जशा, इन कली कोंइतीक दुग्त्। मोपतीके गे आ खोदेशो पचा माल्नीनी। १पत्रुस ३:१८; मत्ती १६:२४

22 मेकोमी काइ पाप मपवो। जोल यो मपवो। यूहन्ना ८:४६; यसैया ५२:९

23 मुरपुकीमी मेको कली शुक्शी लोव्र पाम्तेकम हना यो, मेको आन कली लोव्र मलेत्त। मिनु श्येत जशा यो, मुर आन कली हिंच मकोंडद। तन्न ठीक पा निसाफ पाइब कली जिम्मा गेंसाकव।

24 मेको इं पाप क्याम्चा कली शीमी क्येप्शा कांटी थोकशा साइक्या पुंडसाकव। इं पाप पतीक थुं साइक्या नु इं ठीक पतीक थुं प्रोंइचा, दे साइक्या पुंडसाकव। मोपा मेको आ कांटी थोकशो गारपुकीमी गे साशा ठीक दुम्तीनी। १यूहन्ना ३:५; गलाती ३:१३; रोमी ६:८,११

25 डोंइती गे हेंथे गाकब भेडा खोदेंशो बाक्तीनी। तन्न मुल इन गोठला नु इन थुं कोव्रब आ नेक्था लेशशा जाक्तीनी। यसैया ५३:६; यूहन्ना १०:१२

### 3

#### मीश वोंइश कली अरेतीक लोव्र

1 गे मीश मुरपुकी, आंम वोंइश आ देशो टिने। का निकशी वोंइश मुरपुकी परमप्रभु यावे आ लोव्र मटीब बाक्तेकम हना यो, आ मीश आ रिम्शो पशो तशा, लोव्र मपथु यो, थमा सुइकब दुम्नीम। एफिसी ५:२२; १कोरिन्थी ७:१६

2 इन मान पशो नु इन पाप रे डोन बाक्शो तशा, मोदेंशो पाइनीम।

3 रिम्शो पतीक मार बाकब देशा हना, जाम्शा लाइब नोस पचा, चांमी मार मार चुंडसीचा, सुन पांइचा नु शुश क्येट लाइब वा फेक्चा ममाइ, यसैया ३:१८-२३; १तिमोथी २:९

4 मुर आन थुंमी खुइशो जाम्शा मलाइब पांइतीके बाकब। मेको मार बाकब देशा हना, ब्रेम्शो नु सिक्सी पा बाक्तीक थुं बाकब। मेको परमप्रभु यावे आ डोंइती शुश रिम्शो बाकब।

5 साइ डोंइती पाप रे डोन बाक्शो मीश मुरपुकीम परमप्रभु यावे कली आस पा आंम वोंइश कली टिशो बाक्तेकम।

6 सारामी अब्राहाम कली मान पा टिशो बाक्त। मिनु मुल गे यो ठीक गेय पशा, श्येत जचा महिंथु, मेको आ तमी खोदेंशो दुम्तीनी। उत्पत्ती १८:१२

7 गे वोंइश मुरपुकी, आंम मीश नु रिम्शो पा बाक्कीने। मीश मुरपुकी वोंइश मुर खोदेंशो पा बोल्यो मबाक्नीम, दे तुडक्नीनी। मेको मिम्शा, इन मीश कली मान पने। मारदे हना गे निम्फा परमप्रभु यावे आ शिशो ताइब बाक्नीसी। मो पाइतीनी हना, इन पुंडशो लोव्र परमप्रभु यावे आ डोंइती मतेक्सीब। १कोरिन्थी ७:५; एफिसी ५:२५

#### थमा सुइकब आन कली अरेशो

8 मिनु नोले गे नेल्ल थुं का डा दुम्शा, मुर आन कली दाक्शा, इन लोकब नु दाक्मुने। ब्रेम्शो थुं पाइशो मुर दुमीन।

9 इन कली मरिम्शो पाइब आन कली मरिम्शो मपने। इन कली शुक्शी लोव्र पाइब आन कली शुक्शी लोव्र मपने, आसीक गेने। मारदे हना गे आसीक ताइब दुम्चा कली योव्रशो बाक्नीनी। १थिस्सलोनिकी ५:१५

10 मिनु परमप्रभु यावे आ लोव्रमी “सु सु ब्रोंइचा नु रिम्शो बाक्चा दाक्नीमी, मेकोमी शुक्शी लोव्र मपने। सुइ आन कली जोल मपने। मुर नु दुशा बाक्कीन। याकूब १:२६

11 मरिम्शो पचा प्रोंइशा, ठीक गेय ला पने।

12 मारदे हना परमप्रभु यावेमी ठीक पाइब आन कली कोव्रब। आन पुंडशो लोव्र नेंचा कली आ नोफा दाइकब। तन्न मरिम्शो पाइब आन कली मकोव्रब, आन पुंडशो लोव्र यो मनेंब” दे ब्रेक्शो बाकब। भजन संग्रह ३४:१३-१७

#### येसु ख्रीस्त नेल्ल आन क्येडा ठेयब बाकब

13 गे ठीक गेय ला पाइतीनी हना, सुम इन कली श्येत गेबा डा?

14 ठीक पशा यो मोशा श्येत जाइतीनी हना, आसीक ताइब दुम्नीनी। इन कली श्येत गेब कली महिनीन। इन थुमी ग्येथ लुकच मदुमीन। १पत्रुस २:२०; मत्ती ५:१०

15 तन्न इन थुमी “ख्रीस्त ला प्रभु बाक्ब” दे मेको कली ठेयब सेलीन। गे गेना हना यो “इन थमा सुइक्तीके मार में” दे हिल्लो पाइब आन कली लोत्र लेत्चा ठीक दुम्शा बाक्कीन। ब्रेम्शो थुमी रिम्शो लोत्र पा लोत्र लेत्तीने। १पत्रुस २:२१-१४

16 इन थुं डा मिम्तीक कली पाप रे डोन वोतीन। इन कली शुक्शी पाइबपुकी ख्रीस्त आ नेंमी रिम्शो पशो तशा, मुने दोक्मल। १पत्रुस ४:६

17 मरिम्शो पशा श्येत जचा क्येडा ठीक पशा, श्येत जचा परमप्रभु यावे आ दाक्शो बाक्ब।

18 मारदे हना ख्रीस्त यो मुर नेल्ल आन पाप क्याम्चा कली साइक्चा पुंडसाक्ब। ठीक पाइबमी ठीक मपाइब आन श्येत जाप्तु। मो पशा इं कली परमप्रभु यावे आ बाक्तीक चाक्दीप्ब। मोपतीके साइक्चा पुंडसीशा यो, सेंचा पुंडसाक्ब।

19 नोले मेको आ सोक्त लशा, जेल्खानमी बाक्शो सोक्त आन कली लोत्र पाप्तु।

20 मेको सु बाक्तेक्म देशा हना, साइ डोंइती नोआहमी ठेयब डोंगा सेलानु, परमप्रभु यावेमी रिम्ना रिम्न बाक्शो बाक्त। तन्न परमप्रभु यावे कली काइ मटीब, नोआह आ पाला डा बेक्शो मुर बाक्तेक्म। ८ जना मुर चहिं नोआह आ सेल्शो डोंगामी बाक्शा, ब्वाक्कु रे ब्रोंइचा ताम्तेक्म। उत्पत्ती ७:७; २पत्रुस २:५

21 ब्वाक्कुमी खुम्शा गुंडतीके मेको नु गारचा डा बाक्ब। मेकोमी इन कली मुल प्रोंइब। इन रां चिकचा ममाइ, तन्न इन थुं डा मिम्तीके रिम्शो दुम्ल, दे परमप्रभु यावे कली पुंडतीके बाक्ब। मेको नेल्ल येसु ख्रीस्त आ सेंसीशो रे जाक्ब। एफिसी ५:२६; हिब्रू १०:२२

22 मेको स्वर्ग लशा, परमप्रभु यावे आ ग्युरा गे बाक्ब। परमप्रभु यावे आ स्वर्ग डा गेय पाइबपुकी, अधिकार तशोपुकी नु सक्ति पाइइशो नेल्लेमी मेको आ देंशो टीनीम। एफिसी १:२०-२१

## 4

थमा सुइक्ब श्येत जचा माल्नीम

1 दोपा ख्रीस्त रागीम बाक्शा, श्येत जवा, मोपा गो नेल्ल श्येत जचा माल्नय, दे मिम्तीन। सु सु रागीमी श्येत जाइनीमी, मेको मरिम्शो पतीक कली प्रोंइने थुम्शो बाक्नीम।

2 मिनु गे रागीमी बाक्नी सम्म इन दला दाक्स मपथु, परमप्रभु यावे आ दाक्शो पने।

3 डोंइती परमप्रभु यावे कली मतुइक्थु मारेइ मारेइ पाइतीनी, मुल मेको गाप्त। थमा मसुइक्बपुकीमी मार पाइनीम देंशा हना, महिंब दुम्शा आन दला दाक्स पाइनीम। दुक्शा बाक्नीम, शुश जशा तूशा बाक्नीम नु ग्रॉन्ग दिचा डा मूर्ति पूजा पाइनीम। एफिसी २:२-३; तीतस ३:३

4 गे चहिं मुल मेको आन पशो खोदेंशो मपाइनीनी। मोपतीके मेकोपुकी छक लाक्नीम। मिनु इन पबर्म शुक्शी पाइनीम।

5 तन्न मेकोपुकीमी बेक्शो नु ब्रोंइशो मुर आन कली निसाफ पाइब आ डोंइती मेको आ पबर्म लोत्र पचा माल्नीम। २तिमोथी ४:१

6 मोपतीके बेक्शो मुर आन कली यो परमप्रभु यावे आ ग्येरपाइक्ब लोत्र शेंशो बाक्त। परमप्रभु यावे खोदेंशो पा सोक्तीम ब्रोंइचा तामेक्ल, दे रागीमी बाक्मानु, निसाफ पचा पुंडसाक्म। १पत्रुस ३:१९

परमप्रभु आ पपाइइशो गेय

7 रागी नु रागीमी बाक्शो मारेइ मारेइ नुच्चा चिकशो बाक्तेक्म। मोपतीके इन गेय पचा डोंइती मिम्शा नु आंम रां कली अरेशा प्रार्थना पने। १कोरिन्थी १०:११; १यूहन्ना २:१८

8 नेल्ल क्येडा ठेयब मार बाक्ब देंशा हना, शुश दाक्मुचा बाक्ब। मारदे हना दाक्मुतीकेमी शुश पाप यो ग्याम्ब। हितोपदेस १०:१२; याक्ब ५:२०

9 मगाइक्थु बास गेमुने।

10 परमप्रभु यावेमी इन कली गेय का का पपाइशो बाक्त। मोदेशो पा वारच पमुने। परमप्रभु यावेमी गेशो गेय रिम्शो पने।

11 सुमी लोत्र पाइबा, मेकोमी परमप्रभु यावे आ खुइशो लोत्र पवल। सुमी गेय पाइबा, मेकोमी परमप्रभु यावे आ गेशो सक्तिमी पवल। मोपा नेल्लेमी येसु खीस्त आ नेमी परमप्रभु यावे कली ठेयब सेल्लेक्ल। मेको छेडछेडमी बाक्शा, गेना हना यो सक्ति पाइशो बाक्ब। आमैन। रोमी १२:७

### थमा सुइक्ब आन श्येत

12 मिनु आं दाक्शो लोकबपुकी, इन कली थुं थाम्चा डा श्येत शुश दुम्त हना, महिनीन। मेको मारेड ममाइ। इन थमा सुइक्तीके नाक्चा कली बाक्ब। १पत्रुस १:६-७

13 गे खीस्त आ श्येत जशो खोदेशो पा श्येत जाइतीनी हना, ग्येरसीने। मारदे हना आ छेडछेड पा जाक्ची ना शुश ग्येरनीनी। प्रेरित ५:४१; याकूब १:२; रोमी ८:१७

14 खीस्त आ नेमी श्येत जाइतीनी हना, आसीक ताइब दुम्नीनी। मारदे हना छेडछेड डा परमप्रभु यावे आ सोक्त गे नु बाक्ब। मत्ती ५:११; एफिसी १:१३

15 गेपुकी मुर कली साइक्ब, खुइ पाइब, ग्रांया दिचा डा गेय पाइब नु अरु आन कली ग्येतथ लुक्च सेल्शा, सजाइ तपाइक्ब खोदेशो मदुमीन।

16 तन्न गे थमा सुइक्ब दुम्शा, श्येत जाइतीनी हना, मुने मपने। येसु खीस्त आ नेमी परमप्रभु यावे कली ठेयब सेलीन। फिलिप्पी १:२०

17 निसाफ पची ना दुम्चशो बाक्त। परमप्रभु यावे आ खिं डा मुर डोंइती निसाफ पचा पुंडसीनीम। मिनु गो डोंइती डा बाक्तय हना, ग्येरपाइक्ब लोत्र थमा मसुइक्ब आन कली दोदेंब दुम्बा? येरमीया २५:२९; इजीकीएल ९:६

18 मिनु ठीक पाइब मुरपुकी हेरा ब्रोंइचा मताइब दुम्तेक्म हना, थमा मसुइक्ब नु मरिम्शो पाइबपुकी दोदेशो दुम्नीमी? हितोपदेस ११:३१

19 मोपतीके परमप्रभु यावेमी सु कली श्येत जचा गेबा, मेकोपुकीमी ठीक गेय पशा, आंम थुं परमप्रभु यावे कली जिम्मा गेमेक्ल। परमप्रभु यावेमी आ मुर आन कली गेनायो मप्रोंइब। भजन संग्रह ३१:६

## 5

### खाल्पा नु ठिटा आन कली अरेशो

1 गो इन खोदेशो खाल्पा नड। गो थमा सुइक्ब आन दातेमी बाक्शो शेंब खाल्पा इन कली अर्ती गेनुड। गो खीस्त आ श्येत जशो तशो नड। मुल गो जाक्चशो छेडछेड डा मुर यो दुम्ती। २यूहन्ना :१; मत्ती २६:३७,६९; रोमी ८:१७

2 इन कली मार अर्ती गेनुड देंशा हना, गे परमप्रभु यावे आ योव्रशो मुर आन गोठला खोदेशो दुम्शा, मेको आन कली रिम्शो पा कोव्रडीन। इन थुंमी “आं मदाक्शो गेय बाक्ब” दे मिम्शा ममाइ, तन्न “गो मेको गेय दाक्नुड” दे ग्येरशा पने। “क्येट चेम्नुड” दे मिम्शा ममाइ, तन्न रिम्शो शेंतीके गेय शुश पने। यूहन्ना २१:१६; प्रेरित २०:२८; १तिमोथी ३:२-७

3 “गो परमप्रभु यावे आ योव्रशो मुर आन कली हुकुम पाइब दुम्ती” दे ममाइ, तन्न मेको दोदेंब दुम्चा माल्नीमी, इन पशो गेयमी कोंइदीन। इजीकीएल ३४:२-४; २कोरिन्थी १:२४; तीतस २:७

4 नेल्ल क्येडा ठेयब गोठला जाक्मेनु, गे गेना हना यो लीब परमप्रभु यावे आ छेडछेड डा सिरपेच ताइनीनी। हिब्रू १३:२०; १कोरिन्थी ९:२५; २तिमोथी ४:८

5 मिनु गे ठिटापुकी, शेंब खाल्पा आन देंशो लोत्र टिने। गे नेल्ल ब्रेम्शो थुं पाइशो दुम्शा, गेय पमुने। मारदे हना परमप्रभु यावेमी ठेयब लेशो मुर आन कली मकोव्रब, ब्रेम्शो थुं पाइशो मुर आन कली ला शिशी पाइब। एफिसी ५:२१; अय्युब २२:२९; हितोपदेस ३:३४; मत्ती २३:१२; याकूब ४:६

6 मोपतीके गेपुकीमी “नेल्ल सक्ति परमप्रभु यावे केन बाक्ब” दे आ देंशो लोत्र ब्रेम्शो थुंमी ठीक पा टिने। मो पाइतीनी हना, परमप्रभु यावेमी आ मिम्ची ना इन कली ठेयब सेल्लब। याकूब ४:६

7 गेपुकीमी “मार जाइनीकी? मार तूनीकी? मार फेक्नीकी? मार दुम्नीकी?” दे हिंशा, सुर्ता पचा ममाल्नीनी। मारदे हना परमप्रभु यावेमी इन कली कोवब। भजन संग्रह ५५:२१; मत्ती ६:२५; फिलिप्पी ४:६

8 गेय पचा डोंइती मिम्तीन। होस पा बाक्कीन। मारदे हना इन कली मदाक्ब सैतानमी थोत्रलु बेक्शो गुप्स खोदेशो पा “सु कली ब्वाइनुडा” दे माल्ना माल्न गाक्ब। १थिस्सलोनिकी ५:६; लूका २२:३१; २कोरिन्थी २:११

9 गेपुकीमी थमा सुइश्शा “गो सैतान कली तुइक्नुड” दे मेको कली काइ मटिने। रागी नेल्ल डा थमा सुइक्ब लोकबपुकीम मोदेशो श्येत जाइनीम दे तुइक्नीनी।

### पत्रुस आ गेशो आसीक

10 मिनु का निक्शी नाक्त श्येत जनी नोले नेल्ल शिशी पाइब परमप्रभु यावेमी “गेना हना यो छेडछेडमी बाक्चा गेनुडमी” दे खीस्त आ नेमी इन कली ब्रेशो बाक्त। मेकोमी इन कली आ राज्यम गारचा डा सक्ति पाइश्शो नु ठीक सेल्ब। १पत्रुस १:६

11 मेको गेना हना यो नेल्ल क्येडा ठेयब बाक्ब। आमेन।

### नोले डा लोत्र

12 गो सिल्वानस थमा सुइक्ब लोकब बाक्ब, दे मिम्शा, आं ब्रेक्शो आइक्च चिठी मेको नु सोइक्ताक्ड। गो इन कली परमप्रभु यावे आ थमा शिशी मार बाक्मे, मेको शंताक्नी। मिनु गे मेको तुइश्शा, थमा सुइक्चा मप्रोंइथु बाक्कीन। प्रेरित १५:२२

13 इन खोदेशो बेबीलोनम बाक्शो योत्रशोपुकीमी यो इन कली “रिम्शो बाक्कीन” दे आं कली ब्रेक्पाइक्तीमी। मिनु आं तौ मक्कूसमी यो मो देंत। २तिमोथी ४:११

14 गे दाक्मुशा, प्रभु आ नेमी मुम्मुने। परमप्रभु यावेमी खीस्तम बाक्शो नेल्ल इन कली थुं नाइक्चा गेवल।

## २ पत्रुस

**ब्रेक्ब मुर:** पत्रुसमी एको चिठी थमा सुइक्ब आन कली नोले ब्रेक्शो बाक्त।

**गेना ब्रेक्शो:** एको चिठी डोंइती डा क्येडा इच्का नोले ६४-६५ ए. डी.मी मेर ब्रेक्शो बाक्त।

**मार ब्रेक्शो:** पत्रुसमी थमा सुइक्ब आन कली परमप्रभु यावे आ लोत्र पाइब आन ब्रेक्शो लोत्र तुइश्शा नु होस पा बाक्कीन, दे अरेशो बाक्त। मारदे हना मेको आन दाते रे दूली शेंब बोक्तेकम। मेको दूली शेंबपुकी दोदेशो बाक्नीमदेशा हना,

१. प्रभु येसु ख्रीस्त परमप्रभु यावे आ तौ मबाक्ब।
२. क्येट शुश दाक्ब बाक्नीम।
३. मरिम्शो पचा मुने मपाइनीम।
४. नक नु बोल्यो मदुम्शो थमा सुइक्ब आन कली हेंथे लां कोंइनीम।

### डोंइती डा लोत्र

१ गो येसु ख्रीस्त आ वाइल नु आ सोइश्शो, सिमोन पत्रुस नड। इं परमप्रभु यावे नु पाप रे प्रोंडब येसु ख्रीस्त रे पा ठीक दुम्तय, दे थमा सुइश्शा, थुं का दुम्तय। मोपतीके इन कली एको चिठी ब्रेक्ताक्ड।

२ परमप्रभु यावे नु प्रभु येसु कली तुइक्तीकेमी शिशी नु इन थुं नाइक्तीके बारना बारन लल।

### थमा सुइक्चा नु गेय गारचा माल्ब

३ परमप्रभु यावे आ सक्तिमी ब्रोंइचा नु परमप्रभु यावे आ डोंइती बाक्चा कली मार मार माल्या, मेको नेल्ल इं कली मो गेप्टु। दोपा गेप्टु देशा हना, मेको कली तुइक्तीके गेप्टु। आ छेडछेडमी बाक्चा नु आ पतीके नेल्ल पचा कली योत्रतु। १पत्रुस २:४

४ मोपा आ नेल्ल क्येडा ठेयब थोक्शा पशो लोत्र गेप्टु। मेको तुइश्शा, गेपुकी रागी डा मुर आन दला दाक्स पतीके रे ब्रोंइशा, प्रोक्ने चाप्नीनी। मोपा गेपुकी परमप्रभु यावे आ पशो खोदेशो पाइब दुम्नीनी।

५ मोपतीके गे इन थमा सुइक्तीके नु इन पशो गेय गारचा माल्ब। इन पशो गेय नु “परमप्रभु यावे आ दाक्शो मार बाक्मे?” दे तुइक्चा माल्नीनी। गलाती ५:६, २२

६ इन तुइक्तीकेमी आंमा अरेसीचा माल्नीनी। आंमा कली अरेसीतीके, पपाइक्तीके नु थमा सुइक्तीके मप्रोंडनुड, दे खोइली थेक्शा बाक्चा माल्नीनी। इन खोइली थेक्शा बाक्तीकेमी परमप्रभु यावे खोदेशो पा गेय पने।

७ परमप्रभु यावे खोदेशो पा गेय पशा, थमा सुइक्ब आन कली आंम इन लोक्ब खोदेशो पचा माल्नीनी। लोक्ब खोदेशो पा दाक्चा माल्नीनी। गलाती ६:१०

८ गेपुकी मोदेशो शुश पाइतीनी हना, इं प्रभु येसु ख्रीस्त कली तुइक्तीकेमी रिम्शो पा शुश फल सिश्शो खोदेशो दुम्ब।

९ सुम मोदेशो मपाइबा, मेको ब्रा ब्रा पा ताइब बाक्ब। मेको मुर आ डोंइती पशो पाप क्याम्शो बाक्ब, दे प्रेशो बाक्ब। १यूहन्ना २:९, ११

१० मोपतीके आं लोक्बपुकी, गेपुकीमी “गो ब्रेश्शो नु योत्रशो मुर बाक्नीकी” दे गेना हना यो मिम्चा माल्नीनी। मो पाइतीनी हना, गे गेनायो नोले मशोंइसीनीनी।

११ मिनु नोले पाप रे प्रोंडब इं प्रभु येसु ख्रीस्तमी इन कली आ गेना हना यो लीब राज्यमी रिम्शो पा ओत्रचा गेब।

१२ मोपतीके गो इन कली नेल्ल नाक्ती मोदेशो मिम्पाइक्नुड। गेपुकी मेको तुइश्शा नु थमा शेंतीके पाइब दुम्नीनी हना यो, गो इन कली मिम्पाइक्नुड।

१३ गो ब्रोंइडा सम्म इन कली मिम्पाइक्चा रिम्शो बाक्ब, दे मिम्नुड। २कोरिन्थी ५:१

१४ इं प्रभु येसु ख्रीस्तमी “गे शुश नाक्त मलीनेवे” दे कोंइताक्यी। यूहन्ना २१:१८-१९

१५ मिनु आं लचा नोले गे नेल्ल नाक्ती आं शेंशो मिम्ने चाप्नीनी, दे शुश गेय पना पन बाक्नुड।



### छिडछिडम ब्रशो बत्ती

16 गोपुकीमी इन कली इं प्रभु येसु ख्रीस्त आ सक्ति नु आ रागीम जाक्शो आ पबर्म मुर आन सेल्शो कथा मशेंदक। तन्न गोपुकीमी “येसु ख्रीस्त नेल्ल क्येडा ठेयब बाक्ब” दे आंम आंइ मिक्चीम ताइतक।

17 इं आफ परमप्रभु यावेमी मेको कली मान पशा, आ छेडछेड तपाइश्शा “मेको आं दाक्शो तौ बाक्ब। मेको कली तशा, गो ग्येरसाक्यी” देंशो सेंदा छेडछेड रे गूत। मत्ती १७:५

18 गोपुकीमी मेको सेंदा सरीड रे नेंतक। मारदे हना गोपुकी मेको नु परमप्रभु यावे आ डांडाम बाक्शो नकी।

19 मिनु गोपुकीमी साइ डा परमप्रभु यावे आ लोव्र पाइब आन पशो लोव्र मुल रिम्शो पा रुप्तक। गे यो परमप्रभु यावे आ साइ डा लोव्र पाइब आन ब्रेक्शो लोव्र रुप्चा नु तुइक्चा कली छिडछिडमी ब्रशो बत्ती खोदेशो पा होस पा बाक्कीन। मिनु नोले इन थुमी सुक्कुर सौरुल खोदेशो पा छेडछेड दुम्नीनु, आन ब्रेक्शो नेल्ल रुप्नीनी। भजन संग्रह ११९:१०५

20 गोपुकी डोंइती मार रुप्चा माल्नीनी देंशा हना, परमप्रभु यावे आ साइ डा लोव्र पाइब आन ब्रेक्शो लोव्र मुर आन मिम्शो लोव्र ममाइ,

21 मुर आन थुं रे मपीब। तन्न परमप्रभु यावे आ सोक्तीम आ मुर आन कली सुम्शा, परमप्रभु यावे आ लोव्र ब्रेक्पाइश्शो बाक्ब, दे रुप्चा माल्नीनी। १तिमोथी ३:१६-१७

## 2

### दूली शेंबपुकी यहूदा ३-१९

1 साइ डोंइती परमप्रभु यावे आ लोव्र जोल पा दूली शेंबपुकी बाक्मा बाक्त। मुल मोदेशो जोल पा शेंबपुकी इन गुम्तीक खिंमी यो जाक्नीमी। मेकोपुकीमी खुइश्शोमी खतम सेल्ब शेंतीके शेंनीमी। प्रभुमी मेको आन कली ग्याप्शा यो, मेकोपुकी “गो मेको कली मतुइक्नुड” दे जाम्शा लाइब बाक्नीम। मत्ती २४:११; १तिमोथी ४:१

2 शुशेमी आन शेंशो नेंशा, हेंथे पा दला दाक्स यो पाइनीम। मुरपुकीमी मेको आन कली तशा थमा लां कली शुक्शी लोव्र पाइनीम।

3 मेको आन शीम पतीकेमी इन कली दूली लोव्र पा, इन क्येट योल्नीम। मेकोपुकी डोंइती रे नरक लचा चिक्शो बाक्नीम।

4 का निकशी परमप्रभु यावे आ स्वर्ग डा गेय पाइबपुकी यो पाप पतीके शिशी मतामे। परमप्रभु यावेमी मेको आन कली नरकमी ताइश्शा, नेल्ल क्येडा मरिम्शो बाक्तीकेमी सोइक्ताक्मी। मिनु निसाफ पची नाक्त सम्म छिडछिडमी चोक्शा वोइक्तीमी।

5 मिनु परमप्रभु यावेमी साइ डा मुर आन कली शिशी मपथु, नोआह ला ठीक पाइब बाक्तीके मेको नु अरु ७ जना आन कली ला श्येत रे प्रोंइतीमी। मेना परमप्रभु यावेमी रागी नेल्ल ब्वाक्कुमी ब्रीपाइश्शा, आ कली मटीब आन कली साइश्शो बाक्त। उत्पत्ती ८:१८; १पत्रुस ३:२०; २पत्रुस ३:६

6 परमप्रभु यावेमी सोदोम नु गोमोररा माइश्शो सहर निकशी कली मीम क्रोइश्शा, पुलु सेल्शो बाक्त। मेको मटीब आन कली कोंइतीक चिनु बाक्त। उत्पत्ती १९:२४-२५

7 परमप्रभु यावेमी ठीक पाइब लोत माइश्शो मुर कली श्येत रे प्रोंइशो बाक्त। लोतमी पाप पाइब आन कली तशा, आ थुं शुश मनुशो बाक्त।

8 मारदे हना मेको ठीक पाइबमी नाक्त किंत किंत आन ग्रॉग्रा दिचा डा गेय तशा नु नेंशा, आ ठीक मिम्तीक थुं शुश स्वाइश्शो बाक्त।

9 परमप्रभु यावेमी चहिं आंम कली टीब मुर आन कली “दोपा थुं थाम्चा डा श्येत रे गुंइनुडा” दे तुइक्ब। मिनु ठीक मपाइब आन कली सजाइ गेचा कली निसाफ पची नाक्त सम्म वोइक्ब। १कोरिन्थी १०:१३

10 मिनु सु सु आन दला दाक्स नु ग्रांरा दिचा डा गेय पाइनीमी नु अधिकार गेशो आन कली मटीनीमी, मेकोपुकीमी नेल्ल क्येडा शुश सजाइ ताइनीम। मोदेशो जोल पा शेंब काइ महिंब दुम्शा, ठेयब लेशशा, थमा सुइक्ब आन कली शुक्शी पचा महीनीम।

11 तन्न परमप्रभु यावे आ स्वर्ग डा गेय पाइबपुकी मेको आन क्येडा ठेयब नु सक्ति पाइशो बाक्तेकम हना यो, मेको जोल पा शेंब आन कली प्रभु आ डोंइती दोस मगेनीम।

12 मेको दूली शेंब ममिम्ब ग्याइक्चा नु साइक्चा पुंडसीचा कली जरमेशो बस्तु भाव खोदेशो पा, आन तुइशो ला पाइनीम। मेकोपुकीम काइ मरुप्नीम। तन्न शुक्शी पाइनीम। मिनु बस्तु भाव खोदेशो पा खतम दुम्नीम।

13 आन मरिम्शो पशो आ परबम मरिम्शो पाइक्चा पुंडसीनीम। नाक्तीम आन दला दाक्स पशा ग्येरशा बाक्नीमी। गेपुकी नु भोज जशा, मुने दोक्चा डा पा इन गुम्तीक खिं मरिम्शो लुम्सीशो सेल्ब बाक्नीम।

14 मेकोपुकीमी मुर आन मीश तशा वाल्नीम। पाप पचा गेनायो “मोक्ल” मदेनीम। सक्ति मपाइशो थमा सुइक्ब आन कली लेम्शा, आंम दूली लां खोइक्पाइक्नीमी। मेकोपुकी शीम बाक्नीम। मिनु सराप रशो मुर बाक्नीम।

15 ठीक लां प्रोंइशा, हेंथे गाक्शा, बेओर आ तौ बालाम माइशो मुर खोदेशो दुम्तेकम। बालाममी मार पशो बाक्त देशा हना, मरिम्शो गेय पतीके रे ताक्शो क्येट शुश दाक्शो बाक्त। गन्ती २२:७-३५

16 मेकोमी मरिम्शो मिम्शा पचा चिक्तानु, हुइक्चा पुंडसे बाक्त। दोपा हुइक्चा पुंडसे बाक्त देशा हना, मब्वाक्ब गधामी मुर आ सेंदामी लोत्र पवा बाक्त। मिनु परमप्रभु यावे आ लोत्र पाइब कली मेको आ मरिम्शो गेय रे तेक्गा बाक्त।

17 मेको दूली शेंबपुकी ब्वाक्कु मयीब धारा नु फशेम बेरपाइशो गोस्स खोदेशो बाक्नीम। मेको नेल्ल क्येडा छिडछिड डा बाक्तीकेमी वोइक्चा पुंडसीनीम।

18 मेकोपुकीमी हेंथे लोत्र पा पाप रे प्रोंइचा पुंडसीशो नक थमा सुइक्ब दुम्शो मुर आन कली आन हेंथे पतीके ग्रांरा दिचा डा गेय पपाइक्नीम।

19 मेकोपुकीमी “गे पाप रे प्रोंइशो मुर बाक्नीमी” दे लोत्र पाइनीम। तन्न ग्रांरा दिचा डा गेय आन वाइल बाक्नीम। मार मारमी मुर आन कली ग्राबा, मेको आन वाइल दुम्नीम। गलाती ५:१३; १पत्रुस २:१६

20 मुरपुकी इं प्रभु येसु खीस्त कली तुइक्तीकेमी रागी रागी डा मुर आन पाप रे ब्रोंइशो बाक्तेकम हना, मेको लेंशा पापमी मुर कली ग्रात हना, मेको पाप आ वाइल दुम्नीम। मेको आन कली डोंइती डा दुम्तीके क्येडा नोले शुश मरिम्शो दुम वा। मती १२:४५

21 मुरपुकीमी ठीक लां गाक्चा तुइशशा यो, मेको डोंइती रे पाप रे डोन बाक्चा, दे परमप्रभु यावे आ अरेशो लोत्र प्रोंइशा, पापम लेत्तेकम हना, मेको तुइक्चा क्येडा गेनायो मतुइशो हना रिम्शो दुम वा। लूका १२:४७-४८

22 मिनु मुर आन देतीक लोत्र “कुचुममी आ मेशो लेंशा जाइब।” मिनु “पोत्र कली गिश चिक्शा हना यो, लेंशा ग्रांग्रामी गुम्दीब” देशो लोत्र थमा बाक्ब। हितोपदेस २६:११

### 3

#### येसु आ जाक्ची नाक्त

1 आं दाक्शो लोकबपुकी, गो इन कली चिठी निक्शी ब्रेक्ताकड। गो एको चिठी निक्शीमी इन थुंमी मिम्पाइशशा फुकपाइक्ता। २पत्रुस १:१३

2 इन कली मार फुकपाइक्चा दाक्ताकड देशा हना, परमप्रभु यावे आ साइ डा लोत्र पाइब आन ब्रेक्शो लोत्र फुकपाइक्चा दाक्ताकड। पाप रे प्रोंइब प्रभु आ अरेशो लोत्र इन कली मिम्पाइक्चा दाक्ताकड। इन शेंबपुकीमी इन कली शेंताकमे।

3 नोले डा नाक्त शुक्शी पाइबपुकी जाक्नीमी, दे तुइक्चा मालनीनी। मेकोपुकीमी शुक्शी पा, आंम दला दाक्स पाइनीम। १तिमोथी ४:१; यहूदा:१८

4 मेकोपुकीमी “लेशा जाकनुड देंब, ते जाकमे? इं किकी पिपी बेकशो बाक्तेकम। रागी सेल्चा रे ओदेंशो बाक्त” देंनीम। यसैया ५:१९; इजीकीएल १२:२२; मती २४:२८

5 मेको शुक्शी पाइबपुकीमी “डोंइती परमप्रभु यावेमी लोत्र पशा, सरीड कली मसेल। रागी नु ब्वाक्कु यो मफ्रादीम्सी” दे शेंनीम। मती २४:३८; उत्पती १:२, ६, ९; भजन संग्रह २४:२

6 मेना रागी नु मुर नेल्ल आन कली ब्वाक्कुमी खुम्शा सदा बाक्त। २पत्रुस २:५; उत्पती ७:२१

7 मुल सम्म बाक्ब सरीड नु रागी कली “बाक्ल” दे परमप्रभु यावेमी खाल का डा लोत्र पशा, वोदा बाक्त। परमप्रभु यावेमी रागी नु मटीब मुर नेल्ल आन कली मीम क्रोइक्चा, दे निसाफ पची नाक्त सम्म कली चोइश्शो बाक्त।

8 मिनु आं दाक्शो लोकबपुकी, प्रभु कली नाक्त का हजार का बर्स खोदेंशो बाक्ब। मिनु हजार का बर्स नाक्त का खोदेंशो बाक्ब। भजन संग्रह ९०:४

9 प्रभुम आ देंशो लोत्र ठीक पा पाइब। तन्न का निक्शी मुरपुकीमी “प्रभुम आ देंशो मपाइब। नोले ला जाक्ब” देंनीम। तन्न प्रभुमी “सुइ जाम्शा मलमल। आं गे लेम्मल” दे रिम्ब। हबकुक २:३; १तिमोथी २:४

10 प्रभु जाकमेनु, खुइ जाक्शो खोदेंशो पा जाक्ब। मेना सरीड ठेयब रेयके पा जाम्ब। मारेइ मारेइ ग्रोइश्शा नुप्नीम। रागी नु रागीम बाक्शो मारेइ मारेइ मीम खतम दुम्नीम। १थिस्सलोनिकी ५:२-३; मती २४:२९; प्रकाश २०:११; यसैया २४:१९

11 मोदेंशो दुम्मेनु, नेल्ल मीम ग्रोइश्शा, मारेइ मलीब। मोपतीके गेपुकी परमप्रभु यावे कली थमा सुइश्शा, आ देंशो लोत्र टिशा, पाप रे डोन बाक्शा, परमप्रभु आ नेक्था बाक्चा माल्नीनी।

12 गेपुकी परमप्रभु यावे आ नाक्त जाक्ब, दे रिम्शा नु गेना दुम्बा, दे मिम्स डा मिम्स बाक्चा माल्नीनी। मारदे हना मेना सरीड नेल्ल मीम ग्रोइश्शा नुप्ब। मार मार बाक्मे, मेको नेल्ल मीम ग्रोइश्शा नुप्नीम।

13 तन्न आ डोंइती देंशो “नक सरीड नु नक रागी सेल्लुड। मेकेर नेल्ल रिम्शो नु ठीक ला पाइनीम” देंशो लोत्र रिम्नय। यसैया ६५:१७; प्रकाश २१:१; प्रकाश २१:२७

14 आं दाक्शो लोकबपुकी, मोदेंशो रिम्शा, गलती मपाइब नु दोस मताइब दुम्चा कली शुश गेय पने। परमप्रभु यावेमी इन कली मोदेंशो पशो नु थुं नाइश्शा बाक्शो युम्चा दाक्ब। १कोरिन्थी १:७-८

15 प्रभु आ रिम्ना रिम्न बाक्तीके मुर आन कली पाप रे प्रोंइचा बाक्ब, दे मिम्तीन। इं दाक्शो लोकब पावलमी आं खोदेंशो पा, इन कली आ तशो तुइक्तीकेमी चिठी ब्रेक्ताक्व। रोमी २:४

16 मेको आ पर्बम आ चिठी नेल्लेमी लोत्र पाइब। पावल आ ब्रेक्शो लोत्र का निक्शी रुप्चा कली श्येत बाक्ब। मजोक्ब नु थमा मसुइक्ब मुरपुकीमी मेको दूली शेंनीम। परमप्रभु यावे आ ब्रेक्पाइश्शो अरु लोत्र यो दूली शेंनीम। मोपा आंमा जाम्शा लाइब दुम्नीम।

### नोले डा लोत्र

17 मोपतीके आं दाक्शो लोकबपुकी, गे मेको डोंइती रे तुइश्शा, होस पा बाक्कीन। मोपा मबाक्तीनी हना, गेपुकी दूली शेंब आन दूली शेंतीके खोइश्शा, इन थमा सुइक्तीके साम्नीनी।

18 तन्न इं प्रभु, इं कली पाप रे प्रोंइब येसु ख्रीस्त आ शिशी नु मेको कली तुइक्तीकेम बारना बारन लल। मेको कली मुल नु गेना हना यो ठेयब सेल्य। आमेन।

## १ यूहन्ना

**ब्रेक्ब मुर:** एको चिठी येसु आ शेंसीब, यूहन्नाम डोंइती ब्रेक्शो बाक्ब। चिठी ब्रेक्ची ना मेको खाल्पा दुम्शो बाक्त।

**गेना ब्रेक्शो:** एको चिठी गेना ब्रेक्शो बाक्मे, ठीक पा मतुइक्नीम। दूली शेंबपुकी १०० ए. डी. क्येडा डोंइती जाक्शो बाक्तेक्म। मेको आन पर्बम लोत्र ब्रेक्शो बाक्ब। मोपतीके मेना ब्रेक्शो बाक्ब, दे मिम्सीब।

**मार ब्रेक्शो:**

१. ठीक पा थमा सुइश्शो कोंइतीके यूहन्ना १:५-२:२७

२. परमप्रभु यावे आ मुर दुम्शो दोपा तुंडसीबा यूहन्ना २:२८-४:२१

**थमा सुइक्ब आन कली ठेयब शेंतीके**

1 नेल्ल क्येडा डोंइती रे बाक्शो, सु बाक्त देंशा हना, ब्रोंइचा गेब लोत्र माइश्शो बाक्त। गोपुकीमी मेको आ लोत्र नेंतक। आंइ मिक्चीमी ताइतक। आंइ मिक्चीमी कोव्रतक। आंइ गुइमी थीतक। यूहन्ना १:१; यूहन्ना १:१४; यूहन्ना १:४

2 मेको ब्रोंइचा गेब लोत्र माइश्शो रागीमी तपांडसीचा पुंडसाक्ब। मिनु गो मेको कली ताइतक। मोपतीके गोपुकीमी मेको आ लोत्र शेंनीकी। मिनु इन कली यो गेना हना यो, इं आफ नु बाक्चा आ पर्बम शेंनीकी। मेको गेना हना यो ब्रोंइशा बाक्तीक माइश्शो डोंइती आ आफ परमप्रभु यावे नु बाक्त। मिनु परमप्रभुमी मेको आंइ कली कोंइताक्ब।

3 मिनु आंइ तशो नु नेंशो इन कली शेंनीकी। मारदे हना गो नेल्ल थुं का डा दुम्यल। मिनु गो नेल्ल इं आफ परमप्रभु यावे नु आ तौ येसु ख्रीस्त नु थुं का डा बाक्नय।

4 गो नेल्ल इं थुं ग्येरसीशा बाक्च, दे एको चिठी ब्रेक्शा, इन कली सोइक्ताक्ब। १ यूहन्ना ५:१३; यूहन्ना १५:११; यूहन्ना १६:२४

**परमप्रभु छेडछेड बाक्ब**

5 मेकोमी आंइ कली नेंपाइश्शो लोत्र इन कली शेंनीकी। मार लोत्र शेंनीकी देंशा हना, परमप्रभु यावे छेडछेड बाक्ब। मिनु मेको नु छिडछिड काइ मबाक्ब। याकूब १:१७

6 गोपुकीमी छिडछिडम गाक्शा यो “परमप्रभु यावे नु थुं का डा बाक्नय” देंतय हना, जोल्फे दुम्यन। थमा गेय मपाइनय। १ यूहन्ना २:४

7 मेको छेडछेडमी बाक्शो खोंदेंशो पा, गो छेडछेडमी गाक्तय हना, अर्को थमा सुइक्बपुकी नु थुं का डा दुम्यन। मिनु आ तौ येसु आ हुशेमी इं मरिम्शो पशो नेल्ल क्याम्ब। हिबू ९:१४; प्रकाश १:५

8 गोपुकीमी “मरिम्शो काइ मपक” देंतय हना, इं आंमा मिक्च सिल्शो बाक्नय। इं थुं आगामी थमा मबाक्ब।

9 गोपुकीमी “मरिम्शो पाइतक” देंतय हना, इं मरिम्शो पतीके क्याम्शा, इं कली शेक्ब। मारदे हना मेको आ देंशो पाइब नु ठीक पाइब बाक्ब। भजन संग्रह ३२:३-५; हितोपदेस २८:१३

10 गोपुकीमी “मरिम्शो काइ मपक” देंतय हना, मेको कली जोल्फे सेल्नय। मिनु आ देंशो लोत्र इं थुंमी मलीब। रोमी ३:१०-१८

## 2

**पाप रे प्रोंइब येसु ख्रीस्त बाक्ब**

1 मिनु आं आलपुकी, इन कली मारदे ब्रेक्ताक्ड देंशा हना, गो इन कली “मरिम्शो मपने” देंचा कली ब्रेक्ताक्ड। मिनु थमा सुइक्ब कामी पाप पाप्तु हना, मेको आ पर्बम आ आफ कली पुंडब का बाक्ब। मेको पुंडब सु बाक्ब देंशा हना, मेको नेल्ल ठीक पाइब येसु ख्रीस्त बाक्ब।

2 दोपा नेल्ल ठीक पाप्टु देंशा हना, मरिम्शो पाइब आन बेक्तीकेमी साइक्चा पुंडसाक्व। इं पाप कली ला ममाइ, तन्न रागी नेल्ल डा मुर आन पाप क्याम्चा कली यो साइक्चा पुंडसाक्व। १यूहन्ना ४:१०; कलस्सी १:२०; यूहन्ना ११:५१-५२

3 मिनु गोपुकी येसु खीस्त आ मुर दुम्शो, दोपा तुइक्नय देंशा हना, परमप्रभु यावे आ अरेशो लोव्र पना पन बाक्तीके येसु खीस्त कली थमा पा तुइक्नय।

4 मिनु सुमी “गो येसु खीस्त आ मुर दुम्शा, मेको तुइक्नुड” देंबा, तन्न आ अरेशो लोव्र मटीबा, मेको जोल्फे बाक्ब। मोदेंशो मुर आगामी परमप्रभु आ थमा पतीके मबाक्ब।

5 सु चहिं आ देंशो लोव्र पना पन बाक्बा, मेको मुरुमी परमप्रभु यावे कली थमा पा दाक्ब। मोदेंशो दुम्शो मुरुमी “गो येसु खीस्त आ मुर दुम्ती” दे तुइक्ब। यूहन्ना १४:२१-२३

6 मिनु सुमी “गो येसु खीस्त नु बाक्नुड” देंबा, मेको येसु खीस्त खोदेंशो दुम्चा माल्ब। यूहन्ना १३:१५; १पत्रुस २:२१-२३

### थमा सुइक्ब आन दाक्मुशो

7 आं दाक्शो थमा सुइक्ब लोकबपुकी, गो इन कली नक अरेशो लोव्र मब्रेक्तु। एको अरेशो लोव्र माइत बाक्ब। गोपुकी मेको डोंइती रे पाइनीनी। मिनु गे मेको माइत अरेशो लोव्र नेंशो बाक्तीनी। यूहन्ना ११:३४; २यूहन्ना :५

8 मिनु मेको ब्रेक्शा यो गो इन कली नक अरेशो लोव्र ब्रेक्नुड। मारदे हना मेको नक अरेशो लोव्र येसु खीस्तमी खाप्टु। मिनु गोपुकी यो पाइनीनी। गो मेको मारदे ब्रेक्ताक्ड देंशा हना, मुल छिडछिड जाम्ना जाम्ना लाइब। मिनु थमा छेडछेड बारना बारन बाक्ब। यूहन्ना ८:१२; रोमी १३:१२

9 मिनु सुमी “गो परमप्रभु यावे आ छेडछेडमी बाक्नुड” देंबा, तन्न आ लोकब आन कली मदाक्बा, मेको छेडछेडमी ममाइ, छिडछिडमी बाक्ब। १यूहन्ना ४:२०

10 सु चहिं आ थमा सुइक्ब लोकब आन कली दाक्बा, मेको छेडछेडमी गाक्ना गाक्न बाक्ब। मोदेंशो दुम्शो मुरुमी मरिम्शो गेय मपाइब।

11 सु चहिं आ लोकब आन कली मदाक्बा, मेको मुर छिडछिडमी गाक्ब। मिनु ते लाइबा मतुइक्ब। छिडछिडमी मेको कली मिक्च मताइब सेल्ब।

### रागी नु रागी डा थोव्रक

12 आं दाक्शो तमी तौपुकी, गो इन कली मारदे ब्रेक्ना ब्रेक्न बाक्ती देंशा हना, इन पशो मरिम्शो नेल्ल येसु खीस्त आ नेंमी क्याम्सीशो बाक्त। मोपतीके गो इन कली ब्रेक्ना ब्रेक्न बाक्ती।

13 आम आफपुकी, गो इन कली मारदे ब्रेक्ना ब्रेक्न बाक्ती देंशा हना, गे मेको डोंइती रे बाक्ब कली तुइक्नीनी। मोपतीके गो इन कली ब्रेक्ना ब्रेक्न बाक्ती। टेयब वोंइश आलपुकी, गो इन कली मारदे ब्रेक्ना ब्रेक्न बाक्ती देंशा हना, गे सैतान कली ग्रातीनी। मोपतीके गो इन कली ब्रेक्ना ब्रेक्न बाक्ती। मिनु आं तमी तौपुकी, गो इन कली मारदे ब्रेक्ताक्ड देंशा हना, गे इं आफ परमप्रभु यावे कली तुइक्नीनी। मोपतीके गो इन कली ब्रेक्ताक्ड। यूहन्ना १:१

14 मिनु आं आलपुकी, गो इन कली मारदे ब्रेक्ताक्ड देंशा हना, गे इं आफ कली तुइक्नीनी। गो आम आफ इन कली मारदे ब्रेक्ताक्ड देंशा हना, गे डोंइती रे बाक्ब कली तुइक्ब बाक्नीनी। गो टेयब वोंइश आल इन कली मारदे ब्रेक्ताक्ड देंशा हना, गोपुकी बोल्यो दुम्तीनी। गे परमप्रभु यावे आ लोव्र इन थुमी वोइशशा, सैतान कली ग्रातीनी। मोपतीके गो इन कली ब्रेक्ताक्ड। एफिसी ६:१०;

15 गोपुकी रागी नु रागी डा थोव्रक कली मदाक्तीन। सु चहिं रागी कली दाक्बा, मेको आ थुमी इं आफ, परमप्रभु यावे आ दाक्शो मबाक्ब। याकूब ४:४

16 मिनु रागीमी मार बाक्ब देंशा हना, मेको मुर आन रांमी मार मार पचा दाक्नीमी, मेकोन पाइनीमी। मेको आन मिक्चीमी मार मार कोव्रचा दाक्नीमी, मेकोन कोव्रथ लाइनीम। आन शुश शोंप आ पर्बम टेयब लेत्तीके इं आफ परमप्रभु यावे रे ममाइ, रागी डा मुर आन पतीके बाक्ब।

17 मिनु रागी नु रागी डा मुर आन दाकशो नेल्ल जाम्ब। सु चहिं परमप्रभु यावे आ देशो पाइबा, मेको मुर गेना हना यो ब्रॉइशा बाकब।

### दूली शेंब जाकतेकम

18 आं तमी तौपुकी, रागी जाम्बशो बाकब। दोपा तुडक्ताक्य देशा हना, ख्रीस्त आ पर्वम दूली शेंब का जाकब, दे डोंइती रे तुइश्शो ननी। ख्रीस्त आ पर्वम दूली शेंब शुश जाकतेकम। मोपतीके रागी जाम्बशो बाकब, दे तुडक्ताक्य। १पत्रुस ४:७; मती २४:२४; २थिस्सलोनिकी २:३-४

19 मेको दूली शेंबपुकी ई दाते रे यूतेकम। मेकोपुकी चहिं ई खोदेशो पा येसु ख्रीस्त कली थमा सुइक्ब मनम। ई खोदेशो पा येसु ख्रीस्त कली थमा सुइक्ब नम हना, गोपुकी नु काथा बाकम वा। तन्न ई दाते रे गूशा लाम्तेकम। मिनु ई खोदेशो पा येसु ख्रीस्त कली थमा सुइक्ब मनम, दे तुइसीब। प्रेरित २०:३०; १कोरिन्थी ११:१९

20 येसु ख्रीस्तमी इन कली परमप्रभु यावे आ सोक्त गेप्टु। मोपतीके नेल्ल तुइक्नीनी।

21 इन कली एको लोत्र मारदे ब्रेक्ताकड देशा हना “गे मतुइक्ब ननी” दे ममिम्नुड। थमा लोत्र तुइक्नीनी। मिनु मेको इन तुइश्शो थमा लोत्र क्येडा जोकब सेल्चा, दे ब्रेक्ताकड। थमा शेंतीकेमी येसु ख्रीस्त आ पर्वम जोल मबाकब।

22 दूली शेंबमी मार शेंब देशा हना “येसु ख्रीस्त परमप्रभु यावे आ सोइश्शो ममाइ। परमप्रभु यावे नु आ तौ पोबु मनसी” दे शेंब। मेको ख्रीस्त आ पर्वम दूली लोत्र शेंब बाकब।

23 सु सुमी “येसु ख्रीस्त परमप्रभु यावे आ तौ ममाइ” दे शेंनीमी, मेको ई आफ परमप्रभु यावे नु थुं का डा मबाक्नीम। सु सुमी चहिं “येसु ख्रीस्त परमप्रभु यावे आ तौ बाकब” दे शेंनीमी, मेको ई आफ, परमप्रभु यावे नु थुं का डा बाक्नीम। यूहन्ना ५:२३; १यूहन्ना ४:१५

24 मिनु इन डोंइती रे नेशो शेंतीके मिम्शा बाक्कीन। इन डोंइती रे नेशो शेंतीके मिम्शा बाक्तीनी हना, गोपुकी ई आफ, परमप्रभु यावे नु आ तौ नु थुं का डा दुम्शा बाक्नीनी।

25 परमप्रभु यावेमी “गो इन कली गेना हना यो ब्रॉइशा बाक्चा गेनुड” देशो बाकब।

26 मुर का निक्शीमी इन कली दूली शेंनीमी। मोपतीके गो इन कली एको लोत्र ब्रेक्ताकड।

27 येसु ख्रीस्तमी इन कली परमप्रभु यावे आ सोक्त गेप्टु। मिनु मेको गोपुकी नु बाकब। मेको परमप्रभु यावे आ सोक्त गोपुकी नु बाक्मेनु, अर्को शेंब ममाल्नीनी। परमप्रभु यावे आ सोक्तीमी इन कली नेल्ल शेंना शेंन बाकब। मेको आ शेंशो थमा बाक्तीके जोल मदुम्ब। मेकोमी डोंइती इन कली शेंशो टिशा, मेको नु थुं का डा दुम्शा, बाक्कीन। यूहन्ना १६:१३; २कोरिन्थी १:२१-२२; येरमीया ३१:३४

28 आं तमी तौपुकी, येसु ख्रीस्त नु थुं का डा दुम्शा बाक्कीन। मेको यिमेनु, गोपुकी महिंब दुम्ने चाप्यल। मेको आ डोंइती मुने मदोक्कयल।

29 “येसु ख्रीस्त नेल्ल ठीक पाइब बाकब” दे तुडक्ताक्नी हना, सु सुम ठीक पाइनीमी, मेको नेल्ल परमप्रभु आ आलपुकी नमी, दे तुइक्नीनी। १यूहन्ना ३:७-१०

## 3

### परमप्रभु आ आल दुम्शो

1 ई आफोमी ई कली शुश दाकशा “परमप्रभु यावे आ तमी तौ” दे नें वोइश्शो बाकब। मिनु गोपुकी आ तमी तौ दुम्तय। मोपतीके रागी डा मुरपुकीमी ई कली मतुइक्नीम। मारदे मतुइक्नीम देशा हना, मेकोपुकीमी येसु ख्रीस्त कली यो मतुइक्नीम। यूहन्ना १:१२; यूहन्ना १६:३

2 आं दाकशो लोकबपुकी, मुल गोपुकी परमप्रभु यावे आ आल दुम्तय। नोले गो दोदेशो दुम्नया, मारेइ मतुइक्नय। मिनु येसु ख्रीस्त गूमेनु, गोपुकी मेको खोदेशो दुम्नय। दोपा मेको खोदेशो दुम्नय देशा हना, गोपुकी मेको कली दोदेशो बाक्मे, दे तशा, मेको खोदेशो दुम्नय। रोमी ८:१७; फिलिप्पी ३:२१; कलस्सी ३:४

3 मिनू सु मेको आ मग्रूम सम्म रिम्शा बाक्बा, मेको येसु ख्रीस्त पाप रे डोन बाक्शो खोदेशो पा, मेको यो पाप रे डोन बाक्ब।

4 मिनू सुम मरिम्शो पाइबा, मेकोमी परमप्रभु यावे आ अरेशो लोत्र मटीब। मरिम्शो मार बाक्ब देशा हना, परमप्रभु यावे आ अरेशो लोत्र मटिचा मरिम्शो बाक्ब।

5 मरिम्शो क्याम्चा कली येसु ख्रीस्त जाक्त, दे तुइक्नीनी। मिनू मेकोमी काइ मरिम्शो मपवा। यसैया ५३:४-६; यूहन्ना १:२९; १ पत्रुस २:२४; यसैया ५३:९; यूहन्ना ८:४६

6 सु चहिं मेको नु थुं का डा दुम्शा बाक्बा, मेकोमी मरिम्शो मपाइब। सुम चहिं मरिम्शो पना पन बाक्बा, मेको येसु ख्रीस्त नु थुं का डा मद्रुम्शु, मेको कली मतुइक्ब। रोमी ६:११,१४

7 आं आइक्च आलपुकी, दूली लोत्र शोब आन लोत्र मनेनीन। सुम ठीक गेय पाइबा, मेको मुर यो येसु ख्रीस्त खोदेशो पा ठीक पाइब बाक्ब। १यूहन्ना २:२९

8 सु चहिं मरिम्शो पना पन बाक्बा, मेको मुर सैतान रे जाक्शो बाक्ब। मारदे हना सैतान डोंइती रे मरिम्शो पना पन बाक्शो बाक्ब। मोपतीके परमप्रभु यावे आ तौ सैतान आ गेय थुम्चा कली रागीमी जाक्त। यूहन्ना ८:४४

9 परमप्रभु यावे आ आलपुकीमी पाप मपाइनीम। मारदे पाप मपाइनीम देशा हना, परमप्रभु आ थुं मेको आन थुंमी बाक्ब। मोपतीके परमप्रभु आ आलपुकीम पाप मपाइनीम। १यूहन्ना ५:१८

10 मिनू तेको मुर परमप्रभु यावे आ आल बाक्नीमी नु तेको मुर सैतान आ आल बाक्नीमी, दे तुंडसीब। दोपा तुंडसीब देशा हना, सु सु ठीक गेय मपाइनीमी नु आ लोकब आन कली मदाक्नीमी, मेको परमप्रभु यावे आ आल मनमी। मेको सैतान आ आल बाक्नीम। यूहन्ना ५:१८

11 मिनू इन डोंइती रे नेशो लोत्र मार बाक्त देशा हना, गोपुकी दाक्मुचा मालनय। यूहन्ना १३:३४

12 काइन खोदेशो दुम्चा मद्रुम्ब। काइनमी सैतान आ मुर दुम्शा, आ लोकब कली सदा बाक्त। काइनमी आ लोकब कली मारदे सदा बाक्त देशा हना, आ थुं डा गेय मरिम्शो बाक्माक्त। आ लोकब आ गेय चहिं परमप्रभु यावे आ डोंइती ठीक बाक्माक्त। उत्पत्ती ४:८

13 आं लोकबपुकी, रागी डा मुरपुकीमी इन कली मदाक्थु श्येत गेमेनु, छक मलाक्कीन। मत्ती ५:११; यूहन्ना १५:१८-१९

14 गोपुकी बेक्तीक राज्य रे पा, ब्रोंइतीक राज्यमी बाक्नय। दोपा तुइक्नय देशा हना, थमा सुइक्ब लोकब आन कली दाक्नय। सुम चहिं मदाक्बा, मेको बेक्तीक राज्यमी बाक्ब। यूहन्ना ५:२४

15 सुम थमा सुइक्ब लोकब आन कली मदाक्बा, मेको मुर साइक्ब बाक्ब। मिनू सुम थमा सुइक्ब लोकब आन कली साइक्बा, मेको गेना हना यो ब्रोंइशा बाक्चा मताइब, दे तुइक्नीनी। मत्ती ५:२१-२२

16 मिनू लोकब आन कली दाक्चा, दोपा तुंडसीब देशा हना, येसु ख्रीस्त इं कली दाक्शा, साइक्चा पुंडसाक्ब। मिनू गोपुकीमी यो लोकब आन कली दाक्चा मालनय। थमा सुइक्ब लोकब आन कली मबेक्या सम्म वारच पचा मालनय। यूहन्ना १५:१३

17 सुमी शुश शोप थिशा यो, लोकब आन कली श्येत जशो तशा “गो मारेइ मगेनुड” दे मिम्बा, मेको मुर आ थुं रे परमप्रभु यावे आ गेशो दाक्तीक सक्ति यो जाम्शा लाइब। ब्यवस्था १५:७; १यूहन्ना ४:२०

18 आं आइक्च आलपुकी, गोपुकी दाक्मुय। मिनू “इ कली दाक्नुड” दे लोत्र पशा ममाइ, तन्न पतीकेमी दाक्मुचा मालनय। याकूब २:१५-१६

19 गोपुकी थमा पा दाक्शा, गेय पाइतय हना, इं थुंमी “थमा लां खोइक्ब नय” दे थमा पा तुइक्नय।

20 मिनू इं थुंमी इं कली दोस गेप्टु हना, इं थुं क्येडा परमप्रभु यावे टेयब बाक्ब। मिनू मेकोमी नेल्ल तुइक्ब। लूका १५:२०-२२

21 आं दाक्शो लोकबपुकी, इं थुंमी इं कली दोस मगेप्टु हना, गोपुकी महिथु, परमप्रभु यावे आ डोंइती जाक्दीनय।

22 मिनू गो महिथु पुंडतय हना, इं पुंडशो गेब। मारदे हना गोपुकी आ अरेशो लोत्र पशा, आ दाक्शो पाइनय। मर्कूस ११:२४

23 मिनु आ अरेशो लोत्र मार बाक्ब देशा हना, परमप्रभु यावे आ सोइश्शो येसु ख्रीस्त कली थमा सुइक्चा नु इं दातेमी दाक्मुचा इं कली अरेशो लोत्र बाक्ब। यूहन्ना ६:२९; यूहन्ना १५:१७

24 सुमी आ अरेशो लोत्र पाइबा, येसु नु थुं का डा बाक्ब। मिनु येसु यो मेको मुर नु थुं का डा बाक्ब। परमप्रभु यावे नु गोपुकी थुं का डा दुम्तय, दे दोपा तुइक्नय देशा हना, मेकोमी गेशो सोक्तीमी शेंशो रे तुइक्नय। १ यूहन्ना ४:१३; रोमी ८:९

## 4

थमा नु जोल दोपा तुंडसीबा?

1 आं दाक्शो लोकबपुकी, शेंबपुकीमी शेंदमेनु, गेपुकीमी परमप्रभु यावे रे पा शेंनीमी देय मशेंनीमी मेको रूपीन। मारदे हना रागीमी शुश दूली पा, परमप्रभु यावे आ लोत्र पाइब बाक्नीम। मती ७:१५

2 परमप्रभु यावे आ सोक्त आ शेंतीक दोपा तुंडसीब देशा हना, सुमी “येसु ख्रीस्त परमप्रभु यावे आ सोइक्तीके रागीम जाक्त” देबा, मेको मुर परमप्रभु यावे नु थुं का डा बाक्ब।

3 सुम चहिं “येसु परमप्रभु यावे आ सोइश्शो ममाइ” दे शेंबा, मेको परमप्रभु यावे नु थुं का डा मबाक्ब। मेको येसु आ पर्वम दूली शेंब बाक्ब। येसु आ पर्वम दूली शेंथ जाक्ब, दे नेतीनी। मिनु मेको मुल रागीमी बाक्ब।

4 आं आइक्च आलपुकी, गेपुकी परमप्रभु यावे नु थुं का डा दुम्शा, मेको रागीमी बाक्ब दूली शेंब आन कली ग्रातीनी। मारदे हना रागी डा मुर आन थुंमी बाक्शो दूली शेंब सोक्त क्येडा इन थुंमी बाक्ब परमप्रभु यावे आ सोक्त टेयब बाक्ब।

5 मेको येसु ख्रीस्त आ पर्वम दूली शेंबपुकी रागी डा मुर बाक्नीम। मोपतीके आन शेंतीके परमप्रभु यावे के ममाइ, रागी डा बाक्ब। मिनु रागी डा मुरपुकी मेको आन शेंशो दाक्नीमी। यूहन्ना १५:१९

6 गोपुकी चहिं परमप्रभु यावे नु थुं का डा बाक्नय। सुमी परमप्रभु यावे कली तुइक्बा, मेकोमी आंइ शेंशो टीब। सु चहिं परमप्रभु यावे नु थुं का डा मबाक्बा, मेकोम आंइ शेंशो मटीब। मोपा थमा बाक्बा देय दूली शेंतीक बाक्बा, दे तुइक्ने चाप्नय। यूहन्ना ८:४७; १कोरिन्थी १४:३७

**परमप्रभुमी दाक्मुपाइक्ब**

7 आं दाक्शो लोकबपुकी, दाक्मुय। मारदे हना परमप्रभु यावेमी थमा सुइक्ब आन कली दाक्मुपाइक्ब। सुमी दाक्बा, मेको परमप्रभु यावे आ आल दुम्शा, परमप्रभु यावे कली तुइक्ब।

8 सुम चहिं मदाक्बा, मेकोमी परमप्रभु यावे कली मतुइक्ब। मारदे हना परमप्रभु यावे दाक्ब बाक्ब।

9 परमप्रभु यावेमी दोपा आ दाक्चा कोंइताक्व देशा हना, आ का ला तौ रागीमी सोइक्ताक्व। मिनु आ तौ साइक्चा पुंडसीतीके इं कली गेना हना यो ब्रोंइशा बाक्चा गेप्टु। यूहन्ना ३:१६

10 मिनु परमप्रभु यावे आ दाक्चा मार बाक्ब देशा हना, गोपुकी डोंइती परमप्रभु यावे कली काइ मदाक्ताक्व हना यो, परमप्रभु यावेमी इं कली दाक्ताक्व। गिश दाक्ताक्व देशा हना, आंम तौ कली साइक्चा पुंडसीब पपाइक्चा कली रागीमी सोइक्ताक्व। इं कली मरिम्शो गेय नु सैतान आ राज्य रे प्रोंइचा, दे साइक्चा पुंडसीचा कली रागीमी सोइक्ताक्व।

11 आं दाक्शो लोकबपुकी, परमप्रभु यावेमी इं कली दोपा दाक्ता, मोपा गोपुकी यो दाक्मुचा माल्नय।

12 मुरपुकीम परमप्रभु यावे कली गेनायो मतामे। तन्न गोपुकी दाक्मुयानु, परमप्रभु यावे इं नु थुं का दुम्त। मिनु परमप्रभु यावे आ दाक्तीक इं थुंमी लीब। यूहन्ना १:१८

13 परमप्रभु यावेमी इं कली आ सोक्त गेप्टु। मोपतीके गो परमप्रभु यावे नु थुं का डा दुम्नय नु मेको गो नु थुं का डा दुम्शो तुइक्नय।

14 मिनु गोपुकी परमप्रभु यावेमी आ तौ रागीमी सोइश्शो ताइतक। गोपुकीमी “इं आफ, परमप्रभुमी आ तौ कली मुर आन कली पाप रे प्रोंइचा, दे रागीमी सोइक्ताक्व” दे शेंना शेंन बाक्नीकी। यूहन्ना ३:१७



15 सुमी “येसु परमप्रभु यावे आ तौ बाक्ब” देंबा, मेको परमप्रभु यावे नु थुं का डा बाक्ब। मिनु परमप्रभु यावे यो मेको नु थुं का डा बाक्ब। १यूहन्ना ५:५

16 मोपतीके गोपुकी “परमप्रभु यावेमी इं कली दाक्ब” दे तुइश्शा थमा सुइक्बनय। परमप्रभु यावेमी मुर आन कली दाक्ब। सुमी दाक्ना दाक्न बाक्बा, मेको परमप्रभु यावे नु थुं का डा बाक्ब। परमप्रभु यावे यो मेको नु थुं का डा बाक्ब।

17 दोपा मुर आन कली दाक्चा रिम्शो दुम्त देंशा हना, गोपुकी परमप्रभु यावे आ निसाफ पची नाक्त महिनय। मारदे हना गोपुकी परमप्रभु यावे नु थुं का डा दुम्शा, रागीमी बाक्नय। १यूहन्ना २:२८

18 मिनु दाक्ना दाक्न बाक्तय हना, महिनय। मारदे हना मुरपुकी सजाइ तशा हिंनीम। मिनु सु हिंबा, मेको आ दाक्शो शुश बाक्ब।

19 गोपुकी चहिं परमप्रभु यावे कली मारदे दाक्नय देंशा हना, मेकोमी डोंइती इं कली शुश दाक्ताक्व।

20 सुमी चहिं “गो परमप्रभु यावे कली दाक्नुड” देंबा, मिनु थमा सुइक्ब लोकब आन कली काइ मदाक्बा, मेको मुर आ देंशो लोत्र यो जोल बाक्ब। मारदे हना सुमी आ नु बाक्शो लोकब आन कली मदाक्बा, मेकोमी मुर आन मतशो परमप्रभु यावे कली दोपा दाक्ने चाप्बा डा? मचाप्ब। १यूहन्ना ३:१७

21 मिनु परमप्रभु यावेमी इं कली अरेशो लोत्र मार बाक्त देंशा हना “सुमी परमप्रभु यावे कली दाक्बा, मेकोमी थमा सुइक्ब आन कली यो दाक्चा माल्ब” दे शेंशो बाक्त। मकूस १२:२९-३१

## 5

### थमा सुइक्ब सक्ति पाइश्शो बाक्नीम

1 मिनु सुमी “येसु परमप्रभु यावे आ सोइश्शो ख्रीस्त बाक्ब” दे थमा सुइक्बा, मेको मुर परमप्रभु यावे आ आल बाक्ब। मिनु सुमी आफ कली दाक्बा, मेकोमी आ आल कली यो दाक्ब।

2 गोपुकी थमा पा परमप्रभु यावे आ आल आन कली दाक्नय, दे दोपा तुइक्नय देंशा हना, परमप्रभु यावे कली दाक्नय। मिनु आ अरेशो लोत्र टीनय।

3 गोपुकीमी “परमप्रभु यावे कली दाक्नय” देंतय हना, आ अरेशो लोत्र टिशा पाइनय। आ देंशो लोत्र टिशा पचा श्येत ममाइ। यूहन्ना १४:१५, २३, २४; मत्ती ११:३०

4 मिनु परमप्रभु यावे आ आलपुकीमी रागी डा मुर आन दाक्शो गेय कली ग्रानीम। दोपा ग्रानीम देंशा हना, येसु ख्रीस्त कली थमा सुइक्चा मप्रोंइथु ग्रानीम। यूहन्ना १६:३३; १कोरिन्थी १५:५७

5 सु सुमी ग्रानीम देंशा हना “येसु परमप्रभु यावे आ तौ बाक्ब” दे थमा सुइक्बमी ग्रानीम। १यूहन्ना ४:४

### परमप्रभु आ तौ आ सांकछी

6 मिनु येसु ख्रीस्त ब्वाक्कु नु हुश रे जाक्त। ब्वाक्कु रे ला ममाइ, तन्न ब्वाक्कु नु हुश रे जाक्त। १यूहन्ना ४:२; मकूस १:९; यूहन्ना १९:३४-३५

7 परमप्रभु यावे आ सोक्त मेको आ सांकछी बाक्ब। मारदे हना परमप्रभु यावे आ सोक्तीम थमा लोत्र ला पाइब। यूहन्ना १:३३

8 मोपा सांकछी सां बाक्नीम। का परमप्रभु यावे आ सोक्त बाक्ब, का ब्वाक्कु रे जरमेतीके बाक्ब नु का मुर आन मरिम्शो पतीके आ पर्बम येसु साइक्चा पुंइसीशो डा हुश बाक्ब। मिनु मेको सांफा गारनीमी।

9 गोपुकी मुर आन सांकछी नेंशा थमा सुइक्नय। परमप्रभु यावे आ सांकछी मुर आन सांकछी क्येडा टेयब बाक्ब। मिनु परमप्रभु यावेमी आ तौ येसु ख्रीस्त आ पर्बम मेको सांकछी गेप्टु।

10 सु परमप्रभु यावे आ तौ कली थमा सुइक्बा, मेको मुर आ थुंमी सांकछी लीब। सु चहिं परमप्रभु यावे कली थमा मसुइक्बा, मेकोमी “परमप्रभु यावे जोल्फे बाक्ब” देंबा। मारदे हना “आं तौ बाक्ब” दे परमप्रभु यावेमी देंशो थमा मसुइक्ब। यूहन्ना ३:३२-३४; रोमी ८:१६

11 मिनु मेको आ सांकछी मार बाकब देशा हना, परमप्रभु यावेमी इं कली गेना हना यो ब्रोंइशा बाक्तीक गेप्टु। मोदेशो ब्रोंइशा बाक्तीक आ तौमी पतीके बाकब।

12 सु मेको आ तौ नु बाकबा, मेको गेना हना यो ब्रोंइशा बाक्चा ताइब। सु चहिं परमप्रभु यावे आ तौ नु मबाकबा, मेको गेना हना यो ब्रोंइशा बाक्चा मताइब।

13 मिनु गोपुकी परमप्रभु यावे आ तौ आ नें कली थमा सुइक्नीनी। मोपतीके गेना हना यो ब्रोंइशा बाक्चा ताइब बाक्नीनी, दे गो इन कली तुइक्पाइक्चा कली ब्रेक्ताकड। यूहन्ना २०:३१

### परमप्रभु कली पुंडतीक लोव

14 मिनु मेको कली थमा सुइश्शोमी इं पुंडशो आ दाक्शो बाक्त हना, मार पुंडतय हना यो, इं कली नेशा गेब। यूहन्ना १४:१३

15 गोपुकीमी इं मार मार पुंडशो नेंब, दे तुइक्ताक्य हना, इं पुंडशो यो गेब, दे तुइक्नय।

16 मिनु सुमी आ लोक्ब मबेक्चा डा सजाइ तचा डा पा मरिम्शो पशो ताइबा, मिनु आ लोक्ब आ पबंम पुंडबा, मेको मुर आ पुंडशो परमप्रभु यावेमी गेब। मेको थमा सुइक्ब लोक्ब गेना हना यो ब्रोंइशा बाक्चा ताइब। तन्न बेक्चा डा मरिम्शो पतीक यो बाक्बा, मोदेशो मरिम्शो पाइब कली पुंडचा ममाल्ब, दे इन कली देनुड। मर्कूस ३:२८-३०

17 परमप्रभु यावे कली मगारचा डा गेय नेल्ल मरिम्शो बाक्नीम। तन्न कोइ मरिम्शो पतीके क्याम्चा डा बाक्नीम।

### येसु ख्रीस्त नु बाक्बपुकी

18 मिनु “सु परमप्रभु यावे रे जरमेशो बाक्मे, मेको मुरुम मरिम्शो मपाइब। मारदे हना परमप्रभु यावे रे जरमेशो आन कली येसु ख्रीस्तमी कोव्रब। मिनु सैतानमी मेको आन कली मथीब” दे तुइक्नय। १ यूहन्ना ३:९; यूहन्ना १७:१५

19 मिनु गोपुकीमी “गोपुकी परमप्रभु यावे आ मुर नय” तन्न सैतानमी नेल्ल रागी डा मुर आन कली हुकुम पाइब, दे तुइक्नय। गलाती १:४

20 मिनु परमप्रभु यावे आ तौमी इं कली रुप्तीक थुं गेप्टु, दे तुइक्नय। मेको रुप्तीक थुमी थमा पतीके कली तुइक्नय। गोपुकी मेको थमा पाइब नु थुं का डा बाक्नय। मोपा आ तौ येसु ख्रीस्त नु यो थुं का डा बाक्नय। मेको थमा परमप्रभु यावे नु गेना हना यो ब्रोंइशा बाक्तीक बाक्ब। यूहन्ना १७:३

### नोले डा लोव

21 मोपतीके “आं आइक्च आलपुकी, मूर्ति रे डोन बाक्कीन” दे इन कली ब्रेक्शा अरेतन्नी। १ कोरिन्थी १०:१४

## २ यूहन्ना

**ब्रेक्ब मुर:** यूहन्नामी आंम कली खाल्पा देश, एको चिठी थमा सुइक्ब आन कली नोले ब्रेक्शो बाक्ब।

**गेना ब्रेक्शो:** डोंइती डा चिठी खोदेशो पा १०० ए. डी. नुप्चा क्येडा डोंइती मीश मुर, दे खुइश्शो नें वोइश्शो, थमा सुइक्ब आन गुम्तीके कली ब्रेक्शो चिठी बाक्ब।

**मार ब्रेक्शो:** परमप्रभु यावे कली दाक्तीक कोंइतीके आ देशो टिचा बाक्ब। दूली शेंब आन पर्वम यो लोव बाक्ब।

### डोंइती डा लोव

1 गो येसु ख्रीस्त कली थमा सुइक्ब आन शेंब खाल्पामी आ योव्रशो मीश मुर नु आ आल इन कली चिठी ब्रेक्ताक्नी। गो इन कली थमा पा दाक्नन्नी। गो ला ममाड, सु सुम परमप्रभु यावे आ पर्वम थमा शेंतीके तुइक्तमे, मेकोपुकीमी यो इन कली दाक्नीमी। ३यूहन्ना :१

2 मारदे हना परमप्रभु यावे आ थमा शेंतीके इं थुंम बाक्ब, मेको गेना हना यो लीब।

3 मिनु इं आफ, परमप्रभु यावे नु आ तौ येसु ख्रीस्तमी इं कली शिशी नु थुं नाइश्शा बाक्चा गेम्सेक्ल। परमप्रभु यावे आ थमा शेंतीके नु आ गेशो दाक्मुचा यो गोपुकी नु बाक्ल।

### थमा लां खोइक्चा नु दाक्चा

4 गो इन आल आन दाते डा का निक्शी थमा लां खोइक्ब तशा, शुश ग्येरसीनुड। मारदे हना इं आफोमी इं कली मोदेशो अरेशो लोव गेशो बाक्ब।

5 मिनु गोमी “गोपुकी दाक्मुय” दे मीश मुर इन कली देशो नक अरेशो लोव मब्रेक्नुड। तन्न साइ डोंइती रे दाक्मुचा, दे अरेशो लोव बाक्शो बाक्ब। १यूहन्ना २:१७

6 मिनु आ अरेशो लोव पचा दाक्चा बाक्ब। मेको इन डोंइती रे नेशो अरेशो लोव बाक्ब। मेको अरेशो पने।

### दूली शेंब आन पर्वम शेंशो

7 मिनु मुल रागीमी शुश मुर आन कली मरिम्शो लां कोंइब जोल्फेपुकी जाक्तेक्म। मेको मुरपुकीमी “येसु ख्रीस्त मुर दुम्शा रागीमी मजरमेसे” दे शेंनीम। मेको मोदेशो शेंब चहिं जोल्फे नु नेल्ल क्येडा मरिम्शो पाइब बाक्नीम। १यूहन्ना २:१८; १यूहन्ना ४:१-३

8 गोपुकी मार कली गेय पनी, मेको मुल यो पना पन बाक्कीन। मो पाइतीनी हना, ठेयब इनाम ताइनीनी। गलाती ४:११

9 सुम चहिं ख्रीस्त आ थमा शेंतीके लोव प्रोंइबा, मेको परमप्रभु यावे नु थुं का मबाक्ब। सुम चहिं ख्रीस्त आ थमा शेंतीक लोव मप्रोंइबा, मेको आफ नु तौ निम्फा नु थुं का डा बाक्ब। १यूहन्ना २:२३

10 सुइ मुर इन बाक्तीके जाक्शा, थमा शेंतीके लोव मपाव्तु हना, मेको कली खिं ओव्रचा मगेने। मिनु मेको कली “रिम्शो बाक्को” दे यो मदेनीन। २थिस्सलोनिकी ३:६

11 मारदे हना सुमी मेको मोदेशो मुर कली “रिम्शो बाक्कीन” देबा, मेकोमी मेको आ दूली शेंतीके नु आ मरिम्शो गेय यो पाइब।

### नोले डा लोव

12 मिनु गोमी इन कली शुश ब्रेक्चा माल्ती हना यो, कागज नु मसीम मब्रेक्नुड, इन कलीन गुम्थ जाक्नुड। मिनु कोव्रमुशा लोव पाइनय, दे आस पाइनुड। मोपा गुम्तय हना, शुश ग्येरनय। ३यूहन्ना :१३

13 इन योव्रशो समी आ तमी तौपुकीमी यो इन कली “रिम्शो बाक्कीन” दे ब्रेक्पाइक्तीमी।

## ३ यूहन्ना

**ब्रेक्ब मुर:** यूहन्ना आ नेल्ल क्येडा नोले ब्रेक्शो चिठी बाक्ब।

**गेना ब्रेक्शो:** एको चिठी १०० ए. डी. क्येडा डोंइती ब्रेक्शो बाक्ब।

**मार ब्रेक्शो:** थमा शेंशो कोंइतीके नु दाक्चा मप्रोंइतीक आ पर्वम ब्रेक्शो लोत्र बाक्ब।

### डोंइती डा लोत्र

1 गो येसु ख्रीस्त कली थमा सुइक्ब आन शेंब खाल्पामी, आं थमा पा दाक्शो गायस इ कली एको चिठी ब्रेक्ताक्ड। २यूहन्ना :१

2 आं दाक्शो लोक्ब, इ जचा बाक्चा नेल्ल रिम्शो बाक्ब। इ थमा सुइक्तीके रिम्शो बाक्ब, दे गो तुइक्नुड।

3 मिनु इ बाक्तीके रे जाक्ब थमा सुइक्बपुकीमी “गायस रिम्शो पा येसु ख्रीस्त आ पर्वम थमा लां खोइक्ब” दे शेंताकयीमी। मेको नेंनु, गो शुश ग्येरसाकयी। २यूहन्ना :४

4 आं आलपुकी येसु ख्रीस्त आ पर्वम थमा लां खोइक्नीम देशो नेंनु, आं कली नेल्ल क्येडा ग्येरपाइक्ब।

### गायसमी जाक्चा गेशो

5 आं दाक्शो लोक्ब, गे येसु ख्रीस्त कली थमा सुइक्ब आन कली वारच पाइतीनी, मोपा रिम्शो गेय पाइतीनी। मोदेशो गेय अर्को सहर डा येसु ख्रीस्त कली थमा सुइक्ब आन कली पाइतीनी, मेको थम रिम्शो बाक्ब।

6 इ खिंमी जाक्शा बाक्शा, थमा सुइक्बपुकीमी “गायसमी थमा सुइक्ब आन कली शुश दाक्शा, खिंमी बाक्चा गेपु” दे आंइ गुम्तीकेमी नेंपाइक्तेक्म। मिनु गे मोपा येसु ख्रीस्त कली थमा सुइक्ब आन कली खिंमी बाक्चा गेचा ला ममाइ, तन्न आन लची ना मेकोपुकीमी मार मार मालनीमी, मेको नेल्ल परमप्रभु यावेमी खोदेशो पा गेशा सोइक्ताकनी हना, गे रिम्शो दुम्नीनी। तीतस ३:१३

7 मारदे हना मेकोपुकी येसु ख्रीस्त आ पर्वम शेंथ लाइनीम। मिनु थमा मसुइक्बपुकी रे मारेइ मलाइक्नीम। १कोरिन्थी ९:१२

8 मिनु गोपुकीमी मोदेशो मुर आन कली रिम्शो पा वारच पचा मालनय। मो पयानु, गोपुकी मेकोपुकी नु गारशा, गेय पना पन बाक्नय। हिब्रू १३:२

### ठेयब लेश्शो शेंब आ पर्वम

9 गो इन गुम्तीके डा थमा सुइक्ब आन कली ब्रेक्ताक्डमी। तन्न डियोत्रीफसमी आंम कली ठेयब सेल्शा, गोपुकी आंइ कली मदाक्ब।

10 मिनु गो मेकेर जाक्शा, मेको आ पशो गेय आ पर्वम लोत्र पाइनुड। मेकोम मार पाइब देशा हना, आं कली श्येत गेचा, दे आं पर्वम काइ मरिम्शो लोत्र पना पन गाक्ब। मिनु मेको ला ममाइ, आं सोइश्शो लोक्ब आन कली जाक्चा मगेव। सु चहिं मेको आन कली जाक्चा गेचा दाक्बा, डियोत्रीफसमी मेको कली “जाक्चा गेचा मटुम्ब” देब। मिनु मेकोपुकी आ देशो मटिम्तेक्म हना, मेको आन कली थमा सुइक्ब आन गुम्तीके रे तिल्ब।

11 आं दाक्शो थमा सुइक्ब लोक्ब, मरिम्शो मुर आन तस मखोतो। तन्न रिम्शो मुर आन तस खोतो। सु रिम्शो गेय पाइबा, मेको परमप्रभु यावे आ मुर बाक्ब। सु चहिं मरिम्शो पाइबा, मेको परमप्रभु यावे कली मतुइक्ब बाक्ब।

12 मिनु थमा सुइक्ब नेल्लेमी “देमेत्रीयस रिम्शो थमा सुइक्ब बाक्ब” दे तुइश्शा देंनीम। मिनु मेको आ थमा लां खोइक्तीकेमी, येसु ख्रीस्त नु थुं का बाक्ब, दे कोइब। गो यो मेको आ पर्वम “देमेत्रीयस रिम्शो मुर बाक्ब” दे सांकळी गेनुड। गो जोल मपाइनुड, दे तुइक्नेवे।

## नोले डा लोव

13 गो इ कली शुश ब्रेक्चा माल्ती हना यो, गो मसी नु कलममी मब्रेक्नुड। २यूहन्ना :१२

14 तन्न इ कली युम्थ जाक्चा कली आस पाइनुड। मिनु युम्शा कौन्नमुशा लोव पाइनस।

15 इ थुं नाइश्शा बाक्ल। आं वारचपुकीमी यो “गे रिम्शो बाक्कीन” दे आं कली ब्रेक्पाइक्तीमी। गे अरु थमा सुइक्ब वारच आन कली यो “रिम्शो बाक्कीने” दे का का पा आन नें थिशा, माइक्मी।

## यहूदा

**ब्रेक्ब मुर:** एको चिठी याकूब आ लोकब यहूदाम ब्रेक्शो बाक्ब। आंम कली “येसु आ वाइल” देंब। डोंइती थमा मसुइक्ब बाक्शा, नोले थमा सुइक्ब दुम्त। प्रेरित १:१४

**गेना ब्रेक्शो:** एको चिठी ६६ ए. डी. नु ६८ ए. डी. दातेमी ब्रेक्शो बाक्ब। थमा सुइक्बपुकीमी येसु आ सोइश्शो मुर आन कली आंमन तशो बाक्तेक्म।

**मारदे ब्रेक्शो:** एको चिठी रिम्शो थमा सुइक्चा आ पर्वम ब्रेक्शो बाक्ब।

१. डोंइती डा लोत्र यहूदा १:१-२

२. दूली शेंब आन पर्वम लोत्र यहूदा १:३-१३

३. दूली शेंब सजाइ ताइनीम यहूदा १:१४-२६

४. थमा सुइक्तीके बोल्यो दुम्चा माल्ब नु नोले डा लोत्र यहूदा १:१७-२५

### डोंइती डा लोत्र

1 गो याकूब आ लोकब यहूदा नड। गो येसु ख्रीस्त आ वाइल दुम्ती। परमप्रभु यावे, इं आफ आ दाक्शो नु येसु ख्रीस्त कली योत्रशा वोइश्शो मुर, इन कली ब्रेक्ताक्ड। मत्ती १३:५५

2 परमप्रभु यावे आ दाक्तीके, थुं नाइक्तीके नु दाक्मुतीके गेपुकी नु शुशु बाक्ल।

### दूली शेंब आन पर्वम शेंशो

२पत्रुस २:-

3 आं दाक्शो लोकबपुकी, गो इन कली इं पाप रे प्रोंइतीक आ पर्वम ब्रेक्चा दाक्ती। थमा सुइक्तीके आ पर्वम दोपा गेय पचा, दे इन कली शेंचा दाक्ताक्ड। मेको थमा सुइक्तीक पाप रे डोन बाक्ब आन कली डोंइती रे शेंने थुम्शो बाक्त। १तिमोथी १:१८

4 तन्न का निक्शी निसाफ पाइक्चा पुंडसीबपुकीमी “थमा सुइक्ब बाक्नीक” देंखु पा, थमा सुइक्ब आन ग्रुन्तीकेमी बाक्नीम। मेकोपुकीमी परमप्रभु यावे कली मटिथु “परमप्रभु यावेमी शिशी पाइब” दे मिम्शा, आंम दला दाक्स पना पन बाक्नीम। मिनु इं होत्रप, प्रभु येसु ख्रीस्त आ पर्वम “परमप्रभु यावे आ तौ ममाइ” देंनीम।

5 गेपुकी डोंइती रे “दोपा ठीक पा थमा सुइक्चा” दे नेल्ल शेंसीशो बाक्तीनी हना यो, गो इन कली लेंशा मेको शेंशो लोत्र मिम्पाइक्चा दाक्नुड। मार मिम्पाइक्चा दाक्नुड देंशा हना, परमप्रभु यावेमी आ मुर आन कली इजीप्त रागी रे प्रोंइपाइश्शा, तन्न नोले मेको थमा मसुइक्ब आन कली सदा बाक्त। गन्ती १४:३५; १कोरिन्थी १०:५

6 परमप्रभु यावे आ स्वर्ग डा गेय पाइब का निक्शीमी परमप्रभु यावे कली मटिथु आन बाक्तीके प्रोंइतेक्म। परमप्रभु यावेमी मेको आन कली ठेयब निसाफ पची नाक्त सम्म गेना हना यो मप्रोंइचा डा पा साडलोमी पाइश्शा, नेल्ल क्येडा मरिम्शो बाक्तीक छिडछिडमी वोइश्शो बाक्ब। उत्पती ६:२-४

7 सोदोम, गोमोररा नु आस एर ओंथ बाक्शो सहर डा मुरपुकीमी आन खोदेंशो पा ग्रांरा दिचा डा नु मपचा डा दूली गेय पशो बाक्तेक्म। परमप्रभुमी मेको आन कली कोंइतीक दुम्पाइक्चा कली गेना हना यो ब्रशो मीमी सजाइ गेशो बाक्त। उत्पती १९:१,४-११

8 मोदेंशो तुइश्शा यो मेको थमा सुइक्नीकी देंखु पाइबपुकीमी आंम मिम्तीके पशा, आंम रां कली ग्रांरा दिचा डा सेल्तेक्म। मिनु अधिकार पाइब आन कली मटिथु, स्वर्गम बाक्ब आन पर्वम शुक्शी पाइनीम।

9 परमप्रभु यावे आ नेल्ल क्येडा ठेयब स्वर्ग डा गेय पाइब मिकाएलमी चहिं सैतान कली मोसा आ बेक्शो रां आ पर्वम लोत्र पशा “परमप्रभुमी इ कली हुइक्ब” दे आंमा शुक्शी पा निसाफ पचा हिंमाक्त। दानीएल १२:१; जकरिया ३:२

10 मेको मुरपुकी चहिं आन मतुइश्शो नेल्ल आन पर्वम शुक्शी पाइनीम। मिनु मिम्तीक मपाइश्शो बस्तु भाव आन तुइश्शोमी खोदेशो पाइनीम। मिनु मेको पशा, खतम सेल्चा पुंडसीनीम।

11 मेको आन पर्वम आबी। काइन खोदेशो दुम्शो बाक्तेक्म। बालाम बुदी परमप्रभु यावे कली मटिथु, क्येट आ पर्वम दूली गेय पाइनीम। मिनु कोराह माइश्शो मुर खोदेशो पा जाम्शा लाइनीम। उत्पत्ती ४:८; गन्ती ३१:१६; गन्ती १६:-

12 मेकोपुकी इन गुम्शुशो भोजमी जाक्शा, दाइल पपाइक्व फुल्लु खोदेशो पा बाक्नीमी। आंम दातेम ग्येरपमुइनीम, तन्न महिंथु आंम कोव्रज ला प्रिनीम। मेको रेट मपाइश्शो फशेम बेरशो गोस्स खोदेशो बाक्नीम। फल सिल्ची ना फल मसिप्ब रवा खोदेशो बाक्नीम। शाक्श दुल्शो रवा खोदेशो पा, निक्शी खेयप बेक्शो बाक्नीम। १कोरिन्थी ११:२१

13 मेको समुन्द्र डा ठेयब हिंचा डा छाल खोदेशो बाक्नीम। आंम मुने डा बोग्यो गुंडनीम। दोक्शो सोरुल खोदेशो बाक्नीम। मेको आन कली नेल्ल क्येडा मरिम्शो छिडछिड डा बाक्तीके वोइश्शो बाक्ब। यसैया ५७:२०

14 मिनु आदम रे ७ पाला नोले डा हनोक माइश्शो मुर का बाक्त। मेकोमी मोदेशो मुर आ पर्वम परमप्रभु यावेमी तुइक्पाइश्शो लोव्र पवा बाक्त। मेकोमी “नेनीन, प्रभु नु आ योव्रशो हजार हजार जाक्तेक्म। हनोक कली हिब्रू लोव्रमी एनोक देंनीम। उत्पत्ती ५:२१

15 परमप्रभु यावे कली मटीब नेल्ल आन कली आन थमा मसुइक्तीकेमी पशो मटितीके तपाइक्नीम। परमप्रभु यावे रे डोन बाक्ब पापीपुकीम परमप्रभु यावे कली मार मार मरिम्शो लोव्र पामे, मेको आन कली निसाफ पशा, सजाइ गेचा, दे जाक्तेक्म” दे लोव्र पवा बाक्त।

16 मेकोपुकी गन गन पाइब बाक्नीम। मेकोपुकीमी “गो श्येत जना जन बाकुनुड” दे गेनायो मग्येरथु, आन दला दाक्स पना पन बाक्नीम। ठेयब लोव्र पा, ठेयब लेशशो मुर बाक्नीम। मेकोपुकीमी आंम कली ठेयब सेल्सीचा कली मुर आन कुल कोव्रनीम।

### बोल्यो थमा सुइक्ब दुमीन

17 आं दाक्शो लोकबपुकी, इं प्रभु येसु ख्रीस्त आ सोइश्शोपुकीमी डोंइती देशो लोव्र ति फुकशा मिम्चा माल्नीनी।

18 मेकोपुकीमी इन कली “मेको नोले डा नाक्त शुक्शी लोव्र पाइनीम। परमप्रभु यावे कली मटिथु, आंम दला दाक्स पाइनीम” देतेक्म। १तिमोथी ४:१; २पत्रुस ३:३

19 मेकोपुकीम मुर आन कली ब्रापाइक्नीम। परमप्रभु यावे कली ममिम्थु, परमप्रभु यावे आ सोक्त मपाइश्शो बाक्नीम। १कोरिन्थी २:१४

### परमप्रभु कली ठेयब सेल्चा

20 आं दाक्शो लोकबपुकी, इन रिम्शो थमा सुइक्तीके बारपतीन। परमप्रभु यावे आ सोक्तीमी प्रार्थना पने। कलस्सी २:७; १थिस्सलोनिकी ५:११

21 परमप्रभु यावेम इन कली दाक्ब, दे मिम्ना मिम्न बाक्कीन। इं प्रभु येसु ख्रीस्तमी इन कली दाक्शा, शिशी पशा, इन कली गेना हना यो परमप्रभु यावे नु बाक्चा गेब, दे रिम्शा बाक्कीन।

22 का निक्शी थमा सुइक्ने मचाप्शो मुर आन कली ठीक पा थमा सुइक्तीके शेंदीन।

23 का निक्शी कली मी रे फो फु गुंडशो खोदेशो पा प्रोनीन। का निक्शी कली शिशी पने, तन्न आन गांरा दिचा डा पाप क्येडा हिंशा, आन लुम्सीशो वासी यो मथिने। याकूब ५:९; प्रकाश ३:४

### नोले डा लोव्र

24 येसु ख्रीस्तमी इन कली पाप मपाइब सेल्ने चाप्ब। इन कली दोस मताइब सेल्शा, ग्येरसीशा, परमप्रभु यावे आ छेडछेड आ डोंइती राप्पाइक्ने चाप्ब। १थिस्सलोनिकी ५:२३

25 परमप्रभु यावे का ला बाक्ब। मेकोमी इं प्रभु येसु ख्रीस्त आ पतीकेमी इं कली पाप रे प्रोंडतु। नेल्ल छेडछेड पाइश्शो, नेल्ल क्येडा ठेयब दुम्तीके, नेल्ल सक्ति नु नेल्ल अधिकार मेको केन बाक्ब। मेको डोंइती बाक्त। मुल यो बाक्ब। मिनु गेना हना यो बाक्ब। आमैन।

## प्रकाश

**ब्रेक्ब मुर:** एको किताब येसु आ शेंसीब यूहन्ना आ ब्रेक्शो बाक्ब। थमा सुडक्ब आन गुम्तीके डा इतिहासम मोदेंशो ब्रेक्शो बाक्त।

**गेना ब्रेक्शो:** इरेनेयुस, थमा सुडक्ब आन इतिहास ब्रेक्बमी “प्रकाश सासन पाइब दोमीतीयन आ सासन पशो नुच्ची ना ब्रेक्शो बाक्ब” देंब। मेको ९४-९५ ए. डी. मेर बाक्त।

### मार ब्रेक्शो:

१. प्रभु येसु ख्रीस्त नु मेको कली थमा सुडक्ब आन गुम्तीके। प्रकाश १:- ३:-
२. प्रभु येसु ख्रीस्त नु रागी रागी डा मुर प्रकाश ४:-; - ११:१४
३. सैतान नु थमा सुडक्ब आन जोरी सत्रु प्रकाश ११:१५; - १४:२०
४. थमा सुडक्ब आन जोरी सत्रु ब्रुशो प्रकाश १५:१; - १९:२१
५. येसु ख्रीस्त नु आ राज्य प्रकाश २०:१; - २२:२१

### डोंइती डा लोत्र

१ परमप्रभु यावेमी येसु ख्रीस्त कली “मार मार दुम्या चिक्ता, आ रागी डा वाइलीम वाइलपुकीमी तुइक्तमेक्ल” दे कोंइताक्व। मिनु येसु ख्रीस्तमी आ स्वर्ग डा गेय पाइब कली आ वाइल यूहन्ना आ बाक्तीके सोइक्ताक्व। मारदे सोइक्ताक्व देंशा हना, मेको दुम्व्चशो लोत्र शेंथ सोइक्ताक्व।

२ मिनु गो, यूहन्नामी, परमप्रभु यावे आ लोत्र नेंता, येसु ख्रीस्त आ पशो ताता। मिनु मेको नेल्ल आन सांकछी दुम्ती।

३ मिनु सु सुमी परमप्रभु यावेमी तुइक्पाइशो एको किताब डा लोत्र पढेनीमी, नेंनीमी नु टीनीमी, मेको आसीक रशो नु ग्येरसीशो मुर दुम्नीम। मारदे हना मेको लोत्र दुम्व्चशो बाक्त। १यूहन्ना १:१-२; यूहन्ना २१:२४; प्रकाश २२:१०

### एसीया डा गुम्तीके कली चिठी

४ गो यूहन्नामी एसीया डा येसु ख्रीस्त कली थमा सुडक्ब ७ ओटा सहर डा थमा सुडक्ब आन गुम्तीके डा शेंब आन कली चिठी ब्रेक्ताक्ड। मिनु मुल बाक्ब, डोंइती बाक्शो, नोले यो जाक्बमी नु परमप्रभु यावे आ ठेयब नित्तीके आ डोंइती बाक्ब ७ ओटा ठाउं डा परमप्रभु यावे आ सोक्तीमी इन कली “शिशी तशा नु थुं नाइशशा बाक्चा तामेक्ल” देंताक्स। प्रस्थान ३:१४-१५; प्रकाश ३:१; प्रकाश ५:६

५ मिनु येसु ख्रीस्तमी यो मो देंत। मिनु मेको सु बाक्ब देंशा हना, परमप्रभु यावे आ देंशो थमा पाइब सांकछी नु नेल्ल क्येडा डोंइती बेक्शो रे सेंसीशो नु रागी डा पिप आन कली सासन पाइब बाक्ब। येसु ख्रीस्तमी इं कली दाक्शा, आ हुशेमी इं पाप रे प्रोंइतु। प्रकाश ३:१४; यूहन्ना १८:३७; १तिमोथी ६:१३

६ इं कली परमप्रभु यावे, आ आफ आ राज्य डा मुर सेल्शा, परमप्रभु यावे आ डोंइती राक्ब सेल्लु। मोपतीके आ छेडछेड नु सक्ति गेना हना यो बाक्ल, आमैन। प्रकाश ५:१०; प्रस्थान १९:६; १पत्रुस २:५,९

७ मिनु येसु ख्रीस्त लेशशा, दोपा यीबा देंशा हना, सरीड रे गोस्सुमी गिलसीशा यीब। मिनु मुर नेल्लेमी मेको कली यिन यिन पशो ताइनीम। मेको कली साइक्पाइक्बपुकीमी यो ताइनीम। मिनु थर थर डा मुरपुकीम मेको कली तशा, रोंका पा डाक्नीम। एको थमा लोत्र बाक्ब। आमैन। मत्ती २४:३०; जकरिया १२:१०; यूहन्ना १९:३७

८ परमप्रभु यावे मुल बाक्ब, डोंइती यो बाक्शो बाक्त। मिनु नोले यो जाक्ब। नेल्ल सक्ति पाइशशो परमप्रभु यावेमी “गो आल्फा नु ओमेगा नड” देंत। आल्फा नु ओमेगा माइशशो ग्रीक लोत्रमी डोंइती नु नोले डा अच्छेर बाक्नीस। प्रकाश २१:६; यसैया ४१:४; प्रकाश ४:८

### येसुमी यूहन्ना कली पपाइशो गेय



9 मिनू गो इन लोकब यूहन्ना, येसु खीस्त कली थमा सुइक्ब नड। गो इन बुदी श्येत जशो परमप्रभु यावे आ राज्य डा मुर यो नड। मोपतीके श्येत जशा, इन खोदेशो पा येसु खीस्त कली रिम्शा बाक्नुड। गो येसु आ सांकछी दुम्ती। मिनू परमप्रभु यावे आ लोत्र शेंताक्ड। मोपतीके मुरुमी आं कली पात्मोस माइशशो टापुमी लाइशशा प्रोइतीमी।

10 मिनू गो परमप्रभु यावे आ नाक्त परमप्रभु यावे आ सोक्तीम बाक्ती। मिनू आं नोले तुराही ताप्शो खोदेशो ठेयब सेंदा नेता।

11 मेको सेंदामी आं कली “मार मार ताइनेवे, मेको नेल्ल कागजम ब्रेक्तो। मिनू ब्रेक्शा डा मिन, एसीया डा ७ ओटा सहर डा येसु खीस्त कली थमा सुइक्ब आन गुम्तीके डा मुर आन कली सोइक्तो। मेको ७ ओटा सहर चहिं एफिसस, स्मिरना पेरगामोम, थिआटीरा, सारडीस, फिलाडेल्फीया नु लाओडीसीया नम” देंत।

12 मिनू गो नु लोत्र पाइब कली कोवडु, दे बिर लेत्ती। लेशशा कोवडुनु, ७ ओटा सुन के दियारीम बती ब्रशो ताता।

13 मेको ७ ओटा दियारी आन दातेमी मुर का बाक्शो खोदेशो ताता। मेको मुर दोदेशो तांइसाक्व देंशा हना, खोइली सम्म लाइशशो वा फेक्शो नु सुन के किप्तीके कुचुमी किप्शो बाक्त। प्रकाश २:१; दानीएल ७:१३

14 मेको आ पिया नु आ चां बुश ऊन नु फुं खोदेशो बुश तांइसाक्व। आ मिक्च हरुर पा ब्रशो मी खोदेशो तांइसाक्व। प्रकाश २:१८; प्रकाश १९:१२

15 आ खोइली याप्पाइशशा टल्केशो कांसा खोदेशो तांइसाक्व। मिनू आ सेंदा ठेयब खोला आन रेयके खोदेशो नेंसाक्व।

16 मिनू मेको आ ग्युरा गुइमी ७ ओटा सोरुल शेशो बाक्त। मिनू निम्फा गे क्योरतीक पाइशशो हेशशो तरवार का आ शोव रे गूत। मिनू आ कुल नाक्त डा नां खोदेशो पा कोवने मचाप्चा डा तांइसाक्व।

17 मिनू गोमी मेको मोदेशो तडानु, बेक्शो मुर खोदेब पा मेको आ खोइलीम गोल्ती। मिनू मेकोमी चहिं आ ग्युरा गुइ आं तारी वोइशशा “महिनी, गो नेल्ल क्येडा डोइती नु नेल्ल क्येडा नोले डा नड। दानीएल ८:१८

18 ब्रोइशा बाक्ब नड। गो बेक्शा यो, लेंशा मबेक्चा डा पा ब्रोइती। मिनू नरक नु बेक्शा लशो मुर आन बाक्तीक डा रोक्तीक सांचो गो नु बाक्ब।

19 गे मार मार तवी, मेको ब्रेक्तो। गे मार ब्रेक्चा मालनेवे देंशा हना, मुल मार बाक्बा, नोले मार दुम्बा, मेको नेल्ल ब्रेक्तो।

20 मिनू आं ग्युरा गुइमी बाक्शो ७ ओटा सोरुल नु ७ ओटा खपीम बाक्शो सुन के दियारी आ खुइशशो अर्थ मार बाक्ब देंशा हना, मेको आं गुइमी तशो ७ ओटा सोरुलपुकी मेको एसीया डा ७ ओटा सहर डा थमा सुइक्ब आन गुम्तीके डा शेंब नम। मेको ७ ओटा दियारी चहिं मेको एसीया डा ७ ओटा सहर डा थमा सुइक्ब आन गुम्तीके डा मुर नम” दे माइक्ती।

## 2

### एफिसस कली चिठी

1 मिनू येसु खीस्तमी आं कली एफिसस सहर डा थमा सुइक्ब आन शेंब कली ब्रेक्पाइक्ती। एको आ ग्युरा गुइमी ७ ओटा सोरुल नु ७ ओटा सुन के दियारी आन दातेमी हिरब आ लोत्र बाक्ब। प्रेरित १८:१९

2 मेकोमी “गो इन पशो गेय, इन फाल्शो श्येत नेल्ल तुइक्नुड। मिनू गे मरिम्शो मुर आन कली फाल्ने मचाप्नीनी। मिनू गे सोइशशो, आं लोत्र शेंब दुम्खु पाइब मुर आन कली नाक्शा, जोल्फ बाक्नीम, दे तुइक्नीनी। १यूहन्ना ४:१

3 गे फाल्शा, आं कली थमा सुइक्तीनी। मोपा थमा सुइक्चा मदथु, आं पर्वम श्येत फाल्नीनी, दे गो तुइक्नुड। १तिमोथी ५:१२

4 तन्न गो इन कली लोत्र का पचा माल्नुड। मार लोत्र पचा माल्नुड देशा हना, डोंइती गे आं कली थमा पा दाक्ताक्नी। मुल चहिं डोंइती डा खोदेशो पा दाक्चा प्रोंइतीनी।

5 इन डोंइती डा आं कली दाक्शो मिम्तीने। इन थुं आं गे लेत्तीने। मिनु इन डोंइती डा पशो गेय पने। गे मेको दाक्चा डा गेय मपाइतीनी हना, गो इन बाक्तीके जाक्शा, इन दियारी आ बाक्तीके रे तिल्नुड।

6 तन्न इन गेय का रिम्शो बाक्ब। गेपुकी निकोलाइटन आन शेंतीके डा गेय ग्रांघ्रा दीनीनी। गो यो ग्रांघ्रा दीनुड। भजन संग्रह १३९:२१

7 परमप्रभु यावे आ सोक्तीमी थमा सुइक्ब मुर आन कली शेंशो लोत्र सु सुमी नेने चाप्नीमी, मेकोमी नेन्मेक्ल। सु सुमी सैतान कली ग्रानीमी, मेको आन कली परमप्रभु यावे आ रूमी बाक्ब ब्रोंइतीक रवा आ फल ब्वचा गेनुड” दे ब्रेक्पाइक्ती। प्रकाश २२:२; उत्पत्ती २:९

### स्मिरना कली चिठी

8 मिनु येसु ख्रीस्तमी आं कली स्मिरना सहर डा थमा सुइक्ब आन शेंब कली ब्रेक्पाइक्ती। मेकोमी “गो नेल्ल क्येडा डोंइती नु नेल्ल क्येडा नोले नड। गो बेक्शा यो ब्रोंइती” दैत। प्रकाश १:११; प्रकाश १:१८

9 मेकोमी “गो इन श्येत जशो तुइक्नुड। गे थमा पा पुडग बाक्नीनी, दे गो तुइक्नुड। तन्न गे इन थुंम शोंप पाइश्शो बाक्नीनी, दे यो तुइक्नुड। मरिम्शो लोत्र पाइब सु सु नमी देशा हना ‘यहूदी नकी’ देखु पाइबपुकी सैतानमी शेंशो मुर नम। याकूब २:५; प्रकाश ३:९

10 मिनु मुल इन कली श्येत दुम्चाप्टु। तन्न महिनीने। नेनीन, मुल दियाबलस सैतानमी गे का निक्शी इन कली थुं थाम्चा कली जेल्खानम चोकपाइक्ब। गे १० नाक्त सम्म ला श्येत जाइनीनी। साइक्चाम्तेक्म हना यो, फाल्शा थमा सुइक्चा मप्रोंइनी। मो पाइतीनी हना, गो इन कली गेना हना यो ब्रोंइशा बाक्तीक सिरपेच गेनुड। मत्ती १०:१९, २८; प्रकाश ३:११; २तिमोथी ४:८

11 परमप्रभु यावे आ सोक्तीमी थमा सुइक्ब मुर आन कली शेंशो लोत्र सु सुमी नेने चाप्नीमी, मेकोमी नेन्मेक्ल। सु सुमी सैतान कली ग्रानीमी, मेको निक्शी खेयप बेक्चा ममाल्नीम। मिनु परमप्रभु यावेमी गेशो सजाइ यो मताइनीम” दे ब्रेक्पाइक्ती। प्रकाश २०:१४

### पेरगामोम कली चिठी

12 मिनु येसु ख्रीस्तमी आं कली पेरगामोम सहर डा थमा सुइक्ब आन शेंब कली ब्रेक्पाइक्ती। आ शोत्र रे निम्फा गे क्योरतीक पाइश्शो हेश्शो तरवार पाइश्शोमी

13 “इन बाक्तीक सहरम सैतान आ नित्तीके बाक्ब, दे गो तुइक्नुड। गेपुकीमी ‘गो येसु ख्रीस्त आ मुर नकी’ दे आं कली थमा सुइक्चा मप्रोंइनी। मिनु इन सहरम सैतान आ नित्तीके बाक्मेनु, अन्टीपास माइश्शो आं कली मप्रोंइथु, थमा सुइक्ब नु आं लोत्र शेंब बाक्त। मिनु मुरुमी मेको कली सैतान आ बाक्तीकेमी बाक्शा, साइक्तेक्म हना यो, गे आं कली थमा सुइक्चा मप्रोंइनी।

14 तन्न गो इन कली लोत्र का पचा माल्नुड। मार लोत्र पचा माल्नुड देशो हना, गे का निक्शीमी मरिम्शो गेय पाइतीनी। इन गुम्तीके डा का निक्शीमी बालाम माइश्शो मुर आ शेंशो थमा सुइक्नीमी। बालाममी मार शेंताक्व देशा हना, डोंइती बालाक माइश्शो पिप कली इस्राएल जात डा वोंइश मुर आन कली खतम सेल्लु। दोपा खतम सेल्लु देशा हना, चढ़ेशो थोत्रक ब्वपाइक्तु। मिनु तेल्लेम पपाइक्तु। गन्ती ३१:१६; २पत्रुस २:१५; यहूदा :११

15 मिनु गे इन गुम्तीकेमी निकोलाइटन आन शेंशो लोत्र का निक्शीमी थमा सुइक्नीमी।

16 मोपतीके इन थुं गो आं गे लेत्तीन। मलेत्ताक्नी हना, गो इन गुम्तीकेमी रीब पा जाक्नुड। मिनु आं शोत्र डा तरवारमी मेको नु लडाइ पाइनुड।

17 परमप्रभु यावे आ सोक्तीमी थमा सुइक्ब मुर आन कली शेंशो लोत्र सु सुमी नेने चाप्नीमी, मेकोमी नेन्मेक्ल। मिनु सु सुमी सैतान कली ग्रानीमी, मेको आन कली खुइश्शा वोंइश्शो मन्ना शोब्ले गेनुड। मिनु गोमी मेको ग्राब आन कली बुश हीरा का का गेनुड। मेको बुश हीरा तार हीरा ताइब आन नक

नें ब्रेकशो बाक्ब। मेको नें हीरा ताइबमी ला तुइक्नीम। अर्को मुरुमी चहिं मतुइक्नीम” दे ब्रेक्पाइक्ती। भजन संग्रह ७८:२४; यसैया ६२:२

### थिआटीरा कली चिटी

18 मिनु परमप्रभु यावे आ तौमी आं कली थिआटीरा सहर डा थमा सुइक्ब आन शेंब कली ब्रेक्पाइक्ती। एको आ मिक्च हुरु पा ब्रशो मी खोदेशो तांडसीशो नु आ खोइली याप्पाइशो टल्केशो कांसा खोदेशो तांडसीशो आ लोत्र बाक्ब। प्रेरित १६:१४; प्रकाश १:१४-१५

19 मेकोमी “गो इन पशो गेय तुइक्नुड। इन आं कली दाक्शो, इन थमा सुइशो, इन थमा सुइक्ब आन कली पशो गेय नु इन श्येत फाल्शो तुइक्नुड। गे डोंइती क्येडा शुश गेय पाइनीनी।

20 तन्न इन कली लोत्र का पचा माल्नुड। मार लोत्र पचा माल्नुड देशा हना, गे इजेबेल माइशो मीश मुर कली इन गुम्तीकेमी बाक्चा गेतीनी। इजेबेलमी ‘गो परमप्रभु यावेमी तुइक्पाइशो लोत्र पाइब नड’ देखु पा, आं गेय पाइब आन कली मरिम्शो पचा शेंताक्मी। मार मरिम्शो पचा शेंताक्मी देशा हना, तेल्लेम पचा नु मूर्ति कली चदेशो थोत्रक जचा ब्वचा दुम्ब, दे शेंताक्मी। २राजा ९:२२

21 गोमी मेको कली ‘इ थुं आं गे लेत्तो। इ तेल्लेम पचा ताइक्तो’ दे रिम्ताक्ड। मेकोमी आ थुं गो आं गे लेत्चा नु आ तेल्लेम पचा ताइक्ने मबीस।

22 मिनु गो मेको कली रोइ पपाइक्नुड। मिनु मेको नु तेल्लेम पाइब आन तेल्लेम पचा प्रोंइशा, गो आं गे लेत्ने मबिस्साक्म हना, मेको आन कली यो ठेयब श्येत गेनुडमी।

23 आ आल आन कली मुर साइक्ब रोइम साइक्नुडमी। मेको आन श्येत जशा, बेक्शो तशा ‘गोम पाप्तु’ दे थमा सुइक्ब नेल्लेमी तुइक्नीमी। मिनु थमा सुइक्ब आन गुम्तीके डा मुर नेल्लेमी ‘येसु ख्रीस्तमी मुर आन थुं नु आन पशो तुइक्ब। मिनु नोले दोपा पामे, मोपा गेब’ दे तुइक्नीम। भजन संग्रह ७:१०; येरमीया १७:१०

24 तन्न थिआटीरा डा थमा सुइक्ब आन गुम्तीकेमी इजेबेल आ शेंशो मपाइबपुकी यो बाक्नीम। मेकोपुकीमी इजेबेल आ शेंसीब बुदी सैतान आ ठेयब गेय यो मतुइक्नीम। मिनु आं कली रिम्शो पा थमा सुइक्ब आन कली अर्को श्येत मगेनुड।

25 गे इन तुइशो गो मजाक्डा सम्म पना पन बाक्कीन। प्रकाश ३:११

26 सु सुमी सैतान कली ग्रानीमी, मेकोमी बेक्ची ना सम्म आं गेय पाइनीमी, गो मेको आन कली रागी रागी डा मुर आन कली सासन पतीके सक्ति गेनुड।

27 मिनु मेकोपुकीमी खप के ग्योब आन कली फलाम के कोक्केमी चोंइटा चोंइटा पशो बुद पा रागी डा मुर आन कली सासन पाइनीम। गो यो मोदेशो सक्ति आं आफ रे तशो नड। भजन संग्रह २:८-९

28 मिनु गोमी मेको सैतान कली ग्राब आन कली सुनी डा सुक्कुर सोरुल गेनुड।

29 परमप्रभु यावे आ सोक्तीमी थमा सुइक्ब मुर आन कली शेंशो लोत्र सु सुमी नेंने चाप्नीमी, मेकोमी नेन्मेक्ल” दे ब्रेक्पाइक्ती।

## 3

### सारडीस कली चिटी

1 मिनु येसु ख्रीस्तमी आं कली सारडीस सहर डा थमा सुइक्ब आन शेंब कली ब्रेक्पाइक्ती। एको ७ ओटा ठांउं डा परमप्रभु यावे आ सोक्त नु ७ ओटा सोरुल नु बाक्ब आ लोत्र बाक्ब। मेकोमी “गो इन पशो गेय तुइक्नुड। गेपुकीमी चहिं ‘गो ख्रीस्त कली थमा सुइशो, ब्रोंइशा बाक्नीकी’ देंनीनी। तन्न इन थमा सुइक्तीके बेक्शो खोदेब पा इप्शो बाक्ब। प्रकाश १:४

2 मोपतीके सेंशा बोक्कीन। इन बेक्चा चिक्शो थमा सुइक्तीके बारपतीन। गोमी इन गेय ताता। मेको इन गेय आं परमप्रभु यावे कली मगारनीम। लूका २२:३२

3 मिनु इन तशो नु इन नेंशो मिम्तीन। मेको कली मप्रेंथु, इन थुं गो आं गे लेत्तीन। गे मो मपाइतीनी हना, गो खुइ खोदेशो पा इन बाक्तीकेमी जाक्नुड। मिनु गो गेना जाक्नुडा, गे मतुइक्नीनी। १थिस्सलोनिकी ५:२

4 मिनू सारडीस सहर डा थमा सुइक्व आन ग्रुन्तीकेमी का निक्शी रिम्शो पा थमा सुइक्व यो बाक्नीम। मेकोपुकीमी पाप मपाम, मोपा आन वा मलुम्सीशो बाक्व। मारदे हना मेको आन नाक्त किंत डा गेय परमप्रभु यावे कली गारब। मोपतीके मेकोपुकी गो नु बुश वा फेक्शा, हिरचा शिरनीम। यहूदा :२३

5 सु सुमी सैतान कली ग्रानीमी, मेको आन कली मोपा बुश वा फेक्वा गेनुड। मिनू मेको आन नें परमप्रभु यावे नु ब्रोंइचा ताइब आन नें ब्रेक्शो किताब रे मक्याम्नुड। गोमी आं आफ नु आ स्वर्ग डा गेय पाइब आन डोंइती 'मेको आं मुर नम' देंनुड। प्रकाश ७:१३; लूका १०:२०; मती १०:३२

6 परमप्रभु यावे आ सोक्तीमी थमा सुइक्व आन कली शेंशो लोत्र सु सुम नेंने चाप्नीमी, मेकोमी नेन्मेक्ल" दे ब्रेक्पाइक्ती।

### फिलाडेल्फीया कली चिठी

7 मिनू येसु ख्रीस्तमी आं कली फिलाडेल्फीया सहर डा थमा सुइक्व आन शेंब कली ब्रेक्पाइक्ती। मेको परमप्रभु यावे आ तौ, थमा पा पाप रे प्रॉइब, दाऊद आ राज्य डा सांचो थीबमी लाप्चो रोकगा डा मेरे सुइमी चोक्ने मचाप्नीम। मिनू चोक्गा डा मेरे सुइमी रोकने मचाप्नीमी। यसैया २२:२२

8 मेकोमी "गो इन पशो गेय तुइक्नुड। गे इन सक्ति आइक्च बाक्त हना यो, आं देंशो टीतीनी। मिनू गेपुकीमी 'येसु ख्रीस्त कली मतुइक्नुड' दे गेनायो मदेनी। मोपतीके गो इन कली लाप्चो रोकशा वोइक्ता। मेको सुइमी चोक्ने मचाप्नीम।

9 मिनू इन ग्रुन्तीकेमी का निक्शीमी 'यहूदी नकी' दे जोल पाइनीम। मेकोपुकी चहिं सैतान आ शेंशो मुर बाक्नीम। नेनीन, गो मेको आन कली इन खोइलीमी बाप्शा सेउ पपाइक्नुड। गोमी इन कली दाक्नुड, दे मेको आन कली तुइक्पाइक्नुड। प्रकाश २:९; यसैया ४९:२३; यसैया ६०:१४

10 मिनू गे शुश श्येत फाल्शा, आं देंशो लोत्र मप्रॉइनी। मोपतीके रागी नेल्ल डा मुर आन थुं थाम्चा कली जाक्शो श्येत रे प्रॉइनन्नी। प्रकाश १४:१२; मती ६:१३

11 मिनू गो फ्रा लेशशा यीनुड। थमा सुइक्वा मप्रॉनीन। मोपा बाक्तीनी हना, सुइमी इन सिरपेच रोइक्ने मचाप्नीम। प्रकाश २:१०

12 सु सुमी सैतान कली ग्रानीमी, गोमी मेको आन कली आं परमप्रभु यावे आ खिं डा थाम खोदेंशो बोल्यो सेल्लुड। मिनू मेको गेना हना यो परमप्रभु यावे आ खिंमी बाक्नीम। मिनू मेको मुर आन तारी आं परमप्रभु यावे आ नें, आं परमप्रभु यावे आ सहर आ नें नु आं नक नें ब्रेक्नुड। आं परमप्रभु यावे आ सहर चहिं नक यरूसलेम माइशो बाक्व। मेको नक यरूसलेम आं परमप्रभु यावे आ बाक्तीक स्वर्ग रे यीब। प्रकाश १४:१; प्रकाश २१:२

13 परमप्रभु यावे आ सोक्तीमी थमा सुइक्व आन कली शेंशो लोत्र सु सुमी नेंने चाप्नीमी, मेकोमी नेन्मेक्ल" दे ब्रेक्पाइक्ती।

### लाओडीसीया कली चिठी

14 मिनू येसु ख्रीस्तमी आं कली लाओडीसीया सहर डा थमा सुइक्व आन शेंब कली ब्रेक्पाइक्ती। एको आमन माइशो, दीगो पाइब परमप्रभु यावे आ सांकछी नु रागी नु मारेइ मारेइ सेल्ल आ लोत्र बाक्व। कलस्सी २:१; कलस्सी ४:१३; २कोरिन्थी १:२०; प्रकाश १:५; कलस्सी १:१५

15 मेकोमी "गो इन पशो गेय तुइक्नुड। इन थमा सुइक्वा सिक्स यो ममाइ, होश यो ममाइ, कि सिक्स कि होश दुम्शो हना, रिम्शो दुम वा।

16 तन्न इन थमा सुइक्तीके गाम्चा चिक्शो बाक्व। मोपतीके गो इन कली तेशा ताइक्नुड।

17 मिनू गेपुकीमी 'आंइ के शुश शोंप बाक्व। गो शोंप पाइशो नकी। गो मारेइ ममाल्नीकी' देंनीनी। तन्न गो इन कली श्येत जाइब नु पुडग, मिक्च मताइब नु हेरा शिश्रा गाक्शा पुंडब खोदेंशो दुम्शो ताता। १कोरिन्थी ३:१८; १कोरिन्थी ४:८

18 मोपतीके गो इन कली लोत्र का पाइनुड, मार लोत्र पाइनुड देंशा हना, गे शोंप पाइशो दुम्चा कली आं सुन ग्यापीन। मेको सुन याप्पाइशो बाक्व। मेको ग्याप्तीनी हना, गे शोंप पाइशो दुम्नीनी।

मिनु फेक्चा कली बुश वा ग्यापीन। मेको ग्याप्तीनी हना, मुने मदोक्नीनी। मिनु इन मिक्च, सापाइक्चा कली मिक्चीम खेक्तीके ग्यापीन। ग्याप्शा खेक्साक्नी हना, गे ताइनीनी।

19 गो आं दाक्शो मुर आन कली आन मरिम्शो पतीके कौंइनुड। नोले गो मेको आन कली श्येत गेशा, आल खोदेंशो पा शेंनुड। इन थुं गो आं गे लेत्तीन। इन थमा सुइक्तीके बारपतीन। हितोपदेस ३:१२; १कोरिन्थी ११:३२; हिब्रू १२:६

20 नेनीन, गो लाडगाम जाक्शा 'बाक्नी?' दे ब्रेत्नुड। सु सुमी आं सेंदा नेंशा 'ओव्रडीन' देंनीमी, गो मेको नु बाक्थ ओव्रनुड। मिनु मेको नु काथा बाक्शा, खमे जाइनुड। यूहन्ना १४:२३

21 सु सुमी सैतान कली ग्रानीमी, मेको आन कली आं ठेयब नित्तीकेमी निप्पाइक्नुड। गो डोंइती प्राती। मोपा गो आं आफ आ ठेयब नित्तीकेमी आफ नु निस्साक्यी। मती १९:२८

22 परमप्रभु यावे आ सोक्तीमी थमा सुइक्ब आन कली शेंशो लोव्र सु सुमी नेंने चान्पीमी, मेकोमी नेन्मेक्ल" दे ब्रेक्पाइक्ती।

## 4

### परमप्रभु कली पशो कुम्सो

1 मिनु नोले सरीड गे कोव्रता। मिनु मेकेर लाप्चो का रोकशा वोइश्शो ताता। मिनु डोंइती आं नेंशो तुराही ताप्शो खोदेंशो ठेयब सेंदा लेंशा नेंता। मेको सेंदामी "एक कुवो। नोले मार दुम्बा, गो इ कली कौंइनन" दे माइक्ती। प्रकाश १:१०

2 मिनु गो परमप्रभु यावे आ सोक्तीमी ब्रीती। स्वर्गमी ठेयब नित्तीके वोइश्शो ताता। मेको ठेयब नित्तीकेमी का निश्शो ताता। भजन संग्रह ४७:९; यसैया ६:१; इजीकीएल १:२६-२८

3 मेको ठेयब नित्तीके बुश नु लल टल्केशो हीरा खोदेंशो तांइसाक्व। मेको ठेयब नित्तीके आ एर ओंथ वाक्श दाप्शो ताता। मेको वाक्श गिग हीरा खोदेंशो तांइसाक्व।

4 मिनु ठेयब नित्तीके आ एर ओंथ २४ ओटा आइक्च नित्तीकपुकी बाक्तेक्म। मेको नित्तीकपुकीमी बुश वा फेक्शो नु आन पियामी सुन के सिरपेच गुप्शो २४ जना शेंब खाल्पा निश्शो बाक्तेक्म। प्रस्थान १९:१६; प्रकाश १:४

5 मिनु मेको नित्तीक रे चिला दाप्शो तांइसाक्व। मिनु बुंबु पशो रेयके नु सेंदापुकी नेंसाक्व। मिनु ठेयब नित्तीक आ डोंइती ७ ओटा ब्रशो तोव्रशी बाक्तेक्म। मेको ७ ओटा तोव्रशी चहिं परमप्रभु यावे आ ७ टाउंम बाक्शो सोक्त बाक्तेक्म। प्रस्थान १९:१६

6 मिनु नित्तीक आ डोंइती समुन्द्र खोदेंशो दिंम का बाक्त। मेको दिंम सिसा खोदेंब टल्केशो तांइसाक्व। मिनु मेको ठेयब नित्तीके आ एर ओंथ आन रां नेल्ले शुश मिक्च पाइश्शो ४ ओटा सेस जन्तु बाक्तेक्म। इजीकीएल १:५, १०, २२

7 मेको सेस जन्तुपुकी दोदेंब तांइसाक्म देशा हना, डोंइती डा जन्तु गुप्स खोदेंशो तांइसाक्व, अर्को सेस जन्तु बोहोर खोदेंशो तांइसाक्व। नोले डा सेस जन्तु आ कुल मुर के खोदेंशो तांइसाक्व। मिनु नेल्ल क्येडा नोले डा सेस जन्तु बेरशो ककाकुली खोदेंशो तांइसाक्व। इजीकीएल १०:१४

8 मिनु मेको सेस जन्तु ६, ६ ओटा फ्रां पाइश्शो बाक्तेक्मे। मेको आन फ्रां नेल्ल नु आन रां नेल्लेमी मिक्च पाइश्शो बाक्तेक्म। मिनु मेकोपुकी नाक्दो नाक्त परमप्रभु यावे कली कुम्सो पना पन बाक्बाक्तेक्म। मार कुम्सो पाइबाक्तेक्म देशा हना, "परमप्रभु यावे, गे का ला परमप्रभु ननी। गे नेल्ल सक्ति पाइश्शो बाक्नीनी। गे डोंइती बाक्शो बाक्तीनी। मुल यो बाक्नीनी। मिनु नोले यो जाक्नीनी" दे कुम्सो पना पन बाक्बाक्तेक्म। यसैया ६:२-३; प्रस्थान ३:१४

9 मोपा मेको ४ ओटा सेस जन्तुम गेना हना यो ब्रोंइशा बाक्ब ठेयब नित्तीकेमी निप्ब कली "गे छेडछेड, मान ताइब नु रिम्शो पाइब बाक्नीनी" देंमानु,

10 मेको २४ जना शेंब खाल्पामी मेको ठेयब नित्तीकेमी निप्ब आ डोंइती आन पोक्च थेक्शा सेउ पाम्तेक्म। मिनु गेना हना यो ब्रोंइशा बाक्ब कली मान पाम्तेक्म। मिनु मेकोपुकीमी आन सिरपेच पुइश्शा, मेको ठेयब नित्तीकेमी निप्ब आ डोंइती वोइश्शा

11 “गे प्रभु, आंइ परमप्रभु यावे ननी। गे सक्ति पाइशशा, छेडछेडम बाकशा, मान ताइब बाकनीनी। मारदे हना गे मारेइ मारेइ सेल्टीनी, मोपा इन दाकशा सेल्लो मुल सम्म बाकब” दे कुम्सो पना पन बाक्तेकम।

## 5

### छाप थोक्शो कागज

1 मिनु गो मेको ठेयब निल्टीकेमी निप्ब आ ग्युरा गुडमी ओल्शो कागज का शेशो ताता। मेको कागजम निम्फा गे ब्रेक्शो बाकत। मिनु मेको कागज ७ ओटा छाप थोक्शा, प्राक्ने मचाप्चा डा सेल्लो बाकत। प्रकाश ४:३; इजीकीएल २:१-१०

2 मिनु गो सक्ति पाइशशो परमप्रभु यावे आ स्वर्ग डा गेय पाइब का ताता। मेकोमी ठेयब सेंदामी “सुमी मेको ७ ओटा छाप पुइशशा, कागज प्राक्ने चाप्बा?” दे हिल्लो पाप्नु।

3 मिनु स्वर्गमी, रागीमी नु रागी आगाम बाक्बपुकीमी सुडमी मेको कागज प्राक्ने मचबेम, कोवने यो मचबेम।

4 मोपतीके गो शुश डाक्ती। मारदे हना सुडमी मेको कागज प्राक्ने मचबेम, कोवने यो मचबेम।

5 मिनु मेको शेंब खाल्पा कामी आं कली “मडाक्को। मेको गुप्स, यहूदा आ थर डा पिप दाऊद आ खिं डा बाक्ब। मेकोमी सैतान कली ग्रात। मोपा मेको कागज डा ७ ओटा छाप पुइशशा प्राक्ने चाप्ब” देंत। उत्पत्ती ४९:९-१०; यसेया ११:१

### पाठा कली नक कुम्सो पशो

6 मिनु गोमी ठेयब निल्टीके, ४ ओटा सेस जन्तु नु शेंब खाल्पा आन दातेमी क्योरशो पाठा खोदेशो पा दोक राप्शो ताता। मेको पाठा के ७ ओटा ग्रोव नु ७ ओटा मिक्च बाकत। मेको मिक्च चहिं परमप्रभु यावेमी रागी रागीमी सोइशशो परमप्रभु यावे आ ७ ओटा सोक्त बाक्तेकम। यसेया ५३:७; यूहन्ना १:२९

7 मिनु मेको पाठामी मेको ठेयब निल्टीकेम निप्ब आ ग्युरा गुड रे मेको कागज ताक्तु।

8 मोपा ताक्गानु, सेस जन्तु नु शेंब खाल्पापुकी पाठा आ डोंइती पोक्च थेक्शा बाप्तेकम। मेकोपुकीमी ठेयब ताप्तीके नु सुन के थनौरो कुरशो बाक्तेकम। मिनु सुन के थनौरो चहिं धूपमी ब्रीशो बाक्तेकम। मेको धूपमी ब्रीशो थनौरो चहिं थमा सुइक्ब मुर आन मान पशो नु पुंइशो लोत्र बाक्तेकम।

9 मिनु मेकोपुकीमी पाठा कली नक कुम्सो का पाप्तेकम। मार नक कुम्सो पाप्तेकम देशा हना “मेको कागज ताक्ने नु प्राक्ने चाप्ब, गे का ला ननी। मारदे हना गे मुर आन कली परमप्रभु यावे आ नेक्था बाक्पाइक्चा कली ग्याप्तीनी। दोपा ग्याप्तीनी देशा हना, साइक्चा पुंइसीशा, इन हुश शाइशशा ग्याप्तीनी। मिनु गे मार मुर ग्याप्तीनी देशा हना, नेल्ल थर रे, नेल्ले लोत्र रे, नेल्ल जात रे नु नेल्ल रागी रे मुरपुकी ग्याप्तीनी। भजन संग्रह ३३:३

10 मिनु गे मेको आन कली परमप्रभु यावे आ राज्य डा पिप नु आ डोंइती राप्ब सेल्टीनी। मिनु रागी नेल्ल कली सासन पाइब यो सेल्टीनी” दे कुम्सो पाप्तेकम। प्रकाश १:६; प्रस्थान १९:६

### पाठा कली मान पशो

11 मिनु मेको ठेयब निल्टीके गे कोवना कोवना बाक्डानु, सेस जन्तु नु शेंब खाल्पा आन एर ओंथ शुश परमप्रभु यावे आ स्वर्ग डा गेय पाइब आन सेंदा नेता। मिनु मेकोपुकी गिश बाक्तेकम देशा हना, हजार हजार, लाख लाख बाक्तेकम। हिब्रू १२:२२

12 मिनु मेकोपुकीमी “मेको साइक्चा पुंइसीशो पाठा का ला सक्ति पाइशशो, शोंप पाइशशो, जोक्तीक तुइक्तीक, बोल, मान, छेडछेड नु रिम्शो पाइब बाक्नीनी देंचा शिरशो बाक्ब” दे ठेयब सेंदामी देंतेकम। १इतिहास २९:११; फिलिप्पी २:९-१०

### शुश मुरुम मान पशो

13 मिनु स्वर्गमी बाक्ब, रागी नु रागी आगाम बाक्ब, समुन्द्र तारी नु आगाम बाक्ब नेल्लेमी “गेना हना यो टेयब नित्तीकेमी निप्ब नु पाठा कली गे रिम्शो पाइब बाक्नीनी, मान, छेडछेड ताइब नु सासन पाइब बाक्नीनी” देशो नेता।

14 मिनु मेको ४ ओटा सेस जन्तुमी “आमेन” देतेक्म। मिनु मेको खाल्पापुकीमी बाप्शा सेउ पाम्तेक्म।

## 6

### पाठामी छाप प्राक्शो

1 मिनु मेको पाठामी मेको कागज रे ७ ओटा छाप रे का प्राक्शो ताता। मिनु सेस जन्तु कामी बुंबु पशो खोदेशो पा “पिवो” दे ब्रेशो नेता।

2 मिनु गो बुश शारा का ताता। मेको शारा डोइक्बमी लिब्रा कुरशो बाक्त। मेको कली सिरपेच गेशो बाक्त। मिनु मेको ग्राना ग्रान गाक्त। जकरिया ६:१-८

3 मिनु पाठामी मेको लीशो ६ ओटा छाप रे का प्राक्गानु, अर्को सेस जन्तुमी “पिवो” दे ब्रेशो नेता।

4 मिनु गो अर्को शारा का ताता। मेको शारा चहिं शुश लल बाक्त। मिनु शारा डोइक्ब कली रागी डा मुर आन दुशा बाक्तीके नेल्ल रोइक्चा कली नु मुर क्योरमुपाइक्चा कली टेयब चुक्ब गेशो बाक्त।

5 मिनु पाठामी मेको लीशो ५ ओटा छाप रे का प्राक्गानु, अर्को सेस जन्तुमी “पिवो” दे ब्रेशो नेता। मिनु गो क्येर शारा का ताता। मेको शारा डोइक्बमी तुला का ग्याइशो बाक्त।

6 मिनु गो मेको ४ ओटा सेस जन्तु आन दातेमी सेंदा कामी “काबु डा गेय कली माना निकशी चेरब फस गाल्च माल्ताक्ब। मिनु काबु डा गेय कली माना सां क्योव्रज फस गाल्च माल्ताक्ब। तेल नु अङ्गुर शांबु कली चहिं मारेइ मपचा” देशो नेता।

7 मिनु पाठामी ४ ओटा लीशो छाप रे का प्राक्गानु, नोले डा सेस जन्तुमी “पिवो” देशो नेता।

8 मिनु गो हौ शारा का ताता। मिनु मेको शारा डोइक्ब आ नें चहिं साइक्पाइक्ब नु बेक्पाइक्ब बाक्त। मिनु रागी डा बेक्शो मुरपुकीमी मेको आ नोले खोइक्तेक्म। मिनु मेको कली रागी डा ४ भाग डा भाग का मुर आन कली साइक्पाइक्चा, दे अधिकार गेशो बाक्त। दोपा साइक्पाइक्चा गेशो बाक्त देशा हना, कोइ आन कली तरवारम साइक्पाइक्चा, कोइ आन कली अन्कालम बेक्पाइक्चा, कोइ आन कली मुर साइक्ब रोइ पा बेक्पाइक्चा नु कोइ आन कली जन्तुमी साइक्पाइक्चा, दे अधिकार गेशो बाक्त। इजीकीएल १४:२१

9 मिनु पाठामी मेको लीशो छाप सां रे का प्राक्गानु, गो चढेतीके आगाम शुश मुर आन कली ताता। मेकोपुकी परमप्रभु यावे आ लोव्र टिचा कली नु अर्को आन कली येसु ख्रीस्त परमप्रभु यावे आ तौ बाक्ब, दे शेंचा आ परबम साइक्चा पुंइसीशो मुर बाक्तेक्म।

10 मिनु मेकोपुकीमी टेयब सेंदामी “परमप्रभु, गे का ला परमप्रभु नु थमा पा नेल्ल आन कली सासन पाइब बाक्नीनी। गेना आंइ कली साइक्ब आन कली निसाफ पाइनीनी? गेना रागीम बाक्ब आन कली क्येक्क लेत्नीनी?” देतेक्म।

11 मिनु परमप्रभु यावे आ स्वर्ग डा गेय पाइबमी मेको आन कली बुश वा का का फेक्चा कली गेप्टु। मिनु मेकोमी मेको आन कली “इक्का रिम्दीन, अर्को इन खोदेशो पा येसु आ गेय पाइब नु अर्को थमा सुइक्ब लोकब इन बुदी साइक्चा पुंइसीमा सम्म रिम्दीन” देत।

12 मिनु पाठामी मेको लीशो छाप निकशी रे का प्राक्गानु, टेयब खिनु कुत। मिनु नां कुंखी खोदेशो क्येर दुम्त। तास्ला चहिं हुश खोदेशो लल दुम्त। यसैया २४:२१-२३; योएल ३:३-४; मत्ती २४:२९

13 मिनु टेयब फशेमी फोव्रशी आ ममीशो गेडा तोक्शो खोदेब पा सरीड डा सोरुलपुकी रागीमी दोक्तेक्म।

14 मिनु सरीड ओल्शो कागज खोदेशो पा लाक्तु। डांडा, टापु नेल्ल याक्साक्म। यसैया ३४:४

15 मेना रागी डा पिपपुकी नु टेयब मुरपुकी, फौज डा कप्तानपुकी, शोंप पाइशो नु बोल्यो मुरपुकी, वाइलीम वाइल नु मुर नेल्ल पहाड डा सेरथे फुल्लु नु पुक्खीमी खुंइसाक्म। यसैया २:१०,१९

16 मिनु पहाड नु सेरथे फुल्लु कली “गो आंड कली सुम्की। मेको ठेयब नित्तीकेमी निण्व नु पाठा आस गाडक्चा रे आंड कली खुडक्तीकी। लूका २३:३०

17 मारदे हना मेको आस गाडक्ची नाक्त जाक्त। सुड मेको आस डोंडती राप्ने मचाप्नीम” दे ठेयब सेंदामी ग्रीतेक्म। आमोस ५:१८; रोमी २:५; मलाकी ३:२

## 7

### इसाएली छाप थोक्सीशो

1 मिनु नोले गो ४ जना परमप्रभु यावे आ स्वर्ग डा गेय पाइबपुकी रागी डा ४ कुनामी राप्शो तातामी। मेकोपुकी रवा आ सफा काड यो महिम्पाइक्चा, रागी नु समुन्द्रमी फश मपपाइक्चा कली राप्शो बाक्तेक्म। दानीएल ७:२

2 मिनु अर्को परमप्रभु यावे आ स्वर्ग डा गेय पाइब का नां दाप्तीके रे कुशो ताता। मिनु गेना हना यो ब्रोंडब परमप्रभु यावे आ छाप मेको नु बाक्शो बाक्त। मेकोमी रागी नु समुन्द्र बिघेचा कली अधिकार तशो ४ जना परमप्रभु यावे आ स्वर्ग डा गेय पाइब आन कली ठेयब सेंदामी

3 “गोपुकीमी आंड परमप्रभु यावे आ वाइलीम वाइल आन कुप्फीमी छाप मथोक्शो सम्म रागी, समुन्द्र नु रवा आन कली मबिघेने” देंत। प्रकाश ९:४; इजीकीएल ९:४,६

4 मिनु गिश मुरपुकी छाप थोक्चा पुंडसीशो बाक्तेक्म देंशा हना, इसाएली आन १२ थर डा लाख का ४४ हजार मुर छाप थोक्चा पुंडसीशो बाक्तेक्म। मिनु इसाएली आन थर डा तेको तेको बाक्तेक्म देंशा हना, प्रकाश १४:१,३

5 यहूदा आ थर रे १२ हजार,

रूबेन आ थर रे १२ हजार,

गाद आ थर रे १२ हजार,

6 आशेर आ थर रे १२ हजार,

नाप्ताली आ थर रे १२ हजार,

मनस्से आ थर रे १२ हजार,

7 सिमियोन आ थर रे १२ हजार,

लेवी आ थर रे १२ हजार,

इस्साकार आ थर रे १२ हजार,

8 जबूलून आ थर रे १२ हजार,

योसेफ आ थर रे १२ हजार नु

बेन्यामीन आ थर रे १२ हजार मुरपुकी छाप थोक्चा पुंडसीशो बाक्तेक्म।

### अर्को रागी डा मुर

9 मिनु नोले हिकने मचाप्चा डा पा रागी रागी नेल्ल डा, जात नेल्ल डा, थर नेल्ल डा मुर नेल्ल नु लोव्र नेल्ल डा मुर ठेयब नित्तीकेमी निण्व नु पाठा आस डोंडती राप्शो तातामी। मेकोपुकीम बुश वा फेक्शो बाक्तेक्म। मिनु आन गुडमी खजूर रवा आ राशी शेशो तातामी।

10 मिनु मेकोपुकीमी परमप्रभु यावे नु पाठा आस कली “मेको ठेयब नित्तीकेमी निण्व आंड परमप्रभु यावे नु पाठामी ला पाप रे प्रोंडने चाप्नीस” दे ठेयब सेंदामी ग्रीतेक्म।

11 मिनु परमप्रभु यावे आ स्वर्ग डा गेय पाइब नेल्ले, ठेयब नित्तीके, शेंब खाल्पा नु मेको ४ ओटा सेस जन्तु आन एर ओंथ बाक्तेक्म। मिनु मेको नेल्लेमी ठेयब नित्तीकेमी निशशो परमप्रभु यावे आ डोंडती खुम्की पा बाप्शा, परमप्रभु यावे कली मान पाप्तेक्म।

12 मेकोपुकीमी “आमेन। नेल्ल आसीक गेचा नु छेडछेड, जोक्ब तुइक्ब थुं, रिम्शो पाइब, मान सक्ति नु सासन पतीके नेल्ल गेना हना यो आंड परमप्रभु यावे केन बाक्ल। आमेन” दे नेल्लेमी देंतेक्म।

13 मिनु मेको शेंब खाल्पा कामी आं कली “मेको बुश वा फेक्शो मुरपुकी सु नमी? ते रे जाक्मा?” दे हिल्लो पती।



14 मिनू गोमी “हजुर, गो मतुडकुनुड, गे तुडकुनीनी” देंती। मिनू मेको खाल्पामी “मेकोपुकी ठेयब श्येत रे जाक्तेक्म। मिनू मेको आन मरिम्शो पतीके लुम्सीशो वा पाठा आ हुशेमी मुरतीके बुश दुम्त। मत्ती २४:२१; प्रकाश १२:११

15 मो दुम्तीके मेकोपुकी परमप्रभु यावे आ ठेयब नित्तीके आ डोंइती बाक्नीम। मिनू नाक्दो नाक्त परमप्रभु यावे आ खिंमी परमप्रभु यावे कली गेय पाइनीम। मिनू ठेयब नित्तीकेमी निम्बमी मेकोपुकी नु बाक्शा, मेको आन कली कोत्रब।

16 मुल मेकोपुकी लेंशा शोत्रलु मबेक्नीम। तूतू मदाक्नीम। नां नु अर्को रापमी मेको आन कली गेनायो मनाम्ब। यसैया ४९:१०

17 मारदे हना मेको ठेयब नित्तीके आ दातेमी बाक्शो पाठाामी मेको आन कली कोत्रशा, गोठला पाइब। मिनू मेकोमी मेको आन कली ब्रोंइचा गेब ब्वाक्कु बुक्तीके कोंइब। मोपा परमप्रभु यावेमी मेको आन प्रेक्कु फिक्ब” देंत। भजन संग्रह २३:२; प्रकाश २१:४; यसैया २५:८

## 8

### पाठाामी नोले डा छाप प्राक्शो

1 मिनू पाठाामी ७ ओटा छाप रे नेल्ल क्येडा नोले डा छाप प्राक्शानु, आधा घन्टा सम्म स्वर्गमी सिक्सी पा काइ रेयके मपाम। हबकुक् २:२०

2 मिनू नोले गो ७ जना परमप्रभु यावे आ स्वर्ग डा गेय पाइबपुकी परमप्रभु यावे आ डोंइती राप्शो तातामी। मिनू मेकोपुकीमी तुराही का का ताक्तेक्म। मत्ती २४:३१

3 मिनू अर्को परमप्रभु यावे आ गेय पाइब का जाक्शा, चढेतीक आ नेक्शा राप्त। मेकोमी सुन के थनौरो कुरशो ताता। मिनू मेकोमी शुश धूप ताक्तु। मार पचा कली ताक्तु देंशा हना, थमा सुइक्ब आन परमप्रभु यावे कली मान पशो नु पुंइशो लोत्र सुन के चढेतीकेमी ब्वाइक्चा कली ताक्तु।

4 मिनू परमप्रभु यावे कली मान पा पुंइशो लोत्र नु मेको धूप आ कुन परमप्रभु यावे आ स्वर्ग डा गेय पाइब आ गुड डा थनौरो रे परमप्रभु यावे आ डोंइती लत।

5 मिनू नोले मेको परमप्रभु यावे आ स्वर्ग डा गेय पाइबमी धूप चढेतीके डा मी लाइशशा, मेको थनौरोमी कुर पाप्तु। मिनू रागीमी ताइक्ताक्व। मिनू रागीमी बुंबु पाप्तु, शुश रेयके पाप्तु। चिला पा खिनु कुत। इजीकीएल १०:२

### डोंइती डा ४ ओटा तुराही

6 मिनू मेको ७ ओटा तुराही शेयब परमप्रभु यावे आ स्वर्ग डा गेय पाइबपुकीमी तुराही ताप्चा चिक्ताक्म।

7 मिनू डोंइती डा तुराही शेयब परमप्रभु यावे आ स्वर्ग डा गेय पाइबमी ताप्तु। मोपा तबानु, सरीड रे रागी तारी हुश ब्वांइसीशो मुप्स नु मी यित। मिनू रागी के भाग सां डा भाग का, रवा आन भाग सां डा भाग का नु घांस नेल्ल दुप्शा नेक्तु। प्रस्थान ९:२३-२६

8 मिनू लीशो ६ जना परमप्रभु यावे आ स्वर्ग डा गेय पाइब कामी तुराही ताप्तु। मोपा तबानु, ठेयब मी ब्रशो डांडा खोदेशो समुन्द्रमी ताइशशो ताता। प्रस्थान ७:२०-२१

9 मिनू समुन्द्र के भाग सां डा भाग का हुश दुम्त। मेकेर बाक्ब जन्तु नु डांइपुकी भाग सां डा भाग का बेक्तेक्म। मिनू जाजपुकी भाग सां डा भाग का खतम दुम्तेक्म।

10 मिनू लीशो ५ जना परमप्रभु यावे आ स्वर्ग डा गेय पाइब कामी तुराही ताप्तु। मिनू सरीड रे मी ब्रशो रांको खोदेशो ठेयब सोरुल खोला इनार नु ब्वाक्कु बुक्तीके डा भाग सां डा भाग का तार दोक्त। यसैया १४:१२

11 मेको सोरुल आ नें कशो बाक्त। तेकेर मेको सोरुल दोक्मे, मेकेर डा ब्वाक्कु कशो दुम्त। मिनू शुश मुरपुकी मेको कशो दुम्शो ब्वाक्कु तूशा बेक्तेक्म।

12 मिनु लीशो ४ जना परमप्रभु यावे आ स्वर्ग डा गेय पाइब डा कामी तुराही ताप्तु। मिनु नां तास्ला नु सोरुल आन भाग सां डा भाग का खतम दुम्तेकम। मोपा छेडछेड डा भाग सां डा भाग का छिडछिड दुम्त। नाक्त डा भाग सां डा भाग का यो छिडछिड दुम्त। मिनु नाकदो डा भाग सां डा भाग का यो छिडछिड दुम्त। प्रकाश ६:१२; प्रस्थान १०:२१

13 मिनु नोले ककाकुली का सरीडमी बेरशो ताता। मेकोमी ठेयब सेंदामी “मुल परमप्रभु यावे आ स्वर्ग डा गेय पाइब सांमी तुराही ताप्चा लीतेकम। मेको आन ताप्शो रेयकेमी रागी डा मुर आन कली थम हिंचा डा दुम्चाप्तु। आबी आबी आबी, तुराही ग्रीशोमी रागी डा मुरपुकी शुश श्येत जाइनीम” दे ग्रीशो नेंता।

## 9

### लीशो तुराही सां डा निक्शी

1 मिनु लीशो ३ जना परमप्रभु यावे आ स्वर्ग डा गेय पाइब कामी तुराही ताप्तु। मिनु गोमी सोरुल का सरीड रे दोक्शो ताता। मेको सोरुलमी ठेयब दुइशो, पुं मपाइशो ढोडोडगा डा लाप्चो रोक्तीके सांचो ताक्तु।

2 मिनु मेकोमी ठेयब दुइशो पुं मपाइशो ढोडोडगा डा लाप्चो रोकगानु, कुन यूत। मेको कुन ठेयब मी आ कुन खोदेंब तांडसाक्व। मेको कुन यूमेनु, नां नु सरीड छिडछिड दुम्त। योएल २:२,१०

3 मिनु मेको कुन रे माले खोदेंशो रागीमी यूतेकम। मेको आन सक्ति रागी डा बिच्छी आन के खोदेंशो बाक्त।

4 मिनु मेको आन कली “मेको रागी डा घांस नु रवा डा सफा मबिग्रेने, परमप्रभु यावे आ छाप कुप्फीमी मथोक्शो मुर आन कली ला श्येत गेने। प्रकाश ७:३

5 मिनु मेको आन कली मसतीन, तन्न ५ महिना सम्म श्येत गेने” देंशो नेंता। मेको श्येत चहिं बिच्छीमी मुर आन कली क्राइशो खोदेंशो बाक्ब।

6 मिनु मोदेंशो दुम्मेनु, मुरपुकी बेक्चा दाक्नीम। तन्न बेक्ने मचाप्नीम। प्रकाश ६:३६

7 मिनु मेको माले आन रां दोदेंशो तांडसाक्म देंशा हना, लडाइ पचा कली ठीक पा वोइशो शारा खोदेंशो तांडसाक्म। मेकोपुकी सुन के सिरपेच खोदेंशो गुप्शो बाक्तेकम।

8 मेको आन चां मीश मुर आन चां खोदेंशो बाक्त। मेको आन खुइ गुप्स आन खुइ खोदेंशो बाक्त।

9 मेको आन कुचु डा फेक्तीके फलाम के खोदेंशो बाक्त। मिनु मेको आन बेरशो रेयके चहिं शुश शारामी बग्गी कीशा, लडाइ पथ लशो रेयके खोदेंशो नेंसाक्व।

10 मेको आन मीलुमी बिच्छी के खोदेंशो फूरो बाक्त। मेको आन श्येत गेतीके या बाक्त। मिनु मुर आन कली ५ महिना सम्म श्येत गेचा अधिकार तशो बाक्तेकम।

11 मेको आन के पिप का बाक्त। मेको पिप सु बाक्त देंशा हना, दुइशो, पुं मपाइशो ढोडोडगा डा गेय पाइब बाक्त। मेको पिप आ नें हिबू लोत्रमी अब्बादोन नु ग्रीक लोत्रमी अपोल्लीयोन देंनीम। मेको निम्फा आस अर्थ चहिं खतम पाइब बाक्ब।

12 डोंइती डा हिंचा डा श्येत नुप्त। मिनु अर्को हिंचा डा श्येत निक्शी बाक्नीस।

13 मिनु लीशो निक्शी परमप्रभु यावे आ स्वर्ग डा गेय पाइब कामी तुराही ताप्तु। मिनु गो परमप्रभु यावे आ डोंइती वोइशो सुन के सेल्शो चढेतीके आ ४ सुर रे सेंदा यूशो नेंता। प्रकाश ८:३; प्रस्थान ३९:१-३

14 मेको सेंदामी मेको तुराही ताप्ब परमप्रभु यावे आ स्वर्ग डा गेय पाइब कली “युफ्रेटीस माइशो ठेयब खोला आ नेक्थाम पाइशो ४ जना सैतान आ गेय पाइब आन कली प्रॉइमी” देंशो नेंता। प्रकाश १६:१२

15 मिनु मेको परमप्रभु यावे आ स्वर्ग डा गेय पाइबमी मेको आन कली प्रॉइतु। मेकोपुकी डोंइती मारदे पाइशशा वोइशो बाक्तेकम देंशा हना, परमप्रभु आ देंशो घन्टा, नाक्त, महिना नु बर्स नेल्ल रागी डा मुरपुकी भाग सां डा भाग का साइक्चा, दे ठीक पा वोइशो बाक्तेकम। प्रकाश ८:-

16 मिनु गोमी “शारा डोइशो लडाइ पाइबपुकी २० करोड बाक्नीम” देंशो नेंता।

17 मिनु मेको शारा नु शारा डोइक्बपुकी दोदेशो तातामी देशा हना, मेको शारा डोइक्ब आन कुचुमी पीतल के फेक्तीके फेक्शो तातामी। मेको फेक्तीके मी खोदेशो लल गिम गिम नु हौ ताता। मेको शारा आन पिया गुप्स आ पिया खोदेशो ताता। मिनु आन शोत्र रे मी, कुन नु गन्धक यूत।

18 मिनु मेको मी, कुन नु गन्धक रे मुरपुकी भाग सां डा भाग का बेक्तेक्मे।

19 मिनु मेको शारा आन मीलु चहिं बुस्स आ पिया खोदेशो तांइसाक्म। मोपतीके मेको शारा आन बोल शोत्र नु मीलुमी बाक्त। मिनु शोत्र नु मीलुमी मुर आन कली श्येत गेम्तेक्म।

20 मिनु मबेक्थु लीशो मुरपुकीमी मेको आन मरिम्शो पचा मप्रोनेम। मार मरिम्शो पाम्तेक्म देशा हना, वोल नु देवी देवता आन कली खुम्की पा सेउ पाम्तेक्म। मताइब, मनेंब, मगाक्ब सुन, चांदी, कांसा, फुल्लु नु शी के सेल्शो मूर्ति आन कली खुम्की पा सेउ पाम्तेक्म। प्रकाश १६:९

21 मिनु मेकोपुकीमी मुर साइक्चा, टुना मुना पचा, चिन्ता बाक्चा, तेल्लेम पचा नु खुइ पचा मप्रोनेम। मिनु आन थुं यो परमप्रभु यावे गे मलेत्तेम।

## 10

### यूहन्नाम इम्चीली किताब जशो

1 मिनु नोले गोमी सक्ति पाइश्शो परमप्रभु यावे आ स्वर्ग डा गेय पाइब का गोस्सुमी गिल्सीशा, रागीमी यिशो ताता। मेको आ पियामी वाक्श दाप्शो बाक्त। मिनु मेको आ कुल नां खोदेशो नु आ खोइली हरुर पा ब्रशो मी के थाम खोदेशो तांइसाक्म।

2 आ गुइमी इम्चीली प्राक्शो किताब शेशो बाक्त। मेको आ ग्युरा खोइली समुन्द्र तार नु आ पेरा खोइली चहिं रागी तार थेक्शा राप्त।

3 मेकोमी गुप्स खोदेशो पा ठेयब सेंदामी ग्रीत। मोपा ग्रीमेनु, ७ ओटा बुंबुमी रेयके पाम्तेक्म। भजन संग्रह २९:३-९

4 मेको ७ ओटा बुंबु आ लोत्र ब्रेक्चाडानु, सरीड रे सेंदा कामी “मेको ७ ओटा बुंबु आन लोत्र मब्रेक्तो, मुर आन कली मशेंदो” देशो नेता। दानीएल १२:४,९

5 मिनु डोंइती तशो परमप्रभु यावे आ स्वर्ग डा गेय पाइब ठेयब समुन्द्र नु रागीम खोइली थेक्बमी कसम जचा कली आ ग्युरा गुइ सरीड गे पोक्तु।

6 मिनु मेकोमी दोपा कसम जाप्तु देशा हना, गेना हना यो ब्रोंइशा बाक्ब, सरीड नु सरीडम बाक्ब नेल्ल सेल्ब, रागी नु रागीम बाक्ब नेल्ल सेल्ब, समुन्द्र नु समुन्द्रम बाक्ब नेल्ल सेल्ब, परमप्रभु यावे आ नेमी “मुल देश मपचा” दे कसम जाप्तु। दानीएल १२:७

7 मिनु मेको आ कसम जशो लोत्र मार बाक्त देशा हना “नेल्ल क्येडा नोले डा परमप्रभु यावे आ स्वर्ग डा गेय पाइबमी तुराही तबानु, परमप्रभु यावेमी आ लोत्र पाइब आन कली ‘मुल रिम्ची ना नुप्त’ दे डोंइती रे मशेंशो परमप्रभु यावे आ खुइश्शो लोत्र मुल दुन्चाप्तु” दे कसम जाप्तु। प्रकाश ११:१५; प्रेरित ३:२१

8 मिनु मेको आं नेंशो स्वर्ग डा सेंदामी आं कली लेंशा “लावो, मेको रागी नु समुन्द्र तार राप्शो परमप्रभु यावे आ स्वर्ग डा गेय पाइब आ गुइमी बाक्शो किताब ताक्को” देशो नेता।

9 मिनु गो मेको परमप्रभु यावे आ स्वर्ग डा गेय पाइब आ नेक्था लती। मिनु गोमी मेको कली “मेको इम्चीली किताब गेयीनी” देंती। मेकोमी “ताक्को। मिनु जावो। इ शोत्रमी खुदो खोदेशो पा ब्रोत्रब। मिनु इ कोत्रजमी चहिं काइब” दे माइक्ती। इजीकीएल ३:१-३

10 मिनु गो मेको इम्चीली किताब परमप्रभु यावे आ स्वर्ग डा गेय पाइब आ गुइ रे ताक्शा डा मिन जाता। आं शोत्रमी खुदो खोदेशो जिज दुम्त। दाक्गुनु चहिं आं कोत्रज कत।

11 मिनु लोत्र पाइब कामी आं कली “गे लेंशा शुश मुरपुकी, शुश रागी, शुश लोत्र डा मुर नु शुश पिप आन डोंइती परमप्रभु यावे आ लोत्र नेंपाइक्चा माल्नेवे” देशो नेता। येरमीया १:९-१०

# 11

## यूहन्नाम पुक्तीक ताकशो

1 मिनू परमप्रभु यावे आ स्वर्ग डा गेय पाइब कामी पुक्तीक का गेती। मेकोमी आं कली “लो, बोक्को। परमप्रभु यावे आ खिं नु चढेतीके पुक्को। परमप्रभु यावे आ खिं आगाम सेउ पाइब आन कली हिक्को। इजीकीएल ४०:३; जकरिया ३:५-६; इजीकीएल ४२:२०

2 मिनू परमप्रभु यावे आ खिं डा लाडगा रागी रागी डा मुर आन कली गेशो बाक्त। मेको मपुक्को। मेकोपुकीमी परमप्रभु यावे आ योवशो सहर ४२ महिना सम्म खोइलीमी दिप्शा ताइश्शा बिग्रेनीम” देत। लूका २१:२४

## परमप्रभु आ सांकछी निक्शी

3 मिनू नोले गो परमप्रभु यावेमी आ सांकछी निक्शी आस कली मार लोव्र पशो नेता देशा हना “गे आं लोव्र पाइब दुम्नीसी। गो इस कली आं लोव्र पचा कली सक्ति गेनुड। गे निक्शीमी अरन्डी फेक्शा, हजार का सहे निक्शी ६० नाक्त सम्म आं लोव्र पाइनीसी” दे परमप्रभु यावेमी आ सांकछी निक्शी आस कली लोव्र पशो नेता। प्रकाश १२:६

4 मिनू मेको सांकछी तेल रवा निक्शी नु दियारी निक्शी खोदेशो दुम्शा, रागी डा प्रभु आ डोंडती बाक्नीस। जकरिया ४:३, ११-१४

5 सु सुमी मेको निक्शी आस कली बिग्रेचा माल्नीमी, मेको साइक्चा पुंडसीनीम। दोपा साइक्चा पुंडसीनीम देशा हना, मेको आस शोव रे मी गूशा, मेको साइक्चा पुंडसीनीम।

6 मेको निक्शीमी परमप्रभु यावे आ लोव्र पाम्सेनु, रेउ मयिपाइक्ने चाप्नीस। मेकोमी ब्वाक्कु के हुश सेल्ने चाप्नीस। मिनू रागी कली मार श्येत गेचा दाक्तसे, मेकोन पने चाप्नीस। गिश खेयप मो पचा दाक्तसे, मिश खेयप यो पने चाप्नीस। १राजा १७:१; प्रस्थान ७:१९-२०

7 मिनू मेको निक्शीमी परमप्रभु यावे आ लोव्र थुम्से नोले, मेको पुं मपाइश्शो ढोडोडगा रे ठेयब जन्तु कुशा, मेको निक्शी नु राम्शी पा ग्रात। ग्राशा डा मिन मेको आस कली साइक्तु। प्रकाश १३:३; प्रकाश १३:७

8 मेको आस बेक्शो रां चहिं ठेयब सहर डा लांमी लीताक्से। मेको ठेयब सहर आ खुइश्शो नें चहिं सोदोम नु इजीप्त माइश्शो बाक्त। मेको ठेयब सहरमी मुरपुकीमी मेको आस प्रभु कली शीम कांटी थोक्शा साइश्शो बाक्तेक्म।

9 मिनू थर नेल्ल डा, जात नेल्ल डा, आंम आंम लोव्र पाइब नु रागी रागी डा मुर नेल्लेमी मेको आस बेक्शो रां नाक्त सां नु आधा मेकेर बाक्त। मुरपुकीमी मेको आस कली तुरसुमी वोइक्चा मगेमे।

10 मारदे हना मेको परमप्रभु यावे आ लोव्र पाइब निक्शीमी रागीम बाक्ब आन कली शुश श्येत गेतीके, रागीम बाक्बपुकीमी मेको आस कली साइश्शो तशा, शुश ग्येरशा, मार मार गेमुन्तेक्म।

11 मिनू नाक्त सां नु आधा नोले परमप्रभु यावे आ ब्रोंडचा गेब सोक्त मेको आस बेक्शो रांमी ओव्रत। मिनू मेको निक्शी छुल छाल बोक्शा राप्ताक्स। मिनू रागी रागी डा मुरपुकीमी मेको आस कली तशा थाम्पा हिंतेक्म।

12 मिनू सरीड रे ठेयब सेंदामी मेको निक्शी आस कली “एक कुस” देशो नेताक्स। मिनू गोस्सुमी गिलसीशा, इर सरीड लाम्ताक्से। मेको आस जोरी सत्रपुकीमी मेको आस कली सरीड गे लशो ताम्तेक्म।

13 मिनू मेको निक्शी लसानु, ठेयब खिनु कुत। मेको सहर डा १० भाग डा भाग का ब्रेत्त। मिनू ७ हजार मुर मेको खिनुमी बेक्तेक्म। मेको लीशो मुरपुकी चहिं क्युल क्युल पा हिंशा, स्वर्ग डा परमप्रभु यावे कली मान पाम्तेक्म।

14 हिंचा डा श्येत निक्शी नुप्शा, नोले डा हिंचा डा श्येत जाक्चापुत। प्रकाश ९:१२

## नेल्ल क्येडा नोले डा तुराही

15 मिनू मेको नोले डा परमप्रभु यावे आ स्वर्ग डा गेय पाइबमी आ तुराही तापुत। मिनू स्वर्गमी ठेयब सेंदापुकी नेता। मेकोपुकीमी “आंइ परमप्रभु नु आ ख्नीस्तमी रागी नेल्ल कली सासन पाइब दुम्ताक्से। मिनू गेना हना यो सासन पना पन बाक्नीसी” देशो नेता।

16 मिनु परमप्रभु यावे आ डोंडती मेको २४ जना शेंब खाल्पा आन नित्तीकेमी निश्शा, परमप्रभु यावे आ डोंडती खुम्की पा बाप्शा मान पांतेक्म। प्रकाश ४:४,१०

17 मिनु मेकोपुकीमी “परमप्रभु यावे, गे नेल्ल सक्ति पाइश्शो परमप्रभु बाक्नीनी। गे मुल बाक्नीनी, डोंडती यो बाक्तीनी। इन ठेयब सक्तिमी सासन पचा गोइतीनी।

18 मिनु रागी रागी डा मुरपुकी गाइक्ताक्म। मिनु मेको आन पर्वम गाइक्ताक्नी। बेक्शो मुर आन कली निसाफ पची ना दुम्त। मिनु इन लोत्र पाइब, इन नोले खोइक्ब, इन नें कली मान पा हिंब, आइक्च नु ठेयब मुर नेल्ल आन कली इनाम गेची ना दुम्त। मिनु गे रागी कली बिग्रेब मुर आन कली बिग्रेथ जाक्तीनी” दे परमप्रभु यावे कली देतेक्म। भजन संग्रह २:३

19 मिनु परमप्रभु यावे आ स्वर्ग डा खिं रोक्साक्व। मिनु मेको कबल पशो सन्दोस परमप्रभु यावे आ खिंम तांडसाक्व। मिनु चिला पाप्तु। शुश रेयके नु बुंबु पशो नेंसाक्व। खिनु यो कुत। मिनु ठेयब मुप्स यित। प्रकाश १५:५

## 12

### आल थिचा चिक्शो मीश मुर

1 मिनु गो सरीडमी ठेयब चिन्ड का ताता। मेको चिन्ड दोदेब बाक्त देशा हना, मीश मुर का नां फेक्सीशा, तास्ला तारी राप्शो बाक्त। मेको आ पियामी १२ ओटा सोरुल के सिरपेच गुप्शो बाक्त।

2 मिनु मेकोमी कोव्रज कुरशो बाक्त। मोपतीके सुत्केरी रोइम श्येत जशा, आल थिचा कली ग्रीशो बाक्त।

3 मिनु गो सरीडमी अर्को चिन्ड का ताता। मेको चिन्ड दोदेब बाक्त देशा हना, ठेयब लल बुस्स का बाक्त। मेको बुस्स के ७ ओटा पिया नु १० ओटा ग्रोत्र बाक्तेक्म। आ ७ ओटा पियामी ७ ओटा मुकुट गुप्शो बाक्त।

4 मेको आ मीलुमी सरीड डा सोरुल भाग सां डा भाग का कीशा, रागीमी तोक्तीमी। मिनु मेको ठेयब बुस्स मेको आल थिचशो मीश मुर आ डोंडती राप्शा, आ आल ब्वचा कली रिम्शा बाक्त। दानीएल ८:१०

5 मिनु मेको मीश मुरुमी वोंडश आल का थित। मेको वोंडश आल नोले रागी डा मुर आन कली फलाम के कोक्केमी सासन पाइब दुम्ब। मिनु परमप्रभु यावे आ स्वर्ग डा गेय पाइबपुकीमी मेको वोंडश आल कली परमप्रभु यावे आ ठेयब नित्तीकेम लाइश्शा वोइक्तेक्म। भजन संग्रह २:९

6 मिनु मेको मीश मुर आल थिशा नोले गोरशो रागीमी प्रोक्त। मेकेर परमप्रभु यावेमी बाक्तीके ठीक पशो बाक्त। मिनु मेको कली हजार का सहे निक्शी ६० नाक्त थुल्लेक्म। प्रकाश ११:३

7 मिनु नोले स्वर्गमी परमप्रभु यावे आ ठेयब स्वर्ग डा गेय पाइब मिकाएल माइश्शो नु आ गेय पाइबपुकी गारशा, ठेयब बुस्स नु आ गेय पाइबपुकी नु लडाइ पथ लाम्तेक्म।

8 मिनु ठेयब बुस्स आ गेय पाइबपुकी लडाइ पा बुम्तेक्म। मिनु नोले मेको ठेयब बुस्स नु आ गेय पाइबपुकीमी स्वर्गमी बाक्तीक मथिदेम। उत्पत्ती ३:१

9 मिनु मेको ठेयब बुस्स आ नें मार बाक्त देशा हना, माइत बुस्स, दियाबलस, सैतान बाक्त। मिनु मेको रागी रागी नेल्ल डा मुर आन कली पाप पपाइक्चा कली रागीमी तोक्चा पुंडसीशो बाक्त। मिनु मेको आ गेय पाइबपुकी यो रागीमी तोक्चा पुंडसीशो बाक्तेक्म। प्रकाश २०:२; उत्पत्ती ३:१; लूका १०:१८

10 मिनु गो सरीडमी ठेयब सेंदा का नेंता। मिनु मेको सेंदामी “मुल थमा सुइक्ब आन कली आन पाप रे ब्रोंडतीके जाक्ने थुम्तु। आंइ परमप्रभु यावे आ सक्ति तांडसाक्व नु आ ख्रीस्त आ अधिकार जाक्त। मारदे हना थमा सुइक्ब आन कली दोस गेब रागीमी तोक्चा पुंडसाक्व। मेकोमी नाक्दो नाक्त इं परमप्रभु यावे आ डोंडती आंइ लोक्ब आन कली दोस गेशो बाक्त। प्रकाश ११:१५

11 मिनु थमा सुइक्बपुकीमी सैतान कली ग्राशो बाक्तेक्म। दोपा सैतान कली ग्राशो बाक्तेक्म देशा हना, पाठा आ हुश चद्देशोमी नु आन सांकछी आन पतीके सैतान कली ग्राशो बाक्तेक्म। मेकोपुकीमी आंम कली ममिंथु, येसु खीरस्त आ पर्बम साइक्चा पुंडसीचा यो महिम। प्रकाश ७:१४; प्रकाश ६:९

12 मोपतीके स्वर्ग नु स्वर्गमी बाक्ब नेल्ल ग्येरसीन। तन्न रागी नु समुन्द्रम श्येत दुम्याप्टु। मारदे हना सैतान थाम्पा गाइशशा, रागी नु समुन्द्रम यित। मारदे गाइक्ताक्ब देशा हना, मुल आ गेय पचा शुश नाक्त मली, दे तुइक्ताक्ब” देशो नैता।

13 मिनु मेको ठेयब बुस्सुम आंम कली रागीमी तोक्शो तशा, मेको वोंइश आल थीब मीश मुर कली “साइक्नुड” दे खेदा पाप्टु।

14 मिनु मेको मीश मुरुमी ठेयब ककाकुली आ फ्रां निकशी ताक्तु। मारदे ताक्तु देशा हना, मेको ठेयब बुस्स रे ब्रोंइशा, गोरशो रागीमी बेरशा, प्रोक्चा कली ताक्तु। मेको गोरशो रागीमी परमप्रभु यावेमी आ दाक्ची ना सम्म मेकेर थुल्शो बाक्त।

15 मिनु मेको ठेयब बुस्सुमी “मेको मीश मुर कली योल्दल” दे आ शोत्र रे खोला खोदेशो पा शुश ब्वाक्कु गुंडताक्ब।

16 रागीमी चहिं मेको मीश मुर कली वारच पाप्टु। दोपा वारच पाप्टु देशा हना, रागी आ शोत्र पाक्शा, मेको ठेयब बुस्स आ शोत्र रे गूशो खोला कली दाक्तु।

17 मिनु मेको ठेयब बुस्सुमी मीश मुर प्रोक्शो तशा, गाइशशा, मेको मीश मुर आ चच युइ नु राम्शी पथ लत। आ चच युइ चहिं सु नम देशा हना, परमप्रभु यावे आ शेंशो लोत्र टीब नु येसु कली थमा सुइशशा, आ लोत्र पाइब नम।

18 मिनु मेको ठेयब बुस्स समुन्द्र आ नेक्था राप्शा, रिम्शा बाक्त।

## 13

### समुन्द्र रे गूशो जन्तु

1 मिनु गो समुन्द्र रे ७ ओटा पिया नु १० ओटा ग्रोत्र पाइशशा जन्तु का गूशो ताता। मेको आ १० ओटा ग्रोत्रमी १० ओटा मुकुट गुप्शो बाक्तेक्म। आ पियापुकीमी चहिं परमप्रभु कली शुक्शी पाइब नें ब्रेक्शो बाक्तेक्म। दानीएल ७:३-७

2 मिनु आं तशो जन्तु जोइ खोदेशो बाक्त। आ खोइल चहिं वां के खोदेशो बाक्त। आ शोत्र गुप्स आ शोत्र खोदेशो बाक्त। मिनु मेको ठेयब बुस्सुमी आ सक्ति आ नित्तीके नु आ ठेयब अधिकार मेको जन्तु कली गेप्टु।

3 मिनु मेको जन्तु आ ७ ओटा पिया डा का साइक्चा डा पा क्योरशो खोदेशो ताता। तन्न आ ठेयब गार साशो बाक्त। मिनु रागी रागी डा मुर नेल्ल मेको जन्तु तशा, छक लाक्शा, आ नोले खोइक्तेक्म।

4 ठेयब बुस्सुमी मेको जन्तु कली आ अधिकार गेतीके मुर नेल्लेमी ठेयब बुस्स कली खुम्की पा सेउ पाम्तेक्म। मिनु मेको जन्तु कली यो खुम्की पा “एको जन्तु खोदेशो ठेयब सु बाक्मे? सु एको नु जिशा ग्राने चाप्बा?” दे सेउ पाम्तेक्म।

5 मिनु मेको जन्तु कली ठेयब लेशशा, ब्वाक्चा नु परमप्रभु आ पर्बम मरिम्शो लोत्र पचा कली शोत्र गेशो बाक्त। मेको कली ४२ महिना सम्म सासन पचा कली अधिकार गेशो बाक्त। प्रकाश ११:२

6 मेकोमी परमप्रभु यावे कली मरिम्शो लोत्र पाप्टु। मिनु मेकोमी आ नें आ पर्बम, आ बाक्तीके आ पर्बम नु आ बाक्तीकेमी बाक्ब आन पर्बम यो मरिम्शो लोत्र पाप्टु।

7 मेकोमी परमप्रभु यावे आ योत्रशो मुरपुकी नु लडाइ पशा, ग्राचा कली अधिकार तशो बाक्त। मिनु मेको कली जात नेल्ल, मुर नेल्ल, आंम आंम लोत्र पाइब नु रागी रागी डा मुर नेल्ल आन कली सासन पतीके अधिकार यो गेशो बाक्त। प्रकाश ११:७; दानीएल ७:२१

8 मिनु सु सु आन नें क्योरशो पाठा आ ब्रोंइतीक किताबमी मब्रेक्शो बाक्मे, मेकोपुकीमी मेको जन्तु कली खुम्की पा सेउ पाइनीम। मेको किताब रागी सेल्चा क्येडा डोंइती रे बाक्त।

9 सु सुमी परमप्रभु यावे आ लोत्र नैशा, रुम्ने चाप्नीमी, मेकोमी नेन्मेक्ल।

10 सु जेल्खानमी लचा योव्वसीशो बाकमे, मेको जेल्खानमी लचा माल्ब। तन्न सुमी तरवारमी साइक्बा, मेको तरवारमी साइक्बा पुंडसीब। मिनू परमप्रभु यावे आ योव्वशो मुरपुकीमी श्येत फाल्लो “परमप्रभु यावेमी तुडक्ब” दे थमा सुइश्शा बाक्का माल्नीम। उत्पत्ती ९:६; मती २६:५२; प्रकाश १४:१२

### खप रे ग्रूशो जन्तु

11 मिनू गो खप रे अर्को जन्तु का ग्रूशो ताता। मेको के पाठा के खोदेशो योव्व निक्शी बाक्त। मिनू मेकोमी ठेयब बुस्स खोदेशो पा लोव्व पाइबाक्त।

12 डोंइती डा जन्तु नु बाक्शा, मेको डोंइती डा जन्तु आ अधिकार यो पाइक्बाक्त। मिनू मेकोमी रागी डा मुर नेल्ल आन कली डोंइती डा जन्तु कली सेउ पपाइक्बाक्त। मेको डोंइती डा जन्तु चहिं तेको बाक्त देशा हना, आ बेक्का डा गार साशो जन्तु बाक्त।

13 मिनू मेको नोले डा जन्तुमी ठेयब छक लाक्का डा गेय पाप्तु। मार छक लाक्का डा गेय पाप्तु देशा हना, मेकोमी मुर आन डोंइती सरीड रे मी यिपाइक्तु। मती २४:२४; २थिस्सलोनिकी २:९

14 मेकोमी डोंइती डा जन्तु नु बाक्शा, आ पशो छक लाक्का डा गेयमी मुर आन कली “परमप्रभु आ सक्ति पाइश्शो नड” दे जोल पा छक लाक्का डा गेय पशा, मुर आन कली पाप पपाइक्तु। मार पाप पपाइक्तु देशा हना, मेकोमी रागी डा मुर आन कली “गार पाइश्शो जन्तु आ मूर्ति सेल्चा” दे शेंताक्मी।

15 मिनू मेकोमी जन्तु आ मूर्ति कली ब्रोंइचा सोक्त गेचा अधिकार यो तशो बाक्त। मिनू मेकोमी सोक्त गेवानु, मेको ब्रोंइतीक सोक्त पाइश्शो मूर्ति लोव्व पचा गोप्तु। मिनू मेको जन्तुमी मूर्ति आ डोंइती खुम्की पा सेउ मपाइब मुर आन कली साइक्पाइक्तु।

16 मिनू मेको जन्तुम मार अर्को गेय पाप्तु देशा हना, मेकोमी ठेयब नु आइक्च, शोप पाइश्शो नु पुडग, वाइलीम वाइल नु मुर नेल्ल आन कली कि ग्युरा गुइमी कि कुप्फीमी चिन्ड वोइक्पाइक्तु। प्रकाश १९:२०

17 मिनू सु सु चिन्ड मपाइश्शो बाक्मा, मेकोपुकीमी मारेइ ग्याप्ने नु लेयने मचबेम। मिनू मेको चिन्ड कि जन्तु आ नें कि आ हिक्तीक चिन्ड बाक्त।

18 मेको जन्तु आ नें आ हिक्तीक चिन्ड आ अर्थ मार बाक्मे, दे तुइक्का कली जोक्ब तुइक्ब थुं माल्ब। जोक्ब मुरुमी जन्तु आ हिक्तीक चिन्ड तुइक्ब, मारदे हना मेको मुर आ हिक्तीक नु गारब। मेको हिक्तीक चहिं ६ सहे ६६ बाक्ब। प्रकाश १५:२

## 14

### लाख का ४४ हजार मुर

1 मिनू नोले गो मेको पाठा सियोन डांडामी राप्शो ताता। मिनू लाख का ४४ हजार मुर पाठा नु बाक्तेक्म। मेको आन कुप्फीमी येसु नु आ आफ आ नें ब्रेक्सीशो बाक्त। प्रकाश ७:४; प्रकाश ३:१२

2 मिनू गो स्वर्ग रे सेंदा का नेंता। मेको सेंदा दोदेशो बाक्त देशा हना, शुश ब्वाक्कु आ रेयके नु ठेयब बुंबु पशो रेयके खोदेशो नेंता। तन्न शुश मुरपुकीमी ठेयब तार पाइश्शो ताप्तीके ताप्शो रेयके बाक्त। प्रकाश १:१५

3 मिनू मेको ठेयब ताप्तीके ताप्बपुकीमी ठेयब नित्तीक आ डोंइती, मेको ४ ओटा सेस जन्तु नु शेंब खाल्पा आन डोंइती नक कुम्सो का पाम्तेक्म। मेको कुम्सो सुइमी शेंसीने मचबेम। तन्न मेको लाख का ४४ हजार मुरुम ला मेको कुम्सो शेंसीने चाप्तेक्म।

4 मिनू मेको मुरपुकी रागी डा पाप रे डोन बाक्शो बाक्तेक्म। मिनू मेकोपुकी पाठा तेक तेक लमे, मेक मेक लाइबाक्तेक्म। मेकोपुकी रागी डा मुर आन दाते रे गुंइशा, परमप्रभु यावे नु पाठा आस डोंइती डा योव्वसीशो मुर बाक्तेक्म। १कोरिन्थी ७:१,८

5 मिनू मेकोपुकीम काइ जोल मपशो बाक्तेक्म। मारदे हना पाप मपाइबपुकी बाक्तेक्म।

### स्वर्ग डा गेय पाइब सां आन लोव्व

6 मिनू स्वर्ग आ दातेमी गो परमप्रभु यावे आ स्वर्ग डा गेय पाइब का बेरशो ताता। मेको रागीमी लीशो मुर आन कली गेना हना यो पाप रे प्रॉइब जाक्त, दे ग्येरपाइबकब लोत्र शेंथ यित। मेको नेल्ल रागी डा, नेल्ल जात डा, नेल्ल लोत्र पाइब नु शुश मुर आन कली शेंथ यित।

7 मिनू मेकोमी टेयब सेंदामी “परमप्रभु यावेमी सरीड, रागी, समुन्द्र नु ब्वाक्कु बुक्तीके नेल्ल सेल्लु। मोपतीके इन पोक्च थेंक्शा, परमप्रभु यावे कली मान पा हिनीन। मेको कली टेयब सेलीन। मिनू ‘गे नेल्ल सेल्ल ननी’ देंशा मान पने। मारदे हना मेको आ निसाफ पची ना दुम्त” देंत।

8 मिनू परमप्रभु यावे आ स्वर्ग डा गेय पाइब अर्को कामी मेको डोंइती डा आ नोले खोइश्शा, मेकोमी “बेबीलोन माइश्शा टेयब सहर खतम दुम्त। मारदे हना मेकोमी डोंइती नेल्ल रागी डा मुर आन कली पाप पपाइक्तु। रागी डा मुरपुकी बेबीलोन आ पबर्म परमप्रभु यावे आ गाइश्शा ताम्तेक्म” देंत। प्रकाश १८:२; यसैया २१:९; येरमीया २५:१५-१६; येरमीया ५१:७

9 मिनू सां आन दाते डा परमप्रभु यावे आ स्वर्ग डा गेय पाइबमी अर्को निक्शी आस नोले खोइश्शा, टेयब सेंदामी “सु सुमी मेको जन्तु नु आ मूर्ति कली सेउ पाइनीमी, मेको आन कुप्फीमी कि ग्युरा गुडमी चिन्ड वोइक्पाइक्नीमी, प्रकाश १३:१२-१७

10 मेको आन कली तशा, परमप्रभु यावे शुश गाइक्ब। मिनू मेको मुरपुकीमी आ गाइश्शा तचा माल्नीम। दोपा परमप्रभु आ गाइश्शा तचा माल्नीम देंशा हना, पाप रे डोन बाक्ब परमप्रभु यावे आ स्वर्ग डा गेय पाइब नु पाठा आस डोंइती मेको मुरपुकी हुरु पा ब्रशो मी नु गन्धकम श्येत जचा माल्नीम। भजन संग्रह ७५:७

11 मेको मी आ कुन गेनायो मकाप्ब। मेको जन्तु नु जन्तु आ मूर्ति कली सेउ पाइबपुकी नु जन्तु आ नें आ चिन्ड वोइक्पाइक्बपुकी नाक्दो नाक्ती श्येत जना जन बाक्नीम” देंत।

12 मेना रागीमी परमप्रभु यावे आ योत्रशो थमा सुइक्बपुकीमी श्येत फाल्चा माल्नीम। मारदे हना मेकोपुकीमी परमप्रभु यावे आ अरेशो लोत्र पाइनीम। मिनू येसु कली थमा सुइक्नीम। प्रकाश १३:१०

13 मिनू गो स्वर्ग रे सेंदा का नेता। मेकोमी “मुल रे सु सु प्रभु कली थमा सुइश्शा बेक्नीमी, मेकोपुकी ग्येरसमल। मेको लोत्र ब्रेक्तो” देंत। मिनू परमप्रभु यावे आ सोक्तीमी “थमा, मेको मुरपुकी ग्येरसीशो बाक्नीम। मारदे हना मेकोपुकीमी रागीमी परमप्रभु यावे आ गेय पशा नाइक्नीम। मिनू परमप्रभु यावेमी आन गेय तुइश्शा, आन तचा डा गोब” देंत। फिलिप्पी १:२३; यसैया ५७:२; हिब्रू ४:३०; १तिमोथी ५:२४-२५

### थमा मसुइक्ब आन कली निसाफ

14 मिनू नोले गो बुश गोस्स का ताता। मिनू मेको गोस्स तारी मुर का निश्शा खोदेशो ताता। मेको आ पियामी सुन के सिरपेच गुप्शा डा मिन आ गुडमी हेश्शा गुये का ग्याइश्शा ताता। दानीएल ७:१३; मर्कूस १३:२६

15 मिनू गो अर्को परमप्रभु यावे आ स्वर्ग डा गेय पाइब कली परमप्रभु यावे आ सिं रे गूशो ताता। मिनू मेकोमी गोस्स तार बाक्ब कली टेयब सेंदामी “रागी डा बाली मीशो बाक्त। मुल रिक्ची ना दुम्त। मिनू मुल रिक्चा गोवो” देंत। योएल ४:१३; मत्ती १३:३९

16 मिनू गोस्सुमी निप्बमी गुये शेशा, रागी कली मीशो बाली खोदेशो पा रिक्तु।

17 मिनू गो अर्को परमप्रभु यावे आ स्वर्ग डा गेय पाइब कली परमप्रभु यावे आ सिं रे गूशो ताता। मेको नु यो हेश्शा गुये का बाक्त।

18 मिनू नोले अर्को परमप्रभु यावे आ स्वर्ग डा गेय पाइब का धूप चढेतीके रे गूशो ताता। मेकोमी मी कली अधिकार पाइबाक्त। मेकोमी टेयब सेंदामी हेश्शा गुये शयब कली “रागी अडगुर रू खोदेशो पा मीशो बाक्त। मोपतीके गुयेमी फल सेक्चा गोवो” देंशा नेता।

19 मिनू परमप्रभु यावे आ स्वर्ग डा गेय पाइबमी आ गुयेमी रागी कली फल सेक्शो खोदेशो पा सेक्तु। सेक्शा खुप्शा, परमप्रभु यावे आ टेयब फल कोलमी वोइक्तु। मेको कोल चहिं मार बाक्त देंशा हना, परमप्रभु यावे आ गाइक्चा बाक्त।



20 मिनु खाक्तीके सहर रे डोन बाक्त। खाक्मेनु, मेको कोल रे रस खोदेशो पा हुश शांडसाक्व। मिनु मेको हुश १६ हजार स्तादीयोन डोन दोक राप्शो शारा आ शोत्र सम्म लत। स्तादीयोन का १८५ मिटर बाक्व। यसैया ६३:३

## 15

लाख का ४४ हजार मुर

1 मिनु गो स्वर्गमी अर्को टेयब नु छक लाक्चा डा चिन्ड ताता। मेको चिन्ड दोदेशो बाक्त देशा हना, ७ जना परमप्रभु यावे आ स्वर्ग डा गेय पाइबपुकीमी ७ ओटा श्येत गेचशो बाक्तेक्म। मिनु मेको श्येतपुकी नोले डा बाक्तेक्म। मारदे हना मेको आन नोले परमप्रभु आ गाइक्चा नुप्ब। प्रकाश १६:१

2 मिनु गो सिसा नु मी ब्वाइशो दोम्ली खोदेशो दिम का ताता। मेको दिममी मुरपुकीम परमप्रभु यावे आ गेशो टेयब ताप्तीके शेशा, राप्शो तातामी। मेको मुरपुकी चहिं सु बाक्तेक्म देशा हना, मेकोपुकीमी मेको जन्तु कली ग्राशो बाक्तेक्म। दोपा ग्रातेक्म देशा हना, जन्तु नु जन्तु आ मूर्ति कली सेउ मपामे नु आ नें आ हिकतीके चिन्ड यो मवोइक्पाइक्सीशो बाक्तेक्म। प्रकाश ४:६

3 मिनु परमप्रभु यावे आ वाइल मोसा नु पाठा आ कुम्सो पांम्तेक्म। मिनु मेको कुम्सोम मार लोत्र बाक्त देशा हना “परमप्रभु यावे, गे नेल्ल सक्ति पाइशो परमप्रभु बाक्नीनी। इन गेय टेयब नु छक लाक्चा बाक्नीमी। गे इन लां नेल्ल ठीक नु थमा बाक्नीमी। गे गेना हना यो पिप बाक्नीनी। प्रस्थान १५:१, ११; येरमीया १०:६-७; ब्यवस्था ३२:४; भजन संग्रह १४५:१७

4 नेल्लेमी इन कली मान पा हिंशा इन नें टेयब सेल्लनीमी। मारदे हना गे ला परमप्रभु बाक्नीनी। रागी रागी डा मुर नेल्ले इन डोंइती जाक्शा, पोक्च थेक्शा, खुम्की पा बाप्नीमी। मारदे हना इन निसाफ पतीके नेल्लेमी ताम्तेक्म” देशो कुम्सो आ लोत्र बाक्त। भजन संग्रह ८६:९; येरमीया १६:१९-२१

गाइशो डा ७ ओटा डप्का

5 मिनु नोले गो स्वर्गमी परमप्रभु यावे आ खिं रोकशो ताता। प्रकाश ११:१९

6 मेकेर रे मेको ७ जना श्येत गेब परमप्रभु यावे आ स्वर्ग डा गेय पाइबपुकी गूतेक्म। मेकोपुकी रिम्शो टल्केशो बुश वा फेक्शा, सुन के पेटी किप्शो बाक्तेक्म।

7 मिनु मेको ४ ओटा सेस जन्तु डा कामी मेको ७ जना परमप्रभु यावे आ स्वर्ग डा गेय पाइब आन कली ७ ओटा सुन के डप्का गेप्टु। मेको सुन के डप्का गेना हना यो ब्रोंइशा बाक्व परमप्रभु यावे आ गाइक्चामी ब्रीशो बाक्तेक्म। प्रकाश ४:६-८; प्रकाश १४:१०

8 मिनु परमप्रभु यावे आ खिं परमप्रभु आ छेडछेड नु सक्ति डा कुनमी ब्रीशो बाक्त। मिनु परमप्रभु यावे आ ७ जना स्वर्ग डा गेय पाइबपुकीमी श्येत मगेमे सम्म सुइ परमप्रभु यावे आ खिं ओत्रने मचाप्बाक्तेक्म। यसैया ६:४; प्रस्थान ४०:३४; १राजा ८:१-११; इजीकीएल ४४:४

## 16

मेको ७ ओटा श्येत

1 मिनु नोले गो परमप्रभु यावे आ खिं रे टेयब सेंदा का नेता। मेको सेंदामी परमप्रभु यावे आ ७ जना स्वर्ग डा गेय पाइब आन कली “लने। परमप्रभु आ गाइक्चामी ब्रीशो ७ ओटा डप्का रागीमी मोतीन” देंत।

2 मिनु डोंइती डा परमप्रभु यावे आ स्वर्ग डा गेय पाइबमी आ कुरशो डप्का रागी तार मोइक्तु। मिनु मेकोमी मोदानु, टेयब जन्तु आ चिन्ड वोंइसीब नु आ मूर्ति कली सेउ पाइबपुकी मरिम्शो पा खाइक्व गार मुम्तेक्म। प्रस्थान ९:१०-११

3 मिनु अर्को परमप्रभु यावे आ स्वर्ग डा गेय पाइबमी आ कुरशो डप्का समुन्द्र तार मोइक्तु। मिनु मेकोमी मोदानु, समुन्द्र डा ब्वाक्कु क्योरशो मुर आन हुश खोदेशो दुम्त। मिनु समुन्द्र डा सेस जन्तु नु डाइ नेल्ल बेक्तेक्म।

4 मिनू लेंशा अर्को परमप्रभु यावे आ स्वर्ग डा गेय पाइबमी आ डप्का खोला नु ब्वाक्कु बुक्तीके तार मोइक्तु। मिनू मेकोमी मोदानु, मेको ब्वाक्कु हुश दुम्त। प्रस्थान ७:१७-२१

5 मिनू ब्वाक्कु कली कोव्रब परमप्रभु यावे आ स्वर्ग डा गेय पाइबमी परमप्रभु यावे कली “इन मुर आन कली पशो निसाफ ठीक बाक्ब। गे मुल बाक्नीनी। मिनू गे डोंडती यो बाक्तीनी। गे का ला परमप्रभु बाक्नीनी।

6 रागी डा मुरपुकीमी इन योवशो मुर नु इन लोव्र पाइब आन कली क्योरशा, आन हुश शाइक्पाइशशा साइक्तेक्म। मिनू गे मेको रागी डा मुर आन कली हुश तूपाइक्तीनी। मार पामे, मेको ताम्तेक्म” देशो नेता।

7 मिनू गोमी मेको धूप चढेतीके रे सेंदा कामी लोव्र पशो नेता। मेकोमी “परमप्रभु यावे, गे नेल्ल सक्ति पाइशशा परमप्रभु बाक्नीनी। मारेड मारेड पने चाप्नीनी। इन पशो निसाफ थमा नु ठीक बाक्नीमी” देशो नेता। प्रकाश ९:१३; प्रकाश ६:१०-११

8 मिनू लेंशा अर्को परमप्रभु यावे आ स्वर्ग डा गेय पाइबमी आ कुरशो डप्का नां तार मोइक्तु। मिनू मेकोमी मोदानु, नांमी मुर आन कली मीम खोदेशो पा क्रोइक्चा गोप्नु।

9 मोपा शुश होशेमी मुरपुकी दुप्शा, श्येत जाम्तेक्म। मिनू दुप्शो आ पर्वम परमप्रभु यावे आ नें कली सराप पाम्तेक्म। मारदे हना मेकोमी श्येत गोप्नु। मिनू मेको मुर आन थुं परमप्रभु यावे गे मलेत्तेम। परमप्रभु यावे कली मान यो मपाम।

10 मिनू लेंशा अर्को परमप्रभु यावे आ स्वर्ग डा गेय पाइबमी मेको आ कुरशो डप्का टेयब जन्तु आ नित्तीकेमी मोइक्तु। मिनू मेकोमी मोदानु, मेको टेयब जन्तु आ राज्यमी छिडछिड दुम्त। मिनू मुरपुकीम शुश श्येत जाम्तेक्म।

11 मोपतीके स्वर्ग डा परमप्रभु कली सराप पाम्तेक्म। मारदे हना मेकोमी टेयब मरिम्शो गार दुम्पाइशशा, श्येत गोप्नु। तन्न आन मरिम्शो पचा मप्रोनेम।

12 मिनू लेंशा अर्को परमप्रभु यावे आ स्वर्ग डा गेय पाइबमी आ कुरशो डप्का युफ्रेटीस माइशशा टेयब खोलामी मोइक्तु। मिनू मेकोमी मोदानु, खोला डा ब्वाक्कु सोव्रत। मारदे सोव्रत देशा हना, नां दाप्तीके रे पीब पिप आन लां ठीक पचा कली सोव्रत। यसैया ११:१५-१६

13 मिनू गो टेयब बुस्स, टेयब जन्तु नु जोल पा परमप्रभु यावे आ लोव्र पाइब आन शोव्र रे कुक्कु खोदेशो वोल सां गूशो तातामी। प्रकाश १२:३

14 मेकोपुकी छक लाक्चा डा चिन्ड कोइब सैतान आ गेय पाइब वोल बाक्तेक्म। मिनू मेकोपुकीमी परमप्रभु यावे, नेल्ल सक्ति पाइशशा परमप्रभु आ टेयब नाक्तीमी नु लडाइ पचा कली रागी रागी डा पिप आन कली ब्रथ लाम्तेक्म। मो दुम्मेनु, येसुमी मुर आन कली

15 “नेनीन, गो खुइ खोदेब पा जाक्नुड। सु थमा सुइशशा मडप्थु सेंशा, ठीक दुम्शा बाक्मे, मेको ग्येरेसेक्ल। तन्न सु पाप पाइबा, मेको शिश्रा गाक्ब मुर खोदेब पा मुने दोक्ब” दे येसुमी माइक्तीमी। १थिस्सलोनिकी ५:२

16 मिनू मेको वोल सांमी रागी रागी डा पिप ब्रथ लशा, जाक्शा, हिबू लोव्रमी आरमागेडोन माइशशा रागीमी खुम्साक्म।

17 मिनू नोले डा परमप्रभु यावे आ स्वर्ग डा गेय पाइबमी आ कुरशो डप्का फशेमी मोइक्तु। मिनू मेकोमी मोदानु, परमप्रभु यावे आ खिं रे नु आ नित्तीके रे टेयब सेंदा कामी “मुल नुप्त” देशो नेता।

18 मिनू चिला, टेयब रेयके, बंबु पशा, टेयब खिनु कुत। मुरपुकी रागीमी बाक्मानु, मोमो टेयब खिनु गेनायो मकुशो बाक्माक्त।

19 मिनू मेको टेयब सहर सां दुम्त। रागी रागी डा सहरपुकी ब्रेत्तेक्म। मिनू परमप्रभु यावेमी बेबीलोन टेयब सहर कली फ्रुक्तु। मारदे फ्रुक्तु देशा हना, मेको मुर आन पाप तशा “गो सजाइ गेनुडमी” दे गाइशशा फ्रुक्तु। प्रकाश १४:८-१०

20 मेना टापु नेल्ल ब्वाक्कुमी सुम्साक्म, डांडापुकी ब्रेशशा, दिम दुम्तेक्म। प्रकाश ६:१४

21 मिनु मुर आन बाक्तीकेमी शुश मुप्स यित। मेको मुप्स टलेन्ट का सम्म हेल्शो बाक्तेक्म। मिनु मेको मुप्स मुर तार दोक्मेनु, मुरपुकी मेको मुप्स तशा, परमप्रभु यावे कली सराप पाम्तेक्म। मारदे हना मेको मुप्सीम रागीमी बाक्ब मुर आन कली शुश हिंचा डा श्येत गेण्टु। टलेन्ट ३५ किलो कोदेशो बाक्ब। प्रस्थान ९:२३

## 17

### ठेयब तेल्लेम कली सजाइ

1 नोले गो परमप्रभु यावे आ स्वर्ग डा गेय पाइब का ताता। मेको सु बाक्त देशा हना, मेको डोंइती डा ७ जना श्येतमी ब्रीशो डप्का कुरबपुकी डा का बाक्त। मिनु मेकोमी “एके पिवो, गो इ कली ब्वाक्कु तार बाक्ब ठेयब तेल्लेम कली गेशो सजाइ कोंइनन। प्रकाश १५:१

2 रागी रागी डा पिपपुकीमी मेको नु तेल्लेम पाम्तेक्म। मिनु मेको आन तेल्लेम पशो तशा, रागी रागी डा मुरपुकीमी यो मोदेशो पाम्तेक्म” दे आं कली देंत।

3 मिनु मेकोमी आं कली परमप्रभु यावे आ सोक्तीमी बाक्शा, मुर मबाक्तीकेमी लाइक्ती। मिनु गो मीश मुर का लल जन्तु तारी निश्शो ताता। मेको जन्तु दोदेशो तांइसाक्व देशा हना, आ रां नेल्ल परमप्रभु यावे कली मरिम्शो लोत्र ब्रेक्शा वोइश्शो बाक्त। मेको ७ ओटा पिया नु १० ओटा ग्रोत्र पाइश्शो बाक्त।

4 मिनु मेको मीश मुर दोदेशो तांइसाक्व देशा हना, पिप आन फेक्शो खोदेशो वा नु लल वा फेक्शो बाक्त। सुन, हीरा नु मोती पांइशो बाक्त। मेकोमी सुन के कचौरा कुरशो बाक्त। मेको कचौरा आ तेल्लेम पतीके, ग्रान्रा दिचा डा नु मरिम्शो गेयमी ब्रीशो बाक्त। येरमीया ५१:७

5 मिनु मेको आ कुप्फीमी खुइश्शो लोत्रमी आ नें ब्रेक्शो बाक्त। मार ब्रेक्शो बाक्त देशा हना “बेबीलोन ठेयब सहर, तेल्लेमपुकी नु नेल्ल रागी रागी डा ग्रान्रा दिचा डा आन ममा” दे ब्रेक्शो बाक्त।

6 मिनु गो मेको मीश मुर कली परमप्रभु यावे आ योत्रशो मुर नु येसु आ सांकछी आन हुशेमी दुक्शो ताता। मेको कली तडानु, गो शुश छक लाक्ती। प्रकाश १८:२४

7 परमप्रभु यावे आ स्वर्ग डा गेय पाइबमी चहिं आं कली “गे मारदे छक लाक्डे? मेको मीश मुर नु मेको आ डोइश्शो ७ ओटा पिया नु १० ओटा ग्रोत्र पाइश्शो जन्तु आस खुइश्शो लोत्र गो इ कली शेंनुड।

8 इ तशो जन्तु डोंइती बाक्त, मुल चहिं मबा। तन्न नोले पुं मपाइश्शो ढोडोडगा रे कुशा खतम दुम्ब। रागी सेल्चा रे डा ब्रोंइतीक किताबमी आन नें मब्रेक्शो मुरपुकी चहिं मेको जन्तु तशा छक लाक्नीम। मारदे हना मेको जन्तु डोंइती बाक्त, मुल मबा, नोले जाक्ब।

9 रुब्ब मुर आन कली एको तुइक्तीके लोत्र बाक्ब। मेको ७ ओटा पिया ७ ओटा डांडा नम। मेको मीश मुर मेको डांडा तार निप्ब। प्रकाश १३:१८

10 मिनु मेको ७ ओटा डांडापुकी ७ ओटा पिप यो नम। मेको रे ५ ओटा बेक्शा लाक्तेक्म। मिनु कामी सासन पना पन बाक्ब। अर्को लीशो का चहिं मुल सम्म मजाक्शो बाक्त। मिनु नोले जाक्शा डा मिन, छिन का ला सासन पाइब।

11 मिनु मेको डोंइती बाक्शो नु मुल मबाक्शो जन्तु चहिं मेको अर्को ७ ओटा पिप आन नोले जाक्शो बाक्ब। मिनु नोले जाक्शो यो, मेको ७ ओटा रे जाक्ब। मिनु मेको नरक लाइब।

12 मिनु मेको इ तशो १० ओटा ग्रोत्र चहिं मुल सम्म सासन पचा मतशो १० जना पिप नम। मिनु मेको आन कली नु ठेयब जन्तु कली घन्टा का पिप आन अधिकार गेशो बाक्ब। प्रकाश १३:१

13 मेको १० जना पिप थुं का दुम्शा, आन सक्ति नु अधिकार ठेयब जन्तु कली गेनीम।

14 मोदेशो दुम्मेनु, मेकोपुकी पाठा नु लडाइ पाइनीम। मिनु लडाइमी पाठा ग्राब। मारदे पाठा ग्राब देशा हना, मेको पाठा प्रभु आन प्रभु नु पिप आन पिप बाक्ब। मिनु मेको नु बाक्शोपुकी आ ब्रेश्शो नु योत्रशो मुरपुकी बाक्नीमी। मेको नु बाक्बपुकी आ ब्रेश्शो नु योत्रशो दीगो पाइब यो बाक्नीमी” दे आं कली देंत। प्रकाश १९:१६; प्रकाश १९:१४

15 मिनु मेको परमप्रभु यावे आ स्वर्ग डा गेय पाइबमी लेशा “तेल्लेम आ नेक्था डा शुश ब्वाक्कु, मार बाक्ब देंशा हना, मेको मुरपुकी नम। मिनु मेको शुश मुर आन हुल, रागी रागी डा मुर नु शुश लोव ब्वाक्ब मुर बाक्नीम। यसैया ८:७; येरमीया ४७:२

16 मेको इ तशो १० ओटा ग्रोत्र नु मेको ठेयब जन्तु मेको तेल्लेम आ जोरी सत्रु दुम्नीम। मेको कली श्येत गेशा, आ फेक्शो वा प्रुइक्नीम। मिनु आ श्ये ब्वाइनीम। मिनु आ लीशो नेल्ले मीम चोइनीम।

17 मारदे मोदेशो पाइनीम देंशा हना, परमप्रभु यावेमी आ देंशो थमा दुम्पाइक्चा कली मेको आन थुं का दुम्पाइक्तीमी। मिनु मोपा मेको १० जना पिपमी राज्य नु सक्ति ठेयब जन्तु कली गेनीम। परमप्रभु यावे आ लोत्र खाप्चा कली मोदेशो दुम्ब।

18 मिनु इ तशो मीश मुर चहिं ठेयब सहर बाक्ब। मेको रागी रागी डा पिप आन कली सासन पाइब बाक्ब” दे शेंताकयी। प्रकाश १८:१०

## 18

### बेबीलोन सहर नुप्त

1 मिनु नोले गो शुश अधिकार पाइश्शो परमप्रभु यावे आ स्वर्ग डा गेय पाइब का सरीड रे यिशो ताता। मेको आ टल्केशोमी रागी नेल्ल छेडछेड दुम्त। इजीकीएल ४३:२

2 मिनु मेकोमी ठेयब सेंदामी “मेको ठेयब बेबीलोन सहर ब्रेशशा नुप्त। मेको ब्रेशशो सहर वोल आन बाक्तीके जेल्खान दुम्त। मेको ग्रांरा दिचा डा चिक्ब आन जेल्खान दुम्त। प्रकाश १४:८; येरमीया १५:३९

3 मारदे मेको सहर मोदेशो दुम्त देंशा हना, रागी रागी डा मुर नेल्लेमी आ ग्रांरा दिचा डा गेय शेंसीशा मोदेशो पाम्तेक्म। मिनु रागी रागी डा पिपपुकीमी यो मोदेशो पाम्तेक्म। मिनु रागी रागी डा ग्याप्ब लेयबपुकी मेको सहर डा शुश थोत्रक रे शोंप पाइश्शो दुम्तेक्म” देंत। यसैया ५१:७; नाहुम ३:४

4 मिनु नोले स्वर्ग रे अर्को सेंदा का नेता। मेको सेंदामी “आं मुरपुकी, मेको सहर रे ग्यूशा पिने। मेकेर रे मग्रूतीनी हना, गे मेकोपुकी खोदेशो मरिम्शो पाइनीनी। मोपा मरिम्शो पाइतीनी हना, मेको खोदेशो पा सजाड ताइनीनी। यसैया ४८:२०; येरमीया ५०:८; येरमीया ५१:६,४५; २कोरिन्थी ६:१७

5 मेको आन मरिम्शो पशो देल्शा, सरीड सम्म जाक्शो बाक्त। मिनु परमप्रभुमी मेको आन मरिम्शो पशो मिम्शो बाक्त। उत्पत्ती १८:२०-२१; येरमीया ५१:९

6 मिनु गे इन कली गेशो श्येत मेको कली लेत्तीन। श्येत का ला ममाइ, निक्शी खेयप श्येत गेने। इन कली गेशो श्येत निक्शी खेयप गेचा ठीक दुम्ब। भजन संग्रह १३७:८; येरमीया ५०:१५,२९; २थिस्सलोनिकी १:६

7 मिनु आंम कली गिश ठेयब सेला, मिश श्येत गेशा, सुरता नु रोंका पपतीन। मिनु मेकोमी आ थुंमी चहिं ‘गो पिपीम नड। गो वोंइश बेक्शो मीश मुर मनड। मोपतीके गो सुरता गेनायो मपाइनुड’ देंब। यसैया ४७:७-९

8 मोपा मोमो ठेयब लेशशो लोत्र पतीके, काबु मेको कली श्येत दुम्ब। मेको कली मार श्येत दुम्ब देंशा हना, मेको सहरमी मुर साइक्ब रोइ जाक्ब, मिनु रोंका पाइनीम, अन्काल यो दुम्ब। मिनु मेको सहर मीम दुप्शा पुलु दुम्ब। मेको श्येत नेल्ल मारदे दुम्ब देंशा हना, मेको आन कली निसाफ पाइब परमप्रभु यावे सक्ति पाइश्शो बाक्ब” देंशो नेता।

### मुरपुकी बेबीलोन तशा डाक्शो

9 मिनु रागी रागी डा पिपपुकी मेको नु तेल्लेम पाम्तेक्म। मेको आ शोंप यो दाक्शो बाक्तेक्म। मोपतीके मेकोपुकी ग्रोइश्शो सहर कली तशा, रोंका पा डाक्नीम।

10 मिनु मेको आ श्येत तशा हिंशा, डोन रे कोत्रबपुकीमी “आबी, आबी, मेको ठेयब बेबीलोन माइश्शो सहर गिश दारशो सेल्शो बाक्त। मुल चहिं घन्टा कामी इ निसाफ दुम्त” देंनीम। येरमीया ५१:८

11 मिनु रागी रागी डा ग्याप्ब लेयबपुकी मेको सहर तशा, डाकशा रोंका पाइनीम। मारदे डाकशा रोंका पाइनीम देशा हना, मेको आन लेयचा डा थोव्रक सुइमी मग्याप्नीम।

12 आन लेयचा डा थोव्रक मार बाक्त देशा हना, सुन, चांदी, हीरा, मोती, शुश क्येट लाइब सुती वा, प्याजी रड डा वा, रेसम वा, लल वा, ब्रोव्रशो रिना पाइश्शो शी, हात्ती आन खुइ शुश क्येट लाइब शी, कांसा, फलाम नु दारशो फुल्लु रे सेल्शो थोव्रकपुकी बाक्तेक्म।

13 मिनु सिन्कौली, चां खेक्तीक तेल, मस्ला, ब्रोव्रशो रिना पाइब तेल, धूप, अडगुर शांबु, जचा तेल, थम रिम्शो फस, चेरब, बी ब्यफ, भेडा, शारा, बग्गी नु वाइलीम वाइल मेको मुर आन लेयतीक थोव्रकपुकी बाक्तेक्म।

14 मिनु मेको ग्याप्ब लेयबपुकीमी मेको सहर कली “इन दाकशा ब्रोव्रशो फल फुल जाम्तेक्म। इन ग्योम्सीचा, इन शोंप पाइश्शो दुम्चा नेल्ल गेनायो मथित्त्वा डा पा जाम्शा लाम्तेक्म” दैतेक्म।

15 मिनु मेको सहर रे शोंप पाइश्शो ग्याप्ब लेयबपुकी सहर रे डोन बाकशा, मेको सहर कली गेशो सजाइ तशा हितेक्म। मिनु मेकोपुकीमी डाकशा रोंका पशा,

16 “आबी आबी, मेको ठेयब सहर, मेको सहर डा मुरपुकी शुश क्येट लाइब सुती वा, प्याजी नु लल रड डा वा फेक्शो बाक्तेक्म। मिनु मेकोपुकीम शुश सुन, हीरा नु मोती पांइशो बाक्तेक्म। प्रकाश १७:४

17 तन्न मुल घन्टा कामी मेको सहर डा शोंपपुकी खतम दुम्तेक्म” दैतेक्म। मिनु डोंगा चलेबपुकी, डोंगामी गेय पाइबपुकी नु डोंगामी डोइश्शा ग्याप्ब लेयब मुर नेल्ल सहर रे डोन राप्शा, इजीकीएल २७:२७-३६

18 सहर दुप्शो कुन तशा “मेरे सहर खोदेंब ठेयब अर्को मबा” दे ग्रीतेक्म।

19 मिनु मेकोपुकी सुर्ता पशा, रोंका पा डाक्तेक्म। मेकोपुकीमी “आबी आबी, मेरे ठेयब सहर। मेरे सहर डा डोंगा आन होव्रपपुकी मेरे सहरमी मार मार लेयशा, शोंप पाइश्शो दुम्शो बाक्तेक्म। तन्न घन्टा कामी मेरे सहर जाम्शा लत।

20 मिनु स्वर्गमी बाक्ब नेल्ले ग्येरसीने। परमप्रभु यावे आ योव्रशोपुकी, ख्रीस्त आ सोइश्शोपुकी नु परमप्रभु यावे आ लोव्र पाइबपुकी ग्येरसीने। मारदे हना, परमप्रभु यावेमी इन कली गेशो श्येत आ पर्बम मेको कली सजाइ गेप्तु” देशो नेंता। येरमीया ५१:४८

### बेबीलोन सहर मथिंसीब

21 मिनु बोल्यो परमप्रभु यावे आ स्वर्ग डा गेय पाइबमी ठेयब यात खोदेशो फुल्लु का क्युक्तु। मिनु मेको फुल्लु कली समुन्द्रमी ताइक्ताक्व। मेको परमप्रभु यावे आ स्वर्ग डा गेय पाइबमी “मेको फुल्लु खोदेशो पा ठेयब बेबीलोन सहर ताइक्चा पुंइसीब। मोपतीके मेको सहर गेनायो मथिंसीब। येरमीया ५१:६३-६४

22 मिनु मेको ठेयब सहर दोपा नुप्ब देशा हना, ठेयब ताप्तीके ताप्शो, कुम्सो पशो मुराली ताप्शो नु तुराही ताप्शो मेकेर लेंशा मनेंसीब। मिनु मार मार सेल्ब सीप पाइश्शो मुरपुकी मेकेर लेंशा मथिंसीब। यात हिल्लो आ रेयके मेकेर का यो लेंशा मनेंसीब। यसैया २४:८; इजीकीएल २६:१३

23 मेकेर बत्ती दाशो हाम्सो का यो लेंशा मतांइसीब। मेकेर ग्युम्ले नु ग्युम्ली आस सेंदा लेंशा मनेंसीब। मारदे मोदेशो दुम्ब देशा हना, रागी डा ठेयब मुर ग्याप्ब लेयबपुकी बाक्तेक्म। मेकोपुकीमी मेको आन टुना मुनामी रागी नेल्ल डा मुर आन कली दूली लां खोइक्पाइक्तेक्म। येरमीया २५:१०; यसैया २३:८

24 मिनु मेको सहर डा मुरपुकीमी परमप्रभु यावे आ लोव्र पाइबपुकी नु परमप्रभु यावे आ योव्रशो मुर आन कली साइश्शो बाक्तेक्म। नेल्ल रागी डा सु सु मुर साइश्शो बाक्मा, मेको सहरमी साइश्शो बाक्तेक्मे” दे परमप्रभु यावे आ स्वर्ग डा गेय पाइबमी दैत। प्रकाश ६:१०; प्रकाश १७:६

1 मिनु नोले गो स्वर्गमी शुश मुरपुकीम कुम्सो पशो ठेयब रेयके खोदेशो नेता। मिनु मेकोपुकीमी “हाल्लेलया, आंइ परमप्रभु ला मुर आन कली पाप रे प्रॉइब बाक्ब। छेडछेड नु सक्ति नेल्ल आंइ परमप्रभु यावे केन बाक्ब।

2 मारदे हना परमप्रभु यावे आ पशो निसाफ थमा नु ठीक बाक्ब। मिनु परमप्रभु यावेमी रागी नेल्ल डा मुर आन कली खतम सेल्ब तेल्लेम कली ठीक पा सजाइ गेण्टु। मेको तेल्लेममी शुश परमप्रभु यावे आ वाइलीम वाइल आन कली साइक्तीके, मुल मेको कली क्येक्क लेत्ताक्व” दे ग्रीशो नेता। प्रकाश ६:३०; ब्यवस्था ३२:४३

3 मिनु मेको स्वर्गमी बाक्बपुकीमी लेंशा “हाल्लेलया, मेको सहर दुण्थो आ कुन गेनायो मनुण्थु कुइब” दैतेक्म।

4 मिनु मेको २४ जना शेंब खाल्पा नु ४ ओटा सेस जन्तुपुकीमी आ ठेयब निल्लीकेमी निश्शो परमप्रभु यावे कली खुम्की पा बाण्शा सेउ पाम्तेक्म। मिनु मेकोपुकीमी “आमेन, हाल्लेलया” दैतेक्म। प्रकाश ४:४; प्रकाश ५:३१; प्रकाश ४:६; भजन संग्रह १०६:४८

5 मिनु परमप्रभु यावे आ निल्लीक रे सेंदा का गूशो नेता। मेको सेंदामी “परमप्रभु यावे आ वाइलीम वाइल, परमप्रभु यावे कली मान पा हिंब आइक्च नु ठेयब मुर नेल्लेमी ‘आंइ परमप्रभु यावे नेल्ल क्येडा ठेयब बाक्ब’ दैनीन” देशो नेता।

6 मिनु नोले गो शुश मुर आन सेंदा ठेयब खोला आ रेयके नु ठेयब बुंबु आ रेयके खोदेशो पा नेता। मिनु मेको सेंदामी “हाल्लेलया, प्रभु, नेल्ल सक्ति पाइश्शो आंइ परमप्रभु यावे नेल्ल सासन पाइब बाक्ब।

7 गो नेल्ल ग्येरसय। गो नेल्लेमी “इन सक्ति नेल्ल क्येडा ठेयब बाक्ब” दैय। गो नेल्लेमी परमप्रभु यावे कली मान पय। मारदे हना पाठा आ ग्युबे दुम्चशो बाक्त। मिनु आ ग्युम्लीम आंम कली ग्योम्सीशा, ठीक दुम्शो बाक्त। प्रकाश २१:९

8 मेको ग्युम्ली कली सुती के रिम्शो बुश टल्केशो वा फेक्चा कली गेशो बाक्त” देशो नेता। मिनु मेको सुती के रिम्शो वा मार बाक्ब देशा हना, परमप्रभु यावे आ योत्रशो आन ठीक पतीके बाक्ब। यसैया ६१:१०

9 मेको परमप्रभु यावे आ स्वर्ग डा गेय पाइबमी आं कली “एको लोत्र ब्रेक्तो। पाठा आ ग्युबे जचा कली ब्रेक्ता पुंडसीबपुकी ग्येरसीशो मुरपुकी बाक्नीम” दे माइक्ती। मिनु मेकोमी लेंशा आं कली “मेको थमा पा परमप्रभु आ लोत्र बाक्ब” दे माइक्ती। लुका १४:१५

10 मिनु नोले गो मेको परमप्रभु यावे आ स्वर्ग डा गेय पाइब कली सेउ पचा कली आ खोइलीमी बाप्ती। मेकोमी चहिं आं कली “मपावो। गो गे नु इ लोकबपुकी खोदेशो येसु आ लोत्र पाइब, परमप्रभु यावे आ वाइल नड। परमप्रभु यावे कली मान पावो। मारदे हना येसु आ लोत्र पाइबपुकीम परमप्रभु यावेमी तुइक्पाइश्शो लोत्र ला पाइनीम” दे माइक्ती। प्रकाश २२:८-९

### बुश शारा डोइक्ब

11 मिनु नोले गो स्वर्ग रोकसीशा, बुश शारा का ताता। मेको शारा तार डोइक्ब का बाक्त। मेको शारा डोइक्ब सु बाक्त देशा हना, दीगो नु थमा पाइब माइश्शो बाक्त। मेको घूस मताक्थु ठीक पा निसाफ पाइब बाक्त। लडाइ पाइब यो बाक्त। मत्ती २४:३०; प्रकाश ३:३४; यसैया ११:४-५

12 मिनु मेको दोदेब तांइसाक्व देशा हना, मेको आ मिक्च हुरुर पा ब्रशो मी खोदेशो तांइसाक्व। आ पियामी शुश मुकुटपुकी बाक्तेक्म। मिनु मेको तारी नें का ब्रेक्शो बाक्त। मेको नें सुइमी मतुइक्नीम। मेकोम ला तुइक्ब। प्रकाश १:३४; प्रकाश ३:१२

13 मिनु मेकोमी हुशेमी खुम्शो वा फेक्शो बाक्त। आ नें परमप्रभु यावे आ लोत्र माइश्शो बाक्त। यसैया ६३:१-३; यूहन्ना १:१

14 मिनु स्वर्ग डा फौजपुकी बुश शारा डोइश्शा, मेको आ नोले खोइश्शो बाक्तेक्म। मेको शारा डोइक्बपुकी रिम्शो बुश सुती के वा फेक्शो बाक्तेक्म। प्रकाश १७:३४

15 मिनु मेको डोंइती डा बुश शारा डोइक्ब आ शोत्र रे रागी रागी डा मुर आन कली साइक्चा कली हेरशो तरवार का गूत। मिनु मेकोमी फलाम के कोक्केमी मेको आन कली सासन पाइब, नेल्ल सक्ति पाइशो परमप्रभु यावे आ गाइक्चा डा कोल खोइलीमी दिम्ब। भजन संग्रह २:९; प्रकाश १४:१९-२०

16 मिनु मेको डोंइती डा शारा डोइक्ब आ वा नु आ फिलामी नें का ब्रेक्शो बाक्त। मार नें ब्रेक्शो बाक्त देशा हना, पिप आन पिप नु प्रभु आन प्रभु, दे ब्रेक्शो बाक्त। प्रकाश १:५; १तिमोथी ६:१५

### ठेयब जन्तु नु जोल पाइब

17 मिनु नोले गो परमप्रभु यावे आ स्वर्ग डा गेय पाइब का नांमी राप्शो ताता। मेकोमी शुश ग्येत्थ सरीडमी बेरब चिक्ब आन कली ठेयब सेंदामी “परमप्रभु यावे आ गेशो ब्वचा कली खुम्सीशा यिने। इजीकीएल ३९:४, १७-२०

18 मार ब्वचा कली यिने देशा हना, पिपी, कप्तान, बोल्यो मुर, शारा, शारा डोइक्ब, वाइलीम वाइल, आइक्च नु ठेयब मुर नेल्ल आन श्ये ब्वचा कली यिने” दे ग्रीशा माइक्तीमी।

19 मिनु गो ठेयब जन्तु नु रागी डा पिप आन फौजपुकी मेको डोंइती डा बुश शारा डोइक्ब नु आ फौजपुकी नु लडाइ पचा कली खुम्सीशो ताता। प्रकाश १६:१४, १६

20 मोपा मेकोपुकी लडाइ पामेनु, मेको ठेयब जन्तु नु जोल पा परमप्रभु यावे आ लोत्र पखु पाइब आस कली ग्याइक्ताक्म। परमप्रभु यावे आ लोत्र पखु पाइब चहिं ठेयब जन्तु नु बाक्शा, छक लाक्चा डा गेय पाइब बाक्त। मोपा मेको ठेयब जन्तु नु आ मूर्ति कली पूजा पाइब नु आ चिन्ड वोइक्ब आन कली मरिम्शो लां शेशा खोइक्पदा बाक्त। मिनु मेको निक्शी सेसीन गन्धक नु ठेयब मी ब्रतीकेमी हुम्चा पुंडसाक्स। प्रकाश १३:११-१७; २थिस्सलोनिकी २:८

21 मिनु लीशो मेको आस फौजपुकी चहिं मेको बुश शारा डोइक्ब आ शोत्र रे गूशो तरवारमी साइक्चा पुंडसाक्म। मिनु चिक्बपुकी मेको नेल्ल आन श्ये ब्वशा रूतेक्म।

## 20

### सैतान कली पाइशो

1 मिनु नोले गो परमप्रभु यावे आ स्वर्ग डा गेय पाइब स्वर्ग रे पुं मपाइशो ढोडोडगा डा सांचो नु ठेयब साइलो शेशा, यिशो ताता। प्रकाश ९:१

2 मिनु मेकोमी ठेयब बुस्स कली ग्याइशशा पाइक्ताक्व। मेको ठेयब बुस्स आ नें मार बाक्त देशा हना, साइ डोंइती डा बुस्स, दियाबलस नु सैतान मेको आ नें बाक्त। मिनु मेको परमप्रभु यावे आ स्वर्ग डा गेय पाइबमी मेको कली हजार का बर्स सम्म पाइक्ताक्व। दियाबलस आ देशो “मुर आन कली खाल्ब” बाक्ब। प्रकाश १२:९

3 मिनु रागी रागी डा मुर आन कली मरिम्शो लां मकोइदल, दे मेको कली पुं मपाइशो ढोडोडगामी तोक्तु। मिनु परमप्रभु यावे आ स्वर्ग डा गेय पाइबमी मेको एफिसस ढोडोडगा चोक्शा, सांचो पाइशशा, छाप थोक्ताक्व। मोपा मेको ठेयब बुस्स कली हजार का बर्स सम्म चोक्तु। मिनु हजार का बर्स नोले मेको छिन का कली प्रोइचा पुंडसीब।

### हजार का बर्स डा सासन

4 मिनु नोले गो नित्तीकपुकी ताता। मेको नित्तीकपुकीमी मुर निशो बाक्तेक्म। परमप्रभु यावेमी मेको आन कली निसाफ पचा गेप्तु। मिनु नोले गो येसु कली थमा सुइशशा, आ लोत्र नु परमप्रभु यावे आ लोत्र पतीके आन पिया खोइक्चा पुंडसीब आन कली तातामी। मेकोपुकीमी ठेयब जन्तु नु मेको आ मूर्ति कली पूजा मपामे बाक्त। मिनु मेको ठेयब जन्तु आ छाप आन कुप्फीम नु आन गुइमी यो वोइक्चा मबिस्समा बाक्त। मिनु मेको लेंशा ब्रोंइशा, ख्रीस्त नु हजार का बर्स सम्म सासन पाम्तेक्म। प्रकाश ३:२१; मत्ती १९:२८; १कोरिन्थी ६:२

5 मिनु अर्को लीशो मुरपुकी चहिं हजार का बर्स नोले ला सेंसीनीम। मेको डोंइती डा सेंसीतीके बाक्ब। १थिस्सलोनिकी ४:१६

6 मिनू सु सु डोंडती बेक्शो रे सेंसीनीमी, मेको ग्येरशो नु परमप्रभु यावे आ योत्रशो मुरपुकी बाक्नीम। मेको लेंशा मबेक्नीम। मेकोपुकीमी लेंशा बेक्चा मताइनीम। परमप्रभु यावे नु ख्रीस्त आस डोंडती बाक्नीमी। मिनू हजार का बर्स सम्म ख्रीस्त नु सासन पाइनीम।

नेल्ल क्येडा नोले डा लडाइ

7 मिनू मेको हजार का बर्स नोले सैतान पुं मपाइशो ढोडोडगा रे प्रोंइचा पुंडसाक्व।

8 मोपा गूशा, रागी नेल्ल डा मुर आन कली परमप्रभु यावे कली मटिथु, हेंथे गाक्पाइक्वतु। हेंथे गाक्बपुकी चहिं गोग नु मागोग माइशो डा मुरपुकी देंनीम। मिनू सैतानमी हिक्ने मचाप्चा डा मुर आन कली लडाइ पचा कली खुप्ताक्व। इजीकीएल ३८:२

9 मिनू सैतान आ फौजपुकी रागी नेल्ल साप्शा, लडाइ पथ जाक्तेक्म। मेकोपुकीमी येसु ख्रीस्त कली थमा सुइक्व, परमप्रभु यावे आ योत्रशो आन बाक्तीके नु परमप्रभु यावे आ दाक्शो सहर कली पुम्ताक्म। तन्न स्वर्ग रे मी दोक्शा, मेको पुम्ब नेल्ल आन कली नेक्तीमी।

10 मिनू मुर आन कली मरिम्शो लां शेंब दियाबलस गन्धक रे हुरुर पा ब्रशो मी ब्रतीकेमी हुम्चा पुंडसाक्व। मेकेर टेयब जन्तु नु जोल पा परमप्रभु यावे आ लोत्र पखु पाइब यो बाक्ताक्स। मिनू मेकेर बाक्बपुकी नाक्दो नाक्ती गेना हना यो श्येत गेचा पुंडसीनीम। प्रकाश १९:२०

ठेयब बुश नित्तीके

11 मिनू नोले गो ठेयब बुश नित्तीके का नु मेकेर निप्ब कली ताता। रागी नु स्वर्ग मेको कली तशा प्रोक्ताक्स। मिनू मेको आस कली बाक्तीके मबा। मत्ती २५:३१-४६; २पत्रुस ३:१७,१०,१२

12 गो ठेयब बुश नित्तीके आ डोंडती ठेयब नु आइक्च बेक्शो मुरपुकी राप्शो तातामी। किताबपुकी प्राक्शो बाक्तेक्म। मिनू गो अर्को किताब का यो प्राक्शो ताता। मेको ब्रोंडतीक किताब बाक्त। मिनू मेको ठेयब बुश नित्तीके आ डोंडती राप्शो बेक्शो मुर आन निसाफ पचा पुंडसीनीम। दोपा निसाफ पचा पुंडसीनीम देंशा हना, मेकोपुकीमी रागीमी बाक्मानु, मार मार पामे, मेको किताबमी ब्रेक्शो पढेशा, निसाफ पचा पुंडसीनीम। यूहन्ना ५:२८-२९; दानीएल ७:१०

13 मेको ठेयब बुश नित्तीके आ डोंडती राप्शो बेक्शो मुरपुकी ते रे जाक्तेक्म देंशा हना, समुन्द्रमी बेक्शो मुरपुकी समुन्द्र रे जाक्तेक्म। बेक्पाइक्व आ बेक्पाइशो नु बेक्शो आन बाक्तीके रे जाक्तेक्म। मिनू मेको नेल्ल रागीमी बाक्मानु, मार मार पामे, मेको निसाफ पचा पुंडसाक्म।

14 बेक्पाइक्व नु बेक्शो आन बाक्तीके हुरुर पा ब्रशो मी ब्रतीकेमी हुम्चा पुंडसाक्स। मेको हुरुर पा ब्रशो मीमी हुम्सीशो मार बाक्त देंशा हना, मेको निक्शी खेयप बेक्चा डा मेको नोले डा बेक्चा बाक्त। १कोरिन्थी १५:२६, ५५

15 सु सु आन नें ब्रोंडतीक किताबमी मब्रेक्शो बाक्मे, मेको हुरुर पा ब्रशो मीमी हुम्चा पुंडसाक्म।

## 21

नक यरूसलेम

1 नोले गो नक सरीड नु नक रागी ताता। डोंडती डा सरीड, डोंडती डा रागी नु समुन्द्र जाम्तेक्म। यसैया ६५:१७; २पत्रुस ३:१३

2 परमप्रभु यावे आ सहर नक यरूसलेम माइशो परमप्रभु यावे आ बाक्तीके रे यिना यिन पाइशो ताता। मेको सहर ग्युम्ले कली गुम्चशो ग्युम्ली खोदेंशो दुम्शा, ग्योम्सीशा यिशो बाक्त। गलाती ४:२६; हिब्रू १२:२२; प्रकाश १९:७-८

3 मिनू गो ठेयब नित्तीके रे ठेयब सेंदा का गूशो नेंता। मेकोमी “कोल्रडीन, परमप्रभु यावे आ बाक्तीकेमी मुरपुकी यो बाक्नीम। परमप्रभु यावे मुरपुकी नु बाक्ब। मेकोपुकी परमप्रभु यावे आ मुर बाक्नीम। मिनू परमप्रभु यावे आ मुरपुकी नु बाक्ब। प्रस्थान २९:४३५; येरमीया ७:२३



4 परमप्रभु यावेमी मेको मुर आन कली लेम्शा, आन प्रेक्कु फिक्ब। मुल रे मुरपुकी मबेक्नीम। मोपतीके रेंका मपाइनीमी, मडाक्नीमी, श्येत यो मजाइनीम। मारदे हना डोंइती मार मार बाक्मा, मेको नेल्ल नुप्तेक्म” दे ठेयब सेंदामी देंशो नेंता। प्रकाश ७:१७; यसैया २५:८; यसैया ३५:१०; यसैया ६५:३९

5 मेको ठेयब नित्तीकेमी निप्बमी “नेनीन, गो नेल्ल नक सेल्लुडमी” देंत। मिनु नोले मेकोमी आं कली “मेको लोत्र ठीक नु थमा बाक्ब। मोपतीके ब्रेक्तो” देंत।

6 मिनु मेकोमी लेंशा आं कली “गो आल्फा नु ओमेगा नड। नेल्ल क्येडा डोंइती नु नेल्ल क्येडा नोले डा गो नड। सु सुमी तूत दाक्नीमी, मेको आन कली ब्रोंइचा गेब ब्वाक्कु बुक्तीक रे मोशा तूचा गेनुड। प्रकाश १:८; प्रकाश २२:१३

7 सु सुमी सैतान कली ग्रानीमी, मेकोम आं देंशो नेल्ल ताइनीम। मिनु गो मेको ग्राब आन परमप्रभु यावे दुम्नुड। मेकोपुकी चहिं आं तमी तौ दुम्नीम।

8 तन्न मुर तशा हिंबपुकी, परमप्रभु यावे कली थमा मसुडक्बपुकी, पापमी ग्रुम्शोपुकी, मुर आन कली साइक्बपुकी, तेल्लेम पाइबपुकी, टुना मुना पाइबपुकी, देवी देवता आन कली पूजा पाइबपुकी, नु जोल पाइबपुकी नेल्ल गन्धक रे हरुर पा ब्रशो मीमी हुम्चा पुंइसीनीम। मिनु मेको नोले डा बेक्तीक बाक्ब” दे माइक्ती।

9 मिनु नोले गो परमप्रभु यावे आ स्वर्ग डा गेय पाइब का जाक्शो ताता। मेको सु बाक्त देंशा हना, डोंइती डा ७ जना श्येतमी ब्रीशो डप्का कुरबपुकी डा का बाक्त। मेकोमी आं कली “एके पिचो, गो इ कली ग्युम्ली कोंइनुड। मेको ग्युम्ली पाठा आ मीश बाक्ब” दे माइक्ती।

10 मेकोमी आं कली परमप्रभु यावे आ सोक्तीमी बाक्शा, ठेयब डांडा तार लाइक्ती। मिनु मेकेर आं कली परमप्रभु यावे आ बाक्तीके रे यिना यिन पाइश्शो परमप्रभु यावे आ योत्रशो यरूसलेम माइश्शो सहर कोंइताक्यी।

11 मिनु मेको सहर दोदेंशो तांइसाक्व देंशा हना, परमप्रभु यावे आ छेडछेड नु सक्ति पाइश्शो बाक्त। मिनु परमप्रभु यावे आ छेडछेड नेल्ल क्येडा रिम्शो टल्केशो बुश यास्पेर माइश्शो हीरा खोदेंशो तांइसाक्व।

12 मिनु मेको सहर दोपा सेल्लो बाक्त देंशा हना, मेको सहर आ एर ओंथ ठेयब गारो प्रोव्रशो बाक्त। मिनु मेको गारोमी १२ ओटा ठेयब लाप्चोपुकी बाक्तेक्म। मिनु १२ जना परमप्रभु यावे आ स्वर्ग डा गेय पाइबपुकी मेको लाप्चो का कामी बाक्शो बाक्तेक्म। इस्राएल आ १२ जना तौ आन नें नु थर मेको लाप्चो का कामी ब्रेक्शो बाक्तेक्म।

13 मिनु मेको लाप्चोपुकी ते ते बाक्तेक्म देंशा हना, पूर्वम लाप्चो सां बाक्तेक्म। उत्तरम लाप्चो सां बाक्तेक्म। दक्खिनम लाप्चो सां बाक्तेक्म। पच्छिमम लाप्चो सां बाक्तेक्म।

14 मिनु मेको सहर डा गारोमी १२ ओटा जग बाक्तेक्म। मेको जगमी पाठा आ सोइश्शो १२ जना आन नें ब्रेक्शो बाक्तेक्म।

15 मिनु गो नु लोत्र पाइबमी मेको सहर, लाप्चो नु गारो पुक्चा कली सुन के पुक्तीके का कुरशो बाक्त।

16 मिनु मेकोमी मेको सहर कली पुक्तु। मेको सहर ४ पाटे चारै सुर बराबर दुइश्शो १२ हजार स्तादीयोन बाक्त। आ ग्येथ गे यो मोशोन दुइश्शो बाक्त। स्तादीयोन का १८५ मिटर बाक्ब।

17 मिनु मेकोमी सहर आ गारो पुक्गानु, सहे का ४४ कुबीत ब्रेम्शो बाक्त। मेको परमप्रभु यावे आ स्वर्ग डा गेय पाइब आ पुक्तीके मुर आन पुक्तीके खोदेंशो बाक्त। कुबीत का गज का खोदेंशो, ०.५ मिटर बाक्ब।

18 मेको गारो बुश टल्केशो हीरा के सेल्लो बाक्त। मेको सहर चहिं सिसा खोदेंशो मारेइ मब्वाइश्शो सुन के बाक्त।

19 मिनु गारो आ जग नेल्ल खाल डा हीरापुकीम ग्योम्शो बाक्तेक्म।

डोंइती डा जग सरीड खोदेंशो नीलो यस्पेर माइश्शो हीरामी ग्योम्शो बाक्त। मेको आ नोले डा जग साफीर माइश्शो हीरामी ग्योम्शो बाक्त। मेको आ नोले डा जग बुश कल्केदोन माइश्शो हीरामी ग्योम्शो बाक्त। मेको आ नोले डा जग गिगी स्मारग्द माइश्शो हीरामी ग्योम्शो बाक्त।

20 मेको आ नोले डा जग सुन्तला रड डा सारदोनीक्स माइश्शो हीरामी ग्योम्शो बाक्त। मेको आ नोले डा जग लल सारदीस माइश्शो हीरामी ग्योम्शो बाक्त। मेको आ नोले डा जग हौ नु गिगी ब्वाइश्शो क्रीसोलीथ माइश्शो हीरामी ग्योम्शो बाक्त। मेको आ नोले डा जग सुन रड डा बेरील माइश्शो हीरामी ग्योम्शो बाक्त। मेको आ नोले डा जग शुश हौ तोपास माइश्शो हीरामी ग्योम्शो बाक्त। मेको आ नोले डा जग गिगी क्रीसोप्रास माइश्शो हीरामी ग्योम्शो बाक्त। मेको आ नोले डा जग लल नु नीलो ब्वाइश्शो हीयाचीन्त माइश्शो हीरामी ग्योम्शो बाक्त। मिनु नेल्ल क्येडा नोले डा जग प्याजी रड डा आमेथीस्त माइश्शो हीरामी ग्योम्शो बाक्त।

21 मिनु मेको १२ ओटा लाप्यो चहिं १२ ओटा मोती के सेल्शो बाक्तेकम। लाप्यो का मोती काम सेल्शो बाक्त। मिनु मेको सहर डा लांपुकी सिसा खोदेशो मारेड म्वाइश्शो सुन के बाक्तेकम।

22 मिनु गो मेको सहरमी परमप्रभु यावे आ खिं मतड। मारदे हना परमप्रभु यावे, नेल्ल सक्ति पाइश्शो परमप्रभु नु पाठा आंमान मेकेर बाक्नीस।

23 मिनु मेको सहरमी नां नु तास्ला दाप्या ममाल्ब। मारदे हना परमप्रभु यावे आ छेडछेड नेल्ल सहरमी दाप्य। पाठा मुर आन कली छेडछेड गेब बत्ती बाक्ब। यसेया ६०:३, ५, ११, १९, २०

24 मिनु रागी रागी डा मुरपुकी मेको सहर डा छेडछेडमी बाक्नीम। मिनु रागी रागी डा पिप आन शोंप नु दारस मेकेर चाक्नीम।

25 मेको सहर डा लाप्योपुकी गेना हना यो रोकशो बाक्नीम। मारदे हना मेकेर गेनायो नाक्दो मदुम्ब। जकरिया १४:७

26 मिनु रागी रागी डा मुरपुकीमी आन शोंप नु दारस मेको सहरमी चाक्नीमी।

27 मिनु जाम्शा लाइबपुकी, ग्रांया दिचा डा गेय पाइबपुकी नु जोल पाइबपुकी चहिं मेको सहरमी ओत्रचा मताइनीम। पाठा आ ब्रोंइतीक किताबमी नें ब्रेक्शोपुकी ला ओत्रचा ताइनीम।

## 22

### ब्रोंइचा गेब खोला

1 मिनु परमप्रभु यावे आ स्वर्ग डा गेय पाइबमी ब्रोंइचा गेब खोला कोंइताक्यी। मेको खोला टल्केशो सिसा खोदेशो तांडसाक्व। मिनु मेको खोला परमप्रभु यावे नु पाठा आस ठेयब नित्तीके रे गूशा, इजीकीएल ४७:१-१२; जकरिया १४:८; उत्पत्ती २:९-१०

2 सहर डा लां आ दाते रे पा शाइश्शो बाक्त। मेको खोला ओंथ हांबु नु आइक्ची हांबुमी ब्रोंइचा गेब रवा बाक्शो बाक्तेकम। मेको ब्रोंइचा गेब रवापुकीमी १२ किसीम डा फल सिप्बाक्तेकम। महिनामी खेयप का सिबाक्तेकम। मेको ब्रोंइचा गेब रवा आ सफा रागी रागी डा मुर आन कली सापाइक्चा कली बाक्तेकम।

3 मिनु मेको सहरमी सराप रशो काइ मबाक्नीम। मारदे हना परमप्रभु यावे नु पाठा आस ठेयब नित्तीके मेकेर बाक्ब। मिनु परमप्रभु यावे आ वाइलपुकीमी परमप्रभु यावे कली गेय पाइनीम। यहोसु ७:११-१३

4 मेकोपुकीमी परमप्रभु यावे आ कुल ताइनीम। मेको आन कुप्फीमी परमप्रभु यावे आ नें ब्रेक्शो बाक्ब। प्रकाश ३:१२

5 मेको सहरमी गेनायो नाक्दो मदुम्ब। मिनु मेको सहरमी बाक्ब आन कली बत्ती नु नां आ छेडछेड यो ममाल्नीम। मारदे हना परमप्रभु, परमप्रभु यावे मेको आन छेडछेड बाक्ब। मिनु मेकोपुकीमी गेना हना यो सासन पाइनीम।

### एको किताब आ पबर्म

6 मिनु मेकोमी आं कली “एको लोत्र नेल्ल थमा बाक्ब। मोपतीके थमा सुइक्ने चाप्नीम। परमप्रभु यावे आ लोत्र पाइब आन सोक्त डा प्रभु बाक्ब। मोपतीके आ वाइलीम वाइल आन कली आ स्वर्ग डा गेय पाइब का सोइक्ताक्व। मारदे सोइक्ताक्व देशा हना, दुमचशो लोत्र शेंथ सोइक्ताक्व। आमेन। प्रकाश १:१

7 मिनू नेनीन, गो फ्रा लेशशा जाक्नुड” दे माइक्ती। सु सुमी एको किताबमी ब्रेक्शो लोत्र नेंशा पाइनीमी, मेको ग्येरसीशो मुर बाक्नीम।

8 गो यूहन्ना नड। एको लोत्र नेंता नु मार दुम्वचशो बाक्मे, मेको नेल्ल ताता। मिनू आं कली कोंडब परमप्रभु यावे आ स्वर्ग डा गेय पाइब कली सेउ पचा कली आ खोइलीमी बाप्ती।

9 मेकोमी चहिं आं कली “मपावो, गो परमप्रभु यावे आ लोत्र पाइब इ लोकबपुकी नु एको किताबमी ब्रेक्शो लोत्र पाइबपुकी खोदेशो परमप्रभु यावे आ वाइल नड। परमप्रभु यावे आ डोंइती बाप्शा मान पावो” दे माइक्ती।

10 मिनू मेकोमी आं कली “एको किताबमी ब्रेक्शो लोत्र दुम्वचाप्टु। मोपतीके खुइश्शा मवोतो, पढेशा नेंपाइक्मी। प्रकाश १०:४; प्रकाश १:३

11 सु सुमी पाप पाइनीमी, मेको पामेकल। सु सु ग्रांया दिचा डा बाक्मा, मेको मोदेंन बाक्मल। सु सु चहिं ठीक पाइब बाक्नीमी, मेको ठीक पा बाक्मल। सु सु प्रभु आ मुर बाक्मा, मेको मोदेंशोन बाक्मल” दे परमप्रभु यावे आ स्वर्ग डा गेय पाइबमी देंत। दानीएल १२:१०

12 मिनू नोले येसुमी “नेनो, गो फ्रा लेशशा जाक्नुड। मिनू जाक्शा, मुर नेल्ल आन कली आन पशो खोदेशो पा गेनुड। मेको आन गेय दोपा पामे, मोपा गेनुड।

13 गो आल्फा नु ओमेगा नड। नेल्ल क्येडा डोंइती डा नु नेल्ल क्येडा नोले डा नड। गोइब नु थुम्ब यो गो नड। प्रकाश १:८; हिब्रू १३:८

14 ग्येरसीशो मुर सु सु बाक्नीम देशा हना, सु सुमी आन वा मुरमे, मेको आन कली ब्रोंइचा गेब रवा आ फल ब्वचा गेनुड। मिनू मेको मुरपुकी मेको सहर डा लाप्चो रे ओत्रचा ताइनीम। प्रकाश ७:१४

15 सु सुमी चहिं टुना मुना पाइनीमी, तेल्लेम पाइनीमी, मुर साइक्नीमी, मूर्ति नु फुल्लु कली सेउ पाइनीमी। जोल पना पन बाक्नीमी। मेको कुचुम खोदेशो पा सहर रे लाडगा बाक्नीमी” देंत। प्रकाश २१:८, २७; १कोरिन्थी ६:१-१०

16 मिनू येसुमी “गो येसु नड। गो दाऊद पिपी क्येडा डोंइती बाक्ती। मिनू आ चच युइ यो नड। गो टल्केशो सुक्कुर सौरुल यो नड। गो परमप्रभु यावे आ स्वर्ग डा गेय पाइब कली थमा सुइक्ब आन गुम्तीकेमी शेंथ सोइक्ताक्ड” देंत। यसेया ११:१०; लूका १:७८

17 मिनू परमप्रभु यावे आ सोक्त नु ग्युम्लीमी मुर आन कली “पिने” देंनीस। मिनू सु सुमी मेको लोत्र नेंनीमी, मेकोमी यो “पिने” देंमल। सु सु तूत दाक्नी, पिने। मिनू ब्रोंइचा गेब ब्वाक्कु मोशा तूडीन। यसेया ५५:१; यूहन्ना ७:३७

### नोले डा लोत्र

18 सु सुमी एको किताबम ब्रेक्शो परमप्रभु यावेम तुइक्पाइश्शो लोत्र नेंनीमी, मेको आन कली गो लोत्र का पाइनुड, मार लोत्र पाइनुड देशा हना, सु सुमी एको लोत्रमी अर्को लोत्र तेम्नीमी, मेको सजाइ ताइनीमी। मार सजाइ ताइनीमी देशा हना, परमप्रभु यावेमी एको किताबमी ब्रेक्शो श्येत मोदेशो मुर आन कली गेब। ब्यवस्था ४:२

19 सु सुमी परमप्रभु यावेमी तुइक्पाइश्शो एको किताबम ब्रेक्शो लोत्र खोइक्नीमी, मेको यो सजाइ ताइनीम। मार सजाइ ताइनीम देशा हना, परमप्रभु यावेमी मोदेशो मुर आन कली ब्रोंइचा गेब रवा आ फल ब्वचा मगेब। मिनू मेको मुरपुकी परमप्रभु यावे आ योत्रशो यरूसलेम सहरम ओत्रचा यो मताइनीम।

20 मिनू एको लोत्र पाइबमी “आमेन, गो फ्रा लेशशा यीनुड” देंत। मिनू थमा सुइक्बपुकीमी “आमेन, प्रभु येसु जाक्कीन” देंतेक्म। १कोरिन्थी १६:२२

21 प्रभु येसु आ शिशी नेल्ल नु बाक्ल।